



Early European Books, Copyright © 2017 ProQuest LLC.
Images reproduced by courtesy of Bibliothèque Nationale de France, Paris






**Early European Books, Copyright © 2017 ProQuest LLC.
Images reproduced by courtesy of Bibliothèque Nationale de France, Paris**





**Early European Books, Copyright © 2017 ProQuest LLC.
Images reproduced by courtesy of Bibliothèque Nationale de France, Paris**



**Early European Books, Copyright © 2017 ProQuest LLC.
Images reproduced by courtesy of Bibliothèque Nationale de France, Paris**







~~D. 218.~~

2.

D. 214.

2.

R.^{MI} P. IOANNIS
A S^{TO} THOMA

ORD. PRÆDICATORVM,
DOCTORIS THEOLOGICI,

IN COMPLVTENSI ACADEMIA PROFESSORIS PRIMARI.

Supremi fidei Censoris, & tandem PHILIPPI IV. Magni Hispaniarum
Regis à Confessionibus.

CVRSVS THEOLOGICI

In Primam Partem D. Thomæ.

TOMVS SECVNDVS.
A QVÆSTIONE DECIMA QVINTA
vsque ad vigesimam septimam.

Editio vltima ab innumeris expurgata mendis, & amplissimis Indicibus illustrata.




LVGDVNI,

Sumptibus PHILIPPI BORDE, LAVRENTII ARNAVD,
PETRI BORDE, & GVILIELMI BARBIER.

M DC. LXIII.
CVM PRIVILEGIO REGIS.

D. 100.





CATHOLICO LECTORI.



NCHOATVM Theologiæ nostræ cursum (uti-
nam secundo aspirantis Numinis vento placidum)
secunda hac nauigatione super primam D. Tho-
mæ partem absoluiamus. Quæ difficultates in illa,
quæ pericula superanda sint, qui leget, intelliget:
nos enim sub aquis tam vehementibus non geme-
re tantum (quod & magnis viris, ipsisque etiam
gigantibus euenire, Scriptura diuina testatur) sed Iob. 26.

& opprimi ac pene mergi non diffitemur, cum à spiritu procellæ exal-
tati fluctus ascendunt vsque ad cælos, & descendunt vsque ad abyssos, ut
in tanto disputationum fragore, & illidentium vndarum mole, omnis sa-
pientia nostra (si tamen nostra) planè deuorata sit. Tu ergo, quisquis es, Psalm. 106.
Lector, si ad hæc dignaris attendere, non quæ nostra sunt videas, sed si
fortè aliqua altioris ac sapientioris gubernatoris delineata calamo arri-
deant, & quæ in recondito ac profundo Angelici Doctoris sensu con-
quiescunt, illa hauri, illis frui, ille tibi tramitem aperiat, viamque de-
monstret, à qua penè nullus deuiat, qui non aberret, ipso Innocentio VI.
summo Pontifice prædicante, *quod, qui eius doctrinam impugnauerit,
semper fuit de veritate suspectus.* Non ait, qui crebrius, qui frequentiùs,
qui continuò impugnauerit, reddetur de veritate suspectus, sed potius
quod semper erit de veritate suspectus qui eum impugnauerit; quasi vel
vnica contra veram D. Thomæ mentem impugnatione, perpetua de ve-
ritatis suspicione accumuletur damnatio. Nos verò tali ac tanto duce fre-
ti, restauramus aciem, certamen repetimus. Nostrum est Salomonem
hunc nostrum, non solum in sapientiæ lectulo quiescentem ambire, sed
procedentem ad bella, sed in castris agentem perpetuo militiæ sacra-
mento comitari. Si turpe est cingulo, ac iuramento militari astrictum, vel
pedem à sui ducis vexillo retrahere, cur ignauia, seruilique, ac non potius
ingenuæ menti deputabitur in literaria militia suo astringi ductori, & tot
hostium triumphatori vexillo, Angelico præceptori irrefragabiliter ad-
hærere? Quasi minoris aut leuioris periculi sit in sapientiæ castris ducto-
re destitui, quàm inter hostiles acies sine duce militare. Non ergo nostræ
nos constantia pudeat, nec pertinaciæ deputemus, quod summæ est
prudentiæ, & necessariæ disciplinæ. Nec erubescimus iam vestris oculis

Exodi. 25.

CANA I.

ac menti (ô Lector) rudia hæc, & insipida nostra intimare. Magis meminisse oportet, inter militares æstus, & castrorum puluerem, non delicata quæri debere, sed fortia. Diuitem illum tabernaculi sacri apparatus, tanta auri, gemmarumque varietate splendentem, opertoria cilicina, & ianthinæ rubricatæque arietum pelles defendebant atque seruabant. Inter tabernacula Cedar peregrinantur Salomonis nostri diuitiæ. Oportet & pelles offerre, quibus tam pretiosa totius doctrinæ, & veritatis supellex contegatur; ut iam non formosam tantum Sponsæ faciem, sed & nostris forsân ruditatibus nigram, non repellere ac fastidire, sed suscipere, sed fouere digneris; quia etsi hæc quæ in templo Dei offerimus fusca atque indecora videantur, utpote non aurum exhibentes aut purpuram, sed caprarum pilos, & horrentia fæga, quæ Solis ardoribus exusta haud gratum oculis referant colorem, tamen pugnæ ac laborioso certamini necessaria forsitan videbuntur tanquam tabernacula Cedar, & tanquam pelles Salomonis. Denique quod à nobis erratum, quod minus attentè dictum inueneris, de tuo supple, humanissime Lector, quia tuis hæc nostra seruitutibus dedicamus. Nec te magni Athanasij verbis interpellare confundimur in epistola ad Serapionem, de Spiritu S. *Paucis scripsi, & tuæ pietati transmissi, plurimum te exhortans, ut in istis legendis, quædam emendes; & ubi imbecillior est dictio, veniam dones.* Vale.



CENSURA

*CENSURA R. ADMODUM P. Fr. CHRYSOSTOMI.
Cabero, Ordinis Cisterciensis, Sacrae Theologiae Magistri, & in
Complutensi Academia Philosophiae moralis publici Professoris.*



OMVS Secundus Theologici cursus à sapientissimo P. Mag. Fr. Ioanne à S. Thoma, vespertinae Cathedrae Theologiae Sacrae moderatore insigni, bellè concinnatus, argutéque compositus, & mandato perillustri Complutensis curiae Vicarij mihi commissus : opus est auctoritate graue, stilo dulce, methodo formosum, Augustini doctrina refertum, fidei consonum, moribus minimè contrarium, omnibúsque numeris absolutum, & (vt vno verbo dicam) spiritu Thomistarum elaboratum, quos epistola 77. mellifluus ille Doctor, decuius ore melle dulcior fluebat oratio, his videtur depinxisse verbis. *Non querimus pugnas verborum, nouitates quoque iuxta Apostolicam doctrinam, 2. ad Timotheum, 2. euitamus. Patrum tantum opponimus sententias, ac verba proferimus, & non nostra: nec enim sapientiores sumus quàm patres nostri.* Id Bernardus : hæc Thomistæ; ista hic author, qui suos prælo mandaturus libros ad Thomisticum fontem prostratus, Angelicam doctrinam exhaurire videtur cursu isto, quasi vno haustu bibant, bibant è fonte huiusmodi Theologi, solum qui huius sapientiae salutaris aquam degustantes iudicent, ac approbent, sed pro dolor! *Quidam prius indicant* (ait Bernardus epistola 192. & postea probant, ego de potione utrum dulcis sit, an amara, ante gustum non indicabo. Verè dulcis ac salutifera est hæc doctrina, digna profectò, vt probeatur, approbetur, typisque excudatur. In Collegio Complutensi Diui Bernardi die 20. Iulij anno 1639.

M. FR. CHRYSOSTOMVS CABERO.

*Censura R. admodum P. Fr. Gasparis de la Fuente Ordinis Minorum
Lectoris Theologiae Iubilati, & in religiosissimo Conuentu
S. Didaci Compluti Guardiani.*

HVnc secundum tomum Cursus Theologici attentè perlegi, nihil inueni dissonum, immò totum consonum pietati, & ardentissimo Religionis zelo Sanctissimi Parentis nostri Dominici, irrefragibilique doctrinae, & quasi cælitus datæ Angelici Præceptoris, quam mira dexteritate tuetur, nec minori claritate perlustrat; & vt paucioribus dicam, vidi stellam in conspectu Solis refulgentem, nec minus est, vidi opus Sapientissimo, nec non & Religiosissimo Patre Magistro Fratre Ioanne à S. Thoma dignum. Quare petitam facultatem dignissimè promeretur. In hoc conuentu Minorum Complutensi S. Didaci, die duodecima Iulij anno 1639.

FR. GASPAR DE LA FVENTE.

SVMMMA PRIVILEGII REGIS CHRISTIANISSIMI.

LVDOVICVS XIV. Dei gratiâ Galliarum & Nauarrae Rex Christianissimus, singulari Priuilegio sancxit, ne quis per vniuersos Regnorum suorum fines, intra nouem annos, à die finitæ Editionis computandos, Imprimat, seu typis excudendum curat, & vanale habeat opus, quod inscribitur. *R. P. Ioannis de Sancto Thoma Ord. Predicator. Cursus Philosophicus & Theologicus.* præter Petrum Rigaud Bibliopolam Lugdunensem, aut illos, quibus ipsemet concesserit. Prohibuit insuper eadem auctoritate Regiâ omnibus suis subditis, idemmet opus extra Regni sui limites imprimendum curare, vel quempiam, vbi-cumque fuerit, ad id agendum impellere, ac instigare, sine consensu dicti Petri Rigaud. Idque omne sub confiscatione Librorum, aliisque pœnis originali diplomate contra delinquentes expressis. Dabatur Parisiis 12. Martij 1655.

Ex mandato Regis.

Signatum,

MOREL.

Registré sur le Liure de la Communauté, le 19. Mars 1655. conformément à l'Arrest du Parlement du 9. Avril 1653.

Signé BALLARD Scindieq.

Ledit Pierre Rigaud a transporté son droit du susdit Priuilege à Estienne Michallet, qui en a fait cession à Philippes Borde & Compagnie, comme apert par les Actes entre-eux passez.

Peracta hac Editio die 20. February 1663.

APPROBATIO.

CVrsum tum Theologicum cum Philosophicum R. Patr. Ioannis à S. Thoma Philippi I V. Magni Hispaniarum Regis à confessionibus. Ego infrascriptus Doctor Theologus Parisiensis accuratè & non sine magna animi voluptate perlegi, nihilque nec minimum apicem orthodoxæ fidei aduersantem offendi, imò nihil quod Sanctorum Patrum doctrinam non redolet. Sed potissimum Doctoris Angelici mentem sic exprimit, vt S. Thomam Aquinatem, in Ioannem à Sancto Thoma seu quantum ad profunditatem doctrinae, seu quantum ad perspicuitatem quodammodo transfusam existimare cogamur. Quamobrem vt publicæ consulatur vtilitati, necessarium reor in lucem emitti. Lugduni hac die 25. Ian. 1663.

FR. IOANNES ROBE.



I N D E X

DISPUTATIONVM ET ARTICVLORVM

quæ in Quæstionibus duodecim in primam partem D. Thomæ
à XV. ad XXVII. continentur.

QVÆSTIO XV.

De Ideis.

DISPUTATIO I.

De ideis diuinis.

ARTICVLVS I.

An sint, & quid sint ideæ.

pag. 1.

DANTVR ideæ.

ibid.

Quid sit ideæ.

2. n. 5

Causalitas ideæ.

5. n. 17

Soluuntur argumenta.

7. n. 29

ARTICVLVS II.

*Vtrum essentia diuina habeat rationem
ideæ, & quomodo.*

9

ARTICVLVS III.

*Quomodo pluralitas idearum in Deo expli-
canda sit.*

14

Respectus rationis non constituunt ideæ forma-
liter.

18. n. 21

Respectus ideales non formantur ab intellectu di-
uino.

19. n. 28

Soluuntur argumenta.

21. n. 39

ARTICVLVS IV.

*De quibus rebus Deus habeat propriam, &
per se ideam.*

25

QVÆSTIO XVI.

De veritate.

QVÆSTIO XVII.

De falsitate.

pag. 33

QVÆSTIO XVIII.

De vita Dei.

ibid.

DISPUTATIO II.

De veritate transcendentali & formali.

ARTICVLVS I.

In quo consistat veritas transcendentalis.

p. 34

Varia sententiæ.

ibid. n. 4

Sententia D. Thomæ.

35. n. 8

ARTICVLVS II.

Quid sit veritas formalis.

*An veritas formalis ad conceptum formalem per-
tineat, an ad obiectum.*

43. n. 1

*An veritas formalis sit aliquid absolutum, vel res-
pectuum superadditū actui intellectus.*

46. n. 17

An relatio veritatis sit realis, vel rationis.

49. n. 39

*An sit perfectior veritas formalis, quàm transcen-
dentalis.*

51. n. 55

ARTICVLVS III.

*Vtrum veritas inueniatur solum in composi-
tione, & diuisione, & quomodo sit obiectum
intellectus.*

53

Verum est obiectum intellectus.

ibid. n. 1

Veritas formalis solum est in compositione, &

diuisione.

55. n. 11

Veritas est in actu entitatiuè vno.

58. n. 25

ARTICVLVS IV.

*Vindicantur rationes D. Thomæ ab artic. 4.
vsque ad 8.*

Verum est prius bono.

60. n. 1

Rectè probat D. Thomas Deum esse summam ve-
ritatem.

62. n. 7

Quomodo aliquæ veritates creatæ dicantur æter-
næ.

ibid. n. 63

QVÆSTIO XIX.

De voluntate Dei.

pag. 65

DISPUTATIO III.

*De his quæ ad controuersiam de efficacia
voluntatis, & prouidentia Dei suppo-
nenda sunt.*

p. 66

ARTICVLVS I.

*Qui fuerint errores circa efficaciam diuine
voluntatis, & liberum arbitrium, &
quando cæperint.*

ibid.

ARTICVLVS II.

*Exponitur varius status erroris Pelagij in
gratia Dei confitenda, & neganda.*

69

Prima moderatio Pelagij admittendo gratiam
Dei solum ad facilius, non ad simpliciter.

ibid.

Secunda moderatio Pelagij de gratia non data, ex
meritis, & de gratia remissiuâ peccatorū.

70. n. 7

Tertia moderatio Pelagij, quod gratia ad singulos
actus detur.

73. n. 19

Quarta, & vltima moderatio Pelagij in consen-
do gratiam æternam.

74. n. 22

ARTICVLVS III.

*Quid Pelagius de simultaneo concursu dixe-
rit, & de sufficienti auxilio, quid item ali-
qui eius discipuli.*

81

Quid de auxilio sufficienti Pelagius dixerit?

84. n. 14

ARTICVLVS IV.

Quid senserint Semipelagiani?

87

Quomodo prædestinationem posuerint Semipe-
lagiani.

88. n. 3

Quid circa liberum arbitrium senserint.

ibid. n. 4

ARTICVLVS V.

*Quid in hoc tempore controuertatur in hac
parte.*

91

Diuisio Catholicorum in reiiciendo dogmate
Caluini.

95. n. 15

Caluinianæ propositiones hæreticæ, Thomisticæ,
Catholicæ.

97. n. 22

DISPUTATIO IV.

*De potentia, actu, & obiectio voluntatis
Dei.*

ART I

Index Disputationum, & Articulorum.

ARTICVLVS I.	
<i>Voluntatem in Deo esse.</i>	100
ARTICVLVS II.	
<i>An ratio potentie, & actus primi in voluntate Dei admitti possit.</i>	102
Mens D. Thomæ.	104.n.10
Prima propositio D. Thomæ declaratur.	105.n.17
Secunda propositio D. Thomæ.	107.n.24
Tertia propositio D. Thomæ.	108.n.27
Respondetur fundamentis oppositis.	n.28
ARTICVLVS III.	
<i>An detur in Deo actus liber, & quæ difficultates circa eum versentur.</i>	110
Libertas in Deo.	n.1
Difficultates circa liberum actum Dei.	111.n.4
Variae sententiæ.	n.5
Duæ principales sententiæ.	n.7
Moderationes primæ sententiæ.	112.n.9
Secundæ principalis sententiæ moderationes.	115.n.18
ARTICVLVS IV.	
<i>Mens D. Thomæ circa liberam volitionem Dei.</i>	117
Corollaria ex dictis.	120.n.12
ARTICVLVS V.	
<i>Difficultates enodantur.</i>	122
ARTICVLVS VI.	
<i>Vtrum voluntas diuina feratur aliquo modo in creaturas.</i>	129
Quid tenendum.	n.2
Nec necessario, nec liberè res possibiles amantur.	132.n.12
Deum non suspendere omnem actum suum circa possibilia.	134.n.21
Soluuntur argumenta.	137.n.31
ARTICVLVS VII.	
<i>Quæ obiecta velit Deus necessario, quæ liberè.</i>	143
DISPUTATIO V.	
<i>De efficacia, & inefficacia, signisque diuinæ voluntatis.</i>	
ARTICVLVS I.	
<i>Preludia totius disputationis.</i>	149
Efficacia voluntatis quid requirat.	n.1
Ordo intentionis, & executionis in voluntate diuina.	152.n.12
ARTICVLVS II.	
<i>An circa liberos actus creatos Deus habeat decreta ex natura sua efficacia, an ex suppositione prauis consensus nostri, ex se autem solum indifferentia.</i>	163
Variae sententiæ.	164.n.3
Altera sententia opposita de decreto ex se efficaci.	172.n.27
ARTICVLVS III.	
<i>Decreta indifferentia deportantur.</i>	ibid.
ARTICVLVS IV.	
<i>Efficacia decretorum, autoritate stabilitur.</i>	181
D. Thomæ mens.	n.1
Ex D. Augustino hanc sententiam hausit D. Thomas.	185.n.12
Discipuli D. Thomæ ipsum sequuntur.	186.n.15
Extra scholam D. Thomæ idem docetur.	188.n.17
Testimonium Catechismi Pij V.	189.n.22
ARTICVLVS V.	
<i>Fundamenta ex ratione.</i>	189

Theologica principia, & rationes in hac efficacia statuenda aperiuntur.	192.n.8
ARTICVLVS VI.	
<i>Soluuntur argumenta contraria.</i>	200
Argumenta ab autoritate.	n.1
Ex Scriptura, & Patribus.	205.n.20
Loca D. Thomæ explicantur.	209.n.31
Soluitur argumētū ex libertatis laesione.	211.n.37
Argumenta contra efficaciam decreti ex defectu sufficientis auxiliij.	216.n.56
Argumentum ex influxu Dei in materiale peccati.	220.n.65
ARTICVLVS VII.	
<i>Quid de decretis conditionatis, & de voluntate Dei antecedente, & consequente.</i>	222
Fundamenta opposita conuellantur.	223.n.10
ARTICVLVS VIII.	
<i>Quid sit voluntas Dei antecedens, quid consequens beneplaciti, & signi?</i>	229
Voluntas antecedens, & inefficax est formaliter in Deo, non voluntas signi.	231.n.12
Intelligentia illius dicti: Qui vult omnes homines saluos fieri.	236.n.31

QVÆSTIO XX.

De amore Dei. 238

QVÆSTIO XXI.

De Iustitia, & misericordia Dei. ibid.

DISPUTATIO VI.

De actibus, & virtutibus diuinæ voluntatis. 239

ARTICVLVS I.

Qualis in Deo sit amor erga se. ibid.

In Deo respectu sui non est propriè amor concupiscentiæ neque amicitia. 241.n.10

ARTICVLVS II.

An sint in Deo formaliter affectus fuge, odium, tristitia, ira, spes, &c. 243

Odium, & tristitia in Deo non est formaliter. ibid. n.1

Ira, spes, & desperatio in Deo non sunt. 246.n.14

ARTICVLVS III.

Vtrum in Deo sit iustitia commutatiua formaliter. 247

Fundamentum D. Thomæ elucidatur. 250.n.7

Soluuntur argumenta. 253.n.15

ARTICVLVS IV.

An sit in Deo iustitia distributiua, & vindicatiua. 256

Quid præsupponendum. ibid. n.1

Punctus difficultatis. 258.n.4

Sententiæ. n.5

Mens D. Thomæ. 259.n.6

Fundamentum ex ratione: quomodo pactum Dei requiratur ad meritum. 260. n.10

Quid de gratitudine, & vindicatione Dei. 263.n.18

ARTICVLVS V.

An, & quomodo sit in Deo misericordia. 267

QVÆSTIO XXII.

De prouidentia Dei. 268

QVÆSTIO XXIII.

De predestinatione. ibid.

QVÆSTIO XXIV.

De Libro vite. 269

DISPUTATIO VII.

De essentia predestinationis.

ARTI

Index Disputationum, & Articulorum.

ARTICVLVS I.

An detur in Deo prædestinatio, quod sit eius obiectum, & definitio. 270

Obiectum formale prædestinationis. 271.n.4

Præscientia, præparatio, & certitudo prædestinationis quomodo intelligantur. 273.n.9

An prædestinatio sit distinctum attributum à prouidentia. 275.n.15

ARTICVLVS II.

An prædestinatio, & prouidentia sint actus intellectus, vel voluntatis. 276

Quid certum, & quid dubium in hac parte. ib.n.1

Duæ sententiæ. 277.n.3

Ex D.Thoma resolutio. 276.n.6

Soluuntur argumenta. 280.n.14

ARTICVLVS III.

Ad quem actum intellectus pertineat prædestinatio. 282

Punctus difficultatis. n.2

Resolutio. 284.n.6

Soluuntur argumenta. 291.n.30

ARTICVLVS IV.

Vtrum prædestinatio, & prouidentia Dei sint prædeterminatae nostrarum actionum. 294

Sententiæ. 295.n.3

Mens D.Thomæ. 296.n.6.

Fundamentum ex ratione. 298.n.14

Ex simplici voluntate finis non præordinat Deus, sed ex efficaci, & determinata intentione. 292.n.19

Sententiæ Suarez, & Arrubal reiectæ. 303.n.28

Soluuntur argumenta. 306.n.36

ARTICVLVS V.

Vnde sumatur certitudo diuinæ prædestinationis. 313.n.1

DISPUTATIO VIII.

De causis prædestinationis.

ARTICVLVS I.

Proponitur difficultas: Vtrum absoluta electio ad gloriam sit ante præuisa merita, vel subsequatur illa. 315

Sententiæ. n.4

ARTICVLVS II.

Mens Augustini, & S.Tho. ex Scriptura. 317

Responso ad mentem Augustini, & refutatio. 321.n.10

Mens D. Thomæ. 323.n.18

ARTICVLVS III.

Fundamenta ex ratione. 325

ARTICVLVS IV.

Soluuntur argumenta. 334

ARTICVLVS V.

Vtrum ex parte nostra detur aliqua causa prædestinationis. 342

Erroris reiecti aliæque sententiæ. 344.n.7

Non incipit à nobis efficacia prædestinationis. 347.n.17

Soluuntur argumenta. 351.n.24

ARTICVLVS VI.

An merita Christi sint causa nostra prædestinationis, etiam in singulari. 355

DISPUTATIO IX.

De effectibus prædestinationis.

ARTICVLVS I.

Quæ conditiones requirantur ut aliquid sit effectus prædestinationis. 358

ARTICVLVS II.

Vtrum glorificatio, & iustificatio, & quacumque efficax vocatio sint effectus prædestinationis. 360

ARTICVLVS III.

An vocatio inefficax, & gratia interrupta per peccatum sint effectus prædestinationis. 361

ARTICVLVS IV.

An bonus usus liberi arbitrii, ut tenet se ex parte nostra, sit effectus prædestinationis. 366

ARTICVLVS V.

Vtrum res, & opera bona naturalis ordinis sint effectus prædestinationis. 372

Perfectiones, & actus naturales quomodo sint effectus prædestinationis. 375.n.13

ARTICVLVS VI.

Vtrum permissio peccati sit effectus prædestinationis. 377

Quid sit certum in hac parte, & in quo sit punctus difficultatis. 378.n.2

Opiniones. ibid.n.4

Resolutio. 379.n.5

Permissio peccati an ex motiui poenitentia possit esse effectus prædestinationis. 382.n.15

Soluuntur argumenta. 383.n.23

DISPUTATIO X.

De Reprobatione.

ARTICVLVS I.

Quid sit reprobatio, & quot modis accipiat. 388

Varia sententiæ de Reprobatione. n.3

Mens D.Thomæ explicatur. 390.n.13

Calvinismus huic sententiæ insipienter obiectus. 392.n.19

ARTICVLVS II.

Vtrum ex parte reprobis detur causa reprobationis. 393

Resolutio. 396.n.14

Quid de reprobatione præsupponente in nobis peccatum originale. 402.n.28

Soluuntur argumenta. 405.n.39

ARTICVLVS III.

Qui sunt effectus reprobationis. 411

Resolutio ex mente D.Th. Poenæ & aliæ res naturales quæ sunt effectus reprobationis. 412.n.7

Permissiones peccatorum, & denegatio gratiæ efficaciæ, sunt effectus reprobationis. 414.n.13

Negatio sufficientis auxiliij effectus est reprobationis. 418.n.27

Duæ obiectiones. 422.n.38

ARTICVLVS IV.

Quid de immutabilitate reprobationis, & prædestinationis, & numero eorum. 424

QVÆSTIO XXV.

De Diuina potentia. 425

QVÆSTIO XXVI.

De Dei beatitudine.

DISPUTATIO XI.

De omnipotentia Dei.

ARTICVLVS I.

Quid sit omnipotentia, quid possibilitas creaturae, & quæ connexio inter utramque. 427

Possibilitas creaturarum vnde sumatur. 428.n.4

Ex destructione possibilitatis creatæ quomodo sequatur destructio omnipotentia. 432.n.19

Quomodo dicatur omnipotentia posse in non ens. 434.n.2

ARTICVLVS II.

Vtrum potentia executiua distinguatur in Deo, nostro modo intelligendi, ab intellectu, & voluntate. 437

ARTICVLVS III.

Quid sint in Deo potentia ordinaria, & absoluta. 441

IN PRI



IN PRIMAM PARTEM
D. THOMÆ.
QVÆSTIO XV.
DE IDEIS.


S V M M A L I T E R Æ.

BREVITER discurrit S. Thomas circa diuinas ideas, idest, circa exemplaria, quæ intellectus diuinus intra se habet ad fabricandas res creatas, & inquit tria: Primò, an dentur tales ideæ, quod pertinet ad quæstionem *an est*. Secundò, an sint vna, vel plures. Tertiò, circa quæ obiecta versentur: quod pertinet ad quæstionem *quid est*.

Igitur in articulo 1. docet D. Thomas ponendas esse ideas in Deo, eo quod est agens intellectuale, quod in hoc differt ab agente purè naturali, quòp agens naturale operatur per formam entitatiuè similem suo effectui, cui, agens autem intellectuale per formam intelligibilem, quæ exprimitur, & formatur in conceptu: & quando sic formatur, quod ex modo concipiendi est etiam formatiua rerum ad extrà, talis forma vocatur idea, sicut in mente artificum datur ad formanda sua artefacta.

In art. 2. ostendit dari in Deo plures ideas, non quidem entitatiuè plures, sed respectiue ad res ideatas, & secundum officium ideandi, eo quod Deus non solum est artifex vnius creaturæ, sed omnium, etiam in quantum plures & distinctæ sunt. Vnde oportet quod ad diuersas creaturas diuersas imitabilitates fundet, quia quælibet creatura cum distincta sit ab alia, distincto etiam modo imitatur exemplar Dei; & sic habet diuersos modos ideandi, & diuersos respectus fundat ad sua ideata.

In art. 3. docet omnium eorum, quæ Deus facit, dari ideas, practicè quidem, quantum ad executionem, respectu eorum, quæ de facto fiunt: respectu verò eorum, quæ solum sunt possibilia, utitur ideâ, ut ratione cognoscendi tantum, non ut ratione practicante executiue.



Dari Ideas.

DISPUTATIO I.

De Ideis diuinis.

ARTICVLVS I.

An sint, & quid sint Ideæ?



AL I Q V A de his egimus, in 2. phys. q. 11. art. 3. quantum breuitas illius hoc patiebatur. Nunc autem, ut latius res ista declaretur, tria in hoc articulo tractanda sunt. Primū, An sint ideæ. Secundum, Quid sint. Tertium, Quomodo causent.

Ioan. à S. Thoma in 1. Part. D. Th. Tom. 2.

Idea nomen est Græcum significans formam, non I quamcumque, sed primam, seu exemplarem, nostro vulgari, *original*, ex cuius imitatione aliæ deducuntur, seu exemplantur: vnde non est forma coniuncta materiæ, neque informans per sui vnionem, sed per imitationem sui, non tam informans, quàm formans ideatum. Est autem frequens huius nominis vsus, tum in sacris Literis, tum in Patribus, tum in Scholasticis. Apud Scripturam Exodi 25. dicitur Moyse, *Inspice, & fac secundum exemplar, quod tibi in monte monstratum est.* & 1. Paralip. 28. *Omnia venerunt scripta manu Domini ad me, ut intelligerem vniuersa opera exemplaris.* Ecclesiastici 38. *Omnis faber, & architectus qui sculpsit signacula sculptilia: cor suum dabit in similitudinem picturæ, &c.* Apud Patres videri potest S. Dionysius cap. 5. *de diuinis nominibus,* lectione 3.

A

lectione 3.

lectione 3. apud D. Th. ubi docet exemplaria, seu ideas esse in Deo rationes substantificas effectivas, & praedeterminativas rerum. S. August. pluribus in locis lib. 7. de civitate cap. 28. lib. 12. cap. 26. & lib. 14. cap. 25. Sed praecipue in lib. 83. questionum, quaest. 46. ubi inter alia, inquit, quod ideas plato primus appellasse perhibetur, non tamen est verisimile sapientes, aut nullos fuisse ante Platone, aut istas quas Plato, ut dictum est, ideas vocat, quaecumque res sint, non intellexisse, siquidem tanta in eis vis constituitur, ut nisi his intellectus sapiens nemo esse possit. Item Boetius lib. 3. de consolatione, metro 9.

Tu cuncta superno

Ducis ab exemplo, pulchrum pulcherrimus ipse

Mundum mente gerens, similique ab imagine ducens.

Apud scholasticos videndus est Magister in 1. dist. 36. ubi communiter Doctores, & D. Thomas in praesent. & quaest. 3. de verit. Ac denique Philosophi cum Arist. in 1. & 7. metaph. ubi late impugnat opinionem Platonis, qui ponebat ideas esse substantias quasdam separatas ab omni singularitate, per quarum participationem res singulares fortiebantur speciem.

2 Et ex hoc declaratur ratio, & necessitas ponendi ideas, tum ex quotidiana experientia, quia videmus nihil per artem nos elaborare, nisi inspiciendo aliquam similitudinem, & exemplar quod formamus in intellectu: tum ex ratione D. Thomae in praesent. quia in hoc distinguitur agens intellectuale a naturali, quod naturale agens operatur per formam naturalem per quam assimilatur sibi effectum executivum generando: at vero agens intellectuale operatur per formam intelligibilem, non solum cogitationem, quae est actus immanens ad intra, sed etiam effectus aliquos ad extra, dirigendo illorum formationem, iuxta id quod concipit: ergo oportet quod forma intelligibilis non solum sit forma, quatenus informat intellectum ad cognoscendum, sed etiam quatenus format rem ad extra, imprimendo imitationem, & participationem sui in illa, sicut forma naturalis non solum est ratio constituendi compositum, & dandi illi esse, sed etiam est ratio agendi, & propagandi suam similitudinem. Et primo modo, forma intelligibilis, quatenus informat intellectum ad cognoscendum, dicitur species, vel conceptus: secundo autem modo, quatenus format ad agendum, dicitur idea, quia agens intellectuale, non casu, & fortuito operatur, sed intendens, & respiciens aliquid quasi regulam, & exemplar, ad cuius imitationem faciendum est opus. Quae ratio etiam sumitur ex D. Th. quaest. 2. de verit. art. 1.

3 Ex quo deducuntur duo valde notanda. Primum est quod in nobis qui desumimus cognitionem ab obiectis, ideas, seu exemplaria quae formamus non ita sunt purae formae, quin sint etiam formatae, & derivatae ab alio, id est, ab obiecto exteriori; & ideo etiam obiectum solet dici exemplar, seu originale, non formaliter sed obiectivum, tanquam id a quo sumit intellectus species; non tamen obiectum ad extra: Dicitur idea, quia nomine ideae intelligimus aliquid formatum, & conceptum intra intellectum. Ceterum intellectus, qui non accipit species ab obiectis, habet ideam, quae sit pure forma, & non sit formata, quod praecipue competit intellectui divino, cuius idea est forma pure formans, quia nullo modo formatur, aut desumitur ab obiectis ad extra, sed ipsa format omnia.

4 Secundum est, quod radix, & fundamentum ponendi in Deo ideas rerum faciendarum, est idem ac ponendi praedestinationes praedeterminativas omnium eorum, quae a providentia, & arte divina diriguntur, & fiunt; & sicut ideas antecedenter ad ipsas res se habent, neque illas praesupponunt, sed disponunt, ita & praedestinationes: nam & ipsae ideas non

possunt operari nisi adiuncto decreto efficaci voluntatis; & ideo S. Dionysius supracitatus dixit ideas nominari in Theologia praedestinationes; verba Dionysij sunt: Exemplaria dicimus in Deo existentium rationes substantificas, & singulariter praesistentes, quas Theologia praedestinationes vocat, & divinas, & bonas voluntates existentium praedeterminativas, & effectivas, secundum quas supersubstantialis essentia omnia praedefinit, & produxit. Itaque Dionysius in unum coniungit fundamentum ponendi ideas, & ponendi praedestinationes praedeterminativas, & effectivas omnium; & ratio est, quia cum omnia deriverentur, & causentur a Deo ut artifices, consequenter debent causari ab idea, & exemplari divino, tanquam ab eo quod Deus inspicit ut res producat: ergo prius debet intendere, & apud se definire, & statueret determinate quomodo aliquid faciendum sit, quam praesupponere cognitum sub aliquo statu, v.g. sub statu conditionato, antequam definiat: nam si praesupponit cognitum in aliquo statu, & non pro illo praedefinitum, neque etiam erit sub illo statu ideatum, & ab arte Dei profectum, quod est simpliciter non esse a Deo pro illo statu. Eadem ergo radix est ponendi ideas in Deo, & ponendi praedestinationes praedeterminativas rerum, non praesuppositivas illarum.

Quid sit idea?

5 Explicata necessitate ponendi ideas, restat videre quid sint. Ad quod supponimus definitionem ideae communiter receptam, quod est forma imitabilis ad quam artifex respiciens operatur. Et hinc nascitur difficultas explicandi quidditatem ideae, quia ex una parte dicitur forma, & sic videtur quod debet informare intellectum, quod non potest esse nisi sit species, vel conceptus, cum sit forma per modum imaginis. Ex alia parte dicitur quod debet esse imitabilis, & id quod respicitur ab artifice, & sic debet esse obiectum cognitum, non conceptus informans.

6 Hinc orta est varietas opinionum. Quidam enim constituunt ideam in conceptu formali, qui est ipsa species expressa: Alij in conceptu obiectivo, qui est ipsa res cognita; utriusque diuiduntur in alias duas sententias: nam quidam dicunt esse conceptum obiectivum; quidam affirmant esse ipsam rem ideatam, prout apprehenditur ab artifice. Ita sumitur ex Scotto in 1. dist. 35. quaest. 1. §. Ad ista, ubi loquendo de ideis divinis, dicit quod sunt ipsae creaturae ut obiectivum cognitae, non vero ipsa intellectio, aut representatio Dei, sed ipsae creaturae ut apprehensae a divino intellectu, sunt ideae suae in esse reali: & hoc esse obiectivum, seu apprehensum creaturarum vocat Scotus esse quoddam diminutum, non quod posuerit Scotus aliquod esse reale positivum extra Deum, quod esset medium inter ens rationis, & ens reale, sed nomine entis diminuti intellexit ipsum ens reale creaturae sub statu apprehensae, non sub statu productae. At vero Durandus licet etiam teneat quod idea est conceptus obiectivus, non formalis, non tamen eodem modo ponit creaturas cognitae esse ideas, sed distinguit de perfectionibus, quod quaedam inveniuntur tam in Deo, quam in creaturis, ut esse, vivere, intelligere, &c. & de talibus perfectionibus dicit ipsam divinam essentiam, seu perfectiones illas divinas posse habere se ut ideas respectu talium perfectionum, quae sunt in creaturis: alias vero perfectiones esse quae non sunt formaliter in Deo, sed solum in creaturis, quia habent imperfectionem admixtam; & de talibus non habet Deus ideam, nisi quatenus ipsas perfectiones creatas apprehendit, & iuxta illas format ad extra. Alij vero distinguunt de idea creata, & increata, & dicunt quod in mente artificis

artificis creati idea est conceptus obiectiuus, seu res ipsa cognita, non quidem res ipsa facienda, ut putauit Scotus, sed res illa, seu exemplar quod sibi proponit artifex, ut ad instar illius faciat rem ad extra. In Deo autem dicunt ideam esse ipsum Verbum, seu conceptum formalem, quia Deus non sumit ideam ab aliquo originali extra se, sed ex representatione quam habet de omnibus. Ita Pater Vasq. in presenti disp. 71. cap. 2.

7 Qui vero dicunt ideam esse ipsum conceptum formalem, etiam dupliciter diuiduntur. Quidam enim constituunt ideam in ipso conceptu formali, prout deseruit intellectui tanquam forma, seu medium representandi ut quo. Ita P. Suar. disp. 25. metaph. sect. 1. praesertim conclus. 2. eamque sententiam tribuit Alensi, Bonauenturae, Capreolo, & alijs. Alij vero existimant ipsum conceptum esse ideam, non secundum quod exercet illud officium informandi ipsum intellectum, & representandi ei formali representatione, sed prout exercet aliud officium erga obiectum, quatenus reddit illud expressum, & formatum, & intrinsece cognitum ut quod; & sic obiectum immateriale, & intelligibile factum in ipso conceptu, est ratio originandi, & exemplandi res ad extra in se entitatiuo, & materiali. Ita communiter Thomistae, quos etiam citat P. Suar. ubi supra n. 7. Caiet. Ferrar. Capreolus, & alij.

8 Haec vltima sententia tenenda a nobis est, quam sine dubio existimamus esse D. Thom. nam Doctor sanctus fatetur ideam esse ipsum conceptum, seu formam intelligibilem in mente artificis, & negat esse ipsum conceptum, seu cognitionem, quatenus est id quo intellectus cognoscit, sed quatenus est forma cognita, quatenus se habet ut ratio ad cuius instar res ad extra formatur: ergo sentit consistere in ipso conceptu, non secundum quod exercet informationem respectu intellectus, & est id quo cognoscit, sed quatenus reddit obiectum formatum, & expressum, & est id quod cognoscit ut formatum a se, ad cuius instar res ad extra formetur.

9 Maior huius syllogismi probatur duplici loco D. Thom. & minor alio duplici loco. Probatur ergo maior in primis ex D. Thom. super Epistolam ad Hebraeos cap. 11. lectione 2. ad illa verba; fide intelligimus aptata esse sacula Verbo Dei, ut ex inuisibilibus visibilia fierent, ubi inquit: Sciendum est quod Verbum Dei est ipse conceptus Dei, quo seipsum, & alia intelligit: Deus autem comparatur ad creaturam, sicut artifex ad opus suum. Hoc autem videmus quod artifex opus illud quod producit extra, producit in similitudinem conceptus sui. Vnde facit domum in materia ad similitudinem domus quam in mente sua formauit. Deinde in hac quaest. 15. art. 1. inquit, quod similitudo domus praexistit in mente adificatoris, & hac potest dici idea domus, quia artifex intendit domum assimilari formae, quam mente concepit. Fatetur ergo D. Thom. ideam esse ipsum conceptum formalem existentem in mente artificis: talis autem conceptus est conceptus formalis, non obiectiuus, est enim intra intellectum: ergo in conceptu formali ponit D. Thom. ideam.

10 Minor vero syllogismi facti, scilicet quod D. Thom. negat conceptum esse ideam, quatenus est id quo intellectus cognoscit, sed ut est forma cognita, & expressa, constat ex his quae docet in presenti, artic. 2. ubi inquit, ideam operati esse in mente operantis, sicut quod intelligitur, non sicut species qua intelligitur, quae est forma faciens intellectum in actu: forma enim domus in mente adificatoris est aliquid ab eo intellectum, ad cuius similitudinem domum in materia format. Et iterum Ioan. a S. Thoma in 1. Part. D. Th. Tom. 2.

solutione ad 2. Sapientia & ars significantur ut quo Deus intelligit, sed idea ut quod intelligit, sicut artifex dum intelligit formam domus, in materia dicitur intelligere domum, dum autem intelligit formam domus ut a se speculatam (id est formatam, & excogitatam) ex eo quod intelligit se intelligere eam, intelligit ideam, vel rationem domus. Manifeste ergo docet S. Thom. conceptum non esse ideam, quatenus praecise exercet munus informandi intellectum, & se habet ut medium quo cognoscit, sed ut importat aliquid formatum, & cognitum ut quod intra intellectum. Deinde D. Thom. in 1. dist. 27. quaest. 2. art. 3. ad 4. inquit, quod artifex potest conuertere ad speciem artis, quae apud ipsum est tripliciter; vel secundum quod est similitudo rei per ipsum fiende, & sic absolute conuertitur in rem artificiatam, nullam considerationem habens de arte sua: vel in ipsam speciem artis secundum esse quod habet in anima, & sic est absolute consideratio ipsius speciei, in quantum est res quadam, neque aliquid tunc de re artificiatam considerat: vel comparando unum ad alterum, dum considerat illam speciem, quae apud se est, esse causam eorum quae ab ipso fiunt; & ita etiam est de intellectu diuino. Et solum hoc tertio modo concedit quod similitudo est causa eorum quae sibi assimilant, quod utique pertinet ad rationem ideae, & sic non consideratur species illa, seu similitudo intellectus, ut praecise ipsum intellectum informat, & illi seruit ut forma, & medium cognoscendi ut quo, sed quatenus continet obiectum formatum, & excogitatum a se: sic enim comparari potest ad rem extra, ut id cui assimilatur res extra per imitationem, non ipsa entitas conceptus, ut qualitas est informans intellectum, id enim non est imitabile in re extra.

Hanc mentem D. Thom. non negauit P. Vasq. 11 cum dixit disp. 72. citata cap. 2. num. 11. quod S. Doctor existimauit ideam in mente artificis esse formam, seu speciem quam intellectus exprimit, quia putauit id quod intelligitur non esse rem obiectiuam praesentem, sed qualitatem intus formatam, quam verbum appellamus. Sic autem absque dubio verbum ipsum esset idea in mente artificis. De qua opinione D. Thom. an vera sit, dicit se tractasse supra disp. 39. circa finem cap. 2. Ceterum D. Th. non existimauit obiectum intelligi a nobis cognoscendo prius ipsam entitatem, & qualitatem conceptus qua informamus: hoc enim reflexione indiget, cum cognitio reflexa maxime sit cum pro obiecto habet entitatem ipsam conceptus, supra quam reflectitur intellectus postquam per eam cognouit obiectum. Non ergo potuit existimare D. Thom. quod intellectus cognoscit obiecta directe, cognoscendo prius ipsam qualitatem conceptus, nisi ponendo manifestam implicationem, supponeret enim ad cognitionem directam obiecti, cognitionem reflexam, quae tendit ad entitatem conceptus cognoscendam; cum tamen reflexa cognitio sit posterior ipsa directa, & supponat illam. Et si quando D. Thom. docet verbum, seu conceptum non solum esse medium cognoscendi ut quo, sed etiam esse cognitum ut quod, loquitur ratione sui praesentati, quatenus in ipso conceptu habet obiectum reddi intellectuum, & immaterializatum, seu denudatum conditionibus materialibus, & sic non intelligitur ipse conceptus ut quod, in quantum est qualitas quadam informans intellectum, sed res excogitata, & formata per illum conceptum cognoscitur ut quod, & sic comparatur ad rem extra, & induere potest rationem ideae.

Vt fundamentum huius sententiae tradatur, supponendum est, quod ex conceptu qui a nobis for-

matur, resultat aliquid in intellectu ut in subiecto, & aliquid in ipso obiecto ut formato ad intra, & aliquid in ipso obiecto ut existente ad extra. In ipso intellectu, seu subiecto resultat quod per conceptum intellectus reddatur concipiens, & attingens obiectum, tanquam per id in quo sibi sit expressa representatio. In ipso obiecto ut formato, & expresso intra ipsum conceptum resultat quod obiectum ipsum dicatur intellectum, & cognitum in actu, quod quidem est esse immateriale, & inuisibile, quo obiectum intra intellectum redditur abstractum à conditionibus materialibus, non sicut in specie impressa, ubi solum representatur obiectum per modum principij cognoscendi, sed sicut in specie impressa, ubi relucet per modum termini cogniti. Et quia iuxta modum, & dispositionem cognoscentis formatur, seu depingitur ipsum obiectum in conceptu, & iuxta maiorem aut minorem viuacitatem, obiectum intus formatur, & exprimitur, ideo variantur formæ, seu exemplaria intus formata, quæ ad extra res factæ imitentur. Et quidem res ista sic formata, & disposita intus in conceptu non est aliquid extra ipsum conceptum, sed tamen distinguimus in ipso conceptu, & id quod entitatis est, seu qualitatis representantis, & id quod est rei formata, & representatæ; hoc enim est proprium formarum representantium quod non solum consideratur in eis ipsa entitas absoluta, & representatio actiua, sed etiam ipsa res representata; ut in speculo non solum consideratur vitrum, aut lux reuerberans, & formans illos colores, sed homo ipse figuratus intra speculum. Et ratione huius rei representatæ intra conceptum, & non solum ratione qualitatis, & entitatis, quæ est conceptus, fiunt multi effectus reales, sicut multi discursus, demonstrationes, directiones, ac locutiones ad extra, quæ non tam qualitatem concipiunt, quam obiectum respiciunt, & ut existimamus, etiam idearum causationes. Denique in obiecto ad extra resultat denominatio extrinseca, quæ nihil reale ponit, neque immutat in ipso obiecto.

13 Hoc supposito dicimus quod idea neque consistit in obiecto ut cognito, seu in esse obiectiuo, ut præcisè constituitur illa denominatione extrinseca, neque in ipso conceptu, ut præcisè, dicit rationem formæ informantis ipsum intellectum tanquam medium quo redditur concipiens, sed in ipso conceptu quatenus reddit ipsum obiectum formatum, & expressum intelligibiliter, & inuisibiliter; tali modo quod ex ipso participari potest, & reddi visibile ad extra. Primum probatur, quia bene stat rem aliquam perfectè esse cognitam à nobis, neque tamen habere rationem ideæ: ergo aliquid amplius importat idea, quam obiectum ut cognitum denominatione extrinseca: etiam si sit res ipsa facienda, vel aliquod originale ex quo potest deriuari & fieri. Antecedens manifestè constat, quia multi perfectè vident & cognoscunt aliquod artefactum, v.g. domum, vel statuam, imò res naturales perfectè à multis cognoscuntur; & tamen non habent ideam istorum, quia non sunt artifices, & multò minùs factores rerum naturalium: idea autem est forma factiua ideati exemplariter. Consequentia verò constat, quia si esse cognitum obiectum non sufficit constituere ideam, & per hoc quod sit cognitum constituitur in esse obiectiuo; manifestum est quod per hoc solum quod res sint in esse obiectiuo, & ut cognitæ ab intellectu non constituitur ratio ideæ, sed aliquid amplius requiritur, nempe quod aliquid concipiatur cum tali praxi, & modo quod possit ex se deriuare aliquid factum ad extra in quo exprimitur id quod est in mente.

14 Deinde sumi potest ratio huius à priori, quia nullum obiectum externum, siue sit ipsamet res facien-

da & ideanda, siue aliquid aliud ad cuius instar formandum est, potest habere rationem ideæ, & exemplaris, quantumcumque sit cognitum cognitione extrinseca, quia idea non potest influere in ideatum actione solū naturali, sed modo intelligibili, & vitali, quia solum influit inquantū est intenta, & inspecta ab artifice, ut imitabilis ad extra modo artificiali, non modo naturali, obiectum autē existens extra intellectum quantumcumque sit cognitum denominatione extrinseca non est influens vitali, & intelligibili modo, quia hoc procedere debet à principio vitæ intrinseco: ergo nisi obiectum intra ipsum principium vitale ponatur, quod est intellectus, non potest esse forma viuua, & idea, seu exemplar intelligibile, & artificiali modo influens, sicut habet idea in mente artificis, non autem obiectum extra quantumcumque cognitum, quia denominatio cogniti omnino manet extrinseca respectu obiecti, nec illi quidquam vitalitatis, & influentiæ per modum intelligibilem tribuit.

Vnde cessat instantia P. Suar. *ubi supra sect. 1. as. 19* *sect. 3. n. 30.* quod ipsa ratio obiecti constituit rationem formalem ideæ; cognitio verò solum se habet ut conditio, sicut in fine apprehensio solum se habet ut conditio finalizandi; ratio verò formalis ipsius finis est ipsa bonitas rei ad extra. Hæc inquam instantia cessat, quia finis tribuit voluntatem, tanquā inclinationem, & pondus quoddā ad realem assequutionem sui; unde illud præbet rationem formatam finis, quod præbet rationem formalem assequibilis; quod utique cōuenit rei secundum bonitatem quam habet in se ad extra, licet applicetur, & manifestetur ipsi voluntati per apprehensionem: at verò idea non habet modum influendi intelligibiliter, & artificialiter tanquam conditionem & applicationem causandi, sed tanquā rationem formalem suæ causalitatis, quia in hoc distinguitur forma idealis & idealiter operans à forma naturali & operante naturaliter, quod illa intelligibili & artificiali modo operatur imitationem sui, hæc naturali modo propagationem sui efficit: & sic apprehensio in forma ideali in qua constituitur ut forma intelligibili modo operans, quod habet beneficio intellectus, non pertinet ad conditionem & applicationem causandi, sicut apprehensio in fine, sed pertinet ad rationem formalem.

Secundum verò quod restat probandum, scilicet 16 quod idea non sit ipse conceptus secundum præcisam habitudinem informantis intellectum, sed formandi obiectum intra se, probatur, quia idea est forma imitanda, & sic dicitur in eius definitione quod est forma, quam aspiciens artifex operatur, sed secundum priorem illam habitudinem non est forma imitanda, nec inquam artifex aspicit ut imitetur, sed medium quo aspicit: ergo sub ista secunda habitudine, & non sub priori induit rationem ideæ. Maior est certa ex definitione ideæ; & Minor ex ipsa natura & ratione conceptus, quia sub illa habitudine non est id quod aspicitur & videtur, sed id quo intellectus informatur in videndo & cognoscendo. Similiter res ideata ad extra non imitatur rationem conceptus, quatenus intellectum informat, sic enim se habet per modum qualitatis representantis intellectui: nullus autem imitatur ad extra, neque imprimit in suo artefacto id quod qualitatis, & informationis est in conceptu, sed id quod excogitatur, formatur, & aspicitur in illo ut imitandum: sub hac ergo formalitate induit rationem ideæ. Et præterea quia causalitas ideæ non est præbere effectum formalem intellectui, sed ideato, eo quod propria causalitas ideæ non est esse formam intrinsecam, & informantem, sed extrinsecam & formantem ideatum: ergo licet in conceptu inueniatur ordo ad intellectum, ut ad subiectum quod actuat, tamen iste ordo non constituit ipsum in ratione ideæ

idea, quia sub hoc respectu est forma intrinseca per sui inhaerentiam, & coniunctionem reddens intellectum cognoscentem, non autem forma imitabilis, & extrinseca reddens rem ad extra formatam, & ideatam.

Causalitas idea.

17 Causalitas ideæ optimè discernitur à causalitate materiali, finali, & formali intrinseca. Differt causalitas ideæ à causalitate materiali, quia munus ideæ non est recipere, & per modum subiecti se habere, sed potius materiam sibi subiectam format, & in formam artis reducit. Differt à forma intrinseca respectu sui ideati, licet respectu intellectus cui inhaeret formalem causalitatem habeat, non in quantum idea, sed in quantum conceptus. Respectu autem ideati, quod est proprium causatum ideæ, manifestum est quod idea non se habet, vt forma intrinseca, sed vt forma imitabilis, quia idea non est extra intellectum informans: vnde oportet quod in ideato producat aliam formam similem sibi, & hæc est intrinseca in ideato. Differt à causalitate finis formaliter loquendo, quia finis mouet metaphorice alliciendo per modum appetibilis, vnde immediate fertur in ipsum appetitum, licet requirat apprehensionem, & cognitionem tanquam conditionem vt applicetur, & manifestetur appetitui: at verò idea, in quantum idea, non agit in ideatum per alliciendum, & desiderium sui, sed per expressionem imitationis, nec mouet appetitum directe in quantum idea, licet alias illum mouere possit in quantum pulchra, vel conueniens, aut bona, sed eius causalitas in quantum idea, est expressio sui in ideatum, & sic est forma imitabilis, non finis alliciens: potest tamen habere rationem finis in quantum artifex intendit assequi imitationem ideæ in opere suo. Vnde D. Thom. *quest. 3. de verit. art. 1. in fine corp.* dixit quod idea seu exemplar habet quodammodo rationem finis, quia videlicet res exemplata habet pro fine perfectam assimilationem ad suum exemplar: hæc enim est eius perfectio: sub alia tamen causalitate se habet vt finis, alliciendo appetitum, & sub alia vt idea exprimendo sui imitationem.

18 De causalitate efficiendi, & formali extrinseca restat difficultas. Et quidem P. Suar. *ubi supra sect. 2. num. 2. & sequent.* solum ad causam efficientem reducit ideam, & solum dicit esse formam, quia extrinsece repræsentat, aut mouet ad sui imitationem: fundamentum eius est duplex.

Primum, probando quod habeat rationem cause efficientis, quia ars est causa effectiua artificiat, vt docet Philosophus 2. *Physic.* & D. Thom. 3. *p. 78. art. 2. & quodlib. 7. art. 3.* ergo idea quæ est forma artis debet efficienter concurrere, sicut & ipsa ars cuius est forma. Vnde ideas diuinas vocat S. Dionysius effectrices creaturarum in 5. *cap. de diuinis nominibus* & August. 12. *de ciuitate cap. 24.*

Secundum fundamentum est ad probandū quod non sit causa formalis extrinseca, id enim solum potest esse verum in sententia quæ existimat ideam esse conceptum obiectiuum siue extrà positum vt inspicitur, siue intrà formatum: constat autem hoc non semper esse necessarium: potest enim formari exemplar non desumendo ab extrinseco exemplari, sed per inuentionem de nouo formatam: & Angeli siue acceptione ab obiectis externis possunt formare ideam de aliquo artefacto: exemplar autem interiorius formatum licet semper requiratur ad ideam, non tamen requiritur quod sit obiectum diuersum ab ipso effectui faciendo, imò quantò magis effectus ad extrà est similis obiecto formato ab artifice, tantò perfectior est influxus ideæ; in id enim quod

Ioan. à S. Thoma in 1. Part. D. Th. Tom. 2.

diuersum est, & dissimile, non influit per se idea: sufficit ergo ad rationem ideæ concipere, & formare pro obiecto illud ipsum quod faciendum est, & quantò magis in indiuiduo illud concipit, & sic efficit ad extrà, tantò perfectius exemplar est: ipsa autem res facienda vt concepta, & formata non habet effectum formalem in seipsum, vt est in re, & multò minùs ipse conceptus qui est accidens informans intellectum, potest informare rem ad extrà; neque explicari potest in quo consistat ista causalitas formalis extrinseca, & quid sit.

Nihilominus vtramque causalitatem attribuimus 19 ideæ, supponendo, quod iam dictum est, quod idea est forma intelligibilis, agens in ideatum per imitationem sui: & quia sic operatiua est ad extrà, pertinet ad rationem practicæ potestque in ea considerari aliquid quod pertinet ad efficaciam, & motionem executiuam ad extrà, & sic induit rationem causæ efficientis, quæ respicit executionem & positionem rei in esse. Potest etiam considerari id quod repræsentationis est in idea, & imitabilitatis eius in ideato, ratione cuius ideatum respicit ideam quasi regulā, & specificatiuum sui extrinsecum, quasi originans & principians id quod specificum est in ideato, non solum dando illi existentiam, sed regulationem, & imitationem, & sic habet rationem causæ formalis,

Vtramque causalitatem ei tribuit D. Thom. nam 20 5. *metaph. lectione 2.* dicit, quod habet causalitatem formalem, non sicut forma intrinseca, sed sicut extrinseca à re, ad cuius tamen similitudinem res fieri dicitur, & secundum hoc exemplar rei dicitur forma. Qui locus est apertissimus, cum ponat formam extrinsecam cum causalitate formali, non efficiente. Item, in *quest. 3. de verit. art. 1.* dicit, quod forma rei potest dici tripliciter. Vno modo à quo formatur res sicut à forma agentis procedit formatio. Alio modo dicitur forma alicuius secundum quam aliquid formatur, sicut anima est forma hominis, & figura statuæ est forma capri. Tercio modo dicitur forma alicuius illud ad quod aliquid formatur, & hæc est forma exemplaris, ad cuius similitudinem aliquid constituitur. Et in hac significatione consuetum est nomen idea accipi, ita quod idem sit idea quod forma quam aliquid imitatur. Quo loco D. Thomas aperte distinguit rationem formæ in idea à forma intrinseca, quæ est secunda acceptio, & à ratione formæ agentis, quæ est prima: ergo sentit quod præter causalitatem effectiuam habet aliam, quæ est propria ideæ, & non est forma intrinseca.

Hoc idem sumitur ex Arist. qui in 2. *Physic.* definit 21 causam formalem, quod est species & exemplar, & vt aduertit D. Th. *loco citat. metaph.* forma intrinseca rei dicitur species, & forma extrinseca, exemplar, seu idea. Nec satisfacit solutio Suar. *ubi supra* quod ideā vocat formam generali ratione: idea enim generaliter formam significat, vel quia Plato nomine ideæ vsus est, dicendo quod per ideas constituebantur essentiae rerum, & species; sed quidquid sit de hoc, tamen constat quod Aristoteles non posuit, vel reduxit ideam ad aliud genus causæ, quæ quàm ad genus formæ; & certum est non esse formam intrinsecam in ideato; ergo extrinseca. Si autem in illa definitione Aristotelis tradita de forma communiter sumpta quod est species & idea, ly idea esset id quod forma generaliter sumpta, sensus definitionis esset, forma est species & forma, quæ definitio esset omnino inepta.

Quod verò etiam idea habet causalitatem effectiuam, deducit D. Th. 3. *de verit. art. 7. ad 3.* ex illis verbis D. Dionysij in 5. *de diuinis nominibus*, quod exemplaria in Deo sunt diuinæ & bonæ voluntates prædeterminatiuæ, & factiuæ rerum, vbi ponderat S. Doctor quod non dixit Dionysius esse voluntatem prædefinientem, & efficientem, sed prædeterminatiuam, 22

A 3 natiuam,

natiuam, & effectiuam, vt non solum comprehendat id quod actu facit, sed etiam id quod potest facere, licet de facto non faciat. Supponit ergo quod idea habet rationem efficientis, ex voluntate adiuncta; ratione enim bonæ voluntatis dicit Dionysius quod est effectiua rerum; videatur etiam *quodlibet* 8. art. 2. vbi dicit D. Th. quod idea includit intentionem operandi: & 1. p. q. 45. art. 6. quod Deus est causa rerum per suum intellectum, & voluntatem, sicut artifex rerum artificiarum; voluntas autem est causa per modum efficientis.

23 Fundamentum autem propter quod attribuimus ideæ causalitatem formalem extrinsecam, quæ reductiue pertinet ad genus causæ, quæ est forma, est quia idea non solum est forma productiua, & respiciens existentiam effectus à se causandam, quod est proprium efficientis, sed etiam est regula, & mensura ipsius ideati, quantum ad eius speciem, & rationem, ad modum quo obiectum respectu potentia, vel actus se habet vt specificatiuum eius. Et hoc constat, quia tantò veriore, & perfectiore iudicamus aliquam imaginem, & artefactum, quantò conformior est suo archetypo, & ideæ; & sic tota ratio, & perfectio huius consistit in imitatione illius: si ergo idea se habet vt forma imitabilis: ergo vt forma regulans, & mensurans, siquidem ex imitatione ad ipsam sumitur perfectio, & ratio istius. Quod verò hic modus perficiendi & mensurandi se habeat per modum formæ extrinsecæ, pater, quia tota species, & forma ideati, quæ in ipso intrinsecè & formaliter est, non est aliud quàm imitatio, & deriuatio ab idea, vt à forma principali, & exemplari: ergo idem munus facit idea exemplando, quod forma in formando, id est, dare ideato formationem, & speciem per modum formæ principalis, sicut forma intrinseca dat tanquam forma proxima, in formando; & quasi imprimens in se vices formæ idealis. Vnde si obiectum se habet vt causa formalis extrinseca respectu actus specificati à se, quia obiectiue terminat vel principiat specificationem, multò magis idea, quia exemplariter, & per modum formæ imitabilis, & principalis originat, & principiat specificationem formæ artificialis: forma enim artificialis est quasi quoddam vestigium, & representatio formæ idealis, quia est eius imitatio: ergo in quantum talis respicit ideam vt representatum, & imitatum à se: ergo vt significatiuum extrinsecum.

24 Dices: hac ratione probaretur quod quæcumque habitudo similitudinis ad suum simile, vel mensurati ad mensuram respiceret illum terminum vt causam formalem extrinsecam, quod tamen non admittitur communiter, cum terminus relationis prædicamentalis sit purus terminus, non causa formalis, aut specificatiuum eius. Sequela autem constat, quia in quocumque termino extrinseco potest fieri simile argumentum, quia ab illo dependet talis habitudo vt à mensurante, & perficiente extrinseco: ergo vt à forma. Confirmatur, nam etiam forma efficiens, & executiua perficit extrinsecè rem quam producit, & similiter finis: ergo etiam dicentur habere genus causæ formalis extrinsecæ. Sic autem talis ratio causæ formalis nimis generalis est pro omni perficiente extrinseco, & sic nihil peculiare dicitur de idea, præter rationem causæ efficientis, aut termini relationis ideati ad ipsam.

25 Resp. non omnem terminum extrinsecum habere rationem perfectiui, vel specificatiui respectu eius quod habet habitudinem ad ipsum, sed aliquando se habet vt purus terminus, sicut vnum simile, vel æquale ad alterum: aliquando est aliquid minus perfectum, & potius perfectibile ab altero, quàm perfectum eius, sicut materia respectu formæ. Respe-

ctus autem ad terminum vt ad perficientem, & specificantem non est inconueniens, quod se habeat ad illum vt ad causam formalem extrinsecam, præsertim quando ita perficit extrinsecè specificando, & regulando, quod relinquit aliquid intrinsecum, & informans in suo perfectibili cum dependentia à se vt ab extrinseco perficiente, non autem omnis mensura sic se habet: aliquando enim mensuræ non perficiunt suum mensuratum, sed solum ex usu, & instituto humano notificant mensuratum, sicut pecunia est mensura rerum venalium, & libræ, ac pondera publica institutione designantur. Idea autem perficit, & regulat ideatū, quia tota veritas ideati in imitatione ideæ consistit tanquam vestigium formæ principalioris, & exemplaris, & sic respicit illam tanquam formam specificantem exemplariter, seu imitabiliter quod est extrinsecè, non inhærenter quod est intrinsecè; & sic idea verè informat idearum, sed exemplariter, non intrinsecè.

Ad confir. Resp. quod causa efficiens solum respicit rem, vt ponendam extra causas, quod est respicere existentiam, & executionem, & si respicit essentiam solum est quatenus subest existentia. Et similiter finis mouet efficiens, vt exequatur, & producat in esse. Vnde non potest specificatio sumi ab istis causis, vt à mensura, & specificatiuo formali, sed per accidens est ad quidditatem rei, quod sit ab isto, vel illo efficiente, quia non est eius munus specificare, sed rem specificatam producere, & extra causas ponere; & sic dicitur causa extrinseca efficiens, non solum quia non causat per coniunctionem ad effectum, sed etiam quia nō respicit quidditatem vt specificandam, sed vt producendam, & sub ratione existentia; & sic non tam respicit obiectum, quàm effectum. Idea autem regulat ipsam veritatē, & quidditatem ideati, & facit exemplariter formando id, quod forma intrinseca in formando.

27 Quod verò etiam in idea concurrat ratio causæ efficientis, ex dictis probatur, quia non solum pertinet ad ideam, speciem, & veritatem ideati formare, sed etiam ad executionem, & existentiam eius procedere, & ad ponendum ideatum extra causas: formatur enim idea ex intentione ponendi aliquid in esse, & sic non solum deseruit intellectui vt formanti, & determinanti veritatem ideati, sed etiam deseruit voluntati, & intentioni artificis, vt res ipsa executioni mandetur: artifex enim sic producit per formam idealem sicut agens naturale per formam naturalem; & ita debet respicere existentiam, & productionem sui ideati, & non solum speciem, & naturam in abstracto: ergo debet habere vim efficiendi, quia causalitas efficientis respicit existentiam, & positionem rei extra causas. Caterum hoc habet idea ex participatione voluntatis, quia enim voluntas est principium mouens, & inclinans subiectum ad executionem agendi, quicquid efficaciz est in his quæ per voluntatem faciendæ sunt, in ipsam voluntatem tanquam in primū mouēs internum reducitur, sicut etiam quicquid ordinationis, & specificationis est, in ipsum intellectum; quia sicut est proprium voluntatis impellere, & mouere ex parte subiecti per inclinationem, ita est proprium intellectus ordinare, & formare ex parte obiecti, atque aded ex parte specificationis, quia obiectum specificationem præbet, sicut intentio, & voluntas impulsus, & motum.

Argumenta P. Suar. quæ probant efficientiā ideæ, concedimus. Quæ verò impugnant causalitatem formalem, non vrgent: Concedimus enim non requiri per se ad rationem ideæ quod deducatur ab aliquo exemplari externo, vt argumentum probat. Et obiectum externum licet possit dici exemplar, seu originale; non tamen potest dici idea; quia non est forma

forma viua, & vitaliter artificiosè mouens ad sui imitationem: per se ergo solum requiritur ad ideam quòd sit aliquid formatum in intellectu, vt exprimens, & formans imitationem sui ad extrà. Et licet inter obiectum cognitum, vt præcisè cognitum denominatione extrinseca, & seipsum vt existens ad extrà non intercedat formalis causalitas, quia neque intercedit imitatio, & expressio vnius ex alio, tamen inter ipsum obiectum vt formatum ad intrà, & rem ipsam vt formandam ad extrà, vera imitatio intercedere potest, atque adeo formalis causalitas extrinseca. Et ad instantiam, quòd hoc exemplar interius, si perfectum est, est omninò simile, imò omninò idem cum re facienda ad extrà. Respondetur quòd non est distinctum obiectum quantum ad rem, transeat, seu quantum ad similitudinem rei, quantum ad modum, nego. Et diuersus modus stat in hoc, quòd exemplar, seu conceptus idealis respicit ideatum vt formabile à se modo artificioso, non vt præcisè cognitum, seu cognoscibile: sic enim simplex cognitio respicit, & reddit cognitum ipsum ideatum denominatione extrinseca: multi enim qui non sunt artifices possunt cognoscere perfectè ideatum, seu artefactum, nec tamen formant ideam illius. Et idea non solum dicit conceptum cognoscentem quid sit obiectum, sed quomodo sit faciendum, ita quòd modus ipse faciendi & formandi reluceat in conceptu, & practicum illum reddat; & quantò imperfectior est idea, tantò perfectiùs totum ideatum repræsentat, sed vt factibile & imitabile à se, non vt purè cognitum. Et cum infertur quòd sic ipse conceptus sufficit ad rationem ideæ. Distinguo, ipse conceptus ratione obiecti à se excogitati, & formati tali modo quod possit exprimi artefactum ad extrà, concedo: ratione ipsius conceptus, vt præcisè informantis potentiam, & reddentis illam cognoscentem, nego: Illud autem obiectum sic formatum & attractum vt quod intra conceptum, est causa formalis extrinseca respectu ideati, quia distinguitur ab ipso obiecto vt est extrà, sicut inuisibile, & immateriale ab eo quod entitatiuè, & visibiliter in se existit: sic enim ex inuisibilibus visibilia fiunt, vt inquit Paulus, ad Hebr. 11. vbi ly ex dicit causam non solum efficientem, quæ respicit productionem in se, sed etiam formatiuam, quæ respicit speciem ipsam ideati in se.

Soluantur argumenta.

29 Obiicies primò ex P. Vasq. disp. 71, cap. 2. & 72. cap. 2. ad probandum ideam non posse esse ipsum conceptum in mente artificis, quando perfectè repræsentat rem quam facturus est, sed rem illam quæ obiectiuè sibi proponit artifex, vt ad instar illius efficiat ideatum. Idea est forma exemplaris quam artifex aspiciens ad instar illius, aliquid operatur; ergo non potest idea esse ille cōceptus qui habet pro obiecto id quod facturus est. Consequentia patet, quia iste conceptus non respicit aliquid distinctū ab ipso ideato; ergo neque aliquid imitabile ab ideato, & sic ex vi talis conceptus non potest formati illud ideatum ad instar alterius, quia non concipitur per talè conceptum aliquid aliud ab ipso ideato; antecedens autem constat ex ipsa definitione ideæ: & patet manifestè, quia nihil seipsum imitatur, nec causatur à se, ideatum autem imitatur ideam: ergo idea non potest esse conceptus ipsius ideati: sic enim imitaretur seipsum: & sic artifex perfectè cognoscens ideatum non diceretur facere illud ex idea, sed ex cognitione sui ipsius.

Confirm. quia opus factum per artem proximè

imitatur rem obiectiuè propositam intellectui, ipsum autem conceptum non imitatur, quia non assimilatur illi, sed rei obiectæ, sicut videmus rem artefactam, v. g. domum procedere similem domui conceptæ, non ipsi qualitati spiritali conceptus: ergo immediatè imitatur rem apprehensam, remotè verò conceptum, quatenus rem apprehensam continet.

Resp. non esse necessarium, & per se requisitum ad ideam quòd desumatur ab aliquo obiecto extrà, vel repræsentet ideatum imperfectè, vt iam diximus. Neque conceptus induit rationem ideæ ex eo præcisè quòd rem ideatam perfectè cognoscit, sed quia tali modo cognoscit, scilicet artificiosè, & modo practico faciendi illud: potest enim aliquis perfectè cognoscere rem aliquam artefactam, nec tamen ideam illius formare, licet conceptum formet, quia artificium non habet. Vnde ad Arg. in forma, concessio antecedenti, distinguitur consequens: non potest esse idea ille conceptus qui habet pro obiecto ideatum, si solum repræsentet rem ideatam in se, & sub modo quo passiuè in se facta est, concedo: si repræsentet rem illà sub modo actiuè faciendi nego. Et sic idea non respicit pro obiecto ipsum ideatum præcisè vt in se est in re, sed aliquid excogitatum & formatum in conceptu sub modo exprimendi illud ad extrà; quod tamen quia simile est ipsi rei ad extrà quæ ideata est, etiam dicitur ideatum ipsum repræsentare, tantò perfectiùs, quantò est illi similius: qui enim format ideam de domo, non solum nititur apprehendere domum, quæ materialiter est in re; hoc enim etiam cognoscit quicumque videns domum, etiam si artifex non sit: sed nititur formare modum, quo domum faciat, & habilitare conceptum vt rem illam excogitatam à se reducere possit ad exteriorè materiam, & ex inuisibili visibilem facere: domus ergo inuisibilis, & immaterialis sub tali modo excogitata quo possit ex illa inuisibilis domus exteriori deriuari, idea domus est, aliquando perfectæ, & valde similis ideato, vel etiam illi eminentior, vt idea diuina; aliquando imperfectæ repræsentans ideatum deficienter, & non eo modo quo fieri debet, vt plerumque in nobis accidit.

Ad Confirm. resp. quòd res exteriori facta non imitatur conceptum, vel intellectum, vt qualitas quædam formaliter est, & vt medium cognoscendi vt quo, benè tamen imitatur rem excogitatam in illo conceptu, prout ibi immaterialiter, & inuisibiliter continetur cum tali modo formandi rem ipsam ad extrà: sicut si diceremus quòd speculum habens imaginem aliquis imitaretur, non quatenus vitrum, sed quantum ad imaginationem contentam.

Secundò, arguitur pro sententia Scoti ad probandum quòd obiectum exteriori vt propositum, & cognitum denominatione extrinseca sufficit ad constituendam rationem ideæ: nam res exteriori proposita ad imitandum dicitur idea, dummodo per cognitionem applicetur: sic enim dicit Aristot. 12. metaph. textu 24. quòd ars medendi est sanitas ipsa apprehensa, & species domus est idea domus faciendæ. Et præterea, quia artefactum non imitatur ipsum conceptum in re, qui est qualitas spiritalis, sed obiectum quòd est ab eo cognitum, hoc ergo habet rationem ideæ.

Confirm. quia ipsa res cognita, & apprehensa cum facultate, & vñu artis sufficit ad exprimendum opus artificiale extrà: ergo illa habet rationem ideæ, licet applicatio fiat per cognitionem, sicut finis ratione suæ bonitatis apprehensæ mouet; & tamen apprehensio non est ratio formalis finalizandi, sed conditio.

Confirm. secundo in idea diuina, nam hæc non potest esse ipsa diuina essentia, vel eius conceptus, seu verbum, quia omnis creatura dissimilis est illi: ergo non fiunt creaturæ ad instar essentiae diuinæ: vel conceptus diuini: ergo ad instar creaturæ apprehensæ, & cognitæ, hanc enim imitatur creatura facta in re: ergo ipsa est idea.

32 Resp. negando antecedens. Ad probationem ex Aristot. responderetur ipsum non dicere absolute quod sanitas est ars medendi, & species domus ars ædificatoria, sed cum diminutione quod aliquantuliter species domus est ars ædificatoria, & sanitas ars medendi. Quod D. Thom. *super illum locum lectione 4.* exponit quod ars est similitudo quædam, & ratio formæ, quæ est in materia. Sentit ergo non esse eandem formam, quæ est in materia solum prout cognita denominatione extrinseca, sed prout concipitur, ut ratio faciendi, & formandi rem illam quæ est ad extrâ. Quod verò dicitur artefactum imitari ipsum obiectum cognitum, non verò conceptum, iam sæpe dictum est, quod non dicitur conceptum imitari, ut est qualitas quædam, & id quo fit cognitio, sed ratione rei excogitatæ per ipsum, & cognitæ *ut quod*: sicut sæpe asserit D. Thomas. Nec sufficit esse cognitam *ut quod*, sicut res externa dicitur cognita per extrinsecam denominationem & potest esse cognita modo simplici, sicut cognoscitur à quocumque etiam non artifice: sed idea dicit rem cognitam, & formatam intra conceptum per modum practicæ formandi & exprimendi rem ad extrâ.

Ad primam confir. Respondetur quod res ad extrâ, etiam ut apprehensa, & cognita denominatione extrinseca, non est idea, quia de ratione ideæ est quod ex illa tanquam ex forma inuisibili, & intelligibili ad quam artifex intendit fiat res ad extrâ. Forma autem intelligibilis ad quam respicit artifex debet esse expressa in conceptu, non autem in specie impressa tantum, hæc solum continet obiectum per modum principij ad intelligendum, non per modum termini qui respicitur *ut quod*. Forma etiam intelligibilis in conceptu est forma viua, & vitaliter, atque artificiosè mouens ad sui imitationem. Vnde apprehensio per quam redditur intelligibilis, & expressa talis forma non est conditio solum ad rationem ideæ, sicut apprehensio ad rationem finis, quia ab apprehensione non datur fini aliquid appetibilitatis: hanc enim solum habet ex eo quod in se est in quantum assequendus; in idea autem tota ratio imitabilitatis ut artificioso & intelligibili modo faciendæ prouenit ex formatione, & expressione quam habet in conceptu. Et ideo exemplum de bonitate finis non currit in præsentem, ut iam *suprà* diximus.

Ad secundam confir. dicitur plenius *art. sequenti*, modò solū dicimus quod idea diuina non est homogenea, & adæquata creaturæ, sed eminentissima, & perfectissimè omnem creaturam continens. Vnde licet entitatiuè sit valde dissimilis creaturæ, repræsentatiuè tamen, & causatiuè totum quod est in creatura continet, & assimilât illam sibi inadæquatè.

33 Terriò, arguitur in fauorem sententiæ Suar. ad probandum quod conceptus non ratione rei repræsentatæ, & cognitæ *ut quod*, sed ratione sui, & ut est medium cognoscendi quo induat rationem ideæ: nam præter realitatem, & qualitatem conceptus ut informantis intellectum, quidquid ibi restat, solum est obiectum cognitum, quod non addit nisi denominationem extrinsecam in ratione cogniti: Hoc autem nullo modo potest esse ratio formalis constitutina causæ realis, qualis est idea: ergo in ipso esse cognito nõ consistit eius ratio formalis, licet possit se habere ut conditio, sicut in fine ipsa apprehensio.

Confirm. in exemplari externo quod proponitur artifice ut imitetur illud: licet enim requiratur quod sit visum ab artifice, ut ab eo dirigi possit, tamen esse visum non constituit illud in ratione exemplaris imitabilis, licet sit conditio, & applicatio illius: ergo similiter in exemplari interno esse cognitum intra conceptum non pertinebit ad formalem rationem ideæ, sed ad conditionem; realiter verò conceptus constituet ideam in ratione causæ realis.

Resp. quod præter realitatem conceptus quid- 34 quid habet rationem cogniti ad extrâ, solum redditur cognitum denominatione extrinseca, sed esse cognitum intrinsecè, id est repræsentatum intra conceptum, non est aliquid præter realitatem ipsius conceptus. Cæterum hæc realitas conceptus habet duplex munus secundum duplicem comparisonem, alterum respectu subiecti, seu intellectus in quo est, & sic habet se tanquam medium *quo*, & reddit intellectum cognoscentem, seu excogitantem: alterum munus exercet per comparisonem ad obiectum, & sic reddit illud repræsentatum, & excogitatum, & hoc realiter non est aliud quam ipse conceptus sic intra se rem excogitatam, & formatam habens, sicut homo effigiatus in speculo non est aliud quam ipsi colores reuerberantes in speculo, non ut præcisè inhærent vitro, sed ut reddunt hominem repræsentatum. Sic ergo rem esse repræsentatam intra conceptum non est denominatio intrinseca, sed realis formalitas, non distincta à realitate conceptus, exercita tamen circa obiectum, non circa subiectum. Sub hac ergo ratione qua consideratur conceptus ut reddens formatum, & excogitatum obiectum non informatum intellectum, & excogitantem, constituitur ratio ideæ, quatenus exprimitur ibi obiectum modo practico, & artificiosè deriuabile ad extrâ: & sic idea habet rationem causæ realis, quia res ut formata, & contenta in conceptu aliquid reale est, non realitate distincta à conceptu intra quem est. Differentia autem inter apprehensionem requisitam ad finem ut appetatur, & ideam, ut artificiosè, & intelligibiliter exprimatur, iam sæpius explicata est.

Ad primam confir. Resp. quod exemplar externum non est formaliter idea, sed obiectiue, & fundamentaliter, quia ab illo desumit artifex species quibus formet ideam intra se, & hanc proximè imitatur ideatum, quatenus ab ea formatur artificioso, & intelligibili modo: ab exemplari autem externo immediate non formatur aliquid artificioso modo, sed ab eo desumuntur species, quibus artifex format ideam. Ad hoc autem ut exemplar illud solum obiectiue, & fundamentaliter sit exemplar, non concurrat esse visum per modum rationis formalis, sed est quædam conditio, seu denominatio resultans in obiecto ut species eius per visum transeat ad potentias interiores: Exemplar enim externum solum concurrat emittendo species, non artificiosè formando artefactum ad extrâ. Exemplar autem internum non concurrat emittendo species, sed artificioso modo, & intelligibili, formando artefactum ad extrâ, ut scilicet ex inuisibili visibile fiat; & ita esse inuisibilem formam excogitatam: & repræsentatam intra conceptum tali modo practico pertinet ad formalem rationem ideæ, licet id non alia realitate habeat quam realitate ipsius conceptus, sub habitudine tamen ad obiectum non præcisè ad subiectum, seu intellectum.

ARTICVLVS II.

*Vtrum essentia diuina habeat rationem
idea, & quo modo.*

- 1 **E**X opinionibus *precedenti articulo* relatis circa constitutionem ideæ in communi, deriuantur diuersæ sententiæ circa constitutionem ideæ diuinæ. Quidam enim constituunt ideam diuinam in conceptu diuino vt cognoscente: quidam in obiecto aliquo, seu re cognita. In conceptu diuino vt cognoscente constituit Valsq. *in presenti disp. 72. cap. 2.* licet ideam creatam non in conceptu artificis constituat, sed in aliquo obiecto ad quod respiciens operatur: non autem respicit suum conceptum, aliàs indigeret cognitione reflexa ad operandum ideatum: Deus autem prius intuetur Verbum suum, quàm creaturas, quia istæ sunt obiectum secundarium respectu Verbi diuini, in quo exprimuntur. Similiter P. Suar. conuenit cum sententia Valsq. quantum ad hoc quod idea diuina sit ipse conceptus Dei formalis; non obiectiuus, nec tamen facit differentiam, quantum ad hoc, inter ideam artificis creati, & increati. Ipsam autem diuinam essentiam negat esse ideam, neque secundum se, & entitatiuè: quia sic non est cau. a exemplaris sed solum executiua: neque vt cognitam, quia esse cognitum non reddit supra ipsam essentiam nisi denominationem rationis, quæ ad rationem ideæ per se non requiritur. Et ita pro hac sententia referri possunt Auctores *artic. preced.* relati pro hac sententia, quod idea consistat in conceptu formali, & non in obiectiuo.
- 2 Ex aliis autem Auctoribus qui constituunt ideam in conceptu obiectiuo, etiam differentia sententiarum orta est: nam quidam constituunt ideam diuinam in ipsis creaturis à Deo cognitis, quatenus secundum esse obiectiuum concipiuntur ab intellectu diuino, vt producendæ in re. Alij verò in essentia diuina, non vt cognoscente, sicut Valsq. & Suar. sed vt cognita. Alij denique distinguunt, quod aliquæ ideæ diuinæ sunt ipsa essentia diuina vt cognita, aliquæ verò sunt creaturæ ipsæ obiectiuè attractæ. Primam sententiam tenet Scotus *in 1. dist. 35. quæst. 1. §. Ad ista*, cui Nominales adherent, vt Ocham, Gabriel, & alij. Secundam cõmuniter sequuntur Thomistæ, qui constituunt ideam in ipsa diuina essentia, quatenus cognita non absolutè in se, sed comparatiuè ad creaturas, vt imitabilis seu participabilis ab illis. Ita Caiet. *art. 2. huius quæst. & ibi* recentiores Thomistæ Bafiez, Nazar. Gonzalez Nauarrete, & alij. Tertiam sententiam docuit Durandus *in 1. dist. 36. quæst. 3. art. 3.* qui distinguit de perfectionibus, quæ formaliter sunt in Deo; participantur autem à creaturis, sicut esse, viuere, & intelligere, & de perfectionibus, quæ licet inueniantur in creaturis, non tamen formaliter sunt in Deo, quia imperfectionem intrinsecam imporrant, sicut motus, discursus, sensus, &c. Et de prioribus dicit quod ipsæmet perfectiones, vt sunt in Deo, habent rationem ideæ respectu similibus perfectionum creaturarum, licet non sit perfecta idea, quia valde dissimilis. De posterioribus verò dicit diuinam essentiam non habere rationem ideæ, sed creaturam cognitam à Deo.
- 3 Nihilominus sit conclusio: Conceptus formalis Dei siue sumatur pro intellectu, siue pro specie expressa prout comparatur ad intellectum, tanquam id quo redditur cognoscens, non induit rationem ideæ, neque creatura ipsa vt obiectiuè cognita habet rationem ideæ ad seipsam vt in re producendam, sed idea diuina consistit in ipsa essentia diuina cognita vt quod, non absolutè vt est in se, sed comparatiuè vt imitabilis, & participabilis determinatè ab ista crea-

tura, vel ab illa, &c. Prima pars est expressa D. Th. *in presenti art. 2. in corp. & ad 2.* vbi inquit quod sapientia, & ars significantur vt quo Deus intelligit, sed idea vt quod Deus intelligit. Et ex hoc explicat D. Thom. quomodo plures ideæ sint in Deo, vt docet August. quia licet species, seu conceptus diuinus, vt est principium, seu forma cognoscendi, sit vnum, & non plura, tamen rationes per talem conceptum cognitæ plures sunt, quatenus cognoscit Deus suam essentiam esse diuerso modo imitabilem à creaturis: Conceptus tamen quo ista intelligit vnicus est, quia esset contra simplicitatem diuinam plures conceptus in ratione formæ cognoscentis habere.

Ratio autem & fundamentum conclusionis sumitur ex his quæ *art. preced.* notata sunt, quia ad ideam pertinet vt sit forma ad quam aspiciens artifex operatur, vt constat ex eius definitione, & aliis *art. precedenti* traditis. Sed conceptus, vt est forma reddens intellectum cognoscentem tanquam medium quo, non est id quod intellectus inspicit, sed id quo inspicit: ergo non est idea sub ista formalitate, sed inquantum est aliquid cognitum. Et hoc ipsum confir. ex ipsa ratione ideæ, quia ad ipsam pertinet esse regulam, seu mensuram per quam formatur ideatum, vel si deficiat, reformatur. Ipse autem conceptus inquantum reddit formaliter cognoscentem vt quo, non potest induere rationem mensuræ, quia regula, seu mensura applicari debet per intellectum concipientem ad ipsam regularum, vt illi adæquetur, & assimiletur: ergo non potest conceptus, quatenus reddit intellectum concipientem, esse ipsa mensura, & regula formadi ideatum, aut reformati. Patet consequentia, quia prout constituit intellectum concipientem constituit illū cognoscentem: ergo mensurantem, seu applicantem mensuram, siquidem ista applicatio fit per cognitionem, quia idea modo intelligibili format ideatum: ergo prout sic non potest esse mensura; quia distincta formalitas est ratio mensuræ & applicatio eius ad mensuratum. Denique currit hic ratio D. Th. *in presenti art. 2.* quia Deus vnico conceptu, seu specie attingit omnia obiecta, nec variatur ex eorum diuersitate: ideæ autem multiplicantur iuxta diuersam imitabilitatē, & respectum ad ipsas res ideatas: ergo non potest idea consistere in conceptu, quatenus forma est intellectus reddens illum cognoscentem: sic enim vnico modo se habet, & non multiplicatur etiam respectu diuersarum rerū, quia omnes sub vna formali ratione attingit: vt autem est idea, multiplicatur respectu diuersarum rerum, quia multiplicantur diuersæ rationes formales imitabilitatis, vt infra dicemus, ergo sub alia formalitate conceptus se habet ad intellectum, & constituit cognoscentē, sub alia induit rationem ideæ, & se habet ad ideatum, licet sit eadē entitas, cum diuersa tamen cõnotatione, & respectu.

Secunda pars Conclus. quod idea in Deo non sit creatura cognita obiectiuè, vt voluit Scot. Probatur, quia idea est ad cuius instar formatur ideatum, sed creatura obiectiuè repræsentata non est id ad cuius instar formatur creatura in se, & per quā eius formatio regulatur, & causatur: ergo non potest consistere idea in aliqua creatura obiectiuè cognita. Minor probatur, quia creatura obiectiuè cognita cognoscitur à Deo vt quid creabile à se, nō vt quid increabile: ergo vt formabile à se: ergo ipsa creatura etiam vt cognita non est forma, sed formabilis, nec idea, sed ideabilis: ergo forma quæ est idea; est aliquid præter creaturam cognitā; atq; adeo essentia diuina. Confir. quia Deus non solum causat creaturas vt artifex quomodocumque, sed vt prima causa: ergo etiam idea diuina debet esse forma supremo modo causans, quia artifex causat per ideam tanquam per formam: ergo artifex supremus, & prima causa per ideam;

ideam, quæ sit suprema forma, & causet per modum formæ causæ primæ: nulla autem creatura etiam ut cognita est forma diuina, & suprema causa, cum sit aliquid creatum obiectiue actum à Deo: esse autem obiectiue actum non eleuat rem illam creatam ad rationem formæ diuinæ, & primæ causæ: ergo prout sic non constituit ideam primi artificis, aliàs desumeret Deus formam cauandæ artificiosè à creatura ut cognita, & denominata extra se. Nec Deus indiget tali creatura cognita ad formandam ideam creaturæ, quia in suamet essentia continet rationem plenissimam cognoscendi totum quod est in creatura, quia totum causatur, & participatur ab illa: ergo & formandi ipsam creaturam, quia ubi est ratio cognoscendi perfectè, si adsit virtus artificiosa, & practica (ut datur in Deo) hoc ipso datur ratio formandi, & ideandi ad extrà. Quod amplius ex D. Th. confirmabimus in sequenti parte conclusionis, ostendendo essentiam diuinam esse ideam, ut comparatam ad creaturas.

6 Et per hoc manet exclusum illud dictum Scoti in 1. dist. 36. De creaturis in esse quodam diminuto, quod ab æterno intelligitur à Deo, & non est illud esse reale in quo res temporaliter fiunt. Quod aliqui acriter censurant putantes poni à Scoto aliquid esse extra Deum, quod vel sit medium inter ens reale, & rationis, & sic esset absurda Metaphysica, vel quod sit aliquid reale, & sic esset error ponere illud ab æterno extra Deum quantumcumque diminutum in esse: vel quod sit aliquid rationis, & sic esset nihil, & ad nihil deseruiens, nec potest esse idea, quia idea est vera & realis causa. Cæterum Scotus nomine creaturæ in esse diminuto solum videtur intellexisse creaturam in esse obiectiuo, seu creaturam ut cognitam, non ut aliquid existens extra Deum ab æterno. Sed defecit Scoti sententia; tum fortè in modo loquendi, dum dicit hoc esse diminutum, nec esse absolutum, nec respectuum etiam rationis, sed quoddam esse secundum quid productum per actum diuini intellectus (quod tamen potest intelligi non de producto rigorosè, sed de consequuto per modum denominationis) tum etiam quia posuit res creatas in hoc esse diminuto esse ideas diuinas, quia contra hoc militant rationes factæ. Quod si dicatur sumi ly cognitum pro cognitione practica, & formatiua rerum, non purè speculante; Contra est, quia cognitio practica creaturæ est formatiua, & operatiua illius: ergo respicit illam ut formatam, & operatam: ergo ex aliqua idea præsupposita, ratione cuius practice causat, non verò ipsam rem cognitam constituit in ratione formæ & ideæ, quia potius attingit illam ut formatam, operatam, & ideatam.

7 Denique tertia pars conclusionis expressè affirmatur à D. Th. hic art. 1. ad 2. *Essentia, inquit, diuina habet rationem ideæ secundum quod ad alia comparatur.* Et ad 3. *Idea nihil aliud est quàm essentia Dei, &c.* & art. 2. ad 1. *Idea, inquit, non nominat diuinam essentiam in quantum essentia, sed in quantum est similitudo, vel ratio huius, vel illius rei.* Et idem affirmat quæst. 3. de verit. art. 1. & 2. Et sumitur ex D. Dionysio 5. cap. de diu. nomin. ubi ideas, seu exemplaria appellat substantificas rationes existentiū, quas Theologia prædeterminaciones vocat, & diuinas, & bonas voluntates omnium effectrices, &c. Non sunt autem substantificæ rationes omnium, si sunt aliquid extra Deum, & aliquid creatum: ergo debent esse ipsa substantia diuinæ essentia. Similiter D. August. lib. 83. quæstionum quæst. 46. dicit quod ideas sunt quadam formæ, vel rationes rerum incommutabiles, quæ formatæ non sunt, ac per hoc æternæ, quæ diuina intelligentia continentur. Formæ autem incommutabiles, & æternæ non sunt aliquid

præter substantiam Dei, nec continentur in intelligentia diuina solum ut res cognitæ ad extrà; sic enim continentur in ea etiam res ipsæ creatæ, ut mutabiles, & temporales, quia sic sunt cognitæ à Deo terminatiue: ergo si continentur ibi ut incommutabiles formæ, continentur ut aliquid de substantia Dei.

Ratio, & fundamentum est, quia idea debet esse 8 aliquid quod artifex attendit, & cognoscit tanquam formam & regulam iuxta quam format sua artefacta, sed respectu totius collectionis entis creati Deus nō potest respicere tanquam formam exemplarem aliquid ens creatum, nec vnā creaturam ut ideam alterius: ergo solam essentiam suam potest respicere ut formam & ideam totius huius formationis. Consequenter patet, quia præter totam collectionem entis creati, non restat nisi ens increatum, vel nihil; ergo si tota collectio entis creati non habet rationem formæ, & ideæ, nec vna creatura respectu alterius, restat ut sola essentia increata rationem exemplaris, & ideæ habeat. Maior nota est ex definitione ideæ, sicut præced. art. explicauimus. Minor probatur, quia tota collectio entis creati est formata, & causata, seu causabilis à Deo: ergo ideabilis, ergo ipsa non est idea, nec intra ipsam inuenitur idea, quæ sit prima & suprema, qualis Deo competit, quia quidquid intra illam collectionem inuenitur, creatum est: ergo ideatum, & formatum à suprema idea Dei. Nec vna creatura est idea respectu alterius, tum quia ipsa etiam creatura, quæ sumitur pro idea, debet esse ideata & formata, utpote causata à Deo: ergo non potest esse suprema idea, sed supponit illam extra se: tum quia non potest vna creatura continere omnem perfectionem, quæ est in alia, cum in se limitata sit, nec potest causare omnia, quæ sunt in alia creatura: nam materiam primam causare non potest, nec substantias spirituales, quia solum per creationem petunt produci: ergo nulla creatura potest esse idea suprema respectu alterius, quia idea suprema est sicut forma causæ primæ in causando, & ita debet vniuersalissimo modo influere, & per modum exemplaris primi operari totum quod est in suo ideato: hoc enim modo supremus, & primus artifex operatur: ergo debet operari per ideam suo modo operandi proportionatam: modus autem iste vniuersalissimus in influendo nulli creaturæ competere potest, quia est forma particularis, & limitata.

Quod si dicas: nam essentia diuina ut nos asserimus 9 constituitur in ratione ideæ, non per ipsam entitatem essentia absolute, sed per comparisonem eius ad creaturam: hæc autem comparatio est relatio rationis, cum Dei ad creaturas non possit dari relatio realis, ergo constituimus ideas in Deo sub conceptu ideæ, & in quantum distinguuntur ab essentia nostro modo intelligendi per aliquid rationis, & sic in quantum distinguitur ab essentia, & sub proprio conceptu, non potest idea esse causa realis.

Resp. quod de hoc plenius agatur infra art. sequenti. Interim dicimus quod essentia diuina comparata ad creaturas à nobis intelligitur per modum respectus qui est relatio rationis, & non realis, sed ex parte ipsius Dei non est respectus, sed eminentia summa respectu creaturarum, quas reddit illas dependentes à se sine dependentia, & relatione ad illas, quod tamen nos non explicamus, nisi per respectum. Vnde idea in Deo ipsam realitatem Dei includit, licet connotet ipsum respectum; & quantumcumque præscindatur, semper includit illam, licet non semper exprimat; distinctio enim in his quæ ad essentiam & attributa pertinent, non fit per omnimodam præscissionem & exclusionem vnus ab alio, sed includendo illud solum fit per non expressionem eius, quod includit, sicut etiam fit in transcendentibus

libus, quorum vnum imbibitur in alio, licet distinguatur ab illo per rationem, non abstrahendo, sed non exprimendo.

- 10 Sed restat difficultas in explicando quomodo essentia diuina, cum sit ita dissimilis creaturæ, possit esse idea illius, & ei assimilari ideatum, etiam si eminenter dicatur illi similis, sicut lux solis non potest dici idea caloris, etiam si eminenter calorem contineat. Sed de hac difficultate, aliisque, quæ opponuntur à P. Vasq. commodius dicemus in solutionibus argumentorum.

Soluuntur Argumenta.

- 11 Primò; Arguitur ex D. Dionysio cap. 7. de diuinis nominibus, ubi dicit *Ideam non cognoscere res per ideam*, & tamen cognoscit illas per essentiam suam: ergo idea non est essentia Dei. Et similiter Anselmus in monologio cap. 29. Docet in Verbo non esse similitudines rerum, sed simpliciter essentiam: sed D. Th. hic art. 2. ad 1. docet quod essentia diuina non est idea, vt essentia, sed vt similitudo huius, vel illius rei: si ergo in Verbo non sunt similitudines rerum, sed solum essentia, non est in Verbo idea: ergo extra Verbum, & sic vel erit aliquid creatum, vel ipse actus cognitionis diuinæ.
- 12 Confirm. quia idea est principium operandi ipsi artifici vt sit causa ipsius ideati, & artefacti: sed Deus operatur per cognitionem imperando, & dicendo, quia ipse dixit, & facta sunt: ergo idea est principium cognoscendi, & dicendi: ergo est id quod Deus dicit, & cognoscit: ergo non ipsa diuina essentia vt cognita, tanquam id ad cuius instar facit rem creatam, sed id quo cognoscit, & dicit; quod tamen nos negamus cum D. Thom.
- 13 Confirm. quia essentia diuinæ non possunt conuenire conditiones requisitæ ad rationem ideæ, scilicet quod sit similitudo rei ideatæ, & quod conueniat Deo liberè, & non necessariò, siquidem solum conuenit illi in quantum est agens liberum operans ex voluntate, & intentione, agens enim necessarium non agit ex idea, sed ex natura: istæ autem conditiones non possunt conuenire essentia diuinæ, vt cognitæ. Non prima, tum quia diuina essentia non est similitudo rei creatæ, nisi analogæ, & eminens, & sic ad instar illius non potest fieri propriè & determinatè creatura, quia potius est dissimilis illi. Tum quia illa similitudo diuinæ essentia intelligitur conuenire essentia antecedenter ad intellectionem, ex eo scilicet quod est infinitum esse, & à se, & per modum speciei impressæ fecundantis intellectum: at verò ratio ideæ non est similitudo creaturæ, nisi vt terminus intellectionis, & post ipsum intelligere, quia est id in quod respicit intellectus vt in terminum cognitum, & sic verbum procedens est imago, & idea creaturarum, quia est terminus intellectionis, non ergo ipsa essentia diuina in ratione essentia est idea. Secunda etiam conditio non conuenit, quia ideæ necessariò sunt in Deo non minùs quàm ipsa ars, & cognitio creaturarum, & similitudo earum: ergo non liberè conuenit Deo.
- 14 Resp. ad auctoritatem Dionysij iuxta explicationem D. Th. hic art. 1. ad 1. quod Dionysius negat Deum cognoscere creaturas per ideas existentes extra se, & ab ipsis rebus acceptas, quales ponebat Plato, qui dicebat ideas dari extra intellectum per se subsistentes. Eodem modo Anselmus docet in Verbo non esse similitudines rerum, scilicet acceptas à rebus, & immediatè atque adæquatè representantes creaturam, non tamen negat similitudines rerum eminentiales & increatas, quæ sunt ipse Deus: & sic illum explicat D. Th. q. 3. de verit. art. 1. ad 10. D.

Thom. autem cum dicit ideam esse diuinam essentiam, vt est similitudo rerum, loquitur de similitudine eminentiali, quæ licet solum sit analogica entitatiuè, & quoad conuenientiam entitatis cum creatura, est tamen propriissima in causando & continendo in virtute totum quod est in creatura, quia totum ab illa participatur, sicut ternarius continetur in millenario, & imago in speculo.

Ad primam confirm. Resp. ideam esse principium operandi ipsi artifici, vt cognoscenti, & intendenti, & sic supponit cognitionem, & tenet se ex parte conceptus, seu rei cognitæ: non autem est principium per modum fecundantis potentiam artificis, vt reddatur cognoscens, & sic non debet concedi quod idea est principium cognoscendi *vt quo vel in quo* formaliter, sed solum ex parte rei cognitæ intra conceptum, vt docet D. Th. hic art. 2. sed & principium formandi, & operandi exemplariter ad extra, & sic se habet vt cognitum, quia est id ad quod respiciens artifex operatur. Vnde potius ex hoc quod est principium operandi per modum exemplaris practici, & per modum dirigentis, non tenet se ex parte principij cognoscendi, quæ est species impressa, sed ex parte conceptus, & rei cognitæ, quia directio, & motio qua mouetur, voluntas, & à voluntate potentia executiva, fit mediante re cognita, & apprehensa, & mediante conceptu. Et sic non sequitur quod principium operandi in intellectu sit principium cognoscendi, sed potius oppositum, quia principium operandi, & mouendi est res cognita per conceptum; conceptus autem non est principium cognitionis, sed terminus.

Ad secundam Confirm. Resp. quod prima conditio saluatur in essentia diuina respectu creaturæ, quia est similitudo illius eminentialis, non formalis, & creatura non est ideata vt perfectè imitans diuinam essentiam, sed imperfectè, & deficienter, vt amplius dicetur ad tertium. Hæc autem similitudo qua essentia diuina continet creaturam, non est solum eminentialis inadæquatè, sicut lux solis eminenter est calor, sed sicut continens plenè, & perfectè totum quod est in creatura, ita quod ex eius participatione, & per imitationem ad illam debet deriuari quicquid est in creatura, non autem totum quod est in calore deriuatur à luce tanquam ab vniuersali principio, nec per illius imitationem calor efficitur, sed lux est virtus continens calorem, sicut effectum secundariò consecutum ex multiplicatione radiorum in tali materia capaci caloris. Vnde lux non potest se habere vt idea, per cuius imitationem, & participationem fiat calor: essentia autem diuina cognita vt imitabilis à calore, est idea illius. Vnde patet ad primam probationem argumenti, licet enim essentia diuina entitatiuè sit dissimilis creaturæ, est tamen eminentialiter similis, quatenus est principium continens totum quod est in creatura; ita quod ex eius participatione creatura habet totum quod habet, & sic participatiuè, & imperfectè creatura est similis Deo. Ad secundam probationem dicitur quod essentia diuina non solum est similitudo per modum speciei impressæ, sed etiam per modum speciei expressæ, quia in Deo intellectus, intellectio, species, & conceptus sunt omnino idem, quia per seipsam essentia diuina est intelligens, & intellecta in actu secundo quod pertinet ad speciem expressam. Neque hoc habet essentia diuina per Verbum notionaliter procedens à Patre: nam Pater per seipsum, & non per Verbum est sapiens, & habet essentiam diuinam in actu secundo intellectam; sicut etiam Spiritus sanctus; & sic essentia diuina vt cognita tam in Patre, quàm in Spiritu sancto, & non solum in ipso Verbo habet rationem ideæ: neque enim idea dicitur notionaliter

tionaliter in Deo, sed essentialiter, & communiter ad omnes tres personas, quia omnibus commune est esse artificem, & creatorem omnium rerum, & consequenter operari per artem, & ideam.

- 17 Secundò, arguitur fundamento Scoti, & Durani, quia creatura perfectè cognita, & posita in mente Dei habent omnia requisita ad perfectam rationem ideæ: ergo non potest hoc eis denegari. Antec. probatur, tum quia creatura inspicitur, & cognoscitur à Deo, & si operetur iuxta illam, operabitur ad instar similitudinis existentis in mente sua, & iuxta id quod debetur perfectioni creaturæ; id enim creaturæ est debitum, quod Deus de illa apprehendit in mente sua: ergo sufficienter saluatur ratio ideæ, si iuxta id quod Deus apprehendit de creatura in mente sua, illam producat: Tum etiam quia ponendo hoc modo ideam in Deo, ponimus aliquid quod perfectè imitetur ipsa creatura; ponendo autem essentiam diuinam tanquam ideam, non potest creatura perfectè imitari ipsam, quia essentia diuina est valde dissimilis creaturæ, & sic non est perfectæ, & adæquata in ratione ideæ. Tum etiam quia hoc modo optimè saluatur pluralitas idearum, quia plures sunt creaturæ conceptæ in mente diuina; ponendo autem diuinam essentiam pro idea, vix potest talis pluralitas saluari.

Confir. à simili, quia res ad extrà apprehensa vt bona mouet ad sui amorem per modum causæ finalis: ergo etiam eadem res apprehensa vt imitabilis mouebit vt causa exemplaris ad sui executionem; non enim minus est causa finis, quam idea: ergo quod sufficit ad rationem finis, id est res apprehensa, sufficit ad rationem ideæ.

- 18 Resp. negando antecedens. Ad primam probationem dicitur quod creatura est cognita à Deo vt obiectum secundarium, & deriuatam ab ipso Deo, & tanquam res ideata, & formata ab ipso, non vt prima forma, ad cuius instar formetur ipsa creatura; immò quia Deus non cognoscit creaturam, nisi per medium, & speciem diuinam, non potest representatio creaturæ esse nisi eminentialis respectu creaturæ: talis autem representatio cum sit diuina, respicit primò diuinam essentiam, & secundariò creaturam vt deriuatam à Deo; & consequenter Deus inspiciendo suam essentiam vt imitabilem, & participabilem à creatura, est idea illius modo eminentialis diuino, creatura autem ipsa cum non representetur in mente diuina per speciem propriam, & adæquatam creaturæ, sed per speciem increatam, quæ est essentia diuina, nec per conceptum immediatum, & adæquatam creaturæ, sed per conceptum increatum, qui est essentia diuina, non potest representari vt prima forma, & idea sui, sed vt formata, & deriuata ab essentia diuina, à qua tanquam à prima forma deriuatur, & consequenter ipsa diuina essentia representatur vt principium à quo creatura participabilis, & imitabilis est: & hoc est esse ideam supremam, & eminentissimam, cuius creatura est imperfecta participatio. Quod verò Deus apprehendat per intellectum suum quid unicuique creaturæ debitum sit, hoc non apprehendit nisi mediante essentia sua, tanquam regula, & principio huius debiti; quia illud est debitum creaturæ quod in ea participatur ab essentia diuina, tanquam à principio, & fonte totius perfectionis creatæ, & iuxta suam sapientiam dispensante unicuique quod ei proprium est; & sic essentia diuina vt principium huius creaturæ est id quod Deus accipit vt regulam & exemplar eius quod tali creaturæ debetur, non autem ipsam creaturam immediatè inspicit vt regulam, quia non inspicitur nisi vt regulata, & formata à tali principio, & habens ab illo id quod sibi debetur.

Ad secundam probationem dicitur quod ponendo essentiam diuinam esse ideam, quam imitetur creatura, etiam ponitur idea perfectissima ex parte ipsius formæ, & principij imitabilis, quia perfectissimè continet totum quod est in creatura, multò melius quam ipsa creatura se contineat: Et hoc est quod pertinet ad perfectionem ideæ. Quod verò idea sit ita restricta & limitata ad hoc ideatum, quod non possit secundum aliam rationem esse idea alterius, hoc non pertinet ad perfectionem ideæ, sed potius oppositum pertinet ad eius eminentiam, & infinitam perfectionem: hac ratione dicitur creatura imperfecta, & deficiens participatio ideæ diuinæ, quia non adæquat totam eius eminentiam, siquidem est idea multorum, licet totam suam perfectionem adæquat, & plenè habeat ab illa.

Ad tertiam probationem dicitur optimè saluari pluralitatem idearum in essentia diuina, quia pluralitas hæc non est entitativa, sed respectiva: Deus enim per vnicam essentiam suam, & omnipotètiā respicit omnes creaturas, & ab vnaquaque secundum diuersum modum participabilis est: & sic vnica existens in sua entitate propter summam simplicitatem æquiualeat omnibus; & ita fundare potest plures respectus ad diuersas creaturas, iuxta quod unicuique se accommodat, & ab illis participatur diuerso modo, & diuerso respectu, vt D. Th. in hac quaest. & quaest. 3. de verit. docet, & sequenti art. explicabitur.

Ad confirm. Resp. quod finis mouet, & causat vt in intentione existens ad assequutionem illiusmet rei quæ intenditur, & apprehenditur: idem enim est quod apprehenditur, & intenditur vt assequendum, & quod postea in re, & in executione assequimur: & ita finis solum mouet metaphorice, & moraliter, tanquam idem in apprehensione intentum ad seipsum in executione ponendum: at vero idea non mouet ad assequendum id quod inspicitur, & apprehenditur, sed ad imitandum, & assimilandum illi, siue sit similis eminenter, & modo infinito, siue sit similis limitatè, sicut idea creata respectu sui ideati: id autem quod Deus inspicit ad imitandum à creatura non potest esse aliqua creatura, quia illa ideata est, vt pote facta & creata, non autem idea prima, & suprema: neque Deus cognoscit creaturas nisi per essentiam suam tanquam deriuatas, & participatas à se: idea ergo semper debet esse distincta ab ideato, sed multò magis idea prima & suprema, quia omnis idea extrinseca forma est ad ideatum, & imitabilis ab eo; idea autem prima debet esse non formata, neque creata: sic enim esset etiam ideata, & non purè idea: debet ergo infinite distare, & distingui ab ideato, quia hoc semper est creatum & limitatum.

Tertiò arguitur ad probandam sententiam P. Vasq. videlicet quod essentia diuina vt cognita, & acta, seu expressa non est idea, sed vt cognoscens, & exprimens. Et fundamentum est, quia essentia diuina in se non est similis creaturæ, nisi analogice, sed omninò dissimilis: ergo non potest in ea reperi similitudo ad creaturam, qualis requiritur in idea respectu ideati. Patet consequentia, quia similitudo ideæ est talis quod ad instar illius debet fieri ideatum: Deus autem nullam creaturam potest facere ad instar suæ essentiae: ergo non potest essentia sua esse similitudo idealis. Nec potest dici quod Deus vt virtute continet creaturas, est idea creaturarum: Contra enim est, quia res eminenter continens aliam, cum sit valde dissimilis illi, & superior, non potest habere rationem ideæ respectu illius, sicut lux solis, quæ eminenter continet calorem, non potest dici idea caloris. Et deinde quia in hac ratione eminenti vel aspiciat Deus id quod eminenter continet,

continet, vel id, quod in illa eminentia est contentum: id quod eminenter continet est essentia diuina, vt superior, & eminens respectu creaturæ: ergo vt dissimilis: ergo non vt idea sub hac ratione eminentiæ: id autem quod continetur in illa eminentia, est ipsamet creatura; & hæc non potest esse idea, vt probatum est contra opinionem Scoti: ergo essentia diuina, vt cognita, non est idea, sed vt cognoscens, & exprimens.

23 Confirm. quia vt docet S. Thom. *infra quest. 19. artic. 4.* res sunt in Deo velut in causa secundum modum causæ, & quia est causa per intellectum, ideo sunt in Deo, vt in cognoscente: ergo si Deus est idea creaturatum, in nostra sententia, secundum quod eminenter eas continet, & hoc habet in quantum cognoscens est, consequenter est idea in quantum cognoscens, & exprimens, seu repræsentans creaturas, non autem essentia diuina, vt cognita; præsertim si sit vera sententia ipsius Vasq. quod Deus non cognoscit creaturas in essentia sua, tanquam in causa, & medio prius cognito, sed tanquam in specie repræsentante, de quo *supra* diximus ad *questionem 12. D. Thom. disputatione 17. articulo 3.*

24 Confirm. secundò, ex eodem D. Thom. in *præfati artic. 2. ad 1.* vbi docet quod idea non dicit essentiam diuinam, vt essentia est, sed vt similitudo, vel ratio huius, vel illius rei. Vnde secundum quod sunt plures rationes intellectæ ex vna essentia, secundum hoc dicuntur plures idee. Ergo sentit D. Thom. quod ipsa essentia diuina, secundum entitatem essentiæ, non est idea, sed secundum quod est similitudo, seu species repræsentans, non ratione essentiæ repræsentatæ; imò *ibidem*, *solutione ad 2.* docet quod Deus non solum intelligit multa per essentiam suam, sed etiam intelligit se intelligere multa per essentiam suam, & hoc est intelligere plures rationes rerum, vel plures ideas esse in intellectu eius, vt intellectas: ergo sentit D. Thomas essentiam Dei non esse ideam, nisi quatenus sumitur sub illa reflexione, vt intelligit se intelligere multa per essentiam suam: ergo ipsum intelligere constituit ideam in Deo, & consequenter conceptus vt repræsentans, & cognoscens, non essentia vt repræsentata est idea.

25 Respondetur quod essentia diuina, vt diximus, est similis creaturæ similitudine eminentiali, & inadæquata, non similitudine formali, & limitata, quatenus continet eminenter totum quod est in creatura, sicut senarius est similis ternario eminenter, & inadæquate, quia continet ipsum ternarium, non adæquate; & formaliter. Vnde Deus non facit creaturam ad instar sui absolute, & vt est in se, sed ad instar sui, vt continentis talem, vel talem creaturam; ad rationem autem ideæ non requiritur quod ideatum producat ad instar sui, quantum ad id quod est idea entitatiuè in se; sic enim idea est qualitas quædam spiritualis, nempe conceptus in intellectu, res autem ideata est aliquid corporeum in re productum, sed sufficit quod sit similis ideæ, quantum ad id quod in idea continetur, tanquam expressum, & formatum in conceptu, sicut videmus in sigillo quod sigillatum per illud non imitatur sigillum in eo quod sigillum est in se, quia in se est ex ære, vel ex auro; sigillatum autem est cera, sed in eo quod sigillum continet sigillatum in ratione figurabilis, imò ipsam figuram continet sigillum modo inuerso, quàm sit in sigillato.

26 Ad primam replicam contra hoc. Respondetur quod bene potest aliquid quod est dissimile alteri, *Ioan. a S. Thoma in 1. Part. D. Th. Tom. 2.*

formaliter, & entitatiuè esse idea illius, dummodo eminenter contineat quidquid est in alio, sicut de qualibet idea, quæ est intra intellectum, ostensum est quod in sua entitate spiritali est dissimilis rei artefactæ ad extrà, quæ est aliquid corporeum; & bos format vestigium sui pedis, cum tamen alterum vestigium iam formatum id non possit, & tamen vnum vestigium entitatiuè, & formaliter est similius alteri, quàm pes bouis suo vestigio: & si bos vteretur intellectu, & artificio in figendo pedem, haberet suum pedem pro idea vestigij, sicut Deus essentiam suam, vt contentiuam creaturæ, habet pro idea talis creaturæ, & quasi sigillat illam tanquam vestigium sui. Exemplum autem de luce respectu caloris non obstat, quia lux non causat calorem per sui participationem, & imitationem, quæ sit quasi formatio, & sigillatio caloris, sed vt est virtus Cœli, quod est primum alterans hæc inferiora, & sic lux non se habet vt exemplar caloris, sed vt virtus actiua eminentialis Cœli ad alterandum hæc inferiora per calorem. Vnde dicit D. Thom. in *2. distinct. 13. quest. 1. artic. 3. ad 6.* quod ex hoc multiplicatur calor, in quantum lumen, ex hoc quod est qualitas primi alterantis, habet quod ad alterationem inuenit, & præcipue secundum illam qualitatem, quæ est simpliciter & maxime actiua, scilicet calor, ac per hoc virtuti primi alterantis maxime conformis. Lux ergo ex sua specie non habet causare, aut continere calorem, vt patet tum in luce plurium stellarum, quæ calorem non causant, tum in luce corporis gloriosi, quæ non causat calorem, neque offendit visum, vt docet D. Thom. in *additionibus quest. 85. art. 2.* Posset tamen lux esse idea non caloris, sed coloris, qui ex modificatione lucis causatur, & ideo in ipsa luce continetur vt à quo participetur, & formetur; licet quia ista modificatio lucis debet fieri in aliquo opaco, in quo sit reuerberatio lucis, non potest sola lux esse perfecta idea caloris, sine ordine ad opacitatem.

Ad aliam replicam dicitur quod Deus in illa ratione eminenti, quam respicit pro idea creaturæ, neque respicit rem ipsam contentam in se, tanquam ideam formaliter, quia res illa contenta est ideata, non idea, vt pote creatura ipsa, nec respicit ipsam eminentiam continentem secundum entitatem, quæ est in se absolute, sic enim est omnino dissimilis, nec entitati suæ assimilatur creaturam, sed respicit rem diuinam sic eminentem, vt comparatiuè se habet ad hanc creaturam, & vt contentiuam est illius, iuxta id quod petit talis creatura; sic enim consideratur vt principium, & ratio, ex cuius participatione, & formatione deriuatur illa creatura, sicut ex sigillo deriuatur sigillatum, & ex pede bouis vestigium, non imitando entitatem pedis, aut sigilli, sed figurationem quam continent.

Ad primam Confirm. Respondetur non esse dubium quod Deus est causa creaturarum, & continet illas in quantum cognoscens est; per cognitionem enim causat, & format creaturas: ex hoc tamen non potest inferri quod ipsa cognitio sit ipsa idea, ad cuius instar format creaturas: sed cognitio aspiciat ideam tanquam formam cognitam, & aspectam, vt ex illa per imitationem deriuatur creatura; & sic essentia diuina, vt cognoscens, causat, & format artificiosè; vt autem est cognita, tanquam principium contentiuum creaturarum, est idea, seu res aspecta, ad cuius instar cognitio format creaturam. Vnde cum infertur quod Deus est idea, vt cognoscens, & repræsentans, quia sic continet eminenter creaturas. Respondetur, quod non sufficit

B

sufficit ad rationem ideæ continere creaturam quomodocumque, sed tanquam forma inspecta, ad cuius instar formetur ipsa creatura, non autem tanquam cognitio inspiciebat, quæ solum continet, & caulat actiue, dirigendo, non vt forma, exemplando: hæc autem forma inspecta à Deo non potest esse creatura ipsa, tum quia hæc est ideata, & formata, non ipsa forma, & idea; tum quia Deus non potest repræsentare creaturam per conceptum, & speciem increatam, nisi repræsentando, & attingendo immediatè suam essentiam, vt primum obiectum, & creaturam, vt aliquid secundarium, & derivatum ab illa, vt contra Vasq. latè probatum est *precedenti tomo disput. 15. artic. 3. & disput. 17. art. 2.*

29 Ad secundam Confir. Respondetur quod quando D. Thom. dicit diuinam essentiam non esse ideam, vt essentia est, seu similitudo huius, vel illius rei, sensus est manifestus quod essentia diuina non exercet officium ideæ secundum ipsam essentiam absolute sumptam, sed comparatiue ad hanc, vel illam creaturam, in quantum continet illam, & est similitudo illius eminentialis. In secundo autem loco docet D. Thom. in Deo esse plures rationes, seu ideas rerum, vt intellectus, quatenus intelligit se intelligere multa per essentiam suam; non quia constituat rationem ideæ in ipso intelligere actiue sumpto, aut in cognitione reflexa suæ intellectionis, vt *seq. artic.* dicitur, sed ad declarandum quod essentia diuina non induit rationem ideæ, ex hoc præcisè quod habeat rationem speciei repræsentantis plures creaturas, tanquam principium quo cognoscendi illas, sed ex eo quod essentia diuina cognoscatur vt res quædam continens hanc, vel illam creaturam, & vt principium originarium illius. Ad hoc autem necesse est quod comparatur seu intelligatur vt comparata ad talem, vel talem creaturam. Hoc autem non habet essentia diuina per hoc præcisè quod sit ratio cognoscendi plura vt quo, sed ex eo quod intelligatur ipsa essentia vt quod comparatiue ad plures creaturas, quod est ex eo quod intelligit se plura intelligere per essentiam suam vt cognitam & comparatam.

30 Vltimò, argui potest argumentis P. Suarez quibus generaliter probat omnem ideam esse conceptum vt actiue repræsentantem, & concipientem, non verò ipsam rem formatam per conceptum. Sed hæc argumenta non tangunt specialiter ideam diuinam, sed procedunt generaliter pro omni idea, & ita *precedenti art.* à nobis soluta sunt.

ARTICVLVS III.

Quomodo pluralitas idearum in Deo explicanda sit.

1 D Vplex in hac parte difficultas agitari solet. Prima, quomodo cum summa simplicitate diuinæ essentiae stet pluralitas idearum, quæ verè, & propriè plures ideas constituat, non verò solum plures respectus rationis importet in eadem ideam.

2 Secunda difficultas est, dato quod ideæ plurificentur, non per plures relationes reales, sed rationis, an illi respectus formentur per intellectum diuinum, ita quod etiam ante nostrum intellectum sint in Deo plures ideæ formaliter, an solum fundamentaliter, & per nostrum intelligere formaliter multiplicentur.

3 Circa primam difficultatem diuiduntur Auctores iuxta diuersum modum sentiendi circa constitutionem ideæ diuinæ, vt *articulo precedenti* vidimus. Qui enim dicunt ideas in Deo non esse ipsam diuinam essentiam, neque conceptum eius formalem, sed creaturas ipsas obiectiue cognitæ, vt sensit Scotus, & ex parte Durandus, etiam concedere possunt plures ideas in Deo esse realiter distinctas, quia non sunt aliud quàm ipsamet creaturæ cognitæ, quæ vtique realiter distinguuntur. Qui verò constituunt ideas in aliquo increato, siue dicantur esse ipsa essentia diuina, vt cognita, siue vt conceptus cognoscens, etiam diuiduntur. Quidam enim antecedentes ad ipsam entitatem ideæ; dicunt illam non posse esse nisi vnā, non solum vt entitas est, & vt ratio cognoscendi, sed vt formaliter idea est, sicut ars, & sapientia vnica est in Deo respectu omnium creaturarum. Pro qua sententia citatur Aureolus in *1. distinct. 36. quaest. 1.* qui absolute docet vnā esse ideam in Deo. Durandus autem qui dixit diuinam essentiam habere rationem ideæ, respectu earum perfectionum, quæ formaliter inveniuntur in Deo, & deriuantur ad creaturas, dixit hanc ideam esse vnā in Deo in esse ideæ, licet habeat plures respectus ideales. Et similiter Marsilius in *quaestione 1. prologi artic. 1. in secunda parte*, posuit ideas solum esse plures in Deo obiectiue, non formaliter, quia versatur circa plura obiecta. Omittimus Auicennam qui docuit vnā tantum ideam esse in Deo, sed erroneè, vt videri potest apud D. Thom. *quaest. 3. de verit. art. 2.* quia putauit Deum solum produxisse primam creaturam, seu primam intelligentiam, & de illa formasse ideam, non verò de aliis, quia reliquæ creaturæ dicit quod processerunt ab illa prima, non à Deo, cum tamen fides Catholica doceat quod Deus est Creator omnium tam visibilium, quàm inuisibilium. Et similiter quidam Clemens Philosophus relatus à Diuo Dionysio *5. cap. de diuinis nominibus*, dixit principaliora entia esse exemplaria inferiorum.

4 Cæterum D. Thom. in *presenti articulo tertio* quem communiter sequuntur alij Auctores, tenet ideas formaliter in Deo esse plures, non quidem entitatiue, (entitas enim Dei absoluta diuidi non potest,) sed respectiue, & secundum officium, & munus ideandi. Non modica tamen difficultas est, quomodo isti respectus sub quibus multiplicentur ideæ, ad ipsam constitutionem, seu formalitatem plurium idearum pertineant. Ad quam explicandam.

5 Dico primò: ideæ in Deo non sunt plures realiter, & entitatiue, sunt tamen formaliter plures in officio, & munere ideandi, & ita absolute, & simpliciter debent dici plures ideæ in Deo; sicut etiam persona Christi absolute, & simpliciter dicitur composita, non entitatiue, sed in officio terminandi, & personandi plures naturas: & sic idea licet entitatiue sit vna in Deo, tamen in ratione, & officio ideæ non est simplex, sed multiplex.

6 Prima pars asseritur à D. Thoma in *presenti articulo 3.* vbi docet quod multiplicitas idearum non obstat simplicitati diuinæ: Et supposita sententia *precedenti articulo* à nobis probata, quod idea in Deo sit ipsa essentia diuina vt cognita comparatiue ad creaturam, nullo modo potest in dubium reuocari. Et probatio est manifesta, quia in Deo nulla est distinctio realis, & entitativa, nisi vbi interuenit relationis personalis oppositio, quia solum tres personas diuinas realiter in Deo distinctas Fides Catholica confitetur; sed ideæ non pertinent

pertinent in Deo ad relationes personales, & ad notionalia, sed ad absoluta: ergo non distinguuntur realiter. Consequentia est legitima. Maior est commune axioma Theologorum: si enim præter personales relationes multiplicaretur aliquid in diuinis, ipsum esse diuinum, & essentia absoluta diuideretur, essentque plures dii. Minor verò constat, quia ideæ non sunt personæ, neque relationes personales inter se oppositæ, cum vna idea non procedat ab alia per realem originem: pertinent etiam ideæ ad omnes tres personas, cum ad omnes pertineat creare, & gubernare mundum: ergo ideæ pertinent ad prædicata absoluta in Deo, non ad notionalia.

6 Secunda pars conclusionis sumitur in primis ex modo loquendi SS. Patrum, quem maximè debet æmulari Theologia. Et in primis S. Dionysius in 5. cap. de diuinis nominibus, plures ideas in Deo ponit cum dicit, *dari in Deo exemplaria rerum quas Theologia prædefinitiones vocat, & veras, & bonas voluntates.* Similiter S. August. lib. 83. quest. questione 46. dicit quod *ideæ sunt principales rerum formæ, quæ diuina intelligentia continentur.* Et iterum addit: *Restat ut omnia ratione sint condita, neque eadem ratione homo, quæ equus.* Et in epist. 115 inquit quod *sicut inconueniens est dicere quod eadem sit ratio anguli, & quadrati, ita inconueniens est dicere quod eadem sit ratio in Deo hominis, & huius hominis.* Secundò, probatur ex illo ad Hebr. 11. *Fide intelligimus aptata esse sæcula Verbo Dei, ut ex inuisibilibus visibilia fierent:* sed aptare sæcula per Verbum, est facere per ideam, quia Deus per ideam producit, & aptat creaturas, ex quibus iaculum constat: ergo istæ ideæ in ratione, & officio ideandi plures sunt in Deo, quia illa inuisibilia, ex quibus dicit Apostolus fieri visibilia, non sunt aliud quàm ideæ, seu formæ, quibus Deus disponit, & facit creaturas.

7 Denique probatur ratione, quia maximè pertinet ad officium, & formalitatem ideæ, quod formet vnumquodque ideatum iuxta modum proprium suum, & secundum quod vnum discernitur ab alio: nam & in mente artificis esset confusio velle eodem modo ideare, & formare lectum, vel cathedrâ, nauem, vel domum; sed maximè pertinet ad artificis petitiâ unicuique seruare distinctionem suam, & tribuere suam propriam rationem distinctam ab aliis: ergo cum proprium munus ideæ sit distinguere vnum ideatum ab alio, seu formare illud secundum suam propriam rationem, & secundum id quod sibi debetur, ei autem debetur id in quo discernitur ab alio; oportet quod vel vnumquodque ideatum habeat suam ideam distinctam, si sit adæquata, & limitata ad suum ideatum, vel si idea sit ita eminens, & perfecta quod vnica existens, pluribus ideatis sufficiat, & æquiualeat, non tamen sub eadem proportionem debeat applicari, & correspondere cuilibet ideato, quia non eodem modo participatur ab illis, quod est fungi officio plurium ideatum, & sic est multiplex idea, quantum ad officium, & formalitatem ideandi, licet entitatiuè sit vnicus conceptus. Itaque cum idea sit forma inhærens intellectui, & quoad hoc forma intrinseca ipsius, respiciens autem & regulans res ad extrâ, & sic intrinsecè formans illas, & quoad hoc est forma extrinseca, licet, in quantum identificatur in Deo cum ipso intellectu, non sit minùs vna, quàm intellectus ipse, quod est entitatiuè esse vnâ formam, tamen vt est forma extrinseca rei ideatæ, necessariò debet distinguere in ratione formæ sic regulantis, & ideantis extrinsecè, sicut res ipsæ ab illa ideatæ plurificantur, & distinguuntur inter se. Ratio est, quia cum proprium munus formæ sit actuare, & distinguere id quod informat, eo quod actus est qui distinguit, non potest

Ioan. & S. Thoma in 1. Part. D. Th. Tom. 2.

aliqua forma esse vnica in ratione, & officio formæ, si effectus eius formalis, & res formata est multiplex, quia forma, & effectus formalis perpetuò sibi correspondent, & proportionantur: sicut autem in idea diuina id quod entitatiuè formatur ab illa intrinsecè, seu potius cum quo identificatur intrinsecè, est vnicum, & non plurificatum, scilicet intellectus diuinus, & ita ipsa idea entitatiuè sumpta, & in ratione formæ intrinsecæ, vnica est, & non multiplex; ita cum id quod est formatum, & ideatum ab illa sit multiplex, scilicet tam multæ creaturæ, sic est multiplex effectus eius formalis extrinsecus, quatenus plures res redduntur formatæ ab ideis, & consequenter ipsa idea in ratione formæ extrinsecæ multiplex esse debet, quia effectus eius formales plures sunt: forma autem, vt forma, multiplicatur secundum multiplicationem effectuum formalium, quia effectus formalis non est aliud quàm forma communicata.

Obiicies: licet forma informans per vnionem nõ distinguatur entitatiuè ab effectu suo formali, quia effectus formalis est forma communicata, tamen forma extrinseca non est cur non distinguatur ab effectu formali, quia cum ipsa non communicate subiecto, non consistit eius effectus formalis in ipsa forma vt communicata, sed in aliquo alio præter ipsam: ergo ibi distinguitur effectus eius formalis à forma, & sic ruit tota probatio facta.

Confir. quia idea est forma per modum regulæ, & mensuræ ad quam reducitur ideatum, vt formatum per illam: sed mensura, & regula vnica existens, mensurat plura, sicut vnica vna mensurat plures pannos, & æternitas in Deo sine sui multiplicatione mensurat omnia tempora, nec dicuntur istæ mensuræ multiplicari etiam in ratione mensuræ, seu formæ extrinsecæ: ergo similiter neque idea.

Resp. argumentum convincere, quod forma extrinseca debet entitatiuè distinguere à suo effectu formali, aliàs extrinseca forma non esset, si extra effectum ipsum, & rem à se formatam non maneret. Et hac ratione idea entitatiuè distinguitur ab ideato. Cæterum in officio, & proportionem formæ multiplicari debet idea, & distinguere iuxta multiplicationem effectuum formalium extrinsecorum, licet id sua entitate, in qua semper distinguitur ab effectu formali, vna sit. Et hoc ideo, quia forma, siue intrinseca, siue extrinseca debet præbere speciem, & distinctionem formalem, & specificam ipsi rei quam format, species autem adæquatur ipsi specificato, ita quod extra illud non inuenitur, sed illi adæquari, & quadrari debet: ergo id quod exercet munus, & officium formæ dantis talem speciem etiam formaliter proportionari, & adæquari debet cum re specificata; & si plures specificationes præbet plurium formarum munera gerit, siue in sua entitate sit vna, siue non, siue distinguatur entitatiuè à suo effectu formali, siue non: in hoc enim non facimus vim, sed in eo quod secundum respectum, & officium formæ debet multiplicari, si specificationes, quæ sunt effectus formales eius multiplicantur; sicut etiam obiectum quod est vnum materialiter, & entitatiuè, si fundet diuersas rationes formales specificatiuas, est multiplex obiectum formaliter.

Ad Confir. responderetur quod est duplex genus mensuræ: quædam est mensura quætitatis, quæ ordinatur ad tollendam confusionem, ex multiplicitate, seu accumulatione mensuratorum orta; reducendo illam ad maiorem vniformitatem, seu vnitatem, quia hæc minus confusionis habet, & sic magis potest manifestare intellectui confusionem ortam ex multiplicitate quantitatis. Et in tali mensura repugnat quod fiat multiplicatio ipsius mensuræ ad multiplicationem

B 2

cationem

cationem mensuratorum, cum potius mensuratio fiat per reductionem illius multipliciter ad uniformitatem, & unitatem mensuræ. Et hoc modo procedunt exempla allata in argumento, sicut vna respectu panni, & æternitas respectu temporum, quia istæ mensuræ, & aliæ similes solum sunt mensuræ ad manifestandum confusionem rei mensuratæ, non ad specificandum illam. Alia mensura est perfectionis, seu per modum specificationis, & informationis, quæ pertinet ad mensuram perfectionis, non quantitatis. Et hæc cum mensuret specificando, & formando, seu perficiendo ipsum mensuratum, non autem confusionem quantitatis eius manifestando, oportet quod proportionetur, & adæquetur ipsi mensurato, distinguendo per sui formationem, & discernendo ipsum ab aliis; & sic diuerso modo formando vnum, quam aliud. Et hoc modo dicitur idea mensura ideati, scilicet tanquam mensura perfectionis, non quantitatis, quæ ipsum ideatum specificat, & mensurat, formando illud per imitationem sui, non per informationem intrinsecam. Et talis mensura specificationis debet multiplicari iuxta effectus formales, quos ponit in mensurato, non autem mensura manifestationis, seu quantitatis.

11 Ex quibus deducitur quàm subtiliter D. Th. in hoc art. 2. probauerit multipliciter idearum, ex eo quod Deus est causa distinctionis, & ordinis in vniuerso; ordo autem non potest intendi, nisi distinctio in rebus intendatur, neque distinctio potest intendi, nisi propriæ, & distinctæ rationes de ipsis rebus habeantur: quod est concludere distinctas, seu plures rationes, quæ sunt formæ ideales per intentionem, seu inspectionem sui causantes, non quidem plures entitatiuæ, sed respectiuæ: scilicet quantum ad officium, & munus ideandi.

12 Dico secundò: pluralitas ista idearum in Deo sumitur secundum respectus rationis, qui non fundantur in ipsa pluralitate idearum, sed in ipsa diuina essentia, ut est principium, & ratio diuersitatis in creaturis. Quod pluralitas idearum sit respectiua secundum respectus rationis, ex præcedenti conclusione deducitur, quia non est pluralitas entitatiua secundum entitatem absolutam Dei: hæc enim in Deo plurificari non potest: ergo debet esse pluralitas respectiua; & non secundum respectum realem, qui in ipso Deo sit, quia non dantur in Deo aliæ relationes reales, quàm personales, quæ fundantur in origine, & processione reali intra Deum: ideæ autem non sunt relationes personales inter se oppositæ, sed sunt communes omnibus personis: ergo debet earum pluralitas sumi secundum respectus rationis, non idearum inter se, quia vna idea non procedit nec opponitur relatione alteri, sed respicit ipsa ideata, per ordinem ad quæ idearum distinctio debet intelligi. Respectus autem Dei ad creaturas semper est rationis.

13 Quoad secundam verò partem conclusionis, quod isti respectus rationis non debeat fundari in ipsa pluralitate rerum, quæ causata, & ideata est, sed in ipsa diuina essentia, ut est principium, & causa istius pluralitatis rerum, sumitur ex D. Th. in 1. dist. 36. q. 2. art. 2. ad 3. ubi inquit quod quamuis pluralitas idearum attendatur secundum respectum ad res, non tamen pluralitas rerum est causa pluralitatis idearum, sed contrariò, non enim quia res diuersimodè imitantur diuinam essentiam, ideo intellectus eius inuenitur eam diuersimodè imitabilem, sed potius contrariò: intellectus enim diuinus est causa rerum, distinctio autem idealium rationum est secundum operationem diuini intellectus, prout intelligit essentiam suam diuersimodè imitabilem à creaturis. Ergo secundum D. Th. pluralitas istorum respectuum non fundatur in ipsa pluralitate creaturarum. Ratio autem est, quia si fundaretur in illis, causaretur, & ori-

retur ab illis, res autem illæ, etiam in quantum plures, sunt ideæ, & causatæ per plures ideas, & non per vnā tantum: ergo iam supponunt pluralitatem idearum, non illam fundant, & causant, & ita pluralitas causata & ideata non solum supponit unitatem idearum, sed pluralitatem, quia non causantur illa plura nisi per diuersas ideas, & non per eandem rationem vnā, per quam aliud: ergo si pluralitas idearum est respectiua secundum respectus rationis, non possunt tales respectus fundari in ipsa pluralitate rerum, sed antecederet ad ipsas res creatas. Et confirmatur, quia res creatæ ut plures sunt, & multiplicatæ, sunt terminus illorum respectuum idealium, quibus ideæ distinguuntur: ergo non sunt fundamentum, & causa illorum. Consequenter patet, quia terminus, & fundamentum relationis non possunt esse idem, alias relatio esset eiusdem ad se. Antecedens autem est certum, quia res creatæ, etiam ut sunt plures, & distinctæ, sunt formata, & ideata à Deo: ergo sunt terminus formationis eius: ergo & habitudinis, seu relationis ideæ, sic formantis: constat enim quod habitudo ideæ est habitudo formæ ad suum formatum, & ideatum: ergo terminus istius habitudinis ideæ est res formata, & ideata per ipsam ergo pluralitas rei formata est terminus habitudinis formæ, seu ideæ, non potest esse fundamentum ipsius respectus, quo multiplicatur idea respiciendo ideatum.

Ultima pars conclusionis, quod scilicet isti respectus fundentur in ipsa diuina essentia cognita ut principium diuersitatis creaturarum, sumitur ex D. Th. in presenti art. 2. ad 2. ubi inquit quod Deus vno intellectu intelligit multa, & non solum secundum quod in se ipsis sunt, sed etiam secundum quod in intellectu sunt, quod est intelligere plures rationes rerum. Et infra: Deus autem non solum intelligit multas res per essentiam suam, (id est in esse entitatiuo, quæ sunt extra Deum) sed etiam intelligit se intelligere multa per essentiam suam, sed hoc est intelligere plures rationes rerum, vel plures ideas esse in intellectu eius, ut intellectas. De eodem videri potest q. 3. de verit. art. 2. in corp. & ad 6. & in 1. cont. gent. cap. 5. circa finem ubi docet quod oportet in intellectu diuino distinctionem quandam, & pluralitatem rationum intellectarum considerare, secundum quod id quod est in intellectu diuino est propria ratio diuersorum. Igitur secundum D. Th. pluralitas idearum non sumitur ex essentia diuina: ut est ratio cognoscendi ipsas creaturas, siue sit ratio ut virtus, siue ut species, & representatio; sic enim per vnicam speciem, & per vnicam virtutem intellectus plura cognoscit, sed sumitur ex ipsa essentia diuina, ut est res cognita diuersimodè comparabilis, & participabilis à creaturis; sic enim accipitur non præcisè ut ratio representandi, & cognoscendi, sed ut res inspecta, ex cuius imitatione aliquid fit.

Et fundamentum huius ex hoc ipso desumitur, quia essentia diuina, ut est ratio cognoscendi plura, tanquam species representatiua, vel virtus, seu lumen intelligendi, non repugnat quod sub vna ratione formali attingat plura, quæ sub illa ratione formali continentur, & representantur, sicut videmus per vnicam visionem, & per vnicam rationem formalem, & ab vnicā potentia attingi plura colorata; & intellectus per vnicam speciem attingit plura representata, in quantum reducuntur ad vnum, & per vnicum habitum scientiæ plures conclusiones secundum quod induunt eandem rationem formalem scibilem. Quare intellectus ad cognoscendum plura non indiget plurificatione medijs, seu rationis formalis, imò tantò melius intelligit, & tantò superius, quantò magis ad unitatem intelligendi se reducit. Cæterum ad causandum per modum exemplaris, seu ideæ, non sufficit cognitionem rerum ideatarum in se habere; hanc enim etiam habere possunt qui ideam illarum carent; & artifices

tifices non sunt, sed oportet quod formam secundum quam res ideata est facienda intellectus proportionet, & adequet suo ideato, quia idea, & proportio, quæ deseruit pro vna re facienda, non seruit pro alia, vt *precedenti conclusione* ostendimus: ergo oportet quod artifex, & similiter ipse Deus prius formet in mente sua non solum cognitionem rei per essentiam suam, sed proportionem, & adæquationem essentiae suae cum tali creatura, eo quod proportio, & imitabilitas vnius creaturae non seruit pro alia, sed diuina essentia diuerso modo imitabilis est à diuersis creaturis; & ita licet diuinus conceptus seruiat pro omnibus creaturis, quia infinitæ perfectionis est, sed non eodem modo repræsentat diuinā essentiam, vt imitabilem ab vna creatura, & accommodatam, seu proportionatam vni, atque alteri. Diuina autem essentia in tantum induit rationem ideæ, in quantum redditur imitabilis ab vna creatura, & formatiua illius, ea ratione, & modo qui tali creaturae debetur, & secundum quem discernitur vna creatura ab alia: ergo ipsa diuina essentia in quantum est cognita sub hac diuersa imitabilitate, est sufficiens fundare istos diuersos respectus ideales ad creaturas. Paret consequentia, quia isti respectus non sunt orti ex aliqua mutatione reali creaturarum, quia ante omnem mutationem temporalem Deus habet intra se ideas de ipsis creaturis ab æterno, nec sunt respectus rei ideatae, & causatae, sed ipsius ideæ vt causantis, & ideatis secundum diuersam rationem vnum & aliud: ergo tales respectus debent fundari in eo, quod de se habet sufficientem imitabilitatem, & rationem formandi diuersas creaturas iuxta diuersam proportionem & imitabilitatem eius; & hæc est essentia diuina cognita, non absolute, vt in se est, sed secundum diuersam accommodationem, & imitabilitatem creaturarum; sic enim est diuerso modo formatiua vnius creaturae, & alterius, quod pertinet ad rationem ideæ vt dictum est.

16 Dices: Si ista pluralitas idearum fundatur in essentia diuina cognita, vt dicit D. Th. quatenus intelligit Deus se intelligere per essentiam suam plures rationes creaturarum, sequitur quod pluralitas idearum petat cognitionem reflexam Dei, quam nos negauimus conuenire Deo, *precedenti tomo disp. 17*. Et est inconueniens quod Deus non possit per cognitionem directam formare ideam, sicut potest artifex creatus; cum tamen creaturas cognoscat per cognitionem directā, & non cognoscit illas nisi per ideas. Sequela verò pater quia dicit D. Th. *hic art. 2.* quod sunt in Deo plures ideæ, quatenus intelligit se intelligere per essentiam suam plures rationes creaturarum: ergo loquitur de reflexa cognitione, quia hæc sola est quæ intelligit se intelligere: habet enim pro obiecto intelligere directum.

17 Confr. quia si pluralitas idearum sequitur per cognitionem directam diuinæ essentiae, vt imitabilis est à pluribus creaturis: ergo multiplicatur essentia diuina in ipso esse cognito directo, in quo illi conuenit pluralitas idearum, sed esse cognitum directum diuinæ essentiae est idem cum esse entitatio eius, quia ipsa essentia diuina consistit in intelligere, & intelligi sui: ergo si multiplicantur ideæ in ipso esse cognito, seu intellecto diuinæ essentiae, multiplicantur in esse reali, & entitatio.

18 Resp. non desse qui sentiant consequi pluralitatem idearum ad cognitionem reflexam ipsius diuinæ essentiae, quia id videntur indicare verba D. Th. Sed oppositum optime sentit Caiet. *in present. art. 2.* quia non solum pertinet ad cognitionem directam Dei cognoscere seipsum vt est in se absolute, sed etiam vt est ratio cognoscendi creaturas: non potest autem cognoscere creaturas per essentiam suam, nisi vt for-

Ioan. à S. Thoma in 1. Part. D. Th. Tom. 2.

matas à se: ergo ad eandem cognitionem pertinebit attingere creaturas in essentia diuina, & attingere rationes essentiae diuinæ formatiuas creaturarum. Dicimus ergo quod quando D. Th. docet quod Deus intelligit se intelligere multa per essentiam suam, & hoc est esse plures ideas in Deo, vt intellectas, *ly intelligit se intelligere* non est actus reflexus, sed explicatio intellectus onis Dei, vt formatiua plurium idearum; ex eo enim Deus format ideas rerum faciendarum, quia intelligit essentiam suam, non solum vt est medium, & ratio cognoscendi res extra se, sed vt est medium, & ratio formandi exemplar earum intra se, & cognoscendi quod hoc exemplar formatum intra se est ratio imitabilis, & formatiua rerum ad extra: hoc autem ex eo conuenit intellectui diuino, quia intelligit suam *intelligere*, id est quia intelligit suam naturam, quæ consistit in intelligere tanquam rem cognitā, & intra intellectum formatā, id est adaptatā, & proportionatā huic creaturae formandæ potius quàm alteri: Sicut etiam artifex creatus, inquit D. Th. *ibidem*, dum intelligit formam domus vt à se speculatā, ex eo quod intelligit se intelligere eam, ex eo, inquam, intelligit ideam, vel rationem domus, non quod artifex ad formandam ideam indigeat cognitione reflexa, vt manifestè constat ipsa experientia, sed quod indiget cognoscere id, quod formatum est intra suum intellectum cum habitudine ad rem extrā, vt participabilem à se, & imitabilem sui; non vero quod simpliciter cognoscat re ad extrā per speciem in se existentem. Quod autem possit artifex cognoscere id quod formatum est intra se, vt fundans habitudinē exemplaris ad rem extrā, licet non consistat in actu reflexo, tamen ex eo conuenit intellectui, quia reflexius est, & quia potes est intelligere se intelligere: potentia enim quæ non est reflexiua supra suum actum, etiam non potest cognoscere id quod formatum est intra se, cum habitudine ad id, quod est extra se: D. Th. autem eodē modo loquitur de Deo in hac parte, sicut de artifice creato, qui non indiget vti reflexione ad formandam ideam, sed esse reflexiuum. Deus autem ad intelligendum se intelligere nec indiget reflexione, nec quod sit reflexiuus, quia suum intelligere est sua essentia, & obiectum directum suæ cognitionis.

Ad Confr. resp. quod esse cognitum, & intellectum Dei absolute, & adæquatè sumptum, & in ordine ad suum intellectum, sic est ipsamet natura Dei realis, & entitatiua, nec constituit in hac consideratione ideam: at vero esse cognitum comparatiuè, & inadæquatè secundum proportionem, & imitabilitatem huius, vel illius creaturae, sic non dicit solam entitatem Dei absolute, sed addit respectum, & comparisonem ad creaturas, secundum quem non est inconueniens multiplicari ideas in officio, & ratione formæ; non in entitate.

Ex his colligitur quomodo in ideis distingui so-
leat duplex consideratio, scilicet ratio cognoscendi, & ratio causæ exemplaris: cum enim idea non inueniatur nisi in mente, & conceptu, in quo exprimitur ratio formata per intellectum, ad cuius instar fit res ideata, considerari potest ille conceptus idealis, vel vt dicit ordinem ad subiectum, id est ad intellectum in quo est, & sic habet se vt ratio cognoscendi; non tanquam principium quo fiat cognitio, id enim pertinet ad speciem impressam, sed tanquam conceptus, seu species expressa, quæ tenet se ex parte termini cognitionis. Vel potest considerari in ordine ad obiectum, quod formatur, & cognoscitur intra ipsum conceptum, non absolute, & sistendo in ipso in se, sed relatè, & comparatiuè ad aliquid formandum ad extrā ex ipso quod formatur ad intrā, & sic habet rationem ideæ.

B 3

Respectus

*Respectus rationis non constituunt
ideas formaliter.*

21 Dico tertio: respectus isti, quorum ratione plurificantur ideæ, non se habent ut ratio formalis constitutiva idearum; sed ut conditio requisita, ut ipsa entitas ideæ respectivo modo se habeat ad creaturas, & sic induat, & exerceat officium plurium idearum. Ratio primæ partis conclusionis, scilicet quod isti respectus non constituent, nec se habeant ut ratio formalis ideæ; illa est, quia idea est vera, & realis causa, & realiter influxiva in suum ideatum, & idea divina est suprema, & eminentissima in causando, etiam respectu cuiuslibet ideati in singulari, quia etiam id quod singulare est, format, & causat: ergo etiam in quantum specialis, & propria huius, & consequenter ut formaliter distincta ab idea alterius non potest constitui in ratione formali specialis, & distinctæ ideæ per illum respectum rationis, quo appropriatur isti pro illo. Antecedens certum est ex ipsa natura, & ratione ideæ hucusque tradita: idea enim est id cui assimilatur ideatum, & ad cuius instar fit, sed ideatum ipsum est aliquid reale: ergo idea in ratione formali ideæ aliquid reale est, siquidem ideatum in eo quod assimilatur illi, aliquid reale est; non potest autem reale ideatum assimilari ei, quod aliquid rationis est, & per imitationem illius esse aliquid reale: ergo si per participationem, & imitationem ideæ creatura est realis entitas in se, à fortiori idea debet formaliter esse aliquid reale, & non rationis, cum ex eius participatione ideatum aliquid reale sit. Consequentia verò probatur, quia idea formalissime constituitur per id, ad cuius imitationem formatur ideatum, & illud est formale in idea, cui assimilatur ideatum: per hoc enim causat ipsa idea, sed non causat Deus ideatum in singulari, nisi in quantum habet ideam illius in singulari, ita quod sit propria, & specialis huius, & non alterius; nec enim Deus causat hominem per ideam equi, sed per specialem, & propriam ideam hominis: ergo illa idea, ut est specialis, & propria hominis, & distincta ab alia, non constituitur formaliter in ipsa formali ratione ideæ per respectum rationis, sed per aliquid reale.

22 Ex quo deducitur secunda pars conclusionis, quia isti respectus rationis non se habent ut formale constitutum ideæ, ut specialis idea est, & tamen sine illis non potest intelligi ista multiplicitas idearum, quia ista multiplicitas est respectiva, seu comparativa, & non per respectum realem, ut ostensum est: ergo oportet quod talis respectus rationis intret tanquam conditio, seu modus requisitus in ideis, ad multiplicationem earum, quia non potest aliquid pertinere ad alterum necessarium, nisi vel tanquam constitutum, vel tanquam conditio, seu modus requisitus. Et hoc rationabiliter ita ponitur, quia respectus isti rationis nec important in idea vim influendi in ideatum, neque rationem ipsam in qua fiat imitatio, & assimilatio ideati, quia totum hoc aliquid reale esse debet in idea, siquidem ipsa realitatem ponit in ideato: hoc autem est quod pertinet ad rationem formalem in idea, siquidem ad rationem formalem causæ maxime pertinet id in quo effectus assimilatur causæ, & id per quod influat in causatum. Respectus autem, seu ordo, vel proportio causæ ad causatum quamvis necessarium requiratur ad ipsam causam, vel consequatur illam, non tamen fit assimilatio, & influxus in causatum in ipso respectu. Sic etiam respectus idealis omnino requiritur ut idea compareretur, & adæqueretur suo ideato, non tamen est ipsa ratio formalis in qua assimilatur

sibi ideatum, & in illud influat, & sic solum requiritur ut conditio.

Dices, tota ratio multiplicationis idearum, qua formaliter plures sunt, sunt ipsi respectus rationis, siquidem id quod reale est in idea multiplicari non potest, cum sit intra Deum, sed implicat aliquid esse distinctum, & non constitutum in ea ratione qua distinctum est, quomodo enim potest idea constitui in esse ideali per unum, & distingui per aliud in eodem esse ideali? non ergo pertinent isti respectus ad solam conditionem, seu modum requisitum, sed ad formale constitutum, siquidem pertinent ad distinctum.

24 Confr. si respectus solum se habent ut conditio; vel ergo pluralitas idearum, in quantum plures, aliquo rationis constituuntur, vel aliquo reali: si aliquo rationis; ergo male negamus constitui respectibus rationis illas ideas in quantum plures, & distinctæ sunt: si aliquo reali: ergo in quantum plures, & distinctæ realitatibus differunt; & sic realiter plurificantur, & distinguuntur: nihil autem realiter differt intra Deum, nec realiter multiplicatur, nisi ubi est oppositio relationis realis, non rationis, alias enim unum & idem sunt.

25 Resp. distinguendo antecedens. Ita ratio formalis multiplicandi ideas est respectus rationis formalitate quasi completiva, & respectiva, concedo; formalitate causativa, & assimilativa ideati, nego: hæc enim non habet pluralitatem formalem in Deo, sed eminentialem, quia in una eminentissima ratione continetur omnis ratio formalis causando, & assimilandi sibi diversa ideata, quod apud nos per plures formas entitativè distinctas fit: proportio autem, & respectus quo adaptatur, & adæquatur idea suo ideato non pertinet ad formalem rationem, & ad characterem ipsum ideæ, quo sigillat ideatum, hoc autem formale ideæ in Deo eminentialiter realiter est plura, non realiter formaliter: fungitur autem, & exercet, quantum ad applicationem, officium plurium per istos respectus quibus adæquatur diversis ideatis. Ideæ autem solum sunt plures formaliter in executione officij, & muneris ideandi, & correspondendi, ac proportionandi se creaturis; sunt autem plures eminentialiter, & non formaliter in virtute, & ratione formali assimilativa, & causativa plurium; & hæc pluralitas eminentialis realis est, sed non plurificatur formaliter. Sic ergo dicimus quod distinctum, & constitutum rei semper est unum & idem, loquendo iuxta proportionem, & modum in quo aliquid constitutum est, & distinctum, non autem mutando istam proportionem: quod enim distinguit, & plurificat ideam in ipso officio, & respectu ideandi, & comparativè se habendi ad ideata, sicut distinguit, ita constituit, nempe formaliter in esse respectivo, & comparativo ad ideatum: sed totum hoc comparativum, & respectivum est conditio, seu modus, non verò constitutum ipsius ideæ in ratione formali assimilandi, & causando quod est principalis, & essentialius in idea. Quod autem distinguit, & plurificat ideam eminentialiter, etiam eminentialiter constituit: sed hoc quod est esse plura eminenter, non est pluralitas realitatum, & entitatum, sed potius eminentia petit unitatem in entitate: divisio enim eminentiam destruit, quæ in uno plura continet; & ideo pluralitas eminentialis sic distinguit, & constituit, quod intra limites unitatis entitativè se continet, non autem formaliter dividit.

26 Ad Confr. resp. ex dictis quod constitutum pluralitatis idearum in esse eminentiali reale est, sed non realitate, & entitate divisum; esse enim plura eminenter, est existendo unum æquivalere pluribus realiter, sicut nūmus aureus in valore reali est plures auri

rei realiter : constitutum autem pluralitatis idearum in esse respectivo, & comparatio formali ad ideata non est reale, sed rationis, sed hoc habet se tanquam conditio ad ipsam virtutem, & constitutionem idearum in ratione causae, sicut in constituendo aucto, & eius valore intrinseco pro multis denariis, non concurrunt respectus ad plures denarios, ut quid constitutum, sed sequuntur ut conditio, aut modus talis valoris, eo quod valet ad plura. Et sic ad argumentum dicitur quod plures idearum constituuntur aliquo rationis, quantum ad formalitatem in esse respectivo, & comparatio, plures verò idearum in esse eminentiali, quod pertinet ad virtutem, & rationem causativam, constituuntur realitate essentiae infinitae, cuius illi respectus rationis se habent ut conditio.

- 27 Quod si adhuc instes, quia secundum hoc non aliter plurificantur in Deo idearum, quam attributa: nam etiam in Deo datur eminentialis pluralitas attributorum: formalis autem distinctio solum per rationem. Hoc autem videtur contra communem modum sentiendi Theologorum, qui aliter loquuntur de pluralitate idearum, quam attributorum, ponunt enim plures ideas in Deo ab aeterno: plura autem attributa non nisi in mente, & conceptu nostro. Ad hoc statim plenius dicemus, tractando an isti respectus rationis sint formaliter in mente divina. Interim dicimus esse differentiam inter attributa, & ideas, quia attributa importat in sua formali significatione perfectionem per modum formae efficientis ipsum subiectum, & perfectionem illius explicantis: solum autem plurificantur eo modo, quo à nobis intelliguntur, quia cum in se sint infinitae perfectionis, finitis, & multiplicatis conceptibus à nobis sunt intelligibilia, & ut sub sunt, & fundant hos conceptus, multiplicantur: Idea autem sub formalitate idearum non explicat formam, ut perfectientem ipsum subiectum, id est, intellectum artificis, sed ut perfectientem ipsum ideatum, quia licet ut forma inherens perficiat intellectum, ut tamen forma exemplaris perficit ideatum non subiectum: idea autem ut idea magis exprimit vim formae exemplaris, quam formae inherens; & sic idea in suo conceptu petit, seu fundat respectum, & comparisonem ad ideata, ideoque non explicat perfectionem essentiae ut intra se, sed cum comparatione ad extra se: attributa verò significant perfectionem ut intra Deum, & ut perfectientem essentiam Dei; & hac ratione D. Thom. q. 3. de verit. art. 2. d. 2. negat plures ideas esse plura attributa, quia sub formalitate exemplaris non significant formam ut perfectientem Deum, sed ut perfectientem creaturas, & habent pluralitatem solum in hoc officio, & comparatione formandi plura extra se. Videatur D. Th. in fi. q. 34. art. 3. ad 4.

Respectus ideales non formantur ab intellectu divino.

- Dico quartò: Respectus isti rationis secundum quos multiplicantur idearum, causantur ab actu intellectus divini, ut à proximo fundamento, non tamen ab ipso formantur concipiendi illos ad instar relationum realium, sed hoc fit ab intellectu nostro. In hac conclusione non omnes auctores conveniunt, sed est differentia inter sententiam P. Vasq. & communem Thomistarum in duobus. Primum quod ipse tenet respectus istos rationis non fundari immediate in ipso actu intellectus, seu in essentia divina, sed in creatura. Secundum, quod isti respectus formantur ab intellectu divino hoc ipso quod intelliguntur ab eo.

- 29 Circa primum id affirmat P. Vasq. hic disp. 80. c. 2. loquens de respectibus rationis, tam praesentiae

quam libertatis divinae erga sua obiecta, quos putat fundari in ipsis creaturis futuris, non in ipso actu Dei; ut intra intellectum, vel voluntatem; & eadem ratio videtur esse de respectibus idearum. Vnde maxime laborat in illo circulo, admittendo ideò Deum liberè velle istas creaturas, quia futurae sunt, & ideò esse futuras, quia Deus liberè eas vult, de quo plenius agemus infra, circa quaest. 19. In hoc enim oppositum affirmamus, scilicet fundari aliquos respectus rationis, proxime in ipsis actibus intellectus, & voluntatis divinae.

Circa secundum verò quod magis pertinet ad praesens, duo affirmat P. Vasq. Alterum hic disp. 63. cap. 2. quod intellectus divinus, & quilibet alius cognoscens res sicut sunt per proprium, & distinctum conceptum non format aliquod ens rationis, & sic respectus ideales, & distinctio attributorum non formatur actu ab intellectu divino cognoscente immediate illos respectus, quia non cognoscit illos ad instar relationum realium, quod requiritur ad immediatam formationem eorum. Et idem docet 2. tom. 1. part. disp. 11. cap. 4. Alterum quod affirmat est in disp. 78. circa num. 12. & 13. quod intellectus divinus non solum non format ens rationis primò, & per se, quando non supponit esse factum, & formatum ab intellectu nostro, sed neque concipit illud, ut ens rationis est; quia si sic conciperet, cum redderet illud cognitum, & apprehensum, hoc ipso daret illi esse rationis, & formaret illud.

Ceterum Thomistae qui sentiunt Deum cognoscere ista entia rationis, & istos respectus ideales, alii qui dicunt non formare illa, neque fingere, licet cognoscat esse formata à nobis, quia ad formanda entia rationis non sufficit quomodocumque cognoscere illa, sed oportet quod cognoscantur ad instar relationis realis, & non supponantur formata ab alio. Alij verò dicunt respectus ideales, & alia entia rationis non solum fundamentaliter, sed etiam actu esse in intellectu divino, quia ad hoc sufficit actu esse cognita, etiam si non concipiantur ad instar entis realis, quia hoc ipso quod sunt actu cognita, sunt actu existentia, seu praesentia intellectui. Quam sententiam videtur sequi Mag. Gonzalez hic disp. 47. sect. 2. & apertius Mag. Serra 1. tom. 1. p. 9. 15. art. 2. conclus. 3. aliique Doctores.

Nihilominus conclusio nostra quantum ad primam sui partem, nempe quod aliqui respectus rationis, inter quos sunt isti ideales, non fundentur immediate in ipsa mutatione creaturae, sed in ipsa actione aeterna Dei ut immanente, sumitur expressè ex D. Thom. in hac 1. p. quaest. 13. art. 7. ad 3. ubi inquit quod operatio intellectus, & voluntatis est in operante, & ideo nomina quae significant relationes consequentes actionem intellectus, vel voluntatis dicuntur de Deo ab aeterno, quae vero consequuntur actiones procedentes ad exteriores effectus, dicuntur de Deo ex tempore, ut Salvator, Creator & eiusmodi. Et idem docet his quaest. 14. art. 15. ad 1. Quod autem respectus ideales immediate fundentur in intellectu divino, & ab aeterno illi conveniant, docet, tum in praesenti art. 2. ad 2. dum inquit quod huiusmodi respectus quibus multiplicantur idearum, non causantur à rebus, sed ab intellectu divino comparante essentiam suam ad res; tum in 1. dist. 36. quaest. 2. art. 2. ad 2. ubi dicit quod propter hoc fuit pluralitas idearum ab aeterno in intellectu divino, & non in natura ipsius, quia intellectus divinus ab aeterno fuit intelligens essentiam suam diversimodè à creaturis imitabilem.

Ratio autem huius est, quia ad fundandum istos respectus inter operationem Dei, & creaturas, sufficit attingentia operationis erga illas, sicut in actionibus creatis fundatur relatio ad suos terminos, sed

in nobis ista relatio est realis, quia actio dependet à termino realiter, actio autem Dei quia est entitas absolutissima, & independentissima, idè non attingit creaturas aliqua reali dependentia, sed summa eminentia, sicque non fundat respectum realem, sed rationis; sed cum hac differentia, quòd actio Dei ut transiens respicit creaturas ut effectus productos, effectus autem non dicitur quousque in se passivè immutetur, & producat in tempore, & idè licet actio sit æterna, non tamen fundat relationem ad effectum, quatenus æterna est, sed quatenus temporaliter reddit effectum productum, & immutatum passivè, & idè talis relatio fundatur in ipsa immutatione creaturæ, quia solum per illam attingitur ut effectus: at verò actus immanens inquantum talis, respicit creaturas per modum obiecti intra se cogniti, & attracti; & sic ad attingendum illas non expectat immutationem creaturæ temporalem, sed hoc ipso quòd attingit intra se immanenter, fungitur officio suo, nec aliud requirit ut fundetur habitudo, & respectus ad ipsas, quia hæc habitudo fundatur in ipsa attingentia obiecti: hæc enim intelligi non potest sine aliqua habitudine ad ipsum, saltem rationis; datur autem hæc attingentia operationis immanentis ante omnem immutationem creaturæ: ergo ante ipsam fundari potest habitudo, & respectus rationis in ipso actu intellectus, & voluntatis ab æterno.

34 Nec tamen simili modo sequitur quòd Deus format, vel fundat in suo intellectu distinctionem suorum attributorum, quæ etiam est distinctio rationis, quia hæc non fundatur in attingentia attributorum, ut sunt in se, sic enim cognoscuntur ut sunt unum, sed intellectu cognoscente limitatè illa attributa, & cum connotatione ad creaturas, nec adæquante totam eminentiam attributorum: talis autem cognitio non datur in Deo, & idè non fundat distinctionem rationis inter attributa, neque quamlibet aliam relationem rationis, quæ fundatur, & petit inadæquatam & imperfectam cognitionem Dei: at verò relationes idearum consequuntur ex perfectissima cognitione, & attingentia creaturarum: & ipsius Dei, ut cognoscitur omni modo quo imitabilis, & comparabilis est ad creaturas, & sic in ipso Dei intellectu fundantur isti respectus idearum.

35 Quoad secundam verò partem conclusionis, pendet ex illa difficultate quomodo ens rationis consistat in cognosci, & dicatur habere esse per rationem: Nam aliqui existimant ens rationis actu, & formaliter esse per quamcumque cognitionem, quæ cognoscatur, etiam si supponatur formatum & cognitum ab alio, & prout sic formatum intelligatur, vel etiam fundamentum ipsum relationis sub comparatione aliqua cognoscatur. Alij per aliud extremum requirunt non solum cognitionem directam, qua aliquod obiectum extra intellectum cognoscatur comparativè ad aliud, sed etiam reflexam, qua illa comparatio cognoscatur in actu signato, & consideretur ab intellectu, ut relatio. Alij dicunt relationem rationis tunc actu, & formaliter habere esse in intellectu, non quando cognoscitur in actu signato, & reflexo quid sit, nec quando cognoscitur ut formata, & cognita ab alio: his enim modis solum cognoscitur ens rationis tanquam obiectum quod, & tanquam res cognita denominativè, qui modus cognoscendi est communis enti reali, & rationis: omne enim obiectum siue rationis, siue reale, potest denominari cognitum denominatione extrinseca, & hæc sola denominatio extrinseca non constituit ens rationis, sed per hoc constituitur, quòd apprehendatur aliquid quod non est ens, vel relatio realis ad instar entis, vel relationis realis, & sic consequentiè

dicitur relatio, seu ad instar relationis se habet beneficio cognitionis, non verò solum denominativè redditur cognita.

Nostertium modum dicendi sequuti sumus in 36 Logica q. 2. art. 4. & 5. idèque negavimus Deum formare entia rationis, quia cognoscere id quod non est relatio ad instar relationis, & quidquid non est tale ad instar alterius, est cognitio imperfecta pro eo quod habet connotationis, & ad instar: & sic aliud est cognoscere unum per aliud, in quo continetur, vel cui opponitur, aliud cognoscere ad instar, ut etiam *precedenti tomo disp. 18. art. 4.* deduximus. Eandem sententiam nunc sequimur ut verior, & magis Divo Thomæ conformem, qui in *opusc. 42. cap. 2.* inquit quòd *tunc efficitur ens rationis, quando intellectus nititur apprehendere quod non est, & idè fingit illud ac si ens esset.* Et particulariorem istam ponderat *quest. 7. de potentia art. 11.* ubi prius distinguit de relationibus, quæ sunt secundæ intentiones, & attribuuntur rebus, prout intellectis, & sic sunt relationes ab intellectu inventæ: aliæ sunt relationes rationis, quæ sunt primæ intentiones, & attribuuntur rebus extra intellectum, & pro ut sunt à parte rei, & *tales relationes* (inquit) *consequuntur modum intelligendi, secundum quod aliqua non habentia secundum se ordinem ordinatè intelliguntur, licet intellectus non intelligat ea habere ordinem, quia sic esset falsus:* Requirit ergo D. Th. ad relationes rationis, siue secundæ, siue primæ intentionis, quòd consequantur modum intelligendi, qui modus consistit in hoc quòd concipiatur id quod non habet ordinem secundum se, tanquam ordinatè se habens, licet intellectus non iudicet quòd habeat talem ordinem: sic enim esset falsus; hoc autem manifestam importat imperfectionem in cognoscendo: tum quia id quod non habet ordinem concipitur ad instar rei ordinatæ, & ad instar alterius, & non secundum quod in se est, quod patet manifestè, quia non potest iudicari, & affirmari quod ita se habeat sicut per illum modum concipitur, quia sic esset falsus intellectus ut dicit D. Thom. Non potest autem non esse imperfectio sic rem aliquam apprehendere, quòd ex modo apprehensionis non possit iudicari quòd ita sit in re, atque adèd si Deus concipit essentiam suam ut relatam, & ordinatam ad creaturas, cum in re ordinata non sit: ergo debet formare hoc iudicium; ego concipio meam essentiam taliter quòd non est sicut concipio: hoc autem manifesta imperfectio est, quia multò perfectius est concipere taliter quòd semper possit dici, ita est in re, sicut concipitur: ergo Deus non format instas relationes rationis. Quòd autem relationes istas ab alio intellectu formatas cognoscat, vel etiam earum quidditatem, & fictionem intelligat, reddit quidem illas cognitatas denominativè denominatione extrinseca, eo modo quo redditur cognita quæcumque res, quando cognoscitur, non tamen redditur formata in esse cognito, & habens esse fictum per intellectum divinum, quia non reddit illam cognitam ad instar relationis realis, qua ratione formatur & fingitur in cognitione illa creata, sed solum cognoscit quid ab alio intellectu de illa formatum, & cognitum sit.

Dices intellectus divinus comparat essentiam suam ad creaturas, ut dicit D. Thom. in *presenti art. 2. ad 3.* & illa comparatio non est relatio realis in Deo ad creaturas, ut nos etiam fatemur: ergo est rationis, & non est formaliter ab alio intellectu formata, quia non est alius intellectus ab æterno nisi divinus, & ille ab æterno comparat essentiam suam ad creaturas: ergo immediatè per suam cognitionem format illam relationem rationis, siquidem formaliter comparat.

Resp.

38 Resp. admittendo quòd intellectus diuinus comparat essentiam suam ad res, vt D. Thom. dicit, sed negamus quòd istam comparisonem facit per modum, & ad instar relationis formaliter, sed eminenter, & ita causat illas relationes, id est, fundat proximè, non autem causat, id est format per modum relationis, & ad instar illius concipiendo essentiam suam, licet nos illam comparisonem intelligere non possimus, nisi per modum relationis formalis, & ideo relationes illas rationis in Deo formamus. Itaque comparatio essentiae diuinæ ad creaturas est duplex, scilicet eminentialis, & formalis. Eminentialis est ipsa absolutissima perfectio diuinæ essentiae, qua se habet erga creaturas sine vllò respectu formali, aut dependentia, sed cum summa eminentia, qua facit erga creaturas superiori modo id, quod agens creatum agit cum dependentia, & respectu. Et hoc modo Deus comparat essentiam suam ad creaturas comparisone eminentiae, non dependentiae, nec relationis formalis, id est cognoscendo essentiam vt relata ad creaturas, cum in se relata non sit: nos autem quia non possumus illam eminentiam, vt talis eminentia est, attingere in se, ad instar relationis illam cognoscimus, & comparamus. Et talis comparatio ad instar relationis formalis facta & apprehensa constituit, & format relationem rationis actu. Prima verò non format actu, sed fundat, licet etiam videat nos illam formare, siue de praesenti formemus, siue de futuro, aut de possibili Deus videat posse formari, quod totum ad idem pertinet.

Soluuntur argumenta.

39 Primò arguitur illo vulgari argumento, quia in Deo non sunt plures artes, vel plures sapientiae, imò nec plures conceptus, seu species, licet sint plures creaturae factae per artem, intellectae per sapientiam, & expressae per conceptum: ergo neque etiam dantur plures ideae. Antecedens est certum, & admittitur à D. Thom. *hic art. 2.* quia vnica ars sufficit ad plura artefacta, & vnica scientia ad plura obiecta. Consequentia verò probatur à paritate rationis, quia si attendamus ad ipsam realitatem, & substantiam idearum tantum est vna, nempe essentia diuina, quae in ipsa realitate non multiplicatur, vt satis dictum est. Si attendamus ad rationem formalem producendi, etiam omnes ideae conueniunt in vna ratione formali, tum quia totum hoc vniuersum, quod est integer effectus idearum, est vnum vnitatem ordinis; & haec est primò, & per se intenta vt ratio formalis ex parte effectus; tum quia idea est exemplar, & forma ipsius artis: ergo eadem ratio formalis quae sufficit ad vnitatem artis, sufficit ad vnitatem idearum. Si denique attendamus ad relationes rationis propter quas ideae multiplicantur, etiam istae dantur in ipsa sapientia, & in ipso conceptu, & arte Dei, quia etiam conceptus, & sapientia attingit plures creaturas, vt plures sunt, & sic fundat respectus ad illas, non vnicum, sed plures, quia istae creaturae plures sunt: ergo vndique est paritas.

40 Confir. quia isti respectus rationis non sunt constitutiuu idearum, etiam vt plures sunt, sed conditio ad illas requisita, vt diximus: ergo simpliciter, & absolute non sunt in Deo plures ideae. Conseq. probatur, qui isti respectus non pertinent ad constitutiuu idearum: ergo neque ad distinctiuum: ergo non possunt denominari ideae plures, & distinctae ex pluralitate respectuum rationis.

41 Resp. quòd P. Vasq. *hic disp. 73. cap. 3.* assignat differentiam inter scientiam, seu artem Dei, & inter ideam, quòd scientia, & ars sumunt pluralitatem, vel vnitatem ex ratione formali respiciendi obiectum,

idea verò ex pluralitate materiali obiectorum circa quae versantur, sicut ars pictoris, quae est vna in ratione habitus, procedit ex diuersis ideis circa diuersas picturas. Sed quia restat de hoc ipso assignare rationem, videlicet cur pluralitas idearum sumatur ex pluralitate materiali obiectorum, & non ex ratione formali, si est vna, conatur eam assignare Vasq. *ibid. n. 13.* quia in Deo pro singulis rebus, etiam minimis, singulae ideae constituendae sunt nostro modo intelligendi, quia idea est essentia diuina, vt habet rationem cognitionis; haec autem ex diuerso ordine ad diuersa obiecta dicitur multiplicari; artifex autem creatus vtitur idea exteriori sibi proposita, quae vna, & eadem manet pro diuersis artefactis eiusdem rationis, licet id faciat artifex per diuersas apprehensiones, & cognitiones. Ceterum in hac etiam ratione non soluitur difficultas proposita: inquirimus enim cur in Deo scientia, & ars non multiplicentur, quia ratio formalis earum vna est, licet obiecta materialia sint plura, scilicet omnes creaturae sub ratione entis creabilis; ideae verò multiplicantur ex multiplicatione materiali obiectorum, stante etiam vnica ratione formali: quod enim idea in Deo non sit aliquod externum exemplar, sed ipsa cognitio Dei, nihil obest, quia potius oppositum ex hoc debebat inferre Vasq. si enim idea est cognitio ipsa, & cognitio non multiplicatur in ratione cognitionis propter multiplicatam obiectorum materialium stante vnica ratione formali: ergo etiam idea non multiplicabitur ex multiplicatione materiali obiectorum stante ratione formali vna.

Quare recurrendum est ad solutionem D. Thom. 42
in praesenti art. 2. quòd ars, & scientia, & alia attributa important aliquid per modum formae ipsius subiecti tantum, & rationis, seu principij quo operatur, seu cognoscit Deus: idea autem, in quantum idea, non importat formam ex parte ipsius subiecti, seu principij quo operandi, sed ex parte ipsius subiecti cogniti, & sic est forma ipsius ideati, non ipsius ideantis, & sub hac formalitate, seu ratione multiplicatur idea, non solum in ratione materiali obiectorum quae tangit, sed etiam in ratione formalitatis formae, quia alia ratione format vnum ideatum, quam aliud. Itaque idea & habet rationem formae intrinsecae respectu ipsius intellectus ideantis, & hoc modo non est aliud quam ipse conceptus, nec magis plurificatur in Deo, quam cognitio ipsa, & ars, seu scientia sub hac consideratione. At verò in quantum forma extrinseca (quod proprie & formaliter importat ipsum nomen ideae) sic alio modo habet suam rationem formalem, scilicet per ordinem ad sua ideata, in quantum diuerso modo formabilia, non per ordinem ad ipsum intellectum vt tendentem ad illa sub vnica ratione intelligendi. Sic autem habet vim, & rationem multiplicis formae, quia ea quae formantur plura sunt, vt plura, & vt distincta inter se; atque ita ratio formalis ideae in ratione formae extrinsecae non est vnica, sed plures, quia pluribus modis format ipsa ideata, respectu quorum induit rationem formae intrinsecae, & gerit munus multiplicis formae iuxta diuersa formabilia, licet in ratione conceptus, scientiae, & artis ratio formalis vnica sit, quia solum ex parte intellectus se tenet tanquam virtus eius & forma intrinseca qua tanquam principio, & virtute attingit omnia.

Et cum instatur, quòd idea est exemplar, & forma 43
artis, sicut complementum eius, & sic non debet magis plurificari, quam ars, distinguo est forma, & complementum artis, forma solum subiectiua (id est solum informans ipsum ideatum, concedo; & in hac consideratione multiplicatur in ratione formae extrinsecae, quatenus diuerso modo imitabilis est,

&

& sic induit diuersum officium, & munus informandi, & pluralitatem formæ, quod non habet ars, quæ non respicit artefacta per modum formæ imitabilis, sed per modum principij cognoscentis, & dirigentis. Quod verò additur in argumento, quod vniuersum, hoc est vnicus, & integer effectus vnitatis ordinis, & sic vnā rationem formalem habet respectu ideæ. Respondetur quòd hoc vniuersum solum est vnum vnitatis ordinis, non vnitatis rei formalis, & ita requirit vnā ideā illius ordinis; & plures ideas rerum ordinarum, quæ in se sunt diuersæ res totales, & diuersam speciem, vel indiuiduationem habent; debent autem dari ideæ istarum rerum ex quibus componitur vniuersum, non solum pro ea parte qua conueniunt in vnitatis ordinis, sed etiam pro ea parte qua inter se diuersæ sunt, & sic exigunt diuersas ideas: imò D. Thom. in *presenti art. 2.* ex eo probat dari in Deo plures ideas, quia hoc vniuersum est vnum sola vnitatis ordinis, quæ exigit pluralitatem inter se rerum ordinarum.

44 Instabis: vnitatis ordinis in obiectis scientiæ, & artis sufficit ad vnā rationem formalem vnus habitus, imò & vnus ideæ: nam vna domus, aut vna statua, aut pictura habent vnā ideam, & tamen ipsum ideatum plerumque non habet nisi vnitatis ordinis, quod patet in vna domo habente plura habitacula, aut in alio artefacto constante ex pluribus entibus quasi aggregatum. Cur ergo non sufficiet vnica idea Dei ad totum vniuersum, licet non sit nisi vnum vnitatis ordinis? Nec amplius probat ratio D. Thom. nisi quòd detur vnica idea simpliciter totius vniuersi, & plures partialiter respectu diuersarum partium, sicut patet in exemplo ædificatoris, quo videtur D. Th. qui habet ideam domus, & singularum partium; sed non pro qualibet parte datur distincta idea simpliciter. Vnde *art. 3. sequenti ad 3.* ponit D. Th. quòd neque genera, neque accidentia propria subiecti habent specialem ideam: ergo sicut pro illis sufficit vnica idea totius, ita sufficiet vnica idea pro toto vniuerso.

45 Resp. quòd tam in mente diuina, quàm in mente artificis creati quantumcumque effectus artificiosi adueniunt vnitatis ordinis, si tamen quodlibet illorum sit diuerso modo formabile in sua propria specie, distinctam ideam postulat simpliciter, licet iterum detur idea illius vnitatis ordinis quem inter se seruant, & cui subiiciuntur omnia illa ideata: sicut in artificio domus diuersam ideam habet fenestra, quàm paries, quia diuerso modo formari debent, licet ex omnibus componatur domus, & diuersam ideam habet columna quàm porta, licet ex omnibus integretur ædificium. Sic multò magis Deus habet diuersas ideas de diuersis rebus integris, & totalibus, quæ sunt in hoc vniuerso, eo quòd diuerso modo est formabilis vna ab altera, & pertinet ad ideam diuinam esse formatiuam rei vsque ad minimam, & magis indiuidualem differentiam, quia totum hoc est à Deo: vbi autem aliquid diuerso modo formabile est simpliciter, & in genere entis, habet etiam distinctam ideam formatiuam simpliciter, in ratione, & officio formæ, quia hæc distinguitur penes id quod formatum, & ideatum reddit. Quando autem aliquid in genere effectus artificiosi, respectu artificis creati, vel in genere entis, & quidditatis non habet diuersitatem simpliciter in ratione formabilis, sed solum diuersitatem partialem intra eandem formationem, sicut diuersæ partes eiusdem parietis, vel columnæ, sic non exigunt diuersam ideam simpliciter; nec tamen hæc diuersitas, quæ sufficit ad diuersas ideas, sufficiet ad diuersificandum diuersos habitus artis, vel scientiæ, quia isti habitus non se habent per modum formæ, quibus res artefactæ, vel

scitæ formantur, & distinguuntur inter se, sed solum se habent vt formæ, quibus intellectus perficitur ad cognoscenda illa obiecta; potest autem intellectus reducere vnā rationem altiore entitates plurium in ratione cognoscibilis, aut dirigibilis, sicut altiori modo, & magis vnito dirigit gubernationem regni Rex, quàm inferior iudex, aut dominus: non potest autem reducere intellectus ad vnitatem formas, quibus res in particulari formandæ sunt, quia potius imperfectè formaret, si sub vnitatis formaret, quæ in se formaliter, & totaliter diuersa sunt, quia per hanc formationem non solum intendit intellectus cognoscere, & trahere res ad se sub modo vnitatis suæ, sed formare, & constituere sub diuersitate quam in se habent. Quod verò genera, & accidentia propria dicantur habere eandem ideam, ideo est, quia cadunt sub vnica specie, & quidditate totali, & pertinente ad idem ideatum, cuius genus est pars, & accidentia sunt passionis.

Et hinc etiam patet id quod dicitur in argumento principali quòd sunt plures respectus rationis in arte, & in scientia; & tamen non diuersificant illas, sicut respectus rationis ideæ: dicitur enim quòd illi respectus rationis in scientia, & arte solum sunt diuersi terminatiue, & materialiter; sunt autem vnum ex parte rationis formalis, & ex parte sui fundamenti, sicut patet respicit plures filios relatione eiusdem rationis: at verò respectus ideales, etiam ex parte fundamenti, sunt diuersi, & non solum ex parte termini materialis, quia petunt diuersam rationem formandi ex parte ipsius ideæ, quatenus exercet munus, & officium diuersæ formæ, licet entitatiue sit vnum.

Ad confirm. respondetur illos respectus habere se in idea tanquam conditio requisita, vt resulter diuersum munus, & officium formæ in ipsa idea, quæ in sua entitate vna est, sed multiplex in officio, & ratione formæ, quatenus virtualiter, & eminenter habet esse principium diuersarum rerum, & consequenter fundat multipliciter informandi illas, ad quod requiritur tanquam conditio, & applicatio respectus, quo adæquatur, & correspondet illud principium diuersis ideatis; & hanc rationem informandi, & officium, seu munus formæ significat idea. Quando autem aliquod nomen imponitur magis ad significandum officium, vel formalitatem alicuius rei, quàm entitatem, & realitatem ipsius, tunc multiplicatio seu pluralitas non sumitur ex parte ipsius constitutiui, seu entitatiui, sed ex parte ipsius conditionis, vel modi secundum quem fit multiplicatio talis officij, seu formalitatis, sicut in Deo dicuntur esse plura attributa, licet illa non sint nisi vna entitas, & perfectio, quia *by attributum*, nominat perfectionem Dei, non absolute; vt est in ipso, sed vt cognoscibilis est à nobis, non per adæquationem ad illam summam eminentiam, sed per multiplicationem conceptuum ad illam. Similiter dicuntur esse in Deo quatuor relationes reales, licet solum sint tres realiter distinctæ, (nam spiratio actiua identificatur cum paternitate & filiatione) propter diuersam terminationem, & exercitum, seu munus referendi, licet entitatiue non distinguantur nisi tres. Et passionis entis dicuntur tres, scilicet vnum, verum, & bonum, non quia entitatiue multiplicentur, sed secundum connotationes, & habitudines, non quidem constitutiuas entitatis, & realitatis earum, cum sint aliquid rationis, seu requisitas ad exercendum illas formalitates veri, & boni. Similiter ergo cum idea significet exemplar non absolute, quantum ad entitatem, & realitatem suam, sed quantum ad officium, & formalitatem ideandi, & formandi plures res, dicuntur plures ideæ, non quia multiplicentur constitutiuæ realitatis

realitatis earum, sed quia multiplicatur officium, & exercitium formandi plura: sicut è conuerso locus dicitur vnus, & immobilis, quandiu situs, & distantia vna est, licet superficies sint plures, quia locus non significat superficiem absolute, sed vt lubest illi distantia.

48 Secundò arguitur. Idea est verum, & proprium attributum Dei, cum sit perfectio eius intrinseca, & in eo existens, pertinetque ad causalitatem Dei; ergo si dantur plures idee, dantur plura attributa realiter in Deo, & plures conceptus; quia idea conceptus est. Quòd si dicatur omnes ideas esse vnum attributū in Deo realiter, licet per rationem sint plures idee, sicut etiam sunt plura attributa. Cōtra est, quia hoc modo quilibet beatus videret omnes ideas, sicut videt omnia attributa, quia in re vnum quid sunt, & sic videret omnia ideata, quæ sunt omnes creaturæ possibiles: tum etiam quia si idea hominis, & equi in re sunt vnum attributum, sicut misericordia, & iustitia: ergo sicut est verum dicere quòd misericordia est iustitia, ita erit verum dicere, quòd idea hominis est idea equi, & falsum esset quòd alia ratione factus est equus, & alia homo.

49 Confir. quia Deus respicit omnes creaturas vnica relatione dominij, & potestatis: omnes enim creaturæ continentur eodem modo in eius potestate, id est cum summa dependentia, quia ab ipso possunt annihilari: ergo etiam omnes respicit vnica relatione idee. Patet consequentia, quia etiam omnes idee producunt creaturas eadem actione creatiua, quæ subiicit illi creaturas summo modo: ergo sicut propter vnica actionem: creandi sufficit vna relatio dominij, ita propter eandem actionem sufficit vna idea eminenter complectens omnia.

50 Resp. ideam esse attributum, & conceptum Dei, non absolute vt est in Deo, sed vt subest respectui rationis, & officio formandi plures creaturas. Et sic non multiplicatur idea in ratione attributi, vel conceptus, sed in officio, & munere formæ exemplaris ad res ideatas. Quòd non sit attributum absolute, constat ex his quæ docet D. Th. in quest. 3. de verit. art. 2. ad 2. vbi inquit quòd attributa essentialia non habent aliquid de principali intellectu suo præter essentiam Creatoris; vnde etiam non plurificantur: at vero idea de suo principali intellectu habet aliquid præter essentiam; in quo etiam completur ratio idee, ratione cuius dicuntur plures idee. Similiter loquendo de Verbo, seu conceptu diuino inquit D. Thom. 1. p. q. 34. art. 3. ad 4. quòd nomen idee principaliter impositum est ad significandum respectum ad creaturam, & ideo pluraliter dicitur: Sed nomen verbi principaliter impositum est ad significandum relationem ad dicentem, & ex consequenti ad creaturas, in quantum Deus intelligendo se, intelligit omnem creaturam, & propter hoc in diuinis est tantum vnicum verbum. Itaque secundum hanc doctrinam D. Thom. ex diuerso modo significandi in hoc nomine idee, & in hoc nomine attributum vel verbum seu conceptus sumitur multiplicatio in vno, & non in alio; & quòd plures idee non dicantur plura attributa, quia *ly attributum* significat directè perfectionem aliquam, prout ex parte ipsius Dei se tenet, & ipsum afficit, quasi forma illius, & similiter *ly verbum*, aut *conceptus* significat id quo formatur intellectus in ratione cognoscentis: Idea autem in ratione formæ idealis non significatur vt forma intelligentis, sed vt forma ideati, quia prout sic significat officium formæ extrinsecæ, & exemplaris, non formæ intrinsecæ, & inherens: sic enim significatur nomine conceptus, seu verbi. Quare vt significat officium, & munus idee, non significat formam attributalem, quia non significat formam vt informantem Deum, sed vt formantem

creaturas, & sic multiplicatur iuxta accommodationem ad ipsas.

Vnde patet ad replicas argumenti, nam Beatus 51 licet videat realitatem omnium idearum, quatenus vna est, & in quantum habet rationem formæ intrinsecæ in intellectu diuino, non tamen penetrat omnes respectus imitabilitatis ad creaturas, nec omne exercitium, & explicationem earum in ratione formæ extrinsecæ, sicut nec in ipsa omnipotentia Dei penetrat omnem respectum ad creaturas possibiles, ita quòd totaliter, & sub omni explicatione eam videat, licet omnem realitatem omnipotentia videat, sicut ego video oculos alterius, & non video omnes colores quos potest oculus videre. Similiter non potest dici quòd idea hominis est idea equi, quia in *ly idea hominis*, semper fit specialis significatio, vel appellatio idee sub formalitate, & officio formæ extrinsecæ vt correspondentis, & applicatæ ad creaturam determinatam, & sub hac ratione, & significatione idea vnus non est idea alterius; potest tamen concedi quòd realitas idee hominis est realitas idee equi, sicut conceditur absolute quòd misericordia est iustitia, non tamen quòd attributum misericordiae est attributum iustitiæ.

Ad confir. resp. quòd relatio dominij est vna, quia 52 fundatur super potentia diuina, qua creat Deus, & gubernat res ad extrà, quæ potentia vna est, & sub vnica ratione formali respicit creaturas, sicut scientia, & ars in Deo, quia omnia ista significant attributa se habentia erga creaturas per modum primi principij efficientis: principium autem efficiendi semper significatur vt forma intrinseca ipsius cause, quia eadem forma aliquid est, & operatur: idea verò sub formalitate, & officio idee non significat formam vt intrinsecam Deo, licet hoc præsupponat, sed vt extrinsecam ideato, & ideo multiplicat respectus ad diuersa ideata, secundum diuersas formationes eorum, relatio verò dominij non multiplicatur propter multas creaturas, quia omnibus vnico modo denominatur, sicut vnica potestate gubernat.

Tertiò arguitur ad probandum respectus rationis 53 ideales formari actu ab intellectu diuino: nam in primis facit ad hoc auctoritas D. Th. tum in presenti art. 2. ad 3. dum inquit, *causari ab intellectu diuino, comparante essentiam suam ad res*: tunc autem causantur actu ab intellectu, quando actu intelliguntur, & per modum comparisonis. Et solutione ad 4. dicit hos respectus esse intellectos à Deo; idem autem est in eis esse, quod intelligi: tum in quest. 3. de verit. art. 2. ad 7. vbi dicit, quòd illi respectus non sunt temporales, sed æterni in Deo, & solutione ad 8. quòd sunt in Deo vt intellecti ab ipso. Si ergo ab æterno sūt intellecti ab eo, ab æterno habent cognosci, seu intelligi, quod est habere esse actu, & formari. Deinde probatur ratione, quia Deus debet propriè cognoscere ens rationis per ordinem, & connotationem ad ens reale, cognoscit etiam ens rationis vt formatum à nobis: ergo habet sufficiens principium formandi ens rationis. Patet consequentia; quia ad formationem entis rationis non ampliùs exigitur quàm quòd denominetur cognosci, quia eius esse solum consistit in ipso intelligi, non autem requiritur quòd ens rationis indicetur esse ens reale, hoc enim esset falsum, & ita si hoc requireretur ad formationem entis rationis, nec nos possemus illa formare, nisi per falsitatem. Neque etiam requiritur quòd intellectus formet, & fingat aliquod ens reale, ad cuius instar formet ens rationis, quia sic tale ens reale fictum esset minoris entitatis, & cognoscibilitatis, quàm ens rationis. Sufficit ergo quòd cognoscatur ens rationis per connotationem, & ordinem ad

ad aliquod ens reale, ut dicatur formari per intellectum. Antecedens autem probatur, nam quod Deus cognoscat ens rationis per connotationem ad ens reale, constat, quia Deus cognoscit mala, & priuationes per opposita bona, & sic docet D. Thom. quod cognoscere unum per aliud, quando per se, & ratione sui non habet cognoscibilitatem, non est imperfectio: cum ergo ens rationis, malum, & negatio non habeant cognoscibilitatem per se, sed per ordinem ad ens reale, tali modo cognoscuntur à Deo. Similiter quod cognoscat ens rationis ut formatum à nobis, dubitari non potest, quia cognoscit omnes actus nostræ imaginationis, & intellectus: ergo quidquid per illos fingimus, & cognoscimus ut obiecta.

54 Confirm. ex P. Vasq. *disp. illa 118.* nam illud esse obiectuum quod habent entia rationis in nostro intellectu, etiam habet in intellectu diuino, quia ab eo cognoscuntur, & illud esse obiectuum quod habent ab intellectu diuino, integrè, & solū habent ab illo: ergo intellectus diuinus aut format, aut continuat illud esse obiectuum, quod habebant in intellectu creato, & consequenter etiam ens rationis habet esse ab intellectu diuino, quod est formari ab eo. Similiter ante intellectum creatum format intellectus diuinus ens rationis, quia antequam intellectus creatus fingat, intellectus diuinus illud intelligit, cum ab æterno cognoscat intellectus diuinus id quod format in tempore intellectus creatus: ergo antequam intellectus creatus formet ens rationis, à solo intellectu diuino formatur, quia ab eo solo dependet, & intelligitur ab æterno: ergo tunc solū est cognitum ab intellectu diuino: ergo ab illo solo habet intelligi, quod est formari tale ens rationis.

55 Resp. ad 1. locum D. Thom. quod quando dicit illos respectus causari ab intellectu diuino, *ly causari* est idem quod fundari: à fundamento enim etiam causatur relatio, & illi respectus proximè fundantur in ipso actu immanente intellectus diuini, non in mutatione rerum ad extrā, ut *suprà* diximus. Quando autem dicit id fieri ab intellectu comparante essentiam suam ad creaturas, iam *suprà* diximus quod ista comparatio non est formalis, seu ad instar relationis facta, sed eminentialis, quatenus cognoscit essentiam suam ut imitabilem à creaturis, non ut relata, quia in se relata non est; non formatur autem relatio rationis in diuina essentia nisi ipsa consideretur ut relata, quod quidem nos facimus, qui eminentiam illam Dei ad creaturas non nisi per relationem intelligimus, & explicamus. Similiter cum dicit quod illi respectus sunt intellecti, à Deo sensus est quod sunt intellecti, non sub modo relationis, & ad instar illius, sed sub modo essentiae diuinæ ut imitabilis, & eminenter se habentis erga creaturas, non relatè. Et hac ratione explicatur secundus locus D. Thom. quando dicit quod illi respectus sunt æterni, id est ab æterno intellecti: sunt enim intellecti ab æterno in suo fundamento, non in se formaliter, quia non intelliguntur à Deo per modum relationis, seu essentiae suæ ut relatæ, sed per modum eminentiæ quam habet erga creaturas, quæ eminentia non est relatio, licet sit fundamentum ut à nobis intelligatur per modum relationis. Et hunc esse sensum D. Thom. deducitur ex eius verbis *quæst. 3. de verit. art. 2.* ubi postquam dixerat *solutione ad 8.* quod illi respectus sunt in Deo ut intellecti ab ipso, & non ut respectus reales (id enim intendebat argumentum) subdit *solutione ad 9.* quod *quamuis respectus intellecti à Deo sint multi, in quibus pluralitas idearum consistit, quia tamen omnes illos per suam essentiam intelligit, intellectus eius non est multiplex, sed vnus.* Sentiit ergo S. Doctor quod illi respectus non co-

gnoscuntur à Deo ad instar relationis, sed per essentiam suam, quam utique non potest considerare ut relata à creaturas formaliter; id enim esset considerare illam sub imperfectione quam non habet, quia relatio formalis dependentiam dicit, & imperfectionem, si est ad creaturas, sed considerat illam ut in se omnino absolutam, & solū eminenter se habentem erga creaturas, quæ eminentia non est aliud quam ipsa imitabilitas essentiae diuinæ ad creaturas, in se omnino independens, & creaturas à se dependere faciens; sed hoc est non formare relationem rationis, sed fundamentum eius considerare, quia hæc non formatur ad instar eminentiæ diuinæ, sed ad instar relationis formalis, quæ cum sit ad creaturas, non reperitur in Deo, neque ad instar illius essentiae suam Deus considerat; quia hæc esset imperfectio utpote cognitio cum connotatione ad aliud ad cuius instar cognoscitur. Eodem modo loquitur D. Th. in 1. *dist. 36. q. 2. art. 1. ad 1.* ubi inquit quod *quamuis relationes quæ sunt Dei ad creaturam realiter in creatura fundentur, tamen secundum intellectum etiam in Deo sunt, intellectum autem dico non tantum humanum, & Angelicum, sed etiam diuinum; & ideo quamuis creatura ab æterno non fuerint, tamen intellectus diuinus ab æterno fuit intelligens essentiam suam diuersimodè imitabilem, & propter hoc fuit ab æterno pluralitas idearum in intellectu diuino, non in natura ipsius.* Ecce quomodo D. Thom. ponit fuisse ab æterno respectus istos ideales in Deo, scilicet quia fuit ab æterno intelligens essentiam suam ut imitabilem à creaturis; & propter hoc fuit ab æterno pluralitas idearum. Si propter hoc: ergo non fuerunt ab æterno isti respectus ut intellecti formaliter ad instar relationis, quod requiritur ad formationem illorum, nec intelligendo essentiam ut relata, & ordinatam formaliter ad creaturas, hoc enim esset imperfectè illam attingere, sed intelligendo illam ut imitabilem à creaturis, quæ imitabilitas per modū eminentiæ super creaturas se habet, & à Deo intelligitur, non per modum relationis formalis, & tendentiæ, quod est solū intelligi à Deo illam pluralitatē idearum, seu respectuum in suo fundamento proximo, id est in ipsa essentia ut imitabili, & ut eminenter se habente ad creaturas, non in sua relatione formali, id est in essentia ut formaliter relata ad creaturas, sicut nos intelligimus quando illam eminentiam imitabilitatis diuinæ consideramus.

Ad rationem argumenti respondetur negando 56 consequentiam. Ad probationem dicitur quod non sufficit ad formationem entis rationis, quod denominetur cognosci quomodocumque, etiam per connotationem ad ens reale, sed quod denominetur cognosci denominatione cognitionis fictæ, seu fingentis, id est apprehendentis per modum entis id quod in se non est ens, & sic beneficio intellectus dicitur ens: sic enim fingitur, seu formatur ens rationis, quia quasi vestitur entitate quam nō habet, ut *præced. tome disp. 18. art. 4.* ostendimus. Ad hoc autem non requiritur quod intellectus iudicet ens rationis esse ens reale, hoc enim iudicium est falsum, sed quod apprehendat ad instar entis, vel relationis id, quod non est ens, nec relatio, & hoc non est falsum, quia non est iudicium, sed apprehensio ad instar, & ideo imperfecta, quia ad instar alterius. Vnde ipsum ens reale non est id quod fingitur, nec redditur minoris intelligibilitatis quam ens rationis, sed id quod in se non est ens redditur fictum per hoc quod ad instar entis realis cognoscitur. Dupliciter autem potest intelligi quod ens rationis, seu non ens cognoscatur per ordinem ad ens reale; vno modo per connotationem ad ens reale vel connexionem cum ipso, quam naturaliter habet, & sine beneficio intellectus sicut

sicut priuatio connotat suam formam oppositam quam tollit, & subiectum à quo tollit, & fundamentum unde oritur, hoc enim totum habet priuatio ex se, & non beneficio intellectus. Alio modo intelligitur per connotationem ad aliquid reale, ad quod solum beneficio intellectus dicit ordinem, vel connexionem, quia ad instar illius apprehenditur, & ratione cuius id quod non est ens vestitur entitate apprehensa. Primo modo cognitio negationis, seu non entis non reddit formatum ens rationis, sed remanet negatio cognita intra limites negationis, prout se habet in re, non verò induit rationem entis in se, quod solum habet beneficio intellectus; in re autem habet connotationem ad ens reale, à qua non potest omnino absolui, quia & tollit formam realem, & afficit subiectum reale cui conuenit. Et hoc modo cognoscit Deus negationem ut negatio est in re per suam formam oppositam, nec tamen ratione entis, vel ente rationis illam vestit, quia forma opposita per ordinem ad quam cognoscitur, se habet ut forma ablata per negationem, non ut id ad cuius instar concipitur ut ens. Secundo verò modo formatum ens rationis, non quia præcisè cognoscitur, sed quia tali modo cognoscitur ad instar entis; & sic ex beneficio intellectus consequitur quod sit ens, seu vestiatur entitate per intellectum, quam in re non habet. Unde non sufficit quod cognoscatur ens rationis, ut formatum, vel formabile ab alio, quia sic supponitur formatum, & ut habens esse beneficio alterius intellectus; & consequenter solum redditur cognitum denominatiue, & ut quod, seu tanquam ens iam præsuppositum, non autem ex vi talis cognitionis consequitur illi entitas quam non habet, hoc enim est formari, & accipere esse rationis ex non esse, sed intelligitur ea entitas quam iam habet, atque adeo tunc non accipit esse rationis ex non esse, sed esse iam acceptum quasi reflexè attingitur; ergo tunc non formatum.

57 Ad confir. respondetur ex dictis, quod intellectus diuinus cognoscens ens rationis formatum à nostro intellectu non dat illi esse fictum, neque continuat illud quod dabatur ab intellectu nostro, quia non eo modo cognoscit quo intellectus noster, & sic non continuat, sed cognoscit esse rationis tam præsuppositum, & formatum, non autem format, neque fingit, sicut id quod est falsum, vel opinatum potest cognosci verè, & demonstratiue, & denominari cognitum verè, & demonstratiue, sic ens rationis ab alio formatum & fictum potest cognosci à Deo, non fingendo illud neque formando, sed solum reddendo cognitum denominatiue; & sic non continuat, nec format solus intellectus diuinus id quod noster intellectus faciebat, vel facturus præuidetur, quia non eo modo facit, & apprehendit, quo noster intellectus.

58 Quod vero dicitur in argumento de intellectu diuino cognoscente ens rationis antecedenter ad intellectum nostrum. Respondetur quod non cognoscit illud ut formatum: ad instar entis realis antecedenter ad intellectum nostrum, vel existentem, vel futurum, vel possibilem, licet non semper requirat intellectum nostrum actu existentem, quia non semper intelligit illud ut actu formatum, sed potest intelligere illud ut formatum respectu intellectus futuri, sed ut possibile formari respectu intellectus possibilis. Si autem intelligat Deus ens illud rationis, non ut formatum ab alio intellectu, non potest intelligere illud ad instar entis realis, quod est sua cognitione formare, seu fingere illud, propter imperfectionem quam inuoluit iste modus intelligendi, ut dictum est. Unde quoad hoc perinde est Deum ab æterno videre ens rationis ut formatum ab intellectu iam existente, vel futuro, vel possibili: semper enim Deus cognoscit ens rationis ut formatum, vel formandum ab alio, non per se immediate fingit, & format.

Ioan. à S. Thoma in 1. Part. D. Th. Tom. 2.

ARTICVLVS IV.

De quibus rebus Deus habeat propriam, & per se ideam.

Licet constet quod omne quod est formatum, & productum à Deo debeat habere ideam formatiuam eius, quod tali modo formabile est; de quibusdam tamen specialis est difficultas, utrum habeant de facto ideam in Deo, quia aliquantulum deficiunt à formatione diuina. Et est difficultas de quinque generibus rerum. Primo, de purè possibilibus, quæ nunquam sunt, vel erunt, & sic de facto non sunt formata; seu ideata à Deo. Secundo, est materia prima quæ de se caret forma informante: ergo & ideante, quia id solum ideatur, quod formatur. Tercio, est malum, seu priuatio, quia opponitur formæ qua priuat: ergo & ideæ à qua est talis forma. Quarto, sunt accidentia quæ per se non sunt res formatae, sed rei formatae adiunguntur. Quinto, sunt indiuidua quæ solū materialiter multiplicantur, non formaliter, & sic una idea, seu forma videtur pro indiuiduis eiusdem speciei sufficere, non pro singulis indiuiduis debet multiplicari.

Dico ergo primo, de purè possibilibus habet Deus de facto ideam, licet non habeat de facto executionem: & exercitium ad extrinsecam talis ideæ, & quoad hoc non habet modum practicum, videlicet quoad efficaciam executionis, licet habeat virtutem practica de se directiuam, & executiuam ideati. Conclusio ista sumitur ex D. Th. in præsent. art. 3. cuius ampliorem explicationem habet q. 3. de verit. art. 6. In præsentis siquidem distinguit in idea duplex officium, scilicet quod sit principium productionis, & quod sit ratio cognitionis. Et primo modo dicitur exemplar, secundo modo, ratio cognoscendi, potestque ad speculatiuam scientiam pertinere. Et primo modo, respicit idea ea omnia quæ secundum aliquod tempus fiunt; secundo autem modo respicit etiam ea, quæ nullo tempore fiunt, secundum quod cognoscuntur à Deo per modum speculationis. Vbi prima facie videtur D. Th. denegare Deo ideam practicam respectu rerum possibilium, & solum speculatiuam admittere; cum tamē nulla detur idea speculatiua tantum, id est, quæ solum sit forma ad cognoscendum, & non ad elaborandum rem artificialem, quod est ideare illam, sed tollit modum practicum ab idea rei possibilis, quia caret exercitio, & executione, quæ est efficacia practica. Explicat autem hanc mentem suam S. Doctor q. cit. de verit. ubi inquit quod idea respicit practicam cognitionem non solum actu, sed habitu. Unde cum Deus de his quæ facere potest, quamuis nunquam sint facta, habeat cognitionem virtualiter practicam, relinquatur quod idea possit esse eius quod nec est, nec fuit, nec erit, non tamen eo modo, sicut est eorum quæ sunt, aut erunt, aut fuerunt, quia scilicet respectu horum habet propositum voluntatis non respectu aliorum. Ecce explicatam mentem D. Th. ex ipsius verbis, dum fatetur quod etiam respectu possibilium datur idea virtualiter practica, id est virtutē practicam habens, quod ad essentiam eius pertinet, licet careat proposito voluntatis, quod pertinet ad efficaciam applicationis, & executionis eius; & sic vim formatiuam, & directiuam, quæ ex parte intellectus se tenet, ibi habet, solum verò caret eo quod ex parte voluntatis se tenet, quod non pertinet ad vim formatiuam, sed ad executiuam, seu applicatiuam ipsius ideæ.

Ex hoc autem deducitur fundamentum, & ratio conclusionis: nam respectu possibilium Deus habet vim formatiuam & ideatiuam eorum, sicut & omnipotentia productiuam: plura enim potest Deus facere, quam de facto fecit, aut facturus est, & ad id habet virtutem: ergo etiam ideam, siquidem cognoscit ea quæ potest facere, & modum quo potest facere, & quod illa solum per intellectus directionem, & artificium fabricari

C lia

lia sunt; sicut omnia ea quæ creauit: ergo format ideā de illis. Patet conseq. quia idea non est aliud quā forma per intellectum expressa, & formata, vt ad eius instar aliquid fieri possit, & de modo quo fieri possit, sicut artifex creatus potest veram ideam formare de re quam nunquam intendit facere; sic Deus cognoscit plura quæ facere potest, & modum quo formare potest, licet non velit formare: habet ergo vim formatiuam ex parte intellectus: neque enim hanc liberam voluntas constituit, cum pertineat ad perfectionem Dei habere vim formandi omnem creaturam quam potest, & sic necessariō ei cōuenit talis vis formatiua, & ideatiua, & ex illis eligit, & determinat facere quod vult: non ergo per determinationem liberam aduenit ei idea, sed antecedenter ad omnem executionem eam habet ex parte intellectus, & artis.

4 Dico 2. Malum, priuatio, defectus; & quidquid entitati opponitur, & ab ea deficit, caret idea in Deo. D. Th. q. 3. de ver. art. 4. & in pres. ar. 3. ad 1. ita quod malum nullo modo ideam habet, neque sub modo speculatiuo, neque sub modo, & exercitio practico. Prob. quia malum, & defectus non sunt ex intēione Dei, neque ex imitatione; & participatione eius, pro vt carent entitate: ergo carēt idea. Patet conseq. quia idea est forma imitabilis, & participabilis ab ideato: ergo quidquid deficit à participatione, & imitatione Dei, deficit ab eius idea, siquidem id quod participat, & imitatur Deum, mediante idea imitatur, & participat: participatur enim Deus à creatura tanquam quoddam artefactum ab ipso, non tanquam effectus naturaliter procedens: omnia enim in sapientia fecit: ergo idem est carere creaturam imitatione Dei, & carere idea in Deo. Anteced. autem prob. quia Deus cum sit primum, & summum ens, non potest aliquid causare, nisi sub ratione entis, quia vnumquodque causat sub ea ratione, & forma, qua in se constituitur; quod ergo in se est purè ens, & purus actus, non potest nisi sub ratione entis causare, non autem deficiendo ab ente, aut intendendo & imitando defectum entis, quia sic deficeret à se, & intenderet contra id quod est in se: ergo defectus, & malum non est ex imitatione, & idea diuina, sed ex deficientia ab idea diuina; & sic malum, & defectus non habent ideam in Deo quam imitentur, sed à qua deficient, aliās Deo auctore fieret aliquid peius, & deficient. Conf. quia si Deus haberet ideam mali, & defectus; vel esset in idea defectuosa, vel perfecta: defectuosa in Deo esse non potest, quia est summè perfectus: perfecta verò non potest esse idea mali, quia si ei conformatur ideatum, perfectum erit, cum ipsa idea perfecta sit. Si verò ei non conformatur, sed ab ea deficit, non habet ideam malum, quam imitetur, sed à qua deficiat: ergo caret idea imitabili à se.

5 Dico 3. Materia prima habet ideā in Deo, sed non distinctā ab idea compositi; secundū se autem, & in quantum purè informis, seu carēs omni forma, caret etiā idea: itaque carens omni forma intrinseca, & informante, caret etiam omni extrinseca, & ideāte, quia hęc nō nisi media aliqua forma intrinsecaparticipatur in ideato. Nō omnes Auctores conueniūt in hac cōclusionē, sed est triplex modus sentiēdi. Quidā absolute docent dari ideā materiæ secundū se, sicut datur idea formæ, quia existimant materiam secundum se, & non solum mediāte forma, habere entitatē aliquā actualem, seu actum entitatum, licet careat, & sit in pura potentia ad actum formalem, seu à forma prouenientem, & illud esse quod materiæ secundum se proprium est, ex Deo efficiēte est: ergo etiam ex Deo ideante, quia quidquid efficit, per ideā efficit, Ita P. Valsq. hic disp. 73. c. 3. Moli. super hūc art. 3. Suar. disp. 13. mer. sect. 6. & lib. 3. de attrib. posit. c. 5. n. 13. & alij, qui illam sententiam de entitate materiæ sequuntur.

Alij, qui existimant materiā primā esse ens purè 6
potentiale, & carere omni actu, etiam entitatiuo, adhuc admittūt ideā respectu illius esse potēialis, quia licet actu careat forma, & esse, dicit tamen ordinem, & capacitatē ad illud, & ad formam qua informari potest; ergo & ad ideam: atque ita sicut ratione huius capacitatis, & ordinis ad formam non est purum nihil, sed verè, & propriè ens factum à Deo, ita debet habere ideam in Deo, saltem vt quid imperfectum, & inadæquatum, quia ipsa materia in se imperfectissimum ens est. Et habet hæc sententia fundamentum in D. Th. qui in 1. dist. 36. q. 2. art. 3. ad 2. docet in Deo dari ideā materiæ, licet inadæquatā, quia in se imperfectum esse habet secundum vltimum gradum essendi, qui est esse in potentia, & ita licet perfectā ideam in Deo nō habeat, benè tamen imperfectā. Et in q. 3. de verit. art. 5. docet quod si largè accipiamus ideam pro similitudine, vel ratione, tunc illa possunt per se distinctā ideam habere, quæ possunt distinctè cōsiderari, licet separatim esse nō possint, & sic nihil prohibet materiæ primæ etiam secundū se ideam esse; & solut. ad 2. dicit quod existentis in potētia est idealis similitudo, etiam in actu. Idem debet poni ab his qui sentiunt materiā primam secundū se esse bonam, licet solum in se dicat ordinē ad formam, & careat forma, de quo diximus præced. tomo super q. 5. Refert etiam Valsq. cit. loco. Albertum in 1. dist. 35. art. 10. expressè concedere ideam materiæ primæ in Deo.

Denique alij tenent materiam primam secundum 7
se, & vt exutam omni forma, nullo modo habere ideam in Deo, nec vt est ratio cognoscendi, nec vt exemplar faciendi, quia D. Th. absolute dicit, quod materia 1. secundum se nec esse habet, nec cognoscibilis est, & sic caret idea, etiam vt est ratio cognoscendi. Imò Caiet. sup. hūc. a. 3. dicit D. Th. hīc retractare quod dixerat de idea materiæ primæ in 1. sent. & in q. 3. de verit. quia docet materiam secundum se non esse cognoscibilem.

Nos ergo dicimus quod materia prima si cōsideretur 8
secundum se, vt carens omni forma, sic ratione huius status adiuncti, scilicet carentiæ omnis formæ, caret etiam idea, si autem cōsideretur sub alio statu, scilicet vt subiecta, & subordinata formæ, ideabilis est, sed vt contenta sub idea compositi, vt pars potēialis eius, non autem vt distinctā ideam habēs. Ratio primæ partis est, quia materia prima sub illo statu puræ potēialitatis, & carentiæ omnis formæ non est factibilis à Deo; ergo neq; ideabilis. Cōseq. est nota, quia quod est ideabile est producibile, & causabile per talē ideam: ergo quod non est causabile, ideā non habet, per ideam enim produci potest quidquid illā habet, & sic non potest dici quod sit improducibile, & infactibile absolute. Antec. verò prob. ex his quæ latè probauimus 1. physic. q. 3. art. 3. & 1. de generat. q. 1. art. 2. & tomo præced. disp. 6. quod materia secundum se, & posita sub statu carentiæ omnis formæ, est incapax existentie; ergo est infactibilis sub illo statu, quia illud est factibile quod potest poni extra causas & habere esse: poni enim extra causas est existere, seu existentiam habere: ergo quod in aliquo statu non potest habere existentiam, non potest poni extra causas: ergo neq; est factibile, seu producibile. Quod autem materia prima vt carens omni forma sit incapax existentie, ibi ostendimus, quia existētia est actus secundus essendi, sicut operatio est actus secundus agendi, vnde supponere debet necessariō aliquem actum primum, aliās nullo modo esset secundus, si primum non supponeret; actus autem primus necessariō est aliqua forma, sicut actus secundus est existentia, quia existentia est vltimus actus qui intenditur in aliqua re, ita quod non datur vltior actus intendendus ab agente in genere entitatiuo: quidquid

quidquid enim est in potentia per hoc quod redditur existēs, ponitur extra causas, & si aliquid ei deest ideo est, quia illud quod deest non est existens in eo: Existētia ergo se habet ut actus ultimus, seu secundus in genere essendi; & dicitur secundus, quia non pertinet ad constituendam rem in quidditate, & specie sua, sed in aliquo prædicato contingenti, scilicet esse extra causas, & hoc est quod est accidentale, & secundum, seu posterius essentiali, & quidditativo, quod tamen quia constituit in actu essentiali, seu in specie sua, quæ aliquid actuale est, dicitur etiam actus, & forma, & primus actus, quia est prior ipso actu contingenti, seu accidentali, & consecuto. Cum ergo dentur isti duo actus, scil. primus, & secundus, repugnat quod actus secundus, seu ultimus conveniat alicui, nisi mediante actu primo, quia inter istos actus est essentialis coordinatio, sicut inter gradum vegetatiui, & sensitiui, sicut inter potentiam operantem, & actionem quæ est operatio; nec enim potest operatio convenire cui non convenit potestas, seu actus primus operandi, sic neque actus secundus existendi extra causas, nisi cui convenit actus primus, quo aliquid formatur, & constituitur, alioquin ille non esset actus secundus, si primum non supponeret: at materia prima secundum se caret omni actu primo, quia caret omni forma tam substantiali, quam accidentali, & in se non est forma, nec actus, sed receptaculū, & potentia ad actus; ergo caret omni actu secundo, qui est existētia. Et deinde quia existētia nō est de se actus determinatus ad aliquam speciem, sed generalis pro omni ente, quod extra causas potest poni, nec de se est forma constitutiva alicuius naturæ, seu quidditatis, quia nulli rei creatæ essentialis est, sed tantum ponit rem iam constitutam extra causas; determinatur autem ad hanc vel illam speciem, ratione naturæ cui advenit, & formæ cui convenit: materia autem prima omni forma carens, & exuta ad nullam speciem determinatam pertinet, quia ad omnes illas pertinere potest, & reduci, ad quas pertinent formæ, quarum est capax: Si ergo immediatē in se reciperet existētiā, illa existētia ad nullam speciem determinatam pertineret, quod est impossibile, sed tamen esset existētia rei capacis diversarum specierum, quod est in se actu non esse determinatæ speciei, quod autem actu non est determinatæ speciei, quomodo potest esse determinatum individuum, & quomodo potest esse in rerum natura sine determinata singularitate & specie? Plura de hoc diximus *locis cit.* ubi latius probationes huius rei possunt videri.

9 Dices: Esto, ita sit quod materia non possit existere existētiā determinatæ speciei & individuationis sine forma, tamen nō tollit quin habeat propriam ideam secundum se, etsi non ratione illius status: nam etiam res possibiles sub statu illo possibilitatis non possunt existere, cum status existētiæ repugnet statui possibilitatis, & tamē etiam sub illo statu habet ideam; ut *supra* admisimus: ergo eodem modo materia prima.

Conf. quia sub illo statu licet careat omni forma, non tamen habitudine, & ordine ad formam, & capacitate illius: hæc autem capacitas, etiam in quantum capacitas & habitudo, est aliquid factibile, & participabile à Deo, quia non est purum nihil, sed aliquid: ergo est ideabile à Deo.

10 Resp. statum possibilitatis non esse statum sub quo res sunt formadæ, sed à quo sunt extrahendæ, seu status relinquendus tanquam ex parte termini à quo, non efficiendus, & talis status non impedit dari ideam de ipsa re possibili, licet non de statu eius: quia sic status non sumitur ut ideabilis, seu sub idea comprehensus, sed ab idea relinquendus, sicut etiam ipsum nihil, à quo creaturæ fiunt, non impedit quod detur idea

Ivan. à S. Thoma in 1. Part. D. Th. Tom. 2.

de creaturis, licet non de ipso nihilo, quia se habet nihil ut terminus à quo, relinquendus, non formandus: at verò status materiæ primæ, ut carentis omni forma, accipitur ut status sub quo materia sit ideabilis, tanquam sub illo posita, & existens, & inquirimus an sub isto statu posita ideabilis sit, non verò iste status accipitur ut ex parte termini à quo se tenens. Et sic dicimus quod materia sub illo statu posita caret idea, quia sub illo statu produci, & esse non potest.

Ad Conf. Resp. quod illa habitudo, & ordo materiæ ad formam est aliquid factibile à Deo, distinguo ut coniuncta alicui formæ, concedo, ut separata ab omni forma, nego. Ad Conseq. Ergo est ideabilis à Deo, & habet ideam in Deo, distinguo, respicientem illam sub omni forma, nego, ut coniunctam alicui formæ, concedo.

Instabis: Materia prima coniuncta alicui formæ habet habitudinē realem & existentem ad reliquas formas, quibus caret, est enim realis capacitas illarū: ergo illa habitudo ad reliquas formas est ideata à Deo, licet careat illis: ergo etiam si careat illa quæ habet, & omnia alia, potest manere idea de tali habitudine, quia realis habitudo, est nec enim ex oblatione formæ redditur illa habitudo non realis & nihil.

Resp. illam habitudinē esse realem & ideatam à Deo, nec enim est aliud quam ipsa entitas materiæ, ut capax est formæ, sed hæc habitudo, seu capacitas, & hæc entitas materiæ non potest poni in rerum natura, nisi ut coniuncta alicui formæ, & tunc manet realis capacitas; etiam ad alias formas, quas non habet. Et si illa forma amittatur, debet tamen aliā acquirere, & sic semper manere sub aliqua forma, ut ad alias quas non habet realem habitudinem dicat. Si verò omni forma exuatur, exuitur omni esse, & sic non potest sub illo statu ideari, quia nec produci, & habere esse. Itaque non aliter philosophandum est de ista habitudine materiæ ad formas, quam de ipsa entitate materiæ, quia habitudo illa cū transcendentalis sit, non est aliud quam ipsa entitas materiæ, seu capacitas eius ad formam: entitas autem materiæ producitur, & formatur à Deo per ideam, sed ut adiuncta alicui formæ, & composito, non sine illis; sic ergo se habet illa habitudo, seu capacitas: de forma verò & aliis partibus compositi quomodo ideam habeant, statim dicemus.

Secunda verò pars conclusionis, scilicet quod materia prima ut adiuncta formæ ideā habeat, patet ex dictis, tum quia Deus habet ideā faciendi res ex nihilo, & non solum ex materia præsupposita: non potest autē facere ex nihilo, nisi ipsam materiam faciat, quia non præsupponit illam, & tamen est res facta à Deo: ergo habet ideam de materia eo modo quo facit eam, scilicet ut adiunctam formæ: tū etiam quia materia prima, ut adiuncta formæ, non est nihil, sed realis entitas capax formæ, & constituēs realiter compositum: ergo talis capacitas, & talis entitas sic coniuncta formæ sit à Deo, & participat aliquid à Deo, quia entitas creata est, & hoc ipsū quod est suscipere formas, & pacem esse formarū, aliquid reale est, & consequēter participatio Dei est, & ut coniuncta formæ est entitas actualiter formata, & reducta ad actū: ergo actualiter participans à Deo esse, ergo habet ideam, quia habet esse formatum, licet remota omni forma remoueat etiam idea, quæ est forma extrinseca, neque causat nisi mediāte aliqua intrinseca, quæ redditur res formata, & ideata, & determinatum esse habēs. Itaque cum materia habeat duplicem statum, informitatis, & formationis, cū formatur habet esse determinatū ita quod illud esse licet proveniat à forma, non soli formæ convenit, sed etiam materiæ per formam, cum autem informis est, indeterminatum habet, & solum in potentia ad esse, sub statu formationis,

C 2

tionis,

tionis, id est ut adiuncta alicui formæ ideam habet, sed non aliam à composito; sub statu autem informitatis caret idea determinata, quia caret esse determinato; sicut lignum, ut subest alicui formæ artis, ideam artificiale habet; sine illa caret arte, & idea artificiosa.

Sed quæres, an formæ tam substantiales, quàm accidentales habeant solum ideam compositi, an etiam propriam ideam, & similiter alias partes compositi. Ad hoc.

15 Dico 4. Formæ substantiales non subsistentes, & accidentales propriæ, quæ ex illa dimanant, ut propriæ passionis, si connaturali modo fiant, non habent ideam distinctam, & seorsim ab idea compositi, licet inadæquatæ ideæ sibi corrépondeant; possunt tamen proprias, & adæquatas ideas habere, si modo non connaturali fiant: accidentia verò communia etiam connaturaliter suas proprias ideas habent. Totum hoc desumitur ex D. Th. in presenti art. 3. ad 4. & q. 3. de veritat. ar. 7. Vsq. tamen in presenti disp. 73. c. 3. docet contra D. Thom. accidentia propria habere suas speciales & proprias ideas. Ut probetur conclusio, supponimus quod forma licet non habeat esse ut quod, & ut res subsistens, habet tamen esse determinatum ut quo, tanquam ratio, & principium determinatè essendi; in quo differt à materia, quæ de se solum dicit principium quo recipiendi varias formas, non determinandi, & sic est indifferens, & indeterminata, & carens omni esse determinato ex se: forma autem licet non habeat esse ut quod, & sic non sit ideata ut quod, sed id competat ipsi composito, cuius est forma, est tamen principium essendi ut quo, & ita est principium quo aliquid est ideatum, & formatum. Conuenit ergo tam materia, quàm forma, quod neutra est res ideata per se, & ut quod, differunt verò, quod forma est principium quo aliquid redditur formatum, & consequenter ideatum, materia verò est principium recipiendi formationem mediante tali forma, & consequenter ideationem, de se verò determinatam formationem non habet, atque adeo neque ideationem, seu ideam determinatam.

16 His positis probatur prima pars conclusionis, quia forma substantialis, & est pars constituens ipsū compositum quod generatur, & est terminus intrinsecus, & formalis generationis; accidentia etiam propria ita consequuntur ad formam substantialem, illique sunt connexa, quod ad cōplementum pertinent generationis, quia qui dat formam, dat consequentia ad formam; ergo connaturali modo ita omnia producantur eadem generatione, & cadunt sub eadem efficientia: ergo sub eadē idea, quæ omnia illa per modum vnius cōprehendit, sicut per modum vnius generationis fiunt. Et declaratur amplius, quia si ad hoc non sufficeret vnica idea, sequeretur quod ubicūque ideatū plures partes habet, etiam idea deberet multiplicari, & sic solum daretur vna idea respectu rei indiuisibilis, non respectu compositæ, quantumcumque res composita vna esset: cum tamen videamus etiam in artificialibus creatis, quæ plures partes habent, & plura accidentia adornantia, & tamen vna & eadem idea fiunt; sicut pictor vnica idea facit totam imaginem, & statuarius statuam, licet pluribus partibus constent, & pluribus accidentibus, siquidem totum hoc potest vnico conceptu exprimi, quia omnia sub vnitatem rediguntur: ergo etiam vnica idea formari ex parte ipsius conceptus, & similiter vnica generatione causari ex parte ipsius efficientiæ: ergo ex omni parte vnica idea sufficit ad omnes partes, & accidentia propria vnius ideati, quæ vnica generatione possunt fieri.

17 Secunda verò pars, quod istæ formæ possunt speciales & proprias habere ideas, si modo sibi non connaturali fiant, sed præternaturali; probatur, quia pos-

sunt istæ formæ fieri à Deo, & conseruari sine omni subiecto, & extra totum compositum; ergo & specialiter idea distincta, & separata ab ipso composito formari, & attingi. Antecedens est certum, cum possit Deus ponere formam accidentalem extra subiectū, ut quantitatem in Eucharistia: ergo & substantialem extra compositum: ergo sine idea compositi, aut subiecti, seu independenter ab illis potest eas producere. Consequentia verò manifesta est, quia tales formæ si illo modo producantur, ponuntur in esse, & formantur extra subiectum, & compositum, quia extra illud conseruantur, & sustentantur; ergo sunt ideabiles sine idea subiecti, & compositi, sed per ideam propriam seorsim: siquidē seorsim ab ipso cōposito ideato & posito in rerū natura ponuntur à Deo, & conseruantur in esse: ergo etiam debet poni idea talium formarū seorsim, & distincte ab idea cōpositi: semper enim conformantur inter se idea, & ideatum. Et licet formæ illæ dicant ordinē ad subiectū, vel compositum, tamen de facto non pendent in suo esse, & conseruatione vel formatione ab ipso subiecto, sed independenter ab ipso fiunt, & existunt: ergo etiam actu non fiunt, neque existunt per ideam subiecti, quia independenter à tali subiecto, & idea eius habet esse, nec formantur per ideam cōpositi, sed seorsim ab illa.

Dices: ut accidens maneat separatum, non indiget Deus mutare concursum, aut ponere aliquid positum de nouo in accidente, ut diximus in lib. de gener. q. 9. sed solum continuare illummet concursum quo ante dabat esse accidēti, dando modō illum sine dependentia à subiecto: ergo nec indiget distincta idea.

Resp. nō indigere distincta idea ipsius accidētis secundū se, sed solum quod non dependeat ab idea ipsius subiecti, cui illud accidēs erat annexum, & cum quo producebatur. Vnde idea illa qua simul cū subiecto attingebatur accidēs, erat virtualiter multiplex, quia dabat esse pluribus formis, seu partibus: quando autem diuiduntur, & fiunt veluti quædam totales entitates, etiam diuersa & distincta indigent idea, saltem quia diuerso modo accipiunt esse, & sine dependentia, sine qua antè non accipiebant; hoc enim sufficit ad ideandum diuerso modo, & ponendā diuersam ideam, licet entitas & esse sit idem; sicut idem corpus Christi diuersa idea fit per transubstantiationē, & per generationem; & pars aquæ si diuidatur, & fiat distinctū indiuiduum, diuersa idea fit, quia diuersa indiuidua diuersam ideam habet, ut mox dicemus. Itaque idea respicit rem ut formatam, & generatam, & vbi diuersa generatio, seu modus, aut dependentia tollitur, aut ponitur, diuersa idea datur.

Denique tertia pars conclus. de accidentibus cōmunibus probatur ex dictis, quia alia generatione, seu actione fiunt, quàm propria, aut saltē sic perunt fieri tanquā perfectiones quædam superadditæ, nec ad complementum generationis pertinentes, & habent distinctā entitatem & imitationem Dei: ergo & distinctam ideam de se postulant: sicut non eā ideam quā homo fit homo, fit grammaticus, nec eadem ideam qua fit aliqua domus, depingitur, vel ornatur.

Quod si dicas: Etiam accidentia communia possunt fieri eadē generatione cum ipsa substantia, sicut homo generatur albus vel niger, cum hac, vel illa figura, &c. Ergo possunt etiam ab eadē idea formari, qua formatur ipsa rei substantia. Si verò recurramus ad dependentiam, & inhærentiam accidentium, quæ diuersa est in ipsis à modo existendi substantiæ, vel etiā ad diuersam entitatem, qua diuersimodè imitantur diuinam essentiam & ideam: contra est, quia hæc duo pari modo currunt in accidentibus propriis atque in communibus: nam etiam illa inhærent, & diuersam entitatem, atque imitabilitatem habent: ergo vel vtraque habent diuersam ideam, vel neutra.

Resp.

22 Resp. accidētia communia posse fieri eadem generatione, qua subiectū, non per se, & ex formali ratione talis generationis, sed per accidens, ex aliqua materiali determinatione adiuncta, quia materia sic determinatur ex aliquibus præcedentibus dispositionibus non requisitis necessariò ad formam illam: nam de se illa accidētia possunt magis fieri distincta, mutatione, & alteratione, quàm per primā rei generationē, ut experiētia ipsa videmus, quòd manēte tota rei substantia, alteratur, & mutantur ista accidentia, & sic de se exigunt distinctam ideam, quia absolute non sunt connexa substantiæ rei, & possunt alia mutatione tolli, aut poni. Quòd verò generentur simul cum ipsa substantia, non est ex aliqua connexionem cum illa, & consequenter neque cum idea illius, sed quia sicut postea ista accidētia possunt mutari, & alterari, tolli, aut poni, ex diuersa susceptione, & dispositione materiæ, quæ talibus subiaceret accidentibus, ita possunt in ipsa rei generatione sic produci, quia potest tunc similis materiæ immutatio, aut dispositio occurrere; ut quòd lapis generetur cum calore vel frigore, homo cum albedine, vel nigredine, nascitur ex dispositione materiæ, quæ tunc per accidens occurrit, non ex aliqua consecutione & connexionem cum forma, & natura, quæ tunc generatur, nec ut per se ad illam requisitum, & ex vi suæ propriæ ideæ talis substantiæ postulat.

23 Quòd verò dicitur accidentia communia non minus fieri cum dependentia, & inhærentia in subiecto, quàm propria; Resp. quòd quantum ad inhærentiam verum est, sed quantum ad connexionem cum ipsa substantia, & natura, est magna differentia, ut explicauimus, & ita non sunt eadem generatione, & idea per se, & formaliter loquendo, & vi talis generationis, & naturæ, licet per accidens, & materialiter, id est ex aliqua determinatione materiæ tunc per accidens occurrente, possint nunc simul fieri. Quòd verò dicitur de diuersa imitabilitate in accidentibus, & in substantia, dicimus diuersam esse imitabilitatem, tam in accidentibus propriis, quàm communibus, respectu ipsius substantiæ cui inhærent, quātum ad entitatem, seu quidditatem substantiæ, & accidentium. Si autem attēdamus ad connexionem, & coordinationem accidentium cum substantia, idea substantiæ exigit ad sui complementum etiam extendi ad accidentia, quæ sunt propriæ passiones eius, quia in eis completur generatio substantiæ; qui enim dat formam, etiam dat consequentia ad formam; & sic talia accidentia continentur radicaliter in ipsa substantia, cum ex eius visceribus per necessariam connexionem emanent, imò ipsa substantia radicaliter est suamet proprietates, sicut dicimus quòd rationale radicaliter est risibile: Ergo similiter idea substantiæ radicaliter est idea accidentis proprii, & ad illud extenditur, quia per se eadem generatione sunt, & in ipso accidente proprio completur generatio substantiæ: ergo illa idea qua formatur talis substantia extensiuè, etiam tangit talia accidentia, & per se ex vi formali talis generationis, quod non currit in accidentibus communibus, quæ nec radicaliter continentur in substantia, nec eadem generatione per se fiunt.

24 Dico vltimò: Diuersa indiuidua intra eandem speciem habent distinctam ideam in Deo; gradus verò diuersi in eodem indiuiduo, ut generis, speciei, eadem ideā attinguntur in ratione causæ, & exemplaris, Prima pars conclusionis est expressa D. Thom. in præsentī art. 3. ad 4. & in 1. dist. 36. q. 2. art. 3. ad 3. & q. 3. de verit. art. 8. vbi inquit quòd per diuinam providentiam definiuntur omnia singularia, & ideo oportet nos singularium ponere ideas. Fundamentum autem videbitur posse sumi ex dictis, quia diuersa indiui-

dua fiunt per diuersas actiones, seu generationes: ergo exigunt diuersam ideam: hæc enim generationem respicit ideati, generatio autem non exercetur, nisi in indiuiduo, & in diuersis indiuiduis diuersæ generationes. Sed hæc probatio est insufficiens, quia diuersa indiuidua solum materialiter differunt, & similiter eorum generationes: possunt ergo procedere ab vna idea, quæ directè solum respicit naturam, & speciem, intra quam potest plura multiplicare, sicut eadem causa efficiens potest plures affectus indiuiduales causare: cur non ergo eadem idea præsertim cum in artifice creato videamus quòd per eandem ideam facit, plura indiuidua, ut plures statuas, aut vasa eiusdem rationis.

Propter hoc profundius rationem hanc penetrauit D. Thom. & ostendit Deum habere distinctas ideas de distinctis singularibus, & non solum vnam ideam de ipsa specie, quæ teneat pro omnibus singularibus; eo quòd Deus non solum est author formæ, à qua desumitur species, sed etiam ipsius indiuiduationis, quia producit ipsam materiā, non supponit sicut artifex creatus. Vnde in hoc maxime excellit eminentia artis diuinæ super artificem creatū, quòd artifex creatus cum debeat supponere materiam non producere, & ab ipsa dependeat, non oportet quòd de singulis indiuiduis habeat distinctas ideas, sed solum ideam de ipsa forma: multiplicatio verò indiuidualis non oportet quòd sit ex arte, sed ex ipsa diuisione materiæ naturaliter resultat. Et ita ex præcisa ratione indiuiduationis non oportet multiplicare ideas creatas, nisi in aliquo indiuiduo sit specialis aliqua difficultas, vel ratio ob quam specialis idea requiratur, quia videlicet aliqua specialia accidētia, vel ornatus, aut circumstātia aliqua est in eo, quæ non inuenitur in alio indiuiduo: & tunc ideo requiritur specialis idea, quia interuenit aliqua specialis forma accidentalis, quæ artificiosè facienda est: sola verò, & præcisa indiuiduatio, quæ ex diuisione materiæ, & quantitaris resultat, ideam specialem in artifice creato non requirit, quia hoc naturaliter resultat, posita diuisione, licet ipsa diuisio aliquando artificiosè fiat, non propter ipsam diuisionem præcisè, sed quia talis figura, aut forma fit per incisionem rectam, vel curuam, aut rotundam: at verò Deus quia etiam est artifex ipsius naturæ, & ipsius materiæ, & diuisionis eius naturalis, quia non supponit aliquid de materia, sed facit, pertinet ad ipsum de diuersis indiuiduis distinctas ideas habere, imò maxime ad ipsum, quia vltima determinatio indiuiduationis tam in actionibus, quàm in rebus ad ipsum Deum pertinet, qui est causa ipsius materiæ, & determinationis eius indiuidualis, quæ non est ex forma, sed ex efficiente: forma enim determinat speciem, efficiens autem determinat exercitium in materia à quo pendet indiuiduatio: supremum autem efficiens Deus est.

Secunda verò pars conclusionis probatur ex Diuo Thoma q. 3. de verit. art. 8. ad 2. vbi dicit, quòd si loquamur de idea propriè secundum quòd est rei, eo modo quo est in esse producibilis, sic vna idea respondet singulari speciei, & generi in indiuiduatis in ipso singulari, eo quòd Socrates, homo, & animal nō distinguuntur secundum esse: si autem accipiamus ideam communiter pro similitudine, vel ratione, sic cum diuersa sit consideratio Socratis, ut Socrates est, & ut homo est, & ut animal est, respondebunt ei plures ideas, vel similitudines. Ita D. Thomas, cuius ratio sumitur ex eius verbis, quia omnes illi gradus in eodem singulari indiuiduo constituant vnam naturam, & vnum suppositum vnica actione producibile, & sub vnica existentia existens: ergo etiam sub vnica idea comprehensum, quatenus idea dicit causam efficaciter intendentem, & produ-

etiam effectus, Caterum quia omnia ista predicata, & omnes isti gradus illa re singulari fundant diuersas rationes, licet in re sint vna entitas, & sunt representabiles secundum suam distinctionem virtutalem, idem si idea sumatur solum pro ipsa similitudine, seu conceptu representante, & non causante, sic possunt de istis diuersis rationibus inueniri plures similitudines representantes tales rationes, eo modo quo ipsae diuersae sunt, scilicet secundum diuersam considerationem, v.g. ut est homo, vel ut est animal, ut dicit D. Th. Ad hoc autem non exigitur diuersitas formalis idearum, sed sufficit virtualis, videlicet eo modo, & non aliter quo inuenitur in ipso ideato.

Soluntur argumenta.

27 Contra primam conclusionem arguitur, quia scientia practica, ut practica est, & similiter idea, quae essentialiter est forma practica necessariò supponit voluntatem liberam erga suum obiectum, eo quod scientia practica est quae ordinatur ad operari; non potest autem ordinari ad opus, nisi per voluntatem, quae est inclinatio ordinans ad mouendum, & operandum in exercitio: voluntas autem Dei ad operandum ad extra debet esse libera: sed circa res possibiles Deus nullam habet volitionem liberam, ut infra circa quaest. 19. dicemus: ergo nec scientiam practica, & consequenter neque id eam in actu, quia idea est forma practica, & ordinata ad opus. Conf. ex D. Th. qui supra q. 14. art. 16. dicit quod Deus respectu eorum quae nunquam erunt, solum habet scientiam practica virtute, non actu. Et in praesenti art. 3. dicit quod respectu eorum, quae aliquando fiunt, habet Deus ideam, ut exemplar, respectu vero eorum quae nunquam fient, habet Deus ideam, non ut exemplar, sed ut rationem cognoscendi per modum speculationis: ergo non habet ideam actu practica respectu pure possibilium; idea autem non practica non est idea. Et D. Dionys. in 5. cap. de diu. nomin. vocat exemplaria praedefinitiones Dei, & veras, & bonas voluntates praedeterminatiuas, & effectiuas bonorum: ergo ubi non est voluntas, non est idea; circa possibilia autem non est voluntas.

28 Resp. ex supra dictis, quod idea, & scientia practica dependent à voluntate, & supponit illam quantum ad vim executiuam, quia omnis executio, & efficacia in mouendo à voluntate dependet, sed quantum ad vim directiuam, & formatiuam solum consistit in intellectu formante, & exprimente ipsam ideam: Et ita idea in actu practica quoad virtutem directiuam solum requirit intelligentiam in actu, non vero voluntatem in actu, nisi quando actu exequitur, & ad effectum mouet, se sufficit, quod in intellectu existens dicat ordinem ad voluntatem, quando executinè operandum est. Vnde licet actu Deus non habet amorem erga creaturas possibiles, habet tamen actu ideam, non quidem actu exequentem, sed actu habentem virtutem formatiuam; dependentem tamen quoad executionem à voluntate ut ab applicante.

29 Ad Confiam supra diximus quod Diu. Thom. in priori loco dicit dari scientiam practica virtute, & non actu, id est quantum ad executionem, & applicationem, qui est modus practicae scientiae, non tamen negat quod habeat actu virtutem formatiuam practicae ipsius ideati, licet quantum ad applicationem dependeat à voluntate. In secundo autem loco dicitur Deus habere ideam respectu eorum, quae aliquando fiunt per modum exemplaris, quia non solum habet illam quantum ad virtutem formatiuam, sed etiam quantum ad applicationem, & executionem, quia iste est modus exemplaris practici: respe-

ctu vero eorum quae nunquam fient, habet quidem ideam practica, quantum ad vim formatiuam, sed quia caret modo practico quoad applicationem, & usum, dicitur solum habere per modum speculationis, non quia practica non sit, sed quia non vritur illa modo practico quoad executionem ad extra, sed quoad modum cognitionis ad intra, quod est modum speculationis quodammodo habere. Ad D. Dionys. dicitur quod exemplaria, seu ideas vocat praedefinitiones, & bonas voluntates quantum ad id quod in idea requiritur ex parte applicationis, & executionis, non ex parte virtutis formativae.

Secundò arguitur contra tertiam conclusionem, 30 in qua dicimus materiam primam secundum se parere idea: nam in primis id expresse est contra Diu. Thom. q. 3. de verit. art. 5. ubi inquit; Nos ponimus materiam causatam esse à Deo, unde necesse est ponere quod aliquo modo sit eius idea in Deo. Et concludit: Si largè accipiamus ideam pro similitudine, vel ratione, tunc illa possunt per se distinctam ideam habere, quae possunt distinctè considerari, quantum separatim esse non possunt; sic nihil prohibet materia prima, etiam secundum se, esse ideam: Ergo contra D. Thom. est, dicere quod materia secundum se non datur idea. Et in 1. dist. 36. q. art. 3. ad 2. inquit quod materia in se habet esse imperfectum, secundum ultimum gradum essendi, qui est esse in potentia, & ideo perfectam rationem ideae non habet, nisi secundum quod est in composito, quia sic sibi à Deo perfectum esse confertur: in se vero considerata habet in Deo imperfectam rationem ideae, hoc est actu, quia diuina essentia est imitabilis à composito secundum esse perfectum, à materia secundum esse imperfectum, sed à priuatione nullo modo. Ratione etiam arguitur quia materia habet entitatem realem in se participatam à Deo, & creatam, & secundum se etiam antecedenter ad formam, & compositum habet esse entitatum, vel saltem ordinem ad esse: ergo habet quidquid requiritur ut sit ideata à Deo, quia si est creata, est participata, & per artem Dei, & imitationem eius facta, non naturaliter ab eo procedens. Antecedens negari non potest, quia materia prima non est purum nihil, nec priuatio, sed vera entitas realis, quia verè componit ipsum totum, & ex illa educitur forma, & non est entitas realis increata: ergo creata. Conf. quia ille ordo materiae ad formam sufficit ut materia sit bona, saltem bonitate extrinseca, ut praeced. tomo disp. 6. diximus: bonitas autem perfectio est quod autem sufficit ut res dicatur perfecta à Deo, etiam sufficeret ut dicatur ideata à Deo. Omitto argumenta quae fiunt ad probandum materiam habere de se existentiam, & actum entitatum, quo fundamento mouentur Suar. & Vasq. Sed haec argumenta soluta sunt à nobis, ostendendo quod materia secundum se caret isto esse entitativo praecedenti tomo & in physicis & in libris de generatione.

Resp. quod attinet ad authoritatem Diu. Thom. 31 Caietanum in praesenti liquide tenere quod mutauit sententiam, fundaturque illo verbo D. Thom. hic art. 3. ad 3. ubi negat ideam materiae secundum se, quia nec habet esse, nec cognoscibilis est secundum se: ergo negat ipsi ideam, etiam ut est ratio cognoscendi, & non solum ut est ratio producendi. Sed quia potest instari quod materia, etiam secundum se est cognoscibilis, quia ad hoc sufficit quod dicat ordinem ad formam, non autem quod actu sit formata, iste enim ordo conuenit materiae, etiam secundum se, & antequam sit formata: per ordinem autem ad formam cognoscibilis est materia, nam, etiam priuatio per ordinem ad formam cognosci potest; idem responderetur quod sensus D. Thom. in vtrisque locis non est contrarius, nec retractat in vno, quod dicit in alio, quia procedit secundum diuersas considerationes

siderationes materiæ; quando enim dicitur materia secundum se, *ly secundum se*, vel potest appellare ipsam entitatem materiæ cum ordine, quem includit ad formam, vel potest appellare statum materiæ, qui est privatio omnis formæ. Et sub prima consideratione concedit D. Th. materiæ secundum se ideam in illis locis quæ *supra* citantur: sub posteriori autem negat ideam materiæ secundum se in aliis locis, quæ in probatione conclusionis citauimus, quia sub statu privationis materia non est producibilis, neque cognoscibilis ratione illius status. Et cum S. Th. addit *in hoc art.* quod neque potest cognosci secundum se materia, *ly secundum se*, intelligitur ratione status privationis formatum, & non respectus, seu ordinis ad illas, ratione cuius non potest cognosci, nisi extrahatur ab illo, & consideretur sub ordine ad formam. Vel etiam potest intelligi quod secundum se non est cognoscibilis practicè, quia prout sic non potest poni in esse, cum sit incapax existendi extra omnem formam, licet cognoscibilis sit eius entitas per ordinem ad formam, & compositum, quod etiam conuenit illi secundum se; & sic etiam loquitur *in quest. 3. de verit. & in 2. dist. 36. citatis.*

32 Ad rationem responderetur nos non negare quod materia secundum suam entitatem habeat ideam, licet inadæquatam, & imperfectam, quia creata est à Deo, sed dicimus non habere illam sub omni statu, sed sub illo, sub quo potest creari à Deo, id est, ut subest alicui formæ, & dicit ordinem ad formam; sub alio autem statu, id est, sub carentia omnis formæ, non potest ideari, quia nec creari. Itaque defectu status tanquam conditionis requisitæ negamus illi ideam, non defectu entitatis, si in alio statu ponatur, id est, sub ordine, & subiectione ad formam, quia sic solum producibilis est, licet etiam ante informationem ipsius formæ sic cognoscibilis, quasi speculatiue; per ordinem tamen ad formam, sed non practicè creabilis in esse, ut diximus.

33 Ad Conf. responderetur quod materia secundum se est bona in potentia, redditur tamen perfecta, & bona in actu per formam cui coniungitur, non sub statu carentiæ omnis formæ: Vnde similiter habet ideam, quæ constituit illam bonam in potentia, requirit tamē pro conditione, & statu, alicui formæ coniungi, & non potest illa idea separari ab omni idea formæ, quia non potest aliter produci materia, quia non est capax existendi sine forma: ipsæ autem formæ sunt capaces existendi sine materia, ut *supra* iam diximus.

34 Tertiò arguitur contra quartam conclusionem ex *Vasq. hic disp. 74. cap. 3.* quia accidentia propria habent suam distinctam cognoscibilitatem, sicut & entitatem à subiecto: ergo distinctam ideam, saltem speculatiuam, imò & practicam: nam idea practica solum addit supra speculatiuam efficaciam ex parte voluntatis. Quod verò simul tempore producantur, nihil obstat, quia etiam si producantur simul, habent tamen distinctum esse, & distinctam cognoscibilitatem, & consequenter distinctam ideam: hæc enim sequitur ad distinctionem entitatum, sicut pro diuersis indiuiduis ponimus diuersas ideas.

35 Confir. quia si aliquid obstaret, maximè ratio D. Thom. quia scilicet vna domus cum omnibus suis partibus, & accidentibus vnica idea fit: hoc autem nihil obstat, quia vna domus solum est vna vnitate ordinis, & sic habet vnā ideam, quæ etiam sit vna in ordine; nos autem loquimur hic de idea entitatis naturalis, quæ habet vnitatem simpliciter, & sic vbi est diuersa entitas, est diuersa idea.

36 Resp. distinguendo antecedens: accidentia propria habent distinctam cognoscibilitatem, seu entitatē à subiecto, radicam in illo, & emanantē ab illo, & sic eadem generatione producibilem, concedo: non ra-

dicatam in illo, nec eadem generatione producibile, nego. Vnde habent eandem ideam practicè cum ipso subiecto, quia hæc attendit generationem, & productionē rei, quæ producit accidentia propria ut emanantia à subiecto, & radicaliter in illo inuoluta. Speculatiue autem, & secundum præcisionem quam intellectus format, bene possunt accidentia propria habere distinctam ideam à subiecto, id est distinctam rationem cognoscendi sub ista abstractione, & præcisione, non sub ratione practica, quæ nō solum addit ad speculatiuam efficaciam voluntatis, sed etiam diuersam formationem intellectus. Nec ponimus eandem ideam pro subiecto, & passionibus, quia simul tēpore producantur, sed quia radicaliter continentur in subiecto, & ab illo dimanant, & eadē generatione fiunt, & sic nō vbiq; est distincta entitas, est distincta idea, sed vbiq; est distincta, & nō radicata in alia, neq; ad complementū generationis eius pertinens: sic enim sicut eadem generatio se extendit ad illa, ita & vna idea illa omnia comprehendit: diuersa autem indiuidua non habent hanc subordinationē, & dependentiam inter se, ut vnica generatione fiant.

Ad Confir. Resp. exemplum D. Th. de idea domus 37 procedere à fortiori, quia si pro vna domo, seu artefacto faciendo sufficit vna idea, quæ omnes eius partes comprehendat, & accidentia propria, multò melius vna idea comprehendet omnes partes vnius rei physice, & naturalis, cuius quæ propria accidentia, quia totum eadem generatione attingitur.

Vltimò arg. contra vltimam conclusionem, nam 38 indiuidua solum multiplicantur ex parte materiæ, & diuisionis eius, sed nos non ponimus ideam propriam materiæ secundum se; ergo nec multiplicari debent ideæ pro pluribus indiuiduis, quæ solum differunt secundum diuisionem materiæ.

Conf. quia D. Th. *in present. art. 3. ad 3.* negat ideas 39 speciales gradus generici, eo quod simul cum specie producantur: ergo eadem ratione debet negare distinctas, & speciales ideas pro gradibus indiuidualibus, quia cum specie formatur gradus indiuidui sicut gradus generis: si autem multiplicantur ideæ pro indiuiduis, non verò pro ipsa specie, in qua indiuidua conueniunt, idea talis speciei erit idea quædam in abstracto, & in confuso præscindens ab omnibus indiuiduis, quod est absurdum.

Resp. quod indiuidua multiplicantur per diuisionem 40 materiæ, non ut carentis forma, sed ut subiectæ illi, quia ex materia signata sumitur hæc multiplicatio, non signatur autem à quantitate, nisi cum ordine ad formam; de materia autem informata, & signata datur idea, ut diximus. Et præterea, licet materia signata quantitate sit principium indiuiduationis, non tamen est ipsa formalis indiuiduatio, sed hæc consistit in differentia indiuiduali, & sic licet ex materia sumatur, tanquam ex principio, potest tamen dari idea de ipsa indiuiduatione formali, quæ sic ex materia signata, & determinata per formam oritur.

Ad Conf. Resp. quod D. Th. loquitur de gradu generico, & specifico, & indiuiduali reperto in eodem 41 subiecto, seu indiuiduo: hæc enim ratione non datur diuersa idea de diuersis gradib. in eodē indiuiduo, ut expresse docet D. Th. *q. 3. de verit. art. 8. ad 2.* Loquendo autē de diuersis indiuiduis, sic requiruntur diuersæ ideæ, quia diuersæ entitates sunt, non coordinatæ inter se, nec eadem generatione, sed diuersa factibiles. Nec propter hoc ponimus ideam de ipsa specie in abstracto, sed dicitur Deus habere ideam de specie, ut coniuncta indiuiduis, non seorsim ab illis, licet de quolibet indiuiduo suam habeat ideam, in qua & gradus specificus, & genericus includitur, non autem de quolibet gradu seorsim, & abstractè sūpto habet diuersam ideam, in quantum exemplar practicū est.



QVÆSTIO XVI. DE VERITATE.

SVMMMA LITERÆ TEXTVS.



IN duo principalia capita distribuit D. Thom. tractatum hunc de veritate. Nam primò agit de illa in genere, deinde de veritate diuina in speciali, & de his quæ ex illa sequuntur. Circa veritatem in genere considerat D. Thom. quòd veritas dicit respectum ad tria, scilicet ad intellectum à quo cognoscitur, formatur, vel manifestatur. Secundò ad entitatem in qua fundatur, quia vbi non est entitas, nihil est veritatis. Tertiò denique ad bonum, quod est passio entis posterior veritate. Circa veritatem verò diuinam considerat quomodo sit in Deo, ita quòd Deus sit ipsa veritas. Ex veritate autem diuina consequitur quòd veritas sit vna, sit æterna, sit immutabilis, quod explicat tribus vltimis articulis.

In primo ergo art. determinat quòd veritas formaliter est in intellectu, obiectiuè autem in rebus, quia in re datur esse, à quo, velut ab obiecto, sumit intellectus adæquationem cognitionis, & conceptu, & in illa est veritas.

In 2. ostendit quòd ista adæquatio intellectus ad esse rei potest quidem esse in sensu, vel in simplici apprehensione per modum repræsentationis, & simplicis habitudinis, sed per modum conformitatis vt cognitæ, & comparatæ ad esse rei, solum est in iudicio, seu in intellectu componente, & diuidente, quia ibi primò relucet conformitas, & conuenientia, vel disconuenientia prædicati ad subiectum.

In 3. determinat de habitudine veritatis ad ens, & dicit conuerti cum ente, addendo ordinem ad intellectum; & ideò verum, vt est in rebus, scilicet obiectiuè, & fundamentaliter conuertitur cum ente entitatiuè: vt autem est in intellectu conuertitur cum ente, non entitatiuè, sed manifestatiuè, seu regulatiuè, scilicet vt manifestans & regulans cum manifestato & regulato.

In 4. tractat de habitudine veri ad bonum. Et dicit quòd verum, & bonum licet entitatiuè sint idem, tamen secundum suos respectus, & formales rationes prius est verum, quàm bonum, quia verum fundatur in esse rei secundum suam quidditatem præcisè sumptam, bonum autem in esse rei vt perfectio, & perficiente appetitum: & similiter verum respicit cognitionem, quæ est prior appetitu, quem respicit bonum.

In 5. art. incipit agere de veritate diuina in speciali; primò quidem de illa secundum se; deinde de his, quæ in veritatibus creatis sequuntur per ordinem ad diuinam. De ipsa secundum se agit art. 5. vbi ostendit quòd Deus non solum est verus, sed ipsa veritas, non quomodocumque, sed prima, & summa veritas. Est quidem Deus ipsa veritas, & non solum verus, quia eius esse est ipsum intelligere; veritas autem est in intellectu: ergo eius esse est veritas ipsa, & non solum verificabilis ab intellectu. Est autem prima & summa, quia est causa & regula omnis veritatis.

In art. 6. 7. & 8. explicat tres conditiones, quæ ex veritate diuina deriuantur, etiam veritatibus creatis. Prima, quòd veritas sit vna. Secunda, quòd sit æterna. Tertia, quòd sit immutabilis: nam veritas omninò vna solum inuenitur in intellectu diuino, qui est omnium mensura; in creaturis autem multiplicantur veritates transcendentes, sicut & ipsæ entitates, formales autem veritates, sicut & ipsæ cognitiones. Et hoc art. 6. Quòd verò sit æterna formaliter, & positiuè, solum habet veritas in intellectu diuino, qui æternus est. Negatiuè autem aliqua dicuntur æternæ veritatis, quia non sunt alligata loco, & tempori, sicut vniuersalia, sed veritas formalis, seu cognoscitiua istorum solum est æterna in intellectu diuino. Et hoc art. 7. Denique quòd aliqua veritas sit immutabilis, & consequenter infallibilis, si sit veritas formalis, solum habet in intellectu diuino, qui immutabilis est: veritas autem obiectiua quæ est ipsum esse rei, non est immutabilis omninò, nisi in Deo.

QVÆSTIO

QVÆSTIO XVII. DE FALSITATE.

S V M M A L I T E R Æ.



QUÆ falsitas dicitur à fallentia, seu deficientia à regula per cuius conformitatem datur veritas, potest hæc fallentia considerari, vel in ordine ad illum quem decipit & fallit, vel in ordine ad id quod est occasio, seu ratio fallendi. Et ideo D. Thom. duo tractat in hac quæst. Primò, vbi inueniatur falsitas, an in rebus, vel in intellectu, seu sensu per tres articulos. Secundò quam oppositionem habeat cum veritate art. 4.

Igitur in art. 1. inquit an falsitas sit in rebus extra intellectum. Et determinat quòd res naturales comparatæ ad intellectum diuinum non sunt falsæ, quia in tantum sunt, in quantum à Deo sunt, & ab eius idea cui conformantur: morales tamen actiones etiam à regula Dei possunt se subducere, & ideo peccata vocantur mendacia. Respectu autem intellectus creati res possunt dici falsæ, aut quia falsò significantur, sicut verus tragædus est falsus Hector, aut quia falsitatem in intellectu inducunt, propter similitudinem cum vero, sicut auricalchum est falsum aurum.

In art. 2. determinat quòd in sensu non inuenitur falsitas formaliter, tanquam in cognoscente falsitatem, sicut nec veritas, quia non comparat vnum alteri: inuenitur tamen ibi occasio falsitatis, quatenus præbet occasionem falsi iudicij ex apprehensione rei verosimilis respectu veræ.

In art. 3. determinat quòd intellectus potest esse falsus, non in apprehensione simplici quidditatis, sed in compositione, & diuisione, vel in iudicio, quatenus attribuit alicui quod ei non inest.

Denique in art. 4. expedit alterum punctum de oppositione veri, & falsi, docetque veritatem, & falsitatem, quæ sunt in intellectu opponi contrariè, seu positivè, non sicut positivum, & negatiuum, quia vtrumque consistit in aliquo actu, seu acceptione intellectus, veritas quidem secundum adæquationem, falsitas verò per inadæquationem.

QVÆSTIO XVIII. DE VITA DEI.

S V M M A L I T E R Æ.



QUÆ ratione D. Thom. in hoc loco tractet de vita Dei post considerationem de scientia, ideis, & veritate, diximus *tomo precedenti in isagoge D. Thom.* Duo ergo facit in hac quæstione; primò præmittit duo quæ sunt communia omnibus viuentibus; secundò specialiter agit de vita Dei. Præmittit inprimis in quo differant viuentia à non viuentibus, art. 1. Deinde in quo consistat vita, an in actione, vel in substantia, art. 2. Ex primo infert art. 3. in Deo dari summam vitam: & ex secundo infert art. 4. omnia in Deo esse vitam ratione operationis Dei.

Igitur in art. 1. determinat quòd viuentia differunt à non viuentibus per hoc quod viuentia se mouent ad operationes, non viuentia autem tantum mouentur ab alio; & sic vita non conuenit omnibus.

In art. 2. determinat quòd vita non est prædicatum accidentale, sed substantiale in viuentibus, licet manifestetur nobis per operationes vitales, quæ accidentia sunt, ipsa verò substantia est viuens, quam propriè significat nomen vitæ.

In art. 3. determinat quòd Deus habet summum gradum vitæ, quia est suum intelligere, ita quòd à nullo alio determinatur, vel mouetur: in tantum enim aliquid deficit à ratione vitæ, vel minus perfectè habet illam, in quantum indiget moueri, vel determinari ab alio, vt

ut se moueat : Determinatur autem, vel mouetur aliquid ab alio, vel tanquam, ab agente-vel tanquam à dirigente per cognitionem, vel tanquam à fine alliciente, & ex fine mouente ad media, sicut intellectuales creaturæ se mouent, quæ tamen circa ipsa prima principia, & excitationem ad finem indigent determinari ab Authore naturæ; & sic nullum viuens creatum habet ita puram rationem vitæ, quod omnino moueatur à se, & non indigeat ab alio moueri : Si ergo Deus à nullo mouetur aliquo modo in operando, sed ita est à se, quod est ipsamet operatio, habet summum gradum vitæ.

In att 4. ostendit omnia quæ à Deo fiunt, & procedunt, habere vitam in Deo, quia habent esse intellecta, & formata in ipso intelligere Dei, seu in ipsa idea, quæ est forma exemplaris viua; quatenus per conceptum format, & cognoscit id quod imitandum est à creatura. Omnia ergo viuunt in Deo, id est in idea diuina.



DISPUTATIO II.

De veritate transcendentali, & formali.

ARTICVLVS I.

In quo consistat veritas transcendentalis.

I OMVNIS omnium conceptio est nomine veritatis duo significari, quæ maximè ad veritatē ipsam pertinent. Alterum est ipsum esse non fictum, sed ratū, sicque nomine veri excludimus id quod est inane & fictum, & tunc maximè dicitur aliquid verum quādo est fundatum & firmum in re. Alterum est conformitas, seu adæquatio intelligentis cum ipsa re, per quod excluditur falsitas, quæ est inadæquatio ad id quod est in re: omnes enim rectè definientes verum ponunt in eius definitione intellectum, vt rectè obseruat D. Thom. 21. de verit. art. 1. Et omnes definitiones veritatis, quas D. Thom. in præsentī art. 1. & q. 1. de verit. art. 1. affert ex Hilario, August. Anselmo, & Auicenna, tangunt primam, aut secundam habitudinem veritatis iam dictam, vel vtramque. Ex hoc ergo notata est duplex acceptio veritatis, alia in essendo, alia in cognoscendo, seu alia transcendentalis, alia formalis. Transcendentalis, seu entitatiua pertinet ad ipsam essentiam rei, & est fundamentalis veritas, seu ipsum fundamentum veritatis: formalis autem veritas est ipsa forma adæquationis, & conformitatis in cognitione cum esse rei, quia ab eo quod res est, vel non est, intellectus verus, vel falsus est.

2 Cur autem hæc veritas in cognoscendo dicatur veritas formalis, veritas autem transcendentalis, & entitatiua non dicatur formalis, inde desumi potest; quia ipsa formalitas veri, & boni, quam addunt supra ens, sumitur per ordinem ad potentias quas mouent, scilicet intellectum, & voluntatem, sed cum hac differentia, quod veritas mouet intellectum per hoc quod res trahuntur ad ipsum; voluntas autem mouetur per hoc quod inclinatur ad res, in quarum assentione perficitur tanquam pondus, & inclinatio in suum centrum. Quare formalitas veritatis debet desumi per ordinem ad intellectum, eo modo quo obiectum intelligibile mouet, & perficit potentiam intelligentem, & sic cum in ista potentia formalis perfectio quam habet ab obiecto fiat intra ipsam, consequenter formalis veritas intra intellectum inuenitur in ipsa cognitione, in re autem extra fundamentaliter solum, & obiectiue, quia in intellectu est veritas vt manifestata, & sub forma manifestationis non est in rebus, sicut scientia for-

maliter inuenitur in intellectu, in obiecto autem nō inuenitur formaliter, sed obiectiue, quia scientia formalis est, quæ reddit formaliter scientiam, & sic solum est in intellectu; sic veritas formalis: est illa, quæ reddit formaliter cognitionem adæquatam rebus, & verè attingentem illas, quæ attingentia non potest esse formaliter nisi intra intellectum, non extrā. Et ita D. Th. quæst. 1. de verit. art. 2. ostendit veritatem formaliter esse in intellectu, quia in eo consummatur motus obiecti cognoscibilis ad cognoscendum, & attingendum veritatem: at verò bonum formaliter est in rebus, & non in appetitu, quia non perficitur motus appetitus in ipsa voluntate, sed in reali assentione obiecti, & ideo formalis perfectio boni in ipso obiecto appetibili est, non vt intra voluntatem tracto, sed vt extra assento.

3 His suppositis difficultas in præsentī est, in quo consistat, & quid sit veritas transcendentalis, quæ est passio entis. Et non est dubium quod, identifice loquendo, ista veritas includit ipsum ens, & non distinguitur ab illo; tum quia hæc est natura transcendētium, quod vnum imbibatur, & includatur in alio, aliàs non esset transcendens; tum quia si veritas non esset ens, esset nihil, & sic non esset vera & realis passio illius, sed aliquid fictum, & ens rationis; cum tamen ens per solam rationem veri separetur à ficto. Sed difficultas est de veritate secundum formalem conceptum, quem addit supra ens; constat enim non significari idem nomine veri, & nomine entis, nec esse conceptus synonymos; & sic restat videre quid sit ista formalitas, & iste diuersus conceptus, quem dicit verum supra ens.

Varia sententia.

4 In hoc puncto multiplex, & varia est sententia Auctorum, quas ad tres principales reducimus.

Prima affirmat veritatē addere supra ens aliquid reale absolutum, licet sola ratione distinctum ab ente. Hinc sententiam attribuit P. Suar. aliquibus Thomistis disp. 8. metaph. sect. 7. fortè quia aliqui, vt Capreolus, & Soucinus dicunt veritatem non solum importare respectum, sed etiam includere ipsam entitatem, quæ absoluta esse potest. Sed hoc est loqui non solum de eo quod addit veritas supra ens; sed de toto quod includit. Aliqui etiam volunt veritatem addere quidem supra ens aliquid reale, non tamen absolutum, sed respectiuum per modum adæquationis, & conformitatis cum sua regula.

5 Fundamentum vtriusque, quantum ad hoc quod est addere aliquid reale supra ens, ex eo sumitur, quia veritas in suo conceptu formali distinguitur ab ente, & est realis, & vera perfectio, siquidem in suo formali conceptu opponitur falsitati, & fictioni, & sic per conceptum formalem veritatis ens habet esse verum, & non fictum, distinguiturque ab ente rationis: ergo repugnat quod veritas de formali importet ens rationis: sic enim non posset formaliter

maliter per ipsum distingui ens reale, & verum ab ente non vero, & ficto. Est etiam perfectio realis, quia carere falsitate magna perfectio est, & in Deo veritas est summa perfectio, per quam distinguitur à falsis diis: hoc enim non est aliquid rationis in Deo. Quod verò sit perfectio absoluta, ex eo patet, quia ante omnem relationem, siue ad intellectum, siue ad aliquid aliud, aurum est verum aurum, & nō auricalchum, quia habet essentiam auri, non per ordinem ad alterum, sed in se: ergo veritas ista ante omnem relationem subsistit. Imò posito fundamento huius relationis, antequam relatio confurgat, vel illud fundamentum est aliquid fictum, vel aliquid verum: Si verum, habetur veritas ante relationem: si fictum, non potest fundare veritatem, quæ opponitur ipsi fictioni: ergo veritas transcendentalis est aliquid absolutum.

6 Secunda sententia principalis est, quòd veritas addit supra ens aliquid rationis, ea generali ratione; quia supra rationem entis, vt sic, nihil potest addi quod sit ens reale, quia si hoc ipsum includeretur in ente, non ultra illud adderetur. Cæterum in explicando quidnam sit hoc rationis, quod veritas addit supra ens, variant Auctores. Quidam dicunt addere aliquid negatiuum, sicut vnitas; quam sententiam refert Suar. *vbi supra num. 17.* licet nulli Auctori illam tribuat: etenim ad rationem veri sufficit quòd aliquid habeat sua principia essentialia cum exclusione falsitatis, seu fictionis: nam hoc ipso aliquid est verum aurum, quòd non est fictum, & cum principia essentialia pertineant ad conceptum ipsum entitatis, restat quòd negatio falsitatis, seu fictionis sit id quod veritas addit supra ens. Alij autem dicunt addere supra ens relationem rationis, quæ videtur esse sententia D. Thom. *quest. 1. de verit. art. 1. & in 1. dist. 19. q. 5. art. 1. ad 3.* Et solet explicari quòd ista relatio sit ordo ad intellectum: sed tamen intellectum quem respicit veritas potest esse, vel intellectus à quo formatur in suo esse sicut res artefactæ formantur ab intellectu artificis, & res naturales à Deo, vel potest esse intellectus in quo res causant veritatem, sicut intellectus creatus, quia accipit veritatem à rebus. Possunt ergo res dici veræ transcendentali-ter, vel quia sunt conformes intellectui à quo causantur, vel quia sunt causatiuæ veritatis in intellectu qui sibi conformatur, ita quòd veritas sit vel regulatio passiuæ respectu intellectus à quo formatur, & regulatur, vel sit regulans actiuæ respectu intellectus in quo causat veritatem. Et quidem ordo ad intellectum in quo causatur veritas, qui est intellectus cognoscens res, & non formans manifestum est quòd est aliquid rationis, quia obiectum non respicit potentiam relatione reali, sed è conuerso, quia potentia dependet ab obiecto, non è contrà. Relatio autem veritatis ad intellectum à quo formatur, videtur realis esse, quia est dependentia realis ipsius rei formatæ ad suam causam & ideam, sed tamen adhuc dicitur esse relatio rationis, quia potest manere veritas sine existentia rei, sicut est verum quòd duo, & tria sunt quinque, etiam nulla re existente. Et sic sufficit relatio rationis. Et omnes istas habitudines existimat P. Suar. *vbi supra num. 26.* contineri in veritate, & ab eis posse rem denominari veram; simpliciter tamen fatetur non consistere veritatem in extrinseca denominatione, quamuis connotet aliquo modo coniunctionem alterius rei, vnde veritas resultat, vt docet *n. 24.* Ad hanc sententiam reduci possunt illi qui existimant veritatem transcendentalem esse conformitatem rei cum sua definitione, sicut illud dicitur verum aurum cui conuenit definitio auri. Constat autem quòd inter rem, & suam definitionem non intercedit, nisi relatio rationis.

Tertia sententia principalis est, quòd veritas trans-
cendentalis in ipsis rebus solum est denominatio ex-
trinseca qua res dicuntur veræ à veritate diuina, vt
effectus eius, vel respectu intellectus creati, quia sunt
causa veritatis in illo, sicut medicina, vel vrina dici-
tur sana denominatione extrinseca à sanitate anima-
lis, illa vt causa, hæc vt effectus sanitatis. Hanc sen-
tentiam Suar. attribuit Caiet. *in present. art. 6. in fine.*
Sed Caiet. loquitur de veritate formali, quæ est veri-
tas in cognoscendo, quam constat solum esse intrin-
secè, & formaliter in intellectu, in rebus autem solum
denominatiuè: de veritate autem transcendentali
nihil loquitur: At verò hanc sententiam simpliciter
tenet Valsq. *hic disp. 77. cap. 4.* & citat pro ea Durand.
Henricum, & alios: sentit enim veritatem non inue-
niri primariò in rebus, sed secundariò per denomi-
nationem à veritate, quæ est in intellectu, cuius causa
sunt res, sicut medicina dicitur sana à sanitate ani-
malis quam causat. Vnde etiam fatetur *c. 5.* veritatem
non esse passionem entis, neque in sua sententia, quia
est aliquid rationis per modum denominationis ex-
trinsecæ, neque in sententia eorum qui dicunt esse
aliquid reale, qui sic non distinguitur à subiecto, dici
tamen solet passio entis, quia recipitur cum ente,
illudque comitatur. Et ita infert inde duo: alterum
est veritatem non esse in rebus, quia conformantur
iudicio diuino, vel arti creatæ: sed quia causant veri-
tatem in intellectu cognoscente: alterum est, verita-
tem esse primariò in intellectu, secundariò & deno-
minatiuè in rebus, quatenus sunt causa iudicii veri,
aut signa veritatis, quæ est in intellectu: non autem
veritas est in rebus per aliquid intrinsecum, quate-
nus conformatur ideæ diuinæ, vt dicunt aliqui Tho-
mistæ, quia expresse S. Doctor dicit *in art. 1. huius
quest.* quòd veritas primariò est in intellectu, & inde
deriuatur ad res, sicut sanitas est primariò in anima-
li, & secundariò, seu denominatiuè in vrina, vel me-
dicina: cum hoc enim stare non potest quòd intrin-
secè veritas sit in rebus (sicut sanitas non potest esse
intrinsecè in medicina) sed secundum denominatio-
nem sumptam ab intellectu, sicut etiam falsitas non
inuenitur in rebus absolute, & intrinsecè, sed per or-
dinem ad intellectum, quatenus scilicet aliqua res
nata est causare falsitatem, & deceptionem in intel-
lectu, in se autem non potest esse falsa, quia id quod
in se est, verè est. Sicut ergo falsitas dicitur denomi-
natiuè ab intellectu, & non absolute in se, ita & ve-
ritas.

Sententia D. Thom.

Magna cōplicatio in hac parte orta est ex eo, quòd 3
confunditur, & non plenè distinguitur veritas trans-
cendentalis à formali; & denominatio quæ oritur
in rebus à veritate formali, quæ est in intellectu, re-
cipitur pro ipsa veritate transcendentali, quæ est in
rebus, cum tamen veritas transcendentalis distin-
gui debeat à formali, quæ est in intellectu, & à de-
nominatione quæ oritur à veritate formali, & de-
nominat extrinsecè ipsas res: veritas enim transcen-
dentalis est idem quòd veritas fundamentalis respec-
tu veritatis, quæ est in intellectu nostro; & hoc
fundamentum inuenitur in ipsis rebus intrinsecè
ante denominationem ortam à veritate formali in-
tellectus, sed tamen nominamus illam nomine ve-
ritatis, sicut veritatem formalem, quæ est in intelle-
ctu propter penuriam vocabulorum, appellamus au-
tem veritatem transcendentalem designando per *ly
transcendentalem* aliquid quòd sit fundamentum ve-
ritatis formalis: in his autem quæ dicuntur per ana-
logiam attributionis, licet analogum sit formaliter
in vno, & denominatiuè, seu respectiuè in alijs, ta-
men non repugnat aliquid intrinsecum inuenire in
istis

istis per quod respiciant illud principale analogatū, & ab eo denominationem accipiant, sicut cibus denominatur sanus à sanitate, quæ est in animali denominatione extrinseca, habet tamen in se intrinsecè qualitates sanativas, per quas respicit, & causat sanitatē animalis; unde non est formaliter sanus intrinsecè, est tamen intrinsecè, & formaliter sanativus. Quod si istam virtutem sanatiuam nomine sanitatis appellaremus, oporteret dicere quod sanitas causatiua esset intrinsecè in cibo, sanitas autem formalis, quæ solum est in animali (quia solum in ipso est temperies humorum) est in cibo denominatiuè, & extrinsecè. Sic veritas formalis, quæ consistit in expressione, & manifestatione veritatis, solum est in intellectu intrinsecè & formaliter, à quo fit denominatio extrinseca in ipsas res. Fundamentum autem, & obiectum huius veritatis, quod etiam dicitur veritas, non quomodocumque, sed transcendentalis, etiam inuenitur in rebus intrinsecè. Quam doctrinam egregiè obseruauit D. Th. q. 1. de verit. art. 4. in fine corp. & ad 1. cuius verba statim citabimus.

9 Hoc supposito, ut mentem D. Thom. explicemus circa veritatem transcendentalem, duo nobis dicenda sunt. Primum, quod ista veritas in quantum transcendentalis, est aliquid intrinsecum in rebus, & non solum per denominationem extrinsecam à veritate, quæ est in intellectu id enim currit in veritate formali, quæ est intrinseca in intellectu, & extrinsecè denominat res, sicuti de sanitate diximus, & magis tractabitur seq. art. Itaque non potest consistere veritas transcendentalis in sola denominatione extrinseca, ut putauit Vasq.

10 Secundum est, quod ista veritas transcendentalis sic explicata consistit formaliter in duplici habitudine, alterā quam dicit ad intellectum à quo formatur, & in sua proprietate constituitur, si sit veritas creata, vel cum quo identificatur, & est vnum si sit veritas prima; alterā quam dicit ad intellectum quē mouet, & in quo causat veram æstimationem sui. Et prima habitudo est præcipua, & magis per se in veritate transcendentali, illique intrinseca, sicut & ipsa entitas rei, & prædicata essentialia, quæ aliquando existunt, aliquando non. Secunda autem habitudo est minus principalis, & consequuta in veritate transcendentali, estque habitudo rationis, quā obiectum respicit intellectum quem mouet; & secundum priorem habitudinem aliquando dicit D. Th. veritatem transcendentalem esse aliquid intrinsecum in rebus; iuxta secundam verò habitudinem aliquando dicit verum addere supra ens respectum rationis.

11 Primum dictum probatur quoad vtramque partem esse D. Thom. scilicet quod veritas transcendentalis sit intrinsecè in rebus, & tamen quod veritas formalis sit primariò in intellectu, & denominatio ab illa resultans solum extrinsecè tangat res ipsas. In quo nulla est contradictio in D. Thom. licet eam inueniri putauerit Vasq. disp. cit. 77. cap. 2. ut mox videbimus; prius tamen ostendo id esse expressè sententiam S. Thom. nam in q. 1. de verit. art. 4. ubi distinguit denominationem quam res habent à veritate quæ est in intellectu, ab ea quam habent à forma intrinseca qua denominantur veræ transcendentales: *Denominantur* (inquit) *res veræ à veritate quæ est ab intellectu diuino, vel intellectu humano, sicut denominatur cibus sanus à sanitate quæ est in animali, & non sicut à forma inherente, sed à veritate quæ est in ipsa re, quæ nihil est aliud quàm entitas intellectui adequata, vel intellectum sibi adequans, sicut à forma inherente; sicut cibus denominatur sanus à qualitate sua à qua sanus dicitur.* Vbi S. Doctor totam nostram sententiam, & primum hoc dictum declarat, scilicet quod veritas entitatiuè, & transcendentaliter sumpta

inherenter, seu intrinsecè est in rebus, formaliter autem sumpta pro veritate cognitionis, est solū intrinsecè in intellectu; denominatiuè autem, & extrinsecè in rebus, sicut sanitas formalis est intrinsecè in animali, & extrinsecè in medicina, aut cibo, qualitas autem sanatiua, quæ etiam sanitas solet appellari, intrinsecè est in cibo, aut medicina. Et amplius constabit ex seq. dicto, ubi probabitur veritatem transcendentalem secundum D. Thom. dicere habitudinem realem ad ideas, & intellectum diuinum: hoc enim non potest stare, nisi veritas transcendentalis intrinsecè, & inherenter sit in ipsis rebus, quia realiter in ipsis est.

Et hinc constat nullo modo in doctrina D. Thom. 12 esse contradictionem, cum ex vna parte affirmat veritatem transcendentalem esse intrinsecè in rebus, ex alia docet esse primariò in intellectu, & denominatiuè in rebus, nec in rebus propriè esse veritatem, quæ causet veritatem in intellectu, sed esse rerū causare illam veritatem quæ est in intellectu, ut dicit in presenti art. 1. ad 3. In hoc inquam, nulla est contradictio, quia veritas quæ est intrinsecè in rebus, dicitur veritas transcendentalis, non formalis: est enim fundamentum, & obiectum veritatis formalis, quæ est in intellectu, & hoc intrinsecè inuenitur in ipsa entitate, vocaturque veritas transcendentalis, non formalis: dicendo enim transcendentalis, designamus veritatem pro fundamento, non pro expressione, & manifestatione; sic enim solum in intellectu est, sicut in cibo est sanitas extrinsecè, sumendo illam pro virtute sanatiua, non sanitas formalis, quæ est in temperamento humorum: & ideo rectè dixit S. Thom. quod non veritas rei, sed esse rei causat veritatem in intellectu, id est, non veritas formalis rei, sed veritas transcendentalis, quæ est in ipso esse rei, quod quidem intrinsecè est in rebus, licet participatiuè sit à Deo, sic veritas entitatiua est in rebus intrinsecè, licet sit participatiuè à Deo. Loquendo autem de veritate formali, quæ est expressio intellectus circa verum, hæc intrinsecè, & primariò solum est in intellectu, denominatiuè autem in rebus, & extrinsecè, & de hac loquitur D. Th. & Caiet. quando dicunt inueniri in rebus per denominationem extrinsecam, in intellectu autem primariò, eo quod veritas, ut formaliter expressa, solum inuenitur in intellectu intrinsecè, eo modo quo sanitas, sumpta pro temperamento humorum, non inuenitur intrinsecè nisi in animali; sanitas autem pro virtute sanatiua, etiam in cibo inuenitur intrinsecè. Nulla ergo est contrarietas in doctrina D. Th.

Nec obstat, quod D. Thom. dicit in art. 1. huius q. 13 quod non minus veritas rerum est adæquatio rei cum intellectu, quàm ipse veritas formalis, quæ est in intellectu, sit adæquatio cum ipsa re, & sic videtur sibi contradicere, ponendo veritatem primariò in intellectu, & denominatiuè in rebus. Respondeo enim quod D. Thom. non sic dixit, sed verba eius sunt, quod veritatem esse adæquationem rei, & intellectus pertinet ad vtrumque, scilicet ad veritatem formalem, & transcendentalem. Quod idcirco dixit S. Thom. quia plures attulit definitiones veritatis ex diuersis Auctoribus in art. 1. quarum quædam explicabant veritatem entitatiuam, ut illa definitio Augustini, Veritas est id quod est; & illa Avicennæ: Veritas est proprietas sui esse quod stabilitū est ei: quædam verò explicabant tantum veritatem formalem, ut cum dicitur ab Anselmo, Veritas est rectitudo sola mente perceptibilis, & ab August. Veritas est summa similitudo principij, quæ sine dissimilitudine est. Alia verò definitio veram veritatē complectitur, scilicet quod veritas est adæquatio rei, & intellectus: & hæc dicit D. Thom. ad vtrumque pertinere, scilicet ad vtramque.

utramque veritatem transcendentalem, & formalem, quia in utraque relucet adæquatio intellectus, & rei; non tamen dixit D.Th. quod eodem modo pertinebat, & inueniebatur in utroque, nec dixit quod non minus inuenitur in rebus, & in intellectu, bene enim stat quod pertineat ad utrumque, sed non æqualiter, & eodem modo; veritas enim formalis pertinet intrinsecè ad intellectum, & denominatiuè ad res: veritas verò transcendentalis pertinet intrinsecè ad omnem entitatem.

14 Secundum dictum etiam probatur esse de mente D.Thom. Nam in primis quod verum addit super ens aliquam habitudinem ad intellectum generaliter loquendo, nec aliter distinguatur conceptus entis, & viri, nisi per istas habitudines, docet in q. I. de ver. a. 4. in fine corp. & a. 8. in corp. & q. 21. de ver. a. 1. & in pref. art. 1. Quod verò addat duplicem habitudinem, scilicet ad intellectum diuinum, seu artificialem à quo res causantur, & ad intellectum creatum quem ad sui cognitionem mouent, manifestè docet q. I. de ver. art. 2. in corp. vbi dicit; *Res naturalis inter duos intellectus constituta secundum adæquationem ad utrumque vera dicitur; secundum enim adæquationem ad intellectum diuinum dicitur vera in quantum implet hoc ad quod est ordinata per intellectum diuinum; secundum autem adæquationem ad intellectum humanum dicitur res vera in quantum nata est de se formare veram estimationem.* Et a. 4. in fine corp. dicit quod veritas, quæ est in ipsa re, non est aliud quam entitas intellectui adæquata, vel intellectum sibi adæquans. Et art. 6. Res dicitur vera per comparationem ad intellectum diuinum, & humanum. Et art. 5. ad 2. Res ipsa ex specie quam habet, diuino intellectui adæquatur, sicut artificialis arti, & ex virtute eiusdem speciei nata est sibi intellectum nostrum adæquare. Quæ omnia confirmat S. Doctor in pref. art. 1. vbi dicit, veritatem per se dependere ab intellectu à quo habet esse, sicut res naturales ab intellectu diuino; per accidens autem ab intellectu à quo solum cognoscibilis est, non verò ab illo habet esse, sicut respectu nostri intellectus.

15 Quod autem in hac duplici habitudine principalior sit illa quæ est ad intellectum diuinum à quo causatur veritas, quam respectu illius in quo veritas rei causat veritatem, docet ipse D.Th. q. 1. de ver. art. 2. quia prius, & magis per se est veritatem esse in se, quam estimationem veram de se causare in alio; hoc enim supponit iam veritatem in se, & sic est aliquid consecutum ad ipsam, non per se primò constituens. Quod verò hæc habitudo sit intrinseca ipsi rei, & sumatur per ordinem ad ideas diuinas, atque adeò non minus realis sit in ipsa re, quam entitas eius, & dependentia ab ideis, sumitur ex eodem D.Th. in pref. q. a. 1. vbi inquit quod res artificiales dicuntur vera per ordinem ad intellectum nostrum: dicitur enim domus vera quæ assequitur similitudinem formæ, quæ est in mente artificis. Et similiter res naturales dicuntur esse vera secundum quod assequuntur similitudinem specierum, quæ sunt in mente diuina; dicitur enim verus lapis quia assequitur propriam lapidis naturam secundum conceptionem diuini intellectus. Et q. 1. de ver. a. 2. docet quod res naturalis dicitur vera secundum adæquationem ad intellectum diuinum, in quantum implet hoc ad quod est ordinata per intellectum diuinum. Constat autem quod ordinatur per intellectum diuinum mediantibus ideis. Et a. 8. dicit quod in rebus est veritas secundum quod imitantur intellectum diuinum, qui est earum mensura, sicut ars est mensura omnium artificiorum. Et infra: Res autem existens extra animam per formam suam imitatur artem diuini intellectus, & per eandem nata est facere de se veram apprehensionem in intellectu humano, per quam etiam formam vnaquæque habet esse. Vnde constat ponere D.Th. habitudinem illam veritatis ad intellectum diuinum in ipsamet habitudine quam habent res creatæ ad ideas di-

Ioan. à S. Thoma in 1. part. D.Th. Tom. 2.

uinas, quam constat realem esse in vnaquaque re, eo modo quo entitas ipsa, scilicet in statu existentia ut existens, in statu possibilitatis ut possibilis.

Quod autem veritas prima, quæ est veritas Dei, non importet habitudinem conformitatis cum intellectu diuino, sed summam vnitatem cum eo, constat, quia veritas prima non habetur per participationem, & deriuationem ab alio, sed quia in se est prima regula, & mensura cæterorum, & est ipsum intelligere, & ipsum esse à se; ergo habet veritatem, non per adæquationem, sed per summam identitatem, & vnitatem cum veritate intellectus diuini; nec enim est veritas mensurata per intellectum, sed ipsum intelligere diuinum; vnde dicit S.Th. in pref. a. 5. quod esse diuinum non solum est conforme ipsi intellectui, sed etiam est ipsum suum intelligere, & suum intelligere est mensura, & causa omnis alterius esse, & omnis alterius intellectus, & ipsi est suum intelligere, & suum esse: Vnde sequitur quod non solum sit sua veritas, sed summa, & prima veritas. Videatur etiā ibi ad 2.

Fundamentum ex ratione.

Stabilito quod hæc sit mens D.Th. restat tradere eius fundamentum circa hæc duo dicta, & ex ipsis inferemus aliqua corollaria pro maiori eius explicatione. Sumitur autem fundamentum ex vnicò principio, scilicet quia veritas entitatiua in creatis debet sumi secundum aliquam mensuram, & regulam, qua discernamus id quod legitime, & proprie est tale, ab eo quod spurie, & fictè, seu falsò: possumus autem triplici mensura, seu regula discernere proprietatem, & legitimationem, seu veritatem alicuius rei à spurietate, vel fictione, seu falsitate. Primò, ex propriis, & originalibus causis eius. Secundò, & prædicatis constitutiuis. Tertiò, ex effectibus, & accidentibus sibi debitis. v.g. si volumus discernere aurum verum nobilitatem veram, filium verum, & legitimum, possumus vti aut causis originalibus, ut quod hoc aurum in mineralibus auris est genitum, hunc esse verum filium, aut verè nobile, quia à parentibus nobilibus procreatus. Possumus secundò discernere hoc esse verum aurum, verum hominem, quia ei conueniunt essentialia prædicata, & definitio auri, vel hominis. Denique ex proprietatibus, seu accidentibus iudicamus hoc esse verum aurum, quia conueniunt ei proprietates auri, color, fulgor, pondus, soliditas, &c.

Igitur ex accidentibus, & proprietatibus non possumus tanquam ex mensura, & à priori iudicare veritatem rei; quia accidentia, & proprietates supponunt naturam, & essentiam à qua dimanant: ergo & veritatem entitatiuam talis rei, quia proprietates veræ ad veram naturam sequuntur, ut proprietates auri ad verum aurum. Supponunt ergo, non præbent veritatem naturæ, & essentiæ: Solum ergo deferuiunt ad veritatem rei indagandam, & notificandam nobis à posteriori, qui vitimur imperfecta cognitione: sed tamen ex hoc etiam falsitas in nobis provenire solet, quia ex similitudine accidentium volumus iudicare de veritate substantiæ, cum non sit talis. Ex prædicatis autem constitutiuis optimè iudicatur veritas rei, illud enim est verum aurum cui competunt prædicata, & definitio auri. Sed tamen hæc non se habent ut mensura, & regula veritatis; veritas autem per adæquationem & legitimationem debet sumi, quia omnis legitimatio rei, qua discernitur ab eo quod spurium, & fictum est, penes aliquam mensuram debet accipi, qua fiat talis discretio. Nihil autem est mensura sui: ergo nec definitio, & prædicata essentialia sunt mensura essentiæ. Quare licet sit verum aurum cui conuenit definitio, & essentia auri, tamen hoc ipsum quod est habere talem essentiam, & talem formam, & definitionem, quæ debita est auro, ex aliquibus principiis habet, à quibus originatur, & participatur talis forma, & talis essentia, Et ista prin-

D

cipia

cipia sunt ideæ diuinæ, & veritas diuina, vnde sumitur omnis specifica determinatio rei, & essentia, seu formæ, quæ illi conuenit, sicut res artificiales ab arte, & ideis artificis. Vnde S. Th. in *præf. art. 1. & q. 1. de ver. art. 1. & in 1. dist. 19. q. 5. a. 1.* inter alias definitiones veritatis, acceptat etiā illam, *veritas est id quod est*; & illā Auicennæ, *veritas est proprietas sui esse, quod stabilitum est ei*; sed dicit istas definitiones dari de veritate fundamentaliter; fundamentum enim veritatis est esse proprium rei, & cui conuenit essentia propria, conuenit veritas talis rei; sed veritas non est sola quidditas, sed conformatio illius quidditatis cum illis principiis; vnde talis essentia tali rei accommodatur, & determinatur: & hæc sunt ideæ diuinæ, à quibus omnia formantur, & distinguuntur in suis quidditatibus. Restat ergo veritatem sumi per adæquationem, & regulationem primo modo, scilicet ex conformatione, & adæquatione cum suis causis originalibus; non quidem ex causis efficientibus, aut materialibus, quæ indifferentes esse solent ad varias res formandas, sed ex formalibus, præsertim si originem præbeant, vnde sumatur distinctio, & formatio rei, sicut sunt formæ ideales.

18 Ex hoc ergo principio probatur in primis primum dictum allatum ex D. Th. nam ex vna parte constat veritatem non importare conceptum entitatis sub ratione absoluta entis, sed sub respectiva, scil. sub adæquatione, & regulatione ad aliquam mensuram, per quam discernatur verum à falso, legitimum à ficto. Ex alia verò parte constat hanc regulam in naturalibus esse ideam diuinam, in artificialibus ideam artis; licet enim nos non possimus vti idea diuina tanquam regula ad cognoscendam veritatem rei, sed ex accidentibus, quasi ex effectibus veniamur illam, tamen hæc veritas transcendentalis non dependet ab eo quod nos intelligimus, vel mensuramus, sed ex eo quod in re participatur à tali idea, quæ in pondere, & mensura omnia facit, quatenus iuxta cuiusque debitum illi paritur quod proprium, & legitimum est ei. Rursus habitudo rei ad ideas diuinas intrinseca, & realis est, quia participatio ab ipsis realis est: ergo veritas quæ in hac adæquatione, & regulatione consistit intrinseca, & realis est ipsi entitati. Et tunc aliquid dicitur legitimum, & verum habere esse cum conformatur ei quod sibi idea diuina constituit, tanquam primo exemplari, & mensuræ per quam regulatur id quod vnicuique proprium est, & legitimum ei: Denique hæc habitudo habet causas, & fundamentum reale, subiectū & terminum: cur ergo realis non erit? De termino constat, quia est ipse Deus, & idea eius de subiecto, quia est ipsa entitas creaturæ, quæ realis est; de fundamento, quia est ipsa participatio ab ideis, commensuratio, & adæquatio cum ipsis: ergo si in hac fundetur veritas, quia per hanc discernitur, & distinguitur à falso, & spurio, quod legitimum, & verum est, utique relatio hæc veritatis transcendentalis in creaturis existentibus realis erit, in non existentibus possibiliter realis erit, sicut & ipsamet entitas creaturæ.

19 Quod verò ista veritas transcendentalis non sit extrinseca denominatio à veritate formali, quæ est in intellectu, licet ipsa veritas formalis primario in intellectu sit: transcendentalis enim veritas debet habere habitudinem in se ad illud principium à quo regulatur eius legitimatio, & proprietas, & hoc diximus esse ideas diuinas; licet autem talis habitudo sit ad intellectum diuinum in quo sunt ideæ, tamen non per extrinsecam denominationem ab eo redduntur veræ, sicut res denominantur cognitæ, sed redduntur causatæ, & participatæ à talibus ideis, reali, & propria causatione, ut *disp. præc.* ostensum est; quod autem realiter causatum est non determinatione extrinseca conuenit, sed intrinseca realitate: Ergo veritas transcendentalis quantum ad istā habitudinem qua respicit intellectu

ut ideantem, regulantem, & causantē se, non est denominatio extrinseca ab intellectu veritate proneniens, sicut rem esse cognitā, sed sicut rem esse effectā, & participatā in realitate sua. Cæterum veritas formalis, quia consistit in expressione veritatis, & attingentia qua adæquatur ipsi obiecto in se, clarum est solum posse inueniri intrinsecè in intellectu; extra illum verò non posse denominare intrinsecè, sed extrinsecè res expressas, & verificatas à se, ut dicemus *art. seq.*

20 Ex eodem fundamento prob. 2. dictum nostræ sententiæ. Nam quod veritas dicat illam duplicem habitudinem primò ad intellectum à quo regulatur, & causatur, seu ad ideas diuinas, deinde ad intellectum quem mouet ad sui existimationem, constat, quia veritas transcendentalis in ipsa entitate est mensuratio, & regulatio penes mensuram, & regulam à qua verificatur & legitimitur, discerniturque ab eo quod falsum, aut fictum est tale, quasi dicatur per veritatem transcendentalem res aliqua verificata, seu comprobata, aut legitimita in eo quod est; veritas autem formalis dicitur quasi mensurans, seu manifestans legitimationem, & verificationem rei, quæ ad duo debet respicere, scil. ad id à quo pendet talis legitimatio, & verificatio, & ad id in quo fit æstimatio, & manifestatio talis legitimationis, & verificationis: inde enim constat legitimatio, & veritas rei, quod & in se sit legitima per commensurationem ad suam regulā, & principium vnde sumit commensurationem suā, & legitimū esse, & quod æstimationem sui verā facere possit in aliorum mentibus. Et prima habitudo est ad ideas diuinas, à quibus omnis rerum mensuratio, & debita proprietas, ac legitimum esse dependet. Secunda autē est ad intellectum creatum, quem mouere, aut terminare possunt, veram sui existimationem in eo ponendo. Constat etiā quod prima habitudo debet principalior, & prior esse in veritate rei, secunda verò consecutiue se habens ad illam; eo quod prius, & principalius est id quod pertinet ad constituendum rem in se, quàm ad perficiendum aliud: veritas autem respicit ideas diuinas ut constituatur in se, & causetur in se per participationē ab illis, respicit autem intellectum creatum ut perficiendū à se, & tanquam obiectum, & fundamentum veritatis illius: ergo iam supponitur in se habens veritatē transcendentalem, quæ est veritas obiectiua, & sic per illam habitudinem ad nostrum intellectum non potest constitui transcendentalis veritas ut transcendentalis est, & entitatiua, sed consequi ad ipsam, & sic minus principaliter se habet inter istas duas habitudines respectu veritatis entitatiuæ constituendæ: denominatio autem quæ à veritate formali deriuatur ad res extrinsecè, non constituit in se veritatem transcendentalem, sed super illam cadit, eamque supponit, sicut & entitatem ipsam. Quæ omnia procedunt de veritate transcendentali creata, quæ est veritas mensurata, & participata, & per hoc quod participata, & regulata sit per adæquationem ad diuinam, constituitur in ratione talis veritatis creata; quod verò sit etiam mensurans veritatē nostri intellectus, est quid posterius & supponens ipsam veritatem creatam in se constitutam, sicut ens creatum ut tale constituitur per participationem à Deo; quod verò ab ente creato aliud ens deriuetur, est consecutum & posterius in eo, quia iam supponitur ipsum esse creatum constitutum, quando aliud perficit: loquendo autem de veritate increata, quæ est veritas prima, illa est purè mensura, & non mensurata, & sic non constituitur per adæquationem, & regulationem cum alio mensurante, sed per summam identitatem cum intelligere diuino ut iam *suprà* diximus.

21 Quod autem habitudo ista veritatis transcendentalis ad nostram intellectum sit habitudo rationis, constat, quia veritas transcendens respectu nostri intellectus se habet ut obiectum, & ut mensura, intellectu

Etus verò noster vt mensuratum : inter mensuram autem, & mensuratum, obiectum, & potentiam non est mutua relatio, sed ex parte mensurati est realis, ex parte mensuræ, seu obiecti, rationis: ergo sic est in proposito.

Corollaria ex dictis.

22 Infero in primis ex dictis concordiam D. Thomæ cum aliquando dicit veritatem, quæ est passio entis, scilicet transcendentalem, addere super ens aliquid rationis, aliquando verò dicere aliquid reale, & intrinsecum ipsi entitati: nam in q. 21. de verit. art. 1. dicit quod verum, & bonum non possunt addere super ens, nisi relationem rationis, quam tamen relationem dicit esse qua verum est perfectiū intellectus, quatenus perficit intellectum, non secundum esse naturale, & entitativum, sed intentionale, & hunc modum perficiendi, inquit, addit verum supra ens. At verò in q. 1. de verit. art. 4. & aliis locis supra adductis docet veritatem esse intrinsecam formam in ipsa entitate, nec solum per denominationem extrinsecam convenire. Quæ duo non pugnant inter se, quia verum, vt diximus, importat duplicem illam habitudinem, scilicet ad intellectum diuinum cui adæquatur, & per quā regulatur, & ad intellectum creatum quæ adæquat sibi. Hæc secunda habitudo est rationis, prima verò realis, nec aliud est quàm ipsa entitas vt dependens, & participata à Deo præsupponiturque ad istam secundam. Quando ergo D. Thomas dicit veritatem esse aliquid intrinsecum ipsi entitati, loquitur de veritate secundum primam habitudinem tantum; quando autem dicit addere aliquid rationis supra ens, loquitur iuxta secundam habitudinem: & verè sic dicendum est, quia licet prima habitudo sit principalior, & intimior in veritate transcendentali, non men superaddere dicitur ad ens, quia est ipsa entitas rei vt dependens à Deo ipsique intimè imbibita; quare sub ista habitudine præcisè nondum intelligitur superaddere ad ens, sed ipsi æqualiter, & transcendentaliter identificari. Solum ergo incipit addere supra ens, quando incipit connotare secundam habitudinem, quæ est aliquid rationis: nā supra ens nō potest addi quod est intra ipsum ens, seu entitas ipsa: si ergo addit supra totum ens, aliquid solum rationis esse potest. Et ita verum addit ad ens, non pro ea parte præcisè quæ dicit perfectionem veritatis in se per passivam adæquationem, & regulationem sui ad Deum, seu ideas diuinas, sed pro ea parte, qua est perfectiū intellectus creati; sic enim non reali habitudine, & dependentia se habet ad illum, sed habitudine rationis, quatenus obiectū eius est. Vnde signatè D. Thom. q. 1. de verit. art. 4. & 8. dicit quod verum addit supra ens habitudinem ad intellectum diuinū, vel humanum, vt ibi non solum inuolueret habitudinem realem quam habet veritas ad Deum, sed etiam rationis, quam superaddit ad ens dum connotat ordinem ad nostrum intellectum: in q. autem 21. de verit. art. 1. & in 1. dist. 19. q. 5. art. 1. in fine corp. vbi expressius distinxit quid adderet verum super ens, ostendit addere aliquid rationis, in quantum est perfectiū nostri intellectus.

23 Secundò infertur veritatem transcendentalem optimè dici passionem entis, quod malè negat Vasq. hic disp. 77. c. 5. sed tamen cōmuniter in metaphysica appellantur passionem entis vnum, verum, & bonū, quia omne ens necessariò concomitantur, & non explicat ipsum constitutum entitatis, sed connotationem, aut concomitantem constituti. De quo videri potest, S. Th. q. 21. de ver. a. 1. & q. 1. de ver. 1. & in præf. a. 3. Aliter autem considerandæ sunt passionem in rebus prædicamentibus, v.g. in substantia, quæ habet pro passionibus aliqua accidentia, aliter in transcendentali-

Joan. à S. Thoma in 1. part. D. Th. Tom. 2.

bus, vel in Deo: nam transcendentale vt ens, non potest habere pro passione aliquid omninò extra se, & distinctū à se, sicut substantia habet pro passione aliquid quod accidens, quia id quod est transcendens, intimè imbibitur in omnibus, & sic non potest omninò discerni, & distingui ab eo quod est passio; sed solum distinguuntur passionem in transcendentalibus penes diuersas connotationes & expressiones eiusdem rei, vt notat D. Th. q. 1. de ver. citata art. 1. sicut etiā attributa diuina concipiuntur à nobis per modum passionum, non quæ sint distinctæ ab essentia Dei, sed quæ diuersum in nobis conceptum exprimunt ab essentia. Et sic ipsum ens vt in se habens esse, & prædicata constitutiva pertinet ad conceptū essentiae; vt autem incipit exprimere connotationem aliquā extra se, v.g. comparisonem ad intellectum, vel ad voluntatem, sic ipsum ens vt comparatiuè, se habet vt propria passio suimet vt absolutè. Nec tamen vt exprimit habitudinem realem præcisè importat passionem, quia pro vt sic adhuc intra limites ipsius entitatis continetur vt entitas est, & sic non explicat, neque connotat aliquid ultra ipsam, quo se habeat vt passio, sed adhuc ipsam entitatem solum explicat: potius ergo dicitur veritas superaddere respectum rationis ad conceptum entis, licet prius includat habitudinem illam priorem ad intellectum diuinum cui conformatur, quia per hanc priorem habitudinem, quæ entitatiua est, adhuc entitas ipsa consideratur, non connotatio superaddita, quæ rationis solum esse potest, si superadditur ad ens.

24 Tertiò colligitur quod licet D. Th. dixerit veritatem primariò, & propriè reperiri in intellectu, quia ibi solum est veritas formalis, in rebus autem non est veritas formalis intrinsecè, & propriè, sed solum transcendentalis, quæ est fundamentum, & obiectū formalis, non tamen dixit quod veritas formalis est perfectior, aut nobilior quàm entitatiua, & transcendentalis, neque hoc necessariū est: dicitur enim veritas formalis (quæ est in intellectu) primariò in ratione, & denominatione veri, non quia principalior, aut nobilior, sed quia ibi completur, & consummetur motus, & tendentia veritatis. Vt autem aduertit S. Th. q. 1. de ver. art. 2. in illis quæ dicuntur per prius, & posterius de multis, non semper requiritur quod id quod per prius recipit prædicationem, sit vt causa aliorum, sed illud in quo primò ratio illa communis completur, sicut sanū per prius dicitur de animali, & tamen medicina est causa sanitatis. Verum autem completur intra intellectum quia cum cognitio versetur circa verū, sicut voluntas circa bonum, debet verum consummari intra intellectum, quia cognitio perficitur trahendo obiectū ad se. Non ergo dicitur veritas primariò de veritate formali nostri intellectus, quia illa perfectior sit transcendentali à qua regulatur, sed quia in intellectu consummatur, & completur motus veritatis, & manifestatio eius trahendo obiectum ad se; in artificialibus autem veritas eorum, quæ est in re, etiam dependet à veritate formali artificis creati, sicut veritas naturalis à Deo: sed tamen veritas artificialis non est transcendentalis, & communis omni enti.

25 Vltimò, colligo in veritate transcendentali habitudinem regulationis passivæ ad diuinum intellectum ideantem, & regulantem non esse conformitatem aptitudinalē, sed actualem, habitudinem autem ad nostrum intellectum non debere esse actualem conformitatem, sed sufficere aptitudinalem, quatenus perfectiū est nostri intellectus, nō autem semper actu perficiens. Sumitur ex D. Th. q. 1. de ver. a. 2. ad 4. vbi inquit, quod in definitione rei vera potest poni visio in actu intellectus diuini, non autem visio in actu intellectus creati, nisi in potentia tantum. Et ratio est, quia veritas, sicut & entitas creata semper actu pendet, & participatur à Deo, si

D 2 vera

vera est, non autem in potentia tantum, nisi desinat esse, & maneat in statu possibilitatis: at verò quòd actu moueat, aut cognoscatur ab intellectu creato, accidentarium illi est; nec enim veritas transcendentalis pendet ab intellectu creato, sed à diuino: vnde si Deus remoueret modò omnem intellectum creatum, & remaneret reliquæ creaturæ, tam veræ manerem, tanquam nunc sunt, etsi nullum creatum intellectum actu mouerent: sufficit ergo ad veritatem transcendentalem, quòd possit mouere intellectum creatum, etsi non actu moueat, requiritur autem quòd actu participetur ab intellectu diuino, si actu datur veritas. Quòd si res pereat, dicitur adhuc manere veritas illius rei nò in se actu, sicut enim actu nò est entitas, ita nec veritas, quæ ad eam sequitur, & cum illa identificatur; dicitur tamen remanere veritas, quia vel manet in memoria, seu intelligentia creati intellectus, vel si omnis intellectus creatus deesset, maneret in intellectu diuino, quo sublato nulla esset veritas. Videatur D. Thom. q. 1. de verit. cit. art. 2.

Soluntur argumenta.

26 Primò arguitur auctoritatibus ad probandum non esse veritatem in rebus, sed ordinem ad veritatem, quæ solùm est in intellectu. Nam in primis Philos. 1. *Peri herm.* 1. & 6. *met. c. 2.* docet, veritatem solùm esse in compositione, & diuisione; & ibidem textu 8. dicit quòd *verum, & falsum non est in rebus, sed in mente*; quod etiam ex ipso affert S. Th. in *presenti art. 1. in argum.* Sed contra, Ergò secundum Philos. non inuenitur veritas in rebus, sed in intellectu; in rebus autem solùm est ordo ad veritatem.

27 Confir. quia S. Thom. dicit *hic q. 17. art. 1.* quòd cum verum, & falsum opponuntur, ibi primùm querenda est falsitas, vbi primùm veritas inuenitur: falsum autem à D. Thom. ibi, & à Philos. 5. *met. c. 29.* non ponitur in rebus, sed in mente, res enim falsæ esse non possunt in se, quia id quod sunt, verè sunt, quod autem non sunt, non dicuntur falsò esse, sed absolutè non esse, nec enim homo est falsus equus, quia non est equus, aliàs omnis res falsò esset alia, quod non est: Ergò similiter veritas solùm est in mente, & non in rebus, quia eadem ratio contrariorum est. Et in hac consequentia à falsitate ad veritatem, ferè tota vis rationum Vsq. versatur, quia si non est falsitas in rebus, neque veritas.

28 Resp. Aristotelem manifestè loqui de veritate formali, quando dicit illam esse solùm in mente, quod & nos libenter fatemur, solùm enim transcendentalem veritatem ponimus intrinsecè in rebus, formale in intellectu, & inde denominatiuè ad res. Hæc explicatio est D. Th. 1. *Peri her. lect.* vbi inquit: *Veritas in aliquo inuenitur dupliciter; vno modo, sicut in eo quod est verum: alio modo sicut in dicente, vel cognoscente verum inuenitur autem veritas sicut in eo quod est verum tam in simplicibus, quàm in compositis: sed sicut in dicente verum non inuenitur nisi secundum compositionem, & diuisionem.* Quod ibi probat ex Philos. 6. *Ethic.* & ostendit quomodo res non dicantur veræ essentialiter, vel formaliter per ordinem ad nostrum intellectum speculatiuum, sed per ordinem ad intellectum artificiantem, & ideantem, sicut res omnes naturales per ordinem ad intellectum diuinum, qui eis tribuit formam suam. Et subdit S. Doctor quòd Philos. in 6. *met.* dicit quòd *veritas est solùm in mente, scilicet sicut in cognoscente veritatem*, quod pertinet ad veritatè formalem. Manifestè ergo D. Thom. explicat vtrumque locum Philosophi de veritate formali, quam nos dicimus esse intrinsecè solùm in intellectu, in rebus autem denominatiuè, sicut de sanitate formali dictum est sæpè. Veritas autem transcendentalis, quæ est fundamentum veritatis formalis, in rebus est intrinsecè,

Ad Conf. Resp. verissimum esse quòd ibi primò 29 inuenitur falsitas, vbi & veritas, scilicet falsitas formalis; nam falsitas transcendentalis dari non potest, sicut veritas transcendentalis; cum enim veritas sit passio entis, & sequatur omne ens, vt comparatum, & adæquatum diuinis ideis, respectu quarum non potest esse deficientia in rebus, atque adeò nec falsitas, quia quidquid in rebus est, ex aliqua idea diuina est, & sic impossibile est quòd falsitas transcendentalis inueniatur, id est, quæ per omne ens transcendat, & omni enti conueniat, aut in entitate ipsa imbibatur intimè; & impossibile est quòd falsitas inueniatur per inadæquationem, & deficientiam ab idea, & intellectu diuino, respectu tamen cuius veritas inuenitur, & adæquatio. Quare falsitas solùm potest inueniri in rebus penès aliam habitudinè, scilicet per ordinem ad intellectum nostrum, cuius veritas est regulatiua, non penès intellectum diuinum, à quo solùm est regulata: respectu enim intellectus nostri potest aliquid deceptiuè, & simulatoriè se habere, quatenus conuenit aliquid cum alio in similitudine accidentium, & non in substantia, per illam autè similitudinem fallit, & in aliud inducit, seu declinare facit. Et hæc est falsitas rei, vnde nò omni rei còuenit respectu eius quod non est, sed solùm conuenit rei habenti similitudinè accidentalem cum alio, & sic occasionantem deceptionem. Quare falsitas solùm contrariatur vero entitatiuo in vna habitudinè, scilicet in ea qua ad intellectum nostrum importat verum; in ordine enim ad illum dari potest deceptio, seu occasio, & fundamentum deceptionis ex parte rerum, non respectu intellectus diuini. Quando autem dicit Philosop. quòd falsum non inuenitur in rebus, loquitur de falso formali, sicut idem dicit de veritate: non tamen negat inueniri etiam falsitatem obiectiuè in rebus, eo modo quo res possunt occasionare deceptionem; dicit enim quòd *falsum dicitur vno modo vt res falsa, & huius quidem quod non componitur, &c.* vbi & designatur veritas formalis respectu compositionis, & obiectiua respectu huius quod est res dici falsa. Et similiter dicit quòd *res falsa dicuntur, aut quia non sunt, aut quod phantasia ab eis facta entis non est.* Vbi in ly quòd non sunt, falsitas obiectiua in ly quòd phantasia entis non est, formalis falsitas designatur.

Secundò, arguit. ad probandum veritatè non posse 30 consistere in commensuratione ad intellectum diuinum: quia veritas transcendentalis in eo debet consistere quòd superaddit ad ens, quia habet se vt passio entis, & conceptus eius formalis à conceptu entis distinguitur: ergo in eo in quo distinguitur, & quod superaddit ad ens debet consistere: sed habitudo ad intellectum diuinum, vt ideantem, est realis in qualibet creatura: ergo talis adæquatio non potest formaliter pertinere ad veritatè transcendentale. Consequentia parte, quia cum realis sit, ad ipsam entitatè pertinet: non ergo ad passionem entis, & ad id quo distinguitur verum ab ente. Minor etiam est manifesta, & à nobis concessa, quia illa dependentia qua res dependent ab ideis diuinis, & regulantur ab illis, realis est, fundatur etiam in causatione reali: illa ergo non constituit veritatem in ratione passionis entis, & vt aliquid ei superadditum, & condistinctum, sed adhuc ad ipsam rationè entitatis, & realitatis pertinet: ergo nò importatur formaliter in conceptu veritatis.

Conf. quia veritas vt transcendentalis debet inue- 31 niri non solùm in rebus creatis, sed etiam in Deo: in Deo autem veritas non includit illam habitudinem commensurationis ad intellectum diuinum, quia ab eo non pendet: ergo neque id potest esse de ratione veritatis vt transcendentalis.

Conf. 2. quia potiùs illa habitudo ad ideas, & ad in- 32 tellectum fundatur in veritate transcendentali, & supponit

ponit illam, quàm constituat; ergo formaliter non pertinet ad illam. Antec. probatur, tum quia illa habitudo fundatur in ista creatura ut facta per istas ideas potius, quàm per alias; nec enim aliud fundamentum habet quàm creaturâ ipsam: ergo iam supponit propriam, & determinatam speciem huius rei sibi datam & attributam ab ideis: ergo supponit veritatem rei, hæc enim consistit in eo quòd sibi tanquam propriâ, & legitimum attributum est ab ideis diuinis. Tum etiam in artefactis; non enim idèd domus aliqua est vera domus quia respicit intellectum artificis, sed ideo potius respicit ideam artificis, quia vera domus est, scilicet tali materia, figura, & dispositione facta: ergo non consistit in illa habitudine vera domus, nam etiam illa relatione præcisa, & manente toto absoluto illius artefacti, vera domus manebit.

33 Resp. distinguendo maiorem: Veritas transcendentalis debet consistere in eo quod superaddit ad ens tanquam in constitutiuo formali, & adequato sui, nego, tanquam in connotato, aut modo requisito ut distinguatur proprietas veritatis, transeat. Cuius ratio est, quia formale constitutiuum veritatis transcendentalis etiam aliquid transcendentalis esse debet, quia ipsa formaliter transcendentalis est, & passio entis realis. Vnde quia passio est entis realis, non potest formaliter esse ens rationis, sic enim esset nihil in re, & quid fictum; passio autem quæ formaliter est nihil, formaliter non est passio: & quia transcendentalis est formaliter, debet imbibere in ipso ente, & in se imbibere ipsum ens, aliàs transcendentalis non esset. Certè cum veritas sit id quo formaliter ens segregatur ab ente ficto, & à falso, magnum absurdum est ipsam veritatē formaliter constitui aliquo ente rationis quod fictum est. Quare in transcendentalibus non sunt assignandæ propriæ passionēs, sicut in aliis particularibus entibus, in quibus passionēs dimanant ab essentia, & sunt alia entitas ab ipsa distincta; in transcendentalibus autem cum etiam ipsa passio transcendentalis sit, & enti æqualis, oportet quòd in ipso ente imbibatur veritas, & entitas in veritate: solum ergo addere debet vnus conceptus ad alterum, non in aliquo formali constitutiuo, talis transcendentiæ, sed in aliquo connotato, quo posito, illamet entitas quæ secundum se, & absolute sumpta se habet ut subiectū, sub illo connotato præsupposito, sumpta comparatiue, seu ut fundans tale connotatum, est proprietas sui ut absoluta entitas est. Sic ergo veritas, & entitas distincto conceptu concipiuntur, non quia vnum formaliter non includat aliud, sed quia per vnum modum, & sub vna connotatione exprimitur entitas in vno sub qua non exprimitur in alio, quæ connotatio non est aliquid reale, sed rationis, necessariò tamen requisitum ut vnus conceptus sic distinguatur ab alio, scilicet per diuersum modum exprimendi eandem entitatem, quia inter transcendentalia, quæ se intimè imbibunt, non potest alio modo formari distinctio, nisi sub istis connotationibus, & respectibus sic diuersimodè exprimentibus.

34 Ad 1. Conf. iam *suprà* diximus quòd veritas prima non est veritas mensurata, sed mensurans, utpote prima, & summa, & sic non per modum adæquationis, sed summæ identitatis conformatur cum intellectu diuino. Veritas ergo transcendentalis in communi ut abstrahit à creata, & increata, dicit conformitatem cum diuino intellectu, abstrahendo à conformitate per regulationem, sicut in creatura, vel per summam identitatem, sicut in Deo.

35 Ad 2. Conf. Resp. procedere illud argumentum de relatione prædicamentali, siue secundum esse fundata super entitate rei, non de transcendentali creaturæ, quæ ex se, & ex intrinseca ratione sua, & non per relationem distinctam superadditam respicit Deū tan-

Joan. à S. Thoma in 1. part. D. Th. Tom. 2.

quam ens participatum, & deriuatū ab illo, sicut materia per suam entitatem respicit formam, & forma materiam, & potentia obiectum relatione transcendentali, quæ non supponit aliam entitatem priorem super quam fundetur, sed ipsa per se respicit, & ordinatur ad aliam ex intima entitate sua. Sic ergo habitudo veritatis ad Deū non est fundata super entitatē creatam, sed est ipsa entitas ut creata, id est, ut regulata, formata, & determinata à Deo per ideas. Idem dicitur de artefactis creatis, quæ sunt effectus artificis: nam secundum suam entitatē intrinsecam constituuntur ut dependentes, & deriuatæ ab idea sua, & sic transcendentali relatione respiciunt ipsam, sicut alij effectus suam causam, licet superaddatur respectus prædicamentalis, qui etiam interuenire potest inter effectum, & causam, sicut inter filium & patrem. Sed per hunc non constituitur intrinsecè veritas entitatiuæ, quæ communis est omni prædicamento, & entitati; sed supponitur, nec est aliud quàm ipsa entitas ut à tali causa. Vnde relatio prædicamentalis inter effectum, & causam solum est ad causam existentem; transcendentalis autem manet etiam non existente causa, quandiu manet entitas effectus ut causata.

36 Tertiò arguit ad probandum quòd veritas transcendentalis non dicatur per ordinē ad intellectum diuinum: non ad cognoscendam veritatē rerum, v.g. verum aurum, aut lapidē, non recurrimus ad exemplaria diuina, sed ad prædicata quidditatiua, & definitionē talis rei, an illi conueniat, necne, & tunc indicatur verum aurum, quando illi cōuenit definitio, & proprietates veri auri; ad ideas autē diuinas non recurrimus, quia illis uti non possumus tanquam mensuris ad notificandum nobis veritatem rerū: ergo in aliquo alio præter relationem ad ideas debet poni cōmensuratio veritatis. Ex alia autem parte sufficienter explicatur veritas rei per hoc quòd alicui conueniat sua definitio cum negatione entis ficti, seu falsi, cum ipsa veritas non sit minùs absoluta, quàm quidditas, & hæc sine habitudine aliqua ad extrinsecam causam, seu ideas explicatur, sed per sua intrinseca constitutiuā. Ad quid ergo recurrimus ad istam relationem ad ideas pro explicanda formali ratione veritatis?

37 Conf. quia in ordine ad intellectum diuinum non sumitur falsitas rei: ergo neque veritas. Conseq. patet, quia veritas, & falsitas versantur circa idem, cum sint opposita. Antec. verò constat, tum quia idea diuina est indeficiens, & infallibilis, non falsa, tū quia Deus est vniuersalissimum agens totius entis: vnde si ab vna idea aliquid deficit, relabitur in aliam, cui conformatur in sua linea, & gradu. Quòd si peccatum deficit à tota causalitate diuina, & ita in eo maximè videtur dari falsitas, tamen hoc non pertinet ad transcendentalē veritatem, sed ad moralem, quæ est malitia; entitas autem causalitati Dei conformatur: ergo in ipsa entitate falsitas transcendentalis nunquam datur per ordinem ad Deum: ergo neque veritas.

38 Resp. aliud esse quomodo non cognoscamus veritatem, & nobis notificetur, aliud quomodo in se constituatur, & commensuretur suis principiis: nos enim non cognoscimus res, nisi sumendo cognitionem ex accidentibus, quia à sensibus dependemus, qui solum accidentia percipiunt; & sic adæquationē veritatis in rebus discernimus penes accidentia, & proprietates, quæ sunt aliquid posterius, & consecutū ad essentiam, atque aded ad veritatē ipsam essentiæ quæ entitatiuè est idem cum ipsa. Quare ad discernendum verum aurum à falso per nostram cognitionem quæ procedit imperfecto modo, & ex accidentibus hauriendo cognitionē substantiæ, non recurrimus ad ideas diuinas, quas non videmus, neque ad prædicata quidditatiua, quæ immediatè nobis nō repræsentantur in se, sed recurrimus ad accidentia, & proprietates

D 3

veri

viri auri, quas experimur, ut colorem, soliditatem, pondus, &c. & id reputamus pro vero auro, quod talibus accidentibus adæquatur. Cæterum licet nos non possimus ad discernendam veritatem rerum vti illi prima mensura à qua deriuantur, sed istis accidentibus per quæ cognoscimus, tamen ob hoc negandum non est ab ipsis ideis, ut à prima mensura desumi veritatem, cum accidentia, ut diximus, supponant veritatem, quia supponunt essentiam à qua consequuntur, atque ad eam veritatem eius, quia à vera essentia consequuntur. Alia ergo prior mensura est, per habitudinem ad quam mensuratio veritatis desumatur, tanquam ab originali, quia omnis creatura est quoddam ideatum, & vestigium Dei, & consequenter per suum originale debet legitimari, & verificari, seu discerni à spurio, & ficto, non per solam suam definitionem nec per solam negationem falsitatis, seu fictionis: nam definitio ipsa cum non sit aliud quam declaratio definiti, & idem prorsus quod ipsum definitum, restat videre unde verificetur, & an legitima definitio sit: eadem enim est veritas definitionis, & definiti, ergo non potest veritas definiti desumi ex definitione ut ex prima regula, à qua veritatem, & legitimationem habeat: hoc enim esset desumi ex se ipsa: si enim dicimus quod ille est verus homo, qui est animal rationale, omnino hoc ita est, sed est perinde ac dicere quod ille est verus homo, qui est homo, quia homo, & animal rationale idem sunt. Similiter negatio fictionis, seu falsitatis non potest constituere veritatem, sed supponere: quod enim est verum, non est falsum, sed negatio ista non potest primò, & per se constituere verum, sed fundari in illo, quia positium non constituitur negatiuo, sicut quod non est tenebrosum est lucidum, sed non constituitur lucidum per negationem tenebrosi: esse autem verum ens, & verè tale, aliquid positium est, verum enim aurum positium est tale, quia perfectio entis est, quod verè & legitime sit tale: imò de ipsa negatione fictionis, seu falsitatis eadem ratio est, unde desumatur, & unde conveniat isti enti negatio ficti, & falsi: omnis enim negatio in aliquo positiuo fundatur, & ad illud consequitur: id ergo quod est ratio ut consequatur negatio ficti, erit ratio ut constituatur positio veri recurrentum ergo est ad principia originalia rerum, quæ formam vnumquodque, & dant illi legitimam, & propriam rationem, quæ sibi debetur, & istæ sunt ideæ diuinæ respectu naturalis entitatis, & quidditatis, non quatenus præcisè producunt rem in sua existentia, sed quatenus determinant vnicuique rei propriam formam, & distinguunt illam ab alia, quæ talis non est, & sic reddunt illam legitimam, & veram, seu distinctam ab eo quod fictum est, & non solum reddunt existentem.

29 Ad confirm. dicitur quod, ut docet S. Thom. *hic quest. 17. art. 1.* nulla res dicitur falsa per ordinem ad intellectum diuinum, & ideam, nisi in actibus voluntariis peccaminosis, quæ totaliter deuiant à Deo, ut à regula moralitatis, & sine. Vnde in ratione malitiæ non habet ideam in Deo, & sic non dicitur falsum per inadæquationem ad aliquam ideam sibi debitam, quia prout sic nulla ei debetur. In ratione autem entitatis materialis peccati, eo modo habet ideam quo entitatem, & per ordinem ad illam veritatem habet, non falsitatem, respectu verò alterius ideæ, quæ sibi propria non est, & à qua non deriuatur, nec ista entitas, nec aliqua alia habet inadæquationem, aut falsitatem, sed disparatè se habet ad illam, quia ad se non pertinet, sicut argentum non dicitur falsò adæquati ideæ auri, vel homo ideæ equi, quia ad se non pertinent istæ ideæ. Quare in entitatibus creatis nulla datur falsitas transcenden-

talis, sed vnum quodque ens siue perfectum, siue imperfectum habet suam ideam, cui in suo genere, & linea adæquatur, & respectu cuius falsitatem non habet, sed veritatem, quia adæquatur ei. Et licet habeat apparentem similitudinem cum alia re, sicut auricalchum cum auro, tamen hoc ipsum verè habet ab idea auricalchi, quæ sibi dat veram similitudinem auri, non tamen habet falsitatem cum idea auri, quia ad se non pertinet, sed disparatè se habet, non falsò, & inadæquatè. Solum ergo induunt respectum falsitatis res per ordinem ad nostrum intellectum quatenus est deceptibilis, & fallibilis à rebus à quibus mouetur, non respectu diuini intellectus, à quo non habent res deficientiam & falsitatem, sed id quod vnicuique debetur. Quod si aliquando res deficient ab eo quod sibi debetur, ut homo gibbosus, aut cæcus, aqua calida, lapis sursum, &c. cum per hoc non amittant essentiam sed in accidentibus varientur, non dicuntur falsæ per ordinem ad ideam suæ substantiæ, & quidditatis, quia in hoc adæquantur ei, sed dicuntur diminutæ, & imperfectæ, quia non perfectè illam participant, id est, quantum ad accidentia sibi debita, adæquantur autem alteri ideæ aliorum accidentium, quæ sibi adueniunt, quæ accidentia suam propriam ideam habent, licet respectu talis rei non sint perfecta, & debita. Si autem res essentiam mutat, corrumpitur, & recidit in aliam ideam, cui verè comparatur, respectu verò alterius præcedentis iam non manet falsa, & inadæquata, sed disparata, sicut respectu alterius cuiuscumque.

Ultimò arguit, ad probandum quod veritas in rebus est extrinseca denominatio à veritate intellectus: nam in primis S. Thom. comparat veritatem quæ est in rebus, & intellectu, sanitati, quæ est in animali, & in cibo, & dicit quod veritas est primariò in intellectu, & secundariò in rebus, sicut sanitas est primariò in animali, & denominatiue in medicina, ut patet in hac 1. p. q. 16. art. 1. & quest. 1. de 2. er. art. 2. ergo sicut sanitas dicitur esse in medicina solum quia causat sanitatem in animali, non verò quia intrinsecè sana, sit ita dicitur veritas esse in rebus solum quia causant veritatem in nostro intellectu, non quia in eis veritas intrinsecè sit, sed solum intrinsecè erit entitas, à qua ut ab obiecto, causatur veritas, quæ est in intellectu, sicut in medicina est virtus causatiua sanitatis, non sanitas ipsa, quæ est temperatura humorum.

Confirm. quia bonitas dicitur in rebus per ordinem ad voluntatem quam ad se inclinat, non per ordinem ad Deum à quo participatur bonitas: ergo similiter se habebit verum respectu nostri intellectus quem mouet, licet à diuino participetur.

Confirm. 2. quia ut præc. solut. diximus, falsitas simplex, & transcendentalis non inuenitur in rebus, sed solum denominatio extrinseca per ordinem ad enunciativam propositionem iudicij, in quo potest esse falsitas: ergo similiter se habebit veritas simplex in rebus: contrariorum enim eadem est ratio.

Resp. quod, ut iam sæpè diximus, quando D. Th. comparat veritatem sanitati, quæ formaliter est in animali, denominatiue in medicina, loquitur de veritate formali, quæ consistit in manifestatione, & expressione veritatis: talis enim manifestatio solum formaliter est in intellectu, causaliter verò in rebus, seu obiectis, in quibus nõ potest formaliter dari manifestatio veri, sed denominantur à formali veritate res veræ, ut causa, vel signum talis manifestationis, seu veritatis formalis; atq; ita in linea, & ordine veritatis formalis, seu veritatis manifestatæ, quidquid extra intellectum est, denominatur in ordine ad formalem veritatem extrinseca denominatione, quia nihil manifestationis

nifestationis potest esse extra intellectum intrinsecè, & propriè, sed denominatiuè & extrinsecè, sicut sumpta sanitate pro temperatura humorum, non potest extra animal inueniri, nisi extrinsecè, & per denominationè, non intrinsecè, & propriè; sanitas autem virtualis, seu sanatiua, id est, virtus ad sanandū est intrinsecè in medicina, & si illa vocaretur sanitas, diceremus sanitatem formale esse intrinsecè in animali, & extrinsecè in medicina, sanitatem verò sanatiuam esse intrinsecè in medicina. Sic ergo veritas transcendentalis, quæ non est formalis veritas, id est, non est ipsa forma, & manifestatio veritatis, sed est veritas mensurata, seu verificata à mensura diuina, est intrinsecè, & propriè in rebus, licet deriuata ab intellectu diuino, sicut etiam ipsa entitas, & quidditas creata est intrinseca rei, licet sic participata à Deo. Nec solum dicitur res vera per ordinem ad conceptum nostrum, quia etiam si nullus daretur intellectus humanus, vel creatus, res dicerentur veræ, & aurum esset verum, quod haberet essentiam auri participatam ab idea diuina, vt docet D. Th. q. 1. de verit. ar. 2. in fine corp. Non ergo, vt dicit Vasq. ex sola denominatione ad intellectum nostrum veritas Dei dicitur in rebus, sed etiam illo ordine remoto, & manente ordine ad intellectum, & ideas diuinas, qui ordo intrinsecus, & realis est in rebus, manet veritas transcendentalis. Itaque manifestatio veritatis formaliter est in intellectu, denominatiuè in rebus, transcendentalis autem veritas, quæ est ipsa legitimatio talis essentie per ordinem ad suum principium originale realiter est in rebus.

44 Ad 1. conf. Resp. quod bonitas sequitur ad ens vt perfectum, non solum in ipso esse, & quidditate, & in ipsa perfectione vt informante, & constituyente subiectum, sed vt finalizante, & mouente appetitum, quia bonum est diffusiuum sui, & id quod omnia appetunt: diffunditur autem bonitas, seu perfectio non præcisè constituendo subiectum, sed mouendo appetitum: At veritas transcendentalis (de qua solum loquimur) non consistit solum in eo quod est mouere intellectum, vt manifestetur, sicut bonum vt appetatur, sed præcipuè consistit in legitimatione ipsius rei, & discretionem eius ab eo quod fictum aut falsum est: legitimatio autem, & segregatio ab eo quod est fictum debet fieri per aliquam mensuram, seu regulam qua id discernatur. Quare prius est in veritate transcendentali regulari, & discerni à ficto, quam regulari, & mouere nostrum intellectum: regula autem & mensura rerum naturalium est idea diuina, sicut artificialium idea artificis; & ideo in respectu commensurationis ad ipsam principaliter veritas consistit. Vtraque ergo tam bonitas, quam veritas in creatis sunt participationes Dei, sed diuersimodè, nam bonitas est participatio Dei principaliter, & formaliter in eo quod est esse diffusiuum sui ad appetitum, veritas autem transcendentalis in legitimatione rei in se, & segregatione ab eo quod fictum est, & hoc fit per commensurationem ad regulam à qua sibi datur id quod sibi debetur, & proprium ac legitimum sibi est, vt explicauimus.

45 Ad 2. conf. iam sæpè diximus veritati transcendentali non contrariari falsitatem omni modo, & secundum omnem respectum, sed solum secundum respectum quem dicit ad nostrum intellectum: dicit enim veritas rei & respectum mensurati ad ideas diuinas, & rationem mensurantem, seu mouentem ad intellectum creatum; & sub primo respectu non est capax falsitatis, quia est mensurata immutabili commensuratione ideæ diuinæ, quæ falli, & inadæquari non potest. Sub secundo autem respectu potest dari falsitas, quia potest falsè mensurare habendo occasionem decipiendi, & fallendi intellectum per inadæ-

quationem cum ipso, licet hæc falsitas in solo intellectu sit formaliter, in obiecto autem occasionaliter quia præbet ratione similitudinis cum vero occasione fallendi: non tamen ex hoc sequitur quod veritas principaliter consistat in habitudine ad nostrum intellectum, quem mensurat, sed ad illum per quem regulatur, & legitimatur, in quem non potest cadere falsitas. Contraria autem versantur circa idem in eo in quo contrarietatem habent, & non aliter, non autem falsitas contrariatur veritati respectu idearum diuinarum, quia ibi capacitas non est falsitatis, sed solum respectu nostri intellectus, in quo talis capacitas datur, vt dictum est. Videatur D. Thom. q. 1. de verit. art. 10. in fine corp.

ARTICVLVS II.

Quid sit veritas formalis?

DE veritate formali, quia plures emergunt dubitationculæ ad explicandum quid sit, & quid addat supra ipsam cognitionem, breuiter ea quæ sic difficultatem faciunt, per breues quæstionculas enodabimus.

PRIMA DIFFICULTAS.

An veritas formalis ad conceptum formalem pertineat, an ad obiectiuum?

Dicitur conceptus obiectiuus res ipsa concepta, & attracta per cognitionem, formalis verò ipsa representatio expressa concipiens, & attingens. Sententia ergo Durandi fuit, quod ista veritas est in conceptu obiectiuo, ita quod ipsa conformitas inter rem obiectiuè attractam, & seipsam, vt est in re, dicitur veritas formalis. Ita tenet in 1. dist. 19. q. 5. n. 13. Sequitur P. Vasquez, hic disp. 76. c. 1. citatque pro illa Heruæum, Soncinatem, & alios.

Fundamentum à Vasquez allatum est duplex. Primum, quia veritas formalis consistit in conuenientia, seu adæquatione intellectus ad rem, sed hæc adæquatio & conuenientia primò, & per se non exercetur inter conceptum formalem, & obiectum, sed inter rem vt cognitam, seu representatam, & seipsam vt est in re: ergo in adæquatione conceptus obiectiuus ad seipsam in re consistit veritas formalis. Minor prob. quia hæc adæquatio, seu conuenientia consistit in hoc quod ita representetur res intellectui, sicut est in se: ergo ista conuenientia est inter rem representatam, & rem in se: in hoc enim vniuntur seu conformantur intellectus, & res, quia videlicet ita res est representata intellectui, sicut est in se, res autem representata sub esse representato, & obiectiuo, est conceptus obiectiuus.

Secundum fundamentum est, quia ibi primò, & per se est veritas formalis, vbi primò, & per se inuenitur significatum per enunciationem vocalem: hæc enim non continet veritatem, nisi sicut signum: voces autem directè non significant conceptus formales, sed obiectiuos, quia non significant qualitates ipsas vitales expressiuas, sed res ipsas de quibus loquimur per voces: ergo veritas significata, non est in conceptibus, sed in obiectis.

Addere possumus in confir. huius sententiæ, quia veritas in mente artificis, quæ est in ideis ipsius, est veritas formalis, vnde originatur veritas rei artefactæ, sed idea non consistit in ipso conceptu formali, sed obiectiuo, vt præced. disp. tractatum est: ergo veritas formalis non consistit in conceptu formali, sed obiectiuo, vt adæquato rei in se.

D 4 Deinde

5 Deinde conf. quia negari non potest quod inter rem, vt repræsentatam, & seipsam in re debet intercedere aliqua conformitas, & adæquatio, & hæc nõ pertinet ad veritatem transcendentalem: ergo ad formalem. Minor prob. quia veritas transcendentalis non consistit in rebus vt repræsentatis, sed vt existentibus à parte rei: ergo illa conformitas inter esse obiectum, & seipsum in re est conformitas veritatis formalis. Denique quia veritas intellectus desumitur ab obiecto, in quo solum est veritas entitatiuè, & fundamentaliter, non ergo transit veritas ab ipsa re ad intellectum, nisi mediante esse obiectiuo talis rei: ergo inter ipsum, & esse reale quod habet res ipsa à parte rei, debet conformitas veritatis intercedere, quia tale esse obiectiuum magis accedit ad ipsam rem in se, & est medium quo intellectus haurit, & participat veritatem à rebus.

6 Sed neque pro ista sententia desunt auctoritates D. Thom. quæ non modicam difficultatem videntur facere: nam 1. contra Gentil. c. 59. dicit quod *veritas in intellectu pertinet ad id quod intellectus dicit, non ad operationem qua id dicit: non enim ad veritatem intellectus exigitur, vt ipsum intelligere rei aquetur, sed illud quod intellectus intelligendo dicit, & cognoscit, oportet esse rei æquatum.* Sed operatio intellectus, & ipsum intelligere pertinent ad conceptum formalem, id verò quod intelligitur ad conceptum obiectiuum: ergo inter ipsum, & rem in se ponit D. Th. veritatem formalem, non inter cognitionem, & obiectum. Expressius in opusc. 48. tract. de enunciat. c. 4. inquit sanctus Thomas quod *quando res qua est in intellectu obiectiuè, est conformis sibi ipsi vt est in rerum natura, tunc talis conformitas dicitur veritas.* Qui locus omnino docet hanc sententiam, nec ponderatione indiget.

Dicendum nihilominus est veritatem formalem per se, & formaliter consistere in adæquatione, & conformitate iudicij, quod est conceptus formalis cum obiecto in re, non in adæquatione conceptus obiectiu cum re, licet hæc conformitas etiam sequatur ex priori: si enim conceptus formalis est conformis, etiam & obiectiuus qui est obiectum ipsum vt cognitum cum seipso vt est in re. Et ideo aliquando dicitur consistere veritatem in hac secunda conformitate, scilicet tanquam in consecuta ad priorem in qua formaliter veritas ista consistit. Prob. 1. ex D. Thom. tum in presenti q. art. 2. tum in q. 1. de verit. art. 3. vbi docet formalem veritatem conuenire intellectui, vt cognoscenti verum, ideòque eam attribuit compositioni, & diuisioni, seu iudicio intellectus, quia ibi cognoscitur verum comparatiuè ad rem cui conformatur intellectus, & non absolute res ipsa quæ est vera, ideòque solum illi potentia, quæ est reflexiua super se attribuit veritatem formalem, eamque negat sensui, vt patet in hac q. art. 3. non reflectit autem potentia nisi supra suum actum, & conceptum formalem. Fit ergo argumentum ex verbis D. Thom. quia ipse attribuit veritatem formalem intellectui, quatenus est cognoscens verum per compositionem & iudicium: ergo illi conceptui debet attribui veritas ista formalis, cuius beneficio intellectus redditur cognoscens, & iudicans; conceptus autem obiectiuus potius est denominatio cogniti passiuè, quàm constitutio cognoscentis actiuè; ergo non in conceptu obiectiuo, sed formali ponenda est veritas formalis, quatenus cognoscentem reddit intellectum.

7 Secundo, deducitur fundamentum huius sententia, quia negari non potest quod veritas formalis, sicut & falsitas ipsam cognitionem, seu iudiciũ denominat verum, vel falsum in se, non solum ratione entitatis, qua ipsa cognitio in se entitatiuè est talis natura, sicut alia entia: hoc enim ad transcendentalem

veritatem spectat, sed quatenus ipsa cognitio, seu iudicium manifestatum est, & attractiuum veritatis, & obiecti veri in se, in hoc enim distinguitur veritas formalis à transcendentali, seu entitatiua, quod hæc est id quo aliquid est verè in se, illa est id quo cognoscitur ita esse in se. Pertinet ergo veritas formalis ad intellectum, nõ vt est, sed vt cognoscit verum. Conceptus autem obiectiuus non est id quo intellectus est cognoscens, sed conceptus formalis, vt constat; quia obiectiuus est res cognita seu obiecta; formalis est repræsentans intellectui: ergo in hoc, & non in illo veritas formalis constituenda est.

8 Conf. quia conceptus obiectiuus est ipsum obiectum vt conceptum seu cognitum, ita quod *ly cognitum* est denominatio extrinseca ex cognitione proueniens: non enim potest intelligi conceptus obiectiuus, seu obiectum conceptum, nisi latione conceptus, & cognitionis concipientis ipsum. Vel ergo adæquatio, & conformitas inter conceptum obiectiuum, & rem in se (in qua dicitur consistere veritas formalis) est inter ipsum conceptum in quantum est res quædam, vel in quantum denominatur obiectiuè talis à cognitione denominatione extrinseca. Primo modo esse non potest, quia res illa, quæ est conceptus obiectiuus, non est alia res ab ea quæ in re inuenitur, eadem enim res quæ est in se, est etiam cognita & obiecta intellectui, & sic inter ipsam in statu obiectiuo, & in re non datur conformitas, sed adæquatio, sed identitas, & vnitas in ratione rei; unde non esset capax falsitatis, & inadæquationis, quia semper est identitas, & vnitas quantum ad entitatem & rem talis conceptus cum re, & entitate quæ est à parte rei: ergo nunquam inter ipsos potest esse falsitas, & inadæquatio: at conceptus qui in nobis habet veritatem formalem est talis quod potest habere inadæquationem, & falsitatem: ergo non potest esse conceptus obiectiuus, sed formalis; si autem ista conformitas sumatur inter conceptum obiectiuum, & rem in se, non ratione entitatis, quæ vna & eadem est, sed ratione status, & denominationis, qua dicitur obiectiuè esse conceptum & attractum, talis denominatio cogniti, & obiecti supponit ipsam cognitionem, & conceptum formalem, à quo fit illa denominatio obiectiu in esse obiectiu: ergo supponit etiam adæquationem ipsius conceptus formalis cū re quæ est obiectum, quia si cognitio ipsa, seu conceptus formalis non esset adæquatus rei, nec etiam obiectiuus (qui in quantum talis à formali denominatur) adæquatus esset prout talis. Prius ergo est conceptum formalem esse adæquatum rei in se, quàm conceptum obiectiuum sub denominatione obiectiu: ergo si inter obiectiuum, & rem in se ponitur adæquatio veritatis formalis, à fortiori debet poni inter ipsum conceptum formalem, & rem in se; & principalius in ipso, cū sit forma intrinsecè reddens intelligentem, & extrinsecè denominans rem obiectam & cognitam, quæ est conceptus obiectiuus in ratione obiectiu.

9 Ad fundamenta opposita resp. Ad 1. negatur minor. Ad prob. dicitur quod illa adæquatio consistit in hoc, quod ita repræsentetur res in intellectu, sicut est in re repræsentatione formali, & expressiua rei; hæc autem pertinet ad conceptum formalem, non ad obiectiuum; conceptus enim obiectiuus non est conceptus repræsentans, sed res concepta, & obiecta ipsi cognitioni. Vnde negatur conseq. quod ista conuenientia, & commensuratio sit inter rem vt obiectam, seu repræsentatam, & rem vt est in se, non autem inter ipsam repræsentationem formalem, & rem ad extrà, quæ est obiectum eius. Nec est verum quod conceptus, & res vniantur in ipso obiecto repræsentato, & obiectiuè cognito tanquam in medio adæqua

adæquationis, seu in ratione formali habendi adæquationem; potius enim ipse conceptus formalis qui per seipsum immediatè est repræsentatio, & iudicium mentis, per seipsum immediatè est attingens res iudicatas, & sic per seipsum immediatè habet adæquari, & correspondere rei repræsentatæ, & iudicatæ. Conceptus autem obiectiuus quantum ad rem est idem quod res ipsa in se: hæc enim est quæ obicitur, & cognoscitur; quantum autem ad statum, seu denominationem obiectiui, hoc resultat in ipsa re, ex eo quod cognoscatur, & concipiatur, & sic potius se habet ut quid consecutum, ex adæquatione cognitionis, quam ut ratio formalis, seu medium quo fiat adæquatio conceptus ad rem: hæc enim adæquatio non est quod res ita sit repræsentata passiuè, & obiectiuè, sicut est in se, sed quod repræsentatio ipsa formalis ita repræsentet formaliter, & secundum se, sicut res est à parte rei.

10 Ad 2. fundam. Resp. quod ibi primariè est veritas formalis, ubi est conceptus expressus, & expressius veritatis, non ubi est res significata, & obiecta isti conceptui, qui est conceptus obiectiuus: voces autem non solum significant res, sed etiam conceptus internos: per voces enim manifestamus nos intus concipere, & quid concipiamus, licet aliqui dicant voces significare solum res, exprimere verò conceptus, quasi differentiam inuenientes inter significare, & exprimere, quæ tamen vix inuenitur. Sed nobis pro nunc sufficit quod voces manifestant ipsos conceptus, seu notitiam internam quam habemus, & quia in illis est veritas formatis, dicitur hæc esse in vocibus ut in signo manifestante. Cum verò instatur, quia voces non significant conceptus, qui sunt qualitates vitales, sed obiecta repræsentata in eis. Resp. quod non est necesse voces significare nobis entitatem, vel spiritualitatem conceptus interni, sed sufficit manifestare nobis exercitiū, seu munus quod intus efficiunt, scilicet repræsentare, & præsens reddere obiectum potentie cognoscenti: sic enim quia repræsentatio interior, quæ solum est quoad nos, non potest sensibiliter exhiberi, & repræsentare quoad alios, substituitur hæc significatio, & repræsentatio conceptuum per voces, & sic voces repræsentant conceptus formales, non quantum ad entitatem quam habent, sed in quantum signa interiora sunt, quorum loco voces ad significandum ad extra substituuntur. Et sic veritatem etiam conceptuum formalium manifestare possunt.

11 Ad 3. fundamentum, Resp. quod veritas formalis practica de re facienda non consistit in ipsis ideis, sed in iudicio quod secundum ideas formatur ab artifice de rebus à se fabricandis: veritas enim formalis, ut *infra* dicemus, consistit in actu iudicii seu compositionis, & diuisionis, idea autem solum dicit imaginem, vel rem repræsentatam, ad cuius instar aliquid faciendum est, quod simplicem repræsentationem, seu exhibitionem originalis, & exemplaris importat, non iudicium, seu actum compositum de ipso: & sic etiam veritas ista practica ad conceptum formalem pertinet, scilicet ad iudicium.

12 Ad conf. Resp. quod inter conceptum obiectiuum, & rem in se non est conformitas, & commensuratio, sed identitas, loquendo de ipsa entitate, seu re sic obiecta; quæ dicitur conceptus obiectiuus. Vnde hæc identitas non spectat ad veritatem formalem, quia non reddit commensuratum ipsum cognoscentem cum re cognita, quod facit veritas formalis. Si verò accipiamus conceptum obiectiuum, non pro ipsa re quæ concipitur, sed pro ipsa denominatione obiectiuè se habendi, hæc supponit, & prouenit ex conceptu formali, seu à cognitione, à qua denominatur res concepta, seu obiecta intellectui, & obiectiuè se ha-

bere ad illam. Vnde adæquatio talis denominationis ad rem in se, debet præsupponere adæquationem ipsius formæ denominantis, quæ est cognitio, seu conceptus formalis, & in hac consistet veritas primordialiter; consecutiue autem, & secundariò in illa determinatione. Ad id quod ultimo loco ponitur; Resp. veritatem entitatiuam non transire ad intellectum, media veritate obiectiua, sed media specie repræsentante, qua formatur intellectus, & format iudicium; unde resultat denominatio in re obiecta, ut dicatur obiectiuè esse, seu tangi ab intellectu. Vnde hoc non est esse medium, quo veritas ad intellectum transit, sed potius est denominatio consecuta, & per modum effectus relictæ.

Ad auctoritates D. Thomæ, Resp. Ad primam quod D. Thom. in eodem loco citat. scil. cap. 59. in fine, & in c. 60. dicit quod veritas est perfectio, seu bonum quoddam intellectualis operationis, & sic non ad obiectum ipsum, seu conceptum obiectiuum, sed ad operationem, quæ pertinet ad conceptum formalem refert veritatem. Quando ergo in prioribus verbis docet quod veritas in intellectu pertinet ad id quod intellectus dicit, non ad operationem, quæ id dicit, sensus est quod non pertinet hæc adæquatio ad ipsam operationem ratione suæ entitatis, quia hæc spiritualis, & intentionalis est, nec semper adæquatur rei, quæ materialis esse solet. Vnde in adæquatione entitatis conceptus cum entitate rei in se non potest veritas consistere, sed in adæquatione, & conformitate iudicii ut cognoscentis & tangentis rem. Et hic sensus manifestus est in ipsis verbis S. Thom. dicit enim quod *non pertinet veritas ad operationem intellectus: quia non exigitur quod ipsum intelligere rei æquetur, cum res interdum sit materialis, intelligere verò immateriale*; quod aperte procedit de ipsa adæquatione conceptus, seu cognitionis quantum ad entitatem suam. Cum autem subdit, *quod illud quod intellectus dicit & cognoscit, oportet rei esse æquatum*, manifestus est sensus, quod id quod dicit oportet rei esse æquatum ratione ipsius cognitionis, seu dictionis exprimentis, non ratione solum rei expressæ, & obiectiuè tractatæ.

In tabis: si ita intelligendus est D. Thom. ergo male infert quod in simplici intelligentia Dei inuenitur veritas ex eo quod licet in re non sit compositio, & diuisio, tamen id quod intellectus diuinus intelligendo dicit, est compositio, & diuisio; sed compositio, & diuisio quam intellectus diuinus dicit, & intelligit, est aliquid obiectiuè intellectum, & cognitum: ergo ponit D. Thom. veritatem in conceptu obiectiuo.

Resp. illationem D. Thom. optimam esse, quia diuina intellectio licet in se sit simplicissima, virtualiter tamen est compositiua, quia ipsam compositionem ex parte rei cognita attingit, & diiudicat. Vnde in se habet adæquationem veritatis ipse conceptus formalis Dei quatenus iudicatiuus, & virtualiter compositiuus, quia non consistit hæc veritas in adæquatione entitatis ipsius conceptus cum re cognita, ut dictum est, sed in conformitate cognitionis exprimentis, & iudicii, ut attingit compositionem, quod habet intellectus diuinus, quia eminenter compositiuus est.

Ad 2. locum S. Thom. Resp. quod in illo opusculo (quod non est omninò certum ipsius esse) refert duas opiniones de veritate, & utramque probabilem reputat, nec de illis determinat, sed tantum refert illas, aliam quæ dicit quod veritas est primò inter rem obiectiuè tractatam, & seipsam in re; licet etiam non neget esse in ipso actu intellectus; aliam quæ dicit, quod veritas est conformitas ad rem informatam similitudine. Ex iuxta priorem loquitur in verbis relatis

relatis in argumēto. Quia verò ibi non determinauit de his duabus opinionibus, quia ibi solum logicum agebat, nec erat locus hoc determinandi, idēd solum vtramque retulit, & iuxta illas loquutus est de veritate. In aliis tamen locis, quæ *suprà* retulimus determinauit veritatem esse in ipsa cognitione, & iudicio, quatenus reddit intellectum cognoscentem veritatem, quod non nisi de cognitione, & conceptu formali intelligi potest. Et idēd his locis standum est.

SECUNDA DIFFICULTAS.

An veritas formalis sit aliquid absolutum, vel respectuum superadditum actui intellectus?

17 **A**ctus cui conuenit veritas formalis quis sit, an compositio, & diuisio, an simplex intelligentia, & in ipsa compositione, & diuisione, an sit enunciatio, vel iudicium *seq. art.* disquiretur. Nunc solum inquirimus quid veritas addat super illum actum in quo est, quicumque actus ille sit: nam addere aliquid præter ipsum actum, non potest negari, cum contingat eandem orationem mutari de vera in falsam, vt docet Philos. in *cap. de substantia*. Aliquid ergo est veritas, & falsitas præter orationem; de quo etiam videri potest D. Th. in *1. dist. 19. q. 5. art. 3. ad 5.* & in *hac q. art. 8. ad 3.* & *suprà q. 14. art. 5.* Difficultas est quid sit illud quod contingit mutari in oratione, cum transit de vera in falsam, & è contra, nam si est aliquid absolutum superadditum actui intellectus, & non facile explicatur quid sit præter ipsam attingentiam actus ad obiectum, si verò est aliquid relatiuum, & est rationis, veritas non erit perfectio actus intelligendi; si reale, non manebit veritas transeunte obiecto, quia ad terminum non existentem realis relatio non datur, nisi sit transcendentalis, quæ est ipsa entitas actus, & hæc non mutatur.

18 In hac parte triplicem inuenio sententiam. Prima quæ attribuitur Soncin. *6. met. q. 17.* quod veritas formalis sit aliquid absolutum superadditum ipsi actui intellectus, quæ est perfectio simpliciter intellectus, & independens ab aliquo externo: sed Soncinas non ita independentem facit hanc veritatem, vt ab omni respectu euacuet, sed illam dicit esse relationem secundum dici.

19 Secunda sententia ponit veritatem solum addere relationem secundum esse, quæ est adæquatio ad rem super ipsum actum intellectus, & sic saluatur posse eandem orationem sine mutatione sui transire de vera in falsam, & è conuerso. Hæc pluribus Thomistis attribuitur, vt Flandriæ, Heruæo, Iauello, eamque sequitur Bañes *super hanc q. art. 3. dub. ult.* quamuis addat hanc relationem non semper esse realem, sed aliquando rationis, scilicet quando obiectum non existit in re, quia ad terminum non existentem non terminatur relatio realis. Videatur etiam Suarez *disp. 8. met. sect. 2.*

20 Tertia sententia est, quam tenet ipse Suarez *loc. cit.* scilicet veritatem non esse puram relationem secundum esse superadditam ipsi actui, cum aliquando detur veritas circa obiectum non existens, sed esse ipsummet actum cognitionis, transcendentali respectu tendentem ad obiectum cum connotatione obiecti sic se habentis in re, sicut est in iudicio mentis.

21 Dicendum nihilominus est, veritatem, & falsitatem non importare aliquam entitatem absolutam superadditam ipsi actui, seu iudicio rationis, neque relationem transcendentalem, quæ in se est entitas absoluta, vt dependens, vel respiciens aliud extrinsecum, sed id quod addit veritas, & falsitas formalis ad actum intellectus est relatio secundum esse: an verò sit rea-

lis, vel rationis, & dato quod aliquando sit realis, an ex defectu existentie termini sufficiat quod sit rationis, dicemus *seq. dubio*. Hæc est communior inter Thomistas, & videri potest de ea Bañes *loco citato*. Et sumi potest ex variis locis D. Thom. Nam in *1. dist. 19. q. 5. art. 3. ad 5.* inquit quod in propositione, vt est signum talis rei, veritas est per adæquationem ad rem illam, mutata autem re, tollitur adæquatio signi ad signatum sine aliqua mutatione ipsius signi, quod manifestum est in relationibus posse contingere, unde veritas enunciationis non manet. vbi manifestè D. Th. ponit veritatem propositionis in relatione aliqua secundum esse, quia dicit sine mutatione ipsius signi per solam mutationem termini posse definire hanc adæquationem, quia sic contingit in relationibus: non contingit autem sic nisi in relationibus secundum esse; relationes enim secundum dici, aut transcendentales manent, etiam obiecto non existente, sicut potentia respicit obiectum; quia talia relatiua entitatiuè aliquid absolutum sunt, licet explicentur per relationem, & sic manent obiecto non existente, & non mutantur nisi cum mutatione subiecti. Ex quo loco etiam obiter colliges, quàm sit conforme menti S. Th. id quod diximus in *Logica q. 21. art. 1.* quod signum consistit in relatione secundum esse, quia dicit sine mutatione signi, adæquationem eius ad rem mutari, quod solum in relationibus secundum esse contingit. Ad hæc D. Th. comparat veritatem propositionis, quæ mutatur de vera in falsam, similitudini, quæ ex veritate sui termini variatur, vt docet in *hac q. 16. art. 8.* Similitudo autem est relatio prædicamentalis, & secundum esse. Quare veritas formalis, aut falsitas non importat aliquid superadditum actui per modum entitatis absolutæ, nec solum ipsum actum qui in se aliquid absolutum est cum connotatione obiecti sic in re inuenti, sicut est in iudicio mentis, sed in relatione aliqua secundum esse, quæ mutari potest ipso iudicio, seu actu intellectus inuariato. Nec sola extrinseca connotatio sic habet locum, vt statim ostendemus, & D. Th. in *præfati art. 6. ad 1.* docet quod veritas est perfectio intellectus, sicut scientia: si autem solum adderet connotationem extrinsecam obiecti super ipsum actum, non importaret perfectionem intellectus, seu actus eius. Similiter docet quod vna opinio potest mutari de vera in falsam, eadem opinione manente, per mutationem obiecti: si autem solum adderet extrinsecam connotationem obiecti, non diceretur mutari propositionem ipsam in se, quia illa extrinseca connotatio nihil ponit in propositione, & actu mentis.

22 Fundamentum huius sententiæ, quantum ad hoc quod veritas non sit aliquid absolutum superadditum actui, nec relatiuum transcendentalis, aut secundum dici, ex eo sumitur, quia veritas illa formalis talis conditionis est, quod ex sola obiecti mutatione potest variari in falsitatem, vt Philos. docet in *c. de substantia*, quia oratio sine mutatione sui suscipit veritatem, & falsitatem, vt si aliquis affirmet Socratem sedere, ipso sedente; & perseverando in tali actu, Socrates non sedeat. Si autem mutatur per solam obiecti mutationem: ergo non potest veritas addere super actum intellectus aliquid omnino absolutum, & independens ab omni intrinseco, neque aliquid relatiuum secundum dici, vel transcendentalis, quia in re tale relatiuum est aliqua entitas absoluta ordinata, vel dependens ab aliquo extrinseco, quæ tamen non mutatur ex mutatione sola illius extrinseci, sed ipso desinente potest manere, vt constat multis exemplis, sicut scientia, & potentia, materia, & forma, & alia multa similia quæ relatiuè dicuntur sub respectu transcendentali, & illum retinent, etiam si terminus non existat: nec enim variantur ex termini variatione, quia in

in sua entitate, & de se semper ordinantur ad illum : ergo si oratio mutatur de vera in falsam, & è contra, solum ex variatione termini, manifestum est non consistere formaliter in relatione secundum dici, aut in aliquo absoluto, sed in respectu secundum esse.

23 Er confirm. quia iudicio stante rerum, producto actu eius in intellectu, potest mutari de vero in falsum, & aduenire ea veritas, vel tolli, vt ostensum est, nihil autem absolutum, siue quoad entitatem, siue quoad modum potest aduenire illi actui semel producto, nisi noua elicientia intellectus detur: ergo non potest veritas illa superaddere aliquid absolutum, vel relationem secundum dici ad actum intellectus. Minor prob. quia talis modus, vel entitas absoluta, si detur in actu, debet vitaliter in illo produci, atque coniungi, nec enim illi aduenit tanquam rei inanimi; ergo indiget elicientia vitali, vt actus procedat cum illo vitali modo, seu entitate, & sic cum ille actus mutat veritatem, aut falsitatem, oportet quod mutet elicientiam, & vitalem processum, vt ei conueniat talis entitas, vel modus de nouo; mutata autem elicientia, mutatur actus, saltem numero, quia procedit per distinctam emanationem, & ipse actus elicientie vitalis est: ergo non potest veritas consistere in tali entitate superaddita actui, & ipso immutato variari, nisi sit relatio secundum esse, quæ resultare potest, aut desinere in actu vitali sine noua elicientia, vitali, sed solum ex mutatione termini quem respicit.

24 Quod autem non sufficiat sola connotatio extrinseca obiecti sine relatione superaddita, prob. quia illud obiectum se habet vt terminus cui adequari, & conformari debet actus iudicii in ratione veritatis, & se habere ad illud vt mensuratum ad mensuram: ergo repugnat quod hoc fiat sola connotatione extrinseca sine reliqua relatione interueniente, quia ordo ad mensuram relatio est, non connotatio tantum.

25 Et conf. quia repugnat quod aliquid importet connotationem alicuius extrinseci sine relatione aliqua ad ipsum, vel è conuerso: nam vbi est connotatio alicuius extrinseci, ideo est, quia illud extrinsecum pertinet aliquo modo ad se, & ordinatur ad se, vel è conuerso aliquid ordinatur ad ipsum. Quod non potest intelligi sine aliquo respectu, vel reali, vel rationis, vel sine aliqua dependentia, aut ordine inter hoc, & illud; nam etiam in Deo, cum aliquod attributum connotet creaturas, v.g. prouidentia, iustitia, potentia, intelligitur hæc connotatio cum aliquo respectu ex parte creaturæ, reali; ex parte Dei, rationis: & hoc ideo, quia nihil aliud exigitur ad fundandum respectum, & relationem, quam similis dependentia, vel connotatio, aut conditio requisita alicuius extrinseci: Relatio enim, & respectus vbiunque vnum est alterius, seu ad alterum pertinet, sufficienter fundatur: ergo cum connotatio alicuius extrinseci non possit intelligi, nisi quia hoc pertinet ad illud, vel est aliquid eius, non potest connotatio intelligi respectu alicuius extrinseci sine aliqua relatione siue reali, siue rationis. Veritas autem nostri intellectus cum sumatur à rebus, & mensuretur per illas, non potest dici quod illas connotet sine aliquo respectu, aut dependentia ab illis. Veritas autem Dei non pender à rebus, sed res ab illa, & ex parte rerum datur relatio realis ad eam, ex parte diuinæ veritatis solum est respectus rationis, quia non per dependentiam, sed per eminentiam super res, connotat illas.

26 Obiicies 1. ad probandum quod veritas formalis debet dicere aliquid absolutum, aut si est respectiuum, illud est transcendente, & secundum dici: Nam vt *suprà* vidimus ex Diuo Thoma, veritas est magna perfectio mentis, cum finis eius sit veritatem

attingere, & tantò aliquis perfectior est, quantò verior in intelligendo, & dicendo; ergo non potest veritas consistere in sola relatione prædicamentali. Conseq. patet, tum quia relatio secundum purum respectum, aut non dicit perfectionem, aut minimam inter omnes: ergo non potest tanta perfectio quanta est veritas in pura relatione consistere; tum quia ipsa enunciatio, & actus iudicii secundum se dicunt ordinem transcendentem ad obiectum: ergo si veritas est maior perfectio, & vltima perfectio quam potest habere iudicium, à fortiori non est pura relatio, sed aliquid absolutum.

Conf. quia si aliquid obstat, maximè ratio *suprà* 27 adducta, quia mutatur propositio de vera in falsam, non mutato ipso actu iudicii vitaliter, & sic solum potest mutari penes relationem, non penes aliquid absolutum; hæc autem ratio est nulla, quia necessario debemus fateri quod non mutatur sola relatio, sed etiam fundamentum eius, quod vtiq. aliquid absolutum est. Et hoc patet, quia quando mutatur propositio de vera in falsam, non solum desinit ipsa relatio veritatis, ad quod sufficeret sola termini desinitio, sed etiam mutatur in oppositam, scilicet in falsitatem: ergo oppositum fundamentum requirit, sicut cum mutatur actus de bono in malum morale, non sola relatio bonitatis mutatur: sed etiam fundamentum; ergo si idem actus mutari potest quoad aliquid absolutum, sine hoc quod noua elicientia eius detur ex hac parte non repugnabit quod veritas quæ sic mutatur in ipso actu, sit aliquid absolutum.

Resp. quod quædo veritas dicitur magna perfectio 28 intellectus, aut etiam vltima, non debet sumi pro sola relatione adæquationis, sed pro eius fundamento, & pro certitudine atque euidencia qua attingitur veritas, sic enim non solum opponitur falsitati pro inadæquatione, sed etiam ignorantie, seu deceptioni: sola autem & nuda relatio veritatis non est ipsa perfectio intellectus, sed quid consequutum ad ipsam. Et huius manifestum signum est, quia veritas & falsitas pro sola relatione, fortuito, & casualiter possunt conuenire iudicio, & mutari ipso etiam ignorante, & non aduertente, vt si quis formet hoc iudicium, Petrus loquitur, & ipso nesciente, cessat loqui, veritas mutatur in falsitatem, & sic in reliquis veritatibus contingentibus, quia etiam sine propria aduertentia potest obiectum mutari, & tamen actus, qui antea erat, continuari; & hoc ipso desinit esse verus: ergo hoc præcisè non est magna perfectio, si sumatur solum pro relatione adæquationis, vel inadæquationis. Vnde patet ad 1. probationem: nam relatio secundum se est minimæ entitatis, sed in suo fundamento potest esse magnæ perfectionis, sicut relatio causæ, relatio domini, relatio patris, &c. Ad secundam probationem quod ille actus iudicii vt conformabilis rebus per intelligentiam, & manifestationem earum, est fundamentum relationis veritatis: vnde non est necesse quod veritas addat super hoc maiorem perfectionem absolutam, sed respectiuam: veritas autem cum dicitur esse tam magna perfectio, non sumitur pro sola relatione adæquationis, sed pro ipsa cum suo fundamento manifestationis vt conformabilis rebus in se.

Ad conf. Resp. quod quando propositio mutatur 29 de vera in falsam, vel è conuerso per solam mutationem obiecti, sine noua aduertentia, vel iudicio, solum mutatur relatio, & ratio proxima fundandi, quæ est illa applicatio commensurans vnum alteri, licet ipsa entitas actus in se nõ mutetur. Et hoc modo bene contingit mutari vnam relationem in suam oppositam ex sola mutatione termini, quatenus inde resultat opposita ratio proxima fundandi & applicandi fundamentum termino, sicut patet in relatione æqualitatis, & similitudinis.

litudinis: nam si duo sunt similia, aut æqualia, mutato termino, non solum potest desinere relatio similitudinis, sed etiam transire in relationem dissimilitudinis, vel inæqualitatis, ut si terminus non purè desinat, sed in oppositum mutetur, & idem est de quacumque alia ratione adæquationis, vel inadæquationis, qualis est relatio veritatis, aut falsitatis. Et hoc idè, quia tales relationes non fundantur in quantitate, vel qualitate rei ut absolutè est in vno extremo, sed ut conveniens, aut comparata cum alio: unde si in oppositum mutetur terminus, resultat diuersa comparatio, seu convenientia, & consequenter

30 opposita relatio.

2. Obiicies: Nam, ut diximus in *Logica* q. 23. ar. 1. verum, & falsum non ponunt mutationem intrinsecam in oratione, intuitum autem, & abstractiuium ponunt talem mutationem, licet accidentalem ipsi actui: Ergo veritas, & falsitas non consistit in aliquo intrinseco, etiam per modum relationis in ipso iudicio. Imò D. Thom. *opusc.* 48. tractat. de enunciat. cap. 4. apertè dicit veritatem, & falsitatem esse accidentia rationis, & nos ex ipso id diximus in *summulis* q. 5. art. 1. conclus. 3. ergo non potest consistere veritas formalis in aliqua relatione reali.

31 Confir. argumento *suprà* insinuato, quia veritas enunciationis aliquando est circa rem non existentem, vel abstrahit ab omni existentia, sicut sunt omnes propositiones veritatis æternæ; & tamen illæ sunt formaliter veræ: imò maximæ, & immutabilis veritatis: ergo remota omni relatione reali, & intrinseca, manet veritas formalis.

32 Resp. quòd in illa q. 23. *Logica* negauimus verum, & falsum importare aliquid intrinsecum in propositione, per modum nouæ attentionis, & actus, sicut exigit intuitiua notitia respectu abstractiuæ, non per modum relationis eidem iudicio aduenientis: nec enim potest aliquis de nouo intuitiuam notitiam habere sine aliqua noua aduertentia, aut attentione ad id quod videt; potest tamen propositio amittere veritatem sine vlla aduertentia noua, sed per solam termini mutationem, stante continuatione eiusdem iudicii. Quod totum videri potest q. 23. circ. art. 1. §. *Hac sententia*. Et in eadem *Logica* q. 15. art. 5. respondimus quòd oratio susciperet verum, vel falsum, vel solum secundum conformitatem, & difformitatem (quod ad relationem pertinet) vel secundum aliquem modum, vel perfectionem superadditam, ut iuxta omnes opiniones responderemus, non determinando ibi sententiam de hac re, quia ibi locus non erat. Quod verò in *summulis* retulimus ex D. Thom. *opusc.* illo 48. quòd dixerit veritatem in propositione esse accidens rationis, & quando intelligendum sit *seq. difficultate* dicemus.

33 Ad conf. Respondebitur *seq. difficultate*, ubi tractatur an relatio ista veritatis sit realis, vel rationis. Nunc sufficit dicere istam relationem quantum est ex vi sui fundamenti, esse realem, dummodo supponatur terminus existens, quia hæc est conditio requisita ad omnem relationem realem: si verò terminus desinat, relatio illa realis non erit ob defectum termini, non quia ex se, & ex vi fundamenti realis esse non possit, sicut relatio partis realis est, sed si desinat esse filius, non erit relatio realis ob defectum termini: an vero possit manere relatio veritatis desinente obiecto, non ad ipsam in se, sed ad id quod de ipso manet in effectu suo, vel ad Deum, in quo omnis veritatis causa est, dicemus *seq. difficultate*. Vnde etiam soluitur ratio dubitandi à principio: veritas enim nū est sola relatio transcendentalis ipsius actus ad obiectum, quia hæc manet, etiam variato iudicio de vero in falsum, sed in relatione secundum esse superaddita, quæ de se realis esse potest, dummodo termi-

nus existens sit; ex eius enim defectu realitas relationis desinit.

3. Obiicies: Nam remota quacumque relatione, & solum manente iudicio de aliqua re cū existentia obiecti in quo remanet veritas formalis, siquidem illud iudicium affirmat id quod est in re: ergo etiam si relatio non resulter, veritas manebit, & sic non consistet veritas in relatione, sed sufficiet ipse actus iudicii cum connotatione obiecti.

35 Confir. ex quibusdam exemplis, quæ pro alia parte faciunt ad probandum quòd veritas sit absoluta perfectio enunciationis: nam ipsa scientia, & ipse actus cognitionis essentialiter ordinantur, & commensurantur cum suis obiectis, & non consistunt in relatione secundum esse, sed in aliquo absoluto quod est relatiuum secundum dici: ergo similiter veritas, quæ non minus est commensuratio cum rebus, nec minoris perfectionis, quàm ipsa scientia, & cognitio. Aliud exemplum est in bonitate, & malitia actus moralis: nam istæ consistunt in commensuratione, vel difformitate ad regulam morum, & tamen non dicunt solam relationem prædicamentalem ad talem regulam, sed transcendentalem, & secundum dici, cum constituent diuersas species actuum moralium, quæ non constituuntur sola relatione pura, sed vera & absoluta entitate, ideòque actus non mutatur de bono in malum, vel è contra sine mutatione intrinseca, non per solam relationis mutationem: ergo etiam veritas formalis, non in sola relatione consistet, sed in aliquo absoluto variante speciem ipsam actus.

36 Resp. quòd remota relatione adæquationis, remanebit veritas illa in propositione fundamentaliter, non formaliter: sicut remota relatione paternitatis, & manente utroque extremo patris & filij non remanebit pater, aut filius formaliter, sed fundamentaliter tantum, & tamen *ly pater* formalissimè importat relationem; & idem est de relatione similitudinis, & adæquationis, atque adeò & de ipsa veritate formali.

37 Ad confir. quantum ad primam eius partem, Resp. quòd aliter scientia, vel cognitio est commensuratio cum obiecto, aliter veritas: nam scientia se habet ut habitus, & cognitio ut actus, seu operatio circa obiecta; unde non se habet ut purus respectus, & relatio ad ipsa, sed ut aliquid absolutum, quia habitus qualitaris est, & actus cognitionis etiam est qualitas, vel, ut alij volunt, est actio de prædicamento actionis, & utrumque est entitas absoluta: at veritas formalis supponit quidem hanc operationem, quia in ipso iudicio, seu propositione inuenitur, sed non superaddit ad eam aliam operationem, vel representationem, sed meram adæquationem cum re iudicata, aut enunciata; & ideò non sequitur quòd veritas sit aliquid absolutum, seu transcendentalis respectus superadditus actui, sed solum quòd sit commensuratio supponens ipsum actum, & in eo fundata, & sic præsuppositiue & fundamentaliter est aliquid absolutum, & per modum actus tendens ad obiectum, formaliter autem est pura adæquatio, & respectus, non autem noua tendentia operationis, aut representationis, vel alia relatio secundum dici erga obiectum, sed solum noua relatio adæquationis, & conformitatis in expressione veri fundamenti. Vnde veritas sumpta cum suo fundamento non est minoris perfectionis quàm actus scientiæ, tunc enim sumitur pro actu talem adæquationem fundante, & sic perfectionem importat, non solius relationis, sed etiam actus ipsius talem relationem fundantis: sola autem relatio non dicit hanc perfectionem.

Ad alteram partem, seu exemplum, Resp. quòd moralitas

moralitas in actu ipso non variatur de bona in malam per solam, & præcisam mutationem obiecti, nisi mutetur etiam aduertentia noua, & dictamen moris, vel omittatur cum currit obligatio, & consequenter etiam actus ipse mutatur: si enim me ignorante, & non aduertente obiectum reddatur prohibitum, quod ante non erat, non pecco, vel si teneor aduertere, & nolo, vel ad aliud diuerto, & ita omitto, illa nolitio, vel diuertentia aliquis nouus actus est, unde resultat nouum dictamen, & consequenter nouus actus, vel noua tendentia in obiectum cum aliquo defectu culpabili: at veritas, vel falsitas in intellectu, etiam nulla posita aduertentia, vel notitia de nouo, per hoc solum quod obiectum non ita sit sicut antea, mutatur, & redditur falsum quod erat verum, ut si dico Ioannes sedet, & me nesciente surgat, illud iudicium incipit esse falsum.

TERTIA DIFFICULTAS.

An relatio veritatis sit realis, vel rationis?

39 **S**unt tres principales sententiæ. Prima est P. Vasq. *hic disp. 76. c. 2.* qui docet veritatem formalem esse aliquid rationis, & hoc conformiter ad sententiam eius *suprà* relatam *disp. 1.* quod veritas consistit in conformitate conceptus obiectiui ad rem in seipsa, inter quæ solum potest esse relatio rationis, quia est eiusdem ad seipsum, ut apprehensi ad se ut est in re, & sic non conuenit rei ut in se, sed ut apprehensa, & cognita. Eidem sententiæ adhæret Molin. etsi ex alio fundamento, quia existimat *in hac 1. p. q. 16. art. 1. disp. 2.* semper relationem veritatis esse rationis, quia æquè versatur veritas circa rem existentem, vel non existentem, circa negationem, vel rem posituam, quod argumentum tractat S. Th. *q. 1. de verit. art. 5. ad 2. ut infra* ponderabimus. Videtur autem facere Diu. Thom. huic sententiæ *opusc. 48. tract. de enunciat. cap. 4. & 5.* ubi docet veritatem, & falsitatem in propositione esse accidentia rationis: quia est mensuratio inter rem, ut cognitam, seu formatam ab intellectu, & ut est in re, quod etiam ex ipso D. Thom. retulimus *in summulis q. 5. art. 1. concl. 3.*

40 Secunda sententia docet veritatem esse relationem realem. Ita pluribus Thomistis tribuit P. Suarez *d. 8. met. sect. 2.* ut Flandriæ, Iauillo, & aliis. Omitto ipsius P. Suarez sententiam, quæ *præced. difficult.* relata, & impugnata est, quod consistit in actu iudicii cum connotatione ipsius obiecti sic se habentes in re.

41 Tertia sententia docet relationem illam de se, & ex vi sui fundamenti esse realem, licet ex defectu termini, si non existat, possit quoque relatio ipsa deficere, & tunc solum erit rationis. Ita sentit, & explicat sententiam Thomistarum Bañes *hic q. 16. art. 3. dub. ultimo.*

42 Dicendum nihilominus est relationem veritatis in intellectu speculatio, quæ consistit in ipso affirmare, aut negare, secundum quod exercetur inter ipsum actum iudicarium, & res, esse realem, dummodo terminus existens sit à parte rei: nam termino non existente nulla relatio realis manet, resultat nihilominus relatio rationis ex ista veritate, si consideretur sola conformitas, & adæquatio inter ipsam rem cognitam, & expressam, & se ipsam à parte rei, seu inter conceptum obiectiuum, & rem in se. Loquimur in præsentia de veritate speculatiua, quia hæc in nobis regulatur ab ipsis rebus, quibus conformatur, & à quibus desumitur, & ita respicit res ipsas, sicut id quod regulatum, & mensuratum est suam men-

Ioan. à S. Thoma in 1. Part. D. Th. Tom. 2.

suram, & regulam, qui respectus realis est. Intellectus autem practicus qui est factiuus ipsarum rerum, sicut intellectus artificis respectu artefactorum in quantum factiuus, potius est mensura talium rerum, & ipsæ sunt mensurate ab illo, & ideo potius fundat respectum rationis ad res, & non realem, quia mensura non respicit realiter suum mensuratum, sed è contrà; & ita talis veritas non se habet per modum relationis realis ex parte intellectus. Et hac ratione etiam veritas Dei respectu creaturarum realis non est, quia talis veritas non mensuratur à rebus, sed mensurat illas. Et vocamus speculatiuam veritatem, omnem illam quæ præcisè explicatur per *affirmare* & *negare* tantum: practicam verò, quæ non solum affirmat rem esse, sed statuit, & determinat quomodo, & quid faciendum sit.

Pro intelligentia ergo conclusio est aduertendum quod in veritate formali tria inueniuntur, inter quæ potest esse respectus, scil. ipse intellectus cognoscens per actum; res ipsa à parte rei, cui conformatur actus; res ut cognita respectu sui, ut est in re. Et sic est triplex respectus. Vnus ex parte ipsius intellectus, ut mensurantis, & applicantis mensuram rei mensurate. Secundus inter actum intellectus, ut mensuratum ad ipsam rem, ut mensuram. Tertius inter conceptum obiectiuum, seu rem ut apprehensam, & seipsam ut est in re quæ est eadem res. Hic tertius respectus est rationis, duo priores reales: dicitur enim ille tertius respectus esse rationis, quia est eiusdem ad seipsum, & quia conuenit rei ut cognita, seu apprehensa ad seipsam ut est in re, & in re ut apprehensa non potest dari nisi respectus rationis.

Et ex distinctione istarum relationum conciliabuntur diuersa loca D. Thom. Aliquando enim dicit quod veritas enunciationis est accidens rationis, ut *in opusc. 48. cit.* quia *ibi* solum considerat relationem illam adæquationis, quæ est inter conceptum obiectiuum, seu rem ut conceptam, & rem ut in se; & referens duas opiniones, alteram, quod veritas est respectus inter conceptum obiectiuum, & rem in se; alteram, quod est inter conceptum formalem, & rem in se, non determinauit *ibi* de his opinionibus, quia locus non erat, sed iuxta primam docuit esse respectum rationis, quia hinc solum inuenitur inter conceptum obiectiuum, & rem in se. At verò in aliis locis explicauit veritatem penes relationem, quæ est inter ipsum actum, seu conceptum formalem iudicii, & rem ipsam in se, quæ relatio est principalis in veritate, quæ in ipso iudicio inuenitur, ut *suprà difficult. 1.* ex ipso D. Thom. ostendimus; licet inde consequatur etiam talis adæquatio inter conceptum obiectiuum, & rem in se: Et talem relationem esse realem, & per fundamenta realia explicari, docet *q. 1. de verit. art. 5.* nam inter cognitionem, & rem scibilem fundari relationem realem docet *ibi solut. ad 15.* & loquitur manifestè de relatione prædicamentali: *in solut. verò ad 2.* pro fundamento huius relationis, seu adæquationis veritatis, ponit D. Thom. ordinem cognitionis ad rem, quæ per similitudinem suam cognitionem de se facit; & hoc fundamentum est sufficiens ad relationem realem, quia reale fundamentum est, dummodo terminum positum habeat: consequenter ergo relationem ipsam realem esse, non potest negare. Addo quod ipse D. Thomas agnoscit mutationem propositionis de vera in falsam, esse propriam, & veram mutationem, qualis in Deum cadere non potest, ut patet *suprà q. 14. art. 15.* & *in hac q. 16. art. 7.* & *q. 1. de verit. art. 6.* ergo aliquid reale, saltem per modum relationis, importatur in veritate, aliàs mutatio propria, & vera non esset.

E

Funda

Fundamentum autem praedictae resolutionis ex eo sumitur, quia inter actum iudicii, & rem ad extra datur vera dependentia, non solum in ratione representationis, & cognitionis, sed etiam in ratione adaequationis, & veritatis: hoc enim quod est iudicium esse verum, est in quo maxime dependet cognitio à rebus, & in quo perficitur: ergo sufficiens fundamentum praebet ut relatio realis sit, si terminus non desit, quia ubi dependentia, & perfectio realis est, ibi fundamentum relationis realis est.

- 46 Conf. quia relatio mensurae, & mensurabilis, realis est, sed haec interuenit in veritate formali: ergo est relatio realis. Maior constat, quia relatio mensurae est una ex speciebus relationis praedicamentalis, ut constat ex diuisione Aristotelis, qua diuidit species relationis 5. metaph. & nos diximus *quaest. 17. Logicae*. Constat autem quod in praedicamento relationis solum ponuntur relationes reales, cum sit genus entis realis. Minor prob. quia veritas consistit in adaequatione, & mensuratione intellectus ad rem: ex eo enim intellectus dicitur verus, quia conformatur, & adaequatur rebus in se, quod utique per aliquam mensurationem fit, & regulationem; & ita definitur veritas, quod est adaequatio intellectus ad rem; In hac autem mensuratione interueniunt extrema realia, scilicet ipse actus iudicii, seu conceptus internus, & res extra, si existat in se realiter, vel saltem in aliquo reali fundamento, causa, vel effectus, cui immediate adaequatur veritas, seu per quod probatur, & similiter fundamentum reale, scilicet ipsa dependentia actus ab abiecto extra, & assimilatio, seu intendentia ad obiectum: haec enim omnia realia sunt, quia realiter inueniuntur in ipso actu interno, & in obiecto: ergo tam extrema, quam fundamenta sunt realia, & ipsa extrema sunt realiter distincta, scilicet actus intra intellectum, & obiectum ad extra: ergo relatio quae inde consurgit realis est; nec enim amplius requiritur ad realem relationem.

- 47 Ex eadem autem ratione constat quod relatio inter conceptum obiectiuum, & rem ipsam in se non est realis, quia non est distinctio inter ista extrema, sed est eadem res ut cognita, vel ut in se ipsa, inter quae solum est distinctio mediante apprehensione, seu esse cognito, super quod non potest fundari realis relatio.

- 48 Similiter veritas de re non existente, ut de re praeterita, aut futura, aut de connexione essentiali potest habere pro termino reali, non rem ipsam in se, quae iam praeteriit, sed in suis effectibus quos reliquit, & ratione quorum probatur, aut in speciebus sui quas relinquit in memoria, aut quae sunt in mente Angeli, vel in diuinis ideis: sed tamen haec relatio, ut diximus, non est ad ipsam veritatem in se, sed ad eius causas, effectus, fundamenta, aut probationes, quibus intellectui manifestatur veritas: ad ipsam enim veritatem in se non potest manere relatio realis, cum talis res non existat, sed hoc est ex defectu termini, non fundamenti relationis.

- 49 Et ex hoc intelligi potest Diu. Thom. cum dicit *quaest. 1. de verit. articul. 5. in corp.* quod in adaequatione, & commensuratione intellectus, & rei non requiritur quod utrumque extremorum sit in actu; potest enim adaequari intellectus noster nunc his, quae in futurum erunt, & nunc non sunt. Et in *solut. ad 2.* dicit quod non ens extra animam non habet unde intellectui diuino aequetur, neque unde cognitionem sui faciat in intellectu nostro, & sic quod aequetur intelle-

ctui, non est ex seipso, sed ex ipso intellectu, qui rationem non entis accipit in seipso: hoc autem proprie pertinet ad relationem rationis, quia haec resultat ex formatione per intellectum. Et idem docet de futuris, & praeteritis, quod de non ente in *solut. ad 6.* Sed Resp. quod D. Thom. loquitur de relatione, & adaequatione ad ipsam rem, & veritatem eius in se, non ad ipsam in alio, scilicet in causis, vel effectibus, aut aliis fundamentis veritatis, ad quae terminatur aliquando iudicium, & conceptus veritatis, non ad ipsam veritatem solum in se, ut diximus.

Ad fundamentum P. Vasq. iam satisfactum est *50* *difficultate 1.* ubi ostendimus veritatem formalem non versari inter conceptum obiectiuum, & rem in seipsa, sed in conceptu formali, seu actu iudicii inueniri. Ad auctoritatem S. Thom. iam responsum est, quomodo loquatur in illo opusculo 48 (si tamen eius est, nec enim est ex opusculis indubitatis) & quomodo in aliis locis.

Sed adhuc obiciet ex Molin. Primò, quia saepe *51* contingit propositionem esse veram veritate formali, & omnino eadem, & tamen obiectum non existere; eo autem non existente non datur relatio realis, quae terminum realem exigit. Secundò, quia aequè vera est propositio negatiua, atque affirmatiua, & tamen ad negationem non potest dari realis relatio, quia nihil est: ergo non consistit veritas formalis in relatione reali. Tertiò, quia relatio conformitatis, & adaequationis huius ex parte obiecti ad conceptum non est realis, cum obiectum se habeat ut mensura, quae non refertur realiter ad mensuratum, quia non est mutua relatio inter mensuratum, & mensuram: ergo neque ex parte conceptus erit relatio realis.

Resp. ad primum ex dictis. Primò quod non est *52* inconueniens relationem veritatis realem non esse, sed deficere ex defectu termini, sicut aliae relationes reales deficiunt, si terminus deficit, sed ex vi sui fundamenti petit esse realem, dummodo tamen adsit terminus in re. Vel secundò dicitur quod manet aliquando realis relatio veritatis, etiam non existente ipsa re, quia non solum illi conformatur in se, & in sua existentia, sed in suis fundamentis, & causis, vel effectibus, quia potius abstrahit ab existentia rei, & illa fundamenta, vel causae sunt in rerum natura. Relatio tamen intellectus diuini ad suammet essentiam realis esse non potest, quia non sunt extrema distincta, nec ad creaturas, quia ad illas realiter non ordinatur.

Ad 2. Resp. quod in propositione negatiua, vel quae formatur de aliquo ente rationis, si relatio *53* veritatis respiciat ipsam negationem, & non esse in se, ut terminum cui conformatur, non erit realis relatio ex defectu termini, non quia veritas de se realem relationem non fundet, si adsit terminus realis, at verò si in propositione negatiua respiciatur fundamentum negationis, vel entis rationis, tanquam id cui formaliter conformatur veritas, sic relatio eius potest esse realis, quia formaliter respicit terminum realem. Videatur Diu. Thom. *q. 1. de verit. art. 5. ad 1.*

Ad 3. Resp. quod potius probat nostram sententiam: nam relatio mensurae, & mensurati non *54* est mutua: unde ex parte mensurati est realis, quia ubi est realis dependentia, ex parte verò mensurae non; In veritate autem formali, res mensurata est iudicium, seu conceptus, res verò extra est mensura.

QUARTA DIFFICULTAS.

*An sit perfectior veritas formalis, quam
transcendentalis?*

55 **H**Æc comparatio fit secundum præcisionem conceptuū: constat enim quod transcendentalis veritas, etiā in formali includitur, quia ipsum iudicium, & relatio eius etiā entitas est, & cōsequenter veritatem transcendentalem habet, unde includendo ipsam non potest fieri comparatio cū ipsa, an sit perfectior. Sed difficultas currere debet secundum præcisionem, quatenus exprimimus formalitatem veritatis intellectus, ut manifestatiua est, & veritatis transcendentalis, ut entitatiua perfectio est, & explicantur per ipsas diuersa munera: entitatiua enim veritas est mensura per ideas diuinas, & mensurans nostrum intellectum, veritas autem formalis est manifestatio, & expressio mensurata per ipsas res, & inquirimus, quidnam ex his explicat maiorem perfectionem. Vnde etiam constat quod si fiat comparatio veritatis entitatiuæ creatæ cum veritate formali, quæ est in Deo, illa sine dubio excedit, & est mensura istius, sed debet fieri comparatio vtriusque intra eandem lineam, scilicet formalis veritatis creatæ cum transcendentali creatæ, & diuinæ cum diuina.

56 Oritur autem ratio dubitandi, quia ex vna parte videtur esse perfectior veritas transcendentalis, quam formalis, eo quod illa est mensura, & fundamentum istius, mensura autem est perfectior mensurato, quia tantò mensuratum est perfectius, quantò suæ mensuræ conformius. Ex alia parte, veritas videtur per prius dici de veritate intellectus, & secundariò, ac per quandam analogiam de veritate rei, sicut sanum per prius dicitur de animali, & secundariò de herba, quo exemplo frequenter vtitur S. Thom. ad explicandam hanc rationem veritatis in intellectu, & in rebus, ut in *presenti quæst. 16. art. 1. & 3. ad 1. art. 6 & quæst. 1. de verit. art. 2.* Et certè veritas transcendentalis non appellatur propriè, & formaliter veritas, sed causa, seu fundamentum veritatis, sicut herba non habet propriè, & formaliter sanitatem, sed causam eius: ergo stando in vi, & formalitate præcisa veritatis, principalius, & perfectius est veritas in intellectu, quam in rebus, imò in intellectu propriè, in rebus solum per analogiam, & denominationem.

57 Propter hoc diuisi sunt Auctores in hac parte. Quidam censent tam veritatē intellectus, quam rerū esse ens rationis, & ex hac parte æquales, ut P. Valsq. *hic disp. 77. c. 4.* sed tamen quoad denominationē, seu expressionē veri, censet primariò, & per se esse in intellectu, secundariò in rebus, & solum per quandam attributionem quia res in se nō est formaliter vera, sed solum causa veritatis, aut falsitatis, quæ in enunciatione inuenitur, ut etiam docuerat *disp. 76. c. 2.* & ita verū se habet, sicut sanum: hoc enim dicitur de animali propriè, & formaliter, de herba denominatiue, sic verum formaliter, & propriè pertinet ad intellectum, denominatiue ad res quia causæ sunt veritatis. Quæ sententia etiam attribui solet Caieten. in *presenti art. 6. §. Ad secundam*, qui sentit veritatem solum esse in intellectu, in rebus autem secundariò, sicut sanum in animali, & herba, & fauet D. Thom. *locis allegatis.*

58 Alij tenentes veritatem principalius & perfectius inueniri, vbi est conformitas passiva rei cum suo principio, & per modum mensurati ad mensuram, conformitatem verò per modum mensuræ, dicunt quod non est propriè veritas, sed veritas solum dicit conformitatem mensurati. Vnde aliquando veritas

Ioan. à S. Thoma in 1. Part. D. Th. Tom. 2.

est proprius & principalis in intellectu, aliquando in rebus: nam in nostro intellectu speculatiuo qui sumit cognitionem à rebus, veritas est propriè, quia est ibi adæquatio, & conformitas ut passiuè mensurata à rebus; in intellectu verò practico qui facit res, & est mensura illarum, non est veritas propriè, quia se habet ut mensura, non ut mensurata respectu illarum. At verò in rebus creatis respectu intellectus diuini, cui tanquam principio, & regulæ conformantur, datur etiam veritas propriè, & formaliter, quia est veritas mensurata ab illis, non respectu intellectus creati quem mensurant.

Tertij denique distinguunt de eo à quo primo fit 59 denominatio, seu cui primo nomen imponitur, & de ipsa re, quæ tali nomine significatur. Primo modo dicunt principalius veritatem conuenire intellectui, quia est nobis illa veritas notior, & primo sic nominata est. Secundo verò modo dicunt verum principaliter esse in rebus, quia ibi inuenitur passio entis, & fundamentum veritatis intellectus, sicut plura nomina primo sunt imposita ad significandas perfectiones creatas, & tamen ex parte rei significatæ principalius sūt in Deo, quam in creaturis.

Nihilominus dico primò, si veritas consideretur 60 secundum se pro præcisa relatione conformitatis, & adæquationis, omninò consistit in indiuisibili, nec est principalius in vno, quam in alio, in intellectu, quam in rebus. Ratio est, quia sic veritas versatur purè inter esse, & non esse, inter quæ non est inuenire medium, nec latitudinem magis, & minus, sicut etiam aliarum relationes, ut æqualitatis, & adæquationis, non inueniuntur principalius in substantia, quam in accidente, licet illa principalioris entitatis sit, quia consistunt formaliter in indiuisibili: quidquid enim excedatur, vel diminuatur, iam non manet æqualitas. Quod ergo veritas sic consistat in indiuisibili, patet, quia veritas sumitur ex eo quod res est, vel non est; ita quod si non ita est, sicut affirmatur, hoc ipso definit veritas, & succedit falsitas: ergo veritas est conformitas, & adæquatio inter esse, & non esse, inter quæ non datur latitudo: & sic omnis veritas ex hac parte consistit in indiuisibili, & consequenter non suscipit magis, & minus. In veritate quidem intellectus id constat, quia est affirmatio, vel negatio de eo quod res est, vel non est, atque ad eam eius conformitas versatur inter esse, & non esse rei. Similiter veritas entitatiua est adæquatio indiuisibilis cum suo principio, seu idea, quia vel conformatur cum tali idea, vel non: si non conformatur, recedit ab illa, & incipit habere aliam ideam; si verò adæquatur illi, saltem quoad substantiam, & esse, hoc ipso habet veritatem illius: Et licet aliquid possit quantum ad apparentiam conformari vni ideæ, & in proprietate, seu substantia alteri, tamen non potest duplici ideæ conformari in proprietate, & substantia, sed tantum vni, quia tantum habet vnā essentiam. Vnde sicut essentia rerum consistunt in indiuisibili, ita & veritas entitatiua, falsitas autem ex eo contingit in rebus, quia in apparentia videntur vnum, & in proprietate sunt diuersa. Quare in substantia, & essentia res solum conformantur vni ideæ, seu principio, si autem res conformantur illi, cessat proprietate, seu veritas, quæ sumitur per ordinem ad tale principium, & ideo consistit in indiuisibili, scilicet in conformari, vel non conformari.

Dico 2. si attendamus ad fundamentum, seu firmitatem veritatis, & conditiones eius, potest admittere latitudinem, & principalius seu perfectius potest inueniri in vno, quam in alio. Et aliqua conditiones ex istis principalius inueniuntur in intellectu

E 2

alia

aliæ principaliter in rebus: Et iuxta hoc sententiæ relatæ conciliantur inter se, & ex omnibus illis resultat resolutio. Hæc conclusio constabit, enumerando istas conditiones, seu respectus, & formalitates veritatis. Et primò considerari potest ratio firmitatis, seu immutabilitatis, & certitudinis. Secundò, quod sit passio entis discernens ens verum ab ente ficto. Tertiò, quod sit obiectum intellectus. Quarto, quod sit asserta, & manifestata veritas. Quintò, quod habeat rationem mensuræ, vel mensurati. Sextò, ipsa denominatio, seu potius nominatio veri, ubi præcipue inueniatur, an in veritate intellectus, vel rei.

62 Circa istas conditiones discurrendo, quod attinet ad primam, constat manifestè quod firmitas, seu immutabilitas veritatis principaliter inuenitur in intellectu diuino, ex cuius ideis deriuatur ad creaturas; participatiue autem prius & principaliter inuenitur in rebus, quàm in intellectu, quia totum fundamentum certitudinis, & firmitatis intellectus ipse sumit à rebus: ipsa autem certitudo formalis, id est vt certificans nos, seu vt asserta, & manifestata in nobis, primariò, & per se inuenitur in intellectu, vt statim dicemus. Secunda, & tertia conditio veritatis principaliter, & per se inueniuntur in rebus: nam esse passionem entis transcendentaliter conuenit ipsi entitatiue veritati. Similiter esse obiectum intellectus principaliter conuenit ipsi enti: intellectus enim non est obiectum sui, nisi in quantum ens quoddam est. Quarta conditio primò, & per se inuenitur in intellectu, quia veritas vt manifestans se nobis, & certificans nos, non est nisi intra intellectum, vbi est manifestatio, & apprehensio, seu assertio veritatis; Et talis veritas dicitur formalis formalitate scilicet manifestationis, & certitudinis. Et secundum hanc rationem veritas sic sumpta non inuenitur in rebus, nisi denominatiue, & analogicè, licet veritas transcendentalis & obiectiua propriè inueniatur in rebus. Quinta conditio sic distribuitur, quod veritas in ratione mensuræ inuenitur principaliter in intellectu diuino, quia est principium, & mensura omnium: in rebus autem inuenitur veritas vt mensurata per conformitatem, & ordinem ad intellectum diuinum, vt mensurans autem per ordinem ad intellectum creatum, quia intellectus ex conformitate ad res desumit suam veritatem: & tamen, vt aduertit sanctus Thomas, *quest. 1. de verit. artic. 2.* in rebus prior, & principalior est ordo mensurati ad intellectum diuinum, quàm mensurantis ad intellectum creatum, quia prius est id quod participamus à Deo, quàm quod communicamus aliis: In ipso autem intellectu creato inuenitur veritas per modum mensurati, quantum ad intellectum speculatiuum, quia sic dependet ab obiecto, vt mensurante, & mouente. Inuenitur autem per modum mensuræ in intellectu practico, quia sic regulat, & determinat res quas facit. Sexta denique conditio videtur per prius inueniri in veritate intellectus, quàm rei, quia nomen veritatis, seu denominatio ipsius prius videtur imposita veritati intellectus, eo quod veritas ibi est nobis notior, vbi magis resplendet eius manifestatio, & certificatio quoad nos, quod sit in intellectu, sicut è contrà nomen boni magis impositum est bonitati rerum, quàm voluntatis, eo quod perfectio in qua fundatur ratio boni magis consummatur in apprehensione, & possessione rei, quàm appetimus, quàm in ipso actu appetendi.

63 Ex his autem omnibus elicimus, quod simpliciter loquendo veritas creata perfectius inuenitur in rebus, quàm in intellectu, quia ibi inuenitur

permanentius, & actualius, & participatio veritatis à Deo immediatius descendit ad res, inde verò communicatur cognitioni intellectus, quia habet pro fundamento, & obiecto mouente ipsam veritatem entitatiuam rei. Et licet intellectus, quia entitas spiritualis est, sit perfectior multis veritatibus rerum ad extrà, tamen hoc ipsum conuenit illi ratione veritatis suæ transcendentalis, quæ sequitur ad entitatem illius spirituale, sicut etiam inter ipsas res quædam sunt perfectiores aliis in entitate, & veritate.

Ad rationem dub. à principio pro ea parte quæ 64 tangit veritatem transcendentalem, iam responsum est. Pro ea autem parte qua intendit probare de veritate iudicij, quod sit principalior; Resp. quod quando Diuus Thomas, Caietanus & alij Auctores docent veritatem esse primariò in intellectu, & secundariò in rebus, loquuntur de veritate formali, prout est veritas manifestans, & certificans nos, aut manifestata, & expressa; sic enim propriè, & formaliter solum inuenitur in intellectu: in rebus enim non inuenitur manifestatio, & expressio veritatis, sed solum obiectum, fundamentum, & causa illius. Hoc tamen non obstante veritas transcendentalis propriè, & formaliter est in rebus, neque est negandum quod cum omni proprietate sit appellanda veritas, tum quia sic communiter appellatur à sapientibus, qui dicunt veritatem esse passionem entis, & conuerti, sed identificari cum illo: tum quia per hanc veritatem distinguitur ens verum ab ente ficto, quod anteuertit omnem existimationem nostram, nec dicitur tale per ordinem ad nostram cognitionem, verbi gratia, verum aurum non dicitur talè per ordinem ad existimationem humanam, sed quia in se tale est. Vnde Diuus Thomas *quest. 2. de verit. artic. 2.* dicit quod *res dicitur vera, & per ordinem ad intellectum diuinum, in quantum implet id quod Deus ordinat de illa, & per ordinem ad intellectum humanum, in quantum nata est facere veram estimationem sui, & prima ratio per prius inest ei, quàm secunda.*

Vnde soluitur fundamentum Vasq. *suprà* allatum. 65 Nam quod veritas non sit ens rationis tantum, iam *suprà* satis ostensum est, quod verò res non dicantur veræ, solum quia sunt causa veritatis in intellectu, loquendo de veritate entitatiua, apertè sanctus Thomas dicit *citatis verbis*, dum inquit *res esse veras per ordinem ad intellectum diuinum, & per ordinem ad intellectum creatum, sed quod prima ratio prius inest.* Et tamen Vasquez *disputatione 77. capite 4.* dicit res non dici veras, nisi in quantum sunt causa veritatis in intellectu nostro, non in quantum conformes diuino; quod est expressè contra verba citata Diu. Thom. Et tota hallucinatio Vasquez in eo est, quia quando dicunt Auctores veritatem esse analogicè in intellectu, & in rebus, sicut sanitas in animali, & in herba, id accepit de omni veritate absolute, non autem de sola veritate formali, vt accipiunt Auctores, quid id dicunt, cum tamen veritas transcendentalis propriè sit in rebus, & de hac procedit quæstio, an sit perfectior quàm veritas intellectus.

Sed adhuc obicit Vasq. *vbi suprà*, nam res non 66 dicuntur falsæ per aliquid sibi intrinsecum, nec per ordinem ad ideam diuinam, sed præcisè per ordinem ad intellectum nostrum: ergo etiam per ordinem ad illum præcisè dicuntur res veræ. Consequentia patet, quia contrariorum eadem est ratio: ergo sicut falsitas nõ conuenit rebus, nisi per ordinem ad intellectum nostrum, similiter nec veritas. Antecedens autem constat, ex *art. præced.* vbi ostendimus, nihil

nihil dici falsum in sua entitate, nec in ordine ad ideas diuinas, sed in ordine ad intellectum nostrum.

67 Resp. iam in eodem art. precedenti nos dixisse quod falsum non inuenitur in rebus, nisi per ordinem ad intellectum nostrum, nec contrariatur vero secundum omnem respectum, & rationem quam dicit, sed solum secundum unum respectum, quem dicit veritas ad nostrum intellectum; duos enim respectus includit, vt Diu. Thom. dicit in verbis supra citatis, alterum ad intellectum diuinum, cuius idea conformatur, & à qua regulatur in suo proprio esse; alterum ad intellectum nostrum quem mouet ad veram notitiam sui, non potest falsitas contrariari vero quantum ad primum respectum, sed solum quantum ad secundum propter apparentiam aliquam, qua potest nostrum intellectum decipere. Et ideo solum in respectu ad intellectum nostrum potest dari falsitas, seu fallentia, non per respectum ad ideam diuinam, quæ infallibilis est in adæquatione ad suum ideatum, nec per respectum ad ipsam entitatem in se, quia verum est passio entis conueniens unicuique secundum suam proprietatem, & essentiam: nulla autem res est falsa in essentia sua, quia essentia rerum immutabiles sunt. Quare ad argumentum negatur consequent. quia falsitas, vt dictum est, non contrariatur vero adæquate, & ex omni parte, sed solum provt fundat respectum ad intellectum nostrum.

68 Ad fundamentum secundæ sententiæ, quæ est Caietan. dicitur quod sensus Diu. Thom. quando docet quod veritas est prius in intellectu, quam in rebus, est duplex. Primus, quod loquitur de intellectu diuino: sic enim Diuus Thomas se explicat in hac questione, articulo 6. vbi inquit; *Dictum est autem quod veritas per prius est in intellectu, & per posterius in rebus secundum quod ordinantur ad intellectum diuinum.* Secundus est, quod si intelligatur de intellectu creato, dicitur ibi esse per prius veritas, loquendo de veritate formali: hæc enim intra intellectum per se inuenitur, quia ibi est veritas vt manifestata, & vt manifestans, quæ dicitur veritas formalis. In rebus autem est veritas transcendentalis, quæ est obiectum & fundamentum istius.

69 Ad fundamentum 3. sententiæ, Resp. quod ad veritatem non solum pertinet ratio mensurati, sed etiam ratio mensurantis, & deriuantis ex se alias veritates, sicut patet de veritate diuina, quæ propriissime est veritas, imò & summa veritas, & mensurat alias veritates, & similiter veritas artis respectu artefacti. Vnde non repugnat secundum has considerationes per prius esse veritatem in intellectu, vel in rebus secundum diuersas rationes mensuræ, vel mensurati.

70 Ad ultimam sententiam patet ex dictis de impositione huius nominis veritas, cui primò facta est, & vnde inceperit talis denominatio.

ARTICVLVS III.

Virum veritas inueniatur solum in compositione, & diuisione, & quomodo sit obiectum intellectus?

Tria in hoc articulo tractabimus. Primò, quomodo veritati conueniat esse obiectum intellectus. Secundò, quomodo veritas formalis inueniatur in compositione intellectus. Tertiò denique, an in actu iudicij, & in ipsa enunciatione inueniatur veritas. Ioan. à S. Thoma in 1. Part. D. Th. Tom. 2.

tas per conjunctionem diuerforum actuum, vel per modum vnius actus simplicis.

Verum est obiectum intellectus.

Loquimur de veritate entitatiua, seu transcendentali, nam veritas formalis pertinet ad ipsam cognitionem intellectus, non ad obiectum eius, nisi per reflexionem, sed loquimur de veritate, quæ directè percipitur ab ipsa cognitione intellectus, & hæc est veritas entitatiua; & de hac inquirimus quomodo sit obiectum intellectus, an tanquam res obiecta, an tanquam ratio formalis, an verò tanquam conditio requisita vt aliquid sit obiectum intellectus.

In qua re P. Vasquez sentit, verum non esse obiectum adæquatum intellectus, quod duobus modis explicat. Primò, *disputatione 76. capite 2. numero 9.* quia scilicet intellectus versatur circa verum, vel quod apparet verum per assensum; circa falsum verò per dissensum; & sic veritas non est adæquatum obiectum, quia non comprehendit tam assensum, quam dissensum. Secundò, id explicat *disputat. 77. capit. 5. numero 14.* quia videlicet veritas non est formalis ratio obiecti intellectus, sicut bonitas voluntatis, sed est conditio consequens, seu denominatio proueniens ex respectu extrinseco ad ipsum intellectum, sicut etiam denominatio intelligibilitatis: sed hac ratione etiam falsitas potest assignari vt conditio obiecti intellectus, licet non ita latè patens sicut veritas, nec tanquam perficiens ipsum.

Dicendum nihilominus est, solam veritatem pertinere ad obiectum intellectus, non falsitatem, sed ad defectum obiecti intellectus. Ipsa autem veritas sumpta formaliter pro relatione qua comparatur ad intellectum nostrum, non est obiectum intellectus per modum rei, neque per modum rationis formalis obiectiue, sed per modum conditionis, seu denominationis necessario consequentæ.

Prima pars huius conclusionis sumitur ex Diuo Thoma. in presenti articulo 3. ad vbi inquit quod *cum dicitur quod ens non potest apprehendi sine ratione veri, si intelligatur sic, quod non apprehendatur ens, nisi ratio veri consequatur apprehensionem entis, sic loquutio habet veritatem.* Ergo sentit Diuus Thomas quod sine ratione veri, vt consequuti nullum ens habet rationem apprehensibilis ab intellectu: ergo neque obiecti, quia illud est obiectum quod est apprehensibile. Nusquam autem dixit Diuus Thomas, quod ens non apprehenditur nisi consequatur ratio falsi aut disiunctiue ratio veri, vel falsi, sed solum ratio veri. Et rectè hoc dixit, quia non est obiectum intellectus ens provt falsificabile, sed provt verificabile: falsum enim est defectus intellectus, proprium autem obiectum alicuius potentia, siue adæquatum, siue inadæquatum non est à quo habet defectum, sed perfectionem siue adæquatam, siue inadæquatam, & partialem, quia illud est obiectum proprium ad quod propriè ordinatur potentia, non ordinatur autem ad suum defectum, sed ad suam perfectionem: si ergo falsitas est defectus intellectus per se, non ordinatur ad illam: ergo non est obiectum eius, neque partiale, & inadæquatum, neque totale, sed ab illo deficit tanquam ab opposito sui obiecti. Si autem est oppositum obiecti proprii, & per se intellectus: ergo non potest esse obiectum, etiam partiale illius.

Et conf. quia omne ens, & omne obiectum intellectus

intellectus adæquatè sumptum habet veritatem transcendentalē, per quam conformatur ideæ diuinæ, & mouere potest intellectum creatum ad propriam & veram sui notitiam. Quod autem moueat ad falsam, & alienam est ex aliquo defectu, vel sui, vel intellectus, vel sensuum, quibus mediantibus intellectus accipit cognitionem, & solet extraneari per illos à propria veritatis cognitione: ergo in tantum induit rationem obiecti intellectus per se, in quantum fundat veritatem, seu propriam cognitionem sui; in quantum verò deficit à ratione obiecti, deuiat ad falsitatem; ergo falsitas nullo modo pertinet ad rationem obiecti, neque adæquatè, neque inadæquatè, sed ad defectum obiecti, sicut etiam malum non est per se obiectum appetitus, sed defectus appetibilitatis, & solum est refugibile ab appetitu; si autem appetitur, solum est sub aliqua ratione boni apparentis, quam induit.

6 Secunda pars conclusionis sumitur ex D. Thom. in presenti art. 3. ad 3. tum in verbis supracit. vbi inquit, quod ratio veri consequitur apprehensionem entis; tum in his quæ subdit; quod si dicatur quod ens non potest apprehendi nisi apprehendatur ratio veri, falsum est, sed verum non potest apprehendi, nisi apprehendatur ratio entis, quia ens cadit in rationē veri. Et est simile, sicut si comparemus intelligibile ad ens, non enim potest intelligi ens, quin ens sit intelligibile; sed tamen potest intelligi ens, etsi non intelligatur eius intelligibilitas: & similiter ens intellectum est verum, non tamen intelligendo ens, intelligitur verum. Ita D. Thomas sentit: ergo quod ratio veri in ente non habet rationem obiecti, tanquam res intellecta, sed sicut respectus, seu ratio consequuta, sicut intelligibilitas non est res intellecta & obiecta intellectui, licet ens non sit obiectum nisi sit intelligibile, & obiectum visus est visibile, nō tamen visibilitas ipsa est res quæ videtur, sed visibilitas, & intelligibilitas & veritas sunt respectus quos obiecta ipsa fundant ad potentias, quæ versantur circa talia obiecta; vnde supponunt, non constituunt obiectum ipsum. Videatur etiam Caiet. dicto art. 3. & alij Comment. D. Th. ibi. Fundamentum autem est, quia veritas, vt dictum est, formaliter dicit mensurationem, & adæquationem rei cum intellectu, siue cum nostro quem mouet, siue cum diuino, à quo deriuatur: ergo non potest ipsa ratio, & formalitas veri esse obiectum intellectus, sed id quod fundat talem rationem veri, & præsupponitur illi. Consequenter, quia hæc adæquatio, & mensuratio est intra intellectum, & eius obiectum; illi enim commensuratur, & adæquatur intellectus: ergo obiectum intellectus non est ipsa adæquatio, sed illud extremum ad quod ista adæquatio terminatur, vel quod fundat illam, quia inter ipsum, & intellectum versatur ista adæquatio, & sic verum fundamentale, & ex parte rei se tenens est id in quod intellectus tendit, & cui adæquatur, & consequenter illud erit obiectum eius, non autem ipsa formalis adæquatio, & commensuratio, quæ est ratio veri.

7 Quod autem ratio veri non sit formale obiectum, neque ratio formalis obiecti intellectus, probatur tum quia formale, obiectum intellectus constituitur per immaterialitatem qua redditur obiectum spiritualiter cognoscibile, & apprehensibile, non autem per id solum quod pertinet ad compositionem, & diuisionem, seu ad iudicium, sicut veritas, quæ in solo iudicio inuenitur; tum quia ratio formalis obiecti dicitur illa quæ est ratio motiua, & perfectiua intellectus, seu propria forma qua obiectum habet mouere, & perficere potentiam, vel actum. Constat autem quod prius est quod mouens habeat formam, & vim mouendi proportionatam mobili, deinde quod inter ipsa resultet adæquatio, & regulatio, eo

quod regulatio fundatur inter res habentes inter se proportionem, per quam inter se æquantur, seu regulentur: ergo formalis ratio constitutiua obiecti in ratione mouentis, & perficientis potentiam antecedit, & fundat ipsam regulationem, & commensurationem, quæ est formaliter ratio veritatis.

Ad fundamentum supra insinuat ex P. Vafq. 8 quia scilicet intellectus etiam versatur circa falsum, & ita non potest verum esse adæquatum eius obiectum. Resp. ex dictis quod intellectus versatur circa falsum dissentiendo, & refugiendo tanquam ab aliquo sibi opposito; vnde non fertur in illud sicut in obiectum, sed potius reiicit tanquam deficiens à ratione obiecti, & oppositum illi. Quod autem deficit, & opponitur ratione obiecti, quomodo potest dici obiectum, etiam inadæquatè, & partialiter? sicut quia oculus refugit tenebras vt oppositas rationi formali sui obiecti, quæ est lux, non potest dici quod tenebræ sunt obiectum partiale visus: ergo neque quod falsum sit obiectum partiale intellectus, aut malum voluntatis, licet refugiat illa, imò quia refugit illa, obiectum non sunt. Quod si intellectus tendat in falsum per deceptionem, tanquam si esset verum, aut per reflexionem iudicans aliquid esse falsum, hoc totum sub ratione veri accipit intellectus & per assensum, non dissentiendo, & refugiendo ab illo vt ab opposito sui obiecti.

Instabis ex D. Thom. qui in hac quæst. art. 4. comparat verum bono, dicens quod sicut bonum est id in quod tendit appetitus, ita verum nominat id in quod tendit intellectus: ergo sentit quod verum est formale obiectum intellectus, sicut bonum appetitus; & art. 2. docet quod perfectio intellectus est verum vt cognitum, & sic sentit quod proprium obiectum intellectus est verum formaliter vt in cognitione, & non solum res illa quæ fundat hanc veritatem. Vnde communiter dici solet quod verum est obiectum intellectus, & veritas definitur quod est rectitudo sola mente perceptibilis, & ens in quantum verum dicit ordinem ad intellectum, non in quantum ens, aliàs ratio veri non adderet supra ens ordinem ad intellectum, si ante ipsam rationem veri esset obiectum intellectus: nam hoc ipso haberet ordinem ad intellectum in ratione obiecti.

Resp. quod intellectus dicitur respicere verum, 10 sicut appetitus bonum, sumendo verum non pro ipsa formali adæquatione ad iudicium, sed pro eius fundamento; & præsupposito, quatenus immateriali & spirituali modo potest mouere intellectum, non quatenus solum formaliter est adæquabile eius iudicio: in hoc enim consistit veritas: bonum autem non consistit in regulatione cum iudicio appetitus, sed in ipsamet appetibilitate, seu perfectione rei vt finalizante, seu mouente appetitum, & ideo ad rationem obiecti appetibilis pertinet formaliter. Ad id verò quod dicit D. Th. art. 2. Resp. quod aliud est quod veritas cognita sit perfectio intellectus, aliud quod sit ratio formalis obiecti intellectus: pertinet enim ad perfectionem intellectus non solum rem ipsam, quæ vera est, attingere, sed etiam veritatem ipsam, id est comparisonem, & adæquationem eius, in quo formaliter veritas consistit; & quandiu comparatio ista non cognoscitur, veritas perfectè non attingitur: cognoscere autem comparisonem, & comparatiuè res attingere, perfectio intellectus est: hoc enim non conuenit aliis potentiis, non tamen hoc eius obiectum formale est, quia etiam sine comparatione potest intellectus cognoscere. Vnde cum dicitur quod verum est obiectum intellectus, intelligitur de vero fundamentali, & non solum de formali, hæc enim solum per iudicium intellectus attingi potest, vt statim dicemus: & quia solus intellectus comparationem

tionem istam veritatis potest cognoscere, ideò dicitur quod est rectitudo sola mente perceptibilis. Quòd autem dicitur quòd ens antecederet ad verum non dicit ordinem ad intellectum: Resp. quòd non dicit ordinem ad intellectum per modum adæquationis, quod formaliter importat ratio veri, bene tamen per modum obiecti, seu fundamenti huius adæquationis,

Veritas formalis solum est in compositione, & diuisione.

11 **S**upponimus ex tribus actibus intellectus secundum, qui vocatur cōpositio, & diuisione, duos actus habere, seu formare, vnum qui apprehendit, seu format propositionem, alterum qui iudicat; & primus vocatur enuntiatio apprehensiva, secundus iudiciū. Dicitur autem vterque pertinere ad compositionem, & diuisionem, quia vterque actus non fit solum per simplicem terminum, sed per aliquam vnionem, seu copulam, & verbum quod vel ipsa extrema coniungit, vel super ipsa coniuncta cadit iudicando, vt cum per iudicium dico, ita est, vel non est. Et cogimur istos duos actus distinguere, quia prius est propositionem formari ex subiecto, & prædicato, & cum apprehendo hominem esse album, & postea iudicare, an ita sit, vel non sit in re. Vnde enuntiatio solum attendit ad coninentionem extremorum; iudicium verò ad conuenientiam, & conformitatem eorum cum eo quod est in re. Præsertim autem hoc apparet, quia sæpè formatur enuntiatio, & suspenditur iudicium, vt quando caremus ratione sufficienti ad iudicandum, vt cum nobis repræsentatur hunc hominem esse furem, illam fæminam esse adulteram, & tamen non audemus iudicare.

12 Nec potest dici (vt significant P. Suar. *disp. 8. met. sect. 4.* & Vasq. *hic disp. 75. c. 4. in fine*) quod ibi per modum quæstionis, & interrogationis repræsentatur nobis illa cōpositio ante iudicium, non per modum enunciationis: vel si ibi coniunguntur extrema enunctiue, non coniunguntur conceptus vltimati rerum, sed non vltimati vocum. Nam contra primum est, quia multoties nobis repræsentatur illa cōpositio absolute, v.g. iste homo est fur, & non per modum dubitationis, vel interrogationis, vtrum sit fur; & tamen posita illa absoluta repræsentatione suspendimus iudicium: ergo ante iudicium repræsentatur absoluta cōpositio extremorum, quæ non est aliud, quàm enuntiatio, cum coniungat extrema per copulam.

13 Contra secundum autem est, quia in illa repræsentatione, iste homo est fur, non repræsentatur nobis ipsa significatio, vel idioma hominis, vel furti, sed res quæ est homo, & quæ est furtum. Quòd si sola vox, vel significatio repræsentaretur, non esset ratio cur suspenderemus iudicium: nam quòd vox homo significet hominem, & vox furtum significet furari, nulla est dubitatio, sed totalis certitudo: ideò ergo suspendimus iudicium, quia res ipsæ nobis repræsentantur, non voces. Hoc supposito duo oportet discutere in præsentia.

Primum, an veritas solum inueniatur in compositione, & diuisione, non verò in simplici apprehensione, vel sensu. Secundum, an in solo actu iudicandi, vel etiam in ipsa enunciatione inueniatur veritas.

Circa primum, non desunt qui existiment etiam in simplici apprehensione inueniri veritatem, & non in sola compositione, & diuisione, quæ opinio attribuitur Ferrar. 1. *cont. gent. c. 59. & 60.* Capreo. in 1. *dist. 19. q. 3. art. 1. concl. 3.* Soncin. 6. *met. q. 17.* & aliis. Et fundamentum constat, tum auctoritate, tum ratione. Auctoritas est Arist. 3. *de anima. cap. 6. lect. 11.* apud

D. Thom. vbi dicit quòd *intellectus, non omnis, sed qui est ipsius quid est, ad formam accommodari, est verus, & non quippiam de quopiam, sed vt visio proprii ipsius est vera.* Super quæ verba inquit D. Thom. *Veritas, & falsitas, consistit in quadam adæquatione, vel comparisonem vnus ad aliud, quæ quidem est in compositione, & diuisione intellectus, non autem in intelligibili incomplexo. Sed licet ipsum intelligibile incomplexum non sit neque verum, neque falsum, tamen intellectus intelligendo ipsum verus est, in quantum adæquatur rei intellectæ. Et ideo subdit, quod intellectus qui est ipsius quid est, scilicet, secundum quod intelligit quid est res, verus est semper, & non secundum quod intelligit aliquid de aliquo.* Et huius rationem assignat, quia quod quid est, est primum obiectum intellectus, vnde sicut visus nunquam decipitur in proprio obiecto, ita nec intellectus in cognoscendo quod quid est. Ergo sentit Arist. Et D. Thom. quod etiam in cognitione simplici quidditatis datur veritas, & non falsitas. Similiter in 9. *met. text. 22. lect. 11.* apud D. Thom. docet, quòd *in simplicibus attingere, & dicere verum est, non attingere verò est ignorare.* Vbi D. Tho. inquit quod *attingere mente id ipsum simplex, scilicet, vt apprehendatur quod quid est verum, quod est in simplicibus.*

Ratio verò est quia veritas est adæquatio intellectus cum re, hæc autem non alio modo fit, quàm per repræsentationem conceptus cum re repræsentata. Hoc autem etiam inuenitur in simplici apprehensione, quia repræsentat obiectum suum, & conformatur, vel non conformatur illi, nec alio modo inuenitur in ipsa compositione veritas, quàm per adæquationem repræsentationis. Quod si dicatur in compositione non solum repræsentari obiectum, seu etiam discerni vnum alio, & ab attribui, seu coniungi vnum cum alio. Contrà est, quia etiam simplex apprehensio discernit vnum ab alio, quia aliter definit quidditatem hominis, quàm equi, & in ipsa definitione coniungit vnum alteri, v. g. dicendo animal rationale, animal ininhibile. Cur ergo discretio, & cōpositio, seu cōiunctio in simplici apprehensione non sufficit ad veritatem, & sufficit in cōpositione, & iudicio? aut quid addit modus repræsentandi in iudicio, quàm in simplici apprehensione, vt in illo potius dicatur esse veritas?

15 Quod conf. ex magna difficultate explicandi quomodo specialiter veritas reperiatur in cōpositione, & non in simplici apprehensione præter adæquationem repræsentationis. Nam quidam dicunt specialiter reperi in compositione, quia ibi solum potest esse falsitas, quæ est contraria veritati; in simplici autem apprehensione falsitas esse non potest, sed sola veritas. Hoc tamen non est negare veritatem in simplici apprehensione, sed potius ita perfecte in ea ponere quòd non est capax sui oppositi, sicut anima Christi verè habuit virtutes, licet non sit capax vitij. Alij dicunt veritatem specialiter esse in compositione, quia per illud solum dicimur nos sentire verè de rebus, vel falli. Sed hoc est explicare rem istam per effectum quem facit in nobis, de quo redit eadem difficultas quis sit ille modus, & specialis ratio per quam reddimur verè, vel falsò sentientes quòd non inueniatur in simplici apprehensione: si enim in illa est veritas, per illam reddimur verè sentientes. Alij dicunt in simplici apprehensione esse veritatem simplicem, in composita verò compositam. Sed hoc est succumbere difficultati, quia si veritas simplex est veritas formalis, de qua in præsentia loquimur, iam fateamur dari in simplici apprehensione: si non est, restat tota difficultas, quo modo sola veritas composita, quæ est formalis veritas inueniatur in sola compositione speciali modo. Nec minori difficultate caret sententia D. Thom. vt mox videbimus.

Nihilominus sententia Arist. & D. Thom. est in sola compositione, & diuisione propriè reperiri veritatem, & falsitatem. Arist. id affirmat *1. peri her. cap. 1.* vbi dicit quod *verum, & falsum in compositione, diuisioneque consistit.* vbi D. Thom. *lect. 3.* inquit quod in hac secunda operatione intellectus, id est componentis, & diuidentis dicit Arist. quod inuenitur veritas, & falsitas, relinquens quod in prima operatione non inuenitur. Et *cap. 3. eiusdem lib.* dicit Arist. quod enunciativa oratio est in qua est verum, vel falsum. Super quæ verba iterum dicit D. Th. quod *duæ sunt operationes intellectus, in quarum in una non inuenitur veritas, aut falsitas, in alia autem inuenitur verum, aut falsum, & ideo orationem enunciativam definit ex significatione veri, vel falsi.* Item in *6. met. text. 8.* expressè dicit Philosoph. quod *verum & falsum non est in rebus, sed in mente: circa simplicia verò, & quid est, nec etiam in mente: vbi etiam videndus est D. Thom. lect. 4 & 9. met. lect. 11 & 3. de anima textu 26. lect. 11.* vbi totum hoc disputat D. Thom. & resoluit quod in sola compositione, & diuisione reperitur veritas, & soluit fundamenta opposita. Videndus est etiam D. Th. in *presenti art. 2. & q. 1. de verit. art. 3. & 1. cont. gent. cap. 59.* vbi perpetuò docet quod veritas solùm est in intellectu componente, & diuidente. Et communiter sequuntur hoc Thomistæ, viderique potest Caiet. in *presenti art. 2.*

17 In his autem locis perpetuò D. Thom. vitur illa ratione quæ sibi efficax visa est, quia solùm intellectus componens, & diuidens cognoscit adæquationem vnius ad alterum, quod non facit sensus, vel simplex apprehensio, & ideo ibi solùm est veritas formalis, vbi ista adæquatio in qua veritas consistit, est obiectum cognitum ab ipsa. Ex qua ratione datur occasio ad intelligendum quod D. Thom. requirit cognitionem reflexam, scilicet, quæ cognoscat ipsam conformitatem inter intellectum, & rem, vt dicatur in ea esse veritas. Quod insinuat *6. met. lect. 4. citata,* dum inquit, quod in sola secunda operatione est veritas, & falsitas secundum quam non solùm intellectus habet similitudinem rei intellectæ, sed etiam super ipsam similitudinem reflectitur cognoscendo, & iudicando ipsam.

18 Ceterum S. Thom. seipsum explicauit *1. peri her. lect. 3.* & consonat ei valde expositio Caiet. in *presenti art. 2.* vbi explicans quomodo sensus non possit cognoscere veritatem, quia non apprehendit habitudinem conformitatis, quam tamen potest cognoscere intellectus, subdit quod *cognoscere prædictam conformitatis habitudinem nihil est aliud quam indicare ita esse in re, vel non esse quod est componere, & diuidere, & ideo intellectus non cognoscit veritatem, nisi componendo, & diuidendo per suum iudicium.* Hoc autem Caiet. citato loco explicauit, dicendo quod conformitas ista potest cognosci dupliciter, scilicet in actu signato, & in actu exercito. In actu signato nihil aliud est quàm cognitionem terminari ad relationem ipsam conformitatis secundum se. Cognoscere in actu exercito, est cognoscere res ipsas vt conformes, seu coniunctionem prædicati cum subiecto in enunciatione factam conformem esse ei quod versatur in re, quod non potest fieri, nisi per aliquam cognitionem complexam, quæ coniungit prædicatum subiecto, seu de ipsa coniunctione iudicat. Et in hoc videtur aliquo modo interuenire cognitio reflexa, quatenus iudicium supponit coniunctionem extremorū, & super ipsam enunciationem cadit. Sed re vera non est nisi iudicium directū habens pro materia ipsa extrema composita, & coniuncta in enunciatione, ideoque D. Th. dixit nuper citato loco, quod *cognoscere prædictam conformitatis habitudinem, nihil aliud est quam indicare rem ita esse.*

Sed propriè non est reflexio, quia iudicium non reddit super ipsum intelligere, seu entitatem enunciationis, sed cadit super extrema repræsentata in ea; Et ita dixit D. Thom. *1. cont. gent. cap. 59.* quod *non exigitur ad veritatem intellectus, vt ipsum intelligere adæquetur rei, cum res interdum sit materialis; intelligere verò immateriale, sed illud quod intellectus intelligendo dicit, & cognoscit, oportet esse rei æquatum, scilicet vt ita in re sit, sicut intellectus dicit.* Non ergo iudicium est reflexio super immaterialitatem, & entitatem conceptus, sed super repræsentatum in enunciatione. Et de hoc loquitur D. Th. in *6. met. citato.*

19 Ex his ergo explicatur ratio D. Thom. in hunc modum. Cum enim veritas formalis importet quandam mensurationem, & regulationem intellectus ad rem, dupliciter possumus vti hac mensura, & attingere illam. Primò, absolutè illam in se videndo, aut tangendo, sicut cum in manu sumimus vlnam, vel pondus, aut videmus illud. Secundò, applicando ad mensuratum, & exercendo mensurationem ipsam. Et primo modo videtur, res quæ est mensura, sed nondum sit mensuratio, sicut secundo modo. Sic ergo in intellectu duplex illa operatio prima, & secunda videt, & tangit veritatem, quæ est mensura. Prima quidem quæ est simplex apprehensio, videndo rem quæ est vera, & ipsam veritatem rei quæ est mensura. Secunda autem operatio applicat ipsam mensuram, & exercet mensurationem comparando, & coniungendo vnum alteri, quod est componere, vel diuidere. Optimè ergo probat S. Th. veritatem solùm esse in secunda operatione, quia ibi solùm est veritas vt cognita, seu vt in cognoscente, non quidem vt cognita quidditatiuè, id est cognoscendo quid sit veritas: hoc enim pertinet ad primam operationem, quæ cognoscit quidditates rerum, sed est cognita mensuratiuè, seu applicatiuè exercendo ipsam mensurationem, & in ipso exercitio discernendo, & manifestando veritatem: sicut qui videt aliquam mensuram, aut tenet manu sua, v. g. vlnam, sed nondum applicat, non dicitur mensurare, nec in exercitio cognoscere mensuram. Constat autem quod per simplicem apprehensionem, licet res ipsa quæ vera est, & veritas eius apprehendatur, & teneatur cum adæquatione repræsentationis, non tamen applicat istam mensuram, quia non coniungit vnum alteri, nec discernit conuenientiam vnius termini cum alio, aut prædicati cum subiecto, vel disconuenientiam eius: hoc enim pertinet ad secundam: omnis autem mensuratio fit per applicationem, & compositionem mensuræ ad mensuratum, talem quod possit per ipsam discerni conuenientia, aut disconuenientia, æqualitas, vel inæqualitas mensuræ cum mensurato. Vnde licet in prima operatione non solùm derur terminus simplex, sed etiam compositus, vt homo albus, animal rationale, tamen ista coniunctio terminorum sit simplici modo adiiciendo vnum terminum alteri, non discretiue cognoscendo conuenientiam, aut disconuenientiam, adæquationem, vel inadæquationem prædicati cum subiecto, quia cum audio hunc terminum homo, vel homo albus, adhuc nō certificor quid illi conueniat, vel non conueniat, vel an ille terminus albus habeat adæquationem, & conuenientiam cum homine, vel non. Ergo licet simplex apprehensio veritatem ipsam attingat cognoscendo id quod in se est verum, seu mensuram ipsam veritatis, non tamen applicat, & in exercitio ipsam mensurationem, & regulationem facit, quia non comparat, neque componit discernendo conuenientiam vnius cum altero, sicut facit secunda operatio, cum dicit quod est, vel non est. Et ideo hoc speciali modo est veritas cognita in compositione, & diuisione, quo

quo non est in simplici apprehensione.

20 Ad fundamenta opposita resp. Ad primum, ex auctoritate Arist. dupliciter. Primum, quod quando dicitur quod intellectus simplex est verus, sumitur *ly verum* negativè, pro eo quod est non decipi, quia ibi non contingit deceptio circa proprium obiectum, non tamen loquitur de veritate positiva, prout explicat ipsam comparationem, & regulationem conceptus cum re, in quo consistit exercitium veritatis formalis. Secundò, dicitur quod Arist. tribuit veritatem apprehensioni simplici, quantum ad representationem rei veræ, non quantum ad exercitium ipsius mensurationis, quæ fit per comparationem compositionis, & divisionis per esse, vel non esse: Aliud est enim, ut diximus, tenere, seu videre mensuram, aliud mensuram ipsam evolvere seu discernere mensuratum, applicando, & adæquando illi mensuram, sicut aliud est vestem manū tenere, aliud esse illā vestitum. Quæ explicatio sumitur ex ipso Arist. 9. met. textu 22. vbi etiam insinuat præcedentem explicationem lect. 11. apud D. Thom. vbi textus Arist. secundum antiquam translationem loquens de veritate simplicium, sic dicit, *Sed hoc* (scil. simplex apprehensio) *est verum quidem, aut falsum, attingere quidem, & representare verum: non enim idem affirmatio, & representatio, ignorare autem, non attingere, decipi enim circa quod quid est non est, sed aut secundum accidens.* Vbi S. Doctor docet quod verum quod est in simplicibus, est significare ipsum simplex. Itaque representatio ipsa conformatur quidē, & adæquatur in ratione representationis ipsi rei veræ, & hac ratione potest dici vera veritate representandi, non tamen veritate mensurandi, & discernendi verum à falso, quod est proprium exercitium veritatis formalis, & hoc solum fit per compositionem, & divisionem. Et sic notat D. Tho. quod cum Aristoteles dixisset quod in simplicibus attingere, seu representare, est verum, non dixit quod nō attingere est falsum, sed dixit, quod est ignorare, quia scilicet, non est ibi veritas quæ opponitur falsitati, eo quod circa simplicem quidditatis apprehensionem non contingit deceptio, sed solum est ibi representatio rei veræ, cui opponitur, non representatio, seu ignoratio, non autem deceptio.

21 Ad fundamentum ex ratione Resp. quod in simplici apprehensione, & in sensu, imò etiam in pictura, & imagine est adæquatio cum suo representato per modum representationis talis rei, & sic D. Thom. dixit in presenti art. 2. quod in simplici apprehensione est veritas, sicut in quadam re vera, quia scilicet veritas representationis non aliter est veritas quam sicut qualibet res suo principio seu ideæ conformatur. In compositione autem, & divisione est veritas non solum ut representata, & in re habens conformitatem cum suo principio, sed ut exercens ipsam mensurationem, & regulationem veritatis, comparando, & applicando mensuram mensurato. Quod totum licet intellectus faciat per similitudines, & representationes, tamen alio modo fit representatio, & similitudo præcisè representando modo simplici, alio comparativè, & coniunctivè unius cum alio, sicut fit in compositione, & divisione, & per talem applicationem, & comparationem potest exerceri mensuratio inter mensuratum, & mensuratum, non autem solum representari mensura sine exercitio applicationis ad mensuratum, sicut fit in pictura, vel simplici representatione. Vnde patet quomodo speciali modo sit veritas in compositione, quam non sit in simplici apprehensione, quia in hac solum est attingentia, & representatio rei quæ est vera, in illa autem etiam ut in applicante & comparante mensuram veritatis mensurato, & hoc speciali modo nullatenus est in simplici apprehensione.

Dices; per simplex signum externum aliquando significamus integram veritatem, vel exprimimus fictionem: ergo etiam ad simplicem conceptum potest pertinere veritas, vel falsitas. Antecedens constat, ut cum per fumum significatur adesse hostes, per habitum æternum significatur hunc esse Religiosum, Iudicem, aut Doctorem; similiter per nomen falsò sibi impositum finget aliquis se esse nobilem. Et in ipsa simplici apprehensione potest fieri terminus complexus ex terminis repugnantibus ut coruus albus, homo rudibilis, quod totum est falsum.

Resp. quod illa signa simplicia externa non significant veritatem, aut falsitatem per se, & formaliter, sed causaliter, & per accidens, quatenus sunt occasio ut excitetur intellectus ad formandum iudicium de eo quod sub illo signo simplici, aut naturaliter, aut ex impositione latet, sicut viso fumo representatur nobis non solum ignis, aut hostis, sed etiam ignem, aut hostem adesse, & viso habitu excitatur species ad iudicandum hunc esse Religiosum, & per nomen fictum dicitur aliquis falli, quia est causa deceptio- nis, & falsi iudicii, in quo formaliter falsitas consistit. Similiter terminus complexus, vel definitio constans ex terminis repugnantibus dicitur habere falsitatem per accidens, & causaliter, quia est occasio falsi iudicii, de quo D. Thom. 9. met. lect. 11. & 3. de anima lect. etiam 11.

Circa secundum punctum huius difficultatis, an 24 veritas consistat formaliter in actu iudicativo, vel in ipsa enunciatione apprehensiva super quam cadit iudicium. Resp. consistere formaliter in actu iudicativo. Sumitur ex D. Thom. in presenti art. 2. vbi dicit, *Quando intellectus indicat rem ita se habere, sicut est forma quam de re apprehendit, tunc primò cognoscit, & dicit verum, & hoc facit componendo, & diuidendo.* Ergo si primò id habet cum indicat, sicut est illa forma, illa autem nec est forma simplex, sed enunciatio, seu de aliquo subiecto dicta, non ante iudicium dicit verum. Similiter 1. per her. lect. 3. *cognoscere*, inquit, *pred. etiam conformitatis habitudinem, nihil est aliud, quam indicare ita esse, vel non esse in re quod est componere, & diuidere, intellectus non cognoscit veritatem, nisi componendo, & diuidendo per suum iudicium.* Manifestè ergo D. Thom. collocat veritatem in illo actu compositionis, & divisionis, qui est iudicium. Ratio verò sumitur ex dictis, quia veritas est in intellectu per modum cuiusdam mensurationis, qua comparat suum conceptum ad id quod est in re, non quidem conceptum ipsum solum, ut qualitas quædam est, sed prout tangit obiectum suum: sic enim comprobatur intellectus ita tangi obiectum à suo conceptu, sicut est in re, & hoc est mensurare illum per id quod est in re: hoc autem non fit nisi per actum iudicativum, quia antequam intellectus affirmet iudicando ita esse, vel non esse quantumcumque representetur prædicatum in esse subiecto, quod pertinet ad enunciationem apprehensivam, adhuc est indifferens ad verum, vel falsum, quia adhuc non comprobatur ita esse in re, sicut representat in enunciatione coniunctionem prædicati cum subiecto, quia nondum comparat totam illam coniunctionem ad id quod est in re, dicendo ita esse, vel non esse. Quando autem iudicat sic affirmando, tunc mensurat, & applicat illam compositionem ad id quod est in re, dicendo ita esse in re, sicut in conceptu: tunc ergo incurrit veritatem, vel falsitatem, quia ex eo quod res est, vel non est, propositio vera, vel falsa est. Igitur enunciatio apprehensiva representat quidem verum, vel falsum, & significat illud, hoc est rem illam sic compositam per prædicatum, & subiectum, super quam potest cadere iudicium. Representare etiā potest ipsum iudiciū in quo formaliter consummatur veritas, qua-
tenus

tenus intellectus applicat, & comparat rem compositam ad id, quod est in re: quia enim exercetur ista comparatio, & mensuratio per verbum, *est*, dicendo ita est in re; potest etiam vnico conceptu de *ly est*, vtrumque significari, & representari, in eadem enunciatione, dicendo hoc est illud, v. g. homo est albus, non solum copulando predicatum subiecto, sed etiam affirmando, ita quod *ly est* non solum sumatur absolute per modum copulationis, sed etiam comparatiue per modum commensurationis ad id quod est in re, quod est componere, & diuidere comparatiue, seu mensuratiue, non solum copulatiue: licet possit etiam hoc fieri diuersis actibus, quando prius fit, seu apprehenditur copulatio predicati, & subiecti, & postea fertur iudicium quod prius erat suspensum, vt dictum est.

Veritas est in actu entitatiue vno.

25 Cum compositio, & diuisio includat duplicem actum enunciatium, & iudicatum, vt dictum est de iudicatio communiter tenetur esse actum entitatiue vnum, licet cadat super enunciationem compositam, tanquam super materiam. Difficile tamen assignatur ratio huius ab illis qui existimant propositionem apprehensiuam non posse esse vniam entitatiue, sed solum vnitatem ordinis. Nam sicut propositio apprehensiuam negatur ab his Authoribus esse vnum actum entitatiue, sed solum vnum vnitatem ordinis, quia ad illud concurrunt plures species, & consequenter formantur plures conceptus, qui solum vnitatem ordinis colligantur, ita formatio iudicij fit ex pluribus speciebus, quia comparatur id quod est in conceptu, ad id, quod est in re, per *ly est*: ergo similiter non erit vnus conceptus entitatiue, sed vnitatem ordinis, sicut enunciatio. Quod enim aliqui dicunt quod per iudicium intellectus non componit, & diuidit, sed sententiam fert; & sic accedit ad proprium modum cognoscendi Angelorum, qui iudicant simplici actu de compositis, hi non legerunt D. Thom. cui e diametro opponuntur: dicere enim quod iudicare non est componere, & diuidere, est contradictorium D. Thom. qui 1. *peri her. lect. 3.* dicit quod *cognoscere predictam habitudinem conformitatis nihil aliud est quam iudicare ita esse, vel non esse in re, quod est componere & diuidere: & in presenti art. 3. inquit: Quando intellectus iudicat ita se rem habere, sicut est forma quam de re apprehendit, tunc primo cognoscit, & dicit verum, & hoc facit componendo, & diuidendo.* Quomodo ergo potest dici in sententia D. Thom. quod iudicare non est componere & diuidere? Licet enim non sit compositio per modum copulationis predicati cum subiecto, est tamen per modum comparisonis eius quod est in intellectu, ad id quod est in re, quod etiam est componere, & diuidere: constat enim quod iudicium negatiuum fit per separationem, & diuisionem: ergo affirmatiuum per compositionem. Nec obstat quod Angelus iudicat simplici actu: hoc enim non est mirum, quia etiam ipsam enunciationem sine compositione cognoscit vnica specie attingens subiectum, & conuenientiam, vel disconuenientiam predicati. Vbi tamen magis apparet pluralitas conceptuum, quia enunciatio ex pluribus congregatur, quam in iudicio, quo super ipsam copulationem plurium cadit.

26 Circa ipsam ergo enunciationem, quae praecedit iudicium, certius existimamus formaliter fieri per conceptum, & operationem, quae sit vna entitatiue, licet praesuppositiue plures conceptus simplices praesupponat, ex quorum collatione format compositionem predicati, & subiecti: sed quia istam compositionem respicit sub modo vnus conuenientiae, hoc

sufficit vt vnica operatione, & conceptu possint illa attingi. Et hoc est fundamentum huius sententiae, quod in doctrina D. Thom. est firmissimum, quia licet illa obiecta materialiter sint plura, tamen conueniunt in aliqua ratione vna, & sufficienti terminari vnum actum numero, scil. in quantum conueniunt in vna ratione comparisonis, & differentiae, seu copulationis, & in vnitatem totius compositi, cuius sunt partes: ergo vnicum cognitionis actum terminare possunt. Consequentia patet, quia vnitatem; vel diuersitas actuum intellectus, etiam entitatiua, & in ratione qualitatis non sumitur ex vnitatem; vel pluralitate materiali obiectorum, sed ex formali, vt est notissimum apud omnes, & constat manifeste etiam in visu externo: vnica enim visione entitatiua videmus plura quae ante oculos ponuntur, quia sub vna linea visuali ad oculos species diriguntur, & scientia quae est vna entitatiue plura obiecta materialia attingit, quia sub vnico lumine, & ratione formali fertur. Secunda autem operatio intellectus, quae est compositio, & diuisio, est superior ad simplicem apprehensionem, & ad visionem oculorum: ergo ea quae pluribus actibus prima operatio attingit, debet secunda operatio vnico actu attingere, alioquin non esset superior in attingendo eadem obiecta, quae prima operatio attingit: ergo si inuenitur in illa vna formalis ratio cognoscendi, v. g. sub vna ratione comparisonis, vel differentiae, aut compositionis totius, talis ratio formalis vnicum actum entitatiuum postulabit, licet superiorem ad actus simplicis apprehensionis.

Quod autem interueniat ista ratio formalis vna in compositione, & diuisione, licet extrema sint plura, & per plures species antecedenter, & praesuppositiue cognita in simplici apprehensione, constat, quia omnia illa extrema reducuntur ad vniam compositionem, & conuenientiam, vel disconuenientiam extremorum, tanquam partes componentes illud totum: haec autem induunt vnitatem totius sub ratione vnus comparisonis, conuenientiae, vel disconuenientiae; ergo datur vna ratio formalis, sub qua intellectus potest respicere, & attingere illa extrema.

Quod confirm. manifeste ex duobus exemplis D. Thom. Primum est quando dicit quod ex pluribus speciebus potest intellectus formare vniam speciem (quia scil. sub vnica ratione formali fit illa representatio ex pluribus) sicut ex specie montis, & auri format imaginatio speciem montis aurei, & intellectus ex praconceptis speciebus generis, & differentiae format conceptum speciei, vt dicit 1. *part. quest. 12. art. 9. ad 2.* Ergo similiter potest ex praconceptis speciebus subiecti, & predicati formare vniam speciem, seu conceptum totius propositionis. Patet conseq. quia in tantum speciebus montis, & auri, generis, & differentiae formatur vna species, seu conceptus totius speciei, vel montis aurei, quia illa plura conueniunt per modum partium constituendum vnum totum, sicut partes domus constituunt vnum, & cognoscuntur per vniam speciem domus: sed eodem modo, dicit S. Thom. cognosci propositionem per modum vnus, sicut partes in toto: ergo non minus ponit vniam speciem, seu conceptum in formatione vnus propositionis, sicut in cognitione domus, & in formatione montis aurei & speciei ex genere, & differentia. Min. patet in 6. *met. lect. ultima*, vbi inquit S. Doctor quod cum intellectus format ex conceptibus simplicibus compositionem, aut diuisionem, intelligit ambo vt vnum, in quantum scil. ex eis format aliquid vnum, sicut etiam partes cuiuslibet totius intelligit intellectus vt vnum, intelligendo ipsum totum: non enim intelligit homo domum, intelligendo prius

prius fundamentum, & postea parietem, deinde tectum; sed omnia ista intelligit simul in quantum ex eis fit unum: Ergo omnino comparat D. Thom. formationem propositionis formationi ex partibus, qualis est in domo, & in monte aureo, &c. ergo non minus est una species, & conceptus in formatione propositionis, quam in formatione montis aurei, vel domus.

29 Ad hoc non habet opposita sententia quid respondeat, nisi dicendo quod D. Thom. loco citato ex quest. 12. solum intendit quod transacta cognitione manet aliqua species impressa, quæ formata est ex cognitione obiectorum, sicut in D. Paulo remansit ex cognitione diuinæ essentiae. Et quod in illo loco ex 6. met. nō comparauit modum, quo formamus prædictam speciem, cum illo, quo formamus propositionem, sed tantum dicit quod intellectus intelligit prædicatum, & subiectum simul in quantum ex eis fit unum, scil. affirmatio, & negatio; quod verò fiat unum unitate simplicitatis, vel ordinis, ibi non explicat. Sed certè D. Thom. in hoc ultimo loco ex 6. met. non solum dicit quod intellectus intelligit prædicatum, & subiectum simul, sed etiam explicat modum quo format compositionem, & diuisionem, Sicut, inquit, partes cuiuslibet totius intelligit intellectus ut unum, intelligendo ipsum totum; & ponit exemplum in domo, & eius partibus: ergo aperte explicat modum quo fit ista compositio quantum ad unitatem conceptus, sicut est unitas in conceptu domus. Et tamen hæc solutio mittit hæc verba D. Thom. & non soluit id in quo facimus vim. Et ut clariùs constet hanc esse expressam eius mentem, videatur hac 1. part. quest. 58. art. 2. ubi inquit quod contingit aliqua accipi ut plura, & ut unum, sicut partes continui, quæ si accipiuntur secundum quod sunt unum in toto, sic simul una operatione cognoscuntur tam per sensum, quam per intellectum, dum totum continuum consideratur, ut dicitur in 3. de anima, & sic etiam intellectus noster simul intelligit subiectum, & prædicatum, prout sunt partes vnius propositionis. Vbi pondero quod quando D. Thom. dixit quod partes in continuo cognoscuntur simul, dicit, quod ly simul est una operatione, ergo & unico conceptu, quia vni operationi vnus conceptus respondet: nec sententia opposita negat conceptum totius continui, & partium esse unum entitatiuè: sed eodem modo dicit D. Thom. quod cognoscit simul prædicatum, & subiectum prout sunt partes vnius propositionis: ergo intelligit simul cognosci, id est vna operatione, & consequenter vno conceptu entitatiuè. Similiter D. Thom. in loco allato ex quest. 12. non solum dicit quod transacta cognitione manet species rei cognitæ, sed etiam addit quod imaginatio, & intellectus ex pluribus speciebus format vnā speciem, & conceptum entitatiuè unum, & non solum ordine unum, ut etiam fateretur opposita sententia. Nos autem non virgemus, nec adducimus istam doctrinam quoad hoc quod est manere, vel non manere speciem transacta cognitione, sed quoad hoc, quod est formari ex pluribus speciebus aliquam speciem entitatiuè vnā, & hoc non tangit prædicta solutio.

30 Secundum exemplum D. Thom. est in locis ubi tractat illam questionem, An possit intellectus multa simul cognoscere, videlicet 1. part. quest. 58. art. 2. & quest. 85. art. 4. ubi semper docet quod plura comparata, sub vna ratione comparisonis, aut differentie intellectus cognoscit, sicut partes totius sub vna ratione, & specie totius, quam utique aduersarij fatentur esse vnā entitatiuè. Et quia iam ponderauimus locum ex q. 58. solum pondero id quod dicit S. Thom. posteriori loco ex quest. 85. art. 4. nam, solutione ad 3. dicit, quod partes quando cognoscuntur sub vna confusione totius, per vnā formam totius

cognoscuntur; & hanc non negant aduersarij esse vnā entitatiuè, nec potest ab aliquo negari, alias nullum totum posset vnā speciem habere, hoc ipso quod plures habet partes. Deinde solutione ad 4. immediate sequenti, dicit quod quando intellectus intelligit differentiam, vel comparisonem vnius ad alterum, cognoscit utrumque sub ratione ipsius comparisonis, vel differentie, sicut dictum est quod cognoscit partes sub ratione totius: ergo intelligit quod cognoscit illa per vnā speciem, seu formam: partes enim in cognitione totius sic per vnā speciem attinguntur. Loquens verò D. Thom. de compositione, & diuisione nostri intellectus art. 5. sequenti ad 1. dicit quod compositio, & diuisio per quandam differentiam, vel comparisonem fit, unde sic intellectus cognoscit multa componendo, & diuidendo, sicut cognoscendo differentiam, vel comparisonem rerum. Sed dixerat quod comparisonem, vel differentiam rerum cognoscit intellectus per modum partium in toto, & hoc fatentur aduersarij cognosci per speciem entitatiuè vnā: ergo idem debent asserere de compositione, & diuisione, aut negant D. Thomam.

Obiicies: ad formandam propositionem, vel intel- 31
ligendum plura sub compositione, & coniunctione possunt concurrere plures species impressæ sola unitate ordinis coniunctæ, & coordinatæ: ergo etiam conceptus sola unitate ordinis erit vnus, & non entitatiuè. Antecedens nos non negamus, & affirmatur à D. Thom. 1. part. quest. 14. art. 14. & quest. 2. de verit. art. 1. in corp. ubi dicit quod intellectus componit alteram speciem cum altera, & unit quodammodo, & sic in seipso enunciabilia format. Conseq. verò probatur, quia unitas conceptus sumitur ab unitate speciei, quia sumit unitatem ab obiecto ut contento in specie, & sic non potest maior unitas poni in conceptu, quam in specie impressa per quam producit. Si ergo saluatur doctrina D. Thom. quod multa intelliguntur ut unum, quæ vnica specie representantur, & ad hoc sufficit quod species sit vna unitate ordinis, cur etiam non sufficiat ad eandem doctrinam saluandam, quod conceptus quo concipiuntur plura ut unum, sit conceptus vnus unitate ordinis?

Confirm. quia si propositio esset vnus conceptus 32
entitatiuè, non differret noster modus intelligendi propositionem à modo intellectionis Angelicæ, siquidem utrobique datur simplicitas ex parte intellectus, seu conceptus licet sit multitudo, & compositio ex parte obiecti: hoc enim etiam seruat intellectus Angeli, qui attingit compositionem ex parte obiecti, modo tamen simplici ex parte conceptus: ergo si in nobis etiam conceptus propositionis est simplex, licet obiectum sit multiplex, habebit se sicut Angelus. Nec sufficit dicere quod in nobis inuenitur diuersus modus à cognitione Angeli, quia nos ex collatione plurium conceptuum simplicium formamus unum, qui est propositio; Angelus autem non per collationem conceptuum, sed per efficaciam indiuisibilis luminis indiuisibiliter propositionem attingit. Contra enim est, quia Angelus, præsertim inferior, qui intelligit per plures species quam superior, etiam præsupponit plures conceptus, ex quorum collatione format propositionem, & tamen solum quia conceptus formatus est vnus entitatiuè, non componit, nec diuidit: ergo sufficit unitas entitatiua conceptus ad tollendam compositionem. Antecedens patet, quia Angelus inferior intelligit quamlibet naturā per speciem distinctam, & sic, si attribuit alicui subiecto aliquod accidens, præsertim alterius generis, v. g. accidens supernaturale, aut negat de illo aliam naturam, v. g. quod homo non sit cælum, indiget duplici specie representante illas diuersas naturas, & conferendo vnā alteri negat,

negat, vel attribuit illi. Præcedit ergo in Angelo inferiori diuersarum specierum collatio, & coniunctio, & tamen non format compositionem: ergo sola præcedentia plurium conceptum, vel specierum, ex quarum collatione consurgit propositio, non sufficit ad compositionem, si tota propositio vnicò conceptu representatur. Nec facile potest reddi ratio cur ad discursum non sufficiat vnus conceptus entitatiuè, sicut ad compositionem, & diuisionem, cum tamen discursus etiam fiat sub ratione vnus comparationis, & collationis in ordine ad vnā conclusionem inferendam.

33 Respond. imprimis non requiri ad formandam compositionem, quod concurrant plures species impressæ sola vnitatem ordinis coniunctæ, sed etiam formari potest vna species impressa ex pluribus, quæ iunentur in prima operatione, collatis inter se, & per illam speciem impressam sic formatam, & representantem plura, quæ representabantur in simplici apprehensione sub altiori ratione vnus comparationis, aut coniunctionis, & differentia, & per talem speciem formabitur vnus conceptus propositionis. Nec nos diximus solum ipsum conceptum propositionis esse vnum entitatiuè, sed conceptum, vel speciem; nec D. Thom. requirit plures species, nisi præsuppositiue: ex eo enim quod vna species in nobis sic representat vnum, quod non aliud, indiget conferre vnā speciem cum alia; sed quod ex ista collatione non formetur vna species impressa pro conceptu compositionis D. Thom. non dicit, sed potius oppositum affirmat in hac 1. part. quest. 12. art. 9. ad 2. Neque enim est maior ratio cur formetur vnus conceptus representans plura per modum vnus, & non vnica species impressa. Et in hac solutione argumentum non habet locum.

34 Secundò, dicimus quod adhuc dato quod concurrant plures species impressæ immediate, & formaliter ad formandum vnā propositionem, adhuc potest propositio formata esse vna entitatiuè, licet species impressæ sint plures, & solum vnitatem ordinis coniungantur. Et ratio est, quia plures species impressæ concurrunt ad formandum conceptum sub applicatione, & vsu potentia, & ista applicatio est vna, & ordinat omnes illas species ad vnum effectum numero, sicut artifex potest applicare plura instrumenta ad vnum effectum numero faciendum, sic intellectus vtitur speciebus quasi instrumentis, seu representationibus sibi subordinatis, & potest vti pluribus inadæquatè se habentibus ad producendum vnum conceptum numero, quia vtitur omnibus illis sub ea ratione, qua conueniunt, & sic accipit illas vt causas parciales respectu vnus effectus; sicut ex patre, & matre fit vna causa, quæ sub vna actione producit vnum effectum numero. Dicimus ergo quod vnitas conceptus entitatiua non sequitur vnitatem speciei materialiter, & entitatiuè sumptam, sed vnitatem operationis, quæ potest pluribus speciebus tanquā causis partialibus, & inadæquatis vti ad eliciendam vnā operationem, & consequenter vnum conceptum qui est terminus illius.

35 Ad Confir. Resp. solutione data: & ad replicam dicemus infra, circa quest. 58. art. 4. vbi D. Thom. omni Angelo, tam superiori, quàm inferiori negat compositionem, & diuisionem, propter eandem rationem, scil. quia Angelus, siue inferior, siue superior intelligendo aliquam quidditatem, per eandem speciem intelligit quidquid ei attribui, vel remoueri potest. Itaque prædicatum aliquod vel negatur à subiecto, vel attribuitur illi. Et si attribuitur, vel est eiusdem ordinis, vel superioris, sicut accidens supernaturale. Si negatur aliquod prædicatum quodcumque illud sit, non indiget Angelus vti specie re-

presentante distinctè naturam rei negatæ: ad hoc enim indigeret distincta specie, sed sufficit quod sibi representetur carentia talis naturæ, etiam si solum in confuso representetur res negata, & sub ratione rei exclusæ, non sub ratione positiua suæ quidditatis, & constitutionis: non enim ad cognoscendum quod homo non est leo requiritur representatio distincta quidditatis leonis, sed sufficit representatio repugnantiæ quam habet cum homine. Et hoc in ipsa representatione hominis videtur, seu in affirmatione eius, vt dicit D. Thom. loco citato ad 2. Per hoc, inquit, quod cognoscitur veritas affirmationis, cognoscitur falsitas negationis opposita. Et sic species vnus seruit ad cognitionem sui oppositi, vt exclusi à se, si attribuitur aliquod prædicatum proportionatum, & connaturale subiecto, non indiget nisi specie ipsius subiecti ad illam attributionem faciendam, non autem collatione plurium specierum, quia per speciem vnā substantiæ cognoscit Angelus, etiam inferior, omnia accidentia, quæ sibi conueniunt. Si verò prædicatum quod attribuitur subiecto sit supernaturale, seu alterius ordinis, tunc indiget distincta specie representante illam quidditatem supernaturalem, sed tamē in illamet specie representante accidens supernaturale representatur eius subiectum, quia representatur illud accidens in concreto: licet enim illud accidens non sit debitum subiecto, tamen subiectum illud est debitum accidenti, & est illo inferius, cum sit naturalis ordinis. Vnde licet per speciem subiecti non possit representari accidens supernaturale, tamen per speciem talis accidentis potest representari subiectum, quia est illi accidenti debitum, seu inferius illo. Vnde ad attribuendum istud accidens subiecto, non indiget collatione plurium specierum, sed sola specie accidentis supernaturalis representati in concreto, & per illam speciem intelligitur attribui tali subiecto in eo representato.

Ad id quod dicitur de discursu, respondimus q. 5. 36
summul. art. 2. Breuiter dicimus quod in discursu non intelligit intellectus plura per modum vnus, quia non reducit illa ad vnā comparationem conuenientia, vel differentia, sicut facit in compositione, & diuisione, sed potius facit plures comparationes, scil. maioris, & minoris inter se, & cum conclusionem. Et iterum procedit per modum resolutionis, & deductionis vnus ex alio formaliter; & sic formaliter exigit plures operationes, quia fit per transitum de vno ad aliud: compositio autem, & diuisio fit per adunationem plurium in vno, & sic vna operatione intelligit plura per modum vnus.

ARTICVLVS IV.

Vindicantur rationes D. Thom. ab art. 4. vsque ad 8.

Verum est prius bono.

IN art. 4. docuit S. Thom. verum nostro modo intelligendi esse prius bono, duplici ratione. Primò, quia verum propinquius se habet ad ens, quàm bonum: consequitur enim verum ipsum ens simpliciter, etiam abstrahendo ab existentia; bonum verò ipsum ens vt perfectum, & cum ordine ad existentiam, sic enim est appetibile. Secundò, quia verum respicit cognitionem, bonum verò appetitum; prior est autem cognitio, quàm appetitus.

Vtraque ratio displicuit P. Valquez, eamque reii- 2
cit hic dist. 77. cap. 5. num. 15. & 16. Et primam soluit distinguendo duplex bonum, vnum absolutum, quod

quod est ipsa integritas rei, aliud relatum, quod est bonum, ut conueniens alteri. Et hoc secundum dicit fundari in ente ut perfecto, & sic est obiectum appetitus, scilicet quatenus conueniens. Primum autem fundatur in ipso ente simpliciter, non minus quam verum, & hoc bonum est passio entis, non secundum. Et ita si ratio D. Thom. procedit de hoc bono, quod est passio entis, nihil probat. Secundam rationem soluit, quia bonitas est in rebus ante omnem ordinem ad appetitum, vel intellectum, veritas verò est primò, & per se in intellectu, denominatiue verò in rebus: ergo potius bonitas est prior veritate, sicut res est prior cognitione. Licet ergo cognitio sit prior appetitu, tamen bonum si sumatur absolute pro integritate, non dicitur per ordinem ad appetitum, sed absolute in se, & sic est passio entis. Si verò sumatur relatè, & ut conueniens appetui, non dicitur bonum ex appetitu, sed quia bonum est, appetitu attingitur. Nihil ergo conducit posterioritas appetitus, ut bonum dicatur posterius verò.

3. Ceterum impugnationes istæ valde debiles sunt, nec possunt labefactare rationes D. Thom. Et in primis bonum sumptum pro integritate rei, ut latè ostendimus, *præced. tomo circa q. 5. disp. 6.* non est passio entis, sed pertinet ad constitutionem ipsius entis, quia integrat, & componit illud, & sic perfectio ut formaliter constituens, & reddens rem perfectam in se non est passio rei, sed constitutio: perfectio autem, seu bonum ut finalizans, non ut constituens est passio entis, sic autem respicit appetitum quem finalizat, & qui tendit ad se. Quare bonum, quod est passio, debet explicare aliquid ultra constitutionem ipsius entis: constitutio enim, & integratio subiecti nunquam potest vim habere proprietatis, quia hoc consequitur (saltem ratione nostra) ad ipsam rem, cuius est proprietas, non verò constitutionem ingreditur: repugnat enim conceptui proprietatis esse constitutum formaliter eius, cuius est proprietas, licet possit realiter esse identificatum illi. Implicat ergo quod bonum sub conceptu integritatis, qua constituitur, & integratur ens se habeat ut passio, sed tunc incipit induere conceptum passionis, cum incipit consequi ad ens constitutum, non ipsum constituere. Et ideo oportet quod secundum conceptum passionis addat supra ens constitutum aliquem respectum causæ finalizantis, seu appetibilitatis, & non solum sistat in conceptu formalis integritatis: ita quod non solum se habeat ut perfectum, sed ut perficiens per modum finis: ergo prout sic debet ei correspondere aliquod perfectibile ut finalizatum: hoc autem quod est perfectibile à fine, & in potentia ad ipsum, & tendens ad illud, generali modo dicitur appetitus, siue innatus, siue elicitus, & bonum, seu finis sic perficiens dicitur appetibile. Et sic bonum, ut passio, addit supra ens hanc rationem, seu conuenientiam appetibilitatis, siue sit bonum absolute, siue relatè. Sed in hoc distinguitur bonum ut absolutum, & bonum ut relatum, quod bonum absolute est conueniens respectu sui, & respectu propriæ appetibilitatis; bonum verò relatè respectu alterius extra se. De quo plura videantur *citato loco*.

4. Adhuc tamen abstrahendo ab hac disputatione, an bonum consistat in integritate entis, an verò addat respectum ad appetitum, ratio D. Thom. subsistit. Nam veritas transcendentalis, & quæ est passio entis, ut latè *suprà* ostendimus ex ipso D. Thom. & dicit ordinem adæquationis ad ideam diuinam, à qua habet proprietatem sui esse, & habet ordinem ad intellectum creatum, quem mouet, ut ipsi veritati rei adæquetur. Bonitas etiam dicit perfectionem, seu plenitudinem, aut integritatem in suo esse, & hoc

Ioan. à S. Thoma in 1. part. D. Th. Tom. 2.

habet ex participatione bonitatis diuinæ; & ex hac conformatione ad ipsam, in habendo omnia quæ sibi debentur, habet perfectam integritatem, & plenitudinem sui esse. Et deinde ex hoc resultat quod tale bonum sit appetibile, & perficiat finalizando appetitum. Si ergo comparemus veritatem cum bonitate, quantum ad primū respectum, & formalitatem, clarum est quod veritas propinquius, & prius se habet ad ens, quam bonum, quia prius est aliquem effectum, seu artefactum commensurari suæ ideæ, & principio absolute, & simpliciter in esse, quam imperfectione, & integritate eorum, quæ sibi debentur. Ad veritatem autem pertinet quod aliquid sit tale simpliciter, & in esse, ad bonitatem verò, quod sit tale in perfectione, & integritate, ut etiam Vasquez vult: ergo prior est adæquatio veritatis, quam commensuratio bonitatis. Patet consequenter quia esse simpliciter, & absolute tale quod pertinet ad veritatem, est fundamentum & præsuppositum ut sic perfectè, & integrè tale: hoc enim pertinet ad ornatum, illud ad substantiam, sicut prius est aliquid esse hominem quam habere integra & perfecta membra, & sensum hominis, quod est esse perfectum hominem; si ergo illud est fundamentum, & quasi substantia bonitatis, prius est illa; & sic veritas se habet quasi ipsa substantia, & esse rei, & id per quod talis res non est falsa, nec ficta, sed habet proprium esse, & essentiam talis rei, abstrahendo ab hoc quod est habere illam ornatam, perfectam, & integram, bene enim stat quod aliquid verè sit homo, & non sit integrè, & perfectè homo, quod aliquid verè sit aurum, & non perfectè aurum. Ergo stat solida ratio prima S. Th. quod verum est prius bono, quia propinquius se habet ad ens; sequitur enim ipsam substantiam, & essentiam rei, bonitas autem ipsam perfectionem, & integritatem, hæc autem supponit tanquam fundamentum, & præsuppositum ipsam substantiam, & essentiam; super hanc enim cadit perfectio. Et sic manet soluta prima impugnatio Vasq.

Ad 2. impugnantiam Vasq. contra secundam rationem D. Thom. est aduertendum quod S. Th. ponit eandem obiectionem in hoc art. 4. arg. 2. *Bonum, inquit, est in rebus, verum autem compositione, & diuisione intellectus, sed ea quæ sunt in re, sunt priora his quæ sunt in intellectu: ergo prius est secundum rationem bonum quam verum.* Hoc idem est argumentum Vasq. Respondet autem S. Th. quod secundum hoc aliquid dicitur prius ratione, secundum quod prius cadit in intellectum. Intellectus autem per prius apprehendit ens, & secundo apprehendit se intelligere ens, & tertio se appetere ens. Unde primò est ratio entis, secundo ratio veritatis, tertio ratio boni, licet bonum sit in rebus. Quare D. Th. concedit maiorem pro prima parte, scilicet quod bonum sit in rebus; sed pro secunda, scilicet quod verum est in compositione intellectus, virtualiter distinguit illa. Verum est in compositione intellectus, loquendo de veritate formali, concedo, loquendo de veritate transcendentali, & quæ est passio entis, nego; hoc enim etiam inuenitur in rebus. Et D. Th. in initio corporis art. explicauit se loqui de vero transcendentali, dum dicit quod verum, & bonum supposito conuertuntur cum ente, id est in eodem subiecto sunt, veritas autem formalis cum sit in intellectu, non est in eodem subiecto cum bono quod est in re extrà. Ad minorem, concedit D. Th. quod ea quæ sunt in rebus sunt priora his, quæ sunt in intellectu loquendo cum præcisione. Ad consequentiam: Ergo bonum est prius quam verum; distingo, quam verum formale, quod est intellectu nostro, transeat; quam verum entitatum quod est in rebus, & participatur ab intellectu diuino, nego. Hoc autem explicat verbis *suprà* relatis, quia esse prius ratione dicitur aliquid

F

aliquid secundum quod cadit in intellectum, id est secundum quod natum est illi obici, & ab eo apprehendi. Prius est autem, inquit, in intellectu apprehensio entis (quod pertinet ad simplicem apprehensionem) secundum, apprehendit se intelligere (quod pertinet ad compositionem, & diuisionem, quæ, comparando id quod intelligit ad id quod est in re, quodammodo reflectit) & tertio est apprehendere se apparere ens (id est iudicare de convenientia, & appetibilitate rei, proponendo illam voluntati.) Vnde sicut hi actus ordine quodam se habent ex parte intellectus, ita signum est quod ordine quodam eis corresponsdeant aliquæ rationes, seu respectus ex parte obiecti, & ita primo est in intellectu ratio entis, quæ simplici apprehensioni correspondet; deinde ratio veri transcendentalis, quæ correspondet secundæ operationi compositionis, & diuisionis. Tertia ratio appetibilitatis, quæ correspondet iudicio proponenti voluntati bonum. Et sic patet mens S. Th. & solutio argumenti Vasq. Et quando dicit quod ex eo quod cognitio est prior appetitu, non efficitur, quod veritas sit prior bonitate; dicimus, non effici ex hoc tanquam ex causa, sed ex hoc quasi à posteriori colligi, quia quod relucet in actibus, correspondet in obiectis.

6 Quod verò addit bonum absolutum non dici in ordine ad appetitum, sed ad se, bonum verò relatè antecedere appetitum. Resp. quidquid sit de ista antecedentia boni ad appetitum, nos non agere de illa, sed de antecedentia inter verum quod respicit intellectum, & bonum quod respicit appetitum, non de prioritate inter ipsum bonum, & appetitum. Et quia cognitio est prior appetitu, inde quasi à posteriori deducitur quod etiam ex parte obiecti cognoscibilitas est prior appetibilitate, veritas bonitate, quia illa est obiectum intellectus, ista appetitus, siue constituitur in ratione obiecti per tales respectus, siue ante illos. Nam quidquid sit de hoc, tamen constat bonum esse obiectum appetitus, fundareque respectum, seu terminationem ad ipsum, & verum transcendente; saltem pro fundamento esse obiectum intellectus, & fundare respectum ad illum, id est respectum rationis. Et sic proportionatè loquendo tanta est prioritas inter verum & bonum nostro modo intelligendi ex parte obiecti, quanta realiter ex parte actuum cognitionis, & appetitionis. Nec obstat quod appetitus innatus antecedit cognitionem, & tamen respectu illius datur bonum: dicimus enim quod appetitus innatus antecedit cognitionem in eo in quo est appetitus, non in authore naturæ, à quo dirigitur, & ordinatur.

Rectè probat D. Thom. Deum esse summam veritatem.

7 Procedit probatio D. Thom. tam de veritate formali, quàm de transcendentali; & utramque probat esse in Deo ex earum definitione. Nam veritas transcendens dicitur esse in re per conformitatem ad intellectum diuinum, à cuius participatione descendit: entitas autem diuina non solum est conformabilis diuino intellectui, sed summè identificata cum illo: ergo est summa veritas transcendens. De veritate formali id probat, quia veritas formalis est illa quæ apprehendit rem vt est in se. Hoc autem summo modo conuenit Deo, quia respectu sui esse diuini apprehendit seipsum vt est in se, quia est ipsum suum intelligere; Respectu verò esse creati est mensura, & causa ipsius, quia illud est verum esse cuiuscunque rei, quod ab intellectu, & idea diuina ei attribuitur: ergo Deus summo modo apprehendit rem vt est in se: ergo est summa veritas formalis.

8 Utramque hanc rationem Vasq. fastidiuit in com-

mentario art. 5. huius quest. Et quod attinet ad veritatem formalem, obiicit contra D. Tho. quia illa non consistit in conformitate intellectionis, seu cōceptus formalis cum re, sed in conformitate conceptus obiectiui, vt dicit se probasse d. 76. ergo non ex summa conformitate conceptus formalis, sed obiectiui cum ipsa re, hoc deberet probari. Sed quia videt Vasq. ex hoc sequi quod visio beata in intellectu creato etiam erit summa veritas, quia conceptus obiectiuius talis visionis est ipse Deus cognitus in se, qui utique summam conformitatem habet cum seipso in re, quia habet summam identitatem: idè addidit, quod ratio quare Deus est summa veritas formalis, est quia decipi non potest, & ideo decipi non potest, quia intellectus eius est infinitus, & sic nihil eum latet: cum autem iudicat de seipso, etiam decipi non potest, quia iudicat de re summè necessaria, scil. de ipso Deo. Beati autem licet etiam decipi non possint in visione beata, non tamen eodem gradu necessitatis, quia etiam ipsum lumen gloriæ creatum est.

Circa primam rationem Diu. Thom. de veritate transcendentali dicit Vasq. quod quando S. Thom. dicit esse summam veritatem, quia est summè conformis suo intellectui, id ita intelligendum esse, non quia sit conformis alicui intellectui, vt causæ, sicut de veritate aliarum rerum dicunt Thomistæ, sed quia refertur ad intellectum vt obiectum veri iudicii, non solum ad intellectum ipsius Dei, sed etiam ad nostrum: Deus enim non potest esse obiectum falsi iudicii, si iudicatur esse verus Deus, sicut falsi dii, vt Iupiter, Apollo, &c.

Caterum loquendo de veritate formali iam ar. 2. ostendimus eam non consistere in conformitate cōceptus obiectiui, sed conceptus formalis cum ipsa re; hic enim conceptus est qui constituit formaliter intellectum verum: ergo in conformitate ipsius ad rem debet consistere veritas formalis, quatenus scil. est ratio attingendi ipsum obiectum, vt est in se, id autem quo intellectus redditur formaliter verus, non est conceptus obiectiuius, sed formalis, quia ab hoc informatur intellectus: ergo in conformitate huius ad rem in se, non in conformitate rei cognitæ ad seipsam consistit veritas formalis.

Ratio ergo S. Thomæ procedit ex propriis, & immediatis. Ratio enim quare aliqua cognitio est vera, non est quia infinito, vel finito lumine attingit obiectum, sed quia attingit illud vt est in se, ab eo enim quod res est, vel non est, intellectus verus, vel falsus est: ergo illa ratio quæ probat aliquem intellectum esse summè verum, quia summè attingit rem vt est in se, optimè procedit, & maximè per locum intrinsecum. Quod verò intellectus Dei decipi non possit, hoc est quod inquirimus: idem enim est esse summè verum, & decipi non posse, id est disconformari veritati: ergo hoc non potest reddi pro ratione. Quod verò ex infinitate intellectus diuini probetur non posse decipi, quia nihil illum latet, est diminuta probatio, & non propria. Est diminuta, quia hoc solum probat Deum non posse decipi per ignorantiam, nō tamen quod non possit decipi per malitiam, formādo aliquod iudicium disconforme rei, non ad assentiendum illi, sed ad decipiendum alios, sicut nos possumus aliquando rem aliquam clarè videre, ita quod nullo modo nos lateat, & tamen ex malitia formare iudicium oppositum, & disconforme illi, non quidem ad assentiendum, sed ad decipiendum alios, vel ad ostendendum nos non esse conuictos. Ergo ex hoc præcisè quod nihil lateat diuinum intellectum, non probatur in Deo non posse esse iudicium disconforme rei, nisi probetur etiā ex malitia non posse id formare. Est etiā impropria probatio, quia nō procedit ex propriis ipsius veritatis; propria enim ratio quare

quare aliquod iudicium sit verum, est, quia apprehendit res ut sunt. Hoc autem recte probat D. Th. esse in Deo summo modo, quia respectu sui suum intelligere non solum est conforme, sed etiam summe vnum cum illo: respectu vero creaturarum, iudicium Dei est causa, & regula illius esse quod habent, & sic neque per malitiam, neque per ignorantiam potest disconformari rebus, quia ipsae non possunt aliud esse habere, quam quod à diuino iudicio eis conuenit.

- 12 Circa veritatem autem transcendentem, iam supra ostendimus in rebus creatis dici primò, & per se per ordinem ad intellectum à quo participatur, scilicet ad intellectum diuinum; secundariò verò dici per ordinem ad intellectum creatum, quem mouere potest tanquam obiectum. Et ita esse obiectum veri iudicij creati est secundarium in veritate transcendentali. In Deo autem veritas transcendens non respicit intellectum suum ut causam, aut ideam, & multò minùs intellectum extra se, sed illa veritas dicitur per summam identitatem cum intellectu diuino: constituitur enim in natura sua per ipsum intelligere, & sic non indiget respicere intellectum ut causam, quia non est participata veritas, sed summa & prima.

Quomodo aliqua veritates create dicantur aeternae.

- 13 In art. 7. docet D. Th. quòd formaliter, & positiuè nulla est veritas aeterna, nisi in intellectu diuino, & per ordinem ad illum, ita quòd remoto diuino intellectu nulla veritas dicenda est aeterna, neque ex parte ipsius enunciabilis, nec ex parte ipsius enunciationis, neque ex parte rerum. Docet 2. posse vniuersalia dici aeterna negatiuè, in quantum abstrahunt ab hic & nunc. Dicit 3. futura etiam non habere veritatem aeternam, nisi in causa prima, quae est Deus. Et quoad hoc eadem ratio est immutabilitatis, & aeternitatis.

- 14 Huic doctrinae se opponit Vasq. hic d. 7. c. 2. & docet omnem veritatem esse aeternam, sicut connexiones essentialis rerum, nò solum quia intellectus diuinus qui de illis iudicat aeternus est, sed quia obiectum intelligibile ex se habet non repugnantiam, & talem extremorum connexionem, tam secundum esse possibile, quam futurum, ut quilibet intellectus siue increatus, siue creatus, si ab aeterno esset, possit habere de illo verum iudicium. Hoc ergo quod est non repugnare aliquid verè intelligi ab aeterno, veritatem aliquam reddit aeternam; vnde etiam si Deus in tempore, & non ab aeterno inciperet intelligere, veritas tamen rerum esset aeterna, quia quantum est ex se non repugnat ex se antea, & antea sine determinato principio intelligi. Nec tamen hinc sequitur aliquid ab aeterno subsistere praeter Deum, quia veritas solum dicitur aeterna, quia non repugnat ab aeterno intelligi, ut quando connexio est essentialis, vel quando enunciatio est de re futura, quia vtrumque de se natum est intelligi verè à quocumque intellectu, etiam ab aeterno. Ex quo colligit veritatem dici immutabilem, non ex eo quòd Deus, vel eius veritas mutari non potest, sed quia de se quaelibet veritas ab aeterno est, ut dictum est.

- 15 Nihilominus pro intelligentia D. Thom. supponendum est id quod saepe diximus, veritatem transcendentem rerum consistere in conformitate cum ideis diuinis, à quibus deriuatur, ita quòd licet ista veritas entitatiuè debeat procedere veritatem nostri intellectus, quia in nobis formatur ex motione, & dependentia à rebus à quibus sumitur nostra scientia, tamen veritas intellectus diuini praecedit ipsam veritatem rerum, utpote à se deriuatam, & participa-

Ioan. à S. Thoma in 1. Part. D. Th. Tom. 2.

tam, non solum in esse existentiae, sed etiam in statu possibili, aut secundum se, quia quocumque modo sumatur, est veritas creata, & participata à Deo. Nec potest intelligi quòd solum sit veritas in potentia à Deo in ratione veritatis, licet quantum ad rationem existendi non semper sit actu existens, sed mutetur de non esse ad esse, vel è contrà: sed in hoc sensu dicitur veritas esse participata à Deo, quia si intelligitur veritas, debet intelligi per ordinem ad actualè ideam; & veritatem Dei, non ad potentialem. Et ita si per impossibile Deus aliquando non habuisset ideam, sed coepisset habere in tempore, tunc non daretur aliqua veritas creata ab aeterno, etiam obiectiuè, & fundamentaliter, quia non daretur actualis idea per ordinem ad quam diceretur participata veritas, sicut communiter dicunt Theologi, 1. 2. q. 71. art. 6. quòd si tolleretur lux aeterna, non solum in suo effectu, prout in nobis manifestatur, sed prout est intra Deum, tolleretur omnis ratio peccati, quia essentialiter est transgressio legis: sic etiam quia veritas transcendens est participatio regulata à veritate aeterna, quae est idea, non potest sine veritate aeterna Dei intelligi aliqua veritas creata. Et hoc multò fortius currit in veritate, quam in peccato, quia peccatum solum respicit legem, vi illi oppositum, & ab ea deuians: ut autem aliquid opponatur alteri, non requiritur quòd suum oppositum existat, sed etiam eo remoto, adhuc potest retinere oppositionem ad illud, quia retinet naturam, quae de se nata est opponi, licet de facto non exerceat oppositionem, id est exclusionem illius, & relationem realem oppositionis ad id, quod non est. At verò id quod est participatio alicuius non potest intelligi tanquam participatio, nisi detur de facto id à quo participatur, & sic veritas participata essentialiter supponit primam veritatem, à qua dicitur participata & creata.

Ex qua doctrina sequitur confirmatio, & illustratio doctrinae D. Thom. & responsio ad obiecta Vasq. 16 Nam in primis ex hoc intelligitur quomodo verum sit, quod in art. 6. docet S. Thom. quòd omnes res sunt verae, quantum ad veritatem transcendentem ab vna prima veritate, quae est in intellectu diuino: veritas autem quae est in intellectu creato multiplicatur secundum diuersos intellectus. Hoc enim dictum non intelligitur sic quòd res omnes sint verae vna prima veritate, tanquam sibi inhaerente, sed tanquam regulante, & mensurante, & à qua tanquam à principio participatur veritas transcendentalis, quae est inhaerens in rebus ipsis, & est conformatio cum veritate diuini intellectus, & talis conformatio multiplicatur in rebus, sicut ipsa entitas, ut concedit D. Thom. q. 1. de verit. art. 4. ad 1. Veritas autem formalis, quae est in intellectu, haec est vna in Deo, in rebus autem solum denominatiuè, sicut sanitas in animali, & medicina; quod non tollit transcendentem veritatem esse intrinsecè in rebus, & multiplicari, ex participatione tamen intellectus diuini.

Secundò, colligitur ex eodem fundamento veritates creatas non posse dici aeternas, quia possunt de se causare, aut terminare iudicium cuiuscumque intellectus, si daretur ab aeterno, ut putat Vasq. loco citato, sed ex eo potius, quia à veritate aeterna diuini intellectus tanquam à prima regula, & principio sui deriuantur, & participantur; quod constat ex opposito fundamento, quia veritas creata, quae conuertitur cum ente, prius comparatur ad intellectum diuinum, cuius participatio est quam ad creatum, in quo cognitionem sui causare potest: causare enim sui cognitionem non est constitutum veritatis transcendentalis in rebus, participari autem à diuina veritate, eique conformari, essentialiter est veritati creatae: prius est enim esse in se, quam causare aliquid

aliquid in alio : nam & illa capacitas vt cognoscat-
tur aliquid ab intellectu creato , etiam si daretur ab
æterno , est aliquid participatum à diuina veritate,
& sic ex ipsa veritate diuina habet veritas creata to-
tum quod requiritur vt veritas dicatur æterna. Ad
hæc ; licet possit res aliqua semper intelligi ab intel-
lectu creato, si daretur, tamen in se debet habere ali-
quod fundamentum, ratione cuius potest à quocum-
que intellectu semper intelligi, siue hoc fundamen-
tum sit inuariabile, & semper verum, siue variabile,
& diuersum, vt in contingentibus : ergo antece-
denter ad hoc quod aliqua res possit intelligi, assi-
gnari debet fundamentum talis intelligibilitatis, &
veritatis ; hoc autem non est aliud quam ipsa enti-
tas rei, vt adæquata, & conformata suo principio,
id est diuinæ ideæ, vnde illi determinatur ratio, &
mensura suæ naturæ, & eorum quæ sibi debentur :
ergo prius, & principaliter desumenda est veritas,
æterna in rebus creatis, ex conformitate ad verita-
tem æternam diuinam, quàm ex eo quod possit in-
telligi ab aliquo intellectu creato, etiam si esset ab
æterno.

18 Colligitur tertio specialiter aliquas veritates dici
æternas, alias verò non, quia licet omnes deriuentur
à veritate diuina, sed non eodem modo. Quædam
enim deriuantur à Deo tanquam essentialia prædi-
cata rei, aut necessariò consequuta, quædam vt acci-
dentialia. Quæ deriuantur, vt substantialia, non solum
à principio immutabili deriuantur, quæ est diuina
veritas, sed etiam ab illa necessitate participant sic
conueniendi, & constituendi res : vbi autem partici-
patur necessitas, ibi etiam participatur immutabili-
tas, quia quod necessariò est tale, semper est tale, &
sic vocatur æterna veritas, id est necessaria, quia ne-
cessarium semper est idem. Quæ autem deriuantur
à Deo vt prædicata accidentalialia, licet deriuentur
ab immutabili principio, in se tamen sunt contin-
gentia, & mutabilia, & ita non fundant prout in se,
& secundum suam participationem veritatem ne-
cessariam, & semper eandem, sed variabilem, & con-
tingentem, licet veritas diuina omnia illa immuta-
biliter complectatur, causans vnā veritatem pro
vno tempore, & aliam pro alio. Videtur D. Th. q. 1.
de verit. art. 6. ad 4.

19 Colligitur quarto quod hæc veritas creata neces-
saria non dicitur æterna positiuè, seu duratiuè,
quia æternitas quantum ad durationem supponit
existentiam, quæ non datur in creaturis secundum
se, & essentialiter, sed dicitur æterna dupliciter ; pri-
mò, negatiuè, secundò, denominatiuè, seu obiecti-
uè. Primo modo dicitur æterna, quia non fundatur eius
veritas, & connexio in aliqua mutatione temporali,
nec dependet ab hic & nunc vt possit verè intelligi,
licet vt possit existere requirat aliquam actionem
agentis, quæ necessaria non est. Et hoc modo assi-
gnat D. Thom. veritatem æternam propositionibus
necessariis, & vniuersalibus, in præsent. art. 7. ad 2. &
quest. 1. de verit. art. 5. ad 14. Secundo modo dicitur
hæc veritas æterna, quia est obiectum iudicij æterni
Dei, participando ab illo necessitate, ita vt semper
vno & eodem modo iudicari, & intelligi possint,
non vt pro diuersis statibus, vel temporibus muten-
tur, sicut contingentia. Et hoc modo connexiones
essenciales dicuntur veritates æternæ ex participatio-
ne veritatis diuinæ, quæ de eis iudicat ab æterno se-
cundum eundem modum, & necessitatem quam ab
illa habent, licet etiam secundariò possint sub ea-
dem necessitate intelligi à quocumque intellectu, si
detur. Et hæc denominatio veritatis dicitur mane-
re, etiam ipsis rebus non manentibus in sua existen-

tia, quia sic manent in sua intelligibilitate, & in iu-
dicio diuino.

Colligitur vltimò quid dicendum sit de veritati-
bus contingentibus, siue futuris, siue non futuris, hæc 20
enim veritatem non habent, nisi ex sua causa, vt do-
cet S. Thom. in hoc art. 7. ad 3. Nam ex se, id est, ex
propria essentia, & connexione suorum prædicato-
rum, non fundant determinatam & vnā veritatē,
sed variabilem, & indifferentem ad se, vel non esse,
eo quod tota ista veritas in aliqua existentia, vel ex
ordine ad existentiam desumitur : ergo ex se non
sunt nata causare, & inducere semper eandem veri-
tatem in intellectu, secundum id quod de se fun-
dant : sed si aliquam determinationem veritas illarum
habet, debet esse ex aliqua causa determinante illam
indifferentiam, & suspensionem, quæ causa est Deus,
qui de istis contingentibus disponit, & præuidet, vt
suprema, & vniuersalissima causa, atque adeò deter-
minat quid futurum sit in vnā partē potius quàm
in aliam, de quo latè egimus præcedenti tomo disp. 19.
Quod autem Vasquez dicit hic disp. 78. citata quod
ista futura contingentia, v.g. Antichristus erit, sunt
aptata nata verè sic intelligi à quocumque intelle-
ctu, non potest dici quod id habeant ista futura ex
meritis suæ propriæ contingentia, & indifferentia,
quam solum fundant ex se, & ex propriis causis, sed
si talis veritas determinatè eis attribuitur, id erit,
ex habitudine ad causam primam, quæ suo decreto
id determinat, vt citato loco ostendimus. Vnde iste
sensus P. Vasquez est fundatus in illa sententia, quod
veritates de futuro contingentia ex se determinatæ
sunt, neque idè sunt determinatæ futuræ, quia à Deo
intelliguntur, & decernuntur, sed potius idè deter-
minatè intelligi etiam à Deo, quia in se sunt deter-
minatæ futuræ, atque adeò antecedenter ad Dei in-
telligentiam & dispositionem sunt determinatæ, &
sic non solum in se, sed ex se determinationem ha-
bent, & non ex Deo, quæ est magna absurditas. Vide
loc. cit. quæ diximus.

Sed dices : hæc propositio, homo est animal, se- 21
cundum se, & independentem à iudicio intellectus
diuini est vera, siquidem id habet ex sola termino-
rum connexione ; ergo non ex eo est æterna, quia est
in intellectu diuino, neque ex eo est vera, quia Deus
illam intelligit, sed è conuerso : & similiter hæc pro-
positio Antichristus erit, de se determinatæ veritatis
est, quia à quocumque dicatur, etiam ab æterno, di-
cetur id quod est in re : ergo dicetur verum : ergo non
ex eo solum est vera, quia est in mente diuina, sed
quia conformabilis est cuilibet intellectui.

Respond. illam veritatem necessariam homo est 22
animal, esse veram, ex connexione extremorum se-
cundum se, vt participata à veritate diuina, quia et si
sit necessaria connexio, habet tamen necessitatem
participatam, & creatam. Vnde ex eo quod Deus il-
lam intelligit per modum ideæ causantis illam veri-
tatem, talis veritas necessaria est, non ex eo, quod ve-
ritas illa est, Deus habet ideam, & cognitionem il-
lius. Quod multò magis requiritur in veritate con-
tingenti, cuius veritas non solum est participata à
Deo, sed etiam determinatio indifferentia eius ex
decreto Dei est, quia determinatio circa existentiam,
vel non existentiam est. Vnde qui proferret illam,
etiam ab æterno, proferret verum determinatè, non
determinatione orta ex meritis ipsius obiecti, quod
potius de se est indifferens, & incertum, sed ex sub-
ordinatione ad decretum diuinum, cui, si non con-
formaretur, illa veritas non esset determinata. Vi-
deantur quæ diximus disputat. 19. citat. tomo præ-
cedenti.



QVÆSTIO XIX.

DE VOLVNTATE DEI.

S V M M A L I T E R Æ.



P R E D I T O tractatu de intellectu; seu scientia Dei, ordo ipse postulat, vt agatur de voluntate eius. In qua quæstione generaliter considerat Dⁿⁱ u^s Thomas tria.

Primum id quod pertinet ad quæstionem *an est*, & *quid est*, diuinæ voluntatis, quod tanquam duplex præsuppositum explicat duobus primis articulis.

Secundum pertinet ad modum ipsius voluntatis erga actus, & obiecta sua, qui modus consideratur secundum quatuor, scilicet quoad necessitatem volendi, quoad causalitatem in re volita, vel causam suæ volitionis; quoad efficaciam, & immutabilitatem, & denique quoad impeccabilitatem, & electionem. Et hæc tractat octo sequentibus articulis.

Tertium pertinet ad manifestationem voluntatis diuinæ erga nos, quod pertinet ad voluntatem signi, eamque, & signa diuinæ voluntatis explicat duobus vltimis articulis.

Igitur in art. 1. ostendit id quod pertinet ad quæstionem *an est*, scilicet dari in Deo voluntatem, quia datur intellectus: ad formam autem intelligibilem sequitur appetitus elicitus, & intellectualis, qui est voluntas, sicut ad formam naturalem, innatus.

In art. 2. tractat de obiecto voluntatis diuinæ quod pertinet ad quæstionem *quid est*, quia ab obiecto sumitur specificatio, seu quidditas potentia. Et docet quod obiectum diuinæ voluntatis nō solum est ipsemet Deus, qui amatur vt summum bonum, sed etiam creaturæ, quæ ordinantur ad ipsum, & participant ab eo bonitatem.

In art. 3. incipit inquirere modum diuinæ voluntatis in volendo. Et primò, quoad necessitatem; & ostendit quod Deus seipsum necessariò vult, quia est summum bonum, & proprium obiectum suæ voluntatis, atque adeò habet cum ipso necessariam connexionem creaturas autem non vult necessariò, quia non requiruntur ad suam bonitatem, neque indiget illis, cum sit in se summè perfectus.

In art. 4. inquit alium modum diuinæ voluntatis, scilicet causalitatem eius in res, & in art. 5. quomodo voluntas Dei habeat causam volendi. Ostendit ergo voluntatem diuinam esse causam rerum, quia Deus non agit per naturam, sed per intellectum, eo quod omnia modo intelligibili in ipso sunt, & consequenter agit per voluntatem, quæ est inclinatio intellectus. Agere autem per naturam, & non per intellectum est eius quod agit vt directum ab alio intellectu, & secundum modum determinatum ad vnum, quod totum est alienum ab vniuersalissima ratione primæ causæ respectu creaturarum. Ostendit similiter in art. 5. Voluntatis diuinæ nullam esse causam ex parte volentis, quia vnico actu vult omnia, non verò ex actu circa finem causat actum circa media, & istum actum habet à semetipso, non autem ab aliquo extra se mouetur. Ex parte autem volitum datur causa, quia vult vnum esse causam alterius, & vnum ordinari ad aliud, vt media ad finem.

In art. 6. incipit inquirere tertium modum voluntatis, scilicet eius efficaciam, & immutabilitatem. Et in primis art. 6. ostendit voluntatem Dei in tota sui vniuersalitate semper impleri, licet diuersos ordines rerum habeat, ita vt qui excidit ab vno, relabatur in alium, in quo Dei voluntas impletur, quia hoc pertinet ad voluntatem consequentem.

In art. 7. ostendit voluntatem Dei esse immutabilem, quia vnico actu vult omnia, quod si est vnicus, est immutabilis, aliàs maneret Deus sine actu. Vult tamen Deus rerum mutationes, & quod aliquæ causæ impediuntur ab aliis, licet de se inclinatæ sint ad effectus.

In art. 8. ostendit hanc efficaciam, & immutabilitatem Dei non auferre contingentiam, aut libertatem à causis inferioribus, eo quod efficacia eius licet sit immutabilis, est tamen vniuersalissima, & sic non solum attingit, & disponit de effectū aliquo faciendo, sed etiam de modo, quo à sua causa faciendum est, quia etiam modus iste à diuina voluntate est. Vnde pro quibusdam causis voluit Deus modum necessarium operandi, pro aliis contingentem, & liberum, quia contingentes sunt: non ergo tollit contingentiam, si dat illam.

In art. 9. incipit inquirere modum quartum diuinæ voluntatis, scilicet impeccabilitatem,

Ioan. a S. Thom. in 1. part. D. Th. Tom. 2.

F 3

& inde

& indeficientiam, licet electionem habeat. Et in art. 9. ostendit quod voluntas Dei non est volitiva mali quod est culpa, nec etiam per accidens, quia pro nullo alio bono vult contra suam bonitatem, mala autem poenae vult Deus volendo aliquid bonum cui poena coniungitur, vel malum naturae, sicut volendo aliquid generari, vult aliud corrumpi.

In art. 10. ostendit Deum esse liberi arbitrij, quia electionem habet, licet non cum defectu peccati, quia non vult malum.

In art. 11. incipi, inquirere ultimum quod in hac quaestione tractat, scilicet de voluntate signi in Deo, quae distinguitur à voluntate propriè dicta, quia voluntas propriè dicta est volitio beneplaciti, quae in Deo est: voluntas autem signi non est voluntas quae sit in Deo, sed effectus aliquis extra Deum, quo manifestatur aliquid Deum velle, & metaphoricè dicitur voluntas.

In art. 12. explicat quinque signa voluntatis diuinæ. Primò, præceptum, quo cognoscimus Deum aliquid velle ut fiat. Secundò, consilium, quo suadet ut melius fiat. Tertio, prohibitio, qua vult ne aliquid fiat. Quarto, operatio qua significat aliquid à se fieri, ut miracula, & similia. Quintò, permissio qua significat se non impedire ne mala fiant.



DISPUTATIO III.

De his quæ ad controuersiam de efficacia voluntatis, & prouidentia Dei supponenda sunt.

NON est nostræ intentionis aliquo modo agere de efficacia diuinorum auxiliorum, cum sit expressè prohibitum à sanctissimo Domino nostro Urbano VIII. ne de hac materia libri, compositiones, vel tractatus possint imprimi, aut in lucem edi, quocumque prætextu, ut habetur in Congregatione sanctæ, & generalis Inquisitionis facta die 22. Maij 1625. coram Sanctitate sua. Solum ergo de ipsius voluntatis, & prædestinationis diuinæ efficacia, prout ex parte Dei se tenet, in his tractatibus agendum est. Sed quia multum pendet ista quaestio; & difficultas ex plena cognitione eorum quæ olim in Pelagio, aliisque eius discipulis, & reliquiis, & ante ipsum in aliis hæreticis sancta damnauit Ecclesia, operæ pretium visum est, ad omnes istos tractatus hanc præmittere disputationem, quæ de ipso facto errorum, & opinionum quæ in hac parte versantur, historiam potius texat, quam disputationem: prout etiam magna ex parte fecit P. Suarez 1. tomo de gratia prologomeno 5.

ARTICVLVS I.

Qui fuerint errores circa efficaciam diuinæ voluntatis, & liberum arbitrium, & quando caperint.

FVISSE Pelagium primum qui gratiæ Dei efficaciam, necessitatemque negauerit, & ad bene agendum sufficientes existimauerit vires liberi arbitrij, fortassis aliquis sibi persuadebit ex verbis Vincentij Litinensis, in lib. aduersus hæreses, ubi agens de Pelagio, sic inquit: Quis vnquam ante prophanum illum Pelagium tantam virtutem liberi præsumpsit arbitrij, ut ad hoc in bonis rebus per singulos actus adiuvandum necessariam Dei gratiam non putaret? Quo loco manifestè Vincentius affirmat nullum ante Pelagium extitisse, qui necessitatem gratiæ pro libero arbitrio sic negaret. Verumtamen certum est, multò ante Pelagium difficultates istas de gratia, & libero arbitrio incæpisse, etsi nullus fortasse ante ipsum ita impudenter, & apertè contra gratiæ necessitatem liberi arbitrij vires, sufficientiamque extulerit: quo

sensu præfata verba Litinensis accipienda sunt. Ante Pelagium enim Iudæi gratiam non requiri ad iustificationem, neque ad custodienda mandata, sed sufficere Legem cum libero arbitrio existimabant, sicut docet August. serm. 13. de verbis Apostoli, ubi verba quædam ipsius Apostoli referens, quibus Dei iustitiam ex gratia statuit, & propriam ex libero arbitrio euacuat, inquit, quod commendat ita Apostolus propter Iudæos, qui de Lege gloriabantur, & libero suo arbitrio Legem sufficere arbitrabantur. Et epist. 95. de eisdem Iudæis loquens inquit, quod per Legem iustificari se arbitrabantur, sufficiente sibi ad eam custodiendam libero arbitrio. Cum quibus postea consensit Pelagius, qui quando aliquid de gratia Dei admisit, eam dixit consistere in lege, sicut Iudæi in persuasionem, in doctrina, seu scientia. Ergo in hoc ipso errauerunt Iudæi multò ante Pelagium, contra quos Apostolus in epist. ad Rom. & ad Gal. præcipuè agit, ostendens Legis insufficientiam, nisi addatur gratia, quæ neque ex meritis, neque ex operibus Legis nobis datur.

Ut autem specialiter ipsum Iudæorum dogma² circa hanc materiam discernamus, supponendum est quod ex variis quæ apud Iudæos vigeant sectis, in quas eorum doctrina, & Respublica tandem dissecta fuit, quarum 28. refert Philastrius in lib. de hæresibus, & aliquas etiam tradit Epiphanius lib. 1. de hæresibus tomo 1. præcipuè tamen, & quasi omnium capita erant tres, scilicet Essenorum, Phariseorum, & Sadducæorum, ut ex Iosepho lib. 2. de bello Iudaico cap. 7. refert Baronius in apparatu ad Annales Ecclesiasticos cap. 7. Inter Phariseorum autem, & Sadducæorum dogmata Iosephus citato loco, ponit id, quod pertinet ad liberum arbitrium, & efficaciam operationis Dei, his verbis. Pharisei primum dogma habent, ut fato, & Deo vniuersa deputent: & quidem vel agere, quæ iusta sunt, vel negligere secundum maiorem partem esse in hominibus profitentur, adiuuare autem in singulis & fatum. Sadducæi porro fatum omnino negant, & Deum extra omnem mali parrationem inspectionemque constituunt. Aiunt autem electioni hominum, vel bonum, vel malum esse propositum, & secundum voluntatem propriam alterutrum unicuique contingere. Quod hîc de fato Pharisei tradebant, fortasse non sumebant fatum pro necessitate orta ex Cœli dispositione, sicut plerique Gentilium qui fatalem vim sideribus tribuebant, sed pro dispositione diuina ex prouidentia sua orta, qua ratione loquitur de fato D. Thom. 1. part. quaest. 116. Si quidem pro eodem reputabant Pharisei Deo, & fato cuncta tribuere. Excipiebant tamen ad hoc liberum arbitrium, cui maiorem partem tribuebant in his, quæ iuste agere, vel negligere poterat, quia hoc necessarium erat ad constituenda præmia, vel poenas pro

pro alia vita, & resurrectione mortuorum; quæ omnia contra Sadducæos ipsi fatebantur; licet inconsequenter loquutos notet S. Epiphanius lib. I. de hæresibus tomo I. cap. 16. in hoc quod ex vna parte omnia tribuerent fato, quod necessitatem videtur inducere, ex alia iudicium Dei circa homines constituerent, quod libertatem in ipsis supponit.

3 Vtramque hanc lectam Pelagius in suo dogmate videtur imitatus. Primò quidem Sadducæos, qui ita dicebant in nostra electione esse propositum bonum, vel malum, ut vtrumque æqualiter secundum propriam voluntatem contingeret. Quod ipsum Pelagius in initio sui erroris dixit, existimando non minùs esse potens liberum arbitrium ad benè agendum, quàm ad malè, itavt sine gratia crederet posse hominem facere omnia divina mandata, ut refert Augustin. in lib. de hæresibus, hæresi 88. Phariseorum autem dogma videtur postea sequutus Pelagius, qui etsi aliquantulum admiserit gratiam Dei, tamen maiorem partem tribuebat libero arbitrio, & minorem dabat Deo, ut multis locis docet Augustin. præsertim lib. de gratia Christi cap. 26. Quod minus est, inquit, divino tribuit adiutorio, quod autem maius est, humano usurpat arbitrio. Quod autem addebant Pharisei fatum in singulis adiuuare, intelligendo nomine fati (ut videretur) ipsam dispositionem divinam; hoc ipsum Pelagius postea dixit, renuens concedere divinam gratiam præcedere, & inspirare nobis cupiditatem boni, sed bonum propositum conceptum adiuuare, licet non sub nomine fati hoc diceret, sed sub nomine auxilij, seu gratiæ, quod ex ipsorum Pelagianorum verbis refert Augustin. lib. 2. contra duas epistolas Pelagianorum cap. 5. & 6. Hæc, inquit, verba sunt vestra: Baptisma omnibus necessarium esse a nobis confitemur, gratiam quoque adiuuare vniuscuiusque bonum propositum, non tamen reluctanti studium virtutis immittere, quia personarum acceptio non est apud Deum.

4 Secundo loco, Simon Magus in disputationibus habitis cum D. Petro Apostolorum Principe, ut refert S. Clemens lib. 3. Recognitionum, ex efficacia diuinæ voluntatis negavit liberum arbitrium nostrum. Cum enim à Petro vi argumentorum sic ageretur, ut qui priùs liberum hominibus concesserat arbitrium, postea in magna inconuenientia lapsus, ipsum negaret, & de hoc à Petro postularetur coram tota multitudine, volens Simon aliquod sibi patrociniū negatæ libertatis prætere, ad illud commune argumentum confugit, quomodo cum efficacia voluntatis diuinæ stet libertas creata? quia id quod Deus vult, est, & quod non vult, non est. Cui Petrus distinguens duos ordines rerum, scilicet eorum quæ necessariò mouentur, & quæ voluntariè, quorum prima in ordine quo creata sunt semper permanent, non secunda, subiecit pro responsione Simonis. Ignoras Simon, & valde ignoras quomodo in singulis quibusque voluntas Dei sit: quedam enim voluit ita esse, ut aliud esse non possint, quàm id quod ab ipso instituta sunt, & his neque præmia, neque supplicia statuit: ea verò quæ ita esse voluit, ut in sua potestate habeant agere quod velint, his pro actibus ac voluntatibus suis statuit, ut aut remunerationes mereantur, aut pœnas. Cum ergo in duas, ut edocui partes diuidantur cuncta quæ mouentur, secundum eam quam supra diximus distinctionem, omne quod vult Deus, est, quod autem non vult, non est. Vbi vides Apostolicam doctrinam ab ipso Ecclesiæ fundamento, & Apostolorum Principe traditam, nempe in hac efficacia diuinæ voluntatis componenda cum libertate nostra nõ oportere recurrere ad aliquid præsuppositum, & præuisum ex parte nostra, iuxta quod Deus moderetur decreta sua, sed ad ipsammet efficaciam vniuersalis-

simam diuinæ voluntatis, quæ quibusdam causis necessitatem operandi constituit, aliis contingentiam, & ideò in omnibus semper fit id quod Deus vult, & tamen liberè fit, & contingenter, quia hoc ipsum Deus vult quod res non solum fiant, sed etiam liberè fiant, & sic fit semper quod Deus vult, quia etiam vult ipsum modum quo fiunt, & dat illum. Si ergo efficacia diuinæ voluntatis est tam vniuersalis quod dat omnia, utique non tollit libertatem, quia dat. Quam solutionem & doctrinam perpetuò sequitur S. Thom. ut præcedenti tom. disp. 20. art. ultimo diximus, & ampliùs infra dicemus art. 5.

Eandem difficultatem videtur Apostolus Paulus tetigisse tanquam in hac materia potiore, cum ad Rom. 9. illam quorundam obiectionem ponit. Dicis itaque mihi: Quid adhuc queritur? voluntati enim eius quis resistit? Quasi volentes illi qui sic obiciebant, ex efficacia voluntatis Dei, cui nullus resistit, declinare querelam quam aduersus nos Deus habere potest, si rectè non operemur. Et ideò videbatur illa obiectio ad hoc tendere, ut efficacia diuinæ voluntatis cum arbitrio nostro stare non possit, quasi illud destruat sua efficacia, cui non potest resisti: Et tamen vnico verbo respondet Apostolus: Nunquid dicit figmentum ei qui se finxit, quid me fecisti sic? Vbi in hoc sic denotat Apostolus fecisse Deum voluntatem, & actum eius, tam quoad substantiam, quàm quoad modum, & si sic fecit, non destruxit, sed libertatem faciendo, & mouendo conseruat. At verò volendo ostendere iram, sustinuit in multa patientia, hoc est permisit, coëgit vasa iræ; quod est signum reliquisse, non destruxisse libertatem, quia figmentum, id est bonum opus à se causatum sic fecit, & vas iræ sic sustinuit. Constat ergo viguisse illis Apostolorum temporibus hanc sententiam de fato, de efficacia diuinæ voluntatis destruyente liberum arbitrium, & de negatione necessitatis gratiæ, & sufficientia liberi arbitrij, aut simpliciter, aut in maiorem partem pro bonis operibus faciendis.

Tertio loco hic error de sufficientia liberi arbitrij, & negatione gratiæ Dei suscitatus videtur à Basilide, & Valentino antiquissimis hæreticis; Basilides enim sub Adriano Principe Successore Traiani erupit, ut refert Eusebius lib. 4. historia Ecclesiastica cap. 7. & Clemens Alexandrinus 7. Stromatum. Valentinus autem paulò post, sub Higinio Papa, Romam venit, & permansit ibi sub Pio, & Aniceto, ut ex Eusebio loco citato cap. 11. & Nicephoro lib. 4. cap. 3. constat; imò vsque ad Eleutherium Pontificem superuixisse significat Tertullianus de præscriptionibus, cap. 30. fuitque sub Principatu Autonini Pij. Isti ergo hæretici docuerunt fidem esse naturalem, & salutem posse nobis per naturam contingere, semotà gratiâ prout de Basilide Clemens Alexandrinus lib. 2. Stromatum; licet alij Authores qui eius errores referunt, ut Epiphanius, & Theodoretus id ei non attribuant, sed neque Clemens Alexand. hoc ipsi tribuit, sed sectatoribus eius; Fidem, inquit, esse naturalem existimant Basilidis sectatores. Valentiniani autem nec fide, nec gratia, nec bonis operibus, sed sola sua cognitione salutem se assequuturos putabant, excellentiorem eam putantes, quàm fidem (naturalem eam fortiter ponebāt) & solum pro simplicioribus, sibi autem suam cognitionem sufficere putabant. Videatur Theodoretus lib. 1. hereticarum fabularum, & Epiphanius lib. 1. contra hæreses tomo 2. & Clemens Alexandrinus lib. 4. Stromat. vbi Valentino, & Basilidi tribuit, quod naturā saluum sit genus humanum. Non tamen Patres, qui illo sæculo scripserunt, contra huiusmodi hæreticos, in hoc puncto specialiter impugnando immorati sunt, circa alios eorum errores principalius occupati, quibus multitudinem deorum moliebantur.

tur introducere, quod maius tunc negotium facesset.

7 Rursus tempore Origenis suscitata est quaestio ista de sufficientia liberi arbitrii, ita quod non indigeret motione Dei, seu gratia (gratia autem ad motionem, seu concursum Dei pertinet.) Dixit enim Origenes *Peri archon*, ut refert S. Th. lib. 3. cont. gent. cap. 89. quod Deus causat in nobis velle, & perficere, in quantum dat nobis virtutem volendi, non autem sic quod faciat nos velle hoc, vel illud. Sentit quoque Origenes posse hominem sine peccato esse, cum ad summitatem virtutum venerit, ut ex ipso refert sanctus Hieron. in epist. ad Ctesiphontem contra Pelagianos, quem postea secutus est Iovinianus, qui inter alia dogmata, etiam illud introduxit, de impassibilitate animae, existimans posse hominem ad hoc peruenire; ut absque omni passione peccati viuat, de quo Augustin. lib. de haeresibus, haeresi 82. A Ioviniano, inquit, quodam Monacho ista haeresis orta est atate nostra, cum adhuc iuuenes essemus. Hic omnia peccata, sicut Stoici Philosophi paria esse dicebat, nec posse peccare hominem lauacro regenerationis accepto. Quam etiam de impassibilitate, & impeccantia haeresim eidem Ioviniano attribuit D. Hieron. lib. 2. contra Iovinianum, statim in principio, ubi eam exagitat.

8 Ex Origene, & Ioviniano proximè prorogata est haeresis Pelagij. Vnde S. Hieron. in epist. ad Ctesiphontem citata, loquens cum Pelagio, Doctrina tua, inquit. Origenis ramusculus est: & in prologo ad lib. 1. contra Pelagianos, Iovinianus, inquit, cuius a te, o Pelagi, haeresis suscitatur, Romanam fidem me absente turbauit. Vnde in ipso primo lib. incipit Pelagium arguere de illo Ioviniani dogmate, dum inquit, Audio à te scriptum, hominem posse sine peccato esse, si velit. Et iterum praefatione in lib. 4. Ieremia; subito, inquit, haeresis Pythagora, & Zenonis, id est impossibilitatis, & impeccantiae, quae olim in Origene, & dudum in discipulo eius Grunio, Euagrioque Pontico, & Ioviniano ingulata est, cepit reuiuiscere, & non solum in Occidentis, sed & in Orientis partibus sibilare: quae utique fuit haeresis Pelagij illo tempore Hieron. iam senis recentissima. Denique omnes illos haereticos qui impeccantiā hominibus esse possibilem crediderunt, principes, & Authores Pelagianae haeresis fuisse, optimè aduertit Hieron. citata ep. ad Ctesiphontem, & in prologo ad libros contra Pelagianos, scilicet Origenem, Manichaeum, Priscillianum, Euagrium Ponticum, Iovinianum, & totius penè Syriae haereticos, inquit Hieron. in prologo citat. quos gentili sermone Albin & Panin, id est peruersos, & Massilianos, Graecè enchitas vocant, quorum omnium ista sententia est, posse ad perfectionem, & non dicam ad similitudinem, sed aequalitatem Dei hominum virtutem & scientiam peruenire, ita ut asserant ne cogitatione quidem, & ignorantia cum ad consummationis culmen ascenderint, posse peccare. Hoc enim consequens erat in haeresi Pelagij, quod cum assereret sufficientem liberum arbitrium sine gratia ad seruanda omnia mandata, etiam diceret ad non peccandum; & ita ex illa haeresi Ioviniani de impassibilitate, & impeccantia, ista Pelagij orta est de sufficientia liberi arbitrii sine gratia: solet enim ex vno errore alius emergere, & quasi catena intexi, ut hoc etiam modo verificetur id quod legimus de corpore Diaboli quod aduersus Ecclesiam Dei tot haeresibus armat Iob, 41. Corpus eius quasi scuta fusilia compactum squamis se prementibus: una uni coniungitur, & ne spiraculum quidem incedit per eas.

9 Sic ergo ad fabricandum errorem Pelagij, cuius scintillae, & cineres vix multis saeculis extinguere poterunt, totam superiorum haeresum colluuiem, & straginem quasi in sentinam Diabolus infarcinauit,

ut ex omnium illarum face tam virulenta vipera euaporaret, & obstetricante manu eius educeretur coluber tortuosus, qui totum gratiae Dei spiritum morsu venenoso extinguere conatus est. Nam haeresim istam Pelagij omnem excedere blasphemiam, & haereticorum venena superare, rectè dixit Hieron. in epist. citata ad Ctesiphon. referens illud dictum Pelagij, quod si alterius ope indigemus, liberum arbitrium in nobis destruitur. Et sub magna hypocrisis, & ouina pelle delituit feralis bestia, ita ut penè in errorem, & deceptionem inducerentur ipsi electi, plebsque enim decepit, ut Patres Concilij Palæstini, magna æquiocatione vsus in confitenda gratia Dei, ut securius eam euenteret, dum putabatur admittere. Coepit autem paulatim se prodere vltimis S. Chrysostomi temporibus circa annum 405. ut Cardinalis Baronius notat in eodem anno, ex epist. 4. eiusdem Chrysostomi ad Olympiadem. in qua significat fuisse Pelagium in partibus Orientis non ignotae famae Monachum, licet ipse ex vltimis Occidentis finibus, scilicet ex Britannia, vel, ut S. Hieron. videtur, ex Scotia artum duxerit, ut praefatione lib. 3. in Ieremiam insinuat illis verbis: Ipse mutus latrat per alpinum canem grandem, & corpulentum, & qui calcibus magis possit sanire, quam dentibus, habet enim progeniem Scoticam gentis, ex Britannorum vicinia, qui iuxta fabulas Poëtarum, instar Cerberi, spiritali percutiendus est claua, ut aeterno cum suo magistro Plutone silentio conricescat. Ex Scotia ergo, seu Britannia ad Orientem progressus Pelagius Monachum egit; de quo Chrysostom. non sine animi moerore rescripsit ad Olympiadem, eius lapsum deplorans, In vltimis illius epistol. verbis: De pelagio Monacho, inquit, magno dolore affectus sum. Cogita igitur quot, quantisque coronis digni sunt qui forti animo in acie steterunt, cum viros tam pie ac sanctè, tamque cum tolerantia viuentes abripi atque in fraudem impelli videamus. Sic Chrysostom. sanctum, & pium fuisse existimans Pelagium, ex fama tantum, & ex auditu, ut existimo, sicut etiam August. lib. 3. de peccatorum meritis, & remissione, cap. 1. dixit se legisse scripta quaedam Pelagij, viri, inquit, ut audio, sancti, & non paruo profectum Christiani. Sic enim fama tunc de Pelagio loquebatur. Illa siquidem exterior species, & hypocrisis qua internam animi calliditatem occultabat, non modicam apud alios, praesertim longius degentes, sui opinionem conciliabat. Intimius tamen eius mores perspexisse potuit Isidorus Pelusiota, & hic Chrysostomi magni discipulus, qui Monachum agens, Monachi Pelagij actiones pressius potuit existimare, easque ad statum appendens, inuenit minus habentes, nec auri fulgorem esse qui exterius aliquando in Pelagio affulgebat, sed aramentum sonans, nidorem carniū, & ventris obsonia, deliciasque appetentem. Vnde acriter ipsum increpat lib. 1. epist. 3 & 4. his verbis: Tibi ingens annorum turba caniciem inuexit, & tamen rigidum atque inflexum animum habes, ex alio monasterio ad aliud subinde migrans, atque omnium mensas perscrutans & explorans. Quamobrem si tibi carniū nidor, atque obsoniorum condimentum cura est, iis qui magistratus gerunt potius blandire, atque urbium caminos vestiga. Neque enim homines eremita facultates eas habent, ut te quemadmodum tibi gratum est excipere valeant. Sic Pelusiota. An hæc actitaret Pelagius post erroris sui larvam detectam, an adhuc dum lateret in Orientis monasteriis sub opinione religiosa, mihi incertum est. Sanè non potuit inimicus gratiae, & totius spiritus hostis, ventris non esse amicus, & spiritui gratiae contumeliam faciens, consequens erat, ut malè blandas carnis delicias effusè quæreretur.

ARTICVLVS II.

Exponitur varius status erroris Pelagij in gratia Dei confitenda, & neganda.

- 1** **V**T Pelagius astutiâ suâ, & calliditate quâ omnes penè hæreticos antecelluit plures deciperet, & sub specie subdolâ delitescens suam hæresim propagaret, illud Diabolica arte inuenit, vt contra Manichæi errores solum agere videretur, ac proinde eos qui sibi ex Catholicis contradicebant, quasi Manichæorum fautores suggillaret. Inter alia autem quæ Manichæi tanquam mala vituperabant, & à malo Deo esse picebant, quinque erant præcipua. Primò enim carnem nostram, quia vitio subiecta est, & naturam corporalem, quæ ad malum prouocat, malam esse dicebant, & à malo Deo processisse. Secundò, nuptias dicebant esse malas, eo quòd cum libidine exerceantur, & in prolem transmittant peccatū. Tertiò, vituperabant legem veterem, quia iustificare nō poterat. Quartò, damnabant liberum arbitrium tanquam malum, eo quòd peccat. Quintò, non admittebant tanquam Sanctos, Patriarchas, & Prophetas antiquos, eo quòd planè peccato non caruerint, sed iustitiæ eorum fuerunt quasi pannus menstruatus, vt loquitur Isaias. Contra ista quinque Manichæorum asserta, quinque alia extremè contraria Pelagiani introducebant. Nam primò carnem nostram dicebant ita esse bonam, vt etiam omni peccato originali careret. Secundò dicebant nuptias ita esse bonas, vt nec peccatum transmitterent in prolem, nec aliquid erubescendum haberet motus ipse libidinis. Tertiò, asseriebant legem ita esse bonam, vt iustificare posset, vitamque æternam conferre. Quartò, liberum arbitrium ita esse bonum & perfectum, vt gratiâ Dei ad nulla bona opera indigeret. Quintò, Sanctos ita esse perfectos, vt nullum haberent omninò peccatum. Hæc fuerunt præcipua capita Pelagianæ hæresis. Vnde S. August. l. 4. cont. duas epist. Pelagianorum, c. 1. inquit, *Pelagium quinque rerum obtendere obstacula, in quibus eorum dogmata inimica gratiæ Dei, & Catholica fidei delitescant, scilicet in laude creaturæ, laude nuptiarum, laude legis, laude liberi arbitrij, laude Sanctorum.* Et infra c. 1. *In his omnibus, inquit, quidquid dicunt de laude creaturæ, atque nuptiarum, ad hoc referre conantur, vt non sit originale peccatum: quidquid de laude legis, & liberi arbitrij ad hoc, vt gratia non adiunget, nisi meritum, ac sic gratia iam non sit gratia: quidquid de laude Sanctorum ad hoc, vt vita mortalis in Sanctis videatur non habere peccatum, nec sit eis necessarium pro dimittendis debitis suis precari Deum. Videri etiam potest Augustin. lib. 3. contr. duas epist. Pelagianorum cap. 8. vbi latè docet, quomodo excogitauerunt Pelagiani, Manichæorum detestabili nomine imperitos deterrere, ne aduersus eorum dogmata aures accommodarent veritati.*
- 2** In præsentia ergo, relictis aliis quæ Pelagius asseribat, solum egemus de his quæ pertinent ad liberum arbitrium, & gratiæ necessitatem; in qua Pelagius non vno modo processit, sed magna æquiuocatione, & calliditate, ita vt primò omnem gratiam negaret, & eius necessitatem ad operandum, postea autem variis moderationibus eam apparenter admisit, & illusoriè, nunquam autem veram gratiam, quæ est per Christum, & per subministrationem Spiritus sancti, in voluntate confessus est.
- 3** Itaque in ipso initio exorientis huius hæresis, quando primum vipera ista venenum suum diffudit, ita apertè contra gratiam Dei se erexit, vt totaliter illam negauerit sine vlla prorsus modificatione, aut yelamine. Sumitur hoc ex Aug. lib. de hæresibus, hæ-

si 88. vbi de Pelagianis in principio suæ hæresis loquens, inquit: *Hi Dei gratia quâ predestinati sumus in tantum inimici sunt, vt sine hac posse hominem credant facere omnia diuina mandata.* Nec solum gratiam Dei specialem negauit tunc Pelagius, sed etiam generale auxilium ad singulas actiones, etiam ordinis naturalis requisitum. Constat hoc ex D. Hieron. lib. 1. aduersus Pelagianos, vbi introducit Pelagium si loquentem: *Si in singulis rebus quas gerimus Dei vtendum est adiutorio: ergo & calanum temperare ad scribendum, & temperatum pumice terrere, manumque aptare litteris, tacere, loqui, sedere, stare, ambulare, currere, comedere, ieiunare, flere, ridere, & cetera huiusmodi, nisi Deus iuuerit, non poterimus.* Et in epist. ad Ctesiphontem cap. 3. *Audite queso sacrilegum, si inquit voluero curuare digitum, mouere manum, sedere, stare, ambulare, discurrere, sputa iacere, duobus digitulis narium purgamenta decuere, relaxare aluum, urinam digerere, semper mihi auxilium Dei necessarium erit?* Hic fuit primus status hæresis Pelagianæ, in qua omnem gratiam Dei, & auxilium, etiam ad actiones naturales omninò negauit. An verò simultaneum concursum aliquando concesserit, postea videbimus. Negauit autem in hoc primo statu gratiam Dei non solum ad simpliciter, sed etiam ad facilius, & melius operandum: hoc enim postea moderando suum errorem concessit, vt iam videbimus, & ita in primo statu omninò negauit.

Prima moderatio Pelagij admittendo gratiam Dei solum ad facilius, non ad simpliciter.

Tantam impietatem, & blasphemiam negando **4** penitus gratiam Dei, orbis totus exhorruit, sensitque Pelagius pessimè à fidelium auribus hoc eius dogma excipi, idèoque tentauit aliquo modo rigorem illum moderari, admittendo aliquantulum gratiam Christi, sed verbis tantum, non veritate; Nam, vt inquit August. citato lib. de hæresibus. *Pelagius increpatus à fratribus quòd nihil tribueret adiutorio gratiæ Dei, ad eius mandata facienda, correptioni eorum hætenus cessit, vt non eam libero arbitrio præponeret, sed infidelicalliditate supponeret, dicens ad hoc eam dari hominibus, vt qua facere per liberum iubentur arbitrium, facilius possint implere per gratiam.* Dicendo utique, vt facilius possint, voluit credi, etsi difficilius, tamen posse hominem sine gratia, diuina facere iussa. Illam verò gratiam Dei, sine qua nihil boni possumus facere, non esse dicunt nisi in libero arbitrio, quod nullis suis præcedentibus meritis ab illo accepit nostra natura ad hoc tantum ipso adiuuante per suam legem, atque doctrinam, vt discamus qua facere, & qua sperare debeamus. Vbi videri potest varium, & tortuosum hæretici ingenium abutentis nomine gratiæ ad suum errorem occultandum: distinguebat enim quandam gratiam, vt facilius possumus implere mandata, aliam verò sine qua nihil boni possumus facere, & hæc non est ad facilius, sed ad simpliciter; vt ex illis verbis Augustin. colligi potest: *Illam verò gratiam Dei, sine qua nihil boni possumus facere, &c. vbi dicendo, illam verò gratiam, de alia gratia se loqui significat, quam sit illa quæ solum datur ad facilius; dicit enim esse talem sine qua nihil boni possumus facere: ergo hanc ponebat pelagius vt simpliciter necessariam.* Et hoc etiam ex eo patet, quia hanc gratiam dicebat non esse aliud, quam ipsummet liberum arbitrium, quod utique simpliciter est necessarium ad facienda opera ipsius liberi arbitrij. Sed tamen illud gratiam appellabat, quia gratis accipitur à Deo creatante animam ipso beneficio creationis, vt hæc modo

modo deciperet fideles ipse gratiæ vocabulo; explicando autem quid sub hoc vocabulo intelligeret, nempe esse ipsum liberum arbitrium, & naturam, quæ totam gratiam, quæ naturæ superadditur euacuerat.

5. Ceterum illud est dubium quid intellexerit Pelagius nomine gratiæ requisitæ ad facilius operandum. Nam solum tria nomine gratiæ poterant intelligi: Primò, ipsa natura, & liberum eius arbitrium, quod etiam gratia dicebatur ab ipso Pelagio, quia gratuito beneficio creationis accipitur. Secundò dicebatur gratia ipsa lex, & doctrina siue per extrinsecum auditum accepta, siue per internam illuminationem, & reuelationem data, & hæc dicitur gratia quia etiam beneficio Dei datur; sed tamen solum pertinet ad perficiendum intellectum, & proponendum obiectum voluntati. Tertiò, dicitur gratia subministratio virtutis internæ, qua voluntas ipsa adiuvatur, & præparatur, & hæc non solum tangit intellectum, sed etiam voluntatem. Primum quidem genus gratiæ admirabat Pelagius, non solum ad facilius, sed etiam ad simpliciter, quia liberum arbitrium simpliciter requiritur ad sua opera facienda. Tertium genus gratiæ omninò respuebat, nec ad simpliciter, nec ad facilius, quia per hanc gratiam inspirantem, & mouentem dicebat tolli liberum arbitrium, quasi necessitate quadam fati, ut patet ex August. lib. 2. cont. duas epist. Pelagianorum, cap. 5. ubi ponens obiectionem Pelagianorum contra Catholicos, sic inquit: *Hoc nobis obiiciendum putarunt; sub nomine, inquit, gratia uia fatum asserunt, ut dicant, quia nisi Deus inuito ac reluctanti homini inspirauerit boni, & ipsius imperfecti cupiditatem, nec à malo declinare, nec bonum possit arripere.* Deinde aliquantò post, ubi ipsi qua defendant commemorant, quid de hac re ab eis diceretur attendi. Baptisma, inquit, omnibus necessarium esse ataribus confitemur, gratiam quoque adinuare vniuscuiusque bonum propositum, non tamen reluctanti studium virtutis immittere, quia personarum acceptio non est apud Deum. Pelagius ergo istam gratiam, quæ per modum inspirationis internæ in voluntate ipsam immittitur prorsus negabat, siue ad simpliciter, siue ad facilius, quia existimabat necessitate voluntatem. Et hoc ipsum constat ex August. in toto lib. de grat. Christi contra Pelagium, & Celestium, ubi ostendit Pelagium semper hanc gratiam, quæ datur voluntati per inspirationem, & subministrationem virtutis, prorsus negasse. Solum ergo poterat gratiam istam, quæ datur ad facilius constituere in illo secundo genere gratiæ, quod pertinet ad legem, & doctrinam: quod tamen valde difficile est, si lex, & doctrina in tota sua vniuersalitate sumatur pro quacumque cognitione, qualis datur per legem, & doctrinam: nam cognitio intellectus non ad, facilius operandum, & volendum requiritur, sed ad simpliciter, quia nihil volitum, quin præcognitum. Quod etiam videtur Pelagius agnouisse explicans illud Apost. *Qui operatur in nobis velle, & perficere, quod vniue suo dogmati videbat esse valde contrarium, ut inquit August. lib. de gratia Christi cap. 10.* Dicebat ipse quod operatur in nobis velle, quod bonum est, dum nos terrenis cupiditatibus deditos futura gloria magnitudine, & præmiorum pollicitatione succendit, dum reuelatione sapientiæ in desiderium Dei stupentem suscitatur voluntatem, &c. Intelligebat ergo Pelagius hoc quod ipse vocabat reuelationem, & doctrinam ad excitationem voluntatis pertinere; excitatio autem simpliciter requiritur ad volendum, non facilius solum.

6. In hoc dubio, existimo Pelagium aliquid legis, & doctrinæ tanquam simpliciter necessarium assignasse, scilicet cognitionem, sine qua voluntas velle non

potest; aliquid verò de doctrina, & reuelatione assignabat tanquam gratiam non simpliciter requisitam, sed ad facilius operandum. Et totum hoc in genere legis, & doctrinæ includebat. Ducor, ad hoc imprimis August. lib. de gratia Christi cap. 40. ubi referens verba Pelagij dicentis. *Diuinam mereamur gratiam, ut facilius nequam spiritui, Spiritui sancti auxilio resistamus,* addit August. *In quibus eius verbis manifestum est ita eum velle nos adiuuari gratia Spiritus S. non quia sine illo etiam per solam naturam possibilitatem non possumus resistere Tentatori, sed ut facilius resistamus.* Quod tamen qualecumque adiutorium, eum credibile est in hoc constituere, quod nobis additur scientia, reuelante spiritu per doctrinam, quam vel non possumus vel difficile habere possumus per naturam. Ecce in quo dicit August. constitui ab ipsis adiutorium illud, quod datur ad facilius, & non ad simpliciter, videlicet non in quacumque scientia, seu cognitione, sed in illa quæ nobis additur per reuelationem Spiritus sancti, quam vel supernaturalem ponebat, vel indebitam naturæ, quia dicebat non posse, aut difficile posse nos eam habere per naturam. Non ergo quacumque cognitio, aut scientia ponebatur à Pelagio pro adiutorio ad facilius operandum, sed illa peculiaris, & specialis cognitio, quæ additur per reuelationem Spiritus. Ducor secundò, quia in eodem lib. de gratia Christi. cap. 7. referens August. eadem verba Pelagij, qui dicebat, *auxilium gratiæ nobis subministrari, ut quod per liberum homines facere iubentur arbitrium facilius possint implere per gratiam;* ubi expressè loquebatur de gratia, quæ datur ad facilius, non ad simpliciter operandum, subdit August. de ipso Pelagio: *Et tanquam explicaturus, quam dicat gratiam, secutus adiunxit dicens; quam nos non, ut tu putas, in lege tantummodo, sed & in Dei esse adiutorio confitemur.* Vbi aliquod adiutorium videbatur ponere præter legem, seu cogitationem mandatorum Dei, quod dicebat ad facilius dari. Sed quale erat hoc adiutorium? Subiungit August. *Quis non desideret ut ostendat, quam vult intelligi gratiam? Propter hoc enim maxime de illo expectare debemus, ut dicat hoc quod dicit, non in lege tantummodo se gratiam confiteri. Sed nobis hac expectatione suspensis, quid addiderit, intuemini.* Adiunxit enim nos, inquit, Deus per reuelationem, & doctrinam suam, dum cordis nostri oculos aperit, dum nobis, ne presentibus occupemur, futura demonstrat, dum Diaboli pandit insidias, dum nos multiformi, & ineffabili dono gratiæ celestis illuminat. In his omnibus non recessit à commendatione legis, atque doctrinæ, hanc esse adiuvantem gratiam diligenter inculcans, & hoc exequens quod proposuerat, cum diceret, sed in Dei adiutorio confitemur. Ecce quomodo Pelagius dicebat illud adiutorium quod datur ad facilius, aliquid esse præter legem, & communem notitiam mandatorum: Et tamen id in quo tale adiutorium constituebatur sic explicabat quod etiam pertinebat ad doctrinam illuminationem, & reuelationem; quod totum nomine cognitionis, & doctrinæ includitur, addit tamen ad legem aliquid speciale, scilicet specialem illuminationem, aut ineffabile donum, quod totum pertinet ad reuelationem, doctrinam, & apertionem oculorum cordis. Hæc erat gratia ad facilius, lex autem, & communior quædam notitia, ad simpliciter.

Secunda moderatio Pelagij de gratia non data ex meritis, & de gratia remissiva peccatorum.

Abutebatur Pelagius vocabulo gratiæ, quæ generaliter quodlibet gratuitum beneficium designat, sub ista ambigua generalitate se abscondens, gratiæ

gratiæ tamen vocabulo frangens inuidiam, offensionemque declinans, ut August. ait *præfatio lib. de gratia Christi, cap. 37.* Et ut vidimus in *preced. moderatione*, inuenit quo modo gratiam confiteretur, sed ad facilius implendum mandata, ponendo illam in aliqua speciali reuelatione, aut doctrina, & illuminatione Dei; inuenit etiam quomodo, si vrgeretur à Catholicis, posset sine sui erroris diminutione fateri gratiam simpliciter necessariam ad benè operandum; sed nomine gratiæ intelligebat ipsum liberum arbitrium, quod dono, seu gratia creationis accipimus à Deo, ipsam etiam legem, quæ communiter datur omnibus. Nunc cum ulterius instaretur à Catholicis, ut fateretur gratiam talem, quæ non daretur ex meritis; ad hoc etiam inuenit quomodo affirmaret gratiam aliquam non ex meritis datam, aut omnino ex nullis meritis, neque condignis, neque de congruo, aut saltem non ex condignitate, etsi de congruo. Et dicebat gratiam quæ non datur ex meritis, esse ipsam naturam cum libero arbitrio, quam beneficio creationis ante omnem meritum accepimus, gratiam verò, quam ex æquali merito habemus, etsi non rigoroso, sed innixio misericordiæ Dei, esse gratiam remissionem peccatorum, quæ est gratia sanctificans, quam ultra naturam, & legem nobis à Deo dari fatebatur, ut ex verbis S. August. *epist. 105.* & *alij locis citandis*, deducemus.

8 Ut autem in hac parte melius possit Pelagij sensus manifestari, aduertendum est, P. Suarez *tomo 1. de gratia prolegom. 5. cap. 2.* tenere quòd ex sententia Pelagij probabiliter colligitur ipsum non agnouisse gratiam internam sanctificantem nos, neque virtutes, seu dona infusa, cum hæc propter actus supernaturales dentur, ad quos nullam gratiam Pelagius requirebat. Nam etiam in Adamo ante peccatum, nullum donum agnouit præter naturalia, & sic dixit nos generari in eo statu in quo Adam fuit conditus. Et licet in paruulis posuerit gratiam adoptionis, tamen in adultis dicit hanc dari secundum merita, & sic potius esse præmium, quam gratiam, neque in paruulis dixit esse internam, & inhaerentem. Et in hoc ultimo etiam conuenit P. Vasq. *2. tomo in 1.2. disp. 203. cap. 8. num. 77.* & *sequentibus*, ubi docet Pelagium nusquam concessisse donum remissionis esse nouam gratiam distinctam à pœnitentia, & contritione, sed eam dari tanquam condignam remunerationem, aut effectum pœnitentiæ, eo quòd in Concilio Palæstino, ubi causa Pelagij fuit discussa, inter alia, obiectum illi fuit duodecimum capitulum errorum eius, *Quòd pœnitentibus venia non datur secundum gratiam, & misericordiam Dei, sed secundum merita, & laborem eorum, qui per pœnitentiam digni fuerint misericordia.* Senniebat ergo Pelagius donum remissionis non esse gratiam, sed secundum materia pœnitentiæ, & contritionis pœnitentibus dari. Vnde proponitur ipsi à Concilio forma abiurandi prædictum articulum, sic: *Ut fateatur secundum gratiam, & misericordiam Dei, veniam petentibus dari, non secundum merita eorum, quandoquidem etiam ipsam pœnitentiam donum Dei dixit Apostolus, cum ait, ne forte det illis Deus pœnitentiam.* Vbi aduertit Vasq. noluisse PP. definire idèd gratiam remissionis esse nouam gratiam, quia ipsa contritio, & pœnitentia non sit sufficiens forma ad delendum peccata, sed hoc voluisse obtinere à Pelagio, ut fateretur veniam, & remissionem peccatorum esse gratiam, & dari secundum misericordiam pœnitentibus, quia ipsa pœnitentia datur à Deo secundum gratiam, & est verè donum gratiæ, & misericordiæ Dei.

9 Nihilominus si diligenter verba August. quibus Pelagij sententiam explicat, conferantur, existimo sententiam Pelagij in hac parte fuisse, quòd gratia

remissiuæ peccatorum erat donum, & gratia supernaturalis, eaque internè renouans, seu instaurans naturam, non extrinsecè tantum condonans; Secundò, etiam existimasse quòd ista gratia remissiuæ verè, & propriè erat gratia donata ex misericordia Dei, licet ex aliquo merito largè loquendo de merito innixio orationi, & fidei, aliisque dispositionibus, ut pœnitentiæ, & contritioni. Sed in hoc maxime errabat, & à Catholicis dissentiebat, quòd istas dispositiones, seu merita præcedentia negabat esse ex gratia auxiliante, sed ex viribus liberi arbitrij, & idèd concedebat merita aliqua, saltem de congruo, præcedere iustificationem, sicque illam non esse merè gratiam, quod tamen vehementer vrgebant Concilia, & Patres ut abnegaret Pelagius.

Prima pars de supernaturalitate gratiæ remissiuæ in sententia Pelagij, probatur contra P. Suarez, præsertim ex duplici loco Aug.

Primus est in *lib. 2. de peccato originali cap. 5.* ubi **IO** citans libellum quemdam Cælestij discipuli Pelagij, quem Romam miserat: *Verba, inquit, eius ista sunt; Infantes debere baptizari in remissionem peccatorum secundum Euangelium confitemur, quia Dominus statuit regnum cælorum non nisi baptizatis posse conferri, quod quia vires naturæ non habent, conferre necesse est per gratiæ libertatem.* Sed gratia quæ datur ad id quod vires naturæ non habent, supernaturalis est; quod enim est naturale, ad aliquas vires naturæ pertinet, quod verò superat naturam, supernaturale est: ergo gratiam remissiuam peccatorum, quæ ad regnum cælorum confertur, supernaturalis ab istis ponebatur, quia hoc vires naturæ non habent, sed ad gratiæ virtutem pertinet. Primò, si rectè perpendatur, Pelagiani non ponebant gratiam Baptismi in paruulis propter tollendum aliquod peccatum, quia ipsi peccatum originale negabant; sed ut intrare possent in regnum cælorum, quod superat vires naturæ, ut Aug. docet, ex ipsorum sensu, *lib. 1. contra duas epist. Pelagianorum cap. 22.* Non ergo ponebant gratiam remissiuam in aliqua condonatione extrinseca peccati, quia tale peccatum non ponebant in paruulis, sed in aliquo adoptante, & eleuante ad regnum cælorum.

Secundus locus est in *lib. de natura & gratia*, ubi **II** aliam rationem insinuat propter quam Pelagius hoc donum docebat esse supernaturale, seu supra totam naturam, dicit enim sic *c. 18.* *Diuinitus tamen expianda esse peccata (scil. adultorum) ac pro eis dominum exorandum esse fateatur (Pelagius) propter veniam scilicet promerendam, quia id quod factum est infectum facere, multum ab isto laudata potentia naturæ, & voluntas hominis, etiam ipso fatente, non potest: quare ista necessitate restat ut oret ignosci.* Vbi clarè agnoscit Pelagius donum hoc remissionis peccatorum esse aliquid supernaturale, quia dicit esse diuinitus datum, & à potentia naturæ, & voluntatis fieri non posse, idèdque pro illo esse exorandam misericordiam Dei. Quod autem est supra potentiam naturæ, & voluntatis, & diuinitus datur ex misericordia diuina, supernaturale beneficium, & gratia est, cum supra naturam, eiusque potentiam ponatur.

Quòd verò hoc donum sanctificans, seu remittens **12** peccata, & adoptionem ad vitam æternam præbens, Pelagius dicebat esse aliquid internum, non ita clarè videtur dixisse, neque hoc vocabulo, *interni*, esse usum, quia de hoc non videbatur tunc esse controuersa, an iustificatio fieret per aliquid internum nobis inhaerens. Sed tamen quantum coniici datur ex ipsa Catholicorum disputatione, & verbis Pelagij, non videtur constituisse hanc iustificationem in sola extrinseca remissione peccatorum, sed in aliqua interiori renouatione: cum quia iustificationem ponebat,

nebat, & remissionem peccatorum in forma consueta, qua cōmuniter admittebatur ab Ecclesia Catholica, siquidem in hoc nunquam fuit specialiter accusatus, aut damnatus, quod iustificationem non poneret sicut Ecclesia Catholica, sed in aliqua tantum condonatione extrinseca; tum etiam quia per istam gratiam dicebat instauratam in melius esse naturam, instauratio autem renouationem dicit, & non solum condonationem extrinsecam, non enim intelligi potest instauratio naturae per solam extrinsecam denominationem, quia natura in se diminuta est, & sic indiget in se instaurari; nec nos modò aliter significamus internam hanc gratiam, nisi nomine renouationis, quae idem est quod instauratio. Quod verò Pelagius diceret gratiam remissionis esse instauratorem naturae, constat ex August. *lib. de gratia Christi*, c. 37. ubi refert verba Pelagij sic dicentis: *Quòd si etiā sine Deo homines ostendunt quales à Deo sint facti, vide quid Christiani facere possunt, quorum in melius per Christum instaurata natura est, & qui diuinā quoque gratia iuuantur auxilio? Naturam in melius instauratam* (subdit August.) *remissionem vult intelligi peccatorum.* Quod alio loco in hoc ipso libro satis demonstrauit, ubi ait; *Etiā illi qui longo peccandi usu obduruerunt, instaurari per poenitentiam possunt.* Sic Aug. quibus verbis manifestè docet quid Pelagius sentiret de ista gratia remissionis, quam dicebat nostram instaurare naturam, ac per hoc internam esse gratiam non negabat. Nec obstat quod virtutes infusae propter actus dentur, ad quos actus gratiam negabat dari Pelagius. Non, inquam, obstat, tum quia gratia quam negabat solum erat gratia illa auxilians, & per modum transeuntis, quae ad singulos actus datur, non habitualis, quae pro pluribus actibus seruit: tum quia gratiam saltem assererat dari ad facilius, & sic saltem sub hac moderatione virtutes illas non negabat: tum denique quia quidquid sit de virtutibus, de quo nihil Pelagius expressit ut à gratia condistinguuntur, de ipsa tamen gratia remissionis, quidquid illa sit, nec supernaturalem negauit, nec internam.

13 Secunda verò pars nostrae assertionis, quod scilicet hanc gratiam remissionem donatam censeret ex misericordia Dei, & distinctam à poenitentia, licet ex aliquo merito, seu dispositione datam, ponendo tamen (in quo maxime errabat) hoc meritum, seu dispositionem esse in nobis ex viribus liberi arbitrij, probatur contra P. Vasq. quia Pelagiani dicebant, illam dari ex misericordia Dei, & esse gratiam prae naturam, & legem, & pro ea Deum esse orandum, quae omnia sunt manifesta signa gratuiti beneficij, & hoc ipso quod ponebant ex meritis poenitentiae, aut fidei dari, distinctam illam docebat esse ab ipsa poenitentia, alias non daretur ex illis tanquam ex meritis si distincta non esset: Merita verò quae misericordiam Dei exorabat, & misericordiae innitebantur, manifestum est non fuisse condignitatis, sed dispositionis congruae. Singula probemus.

14 Dicebant Pelagiani esse istam gratiam ex misericordia Dei, & orandum pro illa Deum, ut patet ex Aug. *lib. de natura & gratia* c. 26. ubi inducit verba Pelagij sic dicentis: *Adhibet quidem huic etiam parti, si quando necessarium fuerit, misericordiam suam Deus, quia homini post peccatum ita subuenire necesse, non quia Deus causum huius necessitatis optauerit.* Et subdit Aug. *Viderisne, quomodo non dicat necessariam misericordiam Dei, ut non peccemus, sed quia peccauimus?* id est propter peccata praeterita, ut dimittantur, indiget homo misericordia Dei, & sic gratia remissionem ex misericordia datur apud Pelagium Dicebat pro ea esse orandum Deum (quas tamen orationes negabat pro gratia auxiliante, oratio enim est clarissima gratiae testificatio) ut constat ex eodem *lib. de natura & gratia* c. 18. *Diuini tamen expianda esse peccata commissae,* &

pro eis Dominum exorandum esse fatetur, propter veniam scilicet peccatorum promerendam. Dicebat esse gratiam datam à Deo praeter legem, & naturam, ut patet ex Aug. *lib. de gratia & libero arbitrio*, c. 13. ubi inquit: *Dicunt etiam Pelagiani gratiam Dei quae data est per fidem Iesu Christi, quae neque Lex est, neque natura, ad hoc tantum valere, ut peccata praeterita dimittantur, non ut futura vitentur, vel repugnantia superentur.* Ergo Pelagius ultra Legem, & naturam ponebat ipsum donum remissionis esse gratiam.

15 Dicebat non esse ex meritis simpliciter, & de condigno, sed largo modo, & innitendo misericordiae Dei, tum quia, ut vidimus, dicebat Deum adhibere misericordiam suam propter peccata praeterita, scilicet ut indulgeantur, & Deum pro ista venia esse orandum, quod utique ad gratiam pertinet, non ad iustitiam: tum etiam quia August. referens *epist. 105.* quomodo Pelagiani faterentur gratiam aliquam sine meritis dari, dicit hanc gratiam ipsos dixisse esse naturam, & legem, quia haec nullis meritis nostris praecedebus dantur nobis ipso beneficio creationis. Quod Aug. ibi impugnat, quia haec non est gratia redemptionis, & propria fidelium, de qua hic loquimur, sed creationis, & omni homini communis. Subdit autem de remissionis gratia August. *Possunt quidem dicere remissionem peccatorum esse gratiam, quae nullis praecedentibus meritis datur: Quid enim boni meriti habere possunt peccatores? Sed nec ipsa remissio peccatorum sine aliquo merito est si fides hac impetrat.* Neque enim nullum est meritum fidei, quia fide ille dicebat, *Deus propitius esto mihi peccatori.* Restat igitur ut ipsam fidem unde omni iustitia sumit initium, non humano, quod isti extollunt, tribuamus arbitrio, nec nullis praecedentibus meritis, quoniam inde incipiunt quaecumque sunt merita, sed gratuitum donum Dei esse fateamur, si gratiam veram, id est, sine meritis esse fateamur. In qua auctoritate illud ponderandum est, quod Aug. numerans etiam inter ipsas gratias, seu beneficia, quae sine meritis dantur, aut opponens quod numerari posset à Pelagio, remissionis donum, solum dicit quod talis remissio, si impetratur per fidem, aliquo merito impetratur, quia non est fides ipsa nullum meritum. Nec in hoc dissentit, aut contradicit Pelagius, quod fides aliquod meritum sit remissionis obtinenda, sed docet hanc fidem, quae sic impetrat, non esse ponendam ex libero arbitrio, ut ponebat Pelagius, sed ex gratia, quia sic veram gratiam fateretur, quae ex nullis meritis esset, eo quod etiā ipsa dispositio, & ipsum meritum ex gratia est. Sed constat quod dispositio ad gratiam iustificantem, quae est per fidem, orationem, & poenitentiam, solum potest fundare meritum secundum quid, & innixum misericordiae Dei ad obtinendam remissionem peccatorum: hoc ergo solum ponebat Pelagius, nec in hoc arguitur ab Aug. quasi poneret meritum ex iustitia, & de condigno ad gratiam, sed ad hoc recurrit, cumque de hoc arguit, quod hoc meritum fidei dicebat esse ex nobis; Catholici verò à gratia, quae est initium fidei, orationis, & poenitentiae.

16 Confir. quia Aug. expressè fatetur in *epist. 106.* se conuenire cum Pelagianis in hoc, quod fides meretur gratiam remissionis, differre verò quia ista fides non ponebatur à Pelagio esse ex gratia (scilicet auxiliante) sicut à Catholicis ponebatur: sed quando Aug. fatur fidem mereri gratiam iustificantem, solum loquitur de merito secundum quid, & innixum misericordiae Dei, ita quod meritum sit idem quod dispositio ad gratiam, non autem de merito simpliciter, & de condigno, ad hoc enim praecedere debebat gratia sanctificans: ergo tale meritum, & non maius ponebat Pelagius: quod etiam constat, quia non obstante ista fide, & oratione, quae praecedit, dicebat ex misericordia

dia Dei dari veniam peccatorum, & Deum pro ipsa esse orandum: non ergo ponebat fidem tanquam meritum ex iustitia, licet illam poneret non esse à gratia. Maior constat ex ipsis verbis Augusti, in dicta epist. 106. Si quis autem dixerit quod gratiam bene operandi fides meretur, negare non possumus, imò verò gratissime suscipimus: hanc enim fidem volumus habeant, qua impetrent charitatem (quæ sola verò bene operatur) isti fratres nostri, qui multum de suis operibus gloriantur. Et infra Nec dicat sibi, si ex fide, quomodo gratis iustificati? Quod enim fides meretur, quomodo non potius redditur, quam donatur. Non dicat ista homo fidelis quia cum dicitur, ut merear iustificationem, habeo fidem, respondetur ei quid habes quod non accepisti? Ecce quomodo Aug. non negat fidem mereri, seu impetrare iustificationem, eo scilicet merito quod in nondum iustificato esse potest, scilicet quod innititur misericordiae Dei, & orat sibi dari, non utique ex iustitia, sed ex gratia; quod totum dicebat etiam Pelagius, cum ita poneret ex fide, seu poenitentia dari nobis remissionem; quod tamen ex misericordia Dei dabatur, & pro ea Dominum orandum esse dicebat. Totus ergo error Pelagij in hoc puncto, ad id reducebatur, quod illam dispositionem, seu poenitentiam, aut fidem dicebat esse ex libero arbitrio, non ex gratia, ac per hoc gratia iustificationis non dabatur sine ullis meritis, & simpliciter gratis, quia aliquam dispositionem supposebat ortam non ex gratia, sed ex natura.

17 Ex quo patet non bene impugnare Vasq. eos qui dicebant Pelagium non errasse in eo quod ponebat gratiam remissionis esse nouam, & distinctam gratiam à fide, & poenitentia, eamque ex meritis istorum dari tanquam ex meritis alicuius congruitatis, seu dispositionis, quæ innituntur misericordiae Dei, sed in eo errasse, quod istam dispositionem, & fidem, & poenitentiam dicebat esse ex libero arbitrio, non ex gratia Dei. Quod enim nouam, & distinctam gratiam poneret esse ipsam remissionem à fide, & poenitentia, patet, quia illam dicebat ab istis impetrari, & mereri: ergo distinctam censebat; similiter illam dicebat ex misericordia Dei provenire, & pro ea Dominum esse exorandum: istas verò dicebat esse ex libero arbitrio, non ex gratia Dei: ergo illam solum censebat gratiam, & distinctam ab istis. In eo autem quod ponebat istam gratiam impetrari ex meritis fidei, non obstante quod ex misericordia Dei dabatur; etiam Catholici conveniebant; differentia verò erat, quod isti ponebant fidem ex gratia, & similiter poenitentiam; ille verò ex natura. Solum ergo in isto condemnabatur Pelagius, non in eo quod gratiam remissionis poneret esse gratiam distinctam, & impetrari à fide.

18 Vnde soluitur fundamentum Vasq. dicimus enim, quod Pelagius concedebat donum remissionis esse nouam gratiam distinctam à fide, & poenitentia, imò illam solum dicebat esse gratiam, non istas, quia istas ponebat esse ex libero arbitrio, illam supra vires naturæ, & voluntatis, & à misericordia Dei petendam: Nec dicebat eam dari ex meritis fidei, aut poenitentiae, tanquam ex meritis de condigno, & ex iustitia, sed ex meritis secundum quid innixis misericordiae Dei. Quod etiam non negabant Catholici, sed tamen dicebant hæc merita, & has dispositiones esse ex gratia auxiliante, Pelagius ex libero arbitrio, & in hoc errabat. Vnde in hoc sensu illi obiicitur à Concilio Palæstino, quod ipse diceret veniam non dari secundum gratiam, & misericordiam Dei, sed secundum merita, & laborem eorum, qui per poenitentiam digni fuerint misericordia, quia videlicet, licet ipse diceret dari gratiam istam per misericordiam Dei, tamen dicebat præcedere ad hanc misericordiam, & gratiam impetrandam merita, seu dispositiones, quæ

Ioan. à S. Thomain 1. part. D. Th. Tom. 2.

erant non ex gratia, sed ex libero arbitrio, & sic non ponebat gratiam remissionis esse simpliciter gratiam. Vnde Concilium proposuit ipsi abiurandum hunc articulum, & iussus est ut fateatur secundum gratiam Dei veniam dari, quia etiam ipsam poenitentiam donum Dei dixit Apostolus, quem articulum etiam refert Aug. dicta epistola 106. quia scilicet sensit Concilium totum eorum Pelagij ad hoc deuolui, quod existimabat dispositiones, seu merita illa fidei, quibus impetramus gratiam remissionis non esse à gratia, sed à viribus liberi arbitrij, & hoc oportebat abiurare.

Fundamenta P. Suarez soluta sunt: constat enim Pelagium, licet poneret paruulos nasci sine peccato originali, & sic quoad hoc esse sicut Adam in statu innocentiae; tamen propter adipiscendum regnum Cælorum, & in adultis propter remittenda peccata commissa, donum supernaturale gratiæ admisisse.

Tertia moderatio Pelagij, quod gratia ad singulos actus datur.

Catholici tot ambagibus & subdolis Pelagij equiuocationibus pulsati, ut ipse tandem directe, & de plano fateretur gratiam illam, quam Catholica Ecclesia ad bene operandum necessariam docet, & à Deo supplicat, ad tollendam omnem ambiguitatem, qua ipse se occultabat, dixerunt ut fateretur gratiam Dei ad singulos actus dari. Per hoc enim dabatur intelligi, quod gratia de qua erat controuersia cum Pelagio, non erat natura, non liberum arbitrium, non lex; postremo nec ipsa gratia habitualis, & sanctificans, quia hæc omnia non erat necesse à Deo dari pro quolibet actu sigillatim; semel enim data pro pluribus actibus seruiunt, eodem enim libero arbitrio, eadem lege, eodem habitu gratiæ plures actus eliciuntur, & non pro quolibet actu de nouo dantur. Volebant ergo Catholici ut fateretur aliam gratiam præter omnia ista, quæ est gratia auxilians, & ita seruit pro vno actu, quod non pro alio, sed cum quolibet transit, & sic dicitur ad singulos actus dari, quia est aliquid per modum transeuntis, non per modum habitus, nec ad habitum pertinet gratia illa, de qua cum Pelagio certabatur, sed ad actionem, quæ non est in homine nisi quando bene vult, & bene agit, ut docet Aug. lib. de gratia Christi, c. 47. quod est dari hoc auxilium per modum transeuntis. Nusquam autem voluerunt Catholici per hoc significare quod quilibet actus quantumcumque imperfectus, & minimus indigeat gratia per Christum, sed solum per hoc discerni voluerunt, & distingui gratiam, quæ in habitu, vel in potentia, aut in ipsa natura, vel lege consistit, ab ista gratia auxiliante, quæ ad quemlibet actum requiritur per modum transeuntis, non quæ semel data pro pluribus actibus sufficiat.

Pressus ergo autoritate Concilij Palæstini Pelagius, in quo coactus est hanc gratiam fateri, consensit quidem, & confessus est gratiam Dei ad singulos actus dari, ut Aug. dicit in epist. 107 ad Vitalem. Quomodo, inquit, dicitur gratiam Dei esse in natura liberi arbitrij, vel in lege, aut in doctrina, cum istam sententiam Pelagius ipse damnaverit, proculdubio confitens gratiam Dei ad singulos actus dari. Ecce quomodo Pelagius dampnando illam priorem propositionem, qua aperte negabat dari gratiam ad singulos actus, nec indigere nos Dei adiutorio pro tam minutis, & diuersis actionibus quas facimus, ut ex Diu. Hieron. supra retulimus, amplius moderatus est suam primam sententiam. Et hoc pacto fefellit Patres illius Synodi, & tanquam Catholicus absolutus est. Veruntamen ita subdole confessionem istam gratiæ ad singulos actus contexuit, & explicauit, quod in suo sensu

sensu denegandi veram gratiam semper permaneret. Quid enim nomine gratiae intelligeret, cum fatebatur ad singulos actus dari, singulari dexteritate Aug. detexit, cum eius æquiuationes, & lubricas ambages intimè perspectas heberet. Sic enim in lib. de gratia Christi contra Pelagium & Celestium cap. 2. dicit. *Scriptisti mihi, dixisse Pelagium audientibus vobis; anathema, qui vel sentit, vel dicit, gratiam Dei, qua venit in hunc mundum peccatores saluos facere, non solum per singulas horas, vel singula momenta, sed etiam per singulos actus nostros non esse necessariam, & qui hanc conantur auferre poenas sortiuntur aeternas.* Sic dicebat Pelagius. Subdit autem August. *Quisquis hæc audit, & sensum eius ignorat, quem in libris suis euidenter expressit, omnino eum putat sentire quod veritas habet. Quisquis autem quid in eis apertius dicat, aduertit, debet habere etiam ista verba suspecta; quia etsi gratiam Dei qua Christus venit in mundum peccatores saluos facere in sola remissione peccatorum constituat, potest huic sensui verba ista coaptare, dicens, ideo eam per singulas horas, & per singula momenta, & per actus singulos necessariam, ut semper in memoria retinentes, & reminiscences dimissa nobis esse peccata, non peccemus ulterius, adiuti non aliqua subministratione virtutis, sed viribus propriis voluntatis, quid sibi remissione peccatorum præstitum fuerit per actus singulos recordantis, &c.* Inuenit ergo Pelagius qualiter fateretur gratiam Dei ad singulos actus dari, non tamen intelligendo nomine gratiae aliquid quod pertineat ad subministrationem virtutis, & spiritus tangendo voluntatem, sed ex parte cognitionis, & intellectus tantum se tenens, scil. ex parte recordationis habendæ de peccatis remissis, & de exemplo Christi ad imitandum, quod totum ad doctrinam, & cognitionem pertinet, atque in ea sistit, non in additione, & subministratione virtutis. Quomodo autem in lib. de gestis Pelagij c. 11. dicatur eum posuisse gratiam, quæ per subministrationem spiritus ministratur, infra dicemus in hoc art.

- 2.1 Quando ergo aliqui Authores sic in confuso dicunt Pelagium negasse necessitatem gratiae ad singulos actus, oportet bene hoc discernere, & distinguere. Nam etsi prius id negavit Pelagius, tamen postea concessus est etiam ad singulos actus gratiam esse necessariam. Sed quia ambiguit, & subdole utebatur nomine gratiae, ulterius ab Aug. coactus est explicare quid intelligeret per hanc gratiam, quam ad singulos actus docebat esse necessariam: nam etiam illam reducebat ad genus doctrinae, vel scientiae, aut cognitionis, scil. ad recordationem beneficiorum Dei, quæ vti que poterat singulis actibus bonis adesse, sed non fatebatur gratiam, quæ voluntati subministraret spiritum, & virtutem: hoc enim putabat destruere libertatem, & sic excitantem gratiam fatebatur, negabat verò mouentem, & inspirantem voluntati bonum effectum: Totum verò genus doctrinae, & cognitionis ad legem, & scientiam reducebat Aug. & sic Pelagius adhuc à suo sensu non recedebat, ponens gratiam in lege, & doctrina. Sed quia lex, & doctrina videtur solum ad externam gratiam pertinere, quia per externos sensus, & actiones docentium nobis ministratur, ulterius oportebat fateri Pelagium gratiam internam qua Deus intus occultè mouet corda nostra, & in hoc eius explicatio amplius postulabatur.

Quarta & vltima moderatio Pelagij in confitendo gratiam internam.

- 2.2 Tandem vltimam moderationem adhibuit Pelagius impietati suæ, & confessus est dari gratiam internam, eadem tamen nequitia, & vafrie, ut scil.

confiteretur gratiam interiùs excitantem, & illustrantem intellectum, & non solum extrinsecus ministratam per prædicationem, non tamen immutantem, seu mouentem voluntatem, ita quod ex nolentibus Deus faceret volentes, & ipsum affectum inspiraret, sed solum intellectum instrueret: omnem enim gratiam quæ voluntatem tangeret refugiebat Pelagius concedere; quæ verò intellectum illuminaret, non multum curabat, quia hoc totum ad doctrinam, & scientiam reducitur. Sed quia illustratio, & excitatio intellectus etiam interna est, cum fit à Deo per illuminationem, & non solum externa, sicut cum fit per prædicationem, & auditum, ideo Pelagius inuenit quomodo ex vna parte fateretur dari gratiam internam, & tamen ex alia parte negaret gratiam, quæ tangeret cor, & voluntatis affectum per subministrationem virtutis infunderet: in illa enim gratia solum excitatiua intellectus quantumcumque interna non recedebat à sua sententia, quod gratia solum erat lex, & doctrina superaddita naturæ.

Et quia in hoc puncto non conueniunt nobis cum 23 P. Suarez, & Vasquez, putantes nullo modo Pelagium adinuisse gratiam internam per excitationem interiorem factam per sanctam cogitationem, quam magnopere Vasquez extollit, sed solum agnouisse excitationem externam, qualis fit per prædicationem, & auditum fidei, aut etiam illuminationem internam, non per modum excitantis voluntatem, sed solum reuelantis obiectum, oportet hoc punctum diligenter explicare, quia ex eius claritate pendent multa, quæ ad intelligentiam faciunt eorum, quæ disputantur circa efficaciam diuinæ voluntatis, & prædestinationis. Et ita in disputationibus de hac materia in Congregatione 43. habita coram Paulo V. valde laboratum est circa hoc punctum, & ostensum Pelagium adinuisse internas illustrationes, & illuminationes, quæ ex parte intellectus se tenent, & suadendo operantur tantum, aut alliciendo.

Igitur P. Vasq. gratiam operantem, & congruam, 24 quam Aug. contra Pelagium toties statuere vult, posuit in sancta cogitatione consistere, & motu subito, seu indeliberato voluntatis, qui ex cogitatione ipsa oritur, & multus est in impugnanda sententia Gregorij Ariminensis, qui censuit præter cogitationem necessariò ponendam esse in sententia Aug. quandam applicationem ipsius voluntatis internam, qua afficiatur, & moueatur. Vnde consequenter debuit negare Vasq. quod Pelagius confessus fuerit gratiam, seu auxilium quod in interna cogitatione consistat, qua excitetur voluntas, ipse enim eam gratiam vult, asserere, quam Pelagius negabat, & Aug. urgebat ut confiteretur. Porro sic Vasq. sentire manifestum est ex his, quæ tradit 1. romo 4. p. disp. 88. c. 6. nam num. 20. docet in sententia Aug. gratiam operantem esse piam cogitationem, quæ est ante consensum, atque eodem modo motum voluntatis subitum sine nostra libertate ex pia illa cogitatione ortum, quo deterremur à malo, & ad bonum prouocamur. Et. n. 22. recitat verba Bernardi ex libro de gratia & libero arbitrio, dicentis quod ipsa gratia liberum arbitrium excitat, cum seminat cogitatum, sanat, cum immutat affectum, roborat, ut perducatur ad actum; subdit Vasq. *Quid quæso clarius dici potest? nam si post primum, quod est sola cogitatio quam Deus seminat, nihil aliud superest, quam affectus & consensus liberi arbitrij, & in primo præuenit, illa profectò erit præueniens gratia, quam Deus in nobis sine nobis operatur.* Vbi præuenientem gratiam in sola cogitatione constituit, quia Bernardus dicit in primo præuenire gratiam, in cæteris comitari. Et tamen Bern. non dicit solam cogitationem præuenire, sed gratiam, cum seminat cogitatum. An verò gratia

gratia plus importet, quam cogitationem quam seminat, dum etiam in voluntatem se insinuat, Bernard. *ibi* non dicit. Addit autem Vasquez ad explicandum hoc, quod sumus sicut instrumenta mota à Deo per affectum, sicut Rex operari dicitur per ministrum, quem de rebus agendis instituit. Quod totum pertinet ad instructionem cogitationis, seu cognitionis, quod non egreditur limites doctrinae, vel scientiae. Item *cap. 7. n. 27. in fine*, dicit: *Aliam applicationem voluntatis nostra ad consentiendam, qua soli Deo tribuitur, & ratione cuius dicatur opus salutis nostra esse solius Dei misericordiae, non cognovit August. prater vocationem, qua est sola cognitio.* Vbi iterum notandum est, in sola cognitione posuisse vocationem Dei. Vasquez, & idem ferè habet *ibidem num. 28. & cap. 9. paulo ante numerum 40.* Observandum est, inquit, eandem vocationem, & cogitationem sanctam, & primum motum voluntatis subitum dici gratiam operantem, cooperantem, & comitantem, eandem inquam diuersimodè consideratam. Nam quatenus consensum nostrum antecedit, est operans, & praeueniens, quatenus verò permanens nobis efficit nobiscum consensum, est cooperans, & comitans, nam ita consensus est à Deo, & à nobis, ut Deus non solum immediatè physicè ad illum concurrat, sed etiam media cogitatione illum in nobis efficere dicatur eo modo quo intellectus voluntatem mouet, & allicit. Vbi apertè constat Vasquez prater simultaneum concursum Dei in actum, nihil aliud ponere quo Deus moueat voluntatem, & excitat, quam cogitationem, & id quod ex parte intellectus se tenet, quod totum doctrina & illuminatio interior est, non subministratio Spiritus & virtutis in ipsam voluntatem. Quod etiam significat *hac 1. p. dist. 98. c. 7. §. Quam igitur.* Docet tamen ipse Vasq. *dist. 89. c. 4. n. 22.* Pelagium agnouisse gratiam Christi interiorem dari, sed eam tantum esse utilem ad faciùs, & melius operandum, non simpliciter necessariam.

25 Similiter P. Suarez 1. *tomo de gratia, prolegomeno §. c. 3. n. 13. & seq.* In primis censet, quòd si Pelagius veram internam gratiam praeuenientem confessus est, in eo non fuit haereticus, sed vel quia eam posuit non simpliciter necessariam, sed ad melius, vel quia cooperantem gratiam non admisit.

Secundò, sentit non agnouisse ipsum veram, & internam gratiam, quae legem, & doctrinam excederet, totum enim quod dicebat de adiutorio Dei ad singulos actus nobis dato, ad memoriam exempli Christi, & remissionis peccatorum nobis collatae per ipsum reducebat; quod autem de adiutorio non in sola lege, sed in aliquo alio posito docebat; totum reducebat ad doctrinam, nusquam ad inspirationem, & subministrationem Spiritus, ut constat ex *Aug. lib. de gratia Christi in multis capitulis in 7. in 10. 13. 31. & 41.* Similiter Augustin. dixit Massilienses admisisse excitantem gratiam, quam negabat Pelagius, *lib. de praedest. Sanctorum cap. 1.* ergo sentit Pelagium eam non admisisse. Quod etiam colligitur ex ipso Augustin. *lib. 3. contra duas epistolas Pelagianorum, cap. 19.* vbi ex sententia Pelagianorum refert, ipsum non dixisse hominem Dei gratia in bonum opus excitari, sicut dicebat in malum Diaboli suggestibus incitari.

26 Quia verò non poterit Suar. negare manifestissima testimonia, quibus constat ex Augustin. Pelagium admisisse illuminationes, & reuelationes Dei internas, addit *in fine num. 15.* quòd hoc non obstante veram excitantem gratiam, quam peculiari modo inspirationem, & illuminationem appellamus, nunquam agnouit. Quod sic explicat *num. 16.* quia nomine reuelationis solum intelligitur propositio obiecti, vel externè per sensus, vel internè per illustrationem facta; sed prater hoc quod pertinet ad legem, Ioan. à S. Thom. in 1. part. D. Th. Tom. 2.

vel doctrinam, requiritur donum voluntatis bonae, per quam & coelestis doctrina discitur, seu recipitur & lex impletur. Et primum donum non negauit Pelagius, siue interno, siue externo modo fiat; secundum verò negauit; & sic non negat Suarez admisisse Pelagium reuelationem diuinam fidei tam externam, quam internam, quatenus se tenet ex parte obiecti, & pertinet ad illius applicationem, seu propositionem. Negat autem admisisse illam gratiam, quae prater propositionem, seu apertionem obiecti requiritur ad concipiendam conuenienti modo doctrinam reuelatam, & cum inclinatione, & affectione voluntatis suscipiendam; solum enim sistingebat Pelagius in nuda legis, & doctrinae manifestatione, ut ex verbis Augustin. *epistol. 107.* deducitur, *Operatur quippe ille, dicens, quantum in ipso est, ut velimus, cum nobis nota sunt eius eloquia, sed si eis acquiescere nolumus, nos ut operatio eius nihil in nobis proficit efficitur.* Negauit ergo prater notitiam eloquiorum Dei aliam gratiam internae inspirationis, & vocationis, neque ut necessariam simpliciter, neque ad faciùs.

Nihilominus tamen oportet in hoc puncto diligentissimè inuigilare, quia hoc nomen internae gratiae æquiuocationem non modicam parere potest: Cum enim sint duae potentiae internae, scil. intellectus, & voluntas, & intellectui ministrent sensus externi per species, quas ab illis haurit, voluntati autem non ministrent immediatè sensus, sed ipse intellectus qui eam mouet, idèò voluntas magis interna potentia est, & quasi post intellectum recondita, & in vtraque ista potentia potest assignari gratia interna, ita quòd dicatur gratia interna, quia non ministratur solum per sensus externos, sed per interiorum illustrationem, qua Deus intellectum illuminat. Potest etiam dici gratia interna, quia tangit ipsam voluntatem, & non solum illustrat intellectum; sed tamen iste tactus voluntatis potest fieri dupliciter, vno modo, medio obiecto proposito tantum à quo allicitur voluntas, & trahitur, & haec est motio moralis, seu metaphorica consistens in motione intentionali, quae scil. fit ab intentione intellectus, & cognitione obiecti: alio modo per actum ipsius Dei agentis immediatè in voluntatem, praesupposita tamen obiecti cognitione, & motione morali, quia nimirum diffunditur suauitas, & subministratur Spiritus à Deo in voluntatem ut obiectum propositum acceptet, quod S. Gregor. appellat modificationem inuisibilem obiecti, quae mirabiliter plantauit in cordibus hominum, sic enim dicit *27. mor. c. 15.* ad illa verba Iob. 37. *Et non inuestigabitur cum audita fuerit vox eius, una res foris agitur, sed non per hanc intuentium corda penetrantur, quia qui inuisibiliter visibilia modificat, in humanis cordibus causarum semina inuisibiliter plantat.* Et ponit exemplum in duobus latronibus qui Christum morientem viderunt. & in vnare, inquit, *vna vtriusque cogitatio non fuit, quia hanc supernus artifex inuisibiliter modificando distinxit.* Quam modificationem quomodo Deus causet, statim infra explicat. *Quia latribus modis premit in timore, & format in amore, & fit cuiusdam impulsione nimietas in mente, cum nihil sonet in voce.* Pertinet ergo ad internam gratiam non solum doctrina quae exterius per sensus ministratur, & intellectus peruenit, sed etià interior illustratio, quae immediatè à Deo fit intra intellectum. Sed vltèriùs illa gratia ut interna sit, non tantum ex parte intellectus, sed etiam ex parte voluntatis, debet non solum sistere in intellectu, sed etiam tangere, & excitare voluntatè, non sola motione allicientiae, sed etià subministratione virtutis, & modificatione cogitationis: hac enim ratione ut docet S. Th. 1. p. q. 105. art. 4. & 5. & 1. 2. quest. 9. art. 6. & 3. contra gent. cap. 88. & G 2 89,

89. & 91. voluntas, & mouetur ab obiecto, vt ab alliciente, & ab eo qui dedit virtutem vt inclinante, & hoc secundo modo solus Deus mouet intra voluntatem; obiectiue autem quodcumque bonum, vt propositum per intellectum. Hic autem secundus modus si distinguitur à primo, distinguitur à motione morali, quia hæc fit per allicientiam obiecti tantum. Videamus ergo quam internam gratiam ex his admisit Pelagius, quam negauerit.

28 Dico ergo: tria sensisse Pelagium in hoc puncto.

Primum est, admisisse reuelationes, & illustrationes internas per modum reuelationis, & propositionis obiecti, in quod non solum doctrinam exterius per sensum manifestam, sed etiam interius à Deo reuelatam confessus est.

Secundum est, admisisse cogitationem sanctam, & motum eius in voluntatem, ita quod omnem motionem, & tactum voluntatis moralem ex obiecto in voluntatem deriuatum, ipsamque excitantem admisit. Et hæc est interna gratia quam confessus est, scil. ex parte excitationis, & intellectus motione morali.

Tertium est, nunquam admisisse tactum Dei immediatum, eique subministrantem virtutem, & spiritum, licet in Concilio Palæstino confessus fuerit gratiam ad singulos actus dari, & non esse solum in libero arbitrio, & lege, atque doctrina.

29 Primum hoc dictum Pelagij negari nullo modo potest, nec P. Suar. negauit loco cit. sed admisit. Et constat, quia in lib. de gratia Christi c. 7. refert August. verba Pelagij dicentis: *Adiuua nos Deus per reuelationem, & doctrinam, dum cordis nostri oculos aperit, dum futura demonstrat, dum Diaboli pandit insidias, dum nos multiformi, & ineffabili dono gratia cœlestis illuminat.* Hæc autem dicebat Pelagius distinguens hoc adiutorium à lege, & doctrina: *Quam, inquit, gratiam non vt tu putas in lege tantummodo, sed in Dei esse adiutorio confitemur.* Et explicans quam gratiam intelligeret, dixit verba supra relata, in quibus, vt vidimus, ponit aliqua quæ pertinent ad internam illustrationem, vt apertio oculorum, vtique spirituum, non exteriorum, non autem aperiuntur oculi interni sine lumine aliquo interno; & similiter ineffabile donum gratia cœlestis illuminantis, vtique aliquid interius est, nec enim hoc donum dici potest esse prædicatio solum externa, quia hæc ad doctrinam & legem reducitur: distinguebat autem Pelagius hoc donum, seu adiutorium à lege, atque doctrina. Idem amplius explicant alia verba Pelagij in eodem lib. c. 10. ab August. relata; explicans enim quomodo verificetur quod ait Apostolus, *Operatur in nobis velle, & perficere*, dicebat hoc operari Deum, *dum nos terrenis cupiditatibus deditos mutorum more animalium tantummodo presentia diligentes, futura gloria magnitudine, & præmiorum pollicitatione succendit, dum reuelatione sapientia in desiderium Dei stupentem suscitatur voluntatem, dum nobis, quod tu alibi negare non metuis, suadet omne quod bonum est.* Vbi Pelagius per reuelationem sapientia non potuit doctrinam externam intelligere, sed aliquam interiorem illuminationem, quia per externam sapientiam acquiritur, non reuelatur, nec est sapientia reuelationis, sed discursus, quæ pertinet ad Theologiam, seu scientiam acquisitam. Similiter cum dicit dari gratiam, quæ suadetur omne quod bonum est, necessariò in hac generalitate debet includi etiam interior illustratio, & cogitatio sancta quia multa sunt, quæ non suadentur nobis per externum auditum, & sensum, sed per internam cogitationem, & illustrationem, sicut cum incidit nobis aliquod bonum consilium, de quo nihil dictum nobis fuerat, & in multis casibus quotidie experimur.

30 Confir. quia sic mentem, & verba Pelagij intelle-

xit Augustin. Nam in cap. 19. eiusdem libri, explicans quomodo gratia debeat dici doctrina. *Hæc gratia, inquit, si doctrina dicenda est, certè sic dicatur, vt alius & interius eam Deus cum ineffabili suauitate credatur infundere, non solum per eos qui plantant, & rigant extrinsecus, sed etiam per seipsum, qui incrementum suum ministrat occultus, ita vt non ostendat tantummodo veritatem, sed etiam impertiat charitatem.* Et cap. 24. *Legant, & intelligant, intueantur, & faciantur, non lege, atque doctrina insonante forinsecus, sed interna, atque occulta, mirabili, & ineffabili potestate operari Deum in cordibus hominum, non solum veras reuelationes, sed etiam bonas voluntates.* Intelligit ergo Augustin. quod non sufficiebat Pelagio ponere solum reuelationes veras, & ostendere veritatem, etiam si per internam, & occultam potestatem id faceret, quod pertinet ad illuminationes interiores, sed quod has solum admittere, non erat recedere à sua doctrina, nec veram internam gratiam confiteri, qualis in Ecclesia Catholica ponitur. Et tandem cap. 4. addit Aug. quod Pelagius *auxilium constituit in lege, atque doctrina, quam nobis fatetur etiam S. Spiritu reuelari, propter quod & adorandum esse concedit.* Sed Spiritus sanctus non adoratur vt Deus quia solum reuelat nobis per exterius hominum ministerium, sed quia interius in mentem illabatur, eamque illustrat: ergo internas reuelationes Pelagius concessit.

Secundum quod diximus admisisse Pelagium, 31 scil. hanc gratiam internam, vt excitatiuam, & pulsatiuam voluntatis, ita quod non solum reuelationem in intellectu, sed motum subitum in voluntate per excitationem ab intellectu factam admitteret, constat in primis ex loco nuper cit. ex lib. de gratia Christi, cap. 10. vbi introducit Pelagius dicens quod Deus operatur in nobis velle quod bonum est, dum reuelatione sapientia in desiderium Dei stupentem suscitatur voluntatem, dum præmiorum pollicitatione nos succendit, dum suadet nobis omne quod bonum est. Sed suscitatio voluntatis, & succensio facta per reuelationem sapientia, est motus voluntatis bonus, & fit per cogitationem sanctam, scil. quæ datur per reuelationem sapientia, & pollicitationem præmiorum, & suadet, & excitat ad bonum: ergo agnouit Pelagius non solum reuelationem quoad propositionem obiecti, sed etiam vt conuenienti modo datur ad excitandum ad bonum, dummodo hæc excitatio solum fiat media motione ex parte obiecti, & cognitionis, quæ est motio moralis, & non per subministrationem virtutis in voluntatem. Nec solum posuit Pelagius istam illustrationem ad propositionem obiecti credendi, sed etiam ad bene operandum, quia expresse dicit quod hoc modo operatur Deus velle quod bonum est, & velle quod sanctum est, & quod suadet omne quod bonum est: ergo malè restringitur hoc ad solam propositionem obiecti fidei, & ad credendum, cum omne bonum comprehendat & ipsum velle, atque operari quod sanctum est. Suasio autem per sanctam cogitationem fit alliciendo, & proponendo obiecti conuenientiam: ergo si Vsq. non agnoscit aliam applicationem voluntatis, quàm quæ fit per intellectum, & cogitationem, non agnoscit aliam, quàm quæ fit per suasionem in quocumque bono, mediante qua operatur Deus velle, & suadet omne quod bonum est. Hoc autem non negabat Pelagius, sed non sufficere ad gratiam docet August. ibidem, quia totum hoc non excedit doctrinam, quia nec excedit motionem cognitionis, & cogitationis allicientis, & suadentis.

Præterea in eod. lib. c. 26. impugnās doctrinā Pelagij: 32 *Cogitatione, inquit, & dilectionem sicut sunt discernenda discernat, quia scientia inflat, charitas autem adificat, &*
cū m

cum sit utrumque donum Dei, alterum minus, alterum maius non sic iustitiam nostram super laudem iustificatoris nostri extollat, ut horum duorum quod minus est, diuino tribuat adiutorio, quod autem maius, humano usurpet arbitrio. Ecce quomodo agnoscebat Pelagius cogitationem sanctam, quæ sit donum Dei, quia utrumque horum, scilicet cogitationem, & charitatem, Aug. dicit esse donum Dei, & dicendo, utrumque, supponit non esse unum tantum donum, sed duo: donum autem quod August. vocat charitatem, certum est non esse immediate in intellectu, nec in cogitatione, sed in voluntate, ad quam pertinet charitas, non solum charitas habitualis, sed etiam charitas auxilians, quæ illi potentie imprimitur, in qua est habitus charitatis, non loquitur autem Aug. de charitate pro habitu, sed pro auxilio, quia loquitur de illa gratia, quæ ad singulos actus datur, hæc autem non est habitus, hic enim non pro singulis actibus datur, sed pro multis deferuit: ergo sentit Aug. non sufficere id quod ponitur in sola cogitatione, sed requiri aliud donum, quod vocat charitatem, & hæc non pertinet ad cogitationem, licet illam præsupponat, sed ad voluntatem; quia non unum, sed duo dona requirit August. cum dicat *utrumque esse donum Dei*. Ergo primum tantum donum ponere, scilicet cogitationem, & mediante illa excitationem, sine alio dono distincto non negauit Pelagius, sed non sufficere docuit Aug. Et præsertim quia Vasq. dicit eandem esse gratiam operantem, & cooperantem, & comitantem, quatenus in nobis manens efficit nobiscum consensum, quod est non ponere utrumque donum, sed unum tantum, scilicet cogitationem suadentem ad bonum, quam Pelagius utique non negabat, etiam ut suscitativa est stupentis voluntatis, ut in verbis *suprà* relatis ab August. *lib. de gratia Christi c. 10.* vidimus. Ad quod etiam pertinet, quod *eodem libro c. 7.* refert Aug. ex Pelagio, qui dicebat adiuuari nos à Deo per gratiam, & non solum per legem, dum per reuelationem, & doctrinam suam cordis nostri oculos aperit, dum nobis ne præsentibus occupemur, futura demonstrat, dum Diaboli pandit insidias, dum nos multiformi, & ineffabili dono gratiæ cœlestis illuminat. Hæc autem apertio oculorum, & demonstratio futurorum, quæ non nisi per aliquam interiorem cogitationem, & reuelationem fit in nobis, non adiuuat voluntatem, nisi ipsam suscitando, & tangendo; si enim non tangit, quomodo adiuuat? Non ergo negabat Pelagius suscitationem, & tactum voluntatis, si solum mediante cogitatione, & obiecti propositione fiat, quæ est moralis efficientia. Vnde in Congregatione 37. habita in materia ista coram summo Pontifice Clemente VIII. cum ipse Pontifex instaret P. Vastidæ, & sociis, ut explicarent, quid est quod facit hominem facere, & hoc sapius sua Sanctitas vrgeret, & repeteret, responsum est illi, quod gratia facit facere moraliter. Tunc rursus Pontifex summus: *Hanc gratiam excitantem etiam posuit Cassianus.* Quæ verba etsi nullam contineant censuram, nec definitionem in hac materia, sed solum particulare Pontificis dictum; quantum tamen ponderis significant, præsertim sic publicè prolata coram confesso, & in tam graui negotio, nemo est, qui non videat.

33 Tertium denique Pelagij dictum, scilicet nunquā admisisse gratiam, quæ per subministrationem spiritus, & virtutis nobis datur (intelligendo per subministrationem spiritus, quod frequens est apud Aug. scilicet illa inspiratio quæ immediate tangit voluntatem, ad eam enim pertinet affectio, quæ spiritus, seu spiratio amoris propriè dicitur, non autem illuminatio obiecti, & propositio dicitur spiritus, licet etiam requiratur ad spirandū affectum, quatenus obiectū propositū mouet voluntatem) constat tū ex Aug. ipso *lib. de gratia Christi c. 2.* ubi id apertè dicit, referens enim id quod

Ioan. à S. Thoma in 1. part. D. Th. Tom. 2.

dixerat Pelagius; anathema qui sentit, vel dicit gratiā Dei non solum per singulas horas, vel singula momenta, sed etiā ad singulos actus nō esse necessariam, hæc verba suspecta esse dicit Aug. quia ideo cā per singulos actus necessariam dicit, ut semper in memoria retineamus dimissa nobis esse peccata, adiuti non aliqua subministratione spiritus, sed viribus propria voluntatis. Et in *epist. 95.* de eodem Pelagio loquens Aug. etiam post ipsius gesta in Cōcilio Palæstino & subdolā confessionē quam ibi fecit: *Sine, inquit, gratiam dixerit liberum arbitriū, sine gratiam esse remissionē peccatorum, sine gratiā esse legis præceptum, nihil eorum dicit quod per subministrationem Spiritus sancti pertinet ad concupiscentias, tentationesque vincendas.* Nec obstat quod in libro nuper excusō inter opera Aug. de gestis contra Pelagium: cuius ipse mentionem facit in *lib. 2. Retract. c. 47.* dicat, *c. 11.* quod satis euidenter apparet eam Pelagium dicere gratiam, quæ in Christi Ecclesia prædicatur, quæ subministratione spiritus datur. Nō, inquam, obstat, quia hoc non dicit quasi Pelagius in veritate ita fatetur; si enim gratiam, quæ in Ecclesia prædicatur verè ipse admitteret, Catholicus verè haberetur, cum tamē postea ut hæretic. ab Aug. iudicatus sit; sed dicit euidenter id apparere, quantum est ex verbis confessionis Pelagij, quā tūc apparēter fecit, cuius tamē sensus, & æquiuocatio postea apparuit. Nā, ut Aug. ipse dicit, *cit. lib. de gratia Christi c. 3.* Pelagius cum Episcopis, gestis sine ulla recusatione dānauit eos, qui dicunt gratiā Dei, & adiutorium nō ad singulos actus dari, ubi putabamus eius de hac re omnes tergiversationes esse consumptas: tamen in libris quos edidit pro libero arbitrio, quorum mentionē facit in epistola quā Romā misit, nihil aliud sentire monstratur, quam id quod damnassee videtur. Quare liber ille de gestis contra Pelagiū in Concilio Palæstino, scriptus videtur ab August. ante istum de gratia Christi, ubi eius sensus, & tergiversationes magis explicatur, etiam post illa gesta Concilij Palæstini, præsertim cum post illa gesta Concilij, Pelagius librū illum miserit Romā, ex quo sensū eius expressit Aug. & sic magis standum est isti posteriori libro, quā apparenti illi confessioni in Cōcilio, vnde videbatur sequi, ipsum admittere gratiam subministrantē spiritū.

Ex his patet non attigisse Vasq. in hac parte sententiam, sensumque Pelagij, solum ponēdo gratiā in sancta cogitatione, cū motu subito voluntatis, putās id negasse Pelagium, cū hoc toties concesserit, ut ex manifestissimis locis allatis constare potest. Itaque non negauit cogitationem internam bonam, & quidquid mediāte cogitatione, & propositione obiecti suadere, accēdere, aut suscitare potest voluntatē in desiderium, sed quidquid præter donū cogitationis per subministrationem spiritus, per diffusionē charitatis, per immisionē studij virtutis in reluctantem voluntatē ministratur. Sed neque P. Suar. ab hac motione morali recessit; & licet fateatur Pelagium admisisse illuminationes internas quoad propositionem obiecti, non quoad donum voluntatis ad acceptandā, & suscipiendā, & conuenienti modo proponendā hanc doctrinā reuelatā, tamen restat distinctè explicare quid sit hoc donū bonæ voluntatis, & quid superaddat ad hanc illuminationē internā: Si enim hoc donū bonæ voluntatis non est aliud quam ipsa cogitatio mouēs moraliter iuxta congruitatē, & dispositionem voluntatis, non receditur à sententia Vasq. nec aliud ponitur pro gratia operāte, seu præueniēte, quam id quod ex parte cogitationis se tenet, & mediāte propositione obiecti suscitāt stupentē voluntatē, accendit cor, & suadet omne quod bonum est, in quo impottatur donū ipsius voluntatis mediāte cognitione, & doctrina sic ad bonū suadēte & excitante, quod totum non negabat Pelagius, ut videmus. Sic autem præter hæc omnia quæ pertinent ad motionem moralem datur aliquod

G 3 donum

donum subministratum voluntati, & immediatè tangens illam, hoc est quod intendimus, quia est aliud donum præter cogitationem, & præter motionem illam moralem tangens immediatè voluntatem, & hoc est donum voluntatis bonæ, non solum mediâtè cogitatione, & morali motione datum; sed etiam supposita illa motione excitatiua, à Deo immediatè subministratum, & hoc est quod negauit Pelagius, sed quantum ex aliis locis P. Suarez colligitur, ipse talè motionem non cognoscit, sed solum moralem: ad hanc enim reducit totam congruitatem, & efficaciam gratiæ, vt videri potest in opusculis eius, in breui resolutione de gratia efficaci, num. 48. & 51. & in lib. 3. de auxiliis cap. 5. & 10. 11. & 14. & in aliis locis. Quare oportet verba illa quæ habet in prolegomeno 5. cit. cap. 3. num. 16. & 17. bene aduertere, cum dicit quod præter illuminationem internam, quæ est donum perti-nens ad legem, & doctrinam, requiritur donum volutatis bonæ, per quam & cœlestis doctrina discitur, & recipitur, & lex impletur. Oportet enim explicare quodnam sit hoc secundum donum præter illud: si enim est donum, non in intellectu positum, & mediante intellectu tangens voluntatem, quod est donum sanctæ cogitationis, sed est donum immediatè impressum voluntati, habemus nos intentum, si est donum non impressum, & subministratum voluntati, sed ex intellectu feriens voluntatem, & excitans, totum hoc pertinet ad illuminationem, & doctrinam suscitatiuam stupentis voluntatis; & ad summum potest addere congruitatem moralem, quod scil. detur tali tempore, & occasione, qua Deus prouidet habituram effectum, quæ est congruitas non à gratia ipsa causata, sed præsupposita, deductaque ex præscientia media Dei, non ex causalitate ipsius gratiæ, quod est à sententia Vasq. non recedere, nec ampliùs dicere, quàm quod præced. tomo impugnatum est circa scientiam mediam, & infra circa efficaciam decretorum diuinorum impugnabitur.

Fuit autem in illa Congreg. 43. valde inefficaciter argutum contra istam nostram sententiam, videlicet quia Pelagius negabat semper veram gratiam, vt Augustinus, & Concilia communiter dicunt: sed istæ internæ reuelationes, & illuminationes suasoriæ vera gratia sunt, cum pertineant ad gratiam excitantem, qua Deus nos mouet: ergo illas non admisit Pelagius. Frigidum argumentum? Idem posset dici de externa prædicatione Euangelij, de lege, & doctrina; nam hæc omnia pertinent ad veram gratiam, cum per ista externa ministeria Deus nos excitet, & moueat, sed Pelagius non agnouit veram gratiam: ergo non agnouit illuminationem, & suasionem externam. Ipsi oppositi Authores id negant. Soluant ergo suam consequentiam. Nos dicimus Pelagium negasse veram gratiam adæquatè, & vt ponitur ab Ecclesia Catholica, non solum in reuelationibus & doctrinis, sed etiam in spiritu, & virtute intra voluntatem. Pelagius aliquid gratiæ paulatim admisit vt supra vidimus, sed non totam, & adæquatè, vt Catholici, & in hoc sensu non veram, id est plenam, & totalem agnouit.

35 Cæterum vt magis constet Augustinum non solum in sancta cogitatione, & excitatione eius in voluntatem, totam vim gratiæ posuisse, sed ita cogitationem, & excitationem, seu moralem motionem requirere, quod etiam vires, & spiritum, & virtutem subministratam voluntati reluctanti, vt eius duritia tollatur, requirat, quod est aliquid vltra moralem motionem, & ad gratiam adiuuantem pertinet, non solum simultaneè, sed præuenienter subministratam, scil. vt duritia cordis tollatur, vt dicit lib. de prædest. SS. c. 8. & reluctanti voluntati studium virtutis im-mittit, vt dicit lib. 2. contra duas epist. Pelag. cap. 5. & 6.

& lib. 4. cap. 6. Aduerte, Augustinum modò vnā, modò alteram gratiam explicare, non tamen quando vnā solam explicat, aliam negat. In tribus autem præcipuè locis videtur solam moralem motionem ex parte cogitationis requirere.

36 Primò quidem, in lib. de spiritu, & litera cap. 34. vbi tractans quomodo voluntas credendi sit à Deo, dicit, *Non idè tantum Deo tribuendam, quia ex libero arbitrio est quod à Deo creatum est, sed quia visorum suasionibus agit Deus, vt velimus, & vt credamus, siue extrinsecus per Euangelicas exhortationes, siue extrinsecus, vbi nemo habet in potestate sua quid ei veniat in mentem, sed dissentire, vel assentiri propria voluntatis est.* His ergo modis quando Deus agit cum anima vt credat (neque enim potest credere quodlibet arbitrio, si nulla sit suasio, vel vocatio cui credat) profectò & ipsum velle credere Deus operatur in homine, & in omnibus misericordia eius prauenit nos: consentire autem, vel dissentire, vt dixi, propria voluntatis est. Vbi non agnoscit Augustin. alium modum quo Deus operatur velle in nostra voluntate, quàm mediante suasionem, & cogitationem; de qua etiam dixerat ante cap. 33. quod voluntatem credendi accipit homo à Deo, quandoquidem vocante Deo surgit de libero arbitrio, quod naturaliter cum crearetur accepit.

37 Alter locus est lib. 1. ad Simplicianum, quæst. 2. vbi obiciens sibi Augustin. quod si vocatio Dei ita est effectrix bonæ voluntatis, vt omnis eam vocatus sequatur, quomodo verum erit. *Multi vocati, pauci verò electi?* Cui obiectioni August. sic respondet: *An fortè qui hoc modo vocati non consentiunt, possunt alio modo vocati accommodare fidei voluntatem, vt & illud verum sit, Multi vocati, pauci verò electi, vt quamuis multi vno modo vocati sint, tamen quia non omnes vno modo affecti sunt, illi soli sequantur vocationem, qui ei capiendæ reperiuntur idonei, & illud non minus verum sit: Igitur non volentis, neque currentis, sed miserentis est Dei, qui hoc modo vocauit, quomodo aptum erat eis, qui sequuntur vocationem.* Et infra illi enim electi, qui congruenter vocati, illi autem qui non congruebant, neque contemperabantur vocationi, non electi quia non secuti, quamuis vocati. Quo loco, & aliis similibus vt in lib. de bono perseuer. cap. 14. videtur reducere congruitatem gratiæ ad vocationem, quæ tenet se ex parte intellectus, cum dispositione in qua voluntas inuenitur vt sequatur vocationem, vel non sequatur, non autem ad aliquam applicationem, vel subministrationem spiritus, quæ immediatè immutet ipsum affectum.

38 Tertius locus est in lib. 2. de peccatorum meritis & remissione cap. 19. vbi inquit, *Ideo Deum aliquando non tribuere sanctis suis, vel certam scientiam vel victricem delectationem, vt cognoscant, non à seipsis, sed ab illo sibi esse lucem qua illuminentur tenebræ eorum, vi suauitatem, quæ fructum suum det terra eorum.* Ergo tota vis gratiæ solum reducitur ad illam scientiam, & delectationem victricem, quæ utique ex parte obiecti propositi delectationem facientis se tenet.

39 Nihilominus tamen in his locis August. ita requirit ad operandam vocationem, quæ ex parte intellectus se tenet, quod semper supponit voluntatem vt illi correspondeat, non esse solam, sed suffultam virtute, & spiritu sibi impresso, & subministrato à Deo. Hac enim generali regula vitur August. cum dicit in lib. de gratia Christi c. 14. *Quis, inquit, non videat, & venire quemquam, & non venire arbitrio voluntatis? Sed hoc arbitrium potest esse solum, si non venit, non autem potest esse nisi adiutum, si venit, & sic adiutum, vt non solum quid faciendum sit, sciat, sed quod scierit, etiam faciat.* Ac per hoc quando Deus docet non per legis literam, sed per Spiritus gratiam, ita docet, vt quod quisque didicerit non tantum cognoscendo videat, sed etiam

etiam volendo appetat, agendoque perficiat. Ecce quomodo quando aliquis audit vocationem Dei, & doctrinam quod utique in intellectu fit, per liberum arbitrium venit, sed non liberum arbitrium solum, sed suffultum auxilio; quod auxilium dicit Aug. non esse solum in eo quod sciat, seu cognoscat quid agendum sit, atque adeo non sufficit illa allicientia moralis motionis ex parte cognitionis se tenens, sed ille spiritus quo voluntas tangitur, ut velit, & faciat id quod cogitatione cognoscit. Requiritur ergo duplex donum, seu impressio Dei tangens utramque potentiam intellectus, & voluntatis; intellectum per illustrationem; voluntatem per spiritum, seu inspirationem, quasi duo brachia Dei animam amplectentia, de quibus dicitur in Canticis Canticorum. *Lana eius sub capite meo* (id est sub intellectu, qui est caput, illustrato per cognitionem) & *dextera illius amplexabitur me* (per spiritum scil. tangentem voluntatem, & inflammantem) ut fiat homo filius dexteræ. Et Concil. Trident. sess. 6. can. 4. dicit *liberum arbitrium esse motum, & excitatum*. Non dicit mentem, sed arbitrium, quod est voluntas, & hæc non solum excitata est, sed & mota; excitatio autem est per cogitationem, motus autem per subministrationem spiritus in voluntatem: nam si *ly motus* intelligeretur de sola motione morali, quæ fit per cogitationem in arbitrio, hæc in ipsa excitatione inuoluitur, & sic *ly excitatum, & motum* essent idem in libero arbitrio, de quo loquitur Concilium, licet in mente illa sit excitatio à motu voluntatis, sed liberum arbitrium excitatum est recipiens motum excitationis à cogitatione. Si ergo *ly motum* est idem quod motum moraliter, est idem quod excitatum à mente, & sic motum, & excitatum in libero arbitrio esset idem quod excitatum, & excitatum. Plura de hoc dicemus infra disp. 5. agentes de efficacia decreti diuini.

40 Sic ergo quando Aug. dicit in lib. illo de spiritu, & littera cit. quod *visorum suasionibus agit Deus, siue per reue ationes Euangelicas extrinsecas, siue per illustrationem intrinsecas*, optimè dictum est, quia explicat ibi gratiam Dei, ut vocantem, & illustrantem intellectum, & excitantem. Quando autem dicit quod *consentire vel dissentire, propria voluntatis est*, debet glossari, propriæ voluntatis est adiutæ subministratione spiritus, quæ est aliud donum à cogitatione suadente; & tunc tali voluntate propria sic adiuta, & spirata, venit, seu consentitur Deo vocanti; & visorum suasionibus agenti. Si enim sola suasionem visorum, & sola media cogitatione Deus ageret, & gratiæ vim in ea constitueret, Aug. sibi ipsi contradiceret, qui in lib. de gratia Christi c. 10. dicit, *Ad doctrinam pertinet cum suadetur omne quod bonum est: & si inter docere, & suadere, vel potius exhortari, distare aliquid videtur, etiam hoc tamen doctrinæ generalitate concluditur, quæ quibuscumque sermonibus vel literis continetur*. Ecce quomodo suasio, si sola sumatur, ut tenet se ex parte intellectus, etiam in eo in quo videtur distingui ab eo quod est docere, adhuc dicit Aug. sub doctrinæ generalitate concludi. Gratiæ autem quam Aug. ponit contra Pelagium, non est sola doctrina, nec doctrinæ generalitate concluditur, sed debet addere subministrationem spiritus in voluntate: ergo cum Aug. dicit visorum suasionibus Deum agere, & voluntatis proprium esse consentire, non est intelligendus de nuda, & sola suasionem, ex parte cogitationis, & illuminationis, nec de sola voluntate sed etiam de voluntate adiuta, & suffulta aliquo adiutorio illi immediatè imprimente, & subministrante spiritum. Quod utique in eodem libro de spiritu, & littera c. 3. expressit Aug. Nos dicimus, inquit, *humanam voluntatem sic diuinitus adiuari ad faciendam iustitiam, ut præter quod creatus est homo cum libe-*

ro arbitrio voluntatis, præterque doctrinam, qua ei præcipitur quemadmodum viuere debeat, accipiat Spiritum S. quo fiat in animo eius delectatio, dilectioque summi illius, & incommutabilis boni. Nam neque liberum arbitrium quidquam nisi ad peccandum valet, si lateat veritatis via. Et cum id quod agendum, & quod nitendum est, caperit non latere, nisi etiam delectet, & ametur, non agitur, non suscipitur, non bene viuitur. Ut autem diligatur, charitas Dei diffunditur in nobis, non per liberum arbitrium quod surgit in nobis, sed per Spiritum S. qui datus est nobis. Ecce manifestam Augustini mentem quod adiutorium voluntatis non solum debet per viam intellectus, & cogitationis diffundi, sed immediatè à Deo subministrari, & imprimi voluntati, quia non sufficit non latere nos quod agendum est, quod utique ad cogitationem, & intellectum pertinet, sed requiritur quod delectet, & ametur, quod manifestè ad voluntatem pertinet. Et ad hoc dicit nobis dari Spiritum S. & diffundi charitatem: ergo suasio, & vocatio, & auxilium Dei mouentis, non solum per manifestationem, seu non latentiam obiecti in cogitatione sancta, quod totum moralis motionis est, sed per immediatam diffusionem in voluntatem, quod charitatis est, agit in nos, & sic non solum visorum suasionibus, sed etiam subministratione Spiritus agitur voluntas.

Et hinc manet explicatus tertius locus, qui adducitur ex Augustino; requiritur enim ad bene agendum certa scientia (quod ad sanctam cogitationem pertinet) & victrix delectatio, quæ non est sola obiecti delectantis allicientia, & motio moralis, sed etiam diffusio, & impressio spiritus in voluntate, ut id quod per certam scientiam proponitur, & allicit sui præsentia, à voluntatis affectu suscipiatur per spiritum, non solum moueatur per cogitationem, seu apparentiam sui, ut ex loco nuper cit. ostendimus.

Quod attinet ad secundum locum ex lib. 1. ad Simplicianum, facilis est sensus, quod vocatio ex parte intellectus qua multi vocantur, esse potest vna, sed affectus, & dispositio, contemperatioque voluntatis dispar; sed hic affectus, & contemperatio, si est bona, & ad sequendum vocationem extenditur, non est ex solo libero arbitrio præuiso, cum illa morali motionem suggestionis, sed per subministrationem spiritus adiuto, & suffulto, ut ex Augustino vidimus. Itaque congruitas liberi arbitrij ad vocationem non est sola congruitas moralis motionis, nec sola congruitas præsupposita ex parte voluntatis, sed ab ipsa gratia facta, & subministrata. Et hanc semper supponit August. etsi non semper explicet; & tamen adhuc in illo loco ad Simplicianum, congruitatem hanc, & aptitudinem explicauit August. prouenire ab ipsa gratia, seu ab ipso Deo, quatenus applicat voluntatem ad credendum, & bene operandum, dum ita concludit, dicens, *Cum ergo alius sic, alius sic moueatur ad fidem, eademque res sæpè alio modo dicta moueat, alio non moueat, quis audeat dicere, defuisse Deo modum, quo Esau ad eam fidem mentem applicaret, voluntatēque coniungeret, in qua Iacob iustificatus est?* In hoc ergo constituit August. congruitatem vocationis, quod per gratiam applicat Deus mentem, & voluntatem coniungit ad eam fidem, quia iustificari possit. Non ergo tota vis reducitur ad cogitationem, ut excitantem, & motum subditum in voluntate causantem, sed ad applicationem Dei, qua mentem applicat, voluntatēque coniungit ad fidem, quæ applicatio, & coniunctio importatur in ipsa causatione diuina. Et quando docet Augustin. quod licet vocatio sit vna, tamen quia non omnes vno modo sunt affecti, ideo non omnes vocationem sequuntur, *ly affecti*, non intelligitur solum de affectu præsupposito in voluntate, quando tendit ad bonum, sed de affectu causa-

to, & facto per ipsam gratiam, quæ mentem applicat, voluntatemque coniungit ad fidem; ut enim dicit ipse Augustinus, *epist. 107. Gratia sic praeuenit hominis voluntatem, quod non inuenit eam cuiusquam in corde, sed facit.* Ergo contemperatio, seu congruitas voluntatis non praeiusta supponitur à gratia, sed fit & causatur.

43) Cæterum pro parte Vasquez adhuc responderi potest quod Pelagius agnouit quidem gratiam internam ex parte illustrationis, & sanctæ cogitationis, sed solum ad faciilius, ut *suprà* ex eodem Vasquez referebamus: ergo simpliciter gratiam internam Christi non est confessus, vel secundò, quod Pelagius non agnoscebat gratiam aliquam tangentem voluntatem, sed solum illustrantem intellectum, & ex parte doctrinæ, & legis se tenentem. Sancta autem cogitatio quam ponit Vasquez est illa, quæ voluntatem tangit, & spirat affectum, & tali pacto modificatur à Deo, & contemperatur voluntati, ut eam moueat, quam contemperationem Pelagius non agnouit. Tertiò, quod non loquitur Pelagius de ipsa cogitatione mouente voluntatem, & agente illam, sed solum admittit quod ad obiecto interius proposito mouetur voluntas, quod est ponere gratiam in doctrina, aut lege, quæ sunt res proposita, non in ipsa cogitatione, quæ etiam agit in voluntatem. Denique Aug. non docet contra Pelagium dari præter cogitationem bonam, aliquam applicationem in voluntate determinantem illam, sed quod aliqua virtus, seu vires subministrantur voluntati ad operandum, quod pertinet ad auxilium sufficiens, quod Vasq. non negat requiri in voluntate, licet non illa applicatio ultra sanctam cogitationem mouentem, & applicantem moraliter.

44) Nihilominus hæ solutiones nihil eleuant doctrinam à nobis traditam. Non prima, tum quia Pelagius non omnem gratiam, seu auxilium pro omni generalitate sumptum dicebat requiri solum ad faciilius, sed etiam aliquam simpliciter requirebat, scil. legem, & doctrinam, in qua includi debet aliqua cogitatio sancta, quia nihil potest esse volitum, quin præcognitum, seu præcogitatum, & solum ponebat gratiam ad faciilius, illam, quæ specialem addit notitiam, seu cognitionem ex reuelatione Spiritus sancti, ut iam *suprà* circa primam moderationem Pelagij annotauimus, quo etiam sensu intelligi debet quod in *eodem lib. de gratia Christi c. 41. in fine* dicit Aug. quod etiam ipsa ostensio, & monstratio via, qua nobis eundum est, contendit Pelagius sola posse natura inueniri, sed faciilius si adiunget gratia. Tum etiam quia non solum Aug. impugnat in Pelagio quod gratia detur solum ad faciilius, sed etiam impugnat, quod gratiam illam, quæcumque sit, & quæ ad faciilius datur, solum dicat ad cognitionem, ad reuelationem, vel suasionem pertinere, & non ad subministrationem spiritus in voluntatem: ergo non sufficit ad tollendum dogma Pelagij dicere quod gratia datur ut simpliciter necessaria, & non solum faciilius, sed etiam oportet fateri quod illa gratia, quæ simpliciter est necessaria, non solum pertinet ad cogitationem, & doctrinam, sed etiam ad subministrationem spiritus, & ad distinctum donum quo diffunditur charitas Dei in nobis, ut *ex suprà dictis* constat: & videri potest Aug. *lib. de gratia Christi c. 40. vbi* utramque in Pelagio impugnat, & quod dixerit dari gratiam ad faciilius, & quod hoc quaecumque adiutorium in scientia & reuelatione per doctrinam constituerit. Accedit quod Pelagius, ut in *illo lib. c. 2.* dicit Aug. fatebatur gratiam ad singulos actus dari: gratia autem ad faciilius non potest requiri ad singulos actus, quia si solum est ad faciilius, saltem qui difficilè fiunt, sine illa fiunt, & sic non ad singulos datur: ergo non hoc solum impu-

gnabatur ibi ab Aug. quia ad faciilius requiritur, sed supponendo quod ad singulos actus datur, de hoc præcipue impugnabatur, quia non in sola cogitatione deberet poni, quia sic reduceretur ad doctrinam, & suasionem tantum, sed in aliquo alio dono, quod immediatè diffunditur, & tangit voluntatem.

45) Secunda etiam solutio manifestè excluditur *ex superius dictis*, cum apertè diceret Pelagius per illam reuelationem sapientiæ, & præmiorum pollicitationem stupentem suscitari voluntatem à Deo ut *lib. de gratia Christi, c. 10.* affert Aug. Non ergo ita præcisè sistebat in intellectu illa illustratio Pelagij, quod non etiam tangeret per illam, & excitaret voluntatem. Nisi fortè dicatur excessisse Pelagium in hoc quod illam cogitationem sanctam non solum ad primum & subitum motum voluntatis, sed etiam ad consensum & operationem ipsam bonam sufficere iudicabat, quod est per aliud extremum non sistere illam cogitationem in intellectu, sed multum extendi, & sufficere ad voluntatem. Cæterum cum etiam Vasquez dicat eandem esse gratiam operantem, & cooperantem, & comitantem, quæ primo nos excitat, & in nobis permanens liberum efficit consensum, non potest hoc effugio uti, quia etiam apud ipsum sancta cogitatio, qua mediante Deus nobiscum cooperatur, usque ad liberum consensum extenditur, dum in nobis permanet, & permanendo cooperatur.

46) Tertia solutio nihil valet; nec enim potest hæc distinguere de motione medio obiecto, vel media cogitatione, cum non moueat nos obiectum, nisi cogitatum, & per cogitationem fit motio, proponendo scil. & alliciendo per obiectum. Nec Pelagius negabat istam cogitationem in nobis operari, nec distinguebat eam ab obiecto, ut hoc diceretur mouere, non illa; expressè enim dicit Aug. *cit. lib. c. 26. contra Pelagium. Cogitationem & dilectionem ut sunt discernenda discernat, quia scientia instat, charitas autem adificat, & cum utrumque sit donum Dei, &c.* Ergo cogitationem pro gratia agnoscebat, non autem solum de obiecto loquebatur. Vnde ipse Aug. *ibidem c. 14. Quando Deus,* inquit, *docet non per legis literam, sed per Spiritus gratiam, ita docet, ut quod quisque didicerit, non tantum cognoscendo videat, sed etiam volendo appetat, &c.* Videre autem, & cognoscere non est obiectum, sed actus cogitationis, & cognitionis. Et denique ipse Pelagius, ut refert Aug. *eodem lib. c. 7.* dicebat, adiungere nos Deum per gratiam suam, dum cordis nostri oculos aperit, & Diaboli pandit insidias, &c. *Et c. 10. dum suadet nobis omne quod bonum est.* Apertio autem oculorum non fit sine actu visionis, & suasio ad omne bonum non fit, nisi cogitetur, & attendatur id quod suadetur. Non ergo sic dicebat Pelagius nos moueri ab obiecto, quod non à cogitatione.

47) Denique quarta solutio non est ad rem, quia Aug. non solum affirmat contra Pelagium debere nobis per subministrationem spiritus dari vires, quibus possimus operari, sed quibus de facto operemur, & vocanti Deo consentiamus; auxilium autem sufficiens dat posse, non verò dat ut de facto operemur. Non ergo loquitur Aug. solum de subministratione virium sufficientis auxilij, sed de illa applicatione, seu motione qua de facto facimus. Dicit enim *lib. cit. de gratia Christi c. 14.* repellens illud dictum Pelagij, quod Deus per doctrinam solum nos adiuuat, & quod possibilitatem, seu posse nostrum adiuuabit, non operationem ipsam, seu volitionem: *Et ista,* inquit, *diuino docendi modo, etiam ipsa voluntas, & ipsa operatio, non sola volendi, & operandi possibilitas adiuuatur, Si enim solum possemus nostrum hac gratia inuaretur, ita diceret dominus; Omnis qui audiuit à Patre & didicit, potest venire ad me. Non autem ita dixit, sed Omnis, inquit,*

quit, qui audit à Patre, & didicit, venit ad me. Venire posse in natura ponit Pelagius, vel etiam ut modò dicere cepit in gratia, qualem libet eam sentiat, qua ipsa, ut dicit, possibilitas adiunatur, venire autem iam in voluntate, & opere est. Sed omnis didicit à Patre, non solum potest venire, sed venit, ubi iam & possibilitatis profectus, & voluntatis affectus, & actionis effectus est. Vbi manifestissime liquet, nec Pelagium sufficientem gratiam negasse, quia ipsum posse venire (quod posse, sufficientis auxilij est) etiam ut modò dicere cepit, in gratia posuit, nec Augustinum subministrationem virium, quæ solum constituerent posse, quod pertinet ad sufficientem auxilium, posuisse contra Pelagium, sed subministrationem virtutis, & spiritus, ut de facto operemur, quia non solum Deus docet ut venire possimus, sed ut de facto veniamus ad Christum. Et ita ut ipse Aug. dicit eodem lib. c. 47. tota difficultas cum Pelagio non erat circa posse, quod est sufficientis auxilij, sed circa agere. Si consenserit, inquit, nobis non solum possibilitatem in homine, etiam si nec velit, nec agat, sed ipsam quoque voluntatem, & actionem, id est, ut benè velimus, & benè agamus, quæ non sunt in homine, nisi quando vult, & benè agit, si, ut dixi, consenserit etiam istam voluntatem & actionem diuinitus adiunari, nihil de adiutorio gratia Dei controuersie relinquetur.

48 Ex his soluuntur loca quæ suprà Suarez attulit ex Aug. ad probandum non agnouisse Pelagium veram gratiam internam excitantem: nam ad id quod dicit de Massiliensibus ex lib. de prædestin. Sanctorum c. 1. ipsos discessisse à Pelagio in hoc quod gratiam excitantem agnoscebant, non Pelagius, Respondetur Massilienses, ut constat ex eodem Aug. & ex epistolis Prosperi, & Hilarij ad ipsam, dicebant voluntates nostras præueniri à gratia diuina ad bona opera, non tamen ad initia bonorum operum, id est, ad desideria, ad fidem, ad orationem, &c. qua petimus à Deo gratiam, distinguentes inter initia operandi, & ipsum operari. Quando autem dicebant nos præueniri gratia Dei, non quidem ad illa initia, seu ad credendum, sed ad benè operandum, illam gratiam præuenientem, seu excitantem fatebantur Massilienses eo modo, qui in Ecclesia Dei asseritur, & ipse Aug. docebat, scil. illam quæ non solum illustrat intellectum, sed etiam spiritum ministrat voluntati. Pelagius autem non agnoscebat gratiam præuenientem, seu excitantem, quæ reluctanti voluntati stadium virtutis immitteret, & per subministrationem spiritus voluntati imprimeretur non solum ad credendum, sed nec etiam ad benè operandum.

49 Ad alium locum ex lib. 1. contra duas epistolas Pelagianorum, c. 19. ubi dicit August. Pelagium non dixisse hominem excitari Dei gratia in bonum, sicut in malum Diaboli suggestionibus incitatur; Respond. verum esse quod negabant discipuli Pelagij) quorum sunt illa verba, quæ ibi refert Aug.) voluntatem excitari in bonum à Dei gratia, seu potius, ut ibi dicit Aug. in excitanda voluntate nihil dicebant gratiam Dei operari, quia videlicet negabant Deum subministrare spiritum voluntati, & ei adhuc reluctanti studium virtutis immittere, & hoc in eis impugnat Aug. licet non negaret Pelagius per reuelationem, & illustrationem interiorem (quod pertinet ad cogitationem mentis) stupentem voluntatem suscitari in desiderium Dei, ut alio loco Pelagius dixerat, & ex Aug. lib. de gratia Christi c. 10. retulimus. Itaque vult. Aug. quod sicut incitationem Diaboli, quæ sola suggestionem fieri potest, & propositionem extrinsecam fatebantur, ita excitationem Dei faterentur, quæ per subministrationem spiritus intra voluntatem operatur.

50 Nec Pelagius, cum dixit suscitari voluntatem stu-

pentem in desiderium Dei, loquebatur solum de desiderio simplici, & inefficaci, sed etiam de illo quod ordinatur ad consensum, quia ad hoc stupentis voluntatis suscitationem ponebat, ut operaretur voluntas id quod sanctum est, & vellet quod sanctum est, ut eo loco. scil. lib. de gratia Christi c. 10. refert. Aug. operari autem, & velle quod sanctum est, consensum importat, & liberum velle efficax non solum simplex, & inefficax desiderium.

ARTICVLVS III.

Quid Pelagius de simultaneo concursu dixerit, & de sufficienti auxilio, quid item aliqui eius discipuli?

Licet confundi sæpè soleat nomen diuini concursus, & auxilij strictè tamen, & in rigore loquendo, concursus magis significat simultaneum influxum simul cum causa in effectum, auxilium verò significat influxum in ipsam causam, quatenus forsitan vires ei præbentur, vel quæ sunt in ipsa conseruantur, & roborantur, vel motio aliqua, seu applicatio ad operandum imprimitur. Vnde simultaneus concursus, non tam efficax quàm efficiens dici potest, nec datur ad præparandam causam inferiorum, aut eius defectum tollendum, & infirmitatem adiuuandam, sed cum præparata causa, & operante simul influit in actum, vel in effectum, propter dependentiam ipsiusmet actus, aut effectus in ratione eius creati à Dei influxu, sine quo nulla entitas stare potest. Et ideo concursus simultaneus generalis dicitur propter, generalitatem, & transcendentiam ipsius entitatis creatæ, quæ generaliter loquendo dependet ab influxu Dei, & ita cum ipse actus causæ creatæ, & voluntatis nostræ, & effectus ex operatione causatus sint entitates creatæ, necessariò ab influxu Dei dependent, & concomitantur cum ipsa causa creata influente, debet influere Deus. Quare non pertinet ad hunc concursum simultaneum perficere, vel applicare causam inferiorem, sanare, aut roborare voluntatem nostram, aut ex nolente facere volentem, & duritiam eius tollere, vel impedimenta ad operandum, sed omnia ista supponit, & cum operante seu influente causa secunda influit etiam Deus, non tam propter ipsam causam inferiorem, quàm propter ipsius effectus dependentiam in esse suo à Deo, sicut cum duo trahunt lapidem non alter alteri præstat vires, aut præparationem, sed vterque simul facit effectum. De hoc ergo querimus an negauerit illum Pelagius, negando omnem gratiam Dei, præsertim in initio hæresis suæ, an verò solum negauerit gratiam, quæ ipsi causæ necessaria est propter ipsam sanandam, perficiendam, aut applicandam ad agendum, non verò dependentiam effectus à Deo negauerit.

Circa hoc punctum non desunt qui sentiant Pelagium etiam hunc concursum simultaneum negasse, imò sub nomine gratiæ etiam illum comprehendisse, eo quod gratis à Deo datur, & per singulos actus necessarius est, ut ex Bellarmino, & Abulensi, refert P. Suar. prolegom. 5. de grat. c. 4. ipseque id reputat probabile n. 9. in fine, licet absolute non definiat. Et ratio huius est tum ex generali negatione gratiæ quam posuit Pelagius, etiam respectu actionum merè naturalium, tum ex assertionem Aug. contra ipsum ponentis influxum Dei communem actibus bonis, & malis, quod utique esse non potest nisi loquendo de concursu simultaneo, & generali Dei, Anteced. certum est, & clarè deducitur ex verbis Hieronymi

in epistola ad Cresiphontem, & in lib. 1. aduersus Pelagianos, ubi introducit ipsum negantem omne auxilium, seu influxum Dei, etiam ad minimos actus. Si voluero, inquit, curuare digitum, mouere manum, ambulare, stare, sedere, scribere, sputa iacere, &c. semper mihi auxilium Dei necessarium erit. Quod utique auxilium non aliud poterat esse quam simultaneus concursus, ad has enim actiones alia gratia præparans, & antecedens non requiritur. Quod si prædeterminatio, vel applicatio Dei requiritur, illa non erit specialis gratia, quia non minus generalis est, quam simultaneus concursus, nec minus pro omnibus causis secundis requiritur propter earum dependentiam à Deo in operando, sicut aliorum effectuum in essendo, ergo eiusdem rationis est negasse Pelagium hanc applicationem præuiam, atque negasse concursum simultaneum.

3 Præterea apud ipsum Hieron. lib. 1. contra Pelagianos, cum obiiceretur Pelagio, siue illi qui ibi personam Pelagij agit, non ita esse datum nobis liberum arbitrium, ut per singula opera Dei tollatur adminiculum; respondet ex parte Pelagij, quod non tollitur Dei adiutorium, cum creatura in semel dati liberi arbitrij gratia conseruentur. Vbi solum agnoscit pro gratia, seu auxilio diuino potentiam liberi arbitrij semel nobis datam, non autem concursum simultaneum, & generalem nobis dari, qui ad singulos actus necessarius est; sed alludit ad illam sententiam quam antè sensit Origenes, ut refert S. Thom. 3. contra gent. c. 89. quod Deus solum operatur cum libero arbitrio, quatenus dat illi virtutem volendi, non quatenus mouet ad volendum, & idem multò post docuisse videtur Durandus, qui sensit actiones nostras non esse immediatè à Deo, sed mediatè, quatenus semel dedit causis secundis virtutem operandi.

4 Denique Pelagius illum influxum Dei negauit, qui bonis, malisque actibus est communis, & hunc contra ipsum statuit Aug. Hic autè influxus non est aliud quam simultaneus influxus, aut si etiam requiritur prædeterminatio applicans, & mouens, illa æquè generalis est ad omnes causas, & actus, sicut concursus simultaneus, ita ut qui eam negauerit in sententia Thomistarum, etiam concursum generalem negare debet: ergo sine dubio illum Pelagius negauit. Maior constat, tum ex D. Hieron. in lib. 1. contra Pelagianos, ubi ex persona Pelagij dicitur: Si absque Deo, & nisi ille per singula me inuenerit, nihil possum agere; nec pro bonis me operibus iuste coronabit, neque affliget pro malis, sed in utroque suum vel recipiet, vel damnabit auxilium. Ergo apertè fatetur se loqui de auxilio; seu influxu bonis, malisque communi, qui sine dubio est concursus simultaneus, & generalis. Tum quia in lib. de gratia Christi c. 3. & 6. & aliis, refert Aug. Pelagium solam possibilitatem, seu potentiam dixisse adiuuari in nobis à Deo, non voluntatè ipsam, & actionem; ad hanc autem datur concursus simultaneus: ergo hunc tollebat Pelagius. Tum denique quia Aug. non solum actiones bonas morales vult esse à Deo, sed etiam actiones naturales, imò & materiales actus peccatorum, ad quorum entitates Deum agere in cordibus hominum docet in lib. de gratia, & libero arbitrio c. 21. & de operibus infidelium idem affirmat, lib. 4. contra Iulianum c. 3. circa finem, & idem de operationibus, bonisque naturalibus docet, ibidè circa principium cap. & epist. 130. idem docet de naturali opere temperantiæ in quodam adolescente. Hæc autem omnia non sunt à Deo, nisi ratione generalis, & simultanei concursus: ad ea enim quæ naturalia sunt non concurrat Deus præbendo vires, sed virtutem supponendo, nec ad entitatem peccati excitat, aut aliter concurrat, quam dando generalem concursum.

Pro resolutione aduerto quod in concursu simul-

taneo duo considerantur. Primum eius generalitas; nam concursus simultaneus habet reperiri in omni operatione, seu effectui tam naturali, quam supernaturali. Secundum est influentia in actionem, & non in causam, per quod distinguitur à præmio, seu præmouente, & præparante ipsam causam, siue ista præparatio fiat dando vires, siue dando applicationem, & motionem ipsi causæ. Si loquamur præcisè de generalitate huius concursus prout extenditur tam ad opera supernaturalia, quam ad naturalia, tam ad ea, quæ virtuosè fiunt, quam quæ merè naturalia sunt, nec restringitur ad solam gratiam, & specialem influentiam, sic non multum cum Pelagio in hac parte certatum est à Patribus, qui solum volebant statuere contra ipsum iam gratiam, qua Christiani sumus, non id solum quod ad gratiam creationis spectat, licet aliquod boni naturalis, & politicæ, aut ciuilis virtutis quis faciat. Vnde Aug. epist. 95. loquens contra Pelagium; Illam, inquit, confiteatur apertissime gratiam, quam doctrina Christiana demonstrat, & prædicat esse propriam Christianorum, quæ non est natura, sed qua soluitur natura, non auribus sonante doctrina, vel aliquo adiamento visibili, sicut plantatur quodammodo, & irrigatur extrinsecus, sed subministratione spiritus, & occulta misericordia, sicut facit ille qui incrementum dat Deus: Et si enim quadam non improbanda ratione dicitur gratia Dei, qua creati sumus, & de hoc tanto beneficio Creatori nostro gratias agere debeamus, alia tamen est, quæ prædestinati vocamur, iustificamur, glorificamur. De hac gratia quæstio vertebatur, quando ab iis, quos Pelagius grauiter offendeat, atque turbabat, dicebatur ei quod eam suis disputationibus oppugnarit. Erat ergo difficultas, & controuersia cum Pelagio, non de gratia ita generali, prout etiam beneficium creationis, & naturalis opera complectitur, sed de gratia qua Christiani sumus, & quæ est propria Christianorum. De concursu autem, aut auxilio Dei ad opera merè naturalia, & ad actiones quibus sæculi creaturæ conseruantur, aut ad ciuiles virtutes spectant, non ita curatum est, licet illas etiam Aug. ad diuinam referat operationem, & ad beneficium eius, quod etiam largo modo dicitur gratia, quia beneficium est Dei. Vnde in lib. de gratia, & libero arbitrio c. 20. inquit: Scriptura sacra, si diligenter inspiciatur, ostendit, non solum bonas hominum voluntates, quas ipse facit ex malis, & à se factas bonas in eternam dirigit vitam, verum etiam illas, quæ conseruant sæculi creaturam ita esse in Dei potestate, ut eas quod voluerit, quando voluerit, faciat inclinari. & c. 21. Satis, quantum existimo manifestatur, operari Deum in cordibus hominum ad inclinandas eorum voluntates quocumque voluerit, siue ad bona pro misericordia sua, siue ad mala pro meritis eorum, &c.

Quare non est dubium, quod August. multis locis, etiam respectu actionum naturalium, auxilium, seu influxum Dei dari fatetur, & hoc etiam esse beneficium ipsius, & ita intellexit Augustinus D. Thom. in 2. dist. 28. qu. 1. art. 1. & art. 3. & apud ipsum constantissimum est quod ex Deo interiùs in voluntate operante pendent omnes motus, etiam naturales, & qui fiunt sine gratia, sed virtute naturæ, ut constat, tum cit. loco art. 1. ad 3. tum Ioan. 15. lect. 1. ad illa verba. Sine me nihil potestis facere, tum 1. p. q. 105. art. 6. & 1. 2. q. 9. art. 4. & q. 109. art. 1. Sed hoc non erat præcipuum in quo cum Pelagio certabatur à Patribus, qui gratiam qua Christiani sumus, & ad vitam dirigimur æternam, volebant ut confiteretur. Certum tamen est quod Pelagius saltem in initio suæ hæresis, etiam ad opera merè naturalia negauit adiutorium Dei requiri, quod est negare generalem influxum Dei (qui non solum simultaneum concursum, sed etiam præuium includit) ut constat ex S.

Hieronymo

Hieronymo in epistola ad Stesiphontem, & lib. 1. aduersus Pelagianos, ut supra retulimus.

Cæterum, loquendo de simultaneo concursu, prout distinguitur à præuio, id est, à quocumque alio auxilio influente in ipsam causam, eamque præparante, aut mouente ad operandum, & non solum de eius generalitate prout distinguitur à speciali, sic existimo Pelagium non negasse talem concursum, sed solum auxilium illud quod influit in ipsam causam, eamque præparat, aut mouet ad volendum, & ex nolente volentem facit. Et hoc quidem certum mihi est ita sensisse Pelagium, aut eius sectatores, saltem post impugnaciones Catholicorum, & magis explicatam suam hæresim, licet ab initio forsitan non ita distinxerint de hoc concursu simultaneo, postea tamen illum euidenter admisserunt.

7 Ducor ad hoc primò, quia sic ipsi explicarunt se admittere gratiâ, scil. quæ adiuuaret opus, influendo cum voluntate, non quæ voluntatem inclinaret aut ex nolente redderet volentem, & studium virtutis immitteret. Constat hoc ex Aug. lib. 1. contra duas epistol. Pelagian. c. 19. ubi de ipsis Pelagianis dicit: *Vos autem in bono opere sic putatis adiuuari hominem Dei gratiâ, ut in excitanda eius ad ipsum bona voluntate, nihil eam credatis operari. Quod satis ipsa tua verba declarant. Cur enim non dixisti, hominem Dei gratiâ in bonum opus excitari, sicut dixisti in malum Diaboli suggestionibus incitari? Sed dixisti, in bono opere à Dei gratia semper adiuuari, tanquam sua voluntate, nullâ Dei gratiâ bonum opus aggressus, in ipso iam opere diuinius adiuuetur, pro meritis videlicet bonæ voluntatis, &c.* Itaque voluntatem non præueniri, aut præparari, seu excitari per operationem gratiæ ponebant, (licet excitationem media doctrina, & propositione intellectus non negarent) sed quod voluntas in se perfecta, & bona & sana aggrediebatur bonum opus, & in ipso opere adiuuabatur à Deo. Influxus autem Dei in opus, seu in actionem, & non in causam ipsam est concursus simultaneus, qui influit simul cum causa in actionem, & effectum, non ipsam causam præparat, & præuenit. Ergo concursum simultaneum fatebantur Pelagiani, qui est influxus in operationem. Et de hoc optimè dicit S. August. quod datur pro meritis voluntatis bonæ, quia eam supponit: concursus enim simultaneus supponit causam in eo statu & dispositione qua possit influere in operationem, non eam perficit, aut præparat; & ita cum sit in statu influendi in bonum opus, supponit illam bonam esse, & iuxta illius dispositionem se accommodat, & hoc modo dicitur pro meritis dari.

8 Ducor secundò, quia August. in Enchiridio c. 32. contra eosdem Pelagianos, sic dicit: *Si propterea dictum est, non volentis, neque currentis, sed miserentis est Dei, quia ex utraque fit, id est, ex voluntate hominis, & misericordia Dei, ut sic dictum accipiamus, non volentis neque currentis, sed miserentis est Dei, tanquam diceretur, non sufficit sola voluntas hominis, si non sit etiam misericordia Dei; non ergo sufficit sola misericordia Dei, si non sit etiam voluntas hominis; ac per hoc si rectè dictum est, non volentis, neque currentis, sed miserentis est Dei, quia id voluntas hominis sola non implet, etiam e contrario rectè dicitur, non miserentis est Dei, sed volentis est hominis, quia id misericordia Dei sola non implet. Porro si nullus Christianus dicere audebit, non miserentis est Dei, sed volentis est hominis, ne Apostolo apertissime contradicat; restat ut propterea dictum intelligatur non volentis neque currentis, sed miserentis est Dei, ut totum Deo detur, qui hominis voluntatem bonam, & præparat ad iuuandam, & adiuuat præparatam. Ecce quomodo Pelagius non refugiebat concedere simultaneum concursum, scil. quia ex utroque fit, id est ex*

voluntate hominis, & misericordia Dei. Ipsa autem voluntas non præparari indigebat à gratia, sed in se, & ex se bona, & præparata supponebatur, dummodo adesset concursus Dei, non in ipsam voluntatem, qui eam præpararet, sed in ipsam actionem, & effectum cum voluntate. Hic autem est simultaneus concursus, non in ipsam causam, sed in ipsum effectum, & actionem cum causa.

9 Ducor tertio, quia licet verum sit Pelagianos non admisisse cooperantem gratiam, quæ supponeret operantem, qua præuenitur, & præparatur voluntas, ut bene velit, tamen quod influeret Deus simul cum ipsa voluntate non præparata, & præuenta à gratia, nullo modo negauerunt, & hoc modo admittebant concursum simultaneum, & cooperantem, scil. qui esset cum voluntate non præparata per gratiam operantem, sed ex se habente unde influeret cum Deo in bonum opus. Hoc enim est quod ex ipsis toties refert August. scil. non negare eos quod gratia adiuuat vniuscuiusque bonum propositum, non tamen reluctanti voluntati studium virtutis immittere; quod est præparare voluntatem, ut reluctans non sit, atque adeò apra, & accommodata reddatur ad operandum, & volendum. Sic enim eorum verba refert Aug. in lib. 2. contra duas epistol. Pelag. c. 5. & 6. *Hæc, inquit, verba sunt vestra, Baptisma omnibus necessarium esse atatibus confitemur, gratiam quoque adiuuare vniuscuiusque bonum propositum, non tamen reluctanti studium virtutis immittere, quia personarum acceptio non est apud Deum.* Et lib. 4. contra easdem epistol. c. 6. *Quod autem dicunt gratiam quoque adiuuare bonum cuiusque propositum: mox addiderunt, non tamen reluctanti studium virtutis immittere; posset benè intelligi, si non ab istis, quorum sensus notus est, diceretur. Reluctanti enim prius aditus diuina vocationis, ipsâ Dei gratiâ procuratur, ac deinde in illo iam non reluctante spiritus virtutis accenditur. Veruntamen in omnibus quæ quisque agit secundum Deum, misericordia eius præuenit eum.* Quare Pelagiani libentius utebantur nomine gratiæ adiuuantis, quia hoc nomine significabant gratiam simul cum causa inferiori influere in operationem, non tamen volebant concedere gratiam, quæ ipsam causam inferiorem præpararet, & præueniret, atque ita simultaneum concursum, qui simul cum nostro proposito bono concurrat, & operetur, seu adiuuet, non negabant, dummodo bonum ipsum propositum, seu voluntatem non præpararet gratia, sed supponeret. E contra verò August. ferè semper totum pondus necessitatis gratiæ in ipsam præparationem voluntatis à gratia factam reducit, licet non neget etiam cooperationem, & simultaneum influxum in opus: ut patet in lib. de gratia, & libero arbit. cap. 16. *Certum est, inquit, nos mandata seruare, si volumus; sed quia præparatur voluntas à Domino, ab illo petendum est ut tantum velimus, quantum sufficit ut volendo faciamus. Certum est nos velle cum volumus, sed ille facit ut velimus bonum, de quo dictum est, quod paulò ante posui, quod præparatur voluntas à Domino. Certum est nos facere cum facimus, sed ille facit ut faciamus, præbendo vires efficacissimas voluntati, qui dixit, Faciam ut in iustificationibus meis ambuletis, & iudicia mea obseruetis, & faciatis. Eodem modo ad præparationem voluntatis à gratia factam reducit Aug. hanc gratiæ operationem, non ad simultaneum concursum in lib. de corrept. & gratia c. 8. cum dicit. *Quis ignorat tunc fuisse perituram fidem petri, si ea quæ fidelis erat, voluntas ipsa deficeret, & Permanfuram, si eadem voluntas maneret? Sed quia præparatur voluntas à Domino; ideo pro illo non posset esse inanis oratio. Ecce quomodo Aug. non ad simultaneum concursum cum voluntate, sed ad præparatum reducit vim gratiæ; signum ergo est non in primo, sed in secundo**

secundo cum Pelagianis fuisse controuersiam. Nam ipsorum vox erat: *In bono opere à Dei gratia semper hominem adiuuari*, vt refert Aug. lib. 1. contra duas epist. Pelag. c. 18. Adiutorium autem in opus, non in causam, præparando illam, simultaneous concursus est. Vnde tandem in epist. 107. ad Vitalem concludit August. eam quæstionem, quæ cum Pelagianis de gratia agebatur in eo sitam esse, videlicet, *utrum præcedat hac gratia, an subsequatur hominis voluntatem*, hoc est, *ut planius id eloquar, utrum ideò nobis detur quia volumus, an per ipsam etiam Deus efficiat ut velimus*. Ergo non erat difficultas cum Pelagio de concursu simultaneo, & consequente, sed de præcedente, & præparante ipsam voluntatem.

10 Ducor vltimò, quia Pelagius ideò negabat adiutorium Dei requiri ad nostros actus, quia dicebat tolli liberum arbitrium, si Dei indiget adiutorio, vt constat ex D. Hieronymo in epist. ad Ctesiphontem vbi refert errorem Pelagij, *quòd non ultra indigemus Dei auxilio, ne si indiguerimus, liberum frangatur arbitrium*. Cur autem Pelagius dixerit arbitrium nostrum tolli, & necessitari per adiutorium Dei, & quasi sub fato quodam redigi, aperit Aug. lib. 2. contra duas epist. Pelag. c. 5. his verbis. *Vnde autem hoc eis visum fuerit nobis obicere, quòd fatum asseramus sub nomine gratie, cum aliquantò attentius cogitarem, prius eorum verba qua consequuntur, inspexi. Sic enim hoc nobis obiciendum putarunt. Sub nomine, inquiunt, gratie ita fatum asserunt, vt dicant, quòd nisi Deus inuito, & reluctanti homini inspirauerit boni, & ipsius imperfecti cupiditatem, nec à malo declinare, nec bonum posset arripere. Deinde aliquantò post, vbi ipsi qua defendant commemorant, quid de hac re ab eis diceretur, attendi. Baptisma, inquiunt, omnibus necessarium esse ataribus confitemur, gratiam quoque adiuuare vniuscuiusque bonum propositum, non tamen reluctanti studium virtutis immittere, quia personarum acceptio non est apud Deum. Ex his eorum verbis intellexi, ob hoc illos vel putare, vel putari velle fatum nos asserere sub nomine gratie, quia gratiam Dei non secundum merita nostra dicimus dari, sed secundum ipsius misericordiosissimam voluntatem. Itaque Pelagius negabat gratiam, seu auxilium quod per modum fati, & necessitatis dicebat tollere liberum arbitrium, eo quòd reluctantem voluntatem, & nihil de se merentem atque adedò nec bonam supponebat, sed faciebat: hoc enim intelligebant ipsi lædere liberum arbitrium quia totaliter ipsum præueniebat, nec in manu eius erat id habere. At verò concursus simultaneous in operationem bonam supponit voluntatem iam in se bonam, & aptam ad talem operationem, quia simul cum voluntate inclinata influit in opus: ergo de tali influxu non poterant dicere Pelagiani quòd tollit liberum arbitrium, siquidem cum illo simul influit in bonum opus, & si simul cum illo: non ergo tollit illud. Ergo si solum negabant adiutorium, seu gratiam quæ tolleretur liberum arbitrium, simultaneous concursus non poterant negare.*

11 Ad fundamenta opposita, patet responsio. Ad primum dicitur esse certum quòd in initio Pelagius negauit auxilium Dei generale, etiam ad actus naturales, non explicando quid nomine adiutorij intelligeret, an aliquid influens in ipsam causam, & præparans, seu mouens illam & applicans ad operandum, an solum influxum in ipsammet operationem, sed absolutè adiutorium Dei necessarium esse negauit, quidquid illud sit; cum tamen etiam ad actus naturalis ordinis, & virtutis acquisitæ influxus, & auxilium requiratur præparatiuum voluntatis, sicut cum Deus conuertit cor Regis Assueri in mansuetudinem, Esther 15. qui videtur fuisse actus mansuetudinis acquisitæ, non infusæ, quia hæc solum est cum charita-

te, & tamen illam conuersionem fuisse ex auxilio Dei omninò præueniente, & non solum adiuuante bonam voluntatem probat Aug. lib. de gratia Christi, c. 24. & lib. 1. contra duas epist. Pelag. c. 20. *Occultissima, inquit, & efficacissima potestate cor Regis conuertit, & transtulit ab indignatione in lenitatem*. Cæterum postea Pelagius cum specialiter ageretur de gratia, simul & vrgeretur à Catholicis, magis se explicauit, & simultaneous concursus concessit, quo adiuuaretur bonum opus, negauit autem auxilium quod ipsam voluntatem præpararet, vt vidimus.

Ad secundum, dicitur in illa autoritate Hieronymi, Pelagium dixisse quòd conseruatio liberi arbitrij semel dati erat adiutorium, id est beneficium Dei, non tamen negasse expressè simultaneous concursus, licet ibi etiam non concesserit, sed postea alibi explicauit, nempe in illis locis, quæ Aug. refert, vbi concessit Deum adiuuare vniuscuiusque bonum propositum ad ipsum opus, adiuuando, non voluntatem præparando.

Ad 3. Resp. quòd bonis, & malis actibus, in quantum mali sunt, formaliter non est communis simultaneous concursus, quia ad malum vt malum nullo concursu Deus concurrat; ad entitatem autem materialem peccati, quatenus entitas est, eodem modo Deus concurrat; sicut ad naturales actus sub ratione physice entitatis præcisè, & physici influxus præcisè. Sed tamen Pelagius in loco adducto ex S. Hieronymo, ista non distinxit, sed absolutè, & in confuso docuit non dari Dei adiutorium ad bonos, nec ad malos actus, eo quòd existimabat per illud tolli libertatem nostram, qua absoluta, consequens erat id quod dicebat quòd nec me coronabit pro bonis, neque affliget pro malis (quia libertas non est) sed suum recipiet, aut damnabit auxilium. Non tamen ex hoc sequitur quòd ipse semper negauerit concursus simultaneous, qui supponit, non destruit liberum arbitrium, simul enim influit cum illo, sed solum illud auxilium negauit, quod tollere putabat libertatem, qua sublata, nihil est quod Deus in nobis coronet, vel puniat. Ad secundam probationem dicitur quòd Pelagius docebat adiuuari possibilitatem nostram, seu potentiam simul cum illa influendo in operationem bonam, non autem præparando illam, & immutando vt velit, & agat, & sic non negabat simultaneous concursus, sed præparatiuum, & influxiuum in voluntatem, vt velit, & agat. Ad tertiam probationem dicitur quòd Aug. etiam ad naturales actiones, & ad entitatem peccati ponit Deum operari, & influere in nobis: non tamen omne quod ponit Aug. circa naturales actiones, negabat Pelagius in moralibus, & voluntariis bonis, sed ad illas dicebat requiri auxilium Dei adiuuans in operationem (quod est concursus simultaneous) non tamen præparatiuum, & immutatiuum ipsius voluntatis, quod reluctantis voluntas præparatur in bonum, vt diximus.

Quid de auxilio sufficienti Pelagius dixerit?

Sufficiens auxilium dicitur illud quod dat sufficientiam, seu posse, non effectum ipsum, aut actionem, stat enim benè nos multa posse, quæ non volumus, nec egimus; multa etiam velle quæ non possumus agere, licet velle possumus, si de facto volumus. Vnde Aug. in lib. de corrept. & gratia, c. 12. *Ipsa, inquit, adiutoria distinguenda sunt: aliud est adiutorium sine quo aliquid non fit, & aliud est adiutorium, quo aliquid fit: nam sine alimentis non possumus viuere, nec tamen cum affuerint alimenta, eis fit vt viuatur, qui mori voluerit: ergo adiutorium alimentorum esse sine quo non fit, non quo fit vt viuamus. At verò beatitudo, quam non habet homo, cum data fuerit, continuo fit beatus.*

Et

Et primum auxilium quod est sufficiens docet datum fuisse primo homini, quia poterat perseverare, non tamen fuit ei datum illud quo perseveraret. Nunc autem predestinatis, inquit, tale datur adiutorium, non solum ut sine isto dono perseverantes esse non possint, verum etiam ut per hoc donum non nisi perseverantes sint. Vnde patet apud Aug. illud quo efficax auxilium à sufficienti distinguitur ex dono Dei esse, & tale esse donum, quo non nisi operans aliquis, seu perseverans fit: si autem aliquid detur cum quo stare possit, quod non operans, nec perseverans sit, in hoc dono non potest constitui illud adiutorium quod à eo sufficienti distinguit August. per hoc solum quod aliquis non nisi perseverans sit.

15 Hoc supposito de hoc secundo auxilio, quo aliquis non nisi operans, seu perseverans fit, dubitari non potest à Pelagianis admissum non fuisse, imò illud molestissime accepisse Semipelagianos, & ob hoc maxime ab Augustini doctrina decessisse, docet S. Prosper in epistola ad August. ante librum de predestinatione Sanctorum. Et ipse Pelagius negabat voluntatem nostram, (id est actum volendi) & operationem esse ex adiutorio Dei, sed solum ipsam possibilitatem, id est potentiam ad agendum dicebat adiuvari gratia, & auxilio Dei, ut refert August. lib. de gratia Christi cap. 4. & 5. & sic auxilium efficax quod est ad volendum, de facto, & nō solum ut habeat quis potentiam ad volendum, prorsus negabat Pelagius, quia velle, vel nolle, consentire, vel dissentire ita nostrum dicebat esse, quod ad id non indigemus adiutorio Dei, sed nos facimus ut valeat, vel non valeat in nobis gratia ipsius. Vnde epistol. 107. ad Vitalem, sic ipsum introducit dicentem: Operatur ille, dicis, quantum in ipso est, ut velimus, cum nobis nota sunt eius eloquia, sed si eis acquiescere nolumus, nos ut operatio eius nihil in nobis possit, effecimus. Quæ si dicis, profecto nostris orationibus contradicis, &c. Et in eodem lib. de gratia Christi cap. 25. sic contra Pelagium dicit Augustin. Desinat dicere quod possumus omne bonum facere, dicere, cogitare, illius est qui hoc posse donavit, quod verò bene, vel male agimus, vel loquimur, vel cogitamus, nostrum est: desinat, inquam, ista dicere, non solum enim Deus posse nostrum donavit, atque adiuvat, sed etiam velle, & agere operatur in nobis. Et cap. 41. Ab illo, inquit, suo manifestissimo dogmate non recedit omnino, ubi tria illa constituit, possibilitatem, voluntatem, actionem, & solam possibilitatem dicit diuino semper adiuvari auxilio, voluntatem autem & actionem nullo Dei adiutorio existimat indigere. Quare auxilium ad ipsum actum siue volendi interius, siue agendi exterius, Pelagiani negabant, quod est auxilium efficax quod datur ad volendum vel agendum de facto: ad hoc enim dicebat liberum arbitrium ex se determinari: imò in hoc præcipuum punctum controversiæ fuit cum Pelagio, ut fateretur non solum gratiam, quæ dat nobis posse, & potentiam adiuvat, sed etiam illam gratiam, quæ addiuuat ut velimus, & agamus de facto, ut patet in eodem lib. cap. 47. Et hæc gratia non solum per doctrinam, aut suasionem, vel reuelationem, sed per subministrationem in ipsam voluntatem debere poni docuit toto illo lib. c. 2. cap. 7. cap. 10. cap. 14. cap. 24. & aliis.

16 Loquendo autem de auxilio sufficienti per quod nobis datur ipsum posse, licet non ipsum de facto operari, lubricè, & sub ambiguitate de illo locutus est: nam licet perpetuò illa tria distingueret in nobis, scilicet posse, velle, & agere, seu possibilitatem, voluntatem, actionem; & primum, scilicet posse, seu possibilitatem dicebat esse à Deo, & à Dei

Ioan. à S. Thoma in 1. Part. D. Th. Tom. 2.

gratia adiuvari, secundum autem & tertium à nobis, sine alio adiutorio Dei, quia per illud quo adiuuatur posse, seu possibilitas, dicebat Deum operari in nobis velle, & perficere, scilicet per legem, & doctrinam, ut in lib. de gratia Christi cap. 7. & 10. refert Augustin. Sed tamen in hoc posse, seu in hac possibilitate adiuuanda per gratiam Dei aliquid requirebat ad simpliciter, aliquid ad facilius posse. Ad simpliciter solum requirebat Pelagius ipsam naturalem potestatem liberi arbitrij, & ad summum etiam notitiam aliquam legis, quia sine cognitione nihil potest esse volitum; discipuli autem Pelagij etiam ad aliqua opera requirebant simpliciter gratiam; ad facilius autem posse, admittebat Pelagius gratiam aliquam dari, quæ ipsum posse iuuare, ac per hoc intra lineam sufficientis auxilij remaneret, id est, cuius munus, & officium esset dare, seu iuuare potentiam, non ad operandum de facto subministrare, & applicare. Sed tamen totum hoc adiutorium pro sic posse, reducebat ad doctrinam, vel cognitionem magis, aut minus manifestantem, & ostendentem quid agere debeamus. Ottendo singula.

Dicimus quod ad simpliciter operandum requirebat ipsam naturam liberi arbitrij, quam etiam iurabat gratiam, id est beneficium gratis à Deo acceptum in creatione, ut pluribus locis præced. art. ostendimus, & Aug. specialiter refert lib. de gratia Christi cap. 4. ubi in Deum etiam referebat laudem boni operis, quia possibilitatem voluntatis, & operis dedit, quique ipsam possibilitatem gratia sua adiuuat semper auxilio. Naturam ergo potestatis liberæ simpliciter requiri ad posse operari non potuit Pelagius negare, quia sine ipsa nihil esset, quod posset operari, & ut dicit Aug. c. 6. præf. lib. Nisi esset natura in qua nos condidit, qua velle, & agere possemus, nec vellemus, nec ageremus. Legem autem, seu aliqualem notitiam operis faciendi, etiam simpliciter requiri, non potuit negare, ut ponderauimus art. præced. circa primam moderationem Pelagij, tum quia hoc pertinet ad ipsam naturam liberi arbitrij, quia nihil potest velle, quin prius cognoscat; tum quia Pelagius apud August. lib. cit. de gratia Christi cap. 7. affirmans gratiæ auxilium subministrari à Deo, ut quæ per liberum homines facere iubentur arbitrium, facilius possint implere per gratiam subiungit: quam nos, non ut tu putas, in lege tantummodo, sed & in Dei adiutorio esse confitemur. Ergo illam gratiam quæ est ad facilius segregabat Pelagius à lege sola, & aliud esse dicebat: legem ergo solam ad simpliciter posse requirebat. Quod verò Pelagij discipuli requirerent pro aliquibus operibus gratiam simpliciter, statim eorum sententiam referendo ostendemus.

Quod verò ad facilius admitteret gratiam, seu 18 auxilium sufficiens superadditum naturæ libertatis, pertinenſque ad officium, & munus sufficientis gratiæ, quia daret vires, & posse, licet ad facilius, patet; quia, ut refert August. lib. cit. de gratia Christi, cap. 4. & 5. dicebat possibilitatem adiuvari auxilio gratiæ, non ut velimus, non ut agamus, sed ut velle, & agere valeamus: ergo hoc adiutorium ponebat ad posse, scilicet ut valeamus, quod utique est munus sufficientis auxilij. Et cap. 7. dicit quod gratia sua auxilium subministrat, ut quæ homines per liberum facere iubentur arbitrium, facilius possint implere per gratiam, ubi iterum datur gratia ad posse implere, sed facilius. Vnde in cap. 14. refert Augustin. ex ipso Pelagio sic: Venire posse in natura ponit Pelagius, vel etiam, ut modo diceret cæpit, in gratia, qualem libet eam sentiat, quo ipsa ut dicit possibilitas adiuuatur. Ergo ita ipsum posse affirmabat

H

pertinere

pertinere ad naturam, quod etiam non negabat pertinere ad gratiam, etiam si hoc fortassis ab initio non admitteret, qui modo, inquit, id dicere coepit.

19 Quod verò diceret pertinere totum hoc ad legem, atque doctrinam, ita ut ipsum adiutorium sufficiens, quo possibilitas adiuuatur, non in alio poneret, ipse Aug. declarat lib. cit. de gratia Christi. c. 41. Solam possibilitatem, inquit, diuino dicit adiuuari semper auxilio, voluntatem autem, & actionem nullo Dei adiutorio, existimat indigere: ipsum verò auxilium quo possibilitatem naturalem perhibet adiuuari, in lege constituit atque doctrina, quam nobis fatetur, etiam sancto Spiritu reuelari, propter quod & adorandum esse concedit. Sed hoc adiutorium legis, atque doctrinae etiam prophetis fuisse temporibus, adiutorium autem gratiae, quae proprie gratia nuncupatur, in Christi esse arbitrat ex exemplo. Quod nihilominus ad doctrinam pertinere perspicitis quae nobis Euangelio predicatur, ut videlicet tanquam via demonstrata qua ambulare debeamus, iam viribus liberi arbitrii, adiutorio nullo alterius indigentes, sufficiamus nobis ne deficiamus in via, quamuis & ipsam viam contendat etiam sola inueniri posse natura, sed facilius si adiuuet gratia. Ecce quomodo explicabat Pelagius auxilium sufficiens, quod ad possibilitatem ipsam iuuandam dari dicebat, nimirum quod esset lex, aut doctrina, sed non lex, aut doctrina qualiscumque, sed Spiritus sancti reuelata (quod aliquid supernaturale sonat) & in lege gratiae addebat esse exemplum Christi, per hoc enim nobis facillius monstratur via ad Deum, licet per naturam etiam aliquantulum possit inueniri, ut proinde intelligamus aliquid poni à Pelagio quod simpliciter esset necessarium ad opera bona, scilicet illa notitia, & demonstratio viae, quae saltem per naturam, aut legem naturalem posset inueniri. Quod verò addebatur super hoc per Euangelium, & per reuelationem Spiritus sancti, ad facilius operandum pertinebat. Quod etiam ibidem cap. 40. indicat Augustinus. dum dicit quod Pelagius ponebat nos adiuuari gratia Spiritus sancti, non quia sine illo etiam per solam naturam possibilitatem non possumus resistere Tentatori, sed ut facilius resistat. Quod tamen quaecumque, & quantumcumque adiutorium, eum credibile est in hoc constituere quod nobis additur scientia, reuelante spiritu per doctrinam, quam vel non possumus, vel difficile possumus habere per naturam. Constat ergo quod illud adiutorium ad facilius, quod tamen solum dicebat pertinere ad possibilitatem, quia ipsum posse augebat, aut facilitabat addendo sufficientiam, non efficaciam praebendo, in aliqua doctrina superaddita per reuelationem spiritus, qualis per naturam non poterat haberi, constituere, non in communi notitia, nec in aliqua alia subministratio-
ne virtutis, ut supra latè ponderauimus.

20 Valde autem parum vrget argumentum oppositorum Authorum, quod in 42. Congregatione posuerunt, quia gratia quae dat posse, est vera gratia, Pelagius negauit veram gratiam: ergo negauit auxilium sufficiens quod dat posse. Iam supra solui-
mus simile argumentum. Negauit Pelagius veram gratiam adaequatè, & plenè, sicut ponitur à Catholicis, quae dat posse, & dat operari: concessit aliquam saltem ex parte legis, & doctrinae etiam interioris, & non ampliùs, & haec pertinet ad sufficiens auxilium. In eo verò quod non ampliùs concessit, vel solum ad facilius, non veram gratiam admisit, sicut à Catholicis ponitur.

Quid alij discipuli Pelagij super ipsum addiderint?

Cum à Pelagio, & Caelestio sub tot ambiguitatibus, & ambagibus nihil ampliùs posset extorqueri in confessione diuinæ gratiae, quàm id quod hucusque ex ipso retulimus, & ex Aug. qui praecipue in l. b. de gratia Christi, exactiùs mentem, sensumque Pelagij in hac materia detexit, coeperunt eius discipuli diuidi.

Ac primò, Episcopi quidam Pelagiani in epistola quam Theſſalonicam miserunt, cuius mentionem facit Augustinus. lib. 2. contra duas epistolas Pelagianorum cap. 1. & Cardinalis Baronius anno Christi 419. num. 45. admiserunt gratiam Dei subsequenter, & adiuuantem bonum propositum, atque simpliciter necessariam ad faciendum opus perfectum, & consummatum, non tamen praueientem ex parte voluntatis, ita quod reluctanti cordi Deus illam immitteret, nec simpliciter necessariam ad ipsius imperfecti operis cupiditatem. Quod enim ipsi admitterent, gratiam Dei adiuuare bonum propositum, non tamen ita quod reluctanti studium virtutis immitteretur, clarè liquet ex ipso Aug. lib. ipso 2. contra duas epist. Pelagianorum cap. 5. & 6. in verbis supra iam relatis; Gratiam quoque adiuuare vniuscuiusque bonum propositum, non tamen reluctanti studium virtutis immittere; hoc enim dicebant esse ideam, ac sub nomine gratiae fatum ponere. Quod verò dicerent aliquam gratiam dari, non solum ad facilius, sed etiam ad simpliciter, non quidem pro quocumque opere, etiam imperfecto, sed pro perfecto, & consummato, clarè significat Augustinus. lib. 2. cit. cap. 8. & in hoc eos à Pelagio magistro suo discernit. Verba Augustini sunt: Pelagius facilius dicit impleri quod bonum est, si adiuuet gratia. Quo additamento, id est, addendo facilius, significat hoc se sapere, quod etiam si gratia defuerit adiutorium, potest quamuis difficilius impleri bonum per liberum arbitrium. Sed istis quid in hac re sentiunt, non de illo autore huius haereseos, praescribamus. Praemittamus eos cum suo libero arbitrio esse liberos, & ab ipso Pelagio ad quem ista verba eorum, quae in hac cui respondemus epistola posuerunt, potius attendamus. Hoc enim nobis obiciendum putarunt, quod inuito ac reluctanti homini Deum dicamus inspirare, non quantumcumque boni, sed & ipsius imperfecti cupiditatem. Fortassis ergo ipsi saltem eo modo seruant locum gratiae, ut siue illa putent hominem posse habere boni, sed imperfecti cupiditatem, perfecti autem non facilius posse, sed nisi per illam omnino non posse. Verum & sic gratiam Dei dicunt secundum merita nostra dari, &c. Sic Aug. de his Pelagij discipulis. Vbi apparet, quomodo post Pelagium videbatur aliquam gratiam ad simpliciter, confiteri, licet id cum aliqua haesitatione dixerit Augustinus. in illo verbo, Fortassis, &c. non quidem pro prima inceptio, & imperfecta boni cupiditate, seu desiderio, sed pro perfecta. Vnde nomen gratiae adiuuantis absolute non respuebant, quia adiuuare simultaneo concursu supponit aliquid quod adiuuatur, & cum Deus non adiuuet nisi bonum, dicebant istam gratiam supponere bonum propositum, & sic gratiam consequenter videbantur concedere, non praueientem; ad opus tamen perfectum dicebant ita gratiam istam adiuuantem requiri, quod non solum ut facilius posset, sed ut simpliciter voluntas posset, requirebatur. Et hunc sensum istorum discipulorum Pelagij, videtur postea sequutus Vitalis, ad quem scribit Augustinus. epist. 107. & Massilienses, seu Semipelagiani de quibus art. seq.

Secundo

22. Secundò, alij conuicti ad ponendam gratiam quam Catholici afferebant, in aliud extremum declinarunt, confitendo gratiam, sed tollebant liberum arbitrium, ideòque dicebant non esse necessariam correptionem pro male agentibus; sed solùm Deum esse orandum, vt det nobis Spiritum, & gratiam qua bonum operemur, siquidem ipse operatur in nobis velle. Hi autem fuerunt quidam Monachi Adrumentini sub Valentino Abbate, vt colligitur ex Augustin. lib. 1. *Retract. cap. 66.* quibus etiam scripsit idem Aug. epistolam 46. & 47. & ad eos instruendos, ac reducendos misit librum de gratia, & libero arbitrio, & de correptione, & gratia, vbi ostendit non tolli liberum arbitrium per gratiam Dei, potius enim per gratiam perficitur ad operandum liberum arbitrium modo libero, & sibi proportionato; immò vbi non est libera operatio, gratia nihil facit. Nec etiam tollitur correctionis necessitas, quia correctione vititur Deus tanquam medio extrinsecus adhibito, vt intus operetur bonam voluntatem.

ARTICVLVS IV.

Quid senserint Semipelagiani?

I Dìcti sunt Semipelagiani quidam hæretici, qui non ex toto errorem Pelagij sequebantur, sed in plurimis ab eo discedentes aliquid tamen de eius erroribus retinebant, præsertim in materia de prædestinatione, & initio bonorum operum, vt mox referemus. Et quidem cum Pelagiana hæresis multis scateret erroribus circa peccatum originale, circa carentiam omnis peccati in viris perfectis, circa necessitatem gratiæ ad benè operandum, variè discipuli Pelagij, imò & Pelagius ipse moderationem suæ sententiæ temperarunt, nec tamen Semipelagiani sunt dicti, sicut illi qui à Prospero, & Hilario in suis epistolis Augustino significantur, & propriè dicti sunt Semipelagiani, seu reliquæ Pelagianorum, eo quòd illi qui temperabant sententiam Pelagij, nulum ferè errorem Pelagij abiiciebant, sed verbis potius ladebant, eadem diuersis verbis iterum atque iterum inculcantes. Semipelagiani autem multos ex erroribus Pelagianorum negabant, admittentes peccatum originale, & baptismum etiam paruulis esse dandum, gratiam quoque esse necessariam pro bonis operibus, solùm verò initium bonorum operum, sicut est fides, oratio, desiderium, & similia, esse ex nobis. Quare omnes illi discipuli Pelagij qui eum ita moderati sunt, vt dicerent Deum non inspirare nobis etiam ipsum initium boni, & imperfecti operis cupiditatem, nec reluctanti cordi studium virtutis immittere, ne Deus diceretur acceptor personarum, isti, inquam, Semipelagianismo viam aperuerunt, & occasionem Semipelagianis dederunt suam hæresim suscitandi, sicut fuerunt illi Episcopi, quorum epistolam Aug. impugnat, lib. 2. *contr. duas epistolas Pelagianorum*, & hæc refert de illis c. 5. 6. & 8. prout in fine præced. art. retulimus. Maximè etiam ad hanc hæresim videtur occasionem præbuisse Vitalis, ad quem Augustin. scripsit epistolam 107. qui quidem à Pelagio discedebat in eo quòd à fidelibus, etiam bonam voluntatem habentibus, dicebat Deum esse creandum, & gratias ei agendum pro gratia data vt proficiant. At verò ipsum initium fidei, & bonæ voluntatis dicebat esse à nobis, quod prorsus ad errorem Semipelagianorum pertinet: sic enim de ipso inquit Aug. *sub finem citata epistola: De orationibus fidelium, quas pro se, & pro alijs fidelibus faciunt, vt proficiant in eo quòd esse cœperunt, & de gratiarum actionibus, quia*

Ioan. à S. Thoma in 1. part. D. Th. Tom. 2.

proficiunt, confligendum esse secum non puto. Contra Pelagianos est iste conflictus tibi, nobisque cõmunis (Ecce quomodo à Pelagianis discebat in hoc Vitalis.) Illi quippe omnia ad fidelem, piàmque vitam hominum pertinentia ita tribuunt libero voluntatis arbitrio, vt habenda ex nobis, non à Domino putent esse poscenda. Tu autem si ea qua de te audio vera sunt, initium fidei, vbi est etiam initium bonæ, hoc est piæ voluntatis, non vis donum esse Dei, sed ex nobis nos habere contendis, cætera autem religiosa vita bona Deum per gratiam suam iam ex fide petentibus, quærentibus, pulsantibus, donare consentis. Ecce quomodo Vitalis sola initia bonæ voluntatis, ipsam fidem docebat ex nobis esse; cætera verò bona opera ex gratia Dei, quod ipsum Semipelagiani affirmabant. Vnde in ipso videtur eorum errorem fuisse inchoatum. An verò in alijs omnibus quæ Semipelagiani vel negabant contra Pelagium, vel afferebant vt propria, Vitalis cum eis conueniret, ita vt plenè, & in omnibus Semipelagianus esset, ex illa epistola, nec ex alijs scriptis mihi non constat, ideòque sufficit pro nunc dicere hunc errorem quem de Vitali commemorat Augustin. fuisse etiam Semipelagianorum, alios verò errores, & capitula, in quibus errabant Semipelagiani expressius inuenimus in his, quæ de ipsis referunt Prosper, & Hilarius ad Aug.

Igitur vt eorum errores qui in Gallia, & maximè apud urbem Massiliam, vnde & Massilienses dicti sunt, in ipsa ferè vltima Aug. ætate cœperunt, radicis percipiamus, est aduertendum quòd eo ferè tempore quo August. Pelagij hæresim expugnabat, alia quædam hæresis emerit, cuius meminit Sigebertus in *chronico*, anno Christi 415. ex quo eam refert Baronius anno 490. num. 16. quæ appellata est hæresis Prædestinatorum. Asserebant isti prædestinationem esse velut quoddam fatum tollens liberum arbitrium, ita quòd nec piè viuentibus dicebant prodesse bonorum operum laborem, si sunt ad damnationem à Deo præsciti, nec improbis obesse, etiam si improbè viueret, si à Deo essent prædestinati. Occasione ergo damnandi hanc hæresim, simulque declinandæ impietatis Pelagianæ, docti aliqui, & non paræ authoritatis viri in Gallia cum eis August. doctrina, præsertim circa infallibilitatem prædestinationis, & præuentionem gratiæ, quæ datur etiam malis vt boni fiant, displiceret, declinarunt in aliud extremum, negantes infallibilitatem prædestinationis, & doni perseverantiæ, & similiter initia bonæ voluntatis à gratia non dari, sed supponi asserebant, ne personarum acceptio esset apud Deum, dum his qui æqualiter mali sunt, & peccatores, dat aliquibus gratiam, alijs negat. Maximè autem ad hoc impulsus sunt occasione libri de correptione & gratia, in quo Augustin. præsertim cap. 12. distinguit auxilium quo aliquis non nisi perseverans fit in bono (illud vocatur efficax) ab eo quo potest fieri perseverans (quod est auxilium sufficiens) docuitque indeclinabiliter, & inseparabiliter agi voluntatem nostram ab efficaci auxilio. Hanc doctrinam nequaquam recipientes Massilienses illi, eruperunt in errorem prædictum. Euenit, inquit, Prosper in *epist. ad Aug. ex dispositione diuinæ misericordie, vt cum quosdam intra Africam similia mouissent* (forfitan Vitalem, & alios similes, denotat, qui in Africa ab Augustini sententia recedebant) *librum de correctione & gratia plenum diuinæ authoritatis emitteres. Quo in notitiam nostram insperata opportunitate delato, putauimus omnes querelas resistentium sopiendas, &c. Recensito autem hoc beatitudinis tuæ libro, sicut qui sanctam, atque Apostolicam doctrinam tuam authoritatem ante sequebantur intelligentiores multò, instructioresque sunt facti, ita*

H 2

qui

qui per suasionis suae impediabantur obscuro, aueriores quam fuerant, recesserunt.

Igitur Semipelagiani in duobus recedebant à Pelagio, tum circa peccatum originale, tum circa necessitatem gratiae. Circa peccatum originale fatebatur, omnes homines nasci tali peccato obnoxios, & non nisi per gratiam Dei, & iustitiam secundi Adam aliquos ab isto malo liberari. Circa necessitatem gratiae docebant gratiam Dei requiri ad opus bonum, ita ut nec ad incipiendum, nec ad perficiendum illud, sibi quisque posset sufficere; & sic non solum adiuuari, sed etiam praeueniri hominum voluntates à divina gratia ad bona opera fatebantur. Ita refert de ipsis Aug. lib. de praedestin. Sanct. c. 1. Et addit quod ista quae sic asserunt Semipelagiani plurimum eos à Pelagianorum errore discernit. Quomodo autem dicerent praeueniri nostras voluntates ad omne opus bonum, cum ex alia parte faterentur initia voluntatis bonae esse à nobis, & à gratia non dari, sed supponi, postea explicabimus tractando de eo quod senserunt circa liberum arbitrium, eiusque vires. Quid etiam nomine gratiae intelligerent, praeuenientis nos, & quomodo in ea explicanda iterum aliqui eorum ad Pelagianum dogma recurrerent, postea dicemus.

Circa id verò in quo proprius eorum error consistebat, & in quo conveniebant cum Pelagianis, satis ambiguum est id dilucidare, & diffusissime tractatur à P. Suarez tom. 1. de gratia prologom. 5. praesertim c. 6. cum prius plura c. 5. de Cassiano, & Fausto Rhegiensi, aliisque Semipelagianis circa eorum asserta retulisset, Nos ut in aliquem ordinem eorum errores reducamus, recensebimus ea quae Massilienses dixerunt, & referunt Prosper, & Hilarius citatis epistolis, quibus si aliqua Cassianus, & Faustus postea addiderunt, ad aliquam maiorem explicationem pertinent eorum quae Massilienses affirmarunt.

Generaliter ergo errores Semipelagianorum ex duobus praecipuis capitibus seu principiis, in quibus ipsi conveniebant, derivantur. Alterum principium ponebant circa praedestinationem Dei, alterum circa liberum arbitrium nostrum, unde varia deducebant corollaria, tanquam errores ex erroribus derivamus.

Quomodo praedestinationem posuerint Semipelagiani.

3 Nomine praedestinationis intelligitur hic non sola transmissio efficax ad gloriam qui est frequentior usus illius nominis apud Theologos, sed quodcumque decretum, seu constitutio aut voluntas efficax Dei circa actus nostros, ut in litteris Prosperi, & in doctrina Aug. libro de praedestin. Sancto-
rū, & de bono perseverantia aperte cernitur. De praedestinatione ergo electorum, & de decreto efficaci Dei circa humanas voluntates tria dicebant Semipelagiani.

4 Primum, Dei praedestinationem, seu decretum, aut constitutionem, humanas non praevenire voluntates, quia tolleretur libertatem humanam, & fatali quadam necessitate eam ageret, quae praeventio nihil aliud est, quam gratiam Dei, seu decretum ita antecedere omnem bonam voluntatem, ut etiam resistenti, & reluctanti daretur, ut eam converteret, ac non reluctantem faceret; hoc enim perpetuo negabant, tum ne gratia Dei indignis daretur, tum ne voluntatis libertatem laederet, eam immutando, & convertendo ab extrinseco. Constat hoc dictum ex verbis Prosper referentis eorum errores in cit. epistola ad Aug. Removeri dicunt omnem industriam tollitque virtutes, si Dei constitutio humanas praeveniat voluntates, & sub

hoc nomine praedestinationis fatalem quandam necessitatem induci.

Secundum erat, praedestinationem non esse ita infallibilem, quod non posset numerus praedestinatorum minui, vel augeri, & voluntate sua à dono perseverantiae deficere. Constat ex verbis eiusdem Prosperi in eadem epist. Nec acquiescunt praedestinatorum electorum numerum nec augeri posse, nec minui, ne locum apud infideles, & negligentes cohortantium incitamenta non habeant. Et Hilarius in epist. etiam ad Aug. Inde est quod & illud pariter non accipiunt, ut eligendorum, reiciendorumque esse definitum numerum non accipiant.

Tertium erat, praedestinationem habere certitudinem, non ex se, ut in 2. dicto vidimus, sed ex praescientia, qua Deus praevidet quid unusquisque facturus est, non solum ex naturalibus viribus, sed etiam quia praevidetur sub adiutorio gratiae, quo fine discessurus sit, hanc praescientiam dicebant praecedere decretum Dei, ita ut ipsi praescientiae decretum inniteretur, non solum quia inde sumit praedestinatio certitudinem, sed quia per praescientiam videt aliquid futurum tanquam meritum ob quod detur gratia à Deo; eo quod apud ipsos erat infallibile principium, quod Deus non dat gratiam suam, & praedestinationem indignis, ita quod omne bonum meritum praecedat & omne bonum desiderium, alias Deus esset acceptor personarum, si aliquibus indignis daret gratiam, & aliis negaret. Constat ex verbis Prosperi, tum in initio epist. tum in fine. Circa principium inquit: Qui autem credituri sunt, quine in ea fide, qua deinceps per Dei gratiam sint iuvandi, mansuri sunt, praecise dicunt ante mundi constitutionem Deum, & eos praedestinasse in regnum suum, quos gratis vocatos, dignos futuros electione, & de hac vita bono fine excessuros praevidetur. Circa finem verò epistolae. Penè omnium, inquit, par invenitur, & una sententia, qua propositum, & praedestinationem Dei secundum praescientiam receperunt, ut ob hoc Deus alios vasa honoris, alios contumelia fecerit, quia finem unuscuiusque praevidetur, & sub ipso gratiae adiutorio in qua futurus esset, voluntate, & actione praescierit. Unde ipse Prosper ibidem inter alia consulit Aug. ut sibi explicet, an praescientia fundetur, & innitatur proposito, seu decreto libero Dei, an verò praescientia sit prior, & antecedit decretum liberum Dei, praesertim in his quae à nostra voluntate dependent, & non à solo Deo fiunt. Quae loca cum aliis pro exclusionem scientiae mediae late ponderavimus praeced. tomo disp. 20. Similiter apud Faustum Rhegiensem tomo 4. Bibliotheca lib. 2. de gratia & humanae mentis arbitrio, c. 3. Invenitur haec eadem doctrina, dum inquit: Aliud est praescire, aliud praedestinare: praescientia gerenda praescit, postmodum praedestinatio retribuenda describit: praescientia de alieno subsistit actu, praedestinatio de iudicio suo: à praescientia quae sunt nostra produntur, à praedestinatione quae sunt preparantur, ac per hoc nisi praescientia exploraverit, praedestinatio nil decernit. Sic Faustus. Quare tota praedestinationis certitudo ab his reuocabatur ad praescientiam Dei; praesciens enim quid unusquisque facturus sit ante decretum & praedestinationem suam, quae humanas non praevenit voluntates, praedestinat Deus, & decernit id quod per praescientiam explorabat in tali, vel tali occasione futurum. Et hoc modo haeresim illam praedestinatorum, excludebant, tollendo scilicet infallibilitatem praedestinationis, & causalitatis eius, ita quod nostras non praeveniret voluntates.

Quid circa liberum arbitrium senserint.

Ut refert Hilarius in epist. ad S. Aug. distinxerunt Semipelagiani in voluntate nostra vires ad bene operandum

operandum, vel solum ad bene desiderandum, vel petendum, aut credendum, quod pertinet ad ipsa initia bonae operationis. Et dicebant quod nostra voluntas in statu integritatis ante lapsum poterat non solum bene petere & desiderare, sed etiam bene velle, & operari, unde tunc gratia adiuuabat hominem bene volentem & operantem, seu bonam eius voluntatem. Prostrata autem natura non remanserunt in nobis vires ad bene operandum, & recte volendum, quae sunt operationes hominis sani; manserunt autem vires ad desiderandum salutem, & petendum remedium, quae dicebant esse semina quaedam virtutum naturaliter insita animae nostrae. Et quia nemo potest petere salutem, nisi prius credat Salvatorem, ideo etiam credulitatis affectum ex nostra voluntate esse, gratiamque antecedere dicebant; sicut aegrotus, qui non potest, nec habet vires ad ambulandum, & faciendum opera hominis sani, habet tamen potentiam ad desiderandam salutem, & querendum medicum, & petendam medicinam. Unde ista initia bonae voluntatis & facultatis naturalis non in solo actu fidei, & credulitate ponebant, licet hic esset praecipuus, & prior, sed etiam in petendo, pulsando, desiderando, querendo medicinam, & adiutorium Dei, ut ex Concil. Arausic. II. can. 6. & ex Prospero cit. epist. constat, illis verbis, *Ad hanc gratiam pervenire nos per naturalem facultatem petendo, querendo, pulsando, &c.*

5 Ex hoc principio inferebant aliqua circa vim & rationem auxilij praevenientis, alia circa efficaciam, & sufficientiam auxilij. Circa auxilium praeveniens etsi videantur lubricè locuti, tamen in primis ferebantur voluntatem nostram ad bene operandum Dei gratia praeveniri, ita ut ad nullum bonum opus, siue incipiendum, siue perficiendum quemquam sufficere posse concederent, ut Aug. refert, *lib. de predest. Sanctorum c. 1.* & Hilarius ep. cit. Caeterum per ly bonum opus, non intelligebant omnes actus voluntatis, etiam imperfectos, & quales possunt esse in homine infirmo, & primum desiderium, aut cupiditas boni, &c. Sed opera virtutum, & hominis sani, quod simpliciter opus bonum nominabant, & distinguebant ab iis quae solum sunt initia, & quid praeuium ad bene operandum. Quid autem nomine gratiae praevenientis intelligerent statim dicemus.

Inferebant secundò, illud primum desiderium, & initia bonae voluntatis non esse computanda inter opera bona, ad quae indiget homo curatione, & gratia, quia quantum ad illa non fuit infirmata natura. Nec ex hoc tollitur, quod gratia ad bene operandum gratis detur, quia solum datur petenti; petentio autem alicuius beneficii non tollit, quin gratis detur, ut etiam in humanis constat, nec importat meritum de condigno, sed ad summum de congruo.

Inferebant tertio ratione huius desiderij, seu petitionis antecedentis dici quod Deus expectat voluntates nostras, ut purgari velimus, hoc est, ut desideremus purgari, quam propositionem damnat Concil. Arausicanum II. Et dicebant praerequiri hanc voluntatem, seu initium bonae voluntatis desiderantis, & petentis, ut Deus daret gratiam ad bene operandum, quia existimabant Deum reluctanti, & nolenti non dare dona sua, sed querenti, & pulsanti, ut dicebat Faustus loco supra cit. cap. 17. & alij tempore S. Prosperi, ut in verbis supra citatis vidimus, unde dicebant gratiam Dei non fouere, nisi hominem iam appetentem bona, & priorem esse obedientiam nostram, quam Dei gratiam; tum ne videretur Deus esse iniustus, si nolentibus daret gratiam, & tamen non omnibus nolentibus, sed quosdam relinqueret: tum ne videretur voluntas esse omnino extincta per pec-

Ioan. à S. Thoma in 1. Part. D. Th. Tom. 2.

catum, si nec etiam sanitatem suam posset desiderare, & petere.

Quartò, circa gratiam quae praevenit nos, quanam gratia esset, & in quo consisteret, videntur fuisse diuisi: nam cum vrgerentur à Catholicis super illa propositione, quod gratia praevenit omnia merita, & non ex merito datur, alioquin gratia non esset gratia, vel videtur circa explicationem huius gratiae fuisse diuisos. Nam quidam admittebant simpliciter illam propositionem quod gratia praevenit omnia merita, sed nomine gratiae non intelligebant id quod Catholica Ecclesia contra Pelagium, scil. aliquam Spiritus, & virtutis subministrationem nobis superadditam, sed id quod Pelagius nomine gratiae intellexit, scil. naturam cum libero arbitrio gratis acceptam à Deo, aut etiam legem, vel doctrinam, gratiam verò quam Ecclesia Catholica ponit, solum ad bona opera praevenire nos dicebant, non ad ipsa initia bonae voluntatis, ut ad desiderandum, & petendum. Unde Prosper in epist. cit. dicit quod *quidam eorum in tantum à Pelagianis semitis non declinant, ut gratiam quae omnia praevenit merita velint esse conditionem liberi arbitrij.* Ponebat ergo gratiam non in alio quam Pelagiani, scil. in ipso libero arbitrio gratis à Deo recepto in sui creatione: & sic dicebant quod Deus gratis vocatos dignos futuros sua electione praeuidebat; ubi ly gratis poterat applicari ad quodcumque beneficium gratis acceptum à Deo, ubi etiam continetur creatio naturae, praedicatio externa, lex, & alia similia, quae Pelagius non negabat. Hunc ergo modum gratiae, seu generalitatem gratuiti beneficii admittebant isti ad ipsam vocationem, & initia bonae voluntatis. Et Faustus lib. 1. de libero arbitrio cap. 12. tom. 4. bibliotheca, praevenientem gratiam solum reducit ad illuminationem, & propositionem boni, & praemiorum pollicitationem, quod totum ponebat Pelagius. Ad ipsa verò opera bona quae post ista initia sequuntur, & pertinent ad opera hominis sani, propriam & veram gratiam non negabant, ut August. refert lib. de predest. Sanct. cap. 1. quia in hoc eos discriminat à Pelagianis.

Alij verò ex istis Semipelagianis simpliciter negabant illam propositionem, dicendo non omnia merita praeveniri à gratia Dei, sed aliquod meritum praesupponere, id est aliquod bonum desiderium, seu initium bonae voluntatis, ut in eadem epist. Prosper refert. Et sic simpliciter dicit de Semipelagianis, quod *gratiam non praeuiam humanorum actuum sed commitem faciebant.*

Circa efficaciam, & sufficientiam auxilij etiam duo inferebant ex dicto principio, quae maxime efficaciam gratiae labefactant.

Primum est, non esse admittendam diuisionem in auxilium sufficiens, & efficax, eo modo quo ponebatur ab August. lib. de correct. & gratia cap. 12. videlicet, ut auxilium sufficiens dicatur id sine quo aliquis operari non potest; efficax verò id quo aliquis non nisi operans fit. Constat hoc ex cit. epist. Hilarij ad Aug. ubi de ipsis Massiliensibus inquit: *Deinde moleste ferunt ita diuidi gratiam, quae vel tunc primo homini data est, vel nunc omnibus detur, ut ille acceperit perseverantiam, non qua fieret ut perseveraret, sed sine qua per liberum arbitrium perseverare non possit; nunc verò sanctis in regnum per gratiam praedestinationis non tale adiutorium perseverantiae detur, sed tale, ut eis perseverantia ipsa donetur, non solum et sine isto dono perseverantes esse non possint, verum etiam ut per hoc donum non nisi perseverantes sint.* His verbis sanctitatis tuae ita moventur, ut dicant quendam hominibus desperationem exhiberi. Ecce quomodo negabant isti diuisionem, seu distinctionem illam gratiae, sicut assignabatur ab Aug. nec volebant auxilium efficax

H 3 esse

esse illud, quo homo non nisi operans, seu perseverans sit, sed dicebant quodcumque donum à Deo collatum etiam prædestinatis posse voluntate propria aut retineri, aut amitti, ut de ipsis refert Hilarius cit. epistola; Quod nunc, inquit, falsum esset, si verum putarent eam quosdam perseverantiam accepisse, ut nisi perseverantes esse non possint: sentit ergo Hilarius repugnare inter se doctrinam Aug. quæ dicit efficax auxilium esse illud quo non nisi operantes, seu perseverantes sumus, cum ea quæ dicebat ex voluntate nostra habere quod retineatur, vel amittatur, id est quod effectum habeat, vel illo careat, ut dicebant Massilienses: licet enim quocumque dono recepto, etiam perseverantia, possimus non perseverare in sensu diuiso, quia hanc ipsam potestatem donum illud supponit, & cõferuat; tamen in sensu composito propter infallibilitatem diuinæ voluntatis non stat oppositum, & in hoc sensu procedebant Massilienses, nec infallibilitatem dabant ex parte doni perseverantia. Quod etiam dixisse videtur Vitali, contra quem agit Aug. eplst. 107. quia dicebat, operari Deum quantum in ipso est ut velimus, cum nobis nota sunt eius eloquia, sed si eis acquiescere nolumus, nos ut operatio eius nihil nobis proficiat. Quod est ponere gratiam Dei, ut effectum habeat, seu efficax sit, dependere à nostra voluntate, quia per ipsam potest cassari, & euacuari. Et tamen subdit Aug. de ipso vitali: Quæ si dicis, profecto nostris orationibus contradicis. Quare in hoc valde contradicebant Massilienses sententiæ Aug. non acceptando definitionem eius, & distinctionem circa ista auxilia. Vnde si auxilium efficax est illud, quo aliquis non nisi operans aut perseverans sit, ut dicat August. ergo non potest per nostrum consensum superuenientem reddi efficax, aut per dissensum cassari, amitti, aut retineri; quia secundum hoc, illud donum Dei, ut ex parte Dei se tenet, erit tale, quod aliquando per illud redditur homo operans, aliquando non; ergo non est tale quod per illud non nisi operans sit, ut dicit Aug. Quod si dicatur efficax decretum Dei esse illud quod iam includit consensum nostræ voluntatis, saltem præuisum, & tale in quantum efficax non nisi operantem, aut perseverantem reddit. Contra est, quia hoc etiam non negabant Semipelagiani, non etiam asseriebant quodlibet Dei donum voluntate nostra aut retineri, aut amitti, & in quantum retinetur propria voluntate, clarum est quod non nisi volentem, & operantem reddit, quia propria voluntas volentem facit, si autem redditur non volens, est quia voluntate propria non retinetur, sed abiicitur, dum ergo retinetur non nisi volentem facit, consensus autem vel positus, vel præuisus qui superuenit illi dono est propria voluntas retinens; ergo si solum dicitur decretum efficax quod proprium consensum supponit, & tunc non nisi operantem reddit, solum erit efficax donum illud quod propria voluntate retinetur, & tali supposita voluntate retinente, non nisi operantem reddit, quod totum Massilienses non poterant negare.

7 Secundum dictum quod inferebant circa gratiam efficacem, erat, quod gratia Dei operabatur secundum præscientiam humanorum meritorum: operari autem de facto est esse efficacem, & consequenter ex præscientia humanorum meritorum efficaciam tribuebant gratia. Hoc autem constat ex verbis Prosperi in epistola cit. Hanc inquit, de humanis meritis præscientiam, secundum quam gratia vocantis operetur. (Ecce efficaciam vocationis, quæ est operari de facto secundum præscientiam desumptam) multo sibi rationabilius videntur asserere, cum ad earum nationum contemplationem venit, &c. In his autem meritis humanis præuisis etiam includebant tempora, & circumstantias sub quibus prævidebatur exortura bona voluntas, atque ita nomine meritorum non intelli-

bant solum merita strictè dicta, & rigorosa, sed etiam occasiones, & quidquid conducit ut voluntas effectum habeat, quod & Cassianum, unum ex Semipelagianis dixisse constat, tum ex collatione 17. c. 13. ubi ait Deum occasiones querere quibus humana segnetia torpore discusso non irrationabilis munificentia suæ largitas videatur, dum eam sub colore dat cuiusdam desiderij, ac laboris, & nihilominus gratia Dei gratuita perseveret, &c. Et lib. 12. de institutis, renunciantium, cap. 13. Quantumlibet ieiuniorum, vigiliarum, ac lectionis labor fuerit impensus, condignus esse non poterit, qui hac virtute sui laboris obtineat. Non ergo meritum rigorosum exigebant in his initiis, sed ut occasione tantummodo oblata Deus gratiam nobis conferret, ut ibi dicit, c. 14.

8 Quanquam etiam si ipsa fides petentis, & desiderium postulantis nonnullum meritum est, ut Aug. docet epist. 106. quomodo non etiam ipse consensus voluntatis in bonum præuisus à Deo meritum non erit in intentione, & præuisione sumptus, atque adeo id quod ut præscitum bonum est, & ut bonum prævidetur, cur Deum mouere non possit, ut intuitu illius det gratiam, omnino non video, de quo amplius infra dicitur in disp. 5. Itaque inter ea quæ vocabant humana merita Semipelagiani, etiam tempora & occasiones, aliasque circumstantias inclusisse, ex verbis S. Prosperi in ea epistola accipimus, quia cum ab ipsis quærebatur quomodo aliquorum nunc misereatur Deus, quorum ante non erat misertus, respondebant, præuisos à Domino credituros, & ad unamquamque gentem ita dispensata tempora ac ministeria magistrorum, ut exortura erat bonarum credulitas voluntatum. Et Hilarius in epist. cit. ad Aug. Cum dicitur eis, quare aliis, vel alicubi prædicetur vel non prædicetur, vel nunc prædicetur, quod aliquando ferè omnibus, sicut nunc aliquibus gentibus non prædicatum sit, dicunt id præscientia esse diuinæ, ut eo tempore, & ibi, & illis veritas annuntietur, vel annuntiaretur, quando & ubi prænunciabatur esse credenda.

9 Asseriebant ergo Semipelagiani observare Deum tempora & occasiones, quibus prævidet, bonam voluntatem in aliquo exorturam, ita ut ratione talis occasionis, & temporis, & voluntatis futuræ, duo consequerentur; alterum quod Deus intuitu illius daret gratiam suam, in quo maxime errabant Semipelagiani; alterum quod ratione illius voluntatis redderetur gratia, seu donum Dei efficax, seu effectum habens, cum de se posset cessari. Et utrumque hoc constat in ipsis principiis horum hæreticorum; primum quidem, quia semper insistebant Semipelagiani in illo principio, quod Deus non dat gratiam suam quibusdam præ aliis, nisi quia aliquid videt in voluntate vnus, quod non in voluntate alterius, alias esset Deus acceptor personarum, si existetibus æqualibus meritis, vel demeritis, vni daret, & alteri denegaret, & sic non omnia merita potest gratia Dei præuenire, sed aliqua supponere: cum autem non semper ista merita præcedant ante donationem gratiæ, ut patet in paruulis, quo exemplo Catholici urgebant Semipelagianos, quidam enim paruuli saluantur, alij non, cum tamen voluntas eorum æqualis sit, recurrebant ipsi ad merita præuisa sub conditione, scilicet quia Deus prævidet quid faceret iste si viveret, & ideo dat illi gratiam, quem prævidet bene operaturum; aliis negat. Et idem dicebant de adultis qui cum essent peccatores, quibusdam Euangelium prædicatur ut credant, aliis non, eo quod in quibusdam prævidetur bona voluntas exortura, in aliis non. Secundum etiam constat ex alio principio istorum hæreticorum, quia dicebant nullum esse donum Dei ex se efficax, ita ut per illud homo non nisi operans, aut perseverans sit, ut Aug. dicebat, sed quod omne donum

num Dei etiam prædestinatis datum, poterat propria voluntate retineri, aut amitti, cassari, aut efficax reddi, ut ex Hilario in epistola citata supra retulimus. Vnde consequens erat quod gratia non redderetur efficax nisi ex nostræ voluntatis acceptatione, seu consensu, ratione cuius retinetur donum Dei, seu effectum habet, quæ non haberet, si talis voluntas non adesset. Et sic gratia vocantis Dei operatur, & effectum habet, idè est quia tunc datur à Deo quando prævidetur ista voluntas consensura, & retentura donum Dei, non amissura; hæc enim omnia consequenter se habet. Vnde tandem ipsi non recipiebant decretum Dei, seu voluntatem efficacem præuenientem, & causantem omnia bona merita nostra, id enim dicebant tollere nostrum arbitrium, veluti fatalem quandam necessitatem, sed admittebant illud decretum supposita præscientia nostræ voluntatis vrentis dono, seu adiutorio gratiæ, ut docet Prosper, in fine illius epistolæ, tum ut ratione illius voluntatis præuisæ meritum aliquod haberetur in nobis intuitu cuius daretur gratia, tum ut ipsa gratia propria voluntate nostra retineretur seu effectum haberet, & efficax esset, non autem ex se talis esset ut amitti nostra voluntate non posset, ut Hilarius in epist. cit. refert. An verò & quomodo ista præscientia conditionatæ voluntatis nostræ sit scientia media quæ modò euulgatur ab aliquibus, & quomodo eam Semipelagiani admiserint præced. tomo disp. 20. latè à nobis tractatum est.

10 Ex his patet, errores Semipelagianorum in quibus partim conueniebant, partim recedebant à Pelagio in duo præcipua puncta resolui, alterum circa initium gratiæ, seu prædestinationis, alterum circa finem. Circa initium, ponèdo quod non datur nobis gratia Dei, nec prædestinatur aliquis, nisi supponendo aliquid bonæ voluntatis, aut præcedens in nobis, aut præuisum quod dabitur si tali, vel tali tempore gratiæ donum concedatur, aut saltem quod esset si aliquis viueret. Circa finem, ponendo quod nullum donum Dei, etiam perseverantia vltima est tale quod de se sit efficax, & non nisi operantem, vel perseverantem reddat hominè, sed quod est tale, quod propria voluntate potest retineri, vel amitti, cassari, aut effectum habere, & sic ut gratia efficax sit, & perseverantia effectum habeat, ex consensu, & acceptatione nostræ voluntatis pendet non iam habito quando gratia datur à Deo, quia nondum tunc datur operatio; ergo præuisa saltem sub conditione, scil. quod erit si tali tempore & occasione gratia detur.

11 De sufficienti gratia, quomodo eam agnouerint Semipelagiani, nõ oportet multa dicere, sufficit duo aduertere. Primum quod eam non distinguebant ab efficaci, sicut Aug. ut dictum est. Secundum quod aliquam sufficientem gratiam omnibus à Deo dari fatebantur, scil. legem, doctrinam Evangelij, & similia; specialem autem gratiam, vel vocationem quæ datur aliquibus ad bene operandum, id est ad opera perfecta & hominis sani, non negabant, sed quæ præueniret hominem etiam ad bene petendum, & desiderandum, & ad similia initia bonæ voluntatis non ponebant, nisi largè sumendo gratiam pro beneficio creationis, dando nobis naturam, legem, & c. Hoc totum constat ex dictis. Primum quidem, quia, ut ostendimus, dicebant nullum esse donum Dei, etiam in prædestinatis, quod non posset nostra voluntate retineri, aut amitti, & sic nullum ponebant quod ex natura sua, & prout à Deo descendit esset efficax, sed solum sufficiens. Secundum etiam iam ostendimus quomodo ipsi affirmauerint quod ad bene operandum non poteramus sine gratia Dei, ut Aug. de ipsi refert lib. de prædestin. SS. c. 1. intelligendo per bene operari, opera hominis sani, non initia imperfecta bonæ vo-

luntatis. Quod verò Deus omnibus proponeret salutis viam, & baptismum, & omnibus exhiberet paratam vitam æternam, qui voluerint ad fidem accedere, salui esse possint, aperte testatur ipsos dixisse S. Prosper in epistola sæpè cit.

Plura legi possunt de his Semipelagianis apud Suarez loco supra cit. id est, prolegomeno 5. de gratia c. 6. Vbi aduerte quod dub. 2. & 3. benè admittit Semipelagianos istos admisisse gratiam supernaturalem, quæ datur nobis intuitu bonæ illius voluntatis, quæ petimus & desideramus illam, dicebant enim illam esse gratiam qua sanatur natura, & consequimur remissionem peccatorum, & vitam æternam, quod totum supernaturale est, licet multa ex his donis solum propter laborem, & dispositionem naturalem tribui non negarent. Cæterum etiam hoc ipsum deberet affirmare de Pelagianis, & non negare eos non agnouisse supernaturalem gratiam, ut dicit prolegom. 9. c. 2. num. 8. ut supra contra ipsum ostendimus, quia etiam ponebant gratiam, quæ in nobis remissionem peccatorum facit, & perducit ad vitam æternam, quod tum vires creati arbitrij superare dicebant, idè est esse ex gratia Dei, utique supernaturali, quia ut dicebant, excedit vires creati arbitrij, & quia effectus illi omninò supernaturales sunt.

ARTICVLVS V.

Quid in hoc tempore controuertatur in hac parte?

1 Hæretici huius temporis Lutherus, & Calvinus duo præcipua antiqui Draconis capita, inter plures religionis, & fidei controuersias, quas turbare conati sunt, etiam hanc de gratia, & libero arbitrio, quæ in se semper obscurissima fuit, de nouo suscitauit. Et sicut olim (ut in fine 3. art. retulimus) quidam qui tempore Augustini gratiæ vires, & necessitatem negare non poterant, in aliud extremum declinarunt, negantes liberum arbitrium nostrum simul cum gratia stare posse, contra quos scripsit August. librum de gratia, & libero arbitrio, ita Nouatores istis gratiæ necessitatem, & efficaciam cum nostra libertate componere non valentes, aut nolentes in idem extremum declinarunt nostrum liberum arbitrium negantes. Non tamen est facile discernere, quo præcipue titulo, aut motiuo impulsæ sint ad negandum nostrum liberum arbitrium: non enim sicut aliqui hæretici, vel Philosophi antiqui liberum arbitrium negant, ex eo quod malè sentiant, aut de natura seminis, aut de prouidentia Dei, sicut Manichæi negabant liberum arbitrium, ut refert August. hæresi 46. & ante illos negauit Simon Magus ut supra art. 1. retulimus, & alij quos refert D. Thom. 3. contr. Gentil. cap. 93. & 94. Cæterum Nouatores duplici titulo videntur illud in nobis negare. Primò quia dicunt per peccatum fuisse extinctum in nobis liberum arbitrium, sicque illius carentiam ponunt esse effectum peccati. Secundò, quia existimant efficaciam voluntatis, & motionis diuinæ non stare cum nostra libertate, sed illam destruere. Qui duo tituli non satis cohærent inter se, nam efficacia prouidentia, & motionis diuinæ eadem est ante peccatum; & post, in Angelis & hominibus; hoc enim ex ipsa natura rei, & ex subiectione creatæ causæ ad increatam nascitur: ergo siue detur peccatum, siue non, cum semper permaneat ista efficacia diuinæ voluntatis, semper tolletur libertas nostra: malè ergo refertur in pœnam peccati. Nisi fortè dicatur quod Deus in pœnam peccati voluit tali efficacia concurrere cum nostra libertate, quod destruit illam, cum ante

H 4 pecca

peccatum alio suauiori modo concurreret: quod plane absurdissimum est, & ex hoc sequeretur quod talis concursus inductus in poenam peccati impediret ne ulterius aliquis peccaret, & ne liberaretur à peccato, & mereretur vitam aeternam, quia sublata libertate, nec meritum, nec demeritum manet. Unde gratis Christus mortuus esset, si à peccato non liberat nos, nec habemus meritum vitae aeternae, & coronam iustitiae; nec etiam infernus erit pro peccatis actualibus, sed solum poena pro originali, siquidem non peccat homo, sublata libertate in poenam peccati originalis.

2 Sed nobis opus non est laborare in conciliandis haeticorum dictis, qui à vera fide deficienter fluctuant omni vento doctrinae, nec cum Deo, nec cum Ecclesia, nec inter se pacem habentes. Et ideo non mirum quod isti Nouatores aliquando carentiam libertatis in nobis, & extinctionem liberi arbitrij dicant esse poenam peccati originalis, aliquando ex Dei efficacia, & infallibilitate provenire, immò ex naturali ipsa voluntatis nostrae dispositione, quā Lutherus *super Psalm. 5.* dixit ideo ex necessitate moueri, quia non agit suos motus, sed velut inanime quoddam illos recipit, ipsa passiuè tantum se habente. Quod videtur ad naturalem eius dispositionem reduci: quanquam & ad defectum virium ex peccato relictum posset ipse reducere quod voluntas passiuè se habeat nunc, & non actiuè in mouendo se, quasi carens actiuitate ista post peccatum. Quod tamē an haeticus iste diceret non scio. Sic tamen videntur accipisse aliqui ex eius discipulis, qui non ita rigidi, sed molliores Lutherani appellantur, vt ex Stapletonio refert P. Suarez *prolegomeno 5. cap. 7. num. 8.* Nam quidam ex eis admittunt mansisse in nobis libertatem pro malis operibus, quia negare non possunt multa à nobis peccata committi, quae sine libertate peccata non essent. In operibus autem bonis illam negant, maximè in prima conuersione ad Deum: in operibus autem iustitiae quae procedunt à voluntate iam iustificata, aliqui ex modernis Lutheranis aliquam libertatem agnoscunt, quia iam supponitur anima sanata à peccato. Quod est signum ipsos attribuerent carentiam liberatis, non ipsi naturae voluntatis nostrae, sed defectui virium per peccatum, cum antea Lutherus tam in actibus bonis, quàm malis amisisset hominem libertatem assereret, & haec opera indifferenter esse à Deo tam bona, quàm mala diceret, vt ex 36. art. Lutheri, ex damnatis à Leone X. deducitur. Similiter Calvinus, qui ex efficacia diuinæ voluntatis, praedestinationis, & praescientiae sustulit in nobis libertatem, atque adeò videbatur eam tollere absolutè, & non solum ratione peccati, quia efficacia diuinæ prouidentiae semper est eadem: tamē vt in homine seruaret libertatem ante peccatum, dixit quod de Adam ante peccatum non determinauit Deus quid esset acturus, & quod illa praescientia, qua vidit illius peccatum non abstulit eius libertatem, quia constituebat Calvinus illam praescientiam post peccatum ipsum factum ex humana libertate (quae est praescientia praesupponens quid agendū à nobis sit, nulla praecedente determinatione, seu decreto, aut permissione Dei, & est scientia media) si autem posuisset Calvinus illam praescientiam ante tale peccatum, vtique diceret eam laedere libertatem Adā. Ita explicata fuit sententia Caluini in 38. Congregatione habita in materia de Auxiliis coram summo Pontifice Paulo V.

3 Vt vt est de sensu, seu sententia Nouatorum: illud tamen nobis in praesenti valdè necessarium est, vt clarè aperiamus rationem, modūque negandi libertatem nostram à Caluino ob efficaciam diuinæ gratiae: eo quod importunè soleat Thomi-

stis obici hoc tempore eorum sententiam conuenire cum Caluiniano errore in ipsa efficacia antecedenti, & independenti à nostra voluntate in decretis diuinis: sicut etiam olim à Pelagianis obieiebatur Augustino quod sentiret cum Manichaeis in destruendo nostram libertatem, & admittendo peccatum originale: ipsi enim putabant sub nomine gratiae, quae inuito ac reluctanti cordi à Deo immittitur, fatum, & necessitatem quandam ab August. induci, vt constat ex lib. 2. contra duas epist. Pelagianorum c. 5. cuius verba *supra* retulimus art. 3. immò & Semipelagiani dicebant remoueri omnē industriam, tollique virtutes, si diuina constitutio humanas praueuiat voluntates, vt refert Prosper in epist. ad Aug. Hinc factum est vt Pelagiani diuulgarent sententiam August. de gratia, in errorem Manichaeorum diuertere, negando libertatem, & fatum nomine gratiae ponendo, cum tamen, vt ipse affirmat, non haberent Manichaei tales patronos sui erroris, quales in Pelagianis, praesertim in Iuliano, vt eius verba declarant lib. 1. in Iulianum cap. 1. Ostendam, inquit, quantis, & qualibus Ecclesia Catholica Doctoribus nomine Manichaeorum intolerabilem facere non cunctis iniuriam, & cum me appetis, in quos tela sacrilega iaculeris. Deinde monstrabo quod tu ipse sic adiuues Manichaeorum damnabilem, & nefandam impietatis errorem, vt nullum talem patronum nec in suis dilectoribus valeant inuenire. Sic in isto tempore efficacia decretorum Dei vt independens, & anteuerrens nostrum liberum consensum ita suggillatur, quod in Caluini errorem vergere diuulgatur: & ideo ostendendum est, quis fuerit error Caluini in hac parte, & quomodo potius ex opposita sententia id sequatur, vt ex hoc quid controuersiae hoc tempore circa hanc efficaciam diuinæ voluntatis sit, apertè cognoscatur.

4 Igitur Calvinus in hac parte, & Pelagius conueniunt in vna propositione, & per malas consequentias extremos errores deducunt, non perspecta vera efficacia diuinæ voluntatis, sed ambigua æquiocatione obscurantes. Propositio in qua conueniunt Pelagius, & Calvinus est, quod efficacia diuinæ voluntatis, & nostrae libertatis indifferentia & contingentia simul stare non possunt quia illa efficacia tanta est, vt ei volenti nihil resistere possit, huius mutabilitas tanta est, vt quocumqueposito, vel oblato, illud respuere, aut admittere possit. Hoc fundamento iacto ex praua intelligentia diuinæ efficaciae, intulerunt isti haetici duos extremos errores. Nam Pelagius videns secundum Scripturam, & experientiam liberum arbitrium non posse negari, sic discurret. Liberum arbitrium non est negandum, sed efficacia gratiae antecedens, & reluctanti cordi immissa fatum est necessitans, & libertatem tollens: ergo haec est neganda, & ita negabant dari gratiam quae reluctanti cordi immitteretur, & ex nolentibus faceret volentes, quae est gratia antecedens, & independentes à libero arbitrio ipsum conuertens, & effectum habens, licet non sine ipso. At verò Calvinus sumit pro principio oppositum eius, quod intulit, & negauit Pelagius, scilicet gratiae, & voluntatis diuinæ efficacia non est neganda ex se, & ex propria ratione, quia immutabilis, & infallibilis est in operando, ita vt ei resisti non possit, vt clamat Scriptura, & antecedenter ad bonum consensum voluntatis, quia reluctanti, & duro adhuc cordi datur, vt eius duritiam tollat, sicut dicit Aug. lib. de praedest. SS. c. 8. Sed haec non potest cum libertate nostra compati, quia ei non valet resistere, nec in manu eius est eam repellere, aut habere, ergo tollenda est nostra libertas. Itaque formaliter error Caluini in mala illatione, & consequentia stat, quae ex efficacia gratiae sinistrè intellecta, sinistram intulit consequentiam.

Nunc

5 Nunc videamus quomodo sinistrè intellexerit efficaciam Dei liberum arbitrium mouentis; intellexit enim efficaciam esse, vt creatum arbitrium absolute faceret quod Deus vult, non vt liberè faceret, quasi hoc etiam diuina efficacia velle nō possit, scilicet non solum vt homo faciat, sed etiam vt liberè faciat, & si vult efficaciter vt liberè faciat, non potest illa efficacia tollere, sed causare libertatem, quia quæcumque vult, facit. Et ideo Calvinus posuit decretum Dei necessitans nos, seu determinans vt necessariò faciamus, non vt liberè; & sic dixit Deum mouere physicè, seu efficienter voluntatem nostram, sicut mouetur lignum, aut equus, ita vt sit purè motum, non etiam excitatum. Qua etiam ratione gratiæ efficaciam intelligebant Pelagiani, quasi fatum quoddam necessitans, & ipsam voluntatem mutans, sicut mutatur linteum, aut vas aliquod, ideoque eam negabant. August. autem posuit semper hanc efficaciam immutantem & conuertentem voluntatem, non vt ipsa nolens operetur, sed vt volens fiat, sicut dicit in lib. 1. *contraduas epistolas Pelag. c. 19. Trahitur ergo miris modis vt velit ab illo qui nouit intus in ipsis hominum cordibus operari, non vt homines quod fieri nō potest, nolentes credant, sed vt volentes ex nolentibus fiant.* Constat autem quod esse volentem non est inuitum, & necessitatum, sed liberum esse, & ita si Deus operatur, vt homo volens sit, etiam vt liberè velit operatur, non autem libertatem bonam supponendo, aut præuidendo eam seruat, sed conferendo, & operando: *Voluntas enim humana non libertate consequitur gratiam, sed gratia libertatem*, vt ait Aug. lib. de corrept. & gratia c. 8. *nec bonam voluntatem cuiusque inuenit in corde, sed facit*, vt inquit, in epist. 107. ad Vitalem. Et hoc ideo, quia si voluntas, & anima se mouendo non lædit libertatem suam, sed potius constituit, ita Deus qui est principium animæ, & voluntatis, motu suo non lædit eam, sed dat, quia magis habet in potestate sua hominum voluntates, quàm ipsi suas, vt dicit Aug. eodem libro c. 14. & iterum in lib. de gratia, & libero arbitrio c. 21. *Agit Deus omnipotens in cordibus hominum, etiam motum voluntatis eorum, vt per eos agat, quod per eos agere ipse voluerit.*

6 Et hoc est punctum totius æquiocationis, & causa hallucinationis in hac materia, non solum apud hæreticos, qui efficaciam diuinam non intelligentes præcipitati sunt in errores fidei, aut negando libertatem nostram, aut efficaciam diuinæ voluntatis tollentes, sed etiam apud plures Catholicos, qui sub eadem difficultate anxii, nec nisi vno modo hanc efficaciam accipientes, ipsam efficaciam diuinam sic moderantur, vt non antecederet ex se, & ex vi suæ causalitatis independentis à libertate nostra efficaciam habeat, sed ex præsuppositione nostræ voluntatis, & consensus præuisi, quasi ipsa efficacia, & virtus Dei non possit esse causa actus liberi in singulari, & determinatè, nisi circa ipsum quod præuidet à voluntate faciendum, cum tamen hoc ipsum quod præuidet faciendum à voluntate, ex aliqua causa priori ei conueniat, cum ipsa sit causa secunda, & de se potentialis, & indifferens. Vnde influxus, & motio Dei non habebit ab omnipotentia sua, quod habet à voluntate nostra, & consensu eius præuiso, & sic influxus, seu motio Dei, prout ab ipso procedit, & ab omnipotentia sua talis erit, quod voluntate nostra aut impediri potest, aut effectum habere, sicut dicebant Massilienses apud Hilarium *ubi supra*. Et Aug. apertissimis verbis tradidit lib. de corrept. & gratia c. 14. *Deo, inquit, volenti saluum facere, nullum humanū resistit arbitrium, sic enim velle, vel nolle in volentis, aut nolentis est potestate, vt diuinam voluntatem non impediat, nec superet potestatem.* Si ergo ideo non resistit, quia non impedit diuinam voluntatem, aut potesta-

tem, ex ipsa potestate diuina, efficacia ista sumitur, non ex nostræ voluntatis consensu præuiso, aut ex contemperantia & congruitate cum eo. Et ad eandem omnipotentiam Dei efficaciam voluntatis eius reducit Aug. in Enchiridio. c. 95.

Duplex ergo efficacia in Deo respectu nostri liberi actus potest considerari. Vna quæ solum velit determinatum actum, sed non eius modum libertatis. Alia quæ & substantiam actus, & modum libertatis velit, & causet. Efficacia prima, sine indifferentia data, & non causans, aut non curans de libertate, sed solum de determinatione actus tolleretur libertatem, quia per modum naturæ, & necessitatis daretur; & de hac plures Patres loquuntur, qui eam omnino negant, & respuunt, sicut negant fatum pro libero arbitrio. Ita Cyrillus, lib. 4. in Iulianum, ubi inquit; *Si Deus ineffabili quadam, & diuina virtute, & efficacia usus mutasset singulorum mentem ad benè agendum, & indidisset postea bonum, à quo agerrimè discedere posset, & non sponte, ultra non esset fructus mētis, &c.* Vbi loquitur de efficacia aliqua particulari, qua non sponte quis adhereret bono, quæ est efficacia naturaliter agens, non libertatem causans. Et similiter Damascenus in lib. 2. fidei c. 3. dicit quod *Omnia Deus præno-scit, sed non omnia prædeterminat, nec enim vim affert virtuti.* Quod intelligitur de prædeterminatione necessitante, & non causante interiorem libertatem, vt exponit S. Thom. 3. contra gent. c. 90. in fine & 1. p. q. 23. art. 1. ad 1. Et sic etiam D. Thom. agnoscit prædeterminationem aliquam, seu efficaciam Dei necessitantem, & libertatem destruentem, sed nō omnem, aliàs non exponeret Damasc. de illa tantum, sed vniuersaliter loqui diceret.

In quo autem consistat, aut quomodo se habeat 8 ista efficacia, quæ sic naturaliter ageret voluntatem, vt libertatem prosterneret, eleganter expressit S. Th. cit. loco 3. contra gent. c. 88. ubi inquit: *Si voluntas mouetur ab exteriori principio, erit violentus motus: dico autem moueri ab extrinseco principio, quod mouet per modum agentis, & non per modum finis: violentum autem voluntario repugnat; impossibile est ergo quod voluntas moueatur à principio extrinseco, quasi ab agente, sed oportet quod omnis motus voluntatis ab interiori procedat, nulla autē substantia creata coniungitur animæ intellectuali, quārum ad sua interiora, nisi solus Deus, qui solus est causa ipsius, & sustinet eam in esse; à solo ergo Deo potest motus voluntarius causari.* Et infra. *Illud solum agens potest causare motum voluntatis absque violentia, quod causat principium intrinsecum huius motus, quod est potentia ipsa voluntatis, hoc autem est Deus qui animā solus creat.* Et hac ratione ipse D. T. 1. part. qu. 83. art. 1. ad 3. ostendit quod liberum arbitrium ita mouet se, quod etiam moueri potest ab extrinseco, à quo habet esse, & causatur, licet enim voluntas sit causa sui motus, non tamē est causa prima, & ideo priorem causam se mouentem supponere potest, qua non lædit, sed causat motus voluntarios sicut & naturalis. Et ita apud D. Thom. non quilibet extrinsecus motus, cuius motio non est in manu nostra, tollit libertatem, sed quando extrinsecus motor causat internum esse animæ, & voluntatis, magis causat inclinationē voluntariam, quàm ipsa anima, quia est sicut anima animæ. Et licet non sit in manu nostra vt extet illa motio à Deo, est tamen ita causatiua nostræ intimæ voluntatis, quod dat nobis vt actus sit in manu nostra, & ita habet pro effectū ponere actum in manu nostra, quia causat ipsum modum libertatis. Quod ipsum confirmat eadem 1. par. qu. 105. art. 4. ubi ostendit, *Deum mouere voluntatem non solum per modum obiecti, sed etiam interius inclinando, etsi enim sit principium extrinsecum, est tamen causa intrinseca vt voluntas se moueat.* Quam rationē etiam agnouit August. lib.

lib. de corrept. & gratia, c. 14. dum dicit, habere Deum inclinandum humanorum cordium quod voluerit omnipotentissimam potestatem. Et habere Deum voluntates hominum in manu sua magis, quam ipsi suas.

9 Quare illa efficacia dicitur arctare, & cogere voluntatem, quæ ita ab extrinseco moueret voluntatem, & determinaret, quod purè per modum agentis non excitantis etiam eam moueret, hoc enim esset agere illam per modum naturæ, si autem ageret per modum etiam propositionis, finis, qui est internum mouens liberi arbitrij, & vtrumque causaret in nobis, tam motionem excitatiuam finis, quam eà suppositâ, interiorem entitatem motus voluntatis, in eam influendo inclinationem cum suo modo libertatis, non tolleretur libertatem.

10 Et hic est secundus modus efficaciarum diuinæ, qui tangit voluntatem interiùs intrâ ipsam operando, & mouendo inclinationem eius, aut entitatem inclinationis, vt etiam modum libertatis causet, & motionem, seu excitationem ex parte obiecti (saltem quoad entitatem, vt in materiali peccati.) Et talis efficacia fundat suam infallibilitatem in vniuersalissima ratione operandi, quia operatur omnia, tam quoad modum, quam quoad substantiâ; omnia enim participantur à Deo. Si autem operatur omnia (sicut Scriptura dicit, Isai. 26. Omnia opera nostra operatus es in nobis, Domine, & Apost. ad Ephes. 1. Qui operatur omnia secundum consiliū voluntatis suæ) vtique sequitur, & quod talis efficacia sit inuitabilis, & quod non lædat libertatem. Est inuitabilis, quia si omnia operatur, nihil potest effugere manum eius, siquidem ipsum etiam effugere ab eo esset, & sic non effugeret ipsum. Non est autem læsua libertatis cum efficaciter vult aliquid fieri, quia vult etiam efficaciter vt fiat tali modo, id est liberè, quia etiam ipsum liberè fieri ab ipso est, à quo sunt omnia.

11 Hanc autem efficaciam vniuersalitate sua tangentem voluntatem, & non destruente libertatem, & quæ ex vniuersalitate dandi omnia infallibilitatem habeat, non ex coactione, & coarctatione causarum inferiorum, agnouerunt D. Aug. Et Thom. Ille quidem, quia dicit lib. 1. contra duas epistolas Pelagianorum, c. 19. quod Operatur Deus in cordibus hominum, non vt nolentes credant, sed vt volentes ex nolentibus fiant; non fiunt autem volentes, nisi liberè. Dicit in lib. de prædestinatione Sanctorum c. 10. Cum Deus vult fieri quod non nisi volentibus hominibus oportet fieri, inclinari eorum corda vt hoc velint, eo scilicet inclinante qui in nobis mirabili, & ineffabili modo operatur & velle. Dicit in lib. de gratia, & libero arbitrio, c. 11. Vtrumque verum est, quia & sua voluntate venerunt, & eorum spiritum Dominus suscitauit: agit enim omnipotens Deus in cordibus hominum, etiam motum voluntatis eorum, vt per eos agat quod per eos agere ipse voluerit. Et infra; Satis manifestatur operari Deum in cordibus hominum ad inclinandas eorum voluntates quocumque voluerit, &c. Dicit in lib. de corrept. & gratia c. 2. Aguntur, vt agant, non vt nihil agant, quod etiam in serm. 13. de verbis Apostoli explicat dicens: Dicit mihi aliquis; Ergo agimur, non agimus. Respondeo, immò agis, & ageris, & tunc benè agis, si ab illo agaris. Spiritus enim Dei qui te agit, agentibus adiutor est. Dicit in eodem lib. de corrept. & gratia c. 14. Nisi fortè quando Deus voluit regnum dare Sauti, sic erat in potestate Israëlitarum subdere se memorato viro, siue non subdere, quod vtique in eorum erat propositum voluntate, vt etiam duo valerent resistere: Qui tamen hoc non fecit, nisi per ipsorum hominum voluntates, habens sine dubio humanorum cordium quod placeret inclinandum omnipotentissimam potestatem. Et infra. Intus egit, corda tenuit, corda mouit, eosque voluntatibus eorum, quas ipse in illis operatus est, traxit. Si ergo cum voluerit Deus reges in

terra constituere, magis habet in potestate voluntates hominum, quam ipsi suas, &c. Quibus locis manifestè Aug. ponit operationem, & efficaciam Dei sic ad aliquid determinatum inclinare corda hominum, & intus operari, quod etiam ipsam rationem voluntarij, seu liberi in eis faciat, inclinando per omnipotentiam suam, cui resisti non potest, vt voluntariè, & liberè velint, & non solum vt substantiam actus agant. Et sic ex efficacia, prout omnipotente, & operante omnia descendit quod non tollat libertatem, sed potius quod det, quia dat omnia, & dando nil lædit, & tamen infallibilis est, quia omne quod est, ab eo est.

Similiter D. Thom. talem efficaciam ponit, non tollentem, sed dantem omnia, & ideo infallibilem agnoscit, & non læ suam cōtingentiæ, aut libertatis, vt patet 1. par. q. 19. art. 8. Melius dicendum, inquit, quod hoc contingit propter efficaciam diuinæ voluntatis: cum enim aliqua causa efficax fuerit ad agendum, effectus consequitur causam, non tantum secundum id quod fit, sed etiam secundum modum fiendi, vel essendi. Cum igitur voluntas diuina efficacissima sit, non solum sequitur quod fiant ea quæ Deus vult fieri. (Ecce) determinatum volitum, scilicet id quod Deus vult fieri sed etiam quod eo modo fiant quo Deus vult ea fieri vult autem quadam fieri necessario, quadam contingenter, vt sit ordo in rebus ad complementum vniuersi; & ideo quibusdam aptauit causas necessarias, quæ deficere non possunt, quibusdam contingentes, & defectibiles. (Ecce modum contingentiæ, seu libertatis causatum ex efficacia Dei.) & solut. ad 2. Ex hoc ipso quod nihil voluntati diuinæ resistit, sequitur quod non solum fiant ea quæ Deus vult fieri, sed quod fiant contingenter, vel necessario, quia sic vult fieri. Quæ verba valde notanda sunt, quia ad viuum exprimunt hanc efficaciam irresistibilem, & tamen datiuam libertatis, quia est efficacia dans omnia, etiam ipsum modum libertatis. Vnde id quod maximè videbatur posse nocere libertati, scilicet quod non possit Deo resisti, est id quod maximè eam firmat, quia si ei non potest resisti, & ipse vult vt nos liberè operemur, & propter suam vniuersalitatem, etiam libertatem dat, firmum & certum est quod liberè operabimur. Et similiter dici in 3. contra gentiles. c. 94. circa finem. Prouidentia diuina per se, est causa quod hic effectus contingenter proueniat, & hoc cassari non potest. Ex quo patet, quod hæc conditionalis non est vera; Si Deus prouidit hoc futurum. (Ecce aliquid determinatum ex parte effectus) hoc erit, sed sic erit, sicut Deus prouidit illud esse futurum, prouidit autem illud esse futurum contingenter: sequitur ergo infallibiliter quod erit contingenter, non necessario. Et de eodem videri potest hac 1. par. q. 22. art. 4. & aliis multis locis, quæ in progressu agentes de efficacia diuinorum decretorum afferemus.

Quare colligentes hos duos modos efficaciarum diuinæ tangentis immediatè voluntatem, & inuitabiliter agentis illam, dicimus quod vnus modus efficaciarum inuitabilis est, tollendo, alius dando. Inuitabilitas tollens est, quæ coarctat causas inferiores, vincendo earum contingentiam, & assecutando, seu stabiliendo id quod vult per ablationem contingentiarum, & potestatis impeditiuarum, & impositionem necessitatis. Et hic est proprius modus causæ particularis, cui alia causa opponi potest, & impedire, seu frustrare eius conatum; ideoque talis causa, ad assecurandum effectum suum, oportet quod potestatem alterius causæ impeditiuam sui vincat, & sternat. Efficacia autem causæ vniuersalissimæ, & primæ est talis quod nulla causa ei opponi potest, aut impedire, quia potius omnia ab ipsa deriuantur, & accipiunt. Vnde eius infallibilitas & assecratio efficacis decreti, non est in vincendo potestatem causæ contin

contingentis, aut impediens, sed in dando, & deriuando à se id quod vult fieri, & ipsam contingentiam, & potestatem impediens præbendo, cum qua vult aliquid fieri. Et quia debilitas nostri intellectus non valet ad plenum percipere tam vniuersalissimum modum agendi, sed modum particularis causæ, & efficaciam, ideo facile deuiamus in hac difficultate ex illo particulari modo efficaciam, quem solum imaginamur; nec inuenimus quomodo tangat Deus libertatem infallibiliter ut vnum determinatè fiat, & non destruat libertatem.

14 Igitur Calvinus in hac æquiocatione laborauit, sicut & alij, qui ex efficacia diuinæ voluntatis intulerunt negationem liberi arbitrij, quia considerauit efficaciam diuinam tantum ut agentem, & determinantem ad vnum, non causando libertatem, neque interiorum modum voluntarium in operando, sed prorsus necessitantem, & tollentem in nobis contingentiam ut in se sit infallibilis; & inde intulit non minus esse opus Dei proditionem Iudæ, quam conuersionem Pauli, si vtrumque est necessarium, nec distinxit de malitia peccati, & de entitate, quia nullam rationem malitiæ agnouit, sublata libertate. Et vno verbo necessitatem consequentiam tantum, & ex suppositione iudicauit esse necessitatem absolutam; ex eo enim quod est necessaria consequentia, si Deus vult hoc, id fiet, iudicauit necessitatem in ipso consequente, ita quod causa per quam id fit, maneat necessitata; quasi hæc consequentia non sit etiam necessaria; si video Petrum currentem, ille currit, & tamen ille non currit necessariò. Vnde ita posuit Deum mouere liberum arbitrium, quod purè esset motum Deo, non excitatum, gratiamque excitantem negauit, non purè mouentem. Et hoc constat, tum quia ipse Calvinus sic explicauit moueri voluntatem à Deo, sicut equus à fessore, quem utique purè mouet freno, vel calcari, non suasionem: tum etiam constat ex discipulo Caluini, Beza, qui ipsum in hac parte secutus fuit, dicit enim in *summa Christianissimi pag. 188. Omnia necessariò ex Dei immutabili decreto euenire, & secundum illud Iudas necessariò prodidit Christum, & Herodes, & Pilatus necessariò condemnarunt*: tum etiam quia, ut refert Franciscus Vulcanus Episcopus Metensis *opusc. contra dogmata Caluini pag. 63. Inde manauit error Caluini, quod falsum axioma sibi constituit, ut omnia fieri necessariò, nihil contingenter euenire confermet. Quare error Caluini non fuit in admittenda efficacia gratiæ ex natura sua, & antecederet ad nostrum liberum consensum, sed in tali efficacia, scilicet necessitante nostram libertatem, & ita eam agente, quod non causet, nec curet de libertate eius saluanda. Et talem vim mouentem posuisse Calvinum etiam fatetur P. Becanus *tomo 5. opusculorum opusc. 3. c. 1. ubi refert dixisse Calvinum, quod Deus per se occulta quadam ut incitat, mouet necessitat miseris mortales ad omnia flagitiorum genera perpetranda. Et conformiter ad hoc dixit in Congregatione 37. in materia de Auxiliis coram summo Pontifice habita, Archiepiscopus Armachanus vir excellenter doctus, quod errauit Calvinus constituendo efficaciam gratiæ necessitatem voluntatem. Et in Congregatione 38. seq. apertum est coram summo Pontifice, & explicatum fundamentum huius erroris apud Calvinum, quia scilicet negauit excitantem gratiam, & solum posuit gratiam mouentem sine excitatione; cum tamen Ecclesia Catholica per Concil. Trident. sess. 6. can. 4. dicat, liberum arbitrium à Deo esse motum, & excitatum: Vbi nec solam motionem posuit, sicut Calvinus, nec solam excitationem sicut Pelagius, sed vtramque. Sublata autem excitatione, motio superueniens solum erit motio per modum naturæ, sicut mouetur lapis, aut equus. Et ideo D. Thom. 3. contra**

gent. c. 88. supra cit. dixit, quod illud quod moueret voluntatem per modum agentis, & non per modum finis, moueret violentè, & tanquam principium extrinsecum. Motio autem per modum finis est motio excitatiua, & moralis: Ergo in eo maxime errauit Calvinus, quod solum agnouit efficaciam gratiæ, ut purè agentem, & mouentem, sicque necessitantem, & per modum naturæ tangentem voluntatem, non excitantem, aut supposita excitatione mouentem, & ipsum modum libertatis causantem. Vnde quando dixit quod totum agebat gratia in nostra conuersione, id dixit, quia ita nos agi à gratia putauit, quod nihil ageremus, quod est hæreticum. Catholici autem cum Aug. ita totum Deo tribuunt, quod nos agere, & laborare docent, sed ex gratia.

Diuisio Catholicorum in reiciendo dogmate Caluini.

15 Excepit Nouatorum errores singularis cōtrouersia inter Catholicos Auctores, quæ etiam coram Sede Apostolica prolixè agitata est circa componendam hanc efficaciam diuinæ voluntatis, & gratiæ cum libertate nostra. Nam cum totus error Caluini, & Nouatorum consistat in illa consequentia *supra* facta, qua ex efficacia diuinæ voluntatis ex se, & antecederet ad nostrum liberum consensum, intulit nostram voluntatem tolli, quia non est in manu nostra aut habere tale auxilium antequam detur, aut habitum à se excutere, diuisi sunt Catholici Authores in hac consequentia enodanda, & in hoc errore superando. Quidam enim sequentes D. Thom. & Aug. vestigia simpliciter concedunt efficaciam decreti diuini esse ex se, & prout descendit ab omnipotentia Dei, non autem ex præsuppositione nostri consensus infallibilem, & efficacem, ita quod consensus non est quid præsuppositum, sed quid consecutum, & effectum ex ipsa efficacia Dei; sed tamen ex hoc ipso quod illa efficacia est summa, & vniuersalissima operans omnia, & ei nihil potest resistere, ex hoc ipso nascitur libertas in nobis, ut explicatum est, quia non solum dat substantiam, & determinationem actus, sed etiam modum libertatis eius. Et sic isti Authores contradicunt Caluino, & in antecedenti, & in consequenti, & in ipsa consequentia, seu illatione. Vnde è diametro, & per omnia ei opponuntur. In antecedenti quidem, quia efficaciam diuinæ voluntatis ponunt ex sua natura, & antecederet ad consensum nostrum influentem in voluntatem, & determinantem speciem, & indiuiduationem actus, & agentem in ipsam, sed non purè agentem, & mouentem, sed etiam excitantem, atque aded ita vniuersalem in operando quod etiam ipsum modum libertatis causat, & intendit, quia omnia causat, & dat, & sic quia nihil ei resistit, ideo est causa non solum ut actus fiat, sed ut liberè fiat, quia ipsum fieri liberè intendit, & vult, ut S. Thom. docet *1. par. qu. 19. art. 8. ad 2.* In consequente contradicunt Caluino, quia farentur libertatem in nobis, & eam optimè compatì cum efficacia diuina excitante, & mouente, non mouente tantum. In consequentia verò opponuntur Caluino, quia dicunt ex sola efficacia diuina non inferri ablationem libertatis quantumcumque sit antecedens, & independens à nostro consensu; quia deriuatur à Deo qui est prior, & indepēdens à consensu creato in agendo liberum actum, etiam ut liberum, sed tamen efficacia, si esset purè mouens, & per modum naturæ agens, & determinans, tolleretur libertatem, sed efficacia mouens & excitans, seu determinans substantiam actus, & causans modum ipsum libertatis, non tollit, sed perficit libertatem, & sic liberum arbitrium motum, & excitatum, & non purè motum,

motum, potest dissentire. Et hi sunt Thomistæ per omnia oppositi Caluino. Et quæcumque propositiones Caluini illis attribuantur, sine vlllo sunt fundamento, & ex mera hallucinatione efficaciarum antecedentis proueniunt, vt statim referemus, quia etsi vtrique ponant efficaciam antecedentem, tamen Caluinus vt purè mouentem, & non excitantem, nec causantem modum libertatis: Thomistæ vt mouentem, & excitantem cum Concilio Trident. & causantem libertatem.

16 At verò alij Authores opponuntur quidem Caluino in asserenda libertate humana, sed in efficacia ipsa diuina explicanda, & in ipsa illatione, seu consequentia Caluini reprobanda, multò aliter procedunt: existimant enim omnem efficaciam antecedentem, & independentem à consensu nostro præuiso ipsi voluntati datam, eamque determinantem, & mouentem, tollere nostram libertatem, & indifferentiam, eo quod pugnare inter se videntur ista duo, scil. quod efficacia diuina sit determinata ad vnum, & ex natura sua sit infallibilis, & inuitabilis, nec in manu nostra sit eam habere, vel repellere, & tamen ex alia parte relinquat indeterminationem, & contingentiam, qua libertas nostra possit oppositum facere, quia si potest oppositum facere, & contingentiam habet faciendi, & non faciendi: potest ergo frustrare illam efficaciam Dei, aut si non potest, manet sine potentia ad oppositum, & consequenter incontingens. Quare quocumque modo sumpta efficacia illa Dei inuitabilis, si ex natura sua vt antecedit nostrum consensum factiua, & determinatiua est eius, dicunt destruere libertatis indifferentiam, & sic errorem Caluini sequi ex quacumque efficaci antecedentia diuinæ voluntatis, quæ ex se, & antecedenter ad nostrum consensum determinatiua est eius. Vnde consequenter dicunt, quod concessio antecedente Caluini, illatio, & consequentia eius est bona, scil. quod destruitur libertas nostra, si semel efficacia illa ita antecedens, & ex natura sua determinatiua consensus nostri admittitur. Vnde etsi opponantur Caluino in negatione consequentis, scil. in affirmanda nostra libertate, tamen in eius illatione, & consequentia ex suppositione antecedentis, quod assumit, scil. quod detur gratia antecedens ex natura sua efficax, minus Caluino opponuntur. Et hanc etiam sequuntur Authores ex Societate Iesu communiter, de quibus infra disp. 5.

17 Sed quia efficacia infallibilis diuinæ voluntatis, & prouidentia, quæ in sui dispositione non fallitur, negari non potest salua fide, cum hoc passim clamet Scriptura, vt Isai. 14. *Dominus exercituum decreuit, & quis poterit infirmare, & manus eius extenta, & quis aueriet illam?* Et c. 46. *Consilium meum stabit, & omnis voluntas mea fiet*, Esther 13. *Non est qui possit tue resistere voluntati, si decreueris saluare Israël*, & Roman. 9. *Voluntati eius quis resistit?* Qua ratione dixit Aug. lib. de corrept. & gratia, c. 14. *Deo volenti saluum facere, nullum humanum resistit arbitrium*, & multa alia quæ supra retulimus; cum hæc inquam omninò negari catholicè non possint, idè isti Authores distinguunt duplex genus efficaciarum, & infallibilium decretorum; quædam rigorosa quæ determinationem ponunt in voluntatem antecedenter, & independentem ab eius consensu, præsupposito, & præuiso, sed causato per tale decretum, & quia decretum causat illum, dicitur independens ab illo, licet non sit sine illo, quia est effectus eius. Et talia decreta Thomistæ ponunt; alia benigna, quæ ipsi admittunt, quæ non determinationem, sed indifferentiam, seu indifferentem concursum, & motionem tribuunt voluntati, habent tamen congruitatem, & coaptationem moralem cum ipsa voluntate talem, & tali tem-

pore, & occasione datam, in qua præuidetur voluntas consensura, si sic, vel sic præueniatur. Et quia nulla est voluntas, nullum momentum, vel occasio in qua non possit tali modo præueniri, & adiuuari voluntas, quo præuideatur à Deo de facto consensura, si alio, vel alio modo vocetur, idè ex tali præuisione datus concursus indifferens, & moraliter tantum per cogitationem mouens, & benignum discretum est ex se, vt pote non efficienter, sed moraliter determinans, & infallibile ex præuisione adiuncta eius quod faciat in tali occasione liberum arbitrium cum tali, vel tali adminiculo. Et sic S. Thom. qu. 6. de verit. art. 3. ad hoc videtur reducere certitudinem prædestinationis, quod circa prædestinatum tot adminicula præparat, quod vel non cadat, vel si ceciderit, resurgat. Quasi inter hæc adminicula non sit principaliter computanda efficacia causalitatis Dei ex se. Quare hæc sententia, & via defendendi efficaciam infallibilem Dei nisi innitatur scientiæ mediæ, quæ præuidet quid voluntas de se factura sit antecedenter ad omne decretum Dei causatiuum illius, omninò corrui.

Et sic ad antecedens assumptum à Caluino: Gratia est ex se, & antecedenter efficax ad consensum nostrum, distinguunt, ex se est efficax, id est ex natura sua, prout præcisè descendit ab omnipotentia Dei, nego; prout etiam descendit à præscientia præsupponente nostrum consensum, non efficienter sed moraliter inclinante, transeat: sic enim cum Deus præsciens per scientiam necessariam, & non fundatam in aliquo decreto, & causalitate sua quid voluntas nostra factura sit in tali, vel tali occasione, si tali, vel tali concursu indifferente, & moraliter mouente præueniatur, afferaturque à Deo concursus simultaneous generalis, decernat, & velit dare illud auxilium, & gratiam cum qua præuidet consensuram voluntatem, tale decretum erit infallibile, & efficax, non tollet libertatem, quia de se solum importat indifferentiam, ex præsuppositione autem consensus præuisi sic à Deo ante omne decretum suum determinatiuum nostræ voluntatis, infallibile. Et sic soluunt consequentiam erroris Caluini, aliter statuendo efficaciam diuinam, scil. non ex natura causalitatis, & antecedentiæ ortam, sed ex præuisione consensus nostri futuri certam & securam.

Vnde in 38. Congregatione habita coram Paulo V. in materia de Auxiliis, cum legeretur scriptum quindecim capitula continens à prædecessore suo Clemente VIII. euulgatum circa mentem S. Aug. in eadem materia dixit P. Vastida, se prædictum scriptum communicasse cum Patribus à Societate per diuersas provincias dispersis, cum Hispanis, Italis, Gallis, &c. & ex omnium sententia proponere hanc conclusionem, scil. se admittere, omnia quæ in prædicto scripto continentur esse de mente S. Aug. id est, esse doctrinam conformem doctrinæ S. Aug. siue formalibus, siue æquivalentibus verbis, excepto vno tantum capitulo 5. & exceptis quæ in illo dicuntur. Capitulum autem quintum, vt ibi relatum est, sic se habebat: *Gratia habet suam efficaciam ab omnipotentia Dei, & à dominio quod sua diuina maiestas habet in voluntates hominum, sicut & in cætera omnia, quæ sub cælo sunt secundum S. Aug.* Circa quod caput dicebat Vastida, non esse sententiam S. Aug. nec ex inductis testimoniis probari. Primò quia inducta testimonia non dicunt gratiam esse efficacem ex Dei omnipotentia, vel ex dominio quod habet in liberum hominis arbitrium. Secundò, quia illud verbum *sicut & in cætera omnia, quæ sub cælo sunt*, admitti non poterat; denotat enim ita Deum habere dominium in voluntates hominum, sicut & in cætera omnia, quæ sub cælo sunt, & ex consequenti sicut in cætera omnia ita habet dominium, vt omnia illa verat quocumque voluerit

voluerit sine libertate eorum, ita habeat dominium in hominum voluntates, ut & vertat quocumque ipse voluerit absque eorum libertate. Ex quibus verbis constat quomodo Authores huius sententiæ in hoc præcipue faciant vim, quod efficacia decreti eiusque infallibilitas non debeat deriuari ab omnipotentia Dei, & potestate immutatiua voluntatis nostræ ut dominio quod habet in eam, sed ex præsuppositione præuisa consensus nostri. Atque ita omnipotentia Dei solum habet posse præcipere, suadere, & rogare nostram voluntatem, non intimè immutare. Et tamen certum est S. Augustinum ex omnipotentia, & dominio Dei super nostras voluntates efficaciam gratia deducere, non quia agit nos ut agamur tantum, sed quia agit ut agamus. Nec ex eo quod Deus supremum habeat dominium in nostras voluntates, sicut & in cætera quæ sub cælo sunt, *ly sicut*, significat quod sine nostra libertate habet illud dominium, sicut in alias res, nam etiam dicitur Prou. 21. *Sicut diuisiones aquarum, ita cor Regis in manu Dei, quocumque voluerit, inclinabit illud*: Esse enim in manu Dei significat esse in potestate, & dominio eius; esse autem sicut diuisiones aquarum, quæ deriuantur quocumque hortulanus voluerit, non significat cor Regis esse sine libertate, sicut aqua est sine libertate, sed summam potestatem, & dominium Dei super voluntatem liberam, sicut super aquam, qui diuidit illam: ergo neque vllum est inconueniens quod diceret Pontifex, Deum habere dominium in voluntatem nostram, sicut in omnia quæ sub cælo sunt, cum voluntas nostra sit creatura Dei, non minùs ei subiecta, quàm cæteræ res, licet istæ non participant à Deo libertatem, sicut illa.

20 Quod verò ex omnipotentia & dominio Dei in corda nostra posuerit Aug. efficaciam gratiæ, constat imprimis ex *Enchiridio* cap. 95. ubi inquit; *Tunc videbitur quàm certa, immutabilis, & efficacissima sit voluntas Dei, quàm multa possit, & non velit, nihil autem velit quod non possit* (Ecce omne volitum & potentia Dei) *quamque sit verum quod in Psalmo canitur, Deus autem noster in cælo, & in terra, omnia quaecumque voluit fecit. Quod utique non est verum, si aliqua voluit, & non fecit. Et quod est indignus, ideo non fecit, quoniam ne fieret quod volebat omnipotens, voluntas hominis impedivit. Non ergo sit aliquid nisi omnipotens fieri velit, vel sinendo ut fiat, vel ipse faciendo. Et infra c. 97. In cælo & in terra non quadam voluit, & fecit, quadam vero voluit, & non fecit, sed omnia quaecumque voluit fecit. Quis porro tam impiè desipiat, ut dicat Deum malas hominum voluntates, quæ voluerit, quando voluerit, ubi voluerit in bonum non posse conuerti? Ergo hanc efficaciam conuertendi nostras voluntates ad omnipotentiam, & dominium Dei in illas August. reducit, quia scilicet potest facere quidquid vult, non autem quidquid præuidet aut supponit nos facturos. Et lib. de corrept. & gratia c. 14. Qui hoc non fecit, nisi per ipsorum hominum voluntates, habens sine dubio humanorum cordium quo placeret inclinandorum omnipotentissimam potestatem. Et infra. Regis habet in potestate voluntatem hominum, quàm ipsi suas. Sed homines habent dominium suæ voluntatis, & per hoc vertunt, & mutant illam: ergo multò magis Deus, ex potestate sua super voluntatem id facit. Et lib. 1. contra duas epist. Pelagianorum c. 20. Deus, inquit, cor Regis antequam mulieris sermonem poscentis audisset, occultissima & efficacissima potestate conuertit, & transtulit ab indignatione in lenitatem, hoc est de voluntate ledendi, in voluntatem faciendi secundum illud Apostoli; Deus est enim qui operatur & velle. Numquid homines Dei, qui hac scripserunt, immò ipse Spiritus Dei, quo auctore per eos ista scripta sunt, oppugnavit liberum arbitrium? Absit. Sed omnipotentis in omnibus & iudicium*

Ioan. à S. Thoma in 1. Part. D. Th. Tom. 2.

institissimum, & auxilium Dei misericordissimum commendauit. Item in lib. de gratia, & libero arbitrio cap. 21. *Agit omnipotens Deus in cordibus hominum etiam motus voluntatis eorum ut per eos agat, quod per eos agere ipse voluerit*. Et alia multa passim occurrunt in Aug. ubi ipsum motum, ipsam mutationem voluntatis, ipsam efficaciam in bonum ad omnipotentiam, & potestatem Dei super nostras voluntates, atque aded ad dominium super eas reducit, non ad aliquid præsuppositum & præuisum, ex parte nostra. Vnde etiam dixit S. Thom. 1. p. q. 22. art. 2. ad 4. quod quia ipse actus liberi arbitrii reducitur in Deum, ut in causam, necesse est ut ea quæ ex libero arbitrio fiunt, diuine prouidentie subdantur. Vbi notanda causalis illa est, quia reducitur in Deum, ut in causam, significat enim ex Deo habere etiam quod liber sit. Ac proinde tam magnum inconueniens est velle hoc subtrahere à dominio, & potestate Dei, & efficaciam immutandi voluntatem, non ad eius omnipotentiam reducere, sed ad nostram voluntatem, & consensum præsuppositum à Deo, & non factum, ut ob hoc, solum (essentialiter non obstant) omnino talis sententia explodenda sit.

Hoc ergo est præcipuum caput in quo istæ sententiæ inter se discoueniunt. Ex illo autem innumera alia deducuntur capitula. Nam euacuatà efficiacià in diuinis decretis ex propria, & intrinseca potestate, & dominio ipsius super creatam voluntatem etiam ut liberam, oportet innumera alia corollaria admittere quæ latius in sequentibus propositionibus, & responsione ad illas videbimus.

*Caluinianæ propositiones hereticæ;
Thomistica Catholica.*

Hinc denique intelligitur, omnia capita, & propositiones erroris Caluini, quæ in hac materia cum propositionibus Thomistarum quasi parallelæ inducuntur, in vanum sic parificari. Plures relatæ sunt à P. Vastida in Congregatione 44. habita de hoc re, ubi conatus est probare Caluinisticas propositiones omninò cum Thomisticis conuenire. Et retulit decem præcipuas propositiones huiusmodi, quas in Caluino, & in Thomistis æqualiter legi dicebat. Prima & principalis, & quæ cæterarum est radix, est hæc: *Auxilium praueniens gratia est de se solo efficax independens ab humana libertate, ita quod humana voluntas non potest illud reddere efficax vel inefficax*; quod totum in terminis legebatur in Caluino, immò Caluinus non dixit, nisi quod hoc auxilium de se est efficax: Thomistæ verò addiderunt de se solo. Secunda propositio erat; *Positâ gratiâ Dei de se sola efficaci non possumus non velle, non possumus dissentire, non possumus resistere, aut refragari*. Quam propositionem dicebat ex præcedenti inferri, càmque apud Thomistas haberi, & in Caluino legi. Tertia; *Ex hac gratia actus voluntatis sequitur necessariò non suapte natura, sed ex suppositione decreti diuini, vel alterius antecedentis causæ*. Si enim huic auxilio non potest resistere voluntas, quandiu ipsum manet (manet autem quandiu operatur in actu) necessariò actus voluntatis sequitur. Et hanc etiam dicebat inueniri apud Thomistas, & Caluinum. Quarta, *Sine auxilio efficaci gratia, homo non potest bene operari, nec ad Deum conuerti*; quam etiam ex Thomistis & Caluino referebat. Quinta, *Quod ex duobus hominibus unus conuertatur, alius non, non aliunde, quàm ex inæqualitate gratia est*. Quam dicebat sequi ex antecedentibus, & à Thomistis affirmari, atque etiam poni à Caluino. Sexta, *Eos quibus æqualem gratiam Spiritus sanctus partitur, æqualiter cum illa conari necesse est*. Et hanc dicebat esse contra Concil. Trident. sess. 6. cap. 7. ubi dicitur

I vnum

unumquemque recipere gratiam secundum mensuram, quam Spiritus sanctus partitur, & vniuscuiusque dispositionem, & cooperationem; illamque similiter tribuebat Thomistis & Caluino. Septima, *Oblatam gratiam recipere, hoc est acceptare, non nostrae facultatis est*: quam etiam vtrisque tribuebat & Caluino & Thomistis. Octava, *Hec gratia ita voluntatem agit, ut quamuis voluntas agat, nihilominus adequata causa conuersionis sola gratia sit*. Nona, *Auxilium in quo consistit perseverantia donum, est inamissibile, redditque hominem immobilem in bono, independenterque à libero arbitrio antecederet facit hominem perseverare*. Decima, *Deus eterno suo decreto, & inevitabili omnes nostras actiones sine bonas, siue malas praedestinat, ac praedeterminat*; quas etiam tam in Thomistis, quam in Caluino aiebat inueniri.

- 23 His propositionibus sic à V. stida obiectis contra Thomistas in conspectu suae Sanctitatis, ita satisfactum est in praedicta Congregatione, & veritas manifestata, ut non possint amplius nisi ex intolerabili ignorantia, aut calumnia Thomisticae propositiones equiparari Caluinianis; cum ipse Caluinus semper procedat secundum efficaciam per modum naturae agentem voluntatem, & sic destruentem modum libertatis eius. Thomistae autem secundum efficaciam ita vniuersalem & operantem omnia infallibiliter, ut ob hoc ipsum debeat non solum causare actum, sed etiam modum eius, ut liberè fiat, quia etiam ipsa libertas est à Deo, & eam vult in nostris actibus, ut S. Th. dicit, 1. p. q. 19. a. 8. ad 2. Et ita solum est necessitas consequentiae, & ex suppositione quod posito decreto efficaci sequatur operatio, non necessitas simpliciter, & ex parte consequentis, ut docet expressè S. Th. 1. 2. q. 10. art. 4. *quod si est ex Deo quod voluntas alicuius moueatur ad bonum, necesse est quod ita sit, sed non est necessarium simpliciter*; sicut est necessaria consequentia, quod si video Petrum currentem, ipse currit, sed non est necessarium simpliciter & ex parte ipsius consequentis.

- 24 In summa ergo. Prima propositio quae ceterarum est radix, ita intelligitur, & traditur à Thomistis secundum intelligentiam Catholicam, decretum praueientis gratiae de se solo est efficax, & independenter à libero arbitrio, ubi ly *solum & independenter*, excludit in libertate nostra quod praebat rationem, aut causam ipsius efficaciae, non quod sit effectus ipsius, quia nos per nostram libertatem non efficimus ut dona Dei in nobis valeant, seu effectum habeant, ut dicit August. epist. 107. contra Vitalem, sed potius per gratiam voluntas nostra consequitur libertatem, quod est habere liberum modum pro effectum, ut dicit lib. de corrept. & gratia c. 8. Caluinus autem intelligit quod de se decretum est efficax, & independenter ab ipsa, & ut à causa, seu ratione efficaciae, & ut ab effectum, quia dicit esse efficaciam per modum naturae agentem, & necessitantem nos, atque adeo non habentem pro effectum libertatem actus, sed tolentem illam.

- 25 Secunda propositio: Proposito decreto efficaci de se solo, non possumus non velle, dissentire, aut resistere, apud Thomistas, secundum Catholicam doctrinam hunc habet sensum: non possumus dissentire, aut resistere, potentia antecedenti est falsum, & haereticum, potentia consequenti est verum, & Catholicum. Potentia antecedens est potentia sine actu resistentiae, sed cum potestate resistendi, potentia consequens est potestas resistendi cum actu resistentem. Posita ergo efficacia Dei dante actum, & libertatem actus, manet potestas resistendi antecedens: id enim conseruat gratia conseruando libertatem, & ratione huius dicit Concil. Trident. sess. 6. c. 5. *quod potest homo dissentire, potest illam gratiam abiicere, si*

velit, potestate scil. antecedenti. Sed non manet potestas consequens, id est cui sit coniunctus actus resistendi, & abiiciendi ipsam efficaciam Dei, quae hoc operatur, ut homo non abiiciat eam, quia à nullo duro corde respuitur: datur enim ut cordis duritia primitus auferatur, ut August. dicit de predest. SS. cap. 8. Et ita nulla est potestas ad coniungendum actum resistentiae cum actuali efficacia conuertentis Dei. Et in hoc sensu dicitur catholicè Esther 13. *Non est qui tua possit resistere voluntati*, & Rom. 9. *Voluntati eius quis resistit*. Et August. de corrept. & gratia c. 14. *Deo volenti saluum facere, nullum humanum resistit arbitrium*, & c. 12. *Subuentum est infirmitati humanae, ut indeclinabiliter, & inseparabiliter ageretur, & ideo quamuis infirma non deficeret*. Caluinus autem dixit non posse nos resistere, non posse dissentire, etiam potestate antecedenti, quia per modum naturae necessitatem posuit nostram voluntatem, & sine libertate.

Tertia propositio: Ex hac gratia sequitur actus voluntatis necessariò, & c. Thomistae non intelligunt sequi actum necessariò necessitate simpliciter, & ex parte consequentis, sed necessitate ex suppositione, & necessitate consequentiae quae est necessitas infallibilitatis, quam expressè ponit S. Th. cit. loco 1. 2. q. 10. & iterum q. 112. art. 3. & aliis locis. Caluinus autem posuit sequi actum necessariò necessitate simpliciter, & tollente omnem libertatem, quia sentit nos agi per modum naturae.

Quarta propositio: sine auxilio efficaci homo non potest bene operari, & c. Thomistae dicunt, non potest sine auxilio efficaci, quantum ad sufficientiam seu potentiam agendi, falsum est; ante efficaciam enim habet hanc potentiam. Non potest quantum ad applicationem, & motum ipsum agendi, transire: seu aliis verbis. Non potest potentia antecedenti, est falsum; non potest potentia consequenti, est verum: sicut si diceremus, Agens sine actione non potest agere, sine motu non potest mouere: clarum est enim quod sine actione, id est antecederet ad actionem potentiam habet agens ad agendum, & tamen nisi ipsa actio ponatur, vel applicatio ad actionem, non poterit agens habere effectum. Caluinus autem quia potentiam liberam negauit, & totam operationem ita voluit esse à gratia, quod non à nobis liberè operantibus, ideo ante efficaciam gratiae, potentiam denegauit liberam, nec voluit esse aliud auxilium sufficiens, quam efficax.

Quinta propositio: Quod ex duobus hominibus vnus conuertatur, alius non, solum ex inaequalitate gratiae prouenit. Thomistae hoc dicunt in sensu Catholico, Caluinus in haeretico. Sensus Thomistarum est; quod solum ex inaequalitate gratiae prouenit tanquam ex prima radice & virtute, quia totum quod est in conuersione, licet sit à libero arbitrio ut eliciente liberè, tamen tota radix, & virtus vnde haec libertas habet vigorem, valorem, & proportionem ex gratia est, & quidquid palmes producit ex vite nostra est, quia sine ipso nihil possumus facere. Et sic quicumque conuertitur, maius auxilium habet, à quo & actum conuersionis, & libertatis suae modum in ipsa conuersione haurit, quia radix est Deus, etiam libertatis nostrae. Sensus verò Caluini est. Ex sola inaequalitate gratiae prouenit, ita sola, quod omnem libertatem nostram excludit & omnem modum agendi liberè, quia posita efficacia illa Dei, non liberè sequitur effectus gratiae.

Sexta propositio: Eos quibus aequalem gratiam Spiritus S. partitur, aequaliter cum illa conari necesse est. Huic non refragatur Concil. Trident. quia ita docet dari gratiam secundum mensuram Spiritus S. & dispositionem nostram, quod nostra dispositio ex Spiritu

Spiritus S. etiam est, quia preparatio ad gratiam, ut etiam Concilium fatetur, ex gratia est, *preparatur enim voluntas à Domino*. Quare si æqualem gratiam partitur Spiritus S. id est, omni modo æqualem, non solum ex parte iustificationis, & habitus, sed etiam ex parte dispositionis, & auxilij, necesse est æqualem conatum nasci, quia totum quod in agendo liberè conatur voluntas, ex Deo mouente ut à radice oritur, de quo videatur S. Th. 2. 2. q. 24. art. 3. ubi expressè propositionem illam docet. Calvinus autem in sensu hæretico docet, ex æquali gratia nasci æqualem conatum, tanquam ex causa excludente liberum conatum nostrum, ita quod nec etiam se habeat ut effectus illius æqualis gratiæ conatus nostræ libertatis modo libero operans.

30 Septima propositio: Oblatam gratiam acceptare nõ est facultatis nostræ liberæ. Non dicunt hoc Thomistæ, sed solum non esse facultatis liberæ reddere efficacem, vel inefficacem gratiam, quasi ex nostro consensu efficacia, & determinatio gratiæ accrescat, aut euacuetur. Hoc negant, & verè, Thomistæ. Ipsam autem efficaciam, quæ donum Dei est, acceptare, liberrimum nobis est, quia hoc ipsum facit efficacia gratiæ, scil. quod liberè acceptetur, & duritia cordis primitus auferatur, quæ duritia non auferretur, sed maneret, si liberè non auferretur, sed coactè. Itaque potest dissentire, dum acceptat gratiam nostra voluntas, potentia scil. antecedenti, ut explicatum est, non consequenti. Calvinus autem negat facultatem liberam ad acceptandam gratiam, quia omnem potestatem liberam etiam antecedentem tolli per gratiam docet, & solam necessitatem induci.

31 Octava propositio: Gratia ita voluntatem agit, ut quamvis voluntas agat, adæquata tamen causa conuersionis sola gratia sit. Si *ly adæquata*, & *ly sola* excludat libertatem arbitrij, etiam ut subiectam, & motam ab ista gratia hæretica propositio Calvinus est. Si libertatem affirmet, ex subiectione ad gratiam non destructam, sed perfectam, ita quod tota virtus, & radix huius efficacæ sit gratia & misericordia, effectus autem eius sit operatio nostra, non solum in sua substantia, sed etiam in libertate sua, seu modo libero operandi, vera propositio est, & sic asserta à Thomistis, & accepta ab Aug. qui in *Enchiridio* c. 32. dicit. *Propterea dictum esse, non volentis, neque currentis, sed miserentis est Dei, non quia ex utroque sit, id est ex voluntate hominis, & misericordia Dei, tanquam diceretur; Non sufficit sola voluntas hominis, si non sit etiam misericordia Dei. Hoc enim reprobatur Aug. quia hac ratione inquit, etiam non sufficit misericordia Dei, si non sit etiam voluntas hominis, ac per hoc si rectè dictum est, non volentis hominis, sed miserentis est Dei, quia id voluntas hominis sola non implet, cur non è contrariò rectè dicitur, non miserentis est Dei, sed volentis est hominis, quia id misericordia Dei sola non implet? Porro si nullus Christianus dicere audebit, non miserentis est Dei, sed volentis est hominis, ne Apostolo apertissime contradicat, restat ut propterea dictum intelligatur, non volentis, neque currentis, sed miserentis est Dei, ut totum Deo detur, qui hominis bonam voluntatem & preparat adiuvandam, & adiuvat preparatam. Tota ergo & adæquata causa nostræ conuersionis Dei misericordia, & gratia est, non quia nos non etiam liberè agamus, sed quia per suam gratiam ille facit ut velimus, & agamus, utique liberè. Vnde rursus dicit Aug. *lib. de gratia & libero arbitrio* c. 16. *Certum est nos velle cum volumus, sed ille facit ut velimus de quo dictum est, quod preparatur voluntas à Domino. Certum est nos facere cum facimus, sed ille facit ut faciamus præbendo efficacissimas vires voluntati.**

32 Nona propositio: Auxilium perseverantiæ est inamissibile, & reddit hominem immobilem in bono
Ioan. à S. Thoma in 1. Part. D. Th. Tom. 2.

independenter à libero arbitrio. Iam sæpè dictum est quod *ly independenter* à libero arbitrio solum significat quod gratia ut descendit à Deo hoc facit, non autem à voluntate nostra accipit efficaciam, licet pro effectu habeat liberam operationem nostram, etiam ut liberam. Illa ergo propositio si intelligatur de immobilitate liberi arbitrij, & independentia ab ipso per exclusionem libertatis, hæretica est, non Thomistica. Si includendo libertatem, subiectam tamen, & dependentem ab ipsa gratia, Augustini est, & Catholica, & Massiliensibus opposita, qui, ut dicit Hilarius in *epist. ad Aug. Molestè ferebant, Augustinum tale donum perseverantiæ in sanctis ponere, quod non solum sine isto dono perseverante esse non possint, verum etiam ut per hoc donum, non nisi perseverantes sint. Et infra, refert de ipsis, quod dicebant; Quidquid donatum est prædestinatis, id posse & amittere, & retinere propria voluntate. Quod tunc falsum esset, si verum putarent eam quosdam perseverantiæ percepisse, ut non nisi perseverantes sint. Ergo esse amissibile donum perseverantiæ Massiliensium est, & non esse amissibile, doctrina Aug. qui in *lib. de correptione & gratia* c. 8. manifestè docet perseverantiæ donum à libero arbitrio independens esse, & tamen liberam voluntatem donare, dum inquit: *Si ad liberum arbitrium hominis, quod non secundum gratiam, sed contra eam defendis, pertinere dicis ut perseveret in bono quisquam, vel non perseveret, non Deo donante si perseveret, sed humana voluntate faciente, quid moliturus es contra verba dicentis, Rogavi pro te Petre ut non deficiat fides tua? An audebit dicere etiam rogante Christo ne deficeret fides Petri, defecturam fuisse si Petrus eam deficere voluisset, quasi aliud Petrus ullo modo vellet, quam pro illo Christus rogasset ut vellet? Nam quis ignorat tunc fuisse perituram fidem Petri, si ea quæ fidelis erat voluntas, ipsa deficeret, & permanfuram, si eadem voluntas maneret? Sed quia preparatur voluntas à Domino, ideo pro illo non posset esse inanis oratio. Quando rogavit ergo, ne fides eius deficeret, quid aliud rogavit nisi ut haberet in fide liberrimam, fortissimam, invictissimam, perseverantissimam voluntatem? Ecce quomodo secundum gratiam Dei, non contra eam libertas defenditur voluntatis. Voluntas quippe humana non libertate consequitur gratiam, sed gratia potius libertatem. Huc usque Aug.**

Vbi nota tria destructiva doctrinæ oppositæ. Primum, quod aliquod donum Dei est quod in quantum donum, & ut descendit à Deo, ita est efficax ut non stet cum opposito actu voluntatis, licet potentiam ad oppositum non lædat. Patet hoc, quia rogante Christo ut Petrus non vellet deficere, non stat ipsum velle deficere in fide, ut dicit Augustin. Ergo etiam donante Christo: nam si cum rogatione non stat non velle, multo minus cum donatione: rogabat enim Christus pro aliquo dono Dei, non pro ipso consensu futuro Petri, ut per illam fieret efficax ipsa perseverantia: hoc enim dicitur ab adversariis præsupponi cognitum à Deo cognitione ante omne decretum, & necessaria, non autem ex decreto, & donatione Dei descendere. Christus autem non rogavit ipsum Petrum pro aliquo præsupposito, & præuiso, scilicet ut haberet hoc velle, sed pro Petro rogavit Deum; *Rogavi, inquit, pro te, non rogavi te: ergo si cum rogatione Christi non stat aliud velle Petrum, non mirum quod non stet cum donatione Dei, quam Christus rogat. Secundum, quod cum August. diceret defecturam fidem Petri, si voluntas eius fidelis deficeret, & mansuram, si permaneret, inquirens unde erat infallibilis, seu non inanis illa oratio, ut permaneret, non recurrit ad præuisum consensum voluntatis Petri, & successorum eius, ut ex illo sumeret efficaciam infallibilem oratio Christi, ut recurrunt defensores*

scientiæ, mediæ: sed recurrit ad præparationem Dei. Nec enim Aug. dixit: Quia præuiderat Deus voluntatem Petri mansuram, & consensuram fidei, non potuit esse inanis Christi oratio: non hoc dixit, sed. *Quia preparatur voluntas à Domino, ideo non potuit esse inanis oratio.* Quis ergo cum Aug. sentit in hac efficacia diuina asserenda? qui dicunt ex præuiso consensu futuro esse infallibilem & efficacem Petri fidem, & perseverantiam, quod facit scientia mediæ, & Augustinus non meminit, an qui ad Dei operationem, ut præparatiuam, & præuentiuam voluntatis (quæ utique causat consensum, non supponit) recurrunt, quod facit Aug. & D. Thom. eiusque Discipuli?

Tertium est, quod Aug. dicit rogasse Christum ut haberet Petrus liberrimam voluntatem in fide, sicut & inuictissimam & firmissimam: ergo non minus à gratia, & concursu Dei deriuatur libertatis modus, quàm firmitatis, & constantiæ. Dominus est enim filius hominis, etiam nostræ libertatis. Aut quomodo deuotari potest hoc inconueniens, quod libertas in actibus nostris ex dominio & omnipotentia Dei non sit? Est ergo doctrina Aug. sicut & Thomæ, quod gratia & efficacia Dei, non solum supernaturalitatis, non solum substantiæ actus, sed etiam libertatis radix est, atque adeo cum in voluntatem influit, non libertatem tollit, sed dat, quod & Aug. expressit illis verbis, *quod voluntas nostra gratia consequitur libertatem.* Nec potest dici quod sumit libertatem non pro indifferentia arbitrij, sed pro audacia quadam, & libera confessione fidei, quod pertinet ad virtutem, non ad potestatem libertatis quæ opponitur necessitati, non pusillanimitati, & contractioni animi. Contra enim est, quia Aug. in illis verbis immediatè anteceditibus. *Ecce quomodo secundum gratiam Dei, non contra eam defenditur libertas voluntatis,* loquitur planè de libertate arbitrij, hæc enim dicebatur tolli per gratiā: Ergo cum reddit rationem huius per verba immediata, *voluntas quippe gratia consequitur libertatem,* de eadem libertate arbitrij loquitur, & D. Th. cum dicit quod principium extrinsecum quod est causa ipsius intrinseci in voluntate, non causat violentiam, sed voluntarium motum 3. *contra Gent. cap. 88. l. p. q. 83. art. 1. ad 3. & q. 105. art. 4 ad 1. & 2. idem omninò sentit.*

34 Decima propositio; Deus æterno & immutabili decreto suo omnes actiones nostras tã bonas, quàm malas prædefinit, & prædeterminat. Hæc propositio nusquã asseritur à Thomistis pro ea parte qua dicit Deum prædefinire ad mala, sed solum ad entitatem bonam quæ est in ipso malo, quam causat Deus, ut docet S. Th. in 2. *dist. 37. q. 1. a. 3.* oppositum damnans ut proximum erroris. Bonas autem actiones prædefinit Deus, etiam cum sua libertate, quia libertas earum etiam à Deo causatur, & consequenter prædefinitur, non tollendo libertatem, ut Calvinus docuit, & infra agentes de efficacia decretorum amplius dicemus.



DISPUTATIO IV.

De potentia, actu, & obiecto voluntatis Dei.

ARTICVLVS I.

Voluntatem in Deo esse.



1 VOLUNTATEM in Deo inueniri manifest^a fides est, & naturalis ratio demonstrat: Quod fides voluntatem in Deo credat. Scriptura docet; Isai. 46. *Consilium meum stabit & omnis voluntas mea fiet*; Ezech. 18. *Numquid*

voluntatis mea est mors impij? Sapient. 11. *Quomodo posset aliquid permanere, nisi tu voluisses:* Ioan. 6. *Descendi de celo, non ut faciam meam, sed voluntatem eius qui misit me.* Rom. 12. *Ut probetis quæ sit voluntas Dei,* ad Ephes. 1. *Qui operatur omnia secundum consilium voluntatis suæ.*

2 Ex naturali ratione variæ huius veritatis deducuntur probationes. Quidam illa ratione contenti sunt, quæ à posteriori deducitur, quia in creaturis rationalibus datur voluntas ut in nobis exprimitur, & voluntas pertinet ad perfectionem, nec enim aliquid imperfectionis explicat: ergo etiam datur in Deo. Probatio quidem recta, supponendo quod voluntas ad perfectionem simpliciter pertinet: nulla enim perfectio deesse debet primo enti superiori modo quam sit in creatura; minus tamen. Sapientem hæc ratio decet, qui causas rerum perscrutatur, non in effectibus continetur. Et ideo restat semper inquirendum, quæ sit ratio & causa propter quam aliquibus rebus conueniat voluntas, & sit perfectio simpliciter; hanc enim inuestigare debemus, an in Deo sit. Et ita D. Th. tam in 1. *contra gent. c. 82. quàm in presenti,* conatus est rationem reddere valde vniuersalem, cur alicui enti conueniat voluntas, eamque applicat Deo, ut inde à priori ostendat conuenire illi voluntatem.

3 Ratio ergo D. Th. quæ valde efficax, & demonstratiua est, reducit ad hunc syllogismum: Voluntas sequitur ad intellectum: sed in Deo est intellectus, immò eius esse, & eius intelligere; ergo in Deo est voluntas, & suum esse est suum velle. Minor, & consequentia sunt notæ: nam in Deo dari intellectum, & quod intelligere non sit aliud esse à Deo, constat ex traditis in *quaest. 14.* Quod verò inde sequatur quod in Deo sit voluntas, constat ex maiori, quia ubi est intellectus, est voluntas. Et quod velle sit esse Dei, constat, quia sicut intelligere in Deo non est accidens, sed substantia, ita velle non potest esse accidens, sed substantia. An verò sit constitutum ipsius naturæ diuinæ, sicut intelligere quæ est esse diuinum, an verò solum identicè dicatur substantia Dei, præced. *tomo diximus dist. 16. & ex dicendis* constabit. Modò sufficit ad vim consequentiæ S. Th. quod rectè infert quod velle Dei est esse Dei, saltem identicè, ita quod non est accidentale, sed substantiale. Maior ergo, in qua est difficultas, probatur, quia omnem formam sequitur aliqua inclinatio; hanc enim quælibet res habet habitudinem ad suam perfectionem seu formam, ut cum habeat illam, quiescat in illa, cum verò non habet, tendat in illam: vnumquodque enim tendit & quærit suam perfectionem; ergo similiter ad intellectum quatenus redditur intelligens per formam intelligibilem, consequetur inclinatio ad rem sic apprehensam, ut cum habeat illam, quiescat in illa, cum non habet, tendat in illam, inclinatio autem consecuta ad apprehensionem, dicitur voluntas, sicut consecuta ad formam naturalem, dicitur appetitus innatus: ergo voluntas sequitur ad intellectum.

Ratio ista D. Thom. est efficax.

4 Circa hanc rationem, P. Vasp. in *commentario art. 1. huius q.* existimauit solum asserere quandam congruitatem desumptam ex proportionem naturæ intellectiue ad res naturales, quod sicut istæ appetitum habent innatum, ita illa elicitum. Et rationes eius dubitandi, quæ ferè reducuntur ad illas, quas Caiet. *super dictum artic.* excitauit, ad explicandum rationem D. Thom. principaliter sunt tres.

5 Prima, quia S. Thom. assumit quod intellectus constituitur per formam intelligibilem, & inde infert debere dari appetitum ad bonum apprehensum, per talem formam. Sed præterquam quod

quod est valde dubium intellectum constitui per formam intelligibilem, quia in actu secundo constituitur per ipsum intelligere, & in actu primo, seu in potentia per ipsam virtutem intelligendi. Hoc, inquam, prætermisso, illatio à D. Thom. facta non est bona, quia ex illo antecedente assumpto, solum potest inferri quod datur appetitus ad ipsam formam intelligibilem, quæ est perfectio intellectus, non ad rem apprehensam per talem formam, quæ est extra intellectum, sicut res naturalis appetit formam suam, quæ est perfectio sua, non id quod extra talem formam est; voluntas autem non fertur in species intelligibiles, sed in res representatas per illas.

5 Secundò, quia dato quod forma intelligibilis sit res ipsa apprehensa in alio esse, nempe in esse intentionali, adhuc non sequitur intentum; tum quia voluntas, ut dictum est, fertur in ipsas res, prout in esse proprio, & naturali, sic enim eas assequi intendit, non autem apparet qua consequentia inferatur ex forma in esse apprehenso appetitus ad illam in esse naturali, quæ est voluntas. Tum etiam quia ad summum potest ex forma intelligibili, quæ est species perficiens intellectum inferri inclinatio ipsius intellectus ad talem formam, quia est eius perfectio, & hæc inclinatio in intellectu erit appetitus innatus, sicut in qualibet alia re ad suam perfectionem. Quod verò inde sequatur appetitus elicito, qui est in alia potentia distincta ab intellectu, scilicet in voluntate, non apparet quomodo inferatur. Tum denique quia voluntas est inclinatio totius suppositi, & nascitur à potentia ei propria eliciente actum illum volendi. Ex eo ergo quod intellectus, seu natura intellectualis appetit formam intelligibilem, quæ est sua perfectio, vel representatam per illam, unde sequitur: ergo actu elicito per voluntatem id appetit, nisi supponamus dari voluntatem, & hoc est quod querimus.

6 Tertiò, circa illam maiorem D. Thom. nascitur dubium, quando dicit quod hæc est habitudo rei ad suam formam, quod quando habet illam, quiescit in illa, quando non habet, tendit in illam: nam res constituitur per formam, ergo si non habet illam, non potest tendere in illam, quia sine forma non datur res, nec appetitus qui tendat, quia non est res constituta. Si dicatur esse restringendam propositionem ad formam, quæ aduenit rei constitutæ, non quæ est ipsamet forma. Contrà: ergo ex forma intelligibili, quæ est ipsummet obiectum in alio esse, non sequitur quod detur appetitus ad ipsamet formam intelligibilem, vel ad obiectum, sed ad aliquid consecutum ad ipsum, quod est planè falsum: ipsum enim obiectum in se appetimus, & ipsam speciem. Imò ipse D. Thom. distinguit formam ab eo quod aduenit formæ, dicendo, quod potest appetere formam, quam non habet, & idem est de qualibet perfectione naturali: ergo non solum perfectio adueniens, sed etiam forma propria appeti dicitur à D. Thom.

7 Ultimò, potest adici difficultas, quia benè stat dari formam intelligibilem in intellectu, & cognitionem eius, qua apprehenditur, & tamen non sequi appetitum, tum quia voluntas est libera, & potest ab omni actu se suspendere, & sic ex cognitione non sequitur appetitus, tum quia potest Deus denegare concursum, ne aliquis velit, etiam si obiectum sit propositum: ergo non benè infert S. Thom. ex forma apprehensa appetitum elicito, seu voluntatem, quia stat poni illam, & deficere istam.

Nihilominus ratio D. Thom. omninò efficax est. Et videri possunt, quæ circa eam diximus in lib. de anima q. 12. a. 1. Nunc sufficit obiectionibus respondere, his enim solutis, perspicua redditur D. Th. ratio.

Ioan. à S. Thomà in 1. part. D. Th. Tom. 1.

Ad primam ergo obiectionem resp. rationem S. Thom. benè supponere, & optimè inferre, Supponit quod sicut res naturalis habet esse per suam formam, ita intellectus intelligens actu per suam formam intelligibilem. Quæ propositio verissima est, quia dubitari non potest quod forma dat rei esse specificum & determinatum: species enim, & natura rei determinatè constituitur per formam. Et similiter dubitari non potest quod intellectus ad intelligendum actu determinatur, & specificatur ab obiecto: obiectum enim mouet, & specificat potentiam, & actum, præsertim quando potest diuersos actus elicere, sicut intellectus: determinatur enim ab obiecto, & per ordinem ad illud distinguitur iste actus ab illo; & sic obiectum habet rationem formæ, ut intelligibile factum per speciem, ita quod obiectum, & species non ponunt in numero: obiectum enim vnitur intellectui per formam intelligibilem, quæ obiectum ipsum representat, & vnit potentia, ut patiatur notitia. In hac ergo proportionem, quod sicut res naturalis habet esse per formam, sic intellectus per formam intelligibilem seu obiectum nihil præsupponit S. Thom., quod non sit notum ex natura formæ naturalis, & formæ intelligibilis, & intellectus, quod hîc non erat probandum, sed præsupponendum, tanquam quid pertinet ad naturam, & propriam rationem talium formarum. Quod vero ulterius constituatur res in actu ultimo entitatio non per formam, sed per existentiam, & intellectus in actu secundo, nò per formam, sed per existentiam, & intellectus in actu secundo, non per formam intelligibilem, sed per intelligere, non tollit, sed potius confirmat id quod dictum est, quia quando S. Thom. dicit quod res naturalis habet esse per formam, sufficit quod intelligatur de esse specifico, seu constitutio non de esse existentia: inclinationes enim rerum, non sequuntur ad existentiam, ut existentia, sed ad formam constituentem naturam, quia secundum diuersas naturas, diuersificantur, & inclinationes ad diuersos fines; super hoc autem esse specificum, & essentiale quod dat formam, superuenit esse existentia, quo res non constituitur, sed deducitur extra causas. Similiter etiam per formam intelligibilem non constituitur potentia in actu ultimo, qui est intelligere, neque in esse entitatio potentia, quia potentia est capax, & indifferens ad plures species, & actus, & per illam capacitatem sic indifferentem constituitur in esse potentia; sed constituitur per speciem intelligibilem in ratione potentia determinata, & actuata ad determinatum actum ex coniunctione determinati obiecti, & ex hoc sequitur determinata inclinatio, sicut ex potentia in ratione potentia, & indifferentia sequitur potentia inclinatio, quæ est voluntas de se etiam indifferens ad plures actus, & ad plura obiecta volenda.

Quod verò attinet ad illationem, optimè infert illam consequentiâ S. Thom. quia appetitus qui sequitur ad aliquam formam non est ad appetendam ipsam formam in seipsa, ut constituens ipsum subiectum, sed ad appetendum id quod est conueniens tali formæ, & per ipsam redditur conueniens subiecto, sicut ad formam lapidis non sequitur appetitus formæ lapidis, ut constituatur lapis, sed sequitur appetitus ad centrum, quod est locus conueniens lapidis, & in igne appetitus ad locum sursum. Sic ergo habenti formam intelligibilem representantem rem extrâ, ut conuenientem, vel disconuenientem ipsi apprehendenti & cognoscenti, quæ est cognitio practica sequitur appetitus ad habendum re ipsam non in esse intelligibili, in quo informat apprehensionem, sed in esse entitatio, in quo repræ-

sentatur

I 3



sentatur ut conueniens ipsi: semper enim appetitus, qui sequitur ad formam, est ad aliquid sibi conueniens, vel ipsi subiecto, in eo esse, & in eo statu in quo conueniens est. Et praeterea, licet forma intelligibilis informet intellectum entitatiue ut qualitas intentionalis ei inherens, tamen repraesentatiue non informat ratione sui, sed vice obiecti, quod est principale informans, & significans intellectum, species. enim illa de se solum se habet ut vice obiectum. Quare sicut actus intelligendi principaliter respicit obiectum ipsum, licet obiectum per sui vicariam speciem informet, ita inclinatio non ad rem vicariam tendit, sed ad id quod principale est, & per illud substitutum quaeritur.

10 Ad secundam, negatur sequela. Ad primam impugnationem constat ex dictis: forma enim apprehensa ostendit practice conuenientiam sui in esse reali pro isto subiecto, & quia ex omni forma nata est sequi inclinatio ad sibi conueniens, consequenter ex forma apprehensa nata est sequi inclinatio ad affectionem eius in esse reali, quia sic est sibi conueniens.

11 Ad secundam impugnationem dicitur quod forma apprehensa potest considerari dupliciter: Vno modo in esse qualitatis, & accidentis realiter informantis intellectum, sicut reliqua forma naturales sua subiecta: Alio modo in esse apprehensui, quatenus medio actu, & cognitione intellectus obiectum trahit ad se, & de se conuenientiam, vel disconuenientiam eius ad ipsum subiectum repraesentat. Primo modo nascitur appetitus innatur ad formam illam intelligibilem, quia sic per modum naturae ab ea afficitur, & perficitur, & consequenter eodem modo appetitur ab ipso intellectu, quia appetitus iste innatus non est aliud quam ipsamet proportio, & motus, seu tendentia naturae ad id quod sibi conueniens est. Secundo autem modo nascitur appetitus elicitus, qui actu producto, seu elicit ab appetitu tendit ad id quod repraesentatur ut conueniens non solum ipsi intellectui, sed & toti subiecto. Et hoc ideo, quia forma apprehensa non actuatur, & informat intellectum per modum naturae, & per modum inheretiae accidentis, sed mediante actu apprehensionis; & sic inquantum est forma apprehensa in sensu formali loquendo, scilicet prout actuatur in esse apprehensui, quod est actuare medio actu apprehensionis, & non solum per modum naturae, & inheretiae, fundat etiam appetitum per modum actus tendentis ad obiectum. Et sic verum est quod omnis appetitus, qui sequitur ad formam apprehensam, est appetitus elicitus, quia sequitur ad ipsam ut informat apprehensiuè, & non naturaliter, & informare apprehensiuè est informare medio actu apprehendente, & eodem modo sequitur appetitus medio actu elicit, non solum ad appetendum pro ipso intellectu, sed etiam pro toto subiecto, quia in apprehensione omnis ista conuenientia repraesentatur. D. Th. autem processit in hac consequentia valde formaliter loquens de forma apprehensa, prout apprehensa, & in esse apprehensiuo, id est, mediante apprehensione repraesentans, non in esse naturali informans. Et sic recte intulit appetitum alicum.

12 Ad tertiam impugnationem, concedimus voluntatem esse potentiam inclinationem totius suppositi, & ad omne id quod conuenit toti supposito, ut bene D. Th. deducit, 1. p. q. 80. a. 1. Et hoc ipsum facit actu elicit. Et utrumque optime deducit D. Tho. ex intellectu ut informato forma intelligibili, non supponendo dari ipsam potentiam voluntatis, sed inferendo illam, quia ipse intellectus est potentia non solum intelligens sibi, sed toti supposito, nec aliquid solum determinate, sed quodlibet ens, & hoc per formam intelligibilem, per quam fit in actu sub

raione apprehensi medio actu cognitionis. Vnde optime inferitur: Ergo appetitus qui ad tales formas intelligibiles sequitur, debet esse vniversalissimus, quia non sequitur ad formam determinatam, sed ad intellectualitatem, quae fit in actu per omnes formas intelligibiles vniversalissimè, & sic extendere se debet non solum ad appetendum sibi, sed toti supposito, & ab omne conueniens sibi, quia ad omnia haec se extendunt formae intelligibiles. Et secundò, ergo id debet esse mediante appetitu elicit, & consequenter mediante potentia eliciente, quia forma ad quam sequitur est forma apprehensa sub ratione apprehensi, & haec non informat modo naturae, sed mediante actu apprehensionis, & sic inclinatio, quae ad eam sequitur, non debet esse per modum naturae, seu appetitus innatus, sed mediante actu elicit: formae enim proportionatur inclinatio ex illa secuta.

Ad tertiam Resp. quod propositio D. Th. intelligitur absolute, & vniversaliter absque vlla restrictione, ita hoc complectitur tam formam propriam, quae res constituitur, quam aduentitiam, & superadditam: sed tamen respectu propriae formae constituentis si iam habetur in esse reali, non tendit appetitus, quaerendo acquisitionem eius, sed quiescendo in acquisita, & tendendo aut procurando conseruationem eius, si contingens, & incerta sit, ut in re corruptibili. Aduentitiam autem formam potest etiam appetere, quaerendo illam, si desit: si verò forma nondum habetur in esse reali, sed solum in intentionali, sicut per speciem intelligibilem apprehenditur etiam id quod nondum habetur, tunc poterit ex tali forma nasci appetitus ad acquirendam formam in esse reali, quia licet forma intelligibilis, & obiectum repraesentatum non ponant in numero obiectiuè, quia tamen in diuerso statu est in esse intentionali, quam reali, potest qui solum habet formam in vno statu appetere illam in alio, etiam quoad sui acquisitionem, sicut habens formam in primo esse, potest appetere in conseruari, & ad id tendere.

Ad quartam Resp. quod etiam dato, non concessio, quod voluntas possit suspendere omnem actum posito obiecto apprehenso, de quo in 1. 2. disputabitur Deo dante, & concessio etiam quod stante cognitione, & obiecto apprehenso possit Deus suspendere suum concursum, ne sequatur vlla inclinatio actualis in appetitu, adhuc ratio D. Tho. subsistit, quia cum probat dari inclinationem appetitus, ex eo quod datur forma intelligibilis in intellectu, id procedit quantum est ex natura, & meritis talis formae, & hoc sufficit, licet in nobis possit impediri exercitium talis inclinationis, ita ut de facto non sequatur actus appetitus ex aliquo impedimento, aut cessatione causae, à cuius influxu dependet, sine quarum causarum prauiudicio loquimur, quando dicimus ad formam sequi inclinationem: non enim remouemus, sed supponimus alias causas à quibus talis inclinatio dependet, & per quarum remotionem potest impediri, sicut ad lapidè sequitur grauitas, ut ad grauitatè motus deorsum, ut appetitus innatus, nisi impediatur ab aliquo extrinseco.

ARTICVLVS II.

An ratio potentiae & actus primi in voluntate Dei possit admitti.

Voluntas Dei potest comparari tum ad actum volendi, tum ad res procedentes per voluntatè: per voluntatem enim diuinam procedunt ad extrà creaturæ (*Operatur enim omnia secundum consiliū voluntatis suae*, ad Ephes. 1.) & procedit ad intra Spiritus S. qui est amor Patris, & Filij, sed creaturæ per creaturam potentiam, Spiritus S. per spiratuiam, quae est communis Patri, & Filio. Respectu ergo rerum procedentium

cedentium à diuina voluntate, siue notionaliter ad intrā, siue essentialiter ad extrā, vera & propria ratio potentiae saluatur in Deo. De potentia creatiua expressè id docet S. Th. *infr. q. 25. a. 1. ad 3. Saluatur*, inquit, *in Deo ratio potentiae quantum ad hoc quod est principium effectus*. De potentia notionali dicit *infr. q. 41. a. 4. Potentia ad actus notionales non dicitur in diuinis per respectum ad aliquam personam factam, sed solum per respectum ad procedentem personam*. Et huius ratio est, quia respectu rei procedentis tanquam terminus processionis, potentia, seu principium importat perfectionem simpliciter, quia comparatur ad terminū à se distinctum, non vt perfectibile ad perfectionem sui, sed vt id cui communicat perfectionem. Communicare autem perfectionem, magna perfectio est. Vnde si potentia respectu sui termini à se procedentis nihil aliud importat, quàm principium communicationis perfectionis, simpliciter respectu illius saluatur ratio potentiae in Deo.

- 2 Difficultas est, an possit intelligi, & saluari in Deo ratio potentiae respectu ipsius actus secundi, & non solum respectu termini procedentis. Et non est difficultas de potentia realiter productiua actus, id est, à qua actus realiter dimanet, quia constat in Deo actu non dimanare realiter, aliàs distingueretur realiter à suo principio, seu potentia. Non distinguitur autem realiter actus intra Deum à Deo, quia quidquid intra Deum est, substantia Dei est, & actus nominat perfectionem absolutam, quae non habet aliquid relatiuè oppositum, à quo distinguatur. Sed difficultas est an detur potentia distincta ab actu distinctione sola rationis, sicut alia attributa distinguuntur inter se, & ab essentia, licet identicè sint vnum, ita quod in eadem entitate cum fundamento in re possimus distinguere munus, seu perfectionem potentiae per modum actus primi & fundamenti ipsius actus, & munus ipsius actus secundi, sicut in nobis datur intellectus, & actus intelligendi, voluntas, & actus volendi, ita transferantur ista duo in Deum, semotis imperfectionibus distinctionis realis.

In hac difficultate sunt duae extremae sententiae, & duae mediae.

- 3 Prima extrema negat rationem potentiae, & actus primi Deo, etiam in voluntate, tam secundum rem, quàm secundum modum intelligendi, non solum in ordine ad actum essentialem, sed etiam in ordine ad actum notionalem, & ad actum liberum.

Fundamentum est, quia potentia comparatur ad actum secundum, vt perfectibile ad suam perfectionem, ita quod potentia non solum dat perfectionem actui, sicut termino à se producto, & procedenti, sed etiam perficitur ab ipso, quia constituitur in actu secundo, & ultimo per illum, qui est simpliciter perfectio ipsius potentiae, & actus primi. Non ergo est possibile distingui istos duos conceptus in Deo, potentiae, seu actus primi, & actus secundi, nisi relinquendo vnū vt minus perfectum alio, & vt perfectibile, & in potentia ad ipsum, quod repugnat cuicumque conceptui actus puri, qui est summus actus. Itaque duas perfectiones bene possumus in Deo distinguere, quamlibet in suo genere, & concipiendo vtramque per modum actus puri, & summi, quorum vna non concipiatur vt perfectibile ab alia, sed vtraque vt perfectio, licet vna concipiatur sine alia, sicut concipitur iustitia, & misericordia, immensitas, & aeternitas, & reliqua attributa; omnia enim haec induunt rationem actus summi, & puri in suo genere, licet nos vnico conceptu totum illud non possumus adaequare. Caterum concipere vnam perfectionem per modum actus primi, & aliam vt actum secundum eius, frangit conceptum actus puri, & summi, quia actus primus ex intrinseco conceptu non est summus,

cum sit actualis per secundum: ergo non summus actus.

Conf. quia potentia haec si ponitur in Deo, debet poni vt potentia realis, nō vt ficta, sic enim non esset potentia, sed chimæra potentiae, licet realiter non distinguatur, sed identificetur actui. Potentia realis non potest poni nisi determinata, scil. vel actiua, seu productiua, vel passiuua. Productiua realiter actus in Deo poni non potest, cum realiter volitio nō emanet in Deo. Passiua realiter multo magis est facta in Deo: ergo. Pro hac sententia videntur stare omnes qui negant in Deo dari intellectum per modum actus primi, sed ipso intelligere, qui est actus secundus constitui, quos reuli, & secutus sum, *tomo praecedenti, d. 16. a. 1. Sed in specie negat potetiam in Deo ad omnes actus, etiam notionales*, P. Herice *1. p. tract. 1. d. 2. c. 3. §. 2. & tract. 2. d. 12. c. 1.* qui citat Aureolum, & Gabrielem,

Secunda sententia extrema docet in Deo esse admittendum conceptum potentiae, & actus primi, non solum ad actus notionales, vel ad actionem ad extrā, sed etiam ad actus essentiales, nec solum esse actum primum in Deo virtualiter, aut eminenter, sed etiam formaliter. Hanc sententiam tenentur à fortiori tueri, qui in intellectu diuino ponunt intellectualitatem, vt principium, vel potentiam, seu radicem intelligendi. Sequitur eam in specie P. Marcon *1. p. tract. 3. de voluntate Dei disp. 1. c. 1.* citatque pro se Durandum, Henriquez, Scotum, P. Ruiz *tomo de voluntate disp. 2. sect. 1. n. 5. M. Gonzalez 1. p. d. 50. sect. 2. n. 12. & 15.* Sed de sententia Gonç. quānam sit, statim dicemus.

Fundamentum huius sententiae est oppositum primae, quia illa ratio actus secundi, & potentiae ad actū volitionis non dicit imperfectionem aliquam: ergo non est Deo negandus, nec vllō modo violat puritatem, & eminentiam actus puri.

Antec. prob. primò, quia in Deo datur conceptus naturae constitutae antecederet ad volitionem, siquidem constituitur per intellectualitatem in actu puro, seu per ipsum intelligere, vt latè ostendimus *praced. tomo d. 16. cit.* sed natura secundum conceptum naturae condistinctum à sua operatione non potest concipi nisi per modum principij, & actus primi radicalis: operatio autem cuius est principium concipitur vt actus secundus eius: ergo non repugnat Deo conceptus principij, & actus primi respectu actus secundi, siquidem non repugnat distinctus conceptus naturae, & volitionis tanquam operationis eius. Si ergo non repugnat actus primus radicalis, cur repugnabit formalis, & per modum principij proximi, seu potentiae?

Secundò, prob. idem, quia datur in Deo formalis potentia ad actus notionales, v. g. ad generationem, & inspirationem, vt expressè fatetur D. Thom. *1. p. q. 41. art. 4.* & cum eo Theologi communiter, siquidem intelligimus Patrem vt principium generationis, seu originis Filij, principium autem generandi est potentia generandi. Sed isti actus notionales non minus sunt actus immanentes, quàm ipsa volitio, & intellectio, cum producant suos terminos ad intrā, scilicet Filium, & Spiritum sanctum, & se habent vt actus secundus talis potentiae, generatiuae, & spiratiuae: ergo si in notionalibus non repugnat dari in Deo potentiam condistinctam ab actu secundo, cur repugnabit in essentialibus nostro modo intelligendi.

Tertiò, quia etiam actio productiua creaturae est actus secundus omnipotentiae diuinæ, qua redditur actu operans, & tamē potest nostro modo intelligēdi distingui ista potentia ab illo actu secundo: ergo non repugnat in diuinis distinctio duorum conceptuum, quorū vnus sit actus primus seu potentia, alius actus secundus. Minor est expressa S. Th. *infr. q. 25. a. 1. ad 3. vbi dicit, quod secundum modum intelligendi, diuina*

essentia, quæ in se simpliciter præhabet quidquid perfectionis est in rebus creatis, potest intelligi, & sub ratione actionis, & sub ratione potentie. Denique idem probatur quia diuina essentia verè, & propriè habet rationem obiecti, & speciei intelligibilis, à quo tanquam à principio obiecti. o intelligitur procedere actus, licet actus non distinguatur ab obiecto, quia scilicet habet Deus in se quidquid perfectionis est in obiecto, & in actu: ergo eadem ratione dicitur habere rationem potentie vitalis ad actum, licet non distinguatur ab illo, quia habet quidquid perfectionis est in potentia vitaliter producente, & in actu. Et parum obstat quòd potentia in Deo non dicatur principium productiuum, sed producens actum; nos enim non volumus ponere in Deo potentiam separatam ab actu, sed identificatam illi, verè tamen habentem rationem potentie, imperfectionibus semotis. Ad idem faciunt verba Iustini Martyris q. 3. ad Græcos, vbi loquens de voluntate diuina, dicit; *Quæ differentia est potentie ad actum, ea est voluntatis ad velle*. Ponit ergo aliquam distinctionem inter actum volitionis, & potentiam.

7 Inter has extremas sententias, sunt duæ mediæ.

Prima est P. Suarez in met. disp. 30. sect. 16. à n. 8. qui docet voluntatem habere rationem potentie in Deo respectu volitionis notionalis, seu spirationis: respectu verò volitionis essentialis negat voluntatem habere rationem potentie, siue respectu volitionis liberæ, siue necessariæ. Et licet ibi etiam doceat non dari in notionalibus potentiam secundum rem ad actum, quia hi non distinguuntur à potentiis, sed ad personas productas, tamen lib. 6. de Trinit. c. 5. n. 1. absolutè cum communi sententia Theologorum concedit potentiam realem ad actus notionales.

8 Altera sententia media est P. Arrubal 1. p. disp. 49. c. 2. quæ non paucis recentioribus arridet, qui negat potentiam formalem in Deo respectu volitionis, dicit tamen esse virtualem propter distinctionem rationis inter actum, & potentiam diuinam, nostro modo concipiendi. Vocatur virtualis potentia illa entitas, quæ cum sit vna & eadem cum actu secundo, habet tamen propter eminentiam suam, vim potentie, & gerit munera, seu vices plurium entitatum: quotiescumque enim aliqua entitas vna existens admittit prædicata cōtradictoria, aut plura, dicitur esse virtualiter multiplex, quia contradictio in nobis est principium pluralitatis formalis; in Deo autem, quia euincere non potest purissimam eius simplicitatem, vt diuidat eam, saltem eminentiam ponit, quæ eadem entitas vice plurium fungitur, & illa functio plurium, non diuisio, virtualiter pluralitas vocatur. Sic paternitatem, & essentiā virtualiter realiter distinguimus, quia eadem entitas suscipit prædicata contradictoria, vt realiter communicari, quæ natura, non communicari, quæ paternitas. Eodem modo inuenitur ex duplici capite distingui virtualiter volitio à voluntate; Primò quia in Deo saluamus quod moueatur, seu determine- tur à sua cognitione: non mouetur autem volitio, quia hæc est formaliter ipsum velle, nec determinari, & moueri indiget vt velit: mouetur verò voluntas pro potètiâ: ergo distinguuntur. Secundò, quia posse amare etiam creaturas non est liberum prædicatum in Deo, amare verò in actu, liberum: ergo est sufficiens fundamentum distinguendi ipsum posse à velle.

9 His opinionibus mediis aggrego illam, quæ dicit in Deo esse potentiam voluntatis logicam, non physicam: est autem logica potentia nil aliud quàm non repugnantia quæ aliquid dicitur possibile, & ita est idem quod possibilitas actus, non potentia influxiua, seu causatiua actus. Est autem potentia physica, vis aliqua causatiua alicuius actus, quæ radicaliter est in ipsa natura, vel substantia rei operantis, proximè &

formaliter in ipsa virtute eliciente, quæ determinat substantiam de se indifferentem, aut non immediatè potentem ad actionem talem, vel talem. Et licet in Deo non sit aliud principium operatiuum quàm eius substantia, hoc tamen ideo est, quia eius substantia seipsa habet omnem vim & determinationē, quam nos habemus per duas entitates, substantiam, & potentiam; vnde non deest Deo perfectio, & vis potentie, sed duplicatio entitatis, & imperfectio. Hæc ergo sententia negat voluntati diuinæ potentiam physicam, logicam concedit, id est possibilitatem actus, non vim influxiuam in actum. Ita M. Gonçalves in præsent. disp. 50. sect. 2. Sequitur P. Ruiz tomo de volunt. disp. 1. sect. 1. n. 19.

Mens D. Thom.

Vt à clarioribus incipiamus, hæc vltima sententia 10 de potentia logica, non physica, relinquenda est, non quia falsa, sed quia non ad rem. Non est dubitatio præsens de possibilitate diuinæ voluntatis, aut volitionis, sed de potentia physica, quæ est vis influxiua in actum. Nam de possibilitate constat quòd est potentia ad esse, non operari, dicitur enim aliquid possibile vt sit, potentia autem physica, de qua agimus in præsent. est vis, seu virtus operatiua. Non inquirimus autem nunc, an in Deo sit possibilitas ad esse, nec volitio diuina, an habeat possibilitatem vt sit, cum constet non esse impossibile, sed omninò possibile, cum sit ipsum esse per essentiam, sed an sit in Deo voluntas per modum potentie operatiue & influxiue in volitionem. Et sic impertinenter diuertit ista sententia, & inflectit dubium propositum de potentia, quæ est vis physica ad possibilitatem logicam, quæ est posse ad essendum, quasi dicatur quòd in Deo datur posse velle, id est, possibilitas ipsius volitionis, non autem posse, id est, potentia, seu virtus influxiua in volitionem, quod solum in præsent. quærimus.

Confirmatur quia hac ratione non solum in vo- 11 luntate, seu in actu secundo voluntatis, sed in actu secundo intellectus, & in actu secundo ipsius existentie, & in quocumque actu secundo quantumvis abstracto, & præciso ab actu primo, imò in quocumque attributo Dei datur istud posse, quod est non repugnantia, seu possibilitas logica; nam etiam intelligere quod est actus secundus, non repugnat dari, & existentia, seu esse Dei non repugnat dari, & immensitas, & æternitas, & quodlibet attributum non repugnat dari: ergo si hoc solummodo datur posse ad velle, id est, non repugnantia volitionis, nihil dicimus quod non sit commune omni attributo, & omni actui secundo; & sic non condistinguiamus actum secundum à potentia, quæ est principium eius, nec respondemus difficultati, an detur potentia, quæ sit principium, & virtus influxiua in actum secundum, vt in operationem suam.

Loquendo ergo de potentia physica, & influxiua 12 mens S. Thom. clarè videtur colligi ex 2. contra Gentiles cap. 10. & 1. p. q. 41. art. 4. ad 3. Nam priori loco sic dicit: *Potentia non dicitur in Deo sicut principium actionis, sed sicut principium facti*; quia potentia respectum ad alterum importat in ratione principij, est enim potentia actiua principium agendi in aliud, vt patet per Philos. in 5. met. manifestum est quòd potentia dicitur de Deo per respectum ad facta secundum rei veritatem, non per respectum ad actionem, nisi secundum modum intelligendi, prout noster intellectus diuersis conceptionibus vtrumque considerat, id est, diuinam potentiam, & eius actionem: Vnde si aliqua actiones Deo conueniant, quæ non in aliquod factum transeant, sed maneant in agente, respectu harum non dicitur

dicetur in Deo potentia nisi secundum modum intelligendi, non secundum rei veritatem: Huiusmodi autem actiones sunt intelligere & velle: potentia igitur Dei proprie loquendo non respicit huiusmodi actiones, sed solos effectus: Intellectus igitur, & voluntas in Deo non sunt ut potentia, sed solum ut actiones. Posteriori loco sic dicit D. Thom. Intelligere & velle non sunt tales actus qui designent processionem alicuius rei à Deo distincta vel essentialiter, vel personaliter. Vnde respectu horum actuum non potest saluari ratio potentia in Deo, nisi secundum modum intelligendi & significandi tantum, prout diuersimodè significatur in Deo intellectus, & intelligere, cum tamen ipsum intelligere sit eius essentia non habens principium. Sic D. Thom.

12 Ex quibus locis colliguntur istæ tres propositiones de mente D. Thom.

Prima, quod respectu actionis non datur secundum veritatem potentia in Deo, licet detur respectu termini producti, seu procedentis per actum.

Secunda, quod datur potentia respectu actus solum secundum modum significandi, non ex parte rei significatæ, sub diuersis tamen conceptibus diuersum illum modum, seu sub diuerso illo modo significantibus.

Tertia, quod eodem modo loquendum est de voluntate, atque de intellectu quoad negandam rationem potentia, excepto quod intelligere constituit ipsam naturam Dei. Vnde addo illationem, quod sicut de intelligere negamus omnem conceptum actus primi ex parte rei conceptæ, ita debemus negare in ipso velle, excepto solum quod velle non constituit naturam diuinam, sicut intelligere, sed se habet ut consequutum ad illud, & hac ratione respectu ipsius intelligere, ut natura diuina est, volitio habet quasi rationem operationis, ut statim explicabimus.

Pro huius intelligentia nota tres terminos.

Primum, quid sit aliquid Deo attribui secundum modum significandi, quid ex parte rei significatæ.

Secundum, sub qua consideratione potentia significatur in Deo.

Tertium, quomodo operatio ei attribuitur.

14 Primum sic explico: Illa dicuntur attribui Deo ex parte rei conceptæ, quando res ipsa representata verè inuenitur in re in Deo, licet in conceptu representetur ut distincta ab alia perfectione, cum tamen in Deo totum sit vna entitas, sicut sapientia, & iustitia Dei à nobis diuersis conceptibus representantur; & quælibet perfectio representata inuenitur in Deo, v. g. sapientia, & iustitia, sed non inuenitur vna distincta ab alia, sed totum est vna entitas. Illa verò dicuntur secundum modum significandi attribui Deo, quæ ita representantur, ut in Deo in re non sint, sed nos non possumus nisi sub illa connotatione, & modo ea representare: sicut cum aliquod attributum representamus per ordinem ad creaturam, qui ordo in Deo non est, nec potest correspondere illi respectui, quantumcumque præciso conceptu velimus illum apprehendere, aliqua relatio in re, se tenens ex parte Dei, quia talis relatio in Deo non est etiam identificata cum aliis attributis, sed solum ex modo nostro concipiendi imperfectè concipitur sic.

15 Secundum sic explico; quod potentia potest comparari ad suum exercitium & operationem dupliciter. Primum, in ratione principij fundantis, seu sustentantis operationem, & quasi ex parte suppositi se tenentis tanquam res operans. Secundum, in ratione actus primi, id est vltimè actuabilis, & in vltimo actu constituibilis: sicut se habent essentia,

& esse, quod essentia potest comparari ad esse, vel sicut ipsa substantia & quidditas rei, quæ per esse non constituitur, sed res constituta per esse extrahitur à suis causis, & sic dicitur perfectionem, nec repugnat Deo; vel potest comparari in ratione actus condistincti ab existentia, & est actuabilis per ipsam, & sic consideratur ut aliquid actuabile, & minus in ratione actus quàm existentia, quæ est actus vltimus in essendo. Et hoc modo non inuenitur in Deo conceptus essentia seorsum ab existentia, & sub distincto conceptu, ei correspondens.

Tertium sic explico, quod operatio importat 16 duo scilicet exitum ab operante, & actum secundum, seu vltimum in genere operatiuo. Et sub præcisa ratione exitus, seu egressionis ab operante non repugnat Deo, nisi ob summam eius simplicitatem, quia non potest dari realis egressio, nisi ubi est realis distinctio, quæ in Deo non inuenitur, nisi ubi obuiat oppositio relatiua: in absolutis enim distinctio esse non potest. Seclusa autem ratione hac summæ vnitatis, non repugnat egressio, & origo vnius ab alio, ut patet in personis diuinis, quarum quælibet habet summam perfectionem, & tamen procedit vna ab alia. Vnde si cum summa vnitatis Dei comparatur virtualis distinctio, comparietur virtualis, seu eminentialis egressio, qua ratione admissimus in Deo virtualem, & eminentem rationem operationis etiam in intellectu præced. tomo disp. 16. art. 2. Cæterum considerata operatione in ratione actus vltimi, & secundi, non potest considerari aliquid ab illa distinctum, nisi vel quia etiam est actus secundus, & vltimus in alia linea, & eo in alio genere, sicut intelligere comparatur ad velle, & vnum attributum ad aliud, vel quia intra eandem lineam consideratur ut potentia & actus primus, & consequenter ut actuabilis; & consummabilis per actum secundum. Et hoc est quod repugnat conceptui actus puri, ut diximus disp. cit. & iam iterum explicamus.

Prima propositio D. Thom. declaratur.

Hoc supposito explicamus mentem S. Thom. 17 & propositionis eius. Negat prima propositio rationem potentia respectu actionis, seu actus, tam volendi, quàm intelligendi, vel exequendi, quod intelligitur de potentia per modum actus primi, siue formalis, siue virtualis intra eandem lineam sui actus, v. g. potentiam, seu actum primum in genere volitiuo ad volendum, in genere intellectiui ad intelligendum, &c. Nam quod vnum attributum intra suam lineam perfectum, & in actu vltimo & puro intelligatur quasi radix & principium alterius, vel ipsa natura, quæ se habet ut radix respectu alicuius attributi, vel operationis, non repugnat, nec hoc pertinet ad rationem actus primi. Et negamus talem potentiam tam formalem, & secundum rem in Deo, quàm virtualem, & secundum munus actus primi. Sicut non potest dici quod in Deo sit potentialitas aliqua virtualis, sicut non potest dici quod est imperfectio virtualis in Deo. De actu primo formali, patet, quia hoc ipso quod dicimus actum primum, secernimus ab illo conceptu actum eius vltimum, & secundum: ergo in illa linea concipimus aliquid ut amplius actuabile & consummabile per vltiorem actum: ergo ille conceptus actus primi ita est actus quod est actuabilis, utpote nondum vltimus actus, in illa linea: ergo pugnat cum conceptu actus puri, qui est summus actus, & nullo modo actuabilis quia excludit intrinsecè omnem potentialitatem, & imperfectionem.

fectionem : ergo & omnem actuabilitatem : est enim actuabile aliquid sub ratione alicuius potentialitatis. Et sic licet plures conceptus & lineas, seu genera perfectionum possimus distinguere in Deo, quarum quælibet in sua linea actus purus sit, explicatus tamen per diuersos conceptus, seu attribua; tamen quod diuidatur vnus conceptus tanquam actus primus, & alius tanquam actus vltimus, & secundus in eadem linea, seu perfectione, non stat, nisi soluendo conceptum actus puri, qui non patitur conceptum actus vltius actuabilis, sed summus actus est.

18 Et hinc prob. non posse etiam virtualementem actum primum Deo attribui, ita quod ex parte rei conceptæ ei conueniat, quia quod in sua intrinseca ratione potentialitatem, & consequenter oppositionem habet cum ratione actus puri, nec virtualiter potest esse in Deo, quia nihil est in Deo nisi purificatum ab omni imperfectione, nec potest in Deo esse virtualiter, quod in se intrinsecè imperfectum est, alioquin possemus dicere quod Deus virtualiter realiter est ens limitatum & impotens & deficiens, quod est implicatorium, cum Deus in se sit omnibus modis perfectus, nec possit ei attribui aliquid siue virtuale, siue formale, quod verè diuinum sit, & ei conueniens realiter in se, nisi sub ratione, & conceptu perfectionis omnem imperfectionem excludente. Imo etsi perfectiones omnes creatas contineat, & fungatur illarum vice, non tamen continet etiam virtualiter earum imperfectiones & potentialitates, quia illud continet Deus virtualiter, & eminenter, cuius est principium, & quod à se participatur: Non participatur autem imperfectio aut potentialitas; non ergo id continet etiam virtualiter. Vnde excludimus à Deo omnem conceptum virtualementem rei imperfectæ, quod aliqui Recentiores conantur Deo intrudere, v. g. conceptum contingentie virtualis, actus primi virtualis, & similia, (possent etiam limitationem virtualementem, dependentiam, deficientiam virtualementem Deo imponere) existimantque illo nomine *virtualis*, quasi spongiâ quadam deleri omnem creaturæ sordem, Deoque posse attribui, eo quod summa illa, & eminentissima entitate sua fungitur vice omnium eorum, quæ in diuersis, & imperfectis creaturis dispersa sunt. Sed falluntur vehementer, & nihil hoc pertinet ad explicandam præsentem quæestionem, in qua tractantes, an voluntas diuina, vt in Deo est, secundum rem, habeat vim potentie & actus primi per ordinem ad actum secundum, ita quod ex parte rei conceptæ attribuat Deo actus primus in re identificatus cum secundo, per nostros conceptus diuisus, sicut diuiditur immensitas, & æternitas, iustitia, & sapientia, & vterque conceptus Deo datur, licet distinctio eorum non sit in re.

19 Ostende hoc, quia ille virtualis actus primus, qui attribuitur diuinæ voluntati, vel est in Deo realiter, & constituit illum vt potentem in ratione diuinæ voluntatis ad actum, & operationem suam, vel solum vt continentem omnem potentiam, & actum primum voluntatis creatæ, quam manifestum est continere, quia causat, & deriuat illam, à se, quidquid autem causatur à Deo, est in Deo vt in causa. Si dicatur actum primum virtualementem solum dici virtualiter esse in Deo, quia in eo virtualiter continetur actus primus creatus, vt in causa, sic omnino est extra rem, quia nos non quærimus in præsentem an Deus contineat in se, vel in causa, voluntatem creatam, & non solum actum secundum eius, sed etiam actum primum: constat enim quod totum hoc causatur à Deo; sed quærimus an Deus ipse in se habeat voluntatem per modum actus primi, ita

quod actus primus sit diuinus, & non solus creatus, non solum contentus eminenter, & virtualiter in Deo, vt effectus in causa, sed etiam realiter sit ipse Deus. Si autem Authores illi & assertores actus primi & potentie virtualis in diuina voluntate nihil aliud volunt dicere, quam quod voluntas diuina continet eminenter potentiam, & actum primum voluntatis creatæ, non respondent quæstioni, nec nos in hac parte difficultatem habemus, quis enim dubitare potest, quod Deus virtualiter & tanquam in causa contineat omnem potentiam & actum primum creatum? aut quis etiam dubitare potest, quod quando alij Authores dicunt esse in Deo potentiam voluntatis, & actum primum formaliter vt *supra* retulimus, quibus opponuntur isti Authores qui dicunt solum esse virtualiter, non intelligunt quod in Deo sit formaliter potentia, & actus primus creatus, seu voluntatis creatæ. Quis enim hoc diceret, nisi infans? Ergo si contra illos dicunt isti Authores solum in Deo esse potentiam virtualementem, loquuntur de virtuali potentia quæ sit in Deo, non de continentia virtuali, tanquam in causa potentie voluntatis creatæ: in hoc enim nullo modo illis opponuntur, nec ad rem loquuntur.

Si autem dicatur primum, scil. potentiam illam virtualementem per modum actus primi non solum esse voluntatem creatam in Deo contentam vt in causa, sed esse realiter diuinam entitatem, illamque reddere realiter potentem, licet virtualiter, id est fungentem vice potentie eminentiori modo quam creaturæ. Contra est, quia in hoc nihil hæc sententia addit supra illam, quæ docet dari actum primum formaliter in Deo, licet sola ratione distinctum ab actu secundo, cum fundamento in re, quod fundamentum est virtualis distinctio, id est non actualis, sed fundamentalis. Non etiam illa sententia fatetur in re non distinguere actum primum à secundo, sed esse eandem prorsus entitatem eminentiâ suâ fungentem vtriusque officio, ita tamen distinguibilem per duos conceptus, quod non solum ex modo significandi, sed ex parte rei conceptæ, vni conceptui correspondet actus primus tantum, alteri actus secundus tantum, sicut eadem res est iustitia, & misericordia fungens vtriusque munere, sed tamen formaliter, & in re correspondet aliquid conceptui iustitiæ, & aliquid conceptui misericordiæ, quæ solum distinguuntur actu formaliter per intellectum, & in re virtualiter, seu fundamentaliter. Et similiter se habet paternitas, & essentia quæ in re sunt eadem entitas, communicabilis vt essentia, incommunicabilis vt relatio; quo exemplo vtuntur. Si Authores ad explicandum illum virtualementem actum primum & tamen iustitia, & misericordia, paternitas, & essentia formaliter sunt in Deo, non virtualiter tantum. Ergo non amplius dicunt, quam illi qui ponunt formaliter dari actum primum, sed sola ratione distinguere, & qui ponunt formaliter dari paternitatem, sed sola ratione distinguere ab essentia. Cuius signum euidentius est, quod si diuiduntur illi duo conceptus, & virtualementem distinctionem beneficio intellectus actualementem reddunt, vni conceptui correspondet actus primus in Deo, sine secundo, & alteri actus secundus sine primo, sicut vni conceptui correspondet paternitas sine essentia, alteri essentia sine paternitate, & idem est de omnibus attributis. Si autem correspondet vni formaliter actus primus diuinus, licet sola ratione distinctus ab actu secundo, nihil aliud significatur illo termino *virtualis potentia*, quam illo termino *formalis potentia*, licet sola ratione distincta ab actu secundo, sicut idem est dicere *virtualis paternitas* quod *formalis paternitas*, id est virtualiter solum distincta ab essentia. Aut si aliquid

aliquid aliud correspondet illi conceptui præciso, quam actus primus formaliter, vel formaliter erit actus secundus, & sic non est præscindere ab actu secundo, & ponere ex parte rei conceptum actum primum in Deo, distinctum ab actu secundo, nec aliquid illo conceptu virtualis actus primi explicatur, quod non conceptu formalis actus primi, ut distincti ab actu secundo.

21 Itaque istis duobus conceptibus separatis per intellectum, ille qui repræsentat potentiam seu actum primum per respectum ad actum secundum, sed segregatum ab ipso, non repræsentat illum in actu ultimo possibili in illa linea, v.g. in linea voluntatis, & intellectus, aut alterius potentie, siquidem actus secundus est actus posterior, & ultimus in illo ordine: ergo ille conceptus sic præuisus non est conceptus actus puri in illa linea. Patet consequentia, quia actus purus est actus summus nihil potentialitatis aut actuabilitatis habens, ita quod non sit reducibilis ad ulteriorem actum, alioquin si est reducibilis, illud habet minus de actu, & sic non est summus. Si autem datur conceptus actus primi seorsum à secundo, ille nondum est in ultimo actu illius lineæ, sed est reducibilis ad ulteriorem actum, siquidem deest ei secundus actus: ergo non est actus purus & summus in illo ordine. Nullus autem conceptus datur de Deo, quantumcumque præcisus ab alio conceptu vel attributo, quin uterque repræsentet actum purum in illo ordine & linea, quia id quod repræsentat diuinum, esse debet non creatum, nihil autem est diuinum quod non sit actus purus omnem actuabilitatem & potentialitatem excludens.

22 Ex quo patet esse differentiam inter distinctionem vnius attributi ab alio, & distinctionem actus primi à secundo, quod etsi distinguantur duo attributa, utrique tamen attribuitur, & correspondet ratio actus puri, & actualitatis diuinæ, quia utrumque concipitur ut aliquid diuinum & summum, non creatum, licet quia totam diuinitatis perfectionem vnicus conceptus noster exprimere non possit, diuidit conceptus, quorum cuilibet correspondet perfectio ut diuina, & in actu ultimo, licet non exprimat omne quod in re identificatur cum tali perfectione; sed tamen id quod pertinet ad formalem rationem, & lineam illius perfectionis sub actu puro & diuino explicare debet, quod non fit, si distinguitur in eadem linea vnius perfectionis actus primus & secundus, quia ille primus non exprimitur in actu ultimo, & consequenter nec in actu puro. Et licet vnum attributum se habeat ut radix, seu ratio, aut fundamentum alterius, sicut immutabilitas est ratio æternitatis, & natura est ratio proprietatum relationum, & operationum; tamen non per hoc intelligitur sub ratione actus primi, & non ultimi, sed utrumque intelligitur ut actus purus, & diuinus in sua formali perfectione, & in sua linea. Dicitur autem vnum se habere ut rationem & fundamentum alterius propter connexionem vnius cum altero, non solum identicè, sed etiam formaliter, non verò propter emanationem vnius ab altero, vel potentialitatem & actuabilitatem vnius erga aliud.

23 Quod autem concedimus in hac propositione potentiam, seu rationem principij ad terminum procedentem, iam *suprà* rationem reddidimus, quia respectu termini procedentis, siue facti, siue non facti, potentia, seu principium importat ultimam, & puram perfectionem quia non comparatur ad terminum procedentem, ut ad aliquid actiuans se, sed ad aliquid accipiens à se; & ita ratio potentie, seu principij sub illo respectu solum importat rationem dan-

tis & perficientis, non perfectibilis. Vnde ulterius fit quod etiam respectu ipsius actus ut tangentis & connotantis talem terminum datur potentia, & ratio principij, quia talis actus sub illa connotatione & attingentia non consideratur ut actus ultimus perficiens ipsam potentiam, & actum primum, sed perficiens, & tangens ipsum terminum, & sic ad talem actum ut perficientem aliud (scilicet terminum) non se, id est potentiam & principium, non est mirum quod detur ratio principij: sic enim non induit consideratio actus primi, id est perfectibilis ab actu secundo, sed ut pure perficientis sub illo respectu ipsum terminum.

Secunda propositio D. Thomæ.

Concedit quod secundum modum significandi 24 & intelligendi potest dari in Deo potentia distincta ab actu. Quod ex notabili *suprà* posito explicari debet de distinctione, non ex parte rei conceptæ, & quæ est rationis ratiocinatæ cum fundamento in re, sed de distinctione rationis ratiocinantis, & quæ solum tenet se ex parte nostri intellectus, & modi cognoscendi illius. Quod triplici modo potest facere intellectus. Primò, ex parte ipsius potentie, accipiendo non ipsam rationem actus primi, sed ipsam rationem operantis, ut significatur à nobis per modum principij. Secundò, ex parte ipsius actus, accipiendo non ipsam rationem actus secundi, ut contrapositam actui primo, quasi utrumque sit in Deo, sed ipsam rationem operationis, ut significatur, & cognoscitur à nobis per modum exitus ab operante, licet in re non exeat, sed à nobis significatur ut exiens. Tertio, ex parte obiecti, vel effectus connotati ab actu volitionis: sic enim circa particularia obiecta, ut tali modo attinguntur, seu ratione diuersæ connotationis ad obiecta distinguuntur diuersi actus voluntatis in Deo, tum inter se ut amor necessarius, & liber, actus amoris, & gaudij, iustitiæ, aut misericordiæ, &c. tum ab ipsa voluntate secundum se, quæ ab omnibus istis connotationibus abstrahit, & rursus potest saluari in ipso Deo ratio voluntatis per modum principij ad talia obiecta, vel effectus, & ad ipsos actus, ut tangunt & connotant illa obiecta, vel effectus.

Hac ratione diximus *preced. tomo disp. 16 art. 2.* 25 dari in Deo eminenter rationem operationis, & principij eius in intelligendo, non distinguendo ibi rationem actus primi, & secundi, sed rationem principij & exitus operationis ab ipso, eo quod distinctio actus primi, & secundi opponitur ipsi conceptui actus puri, qui in omnibus conceptibus attributorum Dei saluari debet; distinctio autem principij, & egressionis non opponitur nisi simplicitati, & unitati Dei, si sit in re talis egressio, si verò solum eminenter, & virtualiter inueniatur, non repugnat Deo, quia eius eminentissima perfectio implet vnica ratione quicquid fit per distinctionem plurium in creaturis. Et ita eminentialiter, & virtualiter est in Deo operatio, non formaliter. Hoc autem non est quia ex parte rei conceptæ in Deo correspondeat vnus conceptus principij, seu potentie, à qua sit effluxio, alius conceptus operationis quæ effluat intra Deum à suo principio. Hoc stare non potest, quia sic reducerentur ad conceptum actus primi, & secundi, qui in Deo distinguere non possunt neque ponendo actum primum formalem, neque virtualem, eo quod in illo conceptu actus primi importatur intrinseca imperfectio, & potentialitas, quæ nec virtualiter in Deo est. Sed tamen remoto isto conceptu imperfectionis, & potentialitatis, quem nec virtualiter Deo possumus attribuire, restat ut ex parte modi nostri concipiendi,

conciipiendi, & significandi, qui imperfectus est, distinguamus, seu connotemus in illis conceptibus habitudinem principii operantis & ipsius operationis, sine quarum connotatione, diuinam operationem non possumus apprehendere, quia in ordine ad creaturas apprehendimus; sed ex parte rei conceptæ nullam imperfectionem, aut potentialitatem, sicut est actus primus, ei attribuimus, etiam virtualiter.

- 26 Sic ergo in voluntate & volitione, in potentia, & actu eius quærimus aliquas formalitates, seu habitudines sub quibus explicare, & distinguere eas possumus, non sub formalitate actus primi, & secundi, quia formalitas actus primi repugnat conceptui actus puri, sed sub aliis formalitatibus, quæ illi non repugnent, ut est habitudo principij operantis, & operationis egredientis: has enim ex parte nostri modi concipiendi non possumus præscindere & alias in personis diuinis inueniuntur ut diximus: tamen sunt habitudines, sub quibus diuina apprehendimus, non quod in Deo sint, sed quod sub illo modo à nobis intelliguntur; sicut etiam dicimus in Deo dari essentiam, & existentiam, non quidem concipiendo illa sicut distincta, ita quod essentia concipiatur ut actuabilis ab existentia, sed concipitur essentia sub conceptu substantiæ, & quidditatis diuinæ, & existentia ut exercitium essendi extra nihil, licet eadem actualitas sint: sic concipitur habitudo potentiæ ut principij, seu rei operantis, & ut fundamentum operationis, & operatio sub habitudine exercitij exeuntis ab operante, licet talis habitudo non sit in Deo, licet non habitudine actus primi, & secundi, qui destruunt conceptum actus puri, habitudo autem principij, & principati, non, cum hæc inueniantur in personis diuinis. Et hoc est concipere aliqua ut distincta ex modo significandi, seu cognoscendi, non ex parte rei cognitæ. Et hoc pacto fatetur D. Thom. dari diuersos conceptus potentiæ, & actionis, voluntatis, & actus secundi secundum modum significandi, *in locis supra allegatis ex 2. contra Gent. & ex qu. 41. huius 1. p.* Et idem docet de omnipotentia *infr. qu. 25. art. 1. ad 3.*

Tertia propositio D. Thomæ.

- 27 Denique 3. propositio ex ipso D. Thom. manifestata est, qui eodem modo negat potentiam, seu actum primum respectu voluntatis ad velle, & respectu intellectus ad intelligere in Deo *in q. 41. art. cii.* Et repugnantia est eadem, quia actus primus repugnat conceptui actus puri, quæ repugnantia eodem modo currit tam in voluntate, quam in intellectu. Quomodo autem respectu voluntatis saluetur ratio naturæ antecedenter constitutæ per ipsum intelligere, quod nostro modo intelligendi præcedit velle, sine hoc quod detur vlla ratio actus primi ad volendum, sed se habeat ut actus secundus in vna linea, scil. intelligibile, ad alium actum secundum in alia linea, scil. volendi, quod totum capitur sub conceptu actus puri, statim dicemus soluendo argumenta.

Respondetur fundamentis oppositis.

- 27 Fundamenta primæ sententiæ iuuant nostram, idè non oportet soluere. Ad si fundamentum 2. sententiæ negatur anteced. Ad 1. probationem dicitur quod conceptus naturæ quando constituitur per actum secundum, & vltimum in vna linea, scil. in linea intelligibili, non repugnat quod nostro modo intelligendi se habeat ut radix alterius operationis in alia linea, scil. in linea volendi, sine hoc

quod sit in actu primo respectu illius. Repugnat autem quod intra eandem lineam alicuius perfectionis, quæ est actus purus, possit distinguere conceptus actus primi, & secundi, quia esset in illo genere destruere rationem actus puri, ut dictum est. Itaque non pertinet ad rationem naturæ, etiam si concipiatur ut radix alicuius proprietatis, vel operationis, habere se per modum actus primi, etiam radicalis. Et ratio est quia natura, & proprietas, seu operatio habent se ut perfectiones in diuerso genere, & linea, siquidem vnum consideratur ad modum substantiæ, aliud ad modum accidentis, vnum in genere entitativo, aliud in genere operativo, vnum in genere intelligibili, aliud in genere volitiui, aut sit de aliis, quæ diuersas lineas, & diuersa genera perfectionum sub istis considerationibus inducunt. Vnde bene stat quod vnum quodque intra suam lineam sit perfectum perfectione vltima, & requisita in ratione actus puri, sicut in linea intellectiua ipsum intelligere Dei est vltimatè perfectum, & actus summus in illo genere. Quod verò semel in suo genere, & linea se habet ut actus vltimus, & purus formaliter, licet consideretur ut ratio, seu radix alterius perfectionis in alio genere, & linea, non dicitur actus primus respectu illius, sed solum habere connexionem, & ordinem formaliter cum illa alia perfectione, non autem tendere ad illam, ut perfectibile ad perfectionem, & tanquam ad aliquid quod sibi deest ut perficiatur; quod tamen est de ratione actus primi, qui consideratur respectu actus secundi, ut perfectibile ad perfectionem, ut minor perfectio, & prima, ad summam, & vltimam, quod repugnat Deo. Non autem repugnat quod sint plures perfectiones (plures dicimus secundum formales conceptus: identicè enim, & in re omnia sunt vnum) & quod omnes illæ in summo, & tamen quia connexionem habent formaliter, dicatur vna consequi ad aliam ex vi formalis conceptus, non sicut sequitur perfectio ad perfectibile actus secundus ad primum, sed sicut sequitur perfectio ad perfectionem nostro modo concipiendi, imò in reatiuis realiter sequitur & procedit persona ad personam, & vtraque est in actu puro, non in actu primo respectu alterius?

Quod si instes: Nam conceptui naturæ deesse proprietatem, aut deesse operationem, est deesse aliquam perfectionem illi debitam: ergo si concipitur sine illa, & ut principium illius in quantum natura, concipitur in actu primo, & ut perfectibile ad suam perfectionem. Respon. quod deesse illi in re, & identicè quod est deesse priuatiuè talè proprietatem, esset imperfectio, deesse autem illi formaliter quod non est deesse priuatiuè, sed non exprimi negatiuè in illo conceptu, non est imperfectio, quia non pertinet illa perfectio ad suum conceptum formalem intra suam lineam, & genus, sed extra illam est; & sic intra lineam naturæ in actu vltimo est: petit autem aliam perfectionem alterius lineæ, non per modum perfectibilis ab illa in suo genere, & linea, sed ut perfectio integra, & summa in suo genere habens connexionem cum alia, sicut perfectio cum perfectione, non ut perfectibile cum perfectione: Hoc enim modo etiam attributa distinguimus formando diuersos conceptus, quorum quilibet repræsentat suam perfectionem in illo genere, & linea formali summam, & non repræsentat aliam alterius attributi, tanquam pertinentem ad formalitatem istius, licet habeat cum illo connexionem, sicut perfectio cum perfectione, non sicut perfectibile cum perfectione, actus autem primus semper se habet ut perfectibile. Cum autem comparatur perfectio cum perfectione, licet repræsentando

tando vnā non repræsentetur alia, sed videatur illi deesse, non tamen se habet vt actus primus, quia non comparatur tanquam perfectibile ad perfectionem, sed vt perfectio ad perfectionem, & vtraque in summo, & in actu puro. Petunt tamen omnia attributa, & omnes istæ perfectiones identificari in re entitatiuè, & identicè propter infinitatem in genere entis, & sic quod vna non desit in re alteri, si enim sic deesset, priuatiuè deesset.

- 30 Ad 2. prob. Resp. ex dictis, quod actus notional-
les possunt dupliciter considerari, vel entitatiuè, &
vt sunt idem cum actibus immanentibus essentiali-
bus vt velle, intelligere vt *infra disputat.* 13.
ostendemus : & hoc modo etiam non datur po-
tentia, & actus primus ad illos. Alio modo
possunt considerari relatiuè, id est vt tangunt ip-
sos terminos personales procedentes. Et hoc
modo sicut datur potentia ad terminum proce-
dentem, sic ad actum notionalem vt tangit talem
terminum, quod est sumere illum actum vt notio-
nalem formalissimè, non tamen ad actualitatem,
& entitatem illius actus secundum se vt præcisè
dicit actum secundum essentialem, & immanen-
tem. Quare nos simpliciter fatemur dari poten-
tiam, & principium notionale in Deo ad actus
notionales, sicut ad personas, sed in sensu valde for-
mali, ad actus notionales vt tales, id est, vt tangen-
tes personas procedēte, & sub hac præcisâ ratione,
nō ad ipsos, vt sunt idē quod essentialis actus in se.

- 31 Ad 3. prob. eodem modo Resp. quod ad istam actionem omnipotentia, vt tangit terminum factum, datur principium & potentia, sicut ad ipsum terminum. Ad ipsam vero actionem in sua entitate, & actualitate vt præcisè actus secundus est, non datur potentia, nisi secundum modum intelligendi, & significandi; non ex parte rei conceptæ, vt explicatū est, & hoc est quod dicit D. Tho. *loco cit. in argumento.*

- 32 Ad 4. prob. dicitur quòd in Deo datur ratio obiecti, & speciei, licet non distincta ab actu intelligendi, non tamen datur ratio potentiae, seu principij ex parte rei significatae, sed solum ex parte modi significandi, quia ratio obiecti, & speciei non consideratur vt aliquid perfectibile respectu ipsius intelligere, sed vt purè perficiens, & perfectio eius; quia est specificans ipsum, & terminans, seu mouens. Vnde non repugnat quòd ipsam intelligere Dei sit obiectum, & actus, & species, quia totum perfectio est, & nihil super factibile concipitur. At verò actus primus, & potentia comparantur ad actum secundum, vt perfectio, non quomodocumque, sed vltèriùs perfectibilis & tendens ad vltimam perfectionem, & sub hac ratione repugnat actui summo & puro etià virtualiter, & etiam ex parte modi; taliter quod illi attribuitur, & refundatur in rem conceptam non verò repugnat perfectio obiecti, quæ est purè perficiens ipsum intelligere. Et sub hac ratione datur in Deo scilicet vt purè perficiens, seu specificans & determinans actum: hoc enim solum est de ratione obiecti & speciei. Quod verò sit intelligibilis in potentia, & non in actu, hoc non pertinet ad rationem obiecti, vt obiectum, sed vt imperfectum in linea intelligibili, & in potentia; & sic non est in Deo, nec illi attribuitur.

- 33 Ad auctoritatem Iustini martyris; Resp. ibi non loqui de voluntate diuina in speciali, sed in genere de voluntate; & sic verum est quod sicut se habet potentia ad actum, ita voluntas ad velle: hoc enim sumit ibi pro maiori quomodo verò hoc in Deo inueniatur, an ex modo significandi tantum, an ex parte rei significatæ vt distinctis conceptibus ex parte
- Ioan. à S. Thoma in 1. part. D. Th. Tom. 2.*

Ioan. à S. Thoma in 1. part. D. Th. Tom. 2.

Dei correspondentes, ibi non explicat. Ut omittam non ita constare, an ea verba dicat Iustinus ex propria sententia, sed solum obiciendo contra quandam Græcorum responsionem antè datam difficultati, non resoluendo.

Ad ea, quæ obiecta sunt pro sententia Arrubalis, & pro virtuali potētia voluntatis, quæ sunt illa duo argumenta, quæ similiter *in disp. 16. romo preced. arr. 2.* ex eisdem authoribus retulimus ad probandum dari intellectualitytem in Deo in actu primo.

- Ad hæc ergo Resp. sicut ibi respondimus. Ad primum enim ex parte motionis, quia scilicet in Deo obiectum ipsum mouet, & attrahit voluntatē, & non mouet ipsam volitionem iam habitam, sed voluntatem vt habeat volitionem, dicimus quod hoc argumentum proponit, & soluit S. Thom. q. 23. de verit. art. 1. ad 6. vbi sic dicit: *Ad 6. dicendum, quod quando volitum est aliud à voluntate, volitum mouet voluntatem realiter, sed quando volitum est idem voluntati, tunc non mouet, nisi secundum modum significandi: & quantum ad hunc modum loquendi (secundum Comment. in Physic.) verificatur dictum Platonis, qui dicebat quod primum mouens mouet seipsum, in quantum scilicet intelligit & vult seipsum.* Idem de motu vitæ quo Deus mouet seipsum docet 1. p. q. 18. art. 3. ad 1. & 1. contr. gent. cap. 98. Intelligitur enim motus in Deo seu Deum mouere seipsum vel ab obiecto moueri voluntatem seclusis imperfectionibus, quia videlicet operatur à se, & voluntas eius determinatur à se, seu potius est sua determinatio, & sua volitio ex se, supposita cognitione obiecti. Itaque negamus obiectum in Deo mouere voluntatem vt eliciat actum, seu vt reducat se de actu primo ad secundum: sic enim obiectum non mouet, nec est causa volendi quia in Deo non datur volitio per elicientiam à potentia formaliter, & in re eliciente, dicitur autem moueri ab obiecto, & cognitionem esse causam volendi, ita vt hæc causalis sit vera, Deus quia intelligit, amat, non è conuerso, non quia sit causa vel mouens ad eliciendum actum, sed quia vtrumque Deus habet in actu secundo, & in actu puro, scilicet obiectum esse actu intellectū, & obiectum esse actu volitum, & vna ratio ex suo formali conceptu est connexa, & subordinata alteri, & non è contra, licet identicè sint vnum, sicut etiam æternitas sequitur ad immutabilitatem, bonitas ad perfectionem, non è conuerso; sic ex obiecto intellecto sequitur actus amoris, & intelligere est ratio ipsius velle, sicut vnum attributum est ratio alterius, & natura est ratio attributorum. Et hoc modo verificatur, quod obiectum mouet voluntatem, quantum ad modum significandi, quatenus obiectum volitum est ratio & fundamentum volitionis, sicut vnum attributum est ratio alterius tanquam specificatiuum, & determinatiuum illius, & rationem finis habens respectu sui met, quia totum hoc est vnus & idem actus purus, & secundus, non tanquam mouens ad elicientiam ipsius actus: nec enim actus ille egreditur, & procedit in re, sed est actus purus subsistens. Vel etiam dicitur mouere obiectum secundum modū significandi, & remotis imperfectionibus motus, quia habet in actu vltimo per seipsum, id quod in creaturis fit per motū obiecti ad elicientiam, & egressionem actus, id sine elicientia & egressione fit per summam actualitatem, à seipso id habendo. Habere autem virtualiter rationem mouendi quod in creaturis est motus, & in Deo summa actualitas, non est inconueniens, quia hoc non est Deum in se esse virtualem actum primum, sed conuenire virtualiter actum primum, qui est in creaturis.

K

Ad

35 Ad 2. Resp. quod posse amare creaturas in Deo, & amare illas actu eodē modo, & æquē necessariū est ex parte actualitatis, & actus secundi in se, sed non quantum ad connotationem, & tactum extrinsecum obiecti: volitio enim Dei libera perfectionem, & entitatem habet in Deo necessariam, & ita voluntas diuina est se necessaria, non habens necessariam habitudinem ad obiectum secundarium, ut optimē ex D. Th. dicit Caiet. *hic art. 3. §. In responsione ad 5.* & nos amplius explicabimus *seq. art.* Vnde non sequitur, quod in voluntate diuina possit distinguī actus primus, & secundus quoad intrinsecam perfectionem, sed solum vnus & idem actus secundus, seu actus purus cum connotatione ad aliqua volita, aut sine illa, & ex parte huius connotati recipit contingentiam, non ex parte intrinsecæ entitatis, & perfectionis actus secundi; qua etiam ratione ad actum, ut tangit, seu connotat actum vel obiectum, diximus posse dari in Deo potentiam sine ratione actus primi, quia idem actus secundus est qui habet ad aliqua obiecta istā connotationem, & qui non habet. Vel 2. dicitur, quod velle creaturam, quod est prædicatum contingens, & posse velle eandem, quod est necessarium, est idem quod possibilitas volitionis, & volitio ipsa. Possibilitas autem seu potentia logica, & actualis volitio non distinguuntur in Deo, sicut actus primus & secundus, nec pertinet ad præsens de illis agere, quia solum tractamus de potentia physica & influxiua, an detur, non de possibilitate logica.

ARTICVLVS III.

An detur in Deo actus liber, & quæ difficultates circa illum versentur?

Nihil in fide, & naturali ratione apertius, & expeditius, quàm Deum habere libertatem, nihil in Theologia intricatius, & occultius, quàm modum libertatis eius declarare. Et ideo ut certa in hac parte ab incertis separemus, prius tradenda sunt fundamenta fidei, & principia rationis naturalis; deinde difficultates enodandæ.

Libertas in Deo.

Igitur Deum liberè operari & velle circa obiecta creata, quæ ab ipso procedunt, indubitata fidei dogma est; licet aliquos hæreticos eam negasse, *infra* referemus tractando varias sententias circa liberum actum Dei. Et D. Thom. *in fine questione 25. artic. 5.* refert aliquos, suppresso nomine, dicentes Deum agere ex necessitate naturæ. Dicitur enim ad Ephes. 1. *Qui operatur omnia secundum consilium voluntatis suæ.* Et Psalm. 93. *Deus volitionum liberè egit.* Sapient. 12. *Subest tibi cum volueris, posse.* Et 1. ad Corinth. 12. dicitur de Spiritu sancto. *Hæc omnia operatur vnus atque idem Spiritus, diuidens singulis prout vult.* Isai. 46. *Consilium meum stabit, & omnis voluntas mea fiet:* Constat autem quod consilium non est de necessariis: hæc enim consilio & arbitrio non reguntur, sed solum de liberis. Idem deducitur ex supremo dominio Dei, & potestate qua facit quidquid vult. Vnde dicitur Ps. 134. *Omnia quacumque*

voluit Dominus fecit. Iudith. 9. *Tu fecisti priora, & illa post illa cogitasti, & hoc factum est quod ipse voluisti.* Et Matth. 10. *Annon licet mihi, quod volo facere? volo autem & huic nouissimo dare sicut & tibi.* Denique ex misericordia diuina, est nostrarum precum exauditione, & varia immutatione rerum iuxta causarum merita diuersa, manifestè comprobatur libertas in Deo: nam si ex necessitate ageret, neque misereri posset, neque precibus moueri, aut rerum status mutare, quia ut determinatus ad vnum ageret: Constat autem misericordiam suam Deum liberrimè præstare cui voluerit, Exod. 33. *Miserebor cui voluero; & clemens ero in quem mihi placuerit.* Ierem. 18. *Si penitentiam egerit gens illa à malo suo quod locutus sum aduersus eam, agam & ego penitentiam super malo quod cogitavi ut facerem ei, &c.* Quæ omnia non possunt stare, si Deus ageret ex necessitate naturæ: nam in his quæ necessariò fiunt, non est misericordia iuxta placitum, & in vanum funduntur orationes, ubi non est mutatio sententiæ, &c.

Naturalis ratio sufficientia etiam principia habet ad id demonstrandum, tum ex effectibus à posteriori, tum à priori.

A posteriori quidem, quia in creaturis inuenitur libertas, & dominium in operando, ut experimur in nobis, & hoc est proprium intellectualis naturæ, tum quia in aliis naturis non inuenitur, tum quia hæc ex sua vniuersalissima indifferentia in iudicando, petit etiam hanc indifferentiam in volendo & operando: ergo talis modus operandi cum libertate & dominio est maior perfectio, quàm modus operandi sine illo; quia operari sine dominio est proprium inferioris naturæ, & non intellectualis, ad quam pertinet potius subiici & agi, quàm regere & agere, operari autem cum dominio est proprium superioris, & intellectualis naturæ: vnde & de homine dictum est in eius formatione; *Faciamus hominem ad imaginem & similitudinem nostram, ut præsit.* Cum ergo Deus sit suprema natura inter omnes, non potest ei conuenire modus operandi inferioris & subiectæ natura, sed modus operandi cum dominio, quod est proprium naturæ superioris: cui autem conuenit dominium, conuenit & libertas, quia liberum est quod habet dominium sui actus, & potest agere, vel non agere: Ergo hic modus operandi maxime conuenit Deo, qui est naturæ intellectualis purissimæ & supremæ respectu omnium, & maxime dominatiuæ, quia omnia ei obediunt, etiam quæ liberè operantur.

A priori autem ratio sumitur ex eo, quia Deus operatur cum cognitione finis vniuersalissima & perfectissima, siquidem ipse est finis vltimus, & omnia dirigit in fines suos, cum sit supremus omnium prouisor, & auctor, primum principium: Ergo ea quæ vult ordinata ad finem, non potest necessariò velle, nisi in quantum dicunt necessariā habitudinem ad finem, quia videlicet sine ipsis finis esse vel haberi non potest: cum enim ea quæ sunt ad finem amentur propter finem & ratione finis, si sine ipsis finis haberi vel stare potest, nõ obligant ex sua bonitate ut amentur, quia non deliguntur nisi ex subordinatione ad finem, in tali autem subordinatione non habent necessariam habitudinem ad finem, sed sine illis esse potest: ergo in vitalis subordinationis non amantur necessariò, & tamen amari possunt, non quidem ut necessaria ad finem, sed ex abundantia ad illum: ergo liberè, quia

quia sine necessitate, & coactione. Cum ergo omnes res creatæ ita comparentur ad ipsam diuinam bonitatem, quæ est finis supremus, quod sine ipsis haberi potest & stare illa bonitas, cum sit omnino independens à creaturis, non amantur secundum necessariam habitudinem ad ipsam: ergo ex vi illius non necessario amantur. Deus autem non amat aliquid, nisi ex fine, & propter finem, qui est sua bonitas, aliàs non ordinatè nec perfectè amaret, si non ex fine amaret: Ergo respectu eorum quæ sunt ad talem finem non habet necessarium amorem, sed liberum, licet respectu suæ bonitatis necessarium amorem habeat, quia est summum bonum, & obiectum proprium, & per se diuinæ voluntatis, in quod necessariam & per se habitudinem dicit, imò non habitudinem propriè, sed identificationem, atque adeo necessario est amor illius.

Difficultates circa liberum actum Dei.

4 Veritatem hanc sic fide & naturali ratione stabilitam, mirum quàm acres vrgeant & impugnent difficultates vix humanis discursibus extricabiles. Præcipua difficultatum capita ad tria reducuntur, quæ tria prædicata cum libertate impossibilia videntur inducere. Primum est ex parte indifferentiæ, quæ cum libertate diuina non videtur posse stare, & sine illa non datur libertas: eo quod potentia, seu voluntas significata per modum principij non potest actum habere vel non habere quoad entitatem actus: sic enim posset carere aliquo actu positivo, qui est perfectio diuina: modo enim non habet volitionem saluandi iudam, quam posset habere. Voluntas autem seu volitio significata per modum actus, non potest habere indifferentiam penes elici, vel non elici à potentia, quia non est actus egrediens à potentia, sicut in nobis, sed Deus seipso est actus secundus & purus. In attingendo autem vel non attingendo, non est indifferentia in actu semel egresso à potentia.

Secundum est immutabilitas, quæ omnino conuenit Deo & actui eius, libertati autem, quæ ad vtrumque vertibilis est, non videtur posse conuenire, vel si conuenit immutabilitas, in entitate actus, sed mutabilitas in respectu rationis erga obiecta, non apparet, cur modo in tempore non possit de nouo Deus velle, quod ante non volebat, cum ad hoc nulla mutatio realis requiratur, sed solum mutatio respectus rationis.

Tertium, est ex parte motiui à quo debet liberum arbitrium determinari hoc ipso quod liberum est; non apparet autem à quo determinetur libertas voluntatis in Deo, & cur magis inclinetur in hanc partem quàm in illam, cum ex parte voluntatis non detur potentialitas vt determinetur, ex parte verò intellectus non possint proponi alia motiua ad volendum hunc mundum vel nolendum, quàm quæ proposita sunt, cum omnia Deus comprehendat, & tamen certum est quod si Deus noller mundum producere, non illi defuisset motiuum præponderans isti quod tunc habuit. Vnde ergo magis moueri potest ad vnum, quàm ad aliud, cum omnia motiua siue ad volendum siue ad nolendum æquè illi sint proposita: & quodcumque sequeretur, esset conuenientius.

Varia sententia.

5 Suppono, omnes qui catholicè, & sano modo de diuina libertate sentiunt intellexisse in Deo non
Ioan. à S. Thoma in 1. part. D. Thoma. Tom. 2.

esse ponendam libertatem, sicut in nobis penes multiplicationem actuum egredientium à voluntate, vel retentorum, ne egrediantur: in hoc enim libertas nostra consistit, in emittendo scil. vel retinendo actum. Non sic diuina libertas: est enim actus purus, actus vltimus volitionis, est actus vnicus, pluriificari, & diuidi repugnat, non minus quàm ipsam absolutam Dei essentiam. Vnde oportet explicare diuinam libertatem, non penes retinere vel emittere actum è potentia voluntatis, sed in vno & eodem actu penes attingentiam, & connotationem circa obiectum creatum, & penes indifferentiam actiuam subiicientem sibi obiectum vel relinquentem, non penes passiuam recipiendi seu habendi ab obiecto perfectionem actus, vel non habendi; quo tamen actu posito, non est in potestate actus attingere, vel non attingere obiectum. Et quia aliqui hæretici non potuerunt eleuare mentem ad cognoscendum alium modum libertatis, quàm qui est in nobis penes egressionem, vel retentionem actus; ideo fortassis vel negauerunt in Deo veram libertatem vt VVicleph, Abailardus, Bucerus Calvinus apud Bellarminum lib. 3. de gratia & libero arbitrio c. 15. & 16. tomo. 3. vel posuerunt actum liberum esse accidens in Deo quod illi adesse, & abesse potest; vt quidam Vorstius Calvinista apud Becanum c. 11. de voluntate q. 4. quo nihil horribilius in Theologia dici potest. Sed tamen libertatem indifferentiæ actiuæ in actu penes potestatem attingendi vel relinquiendi obiectum esse magis intrinsecam & perfectiorem nostrâ, inferius expendemus.

6 Nec potest aliquis imaginari quod in Deo libertas sit in iudicio, à quo tanquam à principio & ratione præcedente voluntatem intelligatur oriri libera volitio; & sic penes egressionem vel retentionem ab aliquo principio; licet virtuali modi intelligenda sit libertas in Deo. Non, inquam, hoc potest fingi; tum quia difficultatem non euacuat, cum restet explicandum, an liber actus volitionis, qui modo est in Deo circa Petrum, licet egrediatur à iudicio diuino, sit idem cum actu nolitionis, qui posset esse circa idem obiectum an diuersus? si idè, currunt difficultates statim afferendæ, quomodo constituitur & distinguitur idè actus realiter in ratione volitionis, aut nolitionis, &c. Si diuersus, ergo aliquis actus diuinus deest modo Deo, qui posset ei conuenire scil. nolitio Petri. Tum quia vis libertatis formaliter est in ipsa voluntate, non in iudicio antecedenti: hoc enim principium libertatis esse potest non ipsa formalis libertas; alias ante voluntatis consensum posset in nobis esse meritum, vel peccatum: esset enim perfectum & formale liberum; quod tamen dici nullo modo potest; & sic D. Thom. ostendit liberum arbitrium, licet requirat iudicium indifferens antecedenter, formaliter tamen consistere in ipsa voluntate ad quam pertinet eligere & optare vt docet 1. p. q. 83. art. 4. Et Scriptura per voluntatis actus explicat libertatem Dei, vt Rom. 9. *Cuius vult miseretur, & quem vult indurat*, & 1. Corin. h. 12. *diuidens singulos prout vult*; Sapient. 12. *subest tibi cum volueris, posse*; Iacobi 4. *si Dominus voluerit*, &c.

Due principales sententia.

7 His suppositis, vt ordine aliquo tot & tam varias in hac parte sententias possimus discernere, aduertendum est duas fuisse quasi extremas sententias aut ordines sentiendi in hac parte, ex quibus quasi è fontibus seu capitibus cæteræ dimanant.

K 2

Prima

Prima affirmat Deum liberè velle vel nolle per intrinsecam determinationem, qua formaliter se determinat ad volendum potius, quàm nolendum.

Secunda, quòd per aliquid extrinsecum, & meram aliquam connotationem alicuius extra se, ita quòd Deus dicitur voluntariè producere, & velle producere res, quia in sua potestate habet eas producere, & non producere; non tamen quia per velle intrinsecum determinatur eius voluntas indifferens ad producendum, vel non producendum. Hanc secundam sententiã docuit Aureolus in 1. dist. 45. q. 1. quem refert Capr. ibidem q. unica art. 2. in argumentis contra secundam partem 1. conclusionis. Primam plures sequuntur Authores, sed eam in extremo sensu contra Aureolum aliqui sic acceperunt, ut dicerent non solum Deum per aliquid sibi intrinsecum determinari in sua indifferentia libera, sed quòd hæc determinatio seu extensio, aut terminatio ad obiectum est aliqua realis perfectio in Deo superaddita actui necessario, quàm vocant perfectionem liberam seu voluntariam, quæ est perfectio secundum quid, & ita non est inconueniens quòd aliqua talis perfectio desit Deo, v.g. determinatio ad nolendū producere hunc mundum, quam modo Deus non habet. Ita attribuitur Caiet. hic q. 19. art. 2. & 3. De cuius tamen sensu seq. art. dicitur.

- 8 Cum autem perfectionem aliquam realem ponere, quæ creata non sit, sed diuina, & tamen talis conditionis, quæ possit, vel potuerit non esse in Deo, horribile illud inconueniens afferat, quòd aliquid quod diuinum est possit non esse; sicut modò de facto non est in Deo nolitio creandi mundum, quæ tamen potuit conuenire Deo; vnde etiam sequitur quòd illa perfectio distinguatur ab entitate & perfectione necessaria, quæ Deo deesse non potest: hæc autem potest non esse in illo; nec refert illam vocari perfectionem secundum quid, quia si diuina est, & non creata, neque potest pati illa incommoda deficiendi à Deo, & distinctionem habendi à perfectione, seu actu necessario, nec dici potest perfectio secundum quid, quæ in se diuina & increata est: cum hoc inquam inconueniens sequatur, conati sunt aliqui diuersis viis hanc sententiam temperare.

Moderationes primæ sententiæ.

- 9 Prima moderatio est quòd illa determinatio libera Dei est quidem realis perfectio superaddita actui necessario, sed indistincta ab illo, sicut filiatio vel paternitas addunt ad essentiam diuinam aliquid relatiuum reale; non tamen distinctum ab absoluto quod est essentia. Et quidam addunt seu explicant quòd est quædam realis extensio Dei erga obiecta, quæ potest deficere Deo, & de facto modo deest nolitio creandi hunc mundum, & volitio creandi alium mundum: sed si deficit Deo, nulla perfectio deest, quia illa extensio perfectio non est. Ita Fonseca lib. 7. metaph. cap. 8. quest. 5. sect. 4. & Salas 1. 2. quest. 6. tract. 3. disp. 1. sect. 8. §. 7. & 8. Sed neutri euacuant inconueniens. Non primi; restat enim integra difficultas, quia illud reale sic indistinctum potuit non esse in Deo, si ipse non vellet creare mundum, sicut de facto nunc deest nolitio creandi, quæ tamen etiam aliquid reale & increatum est, licet indistinctum à necessario, & tanto magis reale quanto magis indistinctum à realitate Dei: Dicere autem quòd aliquid in se realiter & simpliciter diuinum potuit non esse, aut de facto non est, est intolerabile absurdum. Et ex hoc sequitur secundum, quòd non potest intelligi hoc superadditum sine aliqua distinctione; quia potest separari

& abesse, sicut de facto nunc deest in Deo nolitio creandi mundum: ergo distinguitur, quia bene sequitur: Est separatio: ergo & distinctio, licet è contra non semper valeat. Est distinctio: ergo separatio à parte rei. Filiatio autem, & paternitas non distinguuntur ab absoluto, non possunt tamen illi deesse, sed semper in illo sunt. Non secundi, quia illa, extensio si realis est, siue sit perfectio, siue non, aut est realitas creata, aut increata: Si creata, non potest esse interna Deo, nec constituere liberum increatum in esse liberi; Si increata; ergo deesse non potest, aliàs posset deficere, & non esse id quod increatum est.

Hinc ergo secunda moderatio illius sententiæ facta est, & dixerunt aliqui actum liberum esse quidem intrinsecè in Deo, & realem entitatem indistinctam ab actu necessario, ita quòd licet actus ipse sit liber, eius tamen entitas, & perfectio libera non sit. Sed tamen dicunt distinctionem eius à necessario, vel distinctionem volitionis à nolitioe sumi penes respectum rationis erga obiecta creata, quæ solum sunt liberè volita. Et hunc respectum addere supra actum necessarium, aut volitionis ad nolitioem, eo quod erga obiecta creata Deus non potest fundare relationem realem. Et sicut ideæ distinguuntur in Deo penes diuersos respectus rationis, licet in se idea realis entitas sit, ita volitio & nolitio inter se, & ab actu necessario distinguuntur penes diuersos respectus rationis; in se tamen intrinseca & realis entitas sunt, indistincta, & vna. Hæc sententia sic in genere videtur communius arrisisse Thomistis, quia sic videtur insinuari à D. Thom. nam quòd actus liber in Deo indistinctus sit à necessario, & ex parte subiecti necessitatem habeat. D. Th. tamquam extra controuersiam supponit, dicit enim (q. 23. de verit. art. 4.) quòd diuinum velle necessitatem habere ex parte ipsius volentis, & actus, indubitabiliter verum est: nam actio Dei est eius essentia, quam constat esse æternam. Vnde hoc in questione non ponitur, sed utrum velle ipsum necessitatem habeat per comparisonem ad volitum, quæ comparatio intelligitur, cum dicimus Deum velle hoc vel illud. Vbi vtrumque videtur, affirmare, & quòd actus ille in sua perfectione seu entitate necessarius & realis est in Deo, & quòd habitudo ad volita est comparatio, quæ intelligitur ad illa, quòd solum aliquid rationis est. Et generaliter has relationes Dei ad creaturas esse rationis, probat S. Th. 1. p. q. 13. art. 7. licet respectus qui consequuntur actionem volendi, & amandi ab æterno dicantur de Deo, ut ibidem dicit ad 3. & q. 14. art. 15. ad 1. & q. 15. art. 2. ad 4. Habitudo autem istam volitionis diuinæ ad creata volita, vocat D. Thom. habitudo non necessariam in hac quest. 19. art. 3. ad 5. & q. 13. de verit. art. 4. ad 2. & 4. & 1. contra gent. cap. 82. non propter defectum volitionis in se, sed propter inadæquationem voliti ad ipsam volitionem, quia excedit eminentia sua vtrumque volitum, ut dicit cit loco contra gent. Vnde communiter Thomistæ hanc viam sequuntur, Capr. in 1. dist. 45. quest. 1. art. 2. ad argumenta contra 1. & 2. conclus. Ferrar. 1. contra gent. cap. 75. & 76. Syluester in conflato 1. part. quest. 19. art. 2. Banez in hac 1. p. q. 19. a. 2. Zumel ibi dub. 1. Gonzalez disp. 53. Nazarius q. 19 art. 2. controu. unica, Nauarrere tomo 2. controu. 4. §. 6. Carmelitani Salmanticensis tract. de volunt. disp. 7. & communiter alij. Imò & Scoto, eiusque scholæ attribuitur à P. Suarez disp. 30. met. sect. 9. num. 30. citatque ipsum in 1. dist. 38. vbi sentit indifferentiam libertatis diuinæ non esse ad diuersos actus; sed ad diuersa obiecta, ad quæ non terminatur reali respectu.

Et

Et idem sequitur P. Suarez *cit. loco met.* præsertim n. 37. & sequentibus, & alij multi quos latè citat & sequitur P. Alarcon *tract. 3. de volunt. d. 4. cap. 8. n. 4.*

11 Caterum hoc quod ita dicitur quasi in communi & in genere, nempe libertatem Dei importare intrinsecum velle cum connotatione & terminatione ad obiectum volitum, quæ est respectus rationis, vrgetur illa vulgari difficultate, quomodo ille respectus rationis se habeat ad libertatem diuinam, vt ille actus determinetur & constituatur in ratione liberi, talis, volitionis, aut nolitionis; siquidem respectus iste rationis vel sumitur formaliter, vt est quid fictum per intellectum nostrum, vel fundamentaliter ante considerationem nostri intellectus, prout ex parte rei præbetur sibi fundamentum. Primo modo non potest pertinere ad actum liberum constituendum in esse liberi, vel distinguendum à necessario, vel ad distinguendum volitionem & nolitionem inter se: nam hoc modo est solum quid fictum per intellectum, & in re nihil, & sic ratio libera in ratione liberi, & vt est quid distinctum à necessario esset fictio in Deo, & sic Deus non verè, & in re esset liber, sed fictè, in re autem solum velleret necessariò, nec id haberet ante operationem nostri intellectus, quod totum mera absurditas est. Secundo modo reproducitur difficultas *suprà* posita, non euacuatur: illud enim fundamentum, est aliquid reale: (nam si esset fictum, rediret argumentum de ente rationis constituyente liberum in esse liberi) & sic cum actus liber vt liber possit non denominare Deum, quia posset non velle istas creaturas: ergo aliquid reale potest deesse Deo, aut si non potest; ergo habet modò nolle mundum, sicut & velle quantum ad denominationem, quod implicat, vel si non habet, & hæc nolitio quantum ad denominationem & distinctionem à necessario est aliquid reale, deest aliquid reale in Deo, quod vtique est aliquid diuinum: intra Deum enim nihil est creatum. Quod si dicatur illum respectum rationis non pertinere ad constitutum liberi vt liberi, sed consequi ad illud: ergo ille respectus rationis quando aduenit, & afficit Deum, iam supponit liberum constitutum in esse liberi vt distinguitur à necessario, & volitionem vt distinguitur à nolitione; & instauratur argumentum, quia illud, prout sic, est aliquid reale, & prout sic, potest deesse Deo, quia liberè vult, & poterat non velle etiam antecederet ad respectum rationis.

Propter hoc diuisi sunt Authores qui respectum rationis requirunt ad realem actum liberum, & resultant duæ sententiæ seu moderationes circa respectum ipsum rationis, duæ circa ipsum intrinsecum velle.

12 Circa respectum rationis quidam dixerunt pertinere ad ipsum constitutum liberi in esse liberi. Insinuât id aliqui antiquiores Thomistæ loquentes de hoc respectu rationis in actu libero, sicut de respectibus idealibus in distinctione idearum. Et videri potest Mag. Bañez *ubi supra*. Alij sentiunt solum se habere istum respectum rationis concomitanter, vel consecutiue ad determinationem liberam in Deo quasi connotatio quædam & terminatio ad obiectum creatum; sed tamen ad denominationem liberi in Deo necessariò talis connotatio requiritur, aut consequitur. De quo videri potest M. Gonzalez *diff. 53. a. ... sect. ult.* & eam attribuerat M. Zumel, & P. Suarez Capreolo, Greg. & alijs. Videri etiam possunt Salmanticenses Carmelitani, *ubi supra cit. tract. 4. diff. 7. dub. 7.* & Nazarius *controuersia unica super Ioan. à S. Thoma in 1. part. D. Th. Tom. 2.*

4.2. Et communius Thomistæ huius temporis. Et eam tãdem sequitur P. Suarez *ubi supra n. 47. & 48.*

Circa ipsum autem velle intrinsecum & reale, P. Suarez existimauit hunc actum liberum in Deo esse ipsummet actum necessarium, qui in Deo est, quoad totam suam actualitatem, & perfectionem ex parte subiecti, sed non necessariò præbet, aut explicat suum adæquatū effectum in ordine ad omnia obiecta, sed in manu eius est velle aut non velle obiecta. Hoc autem non potest inueniri in formis creatis informantibus subiectum, vt videlicet sint in subiecto, & non præbeant totum suum formalem effectum, inueniri tamen in Deo qui est actus purissimus non informans aliquod subiectum, & ita eminentiori modo se habet illa forma, quod constituit Deum volentem, & non constituit necessariò attingentem omnia obiecta, ad quæ talis actus potest se extendere. Ita docet *loco supra cit. ex met. sect. 9. num. 37.* Vnde in constitutione actus liberi non recurrit ad respectum rationis (licet illum admittat vt consecutum, n. 47. & 48. sed ad ipsum intrinsecum velle, quod ex eminentia sua, quatenus non est forma informans, non obligatur dare aut explicare totum suum effectum formale in ordine ad obiecta, licet quando se explicat, solum terminari & tangere obiecta respectu rationis, non neget Suarez. Sed quia premitur illa difficultate hic modus dicendi, quomodo realis denominatio liberi proveniat à forma necessaria, ita quod possit deesse illa denominatio, & tamen formans denominans realis sit, & necessariò existens in Deo. Recurrit P. Suarez n. 46. ad terminationem illius formæ erga obiectum, & dicit quod illa forma volitionis necessaria est quoad esse; & sic dat effectum formalem, seu denominationem necessariā in entitate, sed non necessariā, sed liberam quoad terminationem. Sed hoc premitur eadem vi & difficultate, quia illa terminatio vt libera vel est realis & intrinseca Deo, vel extrinseca & rationis. Si realis; ergo aliquid reale intrinsecum potest deesse Deo, & inciditur in opinionem Caiet. vel Fonseca. Si extrinseca, inciditur in opinionem Aureoli. Si rationis, inciditur in opinionem *suprà* relatum de constitutione liberi per aliquid rationis, cum tamen liberum, vt liberum, sit aliquid reale, vtpote realem effectum habens in creaturis.

Alij posuerunt intrinsecum velle liberum in Deo cum eadem contingentia & distinctione aut pluralitate actuum quam habet in nobis, non tamen formaliter, sed virtualiter. Introducta est non pridem ab aliquibus hæc philosophandi ratio in scholis, qua putant se magna & arcana mysteria Dei explicare per hanc virtualitatem, quia eminentissima illa diuinitatis forma virtualiter facit id, quod diuersæ formæ in nobis imperfecto modo; ibi autem simplicissima forma perfectissime. Et credo emanasse hunc modum explicandi ex eo, quod in distinguendis attributis diuinis frequenter contra aliquos ex schola Scotistarum dicimus non distinguui formaliter actum à parte rei in Deo ante operationem intellectus, sed virtualiter, id est fundamentaliter, quia in Deo est fundamentum, vt intellectus noster distinguat attributa, quæ realiter sunt vnum quid simplicissimum. Cum ergo videant isti Authores dari in Deo realem distinctionem virtuale, non obstante simplicitate summa, inde deriuarunt discursum, vt quidquid fecis est in creaturis, & imperfecto modo apud nos ponitur, addito nomine virtualitatis, transferatur in Deum; & sic ponunt potentiam seu actum primum virtuale in Deo, contingentiam & variationem seu multiplicationem actus liberi

K 3 virtua

virtualem in Deo, diuersitatem virtuales in Deo, egressionem actus virtuales in Deo, & sexcenta alia, quod nihil aliud est dicere quam quod Deus æquivalenter, sed eminentiori modo est omnia ista, & exercet omnia ista; & vno verbo ponunt in Deo *perinde valere* eorum quæ in creaturis sunt (liceat forense curiæ verbum ad explicationem diuinorum transferre) vt quia ea quæ in creaturis facile intelligimus per pluralitatem & imperfectionem, in Deo autem difficillimè propter summam infinitatem, pacificè nobis persuadeamus ea intelligere per *perinde valere*, quia Deus æquivalenter est totum id quod in creatura, seu perinde valet atque id quod in creatura ponimus. Et sic virtualiter realiter Deus discurret, Deus cõsiliatur, & inquit, Deus habet nolitionem, & volitionem actuantem potentiam voluntatis, quia habet virtuales potentiam, seu actum primum, & consequenter virtualiter vult per volitionem distinctam à nolitione, & ab actu necessario, quia perinde valet, atque id quod nos per plures actus facimus.

15 Certè hic modus dicendi vel difficultatè hanc irridet & alias similes, quas in Theologia per hanc virtualitatem & *perinde valere* creaturarum vult soluere, aut nihil omnino tangit de his difficultatibus. Nam nullus vertit in dubium quin omnes perfectiones creaturæ sint in Deo eminenter & virtualiter, ac proinde Deus in se simplicissimus æquiualeat omnibus creaturis, sicut senarius æquiualeat ternario & superat, & aureus nûmus pluribus æreis. Sed quid sit illud sit eminenter æquiualeat creaturis, & quomodo in Deo inueniatur formaliter, hoc inquirimus. Vnde S. Th. *infra*, q. 25. a. 1. ad 3. dicit quod essentia diuina in se simpliciter præhabet quidquid perfectionis est in rebus creatis: nec tamè per virtualitatè illam & æquiualentiam ad res creatas explicari solum possunt mysteria diuinitatis, præsertim attribuendo Deo per hanc virtualitatè & æquiualentiam non solum id quod perfectionis est in creaturis, sed etiam multa quæ imperfectionem in ea inuoluunt. Sed tamen quidquid sit de hoc, si prædicta sententia nihil aliud vult, quam quod ille actus volitionis, qui est vnicus, & actus purus se determinat ad volendum aut nolendum, & terminatur vel non terminatur ad obiectum faciendo per illum vnicum actum qui non egreditur à potentia, id quod in nobis sit per plures actus & per egressionem eorum à potentia, dicit rem verissimam, sed nihil explicat de difficultate præsentis, in qua indagamus quomodo in Deo formaliter sit ista libera terminatio & denominatio in Deo, & non solum quomodo contineat ea quæ libertatis sunt in creaturis. Nam modò Deus non solum virtualiter, sed formaliter vult Petro gloriam, & Iudæ pœnam, cum Scriptura tam apertè volitionem Deo tribuat, vt illam negare formaliter Deo, sicut & intelligentiam, omnino intolerabile sit. Posset etiam Deus non velle formaliter Petro gloriam, neque mundo huic dare esse; Licet ergo illud formaliter velle contineat virtualiter, & eminenter meum velle creatum, tamen per seipsum & per suum velle increatū Deus formaliter vult vnum, & non vult aliud, & posset non velle ab eterno hoc ipsū quod vult. Explica ergo mihi quid sit hoc formale velle increatum, & quomodo abesse potest à Deo, & omitte illam continentiam virtuales mei velle, quod nihil mihi explicat de difficultate, sed id dicit quod omnes debemus supponere, nempe velle diuinum continere eminenter velle creatum & nolle.

16 Et confir. quia Deus virtualiter continet &

æquiualeat omni velle & nolle creaturarum de facto propter suam infinitam eminentiam, & hoc conuenit illi necessariò, sicut & ipsa eminentia infinita: ergo conuenit antecedenter ad velle vel nolle liberum, vt liberè denominat; ita quod potest conuenire, vel non conuenire Deo; Si ergo in illa antecedentia ad liberam determinationem Deus æquivalenter, & virtualiter erat volens & nolens hoc obiectum, v. g. mundum esse, & produci, per quid determinata est illa virtualis contingentia, & continentia, vt magis denominaret Deum volentem de facto producere mundum, quam nolentem? Per virtuales continentiam non potuit, quia hanc præhæbat Deus, & necessariò præhabet in sua infinita eminentia. Per formalem determinationem negant hi Authores id fieri, aut si non negant, incidunt in difficultates, quas in aliis sententiis volunt vitare, & nihil de ipsa difficultate principali declarant. Ergo hoc, perinde valere, & virtualis contingentia, licet in hoc verum dicat quod Deus æquivalenter & virtualiter est volens & nolens vnico actu quod nos per plures habemus; difficultatem tamen non explicat in puncto quod querimus, quomodo, & per quid ex illa virtuali eminentia Deus determinetur vt formaliter sit & denominetur volens potius quam nolens cum virtualiter ex se sit vtrumque.

17 Ad istorum Auctorum sententiam reducitur alia, quæ Recentioribus quibusdam arridet, inter quos est P. Salazar *lib. de Conceptione Virg. cap. 24. sect. 3. à num. 47.* qui ponunt determinationem liberam Dei, non in ipso actu secundo volendi, quem dicunt re vera esse de se volitionem & nolitionem omnium obiectorum, sed in applicatione istius actus ad hoc potius obiectum volendum quam illud, quæ applicatio est quasi in actu primo. Quid autem sit ista applicatio? Id explicant ex eo quod aliqui ponunt in voluntate creatæ, quod se determinat ad volendum per quandam moralem & virtuales volitionem, seu quandam conatum, quo dicitur in actu primo se determinare ad volendum hoc potius quam illud, & velle quia vult, non quia vult actu quodam reflexo: sic enim esset abire in infinitum, sed actu quodam virtuali, quo se applicat & conatur ad hoc potius quam illud, & dicitur libertas causæ quasi applicata & determinata in actu primo: Hac ergo ratione dicunt Deum vti illo actu, qui est in se nolitio & volitio obiecti, illumque, applicare liberè, vt sit volitio determinatè respectu huius obiecti ex vi talis applicationis, quæ est volitio virtualis, & moralis, seu determinatio voluntatis, vt velit, vel nolit. Sed nec isti feliciori mente virtuales istam libertatem explicarunt: Nam præterquàm quod rem certissimam nempe libertatem Dei, incertissima opinione explicant, videlicet illa applicatione & conatu in actu primo, qui si potest immediatè exire à potentia indifferenti, & non per aliam priorem applicationem determinatam, ne detur processus in infinitum, cur non poterit etiam actus secundus sic exire sine illo intermedio conatu determinante? plane hoc, inquam, pro libertate diuina nihil conficit, quia illa applicatio, & determinatio in actu primo quantumcumque moralis, aut virtualis dicatur, vel est aliquid reale, vel rationis. Si rationis, non potest realem determinationem liberam constituere, & realiter determinatam reddere volitionem Dei, sed fictè. Si aliquid reale vel est ipsemet actus secundus, vel aliquid reale intrinsecum antecedens per modum actus primi, vel aliquid extrinsecum. Si ipsemet actus secundus, frustra laboratum est ponendo applicationem ad illum

illum in actu primo, sed reciditur in alias sententias, earumque difficultates, quomodo scilicet iste actus secundus determinetur ad volitionem potius quam nolitionem. Si est reale intrinsecum, ut actus primus, ille potest abesse, cum liberè se applicet ad volendum, cum posset applicari ad oppositum: si enim necessariò applicaretur ad volendum, non posset nolle illud, & velle oppositum; & sic inciditur in opinionem Caiet. Si est extrinsecum, cadit in opinionem Aureoli, quod non datur velle intrinsecum liberum in Deo; Ergo nihil applicatur per hanc opinionem.

Secunda principalis sententia moderationes.

- 18 In prima linea, seu ordine opinionum quæ derivantur ex Aureoli sensu pono opinionem Vasq. in hac 1. p. disp. 80. & aliam Arrubalis, qui illum sequens moderari conatus est hic disp. 54. c. 3. & aliorum qui illos sequuntur, & in actu libero constituendo vel applicando confugiunt ad denominationes extrinsecas, seu ad aliquid indifferens, non tam ex parte ipsius velle quod intelligitur ut actus immanens Dei, quam ex parte ipsius productionis vel effectus ad extra, penes quorum connotationem dicatur illud velle diuinum liberum & indifferens, determinari, ut sit potius volitio, quam nolitio. Et quidem P. Vasq. disput. illa 80. c. 2. quatuor dictis videtur suam sententiam absolute.

Primum est negatiuum: Volitio Dei libera non est perfectio intrinseca Dei, quæ liberè ei convenire aut disconvenire possit: nec est nuda relatio & habitudo rationis ad creaturas, non est nuda essentia diuina, quæ necessariò inest Deo.

Secundum est positivum: Voluntas libera est essentia diuina significata per modum actus elicitum, includit tamen habitudinem quandam ad res futuras, quæ liberè Deo convenit, sicut res liberè sunt futurae.

Tertium dictum: Habitudo hæc confurgit tanquam ex fundamento ex rebus ipsis, quæ necessariae non sunt, & sic etiam liberè Deo convenit, non intrinsecè, sed extrinseca denominatione, ita tamen, quod si res futurae non essent, libera voluntas in Deo non esset, quæ cum illo respectu rationis significatur. Sed quia vidit Vasq. difficultatem manere integram, quia res illæ liberè futurae, quæ hanc habitudinem fundant, supponunt liberam voluntatem Dei, siquidem ideo sunt liberè futurae, quia à libera voluntate Dei causantur, atque adeo si supponunt liberam Dei volitionem, ante talem habitudinem datur libera volitio in esse liberi. Per quid ergo constituitur pro illo tunc? Ad hoc soluendum addit Vasq.

Quartum dictum his formalibus verbis: *Nodus hic meâ sententiâ insolubilis est, vix enim vitare possumus circulum in reddenda ratione.* Addit hunc actum liberum non habentem necessariam connexionem cum obiectis, ita in Deo esse, quod licet necessariò sit in Deo, liberè tamen comparatur cum creaturis. *Ceterum licet hoc modo assignemus libertatem in Deo comparatione facta cum obiectis & rebus creatis, tamen non assignamus sufficientem rationem ex parte Dei, cur tunc actu libero efficaci referatur ad hæc potius quam ad illas, siquidem idem omnino in se manens, poterat eas non velle, quas vult: Quare cum rem exactius enodare contendimus, difficultatem prædictam evadere non possumus.* Sic Vasq.

- 19 Ruentem sub tantæ difficultatis telo ducem suum, ac prorsus oneri succumbentem, releuare conatus est fidus eius discipulus P. Alarcon tr. 3.

de volunt. disp. 4. cap. 9. & altè infixum sibi vulnus mollioribus verbis linere contendit: Cum enim Vasq. à circulo euitando non se expediat, unde omnino consequens est mentem eius in hoc fuisse, quod illa habitudo rationis ad constituendum actum liberum, & actus liber ad producendum creaturam liberè futuram, & fundandam talem habitudinem in eodè genere causæ se haberent: nã in diuerso genere non est quod sibi à circulo timeret, cum non sit vitiosus circulus in diuerso genere causæ, eo quod causæ ad inuicem sunt causæ, & sub diuersis formalitatibus potest aliquid esse prius & posterius, ut ex Aristotele & D. Th. explicuimus in *Logica circularib. Poster. q. 25.* tamen præfatus Author sic ipsum explicat, quod creatura fundans illam denominationem seu relationem rationis non pertinet ad constituendum decretum, cuius tota ratio intrinseca & diuina est intra Deum, sed pertinere ad decretum liberum tanquam terminum & obiectum talis decreti, nec potest intelligi sine creaturæ ut obiecto terminante extrinsecè eam volitionem. Et sicut relatio nõ est sine suo termino, neque potentia sine obiecto, & illo deficiente, deficit, ita volitio diuina non est sine obiecto volito. Et ita non est volitio libera in Deo per creaturam tanquam per rationem formalem, sed tanquam per terminum & obiectum extrinsecum, sine quo nullo modo esset in Deo volitio formalis creaturæ.

Vera doctrina; sed quæ vlcus expandit potius quam oppandit. Nonne conceptis verbis dicit Vasquez, fundamentum illius respectus sine quo essentia Dei non est volitio libera, esse ipsam creaturam liberè futuram; sic *supra* ex ipso retulimus. Quomodo ergo non sarcitur hæc locutio, dicendo quod est terminus, & requiritur ad volitionem ut terminus? Quodnam ergo est fundamentum illius? estne ipsa creatura eiusdem relationis Dei ad se fundamentum & terminus? Non est talis relatio volitionis, sed identitatis, quia est eiusdem ad seipsum; idem enim est fundamentum & terminus. Videtis ergo quàm contrariè explicatur Vasq. ut cum ille dicat creaturam se habere ut fundamentum relationis ad liberam volitionem requisitam, hic dicat se habere ut terminum, & sic requiri ad decretum liberum. Ad hæc nonne doctrina huius Authoris fuit loquendo de possibilitate creaturarum quæ sunt terminus omnipotentis, quod etiam si tolleretur talis terminus, & creaturæ redderentur impossibiles, ahuc potentia Dei non deficeret, ideoque hac vnica ratione fundatur in sententia Vasq. ne videantur creaturæ in Deo ex vi visionis diuinæ essentia, ut *præced. tom. disp. 15. & 18.* latè impugnauius. Quomodo ergo nunc dicitur creaturam ita esse terminum, quod sine ipsa deficeret volitio libera? Si quidem nõ minus est absoluta & independens à creatura terminante volitio libera Dei, quàm à possibili omnipotentia.

Colligamus ergo sic: Creaturæ, iuxta Vasq. se habent ut fundamentum illius respectus, qui omnino requiritur ad hoc ut substantia diuinæ volitionis libera dicatur: ergo est principium talis relationis, quia fundamentum ex parte principij se tenet non ex parte termini in relationibus; sed non se habent ut fundamentum creaturæ ut possibiles, quia sic non magis fundant liberam volitionem quàm nolitionem; ergo creaturæ ut futurae ergo ante futuritionem non fundatur ille respectus rationis: ergo futuritio creaturarum non causatur ab essentia diuina habente illum respectum rationis: ergo ab essentia nuda, & à volitione non libera

libera, sed necessaria: ergo creaturæ sunt futuræ à Deo necessario & per volitionem necessariam. Quod cum concedi non possit contradictorium erit verum: ergo causantur in ratione futuri à volitione libera: ergo libera volitio causat liberè fundamentum illius respectus, sine quo, & ante quem non est liberat: ergo causat ut libera, & non libera, quod est prorsus admittere circulum vitiosum & contradictione plenum. Sed quid moramur? Ipse Vasq. in verbis supra relatis fatetur hunc circulum vix posse euitari, & non posse satisfacere hunc modum dicendi difficultati propositæ: Ergo ex ipsa sua origine nata est sententia ex mente Vasq. falsitatis conuicta, & insufficientiæ vitio laborans. Ipse ergo eam expungit, qui defendit.

22 Propter hoc sententiam Aureoli aliter temperavit P. Arrubal *hic disp.* 54. c. 3. quem sequitur Torres *opuscul. de volunt. disp.* 2. dub. 4. Erice *hic disp.* 16. c. 10. & alij, & dicunt ipsam indifferentiam liberæ volitionis, ut libera est, non attendi in ipso actu intrinseco volendi secundum se intrinsecè: sic enim necessariò est in Deo, nec per ordinem tantum ad effectus, vel ex habitudine orta & fundata in effectibus ad extra, sed per habitudinem ad ipsam causalitatem productiuam effectuum, ita quod ipsa productio & causalitas rei ad extra, quæ de se est indifferens, & potens producere vel non producere, est id quo completur volitio diuina in ratione liberi, & per eam determinatur voluntas ut dicatur velle hunc effectum potius quàm nolle, quia producit hunc effectum potius quàm non producit. Et sic euitat circulum illum Vasq. non enim dicit, ideò Deum velle liberè res futuras quia illæ futuræ sunt, & ideò esse futuras, quia liberè eas vult: sed ideò velle res futuras, quia vult illas producere: ideò autem producere quia vult, volitione, & productione formaliter non causaliter determinante. Addit Erice (quod solum videtur verba addere) quod sicut voluntas nostra est indifferens ad velle & nolle indifferentia in actu primò, ita actus diuinæ voluntatis, quæ est formaliter etiam volitio, indifferens est non ad volendum, vel nolendum, sed ad producendum, vel non producendum: libertas enim non requirit essentialiter quòd sit à voluntate ut amatiua, sed ut indifferens, & sic si ipsa volitio est indifferens ad producere, libera est.

23 Cæterum hæc explicatio eadem infelicitate laborat qua præcedens, quia ista productio, qua dicit constitui determinatè actum liberum est executio diuinæ voluntatis & prouidentiae: Vel ergo sumitur pro executione, & productione passiuè sumpta, ut identificatur cum creatura extra Deum, & ut est aliquid temporale, scilicet ipsa creatio creaturæ, vel sumitur pro executione & productione actiua, ut est aliquid increatum & æterna actualitas Dei. Si primum est aliquid creatum utpote extra Deum, & idem est iudicium de illo atque de effectibus Dei, in quibus Vasquez dicebat fundari respectum rationis requisitum ad nolitionem liberam, ut liberam: quidquid enim extra Deum est, pro effectu & creatura reputari debet: Nec potest aliquid creatum pertinere ad constitutionem liberi ut liberi Dei, nisi tanquam terminus & obiectum eius: nam formaliter dicere quod constituit liberum increatum, non nisi insanissimè dicitur. Si dicatur secundum, eadem difficultas est, quomodo hoc increatum, quod est productio, sit liberum & indifferens erga obiecta, cum in se sit entitatis necessaria, & quomodo hoc increatum quod est volitio, sit indifferens? Et sicut productio

increata libera dicitur, cur velle increatum, indifferens non erit? Et instauratur ibi argumentum sæpè factum, quia id quod addit seu importat productio in quantum increata, est aliquid intrinsecum quod potest abesse à Deo, & liberè illi inest, & sic reciditur in sententiam Caiet. quod aliquid intrinsecum Dei possit non esse in Deo: vel importat aliquid extrinsecum etiam ipsi productioni, & ipsi Deo, & sic est aliquid creatum & effectus productionis, & sic reciditur in sententiam Vasq. quod ex aliquo creato, seu ex effectu Dei sumitur ipsum fundamentum relationis rationis, siue quo diuina volitio non est libera, & determinata.

Et præterea magnum inconueniens est, quod 24 cum voluntati essentialiter & primordialiter competat ius libertatis, & ab ea habet executio eius quod sit libera, quia videlicet dirigitur & deriuatur à libera voluntate, dicatur modo quod voluntas in suo intrinseco velle non sit libera & productio ad extra, quæ est executio huius voluntatis præbeat illi indifferentiam, & libertatis rationem seu determinationem. Vnde recurrit hic iterum vitiosus ille circulus quo rotatus est Vasq. scilicet quod productio ad extra, cum sit executio voluntatis, ideo est libera, quia liberæ voluntatis executio est, & à libera voluntate descendit: nam si à necessaria volitione descenderet, non esset in manu eius non exequi: necessario enim executio illa ex voluntate esset: ergo non posset à voluntate retineri, & si libera non esset. Ideò ergo libera est, quia liberæ voluntatis, & non necessariæ executio est. Ex alia autem parte dicunt hi Authores, quod volitio illa ideo libera est, quia productio, seu executio est libera, & ex eius indifferentia completur: ergo non euitant circulum Vasq. Ac denique sequitur Deum esse liberum, quia potest producere, & non producere, non quia potest velle, & non velle, quod totum Aureolus dicebat.

Denique volitio & decretum diuinum est causa & ratio productionis rerum ad extra, ita quod 25 hæc causalis est vera, quoniam voluit, fecit, sed non est causa faciendi volitio, ut necessaria aut indifferens ad agere & non agere: ergo ut determinata: ergo productio ipsa non determinat, liberè in ratione volendi, sed supponit liberam determinationem in esse volitio. Maior exprimitur à D. Thom. q. 23. de verit. art. 4. ad 15. *Voluntas ad volitum habet duplicem respectum: primum ad ipsum in quantum est volitum: secundum verò habet ad idem in quantum producendum in actu, & hic respectus præsupponit primum.* Et deinde negari hoc non potest salua Scriptura, ut cum dicitur Psalm. 17. *Saluum me fecit quoniam voluit me.* Iob. 1. *Sicut. Domino placuit, ita factum est.* Ionæ 1. *Tu Domine sicut voluisti, fecisti.* Psalm. 133. *Omnia quaecumque voluit, Dominus fecit.* Iudith 9. *Hoc factum est, quod ipse voluisti.* Actuum 4. *Conuenerunt Herodes, & Pontius Pilatus facere, quæ manus tua, & consilium tuum decreuerunt fieri.* Iam si vera est sententia horum Auctorum, quod productio formaliter determinat velle diuinum, ut sit liberè volens, determinatè potius quàm nolens: ergo ideò liberè vult, quia liberè producit, & facit, non è conuerso quia vult facit, & sic erit sensus, saluum me fecit quia voluit, id est, saluum me fecit, quoniam me fecit, quid insulsius? Sicut Dominus fecit, ita factum est: Tu domine sicut fecisti, fecisti. Omnia quaecumque fecit, Dominus fecit, &c. Hoc autem est totam Scripturam vertere, & ad impropriatares relegare, & non propriam volitionem Deo tribuere, sed metaphoricam, id est productionem pro

pro volitione. Minor verò est constans, quia volitio Dei ut necessaria vel indifferens non magis est causa producendi quàm non producendi: ergo non est causa determinatè faciendi magis quàm non faciendi; & præsertim quia voluntas sub hac indifferentia non solum respicit volenda, sed etiam nolenda, non solum facienda, sed etiam non facienda, & sic omnia ad quæ se extendit volitio indifferens, sunt tam quæ facit, quàm quæ non facit, tam quæ vult quàm quæ non vult: indifferentia enim omnia ista complectitur: ergo falsa esset illa locutio *omnia quacumque voluit, Dominus fecit*, si *ly voluit* sumitur indifferenter, & non determinatè pro velle, ut distinguitur à nolle. Pater consequens, nam *ly voluit* indifferenter sumptum complectitur tam volenda quàm nolenda: ergo sensus esset, Omnia volita & nolita, fecit. Quid absurdius? Cum nolente Deo nihil fiat. Et cum dicitur; Hoc factum est quod ipse voluisti, si *ly voluisti* sumatur indifferenter pro velle & nolle, est sensus, hoc factum est quod voluisti, vel noluisti. Quæ omnia absurdissima sunt. Si verò sumatur velle pro velle determinato, ut distinguitur, & hoc habet per ipsum facere seu producere, sensus erit, quæ voluit fecit, quæ fecit fecit. Si verò datur velle determinatè ante producere, hoc est intentum.

ARTICVLVS IV.

Mens D. Thom. circa liberam volitionem Dei.

I Tantam variarum opinionum sententiam, & excrecentes vepres mirum quam paucis verbis præsciderit S. Tho. Versans enim hanc difficultatem cum in hac q. 19. art. 3. tum in 1. contra gent. c. 82. docet habitudinem ad volita creata non esse necessariam in Deo, & quod determinatur à se non aliunde, nec quasi in potentia existens ad aliquid, sed ex eo quod habet ex se necessitatem. Mirum dictum! quod idem immutabile & necessarium in se existens fundet habitudinem contingentem ad aliud, quia ex se necessitatem habet. Si hoc evolvere possimus, totam difficultatem ex mente S. Doctoris exauriemus. Igitur in hac 1. p. q. 19. art. 3. ad 5. sic D. Tho. dicit: *Ad quintum dicendum quod causa quæ est ex se contingens, oportet quod determinetur ab aliquo exteriori ad effectum. Sed voluntas divina, quæ ex se necessitatem habet determinat seipsam ad volitum ad quod habet habitudinem non necessariam.* In hoc ergo consistit totum hoc mysterium secundum D. Tho. quod habitudo contingens seu non necessaria potest habere fundamentum necessarium & immutabile, nec indiget aliquo extrinseco dante indifferentiam, dummodo terminus ad quem est talis habitudo, sit contingens, & omnino subiectum illi necessario, sine dependentia aut indigentia istius ab illo. Hoc enim est proprium rei æternæ & immutabilis quod potest immutare alia, & in illis ponere contingentiam sine mutatione in se, quia est purè immutans, & nullo modo mutabile. Et ad hoc servit doctrina, quam ponit S. Tho. cit. loco contra gent. ubi solvens illam difficultatem quomodo voluntas divina se habeat ad utrumlibet, quod est habere contingentiam sine hoc quod sit in potentia ad utrumque, dicit, *quod esse ad utrumlibet potest dupliciter convenire alicui virtuti. Vno modo ex parte sui: alio modo ex parte eius ad quod dicitur. Ex parte quidem sui, quando nondum est consecuta suam perfe-*

ctionem per quam ad unum determinetur; unde hoc in imperfectionem virtutis redundat, & ostenditur esse potentialitas in ipsa. Ex parte autem eius ad quod dicitur, invenitur aliqua virtus ad utrumlibet esse, quando perfecta operatio virtutis à neutro dependet, sed tamen utrumque esse potest, sicut aliquis qui diversis instrumentis uti potest aequaliter ad idem opus perficiendum. Hoc autem ad imperfectionem virtutis non pertinet, sed magis ad eius eminentiam, in quantum utrumlibet oppositorum excedit, & ob hoc determinatur ad neutrum, sed ad utrumlibet se habet. Sic autem est in divina voluntate respectu aliorum à se: nam finis eius à nullo aliorum dependet, cum tamen ipsa fini suo sit perfectissime unita. Non igitur oportet potentialitatem aliquam in divina voluntate ponere. Sic D. Thom.

Ex his ergo elicio mentem D. Thom. duabus conclusionibus. Altera ad distinguendum volitionem ut liberam à seipsa ut necessaria: Altera ad distinguendum rationem volitionis à nolitione, etiam in ipso actu ut libero.

Prima conclusio: Volitio Dei ut libera, & ut 2 distinguatur à ratione necessariæ volitionis est actus immanens & intrinsecus Deo, distinguiturque à ratione actus necessarij, quod volitio ut necessaria respicit divinam bonitatem ut obiectum sibi omnino adequatum, immò ut omnino identificatum sibi: ut autem libera non constituitur per ordinem ad obiectum creatum, quod est extra se, nec per habitudinem realem, quæ esset dependentia, nec per habitudinem rationis, quæ est quid fictum, & non constituit formaliter actum realiter liberum: sed potius importat & dicit summam & absolutam independentiam à creaturis, & summam subiectionem creaturarum ab ipsa; idèque non tam respicit illas ut obiecta, quàm ut effectus inadæquatos, contingentes, & sibi non necessarios. Solum autem obiectum proprium illius actus est bonitas divina, creaturæ autem effectus sunt illius, etiam ut volitio est. Hanc conclusionem statuimus contra Aureolum, & alias sententias quæ ex illa deducuntur & supra manent impugnata, quatenus indifferentiam & libertatem Dei non ponunt in ipso velle intrinseco divino, sed in ipso operari divino, ita quod sit indifferens in operari, non in velle, sed solum dicitur velle determinatè, determinatione, vel denominatione sumpta ab operatione, vel ab affectu. Et primò, quod volitio in quantum libera, sit intrinseca in Deo, quod est esse ipsum actum immanentem & non operationem transeuntem producendi seu operandi ad extra; Probatur; Nam velle illud divinum quod in Deo est actus secundus sicut intelligere, verè, & realiter versatur circa creaturas, non solum in linea producendi & operandi ad extra, sed in linea volendi, & per modum inclinationis internæ, ita quod non solum Deus se vult, & se amat, sed etiam creaturas actu immanenti, qui solum est volitio: ergo ipse actus ut immanens & intrinsecus in Deo in ratione volitionis libertatem habet.

Antecedens negari non potest; nam creaturæ 3 habent esse & bonitatem participatam à Deo: ergo sunt obiectum amabile, quia bonum & appetibile idem sunt, & sunt cognitæ & intellectæ à Deo: ergo per ipsum velle divinum ut actus immanens est, attingi & amari possunt, nihil enim aliud requiritur ut aliquid per voluntatē attingatur, quàm ut sit bonum cognitum ab intellectu; creaturæ autem sunt bonæ, & cognitæ ab intellectu divino: ergo amabile obiectum sunt ab eius voluntate, etiam secundum quod amabile distingui-

tur à producibili, & amare à producere. Et sic Scriptura diuina significat non solum productionem Dei, sed etiam amorem & voluntatem attingere creaturas, Ioan. 2. *Sic Deus dilexit mundum, ut Filium suum unigenitum daret.* Quis autem dicat facere hunc sensum: Sic Deus produxit mundum ut Filium suum daret: cum productio mundi non inferat donationem Filij: productus enim est mundus à Deo auctore naturæ, datus verò est filius ex amore Dei authoris supernaturalis: non ergo sic produxit ut daret Filium, sed sic dilexit productum ut daret Filium. Nec illa dilectio mundi fuit ipsa datio Filij: tunc enim esset sensus, sic dedit Filium mundo, ut daret Filium, quæ est stupida locutio. Et idem in aliis locis Scripturæ videre est, ut Psal. 17. *Saluum me fecit, quoniam voluit me,* & aliis *suprà* relatis & ponderatis.

4 Conseq. verò prob. quia volitio Dei est actus immanens volitionis, & in linea volendi, ut distinguitur à linea producendi versatur circa creaturas, quantum ad earum esse & bona quæ eis vult: sed non versatur illa volitio & ille actus immanens necessariò circa illas creaturas, aliàs si necessariò essent volitæ, non possent non esse, quia voluntas Dei necessariò non potest non semper operari liberè.

Confirm. quia ratio liberi maximè oebet esse voluntaria, & à principio intrinseco: ergo non potest voluntati conuenire ex denominatione ab aliquo extrinseco, seu ab aliqua actione consecuta ad ipsum velle, & executiua voluntatis. Anteced est certum quia illud primò & per se dicitur liberum, quod primò & per se est electiuum, potestque discernere inter vnum & aliud ex iudicio & collatione rationis: inde enim maximè dicitur aliquis arbitrio regi, quia ex electione propria mouetur & nò ex obligatione aut naturali instinctu, ut hinc docet S. Thom. q. 19. art. 10. & *infra* q. 83. art. 1. & art. 3. ubi dicit, *quod vis electiua est liberum arbitrium:* Sed eligere, & liberè operari, maximè fit per inclinationem ab intrinseco se mouentem, non ex sola productione indifferenti. Nam si indifferenter operari, est solum operari diuersa & varia; hoc etiam habet cælum & Sol, nec tamen est liber: si autem indifferenter operari est cum potestate arbitrandi & eligendi ut fiat vel non fiat operatio, talis indifferentia supponit inclinationem indifferetem; hæc autem inclinatio debet esse ipsum velle, & ipsum intrinsecum appetere ex propria inclinatione & dominio. Nec potest esse aliquid rationis, ut ex dictis *in præced. art.* constat; tum quia Deum velle creaturas, sicut & producere non est aliquid fictum, sed reale; tum quia velle ipsum quod in Deo reale est, etiam in quantum realis actus attractiuus est creaturarum, & non solum sui, quia realiter amari possunt, & voluntatem amare aliquid reale est, sicut etiam intelligere creaturas, & producere, & providere illis ex parte Dei, aliquid reale est: tum denique quia liberè & cum dominio & arbitrio se habere ad alia ad perfectionem & superioritatem pertinet: ergo ad realitatem & non ad aliquid fictum & rationis. Sic ergo ratio liberi primò & per se inclinatione interioriori, quæ est ipsū velle, inueniri debet, non in operatione, ad extra: sed si ista est indifferens indifferentia potestatis & dominij, est ex voluntate & inclinatione interna explicata in operatione.

5 Ex his explicari possunt reliquæ partes conclusionis. Nam quod hæc libertas consistat in summa & absoluta independentia illius volitionis erga creaturas, quas respicit ut obiecta inadæquata, explicatur ex eo, quod libertas in nobis postulat in-

dependentiā ab obiecto, non quidē in specificando actū, quia in hoc dependet necessariò actus ab obiecto in specificatione sua, quæ desumitur ab obiecto, sed in mouendo ad exercitium actus, eo quod obiectū circa quod est actus liber, debet esse tale, quod non cogat potentiam ad habendum actum, nec superet totam resistantiam illius, sed licet possit allicere & attrahere potentiam, non tamen omnem eius adæquationem superet; unde quoad hoc est independens potentia ab obiecto, & est domina sui actus, & in tantum est domina, in quantum minus subiecta, & dependens, ne moueatur & subiiciatur obiecto, nisi secundum quod voluerit. Maior ergo dependentia actus ab obiecto, minuit de dominio & libertate actus, & minor dependentia auget libertatem & dominium. Vbi ergo fuerit summa & absoluta independentia voluntatis erga aliqua obiecta, non solum in mouendo voluntatem, sed etiam in specificando, aut terminando actum, quia non dependet specificatio illius actus, & eius consistentia à tali obiecto; licet possit super illud non per dependentiam aut necessitatem actus etiam in sui terminatione ab illo, sed per subiectionē omnimodam illorum obiectorum ad se, talis volitio erit summè libera, & indifferens, indifferentia & libertate dominij, non potentialitatis, quia videlicet excedit vtrumque eminentia sua, non per tendentiam ad aliquod illorum perficitur, nec per additionem aut mutationem in se. Libertas autem & indifferentia dominij fundatur super independentia, quia opponitur subiectioni & seruituti, quæ est per dependentiam: in illa ergo summa & absoluta independentia volitionis consistit libertas diuina. Et cum non sit independentia penes egressionem actus à potentia, vel non egressionem, quia in Deo tantum est actus secundus & purissimus & vnicus, fit ut dependentia sit in tangendo vel non tangendo obiecta illa, non per terminationem, qua indigeat actus terminari, sed qua potest se communicare, & subiicere sibi obiecta illa: sicut personalitas diuina quæ terminat naturam diuinam potest terminare naturam creatam, vel non terminare sine additione aliqua sui, sed per puram mutationem naturæ creatæ; & actio diuinæ omnipotentiae potest inferre passionem & mutationem in tempore in creatura, non per additionem aliquam ad se, sed per solam mutationem creaturæ.

6 Quod autem hæc sit perfectissima & actualissima & intima libertas, constat ex dictis, quia est magis independens, & minus subiecta, vel desumpta ab aliquo extrinseco: ergo magis dominatiua & superior: ergo magis perfecta & in actu, immò actus ipse secundus libertatis, & magis intimas, quia minus ab extrinseco desumpta aut dependens. Et quidem in libertate creata inuenimus maiorem dependentiam, potentialitatem & subiectionem tum ab aliquo intrinseco quod est ipsa potentia; tum ab aliquo extrinseco quod est obiectum, & quanto magis est de dependentia, & subiectione, tanto minus est de libertate: nam in primis dependet actus à potentia, ut ab eliciente, ab obiecto ut à determinante specificatiue & alliciente moraliter à Deo ut à causa prima influente & mouente. Semel autem egresso actu, ita dependet ab obiecto in specificatione ab illo, & terminatione ad ipsum, quod non sit in manu eius, aut non tangere obiectum, aut non terminari ad ipsum: In hoc ergo libertas illa est minus perfecta & magis subiecta, & sic minus libera & dominatiua. Quod totum secus accidit in diuina, quæ nec est actus egrediens à potentia, neque dependens ab obiecto creato in sui termi

terminatione aut specificatione, sed obiectum pendet ab ipso, & sic si terminetur ad obiectum, est per dependentiam obiecti à se, non sui ab obiecto.

- 7 Secunda conclusio: Volitio in Deo ut determinatè est volitio distincta à nolitione, vel in quantum est volitio magis ad unum quam ad aliud, non id habet formaliter, & per locum intrinsecum ex aliqua diversitate obiectorum, quæ in sua significatione includat, aut ex habitudine rationis ad ipsa tanquam ex ratione formali, sed ex absoluta & intrinseca actualitate sua ut immutata & necessaria in se, immutante autem obiectum seu communicante rationem obiecti non necessariò; nolitio autem ex eadem immutata & necessaria actualitate, ut non immutante nec constituyente rationem obiecti. Itaque sicut omnipotètia Dei, quæ est etià actus secundus operandi ad extra in se immutata immutat aliquas creaturas, alias nō, & non semper immutat, sed in tempore, quo determinat & vult, non quod per hoc aliquid ponatur vel tollatur ab actione divina, sed tota immutatio est in creatura: Et sicut persona Verbi modo terminat naturam humanam, non antè, sine hoc quod aliquid accrescat ipsi personæ, sed tota mutatio tenet se ex parte creaturæ, ita in actu immanente volitionis divinæ creatura participat rationem obiecti, & constituitur in ratione talis per hoc quod subiicitur volitioni, quod est amare illam, vel non subiicitur quod est nolle, sine aliqua mutatione ex parte actus, sed tota mutatione se tenente ex parte creaturæ. Nec est reddenda causa, quare Deus vult hanc creaturam, aut non vult illam ex parte ipsius creaturæ, sed ex parte ipsius Dei qui vult hanc creaturam, non quia elicit actum volendi, sed quia suo actu voluntatis subiicit eam sibi ut existat, & sic constituit illam in esse obiecti voliti, non vult aliam creaturam, non quia elicit actum nolitionis, sed quia est ipse actus nolitionis, non subiiciens sibi creaturam ut existat in tempore. Et sicut potuit subiicere illam creaturam amando, potuit non subiicere, & tunc esset nolitio. Et melius dicimus subiici creaturam aut non subiici, quam obiecti, vel non obiecti, quia reuera creaturæ non tam comparantur ad voluntatem divinam ut obiecta antecederent mouentia, quam ut effectus consecuti, & si sunt obiectum habent participare rationem obiecti, & constitui in eo ab ipso actu, quod est esse effectus eius.

- 8 Hanc resolutionem elicio ex D. Tho. supponendo id quod notissimum est, eandem difficultatem esse, & eandem rationem reddendam inter volitionem & nolitionem divinam circa creaturas; atque inter volitionem magis ad unam quam ad aliam, quia hoc ipsum quod est velle, seu amare magis unam creaturam quam aliam, est velle aliquid bonum uni, quod non alteri: non enim est magis vel minus ex parte actus divini, sed ex parte rei volitæ, quæ est maior pro una, quam pro altera, & illud maius quod est volitum uni, est nolitum alteri. Eadem ergo est ratio volitionis & nolitionis absolute, quæ volitionis secundum magis & minus. Loquens autè D. Tho. de ista diversitate volitionis in Deo dicit in hac 1. p. q. 20. art. 3. quod ex parte actus divini non datur magis & minus, sed omnia amat uno & simplici actu voluntatis & semper eodem modo se habente. Addit autem solutione ad 3. Quod intelligere & velle significant solum actus, non autem in sua significatione includunt aliqua obiecta, ex quorū diversitate possit dici Deus magis scire aut velle, sicut circa amorem dictum est. Ecce quomodo D. To. ponit ipsum actum, qui est velle, ita absolute, quod in sua significatione non includit ob-

iecta (utique creata: nam increatum est ipsummet velle) ita quod ex diversitate obiectorum sumatur diversitas magis volendi unum obiectum, quam aliud. Et eadem est ratio volendi unum, & nolendi aliud, quia, ut diximus, illud quod est magis volitum uni, est nolitum alteri, quod est minus volitum. Ergo antecederet ad obiecta sic diversa, & variata est in Deo magis velle unius, & minus alterius, & consequenter volitio unius, & nolitio alterius in quantum id quod magis est volitum uni non est volitum alteri minus volito. Ergo neque sumitur ista intrinseca distinctio volitionis à nolitione ex ipso respectu rationis ad obiecta aut inclusionem illorum in significatione talis velle: ergo ex absoluta actualitate Dei intrinseca, quia si non ex respectu & ordine ad obiecta, ex absoluta ergo ratione sui ante obiecta ut à ratione formali volitionis & nolitionis. Non autem ita absoluta quod non habeat pro effectu ipsa obiecta, & immutet illa, quia ut dicit ipse D. Thom. loco supra allegato in hac q. a. 3. ad 5. voluntas divina quæ ex se necessitatem habet, determinat seipsam ad volitum, ad quod habet habitudinem non necessariam. Vbi pondero dicere D. Thom. quod necessitatem habet ex se, determinationem autem non à volito, sed ad volitum. Est ergo illa volitio in determinando se, absoluta à volito ut ab obiecto seu ratione formali, aut motiva, non absoluta ab illo, ut à termino, seu effectu, quem utique immutat; & ad illum dicit habitudinem non necessariam, quia non indiget illo etiam ut determinet se, sed volitum indiget volitione Dei & ita ipse actus qui est ex se actus secundus volitionis & nolitionis quantum ad entitatem actus fundat habitudinem non necessariam ad obiectum sibi in ad æquatum & non sibi necessarium, & quia in ad æquatum, obiectum est, alterum respectum tantum terminat, scil. vel volitionis vel nolitionis, immutato actu ex parte Dei, & tota immutatione solum se tenente ex parte creaturæ. Et ex ista terminatione ad obiectum fit denominatio illius actus, quod sit determinatè volitio, vel determinatè nolitio, prout unum ex illis inadæquatis respectibus fundat, & determinat ex se erga obiectum.

Et ex hoc sumi potest fundamentum huius assertionis, cuius tota difficultas est, quomodo possit iste actus in se necessarius & immutatus existens fundare habitudinem illam rationis, sine qua non est volitio determinata, ut distinguitur à nolitione, & tamen illa habitudo est contingens, & deesse potuit Deo, nec tamen fundatur in ipsa mutatione creaturæ, sed antecedit illam, quia causat talem mutationem, in quo distinguitur ab habitudine quam dicit productio, vel creatio creaturæ, aut terminatio divinæ personæ ad naturam creatam, quia in istis habitudo rationis fundatur in ipsa mutatione creaturæ, & ratione eius convenit Deo, quod nos non admittimus in divina volitione ut determinata est, & à nolitione distinguitur. Non potest autem fundari in ipso actu volitionis ex parte Dei, quia de se tam est volitio, quam nolitio obiecti, & sic cum sit indifferens ad utrumque, non potest esse ratio fundandi determinatè hanc præ illa: nec potest reddi ratio huius, quare ille actus magis vult, quam non vult, nisi fortè reddatur causa formalis, ideo vult quia vult, seu quia est volitio, nos autem non querimus causam formalem, quæ notissima est, & in nobis etiam datur: volumus enim, & quia habemus volitionem, sed de fundamentali & determinatiua quasi effectivè ad volitionem potius quam nolitionem, quænam illa sit in Deo?

Ad

10 Ad euincendam igitur hanc difficultatem probamus & explicamus fundamentum nostræ assertionis, quia diuina volitio comparatur ad volita creata, non supponendo ipsa in ratione obiecti, sed constituendo & participando creaturæ quod sit obiectum, non quidem sibi adæquatum & necessarium, sed non necessarium, nec sibi requisitum, sed inadæquatum. Ergo actus ille diuinus, qui simul in sua entitate est volitio & nolitio in actu secundo respectu creaturæ per hoc solum denominatur volitio potius quam nolitio, quia redditur creatura constituta in esse obiecti participati ab ipso, sed inadæquate & deficienter, quia bonum limitatum est, ita quod tota determinatio volitionis est actus ipse ut immutans & reddens creaturam in se obiectum volitionis. Vnde autem ipse actus qui indifferenter sic potest immutare obiectum determinetur, ut potius volitione tangat quam nolitione? Dicimus quod à nullo determinatur, sed ex seipso id facit, quia est purè determinans, & primum determinans, & sic passiuè à nullo determinatur, sed purè actiuè determinat.

11 Antecedens primum est certum, & communiter obseruatum à D. Thoma, qui in hoc ponit differentiam inter nostram voluntatem & diuinam, quod nostra supponit bonitatem quam amat, diuina participat & causat, & videri potest hic q. 20. a. 4. idque manifestè constat, quia bonitas creaturæ, & esse illius quod amat est bonum, non ex se, sed ex participatione, amor autem Dei est amor ex se, non ex participatione obiecti: ergo bonitas creaturæ non est diffusiva sui in Deum, sed diffusa ex Deo, nec eius amorem antecedens, sed ab ipso participatum: nec enim potest aliunde participari quam ab amore ipso Dei, quia liberè, & non necessariò participatur: ergo ex voluntate & non ex necessitate. Non autem participat & diffundit in creaturam tantam bonitatem, & esse, sicut habet in se, sed limitatum: ergo constituit obiectum inadæquatum sibi, & non implens seu trahens ad plenum voluntatem quia est obiectum minus se & deficienti à se: ergo ex hac sola parte habitudo & respicientia voluntatis illius ad tale obiectum est non necessaria, sed libera, licet orta ex actu in se entitatiuè necessario, quia tangit & causat obiectum incapax necessariæ habitudinis, quia inadæquatum & deficienti in se: sicut sol, licet necessariò effundat lucem, contingenter tamen per eam producit herbam vel aurum, quia herba deficienter oritur ex luce solis & dependenter à causis impediabilibus, & si sol cum cognitione talis contingentia herbæ diffunderet lucem, voluntariè illam produceret.

Consequentia argumenti prob. quia illa determinatio actus, ut sit volitio potius quam nolitio, non determinatur ab ipso obiecto, quia non est indifferentia passiuæ, indigens externa determinatione, & præsertim ab obiecto creato orta, nec est actus in se contingens, qui ab alio indigeat determinari, sed in se habet totam necessitatem & actualitatem volitionis & nolitionis absolutè, & independentem ab obiecto mouente & determinante se: ergo per hoc solum quod talis actus sit de facto immutans obiectum seu constituens illud in ratione boni, & volibilis determinatè est volitio potius quam nolitio. Et quia constituit illud obiectum in esse obiecti volibilis per participationem sui limitatam, & non adæquatam ad plenum voluntati, ideo habitudo illa ad obiectum non solum in ratione producti, sed etiam in esse voliti, necessaria non est;

sufficit enim ad contingentiam hanc, & libertatem quod ex parte vnius extremi attingatur aliquid contingens & inadæquatum voluntati, ut actus ille qui in sua perfectione & actualitate est necessarius, in attingentia & deriuatione seu participatione illius obiecti sit contingens seu liber. In quo notanda est insignis doctrina D. Thom. quest. 23. de verit. art. 5. ad 1. ubi inquit, quod ex voluntate sequitur aliquid eo modo, quo voluntas disponit, & non eo modo quo voluntas habet esse; sicut accidit in causis naturalibus, in quibus attenditur assimilatio quantum ad eandem conditionem causa & causati; cum tamen in causis voluntariis attendatur assimilatio, secundum quod in effectu impletur voluntas agentis. Sic ergo quamuis esse illius actus volitionis & nolitionis sit necessarium, & in actu secundo, tamen potest sequi habitudo non necessaria, non propter esse actus, sed propter limitationem obiecti, quod sibi non est adæquatum non minus in actu immanenti voluntatis erga obiectum, quam in actu immutatio ad extra in obiecto mutato, quia etiam actus immanens constituit illud in ratione obiecti, & in ratione obiecti contingentis, quia limitati, & inadæquati sibi: totum enim obiectum participat à voluntate Dei, nihil voluntas ab obiecto. Et licet ille actus de se sit indifferens ad volendum, & nolendum, imò sit ipse actus volitionis & nolitionis potest tamen fundare habitudinem volendi potius quam nolendi ex se ipso, quia non habet indifferentiam passiuam, quæ indigeat alio super addito ut determinatè illam fundet, sed purè actiuæ, immo & purus actus, & ita ex se potest fundare determinatam illam habitudinem; sed quia erga obiectum contingens & limitatum se habet, illudque tale constituit, ideo non necessariò fundat illam. Et sic dicitur operari secundum consilium voluntatis suæ: consilium enim determinat de agendis, sed voluntas diuina, quia non determinatur passiuè ab obiecto, & ab agendis, sed ipsa est summum & primum determinans, ipsa sibi est consilium; determinat autem non se, ut sit in se entitas volitionis, quia sic determinaretur volitio passiuè, sed ut obiectum sit volitum, cum posset ab eodem actu reddi nolitum, quia obiectum inadæquatum est & contingens, & vtriusque capax.

Corollaria ex dictis.

Ex dictis colligo primò sententiam illam P. Suarez *suprà* relata valde accedere ad hanc mentem S. Thom. quatenus totam rationem liberi, ut distinguitur à necessario, tribuit intrinsecæ perfectioni diuinæ, & determinationem volitionis à nolitione, seu distinctionem, tribuit inadæquatæ explicationi eiusdem actualitatis in Deo erga obiectum, quia ex se habet non necessariò & adæquatè se explicare quoad omnem rationem, & ideo contingenter conuenire. Quæ vltima pars si intelligatur de explicatione illius actualitatis, seu actus volendi, & nolendi in ordine ad subiectum, quod afficit, & cui præbet formalem effectum, non potest intelligi, quod ex hac parte possit se explicare, vel non explicare, afficere, vel non afficere contingenter, quia non est capax illud subiectum quod est Deus huius contingentia, sed quidquid illi conuenit, semper & necessariò conuenit; aliàs inciditur in opinionem *suprà* attributam Caiet. quòd aliquid conuenit Deo tanquam perfectio extensiuæ, quæ posset non conuenire. Debet ergo intelligi de explicatione

tionē illius actualitatis, non in ordine ad subiectum quod afficiat, & reddat volentem, sed in ordine ad obiectum quod efficiat, & reddat bonum & constitutum in esse obiecti, ut sic denominetur Deus determinatē volens potius quā nōlens sicut ex natura sua semper & necessariō habet actum, qui est operatio factiua rerum; non tamen semper necessariō denominatur agens, & creans, sed tunc quando sequitur in tempore effectus: hoc enim est mirabile (si non esset, non esset diuinum) & eminentissimū in Deo, quod cum sit in se immutabilis & mutet omnia, habet in se actum, qui est operatio, immō est ipse actus purus, & tamen non semper sequitur effectus, sed contingenter, quia sic subiicit sibi creaturas non necessitatus ad ipsas: quod aduertit S. Thom. q. 1. de potentia art. 1. ad 8. & 1. p. q. 46. art. 1. ad 10. Itaque explicatio illius actualitatis in ordine ad omnem suam rationem, quod non semper, & adæquatē fiat, non debet intelligi per modum explicationis formæ, & effectuum formalium, & quasi in ordine ad subiectum, sed explicationis ad obiectum, & quasi effectiue, quatenus immutat illud, & constituit in ratione obiecti & subiicit sibi, eo quod non comparatur obiectum ad actum ut specifians, & mouens illum, sed ut effectus secutus ad ipsum, contingenter tamen, quia obiectum ipsum contingens & deficiens est, & limitatum. Et hoc immutare & constituere obiectum, realiter conuenit actui, & per summam independentiam, & dominium in obiectum, quia constituit illud, non constituitur ab eo; quod tamen nos per habitudinē explicamus quia aliter nō possumus intelligere, quomodo actus se habeat erga obiectum, etiā quod constituitur, & posset non constituere. Et ita tandē videtur ipse Suarez sentire.

13 Secundō colligo, hanc indifferentiam, & libertatem esse in Deo maximē intrinsecam & formale, versari autem circa obiecta creata constituendo illa in esse obiecti, non præsupponendo: Vnde ad hanc libertatem maximē conducit (nullo modo officit) immutabilitas, & necessitas illius ex parte subiecti. Patet hoc ex dictis quia libertas illa consistit in maxima independentia, & summa actualiter Dei, qua non dependet à creaturis, etiā ut obiectis, sed creaturas facit dependere à se sine necessitate ad ipsas, sed cum summo dominio: ergo non est maximē intima ista libertas. Patet, quia maximē independentens ab omni extrinseco: ergo maximē intrinseca; & similiter est summa perfectio & actualitas: ergo maximē realis. Et quia hæc libertas non consistit in egressione vel non egressione à potentia, nec in aliqua potentialitate, qua possit recipere determinationem ab aliquo, sed in se est in puro actu, ex se immutat & determinat omnia, necessariō fundatur in necessitate & immutabilitate actus, ex qua habet non aliunde determinari, sed ex se determinare omnia, & ex eo denominatur volens, quia determinat in obiecto participationem boni, ratione cuius est volitum, non quia in se determinatur ad volendum: in se enim habet quidquid actus volitionis & nolitionis est.

14 Tertiō colligo respectum, seu habitudinem rationis, qua nos explicamus determinationem huius actus ad volendum potius, quā nōlendum, & alij vocant extensionem, vel applicationem, alij terminationem, seu determinationem actus erga illa obiecta, & omnia in idem redeunt, non pertinere ad constitutionem intrinsecam, & formalem actus liberi, vel determinationem eius erga obiectum, sed consequi ad ipsum, & explicari à nobis per respectum seu habitudinem non necessariam ad obiectum, ut D. Thom. dixit cit. loco,

Ioan. à S. Thoma in 1. part. D. Thoma.

licet ex suppositione quod velit, consequatur illa habitudo. Patet hoc quia constitutio actus liberi est in Deo omnino absoluta, & summē independentens ab obiecto, sed potius per summam dependentiam obiecti ab ipso, & ita dixit S. Thom. velle Dei non includere in sua significatione obiecta in hac 1. p. quest. 20. art. 3. ad 3. Repugnat ergo constitui formaliter & intrinsecē hanc summam independentiam per habitudinem ad aliud, quæ ad modum dependentiæ, seu tendentiæ accipitur, & multo minus, per habitudinem rationis, quæ non est aliquid reale, cum illa summa independentia realissima sit. Sed quia in immutando creaturam, & subiiciendo sibi, non potest à nobis summa & absoluta independentia intelligi, sine aliqua applicatione, quæ per modum respectus, & tendentiæ, significatur; idē illa habitudo dicitur consequi, non constituere formalem actum ut liberum, quia pertinet ad attingentiam qua tangit obiectū, & reddit illud volitum, & in esse obiecti reddit constitutum, quod tamen iam supponit actum constitutum, eo quod causatur obiectum ab actu, ergo supponit actum non autem constituit illum, sicut in nobis actus constituitur per ordinem ad obiectum, non antē; & ideo respectus ad obiectum in Deo consequitur ad constitutionem actus, in nobis antecedit, quia constituit, seu specificat. Et tamen licet consequatur, non necessariō, sed contingenter consequitur, quia obiectum contingens, & inadæquatum est voluntati. Sicut etiam in actione Dei operatiua ad extra respectus ad effectum non constituit actionem illam æternam in se, sed consequitur, non tamen denominatur Deus actu agens, & creans quovsq̃ effectus sequatur & respectus ille, quia denominatio agendi est denominatio terminata, & requirit terminum ad quem sit, non solum subiectum. Sic etiam volitio, licet in actu semper sit in Deo, non tamen denominat Deum volentem potius, quā nōlentem determinatē, nisi per habitudinem ad obiectū quod constituitur in esse obiecti, immutatur in se ab actu illo, sub ratione voliti potius, quā noliti; denominatio autem illa cum non solum sic actus volendi, sed determinet, & discernat à nolitione, intelligi non potest sine discretionē facta in obiectis; & sic oportet, quod non fiat ante ipsa obiecta immutata ab actu, & consequenter nec ante habitudinem illam, seu applicationem explicatam à nobis per habitudinem, quæ non constituit actū formaliter, quia est summē independentens; nec sequitur necessariō, quia circa obiectum contingens est, licet actus in se, & entitatiue sit necessarius. Vnde per hoc quod ille actus determinatē dicatur volitio potius, quā nolitio, non tollitur, aut aduenit aliquid reale in Deo, sed tollitur vel ponitur immutatio, ex parte creaturæ, & in Deo solum variatur respectus rationis, sicut per hoc quod persona terminat vel non terminet naturam, actio producat, vel non producat creaturam, nil tollitur à Deo, sed à creatura, quæ sola istis mutationibus grauari potest.

Quartō colligitur, in hac sententia nullum esse 15
admittendum circulū, nec umbrā eius, dicēdo quare vult Deus determinatē potius, quā nōlunt, scil. quia creaturæ sunt futuræ, aut productio, & immutatio earum datur; & quare datur hæc immutatio vel productio aut futuritio? quia Deus vult. Hoc totum cessat in præsentī: dicimus enim, ideo Deum determinatē velle potius, quā nolle creaturam sumendo *ly ideo* pro causali, seu ratione formali; quia vult, & ex se determinat, non consilio sumpto à conuenientia obiecti, sed consilio voluntatis suæ, quia vult, quia determinat, & constituit suum

L

suum

sum obiectum; non ab eo determinatur, aut specificatur. Et cur non necessario vult hoc, & non vult aliud, sed contingenter sequitur illa determinatio, cum tamen actus volitionis necessario sit in subiecto: dicimus, ideo esse, quia, licet entitas necessaria sit ille actus ex parte subiecti, respectu tamen obiecti habet summum dominium, & independentiam ad ipsum, & obiectum illud in se est limitatum, & inadæquatum ipsi voluntati, & contingens ac defectibile in esse; & ideo ad illud terminari non potest actus necessario, licet actus in se sit necessarius entitatiue, sed non terminatiue. Si autem *ly ideo* (quando dicimus ideo Deum determinatè velle) significet non causam, & rationem determinandi, & volendi, sed effectum consecutum, vel respectum ipsum rationis, ut conditionem requisitam ad denominandum; sic denominatur Deus determinatè volens, quia obiectum est determinatè volitum, & respectus ad ipsum terminatus, sed valde improprie sumitur *ly ideo*, & *ly quia*: nam hoc non est causa, & ratio determinationis, sed effectus; ab effectu autem, & conditione consecuta, non deriuatur causalitas, & ratio, seu fundamentum ad causam, nec dicitur *quia*, nisi à posteriori. Hoc autem modo non est inconueniens, nec vitiosus circulus, quia non est in eodem genere causæ, sicut querenti, quare iste videt Petrum, si dicas, quia est visus ipse Petrus, & rursus, quare est visus, quia dirigit visum ad illum, seu, videt illum, non est circulus, quia primum *quia* est ab effectu, & verè non est *quia*; secundum, à causa, & sic non est circulus. Dices: Hoc solum voluit dicere Vasquez, & non alium circulum ponere. Resp. si hoc voluit, in nostram sententiam transiit, sed frustra laborauit dicendo non euitari circulum, quia hoc non est circulus: præterquam quod iam *suprà* ostendimus, & in ipso Vasquez constat, quod futuritionem creaturarum accepit pro fundamento, & ratione liberæ volitionis Dei, non pro solo effectu.

16 Vltimò, colligo in gratiam Cardinalis Caiet. quòd quando dixit in Deo esse aliquam perfectionem voluntariam, seu liberam, nec esse inconueniens quòd aliqua perfectio libera possit deesse Deo, licet asperioribus vocibus usus sit, potest tamen ad legitimum sensum reduci, ut reducit Nazarius *hac 1. p. quæst. 19. art. 3. §. secundum*, scilicet quòd Caiet. non intellexit dari aliquam perfectionem liberam, id est, quæ secundum suum intrinsecum, & per ordinem ad subiectum possit deesse Deo, sed aliquam perfectionem liberam secundum sui extensionem ad obiectum, potest deesse Deo, id est, ut tangit creaturam, & dicit habitudinem ad ipsam, sub hac denominatione deesse potest. Ducor ad hoc ex verbis ipsius Cardinalis *art. 3. seq. §. Ad hoc dicendum*, ubi expressius se explicauit. Inquit enim quòd *modus quo res est volita est duplex, quidam intensiuus, quidam extensiuus, & primus dat perfectionem amoris, secundus non, sed extendit ipsam. Et si quando inueniatur scriptum quòd secundus pertinet ad perfectionem, intelligendum est de perfectione extensiuâ, & non simpliciter. Et subdit. Amari autem sic, id est secundum condecentiam ad extra, seu ut diffundatur, participetur, & multiplicetur secundum suam similitudinem, non ad perfectionem intensiuam, sed extensiuam pertinet, & consequenter non cum necessario, sed cum liberè conuenientibus Deo computandum est. Quia igitur diuina bonitas liberè est sic perfectè volita à Deo, ideo liberè alia vult, & non è conuerso. Et ideo propriè loquendo, nec ex aliis, nec ex aliorum volitione aliquid perfectionis, etiam ex-*

tensiuè diuina bonitati accrescit, sed è conuerso, ex perfectè extensiuè suæ bonitatis volitione Deus esse & alias perfectiones vult aliis. Ecce Caietani mentem à seipso explicatam. Perfectio intensiuâ est perfectio ex parte subiecti considerata. Perfectio extensiuâ ex parte obiecti & applicationis ad ipsum. Hæc non addit perfectionem etiam extensiuè ipsi subiecto, id est Deo, sed communicat aliis. Hoc idem nos dicimus, & mens Caiet. & noster sensus idem sunt. Non potuit tam sublimis mens Caietani sic ruditer sentire de Deo, ut perfectionem aliquam increatam Deo aduenientem, vel recedentem imaginaretur.

ARTICVLVS V.

Difficultates enodantur.

O Ccurrunt primò difficultates *suprà* positæ **I** *art. 3.* Et prima versabatur circa indifferentiam libertatis componendam cum ipso actu diuinæ voluntatis, quæ semper est in actu secundo. Et dicimus verissimum esse quòd in Deo non potest dari indifferentia penes egredi, vel non egredi à potentia voluntatis, sed dari indifferentiam actus penes tangere, vel non tangere ipsum obiectum creatum, quod solum liberè potest amari à Deo, & semper se habet ut obiectum secundarium, inadæquatum. Et quando obiicitur quòd respectus in actu ad obiectum est illi intrinsecus: Resp. quòd in actu qui dependet ab obiecto, aut ab eo desumit specificationem, vel perfectionem aliquam, respectus ille intrinsecus est, imò est ipsamet entitas actus, ut non omninò ad se, sed ad aliud se habens, & sic ab eo pendens. At verò actus qui nullo modo est pendens ab aliquo, sed est entitas omnino ad se, & à quo potius obiectum ipsum dependet, talis actus intrinsecè non constituitur per respectum, & ordinem ad obiectum illud secundarium, & à se dependens, nec realem respectum ad illud fundat; & respectus rationis per quem explicatur illa summa independentia, & dominium actus erga obiectum, est quid consecutum ad actum, non constitutum, quia si actus est causa obiecti, & obiectum ab eo dependet, non è contrà, supponit ordo ad obiectum talem actum, non constituit. Et si initeretur, quòd actus ille in quantum liber, & ut distinguitur à necessario, non habet pro obiecto nisi rem creatam, sicut & ipsa omnipotètia: Resp. quòd non distinguitur ille actus ut liber à necessario ex obiecto creato, ut mouente aut specificante actum, sed ut causato & immutato ab ipso actu. Quòd si obiectum est causatum ab actu, non est per se distinguens, neque constituens actum, sed supponens, quia ab illo causatur. Et sic distinctio, seu constitutio actus liberi, ut liberi, anterior est ad obiectum creatum, & ad respectum rationis, ad ipsum, licet talis respectus consecutiue se habeat; sed ratio liberi in illo actu sumitur tanquam ex obiecto ex ipsamet bonitate diuina, ut communicabilis est creaturæ, cum summa & absoluta independentia, & dominio, quod habet super omne obiectum sibi non adæquatum, atque adedò sibi non necessarium, sed contingens respectu sui, cuius ille actus immutatus & constitutus est in esse obiecti, quia ab eo participatur quidquid boni est in obiecto, atque adedò quidquid appetibile, & obiectiuum. Vnde *suprà* diximus, quòd potius respicit illud pro effectu, quam pro obiecto;

&

& similiter se habet omnipotentia, quæ est in se absoluta, & independens, obiectum autem respicit ut effectum & quid consecutum à se, sed non consecutum in esse contingenti, quod est esse existentia, sed in esse possibili, quæ est denominatio necessaria, de qua *infr. circa q. 25. disp. 12.* & ideo omnipotentia non est libera respectu possibilium, licet creatura possibilis sit sibi inadæquata, voluntas autem est libera respectu existentium. Et cum inquiritur de indifferentia, quæ non potest esse nisi respectus rationis: Resp. quod indifferentia illa aliquid reale est, denominativum, & potestativum super obiectum in esse volibilis, & in esse contingenti, quod tamen à nobis per respectum rationis significatur, in se tamen aliquid reale est, & absolutum, sed immutativum obiecti ad extra; & sic abesse & adesse non potest entitatiue & ex parte subiecti, sed solum terminatiue, & ex parte obiecti, quia obiectum in se deficiens, & limitatum est in esse, & sic solum est contingens, & modo contingenti attingitur ab actu per habitudinem non necessariam, ut loquitur D. Thom. Et si instes quia si terminatiue adesse, & abesse potest, non entitatiue, & solum est indifferens in quantum adesse & abesse potest: ergo entitatiue non est indifferens: ergo non entitatiue, nec realiter, sed sicut est indifferens. Resp. quod est magna æquivocatio, cum dicitur quod solum est aliquid liberum, & indifferens in quantum abesse, & adesse potest. Nam si intelligatur quod, ut aliquid sit liberum formaliter, exigitur quod in se passiuè sit contingens, & possit in se abesse, aut adesse, falsum est, quia liberum ut liberum, solum consistit formaliter in indifferentia dominatiua, qua potest in aliud pro libito, siue in se mutetur, & passiuè adsit, vel absit, siue: non: hoc enim non pertinet per se ad formalem rationem, & perfectionem liberi, sed solum dominari super vtrumlibet, quod tamen in nobis esse non potest nisi per mutationem diversorum actuum, & contingentiam passiuam; sed in hoc deficit à perfectione & actualitate dominatiua in obiecta. Si verò intelligatur quod ut aliquid sit liberum, exigitur quod possit adesse, & abesse quasi actiuè, id est quod possit facere ut adsit, vel absit obiectum, quod habet pro effectum, sic verum est, quod actus ille est liber, & indifferens actiuè, & facit abesse ille est liber, & indifferens actiuè, & facit realitate actiuæ circa obiectum, nihil in se sustinendo dispendij & mutationis, & sic entitatiue passiuè non est indifferens, entitatiue actiuè est indifferens; sed tunc totum adesse, vel abesse formaliter tenet se ex parte creaturæ, & ex parte terminationis, & respectus rationis: totum autem adesse vel abesse actiuè, ex parte actus diuini: sicut omnipotentia & actio Dei ut tangit creaturas reali actu, & immutatio earum, tangit illas, licet respectus ad illas rationis sit, & tangentia illa prout ex parte creaturarum se tenet, deesse possit.

2 Si instes, primò quod iste respectus rationis non potest solum esse aliquod connotatum in actu libero, cum actus, in quantum liber, non distinguatur à necessario, nisi per illud obiectum circa quod liberè versatur: ergo respectus ad tale obiectum est distinctius actus, ut liberi, à necessario: ergo & constitutivus eius in ratione liberi, & non solum connotatum, quia ante tale obiectum liber actus non est ut liber. Resp. quod actus ille in quantum liber, & ut distinguitur à necessario non habet obiectum constitutivum, & specificativum sui, sed constitutum, & causatum à se, ut sæpe dictum

Ioan. à S. Thoma in 1. part. D. Th. Tom. 2.

est, quia vel Dei causat bonitatem in obiecto, non supponit. Vnde per consequentiam euentem sequitur, quod respectus ad tale obiectum solum potest esse connotatum talis actus, & aliquid consecutum est ipso non constitutivum eius, quia supponit actum, si ab eo causatur, si autem supponit, non per se primò constituit: solum ergo connotat. Et si inquiras quodnam ergo obiectum assignamus actui libero Dei, ut libero ut constitutur per illud? Resp. quod loquendo obiecto constituyente, & specificante, actus liber in Deo non includit obiectum in sui significatione, ut D. Thom. dixit *in presenti quest. 20. art. 3. ad 3.* sicut nec ipsum intelligere Dei, ut tangit creaturas, sed ille actus est summe independens, & absolutus, solumque respicit creaturas ut obiecta causata, & constituta non constituenta se. Obiectum ergo illius volitionis adæquate sumptæ, est diuina bonitas est ut in se, & ut est ratio participationis in creaturis, sed ut est in se fundat volitionem necessariam, quia est bonitas infinita adæquans, & identificata cum ipso velle; ut autem est ratio participationis in creaturis, fundat volitionem indifferentem, quia non habet habitudinem, & connotationem necessariam cum creaturis. Et sic D. Thom. perpetuò ostendit libertatem in actu diuino, ex eo quod diuina bonitas, quæ est finis non petit necessariò nec dependet à bonitate creata, ut patet *in hac quest. 19. art. 3. & quest. 23. de verit. art. 5. & 1. cont. gent. cap. 82. & 83.* ubi docet quod Deus volendo suam bonitatem, vult alia à se prout bonitatem eius participant Bonitas autem diuina, ut est ratio participandi tendit in creata obiecta ut sibi contingentia, non ut sibi necessaria, & consequenter est ratio actus liber & indifferens indifferencia actiuæ ad constituenda obiecta creata, non passiuæ, ut mutetur in se, & ideo conuenienter habet pro obiecto ipsam diuinam bonitatem, non absolutè, sed ut est ratio deriuandi ex se, & participandi bonitatem creatam.

Si instes secundò, quia iste respectus non fundatur in actu illo ut necessario; sic enim non sequeretur respectus liberi erga obiectum: nec in ipso, ut libero; sic enim iam supponeret rationem liberi, & sic ad eam non requireretur. Respondeo, quod in primis est respectus fundatur in actu ut libero, quia, ut sæpe diximus, consequitur ipsum, non constituit, ut obiectum creatum causatur in esse obiecti ab actu, & sic supponit ipsum actum, etiam in esse liberi, quia ab ipso ut libero causatur, non ut necessario; amando enim, & volendo causat volitum, non autem amat necessario aliquid extra se: amat ergo ut liber, causat obiectum, & consequenter fundat respectum ad ipsum. Et sic ille respectus est quasi consecutum quid & connotatum ab actu libero, quia sine obiecto illo ut consecuto non potest intelligi à nobis, licet in se non sit respectus, sed eminentia circa illud obiectum, & hoc est connotare illud. Et cum inquiritur, quomodo ante talem respectum rationis intelligitur constitutus actus liber in esse liberi, ut distinguitur à necessario, cum id non possit intelligi sine obiectorum distinctione, per ordinem ad quæ distinctio illa fiat? Resp. quod ante illum respectum, ut formaliter respectus est, intelligitur libertas actus ut absoluta in se, & independens ab obiecto cum perfectione, & dominio super vtrumque, id est, super obiectum ut volendum, vel nolendum; quod nos non nisi per tendentiam, & respectum ad obiectum intelligimus, sed in re est summa eminentia & independentia erga illud, & cum summa dependentia obiecti ad ipsum,

L 2

Actus

Actus verò ille, vt necessarius, habet non eminentiam ad obiectum, quod est essentia diuina, sed summam adaequationem, & identificationem cum eo. Si autem vltius inquiratur, quomodo actus ille liber, & distinctus virtualiter à necessario habet determinatè esse volitio potius, quàm nolitio antecedenter ad respectum rationis? Resp. quòd ex se, & non ab obiecto, nec aliquo alio determinatur, seu verius loquendo ex se determinat obiectum constituendo, & causando illud in esse obiecti volibilis, & boni, etiam antequam procedat in esse producti ad extra, quia etiam in ratione boni & volibilis id habet à voluntate Dei, non è contra. Et ita volitio, vt immutans ad bonum, & constituens obiectum in esse boni, volitio est, vt non constituens, nolitio. Cur ergo contingenter id facit & determinat. Si ex se determinat, & in se necessarius actus est? Et ad hoc dico: quia obiectum contingens & deficiens, & inadæquatum voluntati diuinæ est, volitio autem in se independens & summè absoluta ab ipso obiecto, nec ipsum obiectum sibi necessarium est, idèò contingenter, seu non necessariò illud tangit & causat.

- 4 Adhuc tamen obiicies: Quia intelligibile est quod extremis, seu causis eodem modo se habentibus sequatur diuersus effectus, sed idem omnino sequitur: ponamus ergo in anteriori signo quando intelligitur Deus se amare, & nondum creaturas, pro illo priori ex parte Dei actus est omnino idem, & indifferens ad volendum vel nolendum obiecta creata omnino sub eodem statu, scilicet in statu puræ possibilitatis. Vnde ergo oritur quòd actus ille reddatur volitio pro istis determinatis creatoris potius, quàm nolitio, pro aliis autem nolitio, & non volitio: cum ex se actus ille indifferenter sit velle vel nolle, obiecta verò ex se indifferenter volibilia & nobilia. Vnde ergo determinatio extremis eodem modo se habentibus?

Resp. hoc esse præcipuum fundamentum Vasq. & aliorum, qui ipsum sequuntur, aut illi ex parte adherent. Sed ex dictis deducitur solutio, quòd illud axioma extremis immutatis, seu eodem modo se habentibus, sequitur semper idem, intelligitur eodem modo se habentibus tam passiuè in se, quàm actiuè pro aliis. Actus autem diuinæ voluntatis, licet eodem modo sit immutatus in se passiuè, sed actiuè aliter immutat obiecta, & ideo non eodem modo se habet obiecta, sed mutantur iuxta modum ipsius actus diuini immutantis actiuè. Vt autem Deus actiuè immutet, non indiget in se immutari, sed immotus permanens, immutat omnia, & idèò immutatus in se, sed immutans actiuè, res non eodem modo se habent. Immutat autem contingenter, possetque non immutare, quia, vt diximus, extremum circa quod versatur est deficiens, & contingens, & inadæquatum sibi nec sibi necessarium, & idèò ita determinatè immutat illud quod potuit non sic immutare, nec vt obiectum volitionis constituere, sed nolitionis.

- 5 Ad difficultatem ortam ex secundo capite scilicet ex immutabilitate diuina, etiam in volendo liberè, cur videlicet non possit Deus modò in tempore incipere velle aliquid quod ante nolebat, vel è contra: cum in hoc solum interueniat diuersa terminatio ad creaturam, vel denominatio rationis, eodem modo semper se habente actu diuinæ voluntatis, quod nullam infert mutationem in Deo. Illæsa ergo immutabilitate, potest modò mutare denominationem, & terminationem volitionis, aut nolitionis. Vnde P. Suarez in disp. 30. metaph. sect.

num. 58. post longam disputationem tandem censet quòd ista variatio diuersæ terminationis ad creaturas non infert immediatè mutationem physicam in Deo, sed moralem, scilicet quandam animi inconstantiam & leuitatem, quæ maximè dedecet Deum: Cum enim ab initio fuerint ei proposita omnia obiecta, & omnes rationes, & motiua, modique volendi, aut nolendi, si semel elegit hunc ordinem, non posset alium eligere, vel istum relinquere, nisi ex nouo motiuo & mutatione obiecti. Nouum motiuum non datur, quia omnia Deus prænouit, quando istum ordinem elegit. Mutatio ex parte obiecti etiam non datur, vt supponimus, nec dari potest, nisi causatur ex actu diuino: ergo prius supponit Deum immutantem & de volitione ad nolitionem transeuntem, quàm obiectum sit in se mutatum. Voluntas autem, quæ eisdem motiuis & obiecto perseverantibus mutatur de volente in nolentem, inconstantia, & leuitatis arguitur.

Nihilominus maior immutabilitas in volendo 6 id quod semel Deus vult assignanda est, quàm moralis illa leuitas vel inconstantia, scilicet immutabilitas omnimoda, vt S. Thom. docet in presenti q. 19. art. 7. Non autem potest dici omnino immutabilis voluntas, quæ solum moraliter immutabilis est. Et q. 3. de potentia art. 15. ad 7. dicit, quòd non competit diuinæ voluntati determinatio ad vnum, licet in ea sit immobilitas summa: ergo in ipsa volitione, vt libera, agnoscit D. Thom. immutabilitatem physicam, & non solum moralem. In ipsa quidem volitione libera, quia loquitur de voluntate, vt non determinata ad vnum, neque agente ex necessitate naturæ: ergo vt libera. Immutabilitatem autem physicam, & non solum moralem ponit, quia dicit esse summam, moralis autem immobilitas sola non est summa, maior est enim etiam physica. Et hoc ideo est, quia in hoc velle libero possumus considerare, vel ipsam entitatem, & actualitatem volitionis, vt tener se ex parte Dei, vel ipsam terminationem, vt tangit creaturas, quod nos explicamus per respectum rationis. Primo, modo constat immutabilem esse illum actum liberum, quia est ipsa essentia Dei, nec magis deficere potest, aut mutari, quàm ipsa diuina entitas. Secundo modo illa terminatio, & ille respectus caret fundamento mutabili, sed fundatur super immutabile fundamentum: ergo etiam pro hac parte immutabilis est physicè ille actus liber. Conseq. patet, quia quando loquimur de immutabilitate istius respectus; non loquimur de illo, prout est formatum & fictum in nostro intellectu: sic enim non est capax immutabilitatis, cum non sit ens; immò cum eius esse sit concipi, & cognosci, sicut mutatur cognitio nostra, sic & eius cognosci, & eius esse. Quòd si Deus format huiusmodi entia rationis (quod est valde dubium, vt alibi diximus) dicetur illud esse, seu cognosci entis rationis immutabile ratione cognitionis ad quam sequitur: sed tamen illud cognosci ortum ex cognitione diuina non est cognosci fictè, sicut nec ipsa Dei cognitio est fingens, sed est cognosci verè ipsa entia rationis. Et hoc, vt sæpe diximus, non est formari & fingi ens rationis. Anteced. verò prob. qui fundamentum illius respectus non est ipsa creatura producta & mutata à Deo, & volita, vt contra sententiam Vasquez sæpe ponderauimus: ergo fundamentum eius est actus ipse diuinus, vt diuinus est, si enim fundamentum eius non est creatura: ergo ipse Deus: ergo est fundamentum immutabile non solum moraliter

liter, sed physicè. Vnde D. Thom. *suprà quest. 14. artic. 15. ad 1.* distinguit inter relationes, quæ consequuntur actus, qui intelliguntur terminari ad creaturas, secundum quod in seipsis sunt, sicut esse Dominum, esse creatorem, &c. & inter relationes; quæ consequuntur actus, qui intelliguntur esse in Deo, sicut scire, & amare, &c. quod primæ relationes dicuntur mutabiliter de Deo, eo quod fundantur in mutatione creaturæ, id est in ipsis creaturis secundum quod in seipsis sunt. Et ideo Deus non dicitur ab æterno Dominus, neque creator, quia non dantur creaturæ ab æterno, in seipsis, quæ dicantur creatæ, vel subiectæ dominio. At verò secundæ relationes non fundantur in creaturis, prout in seipsis, sed prout intellectæ, vel amata, id est, in ipso actu intelligendi, & amandi, prout intra Deum, & prout actus ille immanens est, & ideo habent immutabile fundamentum, nec possunt de nouo in tempore incipere denominare Deum, nisi actus ipse, ut immanens, varietur, quod est impossibile; sicut relationes, priores, quæ fundantur in mutatione temporali creaturæ, non possunt variari, nisi ipsæ creaturæ varientur; & si esset impossibile eas variari, etiam relationes non mutarentur ex parte fundamenti: Si ergo actus Dei immanens in quantum immanens non potest variari, & fundantur illæ relationes in ipso, ut immanens est, & non ut temporaliter immutat, relationes illæ immutabiliter denominant. Constat autem, quod actus immanens in Deo, ut velle, & intelligere, non solum entitatiue in quantum sunt entitas increata, necessariò existunt, sed etiam operatiue, in quantum attingunt obiecta sua, quæ amant, & intelligunt, immutabiliter procedunt, quia creaturas attingunt intra Deum in ipso actu immanenti; intra Deum autem creatura non mutatur, & sic illi actus æternitate mensurantur, nec enim Deus intra se alia duratione & mensura operari potest, quam æterna; ergo talis actus immanens prout immanenter, & intra Deum attingit creaturam, immutabiliter attingit physicè, quia in attingendo sic æternitate mensuratur. Quam rationem adducit S. Thom. 1. *cont. gent. cap. 83. & 23. de verit. articulo quarto ad 2.*

7 Ex quo obiter colliges, non officere libertati diuinæ, quod indiuisibili æternitatis mensura mensureretur, in qua nec est futurum, nec præteritum, & non possit in tempore de nouo incipere, aut ante æternitatem poni, cum ante æternitatem nihil sit. Sed licet determinata volitio Dei sit tota æternitate mensurata, nec extra æternitatem esse possit, nihilominus libera est: ergo signum est quod ut actus sit liber, non requirit diuersum instans seu durationem, scilicet futuram, vel præteritam, in qua potuerit, aut possit non esse, ut aliqui falsò existimant; indeque inferunt Angelum in primo instanti suæ creationis non potuisse elicere actum liberum, neque bonum, neque malum, quia in illo instanti operatur, & sic non potest illo instanti oppositum operari, aliàs operaretur, & non operaretur pro eodem instanti. Ante illud autem instans non fuit aliud in quo posset operari, quia non existerat: ergo solum poterit liberè operari pro illo secundo instanti, post primum suæ creationis. Et sic liber actus ut liberè exerceatur, petit in hac sententia duo instantia, alterum pro quo potest indifferenter, alterum pro quo exercet de facto.

8 Sed hi omnino falluntur ut *infr. in materia de Angelis* latius dicam. Et sufficit nobis modò illius sententiæ falsitatem conuincere ex ipsa libertate Ioan. à S. Thoma in 1. part. D. Thoma.

diuina, quam in Deo dari fides fatetur, & non incepisse in tempore actum illum liberum, sed æternitate mensurari, iuxta eandem fidem tenendum est, & hanc æternitatem esse indiuisibilem durationem sine præterito & futuro indubitatum est, & ante æternitatem non fuisse aliquam durationem, in qua dicatur Deus posse hoc, vel illud indifferenter, certius est: Ergo dicendum, quod in eadem indiuisibili duratione Deus exercet hanc libertatem, & ita vult in toto hac æternitate, quod in tota illa potuit non velle. Et similiter Angelus in hoc primo instanti ita vult hoc obiectum, quod potuit in eodemmet toto instanti non velle. Nec hoc maius mysterium habet, quam quod Angelus in illo instanti potest in sensu diuiso & potentia antecedenti non velle, in sensu autem composito, & ex suppositione quod vult, non potest simul non velle, & idem est de Deo in æternitate. Id est, non habet pro hoc instanti potentiam, ut simul in eodem instanti coniungat & componat velle & non vellet habet tamen in illo instanti potentiam ut velit diuisuè, vel non velit, ita quod sicut habuit velle, potuit habere non velle illo ipso instanti quo habuit velle, licet tunc non haberet, si exiret in nolle. Ex suppositione autem quod habet pro hoc instanti, vel pro hac æternitate velle, non potest habere nolle, sed hoc est non posse ex suppositione, non autem simpliciter, & ex natura rei ut notat S. Thom. 1. *cont. gent. c. 83. 1. & 23. de verit. art. 4. ad 2.*

9 Ex quibus manet soluta ratio dubitandi ex isto 2. capite allata. Relationes quæ fundantur in actu immanente attingente creaturas ad intra, mutari non possunt, nisi mutetur actus ut immanens; dubitari autem non potest, quod non solum actio diuina prout executiua ad extra attingit & respicit creaturas, sed etiam prout manet ad intra, & sistit in ratione volitionis & cognitionis, siquidem prout actus ad intra dirigit, ordinat, & disponit ab æterno de creaturis, iuxta illud Pauli ad Ephes. 1. *Elegit nos in ipso ante mundi constitutionem*, electio ergo ab æterno respiciebat nos: ergo in electione ut æterna, & non solum in temporali mutatione ad extra fundatur respectus aliquis rationis ad creaturas, & ille ex parte fundamenti est immutabilis, & æternus, sicut etiam respectus idearum, licet alij respectus fundati in mutatione creaturarum in seipsis temporales sint. Quam diuersitatem respectuum denominantium Deum, & quod quidam sunt immutabiles, scilicet fundati in actu immanenti ut immanens, alij mutabiles, scilicet fundati in actu ut transeunte & mutante ad extra, docet S. Thom. 1. *p. 2. q. 13. art. 7. ad 3. & q. 14. art. 15. ad 1.*

10 Ad difficultatem ortam ex 3. cap. in art. 3. *suprà* propositam, quæ tangit motuum, & determinationem indifferentiæ voluntatis ex parte iudicii, quo Deus mouetur, seu determinat se. Ad hoc è Resp. præsupponendo, quod ista determinatio & applicatio libera voluntatis non exigit nouas rationes motiua, aut propositionem ex parte intellectus, quia infinitus intellectus omnia comprehendit, & sub hac vniuersalissima & omnimoda comprehensione voluntas ex omnibus illis eligit quod vult, & in vnoquoque ordine quem eligeret, & reperiret conuenientias sufficientes in ordine ad suam diuinam bonitatem, & has omnes conuenientias modo habet excogitatas & cognitatas, & propositas voluntati suæ, & nihilominus voluntas eligit quod vult. Et semper quod elegerit illud erit optimum in ordine ad suam bonitatem, quia de omnibus ordinibus rerum sua bonitas optime

optimè disponit ex parte ordinationis ad se licet res ordinatæ nõ sint æqualiter optimæ in se. Vnde D. Thom. *quæst. 1. de potentia art. 5. ad 11.* inquit, *quod in Deo quidquid ipse cognoscit est per modum excogitati, cum in ipso differat cognoscere actu, & habitu: Ipse enim nouit totam potentiam suam, & quidquid potest. Vnde omnium quæ potest, habet rationes quasi excogitatas.* Constat ergo quod omnium, quæ velle potest, habet Deus rationes, & conuenientias propositas suæ voluntati, quia cognitæ. Similiter proponuntur ipsi practicæ, & secundum conuenientias, quas si voluntas eligeret, optimas & iustas redderet. Et sic dicit S. Thom. *ibi ad 7.* quod *Deus potest facere aliquid, quod nunc non est iustum, quia non est, tamen si esset, faceret iustum.* Et *solut. ad 14.* quod *optimaratio, quæ Deus omnia facit, est sua bonitas, & sua sapientia, quæ manerent, etiamsi alio vel alio modo faceret.* Et *ad 15.* quod *illud quod facit est optimum per ordinem ad Dei bonitatem; & ideo quidquid aliud est ordinabile ad eius bonitatem, secundum ordinem suæ sapientia est optimum.* Constat ergo quod non solum hoc quod modò Deus facit est iustum, & optimum, sed etiam si aliud, vel alio modo faceret, esset iustum & optimum, quia faceret illud conformiter ad suam bonitatem & ordinatum ad illam, in quo consistit optima ratio ordinationis. Quare omnia ista motiua tam ad faciendum hunc præsentem ordinem rerum, quàm ad faciendum alium ordinem, æqualiter & eodem modo proponuntur nunc Deo, ac si de facto alium ordinem rerum faceret, & iustum omitteret, quia licet creaturæ in se sint inæquales, & diuersæ, tamen Deus ab illis non sumit mortua determinandi se, sed ex sua bonitatem ad quam omnia ordinantur, & æquè independens est sua bonitas ab hoc ordine rerum, & ab alio, cum nullo indigeat, nec minus saluatur si participatio eius fiat sub hoc ordine rerum, quàm sub alio. Quare cum omnia motiua sumantur ex parte bonitatis diuinæ, & hæc infinite & comprehensiuè proponuntur voluntati, non est magis propositum hoc bonum & motiuum formale, quo de facto voluit hoc vniuersum quam motiuum quo nollet, vel aliud veller.

11 Cum ergo instatur: Si omnia motiua æqualiter & comprehensiuè sunt proposita tam ad volendum quam ad nolendum, ex quo iudicio magis determinatur Deus ad hoc, quàm ad aliud?

Resp. ex mera & sola voluntate, eligente inter infinitas combinationes, & motiua æqualiter, & comprehensiuè proposita id quod vult. Vnde signanter dicit Apost. ad Ephes. 1. quod *operatur omnia secundum consilium voluntatis suæ*, quia videlicet Deus cum sit infinite comprehensiuus omnium rationum, & motiuorum ad volendum, & operandum, non indiget consilio orto ex parte rei creatæ eligendæ, nec nouo aliquo motiuo, aut noua propositione, & iudicio mentis, sed totum consiliū, & ratio motiua vertitur in voluntatem quæ omnibus motiuis comprehensiuè & propositis omnimodo seipsam determinat, & seipsa eligit & operatur. Quod si in opinione valde probabili ex duobus bonis æqualibus, & æquali modo propositis, potest voluntas eligere quod voluerit sine alio nouo motiuo, seu iudicio superaddito, non obstante quod voluntas nostra propter suam potentialitatem indiget moueri à iudicio intellectus, & ab obiecto determinari, quantò melius hoc non solum erit opinio, sed certitudo, quod voluntas diuina, quæ nullo modo est in potentia, sed purus actus, nec ab obiectis ipsis determinatur, sed obiecta determinat, propositis comprehensiuè om-

nibus motiuis & conuenientiis, tam ad volendum, quàm nolendum, & æqualiter cognitæ ex parte sua, & ad suam bonitatem non necessariis, aut æquè conuenientibus, potest sine nouo iudicio, sed eodem stante, velle, aut non velle, eligere hunc ordinem rerum, vel alium?

12 Et ex hoc patet quod motiuum diuinæ voluntatis est bonitas increata, vt est communicatiua sui creaturis. Et hæc dicitur indifferens ad volendum, vel nolendum, non indifferentia potentiali, sed indifferentia eminentiæ, & domini super omnia, quæ est indifferentia vniuersalissimæ actiuitatis, ad immutandum, & determinandum obiecta, non vt ab obiectis propositis determinetur, sicut nos. Vnde omnia motiua & conuenientias proponit in actu, & comprehensiuè attingit; & sic ad determinandum obiecta non indiget nouo iudicio aut præponderatione aliqua maiori, & consilio ex parte intellectus, sed solo consilio voluntatis suæ, quæ ob sui infinitatem, & carentiam omnis potentialitatis, potest inter æqualia motiua sine nouo iudicio determinare quod voluerit, quia non determinatur, seu mouetur ab illis, nec propriè se determinat quasi ex indeterminato, sed obiecta determinat.

Adhuc tamen obijciens contra nostram resolutionem: Volitio libera Dei nihil addit super actum necessarium: cum ergo liberè amat, nihil habet quod non haberet, si non amaret.

Dices: habet terminationem ad creaturas.

13 Insto: illa terminatio, vel est intrinseca Deo, & superaddita actui vt necessario, vel non. Si primum, est recidere in sententiam Caietano attributam de perfectione voluntaria, quæ Deo deesse potest, nempe illa terminatio intrinseca. Si secundum, inciditur in sententiam Vasquez, Aureoli, & aliorum qui liberam determinationem sumunt ab extrinseco. Nec potest ista terminatio & tendentia entitatiuè identificari cum actu necessario & non conuenire Deo necessario, & denominare quia forma hoc ipso quod est in subiecto dat effectum formalem: ergo si illa terminatio est necessarius actus Dei, & Deo, necessario illi conuenit, illūque denominat.

14 Dices: conuenit quidem Deo necessario entitatiuè & subiectiuè, non terminatiuè & obiectiuè, quia in ordine ad obiectum inuoluit causalitatem, qua causat illud, & hæc non est necessaria. Cæterum hoc est incidere in sententiam Arrubal *suprà* impugnata, quod libertas sumatur in Deo ex causalitate, qua res producit, cum potius ideo causalitas sit libera, quia ex voluntate libera est: supponit ergo causalitas libertatē in actu volitionis, non constituit. Quod si dicatur liberum actum inuoluere causalitatem vt terminum, quia terminatur ad illam, redit argumentum iam factum determinatione actus ad obiectum: idem enim est terminari ad creaturam vt ad obiectum, vel ad causalitatem. An illa terminatio, quæ liberè adest, vel abest, sit intrinseca, vel extrinseca Deo realis, vel rationis. Et primo modo inciditur in opinionē de perfectione voluntaria Dei. Secundo modo in opinionem de libertate, quod sit dominatio extrinseca, vel per aliquid rationis constituta. Denique dici potest quod contingentia illa libera, seu attingentia volendi creaturas est prædicatum intrinsecum, licet entitas illius volitionis sit necessaria, quia volitio illa, vt tangit creaturas, connotat amabilitatē obiecti, saltem in esse possibili: nā in esse actuali iam supponit liberū actum, talis autem amabilitas non necessario mouet aut terminat Dei volitionē. Nec est nouum eandem entitatem seu formam non commu-

communicare omnem effectum suum ex defectu alicuius extrinseci, sicut veritas mutatur in mente ex mutatione obiecti ad extra, relatio paternitatis ex defectu filij, bonitas moralis ex mutatione legis, licet ista non distinguantur entitative à suis fundamentis. Sed contra est; quia in istis exemplis ex defectu connotati extrinseci deficiunt relationes, & realiter mutantur in fundamentis; ex mutatione autem creaturarum nihil realiter mutatur in Deo, & sic non sunt ad propositum. Et deinde quia incidit in illud inconueniens, quod rebus omnino inuariatis, idem actus poterit connotare, & non connotare obiectum, velle & non velle. Nam actus ex parte Dei est entitas inuariabilis, creaturæ vt possibiles, & possibiles amari omnino necessitatem habent: ergo vel semper connotabit actus creaturas, vel nunquam, & sic non liberè; vel connotabit, & non connotabit rebus eodem modo inuariatis.

15 Hanc eandem obiectionem, quæ in vi, & substantia non est alia, admirationibus alij amplificat. Quomodo potest forma, quæ est entitas necessaria, & necessariò conueniens subiecto in actu, dare effectum liberum, & contingentem aut suspendere, vt det aliquem effectum & non denominet volentem v. g. alium mundum, aut nolentem istum, si habet actu formam illius volitionis & istius, nolitionis? Quod si vt præbeat istum effectum dependet à creatura, vt à connotato, quomodo est vera ista causalis: Quia Deus liberè vult hominem esse, homo est: nam antequam homo sit, debet dari libera volitio in ratione liberi: est enim causa hominis: ergo ante connotationem hominis debet præbere effectum formalem liberi in ipso Deo; ante connotationem autem illam, totum quod est in illo actu necessarium est, & necessariò est in Deo: ergo non est liberum, de ratione enim liberi, vt liberi, est quod possit non esse. Denique quia decreta libera diuersa sunt in Deo ratione diuersæ connotationis, & variationis ex parte obiecti: nam tota variatio debet accidere vel ex parte obiecti, vel ex parte actus. Ex parte actus datur necessitas, & inuariatio omnimoda: ergo tota variatio debet esse ex parte obiecti: ergo libera decreta non sunt libera, neque varia ex sola intrinseca realitate & eminentia quam habent, alioquin rebus eodem modo se habentibus esset volens & non volens realiter; & posset deficere aliquid intrinsecum Deo, scilicet illud quo nunc liberè est volens hoc.

16 Resp. In hoc argumento, cuiusque instantiis resumitur quidquid in oppositum ab authoribus contrariis obieitur. Quare ad primum syllogismum dicitur, quod actus liber in Deo nihil addit super necessarium entitative, & ex parte subiecti; quasi superadditum, & passiuè sibi adueniens, addit tamen terminatiue circa obiectum. Itaque ipsemet actus, & entitas eius, vt agens obiectum, & constituens ipsum in ratione obiecti, contingens, & liber est, Deumque denominat liberè volentem, id est tangentem obiectum, & causantem illud, non solum in esse producti, & existentis, sed in esse voliti, seu boni amabilis liberè, licet ipsemet actus, vt entitas quædam ex parte subiecti, seu ex parte Dei sit necessaria, vt potens diuinum.

17 Ad replicam quid sit ista terminatio, an realis, & intrinseca Deo, an extrinseca? Resp. esse intrinsecam entitative, cum vi & potestate super extrinsecam: hæc enim terminatio non est aliud quam ipsemet actus Dei realis, prout tangit ob-

iectum, & imminuat illud, seu communicat illi rationem obiecti, & rationem boni, non solum in ratione producti, sed etiam in ratione voliti, quod à nobis per respectum rationis erga obiecta, explicatur. Reuera tamen est ipsa summa & independens actualitas Dei, quia sibi subiicit hoc obiectum, illudque determinat vt obiectum suum sit. Et sicut ipsa actio productiua ex parte Dei est actualitas eius, & hæc ipsa tangit realiter & imminuat creaturas, producendo, sed non realiter respicit illas, nec constituitur per respectum rationis, sed potius quia summè independens est ab illis, & sic facit illas dependere à se: ita ipsa volitio Dei se habet ad obiecta libera, quæ per summam independentiam constituit in esse voliti, seu obiecti.

Et cum instatur, quod illa terminatio necessariò conueniet Deo, si non distinguitur ab actu, necessario.

Resp. quod necessariò conueniet Deo, vt actus est, & entitas Dei, sed liberè, vt tangit & determinat creaturas, & constituit in ratione obiecti participati à se: non enim illa terminatio est determinans Deum passiuè, sed determinans ipsas creaturas actiuè, vt obiectum volitionis sint. Et licet illa entitas & ille actus formaliter constituat Deum volentem liberè, tamen quia non constituit tanquam actus specificatus ab obiecto, & præsupponens ipsum, sed vt actus à quo participatur & derivatur ipsa ratio obiecti, stat bene quod secundum se, & vt entitas, seu actualitas subiecti est, sit necessarius, & vt est principium participationis obiecti, sit liber, & Deus denominatur necessariò habens entitatem, seu actualitatem liberæ volitionis, quia hoc pertinet præcisè ad perfectionem ipsius Dei, non tamen denominatur necessariò volens creaturam, quia hoc etiam pertinet ad communicationem suæ bonitatis in creaturam, quam constituit obiectum sui, & hoc est liberum, & contingens, prout tangit creaturam. Itaque accidit hic magna hallucinatio ex parte nostræ imaginationis, quam oportet purgare cum de libertate diuinæ volitionis tractamus, & illam accipere inuerso modo ad libertatem creatam, quia nec actus liber Dei specificatur ab obiecto, sicut in nobis, nec est contingens, aut deficere potest ex parte subiecti, in quo est, quia est purus actus, nec egreditur à potentia, & tamen est summè liber in ordine ad obiecta creata, quia summè independens ab illis, & summè faciens illa dependere à se. Vnde libertas in Deo necessariò exigit actum necessarium & necessariò existentem in subiecto, eo quod non est actus procedens à potentia subiecti, nec dependens & specificatus ab obiecto, sed constituens & communicans obiecto rationem obiecti liberi, eo quod obiectum creatum est. Si ergo non est actus procedens à potentia, sed est purus actus conueniens Deo, semper ei conueniet; & similiter si non specificatur aut constituitur, vel dependet ab obiecto libero, sed obiectum à se; planè quantumcumque obiectum ipsum deficiat, vel non deficiat, actus liber, idem perseverabit. Et sic de ratione talis actus liberi non est quod possit deficere in ratione actus. Sed tota libertas consistit in subiiciendo sibi obiectum & constituendo ac derivando in illud rationem obiecti, vel non derivando, quod quidem per actum realem & intrinsecum Deus facit; sed inde non sequitur, quod si Deus nolit, desinat in Deo aliquid intrinsecum, sed quod illud intrinsecum quod est in Deo, desinit immutare & constituere aliquid extra se, quod

est obiectum eius. Et hæc terminatio, & immutatio ut tangit obiectum, licet non constituat actum liberum in ratione actus liberi, quia summè independens & summè liberum est in se, non per dependentiam ab obiecto, sed obiecti à se; tamen quia constituit & facit ipsum obiectum in esse obiecti voliti, & non solum in ratione producti & existentis, ut dixit Arrubal, ideo non denominatur Deus volens determinatè, aut nolens ante istam terminationem, & constitutionem obiecti, quam nos per respectum rationis explicamus. Itaque illa denominatio, seu respectus non pertinet ad constitutionem actus, sed requiritur ad constitutionem obiecti, quatenus sine illa terminatione, quam nos per respectum rationis explicamus, non datur obiectum, licet detur actus; sine obiecto autem actus non denominant. Quæ doctrina valde notanda est, quia in hoc solo tota explicatio huius consistit. Et sicut Deus non denominatur creans, aut creator antequam effectus temporaliter sit, licet actio in Deo sit æterna, sic antequam obiectum æternaliter sit obiectum amatum, actus liber Dei non denominatur determinatè volens; libertas tamen illius actus non ex hoc obiecto dependet, nec per respectum rationis ad illud constituitur, sed ex summa independentia & potestate quam habet circa obiectum ponendum, vel non ponendum in esse voliti, aut noliti, dicitur realiter liber, libertate summa, & diuina, & independenti. Quare non inciditur in sententiam Arrubal, quia non constituimus libertatem in Deo per aliquid extra immanentiam actus, & recurrendo ad productionem rei ad extra, sed stando intra ipsam immanentiam, per hoc quod actus ille, etiam ut immanens, constituit obiectum liberum in esse volibilis, & non solum in esse producti, nec ab eo specificatur aut dependet.

19 Ad ultimam replicam de contingentia, an sit prædicatum intrinsecum actus liberi, licet entitas sit necessaria, quod variis exemplis declarabatur. Resp. nullum exemplum creatum esse posse adæquatum huic mysterio, quia omnes illæ formæ creatæ relatiuæ, siue ad aliud se habentes, habent entitatem suam ita dependentem à termino extrinseco, ut eo variato necesse sit entitatem formæ variari, & sic non potest esse in se magis indeficiens quàm obiectum. Sola diuina volitio est actus omnino independens ab obiecto, sed faciens illud dependere, & ideo est summè libera erga obiecta, & tamen in se est entitas summè necessaria, quia immutat, & constituit illa obiecta ut vult (& hoc est esse maximè liberam circa obiecta & realiter liberam, quia realiter obiecta facit à se dependere) & tamen in se non mutatur. Et ad inconueniens quod rebus omnino inuariatis poterit velle vel nolle, &c. Iam *suprà* diximus non manere res omnino inuariatas, tam passiuè quàm actiuè, sed actum diuinum manere inuariatum in se passiuè, variare verò, seu immutare obiecta actiuè. Ipsa autem obiecta, licet in esse, & statu possibili, sint inuariata, & necessaria, tamen per illam volitionem transeunt de statu possibili ad statum obiecti amati, & futuri, & participant rationem boni ut volibilis, & sic non manent inuariata, licet id habeant ex actu ipso diuino libero, & absolutissimo in se.

Ad ultimam obiectionem, quæ constat ex pluribus interrogationibus, Resp.

20 Ad 1. posse formam necessariam ex parte subiecti, sed immutativam & constitutivam ipsius obiecti liberi, necessariò conuenire subiecto in ratione actus, & non necessariò in ratione attingentiæ

obiecti, & denominationis inde resultantis, quia Deus denominatur volens liberè tale obiectum potius, quàm nolle. Et hoc ideo, quia forma volendi in Deo liberè non se habet, sicut in nobis, in quibus actus ipse, qui est forma volendi solum formaliter præbet hunc effectum voluntati, eamque liberè volentem reddit determinatè, circa hoc obiectum, quia ab obiecto ipso specificatur & constituitur, non verò obiectum sibi constituit, unde sic specificatus & constitutus actus solum formaliter reddit voluntatem volentem. Actus autem diuinus licet formaliter compararetur ad subiectum, & sic necessariò illi insit, tamen ad obiectum comparatur quasi actiuè, quia illi communicat ut obiectum suum sit, & sic reddit voluntatem diuinam formaliter immutativam, & constitutivam obiecti actiuè, quia transfert illud de statu possibili ad statum futuri, sicut operatio formaliter reddit subiectum agens actiuè, & operans effectum. Et in hoc modo se habendi actiuè ad obiectum consistit libertas & contingentia respectu obiecti, & denominatio, quæ inde resultat in Deo, quæ potest adesse & abesse. Ad illud quod dicitur quomodo sit vera ista causalis, *Quia Deus liberè vult hominem esse, homo est*; si ut sit actus liber inuoluit in connotato creaturam? Resp. causalem optimam esse, quia illa connotatio creaturæ, quæ ibi inuoluitur est connotatio creaturæ ut causatæ & participatæ à libero actu Dei, etiam in ratione obiecti voluntatis: Unde ante ipsam connotationem est tota ratio, & constitutio intrinseca actus liberi in Deo, ut liberè constituat sibi obiectum & constituendo tendat in illud, sed non est tota conditio requisita ut obiectum constituatur & habeatur terminus, & sic denominetur Deus volens determinatè hoc obiectum, quia non potest denominari volens hoc obiectum nisi posito obiecto, sicut licet actio Dei intelligatur ante effectum, & æterna sit ante effectum temporalem, tamen non denominat agens agere ante effectum secutum, quia hæc denominatio agendi est dependens à positione effectus, non ut à ratione formali, sed ut à termino effecto. Sic in diuina volitione procedimus, quæ comparatur ad obiectum suum ut causatum & derivatum à se in esse obiecti. Et de ratione liberi est ut deficere possit, in eo scilicet in quo exercet libertatem. Et ita in libero diuino deficere potest quantum ad attingentiam obiecti, quod constituit, & sibi subiicit, non in eo quod sit aliquid reale in subiecto, vel non sit, quia hoc totum necessarium est in Deo, ipsum verò tangere, & constituere obiectum liberè facit, & secundum habitudinem non necessariam, nec à tali obiecto dependet in sui constitutione, etiam ut liber actus est, sed solum habet illud pro effectum à se secuto.

Ad id quod ultimò dicitur de diuersitate decretorum Dei; Resp. decreta in Deo non esse diuersa ex parte actus, & entitatis diuinæ, sed ex parte connotationis diuersorum obiectorum, sine quibus non fit in Deo denominatio volendi, aut nolendi determinatè, licet non fiat ab obiecto, vel respectu ad illud, tanquam à ratione formali; sicut in Deo dantur diuersæ ideæ, non ex parte conceptus diuini, sed ex parte terminationis ad diuersas creaturas secundum quod diuersimodè formantur. Et quando dicitur quod non potest dari duplex decretum volendi, & nolendi, nisi ex duplici & diuersa connotatione obiecti; Resp. quod velle, & nolle entitatiuè, & ex parte actus datur in Deo ante omnem connotationem obiecti

obiecti, non ut duplex, & diuersum, sed ut vnum, quia actus ille non dependet, nec specificatur ab obiecto: sed velle determinatè, vel nolle determinatè, hoc iam non solum inuoluit actum ut forma est subiecti, & in genere causæ formalis actuat, sed inuoluit attingentiam, & constitutionem obiecti quod veluti actiue constituit, & sic non denominat Deum volentem hoc determinatè, nisi connotando, aut tangendo obiectum, non quia illa connotatio requiratur ut ratio formalis ipsius actus liberi, sed ut conditio ex parte termini ut constitutur in ratione obiecti futuri, & extra possibilitatem, in quo solo statu liberè amari potest; & hoc posito, actus ipse formaliter liberè denominat erga obiectum, quia illud liberè in ratione obiecti tangit, & constituit.

ARTICVLVS VI.

Utrum voluntas diuina feratur aliquo modo in creaturas posibles sub illo statu?

Sensus difficultatis apertus est, quod loquimur de creaturis possibiliibus in seipsis, non ut sunt in ipso Deo, qui est exemplar creaturarum, non creatura ipsa possibilis, hæc enim est obiectum potentiae Dei. Et loquimur de illis manentibus in statu puræ possibilitatis: Nam si ab illo extrahantur ad statum futurationis, nulli est dubium quod possint amari, immò hic est effectus amoris diuini, dare, non supponere esse; atque adeò extrahit à possibilitate, & ad esse, seu futurationem transmittit. Sed tamen creaturæ istæ sub illo statu possibilitatis, qui est status excludens, & negans existentiam, possunt considerari, vel secundum quidditatem suam, quæ est capax illius status, & subiicitur illi, sicut etiam subiicitur statui existentiae, quando de facto producit, vel secundum ipsum statum qui additur illi quidditati, illamque constituit, vel sub existentia, si res sit producta, vel sub priuatione existentiae, si nondum producta sit, sed solum possibilis. Itaque possibilitas, vel sumitur radicaliter pro capacitate, ut res producat, vel formaliter pro statu, id est priuatione existentiae in qualibet temporis differentia. Et potest inquiri, an ipsa res, quæ tali statui subiicitur secundum se, & ratione sui amari possit à Deo, licet status ipse non ametur, quatenus priuatio est existentiae, sed res ipsa quatenus capax existendi. Et hæc est prima difficultas in hoc puncto, an detur amor, seu voluntatis diuinæ actus circa talia obiecta non extrahendo ipsa à statu possibilitatis, sed sub illo manendo, licet non ratione status, sed ratione quidditatis, seu capacitatis ad existendum ametur. Deinde est secunda difficultas de qualitate illius amoris, dato quod aliquis amor circa illa detur in Deo, an sit simplex, & nuda complacentia, an aliquid efficacitatis habeat, vel solum inefficax sit. Et similiter, an liberè in Deo detur, an necessariò: in hoc enim autores qui sentiunt creaturas posibles amari à Deo valde inter se dissentiunt. Hinc alia emergit appendix quaestio, an voluntas Dei circa aliqua obiecta suspensa maneat?

Quid tenendum?

2 Circa primam difficultatem est antiqua concertatio inter scholam D. Thom. & Scoti: Nam

Scotus in 3. dist. 34. q. unica sentit Deum diligere creaturas posibles inefficaci quodam amore, seu simplici quadam complacentia, quatenus scilicet ei placet illa bonitas possibilis, sed non intendit ad effectum, & existentiam deducere; hæc enim simplex complacentia vocatur. Eadem sententia tribuitur Caiet. in fr. q. 34. art. 3. Sed Caiet. ibi, non loquitur specialiter de creaturis possibiliibus ponit enim argumentum, quia si Verbum procederet ex comprehensione omnis intelligibilis, etiam Spiritus sanctus spiraretur ut amor essentiae diuinæ, & omnis obiecti amabilis, & sic vel Deus necessariò amaret creaturas, vel Spiritus sanctus non necessariò produceretur. Respondet autem Caiet. Quod vniformiter loquendo de creatura intellecta in Deo, & similiter amata in Deo, par ratio est de Verbo, & Spiritu sancto, nec aliquod sequitur inconueniens. Posset tamen simpliciter negari sequela, & paritas rationis, quia amor respicit res amabiles in seipsis, Verbum autem res in intellectu. Vbi nihil speciale exprimit Caiet. de creaturis possibiliibus, sed generaliter tradit doctrinam de omnibus quæ amantur à Deo. Et parificat omne amabile cum omni intelligibili, si utrumque sumatur intra Deum: sic enim non amatur creatura in se immediatè, sed ut contenta in Deo, & ut est ipse Deus, seu ipsa creatrix essentia. Si verò amentur creaturæ in seipsis, dicit non esse eandem rationem ac de omni intelligibili, & sic potius videtur asserere quod Deus non amet omne amabile; ita ut ex illorum amore procedat Spiritus sanctus. Hanc tamen sententiam Scoti tenet P. Vasq. hic disp. 79. cap. 2. & supra q. 5. art. 3. Ruiz disp. 6. sect. 2. Alarcon tract. 3. de volunt. disp. 3. c. 3. Arrubal disp. 53. c. 3. Erice tract. 2. disp. 18. c. 1. & alij.

Alia sententia tenet voluntatem Dei non habere actum amoris circa creaturas posibles in seipsis. Et dico actum amoris seu volitionis: nam actum nolitionis non est dubium habere nolo eas existere. Sed actus iste propriè non versatur circa possibilitatem ipsam, vel quidditatem creaturarum, sed circa existentiam, quam Deus noluit illis communicare: voluit enim eas non esse, possibilitatem autem, & quidditatem rerum non possumus dicere quod Deus noluit, quia stultum esset nolle res illas esse posibles: esset enim idem ac velle quod essent impossibiles, quod est fatuum & indignum Deo. Quare nolitio circa possibilitatem aut odium, tam stulta esset quam volitio impossibilitatis: æquivalent enim nolitio possibilitatis, & volitio impossibilitatis. Et sic solum est nolitio circa ipsam existentiam possibilem, non circa earum possibilitatem aut quidditatem. Loquendo autem de volitione, seu amore negat, hæc sententia Deo tribuendum esse amorem seu volitionem aliquam circa creaturas posibles in seipsis, aut circa quidditatem earum, non solum efficacem, id est intendentem ponere res illas in esse: id enim manifestè constat, cum Deus nolit eas esse, sed neque inefficacem, seu simplicis complacentiae, de quo solum potest esse difficultas. Hanc sententiam tenet Ferrar. 1. cont. gent. c. 81. & 4. contra gent. c. 13. Bañes hac 1. p. q. 34. art. 3. Zumel ibidem disp. 1. ad 3. Nauarrete 2. tomo controu. 3. Gonzalez hic disp. 52. sect. 2. insinuat Suarez disp. 30. sect. 16. n. 41. & lib. 3. de attributis positinis, c. 6. n. 10. Valentia hic disp. 2. q. 8. puncto 2. & alij. Et hæc est sententia D. Thom. ut mox videbimus.

Hæc 2. sententia à nobis tenenda est. Et sic 4. dicimus

dicimus, Deum nullo modo amare creaturas possibiles, nec amore libero, nec necessario, nec simplici complacentia, nec amore efficaci. Hæc sententia deducenda potius est ex rationibus D. Thom. quam ex specialibus eius verbis. Nam licet sæpius affirmet Deum non velle omnia quæ potest facere, sed solum ea quæ secundum aliquod tempus sunt, ut patet in 1. contra Gentil. cap. 8. ubi inquit quod *relatio voluntatis diuina est ad rem existentem secundum quod est in propria natura secundum aliquod tempus, & non solum secundum quod est in Deo intelligente*: & sic cum possibilia non sint secundum aliquod tempus, non est relatio voluntatis diuinæ ad illa. Et c. 83. in fine. *Non omnia vult* (inquit) *qua ad bonitatem ipsius ordinem habere possunt, omnia autem scit, qua ad essentiam eius per quam intelligit quemcumque ordinem habere possunt*: Sentit ergo quod circa possibilia non habet volitionem, licet habeat de illis cognitionem. Et similiter aliis locis insinuat, Deum non amare, nec velle aliqua, nisi in ordine ad effectiorem, seu existentiam tanquam effectum, & motum à se, ut q. 23. de verit. art. 4. ad 13. & in 1. dist. 45. q. 1. art. 2. ad 2. Et idem insinuat in hac 1. p. q. 20. art. 2. Tamen ista loca possunt explicari de voluntate Dei efficaci, qua vult aliqua ponere in esse; sic enim possibilia Deus non amat, nec ex necessitate vult aliquid extra se, dando ei esse, quod solum intendit ibi S. Thom. excludere. Oportet ergo aliunde colligere mentem S. Thom. ut videamus quod Deus non diligit possibilia, non solum amore efficaci, de quo non est controuersia, sed nec etiam simplici complacentia; Et hæc exinde poterit aperte constare, quia sanctus Doctor denegat rationem boni & appetibilis ipsis rebus, nisi per ordinem ad esse, & ut subsunt alicui esse: ergo quæ penitus abstrahunt ab esse, quandiu sub illo statu considerantur, carent ratione boni: sed ad omnem volitionem etiam simplici complacentiæ requiritur ratio boni ex parte obiecti, aliàs quomodo complacere potest aliquid, nisi ut appetibile, & ut bonum: ergo sub statu abstrahente ab esse, nullam complacentiam res terminare possunt. Talis autem est status puræ possibilitatis: ergo sub illo non possunt terminare etiam simplicem complacentiam Dei. Totus discursus est legitimus. Et solum restat ostendere illud primum antecedens, quod sanctus Doctor deneget rationem boni, seu appetibilis alicui, nisi per ordinem ad esse. Hoc autem constat ex traditis supra. q. 5. art. 2. ad 3. ubi aperte docet bonum conuenire enti secundum ordinem ad esse. Nam, inquit, quod illud quod per se est appetibile, est esse, non esse autem solum per accidens, inquantum scilicet quoddam esse appetitur, quo homo non sustinet priuari. Et solut. ad 4. dicit, quod *vita, scientia, & alia huiusmodi sic appetuntur, ut sunt in actu, unde in omnibus appetitur quoddam esse, & sic nihil est appetibile, nisi ens, & per consequens nihil est bonum, nisi ens*. Vbi S. Thom. requirit ad rationem boni, & appetibilis ens, ut dicitur ab esse, seu secundum ordinem ad esse. Vnde in statu abstrahente ab omni esse, res non remanet appetibilis. Præterea art. 3. seq. solut. ad 2. dicit S. Thom. quod materia prima sicut non est ens, nisi in potentia, ita nec bonum, nisi in potentia: sed quidditates rerum in statu puræ possibilitatis sunt solum entia in potentia, multo magis quam materia prima, quia ista est in potentia subiectiua ad esse, & ad formam, id est, in potentia receptiua illius; res autem possibiles solum sunt in potentia obiectiua ad esse,

quæ est potentialitas magis remota, & minus appropinquans ad esse: ergo pro illo statu solum sunt bona in potentia: ergo non appetuntur actu. Et de mathematicis, ut subsunt abstractioni mathematicæ, idem docet ibi ad 4. quod scilicet bona non sint, quia non mouent, licet quidditates quantitatis habeant: Ergo similiter quidditates rerum sub statu illo, in quo omne esse excludunt, bona non sunt actu, sed potentia tantum; & sic actu non mouent, neque placent voluntati. Quod amplius explicat q. 21. de verit. art. 2. ad 4. ubi negat etiam mathematicis rationem boni, Et reddit rationem, quia ut supra, inquit, dictum est (scilicet art. 1. præcedenti) *bonum non consequitur rationem speciei, nisi secundum esse quod habet in re aliqua; & ideo ratio boni non competit lineæ vel numero secundum hoc quod cadunt in consideratione mathematica*. Et art. præced. dixerat quod verum sequitur rationem speciei, bonum autem sequitur ipsum esse, quod habet in rerum natura, & non solum rationem speciei. Nomine autem speciei intelligitur quidditas sub consideratione quidditatis præcisæ, quo nomine etiam indiuiduatio ipsa considerari potest, quia etiam suam habet quidditatem. Bonum autem sequitur ordinem ad esse, ut distinguitur à quidditate, id est, ipsum exercitium existentiae; seu ordinem ad illud: ergo in illo statu in quo non inuenitur aliquod exercitium existentiae, neque ordo ad illud, sed denegatio totalis existendi, prout sic, non terminant actum volitionis alicuius, etiam simplicis.

Fundamentum huius sententiæ sumitur ex duplici principio. Primo à priori, ex defectu bonitatis in obiecto. Secundo ex impossibilitate amandi ex parte Dei, quia neque est liber amor ille, nec necessarius. Primum explicatur, quia quidditates rerum sub illo statu puræ possibilitatis nullam rationem bonitatis habent, quia possint actu simplicem complacentiam terminare in voluntate diuina; constat autem quod omnis volitio, etiam simplici complacentiæ, circa aliquam rationem boni versari debet, nam quod non est bonum, placere non potest, sed obiectum displicentiæ est; illud enim placet quod inclinationem trahit & mouet ad se, si enim retrahit, displicet; illud autem trahit inclinationem quod ei proponitur ut conueniens: si enim conueniens non sit, resistit inclinatio: nec enim aptatur inclinationi, cum non conueniat illi. Si autem inclinationi conueniens est, appetibile est ei, & consequenter bonum, quia bonum, & appetibile idem sunt. Tota ergo difficultas vertitur in hoc, an quidditates rerum sub illo statu puræ possibilitatis rationem boni habeant, ut placeant.

Quod ergo sub illo statu res nullo modo bonitatem habeant, quia placere possint voluntati diuinæ, probatur; Quia in obiecto quod placet nihil aliud considerari potest quod voluntati obiciatur, nisi vel existentia, seu ordo ad existentiam, vel connexio necessaria & intrinseca prædicatorum, quæ sola remanet remota omni existentia, & ordine ad existentiam. Quantum attinet ad existentiam vel ordinem ad illam, nullo modo bonitas manet in statu puræ possibilitatis, ita ut ex hac parte possit placere Deo, sed potius displicet & actu non vult existentiam aliquam rei possibili, ita quod quantum ad hoc se gerit Deus erga res purè possibiles, sicut circa res annihilatas: sicut enim si modo Deus annihilaret rem existentem, nullo modo placeret illi talis existentia quam annihilabat, ita existentia illarum rerum,

rerum, quas Deus nunquam voluit producere, displicuit ei, quia in nihilo res illæ relictæ sunt, perinde ac si essent annihilatæ.

7 Quod verò attinet ad connexionem intrinsecam prædicatorum, omnia existentia remota, & non communicata, illa totaliter est intra causas, & in se omnino est nihil, & possibilitas illa obiectiva solum est orta ex potestate causæ ad producendam rem illam. Solum ergo potest complacere res illa in suis causis, & in potentia, quia solum est ens intra causas, & in potetia. Et sic Deus deligit causam talium rerum, quæ est ipse Deus; ipsum autem purum nihil amare non potest, nec sibi complacere, quia nihil est in se, & extra causas. Et licet dicatur, quod amatur, seu complacet esse essentiæ, non existentia; Contra est, quia esse essentiæ non est esse perfectum aut perficiens, quod solum respicere potest appetitus seu complacentia, sed esse essentiæ est habitudo connexionis inter prædicata constitutiva cum capacitate ad existendum per potentiam agentis. Non est esse perfectum aut perficiens, quia in ipsa habitudine connexionis solum importatur debitum, & ordo unius ad alterum; non autem quod unum insit alteri, aut in illo habeatur, & consequenter non est ibi perfectio, sed debitum perfectionis, nec integritas, sed connexio, & debitum integritatis. Et hæc est ratio, quare in connexione prædicatorum inuenitur veritas, non verò bonitas, quia veritas est adæquatio, ubi autem interuenit debitum, inuenitur ratio iusti & adæquati. Vnde sicut debitum & connexio unius prædicati ad aliud sufficit ad rationem iusti, seu adæquati, sufficit etiam ad rationem veri, eo modo scilicet quo verum inuenitur in obiecto. Cæterum bonitas, seu perfectio non resultat ex solo debito, quia debitum stat cum carentia seu negatione habendi id quod debetur; ubi autem est negatio, seu carentia est defectus & malum seu non bonum: Si ergo in essentiis rerum remoto omni esse existentia, & ordine ad illud, non inuenitur nisi connexio prædicatorum essentialium, quod nihil aliud est quam debitum, quia videlicet debentur ista prædicata illi rei, v. g. homini debetur esse animal rationale, id est, est necessitas, & connexio, seu debitum intrinsecum homini cum rationali, & animali; consequenter ibi non apparet adhuc perfectio, sed debitum perfectionis, seu necessitas, & connexio ad illud prædicatum, quod si in re ponitur, erit perfectio eius; quandiu autem non ponitur, sed solum debetur; seu connectitur, perfectio non est, si autem ponitur, hoc ipso habet esse. Colligitur ergo sic argumentum: Vbi solum inuenitur debitum, sed nondum ponitur id quod debetur, inuenitur debitum cum carentia, seu negatione eius quod debetur: ergo inuenitur debitum cum defectu: ergo inuenitur adhuc ut malum, seu ut non bonum, malum quidem, si sit carentia cum priuatione in subiecto apto, non bonum autem, si sit carentia cum negatione pura: eodem enim modo se habet malum ad priuationem, quo non bonum ad negationem, quod enim est malum ubi est priuatio, est non bonum, ubi est negatio: sed in quidditatibus rerum secundum se, & omni esse secluso, & in statu puræ possibilitatis, inuenitur sola, & nuda connexio prædicatorum necessaria, sine vlla existentia, aut conuenientia ad subiectum (quia non est) sed cum sola ratione debiti, & habitudinis debiti unius ad alterum: ergo ibi nondum inuenitur perfectio, nec bonum, sed potius non bonum, seu carentia eius

quod debetur; non potest autem simul inueniri bonum, & non bonum, sicut nec bonum, & malum: ergo pro illo statu res non sunt bonæ nec circa illa est voluntas nisi tantum in debito & in potentia.

Et hinc constat, rectè nos dixisse *romo preced.* 8 *disp. 6. art. 2. & 3.* naturas rerum semoto ordine ad existentiam non habere bonitatem, nisi radicaliter & potentialiter. Reuera enim ille status in quo considerantur quidditates rerum secundum se, & in statu puræ possibilitatis, non consideratur nisi ut connexio prædicatorum, & ratio debiti, id est, necessitas, qua aliqua prædicata connectuntur, & conueniunt: status autem huiusmodi connexionis & debiti est status radicalitatis, non quod ibi consideretur dari in re aliquod subiectum, cui debeatur aliquod prædicatum, cum nihil sit extra Deum in illo statu, sed quia ratio connexionis, & debiti est ratio radicaliter, & potentialiter se habendi, radici enim debetur quod ex illa germinat aut ei necitur.

Dices: Possibilitas, quæ in illo statu inuoluitur, 9 est possibilitas ad esse: ergo inuenitur ibi ordo ad esse: cur ergo non sufficiet ut ametur sub illo statu puræ possibilitatis?

Resp. possibilitatem illam ad esse, dupliciter sumi. Primò, actiue, ut tenet se ex parte potentia agentis, & potentis producere res in esse. Secundo passiuè, ut tenet se ex parte obiecti producibilis, vel negatiue, ut est non repugnantia ad existendum; & hæc non inuenitur quasi subiectiue extra Deum, id est, in aliquo subiecto posita, & habita ab aliquo qua extra Deum nihil est omnino de creaturis possibilibus. Vnde quidquid de illis est, non est nisi ipsa potentia actiua Dei, quæ potest illas producere; de ipsis autem creaturis non est nisi obiectiue ipsa non repugnantia, ut producantur, & ipsa denominatio extrinseca possibilitatis ex potentia deriuata: sic ergo totus ille ordo ad esse, ut tenet se ex parte potentia Dei, seu possibilitatis actiua, amatur in ipsa potentia Dei: Illa autem possibilitas passiuæ, ut præcisè sumitur ex parte obiecti, sub illo statu possibilitatis, non amatur quia non est in statu amabilitatis, ut in *solutione argumentorum* amplius dicitur.

Et hinc tandem confirmatur & explicatur hæc 10 ratio à nobis facta, quia non solum intentio efficax Dei respicit esse rerum, quod assequi, vel dare intendit, sed etiam simplex Dei complacentia respicere debet non puram & nudam quidditatem sub illo statu meræ possibilitatis, sed ipsam quidditatem sub aliquo esse, vel ordine ad esse, quod possit intendi. Ratio est, quia Deus non potest moueri ad complacendum circa obiectum omnino fictum, & apparenter tantum bonum: hoc enim supponeret in illo imperfectionem, quia scilicet aut fingeret aliquid intellectus, aut voluntas bono ficto & apparenti decepta delectaretur, sed Deus solum fertur in res ut sunt, & sicut eis debetur: Ergo in tali statu debet de obiecto aliquo complacere, in quo etiam res illa possit efficaci intentione attingi; in illo autem statu in quo non potest efficaciter intendi, nec poterit simplici complacentia amari, quia Deus solum verum & reale bonum amare potest, non fictum, & apparens. Quod autem intendi non potest, & sub statu quo intendi non potest, nec amari potest ut verum bonum, quia verè esse non potest sub illo statu: ergo sub illo intendi non potest, & illud dicitur apparens bonum, quod esse non potest: ergo sub eo statu sub quo esse non potest, nec etiam ut verum bonum amari po-

test

test, sed vt apparens. Constat autem quòd quidditas nuda secundum se, vel sub statu puræ possibilitatis non potest existere, nisi exuendo illum statum, & relinquendo illum tanquam terminum à quo, & induendo alium statum qui est futurationis, vel esse: Ergo si ametur quidditas sub illo statu puræ possibilitatis, retinendo illum statum, & non exuendo, & relinquendo illum, sed vt terminum ad quem habendo, amatur sub statu sub quo esse, & existere non potest. Illud autem dicitur amari vt apparens bonum, quod amatur quatenus existere non potest, verum autem bonum est illud, quod existere potest, & sub eo statu & dispositione amatur sub qua esse potest. Ergo vt Deus amet creaturas possibles, non vt bonum apparens, sed verum, oportet quòd eas amet remouendo statum illum, quo stante, non possunt esse, atque adeo extra statum nudæ possibilitatis eas respicere debet, & vt talem statum relinquentes.

Dices: sub illo statu sunt possibles: ergo sub illo statu complacere possunt: nec enim amantur vt impossibiles, quia est status possibilitatis, licet sub illo, in sensu composito, stare non possint, sed transeundo ad alium.

- 11 Sed contra, quia licet sub illo statu sint possibles, non tamen ille status si manet, est possibilis, sed est negatio existentiae; nec enim possunt existere manente illo statu, sed relinquendo illum & induendo alium: ergo si amantur non exuendo illum statum, sed manendo, non amantur sub statu, quo possunt esse, manendo in eo statu: ergo neque possunt complacere manente eo statu, & posito ex parte termini qui amatur, nisi apparenter, aut fide ametur, quod in Deum cadere non potest, qui solum amat res vt sunt in se: sicut res producibiles sunt ex nihilo, ita quod *ly ex nihilo* teneat se ex parte termini à quo, qui relinquitur, si enim ex parte termini ad quem se teneret; *ly nihil*, sic res sub nihilo non sunt producibiles, nec verè appetibiles. Et cum dicitur quòd illæ res non sunt in statu impossibilitatis; concedo, quia impossibilitas est repugnantia ad transeundum de statu puræ possibilitatis ad futurationem: sed tamen ille status puræ possibilitatis in tantum reddit rem possibilem, in quantum reddit capacem ad relinquendum statum illum, & transeundum ad futurationem: si autem ille status maneat, & sub termino ad quem se teneat, impossibilitatur ad esse, & ad amari.

Nec necessariò, nec liberè res possibles amantur.

- 12 Secunda ratio denegandi Deo etiam simplicem complacentiam de rebus possibilibus sumitur ex eo quod nec liberè, nec necessariò potest diuina voluntas ferri in illas. Liberè quidem non fertur, quia illa bonitas, sub qua amatur (si amatur) est bonitas necessaria, & nec per ipsum Deum variabilis, actus etiam ex parte Dei non est variabilis, & sine variabilitate & contingentia, vel ex parte actus, vel ex parte obiecti non datur libertas. Et conf. quia si necessariò non placet: ergo potest displicere etiam in ratione possibilis, vel ergo displicet sub ratione boni, sub quo modo placet, vel sub ratione mali, seu non boni. Hoc secundum stare non potest, quia creaturæ vt possibles non explicant nisi quidditatiua prædicata, & sibi necessariò connexa, nullum autem malum est necessariò connexum quidditati: malum enim est

privatio, & defectus alicuius debiti, si autem iste defectus est necessariò connexus, & quidditatiuè, opposita forma non est sibi debita: ergo neque defectus eius est privatio, & malum illi quidditati. Non ergo in ratione quidditatis est sibi connexum malum necessario sub quo displiceat, aliàs semper displiceret, quia semper, id est necessariò, adest sibi illud malum. Primum autem stare non potest, quia bonum sub ratione boni displicere non potest: est enim peruersa voluntas vt bonum displicet.

13 Quòd verò necessariò non feratur voluntas diuina in illas quidditates, probatur, quia illud bonum quidditatum possibile est finitum, & limitatum, nec maius aut excellentius, quàm ipsæ res existentes, quæ reducuntur ad esse extra causas: ergo non possunt illæ quidditates sub illo statu necessitare voluntatem diuinam vt amentur, cum nec ipsa existentia & positio extra causas, quæ tantum bonum est, non necessitet voluntatem Dei: nec enim voluntas necessitari potest à bono finito & limitato, quia non adæquat totam eius potestatem.

14 Confirm. quia nostra voluntas non amat necessariò etiam per modum complacentiæ creaturas possibles, & quidditates sub illo statu: ergo neque voluntas diuina, nam incongruum valde est quòd à tali bono voluntas creata non necessitetur, & voluntas diuina, quæ infinitè maior & sublimior est, necessitetur. Nos autem non necessitari ab illis obiectis, experientia constat: nullus enim necessitatur amare alios mundos, & ea quæ in ipsis possibilia sunt.

15 Confirm. secundò, quia nullum obiectum est volitum à Deo, nisi vel tale bonum moueat voluntatem Dei ad sui amorem, vel voluntas Dei communicet ei bonum illud, quod diligit. Neutro autem modo fertur voluntas Dei in illas res possibles. Non primo modo, quia voluntas Dei non potest moueri ab aliquo bono creato; est enim imperfectio magna respicere obiectum aliquod extra se vt motuum sui; sic enim voluntas se habet in potentia erga tale obiectum, & vt perfectibile & mobile ab ipso: obiectum autem se habet vt mouens, & perficiens, quod nequaquàm potest conuenire obiecto creato in ordine ad voluntatem diuinam, cum ipsa potius voluntas debeat esse causa obiecti sui, & ei tribuere perfectionem, & bonitatem non ab ipsa recipere. Et redit argumentum *suprà* factum, quia si res existens non mouet voluntatem diuinam, ita quod sit obiectum eius motuum, quòd minus quidditas in statu possibilitatis. Non etiam secundo modo, quia voluntas diuina non communicat illi obiecto bonitatem illam, quam in eo diligit, sicut nec possibilitatem, independentem enim ab omni actu voluntatis diuinæ illa prædicata quidditatiua conueniunt illi obiecto, & consequenter bonitas, si quam habet; connexio enim prædicatorum non conuenit ex aliqua communicatione voluntatis diuinæ, sed ante omnem voluntatem ex sola formatione ideæ, vel ex ratione omnipotentia; inde enim habet possibilitatem, & consequenter bonitatem sub statu possibilitatis.

Vt autem melius hoc intelligatur, est aduertendum quòd inter authores oppositos qui sentiunt Deum amare creaturas possibles, est diuisio, an illas amet necessariò, an liberè. Et est duplex præcipua sententia.

16 Prima tenet creaturas istas possibles amari à Deo necessariò. Ita Vasq. *hic disp.* 79. c. 2. Arrubal *disp.* 53. c. 3. Erize *disp.* 18. c. 1. n. 2. Alarcon *tract.* 3. de

voluntate Dei disp. 3. cap. 4. qui etiam citat Ruiz disp. 6. de voluntate Dei, sect. 2. n. 11. & P. Suarez saepe docet, quod si hic amor circa possibilia datur in Deo, ille erit necessarius, ut videri potest in met. disp. 30. sect. 16. à n. 37. & lib. 3. de attributis positivis c. 6. n. 10. licet absolute neget talem amorem dari in Deo. Et fundamentum eorum est, quia non potest aliquid liberè amari, nisi vel in ipso actu amandi, vel in obiecto amato inueniri possit aliqua contingentia, & variatio; quod enim liberè amatur, potest non amari: ergo aliquid ibi est quod possit aliter se habere; non est autem aliud quam actus volitionis, aut obiectum: ergo in ista libertate, vel obiectum quod amatur, vel actus quo amatur debet suscipere aliquam variationem, seu contingentiam: si enim necessarius est actus, & necessarium obiectum, unde potest resultare libertas in volitione: Constat autem obiectum illud non esse contingens nec variabile, quia prædicata quidditatiua, & necessariae connexionis sunt inuariabilia: sunt enim necessaria: Ex parte verò actus constat dari eandem immutabilitatem, quia diuinus est, & immutabili modo procedit etiam circa obiecta libera, quanto magis circa necessaria. Item possibilia habent necessariam connexionem, cum omnipotentia Dei: ergo si hanc necessariò amat, etiam ipsa possibilia ut necessariò connexa illi.

17 Altera sententia tenet Deum amare creaturas possibiles, non necessariò, sed liberè. Ita attribui solet Scotò in 3. dist. 23. q. 1. Eam clarè docet Valentia hic disp. 1. q. 19. punct. 2. & 3. & alij quos citat Ruiz supra sect. 1. Et sequuntur etiam in manuscriptis suis non pauci. Fundamentum est quia creaturæ possibiles habent bonitatem limitatam & finitam, cum sint entia creata: ergo non sufficiunt necessitate voluntatem, non solum diuinam, sed nec etiam nostram. Consequenter, quia voluntas non mouetur necessariò à bonitate obiecti, nisi bonitas sit talis quod adæquet & impleat totam capacitatem voluntatis: si enim inadæquatè se habet ad illam, potest voluntas ad aliud diuertere, & illud repudiare, aut tanquam sibi non necessarium omittere: ergo non necessitat.

Dices: non necessitat ratione sui, & ratione intrinsecæ bonitatis, sed ex connexionem necessaria cum alio, quod Deus necessariò diligit, scil. cum omnipotentia Dei, quæ sine possibilitate illorum entium saluari non potest. Sed contra; quia hæc regula de necessariò connexis non habet locum in simplici complacentia, quia benè potest voluntas complacere de vno, & non de his, quæ sibi necessariò sunt connexa, præsertim si illa solum pertinent ad aliquam denominationem extrinsecam, vel priuationem, aut negationem; simplex enim complacentia est præcisiua, quia non tendit ad rem consequendam, ut est de facto, & cum omnibus suis adiunctis & circumstantiis: id enim pertinet ad voluntatem efficacem, sed potest tendere ad bonitatem aliquam ex obiecto, & secundum se, & complacere de illa, relictis aliis sibi adiunctis, sicut potest mihi complacere bonitas hominis, quatenus rationalis, aut pulcher, & displicere quod sit mortalis & corruptibilis, licet homini necessariò sit annexa mortalitas, & placere mihi poenitentia, & iustitia, non tamen culpa, quam ista vindicat, & illa expiat, & cum qua habent necessariam connexionem. Et entitas actus peccaminosi non displicet Deo, quia dat ei esse, & displicet culpa. Immo addo, quod si possibilitas creaturarum diligitur ex connexionem, quam habet cum omnipotentia diuina, non diligitur solum simplici complacentia, sed efficaci voluntate, quia Deus omnipotentiam suam efficaciter diligit, & vult eam esse, & conseruari: ergo si ideo diligit possibilitatem creaturarum, quia sine ipsa non potest itare omnipotentia diuina, non solum simplici affe-

Ioan. à S. Thoma in 1. Part. D. Th. Tom. 2.

ctu, sed efficaciter vult talem possibilitatem dari, ita quod oppositum, scil. res illas esse impossibiles efficaciter non vult, siquidem hoc requiritur, ut ipsa omnipotentia detur: si ergo propter hoc vult Deus creaturas possibiles, efficaciter vult possibilitatem earum, eo modo quo talis possibilitas potest esse, scil. vult dari talem possibilitatem, seu vult efficaciter non dari impossibilitatem earum, quia si daretur, non esset omnipotentia.

Et hinc liceat formare argumentum ad hominem contra Vasq. & eos, qui sentiunt quod etiam si redderetur creatura aliqua impossibilis, non ideo destrueretur diuina potentia, quia est ens in se omnino absolutum, & omnino indepēdens à creaturis, & ex alia parte dicunt Deum amore necessario amare creaturas possibiles. Sic formo argumentum. Ex hypothesi quod aliqua creatura redderetur impossibilis, quæ modò possibilis est, vel adhuc amaretur à Deo amore necessario, sicut quando erat possibilis, vel non. Si amaretur: ergo tam necessariò amaret Deus possibiles res, quæ impossibiles, quo nihil absurdius, sic enim in duabus contradictoriis complaceret. Si non amaretur: ergo ex sola impossibilitate creaturarum, tolleretur amor necessarius Dei: ergo aliquid quod in Deo est necessarium, si blata possibilitate creaturæ, desineret: idem ergo de ipsa Dei potentia dici potest, quæ nō est magis necessaria in Deo, quam ille amor creaturarum: pertinet enim ad necessarium, & quidditatum prædicatum Dei amor ille.

Dices: non desineret ille amor quoad entitatem 18 in se, sed quoad attingentiam obiecti, sicut dicimus de actu libero, si non vellet creaturas, quas modo vult. Vel secundò reddita creatura impossibili, non amaret Deus illam impossibilitatem, sed amaret possibilitatem, quam antè amabat, si daretur. Sed contra primum est, quia ubi attingentia obiecti est necessaria, & non fundatur super aliqua variatione obiecti quam causare possit ille actus, non potest tolli attingentia, nisi actus ipse, & entitas mutetur. Et ratio est quia in actu libero, ideo attingentia obiecti est contingens, potestque variari, ipsa entitate actus inuariata permanente, quia obiectum contingens, & variabile est, nec ab eo dependet, aut perficitur actus, sed habet illud pro effectu consecuto: non in se passiuè perficitur. At verò in casu posito, possibilitas, vel impossibilitas obiecti non causantur à voluntate, nec sunt aliquid contingens. Sed datur possibilitas ex intrinseca connexionem prædicatorum, vel denominatione sumpta ex diuina potentia, quæ res possibiles requirit. Vnde cum variatio huius possibilitatis, vel impossibilitatis non pertineat ad voluntatis attingentiam, non potest dici quod eadem entitas actus inuariata attingat diuersimodè, & variabiliter ipsos effectus, & ipsas res, variatione ex parte rerum se tenente, non ex parte actus voluntatis, quia ad ipsam voluntatem non spectat id variare. Si ergo, hoc non obstante, voluntas necessariò attingit illas res, id habet ratione actus necessariò attingentis illa obiecta, ex eo quod se, & suam omnipotentiam necessariò attingit, & eadem necessitate, licet secundariò, fertur in creaturas possibiles; hæc autem attingentia si variatur, ipse actus in se variari debet, sicut scientia diuina, quia necessariò easdem creaturas possibiles attingit, si aliquam non attingeret, lumen diuinæ scientiæ intrinsecè mutaretur. Idem ergo erit in voluntate, si necessariò attingit creaturas possibiles. Si autem per attingentiam contingentem & causationem contingentem, non per ipsam entitatem actus necessariò eas tangit, liberè, & non necessariò fertur in illas. Contra secundum verò est, quia reddita

M

creatura

creatura impossibili, si Deus adhuc amaret possibilitatem eius, amaret aliquid chimæricum, possibilitas enim rei impossibilis, chimærica est, & complacere sibi de tali possibilitate, est complacere de aliquo ficto & impossibili. Si autem sub conditione placeret sibi, scilicet si res illa esset possibilis, est ponere actum imperfectum, immò otiosum in Deo, aliàs etiam modò placeret Deo chimæra sub conditione, si esset possibilis, & hominem esse Angelum, & cælum esse terram, & quæcumque impossibilia placerent necessariò voluntati Dei sub conditione, si essent possibilia, quod omnino absurdum est.

19 Ex his sententiis cum suis fundamentis, firmatur in nostra, quòd Deus non amat creaturas possibiles, quia nec necessariò, nec liberè illas amat. Nam fundamenta istarum sententiarum non probant positiuè Deum amare illas creaturas liberè, vel necessariò, sed quælibet sententia probat negationem alterius: probat enim sententia affirmans amorem necessarium quòd Deus non potest illas amare liberè, quia non potest illi conuenire conditio essentialiter requisita ad libetum amorem, scil. contingentia, seu variatio aliqua, siue in actu ipso volitionis, siue in obiecto. Non tamen probat positiuè dari actum necessarium circa talia obiecta, quia restat probare, quòd amet illas creaturas pro illo statu, cum potius nolit illas esse. Immò addo, quòd amor necessarius si sit cum plena aduertentia, & non indeliberatus, non potest esse solum simplicis complacentiæ, sed efficax, ita quòd, si Deus necessariò amat creaturas possibiles, non solum complacentia inefficaci vult illas, sed efficaciter vult esse, seu dari possibilitatem earum: possibilitas ergo efficaciter est volita, si necessariò illæ creaturæ amantur. Ratio est, quia non potest necessariò ferri voluntas in obiectum, nisi quatenus necessarium sibi illud iudicat, aut totam voluntatem adimplet: si enim sibi necessarium non esse iudicat, non obligatur prosequi, & velle illud, sed vel potest suspendere omnem actum circa illud, vel actum nolitionis habere, & nullam volitionem. Si autem iudicat illud sibi necessarium, efficaciter vult illud, & non solum simplici & inefficaci voluntate sibi complacet, quia id quod sibi necessarium est, ideo est necessarium, quia sine illo Deus non habet esse, sicut ergo efficaciter diligitur esse proprium, ita id quod ad tale esse necessarium dicitur, eodem efficaci amore diligitur in eo statu, in quo necessarium est ad esse talis rei. Ut si possibilitas rerum necessaria est, ut diuina potentia existat, & detur in rerum natura, etiam diligit Deus efficaciter talem possibilitatem, volendo quòd talis possibilitas detur; non dico, quod velit reducere in existentiam rem ipsam possibilem, nec possibilitas est aliquid existens existentia reali, sed vult talem possibilitatem dari, ita quod efficaciter vult non esse impossibiles res illas, & sic eadem efficacia qua vult suam potentiam esse, vult possibilitatem illam dari. Inconsequenter ergo ponitur necessaria volitio, & negatur esse efficax circa ipsam possibilitatem. Et tamen simplex ista complacentia quæ ponitur ab Authoribus oppositis, non circa existentiam rei ponitur, quæ potius non placet Deo, sed circa possibilitatem ipsam, seu quidditatem possibilem.

20 At verò sententia negans Deo amorem necessarium, non probat positiuè dari amorem liberum, sed probat solum negationem necessarij, scil. quòd desit sibi vna conditio ad amorem necessarium, quatenus non est illud bonum infinitum & adæquans voluntatem, sed finitum, & limitatum, & sic non est capax necessitandi voluntatem, sicut de facto nostram non necessitant quidditates rerum, licet euidenter eas cognoscamus; euidenter enim cognoscimus esse possi-

bilem alium modum, nec eum necessariò amamus, etiam simplici complacentia. Cur ergo necessitatur Deus ad complacendum in illo? An quia caret malo? Sed tamen est finitum bonum, nec Deo necessarium, & sic non necessitatur amare illud, etsi non sit malum. An quia necessariò requiritur, & sequitur ad omnipotentiam Dei? Sed si necessariò requiritur tanquam quoddam bonum mouens voluntatem diuinam ad amandum se, quia necessarium est sibi, non solum simplici & inefficaci complacentia, sed efficaci amore amabit possibilitatem illam, quatenus sibi necessaria est; quia etsi possibilitatem illam non velit reducere ad esse, & hoc modo non velit efficaciter rem illam, tamen possibilitatem illam dari, ita quòd res illa non sit impossibilis, efficaciter Deus velle tenebitur, quia sic est necessaria sibi ut existat: ergo eadem efficacia qua vult se esse, vult possibilitatem illam dari. Si autem possibilitas ista non est bonum aliquod consecutum ex Deo, sed sola denominatio extrinseca ex potentia diuina orta; ergo in se non est obiectum amoris, & complacentiæ, sed solum amatur ipsa omnipotentia Dei, ad quam sequitur illa denominatio possibilitatis. De quo statim amplius dicemus in solutione argumentorum. Quare ista fundamenta harum sententiarum solum sunt efficacia ad probandum negatiuam partem, scil. quòd Deus non potest necessariò res illas diligere, nec liberè, quia desunt aliquæ conditiones ad id requisitæ. Ex eo autem nos inferimus nullo modo eas amare.

Deum non suspendere omnem actum suum circa possibilia.

Supposito quòd circa ipsas quidditates secundum se, & remoto omni ordine ad esse, non potest in Deo dari amor, & consequenter circa illa non dicitur quòd suspendat Deus actum voluntatis, quia suspensio actus est circa obiectum habile & aptum ut non suspendatur, ita quod sit volibile, sed pro sua libertate nō vult aliquid voluntas circa illud; & sic suspensio dicit aliquid priuatiuum, scil. negationē volendi circa id quod potest esse obiectum volendi circa id enim quod non est capax ut sit volitum, non rectè dicitur voluntas suspendere, sicut circa verum, & falsum non dicitur voluntas suspendere actum suum, sed omnino negatiuè se habere. Hoc inquā supposito, solum restat difficultas, an circa ipsum esse, seu rem, ut ordinatam ad esse, sub quo solum statu est capax volitionis, aut nolitionis, possit Deus suspendere omnem actum, ita quod nec actu positiuo velit, nec nolit, sed omnino omittat.

Res hæc multum pendet ex his quæ 1. 2. ad q. 6. disputanda sunt, an possit dari pura, & physica omis-
sio omnis actus circa aliquod obiectum. Sed breuiter, quod attinet ad præsens, dicimus quòd loquendo de voluntate habente aduertentiam ex parte intellectus sufficientem pro altero actu volitionis, vel nolitionis liberæ (nam si deest aduertentia sufficiens ad libertatem, non erit perfectio, sed imperfectio suspendere actum) reducitur tota difficultas, an pertineat ad rationem, & perfectionem libertatis, non solum actu positiuo velle, aut actu positiuo nolle, sed etiam priuatiuè, seu suspensiuè se continere. Et ex eodem principio, scil. ex perfectione libertatis fundatur & dimanat duplex sententia. Nam quidam putant pertinere ad perfectionem libertatis, eiusque dominium, posse suspendere omnem actum. Alij putant pertinere ad perfectionem libertatis, positiuo, & vitali actu versari circa obiectum, & non purè negatiuè, seu suspensiuè se habere, sed talem suspensionem solum nasci ex imperfectione indeterminationis, quando scilicet aliquis in perplexitate & indeterminatione reperitur, aut ex defectu cogitationis,

gitationis, scilicet quia non recordatur, seu non cogitat de aliqua re, & sic nec elicit actum voluntatis. Priorem sententiā sequi videtur Albertinus *tom. 1. propos. 4. q. theolog. 4. dub. 2. num. 9.* & Curiel *lib. 1. controuersiarū contr. 7. art. 3.* alique Iuniores. Posterior sententia communior est apud Thomistas. Tenent eam Ferrar. B.ñez, González, Aluarez, Collegium Carmelit. *tract. 4. disp. 5. dub. 3.* sequuntur P. Granados *hic tract. 3. disp. 5.* Ruiz *disp. 8. de volunt. sect. 3.* qui citat Fonseca, & Suarez, & alios. Arridet quoq; his qui existimant liberam volitionem Dei aliquo extrinseco determinari, & constitui, vt P. Valq. *hic disp. 79. cap. 3.* Arrubal *disp. 56. c. 2.* Erize *disp. 19. c. 5.* Et hi consequenter loquuntur, quia cum apud eos libera volitio Dei, sit ipsa entitas volūtatis, seu essentia diuinæ cum connotatione obiecti ad extra, hoc ipso quod negatio rei ad extra datur, v.g. negatio gratiæ cum potētia efficiendi gratiam, datur volitio cum nihil aliud requiratur ad positiuam volitionē alicuius negationis, quā eam connotari à volūtate, & dari ad extra cum posset non dari, hoc enim modo & non aliter dicitur Deus velle positiuē, & liberē aliquid; potest autem positiuo actu velle negationem.

23 Relicto autem hoc fundamento, quia sententia illa de constitutione actus liberi *suprà* reiecta est, totum fundamentum istarum sententiarū reducitur ad id quod *suprà* positum est, quia vna putat ad perfectionem libertatis pertinere elicto aliquo actu se gerere erga obiectum, alia quod ad perfectum dominium sui actus pertinet etiam ab omni actu posse abstinere. Potest autem dupliciter voluntas liberē, & voluntariē se habere circa hanc suspensionem. Primò volendo illam, aut imperando illam (si propriè imperari potest) vt si voluntas dicat, circa tale obiectū, v.g. dandi centum Petro nec volo, nec nolo, sed volo me suspendere. Et tūc non caret omni actu, sed habet actum *suprà* ipsam suspensionem, ita quod suspensio non solum est voluntaria, vt procedens à voluntate, sed est volita tanquam obiectum illius actus. Secundò potest voluntas absque omni actu, etiam volente suspensionem solum cum aduertentia & cognitione de ipso obiecto suspendere se ab omni actu volēdi & nolēdi, & totaliter omittere obiectum illud, non ex obliuione, aut inconsideratione, sed ex certa scientia. Hoc supposito dico, quidquid sit an voluntas nostra possit ab omni actu physicē se suspendere sciēter, & aduertēter, de quo dicemus *cit. loc. ex l. 2.* tamē talis suspensio omnimoda, & facta secundo modo imperfectionem secum importat, nec pertinet ad meliorationem dominij, & libertatis, ideoque non est ponenda in Deo.

24 Ratio est, quia talis suspensio opponitur duabus perfectionibus in voluntate habendi se erga obiecta sibi proposita, & alias non redditur perfectius dominium ex tali suspensione. Opponitur quidem duabus perfectionibus, quia nec positiuē, nec vltimatē se determinat voluntas, aut resoluit circa tale obiectum per suspensionem illam omnimodā antequam per actum se determinet. Similiter per suspensionem non exercet actum vitalem circa tale obiectum, sed habet se voluntas perinde ac si non esset, perfectius est autem operari in actu 2. & vitaliter exercere actum volūtatis immanentē, quā non exercere circa aliquod obiectum. Quod enim per illam suspensionem minus se resoluat & determinet voluntas, patet, quia suspensio pura nihil addit *suprà* voluntatē quod ex se ante non haberet, solum enim est negatio omnis actus cum facultate proxima habēdi actum si velit, pura autem negatio addita potētiæ indifferenti, non tollit, nec

Joan. à S. Thoma in 1. Part. D. Th. Thom. 2.

resoluit indifferentiā quam ex se habet talis potētia: ergo suspensio non est finalis sententia vltima resoluit, licet sit determinata suspensio, & determinata priuatio omnis actus. Sed aliquid restat faciendum seu resoluendum ex parte voluntatis, siquidem nullum decretum extat, neq; actus voluntatis; qui autem nihil decernit, nihil determinat, nec addit *suprà* indifferentiā potētiæ de se: ergo restat illi accipere determinationem & resolutionem.

Dices: decernit, seu determinat, & resoluit priuatiuē, & omissiuē, non positiuē.

Sed contrā; quia priuatiuē resolvere ex parte actus, per priuationē scilicet omnis actus, est idem quod habere priuationē omnis decreti; ergo non mutat, nec addit *suprà* indifferentiā quam potētia habet de se, & sic priuatiuē illi resolutioni, seu determinationi restat resolutio determinata & positua accipienda. Hæc est ergo imperfectio in genere resoluendi, & decernendi, quod priuatiuē tantum se habeat in resoluendo, & decernendo, id est; priuatur omni positua resolutione, & decreto, & sic nondū vltimatē, & perfectē decernit.

Et conf. quia illud est perfectius in voluntate, quod est ei connaturalius, & conformius. Cum autem per suspensionē omnis actus, voluntas non prosequatur obiectum, sed relinquat, & eundem effectum non prosequendi, seu relinquendi illud possit facere per actum positiuum, quo se explicet positiuē inclinatio voluntatis, connaturalius, & perfectius est voluntati illam reiectionē facere per aliquem actum, v.g. per nolitionem, quā per suspensionem omnimodam, quia cum voluntas sit potētia inclinatiua vitaliter, seu per modum inclinationis se mouens, & tendens, connaturalius illi est explicando hanc inclinationem in actu, suos effectus habere, quā abstinendo ab inclinatione, vel priuado se illa; suspensio enim illa & priuatio omnis actus, inclinatio non est, neque per modum vitalitatis procedens, sed inclinationis suspensio: ergo minūs connaturaliter, minūsque perfectē voluntas reiecit obiectum per suspensionē, quā per actum nolitionis quo explicat positiuē suam inclinationem fugiendi ab illo obiecto, quia minus vitaliter, scilicet non se mouendo.

Et hinc deducitur secundum, scil. quia per talem suspensionem voluntas comparatur ad obiectum, non positiuē, sed negatiuē, aut priuatiuē, perfectius autem, & actualius est tendere in obiectum positiuē, & per actum immanentem, qui est perfectio ipsius potētiæ, & non solum effectus ad extra, quā per negationē, & suspensionē actus: non enim paris, & eiusdem perfectionis, vel rationis est actualis inclinatio, seu operatio, & suspensio actus. Et vrgetur hoc amplius, quia licet in potētiis executiuis, & operatiuis ad extra, in quibus ministratur voluntati, ad perfectū dominij pertineat posse eas suspendere, & non tribuere, aut operari aliquid extra se; tamen in ipsa volūtate, quæ per electionē, & deliberationē dirigit & operatur actu immanēti intra se, non est perfectius cessare ab omni actu, quā habere actū, quia actus ipse pertinet ad vitālē functionē, qua viuit illa potētia, & ad functionē deliberantē, & dirigentē alia, & melius est vitali actu, & deliberatio exercere vitalem libertatem, quā ab ea se abstinere.

Vnde in hoc non melioratur aut perficitur libertas, si suspendat omnē actum, quia quidquid libertas exercet, melius & perfectius exercet, si vigilando, & vitaliter operando, & eligendo id faciat, quā si omittendo, & excludendo à se omnem actum, dūmodo ad eliciendū illum, non cogatur. Si ergo voluntas reiecit aliquod obiectum, & non

M 2 vult

vult illud, si per puram omissionem faciat, facit quasi inanime quoddam, aut dormiens; si autem actu nolitionis elicit id faciat, reiicit illud à se quasi vigilando, & vitaliter operando, & sua indifferentia utendo, quia nullo modo cogitur in elicientia illius actus: manet enim obiectum æquè indifferens, & potentia voluntatis, & iudicium intellectus siue suspēdat, siue eliciat, & aliàs eliciendo facit id vitali actu, & invigilia, & per positivā elicientiam, quæ est melior negatione illius: ergo hic modus nolendi perfectior est per actum, quàm sine illo.

26 Dices: minus cogitur voluntas si non solum est libera ad volendum, vel nolendum obiectum, sed etiam si non coarctetur ad eliciendum aliquem actum, sed possit elicere, vel nullo modo elicere. Nec habere actum pertinet ad perfectionem operantis; nam instatur hoc in operatione transeunti. Perfectius est operari ad extra, quàm sine operatione esse: ergo Deus perfectius se habebit si circa omnes creaturas operetur ad extra per potentiam suam, quàm suspendendo operationem. Consequentia est nulla, potest enim Deus suspendere omnem actum annihilando omnia: ergo idem erit in voluntate libera. Nec dici potest, Deum non carere actione potentia executiva, etiam si de facto non producat effectum, & ita nullum actum, aut perfectionem deesse Deo, licet res ad extra non fiant. Nam contrā est, quia etiam habet totum actum volendi, aut nolendi creaturas, etiam si de facto non velit istas vel illas, quia entitatem actus necessariò Deus habet, & attingentiam volitorum contingenter: ergo non carebit aliqua perfectione ipse Deus, etiam si omnem attingentiam erga creaturas suspēdat; & sic pura ommissio in Deo nullam imperfectionem dicit: entitatem autem actus suspendere non potest, quia est ipsa substantia Dei.

27 Sed resp. quod non est maior libertas, nec perfectius dominiū, si sit libertas ommissiva, & suspensiva omnis actus; sed illa est perfectior libertas, quæ cum positiva inclinatione, & deliberatione, seu electione potest non coarctari circa quod libet obiectum, vel actum intra suam sphaeram. Si autem cum positiva inclinatione, & electione id facit, non ab omni actu se suspēdit, sed aliquem actum habet, nempe illum quo eligit, & inclinat ad non habendū hunc actum, vel non proseguendum illud obiectum, vel illud. Hoc autem potest facere voluntas, aut directè eligendo, & volendo fugere à tali obiecto, seu potius nolendo illud, aut volendo aliud, ex quo sequitur istius nolitio. Cæterum per suspensionem & privationem omnis actus non habetur libertas, & voluntas explicitè, & positivè, & vitaliter in actu, sed solum privativè, & sic minus habet de inclinatione & electione, & consequenter minus de libertate, seu, de perfectione libertatis, quæ per inclinationem & electionem perficitur & minus de vitali motu; Itaq; posse abstinere ab omni actu diviniū maius dominium, & minor coarctio est; posse autem collectivè ab omni actu suspendi, minus perfectum dominiū est, quia minus positivum vitale & actuale, minusque inclinationis & electionis habens, & sic minus ex intimo voluntatis procedit, quia non procedit, sed suspendit.

28 Et ad id quod vrgetur, quod habere actum non semper perfectionis est, ut patet in potentia executiva Dei ad extra, quæ potest totaliter suspendere actum sine imperfectione, & ut si annihilaret omnia.

Resp. esse longè disparem rationem, quia potentia executiva per actionem ad extra perficit effectum potius quàm perficiatur in se. Vnde per hoc quod suspendat actionem suam, solum suspendit

communicationem sui ad alia, quod non pertinet ad perfectionem sui, sed aliorum: posse enim se communicare perfectio est, sed communicare de facto potius perfectio aliorum est, quàm sui, non enim perficit se nisi fortè ipsa potentia operas, & communicans non sit perfectè in actu per seipsam, sicut est divina, sed sit in potentia ut reducat in actum agendo, tunc enim perfectius est operari in actu quàm suspendi ab omni actione transeunte. At verò in voluntate & in intellectu suspendi ab omni actu non est perfectio, sed imperfectio, quia actus ipse immanens pertinet ad perfectionem potentia operantis, tanquā vita eius actualis, & inclinatio interior in obiectum volitum, & exercitiū domini per deliberationem, & determinationem sui. Et ideo perfectius hoc exercetur per actum, quàm per suspensionem actus, quia vitali modo fit, & per electionem propriam se inclinat, & decernit voluntas, & conformat se iudicio intellectus.

Ad id verò, quod instatur, quod voluntas divina, sicut & potentia semper est in actu volitionis & nolitionis, & solum deest illi attingentia obiecti, quæ non tollit ab illo aliquam perfectionem, atque adeo suspensio ab omni actu nullam imperfectionem in Deo inuoluit.

29 Resp. quod licet illa explicatio in creaturas non addat perfectionem supra ipsam entitatem actus, pertinet tamen ad denominationem, qua Deus dicitur actu volens vel nolens, & decernens quid circa illas creaturas habendum sit, & fundatur in ipso actu, pertinetq; ad ipsum exercitiū domini circa creaturas; connaturalius autè, & perfectius exercetur dominiū in creaturas per decretum positivum illas eligendo aut reiiciendo, quàm per solā suspensionem omnis attingentia illarum, sicut etiam relucet perfectius providentia divina in reprobatione positiva, quàm in sola negativa, quæ non est aliud, quàm pura ommissio admittendi aliquos ad gloriam. Et si ibi sisteret, providentia circa reprobos minus efficax & perfecta foret in genere providentiæ supernaturalis, supposita elevatione omnium creaturarū rationalium ad ordinem supernaturalem, quia sola negatio dandi regnum est communis reprobis, qui modo sunt, & his in puris naturalibus relinquerentur, si Deus vellet. Vnde cum quæritur, quam imperfectionem habeat pura suspensio, & ommissio actus in Deo: Resp. quod non habet imperfectionem privativam & tollentem aliquid entitatis & actus divini, quia sic esset privatio rei divina; quæ omnino intelligi non potest, sed suspensio illa solum intelligitur penes ipsam attingentiam, vel non attingentiam creaturarū quæ, ut *supra* diximus, non addit perfectionem ad actum voluntatis divinae, sed est explicatio illius circa creaturas, & fundat respectum rationis ad ipsas. Licet ergo suspensio ista actus in Deo non intelligatur ut tollens entitatem actus divini, sed explicationem eius & respectum ad creaturas, tamè quoad denominationem exercendi libertatem, minus perfecta denominatio est per negationem comparari ad creaturas, quàm per positivum exercitiū: sicut etiam in ideis divinis comparatio ad creaturas solum est respectus rationis, & tamè si sic non compararetur ad creaturas, sed negativè se haberet, idea erga illas imperfectè se haberet: ista enim denominatio & respectus rationis, licet in se formaliter non sit perfectio, tamè non fundatur nisi in perfectione, & eminētia actus divini, qui non potest per deprediam, & relationem reale se habere ad creaturas, & hanc non supponeret, nec haberet si solū fundaret negationem seu suspensionem actus. Et sic præsuppositivè & fundamētaliter est imperfectio illa suspensio.

pensio. Sunt enim aliqui respectus rationis, qui etsi in se perfectiones non sint, fundantur tamen in perfectione, sicut respectus, qui ex parte mensuræ ad mensuratum se habent, ex parte perfectiui ad perfectibile, sicut respectus idearum ad creaturas, & sicut respectus scientiæ visionis ad creaturas existentes, quas si non respiceret positivè per visionem, sed negativè per abstractionem ab ipsis, imperfectio esset in Deo, non formaliter ratione ipsius respectus, sed ratione fundamenti illum requirentis.

30 Quod si petas: Poteritne ergo habere Deus actum voluntatis veluti reflexum, quo velit suspendere actum suum circa determinatum obiectum, v. g. circa gloriam Petri. Et dico circa determinatum obiectum, nam circa omnia si suspenderet actum, etiam careret illo quo vellet suspendere. Sed quærimus an possit circa determinatum obiectum id facere, ita quod suspensio sit volita, ut obiectum alterius volitionis?

Resp. aliquos id libenter concedere, quia in tali volitione nulla reperitur imperfectio: ergo non est neganda Deo. Alij difficultatem inveniunt in istis reflexis volitionibus concedendis, quia una volitio habeat aliam pro obiecto, vel nolitionem aut suspensionem, quia videtur sequi processus in infinitum, quia etiam illa volitio, qua vult se velle aut se suspendere, erit volita, idque per aliam volitionem, & ista rursus per aliam, & sic in infinitum. Caterum ista volitio suspensionis etiam circa determinatum obiectum licet non afferat imperfectionem illam, quæ est per carentiam omnis actus, redditque voluntatem velut inanimem, & non vigilantem, quia iam aliquem actum habet, tamen adhuc aliam imperfectionem non tollit, quam *suprà* notauimus, scilicet quia non facit voluntatem ultimam resolutam circa illud determinatum obiectum, cum tamen circa illud, habeat Deus plenissimum & perfectissimum iudicium; volendo ergo suspensionem circa illud, decernit, seu vult Deus nihil resolvere circa tale obiectum, quia nec volitionem habere vult, nec nolitionem, vult ergo non resolvere aliquid circa tale obiectum, nec ultimam se determinare. Et in hoc semper illa suspensio actus affert aliquam imperfectionem, quia relinquit voluntatem indeterminatam, & indecisam circa tale obiectum, quod certè minus perfectionis sonat. Et quod sic relinquat voluntatem indeterminatam, & non ultimam resolutam, constat, quia illa suspensio hoc operatur, quod Deus nec denominetur velle nec nolle tale obiectum: ergo manet adhuc indifferens ad velle, vel nolle, si autem determinatè vellet, aut determinatè nollet, ulterius non esset indifferens, & suspensus, sed ultimam sententiam haberet & ultimam resolutionem: ergo quandiu vult suspensionem, vult non habere ultimam resolutionem. Sed quandiu non habetur ultima sententia & resolutio in unam vel alteram partem, minus perfectè se habet voluntas, quia non ultimam se explicat in obiectum propositum. Ergo talis volitio suspensionis, seu talis suspensio ita est indecens Deo, & illi minimè tribuenda propter imperfectionem annexam, dum deest ultima resolutio, & sententia, quæ semper expectatur, & eius carentia semper anxiat, quod est signum imperfectionis annexæ. Et cum fundamentum oppositum solum innitatur in eo quod ista suspensio non est imperfectio, assignando imperfectionem solum manet.

Soluntur argumenta.

31 Primò arguitur ad probandum creaturas possibili sub illo statu manentes, diligi à Deo. Tales creaturæ sub illo statu habent bonitatem: ergo sunt ob-

Ioan. à S. Thoma in 1. Part. D. Th. Tom. 2.

iectum complacentiæ diuinæ. Consequentia patet, quia illa bonitas est nota Deo: impossibile est autem quod bonitas à Deo cognita ei displiceat, quia displicere de bono, peruersum est. Anteced. autem constat: tum quia tales creaturæ sub illo statu sunt entia possibili: ergo bona, quia bonum est passio entis, & non minus transcendens, quàm ipsum ens: ergo cui conuenit entitas, conuenit bonitas: ergo est obiectum amoris, & complacentiæ: tum etiam quia in tali statu conuenit creaturis possibilibus integra, & totalis constitutio suæ quidditatis: ergo perfecta constitutio: ergo bona. Antec. constat, quia nihil deest illi quidditati ut sit constituta, v. g. homini in statu possibili, quia est animal rationale, & habet proprias passiones, omnes enim de illo prædicantur & verificantur in illo statu: si ergo nihil deest ad constitutionem, integra est constitutio, cui nullum deest prædicatum constitutum: si autem est integra; etiam & perfecta, quia perfectum est cui nihil deest in eo genere. Quod autem est perfectum, est bonum; quia bonitas perfectionem sequitur.

Confirm. quia in eo statu conuenit enti possibili 32 veritas, siquidem de eo verificantur prædicata intrinseca & necessaria: ergo etiam conuenit bonitas, scilicet eo modo quo veritas, obiectivè, & in statu possibilitatis, quod sufficit ad mouendam voluntatem: nec enim ut voluntas moueatur necesse est quod obiectum sit existens, & in actu, sed ad nondum existens moueri potest, ut infirmus ad sanitatem, quam non habet, immò & ad eam quam non potest iam habere, nec habiturus est, sed solum per miraculum haberi potest, & sic solum est in statu possibili. Addo quod etiam ipse Deus vult multa, quæ solum sunt in statu possibili, & nunquam habebunt esse, sicut vult omnes homines saluos fieri, & tamen multi non saluabuntur, sed eorum salus manet solum in statu purè possibili, & sic de aliis multis quæ sub conditione sunt volita à Deo, nullo autem modo sunt futura, sed tantum in statu purè possibili.

Resp. quod, ut latè diximus, *præced. tomo disp. 6. art. 2. & 3.* creaturæ consideratæ solum secundum prædicata constituta, & intrinseca, seu in statu puræ possibilitatis, non sunt bonæ formaliter & simpliciter, sed in potentia, seu radicaliter, & secundum quid, & sic solum in potentia amari possunt, & placere. Et hoc ideo quia bonum est idem quod perfectum, non quomodocumque consideratum, sed ut alliciens & finalizans appetitum, non ut purè, & præcisè informans seu constituens rem, seu in statu & consideratione constituendi, sed ut diffusium sui, & mouens, seu alliciens appetitum. Vnde dicimus quod res in statu puræ possibilitatis habent bonitatem veluti radicaliter, & inchoativè, & in potentia, non autem formaliter, & secundum exercitium mouendi, quia bonum non potest intelligi, quod habeat exercitium mouendi secundum appetibilitatem suam, etiam in simplici complacentia, nisi intercedat aliqua communicatio, & conuenientia inter ipsum appetibile & appetitum, seu voluntatem: apprehenditur enim ut conueniens, & placens ipsi voluntati, aut ut accipiens aliquam conuenientiam ab ipsa voluntate, unde ei placeat, sicut creaturæ accipiunt bonitatem, & conuenientiam à voluntate diuina, non illi eam tribuunt. Respectu verò voluntatis creatæ tribuunt ei bonitatem, & conuenientiam, non ab ea accipiunt. Sic ergo siue bonitas tribuatur à voluntate, siue tribuatur voluntati, semper apprehendi debet sub aliqua communicatione, & aliqua conuenientia, quæ sine aliquo esse vel ordine ad esse non exercetur, nec apprehenditur. Cuius ratio est, quia nihil apprehenditur ut appetatur

M 3 sub

sub pura speculatione, sed sub aliqua cognitione practica, id est, effectiua, seu mouente affectum, saltem, imaginariò & fictè. Praxis autem respicit opus & exercitium, quod sine aliquo esse, seu ordine ad esse, non est considerabile. Status autem puræ possibilitatis, sub quo res illæ possibiles considerantur, non dicitur status possibilitatis propter ordinem ad esse practicè, & in exercitio, eo modo quo aliquid apprehensum vt possibile mouet appetitum: tunc enim apprehenditur vt possibile practicè, scilicet vt mihi possibile, vel saltem quod fingo esse possibile, vel quod fingo me habere in esse, sicut delectamur in fabulis, & complaceo in eo quod essem Angelus, vel haberem corpus cœleste; hæc enim omnia feruntur in ipsum esse quod fingimus, & nobis quasi practicè possibile, aut existens apprehendimus: sed status puræ possibilitatis accipitur in presenti pro sola capacitate, seu non repugnantia ipsius esse, ex parte ipsarum rerum secundum se, & quatenus est intrinsecum & essentialiale prædicatum ipsius rei, quæ est possibilis, sine vlllo tamen ordine aut exercitio, vel tendentia ad esse, quin potius omne esse illis negando; sic enim se habet Deus erga res purè possibiles, quod nullo modo ordinat illas ad esse, & ad futuritionem, sed claudit sub negatione essendi. Nec fingit illas aut considerat sub aliquo esse: Deus enim nihil amat, nec sibi aliquid complacet sub fictione, & secundum esse fictum. Quare neque fictè, neque verè illas considerat sub aliquo esse, vel ordine ad esse. Vnde illam possibilitatem, seu capacitatem essendi purè speculatiuè considerat, & nullo modo practicè, id est, non vt possibile sub convenientia & respectu ad voluntatem, sed vt possibile, seu non repugans secundum se sub respectu ad potentiam efficientem, sine vlla autem communicatione, & convenientia in aliquo esse ficto vel vero cum ipsa voluntate, quod est carere appetibilitate in exercitio.

34 Vnde soluitur argumentum propositum & eius probationes. Negamus antec. Ad primam probationem dicitur quod sub illo statu creaturæ possibiles sunt entia in potentia, & obiectiue tantum: ergo sunt bona, distinguo, radicaliter, & in potentia præcisè; concedo, formaliter, & in exercitio, nego; seu aliis verbis: sunt bona quasi speculatiuè, & quoad constitutionem essentialem, transeat; sunt bona quasi practicè, id est, sub statu mouendi & se communicandi, nego; quia omni esse, & exercitio mouendi carent, sed præcisè considerantur vt capaces, seu non repugnantes vt fiant sub ordine ad potentiam efficientem. Et sic nullo modo sub illo statu mouent voluntatem, aut placent, vt *cit. loco* latius diximus, & iterum statim magis attingemus *solut. ad 2.*

Ad secundam probationem dicitur, quod in creaturis possibilibus est integra, & perfecta constitutio essentialis, distinguo, perfecta obiectiue, & in potentia transeat, formaliter, & in exercitio, & secundum aliquod esse, vel ordinem ad esse, sicut requiritur ad mouendum voluntatem, nego. Item est perfecta quasi speculatiuè in ratione constituendi essentialiam, seu quidditatem, quæ est radicaliter, & in potentia bona, transeat; quasi practicè in ratione finalizandi & alliciendi appetitum, sicut requiritur ad formalem rationem boni, nego: illa enim quidditas sub conceptu quidditatis secundum se, tantum concipitur vt constituta ex prædicatis suis intrinsecis, & essentialibus, & sic est radix solum bonitatis, quia est radix operationis, & esse, & aliorum accidentium quibus perficitur, & sine quibus non est perfecta, nec eius perfectio communicatur, aut diffunditur. Bonitas autem vt moueat, aut placeat voluntati, debet esse in statu se communicandi & diffundendi, quod non fit nisi mediante aliquo esse vel operatione aut ordine ad esse;

& ideo sub illo statu non habent formaliter bonitatem, id est bonitatem sub formalitate alliciendi, & mouendi, vt finalizandi, quia hæc exerceri non possunt nisi mediante aliquo esse vel operatione, quæ in illo statu non reperiuntur. Itaque vbi est ratio perfecti, ibi est ratio boni, eo modo quo fuerit perfectum, & non aliter. In statu autem puræ possibilitatis est perfectio, & integritas, seu nihil deest quantum ad constitutionem essentialis & prædicata essentialia, & quoad substantiam, seu entitatem vnde oritur bonitas, non tamen quoad exercitium, & statum mouendi bonitatis, quæ est per allicientiam & affectionem sui ad appetitum, quod sine aliqua communicatione, & aliquo esse, vel ordine ad esse intelligi non potest, vt diximus, & amplius statim explicabitur *solut. seq. argumenti.* Bonum ergo non solum dicit rationem perfecti quoad constitutionem perfectam essentialis in sua quidditate & substantia, & prædicatis intrinsecis, sed etiam quoad communicationem, & diffusionem sui, quæ potest perficere alia, alliciendo & attrahendo & mouendo appetitum, vt latè ostendimus *loco supra cit. preced. tomo disp. 6. art. 1. 2. & 3.* Et sic quoad statum, modumque communicationis & convenientiæ deest bonitas rebus in illo statu puræ possibilitatis.

Ad Conf. Resp. quod veritas conuenire potest rebus possibilibus, & quoad substantiam entitatis, & quoad statum cognoscibilitatis, non tamen conuenit bonitas quoad statum appetibilitatis, licet conueniat quoad substantiam vel entitatem integritatis. Ratio differentiarum est, quia licet veritas & bonitas, vt sunt passionis entis, conueniant in hoc quod sunt idem entitatiue cum ente, & sic ubicumque est ens, est verum & bonum eo modo quo est ens, tamen quoad statum, modumque mouendi intellectum, & appetitum, differunt, quia veritas attingitur ab intellectu per hoc quod trahitur ad illum mediante representatione, seu specie, in cuius virtute continetur res intentionaliter, & intelligibiliter, etiam si in se non existat realiter: sufficit enim quod existat in speciei, non in se: immò intellectus cum sit præcisus, & indagatiuus quidditatis, & naturæ rerum non pendet ab esse, & existentia rerum, sed ab illa præscindit. At verò voluntas, licet requirat obiectum sibi esse propositum per intellectum vt feratur in illud, tamen id in quod fertur est obiectum, practicè sub aliquo esse, & convenientia affectiua ad voluntatem: voluntas autem non inuenit convenientiam in rebus, vt abstractis ab esse, sed vt concernentibus aliquod esse, quia de se est potentia per modum inclinationis, & ponderis ad affectionem, & possessionem rei, vel dando illi esse, sicut dat diuina voluntas, vel supponendo illud, & tendendo ad affectionem eius, sicut creata. Et licet simplex voluntas non respiciat, nec tendat ad affectionem rei efficaciter, tamen illud placet simplici voluntati sine efficacia, quod per efficaciam consequibile est. Est autem consequibilis res in statu essendi, non in statu puræ possibilitatis. Et sic in hoc statu non habet bonitas rei statum appetibilitatis & exercitium, licet habeat entitatem bonitatis, & radicalem substantiam. Sed de hoc amplius dicemus *solut. ad 2.* Intellectus autem se habet per modum manifestationis, & lucis, quæ potius diuidit, & separat, ac præscindit omnes formalitates, & rationes, vt omnia illustret, & sic non requirit esse in obiecto, sed sufficit abstractio, & præcisio.

Cum autem instatur, quod ad non existens, & in statu possibilitatis mouetur voluntas, distinguo: Ad non existens, nec in re, nec in ordine ad esse, nego; ad non existens in re solum, transeat: Nec enim nos dicimus quod præcisè requiritur res in esse, vel iam existens vt ametur, sed quod sufficit esse, vel ordo ad esse, & tendentia ad illud, taliter quod nisi aliquod esse

esse apprehendatur, vel verum, vel fictum, nihil appetitur, neque complacet, quia non attrahitur, nec allicitur voluntas, nisi ab aliqua convenientia habendi, vel possidendi, vel fruendi, quod sine esse, vel ordine ad esse practice non fit. Et res impossibilis saltem sub ficto, vel apparenti esse appetitur. Ad id quod dicitur de his quæ Deus vult, quæ tamē nunquam erunt. Resp. quod Deus vult illa, saltem vt futura conditionata, & cum aliquo ordine ad esse: nam saltem ordinat causas ad tales effectus quantum est ex se, licet absolute: & quoad efficaciam, & applicationem non velit illos esse. Sic enim vult omnes homines saluos fieri, vtique volendo esse, seu existentiam, illius salutis non quidditatem tantum: vult enim fieri saluos, & fieri non est quidditatis, sed esse, vult autem existentiam salutis, non in se immediate neque vt euenturam de facto, sed in causis suis sufficientibus: dat enim auxilia sufficientia ad salutem, & in illis auxiliis ordinat salutem ad existentiam, quia ordinat causas ad ponendam salutem in esse, licet impediatur: ergo non fertur in res illas voluntas Dei sub statu puræ possibilitatis, sed sub aliquo ordine ad esse, prout in causis suis continetur illa salus, & ad esse illius ordinatur causæ; quæ causæ habent esse existentiam Respectu verò rerum purè possibilium, causæ non ordinantur aut disponuntur ad dandum illis esse, sed ad oppositum, nec pro illo statu attinguntur sub ratione futuri, saltem conditionati, sicut salus omnium hominum, aut alia futura conditionata.

37 Secundò arguit, vt ampliùs doctrina solutionis præcedentis explicetur. Nam si ob aliquam rationem res possibiles sub illo statu puræ possibilitatis non amantur à Deo, maximè quia prout sic non habent bonitatem in statu finalizandi, & mouendi voluntatem, aut communicandi aliquid ab ea; quod enim respectu voluntatis creatæ est allicientia, & motio, respectu diuinæ est acceptio & communicatio: sed hæc ratio est nulla; ergo Minor prob. tum quia simplex complacentia non respicit assecutionem, & esse rei, aut possessionem ipsius; hoc enim pertinet ad intentionem, seu ad voluntatem efficacem; sufficit ergo ad simplicem complacentiam bonitas, quæ secundum essentialem connexionem, & per modum propriæ passionis conuenit enti, nec est necesse quod voluntas velit illam possidere, & sic malè fundamus negationem istius amoris in eo quod voluntas fertur in assecutionem, & possessionem, vel esse rei, cum simplex voluntas in id non feratur: ergo non petit esse in obiecto, vt sit bonum: tum etiam quia voluntas potest habere etiam complacentiam de re ficta aut impossibili, vt cum delectatur de fabulis, & fictionibus, aut aliquis desiderat esse immortalis, aut esse Angelus; si ergo potest desiderare voluntas, aut complacere de re impossibili, quanto magis de quidditate rei possibilis? Nec valet dicere quod hæc appetuntur sub ipsa ratione existentia, sub qua apprehenduntur, vel finguntur. Nam etiam possibilia apprehenduntur secundum aliquod esse: omnes enim supponunt non posse possibilia amari nisi cognoscantur, & si cognoscantur, sub aliquo esse apprehenduntur; præsertim quia possibilia ordinem dicunt ad esse: possibilitas enim illa ad existentiam est: ergo sub ordine ad esse appeti possunt.

38 Constat. quia vniuersalia sub statu vniuersalitatis non repugnat amari, & ille status non minùs extraneus est ab exercitio appetibilitatis quam status meræ possibilitatis: ergo illud fundamentum non obstat quominus diligere possint

creaturæ possibiles. Minor constat, quia status vniuersalitatis est status abstractionis à conditionibus indiuiduantibus, sine quibus non potest dari existentia, neque operatio, & consequenter neque exercitium appetibilitatis, quod, vt diximus, dependet ab existentia. Vnde si mathematica propter suam abstractionem à motu, & esse repelluntur ab vfu & ratione boni, vt diximus *præced. tomo disp. 6.* & creaturæ possibiles sub illo statu non exercent bonitatem, vt modò dicimus: ergo etiam vniuersalia repelluntur à ratione boni, & non possunt amari. Maior autem constat, quia voluntas nostra sequitur apprehensionem intellectus, intellectus autem cognoscit & proponit res in vniuersali, & in abstractione, & sæpe sine notitia aliqua indiuiduorum rem aliquam diligimus vagè, & in communi: ergo res in vniuersali amari possunt, & sic bonitatem habent.

Resp. negando minorem. Ad primam probationem dicitur quod simplex complacentia non respicit assecutionem rei efficacem, & vt ordinanda, & committenda est per media. respicit tamen assecutionem, seu esse rei efficaciter. Et ratio est quam sæpe diximus, quia bonum non mouet voluntatem, etiam ad simplicem complacentiam sui, nisi per modum alicuius diffusionis, seu communicationis sui, quia bonum non habet exercitium appetibilitatis, nisi per modum finis, aut eorum quæ sunt ad finem: licet autem omnis causa exerceat causalitatem suam mediante aliqua communicatione, tamen specialiter finis, & efficiens causant secundum communicationem in esse, efficiens quidem producendo, & exequendo, finis autem mouendo ipsum efficiens, quia est id cuius gratia agens operatur; & sic istæ duæ causæ specialiter ex sua propria ratione mouent, & causant secundum ordinem ad esse, & ad operationem, non verò ad ipsas pertinet constitutio quidditatis, & naturæ, sicut ad formam, & ad materiam. Quare bonum non potest habere statum, & exercitium appetibilitatis, nisi sub aliquo esse, vel ordine ad esse ad quod mouet ipsum efficiens, seu inclinationem eius, vt agat, & velit, quia propria ratio formalis extra quam non potest exire bonum, seu appetibile, est mouere per modum finis, seu in ordine ad finem. Vnde si complacet hoc bonum voluntati seu inclinationi, debet placere secundum aliquod esse, quia solum sub illo induit rationem formalem finis, & exercitium bonitatis & appetibilitatis, licet non semper efficaciter ad assecutionem, seu executionem talis esse, voluntas moueatur per actum intentionis: sufficit quod si habet simplicem complacentiam, habet principium & inchoationem exercitij causæ finalis, si quidem sub illa ratione attingi debet à simplici complacentia, sub qua potest intendi, & consequi, illud enim intenditur consequi per media, quod priùs placet per amorem, & complacentia enim de obiecto aliquo de se potest esse principium intendendi assecutionem eius, licet ex libertate voluntatis quandoque possit sistere in complacentia, & non transire ad intentionem, aut ex defectu mediæ, vel ex alia causa; Quare in ipsa prima & simplici complacentia sub ea ratione formali debet obiectum seu finis complacere, sub quo potest postea intendi, si voluntas velit: complacentia ergo fertur in bonum sub aliquo ordine ad esse, quia pertinet ad rationem formalem finis sub exercitio finis.

Quare ad argumentum dicimus quod simplex complacentia etiam fertur in obiectum sub ratione existentia, & esse, non vt assequendum per

media, & efficaci conatu, sed ut placens & conueniens voluntati, ita ut illud ipsum quod tanquam assequibile per media obicitur intentioni, ut placens proponatur sine mediis simplici effectui: est autem assequibilis res sub esse, & non abstrahens ab esse: placere ergo debet ipsa res secundum aliquod esse, vel ordinem ad esse, vel verum, & possibile, vel fictum, & imaginatum. Et ideo recte intitulimus *tomo preced. disp. 6. art. 3. solut. ad 1.* quod quia finalizatio est circa assecutionem rei, non potest mouere voluntatem nisi per ordinem ad aliquod esse, ubi locuti sumus de assecutione abstrahendo ab efficaci vel inefficaci, quod statim ibi explicamus §. *Ad aliam probat.* distinguendo de assecutione ut pertinet ad intentionem, vel ad simplicem complacentiam, & assignando quomodo in utroque casu voluntas respiciat aliquod esse, saltem per modum conuenientiae & coniunctionis ad ipsam voluntatem cui placet. Quod totum non currit in creaturis possibilibus, ubi solum consideratur quidditas sine aliquo exercitio existentiae, etiam per modum conuenientiae, sed solum capacitas, seu non repugnantia ad esse per modum praedicati intrinseci pertinentis ad realitatem, & entitatem obiectiuam, non per modum finalizantis, & allicientiam, seu affectionem importantis ad appetitum, aut aliquam communicationem vel motionem circa voluntatem, ob statum ita abstractum ab esse.

41 Ad secundam probationem dicitur quod res ficta, aut fabulosa, vel impossibilis, quando placet voluntati, concipitur sub aliquo esse, saltem ficto sub quo apprehenditur illud obiectum ut conforme, & conueniens voluntati, & sic placet ut *supra* diximus. Cum autem instatur, quod etiamabilia sub aliquo esse apprehenduntur, & proponuntur voluntati, immo ipsa possibilitas eorum est possibilitas ad esse, & sic sub ordine ad esse appeti possunt. Resp. quod apprehenduntur sub aliquo esse, distinguo, quantum ad substantiam & absolutam rationem ipsius esse, seu per modum quidditatis, & constitutionis in entitate, transeat, quantum ad respectum, & modum mouendi, & alliciendi, nego. Et hoc est quod diximus *supra* apprehendi ibi bonitatem quasi speculatiue, & quantum ad entitatem & constitutionem suam, non practice, & quantum ad allicientiam, & affectionem. Licet enim bonitas constitutur & confurgat ex perfectione rei, tamen non exercet appetibilitatem, & motionem voluntatis, secundum quod consideratur in statu omnino absoluto & ad se, & ut praecise constituitur in sua quidditate, & capacitate ad esse, sed ut redditur respectiua, communicatiua, & diffusiuu sui. Non diffunditur autem bonitas, nec communicatur, nisi induat respectum aliquem conuenientiae, & communicationis ad id, quod se diffundit, id est, ad appetitum, seu voluntatem. Et ita bonitas sine omni respectu, & in statu purae constitutionis, & nullius communicationis, non est in statu, nec exercitio bonitatis, & appetibilitatis, licet intelligatur tunc esse constituta bonitas entitatiue, seu radicaliter, sed non cum exercitio communicationis, & appetibilitatis, & consequenter sub hoc statu non amatur. In statu autem purae possibilitatis excluditur omne exercitium respectus, & solum consideratur constitutio rei in suis praedicatis sine alio respectu habendi, vel possidendi, vel communicandi, sine quibus respectibus, non datur amor, vel exercitium diffusionis bonitatis. Et ideo ex defectu horum respectuum non sunt res illae in statu, & exercitio appetibilitatis, quia licet perfectionem, & bonita-

tem entitatiuam, & radicalem importent, ita tamen in potentia, quod non solum carent actuali existentia (quod solum non sufficeret ut non amarentur) sed etiam omni ordine ad esse per modum respectus habendi vel communicandi, stante illo statu sine quibus non fit amor. Propter rationem ergo ita absolutam in illo statu sunt indiligibiles, quia sine ullo respectu.

* Dices: Respiciunt omnipotentiam Dei à qua fieri possunt, & possident, seu habent sua praedicata essentialia, & capacitatem ad esse. Cur ergo sub hoc respectu & esse non poterunt placere.

Resp. quod hic respectus non est in ipsis creaturis, quia nihil sunt, sed est denominatio intrinseca orta ex ipsa potentia diuina, unde in se non diliguntur, sed in ipsa potentia, quae est aliquid existens & possidens ipsam vim faciendi quidquid non repugnat. Similiter praedicata essentialia non habentur quasi subiectiue possidendo sub aliquo esse, sed quasi obiectiue, quia connexio illorum praedicatorum non repugnat ut fiat à Deo, & sic est obiectum potentiae eius, & sic creaturae non habent illa praedicata per possessionem sed per connexionem, & per non repugnantiam obiectiuam: sunt enim obiectum omnipotentiae. Et ita solum possidentur intra causas, non in se; unde amantur in se, ut dicemus seq. argumento. Capacitas etiam ad esse non est aliquid possessiue, & subiectiue habitum in ipsis, sed solum obiectiue, id est, non repugnantia ad essendum, quae solum consideratur tanquam vnum ex praedicatis connexis, & essentialibus, quia per hoc entitas illa realis est, quia capax essendi. Hoc tamen totum ita consideratur absolute & abstracte, & per modum constituendi quidditatem in illo statu, qui est status quidditatis in se cum negatione aliorum extra quidditatem, quod sub nullo respectu consideratur. Voluntas autem in diligendo semper est respectiua, & mouetur à respectu, quia vel sibi diligit, vel alteri.

Ad Conf. Resp. quod vniuersalia in statu vniuersalitatis dupliciter considerari possunt. Vno modo cum respectu ad indiuidua, in quibus contrahi, & communicari possunt, & mediante illis exercere suas operationes, & habere esse, licet hoc exercitium non habeat in statu vniuersalitatis, sed tamen habet ordinem ad illud quatenus habet ordinem ad indiuidua, in quibus exercere omnia illa possunt. Alio modo potest sumi status vniuersalitatis non respectiue, sed pure negatiue, prout consideratur natura secundum se praecise cum negatione omnis indiuiduationis, & eorum quae ratione indiuiduationis conueniunt. Si hoc secundo modo sumatur status vniuersalitatis, non relinquit rem appetibilem, sed in pura & absoluta abstractione, sicut mathematica, vel creaturae possibiles; immo in his non est necesse abstrahere ab indiuiduatione, sed solum ab omni respectu, & tendentia ad esse, quod est exercitium indiuiduationis. Et ita illa cognitio sic abstrahens negatiue, & considerans vnumquodque secundum se, est merè speculatiua, non practica, quae respicit res in singulari & cum circumstantiis & exercitio, &c. & ita non deseruit appetibilitatem bonitatis. Si verò primo modo sumatur vniuersale, sic non repugnat quod ametur, quia licet abstrahat ab indiuiduis, & ab existentia, non tamen ab ordine, seu respectu ad istam, & ad illam, & sic potest diligi res in vniuersali, & vagè, sine aliqua determinatione indiuidui, cum ordine tamen ad indiuiduationem; sic enim licet non consideretur natura ut contracta & determinata ad indiuidua, consideratur

sideraretur tamen ut complectens illa, & habens illa subiecta sibi, & consequenter per ea potens exercere, vel communicare suam bonitatem, & sic est in statu appetibilitatis, quia est in statu respectus, & communicationis ad indiuidua, & per indiuidua.

- 44 Tertiò arguit. Deus diligit actu suam omnipotentiam: ergo vult nihil esse impossibile illi: ergo vult omnia sibi esse possibilia, etiam quæ nullo modo facta sunt, neque fient: ergo placet sibi illa possibilitas omnium rerum possibilem, & sic res possibiles ut subsunt isti possibilitati, placere debent propter connexionem cum omnipotentia Dei, quæ omnino stare non potest, si ista possibilitas obiecti sui non stat: debet ergo in ipsa sufficiens bonitas inueniri ut placeat, & ametur; non tamen ut intendatur consequi, quia ista possibilitas non est consequibilis per media, sed necessariò resultat posita omnipotentia, & ex ipsis terminis habetur illa non repugnantia, seu capacitas essendi in rebus possibilibus.

Conf. quia Deus vult non esse istas creaturas de facto, & videt ipsas posse esse, & apprehendit ordinem quem habent ad esse: ergo non esse earum est volitum: si ergo non esse est capax volitionis, quanto magis ipsum posse esse, seu capacitas existendi? Et idem argumentum potest fieri de multis negationibus, quæ sine dubio possunt esse volitæ à Deo, & aliquando cedunt in magnum beneficium, sicut negatio alicuius felicitis euentus, ex quo nasceretur superbia & præsumptio: ergo si negatio potest esse obiectum volitionis ut vestita aliquo ordine ad aliquem finem, cur non possibilitas creaturarum, quæ de se ordinatur ad esse? Addo quod etiam possibilitas ista potest vestiri aliquo ordine extrinseco ad bonum, non minùs quàm negationes: ergo sub illo poterit amari. Antec. prob. tum quia Deus ante omne decretum efficax potest gaudere de possibilitate alicuius rei à se factibilis, & impossibilitate oppositi, v. g. quod sibi sit possibile infundere gratiam, & non infundere vitium, & idem est de quacumque possibilitate cuiuscumque creaturæ, quam velit facere: tum quia si possibilitas aliquarum rerum reuelatur Angelo, sicut multæ reuelantur Beatis, ex his valde possunt laudare Deum de tam mirabili rerum possibilitate: ergo & de illa gaudere, tum quia non potest Deus proponere voluntati suæ existentiam rerum ut volendam, nisi sub esse possibili conceptam: ergo amatur illud esse possibile ut reducendum ad actum, sicut & intelligitur simplici scientia Dei sub esse possibili; & sic non potest reddi vllum discrimen inter simplicem intelligentiam, & simplicem actum voluntatis circa creaturas. Postremò adduci solet locus S. Thom. 1. 3. de verit. art. 4. in 4. ubi dicitur quod *habitus ad volitum est æterna & necessaria secundum quod volitum est in exemplari, non autem ut est in seipso.*

- 45 Ad argumentum Resp. quod Deus diligendo suam potentiam vult nihil sibi esse impossibile, distinguo, nihil sibi esse impossibile ratione possibilitatis actiue, & amando illam, concedo: ratione possibilitatis passiue, & diligendo illam, nego. Ad aliam consequentiam: ergo vult omnia sibi esse possibilia, & placet illa possibilitas, eodem modo, distinguo, possibilitate se tenente ex parte potentiæ actiue, concedo, ex parte potentiæ passiue, nego. Et cum instatur, quia ista possibilitas habet connexionem cum ipsa omnipotentia Dei, taliter quod omnipotentia desineret, si illa possibilitas non esset, id autem quod habet

connexionem cum omnipotentia Dei, non est possibilitas actiua, sed passiua, quia possibilitas actiua non est obiectum diuinæ omnipotentiae, sed potentia ipsa id autem quod habet connexionem cum omnipotentia est id quod est obiectum eius, & ex parte obiecti se tenet.

Resp. quod possibilitas passiua, & ex parte obiecti se tenens habet connexionem essentialem cum omnipotentia, distinguo per modum cuiusdam non repugnantiae, vel denominationis extrinsecæ, concedo; per modum alicuius perfectionis, seu positiue entitatis cum respectu communicationis, & diffusionis sui, nego: ergo placet & amatur illa possibilitas, distinguo, ratione sui, & ex propria bonitate, nego, ratione potentiæ actiue seu omnipotentiae, quæ est possibilitas actiua, transeat. Non enim omne quod habet connexionem cum alio amatur, amato illo priori, præferim in simplici complacencia, quæ præcisua est, ut *suprà* diximus, & potest in vno obiecto inuenire aliquid quod ei placeat, & aliud ei connexum non attingere, licet si efficaci amore velit rem ponere in esse, etiam illud quod ei non placet debeat non recusare, licet non semper amare; nam multæ negationes aut priuationes possunt habere connexionem cum aliquo, positiuo quod quidem amatur, non tamen priuatio aut negatio illa amatur seu placet, sicut aliquis diligit fidem non tamen amat obscuritatem illi necessariò annexam, ita quod complacet in illa, & qui amat adulterium, non placet sibi priuatio rationis, seu iustitiæ, quæ illi necessariò est annexa; istæ enim priuationes nihil bonitatis habent in se unde diligantur, seu placeant ratione sui, aliàs si quidquid est connexum alteri secundum aliquem defectum vel priuationem aut negationem deberet placere & amari, hoc ipso quod placeret id cui est annexum, sequeretur mille absurda: nam quia ad ignem v. g. sequitur necessariò fumus, qui amaret ignem, deberet complacere de fumo, & qui vult hominem in statu huius vitæ, debet ei placere mortalitas, fames & sitis, & cetera quæ homines in hoc statu sequuntur, & qui vellet sibi nasci prolem, debebat complacere de peccato originali, quod eam per se sequitur, & qui vellet poenitentiam aut patientiam, deberet velle malum vel culpam, sine quibus non est. Quæ omnia cum absurda sint, manifestum est illam consequentiam claudicare: Amatur necessariò omnipotentia: ergo & creaturæ possibiles sub illo statu possibilitatis, quia creaturæ sub illo statu sunt sub pura negatione habendi esse, & cum non repugnantia ad esse, quod totum pertinet ad negationem, & capacitatem essendi, non ut respectiuam, & communicationem sui, vel communicationem à voluntate Dei accipientem, sed ut est in absoluta præcisione constitutionis & quidditatis. Et mirum est quod sub latiori statu, nempe sub existentia, illæ eadem res liberè amentur à Deo, & sub infeliciore, id est, sub pura ratione possibilitatis teneatur Deus illas amare ut connexas cum omnipotentia. Quod si ut possibiles liberè amat potest ergo non amare, & sic displicere ei potest illa possibilitas: ergo & connexio cum omnipotentia displicebit.

Ad Conf. Resp. quod non esse illarum creaturarum non est volitum positiue, & per modum complacentiæ, sed negatiue, & per modum nolitionis, quia excludit Deus eorum esse, & hoc non pertinet ad simplicem affectum & complacentiam, de qua solum loquimur, sed ad efficacem voluntatem, quæ efficacem nolitionem Deus habet

habet de illo esse talium creaturarum. Et cum inde ducitur argumentum ad probandum quod etiam ipsam possibilitatem creaturarum diligit, quia est possibilitas ad esse & ad existentiam, & sic sub tendentia & ordine ad esse considerantur illae creaturae: iam responsum est *supra*, quod non est tendentia per modum communicationis, sed per modum non repugnantiae & capacitatis obiectivae, & hoc non sufficit ad amorem, quia requiritur aliqua communicatio, seu diffusio sui, qua appetibilitas ista sub aliquo respectu ametur, & placeat; omni autem respectu, & communicatione remota, non est amor, nec complacentia, nisi in potentia & capacitate, sicut ex parte creaturarum sola capacitas, & non repugnantia bonitatis est, non bonitas formaliter. Ad id quod dicitur de negationibus volitis; Resp. nimum probare, quia illae negationes si sunt volitae, etiam efficaciter volitae sunt, quia pro beneficio aliquando de facto dantur. Et sic dicimus quod negationes istae non sunt volitae positivae sed negativae, quia nolendo aliquod esse, dicitur esse volitum non esse, sicut Deus nolendo alicui prosperum euentum, dicitur velle negationem euentus, tamen non est illa negatio quae complacet & amatur, sed esse oppositum est nolitum, & hoc modo etiam Deus habet nolitionem de esse creaturarum possibilitatem, non tamen vult aut complacet de possibilitate, seu de quidditate earum nuda, aut de non repugnantia, aut de possibilitate obiectiva, sed earum esse non vult.

47 Ad id quod dicitur de ista possibilitate sub aliquo respectu extrinseco considerata, quod potest diligi, Resp. quod manente statu possibilitatis & non posita ordinatione, vel reductione aliqua ad esse, non possunt res possibiles in se diligi, bene tamen ex parte potentiae Dei in qua continentur, ut explicatum est.

Vnde ad primam probationem, quod videlicet Deus gaudet de possibilitate creaturarum quas potest facere, & de impossibilitate eorum quae non possunt fieri. Resp. gaudere Deum de illa possibilitate ut tenet se ex parte potentiae activae Dei, non ex parte creaturarum, quae in se nihil sunt, nec habent aliquam bonitatem in statu & exercitio diligendi, sed solum in potentia diligibilem, ut dictum est.

Ad secundam similiter dicitur quod manifestatio alicuius creaturae possibilis facta Angelo vel Beato inducere potest in laudem, & amorem ipsius divinae potentiae, & possibilitatis creaturae, ut possibilitas activa est, & ex parte Dei se tenet, non ex parte possibilitatis passivae, ut stat sub illo statu praecise: si enim, ut diximus, creaturas ipsas Deus non amat, licet perfectissime videat, quo modo ex eo quod reuelentur Angelo vel Beato induent aliquam maiorem perfectionem, ut amentur in se, & ratione propriae bonitatis.

Ad tertiam probat, dicitur quod Deus proponens per intellectum existentiam rerum suae voluntati, ut illam velit, non proponit existentiam sub statu possibilitatis, retinendo illum, ita quod voluntas possit ferri in illum statum, ipso manente, sed proponit sub statu possibilitatis ut exuendo & relinquendo, & sic iam ordinantur creaturae ad esse, unde non mirum, quod amentur, non solum simplici affectu, sed etiam efficaci; sed tunc possibilitatis status non tenet se ex parte termini ad quem qui amatur, sed ex parte termini à quo qui relinquitur. *Ad locum D. Thome* quem affert Gonzalez *hic disp. 52. sect. 2.* ego fateor me illum non inuenire, licet diligenter quaesierim. Si tamen illa

verba alicubi dicit, sensus est manifestus de voluntate Dei, ut fertur ad creaturas intra ipsum Deum, & ut sunt in idea seu exemplari, non ut fertur ab ipsis extra in suo statu merae possibilitatis.

Argumenta quae possunt fieri pro suspensione omnimodae divinae voluntatis *supra* soluta sunt tractando hanc difficultatem. Ceterum pro facili expeditione aliquorum, quae solent multiplicari in hac parte, adverte haec tria.

Primum, quod aliud est Deum pro aliquo instanti, seu consideratione nostra aliquid non facere, seu negativè se habere erga aliquem effectum, aliud suspensivè se habere, seu absque aliquo actu positivo: Nam quando negamus voluntatem divinam esse suspensam circa aliquod obiectum, nec volendo, nec nolendo, loquimur de suspensione habita de facto, & in re, & secundum aliquod instans reale, quia hoc pertinet ad quandam imperfectionem voluntatis, ut ponderatum est *supra*. Quod autem sub aliqua consideratione, & signo rationis intelligatur voluntas divina nondum liberè diligere, nec volendo, nec nolendo, aut negativè se habere erga aliquem effectum pro illo signo, dummodo concomitanter, & in re actum aliquem liberum habeat, & determinatè resolvat, nullum est inconueniens. Sic dicimus quod pro illo instanti, aut signo rationis, quo generatur Verbum, nondum intelligitur Deus determinatè liberè velle, aut habere scientiam visionis, licet in re utrumque sit, & pro illo signo quo procedit Spiritus sanctus non intelligitur Deus velle liberè, sed tantum necessariò, quia processio illa per se & in quarto modo solum procedit ab amore necessario, amor autem liber creaturarum non conducit ad productionem Spiritus sancti, quia liber est; processio autem Spiritus S. non est libera, sumpta libertate pro indifferencia contingenti, licet concomitanter, & in re non sit negandus iste amor liber in processione Spiritus S. nec visio creaturarum futurarum in processione Verbi. Similiter pro illo signo rationis quo Deus eligit quosdam ad gloriam, & alios relinquit, dicitur negativè se habere erga istos quos relinquit, quae est reprobatio negativa, non quia in re non detur concomitanter etiam actus positivus excludendi illos, & reprobatio ipsa positiva, sed quia pro illo instanti & signo rationis nondum intelligitur Deus, nisi tantum occupari circa electos, nondum verò decernere circa reprobos, in re tamen decernit. Vel si tunc pro illo instanti efficaciter etiam repellit reprobos à regno (de quo *inf. disp. 10. de reprobatione*) actu positivo nolitionis illos excludit à regno, non suspensivè se habet.

49 Secundum est quod voluntatem divinam non manere suspensam, sed actu positivo debere aut velle, aut nolle creaturas, supposito quod cum summa resolutione, & actualitate procedit, non est aut propter necessitatem ex parte ipsius obiecti, quasi ipsum esse, vel non esse rei, etiam disjunctivè sumptum, propter suam bonitatem, aut perfectionem necessitet ad alterum actum positivum divinam voluntatem, aut quia ad hoc ut creaturae non sint, nec existentiam habeant, requiratur actus nolitionis positivus, cum cõstet, quod Deo suspendente actum, & quocumque modo non habente volitionem positivam dandi esse creaturis, ipse sine vilo esse manerent. Tota ergo ratio habendi actum positivum, & non manendi in pura suspensione non ex obiecto creato, aut ex non esse illius desumenda est, sed ex ipsa

ratione

ratione subiecti, seu voluntatis, quæ cum perfectissimo & actualissimo modo procedat erga obiecta sua, & perfectiori modo tangat obiectum, & denominet voluntatem actus positiuè terminatus, quàm purè suspensus, oportet quòd positiuè attingat siue esse, siue non esse creaturatum.

50 Tertium est, quòd aliqua attributa diuina, quæ vel determinatas virtutes circa voluntatem ponunt, vt misericordia, liberalitas, magnificentia, vel executionem, & productionem ad extra, vt omnipotentia, & similia, non est necesse quòd habeant actum positiuè tangentem creaturas, sicut voluntas: posset enim non exercere misericordiam, aut libertatem, aut productionem omnipotentiam, si nullus vellet producere creaturas. Ratio differentia est, quia illa priora attributa sunt determinata, & restricta solum ad benefaciendum creaturis, vel ordinem in illis constituendum, vt iustitia, & prouidentia. Vnde subordinantur actui determinato voluntatis, qui est amor, & volitio dandi esse creaturis, quo cessante, ipsa attributa non habent actum, non ex suspensione sua, sed ex cessatione materiae circa quam versantur, quia non ministrant nolitioni qua Deus vult creaturas non esse, sed volitioni. Similiter omnipotentia non versatur circa ipsum velle, vel nolle, sed circa executionem ad extra efficiendo ipsos effectus, & sic solum est executiua diuinæ volitionis, qua vult creaturas, non verò ipsius nolitionis, cessante verò volitione creaturarum, cessat materia, seu actus cui ministrat executio. Cæterum voluntas ipsa vniuersaliter complectitur non solum esse creaturarum, sed etiam non esse; Vnde si non habet actum, non est ex defectu materiae, quia ipsum non esse creaturæ materia & obiectum est nolitionis, & ideo si actum non habet, solum potest esse ex suspensione actus, non ex defectu materiae, suspensio autem semper sonat imperfectionem & minus determinationis & actualitatis, vt supra explicatum est.

ARTICVLVS VII.

*Quæ obiecta velit Deus necessariò,
quæ liberè?*

1 Dico primò seipsum & quidquid formaliter diuinum est, & intra Deum, Deus diligit necessariò. Est sententia communis: nam & de voluntate creata id communiter Theologi censent quòd necessariò fatetur in Deum clarè visum, tam quoad specificationem, quàm quoad exercitium. Videatur D. Thom. in presenti quæst. 19. art. 3. vbi dicit quòd voluntas diuina necessariam habitudinem habet ad bonitatem suam, quæ est proprium obiectum eius. Vnde bonitatem suam esse Deus ex necessitate vult, sicut & voluntas nostra ex necessitate vult beatitudinem. Vbi manifestè docet nostram conclusionem, quod Deus amat necessariò suam bonitatem, quidquid autem formaliter intra Deum est, est ens diuinum: ergo habet bonitatem diuinam: ergo necessariò amatur. De eodem videri potest D. Thom. q. 23. de verit. a. 4. vbi inquit quòd respectu principalis voliti, quod est sua bonitas, voluntas diuinam necessitatem habet, non quidem coactionis, sed naturalis ordinis, quæ libertati non repugnat secundum Aug. 5. de ciuitate c. 10. Idem docet de voluntate nostra, quòd de necessitate velit beatitudinem, & de necessitate velit Deum clarè visum, in

quo est tota & vniuersalissima ratio boni, hac 1. p. q. 82. art. 1. & 2. & 1. 2. q. 10. art. 2. & denique 1. contra gent. c. 80. idem docet de voluntate diuina & 1. p. q. 41. art. 2. ad 3.

Ratio huius conclusionis consistit in assignanda radice & fundamento, vnde vt bonitas habet ferri necessariò in aliquod obiectum, quando operatur cum plena cognitione, & aduertentia: nam si aduertentia plena careat, fertur necessariò in obiectum sibi propositum, quia proponitur sine indifferentia, & sic non potest ab illo voluntas modo indifferenti moueri, sed operabitur modo determinato, & contracto ad vnum, ob imperfectum modum apprehendendi obiectum, qui est modus necessitatis oppositus indifferentia dominij, & libertatis. At verò quando est plena aduertentia & cognitio non potest voluntas necessitari, nisi obiectum propositum ita vniuersaliter, & ad plenum illi adæquatur, quod si relinqueret ipsum obiectum, transiret & relinqueret rationem suam formalem & specificatiuam ipsa voluntas. Quare necessitas voluntatis circa aliquod obiectum sumitur ex necessitate quam habet recedendi, aut relinquendi suam formalem & specificam rationem. Est autem formalis ratio sub qua voluntas tendit ad suum obiectum ipsa ratio boni, sicut formalis & propria ratio intellectus est ratio veri, & formalis ratio visus est ratio lucidi seu visibilis. Hæc autem ratio boni sub qua voluntas tendit in suum obiectum & inclinatur, non est aliqua ratio boni particularis & determinatis, sed tota collectio, & vniuersalitas boni appeti potest ab ipsa, quia sicut intellectus omnem rationem entis & quamcumque veritatem potest intelligere, sic & voluntas amare: sequitur enim voluntas intellectum. Vbi ergo solum offertur voluntati bonum particulare, cum non adæquet totam rationem formalem voluntatis, non alligatur illi de necessitate, quia extra illud potest in alio inuenire formalem rationem suam, scilicet rationem boni, & sic relinquere illud particulare bonum, & duci ad istud, vel etiam relinquere istud, & inclinari ad aliud, quia in quacumque inuenit rationem suam formalem independentem ab alio. Si verò offeratur ei aliquod bonum continens omnem collectionem boni vniuersalissimi, quia infinitum bonum est, si posset illud relinquere voluntas, posset excedere totam sphaeram & collectionem suæ rationis formalis, quod est impossibile, quia posset relinquere totam vniuersalitatem boni, Deus autem in seipso clare visus, est vniuersalissimum bonum, quia infinitum; vnde dicitur Exodi 33. *Ego ostendam tibi omne bonum*, ad significandum beatitudinem, quæ in Deo clarè viso consistit: ergo voluntas necessitatur ad bonitatem diuinam clarè visam tanta necessitate, quanta ad non excedendum sphaeram suæ formalis, & specificæ rationis, & multo magis Deus qui non solum habet bonitatem suam visam, sed etiam comprehensam. Et est exemplum ad hoc explicandum in materia prima, quæ respicit pro adæquato termino suæ informationis totam collectionem formarum substantialium, & ita per nullam particularem satiatur, nec ita alligatur illi, quod non possit eam dimittere vel amittere. Si autem daretur vna forma, quæ totam illam collectionem formarum sua perfectione contineret, illa totam potentialitatem materiae satiaret, & exhaustiret, nec posset ab ea diuelli.

Dices: Hæc ratio multum probat: nam sicut probat in voluntate esse necessitatem quoad Deum clarè visum, ita probat esse libertatem quoad obiecta,

Etia, seu bona particularia creata : ergo eadem ratione probaretur esse libertatem in aliis extra voluntatem, quæ habent pro obiecto aliquid vniuersale, & non determinantur ad hoc vel illud, sicut appetitus sensitivus fertur ad omne bonum sensibile, & sic licet necessariò inclinetur in bonum sensibile, vt sic, vel in totam collectionem boni sensibilis, tamen in hoc, vel illud bonum sensibile determinatum non feretur ex necessitate, quia in nullo inuenit adæquatam rationem sui obiecti. Similiter visus licet specificetur à colorato vt sic, non tamen à colore determinato, puta viridi, vel rubeo, & sic erit liber respectu particularium colorum; & materia prima licet necessitetur à tota collectione formarum, non tamen ab ista, vel illa forma determinata, & sic liberè se habebit ad illas. Sicut ergo argumentum hoc nihil probat in istis, nec etiam probabit in voluntate dari libertatem, & consequenter, neque necessitatem respectu Dei clarè visi.

4 Resp. argumentum optimè probare necessitatem, & inclinationem naturalem voluntatis in Deum clarè visum ratione adæquationis cum tali obiecto ex parte rationis formalis, à qua non potest voluntas recedere, aut declinare : esset enim declinare à sua specificatione & essentia. Similiter probat ratio quòd ex parte obiecti nulla datur ratio necessitans voluntatem, quando bonum est particulare, & non totam rationem boni in se continet. Quòd verò probetur absolurè esse libertatem, seu indifferentià cum dominio super attingentiam talium obiectorum, supponit vltra hoc aliud principium, nempe quòd illa obiecta non adæquantia totam rationem formalem & specificam potentie proponantur cum iudicio indifferenti, & conferente proportionem vnus cum altero, non ex instinctu quodam determinato & ad vnā tantum partem inclinante, sed vtramque partem, & proportionem rerum conferente, & sic determinationem accipiente ex arbitrio suo, non ex instinctu alterius. Et dico oriri ex cognitione collatiua, non collatiua formaliter solum, sed collatiua formaliter, vel eminenter, vt in Angelis, & Deo. Et ita D. Thom. probat in hac q. 19. art. 11. esse in Deo liberum arbitrium quia non agitur ex instinctu, sed ex iudicio indifferenti, & q. 83. art. 1. probat quod homo est liberi arbitrij, quia non operatur ex instinctu, sed ex collatione iudicij. Quare non sufficit ad rationem arbitrij habere se obiectum inadæquatè, & non ex alligatione ad determinatum & particulare obiectum suæ rationis formalis sed vtriusque requiritur quòd ex cognitione illius indifferentiæ, & inadæquationis se moueat, quia liberum arbitrium solum est in se mouentibus ex cognitione finis, non in his quæ ex solo instinctu mouentur ab alio. Et ideo appetitus sensitivus licet habeat pro obiecto vniuersalitatem sensibilem, non tamen mouetur liberè etiam circa particularia sensibilia, quia non ex collatione iudicij, & indifferentia, & comparatione obiectorum mouetur; multò minùs visus circa particulares colores, ad quos in adæquatè se habet, aut materia prima circa particulares formas liberè se habet, licet inadæquatè, quia ista non se mouet ad formas per cognitionem, ille non se mouet ad colores per appetitum, nec per collationem iudicij, sed à coloribus mouetur determinatè.

5 Præter hanc rationem hucusque explicatam, quæ communis est voluntati diuinæ, & nostræ, ad probandum quòd Deus clarè visus diligitur necessariò, quia scilicet in eo manifestatur tota plenitudo & vniuersalitas boni, & nulla ratio mali; est

alia peculiaris ratio in Deo ad amandum se necessariò, quia ipse amor actualis est ipsamet diuina essentia : ergo tam necessariò se amat, quàm necessariò existit ipse actus, & ipse Deus. Pater consequentia, quia ipse actus amoris non egreditur à potentia aliqua Dei, reducendo illam ad actum: sic enim distingueretur ab illa, sed est ipsa entitas, seu essentia diuina : ergo sicut naturaliter & necessariò Deus est suum esse, ita naturaliter & necessariò amor Dei est ipsum esse Dei, & ipsa diuinitas; ergo necessariò amat ipsum Deum, quia necessariò est illi coniunctus, imò & summè identificatus cum illo, non solum entitatiuè, & subiectiuè, sed tanquam cum obiecto amabili, id est, vt summa bonitate à se amata, quia etiam vt obiectum est perfectio amoris, & sic necessariò illi coniungitur.

6 Confirm. quia obiectum se habet vt perfectio appetitus, & vt perficiens ipsum : ergo amor qui necessariò habet summam perfectionem, necessariò habet suum proprium appetibile, seu bonitatem quam appetit : Amor autem Dei habet summam perfectionem, cum sit ipsa substantia Dei: ergo necessariò habet coniunctam suam bonitatem, & obiectum quod diligit, & hoc est ipsa bonitas diuina. Plures rationes vide apud D. Thom. 1. cont. gent. c. 80. cit.

Quomodo autem necessaria ista volitio circa obiectum summè bonum, etiam si necessaria sit, perfectior sit, & magis intima, & voluntaria, vtpote totam voluntatis vim, & vniuersalitatem adæquans : dicemus Deo dante 1. 2. circa q. 6. Videatur D. Th. 1. p. q. 82. art. 1.

7 Sed inquires ; an rationes istæ probent dilectionem hanc esse in Deo necessariam, non solum quoad specificationem, sed etiam quoad exercitium ? Et est ratio dubitandi, quia obiectum vt obiectum solum est specificatiuum actus : ergo necessitas in actu proueniens ab obiecto solum est necessitas specificatiua, seu quoad specificationem.

Resp. nihilominus probare has rationes vtramque necessitatem. Et quidem vltima ratio deducta ex perfectione diuini actus, quæ identificatur cum ipso esse, & substantia Dei, manifestè id ostendit, quia si quoad exercitium haberet libertatem, posset non amare se, & consequenter non habere sibi coniunctam perfectionem sui proprii obiecti, & sui appetibilis, cum quo habet summam identitatem quod esset carere perfectione. Ratio autem deducta ex vniuersalissima ratione bonitatis, quæ est in tali obiecto, id est, in bonitate diuina, probat necessitatem quoad exercitium, non ex præcisa ratione obiecti, sed ex ipsa natura, & ratione voluntatis supposita tali ostensione, & propositione obiecti. Vt enim diximus in libris de anima q. 12. art. 4. ex Caietano vt M. Bañez 1. p. q. 82. art. 2. necessitas quoad exercitium, ita quod voluntas non possit aliam operationem exercere, nec eam suspendere, non oritur ex obiecto vt obiectum est, quia sic obiectum solum specificationem tribuit, sed nascitur ex subiecto; & statu eius circa tale obiectum : ipsa enim natura voluntatis hoc petit ex vi sua, quòd circa tale obiectum clarè visum, & in se, quia est vniuersalissimum bonum, & omnem capacitatem & vniuersalitatem eius adæquat, toto pondere, & tota vniuersalitate sua feratur. Vnde non est indifferentia in voluntate ad cessandum ab actu, quia cum illud bonum sit ita adæquatum toti capacitati voluntatis, quod totum eius conatum & pondus ad se trahat, cum ex nulla parte aliquid mali,

mali, vel carentia boni appareat, non potest nec ipsū obiectum, nec cessatio ab eo proponi, ut displicens, & disconueniens, quia idem est proponi sibi ut conuenientem cessationem ab illo amore, atque proponi sibi ut conueniens non velle esse beatū, quia in illo obiecto, & exercitio circa ipsum est tota & adæquata beatitudo. Non velle autē esse beatum est contra rationem formalem, & specificatiuā voluntatis. Ex ipsa ergo natura & pondere voluntatis, & propria ratione formali illius oritur, quod viso clarē Deo sit necessitata in exercitio ad amandum illum.

8 Dico secundò: Non est inconueniens ponere in diuina voluntate aliquam necessitatem erga obiecta creata extra statum possibilitatis posita, nempe necessitatem quoad specificationem, vel exsuppositione alicuius prioris voliti, ita tamen quod ista necessitas oriatur ex ipso Deo in voluntate non ex obiecto volito. Sumitur hæc cōclusio ex D. Thom. 1. contra gent. c. 83. ubi ostendit Deum velle alia à se necessitate aliqua cōditionis, vel suppositionis, & necessitatem etiam ex suppositione admittit in hac q. 19. a. 3. & 25. de verit. a. 4. Similiter necessitatem quoad specificationē admittit in hac 1. p. q. 21. a. 1. ad 2. ubi dicit quod cum bonum intellectum sit obiectum voluntatis, impossibile est Deum velle, nisi quod ratio sua sapientia habet, &c. Ergo quoad specificationem necessitatur voluntas diuina erga bonum suæ sapientiæ ratione regulatum, ita ut circa illud non possit habere displicentiam, licet in exercitio non necessiter hoc vel illud bonum determinatē eligere. Item in 1. contra gent. c. 95. expresse docet, Deum non posse velle aliquod malum, quia semper operatur operatione virtutis: constat autem quod virtus ex sua specificatione necessariò fertur in bonum, quia est id quo aliquis bene operatur: voluntas ergo diuina quæ per essentiam suam est virtus, non minùs necessitatur quoad specificationem erga bonum, ita ut non sit libera, nec possit velle malum, sicut necessitatur ipsa virtus.

9 Ratio autem vtriusque partis ea est, quia neutra necessitas, scilicet ex suppositione & quoad specificationē officit libertati, & non dicit imperfectionē, sed potiùs perfectionem: ergo Deo neganda non est. Anteced. prob. quia vtraque nascitur ex ipsa libertate aut perfectione volentis: nam necessitas ex suppositione nascitur ex eo quod liberè aliquid est volitum, & inde sequitur necessariò esse volendū id quod illi rei per se est annexum, sicut ex suppositione quod Deus vult esse hominem, debet necessariò velle creare animam, quia sine anima non potest intelligi homo, & ex eo quod Deus vult dare gloriam Petro, necessariò non potest reddi nolita illa gloria, quia actus Dei est immutabilis & æternus. Et sic illa prima necessitas suppositionis oritur ex ipsa libera volitione alicuius obiecti, qua supposita, necessarium redditur necessitate, consequēti, id est necessitate quæ fundatur, & sequitur ad ipsā liberā volitionē quod ametur id quod tali obiecto vel actui necessariò est annexum: ergo talis suppositionis necessitas non destruit libertatem, quia ex ea oritur, & ad eam consequitur. Imò pertinet ad perfectionē eius, quia esset diminuta libertas, & sibi cōtradicens, si volendo enim obiectū, non vellet id quod ei necessariò est annexum; sic enim vel recederet à priori volitione, & esset incōstans, vel vellet duo opposita, & sic esset sibi contradicens. Similiter necessitas quoad specificationem oritur ex perfectione libertatis, & ex ipsis visceribus rationis eius formalis, quia ad perfectionē volūtatis, & ad rationem eius formalem pertinet ita respicere bonū, quod ab eo non possit deficere, nec velle

Ioan. à S. Thoma in 1. part. D. Thoma.

aliquid, nisi sub ratione boni, quia ad perfectionē libertatis, & voluntatis pertinet ut recta sit, & recte amet quicquid amat: si enim non recte amat, peruersa est & defectuosa: Ergo non posse non esse rectam perfectio est, quia posse non esse rectam est posse deficere à perfectione, & rectitudine, & quāto ab ista deficit voluntas, deficit à perfectione, & sic imperfecta est. Necessitas ergo volēdi bonum, & rectum, & non deficienti ab ipso, simpliciter est perfectio, & non contrariatur libertati, quia potiùs eā firmat, & consolidat in sua ratione formali, quæ est ordo ad bonum sub ratione boni, & hæc est necessitas quoad specificationem, id est quoad speciē actus circa tale obiectum, quod est bonū, ita quod voluntas si circa bonum & rectum versetur, nō nisi persequendo, & amando versari possit. Vnde optime dixit S. Th. 1. p. q. 62. a. 8. ad 3. quod liberum arbitrium diuersa eligere possit, seruato ordine finis, hoc pertinet ad perfectionem libertatis eius. Sed quod eligat aliquid diuertendo ab ordine finis, quod est peccare, hoc pertinet ad defectū libertatis. Vnde maior arbitrii libertas est in Angelis qui peccare non possunt, quàm in nobis qui peccare possumus. Sic ergo Deum esse necessitatum ad non peccandum, & ad volendum quod iustum & rectum est, si voluntas habeat actum circa illud, & ad abominandum quod malum est, perfectio est voluntatis & libertatis eius.

Et ex hoc manet probata secunda pars conclusionis, quod ista necessitas non ex ipso obiecto nascitur, sed ex ipso Deo quia nullum obiectum creatum potest necessitare ipsam voluntatem diuinam cum sit ea inferius, & infinitè imperfectius. Vnde non supponitur bonitas creata ad diuinam voluntatem, quæ eam moueat sed ab ea deriuatur bonitas quam amat: immò hæc est etiam ratio quare necessitatur quoad specificationē Deus circa amorem boni, quia omne bonum vel est ipse Deus, vel deriuatum à Deo, nec aliud est in Deo erga creaturas amare, quàm dare: ergo id quod amat tale est, quod non possit odio haberi, quia à Deo est: ergo necessitatur quoad specificationem à seipso. Et similiter necessitas ex suppositione à se incipit, quia ex eo quod liberè aliquid vult, necessitatur ad volendum id quod tali obiecto connexum est: ergo illa necessitas oritur ex priori volitione. Non ergo primordialiter ab obiecto nascitur aliqua necessitas in voluntate diuina, sed ab ipsamet deriuatur. Simpliciter ergo quæcumque extra Deum sunt, liberè vult quoad exercitium, & efficacem voluntatem, qua dat eis esse.

Dico terciò. Nulla necessitate obligatur diuina voluntas in ordine voluntatis efficacia, & productiua rerum in esse ad amandum ea quæ meliora sunt in esse physico, sed neque ad ea quæ meliora sunt in esse morali, aut ad maiorem ipsius gloriam videntur conducere absolutè & secundum se, sed semper eligit meliora respectiue, id est secundum proportionem & respectum ad finem præsuppositum, & ad suæ sapientiæ ordinem, & dispositionem. Loquimur in hac conclus. de voluntate, & amore efficaci qui versatur circa creaturas existentes. Nam circa merè possibiles iam supra diximus Deum non habere amorem, nisi quatenus continentur in omnipotentia sua. Quod si aliquam de eis habet complacentiam, vnamquamque æstimat, & vult iuxta gradum suum, & non aliter. Loquendo ergo de voluntate efficaci, qua res producuntur in esse, prima pars conclusionis extra omnem controuersiam est; constat enim quod vltra omnem creaturam quam Deus de facto produxit in hoc vniuerso, vel producer, posse facere alias species, & indiuidua perfectiora,

N. &

& ea quæ fecit, in accidentibus meliorare sine termino, quia potentia eius infinita est, & infinitis modis participabilis, & sic qualibet data, potest alia melior fieri: ergo non necessatur voluntas diuina ad eligendum, & volendum perfectiora in esse physico, & ad dandum eis esse, sed infinita reliquit in statu meræ possibilitatis, quibus si daret esse, perfectiora essent his quæ modò produxit: sicut etiam ex Angelis & hominibus quoad esse supernaturale gloriæ multos reliquit nobiliores in esse naturali, & contemptibilia mundi elegit, ut confundat fortia & ea quæ non sunt, ut ea quæ sunt destrueret, ut non gloriatur omnis caro in conspectu eius, 1. ad Cor. 1.

- 12 Circa secundā partē conclusionis aliqui hærent, putantes Deum morali quadā necessitate eligere id quod magis decet suam gloriam, attentis omnibus circumstantiis, non quia semper eligat id quod melius est secundum se, sed quod comparatiue est melius, id est decentius ad suam gloriam omnibus attentis, sicut oculus secundum se est melior aure, & pede, non tamen debuerunt omnia membra esse oculi, quia id non erat melius comparatiue ad totum corpus, & consequenter neq; comparatiue ad decentiam diuinam, & providentiam, quæ magis prouidet toti, quàm parti. Et pro hac sententia stat P. Granados hic disp. 3. sect. 2. Ruiz disp. 9. & 10. de voluntate. Cui refragatur Suarez 1. tomo 3. p. disp. 4. sect. 3. in fine, Vasquez 1. pendisp. 107. cap. 2. cum multis aliis quos pro se citat P. Alarcou tract. de voluntate disp. 3. c. 7.

- 13 Caterum his ista modica videtur, & ex doctrina D. Thom. eam compono. Sub duplici statu possumus considerare diuinam voluntatem. Primò, supponendo aliquem determinatum finem, & statum rerum, quo voluto, & amato iuxta suam sapientiā, reliqua omnia in pondere & mensura, & ordine decentissimo constituit ad maiorem gloriam suam, non absolute, sed pro illo statu, & ad hoc tenetur debito morali iustitiæ suæ distributioni, seu prouidentia suæ, quæ rectissima est. Alio modo potest considerari voluntas diuina absolute antequam determinatum aliquem statum rerum & finem eligat, & tamen intellectus diuinus proponit illi infinitos rerum ordines, & omnes diuitias omnipotentia suæ, ut ex infinitis rerum combinationibus eligat quod voluerit, ex quibus omnibus potest resultare gloria sua, licet extrinseca, & à qua nullo modo dependet, quia sine illis omnibus perfectissimam gloriam habet in se, & comparatione substantialis & intrinsecæ gloriæ suæ, valde modicus est omnium creaturarum cumulus, & quod perfectiores vel minus perfectæ eligantur à Deo, parui momenti gloria Deo accrescit, scilicet sola gloria extrinseca. In hoc ergo statu, vel in hoc signo considerata voluntate, dicimus nullo debito, aut necessitate morali teneri voluntatem diuinam eligere id quod est maioris gloriæ extrinsecæ, sed potest quod minus est eligere iuxta beneplacitum suum & liberrimæ voluntatis suæ consilium.

- 14 Elicio hanc resolutionem ex S. Thom. qui in 1. ad Arribald dist. 44. quæ unica a. 3. sic inquit. *Modus Deus facit res potest intelligi dupliciter. Vno modo ex parte illa qua exit ab operante, & sic non potest Deus meliori modo facere res quàm facit, quia modus ille sequitur bonitatem & sapientiam facientis, quæ est infinita. Alio modo ex parte facti, & sic absolute loquendo Deus potest facere res meliori modo quàm facit, quia potest eis meliorem modum essendi tribuere: sed ex suppositione diuini ordinis, quo unicuique finem certum prefixit, non potest fieri meliori modo.* Et loquitur etiam de melioratione in ordine ad gloriā Dei, quia eodem tenore loquitur in alio 1. sententiarum dist.

similiter 44. q. 1. a. 2. & dicit quod ex parte ordinis ad finem qui est Deus (ista est gloria Dei) secundum quod cresceret bonitas partium vniuersi, & ordo earum ad inuicem, posset meliorari ordo in finem ex eo quod propinquius ad finem se haberent quanto similitudinem diuina bonitatis magis consequerentur, quæ est omnium finis. Ipsa ergo gloria extrinseca Dei posset melior esse, & tamen non est electa sic de facto à Deo. Et subdit solut. ad 1. quod Aug. loquitur de ordine vniuersi, supposita natura talium partium, quia sic melior ordo esse non potuit. Manifestè ergo tradit nostram conclusionem Videatur etiam hac 1. p. q. 2. 1. a. 4. Et q. 25. a. 6. ad 3. vbi docet quod vniuersi. (suppositis istis rebus) non potest esse melius propter decentissimum ordinem attributum istis rebus à Deo, in quo bonum vniuersi consistit. Posset tamen Deus alias res facere, vel alias addere illis rebus factis, & sic esset illud vniuersum melius. Quibus verbis nostram tradit sententiam, quod scilicet suppositis istis rebus, ex quibus hoc vniuersum constat, non potest esse melius quantum ad decentiam ordinis eis attributi, bene tamen res alias potest facere, aut factis adere, & tunc esset aliud vniuersum, & alius ordo rerum, & illud vniuersum esset melius. Quare non tenetur Deus eligere quod melius est simpliciter, licet ex suppositione alicuius finis, vel status teneatur decentissimum ordinem providere iuxta mensuram & finem ad quem ordinat.

Et ratio vtriusque dicti ex eo desumitur, quia quando Deus determinat aliquam finem, seu statum rerum, illumque eligit, tota decentia, seu bonitas illius status, & illarum rerum quas eligit non iam est absoluta, sed respectiua, & proportionata, videlicet non quantum in se potest esse perfecta & melior, sed quantum pro commensuratione illius finis congruit; Non est autem aliquis finis præsertim vniuersalis & generalis, qui non possit à Deo intendi & consequi multiplicibus viis, & mediis, sicut prædestinationem hominum posset consequi per statum innocentia si durasset, & sine illo ut modò fit, & per redemptionem rigorosam, qualis per mysterium Incarnationis fit, aut sine illa gratis remittendo peccata per gratiam suam; & idem est de multis aliis rebus, quæ diuersis mediis possent consequi. Vnde pertinet ad infinitam Dei sapientiam determinare statum aliquem, & mensuram, seu regulam ponere iuxta quam res determinatè, & in singulari fiant & ordinentur. Et dicimus quod supposita determinatione ista, tenetur decentissimum ordinem eligere debito suæ prouidentia & sapientia, eo quod ordo ille rerum accipit totam decentiam ex respectu ad illum finem sic regulatum per diuinam sapientiam; non potest autem decentior ordo inueniri, quàm qui est regulatus à Deo, & à Sapientia Dei, iuxta proportionem ad finem à se determinatū: licet enim possent res meliores fieri absolute, & meliora media adhiberi, quæ in se entitatiue meliora essent; tamen supposita mensura, & regula Dei qua determinauit hunc finem, incipiunt media induere decentiam quandam respectiuam & conuenientiam, quatenus deseruiunt & adæquantur, non solum fini illi absolute & secundum se, sed ut determinato, & mensurato per diuinam sapientiam, & bonitatem: sed ordo qui reperitur in mediis in ordine ad consequendum finem ut regulatum & mensuratum à Deo, ex hoc ipso habet maiorem & superiorem decentiam, quàm quodcumque aliud medium solum consideratū ad istum finem in sua entitate, aut ad quæcumque aliū finem in sua entitate meliorem, sed nondum à Deo mensuratū & regulatum & determinatū, & Deus tenetur debito suæ prouidentia, & suæ iustitiæ atq; honestatis ordinare omnia

omnia media ad regulas suæ sapientiæ, & bonitatis, & ad finem illum non absolute in se, sed vt determinatum & regulatum à diuina sapientia & bonitate: ergo tenetur decentissimum & perfectissimum ordinem seruare, suppositis istis rebus (vt dicit S. Thom.) quia tenetur seruare ordinem regulatum à sua diuina sapientia & bonitate.

16 Ex eodem autem principio manifestatur, quod in illo priori, in quo nondum intelligitur Deus determinare & eligere hunc finem vel statum finis præ alio, nulla morali necessitate, aut debito obligatur ad eligendum id quod melius & perfectius est secundum se, etiam hoc intuitu, vt inde resultet maior gloria Dei. Quia tunc hoc debitum non nascitur ex aliquo priori actu voluntatis diuinæ præsupposito, sed solum proponuntur diuinæ voluntati ipsæ creaturæ, & variæ combinationes possibiles, in quibus sunt varij gradus perfectionis, & consequenter ex illis variè resultare potest gloria Dei magis vel minus, si Deus voluerit illas eligere. Cæterum hæc maior, vel minor gloria vt nascitur ex ipsis creaturis, seu fundatur in illis, nullum debitum, aut necessitatem moralem inducit Deo, vt eligat id quod præstantius & melius est, etiam in ordine ad gloriam suam, prout tenet se ex parte creaturarum, & fundatur in illis, sed potest eligere id quod minus est: Tum quia gloria Dei considerata ex hac parte, id est, vt tenet se parte creaturæ, & in illa fundatur, quacumq; data, & proposita, semper restat alia perfectior & perfectior in infinitum ergo nunquam potest Deus eligere id quod præstantissimum est, sed semper eligit aliquid minus, quia semper restat aliquid maius ex parte creaturæ producibilis ad maiorem gloriam Dei: ergo nullo debito morali potest teneri ad eligendum melius. Tum etiam quia dato quod eligeret id quod melius, & præstantissimum est ad gloriam suam, vel eligit illud libetè, vel necessariò. Si necessariò, non est electio, sed coarctatio, & sic Deus non liberè daret esse illis creaturis, sed necessariò, quod est impium. Si liberè: ergo potuit relinquere melius obiectum, & accipere id quod minus est, nullo debito morali astrictus, quia si aliquo astringeretur, teneretur exequi illud, & sic non esset liber in oppositum. Tū denique, quia gloria quæ provenit Deo ex perfectiori creatura, vel ex minus perfecta, licet inter ipsas creaturas sit magna distantia, & vna longè melior alia, tamen comparatione ad Deum cui adest infinita gloria ex semetipso, nihil mouenti affert, quod à perfectiori creatura reddatur gloria illa extrinseca, vel nō reddatur. Imò totus creaturarum cumulus comparatione ad Deum quasi nihil & inane reputatur, & quasi gutta roris antelucani: ergo non est aliquid cōsiderabile ista maior vel minor gloria extrinseca, & ex creaturis orta, vt inferat aliquod debitum, vel necessitatem moralem in Deo ad diligendum id quod potest esse obiectū maioris gloriæ, quia cum sit gloria valde extrinseca, nullomodo dependet Deus ab illa, nec in physica sua entitate, nec in sua morali decentia.

17 Sed obiicies primò: Nam in Deo fatemur summam libertatem respectu creaturarum, & ob id negamus illi debitum, seu necessitatem aliquam moralem ad eligendum quod melius est: ergo eadem ratione debemus negare necessitatem aliquam quoad specificationem respectu creaturarū, sed solum respectu suæ bonitatis, respectu cuius etiam habet Deus necessitatem in exercitio, & ita debet in Deo coincidere necessitas quoad specificationem & quoad exercitiū, vel vtraque negari. Consequenter prob. quia sūma libertas debet excludere omnem modū necessitatis: ergo etiam debet excludere ne-

Ioan. à S. Thoma in 1. part. D. Thoma.

cessitatem quoad specificationem, hæc enim aliquo modo excludit libertatem, & sic opponitur summæ libertati.

Et conf. quia creaturæ nullo modo pertinent ad specificum obiectum Dei, nec diuinum esse, aut beatitudo ab eis villo modo pendet, sed sunt obiectum merè secundarium & materiale diuinæ voluntatis, potiusque ab ea pendent, quàm Deus ab illis: ergo nullo modo necessitant Deum quoad specificationem actus. Pater consequenter quia voluntas solum necessitatur quoad specificationem ab obiecto specificatiuo suo, vel ab eo quod requiritur ad ipsam beatitudinem vel esse rei, vt S. Thom. docet 1. 2. q. 10. 2. in c. & ad 3. ergo cum creaturæ nullo modo pertineant ad obiectum specificum voluntatis Dei, nec ad habendum finem, & beatitudinem diuinam, non necessitant quoad specificationem. Nec dici potest quod Deus necessitatur ad non volendum malum, quia malum nō est capax volitionis, & complacitiæ Dei. Nam contra est, quia ante voluntatem Dei prohibentem, seu legē Dei, non datur peccatum, hoc enim est malum quod est contra legem & voluntatem Dei: ergo voluntas eius nō necessitatur ab illo obiecto quoad specificationem, sed à se. Et è contra, illud est bonum quod est cōforme voluntati suæ: ergo ex sua voluntate & non ex obiectis sumit necessitatem quoad specificationem, quia sua voluntas est regula totius rectitudinis & bonitatis. Et ob hoc solum, vt diximus, Deus facit quod melius est semper, quia facit quod est debitum regulis, & ordini suæ voluntatis: ergo ex ipsa sumenda est mensura necessitatis quoad specificationem, non ex obiectis.

Resp. necessitatem quoad specificationem in 18 Deo non oriri ex ipsis obiectis creatis vt supra diximus, sed primordialiter, & per se ex ipsa diuina bonitate, quæ est specificatiuū obiectum voluntatis diuinæ, & principium vnde deriuatur bonitas creata, participatiuè tamen inueniri in ipsis obiectis, quatenus à voluntate & bonitate diuina participat aliquid quod non est capax displicentiæ, vt bonū honestum & subordinatio ad Deum; & similiter aliqua ita deficiunt à Deo, & permittuntur ab ipso, quod solum sunt capacia displicentiæ diuinæ, vt peccatum, & sic necessitatur voluntas diuina ad abominandum illud ex specie sua. Fatemur ergo in Deo summam libertatem, & quod non astringitur aliquo debito ad eligendum id quod melius est ex se, & ex propria perfectione creata. Negamus autem consequentiam, quod huic libertati aliquo modo opponatur necessitas quoad specificationem, vt supra satis ostendimus: quin potius libertas contrarietatis, scilicet ad bonum & malum est imperfecta & defectuosa ex ea parte, qua est ad malum, quia hoc nō nisi deficiendo amari potest, & sic talis libertas contrarietatis ad bonum & malū, est idem quod libertas ad efficiendum & deficiendum, quod imperfectionem importat, & Deo concedi non debet.

Ad Conf. Resp. quod necessitas quoad specificationem 19 orta ex ipso obiecto respectu voluntatis, nō inuenitur nisi in obiecto specificante, & in iis quæ pertinent ad beatitudinem, vel sine quibus beatitudo stare non potest, vt esse, viuere, & similia, vt loquitur D. Thom. loco cit. ex 1. 2. At verò necessitas quoad specificationem orta ex ipsa met voluntate, & cōmunicata ac deriuata ad ipsa obiecta secundaria, quia ex se bonitatem non habent, nisi participata à diuina bonitate, talis necessitas participata nō debet cōuenire ex vi obiecti, sed participari debet à voluntate in obiectum materiale & secundariū. Nec talis necessitas participata dicitur

N 2

necessitas

necessitas quoad specificationem, quia necessaria sit quoad, speciem actus, aut ab ea actus dependeat, sed quia incapax est ne alia species actus versetur circa tale obiectum, nisi complacētia seu volitio, non displicentia seu nolitio, quia bonum honestum est, & subordinatum Deo, & hoc totum à Deo participat. Ad id verò quod dicitur de malo. Resp. quòd malum illud quod est intrinsecè annexum alicui actui, vt odio Dei, licet vt sit peccatum formaliter requirat legem, tamen quia ex se & ex intrinsecis fundat malitiam, & fundamentaliter est peccatum, idè quoad specificationem necessitat voluntatem vt prohibeat illud, non quia actus dependeat à tali obiecto, sed quia non est capax alterius actus si circa illud detur, nisi prohibitionis, & abominationis; & sic non est in potestate voluntatis amare illud, sed licet possit in exercitio non explicare aut promulgare legem circa illud, tamen si actum exercet circa illud, non potest non esse prohibitio & abominatio, propter incapacitatem obiecti, vt ametur amore non defectuoso. Et sic ex incapacitate necessitat quoad specificationem, non ex motione qua moueat illam de necessitate. Quòd verò dicitur id esse bonum quod est conforme diuinæ voluntati, & sic ex se non necessitare quoad specificationem, probat quod necessitas quoad specificationem non oritur primariò, & per se ex virtute obiecti creati mouentis, sed ex bonitate & voluntate diuina sibi bonum communicantis, & hoc iam concessimus.

20 Secundò obijciēs: Nam D. Thom. sæpè docet Deum facere id quod melius est ex parte ordinis faciendi, nec posse melius vniuersum in ratione vniuersi fieri, nec meliorem mundum, vt docet *inf. q. 25. art. 6. & q. 47. art. 3. ad 2.* & alibi sæpè immò hoc ipsū ipsa Scriptura dicit, vt Ecclesiast. 3. *Didici quòd omnia opera quæ fecit Deus perseverent in perpetuum, non possumus eis quidquam addere, nec auferre, quæ fecit Deus vt timeatur.* Ergo in ordine ad timorem seu reuerentiam Dei, & ad eius gloriam nihil melius potest fieri, quia sic posset aliquid eis addi vel auferri. Similiter Ecclesiast. 39. dicitur. *Opera Domini vniuersa bona valde.* Et Genes. 1. *Vidit Deus cuncta quæ fecerat, & erant valde bona.* Et similia multa in Scriptura occurrunt, & passim apud SS. PP. qui dicunt deum semper voluisse & fecisse meliora, quos latè citat Ruiz *vbi supra* & Granados *cit. sect. 2.* præsertim Aug. *lib. de quantitate anima c. 33.* vbi dicit: *Sic sunt omnia vt omnino melius esse non possint.* Et Damascenus *lib. 2. fidei c. 29.* sic fieri omnia, inquit, Dei providentiâ, vt meliori modo existere prorsus nequeant. Et eodem sensu multi alij Patres loquuntur. Imò Arist. dixit 8. *Physic. tex. 56.* *Id quod præstat, in natura esse, modo possit, arbitramur;* ergo author naturæ semper melius seu præstantius operatur.

Conf. quia non est dubium quòd inter creaturas, vna est magis amabilis, quàm alia, non solum physicè, quia vna est perfectioris entitatis, quàm alia, sed etiam moraliter, quia ex vna desumitur maior gloria Dei, quàm ex alia: sed constat, quod ille qui perfectè vult & amat aliquem, vult illi id quod melius est, sicut iusti qui amant Deum in hac vita volunt ei id quod est ad maiorem eius gloriam: ergo cum Deus velit se perfectissimè, vult sibi id quod perfectissimum & melius est, & cum non possit non se diligere perfectissimè, ex hac parte tenetur velle semper id quod melius est ad gloriam suam, & id quod per intellectum suum iudicat melius esse, quia perfectior est amor, qui perfectiori iudicio conformatur.

Resp. authoritates S. Thom. contra nos adduci

non posse, cum stet pro nobis, vt vidimus *locis supra allegatis*, solum enim affirmat ex suppositione & denominatione finis electi à Deo non posse aliquid melius fieri non absolutè, sed secundum ordinem, & respectum ad istum finem, & statum rerum. Et ad id quod adducitur *ex quæst. 47. Resp.* quòd D. Thom. *ibi* longè aliud diuersum tractat, scilicet quòd plures mundi essent meliores quàm vnus secundum multitudinem materialem, & quòd tale melius non est de intentione Dei agentis. Non verò affirmat quòd absolutè & ante omnem suppositionem voluntatis diuinæ teneatur Deus id quod melius est eligere. Similiter in authoritatibus illis Scripturæ sermo est de operibus factis à Deo, & quæ subsunt ordini à se determinato, & attributo huic vniuerso, qua determinatione, & suppositione facta, non potuit aliquid melius Deus facere quantum ad ordinem huic statui, & determinationi diuinæ convenientem, quod est non posse fieri melius respectuè, & ex suppositione determinati huius status, non tamen absolutè. Et sic pro isto statu, & sub hoc ordine & respectu non possumus quidquam addere vel detrachere, quia sic totus ordo corrumperetur, vt docet S. Thom. *infra q. 25. art. 6. ad 3.* Ad authoritates PP. eodem modo respondeo quòd loquuntur de voluntate diuina non absolutè eligente, sed ex suppositione, & determinatione huius vniuersi, & regulis suæ sapientiæ in illo efformando, & fine determinato ad ipsum constituendum, sic enim pulcherrimè fiunt, & meliori modo quo esse possunt propter ordinem decentissimum, qui eis attribuitur à Deo, vt dicit S. Thom. *q. 25. cit. art. 6. ad 3.* decentissimum (inquam) non absolutè, sed comparatiuè ad hunc statum, & finem quem determinauit. Nec cōtra hanc explicationem affert Granados aliquid momenti, eaque est solutio & doctrina S. Thom. & sic non est quòd immoremur.

Ad Conf. Resp. Deum perfectissimè, & summo 21 modo se amare, qui autem perfectè amat aliquem, vult illi id quod melius est iuxta beneplacitum illius, non quod absolutè in se melius est, aut nobis melius videtur. Ex bonis autè quæ conducunt ad gloriam Dei, quædam conducunt ad gloriam Dei internam & essentialem, & hæc est sua bonitas & omnia sua attributa, & hæc vult Deus sibi necessariò, non vt melius, sed vt optimum. Alia sunt bona extrinseca, & secundaria, à quibus illa prima nullo modo pendent, & gloria quæ ex eis provenit Deo extrinseca est, & tanto ei melior, quanto magis in eis iuxta liberum voluntatis suæ consiliū operatur. Vnde cum Deus sibi velit perfectè & ardentissimè bonum, & in manu & voluntate sua sit eligere quod voluerit ex istis bonis extrinsecis, semper vult sibi melius dū volūtatī suæ cōformius eligit ex omnibus illis bonis. Vnde nō solum Deus vult sibi melius ex bonis diuinis, sed ex bonis creatis vult sibi melius formaliter, id est magis secundum suā voluntatē, licet ex parte rei materialiter electæ non sit semper id quod est melius absolutè, sed quia hoc ipsum est id quod voluit, & in quo implet voluntatē suam, hoc ipsum formaliter est melius, & magis ad gloriam suam. Nec potest is qui aliquem perfectissimè amat, magis ad gloriam suam amare, quàm permittendo omnia arbitrio suo, & vt impleat in omnibus voluntatem suam. Nec iusti aliter volunt maiore gloriam Dei, quàm volēdo vt fiat volūtas eius, sicut in cēlo & in terra, siue res in se sint meliores, siue nō. Nec tenetur volūtas cōformare se ei quod iudicat intellectus esse meli⁹ absolutè, sed melius respectuè & proportionatè ad regulas sapiētiæ suæ, & volūtatī consilij sui.

Possent

22 Possent etiam fieri argumenta contra primam conclusionem ad probandum quod Deus necessario amat creaturas, quia actus ille voluntatis necessario in Deo est, & ceteret aliquo actu, si non amaret, & similiter infinitus amor eius est erga creaturas, & infinita misericordia, & liberalitas: ergo habet propensionem infinitam in creaturas: ergo non liberam, & denique amando seipsum ut finem, amat creaturas ut media ordinata ad finem; & sic in creaturis amandis semper inuenit aliquod bonum infinitum, & necessario amatum, scilicet seipsum ut finem.

Sed hæc omnia iam *supra* soluta sunt agendo de constitutione actus liberi in Deo, ubi ostendimus Deum necessario habere entitatem actus liberi, sed non terminationem ad creaturas, nec aliquid deesse Deo si non vellet istas creaturas, sed solum aliquid deesse creaturis, quæ participant bonitatem à Deo, non supponunt illam. Similiter amor infinitus est ex parte Dei, sed ex parte obiecti creati non est obiectum adæquatū illi infinito amoris, sed inadæquatū, & sic non infinite amatur ab amore infinito, & consequenter nec necessario. Vult autem Deus seipsum ut finem in creaturis ut mediis, sed ut finem ipsis inadæquatè se participatorem, nec ab eis ullo modo dependentem. Vnde talis finis, licet in se ametur necessario, ut in se est, tamen ut communicabilis mediis, non nisi liberè, quia inadæquatè se habet ad illa, & independentem ab illis est eorum finis.

Nota.

De ipso actu diuinæ voluntatis qui est amor, an sit etiam gaudium, vel ab illo distinguatur in Deo, & an sit amor amicitiae vel concupiscentiae, hæc & alia similia commodius circa q. 20. ubi sanctus Doctor agit de amore, tractabuntur.



DISPUTATIO V.

De efficacia & inefficacia, signisque diuinæ voluntatis.

ARTICVLVS I.

Preludia totius disputationis.



RIA oportet in hac difficillima, & valde controuersa disputatione præmittere quasi præsupposita, & præludia totius disputationis.

Primum quid sit efficax voluntas, & quid ad illam requiratur (non loquor de auxilio, sed de voluntate in communi, & de voluntate diuina.)

Secundum, quid sit ordo intentionis, & executionis in decretis diuinis.

Tertium quomodo assignanda sint diuersa instantia, seu prioritates, aut signa voluntatis diuinæ.

Efficacia voluntatis, quid requirat.

1 Soler efficax voluntas diuersis nominibus appellari, scilicet voluntas simpliciter, ut distinguitur à voluntate secundum quid, quæ ex parte vult, sed non ex toto, nec cum effectu; appellatur etiam vo-

Ioan. à S. Thoma in 1. part. D. Thoma.

luntas absoluta, ut distinguitur à conditionata, quæ etiam dicitur velleitas, quia per voluntatem inefficacem vellet aliquis rem fieri, & sub conditione, si non esset talis occasio, vel talis circumstantia, ea ratione posita, de facto vult aliter fieri, sicut qui proicit merces in mare occasione tempestatis, vellet autem non proicere, si non esset tempestas, & peccator vellet conuertere ad Deum, & agere poenitentiam, si non esset obligatio restituendi alienum, aut dimittendi alienam, sed ea supposita, non vult dimittere, nec poenitere. Denique vocatur voluntas efficax, voluntas consequens, & inefficax, antecedens, quia ad illam consequitur effectus ex se, ista verò antecedit effectum, & solum ipsam rei bonitatem vult secundum se; quæ etiam ratione vocatur ista inefficax simplex complacentia, alia verò vocatur efficax, quia & rem ipsam, & ea quæ ad eius positionem & consequutionem requiruntur, vult, quasi duplicata voluntas, prior verò & inefficax gaudet, seu complacet de re, de eius verò consecutione nihil tractat. Nec obstat quod etiam in simplici complacentia potest esse peccatum, etiam sine vlla voluntate de executione ad extra, sicut qui consentit in delectationem, & non in opus: ergo videtur posse dari efficacem voluntatem siue ordine ad consecutionem & opus. Resp. enim, quod etiam in simplici complacentia, & inefficaci voluntate, respectu operis potest dari libidinosa delectatio, quæ sit peccatum, quia ad peccatum non requiritur efficax voluntas, sed sufficit complacentia, immò & omissio, non repellendo insurgentes motus appetitus. Et quantum ad hoc quod est delectari intra se, efficax est, quia delectationem ponit in se de facto, licet respectu operis ad extra inefficax sit.

2 Quare efficacia voluntatis per omnia illa nomina significari solet, & sic eam significauit D. Thom. in hac q. 19. art. 6. ad 1. & in 1. distinct. 49. & 47. utrobique quest. 1. art. 1. & quest. 23. de verit. art. 2. Et in omnibus istis locis perpetuò docet S. Thom. voluntatem consequentem, quæ est voluntas simpliciter, & absoluta, & efficax, esse illam quæ respicit rem secundum omnes suas particulares condiciones, quia sic fit, & ponitur in re, & voluntas efficax respicit rem ut ponenda est in re, & secundum quod in se existit. Voluntas autem antecedens est illa quæ respicit rem, non secundum omnes suas particulares circumstantias, & ut ponenda in re, sed secundum aliquam præscisionem, aut ex aliqua parte tantum, & secundum illam placere potest, licet ex alia parte obstat quod ponatur in re propter alias condiciones repugnantes, sicut si homo consideretur secundum naturam humanam præcisè, bonum est viuere, & saluari, sed si consideretur non solum ut homo, sed ut homicida, & peccator, & quod non vult conuertere, non est bonum viuere nec saluari. Sed tamen de hac distinctione voluntatis antecedentis, & consequentis, & quo modo eam Damascenus distinguat, & in quo sensu sit intelligendus, plenius dicemus *infra*.

3 Quare in sententia D. Thom. voluntas efficax est illa quæ respicit aliquid ut ponendum in re, & sub eis conditionibus, & formalitatibus, quæ requiruntur ut ponatur in re; inefficax autem vult aliquid, non ut ponendum in re, nec secundum omnes condiciones aut circumstantias, quæ requiruntur, aut quibus ordinatur ad hoc ut ponatur in re, licet secundum se, vel secundum aliquam conditionem placeat sibi. Quod etiam alio modo explicat D. Thom. quest. 6. de verit. artic. 1. & quest. 12. art. 10. quia in ordinatione ad finem est duo considerare, scilicet ipsum ordinem causarum, & exitum vel euentum ordinis: non enim omnia

quæ ad finem ordinantur, finem consequuntur. Et sic in cognitione futurorum, & in reuelatione prophetica, quæ à diuina præscientia descendit, est duo considerare, scilicet ipsum ordinem causarum ad effectus suos, & exitum seu executionem huius ordinis in hoc quod effectus acti procedunt ex causis suis. Voluntas ergo respiciens tantum ordinem ad finem, seu ordinem causarum, sed non ipsum euentum & exitum effectus à causis non est efficax, nec consecutiva finis. Quæ autem respicit ipsum euentum, & exitum rei à causis, efficax est, nec solum respicit sufficientiam ex parte virtutis, sed egressum effectus à tali virtute.

4 Dices: Voluntas diuina nihil vult nisi per ordinem ad esse, vt *preced. disp. art. 6.* explicauimus, & illud quod vult, debet esse participatum ab ipsa voluntate diuina, & non præsuppositum ab ea: ergo semper voluntas Dei est efficax, nec potest intelligi voluntas aliqua antecedens, quæ non impleatur, sed omnis est consequens, quia omnis impletur, quod tamen negat D. Thom. Consequenter patet, quia voluntas antecedens dicitur illa, quæ vult rem secundum aliquam conditionem & non secundum omnes, vel ordinat aliquid in causis, sed non exitum ipsum rerum à causis suis: Sed hoc ipsum est ex Deo quod causæ sint sic ordinatæ, & quod res sic se habeat secundum se, aut secundum illam conditionem tantum, secundum quam consideratur à voluntate antecedente, & nihil amplius vult per illam voluntatem, ergo illa impletur, & respectu eius quod vult efficax est: ergo nulla datur in Deo voluntas inefficax, quia omnis voluntas implet id quod vult.

Resp. quod voluntas non dicitur efficax vel inefficax, antecedens vel subsequens, nisi comparatione ad aliquod particulare obiectum quod aliquando perducitur ad effectum, aliquando non; Et hoc totum ex voluntate Dei dependet, & ab ea ordinatur. Quare inefficax vel efficax voluntas Dei non est distinguenda per ordinem ad vniuersalem finem, quem Deus intendit, neque penes impletionem, vel non impletionem diuinæ voluntatis ex parte sua, quasi voluntas inefficax sit, quæ frustratur, efficax verò, quæ impletur; sed efficacia vel inefficacia in diuina voluntate sumitur per comparationem ad particulares effectus ex parte creaturarum, ita quod, quando aliquis effectus determinatus intelligitur vt exiens à suis causis, dicitur voluntas Dei efficax circa illum, quia vult, & intendit rem illam esse & de facto poni; quando verò aliquis effectus non exit à suis causis, neque de facto ponitur extra illas, dicitur inefficax voluntas, seu antecedens, quia non respicit existentiam rei, vt de facto ponendam extra causas, sed solum sub aliqua conditione, aut sub aliqua formalitate ei placet? attentis autem omnibus circumstantiis non vult, sed hoc ipsum non velle est ex intentione, & voluntate Dei, quæ efficax est circa non esse & non velle. Et ita secundum vnum ordinem & respectum dicitur efficax, seu antecedens voluntas, quæ secundum alium inefficax est. Non potest autem voluntas diuina absolute & secundum omnes ordines & vniuersalissimum finem & causalitatem suam considerata inefficax esse aut frustrari, vel non impleri, vt docet S. Thom. *in hac q. 19. art. 6. & in 1. dist. 49. q. 1. art. 1.* in hoc enim sensu dicitur Isai. 46. *Consilium meum stabit, & omnis voluntas mea fiet.* & Iudith 9. *Hoc factum est quod ipse voluisti, omnes enim viae tue paratæ sunt, & tua iudicia in tua providentia constituisti.* Vniuersalis ergo voluntas Dei, quæ dicitur omnis voluntas,

semper fit, & omnes viæ eius paratæ sunt, quia nihil imparatū & frustabile est illi. Distinguitur autem in efficacem & inefficacem comparatione singularium effectuum extra Deum, quod vnus exeat à suis causis, vel non exeat, non comparatione gubernationis & directionis, seu intentionis diuinæ absolute, quasi hæc aliquando impleatur, aliquando non, aliquando frustretur, aliquando non, quia semper impletur intentio diuina, nam etiam quando res non exit extra causas suas, etiam Deus illud vult & intendit & disponit.

5 Quare licet eadem voluntas materialiter & idèticè possit esse efficax & inefficax respectu diuersorum, tamen semper obseruanda est ratio formalis secundum quam distinguitur efficax ab inefficaci, videlicet, quod sub illo respectu, & in ordine ad illud obiectum vel rationem, quam respicit vt de facto ponendam & secundum exitum à causis sit efficax, sub eo respectu quo relinquit intra causas sit inefficax; esse tamen causas ordinatas & dispositas ad operandum, licet de facto non operentur, quia est aliquid de facto habitum, quod ad illud efficax denominatur voluntas, licet quoad effectum qui non exit, efficax non sit.

Et quia res ista maximè fundamentalis est, & conducens ad plures difficultates Theologicas, quæ ex cognitione efficacis voluntatis dependent, oportet hanc distinctionem efficacis ab inefficaci, eiusque rationem & vim propriam ex suo fundamento cognoscere, & ostendere.

6 Et ideo sciendum est quod amor duplex genus causalitatis in nobis exercet, scilicet & afficit & efficit. Et afficere quidem conuenit ei in genere causæ formalis, quia amor ipse affectus quidam seu affectio est voluntatis, tanquam forma. Efficere autem conuenit ei in genere causæ efficientis, quatenus ex affectu amoris mouetur quis ad consequendum seu habendum in re rem amatam. Et ita amor formaliter per se facit vnionem cum amato in affectu, efficienter autem quarit vnionem cum amato in re, vt docet S. Thom. *1. 2. q. 28. art. 1.* Hinc ergo sumitur distinctio inter amorem inefficacem & efficacem. Si amor sistat in affectu, & non quarat aliquid in effectum, inefficax est, quia non efficit, nec ad efficiendum ordinatur; efficacia autem ab effectu dicitur, seu ex ordine ad effectum, quod pertinet ad genus causæ efficientis, sed amor ille sterilis est, & solum intra se sistens, pertinetque ad voluntatem simplicem, & volitionem, quæ antecedit actum intentionis, & potest in illo esse magna complacentia, & vehemens delectatio, nec tamen efficax est, quia ad actum voluntatis, qui est simplex volitio immediate sequitur fruitio, seu complacentia de re volita, non fruitio consummata, quæ est in possessione reali rei amata, sed fruitio inchoata, quæ incipit ab affectu primo de re, vt docet S. Thom. *q. 1. 2. q. 11. art. 4.* Efficax autem amor facit conuersionem ad rem in se, vt de facto, & realiter obtinendam, & idèd efficax dicitur, quia incipit habere ordinem causæ efficientis ad rem in se consequendam, vel producendam, & sic efficax dicitur, quasi efficiens, & ordinem induens efficientiæ, respicitque rem vt de facto, & secundum exitum à suis causis. Et sic incipit ordo efficacis amoris ab actu intentionis, qui non est simplex volitio, vel complacentia de re amata, sed volitio tendens, seu in illam tendens, idèdque dicitur intentio, quasi non solum affectu amans, & vnies sibi, sed tendens efficienter ad querendum, & idèd incipit iam attingere media, saltem virtute, quia intentio non est

est simplex actus volendi, sed actus volendi finem sub aliquo ordine ad media; & propterea non est iam simplex actus, sed quasi duplicatus, quia duo attingit, finem, & ordinem ad media, non simplici bonitate contentus est; & sic etiam amor efficax semper est quasi duplicatus, non simplex, ideoque robustus & fortis, quia respicit rem, non in sola sua bonitate, sed in ordine ad consecutionem, & ad media. Propter quod multi sunt qui amant aliquid, v.g. Deum, & valde delectantur de ipso, & videntur sibi vehementer amare, & totum hoc est simplex amor, bonus quidem, sed nondum perfectus, quia non duplicatus, neque robustus: immò quia sola delectatione nititur, cessante illa (ut sæpe cessat per tentationes) corrumpitur. Efficax autem amor non multum occupatur circa delectationem simplicem de Deo, sed circa ordinationem eorum per quæ assequendus est, & ita maxime versatur circa custodiam cordis, circa tollenda impedimenta vitiorum, tentationum, & passionum circa implenda omnia, quæ voluntas Dei iubet; hic est amor ex toto corde, & qui non solum dicit *Domine, Domine, sed facit voluntatem Patris*: licet verum sit quod pro imperfectis & incipientibus multum etiam conducatur ad assuefaciendum cor ut delectetur sæpe de Deo, etiam simplici delectatione, quia inde efficax intentionis actus deriuatur, & faginatur.

7 Ex his colligitur primò efficaciam voluntatis non eodem modo in omnibus reperiri, quia ordo, & tendentia ad ponendum rem in esse, & ad dirigendam executionem & exitum rei à causis non eodem modo subest omnium voluntati. Nam in nobis, & in voluntate quacunque creata efficax amor esse potest, etiam si frustrabilis sit à suo euentu, in Deo autem si euentus non sequitur, euentuissimum signum est quòd ille amor efficax non est, & sic in Deo omne efficax decretum est infallibile. Ratio differentie est, quia licet utrobique, scilicet tam in Deo, quam in nobis efficax volitio respiciat exitum rei à suis causis, & rem ipsam, ut de facto ponendam, tamen quia in potestate voluntatis creatæ non sunt omnes causæ à quibus euentus ille dependet, nec omnia impedimenta potest excludere, stat bene quòd perseueret amor de euentu rei consequendo, nec mutetur intentio & voluntas ponendi res de facto, & tamen frustratur ille euentus ex defectu potestatis, quia non est in manu talis voluntatis causas adhibere vel impedimenta tollere, unde euentus ille fortitatur effectum. At verò diuina voluntas in suo velle habet omnem potestatem, & omnes causas, siue promouentes, siue impediētes talem euentum, nec potest talis euentus impediri, aut promoueri nisi ex voluntate Dei. Quare si effectus frustratur, & non habet euentum, ex Dei voluntate non habet illum: ergo non stat frustrari euentum, & Deum habere voluntatem ut de facto fiat, quod est habere voluntatem efficacem, sed, necessariò debet esse voluntas inefficax, scilicet, ut effectus non fiat, quia si non fit, ex voluntate eius non fit.

8 Colligitur secundò quòd quia in voluntate efficaci id quod formaliter respicit, est res sub existentia, seu res ut de facto ponenda in exercitio, & hoc non potest esse, nisi attentis circumstantiis, ex quarum consideratione, & ponderatione vel voluntas retrahitur, vel firmatur in proposito suo, principaliter debet relucere duplex principium à quo dependet existentia rei, scilicet finis qui est motiuum, cuius gratia mouetur voluntas, aut utilitas ad quam deseruit; unde etiam sumitur cau-

sa, etsi non principaliter motiua, id est cuius gratia, tamen impulsiva, id est quæ iuuat, & quali acuit voluntatem, etsi non principaliter mouet: alterum autem principium est efficiens: ab eo enim datur existentia & ponitur res extra causas, unde si voluntas efficax est, & existentiam rei vult de facto, oportet quòd illam velit in exercitio & executione ponendam, & consequenter ut dependentem à causa, & efficientia per quam inducenda est. Vtrumque horum constat, quia voluntas ut velit efficaciter rem, ut ponendam in esse, aliquo motiuo debet moueri, & aliquo fine, quia aliàs otiosè, & irrationabiliter procederet, & ita cessante illo motiuo cessat talis voluntas, aut erit ponendum aliud decretum & alia determinatio, si ex alio motiuo voluntas fertur. Si autem requiritur motiuum ex parte finis, ut subsistat illa voluntas efficax, etiam requireretur dependentia ab agente, quia finis morio est respectu efficientis, ut moueatur ad operandum, & exequendum. Ergo non potest subsistere efficacia ut ex fine, nisi terminetur & se extendat ad ipsum agens, quod mouetur à fine. Et ideo voluntas ista efficax practica est, & practica cognitione regulatur, quia ad opus ipsum & exercitium efficientis ordinatur.

Quomodo autem ista efficacia voluntatis debeat attingere talem finem, quod pertinet ad intentionem, & talem efficientiam agentis, quod pertinet ad media, quibus fit executio, an virtualiter tantum, an etiam formaliter, & verum etiam in individuo: dependet ex his quæ statim dicemus de ordine intentionis, & executionis, quia ex utroque componitur ista efficacia, incipiendo à fine ut ex mouente, & consummando per media ut exequentia, & agentia per electionem, per imperium, per vsum, per vltimam executionem.

9 Colligitur tertio, aliud esse voluntatem efficientem, aliud efficacem, licet efficax voluntas etiam efficientem includat, sed aliquid amplius dicit: Nam efficiens præcisè dicitur ab effectu, qui de facto sequitur, & ita sufficit ad hoc quòd sit efficiens quod concomitanti concursu, vel etiam ex associatione alterius concausæ, ipsa voluntate cōcomitanter concurrente, effectus sequatur: Ut autem sit efficax voluntas, requiritur quòd ex directione & fine præconcepto & volito, ita moueat ad efficiendum, quòd determinatè moueat ad talem effectum, non verò ita indeterminatè, & indifferenter se habeat, quòd æquè bene possit sequi, vel nō sequi effectus ex tali volitione finis. Et huius ratio est, quia concursus efficientie in voluntate efficaci semper se habet ut executio, ordo autem & respectus ad finem ut directio, quia ex fine mouetur efficiens ad agendum, & ab eo regulatur, aliàs casu & fortuitò operabitur. Si ergo finis volitus non inclinatur determinatè ad agendum, sed tali modo est volitus quòd æquè mouet ad quærenda media, vel non quærenda, ad efficiendum de facto vel non efficiendum, ergo stante voluntate ista, stat bene non sequi effectum, ergo stat bene hanc voluntatem esse inefficacem, & sic non respicit per se, & ex vi talis voluntatis existentiam, seu esse rei, nec ex sua formali, & intrinseca ratione ordinatur ad rem, ut de facto ponendam: Ergo voluntas talis in ratione, & in vi voluntatis non est efficax, quia formalis eius ratio: & id quòd est per se volitum non est esse rei, seu res ut de facto. Si ergo efficiens operatur de facto, & non ex efficacia voluntatis per se id volentis, fortuitò operabitur, & à casu, non per se ex vi voluntatis, & sic erit quidem efficiens de facto, sed non erit efficax voluntas per se loquendo si quidem compa-

titur secum inefficaciam in ratione voluntatis, & ex meritis suis. Vt ergo voluntas aliqua sit efficax in ratione voluntatis, non sufficit efficientia, quæ est voluntatis executio, sed requiritur volitio determinata finis, id est respiciens determinatè ipsum esse, & executionem rei de facto, seu exitum eius à suis causis, non autem æquè compatiens ordinari ad effectum in re ponendum, vel non ordinari.

10 Quare qui solum accipiunt efficaciam voluntatis ex efficientia ipsa, & operatione de facto subsecuta, non autem ex fine voluntati deriuari efficaciam in efficientiam tanquam in executionem suæ directionis, destruunt duo principalia principia in hac parte.

Primum est, quod voluntas in ratione voluntatis, id est, volendi obiectum, non sit efficax, sed solum denominatione extrinseca efficax dicatur, & sic non est sumenda efficacia eius per ordinem ad obiectum, quia hic ordo est intrinsecus voluntati, vt voluntas est, nec est necesse quod determinatè voluntas respiciat finem, seu obiectum, vt de facto ponendum, sed sufficit quod respiciat in obiecto bonitatem ipsam simplici affectu, siue ponendam de facto, siue non, solum autem in re de facto efficiatur & ponatur res illa aliàs volita, & inde denominetur extrinsecè efficax, non verò ex influxu voluntatis in talem efficientiam.

Secundum est quod operatio illa de facto efficiens, à qua fit denominatio in voluntatem, & reddit illam efficacem denominatione extrinseca, per accidens, & fortuitò sequitur ex tali voluntate, quia saluatur tota ista voluntas sine hoc quod effectus sequatur, nec per se, & ex obiecto respicit illam operationem: ergo si sequitur ista operatio, non sequitur per se ex tali voluntate, sed per accidens; nec habet aliam voluntatem ad quam per se sequatur, quia de illa currit eadem difficultas an determinatè & efficaciter illam velit ex directione finis, an tantum per accidens. Sequitur ergo quod respectu finis intenti sequitur per accidens. Vnde qui hoc inconueniens denouant, & hæc duo principia negant, ne in Deo ponant fortuitam & casualem operationem coguntur recurrere ad scientiam mediam, qua Deus sciens operationem illam in tali conditione, vel statu futuram, voluit illam de facto poni, & ad illam concurrere cum voluntate creata perfectitate scientiæ, non perfectitate voluntatis, & intentionis. Quare remota scientia media, efficacia ista extrinsecæ denominationis euacuat prouidentiam Dei, & mundum tradit casui, & fortuitæ fluctuationi. Fœlix scientia, quæ omnium creaturarum gubernationis clauum tenet, & sola fortunæ temeritatem propulsat!

11 Colligitur denique efficaciam voluntatis non perfici vno actu, sed pluribus. Nam in voluntate & datur simplex voluntas finis ad quam sequitur simplex etiam fructio, seu complacentia, & datur voluntas intentiua, seu assecutiua finis, quæ respicit finem vt assequendum, & sic incipit dicere ordinem ad media, non quia illa præsupponat, aut ab illis moueatur vt efficax sit, sed potius respicit media, vt ex se consecuta, & ex sua efficacia & resolutione deriuata. Et ab ista intentione finis sequuntur plures actus circa media vsque ad ultimam executionem & efficientiam de quibus agit D. Th. 1.2. q. 12. vsque ad 17. sicut sequitur electio circa media, consensus, consilium, vsus, imperium, executio, &c. Quomodo autem in istis inueniatur efficacia, quia & includitur hic

De voluntate Dei.

actus pertinentes ad ordinem intentionis, & executionis, iam explicamus.

Ordo intentionis, & executionis in voluntate diuina.

Et hoc apud Theologos frequens est, & pluribus difficultatibus, controuersisque deseruit, præsertim in materia de Incarnatione, & prædestinatione, aliisque similibus difficultatibus, in quibus agitur de his, quæ Deus vult ex parte finis intendendo, & ex parte mediorum exequendo, & quomodo decreta ista componantur in Deo.

In assignando isto duplici ordine intentionis, 12 & executionis, aliqua sunt, in quibus omnes Theologi conueniunt, alia in quibus valde dissident, præsertim Recentiores. Nam omnes Theologi conueniunt in hoc, quod isti duo ordines ponendi sint: constat enim prius nos intendere aliquem finem, quàm exequi: nullus enim mouetur ad exequendum & ponendum aliquid in re, nisi quia vult illam executionem, nec vult exequi nisi propter aliquem finem, & alicuius rei gratia, aliàs non nisi fortuitò ageret, & à casu. Conueniunt etiam, ordinem intentionis, quatenus respicit finem non solum simplici affectu, & in se suæque bonitate absolute sumpta, sed relatè ad media pertinere ad voluntatem efficacem. In hoc enim etiam P. Vasq. conuenit, vt patet 1.2. disp. 40. c. 2. num. 9. vbi expressè affirmat quod spes & desiderium possunt manere in ratione simplicis affectus, & inefficacis, quia feruntur in finem suum, sed non vt consequendum; intentio autem semper est efficax affectus opere consequendi finem. Hoc tamen quod hic dixit, *semper*, alibi limitasse videtur ad solam intentionem finis relatè ad media physica, non moralia, scilicet. 1. p. disp. 8. c. 5. in fine. Quamuis verum sit, Authorem hunc videri attribuire ordini intentionis magnam habitudinem & diuersos actus, ita vt à voluntate simplicis affectus incipiat, & per actus volendi finem, & consultantem media discutat vsque ad executionem in re ponendam, vt constat ex his quæ tradit hac 1. p. disp. 89. c. 7. à num. 53. & 3. p. disp. 23. c. 8. à num. 99. & idè potest refugium inuenire, quo aliquando ordinem intentionis inefficacem appellet ratione primæ voluntatis simplicis, aliquando efficacem ratione secundæ voluntatis intendentis & consulentis de mediis ante opus executionis.

Dissident autem Authores, & non modicè certant, 13 præsertim Vasq. & Suarez, in duobus.

Primum, ex parte ipsius intentionis, an intentionis ordo quatenus finem ipsum respicit ante media exequentia efficax sit, & efficaciam habeat, eo quod efficacia tota denominationem accipit ab effectu, & ab eo quod de facto euentum habet: Intentio autem finis antecedenter ad media effectum habere non potest, nec nisi per media illum habet: ergo neque efficaciam; & sic difficile videtur efficaciam in intentione inuenire separatim, vel antecedenter ad executionem, cum ex suo essentiali conceptu efficacia executiua sit, & effectum habeat.

Secundum est ex parte ipsius executionis, an executionis ordo sit decretum aliquod in mente habitum distinctum à decreto, quo Deus vult aliquid per modum intentionis, ita quod duplex voluntas seu decretum versetur circa idem obiectum intra mentem, alterum intendens finem efficaciter, nihil de executione tractans, alterum de executione eiusdem rei disponens; an verò intentionis ordo comprehendat quidquid decreti est in

in voluntate circa rem exequendam, vel de facto ponendam, ordo verò executionis non iam pertineat ad decreta voluntatis, sed ad executionem in re faciendam, & ita solum sit ordo inuentus in re, non in mente dispositus?

14 Circa hæc componenda P. Vasq. duo sentit. Primum est, intentionis ordinem posse esse efficacem in vi voluntatis intendentis finem ante præuisa media, si sint media physica, & physicè solum perducant ad finem, si verò sint media moralia v. g. merita respectu præmij, non posse efficacem voluntatem finis dari ante ipsa media, sed sufficere inefficacem, seu simplicis affectus erga finem.

Secundum est ordinem intentionis comprehendere omnes actus voluntatis, & intellectus, qui pertinent ad intentionem & consultationem de re agenda, ordinem autem executionis, non in mente, sed in ipsa re inueniri. Et sic intelligitur inuerso modo procedere ordinem intentionis & executionis, quia ille incipit à fine & à propinquantioribus mediis, hic verò à remotioribus, quoniam ille seruat ordinem causæ finalis descendens à fine ad media, hic verò ordinem causæ efficientis procedentis ad finem, idè à remotioribus causis incipit, quia in efficientibus remotior causa proximior mouet, & sic à remotiori incipitur. In consultatione autem, & decreto voluntatis duplicem ordinem ponere, alterum intentionis, alterum executionis nullo modo admittit. Primum dictum habet in hac 1. pen. disp. 82. c. 5. Secundum in disp. 89. c. 7. num. 53. & 54. & 3. pen. disp. 23. c. 8. & non longè est ab ista sententia Arubal, hic disp. 59. qui efficacem intentionem finis præcedere dicit solum in causa, scilicet in medio aliquo quod amatur in illa intentione efficaci finis.

15 Aliqui verò ad explicandam magis hanc sententiam distinguunt de causis, à quibus immediate pèdet aliquis effectus, siue sit causa intrinseca, siue extrinseca, & de causis remotis. Et dicunt quòd intentio efficax necessariò debet respicere finem connotando causas illas, & actionem, à qua in singulari dependet vt à causis immediatis, & ita si intentio sit efficax, non potest præscindere ab executione causæ immediatæ, nec quoad hoc potest distingui ordo intentionis efficaciæ, & executionis. Quoad causas verò remotas, seu mediatas potest bene præcedere intentio, etiam efficax ipsius finis, & per aliam voluntatem decernere de istis causis tanquam de mediis remotis. Ita P. Alarcon tract. 3. de vol. disp. 5. c. 4. qui etiam ex hoc reddit rationem cur possit intentio efficax finis præcedere voluntatem de mediis physicis, non de mediis moralibus in sententia Vasq. quia videlicet media moralia vt merita non se habent vt media remota, sed vt proximum motuum dandi finem in ratione præmij. Et declaratur hoc: tum quia merita non tam se habent vt media, quàm vt conditio & qualitas personæ qua se dignū reddit præmio, vnde debent intrare in ipsa voluntate, qua efficaciter, & determinatè eligitur finis in hac persona, seu ista persona eligitur illi fini, sicut quia esse Redemptorem est conditio, & qualitas personæ Christi venientis in mundum, non potuit intendi efficaciter abstrahendo à conditione veniendi vt Redemptor, vel non veniendi; tum quia merita & alia media moralia in tantū influunt in finem, in quantū mouet ipsum agētem, seu intendentem vt velit talem finem exequi. Quare si inueniunt voluntatem iam efficaciter intendentē, cessat eorum vis & causalitas, & sic nihil operan-

tur extra intentionem volentis efficaciter. Secus est de mediis physicis, quæ non influunt mouendo voluntatem intendentis, sed mota & applicata ab intendente, vt per virtutem suam producant effectum, qui est consecutio finis, & sic supponere possunt voluntatem & intentionem efficacem, non præcedere.

16 Communis tamen sententia contradicit sententia Vasquez in vtroque dicto ipsius: Nam dari efficaciam in actu intentionis finis ante actum electionis mediorum, & multò magis ante vsum, & executionem eorum in re, immò efficaciam volendi media deriuari ex efficaci intentione finis, docent communiter, qui tractant in 1. 2. de actibus voluntatis circa q. 12. & 13. vbi agitur de intentione, & electione, & qui tenent Deum ordine intentionis eligere efficaciter ad gloriam prædestinatos ante præuisa merita, quos inf. referat tractando hanc difficultatem disp. 8. art. 1. Et interim videri possunt Gonzalez disp. 73. Carmelit. super q. 23. art. 4. disp. 9. Suarez lib. 1. de prædest. c. 8. & cap. 14. & videri potest tomo 1. 3. p. disp. 5. sect. 1. & disp. 10. sect. 4. Villegas contr. 13. & alij quos ibi citabimus. Quòd autè ordo executionis nō inueniatur solum in re positus, sed etiam in decreto voluntatis distinctio à decreto, & actu intentionis, & electionis, tenent communiter omnes qui cum D. Thom. existimant vsum esse actum elicitum à voluntate, & non solum à potentiis applicatis ab ipsa ad exequendum, quæ est sententia communis contra Vasquez. 1. 2. disp. 47. c. 2. vbi negauit vsum esse actum elicitum à voluntate, & eodem fundamento ductus negauit ordinem executionis, vt distinguitur ab ordine intentionis esse actum seu decretum voluntatis 3. p. disp. 23. c. 8. referens se ad dict. disp. 47. ex 1. 2. Sed hanc eius sententiam de vfu voluntatis singularem appellat Montefinos 1. 2. super q. 16. art. 1. disp. 9. q. 1. & videri etiam potest Lorca super q. 17. disp. 22. vbi plures citant Authores contra Vasquez & similiter Suarez lib. 1. de prædest. c. 14. Gregorius Martinez 1. 2. q. 16. art. 1. dub. unico, eamque docet esse communem intelligentiam Thomistarum, Medina, Contradi, & aliorum, & etiam extra scholam D. Thomæ.

17 Dicendum est ergo primò ordinem intentionis habere efficaciam in sua linea, & ordine, id est per modum radicis, & principij à quo incipit & originatur omnis efficaciam: non tamen ibi cōpleri & consummari, seu exerceri totam efficaciam, sed in illis actibus qui pertinent ad ordinem executionis: idè enim vocatur ordo executionis, quia executiuè exercet, & complet efficaciam intentā prius in ordine intentionis; sicut etiam in efficientibus tota virtus operandi est in actu primo radicaliter in natura, & formaliter in potentia, sed executiuè, & exercitè non est nisi in actione, & actu secundo, sic tota efficaciam radicaliter, vt sic dicam, & originatiuè est in ordine intentionis, sed exercitè, & cōpletiuè in ordine executionis. Et hoc verum est tam respectu mediij physici quàm moralis, tam respectu causæ immediatæ, & proximæ quàm remotæ, & mediatæ, à qua mouetur & pèdet proximè.

Ratio huius conclusionis est, quia ordo intentionis est ordo causalitatis ex parte finis, ordo verò executionis est ordo causalitatis ex parte efficiētis, executio enim à causa exequēte est, & hæc est causa efficiens. Quia verò causa efficiens nō operatur nisi vt mora à finali, quia finis est cuius gratia agens operatur, oportet quòd motio finis præcedat causalitatē efficientis, & sic ordo intentionis, qui

qui est ordo finis, seu causæ finalis ut intentæ, & volitæ præcedat ordinem executionis. Quare ordo intentionis solum importat ordinem causalitatis finis, ut est mouens ipsum efficiens ad agendum: ergo debet in hoc ordine causalitatis finalis habere efficaciam mouendi finaliter, ante efficaciam ipsius agentis in efficiendo, immo ista efficacia in efficiendo ab illa in finalizando deriuari debet. Et in hoc maxime apparet æquiocatio oppositæ sententiæ, quæ efficaciam solum cōsiderauit vno modo, & in vno genere causæ scilicet in genere causæ efficientis, & ideo nō potuit percipere efficaciam voluntatem, etiam in genere intentionis, antequā sit volita & præuisa ipsa causa efficiens, vel etiam ipsa causa moralis ex qua procedit ille effectus.

- 18 Cæterum negari non potest, quod non solum in genere causæ effectiue, sed etiam in genere causæ finalis, quæ ordinem intentionis occupat, danda sit efficacia illius ordinis, & illius generis: nam etiam causa finalis suam causalitatem habet distinctam à causalitate efficientis, per quam mouet ipsum efficiens ad operandum: ergo etiam debet suam efficaciam habere in genere finis mouentis antecederet & distincte ab efficacia causæ efficientis. Patet hæc consequentia, quia efficiens mouetur à fine tanquā à causa antecedente se: ergo si de facto mouetur, efficaciter mouetur ante efficaciam ipsius efficientis, & influxum eius in effectum: nam efficacia causæ, influxus causæ est, & per influxum suum habet efficaciam suam: ergo si est influxus causæ finalis à efficiente, est efficacia causæ finalis ante efficientem; & sic ordo intentionis, qui est ordo causæ finalis, efficaciam habet in suo genere & ordine ante ordinem executionis, qui est ordo causæ efficientis, quia est ordo causæ executionis. Rursus. Influxus, & causalitas finis non potest importare efficaciam in ratione finis, nisi etiam importet illam in ratione voluntatis, quia influxus finis est influxus in vi voluntatis, causat enim finis ut apprehensus & volitus: ergo efficacia finis est efficacia voluntatis, & sic dari debet efficacia voluntatis antecederet ad actionem efficientis, quia illa efficacia voluntatis finis mouet causam efficientem ut agat.

- 19 Nec dici potest quod ad hoc sufficit simplex affectus & volitio inefficax finis, quia posita moueri potest efficiens ad operandum, licet non per necessariam connexionem, quia inefficax amor est. Non autem requiritur quod efficax sit, quia sic necessariō traheret ipsum agens.

Sed contrā, quia simplex affectus est ante actum intentionis, nec mouet ad assequendum finem, sed solum bonitatem rei repræsentat, non eius assecutionem: hoc enim pertinet ad intentionem quæ respicit finem relatē ad media, per quæ assequendus est, simplex autem affectus putē respicit finem sine vllō respectu ad media: ergo ex tali simplici affectu (qui ideo simplex est, quia non duplicat affectum in ordine ad media) non potest per se sequi operatio, sed si sequitur, erit per accidens, & non ex intentione finis, quia si non proponitur ille finis ut assequendus (id enim pertinet ad intentionem) nec cum respectu ad media: ergo licet moueatur voluntas ad assecutionē eius, & ad ponenda media, tamen fortuitō, & per accidens mouebitur, nec ex vi finis, aut humano modo. Patet consequentia, quia cum tali simplici affectu æquē bene compatitur effectum non sequi illo inuariato, & eodem modo se habente in ratione voluntatis erga finem: ergo ex vi sua non habet connexionem per se cum affectu: ergo

neque influxum per se, quia influxus causæ fundatur in connexionē, & perferre cum effectū, vel effectus cum ipsa: ergo si non sequitur per se, solum sequitur per accidens, quando ex tali affectu sequitur. Nec dico quod sequitur per se perferre necessitatis, sed perferre intentionis, & directionis, quæ solum habet locum in operantibus modo rationali, & ex fine, seu propter finem se agentibus. Et vbi non est connexio per se huius directionis, sed ex tali affectu dirigēte æquē bene habet sequi effectus, vel non sequi, non est directio per se, sed fortuita. Nec obstat quod necessariō trahit per hanc determinationem ipsum agens, quia hæc necessitas est ex suppositione finis voliti, & consequenter est necessitas secundum quid, quæ libertati non obstat.

Ex his autem deducitur quod hæc efficacia finis in ordine intentionis, seu causæ finalis ita antecedit efficaciam causæ efficientis, quod etiam antecedit efficientiam, seu executionem causæ proximæ & immediatæ, & non solum remotæ, nec solum media physica, sed etiam moralia: Nam respectu omnium istorum currit ratio facta, siquidē influxus finis, & efficacia eius nō solum mouet causas remotas, sed etiam proximās ad operandum, & multo magis proximās, quia influxus finis non peruenit ad causas proximās, si mediantibus remotis, quæ mouent & impellunt proximās, nec minūs proximæ agunt ex directione finis, quia non agunt temerē neque fortuitō: sed alicuius gratia: ergo ex influxu & efficacia finis. Et similiter media moralia ut merita seu preces operantur ex influxu finis, & alicuius gratia: ergo supponunt efficaciam finis, nō minūs quā media physica. Nec obstat quod media moralia operantur mouendo voluntatem operantis, atque adeo supponunt non esse motam: operatur enim non ut finis, nec ut id cuius gratia: meritum enim & preces non sunt finis, sed mouent tanquam medium, & ratio quæ per se sufficit ducere ad finem in exercitio, sed mouet alium ut ipse ducat. Itaque id quod faciunt media physica vi sua physica, faciunt media moralia per motionem alterius, quem alliciunt, ut faciat id quod media physica facerent. Mouent ergo ut media, non ut finis, & ad executionem mouent, non ad intentionem; & sic supponunt voluntatem motam per modum finis, moueat verō tanquā media ut executioni detur finis. Et cum dicitur, quod se habet potius ut qualitas & conditio personæ, quā ut media, distinguo, ut qualitas, & conditio requisita ad conferendum finem per modum præmij, concedo, ut qualitas, & conditio requisita ad volendum finem simpliciter seu intendendum illi personæ nego. Itaque qualitas meriti requiritur ad executionem dandi præmium, & mouet agentem, non per modum finis, sed per modum medij, ut det præmium: quia enim non est medium physicum, quod sua virtute potest finem assequi, & causare, oportet quod etiam in ratione medij moueat agens, ut physicē causet. Quod si in ratione medij mouet, supponit agens motū in ratione finis, & ita adhuc inuenit quomodo causalitatem suam exerceat mouendo efficiens. Quare ratio oppositæ sententiæ ex magna æquiocatione procedit, scilicet quia meritum operatur mouendo, seu alliciendo ipsum agens, & non distinguit de modo mouendi per modum finis, aut medij.

Quod autem dicitur, quod efficacia in ordine intentionis necessariō respicit efficientiam agentis proximi, & omnium causarum à quibus effectus immediatē pendet, & consequenter earum existentiam,

stetiam, non tamen supponit, aut respicit illo actu intentionis causas remotas, sed per alium actum disponit de eis tanquam de mediis; omnino in consequenter dictum est. Etenim ut per illud decretum efficax Deus videat illam actionem & illas causas proximas à quibus pender effectus, etiam debet illas videre ut operantes actu, & agentes, alioquin si agentes non videt, neque actionem videbit; nec sufficit videre illas existentes, nisi videat etiam operantes; sed si videt operantes actu, etiam debet videre causas remotas earum, quia actualis operatio causae proximae non procedit nisi ex motione causae remotae, & eius impulsu: à causis enim remotis incipit actio & ordo efficientis: ergo in consequenter dicitur, quod causas remotas remittit Deus ad aliud decretum quod pertinet ad ordinem executionis, & causas proximas videt in decreto efficaci ipsius effectus. Pater consequentia, quia non potest ordo intentionis esse efficax per se, nisi videat effectum egredientem à causa & causis immediatis, neque egredientem effectum potest videre, nisi videat actionem, & efficientiam qua egreditur; sed neque potest videre hanc actionem & efficientiam, nisi videat causam illam agentem immediatam esse motam à causis remotis & mediatis, quia ex connexionem, & continuationem cum illis operatur: ergo hoc ipso quod videt causam proximam operantem, videt esse motam à causis remotis & mediatis: ergo non indiget alio decreto sequenti, ut videat & determinet causas remotas ut moueant proximam, siquidem iam vidit mouisse illam hoc ipso quod eam in actu producere vidit, ut motam ab istis.

22 Dico secundò: Ordo executionis non solum est executio realis, & in re posita, sed est decretum, & actus voluntatis distinctus ab ordine intentionis, & deriuatus ex illo.

Ratio est, quia ordo intentionis, ut dictum est, est ordo causae finalis, ut influentis per modum finis in causam efficientem, ut agat: finis enim mouet causam efficientem, & efficiens gratia finis operatur: finis autem mouet, ut cognitus, & apprehensus, & mediante apprehensione sui & amore: ergo oportet quod immediatum efficiens quod mouetur à fine, sit voluntas: ergo primus effectus finis postquam est amatus & intentus à voluntate, est ut voluntas velit efficere, & voluntarie efficiat, & sic ordo executionis, seu efficientiae necessariò debet inueniri in voluntate post decretum intentionis.

Prima consequ. probatur, quia finis causat alliciendo, & mouendo metaphoricè: per allicientiam autem solum mouetur inclinatio, & voluntas: ergo si finis mouet causam efficientem, oportet quod moueat causam efficientem mouendo inclinationem eius; hæc enim solum est quæ mouetur per allicientiam: ergo inclinatio est immediatum efficiens quod mouetur à fine, & ab ordine intentionis, ut scilicet voluntas non solum efficiatur, sed etiam efficiat & efficienter operetur, licet ex vno fiat continuatio ad aliud, scilicet ex affectu ad affectum.

Secunda verò consequentia patet, quia voluntas non redditur efficiens per hoc præcisè quod sit affecta fini, & amans ipsum finem, sed ulterius per hoc quod velit efficere, & media proposita sibi executioni mandare, quia pro executione ipsa maior virtus & robur requiritur, & maiores difficultates se offerunt, quam pro toto ordine intentionis in voluntate componendo & fabricando: ergo non sufficit intentio finis quantum-

cumque efficax in finalizando, nisi pro executione re ipsa facienda nouo decreto & ordine assistat voluntas & instet operi, tum ut voluntarie efficiatur, tum ut difficultates ex voluntatis inclinatione superentur. Ex hoc enim fundamento probabitur *inf. disp. 7.* prædestinationem, & in vniuersum prouidentiam omnem quæ deseruit ordini executionis requirere specialem actum qui dicitur imperium, & vsum, ut vincantur difficultates in executione inuentæ; & idè principalis actus prudentiae est imperium, quia respicit principales difficultates vincendas, quæ sunt in executione, ut docet S. Thom. 2. 2. q. 47. art. 6. Et de hoc etiam largius agemus Deo dante 1. 2. q. 16. & 17. ostendendo dari hunc actum vsum elicitum à voluntate, & non solum à potentiis imperatis, & actum imperij etiam post electionem ex eodem fundamento, quia necesse est voluntatem decreto suo firmari, & velle executionem, etiam contra impedimenta, quæ se offerunt in exequendo; quod si nulla impedimenta sint, saltem ut executio ipsa voluntarie fiat, & potentiae exequentes, quæ voluntati ministrant, voluntarie moueantur ad opus, quod nullo modo stare potest, nisi voluntas ipsa velit efficere, & potentias illas mouere, atque ex tali voluntate, ipsæ potentiae liberè & voluntarie exequantur. Ordo ergo executionis non debet inueniri solum in re, id est, in ipsis potentiis executiuis, in quibus inuenitur ut in exequetibus, sed etiam in ipsa voluntate applicante per actum suum & inclinante, ut non merè naturaliter exequatur, sed voluntarie, scilicet, ut à voluntate mota, & applicata. Voluntas autem non applicat executiuas potentias causalitate finali, & ordine intentionis, sed causalitate effectiua & applicatiua, quæ præsupponit, & oritur ex causalitate finis, siquidem agit gratia ipsius, ergo ordine executionis, & ita hic ordo inuenitur in voluntate distinctus ab ordine intentionis.

23 Dices: inuenitur distinctus ab ordine intentionis inefficaci, seu ab affectu simplici à quo initatur totus ordo intentionis, non autem ab ordine intentionis efficaci, quia hic includit etiam consultationem de mediis, & totam volitionem eius quod exequendum est, & modi exequendi, & antequam executionem non velit, efficax non est.

Cæterum ista responsio æquiuecat valde in illo nomine *efficax*, summendo illud vno solum modo, scilicet pro efficacia efficientis, nec distinguit illud ab efficacia finis intra genus, & latitudinem causae finalis, in quo tamen genere etiam efficacia danda est, quia etiam finis de facto causat, & mouet ipsum efficiens ut agat, & sit intra suum genus causandi efficaciam habere debet, quatenus finalizat, & mouet de facto, distinguiturque ab inefficaci fine, quia finis inefficax solum mouet ad amandam bonitatem in affectu, non ad querendum se in effectu, idèque non respicit finem relatè ad media, aut si respicit media, non multum curat, sicque languet circa effectum, & sic comparitur secum quod ex vi talis amoris non sequatur electio. Finis autem sub efficacia finis consideratus respicit finem ut assequendum & relatè ad media, sicque non mouet solum ad amorem bonitatis suæ, quæ est simplex affectio sed ad assequutionem sui mouet ipsum efficiens, & reddit inclinationem voluntatis non solum affectuosam, sed effectricem. Quod verò dicitur, ordinem intentionis ut efficacem includere consultationem, & totam volitionem eorum, quæ postea in re facienda est, dicimus confundi in hac parte ordinem

ordinem volitionis comparatiue ad ordinem executionis, cum ordine totius volitionis comparatione ad executionem in re. Dicimus quod tota executio, quæ fit in re prius est volita, & in ipsa voluntate præcedit, quidquid agitur in re ut volitum: sed tamen in ipsa voluntate præcedit duplex ordo, & uterque efficax in sua linea & ordine, antequam fiat effectus in re; alter ex parte finis, ut in intentione, seu ut finalizante, alter ex parte efficientis ut inclinantis ad efficiendum executionem. Et primus ordo non respicit consultationem de mediis, & ipsam applicationem, vsumque voluntatis ut media ponantur, nisi in quantum hæc dependent à fine, quia in genere, & linea finalizandi ea respicit, & non aliter, sed in quantum effectiue fiunt, vel efficiunt, aut operantur ex præsuppositione finis, ad alium ordine pertinent. nempe ad ordinem executionis, qui est ordo efficientis, non solum efficientis in re, & ex parte potentie executiue, sed efficientis ex parte voluntatis inclinatiue ut voluntati exequatur.

24 Vnde in præcedenti tomo. in connexionem partium D. Thom. agentes de actibus voluntariis in 1.2. distinximus actus pertinentes ad ordinem intentionis, & executionis. Quod ordo intentionis versatur circa finem, & concluditur tribus actibus voluntatis duobus absolutis, & qui pertinent ad simplicem & inefficacem amorem, scilicet primus amor finis, & fructio imperfecta seu complacentia de illo, & tertio actus non iam absoluto, sed comparatiuo, qui respicit finem, non solum in se, sed ut consequendum relatè ad media, & hic actus est efficax ordine intentionis, quia finem respicit non solum ut sistentem in se, & in sua bonitate, sed ut se effundentem super efficiens, mouendo ipsum, & super media, ut ad affectionem respiciat. Post istos tres actus incipit ordo actuum circa media adhibenda, & in illis incipit ordo executionis: sed tamen iste ordo applicans media & tractans de illis, prius habere debet illa in affectu, deinde in effectu. In affectu habet, primò consultantem & inquirendum de illis si sit aliquod dubium aut difficultas, & sic consultata media proponit voluntati, deinde illa media placent per consensum, & tandem determinatur illud quod exequendum est per electionem. In effectu vero incipit executio realis ab imperio præcipiente & ordinante ut applicentur media; deinde est usus, qui est actus voluntatis applicantis potentias, & media voluntariè ad exequendum, tandem fit executio, & affectio finis. Videatur *ibi*. Exempla autem facile possunt occurrere.

25 Instat Vasquez argumento quod sibi valde efficax videtur *diff. illa 89. c. 7. in quarto loco*, & repetit illud 3. p. *diff. 2 3. c. 8. num. 98.* ad quod inquit aduersarios non respondisse; iam si semel Deus vult aliquem finem absolute, & efficaciter ante visa & decretata media, numquam poterit ordine executionis propter illa media velle talem finem: sed Deus vult aliquem finem intuitu mediorum, ut vult dare gloriam propter merita in executione: ergo oportet quod illud meritiuum resplendeat in ordine intentionis, & quoad hoc non distinguitur uterque ordo tanquam distinctum decretum in voluntate, quia non potest habere distinctum motiuium. Consequentia constat, & minor patet, quia verè & propriè dicitur Deus velle dare gloriam propter merita in executione, siquidem non coronat nisi eum qui legitime certauerit, & per merita mensurat præmium: ergo intuitu meritorum dat gloriam. Maior verò prob. quia quando in re & in executione ordinatè pro-

ceditur ex vno medio ad aliud aut per vnum medium in executione attingitur affectio finis, non dicitur vnum esse volitum intuitu alterius & propter aliud, licet dicatur ex vno sequi aliud, sicut v.g. si quis vocat chirurgum ut scindat venam, & ex scissione sequitur sanitas, non dicitur sanitatem velle intuitu scissionis, aut scissionem intuitu chirurgi, licet videat à chirurgo fieri, & sequi scissionem venæ, & ex scissione venæ sequi sanitatem: ergo similiter non diceretur Deus intuitu meritorum velle gloriam dare, sed ex meritis velle ut sequatur gloria. Si ergo verè dicitur intuitu meritorum velle gloriam, illa merita seu media fuerunt in ordine intentionis, quod est manifestum signum non esse efficacem ordinem intentionis, nisi includat in se ipsa media.

Resp. distinguendo maiorem: Si Deus semel 26 vult aliquem finem ante decretata & præuisa media, non poterit etiam ordine executionis velle finem propter media, si ly *propter* dicat causam finalem, & cuius gratia, concedo; si ly *propter* dicat causam præparatiuam & dignificatiuam subiecti, quod reducitur ad causam materialem, & ex parte subiecti se tenentem, nego: Ad minorem: Deus vult aliquem finem intuitu mediorum, sicut gloriam intuitu meritorum: distinguo, si ly *intuitu* dicat vim causæ finalis, & cuius gratia, nego; si ly *intuitu* dicat causam dispositiuam, aut dignificatiuam subiecti, & ex parte eius se tenentem, concedo. Et sic non oportet quod in ordine intentionis resplendeat illud medium, seu illud meritum ut motiuium cuius gratia, & ex parte finis se tenens: reuera enim merita non se habent ut finis cuius gratia, sed ut dignitas subiecti, & tanquam causa dispositiua ad præmium, & sic tanquam intuitu dispositionis, & dignificationis subiecti, aut intercessionis se se habeant ut præces, non tanquam intuitu causæ finalis datur præmium. In quo non tenent illa alia exempla quæ adducit P. Vasquez quia solum se habent ut media physica, non ut moralia, & sic non dignificant subiectum, aut disponunt, ut intuitu eorum dicatur finis dari in executione, v.g. quod intuitu chirurgi dicatur scindi venam, aut intuitu scissionis dari sanitas, quia in his mediis physicis sequitur finis ad ea, ut effectus ad causam efficientem, in mediis autè moralibus non sequitur sic ad illas effectus, sed datur ratione & intuitu illoque tanquam allicientium, ut subiecto sic disposito, aut dignificato conferat præmium. Vnde in quibusdam mediis habet locum dicere quod intuitu eorum datur finis, in aliis non. Et mirum est in re tam clara inuenisse difficultatem Vasquez, & argumentum hoc alicuius momenti reputasse. Et ex eius solutione constat non esse negandum ordinem executionis in voluntate post ordinem intentionis, sed ordinem executionis derivari ex ordine intentionis, & posse aliquando etiam in ipso ordine executionis verificari, quod intuitu alicuius mediæ datur finis, quando medium morale est, aliquando non, quando est solum medium physicum, & ad illud sequitur executio finis.

Dices secundò, ex Vasquez illud axioma: Primum in intentione est vltimum in executione, non intelligitur, quod vtrumque inueniatur in mente; sic enim vtrumque esset in intentione, & in effectu, sed vnum in mente, aliud in re; ponere autem vtrumque in mente & in decreto voluntatis nullus vnquam docuit. 27

Conf. quia etiam nos quando aliquid intendimus, statim ad opus procedimus, neque id repetimus quando consultamus, aut decernimus de re: ergo

ergo multò minùs Deo debemus tribuere illa duo decreta, sed statim post ordinem intentionis potest operari.

Ac denique modus iste loquendi vsitatus est, quia Deus vidit Petrum futurum sanctum, voluit ei dare vitam æternam, non autem voluit dare vitam æternam vt sanctus esset: ergo non sunt ponendæ istæ duæ prioritates in decreto Dei.

Resp. quòd licet exequi in effectu solùm sit in re, exequi tamen in affectu seu inclinatione & in præparatione & ordinatione exequendi etiam imminere inuenitur, sed non omnis affectus & decretum metis est intentio, sed solùm illa quæ versatur circa finem relatè ad media. Inde verò resultat alius affectus, seu decretum præparans & vltimò inducens executionem, vt voluntariè fiat.

Ad conf. Resp. quòd nos semel inrento fine non repetimus ipsum directè in se & formaliter, sed repetimus virtualiter quatenus in volitione mediorum semper virtualiter operatur finis. & ex illo deducitur decretum de executione, & vltimò executio ipsa in re. Et sic attribuitur etiam Deo. Ille autem modus loquendi, sc. quia Deus videt Petrum futurum sanctum, vult ei dare vitam æternam, est verus in ordine executionis, non in ordine intentionis. Cùm autem dicitur Deus non vult dare vitam æternam vt simus sancti, si ly *vt* dicat causam finalem, verum est: non enim finis vitæ æternæ est sanctitas nostra; si autem ly *vt* dicat effectum consecutum ex fine, sic Deus vult dare vitam æternam vt simus sancti, quia ex eo quòd vult dare vitam æternam vt finem, sequitur quòd det nobis sanctitatem & gratiam vt media.

28 Denique instabis: nam Deus quando procedit ordine intentionis ad volendum finem, procedit cum comprehensione perfectissima omnium mediorum, & sic non indiget vlla consultatione & inquisitione eorum; neque etiam vlla difficultas, aut impedimentum respectu huius datur, quia totum dependet à se, & ipsa à nullo, & sic si aliquod impedimentum, aut difficultas ponitur, est quia ipse vult: ergo non indiget aliquo ordine executionis distincto ab ordine intentionis, nec aliquo decreto voluntatis per modum imperij vel vsus ad tollenda impedimenta & vincendas difficultates.

Resp. istos ordines non distingui in Deo quasi plures actus ex parte Dei, sed vnus & idem actus est, solùmque distinguitur penes diuersa connotata, & respectus seu formalitates ex parte obiectorum, sic enim distingui solent diuersa decreta & instantia rationis in Deo, vt mox dicemus. Et sic licet omnia media Deus simul ex parte sua cognoscat & comprehendat, tamen etiam videt ipsa inter se ordinari ad inuicem, & vnum causari ex alio, aut etiam ex fine, sicut dicitur Iudith. 9. *Tu fecisti priora, & illa post illa cogitasti.* Et sic ille actus Dei vt tangit finem, potest iussuienter distingui ex parte diuersorum obiectorum à seipso, vt tangit media deriuata ex tali fine. Et quando dicitur quòd non est aliqua difficultas aut impedimentum vincendum per decretum diuinum, distinguo; nulla est difficultas respectu ipsius Dei, & potentiae eius, concedo; nulla est difficultas ex parte ipsorum obiectorum, quatenus vnum impedit aliud, aut ei repugnat, nego. Et sic ratione ipsorum obiectorum requiritur actus, imperij & vsus, qui est idem omnino actus cum actu intentionis ex parte Dei, sed distinguitur ex parte obiectorum, in quibus procedit executiue, non tollendo difficultates aliquas, & impedimenta, quæ respectu Dei impedimenta sunt, sed quæ inter ipsa obiecta impedimento & dif-

Ioan. à S. Thoma in 1. part. D. Thoma.

ficultates esse solent. Et Deus vt intelligitur præparare & disponere, quomodo illa impedimenta tollantur effectiue & executiue, intelligitur habere ex parte decreti sui ordinem executionis; vt autem intelligitur velle aliquem finem in ordine ad quem præparat, & exequitur ista, dicitur habere ordinem intentionis. Inquisitionem autem & consultationem de mediis non habet, quia hæc dubitationem supponunt, & consequenter imperfectionem, sed Deus habet consilium solùm quoad rationem certitudinis, & resolutionis de agendis, & sic solùm operatur secundum consilium voluntatis suæ, non ex consultatione dubietatis suæ. Plura ad hæc pertinentia dicemus *infra d. 7. de predest.*

Quomodo instantia & signa rationis in Deo distinguantur, & secundum quæ connotata?

Cùm actus diuinus sit vnus & simplicissimus, 29 omnia obiecta sua indiuisibili modo complectens, inter quæ obiecta datur ordo & distinctio, & vnum est propter aliud ex parte rerum volutarum, licet non ex parte volitionis diuinæ, oportet quòd ipse actus voluntatis diuinæ comprehensiuus omnium istorum obiectorum sic se habeat ergo illa, quòd gerat vicem plurium actuum, ita quòd ea quæ nos per plures actus volumus, & attingimus, Deus vnico actu gerente vicem omnium istorum, & eminenter illos continente attingat. Vnde dat locum ad considerandum in illo actu quasi diuersa officia, & diuersas terminationes, & respectus ad diuersa obiecta, quibus quasi diuiditur, & distinguitur non entitatiue, sed respectiue, & terminatiue, sicut etiam distinguimus ideas in Deo non entitatiue, sed respectiue, quia licet ex parte Dei sint vnus & idem conceptus, seu species expressa, tamen vt accommodatur vni creaturæ formandæ, eo modo quo formabilis est, & quo alia non est formabilis, resultat diuersus respectus in illo conceptu ad vnam creaturam, quàm ad aliam, sub quo respectu denominatur ille conceptus, idea, & forma istius, seu formatiua istius, & non alterius. Sic ergo actus voluntatis diuinæ, vt decernens circa vnam creaturam, & volens illam, intelligitur vt distincto modo se habens in decernendo, seu respiciendo istam creaturam, atque in respiciendo aliam, & sic ille actus secundum diuersos respectus gerit vicem plurium actuum, seu decretorum respectiue, cùm in se sit vnus entitatiue. Nec prætermittenda est ista distinctio decretorum, & ordo eorum à Patribus, & familiaris valde facta est Scholasticis, qui non possunt plenè explicare modum, quo diuina voluntas disponit de creaturis, & decernit de illis, nisi secundum istos respectus & connotationes, analogia desumpta ad nostros actus, quibus sic volumus & decernimus de obiectis. Vnde S. Prosper in epist. ad Aug. quæ est ante librum de predestinat. Sanctorum, agens de distinctione præscientiæ à proposito, seu decreto Dei; *Licet, inquit, diuini præscientiæ à proposito temporali distinctione non possit, præscientia tamen quodam ordine sit submixta proposito &c.* vbi fatetur distinctionem realem non esse inter propositum & præscientiam seu prioritatem & antecedentiam durationis, quod significat temporalis distinctio, posset tamen esse distinctionem virtualem, seu secundum aliquem ordinem, & respectum. Et D. Thom. *infra q. 23. art. 4.* dicit, *electionem & dilectionem Dei esse priorem nostro modo intelligendi predestinatione.* Et in hac q. art. 5. docet, in Deo non dari ordinem ex parte actus, ita quòd velit hoc propter hoc, sed ex parte obiectorum, quia vult hoc esse propter hoc. Ergo instantia, seu prioritates, & signa atque decreta distinguimus

in Deo, ex comparatione, & connotatione ad obiecta quæ vult, prout in illis obiectis distinctio, & antecedentia, aut prioritas est.

Difficultas autem est in duobus.

Primum, an decreta Dei, & actus liberi distingui à nobis non possint, nisi ex parte obiectorum respondeat diuersa aliqua mutatio, respectu cuius diuersa decreta distinguantur, an verò sine tali diuersitate, ex parte obiectorum possint diuersa decreta assignari & distingui.

Secundum est, qua regula utendum sit ad designanda, & distinguenda ista instantia, decreta, & prioritates in Deo, cum constet posse sub eodem decreto multa & diuersa obiecta contineri: sicut nos etiam possumus multa velle vnico actu, & è contrà posse circa eandem rem plura decreta, aut instantia vel prioritates distingui.

31 Circa primum validè inter se digladiantur Vasquez, & Suarez, & vnusquisque suos habet sectatores. Vasquez enim in hac 1. p. disp. 82. c. 6. docet sine mutatione rerum inter se non posse varias ordinationes diuinæ voluntatis, aut ordinem instantium assignari. Et idè significauerat d. 97. c. 4. Suarez autem lib. 1. de prædest. c. 15. oppositum sentit, scilicet non esse necessarias diuersas mutationes in rebus extrâ, vt variantur decreta in Deo, sed sufficere extrinsecum aliquem respectum, vel denominationem ad varianda decreta. Et idem affirmat l. 2. de scientia conditionatorum c. 7. & tomo 1. 3. p. disput. 5. sect. 1. & aliis locis.

Fundamentum Vasquez in eo stat, quia nō potest rebus omnino eodem modo se habentibus, & inuariatis, duplex contradictorium de eodem prædicari, v. g. quòd Deus velit Incarnationem Christi, propter solam hominum salutem, & quòd non velit eam propter solam hominum salutem: ergo oportet ad hanc contradictionem verificandam, dari aliquam mutationem, & variationem realem, in qua illa contradictio possit verificari: sed ex parte Dei nulla datur: ergo tota debet esse ex parte creaturæ, aliàs de eodem subiecto inuariato duo contradictoria verificarentur.

32 Et hinc confirmatur vniuersaliùs hæc ratio, quia decretum diuinū nō potest liberè tangere de nouo creaturam per mutationem sui: ergo per mutationem creaturæ. Patet cons. quia ista noua attingentia, & nouum decretum fundat nouum respectum inter voluntatem diuinam & creaturam, nouus autem respectus non potest fundari sine aliqua mutatione alicuius extremi, ergo si ista mutatio ex parte Dei assignari non potest, ex parte creaturæ assignanda est, aut variatio decretorum danda sine variatione respectus, quod intelligi non potest: nā ad vnā creaturam sub vno respectu & ratione, vnica voluntas Dei sufficit.

33 Fundamentum autem Suarez sumitur ex diuersis exemplis, & inconuenientibus ad quæ deducitur opposita sententia. Exempla sunt; nam in primis potest Deus aliquid priuariū morale facere, v. g. tollere obligationem moralem, nulla reali mutatione in homine facta, v. g. relaxare obligationē voti per solā dispensationē suā voluntatis, quæ relaxatio nihil ponit in homine, & tamē habet voluntatem in Deo. Potest etiam remittere omnem pœnam temporalem debitam in purgatorio, aut solā suā voluntate, aut ad preces alicuius Sancti, vel ob eius merita, & tamen remissio illa nihil ponit in homine, sed est extrinseca cōdonatio. Potest tercio velle plures negationes, quæ aliquādo maximè cōducunt ad euadēda peccata, aut ad alios effectus, v. g. quòd homini nō occurrat memoria alicuius iniuriæ, vel alterius tērationis, quæ si occurreret, fatigaret

ipsū, & in peccatū impelleret, & tamē illa negatio memoriæ, seu obliuio actualis nihil ponit in homine. Nec potest hīc accommodari respōsio, quæ ad voti relaxationē datur à Vasq. d. illa 82. c. 6. & ab aliis, quòd illa relaxatio debet habere adiunctā reuelationē, & manifestationē Dei de tali relaxatione, aliàs nihil operabitur, vel etiā, vt alij dicūt, destruēdo fūdamentū vel subiectū huius obligationis, v. g. destruendo hominē, qui emisit votū, vel in vinculo matrimonij tollendo vxorem per mortē, quam mortua, cessat vinculum. Sed nos de hoc modo relaxandi non loquimur, sed de illo qui potest fieri à Deo viuente homine, & tamē potest Deus irritare, & totaliter tollere obligationē voti; si enim pater potest irritare vota filij, & nō ponit in illo aliquid reale, cur non poterit Deus cuiuscūq; hominis irritare vota? Cōtra primū autem modū instat Suarez, quia ibi est duplex volitio, alia tollendi obligationem per dispensationem, & condonationem extrinsecam tantū, alia reuelādi id alteri, vt operetur ex relaxatione voti, & tanquam non obligatus. Et licet hæc requiratur vt conditio ad hoc vt iste sciat se non esse obligatū, & sic operetur, tamē ad relaxationem ipsam & obligationē vinculi ista voluntas non tollit illud formaliter, sed illa prior cōdonatiua, quæ nihil ponit in homine. Et præterea ponamus quòd Deus nihil illi homini reuelaret de tali relaxatione, sed aliquantulum post vel interim ne ipse peccet contra tale votum, non concurrat cum ipso vt habeat memoriā voti, totū hoc est negatiuum, & nihil ponit in homine, & tamē ponit voluntatē in Deo. Præterea in relaxatione pœnæ temporalis non requiritur reuelatio ista, neque ad hoc vt Deus auferat occasiones peccandi, & obliuionem immittat, vel non concurrat ad memorandū ista enim sine reuelatione, aut intimatione aliqua suos effectus habent, sine vlla enim reuelatione potest Deus post remissum peccatum, totā pœnā temporalem remittere solā suā voluntate: sicut enim remittit eam in Baptismo, quia vult; in sacramento autem Pœnitentiæ non remittit totā pœnā, etiā si in Baptismo aliquando non maior infūdatur gratia, quā in Pœnitentiā; posset ergo si vellet extra sacramentum totam pœnam remittere, si vellet, sicut vult in Baptismo. Illa autem voluntas si adesset, non poneret nouam mutationem realem in homine, sed solū denominationem moralem non habendi obligationem ad pœnam post hanc vitam: Ergo sine effectu reali ad extra, potest Deus nouam habere voluntatem & decretum.

Et cons. ampliùs ista sententia, quia Deus potest 34 eandem rem in se omnino inuariatam velle ex diuerso fine & motiuo per diuersa decreta (& in sententia opposita etiam ex fine inefficaciter volui, & non ponendo in re: fatentur, n. Deū ex gloria inefficaciter voluit omnib. hominib., producere omnes, & quosdam de facto saluare, alios non: potest etiam habere voluntatem alicuius conditionati non ponendi in re vnquam, sicut habuit voluntatem vt Ioas deuastasset Syriam, se septies iaculasset terram 4. Reg. 13. quam tamen non vastauit, nec iaculo septies percussit. Non ergo requiritur necessariò mutatio aliqua realis ex parte obiecti vt dicantur esse diuersa decreta in Deo. Anteced. quoad voluntatem de re conditionata constat, exemplo adducto, & ad modum illius potest Deus habere circa alias res similem voluntatem & decretum: ibi autem connexio illa inter res ita disparatas non nascebatur ex aliqua connexione, & ordine rerum inter se. Quæ enim erat connexio inter percussiones illas, cum iaculo in tali numero, & percussione Syriæ vsque ad cōsummationem?

Erat

Erat ergo illa ordinatio, & connexio solum ex voluntate Dei, & tamen illa voluntas nihil ponebat in illis rebus. Nec obstat quod posuit aliquid ad extra, scilicet reuelationem illius facti, aut promissionem sic adimplendi. Contra enim est, quia hæc reuelatio nihil posuit nisi in mente Prophetæ, cui Deus reuelauit, in Rege autem loas, in iaculo eius, in Syria percutienda nihil posuit, nec connexionem illam inter percussione[m] terræ, & Syriæ fecit reuelatio, sed supposuit, & solum manifestauit: ergo licet voluntas reuelandi aliquam mutationem posuerit in eo, cui reuelatio facta est, tamen voluntas percutiendi Syriam nihil posuit in ea, neque in iaculo, & Rege percutiente terram, & tamen in Deo fuit voluntas de tali connexione. Est ergo voluntas libera in Deo sine aliquo effectu ad extra in eo circa quod est voluntas.

35 Quoad voluntatem autem & decretum diuersum propter solum diuersum finem, re ipsa omnino inuariata manente, constat in decreto Incarnationis, quæ est volita ex vi huius decreti ob redemptionem generis humani, ita ut si homo non peccaret, Christus non veniret, & tamen posset Deus ob alium finem eandem Incarnationem velle, & tunc haberet aliud decretum, posset enim venire propter redimendum Angelum, aut propter exaltationem vniuersi, non autem ad redimendum hominem. Et similiter Deus potest aliquod beneficium nobis exhibere propter diuersa motiua, seu fines, v.g. dare homini eandem gloriam liberaliter, ex dono suo, aut ex meritis, & pluuiam dare propter abundantiam frumenti, & cursum causarum naturalium seruandum, aut propter preces, & miseriā pauperum: qui fines nihil reale variant in pluuiā, & tamen diuersa voluntas in Deo est. Et præsertim hoc videtur quando finis non est in re ponendus, neque efficaciter intentus, ut admittunt oppositi auctores, ut si Deus producat omnes propter gloriam, quam non omnibus largiturus est: & in eorum sententia ex gloria ineffaciter omnibus volita, tam reprobis quam prædestinatis mouetur Deus ut ex fine ad eligendum aliquos ad gratiam: tunc illa voluntas finis ineffaciter volita, ut ipsi dicunt, quid ponit in rebus ad extra, & tamen Deus habet voluntatem circa talem finem: vult enim omnes homines saluos fieri, & ista salus non fit in omnibus: sufficit ergo ad voluntatis actum, seu decretum in Deo aliquid volitum conditionata voluntate & ineffaciter, licet in re nihil mutationis ponat.

36 Ad hæc non habent oppositi auctores quid respondeant, licet non modicè se affligant, nisi vel dicendo aliquam variationem realem dari ad extra quando Deus vult aliquid diuerso decreto propter diuersum finem extrinsecum, v.g. reuelationem aliquam talis voluntatis, aut promissionem, aut pactum, vel aliquem alium effectum, quem nos ignoramus, vel saltè aliquem effectum negatiuum à parte rei, sc. non ponendi illum finem propter quem aliàs posset esse volita talis res, aut quod talis finis non moueat voluntatem diuinam, licet semper sit cognitus à Deo. Ad decreta verò conditionata negat ea de facto dari in Deo, sed solum esse conditionata ex parte actus, non verò absoluta, & de facto ex parte actus, & conditionata ex parte obiecti, id est, quod illa decreta non datur in Deo, sed darètur posita illa conditione.

37 Sed hæc nihil momenti afferunt. Nam quod attinet ad reuelationem, promissionem, vel pactum, hæc non semper necessaria sunt. Nam quod attinet ad promissionem vel pactum, multa sunt quæ nec promissionem dicunt, nec pactum, & tamen ex solo diuerso fine possunt variare decreta, ut in exemplis supra allatis constat, si Deus veller Incarnationem

Ioan. à S. Thoma in 1. part. D. Thoma.

non ex fine redemptionis hominum, sed ex alio fine, aut si veller dare pluuiam, non propter cursum naturalem causarum, sed propter preces pauperum, vel ob alium finem. Et illa decreta quæ promissionem Dei, vel pactum continent, manifestè probatur dari in Deo de facto, sicut ipsa promissio de facto ponitur, & tamen circa res promissas nihil reale ponit, quia solum sub conditione fit promissio, & illa non purificatur. Solum ergo potest assignari effectus ad extra per hoc quod promissio illa manifestatur ad extra, quod est reducere ad reuelationem. Et de hac iam diximus quod non est effectus voluntatis illius conditionata & ineffaciter, sed supponit illā & manifestat eam: est autem effectus alterius voluntatis efficacis, qua Deus vult reuelare illam priorem voluntatem. Et certè mirabile est quod non possit Deus habere voluntatem illam nihil immutarem de nouo in rebus, sed solum ex fine extrinseco distinctam ab alia, & quod necessitetur illam reuelare ad extra, nec possit sibi soli retinere; Quod verò recurrunt ad effectum aliquem nobis ignotum, fugiunt lucem, qui ad tenebras ignorantia recurrunt. Contra ignorantiam autem non est nobis colluctatio, nec cōcertatio. Quod attinet ad effectum negatiuum, quod scilicet Deus non ponat talē finem quando vult propter alium rem aliquā, & non propter illum, ponat autē, & cōiungat rem cum tali fine, quem vult, v.g. si Incarnationem veller non propter redemptionem hominum, sed Angelorum, tunc Incarnationis decretum esset diuersum, quia apponit diuersum finem, scilicet redemptionem Angeli, & negat alium, scilicet redemptionem hominum: hoc inquam non sufficit, tū quia in istis diuersis finibus aliud est considerare voluntatem, & decretum Dei de fine ipso, aliud decretum de ipsa re quæ ex tali fine est volita. Circa voluntatem finium poterit esse diuersitas (si fines ipsi diuersi sint, & voliti efficaciter) ob diuersam mutationem ex parte obiecti, quia modò est volitus vnus finis, modò alius; & sic si sunt diuersi fines voliti, quidni etiam circa ipsos erunt diuersa decreta? Sed vis argumenti est non solum circa fines, sed etiam, circa rem ipsā, quæ est volita ex diuersis istis finibus dari diuersa decreta, sine hoc quod aliquid in tali re immutetur: nā v.g. Incarnatio eadem quæ modo est volita ex fine redemptionis hominum, posset eademmet esse volita ex alio fine, puta ex redemptione Angelorum, & tunc non solum decretum de redemptione Angelorum esset diuersum, sed etiam decretum de Incarnatione, licet ille finis de redemptione Angelorum, aut negatio finis de redemptione hominum adiuncta Incarnationi ipsi nihil reale variet in illa; & similiter pluuiā data intuitu precum, aut intuitu abundantia terræ sine precibus nihil variat reale in ipsa pluuiā, licet variet in ipsis motiuis, quia ordinatio pluuiæ ad illos fines omnino extrinseca ipsi est, sicut & ordinatio Incarnationis ad hanc, vel illam redemptionem, & tamen decretum circa ipsamet Incarnationem non est idem. Sed adhuc dato, quod illa extrinseca ordinatio ad tales fines aliquam variationem, saltè secundum respectus de nouo aduenientes ponat in rebus sic ordinatis, & ita dicatur quod Incarnatio ordinata ad redimendum Angelum est alia à seipsa ordinata ad redimendum hominem, quid dicemus, quando Deus mouetur ad aliquid volendum ex fine non efficaciter volito, nec in reponendo, ut admittit sententia opposita? ut si Deus ex voluntate soluendi omnes homines producat illos, illa salus omnium non est ponenda in re, & tamen ex illa mouetur ad producendum omnes, essetque diuersum decretum, si ex solo naturali fine illos veller producere. Quid ponit diuersum in hominibus illa gloria ineffaciter volita? Dicunt: mouetur ab illa diuina voluntas.

Q. 2.

Instit.

Insto: ergo mouetur ab aliquo non ponente variationem in obiecto extra, & tamen mouetur ad diuersum decretum habendum: ergo, &c.

38 Quod attinet ad decreta de facto habita circa obiecta conditionata, vbi euidentius apparet Dei voluntas sine mutatione reali ad extra circa ipsa futura, satis *præc. tom. d. 20. a. 2.* ostēdimus illa dari. Vbi etiam addidimus, quod nullum est futurū ita purē conditionatum, quod non aliquid absoluti importet, saltem ex parte causerum, quæ de se sunt ordinatæ ad tale futurū, licet de facto non producat illud, & ipsa veritas futuri conditionati iā de facto est determinata ad vnā partem, cum posset ad aliā determanari. Et sic ratione huius absoluti (etiam si alia ratio non subesset) possent talia decreta circa futura conditionata poni in Deo. Sed ramen præfenti est aduertendum, quod causas inferiores esse ordinatas ad tale futurum conditionatum, licet ex parte causerum supponat realem virtutem ad tales effectus, non tamen reali respectu potest respicere ista conditionata, quæ nunquam sunt, nec erunt, & sic non decernit Deus de illis ratione alicuius realis mutationis in illis, vel in causis vt ordinatis ad illa: nec enim hæc virtus causerum, quæ ordinata est à Deo, vt, quantum ex se est, posset illa conditionata futura producere, accipit realitatem aliquā & immutationem per hoc præcisè, quod illa futura sub tali conditione producenda essent, sed de facto non producentur, præsertim in conditionatis disparatè se habentibus, ad quæ præter naturalem inclinationem vel ordinationem, & inter quæ non est alia connexio quàm extrinseca ex beneplacito Dei, vt *suprà* ponderauimus.

39 Quare hæc sententia simpliciter tenenda est, & necessariò admittenda à Thomistis, qui ponunt decreta absoluta ex parte Dei, & cōditionata ex parte obiecti ad cognoscenda futura conditionata: in hoc enim apparet vniuersalius dominium Dei, & dispositio super omnes creaturas in quocumque statu, etiam conditionato, & secundum omnes cōbinationes, etiam secundum ordinationem extrinsecam ad diuersos fines, & secundum denominationem aliquam moralem, sicut est in obligatione legum, institutione sacramentorū deputatione alicuius officij, & aliorum similiū, quæ in rebus non ponunt intrinsecam denominationē, aut mutationem, & licet per reuelationem aut locutionem seu manifestationem Dei debeat constare nobis de ista voluntate, tamen illa manifestatio, aut reuelatio Dei, est effectus voluntatis manifestādi, & sic supponit aliā priorē voluntatē, qua rem manifestatam voluit in se, & exinde colligimus non repugnare quod Deus etiam sine manifestatione quoad nos habeat illum voluntatē non immutantē realiter ad extra quoad se. Et exinde vlteriùs inferimus, quod apud Suarez & alios, qui hoc ita admittunt, nulla est repugnātia nec imperfectio, quod Deus habeat decreta actu, & de facto circa futura conditionata volēdo & determinando quid in vnaquaque occasione contingeret & fieret determinatè. Quod si ita est, in illis decretis, sine dubio cognoscet Deus determinatam veritatem talium futurorum, & sic non indigebit scientia media, nec illa de necessitate ponenda est in Deo, quia intra se, & in manu sua, seu voluntate sua habet sufficiens medium, immò & perfectius, & infallibilius & eminentius ad cognoscēdā hanc determinatā veritatē, sc. intuendo decretum suū, & determinationem suā erga talia futura. Si ergo intra se habet tale mediū ad illa cognoscenda, non indiget scientia media quæ est ante omne decretū, & independens ab illo, cum in ipsis decretis eminentius & perfectius ea obiecta cognos-

cat, & conuenienti modo ad ipsum Deum, scilicet incipiēdo à se, vt à causa obiecti cogniti, nō ipsum obiectum supponendo ante se, & ante decretum suum, vt ab illo cognitio dependeat.

Ad fundamentum oppositæ sententiæ Resp. iam 40 nos *sup. disp. 4.* ostendisse circa actum liberum Dei quomodo possit idēmet actus inuariatus entitatiuē velle, & nō velle obiectū, & eadē ratione potest velle ex vno motiuo, & nolle ex alio. Et quando instatur, quod hoc est verificare duo contradictoria de eadem re omnino inuariata à parte rei, tā intrinsecè in se, quā extrinsecè in suo cōnotato seu effectu: Res. hoc incōueniens in diuinis esse valde generale, & solui in multis materiis, vt in cōstitutione actus liberi, quomodo eadē entitate possit Deus velle, & non velle obiectum in relatione, & essentia, quomodo eadem entitas sit communicabilis vt natura, nō communicabilis vt relatio; in distinctione virtuali attributorū, quomodo dicatur Deus misereri per misericordiā, nō misereri per iustitiā, producere Filium similem per intellectum, non producere similem Spiritum S. per voluntatē, cum tamen intellectus & voluntas, misericordia & iustitia sint eadē entitas à parte rei. Ad quæ omnia dixit S. Th. sufficere virtualem distinctionem in Deo, vt ex ipso adduximus & soluimus *tomo præced. disp. 4. a. 6. circa solut. ad secundum.* immò vt ibi ostendimus hoc fuit ipsissimum fundamentum Gilberti ad ponendam distinctionem realem inter deitatem, & personas, vt *ibid.* notauimus, quam tamen nec Scotus ponere ausus est, quia illa positio Gilberti in Cōcilio Rhemeni damnata est, vt *ibi* ostēdimus. Et tamē illud argumentum de duabus contradictoriis quod non verificantur de eadem re inuariata à parte rei, si quid probat, etiam probat non esse eandē entitatem realiter, & identicè personam & naturam, attributa inter se, actum volendi & nolendi, &c. quod nullus dicet, siquidem etiam de eadem entitate materialiter & entitatiuē vna à parte rei, non possunt à parte rei duæ cōtradictoriæ verificari. Nec releuatur illa verificatio cōtradictionis de volūtate diuina per hoc, quod extrinsecè, & in suo connotato habeat mutationē, & variationem realem, quia cōtradictoria ista non de ipso volito quod est cōnotatum, sed de ipso velle quod est actus verificatur: dicitur enim Deus velle Incarnationē esse propter redemptionem hominum, aut nō velle propter redemptionem hominum, & inquirimus quomodo verificentur ista cōtradictoria de eodē velle, nō de eodē volito: ergo impertinenter adducitur variatio realis ex parte voliti, si ex parte volūtatis nō datur, & contradictoriæ istæ de ipsa voluntate, quæ in re est vna entitas inuariata, dicantur. Tenentur ergo ipsi soluere suum argumētum, quod tamen euidentius esse iactant, vt Alarcon *tract. 3. disp. 5. c. 2. & 3.*

Quare ad argumentum simpliciter dicimus id 41 quod D. Thom. simili argumento respondet *1. p. q. 39. art. 1. ad 2.* vbi proponit simile argumentum sic: *Affirmatio, & negatio simul & semel non verificantur de eodem, sed affirmatio & negatio verificantur de essentia & persona: nam persona est distincta, essentia verò non est distincta: ergo persona, & essentia non sunt idem.* Argumentum hoc est prorsus idem quod facit appposita sententia in actu voluntatis diuinæ, quæ potest velle, & non velle sub diuersis motiuis: ergo petit aliquam variationem & diuersitatem, si non intrinsecam, saltem extrinsecam, quia de eodem subiecto non possunt affirmari duo contradictoria inuariatis eisdem rebus: nam similiter non poterunt affirmari de persona, & natura (si sunt eadem omnino res) quod sit distincta, seu incommunicabilis, & non distincta, seu communi-

cabilis. Respondet autem S. Thom. non quod requiratur aliqua diuersitas vel variatio realis, saltem extrinseca: hæc enim impertinenter adducitur ad affirmationem, & negationem de ipso actu, seu de ipso velle in se, sed respondet sic. *Ad secundum dicendum quod in quantum essentia, & persona in diuinis differunt secundum intelligentiam rationem, sequitur quod aliquid possit affirmari de uno, quod negatur de altero, & per consequens, quod supposito uno, non supponatur alterum.* Quare S. Thom. non requirit variationem realem in connotatis extrinsecis, vel in effectibus, vt de aliquo subiecto dicatur affirmatio & negatio, sed sufficere dicit differentiã secundum rationem. Ad quid ergo requiritur ista variatio realis? Sic ergo quando subiectum entitatiuè, & in re est indiuisibiliter vnum & idem, sed virtualiter, & eminenter multiplex, ita quod vnicũ existens facit officium plurium, potest, licet inuariatũ in se, admittere affirmationem, & negationem perinde ac si realiter essent plura, quia illa vinca realitas plurium officio fungitur, & non est affirmatio, & negatio eiusdem de eodẽ, quia non sub eadem formalitate, sed sub distinctione virtuali affirmatur, & negatur aliquid, & hæc distinctio sufficit ad verificanda illa contradictoria. Et quia affirmatio & negatio dicuntur de subiecto, vt consideratur in mente, & ibi consideratur vt multiplex & distinctum, potest prout ibi, & sub tali formalitate distincta, admittere affirmationem & negationem, & a parte rei illam admittit fundamentaliter, prout fundat illa res diuersas has distinctiones. Vnde non absolute possunt dici duo contradictoria de Deo, & de attributis vel actibus diuinis, sicut non est verum absolute Deum esse, & non esse, in æternitate Antichristum viuere, in æternitate non viuere, in Deo esse entitatem communicabilem (scilicet naturam) & non esse entitatem communicabilem sed attendendam esse semper formalitatem propositionis, significationemque terminorum, & formalem sensum: cum enim negatio si malignantis naturæ, posita in propositione, totum quod post se inuenit negat, & sic si ponantur termini absolute significantes, & non facientes aliquem sensum formalem & restrictiuium, non possunt absolute dici de eodẽ subiecto a parte rei, & entitatiuè inuariato: sicut dicere Deus est, Deus non est, negatiua absolute negat: Essentia est res communicabilis, non est res communicabilis, negatiua est falsa, quia de ipsa realitate totum negat, & totaliter, seu sub omni sensu etiam idetico. Caterum si fiat sensus formalis, & sub aliqua appellatione vel formalitate, vel expressa, vel subintellecta fiat propositiones contradictoriæ, tunc de eodem subiecto entitatiuè, & materialiter inuariato possunt fieri contradictoriæ propositiones, ratione diuersæ appellationis, vel formalitatis ibi virtualiter inclusæ, super quas cadit contradictio, quæ facit quasi duplex subiectũ, vt latius explicauimus cit. loco in preced. tomo disp. 4. art. 6. ibique docuimus hoc magis fieri per terminos contradictorios, quam per propositiones contradictorias, licet etiam per istas fieri possit, quando sunt eiusdẽ de eodem subiecto ratione significandi vel concipiendi.

42 Quia ergo in actu volitionis diuinæ, seu in ipso velle semper importatur appellatio, seu formalis ordo ad suum obiectum, quia, vt dicunt Dialectici, actus animæ, vt cognoscere, & velle, appellant supra suum obiectum formale, vt intelligitur sub illa formalitate, inde est quod quando duæ contradictoriæ dicuntur de eodem subiecto, id est, de eadem voluntate, seu de eodem velle diuino, non dicuntur sub eadẽ formalitate & appellatione, sed vt dicit ordinem ad diuersum connotatũ, siue

Joan. à S. Thoma in 1. part. D. Thoma.

illud connotatum sit diuersum realiter, siue non, (hoc enim impertinenter se habet) sed sufficit, quod resultet distincta formalitas, seu appellatio in ipso actu volitionis, ratione cuius illa contradictio verificatur, quia illa contradictio non fit, nec habet pro subiecto entitatem absolute, sed sub illa formalitate, seu appellatione, quæ cum sit duplex, & quasi duplex subiectum sub ea ratione, & formalitate qua suscipit contradictionem. Quare dicimus quod non verificantur duo contradictoria de eodem subiecto, inuariatis omnino rebus, quia non est idem subiectum formaliter, & sub eadem appellatione, & ratione, qua est subiectum contradictionis, sed sub diuersa, quia est subiectum virtualiter multiplex. Nec res sunt omnino inuariatæ, quia licet volitio Dei entitatiuè, & in se sit eadem, tamen actiue est diuersa, quia variat obiecta; ad hoc autem non est necesse quod variet illa realiter, & physicè, sufficit quod extrinsecè & denominatiuè, quia hoc sufficit ad varianda obiecta formaliter in esse obiecti seu volibilis, quia sub diuersa ratione respicitur à voluntate.

Ad Conf. dicitur ex dictis, quod Deus non potest 43 liberè velle creaturam per mutationem passiuam sui, sed per mutationem actiuam, qua reddit mutatas creaturas, sed ad volendum illas distincto decreto non requiritur semper distincta mutatio realis, sed sufficit distinctum motuum, seu ratio formalis tendendi in obiectum, licet solùm extrinsecum denominationem ponat in re illa, quia voluntas mouetur ex obiecto proposito, & cognito sub diuersis formalitatibus, & ita ad diuersam voluntatem sufficit diuersis viis, seu formalitatibus proponi obiectum. Nec relatio rationis sub qua intelligitur à nobis distingui decretum diuinum (quæ in Deo non est, nisi eminentialis continentia omnis perfectionis volendi) fundatur in reali mutatione creaturæ, vt sæpe à nobis dictum est, quia relatio rationis non semper exigit istam realem variationem in fundamento, sed sufficit actus ipse diuinus, vt eminentialiter multiplex, & causas in rebus vel diuersam mutationem realem, vel diuersam denominationem tendendi cum diuersa formalitate cognita & proposita per intellectum: ad relationem enim rationis sufficit ex parte fundamenti proximi parua distinctio, eminentia enim diuina sufficiens fundamentum est cum ista denominatione diuersa seu formalitate ex parte creaturarum & proposita ab intellectu,

Circa secundum punctum huius difficultatis 44 licet quomodo assignanda sint instantia, seu prioritates rationis in Deo, & qua regula ad id vtendum sit, Vasquez plures regulas ponit d. illa 82. c. 5. & plures alias reiecit, c. 4. & alias ponunt alij auctores ad dignoscendum ordinem diuinorum decretorum, seu prioritates, & signa rationis in Deo, vnusquisque accommodando ista ad sua principia, vt videri possunt apud P. Alarcon tr. 3. d. 5. c. 6. Ruiz de volunt. Dei disp. 22. sect. 3. & seqq. & disp. 24. sect. 2. & 3. & apud alios.

Nō oportet in hac re nos multum immorari, quia vix potest certis regulis cōprehendi totus ordo, & distinctio, seu prioritates, & instantia quæ indiuisis, & in actibus, seu voluntate Dei cōstituunt Theologi, quia cum ista signa, & instantia sint secundum conceptus nostros, & secundum ordinem distinctionemque rationis, cōtingit tot aliquando distingui instantia, & prioritates, quot nos distinguimus conceptus per respectum ad nostrum modum concipiendi, & connotationem ad creaturas, ad quarum instat concipimus, vel per respectum ad diuersas creaturas, aut diuersum ordinem causalitatis, &

sub

subordinationis in illis, sic in Deo quoque actus vel decreta distinguimur respectuè, non entitatiuè.

Ut ramentum hæc aliquo compendio indicare possumus potius, quàm explicare, notandum est, aliud esse quomodo in diuinis, & in eius actibus sit sumenda distinctio, aliud quomodo sit sumendus ordo, seu ratio prioris, & posterioris secundum rationem: omnis enim ordo distinctionem requirit, sed non omnis distinctio facit ordinem, quia possunt aliqua inter se disparatè se habere, & sine ordine.

- 45 Dico ergo primò, Ad formandum distinctionem in Deo, & in eius actibus, sine qui versantur erga se, sine erga creaturas, sine ordine, seu subordinatione prioris & posterioris, sufficit quod possint accipi ad modum perfectionum, vel actuum, qui in nobis sine ordine inter se distinguuntur, & aliàs non dicantur in perfectionem, nec vnum pertineat ad formalem rationem constitutiuam alterius.

Ratio huius est, quia quæ in nobis sunt perfectiones distinctæ, procedunt à Deo, ut à principio habente illas eminenti, & indiuisibili modo. Nos autem non possumus assurgere ad illam eminentiam, ut est in se, sed ut resultat, & repræsentatur in nobis. Effic accipiendo pro medio & regula cognoscendi diuina, perfectiones creaturarum, attingimus id quod est in Deo vnum, ad modum plurium, quatenus ista quæ sunt plura in nobis, in Deo sunt eminenter, & nos accipimus illam eminentiam ut commensuratum istis pluribus, & ad modum illorum. De hac conclusione videatur D. Th. 1. p. q. 13. art. 4. & in 1. dist. 2. q. 1. a. 3. vbi eam latissime explicat, & dist. 22. q. 1. a. 2. vbi ostendit distinguere istas perfectiones, seu attributa, aut rationes in Deo (vbi etiam comprehenduntur actus, & operationes Dei) secundum quod distinguuntur in creaturis perfectiones, per ordinem ad quas diuina eminentia in se vna à nostro limitato intellectu concipitur instar plurium. Nec loquitur in istis locis nisi tantum de distinctione, non de ordine perfectionum, vel actuum inter se, sed de diuersitate & pluralitate.

- 46 Excipimus ea quæ in nobis imperfectionem important, aut quando vnum consideratur ut pertinet ad rationem formalem alterius. Nam quæ primo modo se habent, non transferuntur in Deum propter imperfectionem adiunctam. Et hac ratione ea quæ se habent per modum actus primi, & potentialitatis inuoluunt, licet distinguantur in creaturis ut perfectiones limitatæ, & coarctatæ, non distinguunt perfectiones in Deo, quia Deo repugnat aliquid sic distinguere, & attribui, quod dicat rationem actus primi, & potentialitatis cuiusdam, quia totum quod in eo est, actus purus est; pugnat autem actus primus cum actu puro, qui est ultimus & summus. Quæ autem secundum modo se habent ut vnum pertineat ad rationem formalem alterius, non possunt distinguere ratione ratiocinata, sed ratione ratiocinante, & quo ad modum significandi tantum, sicut in Deo distinguitur voluntas, & velle, intellectus, & intelligere, natura, & intelligere, esse, & essentia, & alia similia, de quibus vide quæ diximus ex D. Thom. *preced. tom. disp. 16. a. 2. præsertim in corollariis & in solut. primi argumenti.*

- 47 Dico secundò: Ad distinguendum perfectiones, vel actus, aut decreta in Deo, non quomodocumque, & per modum diuersitatis, & pluralitatis, sed etiam per modum ordinis, & cuiusdam prioritatis, & posterioritatis secundum rationem, debet considerari non solum diuersitas perfectionum, aut maior, vel minor dignitas perfectionum, sed connexio ipsa, aut causalitas, seu dependentia in connotatis, seu in his per ordinem ad quæ perfectiones, seu actus illi,

aut decreta considerantur in Deo, & iuxta diuersitatem connexionis istorum inter se, accipitur ordo prioritatis in diuinis, & in eius voluntate. Sumitur hoc ex variis locis S. Th. Nam loquens de actibus voluntatis diuinæ, inquit q. 23. de verit. a. 2. ad 1. quod in voluntate diuina nec est ordo, nec distinctio ex parte actus voluntatis, sed solummodo ex parte volitorum: solum ergo attendendum est quid in volitis habeatur de ordine & distinctione, ut distinctio, & ordo attribuantur decretis in Deo, & sol. ad 8. quod in voluntate Dei non ponuntur antecedens, & consequens ad importandum ordinem successionis, qui repugnat eternitati, sed ad denotandum diuersam comparisonem eius ad volita. Loquendo autem de ordine, qui est in ipsis processionibus diuinis, sicut dicimus quod generatio, seu productio Verbi est prior secundum originem, quàm spiratio seu processio Spiritus S. dicit D. Th. in 3. dist. 12. q. 1. a. 1. quod generatio non est prior processione aliquo modo, qui possit ad diuina referri, sed tantum secundum modum intelligendi, qui est in intellectu nostro tantum accipiente generationem, & processionem in diuinis secundum similitudines reperiæ in creaturis, quæ deficientes sunt ad representandum generationem, & processionem prout sunt in diuinis. Et sic D. Thom. nunquam admisit in diuinis processionibus dari ordinem secundum prius, & posterius, sed solum ordinem originis, ut patet 1. q. 42. a. 3. ad 2. & in 1. dist. 20. q. 1. art. 3. vbi id latius explicat. Remoto ergo ordine originis, in quo non significatur prioritas, & posterioritas, sed solum vnum ex alio, & hoc solum inuenitur in processionibus personarum; in reliquis perfectionibus vel actibus diuinis solum inuenitur ordo, seu prius, & post, vel instantia, aut signa secundum similitudines reperiæ in creaturis, ad quarum instar concipimus & ordinamus per distinctionem ea quæ in diuinis sunt. Et licet etiam ordine quodam distinguimus, & concipimus attributa, & prioritates designamus, & intelligimus vnum ut rationem vel fundamentum alterius, non quia ibi hoc sit formaliter, sed solum eminenter, in creaturis autem ad quarum similitudinem diuina cognoscimus, inuenitur formaliter iste ordo & distinctio. Et sic dicimus nostro modo intelligendi, absoluta esse priora relatiuis, & inter essentialia, prius intelligimus esse, quàm operari naturam, seu essentiam, quàm attributa, quia hæc intelligimus ut proprietates, illam ut substantiam, & inter attributa concipimus aliqua ut priora ad alia, sicut immutabilitatem esse priorè eternitate, infinitatem immensitate, quia in creaturis per quarum species diuinas discernimus, essentia, seu substantia est prior suis proprietatibus, duratio variatur iuxta mutabilitatem vel immutabilitatem, determinatio ad locum iuxta finitatem, vel infinitatem quantitatis, & sic de reliquis. Vbi autem non inuenitur ordo in perfectionibus creatis, neque in diuinis concipimus vnum prius altero, sicut misericordia non intelligitur ut prior iustitia, vel è contrà, magnificentia, quàm fortitudo, bonitas, quàm infinitas, & sic de aliis. Tota ergo ratio istius prioritatis, & posterioritatis, seu ordinis rationis, & instantiæ, quibus concipimus intra Deum perfectiones, vel actus, reducitur, & desumitur ex diuerso ordine perfectionum creaturæ, ad quarum normam & modum diuina concipimus. Quidquid enim in creaturis ordine distinctum est, & prius, vel posterius est, à diuinis exemplatum, & deriuatum est, in illo inuenitur eminenter sine distinctione, & prioritare. Nos autem ascendendo à creaturis, etiam formaliter distinguimus, & ordine concipimus, quod in Deo eminenter est, & causa huius ordinis in creaturis.

Quod

48 Quod si hoc in ipsius perfectionibus & actibus diuinis prout ad intra sic inuenimus, quod ratione ordinis & distinctionis in perfectionibus creatis, ordinem etiam seu instantia, & prius, ac posterius attribuiamus diuinis, multo magis hoc verificatur in decretis, seu voluntate Dei, prout versatur erga creaturas, quod distinguimus & ordinamus ista decreta & voluntates per comparisonem ad voluta, vt inquit D. Thom. *supra* relatus. Nec oportet attendere dignitatem, vel perfectionem rerum, aut alias quolibet rationes, sed tantum ordinem, quem habent res inter se, vt causentur, vel vt conducunt ad hoc vt sint, seu vt finem à Deo præfixum consequantur, quod totum pertinet ad ordinem alicuius causationis vel dependentiæ rerum inter se, vel à Deo. Vnde ex hac ratione non repugnat quod iuxta varias dependentias, aut respectu pertineat aliquid ad diuersos ordines, seu prioritates, & secundum quod in vno ordine est prius, in alio sit posterius, & è contrà. Nam ordo naturæ prior est ordine gratiæ, & prius à Deo procedit tanquam quid præsuppositum ad gratiam, & tamen plura quæ sunt ordinis naturæ possunt supponere ordinem gratiæ, & ab illa deriuari, iuxta aliam dependentiam, & prioritatem, vt si miraculosè alicui detur filius, qui vtrique est aliquid naturale, aut si sanitas detur ratione Sacramenti, aut ex miraculo, ordinem gratiæ supponit in genere causæ efficientis, & illud naturale in ratione subiecti præcedit gratiam quam suscipit, & secundum quod est à causis naturalibus præcisè, semper est prior ipsa gratia, & ordine supernaturali sibi adueniente.

49 Ex quibus fit, quod voluntas diuina ordine quodam prius intelligitur attingere bonitatē suā, quam creatam, quia illa est primum obiectum, ista secundariū. Et inter res creatas prius intelligitur conditionata decreta habere, aut simplicem voluntatem, quam efficacem, vel decreta absoluta. Vnde & voluntas simplex aut conditionata vocatur antecedens à D. Thoma efficax seu absoluta, consequens; quo nomine ipsa prioritas, & ordo designatur. Deinde inter efficaces voluntates, prior est ordo intentionis circa finem, quam electionis circa media, vel præordinationis, & executionis de illis & applicatione ad opus, eo quod finis est ratio deriuandi media, cum sit id cuius gratia. Inter ipsas voluntates efficaces non est distinguere instantia, vel prioritates circa ea, quæ requiruntur necessariò ad efficaciam, vt v. g. quod prius attingatur aliquid secundum rationem communem, vel abstractam, deinde secundum condiciones magis contractas, & indiuiduas, quia efficax voluntas vt efficax nō attingit aliquid sub abstractione. Et ideo non stat efficaci decreto prius esse volitam Incarnationem abstrahendo à carne passibili vel impassibili, Redemptore, vel non Redemptore, &c. sed semper quod ponitur voluntas efficax sub quacumque prioritate, debet attingi obiectum sub ea conditione, & dispositione, qua respiciat esse, & de facto sit, quod & sub conditione indiuidua, & sub his conditionibus, sine quibus in se non potest determinatè concipi vt de facto ponatur; efficacitas enim essentialiter concernit & respicit esse, non ab illo præscindit, & consequenter indiuiduationem. Distingui ergo debent prioritates in decretis efficacibus, secundum diuersos ordines & dependentias seu causalitates, secundum quas vnum præcedit, & prius dicitur alio de facto & in se, non secundum prioritates abstractionis, & contractionis quæ potius extraneant aliquid ab ordine efficacitatis. Finis autem est prior mediis, &

media executione, & in ipsa executione vnus ordo rerum præcedit alium, vt ordo naturæ ordinē gratiæ, secundum diuersas dependentias aut causalitates vnus erga alium, iuxta diuersum genus causæ. Inter voluta autem disparatè se habentia, non assignatur prius, & post, neque ordo in instantibus voluntatis, licet distinctio, seu diuersitas à nobis concipiatur, secundum quod intelligitur attingere vnum, & non consideratur aliud.

ARTICVLVS II.

An circa liberos actus creatos Deus habeat decreta ex natura sua efficacia, an ex suppositione præuisi consensus nostri, ex se autem solum indifferentia?

Pro intelligendo puncto difficultatis duo oportet explicare: Primum quid intelligamus nomine decreti ex natura sua efficacis, vel ex natura sua solum indifferentis.

Secundum, quæ sit ratio controuertendi hoc specialius circa actus liberos nostros, quam circa ceteros effectus creatos, quia in reliquis videmur pro certo relinquere, quod efficacia Dei sit omnino absoluta, & independens à præuisione comparisonis causæ creatæ, solum autem in liberis actibus inuenimus scrupulum, vt non nisi eorum consensu præuifa possit Deus efficaciter velle quod sint.

Circa primum, nomine decreti ex natura sua efficacis, generaliter intelligimus decretum sua virtute independenti à creatura nihil ex parte creaturæ expectans vel supponens, sed totum ex se causans & suo ibfluxu tangens effectum, vel causam inferiorem mouens (quod etiam ad effectum eius spectat.) Et quia diuina virtus si influit, & tangit aliquem effectum, infustrabilis est, quia potestari, & voluntati eius nil resistit; cum agat per infinitam virtutem, ideo decretum sua virtute, seu natura (idem est ibi natura quod virtus) tangens & influens in effectum, efficax est ex se, non ex adiectione & denominatione alterius extra se. Vnde huic decreto ex natura sua efficaci contra ponitur decretum quod solum est efficax ex aliquo extrinseco extra se, & sic vocatur indifferens, non quia indifferentiam nostræ libertatis conseruat tantum, sed etiam, quia de se non habet aliud quam offerre duplicem concursum, vel agitationem ad duplicem actum; expectat autem vt determinet se voluntas ad quod voluerit, & tunc concurrat Deus eo determinato influxu quem voluntas eligit. Itaque decreta ista indifferentia sunt, quæ ex vi suæ virtutis influxiue in nostram voluntatem non habeant connexionem antecedentem cum effectū, id est, cum consensu, quia non determinant illum, sed habent consequentem, ratione scilicet meliorum, quæ adhibeat, quibus positus consequitur effectus iuxta quod voluntas illis allecta & mora se determinat diuidendo per scientiam mediam quod medium in hac vel illa occasione de facto trahet voluntatem ad consensum, quod non.

Et sic reducitur tota ista quæstio ad hoc, an decreta diuina circa actus nostros liberos vt liberos, sint efficacia ex sua virtute causariua, & influxiua in voluntatē, an ex præsuppositione & expectatione alicuius extra se. Quod autem extra se est, aut sunt media moraliter attrahentia & inclinantia voluntatem, de se autem indifferentia, & hæc non

sufficiunt ad efficaciam infallibilem (qualis est diuina) quia indifferentia sunt, & circa ipsa redit eadem difficultas, quomodo vim habeant determinandi antecedenter voluntatem: hanc enim ex Deo habere debent cum ex se non habeant sufficientem, & infallibilem, sed indifferentem; & sic perinde erit ab ipsis infallibiliter determinari voluntatem, & à Deo, qui dat illam: aut est ipsa determinatio & consensus voluntatis consequens ad media sic proposita, & tunc est difficultas, an ex hac præuisa à Deo per scientiam mediam, hauriat diuinum decretum efficaciam infallibilem per modum denominationis extrinsecæ in decreto à præuisione actus, non per modum efficientis de se & causantis eam, sed solum præscientis ante omne decretum suum.

Circa secundum, triplex genus effectuum in hac parte distinguitur.

2 Primum est quod à solo Deo procedit sine consortio causæ creatæ, vt creare Angelum, glorificare animam, dare primam vocationem, &c.

Secundum, quod procedit à Deo cum consortio causæ creatæ, sed non liberæ, vt illuminare, quod procedit à sole, ignire ab igne, &c.

Terrium est quod procedit cum consortio causæ liberæ, & est effectus liber, vt actus amoris Dei, actus iustitiæ, vel temperantiæ, &c. De duobus primis non est controuersia inter Recentiores huius temporis, quod detur in Deo decretum antecedenter influens, & ex natura sua causans tales effectus; constat enim quod si effectus procedunt à solo Deo tota antecedentia influxiua, & causatiua effectus debet teneri ex parte Dei, seu voluntatis eius; Deus enim per voluntatem suam causat, quia operatur omnia consilio voluntatis suæ. Si autem effectus procedunt cum consortio causæ creatæ necessariæ, ipsamet determinatio, & necessitas causandi est conformis ipsi causæ, & sic antecedentia causalitatis, & influxus diuini determinantis talem effectum in illa causa non impedit, sed potius conducit ad modum suum operandi; id enim ex natura sua postulat talis causa, scilicet determinatè & necessariò operari. Si verò effectus est liber, & exit à causa creatæ sine necessitate, & coarctatione ad vnum, influentia Dei antecedit & determinans ipsam ad talem actum potius quàm ad alium, vel ad oppositum, videtur impedire modum operandi causæ liberæ, quia si Deus illam determinat influentia sua antecedenti, & ipsa determinatur à Deo, non potest seipsam determinare, nec tali modo quod possit illi influentiæ & determinationi Dei resistere, quia illa determinatio non est in manu sua, sed antecedit se, & vincens totam resistantiam suam, cum sit diuina, & infallibilis illa influentia, & consequenter non conducit ad modum illum libertatis causæ creatæ. Restat ergo quod vt Deus seruet illum, non debeat toto pondere efficaciarum suarum causam illam agere, nec antecedenti influentia determinare, sed vt mediis inclinantibus suauiter voluntatem, & sic agere sensum, vt etiam accommodet assensum vt dicit Aug. Hoc est ergo decretum indifferens seu benignum, & non efficax ex natura sua, quod operatur efficaciter, non in vi suæ influentiæ, quæ omnino antecedit consensum, sed in vi mediorum quæ adhibet, & in vi consensus ex voluntate consecuti, quem præuidet. Et quia in particulari circa actus liberos vt liberi sunt, obstare videtur ipsa libertas creatæ efficaciarum determinationis diuinæ antecedentis, quia potest illi resistere, si libera est, & si non potest resistere, non est libera, ideo specialior difficultas est in astruenda efficacia vo-

luntatis diuinæ circa actus liberos, quàm circa alios effectus.

Varia sententia.

3 Defensores scientiæ mediæ in eo indiscriminatim conueniunt, quod respectu actuum liberorum, vt liberi sunt, Deus non habet voluntatem efficacem antecedentem, quæ ex sua natura, & virtute causatiua determinet actum liberum. Et ita coguntur peregrinari à diuina influentia determinante & antecedenter causante libertatem nostram in actibus, ad media creatæ applicata à Deo, quæ quia non sufficiunt voluntatem creatam exhaustire, & ad viuum determinare, sistunt in ipsa voluntate se determinante, & eligente ex omnibus illis mediis. Ea verò determinatione præuisa, decretum quoque Dei illi obsecundans, & decernens quod præuidet, infallibile, & efficax redditur præscientia, non causalitate. In hoc conueniunt. Et quantum ad hoc non possunt non ponere decreta ex natura sua indifferentia, id est, non virtute sua antecedenti determinantia causam liberam creatam.

4 Cæterum in eo maximè laborant, & diuiduntur, & vt existimo, à nullo hactenus ad plenum satisfactum est, scilicet in componendo & construendo isto decreto indifferenti, quid videlicet importet, quid connotet tale decretum indifferens; licet enim hoc habeat quod sua virtute influxiua non determinet voluntatem creatam, sed per media oblata ambiat eam inclinare, & tandem videat quid de facto operatura sit cum talibus mediis, & in tali occasione; & ex eo quod non sit influxiua determinationis causæ, indifferens dicatur in causando; tamen quia tandem necesse est Deum adhibere suum concursum, & tanquam causam primam operari in nobis, merito dubium est quomodo decretum illud offerat indifferentem concursum, aut multiplicem, & quid offerat in illo quando indifferenter dicitur offerre & quomodo. Et est ratio dubitandi, quia Deus non solum decernit vagè, & in confuso concurrere cum causa secunda, etiam libera, sed determinatè, & in particulari decernendo hic & nunc concurrere, aliàs prouidentia eius esset valde imperfecta, & diminuta, si non decerneret & prouideret in particulari concursum suum ad hoc potius, quàm ad illud, v.g. ad amorem potius, quàm ad odium, vel è contra, sed solum decerneret vagè, & in confuso dare concursum ad amorem vel odium; ad prouidendum autem in particulari quod hic & nunc concurratur potius ad amorem, quàm ad odium, expectat determinationem causæ secundæ; sic autem non à prouidentia deriuatur illa determinatio concursus, sed expectatur, & sic in vi suæ prouidentiae, vt est ex parte Dei, nisi succurreretur à sua creatura determinante, maneret manca, & imperfecta prouidentia, non valens resolvere ultimam determinationem concursus, nisi succurratur à creatura. Et dato, vel deuorato hoc inconuenienti, insurgit aliud. Nam posita determinatione creaturæ, potest Deus suspendere suum concursum simultaneum cum illa, sicut cum igne suspendit, ne combureret pueros in fornace, & idem fecit cum multis aliis martyribus, qui non sunt combusti ab igne. Ergo concursus Dei non est alligatus determinationi causæ creatæ, vt ab illa determinetur vaga illa & indifferens oblatio concurrendi. Nec potest decretum illud indifferens reddi efficax ex determinatione causæ creatæ, quia sic posita determinatione illius, non posset Deus suspendere

pendere suum concursum, quia iam efficax est: potest autem, ut fecit in igne, & potest facere in causa libera, etiam praeventa in actu primo duplici cogitatione, & iam in procinctu eliciendi actum: ergo non est decretum Dei ita indifferens, ut per determinationem causae creatae reddatur efficax, quia adhuc posita determinatione talis causae potest Deus suspendere concursum suum ne agat, & sic inefficacem reddere determinationem illam. Rursus maius dubium. Quid est illa determinatio causae creatae, ut decretum illud indifferens reddatur determinatum, & efficax, ut v.g. concurrat potius ad amorem, quam ad odium? Non potest esse ipse actus secundus amoris: nam hic determinat oblationem indifferentem concursus diuini, cum sit iam effectus concursus Dei, qui identificatur cum actu creatae voluntatis. Est ergo aliquid antecedens actum secundum, & consequenter pertinens ad actum primum, quo voluntas creata determinat indifferentiam diuini decreti, & concursus oblatus, ut sibi detur potius concursus ad amorem, quam ad odium, ita ut si illa determinatione posita negaret Deus talem concursum, violentaret causam inferiorem, & esset miraculum. Quid est illud sic determinans in actu primo? Hic ferè stupent aduersarij, quia est res in explicabilis. Diuiduntur, ut in re ardua fieri solet, in varia placita.

5 Et primò P. Molina in pluribus locis concordia suae quest. 14. artic. 13. disput. 26. §. Neuter; & disput. 32. §. Primum, & aliis locis quae ipse repetit 1. p. quest. 19. art. 6. disput. 3. affirmat Deum offerre concursum indifferentem, & generalem ad vnum actum, & ad oppositum, quatenus de se est ad vtrumque paratus, deinde verò à voluntate creata determinari speciem actus, ad quem Deus concurrat: de se enim Deus offert concursum indifferentem ad quemcumque actum, quem voluntas nostra determinauerit. Quod decretum, conditionatum vocat Suarez prolegom. 2. de gratia cap. 8. & aliis locis, eo quòd nihil in illo Deus absolute decernit, sed dependenter à conditione quadam, scilicet si voluntas se determinauerit. Et huic asserto Mol. plures subscribunt, quos adducit Villegas controu. 12. c. 1. Alarcon tract. 2. de scientia Dei disp. §. c. 8. num. 5. Illud addunt aliqui ex Authoribus istis, quòd cum decretum illud offerendi tam diuersum concursum voluntati, videlicet, pro quocumque actu se voluerit determinare, non sufficit ut effectus de facto fiat propter indifferentiam suam, & dependentiam à determinatione voluntatis, necesse est subsequi aliud decretum, quod ipsi concomitans vocant, non praedefiniens, ut hic, & nunc concurrat ad actum, quem determinauit, seu elegit voluntas. Per hoc enim decretum non antecedit Deus voluntatem nostram, sed simul cum ea concurrat, cum qua tamen non decreuit concurrere, nisi supposita eius determinatione. Quod Suarez citato prolegom. 2. attribuit Vasquez. Dioraleuio, Pezantio, Cordubæ, Bellarmino; & aliis multis, etiam attribuit Villegas cit. loco. & tenet Alarcon cit. §. 3. concl. 4.

6 Ceterum displicuit P. Vasquez in hac 1. p. disp. 65. c. 2. num. 6. & 7. & rursus disp. 99. c. 5. hæc sententia de indifferentia concursus oblatus, & decretati à Deo sub hac generalitate, eamque etiam reiecit Suarez prolegom. cit. & explicauit solum intelligi debere decretum illud de concursu indifferenti sic, quòd Deus sit paratus concurrere, & offerat voluntati cōcursum ad plures actus, v.g. amoris, odij, consensus, aut dissensus, &c. non in cōfuso, & in communi, neque ad omnes actus in indiuiduo

possibiles, quos de qualibet illa specie potest elicere voluntas, sed in singulari ad hunc determinatum actum amoris, hunc determinatum odij, hunc actum consensus, vel dissensus, prout exercendum hic & nunc. Quo posito, superflue docet illud secundum decretum de simultaneo concursu determinatè & absolute dando, supposita determinatione voluntatis, sed illud prius decretum sufficere, quia posita electione, & determinatione voluntatis transit in absolutum, purificata conditione. Immo illud secundum decretum non potest intelligi quòd sit absolutum ab omni conditione, & efficax, nisi sit etiam praedeterminatum voluntatis nostrae, & contra illud currant rationes, quae ipsimet Authores faciunt contra decretum praedeterminans. Nam vel illud decretum est solum de concursu Dei simultaneo praestando, si voluntas concurrerit, vel est de praestando absolute illo concursu independentè à praeuisione concursus voluntatis creatae, & faciendo quòd ipsa voluntas cooperetur, & non se subtrahat, cum ex se posset. Si primum, adhuc est conditionatum decretum, & sic non est aliud à primo. Si secundum, est praedeterminatum voluntatis, quia absolute facit ut cooperetur secum independentè ab illa, & non est in potestate hominis cooperantis, quòd tale decretum Deus habeat: ergo tollet libertatem eius, aut argumenta contra praedeterminationem Thomistarum sunt nulla. Nec potest dici quòd illud decretum non est antecedens libertatem, sed in manu eius, quia est post praescientiam consensus mei, & actus meae libertatis, & sic est consequens libertatem, non antecedens. Nam contra est, quia non potest praeuideri quid operatura sit voluntas, donec detur iste concursus determinatus & absolutus: nam ex vi illius indifferentis oblatus, non potest videri quid determinatè operatura sit voluntas, siquidem deest vnum requisitum ad operandum, scilicet hoc decretum absolutum: ergo sine ipso non potest praeuideri determinata operatio voluntatis, aut si potest sine ipso: non est necessarium, sed superfluum ad operationem voluntatis.

Propter hoc ipse Suarez prolegomeno cit. existimat illud decretum indifferens concurrenti cum voluntate ad actum, ad quem se determinauerit, esse sufficiens per seipsum, ut de facto, & determinatè operetur voluntas cum illo, si determinauerit se, & purificauerit conditionem. Quia illud decretum non est ad concurrendum vagè & in cōfuso, sed ad determinatos & singulares actus cum peculiaribus circumstantiis; & sic purificata conditione eligendi, & determinandi ex parte voluntatis, ipso decreto concurratur, quasi si esset absolutum, quia purificata conditione in absolutum transit. Vnde non potest fieri instantia contra hoc decretum, casu quo Deus velit denegare concursum suum causae iam determinatae, sicut negauit igni ad comburendum in fornace Babilonis: Nam cum Deus per illud decretum solum determinet concurrere ad particulares actiones cum particularibus circumstantiis, fit ut quando suspendit concursum suum, habeat etiam decretum in particulari non concurrenti cum ista causa in tali occasione, etiam si se determinauerit.

8 Sed insurgit non minor difficultas contra istud decretum, tum ex isto casu denegandi concursum etiam si se determinauerit voluntas, tum ex generali ratione. Ex casu quidem denegandi concursum, quia si Deus habet decretum denegandi concursum, etiam si voluntas se determinauerit: ergo habet decretum non concurrenti ad actum

ad

ad quem se determinaverit, sed non determinatur sine concursu, quia determinatio illa voluntatis est per aliquem actum, siquidem ante actum, totum quod est in voluntate, est indifferens & indeterminatum apud istos Authores, quia denegant prædeterminationem antecedentem in voluntate; ergo facit hunc sensum, habeo decretum non concurrendi, si concurrero cum illo actu, vel si ille actus fuerit sine concursu meo (quod est idem ac non esse illum actum, & illam determinationem) non concurram, & sic non concurrere si se determinaverit, est idem ac non concurrere, si se non determinaverit; siquidem determinare se sine concursu, est non determinare se, quia determinat se per actum, non ante actum, & actus non est sine concursu.

9 Et deinde generali ratione loquendo etiam extra istum casum denegandi concursum causæ iam determinatæ ad operandum fit argumentum contra istud decretum Suarez conditionatum, inquirendo quid est illud, si se voluntas determinaverit, quando in decreto diuino sic componitur indifferens concursus: Volo concurrere ad quemcumque actum ad quem se voluntas determinaverit, & ad id offero omnem concursum necessarium. Quid est ergo illud, si se voluntas determinaverit; Quomodo determinatur voluntas creata, ut Deus concurrat; Vel enim determinatur actu secundo, vel actu primo, si actu primo, illum non habet potentia de se, ex ipsa ratione potentia, quia de se indifferens est, & non determinata: ergo ille actus primus quo determinat se potentia est superadditus potentia antecedenter ad actum secundum: nec enim est actus secundus, sed primus: ergo producit ab aliquo principio, & non ab intellectu, quia ille solum habet cogitationem indifferenter, nec determinat se solo voluntatem, sed ipsa voluntas se determinat, licet inducta & persuasa ab intellectu, nec apparet quid ponat in voluntate superadditum quod dicatur determinationum eius in actu primo ipsa voluntate non influente, aut producente illud. Nec etiam à solo Deo producit illud determinationum, quia in opinione istorum Authorum Deus non determinat antecedenter voluntatem se solo ad actum, quia dicunt hanc determinationem tollere libertatem, & multo magis tollet libertatem, si antecedendo in actu primo illam determinet, quia indifferenter in actu primo tollet, & non solum suspensionem pro actu secundo. Et siue à Deo, siue ab intellectu produceretur ille actus primus, non diceretur per illum voluntas se determinare, sed determinari ab alio: conditionalis autem posita dicit, volo concurrere cum voluntate sic, si ipsa se determinaverit. Ergo oportet hanc conditionalem verificari per determinationem ortam ab ipsa voluntate: ergo per actionem voluntatis: ergo per actum secundum, & non solum per actum primum: & sic deuoluimur ad primum membrum dilemmatis, quod per actum secundum se determinat voluntas. Nec dici potest quod illa determinatio est aliquis habitus collatus ipsi voluntati ad determinatum actum; quia non semper voluntas operatur ex habitu, sed aliquando ante illum acquisitum, vel nondum infusum: tum quia habitus solum habitualiter determinat, quod etiam potest facere in eo qui non est in statu operandi ut in pueris, vel dormientibus habentibus habitus infusos, & tamen Deus tunc non concurrat: ergo illa conditionalis non intelligitur de eo qui se determinat habitualiter, quod cum illo Deus concurrat; imò etiam si sit in statu operandi cum habitu, non

semper Deus concurrat cum illo ad opera talis habitus: ergo non intelligitur illa conditionalis de voluntate se determinante in actu primo per habitum. Imò generaliter neque per habitum, neque per aliquid aliud in actu primo determinans, etiam extrinsecè, & secundum assistentiam omnipotentia ad hunc concursum in actu primo, quæ est determinatio quædam extrinseca, potest intelligi illa conditionalis in sententia horum Authorum ex ipsis principiis Suarez arguendo, quia posito illo determinatio in actu primo, & nondum cooperatione voluntatis in actu secundo, si decretum illud conditionatum de concursu Dei transit in absolutum, & concurrat Deus concursu determinato, vel obligat voluntatem per illum concursum absolutum ad cooperandum secum, vel non disponit aliquid de cooperatione voluntatis in actu secundo, sed illam expectat, & permittit suo vsui. Si primum erit decretum prædefinitium & determinationum cooperationis, quod maxime refugit concedere Suarez, & oppositi Authores. Si secundum, nondum illud decretum transit in absolutum, quia adhuc non absolute operatur, cum expectet conditionem alterius cooperantis, & si illa voluntas creata vellet resistere & non cooperari, etiam posita illa determinatione in actu primo, absolutum decretum Dei frustraretur, quod repugnat, cum sit absoluta voluntas Dei, cui nullus potest resistere, Esther 13. Rom. 9.

Si autem dicatur aliud membrum dilemmatis, 10 nempe quod illa conditionalis, si voluntas se determinauerit, intelligitur de determinatione in actu secundo: ergo sensus est: si voluntas in actu secundo operata fuerit, concurrat cum illa ad talem actum, sed conditionalis non impletur, nec ponitur in re, nisi prius purificetur in re conditio: ergo prius est in re voluntatem operari, quam in re Deum concurrere: ergo ille concursus cadit super actum iam in re egressum à causa sua: ergo facit factum, quia ille concursus Dei datur ut actus sit in rerum natura, & ex alia parte non datur à Deo antequam actus sit. Quid implicatius? Et præterea currit hic casus supra inductus, quod Deus potest denegare concursum simultaneum causæ determinatæ ad operandum, ita ut violentiam in suspensione illa inducat. Voluntas autem ante illam determinationem in actu secundo est indifferens ad duo: ergo denegatio concursus ad vnum, vel ad vtrumque, nondum est ei violentia, quia ad vtrumque est indifferens, & potest ad alia obiecta diuertere sine vlla violentia. Posita autem illa determinatione iam est in actu secundo operans, & sic illa stante non potest suspendi concursus ad operandum, siquidem actus secundus sine concursu stare non potest.

Nec potest hic habere locum distinctio de diuersis prioritatibus, quod scilicet in genere causæ materialis est prior actus, & determinatio causæ creatæ, & in genere causæ efficientis est prior, & requiritur ad illum concursus causæ primæ. Non inquam hoc dici potest, tum quia ut optimè aduertit idem P. Suarez lib. 1. de Auxiliis c. 15. num. 7. hic propriè non habet locum genus aut prioritas causæ materialis, quia iste concursus simultaneus non recipitur in ipsa causa secunda, sed in effectu; imò respectu concursus simultanei nulla est prioritas, & posterioritas inter influxum causæ primæ, & secundæ, quia est simultas, imò identitas, quia influxus causæ primæ identificatur cum influxu secundæ, nec causa secunda concurrat ad effectum in genere causæ materialis, sed efficientis: sunt enim

enim coëfficientes simul : ergo si intelligitur prius ab ipsa esse actum secundum, quam Deum concurrere determinato concursu, intelligi debet, ab ipsa esse efficienter, & consequenter in actu & in esse, quia efficias dat esse effectui & actui. Verum est, quod in alio sensu longè diuerso dicitur, causam secundam determinare primam in genere causæ materialis, non quidem quoad exercitium & influxum in effectum, cum utraque causa effectiue operetur, sed quoad speciem actionis : ideo enim Deus concurret cum igne ad calefaciendum, & non ad infrigidandum, quia hanc speciem actionis postulat ipsa natura ignis, & ad hanc determinatè se Deus accommodat, ut ad subiectum.

12 Alia ratione reiicit P. Alarcon *ubi supra* sententiam P. Suarez, quia scilicet ponit in Deo decreta conditionata, quæ ipse nullo modo probat. Et specialiter ista indifferentia decreta reiicit, quia non potest decretum illud de concurrente ad duplicem actum, seu offerendo concursum ad duplicem actum, v.g. ad amorem, & odium, habere aliquod connotatum, quod ei in re corresponsdeat : nam in re non fit ex vi illius decreti uterque actus, scilicet amor & odium, quia ad utrumque non se determinat voluntas; solum ergo datur ad vnum nempe ad illum ad quem se voluntas determinauerit, v.g. ad amorem, hic autem non est sufficiens connotatum illius decreti quod est ad duplicem actum : ergo caret connotato in re ei adequatè, & sufficienter correspondente, sine eo autem non datur decretum in Deo, quod solum distinguitur per diuersa connotata, ad quæ terminatur. Sed hæc impugnatio supponit non dari in Deo decretum nisi aliquid immutet ad extra in re, quod non esse necessarium sæpè diximus. Decreta autem conditionata in Deo dari ostendimus *præced. tomo disp. 20. art. 2. & amplius seq. a. 4. dicitur.*

13 Tertia sententia explicandi decreta indifferentia desumitur ex P. Vasquez *hac 1. p. disp. 99. præf. c. 7.* qui difficilè & implicatè valde circa hæc locutus est, ideoque eius mens etiam discipulis suis satis obscura visa est. Nam circa illa opera quæ Deus efficit simul cum nostro consensu, supponit efficaciam Dei nullo modo antecedere consensum nostrum, & consequenter Deum non prædefinisse, aut prædeterminasse aliquod opus bonum nostræ voluntatis ante determinationem nostram, præter metum subitum intellectus aut voluntatis, qui ante consensum nostrum fit à Deo: dicit ergo Vasquez duo.

Primum est decretum absolutum Dei esse simul & concomitans cum nostra determinatione, quia ita sunt hæc ordinata in Dei præscientia & ordinatione, sicut in re contingunt. In re autem simul sunt influentia Dei cum nostro libero consensu : eo ergo modo sunt in Dei providentia & mente. Non ramen posset Deus sic decernere absolute, nisi præcederet scientia conditionata prævidens quid nostra voluntas factura sit sub tali vel tali statu vel occasione, quia sine ista scientia non posset decretum Dei comitari consensum nostrum, & determinationem, si non cognosceret illam. Et sic vel deberet antecedere illam, vel subsequi. Si antecederet, euerteret libertatem, quia est infallibilitas antecedens. Si subsequeretur, esset prior operatio nostra quam decretum Dei, & concursus eius, quod repugnat. Aut si simul sine hac scientia Deus decernit concurrere cum nostro arbitrio, non cognoscens in quam partem se determinabit, cæco modo concurret, & cum periculo frustrationis, si fortè concursus suum emit-

tat, quando voluntas nostra non operabitur.

Quomodo verò cognoscat Deus hanc determinationem nostræ voluntatis futuram, & qualiter componat hoc obiectum conditionatum, explicat Vasq. *ibidem num. 43.* quod cognoscit hoc modo: Si Petrus, v.g. tali mea vocatione excitaretur, neque illi deesset concursus meus, quem vocatio tali arbitrio temperata postulat, & qui sine vi, & miraculo negari ei non potest, absque dubio consentiret: si verò tali cogitatione vocaretur, ipse mihi deesse, & ideo ego non deberem ei cooperari.

Ex hoc autem elicitur secundum, quod docet 14 Vasquez adiunctis his quæ tradit 1.2. *disp. 26. c. 5. num. 27. & repetit disp. 189. c. 14. num. 116. & 117.* nempe quod vocatio congrua, seu attemperata voluntati est talis quod Deus sine violentia aut miraculo non potest denegare illi concursum simultaneum, sicut neque igni. Immo addit *prædicta disp. 189. c. 14. cit.* illam contemporaneitatem, & congruam vocationem, qua Deus vocat, talem esse, ut in ea tanquam in causa videat Deus consensum futurum, nec solum ex ea ad consensum fieri consequentiam materiale, sed formalem, & secundum connexionem causæ ad effectum, nec explicari debere per meram coniunctionem, & concomitantiam, sed per causalem quia, & per connexionem causæ cum effectui. Videatur *ibi num. 118. & 119.* Hinc ergo fit, quod in hac sententia decretum illud indifferens ex parte Dei, potest reduci ad absolutum & purificare conditionem dupliciter: Primò sic, Volo dare & offerre duplicem concursum, & si dederò congruam & attemperatam vocationem in qua video determinationem futuram, concurram. Secundò sic, Volo offerre duplicem concursum, & si voluntas ad vnum se determinauerit, & non negauerò per miraculum meum concursum, consentiet. Sed tamen hoc secundum debet reduci ad primum, etiam in sententia Vasquez: quia illud, *si voluntas se determinauerit* non potest stare sine congrua vocatione, in qua dicit ipse Deum cognoscere futuram determinationem tanquam in causa & per consequentiam formalem. Hæc ex scriptis huius authoris colligere potui pro eius mente, ex qua colligunt aliqui posuisse Vasquez vocationem naturæ suæ congruam, ita ut illa data detemineretur voluntas in actu primo ad consensum potius, quam ad dissensum infallibiliter, licet liberè eliciendum. Quid ampliùs sententia Thomistarum dicit decretum efficax ponendo ex sua natura, & non moraliter tantum operans? Certè quidquid mente tenuerit Vasquez, verbis, hoc sine dubio significat, quod congrua, & attemperata vocatio antecedens consensum, connexionem habet cum ipso consensu tantam, ut sufficiat oculis Dei ad intuendum ibi consensum & sequentia formali inferendum, quod sine infallibilitate non stat, & tam accommodam, ut libertatem non tollat, relinquendo possibilitatem ad oppositum cum vna de inesse definitè vtra, quæ sunt verba eius *cit. loco num. 117.*

Sanè hæc sententia Vasquez, si cum exclusione antecedentis efficaciam, & prædeterminationis accipienda est, ut à suis excipi par est, mirum quam scateat difficultatibus & inuolutis, & ita etiam difficilis valde iudicata est ab Alarcon *suprà cit. §. 4. num. 49. & sequentibus.* Nec illi ausus est se committere. Nempe punctus iste in assertoribus scientiæ mediæ & negantibus efficaciam Dei antecedentem, alta profunditas est, & rapidissimis vorticibus plena, quam nullus pene transit, quem non

non hauriat, vel ad lictus efficaciam diuinæ antecedentis eliciat. Igitur in primo dicto decretum illud concomitans nostram determinationem cum præuentione scientiæ conditionatæ eo modo quo explicat Vasquez, & veram tollit efficaciam Dei in voluntatem vt consentiat, & ipsam scientiam mediam prorsus euertit. Tollit quidem efficaciam Dei in voluntatem, quia solum ponit illam in effectum influentem, & coefficientem cum voluntate, non ipsam voluntatem inclinantem; Vnde rectè dixit Suarez *lib. 1. de præd. c. 13. n. 7.* hanc sententiam de concomitantia aut simultate mediorum in prædestinatione, præsertim quando pendet ex libera voluntate nostra, fugere potius difficultatem, quam declarare, & repugnare cum modo loquendi. Aug. & ferè omnium dicentium Deum vocare hominem vt credat, & quia vult dare fidem, dare etiam talem vocationem. Itaque decretum hoc concomitans non est absolutum & efficax, vel ipso Vasquez teste, nisi supponendo determinationem nostri liberi arbitrij præuisam: ergo decretum illud non facit vt nos faciamus, nec inclinat nostram voluntatem, aut ex nolente facit volentem, aut primitus duritiam cordis tollit, quod totum Aug. gratiæ tribuit, sed supponendo inclinationem, seu non reluctantiæ & determinationem eius, facit cum ipsa, & cooperatur cum ipsa consensum & actum, non facit vt ipsa faciat ex parte sua: ergo non habet efficaciam in ipsam, sed coëfficaciam & coëfficientiam respectu effectus. Quid est ergo quod ex parte Dei & gratiæ eius influit in voluntatem, vt faciat eam facere & tollat reluctantiæ & duritiam, & faciat eam cooperari cum Deo, & inclinet illam in consensum potius quàm dissensum? An vocatio congrua & temperata voluntati? Id videtur Vasquez affirmare *locis cit.* Ergo antecedenter ad voluntatis determinationem & cooperationem habet Deus absolutum decretum dandi vocationem congruam voluntati, quia hæc datur vt causa determinandi voluntatem, non illam supponit determinatam. Posita autem congrua vocatione non stat non sequi consensum, licet maneat possibilitas ad oppositum, quia habet connexionem per se cum tali actu. Vnde & ipse Vasquez concedit *disp. illa. 99. c. 8.* quod potest dici Deum prædefinire consensum nostrum, non in se immediatè, sed in sua causa, scilicet in vocatione congrua, quæ tamen non impedit libertatem: prædefinitio autem Dei est infallibilis: ergo in vocatione congrua infallibilis connexio datur cum voluntatis consensu antecedenter ad eius præuisionem, quia datur id quod sufficit ad infallibilem prædefinitionem Dei, qua prædefiniat consensum in ipsa vocatione, vt in causa; prædefinitio autem alicuius in sua causa antecedit præuisionem eius in se, non illam supponit: ergo iam datur aliquid antecedens nostram voluntatem, quod efficacem & infallibilem connexionem habeat cum consensu, & tamen non tollit libertatem. Non ergo omnis suppositio antecedens efficax & infallibilis libertatem destruit, quod est principium maximè obseruatum ab oppositis Authoribus.

16 Similiter in illo primo dicto euertit Vasquez omnem scientiam mediam, quia obiectum eius sic componit, vt non pertineat ad scientiam liberam ex parte obiecti, sed merè necessariam, & simplicis intelligentiæ, vt etiam latè probauimus *præced. tomo d. p. 10. a. 4. sub finem.* Et manifestum est hoc, quia illud obiectum scientiæ conditionatæ sic explicatur à Vasquez quod hoc modo cognoscit Deus si Petrus tali vocatione excitetur, neque illi desit

meus concursus quem talis vocatio postulat, & qui sine miraculo ei negari non potest, sine dubio consentiet. Hæc veritas conditionalis est necessaria: ergo destruit obiectum scientiæ mediæ. Patet consequentia, quia obiectum scientiæ mediæ est liberum, & non necessarium: est enim futurum sub conditione ex voluntate pendens quod posset non esse, etiam stante ea conditione; obiectum autem necessarium est obiectum scientiæ simplicis intelligentiæ. Antecedens autem constat, quia posito concursu Dei simultaneo, sicut ponitur pro conditione in illa conditionali, necessariò ei connectitur, & identificatur concursus causæ secundæ, quia concursus causæ primæ & secundæ identificantur in eadem actione: quidquid enim est à causa secunda, est etiam à prima: ergo necessarium est posito concursu Dei poni concursum causæ secundæ, nec potest vnum separari ab alio, & sic facit sensum omninò necessarium illa conditionalis, immò identicum, ac nugatorium: cum enim dicit, si vocaero Petrum tali vocatione, & non desit meus concursus, consentiet, ly *non desit meus concursus*, est idem ac dicere, si adsit, seu ponatur meus concursus, quia æquipollent, non deesse concursum & adesse, seu poni concursum, & sic est sensus, si concurrero simultaneè cum illo, consentiet: concursus autem simultaneus ad consensum indiuisibiliter est idem ac ipse consensus: ergo idem est dicere si concurrero consentiet, ac dicere, si consentiet, consentiet. Et rursus idem est consensus atque concursus Dei: ergo idem est dicere, si concurrero, consentiet, ac dicere si concurrero, concurram, quia consentire est identicè idem quod Deum simultaneè concurrere. Nec potest recurri ad formalitates diuersas, quia concursus Dei, & consensus meus non sunt formaliter idem, sed solum materialiter, & identicè. Nam sufficit vt obiectum illud necessarium sit, quod in re & identicè sint vnum, nec possit stare vnum sine alio: ergo secundum quod sunt in re, fundant necessariam connexionem, & consequenter necessariam veritatem, quæ non est obiectum scientiæ mediæ.

Et ex hac parte claudicare debere scientiam 17 mediam, quocunque modo explicetur, ostendimus *citata disp. 20.* quia non possunt futura aliqua conditionata cognosci infallibiliter vt futura, etiam sub conditione, nisi subintelligatur semper illa conditio, si Deus non suspendat seu denegat suum concursum; nam illo denegato, nusquam sequetur effectus, nec de facto erit futurum. Eo autem non denegato, sed posito, conditionalis fit necessaria, sicut non appposito fit contingens, & non infallibilis: ergo vndique euacuatur scientia mediæ, quia si est veritas necessaria, posito illo concursu pro conditione, non cognoscitur per scientiam mediam, quæ est libera ex parte obiecti, si verò non est infallibilis, non posito illo concursu ex parte conditionis, non est in Deo. Hæc autem latius tractauimus *præfato loco.*

In secundo dicto Vasquez illum inuenio obiectum, in quo ceteræ sententiæ non inueniunt exitum. Illa vocatio, seu attemperatio congrua, quæ voluntatem inclinat ad consensum vel ita efficax est, vt se sola voluntatis cooperationem inferat, vel non, sed expectat sub conditione si voluntas se determinauerit, & si ipsa consenserit, vt tunc fiat absolutum & efficax decretum Dei. Si se sola trahit efficaciter voluntatem vt causa, & eius cooperationem infallibiliter infert, incidit Vasquez in inconueniens, quod volunt vitare omnes defensores scientiæ mediæ, scilicet quod suppositio antecedens libertatem tollit, si est infallibilis & independens 18

pendens ab eius consensu. Si expectat sub conditione determinationem voluntatis: ergo non habet connexionem formalem cum consensu, ut causa cum effectu, ut dicit Vasquez, nec in ea potest Deus prædefinire consensum, ut concedit. Et rursus, non ergo est talis illa vocatio, quod fiat ei violentia, & necessarium sit miraculum, ut deneger Deus concursum ad consensum determinatè: non enim ipsa est talis quod inferat per se, & ex vi suæ connexionis consensum: ergo nullo miraculo indiget, nec fit ei vlla vis, si consensus non sequatur: ergo nec fiet vis, si concursus ad consensum denegetur, quia non erit hoc contra eius naturam aut renitentiam, de se enim est indifferens & expectat determinationem voluntatis, nec eam natura sua efficaciter infert, cum stet natura sua sine hoc quod sequatur consensus: ergo malè dicit, inferri illi violentiam, & solum per miraculum denegari concursum ad consensum. Et denique semper ille nodus, & difficultas non soluitur, nec explicatur: Quid est illud, si se determinauerit voluntas dabo concursum ad consensum, vel quid est expectare illam conditionem, si se determinauerit voluntas? Vel enim sensus est, si se determinauerit in actu primo, vel si se determinauerit in actu secundo. Si in actu secundo, est iam ipse consensus, & ipse influxus voluntatis, qui utriusque identificatur cum concursu simultaneo, & sic idem erit expectare Deum, si se determinauerit voluntas in actu secundo, atque expectare, si ipsemet concurrat, & dicere: si ego concurram determinatè ad consensum, concurram. Quid ineptius? Aut etiam, si videro actum iam factum, influam, seu faciam illum. Quid implicatius? Certè ipse Vasq. pro inconuenienti reputat, quod sequatur decretum absolutum Dei ad operationem voluntatis, quia sic concurreret ad id quod iam supponitur, & est: ergo non potest illa conditionalis sic intelligi, quod si voluntas se determinauerit in actu secundo, Deus absolutè decerneret concurrere, quia sic concurreret Deus ad id quod iam est, & supponitur, scilicet ad operationem & actum nostrum; quia non concurreret Deus, nisi purificata conditione, conditio autem est, si se determinauerit in actu secundo: ergo supponi debet ipse actus secundus, si purificatur conditio. Si verò sensus est, si se determinauerit in actu primo, concurrat: ergo posito illo actu primo ex parte voluntatis, statim concurreret per decretum absolutum, & tamen non statim concurreret voluntas, & cooperabitur in actu secundo, quia ex eo quod in actu primo sit determinata, non sequitur quod in actu secundo infallibiliter se determinabit, quia potest adhuc post illum actum primum non operari: ergo si Deus concurrat posito illo actu primo, vel debet illo concursu ad ipsam cooperationem voluntatem trahere infallibiliter, & sic currunt ea quæ contra antecedentiam efficacem Authores oppositi obiciunt, & admittunt, vel si voluntatem permittit resilire, & non operari, frustrabitur decretum illud absolutum & efficax Dei, quod repugnat. Præterquam quod est inexplicabile quis sit ille actus primus, & quid addat super voluntatem, ut eo posito, Deus absolutè decernat concurrere, quia non est sola potentia secundum se, aut habitus aliquis, quia cum utroque stat operari & determinari voluntatem ad oppositum. Quid ergo est ille actus primus? Et quidquid dicatur an sit vocatio congrua, & attemperata, vel aliquid aliud, redeunt difficultates

Ioan. à S. Thoma in 1. part. D. Thomæ

positæ, non soluantur.

Propter hæc est quarta sententia Cardin. Bel-
larmini lib. 4. de gratia capit. 16. cum enim dupli-
cem modum concordandi libertatem cum diuino
decreto ponat, alterum cap. 15. ex Gregorio, Ga-
briele, & aliis, qui, ut inquit, non agnoscunt influ-
xum Dei præuium in causas inferiores, sed simul-
taneum in effectum, & ita in hac sententia Deus
concurrat indifferenti concursu ex se qui particula-
rizatur, & determinatur à causa creata, ita ut cum
ipsa voluerit, & determinauerit Deus concurrat;
contra quam currunt instantiæ hucusque à nobis
adductæ, ut explicetur quid sit illud determinare
se causam creatam. Alterum modum concor-
dandi ponit cap. 16. ex sententia S. Thom. quod
Deus influat non solum in effectum, sed etiam
in ipsam causam sibi subordinatam, ad expli-
candum quomodo Deus istum influxum impri-
mat voluntati ante omnem eius operationem,
& positiuam applicationem, dicit ex parte vo-
luntatis præcedere quandam negatiuam determi-
nationem, scilicet, quod sinat se moueri ab ob-
iecto, & non induretur, aut resistat, quod etiam
liberum est voluntati, quia non minus libera est ut
agat, quam ut non agat. Et posita hac negatiua
determinatione, Deus applicat, & mouet cau-
sam ipsam, & cum ea concurrat ad opus, unde
posita motione Dei nulla voluntas potest illi resi-
stere potestate consequenti, bene tamen potestate
antecedenti, quia potest non habere illam nega-
tiuam determinationem, qua præuisa, aut posita
Deus applicat voluntatem determinato concursu
ad consensum boni. Et hanc negatiuam deter-
minationem, qua voluntas sinat se moueri ab ob-
iecto, & à ratione, ponit S. Thom. quæst. 1. de malo ar-
tic. 3. ubi inquit, quod non uti regula rationis præin-
telligitur in voluntate ante inordinatam electionem:
huius autem, quod est non uti regula rationis,
non oportet querere aliam causam, nisi volunta-
tis libertatem, quia videlicet in eius potestate est
ut sinat se moueri à ratione, vel non sinat. Et quæ-
stion. 3. de malo artic. 2. inquit, requiri in homine dis-
positionem quandam ad recipiendum influxum Dei, &
iuxta eam dispositionem produci bonum, vel malum
actum.

Cæterum hæc negatiua determinatio iuxta
quam Deus determinet concursum suum, maio-
ribus opponitur difficultatibus. Imprimis vo-
luntas negatiuè determinata est voluntas sinens
se moueri ab obiecto: ergo est non resistens &
non reluctans ipsi obiecto: si enim resisteret,
hoc ipso non sineret se moueri. At voluntatem
esse non reluctantem, & non resistentem est ef-
fectus gratiæ efficacis, ut sæpissimè docet Au-
gustin. in hoc enim discipuli Pelagij ei maxime
repugnabant, quod volebant concedere Deum
reluctanti voluntati studium virtutis immittere;
Augustinus autem dicit quod Deus reluctanti,
& resistenti cordi studium virtutis immittit, & ex
nolentibus facit volentes, ut patet lib. 1. contra
duas epistolas Pelag. capit. 19. & 20. & lib. 2. cap. 5.
& lib. de prædestinat. Sanctorum capit. 8. dicit
quod hæc gratia à nullo duro corde respuitur,
ideo quippe tribuitur, ut cordis duritia primitiua
auferatur. Et ipsa Ecclesia Deum orat, ut nostras
ad se rebelles compellat propitius voluntates.
Itaque non sufficit obiectum proponere; sæpius
enim proponitur, & non mouet, sed requiritur
gratia Dei tollens duritiam cordis, & auferens cor
lapideum, & dans cor carneum. Ergo non expectat

P Deus

Deus negatiuam illam voluntatis determinationem, & non resistantiam, sed facit illam, quia etiam duro & resistanti cordi gratiam immittit, ut ex nolente faciat volentem, Et in specie S. Thom. super epistol. ad Hebr. c. 12, lect. 3. ad illa verba *Contemplantur ne quis desit gratia Dei*, sic obiicit, & respondet: *Contra*, inquit, *quia si gratia non datur ex operibus, sed tamen ex hoc quod aliquis non ponit obstaculum: ergo habere gratiam dependet ex solo libero arbitrio, & non ex electione Dei, quod est error Pelagianus.* Respondeo, dicendum, quod hoc ipsum, quod aliquis non ponit obstaculum ex gratia procedit. Vnde si aliquis ponat, & tamen moueatur cor eius ad remouendum illud, hoc est, ex dono gratia Dei vocantis per misericordiam suam. Et infr. Quod ergo à quibusdam remoueat istud obstaculum, hoc est ex misericordia Dei. Per quem locum veniunt explicandi alij, qui allati sunt ex quæstionibus de malo quod ibi loquitur de dispositione positiua vel negatiua ex parte voluntatis, quæ quidem est à voluntate, sed si est dispositio ad bonum, ex voluntate ordinata & disposita per voluntatem Dei, & non ante eius influxum, ut ex loco à nobis allato constat.

Denique ponamus hominem audita fide resistere corde indurato his quæ sibi proponuntur, deinde conuerti à Dei, inquiri, quando datur illi concursus ut obediat fidei, præsupponitur illa negatiua determinatio, & non resistantia, an non? si non præsupponitur: ergo ruit sententia Bellarmini, quia sine tali negatiua determinatione Deus dat determinatum concursum. Si præsupponitur: ergo quando incipit habere illam determinationem negatiuam, & incipit esse non resistens, aliter se habet, quàm antè, quando resistebat. Hanc ergo mutationem vel facit gratia Dei, & dextera Excelsi, vel supponit factam ab homine. Si facit gratia: non ergo ratione eius datur gratia & influxus Dei, sed ante ipsam datur ut determinetur voluntas. Si præsupponitur: ergo ante gratiam incipit tolli obstaculum ad fidem ex ipsamet, voluntate, & habet initium conuersionis à se, quia non modicum initium est reddi non resistantem, qui erat resistens, & tali determinatione, cui annexa est determinatio influxus diuini ut consentiat.

21 Accumulari etiam possunt huic sententiæ inconuenientia pro aliis sententiis allata. Nam illa determinatio negatiua quæ antecedit influxum & cooperationem voluntatis, vel relinquit illam indifferentem ad influendum, & cooperandum, ita quod adhuc potest resilire, & non cooperari, vel non, sed ea supposita non potest non influere, & cooperari voluntas. Si primum ergo posita illa non potest Deus absoluto & efficaci decreto decernere concursum suum determinatum, nisi etiam rapiat voluntatem creatam ut concurrat, aliàs frustrari posset voluntas Dei absoluta si resiliret humana voluntas. Et currunt hinc argumenta facta contra determinationem voluntatis in actu primo: eadem enim currunt contra negatiuam. Si secundum: ergo negatiua illa determinatio obligat voluntatem ad positiuè influendum in actum, & ita influit necessariò & non liberè. Dices: Non influit necessariò simpliciter, & necessitate antecedenti, sed consequenti, & ex suppositione, quia potest tollere illam negatiuam determinationem, & sic desinet influere. Contra: Potest tollere illam negatiuam determinationem, &

non influere: ergo poterit etiam tollere ne influat Deus concursu simultaneo, quia eiusdem rationis est tollere influxum suum, & Dei: Ergo non potest Deus absoluto & efficaci decreto decernere quod influet simul cum voluntate, nisi etiam faciat quod ipsa non resiliat à determinatione negatiua, quod est perinde ac determinare illam antecedenti & efficaci decreto, quia ex vna parte influit in actum, ex alia tenet illam ne resiliat à sua determinatione negatiua, & hoc non est in manu voluntatis, nec potest manum illam à se excutere, quia infallibiliter operatur: ergo iuxta principia horum Authorum tenetur voluntas necessitate quadam ne possit resilire.

Ex quibus etiam manet impugnata sententia Erize, quæ ex parte affinis est huic sententiæ Bellarmini, dum inquit 1. part. disput. 19. cap. 4. numer. 3. quod decretum illud indifferens quo prima causa assistit potentiæ creatæ ut compleat perfectè eius virtutem ad agendum connotat in ipsa potentiæ negationem impediendi ad agendum: potest enim Deus impedire omnia agentia creata ne agant, & eo ipso quod non vult impedire potentiam creatam, intelligitur sufficienter velle illi applicare suam omnipotentiam. Additque Erize hoc impedimentum in potentiæ libera esse prædeterminationem physicam in vnam vel alteram partem, & sic decretum non prædeterminandi physicè voluntatem liberam, erit decretum assistentiæ omnipotentis diuinæ, & concurrenti ad suum effectum.

22 Sed hæc sententia omnino insufficiens est. Et ex parte coincidit cum sententia Bellarmini impugnata, quia illa negatiua determinatio apud Bellarmin, qua voluntas finit se moueri, quædam ablatio impediendi est, scilicet resistantiæ voluntatis, immò totum impedimentum voluntatis per hoc aufertur, quod reddatur non resistens. Deinde ablato omni impedimento, & posita potentiæ vel quacumque causa expedita ad agendum, potest Deus denegare concursum suum simultaneum: nec enim indiget Deus appositione impediendi, ut faciat quod causa non operetur, nec effectus egrediatur ab illa, sed sufficit pura suspensio, & denegatio sui concursus, sicut sola suspensione concursus potest rem annihilare, sine appositione contrarij, sic potest effectum detinere ne egrediatur sola suspensione concursus, nullo alio impedimento appposito. Vnde ignis in Babylone nullum impedimentum habebat ad comburendum: de facto enim comburebat ligna, & materiam, quæ sibi ministrabatur, & viros quos reperit de Chaldæis prope fornacem; & tamen tres pueros non combussit propter solam suspensionem concursus: ergo sola ablatio impedimentorum ad hoc non applicat nec determinat decretum diuinum ut de facto concurrat. Et redeunt argumenta facta, an ablatio impedimentorum relinquat adhuc liberam voluntatem ad cooperandum, & influendum in actum, an non. Si non, manet voluntas necessitata, si relinquit liberam: ergo adhuc posita negatione, seu ablatione omnis impediendi Deus debet dare concursum non determinatum, sed sub conditione si voluntas se determinauerit, quod est semper concursum dare indifferentem, & semper inexplicatum relinquere quid est illud, si voluntas se determinauerit. Si verò dat concursum determinatum per decretum absolutum, aut de bet

debet trahere voluntatem infallibiliter ut cooperetur secum, ne frustratur voluntas Dei absoluta, aut exponet se periculo frustrationis, si voluntas creata resiliat. Quod si dicat Erize, quod non intelligitur Deus tollere omnia impedimenta, si suspendat suum concursum, quia hoc maximum impedimentum est, poni causam in statu suspensionis concursus. Contra est, quia secundum hoc non dicitur Deus tollere omnia impedimenta, nisi concurrat de facto, & positiue: nam si impedimentum est suspendere influxum, ablatio impedimenti erit non suspendere, sed concurrere: hoc enim est non suspendere, scilicet concurrere. Et sic decretum Dei de duplici concursu indifferenti ad amorem, vel odium determinabitur ad concurrendum ad amorem, & connotabit pro effectu ad extra concurrere ad amorem, id est, determinatur ad sic concurrere quia sic concurrat. Hoc est petere principium: inquirimus enim, quare sic determinate concurrat Deus, cum ex se indifferens sit ad concurrendum, sic vel ad oppositum? Et dicitur ideo sic determinate concurrat, quia non apponit impedimentum, & non apponere impedimentum est non suspendere concursum, & non suspendere illum est concurrere: determinatur ergo ad concurrere sic, quia sic concurrat. Nugatio.

23 Denique quinta sententia potest esse P. Alarcon loco supra cit. qui licet pluribus conclusionibus explicet mentem suam, in ordine tamen ad causas liberas summa resolutionis eius ad hoc reducit, quod datur in Deo assistentia extrinseca suae omnipotentiae ad concurrendum cum voluntate nostra, & causis creatis, quae assistentia non est sola localis coniunctio, ut ita dicam, seu immensitas Dei, non decretum absolute praedefiniens actum causae liberae, nec prius natura volens concurrere cum voluntate, nec solum decretum indifferens ad utrumque extremum sine alio determinatio in particulari, neque conditionatum efficax concurrendi, si tollatur impedimentum, sed est obligatio quaedam moralis orta ex decreto Dei, qua voluit unicuique causae assistere & concurrere iuxta inclinationem suam, ex qua obligatione necessario oritur aliud decretum determinatum concurrendi ad assensum, v.g. potius quam ad dissensum. Et obligatio illa nascitur remote & naturaliter ex virtute causarum secundarum, quae postulant sic applicari sibi omnipotentiam Dei, quibusdam determinate, & necessario, quibusdam indifferenter, & libere, & ratione huius exigentiae fit quaedam violentia causae creatae liberae, si in actu primo non assistat diuina omnipotentia ad utrumque extremum per obligationem moralem.

24 Haec sententia, in eo quod asserit Deum decreto suo se obligare ad assistendum, & concurrendum cum causis inferioribus, iuxta earum inclinationem & naturam, indeque resultare quod de facto concurrat, quoties causa secunda operatur, nisi pro aliquo particulari casu Deus excipiat ordinatum istum cursum rerum, & suspendat per miraculum concursum suum, verissima est. Sed in hoc non habemus difficultatem, nec soluit illam hoc dictum, difficultas est quomodo illud decretum Dei indifferens ad amorem vel odium, v.g. offerens, & assistens assistentia extrinseca ad concursum, pro utroque extremo, determinetur ad amorem potius quam odium, ad consensum quam dissensum; quam determinationem seu determinatum decretum requiri, non inficiatur Author hic, immo dicit necessario inferri ex primo decreto, quo Deus decernit assistere sua omnipotentia omnibus causis determi-

Ioan. S. Thom. in 1. part. D. Thomae.

nato concursu, & indifferenti liberis: determinatur autem illa indifferentia utriusque concursu ad hoc determinate, v.g. ad consensum, si voluerit creata voluntas, & elegerit sic operari, & secum trahere omnipotentiam Dei ad cooperandum potius consensui, quam dissensui, eo quod causae inferiores & secundae determinant primam, & ut dicit S. Thom. 3. cont. Gent. c. 66. ratione. 5. Secunda agentia sunt quasi particulantes, & determinantes actionem primi agentis. Sed Author iste facit difficultatem, non tangit, multo minus soluit. Nam inquirimus: si Deus habet decretum assistendi ad utrumque extremum, consensus, vel dissensus, amoris, vel odij, determinat autem quod absolute sit ad amorem, quia videt quod voluntas se determinabit, & eliget hanc partem, posita tali vocatione, quid est illud, *Voluntas se determinabit & eliget*, seu si voluntas se determinauerit, & elegerit hanc partem? estne aliqua determinatio voluntatis creatae in actu primo, vel secundo, aut quid est illud? Et currunt omnia argumenta allata contra alias sententias, quae per istam non solvuntur, & tamen hic est punctus totius difficultatis. Deinde quia expresse fatetur iste Author non sufficere ad hoc ut Deus determinate concurrat, v.g. ad amorem potius, quam odium, illud primum decretum indifferens dandi concursum ad utrumque extremum, sed sequi aliud decretum necessario ex primo, quo determinate concurrat ad talem actum, si voluntas se determinauerit pro illa parte, & voluerit uti illo concursu determinato. Quod est incidere in primam sententiam supra impugnata ex Suarez, quia illud decretum determinatum superadditum ad indifferens primum debet esse absolutum & efficax: nam si adhuc est indifferens, & expectans determinationem voluntatis nostrae, non est distinctum a primo. Si autem est absolutum & efficax, nec iam expectat voluntatis determinationem, oportet quod vel habeat vim supra ipsam cooperationem voluntatis faciendo ne resiliat, sed cooperetur sibi, vel quod exponat se periculo frustrationis, si voluntas noluerit cooperari; & tamen Deus absolute velit concurrere, vel quod semper maneat conditionatum illud decretum de concurrendo si voluntas voluerit, & non desistat a cooperatione sua, & sic non distinguitur a primo decreto. Præterquam quod illud decretum indifferens determinandum sub conditione, si voluntas se determinauerit, non potest resolui in absolutum, nisi purificata conditione. Prius ergo est purificari conditionem quam decretum absolutum fieri. Purificatio autem conditionis est, quod voluntas se determinet ad hoc potius, quam illud, quae determinatio non est in actu sine concursu Dei determinato, quia voluntas non se determinat in actu secundo sine causa prima: ergo purificatio conditionis requisita ut Deus determinet concursum suum, est ipsa determinatio concursus Dei, & sic conditio ut Deus determinet, est quod determinet. Quid implicatius?

Omitto, quod non satisfacit suis principiis, cum enim ponat duo decreta, alterum indifferens quo offertur concursus ad amorem & odium, alterum determinatum quando voluntate eligente unam partem, v.g. amorem, ad illam Deus determinate concurrat, oportet quod assignat in re duo connotata, & duplicem mutationem realiter diuersam utrique decreto. Et quidem secundo decreto facile assignatur connotatum, scilicet amor determinatus ad quem Deus concurrat. Primo autem decreto non assignat aliquid in re, scilicet amorem & odium,

D 2 cum

cum non deur vtrumque ex vi talis decreti. Sed recurrit ad reuelationem, vel promissionem Dei, quam facit de concurrente sic cum causis secundis. Sed hoc est connotatum, seu effectus alterius decreti, scilicet decreti de reuelando, aut promittendo; hanc enim reuelationem vel promissionem Deus se solo facit, illum verò duplicem concursum offert, vt cum voluntate cooperetur: distinctum ergo decretum est. Et quid si Deus nihil reuelando aut promittendo, eodem modo concurreret in re cum causa creata? Quid tunc connotaret illud decretum? Et tamen etiam tunc eundem effectum haberet, & idem decretum daretur de eo.

- 26 Quod autem assert. D. Thom. 3. *contra gent. cap. 66.* quod causæ creatæ sunt quasi particulantes, & determinantes actionem primi agentis, sensus est manifestus quod secunda agentia limitato modo agunt, & sic minus vniuersaliter, quam causa prima; vnde determinant eius vniuersalissimum concursum, vt non operetur quicquid de se potest, sed quod ista causa secunda potest, ei se accommodando. Quod non est determinare concursum diuinum indifferentem eligendo, & sumendo concursum quem voluerit, siquidem ipsum sic eligere, & sic determinatè velle, etiam ex Deo est, & ex eius concursu, sed est limitare diuinam actionem ad certam speciem actus vel effectus, quia hac causa particularis solum potest hanc speciem effectus producere, & Deus accommodat actionem & virtutem suam, vt in illa, non ad aliud concurrat.

Altera sententia opposita de decreto ex se efficaci.

- 27 Hucusque retulimus sententiam, variòsque modos eam explicandi, quæ ponit decreta Dei indifferentia expectantia determinationem voluntatis, vt iuxta illam determinet Deus efficaciter, & absolute determinatum concursum præbere, non autem ex natura sua efficaciam habentia, sed ex suppositione nostræ determinationis, indeque denominatione quadam extrinseca decretum Dei efficax dici. Altera ergo principalis sententia est, decreta Dei ex se, & ex natura sua esse efficaciam ad determinatos actus liberos, non ex suppositione determinationis voluntatis nostræ, sed ex causalitate ipsa talis voluntatis, & decreti Dei, quo causat istam determinationem causæ liberæ, eiusque modum, scilicet libertatem, & non tollit istam, quia causat eam, & est radix illius. Hanc sententiam esse D. Thom. & Scoti, aliorumque antiquorum, & plurium recentiorum, postea ostendam, & hoc ordine procedetur, quod prius ostendemus, decreta ista indifferentia de se, & solum ex suppositione, & ex quadam denominatione extrinseca efficaciam, non subsistere. Deinde quomodo D. Th. & alij antiqui posuerint efficaciam decretorum ex se. Et denique rationes & fundamenta huius sententiæ explicabo.

ARTICVLVS III.

Decreta indifferentia deportantur.

Satis quidem videri posset ad explodenda, & reiicienda ista decreta indifferentia circa nostros actus liberos tanta, & tam magna variet

suorum Authorum in eis explicandi, & quàm difficile respondeant ad difficultatem propositam, à qua deuorantur. Ex quibus omnibus resumimus præcipua fundamenta reiiciendi indifferentia ista decreta non efficacia ex natura sua, sed ex suppositione nostri consensus præiussi, & hæc nostra sententia est & firma resolutio DEI DECRETA NIL EXPECTANT VEL SUPPONUNT EX NOSTRA VOLUNTATE, VT DETERMINATE ET EFFICACITER OPERENTUR, QVIA QVOD DIVINVM EST, TOTVM CAVSAT, NIL A CREATURA EXPECTAT.

Et ista fundamenta reducuntur ad tria.

Primum, quia ista decreta non subsistunt nisi posita scientia media, qua Deus præcognoscat ante omne decretum suum quid determinatura, aut factura est voluntas nostra. Proinde euerso hoc fundamento, & negata scientia media, ruat necesse est tota ista indifferentium decretorum compositio.

Secundum est, quia sequuntur ex illa positione maxima inconuenientia, quæ euitari non possunt, nec explicari ab oppositis Authoribus, præcipue quia tota efficacia, & infallibilitas diuinæ prouidentia, & operationis reducitur in suppositionem tenentem se ex parte creaturæ, & præiussam; deinde quia illa indifferentia decretorum cum debeat determinari, & resolui in aliquem concursum determinatum, quo concurrat cum creatura libertate, est inexplicabile quomodo resoluiatur, & determinetur ab ipsa voluntate creatura, & non incipiat determinari à diuino decreto. Quod si à se incipit, non est ex se purè indifferens, sed determinatum ante consensum liberi arbitrij, immò debet ipsum causare, non supponere, atque adeò absolute est prius illo, & ex natura sua determinatum & efficax.

Tertium fundamentum est à priori, confirmando & ostendendo decretum Dei debere esse efficax, & determinatum, etiam circa actus liberos ex natura sua, non ex suppositione nostra: inde enim etiam manifestè deducitur abroganda esse decreta indifferentia.

De hoc tertio fundamento agemus *art. seq.* de primo egimus latè *tomo præced. disp. 20.* contra scientiam mediam. Non sunt ea nobis repetenda, sed supponenda. Nunc solum restat videre, quomodo ista decreta indifferentia non possunt stare, nisi in hac scientia media subsistendo. Id verò non negant oppositi Authores, & diserte Vasquez aduertit *disp. illa 99. cap. 7.* quod nisi præcedat ista scientia, qua videt Deus quid factura sit voluntas in qualibet occasione, non potest habere illa decreta comitantia nostræ voluntatis cooperationem. Et in promptu ratio est, quia prouidentia Dei debet gubernare & dirigere infallibiliter omnes actiones creaturarum, & prouidere omni enti creato, & eius actionibus, & motibus. Oporteret ergo quod tales actiones præcognoscat, & omnem earum fallibilitatem, & modos quibus fieri, vel deficere possunt sciat, vt infallibili modo prouidere possit. Non potest autem omnia ista cognoscere, nisi vel in seipso tanquam in causa infallibili & efficaci talium motuum, & actionum atque determinationum, vel in ipsis creaturis, videndo determinationem earum, per quam ipsum indifferentem concursum Dei, & ad vtrumque paratum eligunt ac determinant, & hoc præiusto etiam Deus determinat suum, iuxta id quod videt in creatura.

Hoc

Hoc secundum est scientia media, quæ antecedit omne decretum Dei de facto habitum, & solum considerat illud sub conditione. Primum autem est positio decretorum ex natura sua efficacium. Ergo qui negauerit illa, & solum posuerit indifferentia & expectantia determinationem creatæ voluntatis, ut Deus decernat determinatè concurrere, oportet quòd ad scientiam mediam recurrat, ut ex illa infallibiliter providentia diuina dirigat motus omnes creatæ libertatis. Et è contra, qui negauerit scientiam mediam, necesse est ponat decreta ex natura sua efficacia, per quæ determinationem omnem creatæ voluntatis Deus cognoscat. Quare primum fundamentum explodendi decreta indifferentia, quibus Deus non determinat, sed supponit determinationem voluntatis nostræ, est negatio scientiæ mediæ, sine qua illa non possunt sustineri.

De secundo fundamento, scil. de inconuenientibus, quæ in istis decretis indifferentibus, & ex se vacuis efficacia inueniuntur, multa iam significauimus inter referendum & impugnandum sententias, quibus Authores oppositi ea explicant. Breuiter ea nunc resumimus.

2 Primum inconueniens est: si dantur decreta indifferentia ex se, & solum ex suppositione nostri consensus efficacia respectu consensus nostri, & cooperationis nostræ (nam respectu eorum quæ à solo Deo fiunt, & non per nostram cooperationem non est difficultas quòd ex se efficiam habeat causalitas & decretum Dei) sequitur quòd aliquid Deus respiciat ex parte creaturæ, quod suæ omnipotentia non subicit, nec ab ea causari & deriuari possit, ita plenè, & absolutè sicut subest, & deriuatur à potentia creatæ, scil. libera illa determinatio & consensus, quem expectat, & supponit, & super quam non habet Deus efficaciam antecedentem ad causandam illam sub ratione liberæ determinationis, sed ab ipsa expectat determinationem sui in differentis concursus. Et declaratur hoc, quia cum Deus dat vocationem congruam antecedentem ad inclinandam voluntatem, & offert concursum indifferentem, & indeterminatum ad vtrumque extremum, scil. velle, vel non velle, totum hoc quod ex parte Dei se tenet, & datur, vel offertur, non sufficit ita determinare liberè voluntatem efficaciter, sicut ipsa sufficit se determinare posita illa vocatione antecedenti, & oblato illo duplici concursu indifferenti: nam si aliquid amplius Deus faceret ad determinandum antecedenter in voluntate præter, ista dicunt quod læderet libertatem: ergo libertas creatæ ita delicata est quòd aliquid potest ipsa circa determinatam cooperationem suam efficaciter determinandam, quod non eum illo temperamento & modo libero potest Deus ex se tanquam ex primo principio & radice omnis entis creati deriuare, & causare, sed si ponat manum suam efficacem, lædet eam; ipsa verò efficaciter se determinando, non se lædit. Cur ergo Deus non poterit ex se deriuare, ut primum principium, illum modum, quæ creatæ voluntas ex se ut causa secunda deriuans, non se lædit? Nam libertas creatæ causat illam determinationem efficaciter ex virtute sua, tanquam ex virtute participata, & deriuata à primo ente & à prima causa, quæ est Deus, qui se habet ut radix & principium illius virtutis, & omnis motus, & determinationis eius: *in ipso enim viuimus, mouemur & sumus* Actor. 17. & iterum Rom. 11. *Non tu radicem portas, sed radicem te.* Et ad Hebr. 1. *Portans omnia verbo virtutis sue.* Si ergo omnia portat: ergo & determinationem illam libertatis, sicut ergo illa erumpit ex libertate creatæ, Deo

Ioh. à S. Thom. in 1. part. D. Thomæ.

spectante & præuidente; cur non etiam erumpit, & procedit à radice & principio primo talis libertatis, quæ est causa prima? aut quomodo potest author ipsius voluntatis, & omnium rerum in solo motu libero creaturæ suæ ita hære, ut si velit causare illum in quantum liber est, hoc ipso lædat & destruat libertatem? Certè inintelligibile videtur, quòd Deus sit author & principium omnium rerum; entium, modorum, motuum, omnis rationis, aut formalitatis creatæ, siue per se immediatè ea faciat, siue mediante creatura sua: omnia enim ex participatione diuina originantur, & quòd non sit causa antecedens, & deriuans ex se, & causans aliquem motum creaturæ, sed supponens, aut purè præuidentis; & quod deterius est, quòd creatæ libertas ex se causet illam determinationem, seu consensum, aut quidquid illud sit quod per scientiam mediam præuideretur, & non causatur, & tamen diuina potestas & causalitas, quæ illi voluntati assistit, eamque in esse continet, & est radix & principium illius, non possit id quod causat voluntas creatæ sine læsione suæ libertatis, etiam diuina illa potestas causare. Quod si causat, antecedenter se habendo causat, quia omnis causa antecedit effectum sine hoc quod antecedentia illa lædat libertatem quia causa talis libertatis est, nec solum est radix & principium ut se determinet voluntas, sed ut liberè se determinet.

Nec potest dici, quòd ratio liberi in illa determinatione non est denominatio reducibilis in Deum, sed quod ratio contingentia, & liberi reducitur in causam creatam, & non importat respectum ad primam, quia respectus libertatis est respectus rationis ad modum operandi cum consideratione, quod inuariata substantia & entitate actus variari potest, quæ est doctrina Vasq. *disp. 99. cap. 7.* additque D. Thomam *in hæc quest. 19. artic. 8.* non bene reprehendisse opinionem quæ non reducit contingentiam causarum in causam primam, nec sequi quod aliàs essent præter intentionem Dei, ut ibi argumentatur S. Thom. quia sufficit ad hoc quod etiam ex voluntate Dei eueniant, quia Deus decreuit cum causa liberæ concurrere iuxta id quod illa postulat, quod satis est ut præter intentionem Dei non sit.

3 Cæterum hæc solutio quæ ita apertè D. Thomæ apponitur defendens opinionem quam ipse D. Thom. reprobendit, sustineri non potest. Licet enim inter D. Thom. & Scotum controuersia sit, an contingentia causarum secundarum reducenda sit in efficaciam diuinam, ut S. Thom. sentit, an in contingentiam illius, id est, in libertatem diuinam, ut Scotus putat, quia existimat si Deus non operaretur liberè, quòd nihil contingens remaneret, sed omnia necessariò euenirent; tamen vterque conueniunt in hoc, quòd contingentia, & libertas creatæ à Deo debet causari, & Deus est radix illius, & consequenter per respectum ad ipsum debet sumi, siue in ordine ad eius efficaciam, quæ potest tam contingentiam, quàm necessitatem causare in rebus, siue in ordine ad eius libertatem, sine qua putauit Scotus non posse temperari actionem Dei quin secum de necessitate raperet omnes causas inferiores. Et huius ratio est, quia hoc quod est creaturas agere liberè, & contingentem pertinet ad perfectionem creaturarum, & non ad priuationem vel defectum, nam liberè agere est perfectius quàm agere ex necessitate naturæ, cum hoc quod est liberè agere conueniat solum nobilissimis creaturæ, scil. intellectualibus, & voluntarium est perfectius quàm spontaneum, quale conuenit brutis, nec solum est perfectio habere libertatem in potètia, sed etiam

in exercitio, & in actu secundo: ergo tam libertas potentia voluntatis, quam exercitij, & actus secundi est participata, & originata à Deo, quia omnis perfectio creata est à Deo causata, & participata; omnis autem perfectio participata dicit respectum, & ordinem ad id à quo participatur: ergo falsum est quod dicit Vasq. liberum in actu non dicere respectum ad primam causam ut operantem, nec actum esse liberum, quia solus Deus illum fieri decreuerit, & fecerit. Falsissimum est hoc, quia solus Deus est primum principium à quo participatur, & deriuatur actus, ut liber, ut à primo ente: ergo ad illum, ut ad causam à qua participatur, dicit respectum, & quia solus Deus decreuit tanquam prima causa, ideo est liber actus, quia etsi exerceatur à voluntate, ab eaque dependeat, tamen hoc ipsum quod est depēdere, & fieri à voluntate Deus fecit, & decreuit, & sic tandem reducitur ad solum Deum, ut ad primum ens & primam causam, saltem ea subordinatione, qua reliqua entia creata, & reliqui motus & actiones causarum secundarum in Deum reducuntur. Nam si Vasq. vult rationem liberi non reduci in causam primam operantem, ut in principium formale, & proximum, verum dicit; sed non ad rem, quia Deus à nullo ponitur ut principium proximum creaturarum actionum. Si autem vult non reduci in Deum, ut in principium primum omnis motus, & entitatis, & modi, etiam liberi, vehemens dictum est, & intolerabile, cum à Deo subtrahat, & non reducat ad illum ut ad primam causam nobilissimum modum operandi, qui est modus operandi liberè. Si autem non referuntur ad causam primam motus nostri ut liberi: ergo neque subsunt providentiæ diuinæ, quæ est providentiæ causæ primæ, quod esse contra sacram Scripturam manifestè probat D. Thom. 3. *contra gent.* c. 89. & 60. contra opinionem quorundam qui dicebant, providentiam non esse de his, quæ subsunt libero arbitrio, scilicet de electionibus, sed de euentibus, seu effectibus, qui non sunt in nostra potestate, & ita indigent providentiæ.

4 Et quando dicit Vasquez hunc respectum esse rationis, quia est dependentia à consideratione rationis, quæ potest variari invariata substantia, & entitate actus, valde in hoc à vero declinavit. Nam voluntas realiter habet subordinationem ad intellectum, à quo dirigitur & movetur ut à causa reali & vera: nam finis qui causat in voluntatem mediante apprehensione intellectus, vera & physica causa est, voluntas respiciens obiectum ut propositum ab intellectu verè & realiter illud respicit, quia ab eo realiter pendet in suo actu, & variato dictamine intellectus, variatur respectus in voluntate, quia alio modo immutatur ad producendum actum suum. Cur ergo non erit respectus realis in actus voluntatis ad intellectum, si realiter illi subordinatur, ab eoque dependet in sui actus elicientia? Sed esto; respiciat voluntas intellectus considerationem solo respectu rationis, tamen quod actus sit liber, non solum consistit in eo respectu, sed illum supponit, & principaliter consistit in ordine egressionis à potentia libera, à qua elicitur sine coactione, & necessitate, sed cum dominio ipsius super talem actum, ita eliciendo quod posset non elicere. Hic autem respectus in ipso actu ad suum principium à quo elicitur tali modo, realis est, quia fundatur in reali egressionem & dependentia à voluntate ut dominante, & non ut coacta & serva: ergo si realis est, à prima causa participatus est.

Denique quod Vasquez taxat D. Thom. eius-

que rationem, valde inconsideratè dictum est. Nam si ille actus ut liber non causatur antecedenter & originatiuè à Deo, sed solum concausatur, & Deus decernit causare cum illa, & concurrere iuxta quod illa postulat: ergo solum Deus ex fine & intentione sua intendit auxiliari, & succurrere causæ creatæ, non verò ex intentione Dei est quod in tali causa detur illa cooperatio, cui ferre debet auxilium, & cum qua debet concurrere. Et hoc patet, quia id quod aliquod agens præsupponit, & non causat, non est ex eius intentione, & causalitate deriuatum, sed in illa sententia Deus præsupponit, & non causat illam determinationem voluntatis liberam, quæ determinat indifferentem concursum decreti diuini: ergo illam determinationem ut præsuppositam Deus non respicit, tanquam ex sua intentione deriuatam, sed præter eam factam. Minor admittitur ab opposita sententia. Maior est certa, quia id quod præsupponitur, & non causatur ab aliquo agente, in eo in quo supponitur non est ab ipso; sic enim causaretur ab eo, non supponeretur, ergo neque est ex eius intentione, quia ad eorum ad quod se extendit intentio Dei, extenditur eius causalitas: quod ergo causalitas supponit, etiam intentio supponere debet, & non causare: frustra enim intenderet Deus fieri, quod factum supponit, nec ad se reducitur: ergo idem est aliquid subtrahi à causalitate Dei, & ab eius intentione, supponi ab ipso agente, & ab eo intendente, cum pari passu currant eius intentio & causalitas, imò si ex eius intentione esset, hoc ipso ex eius causalitate esset, quia intentio causat per modum causæ finalis. Nisi dicatur quod intentio Dei est sola simplex & inefficax voluntas, quæ præcedit quidem in Deo respectu actus liberi creati ut liberi, sed non efficaciter causat, & operatur, etiam per modum intentionis, sed supponit ipsam determinationem creatæ voluntatis. Cæterum hæc responsio falsa est, ut iam sæpè ostendimus, cum etiam intentio efficax esset debeat in ratione causæ finalis, cuius gratia movetur efficiēs ad agendum: nam si in suo genere & linea, id est, in genere causæ finalis efficax non est, non movebitur per se ab illo efficiens, & sic si operetur, erit per accidens, quia non per se connectitur cum illo fine intento, & sic per accidens exit operatio, si exit, non ex connexionem cum fine, & intentione eius. Non habet autem connexionem per se cum effectu, si inefficax est, quia illa est inefficax voluntas cum qua stat bene non consecutio effectus & frustratio eius: ergo non habet per se illationem, nec connexionem cum effectu: ergo si sequitur ex tali intentione, sequetur per accidens. Præterquam quod in illa sententia erit quidem voluntas Dei, seu intentio inefficax respectu effectus, qui simul coëfficiendus est à voluntate creatæ, & Deo: nam cum ab utroque pendeat, habere videtur Deus respectu illius inefficacem voluntatem, quia aliquando sequitur ille effectus, aliquando non, prout associata causa se determinaverit, cuius determinationem ad hoc prævidet Deus, ut iuxta illam possit, vel non possit efficaciter dirigi in effectum. Cæterum respectu ipsius causæ creatæ cooperantis, & determinationis eius, quam dicitur Deus prævidere, nec efficacem, nec inefficacem intentionem Deus habet, quia non causat, illam, sed supponit, & prævidet: si enim causaret, antecederet se haberet, & decretum haberet ad determinandū talem causam ante quod decretum non posset prævidere determinationem illius voluntatis, & sic scientia illa qua id cognosceret, non antecederet omne decretum, nec esset scientia media. Et illa voluntas qua

qua Deus causeret talem determinationem voluntatis, non esset præsupponens, aut expectans determinationem voluntatis ut cum illa causeret, quia hæc ipsa determinatio est id quod causandum est, non cum illa: ergo si eam Deus causet, non ex suppositione alterius causæ, sed ex absoluta efficacia causet, & sic dabitur iam efficax decretum circa liberam determinationem ex natura rei. Si autem absolute Deus de se non causet illam determinationem, nec ex præsuppositione alterius causæ: ergo illa determinatio evenit extra causalitatem Dei: ergo & extra intentionem. Et sic tenet semper consequ. D. Thomæ.

6 Quod si intentio Dei respectu talis determinationis nostræ voluntatis in eo ponatur quod Deus excitat, suadet, proponit, & vocat voluntatem, siue per externam prædicationem, siue per internam illustrationem: si hoc dicatur, valde inconuenienter dicitur, tum quia totum hunc modum motionis moralem, qui pertinet ad suasionem, & illustrationem non excedit vim legis & doctrinæ, quam etiam fatebatur Pelagius, ut latè *disp.* 3. tractatum est: semper verò remanet voluntas insufficienter mota à talibus obiectis, & suasionibus, & debet indifferentiam illam circa res propositas determinare & vincere. Et de hac determinatione est punctus difficultatis, quomodo illam causet Deus & intendat ultra suasionem & omnem moralem motionem, quæ non sufficit determinare infallibiliter liberam voluntatem. Tum etiam, quia omnes istæ motiones suasoriæ, & moraliter inclinatiuæ voluntatis, non sufficiunt ad intendendum quod voluntas se determinet, nisi precariò, sicut potest etiam alter homo vel Angelus intendere me inclinare ad aliquid volendum, & hoc negoriatur blanditiis, suasionibus, minis, argumentis, &c. Quod totum est intendere determinationem meæ voluntatis per media extrinseca allicientia, vel terrentia, & dependentem à voluntate, quæ de se est superior omnibus istis mediis, nec ab aliquo plenè & sufficienter mouentur. Si ergo Deus sic solum intendit determinationem voluntatis, scilicet mediis creatis eam inclinare, & cum dependentia ab ipsa, valde imperfectè habet talem intentionem, scilicet ambiendo alliciendo, & precando à voluntate, sicut, homo mouet hominem, non ut Deus creaturam. Quid imperfectius? Et mirum est quod Deus, qui omnibus istis mediis dat virtutem inclinandi voluntatem, dando illis perfectionem qua ipsam moueant, in seipso non habeat maiorem vim mouendi voluntatem liberè, cum sit author libertatis eius, nec possit uti erga voluntatem ut liberè se moueat actione aliqua diuina, sed allicientia creata? Et creaturæ omnes libertatem saluant in mouendo, solus eius Author si per seipsum moueat, destruit illam? Et iubemur credere hanc grandem de Deo æstimationem, & celsitudinem.

7 Secundum inconueniens contra ista decreta indifferentia deducitur ex complicatione, & insuperabili difficultate qua premuntur aduersarij in declarando quomodo hoc decretum indifferens determinetur ad concurrendum cum voluntate pro consensu magis, quàm pro dissensu ex illis duobus quæ offert ad vtramque partem: quid item correspondeat in re ex parte creatæ voluntatis terminans decretum illud quatenus indifferens, eique prout sic correspondens. Quod vltimum videtur valde illos qui non distinguunt decreta Dei, nisi connotent diuersam mutationem realem in creaturis ad extra. Non inuenitur autem quæ mutatio resultet in creatâ voluntate, ex

oblatione duplicis concursus indifferens: nusquam enim ponitur in re vterque concursus, sed vnus determinatè. Vnus autem non adæquat totum quod amplectitur decretum indifferens, qui duplicem offert & respicit. Vnde cum hi Authores non inueniant quid connotet decretum illud in quantum indifferens quoad mutationem realem in creatâ voluntate, quia ibi non ponit immutationem, nisi secundum determinatum concursum aliàs determinatâ immutatio non esset, recurrunt ad immutationem valde extrinsecam, videlicet ad reuelationem aliquam, vel promissionem, aut pactum quod Deus facit de concurrente sic cum creaturis, excepto si in aliquibus casibus voluerit ipse suspendere concursum suum. Quod totum præced. art. Satis refutatum manet: Hæc enim sunt connotata alterius decreti de reuelando, aut promittendo, non illius de offerendo duplicem concursum.

8 Cæterum, quia nec omnes ex oppositis Authoribus admittunt requiri ad decreta diuina distinguenda diuersam connotationem secundum mutationem realem creaturarum, ideo non multum virgemus hoc inconueniens. Sed insistimus in illo alio inconuenienti, quomodo resoluatur seu determinetur hæc indifferentia decreti diuini? Nam constat decretum illud indifferens de duplici concursu oblato ad vtrumque extremum, v. g. ad amorem & odium, consensum, & dissensum, non posse concurrere in re, & de facto secundum illam indifferentiam, sed secundum partem determinatam, v. g. ad determinatum assensum vel dissensum in singulari. Quomodo ergo fit determinatum ad vnum partem, ita ut si denegaret Deus concursum ad illam partem, & daret pro alia, esset miraculum, aut violentia quædam illata causæ creatæ? Nam communiter dicitur Deum indifferenter offerre concursum suum pro vtraque parte voluntati, & determinatè concurrere ad illam partem ad quam se voluntas inclinauerit. Hoc autem sub hac specie verborum facile dicitur, præsertim apprehendendo Deum ut causam particularem, & partialem tantum cum voluntate nostra; & procedit imaginatio ad hoc, ut non amplius de Dei causalitate æstimet, & virtute, quam de duobus portantibus lapidem, quorum vnus expectat alterum, non illi illabitur, aut principium, & radix eius est, ut ipse suam partialem operationem eliciat. Et ita modus iste considerandi & philosophandi imaginationi speciosus est. Cæterum rationi valde inuisus, si transcendens imaginationem conetur apprehendere (id quod verissimum est) Deum nullo modo esse causam particularem tantum, nec ita cooperari creaturæ suæ quin etiam illabatur illi, detque illi virtutem & motum, & se habeat tanquam radix, & principium illius operationis pro ea etiam parte qua egreditur à creatura multo magis quàm ipsa anima sit principium, & radix potentiarum suarum, & operationum ab ea egredientium; quia est principium dandi illi animæ, & potentiis esse, & virtutem, & motum ergo est etiam radix ipsius operari, ut egreditur à causa creata. Consideremus autem, quod si duo homines vellent portare lapidem; & vnus illorum haberet virtutem suam dependentem, & derivatam ab alio in fieri, & conseruari, multo magis quam ab anima sua, & quod talis non posset suam partialem operationem elicere, nisi alter intra ipsum illaberetur, & animæ eius, atque potentiis præberet esse, & virtutem etiam ad suam partialem cooperationem eliciendam, & cum ipsa cooperatione eius etiam simul influeret in effectum pro-

pter dependentiam effectus à se quid iudicemus de tali homine portante simul lapidem cum altero, & quomodo diceretur expectare alterius cooperationem, cum potius deberet eam causare? Et tamen vix in hoc explicamus summam dependentiam quam habet quælibet causa creata à Deo in operando etiam suum particularem aut partialem influxum.

9 Hac ergo consideratione stante quæ nullatenus negari potest, durissimum est ratione explicare, quod Deus offerat duplicem concursum voluntati ad consensum, vel dissensum, & quod ad dandum determinatè concursum pro vna parte, v.g. pro consensu, expectet quod voluntas se determinet, quæ determinatio (quidquid sit) debet voluntati provenire, & superaddi sine concursu Dei determinato, quia ad hoc requiritur ut concursus Dei determinetur. Non negamus quod Deus proponat voluntati & arbitrio eius eligendum id quod maluerit, sicut dicitur Ecclesiast. 15. *Deus reliquit hominem in manu consilij sui. Adiecit mandata & præcepta, si volueris mandata servare, conservabunt te. Apposuit, tibi aquam, & ignem, ad quod volueris porrigere manum suam.* Sed hoc non ita intelligendum est, quasi Deo offerente obiecta quæ homo voluerit, & concursum ad appetendum illa, non maneat occultè ut prima causa, & radix atque principium omnium operationum subministrans esse & virtutem, & omnia ad eliciendam operationem etiam partialem necessaria, quia si reliquit hominem in manu consilij & arbitrij sui, hoc arbitrium, & hæc voluntas est radicata in anima, ut propria eius passio, & tam voluntas quam anima habent pro radice & principio Deum, non pro principio formali, quasi sit forma, sed agente, quia portat omnia verbo virtutis suæ. Et sic reliquit hominem in voluntate sua dependente ab anima sua, quæ est radix per modum formæ, & à Deo suo qui est radix per modum primi agentis, & ita non potest homo determinari, nisi per animam & per Deum, cum sit eius principium.

10 Reducitur ergo difficultas ad illas angustias quas expendimus *art. præced.* Quid est illud, si voluntas creata elegerit, & se determinaverit ad hanc partem, Deus determinabit talem concursum ad eandem partem? Quid est illud, si voluntas creata determinaverit? Estne aliqua determinatio in actu primo & antecedenter ad operationem superaddita ipsi indifferentiæ potentiæ, quo posito Deus determinet absolutè decretum suum ad illam partem in quam inclinat ille actus primus, an est aliqua determinatio per modum ipsiusmet operationis & actus secundi, quasi incipiente iam operatione partiali voluntatis Deus succurrat, & addat suum concursum determinatè pro illa parte? Vtrumque *art. præcedenti* latè reieciimus. Non est actus primus, quia nec est habitus superadditus, cum non semper operemur ex habitu, & ille quando datur, indifferens etiam est, sicut libertas. Non est actus, quia si est actus productus ab ipsa voluntate, de illo redibit difficultas, quomodo producit à voluntate sine determinato concursu, aut quis determinavit concursum. Si autem est actus receptus in voluntate, & per modum auxiliij, non potest esse determinatio physica, quam isti Authores non recipiunt: Erit ergo sola, vocatio congrua, aut auxilium indifferens, & tunc non soluitur difficultas, sed magis ligatur, quia auxilium indifferens non potest determinare divinum concursum indifferenter oblatum ad vnam partem magis quam ad aliam, sicut neque voca-

tio congrua determinat ante ipsum consensum à quo desumi efficacitatis denominationem. Itaque voluntas determinans se in actu primo, siue actus primus ponatur habitus superadditus, siue actus aliquis productus ab ipsa voluntate, siue auxilium aut motio à Deo impressa, nihil dicitur quod sufficienter determinet ipsum decretum indifferens & concursum eius ad vnam partem efficaciter, cum hæc omnia quæ pertinent ad actum primum antecedant cooperationem, & consensum voluntatis, ante quem semper potest resistere voluntas, & sic semper manet integra indifferentia decreta.

Si verò dicatur, quod illa indifferentia decreti soluitur, & Deus determinatum concursum præbet ipsi voluntati, si ipsa se determinaverit in actu secundo, ita quod iam sit operatio in actu secundo, cum resoluitur indifferentia decreti, est incidere in peiora inconuenientia. Nam actus ille secundus quo se determinat voluntas, est ille qui identificatur concursus diuinus, & sic idem est, dicere, si voluntas se determinaverit concurrat determinatè, ac dicere, si ego concurrat determinatè, concurrat, quæ est intolerabilis bartologia talem actum in Deo ponere. Et sequela patet, quia quando Deus offert indifferentem concursum, taliter quod determinandum est si voluntas se determinaverit, clarum est quod non determinabit Deus concursum quousque purificetur in re illa conditio, & consequenter voluntas creata habeat determinatam operationem in actu secundo, sed operatio in actu secundo non egreditur à voluntate nisi etiam egrediatur à Deo, & egredi à Deo est per concursum simultaneum: ergo operatio in actu secundo respectu voluntatis identificatur cum concursu diuino, ut *præced. etiam artic.* ponderatum est, & quomodo hinc non possimus confugere ad diuersas prioritates naturæ, ita quod sub vna intelligatur creatura se determinare, & sub alia Deus concurrere, *ibi* ostendimus. Et vterius urgeri potest, quia illud instans seu prioritas naturæ non est aliud quam prioritas dependentiæ, & respectus, non exercitij, seu existentia: consideramus enim dependentiam creatæ operationis à sua causa proxima creata, nondum intellecta dependentia à Deo, vel è contrà, non tamen exercetur ista dependentia, nec datur in re sine dependentia à Deo: Ergo si Deus decernit determinare concursum suum, si se determinaverit voluntas pro aliquo instanti naturæ, non autem pro instanti existentia: ergo antequam existat in re determinatio voluntatis creatæ, Deus determinat concursum suum: ergo in re, & quantum ad existentiam soluitur indifferentia decreti diuini, & redditur absolutum, & determinatum efficaciter, ante quam existat in re determinatio voluntatis; & consequenter etiam ab æterno potest esse determinatum, & absolutum sine læsione libertatis, quia si ante instans existentia determinationis voluntatis datur decretum absolutum, & efficax concurrendi cum illa, & non lædit eius libertatem, cum in suo instanti durationis concurrat, erit etiam multis antea instantibus esset determinatum, decretum ad concurrendum: nam hoc ipso quo determinatum est ante existentiam determinationis meæ, est determinatum antecedenter, & non potest non rapere secum voluntatem, quia frustrari non potest decretum efficax efficacia antecedenti, vel argumenta quæ fiunt contra efficaciam antecedenter determinantem carent vi. Quare vel indifferentia decreti, & concursus peruenit vsque ad instans in-

trinsecum

insecum, in quo existit actus, & operatio voluntatis creata, vel ante illud instans soluitur, & redditur determinatum efficaciter pro altera parte, v.g. pro consensu. Si primum, currit argumentum factum, quod existit operatio determinata voluntatis existente adhuc influxu Dei indifferenti, quod est idem ac nondum concurrente, quia non potest influere in re in actum determinatum stante indifferentia, sed soluta, & ex alia parte iam existit determinatio voluntatis in actu secundo, quæ idem sibi concursus determinatum Dei, quæ est manifesta complicatio. Si secundum, datur decretum efficax antecedens nostrum consensum, quia antequam existat, & egrediatur à sua causa consensus, decretum efficax est: ergo rapiet secum voluntatem, & currunt omnia quæ ipsi Authores oppositi obiciunt contra prædeterminationem antecedenter efficacem.

Quod etiam ex hac positione sequatur destructio scientiæ mediæ, *preced. a.* satis ponderauimus.

12 Tertium inconueniens decretorum indifferentium est, quia sequitur ex illis Deum respectu cooperationis liberæ, & consensus, qui à nostra voluntate procedit, & cui simul cooperatur, non habere tantum dominium, & tam plenam causalitatem, & virtutem, sicut respectu aliarum actionum, & effectuum, quæ vel procedunt à solo Deo, vel ab aliis causis non liberis. Consequens est omnino absurdum, & non amittendum, ergo & antecedens. Minor manifesta est, quia in quamlibet rem creatâ, hoc ipso quod ens creatum est, habet Deus summum ius, & ipsa res creata summam dependentiam à Deo, & de ipsa, & in ipsa facit quidquid voluerit, & quidquid in illa creatum est, ab ipso Deo participetur, & originetur; sed cooperatio, & consensus liber, etiam in ratione liberi, & prout egrediuntur à voluntate creata, sunt aliquid creatum, quia ratio necessarij, vel liberi in causis creatis non sunt aliquid factum, & in re nihil; cum præsertim libertas fundetur in potestate perfectiori, & ampliori creaturæ spiritualis, cui soli conuenit agere liberè, supponendo tamen ex parte intellectus considerationem indifferentem, sicut omnes actus appetitus, & voluntatis cognitionem supponunt; ut dirigentem se; ergo absurdissimum est minorem causalitatem, aut dominium ponere in Deo respectu istarum operationum liberarum, quàm respectu aliarum causarum. Aut si ratio liberi in his cooperationibus cēsetur esse aliquid rationis, & propterea non reducitur ad primam causam, ut Vasquez sentit *suprà cit. disput. 99. cap. 7.* tamen saltem ipsa entitas cooperationis huius, quæ subest illi respectui rationis, etiâ dū subest, non poterit non reduci ad causam primam? cum entitas creata sit, ac per consequens ad ipsam entitatem actus, quæ est à voluntate creata, dabitur in Deo causalitas antecedens, & efficax, sicut ad alias entitates creatas, cum tamen etiam multæ ex illis habeant adiunctam aliquam negationem, aut priuationem, vel aliquod aliud ens rationis, ut tempus, seu motus habent respectum ad partes præteritas, & futuras transeuntes, qui aliquid rationis est. Si autem Deus efficaci decreto, & antecedenti causat entitatē cooperationis liberæ, hoc sufficit nobis: nam posita illa entitate, ille respectus qui dicitur rationis, statim consequetur infallibiliter.

13 Restat probare maiorem huius syllogismi, in qua est difficultas. Et facile probatur, quia in aliis causis non liberis etiam inuenitur cooperatio cū concursu Dei, & Deus ita dominatur illis, & illæ ita dependent à Deo, quod Deus non expectat determinationem earum, sed causat illam, & efficaciam

antecedentem habet in talium causarum cooperationem, ut non negant oppositi Authores. Respectu autem causarum liberarum, non est Deus radix, & principium illius cooperationis, quasi antecedenter mouens causas illas, ut cooperentur sibi, sed offert concursus ad utramque partem, prout elegerit & determinauerit voluntas: ergo respectu huius, quod est voluntatem determinare vnā partem ex illis ad quas Deus offert concursus, non habet Deus dominium, & ius causatiuum in voluntatem creatam, sed voluntas creata est extra ius Dei, & in hoc minus dominij habet in voluntatem creatam, quàm in reliquas causas non liberis. Pater hæc consequens. Ille habet dominium expeditum, & perfectum in aliquam rem, qui potest re illa vti sicut voluerit, & quando voluerit, & ille habet summum dominium quod summa independentia à quocumque alio potest vti re sua, & sub eius dominio posita: sed Deus non potest vti voluntate creata ad hoc ut liberè se moueat, & iuxta proprium modum suum ex vi sola indifferentis concursus oblari, quia indifferens concursus quandiu non determinat indifferentiam suam, nihil operatur, nec expedit se habet sub illo statu indifferentiæ? & à voluntate Dei non deriuatur huius indifferentiæ resolutio, sed expectatur à voluntate creata: ergo ex vi voluntatis diuinæ à qua deriuatur omne quod est in creatura, non habetur sufficiens & plenum dominium ad vtendum creata voluntate ut libera, sicut ipsi placuerit, sed quando voluntas creata voluerit, atque adeo non est summè independens illud dominium in vtendo re sua, cum tamen, ut ex Aug. diximus *lib. de corrupt. & gratia. c. 14. magis habet Deus in manu sua voluntates hominum: quàm ipsi suas.* Quomodo autem magis habet, si id quod ipsa voluntas creata facit, scilicet se determinare, & determinare concursus indifferentem Dei, Deus non potest facere, sed à voluntate nostra expectare? Ergo in resoluenda indifferentia concursus, non est Deus expediti dominij, & iuris, sed dependenter à determinatione humana, & sic quoad resoluendam indifferentiam diuini concursus, & consequenter quoad operandum de facto, (quod sine determinatione concursus fieri non potest) magis habet homo in manu sua voluntatem suam, quàm Deus, quæ est contradictoria B. Aug.

Non latuit oppositos Authores ratio hæc, & 14 idem præcipue in illam conspirasse videntur: nolunt enim concedere quod efficacia ista sit ex dominio quod diuina maiestas habet in voluntates hominum, sicut & in cætera omnia quæ sub cælo sunt. Vnde videntur dominium Dei, & plenitudinem eius, quo omnia quæcumque vult facit, sic diuidere, quod non sic habet dominium sua diuina maiestas in nostrum liberum arbitrium, ut liberè velit, quàm in alias res non liberis, ut operentur. Quod certè mirabile est, cum dominium Dei æqualiter, & eodem fundamento fundetur in ordine ad creaturas liberis, quàm ad naturales, quia scilicet tam istarum, quàm illarum creator est, & summo iure, & independenti omnino vtitur in omnes, non lædendo cuiusque proprium modum, sed seruando & deriuando ex se. In hoc autem nihil nos imponimus, sed exhibemus ea quæ referuntur in 38. *Congregatione quæ fuit prima coram Paulo V. & iam supra disp. 3. tacta sunt.* Vbi cum ageretur de quodam scripto felicitis recordationis Clementis VIII. per quindecim capita distributo, P. Vastida dixit se prædictum scriptum communicasse cum omnibus Patribus ex Societate per diuersas prouincias dispersis, cum Hispanis, Italis, Gallis,

Gallis, &c. & ex omnium sententia hæc quæ sequuntur dicere atque proponere, quæ & his duabus conclusionibus continentur.

15 Prima se admittere omnia quæ in prædicto scripto continentur esse de mente S. Augusti. id est esse doctrinam conformem doctrinæ S. Aug. siue formalibus, siue æquivalentibus verbis, excepto vno tantum quinto capitulo, & exceptis quæ in eo dicuntur. Quintum autem capitulum quod exceperat, tale est: *Hæc gratia habet suam efficaciam ab omnipotentia Dei, & a dominio quod sua diuina maiestas habet in voluntates hominum, sicut & in cætera omnia quæ sub calo sunt, secundum S. Aug.* Circa quod caput dicebat, hanc non esse sententiam S. Aug. nec id ex inductis testimoniis probari. Primo, quia inducta testimonia non dicunt gratiam esse efficacem ex Dei omnipotentia, vel ex dominio quod habet in liberum arbitrium. Secundo, quia illud verbum, *sicut & in cætera quæ sub calo sunt*, admitti non poterat; denotat enim Deum ita habere dominium in voluntates hominum, sicut & in cætera, quæ sub calo sunt; & ex consequenti sicut respectu aliorum ita habet dominium ut omnia illa vertat quocumque voluerit sine libertate eorum, ita habeat dominium in hominum voluntates, ut eas vertat quocumque ipse voluerit absque libertate earum, quod dici non potest. Et addebat quod non est dubium quin ex hac efficacia. proueniente ab omnipotentia Dei contradicatur Concilio Trident. sess. 6. can. 4. quia talis omnipotentia & dominium moueret hominem, sicut & cætera omnia inanimata, & sic liberum arbitrium esset inanime quoddam, quæ fuit doctrina Caluini. Dicebat quoque non posse esse sententiam S. Aug. istam, quia S. Aug. expressè q. 2. ad Simplicianum constituit efficaciam gratiæ in suasionibus, & inuocatione, qua Deus ita vocat ut nouit congruere ut homo sequatur: non ergo ex dominio Dei venit illa efficacia.

16 Cæterum iam supra admonuimus disp. illa 3. tractantes hunc eundem locum, quàm in felici scriptulo hæreatur in illo termino *sicut*, quasi velimus significare, quod sicut res inanimatas Deus ex suo dominio vertit, & immutat sicut vult, sine earum libertate, ita voluntatem nostram sine libertate eius vertat sua omnipotentia sicut voluerit quin potius oppositum significamus, quod, sicut dominium Dei est super res inanimatas, & modum earum, ut necessariò, & sine libertate operentur, ita super res rationales & modum earum dominium habet, ut liberè, & non cum necessitate moueantur. Sanè comparatio ista, & verbum, *sicut*, non est nostrum, sed Scripturæ Proverb. 21. *Sicut diuisiones aquarum, ita cor Regis in manu Dei, quocumque voluerit, vertet illud.* Ergo sicut habet Deus dominium in diuisionibus aquarum, ita in vertendo & mutando cor Regis; nec tamen aliquis sana mente dicere potest, quod in prædictis Scripturæ verbis *sicut* in hoc parificet cor Regis diuisionibus aquarum, ut sicut istæ sine vlla libertate diuino obtemperant dominio, ita & illud, sed in hoc potius parificat, quod sicut aquæ non resistunt diuisioni, quæ manu hortulani fit, ita etiam cor Regis manente potestate, & libertate sua antecedenti ad resistendum, de facto non resistit Deo mouenti quocumque voluerit. Non ergo negari potest Deum ex supremo suæ maiestatis dominio cor diuertere sine læsione libertatis eorum, & quo ad hoc, quod est ex sua efficacia immutare sine eorum resistentia & læsione, & causare liberum in quantum liberum, parificari debet creata voluntas cæteris creaturis.

Iam verò quomodo in eadem Congregatione responsum fuerit pro defensione illius capitali quod ex sententia S. Aug. posuerat Clemens VIII. & Vastida contradicebat, sic in eadem Congregatione refertur: *Veniamus ad illud quod principaliter Pater proposuit negando capitulum quintum continere doctrinam S. Aug. cum ait gratiam non habere efficaciam ex omnipotentia Dei, & ex dominio, quod omnipotens habet in voluntates hominum, sicut & in cætera quæ sub calo sunt.* Quod autem ista sit doctrina S. Aug. constat ex formalibus verbis, sic enim primum testimonium inductum habet; Bonas hominum voluntates ita esse in Dei potestate, ut eas quò voluerit faciat inclinari. Ecce ad omnipotentiam Dei reducit in terminis efficaciam gratiæ conuertentis hominum voluntates. Et in secundo testimonio ita dicitur, *Deum occultissima & potentissima medicina sua potestate perducere hominis voluntatem quò vult: ergo apertis verbis dicit ad omnipotentiam Dei pertinere illam efficaciam.* Et in testimonio tertio loco inducto ita dicitur: *sic enim velle & nolle in volentis aut nolentis est potestate, ut diuinam voluntatem non impediatur, nec superet potestatem.* Et tandem in alio testimonio ita habet: *nisi rectissime crederemus & peruersas, & fidei contrarias voluntates omnipotentem Deum ad credendum posse conuertere.* Igitur manifestum est esse formalem & expressam S. Aug. sententiam, quod gratia habet suam efficaciam ad conuertendum hominum corda ex Dei omnipotentia, cum ad Dei omnipotentiam semper recurrat Augustinus cum de efficaci gratia Dei loquitur. Sed Patres Reuerendi ideò negant Deum sua omnipotentia efficaciter mouere liberum arbitrium, & habere dominium super illud, quia constituunt liberum hominis arbitrium exemptum à dominio Dei, ita quòd Deus possit illud rogare, & suadere, non autem possit illud immutare, inflectere, & transferre, istis enim terminis vtitur S. Aug. quocumque ipse voluerit. Præterea de illa efficacissima gratia (de qua præced. cap.) dictum fuerat, quod ut Paulus tam efficacissima vocatione conuerteretur, gratia Dei erat sola (lib. de gratia & libero arbitrio c. 5.) Ecce efficaciam habet vocatione ex sola gratia, ex Deo ipso, & non illam emendicat à libero arbitrio, nec est efficax dependenter ab illo, ut Patres volunt: ideò enim negant efficaciam sumere ex Dei omnipotentia, & eius dominio quod habet supra liberum arbitrium hominis.

Et infra. Quod præterea dixit Pater, affirmans doctrinam huius capituli esse contra Concil. Trident. sessione 6. can. 4. & quod constituit hominum voluntates moueri ut inanime quoddam, grauius est multo. Absit enim ut ex doctrina, non dico S. Augustini, sed ex doctrina Pontificis summi tradita in isto capite, & ordinata, contradicatur Consilio Trident. Absit quòd ex illa sequatur hominem moueri ut inanime quoddam. Sed unum quod Pater fatetur iam mihi sufficit, quòd videlicet talis prædeterminatio apertè contineatur in doctrina huius capituli tradita tanquam S. Aug. per Pontificem summum.

Sic ibi Magister Fr. Thomas de Lemos respondit, defenditque dictam Pontificis doctrinam in illo scripto à se tradito, non quòd ibi canonem aut definitionem Pontifex exprimeret, sed quòd tanquam Aug. doctrinam ex pluribus eius locis colligeret, & in eo efficaciam diuinam ex dominio & omnipotentia suæ maiestatis super nostras voluntates, sicut & super cæteras creaturas prouenire assereret. Et sic istud est vnum ex præcipuis fundamentis euertens decreta indifferentia, & expectantia à consensu voluntatis nostræ efficaciam suam.

Quòd autem Vastida instabat non negare se dominium

minium Dei super voluntatem nostram (quomodo enim auderet negare?) sed quod non habet tale dominium sicut in cetera omnia, taliter quod homines non possent efficaciam Dei resistere, ut Thomistae dicunt, quod etiam Calvinus dicebat, & eisdem terminis utebatur, & eodem argumento ducto ex dominio Dei, quod habet ad inflectendam & transmutandam voluntatem quocumque vellet, unde sequebatur tolli eius libertatem; quodque etiam S. Aug. in loco cit. ad Simplicianum, solum ponebat efficaciam istam Dei in congruentia vocationis, quemadmodum cuilibet videt congruere, sic vocans, & per aliquas suasionem agens. Ad hæc responsum fuit, quod Thomistae dicunt liberum arbitrium non posse resistere efficaciam Dei consequenter, seu in sensu composito, non anteceder, seu in sensu diuiso. De qua distinctione egimus supra disp. 3. & tomo preced. disp. 20. art. 5. & sequentibus, & infra adhuc agemus. Ad Caluini errorem, dicitur quod Calvinus non errauit præcisè ponendo efficaciam gratiam anteceder, sed inde inferens tollere libertatem, & esse necessitatem antecedentem, cum sit solum necessitas consequentiae & secundum quid: sicut Pelagius non errauit ponendo liberum hominis arbitrium, quod est de fide, sed inde inferendo non indigere gratia. Non ergo errauit Calvinus admittendo efficaciam Dei deriuari ex omnipotentia, & dominio eius in nostram voluntatem, sicut & in reliqua omnia, & probando hoc ex testimoniis Scripturæ, quibus S. Aug. id probauit, sed errauit Calvinus in hoc quod ex tali principio certo intulit erroneè quod illa efficacia orta ex dominio Dei tollebat libertatem, putans quod illa efficacia, & illud dominium erat necessitans voluntatem, nec posset causare ipsum modum libertatis, sed tollere, si determinatum actum causabat; & sic non solum dicebat liberum arbitrium non posse resistere efficaciam Dei potentia consequenti, & in sensu composito, sed etiam potentia antecedenti, & in sensu diuiso, quia existimabat purè agi voluntatem à Deo, sicut equum à sessore motione physica tantum, & non excitatiua.

18 Ad locum Aug. dicitur quod ibi loquebatur de vocatione congrua congruitate causalitatis & efficaciam, id est quam causat, & facit ipsa gratia, non de congruitate solum contemperationis, & indifferentiae, cum expectatione determinationis à voluntate creata, quin potius ibidem vocabat congruam illam vocationem effectricem bonæ voluntatis. Et sic summus Pontifex Clemens VIII. rectè collegit ex isto loco S. Aug. gratiam efficaciam reduci in omnipotentiam Dei secundum sensum S. Aug. De quo loco, & aliis duobus aut tribus, quibus Aug. videtur ad efficaciam illam requirere suasionem & motionem moralem, egimus supra, eaque declarauimus disp. 3. cit.

19 Constat ergo ex dictis diminui valde diuinum dominium, quod in se absolutissimum & independentissimum est à quocumque alio extra se, quia omnia extra se summo iure sibi subduntur, si in liberæ voluntatis determinatione non potest sua omnipotentia & dominio causare per modum primæ causæ id, quod causa creata, siquidem illa determinatio aliquid est in rerum natura, & fit à causa creata, scilicet à libertate nostra. Inconueniens autem est quod aliquid ita sit sub dominio causæ creatæ, quod possit determinationem incipere à se quando voluerit, non habendo nisi indifferentem & indeterminatum concursum à Deo, Deus autem sua omnipotentia, & absolutissimo dominio in creaturam non possit facere ut incipiat illa

determinatio sine læsione libertatis, quod tamen facit virtus creata. Vnde fit argumentum: Dominium diuinum ita est summum & perfectum, quod quidquid potest creata virtus, & dominium, potest & Deus, & multo amplius, sed virtus creata potest incipere determinationem suam oblato indifferenti concursu Dei, & hoc sine læsione suæ libertatis: ergo idem poterit Deus sine læsione eiusdem libertatis cum sit causa, & radix illius. Et non dico quod poterit se solo, & excludendo liberam voluntatem: id enim est impossibile, quod Deus se solo operetur, & dicatur voluntas vitaliter velle; sed dicimus quod Deus incipiat, & imbueat, & voluntas sequatur, & cooperetur, sicut oppositi Auctores dicunt voluntatem incipere determinationem, & Deum sequi simul cooperando. Cur non poterit opposito modo fieri? Aut quæ est in hoc implicatio?

Denique potest ex his aliud inconueniens deduci pro his decretis indifferentibus, quia sunt omnino impossibilia causæ vniuersali operanti omnia, sed solum sunt propria causarum particularium, quarum vna expectat aut supponit aliam, & consequenter potest indifferentem, & indeterminatè offerre ministerium suum, aut concursum, ut alia vratur illo, & determinet de illo. Cæterum causa illa, quæ operatur omnia, nihil supponit, aut expectat de aliis causis, siquidem facit omnia. Ergo repugnat intelligere, quod ista causa offerat concursum indifferentem, & relinquat alteri causæ extra se ut vratur illo, sicut voluerit determinando de illo concursu accipere quam partem voluerit. Pater consequenter quia ille ipse vsus, quo illa causa determinat illam partem, debet etiam causari, & deriuari à Deo, siquidem causat omnia: ergo & hoc. Non potest autem causari à Deo per alium concursum indifferentem, ut illum determinet voluntas, quia de hoc iterum idem inquireretur, quomodo determinetur à voluntate, & sic in infinitum: ergo oportet ad aliquem deuenire, qui ex se indifferens non sit, sed determinatus, non autem ex creato consensu determinetur, & tamen libertatem non tollat. Ergo si causatur ille vsus, & cooperatio causæ liberæ à Deo, & habet ipsum Deum pro principio & radice, causatur per concursum determinatum ex se, & ex natura sua, non determinandum ex ipso consensu: si enim expectat ut determinetur à causa creata, & ex suppositione consensus, & cooperationis eius determinatur: ergo non causat, neque fundat istam cooperationem, & consensum, quia non potest causare illum quousque sit resoluta & determinata indifferentia illius decreti, & concursus diuini: determinatur autem per te ex suppositione consensus, & cooperationis creatæ: ergo non causat talem determinationem consensus, si dicimus quod ut causet, supponit illam; vel fateris quod aliquid oritur à causa creata, scilicet illa determinatio, & cooperatio, quæ non oritur à Deo, nec radicem & principium habet in illo, & tamen aliquid creatum est: ergo aliquid creatum, prout creatum, non est à Deo.

Dices: Causatur à Deo ille influxus, & cooperatio causæ creatæ per concursum Dei simultaneum à quo pender, & hoc sufficit ut sit à prima causa, non autem requiritur quod antecederet sit determinatus influxus Dei, ut sit causa entitatis illius influxus, & cooperationis causæ creatæ. Et hoc ipso quod vterque influxus est simultaneus, determinatur vnus ex alio in sua linea, & genere. Et deinde licet ipsa cooperatio causæ liberæ creatæ in sua entitate dependeat à Deo utpote res creata, tamen non sub omni respectu, & consideratione, ut est à causa

causa creata non est à Deo; sub diuersa enim habitudine est à causa vniuersali, & à causa particulari, à causa creata, & increata, & quatenus est ab vna, non est ab alia.

Sed contrà: Nam concursus simultaneus, & cooperatio Dei cum causæ operatione non potest esse causa à qua dependeat ille alter influxus & cooperatio causæ creatæ, sed à qua pendeat effectus, qui est ab vtraque causa, nam influxus Dei est simul cum influxu illo causæ creatæ, immò & identificatur cum eo: ergo non est prior illo, nec dependet à tali in fluxu in effectum ille influxus simultaneus causæ creatæ: ergo neque est causa illius: nam omnis causa est prior effectui, & ab illa dependet effectus: repugnat ergo quòd cooperatio & determinatio causæ creatæ causetur à Deo per concursum simultaneum, sed si causatur, est per aliquid antecedens; si autem antecedens: ergo non determinatur ab ipsa cooperatione & consensu causæ creatæ, quia ipsa determinatio & consensus est posterior, ut pote effectus eius: ergo ante ipsam debet esse soluta indifferentia & indeterminatio decreti, & influxus diuini, quia non potest causare nisi sublata sit indifferentia, & causat antecedenter, quia aliàs causa non esset, si solum simul esset: ergo est determinata antecedenter. Nec possunt ad inuicem determinari in diuerso genere causæ, quia quod est creatum ut creatum, nullum genus causæ exercet respectu Creatoris, etiam materialis, quia etiam materia à Deo est, sed solum habet rationem causati, & effectus: ergo non determinat ipsam indifferentiam diuini concursus in alio genere causæ, cum in omni ratione sit participata, & deriuata à Deo, non causans aliquid circa ipsum, ut Deus causet.

22. Ad id verò, quod dicitur sub alia habitudine esse effectum causæ creatæ, & increatæ, fatemur: in hoc enim difficultas non est: nam etiā effectus necessarij & naturales & determinatio causarum naturalium sub alio respectu sunt à Deo, & à suis causis particularibus, & sub eo respectu quo sunt à causis creatis, non sunt à Deo, & tamen Deus efficaciter efficacia absoluta determinat illas: ergo eodem modo poterit se habere respectu causæ liberæ. Nec nos intendimus quod sub ea habitudine & respectu, qui se habet ad causam particularem se habeat ad diuinam, sed diuerso; tamen dicimus quòd respectus isti se habent subordinatè & vnus ex alio oritur, & in eo radicatur, ab eoque causatur: nam respectus ad causam primam est prior, ut pote radix, & causa creaturæ, & sub eo est respectus ad causam particularem & creatam, & prout est ab ista aliquid creatum, est hoc ipsum quod est oriri & esse ab ista: ergo hoc ipsum quod est esse à causa creata, & causam creatam determinari ad influxum in istum effectum debet esse à causa prima (licet sub alio respectu) ut pote cum habeat illam pro radice, & principio, multo magis quàm operatio habet pro radice formam à qua est, quia forma intrinseca ipsi operanti, à qua egreditur actio, non est aliud quàm participatio quædam formæ increatæ, à qua exculpitur omnis forma. Itaque diuersos esse respectus, & formalitates in effectui ad causam particularem creatam, & ad increatam vniuersalem fatemur, & sub vno respectu non explicari alium etiam dicimus, sed tamen vnum respectum esse priorem alio, & deriuari ex alio etiam negari non potest, cum respectus ad causam creatam sit ad causam participatam, & subordinatam primæ, & consequenter ex participatione illius descendere, & causari

debet. Et sic ille respectus ad causam primam debet se habere non ut ad causam simul solum cooperantem, sed causantem determinationem causæ inferioris, & consequenter ut antecedenter, & prius se habentem ad causam secundam.

Ex quibus colligendum est vnum valde notabile, quòd in Deo non potest assignari respectu causæ creatæ concursus, seu influxus purè concomitans, & simultaneus, sed debet semper habere rationem aliquam præmij respectu ipsius causæ, quia pertinet ad influentiam causæ primæ, quia vniuersalissima est, ita concurrere ad effectum causæ creatæ simul cum ipsa, quòd etiam causet, & principiet in ipsa causa suam determinationem, & cooperationem, quia etiam hoc pertinet ad aliquem effectum creatum, qui in Deum reducibilis est, & ab ipso originabilis. Et in summa, sicut non potest Deus concurrere cum causa creata, ita simul & concomitanter, quòd præscindat à subordinatione, sed necessariò debet eam respicere ut subordinatam sibi, & participatam à se in ratione causæ, ita influentia Dei cum causa creata non potest ita esse simultanea quòd præscindat à præuia, quia etiam dum cooperatur illi, non debet supponere causæ alterius cooperationem, sed causare & facere, quia facit ut faciamus, etiam quando cooperatur nobiscum. Vnde dicit Aug. *lib. de gratia v. libero arbitrio c. 17.* Quòd ille qui preparat voluntatem cooperando perficit, quòd operando incipit. Ergo cooperatio nostra non est purè simultanea respectu cooperationis diuinæ, sed ab illa causatur & deriuatur. Pater consequentia, quia Deus cooperando perficit voluntatem, ut inquit August. ergo cooperatio eius non ita purè influit in effectum simul cum nostra cooperatione, quòd non etiam influat in voluntatem, quia cooperando perficit, id quòd incœperat: incœperat autem in voluntate operando, ut voluntas consentiret; ergo Dei concursus ipsam voluntatem perficit ut cooperetur, & sic est radix & causa ipsius cooperationis. De quo etiam dixerat S. August. *ibidem cap. 16.* Quòd ille facit ut faciamus præbendo efficacissimas vires voluntati. Cum dicit facit ut faciamus, est idem quòd facit ut cooperemur: nos enim non aliter facimus nisi cooperando ipsi Deo, soli enim non facimus, ergo facit ut faciamus: ergo facit ut cooperemur, ergo est causa nostræ cooperationis, & antecedit ipsam, non expectat; hoc autem facit præbendo efficacissimas vires voluntati: ergo vires in quantum efficaces præbentur à Deo: ergo efficacia non expectatur, sed præbetur, & causatur à Deo: non ergo indifferenti utitur decreto, sed determinato & efficaci, quia efficaciam præbet & facit ut faciamus determinatè. Et D. Th. secutus doctrinam præfatam Aug. 1. 2. q. 111. a. 2. docet auxiliū quo Deus nos mouet ad bene volendum, & bene agendum diuidi in operans & cooperans; sed diuinum auxilium nos mouens non est purè concomitans, & influens in effectum, sed antecedens & prius se habens nostro concursu, quia mouet nos ad volendum & agendum, nos autem agimus & volumus cooperando Deo, & simul cum ipso influendo, quia soli, & sine Deo nihil facimus aut volumus: ergo etiam cooperans auxilium præuenit nos, & mouet ad cooperandum Deo, & sic ipsa nostra cooperatio ex Deo causatur. Non ergo expectat Deus ipsam cooperationem, ut voluntas, scilicet se determinet, & tunc determinatè etiam Deus influat, sed prius Deus mouet, quàm nos cooperemur, & determinemus nos: ergo si hoc facit prius, & non expectando

Quando nostram determinationem, quando id facit iam determinatus influxus est, & determinatum decretum: ergo antecedenter ad determinationem nostram determinatum est, & sic non habet indifferentem concursum, & decretum, sed ex se determinatum, & efficax ante determinationem voluntatis, nec tollit libertatem.

ARTICVLVS IV.

Efficacia decretorum, autoritate stabilitur.

Vidimus inconuenientia ponendi decreta indifferentia, & in sui determinatione, & efficacia operandi dependentia à libertate creata. Nunc videamus quomodo ipsa decreta ex se, & independentem à quocumque libertatis nostræ consensu efficacia sint, nec possint ex suppositione alicuius causæ efficaciam sortiri, cum omne illud à quo dependere illa efficacia potest, non supponatur, sed causetur à voluntate Dei; quod si causatur, non ab ipso consensu indifferentia decretorum determinatur, cum causari non possit consensus, nisi à decreto determinato, non indifferenti. Hoc ergo nunc probandum nobis est, & firmandum tum autoritate, tum ratione. Autoritas deducetur imprimis ex Authoribus qui hanc sententiam sequuntur, non solum in Schola D. Thom. sed extra eam. Deinde ex autoritate Patrum, præsertim Augustini. idem stabilitur.

D. Thoma mens.

Primò ergo dari in Deo decreta ex natura sua efficacia & determinata, non ex consensu subsequuto efficaciæ denominationem sumentia, est sententia, & mens indubitata D. Thom. Cognoscitur autem hæc eius mens ex aliquibus principiis eius manifestissimis. Etenim apud D. Thom. certum principium est, quod tota contingentia, & libertas in operando voluntatis creatæ non reducitur in ipsam causam proximam tantum, sed in ipsam causam primam tanquam in radicem & principium unde oritur ille modus contingentia, & libertatis in actu. Cum quo principio non stat quod decretum & voluntas diuina non habeat ex sua propria vi, & natura efficaciam, sed expectet illam à consensu futuro creato, quia habet in se vim causandi libertatem & contingentiam actus multo magis quam ipsa causa proxima creata: ergo sicut voluntas quæ causat suum actum liberum, non accipit efficaciam ab actu, sed ei communicat totum esse & libertatem quam habet, ita similiter causa prima, quia eiusdem libertatis, & contingentia causa est: Nec potest consensus iste denominare efficacem voluntatem diuinam, nisi in re liber sit & contingens. Si ergo voluntas diuina est causa libertatis, & contingentia in illo actu: ergo causat illam, non expectat illam, causare autem non potest, nisi determinatione decreti, & concursus posita: ergo ex se habet illam, si non emendicat ab alio. Et præsertim, quia ideo nunc oppositi Authores decretum diuinum non esse ex natura sua efficacem, quia tolleretur contingentiam & libertatem voluntatis creatæ; si ergo causat illam, non minus, sed multò melius quam ipsa voluntas creata, quæ est causa proxima, eius efficacia non nocet libertati, siquidem causat illam, nec expectare potest determinationem liberam vo-

Ioan. à S. Thoma in 1. part. D. Thomæ.

luntatis, ut dicatur ipsa diuina voluntas determinatè & efficaciter agere, quia illa voluntatis nostræ determinatio causari debet à voluntate diuina, & sic ex ipsa habere debet determinationem & efficaciam, non hæc ab illa supponere; si autem non supponit ab illa: ergo ex se habet.

Hoc principium est manifestissimum in Diuo Thoma, nec Vasquez illud negat, sed planè sic sentire D. Thomam docet hac 1. p. disp. 99. cap. 7. videlicet quod libertas & contingentia actus liberi reducatur in causam primam: id enim apertè docet S. Thom. hic quest. 19. artic. 8. ubi in fine corp. inquit; Non igitur propterea effectus voliti à Deo eueniunt contingenter, quia causa proxima sunt contingentes, sed propterea quia Deus voluit eos contingenter euenire, contingentes causas ad eos preparauit. Et quod hoc reducat ad efficaciam diuinæ voluntatis, statim ponderabimus. Clariùs idem docet infra quest. 22. artic. 4. ubi reducit contingentiam rerum in Deum, qui effectibus contingentibus præparauit causas contingentes, & necessarias necessarias. Et addit solut. ad 3. Considerandum est quod necessarium & contingens propriè consequuntur ens in quantum huiusmodi. Unde modus contingentia, & necessitatis cadit sub prouisione Dei, qui est vniuersalis prouisor totius entis, non autem sub prouisione aliquorum particularium prouisorum. Ecce quomodo D. Thom. ipsum modum contingentia non solum sumit per respectum ad Deum, sed ad eius immediatam prouisionem pertinere docet. Hoc idem latè docet S. Doctor super 1. Perth. lect. 14. ubi ostendit quomodo ex Dei scientia infallibili, & voluntate efficaci non tollitur contingentia in rebus. Et postquam id ostendit de scientia, quia videt omnia in seipsis ut præsentia in æternitate, non autem in suis causis, subdit de voluntate diuina quod *Voluntas diuina est intelligenda ut extra ordinem entium existens, velut causa quadam profundens totum ens, & omnes eius differentias.* Quam pulchra consideratio ad habendum diuinam magnitudinem ubique præsentem! Sunt autem differentia entis possibile, & necessarium, & ideo ex ipsa voluntate diuina originantur necessitas, & contingentia in rebus, & distinctio vtriusque secundum rationem proximarum causarum: ad effectus enim quos voluit esse contingentes, ordinauit causas contingenter agentes, idest potentes deficere. Et secundum harum conditionem causarum effectus dicuntur contingentes, quamuis omnes dependant à voluntate diuina, ut à prima causa, quæ transcendit ordinem necessitatis & contingentia. Hoc autem non potest dici de voluntate humana, nec de aliqua alia causa, quia omnis alia causa cadit iam sub ordine necessitatis vel contingentia, & ideo oportet quod vel ipsa causa possit deficere, vel effectus eius non sit contingens, sed necessarius. Denique hoc ipsum pulcherrimè docet S. Thom. 6. met. lect. 3. in fine, his verbis: *Ens in quantum ens habet causam ipsum Deum; unde sicut diuina prouidentia subditur ipsum ens, ita etiam omnia accidentia entis in quantum est ens, inter quæ sunt necessarium & contingens.* Ad diuinam igitur prouidentiam pertinet non solum quod faciat hoc ens, sed etiam quod det ei contingentiam, vel necessitatem. Et infra. Sic ergo patet, quod cum de diuina prouidentia loquimur, non est dicendum solum, hoc est prouisum à Deo ut sit, sed hoc est prouisum à Deo ut contingenter sit, vel ut necessario sit. Unde non sequitur secundum rationem Arist. hic inductam, quod ex quo diuina prouidentia est posita quod omnes effectus sint necessarij, sed necessarium est effectus esse contingenter vel de necessitate.

Q

Quod

Quod quidem est singulare in hac causa, scilicet in diuina providentia. Reliquae enim causae non constituunt legem necessitatis, vel contingentiae, sed Constituta à causa superiori utuntur. Unde causalitate cuiuslibet alterius causae subditur solum, quod eius effectus sit. Quod verò sit necessarium vel contingenter, dependet ex causa altiori, quae est causa entis, in quantum est ens, à qua ordo necessitatis, & contingentiae in rebus provenit.

2 His testimoniis liquidè ostenditur mens D. Thom. in eo quod expressè affirmat, rationem contingentiae, & libertatis non solum derivari à causa prima, & à voluntate Dei, in eamque reduci, sed ad nullam aliam causam pertinere legem necessitatis vel contingentiae imponere, nisi ad causam primam. Cui principio directè opponitur Valquez loco supra cit. ex disp. 99. in hac 1. p. manifestè enim vidit quod si hoc principium admittitur, necessariò debet esse influxus Dei in nostram libertatem prior quàm influxus in actum, & non simultaneus solum, siquidem causare debet ipsam contingentiam, & libertatem. Quod si eam causat, non ab ipsa determinatione libera nostri consensus expectat determinationem, & efficaciam suam, ne laedat libertatem, sed ex se, & in se habet principium eam componendi & servandi, quia habet principium eam causandi, eo quod oritur ab ipsa ut à radice ordo contingentiae, vel necessitatis. Si autem causat, non tollit.

3 Secundum principium in doctrina D. Thom. manifestum est, quod diuina voluntas respectu nostrae voluntatis non solum se habet ut principium dans ipsam virtutem, & potestatem operandi liberè, sed etiam ipsum velle, seu actum voluntatis causans, & ad illud mouens. Cum quo principio non stat quod decretum, & voluntas diuina respectu nostri consensus, & nostrae cooperationis se habeat indifferenter, & expectet eius determinationem, ut efficax sit; quia si causat ipsam determinationem, & velle nostrae libertatis, potius ergo voluntas nostra expectat Dei causalitatem, & determinationem, & efficaciam quàm è contra, cum ex ipsa non possit in Deum efficaciae denominatio derivari, nisi prius id à Deo causetur. Unde Molina videns hanc D. Thom. doctrinam sibi vehementer aduersari, eam sibi esse difficilem affirmat, & tandem eam non admittit, ut patet in Concordia disp. 26. in principio. Vbi refert doctrinam D. Thom. 1. p. q. 105. art. 5. docentis quod Deus dupliciter operatur cum causis secundis, primò quidem tribuendo eis virtutes ad operandum, & conservando illas in esse, quod etiam Durandus sentit. Secundò, quia eas ad operandum mouet, & applicat, sicut artifex applicat securim ad scindendum, subdit Molina: Duo autem sunt, quae mihi difficultatem pariant circa doctrinam hanc S. Thom. Primum est, quod non videam quidnam sit motus ille, & applicatio in causis secundis, quae Deus illas ad agendum moueat, & applicet, quin potius existimem ignem sine ulla sui mutatione calorem in aquam sibi adnotam inducere. Et infra: Quare ingenuè fateor mihi valde difficilem esse ad intelligendum motionem, & applicationem hanc quam D. Thom. in causis secundis exigit. Sentit ergo Molina doctrinam hanc D. Thom. non posse cum sua adaequari, & sic existimavit ipsum influxum Dei, & causae secundae pari decursu in effectum prodire, non tamen causam ipsam secundam prius tangi à Deo, ut ex ipso causetur, & deriuetur causae secundae cooperatio, & partialis influxus.

4 Ceterum D. Thom. constantissimè semper hoc

principium docuit, quod videlicet Deus praeter virtutem, seu formas operatiuas, quas tribuit causis secundis, etiam agit in ipsas, & mouet & applicat ad operandum; quod utique stare non potest, si Deus non causat, & deriuat ex se tanquam supremum, & vniuersalissimum agens ipsam determinationem, & cooperationem, & influxum particularem, & proprium causae secundae: nec enim causa secunda alium influxum habet, quàm peculiarem, & proprium, & simul cum Deo concurrentem ad effectum; & vnico verbo, illud quid sit quod causa secunda ut creata, & particularis influit, oportet quod ex Deo etiam sit ut ex causa perfundente, & radicante omnem causam secundam, sicut vitis palmites, non solum se habens ut concausa, sed sicut est effectus ex ipsa causa secunda effectiue, & entitatiue, ita ex causa prima, ut ex priori radice, & fonte omnium causarum derivari debet: & consequenter diuina voluntas prius ex se efficax est in determinando & causando ipsam determinationem, & cooperationem causae secundae, quem ipsamet causa secunda, nec expectare debet efficaciam, & determinationem ab ipsa cooperatione, & determinatione causae secundae, v.g. à consensu nostro, sed illi talem determinationem, & efficaciam dare.

Sic explicatum principium hoc habetur expressè in D. Thom. In primis loco illo cit. à Mol. scil. 1. p. quest. 105. art. 1. ad 3. sic inquit, Dicendum quod hoc ipsum quod causa secunda determinatur ad determinatos effectus, est illis à Deo. Unde Deus quia alias causas ordinat ad determinatos effectus, potest etiam determinatos effectus producere per se ipsum. Hic loquitur S. Doctor generaliter de omnibus causis, quarum determinatio, & efficacia cooperatiua ex Deo est. Subdit de voluntate creata in art. 4. ad 2. sic: Quod moueri voluntariè, est moueri ex se, id est à principio intrinseco. Sed illud principium intrinsecum potest esse ab alio principio extrinseco, & sic moueri ex se non repugnat ei quod mouetur ab alio. Et parificans motionem Dei in causas voluntarias cum motione in causas naturales, inquit 1. p. q. 83. art. 1. ad 3. quod Deus est prima causa mouens & naturales causas & voluntarias. Et sicut naturalibus causis, mouendo eas, non aufert quin actus eorum sint naturales, ita mouendo causas voluntarias non aufert quin actiones earum sint voluntariae, sed potius hoc in eis facit; operatur enim in vnoquoque secundum eius proprietatem. Ecce quomodo apertissimè ponit S. Thom. Deum per modum causae agentis & mouentis operari, & facere ut actiones voluntatis sint voluntariae & liberae (hoc enim, inquit, in eis facit) sicut facit ut naturales causae habeant actiones naturales, sine hoc quod praediceretur earum libertati per hoc quod moueatur à principio extrinseco, quia illud principium extrinsecum est causa, & principium illius intrinseci principij voluntarij. Nec loquitur de causalitate, & motione solum per modum obiecti attrahentis, quae est motio moralis, sed de causalitate intima intra voluntatem: id enim expressè distinguit ipse S. Doctor cit. loco q. 105. a. 4. ubi ait, quod voluntas mouetur ab obiecto quod est bonum, & ab eo qui creat virtutem volendi. Et postquam ostendit quod potest moueri, sicut ab obiecto, à quocumque bono, sed non sufficietè & plenè, nisi à summo bono, subdit de alio modo mouendi ex parte virtutis, & non ex obiecto; Quod virtus volendi à solo Deo causatur, velle autem nihil aliud est quàm inclinatio in obiectum voluntatis, quod est bonum vniuersale. Inclinare autem in bonum vniuersale est proprium primi mouentis cui proportionatur ultimus finis. Unde

Vnde utraque modo proprium est Dei mouere voluntatem, sed maxime secundo modo eam interius inclinando. Ergo secundum D. Thom. modus quo operatur, & facit Deus intra inclinari voluntatem ad actionem voluntariam, & liberam non solum est per modum obiecti attrahentis & allicientis, quæ est motio moralis, sed distincta ab ista: si autem non est moralis, & obiectiua, est ergo effectiua & interior.

Præterea declaratur hoc principium ex aliis locis D. Thom. in quibus agit tum de causis omnibus secundis, tum specialiter de voluntate, & semper docet Deum virtute sua causare, & applicare, & determinare ipsam cooperationem causæ creatæ, & modum eius seu actionem, non solum autem præbere virtutem, & formam operatiuam causæ secundæ, sed ad ipsam operationem mouere. Quod luculentè tractat D. Thom. *quest. 3. de potentia art. 7. tum in corp. art. tum in solutionibus argumentorum*. Non possumus totum locum hîc inferere, sed omnino legendus est ab his qui plenè mentem S. Doctoris voluerint intelligere. Nos verba sequentia tantum ponderamus. *Quanto* (inquit D. Thom.) *causa aliqua est altior, tanto est communior & efficacior* (nota bene vnde sumit D. Thom. efficaciam in Deo, scilicet ex vniuersalitate operandi). *& quanto est efficacior, tanto profundius ingreditur in effectum, & de remotiori potentia ipsum reducit in actum*. In qualibet autem re naturali, inuenimus quod est ens, & quod est res naturalis, & quod est talis, vel talis natura. Quorum primum est commune omnibus entibus, secundum omnibus rebus naturalibus, tertium in una specie; & quartum si addamus accidentia, est proprium huic individuo. Hoc ergo individuum agendo non potest constituere aliud in simili specie, nisi prout est instrumentum illius causæ, quæ respicit totam speciem, & ulterius totum esse naturæ inferioris (sumit D. Thom. ly instrumentum non in rigore, pro eo quod operatur vt purè motum, & ministrans, sed laxiori significatione, pro eo quod operatur ex participatione alterius, habens tamen principium sui motus, & tale instrumentum non excludit libertatem, vt apertissimè se explicat *questione 24. de verit. artic. 1. ad 3. vbi hanc distinctionem de instrumentis ponit*.) Et propter hoc nihil agit ad speciem in istis inferioribus, nisi per virtutem corporis celestis, nec aliquid agit ad esse, nisi per virtutem Dei. Et infra: Sic ergo Deus est causa actionis cuiuslibet, in quantum dat virtutem agendi, & in quantum conseruat eam, & in quantum applicat actioni, & in quantum eius virtute omnis alia virtus agit. Et cum coniunxerimus his, quod Deus sit sua virtus, & quod sit intra rem quamlibet, non sicut pars essentie, sed sicut tenens rem in esse, sequetur quod ipse in quolibet operante immediate operetur, non exclusa operatione voluntatis, & naturæ. Sic D. Thom. Qui ex hoc colligit operationem Dei, & naturæ non se habere simul, sed secundum ordinem prioris & posterioris, vt explicat *solutione ad 4. quod tam Deus, inquit, quam natura immediate operantur, licet ordinentur secundum prius & posterius, vt ex dictis patet*. Et tandem *solut. ad 7. distinguit virtutem quam res naturalis habet in sua institutione collatam, quod hæc habet esse rationis, & firmam in natura* (id est permanentem se habere) *sed id quod à Deo fit in re naturali, quo actualiter agit, est vt intentio sola habens esse quoddam incompletum per modum quo colores sunt in aëre, & virtus artis in instrumento artificis*.

Idem à S. Thoma in 1. part. D. Thoma.

Ex qua doctrina constat generaliter pro omni causa inferiori, etiam voluntate creata affirmare D. Thom. quod Deus est causa, & principium eius operationis, seu cooperationis quam habet talis causa inferior, quatenus non solum dat ei virtutem operandi, eamque conseruat, sed etiam quatenus mouet ad operandum, illique communicat virtutem vt operetur non solum secundum gradum suum proprium, & indiuiduum sed secundum communem. Et quod hoc quod facit in istis causis vt operentur actu, est aliquid per modum transeuntis, & non est ipsa virtus permanens à principio collata. Quomodo cum hac doctrina potest coherere quod diuina voluntas ex se efficax non sit, sed efficaciam desumat per denominationem extrinsecam à consensu nostræ voluntatis futuro? siquidem ad hoc vt voluntas habeat ipsum consensum dependet à motione, & applicatione voluntatis diuinæ, & ab eius causalitate qua applicat, & mouet causas secundas ad actiones suas, etiam vt ab ipsis oriuntur: sed oriuntur à causis suis illæ actiones vt determinatæ, & in singulari ergo etiam à causa prima sic determinatè oriuntur & causantur, siquidem ipsa causa prima est principium, & causa illius determinationis, & consensus: non ergo ipsum expectat, vt determinatè influat, siquidem illam determinationem causat.

Quod autem generaliter docet D. Thom. in hoc loco de omnibus causis secundis, specialiter de voluntate creata, docet in aliis locis: nam 1. 2. q. 10. art. 4. in *solutione ad 1 & 3. soluit fundamenta opposita*, quibus nituntur ad dicendum quod Deus efficaciter non determinat, nec ex natura sua decreta diuina causat determinationem, & consensum voluntatis nostræ, sed ab eo accipit denominationem efficacis.

Primum argumentum est, quia omne agens cui non resisti non potest, de necessitate mouet: sed Deo, cum sit infinitæ virtutis, resisti non potest, vnde dicitur Rom. 9. *Voluntati eius quis resistet?* ergo Deus ex necessitate mouet voluntatem. Cui argumento sic respondet S. Thom. *Ad primum dicendum quod voluntas diuina non solum se extendit vt aliquid fiat per rem quam mouet, sed vt etiam eo modo fiat quo congruit naturæ ipsius. Et ideo magis repugnaret diuinæ motioni, si voluntas ex necessitate moueretur, quod sua natura non competit, quam si moueretur libere prout competit sua natura*. Vbi pondero, quod in argumento loquitur D. Thom. de motione efficaci ex se, & entitatiuè, non solum moraliter mouenti, hæc enim cum innitatur propositioni obiecti, & persuasioni, utique non est infinitæ virtutis in mouendo, nec talis quod ei resisti non possit, vt de se patet: ergo in *solutione* de eadem debet loqui, alias non solueret argumentum, sed deberet negare quod Deus ageret vt agens infinitæ virtutis, si sola morali motione, & indifferenti decreto operaretur, & expectando determinationem nostri consensus. Dicit autem quod illa efficacia licet sit infinita, ex hoc tamen habet non necessitate, quia comprehendit, & causat non solum substantiam actus, sed etiam modum operandi congruentem causæ secundæ, qui est modus libertatis: Ergo sententiæ D. Thom. è diametro contradicatur, ponendo voluntatem diuinam ex natura sua non efficacem, sed denominatione sumpta à consensu nostro, cum potius ex summa efficacia super ipsum consensum, seu actum voluntatis, & super modum libertatis eius dicat D. Thom. non necessitare voluntatem, quia causat libertatem. Videatur etiam

Q 2

argumentum

argumentum tertium *ibidem*, & solutio eius, ibi enim loquitur de motione efficaci ex se, cum dicit, quia alias operatio Dei esset inefficax, & hoc infert tanquam inconueniens, quod certè in sententia opposita inconueniens non est; ipsi enim passim concedunt quòd eadem operatio Dei secundum se, & in vi operationis, modò est efficax, si sequatur consensus, modò inefficax, si non sequatur; ergo non est inconueniens apud ipsos si operatio Dei sit inefficax; est autem inconueniens in sententia D. Thom. Et soluendo illud, dicit non sequi tale inconueniens, quia si Deus mouet voluntatem, dicit quòd est impossibile eam non moueri, sed non est impossibile simpliciter; est enim impossibile consequenter, & in sensu composito, non in diuiso, de quo *infra*.

8 Denique videri potest S. Doctor 1.2.q.111.a.2. vbi docet, auxilium quo Deus nos mouet ad bene agendum, & bene volendum, diuidi in operans, & cooperans. Operans quidem respectu primi actus voluntatis, in quo voluntas se habet vt mota, præcipue cum incipit bonum velle. Cooperans autem respectu actus ad quem voluntas se mouet, & sibi imperat; & ad hunc actum Deus nos adiuvat, interius confirmando voluntatem, vt ad actum perueniat, & exterius facultatem operandi præbendo. Sentit ergo quòd etiam respectu ipsius cooperationis voluntatis diuina voluntas se habet vt mouens, & causans talem cooperationem. Non ergo ipsam expectat, vt ab ea denominetur efficax. Clariùs in q. 22. de verit. art. 3. Sicut omnis actio, inquit, naturalis est à Deo, ita omnis actio voluntatis in quantum est actio, non solum est à voluntate vt immediatè agente, hæc est propria cooperatio voluntatis, sed à Deo vt à primo agente, qui vehementius imprimit. Vnde sicut voluntas potest imprimare actum suum in aliud, vt ex dictis patet, ita & multo amplius Deus. Hoc est ergo quod vellemus ab omnibus intelligi & capi, actionem voluntatis ita à voluntate oriri, quòd ab alio priori principio & radice, quæ est Deus, prius incipit, & continuatio cum exteriori principio, quod est Deus, non est discontinuatio, sed perfectio libertatis eius. Et vltimò S. Th. 3. cont. Gent. c. 89. impugnans sententiam eorum qui dicebant Deum causare in nobis virtutem volendi, non autem facere nos velle, quia hoc putabant lædere libertatem, sic ait: Quibus quidem autoritatibus sacra Scriptura resistitur enidenter. Dicitur enim Isaia 46. Omnia opera nostra operatus es in nobis Domine. Vnde non solum virtutem volendi à Deo habemus, sed etiam operationem. Præterea hoc ipsum quod Salomon dicit: quocumque voluerit vertet illud, ostendit diuinam causalitatem non solum ad potentiam voluntatis extendi, sed etiam ad actum ipsius. Item Deus non solum dat rebus virtutem, sed etiam nulla res potest propria virtute agere, nisi agat in virtute ipsius, vt supra ostensum est; ergo homo non potest virtute voluntatis sibi data uti, nisi in quantum agit in virtute Dei: illud autem in cuius virtute agens agit, est causa non solum virtutis, sed etiam actus: quod in artifice apparet, in cuius virtute agit instrumentum, etiam quod ab hoc artifice propriam formam non accipit, sed solum ab ipso applicatur ad actum. Deus ergo est causa in nobis, non solum voluntatis, sed etiam volendi. Non potuit feliciter & clariùs explicare D. Th. quomodo diuina voluntas non indifferentiam habeat in suis decretis expectando à nostro consensu determinationem, sed quòd causet ipsum motum voluntatis nostræ: & sit causa volendi, atque adeò ipsius consensus, qui volitio nostra est. Quòd si causat, & non supponit, nec expectat: ex se ergo & antecedenter ad determinationem consen-

sus determinatè efficax est, aliàs non causeret si antecedenter & determinatè non se haberet, sed indifferenter, & simul.

9 Vltimò est manifestissimum principium in D. Thom. quòd voluntas diuina ex eo quòd efficacissima sit, conseruat libertatem, & non necessitat voluntatem, quia non solum est causa actus, sed etiam libertatis eius, & non solum facit vt res fiat, sed vt tali modo fiat, & ex supremo dominio quod habet in voluntatem nostram, liberum actum causar in ea, etiam in ratione liberi. Cum quo principio stare non potest quòd voluntas diuina non sit ex natura sua, & antecedenter ad nostrum consensum efficax. sed ex ipso consensu provt de facto determinatur, & accidit, efficax denominetur. Nam si efficacia diuine voluntatis tanta est, quòd causat actum, & modum actus, scilicet libertatem, & ideò non præiudicat illi, nec necessitat, quia causat: ergo istam efficaciam & determinationem non sumit ex determinatione consensus, & ex suppositione ipsius, sed antecedenter ad eam, aliàs non causeret illum consensum, & libertatem eius. Hoc autem principium apud D. Tho. haberi manifestissimum est ex pluribus locis. Nam in ista q. 19. a. 8. in corp inquit, quòd cum voluntas diuina sit efficacissima, non solum sequitur quòd fiant ea quæ Deus vult fieri, sed quòd eo modo fiant, quo Deus vult fieri. Vult autem Deus quedam fieri necessariò, quedam contingenter, vt sit ordo in rebus ad complementum vniuersi. Et ideò quibusdam effectibus aptauit causas necessarias, quæ non possunt deficere, quibusdam contingentes, &c. Et solut. ad 2. inquit, quòd ex hoc ipso quòd voluntati diuine nihil resistit, sequitur quòd non solum fiant ea quæ Deus vult fieri, sed quòd fiant contingenter vel necessariò, quia sic vult fieri. Item in 1. ad Anibald. dist. 47. q. unica. art. 4. Voluntas, inquit, Dei non solum res in esse producantur, sed etiam rebus producendis modum quo producantur prædeterminauit (ecce manifesta iugulatio decreti indifferentis, & expectantis determinationem consensus nostri, cum apertè dicatur, voluntate diuina modum producendi prædeterminari) vnde cum voluntas Dei efficaciter impleatur, oportet quòd res fiant, & eo modo fiant, quo voluntas diuina disposuit. Disposuit autem Deus ad completionem vniuersi, vt quedam fierent necessariò, & his præparauit causas necessarias, quedam verò vt fierent contingenter, & his præparauit causas contingentes. Eadem ratione vtitur in q. 23. de verit. art. 5. Voluntas, inquit, diuina est agens fortissimum. Vnde oportet eius effectum ei omnibus modis assimilari, vt non solum fiat id quod Deus vult fieri, quod est quasi assimilari secundum speciem, sed vt fiat eo modo, quo Deus vult illud fieri, vt necessariò, vel contingenter, citò, vel tardè, &c. Et statim subiungit: Et sic non dicimus, quòd aliqui diuinorum effectuum sint contingentes solum propter contingentiam causarum secundarum, sed magis propter dispositionem diuine voluntatis, quæ talem ordinem rebus prouidet. Eadem ratione vtitur S. Thom. 1. contra Gent. cap. 85. vbi ostendit ex efficacia Dei, & voluntatis eius, dimanare contingentiam, & libertatem actuum nostrorum.

10 Denique, quòd ipsum dominium, & libertas nostra ad se determinandum non excludat, sed petat necessariò quòd diuina determinatio, & efficacia in illam influat, eamque causet, docet apertissimè S. Tho. multis in locis. Videri potest 1. contra Gentil. c. 68. in fine, vbi inquit: Dominium quod habet voluntas supra suos actus, per quod in eius potestate est velle, vel non velle, excludit determinationem virtutis ad vnum, & violentiam causæ exterioris agentis, non autem excludit influentiam superioris causæ à qua

à qua est ei esse, & operari, & sic remanet causalitas in causa prima, quæ est Deus respectu motuum voluntatis. Constat autem quod dominium, & libertas nostræ voluntatis est in illam cooperationem, quam simul cum Deo dicunt oppositi Authores influere in effectum: hic enim est motus voluntatis. Si ergo in hoc ipsum habet Deus causalitatem, & influentiam, utique ex sua natura, & non ex suppositione talis motus & cooperationis, & determinationis nostræ efficaciam habet, quia ante illam habet: influit enim in illam. Cui consonat quod docet 3. *contra gent. capit. 88.* ubi ostendit Deum nullam causare violentiam in voluntate, quia licet sit principium extrinsecum, causat tamen ipsum intrinsecum, quod est potentia voluntatis; & ita influendo in illam, non lædit, sed perficit voluntatem. Et idem habet q. 22. *de verit. artic. 9.* ostendens Deum non solum obiectivum, aut proponendo obiectum, sed efficienter intra voluntatem operari, sine vlla violentia in ipsam. Et q. 6. *de malo art. unico ad 3.* id reducit ad efficaciam immutabilem, quam habet ex se voluntas divina. Deus, inquit, *mouet voluntatem immutabiliter propter efficaciam virtutis mouentis, quæ deficere non potest: sed propter naturam voluntatis motæ, quæ indifferenter se habet ad diuersa, non inducitur necessitas, sed manet libertas; sicut etiam in omnibus providentia diuina infallibiliter operatur, & tamen à causis contingentibus proueniunt effectus contingenter in quantum Deus mouet omnia proportionabiliter unumquodque secundum modum suum.* Ecce hic admittit D. Thom. efficaciam ex parte Dei mouentis, eamque infallibilem secundum quam mouet unumquodque proportionabiliter secundum modum suum. Non ergo ex suppositione nostri consensus, sed ex sua efficacia, ut tenet se ex parte mouentis, habet operari infallibiliter. Sed & ipsam causam liberam non se determinare, nisi determinatio ipsa ut contingens, causetur à Deo aperte docet in hac q. 19. *art. 3. ad 5.* quod esse non posset, si voluntas indifferentem concursus offert, & expectat à nostra voluntate determinationem.

II Sunt autem aliqui qui putant D. Th. frequenter quidem docere præmotionem voluntatis, sed nusquam determinationem, seu prædeterminationem à Deo, & ab eius decreto, quia ad hanc putant voluntatem à nullo extrinseco agente determinari, sed à consilio suo, ut docet S. Doctor q. 3. *de malo, artic. 3. ad 5.* aliàs si à solo Deo id fieret, non se applicaret voluntas, aut si applicatur ex prædefinitione, & voluntate Dei, ipsa erit immediatum applicans, Deus autem remotum, licet postea in operatione uterque concurrat. Fastidiosi stomachi scrupulus iste est, sic distinguunt inter motionem & determinationem: Si enim ad hoc ponit D. Th. præmotionem, seu motum in voluntatem, ut indifferentia eius, & suspensio resoluitur, quid aliud est præmotio quam prædeterminatio? Sed ne in vocabulo hæreamus, cum de re constet: ecce tot loca in quibus S. Doctor utitur nomine determinationis. In primis loco cit. 1. p. q. 19. *art. 3. ad 5.* dicit quod *causa contingens debet determinari ab aliquo exteriori ad effectum*, ubi utitur verbo illo determinare. Item in 2. *Physic. lect. 8.* loquens de potentia appetitiua, quæ est ad vtrumlibet, dicit, quod *sicut potentia motiua, quæ est ad vtrumlibet, non exit in actum, nisi per potentiam appetitiuam determinetur ad unum*, ita nihil quod est in potentia ad vtrumlibet exit in actum, nisi per aliquod determinetur ad unum. Nihil inquit, quod est in potentia, ubi eam voluntatem includit. Id autem per quod de-

terminatur, dicit esse Deum in q. 19. cit. Et 1. part. q. 105. a. 1. ad 3. Dicendum quod hoc ipsum quod causa secunda determinantur ad suos effectus, est illis à Deo, Et in 1. ad Anibal. dist. 47. q. unica, a. 4. *Voluntate Dei non solum res in esse producantur, sed etiam modum rebus producendis, quo producantur prædeterminantur.* Quem locum integrè supra dedimus; & comprehendit ibi expressè causas contingentes, & liberas. Item super Dionysium *de diuinis nominibus c. 5. lect. 3.* exponit verba Dionisij dicentis, exemplaria in Deo esse prædefinitiones, & voluntates diuinas existentium prædeterminatiuas & effectiuas; quia has rationes inquit D. Thom. *super substantialis Dei esse prædeterminantur.* Et 1. p. q. 23. *art. 1. ad 1.* explicat dictum Damasc. negantis prædeterminationem Dei, quia intelligitur, inquit, *de prædeterminatione imponente necessitatem.* Et 3. *contra gent. capit. 90. in fine*, eandem authoritatem Damasceni explicat, *ut intelligantur ea quæ sunt in nobis diuina determinationi non esse subiecta, quasi ab ea necessitatem accipientia.* Sentit ergo quod non accipiendo ab ea necessitatem à determinatione diuina sunt, quia dat Deus ipsi voluntati determinationem, & motum ut se moueat, & determinet, ut locis supra allegatis constat. Quod autem Deus causet ipsam applicationem voluntatis, non ut merè passiuè voluntas applicetur, sed ut etiam se applicet, & se moueat, docet locis supra cit. D. Thom. Nec ex hoc sequitur quod voluntas se applicabit ita immediatè, quod Deus solum se habeat ut remotum applicans, quia ita applicat Deus, quod cum se voluntas applicat, etiam simultaneo atque adeo immediato concursu cum illa concurrat, eo quod istamet applicatio voluntatis operatio aliqua eius est, non aliquid præter operationem, & ita indiget simultaneo concursu. Cum autem dicit S. Thom. q. 3. *de malo*, quod non determinatur voluntas ab aliquo extrinseco agente, vel loquitur ad literam de determinatione ad peccatum, in quo licet possit ab aliquo suadente extrinseco determinari, non tamen ab aliquo agente, quia in malis voluntas est primum agensiciens & à nullo alio determinatur. Vel si loquitur absolutè de omni determinatione voluntatis, etiam ad bonum, intelligitur quod à nullo extrinseco agente determinatur, quod sit ita extrinsecum, quod non sit causa ipsius voluntatis & motus eius; hanc enim causam semper excipit D. Thom. ut patet 3. *contra Gent. c. 88. & 1. p. q. 83. a. 1. ad 3. & q. 105. art. 4. ad 1. & 2.*

Ex D. Augustino hanc doctrinam hausit
D. Thomas.

Pluribus ostendimus supra, disp. 3. in D. Aug. 12 doctrina reduci operationem nostræ voluntatis, subiectique dominio, & omnipotentia Dei, illam mouentis, & vertentis quocumque, & quomodocumque voluerit. Breuiter nunc inter alia Aug. loca, videndus est lib. *de correptione & gratia c. 14.* ubi inquit. *Non est itaque dubitandum, voluntati Dei, qui in celo, & in terra omnia quacumque voluit fecit, humanas voluntates non posse resistere, quominus faciat ipse quod vult, quandoquidem etiam de ipsis hominum voluntatibus, quod vult cum vult facit.* Nisi forte quando Deus voluit Sauli regnum dare, sic erat in potestate Israëlitarum subdere se memorato viro, siue non subdere, quod utique in eorum propositum erat voluntate, ut etiam Deo valerent resistere. Qui tamen hoc non fecit, nisi per ipsorum hominum voluntates, habens sine dubio humanarum cordium, quod placeret inclinandum omnipotentissimam

tissimam potestatem. Quomodo verò sic inclinet, & faciat Deus de voluntatibus hominum quod sibi placet, explicat statim infra Aug. Intus egit, corda tenuit, corda mouit, eosque voluntatibus eorum, quas ipse in illis operatus est, traxit. Si ergo cum voluerit Deus Reges in terra constituere, magis habet in potestate sua voluntates hominum, quam ipsi suas quis alius facit, ut salubris sit correptio, & fiat in correpti corde correptio? Sic Aug.

Ex quo loco Aug. euidenter deducitur diuinam voluntatem habere efficaciam circa liberos cordis nostri actus antecedenter ad consensum nostrum, & non ex suppositione ipsius sed ex natura sua. Patet hoc, quia si ob aliquam rationem præ exigitur suppositio consensus, ut Deus efficaciter velit & moueat voluntatem nostram, maxime quia libera voluntas ex sua libertate potest resistere cuicumque motioni & auxilio diuino; & sic non potest esse ex se determinata efficaciter voluntas. Sed Aug. dicit, voluntati illi, quæ fecit omnia in cælo, & in terra humanas voluntates non posse resistere, etiam si in earum voluntate sit positum facere, vel non facere, & quod habet inclinandum cordium omnipotentissimam potestatem, & agit intus in corde, operans ibi voluntates, quibus nos trahit, habensque magis in potestate sua voluntates hominum, quam ipsi suas; ergo soluit totum fundamentum oppositum de libertate nostra, qua possumus resistere Deo, & firmat fundamentum nostræ sententiæ, quia si intra cor operatur voluntates nostras, easque habet in manu sua, & potestate magis quam ipsimet homines: ergo sicut homines se determinando nihil lædunt libertatem, multò magis si diuina voluntas causat hanc determinationem & radix est illius consensus, non lædet, sed perficiet, alioquin quomodo magis habet Deus in potestate voluntates hominum, si ut efficaciter eas moueat, & in illis operetur, non ex sua efficacia id potest, sicut possunt homines, sed ex suppositione consensus & determinationis ipsius hominis?

14 Secundò; docet expresse Aug. Deum intra corda nostra operari etiam motum ipsum voluntatis nostræ, & auersas voluntates conuertere, faceréque ex nolentibus volentes, quod utique stare non potest, si ipsa diuina voluntas ex se efficaciam non habet, sed ex suppositione determinationis, & consensus nostri, denominatur efficax: cum ex se non sit. Dicit autem Aug. in lib. de gratia & libero arbitrio c. 21. sic: Agit omnipotens Deus in cordibus hominum etiam motum voluntatis eorum, ut per eos agat, quod per eos agere ipso voluerit. Et post multa testimonia allata ex Scriptura, quibus hoc probat, concludit: His & talibus testimoniis diuinorum eloquiorum, qua omnia commemorare nimis longum est, satis quantum existimo, manifestatur operari Deum in cordibus hominum ad inclinandas eorum voluntates quocumque voluerit, siue ad bona pro sua misericordia, siue ad mala pro meritis eorum, iudicio utique suo aliquando aperto, aliquando occulto, semper tamen iusto. Vbi operatio Dei ponitur ad inclinandas voluntates hominum: ergo loquitur de operatione Dei non supponente, sed causante consensum, & determinationem voluntatis nostræ, ad hanc enim inclinatur voluntas; non ergo ex ipso consensu præsupposito & præuiso, efficaciam habet illa operatio, sed causat eam: non causat autem quatenus indifferens & indeterminata: ergo quatenus determinata antecedenter ad consensum nostrum. Ergo hoc ipso quòd Aug. ponit voluntatem Dei causatiuam, & non solum comitantem ipsum motum & inclinationem no-

stram, fatetur non ex suppositione nostri consensus, sed ex se, & ex natura sua esse efficacem. Dicit autem etiam operari Deum motum voluntatis ad malum, non formaliter, sed quoad entitatem materiale actus. Ad hæc ipse Aug. apertissime tradit in eodem libro de gratia & libero arbitrio cap. 16. explicans illa verba Apostoli, Deus est qui operatur in vobis velle & perficere. Certum est, inquit, nos facere cum facimus, sed ille facit ut faciamus præbendo vires efficacissimas voluntati, qui dicit; Faciam ut in Iustificationibus meis ambuletis, & iudicia mea obseruetis & faciatis. Cum dicit, faciam ut faciatis, quid aliud dicit, nisi auferam à vobis cor lapideum, unde non faciebatis, & dabo vobis cor carneum, unde faciatis? Et hoc quid est, nisi auferam cor durum, unde non faciebatis, & dabo cor obediens, unde faciatis? Ecce si iuxta Aug. Deus facit ut faciamus, ut cor sit obediens, ut non sit durum, nec lapideum, quod pertinet ad eius cooperationem, & ad id quod ex parte nostri se tenet, & hoc facit præbendo vires efficacissimas: ergo non supponendo efficaciam, sed causando, quia præbet hanc efficaciam, & facit illam obedientiam cordis. Si autem causat efficaciam ipsam, & obedientiam, seu cooperationem voluntatis: ergo ipsa Dei voluntas ex se efficax est, non ex denominatione extrinseca nostri consensus, quia si ipsius consensus efficaciam causat, non ex ipso consensu eam habet, sed antecedenter, atque adeo ex se efficax & determinata est; indeterminatum enim, prout sic, non causat. Certè Molina in concordia disp. 33. in fine, referens Aug. in loco cit. 21. libri de natura & gratia & lib. 5. contra Iulian. c. 3. & dicens non esse concedendum aliquos impelli & moueri ad actus peccatorum à Deo, subdit: Nescio tamen utrum Aug. contra Iulianum, & de gratia, & libero arbitrio locis cit. aliquid amplius velit, quod plane vel admittendum non est, vel ex aliis locis eiusdem Patris pie exponendum. Sensit Molina vim huius loci Aug. in quo planè vult S. Doctor Deum nos non ad peccatum, bene tamen ad entitatem actus eius mouere, & agere.

Discipuli D. Thom. ipsum sequuntur.

Hanc S. Thom. mentem ita apertam vnanimitè eius Discipuli sequuntur. Capreolus in 2. dist. 1. q. 2. conclus. 6. ubi transcribit articulum 7. supra citatum Ex D. Thom. q. 3. de potentia. Similiter dist. 28. ad 12. apertissime dicit, quòd Deus modo speciali inuat faciendo ipsam voluntatem partialiter concurrere, ita quod ipsa voluntas partialiter concausat applicata, & quasi instrumentaliter mota à Deo ad sic particulariter concausandum. Nec in isto loco Capreolus docet in causis naturalibus solum dari coëfficiantiam generalem partialem cum diuino influxu, non causatam ab illo. Nam licet dicat in supernaturalibus Deum non inuare solum partialiter coëfficiendo, qui est modus communis quo concurrat ad cuiuslibet agentis creati effectum, &c. tamen per illud verbum coëfficiendo, non intelligit puram influentiam simultaneam Dei, sed etiam antecedentem, ut simul cum Deo coëfficiat. ut verbis relatis docet. Quod etiam aliis locis tradit Capreolus, ut dist. 1. cit. q. conclus. 6. & in 1. dist. 4. q. 1. concl. 5. Et soluens primum argumentum contra 2. partem conclusionis, quod est fundamentum oppositæ sententiæ, scilicet quia si Deus vellet necessitare voluntatem necessitate antecedenti, non aliter id faceret, quam volendo efficaciter; Respondet, quòd licet faceret hoc Deus volendo, non tamen nunc vult illud, quod vellet tunc. Et sic docet

et quod à causa prima non provenit iste effectus, nisi necessitate immutabilitatis, & suppositionis, quia scilicet causa prima est determinata ad hunc effectum per suam sapientiam, & voluntatem; & sic non stat effectum non sequi illo modo quo prævolitum est, & dispositum à causa prima illum sequi, &c. Non dicit eo modo quo præcognitum est, sed eo modo quo prævolitum & dispositum, quia non ex efficacia tantum prævolita, sed causata & disposita à Deo per eius volitionem, sequitur ille effectus. Hæc & alia multa similia ibi dicit Capreolus. Videndus est etiam S. Antonius 4. p. *Summe theologie* c. 14. de causis gratiæ, §. 2. & c. 5. de necessitate gratiæ, §. 7. Et Albertus Magnus 1. p. *Summe tract.* 20. q. 79. & in tract. 3. q. 18. Conradus 1. 2. super q. 109. art. 9. ubi motionem divinam ponit conferuativam & applicativam gratiæ ad operandum: & super q. 112. art. 3. versic. Nota secundo, eandem doctrinam explicat. Videndus est etiam Ferrari. 3. contra gent. c. 70. & c. 80. Caiet. pluribus in locis eandem tradit doctrinam, licet ab oppositis Authoribus citetur pro sua. Sed manifestè tradit Caiet. doctrinam D. Thom. in primis in hac 1. p. q. 2. art. 3. §. Ad hoc brevitè, explicans illam propositionem S. Thom. quia moventia secunda non movent nisi per hoc quod sint mota à primo motore, ubi docet requiri ad rationem causæ, efficaciam, & hanc in eius causalitate consistere, unde nisi causalitas compleatur, neque causa in actu, neque efficacia salvatur; complementum autem causæ mediæ nullatenus esse potest sine dependentia à prima: ergo causa mediæ, ut est causa mediæ, dependet à prima. Vbi satis individualiter ponit Caietanus nostram sententiam, quod ipsa determinatio seu causalitas, aut efficacia causæ mediæ dependet à prima, & sic non potest solum esse concomitanter cum ipsa, sed derivata ab ipsa. Et sic concludit ibi Caietanus §. Ad objectionem, quod impossibile est mediæ causalitatem perfici, nisi sustentetur in prima. Item 1. p. q. 45. art. 5. §. Ad Durandum, in secunda solutione refert doctrinam D. Thom. quest. 3. de potentia art. 7. ubi omnis causa secunda dicitur non agere, nisi agatur à Deo multipliciter. Videndas est etiam 1. p. q. 105. art. 4. & 5. utrobique circa finem, & q. 115. art. 6. §. Ad evidentiam, ibi, Nunquam agentia inferiora coagunt calo, nisi patiantur à calo, quoniam non movent, nisi mota. Censet ergo Caiet. quod non datur in agentibus subordinatis pura simultas in influendo, sed quod causa inferior, quia mota est, prius patitur à superiori, ut suam partialem operationem emittat, & consequenter eius cooperatio & determinatio causatur à superiori. Insignis etiam locus est Caiet. 2. 2. q. 172. art. 2. §. Ad 2. ubi inquit: At si de inspiratione efficaci intelligendum est cum prophetica dicitur inspiratio, constat quod cum solius Dei sit efficaciter movere voluntatem, & ex parte ipsius voluntatis, ut inspirationis nomen sonat, dicendum esset quod non est ab Angelo, sed à Deo immediate, non per impressionem alicuius forme in voluntate, sed per actualem motionem, qua solus ipse Creator potest eam cum vult, & quod vult movere, iuxta illud, Cor Regis in manu Domini, & voluet illud quocunque voluerit.

16 Nec obstat quod adducunt oppositi Authores ex Caiet. in hac 1. p. q. 19. art. 8. §. Ad primam rationem, ubi dicit quod dupliciter contingit causam secundam moveri à prima. Vno modo, motione prævia actioni, sicut baculus movet lapidem motus à manu. Alio modo motione cooperativa intrinsecè propria actioni. Et quidquid sit de maiori in primo sensu, in secundo est falsa, in quo tantum verificatur minor: non enim oportet cum aliquis vult aliquid, seu cum Sol illuminat,

primam causam prævia motione cooperari, sed sufficit & exigitur eam intrinsecè cooperari tali electioni, vel illuminationi. Et infra: Prima causa non attingit effectum secundæ causæ in seipsa, sed modificata cooperatione sua iuxta modum ipsius causæ secundæ. Et statim docet quod non est aliqua duratio naturæ, in cuius primo instanti causa prima respiciat effectum, & in secundo causa secunda. Remouet ergo Caiet. omnem præuiam operationem, & efficaciam Dei in causam, & solum ponit simultaneam cooperationem in effectum. Idemque docet Conradus 1. 2. q. 79. art. 1.

Resp. Caietanum nullo modo negare præuium influxum quo causa prima applicat, & coniungit virtutem causæ secundæ ad effectum, sed negare illum præuium influxum, quo Deus præbeat totam virtutem causæ inferiori, ita quod illa operetur præcisè ut mota, & ut instrumentum, sicut baculus operatur ut motus à manu: Hoc enim esset auferre à causis secundis proprias virtutes operativas, quibus modificant & determinant diuinum concursum. Hoc autem constat ex ipsis verbis Caiet. in præfatio art. 8. dicit enim sic §. Et si quidem, &c. Non enim causa secunda movet ob hoc præcisè quia movetur, sed etiam ex virtute propria. Et statim. Quoniam stat causam secundam moveri necessario à prima, & cum hoc, ipsum moveri modificari ex natura causæ secundæ, & sic moveri causæ secundæ, provenit non ex moveri tantum, sed ex moveri, & modo proprio ipsius causæ secundæ. Et concludit: Illa autem propositio adiuncta, scilicet causa secunda nihil agit, nisi in virtute primæ, non inuat, quoniam non est sensus quod causa secunda nullam virtutem habeat nisi primæ, sed quod ipsa secunda nullum effectum producit, nisi virtute primæ concurrente, & contingente virtutem secundæ suo effectui, quoniam primæ omnia attingit immediate immediatione suppositi. Ecce manifesta Caietani mens, à seipso explicata. Non negat præuiam influentiam causæ primæ, quantum ad hoc quod applicet & contingat virtutem causæ secundæ effectui, quod est non dare formam operativam, sed applicationem, & motionem actualem, negat autem quod Deus sic præviè moveat, quod illa motione det totam virtutem agendi, non autem virtutem supponat in causa secunda, quæ motionem illam modifcet; hoc enim esset se habere ut purum instrumentum. Quod autem docet, nullam esse durationem in cuius primo instanti causa prima respiciat effectum, & in secundo, secunda, verissimè dicit, quia respectu effectus producendi simul respicitur & attingitur à prima & secunda causa, sed cum hoc stat quod ipsa causa secunda ex subordinatione, & motione ad primam suam eliciat cooperationem in effectum. Et de hoc videri potest ipse Caietanus 1. 2. q. 109. art. 1. ubi eandem præuiam influentiam causæ primæ agnoscit, & Conradus illo ipso loco q. 79. ubi citatur.

Denique hos gravissimos & antiquiores Thomistas, recentiores sequuntur sine vlla discrepancia. M. Bannez 1. p. q. 23. art. 5. ibi. Zumel, Nazarius, Nauarrete, Gonzalez, Zanardus, Ledesma lib. de, Auxiliis q. unica art. 9. Alvarez lib. 3. de Auxiliis disp. 12. Ram. de diuinis premotionibus fol. 86. Corneso tomo 1. in 1. p. tract. 1. in q. 14. art. 13. disp. 2. dub. 6. & tract. 2. in q. 23. art. 6. & 7. disp. 1. dub. 2. Cabrera tomo 2. in 3. p. q. 18. art. 4. disp. 2. §. 4. & 3. tomo. q. 62. art. 1. disp. 19. §. 4. Et super eandem q. 62. M. Nufio latè id docet & tractat. Villegas controverfia 12. disp. priori c. 2. Machin. 1. p. super q. 19. a. 8. & super q. 23. art. 5. Carmelitani Salmanticenses tract. 4. de volunt. Dei disp. 10. diffusè, & plures alij qui ab his Authoribus citantur. Optimè eximius

Doctor Franciscus Syluius in illo breui, sed neruoso opusculo de primi Motoris motione, Duaci. 1609. vbi plures ex Louanienſibus antiquis, aliſque Doctõibus citat pag. 61. & ſeqq.

Extra Scholam D. Thom. idem docetur.

17 Primo loco, & multorum loco occurrit Scotus cum ſchola ſua, qui diuina prouidentia diſponente, forſitan quia pro iſtis temporibus ſic expediebat, non minùs ſtrictè & formaliter locutus eſt in hac parte, quàm D. Thom. & eius ſchola. Extant inter alia duo illuſtria Scoti teſtimonia pro hac parte, videlicet in 2. diſt. 37. q. unica circa ſecundum quæſitum, vel, vt alij citant, q. 2. vbi Scotus quærit an voluntas ſit totalis cauſa ſui actus, & ſui velle, ita quòd Deus reſpectu illius non habeat aliquam efficiẽtiam immediatam, ſed mediatam. Et poſitis argumentis in contrarium, quia aliter voluntas non eſſet libera, ſi non eſſet totalis cauſa, & immediata ſui velle, non ageret contingenter, &c. quæ ſunt fundamenta Authorum ſcientiæ mediæ, ipſe Scotus deſtruit illam poſitionem in §. Contra iſtam opinionem duplici via, tum deſtruendo ſcientiam mediam, tum ex omnipotentia Dei aſſuendo efficiẽciam eius circa voluntatem noſtram. Deſtruit quidem ſcientiam mediam, quia ponit Deum non cognoscere certò futura contingentia, niſi in determinatione ſuæ voluntatis diuinæ. Vnde ſi illa non eſſet cauſa eorum quæ dependent à voluntate creata, poterit voluntas creata aliter velle, & ita non ſequitur certitudo ex cognitione determinationis voluntatis diuinæ. Quæ conſequentia Scoti infringitur, ſi ponitur ſcientia media, quia iſta non accipit certitudinem ex determinatione voluntatis diuinæ, ſed creatæ in ſe immediatè. Quod etiam Scotus alibi negauit, id eſt quod lib. 14. §. Hic intelligendum, vbi inquit, quòd in motionibus contingentibus primò voluntas determinat ſe ad intra, ſecundò intellectus videns iſtam determinationem voluntatis inſallibilem, nouit hoc eſſe futurum. Nihil illiſtius ad aſſerendum ex Scoto non cognosci futura, niſi in decreto Dei priùs inſallibiliter determinante; loquitur enim ibi de voluntate diuina, cùm dicit quòd determinat ſe ad intra, vt videri poteſt in ipſo textu; atque adeò deſtruit à fundamentis ſcientiam mediam, quæ depilata, corruit tota machina decretorum indifferentium, & non efficiacium ex ſua natura, quæ ſuper illam innititur. Ex omnipotentia verò Dei probat Scotus diſt. 37. cit. tali conſequentia inter alias, cauſalitatem diuinam efficiacem in noſtram voluntatem: Quia quidquid vult omnipotens, hoc fit, licet velit volitionem meam fore: & iſta eſt in poteſtate voluntatis meæ, vt totalis cauſa contingenter ſe habentis ad illud: ergo ipſa poteſt ſe determinare ad vnam partem, vſq; ad aliam indifferenter, & ita poteſt non fieri illud aliud ad quod voluntas diuina eam determinauit. Hæc ſunt formalia verba Scoti. Quod inconueniens ab ipſo illatum deuoratur ab Authoribus ſcientiæ mediæ, & indifferentium decretorum, quia dicunt quòd ſi conſideretur decretum diuinum, ſeu determinatio, & influentia eius, prout præciſè egreditur à Deo, & ab omnipotentia eius poteſt inefficax reddi à voluntate mea, ſed ſi conſideretur vt dirigatur à ſcientia media, quæ præuidet quando voluntas mea eſt conſenſura, & tunc dicitur, ſic non redditur inefficax, non quidem vi omnipotentia ſuæ, ſed beneficio determinationis meæ præuiſæ à Deo, non in determinatione ſua.

18 Secundum teſtimonium Scoti eſt in 4. diſt. 49

quæſt. 6. §. Dico ergo, circa finem. vbi ſic inquit: Reſpondetur libertati, quòd contingentia quæ neceſſariò eſt ex parte ipſius non ponat contingentiam ſimpliciter, quantum eſt ex parte omnium inferiorum, quia tollit ipſam eſſe cauſam in ordine ſuperiori: ſed non repugnat ſibi quòd contingentia eius non ponat contingentiam ex parte effectus ſimpliciter, quantum eſt ex parte cauſæ ſuperioris, quia cauſa ſuperior non determinatur ab ipſa: non eſt ergo contra naturam eius quòd determinetur à cauſa ſuperiori. Vide ſingulare dictum Scoti, quo non potuit plenius exprimere ſententiam noſtram, & oppoſitam repellere; dicit enim quòd cauſa ſuperior voluntati (ea eſt diuina voluntas) non determinatur ab ipſa: ergo repellit indifferẽtiam decreti expectantis efficiaciam, & determinationem à conſenſu noſtro, & ponit diuinam voluntatem determinantem voluntatem noſtram. Quòd ſi determinat noſtram, non indeterminatè decernit, nec decretum indifferens eſt, ſed determinatum & efficiac ex ſe ſine hoc quòd contingentiam noſtræ libertatis lædat. Denique videri poteſt Scotus in 1. diſtinct. 41. quæſt. unica, §. Primum iſtorum, & diſtinct. 47. in principio, & §. Ad argumenta, vbi expreſſè docet quòd Deus nescit futurum contingens ſine determinatione voluntatis ſuæ, & ſic non ſcit peccatum futurum per nudam permiſſionem, ſed requiritur quòd ſciat ſe cooperaturum iſti in actu peccandi; ſeu in ipſo materiali peccati, ſi ſit peccatum commiſſionis, vel non cooperaturum, ſi ſit peccatum omiſſionis: Ergo in ſententia Scoti fixum eſt quòd Deus non niſi in ſuo decreto certitudinaliter ſcit futuram cooperationem liberi arbitrij: ergo eadem ratione tenetur dicere quòd decretum illud non eſt indifferens & indeterminatum, & expectans efficiaciam, & determinationem ex conſenſu noſtro præuiſo ante omne decretum, cùm talis præuiſio extra decretum apud Scotum non detur, & talis determinatio noſtræ voluntatis, ex determinatione & efficiẽtia Dei dependeat, vt ibi certò ſciatur.

Quapropter Scotum ſequuntur communiter eius Diſcipuli, Baſſolis, Mayron, Lychetus, Orbelis, Niſe, & quos citat Villegas ſupradicta controuerſia 12. q. priori c. 2.

Eandem noſtram ſententiam, & D. Thomæ, docet Alexander Alenſis, in 1. part. quæſt. 23. de ſcientia Dei, membro 3. art. 4. vbi docet quòd ſi Deus prouidit me iturum Romam, ſecundum cauſam ſuperiorem eſt immutabile, ſecundum cauſam inferiorem mutabile, cùm Deus præuiderit & diſpoſuerit quòd iſte actus eliciatur à mea voluntate non coacta. Non ſequitur ergo, hoc eſt immutabile ſecundum cauſam ſuperiorem: ergo eſt immutabile; immò eſt quid & ſimpliciter: quod enim dicitur ſecundum cauſam ſuperiorem immutabile, ſecundum quid dicitur, & idèò ſecundum quid eſt euenire, quia illa cauſa ſuperior non eſt determinata cauſa huius, nec cogens inferiorem ad hoc quòd res ſit. Vbi ſaluat Alenſis immutabilitatem in effectibus ratione cauſæ ſuperioris, ſic prouidentis & diſponentis quòd ego eliciam talem actum, cum quo tamen ſtat me operari liberè & mutabiliter, quia nec Deus eſt cauſa determinata naturaliter, nec coactiua noſtræ voluntatis, & ſic non neceſſitat illam, ſed immutabili decreto facit me liberè velle. Et idem Alenſis in eadem 1. part. quæſt. 40. membr. 1. dicit quòd in bonis actibus voluntas noſtra ſubiicitur diuinæ voluntati vt efficiens ſub efficiẽti, iuxta illud, Omnia opera noſtra operatus eſ in nobis Domine. At Deum efficere per modum efficiẽtis quòd nos faciamus, eſt verè non ſupponere conſenſum noſtrum, ſed cauſare:

Ergo

Ergo non ex ipso consensu, sed antecedenter ad illum efficax est.

20 Eandem sententiam docet S. Bonaventura, præsertim in 2. dist. 26. q. 26. ubi quærit. An gratia habeat rationem motoris in animâ. Et resoluit quod sic. Gratia, inquit, non solum operatur cum libero arbitrio, sed etiam operatur in libero arbitrio, & liberum arbitrium mouet. Vnde non est aliud dicere, gratiam liberum arbitrium mouere, quam, gratiam esse instrumentum Spiritus S. ad mouendum liberum arbitrium. Et infra: Deus per gratiam mouet voluntatem, nec tamen hoc voluntati repugnat, quia voluntas vult sic moueri à Deo. Itaque voluntas vult sic moueri, & gratia facit quod ipsa velit sic moueri à Deo. Ecce manifestè ponit S. Doctor motionem gratiæ factam in ipsum liberum arbitrium; quæ utique antecedit determinationem & consensum talis liberi arbitrij, aliàs non esset motio facta in ipsum liberum arbitrium, nec gratia faceret quod ipsa volûtas vellet sic moueri, si solum comitaretur eius operationem, & multò minùs, si expectat eius consensum & determinationem ut efficax & determinata sit; sic enim non faceret ut ipsa vellet sic moueri. Et in eodem 2. sentent. dist. 37. q. 1. art. 1. loquens quomodo Deus ad actionem ipsam, quæ est in peccato primordialiter concurrat, solut. ad 5. sic dicit: Ad illud quod quæritur, an tota operatio à Deo est & c. dicendum quod tota est à Deo, & tota à libero arbitrio: non enim est intelligendum quod Deus cooperatur libero arbitrio, sicut cum duo ferunt lapidem, unus cooperatur alteri, sed quia Deus est intimè agens in omni actione, & intimus est ipsi potentia operanti, ita quod potentia ipsa in nihil exit, quod non sit ab ipso. Ecce manifestissimè ponit S. Bonaventura, illud ipsum quod cooperando causat nostra voluntas, quod est ipsa determinatio & consensus noster, esse etiam ex Deo, & ab ipso causari. Si cautat: ergo non supponit: ergo non ex ipso efficaciam & determinationem habet, ex se autem indeterminationem & indifferentiam, quia indifferens, & indeterminatum, ut tale, non causat. Nec obstat quod ibi, solutione ad ultimum dicit S. Doctor quod In operibus meritoriis requiritur excitatio, quæ est effectus gratiæ præuenientis, in aliis autem non est nisi cooperatio diuinæ virtutis, quæ existens in creatura potentialiter, essentialiter, & præsentialiter, sicut conseruat eam in essendo, sic adiuvat in operando, propterea quod conceditur ibi esse cooperatio, non præuentio. Quibus ultimis verbis vtuntur oppositi Authores ad dicendum S. Bonaventuram esse eius sententiæ, quia negat præuentionem, & tantum concedit cooperationem, quæ utique pertinet ad comitantem concursum, & non amplius. Sed hoc non obstat, quia S. Doctor clarè explicat se loqui de præuentione excitante, quæ moralis est, & non inuenitur in aliis actionibus non bonis, ut ibi dicit: non loquitur autem, de cooperatione prius influente & mouente voluntatem, ut satis se explicauerat, & ibi attingit, dum dicit quod cooperatio diuinæ virtutis sicut conseruat eam in essendo, sic adiuvat in operando, conseruatio autem in essendo per causalitatem diuinam est in entitatem rei: ergo & auxilium in operando per modum causalitatis se habet.

21 Minùs obstat quod ex Alensi, & eodem S. Bonaventura affert Vasquez dist. 99. c. 7. num. 46. scilicet quod dicunt, non obstante prouidentia Dei, quæ disponit res fore, actus nostros esse liberos & voluntarios, quia diuina voluntas non est tota causa, sed cum libero arbitrio, quod cum sit proxima causa, modificat concursum primæ; quod verum esse non potest, si

efficacia Dei prior esset determinatione nostra. Sed hæc consequentia Vasquez nulla est, nec ad mentem tantorum Doctorum, quia etsi diuina voluntas non sit tota causa, quasi liberum arbitrium se habeat ut merum instrumentum & inanime quoddam, est tamen superior causa non merè cooperans, sicut cum duo ferunt lapidem, sed intimè dans ipsi libero arbitrio, & causans id quod ab eo exit.

Omitto Ægidium Romanum Cardinalem in 2. dist. 5. q. 2. & dist. 14. q. 3. & dist. 36. art. 3. Roardum Tapper lib. 7. de libero arbitrio pag. 216. & 217. & pag. 226. Driedonem de concordia liberi arbitrij pag. 43. & 46. & de captiuitate & redemptione generis humani 2. c. tractatu 6. Vegam in c. 5. Concilij Trid. lib. 6. de iustificatione, & alios plures.

Testimonium Catechismi Pij V.

Tantam ergo habentes impositam nubem testimonij & grauissimorum Doctorum, qui sententiam 22 hanc confirmarunt & docuerunt, claudat eorum agmen testimonium omnibus maius, nempe ex Catechismo edito per Pium V. ex decreto Concilij Trident. & per ipsum Pontificem toti Ecclesiæ propositum, ut inde quasi ex purissimo fonte doceri possint à Parochis fideles, & in sana doctrina instrui. Explicans ergo in Symbolo fidei, articulum omnipotentiae diuinæ num. 22. pag. 33. sic inquit: Non solum autem Deus vniuersa quæ sunt tuetur, atque administrat, verum etiam quæ mouentur, & agunt aliquid, intima virtute ad motum atque actionem ita impellit, ut quamuis secundarum causarum efficientiam non impediat, præueniat tamen, cum eius occultissima vis ad singula pertingat, & quemadmodum Sapiens testatur, attingit à fine usque ad finem fortiter, & disponit omnia suauiter: Quare ab Apostolo dictum est, cum apud Athenienses annuntiaret Deum, quem ignorantes colebant, non longè est ab unoquoque nostrum; in ipso enim viuimus, mouemur, & sumus. Vbi pondero explicationem istam ut pertinentem ad articulum omnipotentiae diuinæ, tradi à Catechismo verbis clarissimè explicantibus nostram sententiam, videlicet Deum intima virtute ad motum, actionemque impellere: ergo non supponit, aut expectat à nobis determinationem, & consensum, si ad illum motum impellit. Deinde quod non impediendo efficientiam secundarum causarum, tamen præuenit illas utique ad efficientiam earum. Quod si præuenit hanc efficientiam, non ergo supponit illam, ut habeat inde efficaciam sed ex se antecederet illam habet, aliàs quomodo sine efficacia præueniret? Tandem occultissimam vim ponit, qua ad singula pertingit, quod utique non est necesse si indifferenter, & indeterminatè se habet, & offert concursum quem determinet ipsa causa secunda: sic enim non est vis occultissima pertingens ad singula, sed expectans à singulis, ut determinatè & efficaciter se habeat erga illa. Hoc autem ipsum probat illis testimoniis Scripturæ, ex Sapientia, & ex Paulo, de quibus, & aliis similibus dicemus statim.

ARTICVLVS V.

Fundamenta ex ratione.

Notandum est quod duplicis generis fundamenta assignare possumus. Quædam purè metaphysica, & quasi à priori. Alia theologica ex suppositis

suppositione eorum quæ Scriptura, & concilia docent, cum quibus stare non potest, aut non ita accommodari potest, nisi sit assertio efficaciae diuinæ voluntatis ex natura sua.

I A priori fundatur hæc veritas, metaphysicè procedendo in vniuersalissima causalitate, & efficacia diuina, & dominio quod habet supra omnes motus, & actus, & cooperationes causarum secundarum, etiam ut propriæ sunt ipsarum creaturarum; sic enim adhuc subiiciuntur, & subordinantur causalitati, & virtuti diuinæ, ut primæ radici. Et 2. fundatur in summa infallibilitate, quæ habet voluntas diuina ab intrinseco sui, & non ex præsuppositione alicuius causæ creatæ extra se.

Sed tamen antequam hæc duo explicentur, oportet probare quod non est contradictio aliqua in terminis, neque vlla implicatio quod libertas creata componatur cum efficacia intrinseca diuinæ voluntatis, atque adeo quod loquendo de potentia absoluta Dei, nulla est repugnantia quod per actum suæ voluntatis efficacem & determinatum ex natura sua (id est non expectantem determinationem nostri consensus) possit simul voluntas nostra liberè operari, & sine præiudicio suæ libertatis.

Hoc autem probatur dupliciter. Primò à posteriori. Secundo à priori. A posteriori, quia Christus ut homo prædeterminatus fuit ad opera sibi præcepta, v.g. ad moriendum ex præcepto Patris, & ad præcepta naturalia, & tamen liberè obediuit & passus est: ergo libertas nostræ actionis comparitur cum efficacia Dei determinante ad vnum. Minor constat, quia Christus in sustinendo mortem exercuit actum excellentissimæ charitatis, & obedientiæ, ut Scriptura aperte dicit, *Factus obediens usque ad mortem*, &c. *Maiorem charitatem nemo habet, quam ut animam suam ponat*, &c. ergo illi actus fuerunt liberi, quia fuerunt actus virtutis. Maior probatur, quia stante præcepto non paterat stare oppositum quod Christus non impleverit illud, quia erat impeccabilis, & hoc volebat Deus: ergo voluntate Dei præceptiva stante, erat determinatus ad velle, & in sensu composito non poterat non velle. Nec obstat quod poterat velle hoc, vel illo actu in individuo, & sic poterat non velle, non absolute, sed quoad hunc actum. Contra enim est, quia velle hoc, vel illo actu, non est libertas contradictionis, quia contradictio est inter negationem puram, & positivum, sicut explicat Consilium Trident. abjicere vocationem, vel consentire, & sicut in nobis est penes velle, & non velle, non penes hoc velle, & illud velle, quæ sunt duo positiui actus & uterque volitio & consensus. Et præterea, quia idem dicemus de efficacia antecedente quod cum illa stat posse facere hunc actum vel illum in singulari non facere, & simpliciter non facere, & sic conservabit libertatem.

2. Secundo, probatur idem à priori, quia vel Deus est prima radix, & principium possibilitatis actus liberi ut liberi, vel non. Si non: ergo datur possibilitas alicuius rei creatæ non derivata ab omnipotentia Dei, & sic illa creatura, quæ est actus liber, ut liber, non est à Deo, nec eius potentia subiecta, quia si non est possibilis per talem potentiam ergo nec factibilis per illam. Dicere autem quod, actum esse liberum, est aliquid rationis, & fictum, omnino detestandum est: nam quidquid sit, an actus liber includat aliquem respectum rationis ad indifferentiam iudicii, tamen absolute, & realiter ratio liberi non potest consistere in aliquo rationis, & in aliquo ficto, cum operatio libera

in eodem genere inuenta perfectior sit naturali, seu necessaria: esse autem operationem necessariam non est quid fictum & rationis: ergo neque esse liberam, cum potius in hoc quod homo sit liber, magis assimiletur Deo, & eliciendo actus liberos assimilatur Deo in actu secundo. Si autem Deus est causa prima, & radix possibilitatis actus liberi ut liberi, necesse est quod ita sit causa possibilitatis vnius actus determinati, v.g. consensus ad amorem, quod etiam sit causa possibilitatis ad oppositum, scilicet ad dissensum, aliàs non esset possibilitas contingentia, & libertatis; si ita esset possibilitas ad vnum quod esset impossibilitas ad oppositum. Est ergo Deus causa vtriusque possibilitatis ad opposita. Sed efficacia infinita diuinæ potentia, quæ est radix & principium vtriusque possibilitatis in actibus liberis determinatis, per hoc quod exequatur in actu determinatè vnam possibilitatem ex illis, non tollit aliam, nec reddit impossibile, quia si est radix vtriusque possibilitatis, ad eandem pertinet reducere illam in actum eo quod principium, seu potestas reddens aliquid possibile, non tollit possibilitatem per hoc quod ponat executionem; & sic principium possibilitatis actus liberi, ut liberi, debet ex seipso habere vim exequendi illum sine læsione libertatis, hoc ipso quod ex se habet constituere, aut respicere ipsum ut possibilem, etiam in ratione liberi: ac per hoc executio vnius, seu reductio in actum non potest tollere possibilitatem sui oppositi: nec enim reductio vnius possibilis in actum contrariatur possibilitati alterius partis, ut patet cum voluntas actu vnam partem operatur, nec enim destruit possibilitatem ad oppositam: ergo neque potentia diuina quæ est prima radix, & principium vtriusque possibilitatis, per hoc solum quod vnam partem determinatam reducat in actum efficacia suæ voluntatis incipiendo, & determinando voluntatem creatam, non destruet oppositæ partis possibilitatem: ergo neque necessitabit voluntatem, quia ad voluntatem necessitandam requiritur quod ille reddatur necessarius: ergo oppositus reddi debet impossibilis: ergo quandiu potentia diuina conservat possibilitatem oppositi actus quantumcumque determinet, & reducat in actum possibilitatem huius, non tollit contingentiam & libertatem illius, quia tunc servatur contingentia, & libertas, quando sic fit vnum quod oppositum seu non esse illius adhuc est possibile. Non apparet ergo ratio, cur non possit componi infinita efficacia voluntatis reducens determinatè vnam partem consensus vel dissensus in actum cum contingentia & libertate, illius, hoc est non reddens impossibilem alteram partem respectu voluntatis creatæ, sed possibilem conservans: hoc enim sufficit ad contingentiam; siquidem vtriusque partis possibilitas etiam ut ipsi voluntati possibile sit ab omnipotentia diuina derivatur, & per hoc quod omnipotentia reducat in actum, & sit principium reductionis ipsius voluntatis, sicut est principium possibilitatis, non destruit possibilitatem alterius partis: ergo nec destruit contingentiam.

3 Nunc redeo ad illa duo principia supra posita, ex quibus metaphysicè, & quasi à priori procedimus in asserenda ista efficacia decretorum diuinorum ex natura sua, scilicet ad summam omnipotentiam, & dominium in omne creatum, & ad summam infallibilitatem voluntatis diuinæ in operando. Et formatur ratio sic. Determinatio, & consensus creatæ voluntatis, unde dicitur accipere denominationem efficaciae decretum diuinum, quod aliàs ex se indifferens est, est aliquid creaturæ subiectum

ctum dominio voluntatis creatæ, & ordinabile in aliquem finem, atque ab aliqua prouidentia dirigibile: ergo à fortiori causatur entitativè, & efficienter ab omnipotentia Dei, sine qua factum est nihil, & dirigitur à prouidentia diuina in finem efficaciter efficacitate infallibili in ratione operandi, & non solum in ratione sciendi, & videndi. Nec antecedens, nec consequentiam negare possunt oppositi Authores. Non anteced. quia illa determinatio qua voluntas seipsam determinat, & indifferentia decreti diuini vtitur, ex ipsa voluntate oriri dicitur, & ita oriri, quod posset ad oppositum se determinare, cum liberè se determinet: ergo est sub eius dominio illa determinatio. Non consequentiam, quia aliquid esse sub dominio creaturæ, & sub eius causalitate, & nō sub dominio & causalitate Dei, impium esset concedere, cum sine ipso factum sit nihil, & vniuersorum Dominus ipse sit, & specialiter cor hominis in manu eius sit, vt quocumque voluerit vertat illud. Solum potest dici, vel ad antecedens quod illa determinatio voluntatis creatæ sit aliquid rationis in quantum libera: nam si aliquid reale est, non potest effugi, nisi errando, quin à Deo sit: vel ad consequentiam, quod illa determinatio voluntatis, etiam à Deo est, sed comitanti concursu, non præuio, nec in ipsam voluntatem agente, sed cum ipso influxu eius se identificante, quatenus offert voluntati indifferentem indeterminatūque concursus & ipsa voluntas determinatè vtitur vno ex illis, & sic semper est dependens causatusque à Deo ille voluntatis influxus.

4. Cæterum prima solutio nescio quo fundamento possit affirmari, vt sæpè dictum est: nam potentia voluntatis, etiam vt libera, realis potentia est, non ficta, aliās solum esset realis in eo, in quo conuenit cum brutis & inanimatis, nempe in actibus necessariis, seu non liberis; in eo autem in quo maximè ab illis dissidet, & supereminet, nempe in libertate, quod sit aliquid fictum, & rationis. Si autem in quantum libera est realis potentia, ergo actus qui tali potentia correspondet, etiam in ratione liberi realis erit, quia in ratione liberi ei correspondet; nec enim potest intelligi quod aliqua potentia sub aliqua formalitate sit realis, & actus qui sub illa formalitate ei correspondet, realis non sit. Et licet ipsa ratio liberi possit etiam includere, aut exigere aliquem respectum rationis, v. g. ad indifferentiam iudicij, ad contingentiam obiecti, aut aliquid simile (quod modò non disputo, an solum sit respectus rationis) tamen hoc non tollit quod absolute, & per respectum ad perentiam liberam à qua egreditur, & ad obiectum quod tangit in ratione appetibilis, seu volibilis, sit aliquid reale, quia à reali potentia egreditur; & ex reali dominio; sicut etiam fides aliquid reale est absolute & simpliciter, licet includat aliquid rationis, scilicet obscuritatem, quæ est priuatio claritatis. Quapropter actus liber, vt liber, & determinatio illa, seu consensus voluntatis vt liberè determinans, aliquid reale est, immò quod libera sit, maiorem realitatem & actualitatem supponit in causa, quia non potest liberè actionem emittere, nisi potentia; quæ maius dominium habet, nec dominium habere nisi maiorem vniuersalitatem & actiuitatem habeat, hæc autem necessariò requirit maiorem perfectionem & entitatem. Quomodo ergo potest formaliter esse aliquid rationis ipsa ratio liberi in actu, si hæc, in quantum talis, postulat maiorem realitatem in causa? Postulat etiam, aut potest habere realem effectum, sicut videmus ex determinatione illa

libera voluntatis oriri in voluntate actus morales meritorios, vel demeritorios, oriri actus imperatos, tam in se, quàm in aliis potentiis, dirigi per prouidentiam & artem multos effectus, qui à libera determinatione vt libera dependent, quomodo ergo potest aliquid rationis esse id quod tam multos effectus reales habet? Non possumus autem melius colligere realitatem alicuius, quàm ex suis effectibus, & causis.

Contra secundam solutionem instatur, quia supposito quod illa determinatio libera voluntatis aliquid reale est, & sub dominio voluntatis, ab eaque causatum, impossibile est quod solum sit à Deo simul cum voluntate, & non sit prius à Deo, siquidem supponitur quod sit etiam causatum ab eo, & in hoc magna latere potest æquiuocatio, quia enim influxus causæ secundæ, & primæ simul, aut identicè ad effectum discurrunt, & in effectu terminantur, existimatur quod ipse partialis influxus causæ secundæ, non habet aliam priorem dependentiam à Deo vt causante illum. Et in hoc incidit falsitas & deceptio; Et enim causalitas illa, & partialis influxus creatæ voluntatis, licet in ordine ad effectum producendū simul cum influxu simultaneo Dei concurrat, tamen in egrediendo à sua causa etiam vt partialis est causam habet à qua egrediatur, & causa illa prioritatè habet super talem influxum, non simultatem tantum: causa enim, vt causa, prior debet esse effectui. Dicunt: causam quidem habet sed ipsam voluntatem creatam, cuius propria & indiuidua causalitas & partialis influxus est. Replio: Voluntas respectu illius sui partialis influxus causa est, sed non prima, sed creata, & inferior: ergo ita effluit & nascitur ab illa talis partialis influxus, quod etiam à priori, & superiori causa oritur, cui ista creata subordinatur; nec potest illi comparari solum, vt simul concausanti, & coefferenti, sed vt causanti etiam talem influxum voluntatis creatæ, quia nihil reale ponitur à quacumque causa in rerum natura, siue sit effectus siue actio, siue modus, siue res, quod non etiam effluat & deriuetur à causa prima vt à causante, quia omnia operatur consilio voluntatis suæ, & omnia in ipso constant, & sine ipso factū est nihil; vt Scriptura clamat; & cuius ratio conuincit, quia quæcūque realitas creata est dependens à Deo in fieri, & conseruari, nec potest esse nisi ipse voluerit, ita quod per suspensionem suæ causalitatis in nihilū redigi potest; sed ille partialis influxus ortus à voluntate creata, etiam vt talis influxus partialis, aliqua realitas creata est: ergo vt talis partialis influxus à causalitate diuina pendens est. Sed quidquid est dependens à causalitate alicuius, respicit illud sub prioritate causæ, & non sub simultate tantum coefficientis: ergo respectu diuinæ causalitatis, & omnipotentia, debet illa determinatio & partialis influxus voluntatis creatæ esse posterior, & respicere causalitatem Dei vt priorem in causando se. Quomodo ergo potest decretum Dei indifferens, & indeterminatum esse, & expectare determinationem voluntatis, vt causet de facto, & determinetur cum ipsa determinatio, & partialis influxus voluntatis à decreto, & causalitate Dei de facto, & in re causari debeat: ergo determinatè, & efficaciter, quia indeterminatè, & ineffaciter, nihil de facto causatur. Quare siue voluntas diuina, & causalitas moueat nostram voluntatem ponendo in ea aliquid physicum, siue non, de quo non possumus disputare in materia de Auxiliis diuinis, propter Sedis Apostolicæ prohibitionem, quidquid de hoc sit, tamen quod illa partialis determinatio, & influxus voluntatis

voluntatis creatæ, quæ reale aliquid est (siquidem realiter per illam operatur voluntas (si oritur, & causatur à voluntate, etiam debeat causari à prima causa Deo, & consequenter prius se debeat habere Deus in causando & determinando, quàm ab ipsa voluntate creatæ expectare determinationem, ut simul cum illa influat, ratio & discursus factus euidenter videtur convincere, aut subtrahitur aliquid creatum ab ipsa summa omnipotentia Dei, & ab vniuersali dependentia diuinæ causalitatis, quod esset error manifestus in fide; nec sufficit ad id ponere simultatem & coëfficiantiam diuini concursus, & causalitatis cum ipso influxu creato in effectum, hic enim esset manifestus error in scientia naturali, quia nihil causatur ab alio per simultatem, sed per prioritatem: nihil enim causatur, nisi ab aliqua causa, omnis autem causa est prior suo effectui, in quantum causa, non simul. Immo id quod simul cum alio influit, iam supponit illud esse cum quo influit: ergo non causat.

6 Et hinc deducitur quod dicimus de infallibilitate summa Dei, quæ exigit decretum ex natura sua efficax, & antecedenter ad nostrum consensum, & determinationem; nec sufficit infallibilitas extrinseca ratione præscientiæ, sed intrinseca, ratione causalitatis. Quod explicatur tum ex dictis, tum ex ipsa propria ratione causando Dei, quæ est summè immutabilis ex se, & sic summè infallibilis. Ex dictis quidem id deducitur, quia si illa determinatio & partialis influxus voluntatis debet originari & causari à Deo, multò vehementius & intimius quàm à voluntate creatæ, utpote cum à Deo causari debeat, ut à causa prima, nihil autem de facto, & in re causat, nisi efficax sit ad causandum, quia inefficax ut tale non causat: dicitur enim inefficax quod non respicit rem ut de facto faciendam: ergo si de facto causat, de facto est efficax. Et non potest esse efficax denominatione extrinseca desumpta à determinatione voluntatis, & ab ipso effectui: nam ista determinatio non potest supponi à decreto, sed ab ipso causari debet: ergo ante talem determinationem, & non ab ipsa, habet decretum efficaciam. Patet consequenter quia causa efficax esse debet dum causat, non postquam aliquid causatum est, quia causato effectui, efficacia ad nihil deseruit: ergo antequam sit effectus causatus, efficacia debet conuenire causæ: si ergo id quod decretum causat, est ipsa determinatio nostræ voluntatis: ergo non expectat ab ipsa efficaciam, sed potius illi tribuit, ut de facto sit: ergo antecedenter ad ipsam est causalitas in Deo influens de facto: ergo efficax, quia illud dicitur efficax, quod de facto causat.

7 Ex ipsa autem propria ratione causando Dei probatur debere illud decretum esse efficax ex sua natura, & non ex suppositione nostri consensus. Nam ex se illud decretum debet esse immutabile: ergo ex se infallibile: nam ubi est immutabilitas, non potest dari fallibilitas & defectus: deficere enim, & falsificari, seu fallibile esse, mutatio est. Anteced. prob. quia decretum diuinum non solum ratione præscientiæ qua dirigitur, sed etiam ratione causalitatis & dominij vniuersalissimi quod habet in omnia, habet summam immutabilitatem, siquidem habet summam actualitatem; est enim actus purus, summa autem actualitas caret omni potentialitate: ergo & omni mutabilitate, quia mutabilitas in potentialitate fundatur. Quomodo ergo possunt Authores oppositi solum attribuire infallibilitatem, & efficaciam di-

uinis decretis, & voluntati Dei ratione præscientiæ attingentis id quod nostra voluntas effectura est; cum etiam ratione sui, & in quantum operatiua est; sit ab intrinseco immutabilis in operando, & consequenter infallibilis, & efficax: nam si efficax non esset, infallibilis non esset ex natura sua, quia expectaret ex determinatione nostræ voluntatis efficaciam & determinationem, sine qua nunquam de facto operatur. Voluntas autem nostra non potest talem infallibilitatem & efficaciam præbere, sicut diuina voluntas debet habere, quia hæc est fundata in immutabilitate summa virtutis & actualitatis: illa verò est infallibilitas non in se habita, quia potius voluntas contingens est, sed solum præcisa à Deo: ergo malè explicant hanc infallibilitatem ratione præscientiæ tantum, & denominationis extrinsecæ ortæ ex ipso consensu & determinatione nostræ voluntatis.

Theologica principia & rationes in hac efficacia statuenda aperiuntur.

Antequam ad theologica fundamenta accedamus, lectorem iterum mouemus, non attingere nos in præsentem quidquam de ea controuersia diuinorum auxiliorum, de qua scribere fas non est, obistente Sedis Apostolicæ edicto, videlicet in quo consistat efficacia gratiæ & diuini auxilij, an in aliquo intrinseco, & physice impresso in voluntate, an in aliquo extrinseco. Solum de decretis diuinis agimus ex parte Dei. Et si quando aliquid de determinatione efficaci, & antecedenti nostræ voluntatis dicimus, non ideo est ut explicemus per hoc efficaciam auxiliorum, sed quia decreti diuini ratio, & efficacia sine ordine ad hunc effectum explicari non potest, quidquid sit, an in hoc consistat efficacia auxilij, vel non, explicabimus.

8 Ut ergo fundamenta hæc tradi possint, & difficultatis punctus perfecte attingi, hoc præ oculis habendum est, quod in voluntatem nostram solum duplici via, & quasi per duplicem portam influi potest, ut ipsa erga aliquod obiectum afficiatur, aut de vno ad aliud conuertatur.

Primo quidem per manifestationem & propositionem obiecti quod facit intellectus, manifestando illud, & sic obiectum allicit sua conuenientia, & bonitate, aut retrahit sua deformitate, & disconuenientia.

Secundo, post obiectum sic propositum ab intellectu (qui licet intra nos sit, extrinsecus tamen ipsi voluntati est) restat quod voluntas se moueat, & duci velit ad tale obiectum, quod liberè ipsa facit, quia nullum obiectum (extra Deum clarè visum) tantæ bonitatis & perfectionis est, quod adæquatè satiet totam vniuersalitatem voluntatis. Et ideo ipsa interiùs pro sua libertate se mouet erga obiectum propositum. In hoc autem interiori sinu voluntatis, & libertatis officina, nulla creata causa influere potest, aut immutare ipsam ad volendum, quia in hoc superior est voluntas propter suam indifferentiam & libertatem omni causa creata, in tantum quod hac ratione nullus intellectus potest naturali lumine penetrare id quod est intra cor liberum, quia illud nullam connexionem habet per se cum causis naturalibus totius vniuersi; non pertinet autem ad naturale lumen, nisi ea quæ ad naturam vniuersi, & ad causas naturales pertinent, inuestigare. Omnes ergo creaturæ solum ad voluntatis portam, & vestibulum, id est, ad fores intellectus excubare possunt, ut ipsa sollicitent, intus ingredi non possunt, nisi ipsa pef-

efficacis, definiuit dari in nobis excitantem gratiam, eamque abicere nos posse. Qua definitione posita sequebatur necessario posse nos dissentiri gratiæ efficaci, quia hæc habet pro fundamento excitantem gratiam, & illuminationem intellectus, quâ si possumus abicere, possumus dissentiri efficaciæ gratiæ. Et ad instantiam contra hoc, Resp. quod Concilium dū definit posse nos abicere excitantem gratiā, cōcedit tacite, quod possumus resistere adiuuanti, quia cū adiuuans necessario supponat excitantē, illā abiectā, hæc non operatur. Definiendo ergo quod possumus abicere excitantē, consequens erat quod possumus dissentiri efficaci, quod & dixit *canone 4.* sed illud posse est potentia antecedenti, & quantum est ex meritis obiecti propositi, non potentia consequenti, & quantum est ex modo immutabilitatis, & infallibilitatis diuinæ. Et ita manet expedita libertas ad vtrumque ex parte potentiæ, nec ligatur facultas per determinationem Dei, sed aperitur cor, & soluitur suspensio seu indeterminatio. Et hoc aliquis effectus Dei est, non facultatis alligatio. Optime etiam Concilium noluit aliquid innouari circa decretum suum, quia doctrina ista de indifferentia excitationis, de potentia reiiciendi illam, & dissentendi si velit potentia antecedenti, & in sensu diuiso, omni Dei auxilio, etiam specialissimo, communis est.

19 Ad alias ponderationes Concilij, quod Deus non deest, nisi homines ei defuerint, dicimus propositionem esse verissimam, & verificari tum de gratia habituali sanctificante, tū de actuali auxiliante. De habituali quidem verificatur sic, quod nisi homo peccauerit, ita quod peccatum præcedat, Deus non deest, quia per peccatum excluditur gratia, & ante peccatum Deus illam non tollit ab homine. Et in hoc sensu cōcedimus quod cuiusque gratiæ habituali potest homo deesse in hac vita, quia contra quācumque potest homo peccare. De auxiliante autem gratia sic intelligitur, quod Deus de se paratus est semper eam dare, & perficere opus suum quod incēpit, nisi per nos steterit, & nisi prius saltem in genere causæ materialis recedamus, quia licet Deus in genere causæ efficientis suspendat auxiliū, & permittat peccatum, tamē ex parte nostra in genere causæ materialis semper vel præcedit defectus culpæ, vel inconsiderationis, per quem desumus gratiæ Dei. Quod si nō desumus, ex gratia Dei est, cōseruante nos, & faciente ne deficiamus eius gratiæ. Si autem deficiamus, ex nobis est; non autem requiritur, quod prius tempore vel prioritate efficientiæ nos deseramus Deū, ut ipse desit nobis, neque hoc dixit Concil. sed sufficit quod concomitater, & in aliquo genere causæ prius naturalis, scilicet in genere causæ materialis, cū tamen Deus prius deserat in genere causæ permittentis peccatum, quæ reducitur ad causam efficientem; semper tamen non deest, nisi homo ei defuerit, vel concomitanter, vel antecedenter. Sed de hoc amplius dicitur *inf.* Cū autē inferitur: Ergo potest homo deesse cuilibet auxilio, etiam efficaci; distinguo, potentia antecedenti, & in sensu diuiso, concedo; potentia consequenti, & in sensu composito, nego. Et potest seruare mandata sine auxilio efficaci, distinguo, quantum ad virtutem & potestatem seruandi, transeat, quantum ad applicationem potentiæ ad seruandum, nego, applicatio enim datur per auxilium efficax, posse per sufficiens.

Ex Scriptura, & Patribus.

20 Secundō, arguitur ex Scriptura in omnibus illis locis, vbi iubemur cooperari gratiæ, non deesse illi, non in vacuum illam accipere. Dicitur enim, ad Corinth. 6. *Hortamur vos ne in vacuum gratiam Dei recipiatis*, vbi Apostolus loquitur de gratia, quæ potest euacuari, & frustrari à nobis: qui enim admonet, ne

Ioan. à S. Thoma in 1. part. D. Thoma.

in vacuum accipiat, supponit ita posse accipi, sed loquitur de gratia efficaci, ut patet per August. *l. de gratia & libero arbitrio c. 5.* vbi agens de efficacissima vocatione, qua Paulus Apostolus de cælo vocatus est, hoc etiam inducit testimonium: ergo gratia efficax potest in vacuum recipi à nobis, & sic ut non frustratur, à nostravoluntate dependet. Idem significatur ad Hebr. 13. *Contemplantur ne quis desit gratia Dei.* Et Isaia 5. *Quid ultra debui facere vineæ meæ, & non feci ei? & expectaui ut faceret vinas & fecit labruscās.* Vbi dicendo quid ultra debui facere, etiam auxilium efficax à se datum significat. Nam si hoc nō dū dederat, aliquid restabat ei ultra facere tamen hoc non obstantē non fecit vinas, ad quod datum fuerat tale auxilium, ergo aliquando auxilium efficax caret effectu. Deinde est in hac parte celebris ille locus de Tyriis, & Sidoniis Matth. vbi conqueritur Christus de Iudæis, quod videndo eius signa non crediderunt, quæ tamen si viderent Tyrij, & Sidonij conuerterentur: ergo habuerunt auxilium efficax Iudæi, quod si Tyrij haberent, conuerterentur, & cum illo Iudæi non sunt de facto conuersi. Conf. patet, quia si Iudæi non habuerunt auxilium efficax, positis illis signis, & tamen Tyrij haberent siquidem conuerterentur de facto, aliquid ergo daretur Tyriis ut conuerterentur, quod non est datum Iudæis: ergo non erat ratio querelæ, cū posset esse tam iusta excusatio in Iudæis, dicendo quod si Tyrij conuerterentur, idē esset, quia maius beneficiū acciperent præ ipsis. Tādē inducuntur testimonia quæ hominem docent esse liberi arbitrij, & relictū in manu consilij sui, ut dicitur Eccles. 15. & aliis locis. Si autem efficaciam talem haberet voluntas Dei antecedenter ad nostrum consensum, non relinqueretur in manu consilij sui, sicut si quis apprehenderet manum alterius ita efficaciter quod non posset ei resistere, non diceretur relinqui alter in manu sua.

21 Ex Patribus inducuntur plures auctoritates, quæ probant hominem non ita agi à Deo, ut tollat liberum arbitrium, nec amplius prob. S. Clemens Papa epist. 3. *Si aliquid esset quod audentes fidem, vel ad credendum, vel ad non credendum determinaret extra arbitrium eorum, meritum & libertatem tolli.* S. Iræneus l. 4. contra hæreses c. 76. *Neque lumen subiiciet sibi quemquam, neque Deus cogit eum, qui continere nolit eius artem.* Et lib. 5. c. 1. *Deum reducere homines ad se, non vi, sed suadela.* S. Cyrillus Alexandr. lib. 8. in Iulianum sub finem, postquam dixit hominem consilio, & non coactē viuere super terram, subdit: *Itaque est ineffabili quadam & diuina virtute, & efficacia vsus mutasset singulorum mentē ad bene agendum, & indidisset postea bonum, à quo agerrimē discedere posset, & non sponte, ultra non esset fructus mentis, neque res digna laude, sed necessitatis, & cupiditatis, non voluntariæ.* S. Chrys. hom. 11. in Ioannem: *Corporis natura, quocumque eam opifex ducere velit, eo sequitur, neque resistit, anima autem sui iuris vim in se habet operandi, neque vlla in re Deo nisi velit obtemperat.* Et super Psal. 113. multa tractat ad idē, docēs, eum qui non trahitur ad Christū, neque illuminatur, idē peccare quia seipsum non præbet dignum ut eam suscipiat illuminationem. Subdit autem: *Neque enim virtus, nec salus nostra cogitur: nam etsi maxima pars, atque adeo totum ferē eius sit, exiguum quid tamen nobis reliquit, ut non sit à persona, remota causa coronæ.* S. Hier. ep. 106. ad Damasum Papā: *Dedit eis liberū arbitriū, dedit mentis propria libertatem, & ut vinceret unusquisque non ex imperio Dei, sed obsequio suo, id est, non ex necessitate, sed ex voluntate, ut virtus haberet locum.* Et ep. 149. ad Hedibiam q. 10. dicit, non saluare Deū absq; iudicij veritate, sed causis præcedentibus, quia alij nō susceperūt filium Dei, alij autē recipere sua sponte veluerunt. S. Prosp. resp. 6. ad capita Gallorū:

S

Prædestina

Prædestinationem Dei, siue ad bonum, siue ad malum in hominibus operari ineptissime dicitur, ut ad utrumque homines quædam necessitas videatur impellere. S. Damascenus lib. 2. fidei orthodoxa c. 30. Deus præcognoscit ea quæ in nobis sunt, sed non prædeterminat, non enim compellit ad malitiam, neque vim infert virtuti. Et S. Th. 1. p. q. 23. a. 1. ad 1. & 3. contra Gentil. c. 90. exponit S. Damascenum de prædeterminatione tollente libertatē, & necessitante: sed constat quod nihil potest magis necessitare, quàm illa efficacia diuini decreti antecedens nostrum consensum, siquidem illa non est in nostra potestate, & non potest reiici semel posita: ergo illam negat Damasc. Denique S. Anselmus lib. de Concordia, c. 1. docet necessitatem antecedentem tollere libertatem, non sequentem. Et subdit, quod *Voluntas cum vult, non potest non velle, sed eam velle necesse est, sed has necessitates facit libertas, quæ prius quam sint, eas canere potest*. Sentit ergo necessitatem consequentem solum formari ex suppositione ipsiusmet actus voluntatis, non ex aliquo alio antecedente. Istæ sunt potiores auctoritates, quibus plures aliæ similes induci possent, quæ tamen ex istorum solutione explanationem habent.

- 22 Ex S. Aug. qui in hac parte præcipuus est, aliquæ etiam auctoritates inducuntur, quibus nituntur ostendere S. Augustinum sentire, quod ista efficacia antecedens nostram voluntatem, non datur, sed solum ex parte præuenientis gratiæ ponit gratiam excitatē, & quod Deus agit suasionibus, & cōgrua vocatione in nostram voluntatem. Ad quod præcipue solent adduci tria loca Aug. quæ *supra* disp. 3. a. 2. attulimus & soluimus, videlicet ex lib. 1. ad Simplicianum, q. 2. ex lib. de spiritu & littera c. 34. & ex lib. 2. de peccatorum meritis & remissione c. 19. Nunc addimus id quod dicit lib. 83. quæst. q. 69. ubi inquit: *Quia nec velle quidquam potest, nisi admonitus, & vocatus, efficitur ut & ipsum velle Deus operetur in nobis*. Ex hoc efficitur, quod Deus operetur & velle, quia non nisi vocatus quis vult: ergo non ex alia efficacia sumitur efficacia diuinæ voluntatis, quam ex vocatione, seu ex propositione & illuminatione obiecti. De qua ibidem subdit, *Vocatio ergo ante meritum voluntatem operatur, propterea et si quisquam sibi tribuit, quod venit vocatus, non potest sibi tribuere quod vocatus sit*. Eodem modo loquitur Aug. aliis locis, significans solam vocationem, seu obiecti manifestationem præuenire voluntatem nostram, sicut sæpe dicit in q. 2. citata libri 1. ad Simplicianum, præsertim illis verbis: *Quamvis multi vocati, tamen quia non omnes uno modo affecti sunt, illi soli sequuntur vocationem, qui ei capiendæ reperiuntur idonei*. Et iterum: *Qui si vellet misereri, posset ita vocare, quomodo illis aptum esset, ut & mouerentur, & intelligerent, & sequerentur*. Et loquens de Esaï, iterum dicit, quod *si voluisset & cucurrisset, Dei adiutorio peruenisset, qui ei etiam velle & credere, vocando, præstaret, &c.* Quibus locis manifestè sentit Aug. vocatione sua Deum præuenire, & mouere voluntatem nostram, non alia motione, licet postea cooperetur voluntati nostræ. Quod verò illa vocatio efficax reddatur, dependere à congruitate qua affectum est cor nostrum vocationi illi, vel non est affectum. Et eodem modo loquitur S. Aug. lib. de Ecclesiasticis dogmatibus c. 21. *Manet, inquit, arbitrii libertas, id est, rationalis voluntas, sed admonente prius Deo, & inuitante ad salutem, ut vel eligat, vel sequatur*. Et ad hoc sunt multa alia similia loca quibus Aug. docet, Deum nos agere vocatione sua, alta atque secreta, & ideo totum esse miserentis Dei, non volentis hominis, quia *nisi eius vocatione non volumus*. Si ergo Aug. perpetuò reducit motionem gratiæ Dei ad vocationem, qua intellectus excitatur, & mouet iuxta propositionem obiecti, quomodo ad aliud genus efficientiæ vel efficacitæ reducendum est: præsertim cum

codem modo Aug. affirmet, quod posita hac vocatione Dei, nostræ voluntatis est assentire, vel dissentire, & sic efficacem eam reddere; ut in isto loco ultimo dicit post illa verba; *Ut autem acquiescamus salutiferæ inspirationi, nostra potestatis est*. Et lib. de spiritu & littera c. 34. *sed consentire vel dissentire vocationi, propria voluntatis est*. Nusquam autem meminit Aug. illius efficacitæ Dei sic præcedentis, & prædeterminantis consensum nostrum. Denique Aug. in multis locis docet dimitti homines libero arbitrio suo, ut eligat quisque quod voluerit, & secundum potestatem & voluntatem suam agere, supponendo tamen diuinum auxilium, & quod gratia sola non est tota, & adæquata ratio nostræ conuersionis, sed cum libero arbitrio, ut lib. de gratia & libero arbitrio c. 5. & lib. 2. de peccatorum meritis & remissione, c. 5. & aliis multis locis. Quæ omnia solum probant Aug. non negare in nobis liberum arbitrium, nec docere quod ita agatur à Deo, ut non etiam agat seipsum, quod verissimum atque certissimum est. Alia loca in quibus Aug. docet potuisse hominem perseverare si voluisset ex solo auxilio sufficienti, & sic non requiri ex vi subordinationis causæ secundæ à prima aliam efficaciam, *infra*, soluendo hoc argumentum, an efficacia ista requiratur ad posse, dicemus, sicut etiam adducuntur alia, quæ contra prædefinitionem Dei loqui videntur. *inf. disp. 7.*

Ad argumentū ex auctoritatibus Scripturæ: Resp. 23 quod quando dicunt, vel hortantur homines, ne desint gratiæ Dei, ne in vacuum recipiant, ne extinguant Spiritum, &c. etiam admittendo in toto rigore, & strictissimo sensu quod loquantur de gratia efficaci, ut efficax est, nō de habituali solum, nec de sufficienti tantum (quod posset aliquis dicere) nullo modo cogunt, quia cum dicitur, *Hortamur vos ne in vacuum gratiam Dei recipiatis*, subintelligitur, ne in vacuum recipiatis ex ipsa gratia, non ex vobis. Et cum dicitur contemplantes ne quis desit gratiæ Dei, intelligitur ne quis desit gratiæ, nō ex seipso, sed ex gratia: gratia enim dat alicui quod nō desit ipsi gratiæ, iuxta illud toties repetitum ab Aug. *da quod iubes, & iube quod vis*. Itaque cum nō deesse gratiæ, & nō recipere in vacuū gratiam, sit obedire gratiæ, & subiici Deo, quid mirum quod ipsum non deesse gratiæ sit ex gratia, sicut obedire fidei ex gratia est, licet etiā sit ex nobis, quia quod sit ex gratia non tollit quod sit ex nobis ut gratia præueniens: hoc enim ipsum dat gratia, quæ ad hoc datur, ut voluntas se agat, non ut nihil agat. Certè idē est hortari, & monere nos Deum ut conuertamur ad ipsum, ac monere, ut gratiam suam non in vacuū recipiamus, nec illi aliquis desit; hoc enim ipso quod vacuum non habet gratiā, conuertitur. Sed Deus ita hortatur ut conuertamur ad ipsum, quod non possumus conuerti nisi ex gratia, ideoque ut optimè aduertit Concil. Trid. sess. 6. c. 5. *Petimus à Deo ut nos conuertat dicendo. Conuerte nos Domine ad te, in quo nos Dei gratia præueniri confitemur, sicut cum dicitur, Conuertimini ad me, libertatis nostræ admonemur*. Ergo sicut stat bene quod Deus hortetur ut conuertamur ad ipsum efficaciter, quod tamen non nisi ex gratia præuenienti facimus, ita stat bene quod hortetur nos, ne gratiam in vacuum recipiamus, cum tamen ipsum recipere non in vacuū, ex gratia sit. Et sic D. Th. super c. 12. ad Hebr. lect. 3. exponens illud verbum. *Contemplantes ne quis desit gratiæ Dei*, sic, inquit: *Dicendum quod hoc ipsum quod aliquis non ponit obstaculum, ex gratia procedit*. Et *inf. Hoc autem donum gratia non est gratiæ faciens: quod ergo à quibusdam remouetur istud obstaculum, hoc est ex misericordia Dei*. Ergo ita hortamur non in vacuum recipere, & non deesse gratiæ, quod hoc ipsum ex gratia est, sicut hortamur conuerti, & hoc ipsum ex gratia est. Cum verò infertur: Ergo possumus

possumus deesse ipsi gratiæ efficaci, distinguo potentia antecedente, & in sensu diuiso, transeat; consequenti, & in sensu composito, nego.

- 24 Ad illud testimonium Isai. 5. *Quid ultra debui facere vinea mea, & non feci?* &c. Resp. quod loquitur de omnibus pertinentibus ad auxilium sufficiens, & ad posse facere, nihil enim Deus subtrahit de necessariis; non tamen dat omnia etiam ultra necessaria, & indebita; nec omne gratuitum beneficium quod posset dare: sufficit dedisse omnia necessaria ex parte sufficientis auxilij. Quod autem dicitur, quia potuit ultra facere dando auxilium, distinguo, potuit ultra cum debito, & tãquam necessariò requisitum, nego, sine debito, & tanquam gratuitam applicationem, transeat. Non enim est dubium quod multa alia posset dare Deus illi vineæ, quæ non dedit. Dominus autem non dicit. *Quid ultra potui facere, & non feci*, sed quid ultra debui. Et ita tota solutio in illo verbo *debui* fundatur, quæ importat aliquid de necessariis, & requisitis, in quibus illi Deus non defuit. Et in hoc fundatur etiam tota ratio diuinæ querelæ, quia dedit omnia necessaria, & sufficientia, & nihil est factum; querela enim non fundatur nisi in posse, & teneri, & non facere. Si autem Deus etiam daret ipsam applicationem, & ipsum facere de facto, nunquam esset locus querelæ, quia semper adimpleretur. Et retorqueo argumentum: nam etiamsi Deus solum det motionem moralem, & indifferentem concursum & decretum, tamen bene scit quod si isti vineæ daret viuaciorem propositionem obiecti, & plura alia adminicula, & vocationem fortiolem, vel alio modo propositam, sicut scit congruere, sine dubio bonos fructus faceret: ergo potuit aliquid ultra facere, & non fecit ei: sed tamen quia dedit, quod sufficiens erat, rectè conqueritur. Ergo similiter, licet potuerit dare efficaciam de facto, & non dedit, non est quod cõqueratur, quia hoc non debuit, cum non sit de necessariis, & sufficientibus, ut possit, sed solum applicatio ad operandum de facto, quod Deus non teneretur semper dare, præsertim si aliquis ponat impedimẽta, & obstacula gratiæ, licet enim Deus possit illa tollere suâ infinitâ potentiâ, tamen non semper teneretur id, nec ordinarius rerum cursus petit ut id faciat, quia in rebus contingentibus & defectibilibus pertinet ad vniuersalem prouisorum, etiam aliquando defectus permittere, & non semper eodem tenore procedere, & ad idẽ mouere, licet non semper culpa præcesserit, sed solum concomitanter sit, & aliquo ordine naturæ præcedat. De quo amplius dicitur *inf.*

- 25 Ad illud testimoniũ de Tyriis & Sidoniis diximus latè *praced. tomo disp. 20. a. 5. ibi* videri potest. Et de illa ratione querelæ quam habet Deus, etiamsi non det auxilium efficax, iterum *infra* redibit sermo. Ad illa testimonia probantia hominem relictum esse in manu consilij sui, & esse liberi arbitrij. Resp. probare quidem liberum arbitrium, sed non excludere gratiam erga bonũ a quo penderet in sui præuentione, & cooperatione liberum arbitrium: Sicut enim dicitur hominem relictũ esse in manu consilij tui, ita dicitur esse in manu Dei, Prou. 21. *Sicut diuisiones aquarum, ita cor Regis in manu Dei.* Et Psal. 72. *Tenuisti manum dexteram meam, & in voluntate tua deduxisti me;* & Ierem. 18. *Sicut lutum in manu figuli, sic vos in manu mea.* Non autem sic sumus in manu Dei, sicut manus alicuius apprehensa ab alio fortiori, & violẽter trahente, sed sicut in manu dantis illi manui virtutem, & operationem, & omnia, atque adeo & ipsam libertatem, & modum operandi liberum.

- 26 Ad auctoritates ex Patribus, Resp. non adduci ad rem, quia solum ostendunt nos habere liberum arbitrium, nec à Deo illud cogi, quod omninò nos faremur, quia cum D. Th. sæpẽ citato dicimus efficaciam

Ioan. à S. Thoma in 1. part. D. Thome.

diuinam non solum dare, & causare in nobis ipsum velle & ipsum operari, sed etiam ipsum modum operandi, scilicet liberè. Vnde istæ auctoritates quas opposuit auctores afferunt, contra Calvinum directè tendunt, & contra illam motionem sine excitante gratia, quæ ponit Calvinus, quæ impellit necessitudo, non iuxta excitationis exigentiam aperiendo cor, & soluendo indeterminationem eius. Erratum est ergo, iaciendo sagittas istas quæ Calvinum feriunt, in sententiam D. Tho. quæ libertatem fatetur, & maximè defendit dum plenè Deo subicit. Itaque S. Clemens Papa rectè dicit nõ esse aliquid quod determinet extra arbitrium, id est, tollendo libertatem, non autem negat determinationem intra liberũ arbitrium ab eius auctore, & radice quæ ei præbeat operationem iuxta modum suum, seruando eius libertatem. S. Irenæus dicit Deum non cogere, neque homines vi ad se reducere, quod est non lædere eorum libertatẽ. S. Cyrillus expressè loquitur de efficacia sic mutãte mentem, quod ægerrimè, & non sponte possit discedere à bono, quod est tollere spontaneum atque adeo & voluntarium. Vnde & subdit, quod *tunc erit fructus necessitatis, & cupiditatis non voluntaria.* S. Chrysost. solum ponit differentiam inter nostram animam, & alia corporalia, quod illa sui iuris est, neque obtemperat Deo, nisi velit, id est, nisi voluntariè, & liberè, quod aliæ res nõ habet. Quæ doctrina solum probat nos esse liberi arbitrij, nec ita trahit, sicut alię res merè naturales. Hoc autem quis negat? *Infra disp. 7. tractando de prædefinitionibus diuinis, iterũ S. Chrys. explicabitur.* In illo autem loco ex Psal. 115. nihil amplius dicit Chrysost. quàm quod aliqui illuminationem non recipiunt, quia illi seipfos dignos non præbent, quod verissimum est, quia ex culpa eorum nascitur quod carent Dei illuminatione, & beneficio gratiæ siue sit culpa concomitans, siue antecedens. Et cum dicit, quod totum fere eius est, exiguum tamen nobis reliquit, illud exiguum intelligendum est nobis relictum esse cum dependẽtia, & deriuatione ab ipso Deo, quia nos in operando sic sumus dependentes à Deo, & ab ipso causatur, non expectatur illud exiguum, iuxta illud Hieronymi. *Et hoc quod est meum, sine Dei auxilio non est meum.* S. Hieronymus in *epist. ad Damasum* seipsum explicat, quod dicit nos viuere, non ex imperio Dei, sed obsequio nostro, id est, inquit ipse, *non ex necessitate, sed ex voluntate;* solum ergo vult dicere quod liberè operamur, non necessariò. In alio autem loco docet Deũ non saluare, nisi rationabiliter, & causis præcedentibus, quod est dicere quod saluat nos, & dat gloriam in executione intuitu meritõrum, & quia alij recipiunt sponte sua Filium Dei, alij non: cum dicit autem sponte sua, non excludit auxilium, & gratiam Dei, qua fit in nobis hoc spontaneum. S. Prosper dicit homines necessitate nõ impelli ex prædestinatione Dei. Hoc optimè dicit & catholicè, quia non tollitur liberum arbitrium, & ita hoc contra Calvinum allegari potest, non contra nos. S. Damascenus loquitur de prædeterminatione necessitate, ut exponit S. Th. 1. p. q. 23. a. 1. ad 1. & nos ostendimus *tomo præced. disp. 20. a. 5.* & iterum agemus *inf. disp. 7.* S. Anselmus docet necessitatem antecedentẽ tollere libertatem, non autem suppositionẽ quamlibet antecedentem. Illa autem est necessitas antecedens, quæ influit necessitatem, & sic libertatẽ impedit, aut tollit. Quæ verò influit libertatẽ, & dat modum operandi liberum, licet sit antecedens suppositio, non tamen est antecedens necessitas, sed solum consequens, quia solum potest fieri consequẽtia necessaria ex suppositione illius decreti diuini, & modi operandi efficaciam eius, quod non coniungeretur actus oppositus cum tali decreto, non tamen quod ex influxu necessitatis in ipsam operationem, & modũ

S 2 operandi

operandi creatæ voluntatis, tollendo scilicet indifferentiam eius, sequatur illa necessitas. Quod si illa suppositio antecedens non influit necessitatem in operationem voluntatis, sed potius est causa prima, & radix libertatis eius, quantumcumque fiant consequentiæ necessariæ inter talem suppositionem, & actum consecutum, nihil læditur libertas. De quo satis diximus *disp. 20. a. 5. & 6. in tomo preced.* Quando autem subdit Anselmus quod has necessitates consequentes facit ipsa libertas, sic ex suppositione ipsius actus libertatis debet fieri sensus compositus, non ex alio principio extrinseco, Resp. quod perinde est fieri istas consequentias ex suppositione actus, vel ex principio, quod licet in se, & entitatiue & formaliter sit extrinsecum, causaliter tamen, & radicaliter est intrinsecum, quia est causa, & radix totius operationis, & modi operandi voluntatis creatæ, & intra voluntatem operatur, & quidquid in operatione libera est, ab ea deriuatur. Tale principium extrinsecum eminenter, & causaliter est ipsemet actus liber; & sic idem est ex suppositione ipsius actus procedere, atque ex suppositione auxiliij, vel decreti Dei, quia hoc eminenter, & causaliter est totus ipse actus liber, etiam ut liber, quia ab eo originatur, etiam ut liber est.

27 Ad authoritates Aug. respondimus abundè *sup. disp. 3. art. 3.* ubi præcipua loca Aug. in contrarium soluimus, & adhuc agitur *inf. disp. 7.* tractando de prædefinit. onibus diuinis. In summa dicimus probare illa loca, quod Aug. tradiderit auxilium excitans, & id quod in vocatione ex parte excitationis, & illuminationis se tenet, quod nemo negat, nisi qui Calvinum sustinuerit, qui negavit auxilium excitans. Non tamen negavit Aug. vocationem effectricem bonæ voluntatis, ut loquitur *lib. 1. ad Simplicianum q. 2.* nec negavit præter istas excitationes, & suasiones requiri subministrationem spiritus, quo Deus operetur ipsam bonam voluntatem, ut satis superque probauimus *suprà.* Et August. ipse *lib. de corrept. & gratia cap. 12.* expressè docet requiri præter auxilium sufficiens sine quo voluntas non potest operari, quod non relinquatur voluntas sibi ipsi, quia sic deficeret, sed quod Deus operetur ut velit, & sic quod subuentum est infirmitati voluntatis ut indeclinabiliter, & inseparabiliter ageretur. Quod certè sustineri non potest si intelligimus Augustinum solum posuisse excitationem quandam indifferentem, quam nos consensu nostro à Deo præuiso facimus determinatam, & efficacem. Hæc enim excitatio, & quodcumque indifferens auxiliū tale est, quod cum illo relinquitur homini voluntas sua ut maneat in tali adiutorio si velit, nec Deus ulterius operatur, ut velit posito hoc auxilio. Dicit autem Aug. quod si sic relinqueretur illis voluntas sua ut in adiutorio Dei sine quo perseverare non possent (quod est auxilium sufficiens) manerent si vellent, nec Deus in eis operaretur ut vellent, inter tot & tantas tentationes, voluntas ipsa infirmitate sua succumberet: subuentum est ergo infirmitati voluntatis humanæ, ut diuina gratia indeclinabiliter, & inseparabiliter ageretur, & ideo quamvis infirma, non deficeret. Ergo sentit manifestè præter excitationem indifferentem, & auxilium sufficiens, quod de se indifferens est ad operari de facto, vel non, aliud datur quo indefectibiliter agitur. Hoc autem si non sit indefectibile ex natura sua, & prout à Deo descendit, sed ex præuiso consensu, sufficeret illud primum auxilium sufficiens cum tali præuisione. Impertinenter ergo superadderet Aug. hoc secundum, quo indefectibiliter ageretur voluntas, si illud primum sufficit stante præuisione consensus, & hoc secundum non agit infallibiliter, nisi tali præuisione supposita.

28 Quare ad omnia loca Aug. quæ solum faciunt mentionem vocationis, & illa mediante Deus dicitur agere voluntatem nostram, Resp. vnico verbo, quod loquitur de vocatione, non prout sistit in excitatione intellectus, & propositione obiecti, sed habet adiunctam efficientiam intra voluntatem, & gratiam adiuuantem præuenientem; sic enim vocauit illam Aug. effectricem bonæ voluntatis, ut *suprà* citauimus, & quæ non solum operatur veras reuelationes, sed etiam bonas voluntates, ut dicit *lib. de gratia Christi c. 24.* Si autem operatur bonas voluntates solum mediante motione morali, & propositione obiecti, relinquendo voluntati ut per illam se determinet, sufficeret gratiæ veras reuelationes operari, non autem ultra hoc bonas facere voluntates. Hæc est ergo vocatio & excitatio de qua loquitur Aug. & de qua intelligendus est in aliis locis, ubi licet non expresserit id quod ex parte efficientiæ interioris in voluntate se tenet, id tamè supponit, ut ex his locis adductis patet. Et cum in *lib. 1. ad Simplicianum* congruitatem gratiæ videretur sumere ex contemperatione auxiliij cum nostro affectu, & quia diuersimodè aliqui affecti sunt, ideo id quod vnum mouet, alium non mouet, iam *suprà disp. 3. a. 2.* respondimus, quod ille affectus cui attemperatur auxilium, est affectus à Deo causatus per subministrationem spiritus, non ex nobis cum sola gratia excitante, aut auxilio indifferenti adiunctus. Quod ibi latius videri potest.

29 Cum autem Aug. dicit non esse solam gratiam, id quo operamur, virilissimū est, quia gratia non excludit liberum arbitrium, sed perficit, & ita non est sola, est tamen ex ipsa quidquid liberum arbitrium etiam partialiter habet, quia hoc parziale etiam à Deo est, cum aliquid creatum sit, & ipsum meum sine Dei auxilio non est meum.

Aliunde posset ex Aug. obiici, quia aliquando videtur inter duos æqualiter à Deo præuentos, aut tentatos, ad solum arbitrium nostrum referre differentiam quod vnus bene operetur, alius non, quod stare non potest, si ipse etiam partialis influxus nostræ voluntatis, & consensus ex diuersitate gratiæ causatur. De præuentis æqualiter loquitur in *lib. de prædestinatione & gratia c. 15.* (licet hic liber non sit certum quod sit Aug.) ubi parificat quantum ad omnia Pharaonem, & Nabuchodonosor in natura, in dignitate, in pœna qua flagellari sunt à Deo, in causa, quia vterque populum Dei captiuum tenebat. Et tamen fines eorum fuerunt diuersi, quia vnus, inquit, *manum Dei sentiens, in recordatione propria iniquitatis ingemuit; alter libero contra Dei misericordiosissimam veritatem pugnavit arbitrio.* Sed hic locus, etiam dato quod Augustini sit, nihil concludit, quia ille manum Dei sentiens & ingemiscens, hoc ex auxilio Dei fecit, quia, ut ibi subdit Aug. *illi ut mutaretur adfuit diuinum presidium, alteri ut induraretur, defuit.* In eo autem auxilio non solum includitur excitatio, & propositio obiecti, & auxilium indifferens, sed etiam determinata efficacia ut voluntas creata consentiat, hoc enim ibi non negat Aug. & aliis locis, ut vidimus, affirmat. De tentatis æqualiter ponit exemplum 12. de *Cinit. cap. 6.* de duobus æquali tentatione visæ mulieris pulsatis, cum æqualiter essent affecti animo & corpore, & æquali suggestionem Diaboli afflati, tamen vnus vult, alter non vult à castitate deficere. *Vnde, inquit Aug. nisi propria voluntate? ubi eadem fuerat in utroque corporis, & anime affectio, amborum oculis pariter visa est eadem pulchritudo, ambobus pariter institit occulta tentatio.* Cæterum intentio Aug. in illo loco solum est ostendere, quod consensus in tentationem oritur à voluntate propria ut deficiente, & non solum ex eo quod natura est, quia ibi loquitur expressè de

de origine mali, & peccati unde sit, cum ipsa natura sit bona, & dicit oriri ex propria voluntate, ut ex nihilo facta est, seu ut defectibilis est. Resistentia autem contra illam tentationem, licet propria voluntate fiat, tamen quod ex illa oriatur, & non ex Deo, ut ex prima causa determinante, & mouente, ibi non dicit Aug. sed supponit ut certum ex aliis multis locis quæ abundè à nobis allata sunt *suprà*, & *disp. 3.*

30 Alius locus est Cyrilli Alexandrini *lib. 11. in Ioannem c. 21. circa finem*, ubi dicit, *Iudam aequalem gratiam cum aliis Apostolis sortitum esse, seu æquale auxilium.* Et tamen constat Iudam cecidisse, alios stetit: ergo efficax auxilium frustrabile est nostra voluntate; si enim æquale auxilium cum aliis recepit, utique, & hoc recepit. Sed Cyrillus explicat mentem suam, & difficultatem hanc his verbis: *Sin autem non minus quam ceteri diuina gratia regebatur, sed suo ipsius iudicio in profundum perditionis delapsus sit, quomodo etiam non seruauit eum Christus, qui suum patrociniū ei præstitit, qui quantum ad ferendam opem illi attinuerit, seruasset hominem, nisi ille ultro in perditionem insilisset? Gratia igitur in aliis effulset, seruauitque omnes, qui cooperantem ei voluntatem tradiderunt.* Loquitur ergo Cyrillus de æquali gratia, quantum ad dignitatem Apostolatus, & quoad sufficiens auxilium, non quoad efficax; hæc enim gratia in aliis effulset, qui ei cooperantem voluntatem tradiderunt. Non tradiderunt autem nisi ex ipsa gratia, quæ hoc ipsum in eis effecit; ut traderent voluntatem. Id enim esse distinctam gratiam seu beneficium à suasionem, & excitationem, & à sufficiente auxilio expressissimè docet ipse Cyrillus in *lib. de Adoratione in spiritu circa medium*, ubi sic ait: *Iudicium autem tibi sit valde manifestum, dum non solis verbis nos stimulat, & adhortationibus mentis inmissis, ut discedamus à peccato, sed tantam benignitatem nobis etiam exhibet, vniuersorum Saluator Deus, ut efficaci subsidio adiuuet, secundum quod scriptum est, Apprehendisti manū dexteram meam, & in consilio tuo deduxisti me. Nam quoniam hominis natura non valde generosa est, neque satis idonea, ut malum effugere queat, simul quodammodo nobiscum certat Deus, & duplex concedere beneficium videtur, persuadens admonitionibus, ut subsidium inueniamus, & fortius illud præstans, quam ut malum præsens, & violentum praualeat possit. Quid clarius pro distinctione efficacis auxilij à sufficiente potuit dicere Cyrillus, & declarare quomodo efficax sit fortius? Non ergo est indifferens, & ex nostro consensu sit efficax, sed ex se est tale quia fortius est.*

Loca D. Thoma ex.

31 Primò arguitur ex D. Thom. in 4. dist. 49. q. 1. art. 3. *quæstionum. 2. ad 1.* ubi ita dicit: *Ad primum dicendum quod potentia rationalis se habet ad opposita in his quæ eis subsunt, & hæc sunt illa, quæ per ipsam determinantur, non autem potest in opposita illorum quæ sunt ab alio determinata, & ideo voluntas non potest in oppositum eius ad quod ex diuina impressione determinatur.* Ecce quomodo dicit apertissimè S. Doctor determinationem diuinam, quia non subest voluntati nostræ, omnino tollere potestatem in oppositum, quod est tollere indifferentiam eius, & libertatem. Et in hoc eodem sensu loquitur S. Thom. in 2. dist. 25. q. 1. art. 1. ad 3. ubi inquit, *quod Deus in rebus naturalibus operatur sicut ministrans virtutem agendi, & sicut determinans naturam ad talem actionem. In libero autem arbitrio hoc modo agit, ut virtutem agendi sibi ministret, & ipso operante liberum arbitrium agat, sed tamen determinatio*

Ioan. à S. Thoma in 1. part. D. Thoma:

actionis, & finis in potestate liberi arbitrij continetur, unde remanet sibi dominium sui actus, licet non ita, sicut primo agenti. Eadem ratione attribuit dominium voluntati q. 3. *de potentia art. 7. ad 13.* non per exclusionem causæ primæ, sed quia causa prima non ita agit in voluntate, ut eam de necessitate ad vnum determinet. Non ergo indiget voluntas nostra à Deo determinari ad vnum; poterit ergo indifferenti concursu, & decreto succurri à Deo, non efficaci, & determinato ex se. Pertinere autem determinationem voluntatis ad se, & non esse ex aliis prioribus causis, sed ex intellectu suo S. Thom. affirmat in *cit. loco dist. 25. q. 1. a. 1. in corp. & dist. 28. q. 1. a. 1. in corp.*

Conf. ex quolibet 1. art. 7. ad 2. ubi expressè affirmat, quod cuicumque auxilio præuenienti, & preparanti hominem, ipse homo potest resistere; sed inter præuenientia auxilia numeratur etiam illud efficax, ergo ipsi potest homo resistere, & sic non est determinatio & efficacia orta ex Deo, sed supposita ex nostro consensu non resistente. Et idem videtur docere q. 6. *de malo, art. unico ad 15.* ubi inquit, *quod illa causa quæ facit voluntatem aliquid velle, non oportet quod ex necessitate hoc faciat, quia potest per voluntatem impedimentum præstari.* Ergo si efficax voluntas Dei facit voluntatem velle, potest ei impedimentum præstari à voluntate.

Conf. secundò, ex q. 6. *de verit. art. 3. in fine*, ubi infallibilitatem diuinæ prædestinationis reducit ad media quæ Deus adhibet, non autem ratione illius efficacis determinatæ, qua Deus determinat voluntatem: Dicit enim quod *in prædestinatione licet liberum arbitrium deficere possit à salute, tamen in eo quem Deus prædestinat, tot alia adminicula preparat quod vel non cadat, vel si cadat, quod resurgat, sicut exhortationes, & suffragia orationum, donum gratiæ, & alia huiusmodi, quibus Deus adminiculatur homini ad salutem.* Ergo non est ponenda illa efficacia determinans ex parte Dei; sed solum illa quæ nascitur ex mediis indifferentibus.

Resp. ad 1. locum D. Thom. ex 4. *Sententiarum*, quod ibi expressè agit D. Thom. determinatione voluntatis quoad specificationem, non quoad exercitium, & in individuo. Et dicit quod non potest voluntas in oppositum eius ad quod ex impressione diuina determinatur, quantum est ex parte obiecti, ita ut non velit bonum sub ratione boni, sed malum; hoc enim velle non potest: ita enim appetit de necessitate beatitudinem in communi, quod non potest velle miseriam. Et sic verba in argumento relata omittunt aliquid, quod plenè explicat mentem D. Thom. dicit enim quod *non potest voluntas in oppositum eius ad quod ex impressione diuina determinatur, scilicet in oppositum finis ultimi, & hoc omittit argumentum, quia scilicet respectu finis ultimi est necessitata voluntas quoad specificationem, & non habet indifferentiam contrarietatis, quia ex natura sua, seu ex impressione diuina imprimente, & dante naturam voluntati, oritur illa determinatio ad finem vltimum, & ad bonum in communi. Dicimus ergo quod ad id ad quod determinatur voluntas ex impressione diuina, id est, ex naturali inclinatione impressa à Deo, non potest in oppositum, quia necessitatur ex natura sua ad illud obiectum, quantum ad specificationem, scilicet ad bonum sub ratione boni, & ad beatitudinem in communi, ita quod non potest velle oppositum. Cæterum ad id ad quod determinatur in individuo, & in exercitio seruando possibilitatem in oppositum, & cum indifferentia iudicij, & per illam regulando actum eliciendum, potest in oppositum potentia antecedenti, & in sensu diuiso, quia sic determinatur, & mouetur à Deo.*

S 3

Ad

33 Ad locum ex 2. Sentent. dist. 25. Resp. quod D. Thom. ibi solum docet quod determinatio actus, & finis est in potestate liberi arbitrij, quod nullus negare potest, nisi neget libertatem. Quod verò ista determinatio ita sit in potestate nostræ voluntatis, quod non etiam descendat à potestate Dei causante illam determinationem, sed expectante à nobis, hoc D. Thom. nullo modo dicit, sed oppositum ibi insinuat, dicendo quod *in liberum arbitrium hoc modo agit, ut sibi virtutem agendi ministret, & ipso operante liberum arbitrium agat.* Non dicit ipso solum cooperante, sed ipso operante, atque adeo incipiente, & causante ipsam determinationem voluntatis: non enim repugnat quod ista determinatio voluntatis, & libertas oriatur ex alia priori causa, quæ ipsius voluntatis author est, & origo, scilicet à Deo. Quod totum explicauit S. Thom. 1. p. q. 83. art. 1. ad 3. dicens, quod *liberum arbitrium est causa sui motus, quia homo per liberum arbitrium se mouet ad agendum. Non tamen hoc est de necessitate libertatis, quod sit prima causa sui id quod liberum est: sicut nec ad hoc ut aliquid sit causa alterius, requiritur quod sit prima causa eius.* Deus igitur est prima causa mouens, & causas naturales: & voluntarias: & sicut naturalibus causis, mouendo eas, non aufert quin actus earum sint naturales, ita mouendo causas voluntarias non aufert quin actiones earum sint voluntaria, sed potius hoc in eis facit. Ita D. Thom. Dicere ergo quod determinatio actionis sit in potestate voluntatis, non tollit quin sit etiam à Deo eam faciente & determinante ut causa prima. Et cum in eodem loco ex dist. 25. dicit in corp. quod in solis habentibus intellectum est liberum arbitrium, non autem in illis quorum actiones non determinantur ab ipsis agentibus, sed à causis prioribus, sensus clarus est, quod in illis quorum actiones ita sunt ab aliis causis, quod non à se, quia carent intellectu, non est liberum arbitrium, quod verissimum est. Quod autem illi in quibus est intellectus, & mouentur à se, non moueantur ab alio, qui est causa intellectus, & voluntatis, hoc non dicit D. Thom. Et in loco cit. ex dist. 28. nihil aliud dicit, quam quod homo non esset liberi arbitrij, nisi ad eum determinatio sui operis pertineret, ut ex proprio iudicio eligeret hoc, aut illud; quod est pertinere ad ipsum, ut ad causam secundam, & inferiorem, dependenter tamen à causa prima ut causante, & determinante Locus autem ex q. 3. de potentia non vrget, quia ibi solum dicit D. Thom. quod Deus non necessitat voluntatem ad vnum, non tamen dicit quod non mouet determinatè ad actum, seruando indifferentiam ex parte modi operandi.

34 Ad Conf. Resp. rectissime, & catholicè dici à D. Thom. illo quod lib. 1. quod *Deus sic mouet mentem humanam ad bonum, quod tamen potest huic motioni resistere*, motioni quidem purè excitanti, aut tantum præbenti sufficiens auxilium potest resistere, etiam in sensu composito, & potentia consequenti; motioni autem etiam adiuuanti, & præbenti efficax auxilium, in sensu diuiso, & potentia antecedenti. Et sic etiam catholicè, & verissimè idem S. Doctor affirmavit 1. 2. q. 10. art. 4. ad 3. quod *si Deus mouet voluntatem, impossibile est quod voluntas ad illud non moueatur, non tamen est impossibile simpliciter.* Et q. 112. art. 3. in corp. *Si ex intentione Dei mouentis est quod homo cuius cor mouet, gratiam consequatur, infallibiliter eam consequitur.* Quod ergo dicat D. Th. posse hominem resistere motioni Dei, est idem quod posse dissentiri, & posse abiicere motionem Dei, quod apertè Concilium Trid. definiuit, sine præiudicio efficaciam Dei mouentis, & determinantis, &

simul dantis istud posse. Cum autem dicit in q. 6. de malo, quod causa quæ facit velle, non oportet quod de necessitate id faciat, quia à voluntate potest ei impedimentum præstari. Resp. quod non est diuersa significatio in illo verbo *impedimentum præstare*, & in illo verbo *resistere*, aut *abiicere*, aut *dissentire*. Omnia hæc idem significant, & sic posse à voluntate ista fieri, posito auxilio efficaci, concedendum est in sensu diuiso, & potentia antecedenti, negandum in sensu composito. Ista est enim generalis regula tradita à D. Thom. q. 6. de verit. a. 4. ad 8. *Communiter dicitur quod ista, Deus potest non prædestinare, aut prædestinatum non prædestinare, in sensu composito est falsa, in diuiso, vera.* Et idè omnes locutiones illa quæ sensum compositum implicant, sunt falsa simpliciter. Vbi dicendo omnes locutiones, vniuersalifauit regulam illam, & sic quidquid ipse dixit, aut alij dicunt de hoc, quod est posse præstare impedimentum, posse resistere motioni Dei, posse dissentire, &c. & sensum compositum implicant, sunt falsa, diuisum, vera.

Ad secundam Conf. Resp. quod in illo loco D. Th. inter adminicula, & media, quæ ponit Deum adhibere, & præparare, non excludit adminiculum sui concursus, & efficacis voluntatis, licet iste concursus supponat illa adminicula, vel aliqua eorum adhibita ut moueatur voluntas; numerat enim suffragia orationum, donum gratiæ, &c. Ergo in illo dono gratiæ, cur intelligendus est excludere gratiam ex voluntate Dei efficacem?

35 Secundò, arguitur ex eodem D. Thom. qui absolute affirmat quod necessitas præueniens ex causis prioribus, est necessitas absoluta, ut patet 2. Physic. lect. 15. & 3. p. q. 46. art. 1. vbi dicit quod *necessarium ex causa exteriori si sit efficiens, seu mouens, causat necessitatem coactionis.* Sed efficacia diuina est causa exterior, & antecedens, seu prior, est etiam causa efficiens, seu mouens voluntatem in nostra sententia: ergo causat necessitatem absolutam seu necessitatem coactionis.

Conf. quia idè D. Thom. dicit quod *dispositiones, quæ sunt in voluntate, non tollunt libertatem, quia subiacent iudicio rationis, cui obedit inferior appetitus, ut patet 1. p. q. 83. a. 1. ad 5.* sed efficacia diuinæ voluntatis non est dispositio subiacta iudicio rationis, nec est in potestate voluntatis eam habere, vel habitam repellere: ergo tollit libertatem.

Conf. secundò ex eodem D. Thom. 1. p. q. 82. a. 2. ad 2. vbi docet quod *tunc mouens ex necessitate causat motum in mobili, quando potestas mouentis excedit mobile, ita quod tota eius possibilitas mouenti subdatur.* Sed illa efficacia diuini decreti excedit totum quod est mobile in voluntate creata, & eius possibilitas totaliter subditur mouenti: ergo causat de necessitate motum, & non relinquit liberum.

Resp. aliud esse quod determinatio ex causa priori necessitet, aliud quod necessitas ex causa priori sit necessitas absoluta. Determinatio causæ liberæ ad aliquid agendum non causat necessitatem in illa, nisi sit determinatio tollens indifferentiam iudicij, non si sit determinatio tollens eius suspensionem, & inducens inclinationem ad sequendum indifferentiam iudicij. Necessitas autem ex causa antecedente, & priori proueniens, est necessitas absoluta, sed in præsentia non est necessitas proueniens à Deo, sed determinatio ut causa liberi agat non quomodocumque, sed iuxta modum suum liberum. Et sic non causatur in nostra voluntate necessitas absoluta, sed determinatio libera, quæ solum infert necessitatem consequentiæ, seu ex suppositione, non necessitatem absolutam. Vnde ipse D. Th. in hac q. 29. a. 8. ponens idem argumētum quod *necessitas ex priori est*

est necessitas absolutè, sicut animal mori est necessariū, quia est ex contrariis compositum, sed res creata comparatur ad diuinam voluntatem, sicut ad aliquid prius à quo habent necessitatē, quia hæc cōditionalis est vera, si Deus aliquid vult, illud est: ergo omne quod Deus vult est necessarium absolutè. Ecce argumentum positum etiam nunc ab aduersariis. Respondet autem S. Thomas breuissimè, glossando illud axioma, quòd necessitas ab aliquo priori est necessitas absoluta, & dicit, quòd posteriora habent necessitatē à prioribus secundum modum priorum, unde quæ sunt à voluntate diuina talem necessitatē habent qualem Deus vult ea habere, scilicet vel absolutam, vel conditionalem tantum. Quasi dicat, necessitas ab aliquo priori est necessitas absoluta, distinguo, si absolutè sit causata, ita quòd id quod causatur ab aliquo priori sit ipsa necessitas impressa suo causato, concedo; si id quod causatur ab aliquo priori non sit necessitas, sed potius contingentia, & libertas, solum autem per modum consequentiæ, & suppositionis sequatur illa necessitas, vel potius infallibilitas, nego.

Ad Conf. primam. Resp. optimè dicere S. Tho. quòd qualitates, quæ subiacent iudicio rationis, & voluntati, non auferunt: libertatem. Inde tamen non licet inferre, quòd qualitates omnes, quæ antecedunt voluntatem, tollant libertatem, si proueniant à causa, & radice prima talis libertatis, & ad hoc dentur illi, vt modum suum in ea seruent, nempe quia non dantur tollendo indifferentiam iudicij, & necessitando voluntatem, seu ligando potestatem ad vnum, sed appetiendo cor, & soluendo eius indeterminationem, vt iuxta indifferentiam iudicij reguletur, & ad operationem vnam se determinet. Itaque aliæ qualitates subiacent iudicio rationis, & voluntatis, aliæ iuuant & faciunt eam operari iuxta modum suum; & licet non subiaceant voluntati, quasi ab ea emanent; tamen emanant à radicali, & prima causa talis libertatis, eique subiacent, faciuntque vt voluntati creatæ subiaceant qualitates suæ, quòd est conseruare in ea libertatem, & hoc sufficit vt libertatem non tollant, quia sufficit subiaccere ipsi radici voluntatis, scilicet Deo, in quantum radix eius est, & in quantum causat in ea rationem liberi. Hac enim ratione dicit D. Thom. 3. contra Gentil. c. 88. quòd impossibile est, quòd voluntas moueatur à principio extrinseco, sicut ab agente; sed oportet quòd omnis motus voluntatis ab interiori procedat, nulla autem substantia creata coniungitur animæ intellectuali, quantum ad sua interiora, nisi solus Deus. Computatur ergo Deus inter causas internas voluntatis, non formaliter vt anima, sed radicaliter, & eminenter, sicut causa prima libertatis. Et non loquitur de Deo vt mouente per modum obiecti, sed per modum agentis, quia per modum obiecti, æquè internè mouet Deus, & alia obiecta, quia eodem modo proponuntur & mouent. Vnde omnis motio procedens actiue ab ista radice, & prima causa, vt libertatis causa est, non nocet nostræ libertati, sed iuuat, licet à nobis non emanet, nec nobis subiaceat, sed ipsi Deo vt radici nostræ libertatis.

36 Ad secundam Conf. Resp. quòd vt mouens necessitet mobile, necesse est quòd potestas mouentis ita excedat mobile, quòd tota eius possibilitas mouenti subdatur, vbi ibi dicit D. Thom. Quòd intelligendum est formaliter, quando tota possibilitas subditur non manente possibilitate ad oppositum: si autem ipsum mouens relinquat possibilitatem ad oppositum, & conseruet eam, non necessitat ipsum mobile. Voluntas autem

diuina sic mouet voluntatem ad vnum, quòd relinquit possibilitatem ad oppositum, & ita licet in infinitum excedat capacitatem voluntatis, non tamen omni isto modo se applicat illi mobili, quandiu seruat indifferentiam iudicij, sed applicat se causando eius contingentiam, & possibilitatem ad oppositum. Dicit enim S. Thom. in 1. ad Aribald. dist. 47. q. unica art. 4. ad 2. quòd quamuis contrarium eius quòd est volitum à Deo non possit stare cum voluntate diuina, possibilitas tamen ad contrarium potest stare cum ea, propter contingentiam causæ mediæ, & hoc sufficit ad hoc vt effectus sit contingens, & non necessarius. Idem docet q. 23. de verit. art. 5. ad 3.

Soluitur argumentum ex libertatis lesione.

Post argumenta ex autoritatibus sumitur secundum caput argumentorum à ratione quæ fundamentalis est in opposita sententia, scilicet quia efficacia decreti antecedens voluntatem, & determinatè causans consensum, tollit eius libertatem. Nec potest in hac parte intelligi quòd ipsa libertas, seu modus libertatis in actu causetur ab ipsa efficacia causæ primæ. Et formatur argumentum sic. Efficacia, & determinatio decreti diuini ad eliciendum actum liberum non est in nostra potestate, vt nobis detur, sed Deus distribuit hunc influxum, & gratiam prout vult, siquidem antecedit omnem actum, & consensum ex parte nostra: quidquid enim antecederet, ab eo causari deberet. Nec est in nostra potestate, vt semel data repellatur & frustretur, ita vt de facto, & in sensu composito, stante illa efficacia non staret dissentiri voluntatem humanam: Ergo illa efficacia tollit libertatem creatam. Conseq. prob. (nam de antecedenti non est dubium) quia tunc efficacia tollit libertatem, quando, cum sit suppositio antecedens, causat in voluntate determinationem ad vnum, non relinquendo in voluntate potestatem ad expellendum eam, nec ex eius principiis oritur, vt possit eam habere, vel ab illa cessare: ergo quando voluntas exit in operationem, exit sine indifferentia, & potestate ad oppositum, quia exit sine potestate in id, quo posito, non stat poni oppositum. Nec valet hinc respondere illa vulgari distinctione de sensu diuiso, & composito, de quo supra iam egimus, & dicere, quòd potest illa voluntas oppositum in sensu diuiso, & potentia antecedente, non in composito, & potentia consequente: nam præter illa quæ supra obiecta sunt contra istam distinctionem, quæ hinc instaurari possunt, in præsentia fit argumentum, quia illa potentia in sensu diuiso, est solum potentia ad aliquid in se impossibile, & chimericum: ergo ipsa est chimerica. Conseq. patet. Et anteced. prob. quia tolli, seu diuidi, aut extinguere auxilium ab ista voluntate est impossibile, cum auxilium illud non sit à voluntate, sed à Deo, nec voluntas possit impedire Deum, ne recipiatur in se. Non extincto, nec sublato auxilio etiam est impossibile voluntatem prodire in contrarium actum, aut illum ad quem mouetur omittere. Quòd patet, quia illud est impossibile, quo posito in actu, necessariò, & semper sequitur aliquod inconueniens & repugnans; sed si stante auxilio, oppositus actus ponatur in actu, sequitur aliquid repugnans & inconueniens, scilicet quòd frustretur voluntas efficax Dei à sua creatura: ergo illud est impossibile: sed obiectum illius potentiæ sumptæ in sensu diuiso est actus oppositus illi ad quem mouetur de facto à Deo: ergo stante auxilio, illa

S 4 potentia

potentia in sensu diuiso est ad aliquid impossibile & chimæricum; aut assignetur aliud obiectum talis potentiæ, circa quod dicitur potentiam manere, & de illo constabit manifestè quòd non manet obiectum possibile, cum illud dicatur possibile, quo posito in actu, nullum sequitur inconueniens, seu repugnans.

38 Conf. quia vt tollatur libertas hæc & nunc à voluntate, posito illo auxilio, perinde est quòd tollatur potentia ad oppositum, vel quòd impediatur facultas; sed posita illa efficacia antecedente, impeditur facultas voluntatis ne faciat oppositum: ergo tollitur libertas. Minor prob. Tunc manet aliqua facultas impedita ad aliquem actum quando aliquid est in illa obstandum ne talis actus ponatur in re, sed quando efficaciter Deus mouet ad consensum, facultas ad dissensum, habet aliquid obstandum ne tunc ponat dissensum, nempe efficaciam illam antecedentem infallibilem, quam nec potest voluntas auertere, nec frustrare ea semel posita: ergo habet impedimentum ad dissensum: ergo non manet libera potentia ad dissensum, quia nec expedita? sicut homo iniectis vinculis non manet liber ad ambulandum, licet possit stare, vel sedere. Quòd si manet illa potentia libera, & expedita ad oppositum actum, vnde constat quòd non habebit illum? An quia Deus denegat illi concursum ad talem actum, & solum concedit ad oppositum? Ergo hoc ipso impedit, quia nullum maius impedimentum pro creata potentia, quàm sibi denegari concursum Dei.

Resp. hoc argumentum, & alia similia quæ fundantur in læsione nostræ libertatis si efficaciter mouetur à Deo antecedenter ad consensum, non sunt alia, quàm quæ olim & S. Augustino obiecta & ab ipso fuere contrita, & deinde à Sanctis Patribus, atque à D. Thom. sapissime soluta sunt. Nam hoc idem argumentum obiectum fuisse August. quòd tolleretur libertas arbitrij per illam antecedentem efficaciam decreti diuini, constat ex epistola Prosperi ad Aug. ante librum de prædestinatione Sanctorum, vbi refert Semipelagianos dixisse: *Remoueri omnem industriam, tollique virtutes, si diuina constitutio humanas praueniat voluntates, & sub hoc prædestinationis nomine fatalem quandam iudici necessitatem.* Et huius argumenti occasione composuit S. Aug. librum de gratia, & libero arbitrio, in quo postquam latissimè ostendit quomodo non tollatur libertas nostra per gratiam, sic concludit c. 20. *Satis me disputasse arbitror aduersus eos, qui gratiam Dei vehementer oppugnant, qua voluntas humana non tollitur, sed ex mala mutatur in bonam, & cum bona fuerit, adiuuatur: & sic disputasse, vt non magis ego, quàm diuina ipsa Scriptura vobiscum locuta sit evidentissimis testimoniis veritatis. Quæ Scriptura diuina si diligenter inspiciatur, ostendit non solum bonas hominū voluntates quas ipse facit ex malis, & à se factas bonas, in actus bonos, & in eternam dirigi vitam: verum etiam illas quæ conseruant sæculi creaturam, ita esse in Dei potestate, vt eas quò voluerit, quando voluerit faciat inclinari, &c.* Sic Aug. Sic hæc considerauimus quòd voluntas nostra ita est fixa in anima nostra, quòd est in potestate Dei, licet in Deo non sit inhærens, sed ab eo causata, facile nos expediemus ab istis sophismatibus, & araneorum telis, quæ ferè omnes æquiocant in illo verbo *potest* seu *possibile*, vbi fiunt modales diuisæ, & compositæ, & omnes modales affirmatiuæ de sensu composito redduntur falsæ, vt supra ex D. Thom. retulimus. Et ipse D. Thom. omnia ista argumenta de læsione libertatis nostræ ex efficacia motionis diuinæ

posuit, & soluit tum 1. p. q. 19. art. 8. & 1. 2. q. 10. art. 4. ad 3. & q. 23. de verit. art. 5. & in 1. dist. 47. & 3. contra Gentil. o. 88. 89. 90. & 94. tum agendo de certitudine prædestinationis in hac 1. p. q. 23. art. 7. & q. 6. de verit. art. 3. & 5.

39 Igitur ad argumentum dicimus non esse in nostra potestate auxilium diuinum, quasi effectiue, & originatiue, id est quòd à nobis causetur, & deriuetur, esse tamen in nostra potestate quasi terminatiue, & quoad vsum quia ad hoc terminatur illa motio, & efficacia Dei, & hoc respicit pro termino, & fine, vt nostra voluntas habeat potestatem, & modum libertatis in actu. Quare licet non oriatur à nostra potestate, oritur tamen à radice, & causa nostræ potestatis, quæ est Deus, & sic habet causare in nobis potestatem, non tollere. Et sic perinde est oriri à Deo, & à nobis quoad effectum causandi libertatem, & non tollendi, quia Deus est ipsa nostra voluntas eminenter seu radicaliter, quia est principium, seu radix intimè causans illam. Vnde oriri illam determinationem efficaciter à Deo cum sit à radice nostræ libertatis, non præiudicat illi, sed causat; sicut enim substantia animæ si habet aliquem influxum in potentiam voluntatis, non destruit eius libertatem, sed constituit, quia est radix talis potentiæ, & habet pro effectum ipsummet actum vt liberum; ita Deus qui est radix animæ, & vita vitæ eius per modum principij agentis per influxum suum non destruit libertatem, sed astruit, quia influxus eius quantumcumque antecedens, est influxus radicis ipsius libertatis, habens pro effectum ipsum liberum actum, etiam in quantum liberum. Et ita ille influxus est terminatiue in potestate mea, non originatiue. Vel etiam est in potestate mea eminenter, & radicaliter, quia est in potestate Dei, qui est eminenter, & radicaliter mea voluntas, & quod est in potestate Dei, vt causantis, & concurrentis cum mea voluntate, vt libera, est perinde atque esse in mea potestate, quia hoc habet pro effectum.

40 Et similiter cum dicitur nos non posse repellere illam efficaciam & influxum à Deo nobis datum, respondetur quòd cum ille influxus, & efficacia non solum respiciat, & intendat quòd actus fiat, sed etiam quòd liberè, & contingenter fiat, & vtrumque ab illa deriuetur, & participetur, non potest voluntas repellere illam efficaciam in sensu composito, & potentia consequenti, & facere quòd ille actus non fiat liberè, quia supra totum hoc cadit efficacia, potest tamen repellere illum actum absolutè, & secundum se, quia hoc ipso quòd Deus dat ipsum modum libertatis, dat posse oppositum absolutè, quia hoc est dare quòd liberè fiat. Et ita D. Thom. 3. contra Gentil. c. 94. circa finem dicit quòd *hæc conditionalis non est vera: Si Deus prouidit hoc futurum, hoc erit, sed sic erit sicut prouidit futurum: prouidit autem illud esse futurum contingenter: sequitur ergo infallibiliter quòd erit contingenter, non necessariò.* Pater etiam quòd hoc quòd ponitur prouisum esse à Deo vt sit futurum si sit de genere contingentium, poterit non esse secundum se consideratum; sic enim prouisum est, vt sit contingens potens non esse, non tamen est possibile quòd ordo prouidentie deficiat, quin contingenter eueniat.

41 Et cum aliqui instant, quomodo concursus, & efficacia Dei dat libertatem illam, & contingentiam, si dat determinationem ad vnum, non autem præbet ipsam potentiam seu facultatem libertatis, & quomodo stat dare quòd fiat contingenter si infallibiliter?

Resp.

Resp. quod concursus non dat libertatem quantum ad potentiam ipsam: hæc enim ipsa creatione animæ fit, sed quantum ad usum, ut utatur non coactè, sed liberè actu suo. Et dat determinationem ad vnum in ipso actu conseruando facultatem, & possibilitatem ad oppositum, non tollendo, & soluendo ipsam determinationem, & suspensionem ad operandum, non potestatem, & vniuersalitatem dominatiuam coarctando. Dat autem quod fiat infallibiliter ex parte Dei operantis, contingenter autem ex parte effectus operari, ita quod ex parte Dei intendentis totum hoc quod est totum fieri liberè, infallibilitatem habet illa operatio ut à Deo; ex parte autem causæ proximæ contingentiam, & mutabilitatem habet, quia hoc ipsum Deus vult, sicut in se immutabilis existens, & operans, facit effectus mutabiles, & motus ipsos, & infinitus existens, effectus finitos. Et sic dicit S. Prosper 2. *de uocatione Gentium*, c. 28. quod *Deus ad obediendum sibi, ipsum velle sic donat, ut etiam à perseverantibus ipsam mutabilitatem, qua potest nolle, non auferat.*

42 Ad id quod dicitur contra sensum diuisum in ly *potest*; Resp. imprimis, instari illam replicam in aliis similibus, ut cum dico Prædestinatus potest damnari, seu non saluari in sensu diuiso: Voluntas dum operatur potest non operari in sensu diuiso: Quid est illa potentia, & ad quid est? estne ad aliquid impossibile & chimæricum, & quod repugnat in re poni? Et tamen ab omnibus conceditur illa potentia. Nec obstat quod sensus compositus debet fieri supponendo ipsum actum qui procedit à voluntate nostra, non aliquid antecedens illum quo determinetur ad vnum. Nam contra est, quia prædestinatio aliquid antecedens est nostrum actum, & tamen supposita prædestinatione adhuc potest prædestinatus damnari in sensu diuiso, & potentia antecedenti, non in sensu composito. Et ipsa efficacia Dei licet sit antecedens, tamen est causa nostræ libertatis, & eminenter illam continet, & sic perinde est facere sensum compositum & diuisum cum illa, & cum nostro actu.

43 Quare ad instantiam, cum dicitur quod illa potentia in sensu diuiso est ad aliquid chimæricum, & impossibile, eodem modo distinguendum est; ad aliquid impossibile secundum se, & simpliciter consideratum, nego, & ad hoc tantum datur potentia; ad aliquid impossibile ex suppositione, id est ut coniungendum in re cum auxilio, transeat, sed ad hoc non datur potentia, quia solum hoc potest fieri in sensu composito, & in illo non potest concedi. Vnde in istis argumentis mutatur sensus diuisus, & compositus, & ided non tenent.

Cum autem dicitur quod illud est impossibile, quod est repugnans, & inconueniens poni in actu. Resp. eodem modo, quod illud quod est inconueniens, & repugnans poni in re absolute, & ex vi suorum prædicatorum, est etiam impossibile simpliciter, & absolute. Quod autem est inconueniens, & repugnans poni in re ex suppositione, & secundum impossibilitatem consequentiam non consequentis, est etiam impossibile secundum quid, & in sensu composito, & potentia consequenti, non antecedenti. Et hoc modo se habet in nostro casu, quia potentia antecedens, seu in statu antecedenti respicit possibile solum secundum se, & quantum est ex meritis obiecti, quod tamen ratione alicuius suppositionis, vel conditionis adiunctæ potest esse impossibile, potentia consequenti, & in sensu composito, quatenus non

potest coniungi illa suppositio, vel conditio cum isto actu, licet possit coniungi ille actus cum subiecto secundum se, sicut aer tenebrosus potest esse lucidus, & homo sedens potest stare attendendo præcisè aerem, & lucem: attendendo autem aerem ut tenebrosus, non potest.

Et cum inquiritur quod assignetur obiectum illius potentie in sensu diuiso, supposito auxilio, & illo stante. Dico quod obiectum potentie in sensu diuiso est ille actus oppositus auxilio, non quomodocumque, sed ut præcisè respicit potentiam capacem sui, non potentiam, & auxilium simul, ita quod omnia coniungat. Itaque potentia actuatæ auxilio, & stante auxilio includit duo & potentiam, & auxilium. Potest ergo actus oppositus considerari, non ut tangit vtrumque simul, potentiam, & auxilium, sed præcisè potentiam, licet adhuc ibi stet auxilium, & illud præcisè, est diuisum, seu in sensu diuiso tangere, & sic adhuc est potentia, seu capacitatis talis actus, sicut materia prima actuatæ vna formâ, retinet capacitatem, & potentiam ad aliam formam, & illa forma est obiectum illius capacitatis, etiam dum stat sub alia forma specificatiuè loquendo, non tamen habet potentiam ad coniungendam aliam formam cum ista simul; sic enim est sensus compositus, & tale obiectum est impossibile.

Ad Conf. negatur minor. Ad probat. Dicitur, 44 quod tunc est impedimentum quando est aliquid obstand, distinguo, quando est obstand ex aliquo defectu potentie antecedenter ad actum, concedo; quando est aliquid obstand, non est defectu antecedente ad actum, sed ex ipsa determinatione ad actum, nego: Determinatio enim ad actum, vel actus ipse non impediunt potentiam, nec faciunt obstaculum diminuendo, aut coarctando facultatem potentie, & capacitatem eius ad illum actum, sed solum propter impossibilitatem actuum inter se. Vnde per hoc quod habeat potentia vnum actum, aut determinetur ad illum, siue ex se, ut à causa proxima, siue à Deo ut causa prima, quæ est radix huius libertatis, non impeditur facultas, & potestas libertatis in ratione facultatis in se, & absolute, sed solum impeditur ne simul vtrumque actum habeat, quod impedimentum libenter fateremur, quia ad hoc nulla datur potestas, ut simul duo actus habeantur, quod pertinet ad sensum compositum. Impediretur autem potestas, si quando determinatur ad vnum actum, tangeretur ipsa facultas, & capacitas eius coarctaretur aut diminueretur, quod nullo modo fit: sicut materia prima dum habet vnam formam, non destruitur aliquid de facultate, & capacitate eius tunc ad habendum alias, nec impeditur, quia integra capacitas manet ad alias, sed solum impeditur ne simul habeat vtramque formam, ita quod stante ista forma etiam stet alia, non tamen quod stante ista forma maneat possibilitas ad alias diuiniue. Et idem est de determinatione diuina ad actum quæ relinquit possibilitatem integram ad alium, ut dicit S. Thom. in 1. *ad Arib.* dist. 47. q. unica art. 4. ad 2. & q. 23. *de verit.* art. 5. ad 3. solum autem non manet potestas ad habendum simul vtrumque actum, quia hæc potestas numquam fuit.

Quando autem interrogatur; Si manet non 45 impedita illa facultas ad oppositum actum, vnde constat quod non habebit illum, & sic frustrabit diuinam efficaciam; Respondeo: constat, quia Deus immutabiliter vult istum actum, & ita Deo id constat ex sua voluntate, per quam, ut dicit Aug. lib. de corrept. & gratia, cap. 12. *Subueniunt est voluntati*

rati nostra, ut indeclinabiliter, & inseparabiliter ageretur, & ideo quamvis infirma non deficeret, nec aduersitate aliqua vinceretur. Et cum infertur: Ergo constat non operaturam aliud, quia Deus impedit, id est, quia, non vult dare concursum ad oppositum. Resp. quod hoc non est impedire, quia Deum non dare, seu negare concursum ad oppositum, vel est quia dat ad vnam partem, & dando ad vnam, non debet dare simul ad aliam, vel est quia coarctatur voluntas ad vnum, & frangitur eius potestas, seu diminuitur, & ratione huius non datur concursus, nisi ad vnum. Primum non est impedimentum, sed secundum. Si enim ideo daret Deus concursum ad vnam partem, quia voluntas in sua facultate, & potestate coarctata est, & impedita ad aliam partem, aut quia Deus voluntati iam determinatæ, & inclinatæ ad vnam partem denegaret concursum ad illam, tunc verè diceretur Deus impedire causam secundam ne operaretur, aut quia ligaret facultatem potentia, aut quia iam inclinatæ ad operandum denegaret concursum generalem.

Ceterum ex eo quod Deus soluit indeterminationem, & suspensionem potentia, & determinat ad vnum actum præ alio conseruando potestatem pro alio actu, nullum impedimentum ponit, sed potius resoluit, & tollit impedimentum ad operandum istum actum, sicut ipsa voluntas determinans se ad operandum vnum actum præ alio, non ponit sibi impedimentum, sed potius resoluit, & tollit impedimentum ut operetur, licet verum sit quod quia non potest simul operari vtrumque actum contrarium, dum operatur vnum, non potest operari alterum, sed hoc non posse, & hoc impedimentum ex suppositione, & secundum quid, non simpliciter. Hoc ergo quod voluntas ipsa facit in se sine læsione sui dicimus quod Deus incipit & causat illa tanquam primaradix, & causa libertatis eius, non magis lædendo aut impediendo ipsam, quam ipsa se impedit, quia quidquid voluntas ipsa facit, Deus facit ut faciat, & ut tali modo faciat non impediendo, sed dando ut faciat illud, & ut modo libero faciat, licet ex suppositione quod faciat vnum, non possit simul facere aliud. Sed illud non posse, non est impedimentum potentia, sed consequentia secuta ex suppositione operandi vnum.

46 Quod si istes: Quidquid sit an illa efficacia antecedens sit causa nostri actus liberi, vel non sit, & ex hac parte qua tangit nostram libertatem; & ducit illam ad actum, non tollat illam, tamen ex parte qua venit à Deo, immutabilis est, & ei resistere non potest nostra voluntas, & est forma de se immutabilis & determinata atque determinationem in nobis faciens formaliter, ita ut oppositum cum illa stare non possit ergo tollit libertatem. Pater consequentia, quia: ut tollat libertatem, sufficit quod ex vna parte tollat, non ex multis. pro ea autem parte qua venit à Deo, est immutabilis, & infallibilis, & determinationem faciens, nec ei resisti potest à nobis: ergo sufficit hoc ut non relinquat libertatem. Nec sufficit dicere quod est infallibilis, & immutabilis illa efficacia, sed non necessaria, libertati autem non opponitur immutabilitas, seu infallibilitas, sed necessitas, ut patet in libertate diuina, quæ simul est immutabilis.

Contrà enim est, quia licet immutabilitas possit compati cum libertate diuina, non tamen cum creata, quæ intrinsecè mutabilis est: ergo hoc ipso quod illa efficacia Dei dat immutabilitatem, & infallibilitatem actui, tollit libertatem ut

creatam, & ut contingentem; contingentia enim opponitur infallibilitas.

Resp. quod potius illa non resistentia quam habet nostra voluntas, seu non posse resistere Deo, & illa immutabilitas efficacia diuinæ firmant nostram libertatem, non tollunt, siquidem non resistere efficacia diuinæ, est non resistere efficacia, quæ non solum dat determinationem actus, sed etiam modum ipsum libertatis: ergo resistentia ad talem efficaciam esset resistentia ad efficaciam libertatis, & ad ipsum modum libertatis: non resistere autem, seu non posse resistere illi in sensu composito, est non posse resistere ipsi modo libertatis, & consequenter firmari in modo libertatis, & esse firmiter liberam voluntatem. Solum si fiat seperatio, aut sensus diuisus quod dicatur posse resistere illi efficacia ut præcisè determinanti substantiam actus, non autem ut danti libertatem, dicemus quod posse resistere illi efficacia pertinet ad libertatem: sed hoc resistere in sensu diuiso nos libenter concedimus: Sicut ergo pertinet ad nostram libertatem posse resistere illi efficacia quantum est ex parte obiecti, & ex meritis eius, ita pertinet ad libertatem non posse illi resistere, quatenus est inductiua libertatis à Deo, & Deus vult efficaciter non solum ut fiat, sed ut liberè fiat; huic enim resistere, esset resistere libertati. Vnde non currit ratio facta quod sufficit ex vna parte tolli libertatem, ut simpliciter tollatur. Sufficit quidem tolli ex vna parte, sed hinc ex nulla tollitur, quia illa immutabilis, & infallibilis efficacia Dei vult infallibiliter ex parte sua, ut res fiat liberè, & contingentem ex parte nostra: sicut vult immutabiliter ex parte sua, quod fiat motus, & mutationes in rebus naturalibus. Et cum dicitur quod forma illa, seu efficacia, aut influxus est ex se determinata & immutabilis. Resp. quod est immutabilis, ut determinata ut quod, & ut entitas quædam in se, sed est mutabilis & libera ut quo quia est principium quo fit ille actus, & deriuatur à Deo etiam ut liber, & liberè fiat. Ad Replicam contra solutionem, Resp. quod contra libertatem creatam non est immutabilitas, & infallibilitas participata, & accidentalis, sed immutabilitas per essentiam: hæc enim repugnat libertati creatæ, ut creatæ; quod verò participatiuè habeatur à Deo aliqua immutabilitas, vel transeunter in operatione, vel permanenter in statu, sicut beati habent æternitatem, & immutabilitatem participatam, nullum est inconueniens, cum August. ubi supra dicat, indeclinabiliter, & inseparabiliter nos agi à gratia. Vel dicimus quod tota ista infallibilitas, & immutabilitas tenet se ex parte modi operandi Dei, non ex parte rei operatæ: ex hac enim parte potius participat mutabilitatem, & contingentiam, licet ex parte Dei modo immutabili detur: mutat enim omnia immotus manens.

Ex his soluuntur consequentia aliquæ, quæ in hac parte solent importunè accumulari. Prima, si posito decreto efficaci potest voluntas oppositum: ergo possibile est illud poni, possibili autem posito in actu, nullum sequitur inconueniens: ergo nullum erit inconueniens quod ponatur oppositum illius decreti stante illo. Secunda, si potest oppositum voluntas, & nunquam faciet, nec ab illa voluntate vnquam fiet: ergo frustra est talis potentia, quæ nunquam reducitur ad actum, nec in se, nec in aliquo simili. Tertia efficacia illa ut applicata voluntati, & influens in illam, solum habet determinare ad vnum, quia non datur cum indeterminatione & indifferentia; posita autem forma

forma, ponitur effectus formalis necessariò: ergo manet voluntas, ut subordinata illi efficaciz determinata necessariò. Quarta, Si posito illo decreto efficaci poneretur de facto oppositus actus, de facto frustraretur illud decretum, & resisteretur illi: ergo si potest in sensu diuiso facere oppositum, & dissentiri, potest in sensu diuiso frustrare decretum, & resistere voluntati Dei. Iuxta hoc quaeritur, an in sensu quo dicitur posse nos dissentiri, possit dici quòd possumus resistere voluntati Dei, & frustrari illam.

48 Ad istas consequentias ex dictis manet responsum. Et certè contra oppositam sententiam retorqueri possunt. Nam etiam posito decreto indifferenti: & determinatione orta ex consensu prauiso meæ voluntatis, adhuc voluntas manet libera ad oppositum actum: nec enim tollitur ab illa potestas, qua potest agere oppositum aut minui: ergo poterit coniungere oppositum actum cum suo consensu, & determinatione prauisa. Consequentia non valet. Quòd ergo illi responderint ad hanc consequentiam, nos respondemus ad suam. Nam dicere quòd determinatio, seu consensus meus prauisus, quia actus meæ voluntatis est, non tollit libertatem, quia supponit, & consequitur ad illam, determinatio autem diuinæ efficaciz, quia est potestatis extrinsecæ, & non voluntatis propriæ, nec subsequitur ad ipsam, sed antecedit idèò non stat cum libertate, hoc inquam non sufficit; tum quia non facimus vim in eo quòd tollat, vel non tollat libertatem illa determinatio mei consensus, sed supponendo quòd non tollit libertatem, quia subsequens est ad illam, sed relinquit potestatem ad oppositum actum, tamen adhuc non potest oppositum actum ponere stante ista determinatione, licet potestatem habeat ad illum: ergo ex hoc præcise quòd stante efficacia decreti ex se, & non ex consensu desumpta, non stet poni actum oppositum, licet maneat potestas ad illum, non sequitur tolli libertatem, aut frustra esse illam potestatem, vel frustrari posse illam efficaciam: tum etiam quia si determinatio prauisa meæ voluntatis non tollit libertatem quia consequitur ad illam, etiam efficacia determinationis diuinæ non tollit, quia est causa ipsius libertatis, & non solum determinationis actus, & substantiæ eius. Quæ enim potest esse ratio quòd effectus consequens libertatem & determinans consequenter, non lædat illam, & causa ipsius libertatis, quæ illam ponit, & causat etiam in esse liberi, tollat illam? si enim causat non tollit.

49 Ad primam ergo consequentiam iam *suprà* respondimus quòd possibili posito in actu, non sequitur inconueniens, si sit possibile potentia consequenti, & sublata omni appellatione, aut præcisione, transeat, si sit solum possibile potentia antecedenti, & non sublata omni appellatione, vel præcisione, nego; sequitur enim inconueniens, non si poneretur sub illa præcisione, & quantum est ex meritis possibilitatis, sed si ponatur simul cum opposito actu, & in sensu composito cum ipso. Et quia positio in re stante illo decreto efficaci importat sensum compositum, possibilitas verò respectu potentiz antecedentis importat sensum diuisum, idèò possibile, quòd solum est in sensu diuiso, & respectu potentiz antecedentis tantum, non potest poni in re in sensu composito, & stante illo influxu, licet secundum se, & in sensu diuiso non repugnet, nec sit inconueniens esse in re, quantum est ex se, & sub ratione potentiz antecedentis, non simpliciter.

Ad secundam consequ. Resp. non esse frustra 50 potentiam, quæ absolute potest reduci ad actum, licet non sub omni suppositione, & statu reduci possit, sicut materia prima dum est sub vna forma, retinet potentiam ad aliam absolute, licet non ad exercendam hanc potentiam, & ad habendum de facto aliam formam, nisi illa quam habet, tollatur, & idem ferè est de omnibus potentiis, quæ habent actus suos, & dum habent illos, retinent potentiam ad alios actus, nec frustra est talis potentia, licet exerceri non possit, nisi sublato illo actu, non simul cum illo, quia ad hoc nulla est potentia, ut simul duo oppositi actus coniungantur. Sic liberum arbitrium, etiam posito decreto, & influxu Dei efficaci, potentiam retinet ad oppositum actum, nec est frustra illa potentia, quia absolute exerceri potest, licet de facto, & potentia consequenti non exercebitur, nisi tollatur illa suppositio habendi auxilium, & ponatur in alio statu habendi aliud. Et quia sub alio statu, & sub alia suppositione potest, idèò potentia non est frustra; absolute enim reducibilis est ad actum, licet mediatè.

Quòd si instes: nam hoc quod est posse reduci 51 ad alium actum remota forma, & actu quem nunc habet, commune est multis aliis potentiis non liberis, sed necessariò operantibus, sicut materia prima potest habere hanc formam, & aliam, licet dum habet istam non possit habere aliam, & lapis potest descendere, vel quiescere, & brutum potest ambulare, vel stare, & tamen dum est sub vno actu, non potest simul esse sub alio: ergo potentia libera aliquid amplius debet habere, nempe quòd etiam stante decreto Dei efficaci, possit abiicere illum, sicut stante suo actu potest cessare ab illo, etiam potentia consequenti, & in sensu composito: nam potentia antecedenti, etiam ea quæ necessariò operantur, possunt cessare, aut alium actum habere.

Resp. quòd differentia inter alias potentias necessarias, quæ se habent ad multa, & voluntatem nostram, quæ ad plura etiam indifferens est, non consistit in eo quòd possint potentia consequenti multa simul coniungere, aut à Dei motione se excutere, quia si ab vna recedunt, in aliam incidunt, & totum à causa prima debet incipere & causari, non ab ea expectari. Sed differentia in eo est, quòd potentia libera remanet cum potentia antecedenti ad oppositum actum, quæ potentia antecedens est dominatiua, & cum arbitrio se mouendi, sub dependentia tamen à dominio Dei à quo datur sibi suum dominium. Reliquæ verò potentiz non liberæ remanent, etiam sub potentia antecedenti tantum ad aliam formam, sed non cum indifferentia dominatiua, & ex arbitrio se mouente, sed ex instinctu mota, ut in brutis, aut sine instinctu, & naturaliter, ut in aliis. Vtraque ergo potentia tam libera, quàm necessaria quæ potest ad multa, quando est sub vna forma potentiam habet ad oppositam, & quando mouetur ab efficaci influxu Dei, adhuc potest in oppositum potentia antecedenti, sed vnà cum dominio & arbitrio à Deo etiam deriuato, & participato, alia sine ipso.

Ad tertiam consequ. dicitur quòd posita forma 52 ponitur effectus formalis, eo modo quo est à forma, & non aliter. Ab illa autem efficaci, & influxu Dei est non solum quòd fiat determinatus effectus seu actus, sed etiam quòd liberè fiat quòd pertinet ad modum actus: vtrumque enim causatur à Deo, ut dictum est. Quare illa forma non reddit actum determinatum necessariò, sed determinatum

minatum liberè, licet hoc ipsum quod est liberè fieri, sit infallibile, ut descendit à Deo. Atque ita, ut *suprà* diximus, illa entitas, seu influxus licet in se entitativè, & ut quod, sit aliquid necessarium, tamen ut quo, & formaliter est libera forma, id est actum reddit liberum, & sic dat effectum formalem sine læsione libertatis.

53 Ad quartam conseq. concedo anteced. quod si stante auxilio poneretur actus oppositus de facto, frustraretur auxilium, & redderetur inefficax. Distinguo autem consequens: Ergo si potest oppositum stante auxilio, potest frustrari, distinguo, si potest potentia consequenti, concedo, si potest solum potentia antecedenti, nego. Ad frustrandum enim auxilium requiritur quod voluntas vincat efficaciam Dei, & sic maior sit illa; hoc autem implicat, siquidem id quo vinceret, & abiceret de facto efficaciam Dei, cum sit aliquid creatum, etiam à Deo causari debet: Quod si causatur à Deo, non frustratur voluntas eius, & efficacia, sed est signum, quod prior voluntas efficax non fuit. Repugnat ergo quod detur voluntas consequens frustratoria diuinæ efficaciam: potentia autem antecedens ad oppositum non est frustratoria diuini auxilij, quia non habet paratam executionem à Deo, & multò minùs à se sine Deo; potentia autè ad oppositum sine parata executione, ab ipso Deo est, & sic non est frustratoria eius quod Deus vult.

54 Instabis: Hoc modo etiam auxilium sufficiens non est frustrabile à nobis, & sic non differet ab efficaci, siquidem tam infustrabile est vnum, quàm aliud. Sequela prob. quia in eo quod Deus vult quando dat auxilium sufficiens, scilicet quod iste habeat sufficentem potentiam, non potest frustrari, habet enim illam; In eo autem quod est habere effectum, Deus non vult ut habeat illum, cum non sit voluntas efficax, & quoad hoc etiam est infustrabile illud auxilium, quia oppositum stare non potest, scilicet quod habeat effectum solo auxilio sufficienti posito.

Resp. non frustrari auxilium sufficiens à nobis quoad suum effectum formalem, quem præbet nobis, sed frustrari quoad suum finem, propter quem datur nobis secundum voluntatem Dei antecedentem; hoc enim manet frustratum, quia ipsum auxilium dat potentiam ordinatam ad actum: (omnis enim potentia ad actum est) & tamen caret actu: frustratur ergo sine, licet non effectu formali. Et hæc frustratio non est contra Dei voluntatem, sed ex ipsa, quia sic ordinavit Deus, & hoc modo ordinatio Dei vniuersalis semper impletur, ut docet D. Thom. in hac q. 19. art. 6.

55 Hinc sequitur quid dicendum sit absolute, an possimus resistere efficaciam voluntatis Dei, eiusque auxilio, vel non; Nam ex vna parte Scriptura dicit absolute quod voluntati eius non est qui possit resistere, Ester 13. & Rom. 9. Concilium autem Tridentinum dicit quod inspirationem eius possumus abicere, & ei dissentiri, & Concilium Senonense, quod possumus auxilio resistere. Cæterum non contrariantur Concilia Scripturis, sed loquuntur in diuerso sensu, ut iam *superius* satis expositum est: Scriptura enim loquitur secundum sensum compositum, & secundum potentiam consequentem, secundum quam nullo modo possumus resistere Dei voluntati. Concilia verò loquuntur secundum potentiam antecedentem, & in sensu diuiso. At verò nunquam debet concedi quod possumus frustrari efficaciam Dei, & disparitatis ratio est in diuersa significatione

illius termini *frustrari*, & *resistere*, nam ex parte frustrationis nullus locus inuenitur sensui diuiso, sed totum tenet se ex parte sensus compositi, quia frustratio cum sit absoluta euacuatio ipsius efficaciam diuinæ, posita in re oportet quod cum positione, seu suppositione efficaciam componat liberum arbitrium oppositum, faciens, & faciendo vincens efficaciam illam, aliàs frustratio non erit. Resistentia autem potest admittere sensum diuisum, quia resistentia nondum importat totalem victoriam, & expugnationem rei, sicut frustratio, sed conatum. Potest ergo ex hac parte admittere respectum potentiam resistentis, seu conantis in oppositum, quantum est ex meritis ipsius obiecti, & actus ad quem Deus mouet, non autem ex parte immutabilitatis, & modi quo Deus mouet, non solum ut velit, sed ut liberè velit. Et quo ad totum hoc coniunctim & compositè non est resistentia, & sic Scriptura loquitur. Ex parte autem potentiam antecedenter sumptæ, & ex parte actus, & obiecti ad quod Deus mouet, bene stat resistentia & dissensus in sensu diuiso, & sic loquuntur Concilia.

Argumenta contra efficaciam decreti ex defectu sufficientis auxilij.

Et hoc capite fit instantia contra efficaciam decreti diuini, quia si ex sua natura antecedenter ad nostrum consensum datur efficacia, idè est quia ille requiritur ad hoc ut voluntas de facto operetur, & sine illa non est potentia applicata, aut completa, & determinata ut eliciat actum: ergo si Deus deneget illud auxilium efficax, negat aliquid requisitum ad operandum, & sine quo non potest operari in actu potentia; & sic non habet sufficiens auxilium sine illo ad operandum, quia deest aliquid requisitum essentialiter ad operationem, quod non ad ipsam consequitur, sed antecedit, & non est in manu eius ut ponatur.

Et urgetur hoc, quia, ponamus quod præcipiat Deus alicui ut aliquem actum faciat, puta credere, vel amare, aut eleemosynam largiri, & det illi omnia alia requisita ad operandum præter istam efficaciam decreti, qua operetur homo id quod ex parte eius se tenet, scilicet ex parte determinationis suæ, & consensus: talis obligatur ad aliquid impossibile: ergo non teneretur.

Minor prob. Actus meus sine illa antecedenti efficaciam est quoddam impossibile ut nos ipsi supponimus, & docemus loquendo in sensu composito, sed præcipitur ei facere in re, & de facto, etiam non habendo de facto talem efficaciam: ergo præcipitur aliquid impossibile in sensu composito, sicut si alicui habenti potentiam visiuam, sed in tenebris præciperetur ut videret, aut non habenti concursum generalem ad ambulandum, præciperetur ut ambularet, tunc excusaretur à præceptis illis: ergo similiter si alicui non datur illa efficaciam antecedens, excusatur à præcepto, quia redditur sibi impossibile illud opus, ut in re, & de facto.

Communis solutio ad hoc argumentum esse solet, quod illa efficaciam diuinæ voluntatis requiritur non ex parte potestatis, seu potentiam, & virtutis ad operandum, sed ex parte applicationis, sine ista tamen applicatione de facto, & in sensu composito nunquam homo operabitur: & licet illam habere non sit in sua potestate, sed detur à Deo; tamen quia ea simpliciter possumus, quæ per amicos possumus, & illam possumus habere per Deum, simpliciter dicimus posse, quia Deus ex se paratus

paratus est illam dare. Quod si de facto non dat, nihilominus imputatur nobis, quia ex culpa nostra est quod non detur; ponimus enim impedimentum Deo.

57 Sed contra hanc solutionem instatur. Et primo quod illa efficacia ponatur ex parte virtutis vel applicationis, parum interest: sufficit enim quod sit aliquid ita requisitum ad operandum, ut sine illo operatio nunquam possit poni de facto, & in re, & quod non proveniat ex nobis, sed ex alia potestate: sic enim sublato illo requisito, remanet voluntas sine omnibus necessariis ad operandum: ergo remanet non potens, siue hoc sit defectus potentiae, siue defectus applicationis, sicut ignis hic existens simpliciter, non potest Romae comburere, & homo hic existens non potest Romae audire Missam, nec id potest sibi praecipere. Unde cumque ergo sit defectus rei necessariae ad operandum, simpliciter non potest. Quod vero dicitur nos posse quae possumus per alios, id est, per amicos; id enim videtur pertinere ad posse moraliter: tamen si amicus de facto nolit dare tale requisitum, simpliciter non poterimus facere, quia tunc nostrum posse est dependens à voluntate alterius: Unde si de facto non det, de facto non imputabitur mihi: hoc enim habet haec potentia moralis, qua dicimur posse per alios quod cum sit potentia dependens à voluntate alterius, quotiescumque alter non vult, iste excusatur, quia remanet sine potestate solum ex defectu voluntatis alterius. Excusabitur ergo homo ab impletione praeceptorum, quotiescumque Deus non vult illi dare auxilium efficax; si autem dat de facto, implet de facto praeceptum: ergo nunquam est locus quod isti peccet, quia vel implet si habet illud auxilium, vel excusatur si sibi non datur. Quod denique dicitur denegari nobis ob culpam, & sic imputari nobis, si non detur illud auxilium: Contra est quia non semper praecedit in nobis culpa, ut denegetur illa efficacia, ut patet de ipsa prima culpa quam homo vel Angelus committit: ad illam enim non praecedit alia culpa, & tamen denegatur à Deo auxilium efficax, quia si daretur, non peccaret: ergo tunc non imputabitur, & consequenter in tali casu non erit peccatum, atque adeo neque sequens denegatio erit ex culpa, si id quod praecedit, culpa non est.

Resp. de hoc argumento, eiusque solutionibus, & replicis, satis superius que nos egisse in *praced. tomo disput. 10. artic. 5.* ad quem locum remittimus lectorem. In summa, respondemus, quod ista efficacia, & applicatio antecedens si deficeret in totum, & suspenderetur à Deo, sine dubio aliquid necessarium deesset ad operandum, & non imputaretur homini si non operaretur. Ceterum si deest efficacia pro ista operatione, datur tamen pro alia, non deest quidquam ad operandum, & imputatur isti quod non operetur illud bonum, quia redditur volens non operari istud, hoc ipso quod voluntarie se abstinere ab illo, & ad aliud diuertit. Cum enim voluntas nostra non sit potentia restricta, & determinata ad unum, sed potens ad multa, & conringens erga illa, natura eius non postulat ut sibi semper detur determinans concursus ad unam speciem actus, vel ad unam partem, sed ad quamcumque partem habeat, dicitur ad illam voluntarie inclinari, & se determinare, & voluntarie etiam relinquere oppositum: hoc enim operatur ille concursus ut voluntarie velit id ad quod datur, & si datur ad entitatem actus

Ioan. à S. Thom. in 1. part. D. Thomae.

cum permissione ad aliquod peccatum, ex illa permissione sequitur quod voluntarie velit cum defectu. Nunquam ergo datur concursus ad unum, & negatur ad aliud, nisi cum voluntaria inclinatione ad unum & recessu ab alio. Et sic nunquam deest requisitum ad aliquid faciendum, & operandum simpliciter. Quod autem deest aliquando ad operandum hoc, v. g. ad consensum in amorem, est quia voluntarie voluntas aliud vult, & non potest duo opposita simul velle, licet illud ipsam oppositum ex efficacia Dei dependeat, & influxu etiam ad hoc ut voluntarium sit, sic tamen est à Deo, quod ipsa voluntas creata verè & proprie dicitur voluntarie ad aliud applicari, applicatione tamen creata, & consequenter causata & orta à Creatore quoad totum entitativum quod habet.

58 Sic ergo in forma, fatemur illam efficaciam, & applicationem antecedentem esse aliquid requisitum ad operandum per modum ultimae determinationis & applicationis, non per modum virtutis, & potentiae. Fatemur etiam non esse illam efficaciam in mea potestate, quasi derivatam & ortam à me, & ut effectum meum, sed ut causam meae potestatis, & libertatis in actualiter operari. Cum autem inferatur: ergo sine illa efficacia non habeo principia aut requisita sufficientia ad operandum, distinguo, quantum ad sufficientiam virtutis, & potentiae, nego; quantum ad actualem applicationem respectu huius actus determinate, transeat. Vel, ut verbis D. Thom. utamur, *quest. 1. de potentia art. 5. ad primum*, quando dicitur quod aliquis non potest facere sine hoc, *ly non potest*, vel refertur ad potentiam, vel ad actum, scilicet ad facere. Si ad potentiam, est sensus quod sine illo non datur potentia in agente. Si ad actum, est sensus, quod sine illo potentia non operabitur in actu, sicut cum dicitur, Deus non potest facere nisi quod praescit se facturum, *ly non potest*, non dicit defectum potentiae, sed requisiti ad actum; Sacerdos non potest consecrare sine pane, *ly non potest*, non refertur ad potentiam characteris, sed ad actum ex parte alicuius requisiti. Sic sine efficacia decreti non potest homo ex parte actus, licet possit ex parte potentiae. Et cum rursus inferatur, quia sine illo non possum de facto operari, saltem tanquam sine requisito, aut applicatione, sicut ignis sine applicatione non potest comburere, distinguo, sine illo tanquam sine requisito, & applicatione inadaequata potentiae, concedo; tanquam sine applicatione adaequata potentiae, & suspensiva totaliter illius, nego. Est applicatio inadaequata, illa quae est quoad hunc actum determinatum, adaequata, quae est quoad omnes. Est autem differentia in hoc quod est deesse applicationem quoad omnes actus, vel quoad aliquem in particulari, quod applicatio quoad omnes, nullo modo est in manu mea, nec oritur ex ipsa mea voluntate, & sic, si tollitur talis applicatio, tollitur omnino ex causa extrinseca, & est deficientia antecedens actum voluntatis, non consequens, quia non datur tunc aliquis actus, ratione cuius tollatur illa applicatio. Applicatio autem inadaequata est quoad aliquem actum in particulari, qui cum voluntarie sit elicitus, & ad hoc ipsa applicatio operetur ut voluntarie sit, voluntarie etiam impedit ne detur alia applicatio & actus. Et sic deficit mihi applicatio ad priorem actum deficientia consequente aliquem actum voluntarium, quae simpliciter est deficientia voluntaria, ideoque est in manu mea, & sic non deficit mihi simpliciter aliquod requisitum etiam ad illum primum actum, nisi quia volo.

T

Sed

59 Sed dices: Prius est dari applicationem ad hunc secundum actum, quam sequi ipsum actum, & hoc ipso quod datur applicatio ad hunc actum, denegatur applicatio ad alium: ergo hæc deficientia non est consequens actum voluntarium meum, sed antecedens, & consequenter non est in manu mea, sed solum in manu Dei, qui antecederet ad omnem actum negat efficacem applicationem ad istum, & dat ad illum.

Resp. quod applicatio ad actum est prior ipso actu prioritate causalitatis, & naturæ, non tamen denegatur applicatio ad oppositum actum ratione ipsiusmet applicationis, sed ratione actus ex illa consecuti, eo quod duæ applicationes ad oppositos actus non sunt impossibiles ratione sui, sed ratione suorum actum, qui ex illis sequuntur, sicut diuersi motus ratione terminorum ad quos sunt: constat enim quod si ex illo auxilio efficaci seu applicatiuo ad opus, posset non sequi actus, non esset impossibile cum alio efficaci auxilio, seu cum alia applicatione ad oppositum actum, solum enim dicit impossibilitatem cum eo, per quod frustraretur auxilium; frustraretur autem per actum oppositum, non per auxilium ad oppositum formaliter loquendo. Ratione ergo actus voluntarij secuti formaliter denegatur. Et præterea, licet auxilium datum ad unam partem sit prius in genere causæ efficiens ipso actu, tamen ipse actus est prior in genere causæ materialis dispositiue ad expellendum oppositum actum, & consequenter auxilium ad illum, sicut corruptio unius formæ est prior generatione alterius in genere causæ materialis, & sic ratione voluntarij actus oppositi denegatur auxilium.

60 Ad alias replicas factas in argumento. Resp. Ad illam, de his quæ per amicos possumus, dicitur, omnino nos nihil posse nisi per Deum: *Omnia*, inquit Apostolus, *possum in eo qui me confortat*. Et Iſaias, *Omnia opera nostra operatus es nobis Domine*. Non ergo infelicitur possumus, si per Deum possumus, qui utique non se habet ut amicus omnino extraneus, sed ut principium & causa omnium quæ in nobis sunt, vel à nobis fiunt. Quod si Deus noluerit dare auxilium efficax, iste non manebit potens, distinguo; si noluerit dare absolute & ex se tollendo illud, concedo; si non dederit ex aliquo impedimento voluntario, puta ex eo quod voluntariè homo occupatur circa alium, & habet applicationem quoad illum, nego; tunc enim Deus non denegat auxilium illud efficax, nisi propter impedimentum voluntarium ipsius hominis, ad quod quidem Deus dat etiam applicationem, & influxum, sed ipse homo voluntariè acceptat, & sic ponit voluntarium impedimentum, quia illa applicatio Dei non facit ipsum velle coactè, sed voluntariè, & ita ipse voluntariè impedimentum præstat, opposito actui, quia verè habet voluntariè alium actum impossibilem cum illo, licet illum non habeat, nisi etiam ex influxu, & causalitate Dei, sed quæ voluntarium reddat hominem circa talem actum impeditum alterius, non inuitum. Vnde imputatur sibi si operetur contra præceptum, etiamsi non habeat auxilium efficax ad illud, quia non habere, est ex impedimento quod voluntariè præstat occupando se circa aliud voluntariè, & reddendo se impossibilem, & repugnantem illi auxilio efficaci, quatenus exercet actum voluntarium; aut omissionem voluntariam, non pertinentem ad tale auxilium efficax, sed illi impossibilem.

61 Ad illam autem instantiam, quod non denegatur nobis in culpam illud auxilium, cum saltem ipsa prima culpa ex denegatione auxilij comittatur, &

illa denegatio non supponat priorem culpam, respondimus citato loco *tomii præcedentis*, non præcedere culpam, sed saltem comitari, & in aliquo genere causæ, saltem materialis etiam præcedere, quod sufficit ut dicatur homo impedimentum voluntarium ponere Deo, etiam respectu primæ denegationis auxilij efficaci: nam reuera quando denegatur homini auxilium efficax ex parte ipsius hominis, datur peccatum, vel inconsideratio, & utrumque voluntarium est, & sic voluntarium impedimentum concomitanter habet. Quod verò etiam in aliquo genere causæ antecedit, patet, quia ad quodcumque peccatum & requiritur permissio ex parte Dei, & sequitur ex parte hominis defectus, seu lapsus ex defectibilitate propria, qua tuit in nihil, & in defectum, sicut ex abientia solis aer ex propria natura fit tenebrosus. Et quando dicitur nostrum defectum in genere causæ dispositiue & materialis præcedere ipsam denegationem auxilij, non intelligitur præcedere per modum dispositionis antecedentis, sicut dispositiones remotæ præcedunt formam, v.g. calor, vel siccitas ignem, sed eo modo quo ipsa corruptio unius formæ, & generatio alterius se ad inuicem præcedunt: est enim corruptio velut dispositio præcedens introductionem formæ, ut ostendimus *lib. 1. de generatione quæst. 1. & 2.* quia non nisi subiecto catente forma, opposita introducitur, licet in genere formali, seu effectiue generatio sit prior, & ad eam sequitur corruptio. Sic denegatio auxilij, non nisi in subiecto deficiente est, non ante deficientiam, & tamen defectus sequitur ad negationem auxilij. In eo ergo priori causæ materialis & dispositiue, defectus qui comitatur negationem auxilij, est causa, & ratio quare Deus nos deserat, quia videlicet voluntarium impedimentum ponimus, concomitans ipsam derelictionem Dei, sicut introductio unius formæ est causa, & impedimentum ne altera forma sit, & corruptio unius conducit, & disponit ut altera introducatur. Itaque semper datur aliqua culpa vel concomitans, vel antecedens, & illa quæ est concomitans in quodam priori naturæ præcedit, eo modo quo una forma impossibilis & exclusiua alterius illam præcedit; verificatur enim quod in illo instanti, quo Deus denegat auxilium efficax, habet voluntas impedimentum voluntarium talis auxilij, quia voluntariè exercetur circa alium actum (licet hoc ipsum sine alio influxu Dei non sit) qui impossibilis est cum auxilio denegato, & ideo semper sibi deest auxilium propter propriam voluntatem ad oppositum, etiam in prima auxilij denegatione.

Et quod ista sit mens D. Thom. in solutione huius 62 argumenti constat. Nam super epistolam ad Hebr. cap. 12. lect. 3. explicans illud, *Contemplantur ne quis desit gratia Dei*, dicit S. Thom. *Gratia Dei nulli deest, sed omnibus quantum est in se, se communicat, sicut nec Sol deest oculis cecis. Sed contra, quia si gratia non datur ex operibus, sed tamen ex hoc quod aliquis non potuit obstaculum: ergo habere gratiam dependet ex solo libero arbitrio, & non ex electione Dei, quod est error Pelagij. Respondeo: dicendum est, quod hoc ipsum quod aliquis non ponit obstaculum, ex gratia procedit. Vnde si aliquis ponat, & tamen moueatur cor eius ad remouendum illud, hoc est ex dono gratia Dei vocantis per misericordiam suam, Gala. 1. Dum autem placuit ei qui me segregauit ex utero matris mee, & vocauit me per gratiam suam. Hoc autem donum gratia non est gratum faciens. Quod ergo à quibusdam remouetur istud obstaculum, hoc est ex misericordia Dei, quod autem non remouetur, hoc est*

est ex iustitia eius. Sentit ergo S. Thom. quod remotio obstaculi est ex gratia Dei, non quidem gratum faciente, sed auxiliante: non remoueri autem istud obstaculum, seu non dari istam gratiam remouentem (quod idem est) est ex iustitia: & consequenter supponit aliquid in nobis ratione cuius denegetur, quod in prima negatione gratiæ non potest esse ex aliqua iustitia pro culpa prius tempore præcedenti, sed solum prius naturā. Item idem D. Thom. 3. contra gentil. cap. 159. ponens simile argumentum, imò idem quod hinc ponitur, & magnificatur: Dicit enim quod cum in finem ultimum aliquis dirigi non possit sine auxilio gratiæ, sine qua etiam non potest habere fidem, spem, dilectionem, &c. potest alicui videri quod non sit homini imputandum, si prædictis careat, præcipue cum diuina gratia auxilium mereri non possit, nec ad Deum conuerti, nisi Deus eum conuertat; nulli enim imputatur quod ab alio dependet. Ecce argumentum ipsum quod modo proponitur. Respondet autem quod Licet aliquis per motum liberi arbitrii diuinam gratiam nec promereri, nec aduocare possit, potest tamen seipsum impedire ne eam recipiat, dicitur enim de quibusdam Iob 21. Dixerunt Deo, recede a nobis, scientiam viarum tuarum nolumus, & Iob 24. Ipsi fuerunt rebelles lumini; & cum hoc sit in potestate liberi arbitrii, impedire diuinam gratiam receptionem, vel non impedire, non immerito in culpam imputatur ei, qui impedimentum præstat gratiæ receptioni: Deus enim, quantum in se est, paratus est omnibus gratiam dare; vult enim omnes homines saluos fieri: sed illi soli gratia priuantur, qui in seipsis gratiæ impedimentum præstant: sicut Sole mundum illuminante, in culpam imputatur ei qui oculos claudit, licet videre non possit, nisi lumine Solis præueniatur. Vbi loquitur D. Thom. de impedimento quod præstat ipsi gratiæ præuenienti, sicut lumen Solis debet præuenire potentiam visuam, ut videat, & quia auxilium, de quo loquitur, non potest ab aliquo promereri, vel aduocari; loquitur ergo de auxilio præueniente, cui si impedimentum præstat, solum est concomitans, licet in aliquo priori naturæ antecedit. Et ne aliquis dicat S. Thomam loqui non de prima denegatione auxilij quam nulla culpa præcedit, sed de aliis quæ post peccatum aliquod subsequuntur, aduertat, tum quod D. Thom. loquitur vniuersaliter, & eius argumentum etiam primam denegationem auxilij comprehendit, Quia non est, inquit, homini imputandum, si præmissis careat; nulli enim imputatur quod ab alio dependet; quod argumentum etiam currit respectu primæ denegationis auxilij ad dilectionem vel perseverantiam, de qua ibi loquitur; ergo etiam in solutione debet complecti casum primæ denegationis auxilij. Tum etiam, quia ipse D. Thom. se declarauerit, dum immediate in cap. seq. 160. dicit quod Dictum est, in potestate liberi arbitrii esse ne impedimentum gratiæ præstat, competit his quibus naturalis potestas integra fuerit: Ergo declarat se ante locutum fuisse de eo qui adhuc non peccauit, & tamen in potestate sua est impedire vel non impedire receptionem gratiæ (utique actualis, seu auxiliantis:) ergo loquitur de his qui sunt in statu ante denegationem primi auxilij: nam sunt in statu integræ potentiæ naturalis: ergo adhuc supponitur non præcessisse peccatum: ergo nec permissionem eius seu denegationem auxilij: ergo de illa loquitur.

63 Hoc etiam est argumentum illud antiquum, quod Augustinum mouit ad scribendum librum de correptione & gratia; ut manifestè constet non Ioan. à S. Thoma in 1. part. D. Thomæ.

esse aliquod fundamentum nunc negandi efficaciam intrinsecam in decreto & causalitate diuina, & recurrendi ad scientiam mediam, & præuisionem consensus mei futuri, quod non videris & solueris August. nec tamen ad scientiam mediam voluit diuertere, & ad negationem illius intrinsecæ efficaciz, quin potius eam magis in hoc libro, quam in aliquo alio affirmat, explicatque vberius, ut patet toto cap. 12. Occasionem ergo huic libro præbuit illud ipsum argumentum quod hoc loco soluimus, ut patet in cap. 4. illius libri, ubi ponitur aduersariorum obiectio, quod non debet imputari in culpam, neque corripi homo, si bonam voluntatem non habeat, siquidem eam accipere debet à Deo: Rectè, inquit, corripere si eam meā culpā non haberem, hoc est, si eam possem mihi dare, vel sumere ipse, nec facerem, vel si dante eo accipere noluissem. Et statim cap. 5. Cum ergo & ipsa voluntas præparetur à Domino, cur me corripis, quia vides me eius præcepta facere nolle, & non potius ipsum rogas, ut in me operetur & velle? Ecce totum argumentum aduersariorum contra efficaciam Dei ex natura sua antecedentem, non autem à nostro consensu pro sua efficacia dependentem.

Quid ad hæc Augustinus? Nunquid recurrit ad 64 consensum præuisionem ex parte nostri, ut efficax reddatur correptio, & auxilium Dei, an potius in ipsum Deum reducit totam efficaciam correptionis, & in nos retorquet malum & impedimentum, si non habemus gratiam Dei? Quid inquam ad hæc respondet August. cum iterum eandem repetit obiectionem, quasi nimis molestam in hæc parte, in fine cap. 5. Hanc, inquit, charitatem non accepimus, quid itaque corripimur, quasi nos eam nobis dare possimus, & nostro arbitrio dare. nolimus? Quod est dicere, nostro consensu eam efficacem facere possimus; perinde enim est eam dare, atque efficacem facere. Respondet ergo Doctor S. semper suā culpā non accipere aliquem gratiam, ut videas solutionem D. Thomæ & nostram, ex quo fonte hausta sit. Dicit enim cap. 6. quod Si aliqui nondum regenerati sunt, & non accipiunt gratiam, ex originali culpa non accipiunt, & sic corripitur in eis origo damnabilis, ut ex dolore correptionis voluntas regenerationis oriatur, si tamen qui corripitur filius sit promissionis, ut strepitu correptionis forinsecus insonante atque flagellante, Deus in illo intrinsecus occulta inspiratione operetur & velle. Quod si aliquis sit regeneratus, & iustificatus, & in malam vitam sua voluntate relabatur, iam iste non potest dicere non accepi, quia acceptam gratiam Dei suo in malum libero amisit arbitrio. Sed quia potest in isto instaurari argumentum, quia libet fidem & dilectionem acceperit à Deo, non tamen perseverantiam, seu auxilium efficax ad perseverandum. Cur ergo corripuntur, si non perseverant? Respondet S. August. supponendo perseverantiam illam esse donum Dei, respondet inquam, cap. 7. Iuste eos corripimus, quia ex bona in malam vitam sua voluntate mutati sunt; quod utique est recurrere ad culpam concomitantem: illa enim mutatio sequitur ad denegationem auxilij, quo perseverarent. Et tandem id reducit ad secretū prædestinationis Dei, qui voluit dare his perseverantiā, non illis, quia hos, non illos prædestinauit. Cur autem illis non dederit perseverantiam, quibus dedit fidem, ignorare se fateatur Aug. c. 8. quia inscrutabilia sunt iudicia Dei: id enim ad liberum arbitrium pertinere non potest ut perseveret in bono vel non perseveret. Et hoc quidem

ita est loquendo ex parte permissionis diuinæ, cuius non sunt quærendæ causæ, quare isti negat, alij dat auxilium suum. Sed tamen quod semper interueniat ex parte nostra impedimentum & culpa concomitans Augustinam dixerat, & iterum repetit cap. 11. virgens argumentum in primo homine & Angelo, cur eis non est data perseverantia, sed permitti sunt cadere, quod utique est loqui de prima permissione & denegatione gratiæ. Respondet autem cap. 11. quod posset primus homo permanere, si vellet, quia dederat adiutorium per quod posset, & sipe quo non posset perseveranter manere (id est auxilium sufficiens) sed quia noluit permanere, profecto eius culpa est cuius meritum fuisset, si permanere voluisset. Et ita concludit non fuisse in illo adiutorium efficax, quo datur non solum posse quod volumus, verum etiam velle quod possumus, quod non fuit in homine primo, vnum enim horum in illo fuit, alterum non fuit. Sentit ergo ex culpa sua non permansisse, atque adeo ex culpa sua illud efficax adiutorium non habuisse; quod solum de culpa concomitante verificari potest. Si autem ista efficacia non haberetur, nisi ex consensu nostro, ad quid ista omnia docet Aug. pro soluenda ista difficultate, sed compendio dicere poterat non dari isti perseverantiam, quia etsi datur idem auxilium quod alteri, iste præuidetur consensurus, non ille, & sic iste habet efficax auxilium, non ille. Nusquam hoc dicit Aug. sed potius ibi cap. 12. distinguit auxilium efficax à sufficiente, illique tribuit infallibilitatem in agendo voluntatem, ut quamvis infirma non deficeret, &c. ergo August. nusquam sensit ex nostro consensu præuiso summi efficaciam illam, quasi per denominationem extrinsecam; nec enim ad consensum nostrum pro hoc recurrit, sed ad omnipotentiam Dei, eiusque prædestinationem, & decretum, ut patet ibi, cap. 7. 12. & 14.

Argumentum ex influxu Dei in materiale peccati.

- 65 In peccatis duo reperiuntur, alterum pertinens ad defectum, seu priuationem, & auersionem à Deo, quod nefas est dicere quod à Deo causetur, qui author malorum non est; alterum pertinent ad positivum, quod se habet ut materiale, & subiectum cui illa priuatio & defectus coniungitur. Et de hoc fit argumentum quod nullo modo possit esse ex determinatione efficaci Dei, sed ex determinatione liberi arbitrij creati, & Deus solum offert concursum indifferentem: ergo saluatur aliquis effectus creatus qui non oriatur ex efficaci decreto, ac proinde non repugnabit id ita haberi in aliis effectibus creatis. Quod ergo Deus efficaci suo decreto non determinet ad entitatem illam materiale peccati, prob. Quia hæc determinatio est causa ut voluntas determinatè operetur illam entitatem, non eo modo quo exit à Deo, sed eo modo quo exit à causa creata; ad hoc enim in illam agit Deus, eamque determinat, ut ipsa eliciat suo limitato modo talem actum: sed impossibile est voluntatem creatam talem actum, v.g. odium Dei, elicere sine peccato: ergo causa determinans voluntatem ad talem actum antecedenter, & tali determinatione, cui ipsa voluntas non potest resistere in sensu composito, omnino est causa ipsius peccati, quia mouet ad id quod sine peccato exerceri non potest, & mouet ut eo modo fiat, quo à causa creata exire debet, sub quo modo

non nisi defectuosè exire potest.

Conf. quia vehementius & fortius influit causa physica in illum actum, quam moralis, quæ solum persuadendo vel præcipiendo potest mouere, causa autem physica executiuè influendo, quod magis intimum est. Sed Deus non potest concurrere ad actum illum excitando, & suadendo, aliàs esset intentator malorum, quia non aliter excitant homines ad malum, quam persuadendo ad id quod entitatis, & delectionis est in peccato, non ad ipsam auersionem: Ergo multò minùs poterit Deus ad id physicè mouere. Quod si Deus excitare non potest ad entitatem illius actus: ergo neque potest physicè in illud influere, quia influenza Dei physica, ut non tollat libertatem, debet esse motio cum excitatione aliàs moueret Deus voluntatem, sicut mouet lapidem, essetque liberum arbitrium motum, sed non excitatum, quod sufficit ut liberè non concurrat. Quod si concurrat modo libero cum voluntate antecedenter mouendo: ergo ex nolente obiectum peccati facit Deus volentem, sicut è conuerso quando conuerti peccatorem, ex nolente facit volentem, & reluctanti studium virtutis immittit, ut Aug. sæpe dicit. Quis autem audeat dicere Deum ex nolente obiectum prauum, reddere volentem? sic enim homo Deo Authore fieret deterior.

Conf. secundò, quia Calvinus, qui posuit Deum sic concurrere ad peccatum, sicut ad opus bonum, & non minùs esse opus Dei conuersionem Pauli, quam proditionem ludæ, non dixit Deum esse authorem ipsius peccati, ut auersio, & defectus est, sed ut conuersio est ad bonum creatum: ergo si nos ponimus ad id quod positivum est in peccato Deum antecedenter mouere, idem ponimus quod Calvinus; & inducimus necessitatem, quia ab necessitandum non alia efficacia maior requiritur quam ista quam nos ponimus.

Resp. hoc etiam argumentum fuisse olim obiectum Augustino, eiusque doctrinæ, quasi Deus per potentiam suam homines in peccata impelleret, ut constat ex obiectione prima Gallorum & vndecima, quibus respondet S. Prosper in responsionibus ad capitula Gallorum. Similiter Faustus lib. 1. cap. 19. Catholicis imponebat quod assererent per voluntatem Dei homines tradi in perditionem. Igitur S. Prosper ad illam primam obiectionem, qua dicebant Galli contra doctrinam Aug. quod ex prædestinatione Dei, velut fatali necessitate homines ad peccata compulsi cogantur in mortem, sic respondet: *Qui prædestinationis nomine fatum prædicat, tam non est probandus, quam qui fati nomine veritatem prædestinationis infamat: Fati enim opinio vana est, & de falsitate concepta. Prædestinationis autem fides multa sanctarum Scripturarum autoritate munita est, cui nullo modo fas est ea que ab hominibus malè aguntur ascribi, qui in proclinitatem cadendi non ex conditione Dei, sed ex primi patris præuocatione venerunt.*

Igitur nos affirmamus quod in peccati malitiam & defectum nullo modo Deus influit, nec efficacia decreti sui est causa, etiam per accidens talis malitiæ, licet sit causa totius entitatis, & effectus, qui in illo actu, in quo est malitia, inuenitur. Nam quidquid entitatis creatæ inuenitur, vbicumque id inueniatur, & cuicumque defectui coniunctum sit, ita esse à prima causa Deo derivatum & causatum, certum est, quam certum Deum esse factorem omnium visibilium, & inuisibilium, & omnia peripsū facta esse, & omnia in ipso constare, quæ sūt propositiones immediatè de fide. Vnde fit syllogismus demon

demonstratiuus Theologicus : Omnia quæ quomodocumque sunt, seu entitates sunt, & habent esse reale, à Deo sunt; qui enim dixit *omnia*, nihil exclusit : sed entitas actus peccati est aliquod esse reale existens in rerum natura : ergo à Deo est. Consequentia est in *dary*. Minor constat naturali lumine, & ipsa experientia, qua tot actus peccatorum videmus, qui si reale esse non haberent, in rerum natura non darentur. Maior autem est de fide. Dicere autem quod omnis entitas est à Deo causata, vel permixta, non autem omnis entitas est causata, sed illa tantum quæ defectum annexum non habet, hæc enim ratione defectus annexi permixta est, non causata. Hoc inquam dicere, est planè verbis ludere, sine vlla rei significatæ subsistentia. Nam implicat entitatem aliquam acquirere verum, & reale esse extra causas per nudam permissionem, & sine influentia positiva, cum permissio sit sola suspensio agendi, & derelictio, quæ est pura negatio, implicat autem quod sola, & pura negatio det esse reale, quod solum dari potest per influxum positivum. Est ergo repugnantia manifesta quod aliqua entitas quæ veram existentiam habet, in quantum talis sit permixta, & non causata à Deo, licet quoad defectum non possit à Deo causari, sicut motus obliquus tibie in quantum motus vitalis est, repugnat quod non sit ab anima: ergo illa entitas, ut entitas, eodem modo est à Deo, quo reliquæ creaturæ entitates. Quod sitimetur ex influxu antecedenti, & efficaci quod Deus reddatur auctor peccati, eodem modo erit adiutor, si tantum concurrat simultaneè ad illum actum, non minus autem repugnat Deo adiuuare ad peccatum aut cooperari, quam antecederet influere. Et idè S. Thom. in 2. dist. 27. q. 2. art. 2. opinionem dicentem, quod actus peccatorum in quantum actus non sunt à Deo, propinquissimam errori esse dicit. Nec solum Deum esse cooperatorem talis entitatis, & influxu simultaneo influere, sed etiam antecedenti, dum inquit, quod si voluntas humana actionem aliquam posset producere, cuius actor Deus non esset, voluntas humana rationem primi principij haberet. Sentit ergo D. Thom. quod in entitate illius actionis Deus est actus, & non solum cooperatur, & sic eodem modo diuinus influxus se habet antecederet ad causandum talem actionem atque ad alias in ratione entitatis.

67 Ut ergo videamus quomodo causalitas, & influxus Dei antecedens ita tangat entitatem illius actionis, quod non malitiam, & argumenta contraria soluantur, est aduertendum quod cum ad actum liberum requiratur & motio moralis, & physicus influxus, in bonis actibus utroque modo incipit Deus causare actionem; nam, ut Concilium dicit, exordium iustificationis sumitur à prima vocatione, & sic propositio obiecti, per quam fit motio moralis, est primum à quo inchoatur actus liber. In malis autem actibus non potest hæc motio moralis immediatè esse à Deo, quia ipse non suggerit malum, sed ut dicitur Iacobi 1. *Deus intentator malorum est, ipse autem neminem tentat*. Et huius ratio est, quia persuasio, aut consilium, aut quæcumque propositio obiecti non influit intus in voluntatem, nisi iuxta modum ipsius obiecti quod proponit, quia non facit aliud quam obiectum repræsentare, ipsum autem obiectum sic manifestatum allicit, & attrahit voluntatem iuxta bonitatem quam manifestat, & quam continet. Vnde cum illa bonitas obiecti, in his quæ peccata sunt, ita contineat bonitatem, quod habeat adiunctum defectum & malitiam, nec moueat, separando vnum ab alio, inde fit quod eodem modo

Ioan. à S. Thoma in 1. part. D. Thomæ.

est causa peccati obiectum alliciens, & ille qui proponit seu manifestat obiectum, quia manifestans & proponens non habet alium influxum quam obiectum propositum, & ita si obiectum propositum non præscindit à malitia in suo influxu, neque proponens illud, præscindit : Deus autem in suo influxu præscindit à malitia, quia non causat illam : non ergo habet moralem influxum. Propositio ergo obiecti, & motio moralis ad actum peccati, quia defectuosa est, & defectui annexa, incipit à causa deficiente, vel à Diabolo, vel ab homine, vel à seipso, sed semper cum aliqua inconsideratione, & inaduerrentia, vnde incipit defectuosa motio, & propositio obiecti, quanquam id quod entitatis est in tali motione, & propositione, totum ex Deo sit, sed condistinguius modum moralis motionis à causatione entitatis, ut entitas est. Supposita tali motione morali, orta ex inconsideratione, & defectu, incipit causalitas, & influxus Dei in ipsam voluntatem, ad id quod entitatis est in illo actu, & ad id quod effectiuum est, non quod defectiuum, eo quod Deus operatur ut prima causa, & primum ens, & sic, quidquid operatur, est sub ratione entis, & effectus, non sub ratione deficientis, quia in quantum deficit, ens non est. Vnde cum in peccato reluceat defectus, & entitas, sub ratione defectus reducitur ad causam primam deficientem quæ est creatura ex se deficiens, quia de se ex nihilo est, sub ratione effectus & entitatis ad causam primam efficientem, quæ Deus est. Ex ipsa autem ratione entitatis, quam habet absolutè, non infert, neque fundat defectum, sed ex entitate, ut à causa defectibili, quia cum defectus de se dicat carentiam, & priuationem entitatis, potius est destructiua entitatis de se, & ita illa causa quæ sustentat & causat entitatem, ut entitas est, potius obstat ne malum, seu defectus consumat totum ens, quam fundet, & foueat ipsum defectum. Et sic causa prima influendo entitatem illam sub ratione entitatis, tantum abest ut conducat ad defectum, quod potius obstat illi, & contraponitur, entitatem causando sua ratione entitatis, ne totum destruat; & sic nec per accidens causat illud, quia nullam radicem defectibilitatis habet, & potius opponitur de se defectui.

Quare in forma ad argumentum dico : Dei efficacia est causa ut voluntas creata suo determinato modo operetur illam entitatem actus, distinguo, ut operetur suo modo defectiuo, nego, suo modo effectiuo, seu quantum ad id quod effectiuum est, etiam ex parte creaturæ, in tali actu, transeat; quod autem voluntas creata non possit illum actum sine defectu elicere, concedimus; cum verò infertur: ergo causa determinans antecederet ad talem actum est causa ipsius peccati, distinguo, si determinet antecederet, sub eo modo quo voluntas nostra deficiens est, concedo, si tantum sub eo modo quo efficiens est, & quantum ad id quod effectiuum est in tali actu, nego. Causa enim creata & est causa illius actus quoad realitatem suam, & quoad defectum, etsi adiuuetur vel determinetur sub utroque modo, & effectiuo, & defectiuo, seu inuoluendo utrumque, talis causa vel cooperans, vel adiuuans, vel antecederet; etiam ad peccatum operatur, & conducit. Si autem adiuuetur, vel foueatur, aut causetur ille actus sub præcisa ratione entitatis, & quantum ad id quod effectiuum est, non ex hoc fit operatio, aut influxus in defectum, sed potius est influxus obstatens defectui, quia sustinet entitatem ne absorbeat à defectu, & destruat à malo. Nec obstat quod illa efficacia Dei determinat voluntatem creatam ut modo suo limitato operetur, &

T 3

non

non modo ipsius Dei, quia modus ille voluntatis est duplex, effectiuus quoad esse, & realitatem actus, defectiuus quoad defectum; & primus est participatus à Deo, non secundus. Et Deus influendo, & determinando ut voluntas suo modo limitato operetur, influit, & determinat ut suo modo effectiuo, & participato à Deo operetur, non suo modo defectiuo, & à se orto.

69 Ad primam Conf. Resp. quod causa physica influit, seu imprimit vehementius, quam moralis: distinguo, imprimit vehementius quantum ad id quod entitativum, & effectiuum est, concedo, quantum ad id quod defectiuum est, nego, nisi etiam causa physica defectiua sit. Quod si defectiua non sit, sicut causa prima, nullo modo influit in defectum (a quo non præscindit causa moralis) sed potius illi obstat, ut dictum est. Itaque causa moralis minus vehemens, & efficax est, sed magis inuoluens defectum, seu minus præscindens ab illo, quia solum ratione obiecti mouet, in quo obiecto nunquam defectus, seu malitia præscinditur. Causa autem physica præscindere potest à defectu, & solum influere entitatem, si ipsa non sit causa defectiua, sed purè efficiens, quantumcumque in illa entitate subiectetur malitia, quia subiectatur in illa ut procedit à causa deficiente, non ut præcisè entitas est, eo quod defectus iste non aduenit entitati quomodocumque, sed innascitur illi, & consequenter coniunctus est illi, ut oritur à causa deficiente. Ad id quod dicitur, quod si Deus non potest excitare ad actum peccati, neque poterit in illum influere modo libero, negamus hoc; nec enim requiritur ad illam influentiam quod sit excitatio à Deo, sufficit, quod supponatur à Deo & ea supposita influat iuxta illam, non sine illa. Et sic liberum arbitrium est motum à Deo, non sicut equus à sessore, aut lapis à generante, sed sicut libera voluntas supponendo excitationem, non per se excitando, motus autem, seu influxus qui excitationem supponit, & iuxta illam regulatur, etiam modo libero mouere potest quantum ad id quod effectiuum est, non quod defectiuum in illo libero actu. Et cum dicitur quod si Deus concurrat modo libero ad entitatem illius, actus, ex nolente peccatum facit volentem, distinguo, facit volentem entitativè, & effectivè, seu quoad id quod effectiuum est, transeat, facit volentem defectivè & simpliciter quoad ipsum peccatum, nego. Vnde Deo auctore homo non fit deterius, sed potius Deo auctore sustentatur entitas, ne penitus deterioretur, & destruat à malo.

70 Ad secundam Conf. Resp. Caluinum non distinxisse in peccato id quod formale est, seu defectuosum, & auersiuum ab eo quod conuersiuum & effectiuum, quia cum negauerit libertatem ponens Deum necessitare voluntatem nostram, non reliquit locum ut in peccato esset priuatio rectitudinis & demeritum, quia talis actus non est capax defectus liberi, & priuationis culpabilis, si ratio voluntarij liberi ab illo tollitur. Quare non distinxit ibi priuationem auersionis, & conuersionis defectus, seu priuationis voluntariæ, & entitatis, & ideo non dixit nisi quod Deus ad totum illum actum necessitat, & necessitando non est locus distinguendi auersionem seu priuationem rectitudinis ab eo quod effectiuum & conuersiuum est, quia non est priuatio rectitudinis, nisi libera sit. Quod verò dicitur ad necessitandum voluntatem non requiri maiorem efficaciam, quam nos ponimus Resp. requirit nempe efficaciam, quæ tollat indifferentiam indicij, & non causet actum regulatum tali indifferentia, sed sine illa quod est actum esse omnino determinatum.

ARTICVLVS VII.

Quid de decretis conditionatis, & de voluntate Dei antecedente, & consequente?

EGimus præced. tomo disp. 20. art. 2. & 5. de istis conditionatis decretis, & ostendimus Deo nullo modo repugnare, nec ullam indecentiam includere. Et loquimur de decretis conditionatis ex parte obiecti, absolutis autem ex parte actuum, quo nomine non significamus aliud, quam decreta de facto existentia in Deo (id significat absolutum ex parte actus) quæ tamen pro obiecto habent non aliquid de facto, & absolute futurum, seu existens, sed aliquid sub conditione ponendum, id est, quod existeret, si talis conditio poneretur.

Sed quia in his etiam decretis conditionatis admittendis, vel reiiciendis nonnulla variatio est inter auctores, & defensores scientiæ mediæ, licet conueniant in hoc, quod cognitio obiectorum conditionatorum pendentium à libertate nostra non fundatur sufficienter in his decretis conditionatis, operæpretium est eorum vim, naturamque explicare, & quomodo Deo conueniant, aut illi deneganda sint.

Igitur plures ex defensoribus scientiæ mediæ negant absolute ista decreta, tum quia impossibilia, tum quia inutilia, & otiosa, tum quia non conducentia ad cognitionem infallibilem rei liberæ, nisi destruant libertatem. Impossibilia censent, quia decretum liberum Dei non potest determinatè versari circa tale, vel tale obiectum, nisi ponat aliquam variationem, seu mutationem in ipso obiecto: rebus enim omnino inuariatis tam ex parte Dei, quam ex parte creaturæ, nulla sequitur noua denominatio in hanc partem potius quam in oppositam, sed manebit obiectum in sua pura possibilitate, sicut antea: seu ex parte Dei nulla dari potest mutatio: ergo solum ponenda est ex parte creaturæ, & si ex parte creaturæ nulla detur, manebunt res omnino inuariatæ ex omni parte. Per illud autem decretum conditionatum nulla datur mutatio ex parte creaturæ: conditionalis enim nihil ponit in esse: ergo non est dabile tale decretum in Deo. Et præsertim vrgetur hoc, quia non potest voluntas ferri actu in aliquid sub conditione, si esset bonum, sicut nec visus in aliquid, si esset coloratum, sed futurum sub conditione non habet actu bonitatem, sed solum sub conditione: ergo nec actu amatur, seu decernitur, sed solum sub conditione decerneretur. Inutilia verò, & otiosa censent, quia aut Deus decernit tales condiciones purificare, & resolvere, aut non. Si decernit purificare; ad quid vult sub conditione; sufficit enim rem de facto ponere; ut v. g. si Deus decernit facere paradysum cum talibus arboribus, & fontibus, &c. ad quid seruit decretum aliud sub conditione, quo dicat; Si creauero paradysum, faciam in eo fontem. Si verò decernit non purificare conditionem, multò inutilius est decretum: solum enim ad otiositatem pertinere videtur occupari circa combinationes conditionales, simul decernendo nihil de illis facere: nam posito decreto Dei absolute de non purificanda conditione, conditio illa remanet impossibilis, v. g. decernere, si Christus prædicauerit Tyriis, conuertentur, posito absolute decreto non veniendi, est conditio impossibilis, scilicet quod veniat Christus: ergo est formare decretum de conditione impossibili, quo nihil inutilius, ut si decernat Deus, si detur chimæra, illam conseruabo, si non esset Deus, volo ut Tyrij conuertantur. Quid stultius?

stultius? Et præsertim si haberet istas combinationes circa omnia possibiliâ; nec enim maior ratio est quod habeat circa vnum obiectum quam circa aliud: tunc autem occuparetur Deus circa infinita possibiliâ, decernendo quid fieret in tali, vel tali mundo, si illum condidisset; & tamen simul nihil horum volendo facere, quod est planè inutiliter, & otiosè occupari.

2 Denique non conducere ista decreta conditionata ad infallibilem rei liberæ cognitionem probatur. Nam vel istud decretum conditionatum est prædefinitivum actuum liberorum sub conditione, si hoc vel illud ponatur, vel non. Si non est prædefinitivum: ergo neque in vi decreti est infallibiliter ostensuum determinationis liberæ, quia non causat illam determinationem, & sic si non causat, manet voluntas, posito tali decreto, æquè indifferens, & indeterminata. Vnde ad videndam talem determinationem oportet uti non illo decreto, sed alio principio, id est, scientia non fundata in decreto, & hæc est scientia media, quæ cognoscit veritates illas, quatenus in se determinatæ sunt, non quatenus ex decreto Dei libero dimanant. Si verò tale decretum conditionatum est prædefinitivum, & ideo cognoscit Deus talia futura per decretum, quia prædefinita. In primis cum illa prædefinitio sit causa antecedens, & infallibilis, tantæque efficacis quod ei resisti non potest, tollit contingentiam in re decretata; & deinde quia tunc cognoscitur res decretata ex vi decreti per illationem, & consequentiam necessariam: ergo per scientiam simplicis intelligentiæ, ad quam spectat cognitio omnis connexionis necessariæ; quod tamen nos negamus, ponentes illam scientiam fundari in decreto libero. Fieri autem illationem necessariam ex decreto, constat, quia ista consequentia est necessaria. Datur prædefinitio: ergo datur actus prædefinitus. Nec est solum necessaria in vi consequentiæ, & ex suppositione, sed in vi consequentis, & absolute, quia prædefinitio est causa antecedens talis actus.

3 Propter hæc, & alia similia argumenta conveniunt defensores scientiæ mediæ in hoc quod est, non dari in Deo decreta absoluta, seu de facto existentia in Deo ex parte actus, & conditionata ex parte obiecti, tanquam requisita, aut necessaria ad cognoscendum veritatem determinatam talium futurorum; id enim esset manifestè contradicere scientiæ mediæ, cuius unica formalis ratio in hoc consistit, quod possit attingere determinatam veritatem actus liberi creati ante omnem determinationem diuinæ voluntatis circa illam. Loquendo autem de decretis conditionatis, non prædefinitivis nec determinantibus veritatem rei conditionatæ, sed tantum exprimentibus voluntatem diuinam circa rem absolute non futuram, quidam ex defensoribus scientiæ mediæ in totum illa reiiciunt, quidam admittunt, licet alij quasdam limitationes illis addant. In totum reiiciunt Molina 1. p. q. 14. a. 13. disp. 15. 17. & 18. Vasq. 1. p. disp. 67. c. 4. n. 21. & 12. disp. 42. c. 3. & 4. & alij quos citat & sequitur Alarcon tract. de voluntate Dei disp. 5. c. 8. n. 6. Admittunt verò illa Suarez pluribus locis, ut lib. 2. de scientia conditionatorum c. 7. n. 10. & lib. 4. de prædestinat. c. 2. n. 11. ubi ad talem voluntatem conditionatam reducit illam, qua Deus vult omnes homines saluos fieri, & novissimè illa admittit, & probat, ex aliquibus Scripturæ locis prolegomeno 2. de gratia c. 8. Admittunt autem ista decreta de facto dari in Deo Arrubal. 1. p. disp. 45. c. 4. & alij cum quadam limitatione, v.g. quando non sunt ita purè conditionata quod non admittant ali-

quid absolutum, quod à parte rei connotent, v.g. aliquam revelationem Dei ad extra, vel aliquid simile, ut in illo vulgato exemplo 4. Regum. 13. ubi dixit Eliseus ad Regem Ioas Si percussisses quinquies, vel sexies, percussisses Syriam usque ad consummationem; ubi inter illam conditionem, & illum effectum non est aliqua connexio, nisi ex decreto, & voluntate Dei; sed tamen quia nulla voluntas libera datur in Deo sine aliquo effectu connotato ad extra, eo quod in sententia istius Authoris decretum liberum ut liberum in Deo addit aliquam causalitatem effectus ad extra, ideo pro tali connotato in illo actu ponit illam revelationem, quam Deus fecit de illo euentu ipsi Prophetæ. Et sine aliquo effectu absolute posito non admittit decreta ista conditionata. Et eadem ratione videtur non admittenda aliqua voluntas inefficax in Deo sine aliqua efficacia quoad aliquem effectum.

Nihilominus ut incipiamus explicare modum inefficacis voluntatis in Deo, & quomodo in illo ponenda sit ab istis conditionatis decretis id inchoandum est, reuera enim quoad effectum absolutum inefficacia sunt. Dicimus ergo ea nullo modo repugnare Deo, immò necessariò ponenda esse circa illa obiecta conditionata, de quibus Deus revelavit in Scriptura quid faciendum esset sub aliqua conditione. Et præter motiva, & fundamenta quæ latè ponderavimus præced. tomo disp. 20. art. 2. hæc sententia est expressa D. Thom. qui loquens de voluntate antecedente, quæ formaliter & de facto est in Deo, sicut illa qua vult omnes homines saluos fieri: hæc enim voluntas de facto est in Deo: non enim dicit Apostolus quod Deus vellet omnes homines saluos fieri, ita quod voluntas de facto non detur, sed daretur, sed dicit quod vult, quæ est voluntas de facto. De hac dicit D. Thom. quod est voluntas conditionata: Cum enim in 1. dist. 46. q. 1. art. 1. obieisset secundum argumentum, quod voluntas conditionata est voluntas imperfecta: ergo non est Deo attribuenda; respondet quod voluntas antecedens potest dici conditionata, nec tamen est imperfectio ex parte voluntatis diuinæ, sed ex parte voluti, quod non accipitur cum omnibus circumstantiis. Vbi non loquitur D. Th. de voluntate conditionata ex parte actus, id est, de voluntate, quæ non est de facto in Deo, sed esset, si talis conditio poneretur, sed solum de conditionata ex parte obiecti, quia si voluntas illa conditionata non est, sed esset in Deo, etiam voluntas antecedens non est, sed esset in Deo, quia D. Thom. voluntatem antecedentem dicit esse conditionatam; si autem voluntas antecedens non est in Deo, sed esset: ergo per illam Deus non vult, sed vellet, quia Deus non vult nisi ea voluntate quam de facto habet. Per voluntatem autem antecedentem vult, quia vult omnes homines saluos fieri, & illa est voluntas antecedens secundum Damasc. & D. Th. ut docet in hac q. a. 6. & statim ostendemus: ergo non magis repugnat Deo voluntas conditionata quam antecedens.

Conf. quia voluntas antecedens reperitur formaliter in Deo: ergo & voluntas conditionata. Patet consequ. quia voluntas antecedens conditionata est, ut dicit D. Thom. Et constat quia est voluntas ad quam non sequitur effectus, sed sequeretur, si aliqua conditio poneretur, sicut Deus vult omnes homines saluos facere, si per ipsos non steterit. Anteced. verò probatur, quia voluntas beneplaciti est formaliter in Deo, quia est voluntas propriè dicta, non sicut voluntas signi, quæ est metaphoricè in Deo, ut docet S. Thom. in hac q.

19. art. 11. sed voluntas beneplaciti diuiditur in voluntatem antecedentem, & consequentem, vt docet idem D. Thom. q. 23. de verit. art. 3. in corp. ergo talis voluntas antecedens, atque adeo conditionata est formaliter in Deo.

Deinde probandum est quòd ista decreta conditionata non repugnant in Deo, neque ex parte sui obiecti, neque ex parte connotati ad extra, nec ex parte prudentiæ, & gubernationis diuinæ, neque ex parte determinationis, & prædefinitionis voluntatis Dei decernentis: ergo non est cur negentur Deo.

5 Non repugnant ex parte sui obiecti, quia obiectum potest esse bonum, & honestum, vt conuersio Tyrionum, si apud eos Christus faceret signa, imò etiam potest esse debitum, & ordinatum ex inclinatione, & ordinatione causarum, sicut gratia primi Angeli, & primi hominis sub statu innocentie ordinabatur ad gloriam, nisi ipsi impedimentum posuissent, & hoc totum Deus volebat, & ordinabat, dum illam gratiam dabat: ergo potest Deus obiectum sic conditionatum, & honestum velle, sicut vult conuerti peccatorem, & saluari, quem tamen videt non conuertendum de facto: id enim recte nos possumus velle, & ad id conari, & operam dare, idque nobis præcipit Deus: ergo etiam Deus id velle potest tanquam obiectum honestum. Nec obstat quòd Deus videt conditionem non esse amplius possibilem, supposito decreto non ponendi illam. Non enim videt Deus conditionem non esse possibilem, sed non esse futuram. Non repugnat autem Deum velle aliquid sub vno ordine rerum esse futurum, & quantum est ex meritis aliquarum causarum, non tamen simpliciter, & de facto esse futurum in re, propter alias causas superiores, sicut volebat Lazarum non resuscitari secundum cursum ordinarium, bene tamen secundum miraculosum, & volebat Ezechiam mori secundum naturalem vim morbi, non tamen secundum causas superiores: Deus enim varios rerum ordines disponit, & vult & secundum vnum voluntas eius aliquid vult quantum est ex vi illarum causarum, quòd secundum alium ordinem de facto non vult, & talem voluntatem otiosam aut inutilem iudicare non potest, nisi qui otiosum aut inutile iudicauerit in supremo omnium rerum gubernatore diuersos ordines rerum disponere, nec tamen velle vt omnes fortiantur effectum.

6 Nec ex parte connotati ad extra est repugnantia ad habendum ista decreta; tum, quia sicut obiectum est conditionatè, & non absolutè futurum, ita sufficit quòd connotatum sit conditionatè futurum, nec est necesse quòd voluntas de facto inuenta in Deo reguletur penes aliquem effectum de facto positum in re, nisi voluntas sit efficax simpliciter, non autem antecedens & inefficax, præsertim cum Authores oppositi admittant simplicem Dei complacentiam circa creaturas posibles, quæ de facto est in Deo, & nihil ponit circa illas, & multi dicunt illam complacentiam liberam esse.

Tum etiam quia circa res pertinentes ad hoc vniuersum, non est aliqua voluntas Dei antecedens, & inefficax, quæ non habeat adiunctum, saltem concomitanter aliquem effectum ad extra, sicut Deus vult omnes homines saluos fieri dando illis media sufficientia ordinantia ad salutem, etsi non det ipsam salutem, & vult vt Ezechias moriatur quantum est ex vi morbi, ponendo ipsum morbum sic ordinatum ad mortem, licet effectui mortis careat, & sic de aliis. Tum denique

quia nulla est repugnantia quòd voluntas Dei velit aliquid quod tamen nihil reale ponat in effectum ad extra, sed solam denominationem extrinsecam, sicut vult aliquem esse deobligatum à lege, vel à voto, & alia multa similia quæ supra latè ponderauimus, nec est necesse hinc repetere, & solutiones in contrarium refutauimus. Ergo similiter potest velle aliquid conditionatum non ponendo aliquid reale de facto, & absolutè, sed solum aliquam denominationem extrinsecam, qua illa conditio est ordinata ad hunc effectum, si ponatur.

7 Non repugnat ex parte gubernationis, & prudentiæ diuinæ, atque adeò neque stultum aut inutile reputari debet talia habere decreta. Nam prudentia, & gubernatio exigit vt non omnes causæ suam fortiantur effectum, & tamen quòd tales causæ sint inam, v.g. plura debent esse inter se contraria, & opponi ac litigare, nec tamen omnia possunt vincere, sed aliquod debet carere effectum, aliàs esset magna confusio & impossibilitas. Pertinet autem ad prouidentiam summam Dei etiam causas contrarias creare, & earum inter se oppositionem causare, quia hoc pertinet ad compositionem vniuersi, quod ex contrariis coalescit, & ex multis causis contingentibus, quarum non omnes effectum semper fortiri possunt, aliàs contingentes non essent. Vnde dicitur Ecclesiast. 33. *Intuere omnia opera Altissimi, duo, & duo, & vnum contra vnum.* Ergo necesse est ad regimen causarum contrariarum, & contingentium, multa ex illis ad effectum ordinare, nec tamen omnia permittere habere effectum, quæ tamen haberent, si secundum suam ordinationem, & inclinationem permetterentur operari, & sic datur de illis voluntas de facto in Deo cum obiecto sub conditione, & cum absoluta voluntate ex parte Dei, vt sit causa ordinata ad effectum, & quòd effectus ex vi illius ordinationis sit futurus, de facto tamen non sit futurus. Hoc ergo non est inutile, & stultum sic velle, sed omnino necessarium ad rectam prouidentiam, præsertim summi prouisoris, qui omnibus providere debet, tam his, quæ de facto eueniunt, quàm his, quæ suo effectu frustrantur, ad quem tamen habent inclinationem, & consequenter, qui esset, si non impediretur, & omnia hæc Deus vult de facto, quia sic prouidet de facto: cum enim prouidet quòd aliqua causæ sint inclinatæ ad vnum effectum, prouidet quòd ille effectus sit futurus ex vi talis causæ, & sub conditione si non impediatur. Et cum rursus prouidet vt à contraria causa de facto impediatur prouidet vt non sit de facto futurum, sicut prouidendo quòd ignis magnus incendatur circa aliquam domum, conflagratio domus est futura, si ignis appropinquet, & tamen prouidendo quòd à vento contrario repellatur, vel ab imbre extinguatur, prohibet ne sit de facto talis conflagratio. Habere ergo istam voluntatem de conditionatis obiectis nihil repugnat, sed omnino conducit ad prouidentiam diuinam.

8 Denique non repugnantia conditionata decreta ex parte determinationis & prædefinitionis diuinæ: tum quia multa ex his conditionatis obiectis sunt res, quæ ab ipso Deo solo faciendæ erant, si aliqua conditio poneretur, & non ab homine, & de talibus non est inconueniens quòd detur prædefinitio in Deo, cum nulla creata libertas per hoc periclitetur, sed solum explicetur quid Deus decreuerit apud se facere, & se solo, si talis apponatur conditio, vt est illud Matth. 26. *An putas quia non possum rogare Patrem meum, & exhibebit mihi modò plusquam duodecim legiones Angelorum?* Vbi illa

illa exhibitio Angelorum à solo Deo erat facienda, & erat volita à Deo sub conditione, si Christus id peteret: nam illud verbum *exhibebit* omnino determinatam resolutionem, ex parte Dei significat: nec enim id dixit Christus tanquam rem decernendam, & quæ adhuc esset in dubio, sed quæ omnino esset resoluta ex parte Dei, non poterat autem esse resoluta, & determinata, nisi esset de facto decreta ex parte Dei. Et idem sumitur ex illo Psal. 105. *Et dixit, ut disperderet eos, si non Moyses electus eius steteret in confractione in conspectu eius, ut auerteret iram eius.* Ecce si Moyses non orasset in tanta humilitate, & confractione spiritus, decretum erat à Deo disperdere illam gentem, & hoc decretum de facto erat in Deo: nam Deus id dixit: ergo & decreuit: erat ergo decretum de facto habitum ex parte Dei, & tamen obiectum erat conditionatum, & à Deo exequendum, nempe disperdere gentem, si Moyses non orasset. Et similia multa passim reperiuntur in Scriptura. Tum etiam quia in his, quæ per homines faciendæ sunt, ut est conuersio Tyriorum, si Christus apud eos prædicaret, obedientia populi Israël ad Salomonem, & hæredes eius, si custodiret legem Domini, obedientia fidei quam promisit Deus semini Abraham, & quod esset pater omnium credentium, quorum multi crederent si eis prædicaretur, & alia multa similia in Scriptura passim reperiuntur, in quibus non est maius inconueniens quod Deus de facto decernat efficaciter causare illos actus in hominibus si talis, vel talis conditio ponatur, quàm in futuris absolutis de facto, ut ita fiat decernere, sed in absolutis illud decretum efficax, & antecedens non tollit libertatem, ut latè à nobis probatum est *suprà*: ergo neque tollit, si sub conditione aliqua ponatur. Quomodo autem tunc ordinandum sit decretum ut veritas illa non reddatur necessaria, sed maneat libera, & sub libero decreto cognoscibilis, diximus *tomo præced. disp. 20. art. 4.* & iterum attingimus statim solvendo argumenta.

9 Denique constat ex Scriptura Deum ista decreta habere, quia reuelauit multa se facturum si conditio talis, vel talis poneretur, ut Genes. 18. *Si innenero in Sodomis quinquaginta iustos, dimittam omni loco propter eos, si populus meus audisset me, Israël si in viis meis ambulasset, pro nihilo forsitan inimicos eorum humiliassem* 4. Reg. 13. *Si percussisses quinquies vel septies, percussisses Syriam usque ad consummationem,* Ierem. 38. *Si exieris ad Principes Regis Babylonis, viuet animatus.* Matth. 11. *Si in Tyro & Sidone facta fuissent virtutes, quæ in te factæ sunt, incinere & cilicio pœnitentiam egissent.* & alia multa similia, in quibus explicatur determinatio diuinæ voluntatis, & resolutio circa talia obiecta faciendæ: ergo non repugnat dari de facto aliquam voluntatem in Deo circa obiectum non ponendum de facto, neque futurum, nisi tantum sub conditione.

Respondent illam voluntatem Dei non esse absolutam, & de facto in Deo, sed conditionatam, etiam ex parte actus, id est, quæ esset in Deo, si talis conditio poneretur, non quæ iam de facto sit.

Sed contrà, quia si non est de facto voluntas in Deo circa talia obiecta, sed sub conditione, id est, talis voluntas dabitur in Deo si conditio poneretur: ergo nondum diuina voluntas quidquam resoluit & determinat de facto circa tale obiectum, sed remittit in futurum quod decernet, & resoluet. Vel ergo pro nunc manet indifferens, & nihil decernens de tali decreto & voluntate tunc futura, vel determinat voluntas eius quod tunc

posita illa conditione, sic vel sic decernet, ita quod modò vult se volitum & se decretum. Si manet indifferens, & nondum aliquid determinat, seu decernit, nec determinat se volitum, aut decretum: ergo etiam effectus illi conditionati, qui à tali voluntate dependent, manebunt indeterminati & suspensi: nec enim magis determinari esse possunt, quàm ipsa voluntas diuina, à qua dependet eorum determinatio, aut si ipsi effectus determinati sunt, quid prohibet etiam voluntatem diuinam eis conformari, & determinatam manere? Si autem indeterminati sunt, & suspensi, quomodo Deus illos pronunciat tanquàm certos, & determinatos, ut *locus Scriptura citatis* vidimus, præsertim quando Deus explicat resolutionem suam, ut quod dimittet, & non delebit Sodomam si fuerint quinquaginta, vel triginta iusti, quod viuet Rex Sedechias si exierit ad Regem Babylonis, & similia? Si autem Diuina voluntas non manet suspensa & indifferens, sed de facto resoluit, & determinat se decretum, sitalis conditio ponatur in hanc partem potius, quàm in oppositam: ergo iam voluntas diuina habet de facto volitionem & actum absolutum, id est, de facto habitum & resolutum circa id quod tali conditione posita determinandum est, & sic non repugnat decretum absolutum circa veritates conditionatas, aut circa determinationem Dei sub conditione ponendam.

Fundamenta opposita conualluntur.

Ad fundamenta opposita constat ex dictis hæc 10 decreta non esse impossibilia Deo, neque inutilia aut otiosa, neque libertatem destruere. Ad id quod obiicitur ad probandam impossibilitatem iam responsum est decreta ista non exigere mutationem realem in obiecto, sed denominationem voliti. Et cum dicitur quod rebus inuariatis manentibus, nulla sequitur denominatio, distinguo, rebus inuariatis tam actiue, quàm passiuè, tam absolute, quàm conditionatè transeat; variatis saltem conditionatè ex parte sua, ex parte autem Dei actiue variantibus nego: Deus enim actu suæ voluntatis potest variare obiectum, etiam si in se non varietur eius voluntas, & potest tali actu voluntatis variare obiectum vel simpliciter, & de facto, vel sub conditione, aut quoad denominationem extrinsecam, qua vult obiectum sic esse determinatum, aut ordinatum ad effectum, licet effectus non ponatur: Nec enim voluntas, ut voluntas, necesse est quod realiter, & de facto immutet obiectum, sed voluntas ut efficax, sed sufficit quod reddat obiectum liberè volitum, & aliquod esse ei communicet, saltem sub conditione, quod non est aliud quàm ipsum determinari ad esse in vi alicuius causæ, licet cum impedimento, aut determinatione, ne de facto sit. Et sic negamus quod non detur mutatio ex parte creaturæ: datur enim mutatio conditionata, non absoluta, & de facto. Et ad instantiam quod non potest aliquid amari sub conditione, si sit bonum, futurum autem conditionatum non est actu bonum. Resp. quod non est actu bonum subiectiue, concedo, quasi res existens, aut existura de facto, obiectiue, nego: est enim obiectum de facto determinatæ bonitatis ex sua specie, & obiecto, & ordinatum ad esse, quantum est ex parte alicuius causæ vel causarum, sed non determinatè existens. Ut autem aliquid ametur de facto, & absolute ex parte actus, non requiritur quod sit de facto existens, & bonum in se subiectiue, sed sufficit quod habeat

habeat aliquam determinatam bonitatem ex obiecto, & sit ordinatum ad esse, saltem ex parte alicuius causæ, vel causarum. Nam hoc ipsum quod est rem aliquam determinari, ut sit futura sub aliqua conditione potius, quam ut non sit, est aliquid amabile, & actu determinato attingibile, eo quod bonitas illa obiecti determinata secundum se est, licet existentia nondum determinata sit, sed sub conditione suspensa.

II Ad secundum inconueniens negatur ista decreta esse inutilia, & otiosa, ut satis ostensum est. Et ad probationem dicitur quod ista decreta expressius & formalius relucet, vel in promissionibus aut ordinationibus generalibus eorum quæ Deus iubet aut statuit fieri; aut in conditionatis particularibus, in quibus conditio non est resolueda & purificanda, ut transeat in absolutum. In promissionibus quidem, aut ordinationibus generalibus, sicut cum dicitur, *Si vis ad vitam ingredi serua mandata, Si populus meus audisset me, pro nihilo inimicos eorum humiliassem. Si reuertamini & quiescat, salui eritis. Si conuersus fuerit peccator, vita uiuet, & non morietur.* Istæ enim generales conditiones comprehendunt in se omnes, vel multos, & in aliquibus purificatur conditio, & fiunt absoluta, in aliis non. Et ideo non est otiosum, vel inutile talia decreta generalium conditionum habere, quia licet in aliquibus purificentur & transeant in statum absolutum, tamen in aliis non; & de se solum explicant quid debeat à nobis fieri, non quid de facto sit faciendum. In particularibus autem conditionatis, in quibus conditio non est purificanda, relucet ista conditionata decreta formaliter, quia Deus habet tunc expressum & formalem actum circa illa, ut est illud, *Si manserit David in Ceila, tradetur. Si Sedechias exierit ad Principes Babylonis, uiuet anima eius. Si Christus rogauerit Patrem, dabit ei duodecim legiones Angelorum. Si faceret virtutes in Tyro & Sidone, conuerterentur.* Istæ, & alia similia expressè reuelata sunt in Scriptura, & in illis relucet expressè decretum Dei, & resolutio, quæ circa talia obiecta versantur. De aliis uero non possumus scire an Deus expressum actum conditionatum habuerit in particulari circa ea quæ in particulari noluit de facto fieri; ibi enim non apparet ad quid seruiuerint illa conditionata decreta, nec nobis aliquid de hoc reuelatum est: unde temerè resoluemus an fuerint in Deo, vel non: uidetur enim sufficere quod virtualiter, & impliciter fuerint, quatenus voluntas diuina consideratur prius sub aliquo signo rationis uelle, quod si hoc ponatur, illud fiat, & in alio signo rationis uelle quod fiat, quod tamen de facto totum clauditur sub vno decreto id faciendi; potest etiam intelligi quod ad utrumque statum conditionatum, & absolutum habeat suam voluntatem formaliter, & expressè, nec tamen id otiosum est, quia licet Deus non indigeat multiplicare decreta, res tamen ipsæ, seu obiecta multiplicant status, quia possunt considerari sub absoluto statu, & sub conditionato, & utrumque attingitur à voluntate Dei, illique subiicitur; subiici autem eius liberæ voluntati, otiosum non est.

12 Ad id uero quod obiicitur, videri otiosum occupari Deum circa combinationes tam multas conditionatas, simul decernendo ipsas non facere de facto. Resp. magis otiosum videri, quod nos tam infirmæ & constrictæ intelligentiæ homines velimus meriti diuinam voluntatem, & iuxta nostrum modum mensurare. Fortasse in nobis otiosum erit disponere, aut tractare de multis, quæ

ad nostram curam non pertinent; non autem erit otiosum in Rege, qui curam habet totius regni sui, aut in Pontifice qui habet sollicitudinem omnium Ecclesiarum, etiam si non omnia effectum sint habitura. Quid otiosius quam si nos tractemus de modo gubernandi Angelos, aut quomodo Seraphini, vel Cherubini debent præcipere suis inferioribus, & illuminare illos, eique communicare? Non erit autem otiosum de his tractare, & disponere ipsos Angelos inter se. Similiter non erit otiosum Deo, qui est vniuersalissimus prouisor totius entis, & omnis creaturæ, multas combinationes formare circa multa, etiam si effectum non omnia sortitura sint, quia id exigit ipsa natura creaturarum illarum, pro illo statu, & omnibus iuxta suos modos Deus providere debet. An uero habuerit ista decreta conditionata circa omnia possibilia, vel non, sed circa aliqua; Quis cognouit sensum Domini, aut quis consiliarius eius fuit? Aut qui potest ei leges imponere ut dicat ei, quod eadem est ratio habendi decreta circa ista, & circa illa, vel circa omnia? Illa solum est ratio quam ipse sibi proponit, & iuxta quam agere vult, quia operatur omnia secundum consilium voluntatis suæ. Sufficit nobis scire quod aliqua talia decreta habuit, quæ nobis in Scriptura reuelauit, & aliqua similia fortè habuit, quæ ad eius prouidentiam circa hoc vniuersum pertinent, vel ex illa sequuntur. De reliquis nihil scimus; nec tamen propterea mansit diuina voluntas in suspensio, quia omnia illa potuit concludere sub determinata nolitione. Quod autem dicitur otiosum esse has combinationes formare sub conditione, & ex alia parte decernere ea non facere, iam diximus hoc non esse otiosum Deo, quia cum eius voluntas completatur omnes ordines rerum, & de eis disponat, sicut non est inconueniens, sed necessarium quod multa secundum vnum ordinem sint futura quantum est de se, sed omnibus pensatis, vel sub alio ordine considerata de facto non sint, ita non est otiosum, de eis Deum disponere, ut sint futura sub vno ordine, & sub conditione, si ille ordo eueniret, & sub alio ordine uelle quod non sint de facto: Deus enim non solum pro vno, sed pro omnibus uelle debet, & resolueret id quod ad vnumquodque pertinet. Quod uero dicitur quod hoc ipso quod Deus decernit rem non fieri, manet conditio impossibilis, & sic erit conditionatum de conditione impossibili, omnino est ridiculum: nam conditio illa non redditur impossibilis ex natura rei, & secundum se, sed ex suppositione quod Deus nolit illam esse, immò hoc non est reddi impossibilem, sed solum non esse futuram, aliud est autem uelle sub conditione non futura, aliud sub impossibili, quæ sit impossibilis ex natura sua, & antecederet: hoc enim otiosum, aut stultum videtur decernere conditionatè de aliquo sub conditione de se impossibili, ut si chimæra producatur à me, ponam illam in tali loco. Decernere autem sub conditione ex se non impossibili, sed tantum non futura, nec purificanda, non est otiosum, imò sub talibus conditionibus communiter debent fieri conditionata decreta. Quod uero reddatur impossibilis, supposito decreto de non purificanda illa conditione, hæc impossibilitas est ex suppositione libera decreti Dei, non autem est impossibilitas simpliciter, & intrinseca, sicut omnia quæ Deus non facit, ex suppositione quod non facit, sunt impossibilia ut fiant, impossibilitate, secundum quid, & ex suppositione.

Ad tertium inconueniens. Resp. decretum quo Deus de facto vult, ut si talis conditio ponatur, talis

talires fiat, esse prædefinitium illius rei faciendæ, non absolute, & in re, sed sub conditione, si purificetur illa conditio, quia est voluntas determinans & resoluens quod ita res fiat, si conditio ponatur. Ad replicam, quod est decretum antecedens, & tollens libertatem. Resp. quod est antecedens causans libertatem, quia est voluntas volens, non quod res fiat quomodocumque, sed quod fiat liberè, & sic influit in modum libertatis efficacia sua, non tollit illam, quia voluntas Dei est principium rei volitæ eo modo quo vult illa esse: sicut de decreto absoluto, quo Deus de facto vult ut actus meus liberè de facto fiat, satis supèr que dictum est *suprà*: est enim eadem ratio quo ad hoc, de decreto illo sub statu conditionato, atque de eodem sub statu absoluto, purificata conditio. Ad aliam replicam, quod pertinebit ad scientiâ simplicis intelligentiæ cognitio effectus conditionati, quia per necessariam illationem deducitur ex decreto, Respondimus latè in *præced. tomo. disp. 20. a. 4. circa finem*. In summa dicimus, quod ex illo decreto quo Deus prædefinit rem sub conditione futurâ, deducitur necessaria consequentia, distinguo, necessitate supponente, seu cōsequente ad decretum, concedo; necessitate antecedente decreto, & non fundata in illo, nego. Ergo pertinet ad scientiam simplicis intelligentiæ, nego consequentiam: ad scientiâ enim simplicis intelligentiæ pertinent ea, quæ in necessaria connexionē prædicatōrū fundantur ante omnem dependentiam à libero decreto. Quæ verò fundatur in libero decreto, & ex suppositione, aut immutabilitate illius, habent consequentiam necessariam cum futuritione rei volitæ; licet cōsequentia sit necessaria necessitate infallibilitatis, & immutabilitatis, quia tamen oritur ex suppositione decreti, nō pertinet ad scientiâ simplicis intelligentiæ, sed ad liberam. Et quando instatur, quod est necessaria, nō solum ex suppositione, sed absolute, quia prædefinitio est causa antecedens, totum hoc instatur, & soluitur in his quæ pertinent ad voluntatem absolutam, & ad futura absoluta; prædefinitio enim, seu voluntas efficax antecedens est causa antecedens modo libero, & causa ipsius modi liberi, qui in nostro actu reperitur. Vnde ex tali causa antecedenti non fit consequentia necessaria necessitate antecedenti, sed consequente, quia illa causa antecedens non est necessitans, sed libertatē causans, & idè ex illa deducitur necessaria cōsequentia quod infallibiliter erit actus liber, nō verò quod ille actus erit necessariò. Necessitas autem quod erit actus liber, non est necessitas simpliciter, nec est suppositio antecedens necessitans, sed necessitas ex suppositione causæ liberæ & libertatem ipsam causantis, sicut ex suppositione quod ego operor, necesse est me operari non quomodocumque, sed me operari liberè; atque adeò illa necessitas cum sit ex suppositione ipsius causæ liberæ, non p̄iudicat eius libertati. Diuina autem voluntas, eiusque influxus licet antecedens, est tamen eminentiori modo causa ipsius meæ libertatis, & continet totum quod est in actu meo libero, quia totum à se participatur: ergo perinde est ex eius suppositione formare necessariam consequentiam super liberum actum meum, atque ex ipsa suppositione meæ propriæ voluntatis.

14 Quod si instes; nam si ex ipso decreto vel influxu eius formetur conditionalis, redditur propositio necessaria, v.g. si dederò Iudæ prædeterminationem, vel efficax auxilium antecedens, conuerteretur ista conditionalis est necessaria, quia non stat poni antecedens, quin sequatur consequens, ut etiam nos admisimus *præced. tomo. disp.*

20. art. 4. ergo similiter si decretum conditionatum fuerit prædefinitium, reddetur propositio necessaria, pertinensque ad scientiam simplicis intelligentiæ, siquidem eodem modo infertur per necessariam consequentiam ex illo decreto prædefinitiuo ille effectus: nec enim stat poni prædefinitionem, & non sequi actum prædefinitum, idque postulant ipsa intrinseca & essentialia prædicata prædefinitionis, quia est inseparabiliter connexum illud antecedens, idest prædefinitio, cum actu prædefinito.

Resp. sine dubio conditionalem formatam ex decreto prædefinitiuo tanquam ex conditione, & ex ipso effectu secuto, ut cum dicitur, si prædeterminauero, consentiet, esse propositionem necessariam, quia tunc conditionalis fertur in ipsū decretum, ut in materiam & rem cognitam, & solum explicat vim eius illatiuam, & illatio illa est formalis & necessaria, ut expendimus *præced. tomo disp. 20. art. 4. & art. 5. in solutione tertij argumenti*. Ceterum, si propositio conditionalis formetur ex aliqua alia conditione non habente illationem necessariam in effectum, assumatur autem pro medio & ratione videndi illam connexionem, & obiectum conditionatum ipsum decretum Dei quo prædefinit, quod si ponatur talis conditio, sequetur talis effectus, tunc conditionalis non pertinet ad scientiam simplicis intelligentiæ quia non explicat tantum vim illatiuam ipsius decreti ad effectum: ad hoc enim necesse est quod decretum ponatur ex parte conditionis, seu ex parte antecedentis, & se habeat per modum rei cognitæ, ut inferat illud consequens; sed decretum tunc se habet ut medium manifestandi, & cognoscendi connexionem inter antecedens & consequens, ex quibus componitur illa conditionalis, ut, v.g. in hac conditionalis, Si Petrus vadit ad Ecclesiam, conuerteretur, antecedens, seu conditio non habet neque explicat vim illatiuam necessariam cum illo effectu conuersionis. Vnde ut videatur infallibiliter hoc sequi ex illo, seu componi illum effectum cum illa conditione, videtur tanquam medio ipsa prædefinitione sua, & decreto quo statuit, quod si hæc conditio ponatur, ille effectus consequetur.

Et cum instatur, quod hoc præuideretur in vi connexionis quam habet prædefinitio illa cum effectu prædefinito, hæc autem connexio est necessaria: ergo pertinet ad scientiam simplicis intelligentiæ: cur enim per modum conditionis positum decretum facit necessariam scientiam, & per modum illationis liberam.

Resp. præuideri quidem in vi connexionis quam habet prædefinitio illa cum re faciendâ, sicut etiam in futuris absolutis videntur futura in vi connexionis, & consequentiæ, quam habent cum decreto; hoc tamen non pertinet ad cognitionem simplicem, quia fundatur super actu ipso, seu decreto libero, non explicando eius naturam, aut connexionem, sed vtendo eius exercitio, ut immutabiliter, & infallibiliter ducente ad effectum, seu obiectum suum. Itaque ipsum decretum ut manifestans effectum infallibiliter, facit quidem cognitionem certam, & euidentem, sed quia est fundata in ipso decreto, ut libero, non pertinet ad scientiam simplicis intelligentiæ, quæ antecedit omne decretum & exercitium eius. Si autem ipsa natura decreti, & prædicata eius intrinseca considerentur, aut sola vis illationis, & connexionis eius cum effectu, seu obiecto consideretur, sic pertinet ad scientiam simplicis intelligentiæ, quia

licet

licet consideretur decretum, consideratur tamen sub ratione quiditatis, & connexionis secundum se, & ut abstrahit ab exercitio, & existentia eius. Cum ergo ponitur in propositione conditionali ipsum decretum per modum conditionis, solum attenditur ad vim illationis, & connexionis secundum se, & hoc abstrahit ab existentia, & exercitio decreti, ideoque pertinet ad simplicem intelligentiam. Cum vero non ponitur ex parte conditionis, sed assumitur ut medium ipsum decretum, ut habitum, & existens in Deo, fundatur vis consequentiæ in ipso exercitio libero, & existentia obiecti, quia utitur Deus illo decreto ut determinate de facto, & in exercitio talem, vel tale obiecti dispositionem. Vnde licet infallibilem ordinem dicat ad effectum, & illo supposito fiat inde consequentia necessaria, in vi illationis, & consequentiæ, non in vi consequentis, tamen quia fundatur in ipso libero decreto, ut libere exercente, & determinante voluntatem, non est cognitio simplicis intelligentiæ, sed libera, ut pote fundata in decreto, eiusque exercitio p. out libero.

16 Denique instabis ex P. Suarez *prolegomeno* illo 2. cap. 8. num. 22. & 23. quia non inuenitur promissio effectus sub conditione à solo Deo pendente, quæ ob defectum solius conditionis non impleatur, quia talis promissio vana esset, & otiosa: pendet enim tota promissio ex arbitrio Dei, & sic si ipse non vult implere conditionem, perinde est, ac si non fieret: sicut si ego promitterem alicui sic si volueris, dabo tibi centum, vel si veneris tali die, dabo mille, cum proposito non volendi, neque veniendi, sic si Deus promitteret, si te vocarem, prædeterminarem te, cum absoluto proposito non vocandi, esset frustratoria promissio.

Et Conf. quia si ponatur conditio pendens ex solo decreto Dei, non potest veritas conditionata de futuro contingenti fundari super decreto prædeterminante, si tale futurum aliàs non est de facto ponendum. Nam si Deus habuisset tale decretum prædeterminandi voluntatem, si talis conditio ponatur: ergo est paratus ex vi talis decreti ad conferendam illam determinationem, aliàs vanum & inutile esset tale decretum. Deus autem in tali casu non est paratus ad dandam illam prædeterminationem, quia si esset paratus, daret illam, cum non pendeat ab homine illa conditio, sed ab ipso Deo? & alioqui supponitur talis prædeterminatio nunquam futura: ergo Deus non est paratus ad dandam illam. Quod declaratur in illo conditionato futuro dandi pœnitentiam Tyriis, si apud eos fierent miracula, quia illa conditio faciendi miracula, à solo Deo implenda erat, & aliàs erat decretum non faciendi illa de facto: ergo Deus non habuit decretum determinandi ad pœnitentiam Tyrios sub conditione, quia si conditio erat à solo Deo pendens, & ipse aliàs decernebat absolute non ponere talem conditionem, inane, & otiosum erat decretum dandi illis determinationem ad pœnitentiam, quia per hoc nihil conferebat illis hominibus. Non ergo in his conditionatis Deus habet decretum prædefinitivum sub conditione, quia omnino frustraneum est, multo minus illud habet quando conditio non est dependens à solo Deo, sed ab homine, quia tunc est suspensum decretum & expectans conditionem ab alio ponendam, non autem prædefiniens ex se.

Resp. quod quando conditio futuri ponendi, à solo Deo dependet, etiam si decretum de ponendo effectu sub illa conditione non implenda videatur otiosum, quo ad ipsam impletionem pro-

missionis, vel quoad positionem effectus in re, non tamen est otiosum ad alios fines, quos etiam Deus providere debet, nempe ad ostendendam ordinationem & inclinationem causarum, & dispositionem quam habent secundum se, & in ordine causarum inferiorum, vel secundum alios respectus, v. g. in illo conditionato convertendi Tyrios, si apud eos fierent miracula, licet videatur otiosum in ordine ad ipsam conversionem de facto ponendam & implendam, promittere illam sub conditione, si fiant miracula, & ex alia parte decernere quod non fiant, tamen quoad finem ostendendi dispositionem voluntatum Tyriorum præ obduratione Iudæorum, non erat otiosum, sed valde conducens illud conditionatum decretum. Iam autem sæpe monuimus Deum, qui est vniuersalissimus promissor, gerere vicem pro diversis ordinibus rerum, & de vnoquoque disponere; & ita cum non possint omnes ordines rerum simul poni, quia alij aliis contrariantur, oportet quod aliqui solum remaneant sub conditione, & ita non est otiosa voluntas ad quam pertinet de omnibus ordinibus rerum providere, quod velit aliquid sub conditione fieri, & de facto nolit illud fieri, sed aliud. Si enim apud oppositos Authores omnes ordines rerum determinatam veritatem habent, ex ipsa propria ratione causarum inferiorum, & voluntatum creaturarum, & ideo sic præsciuntur sub conditione, sed non decernuntur à Deo, quid repugnantiae habet quod voluntas divina, quæ super omnes illos ordines est, & omnes ab illa derivantur, decernat & determinet sine aliquo scrupulo otiositatis quid vnaquæque voluntas in aliquo ordine factura sit sub conditione, licet de facto decernat ut ille rerum ordo non fiat?

Ad Conf. negatur anteced. Ad prob. dicitur, 17 quod Deus ex vi illius decreti prædeterminantis est paratus dare illum concursus, non absolute, sed in tali statu, & sub tali conditione. Vnde non sequitur quod si est paratus, daret illum, nisi illa conditio ponatur sine qua non decrevit dare. Nec obstat quod conditio à solo Deo pendeat, quia bene stat quod conditio à Deo pendeat, & quod nolit illam de facto ponere; & nihilominus paratus sit, non absolute, sed pro illo statu rerum, si illa conditio poneretur, dare talem concursus; si enim esset simpliciter paratus dare, absque vlla conditione vel statu rerum, sine dubio poneret, & daret concursus, sed esse paratum dare pro aliquo statu rerum tantum, & non absolute, non infert quod debeat illum dare, aut obligetur illum statum & conditionem ponere. Et ad id quod vrgetur in exemplo pœnitentiæ Tyriorum iam responsus est quod non est inane illud decretum conditionatum, quia etsi non sit ponenda in re illa pœnitentia, erat tamen ponenda in re inclinatio illarum voluntatum, & ostendenda minor earum obduratio ad pœnitentiam, quam Iudæorum, & propter alios fines, iudicandum erat decretum illud non otiosum. Nec erat necessarium conferre illis aliquid de facto, sed sufficit Deum velle id ostendere, aut ad alios fines dirigere. Quando autem conditio non est ponenda à solo Deo, sed etiam ab homine, etiam non est frustraneum decretum prædefinitivum sub conditione, quia etsi suspendit executionem, sed non determinationem illius veritatis conditionatæ, nec inclinationem causarum inferiorum ad effectum, licet de facto non sit faciendus.

ARTICVLVS VIII.

Quid sit voluntas Dei antecedens, quid consequens, beneplaciti, & signi?

Difficultates, quæ circa explicationem harum voluntatum versantur, adeo sunt connexæ, vt vix diuidi possint, sed vnâ cum aliis explicari debet. Et primò, supponendi sunt ipsi termini, qui apud Scholasticos Doctores & Patres sunt vtitissimi de voluntate antecedente, & consequente agit S. Damascenus lib. 1. *fidei c. 29.* explicans illud Pauli. *Qui vult omnes homines saluos fieri.* Et ante ipū, Chrysost. *hom. 1. in epist. ad Eph.* meminit eiusdem diuisionis, licet non sub nomine antecedentis & consequentis, sicut Damascen. sed nomine primariæ, & secundariæ. De voluntate autem beneplaciti, & signi agit Magister sententiarum in 1. *dist. 45.* & ibi communiter omnes DD. & D. Th. tum ibi q. 1. a. 4. tum hic q. 19. a. 11. & q. 23. de ver. art. 3. Habetque fundamentum in Scriptura: voluntas quidem beneplaciti, vt cum dicitur Roman. 12. *Vt probetis quæ sit voluntas Dei bona & beneplacens, & perfectâ:* Et Psalm. 105. *Memento nostri Domine in beneplacito populi tui.* Voluntas autem signi, vt cum ipsi effectus ad extra, quibus Deus manifestat voluntatem suam, vocantur voluntates Dei; nec enim in Deo multiplicatur voluntas, sed in effectibus, & sic dicitur Psalm. 15. *Mirificauit omnes voluntates meas in eis,* & Psalm. 110. *Magna opera Domini, exquisita in omnes voluntates eius.* Et similiter dicimur facere voluntatem Dei, vt Matth. 12. *Qui fecerit voluntatem Patris mei, hic meus frater, & mater est.* Non fit autem voluntas, prout est in Deo, sed id quod voluntate Dei præceptum aut ordinatum est. Id ergo in quo voluntas Dei manifestatur, vt præceptum, consilium, &c. rectè vocatur voluntas signi, id est, signum voluntatis, quæ in Deo est, & quæ per aliquid externum manifestatur.

Hoc supposito aliqua sunt certa in his voluntatibus explicandis, & aliqua dubia.

2 Certum est primò, voluntatem signi non esse formaliter in Deo, sed metaphoricè nominari volūtate, vt docet S. Thom. hic art. 1. Ratio verò est, quia voluntas signi non dicit actum voluntatis, sed effectum, quo manifestatur, seu manifestari solet apud homines alicuius voluntas. Effectus autem externi non sunt intra Deum, atque adeo non sunt formaliter & propriè ipsa voluntas, vel actus voluntatis, sed analogicè & metaphoricè dicuntur voluntates, quia voluntatem significant, aut ab ea procedunt, sicut vrina dicitur lana, quia significat sanitatem.

3 Certum est secundò, hanc volūtatem signi rectè diuidi per quinque signa, vt optimè explicat D. Th. in hac q. 19. a. 12. Sunt autem prohibitio, præceptum, consilium, operatio & permissio, quæ distinguuntur ex diuerso modo declarandi voluntatem: nā aliquādo declaramus illam per nos, aliquando per alium. Per nos vel aliquid faciendo, & sic operatio externa est signū voluntatis internæ, vel aliquid permittendo & sinendo fieri, & sic est permissio. Per aliū declaramus voluntatem nostram, quando ordinamus alium ad aliquid faciendū; ordinamus autē de alio vel per imperium obligando, vel per consilium suadendo. Per imperiū obligando vel præcipiendo vt fiat, vel prohibendo ne fiat; & sic sunt quinque signa manifestandi voluntatem, sc. operatio, & permissio, præceptum, prohibitio, & consilium. Et quædā versantur circa mala vt prohibitio & permissio, quædam circa bona, vt operatio, & præceptum, quædam perfecta, seu optima, vt consilium & quædam referuntur ad præsens, vt operatio, & permissio, quædā

Ioan. à S. Thoma in 1. part. D. Thoma.

verò etiam ad futura, vt præceptum, prohibitio, & consilium.

Dubitant verò aliqui quomodo operatio dicatur voluntas signi, cum operatio Dei procedat à voluntate beneplaciti, quia nihil Deus operatur nisi volendo, & cōplacendo. Et existimant tunc solum operationem dici voluntatem signi, cum designat voluntatem, quæ verè in Deo non est, non autem cum demonstrat voluntatem beneplaciti, quæ in Deo verè est, vt si Deus iustificat paruulum, & ille postea peccat, & dānatur, illa iustificatio paruuli fuit operatio significans voluntatē saluandi, quæ verè in Deo non fuit. Sed hoc est supponere quod voluntas inefficax & antecedens in Deo non verè sit, contra quod dicemus postea, & ita operatio significatiua voluntatis inefficacis etiam significat voluntatem aliquam beneplaciti in Deo, licet non efficacem. Quare melius dicendum est cum D. Th. in hac q. a. 12. ad 2. quod nihil prohibet de eodem obiecto esse voluntatem beneplaciti & voluntatem signi, sed sub diuersis rationibus: Nā operatio quæ dicitur voluntas signi, & voluntas beneplaciti, quam demonstrat vel signat illa operatio, non distinguuntur, nisi sicut actus intēnus, qui est propriè & formaliter voluntas, seu actus voluntatis, & effectus externus, qui nō est voluntas, sed à voluntate procedens, & idē metaphoricè dicitur voluntas, tanquā effectus eius.

Certum est tertio, voluntatē cōsequentem circa ea quæ bona sunt semper esse voluntatem beneplaciti, quia volūtas consequens si versatur circa bona etiā à nobis proueniant, est in Deo efficax volūtas habens effectū circa bona: ergo versatur circa aliqua quæ placent Deo, & ab eo emanant, cum efficaciter fiant, & absolute: est ergo etiam volūtas beneplaciti.

Dubium autem est circa voluntatem antecedentem in tribus.

Primum, an ista voluntas antecedens sit solum inefficax & conditionata, an etiam aliqua voluntas antecedens sit absoluta, & efficax.

Secundum, an voluntas antecedens sit formaliter, & propriè in Deo, an sicut voluntas signi solum impropriè.

Tertium, circa quæ versetur ista volūtas in quantum antecedens, & an semper habeat coniunctum aliquid efficacis. Et ex his eliciemus quomodo sit explicandum illud Apostoli, *Quod Deus vult omnes homines saluos fieri.* Circa voluntatem etiam beneplaciti est dubium, an solum sit efficax voluntas, an etiam aliqua inefficax dicatur voluntas beneplaciti & ita non omnis voluntas beneplaciti impleatur.

Circa primū aliqui existimant non omnē voluntatem Dei antecedentem esse inefficacem & conditionatam, sed aliquam esse efficacem & absolutā, vt P. Vasquez hic disp. 83. c. 3. sicut est gratia vocationis, quam Deus de facto aliquibus dat; hanc enim esse antecedentē ipse existimat, quia eam dicit esse antecedentem voluntatem, quæ ex solo Deo emanat; consequentē, autem, quæ ex suppositione alicuius actus nostri datur in Deo, vt punitio, quæ supponit culpā, & præmiatio, quæ supponit merita. A fortiori verò existimat Vasq. voluntatem antecedentē inueniri formaliter in Deo, & esse voluntatē beneplaciti, seu vnū ex membris eius. At verò Molina hic super a. 6. dist. 1. §. Patet secundò, existimat non omnem voluntatē absolutam & efficacem esse cōsequentē in Deo, sed illam tantum, quæ ita absoluta est quod de eius contrario non est in Deo velleitas, seu conditionata voluntas. Denique alij existimant non rectè explicare D. Th. in hac q. a. 6. sensum Damasceni, quod voluntas antecedens sit illa, quæ est de re aliqua secūdū se, & quasi in cōmuni, voluntas autē cōsequens sit de re, attentis omnibus circumstanti-

riis hic, & nunc, sed existimant etiam ad voluntatem Dei antecedentem pertinere quod respiciat rem, etiam in particulari, & ut facienda est à nostro libero arbitrio quoad executionem & hic & nunc, dummodo non sit in nobis sufficiens causa illam faciendi, sed ex Dei liberalitate dependeat.

7 Nihilominus dicendum est quod omnis voluntas antecedens Dei est idem quod voluntas inefficax & conditionata, contra Vasq. & quod omnis voluntas consequens est absoluta, & efficax, contra Molinam. Ex quo consequitur non pertinere ad voluntatem antecedentem ea quæ in executione, & de facto fiunt secundum quod considerantur in sua existentia, & ut facienda, siue mediante nostro libero arbitrio fiant, siue non; sed à solo Deo. Conclusio hæc est expressa S. Thom. hic a 6. ad 1. ubi inquit: *Distinctio voluntatis antecedentis & consequentis non accipitur ex parte ipsius voluntatis diuinæ; in qua nihil est prius, vel posterius, sed ex parte volitorum. Ad cuius intellectum considerandum est, quod unumquodque secundum quod bonum est, sic est volitum à Deo: aliquid autem potest esse in prima sui consideratione secundum quod absolute consideratur bonum vel malum, quod tamen prout cum aliquo adiuncto consideratur, quæ est consequens consideratio eius, è contrario se habet, sicut hominem vivere est bonum, & hominem occidi est malum secundum absolutam considerationem; sed si addatur circa aliquem hominem quod sit homicida vel viuens in periculum multitudinis, sic bonum est eum occidi & malum est eum vivere. Vnde potest dici quod iustus iudex antecederet vult omnem hominem vivere, sed consequenter vult homicidam suspendi. Similiter Deus antecederet vult omnem hominem saluari, sed consequenter vult quosdam damnari secundum exigentiam suæ iustitiæ. Constat autem quod iudex solum inefficaci voluntate vult aliquem vivere in quantum hominem, qui tamen efficaciter, & de facto vult eum mori, ut homicidam, & Deus vult de facto multos damnari ut peccatores, quos tamen sub præcisa consideratione hominis vellet saluari. Vnde subdit D. Th. ad magis explicandum quomodo illa voluntas antecedens sit inefficax, & illa consequens, efficax, quod, Id quod antecederet volumus, non simpliciter volumus, sed secundum quid, quia voluntas comparatur ad res secundum quod in seipsis sunt: in seipsis autem sunt in particulari. Vnde simpliciter volumus aliquid secundum quod volumus illud, consideratis omnibus circumstantiis particularibus, quod est consequenter velle. Vnde potest dici quod iudex iustus simpliciter vult homicidam suspendi, sed secundum quid vellet eum vivere, sc. in quantum homo. Vnde magis potest dici velleitas, quam absoluta voluntas. Et sic patet quod quidquid Deus vult simpliciter, fit, licet illud quod antecederet vult, non fiat.*

8 Si hæc explicatio D. Thom. pro mente Damasceni vera est, ut ipse Vasq. fatetur, qui supra dicta disp. 83. cap. 3. dicit. S. Thomam in hoc articulo apprimè intellexisse mentem Damasceni, nescio quo pacto potest negari, quod iuxta sensum verum Damasceni, & D. Thom. voluntas antecedens efficax, & absoluta non sit, sed solum velleitas, seu conditionata voluntas, cum id tam apertè dicat D. Thom. & quod voluntas consequens sit voluntas efficax: idque discursus ipse conuincit, quia efficax voluntas est, quæ respicit rem ut faciendam, inefficax verò non, sed solum bonitatem rei secundum se attingit, nihil verò tractat de consecutione, seu positione rei de facto. Ergo si voluntas antecedens respicit rem secundum se præcisè, & non ut faciendam, consequens verò respicit sub illo statu & modo quo facienda, est utique talis voluntas

antecedens erit inefficax, & consequens erit efficax. Vnde ut admittatur sententia Vasquez quod detur aliqua voluntas antecedens efficax, & absoluta, vel consequens, quæ non sit efficax, neganda est sententia D. Thom.

Solum ergo restat videre an sit legitimus sensus & explicatio ista quàm D. Thom. ponit circa sententiam Damasceni: hoc enim aliqui negant, sed immeritò, quia D. Th. perpetuò tradit istam doctrinam de antecedente, & consequente voluntate, iuxta mentem Damasceni, ut locis supra citatis videre est, & expressè affirmat in hoc art. 6 ad 1. Quis autem dicat D. Thomam toties versasse locum Damasceni, & ab eius mente excidisse, nec eam fuisse assecutum? Cæterum, abundantius id constabit verba Damasceni ponderanti, quæ sic habent illo 2. libro fidei cap. 29. *Illud quoque nos ne fugiat, Deum quidem ut bonitate præstantem, primariè quidem omnes homines seruari ac regni sui compotas esse velle (neque enim supplicij, ac cruciatus causa, verum ad hoc ut bonitatis ipsius participes simus, nos effinxit): ut iustum autem, iis quoque qui peccant panam inferri nihilominus velle: Ac prius illud, antecedens voluntas seu beneplacitum dicitur ex ipso manans: secundum autem, insequens voluntas ac permisso à nostro votio ortum ducens. Et subdit. Atque hæc de iis rebus quæ in nostra potestate minimè sitæ sunt statuere debemus: at vero ex iis quæ in nostro arbitrio consistunt, ea quidem quæ bona sunt primariè vult, gratæque habet Deus. Vbi Damascenus sine dubio loquitur de ista duplici voluntate Dei sub formalitate & præcissione: hoc enim manifestè indicant illæ particulæ *Ut*, quibus vtitur, *Deum ut bonitate præstantem, &c. ut iustum autem.* &c. id est, sub formalitate, & præcissione bonitatis suæ, & quatenus homo à se emanat, sic non vult perire quemquam, quia ex sua bonitate non formauit aliquem ut perderet, sed ut suæ bonitatis faceret participem. Et hæc vocatur primaria voluntas, quia pertinet ad primum finem ipsius creationis, & formationis hominis, ut constat ex subiuncta probatione Damasc. *neque supplicij & cruciatus causa nos effinxit, &c.* Loquitur ergo de fine propter quem nos creauit, qui est primariè volitus. Si ergo loquitur Damasc. cum præcissione, & sub formalitate illa, quatenus Deus bonitatis suæ nos vult esse capaces, & participes: ergo apud Damasc. voluntas antecedens est voluntas respiciens obiectum sub aliqua præcissione, & primario aliquo fine; non dum verò attendens ad alias circumstantias, quæ tali rei conuenire possunt; utramque enim coniungit Damascenus in voluntate antecedente, scilicet ut in ea procedat Deus sub tali formalitate, sed est, ut bonus; & primariè, id est, quantum ad id quod primò intendit, & respicit in aliqua re; ergo illa voluntas, ut sit antecedens, debet esse præcisa, & sub aliqua præcissione respiciens & procedens, & sic non est voluntas exequens, & ponens rem de facto, quia res ut de facto ponitur, non sub præcissione ponitur, sed cum suis circumstantiis simpliciter requisitis, ut in re sit. Quod autem Deus facit non solum attendens ad illam primariam intentionem, ut præcisè bonitatem suam respiciens, sed, etiam secundum alias circumstantias, quæ post sequuntur, sicut sunt illæ, quas attendit; in quantum iustus, & non ut præcisè bonus, hoc iam pertinet ad insequentem voluntatem, quæ non sistit in illo fine primario, nec in illa præcissione.*

Hæc cum manifesta sint in Damasceno, D. Th. attendens interiorem rationem mentis ipsius, id quod dixit Damascenus circa illam peculiarem materiam de hominibus saluandis, vel non saluandis

dis, vniuersalem fecit pro omnibus decretis, diuinis, seu pro omni voluntate diuina. Vnde in prædicta authoritate Damasceni, aliud est id quod dicit circa illam particularem materiam, circa quam ibi loquebatur, distinguendo voluntatem Dei antecedentem, & consequentem; aliud est ratio & fundamentum talis distinctionis simpliciter, & absolute. Ratio huius distinctionis sumitur ex parte ipsius voliti, quatenus intelligitur aliquid volitum sub aliqua præcisione, vel sine illa, sed attentis omnibus circumstantiis. Et ad hanc attendit D. Thom. Et ideo vniuersalizauit propositionem Damasceni, vt generaliter dicatur illa voluntas antecedens, qua Deus vult obiectum aliquod secundum se, & sub ea præcisione, qua participat bonitatem Dei, nullis aliis circumstantiis in particulari attentis. Illa autem dicatur voluntas consequens quæ attentis omnibus circumstantiis in particulari operatur, & sic efficax est, & aliquando attenduntur circumstantiæ quæ supponunt aliquid ortum ex nostro vitio, aliquando non, sed omnia sunt ex ipso Deo, & tunc primariè vult illa omnia, sed non sola voluntate antecedenti, id est, cum præcisione, sed attentis omnibus in singulari, & de facto. At verò attendendo ad illam particularem materiam de qua ibi agebat Damasc. scilicet de voluntate saluandi omnes homines, aliqua dicit de voluntate consequenti, quæ non pertinet vniuersaliter ad omnem voluntatem consequentem in Deo, sed tantum ad illam, quæ versatur circa prædictam materiam, quatenus scilicet non omnes saluat, sed aliquos reprobat: hoc enim dicit nasci ex Deo, in quantum iustus, & supponere aliquid ex parte nostri, scilicet vitium, ex quo ortum ducit punitiua voluntas, quæ est ex iustitia Dei. Et voluntas antecedens dicitur esse beneplacitum ex ipso manans, id est, nihil supponens ex parte nostra, quod Deus reprobet, & puniat, sed id quod præcisè emanat à Deo in nobis, quod utique prout sic sumptum non vult Deus punire, & damnare, sed saluare, quia solum punit vitium nostrum, & sic punitiua voluntas respicit aliquid consequens ex nobis, quod tamen non de omni voluntate consequente verificatur, sed de consequente punitiua. Et voluntas antecedens respicit aliquid emanans à Deo, sed sub præcisione, id est, vt stat præcisè sub intentione primaria. Potest tamen aliqua voluntas consequens non punitiua respicere aliquid emanans à Deo, sed non cum præcisione, sed attendendo ad omnes circumstantias prout de facto, sicut illa quæ Deus se solo facit, & ab ipso solo emanat, sicut est glorificatio, creatio, &c. Quare voluntas consequens, & antecedens prout è Damasc. traduntur pro hac materia determinata saluandi omnes, & damnandi aliquos, ita distinguuntur, quod voluntas consequens non sumitur pro omni voluntate consequenti, sed tantum pro punitiua qua aliquos damnat. Voluntas autem antecedens sumitur pro voluntate, cum aliqua præcisione considerata, quatenus attendit solum ad id quod nobis est ex bonitate Dei. Ratio tamen distinguendi has duas voluntates, scilicet quia antecedens, cum aliqua præcisione procedit, consequens sine illa, sed attentis omnibus circumstantiis, est generalis pro omni voluntate Dei, & hæc impliciter ibi traditur à Damasc.

II Vnde constat non posse fieri vim in eo quod dicit Damasc. quod voluntas antecedens est beneplacitum ex ipso emanans, vt ex hoc inferatur aliquam voluntatem Dei antecedentem esse efficacem, & effectum habere, scilicet quia à solo

Ioan. à S. Thoma in 1. part. D. Thomæ.

Deo emanat, vt prima vocatio, glorificatio, &c. Hæc enim verba Damasceni referens S. Thom. q. 23. de verit. art. 2. dicit, quod secundum Damasc. voluntas Dei antecedens est acceptio Dei ex ipso existens, sed voluntas consequens est concessio ex nostra causa. Quod explicat ibi S. Doctor, quia illud ad quod Deus creaturam ordinauit quantum est de se, dicitur esse volitum ab eo, quasi prima intentione, siue voluntate antecedente: sed quando creatura imeditur propter sui defectum ab hoc fine, nihilominus tamen Deus implet in ea id bonitatis, cuius est capax, & hoc est quasi de secunda intentione eius, & dicitur voluntas consequens. Non ergo illud beneplacitum ex ipso emanans debet vniuersaliter intelligi de eo quod fit executiuè à Deo solo, siue nostro libero arbitrio, sed de eo quod est participatio Dei, cum præcisione sumptum scilicet, vt ab ipsius bonitate deriuatum ex priori seu antecedente intentione sub hac præcisè formalitate. Sed tamen quia reuera aliqua sunt quæ à Deo emanant, id est, fiunt de facto in re, atque adeo per voluntatem consequentem, & illa etiam prout sic facta, sunt de primaria intentione Dei, ideo dicit Damascenus quod ex his quæ in nostro arbitrio consistant, ea quidem quæ bona sunt primariè Deus vult. Vbi ly primariè non est idem quod voluntate antecedenti, quæ sub præcisione solum respicit rem, sed primariè est idem, quod ex prima intentione Dei, efficaciter tamen, & executiua, non ex secundaria, quæ supponit aliquid ex nobis ortum, v.g. aliquam culpam, vt super illam cadat voluntas, quæ est de secundaria intentione.

Voluntas antecedens, & inefficax est formaliter in Deo, non voluntas signi.

Cum supra ostensum sit voluntatem Dei vel esse voluntatem beneplaciti, vel signi, & quod voluntas signi non est formaliter in Deo, quia non est actus eius, sed effectus, restat quod voluntas in Deo existens, & per modum actus se habens, solum sit beneplaciti, non signi, proinde si inefficax voluntas est voluntas beneplaciti, ita quod sit actus in Deo existens formaliter, sequitur quod non omnis voluntas beneplaciti, seu formaliter in Deo existens impleatur, scilicet illa, quæ inefficax est, ac proinde idem est inquirere an voluntas inefficax sit formaliter in Deo, atque inquirere, an omnis voluntas beneplaciti impleatur, & sit efficax, an aliqua non impleatur.

Aliqui ergo sentiunt voluntatem antecedentem seu inefficacem non esse in Deo formaliter voluntatem beneplaciti, sed solum esse voluntatem signi, ac proinde omnem voluntatē beneplaciti impleri, & efficacem esse: inefficax enim voluntas imperfecta videtur; & sic non potest esse formaliter in Deo tanquam actus voluntatis eius. Quidquid verò per modum actus ponitur formaliter in Deo, semper impletur, quia hoc ad perfectionem pertinet. Pro hac sententia quod voluntas antecedens & inefficax non est voluntas beneplaciti, sed signi, citari solent Caiet. Zumel, Bañez, quos adducit M. Gonzalez his disp. 5. sect. 1. Et quod voluntas Dei beneplaciti semper impleatur, & non sit vnquam inefficax, plures alij citantur ab eodem sect. 3. vt Scotus, Alensis, Bonauen. Maior, Marsilius, & alij. At verò P. Vasq. disp. 83. supra cit. c. 2. simpliciter tenet in Deo dari formaliter voluntatem inefficacem, quæ sit voluntas beneplaciti; & sic non omnis voluntas beneplaciti impletur. Cæterum refugit cōd. & conditionatam voluntatem eam appellare loquendo, de conditionata voluntate, seu velleitate, quæ sit actu ex parte subiecti, seu voluntatis, & conditionata ex parte ob-

iecti, & hoc non solum in Deo, sed etiam in nobis, ut docet loco dicto cap. 4. admittit tamen posse dari voluntatem inefficacem, quæ virtualiter sit, conditionata, non quia actu feratur in obiectum sub conditione, sed quia talis est voluntas, ut ex illa oriretur alia voluntas de facto, si conditio poneretur, sicut Christo ita placebat non mori, quod si non obstaret necessitas redemptionis, de facto non moreretur.

13 Dicendum nihilominus est, voluntatem inefficacem non esse voluntatem signi, quæ solum metaphoricè Deo tribuitur, sed esse voluntatem beneplaciti, quæ formaliter in ipso est, rectèque vocari antecedentem, & conditionatam, quia actu datur in voluntate, licet versetur circa obiectum conditionatum. Vtraque pars est D. Thom. quæst. 23. art. 3. ubi inquit. *Inuenitur in Deo propriè ratio voluntatis, ut supra dictum est, & sic voluntas de Deo propriè dicitur, & hæc est voluntas beneplaciti, quæ per antecedentem & consequentem distinguitur, ut dictum est.* Voluntatem autem antecedentem explicauerat in art. precedente, quod est voluntas inefficax, quæ non impletur & idem affirmat in hac quæst. 19. a. 6. ad 1. ergo sentit S. Thom. hanc inefficacem & antecedentem voluntatem contineri sub voluntate beneplaciti, & in Deo formaliter, & propriè esse. Rursus quod hæc voluntas antecedens, quæ actu in Deo existit sit voluntas conditionata expressè affirmat in 1. dist. 9. 1. art. 1. ad 2. ubi inquit, quod *voluntas antecedens potest dici conditionata, nec tamen est imperfectio ex parte voluntatis diuinæ, sed ex parte voliti, quod non accipitur cum omnibus circumstantiis, quæ exiguntur ad rectum ordinem in salutem.* Ergo expressè tenet Vasquez contra D. Thom. negans hanc voluntatem antecedentem esse conditionatam actu ex parte subiecti, cum antecedens voluntas actu in Deo sit. Et eodem modo appellat illam voluntatem velleitatem, quæ utriusque est conditionata voluntas, in hac quæst. 19. art. 6. ubi inquit, quod *Iudex simpliciter vult homicidam suspendi, sed secundum quid vellet eum vivere, scilicet in quantum homo: unde magis potest dici velleitas, quam absoluta voluntas.* Denique D. Thom. in artic. 12. numerat omnia signa voluntatis diuinæ, & inter illa non ponit voluntatem antecedentem: ergo illa non est voluntas signi: ergo beneplaciti: ergo est in Deo formaliter.

14 Et hinc nascitur manifesta ratio ad probandam primam partem conclusionis, quia voluntas antecedens, seu inefficax non potest esse voluntas signi: ergo debet esse voluntas beneplaciti. Patet conseq. quia voluntas Dei ædequatè diuiditur per voluntatem beneplaciti, & signi, quia omnis voluntas aut est actus in Deo existens, aut effectus extra ipsum manens, eiusque voluntatem indicans, quæ sunt membra inter se immediatè opposita. Antecedens prob. quia voluntas signi dicitur voluntas ut effectus voluntatis, non ut actus, ut supra ostendimus, sed voluntas inefficax non habet effectum, quia inefficax est: ergo non potest pertinere ad voluntatem signi, quæ consistit in aliquo effectu indicante voluntatem Dei. Et à priori sumitur ratio huius, quia obiectum voluntatis inefficacis est aliquod bonum quod secundum se est bonum & obiectum consonum voluntati, & quod de se ponendum erat in re, si aliquid non obstarat: ergo datur in Deo voluntas respiciens actu tale obiectum. Anteced. patet in illo obiecto volendi saluationem, & conuersionem peccatorum, qui de facto non saluabuntur, nec conuertentur: hoc enim bonum est de se. Conseq. prob. quia ex parte obiecti datur quidquid sufficit, & requiritur

ut terminetur actum diuinæ voluntatis, imò & nostra, quia circa tale obiectum voluntatem habere possumus, & de facto habemus plures volitiones inefficaces, quia ad eas sufficit bonitas obiecti secundum se, quæ hoc ipso quod bonitas est, amabilis est, licet non ametur cum ordine ad media, ut assequatur. Multò autem magis est amabilis in ordine ad Deum, quia bonitas illa, quæ competit rei secundum se, etiam si de facto non existat, nec existitura decernatur, conuenit tamen illi rei, ex participatione diuina: ergo ex voluntate diuina qua placet illi, ut talis res habeat talem bonitatem secundum se: nec enim participatio bonitatis creatæ oriri potest, nisi ex participatione bonitatis diuinæ, & talis participatio placet Deo, quia bona est, & bonum quod est ex Deo, placet Deo. Et rursus non est in statu puræ possibilitatis, in qua res actu non sunt bonæ, & sic neque actu amantur, sed res illa considerari potest ut ordinata in suis causis, & quantum est de se ad effectum, licet euentus ipse non sequatur: ergo est in statu, & habet condiciones requisitas ut ametur à Deo, licet de facto non sit futurum, & sic inefficaci voluntate attingitur.

Et conf. quia stat bene quod res alia de facto, 15 & in re non futura, ordinetur tamen à Deo, quantum est de se, & per causas inferiores, ad hoc ut sit: sed non potest ordinari nisi per voluntatem Dei: ergo datur voluntas Dei circa talem ordinationem, & non efficax, quia de facto non habet effectum: ergo inefficax, quæ tamen formaliter est in Deo, quia illa ordinatio formaliter in Deo est, nec Deus ordinat aliquid de creatura, nisi volens, non inuitus, aut nolens: ordinatio enim decretum est. Maior est certa, quia Deus vult multos peccatores conuerti, & de se ponit media ad id sufficientia, per prædicationem, per exempla, per miracula, quæ omnia ordinantur aut conuersionem peccatoris, quæ tamen non est futura, & sic neque efficaciter volita, sicut prædicauit, & fecit miracula apud Iudæos multos, qui non sunt conuersi ut conqueritur, Matth. 11. Et iterum Matth. 23. *Quoties volui congregare filios tuos sub alas, & noluiisti.* Et Ezechielis 18. *Nolo mortem peccatoris, sed ut conuertatur, & viuat.* Isai 5. *Quid ultra debui facere vineæ meæ, & non feci ei?* Ergo ordinat, & vult Deus conuersionem peccatorum, etiam qui conuertendi non sunt. Et pater, quia ponit eis præceptum conuertendi, monet illos, instigat alios ut moneant, ut prædicent, & urgeant ipsos. Hæc autè ordinatio, & præceptum, & admotio, & voluntas in Deo formaliter est in ordine ad conuersionem: ideo enim inspirat, & monet, quia illa conuersio placet illi: ergo placet aliquid Deo de facto, nec placet sola possibilitas, quia complacētia huius si datur in Deo, est communis omnibus possibilibus, hæc autè conuersio placet Deo, ut fiat, & ad id causas ordinat, quæ ad possibilitatem solam non ordinantur, & tamen est inefficax voluntas, respectu principalis intenti, sc. conuersionis, licet habeat adiunctam aliquam voluntatem efficacem circa ordinationem causarum, quia de facto ponit inspirationē, & admonitionem, & de facto dat sufficientia auxilia, sed hoc est habere voluntatem efficacem quoad aliquid adiunctum, inefficacem verò quoad principale intentum.

Quod verò secunda pars conclusionis vera sit, 16 porb ex opposito fundamento Vasquez, quia obiectum conditionatum, licet sub conditione habeat existentiam, seu futuritionem, nō tamen sub conditione habet bonitatem & appetibilitatē, sed absolutè ergo est appetibile de facto. Patet conseq. Nam ut aliquid appetatur de facto, non requiritur ut habeat

habeat bonitatem de facto, & in re existentem, sed sufficit quod in apprehensione: multa autem obiecta conditionata sunt, quæ apprehenduntur ut bona absolute, licet de facto non existant, nec existura sint, sed sub conditione, sicut repræsentatur mihi bonum dare vitam pro Christo, si à Tyranno capiat, & non consentire malo, etiam si in tali vel tali occasione inueniar; & circa hæc conditionata potest aliquis firmare animum suum, & de facto sic velle, licet obiecta illa non sint futura. Antec. autem certum est, nam non solum obiecta sub conditione, sed etiam iam transacta, & non amplius possibilia repræsentari possunt, ut bona, & delectabilia, sicut patrē, vel amicum defunctum desidero, & amo quod viueret; de delectatione præterita, vel sub conditione nuptiarum, potest quis delectari de facto: ergo & velle actu, licet obiectum sit conditionatū; potest quis de facto promittere, aut proponere quod aliquid faciet, si talis conditio ponatur, & sub conditione ex nunc contrahere. Quantum vexant tentationes rerū sub conditione, ut si es Rex, si diues, si coniugatus, si inimicum caperes, & similia, quæ si de facto consensum non elicerent, nec actum haberent, à quantis malis liberaremur! Certē admittit V. Deum habere simplicem complacentiam circa possibilia, quæ tamen non habent bonitatem de facto, sed possibilem, & minùs actualem quam conditionata. Eatergo nunc, & formet argumentum suum contra illa. Non potest potētia ferri in obiectū quod actu non est obiectum, sicut visus non potest ferri in coloratum sub conditione: Adde ego, quod non potest ferri in coloratum possibile, & non actu coloratum; ergo neque voluntas in bonū possibile, & non actu bonum. Ergo si hæc consequentia apud Vasq. non valet, cur valebit illa de bonitate conditionata, quod non potest ferri in bonum quod conditionatē est bonum? Respondemus, quod illud non est conditionatē bonum, sed conditionatē futurum, & hoc potest determinatē esse bonum, & de facto sic repræsentari intellectui, licet non sit existens in re, & consequenter de facto appeti, quia appetitus actualis, & de facto non regulatur, per existentiam obiecti in re, sed in apprehensione. Potest autem apprehendi ut bonum absolute, & ut appetibile id quod non est de facto, sed sub conditione est futurum, ut in prædictis exemplis patet: multa enim sub conditione existentia desideramus de facto aut promittimus, aut proponimus, quæ secundum se placent, licet de facto non sint futura.

17 Fateor quidem, actus istos, licet explicentur per velleitatem, & per verbū *vellem*, quod indicat actū non existentem de facto, nec voluntatem de facto volentem, sed quæ in tali occasione vellet, tamen non semper ista velleitas est sine actu formali, & de facto habito, quia plerumque habemus formale desiderium, & complacentiam de eo quod non nisi sub conditione futurum est, & tunc actus ex parte nostra, & ex parte subiecti est de facto in nobis: obiectum autem est conditionatum, ut cum dico, volo ex nunc pro tunc dare tibi centum, si Rex concesserit tale officium, voueo, & promitto ex nunc offerre lampadem tali Ecclesiæ, si conualuero de infirmitate.

18 Sed obiciēs imprimis. Nam hæc voluntas inefficax est imperfecta: ergo non potest poni formaliter in Deo. Anteced. probat, quia caret effectu, cum sit in manu Dei habere illum, omnis autem voluntas inefficax, aut caret effectu, quia impeditur, si est voluntas impedibilis, aut quia retrocedit, & verè non vult, si impedibilis non est, quia si in manu eius est facere, & non vult, otiosè, & superflue vult inefficaci voluntate. Voluntas autem Dei

non est impedibilis: ergo si non vult facere, est quia retrocedit, & sic non vult, aut otiosè habet illum actum, ad quid enim seruit ille actus volendi, si ipse de facto non vult rem illam fieri?

Et conf. quia si Deus vult omnes homines saluos fieri, non potest velle ut salui fiant à seipsis, quia hoc est impossibile omnino: ergo vult ut salui fiant ab ipso Deo: ergo vult illos saluos facere, quia fieri, & facere sunt correlatiua: ergo non solum fertur ista voluntas circa bonitatem rei secundum se, & obiectiue sumptam, sed circa fieri, & facere ipsius rei, atque adeo efficax est.

Et conf. secundò, quia volens prolicere merces in mare cum voluntate antecedenti conseruandi ipsas, si esset in manu eius cuitare tempestatem, voluntas illa antecedens seruandi merces, vinceret, & esset efficax, quia est voluntas de re sibi placente: ergo si Deus vult antecedenti voluntate saluare omnes, & in manu eius est ut saluentur, illa voluntas antecedens redderetur efficax & vinceret: ergo si non vincit, signum est quod non datur.

Resp. negando antec. Ad probationem dicitur, 19 quod voluntas inefficax, licet careat effectu ut posito ad extra, nō tamen caret ordine ad illum quantum est ex parte causarum, vel alicuius causæ; neque caret bonitate sufficiente ut appetatur & placeat. Vnde licet in genere causæ actiue & efficientis, videatur minùs perfecta voluntas inefficax, quàm efficax, si voluntas sit inefficax ex aliquo impediēte extrinseco, tamen si ex propria ordinatione, & prouidentia sua vult Deus quod careat effectu & sit inefficax, non est imperfecta, quin potius in genere respiciendi finem, & ordinandi ad illum, non est aliquando minùs requisita illa inefficax, & conditionata voluntas, quia sæpiùs expedit aliqua ordinare in aliquem finem, & frustrare illa effectu suo, quia nisi frustrarentur, sequerentur maiora inconuenientia, sicut sunt multæ causæ contrariæ inter se, quarum quælibet ordinari debet in suum effectum, alioquin contrarietate non exercerent; & tamen non potest vtraque habere effectū suum efficaciter, alias non vinceret vna aliam. Et Deus qui est vniuersalis prouisor omnium entium, etiam si inter se contrariantur, debet volūtatē habere, & prouidentia circa omnes; nec tamen omnibus efficaciam debet dare, aliàs finis suæ gubernationis non saluaretur. Sicut prouidet quod omnes homines sint capaces beatitudinis, & quod tendat quantum est de se ad illam, sed tamen si omnes efficaciter saluarentur, non daretur locus mutabilitati, contingentia, & infirmitati liberi arbitrij, imò & humiliationi & patientia, & aliis multis virtutibus quæ occasione defectuum, & peccatorum nascuntur. Quare propter suam vniuersalissimam prouidentiam debet Deus non solum prouidere causis inferioribus habentibus effectum sed etiam non habentibus, & tamen illas quæ effectum non habent ordinare debet ad effectus, & consequenter habere voluntatem, ut illi effectus fiant, quantum est ex vi, & ordinatione causarum, licet non quod fiant absolute. Et sic non est otiosum hæc decreta habere conditionata, & voluntatem antecedentem, cum ita necessaria sint ad prouidentiam vniuersalem, ut vidimus *art. præced.* præsertim cum nulla sit voluntas ita purè inefficax, quod non aliquid efficacis, seu effectus habeat, saltem ordinando sic causas ad effectus non futuros in re. Vnde non est imperfecta voluntas inefficax in Deo, quia non est inefficax ex aliquo impediēto, nec retrocedit in volendo, quia ex propria sua ordinatione est quod illi effectus frustrentur propter maius bonum.

20 Ad primam Conf. Resp. quod sicut Deus vult omnes homines saluos fieri, ita vult omnes saluos facere, non à seipsis, sed à seipso: sed sicut non vult eos saluos fieri absolute, & adæquatè, & in re, ita nec vult illos saluos facere absolute, & simpliciter in re, sed inadæquatè, & secundum quid, videlicet quantum est ex parte sua, secundum primariam intentionem, prout scilicet facit illos capaces beatitudinis, & ordinatos ad illam, sub hac præcisione vult illos saluos facere, id est, pro hac parte, & quantum est ex istis meritis non vult illos perdere, sicut dum Deus dat gratiam reprobis, dat illi ius ad gloriam, & vult illi gloriam ut contentam in gratia, non ut in re habendam. Verum quidem est quod voluntas diuina sic respiciens obiectum, non sistit in illa præcisione, sed ulterius transit ad decernendum quod de facto ita sit, vel non sit; si enim quo ad hoc suspensa maneret, esset imperfecta, & multò magis si esset inefficax illa voluntas ratione frustrationis ab extrinseco impediens: sed si voluntas non manet suspensa, sed transit ulterius ad decernendum quod fiat, vel non fiat, & id quod conditionatè vult, ordinando quod non fiat, ex se vult, & non ob aliquod impedimentum extrinsecum, talis respectus ad rem sub statu conditionato nullam imperfectionem dicit, & verè in voluntate Dei reperitur.

21 Ad secundam Conf. Resp. quod, est magna differentia inter voluntatem antecedentem hominis proiciens merces, & Dei volentis saluare omnes, quod voluntas hominis est inefficax propter impedimentum extrinsecum: nam de se potius veller ille conseruare merces, quia impeditur timore periculi vitæ, retrocedit in illa voluntate, & non vult conseruare merces, redditurque inefficax voluntas, quæ tamen, si tolleretur impedimentum, iterum procederet ad efficaciam suam. At verò voluntas Dei inefficax non habet inefficiam ratione alicuius impedimenti extrinseci frustrantis illam, quia Dei voluntas à nullo est frustrabilis, sed est inefficax ex propria sua prouidentia, & dispositione, quia sic conuenit fini gubernationis suæ, ut quædam causæ ordinentur ad effectus, & tamen non fortiantur illos. Vnde talis inefficax voluntas inefficacitate volita & præintenta, non verò impedita, non retrocederet, & fieret efficax, etiamsi in manu Dei sit illam efficacem reddere, quia potius manus Dei detinet illam, & inefficacem facit, propter convenientiam suæ prouidentia.

22 Secundo obiicies, id quod eommunitè obicere solentij, qui liberum Dei actum in connotatione obiecti ad extra constituunt, quia non potest dari libera voluntas Dei, cui non correspondeat aliquis effectus ad extra: per ordinem enim ad intra actus necessarius & liber idem sunt, distinguitur autem liber per connotationem obiecti ad extra, qui est effectus eius; inefficax autem voluntas, in quantum talis, effectum non habet, quia in hoc consistit eius inefficacia: ergo non datur in Deo actus liber & inefficax.

Conf. quia Deus habet reprobationem negatiuam circa aliquos, quia ante præuisionem operum odio habuit Esau, quod utique non saluatur in positiua reprobatione, quæ est voluntas puniendi: hæc enim necessariò supponit demerita: ergo in negatiua non eligendi ad regnum: cum hac autem non comparitur voluntas saluandi illum, etiam inefficax, & antecedens, quia si Deus habet reprobationem negatiuam ante præuisionem operum, illam habet ex se, & ut voluntatem antecedentem: ergo illi opponitur alia voluntas etiam antecedens saluandi illum quantum est ex se.

Denique conf. quia Scriptura omnem volun-

tatem Dei docet impleri, & esse efficacem: ergo malè nos dicimus aliquam non impleri, sed esse inefficacem. Antec. patet ex illo Mai. 46. *Consilium meum stabit, & omnis voluntas mea fiet.* Et Psal. 134. *Omnia quacumque voluit, Dominus fecit:* ergo nulla est voluntas quæ non fiat, nec aliquid volitum quod non sit factum, Ex hoc enim motus est Aug. ad explicandum locum Pauli, quod *vult omnes saluos fieri*, de voluntate efficaci, intelligendo omnes, non simpliciter, sed pro distributione accommodata, ut postea dicemus, quia scilicet non quædam voluit, & non fecit, sed omnia quacumque voluit fecit, ut dicit in *Enchiridion* c. 95.

Resp. iam sapè nos dixisse *art. preced. & disp.* 23 4 agendo de actu libero Dei, quod non requirit necessariò connotationem alicuius effectus realis ad extra, sed sufficit aliquam denominationem vel ordinationem etiam rationis ipsis obiectis liberè & contingenter conuenientem, ratione cuius dicatur volitum liberè tale obiectum sine alia mutatione reali ex parte effectus, neque ex parte actus, quia actus diuinus propter suam eminentiam potest immutare realiter, aut denominare obiecta libera, sine vlla mutatione sui passiva. Vnde voluntas inefficax, licet non habeat effectum ad extra de facto, & extra causas positum, est tamen talis actus in Deo formaliter in ordine ad effectum sub conditione ponendum, quod aliquam denominationem liberam dicit, & in causis existentibus etiam ordinationem, & inclinationem, aut dispositionem ad talem effectum faciendum importare potest, quæ aliquid reale in talibus causis erit, & tunc illa voluntas inefficax erit quoad effectum, sed habebit aliquid efficaciam coniunctum, scilicet sic de facto ordinare, & disponere causas inferiores, licet de facto executuræ non sint, quia hoc ipsum Deus vult, licet in quantum inefficax effectum realem non habeat.

Ad Conf. Resp. quod ante præuisionem operum 24 fuit reprobatio negatiua, quæ intelligi potest per negationem actus, non solum per nolitionem obiecti, & tunc potius dicitur non prædestinatio. Fuit etiam reprobatio per modum prouidentia circa exclusionem à regno, & permissionem peccatorum nunquam remittendorum. Et hæc fuit voluntas efficax, & non antecedens tantum, quia fuit per modum prouidentia attingentis finem, & media, ut latius dicemus *inf. disp.* 10. Cæterum hæc reprobatio nullatenus repugnat cum illa voluntate antecedenti, & inefficaci volendi saluare hunc reprobum, quia illa est voluntas saluandi non absolute, & in re, sed quantum est ex parte bonitatis Dei, & ipsius hominis, ut homo est, reprobatio autem illa est voluntas non saluandi illum hominem, attentis circumstantiis diuinæ iustitiæ, & defectibilitatis humanæ, cui ob suam vertibilitatem conaturale est labi in defectus, etiam æternos, & non remittendos, sicut Angeli lapsi sunt, & homines qui similes esse volunt dæmonibus, non solum in peccando, sed in non pœnitendo, & ad Deum pertinet id permittere ut ad supremum omnium prouisorem. Itaque homo ut participat naturam humanam capacem beatitudinis, pro hac parte solum ordinatur ad gloriam: homo autem ut defectibilis etiam permitti potest in defectus æternos cadere, & solum per puram misericordiam subleuabilis, aut præseruabilis est, quam Deus non vult de facto omnibus exhibere efficaciter, considerato homine ut defectibili. Et cum dicitur quod illa reprobatio non nascitur ex demeritis præsuppositis, sed ex Deo, & ita contrariaretur voluntati antecedenti saluandi ex se. Resp. non contrariari, quia voluntas saluandi

saluandi nascitur ex se, hoc est ex præcisa ratione bonitatis; reprobatio autem illa nascitur sub alia ratione, scilicet ex ostensione suæ iustitiæ, non ex præcisa communicatione suæ bonitatis, de quo latius *infra disp. 10.*

25 Ad secundam Conf. Resp. quod illa loca Scripturæ & August. loquuntur de voluntate Dei simpliciter sumpta, quæ semper impletur, ut docet S. Thom. *hæc q. 19. art. 6. ad 1.* non de voluntate sub præcisione, & antecedentia. Vel secundò omnis voluntas Dei fiet, & quæcumque voluit fecit, quia à nullo extra se impeditur, sed si aliqua voluntas Dei non impletur, est quia hoc ipsum quod est non impleri, ipse vult; & ita siue aliquid fiat, siue non fiat, totum ex voluntate eius est; cum quo tamen stat quod respectu alicuius voliti sub aliqua præcisione considerari habeat voluntatem ut fiat quantum est ex vi illius obiecti, & rationis formalis, & tamen sub alia consideratione velit quod non fiat, & totum hoc ex voluntate eius est; & sic omnis voluntas Dei simpliciter, & absolute, & sine præcisionibus considerata fit, antecederet autem, & cum aliqua præcisione considerata non fit.

26 Circa tertium dubium, scilicet circa quid versetur voluntas antecedens Dei, & circa quid versetur consequens, P. Vasquez *disp. 83. supra cit. cap. 3. circa finem & cap. 4. circa principium*, ponit pro obiecto, seu materia voluntatis antecedentis quidquid ex se solo facit Deus, non sumendo motuum ex parte nostra, seu ex suppositione alicuius actus nostri, siue mali, siue boni. Inter quæ numerat quosdam affectus efficaces, quosdam simplicis complacentiæ: Efficaces, ut est vocatio Dei, qua vocat nos, & vnde iustificatio inchoatur ante omne opus nostrum bonum: hæc enim à solo Deo manat, non ex suppositione alicuius operis nostri. Effectus autem simplicis complacentiæ, sicut est illa voluntas saluandi omnes homines, cum de facto non omnes saluentur. Et hoc deducitur ex eo quod voluntatem antecedentem dicit Damasc. esse beneplacitum ex ipso Deo emanans, subsequentem autem quod ex nostro opere ortum ducit, seu ex suppositione alicuius operis nostri datur in Deo. Quidquid ergo ex solo Deo est, ad voluntatem antecedentem pertinet, siue efficaciter sit factum siue sola simplicis complacentiæ voluntate habeatur. Addit ipse Vasquez addi posse tertium membrum; scilicet voluntatis comitantis, qua Deus efficaciter decernit dare influxum simul cum ipsa voluntate, qui est influxus concomitans ad consensum quem gratiæ præstamus. Alij existimant obiectum circa quod versatur voluntas antecedens esse quidquid bonum est in nobis, quorum sufficiens causa in nobis non est, sed ex Dei libertate haberi debet. Et sic etiam si supponantur actus nostri, & ratione eorum Deus moueatur ad aliquid dandum; tamen si bonum est, ex antecedente Dei voluntate emanat, eo quod Damascenus dicit quod ea quæ in nostro arbitrio consistunt, si bona sunt, Deus primariè vult, & grata habet, idem est autem primariè, quod antecederet.

Nihilominus consequenter ad ea quæ *suprà* resoluimus, dicendum est ad voluntatem antecedentem, de qua loquitur Damascenus, & explicat D. Thom. non pertinere, nisi ea quæ ineffaciter sunt volita, ita quod ad effectum principalem, & consummatum non perducuntur, licet verum sit quod voluntas ineffacax, & effectum carens circa vnum, habet communiter loquendo annexum aliquid efficacitæ circa aliud; hoc tamen non est

de ratione antecedentis voluntatis, vel antecedens est formaliter, sed ratione alicuius ei annexi, & concomitantis quod efficaciam aliquam dicit, eo quod voluntas Dei non potest ab omni effectu, & ordine statuendo abstrahere, si circa res ad hoc vniuersum pertinentes versatur.

Prima pars huius conclusionis constat ex dictis, quia iam *suprà* probauimus voluntatem antecedentem dici illam quæ versatur, seu respicit obiectum aliquod secundum se, & bonitatem suam obiectiuam præcisè, non consideratis his quæ consequuntur, & circumstant, non quia Deus eodem actu reali totum hoc non respiciat, sed quia in obiecto voluto distinguimus diuersas rationes, quarum vna se habet prius altera, & prout voluntas diuina attingit priorem, sub hac præcisione vocamus illam voluntatem antecedentem, id est, priorem, & respicientem id quod ex prima intentione Dei sibi conuenit. Ergo pro materia & obiecto talis voluntatis antecedentis non potest poni aliquid, prout de facto fit, & executioni mandatur, quia prout sic non attenditur aliquid prius & antecedens in ipso voluto, sed totum quod in ipso est consideratur: nihil enim amplius est in aliqua re, quam id quod de facto est. Voluntas autem antecedens & consequens distinguuntur, non ex parte actus diuini, qui indiuisibilis, & simplicissimus est, sed ex parte rei volitæ: ergo oportet quod in illa distinguatur aliquid prius, & antecedens, & aliquid posterius, seu consequens. Res autem quatenus attracta secundum aliquid prius, & non secundum id quod posterius, & consequens est, non attingitur absolute, sed sub præcisione, quia attingitur solum quantum ad id quod est prius & antecedens, non quoad totum quod in re est de facto, & secundum quod de facto fit: ergo voluntas antecedens, prout talis, non respicit rem de facto, & in executione, sed ineffaciter, & sub præcisione aliqua.

Nec potest dici quod voluntas antecedens, & consequens non versantur circa vnum & idem obiectum sub prioritate, seu antecedentia, & posterioritate, seu ratione consequenti, sed circa diuersa obiecta, quorum vnum est prius, & à solo Deo fit ante nostra opera præsupposita; aliud posterius & consecutiue, seu post præsuppositionem illorum.

Nam contra est, quia maximè distinguitur à Damasceno voluntas antecedens, & consequens circa illud obiectum, quod dicit Apostolus. *Quia Deus vult omnes homines saluos fieri*: maximè enim propter hoc obiectum distinguitur illa duplex voluntas, sed hæc non potest distingui circa diuersos homines, quorum vnum velit prius saluare, & alium postea, quia dicit quod vult omnes, & sic circa singulos procedit illa distinctio voluntatum: ergo respectu vnius & eiusdem obiecti distinguitur voluntas antecedens, & consequens: in tali ergo obiecto oportet quod antecedens, seu prior voluntas sit cum præcisione, & consequenter cum ineffacitate, nunquam autem efficacax dicatur illa, quæ est antecedens, sed solum consequens.

Secunda pars conclusionis, scilicet quod aliquid efficacitatis sit annexum voluntati antecedenti, licet sub formalitate, & consideratione antecedentis, ineffacax sit, deducitur ex D. Thom. qui in *hoc art. 6.* docet quod, cum voluntas Dei sit vniuersalis causa omnium rerum, impossibile est quod diuina voluntas suum effectum non consequatur. Vnde quod recedere videtur à diuina voluntate secundum vnum ordinem relabi-

tur in alium. Sed quod recedit ab vno ordine diuinæ voluntatis, non efficaciter illum consequitur, sed de facto non ponitur in illo: ergo si de facto relabitur in alium, habet de facto annexum aliquid efficacitatis, nempe respectu illius quod de facto assequitur. Et probatur hoc inductione, quia inefficax, & antecedens Dei voluntas, vel versatur circa obiecta, quæ sunt futura, & contenta in aliquibus causis creatis, & quantum est ex inclinatione, & dispositione earum futura erant; sed ex aliquo impedimento non erunt: vel versatur circa obiecta, quæ non sunt contenta in aliquibus causis creatis, sed extra totum ordinem earum, & in sola voluntate Dei continentur, quæ pro alio ordine rerum disponit de aliquibus futuris, licet illa nunquam futura sint. Si primo modo se habet voluntas antecedens, manifestum est quod saltem habet sibi annexum dare sufficientia auxilia, aut relinquere causas inclinatas, & dispositas ad illum effectum, licet in re futurus non sit; quæ dispositio, & inclinatio causarum, & positio auxiliorum sufficientium aliquid de facto est positum in rerum natura, & sic ab efficaci Dei voluntate descendit; frustratur tamen ille effectus, nec de facto est futurus, & quoad hoc est inefficax voluntas, licet in alium ordinem recadat, in quo impletur de illo id quod Deus vult. Si 2. modo se habet, quod nobis omnino incertum est, an Deus de his, quæ non habent connexionem cum hoc ordine rerum habeat conditionatam voluntatem, & decretum; tamen illo dato, quod non apparet esse Deo impossibile, habet tamen efficacem voluntatem ut illa veritas conditionata pro illo statu & ordine rerum sit determinata in vnam partem potius quam in aliam, cum in re contingenti posset ad oppositam determinari. Hæc autem determinatio ex parte obiecti, licet nihil producat, tamen denominat obiectiue, & illa denominatio libera est, reddens determinatam illam veritatem contingentem pro illa parte, quæ de se solum indeterminata & indifferens est: ergo talis denominatio non est nuda denominatio possibilitatis, quæ provenit à potentia secundum se, sed proveniens à voluntate libera sic de facto determinante, & decernente, de quo pluribus egimus *preced. tomo. disp. 20.*

- 29 Ex quo soluitur fundamentum oppositum. Nam quod dicit Damascenus voluntatem antecedentem esse beneplacitum ex Deo emanans, iam *suprà* dicimus quod ly *ex ipso emanans* nun intelligitur solum emanans in executione, sed ly *ex seipso*, est idem quod ex seipso ut motiuo, cum præcisione, ita quod sit à Deo, ut ex puro motiuo, sub aliqua prioritate, seu antecedentia, ut complacet in aliquo bono creaturæ ex sola participatione bonitatis eius. Vnde cum id quod est emanans, & existens ex Deo, ut ex motiuo, seu participatum à bonitate eius, possit sumi aliquando cum aliqua prioritate, seu antecedentia & præcisione, licet non sub omni alia formalitate, quæ in ipsa re inuenitur, aliquando verò possit totum esse à solo Deo, etiam in executione, & cum omnibus ad eam requisitis; ideo aliquando constituitur primaria intentio Dei in voluntate antecedente & inefficaci, quando illa primaria voluntas sumitur cum præcisione, & antecedentia, aliquando verò cum effectu, & executione, sine tali antecedentia, & prioritate, vel præcisione. Et sic stat bene quod antecedens voluntas sit ex Deo emanans, & tamen non sit efficax, quia cum illa præcisione sumitur illa emanatio, scilicet quantum est ex illo

motiuo. Quod verò addit Vasquez de tertio membro comitantis voluntatis, friuolum est, cum influxus concomitans sit aliquid de facto & in executione positum, & supponens influxum potentia creatæ, cum quo simul procedit influxus Dei, & sic ex nulla parte deest illi quin pertineat ad voluntatem consequentem, non ad tertium membrum distinctum concomitantis voluntatis.

Ad aliud fundamentum ex aliis verbis Damasc. 30 *suprà* etiam respondimus, quod illa primaria voluntas qua Deus gratum habet omne bonum, etiam quod ex nobis est, non est voluntas antecedens sistens in ipsa antecedentia, & prioritate illius primæ intentionis, qua Deus vult aliquid secundum se bonum, & non eius existentiam: tunc enim proprie, & cum formalitate est antecedens voluntas, quia in ipsa antecedentia sistit; sed est voluntas primaria, quia ex prima Dei intentione manat, sed non cum præcisione, sed usque ad executionem discurrens, & non in antecedentia sistens; ideoque primaria est, & tamen consequens, non præcisa & antecedens.

Intelligentia illius dicti: Qui vult omnes homines saluos fieri.

Licet multæ tradantur huius loci explicationes, tamen principales ad duo capita reducuntur.

Prima, quod loquatur Apostolus de voluntate antecedente inefficaci, qua vult omnes saluari voluntate quadam generali, & conditionali, videlicet omnibus proponendo salutem, & remedia generalia omnibus sufficientia, sicut qui aperit apothecam, omne remedium pro infirmitatibus continentem, & omnibus patentem eam ponit, qui voluerint illa uti, iste omnes vult sanari, quantum est ex vi exhibitionis medicinæ, licet non velit omnibus eam applicare, qui volunt ea uti. Et hæc expositio de voluntate antecedenti inefficaci huc usque explicata est, quæ est Damasceni *cit. loco suprà*, occasione enim huius loci, distinxit voluntatem illam antecedentem, & consequentem. Alia explicatio est Augustini quod loquitur Apostolus de voluntate efficaci, qua vult Deus saluare de facto, sed tunc ly *omnes homines*, non debet sumi secundum distributionem completam, cum constet non omnes de facto saluari, sed cum aliqua restrictione. Quæ restrictio variis modis adhiberi solet.

Prima est quod illa distributio *omnes*, sumatur accommodè, non vniuersaliter, id est, non quia omnes vult Deus saluare, sed quia nullus fit saluus nisi Deus velit: sicut dicitur aliquis magister docere omnes pueros in hoc oppido, non quia omnes addiscant, sed quia nullus, nisi ab ipso discit. Et sic hortatur nos Apostolus in illo loco 1. ad Timoth. 2. ut obsecrationes, & orationes faciamus ad Deum, ut tranquillam vitam agamus, hoc enim est acceptum apud Deum, qui vult omnes homines saluos fieri, id est, à cuius voluntate pendet salus omnium, & sic debet à nobis rogari, & orari ut velit saluare.

Secunda expositio est, quod ly *omnes* sumatur quidem vniuersaliter, sed vniuersalitate quadam incompleta, & pro generibus singulorum, non pro singulis generum, sicut dicitur, Omne animal fuisse in arca Noë, quia ex omni genere animantium aliquid fuit, sic ex omni genere & natione hominum aliqui saluantur.

Tertia expositio est, quod vult omnes homines saluare

saluare, non formaliter, sed causaliter, quia facit nos velle, & procurare omnium salutem; dixit enim Apostolus, *Prædicate Evangelium omni creaturæ; Docete omnes gentes, baptizantes eos, &c.* Vult ergo omnes homines saluare, qui facit nos velle, & procurare omnium hominum salutem, sicut dicitur Spiritus postulare pro nobis, id est, facere ut postulemus.

Istæ tres expositiones sunt S. August. Prima in lib. 4. contra Iulianum cap. 8. & lib. de corrept. & gratia cap. 14. Secunda in Enchiridio cap. 103. Tertia lib. de corrept. & gratia cap. 15.

Nihilominus licet ab August. ita expresse tradantur istæ expositiones, displicerunt P. Vasquez, qui disp. illa 83. cap. 2. num. 12. inquit, *Frustrâ Augustinum noluisse concedere hanc voluntatem Dei circa omnium salutem, & locum illum Pauli nullo ex illis tribus modis rectè exposuisse.* In Vasq. loquitur de Augustino. Et primas duas expositiones ex eo reiicit, quia Apostolus ita acceptum docet esse Deo, omnes tranquillam, & rectam vitam agere, sicut omnes saluari; sed Deus vult voluntate beneplaciti omnes rectè viuere: ergo eadem voluntate vult omnes saluari. Tertiam expositionem reiicit ex eo quod Deus non facit ut singuli velint saluari, & rectam vitam agere, ut comperit: ergo si facit velle nos quod omnes saluentur, necesse est dicere quod facit nos velle, non quod omnes simpliciter saluentur, sed ex omnibus aliquos, vel, ut quicumque saluantur, à Deo saluentur, quod est recurrere ad duas priores expositiones. Similiter has expositiones non probat P. Suarez *Relect. de libertate Dei, sect. 2. numero. 9.* & Mol. in concord. q. 19. art. 6. disp. 2. Quia in prioribus verbis cum dicit Apost. *Obsecro fieri postulationes, orationes, &c. pro omnibus hominibus.* ly *pro omnibus* non distribuit restrictiue, & incomplete, sed absolute: ergo neque in sequentibus verbis, cum dicit hoc esse acceptum coram Deo, qui vult omnes homines saluos fieri, ly *omnes* distribuit complete & simpliciter, non restrictiue, quia utramque distributionem æquiparat Paulus, & vnā infert ex alia.

Conf. quia Deus omnibus proposuit salutem, nemine excepto, ut saluari possint si velint, omnibus, nullo excepto, dedit præcepta, & legem, nullius peccatoris vult mortem, sumendo omnes istas distributiones complete & simpliciter: ergo non est cur restringantur ad incompletam distributionem vel accommodam. Ac denique quia hoc obiectum, scilicet velle omnibus hominibus salutem, bonum est: ergo Deus complacet in illo, & exinde mouetur ad exhortationem obseruandi mandata, & pœnitendi omnibus hominibus sine vlla exceptione, si autem Deus non haberet veram voluntatem ut omnes simpliciter saluantur, ad quid essent istæ inuitationes & exhortationes, nisi frustratoriæ & irrisoriæ?

32. Cæterum hæc argumenta omnino futilia sunt, ut tanti Patris menti opponantur. Et omnia illa vnico verbo possunt solui, dicendo quod expositiones August. non contradicunt expositioni Damasceni, sed vtræque procedit in diuerso sensu, & sub diuersa ratione, & vna non contradicit alteri, sed verum dicit, quia & verum est quod Deus voluntate antecedenti, & inefficaci vult omnes simpliciter, nullo excepto, saluos esse, & verum

est quod non vult voluntate efficaci, & consequenti omnes de facto saluari, vult tamen ex omnibus generalibus aliquos, & nemo de facto saluatur nisi per eius voluntatem: Si ergo hoc verum est, & negari non potest, cur expositiones istæ reiiciendæ sunt? aut quare non possunt illi loco accommodari, sine præiudicio tamen alterius, quæ est Damasceni, quia vna alteri non aduersatur?

Vnde ad primum argumentum Vasquez, Resp. eodem modo Deum velle omnes rectam vitam agere, & omnes saluari. Et vult omnes rectè viuere distribuendo ly *omnes* simpliciter, quantum ad voluntatem antecedentem, & inefficacem, quantum autem ad efficacem non vult omnes rectè viuere, cum aliqui permittantur prauè viuere, & multi. Vult tamen ex omni genere aliquos rectè viuere, sicut & saluari, & quicumque bene viuit, non nisi per voluntatem Dei sic viuit. Eodem ergo modo vtroque loquitur Apostolus.

Ad secundum fundamentum dicitur, quod Deus non facit ut singuli velint saluari, siquidem multi volunt perdi, sed facit nos velle omnium salutem, quia pro omnibus facit orare Ecclesiam suam, & omnibus salutem procurare, & prædicare; sicut de Apostolis ostendimus, quibus iussit ut omnes docerent.

Ad fundamentum Suarez, Resp. quod in prioribus verbis Apostolus iubet ut oremus pro omnibus distributione simpliciter, & completa, & hoc infert ex quadam distributione incompleta quoad voluntatem saluandi. Et licet ex distributione incompleta non possit inferri distributio completa circa idem, bene tamen ex voluntate volendi saluare omnes incomplete, potest inferri obligatio orandi pro omnibus complete sub intellecta quadam conditione, quod nos nescimus quos velit Deus saluare, aut non saluare. Sic ergo vis consequentiæ Apostoli iuxta hanc expositionem stat in hoc: Deus vult ex omni genere hominū aliquos saluare, & ad hoc sunt necessariae orationes nostræ, & nescimus quos velit in particulari saluare: ergo debemus pro omnibus orare, nullo excepto, fortassis ille est qui saluabitur. Sicut euidenter scimus non omnes fideles saluari loquendo in generali, & nescimus qui in particulari ad infernum, qui ad purgatorium decedunt: ergo pro omnibus orandum est, nullo excepto.

Ad Conf. Resp. omnes illas distributiones esse completas, & simpliciter vniuersales, non tamen pertinere ad voluntatem efficacem Dei, quia non saluat omnes de facto, sed ad generalem & antecedentem, quam non negamus. Si tamen de voluntate consequenti & efficaci saluandi loquamur, illæ distributiones non sunt vniuersaliter accipiendæ, quia sic non verificantur, possunt tamen verificari in sensu accommodo, & restrictiuo.

Quod verò dicitur illam voluntatem saluandi omnes simpliciter esse bonam, & placere Deo: Resp. placere Deo secundum se, & antecederet, non efficaciter, & consequenter, sic enim de facto Deus id non vult, nec placet. Voluntatem autem illam antecedentem nos non negamus Deo conuenire, nec fictitiam dicimus; sed addimus quod etiam loquendo de voluntate efficaci, illa vniuersalis potest suum sensum habere, sed restrictiue aut accommodè ut explicatum est.

QVÆSTIO XX.

De Amore Dei.

S V M M A L I T T E R Æ.



D hanc actum, qui est amor reducit D. Thom. omnes qui Deo possunt convenire, quia sub isto continentur, aut ex illo derivantur.

In art. primo ostendit in Deo esse amorem, eo quod amor est primus actus appetitus, seu voluntatis, quo fertur in bonum tanquam in primum & principale obiectum: omnes enim alij actus præsupponunt amorem, qui est tendentia ad bonum; si enim actus sint circa malum, utique bonum est prius malo; si autem sint circa bonum sub aliqua speciali conditione, v.g. circa bonum habitum vel habendum, &c. tales actus iam supponunt attractum ipsum bonum, & consequenter amatum. Nulli ergo voluntati deesse potest amor, hoc ipso, quod aliquem actum habet.

In 2. art. ostendit ad quæ obiecta se extendit amor Dei circa creaturas. Et dicit se extendere ad omnia existentia: Ipsum enim esse bonum est, & cum sit causatum à Deo, volitum est à Deo, qui per voluntatem illud causat. Nihil autem aliud est amare, quam velle alicui bonum: in quantum ergo Deus vult aliquod esse quod est bonum, amat. Sed diffimiliter ad nos, quia nos supponendo bonum quod amemus, & à quo prouocemur: Deus causando, & creando bonum quod vult.

In art. 3. & 4. loquitur de amore Dei comparatiuè ad hæc obiecta volita, videlicet an quædam magis amet, quam alia, an omnia æqualiter. Et secundò, an magis amet ea quæ sunt meliora. Et circa primum docet *art. 3.* quod Deus magis amat vnum, quam aliud ex parte rei volitæ, licet non magis ex parte actus, quia eodem simplici actu omnia vult, sed non idem, & æquale bonum vult omnibus, sed magis vni, quam alteri, quia diuersum, & æquale bonum vult diuersis rebus. Circa secundum autem ostendit necesse esse quod Deus magis diligat meliora, cum hoc ipsum quod est *meliora esse*, ex Dei participatione & voluntate habeant, quia scilicet maius bonum eis vult.

QVÆSTIO XXI.

De Iustitia & Misericordia Dei.

S V M M A L I T T E R Æ.



D has duas virtutes, quæ propriè, & non metaphoricè ponuntur in Deo, reducit D. Thom. omnes quæ in Deo erga creaturas versantur.

In 1. ergo articulo ostendit dari in Deo iustitiam, & in 2. quod iustitia hæc regulatiuè est idem quod veritas, seu lex. Primum ostendit in *art. 1.* distinguendo duas species iustitiæ, alteram commutatiuam, quæ est in mutua datione, & acceptione: alteram distributiuiam, quæ non est in mutua datione, sed in dispensatione gubernatoris dantis unicuique secundum suam dignitatem. Prima non est in Deo, propter reputantiam de *ly mutua*: nulla enim creatura potest dare Deo, nisi accipiendo ab ipso. Secunda verò in Deo est, quia reddit unicuique quod ei competit, non tamen Deus est debitor, quia non ordinatur ad alia, nec alteri subiicitur. Secundum verò ostendit, *art. 2.* quia iustitia facit ordinem in rebus iuxta rationem sapientiæ. Vnde habet aliquid ex parte regulationis, & sic pertinet ad legem, & ad veritatem, quæ est adæquatio intellectus ad rem, & aliquid ex parte inclinationis ad faciendum, & sic pertinet ad voluntatem.

In art. 3. ostendit dari in Deo misericordiam, quantum ad rationem expellendi defectum & miseriam creaturæ, non quoad rationem tristitiæ, quam misericordia iuducit ex compassione ad miseriam alienam, ut inde moueatur ad eam subleuandam.

In art. 4. explicat quomodo omnes viæ Dei, id est, omnia opera eius, sint misericordia & veritas. Quia in omni opere constituit Deus conuenientem ordinem, & proportionem iuxta cuiusque debitum, & sic seruat veritatem iustitiæ. Et rursus aliquem defectum & miseriam subleuare debet, quia non potest debitum alicui creature reddere, nisi propter aliquid in ea præexistens, & illud præexistens si est debitum, propter aliud reddi debet, & sic cum non sit abire in infinitum sistendum est in aliquo, quod ex sola bonitate, & mera gratia Dei detur, & hoc est ex misericordia dante illud esse, & reuelante ex nihilo.

DISPUTATIO VI.

De actibus & virtutibus diuinæ voluntatis.

ARTICVLVS I.

Qualis in Deo sit amor erga se.

SUPPONIMVS tanquam de fide certum, in Deo dari amorem. Ioan. 3. *Sic Deus dilexit mundum, ut Filium suum unigenitum daret*, ad Galat. 2. *Qui dilexit me, & tradidit seipsum pro me*: Rom. 9. *Iacob dilexi*. Quod si diligit creaturas, multo magis seipsum, *Pater enim diligit Filium*, & ipse Filius dicit: *Sicut diligo Patrem*, &c. Ioan. 3. & 14. Quod autem non sit metaphoricè amor in Deo, constat, tum quia Scriptura simpliciter, & sine addito tribuit Deo amorem sicut sapientiam, intelligentiam, misericordiam, iustitiam & similia attributa; nec est maior ratio cur loquendo de amore intelligatur metaphoricè, & loquendo de misericordia, propriè: tum quia non quomodocumque dicitur Deo conuenire amorem, sed dicitur Deus esse ipse amor, ita quod esse in amore, sit esse in Deo, 1. Ioannis 4. *Deus charitas est, & qui manet in charitate in Deo manet*. Nec dubito aliquando id quod metaphoricè est dici de Deo, ut cum dicitur Deus ignis consumens est, & Christus leo appellatur, & agnus; sed tamen in istis constat manifestè de metaphora, quia constat de imperfectione propter quam Deo propriè attribui non possunt, de amore verò non constat imperfectionem dicere, cum actus voluntatis sit, & attribuitur Deo cum tam stricta identitate, ut dicatur Deus amor, & quod manere in amore sit manere in Deo, igitur tanquam aliquid propriè dictum, & non metaphoricè Deo attribuitur.

2 Difficultas in hoc actu amoris erga Deum duplex est.

Prima an intelligatur in Deo amor ut conditus à gaudio. Nam per modum desiderij Deo attribui non potest, etiam ex parte suæ formalis rationis, ut docet S. Thom. *hac quæst. 20. art. 1. ad 2.* cum desiderium sit voluntas de re absente, quæ nobis deest, & ideo desideratur: Deo autem nihil esse potest, quia omnia in manu eius sunt facere quando voluerit & quomodocumque voluerit; non ergo est capax desiderij.

Scio P. Vasquez *hic disp. 84. cap. 1.* Deo tribuere desiderium, non respectu boni proprii, quia hoc semper sibi præsens est, & non futurum, sed respectu boni alieni, seu creati, quod potest ut futurum considerare; unde & dicitur ardentè desiderare salutem nostram, & bonum virtutis, oppositum autem odit & fugit.

Sed tamen etsi daremus gratis ipsi Vasquez quòd

desiderium propriè dictum possit versari circa bonum alienum, & non solum circa proprium, ad huc non probat in Deo esse desiderium, quia omne bonum creatum ita est in manu Dei, illique subiectum, ut habeat illud sibi præsens quantum ad potestatem, etsi adhuc non sit in propria mensura, quia Deus hoc ipsum vult, & disponit, ut tali tempore sit, cum possit si velit nunc ponere & habere. Unde quòd ex voluntate ipsa futurum est, præsens autem potestati, non est absens simpliciter, nec ad desiderium pertinet. Dicitur autem Deus ardentè desiderare, id est, ad modum desiderantis se habere propter vim amoris sui. Omitto plura de desiderio, in quibus torquetur Alarcon *hic tract. 3. disp. 7. cap. 2.* Loquendo ergo de ipso bono diuino, cum Deus sibi semper sit præsens, ideo difficultas est, an respectu sui possit distingui amor, qui est de bono secundum se à gaudio quod est de bono ut præsentem.

Secunda difficultas est utrum amor iste quem habet Deus erga se, sit amor concupiscentiæ, vel amicitiae.

In Deo amor, & gaudium ratione distinguuntur.

3 Ratio difficultatis in distinguendis istis affectibus nascitur ex eo quòd voluntas diuina non potest ferri in suam bonitatem, nisi ut præsentem sibi, & possessam, non autem cum præcisione in bonitatem diuinam secundum se, aut ut absentem: ergo non potest præscindere à gaudio. Paret consequentia, quia gaudium in hoc distinguitur à desiderio, quod desiderium est amor de re absenti, & quæ deest, gaudium autem de re præsentem, amor autem ab utroque distinctus est de bono in comuni, seu de bono secundum se, ut manifestè docet S. Thom. *in hac q. 20. art. 1.* Ergo si amor in Deo erga se non potest præscindere à se ut præsentem, non potest præscindere à gaudio, quia non potest habere Deus amorem de seipso in comuni, seu abstractè. Anteced. verò prob. quia Deus non potest amare seipsum nisi ut cognitum à se, quia nihil volitum quin præcognitum, non potest autem se cognoscere aut proponere voluntati, nisi ut præsentem; quia non nisi intuitiue, & comprehensiue cognitum: ergo non potest se amare absolute, & tum præcisione, sed ut præsentem.

Unde conf. quia intellectus magis præcisius est quàm voluntas, & tamen intellectus diuinus non potest præscindere ab intuitionem sui, & præsentia sui ut cognita, aliàs posset se abstractiue cognoscere: ergo neque voluntas à præsentia & possessione sui ut amata: ergo non potest amor eius præscindere à gaudio, sicut nec cognitio à visione.

4 Nihilominus dicendum est propriè & formaliter inueniri in Deo amorem, etiam vi distinguitur ratione à gaudio, seclusis imperfectionibus limitationis, abstractionis, & similibus. Conclusio negari non potest in doctrina D. Thom. nam *in hac q. 20. art. 1.* expresse *in corpore art.* distinguit amorem à gaudio quod est de bono præsentem & habito, & à desiderio

desiderio, quod est de bono non adepto, & dicit quod amor respicit bonum in communi, siue sit habitum, siue non habitum: loquitur ergo de amore ut condistinguitur, à gaudio; sed illum amorem ponit ibi in Deo, quem à gaudio condistinxerat, concludens in *sine corp.* quod omnes motus voluntatis præsupponunt amorem, sicut nullus gaudet, nisi de bono amato, unde in quocumque est voluntas, oportet esse amorem, sed in Deo est voluntas: ergo amor. Ponit ergo manifestè in Deo amorem ut condistinctum à gaudio. Et videri etiam potest idem S. Doctor in 1. *contra Gentil.* cap. 90. & 91. ubi hos affectus in Deo distinguit, & in hoc art. solut. ad 2. manifestè utrumque ponit in Deo, scilicet amorem, & gaudium.

5 Fundamentum conclusionis deducitur ex ratione D. Thom. allata, quia gaudium essentialiter supponit amorem, ut possit formari motuum, & specificatum gaudij: ergo necessariò debet distinguui ab amore, etiam in Deo, quia quando ratio vnius supponitur ad aliam, rationes illæ necessariò distinguuntur etiam in Deo, sicut distinguitur immutabilitas ab æternitate, quia hæc subponit illam, & voluntas ab intellectu, quia supponit illum, & derivatur ex illo, quod sufficit ad distinctionem inter attributa Antec. prob. ex doctrina D. Thom. hic in *presenti* & 1. 2. q. 29. art. 4. ubi ostendit delectationem, seu gaudium causari ex amore. Quod ut percipiatur, est aduertendum, quod gaudium licet habeat pro obiecto bonum, tamen bonum non est sufficiens motuum eius, nisi in quantum amatum, & possessum, seu adeptum, ita quod ad delectandum, seu gaudendum, debet aliquis ferri in bonum, non solum quia bonum in se, sed quia amatum, & quia possessum. Et hoc constat, quia delectatio non nascitur ex bono & conuenienti quomocumque, sed ut coniuncto; fruimur enim eo bono quod in nobis est, non quod abest à nobis; quis enim delectari potest de cibo quem manducat, aut de aqua quam non bibit? Bonum autem non est nobis coniunctum, nisi sit amatum, quia debet esse coniunctum in affectu & in effectu. Si enim in effectu coniunctum sit, sed non in affectu, potius molestat: si in affectu, sed non in effectu, desideratur, & solum in spectat gaudium, non in re: Ergo ut aliquid sit obiectum gaudij in re, non sufficit bonum vtrumque, sed ut coniunctum, & ista conditio tam necessariò supponitur, sicut esse cognitum ut sit volitum. Nascitur ergo gaudium ex amore, seu ex obiecto amato, & coniuncto, & sic præsupponit amorem rei; nec sufficit rem esse amabilem, sed requiritur esse amatam, & coniunctam, tanquam conditio ex parte motui, & specificatiui ipsius gaudij, & consequenter est sufficiens fundamentum ad distinguendum inter vtrumque, quia quoriscumque vnum se habet præsuppositiuè, & antecederet ad aliud ex natura, & essentia sua, licet in Deo sint vnum identicè, & entitatiuè, possunt tamen distinguui ratione nostra, ut in exemplis allatis manifestum est. Quare amor in Deo quia perfectus est, & de re sibi præsentem, & coniunctam per amorem, semper habet coniunctum gaudium, & est illatum illius, sicut immutabilitas æternitatis, non tamen est formaliter ipsum gaudium, sed præsuppositiuè, eo quod gaudium fertur in rem præsentem ut amatam, ita quod non solum sit præsens realiter, sed coniuncta, & placens per amorem, & hoc ipsum quod est esse amatum & coniunctum pertinet ad motuum gaudij. Ergo habet sufficiens fundamentum ut virtualiter distinguatur gaudium ab amore, sicut vnus actus

ab alio, sicut æternitas ab immutabilitate.

Denique conf. hæc pars quia bonitas in Deo non solum ratione quietis, & possessionis, quæ causat gaudium, sed etiam ratione suæ perfectionis, ut conueniens ipsi Deo, specificare potest actum voluntatis, siquidem ipsa bonitas secundum se est omnino conueniens Deo, & amabilis ratione sui, & non solum ratione quietis, possessionis quod ad delectationem seu gaudium spectat: sed actus qui fertur in bonitatem ratione sui, & non solum ratione quietis, & possessionis est amor, ut distinguitur à gaudio, quia formaliter non respicit motuum gaudij, quod est possessio & quies in re amata, sed motuum amoris, quod est conuenientia, & perfectio rei secundum se: ergo datur in Deo amor, ut distinguitur à gaudio. Nec inuenitur aliqua imperfectio in hoc actu amoris, ut dicit S. Thom. hac q. 20. art. 1. ad 2. *Quæ imperfectio non importat de Deo dicuntur, ut amor, & gaudium*, quia habet pro motuo bonitatem ut bonitas est, bonitas autem secundum se non dicit imperfectioem, quia vnumquodque est bonum in quantum perfectum: ergo neque actus ei correspondens sub ista ratione boni & perfecti, imperfectioem dicit, & sic Deo conuenit.

Si dicas esse imperfectioem præscindere à præsentia obiecti, & amare bonitatem secundum se tantum.

Respondeo esse imperfectioem præscindere ab obiecti præsentia, & à gaudio, tam formaliter, quam radicaliter, ita quod sit amor, qui possit compati, vel inferre actum circa obiectum absens, quale est desiderium, vel spes; sed amor qui infert gaudium circa obiectum præsens, & connectitur cum illo, nec potest illo catere, licet non formaliter sit illud, sed radicaliter, nullam præcisionem imperfectam dicit, sed tantum diuersam formalitatem explicat, quarum vna infert aliam, sicut non est imperfecta immutabilitas, licet formaliter non explicet æternitatem, dummodo illam inferat, & necessariò postulet.

Ad rationem dubitandi Resp. distinguendo antecedens. Deus non potest se amare, nisi ut præsentem, si ly ut dicat rationem formalem & proximam, nego antec. si ly ut dicat rationem consecutam & annexam seu illatam ex alia priori, transeat. Ad hoc autem ut ipsa præsentia, & possessio Dei sit ratio amandi, quod pertinet ad gaudium, necessariò supponitur bonitas illa amata, & placens, & conueniens, & est formaliter amor, & radicaliter gaudium, non formaliter gaudium. Nec amatur tunc bonitas cum præcisione quasi abstractiua, & exclusiua gaudij tam formaliter quam radicaliter, sed cum præcisione quasi negatiua, quia non explicatur in actu amoris formalis ratio motiua gaudij, licet inde consequatur. Ad probationem antec. dicitur verum esse quod non potest Deus amare seipsum, nisi ut cognitum, nec se cognoscere nisi intuitiuè & possessiuè; sed tamen hæc intuitiua cognitio sui fundat duplex motuum amandi, & ratione bonitatis secundum se, quia ratione sui amabilis est, & ratione possessionis suæ quia fruibilis est, & vna ratio cōsequitur ad aliam, & supponit essentialiter aliam, quia non est gaudium, nisi de possessione rei amatæ, & placentis. Et illa prior ratio motiua amoris non est imperfecta, quia fundatur in bonitate ipsa Dei secundum se, quæ est summa, & radicaliter fundat secundum motuum, scilicet quod feratur voluntas in ipsam ut possessam, & ut est ratio quiescendi, & non solum placendi. Et sic est formale motuum gaudij, licet totum hoc in vnica ratione luminis

minis intuitui formali vniri debeat, vt iā dicemus.

8 Ad Conf. Resp. quod licet intellectus sit magis præcisiuus, quàm voluntas, quantum est ex genere suo, tamen in intellectu summè comprehensiuo rei præsentis, vt est cognitio Dei respectu sui, non potest præscindere ab intuitione præsentie; voluntas autē etsi sit summè amans, virtualiter tamē, propter diuersā rationem motiui formalis, distinguit actum amoris respectu bonitatis secundum se, & gaudij respectu obiecti vt præsentis, & possessi. Ratio differentie est, quia, vt cognitio intellectus sit intuitiua, & non possit abstrahere à præsentia, sufficit quod res cognita sit præsens in se physice, & præsens intellectui per cognitionem & aduertentiam. Vnde cum Deus non solum sit in actu secundo se cognoscens & aduertens, sed etiam sit physice præsens, implicat quod illa cognitio non sit formaliter intuitiua, nec possumus distinguere in illa cognitione formalitatem notitiæ de ipso Deo secundum se, & aliam de ipso Deo vt præsentem, siquidem non requiritur nouū motiū vt Deus cognoscatur tanquā præsens, & intuitiue, sed sufficit illudmet motiū, & formalis ratio qua cognoscit seipsum secundum se, dummodo supponatur in re, & physice esse præsens, sicut patet in cognitione creaturæ, quam Deus intuitiue videt eodem motiū, & ratione formali, qua videt creaturas possibles, licet non eadem terminatione ex parte obiecti existentis, vel non existentis. At vero in voluntate vt detur actus gaudij, non sufficit rem in se physice præsentem amare, etiam aduertendo quod sit præsens, sed requiritur quod ipsa præsentia vt possessa, & vt placens seu amata moueat, sed sit motiū voluntatis, & sic dicatur gaudens seu fruens illa. Vnde nisi supponatur bonitas rei secundum se placens & amata, non potest procedere voluntas ad fruendum, & si ipsa bonitas non esset talis quod secundum se placeret, & amaretur minùs esset perfecta, quia secundum se non esset amabilis, & consequenter neque perfecta. Vnde cum ad habendum actum gaudij necessariò supponatur ex parte obiecti motiui, vt moueat in quantum possessum & placens seu amatum, requiritur non solum præsentia rei physica, sed etiam vt amata, aliàs ad gaudium non moueret quantumuis esset præsens, nisi etiam esset placens, vt iam supra ponderauimus. Et idè quia semper supponitur ista conditio ex parte obiecti, vt sit mouens ad gaudium, necessariò debet supponi aliquis amor circa obiectum secundum se, vt reddatur amatum & placens, & sic possit esse obiectum gaudij, sicut & possessio supponitur, quia ex parte obiecti se tenent istæ conditiones, obiectum autem supponitur ad actum, & sic quia ad gaudium supponitur obiectum amatum, amor debet antecedere gaudium, quia esse amatum est conditio obiecti gaudij. Rem autem esse intellectam secundum se, non est conditio obiecti visionis, & intuitionis vt attingatur, & sic non debet præcedere cognitio Dei secundum se ad cognitionem Dei vt præsentis, sed est vna eademque cognitio.

9 Quod si in istis nam re vera Deus licet essentialiter sit existens, tamen etiā est possibilis, & tamen nō potest respectu sui habere cognitionem possibilitatis præscindentem à cognitione existentie, & consequenter quæ non sit intuitiua: ergo similiter cum bonitas Dei, & existentia eius essentialiter sit possessa, & habita à Deo, non poterit præscindere actus amoris formaliter ab actu gaudij, sicut nec ibi formalis ratio attingendi possibilitatem ab ea, quæ attingit existentiam. Negatur consequentia. Disparitas est ex dictis, quia cognitio Dei hoc ipso quod attingit possibilitatē essentie, cum in ipsa quiditate,

Ioan. à S. Thoma in 1. part. D. Thoma.

& prædicatis essentialibus sit imbibita existentia, & præsentia Dei, non potest non terminari ad essentia vt existentē, hoc ipso quod terminatur ad eius quiditatem, quia existentia in Deo est quiditas. Sufficit autem ad intuitionem terminatio ad obiectum existens, licet formalis ratio, & lumen quo vtitur intellectus sit omnino idem pro possibilitate, & quiditate Dei. Amor autem respiciens bonitatem secundum se, etiam terminatiue attingit ipsam existentiam, & præsentia, seu possessionem Dei, cum hæc cōueniat Deo secundum se, & in sua quiditate, sed hoc non sufficit ad rationem gaudij, quia etiā circa rem præsentem potest dari amor terminatus ad præsentiam, quia ipsam vult, & sibi placet, & nondum intelligitur fruens illa, sed requiritur ad gaudium quod ipsa præsentia, & possessio, rei vt amata & placens, sit motiū formale sui, & non solum terminus amatus. Ad hoc autem præsupponi necessariò debet amor tanquam conditio illius obiecti, vt dictum est, & sic si præcedit, distinctus actus est, & distinctum motiū formale habet, quod in scientia respectu intuitionis non currit.

In Deo respectu sui non est propriè amor concupiscentie neque amicitie.

Pro huius intelligentia aduerte quod de amore concupiscentie possumus loqui dupliciter. Vno modo largè, & generaliter, pro vt est amor cuiuscūque boni erga se, seu potiùs negatiue, pro omni amore, qui nō est ad alterum seu pro altero supposito extra se, alio modo strictè prout est effectus amoris respicientis bonum futurum, & in appetitu est quædam passio media inter amorem, & delectationē, semper tamen se habet ad bonum futurum, vt docet S. Th. 1.2. q. 30. a. 7. in corp. & ad 2. Potest etiam sumi strictè concupiscentia vt contraponitur, & diuiditur contra amorem amicitie, & sic sub eisdem conditionibus debet sumi vterque amor, quia contrariorū eadem est ratio. Pertinet autem ad amorem amicitie, vt docet S. Th. 2.2. q. 25. a. 4. ad 4. quod fūdetur in aliqua vnione duorū, non in omnimoda vnitate, seu idēitate, qualis est eiūsdē ad seipsum, & sic eiūsdem ad seipsum non datur amicitia, sed principium amicitie, quia in tantum habeo amicitiam ad aliū, in quantum reputo illum sicut me, & vt alterū me, & idè amabilia quæ sunt ad alterum, oriuntur ex amicabilibus quæ sunt ad se. Similiter ergo si amor, concupiscentie sumatur strictè, vt contraponitur, & diuiditur contra amorem amicitie, non fundatur in omnimoda vnitate cū bono cōcupito, sed in vnione, quatenus per concupiscentia volumus aliquid vt sc. cōiūgatur, & adueiat nobis, sicut amicitia vult bona alteri cū quo nō sumus vnum, sed vniti. Vnde propriè nō cōcupiscimus nobis nosipfos, sed nobis aliquid concupiscimus, nobis inquā vt subiecto, aliquid tanquā materiā, seu obiectū amatū volumus.

Secundò notandū est, quod amor amicitie potest esse mutus & amicabilis, vel ratione actus, vel ratione personæ. Ratione actus, quia plures actus exercentur, quibus personæ mutuo se amāt, & comunicant in nobis, sicut enim amicitia exigit communicationē in nobis, quia amicitia vult bonū amico, ita postulat amorem mutuū, quia sine hoc mutuo non est redamatio, & cōsequenter neq; bonorū cōmunicatio. Ratione autē personarū amor est mutus, quando personæ se amantes sunt plures, & talem amorem inter se exercent, siue pluribus, siue eodem actu se ament. In Deo autem inuenimus multiplicationem personarū, sed non actuum, neque communicationem mutuam, licet sit amor mutus, sed vel identitatem vel cōmunicationem solum ex parte personæ originantis, non ex parte personæ

X originatis

originata: Pater enim communicat Filio diuinitatem, sed non accipit, nec sibi communicat aliquid Filius. Et Pater, & Filius communicant Spiritui sancto omnia bona diuina, sed non accipiunt, nec sibi communicatur à Spiritu S. aliquid originatiue seu actiue, communicant tamen omnes tres personæ per identitatem in eisdem bonis, & perfectionibus diuinis, quia consubstantiales sunt.

His positis affirmamus in Deo non esse propriè, & strictè amicitiam ad se, neque concupiscentiam, sed amorem summum & infinitum, qui est altior amore amicitiae & concupiscentiae, quo se diligit sibi per summam identitatem, & personæ diuinæ sibi communicant in bonis per eandem identitatem essentiali & per eundem actum amoris se ad inuicem & mutuò diligendo.

11 Fundamentum est, quia amicitia consistit essentialiter in actu amoris ut mutuo: ergo strictè, & propriè supra requirit mutuum amorem, & non vnicum actum in personis exercentibus amicitiam: vnicus enim actus, mutuus amor non est, nec vnitiuus, aut communicatiuus, quia communicatio, & vnitiuus, & mutua correspondentia actuum, plures actus dicit, non vnum tantum. Si ergo amicitia essentialiter dicit actum, quia essentialiter amor est: ergo in Deo non est amicitia erga se in rigore & simpliciter, quia non est mutua redamatio ex parte actuum, sed solum sunt plures amantes adiectiue, id est plures personæ habentes eundem actum amoris essentialem, sed non mutuam redamationem simpliciter, quia redamatio actum amoris dicit, & in hoc amore non datur mutua correspondentia, sed summa idèntitas, & vnitas. Nec in actu notionali spirandi Spiritum S. est mutua redamatio, seu actus, sed vnicus amor: nam Pater, & Filius vnica spiratione & vnico actu spirant, & se mutuò amant, ubi ly mutuò solum verificatur, ex parte personarum, non ex parte actuum. Ex parte autem Spiritus S. non datur mutua redamatio notionalis & spiratiua, quia licet Pater & Filius vnico actu spirent actiue Spiritum S. tamen ipse Spiritus sanctus non mutuò spirat in illos, quia non spirat actiue Spiritum S. solum ergo Pater & Filius mutuò se amant notionaliter ex parte personarum se tenente ly mutuò, non ex parte actuum. Essentialiter autem omnes tres personæ se amant mutuò, per summam identitatem actus, quæ idèntitas non est mutua correspondentia actuum, & consequenter, neque est stricta & rigorosa amicitia, quæ in actu amoris consistit, & in eo mutuam correspondentiam, & redamationem non habet, quia nec pluralitatem, sed vnitatem summam.

12 De amore verò concupiscentiae constat non posse formaliter esse in Deo, si strictè, & in rigore sumatur, quia ut supra diximus, amor concupiscentiae strictè sumptus, vel est motus appetitus circa bonum futurum, & absens: concupiscimus enim quod nobis est absens, & sic amor boni futuri, ut comprehendit sub se amorem, & spem, dicitur cupiditas, seu concupiscentia, ut docet S. Thom. 1. 2. q. 30. art. 2. in corp. & ad 2. imò etiam desiderium sic comprehendit. Et hoc modo concupiscentia manifestum est quod est in Deo respectu sui, imò nec nos dicimur habere concupiscentiam respectu nostri, licet enim nos amemus, non tamen concupiscimus, quia ad amandum sufficit quod bonum quod proprium est nobis placeat, ad concupiscendum verò requiritur quod nondum in nobis sit. Deus autem non potest moueri in seipsum ut absentem, & sic non potest hoc genere amoris se concupiscere. Si autem concupiscentia sumatur ut cōdiuiditur contra amorem amicitiae, & ut contrariatur illi in eadem linea, & ratione, sic non est amor

concupiscentiae strictè dictus in Deo, sicut nec amicitia, ut diximus, quia sicut amicitia strictè dicta respicit vnionem, seu amorem vnitiuum inter amicos & non idènticè vnum, quia amor idènticus superat amicitiam, ita amor concupiscentiae respicit vnionem, & communicationē boni distincti quod concupiscitur, non idèntitatem, & vnitatem cū illo, quia quod concupiscitur debet esse distinctum ab ipso concupiscente, eique communicabile & vnibile, non vnū, sicut amicitia amor est communicatiuus & vnitiuus bonorū, non vnus, & in hac linea debet ei contraponi concupiscentia ut cōdiuisa, amicitia.

Vnde colliges, in Deo non repugnare amorem concupiscentiae erga creaturas, quatenus eas vult sibi, & in bonum suum, ut sibi seruiant, & amorem amicitiae, quatenus vult eis communicare dona sua, & seipsum. Sumendo verò concupiscentiam lato modo, pro omni eo, quod est amor sui, & amicitiam prout est mutuus amor ex parte personarum; sed non ex parte actuum, etiam in Deo inueniri potest. Hæc secunda pars ex dictis manet declarata, quia hoc nihil est aliud dicere quàm in Deo esse amorem sui, & esse plures personas amantes se ad inuicem, licet non plures amores seu correspondentias mutuas in ipsis actibus amoris, quod manifestum est. Prima verò pars quoad amicitiam erga creaturas communiter solet teneri & tractari 2. 2. q. 23. a. 1. & ibi eam affirmat D. Tho. Ut Scriptura agnoscit eandem amicitiam, frequenter vocans ipsos iustos amicos Dei. Quod verò detur in Deo amor concupiscentiae erga creaturas, sic declarat S. Th. in hanc q. 20. art. 2. ad 3. dicens quod Deus propriè loquendo non amat creaturas irracionales amore amicitiae, sed amore concupiscentiae, in quantum ordinat eas ad creaturas racionales, & etiam ad seipsum, non quasi eis indigeat, sed propter suam bonitatem & nostram utilitatem: concupiscimus enim aliquid & nobis, & aliis. Quare concupiscentia non est in Deo, sicut in nobis cum illa imperfectione volendi aliquid propter commoditatem propriam, & tanquam re quæ indigemus, & communicare alij nolumus, sed tantum nobis. His imperfectionibus separatis, manet concupiscentia in ratione amoris alicuius boni distincti à se, quod vult Deus sibi, non ut indigens illo: sed ut sibi seruiat, & participet suam bonitatem in hoc, vel etiam inseruiendo aliis. Hoc ergo modo non repugnat Deo concupiscentiae amor erga creaturas, remotis imperfectionibus.

Sed obiicies: nā inter personas diuinas, v.g. inter Patrem & Filium datur amor mutuus & amicabilis cum summa communicatione bonorum; ergo est formaliter ratio amicitiae. Nec obstat vnitas, seu idèntitas amoris, ita quod amor non sit vnitiuus, sed vnicus. Nam contra est, quod hoc potius cōducit ad strictiorem, & magis perfectam rationē amicitiae, quæ in cōiunctione consistit, & ita ubi est summa coniunctio amoris, & bonorum, qualis est idèntitas, melior amicitia est: sicut eadem ratione probat D. Th. inf. q. 27. a. 1. ad 2. esse in Deo processionem ad intra cum summa vnitate & idèntitate in natura cōmunicata, quia processio ad intra coniunctionem postulat, & ita si est in summo coniunctionis quod est idèntitas, est perfectissima processio. Vnde admittimus generationem simpliciter & strictè in Deo, licet communicet eandem numero naturam, quia saluatur cum sola distinctione reali personarum. Quare ergo non erit similiter vera & formalis amicitia cum summa coniunctione & idèntitate amoris, & communicatione bonorum, dummodo sit cum distinctione reali personarum?

Confi. quia in amore, quo personæ se mutuò amant eodemmet amore non repugnat inueniri duplicem

duplicem illam formalitatem, & respectum amicitiae & concupiscentiae: nam Pater amat bonum diuinitatis Filio ex complacentia ipsius, & vicissim Filius eadem bona diligit in Patre, ex complacentia Patris; & sic saluatur vera & formalis ratio amicitiae. Et rursus eandem bonitatem vult quaelibet persona sibi: ergo saluatur vera, & formalis ratio concupiscentiae, quatenus aliquod bonum sibi concupiscit, & ex amore sui. Et eodem modo philosophandum est de Spiritu S. qui amore essentiali, & sibi, & aliis personis vult bonum diuinum. Et quatenus vult sibi ex complacentia sui, est amor concupiscentiae, quatenus aliis ex complacentia eorum, est amicitiae. Nec requiritur ad amorem amicitiae, quod praecise sit ratione commodi vel utilitatis, sed etiam ratione honesti: possumus enim bonum honestum amare nobis amore concupiscentiae, ut cum nobis ex complacentia nostra volumus virtutem, volumus ipsam beatitudinem, &c. quae sunt bona honesta: ergo & Deus potest velle sibi ex complacentia sui seipsum ut bonum honestum. Imò in ipso amore amicitiae qui honestus est, bonum diligitur amico, ut fini cui, & sic respicit amicum amore amicitiae, & bonum ipsum quod diligit illi, est bonum concupitum, & amore concupiscentiae affectum: ergo datur uterque amor in Deo.

15 Resp. negando esse inter personas diuinas mutuum amorem formaliter ex parte actus amoris, sed solum ex parte personarum amantium, quae unico actu se amant. Vnde non est amicitia simpliciter, quae ex parte actus se tenet, sed aliquid maius amicitiae, scilicet vnitas amoris, & bonorum identitas, non vnitius amor.

Ad Replicam dicitur, non conducere ad strictiorem rationem amicitiae coniunctionem quomodo cumque, sed mutuum, & vnituum, non vnam, & identicam, & esse diuersam rationem de generatione in diuinis; quia generatio non consistit in mutua actione, & correspondentia generantis ad genitum, & e contra, sed in sola processione geniti a generante in similitudinem naturae. Vnde nihil officit, sed potius conducit ad generationem summa identitas in natura communicata, cum ad hoc tēdat communicatio, & actio generantis, ut sibi simile, & coniunctum faciat genitum, sine hoc quod est contrarium genitum operetur quidquam, aut communicet generanti, sed pure accipiat esse ab ipso. At verò amicitia consistit in coniunctione, & communicatione bonorum mutua, & correspondente. Vnde si ita crescat coniunctio, & identitas quod saluatur correspondentia, & ratio mutui, soluitur amicitia & transit ad aliam lineam coniunctionis scilicet ad identitatem, quae est maior amicitia: caret enim mutua correspondentia, & gaudet identitate. Generatio verò solum dicit similitudinem, & coniunctionem cum genito in vi processionis, & expressionis, non correspondentiae. Vnde licet ad hoc perueniat ut communicando naturam similem, communicet eandem, tanto magis perficit & formalizat rationem communicationis transiendo à similitudine naturae ad identitatem, dummodo sit distincta persona cui fit talis communicatio, siquidem generatio idē intendit similitudinem, quia intendit communicationem ipsius generantis ad genitum. Et quia in nobis communicatio non est summa, manet in ipsa communicatione naturae similis; in Deo verò quia summa communicatio est, transit ad identitatem, & tamen formalissime manet ratio generationis, de quo infra disp. 12.

16 Ad Conf. Resp. inter Patrem, & Filium inueniri illam complacentiam, & velle bonum alteri propter ipsum, secundum rationem vnius & eiusdem actus.

Ioan. à S. Thoma in 1. part. D. Thoma.

transcat, secundum rationem mutui actus & correspondentiae, nego; & ex hac parte deficit ratio amicitiae, ut consistit in ipso actu, seu actibus amoris, non ut ex parte amantium se tenet. Ad id verò quod dicitur de amore concupiscentiae, dicimus quod est amor in Deo, quod seipsum amat, & vult sibi, distinguo, per amorem communiter dictum, & fundantem solam rationem gaudij & delectationis, transcat, per amorem fundantem tendentiam in bonum abiens, vel in bonum distinctum à se, quod per amorem communicatiuum & vnituum, non identicum attingi possit, nego. Hoc autem requiritur ad concupiscentiam strictè & propriè dictam, ut ex D. Tho. explicauimus. Idem dicimus de Spiritu Sancto, qui amore essentiali vult alias personas, non amore habente rationem mutui & correspondentiae, sed identitatis; & sibi vult bonum diuinum, & seipsum non ut distinctum aut abiens, & sic non vult amore concupiscentiae strictè dictae.

ARTICVLVS II.

An sint in Deo formaliter effectus fugae, odium, tristitia, ira, spes, &c.

O mnes effectus qui ad fugam in voluntate pertinent, reducimus ad illos, qui versantur circa malum fugiendo, vel etiam ad illos, qui licet circa bonum versentur tamen quia difficultatem vel arduum in eius adeptione inueniunt, ratione cuius aliquo modo retrahitur voluntas, & indiget conari & impelli ad vincendum ut spes, audacia, &c. Et ideo de illis in presenti art. agimus, sicut in praeced. de affectibus prosecutionis, ut amore, gaudio, &c.

Odium & tristitia in Deo non est formaliter.

Supponimus tanquam rem clarissimam, quod si loquamur de istis affectibus, ut pertinet ad appetitum sensituum, & vocantur passionibus, nullo modo possunt Deo attribui, nec aliquis potest id cogitare, nisi errore maximo, putando Deum corporeum esse. Quare hoc modo non solum effectus fugae, sed nec etiam prosecutionis ut amor, si sumatur ut passio sensitua, Deo attribui potest formaliter. Loquimur de istis affectibus prout ad voluntatem pertinent, & spirituales sunt. Et secludimus etiam in his omnem imperfectionem, sicut in tristitia, aut ira id quod aggrauationis, & tedium habet in voluntate, & quod diminuit de ratione gaudij, & similes aliae imperfectiones, quas in nobis afferunt isti actus, quatenus nobis mala, & aliquam priuationem boni habent; in Deo enim nihil imperfectionis ponendum est. Sed loquimur de istis affectibus, ut ab omni imperfectione depuratis, an ponendi sint in Deo, si forte ab omni imperfectione possunt segregari: nam si aliqua sit quae ita intrinsecam habeat imperfectionem, ut ab ea separari non possit, illa formaliter non ponetur in Deo.

Igitur odium propriè, & formaliter in Deo reperiri, docet Vasq. hic disp. 84. c. 3. Et loquitur tam de odio abominationis, quam inimicitiae, ita quod Deus non solum habeat odio peccatum, sed etiam peccatorem, quatenus talem. Differt autem odium abominationis, & inimicitiae, quod abominatio versatur circa ipsum malum, inimicitia circa personam, cui volumus malum; & ita hoc duplex odium correspondet, & contrariatur duplici amori, scilicet concupiscentiae, & amicitiae: sicut enim concupiscentia est circa rem volitam, amicitia circa personam, cui illam volumus; ita odium abominationis est circa ipsum malum, quod displicet, & abominatur

abominamur: odium verò inimicitiae circa personam, cui volumus aliquod malum. Vtrumque ergo odium Vasq. assignat Deo propriè, & non metaphoricè, & in eo sensu intelligenda sentit loca Scripturæ, quæ Deo attribuunt odium, nō solum respectu peccati & impietatis, sed etiam respectu peccatoris. Eandem sententiam docet Molina *super q. 20. art. 1.* & Suarez *lib. 3. de attributis, c. 7. num. 5.* Arrubal *super hanc q. 20. num. 6.* Erice *disp. 20. c. 4.* Alarcon *tract. 3. disp. 7. c. 3.* Quanquam de odio inimicitiae, an Deo tribuendum sit, Suarez *ubi supra* hæret, putatque quæstionem esse de nomine: simpliciter enim docet Deum odio habere peccatorem, iuxta quod dicitur Sap. 14. *Odio sunt Deo impius, & impietas eius.* Et Psalm. 5. *Odisti omnes qui operantur iniquitatem;* quas locutiones videtur D. Thom. in *presenti q. 20. art. 2. arg. 4. & solutione ad illud*, in sensu proprio admittere.

3 Sed quia in odio abominationis Deus non abominatur, & fugit malum aliquod quod sibi inest, quia incapax est mali in se, sed solum malum alienum, seu quod extra se est, ut peccatum, nonnulla intricatio nascitur his Authoribus, quare in Deo nō possit esse tristitia, etsi non de malo proprio, saltem de malo alieno: tritari enim possumus, etiam de malis aliorum, quia displicent nobis, & gaudium non causant. Vasq. idē negat tristitiam Deo, quia est de malo præsentis; si autem detur circa malum proximi, idē est, quia apprehenditur, ac si esset proprium, quod Deo competere non potest. Suarez, quia tristitia vel est de malo pænæ, & hæc ex voluntate Dei provenit, & sic non contristat, quia tristitia est de his, quæ nobis nolentibus accidunt. Vel est de malo culpæ, & hæc si est gravis, dissolvit amicitiam, & sic non contristat Deum, quia est malum inimici, non amici, & proximi; si autem est levis, potest illam de facili impedire, & non contristat. Alij idē negant Deo tristitiam, quia importat quādam animi anxietatem, quæ à Deo longè abest; odium verò sine molestia, & anxietate est, sed cum simplici displicentia saluatur. Quæ rationes quantam valeant, statim ponderabitur.

4 Nihilominus dicendum est, odium non convenire Deo directè & propriè, sed metaphoricè & consecutivè, scilicet, quia diligendo aliquid directè & propriè, dicitur oppositum ex consequenti odisse, aut ad modum odientis tractare. Itaque odium est in Deo, non ut quid totaliter oppositum amoris, sed ut consecutum ad aliquem amorem. Et loquimur tam de odio inimicitiae ad personas, quàm de odio abominationis circa malum in se. Sumitur hæc conclusio ex D. Thom. 1. *contra Gent. c. 96.* ubi non solum loquitur de odio inimicitiae, sed etiam de odio abominationis: dicit enim quod, *Dicitur Deus aliquem odire similitudinariè, & hoc dupliciter. Vno modo, ex hoc quod Deus amando res, volens eorum bonum, non esse vult contrarium bono, scilicet malum non esse: unde malorum odium habere dicitur: nam quæ non esse volumus, dicimur odio habere. Alius autem modus est, ex hoc quod Deus vult aliquod maius bonum, quod esse non potest sine privatione minoris boni, & sic dicitur odire, cum magis hoc sit amare.* Vbi non solum loquitur D. Th. de personis, quæ odio inimicitiae attingi possunt, sed etiam de ipsis rebus malis, quæ per abominationem odio habentur: docet enim quod volēdo aliquid bonum odire, dicitur malum oppositum, vel privationem minoris boni velle, quod utique est odium rerum, & non solum personarum: Et certè si Deus potest immediatè habere odium abominationis de aliquo malo, non apparet cur non possit illud malum quod abominatur, alicui personæ velle, in quantum indigna bono; & sic

habere poterit odium inimicitiae ad personam, si habet odium abominationis ad res. D. Thomam sequuntur communiter eius discipuli, *super hac q. 20. a. 2.* ubi videri potest Nauarrete *contr. 27.* González *disp. 62.* Ferrat. 1. *contra Gent. c. 96.* Capreolus in 1. *dist. 45. quæst. 1. art. 1.*

Fundamentum huius assertionis ad id reducitur quod Deus nō potest habere odium ut contrarium amoris, & ab omni amore purificatum, sed solum ut consecutum ad aliquem amorem, & hoc propriè non est odium, sed effectus quidam amoris. Pro quo est notandum quod odium nō importat solam volitionem boni, vel volitionem mali, sed etiam importat motiū talis volitionis, sc. quod sit ex ipsa dissonantia appetitus, seu voluntatis cū tali re, quia dissonat nobis, non autem ex alio motiū, id est ex alio bono amato, ex quo consequitur oppositum eius non amari: constat enim quod aliquando volumus alicui malum, seu nolumus bonum, non ex odio quod ad ipsum habemus, sed ex alio motiū, v.g. ex obligatione iustitiæ, qua cogimur condemnare & punire etiam quos diligimus. Similiter inter duo bona eligimus vnum alio relicto, non ex odio eius quod relinquitur, sed ex gratia quam alteri volumus facere, vel quia simul utrique non sufficit id quod damus. Quare odium non solum requirit fugam alicuius rei, vel illationem mali, seu nocuenti, sed etiam requirit causam, & motiū, ut scilicet id fiat ex dissonantia quam habemus cum re illa, vel illa res erga nos, tanquam ex motiū. Vnde S. Thom. 1. 2. *q. 29. art. 1.* dicit quod *odium est dissonantia quædam appetitus ad id quod apprehenditur ut repugnans & nocivum.* Ex apprehensione ergo huius repugnantis & nociui oritur illa dissonantia: dissonantia autem, seu repugnantia ut apprehensa est motiū: ergo dissonantia, ut motiū causat odium, quod est dissonantia formalis in appetitu. Si autem aliqua volitio mali, seu nolitio boni, non oriatur ex tali motiū repugnantia & dissonantia apprehensa, sed ex alio motiū amato, quod non comparitur cum volitione talis boni, potius talis nolitio est effectus, & extensio quædam amoris, quàm odium, quia ex motiū amoris nascitur; odium autem ut opponitur amoris, debet nasci ex opposito, & contrario motiū amoris, scilicet ex repugnantia, & dissonantia cum aliqua re, sicut amor nascitur ex convenientia, & consonantia appetitus cum aliquo obiecto. Vnde dicit S. Thom. *cit. loco art. 2. ad 2.* quod *amor, & odium sunt contraria quando accipiuntur circa idem: sed quando sunt de contrariis, non sunt contraria, sed se invicem consequentia: eiusdem enim rationis est quod ametur aliquid, & quod odiatur eius contrarium; & sic amor unius rei est causa quod eius contrarium odiatur.* Vbi apertè distinguit odium quod nascitur ex motiū contrario ad motiū amoris, & odium quod nascitur ex eodem motiū amoris, quasi aliquid ex amore consecutum.

Dices; Omne odium nascitur ex aliquo amore, ut ibi docet S. Thom. in *corpore art.* ergo hoc quod est causari ex amore, & esse effectum amoris non extrahit odium à propria, & directā ratione odij, quia hoc etiam odio propriè dicto convenit quod oriatur ex amore.

Resp. omne odiū nasci ex amore proximè, vel remotè, nō autē omne odiū nasci proximè ex motiū amoris, sed aliquod nasci ex motiū dissono, & contratio amoris, licet præsupponat hoc motiū aliquē amorem circa re convenientem, cui contrariatur id quod repugnans & dissonū est sibi: si enim ego habeo dissonantiam & repugnantiam ad aliquid, ratione cuius odio habeo rem aliquā, talis dissonantia, & repugnantia

repugnantia supponit amorem circa aliquid mihi conueniens, cui dissonat & repugnat id quod odio habeo, sed tamen proximum motuum non est amor ad aliquid; ex quo consequitur repelli & abominari quod oppositum est, non ex motu abominatiōis & repugnantia, sed ex motu amoris alicuius rei, cui non compatitur illud quod reicitur: sicut qui ex zelo iustitiæ amicum homicidam suspendit, non ex odio dicitur illi velle malum quod est mors, sed ex motu, & amore iustitiæ; & qui ex duobus æquè dignis eligit vnum ob gratiam, & alterum repellit, non dicitur ex odio istius eum repellere, sed quia non compatitur cum bono alteri amato ex gratia. Itaque quandoque amor vnius est proximum motuum repulsæ, & nolitionis alterius quandoque dissonantia & repugnantia erga illud. Et primo modo non est directè, & propriè odium, sed similitudinariè; verè autem est effectus ex amore consecutus.

7 Quare odium ut est affectus voluntatis ortus ex tali motu, scilicet, ex dissonantia, & contrarietate ad appetitum, seu ad appetentem, repugnat Deo ex duplici capite, scilicet, quia omnia sunt à Deo per voluntatem eius, & quia nihil contrariatur directè & immediatè Deo. Quod enim est aliquid posituum, & entitatum non dissonat Deo immediatè, quia quidquid est, ab ipso est, & à voluntate Dei complacente sibi de tali re. Et hæc ratio tangitur Sapient. 11. *Nihil odisti eorum que fecisti; nec enim odiens aliquid constituisti, aut fecisti.* Quæ est ratio a priori, & cum à Spiritu sancto reddatur, optima est, conuincitque de omnibus quia quidquid est, à Deo est. Quod verò non est aliquid posituum, sed pure negatiuum, & nihil, non est obiectum odij, quia odio habere nihil, est non odisse. Si verò sit priuatiuum, seu defectus, quod prout sic, à Deo non est, non est obiectum complacentiæ, sed displicentiæ diuinæ, quæ generali ratione potest dici odium, non tamen strictè & propriè, quia motuum eius non sumitur ex contrarietate aut dissonantia erga voluntatem diuinam, cui nihil resistit: potius enim permittit tale malum, & existentia eius est ex permissione voluntatis, non ex resistantia & dissonantia ut sit, sed solùm contrarietas & priuatio eius est in ordine ad gratiam, seu iustitiam creatam. Vnde motuum eius non est motuum odij, sed amoris ad iustitiam, cuius effectus est illa displicentia ad suum oppositum, quod tamen permittit esse. In nobis autem, quia multa sunt, quæ nostræ voluntati resistunt, eique contrariantur; & non omnia à nostra voluntate sunt, idèd possumus accipere motuum odij, quod est dissonantia & contrarietas ad nos, vnde mouemur ad displicentiam, quæ est odium propriè.

8 Ex his verò sequitur in Deo tristitiam non esse, quia affectus tristitiæ est de his quæ accidunt nobis nolentibus, & contra propriam voluntatem: nihil autem accidere potest nisi Deo volente, & ordinante, vel permittente: ergo nihil est quod Deum contristare possit: omnia enim in manu eius sunt, & potest facere quod voluerit, sine vlla resistantia: ergo & sine tristitia, quia tristitia resistantiam supponit erga voluntatem.

9 Obiicies ad probandum in Deo esse odium. Nam ad odium abominatiōis non requiritur displicentia aut dissonantia de persona, sed de aliquo accidente seu forma etiam priuatiua, sicut abominamur ægritudinem aut tenebras, aut peccatum; Deus autem ex se, & secundum se habet abominatiōem & dissonantiam ad peccatum, quia auertit à Deo directè & per se, licet non destruat Deum. Sufficit autem

Ioan. à S. Thom. in 1. part. D. Thom. e.

ad odium dissonantia & contrarietas per modum auersionis: ergo Deus odio habet peccatum per se, & directè. Deinde non requiritur quod aliquid sit contrarium ipsi volutati, ut odio habeatur; sufficit quod sit contrarium amico, seu proximo: ergo Deus potest aliquid odio habere; quatenus contrarium est nobis, licet non sibi. Tertio, potest annihilare creaturam, & sic vult illi malum, quod est non esse, & hoc non ex amore alterius rei propter quam illam creaturam annihilat, quia in annihilatione datur pura suspensio concursus, non effectus resultans ex aliqua priori re voluta. Et in ipso peccatore odit Deus personam, non quatenus homo est, sed quatenus peccator, quia ex displicentia & dissonantia talis personæ, ut peccatoris, procedit Deus ad volendum illi pœnā & malū: pœna autē infligitur illi quatenus ipsi mala, & nociua est, aliās pœna non esset: habet ergo illud odium quidquid requiritur ad inimicitiam, quia ex displicentia personæ procedit. Nec requiritur quod persona displiceat ex omni parte, sed sufficit quod ex aliqua, scilicet in quantum peccator, non ut homo. Nec potest dici quod totum hoc procedit ex amore iustitiæ: nam si hoc sufficeret, nullum odium daretur etiam in nobis: nam omne odium ex aliquo amore procedit, siue quem habemus erga nos, siue erga aliud extra nos; & tamen verè & propriè est odium: ergo impertinenter adducitur illud motuum amoris ad enervandam rationem odij in Deo. Denique Scriptura expresse attribuit Deo odium, & non est inconueniens manifestum quod id intelligat de odio propriè dicto, & non in sensu metaphorico: ergo in omni proprietate Deo tribuendum est. Anteced. constat ex pluribus Scripturæ locis, ut Sap. 14. *Odio sunt Deo impius, & pietas eius.* 1. Psal. 5. *Odisti omnes qui operantur iniquitatem.* Zachar. 8. *Omnia hæc sunt quæ odi, dicit Dominus.* Rom. 9. *Esaï autem odio habui.* Et Aug. lib. 1. ad Simplicianum, q. 2. *Non odit Deus Esaï hominem, sed Esaï peccatorem.* Et S. Thom. in hac q. 20. art. 2. ad 4. dicit quod *Deus odit peccatores in quantum non sunt, sed ab esse deficiunt, & hoc in eis à Deo non est.* Vnde secundum hoc ab ipso odio habentur. Et sic manifestatur sensus D. Thom. quod quando negat Deo odium, loquitur de odio ad creaturas, in quantum creaturæ sunt, & ab ipso sunt: sic enim odio non habentur.

Ad primum Resp. quod Deus non abominatur peccatum, aut alios defectus ex motu dissonantiæ, aut repugnantia, seu resistantiæ ad se, cum potius illa permittat, & sine eius permissione non sint, sed ex motu amoris, quo vult illud bonū, cuius peccatum, vel defectus est corruptiuum, & sic est displicentia consecuta proximè ad amorem, & tanquam effectus eius, non ex proprio motu, suæ dissonantiæ orta, quia hæc non est dissonantia & contrarietas immediata ad Deum, sed ad formam creatam, quam nisi amaret Deus, non faceret illi dissonantiam peccatum. Et sic dicit S. Th. cit. loco contra Gentil. quod *In quantum Deus vult bonum iustitiæ, vel ordinis vniuersi, dicitur illa odire, quorum punitionem vult, vel corruptionem.* Et cum instatur, quod sufficit auersio à Deo, quam immediatè importat peccatum, ut Deus incipiat à dissonantia ipsius, ut à motu: Resp. non sufficere istam auersionem in ordine ad Deum, quia est permessa à Deo, non resistens illi, & consequenter ad formandum motuum dissonantiæ, & resistantiæ seu contrarietatis, oportet quod Deus comparet, & aspiciat illam auersionem ut contra positam rei creatæ, quam Deus diligit, scil. gratiæ; & tunc iam incipit illa displicentia esse consecuta ad amorem rei creatæ, & extra Deum, non autem ut præbens motuum proximum sui, ex meritis suæ dissonantiæ & contrarietatis ad Deum.

X 3

Ad

11 Ad secundum Resp. quod quando aliquid contrariatur proximo vel amico, ita quod etiam contrarietur & resistat mihi, quatenus sum aliquid amici, tunc illa dissonantia, quatenus etiam est mea, sufficit fundare directè, & per se odium. Si autem ita contrariatur alteri, quod non mihi, eius dissonantia non fundat per se, & directè odium, sed displicentiam consecutam, & ut effectum amoris. Deus autem ita respicit alterum extra se, quem amat, quod est eius effectus, ita quod omne quod in illo respicit creatum est, & ei ita subiectum, ut omne quod illi contrarium est repellere omnino possit, si velit. Vnde non facit dissonantiam resistentem & contrariam Deo, licet repugnet & contrarietur ipsi rei creatæ. Et ideo non potest Deus incipere displicentiam de tali contrario ab aliquo motiuo dissonantiæ erga se, sed ex amore sui effectus, cui potest cum vult tale contrarium impedire, & si non impeditur, sed ei opponitur, ex permissione Dei est. Non ergo Deus ita amat creaturas quod quasi suam reputet contrarietatem & dissonantiam, quam eis faciunt sua contraria, quia licet creaturæ aliquid Dei sint, non tamen ita ut quod eis contrariatur, & dissonat, etiam dissonet, & contrarietur Deo; siquidem ita facile est ei id euincere, ut omnino non resistat diuinæ voluntati; & ideo cum dissonantia illius contrarij non transeat ad Deum, sed in ipsa creatura sistat, non accipit Deus pro motiuo displicentiæ & odij ipsam dissonantiam contrarij, sed ipsum amorem creaturæ, cui vult bonum, & displicet oppositum. Nos autem sic reputamus mala proximi, vel amici ut nostra, quod etiam nobis contrariari possunt, ita ut non sit omnino in manu nostra ea repellere & reiicere, & ideo in repellendis malis proximi, etiam à motiuo ipso dissonantiæ erga nos immediatè possumus incipere, & sic formaliter odium habere erga illa, Deus autem non, quia ex motiuo dissonantiæ & repugnantia ad se non potest accipere eorum displicentiam.

12 Ad tertium Resp. quod in annihilatione non remanet aliquid cui Deus velit malum, & quod odio habeat, quia id quod ex annihilatione resultat, est nihil, & hoc non est capax odij, id quod annihilationem præcedit est creatura, quæ toto tempore antecedente annihilationem non est odio habita, cum ex voluntate Dei habeat esse. Quare annihilatio de se non est odium Dei, sed simplex nolitio dandi esse, ita quod remanet creatura annihilata in eo statu quo creaturæ possibiles, quibus Deus noluit dare esse. Vnde sicut Deus non ex aliquo odio motus est ad relinquendum illis creaturas possibiles, & denegandum illis esse, quod voluit dare istis, quæ nunc sunt, sed simplici & gratuita voluntate sua voluit istas eligere, & illas reiicere, ita ex eadem simplici volitione potest vel dare esse ad tempus alicui creaturæ, & postea denegare, non ex dissonantia, & contrarietate creaturæ ad suam voluntatem, quod requiritur ad odium formale, sed ex simplici sua voluntate. Quod si Deus annihilaret creaturam aliquam, non ex præcisa voluntate sua, sicut potest facere circa quamlibet etiam irrationalem creaturam, sed in pœnam & punitionem peccati, tunc illa voluntas annihilandi, ut punitiva, oritur ex amore & zelo iustitiæ, non ex odio: Iudex enim non debet ex odio punire, sed ex iustitia, & ita hoc ipso quod Deus punit, licet inferat malum, non procedit ex odio, aliàs non iuste procederet. Vnde soluitur instantia, quæ fit de peccatore, quem Deus punit, & malum illi infligit ex iustitia, & cui displicet

persona ut peccator est: hæc enim inflictio pœnæ ut malum est peccatoris, non est odium, hoc ipso quod fit ex iustitia; displicentia autem personæ ut peccatoris, non oritur ex malevolentia aut dissonantia illius, & repugnantia ad voluntatem Dei, sed ex amore iustitiæ, & ordinis vniuersi, qui petit ut peccatores puniantur. Et cum instatur quod non tollit rationem odij hoc quod est procedere ex amore. Resp. quod tollit quando amor est proximum motiuum displicentiæ contrarij, quod amatur, non quando remotum, aut conditio requisita. Quando autem aliquis procedit ex zelo & amore iustitiæ, etiam si inferat malum, non dicitur procedere ex odio, imò in iudice vituperabile est quod ex odio procedat, quasi in hoc intelligamus quod relinquit motiuum iustitiæ.

Ad vltimum Resp. quod loca Scripturæ, quæ 13 Deo attribuunt odium, rectè intelliguntur de odio similitudinariè, quatenus est volitio mali, vel nolitio boni consecuta ex amore alicuius, non autem originata ex speciali, & proprio motiuo odij, sicut etiam Deo attribuitur ira; & tamen intelligitur similitudinariè, non propriè, ut statim dicemus. Et ita exponit D. Thom. cit. loco contra Gentil. istas authoritates de odio similitudinariè, & de displicentia consecuta ad amorem alicuius, non ex motiuo dissonantiæ, & contrarietatis ad se habito, quod tamen pertinet ad odium specialiter, & propriè dictum. Et ad hoc etiam deducimur ex eo quod Scriptura diuina se explicat dicens, Sap. 11. *Nihil odisti eorum quæ fecisti; nec enim odiens aliquid constituisti & fecisti*, hoc enim loco docemur, quod quia Deus est factor omnium, nihil factum aut creatum odit. Quod autem non est factum ab ipso, sed permissum, sicut peccatum, non habetur odio strictè dicto, id est, ex speciali motiuo dissonantiæ & contrarietatis ad se orto, cum nihil Deo resistat, & contradicat immediatè; nec etiam ipsum peccatum, cum sine permissio Dei non detur, sed ex amore alterius rei consequitur displicentia ad ipsum. Eodem modo intelligitur August. de odio Esau peccatoris, non Esau hominis; loquitur enim de odio consecuto ex amore virtutis, quam Deus vult habere Esau, & non habet, & sic displicet illi, non de odio ex speciali illo motiuo odij orto. Ad D. Thom. dicemus D. Thomam in hoc loco q. 20. cit. non fuisse sollicitum explicare rationem odij strictè aut generaliter dicti, propriè, vel similitudinariè, id enim accuratè præstitit 1. contra Gentil. cit. cap. 96. sed solum voluit ostendere Deum diligere omnia quæ participant esse; quæ verò non participant esse, ut peccatum, sed deficient ab esse, Deus non diligit, sed odio habet, quodcumque sit illud odium, siue strictè, & propriè dictum, siue similitudinariè, & largè. Itaque solum explicauit obiecta dilectionis & displicentiæ, non modum displicentiæ, siue sit per modum odij strictè dicti, siue non.

Ira, spes & desperatio in Deo non sunt.

Remoueri à Deo iram, quæ est in appetitu sensitiuo, & definiri solet per effectum sensibilem, quod est *accensio sanguinis circa cor*, extra omnem controuersiam est. De ira autem secundum formalem rationem, qua potest transferri ad spiritua- 14 lem potentiam voluntatis, dubitant aliqui, an importet intrinsecè aliquam imperfectionem, ratione cuius formaliter Deo attribui non possit, an verò in suo conceptu imperfectionem non includat, sed ea possit exui, & sic remota imperfectione Deo tribui. Nam P. Suarez diff. speciali de

de Iustitia Dei sect. 5. num. 2. & iterum lib. 3. de attributis c. 7. num. 8. docet iram propriè Deo attribui posse, quia imperfectionem non importat in suo conceptu. E contra verò P. Valquez hic disp. 84. cap. 4. eam docet non posse attribui Deo propriè. Et licet plures afferat ex Patribus, qui eam metaphoricè in Deo intelligi volunt, sicut pedes & manus, & alia membra corporea: sed reuera, ut bene ipse notat, hi Patres loquuntur de ira, quæ est passio sensibilis: hæc enim Deo non nisi metaphoricè tribui potest secundum omnes. In præfenti autem loquimur de ira spiritualiter. Ista autem varietas opinandi circa iram, oritur ex diuerso modo accipiendi definitionem iræ, etiam formaliter sumptæ, & nõ pro passione. Etenim Lactantius in libro de ira Dei, tenet iram solum esse motum animi ad vindicanda & coercenda peccata, sub quo conceptu nullam supponit tristitiam, aut imperfectionem ex parte irascentis, sed solum actum iustitiæ vindicatiuæ. Et videtur fauere D. Tho. 1. 2. q. 46. art. 6. ubi docet iram respicere malum inferendum sub ratione iusti vindicatiui. Vnde si ex sua formali ratione respicit ira rationem iusti vindicatiui, videtur posse purificari ab aliis imperfectionibus, & sic Deo attribui secundum suam propriam rationem formalem, licet non sub aliis imperfectionibus in nobis repertis, quæ ex parte dispositionis ad iram requiruntur, & ideo materialiter solum ad eam pertinent. Vnde tandem S. Doctor eadem 1. 2. q. 47. art. 1. ad 1. inquit quod, *Ira non dicitur in Deo secundum passionem animi, sed secundum iudicium iustitiæ, prout vult vindictam facere de peccato.* Solum ergo iram sensibilem Deo negat. Et conf. quia iræ extrinsecum est causari ex dolore, sicut misericordiæ causari ex compassione: ergo sicut misericordia formaliter est in Deo, licet non sit tristitia, & compassio, ita & ira sine dolore.

15 Nihilominus alij ex antiquis præter Lactantium existimant iram includere necessariò tristitiam & dolorem tanquam motuum formale & proprium. Nam Aristot. 1. de anima textu 16. iram docet esse appetitum doloris vicissim alteri inferendi, iratus enim videtur hoc intendere, ut dolorem, quem sentit, in alterum effundat, & sic alleuietur à dolore quem sentit. Vnde Damasc. lib. 2. cap. 16. & Nillessus lib. 5. cap. 14. dicunt quod *ira componitur ex tristitia & desiderio*, quod exposuit D. Thom. 1. 2. q. 46. art. 3. ad 3. quod *componitur ex illis, non quasi ex partibus, sed quasi ex causis.* Fauet Scriptura. 1. Machab. 2. describens iram per dolorem, tanquam per causam aut motuum: *Et vidit, inquit, Mathathias, & doluit, & contremuerunt renes eius, & accensus est furor eius secundum iudicium legis, &c.* Vnde quoties Scriptura Deo attribuit iram (attribuit autem passim, ut notum est omnibus) debet semper intelligi eo modo attribui, quo attribuitur ei dolor, & tristitia seu poenitentia, sicut cum dicitur Genes. 6. *Poenituit eum quod fecisset hominem in terra, & tactus dolore cordis intrinsecus, &c.* Certè D. Thom. perpetuò sensit iram supponere dolorem seu tristitiam, non solum loquendo de ira, quæ est passio, sed de illa, quæ inuenitur in actu voluntatis: excludens enim à Deo illos effectus qui dicunt imperfectionem ex parte sui formalis, in hac q. 20. art. 1. ad 2. dicit excludi iram, *quia tristitiam supponit.* Et in 1. 2. q. 46. cit. art. 3. ad 1. dicit quod, *ira componitur ex tristitia, & desiderio non sicut ex partibus, sed sicut ex causis.* Et q. 47. art. 3. loquens de causa iræ ex parte dispositionis, quæ relinquitur ex motu iræ: *Manifestum, inquit, est quod nihil mouet ad iram, nisi nocumentum quod contristat.* Et infra. *Ista est causa quare homines, qui*

sunt infirmi, vel in aliis defectibus facilius, irascuntur, quia facilius contristantur. Itaque apud D. Thom. stimulus iræ est dolor, seu tristitia ex aliquo nocumento concepta, ita quod subiectum doloris, & tristitiæ incapax est incapax iræ. Et si facit effectus iræ, id erit ex alio motu, v. g. ex iustitia, & æquitate, aut ex simili effectui, & hoc vocare iram, magna abusio est. Sed tunc erit quæstio de nomine. De ipsa autem re, si ex his quæ in nobis videmus philosophandum est, ira ad hoc datur, ut repellat nocumentum sibi illatum, & dolorem seu tristitiam illaram alterius vindicatione compenset: quia enim intra se dolorem & stimulum sentit, irascitur. Pro aliis autem vindicandis sufficit motus seu affectus iustitiæ: vacat ergo ira, ubi non est capacitas tristitiæ. Secus est de misericordia: nam licet hæc habeat in nobis compassionem adiunctam, non tamen compassio est motuum miserendi, sed affectus in nobis consurgens ex eo, quod tangimur alienâ miseriâ. Vnde non mouemur ad subleuandam illam ex compassione nostra, seu ad hoc ut mitigemus compassionem quam sentimus, sed ut proximum consolemur, & subleuemus, ira autem directè est ad mitigandum & compensandum dolorem, quem in nobis facit nocumentum illatum; quod si non datur mitigatio doloris, sed solum compositio mali & nocumenti facti, non requiritur ira, sed sufficit iustitia vindicatiua.

Vnde patet solutio ad motiua Suarez. Et D. Th. in illo loco negat esse in Deo iram ut passio, & affirmat esse secundum iudicium iustitiæ, non tamen affirmat esse secundum formale quod est mitigatiuum doloris.

De spe, timore, desperatione, audacia, & similibus affectibus, qui vel includunt, vel sapiunt naturam spei, & fiduciæ, omnes excluduntur à Deo, quia isti affectus respiciunt vel aliquod malum non faciliè repellendum, sed contra voluntatem euenturum, quem timor formidat, & contra quod audacia mouet & acuit; Deo autem nihil est mali, quod contra eius voluntatem possit accidere, aut non de facili repelli. Vel est aliquod bonum non habitum, nec faciliè habendum, sed cum arduitate & contingentia, siue quia habendum est per alterius virtutem, siue quia in se excedit propriam potestatem, & sic est spes, quæ est de re non habita, sed futura, & ardua, quod enim videt quis, quid sperat, ut inquit Paulus. Nullum autem bonum est Deo arduum aut contingens, aut ab alterius voluntate habendum, quia omnia in eius manu sunt, & ab eo proueniunt: ergo est incapax spei, & à fortiori desperationis.

ARTICVLVS III.

Vtrum in Deo sit iustitia commutatiua formaliter?

Tota difficultas in attribuenda, vel remouenda à Deo aliqua virtute, quæ in nobis reperitur in eo consistit, an in ratione formali talis virtutis, aut in aliqua conditione essentialiter requisita inueniatur aliqua imperfectio, vel possit ab omni imperfectione purificari, & ita formalis & essentialis illa ratio in Deum transferri.

Dari igitur in Deo iustitiam abstrahendo nunc à specie commutatiuæ, vel distributiuæ, indubitatum est; de ratione enim iustitiæ secundum se solum est voluntas unicuique tribuendi quod suum est, quæ nihil aliud est quam voluntas ordinatè & de-

bitè disponendi ea quæ extra sunt, & circa quæ operamur, Deus autem est principium ordinandi omnia, & debitè constituendi, cum sit summa lex omnium, & regula totius bonitatis, & ordinationis debitæ. Voluntas ergo sic ordinatè & debitè disponendi de omnibus non potest non in Deo dari, quod & frequentissimè Scriptura docet, nec est necesse loca multiplicare.

Sed quia est duplex species iustitiæ, ut docet S. Thom. in hac q. 21. art. 1. & 2. 2. q. 61. art. 1. Altera quæ vocatur commutativa, altera distributiva; specialis difficultas est, an utraque possit Deo attribui, an aliqua dicat imperfectionem illi repugnantem. Nec proponimus difficultatē de aliis partibus iustitiæ, quæ potentiales dicuntur, quia imitantur quidē & æmulantur rationem iustitiæ, vel in reddendo debito, vel in ratione æqualitatis, sed ab ea deficiunt, quia non servant rigorem debiti, vel æqualitatis: iustitia enim propriè respicit debitum compensandum ad æqualitatem. Vnde propria & rigorosa iustitia est, quæ debitum rigorosum & propriam respicit, & æqualitatem facit, quod debitum rigorosum, vocari etiam solet debitum legale, quia est illud quod lege, vel adæquatione ipsa rei statutum, & debitum est. Illæ verò virtutes quæ versantur erga alterum, & deficiunt, vel à ratione debiti, vel à ratione reddendi æquale, dicuntur partes potentiales iustitiæ, ut docet S. Thom. 2. 2. q. 80. art. unico. Sunt enim aliquæ virtutes, quæ debitum quidem habent ad alterum, sed æquale reddere non possunt, sicut Deo, & superioribus, & parentibus debitum habemus, sed ad æqualitatem solvere illud non possumus, & sic Deo religio defert cultum debitum, superioribus obedientia, constitutis in dignitate, dulia, parentibus pietas. Aliæ virtutes possunt quidē reddere æquale, sed non habent rigorosum debitum, & legale, sed morale, quod attenditur secundum honestatem virtutis aut decentiam, non secundum legis obligationem, sicut veracitas, quæ veritatem implet in promissis, in verbis & factis, sicut gratitudo quæ reddit vicem pro beneficiis, vindictio pro malefactis, sicut liberalitas, quæ dat & communicat aliis secundum decentiam convictus humani, sicut amicitia, seu affabilitas, quæ se exhibet aliis gratiosum & tractabilem & alia similia, quæ ibi enumerat, & postea explicat D. Thom. à q. 8. usque ad 120. in 2. 2. Istæ ergo virtutes dicuntur partes potentiales iustitiæ, quia vel rigorosum & legale debitum non observant, vel ad æqualitatem non possunt rependere. Sed de his non agimus in præfenti, quia aliquæ manifestè repugnant Deo, scilicet illæ quæ respiciunt superiorem, ad quem habent debitum rigorosum, sed non possunt reddere ad æqualitatem: Deus enim superiorem non respicit, nec impotens est reddere ad æqualitatem. Quæ autem ad æqualitatem reddere possunt, sed debitum legale non habent, sed morale, Deo non repugnant, dummodo non supponant aliquam inferioritatem in illa ratione debiti, & aliquam imperfectionem, sicut est in Deo liberalitas, affabilitas seu amicitia, veracitas, &c.

Quare in præfenti solum agimus de illis duabus speciebus iustitiæ propriæ, & rigorosæ, quæ sunt iustitia commutativa, & distributiva. Est quidem præter istas alia iustitia, quæ dicitur legalis, de qua agit S. Thom. 2. 2. q. 57. art. 6. quæ respicit bonum commune, cui etiam reddi debet quod suum est, & idèò maximè debemus curare ea, quæ sunt boni communis, Princeps quidē dirigendo & ordinando illud, subditus autè obediendo, & regulando se per legem. Et quia lex est quæ regu-

lat bonum commune, dicitur hæc iustitia legalis, quia bonum legis seu bonum commune servare studet, iuxta id quod ei debetur. Vnde dicit D. Thom. quod talis iustitia est in Principe architectonicè, quasi in imperante, & dirigente, in subditis autem secundariè, & administratiuè tanquam in subiectis & obedientibus ipsi legi. In Deo autem iustitia ista est summa illa voluntas ordinandi omnia per legem æternam, à qua omnis alia lex derivatur, ut docet S. Thom. 1. 2. q. 93. art. 3. & ita est in Deo iustitia legalis superiori modo quàm in omni Principe, cum sit Rex Regum, & Dominus dominantium, & respiciat bonum commune reddens ei quidquid sibi debetur tanquam habens curam de omnibus. Cæterum hæc iustitia licet sit species quædam sub genere iustitiæ, quæ est specialis virtus inter alias morales, dicitur tamen generalis, & communis, non quia prædicetur de omnibus virtutibus, ut cit. loco dicit S. Thom. sed quia movet & dirigit, dum ordinat hominem ad bonum commune, ad quod ordinantur omnes virtutes. At verò commutativa, & distributiva iustitia sunt etiā species iustitiæ, ut est particularis virtus condita contra alias virtutes morales, non quidē dirigens, & ordinans sicut iustitia legalis ad bonum commune, sed respiciens bonum particulare personarum, sicut iustitia commutativa respicit bonum particulare secundum debitum quod est inter personam, & personam; distributiva autem respicit bonum particulare subditorum, ut à superiori distribuendum ordinatè. Et sic fit divisio iustitiæ, quæ est virtus specialis, iuxta diversum modum respiciendi alterum. Nam debitum, & obligatio aut est à superiori ad subditos, aut à subditis ad superiorem, aut inter ipsas personas inter se prout sunt partes alicuius communitatis. Et primo modo est iustitia distributiva, à qua descenditur à toto ad partes, à superiori ad inferiores. Secundo modo est iustitia legalis, qua partes respiciunt totum, & privati bonum commune, aut etiam Princeps bonum commune. Tertio modo est iustitia commutativa inter ipsas partes.

Hoc supposito inquirimus in hoc art. an iustitia commutativa in sua formali ratione, & conceptu includat aliquam imperfectionem, ratione cuius non possit secundum suum formalem conceptum Deo attribui. In qua re acriter inter se, & certarunt & desudarunt P. Suarez, & Vasquez. Nam primus per unum extremum affirmat dari in Deo iustitiam, non solum distributivam, sed etiam commutativam, segregatis omnibus imperfectionibus, à quibus purificari potest, salva sua ratione formali, & essentiali; ad quam tamen iustitiam strictè dictam, taliter quod inducat ius in alio, præsupponi docet promissionem, & pactum Dei, quod si non præcedit, nullum ius nascitur in homine erga Deum: sine iure autem non exercetur iustitia. Posito autem pacto & promissione, vera & propria iustitia intercedit inter Deum & nos, ita quod si Deus non redderet quod ex pacto convenit, violator esset specialis & propriè dictæ iustitiæ. Ita docet in opusc. disput. de iustitia Dei, & refectione de libertate divina disp. 2. sect. 2. num. 37. & antè docuerat, 1. tomo 3. disp. 4. sect. 5. & 6. & tandem tomo 3. de gratia lib. 12. cap. 30. & aliis locis in hoc tamen ultimo loco numero, 34. fatetur Suarez ius hominis erga Deum deficere à rigore iustitiæ commutativæ, quæ inter homines interuenit; simpliciter tamen substantialem iustitiam commutativam inveniri in Deo dicit, num. 32. Vasquez verò per aliud extremum docuit in Deo non dari veram & strictam iustitiam, neque commutativam,

tatiuam, neque distributiua, siue ante promissionem & pactum, siue post, ita quod inducat debitum quod sit ius strictum in creatura respectu Dei, sed solum esse debitum quoddam morale, ex honestate virtutis, & non debitum legale, illudque reddi à Deo ex fidelitate vel gratitudine, aut alia virtute simili, quae sit pars potestatiua iustitiae, non species eius. Vnusquisque horum Authorum suos habet sectatores. Vasquez sequuntur Arrubal, Lessius, Thomas Sanchez, Lorca, Turrianus, Aegidius, & alij, quos citat & sequitur Alarcon tract. 3. de voluntate Dei, disp. 8. cap. 5. num. 3. Suarez sequuntur Granados, Tannerus, Ragusa, Rebellus, & alij quos idem Author ibi citat num. 5. Inter hos Autores arbitrat voluit esse Ruiz De voluntate Dei disp. 58. sect. 1. & sequentibus, qui vult pro Suarez in Deo posita permissione & pacto esse iustitiam strictè dictam tam commutatiua, quam distributiua, licet eminentiorem quam in nobis. Pro parte autem Vasquez voluit ius creaturarum non inducere in Deum obligationem personalem, sed solum realem, ita quod ipsa persona non sit obnoxia debito, sed res ipsa, ad eum modum quo res testamento legata debentur haereditibus debito iustitiae per obligationem realem, quare res ipsa manent effectae, non per personalem, quia testator defunctus est.

- 4 Communior tamen sententia, praesertim inter Thomistas, tenet, in Deo non dari iustitiam commutatiua, bene tamen distributiua. Ita docuit S. Thom. in hac q. 21. art. 1. & ibi eius expositores communiter, Caiet. Bañez Zumel, Gonzalez disp. 63. Ferrar. 1. contra Gentil. cap. 93. Soto lib. 3. de iustitia quest. 5. art. ultimo ad 1. & lib. de natura, & gratia cap. 7. Capreolus in 1. dist. 45. q. 1. art. 1. concl. 4. & art. 3. ad argumentum contra eandem conclusionem. Ex antiquis citat Vasquez pro se Scotum in 1. dist. 46. q. 1. in solutione argumentorum, & Durandum ibidem q. 1. quod negauerint Deo iustitiam commutatiua. Sed nihil minus, de hoc ibi tractant Scotus & Durandus, nec verbum. Fortasse fuit lapsus exscribentis citare Scotum, & Durandum in 1. cum debuissent citare in 4. sententiarum, dist. 46. sed ibi Durandus planè sentit cum D. Tho. & Thomistis, scilicet, in Deo non esse iustitiam commutatiua, bene tamen distributiua. Scotus idem affirmat ibi q. 1. vbi cum distinxisset utramque iustitiam commutatiua, & distributiua, dicit: *Prima illarum non potest esse sim. licet in Deo respectu creaturae, quia non potest esse simpliciter aequalitas, &c. secunda iustitia potest hic esse simpliciter, quia simpliciter potest dare naturis perfectiones debitas, vel conuenientes.* Postea in §. Non improbando, &c. dicit quod Non improbando distinctiones, affirmat tamen in Deo non esse nisi unicam iustitiam, quae determinatè non inclinat ad aliud extra se: ad nullum enim obiectum ad extra Deus determinatè inclinatur, sed solum ad suam bonitatem, ad reliqua verò contingenter; & ideo dicit non habere iustitiam simpliciter ad alterum extra se; licet in creaturis inueniatur iustum secundum correspondentiam unius ad aliud, sicut iustum est ignem esse sursum, & terram deorsum, quia natura eorum id exigit. Vbi Scotus non improbando primum dictum suum de iustitia commutatiua, & distributiua, voluit postea explicare quomodo ista iustitia in Deo non detur per immediatum respectum ad creaturas, sed ad se. Quare antiqui potius stant pro sententia Thomistarum, nec multum de quaestione ista videntur disputasse, sic ut modò.

Expressè sentire D. Thomam quod in Deo non sit iustitia commutatiua, bene tradidit Vasquez in hac 1. p. disp. 85. cap. 2. licet seq. disp. 86. cap. etiam 2. haeritauerit circa ipsius mentem in attribuenda Deo iustitia distributiua, putans errasse S. Doctorem in summa id quod de hac iustitia dixerat in 2. dist. 27. & 1. contra Gentil. cap. 93. Hoc seq. articulo videndum est. Nunc quod attinet ad iustitiam commutatiua, eam Deo denegasse D. Thom. sine vlla controuersia statui debet, ut patet intuenti loca, vbi id ex professo tractat, tum in sententiariis, tum in libro contra Gentiles, tum in summa theologia. Et in primis in 2. dist. 27. quest. 1. art. 3. distinguens iustitiam commutatiua & distributiua, dicit quod, *In redditione praemij ad merita magis attenditur forma distributionis, cum ipse unicuique reddat secundum opera sua, quam commutationis, cum Deus à nobis nihil accipiat.* Deinde in 4. dist. 46. q. 1. a. 1. *Iustitia commutatiua per quam aequalitas constituitur inter Deum dantem & creaturam recipientem Deo competere non potest secundum propriam acceptionem.* Addit tamen modum quendam iustitiae commutatiuae inueniri in Deo respectu naturae, sicut inuenitur inter patrem & filium. Et in loc. sup. citato ex 27. distinct. 2. ponit in Deo iustitiam esse secundum modum distributionis, quia utrumque modum in Deo reperiri postea ostendemus. Item in 1. contra Gentil. cap. 93. *Iustitia, inquit, quantum ad commutationis actum Deo competere non potest, cum ipse à nullo aliquid accipiat, unde Rom. 11. dicitur. Quis prior dedit illi & retribuetur ei, & Iob. 41. Quis ante dedit mihi, ut reddam ei. Per similitudinem autem aliqua Deo dare dicimur, in quantum Deus nostra data acceptat: non igitur sibi competit commutatiua iustitia, sed solum distributiua.* Eodem modo & ob eandem rationem eam denegat Deo in hac q. 21. art. 1. *Iustitia, inquit, commutatiua vel directiua commutationum, siue communicationum non competit Deo, quia, ut dicit Apostolus Rom. 11. Quis prior dedit illi & retribuetur ei; Rursus in 1. 2. q. 114. art. 1. negat iustitiam simpliciter esse in Deo erga nos, quia non est aequalitas simpliciter, sed solum quidam modus iustitiae, sicut dicitur quoddam ius paternum, siue dominatiuum, ut dicit. Philos. in 5. Ethic. Et ulterius eam negat in Deo, quia totum quod est in homine bonum, est à Deo, unde non potest hominis ad Deum esse iustitia secundum absolutam aequalitatem, sed secundum proportionem quandam, in quantum scilicet uterque operatur secundum modum suum. Denique 2. 2. q. 6. 1. a. 4. ad 1. Dicit D. Thom. quod *Forma diuini iudicij attenditur secundum rationem commutatiuae iustitiae, prout scilicet recompensat praemia meritis, & supplicia peccatis.* Quo loco ut obseruat Caiet. solum ponit Deum obseruare modum quendam iustitiae commutatiuae in recompensandis meritis, & suppliciis non ipsam iustitiam commutatiua propriè exercere. Quod postea melius ponderabimus, soluendo argumenta opposita sententiae, quae istum locum pro se adducit.*

Dices, D. Thom. in locis adductis, solum velle 6 excludere à Deo iustitiam commutatiua iuxta mensuram, & modum humanum circa actiones quas adaequat inter se, hoc enim facit cum aliquibus imperfectionibus, quas D. Thom. à diuina iustitia excludere vult, non ipsam iustitiam purificatam his imperfectionibus.

Sed friuola est haec obiectio. Nam secundum illum modum imperfectum quo virtutes sunt in nobis

nobis, non solum iustitia commutativa, sed nec distributiva, nec misericordia, nec liberalitas, & magnificentia, nec sapientia, aut prudentia sunt in Deo, sed modo altiori, & diuino. Ergo si solum intenderet D. Thom. negare Deo iustitiam commutativam secundum eas imperfectiones, quibus affecta est in nobis, & non secundum se, etiam alias virtutes negare deberet Deo, quia non sunt in eo, illo modo, quo in nobis. Sed D. Thom. alias virtutes concedit Deo; & hanc commutativam excipit, ut patet in locis allegatis praesertim in 1. contra Gentil. cap. 93. Ergo loquitur de istis virtutibus secundum se, & secundum rationem suam formalem absolute, & non solum prout in nobis, & cum imperfectionibus, quas in nobis habent. Nec latuit hoc D. Thom. sed id expressit cit. loco. contra Gentil. Postquam enim affirmavit non dari in Deo iustitiam commutativam, bene tamen distributivam, & alias virtutes, ut prudentiam, liberalitatem, veracitatem, &c. subdit sic: *Virtutes praedictae secundum suas rationes ex rebus humanis non dependent: non enim indicare de agendis, aut aliquid dare, vel distribuere solius hominis est, sed cuiuslibet intellectum habentis, secundum tamen quod ad res humanas contrahuntur, ex his quodammodo speciem sumunt, sicut curruum in naso facit speciem simi. Virtutes igitur praedictae secundum quod ordinant humanam vitam activam, ad has actiones ordinantur, prout ad res humanas contrahuntur; ab eis speciem sumentes, secundum quem modum Deo convenire non possunt; secundum vero quod actiones praedictae in sua communitate accipiuntur, possunt etiam divinis rebus aptari. Et infr. Divinae virtutes nostrarum exemplares dicuntur: aliae vero virtutes, quae proprie Deo non conveniunt, non habent exemplar in divina natura, sed solum in divina sapientia; quae omnium entium proprias complectitur rationes. Manifeste ergo S. Thom. extrahit virtutes ab imperfectionibus humanis, ut Deo tribuantur, & ex istis sic purificatis alias tribuit Deo, alias negat, & inter has iustitiam commutativam: ergo sentit iustitiam istam sic in sua essentiali, & intima ratione includere imperfectionem, ut prorsus ab illa purificari non possit.*

Fundamentum D. Thomae elucidatur.

7 Restat pro fundamento videre, quanam ista imperfectio sit, sic essentialiter in ipsa iustitia commutativa imbibita, ut ab ipsa nullo modo purificari possit, manendo in sua formali, & essentiali ratione: ad hoc enim unicum principium, totum fundamentum huius assertionis reduci debet: varie enim circa hoc discutitur ab Authoribus. Nam quidam id sumunt ex parte materiae, circa quam versatur commutativa iustitia, quae est datum, & acceptum: id enim pertinet ad commutationes, seu communicationes; nulla vero materia dati, & accepti est communis Deo, & nobis: nihil enim ei utilitatis conferre potest quidquid dederimus illi. Alij sumunt hanc imperfectionem ex parte personarum, inter quas est tanta inaequalitas, ut fundare non possint ad invicem ius commutativum, & rigorosum: si enim inter patrem, & filium; dominum & servum, non potest intercedere ius stricte dictum, nec iustitia commutativa, quia filius est aliquid patris, & servus domini, & quidquid illorum est, quanto minus poterit esse inter Deum, & creaturas, cum quidquid creaturae est, Dei sit? Alij denique recurrunt ad debitum, & obligationem, in qua essentialiter fundatur ius legale, seu rigorosum; Deus autem incapax est obli-

gationis, & debiti ad creaturam. Et ideo ut hoc debitum Suarez temperaret, dixit esse imperfectum, quando ex lege, seu ordinatione superioris, aut ex actione alterius inducitur, non autem si ex voluntate & pacto ipsius, qui se vult obligare. Et sic ex promissione, & pacto Dei nascitur hoc ius commutativae iustitiae, non eo secluso; si enim secludamus promissionem, & pactum Dei, solum admittit in Deo iustitiam per modum providentiae gubernativae, non per modum iustitiae stricte dictae, ut patet loco cit. in 3. tomo de gratia lib. 12. cap. 30. Unicuique enim creaturae dat quod suum est ratione suae sapientiae, & providentiae, quae singulis providet, prout aptum est illis, non tamen ex obligatione stricta id facit, nisi se voluerit obligare, quod fit vel pacto, vel promissione.

8 Rationes istae, ut efficaces sint ad unicam quam D. Th. semper tetigit, reducendae sunt: Semper enim mihi vim magnam ingerit ratio, quae D. Thomam movit, & in tot locis ea usus est.

Ratio autem qua D. Thom. utitur est eadem semper, quia videlicet nos nihil possumus Deo dare, quod non prius ab ipso sit, & totum eius sit; & sic nemo potest prior illi dare, ut ratione illius retribuat: hac enim ratione usus est Apostolus, *Quis prior dedit illi, & retribuetur ei?* & eam inde sumit D. Th. ut concluderet non posse fundari ius commutativum inter Deum & creaturas, quia hoc ius, & haec obligatio nascitur ex communicatione quam unus dat alteri, non accipiendo ab ipso, sed de suo dando ei. Si autem id super quo fundatur ius & obligatio unius partis, non nascitur ex altero, sed ex se, quantumcumque faciat pactum vel promissionem, non nascitur ius commutativum, sed vel fidelitatis, vel gratitudinis, vel alterius similis virtutis. Iustitia autem commutativa essentialiter fundatur in communicatione, seu commutatione, quam unusquisque dat de suo, non accipiendo ab alio, & quia repugnat Deo quod accipiat aliquid a creatura, quod suum non sit, ideo repugnat in Deo fundari ius commutativum, seu ex communicatione ortum, quantumcumque ex promissione & pacto Dei oriatur, quia nisi tale pactum fiat super tali materia, scilicet super accepto ab alio de suo, & non proveniente a Deo, non potest ius istud fundari. Hoc accurate expendendum est, quia hoc est totum fundamentum nostrae sententiae. Illud autem reducimus ad sequentem syllogismum.

9 Certum est ius commutativum fundare obligationem & debitum in persona ortum ex actione alterius erga se, ita quod solum pactum aut promissio unius partis non sufficit, si obligatio non resulter ex alterius partis actione aut communicatione: sed certum est quod ex nulla actione aut communicatione creaturae erga Deum potest nasci talis obligatio & debitum in Deo, etiam intercedente pacto, & promissione ipsius: ergo repugnat ius commutativum inter ipsum, & creaturam poni, & consequenter neque iustitiam commutativam, quia haec essentialiter respicit hoc ius, & ab eo specificatur. Maiorem sic explico, quia ius commutativum est illud, ratione cuius una persona habet ius erga aliam, ut aliquid faciat, ita quod si illud non impleat, contra ius talis personae faciat, & committat iniustitiam, & hoc ius contra aliam debet nasci ex actione seu communicatione quam unus facit circa alium: si enim nihil faciendo nasceretur ius & obligatio in alio erga se, tale ius non esset ex communicatione seu actione, sed ex alio titulo, v. g. ex naturali vinculo, sicut parentes tenentur filiis, & contra, aut ex aliqua lege

lege superioris. Ius autem commutatum nascitur, & obligationem seu debitum inducit ex alterius actione, vel communicatione in alterum, sicut ex contractu, aut quasi contractu. Ad hoc autem ut ex actione mea resultet obligatio, aut debitum in altero, requiruntur duo. Primum, quod illa actio seu communicatio non sit aliquid illius & ipsius propria, aut sub eius dominio: nam ex his quæ sunt propria & aliæ mea, quomodo potest mihi induci obligatio & debitum, seu ius, ita ut contra iustitiam faciam, si ei non deferam, cum de meo possim facere, & uti sicut voluero sine læsione iuris alterius; Secundò, requiritur pactum seu contractus, aut quasi contractus, non quia pactum det valorem actioni, seu materiæ quam alteri do, vel communico, sed quia est explicatio oneris, & tituli quo illi do, ut in altero resultet obligatio, & debitum iustitiæ, quia si facio, aut do aliquid sine pacto exprimente vim, & onus obligandi, non tenetur alter se obligatum sentire, quia potest titulo liberalitatis, aut gratiæ præsumere sibi oblatum, & ita gratificari tenebitur, rem sic sibi factam, sed non ex iustitia retribuere, & ex stricto debito, sicut si aliquis in vinea laborat non ex condito aut pacto, non teneor illi ex iustitia mercedem reddere, quia non convenit mecum licet labor ille valeat de se ipsum quo d reddi ei deberet si pacisceretur. Vnde & in hoc convenit nobiscum Suarez, quod pacto non interveniente non oritur in Deo titulus strictæ iustitiæ, sed solum providentiæ generalis, qua unicuique tenetur dare quod eius natura exigit, non iure obligationis, sed dispositione sapientiæ, & regulatione providentiæ dantis unicuique quod suum est. Cæterum nec sufficit sola promissio, & pactum Dei ad inducendum hoc ius iustitiæ, nisi cadat tale pactum super materiam habilem, & proportionatam ad tale ius statuendum, quod strictam obligationem non inducit, nisi vis obligationis fundetur super aliquo dato aut facto quod in alterius potestate non est. Nam etiam potest facere Deus promissionem aut pactum faciendi aliquid, quod tamen ex iustitia nullo modo facit, sed ex fidelitate, vel gratia, sicut fecit pactum & promissionem, & fœdus cum Abraham de incarnatione Filij sui quod ante promiserat per Prophetas, ut ait Apostolus, & Abraham dictæ sunt promissiones huius mysterij, & tamen non ex iustitia datus est Christus, sed ex amore & gratia. Et promittit Deus exaudire orationes nostras, sicut dicitur Psal. 90. *Innocabit me & ego exaudiam eum*; & Ioan. 14. *Petite & accipietis*; nec tam ex iustitia Deus implet petitiones nostras, sed ex misericordia sua & fidelitate promissi. Non ergo sufficit quæcumque promissio, & pactum ad inducendum ius commutatum strictæ iustitiæ, sed debet cadere pactum super talem materiam, quod ex eius communicatione seu actione nascatur in altero obligatio, & in me ius contra illum, ita quod si non faciat violet ius. Quod si dicas sufficere pactum Dei in materia, quæ æqualitatem respiciat inter duo: si enim receditur ab æqualitate receditur à iustitia: non vero requiritur, quod ex communicatione & actione unius inducatur obligatio in alterum. Contra est, quia potest Deus promittere dare oranti tantum quantum valeat oratio, & non plus; & tamen non hoc reddit ex iustitia, ita ut sit iniustus si non reddat.

10 Minor verò syllogismi facti prob. quia quæcumque actio vel communicatio creaturæ, ita est Dei, & sub dominio eius, sicut quæcumque res creata, & multo magis quam sub dominio proprio

creaturæ, & quantumcumque Deus donet illam creaturæ, non amittit dominium illius summum quod habet, neque hoc potest Deus abdicare à se, quia non potest manere creatura, quin Deus iugiter in eam influat, & consequenter titulum dominij supremi in eam retineat, & similiter quantumcumque creatura eam actionem, vel rem donet, & offerat Deo, nihil novi dominij & iuris in eo causat, ut habeat titulum iustitiæ retribuendi ei, quia ipsummet offerre, & dare, & ipsa actio creaturæ à Deo originatur, & ex influxu eius pendet, & aliquid ipsius est. Si ergo quidquid dat aut facit creatura, est aliquid Dei & sub eius dominio, & ipsa actio dandi, & faciendi ab ipso est, quantumcumque faciat pactum, aut promissionem retribuendi, & dandi aliquid pro tali actione creaturæ, non oritur in ipso Deo aliquod ius, & debitum strictum dandi, vel retribuendi aliquid creaturæ. Pater consequentia, quia illud debitum seu obligatio est onus impositum Deo respectu creaturæ, & in hoc onere, seu obligatione vel tota, & adæquata eius ratio formalis oritur ex promissione & pacto Dei, vel oritur ex actione creaturæ erga ipsum; supponendo tamen pactum & promissionem, ut conditionem & applicationem requisitam. Si tota ratio formalis est ex ipso pacto & promissione Dei, solum ergo sibi ipsi obligatur, & ratione suæ fidelitatis, & veracitatis tenetur implere, eo quod cadit illa promissio super re aliæ sua, & super persona cuius totum esse, & actio, & bona, & quidquid est, Dei est. Et ita si Deus vult se obligare, & pacisci, est merè gratuitum respectu creaturæ, quia nihil accipit ab illa, sed totum illud est suum, & propter id quod est suum promittere, dare, aut retribuere aliquid, solum manet in vi promissionis obligatus, non in vi iustitiæ, id est, non in vi alicuius quod suum non sit, & sibi detur. Si verò ratio formalis illius tituli, & illius obligationis oritur ex ipsa actione creaturæ: ergo oneratur & obligatur Deus titulo iustitiæ ex aliquo quod aliæ suum est, quod repugnat, quia de illo quod meum est possum disponere ut placuerit quandiu meum est, & sub mea potestate, de illo autem quod debeo ex iustitia stricta non possum ad meum libitum disponere, sed iuxta alterius ius, quod in dominio supremo Dei ponere, nefas est: ergo ex acceptance eius quod meum est, & meum manet, & quod ut fiat, à me dimanare debet, non possum strictè obligari ad retribuendum alteri, magis quam à me ipso obligari possum; à me ipso autem solum ex fidelitate, non ex iustitia obligor. Et ad hoc servit exemplum de filio, & de seruo, à quorum actionibus non potest induci ius strictum in patre & domino. eo quod aliquid illius sunt: multo ergo minus à creatura in Creatorem.

Dices: Licet bona ista & actiones creaturæ sint ipsius Dei ut supremi Domini, tamen etiam sunt creaturæ, licet imperfectiori dominio: ergo capax est Deus alicuius stricti & rigorosi debiti, quia capax est ut hoc quod habet creatura offerat in obsequium eius sub illo dominio quo habetur à creatura; licet etiam sub alio habeatur à Deo, & præsertim quia intercedente pacto & promissione, potest Deus obligari obligatione orta ex tali pacto, licet sit materia super quam habet dominium, quia etiam illud habet creatura, licet inferiori modo, qua etiam ratione inter filium & patrem, servum & dominum, potest intercedere tale pactum, quod sit validum & inducat ius strictæ iustitiæ in vi contractus, quantum est ex natura rei, & seclusa lege humana aut civili, quæ reputat

illos, ut vnam personam: reuera enim distinctæ sunt, & pro hac parte capaces mutua illius obligationis, & eodem modo Deus & creatura; immò licet sint eadem persona, si habeat plures naturas, in quibus persona illa gerit vices plurium, intercedere potest iustitia, ut in Christo Domino erga Deum. Addo quòd sufficit ad rationem iustitiæ, quòd seruetur forma commutatiuæ iustitiæ ex parte ipsarum rerum, quia redditur tantum pro tanto secundum valorem rerum inter se, & inde potest acquiri homini ius proprium & strictum, & non solum moralis decentiæ ad obtinendum à Deo talem retributionem acceptante, & consentiente ipso per pactum, quidquid sit an Deus constituatur debitor simpliciter, vel non: id enim pertinet ad imperfectionem iustitiæ, non ad substantialem eius rationem.

Sed contra has responsiones instauratur argumentum.

12 Contra primam quidem, quia licet creatura habeat creatum dominium, & inferius ad dominium Dei, tamen ex hoc quòd totum hoc dominium tribuat Deo, acceptante, & consentiente Deo, non potest acquirere ius contra ipsum, nec in Deo inducere obligationem & debitum, quia non dat Deo aliquid quod de nouo habeat, vel nouo modo habeat, quia totum hoc quod dat creatura, & ipsamet actio dandi, & modus nouus dandi beneficium Dei est, & sub eius supremo dominio habet. Quod autem creatura habet dominio inferiori, non potest transferre in Deum, quia Deus non est capax dominij imperfecti, quale est in nobis, & dominium supremum, diuinum quod habet in nos, & in actiones, & bona nostra, non potest ei acquiri ex nobis: ergo nostri dominij oblatio & communicatio non dat aliquid Deo quod non sit suum, neque facit, ut nouo modo sit suum, quia illud quod potest dare Deo solum est sub nostro dominio imperfecto & creato, & sub hoc non potest à Deo haberi: ergo nos non transferimus aliquid in Deum ex vi nostri dominij, nec nostrum dominium aliquid conducit, ut Deus nouo modo, aut nouo titulo & iure nobis obligetur. Et dato quòd transferre possemus, & Deus esset capax nostri imperfecti & inferioris dominij, & hoc nouo titulo posset possidere, totum hoc ex Deo ipso dimanare debet, scilicet quòd nos transferamus in ipsum quod hoc imperfectum dominium habeamus, & quòd ei illud offeramus: ergo nihil ei offerimus, quod suum non sit, etiam quoad modum habendi de nouo. Si autem non damus aut communicamus illi aliquid quod fiat suum, nisi illo supremo dominio quod ipse habet, sic nihil illi offerimus, nisi quod suum est, & de quo facere potest quod voluerit: ergo ex vi illius donationis, oblationis aut communicationis nullum ius quod Deum strictè alliget, in vi iustitiæ fundare possumus, quia id quod damus suum est, & ipsam dare illi, beneficium eius est, & ab ipso prius descendit. Et in hoc stat tota vis Apostolici verbi: *Quis prior dedit illi, & retribuitur ei?* id est quis à se incipit dare ei aliquid, & non potius ab ipso accipit? Quod si accipit ab ipso, & quidquid est ipsius est quomodo in hoc dare & communicare ipsi, potest fundari obligatio Dei ad nos & debitum, ut retribuat? Ergo si obligatur, de suo est, non de nostro. Nullus autem de suo debitum sibi, & obligationem strictam creat, quæ iustitiæ commutatiuæ sit.

13 Quòd verò dicitur quòd intercedente pacto potest Deus obligari obligatione orta ex ipsa

promissione, & pacto Dei sicut inter patrem & filium, seruum & dominum posset intercedente pacto, & promissione oriri naturalis obligatio iustitiæ, si lege positua non prohiberetur, totum hoc non obstat, quia nos loquimur de filio & patre, domino & seruo, prout stante lege humana vnum est sub potestate, & dominio alterius, hoc enim stante repugnat induci strictum ius iustitiæ, quia est irrefragabile principium quod ius commutatum & strictum non potest induci ex communicatione vel actione circa id quod meum est, sed solum si detur mihi quod aliàs meum non erat, & inde nascatur debitum in me erga dantem mihi, ita quòd prior det ut ego retribuam seu debeam retribuere. Quod autem in filio & patre, seruo & domino iure humano introductum est ut reputentur vna persona ciuilitate, & totum quod serui est sit domini, & sic non possit inducere ius strictum secundum considerationem ciuilem, id totum in creatura, & Deo naturale, & intrinsecum est, quia creatura ita naturaliter est tota Dei, & totum quod agit aut communicat est beneficium Dei, & sub eius perfectissimo & summo dominio, ut quidquid inde agit, non aliud agat quàm Deo dare id quod eius est, & rem suam. Quis autem potest intelligere quòd ex actione seu communicatione eius quod meum est, & quod est in manu mea ad libitum sicut omnia sunt in manu Dei, possit alter in me inducere ius & debitum strictum retribuendi ei; ita ut lædatur eius ius, si non fecero? cum totum hoc nitatur in eo quod meum est, de quo licet mihi quod volo facere, non autem ligatus manere debeo iure alterius. Nec sufficit ad hoc pactum, seu promissio, quia hæc cadit super tali materia, scilicet quæ sit mea, & ex beneficio meo totaliter pendens, pactum me obligandi circa illam, in mea voluntate, aut fidelitate innititur, non in alterius onere & debito mihi iniecto, & sic non fundat ius commutatum, & strictæ iustitiæ alterius erga me, sed mei ad me.

14 Contra secundam vero solutionem facit, quia ad rationem iustitiæ commutatiuæ, non sufficit seruare formam & modum iustitiæ commutatiuæ ex parte rerum, ita quòd detur tantum pro tanto, constituendo æqualitatem in rebus, sed ulterius spectatur etiam debitum & ius personarum: nec enim ius quod essentialiter respicit iustitia commutatiua; & ex cuius violatione iniustitia committitur, potest versari circa res præcisè, & non tangere personas: personæ enim sunt quæ debito & obligatione iustitiæ grauantur, & tenentur res autem solum sunt materia huius debiti & obligationis. Pertinet autem ad iustitiam commutatiuam non solum facere æqualitatem in rebus, sed in ipsis obligationibus, & debitis personarum implendo obligationem vnius, & seruando illæsum ius alterius, quod totum pertinet ad personas. Licet autem res ipsæ inter se habeant valorem, & adæquationem, tamen non sufficit hoc ad constituendam iustitiam, & ius commutatum, sed requiruntur aliæ conditiones, sine quibus debitum hoc statui non potest, nempe quod non ita sit vtrumque sub dominio perfecto vnius partis; quòd liberè possit uti illo ut voluerit; & sic ex acceptione illius non oriatur sibi onus & debitum retribuendi strictum & rigorosum, sicut de illo loquimur in præsentia. Cum autem Deus tam ipsum quod ei offerimus seu damus, quàm id quod nobis tribui, sit omnino sub eius dominio & disponat de illo ut voluerit, licet inter se res ipsæ adæquationem seruent, non tamen debitum aliquod

aliquod ex tali communicatione & actione sibi inducitur. Sine debito autem in persona non constituitur iustitia commutativa, quia hæc non est in rebus, sed circa res, sed est in persona, siquidem ad voluntatem pertinet, eiusque actum reddit iustum, ex eo quod implet debitum suum. Vnde non sufficit in rebus fieri æqualitatem, si in personis non est debitum, & obligatio quæ iustitia ista adimpleat, eam enim sublatam, tollitur formalis, & specifica ratio talis iustitiæ; Saluatur tamen modus, seu forma iustitiæ ex parte rerum ipsarum, quasi effectus, quidam iustitiæ, quantum ad æqualitatem in rebus, quia iste modus non consistit nisi in adæquatione, & æqualitate rerum inter se; quia tamen hæc fit sine debito, & obligatione personæ orta ex actione alterius erga se, fit non ex iustitia rigorosa, sed ex diuina fidelitate, aut iustitia distributiva; aut alia virtute, quam in solutione argumentorum explicabimus.

Soluuntur argumenta.

15 Primò arguitur, quia in Deo datur vera & propria iustitia, & non metaphorica, non minùs quàm misericordia, & hæc iustitia exercetur erga homines sine debito & obligatione, quæ imperfectionem dicit, & seruat modum, formamque iustitiæ commutatiuæ: ergo non est ratio cur negetur Deo iustitia commutativa sublati imperfectionibus debiti, & obligationis ortæ ex actione creaturæ erga Deum. Maior prob. nam Deo passim Scriptura concedit attributū iustitiæ, officiūque iudicandi iustè, & reddendi unicuique quod suum est, quod non metaphoricè, sed cum omni proprietate Deus exercet: nec enim vlla imperfectio apparet in eo quod est iustitiā exercere, & tribuere unicuique quod suum est. Hoc autē significatur in primis in illo loco Pauli 2. ad Timoth. 4. *Supereſt mihi corona iustitiæ, quam reddet mihi Dominus in illa die iustus Iudex*, ad Hæbr. 6. *Non enim iniustus Deus ut obliuiscatur operis vestri*, Matth. 20. *Voca operarios, & redde illis mercedem*, Et iterum: *Nonne ex donario conuenisti mecū; tolle quod tuū est & vade*. Rom. 2. *Reddet unicuique secundum opera sua*. Et 1. ad Cor. 3. *Vnusquisque mercedem accipiet secundum suum laborem*. Et innumera alia loca sunt, in quibus explicatur iustitia Dei, & actus illius ex conuentione, & pacto Dei erga nos. Et per oppositum designatur Deus fore iniustus, si priuaret aliquem mercede sua, quod esse non posset si vera & stricta non intercederet iustitia, ita ut læderetur ius alterius & Deus esset iniustus si non faceret sic. Vnde dicit Aug. lib. 4. contra Iulianum c. 3. *Deus ipse, quod absit, erit iniustus, sed ad eius regnum verus non admittitur iustus*. Et lib. de natura, & gratia, c. 2. *Non est iniustus, Deus, ut iustos fraudet mercede iustitiæ*. Quod verò seruetur forma commutatiuæ iustitiæ asseritur à D. Th. 2. 2. q. 61. a 4 ad 1. Et constat, quia forma iustitiæ commutatiuæ est, ut tantum pro tanto recipiatur iuxta valorem rei, vel actionis. Hoc autem maximè Deus obseruat in retribuendis præmiis, vel pœnis iuxta illud Apocal. 18. *Quantum glorificauit se, & in deliciis fuit, tantum date illi tormentum & luctum*. Ergo ex hac parte non repugnat Deo iustitia commutativa & stricta.

Conf. hoc amplius, quia hæc iustitia propria & non metaphorica, quæ in Deo reperitur erga nos, eamque ipsi attribuit Scriptura, necessariò debet esse aliqua determinata species iustitiæ, fundata in promissione Dei: dicit enim Tridentinum sess. 6. cap. 16. quod *Vita æterna redditur tanquam merces, ex ipsius promissione, bonis ipsorum operibus, & meritis: hæc est enim illa corona iustitiæ, &c.* Sentit ergo Concilium quodd, posita promissione Dei, fundatur redditio iustitiæ in corona, & in mercede. Rursus

Ioan. à S. Thoma in 1. part. D. Thome.

ista iustitia non potest esse pars aliqua potentialis iustitiæ: ergo vera, & stricta iustitia. Antece. prob. quia si aliqua pars potentialis iustitiæ ellet, maximè gratitudo, aut fidelitas: reliquæ enim ut religio, obsequantia, & similes, hîc locum non habent neutra verò hîc sufficit, quia gratitudo fundatur in beneficio gratis alicui exhibito, Deus verò non est capax beneficij, aut obsequij sibi gratis exhibiti, quia est Dominus omnium rerum, & actionum nostrarum, quibus ei obsequi aut beneficium impendere possumus; & sic omne obsequium est ei debitum, nihil gratis datum, quia omnia Dei sunt, Psal. 49. *Non accipiam de domo tua vitulos, neque de gregibus tuis hircos: meus est enim orbis terræ, & plenitudo eius*. Ergo Deus non est capax rependendi aliquid per modum gratitudinis: imò gratitudo non fundatur in promissione, nec illam requirit, sed etiam si quis non promittat, tenetur gratitudinis vi ex sola acceptatione gratuiti obsequij. In præsentem autem loquimur de obligatione orta mediante promissione, ut loquitur Concilium. Et idè Vasquez qui ex gratitudine dicit Deum retribuere merita, dixit etiā posse sine promissione Dei mereri iustos de condigno vitam æternam, quia promissio non facit condignitatem, ut docet 1. 2. disp. 214. cap. 4. & 5. Fidelitas autem licet supponat promissionem, tamè obligatio ex illa orta, & in ea fundata solum est ad verificandum in reddendo id quod promittit, ratione solius veritatis, non ratione mercedis seu coronæ iustitiæ: Deus autem reddit iustis mercedem laborum suorum, & coronam iustitiæ, & quod suum est, dicente patre familias ad operarium, Matth. 20. *Nonne ex denario conuenisti meum? tolle quod tuum est, & vade*. Ergo datur in Deo iustitia vera & propria præter fidelitatem & gratitudinem, per quam reddit alicui id quod ex contractu, & conuentione paciscitur. Hæc autem est forma commutatiuæ iustitiæ, & non distributiue, quia distributiva non attendit ad pactum vel contractum, sed ad proportionem personarum, quibus distribuendum est: ergo datur iustitia commutativa in Deo.

Resp. aliquos, ut Vasquez & qui eum sequuntur, ut Alarcon ubi supra cap. 6. & 10. concedere in Deo esse propriam iustitiam, ut distinguitur à metaphorica, non tamen esse propriam, id est specialem, & strictam, qualis est illa quæ distinguitur à gratitudine, fidelitate, aliisque partibus potentialibus iustitiæ; istæ enim virtutes sunt propriæ quædam iustitiæ, non metaphoricè, licet specialis virtus iustitiæ non sint, sicut obedientia propriè est iustitia in subdito, & fidelitas, gratitudo, liberalitas, & aliæ similes, iustitia sunt etiam in superiori, eo quod omnes istæ virtutes conueniunt in hoc, quod est rectificare, & dirigere operationes erga alterum, non passiones proprias. Et virtutes moderantes operationes ad alterum non passiones, vocantur generali nomine iustitia, ut docet S. Thom. 1. 2. quest. 59. artic. 4. & 60. art. 2. Talis ergo iustitia propria, & non metaphorica in Deo est secundum quod exercet operationes erga alterum ex æquo & iusto, & secundum debitum morale, non tamen secundum quod iustitia est virtus specialis, quæ implet debitum legale, & rigorosum cum obligatione vnius partis erga aliam, vel distribuentis ad inferiores: utramque enim hanc speciem commutatiuæ, & distributiue iustitiæ Deo denegat Vasquez; & sic omnem iustitiam specialem tollit ab eo, & solum iustitiam pro partibus potentialibus iustitiæ, ei concedit; & de his intelligit loca allegata, & alia similia, quæ iustitiam attribuunt Deo, non metaphoricam, sed propriam, potentialem tamen circa

Y

debi

debitum morale, non specialem circa legale.

17 Nihilominus nos saluamus iustitiā in Deo propriā, ut opponitur metaphoricā, nō solum in virtutibus potētiālibus iustitię sed etiā in speciali iustitiā, licet nō in omni specie sua, sed solum in distributiua, ut dicemus *a. seq.* hoc enim modo saluat iustitiā in Deo D. Th. in 4. dist. 46. q. 1. a. 1. ad 1. quod *iustitia est in Deo secundum quod distributor est naturalis bonorum in omnibus creaturis.* Atque ita tam in speciali, & stricta iustitia, quā in virtutibus potētiālibus eius illā regulā attēdimus quod virtutes quę respiciunt, operationes ad alterū cū obligatione, & debito orto ex actione, vel iure, aut superioritate alterius erga alterū Deo attribui nullo modo possūt. Et hac ratione negamus inter virtutes potētiāles iustitię in Deo esse obedientiā religionē, obseruantīā, & alias similes, quę essentialiter important subiectiōē ex parte personę, & debitum, seu obligationem ortā ex iure, quod est in superiori erga inferiorē. Et similiter inter species iustitię specialis & strictę negamus cōmutatiuā, quę importat debitū in vna persona ortū ex iure quod alter habet ex sua actione contra ipsū; concedimus autem distributiua iustitiā, quę habet in superiori distribuyente debitū dandi unicuique iuxta suam proportionem, quod debitū non est ortū ex iure eorum, quibus distribuendū est, sed ex ipsa æquitate intrinseca & essentiali Dei, qui est summa omnium regula, ut *a. seq.* dicemus. Et eadē ratione est in ipso illa iustitia legalis, quā S. Th. docet architectonicē esse in Principe ad cōseruandū & prouidendū bono communi, non ut est ministerialiter in subditis ad obediendū legi. De qua iustitia agit S. Th. 2. 2. q. 57. a. 5. Et non dicimus hanc iustitiā esse ipsam Dei prouidentiam aut legem, seu prouidentiam regnatiuā, quā etiā legem appellauit S. Doctor 2. 2. q. 50. in titulo quęst. & articuli 1. nam prudentia, & lex pertinent ad intellectū, iustitia vero illa legalis architectonica ad voluntatem, ex qua tamen deriuatur lex illa, & prouidentia de omnibus. Denique est in Deo fidelitas, seu veritas, & alię similes virtutes potētiāles iustitię, quę ē superiori in inferiorem exerceri possunt. Et ratione omnium istarū iustitiarum dicitur Deus habere iustitiā propriē dictā, & si contrarium faceret, esset iniustus, iniustitia opposita vel distributiua, vel legali architectonica, vel fidelitati, aut aliis partibus potētiālibus iustitię. Vnde non sequitur: Deus esset iniustus, si non redderet iustis pręmium & mercedem: ergo habet iustitiā cōmutatiuā quā non potest violare; dicimus enim quod etiam esset iniustus, si violaret iustitiā distributiua, legalem, vel aliquā ex potētiālibus; quę in illo sunt, & hoc sufficit ut verificetur in ipso esse iustitiā, ut Scriptura, & Patres dicunt, & quod si oppositū faceret, esse iniustus.

18 Et cū instatur, quod Deus seruat formā iustitię cōmutatiuę tum in pręmiis, tum in pēnis distribuendis; ergo habet iustitiā cōmutatiuā. Negatur consequenter eam negat D. Th. qui modum iustitię cōmutatiuę tribuit Deo, & non ipsā iustitiā, ut constat ex locis suprà allegatis præsertim in 4. dist. 46. q. 1. a. 1. & 2. 2. q. 61. a. 4. ad 1. Quia modus, seu forma iustitię cōmutatiuę consideratur in adæquatione, & æqualitate ipsarū rerū inter se, quę præstatutur a Deo, quatenus facit quod detur tantum pro tanto. Iustitia autē cōmutatiua nō consistit in hoc quod est facere ut detur tantū pro tātō, sed in hoc quod est implere debitū, & onus dādi aut faciēdi tantū pro tātō, quia iustitia specialis respicit essentialiter ius & debitū personarū, nō solā rerū æqualitatē. Et ita remoto iure & debito, licet ponatur factiō & cōstitutio æqualitatis, nō est iustitia cōmutatiua, quia nō est ex debito orto ex iure alterius contra alterū, sed ex

debito sapientię, vel æquitatis, aut veritatis diuinę.

Ad Conf. Resp. dari in Deo iustitiā propriā, & non metaphoricā, nec solā iustitiā potētiāle, ut diximus, sed etiam specialem, licet non cōmutatiuā, sed distributiua, ut *seq. art.* dicemus. Vnde ad ea quę obiciuntur ad probādum reddi pręmia, & mercedem ex sola gratitudine vel fidelitate, nunc omittimus, & in *seq. articulo* discutiemus. Pro nunc sufficit dari in Deo iustitiā strictā distributiua, seruare tamen modum aliquem, & formā iustitię cōmutatiuę, tū in seruanda & constituenda æqualitate rerum inter se, ut detur tantum pro tanto, tum quia Deus reddit pręmium independentē a concursu plurium personarum, & consideratione maioris proportionis vnius præ alio in dignitate; sed etiam si esset vnus tantū, cui pręmium reddēdum esset, daretur a Deo solum attendendo ad proportionem eius cum pręmio, non ad maiorem proportionem cum aliis, & hoc est propriū iustitię cōmutatiuę, quantum ad id quod ex parte materię se tenet, & ex parte rerum quas respicit, sed non peruenit ad rationem iustitię cōmutatiuę, quia non respicit neque fundat debitum ex iure alterius contra alterum proueniens, & ex eo quod Deus aliquid accipiat a nobis. Quod autem promissione Dei reddatur merces, id pertinet ad debitū fidelitatis, quę est potētiālis pars iustitię. Et quod fiat conuentio & pactum Dei ad homines, & in eo fundetur ratio debiti, & iustitię, in primis id dicitur fieri per quādam metaphorā, quia, ut dicit S. Th. in 2. dist. 27. q. 1. art. 3. *Inuenitur quandoque a sanctis metaphoricē dictum, quod bonis operibus regnum calorū emittitur, in quantum Deus accipit opera nostra ut acceptans ea.* Deinde non fit pactum & promissio Dei cum homine, ut ex actione hominis oneretur, & obligetur Deus, quia talis actiō cū sit sub dominio Dei, & ex eius influxu proueniens, non potest ex ipsa onerari neque nasci obligatio quantumcumque pactum vel promissionem illi adiungat, sed solum pactum, & promissio deseruit ad hoc, ut Deus manifestet hominibus se illa opera, licet sint sub suo dominio, & sibi debita, non acceptare solum eo titulo debiti, sed ea etiam ratione, ut remuneret, cū posset non remunerare; & sic quia vult, non quia obligatur, seruat in eorum remuneratione modum iustitię cōmutatiuę: obligatur autem solum ex fidelitate, & ex iustitia distributiua, essetque iniustus si non redderet mercedem non læsione iuris, sed violatione suę veritatis, & æquę distributionis. Nam etiam in pēnis & suppliciis infligendis seruat Deus modum iustitię cōmutatiuę, ut tantum detur de tormentis, quantum fuit in peccato de deliciis nec tamen intercedit ibi pactum, sed sola iustitia distributiua secundum legem quā ponit ipsemet Deus qui est summa regula. Non ergo promissio aut pactum Dei ponit vel tollit hanc iustitiā in ipso.

19 Secundō arguit quia probabilius est Christum Dominum in satisfactione pro nobis ex iustitia cōmutatiua reddidisse Deo iustum & rigorosum pretiū redemptionis; ergo etiā ex parte Dei debet dari iustitia cōmutatiua in ordine ad Christum. Paret consequentiā, quia iustitia cōmutatiua debet esse mutua ex parte vtriusque extremi; ergo si saluatur in vno, etiam debet cōcedi in alio: nec enim potest intelligi quod Christus correspōdeat Deo per iustitiā cōmutatiuā, & Deus illi per distributiua vel legalē; ergo absolute nō est neganda iustitia cōmutatiua in Deo.

Conf. quia nulla est imperfectio in iustitia cōmutatiua ita essentialis, quin possit ab ea purificari, & sic seclusis imperfectionibus attribui Deo; ergo non est ei deneganda. Antec. prob. quia ex parte personę cōmutantis, non est necesse priuari dominio suo,

ut alteri tribuat, sed solum dare illi ius suum & dominium quod in suo ordine ei competit, & ita sufficit, quod Deus det homini dominium humanum & creatum, retinendo de eadem re ius supremum & diuinum: & si militer cum recipit ab homine aliquid, non est necesse quod ab eo recipiat aliquod dominium nouum de aliqua re, sed sufficit quod aliquid obsequium ei fiat, vel honor tribuatur a creatura; nec oportet quod aliquid utilitatis ei accrescat, quia ille qui soluit debitum, aut restituit, non accipit inde utilitatem, & tamen exercet actum iustitiae commutativae: non ergo requiritur ad tale exercitium quod fiat in utilitatem propriam. Nec denique requiritur obligatio orta ex iure vel actione aliena, quia sufficit Deum obligari ex sua naturali rectitudine vel promissione & pacto voluntarie facto: ergo separari possunt istae imperfectiones a iustitia commutativa. Certè Deus reddit supplicia pro peccatis secundum iustitiam, quia dum punit peccatores non exercet misericordiam, sed iustitiam, & hoc facit ex debito & obligatione supremi iudicis, non interveniente pacto aut promissione de dandis suppliciis. Cur ergo idem non poterit currere in retribuendis bonis?

20 Resp. non disputando nunc difficultatem illam, ex qua iustitia processerit satisfactio Christi Dominus enim pertinet ad q. 1. 3. p. & admittendo quod Christus fecerit satisfactionem rigorosam & exactam pro peccato, consequenter quod talis satisfactio processerit ex iustitia rigorosa & stricta ex parte Christi, quae est iustitia commutativa, inclinans ad reddendum aequale mercedem pro debito & pro iniuria, quod debitum & obligatio nascitur in Christo ex ipso iure diuino quod habet contra peccatorem vel fideiussorem peccatoris, qui fuit Christus, ut sibi satisfiat. Vnde in Christo iustitia commutativa habet omnes conditiones requisitas ut in ipso sit, quia & ponit obligationem, debitumque rigorosum satisfaciendi in eius persona, ut homo est, & inclinationem ut reddat aequivalens ex parte pretij reddendi. Non autem de essentia iustitiae commutativae, quae est in una persona, quod inducat obligationem actiue in altera, sed solum sufficit quod in illo in quo subiectum est iustitia commutativa, eius obligatio & debitum oriatur ex iure alterius contra se. Quod autem faciat etiam actiue & mutuo quod in altero oriatur debitum & obligatio, non est per se de ratione iustitiae commutativae. Et sic ex parte Christi est formalis & stricta iustitia commutativa erga Deum: sed ex parte Dei non correspondet illi iustitia commutativa formalis, quia Deus non est capax obligationis & debiti formalis, id est debiti quod oritur ex iure alieno & actione alterius erga Deum: sed tamen correspondet ei aliquid aliud & eminentius, scilicet illa iustitia distributiva, vel legalis architectonica, qualis est in Principe, quae eminenter in Deo est commutativa quatenus servare potest modum formaeque iustitiae commutativae respiciens aequalitatem ex parte rerum, & tantum pro tanto, licet non habeat obligationem & debitum rigorosum, huic enim obstat supremum dominium Dei circa omnes actiones, & res aliorum, & sic ex ipsa actione alterius non potest in eo nasci debitum. Sine debito autem rigoroso non nascitur ius rigorosum & commutativum quod est specificas iustitiae commutativae.

21 Ad Conf. Resp. ex dictis non posse purificari iustitiam commutativam ab imperfectione debiti, & obligationis ortae ex actione alterius erga se: in hoc enim consistit ius commutativum: sine iure autem commutativo non subsistit iustitia commutativa, quia illud est eius obiectum formale; & sine debito legali & rigoroso deficit iustitia specialis, & est solum aliqua potentialis pars iustitiae. Fatemur tamen, materiam iustitiae commutativae non restringi ad sola bo-

na temporalia & utilia, sicut in nobis sunt, & nomine pecuniae solent comprehendere, sed etiam versari posse circa res spirituales secundum quod valorae estimationemque recipiunt, ut cultus, obsequium, honor, & similia, quae remunerationem exigunt, & aequalitatem habere possunt. Non claudicat ex hac parte iustitia in Deo, sed deficit ratione debiti aut iuris ut fundati in actione & commutatione alterius erga Deum, quod est formalissimum in hac iustitia, quia pertinet ad ius commutativum, quod est eius obiectum specificativum. Et cum dicitur quod sufficit debitum ortum ex naturali rectitudine vel promissione voluntatis. Resp. illud non esse debitum iuris commutativi, sed alterius obligationis & virtutis. Ius siquidem commutativum seu obligatio, nascitur ex ipsa actione, seu commutationibus aut communicationibus partium proximè & formaliter: a natura autem solum radicaliter & remotè, quia naturale ius dicitur: ut si quis mihi aliquid tribuat titulo oneroso, ei retribuam, nec possum ego onerari ex actione alterius, si illa actio, & id quod mihi dat, sit meum, & dispositioni meae subiectum, & ideo illud excludit Apostolus a Deo formalissime illis verbis saepius repetitis: *Quis prior dedit illi, & retribuetur ei?* Si autem hoc ius solum fundetur naturali rectitudine, aut promissione voluntaria, erit ius naturale, vel fidelitatis, non commutativum seu iustitiae specialis, quia per promissionem praecise solum resultat obligatio reddendi promissionem veram, quod est adimplere illam. Naturalis autem rectitudo obligat ex ipsa ratione naturae, non ex onere actionis alterius erga me; & sic pertinebit non ad ius commutativum quod ex ipsis commutationibus & actionibus personarum inter se oritur, sed ad ius naturale, & ex ipsa summa veritate & aequitate Dei, quae omnia ordinatè vult esse ex propria naturae suae aequitate, non ex obligatione erga alterum, & orta ex altero. Pactum autem etsi fiat a Deo, tamen quia cadit super materiam tale, scilicet ex qua non potest ipse onerari & obligari, quia totum illud est sub eius summo dominio, & a beneficio suo praestatur creaturae, ideo ex actione creaturae erga Deum nulla obligatio & debitum nascitur in Deo, nullum ius in creatura erga Deum quia totum illud Dei est, & a Deo nascitur. Et sic est incapax illius specialis iustitiae, quae pro formali obiecto habet ius commutativum & fundatur super actionibus ipsis partium, quibus ad invicem obligatur: Nec refert quod creatura licet nihil utilitatis Deo tribuat, tribuit tamen honorem & obsequium: nam hoc obsequium & honor mille modis debetur Deo titulo creationis, & esse quod censerat Deus, & ipsamet actio obsequendi & honorandi ex Dei influxu est. In summa: sicut non potest corpus obligare animam in actionibus vitalibus quas exercet, quia ab ipsa anima oriuntur, multo minus creatura Deum, quia omnes actiones eius ab ipso oriuntur, ut a primo principio, & prima radice omnium: *in ipso enim vivimus, movemur, & sumus.* Quis ergo actione sua potest ei debitum & obligationem iniungere & fundare ius commutativum, si omnia ista ab eo sunt & sub perfecto & summo eius dominio? atque adeo potest illis uti liberè ut voluerit, tanquam suis: non ergo illis potest obligari & onerari, quia qui obligatur, non potest uti ut voluerit, sed iuxta obligationem suam, aliàs violat ius alterius. Quod autem in suppliciis infligendis iustitiam observet sine aliqua promissione interveniente, aut pacto, non est mirum: id enim facit ex iustitia distributiva, & suprema providentia sua, quae decernit poenam delictis iuxta delictorum mensuram, neque ad hoc indiget pacto, quia ex natura rei debetur culpae non remissa supplicium. In bonis autem operibus, quia multis titulis debentur, & a Deo acceptari possunt, necessarium est pactum ut determinetur a Deo titulus acceptandi illa ad remunerandum.

nam tali præmio quod ipsi conforme, & adæquatum est, vt *seq. art.* dicitur.

Ultimò arguit, quia in præmiandis bonis operibus iustorū inuenitur sufficiens ratio ad fundandū debitū iustitiæ distributiue, quia hæc datur in Deo, vt D. Th. fatetur, & nos dicemus *seq. art.* ergo etiā datur fundamentum ad admittendum iustitiam cōmutatiuā, semotis imperfectionibus dati, & accepti quod transferat dominium in Deum, & in eo oriri faciat debitū seu obligationem ex vi iuris alterius. Conseq. prob. nam in primis iustitia distributiva est species strictæ & specialis iustitiæ, & inducit debitū seu obligationem in distribuyente, vt iuxta proportionem dignitatis meritorū distribuat. Ex hac ergo parte si non repugnat debitum, & obligatio in distribuendo, cur repugnabit in commutando? Ex alia autem parte conditiones requisitæ ad iustitiam cōmutatiuam, & distinguentes a distributiva, Deo non repugnant. Sunt autem tres. Prima, quod seruetur, æqualitas iuris inter rem, & rem, datum & acceptū. Secunda, quod interueniat commutatio seu communicatio aliqua dati, & accepti inter partes Tertia, quod resulet debitum, & obligatio in vna parte ex actione & iure alterius interueniente pacto. Prima, Deo non repugnat, quia Deus retribuit meritis præmium æquiualens & commensuratum eis, & tantum pro tanto: ergo facit æqualitatem inter rem & rem. Secunda, inuenitur, quia inter meritum, & præmium, inter satisfactionem, & remissionem inuenitur commutatio quædam, licet non rerum corporalium, sed spiritualium: ergo ex hac parte nō deest commutatio. Tertia denique datur quia interueniēte pacto Dei, & promisso, Deus redditur debitor ex iustitia, ita quod id quod reddit, reddat alteri tanquam suum, & debitum illi, iuxta illud Matth. 20. *Nonne ex denario conuenisti mecum? tolle quod tuum est, & vade.* Si ergo conuentio & pactum facit vt id quod alteri reddit, sit suum, etiam facit, vt ex iustitia reddatur, quia iustitia solum petit vt reddat unicuique suum.

Conf. quia licet inter homines & Deum non possit esse datum, & acceptum ea proprietate, qua inter homines, in quibus datum transfert in alterum dominium quod non habebat, & sic inducit obligationem, tamen potest deferri aliquid cui correspondeat & commensuretur aliquid sibi æquale & debitum, sicut deferimus Deo obsequium, & cultum & seruitutem, cui correspondet æstimatio, & laus Dei, quia tunc erit laus unicuique à Deo: ergo sufficienter saluatur materia iustitiæ, remotis imperfectionibus, quas habet in nobis.

23 Resp. negando cōsequentiam. Et ad primam probationem dicitur longè differre inter debitum iustitiæ distributiue, & commutatiue, vt dicemus *a. seq.* quia debitum, & obligatio commutatiue fundatur in iure quod alter acquirit contra me; unde requiritur quod prior det mihi, vt ex vi talis dati ergo ei retribuam. Si verò illud ipsum quod dat mihi, nascitur ex me, & est sub meo dominio & dispositione, etiā prout datur, quia beneficio meo dat illud, quomodo inde potest oriri stricta obligatio, vt ego ei retribuam? sed solum ex mea voluntate possum ei obligari, quod reducitur ad promissionem, & fidelitatē. At verò debitum distributiue non nascitur ex iure alterius erga distribuentē, aut ex actione circa ipsū, sed ex naturali rectitudine, & ipsa lege æquitaris, qua tenetur distributū cōmensurare præmia proportioni meritorū, & non secundum alios extrinsecos respectus qui non conducunt, ea dare. Quod debitū in Principe humano obligat sub lege ex ordinatione naturalis legis quæ est à Deo; in ipso verò Deo, quia non habet legem sibi imposita ab alio, nascitur ex eo

quod ipse est ipsa lex, & ipsa natura summæ rectitudinis, & regula omnium. Ad alteram probationem dicitur, illas tres cōditiones non reperiri simul in Deo. Nam prima reperitur quidem, quia facit æqualitatem inter res, idēque seruat pro hac parte, seu ex parte ipsius materiæ modū iustitiæ commutatiue non ex parte rationis formalis, hoc est iuris, & debiti. Secunda autē & tertia non reperiuntur vt requiritur ad rationē iuris cōmutatiui, & iustitiæ, quia datū, & acceptum inter Deum, & creaturas non est simpliciter, ita quod sit inductiuum iuris in creatura & bligationis in Deo: totum enim quod offerimus Deo, vel obsequium, honorem & cultum, omnia hæc damus vel offerimus accipiendo à Deo: *quæ enim accepimus de manu tua reddimus tibi*, & consequenter omnia quæ commutauimus seu offerimus Deo, damus ei sub ratione debiti ipsi Deo: ergo non vt causant debitum in eo, sed reddentis ei quod nos debemus, quia ab ipso habemus Et sic tale datum non est per viam commutationis, & inducentis ius aut obligationem in ipso, sed debitum nostrum reddentis, quia nulla est actio in qua non operemur vt serui, & vt ab ipso, & beneficio ipsius. Vnde deest etiam tertia conditio, quia debitum & obligatio in Deo non potest induci ex vi commutationis quasi actio ipsa & commutatio sit ratio fundans debitum in Deo. Quod verò interueniat pactum aut promissio Dei, nihil refert, quia si ipsa actio seu opus super quod cadit pactum aut promissio non est de se sufficiens ad inducendum ius, & obligationem in Deo, ita quod pactum, solum se habeat vt conditio, & explicatio ipsius vis obligandi, non confurgit iustum commutatum, quia non fundatur in ipso onere actionis seu commutationis erga alterum: Sed tale pactum seu promissio solum erit explicatio voluntatis obligandi se spontaneè, & ex gratia sua, non ex onere actionis erga se; & sic solum confurget debitum fidelitatis & decentiæ, nō Iustitiæ commutatiui, quantum est ex vi promissionis, & pacti. Nec obstat quod pactum facit id quod redditur alteri esse suum, quia facit suum iure promittentis, & spontanei pacti, non onere iustitiæ, & iure commutationis, seu actionis: potest enim fieri suum, etiam ex gratia, dono alterius.

Ad Conf. Resp. quod illud obsequium quod reddimus Deo, accipimus ab ipso; & sic licet habeat commensurationem ex parte rei cum re, quæ sibi datur in præmiū, non tamen ex parte iuris, & obligationis onerosæ, ita quod in Deo confurgat debitum ex vi talis dati, & talis obsequij ipso iure commutationis; & sic non facit iustum commutatum respectu personarum, licet seruetur modus commutationis ex parte æqualitatis in materia & rebus ipsis in quibus versatur pactum & actio.

ARTICVLVS IV.

An sit in Deo iustitia distributiva & vindicatiua.

AD idem punctum reuocatur ista difficultas atque præcedens, videlicet vt discutiamus, an in ipsa formali & intrinseca ratione & obiecto distributiue iustitiæ inueniatur aliquid imperfectionis; & sic non possit Deo tribui, an verò imperfectio quam apud nos habeat, non sit illi essentialis, & per se, sed possit ab illa purificari, & ita Deo attribui. Vnde tota huius difficultatis lux atque discussio pendet ex explicatione rationis formalis iustitiæ distributiue, eiusque differentiæ à cōmutatiua.

Quid præsupponendum.

Igitur circa explicandam formalem & essentialem rationem

rationem huius virtutis, & ius, seu debitum quod obsequatur, & in quo distinguitur à commutativa. Obsequendum est quod principalis differentia inter commutativam & distributivam iustitiam, est, tum in ipsa materia circa quam utraque versatur, tum in ratione debiti, seu iuris & obligationis, quæ in utraque resultat, & inde consequitur differentia inter personas quæ utramque iustitiam ministrant, & inter quas exercetur. Igitur materia circa quam versatur utraque iustitia materialiter potest esse eadem, formaliter autem diversa est, ut docet D. Th. 2. 2. q. 61. a. 1. Potest quidem materialiter esse eadem, quia de eisdem rebus potest disponere iustitia distributiva, & commutativa, v. g. circa pecunias, circa utensilia, circa honores, & iniurias, circa operas & labores: possunt enim hæc distribui à comuni ad particulares per modum præmij aut recompensationis, aut pænæ, & possunt etiā per actiones particulares inter se commutari, & ius ac debitum contrahere, sicut à Republica datur de communibus bonis militi laboranti pecunia, aut redditus, vel magistratus, & honores, & similiter potest per commutativam iustitiam dari alteri pecunia vel redditus pro aliquo quod mihi rependit, & in pretium laboris iuxta pactum quod cum illo facio. Itaque utraque iustitia circa externas istas operationes, quæ utuntur rebus materialibus, & ad usum humanum pertinentibus versatur. Formaliter autem consideratur materia utriusque iustitiæ diverso modo, quantum ad actiones seu respectus earum, quia una respicit distributiones iuxta singulorum merita, & proportionem ad præmia; alia respicit commutationes iuxta æqualitatem valoris rerum vel operationum inter se. Differt autem inter istos duos modos faciendi iustum seu æquivalens, quod primus constituit iustum in proportionibus, secundus in quantitate seu valore. Et prima adæquatio est respectiva & secundum relationem, secunda absoluta, secundum quantitatem vel qualitatem. Adæquatur enim duæ quantitates si tantam extensionem habeat una, quantam alia, vel tantus numerus sit hic, quantus ibi; Duæ autem qualitates adæquantur, si tantum valoris sit in ista quantum in illa, ut tantum ponderis perfectionis aut intensiois, &c. Et ideo vocatur hæc proportio seu adæquatio quantitatis arithmetica, quia fit secundum computationem numeri ad numerum, quantitatis ad quantitatem, ut si hoc valet centum, detur illi centum; arithmeticus enim considerat numerum. Adæquatio autem respectiva fit secundum convenientiam unius ad aliud, vel secundum magis & minus: quod enim convenit uni, non convenit alteri, & quod est magis aptum isti, non est illi, & quod magis excedit, magis ei debetur in eo in quo excedit, non in alio: quæ omnia secundum diversos respectus variatur, & ideo proportio seu adæquatio, quæ hoc modo fit, vocatur geometrica, quia fit secundum proportionem diversorum respectuum, qualem geometra considerat in diversis figuris & quantitativis. Sicut v. g. si Pater familias debet distribuere familiæ suæ vestes, non debet easdem dare toti familiæ, sed minoribus minores, & maioribus maiores, unicuique secundum proportionem; sic enim fit æqualitas respectiva & proportionalis, non absoluta. Et Rex ille qui dedit talenta servis suis, uni quinque, alij duo, alij unum, unicuique secundum propriam virtutem, distributionem fecit æqualem in proportionem, non æqualem absolute.

2. Secunda differentia, eaque præcipua sumitur ex parte debiti, seu iuris secundum quod utraque iustitia suam materiam respicit. Ut enim dicit S. Th. 2. 2. q. 61. a. 1. ad 5. *Iustitia distributiva & commutativa non solum distinguuntur secundum unum, & multa, sed secundum debiti rationem: alio enim modo debetur alicui* Ioan. à S. Thoma in 1. part. D. Thomæ.

id quod est commune, alio modo id quod est proprium. Vbi insinuat differentiam debiti, seu iuris utriusque iustitiæ, quod ius, seu debitum distributivum est ex parte rei communis ut dandæ particularibus, non ut pretium alicuius operis aut valoris, sed ut præmiū vel ministerium dandum iuxta cuiusque dignitatem, meritum, vel proportionem ad tale munus, & respectu etiam ad alios, quibus etiam distribuendum est de illis bonis. Ius autem, seu debitum commutativum est ex parte rei propriæ alterius, vel actionis quæ mihi communicat, & iuxta valorem & pretium eius, retribuendum est. Et sic ius commutativum est ius proprietatis, seu dominij, aut alicuius æquivalentis; in vi cuius alter tenetur recompensare. Ius autem distributivum est ius fundatum in dignitate & proportionem ad bona communia, ut sibi iuxta talem proportionem distribuatur. Vnde debitum seu obligatio quæ confurgit in tali distribuyente, non oritur ex aliqua actione, vel communicatione particulari erga se, sed vel ex ipso iure boni communis, seu communis, & Reip. quæ postulat ut præmia & onera seu ministeria proportionate iuxta possibilitatem, & dignitatem cuiusque distribuatur, vel si res publica, & communitas non potest inducere ius contra distribuentem quia est totaliter illi subiecta, sicut universitas creaturarum Deo, oritur talis obligatio ex ipsa intrinseca æqualitate & naturali rectitudine Dei quæ de se postulat, ut in his iustitiam faciat & secundum cuiusque proportionem, quia hæc est æqualitas & commensuratio, quæ natura ipsa rerum & boni communis postulant, & Deus author naturæ & boni communis, hoc ipso quod sic naturam instituit sua sapientia & veritate & providentia, tenetur in vi naturalis rectitudinis sic instituentis illam proportionem quæ æqualitatem & iustum constituit, servare & sic *personarum acceptio non est apud Deum*, ut dicitur ad Ephes. 6. quia videlicet Deus causas discernit, non personas, ut Glossa ibi dicit. In principe autem creato, qui non est author naturæ, neque boni communis sicut Deus, sed dispensator & provisor positus ab ipsa communitate ut custodiat & prospiciat bono communi, talis obligatio iuste distribuendi oritur in ipso, tum ex iure quod habet Respublica erga ipsum, ut sibi provideat, & distribuat iuxta quod convenit Reip. & non secundum alios respectus non conducentes, tum ex Deo ipso qui legem ponit Principibus ministris suis ut administrent iustitiam, iuxta illud Sapient. 1. *Diligite iustitiam qui indicatis terram.* Et c. 6. *Quia cum essetis ministri regni illius, non recte indicastis, nec custodistis legem iustitiæ.*

Tertia denique differentia est circa personas inter quas versatur utraque iustitia. Primum quidem, quia in iustitia distributiva consideratur aliqua persona, ut communis, id est, ut distribuens bona communia, seu minister communitatis, alia ut particulares quibus distribuendum est. Secundum, quia ipsa æqualitas distributionis per se loquendo, respicit comparisonem proportionum, quæ inter plures personas concurrunt ad distributionem. Commutativa autem iustitia nullum horum per se respicit sed solum actionem vel rem quam aliquis impendit, ut alter ei teneatur valorem æqualem rependere. Vnde versatur iustitia commutativa inter particulares personas, id est, inter personas ut exercentes actiones particulares dandi, & recipiendi, in tantum quod si Respublica vel communitas, aut persona publica cum altero paciscatur aut contrahat, ut sibi aliquid impendat, ex iustitia commutativa tenetur rependere, quia in hoc vices personæ privatæ exequitur erga alterum, quia scilicet privatam actionem exercet, in quantum alterius laboris, vel actionem conducit aut accipit, & ratione illius ut actio privata illius est, vult se obligare & onerare

rare. Distributiva autem iustitia non attendit æqualitatem eius quod quis impendit, cum eo quod recipit, sed proportionem personæ, tum ad id quod sibi datur, tum comparatiuè ad alios, quibus etiam distribuitur, ut sicut illæ suo modo, & pro sua proportionem recipiunt; ita & iste pro suo modo, ut comparato ad alios. Vnde dicit S. Thom. 2.2. quæst. 6. art. 4. ad 2. quod si alicui qui communitati seruisset, retribueretur aliquid pro seruitio impenso, non esset hoc distributiva iustitia, sed commutativa: in distributiva enim iustitia non attenditur æqualitas eius quod quis accipit, ad id quod ipse impendit, sed ad id quod alius accipit secundum modum utriusque persone. Ecce quomodo requirit D. Tho. quod attendatur proportio personæ accipientis comparatiuè ad alias personas, etiam accipientes, ut videlicet quælibet recipiat iuxta modum suum & proportionem suam, & ita iustitia distributiva attendit plurimum proportionem ad accipiendam distributionem, ut unus tantum accipiat, quantum sua proportio exigit, & non æqualiter cum altero, sed proportionatè. Sed tamen etiam attendit distributiva iustitia proportionem in quælibet persona recipiente cum eo quod recipere debet, ut scilicet id recipiat quod sibi proportionatum, & conforme est: hoc enim maximè debet respicere distributor, ut ille cui aliquid datur, sit aptus, & proportionatus tali muneri aut oneri aut præmio. Et in hoc attenditur peccatum acceptationis personarum, quod est directè oppositum iustitiæ distributiue, quando videlicet in aliqua persona respiciuntur conditiones non facientes ad causam propter quam est dignus tali dono, ut docet S. Thom. ibi q. 63. art. 1. Ergo cum in hoc consistat peccatum contrarium iustitiæ distributiue, ipsa distributiva iustitia maximè respiciet conditiones facientes ad causam, & consequenter proportionantes ad præmium vel donum quod quis recipit, & non solum proportionantes comparatiuè ad proportionem aliarum personarum, quibus etiam distribuendum est. An verò essentialiter petat iustitia distributiva respicere plures personas, & earum proportionem comparatiuè ut distributiva iustitia sit, statim disquiretur: in hoc enim diuersitas opinionum esse potest.

Punctus difficultatis.

4 His suppositis, quæ omnino pertinent ad explicandam rationem formalem iustitiæ distributiue ut distinguitur à commutativa, restat videre, an ex parte suæ rationis formalis, & conditionum quas requirit tam ex parte materiæ, quàm debiti & iuris, & personarum, importet aliquam imperfectionem, ratione cuius Deo non possit attribui. Et quidem difficultas hæc potest tum à priori considerari ex ipsis conditionibus essentialiter requisitis & concurrentibus ad iustitiam distributivam, an imperfectionem importent, tum à posteriori ex effectibus, quia constat Deum retribuere præmia pro meritis, & supplicia pro peccatis, Rom. 2. In die iusti iudicii Dei, qui reddet unicuique secundum opera eius, iis quidem qui secundum patientiam boni operis, gloriam & honorem & incorruptionem querunt, vitam æternam: iis autem qui sunt ex contentione, & qui non acquiescunt veritati, ira & indignatio. Seruat ergo Deus distributionem in meritis & præmiis secundum iudicium iustitiæ, & tanquam supremus Iudex, & Dominus. Oportet ergo videre ex qua iustitia ista retributio, & distributio procedat, an ex iustitia stricta, & speciali, quæ sit propria species iustitiæ, qualis est distributiva,

an ex aliqua potentiā? Et si ex potentiā, quænam illa sit; Si ex speciali & stricta, vnde nam oriatur obligatio & debitum in Deo, an ex promissione & pacto suo, an ante promissionem; in hac enim iustitia ut oriatur debitum in distribuyente, nullo modo videtur conducere pactum vel promissio, cum ex ipsa natura, & ratione boni communis, & rectitudine naturali distribuentis sine alio pacto, oriatur debitum sic distribuendi iuxta æqualitatem proportionatam. Ex alia verò parte intercedere permissionem ad reddendam vitam æternam tanquam mercedem operibus bonis est expressus locus Concilij Trident. sessio. 6. c. 16. Quæ est ergo hæc iustitia, quæ promissionem requirit ad debitum inducendum, cum distributiva iustitia ex sua specie id non requirat.

Sententia.

In hac ergo re, Vasquez, ut videmus art. præcedenti, tenet in deo non dari iustitiam distributivam formaliter, & strictè dictam, ut probat tota disp. 86. in hac 1. p. & aliis locis art. præced. citatis. Sed quia in hac difficultate de iustitia distributiva non possumus præscindere à iustitia, seu debito reddendi præmia pro meritis, debetque assignari virtus à qua reddatur tale præmium, & quomodo ad id promissio Dei requiratur; idè sententia Vasquez in hac parte continet duo.

Primum est de ipsa iustitia distributiva Dei absolute sumpta prout respicit communiter omnes distributiones bonorum à Deo, tam rebus naturalibus, quàm actionibus moralibus, videlicet quod talis iustitia distributiva in Deo non est. Et præcipuum seu totale fundamentum est, quia Deus non distribuit bona & perfectiones creaturis, attendendo ad proportionem unius creaturæ cum alia, sed ad id tantum quod unicuique proprium est, ut aquæ frigus, igni calorem, homini discursum, &c. non attendendo ad comparisonem & proportionem comparatiuam creaturarum inter se; sicut qui multis creditoribus debita restituit, unicuique secundum quod debet, non exercet iustitiam distributivam, sed commutativam cum omnibus.

6 Secundum, quod sentit Vasquez circa virtutem ex qua Deus reddit præmia meritis, est quod ex gratitudine illa reddit, pœnas autem pro peccatis non reddi ex vindicativa iustitia, quæ est pars potentialis iustitiæ, de qua agit S. Thom. 2.2. q. 108. Ratione verò promissionis adiunctæ reddere Deum præmia ex fidelitate, qua seruat promissa, sed tamen condignitati meritorum, & retributioni præmiorum esse omnino accidentariam promissionem adiectam, & titulum fidelitatis: Nam etiam si Deus promissionem nullam faceret (liberè enim illam fecit) adhuc si ex gratia & charitate fierent opera bona, essent ab intrinseco digna æternæ vitæ, quia promissio extrinseca est, nec addit dignitatem operibus, sed supponit. Meritum autem sequitur necessariò ad bonitatem, dignitatemque operis. Vnde etiam ante promissionem dari potest in Deo effectus præmiandi illa; & hic affectus non est ex iustitia, quia iustitia respicit valorem operis, seu laborem, vnde id quod reddi pro tali valore est pretium, non præmium, pretium autem non redditur pro actione ut humana est, sed ut utilis, vel commoda mihi, quod etiam reddi potest pro opere & labore bruti, ut pro conductione equi, vel labore bouis arantis. Quare affectus in Deo reddendi præmium pro meritis, non pretium pro valore, non pertinet ad iustitiam, sed

sed ad gratitudinem, quæ recompensat obsequia grata; adiuncta autem promissione, reddet illa præmia ex fidelitate. Ita pluribus locis Vasq. loquitur præsertim 1.2.d.213.214.215.218. & 213. & 1.p.disp.8. & 91. præsertim cap.15. Quod vero attinet ad pœnas & supplicia, reddi illa non ex iustitia vindicatiua quæ nec est distributiua, nec commutatiua, docet in hac 1.p.disp.85. cap.4. num.27. & sequitur Alarcon ubi supra cap.12. Ex qua autem virtute tales pœnæ reddantur; Respondet Alarcon num.13. reddi ex iustitia legali; si ob commune bonum à Deo infligantur: si autem non attendatur commune bonum, sed hoc singulare obiectum, ut iste tantum soluat, quantum peccauit, docet inferri à Deo ex quodam particulari attributo, quod potest vocari iustitia vindicatiua, dummodo propriè vindicatiua non sit, quia nulum concernit damnum pro quo vindicet.

Sententiam Vasq. sequitur Lorca 2.tomo 1.2.disp.44. de gratia, quantum ad hoc quod Deus reddat præmium pro meritis ex gratitudine; sed disconuenit cum ipso, quia existimat fundari meritum de condigno apud Deum in pacto, & promissione Dei, quia licet ex promissione Dei solum videatur oriri obligatio fidelitati, præsertim si propter opera inæqualia promittatur præmium, tamen si propter æqualia opera præmium promittatur, non confurgit solius fidelitatis debitum, sed etiam gratitudinis, ut retribuatur. Fateretur etiam interuenire aliquem modum iustitiæ legalis vel legali similem in redditione præmij pro meritis.

Mens D.Thomæ.

Nihilominus D. Thom. sententia, & à nobis tenenda, docet in Deo dari iustitiam distributiua, in illis eni in locis ubi denegat Deo commutatiua, tribuit ei distributiua, ut præcedenti articulo vidimus, & specialiter videri potest allegato loco in 2. dist. 27. q.1. art. 3. & in 4. dist. 46. q.1. art. 1. ubi hoc expressè affirmat, & in 3. contra Gentiles cap. 93. circa finem. Dicit Vasquez disp.86. cap.2. D. Thomam in summa retractasse hanc sententiam de iustitia distributiua, refertque id ex Capreolo in 2. dist. 27. Et adducit pro se duo loca D. Thom. alterum ex 2.2.q.114. art. 1. ubi negat in nobis simpliciter esse meritum ad Deum, quia non est iustitia simpliciter, si autem esset distributiua, hoc non negaret. Alterum ex 2.2.q.61. art.4. ad 1. ubi docet in diuino iudicio seruari formam, modumque iustitiæ commutatiuæ, quod non staret si haberet iustitiam distributiua, eamque seruaret, modus enim commutatiuæ non comparatur cum modo distributiua, cum sint oppositi inter se; quod si sentiret D. Thom. in Deo esse iustitiā distributiua propriam, melius argumento respondisset in eo non inueniri iustum simpliciter, hoc est vniuersaliter, quia solum inuenitur tale iustum, id est, distributiuum, vel si etiā inueniretur commutatiuum, debebat concedere quod est ibi iustum simpliciter, quod negat. Quia verò in hac q.21. art.1. expressè videtur D. Thom. concedere in Deo iustitiam distributiua, dicit Vasq. quod D. Thom. non ita clarè loquitur, docens solum eam iustitiam distributiua esse in Deo, quia gubernator alicuius Reip. vel dispensator dat unicuique secundum suam dignitatem, ita quod sicut ordo alicuius multitudinis gubernatæ, monstrat in illa esse iustitiam, ita ordo vniuersi gubernati à Deo monstrat Dei iustitiam. Solum ergo videtur concedere Deo iustitiam quandam gubernatiua, quæ habet quandam similitudinem distributiua, non autem iustitia distributiua est.

Cæterum Vasquez minùs acuratè ponderauit locum istum D. Thom. in quo adèd expressè ponit in Deo iustitiam distributiua, quæ est species iustitiæ specialis, ut non nisi in consequentem modum loquendi in D. Thom. ponendo, negari possit. In aliis autem locis citatis ex 1.2. & ex 2.2. nullo modo iustitiam distributiua in Deo negat; & ita cum eam hic concesserit, & in aliis locis ex sententiariis, & 1. contra Gent. non est cur retractationem istam D. Thom. tribuamus. Igitur in hac q.21. art.1. incipit D. Thom. respondere difficultati sic: *Respondendo dicendum, quod duplex est species iustitiæ, una quæ consistit in mutua datione & acceptione, &c.* Vbi apertè loquitur de specie iustitiæ specialis, quia ponit hanc speciem esse commutatiua iustitiam quam Deo negat, hæc autem species est specialis iustitiæ: ergo quando dicit duplicem esse speciem iustitiæ, de iustitia speciali loquitur, quæ in hanc duplicem speciem diuiditur: ergo etiam altera species quam condiuidit iustitiæ commutatiua, est species iustitiæ specialis, dicit enim quod est duplex species iustitiæ: ergo si una earum est species iustitiæ specialis, etiam & altera. Hæc autem altera species quam condiuidit commutatiua, dicit esse distributiua, ut patet illis verbis; *Alia est quæ consistit in distribuendo, & dicitur distributiua iustitia, secundum quod aliquis gubernator vel dispensator dat unicuique secundum dignitatem suam.* Hic autem est proprius actus iustitiæ distributiua. Sive ergo dicatur illa iustitia esse gubernatiua, siue non, tamen illa de qua hic loquitur D. Thom. necessariò est distributiua iustitia, quæ est stricta, & specialis, quia loquitur de illa quæ est species iustitiæ condiuisa contra iustitiam commutatiua, iustitia autem quæ diuiditur in istas duas species est iustitia propriè, & specialiter dicta, ut docet ipse D. Thom. 2.2.q.61. art.1. in fine corp. Hanc autem distributiua quam condiuidit commutatiua, ut speciem iustitiæ, dicit esse in Deo, idque probat ex Dionys. 8. cap. de diuinis nominibus, ubi dicit, *in hoc esse veram Dei iustitiam, quod omnibus tribuit propria secundum cuiusque existentium dignitatem*: ergo veram & specialem iustitiam distributiua in Deo, ponit. Item in eadem q.21. art. 3. dicit quod *In quantum perfectiones damur à Deo creaturis secundum earum proportionem pertinet ad iustitiam.* Ergo admittit materiam distributiua, quæ est respicere proportionem personarum, ut iuxta illas aliquid detur. Addo expressissimum locum S. Thom. quem Vasquez non affert, nimirum super Dionysium de diuinis nominibus c.8. cit. lect. 4. ubi dicit, quod *Iustitia conuenit Deo secundum tres actus. Primum quidem secundum hoc quod est distribuere. Commutatiua enim iustitia in Deo locum non habet, sicut est in venditoribus, & emptoribus, quia ut dicitur. Rom.12. Quis prior dedit illi & retribuetur ei? sed attribuitur ei distributiua iustitia, quæ non obseruat equalitatem quantitatis, ut equalia omnibus det, sed equalitatem proportionis, ut det unicuique secundum quod dignum est.* Ita D. Thom.

Locus autem allatus à Vasquez ex 1.2. non officit, quia ibi D. Thom. ostendit in nobis nullum esse meritum ad Deum nisi ex præsuppositione ordinationis diuinæ, non ante ipsum: dat enim Deus nobis virtutem ad operandum, & id mere-mur ad quod Deus virtutem depurauit. Præsupposita autem diuina ordinatione, non negat D. Thom. non habere rationem meriti, & Deum fieri debitorem simpliciter, non nobis, sicut in iustitia commutatiua requiritur, sed sibi ipsi, in quantum est debitum ut sua ordinatio impleatur, ut dicie

illo loco ad 3. Hoc autem est formale, & proprium iustitiæ distributiue, ut postea ponderabimus. Unde ex hoc loco non sequitur quod eam negauerit Deo, sed quod posuerit, supposita tamen ordinatione voluntatis eius circa actiones nostras sine qua ad determinatam rationem meriti non destinantur. Locus autem ex 2. 2. q. 91. minus fauet, quia Deum seruare modum iustitiæ commutatiue in recompensatione præmiorum, & pœnarum D. Thom. affirmat illis ipsis locis in quibus etiam in sententia Vasquez affirmat dari in Deo iustitiam distributiua, scilicet in 27. dist. 2. & in 46. dist. 4. ut supra citauimus: ergo modus iustitiæ commutatiue non impedit distributiua iustitiam in Deo, quia stat bene quod sine debito commutationis, sed ex iure, & debito rectitudinis circa bonum commune distribuat unicuique secundum suam dignitatem, & tamen inter valorem operum, & quantitatem præmij seruet æqualitatem similem illi quæ fit inter duas res per commutationem; sicut etiam in Principe humano, dum exercet iustitiam distributiua non omnino purificatur à commutatiua, ex debito per modum contractus quod habet erga Rempub. & bonum commune. Et licet D. Thom. in in illo argumento intenderet probare, quod omne iustum simpliciter esset contra passum, quod videbatur facilius solui, dicendo in iustitia diuina solum inueniri iustum distributiua quod non est contrapassum, tamen quia etiam seruatur modus iustitiæ commutatiue, oportuit D. Th. ostendere, quod etiam si iste modus inueniatur, non tamen idè est contrapassum, quia hic modus seruatur ipso in diuino iudicio secundum quod recompensat præmia meritis, non prout accipit ab alio aliquid, vel reddit, quod est contra passum, id est actio contra passionem. Sententiam hanc D. Thom. sequuntur Authores quos citauimus *præced. art.* pro hac parte.

Fundamentum ex ratione: quomodo pactum Dei requiratur ad meritum.

- 10 Vnicum fundamentum sententiæ nostræ est, quia iustitia distributiua in sua ratione formali, & iure quod respicit, nullam dicit imperfectionem: ergo Deo non est deneganda. Antecedens non potest declarari nisi duplici medio. Primò, afferendo perfectiones quas dicit iustitia distributiua. Secundò, repellendo imperfectiones, quas illi attridunt oppositi Authores. Perfectiones quas habet iustitia distributiua sunt; Primò, quia pertinet ad superiorem erga inferiores: distribuit enim de communibus bonis unicuique iuxta proportionem suam; & sic non petit æquitatem inter personas, vel actiones earum; unde huc ad perfectionem, & superioritatem spectat. Unde dicitur Matth. 25. quod *dedit talenta unicuique iuxta virtutem suam.* Et ad hoc etiam pertinet munus iudicis, quod simpliciter perfectionem dicit, & passim id Scriptura Deo tribuitur quod sit omnium Iudex. Secundò, habet iustitia distributiua ius & debitum fundatum non in aliquo accepto vel dato ab alio, sed in ipsa naturali ratione boni communis, & cum Deus ipse sit author, & causatorius boni communis, idem est oriri illud debitum, & ius distribuendi æqualiter ex ipsa natura boni communis, atque oriri ex eo quod Deus sibi ipsi debet, quia debitum est impleri ordinationem suam, ut dicit S. Thom. *loco supra cit. 1. 2. q. 114. a. 1. ad 3.* Unde ad perfectionem istius iustitiæ pertinet, quod non funderetur, nec oriatur debitum, & ius ex eius aliquo extraneo iure, vel actione, sed

intra se habeat Deus sufficiens fundamentum, ut oriatur. Tertiò, est perfectio istius iustitiæ, quod versetur circa tale obiectum, nempe ad tribuendum unicuique iuxta proportionem suam, & dignitatem: hoc enim maximè æquum est, & consequenter maximè decet à Deo procedere, iuxta illud Psal. 16. *De vultu tuo iudicium meum prodeat, oculi tui videant æquitates.* Et Rom. 2. Matth. 16. *Qui reddet unicuique secundum opera sua.* Ista ergo proportionem ad æquitatem reducere, easque respicere ad perfectionem Dei pertinet, quia author est omnis perfectionis, & res sic esse distributas; & earum proportionem ad æqualitatem redactas, perfectio magna est, quia ordinatio magna est, & res esse debite ordinatas, magna perfectio est.

Imperfectiones autem quæ videntur inueniri in hac iustitia, sunt. Prima, debitum, & obligatio erga alterum extra se, quælibet enim iustitia stricta & specialis habet esse erga alterum sub ratione debiti; & obligationis; Deus autem nulli creaturæ extra se potest esse debitor, neque obligatus in vi alicuius iuris, quod habeatur erga Deum, neque ex parte boni communis, seu Reip. neque ex parte alicuius particularis, quia quælibet creatura, vel communitas creaturarum nullum ius potest fundare erga Deum aut obligationem, cum quidquid habeat, beneficio ipsius habeat. Quod si dicatur Deum constitui debitorem, non in vi iuris alieni, sed ordinationis suæ. Contra est, quia ista obligatio si totaliter oritur ex ipsa Dei ordinatione vel promissione, ad fidelitatem pertinebit, non ad iustitiam distributiua, quia hæc solum respicit dignitatem, & proportionem intrinsecā personarum, quibus distribuendum est, quocumque pacto vel promissione remota. Posita autem promissione vel erit obligatio, & debitum ex fidelitate, vel ex alterius actione, & communicatione, quod ad iustitiam commutatiua pertinebit. Secunda imperfectio est, quia per distributionem transfertur dominium alterum cui datur, non autem remanet penes ipsum qui distribuit: Si enim in se retinet quis dominium rei, quam distribuit, non est propriè distributio iustitiæ, sed gratiæ, & magis procedit Deus, ut beneficus, quam ut Iudex: constat autem Deum non posse à se abdicare dominium. Tertia imperfectio est quia iustitia distributiua alligatur ad plures personas quibus distribuit per se & ex vi formæ distributionis, eo quod iustitia distributiua propriè, & per se non respicit debitum & proportionem vnius personæ in ordine ad rem, quæ sibi datur, sed proportionem comparatiuè ad aliam, cui etiam distribuitur, ut videlicet detur mihi præ illo si sim dignior vel è contra si sim minòs dignus: seruat enim iustitia distributiua proportionem geometricam, quæ est proportio duorum vel plurium ad aliquid. Si autem solum attendatur in pluribus personis proportio, & debitum eorum ad rem quæ sibi danda est, hoc non extrahit tale debitum à iure commutatio, ut patet cum quis habet plures creditores, & omnibus soluit, id quod illis debet, licet non sint æqualia debita, non exercet in soluendo, seu restituendo munus distributiue iustitiæ, sed commutatiue. Deus autem cum diuersis creaturis in esse naturæ distribuit diuersas perfectiones, vel diuersis actionibus moralibus diuersa præmia seu supplicia, non distribuit illas secundum comparatiua proportionem vnius ad alterum, sed perinde ac si vni soli daret id quod si bi congruit, & aptum est: non enim dat aquæ frigiditatem comparatiuè ad calorem quem dat igni, vel

vel è contra; nec in supernaturalibus retribuit Petro tantam gloriam, quia Ioanni dat minorem, aut è contra, sed vnique dat quod sibi correspondet, perinde ac si vnicus homo esset, & non plures: non ergo in his bonis distribuendis seruat vim iustitiæ distributiue, sed solùm prouidentiam, & sapientiam suam ostendit in diuersis naturis seu rebus producendis, vnumquodque iuxta quod exigit.

Cæterùm imperfectiones istæ nullo modo sunt de intrinseca & formali ratione iustitiæ distributiue secundum se.

12 Non prima, quia ad iustitiam distributiua non pertinet, vt distributor sit debitor personis quibus distribuit, quasi ipsi constituentur creditores talis distributoris ex aliqua actione, vel iure proprietatis, seu quasi proprietatis erga ipsum vt de se constat, sed distributor si distribuat ex bonis cõmunibus, quæ non sunt propria sua, sed cõmunis, tunc tenebitur ipsi communitati, seu Reip. eique fiet debitor, quatenus dispensator eius est, vel ex contractu, seu quasi contractu cum republica cuius est custos, vel ex lege Dei sibi imposita vt custodiat iustitiam, & sic se habet Princeps humanus. Si autem distribuat ex bonis propriis, vel si ipsa bona communitatis sint sub dominio distribuentis, sicut omnia bona communia creaturarum sunt sub dominio Dei, & ab eo derivantur, tunc non poterit debitorum aliquod nasci in distribuite, nisi ex ordinatione sua, non solùm per modum simplicis promissionis, quæ solùm ex fidelitate impletur, sed ex promissione seu pacto oneroso, quatenus ordinat & dirigit ad ista præmia sub onere talium operum, seu actionum, & iuxta earum proportionem & dignitatem se obligat retribuere; sicut qui instituit certamen, & proponit præmia ex bonis propriis, & non ex bonis reip. talis ex libera ordinatione sua proponit præmia, & proponit illa certantibus, cum ex natura rei ad id non teneretur, quantumcumque aliquis faceret eas actiones, quibus certamen exercendum est; & tamen si ex ordinatione voluntatis suæ proponatur certamen, & præmia sub onere laboris, & certaminis proponantur, non redduntur ex promissione simplici, & ratione fidelitatis, sed ex iustitia distributiua, quæ tunc fundatur in naturali æquitate, & reatitudine sic postulante quòd ordo distributionis seruetur iuxta proportionem actionum; ex suppositione tamen quòd sub onere talium actionum fiat promissio, & propositio præmiorum. Sic ergo cum omnia bona quæ Deus distribuit sint propria ipsius, & sub dominio suo, non astringitur illorum distributioni tanquam custos aut dispensator ex contractu, aut quasi contractu cum ipsa communitate, & republica creaturarum quia tam tota communitas, quam quæcumque bona creata sub perfecto eius dominio sunt, sed astringitur ex ordinatione sua, quatenus proponit ea creaturis sub onere faciendi hoc vel illud opus meritorium; & sub hoc onere promittens & ordinans, corona illa quam dat, est corona iustitiæ, vt vocat eam Apostolus, non autem corona solius fidelitatis vel gratitudinis: non enim dicemus quòd Deus reddet iustis coronam gratitudinis, sed iustitiæ. Nec obstat, quòd ipsæ mer actiones meritorie, quibus creaturæ merentur istam coronam, etiam proueniunt ex Deo; & sic ipse dat præmia & dat merita, & cum coronat merita nostra, coronat dona sua, vt sæpe dicit Augustinus, cuius non solùm dicitur coronare nos in iustitia sed etiam in misericordia, & miserationibus, Psal. 102. Non, inquam, obstat, quia licet

Deus sit Dominus, & author omnium, nec minus meritorum quam præmiorum, tamen etiam eius est ordinare hoc ad illud, sicut vnquamquæ naturam ordinat ad fines suos, & dat illi proprietates, operationesque ad id conducentes, & proportionatas: sic ordinat & disponit, quòd hoc donum eius quòd est meritum, sit competens, & proportionatum ad illud donum, quòd est præmium & statuit hoc dari propter illud; qua ordinatione facta, ipse ex tali ordinatione sua fit debitor dandi vnum proportionatè, ad aliud; & non extra talem proportionem, quia hoc summa reatitudine sua sic ordinauit, licet omnia sint dona sua, sed tamen sic ordinata, & non alio modo data. Ad rationem autem iustitiæ distributiue quando fit distributio ex propriis bonis, & non ex bonis possessis à communitate, sed ipsa communitas, & bona eius sunt sub dominio distributoris, sufficit quòd obligatio & debitum sic distribuendi oriatur ex ipsa naturali reatitudine ordinationis propriæ, proponentis sub tali onere dona sua, & sub illa ordinatione dantis merita. Vnde ex hoc quòd Deus donet & merita & præmia, solùm sequitur quòd non sit debitor ipsis personis, ex aliqua earum actione, non tamen quòd non sit debitor ipsis ex ordinatione sua, qua sic ordinauit illa dona sua & sub tali onere ea præbet.

13 Secunda imperfectio non obstat, quia distributiua iustitia non petit abdicationem omnis dominij à distributore, sed largitionem alicuius dominij, ei cui dat prout est capax illius. Paret enim quòd Princeps potest seruare iustitiam distributiua largendo bona communia in feudum aut emphyteusim, aut etiam solùm donando vsum fructum, in quibus casibus retinet vel totum dominium rei, vel saltem directum, & concedit feudalem. Et in vniuersum in bonis quæ subditis dat Princeps, nunquam abdicat à se dominium iurisdictionis, quòd pertinet ad sua regalia. Non ergo est de essentiali ratione distributionis abdicatione omnis dominij à distributore, sed largitio alicuius. Sic Deus dando creaturis non abdicat à se dominium supremum, sed nostrum infimum, & creaturæ largitur, sicut fecit hominem vt præesset piscibus maris, & bestiis terræ, dominio scilicet humano, quòd est sub supremo Dei. Alioquin non posset Deus verè donare creaturis, si deberet abdicare à se dominium, quòd ergo sufficit ad donationem gratuitam propriè, & verè, sufficit ad distributionem iustitiæ, si hæc dona iuxta proportionem dignitatis dantur, quia tunc non simplici donatione dantur, sed onerosa, & sub ratione meriti. Si ergo est sufficiens dominium in creatura ad accipiendam donationem simplicem à Deo, etiam ad onerosam, non obstat quòd in vtraque non abdicat Deus à se dominium: Deum autem multa nobis donare, passim Scriptura docet, vt Ioan. 3. *Sic Deus dilexit mundum, vt filium suum vnigenitum daret*, Roman. 8. *Omnia nobis cum illo donauit*. 2. Petri. 1. *Per quem maxima, & pretiosa nobis promissa donauit*.

14 Tertia imperfectio seu impossibilitas ponendi in Deo distributiua iustitiam, in qua maiorem vim facit Vasquez, & qui eum sectantur, certè non video, quia ratione adaptetur Deo, aut quomodo probetur ita Deum in largiendo creaturis dona, & perfectiones, attendere ad debitum & proportionem vnus, quòd non etiam ad proportionem aliorum, ad quorum comparisonem distribuit vnique secundum suam virtutem, & dignitatem. Licet enim naturales proprietates, vel operationes dentur cuilibet creaturæ, attendendo

ad absolutam eius exigentiam secundum se, tamē aliquando etiam attenditur ad comparatiuam respectu proportionem quæ sunt in aliis, præsertim in distribuendis bonis, quæ super adiiciuntur aliquibus, ut in illo loco Matth. 25. *dedit uni quinque talenta, alij duo, alij unum, unicuique secundum propriam virtutem*, ubi manifestè fit distributio talentorum comparatiuè ad dignitatē, & proportionem diuerforum. Et eodem modo *reddet unicuique secundum opera sua*, ut dicitur Mat. 16. In hac enim redditione, & attenditur ad proportionem vniuscuiusque ad id quod sibi datur, & ad comparisonem cum aliis quibus distribuitur, ut videlicet non omnibus detur æquale, simpliciter, sed æquale proportionatè. Nec obstat exemplum de eo qui restituit pluribus creditoribus debita, & ipsa debita inæqualia sunt, v.g. vni centum, alij quinquaginta alij viginti; tunc enim illa inæqualitas in redditione debiti, non est ex iustitia distributiva, sed commutativa: dicimus enim inæqualitatem illam respici per accidens in restitutione & satisfactione creditorum; per se enim solum respicit, ut unicuique detur, quod ei debetur iure suæ proprietatis, & dominij, quia suū est, quidquid illud sit siue multū, siue parū, æquale vel inæquale: perinde enim restitueret æqualia, si tantum deberetur creditoribus. At verò in distributione diuina, iuxta cuiusque virtutē, & proportionē, nō attenditur æqualitas vel inæqualitas rei dandæ iuxta ius fundatū in dominio, & proprietate alterius in eius actione & cōmutatione erga Deū, sed in proportionē, & dignitate meriti quod nō importat ius in re, neque ius proprietatis, & dominij. Et ideo inæqualitas in his distributionibus est proportionalis, & fit secundum comparisonem dignitatis vnius erga alium, eo quod cuiuslibet ius est sola proportio quam habet iste præ alio, vel minùs quàm alter. Cum ergo Deus reddat non solum pretium pro valore, sed præmium pro meritis, in his qui non habent ius in re secundum proprietatem & dominium, sed ius ad rem, iuxta suæ dignitatis & virtutis proportionem, manifestum est quod non solum attendit Deus ibi exigentiam, & proportionem vnius tantum erga id quod sibi debetur, sed exigentiam comparatiuam proportionis huius cum altero: hoc enim inhibuitur est necessariò in distributione præmij, seu boni communis iuxta merita, quando fit inter plures: tunc enim cum non sit debitum iure aliquo proprietatis seu dominij quod vnusquisque habeat ad rem suam, sed solum propter dignitatem, & proportionem meritoriam, impossibile est adæquare quantum isti dari debeat & quantum illi, nisi faciendo comparisonem huius cum illo, quæ in ipso modo; distribuendi inter plures inuoluitur.

15 Præterea iustitia distributiva per se, & ab intrinseco solum respicit, quod reddatur aliquid alicui propter debitum dignitatis, & proportionis suæ, non propter ius proprietatis, seu ius in re quod habeat, sed propter ius ad rem. Quod autem res illa diuidatur actu & de facto inter multos, vel vni detur, per accidens est; ut patet cum præmium quod pluribus proponitur, seu ad quod plures concurrunt, est indiuisum, v.g. præbenda, aut beneficium, & tamen datur ex distributiva iustitia, immo etiam si plures oppositores de facto non sint, sed tantum vnus, attenditur ibi dignitas personæ ad illud premium, non tamen fit comparatio eius cum aliis, quia non sunt. Itaque non semper præmium diuidi debet secundum proportionem plurium, imò vnus tantum potest aliquando totum præmium acquirere. Vnde dicit Apostolus,

1. ad Corinth. 1. *Nescitis quod hi qui in stadio currunt, omnes quidem currunt, sed vnus accipit præmium?* Ergo non est de ratione distributivæ iustitiæ diuidere præmium actu, & de facto iuxta plurium proportionem, sed potest saluari respectu vnius. Sufficit quod virtualiter, & potestatiue respiciat plures, quia scilicet ita datur præmium isti, quod si essent plures, & posset diuidi, iuxta comparatiuam proportionem diuideretur, & supposito quod vni solum potest dari, saltem attenduntur aliorum proportionem ut minores & repellendæ à præmio, licet non ut præmiandæ, & saltem hoc modo fit comparatio inter plures proportionem. Et fit semper habetur attentio ad plures personas in iustitia distributiva: aut actu, aut virtute, & in potentia: De omni enim iustitia distributiva dicit S. Thom. 1. 2. quæst. 61. art. 4. ad 3. quod non attenditur in iustitia distributiva æqualitas eius quod quis accipit, ad id quod ipse impendit, sed ad id quod alius accipit iuxta modum vtriusque personæ. Cum ergo Deus aliquando det præmium, seu donum vni tantum, repulsis aliis, ut minùs dignis aut indignis, aliquando distribuat præmium inter plures iuxta quod vniuscuiusque meritum & proportio exigit, ex hac parte non est ei impossibilis distributiva iustitia.

Quod verò recurrit P. Alarcon *suprà cit. c. num. 16* 3. ad hoc quod Deus non potest ligari debito legali, sine quo vera, & specialis iustitia nequit subsistere, nec versatur circa bona temporalia, sine quibus nulla rigorosa iustitia datur, omnino ad rem non est. Nam respicere in iustitia bona temporalia, solum est de ratione iustitiæ humanæ, & politicæ, quæ contractus istos, & officia temporalia respicit, non de ratione iustitiæ secundum se, aliàs non posset exerceri inter Angelos, & inter homines quo ad honores, aut iura merè spiritualia: hoc enim omnino materiale est ad iustitiam. Dari autem debitum legale in Deo, id est, ex aliqua lege vel alieno iure ortum, est impossibile, sed datur debitum legale, hoc est quod sit ipsamet lex & sic ad formalem rationem distributivæ iustitiæ sufficit quod oriatur hoc debitum ex ipsa naturali rectitudine, & ordinatione distribuentis, volentis se obligare, non solum ratione fidelitatis, quæ oritur ex simplici promissione, & obligat ad verificandum promissum, sed ratione promissionis, & ordinationis onerosæ, quæ proponit, & promittit aliquid sub onere actionis magis vel minùs dignæ, & proportionem habentis comparabilem cum aliis, & tunc obligat iustitia distributiva ex ipsa naturali ratione, ut feruetur æqualitas proportionalis inter partes, ut iam *suprà* expensum est, & hoc est debitum legale distributivum non commutativum.

Ex his sequitur, quomodo necessaria sit ordinatio & pactum aliquid seu promissio ex parte Dei ad meritum, nec solum extrinsecè se habeat, ut putat Vasquez, de quo amplius tractabitur in 1. 2. in materia de merito ad q. 114. In præsentem solum dicimus, quod ordinatio, & pactum Dei non requiritur ad dandam dignitatem, & valorem operibus intrinsecum: pactum enim aliquid extrinsecum illi est, & supponit, non facit dignitatem operum, hæc enim ex gratia Dei prouenit, qua posita, per seipsam dignificat, & grata reddit ipsa opera, & intrinsecum valorem eis præbet, quem à pacto nullo modo habere possunt, etsi pactum eadit super opera dignificata à gratia, iam supponit valorem in eis intrinsecum, si autem non eadit super opera dignificata per gratiam, semper intrinsecè, & in suo valore manebunt inæqualia, &c.

& inferiora prämio: Pactum verò superueniens nō erit ad dandum prämium pro æquivalenti opere, sed pro inequali liquidē, inæquale esse supponitur: ergo non serviet tale pactū ad constituendum illam redditionē prämij in linea iusti, quia non in linea æqualis, sed inæqualis. Requiritur nihilominus pactum seu ordinatio Dei tanquam conditio ad meritum, & non ut dans intrinsicam dignitatem propter duo, alterum ex parte Dei, alterum ex parte nostra. Ex parte quidem Dei, ut reddatur debitor illius prämij pro talibus operibus: quod enim respectu Principis, & distributoris humani est lex imposita illi à Deo ut serviet iustitiam, est in Deo ordinatio sua, & voluntas: ipse enim sibi est regula, & lex, & operatur omnia secundum consilium voluntatis suæ, & sibi ipsi debitor est, non alteri. Et præterea, quia Deus est supremus Dominus, & univērsalissima causa, non solum rerum, sed & actionum nostrarum, & de omnibus facere potest quod voluerit sine vlla læsione iuris creaturarum. Vnde potest illas actiones & merita nostra accipere alio titulo quàm propter prämium, quia sua sunt titulo creationis, & summum dominium habet in illas, & ex influxu suo pendent, ut sint multo magis quàm à nostro. Vnde sicut ego possum de re mea disponere sicut voluerō, ita Deus potest disponere de illis operationibus meis sicut voluerit, & dare vel denegare illis prämia, sicut ego actionem meam possum tali recompensatione cumulare, vel omni recompensatione destituere. Ad hoc ergo ut actiones meas Deus velit illo determinato prämio honorare, & non alio titulo velle habere, requiritur ordinatio diuina ad tale prämium obdinendum de facto, quia licet illi sint digna secundum se, & ex vi valoris intrinseci, tamen de facto non obligant Deum ad utendum illis pro tali titulo, & ad reddendum tale prämium, sed alio titulo potest illa acceptare, ut ergo Deus determinatē se obliget ad tale prämium de facto reddendum pro talibus operibus, indiget ordinatione vel pacto suo, quia de se indifferens est ad hoc ut illa acceptet pro ratione sui supremi dominij, vel pro reddendo tali prämio, vel pro alio titulo. Ex parte quoque nostra requiritur illa acceptatio sub illo onere, quia posset homo dicere, quod gratis veller laborare, & opera illa facere, & cedere iuri suo: nemo enim prohibetur iuri suo cedere, sicut qui laborat in vinea nihil dicens aut petens à domino vineæ, non obligat de iustitia ad reddendam sibi mercedem, quia potest id sponte facere. Sed tamen si homo veller sic cedere iuri suo, & gratis Deum colere, hoc ipsum ex Dei inspiratione, & influxu ac directione haberet; unde tandem hoc totum reducitur in ordinationem Dei, quia est causa omnium; & sic oportet quod determinet propter quid velit unumquodque fieri. Aduertendum est tamen quod hoc pactum, seu ordinatio, non est necesse quod superueniat ipsi gratiæ data à Deo, sed in ipsa voluntate qua illam dat efficienter & ut causa eius inuoluitur ordinatio propter quam dat illam ad talem finem, & pro tali prämio ut de facto acquirere per talia opera.

Quid de gratitudine & vindicatione Dei?

18 Præter fundamentum hucusque explicatum, quod est à priori, restat etiā fundamētū quasi à posteriori, quia retributio seu distributio prämiorū fit à Deo per aliquam virtutem, seu attributum, & non est aliud quàm iustitia. Non fidelitas sola, non gratitudo, non vindicatiua pro malis. De fidelitate,

ostenditur, quia fidelitas de se solum, & ex vi suæ formalis rationis solum respicit veritatem, & impletionem eius, etiam si sit in simplici promisso. Prämium autem non solum redditur meritis ratione veritatis implendæ, sed ratione onerosæ actionis, quæ fit à me intuitu illius prämij, & cum ordine ad illud; licet illud onus non sit secundum aliquid iuris commutatum, quod est ius dominij, & proprietatis, sed secundum ius proportionis, & dignitatis, ut tale prämium reddatur proportionatē ad alios, qui etiam concurrunt ad tale prämium. Quare sola fidelitas non potest reddere hanc æqualitatem, & constituere iustum proportionale, quia ad ipsā solam non pertinet nisi reddere verum, & implere quod promissit, & quod dixit in vi veritatis semel dictæ, siue sit in materia gratuita, siue onerosa, non autem ad ipsam pertinet ius seruare, neque quod est ius dignitatis & proportionis ad aliquod prämium respicere, neque quod est dominij & proprietatis seu valoris ad aliquod pretium vel ad aliquam commutationem.

De gratitudine latè probat Suarez dicto lib. 12. 19 de gratia cap. 30. non esse in Deo, eo quod non respicit aliquid à creatura sibi factum tanquam beneficium, aut gratuitum obsequium, cum Deo fieri non possit beneficium à creatura, neque aliquod obsequium ita gratis, quod non magis sit debitum. Gratitudo autem propriè solum recompenfat beneficia, & id quod gratis fit erga aliquem ratione cuius gratiæ redduntur beneficienti ab eo qui recipit beneficium. Quare dicendum est quod gratitudo potest accipi dupliciter. Vno modo propriè, & strictè quatenus accipitur relatè ad beneficium seu obsequium, indebitum, & gratis factum, sicque fundat debitum morale seu honestatis, non rigorosum, & legale, quod est debitum agendi gratias & retribuendi beneficium nobis gratis impensum, quod ad decentiam virtutis spectat, non ad iuris obligationem & exigentiam. Alio modo potest considerari gratitudo non sub hac stricta, & propria ratione, ut fundat debitum recompensandi gratuitum beneficium, aut obsequium gratis impensum; nec ut respicit benefactorem, sed generali quadam ratione, qua voluntas ex propria ratione rectæ inclinationis complacet de bono, & est illi gratum, sicque debet illi affectum bonum, & ex bono affectu sequitur deberi bonum effectum, & promotionem talis boni ex ipsa decentia talis voluntatis. Primo modo non est in Deo gratitudo formaliter, nec si esset illa sufficeret ad retributionem prämiorum pro meritis iuxta æqualitatem proportionis. Secundo modo non est gratitudo de qua loquimur in præsentī, quæ est pars potentialis iustitiæ, neque ad illam spectat specialis hic actus retribuendi & distribuendi prämia iuxta proportionem meritorum.

Primum declaratur sic, quia gratitudo, ut est 20 recompensatiua beneficij gratuiti seu indebiti (& ad idē reducitur obsequium indebitum, quia in eo quod non debetur beneficium est) habet imperfectionem intrinsecè annexam, quæ Deo est impossibilis, scilicet quod possit à creatura recipere beneficium, aut aliquid indebitum rigorosè & propriè loquendo; quia omne bonum quod à creatura procedit, beneficium Dei est, & ab eius influxu libero & gratuito procedit, quia saltem habet esse in rerum natura, & hoc ex libera Dei voluntate est: Si ergo omne bonum, omnis actio, omne obsequium quod creatura dare potest beneficium Dei est, & ab eo procedit, implicat quod ipse Deus

Deus in aliquo sit beneficiatus à creatura, & creatura exhibeat ei beneficium, pro quo debeat Deus gratias agere: hoc enim magnam imperfectionem Deo inferret, & est omnino impossibile, considerando summam dependentiam creaturæ à Deo in omni re, & actione sua: in omnibus enim beneficium Dei est quidquid est, & in ipso vivimus, moveamur, & sumus, unde etiam quæ accipimus de manu eius, reddimus ei. Quomodo ergo beneficium ei præstare possumus, & indebitum obsequium, si quidquid ei præstamus, hoc ipso quod damus, ab eo accipimus; si ergo potest Deus accipere à nobis beneficium, potest & à se, quia ab eo est quidquid est.

21 Et conf. quia, ut dicit D. Thom. 2. 2. *quest. 106. art. 3. ad 4.* seruo in quantum exhibet opus servitutis non debetur gratitudo, quia ut adducit ex Seneca in 3. de Beneficiis. *Quandiu servus præstat quod à seruo exigitur, & ministeriū est, ubi plusquam à seruo necesse est, beneficium est.* Vbi enim in affectum amici transit, incipit vocari beneficium; & ideo etiam servis ultra debitum facientibus, gratiæ sunt habendæ. Sed creatura comparatur ad Deum cum tam stricta servitute, ut quidquid ei præstat, non sit plus, quam à seruo, sed totum sit ut ex Dei dominio, & voluntate fluens in ipsam, quia omnes operationes eius à Deo sunt, quod non ita contingit in seruo hominis, quia non habet omnes actiones ei subiectas, neque ab ipso ut à causa influente derivantur. Ergo, &c.

22 Dices: Neceritā Deus omnia sub præcepto iubet hominibus, & sic non omnia ex servitute reddit Deo, sed quædam sunt opera supererogationis ad quæ homo non tenetur: ergo respectu talium potest Deus habere gratitudinem, sicut Dominus seruo in his quæ facit gratis, & ut amicus. Et præfertim quia homo per gratiam non est servus, sed amicus, iuxta illud Christi Domini Ioan. 15. *Iam non dicam vos servos, sed amicos.* Ergo aliquid potest respicere Deus in homine, non tanquam in seruo, & consequenter, ut obiectum gratitudinis.

Sed contra hoc est, tum quia, ut benè vidit Suarez *ubi supra*, homo non solum meretur per opera supererogationis, sed etiam faciendo opera præcepta: ergo saltem ista quæ facit ex præcepto, non respicientur à Deo titulo gratitudinis, & tamè verè, & propriè meretur per illa, & Deus intuitu eorum dat præmia: ergo non ratione gratitudinis Deus omnia merita præmiat, sed secundum alteram virtutem, & illa erit iustitia distributiva. Deinde, quia aliud est opera supererogationis non esse sub præcepto, sed sub consilio propter suam perfectionem, aliud quando fiunt, non esse beneficia Dei, sed potius gratis, & indebitè impendi ab hominibus ipsi Deo. Primum est verum, sed secundum falsum, cum potius hæc opera quando fiunt ex maiori auxilio, & beneficio Dei fiant, & maius donum in illis faciendis accipit homo à Deo, & sic minus ei donat ex se, sed plus ex acceptis à Deo. Ut autem aliquis faciat ultra debitum servitutis, & mereatur gratias, requiritur quod id quod facit sit de suo, non ex beneficio alterius acceptum. Quod verò dicitur homines iustos esse amicos Dei, non servos: responderetur per gratiam tolli servitutem peccati, non servitutē subiectionis, & dependentiæ: nam etiam iusti servi Dei dicuntur & ita amicitia ad Deum non tollit subiectionem, sed addit consortium, & familiaritatem ad Deum, ideoque in eo magis oneratur homo beneficio diuino, quam ipse ei beneficium impendat, iuxta illud Bernardi *serm. 15. in Psalmum Qui habitat: Onerat*

cum exonerat Deus, onerat beneficiis, cum exonerat peccatis.

23 Quod verò etiam si poneretur in Deo gratitudo, non sufficeret ad faciendam distributionem præmiorum, inde deducitur, quia gratitudo respicit aliquid recompensandum quatenus titulo gratuito, & ultra debitum nobis aliquid impenditur; distributio autem præmij respicit aliquid factum titulo oneroso, & per modum laboris, aut certaminis, & quia sic ordinatur à Deo, ut hoc modo fiat; ideò merito retribuit Deus præmium, ut mercedem, & coronam intuitu illius operis ut habentis proportionem, & condignitatem cum præmio, non ut obsequium aut beneficium gratis impensum, quod solum respicit gratitudo, quia ut dicit D. Thom. *cit. quest. 106. a. 6. In beneficiente hoc præcipue commendabile videtur, quod gratis beneficium contulit ad quod non tenebatur; & ideò qui beneficium accepit, ad hoc obligatur, ut similiter aliquid gratis impendat. Non autem videtur gratis aliquid impendere, nisi excedat quantitatem accepti beneficii, quia quandiu recompensat mirus vel æquale, non videtur facere gratis.* Igitur motiuum retributionis in præmio pro meritis cum sit motiuum faciendi æquale iuxta dignitatem, & proportionem accipientis, opponitur motiuo gratitudinis, quod est impendere aliquid gratis propter gratis collatum. Vnde *solut. ad 3.* dicit ibi S. Thom. quod *sicut in iustitia, quæ est virtus cardinalis, attenditur æqualitas rerum, ita in gratitudine attenditur æqualitas voluntatum, ut scilicet sicut ex promptitudine voluntatis beneficium aliquis exhibuit, ad quod non tenebatur, ita etiam ille qui suscepit beneficium, aliquid supra debitum recompenset.* Gratitudo ergo solum reddit aliquid ex abundantia voluntatis, & motiuo decentiæ, iustitia autem ex alligatione ad debitum proportionis & dignitatis eius, qui debet recipere præmium, & sic gratitudo non respicit proportionem plurium personarum, sicut retributio præmiorum, sed solum beneficium sibi impensum.

24 Et ex hoc etiam deducitur quomodo gratitudo largè sumpta pro complacentia, & affectu grato erga bonum non sufficiat ad distributionem præmij secundum debitum iustitiæ, quia ille affectus, licet imitari videatur gratitudinem, in quantum procedit ex promptitudine animi, & ex abundantia voluntatis & affectus erga benefactorem; & inde potest deriuari acceptio gratitudinis, ut omne quod fit ex abundantia voluntatis & affectus largo modo dicatur gratitudo; tamen hoc non versatur specialiter circa constituendam, vel retribuendam æqualitatem, præmij attendendo ad proportionem, & dignitatem personarum, quod specialiter debet attendi in redditione præmiorum pro meritis. Et sic illa gratitudo largè sumpta non inducit motiuum speciale faciendi hanc æqualitatem, de quo solum loquitur in præsentia.

Quod attinet ad vindicationem seu iustitiam vindicativam, sciendum est ex D. Thom. 2. 2. *q. 108. art. 2.* quod ponitur quædam specialis virtus, quæ est pars potentialis iustitiæ ad propulsanda nocumenta, & iniurias, quæ vocatur vindicativa iustitia; & sicut gratitudo est virtus ad retribuendum bona pro beneficiis seu benefactis gratuitis, sic vindicatio est ad retribuendū pro malis, repellendo illa. Sed tamen ut ibi in *solutione ad 1.* docet S. Thom. punizio malorum secundum quod pertinet ad publicam iustitiam, est actus commutativæ iustitiæ, secundum autem quod pertinet ad immutationem alicuius personæ singularis, à qua iniuria propulsatur, pertinet ad virtutem vindicationis.

cationis. Itaque vindictiua, ut est pars potentialis iustitiæ pertinet ad defensionem personalem, & priuatam, quam quis facit vel per seipsum quando vis repellitur, vel recurrendo ad potestatem publicam quando non est defensio pure naturalis, sed iuridica. Vindictiua autem secundum quod est à iustitia publica quæ malefactores afficit pœnis, & peccata punit, sic pertinet ad iustitiam strictè dictam, quæ seruat formam iustitiæ commutatiuæ quatenus reddit tantum pro tanto in mensura pœnarum, licet in se sit distributiua quatenus respicit proportionem delinquentium & maiorem vel minorem dignitatem aut indignitatem personarum. Hinc ergo patet manifeste quod vindictio, ut est pars potentialis iustitiæ, non habet locum in Deo, sed solum illa quæ pertinet ad publicam iustitiam, quia Deus semper operatur ut vniuersalis causa, & author, & ut gubernator creaturæ, atque adeo secundum formam potestatis publicæ, quia potestatis supremæ, non ut se defendens à malis & propulsans illa; & sic si retribuit pœnas pro delictis, & mala propulsat, non est ex iustitia vindictiua, quæ est pars potentialis iustitiæ, quæ propulsat mala modo priuato, & ut id pertinet ad priuatam personam. Et sic non pertinet ad ipsam respicere proportionem & indignitates peccatorum ut distribuatur pœnæ, neque formam commutatiuæ iustitiæ in his attendere, ut tantum pro tanto reddatur, sed solum propulsare à se mala ut nocua, & se defendere siue per seipsum, siue per potestatem publicam, recurrendo ad illam quod Deo non conuenit. Solum ergo habet vindicare per modum iudicis, non per modum defendentis se, & ut priuata persona, quæ eis repellere malum ex quodam debito naturalis defensionis, vel ex decencia quadam virtutis, quatenus conuenit nobis damna vel iniurias nobis illatas repellere pro loco, & tempore. Deus autem tanquam Princeps summus eas repellit, & iuxta mensuram vnicuique dilecto à se taxat. Iuxta illud Apoc. 18. *Quantum glorificauit se, & in deliciis fuit, tantum date illi tormentum & luctum*: Ergo modo legali punit, id est, iuxta taxam legis, & sic ex iustitia publica quæ est propria & stricta.

25 Dices: Non punit Deus peccata ex debito legali, sed solum ex quadam decencia morali, quia potest liberè non punire, sed indulgere: constat enim quod plures peccatores non punit, sed eis indulget: ergo non operatur ex debito rigoroso, sed ex decencia quadam morali, quia decet Deum fontes punire.

Cōf. quia vindictiua, quæ est inter partes potestiales iustitiæ, propulsat damnum & iniuriam sibi illatam; Deo autem nullum damnum inferitur ab homine quod debeat propulsare, & cum alias propriam iniuriam possit quis remittere, & indulgere, non exercet strictam iustitiam & secundum debitum legale in hac vindicatione.

Resp. quod de facto non facit Deus remissionem peccatorum sine plena & rigorosa satisfactione, quia gratia quam dat, est per Christum, & consequenter per satisfactionem plenam. Itaque aut punit eterniter pœna à se taxata, aut remittit ex satisfactione fidei iustis qui est Christus. Sed dato quod Deus sine ulla satisfactione indulgeret peccata, sicut potest de potentia absoluta, dicimus quod nihilominus quando punit, ex iustitia & debito legali punit, quia iuxta taxatam pœnam à lege iustam quam ipse Deus statuit, pro mensura enim peccati est & plagarum modus Deut. 24. & Apoc. 18. *Quantum glorificauit se, &c.* Et hoc sufficit ut dicatur ex æqualitate iustitiæ, & iuxta proportionem, & merita delinquentium punire, & hoc est ex iustitia & debito legali id facere. Sed tamen quia hoc debitum legale non est ei impositum ab aliqua lege superiori, sed ipse sibi est lex, potest ex supremo dominio suo, & pœnas occultas remittere propter bonitatem suam, quæ est bonum maximè cō-

In i. a. S. Thom. in 1. part. D. Thomæ.

mune, & radix omnium legum. Sicut etiam in humanis Princeps supremus potest quandoque ob bonum publicum, & non instante parte, remittere pœnas & delicta, sicut Dauid remisit Ablalonem, & tamen negari non potest quod Princeps quando punit, ex iustitia stricta, & ex debito legali punit; non ergo ex eo quod Deus qui est summus Princeps possit relaxare iniurias, tollitur quod ex debito legali & rigoroso illas possit punire, quia iuxta modum taxatum à se punit. Vnde dicit D. Th. 2. 2. q. 67. a. 4. ad 2. quod *Deus habet supremam potestatem indicandi, & ad ipsum pertinet quicquid contra aliquem peccatur. Et ideo liberum est ei pœnam remittere, præcipue cum peccato ex hoc pœna maxime debeat, quod est contra ipsum non tamen remittit pœnam secundum quod docet sua bonitas, quæ est omnium legum radix.* Quæ vltima verba satis indicant agnoscere D. Th. debitum legale in Deo, cum punit & infert pœnam iuxta legem, cum etiā remittendo agat iuxta id quod est radix omnium legum.

Ad Cōf. Resp. quod Deus respicit propriam iniuriam ut iniuriam summi Principis, & sic maxime pertinentem ad bonum publicum & commune. Vnde non est locus vindicandi & propulsandi illam ex iustitia vindictiua, quæ est pars potentialis iustitiæ, quia hæc solum propulsat damna particularia per modum defendentis, non iudicantis, ut dictum est, & sic procedit ex quadam decencia, & debito morali vel propulsando vel indulgendo iniurias, non autem iudicando ex debito rigoroso & legali, sicut Deus.

Soluantur argumenta.

Fere omnia argumenta opposita soluta sunt ex probatione nostri fundamenti, ostendendo non esse aliquam imperfectionem in iustitia distributiua, ob quam possit negari Deo. Breuiter tamen represento vim omnium argumentorum. Possunt enim fieri argumenta ex triplici cap. Primo, ad probandum esse aliquam imperfectionem in iustitia distributiua, ob quam non possit attribui Deo. Secundo, ex eo quod solum ex debito morali, non ex legali Deus reddit præmia, vel pœnas infert: hæc enim est omnis materia iustitiæ distributiue. Tertio, quia in præmiis reddendis solum attendit affectum, qui est debitum gratitudinis, non æqualitatem in effectu, qui est debitum rigorosum iustitiæ.

26 Primo ergo arguitur quia debitum legale & rigorosum repugnat Deo erga creaturas: sic enim esset ligatus illis ex debito, quod est imperfectionis: ergo repugnat iustitia distributiua strictè dicta, quia hæc respicit debitum rigorosum erga alterum: si enim non esset tale debitum, esset solum debitum morale & ex decencia virtutis quod solum pertinet ad partem potestatiuam iustitiæ. Nec valet dicere quod Deus est debitor sibi ipsi, quia hoc ipso non est iustitia strictè dicta, quia eiusdem ad se non est proprie iustitia, sed si est debitum iustitiæ, debet esse in ordine ad alterum extra se: hoc autem est maxima imperfectio in Deo quod sit debitor creaturæ, cum ex parte creaturæ nullum sit datum vel acceptum, nullumque fundamentum ad talem obligationem inducendam in Deo. Et præsertim cum iustitia rigorosa & propria versetur circa bona temporalia, ad quæ non conuertatur iustitia in Deo.

Cōf. quia D. Tho. perpetuo dicit quod Deus in iudicio suo quo infert pœnas, vel dat præmia, seruat modum iustitiæ commutatiuæ ut. 2. 2. q. 61. a. 4. ad 1. & q. 106. a. 1. ad 2. & q. 108. a. 2. ad 1. quod non compatitur cum ratione iustitiæ distributiue proprie dictæ. Et hoc ideo quia in operibus nostris debitum iustitiæ fundatur in valore & labore operis, huic autem correspondet præmium, pretium autem pertinet ad iustitiam commutatiuam, nec solum correspondet actioni humanæ, ut humana est, sed etiam actioni brutæ, ut cum conducitur animal, & meretur pretium. Ergo præmij distributio in quan-

Z

tum

tum primum, & ut distinguitur à pretio, non pertinet ad iustitiam, quia non fundatur in valore, & labore; nec in aliquo dato, vel accepto à merente: nihil enim nos Deo damus: *quis enim prior dedit illi, & retribuetur ei?* Ergo solum pertinet ad debitum morale, & ad decentiam, seu honestatem virtutis talis redditio.

Conf. secundò, quia Deus non attendit in distribuendis bonis & perfectionibus suis creaturis, siue quoad naturalia, siue quoad moralia, aut supernaturalia ad proportionem comparatiuas vnius creaturæ ad aliam, sed ad cuiusque creaturæ debitum, & connaturalitatem, seu coaptationem cum eo, quod sibi debetur; & sic perinde se habet erga quamlibet creaturam, ac si illa tantum esset, cui debet dare id quod dat. Non ergo ex iustitia distributiva tribuit, quia hæc solum respicit proportionem geometricam, & comparatiuam vnius ad alterum, non debitum quod unicuique proprium est, etiam si diuersis debitoribus inæqualia debita reddantur, sicut creditor debens multis inæqualia debita, & soluens omnibus ex iustitia commutativa restituit, non ex distributiva.

27 Hæc argumenta sunt præcipua fundamenta V. Et ad illam manet responsum ex dictis. Cum enim quaeritur quomodo Deus possit esse debitor propriæ & strictæ creaturæ, respondetur quod hoc debitum licet exerceatur circa personas ad extra, non tamen debitum ex ipsis personis oritur, neque ex aliquo iure quod in re habeant, & sic non subicitur illis distributor, sed superior manet. Potest tamen manere subiectus bono comuni, seu Reip. ex quasi contractu cum ipsa, de prouidendo illi, & distribuendo bona eius communia secundum æquitatem, aut etiã ex lege alicuius superioris sibi id præcipientis. Sed hoc non est de ratione distributoris ut sic, sed talis distributoris, scilicet creati, qui non habet plenum dominium in Remp. sed est quasi minister, & custos eius, aut etiam minister Dei à quo habet legem & directionem eius quod debet agere. In summo verò distributore, scilicet in ipso Deo hoc debitum nascitur ex eius naturali rectitudine & æquitate, seu lege, quæ est ipsemet ratione cuius Deus habet debitum exercendi istam distributionem iuxta proportionem personarum, quibus distribuendum est. Et sic cum dicitur, esse Deum debitorem, sibi tollit propriam rationem iustitiæ, distinguo, esse debitorem sibi, ut termino, seu personæ, cui aliquid reddendum est, cōcedo; esse debitorem sibi ut principio & fundamento obligationis & debiti, reddendæ tamen, & exercendæ in ordine ad alterum, nego: debitum enim quod Deus habet ad creaturam, debitum quid est ad illam, sed non oritur ex iure, & actione ipsius, sed ex ordinatione Dei; & ideo Deus non est debitor creaturæ, licet impleat debitum creaturæ, quia hoc debitum non nascitur ex ipsa creatura, sed ex ipso Deo, nec ordinat Deum ad creaturam, sed creaturam ad Deum, quæ est doctrina D. Thom. hic q. 21. art. 1. ad 3. sufficit enim iustitiæ, ut sit inter diuersas personas tanquam inter extrema in quibus exerceatur, non tamen requiritur quod ratio & fundamentum huius iuris, seu debiti sumatur in vna persona ex iure alterius quod onerat alteram: id enim solum requiritur in iustitia commutativa, ut diximus art. præced. non distributiva, in qua totum onus nascitur ex ipsa exigentia boni communis, & cum bonum commune primordialiter sit in Deo, ex ipsomet oritur hoc debitum, ut explicatum est; Et sic creatura non est creditrix talis debiti, licet ipsi ut extremo & termino reddatur.

28 Ad primam Conf. quod attinet ad loca D. Thom. iam supra diximus ipsum loqui de modo, & for-

mai iustitiæ commutatiuæ, quæ seruatur in præmiis & suppliciis reddendis ex parte materiæ, seu ex parte effectus, quem facit in ipsa materia, ut scilicet tantum reddatur pro tanto, non ex parte iuris, seu debiti quod per se respicitur à distributiva iustitia in præmiis reddendis, quod scilicet non sit ius commutatum, & fundatum in iure proprietatis, & dominij alterius, vel cōmutationis & actionis, quæ facit erga me, sed sit ius proportionis & dignitatis cuiusque, iuxta quod exigit bonum commune. Et quantum ad rationem, dicimus quod in operibus id quod respicitur per modum valoris & pretij eius pertinet ad iustitiam commutatiuam, quæ respicit æqualitatem rei ad rem secundum valorem. Id autem quod respicitur in valore secundum quod facit dignitatem, & proportionem ad bona communia ut distribuenda per modum præmij, pertinet ad iustitiam distributiuam. Itaque valor, ut pretio æstimabilis secundum se est communis actionibus humanis, vel operibus & rebus inanimatis; valor autem operum ut dignificans personam respectu alicuius præmij est proprium actuum humanorum, & respicit æqualitatem proportionis reddendam à distributore, non æqualitatem rei taxandam secundum valorem.

Ad secundam Conf. iam supra responsum est, 29 ostendendo quomodo etiam Deus respicit proportionem plurium, ut diuerso modo dignificantem diuersas personas ad retribuenda præmia, & quomodo etiam iustitia distributiva respicit proportionem cuiusque ad id quod sibi dandum est per modum dignitatis & coaptationis personæ ad tale præmium, non per modum debiti, ex vi dati, aut accepti ab alio, quod est iuris commutatiui.

Secundò arguit, quia ad distribuenda præmia 30 iuste, sufficit vel debitum decentiæ moralis, vel reductio prouidentiae seu iustitiæ legalis respicientis bonum commune: non ergo requiritur stricta & propria iustitia distributiva. Anteced. prob. nam in primis id videtur dicere Anselm. in prolog. c. 10. *Iustus es, non quia reddis debitum, sed quia decet te summe bonum*, & Aristot. 5. *Ethicorum* dicit quod *Dei iudicium in infligenda pœna non fit secundum iustitiam distributiuam*. Deinde, quia totum fundamentum debiti, quod est in iustitia diuina, non nascitur ex creatura, nec ex iure ipsius erga Deum, nec ex ipso bono communi creato, quia totum hoc creatura est, sed nascitur ex ipsa reductioe Dei, hæc autem non fundat strictum debitum & legale, sed solum decentiam moralem, quam Deus habet ad se: ergo tota ratio iustitiæ fundatur in solo debito morali Dei ad se: non ergo est propriæ iustitiæ distributiva. Quod si supponit ordinationem, seu pactum Dei, ad hoc sufficit fidelitas diuina ut saluetur pactum, si attendit ad obsequium creature, ad hoc sufficit gratitudo; si denique ad rectam dispositionem, & directionem boni communis, & partium eius, ad hoc sufficit diuina prouidentia, & iustitia legalis, quæ est in ipso architectonicè, ut in supremo Principe: ergo superfluit ista iustitia distributiva strictè dicta.

Resp. negando anteced. Ad primam prob. ex auctoritate Anselmi; Resp. ex D. Tho. hic q. 21. art. 1. ad 3. quod iustitia in Deo quandoque dicitur condecencia suæ bonitatis, quandoque retributio pro meritis, & utrumque modum transit Anselmus dicens. *Cum punis malos iustum est, quia eorum meritis conuenit, & cum parcis malis, iustum est, quia bonitati condecens est*. Itaque Ansel. ibi tangit modum illum condecenciæ, non tamen negat veram retributionem pro meritis, quia hæc etiam decet Deum, non tamen est solum debitum decentiæ, sed debitum iuris distributiui, licet non per modum debiti ordinantis

ARTICVLVS V.

An & quomodo sit in Deo misericordia?

In presenti q. 21. art. 3. docuit D. Thom. misericordiam esse maximè tribuendam Deo, secundum effectum, non secundum passionis affectum. Unde dubitant aliqui, an formaliter sit attribuenda Deo misericordia simpliciter loquendo. Quod totum reducitur ad illam questionem, an in suo conceptu formali dicat aliquam imperfectionem, à qua non possit purificari, & sic Deo sub formalitate sua attribui.

Breuitè quia res ista non multum habet controuersie, notandum est quòd misericordia ex suo obiecto formali respicit miseriam, seu malum alienum ut repellendum, & subueniendum in quantum displicet. Et quia id quod nobis displicet causat tristitiam, seu dolorem in nobis, inde est quòd motuum ad misericordiam, quod est displicentia mali aliena, causat in nobis dolorem seu tristitiam, tum sensibilem in appetitu, quando res ipsa quæ displicet sensibilis est, tum spiritualement in voluntate, quæ est tristitia seu simplex displicentia. Reputatur enim malum alienum quasi proprium per affectum, & sic generat dolorem & displicentiam in nobis. Quare requiritur in nobis virtus moralis, quæ secundum regulas rationis moderetur istum motum, tum in voluntate, iustam & debitam displicentiam de malis alienis assumendo, tum moderando dolorem appetitus sensitui de malo alieno, ne aut sit nimis, aut nullus, sed quantum requiritur, ut subueniamus malo alieno secundum quod possumus; ad hoc enim principaliter respicit misericordia, ut scilicet effectum istum faciat, qui est subuenire malo alieno; ex affectu tamen voluntatis, quo displicet illud malum, & sic voluntariè mouetur ad tollendum illud. Quod totum est doctrina D. Thom. hic, & 2. q. 25. a. 3. in corp. & ad 4.

His suppositis certum est in Deo non esse misericordiam prout importat dolorem appetitus sensitui, nec prout dicit virtutem moderatiuam talis passionis, quia quod sensibile est longè abest à Deo. Nec etiam est motus voluntatis misericordia prout contristans, quia Deus non est capax tristitiæ, solum ergo in Deo est affectus, quo amando creaturas displicent ei defectus & mala earum, & inde mouetur ad subueniendum illis: cum enim de facto expellat ista mala, & subueniat nobis, necesse est quòd habeat affectum expellendi illa, & quòd displiceant ei, aliàs non moueretur ad expellendum sine affectu: ille ergo affectus imperfectionem non dicit, cum talem effectum habeat, & tam perfectum. Et hæc est formalis & essentialis ratio misericordiæ: quòd enim ex hoc sequatur dolor & tristitia, est aliquid naturale & per modum consecuti in misericordia, ratione subiecti in quo est, cui non potest aliquid displicere, nisi cum aliqua tristitia vel dolore consecuto; id tamen non pertinet ad formalem rationem, quæ ex parte obiecti respicitur: hæc enim solum importat malum ut depellendum siue ex parte subiecti miserentis sequatur dolor & tristitia, siue non. Et idè formaliter saluatur misericordia in Deo, semotis imperfectionibus ex parte subiecti consecutis, non solum quia hunc effectum habet, qui est expellere miseriam creaturæ, sed ut habet affectum voluntarium, quo facit illum effectum: de hoc enim loquebatur D. Thom. in art. 2. cum dicit *originem huius esse ipsam bonitatem Dei qua tolluntur defectus*, constat autem non tolli à Deo nisi per liberum actum, qui est affectus voluntatis.

Z 2

QVÆSTIO

ordinantis Deum ad creaturas, & ex iure creaturarum orti, sed ex ordinatione sua, & sic negat debitum illud imperfectum, Arist. verò non negat absolute iustitiam distributiuam Deo, sed docet modum commutatiuæ seruare in pœnis infligendis, non autem habet distributiuum modum cum imperfectione, scilicet cum subiectione ad bonum commune.

Ad secundam probat. dicimus quòd debitum illud quod respicitur à iustitia distributiuam non nascitur aut fundatur in aliqua actione vel iure ipsius creaturæ, sed tamen exercetur circa creaturam; & sic nascitur ex rectitudine naturali Dei, & ex bonitate diuina. Itaque decencia illa quam Deus habet ad se, & debitum illud quod habet ad se, est causa & radix debiti quod exercet erga creaturas ex ordinatione sua, & hoc secundum debitum est strictum & legale, sed causatum à Deo ex illa decencia & debito quod habet ex se, quatenus illa decencia est causa vniuersalis omnis rectitudinis & iustitiæ seruandæ in creaturis, quod vniuerso verbo dixit D. Thom. cit. loco ex 2. q. 57. art. 4. ad 2. quòd *remittit pœnam secundum quod decet suam bonitatem, quæ est radix omnium legum*, ubi cum decencia bonitatis diuinæ ponitur radix omnis legis, & consequenter omnis debiti legalis. Fundatur ergo hoc debitum legale ad creaturas in debito decentiæ diuinæ, quatenus radicaliter est principium omnis legis, & omnis debiti quod sit iuxta leges: debitum autem quod est iuxta legem est debitum legale, licet hoc non noscatur in Deo ex lege sibi imposita a superiori, sed ex lege quæ est ipsa eius voluntas. Et sic distinguit D. Thom. in hac q. 21. art. 1. ad 3. quòd aliquid est debitum Deo, aut etiam est debitum creaturæ. Et utroque modo, inquit, *Deus debitum reddit: Debitum enim est à Deo ut impleatur in rebus id quod sapientia & voluntas eius habet, & quod suam bonitatem manifestat, & secundum hoc iustitia Dei respicit decenciam ipsius, secundum quam reddit sibi quod debetur. Debitum etiam est rei create, quod habeat id quod ad ipsam ordinatur, sed hoc debitum dependet ex primo, quia hoc unicuique debetur, quod est ordinatum ad ipsum secundum ordinem diuinæ sapientiæ.* Et quod dicitur sufficere fidelitatem solam ad reddendum debitum secundum proportionem, & dignitatem cuiusque. Resp. non pertinere hoc ad fidelitatem, sed solum implere veritatem Dei, siue in simplici promisso, siue in oneroso, ut supra ponderauimus. Prouidentia autem Dei, & iustitia legalis est sufficiens ad danda ista præmia radicaliter & causaliter, quatenus sic decet bonitatem & sapientiam Dei, non formaliter, quia supposita ordinatione Dei, redditur debitum strictum, & legale ad ministrandum iustitiam creaturis, & hoc pertinet ad iustitiam distributiuam, quæ est subordinata & originata à legali seu prouidentiali, & ex illa oritur, tanquam ex lege & rectitudine boni communis.

32 Denique nota, quòd licet in merito attendatur potius effectus, quàm effectus merentis, idè quæ charitas maximè facit ad meritum: debitum autem decentiæ est quod respicit effectum, debitum autem legale, quod respicit effectum, & sic recompenfare effectum pertinet ad gratitudinem, quæ facit æqualitem voluntatum, non rerum, ut docet S. Thom. 2. 2. q. 106. art. 5. ad 3. Tamen affectus charitatis in merito attenditur, ut dignificans & dans valorem operi, idè quæ pertinet ad iustitiam recompenfare ei præmium. Affectus verò ut facit proprium operis, reddit illud gratiosum, & sic recompenfatur à gratitudine debito morali, & decentiæ tantum.

Ioan. à S. Thoma in 1. part. D. Thoma.

QVÆSTIO XXII.

De Providentia Dei.

S V M M A L I T T E R Æ.



PRÆTATVM de prædestinatione aggredientes, à providentia in communi, cuius pars quædam prædestinatio est, incipimus, de qua etiam egit S. Thom. in hac quæst. 22. antequam in sequenti agat de prædestinatione.

Circa providentiam ergo in communi quatuor considerat S. Thom. primò subiectum eius, an scilicet Deo conveniat. Secundò, obiectum eius, an circa omnia versetur. Tertiò, & quartò, modum eius, scilicet modum ex parte Dei, & modum ex parte creaturæ. Ex parte Dei, an immediatè provideat omnibus per seipsū. Ex parte creaturæ, an imponat eis necessitatē propter suā infallibilitatē.

In art. ergo 1. ostendit Deo convenire providentiam, quia convenit ei ordinare & dirigere creaturas in finem per aliqua media, eo quod per intellectum agit in illas: ordo autem & dispositio in mente gubernatoris de rebus sibi subiectis pertinet ad providentiam, quæ est pars prudentiæ, quia hoc est providere rebus, scilicet dirigere illas ad aliquem finem; per convenientia media.

In art. 2. ostendit obiectum circa quod versatur providentia, esse omnem creaturam, nec aliquid subtrahi ab eius gubernatione, ut aliqui dixerunt. Tantum enim se extendit eius providentia, quantum eius causalitas; quia omnia causat per intellectum, ex intentione & fine operando, & non fortuitò, nec præter suam intentionem: id enim esset magna imperfectio: Causalitas autem Dei ad omnia se extendit, quia omne esse creatum, participatio eius est: ergo ad omnia se extendit eius providentia.

In art. 3. explicat modum istius providentiæ, ut tenet se ex parte Dei, scilicet an immediatè provideat omnibus. Et dicit quod in providentia sunt duo, scilicet gubernatio quantum ad ordinem, & dispositionem, quæ est in mente gubernatoris & executio, qua hunc ordinem in rebus exequitur. Et primo modo providentia est immediatè in Deo de omnibus, quia per suum intellectum omnia attingit, & disponit. Quo ad secundum verò exequitur multa per causas secundas, quas constituit causas aliorum effectuum, non propter defectum suæ virtutis, sed ex abundantia suæ bonitatis, quia communicat ei hoc ipsum, quod est causare in alia.

In art. 4. ostendit modum providentiæ ut tenet se ex parte creaturarum, scilicet quod non omnibus imponatur necessitas, sed etiam contingentia, & libertas relinquatur non obstante infallibilitate eius ex parte Dei, eo quod ista infallibilitas nascitur ex vniuersalissimo modo operandi Dei, à quò nihil potest subduci, sed providet, & causat omnia; & ita dat etiam ipsam contingentiam, & libertatem: inde non vult solum quod res fiat absolutè, sed quod fiat tali modo, v.g. liberè, vel contingenter, quia etiam ipsum modum Deus causat, & ita est infallibile, quod res fiat tali modo, scilicet contingenter ex parte sua, & infallibiliter ex parte Dei.

QVÆSTIO XXIII.

De prædestinatione.

S V M M A L I T T E R Æ.



PRÆTAT D. Thom. de prædestinatione, Primò absolutè in se. Secundò comparatiuè ad alia. Absolutè in se, quoad *an est* & *quid est*. Comparatiuè, tum in ordine ad suum oppositum, quod est reprobatio, tum in ordine ad suas causas, tum in ordine ad suos effectus.

In primò ergo art. ostendit id quod pertinet ad quæstionem *an est*, dari in Deo prædestinationem

stinationem, quia sicut pertinet ad prouidentiam communem Dei ordinare res in suos fines proportionatos & debitos, ita ordinare hominem in aliquem finem excedentem naturam eius; scilicet in vitam æternam ut efficaciter consequendam. Vnde ordo transmittendi creaturam rationalem in talem finem efficaciter, petit specialiolem Dei prouidentiam, & hæc est prædestinatio.

In art. 2. ostendit quid sit prædestinatio, scilicet quod ex parte Dei est illa actiua transmissio in vitam æternam, quæ est in mente diuina. Ex parte autem prædestinati non ponit aliquid ipsa prouidentia (prout est in mente prædestinantis, tanquam actus immanens) sed ponit aliquid executio per modum causæ efficientis quatenus relinquit aliquos effectus in prædestinato.

In art. 3. incipit consideratio prædestinationis comparatiua. Et primò comparat illam ad suum oppositum quod est reprobatio, inquirens, an Deus aliquem reprobet. Et respondet affirmatiue, quia pertinet ad prouidentiam summam Dei etiam permittere aliquos effectus sine reparatione, eisque æternam pœnam constituere, sicut è contra ad æternum præmium aliquos destinare. Et sic reprobatio est pars prouidentia, sicut prædestinatio.

In art. 4. incipit comparare prædestinationem ad suas causas. Et potest causa prædestinationis attendi vel ex parte Dei per electionem ad gloriam, ex qua oritur quod electis prouideat de mediis conuenientibus: vel ex parte nostra per aliqua merita vel opera, quibus mereamur prædestinari. In hoc ergo art. agit de electione Dei ad gloriam, & ostendit quod illa præsupponitur ad prædestinationem: est enim prædestinatio mediorum præparatio & dispositio ad consequendam gloriam. Hæc autem supponit finem esse volitum his quibus talia media præparantur. Et quia hic finis non est volitus omnibus efficaciter, sed aliquibus præ aliis, ideo non solum supponitur delectio ad gloriam, sed etiam electio.

In art. 5. comparat prædestinationem ad aliam causam, quæ tenet se ex parte nostri, & inquit, an talis causa detur. Et respondet quod ad omnes effectus prædestinationis, etiam ut includunt primam gratiam & vocationem, nulla potest dari causa ex parte nostri, neque ex aliquibus meritis in alia vita factis, antequam animæ infunderentur corpori, ut putauit Origines, neque ex meritis in hac vita factis, aut ex aliquo bono initio meritorum, ut Pelagiani & Semipelagiani putauerunt, neque ex bono usu nostri arbitrij futuro & præuiso, ut alij posuerunt, distinguentes inter id quod est ex gratia; & id quod ex libero arbitrio, quia omnia ista tenent se ex parte naturæ, & non possunt esse ratio vel causa gratiæ datæ per prædestinationem. Et sic tota collectio prædestinationis solum habet pro causa meram Dei liberalitatem.

In art. 6. incipit comparare prædestinationem ad effectus suos. Primò quantum ad certitudinem eius in prædestinatis. Secundò, quantum ad numerum prædestinatorum. Tertiò, quantum ad media & instrumenta quibus adiuuatur. Et in hoc art. 6. ostendit esse certam salutem prædestinati ex infallibilitate diuinæ prouidentia, licet libertatem, & contingentiam ex parte causarum inferiorum non auferat, sed promoueat.

In art. 7. inquit de numero prædestinatorum, & docet duo. Primum, quod apud Deum iste numerus est certus & definitus ex quadam principali prædefinitione, quia quodlibet indiuiduum prædestinatum principaliter, & per se Deus præordinat. Secundum, quod definire hunc numerum an tot homines prædestinentur, quot Angeli ceciderunt, vel quot remanserunt, vel quot creati sunt, soli Deo relinquendum est.

In art. 8. inquit de orationibus quibus iuuatur prædestinatio. Et dicit prædestinationem, ut tenet se ex parte Dei, non posse precibus Sanctorum fieri. Sed tamen ex parte effectuum potest vnus effectus ex alio iuari, & sic propter preces Sanctorum potest alicui dari gratia, quæ est effectus prædestinationis.

QVÆSTIO XXIV.

De Libro vite.

S V M M A L I T T E R A E.



LIBER vite metaphora est, qua Scriptura declarat specialem designationem prædestinatorum ad vitam æternam, sicut in libro apud homines conscribuntur illi, qui ad aliquod munus destinantur, vel illa de quibus specialis

Ioan. à S. Thom. in 1. part. D. Thomæ.

Z 3 ratio

ratio habetur. Et ideò tria D. Thom. tractat. Primò, quid sit iste liber vitæ. Secundò, de quo sit, an solùm pro gloria. Tertiò, an aliquis de illo deleatur.

Circa primum docet art. 1. librum vitæ esse ipsam notitiam Dei, qua firmiter retinet aliquos electos & prædestinatos ad vitam æternam, eo quod liber apud nos habetur, tum ad succurrendum memoriæ, tum ad designandum eos qui ad aliquid eliguntur.

Circa secundum docet in art. 2. librum vitæ solum esse pro vita gloriæ, eo quod prædestinatus eligitur ad viuendum vita æterna tanquam ad finem. Et licet ei detur gratia tanquam medium; tamen propriè non eligitur aliquis ad medium, sed ad finem, sicut miles non eligitur ut armetur, sed ut pugnet & consequatur victoriam.

Circa tertium docet art. 3. quòd in libro vitæ quidam sunt simpliciter scripti, id est, in paginis gloriæ ex prædestinatione Dei, & tales nunquam delentur de libro vitæ. Quidam sunt scripti solùm secundùm quid, id est, solùm in paginis gratiæ pro præsentì tempore, & tales possunt deleri de libro vitæ, quia solùm ad tempus datur illis gratia, quæquidem est dignitas & ius ad vitam æternam, sed cadunt ab isto iure.



DISPUTATIO VII.

De essentia prædestinationis.

ARTICVLVS I.

An detur in Deo prædestinatio, quod sit eius obiectum, & definitio.

PRÆDESTINATIONIS VOX in Scriptura, Patribus, & Scolasticis valde celebris, ex duplici significatione destinationis deriuatur, quam D. Thom. indicat *quæst. 6. de verit. art. 1.* Nam destinatio duo significat; primò, designationem internam per aliquod statutum, & decretum aliquid faciendi. Secundò, designationem externam, quæ est effectus prioris, quatenus aliquis mittitur ad exequendum id quod decretatum & statutum est. Primo modo sumitur destinatio in Scriptura, 2. Machab. 6. ubi dicitur de Eleazaro, quòd *Destinavit non admittere illicita propter vite amorem*, & 1. Corint. 9. *Vnusquisque prout destinavit in corde suo*, id est, prout statuit. Secundo modo dicitur, 1. Machab. 1. *Destinaverunt aliqui de populo & abierunt ad Regem*. & 1. Corint. 4. *Puto quod Deus nos Apostolos ostendit tanquam morti destinatos*, id est, ad mortem missos. Et sic D. Thom. *q. 6. de verit. art. 1.* probat prædestinationem importare directionem ad finem, quia quando aliquis destinatur tanquam nuncius, dirigitur ad aliquid faciendum.

Quia ergo destinatio sumpta pro missione exteriori ad aliquid faciendum oritur ex destinatione sumpta pro decreto præordinante, & statuyente, sicut executio oritur ab ordinatione; ideò frequentius prædestinatio sumitur pro ipso decreto præordinante seu prædefiniente sicut Hieron. *su. r. cap. 1. ad Ephes.* ad illa verba, *qui prædestinavit nos*, &c. dicit, quòd *Prædestinare est prædefinire*. Et August. *lib. 6. Hypognosticon*, inquit, *id quod bonum est præscientia prædestinat, id est prius quam sit in re præordinat*. Et *lib. De prædestin. Sanctorum, cap. 10.* *Prædestinatione Deus ea præscivit quæ fuerat ipse factururus, præscire autem potens est etiam qui ipse non facit, sicut quicumque peccata*. Et *De bono perseverantia cap. 18.* *Prædestinasse, est hoc præscisse quod fuerat ipse factururus.*

Quem sensum sequitur & explicat S. Prosper in *responsione ad capitula Gallorum cap. 15.* & ad *obiectiones Vincentianus, obiectione 10.* & *sequentibus*. Hæc autem acceptio prædestinationis est valde generalis pro omni providentia seu decreto ordinante & designante aliquid ut fiat convenienti modo ex intentione & non fortuitò. Qua ratione D. Thom. ostendit dari prædefinitionem Dei ad omnes effectus causarum secundarum, dum dicit *quæst. 1. de verit. art. 7.* quòd *Omnes effectus secundi ex Dei prædefinitione proveniunt*.

Ceterùm quia inter omnes creaturas totius universi specialissimè apud Deum designati sunt illi qui ad vitam æternam præordinantur: sic enim per antonomasiam prædestinati vocantur signati Apocalyp. 7. *Vidi numerum signatorum centum quadraginta quatuor millia signati*, & ad Ephes. 1. *In quo & signati estis spiritu promissionis sancto, qui est pignus hereditatis nostre*: ideò prædestinatio in communi usu Theologorum sumitur pro illa ordinatione & præparatione Dei, qua designantur & destinantur aliqui à Deo ad vitam æternam, iuxta illud ad Ephes. 1. *Qui prædestinavit nos in adoptionem filiorum per Iesum Christum in ipsum*, & Rom. 8. *Quos prædestinavit conformes fieri imaginis filij sui*.

In hoc sensu sumpta prædestinatione, res est extra omnem controuersiam, & sancita de fide, quòd in Deo ponenda sit, sicut patet ex locis allegatis, quæ loquuntur de prædestinatione ad vitam æternam, sicut etiam dicitur Actorum 13. *Crediderunt quotquot erant præordinati ad vitam æternam*, & Lucæ 12. *Quia complacuit Patri vestro dare vobis regnum*. Nec de hac veritate dubitatum est nisi vel ab aliquibus Gentilibus, qui in totum negauerunt providentiam diuinam, aut saltem ab istis inferioribus subtraxerunt, de quibus dicitur Psalm. 93. *Et dixerunt non videbit Dominus, nec intelliget Deus Iacob*. Et Iob. 22. ex eorum persona dicitur: *Nubes latibulum eius circa Cardines caliperambulat, nec nostra considerat*, Contra quos agit D. Thom. *infra q. 22 art. 2. & 3. contra Gent. cap. 89.* vel etiam ab Atheistis qui negantes immortalitatem animæ, negauerunt consequenter prædestinationem ad gloriam, de quibus dicitur Sap. 1. *Et nescierunt Sacramenta Dei, nec speraverunt mercedem iustitiae, nec indicauerunt honorem animarum sanctarum* vel denique ab aliquibus Hæreticis, qui ex prædestinatione Dei negauerunt nostram libertatem, & consequenter veram prædestinationem fateri non poterant, quæ sine libertate in adultis non potest saluari, quia tollit merita & consequenter gloriam per modum coronæ. Hi autem fuerunt illi de quibus diximus

suprà

suprà disp. 3. art. 3. in fine, & art. 4. quod induxerunt hæresim prædestinatorum, cuius meminit Baroni-
us anno Christi. 490. quæ ponebat prædestinationem necessitatem liberum arbitrium. Quod etiam
 videntur secuti Monachi illi ad quos Sanctus
 August. scripsit librum de gratia & libero arbitrio,
 & librum de correptione & gratia, quorum etiam
 meminit *epist. 46. & 47. & 1. Retractionum cap. 66.*
 qui cum efficacia gratiæ dicebant non stare libertatem
 nostram. Quod rursus istis temporibus
 suscitauerunt Calvinistæ, vt latè egimus *suprà*
disp. 3. art. 5. Qui omnes hæretici etsi non nega-
 uerint directè prædestinationem ad gloriam, ta-
 men ita illam ponebant, quod omnino euacua-
 bant, tollentes liberum arbitrium, sine quo non
 sunt merita neque gloria per modum præmij.

Cæterum omnes isti errores manifestè con-
 uincuntur falsitatis, ex eo quod negant principia
 notissima, & in fide, vt *ex locis allatis* constat, &
 in lumine naturali, scilicet Dei prouidentiam, im-
 mortalitatem animæ & nostram libertatem. Quæ
 in præsentī nō sunt discutienda sed supponenda.
 Sufficit nunc dicere quod apud admittentes ista
 principia, non inuenitur dubitatio de prædestina-
 tione ad gloriam propter manifesta loca Scripturæ
 quæ allata sunt, quæ probant illam dari. Et ratio
 suadet quia conuenientissimum est, Deum, qui est
 maximè bonus, & consequenter maximè com-
 munitius, optimo modo se communicare.
 Quod fit per fruitionem ipsius in se. Et quia est
 finis vltimus creaturæ, vt ostendetur *1. 2. q. 2.* de-
 buit se communiter omnibus exhibere assequen-
 dum. Non sic de vnione hypostatica, quæ non
 pertinet ad fruitionem finis omnibus communis,
 & sic non debuit communicari omnibus, sed con-
 stituit summam communicationem Dei, quæ
 pertinet ad rationem capitis, & sic debuit com-
 municari vni, id est Christo.

Stabilita ergo hac veritate de prædestinatione
 ipsa quoad *an est*, restat eius tradere definitio-
 nem. Duplicem autem acceperunt Theologi, &
 communiter tradunt iuxta duplicem illam accep-
 tionem destinationis *suprà* explicatam. Nam se-
 cundum quod significat internum decretum præ-
 ordinans, & præparans media ad consequendam
 gloriam, definitur ab August. *lib. de bono perse-
 uerantia cap. 14.* *Prædestinatio est præscientia &
 præparatio beneficiorum Dei, quibus certissime liber-
 rantur quicumque liberantur.* Secundum aliam ve-
 rò acceptionem destinationis in ordine ad mitten-
 dum seu transmittendū aliquem ad aliquē finem,
 definitur à D. Th. *in præsentī a. 1.* quod *Prædestina-
 tio est ratio transmissionis creaturæ rationalis in vi-
 tam æternam* quod etiam aliis verbis dici solet,
 quod *Prædestinatio est præparatio gratiæ in præsentī,
 & gloriæ in futuro.* Quam etiam definitionem tra-
 dit S. Th. *hic art. 2. argumento 4.* Quæ definitiones
 etiam expriment internum actum & decretum
 Dei, in quo consistit prædestinatio, sed sub re-
 spectu transmissionis, quæ est secunda acceptio
 destinationis, quæ oritur & supponit primam. Et
 ōnes istæ definitiones rectissime traduntur, nem-
 pe per suum genus, & differentias, seu aliquid
 loco generis. Loco generis ponitur *ly præparatio,*
ly ratio transmissionis, quæ generali nomine si-
 gnificant prouidentiam efficacem, seu ordinatio-
 nem & decretum efficax quidquid illud sit. Per il-
 lam autem particulam *in vitam æternam* vel *qui-
 bus certissime liberantur,* &c. designatur differentia
 huius specialis prouidentiae, quæ respicit specia-
 lem finem vt materiam, scilicet gloriam æternam,
 & media quibus ad illam perducitur efficaciter,

Ex quibus excludes aliquas definitiones re-
 centiorum minùs aptas, in quibus suas volunt in-
 culcare opiniones, sicut est definitio Molinae *super*
hanc q. 23. art. 1. disp. 1. quod *Prædestinatio est ratio*
*ordinis seu mediorum in Deo, quibus præuidet creatu-
 ram rationalem perducendam in vitam æternam cum*
proposito eundem ordinem exequendi. Quæ definitio
 tacitè inculcat scientiam mediam, quia dicit esse
 ordinem mediorum, quibus Deus præuidet, non
 autem dicit, quibus Deus præparat creaturam ra-
 tionalem perducendam, &c. Præuisio autem medio-
 rum sine præparatione à Deo facta, est scientia me-
 dia. August. autem dicit quod prædestinatio est
 præscientia, & præparatio beneficiorum, non sola
 præscientia. Nam, vt ipse Aug. dicit *suprà* citatus,
*Præscire potest Deus etiam quæ ipse nō facit, non au-
 tem prædestinat, nisi quæ ipse factururus est.* Ergo
 non sufficit ad prædestinationem fieri ex mediis
 præuisis, sed etiam præparatis à Deo, vt media præ-
 destinata sint. Et hoc omittit in sua definitione
 Molina, Aliam definitionem nihilo meliorem, sed
 multò longiorem tradit P. Alarcon *tractatu 4. de*
prædest. disp. 2. cap. 3. eamque dicit tradi confor-
 miùs doctrinæ Patrum & Scholasticorum, videli-
 cet quod *Prædestinatio est voluntas sola dandi me-
 dia efficacia gratiæ, quibus infallibiliter consequetur*
gloria per decretum quod infallibiliter erit ex diuina
promissione dandi gloriam his qui vsque in finem in
gratiâ perseuerauerint. Sed hæc definitio longissi-
 ma, & propterea non parum vitiosa, inculcat in
 definitione multa, quæ ad disputationem pertinet,
 nō ad definitionē. Nam in primis dicit quod præ-
 destinatio est voluntas sola, cum tamen in dispu-
 tatione positum sit an prædestinatio sit actus vo-
 luntatis vel intellectus. Secundò, infallibilitatem
 mediorum ad consequendam gloriam ponit ex de-
 creto, quod erit ex promissione diuina, &c. vbi
 facit infallibilitatem mediorum dependentem ab
 aliquo decreto futuro orto ex alia promissione
 Dei, quod totum est sub opinione & disputatione
 vnde nā sumatur efficacia & infallibilitas medio-
 rum, an ex præparatione diuina antecedenti, an
 ex decreto futuro conditionatè. Hæc omnia in de-
 finitionem infarcire, est velle res dubias & dis-
 putabiles voluntaria definitione terminare. Omit-
 to alias definitiones: sufficit in istis duabus osten-
 disse quàm infructuosè à definitionibus certis, &
 breuibus communi Theologorum assensu tritis
 receditur.

Obiectum formale prædestinationis,

In obiecto prædestinationis & considerantur
 personæ prædestinatæ, & finis ad quem prædesti-
 nantur, & media quibus prædestinantur. Personæ
 vocantur *finis cui.* gloria vocatur *finis qui.* Et est
 difficultas quodnam ex his sit principalis, & for-
 malius obiectum. Nam ex vna parte videtur quod
 gloria seu gratia, quæ sunt res volitæ personis, sit
 obiectum formale. Nam persona videtur esse sub-
 iectum, non obiectum prædestinationis, vnde
 substantia prædestinati non numeratur inter eius
 effectus, quia subiectū prædestinabile est. Requi-
 ritur ergo alia formalitas, sub qua prædestinatio
 respiciat personas, & agat de illis, & hæc cōstituet
 obiectum formale, non persona ratione sui: nam
 potius persona de se est indifferens vt prædestine-
 tur vel reprobetur: ergo per aliquid superadditum
 personæ secernitur prædestinatio à reprobatione
 illud ergo erit obiectum formale seu ratio forma-
 lis obiecti prædestinationis.

Et Conf. quia prædestinatio formaliter est pro-
 uidentia

uidentia supernaturalis : ergo obiectum eius formale debet esse supernaturale : Supernaturalis enim & naturalis prouidentia in Deo distinguuntur penes obiecta volita, non penes ipsum Deum volentem, qui in se semper supernaturalis est, sed persona prædestinata non est aliquid supernaturale ratione personæ, sed ratione rei ipsi volitæ, quæ est gratia & gloria : ergo ab ipsis sumitur ratio formalis obiecti, non à personis.

Ex alia parte videtur persona esse obiectum principale & formale prædestinationis, siquidem idem est obiectum prædestinationis quod dilectionis, & electionis, siquidem prædestinatio ex dilectione personæ procedit, iuxta illud Psalm. 17. *Saluum me fecit, quoniam voluit me.* & Rom. 9. *Iacob dilexi, Esau autem odio habui*, id est, illum prædestinavi, hunc reprobaui, sed dilectio amabilis habet pro obiecto formali, & principali personam non autem rem, quam illi volumus, siquidem amicus diligitur propter se : ergo in prædestinatione persona est obiectum principale. Similiter gubernatio, & prouidentia principaliter respicit personas, quàm res, siquidem personæ sunt quæ gubernantur, non autem res ad quas diriguntur, sed res gubernatæ recipiunt à gubernante motionem, & impressionem ut dirigantur ad suum finem, sicut sagitta recipit impressionem à sagittante ad suum finem, ut docet S. Thom. 1. part. 9. 103. art. 1. Constat autem quod principale obiectum gubernationis, & directionis non est impressio recepta in re gubernata, sed res ipsa cui fit impressio.

Resp. adæquatum obiectum prædestinationis utrumque respectum includere, & ad personas, & ad res, ad finem qui & ad finem cui. Inter ista autem duo obiecta, id quod habet rationem formalis rationis est finis qui, seu res volita, non persona. Prima pars deducitur ex D. Thom. qui in presenti art. 1. docet quod prædestinatio est pars prouidentiae quantum ad obiecta, quia videlicet non datur in Deo diuersitas actuum, quorum vnus sit pars alterius, sed datur diuersitas obiectorum, quorum vnum se habet ut pars alterius, quatenus hæc prouidentia specialis respicit aliqua ex obiectis prouidentiae communis. Explicans autem quæ sint ista obiecta secundum quæ prædestinatio dicitur pars prouidentiae, inquit *soluzione ad 3. quod Prædestinari conuenit Angelis & hominibus, licet illi nunquam fuerint in statu miserie : motus enim non sumit speciem à termino à quo, sed ad quem, & hic est vita æterna.* Ergo sentit quod obiectum prædestinationis utrumque respectum debet includere, & ad personas, & ad res, ita quod personæ verè pertinent ad obiectum quod, sed res, scilicet gratia & gloria se tenent ex parte termini formalis ad quem, qui dat speciem motui. Quod enim personæ etiam pertineant ad rationem obiecti, constat, quia illud est obiectum alicuius potentiae vel actus, quod ab eo denominatur attingi, sicut illud est obiectum quod visionis, quod denominatur videri, siue se habeat ut obiectum materiale, siue ut formale : ergo illud est obiectum prædestinationis, quod denominatur prædestinari; hoc autem conuenit personis : ergo ipsæ pertinent ad obiectum prædestinationis. Quia verò non respiciuntur à prædestinatione secundum se, & in sua substantia considerata : sic enim sunt indifferentes ad prædestinati, vel reprobari; consequenter oportet quod prædestinatio dicat respectum ad ipsam gloriam, & gratiam, & non sistat in personis, ut inde sumat rationem formalem.

Et hinc sumitur secunda pars nostræ respon-

sionis, scilicet quod res ad quas est prædestinatio, præbent obiectum formale prædestinationi. Et hoc sumitur ex D. Thom. quia ex vna parte fatetur, quod prædestinatio dicit respectum ad gratiam, ut causa ad effectum, & actus ad obiectum, ubi iam fatetur pertinere ad rationem obiecti, ut docet in hac quest. art. 2. ad 4. Ex alia verò parte dicit loco citato art. 1. ad 3. quod terminus ad quem prædestinationis à quo sumit speciem, est vita æterna. Constat autem quod obiectum tenens se ex parte termini ad quem, & dans speciem alicui motui, est obiectum formale, quia obiectum formale est quod specificat : ergo non ipsa persona prædestinata, sed res, seu terminus ad quem est prædestinatio pertinent ad rationem obiecti formalis. Et idem constat ex ratione supra adducta, quia persona de se est indifferens, ut pertineat ad prædestinationem, & reprobationem, & subiiciatur prouidentiae communi, vel particulari : ergo ex sola ratione personæ non potest sumi ratio formalis prædestinationis, quæ distinguat illam à reprobatione, vel constituat in ratione prouidentiae supernaturalis, siquidem persona supernaturalis non est, sed solum gratia & gloria, quæ est res ad quam prædestinatur persona : ergo inde sumitur ratio formalis, quia inde sumitur proprium distinctiuum prædestinationis à reprobatione, & constitutiuum prouidentiae specialis supernaturalis per modum obiecti, & termini ad quem.

Ad fundamenta opposita resp. quod prædestinatio supponit dilectionem amicabilem, sed formaliter non est ipsa dilectio, sed prouidentia circa rem sic dilectam. Prouidentia autem est sicut actio & motus, quia est directio seu transmissio ad aliquem finem; & ideo ab ipso fine seu termino ad quem sumit speciem, non à persona, quæ se habet ut subiectum transmissum. Itaque differentia & inter amorem amicabilem, & gubernationem seu directionem, quod amor est affectus vnitius; & ideo principaliter debet respicere extrema vniuersalia, quæ in amore amicitiae sunt ipsæ personæ, non verò res in quibus communicant personæ sic vnitæ. Gubernatio autem seu prouidentia est directio, & transmissio personæ dilectæ ad aliquem finem, quem illi volumus, & talis transmissio non se habet ut vnio cum persona, sed ut motus seu delatio personæ ad finem; & talis motus non respicit personam ut obiectum formale, sed finem seu terminum ad quem, cuius subiectum est persona. Addo tamen secundò, quod etiam in ipso amore amicali, sic directe respiciente personas, adhuc formalis ratio est res, quam illi volumus, vel saltem est conditio ad ipsam rationem formalem requisita, non quia res quam volumus amico, sit principale obiectum amicitiae, sed quia persona quæ est obiectum amicitiae fundat diuersam rationem amicitiae secundum diuersas habitudines ad diuersas communicationes : inde enim diuersificari amicitias docet S. Thom. 2. 2. quest. 23. art. 1. sicut alia est amicitia & societas inter ciues, alia inter milites, vel mercatores propter diuersas communicationes. Sic in amicitia Dei erga hominem, licet principale obiectum quod diligitur sit persona, tamen communicatio in bonis supernaturalibus gratiæ, & gloriæ distinguit istam amicitiam ab alio amore merè naturali, & sic vel se habet ut ratio formalis illius, vel ut conditio maximè ad illam requisita. In prouidentia autem seu gubernatione, quæ se habet ut motus & delatio ad istum finem, tanquam ad terminum ad quem, habet se ut ratio formalis

formalis ipse terminus, & licet persona prædestinata & gubernata se habeat ut sagitta, quæ recipit impressionem à sagittante ad aliquem finem, tamen impressio non se habet ut terminus *ad quem*, sed ut motio deferens ad terminum *ad quem*; & idè neque ipsa impressio; nec sagitta, aut persona se habent ut ratio formalis, sed ut subiectum vel motio respicientes terminum *ad quem* à quo sumitur ratio formalis.

- 8 Statim verò occurrere potest difficultas, quia aliquando in prædestinatione non distinguitur finis *qui*, & *cui*: ergo non oportet quod prædestinatio respectum dicat ad ista duo. Antecedens patet in prædestinatione Christi, cuius prædestinationis subiectum non est natura humana, sed ipsa persona, ut docet D. Thom. 3. p. q. 24. art. 1. natura enim propriè non prædestinatur, nec redditur filia, quia solum persona est capax filiationis, & multò minùs filiatio naturalis Dei potest convenire naturæ humanæ, quia natura humana cum sit creata, non potest in ipsa ratione naturæ naturaliter procedere à Deo. Id autem ad quod prædestinatur Christus tanquam ad terminum, est ipsamet filiatio naturalis, quæ est persona divina, quia prædestinatus est ut esset filius naturalis, & non adoptivus, sicut nos, iuxta illud Rom. 1. *Qui prædestinatus est filius Dei in virtute*: ergo non distinguitur ibi terminus prædestinationis à subiecto.

Resp. de hac prædestinatione Christi quæ singularissima est, nihil nos agere in præsentia, sed pertinere ad locum citatum 3. p. Breviter tamen dicimus quòd adhuc in illa prædestinatione distinguitur subiectum, & terminus, saltem secundum diversas formalitates: si enim nullo modo distinguerentur, evacuaretur prædestinatio: nihil enim prædestinatur ad id quod iam est, sed ad id quod ei superuenit, & per gratiam datur, cum prædestinatio sit gratiæ præparatio, ut dicit August. de prædestinatione Sanct. cap. 10. Et exemplum ponit in ipsa prædestinatione Christi, cap. 15. Subiectum ergo illius prædestinationis est ipsa persona Christi, non ut est naturaliter filius in natura divina, sed ut capax eiusdem filiationis naturalis per gratiam unionis in natura humana; & sic filiatio naturalis ut communicata gratuito, est terminus prædestinationis, & ipsamet persona filij in quantum persona hominis, est subiectum huius prædestinationis, in quantum est capax istius gratiæ unionis, non ratione sui, sed ratione naturæ humanæ, quæ licet non reddatur filia, ut subiectum quod, est tamen id quo persona filij Dei in quantum homo, est capax huius filiationis per gratiam, qui in natura divina id habet per naturam. Si autem illa persona ut homo, est capax filiationis per gratiam, consequenter per prædestinationem, quia prædestinatio est ad gratuitum beneficium præparatio; in natura autem divina non est capax per gratiam, neque per prædestinationem. Itaque terminus illius prædestinationis non est filius Dei absolute, sed ut in homine, & sic est gratuita illi personæ, non in se, sed ut homini, & terminus huius prædestinationis est de novo factus, non in se, sed in sui communicatione: Neque enim illa prædestinatio facit de novo filiationem Dei naturalem, sed communicationem illius in tempore, quando Verbum caro factum est.

Præscientia, præparatio, & certitudo prædestinationis quomodo intelligantur.

- 9 In his particulis explicandis consurgit diffe-

rentia inter sententiam defensorum scientiæ mediæ, & nos. Defensores enim scientiæ mediæ multò aliter intelligunt istas particulas, ob quarum fortasse sinistram intelligentiam voluerunt etiam aliàs definitiones prædestinationis tradere, ut *suprà* vidimus. Nam nomine præscientiæ intelligunt scientiam mediam, qua Deus ante omne decretum suæ voluntatis cognoscit omnem vim & efficaciam mediorum, & consensum nostrum futurum, vel non futurum. Nomine autem præparationis beneficiorum Dei, intelligunt communiter præparationem specialium auxiliorum, & congruentium, non tamen ex sua intrinseca vi & natura, sed ex nostro consensu, & cooperatione præuisa. Imò P. Lessius *disp. de prædestin. citatus à M. Gonzalez hic disp. 69. art. 2.* Dicit gratiam, quæ datur prædestinatis, non distingui ab ea, quæ datur reprobis, nisi ex effectu & cooperatione nostra, quæ pendet à libertate nostra. Vnde impugnat specialem præparationem gratiæ & auxiliorum, etiam ex præsupposita scientia media, sed docet quòd antè absolutam prævisionem nostri usus liberi arbitrij eodem modo Deus se habet cum electis & reprobis, ductus ea ratione, quia Deus non est insidiator salutis reproborum, licet sit adiutor electorum: si autem Deus solum præbere vellet electis gratiam, quam scit habituram effectum, reprobis autem eam quam cognoscit esse frustrandam, licet illos adiuveret & beneficiaret sua providentia, his tamen insidiari videretur, solum eam gratiam tribuens, quæ frustranda est, cum posset aliam efficaciorē tribuere. Denique nomine certitudinis, cum dicit August. in definitione; *Quibus certissime liberantur quicumque liberantur*, intelligunt non certitudinem ortam ex intrinseca efficacia mediorum deducentium nos ad finem, sed ex præscientia conditionata, qua Deus prævidet quid nostra voluntas factura sit in tali vel tali occasione, tali vel tali gratia provenienta, non ex vi decreti divini, sed ex libertate sua, cum ipso tamen Dei adiutorio. Lessius autem hanc certitudinem ponit in ipsa scientia visionis, qua Deus prævidet bonum usum nostrum de facto, & perseverantiam usque ad finem, etiam si Deus eodem modo se teneat ex parte electorum & reproborum.

Hæc omnia sunt corollaria, & consecutiones 10 scientiæ mediæ, in qua constituenda ut latè deduximus *præced. tomo disp. 20. art. 4.* illud non minoris inconuenientis est, quòd prædestinationem non ponunt distingui à providentia communi per aliquid speciale ex parte Dei se tenens, & ab eo caulatum, sed per aliquid ex parte nostra præscitum à Deo, sed stantibus eisdem donis, & auxiliis diuinis datis reprobo aut prædestinato, redditur specialis providentia illa prædestinatio, & secernitur à reprobatione per hoc quod Deus præscit futurum à libero arbitrio. Quod totum ex verbis Molinæ ostendimus *loco cit.* & quàm è diametro aduersetur D. Thom. cuius verba ex q. 6. de verit. art. 3. retulimus, à quibus se Molina penitus expedire non potuit. Vbi apertè S. Doctor dicit quòd si dicatur quòd Deus ordinat prædestinatum ad salutem, sicut & quemlibet alium, sed cum hoc de prædestinato scit, quod non deficiet à salute, sic inquam dicendo, non diceretur prædestinatus differre à non prædestinato ex parte ordinis, sed tantum ex parte præscientiæ euentus; & sic præscientia esset causa prædestinationis, nec prædestinatio esset per electionem prædestinantis, quod est contra auctoritatem Scripturæ, & dicta Sanctorum. Vnde præter certitudinem

tudinem præscientiæ, ipse ordo prædestinationis habet infallibilem certitudinem. Vide *cit. loco* responsiones Molinæ ad istam auctoritatem D. Th. & eorum refutationem, & August. etiam auctoritates, quas *ibi* citauimus, quia de hoc ipso fuit consultus à S. Prospero in epistola ad August. sub finem, de quo amplius *infra* dicturi sumus agendo de prædefinitionibus diuinis, & *suprà* egimus tractando de efficacia decretorum Dei ex sua natura, & non ex scientia media.

II Illud tantum admouerim, quod attinet ad Dei electionem circa prædestinatos, parum differre communem sensum ponentium scientiam mediam, tamquam requisitam ut Deus habeat certitudinem mediorum & infallibilitatem consecutionis in effectu à sensu P. Lessij ponentis non dari præparationem specialem beneficiorum Dei, etiam ex scientia media, sed solum ex præsuppositione bonorum operum & usus futuri nostri liberi arbitrij per scientiam visionis. Immo in hoc bene vidit P. Lessius non euacuari inconuenientia, quæ solent afferri circa præparationem Dei, specialem ante præuisum nostrum bonum usum ex sola præuisione scientiæ mediæ. Nam communiter qui ponunt scientiam mediam ut præuiam, & requisitam ad ipsam prædestinationem sic philosophantur, quod Deus visis omnibus combinationibus & ordinibus rerum, vidit etiam quomodo in tali occasione & in tali tempore, cum tali auxilio iste conuerteretur, alter non, iste perseveraret, alius non, & consequenter iste damnaretur, non alius, & similiter vidit quod si illi qui non conuerteretur aut perseveraret in illi occasione & cum illo auxilio, daret aliud auxilium, vel in alia occasione, utique perseveraret aut conuerteretur. Et sic præuidens omnia ista sic futura sub illa conditione, præparauit, id est ex omnibus illis combinationibus elegit istam in qua tale auxilium vult dare isti quod præuidit ex eius bono usu non frustrandum, & alteri noluit dare aliud, quod si daret, non frustraretur, sed illud dare voluit quod frustrandum præuidit.

Contra istam præparationem beneficiorum & modum prouidentiae confurgit duplex difficultas.

12 Prima, quod Deus eodem modo se habendo ex parte sua circa duos homines, & nihil magis procurando pro vno, quam pro alio, nec diuersa beneficia aut dona sua largiendo, sed prorsus eadem, vnus consequetur vitam æternam, alter amitteret; & sic vnus prædestinatio præ alio non reduceretur ad specialem amorem, & specialem electionem gratiæ diuinæ intrinsecam, sed solum specialem extrinsecam, & ex ordine ad nostrum bonum usum ei extrinsecè adiunctum, & à Deo præuisum, siquidem cum eadem gratia diuina prout ex parte Dei se tenet, & à Deo est, vnus saluatur, alter non, cum tamen euidenter dicat Apostolus Paulus, Roman. 11. *Sic & in hoc tempore reliquiæ secundum electionem gratiæ saluæ factæ sunt.* Sequela patet, qui videt Deus quod producendo duos homines, & dando illis æqualem gratiam, vnus utitur bene illa, & perseverabit, & consequetur salutem, alter non bene utitur & non perseverabit: ergo nihil magis amando vnum quam alium, nec in naturalibus, nec in supernaturalibus, nec magis eligendo secundum gratiam istum, quam illum (siquidem electio & dilectio Dei ex donis quæ confert perpenditur (iste saluabitur, alius damnabitur.

Nec dici potest, habuisse illum qui saluatur maius beneficium & beneuolentiam Dei, quia voluit Deus illum ponere de facto, & absolute in tali occasione, & præbere tunc gratiam cum qua

videbat consensurum, & alteri noluit præbere aliam gratiam, vel in alia occasione; in qua esset consensurus. Et sic licet sit eadem gratia intrinseca facta vni atque alteri, & idem donum Dei; est tamen diuersa gratia extrinseca in hoc quod vni voluit dare gratiam in occasione qua consentiet, alteri nunquam voluit dare gratiam in occasione qua consentiet, licet eandem dederit quoad intrinsecam entitatem, & essentiam doni. Et ita non indiget diuersa prouidentia Deus, & magis speciali pro vno quam pro alio quantum ad effectus intrinsecos donorum, sed indiget diuersa prouidentia quoad collationem gratiæ pro diuersis occasionibus extrinsecis, & illa est prouidentia prædestinatiua. Hoc, inquam, dici non potest, quia secundum istam solutionem non indiget Deus aliquid speciale dare, & præparare vni præ alio ex parte sua & donorum quæ ab ipso subministrantur, sed tantum occasiones eligere; & futurum consensum ex parte nostra quem præuidet futurum: ergo quod iste prædestinetur seu saluetur, non est ex speciali electione secundum gratiam, sed ex speciali electione occasionum, quibus eadem gratia in vno habebit consensum, non in alio. Non dicit autem Apostolus quod secundum electionem occasionum reliquiæ saluæ factæ sunt, sed secundum electionem gratiæ. Præterea posita eadē gratia intrinseca in vno atque in alio, eligere extrinsecam gratiam magis pro vno, quam pro alio, scilicet quod vni in hac occasione detur qua consentiet, alteri non, vel est electio alicuius rei supernaturalis, & ad supernaturalem ordinem spectans, vel in supernaturalibus donis æquales sunt, & non eligitur vnus præ alio, sed solum in aliquo extrinseco quod verè naturale est, scilicet in diuersis occasionibus, in quarum vna iste consentiet, non alter, & in altera ille etiam consentiret si daretur sibi gratia. Si est aliquid supernaturale quod in vno eligit Deus præ alio: ergo iam in supernaturalibus donis æquales non sunt, sed vnus potior alio; supernaturale autem donum aliqua gratia intrinseca est, scilicet in sua entitate supernaturalis, & ex Deo descendens; & sic non seruatur casus positus quod sint duo æquales in gratia & donis supernaturalibus sibi collatis. Quare illa prouidentia communis reprobis & prædestinatis non fit specialis pro prædestinato, nec specialia beneficia præparat in ordine supernaturali, per hoc solum quod præsciat diuersam occasionem in vno, quam in alio, & diuersum usum sui liberi arbitrij cum eisdem donis supernaturalibus: sic enim illa specialis prouidentia in isto præ alio non est aliud quam præparatio alicuius rei merè naturalis & præsupposita per scientiam mediam, non præparata per electionem gratiæ prædestinantis, si tota gratia specialis reducitur ad illud extrinsecum, quod Deus eadem dona supernaturalia det pro tali occasione, & cum tali usu nostri liberi arbitrij præsupposito non præparato à Deo, nec gratiæ supernaturalis in vno præ alio.

Et hoc vrgetur amplius, quia quando præuidit quod Paulus, v. g. in tali occasione præuentus tali gratia consentiet perseverabit & saluabitur, Petrus autem in eadem occasione eadem gratia præuentus non consentiet nec saluabitur, etiam vidit quod sine noua gratia ex parte Dei si voluisset Petrus consentiret & saluaretur, & quod erat possibile illa mutatio voluntatis in Petro sine noua gratia: ergo vidit intra illum statum conditionatum esse possibilem saluationem Petri, & discretionem, à reprobatione per solam differentiam voluntatis suæ, & non ex noua gratia Dei: Ergo intra statum conditionatum

tionatū manendo, multorum saluationē, & alio-
um reprobationem Deus videt, non ex gratia spe-
ciali sua nasci, sed ex aliquo merē naturali ex parte
liberi nostri arbitrij se tenente, nēpe ex adhibiti-
one nostrae libertatis & vsus nostri, vel non adhibi-
tione, & ex tali occasione extrinseca, vel ex quo-
cumque alio quod in se supernaturale non est, nec
ex dono speciali Dei descendens. Si ergo saluatio
vel condēnatio intra statum conditionatum vide-
tur à Deo sine noua gratia speciali supernaturali &
à se descendente pro vno magis quā pro alio:
prædestinatio ergo & reprobatio deducta ad sta-
tum absolutum non indigebit noua & speciali gra-
tia absoluta supernaturali & à Deo descendente,
sed sola & mera purificatiōe illius cōditionis, qua
purificata soluitur status conditionatus, & transit
in absolutum. Et sic nec in statu conditionato, nec
absoluto, prædestinatio & saluatio vnius pendet
ab aliqua speciali præparatione Dei, & beneficio-
rum eius in genere supernaturali præ alio, quia in
donis supernaturalibus æquales sunt.

13 Et hinc nascitur secūda difficultas quæ videtur
mouisse, P. Lessium. Nam si consistit specialis pro-
videntia prædestinationis, non in hoc quod Deus
præbeat specialia dona vni, quibus cōuertatur, quæ
non alij, sed quod extrinsecam gratiam maiorem
faciat vni, quā non alteri, quātū ad hoc quod vni
solum vult dare gratiam in ea occasione qua scit
conuertendum, & alij solum in ea occasione in qua
scit esse frustrandam gratiam: ergo de industria,
id est ex electione videtur insidiari Deus saluti ali-
quorum, dum in hoc totam electionem & indu-
striam suam ponit, vt vni det gratiam in occasio-
nibus, quibus præuidet non frustrandā, alij solum in
occasionibus quibus frustrandam videt, in alijs ve-
gratiā subtrahit. Et sic per positionē scientiæ me-
diæ non cessant istæ quærelæ, quæ contra ponen-
tes absoluta decreta præuidentiam nostram volun-
tatem & vni dantem, quod conuertatur, alij non,
vnum eligentem ad gloriam ante præuisa merita,
alium non, inducuntur: nam etiam posita scien-
tia mediæ, nūm Deus possit eligere pro reprobo
occasionem in qua bene vteretur gratia, & dū est
in illa ipsum uauferre ex hac vita, vel in alijs occa-
sionibus dare talem gratiā qua conuerteretur, hoc
noluit, certē eo dem modo quærelæ istæ poterunt
dari contra ponentes scientiam mediā, & contra
negantes. Vnde ipse Lessius posuit quod nec etiā
Deus præparat specialia beneficia pro prædestina-
to ex præsupposita scientia mediæ, sed quod tota
gratia prædestinati differt à reprobo ex euentu &
cooperatione nostra. Quod est penitus euacuare
electionem secundum gratiam, & ex ipsius præde-
stinantis electione & directione, sed solum relin-
quere illam euentui & cooperationi prædestinati.
Nec sequitur illud conueniens Lessij de insidia-
tione salutis, quia Deus, quibus dat gratiam, mi-
sericorditer largitur, quibus autem denegat, iusto
iudicio denegat: habet enim tanquam figulus po-
testatem facere ex eadem massa vnum vas in hono-
rem, aliud in contumeliam, ob suam summam po-
testatem, & occultissima iudicia, sine vlla insidia-
tione pro reprobis, quia cum æquissima iustitia, &
summa misericordia pro electis. De quo plenius
dicemus *inf. art. ultim.*

14 Concludamus ergo quod illæ particulæ defini-
tionis, *Præparatio beneficiorum Dei, præscientia &
certitudo mediorum*, sic accipiendæ sunt, quod præ-
paratio est circa auxilia ex se, & prout à Deo des-
cendunt, seu ex eius electione congrua & efficacia,
quia vt dicit August. *lib. de correp. & gratia, c. 12. Si
in tanta infirmitate vita huius, ipsis relinqueretur*

*voluntas sua, vt in adiutorio Dei sine quo perseuerare
non possent, manerent si vellent, nec Deus in eis opera-
retur vt vellent, inter tot & tantas tentationes, infir-
mitate sua voluntas ipsa succumberet & ideo perse-
uerare non possent, quia deficientes infirmitate, nec
vellent, aut non ita vellent infirmitate voluntatis vt
possent. Subuenit igitur infirmitati voluntatis
humana, vt diuina gratia indeclinabiliter & insepa-
rabiliter ageretur; & ideo quamuis infirma non de-
ficeret, neque aduersitate aliqua vinceretur. Non er-
go præparat Deus solum gratiam sufficientem &
relinquit, expectās quid facturi sumus, aut solum
præparat id quod præscit nos facturos per vsum
nostrae libertatis, sed id quod ipse gratia sua inde-
nabiliter facit vt operemur. Nec enim quādo Deus
nobis promittit fidem, aut bona opera (idem est si
præparat) promittit id quod præscit nos factu-
ros, sed quod ipse in nobis facturus est, vt ibidem
dicit S. Aug. c. 7. & l. de præd. SS. c. 10. Promisit, in-
quit, quod ipse facturus est, non quod homines, quia
et si faciunt homines bona quæ pertinent ad colendum
Deum, ipse facit vt illi faciant quæ præcepit, non illi
faciunt vt ipse faciat quod promisit. Similiter illa
particula præscientia, non intelligitur ab Aug. de
præscientia qua prouidet Deus quid nos facturi
sumus, sed quod ipse, & ita debet esse præscientia
innixa decreto Dei, nō prædestinatio innixa præ-
scientiæ, vt Prosper consuluit Aug. in e. istola ad
ipsum, circa finem. Aug. autem docet, quod præde-
stinatione ea præscit quæ fuerat ipse facturus,
vt dicit l. de præd. SS. c. 10. & c. 17. Ergo præscien-
tia prædestinationis in definitione posita non est
scientia mediæ præuidens quid nos facturi sumus
ante decretum Dei, sed scientia factiua eius quod
præscit. Denique certitudo illorum mediorū qui-
bus prædestinati liberantur, non est certitudo so-
lius præscientiæ, sed etiam causalitatis & potesta-
tis Dei, tum quia, vt nuper vidimus ex Aug. præ-
destinatione, præscit Deus id quod est facturus ip-
se, & cōsequenter certitudo illa est certitudo cau-
salitatis & factiouis: tum quia l. cit. de correp. & grat.
c. 8. reddens rationem cur oratio Christi pro fide
Petri vt non deficeret, non poterat esse inanis, sed
infallibilis, dicit, perituram quidem fidem Petri, si
voluntas eius deficeret, & permansurā, si maneret. Sed
quia præparatur voluntas à Dño, ideo pro illo non pos-
set esse inanis oratio. Certitudo ergo & infallibilitas
illa ex præparatione Dei est, seu ex causalitate gra-
tiæ non ex sola præscientia. De quo vide quæ su-
prā d. 5. diximus agendo de efficacia decretorum,
& iterum *inf. agendo de prædefinitionibus.**

*An prædestinatio sit distinctum attribu-
tum à prouidentia.*

Aliis verbis solet proponi hoc dubium, an pro-
uidentia cōmunis, & prædestinatio sint species di-
uersæ prouidentie, & ita sint partes subiectiue pro-
uidentie, an verò solum partes integrales respi-
cientes diuersas materias seu obiecta materialia
eiusdem virtutis?

Res non est magni momenti, sed in ea diuidun-
tur Theologi.

Quidam dicunt esse diuersas species, quia pu-
tant diuersas rationes formales inueniri, quia istæ
sumuntur ex diuerso fine gubernationis, licet sub
eodem Principe, sicut aliter gubernantur milites,
aliter domestici, aliter filij. Vnde & prudētia diui-
ditur tanquam in species, in regalē, militarem, æ-
conomicam, &c. viderit S. Thom. 2. 2. q. 48. Et ita
non repugnat etiā diuersas species prouidentiarum
in Deum reducere nostro modo intelligendi. Et
prædestinati

prædestinati gubernantur vi filij, aliæ res vt mancipia. Iuuantur etiam aliquibus exemplis. Nam in Deo sunt plures species relationum realium, sicut Paternitas, Filiatio, Spiratio: sunt plures species virtutum, vt misericordia, iustitia, mansuetudo, &c. sunt plures, idè & plura decreta. Cur ergo non plures gubernationes, & species prouidentia?

E contra alij nituntur vnam tantum vim prouidentia ponere propter infinitam vim prouidendi comprehensiuam omnium sub vna ratione. Iuuantur etiam aliquibus exemplis. Nā in Deo non est duplex misericordia, vna pro supernaturalibus effectibus, altera pro naturalibus, non est duplex omnipotentia, vna pro naturalibus, alia pro supernaturalibus: non est duplex ars, alia pro naturis rerum, alia pro supernaturalibus: ergo nec duplex prouidentia.

Ego in hac parte sic censeré Prouidentia dupliciter sumi potest. Vno modo pro ipsa vi directiua, & quæ se habet vt ars gubernatoria (sic eam vocat S. Thom. in 1. dist. 40. q. 1. art. 2.) Alio modo pro ipsis decretis vt applicatis ad creaturas prouidas. Si prouidentia sumatur primo modo, existimo esse vnam in specie atoma, non solum identicè quatenus omnia sunt vnum in Deo, sed formaliter in ratione prouidentia summæ & vniuersalissimæ, cuius partes quasi integrales sunt prædestinatio, prouidentia communis, &c. quæ diuersas materias prouidendas respiciunt. Ducor ad hoc, quia D. Thom. ponit 1. 2. q. 93. art. 1. ad 1. legem æternam esse vnam, quia sub vna summa ratione omnium actus dirigit: ergo eadem ratione prouidentia summa erit vna, quia est vis directiua per modum dirigentis, sicut lex per modum regulæ. Secundò quia regimen & gubernatio Dei est maximè monarchica, & ad vnum redacta: ergo sub vno summo ordine complectitur omnia sibi subiecta, & ad vnum finem gubernationis reducit: sed gubernationes distinguuntur secundum diuersum modum regiminis & ordinationem ad diuersos fines, vt docet S. Thom. 1. p. q. 108. art. 1. ergo oportet in Deo ponere vnum modum regiminis in ratione vnius summi Principatus: ergo & vnam summam prouidentiam in specie atoma.

Si autem posteriori modo consideretur prouidentia ex parte decretorum tangentium creaturas, sic non est inconueniens quòd prouidentia communis & prædestinatio distinguantur, sicut distinguuntur ipsa decreta ex parte connotationis obiectorum, decreta autem ad prouidentiam pertinent. Sed tamen simpliciter prouidentia supponit pro vi directiua dirigente; & ideo simpliciter dicendum est quòd est vna in specie & numero in Deo.

Nec obstant exempla opposita: Nam relationes plurificantur in Deo ob diuersam oppositionem, propter quam realiter distinguuntur, quæ oppositio non inuenitur inter prouidentiam & prædestinationem. Idè multiplicantur ob connotationes & respectus rationis, sicut decreta in prouidentia. Virtutes morales distinguuntur ratione tanquam diuersæ species, quia non omnes habent eandem formalem rationem vniuersalissimi regiminis, sicut vna

summa prouidentia.

ARTICVLVS II.

An prædestinatio & prouidentia
sint actus intellectus, vel
voluntatis?

Concurrere ad prouidentiam actum intellectus & voluntatis (idem est de prædestinatione, quæ species quædam prouidentia est) D. Thom. perspicuè docet in initio q. 22. Est hoc multis virtutibus seu actibus commune, quæ exigunt ad sui consistentiam in vtraque potentia libere, sicut fides exigit affectum credulitatis in voluntate, quæ solet dici pia affectio, & assensum veritatis in mente, quem tamè non elicit nisi volens. Similiter prudentia prærequirit rectam intentionem in voluntate circa omnes materias virtutum, & ordinationem qua disponit de agendis in mente, Similiter prouidentia, quia est pars prudentia, debet inesse gare, & ordinare ac procurare de medijs ad aliquem finem consequendum necessarijs, quod pertinet ad intellectum, & deinceps ad executionem eorum indiget efficacia, quæ ex impulsu & motione voluntatis oritur, sicut etiam præcedere debet finis intentio, ne prouidentia fortuito agat, sed ex intentione finis, à quo vt à principio fixa sunt, quæ ab eo deducuntur.

Quid certum, & quid dubium in
hac parte.

Difficultas est, quisnam ex his duobus actibus sit, in quo formaliter & essentialiter prouidentia consistat. Nam ex æquo & immediatè non posse in vtroque consistere, videtur minus dubitabile, licèt aliquibus tribuatur ea sententia, vt Ægidio in 1. d. 40. a. 1. & Marfilio ibidem, aliisque antiquis eo quod prædestinatio vtroque actu significatur, aliquando præscientia, aliquando electionis, & vtrumque Aug. in sui definitione cōiungit dicens quòd est præscientia, & præparatio beneficiorum Dei. Cæterum hoc reiiciendum est statim tãquam aliquid minus dubitabile, tum quia ipsæ potentia intellectus & voluntatis ita se habent in operando, quòd vna sequitur ad aliam, & præsupponit aliam, non æquè immediatè procedunt: mouetur enim voluntas ab intellectu, & rursus voluntas mouet voluntatem; ergo similiter actus seu virtutes talium potentiarum debent ordine quodam procedere, & vnum se habere vt mouens ad aliud, & antecedenter seu præsuppositiuè ad ipsum. Vnde in vno poterit consistere formaliter & essentialiter, in alio motiuè seu præsuppositiuè; licèt vterque requiratur. Non enim potest dici quòd ita requiruntur essentialiter, sicut materia & forma, seu partes ad vnum compositum, quia eo modo requiruntur, quo natura suarum potentiarum id permittit. Potentia autem illæ & actus earum tales sunt, quòd vna earum semper se habet ad aliam per modum mouentis, & consequenter secundum aliquam antecedentiam, seu prioritatem vnius & posterioritatem alterius. Numquam ergo conueniunt ad aliquid constituendum tanquam partes & extrema essentialiter simul, & ex æquo se habentia, sed requiruntur iuxta suam naturam vnum motiuè & antecedenter ad aliud. Tum etiam hoc deducitur ex eo quod prouidentia, sicut & prudentia & fides, aliæque virtutes, quæ aut plures potentias perficiunt, aut ex perfectione plurium resultant, non sunt aliquid vnum per solam aggregationem, &

vnitate

vnitate per accidens, seu sola vnitate ordinis: constat enim quodd fides est vna virtus, & vnus habitus, & similiter prudētia, & virtutes morales, quæ moderantur passionēs. Et tamen ad omnes istas concurrere debent actus diuersarum potentiarum, sicut ad fidem pia affectio voluntatis, & assensus veritatis. Ad prudentiam recta intentio affectus, & ordinatio, seu dispositio vera ex parte intellectus. Ad virtutes morales recta electio voluntatis, & moderatio passionū in appetitu sensitivo. Et tamen istæ virtutes non sūt vnū sola vnitate ordinis vel aggregationis, sed vnitate per se, quia virtus, & vitium, vt patet ex eorum definitione, qualitates sūt, & ad speciem habitus vel dispositionis pertinent, & in prædicamento qualitatis ponuntur, dicitur enim virtus, *qualitas mentis, qua nemo male vitur*, &c. Ergo non debent esse aliquid vnū per accidens, & vnitate ordinis, quia ea quæ non habent vnitatem per se, non ponuntur in prædicamento, & sic oportebit alias definitiones tradere virtutum, si hæc doctrina non admittitur. Vnde si plures actus potentiarum requiruntur ad aliquam ex his virtutibus, non debent ex æquo requiri, sed vnus præsuppositiue, & motiue, alius essentialiter, & formaliter, & de illo currit difficultas quisnam sit. Et sic D. Thom. in hac *quest. 22. art. 1. ad 3.* dicit, quodd *Providence non ex æquo respicit intellectum & voluntatem, sed est in intellectu præsupponendo voluntatem.* Et *quest. 14. de veritate art. 4.* ostendit, quodd *Fides non est ex æquo in intellectu & voluntate, quia vnus habitus vnus est actus.* Loca autem Scripturæ, & August. adducta in contrarium non vrgent, quia etsi vtrumque actum requirant, sed non ex æquo, nec eodem modo: præterquam quod in definitione August. præparatio mediorum non significat actum volendi, sed ordinandi parando quæ fieri debent.

Due sententia.

3 Supposito ergo quodd providentia essentialiter debet consistere in vno ex his actibus, & non ex æquo & immediatè in vtroque, duplex sententia principalior consurgit, ad quam cæteræ aliæ reducuntur; altera quæ illam constituit in actu voluntatis; altera in actu intellectus. Antiquior est hæc dissensio, quàm inter Recentiores orta, nam Scotus, Bonaventura, Gregorius, Gabriel, Aureolus in *40. dist. libri primi sententiarum* existimant, essentialiter consistere providentiam in actu voluntatis, id est, in dilectione & electione mediorum. Nam licet præcedere debeat cognitio voluntatis actum, tamen executio, & consummatio eius quod per intellectum disponitur, ad voluntatem pertinet, & sic præsuppositiue, & antecedenter pertinebit providentia ad actum intellectus, consummantiue autem & substantialiter ad actum voluntatis. E contra verò D. Thom. eiusque discipuli simpliciter fatentur providentiam pertinere essentialiter ad actum intellectus, dirigentem, nō ad voluntatem eligentem, licet præsuppositiue, & motiue supponat voluntatem, sicut fides pertinet ad intellectum vt motum à pia affectione, & prudentia ad intellectum excogitantē, & discernentem de mediis virtutū, vt motum tamen à recta intentione circa illas. Nec negat D. Th. ad omnem actum voluntatis debere præcedere & mouere actum intellectus ad talem volitionem requisitum, sed cum varij sint actus voluntatis, & intellectus, stat bene quodd ad primum actum voluntatis præcedat actus aliquis intellectus, non mo-

Ioan. à S. Thoma in 1. part. D. Thoma.

tus à voluntate, sed præcisè motiens ipsam; sed postea ex actu voluntatis iterum moueatur intellectus ad alium actum, qui ex voluntatis motione efficaciam sumat, instante semper, & vrgente voluntate ipsum intellectum vt inuestiget, vt ordinet, vt discernat, & imperet. Et ita non ponit D. Tho. prudentiam & providentiam, & finem in actibus intellectus primis, qui purè sūt motientes aut representantes voluntati convenientiam obiecti, sed in actibus posterioribus, qui iam supponunt voluntatem affectam vel intēctione finis, vel convenientiam obiecti, & inde mouet intellectum ad aliquem assensum, vt in fide, vel ad ordinationem & dispositionem de agendis, vt in practicis, sicut in prudentia, vel providentia.

4 Occurrunt Recentiores, qui scientiæ mediæ clauo, totam prædestinationis, & providentiæ diuinæ gubernationem administrant, & in iudicio ferendo circa istas scientias fluctuant. Nam ex vna parte non audent omninò negare providentiam & prudentiam ad intellectum spectare, & similiter prædestinationem, propter manifestissimam Aug. Arist. Ciceronis, D. Thom. aliorumque antiquorum in definienda prudentia sententiam. Ex alia parte nolunt admittere prædestinationem & providentiam infallibilem esse in dirigendis nostris actibus ex aliquo præsupposito decreto libero diuinæ voluntatis antecedente directionem, & prædefinitionem ipsam de nobis, sed ex præsupposito, & præuiso ante omne decretum suum nostræ voluntatis consensu. Vnde libentius illis arridet prior illa sententia, quæ actum quidem intellectus requirit, tanquàm mouentem antecedenter voluntatem, sed in ipso voluntatis actu seu decreto postea secuto consummat providentiam ad exequendū. Et differentiam inveniunt in hac parte inter nostram providentiam, & diuinam, quodd nos quidem paulatim proficimus in disponendo, & dirigendo de mediis, & non toto apparatu & cognitione mediorum & circumstantiarum finem proponimus voluntati diligendum, sed proponitur primò ipsa bonitas, seu convenientia finis secundum se, & hæc statim mouet voluntatem, & trahit vt ametur, deinde ex amore finis fit per intellectum inuestigatio, collatioque mediorum, consilium, imperium, &c. & sic non mirum quodd actus illi qui versantur circa media ita sint in intellectu, quodd præsupponat aliquam efficaciam ex voluntate vrgentem, & instantem intellectui. At verò Deus non proponit aliquid amandum voluntati, nisi præconceptra omni ratione, & dispositione mediorum, & omni apparatu circumstantiarum propter infinitam & comprehensiuam notitiam qua res voluntati proponit. Et sic omnis actus intellectus, qui post volitionem finis conulat & ordinet de mediis, quod pertinet ad modum providentiæ nostræ, vacat in Deo, nec requirit providentia eius aliquem actum liberum præcedentem, dantem efficaciam providentiæ vt tractet & disponat de mediis, sed ipsa omnium mediorum consultatio & ordinatio præcedit omnem actum liberum Dei, quia per notitiam illam comprehensiuam & infinitam habetur quando primò res proponitur voluntati.

5 Hinc ergo Molina *1. p. q. 23. a. 1. disp. 2.* dicit quodd prædestinatio vtrumque actum dicit coniunctum, intellectus, & voluntatis, præcipue tamen actum intellectus significat, ita quodd ab actu rationis sumatur nomen prædestinationis, quia significat præuidere, præordinare, &c. Dicit tamen compleri per actum voluntatis, quem pertinere dicit ad prædestinationem intrinsecè. Cæterum illum

A a

actum

actum intellectus, quem principaliter dicit pertinere ad prædestinationem, constituit Mol. in ipsa scientia media, quia Deus prævidet omnia media, quibus potest quisque peruenire ad beatitudinem si in hac vel illa hypothese rerum constitueretur, non in aliqua cognitione supponente decretum liberum Dei: existimat enim ipse *ibidem*, electione ad gloriâ non alia ratione fieri, quam complacendo sibi in mediis, & sine ipso beatorum præmissis, quæ illis Deus exoptavit, quia elegit nos in Christo, ut inquit Paulus. Quare actus voluntatis in prædestinatione est posterior, & cōpletivus actus intellectus, à quo sumit nomen prædestinatio, & prædefinitio; eius tamen vis per voluntatem exercetur. Similiter P. Arrubal *hic disp.* 63. c. 4. eodem modo ponit, quod prædestinatio seu providentia est in actu intellectus, qui est cognitio mediōrum, quibus cōgruè quis deducitur ad beatitudinē, non tamē induit rationem providentiæ, & denominationē, nisi ex actu voluntatis acceptantis illa media: inde enim habet efficaciam prædestinatio. Et in hoc etiā cōvenit P. Alarcon *tract.* 4. de prædest. *disp.* 1. c. 2. num. 3. & citat Erize, quod actus scientiæ qui ad providentiā pertinet, non est actus visionis respectu eius quod providendū est, sed actus scientiæ simplicis & cōditionatæ, qua aliquod mediū cognoscitur ita congruum & aptū ad aliquē finē, ut si in executione ponatur, talis finis per illud obtimeatur. Vnde hi Authores solum ex parte intellectus requirunt pro providentia notitiā possibilitatis rei faciendæ, vel saltem conditionatā cognitionem. Simpliciter tamen ab actu voluntatis sumunt denominationē, aut complementum providentiæ. Vnde tandem P. Suarez in eam sententiā inclinat quod prædestinatio sit actus voluntatis, quatenus efficax providentia est, *lib.* 1. de prædest. c. 7. num. ult. eamque sententiam docet Vasq. *hic disp.* 87. c. 3.

Ex D. Thoma resolutio.

6 Conclusio. Providentia, & prædestinatio eius species consistūt essentialiter, & formaliter in actu intellectus, & iste actus nō potest esse simplex notitia possibilitatis & congruentia mediōrum, neque scientia media de illis, sed debet præsupponere actum voluntatis, qui antecederet, & motinē se habet ad prædestinationem.

Prima pars conclusionis, quod sit essentialiter actus intellectus, & solum præsuppositiōe voluntatis, non autem consumetur in actu voluntatis postea secuto, deducitur clarē ex D. Tho. qui *suprà* q. 22. a. 1. ad 3. ita dicit: *Ad 3. dicendū quod providentia est in intellectu, sed præsupponit voluntatē finis. Nullus enim præcipit de agendis propter finē, nisi velit finem. Vnde præsupponit & prudentia virtutes morales per quas appetitus se habet ad bonū, ut dicitur in 6. Ethicorum. Et tamē si providentia ex æquali respiceret intellectū & voluntatem, hoc esset absque detrimento divine simplicitatis.* Idem repetit in hac q. 23. a. 2. *Prædestinatio, inquit, est pars providentiæ, providentia autem non est in rebus pronis, sed est quædam ratio in mente pronitoris, ut supra dictū est.* Ergo secundum D. Tho. ad intellectum pertinet prædestinatio, & providentia. Idem manifestē docet q. 5. de verit. a. 1. ubi concludit, quod *Providentia includit & scientiam, & voluntatē, sed tamē essentialiter in cognitione manet non speculativa, sed practica.* Et q. 6. de verit. a. 1. tractans de prædestinatione dicit; quod *Prædestinatio in actu rationis consistit dirigētis, vel ordinātis in finē, sed ad directionem in finem præexigitur voluntas finis.* Videatur *ibidem* solut. ad 12. 13. & 14. D. Tho. sequuntur communiter eius discipuli, & interpretes *super hac loca* 1. p.

7 Fundamentum huius deducitur, cum ab autoritate, tum à ratione. Ex autoritate, quia sic intellexerunt veteres, qui providentiā, & prudentiā definiunt per cognitionē, seu actū intellectus. Nam in primis ipse D. Th. q. 5. de verit. affert ex Tullio, quod providentiā ponit partē prudentiæ in 2. veteris *Rhetorica* (*lib.* 2. de inuētiōe) & est pars prudentiæ cōpletiva: aliæ enim duæ partes, scilicet memoria, & intelligētia, nō sunt nisi præparationes quædā ad prudentiæ actū. Ipsam autē prudentiā Tullius *ibidē* definit, quod est *sciētia bonarū, & malarū verū.* Et Arist. *infra* citandus, quod est *habitus cum vera ratione actīvus*, & sic ad intellectū pertinet prudentia, & providentia. Similiter Boëtius *lib.* 4. de consol. inquit, quod *Modus rerum, qui cum ipsa divina intelligētia puritate conspicitur, providentia nominatur.* Et *inf.* *Providentiā est ipsa divina ratio, in summo Principe cōstitutā, quæ omnia disponit.* Item S. Aug. *lib.* 83. qq. q. 31. ponit providentiā esse partē prudentiæ, & per illā videri aliquid ut futurū. Actus autē vidēdi ad intellectū pertinet. Videri potest D. Th. 2. 2. q. 47. a. 1. & 2. ubi ponit prudentiam esse in intellectu ut in subiecto, providentiam autem esse partem prudentiæ docet *ibi* q. 48.

8 Loquendo autem specialiter de prædestinatione, pertinere illam ad vim cognoscitiuā deducitur ex illo ad Rom. 11. *Non repulit Deus plebē suā, quam præsciuit, ubi ly præsciuit est idē quod prædestinavit, sic explicante Aug. lib. de bono perseverantiæ c. 18. ubi inquit, Nullus dubitare vel negare permittitur, ubi ait Apostolus. Non repulit Deus plebem suam quā præsciuit, prædestinationem significare voluisse; præsciuit enim reliquias, quas secundum electionē gratiæ fuerat ipse factururus. Hoc est ergo prædestinavit: sine dubio enim præsciuit si prædestinavit, sed prædestinasse est hoc præscisse quod fuerat ipse factururus. Quid ergo nos prohibet, quando apud aliquos verbi Dei tractatores legimus Dei præscientiā, & agitur de vocatione electōrum, eandē prædestinationē intelligere.* Vbi Aug. in nullo alio ponit & explicat rationem prædestinationis, quam in eo quod pertinet ad cognitionē, scilicet in præscientiā, dūmodo sit de re, quam ipse Deus factururus est, & hoc modo vult intelligi, nomē præsciētia, quādo apud aliquos Authores invenitur, & agitur de vocatione electōrum, scilicet quod ipsa sit prædestinatio. Ergo iuxta Aug. in actu intellectus collocanda est. Et idē definitionē prædestinationis tradit ipse *eodē libro* c. 14. per actus pertinentes ad cognitionē, dicens, quod est *præsciētia, & præparatio beneficiorū Dei, &c.* Vbi ly *præscientia* manifestē pertinet ad vim cognoscitiuā: ly verò *præparatio* etiam actū intellectus denotat, quia importat ordinationem, & directionem in finem, qui est actus proprius rationis, & non voluntatis, ut dicit S. Thom. q. 6. de verit. a. 1. ad 13. disponere est quoddam ordinare; ordinare autem sapientis est, ut ex Philo. docet D. Thom. q. 5. de veritate art. 1. ad 4. in 2. loco positum: per actum enim appetitus & volitionis formaliter non præparamus, sed desideramus aut volumus præparare vel exequi. Tunc autem præparamus, quando disponimus & ordinamus quomodo aliquid faciendum sit, conferendo vnum alteri, quod totum ad actum rationis pertinet, & ad cognitionem.

9 Et licet verum sit quod aliquando etiam in Scriptura explicetur actus voluntatis pertinens ad prædestinationem, ut cum dicitur Rom. 9. *Iacob dilexi, Esau autem odio habui, & Ephel. 1. Elegit nos in ipso ante mundi constitutionem; Prædestinavit nos secundum propositum voluntatis sue, &c.* & sic non videtur ex Scriptura magis colligi quod consistat prædestinatio in actu intellectus, quam voluntatis.

Sed

Sed tamen Resp. quod Scriptura non debet istas quaestiones metaphysicas particulatim explicare; sed ex ea colligitur utrumque Dei actum requiri pro praedestinis, & aliquando explicat unum, aliquando alium, ut cum dicitur Luc. 11. *Complacuit Patri vestro dare vobis regnum*, explicatur actus voluntatis, cum dicitur Act. 13. *Crediderunt quotquot erant praordinati in vita aeterna*, explicatur actus intellectus qui est ordinare. Sed tamen inuenimus nomen praescientiae adiunctum nomini praedestinationis, ut Rom. 8. *Quos praesciuit & praedestinavit*, positum etiam pro ipsamet praedestinatione, ut Rom. 11. *cit. Non repulit Deus plebem suam, quam praesciuit*, & hoc iuxta intelligentiam Aug. qui etiam sic intelligi debere Authores, qui hoc tractant, affirmat, inuenimus etiam iuxta hoc definisse ipsum Aug. praedestinationem per praescientiam, & praeparationem qui sunt actus intellectus, non voluntatis, & hanc definitionem acceptasse communiter omnes Theologos. Non autem inuenimus in Scriptura actum voluntatis poni pro praedestinatione, aut eius nomini adiungi. Et licet dicatur nos praedestinari secundum propositum voluntatis divinae, non tamen dicitur per ipsum propositum nos praedestinari, sed secundum illud quasi alius actus sit praedestinatio, alius voluntatis secundum quam fit, nec inuenimus sic intellectum ab Aug. Patribus, & Theologis acceptantibus eius definitionem quod actum voluntatis intelligant pro praedestinatione, sicut actum intellectus. Magis ergo poterat autoritas Scripturae cum intelligentia Patrum pro ista scientia, quam pro opposita.

10 Fundamentum rationis sumitur ex eo quod prudentia est virtus residens in intellectu, & eius actus ad cognitionem spectat, ut docet Arist. 6. *Eth.* ubi videri potest D. Thom. *lect. 4.* definit enim ibi Arist. prudentiam, quod sit *habitus cum vera ratione actiuus*. Et quia prudentia versatur circa consiliabilia, & prudentes sunt bene consiliatiui, docet ad intellectum pertinere. Quod etiam communiter apud homines constat, quia prudentes dicuntur, non qui magis appetitiui, sed qui magis pondere rationum ducuntur, & melius ordinant de agendis, siue quantum ad consilium, siue quantum ad iudicium, siue quantum ad imperium, quod fit per intimationem, & ordinationem de aliquo faciendo. Haec autem omnia actus cognitionis sunt. Providentia autem est ipsissima ratio, & directio prudentiae in videndo, & intelligendo quae agenda sunt, quia providentia est quasi procul-videntia, & versatur circa futura, considerando, & disponendo quid pro futuris eventibus faciendum & ordinandum est. Sicut ergo prudentia ad vim cognoscitivam pertinet, ita & providentia, quae se habet ut intelligentia eius in ordinando, & gubernando quae agenda sunt.

Ceterum quia dici potest quod prudentia quidem & providentia ad vim cognoscitivam pertinent directivae & regulativae, sed tamen completivae pertinent ad voluntatem, & quia ibi consummatur vis providentiae, ibi quoque essentialiter debet consistere.

11 Circa hoc considerandum est quod praecipue oportet attendere ad obiectum alicuius actus, ut videamus ad quam potentiam pertinet formaliter, & ubi consummatur talis actus inter lineam sui obiecti, & sui generis, ibi essentialiter ponendus est, non ubi consummatur quantum ad aliquos effectus suosisti enim possunt iam esse alterius potentiae, quia iam supponitur tota essentia, & specificatio actus constituta ante effectus, qui subsequuntur ad rem constitutam. Et ita D. Thom. 7. *Eth. lect. 2.* & 1. p. q. 83. art. 3. & 1. 2. *quest. 13. art. 1.* Deducit electionem

nam pertinere ad voluntatem potius quam ad intellectum ex eius obiecto, quod est bonum seu conveniens, non verum, & in hoc consummatur eius actio in ipsa optione seu determinatione, non autem in consilio, seu collatione discursus: id enim antecedit optionem, & determinationem voluntatis. Quod verò etiam post electionem sequantur alij effectus in aliis potentiis ad executionem eorum, quae per electionem acceptata sunt, hoc non pertinet ad ipsam substantiam electionis consummandam, sed ad effectus electionis, in quibus etiam dicitur consummari quantum ad executionem, & eventum, non quantum ad substantiam, id est, quantum ad attingentiam obiecti. Et sic illa regula, quod ibi essentialiter consistit aliqua virtus, vel actus ubi consummatur, intelligenda est iuxta dicta, non ubi consummatur extrinsecè quoad effectus extrinsecos & executionem, sed intrinsecè quoad substantiam & attingentiam obiectivam consummatio quoad effectus, est iam extrinseca, quia effectus iam supponit rem cuius est effectus, constitutam, qua ab illa procedit, & sic consummatio per effectus est extrinseca, non intrinseca, & in qua essentialiter consistit. Sic ergo dicere quod providentia virtus voluntate ad executionem, & consummationem eius quod providet, non ostendit quod in voluntate consistit essentialiter providentia, quia illa consummatio est extrinseca, & quoad effectus, seu executionem providentiae. Executio autem supponit providentiam in se iam intrinsecè & consummatè constitutam. Vnde oportet videre, si consummatio providentiae etiam antecedenter ad eius executionem, & sistendo in attingentia obiecti sui, detur ante voluntatem, & intra cognitionem. Hoc autem manifestum est inueniri, quia obiectum providentiae & prudentiae est aliquid ut ordinabile & cognoscibile ut agendum, & ordinatè disponendum; & sic sistit in ratione veri, quod pertinet ad intellectum. Et huius signum manifestum est, quia quantumcumque voluntas sit affecta alicui rei tanquam convenienti, & bonae, non potest rectè providere, & prudentialiter procedere in eius assentione, nisi per actus cognitionis, id est, consiliando, & conferendo de mediis, & ordinando seu denunciando ut fiant: sicut etiam non potest aliquid haberi pro lege, & regula ex eo quod sit efficaciter volita, sed ex eo quod sit ordinata per rationem: habere enim pro regula ipsū velle praecise iniquum est, nisi sit velle divinum quod intrinsecè est ipsa sapientia, & ordo rationis: ergo provisio pro obiecto habet non aliquid conveniens, ut appetibile, & fruibile aut utile: sic enim induit rationem boni, & obiecti appetitus, sed ut ordinabile & manifestabile, & ut verum secundum veritatem convenientiae, non secundum appetibilitatem tantum, sed sub respectu, & ordine ad finem, & mediorum inter se. Et in hoc sistit tota vis, & obiectum providentiae, & prudentiae, quae est recta ratio agibilium, sicut ars est recta ratio factibilium. Vnde sicut ars non est nisi in intellectu, licet executio eius & consummatio quoad effectus externos dependeat ab aliis potentiis, quae non sepe sunt debite dispositae, quia tota consummatio quoad substantiam, & obiectum proprium sistit intra intellectum, quia est recta ratio de effectibus externis, & obiectum eius est res factibilis ut ordinata & ordinatè facienda, ita prudentia, quae est recta ratio agibilium seu actionum nostrarum moralium, sistit in intellectu, quia respicit illa ut aliquid ordinabile, & manifestabile, quod totum ad cognoscibilitatem pertinet, licet supponat voluntatem ut efficaciter moventem, & postea iterum ad executionem applicantem potentias, de quo latius 1. 2. q. 16. & 17.

12 Secunda pars nostræ conclusionis quod prudentia & providentia non possit consistere in notitia illa simplici aut conditionata mediorum & congruentiæ eius, prout antecedit omne decretum liberum, latius *seq. art.* declarabitur. Sufficit nunc eam probare ex D. Thom. qui perpetuò constituit providentiam & prædestinationem in actu intellectus supponente liberam volitionem & propositum erga prædestinatos, & erga ipsum finem eis volitum. Nam in hac q. 23. art. 4. expressè docet, quod *Dilectio & electio Dei qua aliquibus vult finem, præcedit prædestinationem: est enim prædestinatio pars providentiæ, & providentia est ratio præceptiva ordinationis aliquorum in finem in intellectu existens. Non autem præcipitur aliquid ordinandum in finem nisi præexistente voluntate finis. Unde prædestinatio aliquorum in salutem æternam præsupponit secundum rationem quod Deus illorum velit salutem.* Ita D. Thom. qui idem docet in 1. dist. 41. q. 1. art. 2. & qu. 6. de verit. art. 1. ad 2. & 3. Ergo in eius sententia non potest poni prædestinatio & providentia in actu illo notitiæ antecedentis omnem actum liberum voluntatis, & tantum possibilitatem, seu congruentiam mediorum cognoscens, sed præsupponit & dilectionem hominum ad finem, qui utique actus liber est in Deo. Specialiter contra hanc sententiam ponderanda sunt verba S. Thom. q. 6. de verit. cit. art. 1. solut. ad 4. ubi inquit: *Prædestinatio quamvis in genere scientiæ ponatur, tamen aliquid supra scientiam & supra præscientiam addit, scil. directionem vel ordinationem in finem, sicut etiam prudentia supra cognitionem: Unde sicut non omnis cognoscens quid agendum sit est prudens, ita nec omnis præsciens est prædestinans.* Sed constat quod scientia illa possibilem aut futurorum conditionatorum solum præscit quid agendum sit, non verò ordinat & dirigit in finem: ergo non est illa scientia in qua consistit prædestinatio. Quod si dicatur consistere in illa non absolute, sed adiuncta voluntate, & proposito eius, à quo fit denominatio providentiæ. Contra est, quia voluntas sola non addit directionem & ordinationem in finem, quod pertinet ad rationem, sed inclinationem & appetitum in finem: stat autem bene quod aliquis desideret intensè aliquid fieri, & sciat quid agendum sit, non tamen ordinet, nec dirigat in finem, quia nescit imperare, & sic non est prudens; sicut multi sunt optimi consilij, aut perspicacis iudicij in agendis, & desiderant rem fieri, nec tamen ordinant & dirigunt rectè. Non ergo sufficit scientia sola cum voluntate si desit ordinatio & directio conveniens in finem, quam solum dicit D. Thom. addere prædestinationem supra scientiam cognoscentem quid agendum sit.

Fundamentum autem istius partis præter reiectionem illius scientiæ mediæ, quam *præced. tomo disp. 20.* latè reiecimur specialiter sequenti articulo tradendum est.

13 Ex dictis tamen aduerto, quod licet Deus post volitum & intentum finem, non indigeat nouo actu intellectus propter investigationem & notitiam accipiendam de mediis, & de congruentia eorum quam antea non haberet, sicut nos indigemus consilio & investigatione mediorum post intentionem finis, optimè advertit D. Thom. super illud Pauli ad Ephes. 1. *Qui operatur omnia secundum consilium voluntatis suæ*, ubi consilium dicit non denotare inquisitionem, sed firmitatem divinæ sententiæ. Et idem habet hic q. 22. art. 1. ad 1. tamen propter aliam rationem consideratur in Deo etiam post intentum finem cognitio determinatè proponens media voluntati, non ut

Deus cognoscat media, & inuestiget illa quæ antea non cognoscebat, sed ut moueatur voluntas ad media volenda non propter solam eorum entitatem in se, sed ut mouentia ex suppositione finis voliti & conformiter ad ipsum, quia unum obiectum volitum non potest mouere ad aliud, nisi proponatur per intellectum, tanquam sic volitum, & conformitas ipsa seu conducentia ad ipsum ut volitum. Quod totum non potest fieri per scientiam merè necessariam, sed præsupponentem volitionem finis, ut ex intentione eius & conformiter ad ipsum ut intentum ordinet determinatè de mediis.

Soluuntur argumenta.

14 Primò arguitur ex quibusdam autoritatibus D. Thom. ad probandum quod providentia & prædestinatio debeant consistere in actu voluntatis, quem superaddunt ad præscientiam communem & necessariam. Nam in 1. dist. 41. q. 1. art. secundo ad primum dicit, quod *Electio non est actus voluntatis absolute, sed in ordine ad intellectum ordinantem. Prædestinatio autem dicit actum voluntatis absolute, qui consequitur ordinem istum.* Ergo sentit D. Thom. consistere prædestinationem in actu voluntatis, licet præsupponat ordinem intellectus, non verò in ordine seu ordinatione intellectus præsupponente actum voluntatis. Et ibidem dist. 40. q. 1. art. 2. dixerat quod *providentia qua est ars gubernationis rerum, potest saluari in speculatione tantum, sed prædestinatio importat providentiam secundum quod est ordinata ad executionem operis per voluntatem.* Ergo ultra id quod providentiæ est pertinens ad speculationem non importat prædestinatio nisi actum voluntatis: ergo secundum propriam rationem prædestinationis ad voluntatem spectat. Addere etiam possumus eundem D. Thom. in hac 1. p. q. 24. art. 1. ad 4. ubi inquit, quod *Liber vite differt ratione à prædestinatione, quia importat notitiam prædestinationis: ergo si in hoc differt, utique prædestinatio ipsa non consistit in notitia, seu actu intellectus.*

Respond. in priori loco D. Thom. non dicere quod prædestinatio essentialiter, & formaliter consistit in illo actu absolute voluntatis, sed quod dicit illum, id est, illum requirit, & importat. Et est sensus D. Thom. quod cum dentur duo actus voluntatis cum ordine unus præ alio, alter qui post istum ordinem absolute tendit ad executionem, vult D. Th. quod prædestinatio præter electionem ordinatam unus præ alio in finem requirit voluntatem absolutam præparandi ea quæ absolute, & de facto ducant ad finem, non tamen ibi docet quod in eo actu essentialiter & formaliter consistat, sed in intellectu præsupponente quidem electionem ad finem, & dirigente & ordinante præparationem illam absolutam ad executionem, seu affectionem finis, quod in aliis locis supra cit. expressit. Et hæc solutio sumitur ex verbis ipsius D. Thom. in eodem loco qui in argumento adducitur: concludit enim solutionem illam dicens quod electio divina est secundum quam aliqui ordinantur ad finem beatitudinis; prædestinatio autem secundum quam præparantur eis ea quæ perducunt in finem: & ideo sicut voluntas ordinans in finem præcedit actum voluntatis præparantis ea quæ ducunt ad finem, ita electio prædestinationem præcedit.

Ad secundum locum Resp. quod licet providentia sine voluntate adiuncta solum videatur pertinere ad speculationem, prædestinatio autem addat

addat providentiam ut ordinatam per voluntatem, tamen in ly *ordinata*, importatur id quod pertinet ad essentialem rationem eius, quæ ex parte intellectus se tenet, in ly autem *per voluntatem* importatur id quod pertinet ad efficaciam talis ordinationis, quod est aliquid antecedenter & motuè se habens ad illam, ut ex aliis locis expressis S. Thom. habetur; hic enim non expressit in quo actu formaliter consistat, licet dixerit utrumque actum requiri, intellectus & voluntatis; & ideo ibi concludit quod prædestinatio dicit intentionem divinam cum præscientia eius quod saluabitur. Vbi ly *cum præscientia* intelligitur de præscientia ordinatiua & præparatiua eius quod faciendum est.

16 Ad tertium locum dicitur, quod liber vitæ importat notitiam per modum memoriæ firmiter retinentis id quod decretum est, ut *ibidem* docet S. Thom. ad hoc enim servit apud nos liber, ut succurrat memoriæ & designet aliquos ad aliquod ministerium. Prædestinatio autem importat ipsam notitiam practicam ut præparatiuam & directiuam eorum quæ facienda sunt in finem. Et sic sub nomine notitiæ adhuc habet distinguere ratione liber vitæ à prædestinatione.

17 Secundò arg. quia prædestinatio essentialiter importat transmissionem efficacem creaturæ rationalis in beatitudinem, ut constat ex eius definitione, & ita ad specialem eius rationem pertinet quod infallibiliter consequatur finem, & consequenter quod sit efficax. Efficacia autem pertinet ad voluntatem, & non potest inueniri in cognitione & in modo motionis eius: ergo prædestinatio non potest esse actus intellectus, sed voluntatis. Minor prob. quia modus proprius & essentialis mouendi ex parte intellectus est motio per allicientiam & propositionem obiecti, quæ est motio quoad specificationem, quia videlicet proponit bonitatem seu convenientiam, aut disconvenientiam obiecti, ut attrahat voluntatem ad velle, vel nolle. Non autem est motio quoad exercitium, quæ est motio quoad efficaciam & assecutionem rei: hæc enim repugnat inueniri in cognitione seu actu intellectus, nec ex propriis, quia sic solum mouet proponendo obiectum, & quoad specificationem: nec ex participatione voluntatis, quia non potest participare à voluntate aliquem modum contrarium suæ naturæ ex proprio modo mouendi. Modus autem mouendi quoad exercitium, qui est proprius voluntatis, est per inclinationem & pondus in rem assequendam; modus autem intellectus non potest esse per inclinationem & ponderationem, quia hoc est proprium appetitus, non cognitionis, quæ mouet repræsentando, & proponendo, nec potest intellectus in modum appetitus transire, sic enim mutaret naturam suam: ergo non potest in se formaliter, & essentialiter efficaciam, & motionem quoad exercitium habere: prædestinatio autem habet essentialiter efficaciam: ergo non potest essentialiter in actu intellectus constitui, licet motuè & antecedenter requiratur actus intellectus.

Resp. quod prædestinatio includit essentialiter efficaciam non purè motiuam, & executiuam, sed ordinatiuam, & directiuam ac præparatiuam mediorum. Talis autem efficacia, licet originetur & deriuetur à voluntate, non tamen in actu voluntatis inuenitur, sed in actu intellectus ex participatione & deriuatione à voluntate. Vnde negamus efficaciam voluntatis non posse participatiuè inueniri in intellectu ex voluntatis motione & impressione, ut egregie S. Thom. docet q. 22. de verit. art. 13. & dicemus art. seq. Non quod intel-

Ioan. à S. Thoma in 1. part. D. Thoma.

ctus induat modum operandi appetitus, quasi per modum impulsus operetur, & non per modum repræsentationis & cognitionis, hoc enim impossibile est, ut probat argumentum, sed quia cognoscendo & repræsentando, vel manifestando ipsam voluntatis adhesionem & inclinationem ad aliquid, seu efficaciam eius; ex hoc efficaciter etiam mouet efficaciam scilicet participata in ipsa directione & ordinatione ad aliud, quatenus defert repræsentatiuè, & proponit efficaciam & adhesionem voluntatis. Experimur enim quod abundante affectu voluntatis, manifestatio quoque eius fit cum maiori vi, & spiritu, seu viuacitate, quia repræsentat affectum ipsum ut inclinatem, & urgentem, id est, non solum repræsentando eius naturam seu quidditatem, quod pertinet ad speculationem, sed exercitium ut impellens, & affectum eius ut factum, quod pertinet ad modum practicum. Et hoc modo scientia seu cognitio potest participatiuè habere efficaciam à voluntate ordinando, & dirigendo ad opus, & non sistendo in pura cognitione, nec tamen modum cognitionis relinquendo, & induendo modum appetitus ex parte elicientis, sed appetitus affectum in ipsa ordinatione, & directione repræsentando ut facientem, & inclinatem, quod est repræsentare impulsu practicum, & non merè speculatiuè. Et hæc solutio sumitur ex D. Thom. q. 6. de verit. art. 1. ad 5. & 7. ubi idem ferè argumentum ponit, quia causalitas non est de ratione scientiæ, sed magis de ratione voluntatis, prædestinatio autem causalitatem importat (idem est causalitas atque efficacia,) & respondet S. Doct. quod *Causalitas quamuis non sit de ratione scientiæ, in quantum huiusmodi, est tamen de ratione scientiæ in quantum est dirigens, seu ordinans in finem, quod non est voluntatis, sed rationis tantum, & eodem modo docet ad 7. quod quamuis scientia in ratione scientiæ non respiciat faciendam, tamen scientia practica respicit faciendam, & ad hanc pertinet prædestinatio.* Quod verò hoc habeat ex aliqua participatione voluntatis, docuit *ibidem* solut. ad 1. ubi inquit, quod *In actibus animæ præcedens actus includitur quodammodo virtute in sequenti, & quia prædestinatio præsupponit electionem, quæ est actus voluntatis, ideo in ratione prædestinationis aliquid includitur pertinens ad voluntatem.* Includi autem virtute est includi participatiuè, scilicet eo modo quo efficacia voluntatis potest in ordinatione & repræsentatione practica participari.

18 Tertiò, arg. Quæcumque in prædestinatione reperiuntur, ad voluntatē pertinent: ergo malè reducuntur ad intellectum. Anteced. prob. quia in prædestinatione reperiuntur vel efficacia transmissio- nis, vel dilectio, & electio, vel providentia efficax, vel cura & sollicitudo de adhibendis mediis. Primum, secundum, & tertium manifestè pertinent ad voluntatem: nam electio actus voluntatis est, ut docet D. Tho. 2. 2. q. 13. a. 1. & dilectio est ipsemet actus amoris. Efficacia etiam transmittendi tota est à voluntate, quia est primum principium in nobis mouens quoad exercitium, ut docet D. Thom. 1. 2. q. 9. art. 1. & q. 17. art. 1. unde ubicumque reperitur efficacia seu exercitium in mouendo, totum debet ad voluntatem reduci, utpote primum principium in illo genere mouendi. Similiter providentia tota pendet à voluntate: Tum quia, ut dicit Nyssen. citatus à D. Thom. 3. contra Gentil. c. 73. *Providentia diuina est voluntas Dei.* Et Damasc. lib. 2. de fide cap. 29. dicit, quod *Providentia est voluntas Dei per quam res aptè congruèque gubernantur.* Vnde sicut nos ponimus ex aliquibus Authoribus definitionem providentiæ per actum intel-

A a 3

lectus

lectus, ita alij Authores ponunt illā per actum voluntatis, nec est maior ratio, cur dicamus istos errasse, quā illos, aut istos locutos esse de actu antecedenter requisito, non verò de formali, illos verò è contra. Tum etiam quia posita in Deo efficaci voluntate de futuritione alicuius rei, hoc ipso iam res illa est futura, quia voluntas Dei efficax frustrari non potest, etiam omni alio secluso: ante istam verò efficacem voluntatem quicumque actus intellectus non potest reddere aliquid futurum. Vel ergo providentia est actus intellectus antecedens omnem efficacem voluntatem Dei, vel subsequens. Si antecedens: ergo non participat efficaciam à voluntate præsupposita, & volitionem finis intendente, quod nos negamus, ponentes providentiam in aliquo subsequente volitionem finis ex D. Thom. Si subsequitur, iam ille actus inuenit rem futuram cum omnibus circumstantiis suis, quia sic est volita efficaciter: ergo non habet amplius quid faciat providentia. Denique si prædestinatio sumatur pro cura & sollicitudine adhibendi media congrua fini, hoc pertinet ad studium, quod pertinet ad applicationem voluntatis ad aliquid agendum, ut docet S. Thom. 2.2. q. 166. ubi agit de studiositate. Et sic ex omni parte prædestinatio est actus voluntatis.

Resp. ad prædestinationem pertinere illa tria priora antecedenter & motiue, non essentialiter, quamvis efficacia, si sumatur ut participata, & ut inuenitur in ordinatione mentis directiua, non in sola & pura ratione mouendi quoad exercitium, quod est impellere, & inclinare, etiam in prædestinatione essentialiter inueniatur, deriuata tamen, & participata ab actu antecedente voluntatis, ut explicatum est.

19 Ad id verò quod obiicitur contra providentiam.

Respond. Ad primam probat. S. Thom. q. 5. de verit. art. 1. ad 1. ex his quæ 2. loco ponuntur, respondet, quod *Pro tanto Damascenus dicit providentiam esse voluntatem, quia voluntatem includit, & præsupponit.* Et idem dici debet ad Nissenum, quia tam ipse, quā Damasc. eodem modo loquuntur, dicendo quod providentia est voluntas Dei, per quam omnia quæ sunt convenientem deductionem suscipiunt. Cum autem quæritur, cur potius dicimus, hos Patres non tradidisse veram definitionem providentiæ per id quod formale sibi est, sed per id quod præsuppositum, quā alios qui per actum intellectus definierunt? Dico omnes idem tradidisse quoad sensum, sed Nissenum, & Damasc. expressisse id quod efficaciam est in providentia, non negando id quod ordinationis & directionis est; alios verò è conuerso. Nam Damascenus non dicit providentiam esse voluntatem quomodocumque, sed *per quam res convenientem deductionem suscipiunt*; conueniens autem deductio est deductio ordinata & regulata secundum proportionem mediorum ad finem. Ordinare autem sapientis est & proprium rationis. Vnde voluntas debet ibi intelligi pro eo quod se habet ut principium huius ordinatæ deductionis quantum ad efficaciam, quia quoad ipsam intrinsecam rationem ordinationis, non potest à voluntate habere, sed ab intellectu. Et idem est sensus Nisseni. Ponitur ergo voluntas ut quid præsuppositum ad ordinationem huius convenientiæ, & ut præbens illi efficaciam, non ut id in quo formaliter providentia constituitur, quæ conuenientiam, & ordinationem deductionis facit.

20 Ad secundam prob. Dicitur quod efficacia voluntatis est ratio ut aliquid sit futurum, omni alio

secluso; distingo, omni alio secluso dante efficaciam, concedo (hanc enim solum dat voluntas;) ordinante & applicante debito modo ad effectum, nego. Itaque efficacia voluntatis, licet ab ipsa voluntate ut à principio totaliter oriatur, tamen non per solam voluntatem, ut voluntas præcisè est, explicatur, & applicatur, sed per alias potentias, tam per ordinatiuam, quæ est intellectus, quā executiuam, quæ est omnipotentia. Et efficacia voluntatis quousque sit applicata non intelligitur habere effectum, nec reddere aliquid simpliciter, & complete futurum, sed solum præsuppositiue, & originatiue. Applicatur autem hæc efficacia ad faciendum & exequendum ordinato modo, & disponendo ac regulando media, quod fit per imperium. Vnde requirit actum intellectus qui ordinatiuus est, non ut præbeat efficaciam, sed ut applicet ordinato modo illam ad effectum; & ante efficaciam sic applicatam & sic ordinatam non videtur effectus ut futurus simpliciter, & absolute, & modo ordinato, sicut fit in re.

Ad id quod dicitur de cura & sollicitudine. Resp. 21 ex D. Thom. hic q. 22. art. 1. ad 2. quod cura importat duo, & rationem ordinis, quæ dicitur providentia, & executionem, quæ dicitur gubernatio. Primum ergo pertinet ad intellectum. Secundum fit per applicationem voluntatis utentis aliis potentiis ad exequendum; & sic potest importare studium, subsecutum tamen ad rationem providentiæ, & ordinationis rationis.

ARTICVLVS III.

Ad quem actum intellectus pertineat prædestinatio?

1 CVM ex principiis adeò oppositis procedatur in his materiis de prædestinatione, providentia, & scientia Dei ab his qui defendunt scientiam mediam, & ex ipsa totam Dei gubernationem stabilire volunt, & ab his qui eam negant, ferè in omnibus quæstionibus, & difficultatibus huius materiæ, oportet aliquid de illa attingere, quia ex ea maxime pendet resolutio, & manifestatio veritatis in his controuersis. Quia ergo, ut dictum est, prædest. art. providentia Dei, & prædestinatio ad intellectus actum spectat, licet præsupponat voluntatem, & intentionem finis, duo restant tractanda in hoc & sequenti articulo. In isto quiddam, quantum ad actum intellectus, quisnam actus sit in quo dicimus eam formaliter consistere, & quomodo, non sufficiat ad providentiam Dei conditionata scientia media. In sequenti verò articulo quantum ad actum voluntatis, quem supponit antecedenter, an detur, & requiratur intentio Dei efficax, & absoluta de ipso fine, ut prædestinatio, & providentia ordinet efficaciter de mediis, & ita non solum sit directiua, & monstratiua eius quod faciendum est, sed etiam prædefinitiva.

Punctus difficultatis.

2 Quod ergo attinet ad præsentem difficultatem huius art. conueniunt omnes providentiam, & prædestinationem in intellectu pertinere ad partem practicam, non ad cognitionem purè speculatiuam. Id disertè docuit S. Thom. generaliter de omni providentia q. 5. de verit. art. 1. & specialiter de prædestinatione q. 6. de verit. art. 1. ad 7.

Et ratio est manifesta, quia finis prudentiæ, & providentiæ non est sola veritatis cognitio, indagando

gando quidditates, & naturas rerum, sed directio ad consecutionem alicuius finis per media proportionata & conuenientia: Ergo habet pro fine opus sub ratione & exercitio operis, & sub ratione assequibilis, non sub ratione purè speculabilis, & solum sistendo intra cognitionem & intra intellectum, sed extra illum assequendo: ad hoc enim ponitur prouidentia & per eam media ordinantur ut finis extra cognitionem assequatur, non intra solum apprehendatur. Directio autem ad id quod est extra cognitionem tendens seu ordinans, & non intra intellectum sistens, practica est, quia ordinatur ad opus quod non est sola veritatis cognitio, sed extra eam assecutio.

3 Loquendo autem de actibus ad partem practicam concurrentibus, loqui possumus de practico dupliciter. Vno modo ut applicante se ad opus. Alio modo, de virtute quidem eius factiua & operatiua, sed non ut de facto applicata, sicut ars quæ pertinet ad partem practicam potest considerari ut tradens regulas operandi, quasi in vniuersali, & in abstracto, nondum tamen in particulari se applicans ad operandum, & sub hac vniuersalitate, & abstractione habet modum speculationis, non quia substantialiter speculatiua sit, cum sit ordinatiua ad opus, sed quia abstrahit ab exercitio & applicatione ad operandum, & solum in vniuersali considerat regulas suas, & quidquid in vniuersali consideratur, largo modo dicitur speculatiuum, quia nondum exercetur. Qua ratione etiam S. Thom. dixit in 1. dist. 40. q. 1. art. 2. quod *Prouidentia potest sicut & ars gubernatoria saluari in speculatione tantum*. In presenti non agimus de prouidentia sic, sed de ipsa ut applicata ad exercitium operandi, & non solum abstractè & in vniuersali, sed modo practico, & in particulari applicans ad operandum. Sub hac ergo consideratione quia intellectus practicus non potest applicari ad opus, nisi secundum efficaciam voluntatis, distinguimus quatuor præcipuos actus intellectus iuxta ordinem ad quatuor principales actus voluntatis, quibus tota applicatio ad finem, & ad media dirigatur.

Primus actus voluntatis est simplex volitio alicuius finis, quæ dicitur simplex, quia ibi nondum relucet aliquis ordo ad media, nec ad executionem, sed purè mouetur voluntas à bonitate, & conuenientia finis in se simplici quodam amore. Et huic actui correspondet ex parte intellectus propositio conuenientie & bonitatis finis secundum se.

Secundus actus est in voluntate intentio finis, quando non solum proponitur ipsa bonitas finis secundum se, sed cum ordine ad media, quia proponitur ut assequibilis, & sic intenditur, hoc est non solum amatur, sed in illum tenditur. Et huic actui correspondet in intellectu iudicium de bonitate finis ut conueniens est ad assequendum & habendum; & non solum ad complacendum.

Tertius actus est iam non circa finem, sed circa media apta & conducentia ad illam assecutionem, & est electio voluntatis, quatenus ex diuersis mediis, vnum determinatè acceptat, & acceptatio illa est electio. Et huic actui correspondet ex parte intellectus consilium & inquisitio, atque iudicium per modum sententie & determinationis de conuenientia talis medij, ut acceptetur.

Quartus actus est executio seu vsus mediorum, & applicatio potentiarum exequentium, quo vltimatè res producit ad debitum finem & executionem. Et huic actui correspondet ex parte intellectus iudicium directiuum & ordinatiuum ip-

sus executionis, quod vocatur imperium. De his actibus agit D. Thom. ordine suo in 1. 2. De simplici voluntate q. 8. De intentione q. 12. De electione q. 13. De vsu & imperio q. 16. & 17. Ex his actibus practicis, & ex parte intellectus dirigentibus istos actus voluntatis quæstio oritur, in quoniam ex illis principaliter constituenda sit prouidentia & prædestinatio in Deo.

Non est difficultas in presenti circa primum actum qui solum respicit simplicem voluntatem finis: hoc enim certum est ad prouidentiam non sufficere, sed multo ante rationem prouidentie præcedere & præsupponi.

Ratio est quia prouidentia præparat media quibus assequendus est finis, & illa ordinat & disponit: nam & ipsa prudentia non præstituit finem virtutibus, sed medium determinat secundum circumstantias particulares occurrentes, & ita potius regitur arbitrio, quàm arte & certis regulis, sed iuxta occurrentiam casuum, & circumstantiarum determinat quid agendum sit. Certum est ergo quod præparatio prouidentie non est circa ipsum finem: ad hunc enim diligendum nulla præparatio est necessaria, sed sola cognitio conuenientie aut disconuenientie eius. Solum ergo ad ipsum assequendum præparatione opus est ex parte mediorum, quæ cum varia esse soleant. & ut in re ponantur difficultatibus plena, indigent præparatione & prouisione speciali. Vbi ergo nullus relucet ordo ad media, sed ipse finis simplici modo diligitur, prouidentia nondum habet locum, & sic pro simplici finis amore nondum est prouidentia.

5 Circa alios actus dirigentes media, vel de fine in ordine ad media tractantes, præsens difficultas esse potest, præsertim circa tertium & quartum actum. Nam quartus ille actus qui vocatur imperium, & dirigit vltimatè executionem, à quibusdam Recentioribus negatur tam in nobis, quàm in Deo distinctus à consilio & iudicio præcedente electionem. Si verò post electionem datur aliquis actus intellectus pro executione, solum erit ad notificandam electionem & decretum voluntatis, non ad inferendam specialem efficaciam ad exequendum, quæ dicitur imperium. Similiter tertius actus qui importat consilium & disquisitionem circa media, licet in nobis necessarius sit post finem amatum & intentum, quia imperfecto modo procedimus, & amplectimur sæpius finem sine sufficiente notitia & expeditione de mediis, ideoque post intentum finem indigemus consultatione, & iudicio circa electionem mediorum; in Deo tamen id necessarium non est, quia non procedit hoc imperfecto modo, sed nullum finem proponit diligendum sine perfectissima & comprehensua notitia omnium mediorum & expeditione omnium difficultatum. Quare post intentum finem & amatum efficaciter, nulla indiget cognitione prouidente de mediis & præparante illa ac determinante per modum consilij & prudentie, quia totum hoc supponitur iam cognitum & propositum voluntati, quando finem intendit, præsertim quia Deus, immò, & Angelus, qui non vtitur discursu, nec procedit à principiis ad conclusiones diuersis actibus, etiam non vtitur diuersis actibus pro fine amando & mediis, sed in fine vult media, eo quod non regulantur isti actus discursu, sed comprehensione, ideoque immobiliter tendit in media, quando ex perfecta deliberatione tendit, sicut & finem. Et sic nec Deus, nec Angelus in his quæ perfectè & vltimatè vult, indigent prouidentia orta post intentum finem circa consilium

lium & iudicium de mediis, sed antecederet in ipso fine amando, etiam media inuoluntur.

- 5 Quare reducuntur hi Authores ipsa vi huius discursus ad ponendam providentiam, & prædestinationem Dei in actu intellectus præcedente intentionem finis efficacem, qui utique pertinet ad scientiam mediam, quæ omnia media, & eorum possibilitas, & congruentia proponitur voluntari ante omne decretum liberum, & efficax Dei, & sic non indiget ulterius consulere aut inquirere, & indicare de mediis, quia ibi ex comprehensione infinita illius primi iudicii omnia proponuntur, & sic prouisa, & ordinata manent. Sed quia providentia debet esse libera & efficax, & operari per decreta libera, idcirco illa scientia media non dicitur providentia, quantum ad providentiæ denominationem, & vim, quousque accedat voluntatis efficacis determinatio, quæ unum ordinem rerum præ alio acceptet, & exequi velit; inde enim providentia efficaciam sumit, & determinationem liberam, voluntate subsequente, non antecedente.

Resolutio.

- 6 Non est locus tractandi modò, & ostendendi dari in nobis actum efficacem imperij, distinctum ab electione, & iudicio consiliativo, & ordinatio ipsius electionis. Hoc Deo dante ostendimus 1. 2. circa q. 16. & 17. contra P. Vasquez *ibidem* disp. 49. c. 4. & videri etiam potest 1. tomo 1. p. disp. 87. c. 3. idemque sentit P. Suarez lib. 1. de prædestin. c. 16. Arrubal *hic* disp. 63. c. 3. loquendo de imperio Dei, Alarcon *tract. 4. de Prædestin. disp. 1. c. 2.* & alij, negantes talem actum imperij in mente diuina: licet non desint alij ex eadem familia, qui talem actum imperij in Deo admittunt, & explicant, ut P. Erize *hic* disp. 22. c. 4. & Ruiz *tomo de providentia disp. 3. sect. 7.* & *tomo de prædestin. disp. 1. sect. 6.* Itaque contra Authores negantes in nobis actum imperij in intellectu post electionem, qui non solum sit cognitio manifestatiua ipsius electionis, sed etiam efficaciter inductiua, in præsentia agendum non est, præsertim quoad illam partem de efficacia istius actus imperij: hoc enim maximè mouet hos Auctores, quia non inveniunt quomodo cognitio, quæ de se solum est repræsentatiua & manifestatiua sui obiecti, possit etiam mouere per modum impulsus, & efficaciam, qui est proprius modus voluntatis. Si autem ille actus non habet istam efficaciam, sed nudam propositionem & manifestationem, non est inconueniens quòd detur, sed nec est necessarius, quia ad id sufficet cognitio illa, & iudicium antecedens electionem, quæ decernitur hoc determinatum medium esse eligendum: hoc enim iudicium durat durante electione, & sufficienter manifestat illam.

- 7 Cæterum nobis modò sufficit D. Thom. mentem in hoc actu imperij statuendo manifestare. Nam ipse S. Doctor utrumque affirmat de illo actu imperij, & quòd est actus intellectus secutus ad electionem, & distinctus à iudicio, seu actu regulante electionem, & quòd participat à voluntate efficaciam mouendi.

Primum affirmat 1. 2. q. 17. art. 3. ad primum, ubi inquit quòd, *Non omnis actus voluntatis præcedit hunc actum, qui est imperium, sed aliquis præcedit, scilicet electio, & aliquis sequitur, scilicet usus, quia post determinationem consilij, quæ est iudicium rationis, voluntas eligit, & post electionem ratio imperat ei per quod agendum est quod eligitur, & tunc demum voluntas incipit uti, exequendo imperium rationis.* Vbi manifestè S. Thom. distinguit iudicium rationis

& consilium quod antecedit electionem ab alio actu etiam rationis, qui sequitur post electionem, & antecedit usum executiuum voluntatis, vocaturque imperium.

Secundum verò latè tradit S. Doctor q. 22. de verit. art. 13. & significat 1. 2. quæst. 17. art. 1. ubi multis ostendit quòd quando duo agentia ita se habent, quòd vnum mouetur & recipit impressionem ex alio, potest agens motum habere actionem ex propriis, & actionem ex impressione superioris, sicut aqua maris ex propriis grauitat, & mouetur deorsum, ex impressione autem Lunæ fluit & refluit: & sphaera Solis ex propriis mouetur ab Occidente in Orientem, vel à Septentrione ad Austrum, ex impressione autem primi mobilis mouetur motu diurno ab Oriente in Occidentem. Sic voluntas, & intellectus se habent ut duæ potentiae ad inuicem se mouentes, voluntas quidem quoad efficaciam, & exercitium: intellectus verò quoad specificationem, ordinando, & conferendo. Ex propriis ergo voluntas tantum habet ipsum velle per modum inclinationis & impulsus, ex participatione autem rationis habet velle cum collatione, & vnum præ alio, ut in electione, vel cum ordine ad aliud, ut finem ad media in intentione. Et similiter intellectus ex propriis solum habet cognoscere, manifestare, dicere, sed ex impressione voluntatis potest intimare cum efficacia repræsentata, & participata à voluntate. Et sic se habet in actu imperij. Ita philosophatur ibi D. Thom. Nos hanc eius mentem ad locum cit. 1. 2. latius expendimus Deo dante.

Nunc ergo dicimus duo contra præfatos Authores.

Primum est quòd actus diuinæ providentiæ non potest consistere in actu illo cognitionis proponente indifferenter omnia media, sicut attingi dicuntur per scientiam simplicis intelligentiæ, vel conditionatam mediam, etiam adiuncta voluntate determinante subsequente, & nullo modo antecedente, ut iam art. præced. insinuauimus, sed necessariò debere admitti pro diuina providentia actum intellectus ordinantem de mediis ex supposita volitione finis.

Secundum est, quòd admissio actu ordinatio mediæ post liberam volitionem finis, non debet providentia consistere in solo actu ordinatio mediæ ad eligendum, qui præcedit in nobis electionem, sed ordinatio ad exequendum, qui sequitur ad electionem, & vocatur imperium. Qui quidem actus in Deo identicè sunt unus, sicut omnia in Deo sunt vnum, sed nostro modo intelligendi distinguuntur, sicut alij actus, & alia attributa.

Primum dictum, ut ostendimus præced. art. est expressum D. Thom. qui providentiam constituit in actu intellectus, non absolutè, sed præsupponente volitionem finis, in hac q. 22. art. 1. & aliis locis ibi citatis; & est omnium discipulorum eius; tum quia negant scientiam mediam, & consequenter non possunt in ipsa ponere actum providentiæ; tum quia admittunt cum D. Thom. etiam in Deo dari actum intellectus ordinatum, & prudentialem circa media post volitionem liberam finis. Et specialiter agens D. Thom. de prædestinatione, semper docet quòd præsupponit electionem, & dilectionem eorum qui prædestinantur: nec enim præparantur, & disponuntur media ad consecutionem finis, nisi his qui ad talem finem electi sunt, neque eliguntur, nisi qui amantur, & diliguntur præ aliis; & ita licet prædestinatio non supponat dilectionem ipsius mediæ, seu effectus

effectus prædestinationis, bene tamen dilectionem personæ ad finem, ita quod ex amore vnius proceditur ad amandum aliud; & sic non præsupponitur futuritio eius quod prædestinatur, sed personæ quæ diligitur, ordine intentionis. Hanc autem electionem, & dilectionem præcedere debere prædestinationem docet S. Doctor *in presenti q. 23. art. 4. & q. 6. de verit. art. 1. & in 1. dist. 41. q. 1. art. 2.* Et sumitur ex illo Plam. 17. *Saluum me fecit, quoniam voluit me*, vbi me esse voluit, seu amatum assignatur ut ratio saluationis, prædestinatio autem est quæ salutem dat & procurat: ergo præsupponit volitionem & dilectionem personæ: Ioan. 3. *Sic Deus dilexit mundum ut filium suum unigenitum daret.* Galat. 2. *Dilexit me, & tradidit semetipsum pro me.* Matth. 11. *Reuelasti ea parvulis; ita Pater quoniam sic placitum fuit ante te.* Vbi multi effectus seu præparatio diversorum mediorum numeratur, & omnia oriuntur, & præsupponunt dilectionem: dare enim unigenitum mundo, actus fuit diuinæ providentiæ, & prædestinationis, qua Christum in Redemptorē prædestinavit; & tamen hic actus providentiæ præsupponebat in Deo amorem mundi, quia ille fuit causa illius providentiæ; & idem est de traditione sui pro me, quæ est traditio Christi applicata ad me: hæc enim applicatio prædestinatiua fuit, & tamen ex dilectione mei procedebat. Reuelatio etiam facta ad parvulos est medium præparatum à prædestinatione; cum sit manifestatio fidei, quæ ad vitam æternam ordinatur, & tamen habet pro causa placitum Dei quod utique est aliquod liberum propositum & amor Dei: ergo multa media & effectus præparantur à Deo ex suppositione amoris liberi, quia redditur pro causa illius præparationis ista dilectio, seu amor.

10 Deinde prob. quod illa notitia simplex vel conditionata rei futuræ non possit esse actus in quo consistat providentia & prædestinatio, etiam adiuncta voluntate subsecuta eligente, & determinante talem vel talem ordinem rerum. Et deducitur hoc præcipue ex duobus principiis apud D. Thom. notissimis.

Alterum loquendo de providentia in communi.

Alterum loquendo de prædestinatione in speciali. De providentia in communi sæpissime ostendit D. Thom. providentiam diuinam debere extendi ad omnia quæ quocumque modo habent esse, & nihil præsupponi debere ab ipsa providentia aut respici ut causatum, & ordinatum ab aliis inferioribus causis, & non à se, immediate ordiatum. Quod principium tradidit S. Thom. *in hac quest. 22. art. 2. & 3. & q. 103. art. 6. & late in 3. contra Gent. cap. 76.* De prædestinatione autem in speciali ostendit omnem eventum prædestinationis, seu omnem effectum habere certitudinem, non solum ex parte præscientiæ, sed ex electione prædestinantis, & ex ordinatione eius. Quod principium tradit *q. 6. de verit. a. 3. & in hac q. 23. art. 7.*

11 Ex primo principio formatur ratio sic. Eventus rerum ex applicatione, & combinatione causarum nasciturus præsertim in causis riberis, & contingentibus est maxime contingens & incertus, & sic maxime indiget à providentia ordinari in tantum quodd quidam, ut refert S. Thom. 3. *contra Gentil. cap. 89.* dixerunt quod providentia non erat de his, quæ subsunt libero arbitrio, ut de electionibus nostris, sed quod providentia refertur ad exteriores eventus: non enim qui intendit aliquid consequi, semper cōsequitur, quia eventus isti non

subiacent libero arbitrio, sed providentiā disponuntur. Quæ sententia licet sit falsa pro ea parte qua eximit à providentia diuina liberas nostras actiones, est tamen certissima pro ea parte qua enuncius rerum per providentiam disponi docet, quod enim maxime incertum, & contingens est, maxime indiget certificari, & determinari per ordinationem providentiæ, aliàs fortuito, & à casu essent respectu Dei, quod nullo modo dici potest, quia omne ens quomodocumque sit, est à Deo ut agente per intellectum & voluntatem, & per artem: ergo ut agente per finem, & per ordinationem intellectus, quæ est providentia. Si ergo per scientiam mediam naturaliter, & necessario cognoscentem ante omne arbitrium, & decretum suum liberum proponuntur voluntati Dei omnes combinationes rerum, & omnes eventus, sub quacumque conditione, & statu ut determinatè futuri ex sola intrinseca veritate rei, & non ex arbitrio & ordinatione diuina: ergo quando voluntas eligit aliquod ex illis obiectis, eligit aliquid quod iam præsupponitur, & proponitur ipsi voluntati ut determinatum, & solum oportet purificare conditionem ut de facto sit. Ergo posita voluntate purificandi conditionem, & eligendi hunc ordinem rerum ut sit, Deus nullam habet providentiam propriè dictam circa ipsos eventus ut determinatè fiat hoc potius quàm illud, hoc modo potius quàm illo, sed tota prudentia, & ordinatio Dei erit circa hoc quod est purificare conditionē, & eligere quod sit, vel non sit iste ordo rerum: circa reliqua autem vacat diuina providentia. Consequentia patet, quia circa id quod iam præsupponitur, & proponitur ipsi providenti determinatum ex propriis principiis, & non ut determinandum per arbitrium, & ordinationem ipsius, inutilis est providentia: quid enim debet ordinare aut decernere circa id quod iam videt determinatum ante omnem ordinationem suam. Ergo eligente Deo ex infinitis combinationibus sibi repræsentatis hunc ordinem rerum, & volente quod creetur, providentia functa est officio suo, nec pertinet ad ipsum gubernare, & determinare eventus rerum, sed aliunde determinatos, scil. ex intrinseca veritate eventus, & non ex sui ordinatione acceptare vel non acceptare, quod est valde imperfectum in genere providentiæ, & potius ad ministrum & executorem pertinet, qui supponit rem ordinatam, & gubernatam, quàm ad supremum Dominum, & gubernatorem omnium.

12 Exemplo rem illustro. Oblata est Davidi optio trium rerum iam decretarum à Deo, scil. eligere aut tribus annis famem, aut tribus mensibus bellum, aut tribus diebus pestem, 1. Paralip. 21. Eligit David hoc ultimum, & ceciderunt de populo septuaginta millia. Inquiri modò: licet David habuerit providentiam, & arbitrium circa electionem vnius ex tribus illis ordinibus, facta tamen hac electione, potuitne ad eius providentiam reduci quod morerentur septuaginta millia potius quàm triginta, vel quadraginta, quod morerentur viri, an scemina, senes, an iuvenes, plebei, an nobiles, de viribus, an de villis, totum hoc fuit extra providentiam David, quia supponebatur à Deo determinatum, non sibi proponebatur arbitrio suo determinandum, sed tantum eligere ex illis quod vellet, ut ex electione eius mandaretur executioni iuxta determinationem ab alio factam, id est, à Deo. Vnde imperfecta, & valde inferior manebat providentia David circa illud factum, quia multa proponebantur ibi non determinanda

286 Quæst. XXIII. De Prædestinatione.

determinanda per ipsum, sed iam determinata ab alio principio.

13 Ad rem: Si Deo proponuntur infinitæ rerum combinationes, & omnes earum euentus determinati sunt ex intrinseca sua veritate, & independenter ab ordinatione diuina, sed ante omnem ordinationem sic repræsentantur, & sic cognoscuntur, & proponuntur, & solum pertinet ad voluntatem optio eligendi ordinem rerum, quem voluerit, & purificare conditionem, vt executioni tradatur, & de facto sit: ergo facta ista electione, & purificatione, omnis alia determinatio euentuum, & quod accadat hoc vel illud (cùm tamen posset oppositum accidere, etiam conditione posita, siquidem est contingens) hoc vel illo modo iam præsupponitur determinatum ex propria, & intrinseca veritate sua, & alia omni ordinatione seclusa: ergo etiam si non detur alia prouidentia, & ordinatio, ac dispositio in mente diuina præter illam purificationem conditionis, res illæ æquè bene accident, & determinabuntur sic, imò vt Deus habeat aliquam ordinationem, & prouidentiam de illis veram & certam, debet se conformare his, quæ iam præuidet determinata ex suis intrinsecis principiis, & non ex arbitrio suo. Quid autem imperfectius, quàm ea prouidentia, quæ vel supponit res suas iam determinatas, & ordinatas ex alio principio, vel si ordinat aliquid, debet ordinare idipsum quod determinatum est, & etiam si non ordinet æquè benè res accident propter determinationem iam necessariò antè præhabitam, & præuiam per scientiam mediam? Subtrahuntur ergo à prouidentia diuina, vt causante, omnes illæ determinationes euentuum, quia iam supponuntur determinatæ, & solum proponuntur eligendæ quoad executionem. Vnde licet Deus illas ponat in esse, tamen hoc est esse merè executorem eorum, quæ determinata supponuntur, non ea determinare.

14 Quòd si hoc totum deuoretur, & dicatur prouidentiam non esse aliud quàm id quod determinatum iam ex se præsupponitur & præuidetur imperare, & eligere per voluntatem executiuam, vt de facto hoc vel illud fiat, quia præcipuus actus prudentiæ est imperare, non consiliare, & iudicare, vt docet S. Thom. 2. 2. q. 47. a. 8. tunc sequuntur duo magna inconuenientia.

Primum, quòd aliquid præuidet Deus vt determinatum ex prouidentia creaturæ, & non ex prouidentia increata Dei, seu ex arbitrio & ordinatione creaturæ, & non Dei, quod latè impugnat S. Thom. 3. cont. Gent. c. 77.

Secundum, quòd nec etiam ex prouidentia diuina pendet ipsa electio suæ voluntatis circa executionem quòd sit, vel non sit de facto iste ordo rerum, eo quòd præsupponitur determinatum, & præuium per scientiam necessariam, & sic non dat locum prouidentia superuenienti, quæ per arbitrium operatur, & per decretum liberum; & sic ex omni parte soluitur prouidentia diuina vt causans, & ordinans. Sequela quoad primam partem prob. quia quando Deus per scientiam mediam ante omnem ordinationem suam, & decretum liberum præuidet quid vnaquæque voluntas factura sit in quocumque ordine, id quod ibi præuidet, est aliquid faciendum à voluntate creata ex aliqua præmeditatione, & directione suæ mentis, quia multa ex his quæ Deus videt futura in tali statu, per voluntatem videt futura esse secundum rationem & non temerè, neque à casu: ergo videt tunc ibi aliquam determinationem creatæ voluntatis ex prouidentia eius creata,

siquidem prouidentia creata est quidquid ex creata præmeditatione fit cum ratione, & non à casu. Et tunc quando hoc Deus præuidet, nondum præuidet suam prouidentiam & arbitrium, ex cuius ordinatione res illa determinetur à libero arbitrio creato: ergo aliquid videt determinari, & ordinari à prouidentia inferiori, quod non ordinetur & determinetur à superiori & diuina, quod D. Thom. euidenter impugnat loco cit. 3. contra Gent. cap. 76. Et de se patet manifestè, quia contradicit vniuersalissimæ rationi diuinæ prouidentia, sine cuius participatione, omnis prouidentia inferior intelligi non potest, sicut nihil creatum intelligitur, nisi ex participatione increati. Quòd verò dicitur ex D. Thom. quòd præcipuus actus prudentiæ est imperare, rectissimè dicitur; & sic deberet acceptari ab Authoribus oppositis, vt poneretur prouidentia in actu imperij. Sed D. Thom. addit in eodem loco cit. quòd actus eius est præcipere, qui quidem actus consistit in applicatione consiliatorum, & indicatorum ad operandum. Et curius ipsum imperare non est velle, nec actus voluntatis, sed intellectus scilicet ordinatio cum intimatione efficaci, vt docet idem D. Thom. 1. 2. quæst. 17. art. 1. Ergo ubi totum quod agitur est ordinatum, & dispositum, & determinatum aliunde, nec per ipsum imperantem, & prouidentem determinatur, & ordinatur, sed tantum à voluntate acceptatur, vacat imperium istud quod à D. Tom. ponitur, & ex eo obicitur.

Nec dici potest quòd illa prouidentia creata intelligitur per scientiam mediam vt dependens à prouidentia Dei conditionatè futura, non à prouidentia Dei iam de facto præsupposita, & antecedente ipsam scientiam conditionatam, quia hæc non præsupponit decretum absolutum præcedens se. Sed hoc latè impugnauimus præced. tomo diff. 20. Et in præsentia extra rem assertur, quia prouidentia illa conditionatè futura solum est ad ponendum in esse, & in existentia rem illam, si conditio purificetur. Supponit ergo illa prouidentia sub conditione futura determinatum euentum sub conditione ad vnam partem potius quàm ad aliam, qui iam præuius est per scientiam mediam: ergo hæc determinatio non potest pendere ex illa prouidentia conditionatè futura, quia ab ipsa præsupponitur, non verò ab illa oritur, & causatur, licet non possit poni in esse sine tali prouidentia, & decreto futuro. Si autem determinatio euentus ad vnam partem potius, quàm ad aliam non pendet à prouidentia illa conditionatè futura in vi determinationis, quia supponitur ab illa, sed solum vt ponatur existens: ergo causam inferiorem liberam se determinare ad hanc partem potius, quàm illam; & sic determinatam prævideri, pendet ex inferiori prouidentia creata, & non à diuina, quod est maximum, & intolerabile absurdum, & omninò execrandum. Et sequela patet, quia ab antecedenti, & præsupposita prouidentia non pendet, cùm hi Authores negent omne decretum ante scientiam mediam, & in hoc scientia media consistit, quod independenter ab omni decreto iam habito, & præsupposito cognoscit determinationem voluntatis creatæ. Similiter à futura prouidentia non pendet, quia ab ipsa quando adfuerit, iam præsupponitur illa determinatio causæ inferioris, & solum seruit prouidentia seu decretum vt de facto detur illi esse, vel non detur in executione: ergo extra prouidentia terminos est determinatio illa.

Sequela verò quoad secundam partem prob. quia

quia sicut Deus scientiâ illâ mediâ videt quid determinatè factura est voluntas creata, ita etiam quid factura vel electura sit sua diuina. Quod etiam communiter admittunt defensores scientiæ mediæ, licet id Molina negauerit, quia Deus non supercomprehendit se. Sed immeritò, nam illa determinatio diuinæ voluntatis etiam est aliquod verum, & aliquod intelligibile: ergo ab infinito, & comprehensiuo lumine Dei debet attingi. Quod si attingitur, ergo ut Deus velit & eligat determinatè hunc ordinem rerum potius quàm illum, non indiget providentia libera, & per arbitrium operante, & ordinatione ex parte sui, quia iam totum ordinatum, & determinatum sibi repræsentatur.

16 Ex secundo principio suprà posito deducitur eadem nostra assertio, quia D. Thom. duo principia in sua doctrina ponit, quibus illam scientiam mediam reiecit à ratione prædestinationis.

Primū est, quod prædestinatio nō solum imponit rebus ordinem ad finem quod etiam facere potest providentia communiter dicta, sed etiam ipsum exitum vel euentum ordinat.

Secundum est, quod prædestinatio non differt à non prædestinatione solum ex præscientia euentus, sed ex ipso ordine, & electione prædestinantis ad talem euentum, id est ad saluationem. Cum quibus principiis stare non potest quod providentia seu prædestinatio sit actus intellectus proponens omnem euentum rerum determinatum antecedenter ad omnem actum liberum voluntatis, quia sic non pertineret ad intellectum dirigere & ordinare ipsum euentum & exitum rei à suis causis, sed præsupponere illum. Primum ergo illud principium explicat S. Doctor q. 6. de verit. art. 1. ubi inquit: *In qualibet ordinatione ad finem est duo considerare, scilicet ipsum ordinem, & exitum vel euentum ordinis: non enim omnia quæ ad finem ordinantur, finem consequuntur. Providentia ergo ordinem in finem respicit tantum, unde per Dei providentiâ omnes homines in beatitudinem ordinantur: sed prædestinatio respicit etiam exitum, & euentum ordinis. Unde non est nisi eorum qui gloriam consequuntur.* Vbi manifestè docet S. Thom. quod ipse euentus, seu exitus, qui utique ad executionem pertinet, cadit sub providentiam prædestinatiuâ, & ita de ipso ordinare & præparare debet, quia prædestinatio præparatio beneficiorum Dei est, & nullum est maius beneficium, quàm quod in re tanti momenti bonum exitum seu euentum habeamus. Sed quia possunt dicere Authores oppositi, quod iste euentus habetur per prædestinationem ut præscitus ex ipsa scientia media, quæ secundum se prædestinatio est cum hoc solo quod adiungatur illi voluntas Dei subsecuta eligens & exequens illum euentum determinatè pro isto homine, non pro illo: Contra hoc occurrit secundum illud principium D. Thom. quod non sufficit haberi certitudinem illius euentus ex præscientia, sed ex ordinatione Dei. Sic enim dicit eadem q. 6. de verit. art. 1. *Non potest dici quod prædestinatio suprà certitudinem providentie nihil aliud addit, quàm certitudinem præscientiæ, ut si dicatur quod Deus ordinat prædestinatum ad salutem, sicut & quemlibet alium, sed cum hoc de prædestinato scit, quod non deficit à salute: sic enim dicendo non diceretur prædestinatus differre à non prædestinato ex parte ordinis, sed tantum ex parte præscientiæ euentus, & sic præscientia esset causa prædestinationis: nec prædestinatio esset per actionem prædestinantis, quod est contra autoritatem Scripturæ, & dicta Sanctorum.* Ita D. Thom.

17 Ex quibus principiis sic colligitur: Si Deus per

scientiam illam scit omnes euentus & combinationes antecedenter ad omnem ordinationem, & dispositionem electionis suæ circa ipsos euentus: ergo quando voluntas sua applicatur ad eligendum aliquam ex his combinationibus, & aliquem ordinem rerum, non eligit euentum qui sit sic determinatus ex ordinatione sua, sed ex præscientia sua, siquidem, ut sæpe dictum est, supponit illum euentum prævisum determinatè antequam eligat, & decernat: ergo ad prædestinandum hunc hominem, id est ut fortiatur euentum eius saluatio, non indiget ad prædestinandum unum præ alio specialiter ex parte sua ordinare de vno, quàm de alio, sed æqualiter utrumque hominem ordinando ad salutem, & æqualia media illis dando, & æqualia auxilia ex parte Dei, solum ratione præscientiæ quam Deus ante suam voluntatem habebat, quod iste non deficiet positus illis mediis, alter verò deficiet, manebit unus prædestinatus, alter non. Et sic poterit dari casus, quo Deus æqualiter eligat ex parte sua personas, & æqualiter ex parte sua ordinet, & tamen ratione præscientiæ sequatur dispar effectus, & unus reddatur prædestinatus, non alter; & tunc sola præscientia erit causa prædestinationis, non diuina ordinatione, quia potius diuina ordinatione ex parte Dei est æqualis, & tota differentia est in præscientia illa antecedenti quod hic habebit euentum, seu non deficiet, alter verò sic. Et casus est, quando Deus prævidet ante omne decretum suum quod duobus hominibus æqualiter præuentis, & ordinatis à Deo, unus pro sua libertate utitur bene illa præventionem, alter non; & sic moritur uterque; & præscientiâ istâ positâ, Deus nihil aliud addit uni, quod non alteri, sed utrumque vult sic producere, & sic præuenire, tunc tam in producendo, quàm in præueniendo seu ordinando de mediis Deus æqualiter se habet, & tamen ratione solius præscientiæ sine nova Dei ordinatione circa unum quàm circa aliud, nascitur dispar effectus, salutis in vno, reprobationis in alio. Ergo tunc sola præscientia est causa istius prædestinationis, non electio ipsa, & ordinatione Dei. Hoc dicit S. Thom. esse contra Scripturam & dicta Sanctorum.

Nec dici potest, esse diversam electionem Dei 18 in vno præ alio, quia præsciens Deus hunc non defecturum à gratia, & habiturum meliorem euentum, voluit illum producere, & sic eligere ut poneretur in rerum natura, alium verò prævidens deteriore euentum habiturum, elegit etiam ut esset. Diverso ergo modo eligit Deus prædestinatum, & non prædestinatum, siquidem diversum euentum eligit in vno quàm in alio, cum posset non eligere. Sed hoc nihil est, quia D. Thom. non intendit ponendam esse differentiam inter prædestinatum, & non prædestinatum ex parte electionis eius quod præscitur euenturum, nec ex parte productionis ad extra, sed ex parte ipsius prædestinantis, & ordinantis. Nam D. Thom. ponit hunc casum, quod Deus ordinet eodem modo prædestinatum, & non prædestinatum, sed cum hoc de prædestinato præsciat quod non sit defecturus à salute: ergo supponit quod Deus hunc hominem sic prævisum quod non deficiet, eligit, & alium prævisum quod deficiet, etiam vult, & ordinat ut existat & producat, & sic quod detur diversa electio seu ordinatione, diversitate se tenente ex parte euentus prævisi per præscientiam; & tamen hoc non obstante, dicit S. Thom. quod tunc differret prædestinatus à non prædestinato solum ex parte præscientiæ, & non ordinis diuini, & quod præscientia esset causa prædestinationis, & illa non esset ex electione prædestinantis, quod est contra Scripturam, & dicta

dicta Sanctorum : ergo tota illa diuersa electio ex parte diuersi euentus præuisi, si est eadem ordinatio & electio ex parte Dei prædestinantis nihil omnino refert ad inconueniens illatum à D. Th. quod dicit esse contra Scripturam, & dicta Sanctorum, siquidem hoc inconueniens infert, etiam supponendo quod ex parte euentus præuisi & productionis semper est diuersitas, & Deus illam diuersitatem sic præuisam vult.

19 Colligentes ergo vim rationum hucusque pro hac parte adductam, dicimus, summam earum ad hoc reduci, quia si providentia Dei ponitur in aliqua notitia omnem actum liberum Dei antecedente, quo cognoscat plenissime omnem mediorum apparatus, & efficaciam, & omnes euentus sub quacumque combinatione futuros, non ex decreto Dei dimanando, sed ex sua intrinseca veritate determinatos, & per scientiam mediam quæ necessaria est, & ante omnem providentiam, quæ libera, & arbitraria est, præuisos, ita quod solum restet subsequi actum voluntatis eligentem, & purificantem conditionem, ut de facto res illæ sint, & producantur, ut ex hoc illa scientia denominetur providentia ex adiuncto beneplacito voluntatis exequentis, talis modus explicandi providentiam, licet ex vna parte videatur saluare perfectissimam eius notitiam, respectu rerum omnium providendarum, sicut ille Rex posset prudentissime, & providentissime regnum suum gubernare, qui haberet, antequam aliquid decerneret, plenam & perfectam notitiam de omnibus mediis, & omnibus euentibus, qui succedent in quocumque ordine, & combinatione possibili, & cum hoc haberet omnem requisitam potentiam ad ponendum in executione quod vellent, tamen hoc quod ex hac parte videtur explicare magnam perfectionem providentiæ quoad effugandam ignorantiam, & fallibilitatem rerum gubernandarum modo creato, seu humano, ex alia parte euacuat, & funditus evertit vim providentiæ diuinæ, ut diuina, in causando, & ordinando, quæ providenda sunt, & in providentia diuina quia suprema est, summa ratio causandi debet reperiri.

Vnde nostra sententia ex hoc solum deberet anteferri, quia coniungit utrumque in diuina providentia, & loquitur ac sentit decentissime de illa, sicut de providentia diuina sentire par est, nempe & quod sit summè ordinatiua, & causatiua rerum gubernandarum, quia non supponit determinatos iam esse euentus antecedenter ad sua decreta, sed facit, & quod sit infallibilis, & summè certa in attingendo omnia, quia infiniti luminis est, & in manu sua habet ponere, & determinare quidquid euenturum est; & sic ex seipso accipit medium cognoscendi omnia.

Altera autem sententia deficit in duobus. Alterum est, quod supponit euentus omnes contingentes esse ex se, & ab intrinseca veritate determinatos, ut possint esse obiectum scientiæ mediæ ante omne liberum Dei decretum, quod *præced. tome disp. 19. & 20.* latè impugnatum est. Alterum est, quod istam determinationem euentus, qua vnumquodque determinatè suum finem consequitur, non reducit ad ordinationem, & causationem providentiæ diuinæ ex parte ipsius providentis, sed quod omnia supponit ordinata, & successura ex propria & intrinseca ratione talis veritatis ante omne decretum, & sic præuisa, solum autem restat Deo per voluntatem suam consentire, ut talis vel talis res fiat, aut rerum ordo iam aliunde ordinatus ponatur in esse, quod est solum purificare conditionem, & ut merum executorem producere, quod

ab alio ordinatum supponitur, seu determinatum videtur, non ex ordinatione, & arbitrio proprio res illas determinatas, & ordinatas reddere, & causare, quod est magnæ imperfectionis in summa, & prima providentia.

20 Si autem ex arbitrio & decreto seu ordinatione Dei euentus illi determinandi sunt, & ordinandi, ut in hanc partem potius quam aliam eueniant, non autem debent supponi ex sola præscientia Dei omnia præuisa ut determinata ante omne liberum decretum ipsius Dei, necessariò consequitur, quod aliqua cognitio debet dari in Deo ordinatiua, & pronitiua ex aliqua voluntate præsupposita, saltem circa finem quem intendit, & non debet providentia denominari solum ex voluntate consequente ipsam Dei notitiam. Etenim tunc determinatio illorum euentuum dependet ex voluntate Dei libera, & non habetur antecedenter ad omnem voluntatem. Voluntas autem Dei operatur ex fine, quia non fortuitò, nec temerè facit, nec inordinatè: voluntas autem ordinatè, & rationabiliter procedens prius vult finem, & ex fine ea quæ sunt ad finem: ergo cum ille euentus in re ponendus debeat decerni & determinari à Deo, oportet quod ex aliquo fine determinetur, & non fine illo: ergo ex præsupposita voluntate aliqua, saltem circa finem, debet procedere ordinatio, & notitia illa qua Deus per intellectum etiam ordinat, & providet de euentu sic, vel sic determinando, præsertim cum sæpius determinetur hoc ex conuenientia ad finem, & ex præsuppositione volitionis eius, non absolute propter se.

21 Nunc restat illud secundum dictum supra positum, ostendere quod videlicet supposito actu ordinatiuo mediorum post voluntatem finis, non debet providentia consistere in sola ordinatione consilij aut iudicij antecedentis ad electionem mediorum, sed in actu ordinatiuo executionis, quod sequitur post electionem, & nos vocamus imperium. Et quidem cum hoc præcipue probari debeat ex ipsa efficacia perfectæ providentiæ, quæ stare non potest sine ordinatione præceptiua, quæ respicit executionem, facilius videri potest ista probatio in ipsa prædestinatione, quæ est specialis providentia, quia semper habet certam assecutionem, & executionem finis, & hoc addit supra providentiam communem, ut dicit S. Thom. *q. 6. de verit. art. 1.* quàm in ipsa providentia communi, quæ non semper executionem, & effectum habet, quia hoc ipsum ordinat aliquando providentia, ut effectum in aliqua executione non habeat.

22 Nihilominus tamen in D. Thom. sententia & generaliter, probanda est hæc pars tam de providentia communi, quàm de prædestinatione, quod consistant in actu præceptiui, seu ordinatiui executionis, & non solum in actu antecedente ad electionem, sicut est consilium, & iudicium de agendis. Nam in primis S. Thom. agens de prudentia in communi, ostendit quod eius principalis actus non est consiliari aut iudicare de agendis, quod præcedit electionem, sed præcipere, qui est tertius actus quo consiliata, & indicata applicat ad opus. Verba eius sunt *2. 2. q. 47. art. 8.* Ille est præcipuus actus prudentiæ, qui est præcipuus actus rationis agibilium, cuius quidem sunt tres actus, quorum primus est consiliari, quod pertinet ad inuentionem: secundus est iudicare de inuentis, & hoc facit speculatiua ratio: sed practica ratio, qua ordinatur ad opus, procedit ulterius. Et est tertius actus eius præcipere, qui quidem actus consistit in applicatione consiliatorum, & indicatorum ad operandum. Et quia iste actus est propinquior fini rationis practice, inde est, quod iste est principalis

tipalis actus rationis practica, & per consequens prudentia. Ita D. Thom. loquens de prudentia in communi, & sicut reperitur in nobis, quæ in Deo formaliter inuenitur, sicut sapientia & alia attributa, licet semotis imperfectionibus quæ in nobis sunt: nam etiam Deo attribuitur prudentia in Scriptura, sicut & sapientia, Prouerb. 3. *Dominus sapientia fundauit terram, stabiliiuit celos prudentia.* Est ergo in Deo formaliter, & verè prudentia. Ne autem fiat vis in eo quod dicatur prudentiam quidem esse præceptiuam, sed non ostendi quod etiam prouidentia in actu præcepti consistat, quia prouidentia est pars quædam prudentiæ, non autem omnes partes prudentiæ actum præcepti important, debet aduerti, quod D. Thom. eadem 2. 2. q. 48 art. unico tractans de partibus prudentiæ, numerat octo partes integrales eius, quinque, quæ pertinent ad prudentiam secundum quod est cognoscitiua, scilicet memoria, ratio, intellectus, docilitas, & solertia: tria verò pertinent ad eam secundum quod est præceptiuam applicando cognitionem ad opus, scilicet prouidentia, circumspectio, & cautio. Et infra. Ratio ad hoc quod recte præcipiat, tria debet habere; primò quidem ut ordinet aliquid accommodum ad finem, & hoc pertinet ad prouidentiam: secundò, ut attendat circumstantias negotij, quod pertinet ad circumspectionem: tertio, ut vitet impedimenta, quod pertinet ad cautionem. Ergo D. Thom. prouidentiam constituit in actu præceptiuo, secundum quod ordinat aliquid accommodum in finem, quod vtrique pertinet ad actum intellectus.

23 Loquens autem D. Thom. de prouidentia quæ in Deo est, expressè ponit illam in actu præceptiuo, ut patet in hac quæst. 22. art. 1. ad 1. ubi inquit: *Licet consiliari non competat Deo, secundum quod consilium est inquisitio de rebus dubijs, tamen præcipere de ordinandis in finem, quorum rectam rationem habet, competit Deo, iuxta illud Psalm. Præceptum posuit, & non præteribit. Et secundum hoc competit Deo ratio prudentiæ, & prouidentia.* Et solut. ad 3. *Prouidentia est in intellectu, sed præsupponit voluntatem finis. Nullus enim præcipit de agendis propter finem, nisi velit finem.* Et loquens de prædestinatione hic art. 4. dicit, quod *Prædestinatio est pars prouidentia, prouidentia autem sicut & prudentia est ratio in intellectu existens præceptiuæ ordinationis aliquorum in finem, ut supra dictum est. Non autem præcipitur aliquid ordinandum in finem, nisi præexistente voluntate finis. Unde prædestinatio aliquorum in salutem eternam præsupponit secundum rationem quod Deus illorum velit salutem.* Ergo secundum D. Thom. prædestinatio debet constitui in actu præcepti, qui oritur ex priori voluntate præsupposita volente finem, & sic non debet esse ille prior actus intellectus mouens ad finem, vel solum iudicans aut consilians de medijs, sed etiam præcipiens.

24 Et fundamentum huius sumitur ex dictis, quia ad prouidentiam perfectam pertinet non solum disponere & ordinare de medijs ut à voluntate sint volita, & amata, quod fit per electionem, sed ut de facto & secundum vsum eorum ad extra finem assequantur: ergo non sufficit ordinatio quælibet disponens voluntatem ut eligat, & ante electionem sistens, sed requiritur ordinatio applicans ad executionem, & assecutionem ipsius finis, ut assequendus est ad extra, quod pertinet ad aliquem actum post electionem, & non ante, quia post illam sequitur executio, & assecutio ad extra. Anteced. est certum, quia prouidentia & gubernatio non ordinatur solum ad ad ea quæ intra

Ioan. à S. Thoma in 1. part. D. Thoma.

nos manent, sed ut ea quæ extra nos sunt debite disponantur & ordinentur ad fines suos, & debite executioni tradantur, sicut videmus in gubernatione politica, aut æconomica, & in quacunque alia quæ versatur erga subditos: hæc enim ordinare debet de his quæ extra nos sunt: ergo non debet solum disponere quod media eligantur aut amentur, quod pertinet ad actus immanentes inter nos, sed quod applicentur & tendant ad executionem externam, vsque ad assecutionem finis, & quod vincantur difficultates, & tollantur impedimenta, quæ in externa executione offerri solent, quæ maxima sunt, & maiorem postulant conatum & ordinationem. Et licet Deo nihil sit difficile & arduum respectu ipsius operantis; tamen ex parte obiecti, & assecutionis finis in se multa se offerunt vincenda, quæ Deus non tollit cæco & naturali impetu, sed ordine & ratione & prouidentia, iuxta quod dicitur Iudith 9. *Tu fecisti priora, & illa post illa excogitasti, & id factum est quod ipse voluisti: omnes enim viæ tuæ paratæ sunt, & tua iudicia in tua prouidentia constituisti.* Conseq. vero prob. quia omnis ordinatio intellectus si tantum sistat in electione, & amore ad intra, manet frustrabilis, & subiecta inefficacitati, nisi transeat ad executionem ad extra, & ordinet de his quæ ad executionem requiruntur, cum constet plura bene eligi, & amari, & consiliari, & deficere in executione propter defectum applicandi & imperandi: ergo oportet quod ordinatio prouisiua, & ad executionem tendens, non sistat in electione, sed ordinatiua sit de executione & applicatione, quod est esse præceptiuum post electionem. Et licet electio diuina, & consilium semper habeat infallibilitatem, iuxta illud Isai. 46. *Consilium meum stabit, & omnis voluntas mea fiet;* tamen hoc non ideo est, quia non habeat actum ordinatum de executione & applicatione ad opus per præceptum, sed quia non habet illud ex additione nouæ notitiæ & nouæ excogitationis & inuentionis, sicut nos, sed per certitudinem ex se.

Et conf. hoc totum ex efficacia diuinæ prouidentia & prædestinationis, quia posita intentione finis & electione mediorum, oportet quod ordinatio ad applicandum, & exequendum sit efficax, aliàs deficere poterit ab assecutione finis, si caruerit efficacia; sed prouidentia respicit assecutionem finis, non electionem tantum aut amorem internum, quia ad hoc non multa prouidentia opus est, nec ille diceretur prudenter, & bene gubernare, qui tantum sisteret in disponendo atque ordinando electionem, & amorem internum, nihil curando de externa applicatione, & executione rerum. Si ergo gubernatio & prouidentia maximè attendit, & versatur circa vsum externum & applicationem mediorum ad consecutionem finis, & ut effectum sortiatur (in quo perficitur & completur gubernatio) petit efficaciam in ipsa ordinatione applicatiua ad opus, in eo maximè debet consistere prouidentia, ubi inueniatur ordinatio de applicatione ad opus, quæ ipsum exercitium & assecutionem respiciat, quod vtrique est post electionem, quia tunc incipit applicatio ad opus. Et quidquid sit, tamen ante istam ordinationem de applicatione mediorum ad executionem & assecutionem finis, non potest dari prouidentia ut gubernatiua exteriorum, & non tantum sistens in electione interna. Nec prouidentia ista erit perfecta & completa, nisi in ista ordinatione sic gubernatiua efficaciam habeat, quia si caret illa, non curat de effectu, sed frustrabitur; prouidentia autem

Bb

frustrabilis

frustrabilis, imperfecta est. Consistit autem unaqueque virtus, ubi consummatur, & perficitur: ergo si in ista ordinatione præceptiva, & applicativa ad extracum efficacia perficitur providentia ut gubernativa exteriorum, ibi consistit. Quod verò non sufficiat efficaciam sequi ad actum intellectus ordinatum, sed requiratur aliqua efficacia antecedens, patet ex dictis, quia ista ordinatio est applicativa ad executionem mediorum: ergo supponit antecedenter totum affectum voluntatis ex parte intentionis circa finem, & circa electionem mediorum: prior est enim intentio executione: ergo non potest ista ordinatio de executione antecedere omnem affectum voluntatis & efficaciam eius, etiam ordine intentionis, debet tamen antecedere usum, seu ipsam ultimam voluntatis applicationem, quia ordinat, & disponit de illa: ergo antecedit.

26 Dices: Non omnis providentia est affectiva finis efficaciter, etiam in Deo: nam in hoc distinguitur providentia communis à prædestinatione, quod hæc semper sortitur effectum, non illa, ut docet S. Thom. *quæst. 6. de veritate, art. 1.* Et est de se manifestum, quia datur providentia communis reprobis, & prædestinatis in genere supernaturali, & pro reprobis frustratur effectus, in prædestinatis verò semper impletur: ergo non omnis providentia consistere debet in actu præceptivo efficaci, alioquin omnis providentia impleteretur.

Resp. quod in providentia divina vel possumus considerare finem universalem providentis, vel finem particularem alicuius rei provisæ. Nam ipse providens, qui est Deus, habet multos ordines rerum, quibus omnibus providet sub universalissimo fine suæ bonitatis, ut representabilis in toto ordine huius universi. Et hoc modo providentia divina semper impletur, quia non possunt res provisæ exire terminos huius universalissimi finis & ordinis. Et hac ratione dicit S. Thom. in hac prima parte, *quæstione 19. artic. 6.* quod *Voluntas Dei in quantum universalis causa semper impletur: quod enim recedere videtur ab uno ordine, relabitur in alium.* Vnde etiam quando aliqua causæ particulares frustrantur suo effectui, non frustratur providentia Dei suo intento, quia non erat intentum Dei, quod illa causa effectum haberet, sed quod haberet ordinem ad effectum, & inclinationem, non tamen eventum, sed quod impediretur. Et utrumque horum consequitur providentia: nam & causæ inclinationem seu ordinem habent ad suos effectus, & aliæ causæ impediunt impedimentum consequuntur, & utrumque est sub universalis potestate Dei. At verò si loquamur de fine particulari alicuius causæ, seu rei provisæ, & non solum de fine universalis ipsius providentis, sic aliqua providentia non semper implet effectum suum per comparisonem ad illam causam particularem tantum, alia verò providentia implet, sicut providentia dandi Adam statum innocentiae, & posteris eius, non est impleta quoad illum particularem ordinem, & providentia dandi gratiam reprobis non sortitur finem, qui est gloria in ipsis. Et secundum hanc considerationem distinguit D. Thom. prædestinationem à generali providentia, quod illa semper & efficaciter suum finem sortitur, non ista, loquendo de fine secundum unum particularem ordinem, & secundum quod est particularis finis, & particulariter intentus pro istis personis, seu causis particularibus, v. g. ut isti consequantur gloriam: in hoc enim fine particu-

lari consequendo prædestinatio est efficax, providentia autem generalis, non pro omni fine particulari consequendo efficax est.

Dices iterum: non probari à nobis quod prædestinatio pro imperio efficaci & actu ordinatio executionis sit necessaria absolute & simpliciter, ut aliquis salvetur, sed solum ut plures salventur, vel ut expeditius & convenientius: de se enim videtur sufficere providentia generalis cum sufficientibus auxiliis, cooperando illis.

27 Resp. aliquos ita sensisse, licet ex diversis motibus. Massilienses enim ut in *epistolis Prosperi & Hilarii ad August.* dicitur, sentiebant aliquos posse salvari, qui ab æterno in illo numero inclusi non sunt. Catherinus vero *lib. 3. de prædestinatione*, distinxit duos ordines prædestinatorum: alios eximie sanctitatis, & hos dixit ab æterno esse præparatos, & prædestinatos; alios verò non ita peculiaris sanctitatis posse salvari, licet ab æterno non sint prædestinati. Et solum de primis intelligit ea loca Scripturæ quæ dicunt prædestinationem, & electionem esse ab æterno. Motiva autem tam Catherini, quam Massiliensium ferè sunt eadem, nempe quia iniicitur hominibus veluti quædam desperatio, si illi solum consequi possunt salutem, qui prædestinati sunt, & sic frustra essent exhortationes & correptiones, si illa dispositio est infallibilis, immò esse tollere à reprobis moralem potentiam suæ salutis: nec enim possunt illam consequi contra prædestinationem Dei, nec dicuntur habere omnia requisita ad suam salutem: deest enim illis prædestinatio; præterquam quod liberum arbitrium videtur destrui, si hæc infallibilis destinatio humanas prævenit voluntates. Alij verò Authores hoc tempore sentiunt providentiam generalem dandi sufficientiam, auxilia & communia reprobis ac prædestinatis reddi specialem prædestinationem ex sola præscientia qua iste etiam cum eadem gratia videtur consensurus præ alio, sine vlla alia prædestinatione speciali, quod sensit Molina, alique negantes divinas prædefinitiones requiri ad nostros actus liberos, contra quos agemus *seq. art.* sicut etiam *disp. 8. ostendimus*, etiam comparisonem nostram ad gratiam esse effectum prædestinationis, non rem præsuppositam.

28 Contra Massilienses verò, & Catherinum apertissima sunt testimonia Scripturarum: dicitur enim *Matth. 25. Venite benedicti Patris mei, possidete regnum, quod paratum est vobis ab origine mundi*: sed hoc dicit Christus ad omnes electos suos siue maioris, siue minoris sanctitatis, scilicet ad omnes illos qui à dextris suis erunt: ergo omnibus illis paratum est regnum ab æterno: ergo prædestinatum. Similiter *1. ad Cor. 3.* dicitur *Oculus non vidit, &c. quæ preparavit Deus diligentibus se*; sed omnes qui salvantur debent esse diligentes Deum, siue magis, siue minus sancti: nam, *qui non diligit, manet in morte*: ergo omnibus preparata sunt bona cælestia: ergo omnes qui salvantur sub præparatione, seu prædestinatione Dei includuntur. Et ad *Ephes. 1.* *Qui prædestinavit nos in adoptionem filiorum per Iesum Christum in ipsum secundum propositum voluntatis sue in laudem gloriæ gratiæ sue*: sed omnis qui saluatur debet esse Filius Dei per adoptionem, quia, ut dicitur *Ioan. 1. Quotquot receperunt eum, dedit eis potestatem filios Dei fieri, & Rom. 8. Quicumque spiritu Dei aguntur, hi sunt filij Dei*: ergo omnes qui salvantur prædestinati esse debent, utpote filij adoptionis. Ac denique *Rom. 8. Quos præsciuit, & prædestinavit conformes fieri imagini filij sui*: quicumque autem saluatur debet esse conformis imagini Christi: sicut enim *pertinamus imaginem terreni, sic portemus*

portemus & imaginem celestis. 1. Corinth. 9. ergo omnes qui saluantur sunt prædestinati. Vnde Aug. lib. de fide ad Petrum. cap. 35. Firmissime, inquit, tene & nullatenus dubites, omnes, quos vasa misericordiae Deus fecit ante constitutionem mundi, prædestinatos à Deo, nec quempiam eorum, quos non prædestinavit ad vitam, vlla posse ratione saluari. Et ratio est manifesta, quia nullus saluatur nisi gratuito Dei beneficio: gratia enim Dei vita aeterna, Rom. 6. Hoc autem gratuitum beneficium non datur, nisi cui Deus voluit & paravit, non parat autem, nec vult, nisi ab aeterno: nec enim in tempore incipit aliquid velle aut disponere: ergo habet præparationem ab aeterno, & hæc est prædestinatio.

- 29 Motiva autem Massiliensium & Catherini inania sunt: nec enim desperatio iniicitur per prædestinationem, sed spes firmatur, quia in Deo collocatur, & non in nobis, vt August. dicit de bono perseverantia cap. 17. Nec tollitur oratio aut exhortatio, quia multa non præparat Deus, nisi mediantibus orationibus, & hortationibus, vt ibidem cap. 16. dicit Augustin. & subdit: *Canendum est igitur ne dum timemus, tepescat hortatio, extinguatur oratio, accendatur elatio.* Sic ergo infallibilis dispositio Dei, non tollit orationes, quia per orationum media præparat, & disponit infallibiliter quid fiat. Multò minùs tollit potentiam moralem salutis à reprobis, aut aliquid requisitum ad salutem eis denegat ex parte sufficientium auxiliiorum, per quæ potentia moralis, & proxima habetur ad bene operandum, & salutem consequendam: non tamen omnibus dat vt de facto saluentur, quod est prædestinari. Sine ista autem prædestinatione, & præparatione non possunt consequi salutem potestate consequenti, quæ habet adiunctum effectum, transeat; potestate antecedenti, quæ habet sufficientiam, & potentiam proximam, licet non effectum, & in reprobis etiam invenitur, nego. Minùs tollit liberum arbitrium prædestinatio, sed potius servat, quia hoc ipsum Deus præparat, vt liberè homines operentur per gratiam: *non enim libertate consequimur gratiam, sed gratiâ libertatem*, vt Augustin. docet lib. de corrept. & gratia c. 8. & nos supra, circa efficaciam decretorum Dei loquendo, & præced. tomo, circa scientiam mediam læpè ostendimus.

Soluntur argumenta.

- 30 Primò arguitur contra primum dictum, seu primam conclusionem ad probandum non requiri quòd providentia sequatur ad aliquam volitionem divinam, sed sufficit quòd antecedit, dummodo subsequatur actus voluntatis efficax, quo compleatur, & sumat denominationem providentia. Et argumentum sumitur ex insinuatione supra, quia divina cognitio non proponit finem voluntari, quasi in abstracto & nudè, sed cum plena comprehensione mediorum, & omnium, quæ ad talem finem & eius assecutionem non possunt concurrere, vel requiri: ergo proposito fine sic, non indiget voluntas ad tendendum in ipsum, & in media, & in eius assecutionem, vlla alia ordinatione, & directione mediorum, aut applicatione eorum ad usum & assecutionem, sicut nos qui imperfecto modo procedimus, & primò tendit voluntas in bonitatem finis secundum se, deinde consulit de mediis, & denique de difficultatibus ad executionem ordinat. Si autem omnia ista in tota comprehensione statim proponerentur voluntati, non indigeret aliqua ordinatione intellectus præsuppo-
- Ioan. à S. Thoma in 1. part. D. Thoma.

nente aliquem affectum voluntatis circa vnum, & ordinante circa aliud, sed omnis ordinatio de facto proponitur voluntati ante omnem actum liberum eius: ergo nulla datur ordinatio supponens actum voluntatis antecedentem, & dantem sibi efficaciam, sed tota efficacia subsequitur in providentia divina, quia supponit omnem ordinem, tam circa media, quàm executionem, ante omnem eius actum propositam & attractam ab intellectu ob infinitam comprehensionem.

Conf. ex Arrubal disp. 63. cap. 3. quia si ad providentiam debet supponi aliquis amor, & voluntas libera Dei circa rem creatam: ergo debet etiam supponi aliqua terminatio illius actus liberi ad tale obiectum, quæ posset non esse in Deo (si oppositum vellet) & aliqua mutatio ex parte creaturæ, quæ ex vi talis amoris dicatur immutata in se, & futura: ergo non potest ex aliqua voluntate libera seu decreto libero antecedente lumere efficaciam providentia seu ordinatio intellectus per vim præcepti ad exequendum. Patet conseq. Supponit rem iam executam, & futuram ex vi decreti liberi antecedentis, quia iam est efficaciter volita, atque aded immutata & futura à divina voluntate: ergo non potest ab ipsa dimanare efficacia ad exequendum: ergo neque requiritur aliqua ordinatio causans executionem, si supponit aliquod decretum liberum efficax ante se.

Resp. quòd antecederet ad omnem actum voluntatis proponitur ab intellectu divino finis cum plena comprehensione mediorum in ratione possibilitatis, & comprehensione quasi speculativa, transeat; in ratione exequendi, & determinandi practicè, nego: convenientia enim & dispositio de mediis practico modo, & executio non potest proponi nisi cum aliquo determinato modo eligendi inter omnia possibilia; & hæc determinatio seu electio se habet dependenter ab aliqua voluntate circa finem, eo quòd plerumque convenientia, & determinatio mediorum, & dispositio eorum ad executionem sumitur ex proportionem, & habitudine ad finem iam volitum, & in quantum volitum. Vnde non potest decerni efficaciter & ordinatè de tali executione, nisi conferendo, & proportionando illam executionem fini iam volito, sicut Deus non ordinaret Christum conspui & flagellari, & saturari opprobriis, nisi hoc proportionatum videret redemptioni nostrorum peccatorum iam volitæ, quia videlicet voluit copiosam fieri redemptionem: posset enim aliis modis redemptio fieri, sed ordinatum fuit de illo medio ita pœnali & duro, quia volita erat illa redemptio vt copiosa, & in maximæ patientiæ documentum. Et quotiescumque res aliqua posset per plura media fieri, & hoc proponitur vt possibile, & per modum speculationis, non potest practicè ordinari executio vnus determinatè, nisi ex suppositione finis sic voliti, quod ex suppositione talis volitionis congruentius apparet vnum medium, quàm aliud. Immo generaliter docet S. Thom. quòd non potest præcipi de agendis, nisi supponendo volitionem finis in ordine ad quem præcipitur, vt dicit in hac quest. 22. art. 1. ad 3. & q. 23. art. 4. *Non præcipitur, inquit, aliquid ordinandum in finem, nisi præexistente voluntate finis.* Et præcipuè hoc currit in Deo, qui, vt dicit Apost. ad Ephes. 1. *Operatur omnia secundum consiliū voluntatis suæ.* Non ergo ex noticia antecedenti omnem actum suæ voluntatis, sed consulente suam voluntatem, & secundum proportionem ad beneplacitum eius operatur, & exequitur. Quare negamus quòd ex

292 Quæst. XXIII. De Prædestinatione.

sola cognitione finis & mediorum secundum se, & quasi speculatiue, & comprehensione eorum in ratione possibilis moueatur diuina voluntas, sed etiam ex conformitate, & collatione eorum ad suam voluntatem, & suum beneplacitum; & sic ex suppositione vnus voliti vult aliud volitum, scilicet ex fine media, finem verò ratione suæ bonitatis, licet non ex vna volitione habeat aliam volitionem, vt dicit S. Thom. *supra* q. 29. a. 5.

33 Et declaratur hoc amplius, dicendo quod licet Deus vnico actu ex parte intelligentis finem & media omnia, & omnem ordinem euentuum comprehensiuè proponat, & ex parte voluntatis vnico etiam actu ex parte volentis omnia ista obiecta attingat; & ita non indigeat multiplicare actus ex parte sua, tamen ex parte obiectorum ordinatè se habet ista attingentia, & secundum ordinem obiectorum inter se, & comparisonem eorum ad voluntatem dicuntur variari decreta diuina, & vnum decretum supponere aliud, quia vnum obiectum vt volitum supponit aliud, & dependet ex alio etiam vt volito; & sic dicitur Deus ordinatè velle obiecta, ordine se tenente ex parte obiectorum. Et sic ex hac parte distinguimus decreta diuina & actus voluntatis, & inter vnum & aliud distinguimus actum prouidentia ex parte intellectus, & alios actus practicos, non quod efficacia vnus actus det efficaciam ad alium actum ex parte Dei, sed quod ex parte obiectorum vnum efficaciter volitum per modum finis præsupponitur ad ordinationem efficacem circa media, vel circa executionem; & sic propositio vnica Dei comprehensiva finis & mediorum & totius executionis ita est vnica comparatione ad actum ex parte volentis, quod est virtualiter multiplex ex parte attingentia obiectorum, & terminationis ad ipsa, & diuersarum difficultatum, quæ ex parte obiectorum, rerum prouisarum se tenent, ob quæ diuersa connotata resultant sufficientia ad distinguendum istos actus ex parte obiectorum. Et in hac distinctione ex parte ipsorum relucet diuersa efficacia & terminatio ex parte voluntatis, & diuersa ordinatio ex parte intellectus respectu diuersarum rationum, quæ resplendent in obiectis, licet actus ex parte Dei attingentis omnino vnum sint, sicut & ipsa efficacia, vt ex parte operantis.

34 Ad Conf. Resp. quod prouidentia supponit efficaciam intentionis in volitione finis, non tamen efficaciam executionis, sed illam ordinat & disponit præcipiendo de agendis. Efficacia autem intentionis non constituit rem futuram in exercitio & executione, sed intensiue, & est principium huius futuritionis & executionis, quatenus intentio finis est principium, & ratio exequendi in his, quæ fiunt ex fine; & sic efficacia illa intentionis infert & derivat ex se efficaciam executionis, & est efficacia in suo ordine & linea sufficiens ad intendendum, sed nondum intelligitur efficacia exequens & in actu executione ponens, quousque media & executio ordinentur. Vnde cum non supponat rem executam, sed intentam, potest ex vi talis efficaciae vt intentæ causari executio, & ordinatio de executione, vt res existat, sicut ex intentione finis causatur in nobis electio mediorum. In Deo autem non est causatio actus ex actu, sed obiecti voliti ad obiectum volitum.

Immo potius vt bene vidit M. González *hic* disp. 65. sect. 4. in sententia Arrubalis, quod decretum liberum in ratione liberi constituitur secundum connotationem actionis ad extra, & productionem rei volitæ, non potest diuinæ prouiden-

tia causalitas & ordinatio circa rerum productionem defendi: nam si prouidentia est decretum liberum & efficax mediorum, ex amore finis, & decretum liberum includit ipsam productionem medij: ergo talis productio non pendet à diuina prouidentia. Patet consequ. quia includit illam in ratione liberi: ergo non pendet productio rei ad extra ab illa vt à libera prouidentia, siquidem non intelligitur hæc prouidentia in Deo & hoc liberum decretum ante ipsam productionem & terminationem ad illam: ergo productio ad extra non pendet à diuina prouidentia, & cura Dei, quia ante ipsam non est prouidentia Dei. Falsitas autem consequentis constat ex illo Matth. *Nonne quinque passeris vaneunt dipondio, & vnus ex illis non cadit in terram sine Patre vestro?* ergo occisio passeris à cura & prouidentia Patris dependet: ergo ante illam occisionem constituitur, non post illam intelligitur constitui in ratione liberi. Et non satisfacit responsio Alarcon *tract. 4. de prædestin. disp. 1. cap. 3.* quod occisio passeris & productio rei dicitur subici diuinæ prouidentia, & dependere ab ea, quia quando in tempore fit, dependet ab æterna voluntate, & sic non dependet à prouidentia tanquam ab aliquo actu, qui antecedit secundum causalitatem, ipsam occisionem, sed secundum durationem æternam, connotando tamen ipsam vt futuram. Sed quia res non solum quando in tempore fiunt, sed etiam quando ab æterno decernuntur pendet à prouidentia, addit quod etiam ab æterno res decernuntur secundum prouidentiam, quia decernuntur ex certo fine, non casu, & sine eius cognitione: ex cognitione autem conditionali qua Deus cognouit hoc esse utile ad illum finem, decreuit vt fieret ex tali fine. Cæterum prima solutio est aperte falsa, quia quando in tempore occiditur passer, illa occisio actu pedit à causalitate Dei, vt pote à causa prima, sed non à causalitate diuina operante sine prouidentia: ergo operante per prouidentiam, & non per prouidentiam temporalem, & incipientem Deo conuenire ex tempore: ergo æternam: ergo æterna prouidentia non solum duratione, sed etiam causalitate antecedit illam occisionem: ergo non constituitur in ratione libera prouidentia, & decreti liberi per connotationem productionis ad extra, sed antecederet ad illam, quia est causa illius. Secunda autem solutio nihil etiam valet, quia res non aliter pendet ab æterno à diuina prouidentia, quam in tempore quando fiunt: quidquid enim in tempore fit, decretatum & præparatum est ab æterno, & eo modo fit in tempore quo decernitur ab æterno vt in tempore fiat; sed in tempore dependet occisio illa à causalitate diuina, & eius prouidentia, non solum in genere causæ finalis, vt non temerè fiat, sed in genere causæ efficientis operantis per intellectum & rationem, quod est operari per prouidentiam: ergo prouidentia in tempore, & ab æterno antecedit illam occisionem, non solum duratione, sed etiam causalitate, & non sola causalitate finis, sed efficientis & exequentis per directionem prouidentia. Et præsertim quia prouidentia non ad hoc ponitur tantum vt intendatur finis, sed vt ex fine intento aliquid debite & rationaliter exequatur: ergo occisio passeris non pendet solum à prouidentia in genere causæ finalis, sed in genere efficientis & exequentis; & sic non constituitur connotatione productionis, sed causat illam.

Secundò arguit, quia si prædestinatio consistit in actu

actu imperij ordinante executionem : ergo alicui debet imperare, non ipsi Deo ut eliciat actum, quia Deus sibi non imperat, cum in eo non sit aliquid superius & inferius, quod requiritur ad imperium, nec habet actum per elicientiam, sed seipso est in actu secundo, & sic non indiget imperio ad suos actus habendos. Non ipsis prædestinatis, quia non dum existunt quando prædestinantur, sed quando fiunt in tempore, tunc enim incipit Deus esse dominus eorum : ante productionem enim creaturæ non denominatur Creator aut Dominus : ergo neque imperans, sequitur enim imperium ad dominium : ergo imperium non est ab æterno in Deo, sicut nec dominium : prædestinatio autem est ab æterno in Deo : ergo prædestinatio non est imperium.

35 Confirm. quia imperium solum potest movere aut morali vi, aut physica. Morali, sicut cum unus homo imperat alteri proponendo ei determinationem & obligationem superioris : physica, sicut Christus dicebatur imperare ventis & mari, & Deus rebus insensibilibus, quia videlicet illas transmutat, aut producit, sed neutro modo prædestinatio movet neque ipsum Deum, neque creaturas : ergo non est imperium. Minor prob. nam respectu ipsius Dei non datur motio ista moralis, & multo minus physica, quæ est immutativa ex uno ad aliud, quod in Deo non habet locum. Nam moralis motio fit ex parte obiecti aut finis, & fit ad potentiam ut moveatur ad actum habendum, & si sit imperium aut oratio, supponit aliquid superius, & inferius : Deus autem nullo modo movetur ab obiecto quod vult per imperium, quia est obiectum creatum : à creatura autem non movetur Deus, nec à fine qui est sua bonitas, quia actus divinæ volitionis non ordinatur in finem, cum sit ipse finis, & ipse Deus, nec applicatur ad utrum, quia Deus non applicat se, nec utitur se, nec fit ad potentiam siue volitivam, ut velit, siue executivam, ut faciat, quia istæ potentie temper sunt in actu, & non indigent motione ut eliciant. Nec est ibi inferius & superius, ut iam diximus, & patet, quia Deus non potest orare seipsum etiam secundum virtutalem distinctionem actuum, & decretorum : ergo neque imperare sibi, quia eiudem rationis est imperare, & orare ; illud ex parte superioris, hoc ex parte inferioris. Si verò prædestinatio dicatur imperium non erga actus divinos, sed erga ipsos prædestinatos ; contra est, quia si hoc imperium sumatur pro præcepto, & lege obligante ipsos, quod est moralis motio, hoc æquè datur prædestinatis, & reprobis, quia lex omnibus est posita : ergo ex hac parte prædestinatio non magis erit imperium, quam reprobatio, nec imperium ipsum ut sic, prædestinatio magis erit quam reprobatio. Si verò sumatur pro immutatione physica Dei in ordine ad beatitudinem, hæc est executio, & respondet potentie executivæ, non imperium, nisi metaphoricè.

36 Resp. imperium hoc, prout est ordinatio ad exequendum intelligi tum in ordine ad ipsum Deum, tum in ordine ad ipsos prædestinatos. Sed in ordine ad Deum non intelligitur hoc imperium ex parte ipsorum actuum, seu ex parte subiecti imperantis & imperati, sed ex parte obiectorum, ex quorum variatione distinguimus in Deo decreta, seu actus ordinativos, non ex parte ipsius subiecti. In ordine autem ad prædestinatos intelligitur imperium cum omni rigore, etiam ex parte subiecti, & actuum, quæ diversitatem habent, in Deo, & in prædestinatis. Cum autem dicitur, quod

Ioan. à S. Thoma in 1. part. D. Thoma.

Deus sibi non imperat, nec habet actum per elicientiam à potentia, & sic non est capax imperij, concedimus antecedens, & distinguimus consequens : non habet imperium cum distinctione actuum, vel potentiarum ex parte subiecti, quæ est distinctio actualis, & formalis, concedo ; cum distinctione virtuali ex parte obiectorum, eo modo quo distinguimus decreta in Deo, nego. Quando enim in Deo ponimus intentionem, electionem, imperium, & similia, non distinguimus istos actus formaliter ex parte subiecti (hoc enim esset destruere Deum) sed virtualiter ex parte obiecti, & ponimus prædestinationem in illo actu, quatenus tangit obiectum correspondens imperio, id est, ad executionem ordinabile, non quatenus tangit obiectum correspondens intentioni, aut electioni, & hoc fit sine superioritate aut inferioritate ex parte Dei, sed cum superioritate aut inferioritate ex parte obiectorum. Ad id verò quod dicitur de imperio in prædestinatos. Resp. quod licet prædestinati non sint in se existentes sub propria mensura ab æterno, sunt tamen capaces imperij æterni ut explicandi & exequendi in tempore. Nec enim imperium Dei supponit, quibus imperet, sed imperando facit, quia omnia imperio suo efficit. Vnde per imperium quod ab æterno est in mente imperantis, & in tempore habet executionem suam, potest Deus imperare his qui non existunt ab æterno, sed in tempore executivè producentur, quia imperium tunc requirit existentiam imperati quando fit executio, non quando mente concipitur imperium : Deus enim vocat ea quæ non sunt tanquam ea quæ sunt ; & lex quæ ponitur in populis ad omnes extenditur, etiam qui postea nascuntur, licet non executivè obliget illos, nisi quando sunt. Et ad illud de relatione dominij & Creatoris, Resp. quod dominium pro relatione non denominat Deum nisi posita creaturæ, ex cuius immutatione nascitur illa relatio, sicut & relatio Creatoris. Cæterum imperium non est denominatio relationis, sed actus immanens ex parte imperantis, qui potest esse æternus, licet executio fit in tempore. Vnde sicut dominij pro potestate, & creatio pro actualitate actionis sūt ab æterno in Deo, sed pro relatione dominij aut Creatoris in tempore denominat ex immutatione creaturæ : ita imperium pro actu immanente est æternaliter in Deo, pro executione in subditos & relatione subditorum ad se fit in tempore, quando ipse dixit & facta sunt, licet mentaliter dicere æternum fuerit, & ordinatio illa intra Deum æterna sit.

Ad Conf. Resp. quod respectu Dei non datur 37, imperium pro motione siue morali, seu physica ex parte subiecti & operationum, sed virtualiter virtualitate orta ex parte obiectorum diversorum, in ordine ad quæ distinguimus intentionem, electionem, & imperium, & alia quæ in nobis actus diversos postulant. Itaque sufficit ad ponenda ista in Deo quod obiecta inter se ordinentur & connectantur ex divino decreto & ordinatione : sic enim inter ipsa ponitur seu resultat sufficiens ordo & efficacia ex vno sic voluto & decretato ad aliud sic ponendum & ordinandum, & in actu quatenus istas diversas connotationes efficit, resultat illa denominatio imperij, quod respectu sui non exercetur, nisi virtualiter virtualitate desumpta ex connotatione obiectorum. Et sic nec Deus utitur seipso, nec movet suam potentiam ab obiecto creato, nec est finis ad quæ ordinatur suus actus ut quid causatū & subordinatū fini, quia nos ex parte actū, & subiecti nō ponimus subordinationes & imperij formaliter, sed virtualiter ex parte obiectorum ponitur

Bb 3 distinctio,

distinctio; respectu autem personarum ad extra formaliter habet Deus rationem præcepti & imperij. Ad id verò quod dicitur de inferioritate, & superioritate, iam dictum est quòd hoc ponitur ratione obiectorum diuersorum, non ratione diuersorum actuum in Deo. Cum verò instatur in ipsa oratione, dicitur quòd oratio nec etiam virtualiter, & secundum connotationem diuersorum obiectorum potest poni in Deo, sicut ponitur actus imperij ob duplicem rationem. Primum quidem quia oratio est inferioris, non quomodocumque, sed indigentis: postulatur enim id quod deest, & non est in manu propria habere: quod enim non deest, frustra petitur, Deus autem nec virtualiter est indigens, & in manu sua non habens: imperium autem est ordinatio, & motio efficax, & nullam supponit indigentiam, quia si quid deest imperato, ipso imperio dari potest; nullum etiam inconueniens est quòd aliquis moueat seipsum, & ordinet de seipso, semotis imperfectionibus diuersitatis, & multiplicationis actuum. Secundò, quia imperium cum sit actio superioris, maximè decet Deum, & licet non exerceatur nisi virtualiter, & secundum connotationem obiectorum in ordine ad actus proprios Dei intra se, inuenit tamen quomodo exerceatur in ordine ad alios extra se formaliter, & idè saluatur simpliciter imperium in Deo. At verò oratio non inuenitur quomodo saluetur in Deo respectu aliorum extra se formaliter, quia non habet superiorem respectu cuius formaliter exerceatur, & idè cessat etiam oratio virtualis absolute loquendo.

38 Ad id quod obiicitur contra rationem imperij erga prædestinatos; Respond. quod attinet ad motionem moralem, eam non solum consistere in impositione legis, quæ communis est reprobis, & prædestinatis, sed in ordinatione, & directione ad impletionem legis, ad quam Deus mouet prædestinatos etiam excitatione morali, & aliis opportunis auxiliis tum physicis, tum moralibus, quibus non mouet reprobos vsque ad finem. Et ad hanc impletionem mouet Deus per imperium ordinando, & disponendo quod ita fiat vt prædestinatus debito modo excitetur, & moveatur moraliter efficaci executione. Quòd verò dicitur de imperio physico, & immutante physice, dicimus quòd licet executione pertineat ad potentiam exequentem, directione tamen, & regulatiue ad potentiam ordinantem hanc executionem, & hoc fit per imperium.

39 Tertio argui potest argumentis probantibus nõ dari in nobis actum imperij efficacem efficacia participata ex aliquo actu voluntatis præcedente, sed sufficere actum intellectus, qui antecedit electionem cum voluntate postea subsequuta. Sed hæc quia tangunt actum imperij, non prout in Deo, sed prout in nobis, remittimus ad locum ubi hæc difficultas tractanda est sub. 1. 2. q. 17. Modò enim id supponitur.

ARTICVLVS IV.

Verum prædestinatio, & prouidentia Dei sint prædefinitiuæ nostrarum actionum.

ET si plura de hoc puncto supra tractata sint *disput. 5.* agendo de efficacia diuinæ voluntatis, quæ non potest esse efficacia antecedens nostras voluntates, & independens à consensu futuro, vt

præsupposito, sed solum vt causato, & subsequuto, nisi sit prædefinitiuæ earum, tamen in præsentī oportet specialiter explicare quomodo ista prædefinitio inueniatur, vel non inueniatur in prædestinatione, & prouidentia Dei, præsertim erga actus liberos, & contingentes, in quibus maior de diuina prouidentia difficultas est.

Nomen prædefinitionis, & punctus difficultatis.

Solent pro eodem accipi apud Patres, & Theologos *prædestinatio, præordinatio, prædefinitio*, loquendo de prædestinatione, non pro sola electorum prouidentia, & transmissione ad gloriam, sed in lata significatione pro omni eo quod à Deo præordinatur & disponitur ab æterno vt fiat. Quæ ratione dixit Christus Dominus Lucæ 22. *Filius hominis secundum quod definitum est vadit*; quam vtique definitionem incommutabiliter in Deo præcessisse, & sic prædefinitam esse Christi Domini passionem, optimè expressit S. Leo Papa *serm. 7. de passione. Nec vlla, inquit, poterat ratione turbari, quod ante æterna secula, & misericorditer erat dispositum, & incommutabiliter præfinitum.* Et communiter Sancti has prædefinitiones in Deo etiam circa bona opera, & actus voluntatis nostræ deducunt ex illo Ephes. 2. *Creati in Christo Iesu in operibus bonis quæ preparauit Deus vt in illis ambulemus.* Quam præparationem esse Dei prædefinitionem, & ex ipsius dono & beneficio procedere docent Patres. Nam Author commentariorum in epistolas Pauli apud Athanasium (habentur in antiquioribus exemplaribus Athanasij, non in excusis de nouo) *super hunc ipsum locum: Hæc (inquit) parauit Deus, quæ differri non poterunt, neque prætermitti quin peragantur tanquam diuinitus sint prædefinita quousque sit procedendum, idque per multam erga nos prouidentiam.* Et S. Prosper in responsione 14. ad capis Gallorum: *Fidei, inquit, & charitatis opera, quæ fuerunt prædestinata, rectè prædefinita dicuntur auctoritate Apostoli. Creati in operibus bonis, quæ preparauit Deus, &c. Quod desumpsit ex August. lib. de prædestinat. SS. c. 10. & ex illis postea S. Fulgentius lib. 1. ad Monimum c. 29. & S. Leo Papa in epist. 86. ad Nicetum. Omnis, inquit, bonorum operum donatio, diuina preparatio est, nec prius quisquam virtute iustificatur, quam gratia.*

Luculenter ante omnes hos Patres expressit harum prædefinitionum vim S. Dionysius c. 5. *de diuinis nominibus*, loquens de diuinis exemplaribus, seu ideis, quæ non operantur efficaciter, nisi adiuncta voluntate, dicit, *Exemplaria dicimus existentium rationes substantificas, & singulares præexistentes, quas Theologia prædefinitiones vocat, & diuinas, & bonas voluntates existentium prædeterminatiuas, & factiuas, secundum quas substantialis essentia omnia prædefinit, & produxit.* Scio aliquos hæc Dionysij verba velle traducere, & ad aliorum versionem appellare, in quibus dicunt non ita haberi ista verba, scilicet in versione Carthusiani, & Ambrosij Florentini. Sed frustra: nam ea verba Dionysij, & prædefinitiones ab ipso positas admittit D. Thom. & S. Ioannes Damascenus, nec aliquid minuunt translationes citatæ. D. Thom. *lect. 3. super hoc caput 5. de diuinis nominibus*, ea verba sic ponit vt relata sunt, & dicit quòd, *Huiusmodi rationes Scriptura Sancta vocat prædefinitiones, seu prædestinationes, Rom. 8. Quos prædestinauit, hos & vocauit. Quæ quidem prædefinitiones, & voluntates sunt distinctiue entium, & effectiue ipsorum, &c.* Et Damascenus *orat. 1. de imaginibus: Hæc, inquit, imagines,*

nes, & hac exempla prædefinitiones appellat Sanctus ille Dei munere diuinis in rebus considerandis, & explicandis excellentissimus Dionysius. Omnia enim ab illo prædefinita & sine ulla commutatione futura, in eius consilio erant expressa, &c. Nec mirum quod ideas, quæ ad intellectum spectant, sic per prædefinitiones explicentur hi Sancti, quia loquuntur de idea, ut practica & efficaci, quod sine decreto, & voluntate diuina stare non potest. Versiones Carthusiani, & Florentini in substantia non discrepant. Nam primus loco prædefinitionum ponit prædestinationes, quas dicit discretivas, & factivas, & quod secundum illas omnia prædestinavit. Secundus dicit esse prædestinationes diffinitivas, & effectivas secundum quas omnia prædestinavit. Idem autem est secundum D. Thom. prædefinitio, & prædestinatio apud Dionysium. Denique ipse S. Thom. q. 3. de verit. art. 7. dicit, omnes effectus secundos ex Dei prædefinitione provenire. Prædefinitio ergo iuxta Sanctorum locutionem in Deo ponenda est.

Cum ergo prædefinitio & determinationem definitivam seu discretivam designet, & antecedentiam, seu præcedentiam ex parte ipsius definitis, & definitionis, potest hæc præcedentia summi, vel in ratione durationis, vel in ratione causalitatis respectu rei definitæ & decretatæ, sicut de ipsa prædestinatione dictum est quod significat præcedentiam, & destinationem. Et quidem de præcedentia durationis, difficultas esse non potest, quia constat ab æterno, & ante omnia tempora dispositionem de rebus faciendis fuisse in mente diuina. Nam, ut dicit Apost. ad Ephes. 1. Elegit nos in ipso ante mundi constitutionem; ad Coloss. 1. Mysterium quod fuit absconditum a sæculis & generationibus, Proverb. 1. Ab æterno, & ex antiquis ordinata sum. Unde S. Gregor. 12. Moral. cap. 2. Deus cuncta secutura præsciens ante sæcula decrevit qualiter per sæcula disposuit. De præcedentia autem causalitatis, secundum quam loquimur in præfati de prædefinitione, apud nos prædefinitio duo importat, unum præsuppositivè, alterum formaliter; præsuppositivè importat voluntatem, seu intentionem finis; formaliter ordinationem seu præceptum de mediis, ut de omni providentia docet S. Thom. hic q. 22. a. 1. ad 3. & de prædestinatione q. 23. art. 4. & q. 6. de verit. art. 7. Licet P. Suarez infra citandus præfati lib. 2. de auxiliis c. 7. prædefinitionem accipiat solum pro decreto efficaci alicuius actus faciendi, antequam prævideatur futurus absolute. Est ergo difficultas tum ex parte intellectus in præsciendo, tum ex parte voluntatis in intendendo. Ex parte quidem intellectus, an præsupponat Deus aliquid ex parte nostræ operationis, & voluntatis præscitum, ut determinet, an verò prius absolute, id est, ante omnem præscientiam mediam vel absolutam de re futura in se decernat, & ex decreto sequatur præscientia determinati illius operis, & consensus futuri. Ex parte verò voluntatis, an Deus absolute, & prius intendat efficaciter aliquid fieri, & postea decernat de mediis quibus fiat, an verò non ita intendat absolute à mediis, sed dependenter ab illis, ita ut prius prævisis, & quasi assecutis mediis, tunc intendat efficaciter efficacitate regulata, & derivata ex mediis, tum ut securè, & sapienter intendat; & sic prius computet sumptus, quam ædificare decernat, tum ut efficaciter dicatur velle ea efficacia, quæ Deo competit, quæ scilicet frustrari numquam potest: talis enim efficacia debet supponere prævisam, & assecutam omnia media, ex quorum defectu potest frustrari intentum. Unde ante illa non erit omnimoda efficacia: præsertim in his, quæ à nostro pendent

arbitrio, cuius determinatio nisi sit præsupposita, efficacia Dei infallibilis stare non poterit, sed manebit dependens à nostra contingentia, aut tenebitur determinare, & cogere voluntatem.

Sententia.

Tres sunt sententiæ; duæ extremæ, & una media.

Prima extrema est, non dari in Deo prædefinitionem hanc, quam explicavimus circa actus liberos, nec dari posse talem absolutam intentionem efficacem salva nostra libertate. Tenent plures Authores ex Societate, non omnes. Tenet P. Valquez præcipue hac 1. p. disp. 82. c. 10. & disp. 99. c. 3. & 3. p. disp. 23. c. 10. & 11. Molina 1. p. q. 4. art. 1. disp. 8. memb. 3. & 4. Lessius de gratia efficaci c. 4. & in peculiari disp. de prædestin. Enze 1. p. disp. 7. cap. 5. n. 28. & disp. 23. c. 9. & disp. 19. c. 2. Alarcon tract. 4. de prædest. disp. 1. c. 6. & alij plures. Cæterum P. Valqu. non ita absolute reiecit omnem efficacem prædefinitionem, quin admiserit in aliquibus præcedere intentionem efficacem finis, & omnino determinatam priusquam sit voluntas de mediis; sed in hac 1. p. disp. 82. c. 5. num. 23. & 24. distinguit de effectibus qui pendent à libero arbitrio, & de effectibus merè naturalibus, qui non dependent. Et de prioribus dixit, quod licet effectus quem Deus vult, debeat esse prius in intentione, & posterius in executione, tamen non debet esse prius in intentione efficaci, & determinata, sed simplici tantum affectu complacentiæ, sicut Deus non decernit prius Petrum consenturum, quam ipsum vocare, alias sine illo decerneret consensum voluntatis. De posterioribus autem effectibus dicit quod ubi effectus est omnino naturalis, potest prius esse in intentione efficaci, quam in executione per media. Quare simpliciter negat liberam cooperationem seu consensum nostrum prædefinitum à Deo, ita quod prædefinitio sit prior ordine causalitatis ipsa nostra determinatione, & cooperatione, quia infallibilitas, seu necessitas, quæ ex tali antecedenti decreto sequitur effectus, eius lædit libertatem, quia est necessitas antecedens, ut docet cit. disp. 99. c. 3. Et ita c. 7. solum admittit prædefinitiones concomitantes nostram cooperationem, supponendo illam prævisam per scientiam mediam, solum verò antecedentes prædefinitiones admittit ad illa quæ Deus sine cooperatione nostra facit, ut primam cogitationem, motum subitum, &c. docet tamen c. 8. Deum prædefinire nostrum consensum non in se explicitè, sed contentum in sua causa, id est, in vocatione congrua quam Deus largitur nobis ante nostram determinationem liberam. Quod etiam docet Arrubal infra citandus, & concomitantes prædefinitiones admittit.

Secunda sententia extrema docet intentionem hanc efficacem, & absolutam, & prædefinitionem omnium effectuum creatorum, & actuum nostrorum omnino ponendam esse in Deo, nec aliter summam eius providentiam, & universallissimam causalitatem (quæ utique est per intellectum, & voluntatem, & ex præordinatione finis) salvari posse. Ita communiter Discipuli D. Thom. immò & Scotus, pluresque eius Discipuli in hoc ipsum conveniunt, quorum plures refert Henricus de Villegas controuers. 1. 2. priori disp. c. 2. videlicet Lichetum, Mayronem, Bassolis, Rubionem, Castrononum, & alios. & Scotus ipse id tenet in 1. dist. 39. q. 3. §. Viso, & dist. 41. q. unica, §. Sed contra, & in 4. dist. 9. q. 6. §. Dico ergo. Possuntque citari omnes quos supra disp. 5. citavimus pro efficacia diuinæ voluntatis

296 Quæst. XXIII. De Prædestinatione.

antecedente, & præueniente actum, & consensum voluntatis nostræ, nec lædente illius libertatē. Ex Thomistis recentioribus videri possunt commentatores S. Thom. ad hanc q. 23. art. 5. ibi Bannez, Zumel, Nanarrete, Nazarius, Gonzalez ad qn. 22. disp. 66. Alvarez lib. 3. de auxiliis disp. 22. Ledesma lib. de Auxiliis q. unica art. 9. Ram. tract. de diuinis promotionibus fol. 86. Salmanticenses Carmelitæ tract. 4. de volunt. Dei, disp. 10. dub. 3. Corneso tomo 1. in 1. p. tract. 1. in q. 14. art. 13. disp. 2. dub. 6. & tr. 2. in q. 23. art. 6. & 7. disp. 1. dub. 2. Cabrera tomo 2. in 3. p. q. 18. art. 4. disp. 2. §. 4. & tomo 3. q. 62. art. 1. disp. 19. §. 4. Ex antiquis Capr. in 1. dist. 45. q. 1. art. 2. & in 2. dist. 28. qn. 1. artic. 3. ad 12. Ferrar. 3. cont. Gent. c. 89. Caiet. Durandus, & alij plures citati à Salmanticensibus loco cit.

5 Tertia sententia inter has duas media, tenet prædefinitiones istas absolutas, & efficacem intentionem absolutam, etiam circa actus liberos creatos non repugnare, nec ex se destruere libertatem, non tamen esse necessariam ad diuinam providentiam, nec Deum uti semper illa, sed ad aliquos speciales effectus, & peculiare insigniorēque actus, qui specialiter à Deo intenti sunt. Ita P. Suarez lib. 1. de absoluta scientia futurorum contingentium, c. 6. n. 6. & lib. 2. de Auxiliis c. 7. n. 7. & sequentibus, & lib. 3. de Auxiliis c. 17. num. 18. & lib. 1. de prædestin. c. 8. num. 18. & c. 13. num. 9. & prolegom. 1. de gratia c. 5. & c. 6. Eumque lequuntur alij Recentiores, & P. Ruiz tomo de providentia disp. 9. sect. 2. & seqq. Eandem sententiam sequitur P. Arrubal. hic disp. 67. c. 4. & disp. 68. c. 1. sed tamen addit, ipsos actus liberos non prædefiniri, & præintendi absolute à Deo in seipso separatim, sed ut contentos in aliquo medio, seu causa, v.g. inuocatione congrua. Quod fecit Arrubal, ne cogeretur ponere duplex decretum circa idem obiectum, alterum intentionis, alterum executionis sine duplici connotato diuerso. Fundamenta istorum Authorum postea soluendo adducemus.

Mens D. Thomæ.

6 Sine vlla difficultate secunda sententia est ipsa S. Thom. mens, qui perpetuò docet omnia debere prædefiniri, & determinari, seu præordinari à Deo siue sint contingenter, siue necessario, nec præsupponi aliquid ab eius voluntate, & ordinatione, sed causari. Vnde si non præsupponit, sed totum à se descendit, necesse est quòd quando primò incipit voluntas ordinare, & velle, quod est intendere rem aliquam efficaciter, incipiat tanquam voluntas absoluta, id est, non prius supponens sumptus, & media, sed causans illa. Vnde quando vocamus voluntatem absolutam, & independentem in sui efficacia, & ordinatione, non intelligimus quòd sit absoluta ab illis mediis, ut ab effectibus suis: causat enim illa, sed ut à motibus, & prærequisitis antecedenter, ut Deus efficaciter se determinet, & ordinet de re aliqua videns se habere sufficientem apparatus, & media ut illam efficaciter velit.

7 Sic ergo prob. nostra conclusio, & sententia ex D. Thom. nam in primis q. 3. de veritate art. 7. generaliter ad omnes effectus prædefinitionem Dei dari ponit, dum inquit: *Quia nos ponimus Deum immediatam causam vniuersiusque rei secundum quod in omnibus causis secundis operatur, & quod omnes effectus secundi ex eius prædefinitione proueniunt, idè non solum primæuentiis, sed etiam secundarum ideas ponimus.* Vbi pondero vniuersalitatem illius causalis, *Quia omnes effectus secundi ex prædefinitione Dei proueniunt:* ergo si omnes, nulli sunt

qui non proueniunt: ergo nulli præsupponuntur. Et loquitur de prædefinitione efficaci, quia loquitur de illa ex qua proueniunt effectus, & secundum quod Deus operatur in omnibus causis. Optimè etiam hanc præordinationem providentiæ diuinæ explicat S. Doctor 3. contra Gent. c. 54. ubi inquit: *In providendo igitur sua sapientia præmeditatione omnia ordinat quantumcumque minima videantur: quacumque verò rerum aliquid operantur, instrumentaliter agunt ab eo mota, & ei obtemperando ministrant, ad ordinem providentiæ ab æterno, ut ita dicam, excogitatum, explicandum in tempore. Si autem omnia quæ agere possunt, necesse est ut in agendo ei ministrent, impossibile est quòd aliquod agens diuinæ providentiæ executionem impediatur sibi contrarium agendo; neque etiam possibile est diuinam providentiam impediri per defectum alicuius agentis, vel patientis, cum omnis virtus actiua, & passiva sit in rebus secundum diuinam dispositionem causata.* Vbi S. Doctor aperte loquitur de providentiæ disponente, & præmeditante, & ordinante efficaciter, quia loquitur de providentiæ habente executionem, non solum per se immediate, sed etiam per causas secundas, & ita efficaciter, quòd non est impedibilis. Hanc autem inimpedibilem efficaciam, dicit D. Thom. oriri non ex præsuppositione præuisa causarum secundarum operantium, sed ex diuina dispositione causata in ipsis, & ex eo quod operantur omnia ut instrumentaliter mota à Deo, & ministrando illi ad explicandum ordinem suæ providentiæ in rebus: igitur ista efficacia diuinæ providentiæ, & præordinationis est absoluta, & antecedens, non autem supponens ipsarum causarum secundarum media, & efficaciam, sed eam causans, utpote quasi instrumentaliter eas mouens, & ex dispositione in eis causata reddens suam providentiam infallibilem. Eandem consequentiam format D. Thom. agens de providentiæ diuinæ 3. contra Gent. c. 76. ubi inquit: *Omnis sapientia, & intellectus à summo Deo in omnibus intellectibus causatur, nec intellectus aliquis potest aliquid intelligere, nisi virtute diuina, sicut nec aliquod agens operatur, nisi in quantum agit virtute ipsius: est igitur ipse Deus immediate sua providentiæ omnia dispensans.* Hæc consequentia S. Thom. stare non potest, nisi Deus omnia prædefiniat, etiam quæ pertinent ad nostrum liberum arbitrium, quia si idè Deus dispensat omnia immediate, & per se, quia omnia alia operantur, vel intelligitur virtute sua: ergo ut sit efficax ista dispensatio, & prouisio, nihil supponere debet unde sumat efficaciam, sed ex ipso debet primordialiter oriri, etiam in his quæ supponere dicitur: Nam si aliquid præuisum ex parte nostra supponit, vel ex parte mediorum, ut illis visis efficaciter provideat, & velit, illud quod supponit non habet vim nisi ex ipsa dispositione, & voluntate diuina: ergo prior fuit dispositio diuina, quàm illorum mediorum vis & efficacia. Tunc ergo cum prior fuit, absoluta, & independens prædefinitio seu ordinatio fuit, quia non præsupposuit alia priora media ex quibus haberet efficaciam, sed ipse dedit illis: ergo hæc secundum D. Thom. concedenda est.

Et hoc idem deducitur ex alia doctrina communissime tradita à D. Thom. qui ex efficacia diuinæ voluntatis deducit quòd est talis, quòd ipsa & præbet substantiam, & modum ipsis effectibus & causis inferioribus, idque in illis præordinat & prædeterminat. Vnde non potest efficacia diuinæ voluntatis præsupponere aliquid extra se, unde sumat illam, sed ante omnem efficaciam causarum inferiorum ipse debet eam habere ut illis committeret: ergo illa efficacia est antecedens, & absoluta, seu

seu prædefinitiva, quia non est præsupponens aliquid unde illam sumat, sed à se habens, & à se communicans. Hoc autem ita docet S. Tho. in hac 1. p. q. 19. art. 8. ubi dicit, quod *Ex eo quod voluntas Dei sit efficacissima, non solum sequitur quod fiant ea quæ Deus vult fieri, sed quod eo modo fiant, quo Deus vult fieri. Vult autem Deus quadam fieri necessario, quadam contingenter, ut sit ordo in rebus ad complementum uniuersi.* Et idem ex efficacia diuinæ voluntatis deducit 1. contra Gent. c. 85. ratione 1. & q. 23. de verit. a. 5. Non potest autem stare quod efficacia diuinæ voluntatis sit ratio, & causa quod aliquid fiat, & quod tali modo fiat, si ante mediocrum præuisionem efficacem non est, siquidem illis dat efficaciam, non ab illis sumit. Nec est læsiva libertatis nostræ antecedentia illa efficacia diuinæ, neque contingentiam tollit, si D. Thom. dicit, quod potius ex eo quod summè efficax est, causat & rem, & modum, modus autem est libertas seu contingentia ut ipsemet dicit: ergo non supponit efficacia diuinæ, quia tanta est libertatem, sed antecedit, quia causat, & præbet illum modum libertatis, siquidem quod summè efficax est, etiam modum ipsum causat, non supponit, & si causat, multo minus destruit.

8 Quod verò hæc ipsa efficacia sic causans substantiam & modum actus seu effectus, præfinitiva sit illius, etiam quoad contingentiam, & libertatem earum, ipsumque modum præordinet, seu prædefiniat, non præsupponat, deducitur contra Valquez tum ex his quæ ibi loco cit. ex q. 19. art. 8. subdit S. Doctor. *Et ideo, inquit, quibusdam effectibus aptauit causas necessarias, quæ deficere non possunt, quibusdam causas contingentes defectibiles, ex quibus effectibus contingenter eueniunt.* Tum in hac 1. p. q. 22. art. 4. *Quibusdam effectibus, inquit, præparauit causas necessarias, ut necessario euenirent, quibusdam causas contingentes, ut euenirent contingenter.* Tum etiam 3. contra Gent. cap. 94. magis ad nostrum propositum de intentione Dei prædefinitiva: *Deus, inquit, qui est uniuersi gubernator intendit quod effectuum eius, hic quidem stabilietur per modum necessitatis, hic autem contingenter: & secundum hoc diuersas causas eis adaptat, his quidem necessarias, his verò contingentes: cadit igitur sub ordinem diuinæ providentiæ non solum hunc effectum esse, sed esse contingenter, alium autem necessario.* Ecce quomodo ex intentione Dei procedit illa aptatio seu præordinatio causarum, ut aliquis effectus contingenter eueniat, quod est prædefiniri ex intentione Dei ipsam contingentiam & libertatem, non præsupponi: si enim ad hoc aptat Deus causas, & præordinat, ut contingenter aliquid fiat: ergo ipsam contingentiam causat & intendit sua ordinatione seu definitione: ergo ut effectum respicit, non ut præsuppositum. Et sic subdit S. Th. quod *Diuina providentiæ est causa per se quod hic effectus contingenter procedat, & hoc cessare non potest.* Et addit, quod *hæc conditionalis non est vera, si Deus prouidet hoc futurum, hoc erit, sed sic erit sicut Deus prouidit illud esse futurum, prouidit autem illud esse futurum contingenter: sequitur ergo infallibiliter quod erit contingenter, non necessario.* Vnde tandem dicit in 1. ad Arribald. dist. 47. q. unica, a. 4. quod *Voluntate Dei non solum res in esse producantur, sed etiam rebus producendis modum quo producantur, prædeterminauit.* Vnde cum voluntas Dei efficaciter impleatur, oportet quod res fiant, & eodem modo fiant, sicut voluntas diuina disposuit, & quodlib. 12. q. 3. art. 4. *A providentiæ, inquit, Dei omnia sunt prædeterminata & ordinata.* Quibus locis aperte ponit prædeterminationem, seu prædefinitionem, tum

circa omnia, tum specialiter circa modum operandi, qui in nobis est contingenter, & liberè.

9 Quod autem in omni hac præordinatione, prædeterminatione, & prædefinitione supponat D. Thom. præcedere intentionem efficacem finis, sumitur clarè ex his locis, ubi docet providentiam præcipere efficaciter de agendis ex præsupposita intentione finis efficaci. Ita docet q. 6. de verit. art. 1. *Ad directionem, inquit, in finem præexigitur voluntas finis. Nullus enim aliquid in finem ordinat, quod non vult. Finis autem in quem prædestinatio ordinat, non est uniuersaliter consideratus, sed secundum comparisonem eius ad illum, qui finem ipsum consequitur, quem oportet esse distinctum apud dirigentem ab his qui finem illum non sequuntur. Et ideo prædestinatio supponit dilectionem per quam Deus vult salutem alicuius; præexigitur etiam & electio, per quam ille qui in finem infallibiliter dirigitur, ab aliis separatur, qui non hoc modo in finem diriguntur.* Ecce quomodo aperte requirit D. Thom. præcedere intentionem finis efficacem in ipso dirigente, & prædestinante seu præfiniente: requirit enim præcedere finem distinctè, & separatè volitum præ his qui non consequuntur finem, sed diriguntur ad finem distincto modo, scilicet ut consequendum: hoc enim modo efficaciter finis intenditur: pro reprobis enim intenditur finis gloriæ, non efficaciter, licet ordinentur ad gloriam; prædestinati autem diriguntur in finem ut consequendum, quod est respici finem efficaciter, scilicet ut consequendum, & hoc modo præcedit prædestinationem intentio finis: efficax ergo intentio finis secundum D. Thom. præcedit. Idem docet in presenti q. 23. art. 4. *Non præcipitur, inquit, aliquid ordinandum in finem, nisi præexistente voluntate finis. Unde prædestinatio aliquorum in salutem æternam præsupponit secundum rationem, quod Deus illorum velit salutem. Ad quod pertinet dilectio, & electio. Dilectio quidem in quantum vult eis hoc bonum salutis æternæ: electio autem in quantum hoc bonum aliquibus præ aliis vult, cum quosdam reprobat.* Et hanc electionem dicit antecedere prædestinationem. Sed hoc bonum quod aliquibus præ aliis vult, non est aliud quàm ipse finis ut consequendus, quem non sic vult reprobis: ergo ante præparationem mediocum, quæ est prædestinatio, præsupponitur intentio finis efficax, id est finis consequendi in re, & de facto: sic enim est præ aliis intentus: inefficax enim volitio eius, communis est reprobis, & prædestinatis: Si ergo antecedit dilectio, & electio prædestinationem, hoc ipso efficax intentio præcedit, quia inefficax etiam reprobis est communis.

10 Eadem sententia D. Thom. sumitur ex Patribus. Et præter superius relatos, cum explicarem nomen rationisque prædefinitionis, quam etiam prædeterminationem vocat Dionysius 5. c. de diuinis nominibus, & D. Thom. super eundem locum lect. 3. & supr. relatus in 1. ad Arribald. dist. 47. & quodlib. 12. art. 4. Sed specialiter notandus est S. Aug. qui multis locis docit infallibilitatem diuinæ prædefinitionis, & prædestinationis, non ex aliquo præsupposito sumi, sed à se causari, & præparari, ideoque absolutam esse talem efficaciam, & infallibilitatem prædefiniendi. Nam loquendo de actibus nostris bonis, qui à Deo præsciuntur, dicit, eos prædestinatione à Deo præsciiri, in qua sua futura facta præsciunt: idem est autem prædestinatio ad actus bonos, atque præordinatio, seu prædefinitio, quæ nihil præsupponit, sed ipsam omnia præsupponunt, quia ab ea determinantur, & decernuntur eo quod causantur ab ea. Sic constat ex lib. de Prædestinat. SS. c. 10. *Prædestinatione ea præsciunt Deus,*
qua

qua fuerat ipse facturum, unde dictum est, fecit qua futura sunt. Ergo prædestinatio, seu prædefinitio non supponit præscita tantum, sed facit, seu causat id quod præscit, & prædefinit, & sic absoluta est, & nihil supponit, quia causat id quod præscit. Et specialiter loquens de actu bono nostræ voluntatis, sicut fuit fides gentium, hanc dicit promississe Deum Abraham non de nostra voluntatis potestate, sed de sua prædestinatione, quia, etsi faciunt homines bona qua pertinent ad colendum Deum, ipse facit ut illi faciant qua præcepit, non ipsi faciunt, ut ille faciat quod promissit. Ex quo fit argumentum: Deus quod promittit, intendit implere, & ex intentione implendi promittit, aliàs non recte promitteret, si non intendere implere. Sed intentio implendi non est efficax ex aliquo quod præsupponit, sed ex aliquo quod causat, & facit etiam in nostris actibus liberis, quia licet nos faciamus illos, tamen ille facit ut faciamus; & sic de sua prædestinatione seu prædefinitione promittit, non de nostra potestate: ergo illa prædefinitio, & intentio absoluta est ex parte Dei, & efficax, ratione suæ causalitatis, non ex præsuppositione nostræ voluntatis, aut potestatis.

11 Deinde quia Aug. istam infallibilem efficaciam, qua Deus operatur, ita ut à nullo vincatur, etiam respectu nostrorum actuum, reducit ad diuinam præparationem (quæ est prædefinitio, seu prædestinatio,) & ad diuinam electionem ex proposito seu intentione, & ad dominium, & potestatem Dei super liberas voluntates hominum. Ergo manifeste sentit dari prædefinitioem in Deo, quæ efficaciter intendat, & adimpleat, nihil ex nobis supponendo, sed totum causando. Quod si totum causat, & nihil præsupponit, absoluta est illa prædefinitio in efficacia sua, non ex suppositione aliqua procedens, & efficaciam hauriens. Anteced. constat ex lib. de correptione, & gratia, nam c. 8. reducit hanc efficaciam infallibilem ad præparationem Dei, cum dicit de fide Petri. Quis ignorat fuisse perituram fidem Petri, si ea quæ fidelis erat, voluntas ipsa deficeret: & permansuram, si eadem voluntas maneret? Sed quia præparatur voluntas à Domino, ideo non posset pro illo esse inanis oratio. Ecce tota causa infallibilis efficaciam habendi firmam perseverantiam in fide; ideo quia præparatur voluntas: ergo ex præparatione, & prædefinitione Dei, non ex præsuppositione aliqua præuisa ex parte nostri provenit infallibilitas, & efficacia; & sic est prædefinitio antecedens, & absoluta, quia causans efficaciam. Versatur autem illa efficacia seu prædefinitio sic causans circa ipsos actus liberos nostros, v.g. circa fidem, & libertatem earum, quia ut Aug. ibi subdit. Quando rogavit Christus, ne fides eius deficeret, quid aliud rogavit, nisi ut haberet in fide libertatem, fortissimam, invictissimam, perseverantissimam voluntatem. Pro voluntate libera oravit Christus, & ideo oratio non fuit inanis, quia præparatur à Deo voluntas pro qua oratur. Ergo præparatio ex vi præparationis circa liberam voluntatem efficax est, id est non inanis, sed effectum habens.

12 Quod verò id reducat ad electionem Dei quæ est efficax ex se, & superat omnia, docet in eodem lib. c. 7. Illi, inquit, electi qui secundum propositum (intentum) vocati, qui etiam prædestinati atque præsciti. Horum si quispiam perit, fallitur Deus, sed nemo eorum perit, quia non fallitur Deus: horum si quispiam perit, vitio humano vincitur Deus, sed nemo eorum perit, quia nulla re vincitur Deus. Vbi hanc efficaciam, & infallibilitatem propositi, & electionis Dei, non fuit August. contentus ad hoc reducere, quia non fallitur Deus, quod fortassis aliquis explicaret de præscientia eius, quod præ-

supponit, non de causalitate eius quod facit, sed ulterius ad hoc reduxit, quia nulla re vincitur Deus: ergo electio, & propositum de his, quorum nullus perit, id est de prædestinatione, talis est, quod nulla re vincitur; ergo quia superat omnia, efficax est: ergo ex vi sua, non ex præsuppositione alicuius extra se: non enim quia præsupponitur aliqua res, præuisa vincit, sed ex potestate, & virtute sua vincit, & quia nulla re vincitur Deus, efficax est.

13 Quod denique id reducat ad summam potestatem, & dominium quod habet Deus super corda hominum, constat, quia, ut dicit in eodem lib. c. 14. Deo volenti saluum facere, nullum humanum resistit arbitrium; sic enim velle vel nolle in volentis vel nolentis est potestate, ut diuinam voluntatem non impediat, nec superet potestatem. Et inf. Non est dubium voluntati Dei humanas voluntates non posse resistere, quominus faciat ipse quod vult, quandoquidem etiam de ipsis hominum voluntatibus, quod vult, cum vult facit. Et addit: Qui tamen hac non fecit nisi per ipsorum hominum voluntates, habens sine dubio humanorum cordum, quod placeret inclinandum omnipotentissimam potestatem. Et concludit: Si ergo cum voluerit reges in terra Deus constituere, magis habet in potestate voluntates hominum, quam ipsi suas, &c. Ecce quomodo mutatio humanorum cordum, actusque liberi eorum, ita ab ipsis voluntatibus hominum procedunt, quod etiam ex dominio, & potestate Dei derivantur, tanquam à priori, & potentiori principio, ita quod magis habet in potestate sua hominum voluntates, quam ipsi suas: Sed efficacia qua homo ipse per suam voluntatem se movet, est efficacia, non supponens, sed causans liberum actum: ergo illa voluntas quæ magis in sua potestate habet voluntates hominum, quam ipsi met suas, erit efficacia, non supponens, sed causans liberos actus hominum: Si enim homo eliciens actus suos liberos, efficaciter illos operatur, non supponendo aliquid, sed causando, multo magis Deus id faciet quod homo, si, ut dicit Aug. habet magis in potestate sua voluntates hominum, quam ipsi suas. Et hoc causat ex intentione, & fine, & ordinatione qua disponit de illis actibus: ergo illa dispositio, & decretum est prædefinitio absoluta, id est non ex præsuppositione aliqua procedens, sed ex causatione.

Nec valet dicere quod potest quidem Deus uti isto modo prædefiniendi, sed non est necessarius ad suam providentiam. Nam authoritates istæ D. August. & Thomæ procedunt absolute, & ex ipsa natura prædestinationis, & providentiæ Dei, & ex ipsa summa potestate, & dominio Dei in actus nostros, quod quidem necessarium est exerceri in omnibus actibus, & effectibus provisus, & omnes æquè comprehendit, quia omnium habet dominium, & potestatem: hoc enim petit ex se providentia, & prædefinitio illa ut diuina, quod procedat ex summo imperio, & potestate in creaturas, & causando omnia, quæ in creatis actibus nostris inveniuntur, siue ad substantiam actus, siue ad modum pertineant, & consequenter non ex præsuppositione aliqua decernat, sed ex se omnino absolute, quia causando omnia.

Denique ex dicendis infra, circa electionem hominum ad gloriam ante præuisa merita, ut præsupposita, & mouentia ad eligendum, licet consecuta ad electionem & causata ab ea, & ut effectus eius, hæc omnia confirmabuntur.

Fundamentum ex ratione.

Duplex est præcipuum fundamentum huius 14 præ-

prædefinitionis stabilizandæ cum absoluta, & antecedenti efficacia, tam ex parte intentionis, quam decreti, seu ordinationis: ex quo ulterius deducemus semper, & pro omnibus effectibus à Deo procedentibus esse has prædefinitiones necessarias ad providentiam divinam statuendam, non solum tangendo causas, & media, virtute quorum effectus fiunt, sed etiam immediate in seipsis.

Alterum fundamentum est negativum ex negatione scientiæ mediæ procedens.

Alterum positivum, ex universalitate divinæ causalitatis super omnia ex ordinatione intentionis, & finis.

15 Fundamentum primum ex negata scientia mediæ procedens, negationem huius scientiæ supponit. Nos hic etiam supponimus, sed relinquimus id probatum *præced. como disp. 20.* Ea negatione supposita. Positio prædefinitionum efficacium, & antecedentium actus nostros liberos est inevitabilis. Deducitur sic: Deus providentiâ certâ, & infallibili disponit, & decernit per seipsum immediate de omnibus quantumcumque minimis, non fortuito, neque à casu, sed ex intentione finis; sed in hac providentiâ sic infallibiliter disponenda non oritur illa infallibilitas ex prævisione præsupponente aliquid determinatum, & determinatè futurum ex parte nostra super quod cadat, sed totum causat ex se ut determinatum sit, etiam pro statu conditionato: ergo illa ordinatio, seu decretum divinum, & providentiâ sic disponens, absoluta est in sua efficacia, id est, non dependens, nec supponens aliquid in præordinando, & disponendo de rebus, quod est prædefinitionem absolutam, & efficacem dari respectu omnium pronorum à Deo, etiam respectu consensus liberi, eamque esse necessariam ad statuendam providentiam divinam. Consequens est bona, quia nihil aliud est absoluta, & efficax prædefinitio, quam ordinatio divina, non præsupponens mediorum efficaciam, aut certitudinem eventus, etiam sub statu conditionato, ut efficax sit, sed ex se habens causare hanc certitudinem sub quocumque statu, & illam efficaciam: si enim nihil præsupponit, sed totum causat, à se incipit, non ab aliquo extra se præsupposito, quod respiciat ut tale, id est, ut præsuppositum: ergo est absoluta in sui efficacia, & certitudine, quia à se, non ab alio præsupposito, & prævisio emendat: hoc enim nomine prædefinitionis nunc intelligimus. Minor ex negatione scientiæ mediæ constat, quia illa est scientia mediæ, quæ præscit aliquid, ut determinatæ veritatis, & sub conditione futurum determinatè ex ipsa veritate rei in se antecedenter ad omne decretum liberum Dei causativum talis determinationis pro illo statu conditionato. Si ergo hoc removemus à Deo, oppositum statuimus, scilicet infallibilitatem providentiæ ortam ex decreto causativo totius illius efficaciz, non prævidendo tantum, & præsupponendo illam ex parte nostra sub illo statu, & ut præsuppositam cognoscendo. Quare non est medium inter negandam scientiam mediæ, vel ponendam prædefinitionem absolutam: nam si Deus non scit futura conditionata in ipsa sua determinatione creata orta ex se, quod ponit scientia mediæ: ergo in determinatione causæ increatæ, quæ est decretum divinum, non præsupponens id quod videt, sed causans, & sic absolute definiens, id est, non ex aliquo supposito. Et loquimur de futuro illo in ratione futuri: nam in ratione possibilis nos etiam id cognoscimus, & Deus in sua potentia per simplicem intelligentiam. Maior autem negari nullo modo potest, cum fides divina providentiam in Deo in-

fallibilem fateatur, de quo Ecclesia dicit in oratione: *Deus cuius providentiâ in sui dispositione non fallitur.* Isai. 14. *Dominus exercituum decrevit, & quis poterit infirmare, & manus eius extenta, & quis avertet illam?* Iudith 9. *Hoc factum est quod ipse voluisti, omnes enim viæ tuæ paratæ sunt, & tua iudicia in tua providentiâ constituisti.* Quod autem immediate de omnibus quantumcumque minimis per seipsum provideat, docet D. Thom. esse de fide, 3. cont. Gent. c. 76. & de eodem videri potest hic q. 22. art. 2. & 3. & q. 103. art. 6. & probat ex illo Iob 34. *Quem constituit alium super terram, aut quem posuit super orbem, quem fabricatus est?* ubi S. Greg. 14. Moral. c. 26. *Mundum, inquit, per seipsum regit, quem per seipsum condidit.* Item Matth. 6. *Respicite volatilia cali, non serunt, neque metunt, & Pater vester celestis pascit illa.* Et iterum *nonne duo passeris vaneunt dipondio, & unus ex illis non cadit sine Patre vestro?* Et iterum: *Et capilli vestri omnes numerati sunt.* Quod certè dici non potest, nisi de his creaturis ita minutis, ut sunt capilli, & passeris immediate Dei providentiâ curet, non solum in causis suis, sed etiam in seipsis; numeratio enim capillorum, & occisio passeris supponit res istas in seipsis esse prævisas, & non in causis tantum. Et ratio id manifestè ostendit, quia omnia ista non solum in causis suis, sed etiam in seipsis immediate à Dei operatione dependent: ergo, & à Dei intentione, & providentiâ. Antec. negari non potest, cum sint entia creata: ergo sunt participationes Dei, & ab eo procedunt per operationem eius, ita ut per suspensionem concursus eius annihilari possint. Consequens verò est manifesta, quia illa operatio Dei, qua producit istas creaturas, & ad eas concurrat, & in eas influit, est operatio, & executio facta ex aliqua directione rationis, siquidem Deus quidquid operatur, tanquam agens intellectuale operatur, non directum ab alio ad finem, sed à se intendens finem, aliàs fortuito, & temerè ageret, seu à casu, quæ est maxima imperfectio: ergo ex providentiâ, & intentione certa operatur hæc omnia, & infallibiliter: si enim falli posset, illa providentiâ esset imperfectissima, & à creatura posset frustrari, quod est non esse divinam.

Fundamentum secundum sumitur ex universalis- 16
sima causalitate divinæ voluntatis, quæ causat, & operatur omnia, & quidquid habet, & participat aliquo modo esse: ergo, & consensum nostrum operari, & causare debet, non supponere, quod si causat, utique determinatum causat, & ut est in re de facto. Hoc argumentum validissimū est: eo enim S. Aug. præcipue vitur *lib. de prædestin. SS. c. 19.* ad ostendendū contra Semipelagianos non solum ad bona opera nos indigere gratia, & dono Dei, sed etiā ad ipsa initia bene operandi, qualis est fides, bonum desiderium, oratio, & alia similia, quibus ægrotus, & infirmus animus quærit remedium à Medico Deo. *Audiant (inquit August.) & ipsi in hoc testimonio, ubi dicit sortem consecuti sumus, prædestinati secundum propositum eius, qui universa operatur. Ipse ergo ut credere incipiamus, operatur, qui universa operatur.* Sic August. ex universalissima causalitate Dei operantis omnia, deducit etiam fidem, & prima nostræ conversionis initia Deum debere operari. Ex eodem principio ego infero, non solum fidem, & prima initia, sed etiam ipsi in consensum liberum meum, qui est à me Deum debere causare, & operari, quia universa operatur, & per consequens non debere Deum præsupponere illum, sed prædefinire: Hæc enim est consequentia immediata, & forma in hac materia, quidquid Deus non præsupponit, & tamen causat, prædefinit,

nit, quia ibi non est præsuppositum, & tamen est: ergo est à Deo ante omnem præsuppositionem, & consequenter per prædefinitionem, sed consensus noster liber oritur, & derivatur à Deo, non præsupponitur, quia si vniuersa operatur, etiam liberos nostros actus operatur, ut fidem, orationem, &c. ergo, & consensum, aut si non istum: ergo non bene probat August. contra Semipelagianos Deum operari fidem nostram, desiderium, orationem, &c. quæ sunt actus liberi, ex eo quod vniuersa operatur, si instatur in nostro consensu ut libero quem præuidet futurum, non causat, & determinat ut sit.

17 Hoc etiam probatum à nobis est latissimè *suprà* *disp. 5.* agendo de efficacia diuinæ voluntatis antecedente nostras voluntates, & causante, non præsupponente earum efficaciam, & consensum, & sic ex se efficaciam habente, & dante, non ex nostra cooperatione id præsupponente, & præsciente. In præsentis sufficit advertere illam vim causalitatis vniuersalissimæ, cum sit causalitas primi entis, ex cuius participatione omne ens creatum est id quod est, non solum debere causare, & influere in substantiam actus, sed etiam in modum, ita quod ipsa contingentia, & libertas in effectibus, & in actibus ex causalitate Dei sit, & ipsa determinatio ad vnam partem potius quam ad aliam, & in vniuersum quidquid à causa secunda, id est, à potentia ipsa creata, & ab anima procedit, multo maiori, & altiori ratione procedere, incipere, & causari debet à Deo. Et hoc negari nullo modo potest, quia non solum ipsa substantia actus secundum se, sed etiam modus contingentiae, & libertatis, determinatioque voluntatis ad hanc partem potius, quam ad illam, & sublatio indifferentiae potentialis, & suspensio est aliquid in rerum natura: id enim quotidie videmus, & experimur, nos liberè agere, nos determinari, nos non manere suspensos, & indifferentes, seu in potentia, licet cum dominio, & sine coactione: ergo totum hoc debet derivari, & participari à primo ente, & ab eius causalitate, & potestate: nam si totum hoc in actibus liberis derivatur à voluntate creata, & ab anima, quomodo non magis derivabitur à primo principio totius entis, quod est Deus, & qui magis habet in sua potestate voluntates nostras, quam nosmet ipsi, ut rectè dixit August. quia est primum, & supremum earum principium:

18 Nec potest dici quod derivatur à primo ente totum hoc in ipsos actus liberos immediatè, & per influxum simultaneum, quo Deus simul cum voluntate influit in ipsos actus, quatenus entia creata sunt, & sic dependent à Deo, sed non influit ista omnia in actus determinando voluntatè, & agendo in eam, sed supponendo eius cooperationem, quam præuidet in tali occasione futuram, & cum hac simul determinat influere in actum. Sed contra, quia in hac ipsa cooperatione instaurum argumentum factum, & deduco illud ex August. *suprà* relato *lib. de prædestinat. SS. c. 10.* ubi inquit, quod *Deus promittens fidem Abrahamæ, non de nostra voluntate potestate, sed de sua prædestinatione promissit, quia licet faciant homines ea quæ pertinent ad cultum Dei, ipse facit ut illi faciant quod promissit, &c.* Vnde sic argumentor: Ipsa cooperatio quæ à nostro procedit arbitrio, procedit ab illo ut aliquid factum, & causat à nobis, & hoc etiam cadit sub promissionem Dei, ut patet quando promittit fidem, quæ sine consensu, & cooperatione nostra stare non potest: sed illud quod nos facimus, & quod procedit à nobis Deus facit ut faciamus; quia promittit illud, & id quod Deus promittit, de suo implet,

non de nostro: quod enim promittit potens est & facere, non solum præuidere, ut ibi ponderat Aug. Et eadem ratione non sufficit, quod moraliter nos moueat ad faciendum id quod promittit, quia cum ista morali motione stat nos non facere de facto: ergo si Deus promittit quod faciemus, & solum moraliter ad id mouet, oportet quod ut promissio sit infallibilis, non nitatur soli morali illi motioni, quæ fallibilis est: ergo vel nititur præuisioni eius quod nos facturi sumus, & non causalitati infallibili; & sic non de suo promittit, sed de nostro, quando illum consensum, & cooperationem promittit, vel nititur causalitati Dei infallibili circa illam cooperationem, quam promittit; & sic prædefinit illam, non præsupponit.

Ex simplici voluntate finis non præordinat Deus, sed ex efficaci, & determinata intentione.

Cæterum potest aliquis subterfugere ex doctrina P. Vasqu. *suprà* adducta cum eius sententiam proponeremus, scil. quod Deus intendens effectus pendentes à libero arbitrio nostro, seu à mediis moralibus, non procedit in illis ex priori intentione efficaci, & determinata, sed ex simplici complacentia, cum præuisione consensus nostri futuri, si talia media adhibuerit. Et sic non facit ut faciamus, nisi moraliter, scil. congruè vocando, & attrahendo, & offerendo indifferentem concursum, qui procedit ex illa simplici, & inefficaci voluntate, seu complacentia, qua vult omnes dirigere ad bonum rationis, & obseruantiam legis. Hoc autem morale faciès, & causans nostrum consensum, cum indifferens concursus, & auxilium sit, non formatum, nec determinatum ex se, sed à nobis determinandum, quasi nos simus figuli, & Deus offerat massam illam indifferentem ad bonè, vel malè vtendum, necessariò præsupponit aliquid præuisum, & præsuppositum ex parte nostra, scil. quod cum tali auxilio congruo tali tempore, & circumstantia dato, voluntas nostra consentiet, & determinabit concursum, formabitque consensum: sine hoc enim præuiso, non potest infallibilitatem habere illa moralitas, & determinationem ille concursus; & sic prædefinitio absoluta, & efficax, nihilque præsupponens præuisum ut determinata, & efficax sit, non datur.

Et huius rei aliqui eam rationem reddunt, quia media moralia, per quorum dispositionem effectus ille à Deo intenditur, non concurrunt ad effectum, nisi quatenus apprehensa mouent voluntatem, ut velit effectum facere: ergo si quando apprehenduntur à Deo, iam voluntas est efficaciter mota, quia efficaciter intendit illum finem ante illa, & se absolutè intendendo, & prædefiniendo, frustra adhibentur illa media moralia, & nullius causalitatis, & virtutis redduntur. Et præsertim hoc vrget, quia intentio ipsa non dicitur efficax, nisi connotet ex parte obiecti futuritionem, seu existentiam rei, non vagè, sed ut pendente ab aliquo agente, & aliqua actione, à qua immediatè exit: ergo si voluntas nostra, & quodlibet aliud medium morale est immediatè influens in illum consensum, & ex illis tanquam ex motiuis Deus mouetur, sine ipsis, seu antecederet ad ipsa, intentio non erit efficax.

Hæc tamen doctrina, tum in eo quod intendit, tum in eo quod assumit, sustineri non potest: intendit enim quod simplex, & inefficax voluntas sufficit

sufficit ad adhibendum, & ordinandum efficacia media. Assumit autem quod sufficit Deum morali influenza circa voluntatis consensum se habere offerendo indifferentem concursum, & praevidendo quid determinabit voluntas cum illo; & sic solum media moralia disponit, & praeordinat Deus: hoc enim posito non potest Deus ex se habere absolutam, & efficacem intentionem, ut actus ille fiat ante praeuisionem ipsius consensus, neque istum providere ante moralia media adhibita, cum quibus praevidetur futurus, vel non futurus. Et ideo in ista sententia, efficax & absoluta Dei intentio ante praeuisionem media, aut effectum habitura est, quin possit resistere voluntas humana, quod est eam tollere, aut indiscrete intendit sic absolute, & cum periculo frustrationis, si humana voluntas resistat.

22 Quod ergo id quod ista sententia intendit, falsum sit, satis ostendimus *supra disp. 5.* agendo de efficacia decretorum Dei contra decreta indifferentia. Nunc breuiter addo, quod illa est simplex & inefficax voluntas, cum qua componitur frustratio rei volitae, non solum ob extrinsecum aut casuale impedimentum, quod voluntas illa euitare non potuerit, sed etiam ex ipsius voluntatis applicatione aut retractione, vel omissione: nam si voluntas omnia media sibiabilia adhibeat, ne frustretur eventus, conuincitur quod efficax sit in sua sphaera, & in modo suae possibilitatis, quia non solum sibi placet bonitas rei, sed etiam ad ipsius existentiam, & positionem respicit, & conatur, quod autem impediatur ab aliquo extrinseco, quod non est in manu sua euitare, non pertinet ad suam sphaeram, & lineam, quia euitare illud non potest: ergo si illa voluntas efficaciam habet intra lineam, & sphaeram suam, non minuitur illa efficacia ex euentu non secuto vel impedito casualiter; sed sumitur ex ipsius voluntatis conatu & applicatione intendente existentiam rei, & conante ad illam, quia reliquum est ei casuale & per accidens, nec in manu sua. Et praesertim hoc in diuina voluntate reperiri debet, quia cum sit causa vniuersalissima, a qua omnia dependent, & per quam sunt omnia, & a qua omnia impedimenta remoueri possunt, necesse est quod ut sit inefficax voluntas, aliqua media non adhibeat, ut effectus non fiat: nam si omnia adhiberet quibus fieri potest, efficax esset, siquidem ille effectus possibilis est fieri per aliquod medium, & causam, alias si per nulum esset possibilis fieri, esset impossibilis: si ergo adhiberet omnia quibus posset fieri, sine dubio fieret, quia ex aliquo fortiretur effectum inter tot media, praesertim quia inter illa media, & causas, principalis est ipse Dei influxus, & motio. Quare cum omnia ista media & causae in manu Dei sint, & ab eo disponantur, ordinentur, & moueantur, impossibile est quod sit voluntas Dei inefficax, & frustretur effectus, nisi quia Deus retrahit manum suam, & non vult adhibere illa media per quae fiat: nam si adhibentur, per manum Dei adhibentur. Implicatorium ergo est dicere, quod ex voluntate simplici, & inefficaci Dei, possint adhiberi media efficacia, quia illa voluntas ut sit inefficax, debet retrahere media aliqua quibus efficietur effectus, ita quod frustrari possit, & ex alia parte si adhibentur media efficacia ad effectum, debent per voluntatem Dei adhiberi, quia omnia per ipsum fiunt, & sine ipso nihil est factum: ergo debet habere voluntatem retrahendi media efficacia, si est inefficax,

Ioan. à S. Thoma in 1. part. D. Thoma.

& ponendi media efficacia si illa adhibentur, quae est contradictio voluntatis.

Quod verò id quod assumit ista doctrina falsum sit, scilicet quod Deus solum moralem influentiam habet in illum consensum nostrum, & moralia media praeordinat, quae cum indifferentia sint, necessariò praeponere debent praeuisionem consensum nostrum ante efficacem, & infallibilem voluntatem de tali consensu. Prob. quia consensus noster, etiam ut liber, & ut cooperatiuus cum Deo, pendet ab aliquibus mediis, & ab ipso Deo physice, & non solum moraliter, & non est praeter intentionem Dei, sed ab ipsius intentione derivatur: ergo Deus praevidet, & praeordinat illum consensum ut liberum, non praeponendo illum, sed causando, nec adhibendo moralia media tantum, praeponendo verò, & non faciendo physica. Antec. patet ex ratione *supra* inducta ex vniuersalissima Dei causalitate comprehendente omnem rationem, & modum entis creati: omnis enim ratio entis à Deo derivatur ut à principio efficienti, & physico omnis entitatis, sed ille consensus, & cooperatio, etiam ut libera aliqua entitas, seu modus entis est, cum sit perfectio rationalis creaturae: ergo ille consensus, ut liber, à Deo est, & non solum dependet à causa morali, & moraliter mouente, sed etiam à Deo, ut physico, seu entitativo principio talis effectus, & entitatis: ergo non sufficit Deo providere illi consensui, & operationi liberae media moralia, seu principia moraliter mouentia, sed etiam entitativè efficientia, & causantia, quia in rei veritate dependet consensus ille, non solum à principiis moralibus, sed etiam physicis, id est, ab ipsa vniuersalissima causalitate Dei qui operatur omnia: ergo & istam entitatem, seu libertatem consensus operatur, id est efficit, & à se derivat, utpote cum aliquid creatum sit: ergo à Deo efficienter participata, & non solum moraliter: ergo Deus non potest illam supponere praeuisionem, ut à nobis derivatam, & elicitam, sed ut à se intentam, & derivatam ut à primo principio omnium rerum effectiuo, & operante omnia secundum consilium voluntatis suae, ut ait Apost. ergo non praeponente aliqua super quae cadet intentio, & decretum eius, sed omnia praecedendo causalitate, & consilio ac decreto suo, quia consilium Dei operatur omnia: ergo praecedit prioritate causalitatis & operationis omnia: ergo & liberum consensum.

24 Confirm. & vrgetur hoc: Quando Deus praevidet cum illa indifferenti & morali motionem seu cogitationem oblata meae voluntati, me determinatè consentire, & cooperari liberè, vel videt illam determinationem, illum consensum, illam cooperationem dependere, & causari à mea voluntate physice & entitativè, vel non. Si non: ergo ille consensus & cooperatio non pertinet ad meam voluntatem vitaliter, & elicitiuè, quia non oritur ex illa; & sic non est consensus, & cooperatio eius: quomodo enim est cooperatio, si non est operatio? Et quomodo videtur ut operatio, si non egreditur, & oritur physice, & operatiuè ab ipso operante? Si autem videt physice pendere, & oriri illam cooperationem, & consensum à voluntate creaturae: ergo etiam à causa prima, quia implicat aliquid physice oriri à causa creata & secunda, & non physice derivari à causa prima, quae est summum principium, & primum ens, & radix portans omnia verbo virginitatis suae: siquidem quaecumque entitas, & modus rei est aliquid creatum, & participatum physice à primo ente: ergo repugnat quod ista cooperatio videatur ut pendens, & causata à causa creata, & non ab increata.

Cc

Ngc

Nec sufficit ad id concursus simultaneous Dei cum illa cooperatione, seu consensu nostræ voluntatis quia ille simultaneous concursus cum simul cum nostra cooperatione feratur in actum, seu effectum, non ipsam cooperationem nostram causet, sed cum ipsa causat effectum utriusque. Necesse est autem quod non solum effectus quia ab utraque causa (creata, & increata) procedit, sed etiam quod ipsamet cooperatio causæ creatæ, ut aliquid causæ creatæ est, procedat, & causetur à Deo: ita quod & causetur à Deo, & causetur cum Deo, quia cum aliquid creatum sit, & à causa secunda progrediens, etiam à Deo est, & ab eo causari, & dependere debet, & quia ad aliquem effectum ulterius tendit simul cum Deo faciendum, cooperatio cum illo est, sed ut cooperatio creatæ, omnino præsupponit quod à Deo participata sit, multò melius quàm à causa creatæ, cuius operatio, & contentus est: à Deo autem nihil creatum denatur per totam moralem motionem, sed per universalissimam causalitatem efficientem primi entis ut primum ens est: sic enim est entitatum principium omnis creaturæ: eo enim modo est principium eius quo cōservat illud in esse, & quo potest annihilare illud, si suspendat concursum suum, quod non fit per suspensionem concursus moralis, sed physici, quo operatur omnia: ergo etiam quo prædefinit omnia, quia non solum operatur quomodocumque, sed secundum consilium voluntatis suæ: ergo intendendo, & decernendo, & præordinando, quia ex fine intento procedit.

25 Hoc argumentum quod sine dubio premit fortiter oppositas sententias, in illud tandem cogit, & erumpit, ut dicant quod ratio liberi in actu nostro non convenit per respectum ad causam primam operantem, sed est sola ratio causæ rationis ad causam secundam, scilicet ad voluntatem nostram, seu ad modum operandi cum indifferentia liberi arbitrii creati. Nec exigitur ut efficacia Dei prior sit determinatione nostra, sed quod simul, & iuxta id quod voluntas nostra exigit, concursus Dei ei contemperetur, quia divina voluntas non est tota causa, sed cum libero arbitrio actuum nostrorum. Nec tamen actus ille liber est præter intentionem Dei, quia ad hoc sufficit ut Deus ipse decernat cum causa libera concurrere, iuxta id quod illa postulat. Ita tandem sentit Valq. hac 1. p. disp. 99. c. 7. num. 47. idèdque à D. Thom. dissentire se non negat: cum enim proposuisset aliquorum sententiam, quod actus nostri sint voluntarii, & liberi, quia Deus non est tota causa, sed cum libero arbitrio, quod cum sit proxima causa, modificat concursum primæ, id quod non esset verum, si efficacia Dei prior esset determinatione nostra, sed quia simul est, eique contemperatur divinus concursus, illam eam servat, subdit sic: *Quorum Doctorum sententiam, nescio qua de causa à S. Thoma reprehendatur q. 19. art. 8. Quod enim inquit, ex illa sequi, liberum effectum esse præter intentionem Dei, si ex particulari causa modificante primam ratio liberi sumenda est; qua ratione rectè colligatur, ego non video. Nam quod effectus exeat liber, quia à causa proxima libera producitur, non obest, quominus ex voluntate Dei eveniat, quandoquidem ipse decrevit cum causa libera iuxta id quod illa postulat concurrere: hoc autem satis est ut effectus non sit præter Dei intentionem. Illud autem certissimum est, nempe rationem liberi actui nostro non convenire per respectum ad primam causam operantem; neque idèd esse liberum, & humanum, quia solus Deus illum fieri decreverit & fecerit, sed potius per respectum ad modum operandi causæ creatæ, quo variato quantumvis ma-*

neat actus secundum substantiam idem, & concursus Dei eodem modo, non manet actus liber. Libertas enim est solum relatio rationis ad modum operandi cum indifferentia liberi arbitrii creati. Sic Valq. ibi. Et tandem addit disp. 100. cap. 3. §. Aut denique. Superest ut libertas Dei, qua nobiscum liberè cooperatur, nihil omnino conferat, ut operatio nostra libera sit, sed tota ratio liberi, qua in denominatione extrinseca posita est, à nostra voluntate solum pendeat. Nam sine Deo liberè, siue necessario operaretur, eodem modo actio nostra libera esset. Prima igitur, & solatio libertatis actus nostri est creatæ voluntas. Hæc sunt verba Valq. Idèdque non mirum quod in disp. 99. cap. 3. referens S. Thom. sententiam hac 1. p. q. 19. art. 8. & q. 22. art. 4. quod Deus non solum operatur id quod vult, sed etiam modum quem vult; & sic facit actum esse, & libero modo esse, nec lædit libertatem, cum causet illam, unde sequitur libertatem nostrarum operationum in liberum arbitrium solum, non esse reducendam, sed etiam in Deum tanquam in primam, & præcipuam causam contingentæ. Non mirum, inquam, quod hanc sententiam quoad hanc partem non admittat, sed tandem reiciat ibi, & disp. 100. cit. constituens primam & solam rationem libertatis in actibus voluntatis creatæ.

25 Retuli fusiùs hæc omnia ipsis formalibus, & expressis verbis huius Authoris, qui suo magno ingenio (in hac parte infelicio) advertit quidem, sed tamen incurrit præcipitia in quæ trudit, & impellit asperissima ista semita scientiæ mediæ, & negatio præordinationis, & prædefinitionis nostrorum actuum liberorum, videlicet, ut voluntatem creatam constituat primam, & solam causam libertatis, quæ est in actibus nostris, ut in istis formalibus verbis ultimò relatis dicit Valq. Sed quàm absurda sit ista sententia, quantumque reicienda nemo est qui non videat. Etenim liber actus in ratione liberi non subterfugit providentiam Dei, neque finalizationem eius: ergo neque causalitatem potentæ eius. Consequens est manifesta, quia de quocumque Deus disponit per suam providentiam, habet in illud plenum dominium: ergo potest illi dare esse, vel auferre: ergo habet causalitatem in illud: præsertim quia providentia Dei non gubernat, aut disponit de aliquo, nisi communicando illi, & præbendo id quod gubernat, & providet, aut permittendo ut fiat, si malum sit, & ab eius fine deviet, aliàs esset aliquid à Deo provisum, & bonum, nec tamen in eius potestate contentum, nec causatum à se, & consequenter neque ideatum, & ab eo per artem suam factibile. Ergo provideret Deus de illo sine idea, & participatione exemplari à se, quod esset non providere providentia perfecta, & infinita. Libertas autem in actibus non est aliquid malum, & à Deo tantum permissum, cum inveniatur in actibus bonis, & meritoriis, debeaturque illi habere Deum pro fine sub ipsa ratione liberi & moralis: ergo non potest non esse causata à Deo, si est provisum. Anteced. autem negari non potest, quia liberi actus, in quantum liberi, non eveniunt fortuitò, & à casu respectu Dei: ergo eveniunt ut provisum, & disprovium ab ipso, aliàs solum provideret Deus res necessarias, & eventus ipsa necessitate provenientes, cum tamen res contingentes, & liberæ propter suam mutabilitatem, & variabilitatem maiori providentia & arte indigeant. Et præsertim virgetur hoc, quia homines habent providentiam, & regimen de suis actibus liberis, & leges ponunt de his quæ liberè agenda sunt, & Deus ipse legem dat nobis de liberis actibus, aliàs si liberi non essent, capaces legis non

non essent, nec oppositum esset prævaricatio. Qui autem dat legem de libero, ut libero, dirigit, & gubernat tale liberum: ergo & prouidet, seu prouidentiam de illo habet. Et mirum esset quod prouidentia humana se extenderet ad liberum, ut liberum, & non diuina.

Nec obstat quod libertas ponatur à Vasquez in aliquo respectu rationis, vel denominatione extrinseca, non in aliquo intrinseco ipsi actui. Quod sequuntur quicumque existimant libertatem solum consistere in actu voluntatis, ut subordinato duplici cogitationi, quæ proponit aliquid, & eius oppositum, ut à voluntate eligatur. Et putant, quod dependentia illa à cogitatione, extrinseca manet actui voluntatis in entitate sua, solumque ponit denominationem extrinsecam in eo. Alij volunt libertatem esse intrinsecam actui, sed sumi per ordinem ad reflexam quandam cognitionem, qua intellectus de ipsa sua actione voluntatis cogitat, de eaque disponit, sicque procedit, non per instinctum, sed per arbitrium. Quasi verò & ipsa cognitio reflexa super actionem voluntatis, non sit extrinseca entitati eius, si solum illam reddit cognitam, non illam specificat, nec eam physice elicit. Quod si amplius facit quam reddere cognitam, cur hoc non faciet cognitio directa dirigens actum? Nos autem ut in lib. de anima quaest. 12. tractauimus, dicimus quod libertas actus dependet, quidem à cognitione, & iudicio indifferenti, sed ut regulante actum voluntatis, disponendo illi obiectum, à quo specificatur, & regulatur actus, & rursus supponit potestatem in voluntate super ipsum actum; & sic ab ea elicitur actus ut liber. Omnis autem ordo actus ad obiectum quod specificat, & ad principium quod elicit, intrinsecus, & realis est illi, non autem respicitur à libero actu cognitio, ut præcisè reddens rem cognitam; & sic extrinsecè tantum denominando. De hoc latè usageretur 1. 2. q. 18. Sed quidquid de hoc sit, amè negari non potest quin fundamentum huius libertatis, & respectus sit aliquid reale, & sub operationem Dei cadens: si enim operatio necessaria est aliquid reale, quantum magis libera, quæ de se perfectior est pure necessaria: Ergo saltem fundamentaliter, & pro eo quod in re datur de respectu libertatis cadere debet sub diuinam operationem.

27 Et hoc ipsum deducitur ex Scriptura, in qua libertas, seu actus ut liberi, diuinæ operationi, & prouidentiae subduntur, sicut ad Philipp. 2. *Deus est qui operatur in nobis velle, & perficere*, Isai. 26. *Omnia opera nostra operatus es nobis Domine*, Prouerb. 21. *Sicut diuisiones aquarum, ita cor Regis in manu Dei*. Dicitur etiam Deus tangere corda, aperire cor, ut Act. 16. *Cuius Dominus aperuit cor*. Convertere & transferre cor, ut Esther 15. *Conuertit Deus spiritum Regis in mansuetudinem*, quod quidem non fecit cogendo voluntatem, sed liberam dimittendo, ut dixit Aug. lib. 1. contra duas epist. Pelag. c. 20. Et quando roganit pro Petro ut non deficeret fides eius, rogauit ut haberet liberam fidem, ut dicit Aug. lib. de correptione & gratia cap. 8. quia fides liberè habetur. Et quando tetigit corda aliquorum, ut hoc vel illud facerent, utique ut id liberè facerent effecit, ut pluribus August. probat lib. de gratia & libero arbitrio. cap. 21. & lib. de predestinat. SS. cap. 20. Vnde tandem D. Thom. 3. contra Gentiles cap. 89. dicit fuisse quorundam opinionem, quod prouidentia diuina non est de his quæ subsumt libero arbitrio, scilicet de electionibus, sed quod refertur ad exteriores euentus: non Ioan. à S. Thoma in 1. part. D. Thoma.

enim qui eligit aliquid consequi vel perficere, putat edificare vel ditari, semper poterit ad hoc peruenire; & sic euentus actionum nostrarum non subiacent libero arbitrio, sed prouidentia disponuntur. Quibus quidem authoritatibus sacra Scriptura resistitur euidenter. Et affert aliqua ex locis allatis, ibique latè id prosequitur. Non ergo negari potest quin liberum, ut liberum, à Dei operatione, & prouidentia dependeat, & deriuetur. Nec eleuatur hoc dicendo, quod Vasquez solum dicit liberum actum nostrum non esse liberum ex eo quod Deus solus illum decreuerit, non tamen negat quod à Deo sit, & causetur, sed non à solo Deo, quod verissimum est, cum dependeat à nostra voluntate. Non inquam eleuatur, quia nec nos volumus non solum actum liberum, sed nec vitalem, imò nec propriam actionem quantumvis necessariam causæ creatæ, ut ignis, vel solis esse à solo Deo. Quis hoc vnquam dixit, aut quando id D. Thom. somniauit, contra quem ibi Vasq. fatetur se sentire? Quod si solum hoc vult Vasq. cessat quaestio: nec enim dubitamus liberum actum non esse à solo Deo proximè & elicitive, sed dubitamus an sit à Deo, ut à prima causa, & radice, sicut actus vitalis vel non vitalis elicitus à causa creata proximè etiam refertur ad Deum, ut ad causam proximam. Vasquez autem illis verbis relatis disp. 100. dicit, quod *Prima & sola ratio libertatis actus nostri est voluntas creata*; ergo subtrahit libertatem actus à Deo, etiam ut à causa prima, & non solum ut à proxima elicente, dum dicit quod *prima & sola*.

Sententia Suarez, & Arrubal reiecta.

Fundamenta allata non solum probant præ- 28 definitionem diuinam absolutam, & efficacem libertati non repugnare, & ex hac parte non debere negari Deo, sed etiam per se semper requiri ad tales liberos actus dirigendos, & ordinandos, non supposito scientia media, sed supposito decreto libero Dei, & ex vi illius ante præuisum nostrum consensum liberum, & ante efficaciam suppositam mediorum, in quo sententia P. Suarez contradicimus; similiter probant actus istos in se immediate, & non in aliquo, in quo virtualiter contineantur, v. g. in vocatione congrua prædefiniri, aut in alio medio, sed in se prouideri. Nec sufficienter explicantur per prædefinitionem concomitantem, quæ est de ipso influxu cum cooperatione causæ, atque adeò supponere debet causam inclinatham, & exigentem talem influxum cooperatum determinatè. Et in hoc contradicimus P. Arrubali.

Contra sententiam Suarez vrgent omnia 29 fundamenta supra allata, quæ pro omnibus effectibus creatis prædefinitiones requiri ostendunt. Et est sine dubio mens D. Tho. qui 1. p. q. 25. art. 5. ad 1. generaliter docet, quod *Non potest esse quod aliqua faciat Deus, quæ non præscierit & præordinauerit*. Et in q. 3. de verit. art. 7. docet, quod *Omnes effectus secundi sunt prædefiniti à Deo*; idemque docet in alijs locis supra allatis. Et sumitur hoc ex ipsa ratione procedendi, & operandi Dei, & ex ipsa dependentia creaturæ, quæ tanta est, ut nihil eius præsupponatur ad prouidentiam Dei, sed totum ab eo causetur, qui operatur omnia secundum consilium voluntatis suæ. Ratio enim qua Deus operatur, est ratio operandi per prouidentiam, & ex intentione, & directione eorum,

quæ agenda sunt: omnia enim secundum rationem facit, & per artem, & per voluntatem suam, quia operatur ex fine, & non à casu. Rursus hæc operatio directiva, & ordinativa, tam vniuersalis, & infinita est, quod omnia in omnibus causet, & nihil supponat, quod à se causatum non sit, & à se impediri, vel annihilari non possit, quia omnia in ipso constant, & ab eo participant id quod sunt, vel quod operantur: ergo ita providet omnibus ex fine, & intentione, qua operatur, quod non præsupponit aliquam efficaciam in mediis, sed præbet, & communicat illam: ergo omnia prædefinit. Patet consequentia, quia illud prædefinitur, quod non præsupponitur à providentia diuina, sed causatur ex fine, & intentione, & non fortuito, seu à casu habetur: sed ad rationem diuinæ providentiæ, quatenus summa, & diuina est, pertinet quod omnia causet ex fine, & non à casu, sed ex intentione, & nihil sit quod non deriuetur ex ipsa, ita quod nihil præsupponat quod à se deriuatum non sit: ergo dicere quod sic prædefinire, & causare, non est necessarium providentiæ diuinæ, est destruere providentiam diuinam loquendo de rebus posititiuis, & factibilibus. Vnde debet providentia diuina antecedere omnia, etiam ipsum modum operandi causæ creatæ, & contingentiam, seu libertatem aut necessitatem operandi, ut optimè docet D. Th. 3. *contra Gent.* c. 94. quia omnia ista etiam modus ipse operandi, & determinatio causæ inferioris, & contingentia, aut libertas, omnia participant rationem entis, & consequenter à Deo non supponuntur, sed causantur aliquo ex fine intento, quod est prædefiniri.

30 Omitto quod ad omnia quæ scientiam mediam prærequirunt, ut debite provideantur, repugnat poni prædefinitionem absolutam, & efficacem, & sic ista duo non componuntur, quod in Deo ponatur non repugnare prædefinitionem efficacem absolutam respectu alicuius actus liberi, & quod illa debeat regulari per scientiam mediam: nam ut prædefinitio, seu providentia Dei sit efficax circa nostram liberam determinationem, & consensum, vel supponit efficaciam mediorum, & determinationem nostræ voluntatis, vel non supponit, sed causat. Si non supponit, sed causat, non regulatur scientia media, quæ præuidet consensum supponendo, non causando determinationem eius, quia solum offert concursus indifferentem. Si supponit, non est absoluta illa efficacia, & antecederet ad nostrum consensum, sed ex suppositione illius. Et si hoc requiritur in statu conditionato, ut ibi saluetur libertas, etiam in statu absoluto, ut de facto sit libertas, talis consensus, & cooperatio de facto dabit illam, non ab illa antecederet causabitur, & sic destruitur efficax prædefinitio, aut si ponitur, tollet libertatem in eius sententia.

Respondet, non tollere libertatem, etiam in principiis Suarez, prædefinitionem, quia extrinseca est ad nostram voluntatem, non sicut forma intrinseca, ut visio beata, quæ necessitat, aut etiam, ut ipse putat, prædeterminatio physica. Vel secundo, quod licet intentio Dei sit absoluta, & efficax circa actum charitatis v. g. eliciendum à me, tamen ex hoc solum Deus manet obligatus ad eligendum aliquod medium ex finitis, quæ videt scientia media, quibus potest moueri voluntas ad illum actum; & sic illa prædefinitio non tollit libertatem, quia exercetur per media congrua præuisa, & regulata per scientiam mediam.

31 Sed contra primam solutionem instatur, quia

decretum illud extrinsecum, cum sit antecedens nostrum consensum, vel causat illud infallibiliter eadem infallibilitate, & determinatione qua intrinseca forma, & determinatio, vel non, sed offert indifferentem concursus, & expectat determinationem nostri consensus. Si hoc secundum, non prædefinit efficaciter ex se, sed indifferentiam solum habet ex se, à nobis autem determinationem expectat. Si primum: ergo non requirit scientiam mediam, cum ex sua efficacia, & vi sua, non autem ex præsuppositione nostri consensus, sit infallibilis; & sic non præuidetur concursus ut determinandus à nostro consensu, sed potius sua efficacia determinans illum.

32 Contra 2. verò solutionem eadem instantia fit, quia illa intentio ex qua Deus obligatur ponere media congruentia præuisa per scientiam mediam, vel talibus mediis præbet efficaciam quam habent, illamque causat, & determinat, vel non, sed expectat illam à mediis, & supponit nostram cooperationem, & ex illa suppositione incipit efficacia illius. Si hoc secundum, non est prædefinitio efficax absolute, & ex se, sed ex se indifferens, seu ponens media indifferentia, & solum ex suppositione mei consensus extrinsece est efficax. Si primum, vacat scientia media, quia congruentia mediorum accipitur ut deriuata & causata ab intentione & decreto Dei, non ut præsupposita, & præuisa ex mea cooperatione; & sic non regulatur scientia media.

33 Contra scientiam autem P. Arrubal, constat hunc Authorem non explicare veram Dei providentiam, ut defendat duo principia suæ doctrinæ; alterum est quod libera Dei determinatio in ratione liberi actus constituitur per operationem ad extra: inde enim colligit solum dari posse prædefinitionem concomitantem, seu executionem respectu actus nostri liberi quatenus Deus suo comitanti influxu cum ipsa concurrat in actum, siquidem non datur in Deo liberum decretum de meo actu nisi per connotationem, & productionem mei actus. Et talis volitio vocatur prædefinitio, non ratione causalitatis in nostrum consensum, sed ratione antecedentiæ durationis, quia illa volitio est æterna, effectus verò temporalis. Alterum principium est, quod in Deo non distinguuntur diuersi actus, etiam intentionis, & executionis, nisi ratione diuersorum effectuum, qui connotantur in creatura. Vnde colligit quod absolute non est necessarium ad providentiam ponere circa aliquem actum liberum intentionem Dei efficacem absolutam, posse tamen poni, si Deus intendat actum aliquem, non immediate in se, sed in aliquo medio seu causa, ut in auxilio congruo in quo continetur actus faciendus. Sufficienter tamen dicit priorem providentiam, seu prædefinitionem executionem, & concomitantem, quia omni alio ablato per hanc solum effectus ponitur.

Cæterum prædefinitio illa concomitans, cum fundetur in illo principio *suprà dis.* 4. late impugnat de constitutione actus liberi per productionem ad extra, eo principio sublato, etiam corrumpit hæc prædefinitio seu providentia constituta per productionem concomitantem ad extra: providentia enim est causa productionis ad extra, non per ipsam constituitur sicut volitio. Vnde D. Th. *inf.* q. 25. a. 5. ad 1. non minus diuinæ volitioni, quæ ordinationi, seu providentiæ subicit effectus Dei, dum dicit, quod *Non potest esse, quod Deus aliqua faciat, quæ non præscierit, & præordinauerit se facturum, quia ipsum facere subiaceret præscientiæ, & præordi*

præordinationi, non autem ipsum posse, quod est naturale: ideo enim Deus aliquid facit, quia vult, non tamen ideo potest, quia vult, sed quia talis est in sui natura. Manifestè ergo D. Thom. ponit ipsam productionem (quæ utique temporaliter de Deo dicitur) vt subiectam, non vt constituentem diuinam prouidentiam, vt causatam ab ipsa, non vt concomitantem. Ergo ponere prædefinitionem cōcomitantem ipsam cooperationem, est mera fictio, & nugæ, cum prouidentia, & prædefinitio semper se habeat vt causa, & vt antecedens ipsam operationem, quia eam dirigit, & ordinat: operatio enim est executio, & prouidentia est directio & ordinatio de exequendo. Quomodo ergo sic iste Author implicat in terminis, vt velit obtrudere prædefinitionem executiuam, & concomitantem, cum hoc ipso quod sit executio, supponat, non constituat directiuam vim prouidentia, siquidem executio à directione procedit: Et insulsum valde est prædefinitionem velle nominare solum quia præcedit effectus suos duratione, id est, æternitate, quia videlicet Dei operatio, seu volitio est æterna, effectus verò temporalis. Nam vel prouidentia, & prædefinitio est causa directiua productionis, & operationis ad extra tangentis ipsum effectum, vel non. Si est causa directiua: ergo malè dicitur præcedere solum duratione, non causalitate, atque aded prædefinitio concomitans cooperationem nostram est chymæra, sicut si dicatur causa concomitans, cum de ratione causæ, vt causa est, sit antecedentia. Si non est causa directiua operationis, & productionis: ergo erit solum executiua seu executio ipsa: ergo vel supponit directionem sui, ita quod ipsa executio sit directæ ab aliqua præcedenti directione, & illa erit prouidentia prædefiniens, & causalitate antecedens; vel non supponit directionem, sed est mera executio sine ordinatione præcedente, & talis executio erit cæco, & ignorantia modo facta, quia nec est directio, nec supponit directionem à qua ordinetur. Et præterea quia quod non est causa directiua, sed executiua, & cooperans ideoque vocatur concomitans, non est causa per modum prouidentia, & ordinationis: prouidentia enim directiua est operis faciendi: præparat enim, præordinat, præuidet quid, & quomodo aliquid rationabiliter faciendum sit, & debet; & sic est causa quod executio sit rationalis, & ordinata: ergo non potest esse prædefinitio, si est concomitans. Patet consequentia, quia prædefinitio, prouidentia est: est enim præparatio, & præordinatio definiens, seu decernens quid faciendum sit, causando efficaciter id quod definit & determinat, non verò id supponens: ergo id quod non se habet, vt prouidentia, non se habet, vt prædefinitio.

34 Quod si dicatur illam prædefinitionem concomitantem posse dici prædefinitionem respectu cooperationis causæ secundæ cuius concomitans est, licet sit executio, & non præordinatio respectu operationis ipsius Dei: per hanc enim constituitur ipsa volitio, & prouidentia diuina.

Contra est, quia si est executio diuinæ volitionis liberæ, & hæc est cooperans, & concomitans nostram cooperationem: ergo non causat illam, nec facit vt sit, sed cum illa iam existente & aliunde causata, simul influit: ergo non prædefinit, nec prædeterminat, quia si solum est simul cum illa influens, & non est simul, nisi cum cooperatione determinata, siquidem est in-

Ioan. à S. Thoma in 1. part. D. Thoma.

fluens, & non influit nisi determinata: non ergo definit, nec determinat eandem, sed præsupponit in se iam determinatam. Implicatio ergo est ponere prædefinitionem concomitantem, quia si definit, determinat, & si concomitanter influit, supponit determinatam, & definitam in omni statu, in quo est concomitans, & supponens alteram sibi cooperantem simul influere, & sic esse dextrinam, siue consideretur in statu conditionato, siue absoluto: si concomitans est non definit, nec determinat.

Loquendo autem de prædefinitione antecedente, & per modum intentionis, quam ponit iste Author, manifestè etiam euacuat rationem prædefinitionis absolutæ, & efficacis. Primò, quia dicit hanc non esse necessariam, sed æquè bene posse effectum eundem fieri per illam prædefinitionem concomitantem, quam hucusque impugnauimus. Hoc constat esse falsum, quia sine dubio aliquam Dei prædefinitionem requiri ad executionem rerum ad extra, manifestum est, nec ipse Arrubal negat, cum Scriptura id apertè testetur *in locis supra adductis*, cum hæc prædefinitio non sit aliud quàm diuina præparatio de his quæ facienda sunt, sicut dicit Apost. ad Ephel. 2. *Creati in operibus bonis, quæ preparauit Deus, vt in illis ambulemus*, & omnis præparatio antecedit & causat rem præparatam, sed illa prædefinitio & præparatio concomitans, nulla est, vt ostendimus: ergo si aliqua prædefinitio requiritur & non concomitans, requiretur præparatio antecedens. Falsò ergo dicit quod non requiritur. Et præterea quia non est dubium omnino requiri ad hoc vt effectus fiant ad extra per potentiam executiuam, ita vt sine illa effectus aliquis dari non possit: ergo eodem modo requiretur prouidentia præparatiua & prædefinitiuam antecedens & causans. Patet consequentia, quia potentia illa executiua supponit directionem, & ordinationem: nec enim exequitur Deus tanquam agens inanime, sed vt agens ordinatum, & cum directione, non cæco modo: ergo sicut requiritur ad omnes effectus Dei, etiam ad actus nostros potentia executiua præcedens, & causans, ita vt sine ea non possint causari, & poni effectus isti, requiritur directio, & ordinatio antecedens, quæ dicitur prædefinitio, seu præordinatio, quia illa potentia non est executiua nisi ordinationis, & directionis antecedentis à qua dirigitur: falsò ergo dicitur quod non est necessaria: prædefinitio Dei antecedens ad actus nostros licet possit dari. Vnde S. Thom. *infra quæst. 25. art. 5. ad 1.* parificat necessitatem potentia executiua ad effectus, & præordinationis, seu sapientia ipsius quæ est prædefinitio antecedens, dum dicit, quod *Non potest esse quod Deus aliqua faciat, quæ non præsciuerit & præordinauerit se facturum, quia ipsum facere subiacer præscientia, & præordinationi.* Si subiacer: ergo illa antecedit.

Deinde euacuat Author iste veram prædefinitionem, & prouidentiam Dei circa actus nostros, quia, vt latè *suprà* ponderauimus articulis præcedentibus, non potest prouidentia, seu prudentia procedere ad disponendum de agendis, & illa præcipere, nisi supponendo intentionem finis: omnis enim electio, & actio si ex debita finis intentione non procedit, temerè, & sine prudentia fit. Vnde ex eo probat D. Thom. quod prouidentia supponit voluntatem finis, quia nullus præcipit de agendis propter finem, nisi velit finem, vt docet *in hac qu. 22. art. 1. ad 3. & qu. 23. art. 4.* Sed intentio finis ex qua proceditur ad præparanda, & dispo-

C c 3

nen da

nenda media, est intentio finis in seipso, & non in ipso medio: finis enim amatur propter se, medium ex ordine ad finem; inconueniens autem est id quod amatur ratione sui, & propter se, non in seipso amari, sed in aliquo subordinato ad se, & effectui sui, cum potius medium ipsum quod propter aliud diligitur, non in seipso, sed in alio debeat amari. Quod autem amatur ratione sui, & propter se, non indiget alio ut ametur, & intendatur, præsertim illo quod est medium subordinatum sibi: nam hoc amatur propter finem: ergo supponit finem esse amatum, sed non supponit finem amatum in ipso medio, alias iam medium esset amatum, ut in eo amaretur finis: ergo supponit finem amatum in se, imò si finis non intenditur nisi in aliquo medio: ergo in volitione ipsius medij intenditur: non enim potest intendi in medio non voluto: ergo voluto. Volitio autem medij cum sit libera, secundum istum Authorem, constituitur per ipsam actionem executiuam, seu productiuam ad extra: ergo intentio illa finis libera, est productio ad extra illius prioris medij, in quo tanquam in causa dicitur volitus seu intentus antecederet ille actus. Productio autem passiuæ est executio passiuæ mediorum, quæ est effectus intentionis finis, non autem potest constituere ipsum actum intentionis, quia intentio est causa illius effectus, siquidem ex intentione, & ex fine dimanat effectus ille, qui est ad finem: medium enim ad finem est. Et præterea, vel volitio illius prioris medij est volitio, seu intentio ex sua natura, vel ex natura medij voliti efficax, & inductiuæ consensus nostri, vel nō, sed ex suppositione ipsius consensus præiudici. Si primum: ergo iam aliqua suppositio antecedens, & quæ non est in manu voluntatis, sed à Deo descendit, non tollit nostram libertatem, licet infallibiliter, & efficaciter inducat consensum; & sic corrumpunt omnia fundamenta opposita in adstruenda scientia media, & tollenda efficacia decretorum ex natura sua. Si secundum, iam illa prædefinitio, & intentio non est efficax, & absoluta, etiam in ipso medio, quia etiam eo posito, v. g. congrua vocatione, non est illatiua effectus absolute ex se, sed ex suppositione consensus.

Soluantur argumenta.

36 Primò, arguitur autoritate Damasceni, & aliorum Sanctorum. Nam Damasc. lib. 2. de fide c. 30. inquit, *Deum omnia præscire, sed non omnia prædefinire: præscit enim ea quæ in nostra potestate, & arbitrio sunt, at non ea prædefinit: neque enim vitium admitti vult, neque rursus virtuti vim affert.* Et Dialogo contra Manichæos: Deus, inquit, illa quæ in nostra sunt potestate præscit, nimirum virtutem, & vitium, ea demum præfinit, quæ in nostro arbitrio minime consistunt. Quem sensum secutus est D. Thom. q. 12. de verit. art. 10. ubi inquit, quod *Quando ex sola operatione diuina virtutis aliquid fit, ut suscitatio Lazari, secundum hoc est prophetia prædestinationis, quia, ut dicit Damascenus, ea quæ Deus prædestinat, non sunt in nobis.* Et eodem modo loquitur solut. ad 3. & ad 4. ubi inquit, quod *Id quod ex arbitrio nostro est, prædestinationi subesse dicitur per accidens.* Ergo per se, & directe non prædefinitur. Adde quod in hac 1. p. q. 23. art. 7. D. Thom. dicit: *Non prædefinire Deum, & prædeterminare numerum individuorum corruptibilium, ut muscarum, culicum, &c.* Ergo non se extendit prædefinitio Dei ad omnia ad quæ se extendit eius causalitas.

Conf. quia S. Chrysost. homil. 12. super epist. ad Heb. inquit, quod *Deus non antecedit nostras volun-*

tates, ne nostrum latur arbitrium. Et Augustin. lib. 3. de libero arbitrio cap. 18. *Quacumque causa est voluntatis nostra, si non potest ei resisti, sine peccato ei ceditur.* Sed illa prædefinitio, quam nos ponimus, est antecedens, & ei resisti non potest: ergo sine peccato ei ceditur, quasi dicat non ex libertate nostra, quia cum ea non potest componi peccatum, sed ex necessitate. Plures autoritates adducit Ruiz *tomo de scientia Dei disp. 33. sect. 5.* Istæ tamē videntur principaliores, & ex eorum responsione ad alias patebit.

Resp. hæc loca Damasc. & Chrysost. aliorumque Patrum mentem latè nos tractasse, & explicasse *tomo præced. disp. 20. art. 4. in solut. 2. argumenti ex autoritate.* Ibi videri possunt. Breuiter dicimus Damascenum rectè explicari à D. Thom. in hac q. 23. art. 1. ad 1. & 3. contra Gentil. c. 90. in fine, de prædefinitioe seu determinatione necessitante, & quæ per modum fati se habeat: fuit enim valde familiare antiquis Patribus, præsertim Græcis, remouere necessitatem fati, & ita loqui de gratia Dei, & voluntatis eius decretis, quod non intelligeretur modo fatali ac necessitante nos agere. Et ibi respondimus ad replicas Suarez, & Vasquez contra hanc explicationem Damasc. Ad autoritatem D. Thom. ex q. 12. de veritate. Resp. omnino formaliter fuisse locutum, & in eo nobis sensum Damasc. explicasse, videlicet quod Deus non prædefinit, nec prædestinat ea quæ sunt in nobis, scilicet quatenus in nobis. Ea autem quæ sunt in nobis, quia etiam ex gratia Dei sunt, quatenus sic ex Deo sunt, etiam prædestinantur à Deo. Et idè dicuntur subiaccere prædestinationi per accidens, id est, per aliud, scilicet per gratiam Dei, quæ facit nos operari ea quæ sunt in nobis, non per accidens, id est casualiter, aut fortuito, & non per se. Vnde ipse D. Thom. q. 6. de verit. art. 2. ad 11. dicit, quod *Hoc ipsum quod est velle accipere gratiam, est nobis ex prædestinatione diuina.* Et art. 3. ad 4. *Quod causa secunda quam oportet supponere ad inducendum prædestinationis effectum, etiam ordini prædestinationis subiaccet; & ideo ordo diuine prædestinationis, quamuis sit cum suppositione voluntatis humane, nihilominus tamen absolutam habet certitudinem.* Et in hac q. 23. art. 5. expressè docet, quod *Non est distinctum id quod est ex prædestinatione, & ex arbitrio nostro, sicut nec est distinctum quod est ex causa prima, & secunda.* Manifestè ergo subiicit prædestinationi id quod est in nobis, sed quatenus deriuatur à Deo. Ad id quod adducitur ex q. 23. art. 7. Resp. D. Thom. negare ibi quod indiuidua corruptibilia sint prædefinita speciali prædefinitioe, quasi vnumquodque ratione sui præfiniatur, sicut Beati prædestinantur per modum cuiusdam principalis prædefinitioe, ut ibi dicit, non tamen negat prædefinitioe quadam generali præordinari à Deo.

Ad locum Chrysost. respondimus loco supra cit. 37 & ostendimus ex ipso negare antecedentiam fatalem, & necessitantem, seu ita operantem quod nostrum non operetur arbitrium, non antecedentiam adiuantem, & quæ nostrum facit liberè operari arbitrium. Ad Aug. Resp. loqui apertissime de causa violenta, & cogente: sic enim incipit illud 18. capitulum: *An fortè violentia causa est voluntatis, & cogit inuitum? Num eadem toties replicatur sumus? sed si laboriosum est omnia mandare memoria, & hoc breuissimum tene.* Quacumque ista causa est voluntatis, si non ei potest resisti, sine peccato ei ceditur. Loquitur de ista causa de qua locutus fuerat, scilicet violenta & cogente, cui resisti non potest. Dei autem voluntati humanum non resistit

resistit arbitrium, ut idem Augustinus dicit *lib. de correptione & gratia cap. 14.* non quia violenter nos impellat Deus, sed quia habet magis in manu sua voluntates hominum, quam ipsi suas; & sic facit ut faciamus, & agit nos, quia agit ut agamus, & ut liberè & voluntariè agamus, ut sæpe idem Augustinus docet, & videri potest *lib. 1. contra duas epist. Pelagian. c. 19. in fine.* *Trahitur, inquit, miris modis ut velit ab illo qui novit in ipsis hominum cordibus operari, non ut homines, quod fieri non potest, nolentes credant, sed ut volentes ex nolentibus fiant.* Itaque loquitur in illo priori loco Augustinus de causa antecedenti ita violenta, quod ei resistere non potest nostra voluntas, nec potentiâ antecedenti, neque consequenti. Dei autem prædefinitioni, & operationi resistere potest potentiâ antecedenti, quia hoc ipsum Deus illi tribuit, ut sic possit oppositum, non potentiâ consequenti, quia sic movet ut de facto non resistat. Constat etiam *ex pluribus locis supra allegatis* Augustinum docere quod actus nostri liberi præfiniantur & præordinentur à Deo.

37 Secundò arguitur; Posito decreto efficaci antecedenti, quo Deus absolute per modum intentionis decrevit actum liberum meum, v. g. contritionem, contritio sequitur necessariò in mea voluntate, necessitate antecedenti: ergo quando fit à voluntate, non fit liberè. Consequenter prob. ex doctrina Anselmi communiter recepta, quod necessitas antecedens tollit libertatem, & de se constat, quia necessitas antecedens relinquit potentiam sic affectam, quod antecederet ad actum necessitata est: ergo non potest alium producere, & consequenter libera potentia non manet: ergo si posito decreto per antecedentem necessitatem non potest voluntas oppositum elicere actum, libera non manet. Anteced. verò prob. quia omne decretum Dei absolutum, & efficax non potest non sortiri effectum, cum sit ab intrinseco infallibile, & efficax: ergo implicat quod possit deficere: ergo etiam implicat quod contritio quam efficaciter intendit, possit deficere: ergo non est contingens, neque libera, sed necessariò futura est. Quæ consequentiæ sunt evidentes, quia non minùs infallibilitatem, & necessitatem habet absolutum, & efficax decretum Dei, quam Sol ad producendam lucem, vel ignis ad producendum calorem. Quod autem ista necessitas sit antecedens, prob. quia illa est necessitas antecedens, quæ oritur ex aliquo priùs natura antecedenti, cum quo effectus nec simul, nec posterius est, ut patet in Sole, cuius virtus antecedit lucem, & non potest non causare illam, & amor beatificus non potest non causari à visione Dei clara, quæ illum antecedit, & determinat, ac necessitat voluntatem ad illum amorem: decretum autem Dei absolutum antecedit nostram voluntatem, eaque neque determinat, & non potest villo modo impediri aut suo effectu cassari: ergo illa inconsequentia siue vocetur necessitas, siue infallibilitas, est antecedens, & sic lædit voluntatem nostram.

38 Hoc argumento tanquam fundamento utuntur negantes efficaciam decretorum antecedentium contra Authores qui istam efficaciam absolutam ponunt, tam in decreto Dei quam in auxilio, sine vlla præcedenti scientia media futuri nostri consensus. Contra eos verò qui negant in auxilio hanc efficaciam, & prædeterminationem, fatentur in decreto Dei posse hanc efficaciam dari absolutam in intendendo rem fieri ante decretum, & præparationem mediorum, sed supponendo præiudicium consensus nostri per scientiam mediam ante omne decretum Dei, ut Suarez, & alij videntur eos inconsequentia arguere, quia non minùs efficaciam

& necessitatis habet decretum divinum absolutum, quam auxilium prædeterminans, hoc autem non ponitur ab illis Authoribus, etiam si præcedat scientia media futuri consensus, sed dicunt necessitatem antecedentem inducere: ergo similiter decretum illud efficax absolutum, quantumcumque præsupponat scientiam mediam, si in se infallibile, & incontingens est, antecedentem necessitatem inducet, quia antecedit consensus nostrum; & sic Deus vult ipsum effectum esse. Et præterea virgetur hoc, quia in statu conditionato per scientiam mediam solum prævidetur voluntas consensus, vel non consensus, posita seu præiudicata cogitatione indifferenti aut vocatione congrua, non verò posito, seu præiudicato decreto efficaci, quia hoc decretum non prævidetur per illam scientiam conditionatam mediam, cum in eo ordine non sit, sed post scientiam mediam habeatur. Ergo parum interest, quod præcedat scientia media, ut dicatur decretum illud non inducere antecedentem necessitatem, & tollere libertatem, quia per scientiam mediam non prævidetur efficacia ipsius absoluta inducens consensus, sed solum congruitas, & indifferentia vocationis, cum qua voluntas prævidetur consensus, vel non consensus. Si ergo postea superadditur aliqua efficacia antea non præiudicata, & illa est antecedens, & absoluta respectu nostræ voluntatis, quid interest tota illa præscientia media antecedens, ut hæc efficacia non dicatur antecedens, & libertatem tollens? Sicut in doctrina istorum Authorum licet præsupponatur scientia media de illa vocatione congrua, & moraliter mouente ad consensus, & simul prævidens consensus nostrum sub conditione futurum, tamen si postea adderetur à Deo prædeterminatio physica, quæ in scientia media non supponitur præiudicata, tolleretur libertatem, quia faceret antecedentem necessitatem: ergo similiter efficacia decreti absoluti, & antecedentis: nam quod prædeterminatio sit forma intrinseca, decretum autem extrinseca, futile est, cum non minùs incontingens sit vnum, quam alterum, nec minùs possit compati actum oppositum, & non minùs est antecedens nostram libertatem: ergo vel tollit illam, vel isti Authores inconsequenter loquuntur.

Respon. ergo hoc argumentum sæpe à nobis esse solutum, tum *supra disp. 5.* agendo de efficacia decretorum Dei, tum *præcedenti tomo* agendo contra scientiam mediam. In summa negamus antecedens, quod ex tali decreto sequatur actus necessariò necessitate antecedente, sed tantum necessitate consequente. Ad probat. Respon. quod illud decretum infallibile est, & non potest deficere, & similiter contritio, seu actus meus liber per illud decretatus infallibilis est ex vi decreti, & ut subest decreto. Et sic cum dicitur quod non potest deficere, distinguo, non potest deficere eo modo quo decretatus est, concedo; alio modo, nego. Est autem decretatus ut fiat liberè, ita quod etiam modus libertatis cadit sub decreto: ergo est infallibile quod liberè fiat: quæ est expressa solutio S. Thom. 3. *contra Gent. c. 94.* cuius verba sæpius retulimus in superioribus, aliàs si decretaretur contritio, & non libertas eius, non decerneretur vera contritio, quæ essentialiter est actus liber. Non repugnat autem quod infallibiliter ex parte Dei, & ex modo operandi Dei decernatur modus libertatis, & contingentia ex parte nostri, & ex parte rei decretatæ, sicut non repugnat quod Deus immutabilis existens, & immutabiliter operans rem mutabilem faciat. Et hoc idem quia, ut sæpe advertimus, infallibilitas Dei habetur non ratione violentiæ

tiæ, qua tanquam superior vincat, & repellat causæ creatæ virtutem, sed est infallibilitas ratione vniuersalissimæ causalitatis suæ, quia dat omnia, etiam ipsum modum operandi causæ secundæ. Vnde si operatur omnia, & dat omnia, etiam dat ipsam libertatem, & quia ita vniuersaliter operatur, quod omnia complectitur, nihil potest ab eius vniuersali ordine exire, & consequenter infallibilis est, etiam quando dat libertatem, & contingentiam, & mutabilitatem ipsam. Et illa infallibilitas non tollit libertatem, quia dat illam; & idè dicitur infallibilis, quia dat omnia, etiam ipsum posse resistere. Quod si dat, non tollit. Et sic dicit D. Thom. *ubi supra* quod non est infallibile ex vi providentiæ Dei quod hoc fiet, sed quod hoc contingenter fiet, totum hoc est infallibile, actus, & modus, non actus solum. Et sic impertinenter dicitur, quod Deus non habet minùs necessitatis, & infallibilitatis in decretis suis, quàm Sol in illuminando, vel ignis in calefaciendo, atque adèd reddit actum meum necessarium. Nam quantum ad perfectionem indefectibilitatis in consequendo effectum, & remouendo impedimenta eius, multò perfectior est infallibilitas Dei in operando, quàm necessitas Solis in lucendo. Sed quantum ad modum istius infallibilitatis respectu effectus, nullam necessitatem infert Deus, sicut infert Sol, quia iste est causa omnino coarctata, & determinata ad vnum, & ex hac imperfectione habet infallibilitatem cum necessitate, & coarctatione; & sic eius necessitas antecedens imponit necessitatem effectui, quia imponit coarctationem. At verò Deus est causa vniuersalissima quæ operatur omnia, etiam modum ipsum contingentiam, & libertatis in causa secunda; vnde propter ipsum vniuersalissimum modum infallibilis est, & propter eundem vniuersalissimum modum causat libertatem, non tollit, quia causat omnia.

40 Ad id quo probatur, quod decretum Dei importat necessitatem antecedentem in voluntatem nostram, Resp. quod necessitas antecedens non solum est illa, quæ est prior, & cum qua nec simul, nec posterius est effectus, sed etiam quæ ita est prior quod nec formaliter supponit effectum liberum, nec virtualiter causat illum, etià in ipsa ratione liberi. Si autem causa aliqua antecedens influit infallibili influxu, & vniuersali, nò solum in ipsam substantiam actus, sed etiam in modum libertatis eius, quia est principium, & radix eius, etiam vt liberi, multo magis quàm anima nostra est radix voluntatis nostræ, & prior illa, licet modo infallibili id faciat, non inducit necessitatem antecedentem, sed consequentem, & in sensu composito, non diuiso, quia licet componendo infallibilitatem illius causæ, & illius decreti cum actu, consequatur necessitas; & sic sit necessitas consequens, tamen considerando causalitatem, & influentiam eius in libertatem, & quod ex ipsa causa prima participatur ratio liberi in actu nostro, sic non habet antecedentem necessitatem, sed potius rationem libertatis. Nec currit similis ratio in Sole illuminante, aut in visione beatifica voluntatem rapiente, quia tales causæ non solum antecedunt; sed etiam non causant ex parte rei causatæ libertatem, & liberum modum agendi, sed coarctantur, & coarctant ad vnum tantum modum operandi; & sic est infallibilitas coarctata, & determinata, diuina verò voluntas non est infallibilitas coarctata, sed vniuersalissima, à quanihil potest se subducere, & sic ipsam libertatem communicat voluntati creatæ, modo tamen infallibili.

41 Instabis ex Alarcon. *hic tract. 4. disp. 1. c. 6. num. 36.* Ille actus liber, v. g. contritio amatur à Deo.

non solum vt physicus actus est, & vt physicè dependens ab influxu voluntatis, sed etiam vt liber, & moralis: ergo vt dependens à cogitatione indifferenti, seu à duplici cognitione, ex qua componitur iudicium illud indifferens, à quo constituitur voluntas determinatè libera: ergo illa volitio Dei non est antecedens, sed comitans illud iudicium, & cognitionem indifferentem.

Resp. eodem modo quo *suprà* (hoc enim difficultatem non addit) quod quando dicimus Deum sua volitione efficaci causare non solum actum, sed etiam libertatem eius, etiam dicimus quod causat illud indifferens iudicium, à quo formatur libertas, & à quo dependet intrinsecè: illud enim indifferens iudicium etiam à Deo pendet, sicut & actus voluntatis. Vnde non est volitio Dei concomitans, sed etiam antecedens cogitationem ipsam, & actum illum vt indifferentem, & liberum, quia causat illam libertatem, & indifferentiam, etiam in iudicio: nec enim solam libertatem formalem in voluntate, sed etiam radicalem in iudicio causat.

42 Tertiò arguit. prædefinitio absoluta oritur ex efficaci intentione absoluta alicuius rei, & inde denominatur absoluta prædefinitio, quia talem intentionem supponit: sed non potest in Deo intelligi efficax voluntas, vt dependens in sui efficacia ab alia volitione postea habenda, sed hoc ipso quo intelligitur efficax efficacia summè perfecta, & diuina, repugnat intelligi efficaciam cum dependentia ab alio vteriori actu, sed in se, & ratione peculiaris sui connotati efficax esse debet, & effectum sortiri: ergo si datur intentio Dei efficax, & absoluta ante præuisum consensum, & præparata media, independenter ab omni medio, & ab omni consensu voluntas effectum habebit. Hoc autem impossibile est, quia sine consensu meo libero aut cum illo coacto non efficitur actus ille prædefinitus, v. g. contritio: ergo efficax intentio absoluta, id est, omnia media antecedens, omnino neganda est in Deo propter summam illius efficaciæ perfectionem. In toto hac discursu solum probatione videtur indigere illa minor, quod videlicet hoc ipso quod aliqua volitio, seu intentio est efficax efficacia summa, non est dependens ab vteriori actu. Et hoc patet, quia vbi est summa efficacia, est efficacia omnipotens: ergo vteriori efficacia non eget ad sui executionem, aliàs non intelligeretur omnipotens. Efficacia ergo in voluntate Dei intentiua nullo modo potest intelligi talis, nisi ex se, & ratione proprij connotati habeat effectum. Vnde si est efficax circa aliquid pendens ab altera causa, vel pendens ab aliquo medio, non potest intelligi sic efficax ante tale medium, & talem causam præuisam, & præparatam, non verò per absolutam efficaciam antecedentem ista media, & illam causam. Quod secus accidit in voluntate creatæ, quia hæc vt efficax, non requiritur quod summo, & omnipotenti modo efficaciam habeat, sed dependenter à medijs, quæ non sunt in manu propria semper, nec semper infallibilia. Vnde licet impediri contingat, hoc tamen non euacuat humanæ voluntatis efficaciam, quia est efficacia sic dependens, & solum modo humano, & in suo genere efficax.

43 Respon. quod diuina efficacia etiam ordine intentionis, & ex parte finis est efficacia summa, & omnipotens, non tamen supponens, sed causans omnia media, & effectus, & ipsum etiam conatum ex parte nostra, & consensum, ex hoc ipso quia omnipotens est: sed sicut res istæ habent inter se ordinem, & connexionem, ita intelliguntur habere

ex

ex parte decretorum Dei, non quod plura decreta dentur ex parte Dei, aut multiplicatio voluntatum, sed quia ratione diversorum effectuum, qui inter se ordinem habent, & à voluntate ipsa divina connotantur, dicuntur decreta multiplicari, sicut etiam ideæ, ut *supra* dictum est *disp. 1.* Quare efficacia intentionis ita intendit finem determinatè, & in singulari assequendum, quod etiam est ratio, & causa determinati medi, & actionum ad talem assecutionem requisitarum, sed non est exercitium, & executio huius assecutionis, nec intelligitur in ipsa efficacia intentionis ipsa executio exercita, & explicata, sed solum intelligitur efficax principium, & ratio unde derivatur illa executio. Et sic efficacia executionis virtualiter est ibi contenta, & quasi in suo initio, & principio, nondum tamen explicata in exercitio, sed solum explicatur causa, & ratio unde illa derivabitur, scil. ex fine efficaciter intento in vi finis, nondum in vi efficientis posito. Et quando instatur quod illa efficacia intentiva est divina, & omnipotens: ergo non indigens ulteriori efficacia, nec dependens ab illa. Respon. quod licet illa efficacia intentiva, sit divina, & omnipotens in ratione intentionis, & sic non indigeat ulteriori efficacia in illa linea intentionis, nec extra Deum accepta, nec in ipso Deo indiget alio distincto actu, quia ex parte Dei non dantur plures actus, nec unus causatur ab alio, tamen ille unus, & indivisibilis actus in seipso habens omnem efficaciam ordine intentionis, & executionis, non explicat sub quolibet conceptu omnem formalitatem, & habitudinem suam, & quatenus solum explicat habitudinem, & ordinem intentionis, intelligitur illa efficacia quasi inadæquatè, & partialiter, quatenus explicat efficaciam in sui initio, & principio; unde habet derivari, & causari complementum efficaciarum circa media, quia videlicet solum explicat vim efficaciarum prout attingit finem, & virtualiter potest causare, & derivare efficaciam in media, sed nondum intelligitur ut actu derivans, & actu explicans habitudinem executionis in mediis; & sic illa efficacia finis in linea intentionis expectat ulteriorem efficaciam circa media in linea executionis, non quasi extraneam à se, & per modum indigentiarum, sed tanquam in se inclusam, cum infinita sit, sed non explicantè quolibet conceptu omnem suam formalitatem, sed aliquando explicat solam efficaciam intentionis, deinde efficaciam executionis, hanc tamen derivatam ex priori, non quia sit duplex actus in Deo, nisi tantum virtualiter, & ex parte obiectorum, quia per diversos respectus ad obiecta explicatur. Unde ex eo quod sit illa efficacia omnipotens, & divina, solum sequitur quod in re utrumque ordinem includat, & intentionis, & executionis, & quod in re, & entitativè idem actus, & eadem efficacia sit intentionis, & executionis, non eadem formaliter, & respectus: sicut misericordia, quia divina est, est idem quod iustitia, sed non eodem modo explicatur in nostris conceptibus iustitia divina, & misericordia.

44 Instabis: ideò distinguuntur decreta plura in Deo, non quia sint plures actus ex parte Dei, sed quia sunt plures respectus ad diversos effectus, seu ad diversas formalitates quas connotant in obiectis, & iuxta obiectorum diversitatem, diversa decreta denominantur, sed ex efficacia intentionis nullus effectus resultat in obiecto qui connotetur ab ipsa, distinctus ab illo qui ex efficacia executionis resultat: nam circa quemcumque effectum seu formalitatem quæ assignetur, & datur intentio de illo & executio; & sic idem effectus ad utramque efficaciam spectat, & utramque petit: non ergo

ex distinctione istorum connotatorum sumitur diversa illa efficacia. Et præterea, quia si efficacia intentionis diversum effectum connotare debet in obiecto, ut ratione illius distinguatur ab efficacia & decreto executionis, illud decretum iam erit executionis etiam, & non solius intentionis, quia aliquem effectum ponit de facto in obiecto quo sigillat illud, & distinguit in ratione decreti intentui à decreto executivo.

Respon. quod ut *supra disp. 5.* attactum est agendo de efficacia divinæ voluntatis dividuntur Authores in hac parte: quidam enim ex stimant posse variari, & multiplicari decreta in Deo sine variatione aliqua reali, & physica ex parte obiecti connotat, sed solum propter diversum finem, aut diversam moralitatem in obiectis repertam, sicut pro sua voluntate potest alicui obligationem imponere, vel relaxare sine ulla mutatione reali ex parte hominis, quas opiniones *ibi* retulimus.

Specialiter autem in assignando diverso connotato circa decretum intentionis Dei, & decretum executionis, non modica dissensio est. Aliqui dicunt intentionem efficacem solum connotare rem ut futuram, seu existentem, id est de facto ponendam, non verò connotare actionem, seu agens aliquod, per quod fiat, quia hoc pertinet ad media, & ad ordinem executionis. Alij putant connotare existentiam cum aliqua actione, & causa, id est, cum illa à qua immediatè fit, & pender effectus; siue sit causa extrinseca siue intrinseca, quia sine his non potest res ut existens, & fienda, practicè, & in re, seu de facto concipi; actiones verò, seu motiva, aut causæ remotæ per quas disponitur quod res fiat, dicunt quod non pertinent ad ordinem efficacis intentionis, sed executionis. Alij in effectibus pendentibus à libero nostro arbitrio, & à mediis moralibus, seu liberis, dicunt intentionem non esse efficacem determinatè, nisi connotet etiam talem causam liberam, in effectibus autem physicis esse efficacem intentionem, sine causis secundis à quibus fit, sed earum dispositionem ad aliam voluntatem, quæ est circa media, pertinere. Alij efficacem intentionem non fieri nisi in aliquo medio, v. g. consensum in congrua vocatione; & sic illam connotari ab intentione efficaci. Alij denique censent intentionem efficacem non connotare aliquid; quod de facto fiat in effectum, ex vi illius voluntatis præcisè, sed quod fiet per aliam voluntatem ortam ex priori, eo quod illa intentio non exequitur per se effectum, sed per aliam voluntatem executionem, & sic connotat ordinationem in effectum, ut fiat per aliam voluntatem, quæ ordinatio est extrinseca denominatio amati per modum finis.

Nos ergo dicimus iuxta id quod *supra disp. 5.* 45 resolutum est, quod diversitas decretorum non exigit necessariò variationem, & diversitatem physicam ex parte obiectorum, sed sufficit diversa ordinatio in obiecto ad diversum finem, vel modum quo res illa potest fieri, vel ordinari, etiam nulla realitate vel reali mutatione sibi impressa. Sicut, v. g. potest Deus eandem rem velle conferre uni, titulo merè gratuito, alij oneroso, & ex iustitia, ut dare gloriam alicui ex meritis, alij omnino liberaliter. Vbi ordo ad merita non semper est ordo realis in gloria, quia nec semper merita existunt, neque ad illa ex natura rei ordinatur, sed ex beneplacito Dei, cum possit dari sine meritis; similiter quod sit illa gloria liberaliter donata, nihil intrinsecum ponit in ipsa gloria. Et tamen diversum decretum exigit una collatio gloriæ, & altera. Idem educitur ex allatis exemplis de impositione, aut relaxatione legis, aut voti, quæ sine ulla mutatione reali

310 Quæst. XXIII. De Prædestinatione.

reali à Deo fieri possunt, aut de condonatione extrinseca alicuius debiti præsertim pœnæ, quæ potest à Deo relaxari, sine alicuius realitatis impressione in eo, cui fit relaxatio. Nec verum est quod aliqui dicunt, hanc relaxationem fieri non posse nisi aliquo intrinseco interveniente, scilicet ablato fundamento illius moralitatis, & illius debiti, ut si alicui, qui ex contractu matrimonij est maritus, tollat Deus illum effectum moralem, qui est esse maritum, per suspensionem concursus quo conservabat vitam vxoris, qua moriente desinit esse maritus. Ita soluit P. Alarcon *tract. 3. de volunt. Dei, disp. 5. c. 3. n. 15.* Lepidè sanè. Quasi dubium sit quod per mortem vxoris, etiam naturali modo factam, cesset ille effectus moralis, qui est esse maritum: nec ad hoc oportet recurrere ad suspensionem concursus divini tollentis vitam vxoris; sed ex natura sua contractus ille talis est, quod mortua vxore desinit esse maritus, etiam si ab homine vel bestia occidatur, sine hoc quod recurramus ad suspensionem divini concursus, sed casus noster est, quod Deus de sua potentia absoluta potest etiam vivente vxore relaxare vinculum matrimonij, & tollere ab illo obligationem mariti, ita ut libere aliam ducere possit. Et tunc per illud decretum relaxativum obligationis, nihil reale ponit in marito, quia nihil reale exigitur ut sit solutus obligatione, quæ est purè moralis. Item decretum de annihilando hoc uniuerso, vel aliqua creatura, aut de non producendo creaturas possibiles, quid reale ponit in obiectis? cum potius omnem realitatem tollat annihilando, aut nolendo producere: ergo sine hoc quod connotet aliquam realem mutationem in obiecto, datur novum decretum in Deo.

46 Neque ex hoc sequitur de eadem realitate verificari duo contradictoria, quod nullo modo adnoti potest, quantumcumque res ipsa sit eminens, quia in contradictionis, negatio absolute, & sine restrictione posita tollit omnia. Et idèd nunquam concedendum est, quod simul possint de voluntate divina duo contradictoria verificari, v.g. quod simul Deus velit propter solam redemptionem Christum venire, & non velit propter solam redemptionem Christum venire. Hæc duo nunquam simul, & pro eodem instanti possunt de Deo verificari. Et ad legem contradictoriarum requiritur quod sint eiusdem de eodem pro eodem tempore, &c. Deus autem licet eodem actu possit velle, & non velle, & velle propter illam rationem, aut propter aliam, non tamen potest simul velle, & non velle, aut velle propter istam rationem, & non propter illam, sed potest velle unum, aut alterum, non simul utrumque. Quod verò eadem entitas, & actus utrumque possit in se immutata, dicitur id non esse inconueniens, quia non utrumque contradictorium simul potest, sed quodlibet diuisim, imò & omnia potest propter infinitatem, & eminentiam illius actus, qui potest ea quæ plures actus in nobis. Et licet in se sit immutatus, tamen volendo, & nolendo mutat res ipsas, non quidem semper ponendo in eis realitatem aliquam novam, sed quando vult, ponit, quando non vult, tollit, quia contradictorium causat; & idèd potius quia illa realitas actus contradictoria potest causare in obiectis, oportet quod non semper connotet realitatem, sed aliquando connotet illam, aliquando eius negationem.

47 Sic ergo actus intentionis efficax proptèr distinguatur ab executione, connotat in obiecto ordinationem aliquam, qua res illa dicitur amata ut finis, & intenta eo modo, & ratione, ut ex illa possit se-

qui appositio mediorum, & consecutio eius in executione, quod non fieret, si sic non intenderetur, quæ ordinatio, & directio passivè accepta in obiecto solum est denominatio extrinseca. Non est autem necesse quod efficacia intentionis ponat aliquid de facto executum in obiecto, & efficacia executionis aliud, sed illud quod de facto ponendum est per executionem, tangitur per efficaciam intentionis, ut ordinatum, & directum per modum finis, ut ex tali modo directionis sequatur mediorum præparatio, & rei executio. Nec requiritur plus connotationis ad diuersificandum decretum, quam noua ordinatio, aut nouus modus vel respectus, sub quo res sic est volita & decretata à Deo.

Et si adhuc instes: nam, ut communiter docere solent Thomistæ, 3. p. q. 1. a. 3. ex vi præstentis decreti Christus non veniret, si non veniret Redemptor, & ex suppositione peccati, nec poterat decerni per modum intentionis Christus venturus, abstrahendo à passibili, vel impassibili, eo quod efficax voluntas Dei debet esse de omnibus circumstantiis in particulari, quia respicit rem, ut de facto, & in re: Ergo supponunt quod efficax decretum etiam intentionis esse non potest, nisi supponendo omnia requisita ex parte mediorum, & executionis, quibus res illa in particulari, cum omnibus circumstantiis intendatur, si efficaciter intenditur.

Resp. dupliciter: Primò, quod decretum efficax de Christo venturo, vel circa quamlibet aliam rem, est cum omnibus circumstantiis, in particulari, vel per illum actum immediatè, & formaliter, vel per alium ex vi illius consecutum, & virtualiter in ipso contentum. Et quia decretum illud intentionis ita est efficax, quod ex vi illius natum est sequi decretum exequens cum talibus circumstantiis, & determinato modo, dicitur tendere in rem determinatè, & cum omnibus circumstantiis, quia est principium, & ratio sic tendendi, & in illo iam virtualiter continetur, non tamen per se immediatè, sed mediatè, & per alium actum ex se derivatum; ita tamen ex se secutum, quod si non derivaretur, non esset illudmet decretum intentionis efficax, sed aliud, sicut natura ex qua non sequuntur proprietates tales, non est talis natura. Secundò dicimus, quod aliud est loqui de subiecto, & conditionibus personalibus eius in particulari, & determinatè aliud de mediis quoad executionem. Ad intentionem efficacem requiritur quod feratur in rem individualiter, & cum his circumstantiis quæ pertinent ad illam in se, & ad eius existentiam de facto, aliàs non esset efficax intentio, aut si mutarentur conditiones illæ, mutaretur intentionis decretum. Ad disponenda verò media, & executionem, requiritur aliud decretum executivum, sed ex vi prioris oritur, & derivatum ex suppositione illius.

Quartò arguitur pro sententia Suarez ad probandum divinam providentiam non indigere necessariò prædefinitione ad providendum de omnibus: nam peccata omnia prædefiniti non possunt à Deo, & tamen habet circa illa providentiam: ergo divina providentia non indiget simpliciter prædefinitione. Non prædefiniti autem peccata à Deo certissimum est, quia non intenduntur à Deo: nec enim respiciens ad malum operatur. Et non solum virgetur hoc in ipsa malitia formali peccati, sed etiam in ipso materiali peccati. Nam materiale ipsum etiam Deus non prædefinit, licet ad illud concurrat quando de facto fit. Et ratio est, quia Deus non intendit absolute, & efficaciter materiale peccati

peccati, aliàs tenebitur Deus ex vi talis intentionis efficacia malitiam eius permittere, quia sine malitia adiuncta non potest illud materiale poni in rerum natura, cum sit ei essentialiter annexus defectus. Est autem contra rationem permissionis quod Deus obliget se ad permittendum malitiam: sic enim refunditur illa permissio, & illa malitia in voluntatem Dei, quia voluit sic intendere entitatem illam, ut obligauerit se ad permittendum malitiã: indirectè ergo malitia est volita ex vi prioris voluntatis. Et deinde quia prædefinitio actus liberi est ratio omnium mediorum, quæ ad illum ponendum requiruntur: ergo excitationis, & propositionis obiecti, & cæterorum requisitorum ex parte moralis motionis: hæc enim se habent ut media ad dictum finem, scilicet ad talem actum liberum eliciendū: ergo oriri debent ex voluntate efficaciter intendente dictum finem. Consequens autem est omnino absurdum, quia sic Deus esset causa illius moralis motionis ad materiale peccati, & suasionis atque excitationis ad ipsum, quod non potest esse sine influxu in ipsam malitiam, eo quod suadens ad entitatem peccati, non potest ab eius malitia præscindere.

Conf. quia Deus per illam intentionem absolutam, & efficacem prædefiniens non præstat maiorem efficaciam mediis, aut infert maiorem vim voluntari, quam ipsa media congrua, & vocatio, ac cætera, quibus voluntas illa libertate mouetur: hæc autem ex se habent sufficientem vim ad mouendum voluntatem, & præsciuntur à Deo quod in tali vel tali occasione mouebunt de facto: ergo sine illa absoluta, & efficaci intentione poterit Deus æquè bene ad effectum perducere illum actum liberum: ergo non indiget prædefinitione ista absoluta, & efficaci ad directionem suæ providentiæ.

Respon. quod nos ad illa extendimus providentiam, & prædefinitionem Dei, ad quæ extenditur eius causalitas, & operatio, ita quod omnia quæ ab eo procedunt, & causantur per executionem suæ potentia, diriguntur per suam providentiam, & prædefiniuntur ab eius absoluta intentione: hæc enim est regula qua utitur D. Thom. in hac qu. 22. art. 2. ostendens omnia cadere sub diuinam providentiam, quæ cadunt sub diuinam causalitatem, scilicet omnia entia, ut entia sunt. Et *infr. qu. 25. art. 5. ad 1.* quod non potest esse quod aliqua faciat Deus quæ non præscierit, & præordinauerit; siquidem potentia causans effectiue non est aliud, quam executiua vis diuinæ directionis. Quare cum peccatum sub ratione malitiæ à Deo non causetur, quia ut sic est defectus à Deo, non effectus eius, consequenter neque præfinitur à Deo. Versatur autem providentia diuina circa illud, non causando aut intendendo, sed permittendo, & commissum postea puniendo, aut remittendo, quod pertinet ad aliam partem diuinæ providentiæ.

50 Ad id verò, quod additur de materiali peccati ut entitas quædam est, & sub conceptu entitatis, prout sic est effectus Dei cum sit vera entitas creata, & consequenter ab eius influxu, & concursu dependet, quod ita certum indicat S. Thom. in 2. dist. 37. qu. 2. art. 2. quod oppositum dicit esse errori propinquissimum. Quid enim tam propinquum errori, quam ponere entitatem veram, & creatam, & à Dei influxu, & causalitate non pendentem? Hæc ergo entitas, sicut in eo quod entitas est, à Deo causatur, ita in ratione entitatis à Deo intenditur, & præordinatur, quia non fortuitò, nec casualiter, sed ex fine, & intentione præmeditata causat illam; & sic prædefinit. Nec maior difficultas est in

prædefiniendo illam, & intendendo ex aliquo fine, quam in causando, & exequendo, cum executio sit regulata in Deo, & ab aliqua directione, & fine descendens per providentiam. De quo *alibi* latius agendum est Deo dante, scilicet in 1. 2. tractando circa qu. 79. de causalitate Dei in actum peccati. Nunc quod attinet ad argumentum. Respondeo ad primam probationem, quod ex intentione absoluta, & prædefinitiva illius entitatis, ut entitas est, solum obligatur Deus ad dandum suum concursum liberæ voluntati ad id quod est effectiue in tali entitate sub ratione effectiui, & ad constituendam illam in esse entis, & in ratione effectus, in rerum natura, & ad ipsam cooperationem causæ liberæ in quantum entitas est, in linea, & ordine cooperationis entitatiuæ, quia totum quod entitatis ibi est, Deo subordinatur, & Deus solum obligatur ad dandum id quod se habet ut medium, vel ut conditio ad esse illius entitatis, & illius actus, ut sit in rerum natura tanquam effectus Dei. Permissio autem malitiæ non conducit ut ille actus, & illa entitas sit in rerum natura, tanquam effectus Dei, sed ut deficiat ab entitate; & sic in rerum natura deficiendo, & cum priuatione. Hæc autem priuatio, & hic defectus non conducit ad esse, sed recedit ab esse. Vnde non obligatur Deus ad permittendum hanc malitiam absolute, & ex se, & ex prima illa absoluta intentione sua, sed ex aliqua suppositione causæ creatæ, ut defectibilis; & idè iam nō influit ibi prædefinitio, & absoluta voluntas, sed procedit ex suppositione alicuius creati, atque adè cessat prædefinitio, quæ ex absoluta voluntate procedit, & influit in omnia prædefinitioni subiecta. Vbi verò incipit Deus operari ex præsuppositione alicuius creati, interruptitur prædefinitio, & operatur Deus permissiue supponendo defectibilitatem causæ creatæ. Nec tamen nego posse Deum prædefinire permissionem peccati (non dico peccatum ipsum, sed permissionem illam) ex alio fine, v. g. propter humilitatem, aut pœnitentiam, aut quid simile, de quo *infra* agetur. Sed dicimus quod ad permissionem malitiæ non obligatur Deus ad hoc ut ponatur peccatum, quantum est ex vi suæ prædefinitionis, licet ex intentione eliciendi multa bona ex malis, possit intendere illam permissionem.

Et ad argumentum quod non potest illud materiale peccati poni in rerum natura sine illa malitia, quia est illi essentialiter annexa: ergo Deus tenetur illam velle, seu permittere ex intentione volendi illud materiale ponere in rerum natura.

Respon. quod illud materiale non potest esse in rerum natura sine illa malitia, distingo, ut materiale defectiosum est, & ortum ex causa defectibili, transeat; ut præcisè entitas est, & quid effectiue nego: Vnde licet non sit illud materiale, & illa entitas de facto, & in re sine tali malitia, non tamen illa malitia est conducent ut sit, & habeat esse in rerum natura, sed potius deficit ab esse, & ab entitate, dum deficit à primo ente. Deus autem ex vi suæ absolutæ, & efficacia intentionis solum obligatur ad ponendum id quod conducit ut res sit, & ad eius esse, non quod deficit ab esse, licet sine illo defectu non sit; & sic ex vi absolutæ intentionis non obligatur ad permittendum, sed solum ad ponendum ea quæ conducunt ad esse; & hæc potius opponuntur ipsi malitiæ, & defectui, non autem permittunt illud: nam ideo potius illud malum, & ille defectus non corrumpit totum bonum, quia Deus sustinet aliquid de actu, & de bono in illa entitate, sustinere autem bonum ne penitus cor-
parum

312 Quæst. XXIII. De Prædestinatione.

rumptur à malo, non est permittere malum, quia permittere est cedere ipsi, non sustinere contra illud. Vnde quia Dei concursus, & causalitas ita operatur esse illius entitatis, quod detinet ne corrumpatur tota à malo, tantum abest quod sit causa etiam per accidens, & indirecta mali, quod potius illi opponitur concurrente ad id quod effectuum est in entitate peccati.

52 Dices: Si Deus non obligatur ex vi intentionis absolutæ permittere malum: ergo potest stante illa absoluta intentione entitatis peccati omittere, & suspendere permissionem: ergo vel tunc non erit materiale peccati, & frustrabitur intentio efficax Dei, vel erit materiale peccati sine malitia adiuncta, quod repugnat, cum sit illi essentialiter annexa, ut in odio Dei.

Respon. distinguendo consequens: Ergo potest omittere, seu suspendere permissionem, quantum est ex vi intentionis prædefiniens, transeat, quantum est ex vi adiunctæ causæ defectibilis, & ex illa suppositione causæ defectivæ, nego. Itaque non negamus, Deum obligari ab permittendum defectum, sine quo illud materiale peccati non est in rerum natura; sed negamus ad id obligari ex vi suæ absolutæ prædefinitionis, quia hæc solum respicit esse illius entitatis, ut entitas est, & ea quæ conducunt ad esse, non verò ea quæ deficient ab esse. Deus autem intendendo, & ordinando ea quæ pertinent ad esse in illa entitate peccati, potius opponitur malo, & defectui, quam illi præbeat occasionem, quia esse, ut esse, opponitur deficientiæ ab esse, & si Deus non sustentaret illud esse ne corrumpatur à malo, ipsum malum destrueret totum bonum: potius ergo illa intentio materialis peccati, quoad esse, opponitur malitiæ peccati, & sic ex vi illius non obligatur Deus ad permissionem malitiæ. Aliunde tamen obligatur, scilicet ex suppositione causæ defectibilis, cuius cooperationem Deus admittit in illo actu: hæc enim causa cum sit defectibilis, & illa entitas peccati, ut à tali causa fundet malitiam, postquam Deus prædefinit id quod entitatis est in tali actu, & in cooperatione causæ creatæ, videns ipsam non nisi defectibiliter posse cooperari, ex tali suppositione permittit defectum; si autem ex suppositione causæ creatæ: ergo non ex prædefinitione, quæ ante omnem suppositionem procedit. Et licet illa vellet absolute esse talem actum quoad entitatem, tamen quia est prædefinitio cum quadam præcisione, scilicet prout solum conducit ad id quod entitativum est, & effectuum in tali actu, non quoad omnia etiam ex parte defectuum; ideo ex vi illius prædefinitionis, non potest inferri quod actus erit absolute, & quoad omnia, sed tantum restrictivè, id est, quoad id quod entitatis est, licet ex adiuncta, & præiuncta causa defectibili, procedat Deus ad permittendum defectum; sed id iam non pertinet ad lineam prædefinitionis, sed alterius voluntatis operantis ex præsuppositione causæ creatæ.

53 Et hinc patet, quomodo non refundatur in voluntatem divinam malitia permissa, quia Deus non procedit ad permittendum malitiam ex vi intentionis suæ, sed ex suppositione causæ defectibilis adiunctæ: ex se enim potius tendit ad oppositionem peccati, & ad sustinendum id quod entitatis, & bonitatis est in illo actu, ne penitus à malo corrumpatur. Et tamen permittit malum, quia universalis prout est, & non debet impedire omnes causas defectibiles, sed potius permittere defectus, quam earum cooperationes impedire, sed ita potenter, quod sustinet bonum ne penitus corrumpatur à malo, & ex ipsis malis postea elicit multa

bona: hæc enim decent summum rerum Auctorem, ut sic impleatur omnis iustitia, unicuique permittendo in sua linea agere, & operari.

Ad secundam probat. ex dictis dicitur, quod 54 Deus ex vi intentionis prædefinitionis solum procedit ad ponenda, & præparanda illa media, quæ conducunt ad esse, & sub linea, & ratione formali entitatis, & eius quod effectuum est comprehenduntur, non ad ea quæ defectum ab esse involunt. Vnde persuasio, & propositio obiecti, & omnis moralis motio, licet quantum ad id quod entitatis, & perfectionis in illis est, à Deo deriventur (hoc enim nullatenus negari potest, quia omne ens creatum à Deo est) tamen sub modo moralis motionis non potest præcindere à defectu, & malitia, quia motio moralis non operatur, nisi mediante allicientia, & bonitate obiecti propositi; cum autem obiectum illius actus sit aliquid dissonum rationi, non potest movere, & trahere nisi adiuncta illa dissonantia, & defectu, nec ab illa potest præcindere in sua ratione formali: Et ideo Deus non potest concurrere sub modo illo morali fundato in attractione obiecti, nec illam motionem moralem ut talem prædefinire, sed hoc pertinet ad defectus permittos ex adiuncta suppositione causæ defectibilis. Quia tamen in his moralibus motionibus etiam aliquid entitatis reperiri debet, cum non sint purum nihil, ad illam entitatem Deus concurrat sub universalis ratione entis, non sub ratione defectus. Quod si concurrat, etiam intendit, & ex intentione præfinit, sicut de materiali actu dictum est.

Ad Conf. Respon. quod illa intentio Dei effi- 55 cax præbet mediis, & vocationi congruæ efficaciam ad movendam voluntatem, eo quod tota hæc efficacia est ex gratia Dei, & ex eius voluntate, non ex aliqua naturali contemperantia voluntatis nostræ cum vocatione: hanc enim congruitatem præiunctam, & præsuppositam à Deo, ex se autem, & ut descendit à Deo indifferentem, nos non agnoscimus, nec admittimus, cum non simus nos figuli formantes massam ex Deo indifferenter venientem, magis autem nos omnes in manu eius simus, ut lutum in manu figuli, Ierem. 18. Roman. 9. Congruitas ergo vocationis est congruitas à Dei voluntate orta, & ex eo efficaciam habens, & determinationem, non indifferentiam tantum, seu indeterminationem suspensam, quæ ex voluntatis acceptione determinetur. Nec tamen hæc efficacia determinata ex Deo descendens, & antecedens nostrum consensum infert vim voluntatis, & libertatem tollit, sed potius causat, quia ita universalis efficacia est, ut non solum faciat impetum, & vehementiam in actum, ut quomodocunque fiat, sed etiam modum eius causat, qui est libertas, quia totum hoc intendit prædefinitio illa Dei, scilicet ut actus fiat, & ut liberè fiat; & ideo efficaciam præbet mediis ut fiat actus talis non absolute, sed cum modo libertatis, etiam ab ipsa prædefinitione intento. Quod sæpius in superioribus explicatum est, & ita non est necesse repetere.

ARTICVLVS V.

Vnde sumatur certitudo diuinæ prædestinationis?

Certitudo seu infallibilitas prædestinationis diuinæ & concordia eius cum nostra libertate omnino coniunctæ esse debent, nec vna sine altera potest explicari. Vnde in effectibus prædestinationis, duo genera distinguenda sunt. Quidam enim fiunt immediate à solo Deo, vt prima excitatio, & vocatio, & vltima glorificatio, aut etiam infusio gratiæ, qualis fit in paruulis. Quidam fiunt consentiente voluntate nostra, vt omnia bona opera quibus satagimus certam nostram vocationem facere. Quantum ad primum, prædestinatio in illis effectibus neque indiget concordia cum nostra libertate, cum tales effectus non fiant voluntate nostra concurrente, & dependenter ab eius consensu, sed immediate & solum à Deo. Vnde neque certitudo prædestinationis quoad illos dependet ab alio quam ab ipsa operatione, & virtute Dei, seu efficacia eius; & sic in istis effectibus ponere prædefinitionem absolutam, & efficacem Dei antecedentem omnem consensum nostrum, cum à solo Deo fiant, omni difficultate vacat. Quantum ad effectus secundi generis, in quibus interuenit concursus nostræ voluntatis, & dependentia à consensu eius, difficultas est quomodo, aut vnde sumatur certitudo illius prædestinationis, cum ibi interueniat contingencia nostræ libertatis.

Et sunt tres modi dicendi:

1 Primus quod certitudo prædestinationis sumitur ex Deo tollente nostram contingentiam, & libertatem, & sic certitudo illa est necessitans; nec enim aliter putant assecurari diuinæ prædestinationis certitudinem, nisi contingentiam omnem auferendo à nobis. Et hic est modus hæreticorum negantium libertatem nostram cum causalitate diuinæ, & efficacia eius stare posse.

2 Secundus est eorum qui certitudinem diuinæ prædestinationis reducunt ad solam præscientiæ diuinæ certitudinem, qui ante omne decretum, quo tangat, & determinet voluntatis nostræ indifferentiam, scit suâ infinitâ scientiâ quid & quomodo se determinabit voluntas nostra, & ea determinatione scita, & præsupposita, Deus decreto suo subscribit, & determinat quod ita fiat non determinando indifferentiam voluntatis efficaciam suâ, sed determinatam supponendo, & ad executionem deferendo. Determinatio autem illa præuisa, & supposita non lædit libertatem, nec indifferentiam eius tollit, quia nascitur ab ipsamet inclinatione potentiæ, non ab extrinseca vi. Et hanc viam sequuntur Authores, & defensores scientiæ mediæ.

Tertius modus est asserendi certitudinem prædestinationis circa actus liberos, & contingentes, non desumi ex ablatione contingentiae, & præuentione Dei necessitante nos, vt dicunt hæretici, neque ex suppositione ipsius determinationis causæ liberæ, quam Deus præscit, & præsupponit antecedenter ad omne decretum suum, vt dicit scientia mediæ, sed ex causatione vniuersalissima ipsius diuinæ voluntatis, qua operatur omnia, & est radix, & principium omnis motus, etiam vitalis, & liberi, quantum ad modum liberi; & sic ipsa causalitudo non tollit libertatem, & contingentiam, quia causat illam; & si causat, non lædit. Causat etiam determinatam speciem, & indiuiduationem actus, quia ad

Ioan. à S. Thoma in 1. part. D. Thoma.

hoc ordinatur, vt voluntas exuat indeterminatorem seu suspensionem, & efficiat actum talem. Et denique certissima, & infallibilis est ex seipsa, quatenus sic causalitudo, & quatenus in causando vniuersalissima: sic enim nihil effugere potest causalitatem eius, & consequenter à nullo impedi, quia quidquid fit, ab ipso fit: non ergo fieri potest ab aliquo impedimentum causalitatis eius, quia si fit, ab ipso fit qui facit, seu operatur omnia, & sic iam non fieret impedimentum, quia ab ipso fieret. Et hanc viam sequuntur Thomistæ.

Nec indigemus modo ad hoc stabilendum nouo discursu, & probatione, cum hæc omnia relinquamus probata. Nam contra hæreticos dari, & saluari debere contingentiam, seu libertatem nostram, luce clarius est, & ex supra dictis *disput. 3. c. 5.* constat. Contra defensores scientiæ mediæ, negandam esse talem scientiam ostendimus latè *remo preced. disp. 20.* Concedendum esse in Deo dari prædefinitiones antecedentes efficaciter operantes, & decreta ex se, & ex natura sua determinata, & infallibilia, & non solum certitudine præscientiæ, ostensum à nobis est latè *suprà disput. 5.* & videri etiam potest *disp. 3. art. vlt. & in hac disp. art. 4. c. 5.* Quare nihil addendum in præfenti, sed tantum illa loca recurrentia sunt.

Vt autem præ oculis habeatur hanc fuisse mentem S. Doctoris, & quomodo sumit ipse certitudinem in prædestinatione, videndus est in *præfenti q. 23. art. 7.* vbi inquit, quod *Numerus prædestinatorum certus Deo dicitur, non solum ratione cognitionis, quia scilicet scit quot sunt saluandi: (sic enim Deo certus est etiam numerus guttarum pluiæ, & arenæ maris) sed ratione electionis, & definitionis cuiusdam.* Sed quia in hac auctoritate potest aliquis hærare; videtur enim S. Thom. solum prædefinitionem in Deo ponere pro effectibus principalioribus, vt pro prædestinatis, non autem pro minus perfectis, vt pro guttis aquæ, vel arenis maris, cum tamen in *q. 3. de verit. a. 7.* pro omnibus effectibus causarum secundarum ponat prædefinitionem in Deo; aduertendum est, quod vt in *eodem art.* se explicat S. Doct. non negat simpliciter res istas prædefiniri vt contenta, & deriuata ex intentione, & præordinatione generali antecedenti; sed negat non eligi, & prædefiniri speciali prædefinitione tanquam primò, & per se, & ratione sui intenta, & electa, sed ratione alterius, & vt ordinata ad aliud, & propter aliud, quod primò, & per se intenditur; hæc verò continentur, aut consequuntur ex aliis prius intentis, vt patet in *illis verbis art. Non per se eligit aliquem numerum in his quæ non principaliter requiruntur, sed solum propter aliud. Sed in tanto numero accipit huiusmodi, in quantum sunt necessaria propter aliud. Et inf. Vnde licet Deus sciat numerum omnium indiuiduorum, non tamen numerus bonum, vel culicum, vel aliquorum huiusmodi, est per se præordinatus à Deo.* Non ergo negat absolute esse præordinatum, sed non per se, seu propter se, sed propter aliud. Vnde tandem concludit, quod *est certus numerus prædestinatorum, non solum per modum cognitionis, sed etiam per modum cuiusdam principalis præfinitionis.* Non ergo negat omnem præfinitionem pro creaturis inferioribus, sed solum præfinitionem principalem. Item in *quest. 6. de veritate art. 3.* sic inquit D. Thom. *Non potest dici, quod prædestinatio supra certitudinem præscientiæ, nihil aliud addit, nisi certitudinem præscientiæ, vt si dicatur quod Deus ordinat prædestinatum ad salutem, sicut & quemlibet alium, sed*

D d cum

cum hoc de prædestinato scit quod non deficiet à salute : sic enim dicendo non diceretur prædestinatus differre à non prædestinato ex parte ordinis , sed tantum ex parte præscientiæ euentus , & sic præscientia esset causa prædestinationis : nec prædestinatio esset per electionem prædestinantis , quod est contra auctoritatem Scripturæ , & dicta Sanctorum. Vnde præter certitudinem præscientiæ , ipse ordo prædestinationis habet infallibilem certitudinem , nec tamen causa proxima salutis ordinatur ad eam necessario , sed contingenter , scil. liberum arbitrium.

5 Qui locus manifestissimus est , & valde notandus : In eo enim manifestè D. Thom. contradicit his qui totam certitudinem prædestinationis reducunt ad præscientiam , quam Deus habet præsuppositam ante ordinationem , seu decretum suum , quæ est scientia mediæ. Ponit autem D. Thom. certitudinem ex parte ordinis , seu ordinationis , aut decreti (idem enim sunt) & sic ex illo , non ex aliquo præsupposito , & præiusto debet sumi certitudo prædestinationis , siue hoc quod ex vi talis ordinis liberum arbitrium quod est causa proxima salutis ordinetur ad eam necessario. Et sic concordiam liberi arbitrii cum certitudine prædestinationis , non ex præscientia illa , sed ex ipso ordine prædestinationis desumit. Et demique reicit D. Th. quod aliqui dicunt , prædestinationem non addere supra communem prouidentiam , nisi præscientiam euentus pro prædestinatis qui non est pro non prædestinatis , non autem , quod diueria dona , & auxilia det prædestinatis quam non prædestinatis , sed æquæ indifferentem gratiam , quod iam *supra art. 1.* impugnauimus , & amplius dicemus *seq. disp.* tractando an præscientia boni vsus nostri possit esse causa prædestinationis , quod hic pro inconuenienti infert S. Thom.

6 Similiter etiam Aug. prædestinationis , & gratiæ infallibilitatem , non ex aliquo à Deo præsupposito & præiusto , sed ex ipsa diuina ordinatione , & operatione desumit , quia videlicet per prædestinationem solum præscit quæ ipse facit , & ordinat , non aliquid supponit quod præsciat , & non faciat. vnde dicit in *lib. de bono perseuer. cap. 18.* *Prædestinasse est hoc præscisse , quod fuerat ipse facturum.* Ergo prædestinationis certitudo non est præscientia eius quod supponitur , sed quod causatur à Deo : ergo habet certitudinem causalitatis , & ordinationis , non solius cognitionis ; imò in hoc etiam conueniunt Damasc. & D. Th. qui ipsum citat in *q. 12. de verit. art. 10.* quod ea quæ Deus prædestinat non sunt in nobis , vnde & prædestinatio quasi quædam præparatio dicitur , hoc autem aliquis præparat quod facturum est ipse , non quod alius. Explicat autem quomodo meritum nostrum non subiaceret prædestinationi , nisi secundum quod est ex gratia. Vnde id quod ex arbitrio nostro est , subesse dicitur prædestinationi per accidens , id est , per aliud , scil. per id quod ex solo Deo est , quod est gratia. Consent ergo Patres quod formalis ratio , quam prædestinatio respicit , est id quod Deus facit , in quantum est factum à Deo , non in quantum præsuppositum : ergo & certitudo eius ex Dei causalitate , & factura accipienda est , non ex præscientia alicuius præsuppositi ante omnem ordinationem & factionem suam.

7 Et in hac conformitate Aug. certitudinem , & infallibilitatem hanc semper ad ipsam præparationem , & operationem Dei reducit , non ad id quod præscit , & præsupponit ; vt videri potest in libro de *corrupt. & gratia* , tum in *c. 8.* vbi dicit , *Quis ignorat fuisse tunc perituram fidem Petri , si ea qua fidelis*

erat voluntas ipsa deficeret , & permanfuram , si eadem voluntas maneret ? Sed quia præparatur voluntas à Domino , ideo non posset esse inanis oratio. Ergo infallibilitas illa orationis Christi , & indeficientia fidei Petri , ex præparatione ipsa Dei sumitur , non ex præsupposito aliquo , & præscito ex parte voluntatis nostræ. Vnde subdit August. quod *Voluntas humana non libertate consequitur gratiam , sed gratia libertatem , & vt perseueret delectabilem perpetuitatem , & insuperabilem fortitudinem.* Pertinet autem ad infallibilitatem perseuerantiæ insuperabilitas fortitudinis , & perpetuitas delectabilis , & hoc totum dicit habere à gratia : ex gratia ergo est infallibilitas , non ex præscientia alicuius præsuppositi ex parte nostri , scil. consensus ante decretum & gratiam. Item in *c. 12. eiusdem libri* , versans illud Apostoli de Abraham , *plenissime sciens quia quæ promisit Deus potens est & facere* , subdit August. *Non ait quæ præscit , potens est promittere , aut quæ prædixit potens est ostendere , aut quæ promisit potens est præscire , sed quæ promisit potens est facere. Ipse ergo eos facit perseuerare in bono , qui facit bonos.* Sed sic est quod promissio Dei est infallibilis : ergo si solum promittit id quod facit , non id quod præscit aut supponit , utique promissio illa non de præscientia eorum quæ Deus supponit , sed de ordinatione , & prædestinatione eorum quæ facit , infallibilitatem trahit ; promittit autem Deus etiam consensum , & cooperationem liberam nostram , vt cum promisit Abraham obedientiam , & fidem gentium : ergo facit , & non solum præscit illa. Quod & August. expressit *lib. de prædestin. SS. c. 10.* *Quando , inquit , promisit Deus Abraham fidem gentium dicens ; Patrem multarum gentium posui te , non de nostra voluntatis potestate , sed de sua prædestinatione promisit. Promisit enim quod ipse facturum fuerat , non quod homines , quin etsi faciunt homines bona quæ pertinent ad colendum Deum , ipse facit , vt illi faciant quod præcepit , non illi faciunt vt ipse faciat quod promisit.* Ecce certitudo , & infallibilitas promissionis diuinæ orta non ex potestate nostræ voluntatis præiustæ : ergo neque ex determinatione nostræ voluntatis præiustæ ante omne decretum , & determinationem Dei , quia illa determinatio si sic præscitur , in potestate voluntatis comprehensa præscitur , vt dicunt defensores scientiæ mediæ : est ergo illa certitudo orta ex ipsa prædestinatione qua Deus facit id quod promittit. Rursus : sed Deus promittit determinationem ipsam , seu actum , & consensum liberum , nempe fidem , & cultum Dei , qui sine illa determinatione , & consensu non stat : ergo etiam in hoc promisso , infallibilitas oritur , non ex ipso opere libero præsupposito , & præiusto , sed ex eo quod Deus facit , vt faciamus illud , sicut dicit Aug. Ergo illud facere Dei , quod facit vt faciamus , infallibilitatem habet ex eo quod Deus facit , non ex eo quod præscit nos facere. Ex natura ergo sua est infallibile in quantum est faciens nos facere : sic enim infallibilem reddit promissionem Dei , non ex natura sua indifferenter , & indeterminatè se habet offerendo voluntati concursum , vt ipsa determinet præsciendo tantum , non faciendo quod ipsa determinet : sic enim promitteret Deus infallibiliter , non quia ipse facit , sed quod nos facturos præscit de nostræ voluntatis determinatione , & potestate. Plura loca August. in superioribus adduximus , & ponderauimus , ibi videri poterunt.

Omittimus referre & soluere argumenta contra hoc , quia solum sunt illa quæ vel alstruere conantur scientiam mediā , vel destruere efficaciam decretorum

rum Dei ex natura sua, aut prædefinitionum antecedenter ad nostram libertatem, quasi ex tali efficacia destruat libertas. Et idè in locis supra citatis videri possunt, ubi à nobis latè soluta sunt.

DISPUTATIO VIII.

De causis prædestinationis.



AVSÆ prædestinationis sumi possunt ex parte Dei, vel ex parte nostra. Ex parte Dei, sicut electio, seu intentio efficax quæ versatur circa finem, est causa præordinationis & præparationis mediorum. Ex parte nostra, sicut aliquod meritum, vel præcedens, vel præsum, aut bonus aliquis usus nostri liberi arbitrij potest esse initium, occasio vel motuum prædestinandi aliquem & dandi ei primam gratiam, vel fidem, aut vocationem. Et idè de omnibus istis in præsentis agendum nobis est.

ARTICVLVS I.

Proponitur difficultas: Virum absoluta electio ad gloriam sit ante præmissa merita, vel subsequatur illa?

Difficultas hæc, quæ non leniter his tēporibus exagitari solet, pendet ex his quæ articulo ultimo præced. disp. tacta sunt circa efficaciam intentionis diuinæ, ex qua dimanat prædefinitio, & præordinatio circa media: pertinet enim electio personæ determinata, & in singulari ad voluntatem intentionem finis, quia scilicet finis iste qui est beatitudo, est volitus huic personæ in singulari, & persona ipsa designatur, & eligitur ad talem finem. Nec enim agimus nunc de voluntate illa inefficaci, qua Deus vult omnibus beatitudinem, quia illa voluntas cum sit inefficax, & antecedens, solum fertur in ipsa media sufficientia, & prouidet hominibus quod possint saluari, & ordinat omnes ad beatitudinem, & hoc totum efficaciter vult, & efficaciter consequitur, scilicet quod omnes ordinati sint ad salutem, & omnes habeant sufficientia media, & remedia ad vitam æternam; sed non est illa voluntas designatiua in particulari, & electiua personarum efficaciter ad beatitudinem, quia ad illam voluntatem non spectat designare personas, & discernere eas quæ de facto consequantur, & quæ de facto excludantur à regno, sed communia remedia, & sufficientia ad salutem offerre, & proponere omnibus indiscriminatum, & sine discretionem reiciendorum, & saluandorum.

Omnes ergo ferè in hoc conveniunt, quod antequam diuina providentia & prædestinatio ordinet de mediis per quæ prædestinatus introducendus est ad gloriam, antecedit voluntas de fine, qua vult illis beatitudinem, siquidem cum media illa quæ præparantur, & prævidentur à Deo sint media consecutiua illius finis, non possent illa præparari, & disponi, nisi supponendo notitiam & amorem talis finis, ad quem diriguntur, & ordinantur, aliàs cæco, & ignorant modo præpararentur media, si commensuratio eorum ad suum finem non videretur; & rursus si ille finis non esset volitus, & in voto habitus, superflue talia me-

Ioan. à S. Thoma in 1. part. D. Thoma.

dia præpararentur, siquidem tota ratio præparandi, & totum motuum, finis aliquis est, cuius gratia, & propter quem fiunt: Si autem gratia alicuius finis, & propter aliquem finem præparantur, siquidem ut media præparantur, & ratio motiua propter quam, seu id cuius gratia sunt volita media, finis est: ergo non potest intelligi mediorum præparatio in prædestinatione diuina, nisi finem supponendo volitum, cuius gratia illa præparantur, & amantur. Hucusque difficultate caret ista quaestio.

Succedit difficultatis punctus, & multorum ingeniorum tortura: An postquam Deus sic per simplicem, & antecedentem voluntatem omnibus hominibus voluit finem istum proponere qui est gloria, iuxta quem finem à se volitum potest operari, & negotiari circa media, tamen ad habendum actum illum, quo non solum vult istum finem communiter, sed applicatè vni præ alio, eligendo vnum efficaciter, & reiciendo alium à regno, prius eligit vnum præ alio ad gratiam, & ad media, seu merita, & ultimò ad gloriam, ita quod electionem ad gratiam qua discernit istum ab illo nulla antecedant merita: electionem verò ad gloriam antecedit electio ad gratiam, & merita gratiæ: an vero contra incipiat discernere prædestinatum à non prædestinato per electionem, & applicationem efficacem vnius ad gloriam præ alio, & deinde subsequatur electio ad media, & ad gratiam, seu ordinatio de mediis; atque ita illa electio efficax, & applicata seu determinata istius personæ ad gloriam præ alia, sit absoluta, non præsupponens gratiam aut merita præmissa ex parte subiecti, post ipsam autem electionem, & ordinationem huius personæ ad gloriam præ alia incipiat ordinatio de mediis, & de gratia illi danda. Et vno verbo, punctus difficultatis est an discretio efficax inter prædestinatum, & non prædestinatum incipiat à gloria, an à gratia?

Sententia.

Duplex est celebrior in hac difficultate sententia, altera quæ electionem, & discretionem primam prædestinatorum à non prædestinatis incipit à gloria, altera quæ incipit, & desumit à gratia. Minutiores alias sententias inter istas duas, statim referemus. Itaque vtrique sententia ad electionem determinatam personarum faciendam, aliquem finem ex parte Dei supponit, ne absque fine fiat electio: Vtrique ex parte hominum nulla merita supponit ad primam istam electionem faciendam, ne in Pelagianorum scopulos, & in Semipelagianorum syrtes illidat: nam qui dicunt Deum incipere electionem discretiuam prædestinatorum à gloria, dicunt ita gratuito incipere electionem Dei, ut nulla merita, nec etiam ex gratia supponat in homine: alia verò sententia quæ incipit electionem à gratia, nulla merita ex nobis, seu ex naturali opera contra Semipelagianos supponit. Deinceps verò in electione ad gloriam, quia est electio ad coronam, & præmium, merita supponit, sed ex gratia. Differunt verò istæ sententiæ, quia.

Prima, scilicet quæ incipit electionem à gloria, intendit saluare efficacem intentionem finis antecedenter ad media, & electionem determinatam ad gloriam reputat pro fine intento, quæ dicit efficaciter debere intèdi, & in singulari ac determinate ante omnia media, nec debere haberi media pro

D d 2

motiue

motiuo eligendi ad finem. Concedit tamen alteri sententiæ debere habere media pro effectu; & sic dicere ordinem ad illa, nec eligi ad beatitudinem ut ad premium, seu coronam, nisi supponendo merita, non ut motiuum eligendi, sed ut effectum.

Secunda verò sententia, quæ incipit electionem à gratia, dicit quod determinata applicatio finis ad hanc personam, seu electio efficax personæ ad finem cum reiectione alterius, supponit aliquem titulum in ipsa persona, ratione cuius ei detur, & applicetur, & cum intendatur dari illi ut corona, & premium, necessariò supponit meritum, cuius intuitu, & titulo detur. Et cum hoc meritum sit ex gratia, supponit electionem ad gratiam. Concedit autem primæ sententiæ debere prius intendi finem quàm media, sed non esse necesse quod intentio finis denominetur efficax, & incipiat esse applicata determinatè huic personæ, quàm alij, ante præiussa media, quando ex ipsis habetur titulus, & ratio propter quam de facto, & efficaciter dandus est isti ille finis potius quàm alteri, seu præ alio. Unde in hoc quod est efficacem voluntatem finis, non præcedere ut efficacem ipsam præiussionem mediorum, præsertim in applicatione finis ad hanc personam præ alia, cum ex mediis dependeat, motiuum, & titulus applicationis, vult sententia ista id reduci ad meram opinionem, nec ex Scriptura & Patribus vllum contra illam induci argumentum.

6 Igitur primam sententiam tenent communiter Thomistæ, & etiam extra eorum scholam stat pro hac sententia Caiet. *hic art. 4.* Alvarez *lib. 5. de Auxiliis disp. 37.* Gonzalez *hic disp. 73.* Bannez *super hanc q. art. 4. dub.* Soto *in epist. ad Rom. c. 9. digressionem de prædestin.* Et ex antiquis Capreolus, Deza, Heruæus, Ægidius, & alij quos citat Villegas *in controu. controu. 13. cap. 2.* & Erize *de prædestin. disp. 23. c. 3.* Eandem sententiam sequitur P. Suarez. *lib. 1. de prædestin. c. 8.* Bellarminus *tom. 3. lib. 2. de gratia & liber. arbit. c. 15.* Granados *1. p. tract. 7. disp. 4. sect. 3.* Ruiz. *de prædestinatione disp. 4. & seqq.* Citat etiam Erize *vbi supra n. 24.* Toletum, Salmeron, Curiel, Eniquez, & alios.

Pro 2. sententia stant P. Vasq. *1. p. disp. 89. c. 2. & disp. 90. c. 2. & 3. p. disp. 23. c. 7.* Mol. *hic q. 23. a. 2. & 3. & a. 5. disp. 1. memb. 6. & 11.* Becanus *tom. 1. c. 11. de volunt. q. 4. n. 5. & c. 14. de prædestin. q. 4.* Lessius *disp. de prædest. sect. 2.* vbi citat plures ex antiquis, Alentem, Bonau. Richardum, Albertum, & alios; sequitur eandem sententiam P. Alarcon. *tract. 4. de prædestin. disp. 2. latissime.*

7 Inter has duas sententias intercedunt aliæ minutiones, quæ vel moderari istas duas voluerunt, vel omnino negare. Nam in primis aliqui apud P. Suarez *lib. 1. de essentia prædestin. c. 8. n. 3.* existimant nullum ordinem dari inter decretum dandi gloriam, & dandi gratiam, sed vno eodemque simplicissimo, & indiuisibili decreto, & eodem signo rationis contineri & voluntatem dandi gloriam, & voluntatem dandi gratiam, nec distingui voluntatem circa finem, & circa media. Et fundantur in hoc, quod voluntas mediorum solum distinguitur à voluntate finis, vbi interuenit aliqua inquisitio, & consultatio de mediis; vbi autem media sunt perua, & sine vlla consultatione patent fini, eodem indiuisibili actu quo tangitur finis, & eodem signo rationis tanguntur media. Tunc enim vtrumque necessaria connexionem attingitur, scilicet gloria propter merita, & merita in finem gloriæ: non ergo est necesse distinguere hæc decreta & voluntates.

8 Alij per aliud extremum ita multiplicant ordines decretorum in Deo, quod non solum circa diuersa obiecta, sed etiam circa vnum, & idem distinguunt decretum intencionis, & executionis efficacem, v.g. circa gloriam ponunt intencionem efficacem, & etiā efficacem executionem. Quem modum P. Suarez *cit. loco n. 14.* indicat sibi placere, ita ut Deus intendat primò efficaciter gloriam absolutè, deinde per alium actum efficaciter velit eammet gloriam exequi, & hic secundus actus supponit merita præiussa, quia Deus non dat executioni gloriam, nisi secundum formam iustitiæ, & consequenter ex meritis, & hoc secundum est quod ibi dicit Suarez sibi placere. Primum verò etiam non reuincit, cum non neget Suarez, sed potius affirmet cum prima sententia absolutam, & efficacem intencionem dandi gloriam ante præiussa merita. In specie autem illas duas voluntates efficaces circa eandem gloriam distinguit Arrubal. *hic disp. 74. c. 2.* quia existimat oriri ex diuersis motiuis, ut primò Deus ex motiuo beneficentiæ, & misericordiæ, seu gratiæ eligat ad gloriam sine apprehensione alicuius debiti, deinde post præscientiam meritorum ex honestate remunerationis, & debito iustitiæ vult Deus efficaciter dare eandem gloriam. Hoc autem idè fecit Arrubal, quia ipse existimat Deum habere intencionem efficacem, & absolutam de aliquo fine, v.g. de gloria, non in se, sed in aliquo medio, v.g. in gratia congrua, siue efficaci auxilio; & sic intendendo gratis, & ex misericordia sua dare gratiam, in ea vult etiā absolutè, & efficaciter dare gloriam ibi inclusam, ex eodem motiuo. Non autem concedit Arrubal gloriam in seipsa prædefiniri absolutè, & efficaciter antecedenter ad merita, sicut etiam *præc. disp. art. vlt.* vidimus, & impugnauimus euisdem Arrubalis sententiam de prædefinitione diuinæ, & intentione efficaci circa aliquem finem, ut continetur in aliquo medio. Et per hoc putauit Arrubal se opiniones *suprà* positas aliquatenus conciliare, ponendo prædefinitionem absolutam, & efficacem gloriæ ex motiuo gratuito, & ex misericordia, sed non in se, sed in medio aliquo, nempe in gratia congrua, & efficaci, & similiter ponendo decretum dandi gloriam ex titulo oneroso, & post præiussa merita. Ita docet *disp. 68. & 73. & 74.*

9 Tertio, alij Authores defensores scientiæ mediæ conati sunt alia via (videtur ipsis noua & non vulgaris) conciliare primam & secundam sententiam, quibus fauet Erize *disp. 23. de prædestin. c. 13. & 14.* Et dicunt, quod post scientiam mediam qua Deus videt ante omne decretum suum cuiuslibet auxilij congruitatem, vel incongruitatem, si tali occasione tali voluntati detur, habet Deus decretum quoddam circa gloriam aliquorum, & non aliorum, in quo incipit discernere prædestinatos à reprobis, & hoc decretum est absolutum ex parte Dei, sed conditionatum ex parte obiecti, quia amat Deus gloriam prædestinatis sub conditione si detur ex illa vocatio congrua, qua ratione etiam conditionata non amat reprobis gloriam. Et ex hac speciali voluntate conditionata circa gloriam electorum, nascitur alia voluntas dandi ipsis prædestinatis de facto, & absolutè efficaciter media illa congrua, & consequenter gloriam. Et ita dicunt quod in voluntate efficaci, & absoluta, & quæ præcedit omni conditione purificata, decretum de gloria, supponit merita & voluntatem dandi gratiam. In voluntate autem conditionata dandi gloriam, si ad sit vocatio efficax, præcedit voluntas dandi gloriam ipsam voluntatem absolutam dandi merita, & congrua auxilia, & hæc voluntas est propria iam & specialis prædestina

prædestinatorum, & in ea secernuntur à reprobis, quia est principium virtuale alterius secundi decreti absoluti dandi ipsam gratiam congruam, & media efficacia. Sed non video quomodo probare possint hi Authores quod sit proprium & speciale prædestinatorum velle illis gloriam sub conditione alicuius auxiliij efficacia, & congrui, si eis detur, cum nullus sit reprobis, cui non videat Deus per eandem scientiam conditionatam affuturam fuisse gloriam si eis daretur auxilium aliquod pro illis efficax, quod sine dubio videt dari posse. Cur ergo eis etiam non amat gloriam sic sub conditione futuram, cum eis etiam conveniat? Quare in sola illa absoluta voluntate dandi media efficacia his, & non illis, potest incipere discretio prædestinatorum à reprobis in ista sententia, & hoc est recidere in opinionem Vasq. aut Arrub.

Denique alij sic voluerunt componere electionem ante merita, & post merita præuisa, quod quasi patrimonij legitima diuidatur, & dicunt quosdam Sanctos eligi ante præuisa merita, quosdam post illa. In prima serie ponunt Sanctos aliquos excellentissimæ sanctitatis, ut qui fuerint in gratia confirmati, & non fuerint eis liberum ex vi talis intentionis in gratia non perseverare. In hac classe ponit Catharinus B. Virginem, Apostolos, & alios eximia sanctitatis. *lib. 1. de prædestinatione Dei c. ult. & lib. 3. cap. 1. & 2. & aliis locis.* At verò P. Lessius *disp. de prædestinat. sect. 5. num. 56. ad 4.* solam B. Virginem in hac serie numerat, quam docet ante merita præuisa fuisse electam, & præelectam.

In his omnibus non est difficultas de prædestinatione Christi ad filiationem Dei naturalem, & ad gloriam animæ: talis enim prædestinatio ex nullis meritis fieri potuit. Parvuli prædestinantur quidem ad gloriam, etiam sine meritis propriis, sed non sine alienis, quia in sanguine Christi, & eius meritis saluantur. Vnde etiam pro his currere potest difficultas, an Deus incipiat eos discernere à non prædestinatis ex volitione gloriæ absoluta, an ex præordinatione mediocum efficaci, v.g. ex præparatione Baptismi, &c.

ARTICVLVS II.

Mens Augustini & S. Thomæ ex Scriptura.

Tanta Authorum diuissio non obscurum signum est, aliquid inuenisse in fundamento illius primæ sententiæ quod vix possit deuorari, & consumi, præsertim in modo loquendi Scripturæ, & Patrum, qui electionem ad gloriam gratuitam, & liberalem solent agnoscere; nec potest hoc conuenienter explicari, si non inuenitur nisi post merita, quæ debiti titulum in gloria inducunt, liberalitatis minuunt. Et præterea quia inuersus ordo non sæpe visus est in recta, & ordinata prouidentia, à mediocum positione efficaciam ordinationis accipere, sed executionis tantum: omnis autem executio deriuatur ex voluntate finis, indeque robur, & efficaciam sumit, ex fine autem solum inefficaciter volito, tepida, & frigida executio, & conatus nascitur. Si ergo rectus iste ordo est, ut à fine efficaciter volito, & feruide, eatur ad executionem, quomodo deesse potest in summo ordinatore? Ut ergo à Scriptura incipiamus, aliqua loca sunt, quæ indicant præordinationem circa gloriam antecedere omnem actum nostrum, seu meritum, & omnem gratiæ effectum, licet ab oppositæ sententiæ Authoribus eludi so-

Ioan. à S. Thomæ in 1. part. D. Thomæ.

leant, dicendo, quod vel loquuntur de via æterna, & gloria prius volita, non in se, sed in gratia in qua continetur, ut in semine, vel loquuntur de præordinatione facta ab æterno, quæ habet pro effectu temporalem executionem gratiæ vel fidei, aut vocationis, ipsa autem præordinatio, & electio æterna est de ipsamet gratia, & de ipsamet fide, aut vocatione.

Cæterum si Scripturæ loca diligenter inspiciantur, & conferantur inter se, inueniemus Scripturam ita attingere, & tractare de electione qua prædestinatos, & sanctos eligit Deus, quod etiā illa electio, prout tangit beatitudinem, & non solum ut tangit gratiam dicitur gratuita, & ex gratia, & misericordia Dei facta: ergo præcedere debet merita: nam si solum subsequitur, & post præuisa merita datur, semper illa electio, prout tangit gloriam, & beatitudinem, esset non ex gratia, sed ex debito & iustitia, quia solum tangeretur ut innixa meritis, & in vi illorum data: non ante illa. Et ad hoc suppono negari non posse quod aliquando Scriptura loquitur de electione hominum ad gloriam, & ad vitam æternam, ut erit in patria, & non solum ut est in semine, & in gratia, & in hac vita: Si enim omnia loca Scripturæ explicare volumus de electione ad gratiam, & nulla loquuntur de electione ad gloriam, prout in alia vita, vix restat nobis via ad cognoscendum electionem prædestinatorum ut prædestinati sunt. Patet hoc, quia prædestinati, in quantum tales, eliguntur ad gloriam in se, & non solum in semine, & prout contenta in gratia, quæ datur in hac vita; tum quia eliguntur ad aliquid perpetuò duraturum, quod est gloria, seu gratia consummata; tū quia ad gloriam in semine, id est, ad gratiam, etiam reprobi quandoque eliguntur: omnes enim Angeli, etiam qui ceciderunt, in gratia creati sunt, & status innocentie gratiam habuit, sed non ille status habuit gloriam; & Iudas de gratia Apostolatus cecidit, cum fuisset electus ad illam. Prædestinati ergo secernuntur à reprobis, quia eliguntur ad gloriam, ad quam isti non eliguntur, vel ad finalem perseverantiam in gratia, quæ est necessariò connexa cum assecutione gloriæ; cum tamen plures effectus ante perseverantiam habeat prædestinatio electorum; & sic si in Scriptura tangitur electio prædestinatorum, ut distinguitur à reprobis, debet utique tangi electio ad gloriam, & non sistere in electione ad gratiam pro hac vita, & prout est gloria in semine, sed ad gratiam, ut in æternum duratura, quæ utique est gratia consummata, & cum gloria.

Hoc ergo stabilito, quod à nullo videtur posse negari, formo sic rationē: Scriptura loquitur de electione ad gloriam in se, & prout duratura est in æternū, in alia vita, & non solum prout est in gratia, & in semine in ista; sed in eisdem locis, quibus loquitur sic de ista electione prædestinativa, & ad gloriam in se, significat illā esse gratuitam, & ex voluntate, & gratia mera Dei, quod non potest intelligi de ipsa gloria in executione: sic enim datur ex meritis, ut corona iustitiæ: ergo intelligendum est de ipsa gloria in intentione, ita quod obiectum & materia illius intentionis fuerit gloria danda per modum coronæ, sed motiuum proponendi illam fuerit solum diuinum beneplacitum, & misericordia, sicut qui vult ex liberalitate exhibere spectacula, in quibus tamen, athletis non vult dare præmia, nisi ob labores. Immo cum in omnium sententia secundum sanam, & Catholicam doctrinam finalis perseverantia detur merè gratis, & ex nullo motiuo meritourum, nec præcedentium, nec futurorum; sumitur inde sufficientissimum argumentū quod primū motiuū proponendi gloriam & eligendi

D d 3

determi

determinatas personas ad illam, fuit mera gratia, & misericordia Dei, non verò præcedentia merita, vel futura præuisa, vt statim ponderabitur.

Minor huius argumenti, scilicet quòd Scriptura loquendo de electione ad gloriam in se, & vt distinguitur à gratia in hac vita, loquatur de electione gratuita, & ex mera gratia, ostenditur. Et in primis occurrit locus ille Ioannis 1. *De plenitudine eius omnes accepimus, & gratiam pro gratia*, qui iuxta interpretationem Aug. intelligitur de gratia consummata, quæ est gloria, pro gratia prima quæ est in hac vita: Ergo supponitur quòd gloria in se, vt distinguitur à gratia, quæ est gloria in semine, etiam gratia est, & gratioso modo datur à Deo, sed non datur in executione, quia sic datur vt corona, & ex meritis: ergo in intentione, quatenus Deus gratuito motiuo, & ex pura misericordia voluit beatitudinem de facto esse assequibilem, & peruiam aliquibus hominibus per modum præmij, sicut qui ex thesauris suis depromit munera, danda athletis per suam pugnam meritis, illa exhibitio munerum, liberalitas est ex parte instituentis agonem, licet ex parte athletarum per meritum sit acquirenda. Verba August. sunt lib. de gratia & libero arbitrio cap. 9. cum enim dixisset in calce cap. 8. quòd vita æterna, quæ bonæ vitæ redditur, Dei gratia est: & ipsa enim gratis datur, quia gratis data est cui datur, & quòd hæc, quia præmium illius est, gratia est pro gratia, vbi clarissime loquitur de vita æterna in se, & formaliter vt distinguitur à gratia, quæ solum in semine est gloria, subdit in c. 9. ad hoc magis explicandum sic. *Vtrum autem legerimus in scripturis sanctis gratiam pro gratia, forsitan queritis, sed habetis Evangelium secundum Ioannem tanta luce clarissimum, vbi Ioannes Baptista de Domino Christo dicit, Nos omnes de plenitudine eius accepimus, & gratiam pro gratia. Ex eius itaque plenitudine accepimus pro modulo nostro, quia unusquisque proprium donum habet à Deo, alius sic, alius autem sic, & ipsa est gratia, & insuper accipimus, & gratiam pro gratia, quando nobis vita æterna redditur. De qua dixit Apostolus. Gratia autem Dei vita æterna in Christo Iesu Domino nostro, cum prius dixisset, Stipendium peccati mors. Vbi cum posset dicere, & rectè dicere, stipendium autem iustitiæ, vita æterna; maluit dicere. Gratia Dei vita æterna, vt hinc intelligeremus non pro meritis nostris Deum nos ad æternam vitam, sed pro sua miseratione perducere. Vbi pondero apertissime loqui Augustinum de vita æterna, & gloria formaliter in se, non in semine, & gratia: quia loquitur de ea quæ superadditur, & redditur huic gratiæ, quando nobis vita æterna redditur, hæc autem vita æterna quæ nobis reddetur de futuro, non est vita æterna de præsentis: hæc enim etiam nunc habetur: loquitur etiam de illa vita æterna, de qua rectè poterat dicere Apostolus stipendium iustitiæ vita æterna, hæc autem non est nisi gloria in seipsa, non vt contenta virtualiter, & seminaliter in gratia liuius vitæ: talis enim non est stipendium iustitiæ: manifestum est ergo loqui de beatitudine in se. Sed de hac dicit August. quòd dicitur gratia, vt intelligeremus non pro meritis nostris, sed pro sua miseratione Deum nos perducere ad æternam vitam: ergo intelligit dari aliquam efficacem voluntatem dandi gloriam (nempe voluntatem perductiuam de facto, quæ utique efficax est) ex motiuo miserationis, & gratiæ; sed hoc non potest verificari de perductione ad vitam æternam in executione: vita enim æterna in executione, non gratis, nec ex miseratione datur, seu non datur gratis, & titulo gratiæ, sed titulo debiti,*

& ex meritis, & per modum stipendij, sicut rectè posset dici ab Apostolo, vt ait Aug. ergo verificatur solum de perductione efficaci in intentione, quia ad intendendum talem finem, ex motiuo gratuito mouetur Deus, licet in executione non nisi ex iustitia illam reddat, quia alius est titulus, & motiuum intendendi ex parte volentis finem, alius est titulus dandi his, quibus in coronam, & præmium proponitur; vt statim expendemus.

Dices, sensum Aug. solum esse quòd Deus perducit ad vitam æternam ex misericordia, quia ipsa bona opera, quibus tamquam meritis ad vitam æternam perducit, ex misericordia Dei sunt: sic enim immediate post illa verba relata explicat August. illud Psalm. 102. *Qui coronat te in misericordia, & miseratione. Quod idè, inquit, dixisse Psalmistam, quia eius miseratione bona operamur, quibus corona redditur.* Ergo non est sensus August. Deum nos perducere sua miseratione ad vitam æternam, quia ex titulo gratuito intendit efficaciter dare nobis gloriam, sed quia largitur sua miseratione auxilia, & gratiam, vnde reddit nobis ex iustitia vitam æternam; & sic miseratione sua perducit, & non ex meritis, id est, per auxilia gratuito, & ex misericordia data nos ducit.

Cæterum tota hæc responsio sic data, & admissa non onerat, sed firmat rationem nostram. Nam si illa ipsa gloria quæ redditur vt merces, & corona, quæ est gloria formaliter in se sumpta, & non solum virtualiter, & vt contenta in gratia, denominari potest data à Deo sine meritis, & ex misericordia, quia in ordine ad illam, seu ad perducendum ad illam dat Deus gratis & ex misericordia auxilia, & gratiam: ergo bene compatitur titulus gratuitus seu motiuum ex misericordia in ipsamet intentione efficaci dandi gloriam in se ipsa ex parte Dei intendentis, cum hoc quòd illa gloria detur in executione hominibus secundum eorum merita, ita quòd Deus sine meritis mouentibus velit dare gloriam hominibus merentibus.

Conseq. prob. Illa gratuita largitio auxiliorum, & gratiæ datæ prædestinatis in ordine ad consequendam gloriam, sufficiens est ad verificandum, quòd illa gloria in seipsa, & prout pertinet ad alteram vitam, datur ex miseratione, & gratis, & non ex meritis (liquidem vt manifestè ostendimus, loquitur August. de gloria in seipsa, vt distinguitur à gratia data in hac vita, & de illamet quæ redditur in præmium in alia vita dicit, non ex meritis, sed ex miseratione Dei nos perducere ad illam: sed non est sufficiens hoc verificari de gloria ipsa, prout in executione datur hominibus: ergo de gloria prout intenditur, & prout est in intentione efficaci, ex parte Dei, & dico intentione efficaci, quia est intentio de voluntate dandi gloriam, non comuni reprobis, & prædestinatis, sed prædestinatis tantum, seu his qui de facto saluantur, & quibus datur corona, & præmium.

Minor prob. quia gloria vt datur in executione, post hanc vitam tantum datur homini merenti, & secundum opera sua facta ex gratia, & tanquam corona iustitiæ: ergo non potest verificari quòd respectu illius hominis datur in executione gratis, & non ex meritis; & tamen dicit August. dicit gratiam vitam æternam, vt intelligeremus non pro meritis nostris, sed pro sua miseratione Deum nos ad æternam vitam perducere, & de gloria, vt data in executione, non potest verificari ista negatiua, quòd non perducimur pro meritis ad vitam æternam, cum non nisi pro meritis nobis detur, eam-

que

que assequamur, seu ad eam perducamur: ergo loquitur de gloria in intentione, non inefficaci, quia loquitur de illa, quæ datur de facto prædestinatis, & dicit ad hanc nos perducere Deum, non pro meritis, sed ex miseratione: ergo ante merita intendit efficaciter nos perducere ad gloriam.

5 Hinc secundò gradum facimus ad illum locum Pauli ad Ephel. 1. quod communiter vtuntur Authores huius sententiæ. *Benedictus Deus, & Pater Domini nostri Iesu Christi, qui benedixit nos in omni benedictione spirituali in cælestibus in Christo, Sicut elegit nos ipso ante mundi constitutionem, ut essemus sancti, & immaculati in conspectu eius in charitate. Qui prædestinavit nos in adoptionem filiorum per Iesum Christum in ipsum secundum propositum voluntatis sue, in laudem gloria gratia sue, &c.* Similia ferè habet Paulus ad Rom. 8. *Nam quas præsciuit, & prædestinavit conformes fieri imagini Filij sui, ut sit ipse primogenitus in multis fratribus. Quos autem prædestinavit, hos & vocavit, & quos vocavit, hos & iustificavit, quos autem iustificavit, hos & glorificavit.* In quibus locis perpendimus loqui Paulum de electione, seu prædestinatione ad gloriam, non communi modo reprobis, & prædestinatis, quæ est voluntas inefficax, & ex ea tantum sequitur largitio gratiæ, quæ est gloria in semine, non largitio gloriæ in se, & in fructu: ergo loquitur de voluntate efficaci: hæc enim sola discernit inter prædestinatos, & reprobos. Sic autem loqui Paulum constat ex ipsis verbis textus, in hoc quidem posteriori loco, quia loquitur de illis filiis adoptivis, inter quos Christus dicitur primogenitus, ipsi autem fratres. Solum autem Christus dicitur primogenitus inter fratres, qui accipiunt hæreditatem, non qui ab illa excluduntur. Et id evincitur ex subiectis verbis, quia hos quos dicit prædestinasse, dicit etiam post vocationem, & iustificationem glorificasse. Si autem ly *glorificavit* intelligitur de gloria in semine, & ut est in gratia, cum per gratiam iustificentur homines, idem esset dicere, quos autem iustificavit, hos, & glorificavit, atque dicere, quos iustificavit, hos iustificavit per gloriam in semine, quia gloria in semine est gratia iustificans in nobis. Loquitur ergo de gloria in seipsa cuius affectio ad solos prædestinatos pertinet, ergo loquitur de prædestinatis ad gloriam efficaciter, & ut consequendam in se. Et eodem modo loquitur in priori loco de his quos prædestinavit in adoptionem filiorum, ut essent sancti, & immaculati in conspectu eius, non ea communi voluntate qua dat gratiam reprobis, & prædestinatis, quia loquitur de illis, quos benedixit Deus omni benedictione spirituali in cælestibus. Gratia autem reproborum nec est in cælestibus, nec est omnis benedictio spiritualis, quia deest ei perseverantia ultima, & glorificatio; & sic deest tota hæreditas, & præcipua benedictio; imò tota benedictio in cælestibus. Cum ergo loquatur Paulus de prædestinatis, & de electione, seu voluntate Dei dandi illis gloriam efficaciter, etiam loquitur de electione eorum ante merita prævisa: ergo talis voluntas dandi gloriam ex beneplacito Dei ante prævisa merita, affirmanda est. Hæc minor subsumpta prob. Quia loquitur Paulus de prædestinatione Filiorum, ex qua sequitur vocatio, iustificatio, & tandem glorificatio: ergo loquitur de prædestinatione antecedente omnia merita, & ipsam etiam gratiam. Patet consequentia, quia primum quod ad meritum requiritur, scil. vocatio ad fidem, & secundum quod est iustificatio, seu esse in gratia, præsupponebant prædestinationem ad imaginem Filij sui; siquidem ex illa procedebant: ergo ista prædestinatio

antecedebat omnia merita. Quòd verò aliqui dicunt sensum Apostoli solum esse quod illos, quos ab æterno prædestinavit ad gratiam per quam conformantur imagini Filij sui, illos in tempore vocavit, & iustificavit, & nihil amplius voluisse dicere, & similiter quod elegit nos ab æterno, ut essemus sancti, & immaculati coram ipso, quod est eligere nos ab æterno ad gratiam, quam in tempore consequimur media vocatione, statim refutabitur. Sufficit nunc advertere, quòd etiam in isto loco, ubi dicit Apostolus quòd elegit nos in ipso, ut essemus sancti, & immaculati in conspectu eius, illa electio tribuitur ibi beneplacito voluntatis divinæ, *Prædestinavit nos*, inquit, *secundum propositum voluntatis sue in laudem gloria gratia sue*: ergo propter laudandam gloriam suæ gratiæ, seu gratuiti huius beneficii prædestinavit nos. Antecedit ergo prædestinatio ad gloriam ipsa merita tanquam motiva, & habet pro motivo ipsum propositum voluntatis Dei in laudem gloriæ sui gratuiti beneficii.

6 Hæc omnia ex August. desumimus. Et quidem quòd in istis locis loquatur Paulus de proposito, seu voluntate divina propria prædestinatorum, & non communi reprobis, & prædestinatis, ut malè aliqui Recentiores interpretantur, manifestè docet August. in lib. de corrept. & gratia c. 7. ubi exponens illa verba allata. *Quos prædestinavit, hos, & vocavit*, subdit sic: *Eos itaque vult intelligi quos secundum propositum vocavit, ne putentur in eis esse aliqui vocati, & non electi propter illam dominicam sententiam Multi vocati, pauci verò electi.* Ergo sentit manifestè August. loqui ibi Paulum de proposito Dei, non communi prædestinatis, & reprobis, sed proprio prædestinatorum, & quibus convenit vocatio secundum propositum Dei, hæc autem vocatio solum est vocatio congrua, & efficax quæ convenit prædestinatis: ergo de illa prædestinatione efficaci loquitur ex qua solum sequitur vocatio secundum propositum. Eodem modo id intelligit August. lib. 2. contra duas epist. Pelagian. cap. 9. ubi utrumque locum Pauli à nobis supra allatum coniungens, sic inquit: *Ignorantes idè dictum esse, qui secundum propositum vocati sunt, ut Dei, non hominis propositum intelligatur, quo eos quos præsciuit, & prædestinavit conformes imaginis filij sui, elegit ante mundi constitutionem. Non enim omnes vocati, secundum propositum sunt vocati, quoniam multi vocati, pauci verò electi. Ipsi ergo secundum propositum vocati, qui ante constitutionem mundi electi.* Constat ergo secundum August. quòd in utroque loco Apostolus loquitur de voluntate, & proposito Dei circa prædestinatos, non de proposito communi reprobis, & prædestinatis, quia loquitur tantum de vocatis secundum propositum Dei, quod non pertinet nisi ad prædestinatos.

7 Deinde intelligit August. in his locis loqui Paulum de prædestinatione, & electione Dei ad gloriam in se, non ad gratiam, quæ est gloria virtualiter, & in semine. Nam in loco cit. ex lib. de corrept. & gratia c. 7. post illa verba supra relata, in quibus dicit August. Paulum in illis verbis, *Quos præsciuit & prædestinavit conformes fieri imaginis Filij sui*, eos intelligere qui ita electi sunt, ut etiam secundum propositum sint vocati, quod est proprium prædestinatorum, & quod sunt electi infallibili modo, quia si quisquam horum periret, falleretur Deus, subdit sic: *Electi sunt autem ad regnandum cum Christo, non quomodo electus est Iudas ad opus cui congruebat. Ab illo quippe electus est, qui novit bene uti etiam malis, ut & per eius opus damnable, illud propter quod ipse venerat opus venerabile compleretur.*

Cum itaque audimus; Nonne ego duodecim vos elegi, & unus ex vobis diabolus est, illos debemus intelligere electos per misericordiam, illum per iudicium. Illos ergo elegit ad obtinendum regnum suum, illum ad effundendum sanguinem suum. Ecce manifestè August. loquitur de electione ad regnum, & ad regnandum cum Christo, quod utique non habetur, nisi in ipsa gloria: in præsentem enim quantumcumque quis sit in gratia nō regnat, quod est præmium, & corona, sed regnare meretur. Si ergo sunt electi ad regnum, utique ad præmium sunt electi, non ad meritum. Eligere autem ad regnum, ut est in semine, & in virtute, & in iure, est eligere ad meritum; sicque per istam solutionem confunditur sensus August. dum volunt ipsum significare nomine regni, ipsum ius ad regnum, & nomine præmij, meritum, & per ipsum regnare, ipsum mereri. Sed fortius hoc virgemus, quia dicit August. illos electos per misericordiam, scil. vndecim, Iudam verò per iudicium: sed Iudas electus fuit ad gratiam, sicut alij, & postea ab illa decidit, à qua non decideret si prius non haberet: ergo fuit electus ad regnum in semine, quod est gratia: Ergo si solum loquitur August. de electione ad regnum in virtute, & in semine quod est gratia, male ponit differentiam inter Iudam, & alios, cum etiam Iudas ad gratiam electus fuerit. Loquitur de regno quod obtineant vndecim Apostoli, & non Iudas: ergo loquitur de regno gloriæ in se, & pro vita futura. Et ad illud regnum, seu gloriam dicit esse electos per misericordiam: ergo titulus misericordiæ locum habet secundum August. in electione ad gloriam in se, sed non in gloria, ut data in executione: hæc enim data est Apostolis ut corona iustitiæ, & ex meritis: ergo loquitur de electione ad gloriam in intentione ex motivo misericordiæ, & ante omnia merita ut motiva, siquidem motivum fuit misericordia. Denique August. expressè in fine illius c. 7. dicit se loqui de electione eorum, qui perseveraturi sunt, qui sunt solum electi. Non ergo loquitur de electione ad gratiam prout communis est reprobis, & prædestinatis, sed solum de electione prædestinatorum, quia loquitur de electione perseverantium. Quod si dicatur cum aliquibus inter quos est Alarcon tract. 4. disp. 2. c. 7. num. 14. & 16. loqui quidem de electione ad ipsam gratiam finalem, quæ est perseverantia, ut clarè liquet in ipso textu, sed non de electione ad gloriam in se, & in futura vita. Contrà est, quia perseverantia, & æterna vita, sunt necessariò inter se connexa; & sic idem est eligere ad unam, quam ad aliam, & eadem inconuenientia quæ mouent oppositos Authores ad negandam electionem ad gloriam ante præuisa merita, currunt in electione ad perseverantiam ultimam ante omnia merita, quia hæc est infallibiliter annexa cum assecutione gloriæ, & posita efficaci electione ad perseverantiam, non stat non sequi gloriam, quantumcumque alia defuerint; imò fortius currit in electione perseverantiæ argumentum, quia perseverantia in singulari supponit talem gratiam, & talia merita determinatè, & in singulari in quibus iste perseverat. Quomodo ergo potest intelligi ista perseverantia ante omnia merita, cum sit ipsorum meritorum perseverantia, & vltima conseruatio? Ergo si loquitur August. de electione gratiæ in perseverantibus, & loquitur de electione per misericordiam Dei, quæ est ante omnia merita, & de illa prædestinatione de qua loquitur Apostolus, ex qua sequitur vocatio, & iustificatio, quæ omnia merita præueniunt, & etiam ipsam perseverantiam finalem, quæ supponit iustificationem, & vocationem: ergo euidenter est loqui

de electione ad regnum, & gloriam in se pro electis seu perseverantibus ante omnia merita ut motiva, siquidem dicit quod est electio per misericordiam.

Ad hæc: in loco supra allegato ex libro de gratia & libero arbitrio c. 9. aperte dicit Aug. quod Cum posset dicere Apostolus, & rectè dicere stipendium iustitiæ vita æterna, maluit dicere, Gratia autem Dei vita æterna, ut hinc intelligeremus non pro meritis nostris Deum nos ad æternam vitam, sed pro sua miseratione perducere. Vbi ut ostendimus supra, & ex ipso contextu August. patet, loquitur aperte de vita æterna in se ipsa, & ut condistinguitur à gratia, in qua continetur ut in semine. Et hanc æternam vitam in se dicit esse gratiam, cum possit etiam dici stipendium iustitiæ (quod utique non verificatur nisi de vita æterna in se, quia gratia, quæ est semen vitæ æternæ, non potest esse stipendium iustitiæ) ex eo quod Deus sua miseratione, & non meritis nostris nos perducit ad illam; quod verificari non potest de perductione, seu assecutione vitæ æternæ in executione, quia hæc in executione stipendium iustitiæ est, & dicere, quod datur sine meritis, esset error: ergo loquitur de illa intentione. Nec potest verificari, quod detur sine meritis, & pro miseratione Dei, quia Deus sine meritis, & pro sua miseratione dat media, quibus ad eam perducamur, id est, ipsam gratiam. Contrà enim est, quia loquitur August. de perductione ad vitam æternam, de qua paulò antè dixerat quod rectè posset vocari ab Apostolo stipendium iustitiæ: sed collatio gratiæ, & perseverantiæ in illa non potest dici stipendium iustitiæ: ergo non potest exponi Aug. de perductione ad vitam æternam pro collatione gratiæ & mediorum. Ergo cum de eadè vita æterna dicat August. & quod est stipendium iustitiæ, & quod est gratia, quia Deus sine meritis & sua miseratione perducit ad illam, in 1. sensu, loquitur de vita æterna in executione, quia datur ut stipendium, & præmium; in 2. intentione, quantum est ex parte motiui ad intendendum, & quod est misericordia diuina; & loquitur de intentione efficaci, quia loquitur de vita æterna, ut de facto assequenda, & de perductione ad ipsam; & sic ut est propria prædestinatorum.

Huic denique locutioni astipulantur loca alia Scripturæ, quæ etiam significant Deum ratione sui beneplaciti, & gratiæ voluntatis, & quasi ex sorte eligere nos ad regnum, & ad salutem, ut Lucæ 12. Nolite timere pusillus grex (id est, prædestinati qui sunt parvus grex comparatione reproborum) quia complacuit Patri vestro dare vobis regnum: Psal. 17. Saluum me fecit, quoniam voluit me. Roman. 9. Cum nondum nati essent, nec aliquid boni vel mali egissent, non ex operibus, sed ex vocante dictum est, quia maior seruiet minori, sicut scriptum est, Iacob dilexi, Esau autem odio habui. Quo loco Apostolum loqui de Iacob, & Esau, non in ordine ad hæreditatem temporalem, & bona huius vitæ, sed in ordine ad æternam prædestinationem, testatur August. lib. 1. contra duas epist. Pelag. cap. 7. & lib. 2. c. 8. & epist. 105. & 106. S. Thom. super illum locum Pauli, & est communis interpretatio inter Patres, idque videtur exigere contextus ipse Pauli, qui exinde discursum dirigit ad vasa misericordiæ, & vasa iræ, quæ sine dubio sunt reprobi & prædestinati. Sed de hoc loco plenius agetur inf. disp. 10. de reprobatione. Denique totum hoc ad placitum diuinæ voluntatis reduci, & ad sortem, qua illa prima electio dicitur fieri à Deo, docet Aug. lib. de prædestin. SS. c. 18. ubi versans illum locum supra à nobis ponderatum ad Ephes. 1. Elegit nos in ipso

ipso ante mundi constitutionem, &c. quem ostendimus intelligi debere de electione ad gloriam in se, & non ut virtualiter continetur in gratia, & similiter de electione efficaci, id est, propria prædestinatorum, & quæ cum effectu ducit ad gloriam, sic dicit August. *Elegit nos Deus in Christo ante mundi constitutionem prædestinans nos in adoptionem filiorum, &c.* Fecit hoc secundum placitum voluntatis suæ, ut nemo de sua, sed de illius erga se voluntate gloriatur: fecit hoc secundum diuitias gratiæ suæ, secundum bonam voluntatem suam, quam proposuit in dilecto filio suo, in quo sortem consecuti sumus prædestinati secundum propositum, non nostrum, sed eius qui uniuersa operatur. Si ergo electio illa, de qua loquitur Apostolus, est electio ad gloriam in se, ut ostendimus, & hanc dicit August. fecisse Deum secundum placitum voluntatis suæ, secundum bonam voluntatem, secundum sortem quam consecuti sumus, & secundum diuitias gratiæ: ergo in illa electione locum habuit titulus gratiæ misericordiæ, & beneplaciti diuini; & consequenter, merita non antecesserunt ibi, ut motiua.

Responsio ad mentem August. & refutatio.

10 Ut supra significauimus duplici via conantur aliqui respondere, vel potius eludere testimonia allata ex Scriptura, & ex mente Aug.

Primò, dicendo quòd nomine vitæ æternæ intelligitur in illis non vita æterna in se, & ut in alia vita, sed ut in semine, & virtute, sicut est in gratia. Et hanc solutionem, ut credo, sufficienter exclusimus, nec posse adaptari locis allatis ex August. ostendimus; sicut nec potest dici quòd loquatur de electione ad gloriam in se, sed inefficaci, sicut vult omnes homines saluos fieri, quæ utique electio, seu voluntas communis est reprobis, & prædestinatis. Ostendimus enim loqui August. expressè de electione propria prædestinatorum, & quæ de facto perducit ad gloriam.

Altera solutio est dicendo, quòd hæc loca solum conuincunt electionem præcedere merita duratione, non præuisione, quia videlicet electio ad gloriam est ab æterno, & executio meritorum in tempore, & hoc modo prædestinatio ad gloriam est ante merita in re executi, sed non ante merita ut præuisa, & mouentia ipsam efficacem electionem ad gloriam, quia vnum ex motiuis, seu rationibus efficaciter ad dandam gloriam mouentibus, sunt merita, sine quibus, quidquid Deus de danda gloria cogitat, inefficaciter vult, eo modo quo omnes homines vult saluos fieri. Et inuari potest hæc solutio ex ipso August. lib. 1. ad Simplicianum q. 2. vbi versans illa verba Pauli Roman. 9. *Cum nondum nati essent ut secundum electionem propositum Dei maneret, non ex operibus, sed ex vocante dictum est, &c.* inter alia inquit: *Electio non præcedit iustificationem, sed electionem iustificatio: nemo enim eligitur, nisi iam distans ab illo qui reicitur. Vnde quod dictum est, quia elegit nos Deus ante mundi constitutionem, non video quomodo sit dictum nisi præscientia.* Ergo sentit August. quòd electio non præcedit iustificationem, nisi solum ratione præscientiæ, quia scilicet electio æterna est, & in mente, seu præscientia diuina præcedit iustificationem in re.

11 Sanè non esse mentem August. dari hanc efficacem electionem ante præuisa merita, illud argumento est, quia id quod August. docet in lib. de corrept. & gratia, circa hanc electionem, & prædestinationem, vnde nostra sententia robar sumit, est illud ipsum, quod Massilienses turbauit, & ipsi

maximè negauerunt, ut constat ex epistola Prosperi ad August. ante librum de prædestinatione Sanctorum, ibi enim dicit quòd iuxta sententiam Massiliensium illa eligendorum, & reiciendorum facta discretio, ut secundum quod placuit Creatori, alij vasa honoris, alij vasa contumeliæ sint creati, & lapsis curam resurgendi adimere, & sanctis occasionem temporis afferre. Vnde ipsi, ut idem Prosper dicit in fine epistolæ; *Prædestinationem secundum præscientiam receperunt, ut ob hoc Deus alios vasa honoris, alios contumeliæ fecerit, quia finem vniuscuiusque præuiderit, & sub ipso gratiæ adiutorio in qua futurus esset voluntate, & actione præuiderit.* Ipsi ergo ponebant electionem, & prædestinationem post præuisa merita, non solum ut sunt à conatu naturæ, sed etiam sub adiutorio gratiæ. Hoc autem totum quod contra istam electionem secundum propositum Dei, & prædestinationem ante merita docebant Semipelagiani, August. damnat ut errorem, ut patet lib. de bono perseuer. c. 18. *Neminem contra istam prædestinationem quam secundum Scripturam sanctam defendimus, nisi errando disputare posse.* Id ergo quod de electione sine meritis docet August. ita docet ut certum, quòd contrarium est error. Sed id quod in hac questione disputamus de electione Dei ante præuisa merita secundum efficacem intentionem, non est ita certum, ut oppositum sit error, nec Auctores oppositi in hoc de errore notantur: ergo non est ista quæstio id quod tractauit August. & vnde maximè nos firmamur in illa sententia, sed prorsus otiosè illius auctoritatem in hac parte adducimus, cum longè aliud tractet August. nempe non dari causam ex parte nostri respectu totius prædestinationis, & omnium effectuum eius, quod negauerunt illi Massilienses, contra quos August. agit damnando id tanquam erroneum. Quòd verò ordine intentionis ante præuisa merita efficaciter Deus velit aliquos eligere ad gloriam in se, & postea ad gratiam, vel vice versa incipiat electionem à gratia, & terminetur in gloria, dummodo utroque modo Deus procedat non motus ex aliquo conatu nostro, aut opere naturali, aut sub gratiæ adiutorio faciendo tanquam ex merito, & motiuo, nihil omnino tractauit August. sed est purè scholastica, & speculatiua quæstio. Ergo adducitur extra rem August. ad probandum quòd electio ad gloriam efficaciter datur ante præuisa merita in sensu, quo à nobis disputatur.

Nihilominus, solutiones allatæ nullo modo ele-
uant fundamentum à nobis positum, & ex Aug.
deductum.

12 Quod attinet ad primam solutionem, quòd nomine vitæ æternæ intelligatur vita æterna, non in se, sed in semine, & virtute, qualis est gratia, & fides, sufficienter, ut vidimus exclusum est ex ipsis locis Aug. quæ supra ponderauimus, quæ omnino stare non possunt cum ista explicatione, cum expressè loquatur de gloria ut datur in alia vita. Et idèd non est quòd immoremur in ista solutione impugnanda; amplius autem ex dicendis impugnabitur.

13 Contra secundam solutionem duo principaliter
vrgeo, quæ in dictis Aug. destruunt illam.

Primum est, quòd licet sit verissimum quòd prædestinatio, & electio est ab æterno in præscientia Dei, & executio eius in tempore, & sic præcedit dispositio, & ordinatio diuina duratione ipsam executionem; tamen in ipsa præscientia, & dispositione seu ordinatione diuina agnoscit August. aliquid prius, & antecedens, quod in tempore prius fieri non videmus, sed posterius, & illud prius, & antecedens est electio ad gloriam in se; vel aliquid
illi

illi necessario annexum, sicut est perseverantia finalis: ergo electio efficax ad gloriam non est prior solum antecedentiâ temporis, sed etiam ordine intentionis.

Secundum est, quod in illa electione ad gloriam de qua loquitur August. admittit fieri ex misericordia divina, & gratia, & sine meritis. In tempore autem non fit executio gloriæ sine meritis, nec ex misericordia, sed ex debito iustitiæ, & distributionis præmij, & stipendij: ergo illa electio ad gloriam non solum præcedit executionem, & assecutionem ipsius, duratione, sed intentione, motivo, & efficacia, sicut nos explicavimus.

14 Primum declaratur ex locis supra adductis, ubi ostendimus August. c. 7. lib. de corrept. & gratia, ubi loquitur de electione ad regnum, non loqui de electione ad primam gratiam, quæ etiam solet dari reprobis, sed de speciali electione prædestinatorum, quæ discernuntur à massa reproborum, quæ vel dicit donum perseverantiæ, vel assecutionem ipsius gloriæ; immò ostendimus ex eodem Aug. lib. de bono persequ. c. 8. hoc donum permanendi, vel perseverandi supponere aliam priorem discretionem, quæ aliqui electi præsupponuntur in Christo, & illis tantum sic electis dari hanc perseverantiam, & iuxta hoc intelligit illud dictum Ioannis; *Si essent ex nobis, mansissent utique nobiscum*, quasi prius præsupponatur quod sint ex nobis, id est, sit electus aliquis in Christo ante constitutionem mundi electione propria prædestinatorum discernente eos à reprobis, ut ibi Aug. docet. Ex quo fit argumentum, secundum Aug. prius supponuntur aliqui electi electione perseverantiæ, seu gratiæ finalis, quàm detur illis prima vocatio, vel fides, & prius supponuntur electi in Christo electione propria prædestinatorum, quæ est ad gloriam, quàm detur eis perseverantia ipsa: sed in executione, siue quæ temporaliter exercetur modò, siue quæ disposita est ab æterno via executionis ante consecutionem gloriæ datur perseverantia, & ante perseverantiam fides, & vocatio, aliique priores effectus gratiæ: ergo in ordine intentionis datur aliqua prioritas, quæ non datur in ordine executionis, & sic non interuenit sola antecedentia durationis, qualis est inter æternam providentiam, & temporalem executionem, sed etiam prioritas intentionis in eligendo ad gloriam, eaque efficax, quia propria prædestinatorum. Minor est manifesta, quia in tempore, non incipiunt effectus prædestinationis à glorificatione, vel à perseverantia finali, sed à vocatione ad fidem, & iustificatione, aliisque meritis, & operibus, quibus perducimur ad glorificationem, sic enim docet Concil. Trid. sess. 6. c. 5. initium iustificationis sumi à vocatione Dei: ergo, & glorificationis, quia glorificationem præcedit iustificatio. Maior prob. tum ex his quæ supra latè probavimus ponderando loca Aug. & ostendendo quomodo in illa prima electione in qua dicit nos electos esse ad regnandum cum Christo cap. 7. de corrept. & gratia, loquitur euidenter de electione propria prædestinatorum, quæ est ad obtinendum, & assequendum regnum, vel ad finalem perseverantiam; tum etiam ex his quæ docet eodem lib. c. 6. ponderans locum illum Actorum 13. *Crediderunt quotquot erant præordinati ad vitam æternam*, ubi inquit: *Quis in æternam vitam potuit ordinari, nisi perseverantiæ dono? Quandoquidem qui perseveraverit in finem, hic saluus erit; qua salute, nisi æterna?* Vbi constat, quod cum illi dicantur credidisse qui præordinati erant in vitam æternam, prius ordinati supponuntur quàm credidisse; & sic fides, seu actus credendi illis datus est, qui præordinati erant,

non postquam crediderunt præordinati sunt: sed dicit Aug. quod ordinati erant non nisi perseverantiæ dono, quod utique efficacem designat ordinationem, cum perseverantia efficax donum sit, & proprium prædestinatorum, quia secundum, Aug. eodem lib. c. 12. per eam homines non nisi perseverantes fiunt: ergo prior fuit in ordinatione divina perseverantia, & finalis gratia, quàm credere, & actus fidei illorum qui audierunt Paulum: non autem fuit prior illa perseverantia secundum executionem, cum constet prius esse in executione credere, & iustificari, quàm perseverare: ergo necessario intellexit August. perseverantiam finalem (atque ad id ipsam assecutionem gloriæ, quæ illi essentialiter est annexa) esse priorem in ordinatione divina ordine intentionis; & sic aliquid efficaciter potest esse volitum ordine intentionis antecederet ad præmissa merita, seu ante priores effectus, siue quibus tamen de facto non ponetur in executione; & sic non solum duratione, sed etiam intentione, & ordinatione præcedit electio ad gloriam ipsa merita, & sic vera est doctrina quam tradimus, posse aliquid esse efficaciter intentum ante illa merita, vel opera, siue quibus in executione non fiet.

15 Secundum verò suprapositum pro mente August. eruenta, explicatur ex supra dictis, ubi ostendimus Augustinum, & loqui de electione ad regnum in se, & non solum ut est in semine, seu in ipsa gratia, & quod illa electio est ex gratia, & miseratione sine meritis, & quod elegit illos per misericordiam, sicut Iudam per iudicium, quæ iam supra allata, & ponderata sunt: sed electio ad gloriam sine meritis, & ex miseratione divina, non est electio eo modo data, quo in executione datur: ergo eo modo intenta, quo ante ordinem executionis Deus intendit; & sic non solum differt electio ad gloriam, & executio in tempore, quia illa est ab æterno, ista in tempore fit, sed etiam, quia via intentionis incipit à gloria efficaciter intenta, antequam moveatur à meritis, tanquam à ratione, & motivo intendendi, licet in ipsa intentione videat illa ut effectum ex illa intentione derivatum. Minor est certa, quia gloria ut data in executione, datur per modum debiti, & coronæ: ergo non titulo, & motivo misericordiæ. Nec potest utroque titulo dari, scil. gratuito, & remunerativo, cum ista motiva oppositionem habeant inter se, & contrarias condiciones requirant. Conseq. verò manifesta est, quia electio ad gloriam ex meritis præsuppositis, & danti-bus motuum eligendi, est electio remunerativa: discernit enim unum ab alio conferendo uni quod meretur, negando alij quod non meretur: ergo si non est in Deo alia electio ad gloriam nisi ex præsuppositis meritis, non est alia electio, quàm remunerativa, & præmiativa. Vbi ergo salvatur electio ad regnum, seu gloriam quam dicit August. ex misericordia, ut in 7. c. de corrept. & gratia, & sine meritis, & ex miseratione, quam ponit lib. de gratia, & libero arbitrio. c. 9. Et ut supra ponderavimus, loquitur de electione efficaci, quia loquitur de ea, quæ est propria prædestinatorum; & sic sortitur effectum, & ad gloriam in se formaliter, & non in semine, quia loquitur de gloria, seu vitæ æternæ, quæ ut stipendium redditur iustitiæ, ut dicit hoc posteriori loco. Cogimur ergo ad dicendum quod quando loquitur de electione ad gloriam ex misericordia, & sine meritis, loquitur de electione ad gloriam ut intentam: ad eam enim intendendam, non fuit Deus motus ex meritis, sed ex sua liberalitate, quamvis hanc gloriam quam ex liberalitate profert, & proponit, non ad liberaliter nobis dandum,

dum, sed iuxta agonem, ac meritum nostrum decernat, sicut qui ex liberalitate instruit spectacula, & profert præmia, quæ athletis danda sunt ex iustitia. De sensu verò Aug. illo loco ad *Simplicianum*, unde vult iuvari ista solutio, plenius dicitur *infr.* soluendo argumenta. Modò sufficiat dicere intelligendum esse August. de electione executâ, quæ cadit super bona opera, non de intentâ quæ antecedit illâ, & ipsa executio electionis vt futura, etiam præcedit in præscientia Dei, non solum electio viâ intentionis considerata.

16 Circa id quod dicitur de errore Semipelagianorum, an etiam hanc controuersiam attigerit eorum error, existimo ipsos quidem negasse electionem Dei ad gloriam, etiam ordine intentionis ante præuisa merita, sed errorem eorum in hoc puncto non consistere quantum ad punctum de prædestinatione, in quo de errore postulantur ab Aug. Negauerunt quidem electionem ante præuisa merita etiam ordine intentionis, & in eo sensu, quo nos ponimus, quia vt refert S. Prosper *in epist. cit. ad Aug. de prædestinatione*, sic dicebant: *Qui autem credituri sunt, quæ in ea fide, qua deinceps per Dei gratiam sint iuuandi, mansuri sunt, præscisse ante mundi constitutionem Deum, & eos prædestinasse in regnum suum, quos gratis vocatos, dignos futuros electione, & de hac vita bono fine excessuros esse præuiderit.* Ecce quomodo ad eligendum in regnum suum, dicebant supponere, & præuidere Deum merita, nempe dignos electione, & bono fine excessuros, & hos prædestinasse in regnum suum. Ante præuisionem ergo dignorum non erat electio: ergo neque ante præuisa merita, quia per merita digni redduntur. Omnino autem negabant discretionem factam esse inter eligendos, & reiciendos, ita vt quidam vasa honoris, alij contumeliæ sint secundum placitum Creatoris, hoc est ex gratuita, & misericordie eius electione, quia hoc lapsus curam resurgendi adimeret, & sanctis occasionem teporis afferret. In qua negatione ita vniuersali, & in affirmatione *supra* posita eligendi solum in regnum eos, quos Deus dignos præsciebat, manifestè excludebant omnem electionem efficacem ante præuisa merita, siue per modum intentionis, siue per modum executionis: semper enim electio dignos supponebat apud ipsos, non faciebat.

17 Cæterum punctus erroris eorum non erat, an ad hunc ordinem prædestinationis, & gratiæ Deus eligat incipiendo ab absoluta voluntate dandi gloriam, & ab intentione efficaci finis, an verò ex simplici voluntate finis, & gloriæ, qualis cõmuniter ad prædestinatos, & reprobos habetur, moueatur Deus ad dandum gratiam, & præparandum merita prius quam ad dandam gloriam, supponendo quòd illa gratia, & illa vocatio, & præparatio ad merita datur à Deo omnino gratis, & nulla habita ratione meritorum, vel occasionis in vno præ ali, deo hoc nihil tangit error Massiliensium, sed totus eorum error circa prædestinationem ad duo reducitur vt *supra* disp. 3. diximus, scilicet pro initio gratiæ negando gratiam dari non præsupponendo aliqua bona initia, quæ non essent ex gratia, sed ex nobis, ratione quorum nunquam æqualibus meritis vel demeritis existentibus dabatur dispar donum gratiæ, vel vni præ alio. Et secundò circa finalem gratiam, scil. perseverantiam dicebant eam dari ex meritis, nec talem esse, quòd non posset nostra voluntate amitti. Vnde tandem colligebant prædestinationem necessariò supponere præscientiam eorum quæ facturi sumus, vel in tali occasione etiam cum adiutorio gratiæ faceremus, vt intuitu talium Deus vel eligeret vel reiceret, quasi pro

qualitate præuisi meriti vel demeriti. Quòd verò electio diuina in ipso ordine prædestinationis, & in ordine gratiæ eligendo sine meritis præsuppositis ad ipsam gratiam, incipiat hanc electionem ita gratuitò, & sine meritis, quod etiam ab intentione efficaci circa finem incipiat sine meritis, an verò sola simplici finis voluntate supposita incipiat efficax voluntas ab electione ad gratiam, prorsus non tangit errorem Semipelagianorum, quamuis à fortiori ipsi negauerint intentionem efficacem ad gloriam esse sine meritis, qui electionem ad primam gratiam, & ad vltimam perseverantiam, etiam sine meritis non ponebant.

Quando ergo August. dixit non posse contra istam sententiam de prædestinatione, sine errore disputari, locutus est de sententia illa de prædestinatione, quæ eius initium, scil. primam gratiam, & eius finem, scil. perseverantiam ex meritis ponebat, hoc enim contra testimonia Scripturarum dicitur. Quòd verò intra istum ordinem prædestinationis factæ sine meritis incipiat Deus habere efficacem intentionem, & voluntatem circa gloriam ante merita, vel ipsa ratio efficacis non resplendeat circa gloriam ante merita, non vt errorem impugnât aut docet August. licet verè doceat nostram sententiam.

De mente D. Thomæ.

Hanc non obscurè ex pluribus eius locis habemus, in quibus docet electionem, & dilectionem finis præcedere præparationem mediorum, & prædestinationem, taliter, quòd ante præparationem mediorum sit efficax dilectio, & electio finis, non solum simplex eius complacentia, nec solum amor finis, id est beatitudinis secundum se, sed vt in tali determinata persona quæ eligitur præ aliis determinatè ad talem finem, & postea ei prouidetur de mediis. Hæc autem mens S. Thom. colligitur clarè ex hac qu. art. 4. ex q. 6. de verit. art. 1. ex dist. 41. in 1. sentent. q. 1. art. 2. Et consistit in tribus propositionibus.

Prima est: ante prædestinationem, vt dicit præparationem mediorum ad gloriam, datur dilectio finis seu gloriæ in se, & electio personarum determinatarum ad illum finem, & non solum electio ad gloriam in semine, & vt continetur in gratia, sed in se.

Secunda illa electio, & dilectio gloriæ, & personarum ad illam est efficax, non communis reprobis, & prædestinatis (quod pertinet ad simplicem complacentiam) sed segregatiua prædestinatorum à reprobis.

Tertia electio ad gratiam efficacem, & ad auxilia congrua, seu consecretiua finis est consequens prædestinationem, & consequenter electionem ad gloriam.

19 Prima propositio constat ex verbis D. Thom. in presenti qu. art. 4. vbi dicit: *Prædestinatio secundum rationem præsupponit electionem, & electio dilectionem.* Probat hanc conclusionem, quia *prædestinatio est pars prouidentie, & prouidentia est ratio in intellectu existens præceptiua ordinationis aliquorum in finem; sed non præcipitur aliquid vt ordinandum in finem, nisi præexistente voluntate finis: ergo prædestinatio aliquorum in salutem æternam præsupponit secundum rationem, quod Deus velit illorum salutem.* In hac ratione expresse distinguit D. Thom. voluntatem finis à ratione ordinatiua mediorum in finem: ergo à fortiori distinguit illam à voluntate dandi illa media ordinata in finem, quia voluntas non dat illa media, nisi vt regulata, & directa per illam

illam rationem ordinatiuam mediorum in finem : dat enim illa rationabiliter, & ordinatè : ergo supponendo rationem ordinatiuam : Sed merita, & gratia pertinent ad media ordinata in finem, quia sunt id per quod assequimur præmium, quod est ipse finis: ergo in sententia D. Thom. antequam sit in Deo voluntas dandi merita, iam est voluntas de ipso fine: ergo hæc voluntas ad dandum, & volendum finem non mouetur ex meritis præuis in homine, quia merita non præuidentur in homine, nisi ut data à Deo, & procedentia ex gratia; hæc autem datur post illam voluntatem finis. Et eodem modo conuincitur, quod loquitur D. Thom. de voluntate gloriæ in seipsa, non ut contenta in semine, quod est gratia: nam loquitur de voluntate ipsius salutis, seu gloriæ, ut est finis ad quem ordinantur media, quæ sunt merita, seu gratia: si autem loqueretur de gloria, ut in semine, seu gratia, idem esset habere voluntatem de fine, seu gloria, atque habere voluntatem de gratia, seu de mediis, in quibus ut in semine continetur finis, seu gloria; & sic esset sensus quod ex præexistente voluntate finis ut contenti in mediis, seu ex præexistente voluntate mediorum, & gratiæ, in qua continetur finis, vult, & ordinat Deus gratiam, seu ipsa media. Egregium dictum! Quod etiam expresse ipse D. Thom. excludit in 1. dist. 41. q. 1. art. 2. in fine corp. dum dicit, quod *Non dicitur quod gratia eligitur homini, dicitur tamen quod gratia prædestinatur homini.* Ergo electio quæ præsupponitur prædestinationi non est ad gratiam, quæ est gloria in semine, sed ad ipsam gloriam in se, quæ est finis ad quem ordinatur gratia. Denique quod hæc voluntas præexistens de fine ante ordinationem mediorum non sit sola dilectio finis, sed electio personarum ad illum, Constat ex ipsis verbis D. Thom. *Ad quod* (scil. ad voluntatem salutis, quam præsupponit prædestinationem) *pertinet dilectio, & electio: dilectio quidè in quantum vult eis hoc bonum salutis eterne, electio autem in quantum hoc bonum aliquibus præ aliis vult, cum quosdam reprobet*: illa ergo electio, quæ præcedit ordinationem mediorum ad finem est electio personarum determinatarum ad gloriam. Quod expresse in q. 6. de verit. art. 1. ad 3. ubi inquit, quod *electio præcedit prædestinationem; electio enim, prout hic accipitur, pertinet ad ipsum, qui in finem dirigitur: prius autem est accipere illum, qui dirigitur in finem quam ipsum dirigere in finem; & ideo electio in proposito præcedit prædestinationem.* Ergo non solum velle beatitudinem, ut sic, & quasi in abstracto, sed velle beatitudinem, ut applicatam isti in particulari præ alio, & cum segregatione ab alio qui reicitur, præcedit prædestinationem, seu præordinationem mediorum, & consequenter præcedit merita, & gratiam, quia hæc datur per prædestinationem tanquam medium.

20 Secunda verò propositio constat manifestè ex verbis D. Thom. cit. quia secundum D. Thom. illa electio ad gloriam, seu ad finem præcedit prædestinationem meritorum, & gratiæ, quæ non est communis reprobis, & prædestinatis, sed segregat istos ab illis: sed voluntas inefficax, seu complacentia simplex dandi gloriam est communis etiam reprobis, nec separat hos ab illis: ergo non loquitur D. Thom. de inefficaci electione, & voluntate, sed de efficaci. Consequens est legitima. Minorem concedunt oppositi Authores. Maiorem verò affirmat S. Thom. locis cit. ut q. 6. de verit. art. 1. cit. *Electio, quæ præcigitur ad prædestinationem, est per quam ille qui in finem infallibiliter dirigitur ab aliis separatur, qui non in hunc finem dirigitur; sed infallibilis directio ad finem, & electio quæ separat ab his,*

qui in illum finem non diriguntur, non est communis reprobis, & prædestinatis ut de se patet: ergo non loquitur de illa electione seu voluntate communi D. Thom. Et eodem modo dicit in hac q. art. 4. loquens de eadem electione, quæ præcedit prædestinationem, *quod electio illa præcedit in quantum hoc bonum aliquibus præ aliis vult cum quosdam reprobet*: ergo si hæc electio est voluntas volendi quibusdam bonum præ aliis, non est communis omnibus.

21 Tertia propositio ex dictis patet, cum electio ad gratiam efficacem, & ad auxilia congrua sit voluntas circa media, cum per ista auxilia, & gratiam perducatur homo ad gloriam, ut ad finem, ordinatio autem de mediis ad finem habetur per prædestinationem, quæ sequitur ad dilectionem, & electionem ad finem, ut dicit S. Thom. ergo electio ad gratiam efficacem, & ad auxilia sequitur ad prædestinationem, & electionem ad gloriam. Unde dicit cit. q. 6. de verit. art. 1. in fine corp. quod *Prædestinatio supponit electionem, & dilectionem, electio verò dilectionem; ad prædestinationem verò duo sequuntur, scil. consecutio finis, qui est glorificatio, & collatio auxilij ad consequendum finem, quod est appositio gratiæ, quod ad vocationem pertinet.* Quare voluntas efficax collatiua gratiæ efficacis, & auxiliorum non est quæ antecedit prædestinationem, sed quæ consequitur.

Cum mens S. Thom. ita manifesta sit, adhuc conantur illum ad se trahere, & interpretari oppositi Authores. Et assignant duplicem explicationem.

22 Primam, quod S. Thom. loquitur de electione ad gratiam efficacem, & perseverantiam: nam, & ipse S. Thom. hic art. 5. ad 1. concedit electionem gratiæ, & gloriæ, non tamen dicit electionem gloriæ factam fuisse ante præuisa merita, & ante prædestinationem gratiæ. Ita P. Valq. hic disp. 89. c. 1. 2. num. 111. eandemque solutionem Molina, Lessio, Becano, Valentia tribuit Alarcon hic tract. 4. disp. 2. c. 10. Alteram solutionem tradit ipse Alarcon ibi, non fidens priori, quod quando dicit D. Thom. prædestinationem, seu ordinationem, & amorem mediorum supponere voluntatem finis, seu gloriæ, loquitur de voluntate finis inefficaci, quæ est communis omnibus, nec distinguit prædestinatos à non prædestinatis. Electio autem quam D. Thom. dicit præcedere prædestinationem, explicatur ab isto Authore, quod sit electio efficax, non gloriæ, sed mediorum ad gloriam, quod probat ex illis verbis D. Thom. quod, *Vult hoc bonum aliquibus præ aliis, cum quosdam reprobet*: sed in sententia D. Thom. reprobatio non est voluntas excludendi à gloria, sed negandi tantum gratiam congruam: ergo voluntas in qua distinguitur specialiter prædestinatus à reprobo, non est voluntas efficax gloriæ, sed voluntas dandi vni media efficacia, & alteri denegandi.

23 Neutra explicatio sustineri potest ad mentem S. Thom. Et primam tandem ipse Valquez digerere non valens, eiecit 3. p. disp. 23. c. 7. num. 91. dicens, sibi semper esse persuasum D. Thomam in opposita esse sententia, licet in ea disputatione, in alio sensu eum explicare contenderit. Et c. 8. num. 104. ait, id quod dixerat de voluntate efficaci ante merita dandi vitam æternam, & salutem, hoc est omnia auxilia congrua usque ad finem vitæ in vniuersum. *Tantum*, inquit, *adduximus ut quoquo modo S. Thom. explicaremus, ne docere videretur efficacem electionem ad gloriam ante præuisionem meritorum.* Nos verò, inquit, neque illam voluntatem circa omnia auxilia præuenientia in vniuersum concedi

concedimus, neque in ea disp. ex propria sententia vnquam docuimus: satis enim putamus inefficacem voluntatem circa beatitudinem per modum finis, & deinde efficaces præfinitiones circa auxilia præuenientia. Ita Author hic à prima solutione in secundam declinans, & de D. Thom. mente hoc tantum curans, vt quoquo modo explicaretur. Quid ergo oportet nos immorari in impugnanda explicatione aded menti S. D. auersa, & quæ solum quoquo modo explicatio est? Sanè eius falsitas manifestè se prodit. Nam S. D. expressè in loco citato 1. sentent. dist. 41. dicit *Gratiam non eligi homini, sed prædestinari*. Et deinde docet ante prædestinationem, & ordinationem mediorum præcedere voluntatem finis, id est, gloriæ, ad quam pertinet electio, & dilectio, qua vult illud bonum, seu finem aliquibus præ aliis; sed auxilia, & gratia efficax, vsque ad perseuerantiam, sunt media quibus perducimur ad finem, non finis ipse: ergo illa electio quæ præcedit prædestinationem, seu ordinationem mediorum, non est electio ad gratiam efficacem, & ad auxilia quæ sunt media, sed ad ipsam gloriam, quæ est finis, non vt continetur in gratia, & in mediis: sic enim est voluntas mediorum, non finis. Nec obstat locus D. Thom. ex hoc articulo quarto.

24 Ad primam dum dicit quòd in collatione gratiæ, & gloriæ attenditur electio, non tamen dicit electionem ad gloriam fuisse ante merita, & ante prædestinationem gratiæ. Leuis ponderatio. Dixerat id in corpore artic. ad quid debebat repetere? Si enim paulò ante probauerat voluntatem finis præcedere prædestinationem, & ad hanc voluntatem finis pertinere electionem, qua tale bonum vult aliquibus præ aliis, quid clarius ad ponendum quòd electio ad gloriam est ante præuisa merita, & ante electionem, seu voluntatem dandi gratiam? Itaque electio attenditur in collatione gratiæ, & gloriæ, sed ordine suo: prior ex parte finis est electio ad gloriam, sed hæc influit in prædestinationem, quæ præparatio est mediorum, & inde derivatur voluntas dandi gratiam, quæ est medium ad illum finem: actus enim præcedens includitur virtute in sequenti, vt docet *quest. 6. de veritate articulo primo, ad 1.* Vnde nec dixit S. Thom. dari electionem ad gratiam, sed in collatione gratiæ attendi, quia fit collatio gratiæ in virtute electionis præcedentis ad gloriam.

25 Secundam solutionem exclusimus *suprà* syllogismo meo videri manifesto, ex verbis D. Thom. composito, ostendendo secundam propositionem. Quòd autem fatigatur ille Author in explicando electionem quam D. Thom. ponit esse electionem mediorum, non ipsius gloriæ, frustraneus labor est, cum manifestè S. Thom. doceat quòd illa electio præcedit prædestinationem *omnibus locis suprà cit.* sed prædestinatio est circa media, seu circa ea quæ sunt ordinanda ad finem, vt dicit in *hoc a. 4. & aliis locis cit.* ergo electio de qua loquitur non est electio mediorum, sed personarum ad illum finem. Et expressè id docet S. Thom. tum in *hoc artic. 4.* dum dicit, quòd *electio pertinet ad illam voluntatem finis, in quantum hoc bonum vult aliquibus præ aliis*; ly autem *hoc bonum*, refert bonum finis, de quo paulò ante locutus fuerat: electio ergo illa est personarum ad illud bonum talis finis, non mediorum. Clariùs *quest. 6. de verit. artic. 1.* *Præexigitur etiam electio per quam ille qui in finem infallibiliter dirigitur, ab aliis separatur,* Ioan. à S. Thoma in 1. part. D. Thoma.

qui non hoc modo in finem diriguntur. Et solut. ad 3. *Electio prout hic accipitur pertinet ad ipsum qui in finem dirigitur; prius autem est accipere illum, qui in finem dirigitur, quam ipsum dirigere in finem.* Quomodo ergo iste Author potest interpretari D. Thom. de electione mediorum, cum tam euidenter loquatur de electione personarum ad finem, seu ad gloriam? Certè aut non vidit, aut dissimulauit ista loca D. Th. Illa autem ponderatio, quam adducit ex verbis D. Tho. *Cum quosdam reprobet, &c.* reprobatio autem apud D. Thom. non est exclusio à gloria, sed denegatio gratiæ congruæ, omnino aliena est à mente S. Doctor. cum expressè ponat reprobationem pro exclusione à gloria. Expressè enim dicit in *hac quest. art. 3.* quòd *Ad diuinam providentiam pertinet vt permittat aliquos ab isto fine deficere, & hoc est reprobare.* Clariùs in 1. ad Arrib. distinct. 41. *quest. unica art. 3.* *Voluntati, inquit, diuinæ de salute hominum duplex voluntas opponi videtur, scilicet de contradictorio secundum quod vult aliquem non saluare, & voluntas de contrario secundum quod vult aliquem damnare.* Prima quidem voluntas non requirit aliquam rationem ex parte voliti, cum salus gloria non sit debitum humane nature, sed voluntas damnationis respicit rationem voliti in damnato, cum damnatio ex debito inferatur. Ergo si negatio gloriæ antecedit omnem rationem ex parte voliti, datur ante negationem gratiæ. Et sic tandem D. Thom. *quest. 6. de verit. articulo primo, ad ult.* dicit, quòd *Reprobatio directè non opponitur prædestinationi, sed electioni, qua qui eligit, vnum accipit, & alterum reiecit, quod dicitur reprobare.* Sed secundum D. Thom. prædestinatio versatur circa media, & confert gratiam, electio autem circa gloriam quam vult quibusdam præ aliis: ergo reprobatio est exclusio gloriæ, priusquam sit denegatio gratiæ. Ergo illa explicatio est contraria D. Thom.

ARTICVLVS III.

Fundamenta ex ratione.

VT fundamentum huius sententiæ aperiatur, illud præ oculis habendum est, quòd in illa voluntate electionis ad gloriam, & dilectionis ipsius finis, nõ negamus merita futura contineri, & attingi, sed tanquam effectus illius electionis, & media illius finis, non vt motiua ad diligendum finem, & eligendum vnum præ alio, quasi Deus prius videat merita orta ex gratia, & ex illis moueatur ad eligendum istum ad gloriam præ illo, quia in hoc inuenit merita gratiæ, non in illo. Sed dicimus quòd Deus ex motiuo suæ puræ misericordiæ, quam vult cui vult, & præstat cui præstat, & ex suo mero beneplacito elegit vasa misericordiæ ad regnum, & gloriam suam dandam illis vt coronam, & inde respexit merita vt effectum, non vt motiuum talis electionis: hoc enim commune est omni intentioni, vt distinguitur à simplici voluntate, quod respicit finem, & vult illum, non absolute, sed relatè ad media, & cum ordine ad ipsa, ita quòd media non intrant ibi, vt motiuum, & vt ratio prior ad finem, cum finis sit prima ratio, & id cuius gratia eliguntur media: si autem media rationem motiui indicerent, & rationem importarent volendi finem, essent tanquam id cuius gratia finis acceptaretur;

E e &

326 Quæstio XXIII. De Prædestinatione,

& sic non se haberent ut media, sed ut finis respectu ipsius finis, quod repugnat. Quare media intrant ibi ut effectus, seu ut quid derivatum ex fine, ita ut finis sit ratio mediorum, & id cuius gratia media sunt volita, media verò ut volita in vi finis; & sic derivata ab ipso in genere voliti.

2. Cæterum est hæc notanda valde differentia quadam inter media quæ solum moraliter inducunt ad finem, seu perducunt, & inter media physica, quæ ipsum virtute sua assequuntur aut producant, ex cuius indiscutione, ferè tota hallucinatio in hac parte orta est. Nam media physica, & moralia in hoc quidem conveniunt, quòd in quantum media volita sunt in vi finis, ita quòd appetibilitas istorum derivatur ex appetibilitate illius; sed tamen in ratione perducendi ad finem, & assequendi ipsum valde differunt, quia physica media virtute sua faciunt quod faciunt, id est virtute physica quam habent, perducunt ad finem, aut deficiunt à fine, si virtus eorum non possit usque ad illum. Media autem moralia, cum solum moraliter influant, indigent rursus ad suum officium præstandum movere alicuius voluntatem ut ad finem perducatur, quia ipsa vi sua non possunt; & hoc est moraliter concurrere, scilicet ut conditio, vel occasio aut ratio quæ moveat aliquam voluntatem, ut eis positus, finem inducat, sicut merita, vel preces quæ assumuntur ut media ad dandum aliquem finem, ipsa etiam postquam media sunt, & supponunt finem cuius gratia sunt volita, imò postquam in re sunt exhibita, cum non possint ut sua physice finem ponere, debent morali modo influere, scilicet movendo, & attrahendo voluntatem alicuius ut illis positus finem inducat. Cæterum ista attractio, & motio non est per modum finis, & cuius gratia, quia merita non se habent ut finis præmij, sed ut media, aut conditiones requisitæ ut moveatur animus alicuius ad ponendum, vel inducendum præmium; & sic ubi interveniunt media moralia, v. g. merita, vel preces, qui intendit, & ordinat de tali fine, & mediis, dupliciter movetur in voluntate: primò à bonitate finis, ut ab eo cuius gratia operatur, ut ratione illius velit ponere media siue moralia, siue physica. Secundò, movetur à mediis moralibus, ut intuitu illorum non mouentium ut finis, sed mouentium ut media aut conditio requisita in executione, & exercitio moveatur voluntas aliqua ad exequendum, & ponendum physice finem, quod non possunt facere ipsa merita vi sua physica. Itaque intuitu illorum movetur, non ad volendum, & intendendum primò finem, tanquam ista præbeant motum ut ille finis ametur, sed intuitu illorum solum movetur, ut ad exequendum in re assecutionem finis, suppleat voluntas dantis præmium id quod facerent illa media si essent physica, scilicet physice ponere finem, quod quia merita facere non possunt, mouent voluntatem præmiatoris ut faciat. Sed totum hoc est in ordine executionis: & tamen quia invenitur ibi, intuitu meritorum moveri voluntatem, & moveri ad dandum ipsum finem, scilicet præmium, facile paralogizavit mens aliquorum, ut totum hoc intelligeret de fine, ut volendo, & amando in intentione.

3. His suppositis, veniamus ad tradenda fundamenta nostræ sententiæ, quæ sumuntur tum à posteriori, tum à priori, tum à speciali ratione Dei providentis, qui voluntate sua debet dare merita, & debet dare finem, non autem

supponere merita, sicut Princeps creatus dat præmia supponendo merita, sed facere; & sic in prima sua voluntate, implicat ab eis moveri circa finem.

A posteriori ergo ratio ex eo desumitur, quia gloria quantumcumque præsupponat merita, & intuitu illorum detur etiam ut corona, & præmium, tamen in sui assecutione dependet à conditione quadam liberaliter, & gratuito danda à Deo: ergo non potest electio ad gloriam, etiam ut coronam præscindere ab aliquo motivo gratuito, & liberali, & habere pro adequato motivo suæ efficaciz, & discretionis à reprobis sola merita: imò principaliter petit ex motivo gratioso, & liberali efficaciam eligendi habere, & discernendi à reprobis, si etiam positus motus efficaciam habere non potest, neque ad effectum perducit ipsa gloria ut corona, nisi ex aliquo gratis, & misericorditer superaddito. Conseq. patet, quia intantum electio ad gloriam incipit efficax esse, & efficaciam habere, in quantum respicit ipsam gloriam, non solum ut volitam in effectu, & per modum finis communis reprobis, & prædestinatis (ubi etiam est volita ut corona inefficax, & communiter omnibus proposita, siquidem etiam reprobi perdunt gloriam, ut coronam, iuxta illud Apocalyp. 3. *Tene quod habes, ut nemo accipiat coronam tuam*) quia ad hoc dicunt oppositi Authores sufficere simplicem affectum finis: sed volitam ut in effectu obtinendam & in eo in quo non communicant reprobi, sed discernuntur prædestinati à reprobis: ergo si in hoc ipso quod est de facto obtinere gloriam, & efficaciter discerni à reprobis dependet illa gloria, sic de facto obtinenda ex aliquo pure gratuito, & non ex meritis solum, manifestum est quòd electio prima ad gloriam ut efficax, & ut discretiva à reprobis, non est ex meritis, sed ex aliquo pure gratuito superveniente ipsis meritis. Nec sufficit ad hoc dicere, quòd dependet ab aliquo gratuito à quo oriuntur merita, scil. à prima gratia, & auxilio, & vocatione, quæ omnino gratis dantur à Deo. Non inquam sufficit, quia ista gratia, & auxilia, in quibus fundantur merita, adhuc possunt esse communia reprobis, & prædestinatis, quia multi reprobi habent primam gratiam, & habent multa auxilia, imò & multa merita, & tamen amittunt illa, & reprobantur: ergo ex istis gratuitis donis quæ antecedunt merita, non potest sumi motum eligendi ad gloriam efficaciter, & discernendi à reprobis, sed loquimur de illo motivo quo discernuntur prædestinati à reprobis, pro ut efficaciter assequuntur gloriam: si enim hoc est gratuito, & liberaliter collatum, & superadditum meritis: ergo est illa electio ut efficax ex non meritis, & gratis. Et sic eadem linea qua oppositi Authores arguunt contra nos, recipimus argumentum contra illos, scilicet quia ipsi ideò putant non esse efficacem electionem ante merita, quia non datur de facto, nisi ut corona, & correlativè ad merita: ergo ut efficax non nisi ex meritis. Nos è contra retorquemus. Etiam positus meritis, non datur corona illa de facto, & efficaciter, & ut discernitur à reprobis, nisi ratione alicuius gratuito superadditi, & à Deo donati: ergo ex non meritis datur electio absolute, & simpliciter.

Anteced. autem huius argumenti, prob. Quia quantumcumque ponantur merita etiam ex gratia facta, non potest dari gloria, etiam ut corona nisi apponatur perseverantia finalis, quæ ultimo introducit in gloriam, & sine qua nulla datur gloria. Sed ista perseverantia non supponitur à Deo, nec datur ex meritis, sed omnino gratis

gratis, vt contra Massilienses docet Aug. *lib. de bono perseverantia*: ergo dependet gloria vt de facto data ab aliqua conditione, & motiuo omnino gratuito præter merita. Si ergo idè dicitur electio ad gloriam non esse efficax ante merita, quia nō datur de facto, nisi ex meritis, cur etiā non dicitur ex motiuo gratuito Deū eligere efficaciter, quia electionem vt de facto dandam, & vt discernit prædestinatum à reprobis, non nisi ex dono gratis collato, & superaddito ad ipsa merita vult, scil. ex perseverantia finali?

4 Dices 1. perseverantiam non esse titulum ratione cuius datur gloria vt corona, sed conditionem sine qua non attingunt præmium ipsa merita: euacuatur enim merita, & tolluntur, si non perseverent; sublatis autem meritis non est mirum, quod præmium non detur. Quando tamen datur, perseverantia supponitur, sed gloria titulo meritorū datur, quia vt corona datur; & sic non dicitur dari gratis, sed ex debito, licet perseverantia gratis detur.

Secundò, conceditur quod electio non ad gloriā, sed ad ipsam perseverantiam, quæ est gratia, & electio gratuita, quia donum perseverantiæ gratis datur, sicut & prima vocatio; & sic electio ad primam gratiam ex misericordia est, non ex debito, & similiter electio ad gratiam, seu perseverantiam. Et hoc non negat opposita sententia: sed tamen electio ad ipsam gloriam vt dandam de facto post perseverantiam, non est ante merita, sed supponit illam, & ex illis est, licet supponat electionem gratuitam ad ipsam perseverantiam, quæ supervenit meritis, sicut etiam supponit electionem gratuitam ad ipsam primam gratiam ex qua procedunt merita. Sic ergo concedit opposita sententia electionem ad gloriam esse ex motiuo gratuito præsuppositivè, & antecedenter, quatenus supponit electionem ad gratiam, siue primam, siue finalem, quæ est perseverantia, gratis factam, sed tamen ipsa electio efficax ad gloriam, secundum quod gloria distinguitur à perseverantia, non est ante merita, sed ex illis, quia si supponit perseverantiam, quantum magis merita quæ sunt ante perseverantiam?

5 Sed contra primam solutionem instatur, quia nec nos dicimus perseverantiam esse titulum, sed conditionem dandi gloriam, requisitam tamen vt meritis gloria reddatur, & hanc non debet supponere, sed largiri gratis, & sine meritis ille qui dat gloriam, ita quod post exhibita merita, requiritur hoc donum gratuito datum, vt cum illo detur gloria: ergo est sufficiens motiuum eligendi, & intendendi gratis ad gloriam, etiam si danda sit quoad executionem intuitu meritorum. Patet hæc consequentia, quia quando Deus videt hanc gloriam dandam istis præ illis vt coronam, & intuitu meritorum, etiam videt efficaciter non posse dari illis meritis positis, nisi gratuito quodam dono superaddatur illis finalis perseverantia, quæ sine meritis datur, & ad quam immediatè, & infallibiliter gloria consequitur: ergo electio efficax, & intentio dandi gloriam intuitu meritorum supponit, & prærequirit aliud motiuum cæteris efficacius pendens ex mera liberalitate, & gratia Dei, nempe illudmet motiuum quo movetur Deus ad dandam perseverantiam finalem, etiam post merita, & tamen, non ex meritis dat illam: potest ergo similiter Deus prævidens hanc gloriam dandam vt coronam ex meritis, & volens non nisi per merita dare illam, moveri ex motiuo gratuita liberalitatis suæ ad eligendum totum hoc simul, scil. coronam ex meritis dandam, siquidem non sufficiunt merita ad efficacem consecutionem coronæ, nisi fulciantur gratuita donatione perseverantiæ

Ioan. à S. Thoma in 1. part. D. Thome.

danda ab ipso met qui daturus est coronam illam: ergo potest ex eodem gratuito motiuo habere hæc intentionem. Volo ex mea liberalitate efficacem consecutionem huius coronæ ponere adhibendo illa quæ ex mea liberalitate requiruntur vt gloria ista comparetur. Et hoc motiuum non est ex meritis, quia illo indigent ipsa merita vt consecutio efficax sit. Ergo bene stat Deum intendere efficacem gloriæ consecutionem, & non ex meritis, licet ibi in obliquo includantur merita, quia vult finem relatè ad illa, vt ad titulum ex parte personæ electæ ad gloriam, sed non vt motiuum ex parte Dei pro efficacia ipsa consecutionis: licet enim merita dent titulum, sed non efficaciam consecutionis, nisi superveniente dono gratuito, vt de facto consecutio fiat. Non ergo quia perseverantia est titulus, sed quia non est titulus ex parte personæ electæ, sed cōditio requisita, & à sola Dei liberalitate donata, oritur motiuum liberale ad intendendum efficaciter gratiam supra merita, seu non ex meritis. Et in hoc differt electio Dei ad gloriam, vt ad coronam, & electio Regis præmiantis ad sua præmia: nam Rex ita proponit præmium distribuendum, quod nec merita, nec virtutem merendi, nec perseverantiam donat gratis, sed supponit, solum autem procedit ad præmia danda ex istorum omnium suppositione. Quare non est ei alia via, & motiuum dandi præmium efficaciter, nisi ex vi meritorum, Deus autem non sic, sed ita dat præmium, & coronam vt index, quod etiā dat merita, & virtutem merendi vt prima causa, & ultra hæc omnia dat gratis perseverantiam finalem, sine qua efficaciter non datur gloria; & sic remanet ei locus habendi motiuum gratuitum, & liberale dandi gloriam vt efficaciter, & in re ponendā gratis, licet respectu personæ in executione titulo meriti, & ex debito detur.

Secunda autem solutio minus eleuat vim argumenti; quia non stat electionem ad gratiam finalem esse gratuitam, & electionem, seu intentionem gloriæ, vt efficaciter, & in re dandæ non esse gratuitam, seu ex motiuo gratuito procedere: nā illud quo ultimo disponitur vt detur in re, & de facto ipse finis seu præmium, si præcognoscitur in intentione, potest movere præmiantem, vt illo determinetur ad ponendum in re, seu dandū tale præmium, sed Deus prævidet quod quantumcumque eliciantur merita per gratiam suam, nisi gratis, & ex misericordia sua det perseverantiam finalem, merita illa non inducunt debitum, vt exhibeatur, & ponatur de facto gloria; ergo potest nisi motiuo gratuito, & liberali ad volendum totum hoc, scil. efficaciter ponere gloriam, vt coronam intuitu meritorum dependentiū à gratuito dono superaddito à Deo, vt finis ipse detur, nempe à perseverantia finali. Vbi autem merita non obligant, neque inducunt debitum nisi depēdenter à gratuito dono præmiantis, qui respicit merita sic dependentia à sua gratia, & liberalitate, & tamen vult vt de facto detur gloria, ex motiuo liberalitatis ad id volendum, & intendendum movetur, quia ex tali motiuo, & non sine illo merita valent, & inducunt ad præmium. Nec obstat quod perseverantia supponit merita; & sic volens gloriam dare intuitu gratuito perseverantiæ, à fortiori includit intuitum meritorum, super quæ cadit perseverantia. Non inquam, obstat, quia supponit merita vt dignificantia personam quantum est ex se, sed non sufficienter inducentia præmiantem ad realem exhibitionem præmi, nisi depēdenter ab aliquo à se dando gratuito, id est, à perseverantia. Ergo voluntas decernens dare præmiū hoc de facto, & in re absolute moveri debet ex motiuo aliquo gratuito, sine quo ipsa merita nō sufficiēter inducūt, etiā si dignificēt personā, quia possunt deficere, & non perseverare. Merita

E c 2 autem

328 Quæst. XXIII. De Prædestinatione,

autem perseverantia usque ad finem aliquid includunt præter rationem debiti, & meriti, scilicet gratuitum donum perseverantiæ ab ipsomet præmiante liberaliter collatum, & sine ipso gloria etiam in præmium non datur: ergo in ipsa collatione liberali talis doni, quæ est ultima conditio ad assequendam gloriam habet Deus sufficiens motuum gratuitum, & liberale ad intendendum dare gloriam efficaciter, & in re, quantumcumque merita supponat, aut ex tali voluntate derivari videat tanquam effectum voluntatis suæ, quia hoc gratuitum donum perseverantiæ etiam ipsa merita afficit, ut de facto gloria exhibeatur, licet posita perseverantia, ipsa gloria in re, non gratuito, sed ut corona iustitiæ reddatur meritis habentibus perseverantiam ex liberalitate Dei. Quod ex seq. ratione amplius confirmabitur.

7 Secundò ergo prob. ex speciali modo providentiæ divinæ, quæ ita universalis est, quod nihil præsupponit ex parte creaturarum, sed omnia causat, & ita non solum dat gloriam, ut præmium, sed etiam dat merita ipsa, & virtutem ad meritum; quæ est gratia, quod non invenitur in Rege creato dante aliquid in præmium, quia ad ipsum non pertinet dare merita, aut virtutem, & valorem merendi, sed supponere, & illis suppositis, ex debito tenetur dare præmium. Vnde in ipso non est mirum quod intentio efficax dandi præmium non possit intelligi, nisi suppositis meritis, quia non potest agens creatum intendere aliquid efficaciter, nisi supponendo causas à quibus dependet res illa in esse, & non est in manu eius tales causas ponere, sed aliquas debet supponere, & ex suppositione illarum, seu dependenter ab illis efficacem habere potest voluntatem, quia est efficacia imperfecta, & dependens à causis, non summa, & à qua cæteræ causæ, & media dependent.

Cæterum Deus habet summam, & universalissimam providentiam, non dependentem ab aliquibus causis, & mediis, sed à qua omnes causæ, & media dependent: ergo etiam ab ipso dependet gloria ut finis, & corona, & merita quæ ordinant, & deseruiunt ad faciendum debitum illum finem, ita quod ipsum debitum non supponitur à Deo, sed causatur, ideoque ipse sibi constituitur debitor, non ab aliquo præsupposito obligatur. *Quis enim prior dedit illi, & retribuetur ei.*

Quare appositissimum exemplum ad hoc explicandum, & intelligendum est, si quis haberet triticum ad vendendum, & non vellet illud dare, seu vendere, nisi exhibita pecunia, tamen ipse etiam daret pecunias, & non nisi ab ipso habere eas possent illi qui emunt triticum: in hoc casu possessor tritici intendens vendere triticum pecunia, si nihil aliud intenderet, in rei veritate, non videretur posse habere efficacem voluntatem dandi illud ante visam ipsam pecuniam, quia non nisi per illam moveretur ad dandum triticum de facto, & in re: sed si ulterius intenderet vendere triticum pecuniis à se donatis ipsis emptoribus, certè necessarium erat in tali homine collocare motuum gratuitum, ex quo moveretur, & vellet exhibere tale triticum, quia si ipsemet debet dare pecunias, ut ematur à se, nec aliter potest emi, nisi ipse det pecunias, æquivalenter est donare triticum; & sic motuum eius debet esse gratuitum, quo primo moneatur ad illud negotium, sicut cum Ioseph fecit reponi fratribus suis pecunias quas detulerant ad emendum triticum in ore saccorum, virtualiter, & æquivalenter voluit illis donare triticum ipsum, licet inter pecuniam quam dederunt, & triticum voluerit servari illam formam venditionis. Si ergo Deus vult dare gloriam ut coronam, & celum ipsum propo-

nit ut venale, sed tamen totus valor quo illud emimus, & merita, & gratiam debet ipsemet donare, ita ut quando coronat merita nostra, non coronet nisi dona sua, ut Aug. inquit, virtualiter vult donare celum, quia intendit illud dare ex meritis, non quomodocumque, sed dandis à seipso. Ergo benè stat quod intendat efficaciter tanquam finem dare gloriam ut coronam, & ut præmiu ex meritis, & tamen merita non se habeant ut motuum intendendi, sed ex gratuita voluntate intendat dare gloriam quasi ex motuo, quia licet in executione non nisi intuitu meritorum danda sit, tamen quia ista merita ex donatione Dei derivanda sunt, non potest intendere gloriam efficaciter, nisi ex motuo æquivalenter, aut superiori modo gratuito, quia vult dare gloriam ex meritis à se donandis, & consequenter, ut terminatur ad gloriam supponit motuum gratuitum proponendi illam ut per talia merita dandam; & sic respectu Dei omnis iustitia, & omnis ratio debiti tandem debet reduci ad aliquod gratuitum, & ex sola bonitate seu dependens, quod est radix debiti & iustitiæ, ut rectè S. Thom. advertit 1. p. q. 21. art. 4. Et in hoc maximè fundatur, quod id quod Deus dat ut præmium, & debitum, habet radicem in aliquo primo motuo omnino gratuito, quia totum dat, & merita ipsa, & præmium.

8 Formeretur ergo sic argumentum: Gloria ut danda ex meritis à Deo donandis est obiectum alicuius volitionis efficax, & non procedit ex meritis tanquam ex motuo, sed ex aliquo motuo anteriori, & superiori, licet in executione detur ex meritis: ergo ex motuo gratuito in ordine intentionis. Consequenter, quia non est aliquod motuum divinæ voluntatis, nisi vel ex debito, vel ex misericordia & gratis: ergo si in illo obiecto volendo, & intendendo Deus non procedit ex meritis, ut ex motuo, non procedit ex motuo per modum debiti (nec enim est alia ratio debiti, quam ex meritis) ergo procedit ex motuo gratuito & misericordiae. Maior prob. quia illud obiectum est ponibile in re, & de facto obtinendum: hoc enim exprimitur dicendo, *Gloria danda ex meritis à Deo donandis*: sic enim in re ponitur, & de facto datur: ergo est obiectum volitionis efficax: illud enim est obiectum efficax voluntatis quod respicitur ut de facto ponendum. Minor verò probatur, quia licet ipsa gloria quando in executione datur de facto homini, detur illi intuitu suorum meritorum, tamen quando Deus vult illam exhibere ex meritis à se donandis, æquivalenter vult illam donare in effectu, & coronare dona sua: ergo debet uti aliquo motuo gratuito, licet habeat homini dare meritum; & sic ex parte sua Deus uti debet motuo gratuito ad efficacem volitionem illius obiecti, prout comprehendit totum hoc, scilicet gloriam dandam ex meritis à Deo donandis, sicut qui haberet illam voluntatem. Volo triticum meum vendere pecuniis à me donandis, indigeret motuo gratuito, quo impelleretur ad sic volendum proponere de facto triticum suum: hæc enim voluntas etiam prout efficaciter tangit triticum, & exponit, & illa prout vult sic exponere gloriam, non potest moveri nisi aliqua ratione pure gratuita ex parte volentis.

9 Dices: Mouetur ipsa donatione gratuita meritorum; & sic prius vult gratis merita donare, & eligere ad gratiam, inde verò vult gloriam intuitu meritorum, sed quia sunt merita donata à Deo, hoc refunditur in ipsammet gloriam, ut intelligatur dari gratis, & gratuito motuo in sua radice, quia radix eius, quæ est gratia, & merita inde orta dantur à Deo gratis, non verò quia ipsa in se efficaciter volita antecedenter ad merita.

Sed contra, quia illa gratuita donatio meritorum

rum, & gratiæ datur à Deo determinatè pro aliquo præmio in ordine ad quod dantur merita: nec enim dantur prius à Deo illa merita absolute, & sine respectu ad aliquod præmium, & postea Deus videns illa, assignat illis præmium, sed quando dat illa merita gratis, in ordine ad aliquod præmium determinatum, & donat & destinat: ergo non potest illa gratia, & illud meritum esse efficaciter volitum, nisi supponat efficaciter esse volitum, & propositum in præmium id quod per tale meritum consequendum est. Patet conseq. quia meritum datur isti in particulari potius, quam illi, ut iste consequatur præmium potius, quam ille (loquimur enim de electione ad gratiam, & ad merita, quæ est propria prædestinatorum, & discernit illos à reprobis) sed istud meritum datur ut efficaciter determinatum, & destinatum ad talem determinatam gloriam in isto subiecto, & non ad gloriam in communi: ad hoc enim non datur efficax voluntas: ergo non solum debet supponere gloriam esse volitam in communi, & secundum quod proponitur communiter reprobis, & prædestinatis, sed in particulari, ut pertinet ad istud subiectum in tali vel tali determinatione, & mensura: ergo non solum debet supponi gloria ineffaciter volita, & in communi ut proponitur reprobis, & prædestinatis, sed ut determinatè, & efficaciter assequenda ab isto: sic enim est id ad quod destinatur, & determinatur tale meritum de facto. Non ergo movetur Deus ab ipsa donatione meritorum gratuita ad volendum istam determinatam gloriam huic subiecto, sed ante ipsam donationem meritorum debet supponi determinatam gloriam huic subiecto volita, siquidem merita donantur cum ordine, & destinatione ad illam, & non ad illam in communi, & ut ineffaciter est volita, & proposita reprobis, & prædestinatis: sic enim non consideratur ut assequenda, nec ut determinatè danda, sicut debet considerari quando respicitur à meritis huic prædestinato datis, & ad assequendam gloriam huic subiecto destinatis. Ergo antecedenter ad merita habet Deus in se motum volendi illam gloriam ut proponendam in præmium, & exhibendam de facto meritis à se donandis, sicut qui vult dare pecuniam suam ut ematur triticum à se, prius destinat triticum ad vendendum, non verò movetur pecuniis à se donatis ad vendendum illud, quia pecuniæ eo intuitu dantur ut illis ematur triticum, aliàs non darentur: ergo prius est etiam Deum velle proponere cælum venale isti, & in præmium dare, etiam si mereatur illud meritis à Deo donatis, & quia videt ex se merita non habere, movetur ad dandum ei gratis merita ut pretium emendi, & merendi cælum; non autè ipsius meritis movetur ad volendum cælum illi proponere, & dare venale. Motum autem quo proponitur aliquid emendum pecuniis ab ipso venditore donandis, vel meritis à præmiatore donandis, est motum gratuitum, quia æquivalenter est dare gratis in ordine ad Deum, licet inter ipsum præmium, & meritum respectu hominis servetur forma iustitiæ, ut *suprà* dictum est *disp. 6.* ergo ex motu gratuito antecedenter ad merita, & ad motum ex debito movetur Deus ad intendendum efficaciter gloriam, & eligendum determinatè istum ad illam.

10 Tandem ratio à priori huius veritatis est ea quam tradit S. Th. in *presenti q. a. 4.* & reducitur ad hanc formam. Merita quibus prædestinatus assequitur gloriam, serviunt ut media, quibus tenditur ad gloriam, ut ad finem: ergo debent esse provisa, & præparata à Deo, sicut media providentur, & præparantur ad aliquem finem. Hæc conseq. est manifesta; & ante-

Ioan. à S. Thoma in 1. part. D. Thoma.

cedens non potest negari, quia merita non quaeruntur propter se, sed propter præmium, & præmium quod est merces meritorum est ultimum quod adepti cessant merita, & denique gloria ipsa est finis ultimus, & pertinet ad felicitatem ultimam, dicente Concil. Trid. *sess. 6. cap. 7.* quod *Finalis causa nostra iustificationis est gloria Dei, & Christi, & vita æterna*: ergo ipsa vita æterna exercet respectu gratiæ, & meritorum causalitatem causæ finalis, merita verò pertinent ad hanc viam, qua tendimus ad illam felicitatem, ut ad ultimum finem: ergo merita se habent ut media, quibus tendimus ad gloriam ut finem. Rursus est secunda conseq. Quæcumque media eliguntur, & præparantur ad aliquem finem, oriuntur, & derivantur ex intentione, & volitione efficaci talis finis, nec sufficit inefficax: ergo merita quæ se habent ut media ad gloriam, ut ad finem, oriuntur, & derivantur ex intentione efficaci talis gloriæ, nec sufficit inefficax eius voluntas: ergo antecedenter ad merita provisa, & præparata, & electa datur intentio efficax volitiva gloriæ; & sic ex motu gratuito, quia si non est illud motum in vi debiti, oportet quod sit in vi gratuiti. Hæc ultima consequentia manifesta est, quia si prærequiritur, & antecedit volitio efficax finis volitionem meritorum: ergo ante volitionem meritorum datur finis efficaciter volitus: ergo non possunt merita esse motum illius volitionis finis, siquidem antecedit illa, nec finis intenditur propter merita, sed exhibetur in re propter merita: ad intendendum enim non requiritur titulus, sed ad dandum: ergo si intenditur efficaciter ante merita, efficax illa volitio non est ratione meritorum. Prima verò consequentia est manifesta ex antecedenti, quia merita, ut ostensum est, sunt media respectu gloriæ ut finis: ergo si omnia media supponunt efficacem volitionem finis, etiam merita eam supponunt. Anteced. ergo prob. Media non possunt esse volita sine præcedente intentione aliqua finis: sic enim non essent volita per se ex intentione, sed casualiter, & per accidens: illa enim sunt casualiter, & per accidens volita, quæ non ex intentione alicuius finis, nec alicuius gratia fiunt. Nec sufficit quod iste finis sit ineffaciter volitus, sed debet esse volitus efficaciter, quantum est ex vi finis: nam finis ineffaciter volitus est ille cum quo bene compatitur frustratio effectus, & non electio mediorum, imò de se non inclinat ad providenda, & eligenda media, quia de se non est volitus ut de facto ponendus; sed tantum per simplicem complacentiam amatur, solum autem movetur voluntas ad eligenda media pro aliquo fine, quando consideratur vel iudicatur ut assequendus, sed nunc sufficit nobis, quod ille finis sit ineffaciter volitus, cum quo compatitur non electio mediorum, & frustratio assecutionis finis: ergo si eligantur media, & consequantur effectus, non erit per se in virtute talis voluntatis finis, sed omnino per accidens, & casualiter. Patet hoc, quia illud sequitur per accidens ex aliquo, & non per se, quando cum illo æquè bene compatitur sequi effectum, vel non sequi: sic enim non habet connexionem per se cum illo: ergo ut per se sequatur, & non per accidens, aut casualiter, indiget alia voluntate, seu alio principio habente connexionem per se cum tali effectum, seu electione: ergo indiget quod extrahatur à linea inefficacis volitionis, & transeat ad efficacem, eo modo quo finis efficaciam habet in sua linea ad movendum efficiens, quia quandiu manet intra terminos inefficacis volitionis, quidquid ex illa sequitur,

Ee 3 non

non per se, sed casualiter, & per accidens sequitur, quia æquè bene oppositum stat cum illa voluntate, siquidem non habet per se connexionem cum illa.

11 Urget amplius hoc argumentum in Deo, quia cum sit principium vniuersalissimum omnium causarum, & effectuum, nihilque accidat sine eius voluntate, si habet inefficacem voluntatem circa aliquem finem, idè est, quia eius assecutionem non vult; quod patet manifestè, quia illa est inefficax voluntas, quæ non habet effectum, nec de facto illum respicit, sed non habere effectum est ex aliqua ratione, & causa impediante, aut inducente oppositum: ergo hoc ipsum debet nasci ex voluntate Dei, quia sine ipsa nulla causa, & nulla ratio posset impedire aut inducere oppositum; habuit ergo Deus voluntatem ne fieret effectus: ergo non potuit intendere efficaciter vt fieret, nec eius assecutionem velle, aliàs vellet duo contradictoria, scil. assecutionem, & non assecutionem. Voluntas ergo inefficax non solum in Deo est illa cum qua compatitur frustratio effectus, vel negatio electionis mediorum, sed etiam est illa, quæ de facto habet adiunctam voluntatem, ne fiat effectus, seu vt impediatur, aut si non habet adiunctam talem voluntatem: ergo vel vult vt de facto fiat, & non habet voluntatem impediendi; & sic nihil ei deest vt sit voluntas efficax, vel abstrahit ab hoc quod est de facto fieri, vel non fieri, & solum habet simplicem complacentiam de bonitate obiecti, qualem dicunt oppositi Authores habere de creaturis possibilibus. Si de facto habet adiunctam voluntatem ne fiat effectus, & vt impediatur: ergo si effectus fiat, & eligantur media, contra eius voluntatem fit; & sic non solum erit præter eius intentionem, & casualiter, sed etiam contra eius voluntatem, quod repugnat. Si habet voluntatem vt de facto fiat, & voluntatem vt non impediatur, est voluntas efficax, cum tendat ad effectum de facto sine vllò impedimento. Si abstrahit ab eo quod est de facto poni, vel impediri, aut non poni, & solum est simplex voluntas, sicut de possibilibus: ergo si ex tali voluntate sequitur electio mediorum, & effectus consequitur, non per se sed casualiter consequetur. Patet conseq. quia volitio simplex non intendit consecutionem de facto: ergo si sequitur, per accidens ad illam voluntatem sequitur: illa enim non habet connexionem per se cum illo effectum, nec intendit consecutionem de facto, nec agit de illa: ergo si consecutio sequitur, præter illius voluntatis intentionem sequitur: ergo vel aliam voluntatem habet Deus intentionem huius consecutionis per se, & efficaciter, & sic in illa habemus intentum, vel nullam habet intentionem huius consecutionis; & sic effectus ille accidit casualiter, & per accidens respectu Dei, quod nefas esset dicere. Quare hi Authores, qui solum ponunt inefficacem voluntatem finis sufficere, totam verò efficaciam constituent in effectum futuro, & denominatione extrinseca, quæ inde resultat, consequenter ponunt efficaciam non nasci per se, id est, ex connexionem causæ, seu intentionis dirigentis cum effectum, quia finis ille sic inefficaciter volitus non magis connexionem habet cum positione effectus, quàm cum opposito: solum ergo efficacia sumitur ex euentu secuto ex parte effectus, non ex connexionem per se cum directione causæ, sequitur ergo per accidens.

12 Mirum est quantum hoc argumentum torqueat aduersarios. Et primò occurrit Molina 1. p. q. 23. a. 5. disp. 1. membr. 7. §. Ad fundamentum; dupliciter.

Primò quòd licet in his qui ordine quodam volunt finem, & media, prius velint finem, quàm media, in Deo tamen non ita contingere, sed simul velle finem, & media, præsertim in hac materia prædestinationis. Secundò occurrit, eum qui vult finem, non sibi, sed alteri, non prius velle illum absoluta voluntate, quàm præuideat merita eius, & media quibus peruenturus est ad illum: qui enim vult alicui præmium, potest quidem prius velle illud voluntate conditionata, alteri si ille merita habuerit, non tamen potest absolute, & efficaciter velle illi præmium, nisi visis eius meritis. Et qui vult operario denarium diurnum per modum mercedis dare, potest quidem prius, quàm eius laborem videat conditionatè velle dare mercedem si ipse laborauerit, sed non absolute, nisi viso labore.

Secundò P. Vasq. hausit hanc secundam solutionem Molinæ; respondet enim disp. illa 89. c. 13. quòd ad assequendum finem sibi prius habet quis voluntatem efficacem circa illum, quæ est prior omni voluntate mediorum. Ad volendum autem finem alteri, non est necesse quòd præcedat voluntas efficax, & absoluta de fine, sed sufficit quòd præcedat simplex desiderium de tali fine, tamen absoluta, & efficaci voluntate non decernit finem dare, nisi præuisis meritis, vel mediis talis hominis ad finem, sicut patet in eo qui proponit præmiu certantibus, qui etsi desideret amicum aliquem victorem euadere, & ei ob hoc tribuat meliora arma, aut instrumenta, quàm alteri, non tamen absolute, & efficaciter decernit dare illi præmium in ratione præmi; quàm, postquàm victoriâ eius spectauerit. Similiter qui vult filium suum doctorem euadere, potest ex illo desiderio moueri ad hoc vt ei præbeat studiorum subsidia, non tamen illud primum desiderium in patre efficax est, quia non subest eius potestati filium doctorem euadere; imò addit Vasquez quòd volûtas Dei erga prædestinatos ante præuisa merita etiam in ratione simplicis affectus non est maior erga prædestinatos, quàm erga reprobos, sed omnibus æqualis est, nec vult illis nisi gloriam ex vi illius affectus, talem verò, vel tantam gloriam solum vult iuxta mensuram gratiæ, & meritum. Et sic ex æquali voluntate simplici, & inefficaci circa gloriam mouetur Deus ad danda feliciora auxilia prædestinatis quàm reprobis, & meliora merita, & ibi incipit discriminari voluntas, & esse maior circa prædestinatos.

14 Tertio, P. Arrubal hinc disp. 73. c. 1. respondet volitionem mediorum non subordinari necessariò voluntati efficaci ipsius gloriæ, sed ex alio fine posse procedere, scil. ex amore quem Deus habet ad se, ratione cuius vult distribuere gratiam, & merita alicui. Quòd verò etiam habeat voluntatem efficacem dandi illi gloriam, non est necesse, quia talis finis licet sit perfectio hominis, non tamen est perfectio volitionis diuinæ, & ita non pendet per se volitio mediorum conducentium ad illum finem ex volitione efficacis talis finis. Addit disp. 74. cap. 2. non sufficere efficaciam decreti intendentis gloriam ante præscientiam meritum vt concurrat ad executionem gloriæ, sed requiri insuper aliud decretum quòd det efficaciam pro executione, & hoc debet esse ortum ex præscientia meritum, quia non potest dari gloria per merita nisi supponatur eorum præscientia, quia merita non mouent nisi in genere causæ moralis, & consequenter media cognitione sui.

P. Suarez lib. 1. de prædest. c. 8. n. 48. cum latè probasset sententiam S. Th. de electione efficaci ad gloriam

riam per absolutam intentionem antecederet ad merita, tandem in solutione rationis dubitandi à principio, eò deuenit vt diceret intentionem illam & decretum dandi gloriam non esse intrinsecè, & quasi physicè necessarium vt homines possint salutem æternam consequi, quia aliàs non sic electi absolute saluari non possent, quia talis electio non est in eorum potestate, & arbitrio. Similiter non est necessaria tanquam voluntas præbens ipsa auxilia & concursus necessarios ad bene operandum, quia non versatur illa electio circa hæc obiecta; nec est necessaria tanquam voluntas præsupposita ad danda ista media, quia sufficit simplex, seu conditionalis affectus antecedens, & illa obiecta habent in se vnde amari possint. Quare solum tale decretum, seu intentionem dicit esse conuenientem, seu necessariam ex parte Dei providentis & volentis ad præparandum, & disponendum omnia quæ pertinent ad cæleste regnum, sicut non est physicè necessarium ad ambulandum, ex hac, vel illa intentione moueri, est tamen conueniens ex parte hominis quòd id ex honesto fine fiat efficaciter volito. Ita ex hac doctrina Suarez videtur suam deriuasse solutionem Arrubal.

15 Quartò, P. Lessius ubi supra disp. de prædest. respondet Deum ex intentione gloriæ non applicare media efficacia ex vi prædictæ intentionis, sed quòd efficacia materialiter se habet respectu talis volitionis antecedentis: hoc enim satis est vt media sint volita propter finem, & ex intentione finis. Addit secundo, quòd finis, & præmium non est necesse quòd sit volitus efficaciter ante media per quæ consequitur, id est, ante merita, quæ est solutio Molinae, & Vasqu. Et tertio dicit quòd ante merita præuisa est volita absolute beatitudo in communi, in particulari autem, vt applicata huic singulari, v. g. Petro, non est volita ante præuisa merita, nisi conditionaliter.

Possent denique dici, quòd efficax intentio gloriæ, & merita præcedunt se ad inuicem in diuerso genere causæ: nam electio ad gloriam præcedit electionem mediorum in genere causæ finalis, sed media ipsa, seu merita præcedunt in genere causæ dispositiue & materialis efficacem electionem ad gloriam, quatenus reddunt personamabilem, & dispositam, vt ei detur gloria, sicut reprobatio, vt punitio, supponit peccatum quod reddit hominem poena dignum, vt autem exclusio à regno, præcedit permissionem peccati in genere causæ formalis. Quæ doctrina tradi videtur à D. Thom. qu. 6. de verit. art. 2. ad 2. dum inquit, quòd *Prædestinatio respicit aliquo modo id quod est ex parte nostra, non sicut inclinans diuinam voluntatem ad volendum, sed sicut id ad cuius productionem diuina voluntas gratiam ordinat, vel etiam sicut id quod ad gratiam quodammodo disponit, & gloriam meretur.* Potest ergo in genere causæ dispositiue meritum ex parte nostra præcedere prædestinationem ad gloriam. Quod etiam expressit in hac quæst. art. 5. in corp. dum inquit, *nihil prohibere, quòd aliquis effectus sit ratio, & causa alterius, posterior quidem prioris secundum rationem causæ finalis, prior verò posterioris secundum rationem causæ meritorie, quæ reducitur ad dispositionem materie, sicut si dicamus, quòd Deus præordinauit se daturum alicui gloriam ex meritis.* Quid clarius? præcedunt ergo merita præordinationem ad gloriam secundum genus causæ dispositiue, & materialis in sententia S. Thom.

16 Contra solutiones istas, stat solida ratio facta à nobis, quæ est fundamentum ipsum D. Thom. in hac qu. art. 4. & qu. 6. de verit. art. 1. Et quidem primam solutionem Mol. reiecit bene P. Suarez lib. 1.

de prædestin. c. 8. tractando primam opinionem, & c. 13. num. 7. quia vel debet negare Molina in vniuersum omnem distinctionem, & ordinem prioris & posterioris in decretis diuinis circa quamcumque materiam, vel nullum habet fundamentum vt negetur in isto negotio prædestinationis. Negare in vniuersum istam distinctionem est contra communem sensum Theologorum, vt tractauimus supra disp. 5. art. 1. eo quod ista signa, & prioritates non tenent se ex parte ipsius actus diuini, sed ex parte obiectorum, inter quos dari ordinem, & prius, ac posterius negari non potest, nisi qui negauerit inter obiecta à Deo volita vnum esse causam, & aliud effectum, vnum esse finem, aliud medium, & ex vno ad aliud deriuari causalitatem, & ordinem, ratione cuius dicitur Iudith 9. *Tu Domine fecisti priora, & illa post illa cogitasti, & hoc factum est quod ipse voluisti.* Ergo fundamentum est ad distinguendum prius, & posterius in cogitatione, seu decreto Dei, non ex parte diuini actus, sed ex parte rerum ordinarum à Deo. Ratione cuius etiam communiter docent Theologi Christum Dominum prius esse prædestinatum, quàm reliquos, quia reliqui electi sunt in ipso, vt dicitur ad Ephes. 1. & de ipso in capite libri scriptum est, quod de Christo dictum esse interpretatur Apostolus Paulus ad Heb. 10. ergo negari non possunt ista instantia seu prioritates in decretis diuinis ex parte obiectorum, quæ à decretis connotantur. Quòd si semel admittuntur, non est cur negentur in electione ad gloriam, & præordinatione mediorum, tum respectu finis, tum inter se, quia in istis inuenitur ordo, & causalitas, & prius, & posterius ex parte obiectorum, cum vnum se habeat vt finis, alia vt media, & vnum medium sit propinquius alteri, & agat in virtute, & coordinatione alterius. Et licet vnum istorum sit connexum cum alio, nec possit vnum in re poni sine alio, tamen vnum nõ est formaliter aliud, sed virtualiter, & causaliter includit aliud, seu deriuat aliud ex se, vnde potest voluntas efficaciter attingere vnum efficacia intentionis formaliter, & efficacia executionis virtualiter; quod sufficit vt in alio posteriori intelligatur attingi formaliter.

Contra secundam solutionem Molin. quæ est 17 etiam solutio Vasqu. instatur manifestè, quia quando positio mediorum, & assecutio finis non est in potestate alicuius pro ea parte, qua non est in sua potestate, non est efficax perfectè, & adæquatè, sed conditionatè, & dependenter; & sic non mirum quòd ex illo capite non oriatur illa mediorum dispositio ex efficaci voluntate finis simpliciter, & perfectè, licet absolute efficax esse possit, quatenus etiam id quod est in potestate alterius assequi intendit, vel precibus, vel suasionibus, aut aliis remediis quibus potest; & sic potest efficaciter intendere, quatenus fertur in rem vt assequendam, & ad eius assecutionem media disponit. Cæterum si id quod per alterius voluntatem exequendū est, sit dependens à voluntate, quæ totaliter, & omnibus modis est in manu mea eam immutare, & inclinare, & potestatem alterius possum mouere non minùs quàm propriam, in tali causa perinde erit quòd res assequenda dependeat à voluntate alterius, vel solum à mea, quia æquè bene est in potestate mea voluntas, & potestas alterius, quàm propria. Sic autem est quod voluntas creata, etiam vt libera, & omnis potestas creata non minùs est in manu Dei, quàm propria voluntas, quia vt dicitur Prou. 21. *Cor. Regis in manu Dei, quocumque voluerit vertet illud,* & idem est de voluntatibus omnium hominum, quia magis habet Deus in potestate sua volun-

332 Quæstio XXIII. De Prædestinatione,

rates hominum quam ipsi suas, ut dicit August. lib. de corrept. & gratia c. 14. Ergo otiosè affert Valquez, & Molina doctrinam illam de eo qui intendit finem ut assequendum per alium, cum respectu Dei non minùs sit in manu eius quod exequendum est per meam voluntatem, quam per suam, cum possit de voluntatibus hominum quod voluerit, quando voluerit facere, habens humanorum cordium inclinandum quò voluerit omnipotentissimam potestatem, ut August. dicit. Et sic potius retorquetur argumentum, quia si in his quæ à propria voluntate dependent, & in manu nostra sunt, prius est finis efficaciter intentus, quam prævisa sint media: ergo, cum voluntates hominum sint in manu Dei, multò magis quam in propria, potest Deus etiam respectu illorum finem intendere efficaciter ante prævisa media. Vnde ad exempla Mol. dicitur quòd ille qui vult alteri dare præmium, & qui vult mercenario dare denarium ob diurnum laborem, si in manu eius sit dare illi victoriam, & vires, & instrumenta, & isti facultatem, & voluntatem laborandi diurno labore, bene potest intendere illud præmium, & hanc mercedem efficaciter ut finem, & deinde in ordine ad illum consequendum merita, & laborem tribuere, quia totum hoc debet esse à Deo. Si ergo in his quæ Deus se solo facit, potest primò intendere finem, & deinde media, & utrumque efficaciter, quia totum ab eo, similiter quia in gloria, & in meritis, in mercede, & labore diurno totum à Deo est, & non minùs in manu eius mouendo, & inclinando, & trahendo voluntatem creatam, quam si se solo faceret: ergo potest eodem modo utrumque efficaciter intendere, primò gloriam ut finem, deinde merita, quia illa vult ut danda à se, & non solum à voluntate alterius exequenda, sed etiam à se deriuanda.

18 Ad exempla autem P. Vasqu. eodem modo resp. Nam de eo qui vult alteri præmium, etiam si desideret ipsum euadere victorem, iam diximus quòd si in manu, & potestate eius qui proponit præmium est dare alteri vires, induitiam, fortunam, cæteraque omnia requisita, ut mereri possit præmium, ita quòd non solum præmium, sed, & meritum, & victoriam dare possit, talis bene potest ante merita prævisa intendere ei dare præmium virtualiter volendo dare illi meritum ex vi talis intentionis, eo quòd merita illa non debet ipse præmiator supponere, sed largiri, vnde potest absolute intendere dare præmium ex motu suæ largitatis, qua istum eligit, ad tale præmium consequendum, obligando se ex vi talis intentionis, & voluntatis ad dandum ei ipsa merita, & quicquid ad merendum requiritur. Quod non currit in hominibus, qui possunt proponere præmia danda certantibus, sed non possunt dare ipsa merita, & idè supponere ea debent, non causare; & sic non possunt habere intentionem efficacem dandi præmium nisi suppositis meritis, quia ab eis merita causanda non sunt. Similiter qui intendit filium suum doctorem euadere, & idè ministrat subsidia ad studium, bene posset habere efficacem propositum & intentionem ut doctor euaderet, si in eius potestate esset ministrare illi ingenium, applicationem, intelligentiam, & voluntatem addiscendi, quia verò ista non sunt in manu eius, non intendit nisi ea quæ potest, ea autem quæ non potest, efficaciter non intendit per se, sed per alios procurat: si verò per se omnia illa posset, licet exequenda per alios, quia in manu eius est quicquid alij faciunt, utique etiam illa intendere posset efficaciter, & ex efficaci eius intentione deriuaretur, quia ab eo causandum esset, & non supponendum. Si

ergo isti Authores fatentur, quòd quando finis assecutio non pendet ab alio, potest ab eo intendi efficaciter ante prævisa media, quia in manu eius est ponere illa, & assequi finem: & constat quòd respectu Dei, qui omnia potest, idem est per seipsum ponere media, vel per alios, nec minùs est in manu sua quòd per alios ministratur, quam quòd à se immediate exhibetur, etiam potest intendere efficaciter finem assequendum, & deinde de mediis providere. Nec per hoc obligatur Deus libertatem violare cogendo ad merita eum, qui sic electus est ad præmium, quia in omni opinione siue Dens antecederet prædeterminet voluntatem, illa si libertate, siue non; constat tamen non deesse illi modum in infinitis rerum combinationibus voluntatem sic præparare supposita electione quòd infallibiliter habeat merita, & non lædatur libertas, aliàs merita non essent. Quod verò Valquez dicit ex vi desiderij primi inefficacis, quò Deus vult omnibus gloriam siue reprobis, siue prædestinatis, æqualem omnibus velle gloriam, non discernendo quem gradum unicuique daturus est ante prævisa merita, ex quibus mensuratur qualis gloria unicuique danda est, hoc ex eodem principio refellitur, quia si in manu Dei est ponere, & causare ipsa merita, iuxta quæ mensuratur in executione exhibitio gloriæ, bene potest intendere efficaciter determinatam gloriam isti, & exinde moueri ad causanda merita in tali gradu, & mensura, quòd per illa in executione mensuretur, quia utrumque debet dari à Deo, tam præmium ipsum, quam meritum per quòd mensurandum est præmium in executione.

19 Contra responsionem Arrubalis instatur, quia licet verum sit Deum velle omnia ex amore sui, tamen hic finis est valde generalis: omnia enim propter seipsum operatus est Dominus. In negotio autem prædestinationis specialem finem intendit; idè enim prædestinatio specialis providentia est, quia respicit specialem finem, scil. gloriam ut assequendam, quæ licet non sit perfectio diuinæ volitionis in se, est tamen perfectio causata à diuina volitione, & perfecta ab ipsa, non perficiens ipsam diuinam volitionem, aut causans ipsam. Est autem volita, & causata à Deo, non ex æquo cum ipsis meritis, sed ut finis assequendus per ipsa: sic enim ponitur inter finales causas iustificationis gloria æterna à Concilio Trident. sess. 6. c. 7. ergo hoc ipso est volita à Deo gloria, ut finis meritum, & prius quam ipsa. Vnde siue pendeat per se, & ex natura sua gratia ab illo fine gloriæ, siue non pendeat, tamen de facto gloria est volita à Deo ut causa finalis nostræ iustificationis, ut docet Concil. & consequenter ut finis meritum, quæ ad iustificationem sequuntur: ergo de facto stante hoc ordine rerum procedit iustificatio, & merita ex illo fine, licet etiam tandem referantur ad ipsum Deum qui ex amore sui vniuersa voluit; sed nobis sufficit quòd de facto procedat ab illa gloria volita, ut à speciali fine, & habente rationem causæ finalis respectu gratiæ, & meritum: nam si hoc habet, ergo exercet causalitatem finalem respectu eorum: ergo intuitu eius vult Deus illa, & prius efficaciter vult gloriam, quam gratiam, & merita prioritate, & causalitate finis, à cuius efficacia pendet efficacia mediorum: ergo ex hac parte non euacuat Arrubal argumentum dicendo, quòd non procedunt merita à gloria, ut à fine, sed ex alio fine, siquidem de facto Deus voluit gloriam esse causam finalem iustificationis, ut Concil. docet: ergo de facto exercet munus causæ finalis in iustificationem, & merita: ergo subordinatur de facto illi fini gratia, &

& meritum : ergo procedit ex amore finis huius, supposito quod Deus illam voluit ut causam finalem huius; & sic ex voluntate Dei subordinatur illi ut fini, & procedit ab eius intentione: non ergo repugnat procedere ex intentione efficaci finis ex hac parte, quia videlicet non subordinatur per se illi fini, nec procedit ab illo, cum ostensum sit procedere, eo quod gloria est causa finalis gratiae, & iustificationis; & sic est volita à Deo: ergo ex hac suppositione procedit ab illa, ut à fine, & subordinatur ei.

20 Ad id verò quod addit Arrubal, requiri pro executione dandi gloriam aliud decretum ortum ex praescientia meritorum, quod det efficaciam pro executione. Respon. quod si hoc intelligatur de decreto electivo, & executivo circa media, quod sequitur ex actu intentionis, sicut in nobis post intentionem sequitur electio mediorum, & post electionem imperium faciens imperum ad executionem, & quod haec decreta deriuentur ex intentione finis, & ab eius efficacia accipiant ipsa, & deriuent efficaciam in se, verum est quod dicit, & haec est nostra sententia, ut *suprà* explicuimus *disp. 5. art. 1.* agentes de distinctione ordinis, intentionis, & executionis, quia tunc versatur efficacia utriusque decreti circa diuersa obiecta: vnum circa finem, aliud circa media, vnum secundum efficaciam finalem, aliud secundum efficientem. Si verò velit intentionem finis esse decretum ex se inefficax, & requirere aliud decretum ortum ex praescientia meritorum à quo sumat efficaciam suam circa ipsum finem, ita quod circa idem obiectum, scilicet circa finem, sit duplex decretum, alterum inefficax ordine intentionis, alterum efficax ex efficacia executionis ortum, falsum est, quia efficacia executionis necessariò supponit, & deriuatur ex efficacia intentionis in genere finalis causae procedentis, siquidem ex voluntate inefficaci finis, non sequitur effectus per se: nam stat bene poni inefficacem voluntatem, & non sequi effectum: ideo enim inefficax est, quia effectum caret de se, si autem sequitur effectus, erit per accidens & casualiter, non per se ex vi talis inefficacis intentionis. Ergo decretum illud secundum non potest dare totam efficaciam requisitam ad effectum, sed aliquam debet supponere, nempe eam, quae est in genere causae finalis in ordine intentionis, ex qua deriuatur efficientia executiua, quae ordine executionis agit, id quod ordine intentionis praconceptum est. Quod declaratur ex coordinatione istarum causarum inter se, quia causa efficiens executiua mouetur à finali, siquidem agit gratia illius: ergo supponit causalitatem causae finalis, aliàs nunquam de facto ageret causa efficiens, si à causalitate finis non moueretur: ergo supponit efficaciam finis. Pater consequentia, quia efficacia finis est causalitas eius: haec enim est causatio eius de facto: ergo, & efficacia. Non ergo potest hanc efficaciam habere ex decreto executivo, & posteriori, aliàs acciperet causalitatem finis (in qua consistit eius efficacia) à suo effectum, & ab eo quod est posterius se, & ab efficiente praestaretur causalitas, seu efficacia finis, quod repugnat. Restat ergo quod ante hoc decretum sit efficacia in decreto intentionis, quae pertinet ad suam lineam, scilicet in genere causae finalis, nec ista praestari potest à decreto executivo quod oritur ex praescientia meritorum. Vnde etiam fit quod non possit intentio accipere ordinem ad effectum ab illo posteriori decreto, quia causa finalis, & eius intentio non habent vim cauendi finaliter, nisi in quantum respiciunt effectum ut faciendum, non verò ut respiciunt bonitatem obiecti secundum

se, & abstrahendo ab ordine ad existentiam, quia non finalizat finis per causalitatem suam finalem, nisi mouendo efficiens ut agat gratia talis finis: ergo debet intendere, & respicere effectum ut faciendum, & ut ordinetur ad esse, non verò secundum suam bonitatem praecise abstrahendo ab ordine ad esse. Hoc ergo quod est respicere effectum, ut faciendum, non accipit intentio ex decreto posteriori executivo, sed antecederet haber ex se, cum ratione illius moueat ipsius efficiens ut operetur, & ratione illius respiciat media in obliquo: respicit enim finem ut assequendum per media; & sic media respicit ut effectus, quia respicit illos ut deducendos, & cauendos ex fine: non ergo ut motuum; & sic ex illis non habet efficaciam; sed potius ex efficacia finis deriuantur illa media.

Ad id verò, quod dicit P. Suarez, constat manifestè ex dictis, voluntatem illam eligendi ad gloriam determinatè, & efficaciter, si requiritur, necessariò requiri ad disponendum de mediis, nec posse suppleri per voluntatem simplicem, & inefficacem, quia voluntas finis, quae influit in media, & mouet ipsum efficiens, debet esse voluntas talis, quae operari, & cauere possit in genere causae finalis, aliàs nunquam moueretur efficiens ex vi finis; & sic solum ageret casualiter, & praeter finem. Causa autem finalis operans in genere causae finalis, & habens causalitatem in eo genere, habet etià efficaciam in eo genere, quia idem est efficacia quod causalitas de facto influens in eo genere, in quo efficacia est, & si est sufficiens ad perducendum usque ad executionem in re, est perfecta, & plena efficacia. Sicut ergo non potest suppleri causalitas finis per voluntatem eius inefficacem, quia inefficax voluntas non mouet per se, & in vi sua ad operandum, sed si mouetur efficiens, casualiter & per accidens à tali voluntate mouetur, ita non potest suppleri efficacia eius ad mouendum efficiens, & cauendum media in genere suo, id est in genere causae finalis. Non ergo consequenter potest dici, quod detur absoluta intentio eligendi ad gloriam, ut ad finem ante prauiſa merita, & quod haec voluntas non sit necessaria in ordine ad media eligenda, sed quod possit suppleri per simplicem, & inefficacem voluntatem, cum omnino necessaria sit propter subordinationem mediorum ad finem, & dependentiam efficaciae huius ab efficacia illius, si per se ex fine debet deduci, & non per accidens, & casualiter euenire.

22 Contra solutionem P. Lessij vix oportet instare: nam inquiri: Quando Deus vult gloriam ut causam finalem iustificationis & meritorum (esse autem causam finalem docet Concil. *ubi supra*) ex vitalis volitionis, & intentionis finis per se vult aliquid, vel non. Si non vult aliquid, frustra est illa causa finalis, quia nihil per se consequitur ex illa; & sic per se non est causa, sed materialiter, & per accidens. Si autem per se vult aliquid ex vi intentionis talis finis, maximè efficaciam mediorum: nam finis maximè mouet ad sui assecutionem, si est intentus, & non simplici tantum voluntate volutus, & Deus in praedestinis intendit assecutionem finis in re, & cum effectum: ergo maximè debet cauere efficaciam mediorum ad talem assecutionem: id enim principaliter conducit ad talem assecutionem. Si ergo Deus assecutionem intendit illius finis voluntate antecedenti, & priori in ordine intentionis, vel cognoscit efficaciam mediorum, vel non. Si non cognoscit, caret scientia. Si cognoscit, & non intendit ex vi finis, caret prudentia, quomodo enim prudenter procedit, qui intendens assecu-

secutionem alicuius finis, quæ vnicè dependet ex efficacia mediorum prætermittit intendere illam, & solum materialiter ibi adhibetur efficacia, cum hæc sit maximè requisita, & non casualiter debeat adhiberi: sic enim exponitur casui, & fortunæ, & consequenter frustrationi, si non per se, & formaliter ex vi finis efficacia media adhibentur, sed solum materialiter, & per accidens apponuntur. Quod verò secundò addit non esse necesse quoddam finis, & præmium prius sit efficaciter volitum ante media, iam *suprà* contra Molinam & Vasquez impugnatum est, cum gloria sit finis ut consequendus in re per media danda ab ipso Deo, non ab alio principio expectanda, sed prorsus in potestate eius sita. Et ad idem pertinet quod dicit beatitudinem esse volitam in communi ante præuisa merita, non in particulari pro Petro, vel Paulo: nam beatitudo in communi non est volita efficaciter, & per electionem, quæ discernit reprobos à prædestinatis: nec enim beatitudo in communi proponi potest ut assequibilis efficaciter, cum in communi à nullo assequi possit. Solum ergo in communi diligi potest ratione suæ bonitatis, & secundum quoddam communis est prædestinatis, & reprobis, non autem ut in esse, & exercitio assequenda. Nec electio ad gloriam, ut discernit prædestinatum à reprobo, potest esse, nisi ut propria, & individualis istius: ergo non in communi. Et Deus eligens determinatè ad hanc gloriam ante merita, cum habeat in potestate sua dare merita, quæ velit, & in qua mensura velit, nec dependeat in hoc ab homine, sed homo ab ipso, *quia unicuique data est gratia secundum mensuram donationis Christi*, ad Ephes. 4. consequenter non minùs potest in hoc fine intendendo procedere ex absoluta, & efficaci intentione ante merita, quam in fine, qui assequendus est per merita ab ipso solo Deo ponenda, ut probatum est.

23 Ad id denique quod dicitur de præcedentia meritorum, & gloriæ in diuerso genere causæ; Resp. quod illud intelligitur secundum ordinem intentionis, & executionis, quod videlicet gloria est causa finalis meritorum, & præcedit illa in hoc genere causæ finalis, qui est ordo intentionis. In quo genere non possunt merita præcedere dando rationem motivam electionis huius, quia sic præcederent ut motuum amandi finem, atque adeò ut id cuius gratia finis amatur, quod repugnat, cum merita sint effectus finis. Præcedunt autem merita ipsam gloriam in genere causæ dispositivæ, & materialis quantum ad executionem, seu assecutionem, quatenus reddunt subiectum dignum, & idoneum ut illi detur gloria ratione meritorum ut qualificantium personam. Et in hoc sensu loquitur S. Thom. in illis autoritatibus quæ in solutione ista adducuntur, videlicet quoddam merita non se habent ut motuum propter quod Deus elegit nos ad gloriam, nec ad id inclinant diuinam voluntatem, sed quatenus reddunt hominem idoneum ad hoc ut illi in executione detur gloria ex meritis, quia sic præordinavit Deus ut ex meritis detur gloria, non tamen ex meritis motus fuit ad sic præordinandum. Quem sensum etiam expressit Scotus in *Reportatis dist. 41. q. unica, §. De argumento*, ubi explicat illam propositionem *Deus vult Petrum premiari propter merita*, quod ly *propter merita* potest construi cum ly *vult*; & sic est sensus, Deus propter merita vult Petrum premiari, & hæc est falsa: vel potest construi cum ly *premiari*, sic, Deus vult Petrum premiari propter merita, & hæc est vera. Sic Scotus sentiens cum D. Thom.

ARTICVLVS IV.

Soluntur argumenta.

1 **E**re omnia argumenta quæ in hoc puncto prolixè multiplicantur, æquiocant in præuisione meritorum respectu gloriæ: aut enim in intentione gloriæ dandæ, præuisa merita intrant ut motuum intendendi, & volendi gloriam, vel ut effectus subsecuti: qui enim vult dare gloriam ut coronam, vult illam dare per merita, ita ut merita subsequantur hanc voluntatem, & deriuentur ex illa, ut effectus. Non tamen utitur ipsis meritis ut motiuo intendendi illum finem, qui est gloria, licet utatur illis ut motiuo ex parte merentis ad dandum illam in executione, quia non dat nisi digno. Quare Deus non vult gloriam sine meritis, sed non ex meritis intendit finem, qui est gloria. Et gratis vult dare gloriam, non tamen vult dare gloriam gratis, quia variatur hic appellatio: sensus enim primæ propositionis est, Deus gratuito motiuo mouetur ad intendendum gloriam, quæ in executione non est danda gratis, sed ex meritis: Secundæ autem propositionis sensus est; Deus vult dare gloriam in executione ex meritis, quæ tamen sunt effectus subsecuti ad intentionem gloriæ ut finis. Vnde etiam laborant argumenta opposita illa æquiocatione efficaciam in ordine intentionis, & executionis: nam in ordine intentionis, qui est ordo, & linea causæ finalis, habetur efficacia solum in genere finis, non in genere aliarum causarum; quæ tamen cum sit prima causarum, inchoat efficaciam, non complet. In genere autem, seu ordine executionis. Datur efficacia in ordine causæ efficientis, seu exequentis, quæ supponit efficaciam finis. Vnde non debet argui ab vna sola efficacia, ad positionem effectus absolutè, sed ut subest illi lineæ, & ordini.

2 **H**oc supposito obiicitur primò argumentum ex autoritate tum Scripturæ, tum Patrum: Scriptura enim in multis locis docet electionem ad gloriam non solum ut in tempore dandam executiue, sed ut præparatam in prædestinatione supponere aliqua merita: ergo malè dicitur esse ante præuisa merita. Antec. prob. nam Matth. 25. dicitur. *Venite benedicti Patris mei, possidete paratum vobis regnum à constitutione mundi: esuriui enim, & dedistis mihi manducare, &c.* ubi illa particula *enim*, reddit causam, non solum possessionis in tempore, sed etiam præparationis ab æterno: ergo motuum præparandi fuit bonorum operum præuisio. Item Iacobi 2. *Nonne Deus elegit pauperes in hoc mundo diuites in fide, & heredes regni quod repromisit Deus diligentibus se.* Et 1. Corint. 2. *Oculus non vidit, nec in cor hominis ascendit, quæ preparauit Deus diligentibus se.* Ergo ratio præparandi regnum apud Paulum, & eligendi apud Iacobum, est dilectio eorum, qui eliguntur, & quibus præparatur: dicit enim præparasse diligentibus se. Alia minoris ponderis obiicit Lessius, ut est illud 2. Petri 1. *Satagite ut per bona opera certam vestram vocationem, & electionem faciatis.* Et Apocalyp. 3. *Tene quod habes, ne alius accipiat coronam tuam.* Si autem præcederet electio efficaciant opera, seu merita, fixum esset ante opera quoddam talis consequeretur gloriam: ergo nec esset timendum quoddam ab alio acciperetur corona, nec indigeret illa electio certificari bonis operibus.

Conf. ex Ambr. *super epist. ad Rom. c. 8.* ubi dicit, quoddam eos quos præsciuit deuotos, eligit ad promissa premià capiendâ. Et lib. 5. de fide c. 3. *Quorum*, inquit,

quit, *merita præsciuit, horum merita prædestinavit*: non ergo ante meritorum præuisionem id fecit. Et S. Hieron. *epist. 150. ad Hedibiam; Non saluat irrationabiliter Deus, & absque iudicii veritate, sed præcedentibus causis*. Sed electio illa ad gloriam est electio saluans: ergo non est absque præcedentibus causis.

3 Respon. in authoritatibus Scripturæ allatis nullo modo assignari merita vt motiua præparandi, aut eligendi ad regnum, sed vt effectus ipsius electionis, quia eligit Deus ad gloriam dandam in executione per opera bona, non sine illis, non tamen ex illis vt motiuis eligit ordine intentionis. Itaque in primo loco illa causalis *esuriui enim, &c.* non reddit causam præparationis regni, sed possessionis iam præparati; & quando præparauit, non præparauit vt sine meritis daretur, sed vt à meritis ad præparandum moueretur. In secundo & tertio loco dicitur eligere diuites in fide, non quos supponit, sed quorum electione ipsa facit, & promittit diligentibus se regnum, & similiter præparat bona diligentibus se, non quia diligentes supponit, sed quos diligentes sua præparatione facit: vnum enim ex his quæ præparat, est vt diligentes sint. Si autem electio diligentes facit, non supponit: respicit ergo dilectionem, & merita, vt effectus electionis, non vt motiua. In locis P. Lessij nihil consequentia video: nam efficax electio non excludit bona opera, sed præbet. Vnde per ipsa tanquam per effectus fit certa vocatio, & electio certitudine executionis deriuata ex efficacia, & certitudine intentionis. Vnde non sequitur quod si electio est certa non indigeat operibus, quia est electio ad gloriam dandam in executione per opera, non ad gloriam absolutè, & sine respectu ad merita; & sic opera in executione reddunt certam illam electionem in sua executione, non in suo motiuo intendendi gloriam. Quod verò dicitur in alio loco. *Tene quod habes, ne alius accipiat coronam tuam*, non dicitur respectu coronæ, vt habetur ex prædestinatione diuina, sed vt præcisè habetur ex merito gratiæ, vt exponit S. Thom. in hac q. 23. art. 6. ad 1. Itaque ibi corona accipitur non pro ipsa gloria in se, sed in semine, id est, in gratia, & est sensus: Tene gratiam quam habes, ne alius accipiat coronam tuam, quia alteri dabitur gratia cum perseverantia loco tui; & sic accipiet coronam. Et hoc patet quia loquitur de eo quod iam habetur, dum dicit, *Tene quod habes*, habetur autem gratia, & non gloria: ergo de gratia loquitur. Itaque in his locis solum admonemur, gratiam quæ ducit ad coronam, & finem electionis, esse amissibilem, & per bona opera esse firmandam: sic enim certa fit nostra electio, qua inter iustos per gratiam cooptati sumus.

4 Ad Conf. Respon. Ambros. exponendum esse in utroque loco de præuisione meritorum consecuta ad ipsam electionem per modum effectus, non mouente ad ipsam electionem: eligit enim ad promissa præmia quos præscit deuotos, non quacumque præscientia, sed qua eos deuotos facit, vt sæpe exponit August. in libris de prædestinat. *Sanctorum, & de bono perseverantia*. Si autem quos facit deuotos eligit, & prædestinat merita quæ præscit, utique non est inconueniens quod ipsa electione, & prædestinatione id faciat; & sic merita sint effectus electionis, non motiuum. Vel etiam dicitur eligere ad præmia promissa ordine executionis: nam certissimum est in executione, & in re, Deum eligere aliquos, cum eos ad aliquod ministerium, vel munus gratiæ promouet, sicut elegit Apostolos suos, quibus ipse dixit, *Ego elegi vos de mundo*. Ioan. 15.

Ista ergo electio (quæ in tempore fit, & est executio æternæ prædestinationis, & electionis) est electio ad æterna præmia, & ad munus gratiæ, & eligit Deus in tempore ad ista munera quos deuotos præscit præscientia ipsa prædestinatiua, quæ facit quod præscit, iuxta regulam August. *de bono persever. c. 18. Quid nos prohibet quando apud aliquos verbis Dei tractatores legimus præscientiam Dei, & agitur de vocatione electorum, eandem intelligere prædestinationem?* Prædestinatione ergo præscit, facitque deuotos, & sic eos temporali executione eligit ad promissa præmia. Locus Hieron. nihil vrget: quis enim dubitare potest quod Deus rationabiliter saluat, & non sine iudicii veritate, & præcedentibus causis, sicut nullus potest negare quod Deus saluat ex meritis, & per merita: sed totum hoc quod est velle saluare per merita, & ex causis præcedentibus, fuit intentum à Deo per modum finis, & in illa intentione merita ipsa, ex quibus tanquam ex causis præcedentibus Deus saluat, in executione, non se habuerunt vt motiua intendendi, sed vt effectus, & media ex intentione illa deriuata, vt ex illis tanquam ex causis meritoris detur gloria, & saluet Deus in executione. Hoc enim generale est in quocumque fine, vt intendatur prius ex motiuo suæ bonitatis, deinde ex illa intentione quarantur media, quibus tanquam ex causis exequentibus finis ipse in executione consequatur.

Secundò arguitur specialiter ex Aug. præsertim in duplici loco ubi videtur docere electionem ad gloriam esse post præuisa merita.

Primus est lib. 1. ad Simplicianum qu. 2. ubi latè expendens illa verba Pauli ad Rom. 9. *Vt secundum electionem propositum Dei maneret, non ex operibus, sed ex vocante dictum est, Maior seruiet minori*, inquit inter alia argum. *Non quia inuenit Deus opera bona in hominibus quæ eligat, ideo manet propositum iustificationis ipsius, sed quia illud manet, vt iustificet credentes, ideo inuenit opera, quæ iam eligat ad regnum celorum*. Et infr. *Non tamen electio præcedit iustificationem, sed electionem iustificatio; nemo enim eligitur nisi iam distans ab illo qui reicitur. Vnde quod dictum est quia eligit nos Deus ante mundi constitutionem, non video quomodo sit dictum, nisi præscientia*. Vbi in prioribus verbis apertè docet August. propositum iustificationis (id est decretum dandi gratiam iustificantem) esse in Deo ante electionem. In posterioribus autem apertè docet electionem non præcedere iustificationem, utique electio ad gloriam: nam electio ad gratiam iustificantem quis posset dubitare quod præcedit ipsam iustificationem in tempore factam ex vi electionis? Ergo illa electio, quæ est ad gloriam ante mundi constitutionem iuxta mentem August. non est ante præuisa merita, sed in præscientia, utique meritorum. Alter locus est *serm. 7. de verbis Domini*, ubi duplicem electionem agnoscit, aliam sine examine præmissio, aliam præmissio examine, & dicit, *Quoniam quos voluit Dominus hos elegit; elegit autem, sicut dicit Apostolus, & secundum gratiam, & secundum illorum iustitiam*. Sed ad gratiam, & iustificationem non eligit nos secundum iustitiam, quia ad gratiam nulla præcedunt merita: ergo quando dicit quod eligit secundum iustitiam, intelligit de electione ad gloriam. Repugnat autem dari electionem secundum iustitiam, nisi sit ex suppositione aut præuisione meritorum. Illa ergo debent electionem præcedere.

Respond. primum locum magnificari valde ab opposita sententiæ Authoribus, quasi euidenter exprimat August. mentem. Nec defunt aliqui ex parte alterius sententiæ, qui putant Augustinum scripsisse

scripsisse librum illum adhuc iuniorem, postea vero senem retractasse hanc expositionem quam hic adhibet isti loco: nam illa verba. *Ut secundum electionem propositum Dei maneret*, quæ hic explicat de electione ad gloriam, alibi explicat de electione ad gratiam, ut *epist. 105. & 106.* & alibi sæpè. Illa autem verba, *Elegit nos in ipso ante mundi constitutionem*, non de electione ad gloriam ratione præscientiæ, sed de electione ad gratiam ante præscientiam exponit, ut in *lib. de prædestinat. SS. c. 18. & 19.* constat, & in *lib. de bono perseverantia*. Videtur ergo retractasse August. quæ hic dixerat ad Simplicianum. Cæterum retractationem istam August. haud satis fundatam video, ab ipso vero nullibi expressam: nam nec in *libris Retractationum* cum mentionem huius libri faceret *lib. 2. c. 1.* quidquam de hac doctrina retractavit, nec in aliis libris quos in ultima ætate, id est, post libros Retractationum edidit, id est, in *libris de prædestinat. SS. & de bono perseverantia*, ubi etiam meminit huius quæstionis tractatæ in libro ad Simplicianum, nullo modo doctrinam illam retractat, quin potius in *c. 4. dicti libri de prædestinatione*, illam approbat, præsertim in eo quod tractavit, an fides esset ex gratia. Sed & *c. 20. lib. de bono perseverantia*, ita laudat librum illum ad Simplicianum, quod de gratia Dei, etiam ante exortam hæresim Pelagianam plenius in illa disputatione se sapere incepisse fateatur. Non ergo est vestigium retractationis huius doctrinæ, quam docuit in libro ad Simplicianum, in aliis locis August. Quare una, & eadem doctrina censenda est apud August. quæ ibi tradita est, & quæ in aliis locis. Cui non obest, eidem loco Pauli diuersas alibi explicationes adhibuisse: id enim non est retractare priores, cum de eodem Scripturæ loco diuersæ expositiones inueniri possint.

7 Respon. ergo sensum August. in isto loco quando loquitur de electione subsecuta ad iustificationem, manifestum esse procedere de electione exequente, & eligente in re ad consecutionem finis, non de electione intendente, & respiciente finem, ex cuius gratia sequantur media, quod deducitur ex ipso contextu: loquitur enim de illa electione qua opera ipsa eliguntur ad regnum cælorum, non de illa electione qua homo eligitur ad talem finem, cuius gratia eligatur ad ipsa opera. Quando autem opera eliguntur ad regnum cælorum, seu homo ratione operum, proceditur viâ executionis & tunc iam præcedit iustificatio, ratione cuius opera illa sunt digna eligi ad regnum cælorum. Hoc autem patet ex *ipsis verbis August. ibi*: Non quia inuenit Deus opera bona in hominibus quæ eligat, idè manet propositum iustificationis ipsius, sed quia illud manet ut iustificet credentes, idè inuenit opera quæ iam eligat ad regnum cælorum. Loquitur ergo de electione ipsorum operum. Opera autem sunt merita, & media quibus homo perducitur ad regnum: ergo electio eorum est electio mediorum ad illum finem, & talis electio necessariò debet supponere iustificationem, quia opera non eliguntur nisi ut informata gratia iustificante. Loquendo ergo de electione mediorum ad gloriam, id est, de electione operum, quæ inueniuntur in iustificatis, utique hæc electio non pertinet ad ordinem intentionis, nec de ea agit hic August. sed de electione ordine executionis, quia ordo intentionis est circa finem, & executionis circa media. Ergo non est hoc inuentum ad fugiendam vim authoritatis August. sed est ipsamet expressa mens August. Vnde cum subdit quod *electio non præcedit iustificationem, sed iustificatio electionem*, optimè dicit loquendo de ipsis mediis quæ eli-

guntur: hæc enim sunt ipsa opera à iustificationis gratia procedentia; & sic supponunt illam. Et cum addit, *Nemo enim eligitur nisi distans ab illo qui reicitur*, optimè dicit, loquendo de electione executâ, & inuenta in re in eo qui per media, seu per opera ipsa aut ratione operum eligitur, id est assumitur, & perducitur ad gloriam: ordine enim executionis nemo eligitur nisi distans, & distinctus ab eo qui eiicitur; quia loquitur August. eodem sensu, & eodem tenore, de eo qui eligitur electione eadem pertinente ad media, & ad ordinem executionis, sicut locutus fuerat de operibus quæ inuenit ut eligat: idem enim est eligere opera ad regnum (quod est ordine executionis) ac eligere personam ratione operum: non enim opera sine persona eliguntur. Denique cum addit: *Vnde quod dictum est quia elegit nos Deus ante mundi constitutionem non inuenio quomodo sit dictum, nisi præscientia*, verissimum est, quia hæc electio mediorum, executiua ab initio, & ante mundi constitutionem, non fuit nisi in præscientia, quæ illam executionem disposuit, & ordinauit, & ibi fuerunt merita, quia ibi fuerunt ordinata media, & hæc sunt merita.

8 Quare, cum in hoc loco nullatenus August. locutus fuerit de electione in ordine intentionis, sed ut inuenitur in mediis, quæ propriissimè eliguntur ad finem, supponunt verò præcessisse intentionem finis qua homo eligitur ad gloriam, & eius causa, (quæ finalis est, ut docet Concil. Trident.) disponuntur media, non fuit necesse August. quidquam retractare de hac doctrina tradita ab eo in isto libro ad Simplicianum, sed solum supplere id quod in hoc loco non tractauerat, scilicet quod gratis etiam homines via intentionis eliguntur ad gloriam, electione non supponente merita, sed faciente. Quod accuratè præstitit post exortam hæresim Pelagianorum, quia occasione illius magis explicauit, quomodo electio sit purè gratuita, etiam ordine intentionis, & secundum primam electionem ad gloriam ut intentam, ut ex locis supra cit. constat, & absolute electionem Dei non supponere diuersitatem, seu inæqualitatem in eligendis (quæ utique venit ex diuersitate meritorum) sed facere docuit *epist. 105. & epistola 106.* explicans eadem verba Pauli Rom. 9. *Ut secundum electionem propositum Dei maneret, non ex operibus, sed ex vocante dictum est, &c.* Et de eodem videri potest *lib. de corrept. & gratia c. 7.* Non ergo necesse est dicere quod in hoc retractauit August. sententiam, sed suppleuit, sed explicauit quod ante non ita necesse fuerat explicari.

Ad secundum locum August. ex *serm. 7. de verbis Domini*, dicimus verba ipsa August. sic haberi: *In hoc capite dicimus, quoniam quos voluit Dominus hos elegit. Elegit autem sicut dicit Apostolus, & secundum gratiam suam, & secundum illorum iustitiam.* Vnde videtur inferri, quod prius elegit Deus homines ad gratiam, & visis meritis ex gratia procedentibus elegit secundum eorum iustitiam ad gloriam, quia hæc datur ex iustitia.

Sed respon. hunc locum si bene inspicatur, potius stare pro nobis, quia loquitur August. de electione circa eosdem, non circa diuersos homines, cum dicit quod Dominus elegit quos voluit, elegit autem, & secundum suam gratiam, & secundum illorum iustitiam. Eosdem ergo quos voluit elegit secundum gratiam, & secundum iustitiam; Et non dicit quod elegit primum ad gratiam, deinde ad iustitiam, id est ad gloriam: quomodo enim per ly *iustitiam*, potest intelligi ipsa gloria: non enim gloria est iustitia, sed datur secundum iustitiam: est ergo sensus quod ad regnum elegit secundum gratiâ, id est,

id est, merè gratis, seu motiuo gratuito, & titulo iustitiæ. Hoc est ergo quod nos asserimus, quod ordinæ intentionis, & respectu finis intenti elegit secundum gratiam, seu motiuo gratuito ex parte intendentis; & hoc est secundum gratiam suam, hoc est gratis ex parte sui; ordine autem executionis secundum illorum iustitiam, quia mediantibus meritis eos fecit electos, retribuendo eis secundum iustitiam, non quod merita fuerint motiua electionis intentionis ad gloriam, sed effectus, & media, per quæ data est illis gloria secundum iustitiam. Ecce quomodo sensus verborum August. saluatur in nostra sententia sine vlla violentia, nec in illis opposita habet fundamentum.

Omitto alias auctoritates minoris ponderis, quæ ex Chrys. Prospero, aliisque citantur, & facillè iuxta expositionem auctoritatibus allatis datam exponi possunt.

Tertiò arguitur, Deus in ordine intentionis eligens Petrum, eligit illum ad gloriam, ut ad coronam, & præmium, non ut ad donum gratuitum: ergo in illa intentione efficaci non mouetur titulo gratuito ad dandam eam efficaciter Petro, sed titulo meritorio: ergo non ante præmissa merita. Hæc vltima consequentia est manifesta, quia non vult illam ante præmissum aliquem titulū dandi, sed titulus est meritum, quia respicit præmium, & coronam: ergo non ante illud efficaciter vult coronam dare. Prima verò consequentia patet, quia corona & præmiū ita se habent correlatiuè ad merita, ut sine illis intelligi non possint, sicut nec pater sine filio, nec est intelligibile quod ratio præmij, & coronæ alio titulo detur quam per merita: ergo in eo signo & instanti in quo relucet gloria ut præmium, & corona, relucet merita ut titulus, & motiuum dandi illa. Anteced. verò prob. Deus ordine intentionis vult efficaciter gloriam ea ratione, & modo, quo ponenda est in re & non aliter, alias efficaciter non vellet illam, si non intenderet illam eo modo quo ponenda est in re: impossibile enim est efficaciter rem aliquam intendere intendendo illam, ut de facto assequendam: ergo non alio modo quam in re ponenda sit. In re autem non ponitur nisi ut corona, & præmium, & non titulo gratuito: ergo ut corona debet intendi. Quod si alio titulo intenderetur danda, quomodo in re non illo titulo daretur, sed diuerso?

Conf. quia gratia data antiquis Patribus per Christum non potest efficaciter intendi ab hoc decreto, nisi præcedant merita Christi, etsi non existentia, tamen ut motiua dandi istam gratiam in eorum remunerationem anticipatam: ergo etiam licet merita prædestinati secutura sint per modum effectus ex illa intentione, tamen antecedere possunt ut motiuum efficaciter dandi gloriam intuitu illorum; & sic non ante ipsa præmissa intenderetur gloria ut efficaciter danda in præmium.

10 Resp. distinguendo antecedens: Deus eligit Petrum ad gloriam, ut ad coronam, & non ut ad gratuitum donum, ex parte rei intentæ, & volitæ, concedo; ex parte rationis, & motui intendendi, nego. Ad consequentiam: ergo non mouetur ad dandam eam efficaciter titulo gratuito, sed ex iustitia, distinguo, titulo se tenente ex parte rei dandæ, & consequendæ, concedo; titulo se tenente ex parte motui intendendi, nego. Itaque id quod Deus vult dare Petro quando eligit illum ad gloriam, non est aliud quam corona, & præmium dandum per merita, & intuitu meritorum in execu-

Ioan. à S. Thoma in 1. part. D. Thoma.

tionem, & hanc rem volitam sic intendit Deus dare, sicut in re danda est; cæterum non intendit Deus totum hoc quod est dare gloriam, & coronam ex meritis accipiendo motiuum intendendi ex meritis: hoc enim impossibile est, cum etiam ipsa merita daturus sit, & hoc non potest esse ex meritis, scilicet quod ipsa merita velit dare ex meritis; nec supponere potest ipsa merita, & ex eorum suppositione incipit intendere præmium, & coronam, liquidem merita ipsa à Deo ipso causanda sunt, non supponenda. Non possunt autem merita se habere ut obiectam primò intentum, seu primò cadens sub intentionem, quia non se habent ut vltimus finis, sed ut via, & mediū ad finem: ergo neque possunt præbere motiuum intendendi finem, quia motiuū intendi, non est id quod se habet ut via, sed quod pertinet ad ipsum finem, cuiusque bonitatem. Habemus autem ex Concil. Trid. sess. 6. c. 7. quod gloria est causa finalis ipsius gratiæ, & consequenter meritorum, quæ ex gratia procedunt, & à qua accipiunt valorem. De ratione autem causæ finalis est ut sit id cuius gratia media sunt volita, & præbeat motiuum volendi, non à mediis accipiat. Ergo in ratione intendendi gloriam ut finem, merita non dant motiuum, sed potius ipsa gloria ut finis dat motiuum ad volendum merita, & gratiam.

Ad probat. autem antecedentis similiter dicitur quod Deus eo modo, & eo titulo intendit gloriam dandam, quo datur in re, distinguo; eo titulo, & eo modo ex parte rei volitæ, & intentæ: concedo ex parte rationis, & motui intendendi, nego. Res enim volita est corona danda titulo debiti, & ex meritis mouentibus ad dandum illam in re; motiuum autem intendendi totum hoc, scilicet coronam, & merita, quia totum causandum est à Deo, & nihil supponitur ab ipso, est aliquid anterius meritis, non tanquā titulus dandi in re, sed tanquā motiuum intendendi gloriam, quæ est causa finalis, & titulum allocationis eius quæ sunt merita: motiuum enim intendendi est bonitas diuina, non titulus ex parte hominis se tenens, qui est meritū.

Instabis; Gloria ut corona non addit *supra* entitatem gloriæ nisi denominationem extrinsecam, & aliquid rationis, liquidem eadem gloria dari posset ex liberalitate, nulla reali mutatione facta in ipsa gloria. Denominatio autem coronæ, & præmij sumitur per respectum ad merita, quia præmium, & meritum correlatiua sunt: ergo non potest efficaciter intendi ut corona sine intentione meritorum, quia nulla denominatio extrinseca potest esse volita, nisi forma denominans volita sit.

Respond. gloriam ut coronam, & præmium importare respectum ad merita, sed tanquam ad effectum subiectum, non tanquam ad motiuum intendendi ipsam coronam, ut est causa finalis meritorum. Sicut etiam finis per actum intentionis attingitur, non absolute, sicut per actum simplicis voluntatis, sed relatè ad media ut acquirendus per illa; & tamen hic respectus est ad media ut ad effectus, non ut ad motiua finis intendendi. Sic gloria ut corona, est finis ut relatè ad media moralia, quæ sunt merita ut effectus, non ut motiua intendendi.

Ad Confir. Respond. quod gratia data antiquis Patribus, non ita comparata est ad merita Christi, sicut gloria comparatur ad merita nostra, quia gratia antiquorum Patrum non fuit causa finalis meritorum Christi, sed effectus illorum, sicut & nostra gratia: est enim inferior ad

Ff

merita

merita Christi; & sic non se habet ut finis illius. Vnde potius gratia, & dignitas Christi, & merita eius se habent ut finis; nec enim comparantur ad gratiam nostram ut pura, & præcisa merita ad præmium, sed ut redemptiua & satisfactiua ad æqualitatem pro culpa; & sic dativa, & causatiua ipsius gratiæ; non solum dispositiua ad illam. Merita autem redemptiua, & satisfactiua ad æqualitatem superiora sunt ad gratiam, & non sunt propter illam tanquam propter finem cuius gratia, sed tanquam propter finem effectum; & sic debent præcedere ista merita etiam ordine intentionis tanquam motuum, & finis ipsius gratiæ, & iustificationis nostræ. Vnde inter causas finales nostræ iustificationis ponitur à Concil. *supra cit. gloria Dei, & Christi*: pertinent autem merita ad gloriam Christi, quia redemptiua sunt, & ordinis hypostatice: ergo & ad causam finalem: ergo ordine intentionis præcedunt gratiam, tam nostram, quam antiquorum Patrum. Nostra verò merita non sunt superiora ad gloriam, sed respiciunt illam, ut causam finalem, & respectu illius se habent ut media moralia, quæ quidem mouent ad dandum in executione finem, non ad intendendum, quia solum præstant titulum dignificationum personæ ad obtinendum tale præmium, non motuum intendendi illud ut finem in Deo. Non est autem possibile quoddam media præbeant motuum intendendi finem, cum potius finis ut intentus sit motuum volendi media; & sic supponunt antè motuum ut intendatur ille finis.

12 Quartò arguit. Non potest dari duplex voluntas efficax circa idem obiectum, nisi detur duplex connotatum correspondens in ipso obiecto, seu effectui ad extra ex tali duplici voluntate resultans, ut saltem detur duplex motuum, & titulus volendi rem illam, sed in ipsa gloria volita ordine intentionis ante præuisa merita, & volita ordine executionis post præuisa merita, non relucet aliqua diuersitas, aut diuersum connotatum, nec alio titulo datur gloria in re quam titulo meriti, & debiti, cum ipsa detur per modum præmij, & coronæ: ergo non datur duplex voluntas efficax, altera ante præuisa merita, & ordine intentionis, altera post præuisa merita, & ordine executionis. Maior prob. quia voluntas efficax est quæ respicit rem ut de facto ponendam: ergo duplex voluntas efficax aliquid respicit duplicatum ex parte ipsius effectus, & illud connotat, aliàs si idem omnino quod una voluntas ponit de facto, alia etiam ponit, & non amplius, nec alio modo, una ex illis superfluit. Minor prob. quia in primis illa voluntas prima, & antecedens quæ est ante præuisa merita nihil producit de facto, & in re per se solum, & independentè à meritis, & posteriori voluntate, quia quicquid intendit voluntas prior, ponitur de facto, & in re per voluntatem executiuam, & secundam: ergo nihil productum, & in re positum correspondet uni voluntati, quod non respondeat alteri; & sic vel illa prima non est efficax de se, & independentè à secunda, vel est superflua. Quoddam verò non alio titulo prior voluntas præbeat gloriam, quam secunda, prob. quia titulus, & motuum prioris voluntatis ante præuisa merita non est motuum ex debito, & iustitia, quia sic esset ex meritis: est ergo liberalitatis, & gratiæ, sed in re non datur gloria ex liberalitate: ergo non datur voluntas efficax gloriæ ut efficax ex hoc titulo. Patet consequentia, quia titulus efficacis voluntatis est titulus ponendus de facto in re: ergo

ubi non de facto res posita per talem titulum, non est titulus efficacis voluntatis. Nec potest hic confugi ad efficaciam ordine intentionis, & non ordine executionis; quia si illa voluntas ordine intentionis non ponit per seipsam in existentia, & de facto rem quam intendit, per se efficax non est, sed totum efficaciam, quod habet, ex ordine executionis est; & sic frustra vocatur efficax distincta ab executione, cum non nisi per executionem efficax sit. Si verò per seipsam illa intentio ponit rem de facto, & in existentia: ergo aliquid ei correspondet in re ex vi efficaciam suæ, quod non correspondet efficaciam executionis, & illud non est assignabile quid sit, nec distinctus titulus, quia non datur in re titulo liberalitatis gloria in adulto, cui datur in præmium. Vel si idem, correspondet efficaciam intentionis, & executionis: non ergo efficax est voluntas intendens, ut intendens, sed ut exequens. Et hoc est in quo maxime insistant oppositi Authores, quoddam voluntas intentionis solum sit inefficax, nusquam autè detur efficax in vi intentionis tantum, quia tota ratio efficaciam est executio.

Conf. quia merita se habent ut media moralia, quæ per se non efficiunt, aut præbent finem, sed mouent voluntatem dantis ut illum det: ergo debent supponere voluntatem dantis non determinatam, nec motam ad dandum præmium, seu finem: nam si supponunt motam, & determinatam, ipsa nihil operatur; & sic non seruiunt ut media ad assecutionem finis: nihil enim assequuntur in sua linea moralis motionis, cum non moueant ad dandum finem, sed motam supponant voluntatem: si autem mouent, & determinant, non autem motam supponunt: ergo præbent motuum dandi gloriam; & sic ante ipsa merita præuisa non datur Deo motuum dandi gloriam efficaciter, & intendendi illam; præsertim quia efficax voluntas respicit effectum ut egredientem à proximis causis suis: sine hoc enim non respicitur ut de facto positus; merita autem sunt causa proxima dandi præmium ex parte ipsius merentis.

13 Resp. hoc argumentum à nobis solutum esse *supra disp. 5. art. 1.* agendo de efficaciam ordinis intentionis, & executionis. Nunc breuiter dico quod efficaciam intentionis, non est efficaciam efficiens, & produceus de facto per se solum, seu exequens efficienter, sed finalizans, & mouens efficientem ut producat; quod est esse executiuam finaliter, non effectiue: sed illa motio non debet indifferenter, & indeterminatè mouere, & dependenter ab alio extra determinante, scilicet à consensu meo, cum ipse etiam consensus cauendus sit à Deo, sed debet esse determinata ex se, & consequenter efficax, sed in sua linea, & genere dumtaxat, scilicet in genere intendendi, & finalizandi: inde enim mouetur efficiens efficaciter ut producat, & ita illa intentio per se solum est efficaciter finalizans, sed per causam efficientem, & exequentem est produceus executiue, & effectiue in re, quasi efficiens, & exequens causa ministret causæ principali, & intentiue, & per istam quasi per manum suam operetur. Vnde quando dicitur quoddam voluntas efficax est quæ respicit rem ut de facto ponendam: distingo, respicit effectiue executiue tantum, nego anteced. executiue, vel intentiue, transeat; ita quoddam intentiue efficaciter pertineat ad ordinem intentionis, & ad lineam finalizandi: executiue autem efficaciter ad ordinem executionis. Et cum petatur, ut assignetur quid in re correspondeat illi voluntati intentiue, si effi-

cax

cax est ex se? Resp. quod in re non respondet aliud, quam id quod producit per ipsam voluntatem exequentem: nec enim ordo intentionis dicitur efficax, quia per seipsum, & seorsum ab executiuo ordine aliquid producat, & exequatur in re, cum ordo intentionis non dicatur efficax executiuè, sed intentiuè, seu directiuè. Quod si non exequitur, nec oportet aliquid ei correspondere in re ut executum: non ergo distinguitur à voluntate, & ordine executiuo ob diuersam mutationem in re executam, & ei correspondentem, sed eadem res ut de facto executam, & ut de facto intentam, fundat hos diuersos respectus & diuersa connotata respectiua ad duas voluntates, seu ad duos ordines voluntatis Dei, qui eandem rem potest respicere diuersis formalitatibus ut intentam, & ut executam, & hoc sufficit ad distinguendum voluntates in Deo, de quo videri possunt quæ diximus *loc. cit.* Cogimur enim ponere istas duas efficacias, tum quia datur duplex causalitas finalis, & efficiens de facto causans; tum quia efficacia solum excuta, & non per se ab intentione finis deriuata, est efficacia per accidens eueniens, non per se intenta ex vi connexionis cum fine intento.

14 Quando autem obiicitur, quod nec etiam illa voluntas respicit illud obiectum sub alio titulo dandum, dicimus quod non respicit gloriam sub alio titulo dandam in re, & executiuè, nisi ut præmium, sed hunc titulum præmij dandi respicit intendendo, & dirigendo ut fiat: ordo verò executionis exequendo, & faciendo quod directum est. Vnde nõ datur gloria duplici titulo ipsi beato, sed attingitur idem titulus duplici ordine, & voluntate à Deo collatore gloriæ, tum intendendo, tum exequendo. Vnde etiam soluitur alia replica, quia illo titulo, & motiuo, quo intenditur gloria ante præuisa merita, non redditur in re: ergo ille titulus surperfluit. Antec. constat, quia intenditur ex liberali motiuo, & ante merita, redditur autem solum ex meritis. Sed Resp. distinguendo antec. Illo motiuo, & titulo quo intenditur, non redditur illo motiuo & titulo formaliter, transeat, illo motiuo, & titulo virtualiter, nego. Nam in illo motiuo quo Deus intendit gloriam, virtualiter, & ut effectus consequantur merita ut media, & illa sunt titulus, quo redditur gloria in re: sicut sanitas intenditur ex motiuo meæ conuenientie, non tamen consequitur mea conuenientia ut medio, sed dieta vel pharmaco. Motiuum ergo intendendi non est titulus dandi, id est, merita. Et ad instantiam quod illa voluntas intentiua non respicit per seipsam existentiam gloriæ, ut de facto, distinguo; non respicit existentiam exequendo illam, transeat, dirigendo & intendendo, ut de facto ponatur, nego. Nam ipsa etiam existentia, & productio gloriæ intenta est, & circa existentiam ut ponendam in re versatur intentio, sed non exequitur hoc per seipsam effectiuè, sed per aliam voluntatem ex se ortam, & deriuatam, & executricem sui; per se autem executio est finalizando, & dirigendo, non efficiendo. Vnde habet in se quod sufficit ut determinata, & efficax sit in suo genere, & linea, scilicet intendendo, & per modum finis mouendo. Et hoc est quod aliqui dicunt illam voluntatem intentionis esse efficacem radicaliter, quia licet in genere mouendi finaliter, & intendendi, formaliter sit efficax, est tamen principium, & radix efficacie executiue, quia ex motione finis oritur efficacia agentis; & ita totum quod est in efficacia efficientis, & quoad productionem seu assecutionem gloriæ, & quoad titulum dandi illam ut præmium, est vir-

Ioan. à S. Thoma in 1. part. D. Thoma.

tualiter in intentione finis, non tamen datur alio titulo gloria ratione intentionis, alio ratione executionis, sed ille titulus qui hic exequitur, scil. ratione meriti, ibi intenditur, licet ex motiuo bonitatis diuinæ, quæ non est titulus ex parte hominis se tenens: hic enim solum est meritum, sed est motiuum, & ratio huius tituli.

Ad Confirm. Respond. quod media moralia, quæ sunt merita, mouent voluntatem dantis præmium per modum medij quo in re fit executio, & assecutio præmij, sed supponunt voluntatem motam per modum finis, & intentionis, quia non exequitur hoc voluntas dantis præmium nisi ex aliquo fine præsupposito, & præintento. Et sic quando inferitur: Ergo non supponunt illa merita voluntatem motam & determinatam ad dandum præmium, distingo, non supponunt motam, & determinatam in exercitio, & executione, concedo, in intentione, & per modum finis, nego. Intendit enim Deus gloriam ut finem præmiatuum meritorum, & dandum propter merita, sed positis meritis in re, ab illis mouetur ad exequendum, & ponendum in re præmium propter illa. Ad illam autem voluntatem intendentem gloriam, merita non concurrunt ut motiuum, sed lequuntur ut effectus talis finis. Motiuum autem est gloria Dei, & communicatio eius liberalissima. Et hac ratione respicit Deus merita ut causas proximas illius existentie, & fruitionis gloriæ; sed tamen tales causæ proximæ non sunt motiuum finalizandi, & intendendi, sed potius ex fine deriuantur tanquam effectus, quia ab ipso finalizantur, & mouentur, ut perueniant ad executionem finis.

Quintò arguit. aliquibus exemplis quæ videntur conuincere gloriam ante præuisa merita efficaciter non esse volitam. Nam si Rex aliquis ea lege proponat præmia, ut solum dentur certantibus, & vincentibus, poterit quidem ex sua liberalitate præmia proponere, & certamen instituere, sed non poterit eligere efficaciter aliquem ad præmium antequam videat victorem euadere. Et hoc idè quia esse victorem est conditio habilitans ut quis sit eligibilis ad præmium. Ergo similiter licet Deus liberaliter proponat gloriam dandam hominibus, tamen non eligit aliquem efficaciter ad illam, nisi postquam videat merentem, & vincentem, quia esse victorem est conditio habilitans ut sit elegibilis. Similiter licet in his quæ aliquis sit consecuturus per se, & per suam operationem, possit prius intendere finem quam media, ut sanitatem prius quam medicinam, & præmium à se assequendum priusquam sua merita: tamen in his quæ sunt consequenda per alium, non potest quis efficaciter intendere, & decernere quod aliquid detur, vel consequatur, nisi prius videat media, & condiciones ad id requisitas, sicut si quis desiderat ut filius suus Doctor fiat, non potest id efficaciter decernere, nisi prius videat ipsum strenuè literis vacare, & in exemplo *suprà* posito de proponente præmia victoribus, idem patet. Ergo similiter Deus non eligit efficaciter homines ad gloriam quousque videat ipsos strenuè merentes, & vincentes.

Confirm. quia Deus gratis eligit ad gloriam ante merita: ergo gratis ponetur in re, etiam si non sint merita; & sic merita euacuantur, & carent effectui, quod erroneum est. Consequentia patet, quia illa voluntas sic eligens efficax est: ergo si pro illo priori quo eligit ante præuisa merita, efficaciter eligit, etiam si in alio posteriori non inueniat merita, sequetur effectus: illud

Ff 2

enim

enim prius decretum est inuariabile, & efficax; & sic independenter à posteriori, ponet effectum suum.

Conf. 2. quia Deus decreto communi reprobis & prædestinatis, voluit omnibus dare gloriam, quia voluit omnes homines saluos fieri, & hæc voluntas fuit ante præuisa merita: ergo vt efficax reddatur, & propria prædestinatorum, debet esse non ante præuisa merita, sed post.

Resp. exempla non esse quadrantia respectu Dei, qui non solum est causa finis, sed etiam mediorum, & omnium conditionum, quæ habilitant hunc vt eligatur ad præmium, & finem. Itaque in hac parte comparatur Deus, & eodem modo se habet, sicut ille qui intendit aliquem finem per media, seu opera à se facienda. Eadem enim ratione Deus est causa mediorum, seu operationum, quas nos facimus, sicut ego sum causa operationum quas ego facio, & per quas consequor finem, quia Deus intimè etiam operatur in nobis, & est prima radix, & causa omnium meritorum, & mediorum, & habet in potestate sua voluntates nostras magis, quam nos ipsi, vt iam *suprà* ponderatum est. Sic ergo dicimus ad primum exemplum, Regem non eligere personam ad præmium, nisi supponat victorem, quia victorè ipse non facit, sed qui certat pro præmio, suis viribus, & industria victor existit. Quare non mirum quòd ante hanc conditionem vitam in subiecto non eligatur à Rege, quia sine illa conditione est inhabilis vt eligatur. Si autem Rex ipse deberet facere, & constituere illum victorem gratia sua, & viribus à se datis, & directis, non posset illum eligere ad talem conditionem victoris, & merentis supponendo merita, sed præbendo, & consequenter ante merita vt motiua, non tamen ante merita vt consecuta, & effectus talis volitionis. In secundo exemplo non est quòd hæreamus, cum manifestè constet Deum non sic providere hominibus finem, & media, sicut pater providet filio vt sit Doctor, quia homo providet emendando ab aliis, & dependendo, Deus dando omnia & nullo indigens. Quare magnæ paupertatis intellectus est, qui ex timida, & incerta nostra providentia velit meriti summam illam, absolutissimam, independentissimam, omnipotentissimam providentiam. Omnes creaturæ non magis se extendunt in providentia, & dispositione sua, quam ab aliis causis petendo, mendicando, vellicando, plura supponendo, pauca causando, quia in paupertate sua agunt quidquid agunt. Solus Deus diues est in misericordia, & nullius indigens.

17 Ad Conf. primam; Resp. multa ex his argumentis pati æquiuocationem in illo termino *gratis*, quem non bene applicant, & mutant appellationem. Nam verum est quòd Deus *gratis* eligit ad gloriam & ante præuisa merita, si ly *gratis* ponatur ex parte motiui, quo Deus mouetur ad intendendum, non tamen eligit ad gloriam *gratis*, id est, ad dandum illam sine meritis; & sic valde diuersus est sensus, & mutatio appellationis dicere, *Gratis Deus eligit ad gloriam, & Deus eligit ad gloriam dandam gratis*, quia in primo fit sensus quòd Deus ex motiui gratuito, & non ex meritis mouetur ad electionem huius ad gloriam; in secundo verò denotatur quòd Deus non solum ex motiui gratuito mouetur ad intendendum ex parte sui, sed ex parte rei consequendæ titulo gratuito vult illam dare. Et hoc est falsum. Et quando dicitur in argumento, quòd si *gratis* eligit ad gloriam, *gratis* ponetur in re talis gloria, distinguo, si *gratis* eligit quantum ad motiui dandi illam, & non quantum ad titulum dandi, nego anteced. Si

gratis eligit quantum ad motiui intendendi (quod est gratuitum) sed non quantum ad titulum dandi in re, qui est meritum, non quidem per modum motiui, sed per modum effectus consecuti, transeat. Deus autem eligit *gratis* ad gloriam, ly *gratis* tenente se ex parte motiui in ipso Deo intendendi, quia non ex motiui meritorum eligit, non autem ly *gratis* tenente se ex parte tituli in homine sub quo reddenda est, quia titulus quo Deus vult gloriam esse reddendam non est gratuitus, sed meritum, licet motiui quo Deus mouetur ad intendendam istam gloriam vt finem, & illum titulum meritorum, vt media, sit gratuitum. Nec est idem motiui intendendi finem, & titulus dandi postea in re, cum iste titulus sit volitus, & datus à Deo ex aliquo fine; & sic non potest esse motiui volendi ipsum finem. Sed quia quando in re datur ipsa gloria, datur ob titulum, & ille titulus tunc est motiui dandi, quia est meritum quod non attingit finem, nisi mouendo voluntatem, æquiuocatur ad putandum quòd ille etiam titulus est motiui intendendi illum finem, sicut in executione mouet ad dandum. Sed hoc non est possibile, quia ad intendendum finem nullus mouetur titulo mediorum, sed ex ipsius finis convenientia, media autem se habent vt effectus consecuti, quæ ob finem diliguntur: ergo non possunt præbere motiui intendendi finem, sed ex fine intento est volitus titulus quo tanquam merito, & medio datur postea affectio ipsa finis. Quando verò additur quòd illa voluntas sic *gratis* eligens efficax est, concedo: ergo si non inueniat merita pro alio posteriori signo adhuc fortietur effectum, nego suppositum, quia si est efficax, non est possibile quod in alio posteriori non inueniat meritum, quia ad hoc ipsum efficax est, vt causet ipsa merita, & merita sint effectus eius, quia illa est efficax voluntas finis, quæ virtualiter continet media, & causat de facto illa, alias non esset efficax, si de facto media non causaret, & in illa influeret, media autem sunt merita: ergo si est efficax ad causandum merita, non potest non in posteriori habere illa; & sic sine illis non fortietur effectum, sed per illa.

Ad secundam Conf. Resp. concedendo quòd inefficax voluntas dandi gloriam, quæ est communis reprobis, & prædestinatis, non est ex præuisis meritis, vt ex motiui, neque etiam habet illa merita pro effectu consecuto. Voluntas autem efficax intendens gloriam, non ex eo redditur efficax, & distinguitur ab inefficaci, quia habetur ex meritis, vt ex motiui, sed quia ex motiui efficaciter intendente habet merita pro effectu consecuto. Et illud motiui ad intendendum efficaciter est diuina bonitas ostendenda per misericordiam aut aliud simile motiui, vnde deriuatur volitio mediorum quæ sunt merita.

Vltimò arguit, decretum efficax dandi gloriam ante præuisa merita est decretum antecedens nostram liberam voluntatem, nec in eius manu est tale decretum non dari, aut illi iam dato & posito resistere: ergo tollit libertatem nostram. Patet consequentia, quia efficacia talis decreti non est consequens nostram libertatem, quia non supponit illam; & sic non est consequens ad illam, sed antecedens: & ex alia parte non est in manu voluntatis eam auertere, aut ei resistere, quia ex natura sua infallibilis est, & efficax: ergo non manet in potestate voluntatis exercere liberè actum qui præuenitur infallibili determinatione quando exercet illum.

Confirm. quia posito illo efficaci decreto ante præuisa merita, tale decretum est independentens

in efficacia sua à quocumque actu meæ voluntatis : ergo & in effectu suo. Effectus autem eius est dare gloriam de facto : ad hoc enim efficaciter fit electio : ergo iste effectus ex vi talis electionis independens est à quocumque actu meo : ergo ex vi illius non repugnat quod ego salutem consequar independenter ab omni actu meo ; consequens est impossibile : ergo etiam quod talis voluntas in Deo detur.

Conf. secundò, quia in reprobatione non datur duplex exclusio à regno, altera ante præiudicia demerita, altera post illa præiudicia, quia Deus solum vno modo excludit à regno, scilicet puniendo, & ratione culpæ, non ante illam, alioquin crudelis esset Deus sine culpa damnans. Ergo neque datur duplex electio ad gloriam, altera ordine intentionis ante præiudicia merita, altera ordine executionis ratione meritorum.

20 Resp. argumentum illud sæpius à nobis esse solutum, & ostensum quàm sit infirmum. Negatur conseq.

Ad probat. dicitur quod illud decretum non est consequens nostram voluntatem, sed antecedens, distinguo, antecedentia causatiua actus, & libertatis, seu indifferentiæ eius, concedo ; causatiua actus solum, & non libertatis eius, nego. Talis autem suppositio antecedens non tollit libertatem : nec enim quælibet suppositio antecedens eam tollit, sed suppositio necessitans, nempe illa, quæ ita constringit, & determinat voluntatem ad actum quod etiam impedit facultatem ad oppositum, & tollit indifferentiam iudicii, & dictaminis. Si autem seruata indifferentia iudicii, & facultate ad oppositum, antecedit cauendo in nobis determinationem ad actum, illa determinatio non ligat voluntatem, sed soluit, non claudit cor, sed aperit, sicut Actor. 16. dicitur de Lydia purpuraria: *Cuius Dominus aperuit cor intendere his, quæ a Paulo dicebantur.* Est enim quedam determinatio cordis, quæ pertinet ad resolutionem, & applicationem ad opus, & est quedam indeterminatio, quæ pertinet ad suspensionem, & perplexitatem, & ligationem : unde homines parum resolutos solemus appellare ligatos, seu perplexos. Et resolutio huius perplexitatis, & ligationis causam aliquam, & per suppositionem debet habere, & illa si est causa, antecedit actum, non sequitur, non tollere debet libertatem, sed cauere; sic enim si tolleretur, non conduceret ad resolutionem actus. Causa huius resolutionis ex parte obiecti, est propositio viuacior intellectus, quæ est motio moralis, non sufficiens de se voluntatem applicare, & resolvere, nisi ipsa efficienter se moueat, & determinet. Eius autem efficientia causari debet elicitivè à nobis, sed motivè, & primordialiter à Deo, qui est prima causa omnis efficientiæ, in ipso enim vivimus, & mouemur; & sic est radix nostræ voluntatis portans nos, non nos portamus illum : ergo prima causa sic efficienter atque adeò antecedenter resoluens non tollit, sed causat libertatem, vel lædit eam magis quàm nostram voluntatem, quæ in sua etiam libertate est potentia à Deo dependens, & ab eo ut à radice habens libertatem. Et ad instantiam : Illa antecedentia est efficax, & infallibilis, cui non potest resisti, nec est in manu mea illam auertere : ergo impedit facultatē meam, nec conseruat potestatem in oppositum ; Resp. Est efficax, & infallibilis præcisè ad faciendum actum, nego ; ad faciendum actum cum libero modo, concedo ; & sic erit infallibile quod fiet liberè, non quod fiet quomodocumque. Et non possum ei resistere, distinguo, quoad hoc ut fiat liberè non pos-

Ioan. à S. Thoma in 1. part. D. Thomæ.

sum resistere, concedo, quia totum hoc vult Deus, & hoc est potentia consequenti, & in sensu composito ei non posse resistere : quoad hoc ut fiat absolute, & potentia antecedenti, nego : hoc enim vult Deus, quod possum dissentire, & facere oppositum actum, & quod de facto non faciam; & sic ei non possum resistere, quia in posse resistere semper inuoluitur potentia consequens, quæ scilicet possit coniungere actum meum contra actum Dei contra meum. Et hoc implicat, quia conatus Dei est factio ipsa rei. Quare non est in potestate mea decretum Dei ponere, quasi aliquid mihi subiectum, & factum à me, verum est, tanquam dans mihi potestatem, ut ego possum facere hoc, vel non facere, nego. Et hoc sufficit ut non tollat meam potestatem, non quia in mea sit potestatem, sed quod mihi det, & conseruet potestatem. Solutio hæc tota, & doctrina est ex D. Th. sæpè à nobis repetita *suprà disp. 5. a. 4. & disp. 7. præced. & constat ex hac 1. p. quest. 19. art. 8. ad 2. q. 23. de verit. art. 5. 3. contra Gentil. cap. 94. circa finem, & aliis locis ibi citatis.*

Ad primam Conf. Resp. quod posito illo decreto 21 efficaci, est independens in efficacia sua à quocumque actu meo, distinguo, est independens ab actu, ut à motiuo, vel causa efficiaciæ, concedo ; ut ab effectu secuto, quatenus vult effectum suum non consequi, nisi per actum meum, nego ; & sic licet sit efficax ante præiudicia merita, ut motiva talis decreti, non tamen ante præiudicia merita ut consecuta, & ut effectus talis decreti, per quæ tanquam per media consequitur suum finem. Et effectus eius est dare gloriam de facto, non quomodocumque, sed per applicationem talium mediorum, quæ sunt merita tanquam per aliquid consecutum ex tali decreto, non tanquam per motiuum habendi decretum.

Ad secundam Conf. dicemus *infra* agendo de reprobatione, ubi ostendemus quod exclusio à regno in ratione beneficii indebiti etiam est ante præiudicia demerita, quia ista se habet ut effectus voluntatis, & prouidentia circa reprobos, licet in ratione punitionis, & damnationis necessariò supponat demerita. Sed tamen est differentia inter electionem, & exclusionem à regno, etiam in ratione indebiti beneficii, quod hæc exclusio nunquā est ex primaria intentione, neque ex beneplacito Dei, quia in se non est positivè appetibilis, cum sit negatio, & exclusio à regno, sed solum propter vniuersalem prouidentiam in qua debet includi etiam ostensio iustitiæ, & locum suum habere, sicut etiam corruptio formarum non est de primaria intentione Dei ratione sui, sed ut conducit ad vniuersalem cursum rerum generabilium, & corruptibilium. Electio autem ad gloriam ex se est appetibilis, & ex primaria intentione Dei pertinet ad eius beneplacitum ; & sic optimè habet in illa locum quod in ordine intentionis motiuum accipitur ex beneplacito Dei, & in executione ex meritis, ut ex mediis dantibus titulum assecutionis finis.

Ex his etiam solutæ manent rationes aliquæ, quas specialiter accumulatur P. Lessius tanquam maxima inconuenientia ; videlicet quod non videtur bonitati Dei congruere ; ut in his quæ ante omnia merita efficaciter vult hominibus, tam multos excipiat, & tam paucos eligat, sine demerito istorum præ illis, & e contra. Secundò, quia non rectè componitur cum diuina sinceritate, quod habeat voluntatem saluandi omnes homines, ut clamat Scriptura, & statim sine vllis meritis, vel demeritis præiudiciis, eligat quosdam paucos efficaciter, ceteros omnes non eligat, sed efficaciter excludat.

Ff 3 Ad

342 Quæst. XXIII. De Prædestinatione.

Ad quid ergo deseruit illa tam pia, tam benigna voluntas saluandi omnes, si statim occulto mysterio nullis præiis meritis, vel demeritis me excludit, & alterum assumit? Certè ludere videtur sic amans, an illudere? Tertio, quando Deus promittit mihi gloriam, semper intelligitur conditionatè, si merita ponantur, si mandata seruentur: ergo similiter electio ante præiis merita non potest intelligi absolutè, sed conditionatè, si merueris, si per me non steterit; alioquin tollitur omnis sollicitudo, & labor hominum, quia ante talem laborem, & sollicitudinem præiis absolutè iam es prædestinatus, quidquid ergo postea feceris, vel non feceris, gloriam conlequeris, quia independentè ab istis voluit Deus tibi gloriam efficaciter.

Resp. hæc omnia procedere ex quadam inconsequentia, qua regulate volumus vniuersalissimam summi Prouisoris dispositionem cum nostræ stylo prouidentia, vel cuiuscumque prouidentis creati.

23 Dicimus ad primum, pertinere ad bonitatem Dei, ut sua antecedente, & quasi primaria intentione omnibus secundum se beatitudinem velit, considerata præcisè natura humana, & benignitate diuina. Pertinere nihilominus ad bonitatem Dei quatenus vniuersalissima, & ad omnia se extendens etiam providere suæ iustitiæ, & ei locum assignare in vniuerso, nec ita velle omnibus bonum peculiare eorum, quod vniuersale tollat: nam etiam Deus aliquos particulariter, & priuatim lædendo, bonus est vniuerso. Nervosè Tertullianus lib. 3. in Marcionem c. 13. *Sic totus Deus bonus est, dum pro bono omnia est. Sic denique omnipotens, quia & iuvandi & ledendi potens. Minus est tantummodo prodesse, quia non aliud quid possit, quam prodesse. De eiusmodi qua fiducia bonum sperem, si hoc solum potest? Quomodo innocentia mercedem secter, si non & nocentia spectem? Diffidam necesse est, ne nec alteram partem remuneretur, qui utramque non valuit.* Ita Tertullianus. Et hæc ad Dei bonitatem nos respondemus; aliter enim bonitas vniuersalis se diffundit, quam oportet sic aliquorum partes agere, ut non omittat contrariorum, aliter particularis bonitas, cui non interest omnibus providere, sed suam priuatam aut communicare, aut ostentare, aut defendere. Certè argumentum hoc Lessij æquè ipsum destruit, si quid valet: nam si Deus prius videt merita, quam eligat ad gloriam, prius demerita, quam excludat à regno, & in manu eius est procurare aut dare isti merita, & gratiam qui non accipit; inquiri, decetne diuinam bonitatem quibusdam dare merita, aliis non? Et certè merita dat, & gratiam, non ex aliis præcedentibus meritis: sic enim esset abire in infinitum. Si ergo non dedecet diuinam bonitatem ut aliquibus det gratiam, aliis totaliter neget, ut paruulis utrisque æquali in massa existentibus, cur indecet bonitatem eandem intendere aliquibus dare gloriam, aliis omissis? Sed de hoc amplius dicemus *disp. de Reprobatione.*

24 Ad secundum Resp. utrumque illum actum decere summam pietatem Dei, & incumbere summo Prouisori, nec vnum inferre supplantationem alterius, aut minus sinceritatis, decet enim piissimum Deum homini in quantum homo est, & omni intellectualem creaturæ velle finem vltimum, qui est ipsa visio Dei. Et hæc pietas est bonitatis, qua vult omnes homines saluos fieri. Pertinet autem ad vniuersalissimum Prouisorem creaturam intellectualem ut defectibilem (non ut præcisè intellectualem) permittere in aliquos defectus labi, tum

temporales, & remittendos, tum æternos, & non expiandos, quia utriusque defectus est capax tam ampla, & magna creatura: nec enim magnorum defectuum est capax, nisi aliquid in se magnum: Et hoc ipsum ad contingentiam libertatis creatæ spectat: ut non semper indefectibilis maneat, sed deficiat, quia contingens est; & sic non omnia suum finem assequantur, ut etiam cognoscatur quàm gratuitus, quàm admirabilis, quàm supremus est ille finis, quàm Dei proprius, quàm humilibus peruius, quàm superbis repugnans: Ergo nihil contrarietatis, nihil supplantationis, nihil insinceritatis est in his duabus voluntatibus, quod scilicet velit Deus te intellectualem ordinare ad finem beatitudinis, te defectibilem permittere labi in æternos defectus cum exclusione à regno, omnes homines velle saluos fieri ut homines, & ex eadem massa tanquam supremus figulus facere aliud vas in honorem, & aliud in contumeliam. Vtrumque nobis manifestauit Deus in Scriptura, nihil in occulto ad supplantandum fecit, aliter loquens, aliter operans. Quid miseri nos & limitatissimi homines volumus illud immensum pelagus iudiciorum Dei, nostra constricta, & incertissima prouidentia metiri, quasi sic faceret melius Deus, sicut nos cogitamus debuissè facere?

25 Ad tertium dicimus promissionem Dei quæ nobis manifestatur, esse de his quæ facturus est in executione nobiscum, non de motiuo suæ intentionis: hoc enim non ad rem est in promissione. Omnis autem executio gloriæ sub meritis tanquam mediis sit; & ideò dum promittitur, sub eorum conditione promitti necesse est. Non sic intentio ipsa finis, quæ non sub conditione fieri debet, cum finis non sub conditione alliciat, & moueat, sed de facto causet, & finalizet. Iam verò quod dicitur de sollicitudine, & labore, quia hac ratione remoueri videtur; hoc est armis Massiliensium nos impetere, quibus Catholicum hominem armari non decet. Arma Goliath suspensa sunt in templo Dei, ab Ecclesia sunt damnata Semipelagianorum tela. Quid illa iterum vibramus, & in quos? Illi in epistola Prosperi ad August. dicebant, *Remoueri omnem industriam, tollique virtutes, si diuina constitutio humanas præuenit voluntates.* Non respondit August. dicendo quod non præuenit diuina constitutio, sed supponit præiis humanas voluntates, ut dicunt scientiæ mediatores. Nec nos id respondemus. Sed dicimus, præuenire Deum nostras voluntates, nec tolli sollicitudinem, & industriam, quia eam causat diuina constitutio, & tanquam vnum ex mediis præparat ad assequendam gloriam, sicut non tollit merita illa voluntas Dei, sed pro effectu habet, sic habet pro effectu nostram industriam, eamque requirit, ut à se causatam, non ut à nobis præsuppositam: est enim nostri interioris motus, & industriæ dominus, & author, & causa per modum causæ primæ, quæ non tollit secundam, sed dat nobis omnia, & sine quo fit nihil.

ARTICVLVS V.

Utum ex parte nostra detur aliqua causa prædestinationis?

IN hac difficultate proceditur in prædestinatione secundum ordinem executionis, secundum quod Deus incipit disponere de mediis, & præparare illa ac dirigere ad assecutionem gloriæ. In hoc enim ordine

dine inquiritur, utrum primum medium, & primum effectum prædestinationis Deus in exercitio det intuitu alicuius operis præsuppositi, seu occasione alicuius ex parte nostra præiussi, aut præsuppositi, & ita ex parte nostra detur causa, seu ratio, aut motum dandi primam gratiam, seu primum effectum prædestinationis.

1 Fuit antiquis temporibus valde celebris ista controuersia, quia apud plurimos difficile valde videbatur, quod Deus dona supernaturalia quibusdam daret, aliis denegaret sola sua voluntate, nulla ex parte eorum existente inæqualitate, aut meritum diuersitate: hoc enim videbatur pertinere ad acceptionem quandam personarum, ut expressè dicebant Massilienses, & refert S. Prosper in *epistola ad Augustinum*. Vnde diuersas vias aliqui excogitauerunt ad assignandum quomodo ex parte nostra aliquid supponeretur vel attenderetur, ratione cuius moueretur Deus ad dandam gratiam vni præ alio, ut S. Thom. refert in *hac quæst. 23. art. 5.* Quibus alij modi dicendi additi sunt à Recentioribus huius temporis, circa ea quæ ad efficaciam gratiæ, seu ut gratia prædestinatio sit ex parte nostra, requiruntur. Quæ omnia ut intelligantur, aduertendū est, quod ut sæpè diximus, prædestinatio est specialis prouidentia, tum ratione materiæ, quia circa rem supernaturalem versatur, tum ratione efficaciam, quia efficaciter transmittit ad gloriam, & de facto consequitur finem. Aliqui ergo conati sunt assignare causam nostræ prædestinationis, seu effectum prædestinationis ex parte nostra respectu donorum supernaturalium, ut supernaturalia sunt, quasi Deus moueretur ad dandum huic præ alio dona supernaturalia, quia in hoc aliquid præ alio attendit ratione cuius id donat. Alij verò conati sunt assignare ex parte nostra rationem, & causam prædestinationis nostræ quoad eius efficaciam, ita quod ex parte Dei paria decernantur auxilia prædestinato, & reprobo, & aliquando maiora ipsi reprobo: tamen quod ista reddantur efficacia præ illis, ex nostro bono vultu, & consensu præiusto est, non sine gratia, sed cum illa. Ex quo tamen non parum aperiebatur via illis primis qui volebant dari ex parte nostra causam, vel occasionem, ut daretur prima gratia, & primus effectus prædestinationis, quia si ista collatio gratiæ, & doni supernaturalis non est efficax, nisi supponendo aliquid in me, quod non in alio præiustum à Deo: ergo habet Deus sufficiens motum ex parte mei, ut det mihi illam gratiam potius, quam alteri, cum non modica occasio sit, nec parua ratio meriti, aut congruitatis, quod ego cooperaturus sum, & non alter, & talia determinationem, & consensum habiturus quod gratiam illam reddam efficacem, licet non sine gratia, non causante illam cooperationem meam, sed comitante. Et saltem quoad hoc quod est gratiam illam reddi prædestinatam, & efficacem, causam habet in me, & consequenter iam prædestinatio ut prædestinatio, seu ut efficax etiam quoad primum suum effectum quem nobis dat, causam habet ex parte mei.

Igitur illi qui assignauerunt ex parte nostra aliquam causam, vel rationem dandi gratiam, & effectus supernaturales nobis, in quatuor præcipuas sententias diuisi sunt, quas S. Thom. commemorat in *hac q. 23. art. 5.*

2 Prima fuit error Origenis qui posuit animas hominum extitisse ante corpora, & iuxta merita vel demerita, quæ tunc habuerunt, recipere ea quæ nunc in corporibus sibi dantur. Ita habet Origenes *lib. 1. Periarchon c. 7. & sequentibus*, refertque ex eo S. Hieron. *epist. 8. & epist. 139.* Cui affinis fuit error

Priscillianistarum, & Manichæorum, qui asseriebant animas humanas in cœlesti habitatione peccasse, & ob hoc in corpora deiectas, ut quidquid in hac vita variè, & inæqualiter prouenit ex præcedentibus causis videatur accidere, ut refert S. Leo Papa *epist. 93. ad Turibium Asturicensem Episcopum, c. 10.* & ex illo videtur accepisse, & damnasse Concilium Bracharense primum *c. 5.*

Secundus error numeratur à D. Thom. error Pelagianorum, qui dicebant liberum arbitrium sufficere per se simpliciter ad bene operandum, licet per gratiam facilius posset operari, aut etiam adiuuari postquam haberet bonam voluntatem, non autem conuerti à malo in bonum per ipsam gratiam, ut ex D. August. latè in *3. disp.* retulimus. Vnde gratia, & effectus supernaturales, ad prædestinationem pertinentes sequebatur dari nobis intuitu alicuius boni operis facti sine gratia tanquam propter meritum; & sic in nobis dari causam prædestinationis.

4 Tertius error fuit Semipelagianorum, seu Massiliensium, qui asseriebant nos quidem non posse sine gratia Dei opera aliqua bona facere, sed debere præueniri voluntates nostras ab ipsa gratia, ut aliquod opus bonum vel inchoetur, vel consummatur, sed tamen dicebant ante istam gratiam præcedere ex parte nostra, non opera, sed initia quædam operum ut fides, desiderium, oratio; quia istis operibus non medicinam habemus sed medicum quærimus, & hoc saltem infirma natura potest ut quærat medicum licet obtinere sibi sanitatem non possit. Hæc igitur initia, dicebant ipsi, in vnoquoque præuidens Deus, dat quibusdam gratiam, seu prædestinationis effectum, aliis negat, qui hanc dispositionem non habent; & sic semper aliquid supponitur ex parte nostra, ratione cuius Deus acceptor personarum non sit. In paruulis autem qui hæc initia non habent, dicebant Deum saluare aliquos, & relinquere alios ex præuisione operum quæ facerent si viuerent, prout latius retulimus *suprà disp. 3.*

Ex hoc autem nascitur quarta sententia quam commemorat S. Tho. *loco cit.* eorum qui dicebant Deum non propter aliquem bonum vultu liberi arbitrij, qui ante gratiam aut sine illa præcessisset, sed propter bonum vultu futurum post largitam gratiam moueri ad prædestinandum istum præ illo, & dandum ei effectum gratiæ, sicut si Rex daret equos militi, & arma in præmium anticipatum futuri laboris. Quos S. Doctor reprobatur, quia distinguebant in opere, seu vultu liberi arbitrij id quod est ex nostra voluntate, & quod est ex gratia seu influxu Dei, cum idem pro indiuiso ab utroque principio sit.

5 Sequitur aliquorum Catholicorum sententia, qui affirmant illam propositionem, *Faciendi quod in se est Deus non denegat gratiam*, intelligi de faciente quod in se est ex virtutibus naturæ, non quidem ratione alicuius meriti, quasi opus ex viribus naturæ factum sit motum, vel causa dandi gratiam, saltem merito conditionati (nam merito congrui aliquibus antiquis Theologis tribuitur quod senserint, opus factum ex viribus naturæ posse esse meritum congrui respectu primæ gratiæ) sed ratione pacti inter Christum, & Patrem, quia sic cum ipso statuit ut cuiusque conanti ex se ad gratiam, daretur gratia infallibiliter. Ita Molina in *concordia disp. 10.* qui in huius pacti confirmatione explicat illud Ioannis 1. *Dedit eis potestatem filios Dei fieri*: quomodo enim daret potestatem omnibus filios Dei fieri, si facientibus, & conantibus ex se ad gratiam non illam daret infallibiliter.

biliter. Ab hac autem sententia non multum abest Vasquez, qui 1.2. disp. 190. c. 11. n. 115. & cap. 12. num. 132. docet opera bona moralia facta ante fidem, vel in peccato iuuare, aut exordium præbere ad fidem, vel ad iustificationem, quatenus sunt per Christum, imò ex eo mouetur ad ponendum omnia opera bona esse per Christum, licet sint ordinis naturalis, quia possunt ad iustificationem conferre. Et in hoc sensu aliqui docent sententiam hanc etiam apud antiquos valuisse quod facienti quod in se est viribus naturæ Deus daret gratiam, quia existimarunt opera naturalia bona ex libero arbitrio esse dispositionem ad gratiam, quod Scoto, Gabrieli, Caietano, Soto, & aliis attribuitur. Sed hi Authores non fundant hoc in pacto infallibili Christi Domini cum Patre, sicut Molina, sed in eo quod habent illa opera aliquam rationem dispositionis ad gratiam, non tamen infallibilem. Alij autem Recentiores illam Molinæ sententiam de pacto Christi cum Patre defendunt.

6 In alio ordine assignandi causam prædestinationis ex parte nostra quantum ad id quod efficaciam est in prædestinatione, per extrema quædam videntur processisse illi qui fatalem necessitatem prædestinationi Dei tribuebant respectu actuum liberorum, & qui nullam infallibilitatem illi tribuant in vi causalitatis, sed in vi præscientiæ. Nam primi posuerunt efficaciam prædestinationis talem esse, quod nec pro causa, nec pro effectu respiciebat usum nostri liberi arbitrij, sed totaliter illum tollebat; & sic posuit Calvinus, qui totaliter à decreto prædestinationis nostram libertatem euerit docuit. Vnde sublata libertate, liber actus, nec causa prædestinationis esse poterat, nec effectus. Quæ fuit quondam hæresis Priscilianistarum, ut retulimus disp. 3. art. 4. qui fatalem necessitatem prædestinationi tribuebant, cuius erroris vitandi occasione Massilienses ab August. discesserunt, existimantes in idem inconueniens incidere Augustini sententiam, qui ponebat decretum Dei nostras antecedere voluntates, & infallibiliter ab eo duci, licet non necessario, & idem, ut S. Prosper refert in epistola ad Aug. dicebant, *remoueri omnem industriam, tollique virtutes, si diuina constitutio humanas præueniat voluntates, & sub hoc prædestinationis nomine fatalem quandam necessitatem induci*. Cæterum sicut tunc Massilienses ut euitarent errorem Priscilianistarum, etiam ab Augustino discesserunt, ita nunc ad euitandum errorem Caluini, aliqui in extremam aliam sententiam recidunt circa prædestinationem, dicentes efficaciam non habere ex se, & in vi causalitatis suæ, & antecedenter ad nostrum consensum, sed denominatiue ab ipso; & sic putant, quod prouidentia generalis Dei, quæ communis est reprobis, & prædestinatis, & de se non efficaciter inducit finem, ex sola adiunctione consensus nostri redditur efficax, & prædestinatio prouidentia; & sic licet ex parte nostra non detur causa prædestinationis, quantum ad donationem supernaturalis gratiæ, datur tamen causa quoad efficaciam, ut videlicet de facto efficax sit, quia ex natura, & causalitate sua sentiunt efficacem non esse, sed ex denominatione extrinseca sumpta à consensu nostro præuiso. Quem tamen consensum dicunt non esse Deo motiuum propter quod istum præ illo prædestinet, sed Deum ex pura misericordia sua uti illa præscientia, qua scit istum præ alio consensurum, ut det illi gratiam suam. Ita Molina 1. p. q. 23. art. 5. disp. 1. memb. 6. & 11. & alij Authores qui ipsum sequuntur. Imò videtur hoc consequenter poni debere à defensoribus scientiæ mediæ, qui

existimant diuina decreta ex se non esse efficaciam, sed ex præuiso consensu nostro, à quo tanquam à conditione dependet efficaciam illa, & consequenter quod prouidentia sit specialis, & prædestinatio.

Errores reiecti, alique sententia.

7 Dico primò, Repugnat dari causam prædestinationis ex parte nostra, quæ sit causa, vel motiuum, aut occasio, ut Deus nobis det illam. Quæ omnia nomine meriti includimus loquendo de merito, non rigore pro merito iustitiæ, & æqualitatis, sed pro quocumque motiuo, aut proportionem, vel occasione, unde Deus moueatur. Nam etiam Semipelagiani cum ponebant Deum gratiam ex meritis dare, seu ex aliquo initio nostro bono, non loquebantur de merito rigore tantum, sed etiam de eo quod se habet ut occasio: nam Cassianus qui ex Semipelagianis fuit, collatione 13. refugit concedere quod gratia dabatur nobis propter merita, sed propter quædam initia, ut propter desideria bona, aut credulitatem, &c. quæ ipse merita esse non concedebat, ut patet illa collatione 13. c. 13. & 16. sed vocat ista initia, occasiones quædam, ut Deus det gratiam, ut patet in c. 15. Præsto, inquit, est Deus occasio tantummodo nostræ voluntatis oblata, ad hæc omnia conferenda. Ista autem quæ ipse vocabat occasiones, S. Prosper dicit merita esse in lib. contra Collatorem c. 6. Nec enim, inquit, nullius meriti haberi potest petentis fides, quærentis pietas, pulsantis instantia. Qui planè est sensus August. qui dixit epist. 105. Neque enim nullum est meritum fidei, quæ fide ille dicebat, Deus propitius esto mihi peccatori. Quare nomine meriti intelligimus etiam quamcumque congruitatem, aut occasionem, aut motiuum, quod Deus accipiat antecedenter ad suam prædestinationem ex parte nostra, ita quod illud non sit effectus prædestinationis, sed det motiuum, seu occasionem Deo ut prædestinet.

8 Conclusio posita fide stabilita est ex determinationibus Conciliorum, Palestino, Mileuitano, Arausicano I. præsertim à canone 4. & deinceps, ubi perpetuo definitur contra Pelagium, ut fateatur gratiam Dei non secundum merita nostra dari. Et quæ Semipelagiani ponebant initia, & non merita, etiam sub nomine meriti comprehenduntur ab istis determinationibus Conciliorum. Nam ut loco cit. inquit S. Prosper contra Cassianum. Velis nolis, conuinceris gratiam Dei secundum merita dari, cum aliquid ex ipsis hominibus præcedere affirmas; propter quod gratiam consequantur: nec enim nullius meriti est petentis fides, &c. Et Aug. agens contra istos Semipelagianos, qui fidem tanquam initium, & occasionem dicebant præcedere, non tanquam meritum, etiam ex meritis dari gratiam, teneri dicere ipsos conuincit, ut patet in lib. de prædestinatione Sanctorum (qui aduersus Massilienses est editus) cap. 2. Quis dicat eum qui iam capit credere, nihil mereri ab illo in quem credidit? (utique merito congrui: quando enim incipit credere nondum est iustificatus ut mereatur de condigno.) Vnde fit ut iam merenti cætera dicantur addi retributione diuina, ac per hoc gratiam secundum merita nostra dari. Quod obiectum sibi Pelagius ne damnetur, ipse damnavit. Constat ergo intellexisse August. & Patres, & consequenter Ecclesiam in suis definitionibus, cum damnat illam propositionem, gratiam Dei secundum merita nostra dari, per ly merita intelligi non solum merita rigore, & de condigno, sed etiam de congruo, & quamcumque occasiones, seu motiua quibus Deus uti dicitur

dicatur ad dandum nobis gratiam, & primum effectum prædestinationis. Sed ut omnis ambiguitas tolleretur, Concilium Arausicanum I l. *canone 6.* expresse numeravit ista initia, quæ ad accipiendam gratiam Semipelagiani ponebant, & ea tollit, dum inquit: *Si quis dixerit, sine gratia Dei credentibus, volentibus, desiderantibus, conantibus, laborantibus, petentibus, quærentibus, pulsantibus nobis misericordiam Dei conferri, resistit Apostolo, &c.* pro ut latius infra in probatione secunda conclusionis referimus. Denique Concilium Trident. idem definit *sess. 6. c. 5.* dum docet, *exordium iustificationis nostre desumi ex vocatione Dei, qua nullis eorum existentibus meritis à Deo vocantur.* Sed primus effectus prædestinationis est vocatio Dei ad suam fidem, iuxta illud Rom. 8. *Quos prædestinavit, hos & vocavit,* &c. ergo primus effectus prædestinationis nulla merita supponit quomodocumque illa vocentur siue occasiones, siue motiva, siue congruitates, &c. ergo nec ipsa prædestinatio, quia quando primum effectum dat, iam est prædestinatio, quæ causat illum: ergo si ipse primus effectus nulla merita supponit, neque prædestinatio, sed omnino gratuita est, iuxta illud Apostoli ad Ephesios 1. *In quo omnes forte vocati sumus, prædestinati secundum propositum eius, qui operatur omnia secundum consilium voluntatis sue.* Si ergo forte vocati, & prædestinati, non utique ullis meritis præcedentibus aut occasionibus, vel congruitatibus: qui enim forte eligitur, omnem istam præventionem excludit.

9 Ratio denique D. Thom. hoc ipsum manifestat in hoc art. 5. nam vel illud motuum, seu occasio propter quam Deus prædestinationis gratiam operatur, est aliquid præordinatum, & directum à Deo ad illum finem, scil. ut detur gratia, vel non. Si non est ordinatum: ergo præter intentionem Dei, & casualiter, seu fortuito accidit; & ita non erit ex providentia Dei, quod detur gratia, seu primus effectus supernaturalis ipsius prædestinationis, quod est omnino detestandum. Et convincitur quod tunc non prædestinaret Deus, nec daret gratiam intuitu, aut occasione alicuius operis naturalis, quia non respiceret Deus ut meritum, seu ut causam dandi gratiam, id quod à se ordinatum non est ad talem effectum præstandum, seu talem finem. Si verò illud opus naturale est præordinatum à Deo, ut propter illud motuum det gratiam, & prædestinet hominem; ergo illud motuum est ordinatum à Deo ad vitam æternam, seu ad gratiam dandam, quæ est semen vitæ æternæ: ergo pro ut tale est effectus providentiæ Dei ordinantis efficaciter in vitam æternam; hæc autem est prædestinatio: ergo est effectus prædestinationis: ergo supponit prædestinationem; & sic non est causa, & motuum illius, nec est ratio primi effectus prædestinationis, cum ipsamet effectus sit prædestinationis; & sic ipsa prædestinatio respectu totius collectionis omnium suorum effectuum non supponit causam, & motuum.

10 Dices: supponit causam respectu effectuum supernaturalium, & gratiæ, non respectu omnium effectuum absolute, sed unus effectus nempe naturalis, est motuum ad dandam gratiam. Et hoc sufficiebat illis hæreticis, quibus non erat cura an totius prædestinationis detur, vel non detur causa, sed an detur respectu gratiæ, ita quod gratia non omnino detur gratis. Et contra hos non probat illa ratio S. Thom.

Sed contra hoc non est necesse aliam rationem urgere quam ipsam D. Thomæ: nam quidquid hominem ordinat ad salutem, totum comprehenditur sub effectum prædestinationis, etiam ipsa præparatio

ad gratiam. Cuius ratio est quia totum hoc, scil. quidquid ordinat hominem in salutem, fit per auxilium divinum, ut patet ex illo Thren. ultimo, *Converte nos Domine ad te, & convertemur,* auxilium autem divinum ordinans in salutem est effectus providentiæ ordinantis in vitam æternam, quæ est ipsa prædestinatio: ergo totum quod ordinat hominem in salutem est effectus prædestinationis. Rursus illud opus ordinis naturalis quod est motuum dandi gratiam, vel est ordinans hominem in salutem, vel non. Si non ordinat in salutem, neque ordinat in gratiam prædestinationis, quia gratia ista Dei est vita æterna, & est salus, *gratia enim Dei salvasti estis*, inquit Apostolus; & si non ordinat in gratiam, non est Deo motuum dandi gratiam, quia connexionem non dicit cum ipsa gratia, quod autem connexionem non habet cum aliquo, sed disparatè se habet ad illud, quomodo potest esse motuum, vel occasio, aut meritum ad illud? nisi solum ex mera voluntate Dei, cum ex natura sua ad id ordinatum non sit. Quod si est ex mera voluntate Dei, iam ibi non est meritum, sed pura gratia, sicut si ob elevationem lapidis vellet alicui dare gratiam aut salutem, esset pura gratia. Si autem ordinat ad salutem, & ad vitam æternam: ergo procedit ex auxilio divino, & ex gratuita Dei voluntate, ordinante in vitam æternam, quia gratia Dei est vita æterna, ut dicitur Rom. 6. Ergo debet illud motuum procedere ex gratia, quæ est auxilium divinum, quatenus ordinat ad salutem; & sic non est causa, & motuum dandi omnem gratiam, quia non est causa dandi illud auxilium, sed est effectus eius. Et sic stat solida ratio D. Thom. contra illos hæreticos.

Dico secundò, opera moraliter bona ordinis naturalis, neque ex pacto Christi cum Patre, neque propter auxilium datum per Christum habent infallibilem connexionem cum gratia, vel conducant infallibiliter ad initium iustificationis, & ad habendum primum effectum prædestinationis, etiam si dicatur Deum non intuitu, & merito illius dare gratiam. Est contra allatas sententias Molinæ, & Valquez, de quibus latius agere spectat ad 1. 2. q. 112. ubi explicari solet illud axioma, *Facienti quod in se est, Deus non denegat gratiam*: non enim intelligitur quod facienti quod in se est viribus naturæ Deus infallibiliter det gratiam; sed facienti quod in se est ex ordinatione gratiæ.

Nunc tamen breuiter illa prima pars conclusionis prob. ex Concilio Arausicano I l. *can. 6.* ubi sic definitur: *Si quis dixerit sine gratia Dei credentibus, volentibus, desiderantibus, conantibus, laborantibus, vigilantibus, studentibus, petentibus, quærentibus, pulsantibus, nobis misericordiam Dei conferri, non autem divinitus ut credamus, velimus, vel hac omnia ut oportet agere valeamus per infusionem Spiritus S. in nobis fieri confitetur, resistit Apostolo, &c.* Vbi Concilium aperte excludit illam intelligentiam, quod facienti quod in se est ex viribus naturæ, Deus non denegat gratiam, aut infallibiliter dat illam, cum tam multa opera bona numeret Concilium, quæ si fiant sine gratia, atque adeò ex viribus naturæ, non sunt ratio dandi gratiam: & tamen si tale pactum daretur inter Christum, & Patrem, ratione cuius propter illa opera naturalia Deus daret gratiam, non bene decerneret Concilium in re tanti momenti, & dogmatica absolute negare, quod facientibus talia opera gratia detur, & sine vlla distinctione, si in quodam sensu de facto, & in re oppositum est verum attendendo ad pactum Christi cum Patre. Et præterea quia facienti opera naturalia bona ex pacto Christi cum Patre datur gratia, & misericordia

cordia Dei : ergo ante gratiam nos incipimus , & postea per gratiam Dei adiuuamur posito illo pacto. Patet consequ. quia ubi interuenit pactum inter duas personas vt hoc facienti detur illud , qui facit id quod ad se pertinet , ratione cuius debet aliud dari , iam incipit implere pactum , & ponit requisitum ex parte conditionis , vt alter compleat. Ergo si Christus fecit pactum vt facienti opera bona naturalia detur misericordia Dei , & gratia , ille qui facit talia opera , iam incipit ante gratiam , & postea per gratiam adiuuatur , & completur. Dicit autem idem Concilium citatum *can. 25. Salubriter profiteamur quod in omni opere nostro , nos non incipimus , & postea per misericordiam Dei adiuuamur*. Loquitur Concilium de omni opere nostro , vtique ante gratiam , & ex naturæ viribus facto : ergo nullum est opus naturale in quo nobis sine gratia incipientibus , postea per misericordiam Dei adiunemur ; si non per misericordiam adiuuamur , multo minus per pactum , sed gratia si adiuuat , etiam antecedit.

13 Dices : Sensus Concilij non est quod facto aliquo bono opere ex viribus naturæ , non detur gratia adiuuans , etiam pro alio opere , sed quod respectu vnius , & eiusdem operis non est dicendum quod nos incipimus , & postea Deus adiuuat , sicut dicebant Pelagiani negantes præuenientem gratiam , & hoc est quod Concilium definit , scil. non sufficere adiuuantem gratiam , sed requiri præuenientem vt incipiamus.

Sed contra ; quia illud pactum quod ponit Molina , non est solum vt Deus facienti vnum opus bonum naturalis ordinis det gratiam pro alio , aut det gratiam pro remissione peccatorum , quia hæc remissio ratione operis naturalis dari non potest , vt de se constat , cū exigat dispositiones supernaturalis ordinis , nempe credere , sperare , diligere , pœnitere vt oportet , vt nobis iustificationis gratia infundatur , quod sine præueniente Spiritus S. gratia fieri non potest , vt definit Concil. Trident. *sess. 6. can. 3.* Similiter pactum Christi non est quod posito vno bono opere naturali , detur gratia actualis , seu auxilium supernaturale pro alio : ridiculum enim est dicere esse infallibile , & ex pacto Christi statutum quod quoties aliquis operatur bonum opus naturale operabitur aliud supernaturale ; cū plerumque videamus homines peccatores , imò , & iustos facere aliquod opus pietatis , & moraliter bonum , nec postea facere aliud opus supernaturale. Et præterea incredibile est quod Christus ita æstima-uerit opera naturalia , quod posito aliquo opere ex illis fecerit pactum , & obligationem dandi gratiam pro alio faciendo opere supernaturali , & non fecerit pactum quod posito aliquo opere supernaturali quod excellentius est , detur gratia pro alio opere supernaturali : aliàs maius commodum reportaret aliquis ex minori , & imperfectiori opere , & consulendus esset aliquis , vt securam haberet gratiam , quod potius exerceretur in operibus naturalibus bonis. Quod si etiam pro quolibet opere supernaturali fecit Christus istud pactum vt gratiam haberet pro alio , qui semel habuit opus supernaturale , non posset iam carere talibus operibus , nec decidere à fide vsque ad mortem. Patet , quia posito hoc opere , est pactum quod detur sibi gratia ad aliud : ergo etiam posito illo alio est pactum quod pro alio sibi detur gratia ; & sic de reliquis , quia pro omni opere est tale pactum , & quodlibet opus supernaturale debet regulari per fidem : ergo non posset deficere à fide , qui semel habuit opus supernaturale. Restat ergo quod illud pactum non intelligitur , neque de danda gratia re-

missionis facienti quod in se est tantum ex viribus naturæ , neque de danda gratia supernaturali pro alio opere habendo , & consequenter intelligitur quod facienti quod est in se , id est conanti , & incipienti facere quod potest , Deus dat gratiam , & misericordiam vt tale opus perficiat. Contra hoc autem directè loquitur canon relatus Concilij Arau-
14
ficani : ergo destruit , & euacuat illud pactum Mol. & id quod tacitè sub Molina dicto , continetur , scil. quod respectu eiusdem operis facienti , & conanti ex viribus naturæ Deus ex pacto adsit per gratiam ; quod valde oportet aduertere.

Denique non constat vbi tale pactum firmatum sit , & factum à Christo , vnde omnino fingitur , nec nobis licet pactum asserere , si reuelatum nobis non est. Non esse autem reuelatum , constat , quia non adducitur locus , vbi sit reuelatum : quod enim adducit Mol. ex illo Ioan. 1. *Dedit eis potestatem filios Dei fieri* , nec leuiter insinuat , quod dedit hanc potestatem operantibus ex viribus naturæ , sed *his qui credunt in nomine eius* , vt ibi dicitur. Supponit ergo potestas ista fidem , non antecedit , atque aded datur operantibus ex fide supernaturali , non ex viribus naturæ , & liberi arbitrij. Vnde dicit August. *lib. 1. contra duas epist. Pelagian. c. 3. Datur ergo potestas vt filij Dei fiant qui credunt in eum , cū hoc ipsum datur vt credant in eum. Quæ potestas nisi detur à Deo , nulla esse potest ex libero arbitrio*. Si ergo datur ipsa potestas , cū credunt in eum , & nulla est ex libero arbitrio , quomodo Molina dicere potest contineri his verbis pactum Christi cum Patre dandi gratiam his , qui ex viribus naturæ bene operantur ?

15
Contra Vasquez autem eodem modo prob. secunda pars conclusionis , quia etiam si auxilium detur per Christum , si est ad opus morale ordinis naturalis , tamen illud opus fit vigore naturæ , non viribus gratiæ , siquidem hoc quod est dari per Christum , non eleuat illa opera ultra ordinem naturalem : nec enim facit illa esse supernaturalia , sed intra ordinem naturæ manent , & consequenter non excedunt vigorem naturæ : sunt ergo vigore naturæ , licet concursus , & auxilium illud naturale detur per Christum : esse enim per Christum datum , non tollit illa esse ordinis naturalis , nec excedere vigorem naturæ , aliàs si essent ordinis supernaturalis , essent ex principiis supernaturalibus , & non essent ordinis naturalis , vt præsupponimus. Dicit autem Concilium Arau-
fic. I I. *can. 7. Si quis per naturæ vigorem bonum aliquod quod ad salutem pertinet vitæ æternæ cogitare vt expedit posse confirmari , absque illuminatione , & inspiratione Spiritus S. qui dat omnibus suauitatem in consentiendo , & assentiendo , heretico fallitur spiritu*. Vnde sumitur argumentum : illa opera ordinis naturalis facta per auxilium datum per Christum , vel conducunt , & pertinent ad salutem , & ad exordium iustificationis , vel non. Si non pertinent , nec conducunt , nihil ad præsens ; & intentum habemus , quod opera naturalia etiam auxilio dato per Christum , nihil iuuant ad gratiam , & iustificationem. Si pertinent , & conducunt : ergo possumus per naturæ vigorem aliquid cogitare quod pertinet ad salutem vitæ æternæ , quod negat Concilium : idem enim est conducere ad vitam æternam , & pertinere : ad id enim aliquid pertinet ad quod ordinatur. Fiunt autem per naturæ vigorem etiam si fiant auxilio dato per Christum , vt ostensum est , quia dari per Christum non extrahit illa ab ordine naturæ , nec supra vigorem naturæ ponit , sed illud ipsum , quod naturale est , dependenter à Christo dicitur causari , tanquam à Christo , vt à causa efficiente , vel merente datum ergo

ergo semper verificatur quod opera facta ex naturæ vigore, seu non supra ipsum, pertinent ad salutem vitæ æternæ sine illuminatione Spiritus S. sed cum illuminatione luminis naturalis ante fidem: illuminatio enim Spiritus S. illuminatio fidei est, atque adeo supernaturalis. Nec potest dici quod illa opera naturalia deferunt, non ut dispositiones ad iustificationem, sed ut remouentia obstaculum, & impedimentum ad gratiam, quia videlicet minus induratum est cor, quod bonis operibus exercetur. Contra enim est, quia, ut dicit S. Thom. *ad Hebr. 12. lect. 3.* hoc ipsum quod est remouere obstaculum, est ex gratia Dei. Et sumitur ex August. *lib. de predestinat. SS. c. 8.* ubi ait: *Hec gratia à nullo duro corde respuitur, idè quippe tribuitur, ut cordis duritia primum auferatur;* ergo tolli duritiam, seu obstaculum cordis ex gratia est, cum ad hoc tribuatur. Et ratio est, quia obstaculum & duritia cordis non remouetur per hoc solum, quod quis negativè se habeat, & cesset à peccando, vel ab operando totaliter, aut quod aliquod opus bonum ex particulari fine agat, sed per hoc quod aliquis cogitet, & moveatur circa ea quæ ad salutem pertinent. Cogitare autem quæ pertinent ad salutem non potest haberi ex vigore naturæ, ut dicit Concilium: ergo nec tollere obstaculum.

16 Confir. hoc idem *ex loco allato* contra Molinam *ex canone 6.* eiusdem Concilij, ubi tam multa opera bona numerantur, sicut est credere, velle, desiderare, conati, laborare, vigilare, petere, &c. quibus tamen docet misericordiam Dei non conferri, sed illa omnia diuinitus fieri debere in nobis per infusionem Spiritus S. ergo etiam si ista fiant ex viribus naturæ ante infusionem Spiritus S. nihil conducunt ad gratiâ, & iustificationem. Deniq; hoc idem deducitur ex Trident. *sess. 6. cap. 8.* ubi docet quod *Prima radix, & initium iustificationis est fides.* Et c. 5. quod *Exordium iustificationis in adultis sumitur à præueniente gratia Dei per Christum, hoc est ab eius vocatione, qua nullis eorum existentibus meritis vocantur.* Ergo opera quæ antecedunt fidem, & vocationem gratiæ, sed sunt merè naturalia, non conducunt ad talem iustificationem, nec quidquam ad illam conferunt. Paret consequi, quia id quod iuuat, aut confert ad iustificationem, aliquod initium ei præbet, aliàs nullo modo ad eam conferret, aut iuuaret, si aliquo modo non disponderet, disponere autem est initiare ad formam. Neque hoc negat Vasqu. qui *disp. illa 190. num. 115.* dicit quod non solum ista bona opera conducunt ad iustificationem tanquam remouentia impedimentum, sed quod ad illam obtinendam non alio modo, quam merito suo conducunt. Et *num. 132.* inquit, Concil. Trid. non negare quod in aliquibus præcedunt bona opera ante fidem ex gratia Christi, à quibus exordium iustificationis sumatur, quia tamen hoc exordium in omnibus necessarium non est; idè Concilium illius mentionem non facit. Solum ergo, inquit, voluit Concilium ostendere fundamentum nostræ iustificationis, à quo ut minimum iustificatio necessariò incipere debet, scil. à fide, licet etiam incipere possit ab aliis operibus ante fidem, sed non necessariò. Cæterum quis non videat hanc solutionem Vasquez violentiam inferre verbis Concilij, imò viam sternere ut doctrina Patrum aduersus Semipelagianos eneruetur. Et vrgeo contra illum verba Concilij *sess. 6. c. 8.* ubi inquit quod *Idè per fidem iustificari dicimur, quia fides est humana salutis initium, fundamentum, & radix omnis iustificationis.* Si est radix, & initium omnis iustificationis, & salutis humanæ: ergo non est aliqua iustificatio cuius fides non sit initium, fun-

damentum, & radix, quia ly *omnis*, totum completur: sed per te potest dari aliqua iustificatio, cuius initium sint aliqua bona opera ante fidem, licet non requiratur de necessitate tale initium, sed sufficiat initium fidei: ergo non omnis iustificationis est initium, & fundamentum fides, cuius contradictoria propositio est illa à Concilio definita: *Omnis iustificationis est initium, & fundamentum fides.* Nec potest glossari, seu restringi illa vniuersalis posita à Concilio, quod sit fides initium omnis iustificationis, non de necessitate, sed sufficienter, vel ad minus, quia in his propositionibus dogmaticis non licet glossas, vel restrictiones inducere: sic enim nihil certi habebimus in definitionibus vniuersalibus, & per propositiones vniuersales factis, si licet illas restringere, & secundum glossas superadditas intelligere.

Et confirm. quia quælibet iustificatio quæ fit per gratiam supernaturalem, computari debet inter res sperandas à nobis, quia gratiam, & gloriam sperare debemus à Deo, & remissionem peccatorum speramus, per quam fit iustificatio: sed iuxta Apostolum ad Heb. 11. *Fides est sperandarum substantia rerum*, id est fundamentum, & prima basis illarum. Ergo quæcumque opera fiant ante fidem non præbent initium, fundamentum, aut substantiam rei sperandæ, qualis est iustificatio, quantumcumque detur per auxilium Christi.

Denique eneruari per hanc doctrinam probationes Patrum, & Conciliorum contra Semipelagianos ex eo patet, quia Patres docent non solum bona opera esse ex gratia Dei præueniente, sed etiam quæcumque bona initia, & desideria esse ex gratia, & non ex viribus naturæ, etiam ipsam primam cogitationem ad iustificationem ordinatam; sed posita hac doctrina Vasqu. omnes istæ probationes evanescunt, quia posset dicere hæreticus omne initium iustificationis ad minimum esse à gratia, non tamen repugnare quod sit ab aliquo antecedente gratiam, scil. ex opere naturali, licet facto per auxilium Christi: de hoc enim non multum ligarent Semipelagiani quod concursus ille daretur per Christum, dummodo ex vigore naturæ, & viribus liberi arbitrij sit. Nec ipsi recusarent dicere quod aliquando sit à gratia, sed non semper, nec necessariò: aliquando enim Deus, ut ipsi dicebant, & videri potest Cassianus *citata collat. 13.* videt in nobis boni desiderij scintillâ quam fouet, & auget, & gratia sua aliquando subito nos ad se trahit, sicut fecit in Paulo. Et sic sufficebat ipsis quod aliquando initium iustificationis sit à nobis, de quo videri potest S. Prosper *contra Collatorem c. 13.* Ergo iuxta doctrinam Vasq. simpliciter fatendum est quod aliquando initium iustificationis à nobis sit, licet non semper, nec necessariò, quod nullo modo potest admitti.

*Non incipit à nobis efficacia
predestinationis.*

Dico tertio, Prouidentia diuina in ordine supernaturali ut reddatur prædestinata, id est efficax, & consecutiva gloriæ, quæ est specialis pro prædestinatis, non id tumit ex cooperatione, & consensu nostro præuiso, & præsupposito, sed ex diuina voluntate efficaci id habet, & in vi causalitatis suæ; & sic nostra cooperatio non est causa, sed effectus prædestinationis, & supponit eius efficaciam, non eam præbet, nec ex illa tumitur. Hæc conclusio est contra Molinam *locis supra relatis*, & qui eum sequuntur, quam etiam sententiam, & verba Molinæ, quibus eam docet, retulimus *præced. tomo disp.*

20. art.

20. art. 4. referendo inconuenientia scientiæ mediæ, quorum vnum, & non ex minoribus est, quod prouidentiam communem, & generalem pro reprobis, & prædestinatis, specialem, & prædestinationem reddit non ex ipsa efficacia electionis, & causalitatis diuinæ, vt a Deo descendit, sed ex denominatione sumpta à consensu nostro, & determinatione voluntatis nostræ prauis, quam Deus supponit cognitam, & determinatam ante omne decretum suum. Vbi etiam adduximus expressum locum S. Thom. q. 6. de veritate art. 3. vbi è diametro opponitur sententiæ Molinæ, vbi sic inquit; *Non potest dici quod prædestinatio supra certitudinem prouidentie nihil aliud addit, nisi certitudinem præscientiæ, vt si dicatur quod Deus ordinat prædestinatum ad salutem, sicut, & quemlibet alium, sed cum hoc de prædestinato sit, quod non deficiet a salute: sic enim dicendo, non diceretur prædestinatus differre à non prædestinato ex parte ordinis, sed tantum ex parte præscientiæ euentus; & sic præscientia esset causa prædestinationis, nec prædestinatio esset per electionem prædestinatis, quod est contra auctoritatem Scripturæ, & dicta Sanctorum. Vnde præter certitudinem præscientiæ, ipse ordo prædestinationis habet infallibilem certitudinem.* Ita D. Thom. Quem locum ibi latè ponderauimus, & reiecit solutiones quas illi adhibet Molina tanquam incongruentes. Nec potest dici retractasse D. Thom. in hac 1. p. id quod in prædicto loco asseruit, cum omnino concordet huic loco id quod affirmat in hac quæst. 23. art. 6. & 7. Nusquam autem saluat Molina id quod tam apertè docet S. Thom. scil. quod certitudo seu infallibilitas prædestinationis supra prouidentiam communem qua Deus etiam non prædestinatum ordinat ad salutem, non solum est certitudo præscientiæ, sed etiam ordinis ipsius prædestinationis. Præscientia autem condistincta contra ordinem est præscientia eius quod à Deo supponitur prauis, non ex decreto eius causatum: quod enim ex decreto causatur, ex ordine seu ordinatione Dei causatur; & sic non est sola certitudo præscientiæ, sed etiam ordinis. Et indiuidualiter reiecit D. Th. hoc quod est prædestinationem Dei habere certitudinem ex illa præscientia, qua Deus videt hunc prædestinatum non deficere à salute, habendo circa illum eandem prouidentiam generalem, quam circa non prædestinatum. Quod est indiuidualiter reiecit sententiam Mol. quod communis prouidentia dans æqualia auxilia reprobis, & prædestinatis, fiat prædestinatio per hoc quod præsciat illa scientia media, quæ non oritur ex decreto aut prædestinatione, istum non defecturum. Et dicit D. Thom. quod hoc est ponere prædestinatum differre à non prædestinato ratione præscientiæ euentus, non ex parte ordinis, seu decreti ordinantis, nec ratione electionis ipsius prædestinantis, quod est contra auctoritatem Scripturæ, & dicta Sanctorum.

18 Omissis autem pluribus aliis quæ ponderauimus citato loco disp. 20. nunc sufficit ponderare vim rationis D. Thom. quam citato loco insinuat, quæ reducitur ad tria inconuenientia. Si cooperatio mea prauis, esset causa cur mea prædestinatio redderetur efficax, & specialis, distinctaque à prouidentia generali, sequeretur quod prædestinatus differat à non prædestinato tantum ratione præscientiæ, non ratione ordinis, seu decreti ordinantis: sequeretur secundò, quod præscientia illius cooperationis esset causa prædestinationis: sequeretur tertio, quod prædestinatio non esset per electionem prædestinantis. Sed hæc tria omnino sunt reiicienda, & euitanda: ergo, &c. Minor, quod videli-

cet ista tria sint inconuenientia, & nullo modo admittenda, manifesta est, nam prædestinationem omnino esse per electionem Dei prædestinantis, non autem per aliquid ex parte nostra se tenens, Scriptura apertissime dicit, ad Ephes. 1. *Elegit nos in ipso ante mundi constitutionem, vt essemus sancti, & immaculati in conspectu eius in charitate, qui prædestinavit nos in adoptionem filiorum per Iesum Christum in ipsum secundum propositum voluntatis suæ.* Et infr. *In quo etiam, & nos sorte vocati sumus prædestinati secundum propositum eius qui operatur omnia secundum consilium voluntatis suæ.* Ex quo loco colligit Aug. lib. de prædestinatione SS. cap. 19. contra Pelagianos, non supponere diuinam electionem & prædestinationem aliqua bona opera ex parte nostra, quia elegit nos vt essemus immaculati, non quia eramus. Contra Semipelagianos autem colligit non supponere etiam aliqua initia bonorum operum, quia fit prædestinatio secundum propositum eius, qui operatur omnia secundum consilium voluntatis suæ; si autem operatur omnia, utique etiam illa prima initia: illa enim aliquid sunt. Ex eodem autem testimonio rectè probatur ex electione, & consilio voluntatis diuinæ provenire quod prædestinatio sit efficax, & specialis prouidentia, non ex præsuppositione consensus voluntatis humanæ, quia etiam illud quo prædestinatio redditur efficax, aliquid est, & ad prædestinationem spectat: ergo ex consilio, & electione diuina est, quia secundum propositum voluntatis suæ operatur omnia: ergo, & illud quod efficax est. Similiter prædestinationem esse per electionem Dei manifestè constat ex illo Rom. 11. *Reliquia secundum electionem gratia salua facta sunt.* Et infr. *Quod querebat Israel, hoc non consecutus, electio autem consecuta est, ceteri vero excacati sunt:* ergo quidquid secundum electionem non est, excacatum est, & non saluatur. Denique Ioan. 15. *Non vos me elegistis, sed ego elegi vos vt eatis, & fructum afferatis, & fructus vester maneat;* sed afferre fructum, & manere fructum pertinet ad efficaciam prædestinationis, & ad specialem rationem, qua distinguitur prædestinatus à non prædestinato: ergo si hoc est ex electione Dei, & non ex electione nostra quod fructum afferamus, nec erit ex prauis, & præsupposito consensu nostro, sed ex causalitate Dei. Ex quo etiam sequitur, quàm magnum inconueniens sit, quod præscientia nostræ cooperationis sit causa, & motuum nostræ prædestinationis: cum enim prædestinatio sit gratiæ præparatio, si prædestinatio ex præscientia alicuius nostri consensus tanquam ex motiuo daretur, gratia daretur ex meritis, seu intuitu ex parte nostra se tenentis, quod rectè negat Molin. quia, & hoc postulatum est vt Pelagius anathematizaret, scil. quod gratia detur ex meritis. An verò id sequatur ex sententia Molin. statim videbimus. Denique eadem ratione magnum inconueniens est dicere quod prædestinatus differat à reprobis, ratione solius præscientiæ, non ratione ordinis, seu decreti Dei ordinantis: si enim quidquid habet prædestinatus in quantum prædestinatus, habet ex electione Dei, non verò ex præsuppositione præscientiæ, & electio est decretum ordinis, seu ordinationis diuinæ, idem est differre prædestinatum à non prædestinato ratione ordinis, ac fieri prædestinationem secundum electionem Dei. Ista ergo tria magna inconuenientia sunt, si admittantur contra Scripturam, & dicta Sanctorum.

Restat ergo probare sequelem, videlicet quod ista inconuenientia sequantur ex doctrina Molinæ. Et primum inconueniens prob. quia in sententia Molinæ

Molinæ prædestinatio ut est specialis, & efficax providentia, differt à providentia communi, quæ est communis reprobo, & prædestinato, non ratione ordinationis, & causalitatis divinæ, sed ratione præscientiæ mediæ supponentis consensum, & determinationem consensu nostri, non causalitatis efficacia sua antecedenti ipsum: ergo etiam prædestinatus differt à non prædestinato, non ratione ordinis, seu decreti ordinationis, sed ratione præscientiæ consensu prævisi. Consequent. patet, quia prædestinatus, & prædestinatio correlatiue se habent tanquam actus, & obiectum: ergo si prædestinatio differt à providentia communi, in qua includitur non prædestinatus, solum ratione præscientiæ, non ordinis, seu decreti ordinationis, idem dicendum est de prædestinato, quia prædestinatus, prout sic, subest prædestinationi formaliter, & ab ea denominatur. Anteced. autem patet ex ipsis verbis Molinæ 1. parte, quæstione vigesimatertia, articulo quinto, disputatione prima, membro undecimo, §. Nos vero, ubi inquit, Collocantes præterea certitudinem totam divinam prædestinationis, non in decreto quo Deus ei quem prædestinabat providere statuit de mediis quibus libertate sua perventurus in vitam æternam prouidebatur, neque etiam in ratione ipsa prouidendi, sed in præscientia, qua id prouidebat, ratione cuius tale decretum ac providentia sortita sunt rationem prædestinationis, asseneramus, sicut præscientia illa, esse originem habuerit ex altitudine, & perfectione diuini intellectus, pendet tamen tanquam à conditione sine qua non fuisset in Deo, ex eo quod arbitrium creatum eo pacto pro sua libertate sit cooperaturum, ut ad vitam æternam perveniat; ita etiam quod decretum illud, prouidentiaque illa rationem prædestinationis fuerint sortita, ex eo fuisse dependens tanquam à conditione sine qua illam non sortirentur, quod arbitrium eo modo pro sua libertate sit cooperaturum, Deusque altitudine sui intellectus certo id præscribit. Ecce quomodo reducit Molina totam rationem, & certitudinem prædestinationis, qua differt prædestinatus à non prædestinato, & ob quam providentia diuina rationem prædestinationis sortitur, non ad decretum, seu ordinationem divinam, neque ad rationem procedendi ipsius, sed ad præscientiam illam, ratione cuius dicit illam providentiam sortiri rationem prædestinationis. Si ergo ratione præscientiæ sortitur illa providentia rationem prædestinationis, ratione quoque præscientiæ, & non ratione ordinis, seu decreti prædestinatus differt à non prædestinato, licet per generalem providentiam sit ei prouisum. Unde sicut præscientiam illam dicit pendere à cooperatione nostræ voluntatis, ut à conditione, ita & decretum illud ut sit prædestinatum à nostra cooperatione pendere dicit, quod postea ponderabimus. Et sic tandem ipse Molina eadem q. 23. art. 6. in paruo commentario illius, affirmat prædestinationem esse certam, in ea tamen non aliam esse certitudinem, quam divinæ præscientiæ, qua Deus prouidet per media, per qua unusquisque prædestinatus est perventurus ad vitam æternam. Reducit ergo Molina totam infallibilitatem prædestinationis ad præscientiam, & non agnoscit aliam, sed iste prædestinatus differt à non prædestinato solum ratione infallibilis directionis ad consequendam gloriam: si ergo tota illa est à præscientia, non differt à non prædestinato ratione ordinis, seu ordinationis, & decreti diuini, sed ratione præscientiæ, quod est inconueniens illatum à D. Thom.

20 Deinde prob. quod sequatur secundum inconueniens à S. Thoma in 1. part. D. Thoma.

ueniens ex sententia Molinæ, scilicet quod præscientia sit causa prædestinationis, id est, præscientia eius quod tenet se ex parte nostra sit causa, & motuum ut nos prædestinet Deus: id enim refugit Molina concedere. Quod ut explicet, aduertit loco illo cit. disputatione 1. membro 11. §. Illud magnopere, & sequentibus, quod aliud est quod præscientiæ usus, & operationis nostri liberi arbitrij sit causa prædestinationis, aut gratiæ, & auxiliorum, quasi pro qualitate, aut propter qualitatem illius usus tanquam pro ratione mensuræ, aut motiuo, vel conditione Deus distribuatur dona sua, aut unum prædestinet, vel reprobet; aliud quod non sine tali præscientia boni usus detur prædestinatio, ita quod sicut ab illo bono usu dependet in re ipsa executio perveniendi id vitam æternam, ita ab eodem pendeat, quod voluntas illa habeat rationem prædestinationis, vel solius providentiæ. Et in primo sensu docet, bonum usum liberi arbitrij prævisum non esse rationem, vel motuum aut conditionem, ut iste prædestinetur, vel accipiat gratiam, & in hoc sensu à D. Augustin. & Thoma quæstionem istam disputari. At verò in secundo sensu dicit ibidem conclusione 9. quod prædestinatio adultorum fuit secundum præscientiam boni usus liberi eorum arbitrij. Unde infert §. quinto, quod ex æternitate fuerimus prædestinati per ea media, quibus re ipsa prædestinati fuimus, vitamque æternam consequuturi sumus, non pendet solum ex divina voluntate, qua Deus ad hac ipsa media nobis opitulanti constituit, sed simul etiam ex libera cooperatione, & influxu nostri arbitrij prævisi, neque voluntas diuina ita nobis opitulandi, rationem habere prædestinationis, nisi de libero arbitrij nostri influxu præscientiam haberet. Et tandem §. postremo, concludit, quod voluntas Dei æterna, qua adultis ea media ex sua parte conferre statuit, quibus in beatitudinem perveniunt, rationem prædestinationis habuerit, tanquam à conditione sine qua eam rationem non habuisset, ex eo fuit dependens, quod adulti ipsi eo modo pro sua innata libertate usurierant suo arbitrio, ut ad eam pervenirent, idque Deus altitudine sui intellectus prouiderit. Itaque vult Molina quod ille bonus usus prævisus non sit ratio, & motuum ut Deus istum prædestinet, aut ei gratiam largiatur, nec tamen sit effectus ex ipsa prædestinatione, ab eiusque causalitate, & efficacia descendens; sit autem conditio quædam prævisa à Deo, cui adiungens media, & auxilia à se decretata, effectus confurget, prædestinatioque ad finem perducetur efficaciter.

21 Contra hunc sensum Molinæ deducimus secundum inconueniens, & dicimus quod hoc ipso, quod Molina concedit illum bonum usum prævisum, non ut effectum descendere à causalitate prædestinationis, sed ut conditionem ex parte nostra se tenentem, & adiungendam auxiliis, & mediis à Deo daris, hoc ipso, inquam, tenetur concedere illud, quod verbis conatur effugere, nempe ex nostra parte dari motuum, & rationem, ita ut pro qualitate, aut propter qualitatem seu mensuram illius usus arbitrij Deus det gratiam.

Et ratio est, quia ille bonus usus sic prævisus prout descendit à me, & à libero arbitrio est aliquid bonum, & placens Deo, cum per illum voluntas subiiciatur gratiæ, eique velit cooperari, & consentire, & tale bonum est, quod eo prævisi si media sua Deus applicet, redditur illa providentia diuina dandi talia media efficax, & prædestinatio, ita ut ex hoc solo quod prouidetur voluntas

G g consensura

consensura illi gratiæ à Deo oblatae providentia, quæ de se communis erat reprobo, & prædestinato, redditur propria, & specialis prædestinati; atque adeo Deus speciali amore diligit illum hominem sic bene cooperantem, & strenue agentem cum gratia, quam alterum ignavum, & torpentem, licet eandem gratiam recipiat; sed illud quod ex parte hominis est ita placens Deo, & dignum speciali amore, etiã est dignum aliqua recompensatione, & retributione Dei: ergo habet sufficiens motuum ex parte ipsius hominis, ut det illi talem, vel talem gratiã, quia prævidetur bene uturus; quod si Deus noluerit propter illud motuum dare gratiam, sed liberaliter, non erit ex defectu motui ex parte hominis, sed quia ipse Deus non vult illo uti. Nobis autem sufficit pro inconuenienti inferre quod ex parte nostra detur id quod sufficit ut Deus inueniat motuum dandi nobis gratiam, & prædestinandi nos, & quod si non utitur isto motuo, non est quia non detur ex parte nostra, sed quia non vult eo uti. Probat ergo minor, quod ille bonus usus sic præuisus habeat rationem sufficientis motui ad prædestinationem, & gratiam, quia si petitio, & desiderium bonorum operum cæteraque initia, quæ ponebant Semipelagiani, darentur in nobis ante gratiam, & non essent effectus illius, & dona Dei, reuera sufficiens motuum esset ut Deus daret gratiam, & prædestinaret homines: hoc enim nunquam negavit Augustinus, imò expressè Semipelagianis concedit quod illa initia si non essent dona, & effectus gratiæ, merita essent gratiæ; imò inde arguit contra illos, & probat quod gratia daretur ex meritis, si illa initia præcederent in nobis, & non essent ex gratia: *Quis enim* (inquit Augustin. lib. de prædestinatione SS. c. 2.) *dicat eum qui iam capit credere ab illo in quem credidit nihil mereri.* Et S. Prosper lib. contra Collatorem c. 8. *Nec enim nullius meriti haberi potest petentis fides, quærentis pietas, pulsantis instantia.* Igitur in hoc conveniebant Patres quod illa initia bonorum operum, petendo, pulsando desiderando, aliqua merita erant respectu gratiæ, ac per hoc gratia daretur ex meritis, si illa initia præcederent, & non essent effectus, & dona gratiæ. Et non dico quod erant merita de condigno, nec id dicebant Semipelagiani, cum non essent ex gratia iustificante: sed talia qualia erant, reiciebantur à Patribus, ut non intuitu eorum gratia daretur. In eodem gradu, & sensu dicimus nos reiiciendum esse quod bonus usus præuisus ex parte nostra sit motuum, & meritum dandi gratiam. Sed bonus usus liberi arbitrij quem habet unus posito auxilio, & non alter cum eodem auxilio, non est effectus, & donum ipsius gratiæ, & prædestinationis Dei, sed effectus liberi arbitrij, requisitus tamen ut conditio ad effectum gratiæ, & in se non est minoris bonitatis, & excellentiæ, quàm illa prima initia, quæ ponebant Semipelagiani ante gratiam: ergo non minus erunt merita, & motiva ad prædestinandum, si supponuntur in præscientia Dei ante prædestinationem, ut supponit Molina, quàm illa initia quæ ponebant Semipelagiani, & quæ reiicit Augustinus tanquam merita gratiæ, si ponantur ante gratiam, seu independentur à gratia. Frustrà ergo Molina ponit illam bonam cooperationem nostram, qua prævidet Deus nos cooperaturos gratiæ, cum possemus non cooperari, esse solum conditionem ut gratia habeat effectum, & efficax sit, non autem posse ha-

bere rationem motui, & meriti, ut intuitu illius, & pro qualitate eius gratia detur, siquidem est cooperatio illa de se bona, & placens Deo, non minus quàm desiderium petentis, aut fides pulsantis: est enim obedientia, & consensus, seu subiectio voluntatis ad gratiam, quod non minus bonum est, quàm desiderare, & petere ipsam gratiam, & aliàs non est effectus causatus a gratia, sed cooperatio simul influens cum gratia, & solum procedens à libero arbitrio: si autem non procedit à gratia, nec est effectus eius, non minus est independens à gratia, & prædestinatione, quàm illa initia bona antecedentia quæ ponebant Semipelagiani, quia tota independentia ad hoc reducitur, quod non est effectus eius. Habet ergo quidquid requiritur ut sit motuum, & meritum dandi gratiam.

Et confirm. quia tunc verificatur quod pro qualitate illius cooperationis detur gratia, quando ratione minoris conatus, & cooperationis datur minor gratia & ratione maioris conatus, maior: sic enim pro qualitate eius mensuratur, & distribuitur gratia: Sed si stante æquali auxilio ex parte Dei in duobus hominibus, unus maiori, & intensiori conatu cooperetur, & alter minori, illi dabitur maior gratia, quàm isti, siquidem ille plus laborat, & meliorem actum elicit: ergo pro qualitate illius cooperationis, ut cooperatio est, datur gratia diuersa: ergo habet rationem motui, & meriti, ut detur gratia, & etiam potest eandem habere, ut detur maius auxilium.

Denique tertium inconueniens *suprà* illatum ex D. Thom. scilicet quod prædestinatio non esset per electionem prædestinantis, probatur. Quia illud solum est per electionem prædestinantis, quod ab ipso prædestinante sit per electionem gratiæ, & liberalitatis suæ, non quod aliunde supponitur, & expectatur, sed posita, seu electa à Deo eadem gratia pro duobus, quod in isto habeat efficaciam, & non in illo, tollat in hoc impedimentum, & non in illo, non est ex ipsa gratia, sed ex mea cooperatione, & consensu præuiso: ergo illa efficacia, prout sic, non est ex electione Dei, quia non est ex gratia Dei, sed adiungitur à nobis ipsi electioni, & gratiæ Dei. Minor est ipsa doctrina Molina, & leuacium, qui ponunt totam efficaciam gratiæ esse denominationem extrinsecam ex ipso consensu nostro præuiso prouenientem, & adiunctam gratiæ, non ipsius gratiæ vim, & causalitatem in consensum: ergo illa efficacia non prouenit ex gratia, & liberalitate Dei, sed adiungitur ipsi gratiæ ex alio principio præsupposito, nempe ex voluntate mea. Maior constat, tum quia electio prædestinationis est electio ad saluandem, & sic tota illa electio est gratiæ, & liberalitatis: dicitur enim Roman. 11. *Reliquia per electionem gratia salua facta sunt*: ergo quidquid non est gratiæ, seu ex gratia, non est per electionem saluantis: ergo nec prædestinantis: tum quia id quod Deus eligit potest dare, & promittere, nihil autem dat, & promittit quod non faciat, etiam si sit per actus nostros faciendum: ergo nihil eligit quod non faciat, sed supponat. Vnde dicit Augustin. libro de prædestinatione SS. c. 10. *quod cum Deus promissit Abrahe fidem gentium, non de nostra voluntatis potestate, sed de sua prædestinatione promissit; promissit enim quod ipse fuerat factururus, non quod homines, quia etsi faciunt homines bona, quæ pertinent ad colendum Deum, ipse facit ut illi faciant* qua

quæ præcepit, non illi faciunt ut ipse faciat quod promittit. Cum ergo id quod Deus eligit possit dare, & promittere, & quando promittit quod per nos faciendum est, ut actum fidei, ipse facit ut faciamus quod præcipit, non nos facimus ut ipse faciat quod promittit, etiam quando eligit actus nostros, non nos facimus ut ipse faciat quod eligit, sed ipse facit, ut nos faciamus quod ipse vult.

23 Nec dici potest quod Deus eligit efficaciam futuram ex consensu nostro, & non ex vi causalitatis suæ, quia præuidens in tali occasione, & cum tali auxilio nos consensuros, cum posset tunc negare auxilium, eligit dare illud tunc ut effectum haberet; & sic illam occasionem cum auxilio eligit.

Contra enim est, quia etiam si Deus eligat occasionem, & auxilium, tamen effectus inde resultans adhuc ex vi talis electionis non sequitur, quia illa electio non est ex vi sua potens illum effectum ponere, sed si ponitur, non ex vi electionis est, sed ex eo quod præuisum est ante electionem: nam Deus solum eligit occasionem, & talem, vel talem gratiam, quam in illa tribuit. Hoc autem totum stare potest sine hoc quod sequatur effectus, sed si sequitur, ex eo est quod voluntas se voluit in tali occasione determinare, & Deus id præiudicat ante decretum suum, & consequenter ante electionem suam: ergo licet ex electione Dei sit illa occasio, & illa gratia quam dat, tamen illa consecutio effectus, & illa efficacia pro tali occasione non est ex electione prædestinantis, sed ante electionem præuisa; & sic bona est consequentia D. Thom. quod ille effectus non erit ex electione prædestinantis, quantum ad efficaciam scilicet, & consecutionem de facto ex tali gratia, & ex tali occasione.

Denique confirmantur hæc omnia contra Molinam, quia non evitat difficultates, quas intendit: sed easdem, quas nobis obicit, tenetur in sua sententia solvere: nam difficultates præcipuæ sunt duæ.

Altera quod non decet divinam bonitatem ex una parte velle omnes homines salvos fieri, & ex alia ante omnem eorum cooperationem præuisam prædefinire illis efficacem gratiam, aut non dare independentem ab eorum cooperatione.

Altera est quod ex hac antecedente efficacia destruitur libertas nostra, quia non possumus illi resistere voluntati. Cæterum illa prima difficultas eodem modo currit in sententia opposita, & fortius urget: nam si ex una parte voluit Deus omnes homines salvos facere, & ex alia vidit per illam scientiam mediam infinitos rerum ordines, & modos, quibus posset omnes illos homines de facto salvare, & potuit tali tempore, & occasione, aut tali auxilio vocare, quo consentiret de facto, quomodo decuit tantam bonitatem ex omnibus illis modis, & mediis eligere illud quod non est habiturum effectum, relicto eo quod effectum sortiretur, cum in manu eius esset eligere quod veller? Et quomodo facta illa Dei electione non inducimur in desperationem, si videmus quod posset Deus eligere vocare nos in alio tempore, vel alio auxilio, quo consentiremus, & noluit; eligendo autem id quod præiudicat nos facturos, id est, non consensuros, cum illud sit obiectum scientiæ necessariæ, non est possibile stante tali scientia retrocedere, & aliud contingere, alias scientia Dei frustraretur. Ergo idem inconueniens remanet huic sententiæ solvendum, & tanto fortius, quanto minus funda-

Ioan. à S. Thoma in 1. part. D. Thoma.

tur in voluntate benignissima Dei, & innititur determinationi nostræ voluntatis, quæ semel præuisa, non est reuertibilis.

Illam autem secundam difficultatem etiam currit in opposita sententia, quia posita semel illa scientia media de meo consensu, seu cooperatione quam adhibiturus sum, non est amplius in manu mea, neque Dei, auertere illam præscientiam, quia illa est omnino necessaria, & infallibilis, nec minus est irresistibilis scientia Dei, quam voluntas: ergo semel posita illa scientia de eo quod facturum sum, non est oppositum factibile illa scientia stante, & illam ego non possum auertere, quando operor, imò nec Deus potest auertere, quia non potest frustrare scientiam suam, quæ omnino necessaria est: ergo oppositum illius, stante illa scientia, non potest contingere; & sic vel perit libertas in conspectu scientiæ mediæ, vel non perit in dependentia ab efficacia diuinæ voluntatis. Nec dici potest quod scientia supponit suum obiectum, quod est mea voluntas liberè consentiens; & sic procedit ex suppositione libertatis meæ, unde non destruit illam, sed necessitas inde secuta est solum necessitas consequens; non antecedens, quia sequitur ex suppositione ipsius libertatis. At verò efficacia voluntatis est antecedens, & non supponit libertatem, sed antecedit, nec est in manu libertatis auertere illam. Sed contra, quia licet illa scientia non causet, sed supponat obiectum futurum, tamen antecedit executionem illius operis, seu actus in tempore quando fit. Tunc autem quando fit in executione supponit quandam scientiam necessariam in Deo, quam non potest auertere, & alias non causat ipsam libertatem, sicut voluntas diuina, quæ causat omnia: ergo alligatus est ille actus, qui hinc & nunc exercetur, cuidam conditioni necessariæ, quam auertere non potest; & sic supposita illa scientia non stat oppositum exequi in tempore propter necessitatem antecedentem ab æterno ad executionem in tempore. Quid enim refert quod non antecedit illam in ratione futuri, si quando hinc & nunc exercetur, supponitur alligatio illius actus ad quandam scientiam necessariam, quam auertere nullo modo potest; & sic non aliter exhibet, quam illa scientia præuideat? Voluntas verò diuina, licet in ratione causalitatis antecedit, tamen quia ob suam eminentiam est etiam causa ipsius libertatis creatæ, non tollit eam sua efficacia, sed statuit, quia vult ut ille actus liberè fiat, sicut scientia media scit quod liberè fiat. Quare ergo magis illa voluntas destruet libertatis exercitium, quam ista scientia.

Soluuntur argumenta.

Primò arguit. Non repugnat ex viribus naturæ 24
facere hominem aliqua bona opera moralia, & evitare aliqua peccata; ut verbi gratia, facere aliquam elemosynam, aut ieiunare, aut orare, sicut Cornelius, Actorum 10. aliqua bona opera faciebat, & non erat adhuc instructus in vera fide, ante fidem autem solum possunt dari opera bona ex viribus naturæ. Et Apostolus ad Roman. 2. dicit, quod *Gentes quæ legem non habent, naturaliter ea quæ legis sunt, faciunt*; ergo ex ductu naturæ, & ex eius viribus possunt fieri aliqua bona opera, ergo illa placent Deo: ergo habet in illis sufficientem congruitatem ut moueatur ad dandum gratiam his, qui sic operantur: congruum est enim ut operanti benè secundum suam facultatem Deus retribuat secundum suam magnificentiam. Valde autem

Gg 2

absurdum

absurdum videtur quod homini bene videnti viribus naturæ Deus nihil plus retribuatur, quam abuti, nec magis respiciatur, & moveatur ab illis bonis operibus, quam ab eo, qui nihil boni operatur.

Quod si dicas posse quidem illa opera deferre pro merito, ut Deus det gratiam, sed de facto nolle Deum illo uti, sed merè gratis gratiam suam concedere, ut non gloriatur omnis caro coram illo.

Contra est, quia in primis non constat Deum de facto noluisse uti tali merito, cum posset. Deinde quia si de facto Deus non vult, non est ex defectu meriti, quod nos habemus, sed quia non vult Deus illo uti. Vnde æquè bene posset gloriari caro coram illo, dicendo quod habet sufficiens meritum ut detur sibi gratia, sed Deus non vult uti illo. Et præsertim, quia illa bona opera, licet sint naturalis ordinis, sunt tamen per Christum, & ex auxilio Christi; unde iam non in se, sed in Domino gloriabitur.

Confirm. quia aliquando propter præuisa peccata Deus rapit aliquos, ne malitia mutet intellectum eorum, licet non semper ad id alligetur, sed aliquando etiam permittit cadere in peccata, & non saluat: Ergo similiter propter aliqua bona opera naturalia potest Deus dare gratiam, licet non semper ad id alligetur, sed ex misericordia sua possit etiam in peccatis existentes ad se convertere. Et evitamus illam difficultatem quod non est Deus acceptor personarum, sed distribuit dona sua iuxta voluntatem præuisam, aut bene operantem, licet ex abundantia pietatis etiam peccatores, & non bene operantes convertere dignetur.

25 Resp. bona opera naturalia non habere congruitatem fundatam in aliquo merito, aut proportionem ipsius operis, sed fundatam in mera misericordia ex parte Dei, quia in omnibus verum est, quod *non est volentis, neque currentis, sed miserationis est Dei*. Si autem congruitas ista fundatur in sola Dei misericordia, sic etiam ad misericordiam pertinet quod peccatoribus det gratiam, & congruum est Deum misereri, & parcere congruitate fundata in ipsa misericordia Dei. Opera autem bona ordinis naturalis etsi non auertant à Deo, nec impediunt; sicut peccata, & ex hac parte congruitatem habeant quasi negativam, tamen positivam congruitatem aut meritum vel proportionem non habent, sed ex mera misericordia dantur à Deo, non autem infallibiliter datur gratia à Deo, ex aliquo pacto, sed sæpè non datur. Nam inquiri, si Deus produceret hominem in natura integra, sed sine gratia supernaturali, vel Angelum, aut quamlibet excellentissimam creaturam, quæ in suis naturalibus esset perfectissima, omnia hæc quid conducerent, aut mererentur, ut daretur ei gratia supernaturalis? siquidem omnis natura creata quantumcumque excellens, nihil momenti ad gratiam affert, sed sola Dei misericordia, cum ille sit ordo supernaturalis, & divinus ad quem non habet proportionem, sed solum potentiam obedientialem quæcumque natura intellectualis, quantumcumque excellens. Quod si Deus in distribuenda gratia sua attenderet ad ista opera naturalia quantumcumque excellentissima, certè in supremo Angelo Lucifero maiores perfectiones naturales invenit, quam in qualibet alia inferiori creatura, & tamen illum non elegit Deus, nec attendit ad tam excellentes perfectiones eius, ut eum in gratia conservaret. Et homines fuerunt excellentissimi ingenij, magnarumque perfectionum, & hos non elegit Deus, sed elegit pauperes, & convertit pec-

catores, & suscitavit de terra inopes, & de stercore eleavit pauperes, & ignobilia, & infirma mundi elegit Deus ut confundat fortia, & misertus est cui misertus est, & misericordiam præstitit cui voluit, nec est alia ratio quærenda in his, nisi voluntas divina, quia Dominus est. Quapropter opera bona naturalia non magis conducunt ad hoc ut Deus det gratiam supernaturalem infallibiliter, quam reliquæ naturales perfectiones in excellentissimis creaturis. Nec tamen parificamus bona opera peccatis, & bene operantes ac studiosos remissis, & pigris, quia peccata impediunt, & auerunt à Deo, bona autem opera naturalia relinquunt hominem minus impeditum gratiæ Dei; & sic habent congruitatem negativam, id est ablationem impediendi, quod est peccatum, non proportionem positivam, aut meritum ex parte nostri, ut gratia detur.

Ad Confirm. Respond. quod Deus cum rapit aliquos ex hac vita prævidens eorum peccata, non respicit peccata ut merita eripiendi illos, sed ex sua misericordia prævenit ipsos ne cadant in peccata: at verò bona opera naturalia ponuntur ut merita, seu ratio ut Deus det gratiam; & sic non est par ratio de illis, & de his quos Deus eripit à peccatis quæ prævidet facturos si viverent.

Quod verò eviteretur illa difficultas de acceptione personarum, Respon. quod Deus non est capax acceptionis personarum, cum gratis & sine aliquo debito det omnibus omnia, præsertim dona gratiæ suæ. Vnde non facit iniuriam quod det aliquibus gratiam sine ullis meritis aut merito, cum id quod dat, sit gratia, quæ ex nullis meritis, aut debito datur; & ideo licet illi quod vult facere, & dare huic, sicut & illi, vel denegare, quia gratuitum est. Si autem ad evitandam acceptionem personarum in Deo debemus recurrere ad aliquid quod ipse præsupponat præuisum in hoc potius quam in illo; hoc ipso in eo quod præsupponere debet, id extrahimus ab eius causalitate, & gratia, quia si ex ipso etiam est, curret eadem difficultas, cur illud dedit uni, & non alteri? Ergo in datore omnium nullam est vitium acceptionis personarum.

Secundò arg. aliquibus exemplis, in quibus videtur posse anticipata solutione dari præmium intuitu eorum, quæ quis facturus est. Nam bene potest Rex dare militi equum, & arma in præmium futuri laboris, & militiæ, & tamen non meretur illa, nisi per opera subsequenda: ergo etiam poterit Deus dare gratiam prædestinationis propter opera postea facienda ab ipso homine, per gratiam.

Quod si dicatur opera militis correspondere eius virtuti, & strenuitati, non equo, vel armis, & ita illud præmium non esse principium meriti. At verò in prædestinato totus valor meriti correspondet gratiæ, non naturæ; & sic principium meriti caderet sub merito, quod implicat.

Contra urgeri potest, quia saltem in aliquo casu non repugnaret correspondere primam gratiam merito, seu operi non procedenti ab illa, sed ab alia gratia, & intuitu illius dari illam primam gratiam, non intuitu sui; sicut, verbi gratia, vocatur quis ad finem, & ad iustificationem: verum quidem est quod opera procedentia ab ista gratia non possunt mereri illam, nec intuitu illorum dari potest talis gratia, sed tamen potest iste homo in gratia crescere, & elicere in ultimo vitæ aliquod opus non procedens ab illa prima gratia vocationis, aut ab illa prima iustificante gratia, sed ab ultima, & tunc illud ultimum opus potest deferre ut meritum, cuius intuitu & ex cuius

cuius prænissione Deus det primam vocationem: ergo non repugnat omnes effectus prædestinationis cadere sub meritum, saltem operis præiusti. Idem argumentum fit de eo, qui emit vineam solutione faciendâ ex fructibus vineæ: verè enim emit, & soluit postea, & tamen illud pretium procedit ex re quam emit: ergo benè potest aliquis soluere Deo gratiam, quam accipit ex operibus procedentibus ab illa gratia, quasi ex fructibus.

Conf. quia Christus Dominus meruit antiquis Patribus gratiam, sicut & nobis, quia de plenitudine eius omnes accepimus, sed non potuit mereri orando, & petendo pro ipsis ut daretur eis gratia, quia iam data erat; & sic oratio illa inanis esset: ergo solum potuit mereri agendo gratias Patri pro illo beneficio collato Patribus, & Deus intuitu illius actionis gratiarum faciendæ, ipsis contulit illam gratiam. At gratitudo, seu gratiarum actio supponit beneficium collatum: ergo si gratia illa Patrum erit præmium illius actionis gratiarum, supponebat in quantum præmium seipsam, quia actio gratiarum supponit beneficium pro quo agit gratias. Fortius etiam vrgeri potest in opinione eorum, qui ponunt ipsos SS. Patres per gratiam à Christo acceptam meruisse de congruo ipsam substantiam Incarnationis: sic enim principium meriti, quod est Incarnatio cadebat sub meritum de congruo per aliquid ortum ex ipsa: ergo etiam iusti per opera subsequencia possunt mereri ipsam primam gratiam, & primum effectum iustificationis.

27 Resp. ad argumentum solutione data, quæ est expressa D. Thom. in hac q. 23. art. 5. ubi adducit illudmet exemplum de milite accipiente equum, quia eo est bene usus; & iterum 1. 2. q. 114. art. 5. ad 3. idem exemplum affert, & utrobique soluit eodem modo, quod scilicet actus procedens à libero arbitrio indistinctè procedit à gratia, & gratia est principium totius valoris, qui est in opere; actus verò militis utentis equo non habet valorem ab equo, sed à virtute, & strenuitate militis, & hanc non dat Rex, sed supponit, & idèd potest per actum suum ut procedit à virtute sua mereri ipsam equum ut mercedem, & præmium. Valor verò meriti in homine iusto procedit à gratia, & hæc datur à Deo; unde non potest gratia esse præmium illius valoris, quia dat ipsum. Nec obstat quod aliqui dicunt ad illum bonum usum equi, ut est actualis usus, concurrere equum, saltem partialiter, nam equus non concurret nisi ut instrumentum militis, non ut partialiter dans valorem, sed totus valor est ex virtute ipsius militis utentis equo, sicut etiam vitur in se, & aliis armis, quæ tamen potest accipere in pretium sui laboris, & meriti. Addo quod equus, & arma, & alia similia, quæ quis potest accipere anticipatè in præmium futuri laboris, habet duplicem considerationem, & quatenus est instrumentum militis laborantis, & quatenus est res mensurabilis per pecuniam, & habet suum pretium, & valorem. Non cadit in præmium equus, quatenus est instrumentum militi ad pugnam, sed quatenus valet tantum pecuniæ, aut æstimationis publicæ; & sic non est præmium ut equus, sed ut pecunia æquivalenter. At verò gratia, & virtutes, & auxilia Dei solum habent rationem virium influentium, & eleuantium animam ad operandum, nõ autem accipiuntur ut mensurabilia valore aliquo fruibili per modum pretij, quia gratia respectu rerum naturalium est superior, & non potest reputari ut mensurabilis per illa tanquam per pecuniam, & valorem suum: respectu autem gloriæ habet se ut semen, & ius, & inchoatio il-

Ioan. à S. Thoma in 1. part. D. Thoma.

lius; non ut continens actu totum quod illa est. Vnde non est idem accipere gratiam, quod accipere totum valorem gloriæ, ut per modum præmij se habeat gratia: ius enim ad aliquam hæreditatem non est ipsa hæreditas in valore, sicut equus valet tantam pecuniam.

Ad Replicam contra hanc solutionem; Respon. 28 quod ultimum opus gratiæ, licet procedat ab alia gratia vocante, quàm à prima, vel ab alio augmento gratiæ iustificantis, si fortè creuit, tamen virtualiter ibi perseverat prima gratia vocans, à qua tota iustificatio sumpsit exordium, & formaliter est prima gratia iustificans, quæ non separatur ab ea parte vel perfectione, quæ est augmentum, & à tota illa gratia procedit operatio illa ultima. Et licet gratia aliquando interrumpatur per peccatum, & redeat alia per poenitentiam, tamen illa solum est materialiter diuersa, & in valore eadem, sicut pecunia data in his nummis, vel in aliis numero, & materialiter diuersis, est idem formaliter in valore. Vnde signanter dicit D. Thom. loco cit. ex 1. 2. quod omne bonum opus hominis procedit à prima gratia sicut à principio; quia videlicet prima gratia, si est actualis, verbi gratia auxilium, vel vocatio prima, semper manet virtualiter in suo effecto; si est habitualis, manet vel ipsamet in sua entitate, vel similis in suo valore si sit interrupta, & reparatur. Si tamen verè daretur alia distincta gratia, seu distinctum principium merendi à gratia prima, & non continuaretur cum illa, posset ex vno esse meritum ad aliud, sine hoc quod principium meriti caderet sub meritum, ut mox dicemus de Incarnatione & gratia nostra.

Ad Confirm. Respond. illud argumentum à 29 multis iudicari difficile, spinosum, & ferè inextricabile, sed fateor incertiam meam, ego non video in eo difficultatem. Respondeo enim Christum mereri potuisse gratiam antiquis Patribus, nec per orationem petendo illam, nec per solam gratiarum actionem, quamvis gratias pro illa etiam egerit, sed aliis actibus, ut effusione sanguinis sui, & aliis multis laboribus, quos ex summa charitate, & patientia tolerabat, & offerebat Deo. Et istæ actiones verè, & non fictæ fuerunt meritoria, etiam pro antiquis Patribus, & intuitu illarum Deus dedit gratiam Patribus, & ob illam sic datam Christus gratias egit Patri. Deinde dicitur quod etiam pro re iam posita, & exhibita potest oratio fundi ad Deum, non quomodocumque, sed repræsentando in oratione tempus illud pro quo res dari debebat. Sic enim Ecclesia orat pro defunctis, ne absorbeat eos Tartarus, ne cadant in obscurum, & tamen cum hoc orat, iam animæ illæ non habent periculum cadendi in Tartarum, hoc est in Infernum: sed quia Ecclesia repræsentat tunc diem mortis illorum, orat, ac si essent in illo instanti mortis. Similiter ergo Christus potuit orare Patrem pro iustificatione omnium hominum, etiam antiquorum Patrum, repræsentando tunc tempus illud quo gratiam receperunt. Denique gratiarum actio exhibita in tempore non semper supponit beneficium iam esse collatum, sed potest actio gratiarum dari pro voluntate conferendi, licet beneficium nondum collatum sit. Nam Christus Dominus gratias egit Patri pro beneficiis, non solum collatis, sed conferendis generi humanq, quia egit gratias pro tota Redemptione, & pro illa voluntate æterna quam Deus habuit conferendi gratiam intuitu Christi tã antiquis Patribus qui ante præcesserant, quàm hominibus tunc præfatis, & dinceps

G g 3 venturis

venturis. Non ergo illa gratiarum actio supponit necessariò gratiam, seu beneficium collatum in re, sed sufficit quòd supponat in voluntate largientis, qui propter illam gratiarum actionem præuisam vult in tempore conferre gratiam Patribus; & sic non valet illa consequentia: si gratia Patrum erat præmium gratitudinis Christi, supponebat seipsam ut præmium ad talem gratitudinem: dico enim quòd sufficit supponere seipsam ut contentam in voluntate diuina, non ut in re exhibitam ut, pro illa ageret Christus gratias, & intuitu illius actionis daretur in re. Certè Christus Dominus Ioan. 11. Lazarum resuscitaturus dixit: *Pater gratias ago tibi quoniam exaudisti me*; & tamen nondum tunc orauerat, nec miraculum pro quo exaudiendus erat, & orabat, factum erat, & tamen iam agit gratias quoniam exauditus erat, scilicet in voluntate Dei, de qua certus erat quòd exaudiret ipsum: *Ego*, inquit, *sciebam, quia semper me audis*. Possunt ergo referri gratiæ etiam pro beneficio nondum recepto, sed in voluntate dandi contento; & sic ex gratiarum actione præuisa potuit dari Patribus gratia, & illa gratiarum actio non supponere beneficium collatum, sed voluntatem conferendi; & sic non supponit seipsam ut præmium, sed in executione datur in præmium illius actionis gratiarum secundum diuersas considerationes, scilicet prout in executione, vel prout in voluntate dominantis contenta. Quare illud argumentum non habet vim.

30 Ad id quod dicitur de merito SS. Patrum respectu substantiæ Incarnationis, latius pertinet ad materiam de Incarnatione 3. p. q. 2. art. 11. Pro nunc dicimus quòd etiam admissa illa sententia, quòd Patres meruerunt de congruo Incarnationem, dicimus non sequi quòd principium meriti cadat sub meritum, licet verum sit quòd per Incarnationem Christus meruerit Patribus gratiam, per quam ipsi meruerunt de congruo, ut Christus veniret, & executioni mandaretur Incarnatio. Cuius ratio est, quia hinc interuenerunt duo diuersa principia merendi, quorum vnum dat valorem distinctum ab alio, licet vnum esset causa ut alterum daretur, & poneretur in diuerso genere causæ, & in diuerso tempore. Nam gratia Patribus data licet intuitu Incarnationis præuisa data sit, tamen valorem merendi non habebat formaliter ab Incarnatione, sed in se distinctum valorem merendi habet ab ipsa Incarnatione, ut patet quando gratia datur non intuitu Incarnationis, ut in Angelis, & in statu innocentiae, verè enim est meritoria, licet non sit data per Incarnationem. Quando ergo distinctus valor interuenit, & est duplex principium merendi, benè potest vnum esse causa alterius ut ponatur in executione, & alterum ut præuisum in intentione esse causa ut illud prius anticipatè detur; & sic Incarnatio præuisa est causa ut detur gratia Patribus, & gratia per suum valorem est causa congrua ut Incarnatio executioni mandetur. Nec obstat quòd Incarnatio est principium huius meriti quod provenit à gratia; quia non est principium eius, ut dans illi valorem, sed solum ut causa existentiae eius: aliqua enim oriuntur à principio meriti ut trahentia valorem ab ipso, sicut opera quæ fiunt à gratia, vel ab Incarnatione habent totum suum valorem à tali principio; & idè illud principium non potest esse præmium illius operis. Alia verò oriuntur à principio meriti ut habentia in se, & ex se valorem, & solum se habent ut effectus, seu præmium talis principij merendi, non ut opera ab eo orta; & sic se habet gratia nostra, vel Patrum respectu Incarnationis: est enim

effectus, & præmium meriti Christi, non tamen habet valorem formaliter ab illo, sed in se habet valorem distinctum à valore Incarnationis, cum constet quòd gratia data, non intuitu Incarnationis, ut si duraret status innocentiae, valorem merendi haberet. Eum ergo qui nunc habet, distinctum ab Incarnatione habet. Et idè licet in re ponatur, & detur quoad existentiam intuitu Incarnationis, tamen semel data ex suo valore, & non ex valore hausto ab Incarnatione dat congruitatem operi ut mereatur Incarnationis executionem. Vnde principium meriti nunquam cadit sub meritum. De vinea empta fructibus vineæ, dicimus quòd illi habent distinctum valorem à vinea, & pendent ab industria, & labore coloni; & sic possunt conuerti in pretium vineæ.

Ultimò arguit argumentis Molinae *disp. illa 1. memb. 11.* quibus nititur probare prædestinationis efficaciam ex præscientia liberi arbitrij desumi, & ex parte consensus eius præuisi. Nam Scriptura reducit hanc prædestinationis vim ad præscientiam, secundum quam Deus elegit prædestinatos. Ad quod plura congerit loca, ut est illud Rom. 8. *Nam quos præsciuit, & prædestinavit.* Prius ergo præsciuit quam prædestinavit, quia scilicet non voluit Paulus in negotio prædestinationis excludi liberum arbitrium, sed illius rationem haberi, ac proinde quos præsciuit futuros pro sui arbitrij libertate conformes imagini filij sui, ex hypothese quòd Deus ex sua parte eos adiuuaret auxiliis misericorditer impensis, etiam hos prædestinavit. Et sic ly *præsciuit*, est idem quòd *præsciuit scientia media*; tales sic præuisos prædestinavit. Quæ expositio iuuatur ex illo August. lib. 6. *Hypognosticon.* Propterea prædestinat, quia quale futurum sit præscit; ideo, & Apostolus: *nam quos præsciuit, inquit, & prædestinavit.* Addo, & D. Thom. qui 3. p. q. 1. art. 3. ad 4. dicit quòd *Prædestinatio presupponit præscientiam futurorum; & idcirco prædestinat salutem aliquorum implendam per orationes aliorum.* Alter locus est Rom. 11. *Non repulit Deus plebem suam, quam præsciuit;* non repellere autem est prædestinare: ergo prædestinatio supponit præscientiam illius plebis Dei. Et idem deducitur ex illo 1. Petri 1. *Petrus Apostolus Iesus Christi electis aduenis secundum præscientiam Dei Patris.* Et iterum 2. Petri 1. *Satagite fratres, ut per bona opera certam vestram vocationem, & electionem faciatis.* Vbi significat ex arbitrij libertate pendere, quòd vocatio, & electio certa sit.

Conf. quia eo modo prædestinat Deus iustificandos, & saluandos, quo ipsi in re postea iustificantur, & saluantur, sed adulti in tempore iustificantur, & saluantur dependenter ab eorum libertate, & auxilio Dei, & in eorum potestate situm est nec saluari, nec iustificari: ergo ab æterno etiam prædestinantur cum præmissione, & dependentia à libero arbitrio, sine quo voluntas diuina qua vult nobis opitulari rationem prædestinationis non haberet, nisi haberet adiunctam præscientiam de influxu futuro liberi arbitrij.

Confirm. secundò quia cum æqualibus auxiliis imò cum maioribus aliqui reprobantur, & alij saluantur, ut deducitur ex illo Matth. 11. *Si in Tyro, & Sidone facta fuissent virtutes, quæ in te, &c.* Et Iudas maiorem gratiam recepit quam multi qui nunc sunt in cælo: ergo ex præuisa cooperatione liberi arbitrij in his, & non in illis, isti saluantur, non illi: nam ex parte gratiæ, & auxiliorum æquales sunt, aut etiam aliqui reprobi plura acceperunt.

Resp. illas omnes authoritates Apostoli, & alias similes loqui de præscientia, quæ est ipsamet prædestinatio, seu in illa fundatur, non quæ antecedit omne

ARTICVLVS VI.

*An merita Christi sint causa nostræ
prædestinationis, etiam in
singulari?*

DVplicitè possumus loqui de meritis Christi in ordine ad prædestinationem hominum (de Angelorum enim prædestinatione nunc non loquimur.) Primò de ipsa absolute sumptâ, & secundum se, seu ex parte dilectionis Dei, & rei prædestinatæ, scilicet quòd detur prædestinatio hominum ad gloriam absolute. Secundò, comparatiuè respectu personarum, quatenus vnus præ alio eligitur, & prædestinatur, alius verò reprobat, an sit Christus Dominus causa huius electionis vnus præ alio. In primo sensu minor est difficultas, & sine dubio asserendum est Christi Incarnationem, & merita esse causam prædestinationis nostræ, vt ex parte nostra se tenet, seu ex parte effectuum prædestinationis: est enim Christus author salutis nostræ taliter, vt omnes effectus gratiæ, etiam primus, dentur nobis per Christum. Et dico prædestinationis ex parte nostra, seu ex parte obiecti, quia prædestinationis, vt est actus Dei, & ex parte Dei se tenet, nullus est ita infans, vt dicit D. Thom. *hic articulo 5.* quòd ponat causam illius: actus enim Dei causari non potest ab aliquo, & ita causam non habet in se.

Hæc assertio est communior sententia inter Theologos; & solum videtur posse negari ab illis, qui sentiunt merita Christi non esse causam omnium auxiliorum, & gratiarum quæ nobis dantur, aut fuisse ante originale peccatum præuisum homines prædestinatos ad gloriam in voluntate diuina. Vnde incarnatio Verbi quæ decreta est de facto in remedium peccati originalis post eius præuisionem, non potuit esse causa electionis, & prædestinationis nostræ ad gloriam, licet deseruierit ad præparanda media, & remouenda impedimenta, quæ consecutionem illius retardare poterant. Quæ sententia attribuitur Scoto, Almaino, Driedoni, & aliis, quos citat M. Gonzalez, *1. p. disput. 74. sect. 4.* Cæterum nostra sententia est expressa S. Thom. *3. part. qu. 24. art. 4.* & videri etiam potest *ibidem qu. 19. artic. 4.* & *quest. 8. art. 1.* & in *3. distinct. 10. qu. 3. articulo unico, quest. 3.* & Ioan. 1. super illa verba, *de plenitudine eius omnes accepimus.* Sequuntur D. Th. communiter eius commentatores, & Discipuli ad illum locum *3. par. q. 24. vbi* videri potest Cabrera, & Suarez *disp. 47. sect. 4. & lib. 2. de prædestin. c. 24.* Valqu. *hic disp. 94. c. 2.* Gonzalez loco cit. Zumel super hanc *quest. 23. art. 5. disput. 2.* & Caietanus super eundem locum, & alij quos citat Gonzalez, & alij citati.

Fundamentum nostræ sententiæ sumitur tum ex Scriptura, tum ex ratione. Ex Scriptura, quia dicitur Ephes. 1. *Elegit nos in ipso ante mundi constitutionem.* Et subditur: *Qui benedixit nos omni benedictione spirituali in celestibus in Christo Iesu.* Si ergo omnis benedictio nostra est per Christum: ergo omnis effectus gratiæ est per Christum, omnis enim effectus gratiæ, benedictio aliqua est. Vnde etiam dicitur Ioan. 15. *Sine me nihil potestis facere.* Et sicut *palmes non potest ferre fructum à semetipso nisi manserit in vite, ita & vos nisi in me manseritis.* Ex quo loco Concil. Trident. sess. 6. c. 16. dicit, quòd ipse Christus Iesus tanquam caput in membra, & tanquam vitis in palmites in ipsos iustificatos iugiter virtutem influit, quæ virtus bona eorum opera semper

G g 4

antece

omne decretum Dei: Dicit enim August. *lib. de prædestinatione SS. cap. 10. Prædestinatione Deus ea præsciuit, quæ fuerat ipse facturum.* Et c. 17. *Electi sunt ante mundi constitutionem ea prædestinatione, in qua Deus sua futura facta præsciuit.* Et generalius libro de bono perseuerantiæ c. 18. *Prædestinasse est hoc præscisse quòd fuerat ipse facturum.* Quid ergo nos prohibet, quando apud aliquos verbi Dei tractatores legimus Dei præscientiam, & agitur de vocatione electorum, eandem prædestinationem intelligere? Qua August. expositione omnia loca ex Scriptura allata non vrgent: nec enim loquuntur de præscientia aliqua media, seu antecedente decretum, & prædestinationem Dei, sed illam consequente, vel quæ est ipsamet prædestinatio. Ad locum August. *ex lib. 6. Hypognosticon* (præterquam quòd non est liber ille indubitatus Aug. sed est authoritatis dubiæ) tamen ipsum sustinendo, dicimus, quòd non vrget authoritas, quia cū dicit, *propterea prædestinat quia quale futurum sit præscit*, non explicat ibi causam antecedentem ad prædestinationem, sed præscientiam, quæ est ipsa prædestinatio, quasi dicat, propterea ad Deum pertinet prædestinare, seu præordinare de futuris, quia pertinet ad ipsum præscire futura, sicut si diceremus; idem Petrus est homo, quia est rationalis, anima est actus corporis organici, quia est organicum per animam. Non verò est necesse, quòd præsciat Deus futurum per aliam præscientiam quæ non sit prædestinatio. Est enim causa per modum includentis, & inclusi, non per modum causæ antecedentis, & extrinsecæ. Ad locum D. Thom. dicitur quòd cū dicit prædestinationem supponere præscientiam futurorum, non loquitur de prædestinatione adæquatè, & pro collectione omnium effectuum, sed inadæquatè prout tangit vnum effectum, & potest supponere præuisionem alterius, ex quo alium causat: vnus enim effectus prædestinationis potest ex alio causari, & ex illo præuiso, iste ordinari; sicut oratio Stephani præuisa, fuit causa, & motiuum salutis Pauli; sed tamen illa oratio Stephani, etiam sub prædestinatione aliqua, & decreto Dei fuit conclusa, & præuisa, non ante omne decretum.

Ad Conf. primam Respon. eo modo prædestinari aliquos, quo in re postea saluantur, & iustificantur, quantum est ex parte rei prædestinatæ. In re autem mandatur executioni iustificatio, & saluatio per liberum arbitrium, distinguo, vt subordinatum gratiæ, & voluntati Dei, & ab ea efficaciter moti, concedo; vt præbenti suo consensu, & determinatione efficaciam decreto indifferenti, nego. Et sic ex prædestinatione diuina, & decernitur actus, & saluatur libertas, quia etiam ipsum liberè esse, à Deo est, quòd abundè in superioribus explicatum est.

Ad secundam Conf. Respon. omnino negandum esse quòd cū æquali auxilio efficaci vnus damnetur, & alter saluetur, sed semper, qui saluatur habet donum perseuerantiæ, & auxilium efficax, quo caret damnatus, licet verum sit quòd damnatus possit habere æqualia, vel maiora auxilia sufficientia. Et hoc solum probat ille locus de Tyriis, & Sidoniis, quòd cum æquali auxilio sufficienti conuerterentur præ Iudæis, licet cum dispari efficaci. Quòd quomodo stet cum iusta querela Christi de Iudæis, quòd non sunt conuersi, diximus abundanter *præced. tom. disp. 20. art. 5.* vbi hunc locum latè explicauimus.

356 Quæstio XXIII. De Prædestinatione,

*antecedit, & comitatur, & subsequitur, & sine qua nullo pacto Deo grata, & meritoria esse possent: sed omnis effectus prædestinationis, prout talis, est Deo gratus: ergo prout sic est ex Christo? & sic ipse est causa influens in totam prædestinationem nostram, seu in omnes eius effectus. Ratione quoque probatur, quia nullus hominum præter Christum est prædestinatus, qui non sit redemptus: ergo nullus est effectus prædestinationis, qui non sit effectus redemptionis. Patet consequentia, quia omnes effectus prædestinationis ipsi prædestinationi, ut causæ subordinantur, & ab ea deducuntur: ergo si prædestinatio ipsa est redemptiva, effectus eius ex vi redemptionis procedunt, quia ex vi talis prædestinationis procedunt. Anteced. verò manifestum est, quia illi sunt prædestinati qui salvi fiunt, nullus autem saluatur ex hominibus nisi per sanguinem, & redemptionem Christi, iuxta illud Actorum 4. *Non est aliud nomen datum sub celo in quo oporteat nos salvos fieri.* Et ad Rom. 5. *Sicut per unius delictum in omnes homines in condemnationem, ita, & per unius iustitiam in omnes homines in iustificationem vita.* Et 1. ad Corinth. 15. *Sicut in Adam omnes moriuntur, ita in Christo omnes vivificabuntur.* Et ad Heb. 2. *Decebat eum propter quæ omnia, & per quem omnia, qui multos filios in gloriam adduxerat, auctorem salutis eorum per mortem consummare.* Unde est illa electorum vox Apocalyp. 5. *Redemisti nos Deo in sanguine tuo ex omni tribu, & lingua, & populo, & natione, & fecisti nos Deo nostro regnum.* Quare omne quod pertinet ad regnum Dei, redemptum est in sanguine Christi: si ergo omnis prædestinatus est redemptus, omnis prædestinatio per redemptionem est, & consequenter omnis effectus prædestinationis, effectus redemptionis Christi est.*

4 Hoc denique declaratur ex eo, quod nullus homo prædestinatus est ante prævisionem peccati originalis, nec ante prædestinationem Christi: supponimus enim pro nunc sententiam D. Thom. de qua latius 3. p. qu. 1. art. 3. quod Christus non est prædestinatus nisi ut Redemptor, ita quod non existente peccato, ex vi præsentis decreti non veniret: ex hoc enim manifestè sequitur, quod prius fuit prævisum peccatum originale, quam Christus prædestinatus, & decretus. Ergo à fortiori ante Christum prævisa est gratia aliqua innocentiae in Adamo, qua privatus est ipse, & totum genus humanum per peccatum. Hæc autem gratia non prævidebatur pro illo statu ante peccatum originale, ut data per prædestinationem, & efficacem transmissionem, & consecutionem gloriæ: nam si ante peccatum originale esset data ex vi prædestinationis, talis prædestinatio vel frustraretur, & destrueretur sicut ipsa gratia per peccatum originale, vel non. Si frustraretur, non esset prædestinatio, quia infructibilis est. Si non frustraretur: ergo æquè bene consequerentur homines gloriam, non obstante peccato originali, ex vi antecedentis prædestinationis, quæ adhuc habitura esset effectum: ergo gratis pro eorum salute Christus mortuus est, quia etiam si non veniret, & moreretur, saluarentur ob prædestinationem ante factam, & non frustratam per peccatum. Quod si illa prædestinatio antecedens non efficaciter perducebat ad gloriam nisi in vi sanguinis Christi post peccatum prædestinandi: ergo illa collatio gratiæ non erat prædestinativa seu effectus prædestinationis ante Christum prædestinatum, quia ante illum efficax non erat pro gloria assequenda. Quare necesse est, quod omnis gratia ut prædestinationis effectus, & ut efficaciter ad gloriam ordinetur, dependeat à Salvatore, & Redem-

ptore Christo, quia non est effectus prædestinationis, nisi quatenus respicit, & ordinatur ad salutem, non potest autem post peccatum ordinari ad salutem nisi dependenter à Salvatore, Saluator autem omnium est Christus: ergo ab illo dependet omnis effectus gratiæ, & beneficium prædestinationis, saltem quoad absolutam rationem electionis, & voluntatis saluandi homines.

In secundò sensu est aliquanto maior difficultas, an merita Christi Domini fuerint causa electionis comparative sumptæ, & in individuo, ita quod fuerit causa ut iste in individuo præ alio eligeretur, & non solum fuerit causa designationis formalis, quæ tenet se ex parte ipsius gloriæ ad quam fit electio, ita quod meruerit aliquos ex tota hominum collectione prædestinari ad gloriam. Designatio autem materialis tenet se ex parte personarum, ita quod assumitur unus, & relinquitur alter, & de hoc est dubium, an fiat ex meritis Christi, an ex sola, & nuda designatione divina.

Et ratio maioris dubitationis pro hac parte est, quia si hæc comparativa electio datur ex meritis Christi, videtur totalis causa nostræ prædestinationis esse humana voluntas Christi, non divina, si quidem divina non eligit, nisi quos Christus designat, & sic tota ratio, & causa prædestinationis erit voluntas humana, cum tamen communiter Scriptura, & Patres ad divinam voluntatem referant huius mysterij altitudinem, sicut est illud Matth. 11. *Quia abscondisti hæc à sapientibus, & prudentibus, & revelasti ea parvulis: Ita Pater, quia sic placitum fuit ante te.* Nec apparet quomodo verificetur, quod prædestinati dati sunt Christo à Patre, sicut ipse dicit Ioan. 17. *Tui erant, & mihi eos dedisti,* si ex meritis Christi erant electi, & à Patre possessi. Denique si Christus merebatur, ut isti præ illis eligerentur, utique ad hanc voluntatem habendam movebatur à voluntate divina, & regulabatur per eam: ergo prius Deus volebat ut Christus vellet, & applicaret merita sua pro istis, quam quod Christus id faceret: ergo prius divina voluntas eos eligebat quam voluntas humana Christi.

6 Dicendum nihilominus est, electionem prædestinatorum ad gloriam formaliter, & explicitè consideratam in Deo etiam quoad materiale designationem unius præ alio fuisse ex meritis Christi efficaciter applicatis istis potius, quam illis: regulatiue autem, & moriue ex divina voluntate antecedente merita Christi ortam fuisse; sed hoc idem dicendum est de electione ipsa ad gloriam formaliter, & absolute sumptam. Probatur conclusio (quæ videtur communiter teneri ab his qui ponunt merita Christi esse causam nostræ electionis absolutæ, quos *suprà* retulimus) quia Scriptura simpliciter attribuit electionem prædestinatorum meritis Christi, non potest autem electio rectè intelligi sine comparatione unius præ alio, quia non potest intelligi electio ad gloriam, nisi sit electio personarum in individuo, ipsa enim gloria non eligitur, sed personæ eliguntur ad gloriam, sicut ad dignitatem aliquam fit electio personæ, non ipsius dignitatis: hæc enim est res quam volumus ipsi personæ electæ, non verò est id quod eligimus. Electio autem personæ non est in communi, & vagè, sed determinatè huius præ alio qui reicitur: electio enim si est inter plura, procedit cum discretionem, & determinationem unius præ alio, si autem est unius medij tantum, ibi maximè est determinata, & in singulari. Quare non potest intelligi electio propriè, & verè, nisi cum determinatione rei electæ, & separatione ab eo quod reicitur, seu non eligitur: velle enim in communi quod aliqui homi-

nes

nes intrent in gloriam, nondum est electio: ad ipsam enim intentionem pertinet velle gloriam hominibus, ut sic, electio autem applicat, & determinat personas, unde & electio dat ius electo ad rem, ex illa autem electione in communi, & vagè nulli acquiritur ius, quia ex vi illius nullus in particulari eligitur, aut reicitur: ergo si propriè, & verè fit electio per Christum, fieri debet electio ipsarum personarum materialiter, & in individuo. Quod autem propriè, & verè eligamur per Christum, & in vi meritorum eius, constat ex Apostolo dicente ad Ephes. 1. *Elegit nos in ipso ante mundi constitutionem*, ubi ly *nos*, designat personas determinatas, & in singulari. Et Ioan. 15. *Non vos me elegistis, sed ego eligi vos*. Et iterum, *Nonne ego vos duodecim elegi, & unus ex vobis Diabolus est?* Electio ergo personarum in particulari pertinet ad Christum, siquidem elegit illos duodecim in singulari designando personas. Eadem autem ratio est eligendi Apostolos in particulari, & reliquos prædestinatos. Non loquitur autem Christus solum de electione ad dignitatem Apostolatus, sed etiam ad gratiam, & ad gloriam, præsertim in illo primo loco: *Ego elegi vos*, & cum dicit, *Ego elegi vos de mundo*, ut constat ex August. lib. de prædestinatione SS. c. 19. *Electionem*, inquit, *quam significavit Dominus, dicens, non vos me elegistis, sed ego elegi vos, nec fides ipsa præcedit*. Et lib. de corrept. & gratia c. 7. *Cum audimus*, inquit, *Nonne ego vos duodecim elegi, & unus ex vobis Diabolus est, illos debemus intelligere electos per misericordiam, illum per iudicium*. Illos ergo elegit ad obtinendum regnum suum, illum ad effundendum sanguinem suum. Loquitur ergo in his locis Dominus de electione ad regnum, & tamen est electio comparatiua, & personarum in singulari præ aliis: ergo ista fit ex meritis Christi.

7 Confirm. quia si non est electio comparatiua, & in singulari determinatè per Christum, neque explicari potest quomodo sit electio vagè, & in communi, seu quoad formalem rationem per Christum. Nam vel est prior electio vaga, & in communi per Christum, & postea per solam diuinam voluntatem determinantur personæ in singulari sine ordine ad merita Christi, vel è conuerso, prius est Deum eligere determinatas personas ad gloriam sine meritis Christi, & postea merita Christi attendi ad electionem vagè sumptam, & sine determinatione personarum. Hoc secundum est intolerabile absurdum: si enim supponitur prius facta electio determinata singularium personarum, ad quid postea deseruit electio vaga, & in communi per Christum, si iam personæ in particulari sine meritis Christi electæ sunt. Si verò dicatur primum: ergo iam supponuntur merita Christi quando electio determinatè, & in singulari fit, siquidem antecedit electio in communi facta per Christum: ergo eadem merita in quantum efficacia, & applicata possunt esse ratio, & causa determinatè eligendi has personas, quia possunt determinatè applicari potius pro istis, quam pro illis; & sic applicata erunt causa, & ratio electionis eorum, siquidem valor meritorum Christi, cum infinitus sit, etiam potest extendi ad determinandum, & designandum personas: quis enim posuit eis limitem, ut possint valere pro gloria vagè, & in communi, & non pro designatione personarum? Christus autem applicauit determinatè pro aliquibus efficaciter merita sua potius quam pro aliis: nam applicauit orationem, & oratio meritoria erat. De Petro enim dixit Lucæ 22. *Ego rogavi pro te, ut non deficiat fides tua*. Et Ioan. 27. *Non pro mundo rogo, sed pro his quos dedisti mihi*. Et inf. *Pro eis ego sanctifico*

meipsum (id est in sacrificium, & victimam trado) *ut sint, & ipsi sanctificati in veritate. Non pro eis autem rogo tantum, sed, & pro eis qui credituri sunt per verbum eorum in me*. Ecce oratio pro omnibus prædestinatis, & non pro aliis. Quæ oratio ad hoc erat, ut daretur eis vita æterna, ut inf. dicit, Pater, quos dedisti mihi, volo ut ubi sum ego, & illi sint mecum, ut videant claritatem meam, quam dedisti mihi. Ergo per orationem, & merita Christi applicatè, & efficaciter, quidam electi sunt præ aliis ad diuinæ visionis claritatem.

Quod autem regulatiuè, & motiuè fuerit hæc electio ex diuina voluntate antecederet ad merita Christi, patet, quia voluntas humana Christi dependebat à diuina ut à mouente, & regulante: ergo debebat Deus dirigere, & mouere voluntatem Christi, ut hos potius, quam illos elegi vellet; & sic antecederet ad voluntatem humanam Christi Deus habebat voluntatem, & amorem erga illos potius quam erga alios, quia ad eos mouebat voluntatem Christi, licet nondum formaliter illos eligeret, ut iam explicamus in solutione dubitationis supra factæ.

Ad rationem ergo dubitandi, Respon. reduci totam causam, & beneficium prædestinationis nostræ ad Christum, ut ad causam meritoriam, & redemptiuam: ad voluntatem autem Dei, ut ad causam simpliciter primam motiuam, & regulatiuam istius voluntatis Christi. Vnde simpliciter ad diuinæ voluntatis placitum reducitur mysterium nostræ prædestinationis, sed per Iesum Christum, quia sumus electi in ipso. Ex hoc autem placito emanauit illa voluntas Christi, & merita eius, & aduentus eius, *quia sic Deus dilexit mundum ut filium suum unigenitum daret: & proprio filio non percipit, sed pro omnibus tradidit illum*. Vnde huius amoris, & huius beneplaciti sola voluntas Dei est causa, qui voluit abscondere hæc quibusdam, & reuelare aliis ex sua voluntate, ut ex causa prima simpliciter; per Christum autem, ut per causam meritoriam. *Nemo enim nouit Patrem nisi Filius, & cui voluerit Filius reuelare*; pertinet ergo etiam ad Filium ut hominem reuelare illis quos vult Pater. Nec inferri potest ex hoc, quod merita Christi erunt effectus prædestinationis nostræ, siquidem ex dilectione nostra mouet Deus voluntatem Christi, ut hos eligat potius quam illos. Respon. enim quod licet hoc aliqui concedant, tamen simpliciter non debet hoc concipi, quia merita Christi non procedunt à decreto nostræ prædestinationis, sed antecedunt, siquidem merita Christi sunt causa prædestinationis nostræ: in ipso enim electi sumus, & sic non sunt effectus eius, sed causa. Procedunt autem à decreto prædestinante Christum ut Redemptorem, & Saluatorem omnium; in quo decreto virtualiter continebatur nostra salus, & prædestinatio, quia decernebatur Christus venturus ad saluandum nos, & pro nostra salute, ubi in ly *nostra salute*, prædestinatio nostra virtute continebatur, sed nondum explicitè, & formaliter intelligebamur prædestinati; & sic ex nostra prædestinatione formaliter, & expressè sumpta non emanauerunt merita Christi, sed præcesserunt. Et præterea constat non esse Incarnationem effectum nostræ prædestinationis formaliter, & expressè, quia nostra prædestinatio solum habet pro effectu ea quæ pertinent ad gratiam adoptiuam, quia *prædestinati sumus conformes fieri imagini Filii Dei*, ad Roman. 8. Incarnatio autem non est gratia adoptiua, sed filiationis naturalis; & idè est altior prædestinatione nostra. Imò, & effectus meritorum Christi etiam tangunt non prædestinatos, ut plura auxilia

lia sufficientia, quæ dantur re probis; & ideo non possunt eius merita solius nostræ prædestinationis esse effectus.

Ad illum locum, qui adducitur ex Ioan. 17. *Tui erant, & mihi eos dedisti.* Respon. sensum illius non obstare nostræ sententiæ: potest enim intelligi quod tui erant per æternam prædestinationem, & mihi eos dedisti tempore per executionem, quæ est expositio S. Thom. super Ioanem: sed tamen in illa prædestinatione æterna erant tui ex meritis meis præiudicatis, quia in me elegisti eos. Vel secundò tui erant per creationem, & mihi eos didisti per redemptionem ut eligerentur. Vel denique tui erant quantum ad voluntatem illam primam, & regulatiuam, qua Deus mouebat, & dirigebat voluntatem Christi ad applicandum merita pro istis potius, quam pro aliis. In hac voluntate sic directiua, & regulatiua iam erant Patris, & erant voliti à Deo isti ad quos mouebat Christum ut eligerentur, & dedit eos Filio, mouendo eius voluntatem, ut pro illis applicaret merita sua; & sic eligerentur de facto, & explicitè: illa enim prior voluntas Dei nondum erat electio, sed ad eam mouebat, & dirigebat.

10 Ad ultimam rationem dicitur ex dictis quod Deus mouens voluntatem Christi, ut pro his potius, quam illis offerret merita sua, volebat, & intendebat eos eligere, sed nondum de facto eligebat, sed media proponit, & adhibet ad eligendum. Et ita in illa priori voluntate Dei solum originatiuè, & directiue est electio, seu virtualiter, nondum expressè, & formaliter: aliàs idem argumentum probaret quod nec posset esse electio absoluta per merita Christi, quia etiam ad illam moueri, & regulari debet à voluntate diuina ut à causa prima, & suprema: ergo si hoc non obstante est electio absoluta per Christum, etiam comparatiua.

Argumenta seu difficultates, quæ contra primam conclusionem possunt proponi, nullius sunt momenti. Nam quod aliqui dicunt, merita Christi non esse causam auxiliorum quæ dantur prædestinatis, aut prædestinatos ante præuisionem originalis peccati fuisse electos ad gloriam, vtrumque falsum est, cum ipsum primum exordium iustificationis, quod sumitur à gratia Dei præueniente, detur nobis per Christum, ut determinat Concilium Trident. sess. 6. c. 5. Et non dari prædestinationem hominum ante Christum qui est primus prædestinatorum, nec Incarnationem ante præuisionem originalis peccati, iam ostendimus. Quod verò obici potest Incarnationem esse præcipuum medium quo prædestinati ducuntur ad gloriam; & sic inter effectus prædestinationis censendam esse, iam ostendimus non esse medium, nec effectum prædestinationis, sed causam, & superiori modo se habere ad ipsam, sicque maximè conducere ad nostram salutem, sed ut causam, authorè, & salutis; est autem Incarnatio propter nostram salutem tanquam propter finem effectum, non propter finem cuius gratia, sed tamen verè habet rationem motiui, sine quo Christus non veniret. Sed de his

latius ad 3. part. in
materia Incar-
nationis.



DISPUTATIO IX.

De effectibus prædestinationis.

ARTICVLVS I.

Quæ conditiones requirantur ut aliquid sit effectus prædestinationis?



1 **D**ISTINGVERE oportet in primis subiectum prædestinationis, & effectum. Subiectum est persona quæ à Deo transmittitur in finem supernaturalem, & hoc solum conuenit creaturæ rationali, quia ipsa sola est capax beatitudinis, & fruitionis Dei. Effectus est omne beneficium gratuitum quod in ordine ad talem finem supernaturalem ordinatur, & conducit, eo quod *prædestinatio*, ut dicit August. *est præparatio beneficiorum Dei, quibus certissime liberantur quicumque liberantur*; & specialiter prædestinatio versatur circa ea quæ gratis, & supernaturaliter à Deo dantur; & sic est gratiæ præparatio. Et quidam effectus sunt immediatè, & quasi elicitiuè ab ipsa prædestinatione, alij mediatè, & quasi imperatiuè: Et hoc ideo quia gratia utitur naturæ ut sibi inferiori, & subiecta; & sic prouidentia, seu præparatio supernaturalis gratiæ imperat naturali prouidentia, & dirigit illam ad finem suum, non quod imperium exerceatur inter actum, & actum, cum in Deo non sint plures actus, sed inter obiectum, & obiectum, finem, & finem.

Effectus ergo prædestinationis ad tria præcipua capita reducuntur. 2

Primò, ad effectus supernaturales, qui propriè, & elicitiuè ad prædestinationem pertinent, sicut glorificatio, iustificatio, & similia.

Secundò, ad effectus ordinis naturalis, qui subiiciuntur prædestinationi, & pertinent ad ipsam imperatiuè, quia licet ab illa ordinentur ad finem altiore supernaturalem, per causas tamen naturalis ordinis exercentur, quæ ministerialiter deseruiunt prædestinationi supernaturali, sicut vita ipsa prædestinati, longior vel breuior sanitas, bona ingenium, & similia quæ ad naturales facultates spectant, & tamen deseruiere possunt ad effectus gratiæ, quia hæc non destruit, sed perficit naturam.

Tertiò reduci possunt effectus prædestinationis ad permissiones peccatorum, quæ utique ad aliquos fines utilitatem suam habere possunt. De omnibus his in præsentī disputatione agimus.

3 **C**onditiones autem requisitæ ut aliquid sit effectus prædestinationis siue elicitus, & immediatus, siue imperatus, & mediatus, sunt quatuor. Duæ tenent se ex parte causæ efficientis, tertia ex parte subiecti, quarta ex parte finis. Ex parte efficientis, requiritur.

Primò, quod aliquid sit à Deo tanquam effectus eius.

Secundò, quod talis effectus oriatur ab ipso efficiente ex intentione efficaci dandi gloriam: cum enim prædestinatio sit præparatio mediorum ad gloriam, talis causa præparans, & ordinans, necessario debet moueri ex fine dandi efficaciter ipsam gloriam. Et ratione huius conditionis, Incarnatio, &

& merita Christi non sunt effectus prædestinationis, licet maxime ad obtinendam gloriam conducant, quia conducunt ut causa prædestinationis, non ut effectus: nec enim sunt ex intentione dandi nobis gloriam, sed potius intentio dandi gloriam ex ipso Christo, & meritis eius causatur: *Elegit enim nos in ipso ante mundi constitutionem*, ut inquit Apostolus Ephes. 1.

Tertia conditio requisita ad effectum prædestinationis, tenet se ex parte subiecti, scil. quod pertineat ad creaturam intellectualem ordinatam ad finem supernaturalem; quod totum ex parte subiecti se tener.

Quarta ex parte finis, quod talis effectus conducat, vel ordinetur ad obtinendum dictum finem supernaturalem; & sic in genere causæ finalis debet esse causatus à beatitudine ipsa supernaturali, eique subiectus.

4 De prima conditione, non potest dubium esse inter Catholicos: constat enim quod quicquid non est effectus Dei, est defectus, & peccatum quoad formale suæ malitiæ, & auersionis. Quod nullo modo potest esse ex prædestinatione Dei: nam prædestinatio est providentia specialis orta ex speciali dilectione, & voluntate Dei, qua eligit, & diligit eos quos prædestinat, iuxta illud Psal. 17. *Saluum me fecit, quoniam voluit me.* Romanorum 9. *Iacob dilexi, Esau autem odio habui.* Ioan. 3. *Sic Deus dilexit mundum, ut Filium suum unigenitum daret, ut omnis qui credit in eum non pereat, sed habeat vitam eternam.* Lucæ 11. *Nolite timere pusillus grex, quia complacuit Patri vestro dare vobis regnum.* Sed peccatum quantum ad suam malitiam non potest procedere à voluntate Dei, cum potius sit auersio à Deo: *Odio enim sunt Deo impius, & impietas eius*, ut dicitur Sapient. 14. nihil autem procedit à Deo per odium, sed per amorem, iuxta illud Sapient. 11. *Nec enim odians aliquid constituisti, aut fecisti*: ergo nullo modo peccatum quoad suam malitiam potest esse effectus prædestinationis; sicut nec voluntatis, & amoris, in quo prædestinatio fundatur. Vnde hoc ipsum, scil. quod peccatum sit ex prædestinatione Dei, damnat S. Prosper *ad obiectiones Vincentianas*, responsione 10. & 12. & August. lib. 1. *contra duas epistolas Pelagianorum* c. 3. & Concilium Arausic. II. *in fine*, & Trident. sess. 6. can. 6. & multis probari solet à Theologis 1. 2. qu. 79. ubi ostenditur Deum non esse authorem peccati, cum tamen sit author omnium eorum quæ prædestinavit, & consequenter omnium effectuum prædestinationis, quia specialiter ab eius providentia ordinata, & præparata sunt, & consequenter causata.

5 Ex quo obiter adverte reiciendas esse aliquorum minus cautas locutiones, qui absolute docent peccatum causari vel prædestinari à Deo, & formale peccati etiam quantum ad malitiam esse ex prædestinatione Dei, saltem quoad secundariam intentionem: quibuscumque enim formis vel locutionibus aut distinctionibus res ista palliatur, aut obscuretur, vel sumit formale peccati pro ipsa malitia, & auersione, ut communiter sumi solet, & secundariam intentionem Dei sumit pro vera, & propria voluntate, & præparatione, licet non prima, sed præsupponente aliam priorem, aut non. Si hoc secundum, nihil dicitur præter communem sententiam, quod peccatum nullo modo sit à Deo, nec ab eius prædestinatione, sed solum verbis luditur, significando quod est à Deo, cum id non dicatur in re, nec ita sit. In rebus autem theologicis, & præsertim dogmaticis ludus iste verborum non licet. Si primum dicatur, inciditur in sententiam

damnatam à Conciliis, & Patribus, quod Deus causet peccatum, non solum permissivè, sed etiam propriè, & per se, cum ex eius prædestinatione, & speciali providentia dicatur descendere, quod tamen sub his verbis damnatur à Concilio Trident. citato loco. Nihil enim ita propriè, & per se Deus operatur, quam quod ex speciali præparatione, & prædestinatione facit, & ex intentione, quantumcumque dicatur secundariò id facere, quia *ly secundariò* non tollit quod propriè, & verè efficiat, aut si tollit, nihil dicitur per illa verba, nisi communis sententia. Plura de his occurrent iterum *infr. art. 6.* agendo de permissione peccati.

6 Secunda conditio si solum explicetur in hoc sensu, quod ut aliquid sit effectus prædestinationis debeat præsupponere, & oriri ex aliquo fine intento supernaturali, extra controversiam est, quia non est dubium quin effectus prædestinationis sit ex præordinatione Dei, & non à casu, & fortuito, & consequenter ex intentione finis: quod enim non est à casu, ex fine, & intentione est. Quod autem iste finis sit efficaciter intentus, & non sufficiat simplex voluntas, iam *suprà* ostensum est, licet aliquid dubitent, contra quos egimus. Quod verò iste finis debeat esse ipsamet beatitudo ex cuius efficaci intentione procedant in executione omnes effectus ab ista prædestinatione præparati, perdet ex illa questione superiori disputatione iam discussa, an efficax intentio ad gloriam præcedat nostrorum meritorum præscientiam tanquam causa, & motum illorum, de quo iam satis dictum est.

7 Tertia denique, & quarta conditio ex ipsa propria ratione prædestinationis manifestæ sunt: est enim prædestinatio transmissio creaturæ rationalis in beatitudinem per certa, & determinata media: ergo subiectum quod transmittitur tanquam persona, de qua huiusmodi providentia disponit, est creatura rationalis, quia hæc sola est capax illius transmissionis ad gloriam. Finis autem ad quem talis persona transmittitur est vita æterna, seu beatitudo; & sic providentia prædestinativa solum potest esse de persona ut ordinata ad talem finem. Ergo ut aliquid sit effectus prædestinationis, oportet quod aliquo modo conducat ad hoc ut talis persona, seu creatura intellectualis transmittatur, & assequatur illum finem, quia ille solum est effectus alicuius providentiæ, & præparationis, qui ad finem ad quem fit illa præparatio conducit. Ea verò quæ non conducunt ad finem prædestinationis, sunt communia reprobis, & prædestinatis: non ergo sunt proprii effectus prædestinationis, ut segregat prædestinatos à reprobis.

8 Potest ultimò addi alia conditio requisita ad effectus nostræ prædestinationis, ut de facto sit, scil. quod sint per Christum: nam cum omnis nostra gratia ab ipso sit, siquidem *de plenitudine eius omnes accepimus, & gratiam pro gratia*, ut dicitur Ioan. 1. consequenter omnis effectus prædestinationis est per Christum, quia omnis effectus prædestinationis est beneficium gratiæ, eo quod prædestinatio, ut Aug. dicit, *est præparatio beneficiorum Dei*, &c. Vnde dicitur Actorum 4. quod *Non est aliud nomen datum sub cælo, in quo oportet nos salvos fieri.* Et Paulus ad Ephes. 1. *Prædestinavit nos in adoptionem filiorum per Iesum Christum.* Cæterum hæc conditio non est per se, & intrinsecè requisita ad prædestinationem absolute, sed ut de facto sit in nobis, quia sine ipsa dari posset absolute, ut si Filius Dei non fieret homo, & si status innocentiae durasset, adhuc homines prædestinarentur. Et Angelos non recepisse ex Christo gloriam, & gratiam essentialem proba

probabilior fert opinio, eo quod non fuerunt prædestinati ut redempti, & gratia per Christum redemptiva est. Solum ergo hæc conditio est necessaria supposita voluntate, & beneplacito Dei, qui præordinavit Incarnationem Christi, ut esset causa nostræ salutis, nec nisi per ipsum haberemus accessum ad Patrem in confidentia in sanguine ipsius. De quo D. Thom. 3. part. quæst. 24. artic. 4. ad 3.

ARTICVLVS II.

Utrum glorificatio, & iustificatio, & quæcumque efficax vocatio sint effectus prædestinationis?

IN hoc articulo coniungimus omnes effectus supernaturales, de quibus aut nulla, aut modica difficultas esse potest, quod sint effectus prædestinationis: hos enim videtur enumerare Apostolus ad Rom. 8. dicens: *Quos prædestinavit, hos & vocavit, & quos vocavit, hos & iustificavit, quos autem iustificavit, hos & glorificavit.* Glorificavit autem (inquit August. c. 17. de prædestinat. SS.) eo sine qui non habet finem. Nec mouere debet quod Paulus loquitur de præterito, iustificavit, vocavit, glorificavit, &c. id enim ponitur, ut inquit S. Thom. in c. 8. ad Rom. lect. 6. vel propter certitudinem futuri, vel quia quod in quibusdam est futurum, in aliis est completum.

Non defuerunt ergo aliqui Theologi, qui dixerunt solam gratiam esse effectum prædestinationis, non gloriam, ut Durandus in 1. dist. 41. qu. 2. num. 19. Alij verò è contra solam gloriam dixerunt esse effectum prædestinationis, non verò gratiam, quod tribuitur Gabrieli, Ochamo, & aliis.

Cæterum communis sententia inter Theologos est glorificationem, seu consecutionem finis omnino debere computari inter effectus prædestinationis. Ita D. Thom. in quæst. præsent. art. 3. ad 2. ubi inquit, quod *Prædestinatio est causa eius quod expectatur in futura vita à prædestinatis, scil. gloria, & eius quod percipitur in præsent. scil. gratia.* Idem sumitur ex citatis verbis Apostoli ad Rom. 8. *Quos prædestinavit, hos & vocavit, &c. quos autem iustificavit, hos & glorificavit.* Vbi inter effectus prædestinantis Dei ponitur glorificatio; & videri etiam potest August. lib. de corrept. & gratia c. 9. ubi hoc testimonium explicat, & de prædestinatione SS. cap. 17. cum quo alij Patres, ut Fulgentius, Origenes, & alij, intelligunt hunc locum de glorificatione alterius vitæ, quamquam alij etiam de gloria, seu magnificatione in præsent. vita id intelligant. Et D. Thom. super epistolam ad Romanos c. 8. lect. 6. utroque modo locum hunc intelligit.

Fundamentum est, quia glorificatio, seu consecutio gloriæ est aliquis effectus de nouo in rerum natura à Deo factus: ergo & prouisus, siquidem Deus nullum effectum facit nisi prouidentia sua. Vel ergo ille effectus est ex prouidentia generali, seu communi reprobis, & prædestinatis, vel tantum prædestinatorum propria. Primum stare non potest, cum reprobi cadant à gloria, nec illam consequantur, & in hoc præcisè à prædestinatis distinguantur: ergo debet esse à prouidentia speciali prædestinatorum, seu ab ipsa prædestinatione; & sic est effectus eius.

Conf. qui ponit media de se consecutiva, & perductiva ad finem, hoc ipso est effectus eius, conse-

cutio talis finis, siquidem adhibet causam consecutivam eius, sed prædestinatio adhibet media consecutiva gloriæ: ergo ipsa consecutio gloriæ est effectus eius. Maior negari non potest, quia media ad hoc adhibentur ut consequantur finem: ergo sunt causa consecutionis eius, & consecutio effectus illorum est: si enim media non sunt causa consecutiva finis, quomodo conducunt ad finem, & quomodo efficacia dicuntur ex se ad talem finem? si per se non causant illam consecutionem, sed alio indigent ad causandum. Minor verò certa est ex definitione prædestinationis, quæ est transmissio efficax rationalis creaturæ in beatitudinem, & secundum August. est præparatio beneficiorum Dei, quibus certissime liberantur quicumque liberantur, sed media quibus aliqui certissime liberantur sunt media consecutiva gloriæ, seu liberationis: ergo prædestinatio quæ adhibet talia media, adhibet media consecutiva gloriæ.

Dices: media illa quæ prædestinatio adhibet sunt consecutiva gloriæ meritorie, non physice, & efficienter: actus enim nostri qui per gratiam, & auxilia Dei fiunt, solum meritorie causare possunt gloriam: ergo non sequitur quod si prædestinatio adhibet, & præparat media ad consecutionem gloriæ, ipsa consecutio sit effectus prædestinationis, siquidem media quæ adhibet, non consequuntur illam effectivè.

Sed contra est, quia media quæ adhibet prædestinatio, non solum sunt ea quæ actibus nostris exercentur, sed quæ à solo Deo fiunt pro talis finis consecutione, quæ est ipsa visio Dei: Multa enim Deus se solo facit, ut est prima vocatio, infusio habituum supernaturalium, eorumque augmentum, infusio luminis gloriæ, unio diuinæ essentiae in ratione speciei, & tandem sequitur visio in qua consistit glorificatio. Ergo licet actus nostri solum meritorie attingant glorificationem, & non effectivè, tamen multa alia quæ Deus se solo facit, effectivè attingere possunt glorificationem, & illa cadunt sub aliquam specialem prouidentiam Dei, & non solum sub generalem, & communem reprobis ac prædestinatis: ergo sunt effectus illius specialis prouidentiae quæ prædestinatio est: ergo, & ipsa glorificatio quæ à talibus mediis causatur.

Vnde colligitur quid nomine glorificationis intelligendum sit, cum dicimus glorificationem esse effectum prædestinationis: Dicimus enim nomine glorificationis intelligi ipsam consecutionem beatitudinis, & actum quo illa consecutio fit: hæc enim est substantialiter ipsa glorificatio. Quæ verò consequuntur ut dotes animæ, & corporis in homine glorificato, non sunt ipsa glorificatio, sed accidentia ad illam consecuta. Quæ verò antecedunt illum actum visionis tanquam principia eius, ut lumen gloriæ, unio diuinæ essentiae in ratione speciei, non sunt formaliter ipsa consecutio gloriæ, sed principia quibus fit. Omnia tamen ista sunt effectus prædestinationis, quia à prouidentia Dei speciali sunt destinati, & non sunt imperati ab ipsa prædestinatione, sed elicti, quia proprii, & immediati sunt illius prouidentiae supernaturalis prædestinationis, nec ab alia prouidentia inferioris ordinis eliciuntur, & ab illa superiori imperantur, cum ipsi in se supernaturales effectus sint, & maxime proprii prædestinatorum.

Obiicies pro sententia Durandi, quia prædestinatio est prouidentia de mediis, non voluntas de fine, quia, ut diximus, est imperium dirigens executionem; & ita præsupponit electionem mediorum, & intentionem finis; unde est quod reprobatio non opponitur præcisè, & directè prædestinationi, sed

sed electioni ad beatitudinem, vt docet S. Thom. q. 6. de verit. art. 1. ad vltimum, eo quod qui eligit ad finem vnum, reiecit alium, prae destinatio autem quae electionem ad gloriam supponit, solum versatur circa media in ordine ad effectum consecutionis finis, ipsa autem realis consecutio non est medium ad consequendum, nec est beneficium prae paratum à Deo, vt per illud certissime liberentur prae destinati, solum autem prae destinatio est prae paratio talium beneficiorum: ergo realis consecutio non est effectus prae destinationis, sed ex effectu eius consequitur, scil. ex prae paratione mediorum tanquam terminus eius, non vt effectus.

Secundò, obijciens pro secunda sententia, quia solum iste effectus, qui est glorificatio, est proprius prae destinatorum: reliqui enim prae ter istum communes sunt reprobis, & prae destinatis: quaecumque enim gratia, si ad glorificationem non peruenit, non repugnat inueniri in reprobo qui à glorificatione deficit: ergo sola glorificatio est effectus proprius prae destinationis, in quo distinguuntur à reprobis, & ratione cuius ceteri effectus ad prae destinatos pertinent.

Ad primum Resp. quod prae destinatio versatur circa media vt perducunt ad consecutionem finis, vnde supponere debet finem in intentione, sed causare debet finem in executione. Argumentum ergo probat quod intentio finis, & electio hominum ad talē finem antecedit prae destinationē, & non sit effectus eius, sed causa, non tamen probat, quod executio, seu assecutio finis non sit effectus eius. Et quando dicitur quod non est mediū ad consequendum, nec beneficium prae paratum à Deo ad consecutionem finis, concedo non esse mediū ad consecutionem, sed terminum qui est ipsa consecutio: sed negamus non esse effectum prae destinationis, quia media non sunt effectus prae destinationis abstrahendo à consecutione, sed concernendo assecutionem, & terminando ad ipsam, quia ad hoc diriguntur media, vt consequatur finis, & vsque ad realem terminationem ad finem non desinunt esse effectus prae destinationis simul cum ipsa consecutione: haec enim praecipue efficitur, & intenditur.

Ad 2. Resp. quod glorificatio est principalis effectus prae destinationis, & qui prae destinatos à reprobis distinguit, sed non solus: nam alij effectus sunt qui ad glorificationem tendunt, ipsamque consequuntur efficaciter, vt vocatio, iustificatio, opera bona, &c. & licet haec possint in reprobis inueniri, non tamen eo modo quo in prae destinatis, quia in his inueniuntur cum ordinatione efficaci, & perseuerantia vsque ad consecutionem gloriae in reprobis sine illa, vnde non eodem modo se habent.

ARTICVLVS III.

An vocatio inefficax, & gratia interrupta per peccatum sint effectus prae destinationis.

Hoc solum restat explicandum in effectibus. Hic supranaturalibus, quia cum saepe gratia data interruptatur, & pleraque auxilia effectum frustrantur, non apparet an ista, prout sic, sint effectus prae destinationis, quae est efficax transmissio ad vitam aeternam. Vnde nihil quod est inefficax, nihil quod est mortuum, videtur effectus illius esse, & ex ipsa, vt efficax est, descendere.

Gratia ergo interrupta per peccatum potest dupliciter considerari. Primò, vt in sua prima illa collatione, quando primò à Deo data est, & prae videbatur interruptenda. 2. in statu ipso interruptionis, quae est gratia prout deletur per peccatum. 3. in statu reparationis, vt per poenitentiam reuiuiscit. Et rursus tam in statu suae primae collationis, quam reparationis.

Ioan. à S. Thoma in 1. part. D. Thoma.

nis potest considerari, vel absolute secundum se, vel cum respectu, & continuabilitate ad perseuerantiam, mediante qua continuatur cum gloria. Si consideretur gratia vt reparata per poenitentiam, sic non est dubium quod sit effectus prae destinationis: antecedens enim interruptio non nocet subsequuta reparatione: sic enim est perinde, ac si non interrupta. Quod si rursus post reparationem quis peccet, & amittatur gratia, rursus se habebit vt interrupta, & non reparata; & sic rursus considerabitur vel in statu interruptionis, vel in statu reparationis postea faciendae, quia etiam illa interrupta rursus reparabilis est; & sic procedemus quouique vel sistamus in vltima reparatione non amplius interruptenda, & haec habet adiunctam perseuerantiam, vel sistamus in vltima interruptione non amplius reparanda, & haec habet adiunctam finalem impoenitentiam. Quare formaliter loquendo de gratia, vt reparata sub hac formalitate, effectus est prae destinationis, nisi ab hac formalitate deficiat per nouam interruptionem, quod est iam non manere vt reparatam. Similiter est certum quod gratia sub statu interruptionis actualis, non est effectus prae destinationis, sed defectus ab ipsa: sic enim non est gratia, sed corruptio gratiae, seu interruptio ipsius, & defectus. Peccatum autem, & effectus peccati, qui est tollere gratiam, non est à Deo: ergo multo minus ab eius speciali providentia, quae est prae destinatio. De permissione quidem peccati opiniones variae sunt, an sit effectus prae destinationis, de ipso vero peccato, & effectu eius, qui est corruptio, seu interruptio gratiae non est dubium quod effectus prae destinationis non sit, cum à Deo non sit, sed deficientia à Deo.

Quare punctus difficultatis est de ipsa gratia quae interruptioni subiecta fuit, si consideretur non vt subest interruptioni actuali, quae est defectus, & corruptio gratiae per peccatum, sed considerata secundum se, & vt primò collata est à Deo ante interruptionem, an sub hoc statu, & consideratione sit effectus prae destinationis. Et si est necessarium quod consideretur cum ordine ad perseuerantiam, vel etiam praescindendo ab illa, vt sit effectus prae destinationis.

Similiter inefficax vocatio potest dupliciter considerari. Primò, secundum entitatem suam, & id quod habet à Deo, quod pertinet ad rationem sufficientis auxilij. Secundò, quantum ad resistantiam voluntatis adiunctam, quam non superat illud auxilium; & sic inefficax est, quia caret auxilio efficaci, & consequenter habet adiunctam voluntatis resistantiam. Hoc 2. modo non est effectus prae destinationis pro parte resistantiae voluntatis: haec enim pertinet ad obdurationem eius, quae non est à Deo effectiue, sed solum permissiue non largiendo gratiam. Pro parte vero denegationis auxilij efficaci, hoc pertinet ad permissionem diuinam, quae consistit in degeneratione auxilij efficaci, & de hac dicemus infra an sit effectus prae destinationis, & quomodo. De ipsa ergo vocatione inefficaci quantum ad ipsam substantiam & entitatem, quatenus talis est, difficultas procedit, an sit effectus prae destinationis. Et dato quod sit, an per se immediate sit effectus prae destinationis, an mediante alio auxilio efficaci, quo illa inefficax in memoriam reducitur, sic effectus prae destinationis reddatur.

In hoc puncto P. Vasq. sentit neque vocationem inefficacem secundum se, neque gratiam, seu sanctificationem interruptam esse effectum prae destinationis. Ita de inefficacibus vocationibus docet 1. p. disp. 93. c. 1. & 3. Et illum sequuntur plures ex Recentioribus, Valentia 1. p. disp. 2. q. 23. puncto 3. Villegas controu. 16. disp. 1. c. 2. & alij. De gratia iustificante idem affirmat eadē disp. 93. c. 3. & de meritis primò collatis;

H h licet

362 Quæstio XXIII. De Prædestinatione.

licet non desint Authores qui distinguunt inter gratiâ primò collatam ex opere operato, vel ex meritis, quod primâ non ponunt effectum prædestinationis, sed secundam, eo quòd merita semel facta semper eadem numero manent in acceptione Dei, quantumvis per peccatum impediuntur. Quare illa merita semper dantur à Deo ex intentione, & ordine ad gloriam, quantum est ex vi suæ dignitatis, quia cuiusque merito semper correspondet sua gloria independentè à pœnitentia, vel ab alia gratia, v.g. merita ut duo semper connexionem habent cum gloria ut duo, independentè ab alia gratia, vel pœnitentia, quæ non dignificat illa merita, sed si sint impedita, solum remouet impedimentum. Quod verò exigant pro conditione quod aliquis moriatur in gratia, ut obtineat gloriam, est conditio generalis omnium meritorum.

4 Sententiam Vasquez ita explicat, & intelligit P. Alarcon. *tract. 4. de prædest. disp. 4. c. 3.* quod quando dicit merita ut primò collata, & gratiâ non esse effectum prædestinationis, intelligit cum præcisione, scil. merita illa prout præcendant à perseverantia, & intelliguntur sic primò collata, quod nondum coniuncta cū ultimo effectū, qui est perseverantia. Et in hoc, inquit, pari fortuna currunt gratia interrupta, vel non interrupta: utraque enim ut primò collata præcisè, & nondū continuata cum perseverantia non est effectus formaliter loquendo prædestinationis, quia adhuc non distinguit à reprobis, cum etiâ reprobis habere possit primâ gratiam, sed non ultimâ. Si autem prima gratia, aut gratia interrupta sumatur specificatiuè prout re ipsa conducit ad gloriam, sic est effectus prædestinationis. Addit quòd in opinione eorū qui dicunt intentionem efficacē dādi gloriam, seu electionē efficacem præcedere prædestinationē, reuerà debere consequenter dici, quòd prima gratia, & prima merita sunt effectus prædestinationis, quia ut procedunt ab illa efficaci intentione, iam infallibiliter ordinantur, & influunt in gloriam, & sunt propria prædestinatorum. In quo optimè dicit hic Author, & hoc ipsum corroborat nostrā sententiā *suprà* latè explicatā de præcedentia electionis efficacis ante prædestinationem, id est, ante præparata merita. Et insinuat fundamentū suæ sententiæ, & P. Vasquez reduci ad hoc quòd gratia, & merita prout primò collata, & ante suam interruptionem sunt effectus communes reprobis, & prædestinatis, non prædestinatorum proprii ut prædestinati sunt: nam prout sic nondum intelliguntur coordinata cum ultima perseverantia, & ex alia parte non supponuntur procedentia ab efficaci, & infallibili voluntate dandi gloriam, quia hanc intentionem hæc sententia non admittit: ergo prout sic nondum intelliguntur esse effectus prædestinationis, quousque connotent ordinem ad ultimum effectum perseverantiæ. Et ita in hac sententia prædestinatio nō est vnica volūtas Dei, sed omnes voluntates dādi media ordinata ad gloriam cum colligatione, & continuatione vsque ad ultimum effectum perseverantiæ, sine cuius respectu & connotatione, reliquæ nō denominantur volūtates prædestinatiæ.

5 Nihilominus cū apud nos oppositum fundamentū sit *suprà* satis stabilitum, scil. quòd præcedit in Deo prædestinationem meritorum efficax intentio dandi gloriam, indubitatè debemus dicere, quòd in prædestinato vocationes inefficaces, & gratia interrupta etiâ ut primò collata, sūt effectus prædestinationis. Dixi consultiò, in *prædestinatione*, quia gratia ista, & vocationes, seu auxilia non decernuntur à Deo in abstracto, & antecedenter ad præuisionem personæ, sed concernendo ipsam. Et cū concernūt personam prædestinatam, seu electā à Deo electio-

ne illa efficaci, & intentiua, qua segregat eos à massa perditionis, quia sic placuit illi, omnia dona, & beneficia gratiæ, quæ ex illa voluntate circa talem personam deriuantur, pro effectibus prædestinationis computanda sunt: quæ enim dantur personæ reprobæ, & non electæ, licet sint dona supernaturalia, effectus prædestinationis non sunt. Hæc sententia est cōmunis inter Thomistas, de quo videri potest M. Gonzalez *hic disp. 71. sect. 3.* Eam docet P. Suarez *lib. 3. de prædestin. c. 4. & 6.* Arrubal *disp. 83.* Herize *disp. 30. c. 2.* & quoad gratiam interruptam etiâ eā docet Villegas *ubi supra*, licet quoad vocationes inefficaces subscribat P. Vasq. Sumitur etiā ex D. Thoma in epistolam ad Rom. *c. 8. lect. 6.* ubi explicans quomodo electis omnia cooperentur in bonum, id docet verificari de omnibus quæ accidunt prædestinatis, idque etiā extendit ad gratiā amissam per peccatum: tum etiā *3. p. q. 89. art. 2. ad 1.* ubi inquit quòd, *Non omnibus diligentibus Deum cooperatur in bonum hoc ipsum quod per peccatum à Dei amore cadunt, quòd patet in his qui cadunt, & nunquam resurgunt, vel qui resurgunt iterum casur: sed his tantum qui secundum propositum vocati sunt sancti, id est, prædestinatis, qui quotiescumque cadunt, finaliter tamen resurgunt.* Vbi S. Doctor aperte ponit fundamentum nostræ sententiæ, quomodo scil. interrupta gratia seruiat prædestinatis, & cooperetur illis in bonū, sitque effectus prædestinationis, quia scil. procedit ex proposito Dei, quo vocati sunt prædestinati, quod est aliud quàm intentio illa efficax, ex qua sunt electi, ut iam explicauimus.

6 Fundamentum igitur nostræ assertionis, licet nostris principiis suppositis videatur concludens, scil. supponēdo quòd intentio efficax, & electio ad gloriam præcedit prædestinationem, seu merita præparata, & præuisa, tamen non ita facile oppositam sententiam coarctat. Nam ex duplici principio potest deduci. Primò, quòd gratia interrupta, & vatio inefficax, aliquē effectum sine essentialis, siue accidentalis præmij in cælo habere potest, dummodo ultimatè aliquis decedat in gratia: hoc enim se habet ut generalis conditio omnis meriti, licet non se habeat ut ratio formalis ad præmiū, sed per se semper correspondet sibi ratione sui præmij aliquod. Secundò potest deduci ex eo quòd procedit vatio inefficax, & gratia interrupta in prædestinato ex intentione efficaci dandi illi gloriam, quidquid autem procedit ex tali fine, oportet quòd aliquem respectum efficacis ordinationis ad gloriam induat, alias non causaretur ex voluntate efficaci dandi gloriam.

Ceterum Vasq. non multum constringetur his fundamentis, nisi amplius explicentur. Nam hoc secundum principium, ipse non admittit, scil. quòd præcedat prædestinationem meritorum electio efficax personæ ad gloriam. Et dato quòd præcedat, dicit ipse quòd præcedit respectu eorum effectū, qui sunt in statu habili, ut intentioni efficaci deseruiāt per se. Qui autē non per se tendunt ad consecutionem finis, sed deficiunt, & deiciuntur ab illo, non à tali efficaci intentione procedunt, etiam in prædestinatis, sed à generali, & communi providētia, qualis etiam est erga plures reprobos, quibus & gratia interruptenda datur, & beneficia communia, seu inefficacia non negantur. Primum verò fundamentum non multum videtur constringere, quia Vasquez non negat gratiam illam absolutè, & in se posse esse effectum prædestinationis, subiiciendo scilicet, & continuando illam reparationi, & perseverantiæ. Non esse autem effectum prædestinationis prout subest alij formalitati, scil. prout antecedit, & præcendit à tali perseverantia, & non concernit

concernit illam, inconueniens non est; sic enim consideratur in sui prima collatione, ut præcisè est prima, & sub hac formalitate non est à prædestinatione ut causante, sed à generali providentia in genere supernaturali. Semper autem difficilè conuincitur sententia, quæ reducit punctum controuersie ad formalitates.

7 Dicendum nihilominus est, quod tam in nostris principiis, quam in principiis oppositæ sententiæ, si rectè explicentur gratia interrupta, & vocatio inefficax etiam ut primò collatæ, sunt effectus prædestinationis, non tamen præscindendo ab ordine, & respectu ad perseverantiam, & gratiam finalem, quia sine isto respectu, & connexionem, seu ordine ad illam, nihil est effectus prædestinationis. Et hoc est nostrum intentum, quod gratia illa iam in sua prima collatione induat istum respectum hoc ipso quod datur prædestinato, & similiter vocatio inefficax, non verò solum induat illum postquam interruptio facta est, reparatio facta, in quo recedimus à sententia Vasq. sed quod in prima sua egressione à Deo iam egrediatur cum illo respectu, & ordine, ratione cuius ad effectus prædestinationis pertinet, & inter illos numeratur.

Ratio est, quia de facto modo nulla gratia vel auxilium datur, quod vel non sit pro prædestinatis, vel pro reprobis, quia omnes homines vel saluatur, vel condènantur; & in his qui reprobantur nullum est dubium, quod non sit effectus prædestinationis in illis. In his autem qui prædestinantur nulla gratia etiam interrupta, & nullum auxilium etiam inefficax est quod secundum se ita perdat, & euacuetur, ut omni effectui & ordine ad gloriam prædestinati careat, cum constet ex Scriptura omnia prædestinatis cooperari in bonum ad Rom. 8. nō cooperarentur autem omnia, si isti effectus gratiæ totaliter euacuarentur: constat etiam gratiæ, & merita interrupta redire per sequentem reparationem, ut ex illo ad Hebr. 6. *Nō enim iniustus Deus ut obliuiscatur operis vestri, & dilectionis quam ostendistis in nomine ipsius*, deducunt, & admittunt communiter Theologi in materia de poenitentia. Et certum est quod gratia quæ interruptitur in prædestinatis, reparatur, alias prædestinati non essent, si semel cadentes non repararentur. Hæc omnia certa sunt, nec Vasquez, & eius sequaces negant, admittentes quod gratia illa secundum se, prout continuata ipsi perseverantiæ, & reparata, est effectus prædestinationis, non prout in prima sui collatione data. Infero ex his principiis: Ergo etiam in prima sui collatione illa gratia interrupta, vel illa vocatio inefficax habet hunc ordinem, & respectum ad ultimam reparationem, nec à tali ordine præscindit: ergo etiā in prima sui collatione est effectus prædestinationis. Hæc secunda consequens est manifesta, quia ut habet illum respectum, & coordinationem conducit ad proprium effectum prædestinationis, qui est ultima perseverantia, & affectio gloriæ, & cū illo connectitur: ergo pertinet ad ipsam prædestinationem prout sic connectitur, quia talis connexio nō reperitur in gratia, quæ datur reprobo: solum ergo est propria prædestinatorum. Prima verò consequens probatur, quia talis gratia in sui prima collatione nō datur ut abstrahens à respectibus, & connexionem cum aliis effectibus, siquidē in re, & in isto homine prædestinato connectitur cū aliis effectibus, & coordinatur cum illis, ita quod ex omnibus sit una integra via, & dispositio hominis ad gloriam, ut ad finem ultimū: ergo cum illis respectibus, & coordinatione producit in re etiam quando primò producit. Patet consequens, quia illa prima gratia, etiam in sui prima collatione, & illa vocatio inefficax de facto producit, cum re-

Ioan. à S. Thoma in 1. part. D. Thoma.

spectu, & coordinatione ad aliquem finem: nam reuera se habent ut media, & ut via ad finem, media autem, & via ab aliquo primo medio, & ab aliquo primo principio viæ incipere debent. In illa ergo prima collatione gratiæ incipit via ad aliquem finem, & primum mediū ad illum, & consequenter quādo primò producit cum respectu, & ordine ad talem finem producit, quia ut initium viæ, & medium ad talem finem producit. Sed in isto homine prædestinato, quando de facto consequitur gloriam, omnes illi effectus, & tota illa gratia à principio usque ad finem habet connexionem actu, & de facto cum tali fine affecto: ergo quando primò conferebatur, iam habebat ordinem ad talem finem ut assequibilem per talia media, & per talē gratiam, quia cum illo fine cum quo connectitur, & coordinatur aliquod medium, & via, tanquā cum fine, quando est affectus, cum eodem coordinatur, & connectitur à principio tanquā cum assequibili, siquidem à principio datur ut initium viæ, & tendentiæ ad illum finem, & ut medium unde incipit, vel quod ad illum conducit, ut postea in ipso effectui patet, quia cū assequitur ipse finis, de facto illa gratia, & illa vocatio inefficax cum tali fine affecto in gloria connectitur, nec hoc negat Vasquez, nec potest negare quod ita sit in re, cum de facto coronetur illa gratia in cælo, & omnia cooperentur ipsi prædestinato in bonum etiam inefficaces vocationes, saltē pro accidentali gaudio: Ergo si ista omnia quando à principio dantur, respiciunt per modum viæ illum eundem finem, quem in re postea assequuntur, & cum quo coronantur, & glorificantur à principio: ergo cū tali ordine, & respectu producantur, & consequenter iam habent quomodo pertineant ad prædestinationem, & sint effectus illius etiam à prima sui collatione, quia iā habent in se coordinationem, & respectum ad gloriam, & ad ultimam perseverantiā, quæ est conditio requisita ut aliquid sit effectus prædestinationis.

Et hinc prob. conclusio à fortiori in nostra sententia, & secundum nostram principia, quia Deus antequā det primā gratiam, & primam vocationē, etiam inefficacē, supponit personam illā cui dat ista dona, esse efficaciter electam: siquidem electio fit ante præuisa merita, ut *suprà* latè probatum est: ergo omnes effectus gratiæ qui ponuntur, & dantur isti personæ, procedunt ex illo fine gloriæ efficaciter intēto, & subiiciuntur illi: ergo respiciunt illum ut causam finalem, & sub respectu ad illum dantur, sed quidquid datur ut respiciens efficaciter gloriam, & ad illam tendens, est effectus prædestinationis, quia effectus prædestinationis sunt media præparata ad gloriam efficaciter: ergo omnia ista quæ ex tali electione efficaciter procedunt, effectus prædestinationis sunt. Patet consequens, quia omnia quæ procedunt ex tali electione efficaciter, & habent illam pro causa finali, ordinantur efficaciter ad illam, & conducunt ad illam: ergo præparantur ad illam, & consequenter sunt effectus prædestinationis, id est præparationis ad gloriam.

Denique prob. eadem sententia quoad utramque partem, non solum supponendo quod procedunt ex efficaci electione ad gloriam tanquā ex fine efficaciter influente; nec solum quia à principio gratia collata; & si interrupta datur ut via, seu initium viæ ad tendendum usque ad ultimam affectionem gloriæ; sed etiam assignando eis aliquid quod in gloria tali gratiæ interruptæ, & tali vocationi inefficaci correspondet: nam si aliquid in gloria datur intuitu illorum, violenta probatio est, quod sint effectus prædestinationis, etiam prout sic dantur, quia eis correspondet aliquis effectus, & præmium in gloria. Quod ergo ita sit probatur:

H h 2 nam

nam quod attinet ad gratiam interruptam, constat quod quando aliquis efficaciter eligitur ad gloriam, eligitur ad determinatum gradum gloriæ, quia efficax providentia ducens ad finem, non ducit ad finem indeterminatè, & in abstracto, sed in singulari, & determinatè. In his autem prædestinatis, qui non sunt innocentes, sed peccant, & resurgunt (inter adultos est sine dubio maior pars) non potest eligi determinatus gradus, nisi componatur ex gradu interrupto, à quo per peccatum deciditur, & ex gradu reparante, quia ex utroque consurgit illa determinata pars gloriæ in cælo reddenda: ergo illa prima pars gratiæ etiam pertinebit ad gloriam prout primò data est, dummodo conditiones generales non desint, scilicet quod decedat in gratia, & non in finali impœnitentia, & determinetur via per mortem, &c. ita tamen quod gradus dandus in gloria non correspondet soli gratiæ reparanti, & ultimæ perseverantiæ, sed etiam primæ gratiæ ut primæ: sic enim ut prima est reparata, quia id reparatur quod prius est datum, unde si ille determinatus gradus gloriæ, ad quem quis prædestinatur, integratus ex primo gradu reparato, & ex secundo reparante, sub utraque ratione est effectus prædestinationis, quatenus uterque est pars unius integri, & determinati gradus dandi in gloria, & quando primò datur, datur per Christum, & in statu ordinabili de facto, & respiciente gloriam pro isto subiecto: ergo non est cur excludatur ab effectus prædestinationis, etiam prout primò collata, dummodo ly *prout primò*, non dicat talem præcisionem quæ sit negatio à secundo statu reparationis, sed potius ordinabilitatem ad illum; quod enim primum est, ad secundum de se ordinatur. Quod verò attinet ad vocationes inefficaces, etiam constat quod licet illis de facto desit consensus, tamen de se sunt beneficia divina, quæ inclinant ad gratiarum actionem, & rursus recogitata excitant ad pœnitentiam, & dolorem de earum amissione, & de non correspondentia ad illas, & in cælo gaudium de illis habetur, tanquam de beneficiis à Deo collatis, & ad ordinem supernaturalem pertinentibus: ergo de se pertinent, & conducunt ad gloriam, & ad prædestinationem tanquam effectus eius. Sufficit autem ut aliquid sit effectus prædestinationis, quod pertineat ad gloriam accidentalem: nam glorificatio corporis, eiusque dotes, & revelationes extra Verbum, prædestinationis effectus sunt, & tamen ad gloriam accidentalem pertinent. Et hac ratione etiam probatur quod gratia interrupta etiam ut primò collata est effectus prædestinationis, quia ut primò collata, & pro illius temporis circumstantia, est beneficium speciale Dei, potestque peculiari modo excitare ad Dei laudem, & amorem, & ad pœnitentiam, considerando quod tali tempore, & in ipso initio, cum nihil boni fecissemus à Deo collata est, quod certè valde suscitavit voluntatem in amorem Dei sic prævenientis nos: ergo etiam prout primò collata conducens est ad gloriam prædestinationis; & sic est effectus illius, quia valde incitat ad continuandum Dei amorem.

Dices: instari hanc rationem multipliciter.

9 Primò, in sententia S. Thom. & plurium Thomistarum, quod peccator resurgens à peccato, non semper resurgit ad totam gratiam quam amisit, sed iuxta præsentem dispositionem aliquando resurgit in minori gratia: ergo aliqua gratia præcedens aliquando ita interruptitur, quod totaliter evacuatur propter tepidam dispositionem resurgentis; & sic illa pars gratiæ quæ non resurgit, totaliter non est effectus prædestinationis.

Secundò instatur, in gratia collata Adamo in

statu innocentiae, quæ prout postea reparata per Christum pertinet ad prædestinationem & pro illa recepit gloriam Adam, & tamen pro illo statu innocentiae non fuit data per Christum, supposita sententia D. Th. quod Christus pro illo statu non veniret, & consequenter pro illo statu non fuit effectus prædestinationis, quia in illo statu nulla prædestinatio facta fuit, quæ solum per Christum facta est, & ante Christum nullus est prædestinatus; & sic ille status non duravit, nec continuatus est cū gloria.

Tertiò instatur, quia in sententia opposita prædestinatio non differt à providentia generali penes efficacem intentionem antecedentem ipsa merita, & collationem gratiæ, sed penes ordinem, & connotationem ad ultimum effectum, qui est perseverantia; & sic quando gratia primò confertur, ex providentia generali confertur, ex adiuncta verò reparatione, & perseverantia redditur ad prædestinationem pertinens; & sic tota ratio quare pertinet ad prædestinationem, est quatenus reparata, & perseverans.

Quartò instatur, quia si solum ponimus illam gratiam ut primò collatam, & vocationem inefficacem esse effectum prædestinationis, quia pertinet ad gaudium accidentale, & potest esse occasio excitandi ad laudem Dei, & pœnitentiam agendi, eadem ratione omnia bona naturalia, & ipsa substantia prædestinati, immò & amissio gratiæ possunt dici effectus prædestinationis, quia possunt esse occasio aut motuum excitandi pœnitentiam, aut dandi laudes Deo, &c.

Ad primam instantiam dicitur, quod D. Thom. absolute non negat gratiam priorem non redire, sed redire, & instaurari iuxta quantitatem dispositionis in pœnitente, ut docet 3. p. q. 89. art. 5. & ad minus semper ei correspondere gaudium accidentale in gloria de operibus prius factis, ut ibi docet ad 3. Et communiter Thomistæ docent reparari etiam quoad gloriam essentialem adveniente ferventiore, & intensiori dispositione, quæ si non datur in hac vita, dabitur in anima separata à corpore, & iuxta quantitatem eius reparabitur tota gratia amissa, aut remissis operibus correspondens. Quare semper salvatur, quod illa gratia non evacuatur simpliciter, sed ad vitam æternam, & gloriam pertinebit, siue essentialem, siue accidentalem; & sic effectus est prædestinationis.

Ad secundam instantiam dicitur esse disparem 10 rationem de gratia pro statu innocentiae; etsi reparanda in statu lapsio, & de gratia modò in isto statu collata, & postea reparanda, quod in statu innocentiae, quantum est ex vi status, neque procedebat ex efficaci intentione dandi gloriam, neque ordinè dicebat ad reparatorem, neque ad reparationem, sed reparatio omnino extrinsecus illi advenit, & ex vi alterius status, quia voluit Deus dare illi statui reparationem, quod omnino extrinsecus illi fuit, & ex alia providentia ortum, quia complacuit Deo reparare in Christo quæ in cælis sunt, & quæ in terra. Unde per se, & in eadem linea, & providentia, ista non connectebantur. At verò gratia quæ modo primò confertur, & postea perditur, etiam pro illo primo statu, & quando primo datur, per Christum est, & ordinabilis ad finem gloriæ, ut efficaciter assequendum per se loquendo, & in vi huius status in quo datur, line hoc quod alium statum expectet in quo ordinetur ad consecutionem efficacem gloriæ, quia hic status in quo datur est efficaciter ductivus ad gloriam, licet intra hunc statum expectet conditiones aliquas generales, & requisitas ad omnem effectum prædestinationis, videlicet quod interveniat mors ipsius hominis, quod habeat finalem perseverantiam,

rantiam, & similia, sine quibus nullus effectus potest prædestinationis effectus esse. Quare non est tota ratio effectus prædestinationis, si ly *ut*, dicat adequatam rationem effectus prædestinationis, bene tamen si ly *ut*, dicat conditionem requisitam, sine qua non erit effectus prædestinationis, sicut sine morte nullus effectus perveniet ad finem prædestinationis, nec ad gloriam pertinebit, & tamen non sola mors est effectus prædestinationis. Et similiter non sola perseverantia finalis est prædestinationis effectus, licet sine illa nullus effectus perveniet ad prædestinationem.

Ad tertiam instantiam Respond. nullo modo dici posse quod gratia, ut primò collata pertineat ad solam providentiam generalem in prædestinatione, pari enim ratione continuatio gratiæ, & augmentum in illa, & reparatio à lapsu non pertinebunt ad prædestinationem, sed ad providentiam generalem, quia omnia illa possunt inveniri in reprobo usque ad finalem perseverantiam, quæ sola est propria prædestinatorum; & sic sola finalis perseverantia dicitur effectus prædestinationis. Quod tamen falsissimum est, quia non sola finalis perseverantia constituit viam, & meritum gloriæ, sed etiam alia antecedentia opera meritoria, perseverantia autem solum consummat, & terminat viam, non totam constituit. Si ergo ante perseverantiam finalem dantur merita, datur via, dantur effectus conducentes ad gloriam per se, & ex sua formali ratione, licet dependeat à perseverantia ut à conditione: ergo ea quæ antecedunt finalem perseverantiam, & pertinent ad ordinem gratiæ, effectus sunt prædestinationis, utpote ad gloriam efficaciter ordinata, & postea in alia vita premiata; quidquid sit an electio efficax antecedit prævisionem meritorum, vel non.

Ad quartam instantiam Respond. quod ea quæ naturalis ordinis sunt, non pertinent ad effectus prædestinationis formaliter, & proximè, seu elicitive, sed remotè, & imperatiue, ut postea dicemus, quia non se habent ut media per se, & ab intrinseco conducentia ad gloriam; quod multò magis currit in ipsa substantia prædestinati, quæ se habet ut subiectum, non ut medium ad prædestinationem, de quo postea dicemus: aliqui enim etiam concedunt esse effectum prædestinationis. Quæcumque ergo se habent ut media aliquo modo conducentia ad gloriam, sub ea ratione qua conducunt, effectus prædestinationis sunt; sed quædam conducunt per se, & formaliter, scilicet ea quæ sunt ordinis gratiæ: & sic elicitive pertinent ad prædestinationem, & proximè, seu immediate, alia per accidens, seu per aliud, & remotè, solumque imperatiue; & sic se habent res naturalis ordinis.

Ex dictis manent soluta fundamenta Vasquez. 11 Præcipuum fundamentum est, quia gratia ut primò collata & præscindens adhuc à perseverantia, & similiter inefficaces vocationes sunt effectus communes reprobis & prædestinatis: ergo non sunt effectus proprii prædestinationis. Consequenter est evidens: & antecedens constat quia multæ vocationes dantur reprobis quæ effectui carent, & inefficaces sunt, & similiter sæpè datur gratia quam amittunt & interrumpunt: ergo propterea sic, illi effectus sunt communes reprobis & prædestinatis.

Conf. hoc exemplis adductis in superioribus instantiis. Et præsertim hoc urget, quia gratia amissa si reparatur non redit eadem numero, sed alia distincta: ergo illa prior nunquam est effectus

Ioan. à S. Thoma in 1. part. D. Thoma.

etius prædestinationis, sed prorsus evacuatur, & alia subrogatur numero distincta pro illa. Quæ autem evacuatur, omnino prædestinationis effectus esse non potest; & gratia quæ reuiuiscit, non semper tota restituitur post poenitentiam, nisi iuxta dispositionem præsentem, ut docet S. Th. 3. p. quæst. 89. art. 2. & 5. ad 3. & in 3. dist. 31. q. 1. art. 4. ergo aliqua pars gratiæ interruptæ nullo modo reparatur; & sic non pertinet ad prædestinationem; quæ autem pertinet, solum ut reparata pertinet, non autem in se.

Secundum fundamentum est circa vocationes inefficaces, quia istæ per se non conducunt ad effectum prædestinationis, siquidem inefficaces sunt, & fructu carent. Si verò aliquem fructum habent, id totum est per accidens, & mediante alio, scilicet mediante memoria, qua recolit se se non bene usum esse illis inspirationibus; & sic dolet, & poenitet, vel humiliatur, &c. Hæc autem recordatio est ex inspiratione efficaci; & sic vocatio illa prior, ut inefficax, non est effectus prædestinationis: præterquam quod hac ratione etiam ipsum peccatum, & resistentia, quæ sit gratiæ diuinæ, potest dici effectus prædestinationis, quia reuocata in memoriam possunt esse causa vel occasio humilitatis, doloris, & poenitiæ. Et deinde quia effectus prædestinationis non possunt oriri ex ipsa, nisi oriantur etiam ex intentione efficaci dandi gloriam, ex qua oritur preparatio mediæ, quæ dicitur prædestinationis. Ex efficaci autem voluntate alicuius finis non oriuntur inefficaces vocationes, quia imprudenter aliquis intendens efficaciter unum finem, eligeret inefficacia media, cum in manu eius sit efficacia ponere, superfluum enim videtur inefficacia adhibere. Denique suffragatur Augustinus, qui in lib. de prædestin. SS. cap. 16. dicit: *Vocat Deus prædestinatos multos filios suos, sed non ea vocatione, qua vocati sunt, qui noluerunt venire ad nuptias.* Et infra: *Sciens esse quandam certam vocationem eorum qui secundum propositum vocati sunt, quos præscivit & prædestinavit, &c.* Vocatio autem inefficax non est secundum propositum, sed sicut eorum qui noluerunt venire ad nuptias.

Hæc fundamenta ex dictis soluta sunt.

Ad primum enim dicitur, quod isti effectus sunt communes reprobis, & prædestinatis si considerentur secundum suam substantiam præcisè, & absolute, non autem si considerentur sub aliquo respectu, & ordine, quo à Deo dantur, & diriguntur ad finem prædestinationis, & ut possunt ad gloriam conducere: nam etiam ipsa auxilia efficacia, & iustificatio & bona etiam naturalia, & ut vno verbo dicamus, omnia alia præter ultimam perseverantiā & glorificationem, si secundum se considerentur, & quantum ad suam substantiam, possunt esse communes reprobis & prædestinatis; & tamen non sola perseverantia & glorificatio sunt effectus prædestinationis, sed etiam alia media, quibus in hac vita, & in hac via perducimur ad illam perseverantiā & glorificationem: hæc enim quatenus coordinata, & continuata, & respectivè se habentia ad ultimam perseverantiā effectus sunt prædestinationis, licet non sub præcisione suæ substantiæ, & ut absoluta ab omni isto respectu. Similiter etiam quatenus possunt conducere ad gaudiū accidentale in cælo, & quatenus ex illis sumi potest occasio humilitatis, poenitiæ, aut excitationis ad particulare Dei laudem & amorem secundum quod in memoriam reuocantur, & ad istos effectus conducunt. Nec solum hoc habent ut reparata, si ly *ut* dicat

H h 3

rationem

rationem formalem : secundum se enim conducunt ad gloriam, & beneficium Dei sunt, bene tamen si ly *ut* dicat conditionem necessariam, quia sine isto respectu ad perseverantiam, ad reparationem, ad reuocationem in memoriam non conducunt.

12 Ad exempla allata iam respondimus *in instantiis adductis*. Ad illud quod dicitur non esse eandem numero gratiam quæ reparatur, & quæ ante erat, Resp. non esse eandem physicè, & entitatiuè, bene tamen moraliter, & æquialenter, & in ordine ad eandem numero gloriam, quæ datur propter illum gradum gratiæ, quæ antea erat, & modò reparatur: licet enim amissa gratia, postea succedat alia entitatiuè distincta, eandem tamè gloriam respicit; & sic censetur eadem numero gratia formaliter, licet materialiter vna entitas succedat alij, sicut est idem locus numero propter eandem correspondentiam ad eandem distantiam, & polos, vel puncta fixa, licet superficies materialiter diuersæ transeant, & varientur in eodem vbi, seu distantia. Ad illud verò de reuiuiscencia meritorum & gratia in minori gradu, quam fuerat à principio, iam respondimus, quomodo gratia reuiuiscit, iuxta dispositionem, quam aliquis habet: vel in hac vita, vel in futura, secundum varias opiniones, vel ad minus valet quoad gaudium accidentale, si non reuiuiscat aliqua quoad essentialia præmium, & sic tandem ad vitam æternam & cæleste præmium potest conducere, quod sufficit ut sit effectus prædestinationis. Et cum dicitur quod solum prodest in quantum reparata, iam sæpè diximus quod in hoc verbo latet æquiocatio, quia ly *ut*, potest reduplicare vel conditionem requisitam, vel rationem formalem: sicut enim cum dicimus quod ignis non calefacit, nisi ut applicatus, & quod non calefacit nisi ut calidus, in primo reduplicatur conditio, & in secundo ratio formalis, ita gratia, quæ primò collata est, si amittitur, non valet nisi ut reparata, neque absolute valet, nisi ut finaliter perseverans, non tamen ita quod totus valor, & ratio formalis ad gloriam sit ipsa perseverantia aut reparatio, cum etiam pro gradu illo, & primò collato corresponsdeat suus gradus in gloria, & non pro sola reparatione aut perseverantia, sed tamen ille primus gradus indiget reparatione & perseverantia ut conditione sine qua non consequetur ille valor efficaciter gloriam. Et similiter vocatio inefficax in se habet unde sit beneficium Dei gratuitum & supernaturale, quod possit excitare ad Dei laudem, & amorem, vel ad humilitatem & dolorem pro eius frustratione, sed tamen nisi in memoriam reuocetur, nihil de facto operabitur tanquam propter conditionem requisitam.

13 Ad secundum fundamentum patet ex dictis, quomodo vocatio inefficax per se, & ratione sui conducit tanquam ex motiuo, & ratione formali excitatiua ad bonum, per accidens autem & ratione alterius tanquam ex conditione requisita ut in memoriam reuocetur, & sic applicetur ad mouendum, quæ quidem recordatio est ex inspiratione efficaci in ordine ad reuocandum in memoriam vocationem illam inefficacem, sed motiuum & formalis ratio excitatiua doloris aut humilitatis, vel laudis Dei, non est ipse actus recordationis, sed res illa quæ in memoriam recordatur, seu ipsa vocatio inefficax: & quoad hoc illud auxilium efficax reuocatiuum in memoriam se habet ut conditio respectu motiui quod est ipsa res vocata, scilicet vocatio inefficax. Quod si in hac vita non recorderetur illius vocationis inefficacis in particulari, saltè poterit recordari omnium in communi, vel saltem

in alia vita recordabitur, ut inde excitetur ad laudem Dei & gaudium accidentale. Et cum dicitur quod hoc modo etiam peccatum in memoriam reuocatum poterit operari ad salutem, & ad poenitentiam, distinguo, per se ut beneficium collatum à Deo, & tendens ad gloriam, nego: per accidens ut materia detestanda & relinquenda, transeat; sed tunc non operatur & conducit ad gloriam ipsum peccatum, sed detestatio eius, vel permissio, ut *infra* dicitur *art. ultimo*. Ad aliam probationem, quod inefficaces vocationes non possunt procedere ex intentione efficaci dandi gloriam. Resp. quod inefficaces vocationes quatenus inefficaces sunt respectu proprii & immediati effectus quo frustrantur, non procedunt ex efficaci intentione dandi gloriam: sub illa enim formalitate potius ei repugnant; quatenus verò ordinantur extrinsecè ad alium finem, seu ad alios effectus, etiam ad prædestinationem pertinentes, sic possunt & sunt effectus prædestinationis: nec superflue, sed valde prudenter intendens efficaciter aliquem finem erogat aliqua media frustrabilia suo effectu, ut sub alia formalitate extrinseca ordinentur ad finem illum, licet ab intrinseco, suo proprio & debito effectu frustrantur, id enim conuenit ut homini ostendatur infirmitas sua, contingentia, inconstantia, ingratitude, &c. & ut sic magis ad interiora reformetur & trahatur.

Ad loca August. Resp. docere in illis Aug. quod prædestinati, prout sic, & formaliter loquendo non vocantur vocatione inefficaci sistendo ibi, quasi illa sit propria prædestinatorum, sed vocantur vocatione efficaci, & secundum propositum per se loquendo. Si autem aliqua inefficax vocatio illis detur, illa etiam ut ordinata ad aliquam efficacem potest esse effectus prædestinationis, & sic illa vocatio inefficax etiam est secundum propositum, non quidem ex suo intrinseco, & ut respiciens proprium effectum, quo caret, sed ut ad aliquem extrinsecum effectum ordinata, qua ordinatione tanquam conditione requisita posita, de se dat motuum sortiendi effectum, ut explicatum est.

ARTICVLVS IV.

*An bonus usus liberi arbitrij, ut tenet
se ex parte nostra, sit effectus
prædestinationis?*

Multa sunt in mediis quibus prædestinatio nostra disponitur, quæ à solo Deo fiunt, ut prima vocatio, infusio habitualis gratiæ, collatio gloriæ; alia quæ nobis etiam influentibus, & cooperantibus fiunt, ut sunt opera omnia bona, & meritorij actus, & consensus liber, qui Deo vocanti adhibetur. De primo genere mediorum non est dubium à prædestinatione diuina procedere, cum à solo Deo supernaturaliter, & specialiter operante fiant. De secundo, etiam pro ea parte quæ à Deo supernaturaliter influente illa opera procedunt, constat à prædestinatione diuina esse. Sed difficultas est pro ea parte quæ à nostro libero arbitrio exeunt, an etiam prout sic dependant à Dei prædestinatione, ita ut effectus eius esse possint. Nec est dubium aut controuersia vlla de ipsa ratione formali agendi ex parte ipsorum agentium, quia cum creatura, & Deus in eodem effectu, seu actione sub diuerso modo, & sub diuersa ratione formali procedant, non potest esse aliqua difficultas, quod prout est à creatura, non sit à Deo

à Deo, quantū est ex parte rationis formalis, id est, quod ratio formalis qua agit creatura, non sit ratio formalis qua agit, & influit Deus; sed difficultas est an ipse influxus, & actio qua procedit à creatura, licet sub distincta ratione formali procedat, sit tamen effectus Dei, & procedat ab ipso Deo ut à causa superiori, & consequenter sub alia ratione formali, quia sub ratione superiori, & distincta. Itaque quod inquirimus est, an id quod procedit à creatura sub ratione formali creata, & sibi propria, sit effectus Dei ut prædestinantis sub ratione formali increta, atque adeo diuersa à formali ratione agendi creata procedentis.

2 Et aduertendum est quodd quando inquirimus, an iste bonus vsus, ut tenet se ex parte liberi arbitrij nostri, & sub ratione formali creata procedit, sit effectus prædestinationis Dei, non est necesse distinguere de concursu concomitante, vel antecedente, indifferenti, vel determinato, physico, vel morali, &c. Supponimus omnes istas distinctiones ex parte diuinæ operationis, & influentiæ, sicut etiam supponimus ex parte nostri liberi arbitrij influentiam physicam in opus supernaturale, licet procedat ab illo ut eleuato, ita quod ly *ut* non dicat partialitatem virtutis, sed totalitatem rationis formalis influendi in supernaturalem actum, ut latè expendimus, & tractauimus *præced. tomo, disp. 14*. Sufficit ergo pro præsentī difficultate expendere an ille bonus vsus sub ea ratione, qua est à nobis, sit à prouidentia Dei præparatus ea præparatione, & modo, quo res à Deo prouisa procedunt ab eius prouidentia, scilicet sic præparando, & ex fine operando, quod etiam causet ut efficiens: nihil enim Deus prouidet, quod non causet.

3 In hac ergo parte notissima est sententia P. Molinæ *hic q. 23. art. 5. disp. 1. membro 10*. ubi et si actibus supernaturalibus tribuat quodd sint effectus præstinationis, non tamen quatenus à libero arbitrio sunt: hoc enim apud Molinam per innatam suam virtutem influit proximè in actum supernaturalem: imò iuxta ipsius explicationem in *Concordia q. 14. disp. 37*. Deus solum influit in hos actus vniuersali concursu indifferenti ad hoc, vel illud, v.g. ad credendum, vel discredendum, assentiendum vel dissentendum; ex nostra autem voluntate determinatur ille concursus tanquam à causa particulari, ut sit potius actus credendi, quam non credendi, & ex præueniente Dei gratia, & simul influente cum libero arbitrio habere actum illum quod sit supernaturalis. In quam sententiam non videntur posse non ire qui sentiunt gratiam reddi efficacem vel inefficacem ex consensu nostro præuiso, non ex efficaci decreto, seu voluntate Dei; atque adeo ex natura sua, quæ in diuinæ voluntatis influentia, seu ministerio ipsi deseruienti consistit.

Sensum hunc Molinæ satis ex se patentem non tam explicare quam complicare nobis aliqui volunt, ut P. Alarcon *hic tract. 4. disp. 4. c. 6*. qui fateatur quidem aliquando Molinam docuisse actiones liberi arbitrij supernaturales, quatenus sunt à libero arbitrio, non esse effectus prædestinationis, sed sensum eius esse loqui formaliter reduplicatiuè, quia procedere à libero arbitrio formaliter non est procedere à prædestinatione, quod verum est, quia licet sit eadem actio, quæ procedit ab arbitrio, & à gratia, est tamè diuersum connotatum, & ab utroque procedit sub diuersa ratione formali, licet sit idem effectus. Sed si iste est Molinæ sensus, leuissimè in tam seria quæstione loquitur, & difficultatem eius non soluit, sed eludit. Nec enim apud aliquam mentem est difficultas, quodd actus proce-

dens à Deo, & à libero arbitrio, non eadem ratione procedat à Deo, & libero arbitrio creato, cum ab illo procedat sub ratione causæ vniuersalissimæ, & supremæ, & modo vniuersalissimo operante, ab isto verò, ut à causa creata, & particulari. Quis enim dubitare potest, quodd quando concurrat ad vnum effectum Deus, & causa creata, causa superior, & inferior, alio modo, & sub alia ratione concurrat causa suprema seu superior, quàm inferior, & quodd modus procedendi vnius, & alterius ex parte agentis, seu modi agendi non est vnus, & idem? Sed difficultas est, an iste modus agendi, & influxus causæ inferioris ita subordinetur causæ superiori, ut effectus illius sit, & ab eius speciali prouidentia, & supernaturali concursu, seu gratia deriuatus; licet etiam concomitanter cum illo ad suum effectum, & terminum concurrat Deus, & influat.

4 Communis ergo sententia contra Molinam tenet bonum vsus liberi arbitrij etiam prout ipsi libero arbitrio, & modo eius causandi correspondet, esse effectum prædestinationis, quia est à gratia, & ex speciali beneficio Dei, non solum quodd vocetur homo, sed quodd respondeat, & consentiat, hic, & nunc. Sed quia solum datur duplex influxus & efficientia Dei, scilicet simultaneus cum ipsa causa creata in effectum, & antecedens qui moueat, & applicet ipsam causam ad operandum, ratione primi influxus præcisè, non potest dici quodd bonus vsus, & efficientia, seu influxus liberi arbitrij sit effectus gratiæ, & prædestinationis, quia concursus concomitans non est causa concursus simultanei à nobis procedentis, eo quod non antecedit ut causa, neque influit in illum, sed cum illo influit in effectum; alias si esset causa illius, non concomitaretur, sed antecederet illum in quantum causa. Restat ergo quodd si iste influxus, & bonus vsus liberi arbitrij est effectus prædestinationis, & gratiæ Dei, hoc verificetur ratione alicuius gratiæ præuenientis. Et tunc est duplex opinio secundum diuersos modos sentiendi de gratia præueniente: quidam enim dicunt nostrum consensum, & bonum vsus esse effectum gratiæ, & prædestinationis ratione moralis allicientis, & influxus, secundum quod per gratiam excitantem mouetur voluntas, in vitando, excitando, vires etiam præbendo, & adiuuando. Alij dicunt quodd etiam physicè in voluntatem influendo, & determinando. Primam viam sequuntur qui ponunt efficaciam diuinæ voluntatis, & gratiæ à nostro consensu desumi; & sic intelligi quodd bonus vsus nostri arbitrij sit effectus prædestinationis docet cum aliis suæ sententiæ Alarcon *ubi supra*. Secundā, qui ex ipsa natura decreti, & gratiæ, quæ ex tali voluntate deriuatur, desumunt efficaciam, & consensum ipsum talis efficacis faciunt effectum. In his ergo diuisionibus opinionum nunc non oportet immorari: nos enim vtrumque modum causandi nostrum consensum, & vsus ut à libelo arbitrio est, Deo concedimus, scilicet moralem per excitationem in bonis actibus, & effectuum per adiuuantem gratiam, & deinde simultaneum, qui non causat consensum, aut præparat cor, nec ex nolente facit volentem, sed cum volente, & præparato, & iam influente simul concurrat, & confluit. In quantum ergo influxus nostri arbitrij pendet ex gratia præueniente, & adiuuante, dicitur esse effectus prædestinationis, sicut est gratiæ: prædestinatio enim, gratiæ est præparatio.

Quod ergo vsus nostri liberi arbitrij in actibus supernaturalibus etiam ut ex nostro procedit arbitrio sit effectus prædestinationis, docet S. Thom. in *hac q. 23. art. 5. in corp.* ubi reprobatur aliquorum positionem, qui distinguebant inter id quod est ex

gratia, & ex libero arbitrio, quasi non possit idem esse ex utroque, & ita concludit quod bonus usus liberi arbitrii est ex prædestinatione. Et 9.7. de verit. art. 2. ad 1. docet quod, *Hoc ipsum quod est velle accipere gratiam, est in nobis ex prædestinatione.* Et super epist. ad Heb. c. 12. lect. 3. circa illa verba, *Contemplantur ne quis desit gratia Dei*, inquit, quod hoc ipsum quod est non ponere obstaculum gratiæ, ex gratia procedit. Vnde si aliquis ponat, & tamen moueatur cor eius ad remouendum illud, hoc est ex dono gratiæ Dei vocantis per misericordiam suam. Sentit ergo aperte D. Thom. quod quidquid ex parte liberi arbitrii se tenet, etiam ipsum non ponere obstaculum, & ipsum velle recipere gratiam, est effectus gratiæ, & prædestinationis. Concordat Aug. multis in locis. Videri potest lib. de prædestinat. SS. c. 8. ubi inquit: *Hæc gratia qua occultè humanis cordibus diuina largitate tribuitur, à nullo duro corde respuitur; ideo quippe tribuitur, ut cordis duritia primis auferatur.* Ipsum ergo non respuere, seu non resistere, & ipsum admittere gratiam, effectus est gratiæ, atque adeo prædestinationis: hoc autem est id quod se tenet ex parte liberi arbitrii, scilicet consentire, non respuere, non resistere. Denique fieri ex nolente volentem, maxime pertinet ad bonum usum liberi arbitrii, & tamen hoc ipsum docet August. esse effectum gratiæ, & operationis diuinæ, inquit enim lib. 1. contra duas epistolas Pelagian. cap. 19. in fine. *Trahitur miris modis ab illo qui nouit intus in ipsis cordibus hominum operari, non ut homines, quod fieri non potest, nolentes credant, sed ut volentes ex nolentibus fiant.* Vnde deducitur argumentum, quod in D. August. negari non potest: Bonus usus liberi arbitrii, & consensus ipse ad gratiam Dei non potest procedere ex libero arbitrio ut nolente: sic enim non consentiret, sed dissentiret: fit ergo ex libero arbitrio ut volente, sed fieri volentem ex nolente est effectus gratiæ, & operationis diuinæ intus in corde operantis, ut dicit August. ergo est effectus prædestinationis, idem enim est effectum esse gratiæ, atque effectum esse prædestinationis. Et sic in lib. 1. Retract. c. 9. circa finem, concludit August. *Quia omnia bona sicut dictum est, & magna, & media, & infima ex Deo sunt, sequitur ut ex Deo sit & bonus usus libera voluntatis, qua virtus est, & in magnis muneratur bonis.* Sæpe etiam August. docet non ita tribui Deo operationes nostras, ut pars debeat tribui Deo, & pars nobis, sed totum Deo, quia, ut dicebat Cyprianus; *In nullo gloriandum, quando nostrum nihil sit.* Videatur August. lib. de prædestin. SS. c. 2. & in aliis capitibus seqq. Videatur S. Hieronymus lib. 1. Dialogi contra Pelagianos: *Velle, inquit, & credere meum est, sed ipsum meum sine Dei auxilio non est meum.* S. Bernardus lib. de gratia, & libero arbitrio: *Ut simul, non vicissim per singulos profectus operentur, non partim gratia, partim liberum arbitrium, sed totum singula opere indiuiduo peragant, totum quidem hoc, & totum illa, sed ut totum in illo, sicut totum ex illa.* Igitur ipse bonus usus liberi arbitrii, etiam quatenus meus, est ex gratia, non partim à me, partim à gratia, ita quod pro ea parte, qua est à me, non sit effectus gratiæ, seu prædestinationis; alioquin non diceretur esse solius Dei miserentis, sed etiam hominis volentis: sicut enim argumentatur August. in Enchiridio c. 32. *Si ideo non est hominis volentis, quia sola hominis voluntas non potest, nisi etiam adsit misericordia Dei; ergo etiam non erit miserentis Dei, quia sola misericordia Dei non operatur sine voluntate nostra.* Quod si nullus dicere audebit non miserentis est Dei, sed volentis est hominis, restat ut propterea dictum intelligatur, non volentis est hominis, sed miserentis Dei, ut totum Deo detur.

Fundamentum huius sententiæ potest sumi vel specialiter pro hac materia prædestinationis, vel generaliter pro quocumque usu nostræ voluntatis cum gratia Dei, vel etiam generalius pro quocumque usu, & cooperatione causæ creatæ cum concursu Dei etiam ordinis naturalis.

Primum fundamentum explicatur sic, quia ille bonus usus liberi arbitrii etiam pro ut à nobis est, conducit ad salutem, & præmiabitur in gloria: ergo est aliquid prouisum efficaciter, & de facto à Deo in ordine ad effectum salutis: ergo est effectus prædestinationis. Hæc vltima consequens est manifesta, cum idem sit esse prouisum aliquid à speciali prouidentia suæ prædestinationis, & esse effectum illius, esse enim prouisum, & prædestinatum, est esse effectum prouidentia. Prima verò consequens etiam est constans: quidquid enim ad salutem, & ad gloriam æternam efficaciter conducit, efficaciter prouisum est pro illo fine, & sic effectus est prouidentia illius efficacis, & specialis pro vita æterna, quæ prædestinatio est. Antec. autem manifestum est, quia opera supernaturalia, & meritoria esse libera, & voluntaria maxime conducit ad hoc ut meritoria sint, cum sit conditio essentialiter requisita ad meritum, quod sit liberum, & voluntarium opus. Est autem liberum, & voluntarium in quantum est à voluntate nostra: ergo bonus usus voluntatis, ut à nostra voluntate est, conducit ad rationem meriti, & consequenter ad rationem salutis: Ergo qui prouidet dari merita pro vita æterna, prouidere debet, ut actus illi sint liberi. Eodem etiam modo præmiabitur illud opus bonum in quantum voluntarium, & laboriosum, & liberum, quia licet valor meriti sit ex gratia, tamen esse humanum, & liberum attenditur in ratione præmiandi, quia si sine his conditionibus non habetur meritum: ergo si istas condiciones habeat, attendentur in præmio; & sic ille bonus usus, quatenus à nostro libero arbitrio est, in præmio æternæ gloriæ attendetur, & ab illo præmio præmiabitur: ergo illa omnia respiciunt æternam gloriam efficaciter, & ad illam ordinantur, licet non nisi adiuta à gratia: ergo sunt effectus prædestinationis, quæ sola est prouidentia ad gloriam efficaciter dirigens, & deducens.

Secundum fundamentum, quod est generale, fumitur ex variis principiis, quæ supra disp. 5. & præcedenti tomo disp. 15. tractata sunt. Nam ostendimus præced. tomo quod in actibus supernaturalibus qui à nostris potentiis procedunt, tota ratio agendi est ipsa virtus supernaturalis eleuans, non quia sola virtus supernaturalis agat, sed quia ipsa naturalis potentia, quæ elicit actum, non nisi sub illa formali ratione eliciat, quia non nisi ut eleuata operatur. Hoc principium latè ibi tractauimus, & defendimus. Ex illo verò inferimus sic pro præsentis sententiæ: Ergo bonus usus, & conatus, seu cooperatio potentiæ nostræ non egreditur ab illa, nisi in quantum habet pro ratione formali talis conatus, & cooperationis ipsam gratiam, siquidem tota virtus, & ratio formalis agendi, etiam in ipso conatu, & bono usu potentiæ est ex gratia: ergo talis conatus est effectus ipsius dantis, & causantis gratiam, quia ab ipso, ut à causa, habet totam rationem formalem agendi, & conandi, & cooperandi in actibus supernaturalibus, & ex subiectione ad talem eleuationem operatur. Alterum principium tractauimus, & expendimus supra disp. 5. ubi ostendimus concursum & conatum nostrum, etiam pro ut egreditur à nostra potetia subordinari Deo, & ab ipso ut à causa esse, quia etiam pro ut sic est aliqua entitas, & egreditur à potentia nostra ut entitas quædam: ergo ut creatura: ergo ut causata à Creatore,

creatore, & effectus providentiæ eius. Sed bonus usus, & conatus in actibus supernaturalibus non est effectus solius providentiæ naturalis, & communis, siquidem est cooperatio efficax ad actus supernaturales, & cum ordine ad gloriam: ergo est effectus providentiæ supernaturalis specialis, & efficacis, quæ est prædestinatio. Quod enim talis conatus, & bonus usus ad supernaturalia, & ad ipsam gloriam ordinatur, & conducatur, negari non potest, cum sit ipsa processio, & emanatio actus supernaturalis à potentia nostra; quis autem dubitet quod emanatio, & processio actus supernaturalis à sua potentia conducatur ad ipsum supernaturalem actum? ergo & ad ipsam gloriam ad quam assequendam ipsa emanatio actus dirigitur, & hoc efficaciter, quia de facto eam assequitur, eique continuatur. Nec Deus præbet alium influxum ad elicentiam illius actus, ut à nobis est, quam influxum supernaturalem, nec alio modo ad illum movet, quam motione supernaturali: non enim intelligi potest quod ad illum actum, quatenus à nobis est, influat, & moveatur motione naturali, & quatenus supernaturalis, supernaturali, sed unico tantum influxu, & motione movet, eaque supernaturali, alias non posset supernaturalitatem ei impartiri, si supernaturalis non esset: ergo ille conatus, & cooperatio ut est à potentia libera, etiam est effectus gratiæ, & causatus à supernaturali influxu; non solum quia in ipso actu, seu opere, & effectu non relucet aliquid quod sit tantum à nostra potentia, & aliud quod sit à Deo, quasi partim ab uno, partim ab alio, cum totum quod entitas est in creatura sit à Deo, sed etiam quia in ipsa causa creata, ut causa est talis actus, datur subordinatio, & subiectio ad Deum, ut ad causam supernaturalem, eo quod iste actus etiam ut voluntarius, & à nobis efficaciter ad gloriam ordinatur, & ad eam conducit: ergo est effectus providentiæ specialis, quæ est prædestinatio. Principium autem hoc sic propositum, quod actus noster, & consensus etiam secundum quod exit à nobis subordinetur, & causetur à Deo, latè tractavimus *disp. 5. citata*.

Solvuntur argumenta.

8 Primò arguitur in favorem sententiæ Molinæ, illis argumentis quibus probari solet supernaturalem virtutem non esse totam rationem agendi in actu nostro supernaturali libero: illis enim videtur probari aliquid esse in actu libero, quod non sit à gratia, si gratia non est tota ratio agendi: ergo illud aliquid quod non est à gratia, propterea sic, & sub illa formalitate, non est à prædestinatione, nec effectus eius. Consequenter videtur certa, quia idem est aliquid esse effectum prædestinationis, & esse effectum gratiæ, cum prædestinatio sit gratiæ præparatio, & specialis providentia supernaturalium effectuum; id autem quod naturale est, & à naturali causa, non est effectus prædestinationis, nisi ad summum per accidens, & imperativè, non elicitive; & sic actus liber, seu bonus usus liberi arbitrii in actibus supernaturalibus non erit per se, & directè effectus prædestinationis. Anteced. verò, nempe quod gratia seu supernaturalis virtus non sit tota ratio agendi actum supernaturalem liberum, in primis est valde probabile, & consequenter sub eadem linea probabilitatis manebit sententia Molinæ, quod bonus usus liberi actus, & operis meritorij, ut est à libero arbitrio, non sit effectus prædestinationis. Deinde, quia gratia, & virtus qualibet supernaturalis est principium extrinsecum, & ab extrinseco proveniens, scilicet à Deo infundente, & est forma ne-

cessariò informans, & influens cum libero arbitrio, cum non sit forma indifferens, sed determinata ad supernaturalitatem: Ergo id quod in actu meritorio, & bono usu liberi arbitrii vitalitatis, & libertatis, seu contingentie est, non potest reduci in gratiam tanquam in propriam, & per se rationem illius, sed reduci debet in principium intrinsecum, quod est ipsa potentia voluntatis secundum innatam, & propriam virtutem, quia solum secundum hanc est principium intrinsecum vitalitatis, & indifferentie, seu libertatis ad utrumlibet: ergo utraque virtus, scilicet innata, & infusa influit, & non altera tantum, scilicet infusa: ergo illa non est tota, & adæquata ratio agendi.

Nec dici potest quod influit quidem utraque virtus, sed innata, non ut præbens rationem agendi, sed ut recipiens, ut eleuata, & subordinata virtuti infusæ, & supernaturali, quæ est virtus eleuans. Nam contra hoc instatur, & simul confirmatur ratio facta ex differentia, quæ est inter potentiam liberam seu vitalem operantem ex dono gratiæ sibi superadiecto, & infusa ab extra, & aquam v.g. vel ferrum calefacientem ex calore sibi ab extra proveniente. Nam res inanimatis, quia se habet ut purè recipiens formam operativam sibi advenientem, & non supponit in se aliquam innatam virtutem activam, quæ etiam influat in effectum, dicitur habere totam rationem agendi à forma sibi superadiecta, v.g. à calore, quia nullam operativam à se habet, sed solum receptivam. At verò voluntas vel intellectus ita eleuantur à virtute supernaturali, & dono gratiæ, quod supponunt in se virtutem innatam operativam, & non purè receptivam, ratione cuius etiam influunt tali modo, scilicet vitaliter, & liberè. Ergo non potest tota ratio agendi in ipsis esse virtus eleuans, sed etiam virtus innata, & eleuabilis, quia hæc etiam in quantum naturalis, seu innata supponitur ut operativa, seu influens, & nisi esset activa seu operativa, non esset eleuabilis: ergo repugnat quod tota ratio agendi in istis sit supernaturalis virtus, & donum gratiæ, quia id quod supponitur virtuti eleuanti, activum etiam est; in rebus autem inanimatis, non supponitur innata virtus activa, sed tota virtus activa est ab extra, & solum ex parte sui est receptiva capacitas, non virtus agens.

Respon. ad hæc, & ad alia similia argumenta, quæ in hac parte multiplicantur, sed fere ad ista, omnia reducuntur, nos latè respondisse *præced. tomo disp. 14. agentes de lumine gloriæ*, quomodo sit tota ratio agendi in visione Dei. Brevisiter dicimus duo.

9 Primum est quod in opinione dicente quod virtus gratiæ non est tota ratio agendi in actibus supernaturalibus adhuc bonus usus, & influxus liberi arbitrii, ut à libero arbitrio est, debet dici effectus prædestinationis, non præcisè secundum suam substantiam sumptus, sed ut conducens ad actum supernaturalem, quia sine tali influxu, & conatu liberi arbitrii, actus ille non erit. Prædestinatio autem non solum est præparatio gratiæ secundum se, & in abstracto, sed etiam eorum quæ ad gratiam conducunt, eique subordinantur, & ministrant, licet mediata, & imperativè, sed non per accidens; aut materialiter, sed per se, & directè, quia ille conatus liberi arbitrii in bono actu non est per accidens, sed per se requisitus, ut talis actus sit, quia liber, & vitalis est. Vnde etiam concessa illa opinione de partialitate influxus, ex parte nostræ libertatis, & virtutis innatæ, & ex parte gratiæ, adhuc manet integrum quod ille bonus usus, & conatus noster sit effectus prædestinationis per se, & directè, licet

licet mediata, quatenus per se conducit ad talem actum supernaturalem, & gratuitum, quia sine tali conatu, per se talis actus non est, perfectate intrinseca, & per se requisita, etiam quarto modo, quia actus ille per se est liber, & vitalis, & in quarto modo per se est à causa libera, & vitali. Vnde per se subordinatur prædestinationi talis actus, non sicut alia res naturales, sine quibus aequè bene potest prædestinatio fieri, ut sine tali ingenio, tali ætate, vitæ breuitate, aut longitudine, tali morte, &c. & tamen etiam hæc quando fiunt, ex prædestinatione fiunt: nam & capillus de capite vestro non peribit, dicebat Christus ad discipulos suos, qui prædestinati erant, Matth. 24. At verò quod actus meritorius fiat liberè; & vitaliter ita per se requiritur, quod sine hoc non dabitur actus; & sic per se conducit ad effectum prædestinationis, qui est actus meritorius. In alia autem opinione, quod etiam ipse bonus usus, & conatus libertatis nostræ est à virtute gratiæ, ita quod tota ratio boni usus, & conatus ex supernaturali virtute est, à fortiori deducitur, quod bonus ille usus sit effectus gratiæ, & consequenter prædestinationis, quia ab ipsa deriuatur.

10 Et hoc est secundum quod dicimus, scil. quod in rei veritate tota ratio agendi in actibus supernaturalibus, etiam quantum ad ipsum bonum usum, & conatum ortum ex nostra innata libertate habet pro ratione agendi proportionata & habili ad operandum ipsam vim supernaturalem eleuantem, non virtutem eleuablem, quæ licet etiam actiue concurrat supposita eleuatione, non tamen proportionatur ad concurrendum, nec rationem formalem motiuam habet, nisi ex ipsa ratione supernaturali eleuante. Itaque voluntas ipsa, & potentia quælibet naturalis ut sit eleuabilis ad supernaturalem actum, debet esse actiua ab intrinseco, & si est libera, debet esse indifferens, & non coarctata ad vnum, neque istæ conditiones possunt ab extrinseca forma, seu principio provenire: sed tamen proportio, & coaptatio, seu ordinatio proxima ad eliciendum actum supernaturalem, tota provenire debet à forma eleuante, & supernaturali, ita quod etiam ipsa vitalitas, & libertas actus supernaturalizari debent: constat enim quod in visione gloriæ vita illa qua vivitur, est vita æterna, quæ in ratione vitæ longè differt à vitalitate naturali. Et idem est de aliis actibus, qui ad istam vitam æternam disponunt, & tendunt, quatenus sic disponunt, & eleuant. Et sic tota actiuitas potentiæ naturalis est actiuitas improporcionata, etiam in ratione virtutis, & efficientiæ. Vnde vocatur ab aliquibus actiuitas radicalis, & remota, non radicalis per modum potentiæ eminentioris, sicut essentia radicaliter continet passionem, quia ex suis visceribus emanant, illique connectitur, sed radicalis per modum potentiæ obedientialis, quæ solum habet capacitatem ut eleuetur, & proportionetur ad illos actus ita superiores, & de se proportionem non habet; & sic non influit aliquid ratione suæ naturalis facultatis in actum, & aliquid ratione formæ supernaturalis eleuantis, sed totum influxum præstat per facultatem quidem, & vim actiuam naturalem, sed ut proportionatam, & eleuatam per formam supernaturalem tanquam per rationem formalem, à qua est tota proportio, & consequenter tota ratio agendi proxima, & proportionata, ut latius tractauimus loco cit. tom. præced.

11 Quare ad id quod dicitur esse ad minus ita probabilem sententiam Molinæ sicut est probabile quod supernaturalis forma non est tota ratio agendi, iam ex dictis constat, quod quidquid sit de pro-

babilitate huius sententiæ, tamen sententia Molinæ adhuc illa priori concessa sustineri non potest, quia, ut diximus, etiam si forma supernaturalis non sit tota ratio agendi in actibus supernaturalibus, tamen quia bonus usus, & conatus potentiæ naturalis conducit per se ad illum, effectus est prædestinationis. Ad id quod dicitur, gratiam esse principium extrinsecum, & necessarium; & sic non posse in illam reduci vitalitatem, & libertatem actus, Resp. esse principium extrinsecum, & necessarium entitativè, & ut quod, formaliter autem, & ut quo esse liberum, & vitale; id est entitas illa auxiliij, & gratiæ provenit à principio extrinseco, scil. à Deo, & in se est quædam forma necessaria, & determinatè inhærens subiecto, sicut inhæret ipsa voluntas; sed tamen provenit à Deo ut ipsam vitalitatem, & vim actiuam vitalem, & liberam perficiat, proportionet, & eleuet ad supernaturales actus modo vitali faciendos, & similiter ut illi actus modo libero fiant, & sic est ratio faciendi liberè, & faciendi vitaliter, quia ad hoc ipsum datur à Deo qui est principium, & fons illius vitæ, sicut potentia voluntatis inhærens animæ, seruit illi pro libertate actuum. Vnde cum inferitur: Ergo non reducitur in illam vitalitas, & libertas actus, distinguo, tanquam in principium proportionans, & proximè ordinans vitalem potentiam ad actus vitales supernaturales, nego; tanquam in principium radicale, & remotum vitalitatis, & libertatis, transeat. Non est autem inconueniens quod actus vitalis, etiam in ratione vitalis, reducatur in aliquod principium extrinsecum, tanquam in formam, & principium proportionans, & eleuans potentiam ad aliquem actum superiorem, & excedentem virtutem nativam, cum etiam vitalitas ipsa nativa dependeat ab agente extrinseco, & similiter ipsa libertas, à quo producit, & mouetur; licet enim voluntas libera moueat se, non tamen est primum mouens, sed ab alio priori mouetur, nempe à suo generante, id est, à Deo, à cuius motu non violentatur libertas, quia iuxta suam naturam mouetur, ut docet optimè S. Thom. 3. contra Gentil. c. 88. & 1. p. q. 83. artic. 1. Vnde cum gratia eleuans, & mouens sit influxus proveniens ab ipso Deo, licet sit principium extrinsecum, tamen quia ipsum principium intrinsecum vitæ, & libertatis, ab ipso Deo, & ab eius influxu deriuatur, ut à principio per se vitæ, & libertatis, talis influxus, & forma potest esse ratio agendi ipsi principio intrinseco etiam quantum ad eius vitalitatem, & libertatem sicut habitus superadditus potentiæ, iuxta modum vitalitatis, & libertatis eius eam adiuvat, & perficit, & determinat.

Ad instantiam, & conf. contra hanc responsionem, dicitur quod aliter res inanimata, v. g. aqua, vel ferrum recipit virtutem ad agendum, v. g. calorem, aliter potentia vitalis, v. g. intellectus, & voluntas formam eleuantem ad operandum supernaturaliter: nam in aqua totalis virtus, & actiuitas ad tale faciendum ita provenit ab extrinseco quod nullam actiuitatem in se supponit, neque proximam, neque remotam, neque proportionatam, neque obedientialem, & proportionandam ad calefaciendum, sed merè passivè se habet, & præcisè ut sustentativum caloris, licet recepto calore, ipsa aqua, in quantum calida, dicatur agere, non in quantum aqua, eo quod agere convenit ipsi concreto, non formæ secundum se, & in abstracto. At verò in potentiis vitalibus eleuabilibus per gratiam, licet tota ratio agendi, ut proportionata, & eleuata sit à gratia, tamen supponitur actiuitas radicalis, licet improporcionata, eleuabilis tamen, & proportionabi-

tionabilis per gratiam; & ideo non merè passivè se habet, & ut purè sustentans virtutem ipsam supernaturalem, neque ut actiuitas partialis, etiam imperfecta, habens tamen porportionem aliquam ex se influxivam in actum illum supernaturalem: hæc enim actiuitatem cum aliqua porportionem, quantumcumque imperfectam omnino negamus, quasi partialiter se habentem in agendo cum ipsa virtute supernaturali, eo quod proportio, & partialitas in agendo respectu alicuius actus, vel effectus supponit quod in eodem ordine se habeat agens cum effectu, vel actu in eo in quo proportionatè se habet cum illo, facultas autem nativa, seu naturalis ordinis semper est inferior, & alterius ordinis ad supernaturalem virtutem, & consequenter improporportionata respectu illius. Solum ergo concedendum est actiuitas vitalis improporportionata, quæ & radicalis dici solet, quæ in se habet capacitatem, seu non repugnantiam, ut per elevationem fiat proportionata, & habilis proximè ad actus, ita superiores, & elevatos; hæc actiuitas ad elevationem ipsam passivè se habet, seu non repugnanter, ad actum verò eliciendum actiivè se habet actiuitate remota, & improporportionata, actiivè autem proportionatè media elevatione: & in hoc differt ab aqua calefaciente, quod in aqua non elevatur, & proportionatur aliqua actiuitas aquæ, ut per calorem reddatur calefactiva, siquidem frigiditas, quæ est virtus activa aquæ, vel humiditas, non est capax ut eleuetur aut perficiatur per calorem ut calefactiva reddatur: frigiditas enim nunquam calefacit, imò de se repugnat ut sit calefactiva, intellectus autem, & voluntas quæ sunt virtutes activæ, sed improporportionatæ ad videndum, & amandum Deum, verè intelligunt, & amant Deum actiivè, mediante tamen elevatione ut ratione formali, nec tali visioni repugnant, sicut frigiditas aquæ calefactioni. Et sic nisi supponeretur actiuitas ista radicalis, & improporportionata ad actus supernaturales, non posset eleuari, & proportionari, non tamen debet supponi actiuitas proportionata, etiam partialis, ut adiecta virtute supernaturali fiat actus, quasi partialiter adiuuvante solum, non intrinsecè porportionante: hanc enim partialitatem in actiuitate nativa negamus, & omnem actiuitatem porportionatam, etiam inchoativè, & imperfectè, sed tantum actiuitatem ponimus improporportionatam intrinsecè; proportionabilem autem per elevationem, ita quod virtus elevans dat totam proportionem, & totam actiuitatem ut elevatam, non totam actiuitatem simpliciter etiam radicalem, & improporportionatam. De quo vide plura loco citato disp. 14. tom. præced.

- 13 Secundo argum. ex auctoritate Concilij Trid. sess. 6. c. 5. ubi dicit, quod *Liberum hominis arbitrium motum, & excitatum cooperatur gratiæ Dei excitanti, atque vocanti*: ergo aliquid induit liberum arbitrium, ratione cuius verè, & propriè dicatur cooperans ipsi gratiæ excitanti; sed si tota ratio agendi est gratia, non potest dici liberum arbitrium cooperans ipsi gratiæ, id est, simul cum illa, sed solum ex illa: ergo hæc doctrina non saluat in proprietate, & rigore sermonis definitionem Concilij. Nec dici potest quod liberum arbitrium non secundum se, sed ut motum, & elevatum cooperatur, non ipsi gratiæ, qua movetur, & elevatur, sed alteri gratiæ, quæ datur postea, & cooperans est. Contra enim est, quia Concilium dicit cooperari nostrum liberum arbitrium ipsi Deo excitanti, & vocanti: ergo non solum gratiæ cooperanti, quæ postea datur, sed etiam gratiæ qua primò excitatur, & vocatur, debet liberum arbitrium esse cooperans; respectu autem talis gratiæ non cooperatur

liberum arbitrium, nisi per suam naturam facultatem, & non ex gratia: ergo secundum sensum proprium Concilij non est tota ratio agendi ipsa gratia, qua elevatur, & movetur arbitrium, sed etiam cooperatur nativa facultas.

Confir. quia illa est tota virtus agendi, qua remota nihil omnino manet virtutis activæ: ergo si gratia est tota ratio agendi, remota vel præcisa illa, nihil actiuitatis manet in voluntate: ergo de se voluntas solum se habet ut inanime quoddam, quia se habet ut nihil actiuitatis habens: ergo solum passivè, & ut res inanimis, quod ibi Concilium expresse damnat. Unde August. *serm. 13. de verbis Apost. explicans illud Psalmi 26. Adiutor meus esto, &c.* docet, quod *ipsum nomen adiutoris nos admonet quod etiam nos aliquid facimus: qui enim nihil facit, adiuvari non indiget.*

Respon. Concilium ipsum apertissimè loqui de libero arbitrio moto, & excitato, & consequenter elevato, ut patet in *canone 4. illius sessionis 6.* Liberum ergo arbitrium non per suam facultatem naturam, tanquam per rationem formalem agendi, sed ut motum, & excitatum, atque adeò ut proportionatum, & elevatum per gratiam tanquam per totalem rationem agendi proportionatam, & immediatam cooperatur gratiæ ipsi simul concurrenti, & cooperanti, quo tali libero arbitrio excitato postea datur: *cooperatur enim*, ut dicit Concilium, *ipsi vocationi assentiendo.* In assentiendo autem, cooperatio fit cum ipso concursu divino concomitante: supponitur autem præcedere excitans auxilium, & movens. Et cum instatur quod Concilium dicit nos cooperari ipsi Deo vocanti & excitanti: Respon. cooperari nos Deo vocanti, non cum ipsa vocatione partialiter concurrente, sed divinæ vocationi per assensum respondendo. Nec enim dicit Concilium nos cooperari vocationi divinæ, quasi ipsa vocatio sit cooperans gratiæ, quæ partialiter concurrat cum libero arbitrio eiusque nativa facultate, sed dicit, quod *assentiendo Deo vocanti, & excitanti, cooperamur*; ita quod *ly cooperamur*, non debet construi, & coniungi cum *ly vocationi*, sed *ly assentiendo*, construi debet cum *ly vocationi*, & *ly cooperamur*, cum Deo, ita quod assentiendo vocationi, cooperamur Deo: sed cum ipsa gratia cooperante, quæ post excitantem, quæ est operans datur: sed tunc quando cooperatur liberum arbitrium cum ipsa gratia cooperante, iam supponitur liberum arbitrium motum, & excitatum, & consequenter elevatum, & sub illa ratione elevati cooperatur, non sub ratione naturæ facultatis.

Ad Conf. Respon. quod remota actiuitate tam radicali, & remota, quam formali, & proxima, id quod remanet, nihil actiuitatis habet, sed passivitatis, & tanquam inanime est. Remota autem actiuitate formali tantum, & elevante, seu proportionante, remanere potest non aliquid merè passivum, sed actuum improporportionatum, & remotum, seu radicale actuum quod per virtutem supernaturalem tanquam per rationem agendi superadditam proportionandum est. Quare non se habet voluntas humana ut aliquid pure inanime, & passivum, sed ut vitale actuum elevabile, & porportionandum per gratiam, de se autem improporportionatum, & solum obedientialiter potens in illum actum non proportionatè, & proximè, etiam partialiter, sed totalem proportionem accipiens ex gratia, in se autem actiuitatem supponens, quæ ut elevata, vitaliter operetur actus supernaturales, *ly ut dicente rationem formalem talis operationis.* Ad auctoritatem August. Respon. quod optimè dicitur, quod nos facimus hoc ipso quod Deus est adiutor, non autem

autem quod nihil facimus, quia ipso adiutorio, eleuamur ad faciendum, & rationem formalem agendi ab ipso adiutorio accipimus, quæ posita, ipsa actiuitas vitalis naturalis sic eleuata operatur. Non autem August. dicit quod nos partialiter facimus cum ipso adiutorio, sed quod ipsum nomen adiutoris nos admonet quod aliquid facimus: saluatur autem quod facimus ipso adiutorio se habente ut ratione formali proportionante proximè ad agendum, non autem ut partiali cum principio tantum.

ARTICVLVS V.

Virum res, & opera bona naturalis ordinis sint effectus prædestinationis?

EA quæ pertinent ad ordinem naturalem in præsentia, in tria capita diuidi possunt. Primum est ipsa substantia prædestinati, quæ se habet ut subiectum receptiuum eorum, quæ per prædestinationem homini à Deo conferuntur. Et in ipsa substantia prædestinati etiam includuntur ea, quæ talem substantiam componunt, & ad eam pertinent vel reducuntur, sicut est temperamentum, ingenium, vires, reliquæque proprietates, imò, & ipsa mors, sic vel sic contingens, talis natiuitas, educatio, &c.

Secundum est opera naturalis ordinis moraliter bona, procedentia ab ipso prædestinato.

Tertium est res externæ naturales ipsis prædestinatis deseruientes, & quibus tanquam instrumentis vel adiumentis vtuntur ad virtutem. Et ideo de singulis breuiter dicendum est.

Dependet autem resolutio circa omnia ista ex duobus præsuppositis.

Primum est quod dupliciter potest aliquid esse effectus prædestinationis, scilicet elicitiuè, & proximè, vel imperatiuè, & remotè, quæ distinctio videri potest *suprà* ex S. Thom. Elicitiue dicitur effectus prædestinationis, quod conducit ad finem supernaturalem tanquam medium supernaturale, & eiusdem ordinis cum illo; & sic à supernaturali prouidentia, eaque efficaci elicitur. Imperatiue dicuntur pertinere ad prædestinationem, quæ sunt inferioris ordinis, seu naturalis; & sic mediantibus aliis causis, & directione naturalis prouidentia, à prædestinatione fiunt, quatenus inferior prouidentia, & directio subordinantur superiori, sicut inferiorius iudicatorium seu tribunal, supremo: natura enim subordinatur gratia, & ordo naturalis supernaturali, tanquam superiori.

Secundum quod aduertimus est, quod ea quæ prædestinationi subiiciuntur, vel ab ea causantur, possunt se habere, vel per se, & ex propriis conductia ad talem finem, vel ut occasionem præbentia, aut ministerialiter deseruientia ad ipsam operationem gratia, & consequenter ad effectum prædestinationis. Quo posito.

Dico primò, In prædestinatione ad gloriam, ipsa substantia prædestinati secundum se præcisè, neque elicitiuè, neque imperatiuè est effectus prædestinationis. Caterum secundum suas circumstantias, & ordinem quo producit, puta talem natiuitatem, ex talibus parentibus, tali temperamento, & ingenio, & aliis similibus, non repugnat esse effectum prædestinationis imperatiuè. Loquor de prædestinatione ad gloriam, quia de prædestinatione ad vnionem hypostaticam alia est ratio: ibi

enim ipsamet substantia, id est, persona prædestinati, ut vnita, est gratia; & sic non debet distingui terminus prædestinationis à subiecto, seu substantia, nisi ratione tantum, id est, persona illa ut subrogata loco humanæ, & constituens hominem, est subiectum sub hac præcisa formalitate, eadem autem persona ut constituens hominem Deum in tempore, & per vnionem, seu communicationem temporalem est terminus prædestinationis, quia est maxima gratia facta illi homini, seu illi personæ ratione humanæ naturæ, licet nulla sit gratia facta illi personæ secundum se, & ut diuina. Vel secundò, ibi non fit gratia, seu beneficium, & prædestinatio subiecto, & personæ in se, sed ipsum subiectum ut vnitum, & communicatum naturæ humanæ est gratia; & sic prædestinatur ipsa persona, seu subiectum, non ut sibi fiat gratia tanquam termino cui, nec enim ibi datur, sed prædestinatur persona ut ipsamet sit gratia, & donum collatum naturæ; & sic aliud est id quod prædestinatur, aliud est cui fit gratia, & beneficium. Fit quidem beneficium ipsi naturæ, sed prædestinatur persona tanquam gratia ipsa substantialis, quæ non sibi est gratia, sed naturæ cui communicatur. Itaque aliud est quid in hac prædestinatione sit gratia, aliud respectu cuius gratia sit. Gratia est ipsummet subiectum, seu persona, non tamen est gratia respectu sui; sed ut communicata naturæ, non quod natura sit subiectum, sed terminus in ordine ad quem ipsa persona induit rationem gratia ut comunicata illi. Et sic ipsum subiectum prædestinationis est gratia, supponendo illam communicationem naturæ; sicut si ipsa gratia esset substantia, ipsamet gratia esset subiectum, & forma prædestinationis. Sic ipsa persona diuina, ut communicata, est subiectum, & forma gratia prædestinata.

Omissa ergo hac prædestinatione substantia, quæ solum est Christi, & loquendo de prædestinatione ad gloriam, qualis est in nobis, conclusio posita duas habet partes.

Prima de ipsa substantia prædestinati, secundum se, quod non sit effectus prædestinationis, & hæc tenetur à pluribus Thomistis in præsentia, & videri potest Caietanus 3. par. qu. 1. art. 3. Alvarez *ibidem*, Gonzalez *hic disp.* 72. *sect.* 1. Cornelio *hic disp. unica dub.* 3. præter alios plures Recentiores. Et fundamentum videtur certum, quia substantia prædestinationis secundum se, & omni alio respectu, & circumstantia seclusa, est indifferens ad prædestinationem, & reprobationem, & de se aliquid purè naturale: ergo nisi addatur aliquis respectus, vel ordo, aut circumstantia respiciens supernaturalem finem, non est effectus prædestinationis. Antecedens constat, cum idem homo qui prædestinatur sit capax reprobationis, & è contra: ergo est indifferens ad vtrumque. Consequenter verò est certa, quia quod est indifferens ad duplicem finem, nisi determinetur ad vnum illorum, non est effectus illius, neque subordinatur illi, aut prouidentiae disponenti, & dirigenti in ordine ad illum: ergo cum prædestinatio sit prouidentia specialis traducens ad finem supernaturalem, oportet quod effectus talis prouidentia, in quantum effectus illius, sit effectus, non sub indifferentia, sed sub respectu, & ordine ad talem finem. Hic autem respectus non potest fundari in substantia ipsa prædestinati secundum se, quia naturalis est, & indifferens ad finem prædestinationis, ergo substantia prædestinati secundum se, & omni alia circumstantia remota, non est effectus prædestinationis.

Et confir. quia effectus prædestinationis debent esse inter se connexi, & cum fine prædestinationis

ad

ad quem tendunt, aliàs non caderent sub vnum ordinem, & gubernationem perfectissimam, qualis est prædestinatio, ac substantia prædestinati secundum se non habet connexionem cum ipso fine prædestinationis: potest enim tota hæc substantia prædestinati remanere, & stare non stante, nec remanente illo fine supernaturali prædestinationis, sed potius cadendo ab illo, ut patet in reprobis, aut non habendo ordinationem ad illum, ut patet in statu puræ naturæ: ergo de se non est effectus prædestinationis.

4 Dices. Hoc est commune omni rei naturali: nulla enim secundum se, & sistendo in ratione puræ naturæ, est effectus prædestinationis, sed ut ordinata ad finem supernaturalem: ergo nihil speciale dicimus de substantia ipsa prædestinati, nisi id quod à nemine negari potest, scilicet quod secundum se, & in sua indifferentia stando, non est effectus prædestinationis.

Resp. esse quidem commune omni rei naturali, ut non possit esse effectus prædestinationis secundum se immediate, & elicitive, sed solum imperatiue, atque adedò interueniente aliquo respectu, & ordine ad finem supernaturalem: sed tamen quia substantia prædestinati se tenet ex parte subiecti, & non mediatorum, quæ ministrare possunt ipsi prædestinationi, & ab ipsa imperari, & disponi, specialis difficultas in ipsa currit. quomodo à prædestinatione attingatur, quia non videtur posse imperari cum non sit mediū, nec præsupponi, quia prædestinatio ex eo quod diuina est, ita est efficax ut omnia facere possit, etiā ipsū subiectū, & nihil præsupponere, & sic videtur quod ad ipsam prædestinationem ad quā pertinet transmittere hoc subiectū ad gloriam, pertinebit etiam ipsū subiectū producere, & habere ipsum pro effectu. Ad explicandum ergo quomodo effectus prædestinationis esse possit, & sub quo respectu, oportuit distinguere de ipsa substantia prædestinati secundum se, & ut subest alicui circumstantiæ, vel rationi ordinati ad talem finem, & ostendere quomodo sub priori consideratione effectus non sit, licet subiectum sit.

5 Secunda pars conclusionis, nempe quod substantia prædestinati sub aliqua circumstantia, aut ordine, seu modo quo producit, possit esse effectus prædestinationis, tenetur à pluribus Authoribus, præsertim Thomistis. Tenet eam M. Bannez hic a. 2. dub. 2. Nazarius eodem art. controu. unica, & art. 1. controuers. 2. notab. 4. in fine, Carmelitani super eundem art. 2. disp. 2. dub. unico. Villegas controuers. 15. Sequitur etiam P. Suarez lib. 3. de prædestin. c. 7. & lib. 6. c. 4. Granados, Valencia, Cartagena, & alij. Sed quod me magis mouet est autoritas S. Thomæ in 1. disp. 4. q. 1. artic. 4. ubi inquit, quod *Omnis causa, cuius operatione interueniente completur effectus prædestinationis, dicitur prædestinationem iuuare, vel per modum cause meritorie, vel persuadendo ad bonum, vel per modum dispositionis, vel etiam naturali operatione, sicut motus celi, & omnes causa naturales iuuant prædestinationem, in quantum earum officio perficitur generatio, & sustentatio electorum.* Ecce quomodo dicuntur causæ naturales iuuare ad effectum prædestinationis, & ipsam prædestinationem iuuare, quatenus eorum officio perficitur generatio electorum. Ipsa ergo generatio inter effectus prædestinationis computatur, quia causa naturalis eam perficiens dicitur iuuare prædestinationem, dum facit generationem. Generatio autem prædestinati ad eius substantiam pertinet: ergo substantia prædestinati, ut generata, ad effectus pertinet prædestinationis. Facit etiam ad eandem rem quod dicit S. Thom.

Ioan. à S. Thoma in 1. part. D. Thoma.

in hac quest. 23. art. 8. in argumento, Sed contra, ubi inquit, quod Isaac rogauit Dominum pro Rebecca uxore sua, & dedit conceptum Rebecca. Ex illo autem conceptu natus est Iacob, qui prædestinatus fuit: non autem fuisset impleta prædestinatio, si natus non fuisset: ergo prædestinatio inuatur precibus Sanctorum. Quæ consequentia esset nulla, si substantia, & natiuitas prædestinati non esset effectus prædestinationis.

6 Et fundamentum sumitur ex dictis; quia non est dubium res omnes naturales, & præcipue ipsam substantiam, & corpus ipsum prædestinati ordinari ad gloriam, & ad finem prædestinationis, & subiaci Christo, ut Redemptori, qui suscitabit corpora nostra configurata corpori charitatis suæ: ergo licet ex se, & ut res naturales præcisè, non sint effectus prædestinationis, tamen ut ordinatæ, & subordinatæ ipsi gloriæ, effectus prædestinationis sunt ratione talis ordinis. Antecedens sine dubitatione est, cum ex ipsa Scriptura manifestè constet, ubi dicitur omnia præter Deum subiecta esse Christo, & sub pedibus eius posita, ad Heb. 2. In eo quod, omnia ei subiecit, nihil dimisit non subiectum ei: 1. ad Corinth. 15. Cum dicat, omnia subiecta sunt ei, absque dubio præter eum qui subiecit ei omnia. Et utrobique adducit Apostolus in confirmationem illud Psalmi 8. Omnia subiecisti sub pedibus eius, idque de Christo explicat. Si ergo ita vniuersaliter omnia subiaciuntur Christo, ut Redemptori, quod nihil dimittitur non subiectum ei præter ipsum Deum: ergo & ipsum corpus & substantia, & vita prædestinati sub aliquo respectu sunt effectus redemptionis Christi, & sunt caulatæ ab ipso, quia sub aliquo respectu subiaciuntur illi ut Redemptori: ergo habent ipsum ut Redemptorem, & Glorificatorem pro fine cui subiaciuntur: ergo ab ipso causantur: ergo sunt effectus eius. Consequens verò probatur, quia ut aliquid sit effectus prædestinationis imperatiue, non requiritur quod secundum substantiam absolute sit effectus eius, aut sit aliquid supernaturale, sed sufficit quod sub aliquo respectu, & ordine ei subordinetur: illud enim imperatiue est effectus alicuius, quod ordinatur ad finem imperatiue ut ad finem extrinsecum, & accidentalem rei imperatæ: virtus enim, seu potentia imperans non dat substantiā, & essentiam ætnei: sic enim eliceret illū, non imperaret, sed aliquid accidentale dat illi, sicut patet in charitate, aut religione quando imperant alicui inferiori virtuti, v. g. temperantiæ, aut fortitudini: nec enim à charitate imperante habent tales actus temperantiæ substantiam, & essentiam propriam, sed solum ordinem, & respectum accidentalem ad finem charitatis, & sub hoc respectu, & ordine sunt effectus talis virtutis imperantis: imperans enim solum mouet, & inducit ut aliquis actus fiat, non speciem ei præbet, sed supponit; & sic solum attingit rem imperatam sub aliquo respectu accidentali, non quantum ad substantiam, & speciem secundum se. Sic ergo similiter ut aliquid sit prædestinationis effectus imperatiue, sufficit, quod sub aliquo respectu, & ordine accidentali ei subiaciatur, & non quoad substantiam, & speciem absolute, & in se consideratam. Constat autem prædestinati substantiam sub aliquo respectu subiaci glorificationi, & redemptioni per Christum, sicut & omnes creaturæ subiectæ sunt ei: ergo est effectus redemptionis, & prædestinationis per Christum imperatiue.

7 Sed obieciens primò. Nam substantia prædestinati non potest esse medium ad prædestinationem consequendam, sed subiectum: ergo non potest esse

Ii

esse effectus prædestinationis. Conseq. patet, quia effectus prædestinationis est ipsa transmissio, vel medium quo fit ipsa transmissio prædestinati ad gloriam: substantia autem prædestinati nec est ipsa transmissio, nec id quo prædestinatus transmittitur ad gloriam: ergo non est effectus prædestinationis: sicut homines qui gubernantur à Principe, non sunt effectus gubernationis, sed à gubernatione supponuntur: ergo nec in se, nec ratione aliquius circumstantiæ potest ipsa substantia prædestinati esse effectus prædestinationis.

8 Secundò, & fortius vrgetur; nam ante decretum prædestinationis Christi, supponebatur substantia Adami, & eius productio, siquidem supponebatur præuisu peccatū Adæ, ante Incarnationem, in sententia S. Thomæ: ergo saltem substantia, & productio Adæ non potuit esse orta ex prædestinatione Christi: ergo neque ex prædestinatione Adæ, quia hæc supponebat prædestinationem Christi, ut causam sui. Rursus idem videtur dicendum de omnibus ab Adam descendentibus, siquidē ante decretū Incarnationis non solum persona Adam, sed totum genus humanum supponebatur infectum peccato, & omnes homines in singulari: ergo etiam supponebantur ab Adam generati, & descendentes in esse naturali, sicut & in esse morali peccati: nec enim peccatum præuidebatur nisi in subiecto talis peccati, & in concreto, non in abstracto: ergo eorum productio, & substantia non potuit caulari, & esse effectus prædestinationis, quia si supponebatur iam facta, & præuisa ante Incarnationem: ergo & ante ipsorum prædestinationem, quia prædestinatio hominum præsupposuit Incarnationem, hæc autem præsupponebat substantiam, & productionem eorum in esse naturali iam executam, & præuisam: non ergo potuit iterum reproduci à prædestinatione, ut esset eius effectus sub quacumque circumstantia aut respectu consideretur.

9 Tertio, vrget illud argumentum, quia ante voluntatem prædestinandi, & eligendi hos determinatos homines præ aliis, intelligitur in Deo voluntas inefficax saluandi omnes homines: hæc enim generalis voluntas inefficax præcedit illam specialem, qua discernit prædestinatos à reprobis, sed illa voluntas generalis volendi saluare omnes homines supponebat eorum substantiam, & esse: versabatur enim circa illos, non tanquam circa possibiles, sed tanquam circa futuros, & ad hoc vniuersum pertinentes: hos enim vult Deus saluos fieri, non illos, qui solum sunt purè possibiles: ergo à fortiori, prædestinatio, quæ sequitur post istam generalem providentiam, supponit hominum prædestinatorum substantiam: ergo non caulat illam, nec est effectus eius, etiam secundum aliquem respectu, quia quod supponitur absolute executum, non potest sub aliquo respectu eius effectus reddi à quo supponitur executum: sic enim esset iterum produci.

Vltimò, quia cum dicimus substantiam prædestinati esse effectū prædestinationis secundum aliquā circumstantiam, vel ordinem ad finem supernaturalem, vel intelligimus solum ipsum modū, vel respectū superadditum esse effectum prædestinationis, vel etiam ipsā substantiā, quæ illi modo subternitur, caulari & effici à prædestinatione. Si primum: ergo solum facimus prædestinationis effectum, id quod superadditur prædestinato, non substantiam eius, & de hoc nulla est dubitatio: quidquid enim supernaturale est, siue accidens, siue modus, prædestinationis effectus est, & quidem elicitivè, non imperativè: de effectu autem elicitivo hæc non disputamus. Et non facile explicatur quis sit iste modus superadditus substantiæ prædestinati, ratione cuius

fit effectus prædestinationis etiam ipsa substantia prædestinati. Si dicatur secundum, iam prima pars conclusionis non verificatur: tunc enim substantia prædestinati, ut naturalis est in se, erit effectus prædestinationis. Dicere autem quod non ipsa substantia secundum se, & in abstracto, sed generatio eius, & productio in exercitio est effectus prædestinationis, nihil est; tum quia substantiæ rerum sic consideratæ in abstracto nullius causæ effectus sunt, sed sub productione, & exercitio; tum quia ipsa productio, & generatio est indifferens ad prædestinationem, & reprobationem, cum sit aliquid naturale, & commune omnibus: ergo ratione sui non potest substantia prædestinati esse effectus prædestinationis, sed oportet aliquid aliud superaddi, & hoc non assignatur quid sit.

Ad primum Resp. negando conseq. Ad probationem dicitur quod effectus prædestinationis elicitivè est ipsa transmissio, aut id quo fit transmissio proximè, & supernaturaliter ad gloriam, imperativè autem est etiam res ipsa, quæ transmittitur, seu deputatur ad talē transmissionem, aut etiam ea media quæ remotè, & ministerialiter deferuire possunt transmissio illi, sicut res naturales, & in vniuersum quidquid in finem prædestinationis referri potest, & ab eo dependet, eique deseruit, siue intrinsecè & per causas proprias, ut res supernaturales, siue extrinsecè, & per ministerium aliarum causarū quæ tamen subordinantur fini supernaturali, & à prædestinatione disponuntur, ut suo fini deseruiant; & sic substantia prædestinati est effectus prædestinationis, quatenus generatio eius, & causæ producentes illā ordinantur à prædestinatione, & ex eius fine ut generent substantiā deputandā, & ordinandam ad finem gloriæ: hoc enim idè est, quia finis prædestinationis, ut potè superior, & vniuersalior, subordinat sibi causas, & fines naturales ut ministerialiter sibi deseruiant; & rursus ipsa vniuersalitas diuinæ providentiæ tanta est, ut nihil supponat eorum quibus providet, sed omnia faciat etiam subiectum, & substantiam ipsam rei prouisæ. Quod si eam facit per providentiam ordinis naturalis, cuius effectus est, & rursus ista providentia naturalis subordinatur supernaturali, tanquam finis inferior superiori, à fortiori erit substantia illa prædestinati, quæ est effectus providentiæ naturalis, effectus etiam prædestinationis imperativè, ut potè ipsi ministrans, & ut quid contentum, & inferius vniuersalitati finis eius. Et in hoc non tenet exemplum de providentia humana, quia hæc nec imperativè, & eminenter, nec elicitivè, & propriè producit substantiam rerum quibus providet, sed eam supponit, providentia autem diuina in re naturali totum producit, & illi imperat prædestinatio.

Ad secundam Resp. esse diuerſam rationem de ipsa persona primorum parentum, & de reliquis qui nunc ab eo descendunt, quia primi parentes de facto, & executivè fuerunt producti in statu innocentiae, reliqui omnes in statu lapsæ naturæ: nullus enim genitus fuit in statu illo primo. Ille autem status, & gratia eius, & à fortiori personæ ipsæ, & naturalis eorum substantia, quæ ad illum pertinent, fuerunt præuisæ, & decretatæ ante Incarnationem, supposita sententia, quod Incarnatio facta est ex peccato præuiso: nam consequenter fuit post statum innocentiae præuisum, & decretatum in executione. Vnde non fuit locus ut ipsa executio talis status, & productio personarum ad illum pertinentium in rerum natura fieret ex prædestinatione, quia pro illo statu nondū supponebatur prædestinatio, cum nullus fuerit in eo statu prædestinatus: omnis enim prædestinatio est facta

facta per Christum, qui pro illo statu non intelligebatur futurus. At verò reliqui homines, etiam quoad substantiam, & productionem naturalem non fuerunt in re præuisi, & executi, nisi pro hoc statu peccati, in quo iam supponitur Christus, & prædestinatio, & consequenter natura ipsa, & naturales causæ subordinantur, & ministrant illi fini prædestinationis, & subiiciuntur Christo, & sic ab ipso dirigi, & finalizari possunt, & consequenter causari ab eo, & à providentia ordinante circa talem finem. Ad instantiam quòd ante decretum Incarnationis, & prædestinationis præuidebantur omnes homines in executione positi, ut pote peccato infecti. Resp. quòd non præuidebantur omnes homines determinatè in singulari, & adæquatè secundum omnes circumstantias, sed solum inadæquatè, & quantum est ex parte Adam, ut in semine, & in capite: constat enim multos de facto esse conceptos, & natos per miraculum, & ex fide in Christum, multos ex parentibus Christianis, & Sacramento matrimonij coniunctis, quæ omnes circumstantiæ non potuerunt prævideri pro illo signo status innocentie, aut peccati Adam ante instantem prævisionem Christi, & decreti Incarnationis. Non ergo pro illo instanti infectionis peccati omnes homines ab eo descendentes fuerunt præuisi adæquatè sub omni circumstantia, & modo quo de facto sunt producti, licet omnes singulares fuerint præuisi inadæquatè, id est, prout præcisè ab Adam, & ab illo, ut à capite infecti, & solum in communi, & in confuso. Et sic relictus est locus, ut ex prædestinatione, & beneficio Christi imperaretur eorum productio, & generatio quoad substantiam naturalem ratione alicuius circumstantiæ, & respectus, propter quem subordinari poterant superiori, & uniuersaliori fini gratiæ, & ab eo causari.

11 Ad 3. Resp. quòd illa voluntas antecedens, & conditionalis saluandi omnes homines non respicit homines sub statu possibilitatis, sed futuritionis; in illo tamen non respicit eos sub omni circumstantia, & respectu, sed inadæquatè, & solum præcisè quatenus homines sunt, & capaces beatitudinis, atque ad illam ordinati: sic enim sicut omnes ordinantur à Deo ad beatitudinem, sic omnes vult saluos fieri, in quantum homines. Cæterum in illa voluntate antecedenti, & inefficaci nondum considerantur omnes circumstantiæ, & particulares respectus in hoc vel illo homine, ut docet S. Tho. *suprà* q. 19. art. 6. & nos *suprà* latè explicauimus *disp.* 7. Et sic relinquitur locus, ut illemet homo, qui in quantum homo præcisè subordinatur generali providentiæ, consideratis omnibus circumstantiis subordinetur speciali fini prædestinationis, & superiori providentiæ, à qua imperatur ut fiat. Sicut etiam iudex qui desiderat homicidam in quantum hominem non suspendi, non id desiderat circa hominem in statu possibilitatis, sed circa hominem existentem, non tamen adæquatè, & secundum omnes circumstantias consideratum, scilicet ut delinquentem, sed præcisè ut hominem. Et sic etiam res omnes naturales, ut pendunt à providentia naturali, præcedunt decretum, & providentiam ordinis gratiæ: ut tamen subordinatæ ipsi gratiæ tanquam superiori, & uniuersaliori fini, ab ipsa superiori providentia imperantur, & causantur.

12 Ad ultimum Resp. quòd tam substantia prædestinati, quam eius generatio, & productio secundum se non sunt effectus prædestinationis, sed ut subordinata fini prædestinationis, & ad illum directa. Hæc autem subordinatio, & directio est in

Ioan. à S. Thoma in 1. part. D. Thoma.

creaturis sensibilibus ad finem gloriæ, ut docet S. Thom. *loco supra cit. super cap. 6. ad Rom. lect. 4.* ad illa verba, *Expectatio creature reuelationem filiorum Dei expectat*, & consequenter debet esse in substantia prædestinati, quæ est una ex creaturis sensibilibus: *Ordinatur*, inquit, *tota creatura sensibilis ad aliquem finem; qui excedit formam naturalem ipsius, quia sicut humanum corpus induitur quadam gloria supernaturali, ita tota creatura sensibilis in illa gloria filiorum Dei, quandam nouitatem gloriæ consequetur.* Si ergo naturæ istæ subordinantur illi fini prædestinationis: ab illo ergo causantur imperatiue, quatenus ad illum diriguntur, & consequenter eius providentiæ subiiciuntur. Nec oportet quòd ista subiectio, & ordo sit aliquis modus intrinsecus superadditus substantiæ rei naturalis, sed sufficit quòd sit extrinseca subordinatio, & directio ad illum finem quatenus substantia ipsa naturalis eleuata, & deputata manet ad illum finem, aut ei ministerialiter deseruit. Ipsa autem substantia secundum se non subordinatur illi fini; & sic non est effectus eius. Vnde per hoc non contradicitur primæ parti conclusionis, quia substantia naturalis secundum se est ipsa substantia, non ut subordinata fini superiori supernaturali, sed ut intra limites suos naturales se continens, & sic est indifferens, & solum capax ordinari pro reprobatione, vel prædestinatione. At verò ut subordinata illi fini est effectus eius imperatiue, non quia solum ipsa forma, & perfectio supernaturalis, effectus sit, sed ipsa substantia, & generatio eius, non per se, & ratione sui tantum, sed ut subiecta illi fini, & sub hoc respectu tota ipsa substantia effectus prædestinationis est; quia illi fini subordinata.

Perfectiones & actus naturales quomodo sint effectus prædestinationis?

Dico secundò, Perfectiones naturales, ut bona indoles, temperamentum, complexio, imò & mors ipsa prout tali vel tali tempore accidens, effectus sunt prædestinationis imperatiue ab ipsa procedentes in ipsis prædestinatis. In hac conclusione variant Authores. Quidam enim quod attinet ad bonam indolem, temperamentum, ingenium, & similia accidentia naturalia, distinguunt, quando sunt orta ex meris principiis naturæ, & quasi ex necessitate naturæ consequuntur, aut quando ex aliquo speciali Dei beneficio habentur, ut ex miraculo, aut alio speciali modo. Et primo modo dicunt non esse effectus prædestinationis ut medium, sed solum ut subiectum, vel ex parte subiecti se tenendo. Secundo autem modo dicunt esse effectus prædestinationis, etiam tanquam medium aliquo modo conducent, quia est beneficium datum à Deo ex diuina gratia, & utile atque conducent ad comparandum supernaturalem finem, prout sic datur à Deo. Ita P. Suarez *lib. 6. de prædestinatione capite 7.* Et in idem inclinat M. Gonzalez *hic disputat. 72. cap. 3.* ubi dicit quòd hæc bona naturalia sunt effectus prædestinationis, quando dantur à Deo ex providentia supernaturali præter leges communes, quia potest conducere bona indoles, & ingenium, saltem ad euitanda aliqua peccata, licet non ut motinum, & ratio dandi finem, vel dona supernaturalia, nec conducunt ad facilius vel melius credendum fide diuina, licet ad faciliorem apprehensionem credibilem, & iudicium purè humanum de illis possunt conducere. Quando verò ista bona non dantur ex fine supernaturali, non sunt effectus prædestinationis.

Ii 2

At

376 Quæstio XXIII. De Prædestinatione,

14 At verò P. Vasquez *hic disput. 93. cap. 4.* absolute docet bonam indolem, & alia similia naturalia bona non esse effectus prædestinationis, quia non sunt causa, vel occasio aliorum donorum gratiæ, licet in subiecto, in quo sunt conducant ad hoc ut facilius excitari, vel iuari possint homines ad gratiam, specialiter circa mortem, est opinio Molinæ *hic quæst. 22. art. 3. & 4.* quod mors fortuita, ut quod natans in fluuio suffocetur, vel in via à grassatoribus occidatur, est effectus permissus à Deo; & sic non videtur reduci ab ipso ad effectum prædestinationis: alioquin dicendum esset, quod idem Deus creauerit hunc hominem ut suffocaretur, & grassatores ut istum occiderent, & consequenter ut peccaret, cum tamen Deus nec peccatum fecerit, nec mortem.

15 Nihilominus dicta assertio nostra ut iacet, tenenda est, deduciturque ex D. Thom. *loco supra cit. in 1. dist. 41.* ubi omnes causas, & morus naturales quorum officio perficitur generatio, & sustentatio electorum, & quidquid ad illum finem iuuare potest, ad effectus prædestinationis reducit. Ea autem quæ imperatiue à prædestinatione proueniunt, non est necesse quod talia media sint, quod habeant connexionem per se, aut proportionem cum gratia, & supernaturalibus formis, aut præbeant motuum, & occasionem dandi illas, sed sufficit quod ministerialiter illi deseruiant, licet tale ministerium necessariū non sit: ad virtutem enim vel causam imperantem solum pertinet inferiorem dirigere ad finem suum, cum quo per se non est connexa talis causa inferior, sed est finis sibi intrinsecus: si enim extrinsecè cum illo connecteretur, non indigeret extrinseco imperio dirigente. Imperans autem dirigit ad finem suum res inferiores; non solum si necessariæ sint pro fine suo, sed etiam si viles, aut solum capaces talis directionis, etiam si non sint medium ad id necessarium: sicut charitas, aut religio potest ordinare actus virtutum inferiorum, aut etiam actus de se indifferentes ad finem suum, licet tales actus non sint per se connexi cum fine charitatis, quia naturalis ordinis sunt. Sic ergo prædestinatio, quæ versatur circa superiorem finem, potest imperare ea quæ inferioris ordinis sunt, & tali fini subordinantur, etiam si ea quæ sunt inferiora non habeant connexionem per se cum tali fine supernaturali: sufficit quod ei possint ministerialiter deseruire, & ad illum ordinari, sicut etiam ipsa substantia prædestinati, ut vidimus, quatenus subordinari potest fini supernaturali, effectus est prædestinationis imperatiue, & tamen non habet connexionem per se cum gratia, & cum fine supernaturali.

16 Ex his ergo fit argumentum pro nostra sententia, Ad hoc ut aliquid sit effectus prædestinationis, & causetur ab ipso imperatiue, etiam si sit medium, vel ex parte mediæ se teneat, & non solum ex parte subiecti, sufficit quod ministerialiter deseruiat fini prædestinationis, & ad talem finem ordinetur de facto, etiam si de se nullam habeat proportionem per se, vel connexionem cum eo, sed solum extrinsecè ad id ordinetur, nec de se det motuum aut occasionem præbendi gratiam, vel formam supernaturalem; sed perfectiones naturales, ut bona indoles, ingenium, &c. hoc modo se habent: ergo sunt imperatiue effectus prædestinationis, etiam ut medium, non per se, & intrinsecè conducens ad finem, sed ministerialiter, & extrinsecè. Maior est certa, quia effectus, qui solum est imperatiue ab aliqua potentia, aut virtute, solum est effectus illius per extrinsecam ordinationem ad finem imperantis: ergo non supponit in effectu im-

perato intrinsecam connexionem, & ordinem ad illum finem, & consequenter neque cum aliis mediis eiusdem ordinis cum fine: ergo neque quod præbeat motuum aut occasionem dandi illum finem, vel talia media, sed solum quod gratis, & per extrinsecam ordinationem se habeat erga talia media, & finem supernaturalem. Minor verò probatur, quia illæ perfectiones naturales in prædestinatis de facto subordinantur fini prædestinationis, quia deseruiunt actionibus ipsis prædestinatorum: de facto enim utitur gratia illa bona indole, & ingenio, & temperamento, & suo fini subordinat: ergo ab illo fine imperantur. Itaque tales perfectiones si considerentur ut sunt proprietates quædā, & quasi potentiæ, aut dispositiones habituales subiecti, non ordinantur, aut imperantur à fine prædestinationis tanquam media, quia non sunt formæ superadditæ, aut actus, sed potius ex parte subiecti se tenent, quasi partes eius, aut illud integrantes, vel ornantes; & sic sunt effectus prædestinationis eo modo quo substantia ipsa prædestinati, scilicet ut subiectum glorificabile, & eleuable ad finem illum supernaturalem. Si autem considerentur actus procedentes à talibus potentiis ut à tali ingenio, & indole, &c. & sunt actus ordinis naturalis, sic etiam à gratia imperari possunt; & ipsi fini prædestinationis subiiciuntur si peccata non sint, & saltem de eis aliquod accidentale gaudium erit in cælo, ut de operibus bonis moralibus dicemus *seq. conclusione.* Et reliquæ omnes actiones naturales, quatenus deseruiunt generationi, conseruationi, aut lætationi prædestinati, etiam diriguntur, & ordinantur à fine prædestinationis, & sub ipso continentur; & sic ab ipso causantur, & effectus eius sunt, ut imperati ab ipsa prædestinatione. Et hoc modo sunt effectus eius ut media, non ut substantia, & subiectum ipsum, quia sunt actus procedentes à subiecto: ergo non prædestinantur ut subiectum ipsum, nec etiam ut media eiusdem ordinis, & proportionis cum fine, sed ut ministerialiter deseruiant fini, & extrinsecè, non necessariò ad illum pertinentia.

17 Ex quibus patet minùs bene processisse aliorum opiniones in hoc puncto distinguentes de istis perfectionibus naturalibus, ut ex principiis naturæ pendent, vel ut dantur ex speciali Dei beneficio. Et hoc secundo modo putant se habere ut medium aliquo modo conducens: saltem ad habendum minora peccata, vel vitanda, plura. Primo autem modo non esse effectum prædestinationis ut medium, sed ut subiectum. Cæterum si loquamur de medio proportionato, & per se connexionem habente cum fine, sic nullo modo tales perfectiones naturales, ut indoles, ingenium, &c. sunt effectus prædestinationis, quia nullo modo per se conducunt, aut per se connexionem habent cum gratia, aut fide: semper enim fides, & gratia, sunt speciale Dei beneficium, nullamque habent connexionem per se cum tali ingenio, aut indole, unde excellentissima ingenia, & ipse summus Angelus, qui cæteros antecellunt in intellectu à beatitudine exclusi sunt, & hoc quantumcumque illa ingenia dentur ex intentione supernaturalis finis, quia talis intentio non facit connexionem per se cum illo fine, sed semper requiritur nouum, & speciale beneficium ut detur gratia. Quod verò conducere possint ad vitanda aliqua peccata, non obstat; quia etiam in reprobis, & in quibus non dantur ex intentione finis supernaturalis, hoc habent: multi enim habent minorem inclin-

tionem ad aliqua peccata, & pereunt, alij verò pessimæ inclinationis, & multorum criminum præueniuntur in ultimo à gratia, & saluantur. Hæc ergo euitatio peccatorum ex naturali indole non inducit connexionem per se cum gratia: si verò loquamur de medio, non per se proportionato, aut per se connexo cum fine, sed solum extrinsecè, & ministerialiter deserviente, sic bona indoles, ingenium, &c. etiam ut pendent à principiis naturæ, & sine speciali beneficio, aut miraculo data, sunt effectus prædestinationis, quia ipsi fini prædestinationis subordinantur, & ab eo imperantur: ipsi enim subiiciuntur omnia quæ sunt in prædestinato, etiam si ex speciali beneficio, aut miraculo non dentur, sed ex ipsa generali ratione, quia prædestinatio versatur circa superiorem finem, omnia ista naturalia ei subordinantur, & effectus eius sunt. Vnde patet etiam impugnatio sententiæ Vasquez: licet enim bona indoles, & ingenium, &c. non sint causa, vel occasio dandi fidem, & gratiam tanquam medium per se conducentis & connexum, bene tamen ut extrinsecè, & ministerialiter deserviens, eique subordinatum.

Quod verò attinet ad sententiam Molinæ, constat respectu providentiæ generalis nullam mortem esse fortuitam, & permissam tantum à Deo, sed per se ordinatam eo modo quo omnes rerum corruptiones: istæ enim cum generationibus ipsis computantur, & sicut omnis generatio est intenta, & non permissa tantum, sic corruptio inde consequens non est purè permissa: nec enim est malum culpæ, ut solum sit à Deo permissa. Nec in hoc est differentia de morte fortuita, & casuali, aut præmeditata: respectu enim providentiæ Dei nihil casuale est, licet nobis fortuitum sit, unde de omnibus æquè iudicandum est respectu Dei. Si verò loquamur non de providentia generali, sed de prædestinatione, constat aliquando dependere ultimam perseverantiam, & decessum in gratia à morte facta tali tempore, aut loco, aut facta subito, & casualiter, & non præmeditate, quia si non casualiter, & subito fieret, fortè ex tentationibus perichlaretur; & è contra aliquando mors subita est effectus reprobationis. Vnde & de iustis dicitur, quod *Iustus si morte præoccupatus fuerit, in refrigerio erit*. Quare talis mors potest esse effectus prædestinationis. Nec obstat fundamentum Molinæ, quia mors subita non est malum culpæ; & sic non est purè permissa; nec tamen est per se intenta ut finis, sed potest esse ordinata, & volita ut medium, in quantum est passio, seu pœna sic ordinata, ut vel sit occasio, vel conditio, ut ultima perseverantia sit in gratia.

Dico ultimò: Opera bona moralia naturalis ordinis sunt effectus prædestinationis in prædestinato imperatiuè. Hæc ferè ex dictis constat: tum generali ratione, quia omnia quæ in prædestinato sunt, superiori fini subordinantur, & cum ille finis sit ita superior, amplectitur omnia inferiora, & subordinat sibi: tum etiam speciali ratione, quia de istis operibus bonis habet prædestinatus in calo accidentale gaudium: ergo pertinebunt ad gloriam, & consequenter sub effectus prædestinationis cadent: tum denique quia ministerialiter possunt deservire ad virtutem, sicut aliæ res naturales, ut diuitiæ, & commoditas, aut dispendia vitæ, &c. & consequenter possunt inter effectus prædestinationis computari, quia diligentibus Deum omnia coope-

Ioan. à S. Thoma in 1. part. D. Thomæ.

rantur in bonum. Et ex hoc sumitur secunda pars, quod imperatiuè sunt effectus prædestinationis, non elicitivè: nam ista opera bona non eliciuntur immediatè à gratia, cum supernaturalis non sint, sed à naturali virtute, & potentia: ergo neque sunt elicitivè, & immediatè à prædestinatione, quia prædestinatio versatur propriè, & immediatè circa gratiam, cum sit gratiæ reparatio.

Quod si inquiras, an etiam opera bona moralia facta extra gratiam cum sint opera mortua, sint effectus prædestinationis.

Resp. esse, tum quia de illis dabitur accidentale gaudium in æterna vita; & sic pertinent ad gloriam: tum quia possunt conducere ad finem supernaturalem ministerialiter, aut occasionaliter, vel quia aliquando procedunt ex auxilio supernaturali, & intuitu finis supernaturalis à Deo dantur, ut cum quis in peccato existens dat eleemosynam intuitu Christi, vel B. Virginis, & inde mouetur ad dolendum de sua miseria, & querendum à Deo eleemosynam spiritualem; aut etiam postea cogitando de tali opere facto in statu peccati accipit ab illo exemplum, & mouetur ad faciendum aliud simile quando est in gratia, aut aliis multis modis ordinari potest à Deo ad finem supernaturalem; & sic imperari à prædestinatione, & esse effectus illius.

ARTICVLVS VI.

Utrum permissio peccati sit effectus prædestinationis?

Permissio peccati, sicut & obduratio cordis in peccato sunt effectus priuatiui, quatenus Deus nō largiendo gratiam seu auxilium, quo peccatum vitaretur, sinit creaturam in illud labi, sicut si concursum suum suspendat quo creaturas in esse conseruat, in nihilum deciderent. Et ita dicit August. *epist. 105. ad Sixtum*, quod *Deus non obdurat impartiendo malitiam, sed non largiendo gratiam*. Et *lib. ad Simplic. quæst. 2. Obduratio*, inquit, *Dei, est nolle misereri, ut non ab illo irrogetur aliquid quo sit homo deterior, sed tantum quo sit melior non erogetur*. Cum ergo permissio peccati sit solum non largitio gratiæ, seu denegatio, & carentia auxilij diuini, quo posito euitaretur peccatum, sumi potest ista permissio dupliciter, vel actiue ex parte Dei; & sic est denegatio auxilij, vel passiue ex parte nostra; & sic est carentia, seu priuatio ipsa gratiæ. Peccatum autem consequitur post istam carentiam, seu denegationem auxilij, quatenus homo illa gratia destitutus liberè auertitur à Deo: Vnde subtractio, & denegatio ipsa auxilij non est culpa hominis, sed quod denegato auxilio operetur contra Deum, in hoc est peccatum, sicut lapis non cadit per subtractionem columnæ detinentis, sed per gravitatem suam qua tendit deorsum remoto obstaculo. Et licet communiter denegetur hominibus auxilium in pœnam alicuius peccati præcedentis, & in ipso originali peccato sit sufficiens ratio denegandi illud quando primò aliquis peccat; tamen non semper denegatio auxilij fit per modum pœnæ, quia non semper supponit culpam, ut patet in ipso primo peccato, quod non potuit contingere sine carentia alicuius auxilij, nec tamen supposuit aliud prius peccatum; ut in peccato Angeli, & peccato primi hominis in statu innocentiae, & in

li 3

primo

primo peccato hominis baptizati, & existentis in gratia. Nunquam tamen ista permissio, & obduratio sit sine aliquo obstaculo ex parte nostra, licet non sit peccatum præcedens, ut docet S. Thom. 1. 2. q. 79. art. 3. quia nunquam aueritur humanum cor ab uno, nisi convertendo se ad aliud, & conversio illa ad oppositum est impeditiva divini luminis, & gratiæ. Non tamen requiritur quod hoc impedimentum præcedat tempore, sed sufficit quod prius natura, in diverso genere causæ.

Quid sit certum in hac parte, & in quo sit punctus difficultatis.

2 Tria sunt certa in hac parte.

Primum quod ipsum peccatum formaliter pro malitia, nullo modo nec per se, nec per accidens est effectus prædestinationis.

Secundum quod ipsa permissio activè sumpta ex parte Dei non est effectus prædestinationis, sed solum potest esse difficultas de ipsa permissione passiva, id est, pro ipsa carentia auxilij in nobis existente.

Tertium est non esse difficultatem de ipsa carentia seu denegatione auxilij secundum se: sic enim non est aliud quam negatio quædam gratiæ, quæ de se indifferens est, ut ordinetur, vel ad condemnationem hominis ex iustitia Dei, vel ad aliquod maius bonum ex misericordia divina. Unde de se non potest esse effectus prædestinationis determinatè magis quam reprobationis: ad minus enim in hoc regulari debet, sicut res naturales, & substantia prædestinati, quæ de se non est determinatè effectus prædestinationis, cum sit indifferens ad prædestinationem, & reprobationem, ut art. præcedenti ponderatum est; & sic ratione sui non potest permissio peccati esse effectus prædestinationis magis quam reprobationis: imò ex natura sua magis inclinat, & ordinatur ad damnationem, quam ad saluationem, ut optimè advertit S. Thom. 1. 2. q. 79. art. 4. Hac tria præsupposita certa sunt. Hoc quidem ultimum ex probatione allata, quia de se est effectus indifferens, & consequenter non est determinatè effectus prædestinationis. Secundum verò ex eo quod denegatio illa gratiæ activè sumpta ex parte Dei non potest esse effectus alicuius causæ vel providentiæ, cum sit ipsa suspensio auxilij ex parte Dei se tenens: Solum ergo carentia, seu privatio inde resultans in nobis potest esse effectus providentiæ, eo modo quo privationes, effectus dici possunt. Primum verò constans est ex generali ratione, quia Deus non potest esse author peccati, cum Deus nihil odio habeat eorum quæ fecit, ut dicitur Sapient. 11. habet autem odio peccatum, ut dicitur Sapient. 14. *Odio est Deus impius, & impietas eius.* Unde dicit Augustin. lib. 83. qq. quæstion. 3. quod *Deus non est causa eius quod homo sit deterior.* Si ergo Deus nec generali ratione potest esse causa peccati quoad malitiam, quanto minus poterit speciali ratione esse causa eius? Esset autem speciali ratione, si esset effectus prædestinationis ipsum peccatum, quia prædestinatio est specialis providentia. Neque hoc subterfugitur aliquorum elusione, qui dicunt peccatum non posse esse effectum diviniæ prædestinationis ex primaria intentione, benè tamen ex secundaria; quia ut supra advertimus, hoc quod est dicere ex secundaria intentione, vel tollit quod non sit ex ordinatione, & influxu Dei, sed ex sola permissione, vel id nõ tollit, sed adhuc affirmat quod ex directione, & ordinatione positiva Dei sit effectus eius, licet non ita principaliter, sicut gene-

rans primariò causat formam substantialem, & secundariò accidentia, seu proprietates. Si primum dicitur, iam non est peccatum effectus diviniæ providentiæ in se, sed eius permissio, quod nos dicimus. Si secundum, remanet idem inconueniens, quia etiam ea quæ de secundaria intentione sunt, verè à Deo sunt, & ab ipso efficiuntur, & consequenter non habentur odio ab ipso, sed amantur, quia vult illis esse, & bonum, aut saltem ea intendit, & consequenter ad se ordinat ut ad finem: peccatum autem est deordinatio à Deo, ut à fine: nullo ergo modo est effectus Dei, etiam de secundaria intentione.

Punctus ergo difficultatis ad hoc reducitur, an permissio peccati, seu carentia auxilij, quæ secundum se est indifferens ad damnationem, vel ad saluationem, & bonum ipsius hominis, possit de facto assumi ut medium ad gloriam prædestinati, & consequenter esse effectus prædestinationis, ratione alicuius boni adiuncti sine hoc quod ipsum peccatum intendatur, & attingatur ab ipsa prædestinatione divina: hoc enim semper vitandum à nobis est, ut in primo præsupposito est ostensum. Invenire autem medium, quo de facto, & regulariter in hac vita, & iuxta modum procedendi in illa, permissio peccati, & carentia gratiæ ita intendatur à Deo, ut nullo modo attingatur peccatum, difficile est. Nam licet multæ virtutes sint, quæ non exercentur, nisi supposito peccato, aut proprio, aut alieno, ut pœnitentia, quæ supponit peccatum proprium, patientia iniuriarum, quæ supponit iniquitatem offendentis, conscientia propriæ fragilitatis & infirmitatis, ex qua nascitur humilitas, quæ non innotescit homini pro hac vita, nisi experientiâ peccati, tamen hæc omnia non possunt intendi, non intendendo peccatum ipsum, ut postea ponderabitur. Et quidem si per scientiâ infusam, aut revelationem innotesceret homini ipsa carentia auxilij divini, posset forsitan talis carentia ordinari à Deo ad bonum ipsius prædestinati independentem à peccato. Si autem per experientiam ipsam peccati debet propriam fragilitatem cognoscere, & sic humiliari, non videtur ordinari posse talem carentiam gratiæ ut manifestantem fragilitatem propriam per peccatum sine intentione ipsiusmet peccati. Et sic difficultas tota est in assignando motivo, & medio, quo possit permissio peccati ordinari ad bonum ipsius hominis, sine hoc quod intendatur peccatum. Et dato quod possit, an ex ipso fine beatitudinis, & gloriæ possit sic intendi à Deo quia huic fini specialiter videtur opponi ipsa carentia gratiæ, quæ est permissio peccati.

Opiniones.

Dux celebriores in hac parte versantur.

Prima negat carentiam gratiæ posse esse effectum prædestinationis, & ex fine beatitudinis intendi.

Secunda affirmat. Prima docetur à P. Vasquez hic disp. 93. cap. 2. & sequitur Arrubal hic disp. 82. cap. 2. Villegas controu. 15. Alarcon tract. 4. disp. 4. c. 5. §. 2. qui censet quod licet absolute, & secundum se negatio auxilij possit esse effectus prædestinationis; de facto tamen, & secluso miraculo non esse. Et in hunc sensum trahit Vasquez, & Erize disp. 30. cap. 6. num. 42. Nec hi Authores omnino negant posse permissionem peccati deferre ad aliquem effectum pium, & ipsi gratiæ convenientem, sed præcipuè intendunt non esse effectum prædestinationis, nec speciale beneficium ex

ex affectu beatitudinis à Deo procedens. Sed tamen eorum fundamenta si quid probant, etiam probant permissionem peccati non esse effectum gratiæ; sicut nec prædestinationis, & beatitudinis, imò nec posse esse effectum Dei, quia putant non posse intendi à Deo, nisi etiam intendat peccatum ipsum quod inuoluitur in ipsa permissione peccati. Et totum pondus huius sententiæ in hoc præcisè consistit, quòd si permissio ista est effectus prædestinationis propter quodcumque motuum quod de facto assignari potest, illud attinget etiam, & intendet ipsum peccatum, quod postea in solutione argumentorum magis ponderabitur.

Secunda sententia affirmatiua valde communis est inter Doctores, præsertim apud Thomistas. Eam significat Caietan. in hac qn. 23. art. 5. §. Ad 4. ubi loquitur quomodo permissio peccati possit esse intenta à Deo propter bona, quæ inde occasionantur: inde enim sumitur fundamentum ad asserendum quod possit esse effectus prædestinationis. Docet eam Bannez, Nazarius, Zumel, Cornelio, super art. 2. huius quest. Gonzalez hic disp. 71. Cursus Carmel. tract. 5. de prædestin. disp. 6. dub. unico. Suarez lib. 3. de prædestin. c. 8. licet non ponat permissionem esse effectum prædestinationis in his virtutibus, quæ per se requirunt, & præsupponunt peccatum, ut poenitentia, sed quæ solum per accidens, de quo infra diceretur. Ruiz disp. 23. sect. 1. Grados, & alij. Verum est aliquos distinguere in hac sententia de permissione peccati, quando est solum subtractio auxiliij naturalis, vel quando est subtractio auxiliij supernaturalis. Et primo modo dicunt permissionem esse effectum imperatum à prædestinatione, secundo modo elicium. Alij verò absolute docent permissionem esse effectum imperatum à prædestinatione, non elicium, quia licet gratia supernaturalis sit, ipsa tamen gratiæ negatio aliquid supernaturale non est, nihil autem aliud est permissio quàm negatio, & carentia gratiæ.

Resolutio.

Sit vnica conclusio: Permissio peccati de facto, est effectus prædestinationis, datumque sufficiens motuum quo possit ordinari ad gloriam sine hoc quod intentio Dei feratur super ipsum peccatum. Hac conclusio est sine dubio mens D. Thom. qui videndus est super epist. ad Rom. c. 8. lect. 6. exponens illa verba, *Diligentibus Deum omnia cooperantur in bonum*, ubi inquit: *Sed nunquid etiam peccata eis cooperantur in bonum? Quidam dicunt quòd peccata non continentur sub hoc quòd dicit omnia, quia secundum August. peccatum nihil est, & nihil sunt homines, cum peccant. Sed contra hoc est quòd in glossa sequitur: Vtique adeo talibus Deus omnia cooperatur in bonum, ut si qui horum deuiant, & exorbitant, etiam hoc ipsum faciat eis proficere in bonum, unde & in Psalmo 36. dicitur: cum ceciderit, non collidetur, quia Dominus supponit manum suam. Et infr. Ex hoc autem quòd iustus cadit, resurgit cautior, & humilior: unde in glossa subditur postquam dixerat quòd hoc ipsum faciat eis in bonum proficere, quia sibi humiliores redeunt atque cautiores: discunt enim cum tremore se exultare debere, non quasi arrogando sibi tanquam de sua virtute, fiduciam permanendi. Si ergo Deus facit proficere in bonum ipsis prædestinatis hoc ipso quòd cadunt, non repugnat ex hac eadem intentione, seu voluntate faciendi proficere in bonum, permittere Deum ipsum lapsum; & sic talis permissio erit causata ex illa priori voluntate, atque adeo eius effectus: Illa autem prior voluntas, ut proficiat in bonum, oritur ex voluntate prædesti-*

natiua, quia accipitur ut medium præparatum ad gloriam: hæc enim cooperantur in bonum diligentibus Deum. *Iis, inquit, qui secundum propositum vocati sunt sancti*, qui utique sunt prædestinati; & sic ex illo proposito oritur quòd omnia eis cooperentur in bonum etiam peccata: ergo ex eodem proposito oritur, quòd permittatur peccatum quòd eis cooperatur in bonum.

Expressius rem tradidit S. Thom. 1. 2. qu. 79. art. 4. ubi inquit, quòd *Excacatio est quoddam præambulum ad peccatum* (excacatio ad amissionem, seu carentiam gratiæ, & luminis diuini pertinet) *peccatum autem ad duo ordinatur, ad vnum quidem per se, scil. ad damnationem, ad aliud autem ex diuina misericordia, seu prouidentia, scil. ad sanationem, in quantum Deus permittit cadere in peccatum; ut peccatum suum agnoscentes humilientur, & conuertantur. sicut August. dicit in lib. de natura, & gratia. Vnde & excacatio sui natura ordinatur ad damnationem eius, qui excacatur, propter quòd ponitur etiam reprobationis effectus: sed ex diuina misericordia excacatio ad tempus ordinatur medicinaliter ad salutem eorum qui excacantur; sed hæc misericordia non omnibus impenditur excacatis, sed prædestinatis solum, quibus omnia cooperantur in bonum, sicut dicitur Rom. 8.* Vbi S. Thom. aperte ponit excacationem ad tempus, seu permissionem peccati, & carentiam gratiæ ordinari ex misericordia, seu prouidentia Dei ad sanationem excacati. Ergo sentit esse effectum illius prouidentiae sic ordinantis, sed illa prouidentia est prædestinatio, ut ibidem dicit S. Thom. quia dicit hanc misericordiam non impendi omnibus, sed tantum prædestinatis: ergo excacatio, & permissio illa peccati est effectus prædestinationis. Deinde quia excacationem perpetuam, quæ de se ordinatur ad condemnationem, dicit D. Thom. esse effectum reprobationis, excacationem autem temporalem, quæ ordinatur ad salutem ex misericordia Dei dicit solum impendi prædestinatis: ergo sentit talem excacationem, & permissionem esse effectum prædestinationis, sicut, & esse effectum misericordiae ordinantis ad salutem, quia misericordia ordinans ad salutem est prædestinatio.

Conformiter ad hanc sententiam D. Thom. sunt multæ locutiones Patrum, & Scripturæ, ubi frequenter docetur Deum permittere peccata propter bonum nostrum, aut propter gloriam suam, Et generaliter hoc significat Scriptura loco cit. ad Rom. 8. *diligentibus Deum omnia cooperantur in bonum*, adiuncta glossa citata, quæ dicit, *cooperari etiam peccata*. Specialiter id docet Scriptura in aliis locis, ubi peccata significat occasionem dare humilitati nostræ, aliisque bonis, quæ ex recognitione peccati oriuntur, sicut Psal. 118. *Præquam humiliarer ego deliqui*. Et iterum, *Bonum mihi quia humiliasti me*. Et de stimulo carnis, qui utique si ad temptationem pertinet, ad peccatum inclinatur, & vix sine peccato accidit, dicit Apostolus 2. ad Corinth. 13. *Ne magnitudo reuelationum excollat me, datus est mihi stimulus carnis meæ Angelus Satana, qui me collaphizet*. Permittuntur ergo ista à Deo propter humiliationem hominis. Id etiam probat August. lib. de natura, & gratia c. 24. ex illo Psal. 29. *Auertisti faciem tuam à me, & factus sum conturbatus*, quæ conturbatio, inquit, contra superbiam fuit medicinalis operatio. Est autem sciendum quòd inter alia Pelagius, contra quem in illo libro August. agit, hoc tolerare non poterat, quòd diceretur necessarium aliquando esse aliquod peccatum, ut vitaretur superbia, vel aliud peccatum, & in hoc maxime ab August. impugnatur, cuius verba placet hic ascribere, ut melius mens eius omnibus innotescere possit:

380 Quæst. XXIII. De Prædestinatione,

Sic ait. cit. libro c. 27. *Acute sanè tractat, & versat, & quantum sibi videtur, redarguit atque convincit, quod eis dicitur, etiam necessarium fuisse homini ad auferendum superbiam, vel gloria occasionem, ut abque peccato esse non posset. Absurdissimum quidem, & stultissimum putat peccatum fuisse, ne peccatum esset, quia & ipsa superbia utique peccatum est: quasi non & vlcus in dolore sit, & sectio dolorem operetur, ut dolor dolore tollatur. Et infir. Sed Deus, inquit, potest omnia sanare. Hoc utique agit ut sanet omnia, sed agit iudicio suo, nec ordinem sanandi accipit ab egroto. Proculdubio quippe firmissimum Apostolum volebat efficere, cui tamen dixit: Virtus in infirmitate perficitur, & non ei toties oranti auferret nescio quem stimulum carnis, quem sibi dicit datum, ne magnitudine revelationum extolleretur. Cetera enim vitia tantum in malefactis valent, sola autem superbia etiam in benefactis cauenda est. Et tandem concludit c. 28. Non itaque dicitur homini, necesse est peccare ne pecces, sed dicitur homini, deserit aliquantum Deus, unde superbis, ut scias non tuum, sed eius esse, & discas superbus non esse. Constat ergo ex August. redarguente Pelagium, Deum ob hoc deferere hominem, seu peccata permittere, ut superbia eius curetur; & sic permissionem peccati esse effectum illius voluntatis sanatiæ, ex hoc autem & prædestinatiæ esse potest, quia sanitas prædestinatorum ex voluntate prædestinantis est. Ac denique nulla mala Deum permittere, nisi ex quolibet malo posset elicere bonum, disertè S. August. affirmat in Enchiridio cap. 11.*

8 Ad idem facit quod S. Damascenus docet lib. 2. de fide c. 29. *Deum aliquando velle permittere peccatum propter gloriam suam, aliquando propter bonum aliorum, aliquando propter bonum ipsiusmet peccatoris.* Nullum autem tam grande bonum peccatoris est, quam ut conuertatur, & humilietur, & salvetur: ergo propter salutem potest fieri ista permissio, atque adeo effectus esse voluntatis, & providentiæ saluantis, quæ est prædestinatio. Et similia videri possunt in D. Gregorio homil. 21. in Evangelia, Bernardo serm. 54. in Cant. Ambros. serm. 47. de fide Petri, & aliis Patribus.

9 Ad hæc, & similia testimonia responderi potest primò, quod Scriptura, & Patres loquuntur de permissione peccati propter nostrum bonum, non tanquam propter finem, sed quia peccatum occasio est illius boni, non propriè effectus eius, qua ratione dixit Nazianz. quod *peccatum deiectionis parens est, deiectio verò respicientia.* Ad quod reducitur quod alij dicunt aliis verbis, humilitatem, & similia bona esse conditionem *sine qua non* illius permissionis peccati, non causam finalem. Secundò dici potest, quod licet permissio dicatur effectus gratiæ, sed non prædestinationis, quia non datur ex intentione beatitudinis, & ut beneficium divinum. Vel tertio addi potest, Patres loqui non de ipsa permissione, sed de ipsis peccatis. Vnde si præfata testimonia aliquid probant, nimis probant: sic enim sequeretur non ipsam permissionem, sed ipsa peccata esse volita à Deo, & effectus prædestinationis, quia ea quæ Deus vult, scil. humilitatem, & conuersionem nostram, non ex permissione, sed ex peccatis ipsis confurgit.

10 Cæterum euasiones istæ non euacuant vim locutionis Scripturæ, & Patrum. Est enim omnino certum permissionem peccati non esse à Deo, nisi ob aliquam causam finalem, cum ista permissio, & ipsa carentia gratiæ, quod sit in isto, vel in illo, ad curam, & providentiam Dei pertineat, sicut, & ipsa gratiæ largitio: in nulla autem providentia movetur Deus, vel disponit de aliquo medio, vel effe-

ctu, nisi ob aliquem finem. Si ergo Patres assignant conditionem *sine qua non*, & non finem, diuinitè procedunt, non assignando id quod præcipuum est, & de quo dubitatio erat, scil. de causa finali, diuertunt autem ad id de quo dubitatio non est, scil. de conditione *sine qua non*; & iterum utendo verbis significantibus causam finalem, si solum volebant conditionem assignare, quod est rem obscurare, non declarare. Constat hoc, tum quia apud August. cum ostendit contra Pelagium ad hoc hominem non esse impeccabilem, sed Deum peccatum permittere, ut curetur peccatum superbiæ, non fuisse dubium de conditione *sine qua non*, vel de occasione, quasi curatio superbiæ esset conditio tantum, aut occasio permittendi peccatum: de hoc enim nullum poterat esse dubium, cum experientia constet, humiliari hominem ex peccato: si autem hoc solum pro conditione poneretur, & non pro ratione, seu causa, restabat satisfacere Pelagio, assignando illi rationem, & causam talis permissionis: quid enim refert inquirenti, & vrgenti cur Deus permittat homines esse peccabiles, assignare illi conditionem, & immittere causam, seu rationem? Tum etiam, quia dicitur excæcatio, seu permissio peccati ordinari ad salutem prædestinati, sicut ad condemnationem reprobis, ideòque ponitur effectus reprobationis, ut in verbis D. Thom. *suprà* relatis constat, idque refert ex August. ut patet cit. loco 1. 2. qu. 79. art. 4. in corp. non autem reprobatio se habet ut conditio *sine qua non*, sed ut vera causa, quia illa excæcatio se habet ut effectus eius. Ergo similiter cum dicitur ordinari ad salutem, salus non ponitur ut conditio, sed ut causa: id enim ad quod aliquid ordinatur, non est conditio eius tantum, sed finis, & causa, quia propter illud est, si ordinatur ad illud. Tum quia in citatis auctoritatibus dicitur Deum permittere peccata propter bonum peccatoris, v. g. ut humilietur, ubi ly *ut*, dicit causam motiuam, & finalem, & specialiter in auctoritate Damasceni relata dicitur, quod Deus aliquando permittit peccata propter gloriam suam, aliquando propter bonum aliorum, aliquando propter bonum ipsiusmet peccatoris, & idem diximus docere alios Patres *ibi* citatos: sed quando dicitur Deus permittere peccata propter gloriam suam, ly *propter*, dicit causam finalem, & non solum conditionem: ergo etiam quando dicit permittere peccata propter bonum ipsius peccatoris, ly *propter*, dicit finem, & non solum conditionem.

Secunda euasio omnino frigida est, quidquid enim potest esse effectus gratiæ, & ad illam ordinari, potest etiam effectus esse beatitudinis, & prædestinationis, quia beatitudo est finis per se gratiæ, & gratia ipsa consummata; Nec enim permissio peccati ordinatur ad gratiam, & est effectus illius solum ut interruptæ: sic enim potius non est effectus gratiæ, sed corruptio eius; ordinatur ergo ad gratiam reparandam, & est effectus gratiæ reparatæ: sic autem multò melius ordinatur ad gloriam, quia reparatio gratiæ ad gloriam tendit, quia tendit ad perseverandum, præsertim cum ex peccato resurgat homo cautior, & humilior.

Denique tertia euasio est extra rem, cum Patres expresse loquantur de permissione: dicit enim Damascen. *Deum velle permittere peccata propter gloriam suam, aut propter bonum nostrum*, dicit August. *Deum deferere hominem ut discat non esse superbus*; desertio autem, permissio est: dicit D. Thom. *ubi supra*, quod Deus permittit aliquos cadere in peccatum, ut peccatum suum agnoscentes conuertantur, ergo expresse loquuntur de permissione, & non de peccato ipso.

Funda

12 Fundamentum conclusionis positæ ferè iam at-
tactum est, quia permissio peccati est obiectum
volitum, & procuratum à Deo de facto, quia ex
voluntate, & providentia Dei nascitur, quodd de fa-
cto aliqui permittantur cadere in peccatum: ergo
etiam talis permissio est volita ex aliquo fine, quia
Deus in sua providentia, & in his quæ operatur ad
extra, nihil agit quod non sit ex fine, sed ex quo-
cumque fine sit volita permissio à Deo, non debet
esse volitum ipsum peccatum, licet necessariò illi
sit annexum, & ipsum bonum peccatoris, scil. con-
versio, & humiliatio est finis maximè congruus ta-
li permissioni: ergo propter ipsum bonum homi-
nis, scil. humiliationem vel conversionem, & con-
sequenter propter gloriam correspondentem illi
est de facto volita ista permissio. Totus discursus
est legitimus. Et primum antecedens omnino cer-
tum est, & per se notum, quod videlicet permissio
peccati sit volita, & procurata, seu prout à Deo ex
aliquo fine. Illa verò minor duas habet partes. Pri-
ma quod ex quocumque fine Deus velit talem
permissionem, non debet esse volitum peccatum,
licet illi necessariò annexum; & hæc est omninò
manifesta ex primo præsupposito *suprà* asserto,
quodd Deus nullo modo debet velle peccatum,
etiam si velit permissionem ipsam. Adde tamen
quodd ex quocumque fine Deus velit talem per-
missionem, semper difficultas illa potest opponi,
quodd Deus tenebitur velle ipsum peccatum, si sine
ipso finis ille attingi non potest. Et hoc patet, quia
finis propter quem Deus potest velle permissio-
nem peccati, vel est gloria sua, vel bonum no-
strum, scil. beatitudo in tali, vel tali gradu, aut con-
versio vel humiliatio nostra, pro qua deseruit
ipsum peccatum. Si est bonum nostrum, habemus
intentum; quod potest se habere ut finis permissio-
nis, & permissio effectus eius sine hoc quod sit vo-
litum peccatum. Si est gloria Dei, currit eadem dif-
ficultas, quæ de ipsa beatitudine: si enim ideò dici-
tur quodd permissio non est effectus beatitudinis,
& prædestinationis, quia est contra beatitudinem,
& contra voluntatem Dei, eodem modo non erit
effectus gloriæ Dei, nec propter ipsam gloriam
Dei, tanquam propter finem, quia peccatum est
contra gloriam Dei, & contra eius voluntatem.
Nec potest dici quodd peccatum conducit ad iusti-
tiam punitivam Dei; & sic est propter gloriam Dei
ut manifestatur in eius iustitia. Non, inquam, dici
potest; tū quia hic loquimur de permissione pec-
cati in vasis misericordiæ, & in prædestinatis, in
quibus non habet locum condemnatio seu punitio:
tum quia iustitia punitiva si potest esse finis
permissionis peccati, sine hoc quod sit volitum
peccatum, multò melius iustitia expiativa, quæ est
pœnitentia, & est pars potentialis iustitiæ, poterit
esse finis talis permissionis. Sed quid moramur in
hoc? Ipsa permissio peccati est volita à Deo, ut
ostensum est, & tamen nihil magis connexum cum
peccato quàm ipsa permissio, non humiliatio, non
pœnitentia, nec denique quidquam aliud quod
peccatum supponit, est illi sic annexum, sicut ipsa
permissio ad quam infallibiliter sequitur pecca-
tum; & sic peccatum non solum utile, sed omnino
necessarium est ipsi permissioni, quia peccato non
secuto, ipsa permissio non subsistit: ergo si hoc non
obstante ipsa permissio est volita, & non pecca-
tum, cur non idem dicatur de humiliatione, de
conversione, & aliis similibus effectibus, quæ pec-
cata supponunt?

13 Et hinc probata manet secunda pars minoris,
quodd conversio, & humiliatio, & similia bona ho-
minis sunt finis maximè congruus ipsi permissio-

ni: nam constat quod ex misericordia Dei excæca-
tio, & obduratio ad tempus, & desertio Dei, seu
carentia gratiæ, ordinantur ad hoc ut aliquis reco-
gnoscat propriam infirmitatem, & erubescat, &
humilietur, & cautior resurgat, ad quod valde cō-
ducit ipsa experientia peccati. Et rursus maior
cautela, & humilitas conducit ad melius perseve-
randum, perseverantia autem est proprium do-
num, & effectus prædestinationis: ergo ipsa per-
missio peccati, etiam est congruum medium ad
facilius, & cautius perseverandum, & ad humiliter
sentiendum, & consequenter propter talem finem
potest esse volita, & præuisa à Deo, atque aded, &
effectus illius.

Dices: Ut velit Deus ex tali permissione, & 14
peccato secuto elicere aliquod bonum, oportet
prævidere, & præsupponere ipsum peccatum, &
tūc tale bonum prævidebitur, & providebitur in-
de eliciendum, sicut redemptio Christi ex peccato
hominis decretata est; & sic supposuit peccatum
ipsum præuisum, & consequenter eius permissio-
nem. Si autem supponit illud: ergo non est causa
permissionis eius: præsupponitur enim peccatum:
ergo, & antecedit permissio.

Sed Respon. quodd ut Deus velit elicere bonum
ex aliquo malo, non oportet quod supponat ipsum
malum ut executum de facto, & in re, sed sufficit
quodd supponat illud ut consequibile, vel sub con-
ditione futurum, sicut omnia media, quando in-
tenditur finis præsupponuntur ut possibilis, & de-
ducibilia ex fine, siquidem intentio cum sit efficax
voluntas, non fertur in finem præcisè, & secun-
dum se, sed ut assequibile per media, non quidem
iam executi, & in re, cum executio ex fine cau-
sanda sit, sed possibilis, in ordine ad quæ appetitur,
& intenditur ipse finis. Cum ergo vult Deus ali-
quod bonum facere, quod non nisi supposito pec-
cato potest fieri, sicut patientiam de iniuriis, humi-
litem de miseria, &c. intendit illud bonum cum
ordine ad permissionem peccati, tanquam ad me-
dium, nec est necesse quodd supponat illud execu-
tum, sicut nec reliqua media, quæ virtualiter in fi-
ne continentur, & in ordine ad quæ, ut in eo con-
tenta intenditur. Sufficit quodd ibi ut possibilis cō-
tineantur, & inde postea per electionem talis me-
dij educantur, unumquodque iuxta naturam, &
capacitatem suam, mala quidem ut permixta, & non
volita, reliqua ut volita, & causata. Quæ prævisio
mediorum in fine virtualiter, & ut in eo contenta,
non obstat, quominus talia media ut exequenda
sint effectus illius finis intenti, sicut omnis electio
mediorum est effectus intentionis finis, imò ne-
cesse est quodd omnis effectus virtualiter in sua
causa contineatur, ut inde postea de facto educatur.
Quodd si argumētum aliquid probaret, probaret ex
nullo fine posse permissionem illam esse volitam,
quia quicumque finis illi assignetur ad quem præ-
supponatur peccatum, ideò erit volita talis per-
missio, quia inde Deus maius elicit bonum: cum
enim Deus sit summè bonus non permetteret fieri
aliquod malum, nisi ex illo eliceret bonum, ut in-
quit August. in *Enchiridio* c. 11. Et tamen non se-
quitur: ergo præsupponitur illud malum iā execu-
tum; & sic permissio eius non est ex fine; sic enim
esset volita sine ordine ad finem, quod repugnat.
Quodd verò dicitur de prævisione peccati in re
executi ante decretum Incarnationis Christi, est
alia ratio, quia permissio peccati non potest se ha-
bere ut medium ad Incarnationem, quando illa in-
tenditur directè, ut remedium: quod enim per mo-
dum remedij est volitum, iam supponit existere
malum, cui remedium adhibet, non autem propter
remedium

remedium sub formalitate remedij potest tanquam propter finem esse volita eius permissio. Incarnatio autem est directè volita à Deo in remedium, & redemptionem peccati, vt modò supponimus. Sed de hoc ampliùs constabit tractando sequens punctum de pœnitentia, quæ eandem habet difficultatem ac de redemptione.

Permissio peccati an ex motiuo pœnitentia possit esse effectus prædestinationis?

15 Est in hoc specialis difficultas, eo quod speciali modo pœnitentia respicit peccatum, & præsupponit culpam, quàm aliæ virtutes, v.g. humilitas vel patientia, quia humilitas non respicit peccatum directè vt malum culpæ est, & auersiuum à Deo in ratione malitiæ, sed solum quatenus in illo relucet propria fragilitas, & miseria, quæ ex suspensione diuini auxilij accidit, licet non sine peccato, & malitia: patientia etiam respicit iniuriam, quatenus malum vexationis infert patienti, non quatenus auersionem facit à Deo: hoc enim per accidens ei est, quin potius vera patientia non tolerat peccatū vt est offensa Dei, sed vt propriam iniuriam. Vnde Deus intendens humilitatem vel patientiam, non est necesse quòd velit permissio, & carentiam gratiæ, quatenus ex illa sequitur peccatum in ratione culpæ, & malitiæ, sed quatenus inde sequitur propriæ fragilitatis notitia, vel vexatio patientiæ quæ est aliquid pœnale, & hoc pœnale potest à Deo intendi, non volendo malitiam peccati, licet in re sine peccato non fiat ab homine. Pœnitentia autem directè respicit ipsam malitiam, & auersionem Dei, vt materiam expiandam, sicut redemptio datur in remedium ipsius peccati vt peccatum est, & punitio sumitur de ipso peccato, vt culpa est. Vnde omninò oportet quòd ista supponant peccatum executum, & sic permissio peccati antecedit, non autem sit effectus eius; & sic pœnitentia, & punitio sunt de secundaria intentione Dei, non de primaria; quia malum præsupponunt, & ex tali præsuppositione intenduntur à Deo non absolute, & secundum se. Vel si absolute, & ex primaria intentione sunt volita, non apparet, quomodo peccatum ipsum non solum sit permissum, sed volitum, eo quod non conducit ipsa permissio ad pœnitentiam, nisi quatenus infert ipsum peccatum in ratione mali, & culpæ.

16 Propter hoc diuersimodè in hac parte sentiunt Authores. Nam P. Suarez et si concedat permissio- nem peccati posse esse effectum prædestinationis, habendo pro motiuo humilitatem (quæ per se non requirit peccatum actu, vt patet in Christo) patientiam, & alia similia, non tamen ex motiuo pœnitentia, ita quòd sit de primaria, & absoluta intentione Dei ante præuisum peccatum ob fundamenta allata, vt videri potest lib. 3. de prædestinat. cap. 8. num. 13. At verò M. Gonzalez disp. 71. cit. sect. 4. num. 34. in fine. oppositum sentit, scil. pœnitentiam posse esse de primatia intentione Dei, eiusque effectum posse esse permissio- nem peccati, sicut patientia Martyrum potest habere pro effectum permissio- nem peccati tyranni. Certe D. Thom. valde in hanc sententiam inclinare videtur, dum dicit loco cit. ex 1. 2. qu. 79. artic. 4. quòd ex diuina misericordia vel providentia ordinatur permissio peccati ad sanationem, in quantum Deus permittit aliquos cadere in peccatum, vt peccatum suum agnoscant humilientur, & conuertantur. Conuersio autem in peccatore idem est quod pœnitentia. Si ergo æqui-

parat D. Thom. in permissione peccati ordinatio- nem eius ad humiliationem, & ad conuersionem, non minus ex motiuo humilitatis, quàm ex motiuo pœnitentia, potest Deus velle permissio- nem. Et idem docet de patientia Martyrum respectu persecutionis Tyrannorum, 1. part. quæst. 22. artic. 2. ad 2.

Nihilominus distinguendum mihi videtur in hac parte quòd in pœnitentia, & aliis, quæ versantur erga malum sub ratione mali vindicandum, aut tollendum, duplex formalitas, seu motiuum attendi potest, sub quo sint volita.

Primò, sub motiuo, & formalitate remedij, vt in exercitio tollens, aut reformans malum, qua ratione dicitur 1. ad Timoth. 1. quòd *Christus Iesus venit in hunc mundum peccatores saluos facere*: hoc enim fuit motiuum veniendi, ad tollenda peccata.

Secundò, sub motiuo ostendendi virtutem, & excellentiam huius virtutis, & ponendi illam in vniuerso, in quo maximè resplendet tam ingens virtus, quæ destructiua est malorum: & quia eius præstantia apparere non potest, nisi posito malo quod vincit, & tollit, idè tale malum ex illo fine permittitur, sicut qui vellet ostendere vim, & præstantiam alicuius antidoti contra venenum, ad hoc venenum apponeret, vel hauriret, vt illud tolleretur, & multi aliquando vulnus inferunt corpori, vt virtutem medicamenti sanantis ostendant. Nec discordat ab hoc modo loquendi Scriptura, vt patet in illis verbis Pauli ad Rom. 9. *Dicit enim Scriptura Pharaoni, quia in hoc ipsum excitavi te, vt ostendam in te virtutem meam*; vbi ly vt, dicit causam finalem in quam ordinata est illa excitatio, scil. vt virtus Dei ostenderetur, & nomen eius annūciaretur; excitationem autem illam fuisse permissio- nem peccati Pharaonis perspicuè docet S. Thom. super eundem locum Pauli, & ex contextu deducitur: infert enim ex illis verbis Paulus: *Ergo cuius vult miseretur, & quem vult indurat*; induratio autem in malum est.

Igitur si pœnitentia, redemptio, punitio, & alia 18 similia, quæ directè respiciunt malum vt expiandum, & tollendum considerentur primo modo, existimo semper esse de secundaria intentione Dei, nec habere pro effectum permissio- nem peccati, sed illud supponere in executione, & super illud cadere, non quia inde necessariò sequeretur Deum debere velle ipsum malum, seu peccatū: hoc enim fundamentum minus solidum existimo, vt postea in solutione argumentorum ponderabo; sed quia est intentio præposita, & incongrua propter remedium permittere malum, cum remedium, in quantum tale, non sit finis: datur enim in subsidium defectus, qui accidit, finis autem per se, & non ratione alterius appetitur. Et deinde, quia velle permittere malum non est voluntas destruendi illud, sed contraria destructioni, cum stante permissione detur malum, seu non opponatur obstaculum ne sit. Voluntas autem dandi remedium est voluntas destruendi malum. Quomodo ergo potest vna voluntas ex alia oriri, & propter hoc permittere malum vt destruat præcisè in hoc sistendo? Bene tamen vt ex destructione mali reluceat aliqua excellentia, vel virtus sui oppositi, vt iam dicemus.

Si ergo consideretur pœnitentia, & alia similes 19 virtutes secundo modo, non repugnat quòd ex primaria Dei intentione, & ante præsupposita in re, & executi, ipsa mala intèdantur; & sic permissio peccati in sui executione sit effectus ipsius pœnitentia in genere causæ finalis, & motiua; itaque adèd, & ipsius prædestinationis, quæ talem pœnitentiam causat.

causat. Et hæc videtur esse mens D. Thom. tum loco cit. ex 1. 2. tum in qu. 5. de verit. art. 4. ubi prius in solutione ad 5. inquit, quod *Aliquod bonum est, quod non potest elici, nisi ex aliquo malo, sicut bonum patientia, non nisi ex malo persecutionis elicitur, & bonum poenitentia ex malo culpæ, & huiusmodi non eliciuntur ex malo, quasi ex causa per se, sed per accidens.* Postea verò solut. ad 10. tradit generalem doctrinam, quod *Facere malum propter bonum in homine reprehensibile est, nec Deo potest attribui, sed ordinare malum in bonum, hoc non contrariatur bonitati, & ideo permittere malum propter bonum inde eliciendum, Deo attribuitur.* Vbi ly *propter*, dicit causam finalem, ad quam ordinatur illa permissio, & pertinet ad Deum facere hanc ordinationem. Cum ergo vnum ex bonis ad quæ potest ordinari permissio peccati, sit conuersio, & poenitentia ipsius peccatoris, ut dixerat *solutio ad 5.* manifestum est, quod pertinet ad Deum hanc ordinationem facere, quia ad ipsum spectat omnia mala ordinare in bonum, & consequenter permissionem peccati velle ut effectum poenitentia, quatenus ordinatur in illam. Et quia hæc bona non eliciuntur ex malo ut ex causa per se, sed per accidens, ut D. Thom. dicit *illa solutione ad 5.* ideo non tenetur velle peccatum propter poenitentiam, sed permittere, quia ad causam per accidens sufficit permissio, non requiritur influxus, & volitio.

20 Et hoc est totum fundamentum huius sententia, quia Deus potest intendere manifestationem illius excellentia, & virtutis poenitentia in prædestinatis, ut conuertantur, & perseuerent, & vivant: licet enim etiam in reprobis possit locum habere poenitentia, & conuersio sine finali perseuerantia; tamen prout in prædestinatis habet fructum pertinentem ad vitam æternam, potest esse effectus prædestinationis, sicut etiam gratia potest inueniri in reprobis, licet non finaliter, & tamen gratia in prædestinatis est effectus prædestinationis. Itaque hoc obiectum est volibile à Deo, scilicet quod in prædestinatis manifestetur vis, & excellentia virtutis poenitentia: ergo potest ex hoc motu ordinare per misericordiam suam permissionem peccati in talem conuersionem poenitentia, ut ostendatur illa virtus, & excellentia eius, & ut ex tali malo, quale est peccatum, eliciatur tantum bonum, sicut est poenitentia. Nequæ hæc est præpostera, aut incongrua intentio, quia, ut in exemplis *supra* allatis vidimus, non est inconueniens quod ut ostendatur alicuius medicamenti virtus, aut ad alicuius particularis rei manifestationem permittatur aliquod malum, v. g. vulnus, vel infirmitas, &c. sicut etiam Propheta quidam, 3. Reg. 20. dixit ad alium ut percuteret eum, ut illa percussione viuacius Regi Israël manifestaret vim diuini iudicii. Ergo similiter potest permittere Deus vulnus animæ, ut manifestetur excellentia contritionis, & poenitentia. Neque ob hoc tenetur velle ipsum peccatum, sed permittere, tum quia peccatum non est capax volitionis, sed permissionis, nec peccatum dependet ab influxu, sed à suspensione influxus Dei; tum quia peccatum est causa per accidens respectu poenitentia, & se habet ut materia destruenda per poenitentiam, & respectu talis causæ per accidens sufficit permissio: nec enim requiritur ut materia destruenda sit per se volita, sicut qui vult generationem, non est necesse quod per se velit corruptionem, aut effectum malum, sed sufficit, quod permittat, ut statim amplius dicitur.

21 Et ex hoc tumi potest intelligentia pro materia de Incarnatione, quomodo Christus ex vi præsentis decreti non veniret, nisi existente peccato, eo

quod decretatus est ut Redemptor, redemptio autem præsupponit peccatum, non ut medium, sed ut materiam redemptionis, & remedij præsuppositam. Et quidam dicunt, quod peccatum debet præsupponi præuisum, & antecedens ad ipsum decretum Incarnationis; alij verò quod prius intelligitur Christus ut decretatus, deinde verò permissio peccati, ut medium ad talem Incarnationem Christi ut Redemptoris intelligitur decerni, eo quod Christus prædestinatus est finis omnium; & sic antecedit electionem mediorum. Nec tamen veniret Christus si non esset peccatum, sicut neque finis de facto executioni mandatur sine tali determinato medio. Et primi Authores considerant Christum prædestinatum esse ut Redemptorem in exercitio redimentem, & saluantem populum suum, & sub motu remedij peccati. Hoc autem essentialiter supponit peccatum in re, & consequenter permissionem eius, & sic in tali consideratione non potest permissio illa deriuari, & esse effectus decreti Incarnationis, sed præcedere, quia remedium supponit malum, & miseriam super quam cadat. Alij verò considerant in Christo etiam Redemptore excellentiam, & perfectionem, quam habet ut finis omnium creaturarum; & sic intendens Deus manifestare diuitias gloriæ suæ in Christo ut redemptore, prius decreuit illum ut finem, etiam in ratione Redemptoris, & quia virtus, & excellentia Redemptoris ostendi non potest, nisi posito peccato, permissio eius electa fuit à Deo ut medium, & consequenter fuit effectus decreti Incarnationis Christi. Sed de hoc latius 3. parte qu. 1. art. 3.

Fundamenta opposita sententia à principio huius dubij posita non vrgēt. Et si enim intercedat differentia illa inter poenitentiam ex vna parte, & humilitatem aut patientiam ex alia, tamen etiam poenitentia potest intendi, & esse volita directe sine hoc quod sit volitum peccatum, sed solum permissum, eo quod peccatum cum sit malum, nec per positum influxum, sed per carentiam auxilij resultat, non exigit ad sui positionem, voluntatem, & a morem Dei, sed permissionem erga ipsum, quia talis est eius quidditas, ut ex voluntate Dei denegante concursum, non influente dependeat. Et tamen si poenitentia ipsa sit volita tanquam remedium in exercitio, fatemur debere supponi peccatum, & permissionem eius antecederet, neque tunc esse effectum illius: secus verò si poenitentia sit volita ut ostendatur eius excellentia, & perfectio, ut explicatum est, qui modus intendendi poenitentiam maximè pertinet ad Deum, quia est vniuersalis promissor omnium, & vnicuique rei debet providere locum in Vniuerso, & eius perfectionem intendere, etiam poenitentia; de quo amplius dicitur in *solutione argument.*

Soluantur argumenta.

Contra principalem conclusionem arguitur 23 primò ex fundamento Vasqu. quod aliqui valde in hac parte magnificant ad probandum permissionem peccati de facto non esse effectum prædestinationis, nec ex voluntate dandi beatitudinem posse oriri. Nam permissio peccati, seu carentia gratia vel amatur à Deo, & est effectus prædestinationis tanquam utilis immediate, & per se, vel mediate, & per aliud. Primum esse non potest, quia cum permissio in se, & immediate sit priuatio gratia, eique opposita, non potest per se esse utilis, & conducing ad gloriam, atque adeò nec ad ipsam ordinari: si enim gratia per se, & essentialiter ordinatur

ad

ad gloriam, quomodo eius carentia potest etiam ordinari, & conducere per se ad gloriam. Si dicatur secundum, talis permissio non potest esse utilis ad gloriam per aliud medium, nisi includendo affectum, & amorem ad ipsum peccatum, hoc est impossibile in Deo: ergo etiam est impossibile quod permissio peccati sit effectus prædestinationis. Anteced. prob. quia si aliquod medium datur, ratione cuius permissio peccati sit eligibilis, maxime pœnitentia, vel humilitas prædestinati, ut scilicet agnoscens peccatum suum convertatur, & humilietur, ut docet D. Thom. 1. 2. cit. Neutrum autem deferuit. Non pœnitentia, quia hæc essentialiter respicit peccatum, ut peccatum, non verò permissionem ipsam, seu carentiam auxilij: nec enim carentia illa utilis est, aut conducens ad pœnitentiam, nisi ratione ipsius peccati: ergo si intuitu pœnitentiae amatur permissio, multò magis peccatum: hoc enim per se respicit pœnitentia ut expiandum, & ut materiam sui, non permissionem: nec enim permissio expiatur, sed peccatum. Non ergo potest amari permissio, nisi ut coniuncta peccato, & illa tina peccati, si amatur intuitu pœnitentiae. Addo, quod hac ratione pœnitentia semper est de secundaria intentione Dei, sicut & punitio, ut docet Damascen. lib. 2. de fide c. 29. eo quod supponit aliquid prius iam præsumptum, & permissum, scilicet peccatum, super quod cadit pœnitentia ut expiatio, & remedium illius: ergo illa permissio non potest esse effectus pœnitentiae, siquidem antecedit illam. Nec etiam humilitas potest esse ratio ob quam ametur illa permissio, quia in tantum conducit permissio peccati, seu carentia gratiæ ad humilitatem, in quantum ex illa privatione cognoscit quis infirmitatem suam, & defectum virium: & sic humiliatur coram Deo; sed non potest in hac vita cognosci ista infirmitas, & derelictio Dei, nisi per effectum subsequutum, qui est peccatum, quia quoad non peccat, quantumvis gravissimis temptationibus urgeatur quis, non caret auxilio, imò si resistit, signum est maiorem accepisse gratiam, si verò non resistit, iam peccat: ergo non nisi per peccatum cognoscitur illa fragilitas, & fit in nobis humilitas. Non ergo respicit permissionem per se, sed ratione peccati adiuncti; & sic idem est ac de pœnitentia.

24 Conf. quia subtractio gratiæ, seu permissio non est beneficium Dei, neque per Christum, sed potius beneficii denegatio, nec nos possumus illam petere à Deo: ergo non est effectus beatitudinis, neque conducens ad gloriam, quicquid enim ad gloriam conducit, non possumus à Deo petere; similiter neque est effectus prædestinationis: prædestinatio enim est beneficiorum Dei præparatio, ut dicit August. ergo omnis effectus eius est beneficium Dei, quia omnis effectus est præparatus à Deo: ergo si hæc permissio non est beneficium Dei, sed potius beneficii denegatio, non est effectus prædestinationis. Et saltem constat maius esse beneficium ipsam gratiam quàm negationem eius: ergo hæc negatio nunquam potest esse gratia, & beneficium ipsi homini: quomodo enim fit ei beneficium, & gratia, tollendo id quod est maius beneficium? Si autem non est gratia, nec beneficium, non est effectus prædestinationis, quæ solum est gratiæ præparatio.

Respon. verissimum esse quod permissio peccati ex se, & ab intrinseco, & ex propriis meritis non est conducens ad gloriam, neque effectus prædestinationis, sicut nec multæ res naturalis ordinis conducunt per se, & ex propriis meritis ad beatitudinem, sed solum extrinsece, & sub extrinseca

habitudine effectus prædestinationis sunt. Concedimus autem quod permissio peccati sub respectu ad pœnitentiam vel humilitatem, ordinatur ex misericordia divina ad bonum ipsius prædestinati, ut concedit D. Thom. cit. loco ex 1. 2. Et ad instantiam circa ipsam pœnitentiam, dicimus quod Deus volens, & intendens pœnitentiam non tenetur velle, sed permittere peccatum, quia peccatum non est capax nisi permissionis ex parte malitiæ, & volitionis, seu influentiæ ex parte entitatis. Unde licet ad pœnitentiam requiratur tanquam essentialiter præsuppositum ipsum peccatum, tamen qui vult illam pœnitentiam, non tenetur velle de illo requisito, nisi id cuius est capax, & eo modo quo est capax, & quo posito infallibiliter sequitur peccatum. Ad hoc autem sufficit permissio illius malitiæ, quia posita permissione ponetur, nec alio modo ponetur nisi per permissionem, nec est capax ut alio modo ponatur: sicut si Deus vult re productionem alicuius Angeli, non tenetur velle ipsum nihil in quod per annihilationem decidit, sed sufficit velle sui concursus suspensionem, qua posita decidet in nihilum, quia non alio modo est capax fieri annihilation, & hoc sufficit ad volendum illam re productionem, quæ necessario supponit annihilationem. Vel secundò dicitur, quod licet pœnitentia prærequiratur peccatum in ratione peccati, & mali, non tamen requirit illud essentialiter ut constitutum sui, sed ut materiam destruendam, & terminum à quo relinquendum. Quod autem requiritur ex parte termini à quo in aliquo motu, licet essentialiter præsuppositivè requiratur, non tamen per se intenditur, & amatur ab intendente motum, quia intentio solum fertur ad id quod se tenet ex parte termini ad quem, in hoc enim tenditur per se loquendo: de termino autem à quo, intentio non curat tanquam de re intenta, sed ut de re præsupposita ad relinquendum, non ad constituendum. Sufficit ergo permittere id quod ex parte termini à quo præsupponitur, & non est necesse illud intendere, quia non omne essentialiter requisitum ad aliquid est capax ut intendatur, & per se ametur, sed sufficit quod permittatur: quod enim requiritur essentialiter ut constitutum eius, vel ut positum manens in ipso ex parte termini ad quem, non ut relinquendum ex parte termini à quo, bene stat quod ametur, secus verò si non sic se habeat. Et sic licet in generatione naturali concurrant essentialiter tria principia, forma, materia, & privatio; tamen privatio non per se intenditur, & amatur, sed solum compositum ex forma, & materia. Et qui vult aliquam rem, non semper vult condiciones imperfectas ex parte materiæ consecutas necessario, sicut qui vult hominem mortalem, non vult famem, ægritudinem, & mortem necessario ex corruptibilitate secutas; qui vult ferrum ad faciendum enssem, non continuo vult ferruginem, qui vult pannum, non vult tineam, qui vult mulierem, non vult immunda, & imperfecta eius, sed tolerat, licet hæc omnia necessario sequantur ut imperfectiones ex parte materiæ.

Instabis: impossibile est quod intentio alicuius finis sit persecutio; & tamen electio mediij utilis, imò necessarij ad ipsum prosecutionem non sit, sed tantum permissio, cum in vi illius primæ prosecutionis, hoc desideretur: sed pœnitentia intenditur à Deo prosecutionivè, & permissio peccati est volita ut medium utile ad talem finem, & non est utile ratione sui, sed ratione peccati secuti, quia hoc est essentialiter requisitum ad pœnitentiam: ergo etiam prosecutionivè est volitum ipsum peccatum in ratione malitiæ, quia sic est

est utile, & conducens ad pœnitentiam.

26 Si dicas quoddam sufficit ad hoc permissio talis mali sicut mulier intendens ire ad Ecclesiam, ubi scit se concupiscendam ab alio, non tenetur abstinere, sed potest illam malitiam alterius permittere: hoc enim est scandalum passivum, non activum. Contra enim est, quia quando aliqua actio habet ex se necessariam adiunctam consecutionem peccati alterius, non potest fieri, non intento, nec voluto ipso peccato, secus verò est si ex se non habeat adiunctum tale peccatum, nec ex se postulet, sed ex alterius voluntate adiungatur, sicut si ista mulier in ordinando, si non potest non uti, seu permittere peccatum, quia per se requiritur ad talem ornatum, tenetur ab ornatu abstinere. Pœnitentia autem ex suo intrinseco, & essentiali conceptu præsupponit peccatum: non ergo potest directe intendi, non voluto peccato. Addo, quoddam efficaciter aliquid desiderans, non potest non efficaciter desiderare id, sine quo talis res poni non potest ab intrinseco, siue sit causa illius, siue conditio applicans, siue materia destruenda; sicut qui vult combustionem papyri, cum pulvere sulphureo, aut statuæ, vult applicationem ignis, & vult ipsam materiam destruendam ut papyrus, vel statuam, poni ut comburatur. Ergo si vult Deus intentione pœnitentiam, vult etiam materiam ab ea destruendam, scilicet peccata, & non solum permittit.

Resp. quoddam ex intentione prosecutiva alicuius finis, sequitur prosecutio mediæ, iuxta capacitatem, & modum talis mediæ, & in eo in quo per prosecutionem est volibile, non in eo quod solum est permixibile, & non volibile. Peccatum autem quoad suam malitiam non est capax poni in rerum natura per positionem divini concursus, & volitionem Dei, sed per suspensionem, & carentiam gratiæ. Non ergo volendum est peccatum pro pœnitentia, sed permittendum. Et hoc ideo quia non est medium positivè acquisitionis pœnitentiæ, & ductivum ad illam, nec effectus ex illa secutus, sed est aliquid præsuppositum destruendum per pœnitentiam, & ex parte termini à quo se tenens. Hoc autem non est necesse quod prosecutivè à voluntate procuretur, sed solum permixivè, quantum requiritur ut detur iste terminus à quo, & non amplius, quia terminus à quo per se loquendo, & in ratione termini à quo non intenditur, sed relinquitur, licet requiratur ad motum. Quoddam si relinquitur, sufficit permitti, non amari.

Et ad instantiam quæ adducitur de muliere orante se, aut faciente aliquid, cui per se est annexum, aut unde per se sequitur aliquod peccatum.

Resp. quoddam quando aliqua actio vel effectus habet annexum per se aliquod peccatum ex influentia aut conducentia ad peccatum, saltem morali, vel periculo proximo in illud ex ratione sua, qui vult talem actionem, vult ex consequenti peccatum, & non se habet purè permixivè, sed prosecutivè erga ipsum, saltem non refugiendo peccatum, dum talem actionem vult. Si autem peccatum non est annexum alicui per se, siue per influentiam in illud, siue per conducentiam aut periculum proximum ex natura sua, non vult peccatum, etiam si per accidens sequatur, aut ex pravitatem alterius, aut ex conditione materiæ in qua operatur, sicut mulier vadens ad Ecclesiam ubi ab alio concupiscitur, sicut prædicans veritatem, quando tyrannus est irritandus, sicut defendens res suas, vel se, cum occisione alterius, sicut audiens confessionem, cum pollutione secuta sine

Ioan. à S. Thoma in 1. part. D. Thoma.

consensu. Peccatum autem licet sit materia pœnitentiæ necessariò ad illam requisita, tamen quia ex parte termini à quo, & materiæ destruendæ se tenet, computatur inter res non intentas ab intendente pœnitentiam, sed relictas, & permixtas.

Ad id quod additur, quoddam desiderans aliquid, etiam desiderare debet quiddam illi est annexum, licet se habeat ut materia destruenda, hoc omninò est falsum univèrsaliter loquendo, ut *suprà* instatum est, si id quod est annexum illi, est annexum ratione alicuius imperfectionis aut privationis non intentæ; sicut ipsamet permissio peccati est volita à Deo ex aliquo fine, etiam si non sit ex pœnitentia, & tamen peccatum ex illa infallibiliter secutum non est volitum à Deo, licet implicet ex proprio conceptu permissionis, illam poni non secuto peccato. Et Deus volens creare Angelum, vel animam, debet illam creare ex nihilo, & supponere ipsum nihil: ergo debet velle, & amare ipsum nihil. Ridicula consequentia: ergo similiter si Deus vult pœnitentiam, quæ peccatum debet destruere, & cor mundum creare, non sequitur ergo debet velle ipsum peccatum, quoddam necessariò requiritur ex parte termini à quo, sicut ipsum nihil ad creationem, sed sufficit quoddam permittat ipsum peccatum, quia peccatum se habet ut defectus à Deo, nec alio modo capax est ut ponatur; nisi per permissionem Dei, nec amplius requiritur ut sit volitum id quod ex parte termini à quo per modum privationis se habet. Verum est quoddam aliquando materia destruenda, & ex parte termini à quo se habens potest esse volita, & procurata prosecutivè, sicut quoddam ignis fiat ex pulvere sulphureo, vel ex papyro, aut statuâ, ut exhibeat lætitiâ, & ludos, aut alium effectum. Et animal si debet generari, debet intendi ipsa seminis vel sanguinis coniunctio ex qua fit generatio. Sed hoc ideo est, quia talis materia destruenda non se habet ut privatio, & ut purè destruendum, sed ut afferens secum materiam relinquendam in ipso genito, vel sic determinatam, & præparatam, ut ex ipsa possit fieri proximè generatio: ex sanguine enim, & semine fit generatio animalis, non ex ligno, vel lapide, & ex chartis, & pulvere sulphureo fit ignis cum strepitu, & lætitiâ, non ex alia materia. Pœnitentia verò respicit peccata, ut materiam purè destruendam, non ut ex ipsis aliquid maneat vel præparetur ad aliquem effectum faciendum.

Ex quibus manent soluta reliqua quæ in primo 27 argumentoangebantur. Negamus quoddam pœnitentia solum sit de secundaria intentione Dei, nisi quando est volita ex motivo remedij, & satisfactionis in exercitio: sic enim supponit damnum iam factum. Secus si sit volita ex motivo ostendendi virtutem, & excellentiam gratiæ, & ipsius pœnitentiæ in immutando corde humano, & convertendo ad Deum ex profundo peccati. Ad id quod de humilitate dicitur, concedimus non cognosci à nobis in hac vita fragilitatem propriam, nisi cum de facto frangimur ipso lapsu, & casu peccati: neque carentiam auxilij, seu permissionem poni, nisi peccato secuto. Negamus tamen ad hoc necesse esse, ut sit volitus prosecutivè ipse lapsus, & peccatum, sed sufficit quoddam sit permixtus, quia solum intenditur propriæ miseræ notificatio, ad quoddam sufficit quoddam Deus eam sibi ipsi relinquat, & non sustineat manu sua, & hoc est permittit; hac enim derelictione posita, nihil ex homine sequi potest quoddam non sit vile, & miserum. Et quia hoc sequitur ad permissionem, non ad positivam volitionem

K K

tionem

tionem ipsius peccati; ideo sufficit ad dandam notitiam huius miserie, permittere culpam ipsam, qua permissione posita, sequitur consequenter miseria, & culpa, eiuſque experientia, unde sumitur humilitas, nec oportet ipsum peccatum velle, sed eius existentiam ex permissione sequi.

28 Ad Conf. dicitur quod permissio illa, seu subtractio gratiæ non est beneficium diuinum, si consideretur quoad intrinsecam, & ex propriis, concedo; si consideretur quoad extrinsecam, & ex parte ordinationis diuinæ, secundum quod ordinatur ad aliud bonum, vel ad impedimentum mali, nego. Sic ergo in quantum est beneficium extrinsecum, etiam potest esse prædestinationis effectus, ad quam pertinet non solum supernaturalia dona, & beneficia largiri, sed etiam ea quæ naturalia sunt, imò ea quæ sine peccato non sunt, ordinare ad bonum electorum. Et cum instatur, quod maius beneficium esset ipsa gratia, quam denegatio gratiæ; dico, quod si hæc duo præcisè, & secundum se considerentur, maius beneficium est gratia, quam denegatio gratiæ; si verò considerentur secundum aliquas extrinsecas circumstantias, aut ordinationem diuinam, maius beneficium est aliqua carentia gratiæ ad tempus, quam gratia ipsa, quia fortasse si illo tempore esset in gratia, fieret homo remissior, aut superbior, & incautior, unde postea caderet irreparabiliter, cadens verò, & postea surgens, humilior, & cautior reuiviscit, sicut qui vult ignem ardentius accendi, aliquot guttis aspergit carbones, & ad tempus extinguit aliquid, ut fortius accendatur.

Secundò arguit. Permissio etiam in ratione permissionis non potest esse volita à Deo: ergo neque potest esse effectus prædestinationis. Consequenter nota, quia effectus prædestinationis specialiter procuratur, & eligitur à Deo: ergo est volitus. Anteced. prob. tum quia Deus per illam permissionem negat homini congruum auxilium, licet det sufficiens: ergo si vult talem negationem, vult negationem nostri liberi consensus ad bonum, quod est impossibile, cum Deus præcipiat illum: ergo non vult eius negationem. Tum quia alias nos possemus velle, & desiderare illam permissionem, & negationem auxilij, siquidem possumus desiderare, & petere omnes effectus prædestinationis, & saltem sub motivo pœnitentiæ aut humilitatis possemus velle illam carentiam auxilij: si enim Deus sub illo motivo eam vult, etiam nos possumus sic velle, sicut Deus; & sic faceremus seu vellemus mala ut eueniant bona.

Confirma. quia pœnitentia non est bonum amabile absolute, sed supposita culpa, sicut nec medicina nisi supposita infirmitate, & imprudens ellet qui ex primaria intentione, ista velleret, & inde moueretur ad volendum infirmitatem propter medicinam. Unde D. Thom. 3. p. q. 61. absolute docet non esse futura Sacramenta in statu innocentiae, quia sunt medicina, & tunc non erant futuri morbi; nec admittit quod tunc ad ostensionem excellentiæ Sacramentorum futura essent Sacramenta: hoc enim præposterum videtur, quod ea quæ in remedium sunt instituta malorum, propter eorum excellentiam in finem assumantur, & ad hoc permittantur mala: nihil enim excellentius est, & melius ipsa Incarnatione, & tamen non est decretata, nisi supposito, & præiſo peccato, non eius excellentia prius est intenta, & deinde malum permisum propter eam. Denique voluntas pœnitentiæ est voluntas destruendi peccatum; & sic conuenienter ponitur præiſo peccato, non ante, cum non possit cadere pœnitentia, nisi super ipsum pec-

catum, quod debet destruere. Voluntas autem ostendendi excellentiam pœnitentiæ, & ob hoc permittendi peccatum, est virtualiter voluntas ponendi peccatum, quia voluntas finis est virtualiter voluntas mediorum, & est magnum inconueniens Deum propter aliquem finem obligari ad ponendum peccatum, etiam permissiue. Sicut qui videt hominem iam inclinatum ad peccatum, non male facit si consulat minus peccatum: tunc enim solum id permittit: si verò non inclinatum persuadeat ad peccatum aliquod, peccat, & non solum permittit. Idem ergo erit in Deo, si ad ponendam pœnitentiam velit peccatum poni, secus verò si supposito iam peccato velit pœnitentiam in remedium.

Resp. negando anteced. Ad primam probationem dicitur Deum velle negationem auxilij efficacis seu congrui, quando vult suspendere illud: hoc enim est permittere, nec tamen vult negationem consensus boni in nobis consecutam ex tali negatione, quia hoc est peccatum, & peccatum Deus non vult, etiam si velit permissionem, & denegationem auxilij. Et hoc ideo, quia negatio consensus non est peccatum in quantum sequitur ex denegatione auxilij præcisè, sed in quantum sequitur voluntarie ex voluntate nostra ut deficiente. Unde bene stat carentiam auxilij esse per se volitam à Deo, & tamen negationem consensus boni ut voluntariam ex nobis non esse volitam à Deo, quia ut sit voluntaria, & culpabilis interuenit alia causa, quæ non est à Deo, scilicet voluntas nostra ut deficiens; & sic quia non est illud peccatum ex illo quod præcisè est à Deo, sed ex interuentu alterius causæ, permissio est volita, & peccatum non est volitum, licet posita permissione sequatur, sed non ex illa, sed ex voluntate deficiente, sicut descensus lapidis non est ex ablatione columnæ, sed illa ablata est ex gravitate.

Ad secundam probat. dicitur quod nos neque permissionem peccati, neque concursum ipsum ad materiale entitatem peccati (quem omnino constat ex Deo esse) possumus petere aut desiderare à Deo, bene tamen ordinationem, quæ ex misericordia fit de peccatis nostris ad bonum nostrum, & gloriam suam, & hoc est desiderare effectum prædestinationis sub formali ratione, qua effectus eius est. Itaque postquam præsupponitur peccatum, possumus nos desiderare ordinationem eius ad bonum nostrum, sed antequam sit, desiderare, & petere permissionem eius, aut concursum ad materiale illius, etiam sub intuitu ordinationis diuinæ ad maius bonum, non possumus. Deus autem etiam ante executionem peccati potest velle, & intendere eius permissionem ex aliquo fine, siue gloriæ suæ, siue boni nostri. Disparitas est, quia quantumcumque voluntas nostra velit carentiam diuini auxilij, etiam sub intuitu ordinationis diuinæ ad bonum nostrum, non potest relinquere quod sequatur defectus peccati media altera voluntate, cum ipsamet sit voluntas deficiens ex se, si à Deo suspendatur, & subtrahatur auxilium. Quare idem est desiderare seu petere pro se carentiam gratiæ seu derelictionem diuinam, ac petere defectum suum, cum petat illam derelictionem, & desideret ut proveniat sibi, & sic defectus secutus non proveniat media alia voluntate, ut per hoc posset ista voluntas sic petens, & desiderans carentiam auxilij, non petere, nec desiderare ipsum defectum ex tali carentia sequendum in se, & ex se; sed quasi ex alia voluntate, siquidem ipsamet est

est, & non alia, quæ defectura est, posita illa carentia auxilij. At verò Deus solum vult suspensionem, & omissionem auxilij sui; ex quo tamen voluntarius defectus non sequitur, nisi mediante alia voluntate distincta à se, scilicet creata, quæ deficientiæ illius radix est. Unde quia distincta voluntas intervenit ad defectum, & peccatum, quæ posita permissione Dei labitur, potest Deus procurare, & velle permissionem propter fines sibi cognitos, & ad gloriam suam pertinentes, non volito defectu peccati ex nobis secuto. Nostra verò voluntas cum sit ipsamet, quæ posita tali permissione defectura est, idem est desiderare, seu petere pro se carentiam auxilij, & derelictionem Dei, ac petere ipsum suum defectum, quia iste defectus non per aliam voluntatem sequetur ex tali derelictione, sed per ipsamet, quæ deseri vult, & petit.

30 Ad Conf. Resp. non esse præposterum aliquando velle aliquam medicinam, non directè ob motum remediij, sed ad ostensionem excellentiæ, & virtutis eius, licet de facto illa ostensio non possit fieri, nisi remedium adhibendo malo permisso, & tunc permissio se habet ut medium ad ostendendam vim illius remediij, ut exemplis *suprà* ostensum est.

Quod verò affertur de Sacramentis, quæ non essent futura in statu innocentiae, etiam ad ostensionem excellentiæ eorum, dico ita quidem esse, quia cum ille status non compateretur secum morbos, aliàs status innocentiae non remaneret, consequenter neque ad ostendendum vim Sacramentorum permitti poterant peccata, quia statum destruerent; & sic intra illum remedium illud ostendi non poterat.

Quod verò additur de Incarnatione, quæ non fuit decretata in ostensionem excellentiæ suæ, ut propter illam permetteretur lapsus hominis, sed potius in remedium peccati iam præsuppositi, & executi. Resp. utroque quidem modo fieri potuisse, & ut ostenderet Deus diuitias misericordiae suæ in illo opere gloriæ suæ, redimendo nos; & in remedium peccati iam facti destinando filium suum ut veniret saluos facere nos, & utroque modo saluatur, quod ex vi talis decreti non veniret Christus nisi stante peccato, quia utroque modo veniebat ut Redemptor, & ad redimendum necessariò debebat respicere permissionem peccati, siue ut illius excellentiam ostenderet, siue ut ipsam in remedium decerneret. Sed tamen de facto videtur Deum ex motu remediij peccati iam prævisi, & præsuppositi voluisse Incarnationem, & non primò, & per se ex motu ostendendi excellentiam ipsius, quia in hoc non possumus iudicare de diuinis decretis prout de facto sunt, nisi quatenus ipse Deus dignatur nobis revelare per spiritum suum. Nobis autè revelavit, quod *propter nos homines, & propter nostram salutem incarnatus est; quod venit peccatores saluos facere quod commendat Charitatem suam, quod cum essemus peccatores pro nobis mortuus est; & cum essemus mortui in delictis conuiuificat nos.* Quæ omnia supponunt peccata nostra præcessisse Incarnationem, non subsequi. Et quia magis charitas, & pietas Dei commendabatur in hoc quod cum essemus iam in peccatis, & peccatum ipsum præsupponebatur regnans in nobis, Deus voluit incarnari, quam in hoc quod in ostensionem excellentiæ illius mysterij veniret in mundum, potius elegit prius motuum quam secundum, quod magis ad charitatem ostendendam conducebat; quamvis etiam supposito hoc remedio voluerit Deus ipsius mysterij excellentiam ostendere, & in Caput omnium Christum destinare, cui creatura omnis subiiceretur; de quo latius 3. p. dicturi sumus.

Ioan. à S. Thoma in 1. part. D. Thoma.

Sed unde, inquires, habemus quod de facto Deus voluerit poenitentiam hominibus decernere in ostensionem excellentiæ talis virtutis, ut inde moueretur ad permittendum peccata in electis suis, non autem solum ex motu remediij de peccato iam prævisi, & præsupposito, sicut voluit ipsam redemptionem Christi?

Resp. id constare; tum quia Ecclesia ex Scripturis edocta dicit, quod *Deus omnipotentiam suam parcendo maxime, & miserando manifestat*; id autem videtur Deus intendere de manifestatione suæ omnipotentiae, ubi maxime manifestatur: tum quia Scriptura specialiter dicit Deum in remissione peccatorum intendere exaltationem suam, & propter poenitentiam peccata dissimulare, ut *Isai. 3. Propterea expectat Dominus ut misereatur vestri, & ideò exaltabitur parcens vobis*: ergo parcere, & misereri est finis intentus à Deo, quod sine poenitentia non fit, & idem est Deum remissionem peccatorum dare ac poenitentiam in adultis. Et *Sapient. 11. Misereris omnium, quia omnia potes, & dissimulas peccata hominum propter poenitentiam*; ubi ly *propter* in proprio, & rigoroso sensu dicit causam finalem, si autem poenitentia est finis dissimulandi peccata, cur non & permittendi? sicut enim dissimulatio est suspensio vindictæ, ita permissio suspensio auxilij. Tum denique hoc idem deducitur ex locis *suprà* allatis ex Scriptura, & Aug. aliisque Patribus, quibus ostendimus Deum permittere peccata propter bonum hominis aliquando, siue hoc bonum sit humiliatio, siue conuersio: ergo licet aliquando velit poenitentiam in remedium, & supposito ac prævisi peccato, tamen non est inconueniens quod aliquando propter ipsam conuersionem, & humiliationem hominis velit talem permissionem, ut ostendat diuitias misericordiae suæ in parcendo, & excellentiam poenitentiae in reparando.

Ad id quod vltimò dicitur in argumento, quod 32 voluntas ostendendi excellentiam poenitentiae est virtualiter voluntas permittendi peccata, concedimus. Cum verò dicitur esse inconueniens, quod Deus ex amore alicuius finis obligetur permittere peccatum loquendo de obligatione, ex suppositione alicuius finis, non simpliciter, hoc omnino falsum est; quia ad Deum, ut ad supremum gubernatorem pertinet permittere aliquando mala, & talis permissio clarum est quod debet esse ex aliquo fine: in quocumque autem fine simile argumentum fieri potest, quomodo Deus obligatur ex suppositione talis finis permittere peccatum: ergo vel nunquam permittet aliquod malum, & tunc male gubernabit, vel ex aliquo fine obligabitur ad permittendum. Quod si ex aliquo fine, cur non ex humiliatione, & conuersione hominis? Exemplum illud de consulente minus malum homini iam determinato ad maius malum, vel consulente illud homini non determinato, non est ad rem, quia in presenti non agitur de influentia morali, qualis est consultatio, quæ in vno calu respectu hominis iam determinati ad maius peccatum iustificatur, non respectu eius qui nondum est determinatus. Sed agimus de suspensione influxus, & denegatione auxilij diuini, quod vniuersaliter respectu omnium peccantium assignari debet (aliàs non peccarent) siue determinati sint aliàs, siue non. Et respectu cuiuscumque sit illa permissio Dei, ex aliquo fine fieri debet, & talis finis non repugnat quod sit poenitentia, quia ex hoc non obligatur Deus maiorem influxum, aut volitionem habere in peccatum, quam permissionem.



DISPUTATIO X.

De Reprobatione.

ARTICVLVS I.

Quid sit Reprobatio, & quorū modis accipiatur?



1 **N**ON est certa, & constans apud omnes reprobationis acceptio, sed iuxta varias sententias, quæ circa effectus, causasque reprobationis versantur, accommodari etiam solet reprobationis nomen, & acceptio ab Authoribus. Et hoc præcipue ex eo iuuatur, quia reprobatio non vnico, & simplici actu consummatur, sed multos includit, tum ex parte voluntatis, tum ex parte intellectus, & quæ eorum principaliter reprobatio sit, non facile liquet. Videntur tamen conuenire omnes in hoc, quod nomine reprobationis intelligunt specialem aliquem actum dispositionis, & decreti diuini oppositum prædestinationi, ita quod ille non est actus communis reprobo, & prædestinato, nec ad prædestinationem, seu salutem alicuius pertinet, sed specialiter erga eos qui æternaliter excluduntur à regno Dei: hanc enim exclusionem æternam aliquorum à regno dari in Deo, fides aperte docet, cum constet dari in iudicio Dei discretionem quorundam, quos saluat, aliorum, quos damnat, sicut ad Rom. 2. dicitur *Qui reddet unicuique secundum opera eius, his quidem qui secundum patientiam boni operis, gloriam, & honorem, & incorruptionem quarunt vitam æternam, iis autem qui sunt ex contentione, & non acquiescunt veritati, ira & indignatio.* Item ad Roman. 9. *Iacob dilexi, Esau autem odio habui.* Et inf. *Quod si Deus volens ostendere iram, sustinuit in multa patientia vasa iræ apta in interitum, ut ostenderet diuitias gloriæ suæ in vasa misericordiæ, quæ preparauit in gloriam.* Et similia multa passim in Scriptura reperiuntur, quibus discretio diuini iudicii inter malos, & bonos ponitur, ut illi in supplicium æternum, isti in vitam æternam mittantur, ut Matth. 25. Lucæ 12. & alibi sæpe. Sicut autem iudicium, & prouidentiam Dei circa electos prædestinationem vocamus, quia Scriptura sic loquitur ad Ephes. 1. *Qui prædestinauit nos in adoptionem filiorum per Iesum Christum,* ita & decretum, seu prouidentiam Dei erga damnatos vocamus reprobationem, quia mali dicuntur tradi in reprobū sensum ad Rom. 1. *Tradidit illos Deus in reprobū sensum, ut faciant ea quæ non conueniunt.* Et Apostolus de seipso dicit, 1. ad Corinth. 9. *Castigo corpus meum, & in seruitutem redigo, ne forte cum aliis predicauerim, ipse reprobus efficiar.* Et de ipso Domino Isai. 7. dicitur, *Ut sciat reprobare malum, & eligere bonum.* Nomine ergo reprobationis ex vñu cōmuni Scholasticorum, & Authorum apud M. sententiarum in 1. distin. 40. & D. Thom. 1. part. qu. 23. art. 3. intelligimus id quod oppositum est prædestinationi, scilicet dispositionem diuinam, seu prouidentiam circa æternaliter exclusos à vita æterna: Pertinet enim ad prouidentiam non solum præmia retribuere dignis, sed etiam supplicia irrogare iniustis.

2 Ex his ergo discerni potest quid sit reprobatio & quos actus includat, & ad quam potentiam pertineat. Cum enim prouidentia ad intellectum

pertineat, & voluntatem supponat, & specialiter prædestinatio, quæ est prouidentia specialis circa electos, supponat dilectionem, & electionem eorum, ut sic electis provideatur de mediis opportunis, ipsa etiam reprobatio, quæ ad prouidentiam opposita spectat, aliquid importare debet ex parte intellectus, & ex parte voluntatis. Ex parte quidem voluntatis debet importare oppositos actus dilectioni, & electioni, quos prædestinatio supponit, & isti sunt abominatio, seu odium, & reiectio, quæ propriè dicitur reprobatio. Vnde S. Thom. q. 6. de veris. art. 1. ad vltimum, inquit, quod etiam posset dici, quod reprobatio directè non opponitur prædestinationi, sed electioni, quia qui eligit, alterum accipit, & alterum reiecit, quod dicitur reprobare. Vnde etiam reprobatio ex ratione sui nominis magis pertinet ad voluntatem: est enim reprobare quasi refutare. Sic ergo reprobare ut opponitur huic quod est approbare, seu eligere, ad actum voluntatis spectat. Ex parte autem intellectus importat prouidentiam diuinam circa eos qui deficiunt à vita æterna, ut D. Thom. docet in hac 1. p. quæst. 23. art. 3. & 3. contra Gentil. cap. vltimo. In qua prouidentia tria numerat S. Thom. loco supra cit. ex q. 6. de veris. scilicet præscientiā malorum culpe, in quo includitur permissio, præparationem quoad mala pœna, iudicium quoad indignitatem admittendi, ubi clauditur condemnatio, quæ est sententia super indignum, & destinatio ac dispositio de pœna. In hac autem q. 23. a. 3. dicit, quod *Reprobatio non nominat præscientiā tantum, sed etiam addit voluntatem permittendi aliquem cadere in culpam, & inferendi damnationis pœnam.* Vnde possumus ex illo art. D. Thom. elicere integram definitionem reprobationis, quam ibi ponit Caiet. in fine commentarij, quod *Reprobatio est præscientia, seu prouidentia de iis qui ab æterna vita excluduntur, cum voluntate permittendi culpam, & inferendi damnationis pœnam.* Vel ut definit M. sententiarum in 1. dist. 40. in fine. *Reprobatio est præscientia malitiæ in quibusdam non finiendæ, & præparatio pœna non terminandæ.* Et sic constat ad quam potentiam, & ad quem actum pertineat reprobatio ut prouidentia: eodem enim modo philosophandū est, sicut de prædestinatione supra disp. 7. tractauimus, oppositorum siquidem eadē est ratio.

Varia sententiæ de Reprobatione.

2 Hæc in communi de Reprobatione. In speciali verò est magna varietas inter Authores in explicando, & componendo voluntatem istā ad reprobationem requisitam qualis sit, & quod obiectū respiciat, vel circa quæ se extendat. Cum enim ex hoc dependeat assignare illi effectus reprobationis, qui ex tali voluntate dedicatur, aut causas, seu motiua, quæ præsupponantur iuxta varios modos sentiendi de effectibus, causisque reprobationis, variè etiam sentitur de ipsa voluntate reprobandi, & excludendi à regno. Et quidem in prædestinatione cum non solum ipse finis, qui est collatio beatitudinis, sed etiā media, scilicet ipsa gratia, & merita sint ex Deo, facile ibi componitur voluntas Dei, quæ vtrumque complectatur ex intentione dandi beatitudinem, vel efficaci, ut nos existimamus etiam antecederet ad merita, vel inefficaci, ut alij putat. Ceterum cum in reprobatione & sit damnatio, & præparatio pœnæ, & sit demeritum culpæ, & hoc secundum non sit à Deo, difficilius discernitur, an vera, & propria reprobatio, id est, prouidentia efficax exclusiua à gloria antecedit etiam permissionem peccati, eamque causet, an solum damnationem pœnæ.

Duz

Dux sunt ergo principales sententiæ, & modi sentiendi in hac parte.

4 Prima quod voluntas reprobatiua solum respicit illationem pœnæ, scil. ipsam exclusionem à regno, ut damniatiua est, & punitiua; & sic ex illa solum sequitur præparatio pœnæ: & inductio in illam; demerita verò culpæ supponuntur per præscientiam cognita, & super illa cadit voluntas reprobatiua, non autem voluntas reprobandi est prior, & causa permissionis culpæ. Et sic videtur iste modus sentiendi adhærere definitioni reprobationis traditæ à Magistro *ubi supra*, quod reprobatio est præscientia malitiæ, & præparatio pœnæ: ea enim quæ pertinent ad malitiam, seu culpam sunt solum præscita, & præsupposita in reprobatione, directe verò, & formaliter solum reprobatio est voluntas præparatiua pœnæ, & damnationis illatiuæ; non permissionis culpæ causa, sed totum quod ad culpam pertinet, supponit.

5 Secunda verò sententia, seu modus dicendi, reprobatiuam voluntatem talem esse dicit, quæ complectatur utrumque, & antecedit tam permissionem peccati, quam illationem, & præparationem pœnæ, & utrumque pro effectu habeat. Et cum reprobatiua voluntas sit exclusiua à regno, ponit consequenter talis sententia exclusionem à regno ante permissionem peccati & præuisa demerita; quod aliis valde durum videtur. Et hæc sententia adhæreret definitioni reprobationis traditæ à D. Thom. *ubi supra*, quod reprobatio est præscientia cum voluntate permittendi culpam, & inferendi damnationis pœnam.

Et prima sententia ferè pro fundamento habet diuinam pietatem, & clementiam, quam nefas est cogitare quod velit aliquem à regno excludere, nisi eius demeritis positus, & quasi à nostris peccatis impulsus.

Secunda habet pro fundamento supremum Dei ius, & dominium in suas creaturas, qui pro sua mera voluntate dat, vel denegat suum regnum cui vult, & miseretur cui miseretur, & antequam quidquam boni vel mali agant, Iacob diligit, & Esau odio habet.

6 Ex his duobus fontibus seu capitibus variè assignata est ab Authoribus reprobatiua voluntas, & reprobationis decretum, in quo formaliter consistat. Aliqui enim ita latè accipiunt reprobationem, quod dicunt importare providentiam diuinam ortam ex voluntate ostensionis iustitiæ diuinæ, quæ voluntas in Deo est antecedenter ad præuisionem peccati; & sic attribunt reprobationi non solum pro effectu condemnationis pœnam, sed etiam permissionem culpæ, & quidquid ad exclusionem à gloria potest conducere in reprobo, & quidquid ad decursum vitæ in reprobo pertinet. Voluntatem autem puniendi, & damnandi reprobum non negat hæc sententia ad reprobationem pertinere, sed inadæquatè, & tanquam partem illius, & hæc supponit quidem culpam, sed non est integra, & adæquata reprobatio, sicut præmiatio, seu glorificatio non est integra prædestinatio, sed pars illius: nam etiam prædestinatio causat ipsa merita. Sic sumit, & explicat reprobationem Granados *tract. 8. de causa reprobationis, disp. unica sect. 1. & 2.* Et pro hac sententia citat Thomistas, qui communiter eam tenent, Ferrar. 3. *contra Gentil. cap. 161.* Alvarez *lib. 11. de Auxiliis disp. 110.* Bañez *ad 1. partem quest. 23. artic. 5. in dub. 5.* Zumel *ibi quest. 4.* Soto *in fine 4. sententiarum*, præter multos alios antiquos Magistrum in 1. *dist. 41.* & ibi Richardum, Durandum, Capreolum, & alios. Eandem tribuit Thomistis Ioan. à S. Thoma in 1. *part. D. Thoma.*

P. Alarcon *tract. 4. de prædestinatione disp. 5. cap. 1.* Sed grauat illam, tingitque non leui fuligine, dicens fuisse sententiam Caluini, cui eam tribuit Becanus 1. *part. cap. 16. quest. 1.* & ex eo Erize *disp. 33. cap. 3.* Nimirum ista Calvinismi larua frequenter ab his Authoribus superponitur Thomistarum sententiis, ut horrorem, & pauorem animis audientium incutiant, ne ad eorum sententias accedant.

7 Alij pressius sumunt reprobationem, nempe pro sola voluntate exclusiua à gloria per modum punitiōis, & damnationis, ac proinde in tali voluntate supponitur culpa iam permixta, ideoque effectus eius esse non potest permissio peccati, sed ab alia providentia Dei procedit permissio, & illa supposita, & non ante intrat reprobatio exclusiua à regno. Et aliqui ita rigorosè hoc accipiunt, ut non velint reprobationem vilo modo habere pro effectu permissionem peccati, nec ante illud præuisum, Deum decernere exclusionem à regno. Quam sententiam à fortiori tenent qui in prædestinatione existimant neminem eligi ad vitam ante præuisa merita, quia solum vult Deus illam ut coronam, multò magis exclusionem à regno non vult ante demerita, quia solum intendit illam ut supplicium. Sequitur hanc sententiam in hoc rigore Villegas *controuers. 16. disp. 1. cap. 3.* & in eam conatur adducere S. Thomam, & Scotum. Eandem attribuit M. Gonzalez *disp. 77. sect. 4.* Bonauenturæ, Gabr. Henrico, Valentia, Soto, aliique etiam citantur à Granados *ubi supra sect. 1.* Eandem sequitur Alarcon *ubi supra, capite 1. conclusione 2.* sicut securus est sententiam de electione ad gloriam, quod non est ante præuisa merita, licet simplicem voluntatem concedat excludendi homines à regno ante præuisum peccatum Adæ, sed hanc voluntatem non esse reprobationem, tum quia non est efficax volitio, tum quia est communis omnibus, sicut simplex voluntas dandi omnibus gloriam.

Cæterum, quia valde difficile videtur multis denegare reprobationi pro effectu permissionem peccati finalis, sicut prædestinationi damus ultimam perseverantiam, & non concedere reprobationi effectum aliquem, nisi post præuisum in executione peccatum, cum violenter reclamet locus ille Pauli Rom. 9. *Cum nihil boni, aut mali egissent, Iacob dilexi, Esau autem odio habui;* quem locum nolle intelligere de amore vel odio in ordine ad vitam æternam, sed ad temporalem hæreditatem, non videtur satis conueniens illi literæ: ex alia autem parte putent pertinere maximè ad diuinæ pietatis abundantiam nolle mortem peccatoris, nec aliquem ad mortem æternam damnare ante peccatum visum, conati sunt varias distinctiones formare, & inducere circa reprobationem ut taliter eam constituent, quod aliquo modo possint ista saluare.

8 Et primum occurrit Erize *ubi supra disp. 34. c. 3.* docens dari in Deo voluntatem conditionalem excludendi aliquos homines à gloria, si in peccato decesserint, quam vult esse specialem voluntatem circa illos, quia eos specialiter excludit; & sic verificatur quod præcedit reprobatiua voluntas præuisionem peccati. Sed hæc sententia fert secum manifestam repulsam: quomodo enim potest iste Author facere specialem voluntatem circa reprobos, illam quæ ita communis est omnibus, ut etiam modò de facto detur circa electos? Quis enim dubitare potest quod modò sit hæc voluntas conditionalis in Deo: Si D. Petrus in suo peccato decessisset, condemnaretur, sicut si Iudas à suo conuerteretur; & sic perseveraret, saluaretur.

K x 3 Istæ

Istæ enim conditionales sunt generales quædam regulæ divinæ iustitiæ, quæ sunt in æternum incommutabiles.

9 Alij apud Villegas *vbi supra cap. 1.* existimant Deum quidem non velle excludere à regno suo, nisi ex motivo iustitiæ punitivæ, sed tamen intelligunt Deum habuisse pro intentione ostensionem huius iustitiæ, & ex illa intentione ortam fuisse voluntatem permittendi peccatum, & deficientiam à consecutione gloriæ. Quod ibi attribuit Aëtio, Gonzalez, Soto, & aliis. Hanc tamen intentionem alij dixerunt non fuisse ad ostendendam divinam iustitiam punitivam, sed divinam libertatem, & dominium in creaturas. Quod præfatus Author *ibi cap. 2.* attribuit aliquibus Thomistis Deza, Caiet. Ferrar. Alvarez, Ripa & aliis. Reuera enim hæc sententia non est alia à prima, quam ex Thomistis retulimus.

10 P. Suarez *lib. 5. de prædestinat. cap. 5. & 6. lib. 2. de Auxiliis cap. 5. ad 3. objectionem.* Bellarminus *lib. 2. de gratia & libero arbitrio cap. 16.* & alij, distinguunt duplicem reprobationem. Aliam negativam, aliam positivam.

Positiva est destinatio, & condemnatio ad pœnam, supponitque necessariò prævisum peccatum, etiam finale, non illius promissionis est causa.

Negativa est nolitio dandi gloriam, seu illa non admissio aliquorum ad gloriam, quando aliquos Deus elegit, cæteris relictis in massa perditionis, illa relectio fuit, non electio, fuit negativa reprobatio, id est, approbationis negatio. Quod licet aliqui voluerint explicare per puram suspensionem actus divini, rectè us Suarez, & alij, in actu vero, & positivo ponunt, quo Deus videns, & sciens noluit istos eligere, quando alios elegit. Igitur respectu positivæ reprobationis docet non posse assignari pro effectu permissionem aliquam peccati, quin potius huius reprobationis datur in homine causa, scilicet peccatum finale. Respectu autem reprobationis negativæ docet non dari ex parte hominis causam, sed hanc voluntatem esse causam permissionis peccati, seu negationis auxilij congrui, docet *loco cit. c. 7. num. 13.*

11 Et quidem quod attinet ad distinctionem illam de reprobatione positivâ, & negativâ quod sit fundata in D. Thom. *inf.* dicemus, & quomodo ab ipso intelligatur *art. seq.* dicetur. Vt verò posita est à Suarez, etiam tradita videtur à Scoto *in 1. dist. 41. q. unica*, vbi in eodem instanti quo Deus intelligitur elegisse quosdam ad gloriam ante prævisa merita, docet alios ad gloriam non elegisse, quod aliqui ex discipulis eius intelligunt per puram suspensionem actus, alij per positivum actum intentionis. Quod utique pertinet ad reprobationem negativam. Vt verò Scotus *in 5. Potest aliter dici*, assignat causam reprobationis ex parte reprobi, scilicet peccatum originale, vel actuale finale. Hoc ergo pertinet ad reprobationem positivam. Eandem distinctionem reprobationis positivæ, & negativæ significat Caiet. *in hac q. 23. art. 5. §. Ad 4.* vbi concedit præscientiam demeritorum esse causam reprobationis, licet præscientia meritorum non sit causa prædestinationis. Vbi loquitur de reprobatione positivâ, seu punitivâ. Postea verò *in fine articuli*, docet quod reprobatio quoad effectum permissionis peccati, negationem misericordiæ seu gratiæ exercet, vbi apertè videtur loqui de reprobatione negativâ. Ac denique distinctionem reprobationis negativæ, & positivæ videntur concedere Vasquez, Arrubal, Alarcon *citato loco*, quamvis reprobationem negativam negent esse efficacem ad habendum pro effectu permissionem peccati, vt Suarez dicit.

Tandem P. Vasquez *disp. 95. cit.* distinguit de reprobatione adultorum, & paruulorum. Et quidem in adultis affirmat *c. 5.* quod respectu reprobationis, seu reiectionis à regno cælesti datur causa ex parte reprobi, scilicet ea peccata in quibus vitam finit; & sic talis reprobatio est voluntas punitiva, non habens pro effectu permissionem peccati, sed supponens, & inde incipit exclusio efficax à regno; respectu autem reiectionis, seu reprobationis à gratia, quod est idem quod carentia gratiæ, seu permissio peccati, non dari in reprobo causam: nec etiam oriri ex voluntate efficaci excludente à fine beatitudinis, quia hæc non est ante prævisum peccatum, sed oriri ex aliqua causa generali, & communi, scilicet ex peccato primi parentis, in quo amisimus omnem bonam cogitationem, quod est ex inefficaci voluntate, & quæ est communis reprobis, & electis derivari illum effectum permissionis peccati, seu carentiæ gratiæ, quæ dicitur permissio peccati, in dæmonibus autem non fuit orta ista permissio peccati ex alia causa quàm ex mera voluntate Dei. Loquendo autem de reprobatione paruulorum *ibi dem c. 6.* similiter distinguit de privatione gratiæ, seu reiectione ab ipsa, & de reprobatione, seu reiectione à gloria. Et de prima docet non dari causam in paruulo, sed totam causam carendi gratia fuisse peccatum commune primi parentis, ex quo in ipsos transfusa est macula, & carentia gratiæ. De secunda autem reprobatione, seu reiectione à gloria distinguit de paruulis, quibus Deus omnia media humana denegavit ad salutem, quippe qui in vteris maternis sine alicuius culpa decesserunt, & de illis quibus media communia proposita sunt, licet ex negligentia parentum, aut ex aliis causis applicata non fuerint. Nam circa priores paruulos dicit statim post prævisum peccatum Adæ, etiam antequam prævideretur in istis paruulis contractum de facto, habuisse Deum simplicem affectum excludendi illos à beatitudine propter peccatum primi parentis, & ex tali affectu permittit eos labi sine remedio in peccatum ipsum originale; & sic ex illo instanti, seu ex illo simplici affectu inceptum eorum reprobatio, non tamen fuit efficax voluntas excludendi illos à regno, quæ est completa reprobatio, quovsq; vidit ipsos de facto infectos originali peccato. In aliis verò paruulis, quibus remedia reliquit, sed de facto non sunt applicata, non voluit simplici affectu eos excludere à regno post prævisum peccatum Adæ, cum potius eis reliquerit media sufficientia ad salutem, sed solum post prævisum peccatum, etiam in ipsis transfusum, & ob aliquam negligentiam, seu non applicationem remedij non remissum, tunc voluit eos excludere à regno, & tunc inceptum eorum reprobatio. Vnde colligit quod licet reprobatio sit pars providentiæ opposita prædestinationi, non tamen in omnibus incipit reprobatio, quando incipit prædestinatio, quia prædestinatio incipit quando Deus præparat media efficacia gratiæ ex intentione beatitudinis, reprobatio verò non incipit quando permittit peccatum, sed quando post prævisum peccatum excludit à gloria.

Mens D. Thomæ explicatur.

Eligimus iuxta D. Thomæ mentem, reprobationem formaliter, & essentialiter, & adæquatè dicere providentiam divinam circa creaturas deficientes ab æterna vita cum voluntate permittendi culpam non remittendam, & præparandi pœnam non terminandam, ita quod reprobatio ista non supponit permissionem

permissionem illam culpæ, sed præcedit, & ordinat. Et M. sententiarum cum in sua definitione dicit, quod est præscientia malitiæ reprobatio, ly *præscientia* sumitur pro præscientia practica, quæ est permissiva, & ordinativa de malo; & sic est providentia. Fatemur tamen reprobationem aliquando sumi inadæquatè, vel pro sola voluntate puniendi; & sic supponit culpam præiudicalem, & permissam, sed hæc est acceptio pro reprobatione respectu vnius tantum effectus, qui est ultima damnatio, sicut si prædestinatio sumatur pro voluntate glorificandi in executione, quæ supponit alios effectus, scil. vocationem, & iustificationem, &c. Aliquando etiam sumitur reprobatio pro sola negatione electionis quæ potest dici reprobatio negativa, sed ea non consideratur ut efficax voluntas, nec parit aliquos effectus reprobationis æternæ, ut postea dicitur.

14 Hanc esse mentem D. Thom. constanter colligitur ex locis supra inductis, præcipue in hac q. 23. a. 3. ubi manifestè docet quod *Sicut prædestinatio est pars providentiæ respectu eorum qui divinitus ordinantur in æternam salutem, ita reprobatio est pars providentiæ respectu eorum qui ab hoc fine decidunt. Unde reprobatio non nominat præscientiam tantum, sed aliquid addit secundum rationem, sicut & providentia, ut supra dictum est: sicut enim prædestinatio includit voluntatem conferendi gratiam, & gloriam, ita reprobatio includit voluntatem permittendi aliquem cadere in culpam, & inferendi damnationis pœnam pro culpa.* Vbi manifestissimum est loqui D. Thom. de reprobatione positiva, quia loquitur de reprobatione, quæ est providentia respectu eorum qui decidunt à salute æterna. Providentia autem est actus ordinativus erga finem, & dispositivus de mediis efficaciter, & est providentia specialis, quia non est communis reprobis, & prædestinatis, sed contra posita prædestinationi: ergo est reprobatio positiva. Includit autem talis providentia voluntatem permittendi peccatum, & inferendi pœnam, unde etiam magis constat esse providentiam positivam, quia includit voluntatem inferendi pœnam: ergo si eadem providentia includit secundum D. Thom. voluntatem permittendi culpam, utique reprobatio positiva est causa huius permissionis; & sic includit voluntatem unde originatur illa permissio. Eodem modo loquitur de reprobatione tanquam de providentia, quæ est reprobatio positiva 3. contra Gent. cap. ult.

15 At verò reprobatio, negativa providentia non est, sed privatio electionis: per hoc enim quod Deus aliquos elegit, aliis omisiss, illa omisissio, seu nolitio aliquorum dicitur reprobatio negativa, quæ non ordinat, nec disponit quid agendum sit circa ipsos, sed solum eos non eligit; quæ utique negatio etiam inveniri posset, ubi nulla esset reprobatio, ut si Deus hominem relinqueret in pura natura, non eligeret illum ad gloriam, & negativè se haberet ad illum quoad nolitioem gloriæ, non tamen diceretur reprobare illum. Sola ergo negatio eligendi, seu actus nolitiois dandi gloriam non est providentia reprobativa: nec enim disponit aut ordinat de tali re, sed solum negat, seu omittit eligere; & sic ex se non infert effectus aliquos reprobationis, nisi aliquid amplius addatur pertinens ad providentiam, & intentionem finis, quia omnis effectus Dei ex aliqua intentione efficaci, & providentia nascitur, liquidem fortuitò non evenit. Datur tamen hæc negativa electio; & sic illam admittit D. Thom. dum dicit reprobationem propriè opponi electioni, non prædestinationi in q. 6. de verit. art. 1. ad ultimum; reprobatio autem, quæ non

opponitur prædestinationi, sed electioni tantum non est reprobatio ut providentia specialis, hæc enim prædestinationi opponitur, quæ se habet ut providentia circa prædestinatos. Eandem duplicem reprobationem explicavit S. Thom. in 1. ad Anibald. dist. 41. q. unica, art. 3. *Voluntati, inquit, divinæ de salute hominis duplex voluntas opponi videtur, altera de contradictorio, secundum quod vult aliquem non saluare, & voluntas de contrario, secundum quod vult damnare aliquem.* Et dicit reprobationem includere utramque voluntatem. Denique reprobationem inadæquatè sumptam pro sola voluntate inferendi pœnam, etiam D. Thom. agnoscit ad Rom. 9. lect. 2. in fine, ubi inquit, quod *Præscientia meritorum non potest esse ratio prædestinationis, quia merita præstata cadunt sub prædestinationem: sed præscientia peccatorum potest esse aliqua ratio reprobationis ex parte pœnæ, quæ preparatur reprobatis, in quantum scil. Deus proponit se puniendum malos propter peccata quæ à seipsis habent, non à Deo.* Vbi solum proponit causam reprobationis non absolutè, & adæquatè, sed ut tenet se ex parte pœnæ, quæ preparatur reprobis. Pœna autem non ordinatur, & disponitur à providentia seu reprobatione, nisi quatenus damnativa, & punitiva est, quæ est una pars illius.

16 Quod autem ista providentia reprobativa, quæ habet pro effectum permissionem culpæ, & est eius causa, non sit sola voluntas, & providentia denegandi gratiam, (quæ sine dubio, quando est denegatio primæ gratiæ, non præsupponit causam) sed etiam sit providentia, & voluntas circa ipsum finem ultimum à quo decidunt reprobi, ex ipso D. Thom. clarè constat dicit enim in hac q. art. 3. quod *Cum per divinam providentiam homines in vitam æternam ordinantur, pertinet etiam ad divinam providentiam, ut permittat aliquos ab hoc fine deficere, & hoc dicitur reprobare, & hanc reprobationem dicit includere voluntatem permittendi cadere in culpam, & inferendi damnationis pœnam, utique tanquam effectus talis providentiæ, quia damnatio apud omnes, effectus reprobationis est: ergo manifestè sentit ex voluntate circa finem ultimum, non ut consequendum, sed ut deficientum, nasci illam voluntatem, seu illum effectum permittendi peccatum, & non solum ex voluntate denegandi gratiam. Quin potius ista denegatio gratiæ non potest pro effectum habere permissionem peccati, quia ipsamet denegatio gratiæ est permissio peccati; & tamen D. Thom. ponit permissionem peccati, sicut & damnationem pœnæ pro effectum reprobationis, ut providentia est: ergo illa reprobatio, ut antecedit permissionem peccati, versatur circa ipsum finem ultimum reiciendo, & excludendo ab illo. Quid autem aduersarij respondeant huic loco D. Thom. & quàm incongruè, videbimus art. sequ. Denique in 3. contra Gentil. c. ultimo dicit, quod *Ratione ipsius distinctionis secundum quod quosdam reprobat, & quosdam prædestinat, attenditur divina electio, de qua dicitur ad Ephes. 1. Elegit nos in ipso ante mundi constitutionem: Sic igitur patet, quod prædestinatio, & electio, & reprobatio est quedam pars divinæ providentiæ secundum quod homines ex divina providentia ordinantur in ultimum finem.* Constat ergo ex D. Thom. sententia, quod reprobatio ut est providentia, quæ versatur circa ultimum finem, non quidem consequendum, ut manifestum est, sed ut excludendum, est talis voluntas quæ includit pro effectum permissionem in culpam, & voluntatem inferendi pœnam, & sic secundum omnes effectus suos adæquatè sumptos non supponit culpam permissam.*

Fundamentum huius mentis S. Thom. maxime 17
Kk 4 dependet

dependet ex tractandis in duobus sequentibus articulis de causis, & effectibus reprobationis: ibi enim hoc totum confirmabitur. Breuiter dico, fundamentum hoc reduci ad ipsam rationem supremæ prouidentia, & supremi Authoris omnium, in quo necesse est aliquos primos effectus, à quibus alij dependent, reducere ad meram ipsius voluntatem, cui plenissimè subiiciuntur omnia tam quoad directionem in bonum, quam quoad permissionem deficientia in malo; est enim supremus gubernator causarum contingentium, & liberarum, quibus licet ex priori, & antecedente voluntate, quæ tantum respicit bonitatem ipsam diuinam secundum se, & ipsius naturæ rationem, & ordinem secundum se, velit bonum, & ordinet ad bonum finem, tamen attendendo ad ipsam naturam contingentem, quæ operatur ad utramque partem ad bonum, & malum, & defectibiliter ad hoc, & ad illud, pertinet ad ipsam prouidentiam primi gubernatoris, & Authoris naturæ contingentis permittere plures defectus, non solum temporales, sed etiam æternos, quia totum hoc in natura contingenti, & defectibili libera locum habet. Non autem hoc pertinet ad gubernatores inferiores, & creatos, quia isti non sunt authores naturæ contingentis, & liberæ, sed directores tantum ad finem illis præstitutum, & secundum legem quam Deus eis impoluit. Vnde non pertinet ad ipsos permittere defectus, sed reprimere, neque intendere ostensionem iustitiæ, sed uti illa ex suppositione culpæ. At verò auctori naturæ, & omnium gubernatori conuenit propter exigentiam contingentia, & defectibilitatis naturæ permittere defectus, & locum dare omnibus virtutibus, etiam iustitiæ punitiue, & sic ordinare de toto vniuerso. Vnde necesse est, quod sine vlla crudelitatis, aut iniustitiæ nota, sed solum ratione summæ, & primæ prouidentia, quæ nihil supponit prouisum, sed omnibus prouidet, ipsas primas permissiones, aut defectus à bono, siue ad tempus, siue in perpetuum permittat, non ex aliquo præsupposito peccato, quia si aliquod peccatum præsupponit, cum illud non nisi ex permissione Dei accidat, rursus inquireretur ex quo motiuo Deus illud permittat, & cum non sit procedere in infinitum, deueniendum est ad alienam permissionem, quæ non ex priori aliqua culpa permittatur, & illa permissio potest esse de peccato, ut nunquam remittendo, sicut patet in Angelorum peccato, quod fuit irremissibile: nullum enim eis remissum est, & in multis etiā paruulis, quibus nulla decreta est remissio. Si ergo in Deo non est inconueniens, sed necessariò ponendum est quod aliquas permissiones peccatorum faciat, etiā irremissibiles, non præsupponendo aliquam culpam in subiecto, sed ex aliquo fine sui diuini iudicij, vel iustitiæ, etiam non erit inconueniens, quod Deus incipiat prouidentiam reprobatiuam antecedenter ad omnem culpam præuisam, sed excludendo ab illo fine propter gloriam suā in ostensionem iustitiæ, vel propter alium finem similem. Pater conseq. quia non minoris iacturæ est denegare, & excludere à gratia irremissibiliter, quam excludere à gloria; si autem exclusio à gloria supponit exclusionem à gratia, nec Deus sit crudelis, & suæ bonitatis præuicator, ipsa exclusio à gratia irremissibiliter, quomodo prouidetur, & permittitur à Deo ex seipso, & non præsupponendo aliam culpam sine vlla crudelitatis nota vel bonitatis diminutione?

18 Quod si semel habemus, Deum à gratia perpetuo excludere aliquem sine motiuo alicuius culpæ ex parte nostra propter ius supremæ prouidentia: ergo bene stat, & conformius ad naturam ipsam

diuinæ prouidentia, philosophamur dicendo, quod ex voluntate illa Dei circa vltimum finem procedit Deus in reprobis ad excludendum illos à gratia, & permittendum peccata. Patet hoc, quia reprobatio est specialis prouidentia ex speciali fine procedens. Nullus autem finis specialior in reprobis inuenitur, quam qui amittitur ab ipsis, qui est beatitudo, & contraponitur fini prædestinationis, cum communiter nomine reprobationis intelligamus prouidentiam oppositam prædestinationi, quæ contrarios effectus, atque opposito modo procedit circa finem prædestinationis, atque ipsa prædestinatio: ergo nullum est inconueniens quod intra prouidentiam reprobatiuam cadat iste effectus, qui est permissio peccati non remissibilis, ortus ex speciali intentione circa finem vltimum à quo procedit reprobis. Patet hoc, quia si Deus potest habere voluntatem permittendi peccatum, non remissibile, cui necessariò est coniuncta exclusio à regno, ex aliquo fine proprio ipsius Dei, & non ex demerito hominis, cur non poterit etiam ex eodem fine sibi proprio, & ante præuisum, & permissum demeritum hominis velle exclusionem æternam à regno, & inde moueri ad permittendum illud peccatum, cum potius in hoc reliceat ordo connaturalis procedendi à fine ad media, seu à denegatione finis indebiti ad negationem mediorum quæ non debentur? Quod si opposito modo procedatur, scilicet à negatione gratia, ad negationem gloriæ, rursus illi negationi gratia finis aliquis & motiuum præstituendum est, & non ex aliquo demerito priori, ut ostensum est ne detur processus in infinitum: ex aliquo ergo fine proprio Dei, v. g. ad ostensionem alicuius attributi, vel ex aliquo proprio creaturæ, quia ita exigit libera, & contingens natura nostra de se defectibilis, quod etiam currit in exclusionem à gloria, quæ ex simili motiuo potest esse volita à Deo. Ex quocumque autem fine sit volita exclusio perpetua à gratia, non est cur non pertineat ad prouidentiam reprobatiuam, cum illi sit necessariò, & infallibiliter annexa exclusio à gloria, quæ manifestè effectus est reprobationis; & solum videbitur esse quæstio de nomine, an illa sit, vel non sit dicenda reprobatio, & connaturalius procedat à proprio fine ad media, siue à denegatione finis gloriæ ad negationem mediorum, seu gratia.

Quomodo autem cum voluntate excludendi à gloria steter voluntas antecedens dandi illam, & saluandi omnes, non est difficile videre, cum vna sit inefficax voluntas, & quasi conditionata, & quantum est ex parte bonitatis diuinæ præcisè, si per nos non steterit, alia absoluta, & attentis omnibus circumstantiis, & ipso fine gloriæ diuinæ sic volito. Plura autem argumenta contra hanc sententiam, sequentibus duobus artic. soluentur.

Calvinismus huic sententia insipienter obiectus.

19 Authores, qui Calviniano errore hanc sententiam grauant, aut Caluini sensum non viderunt, nec expenderunt, aut istam sententiam D. Thom. nimis despexerunt. Certè maiori attentione opus est nec præcipitandum iudicium cum de Catholicorum sententiis agitur, ut hæreticorum errore notentur, cum tam longè absint ab hæreticorum sensu. Quæ enim maior iniuria potest alicui iniuri, quam eius sententiam hæreticam appellare, & cum hæreticorum erroribus inuoluere? Non nego posse in argumentis quæ sunt contra aliquas sententias aliquando inferri tanquam inconueniens, quod oppositum est erroneum, aut hæreticum

ticum, quasi illationis vi, & argumento id inducendo; sed tamen ita liberè affirmare sententiam hanc quam dicunt esse tot grauissimorum, & Catholicorum Authorum, esse etiam sententiam Caluini, vt facit P. Alarcon *tract. 4. de predest. disp. 5. cap. 1. n. 1. & 7.* fateor me ignorare quomodo Christianæ charitati, modestiæque conueniat. Nec video qua fronte disputationes, quæ inter Catholicos, & religiosos viros sine contentione, vt Apostolus monet, sine amaritudine, & felle, solius veritatis indagandæ causa, tractandæ sunt, ad tam amara verba, imò grauissimam contumeliam reducantur. Sed ne in causa huius iniuriæ, & perperam obiecti nobis Calviniani erroris toties hæere videamur, & silentium atque indefensio veritatis in D. Thom. & tot illustrium Thomistarum sententia non patientiam operetur, sed ignominiam, & defectum; ostendam, obiectionem istam ex sola, & mera calumnia aut ignorantia posse procedere: verissimum est enim quòd Spiritus S. Prouerb. 10. nos consolatur, & docet. *Qui contumeliam profert, insipiens est.*

20 Caluinus in suo errore persistens dixit Deum sua motione, & efficacia nostrum tollere arbitrium, ideòque excitantem gratiam denegauit, & solum posuit gratiam mouentem motione ita ceca quòd sublata omni excitatione indifferenti, libertatem quoque euerteret, & ageret nos, sicut agitur equus à fessore, quem solum fræno, & calcaribus agit, non consilio, & excitatione. Hoc errore imbutus hæreticus, consequenter posuit decretum diuinum æquè agere, & prosternere nos in peccata, & in virtute, nec minus esse opus Dei traditionem Iudæ, quàm conuersionem Pauli, quia cum per diuinum illud decretum tolleretur ratio liberi, & voluntarij à nostris actibus, excluderet consequenter omnem rationem malitiæ, & auersionis, quæ pertinet ad formale peccati; & sic ex decreto diuino nos dixit impelli in malum, & in damnationem in executione nulla habita ratione demeriti, & culpæ ex parte nostra. Quod est ponere reprobationem diuinam, non solum incipere in ordine intentionis ex voluntate excludente à fine ultimo ante præuisa seu præsupposita demerita, vt motiua illius voluntatis intentiua, sed etiam in executione nos dānare, atque excludere à regno, sine vllis demeritis, & culpa ex parte nostra, quia ipsa efficacia decreti talis erat, quòd in executione tolleretur culpam, & rationem peccati ac demeriti; & sic in executione etiam condemnaret, & excluderet à regno, non ex vi demeriti, sed ex sua voluntate sic impellente, & prosternente nos, & libertatem nostram. Hic est sensus Calviniani, & execrandi erroris, hæc eius sententia fuit, vt abunde probatum est à nobis *suprà disp. 3. art. ultimo; & preced. tomo disp. 20. art. 5. & 6. & aliis locis.*

21 Iam verò, qui hunc sensum Caluini perspectum habuerit, qua fronte potest talem errorem sententiæ D. Thom. & Thomistarum obicere, cum potius S. Thomas quasi præueniens huius hæretici blasphemiam, & hanc in suam sententiam, calumniam, sic scripserit, 2. *contra Gentil. c. ultimo: Sic igitur patet, quòd predestinatio, & electio, & reprobatio est quedam pars diuinæ providentiæ secundum quod homines ex diuina providentiā ordinantur in ultimum finem: unde per eadem manifestum esse potest quòd predestinatio, & electio necessitatem non inducunt, quibus, vt suprà ostensum est, quòd diuina providentiā contingentiam à rebus non auferit.* Cum ergo S. Thom. ponat in art. 3. huius quæst. quòd reprobatio dicit providentiā, quæ includit voluntatem permittendi culpam, & inferendi damnationis

pœnam, solum ponit voluntatem, seu providentiā reprobatiuam antecedenter ad permissionem culpæ, & antecedenter ad demerita, vt motiua illius intentionis, sicut *suprà* diximus de electione ad gloriam ante præuisa merita, vt motiua, cum enim sit causa illorum meritorum, & sit etiam causa ex fine præintento permissionis demeritorum, quomodo potest intelligi, quòd illa non præueniat; & sic non vtatur illis vt motiuis antecedentibus se, sed vt consecutis? Quod totum currit ordine intentionis; ordine tamen executionis non datur illa gloria intenta sine meritis, nec illa condemnatio sine demeritis, & vera culpa, quia illa providentiā, etiam si sic antecedit ordine intentionis, & etiam si sic moueat ad executionem, non tollit contingentiam, & libertatem, sed causat, vt sæpe à nobis est ostensum, quia ob sui vniuersalissimam rationem etiam est causa libertatis nostræ. Quomodo ergo stat hoc cum errore Caluini, qui ponit decretum Dei reprobatiuam, & prædestinatiuam, non solum ordine intentionis antecedens merita, & demerita vt motiua, & causas sui (in quo cum ipso non est disputatio) sed etiam in executione omnia demerita, & rationem culpæ in nobis tollens; & sic decernens reprobationem antecedenter, quod tollat in executione libertatem? Solum quia Caluinus posuit illud decretum antecedenter mouens, & Thomistæ ponunt etiam antecedenter se habere ad nostram voluntatem, ex hac solum generali ratione, seu nomine antecedentiæ voluntati isti Authores errorem Caluini esse sententiam Thomistarum; cum isti ponant decretum antecedens, causans, & fouens libertatem, dānsque excitantem gratiam, & non solum purè mouentem; ille ponat decretum antecedens ita purè mouens, quòd tollat indifferentiam, & excitationem, & libertatem. Multiplex potest esse antecedentiā libertatis, non vna; antecedit causa libertatem seruans, & causans, antecedit & destruens. Ergo qui ponit antecedentiā causatiuam, ponit destructiuam, vt Caluinus? Hoc fundamentum habet libido grauandi sententiam Thomistarum.

ARTICVLVS II.

Vtrum ex parte reprobati detur causa reprobationis?

Supponendum est primò, tãquam certum, quòd si reprobatio inadæquatè accipitur pro actu iustitiæ punitiue, & ipsa exclusio à regno pro pœna in executione inflicta, necessariò debet assignari causa reprobationis ex parte reprobati, scil. demeritum, & culpa propter quam damnatur. Cuius rationem rectè assignat S. Thom. *ad Anibal. dist. 41. qu. unica, art. 3. quia voluntas damnationis respicit rationem voliti ex parte damnati, cum damnatio ex debito inferatur.* Ergo necessariò supponit culpam, seu demeritum ex parte hominis, quia debitum quod respicitur à iustitia condemnante, & puniente solum est debitum culpæ, seu demeritum. Et ita *super c. 9. ad Rom. lect. 2.* dicit, quòd *Præscientia peccatorum potest esse aliqua ratio reprobationis ex parte pœne.* Et August. 3. *contra Iulianum c. 18.* Potest, inquit, *Deus aliquos sine bonis meritis liberare, quia bonus est, non potest sine meritis damnare, quia iustus est.*

Supponendum est secundò nos non agere in præsentia de causis, aut motiuis, quæ in negotio reprobationis se tenent ex parte Dei, sed solum de motiuis,

motiuo, seu ratione ex parte hominis : nam de causis ex parte Dei nulla est controuersia : constat enim ipsum esse unicam causam efficientem prædestinationis, & reprobationis : imple est enim qui Iacob dilexit, & Esau odio habuit, ipse qui prædestinavit nos in adoptionem filiorum Dei, ipse qui regnum, & gehennam parauit. Constat etiam finalem causam ex parte Dei esse ipsius gloriæ ostensionem siue per misericordiam in vasis misericordiæ, siue per iustitiam in vasis iræ, quia, ut ait Apost. Rom. 9. *Deus volens ostendere iram, & notam facere potentiam suam, sustinuit in multa patientia vasa iræ apta in interitum, ut ostenderet diuitias gloriæ suæ in vasa misericordiæ, &c.* Sola ergo est difficultas de causa non finali, nec efficienti, sed demeritoria aut dispositiua ex parte nostri, quæ etiam motiua dici solet, an Deus reprobet aliquem, præsupponendo in eo causam demeritoriam, qua dignus sit reprobari?

3 Reducitur ergo difficultas ad reprobationem, non ut est actus puniendi tantum, & damnandi in pœnam, sed ut est denegatio alicuius beneficii indebiti, & exclusio ab illo, an supponat in reprobo qui excluditur, aliquam causam, ita ut procedat à Deo etiam in ratione denegati beneficii secundum formam iudicii supponentis indignitatem, & demeritum. Est autem duplex beneficium à quo fit reiectio, scil. gratia, tum habitualis, quæ excluditur per peccatum, tum actualis quæ denegatur à Deo cum quis permittitur peccare, & est gloria, à qua fit reiectio tum negatiua, cum quis non eligitur aliis electis, tum contraria, cum quis priuatur illa in pœnam, & per modum condemnationis. Similiter est duplex status reprobationis : quidam qui modò de facto contingit in hominibus, quorum reprobatio fuit facta post permissum peccatum originale in Adam, & in cæteris eius posteris qui contraxerunt illud. Et hoc idè quia reprobatio non fit nisi post prædestinationem : reiectio enim sequitur electionem, non antecedit. Electio autem, & prædestinatio hominum facta est per Christum ut Redemptorem, & per media redemptiua, quæ à miseria, & à massa perditionis eripuit electos ; & sic supposuit peccatum, etiam in posteris Adæ : ergo à fortiori id supposuit reprobatio. Alius status est reprobationis, quæ non supposuit peccatum originale, ut in Angelis.

Et difficultas modò est in duobus.

Primum, an reprobatio sumpta pro efficaci exclusionem à gloria, & non solum à gratia petat ex natura sua fieri ex præsuppositis demeritis, & indignitate subiecti, an verò ante omnem malam dispositionem, & indignitatem præuisam, detur in Deo, an verò incipiat reprobatio in Deo à reiectione à gratia, & deinde procedat ad reiectionem, seu reprobationem à gloria, supposito peccato, & amissione gratiæ, quæ est indignitas subiecti.

Secundum est, an saltem ut de facto in hominibus reprobatio facta est, supponat causas, & demeritum, scil. ipsum peccatum originale, siue pro excludendo à gloria, siue à gratia. Et idem erit in eo cui iam est remissum peccatum, siue originale, siue actuale, an ut iterum permittatur peccatum, quod est quædam reiectio, & reprobatio à gratia operetur tanquam motiuum aliquod peccatum, siue ipsius hominis, siue ipsius Adam, virtute cuius non solum tanquam beneficium indebitum Deus illam gratiam denegat, sed etiam iusto iudicio derelinquat, & veluti in pœnam alicuius peccati.

4 In hoc ergo puncto est varietas sententiarum, & maior varietas circa secundum punctum quàm circa primum. Igitur circa primum duplex est prin-

cipalis sententia iuxta ea quæ retulimus *preced. art.* Nam qui censent exclusionem à gloria ita esse de secundaria intentione Dei, ut solum detur in pœnam, & supponendo indignitatem subiecti, quia non decet diuinam bonitatem primò, & per se vel le exclusionem æternam alicuius à fine ultimo, censent quòd talis exclusio, nec per modum punitionis, & damnationis, sicut iam dictum est, nec per modum simplicis denegationis beneficii indebiti datur in Deo ante præuisa demerita, præsertim cum eius executio de facto non fiat nisi per modum punitionis, & vindictiue iustitiæ. Ad quid ergo Deus denegat per modum beneficii indebiti, quòd non nisi per modum supplicij irrogandum est? Quòd verò Deus intendat iustitiam exercere, & ad hoc ut iustitiæ detur materia puniendi, permittat mala, omninò indecens, & indignum videtur diuina bonitate. Non negat hæc sententia Deum potuisse hominibus vel Angelis denegare suam gloriam relinquendo omnes vel aliquos in puris naturalibus, & tunc non est dubium quòd per modum simplicis negationis huius indebiti beneficii excluderentur illi à regno cœlorum, non tamen per modum reprobationis. Cæterum modò pro isto statu, in quo nullus excluditur à regno cœlorum, nisi per modum damni, quia omnibus proposita est gloria ut finis assequibilis, & media ad ipsum, necessaria sunt illis volita, non habet locum exclusio à regno, ut negatio simplex indebiti beneficii, sed ut damnificatiua, & dampnatiua hominum, quia illis medijs vti non sunt ; & sic semper est de secundaria intentione Dei, & supponit demerita præuisa.

Tenent hanc sententiam, qui in *art. preced.* allegati sunt pro ea sententia, quæ docet reprobationem solum importare voluntatem damnatiuam. Videri possunt plures pro ea sententia apud Villegas *controu. 16. cap. 3.* Cornelio, in *hanc quæst. 23. disput. 2. de causa reprobationis*, Alarcon *tract. 4. disp. 5. cap. 1. & 3.*

5 Alia verò sententia tenet, posse dari exclusionem à gloria, & non solum à gratia ante præuisa demerita, tanquam motiua huius exclusionis, quæ exclusio in ordine intentionis comitatur electionem ad gloriam ante præuisa merita ut motiua eligendi, & dicitur tunc negari gloriam tanquam beneficium indebitum, & non per modum pœnæ, non quia illa ratio beneficii indebiti sit titulus, quo in re, & in exercitio denegabitur gloria, sed quia beneficium esse indebitum est conditio, ut possit ex ostensione iustitiæ in his subiectis intendi exclusio gloriæ, seu non eligi ad gloriam. Et licet hæc negatiua exclusio non sit positiua reprobatio, si ly *positiua* sumatur pro damnatiua, est tamen positiua, si sumatur pro providentia disponente de his qui decidunt à fine ultimo, & incipit à voluntate non eligente illos ad gloriam de facto, & efficaciter : hoc enim ad providentiam specialem reprobatiuam pertinet, seu ad principium talis providentiæ, quæ sumitur à fine excluso. Tenent hanc sententiam plures Thomistæ, quos citauimus *preced. artic.* & multi etiam videri possunt apud M. Gonzalez *hic disp. 77. sect. 4.* & Curs. Carmel. *tract. 5. de prædestin. disp. 8. dnb. 1. assertione 2. & dub. 2. concl. unica num. 51.*

6 Circa secundum punctum celebris sententia fuit, peccatum originale fuisse causam reprobationis in hominibus, non solum considerando reprobationem ordine intentionis, ut sequitur ad electionem quorundam ad gloriam, sed etiam in ordine executionis, quia ipsæ permissiones cadendi in peccata, etiam illa quæ est primus defectus reprobatio-

nis propter peccatum originale fiunt, & causam habent in ipso reprobo. Quæ sententia ex August. visa est aliquibus derivari, eique attributa est qui frequenter docet reprobationem fieri iusto iudicio relinquendo reprobos in massa perditionis, sicut electionem, & prædestinationem ex Dei misericordia. Et sic totum negotium reprobationis in hominibus tam ex parte intentionis, & finis, quam ex parte executionis, & effectuum damnativa erit, & punitiva iuxta hanc sententiam, quia est in pœnam peccati præcedentis, & ante ipsam reprobationem permissi, scilicet peccati originalis.

7 Cæterum habet hæc sententia contra se duo valde difficilia, quæ vix componi possunt.

Primum, quia etsi peccatum originale secundum se sumptum sit sufficiens causa reprobationis absolutæ, tamen respectu reprobationis comparativæ, secundum quod unus præ alio reprobatur, & iste præ illo eligitur, non potest originale peccatum esse sufficiens causa, quia est æquale in omnibus, & sic non præstat fundamentum illius inæqualis discretionis.

Secundum quia peccatum originale in multis remittitur, qui tamen postea damnantur, & excluduntur à regno: ergo talis exclusio non potest fieri in virtute alicuius peccati originalis, quia si supponitur remissum, non potest operari ad reiectionem à gloria in pœnam sui, & in vi demeriti.

8 Propter hoc conati sunt diversis viis Authores aliqui hanc sententiam moderari. Et aliqui dixerunt peccatum originale non esse univ ersaliter causam reprobationis, quia in his quibus remissum est, causa reprobationis esse non potest, sed tunc peccatum actuale erit causa reprobationis, in his autem in quibus remissum non est, ipsum originale erit causa reprobationis, vel solum ut in paruulis, vel simul cum actuali, ut in adultis: qui cum originali decedunt. Ita attribuit ipsi Soto *super cap. 9. ad Rom. Bannez 1. par. qn. 23. art. 5. dub. ultimo.* Alij dicunt peccatum originale non posse esse causam comparativæ reprobationis unius præ alio, quia in illo peccato omnes sunt æquales, bene tamen ipsius reprobationis absolutæ, id est secundum se consideratæ. Vel saltem hoc explicant de causa sufficienti reprobandi, & derelinquendi in massa perditionis: huius enim sufficiens causa fuit peccatum originale, quamvis aliqui dicant de facto Deum non fuisse usum illa, nisi respectu eorum, quibus peccatum originale non est remissum, alij verò, etiam respectu eorum quibus remissum est, dicunt esse causam reprobationis; quam sententiam cum his declarationibus suppresso nomine refert Gonzalez *hic disp. 77. sect. 4.*

Plurimi tamen in hoc persistunt quod peccatum originale etiam remissum sit, potest esse causa reprobationis, præsertim loquendo de reprobatione à gratia, seu de permissione peccati, & de carentia auxilij divini, quæ pertinent ad effectus reprobationis, & solum sunt causa reprobationis secundum executionem. Et M. Bannez *loco cit.* refert quinque modos explicandi sententiam illam, quæ Augustino tribuitur, quod originale sit causa reprobationis, inter quos plures conantur explicare qua ratione peccatum originale etiam remissum in paruulis possit esse causa reprobationis, quos multi ex Recentioribus secuti, vel imitati sunt, ut hanc sententiam de peccato originali etiam remisso defenderent, præsertim in his quæ pertinent ad reprobationem, seu reiectionem à gratia, quæ est permissio peccati, & nos effectum reprobationis appellamus.

10 Et in primis P. Suarez *lib. 5. de Reprob. c. 5.* præter suam sententiam quæ distinguit de reprobatione

negativa, & positiva, & negativæ dicit non dari causam ex parte nostra, bene tamen positivæ, ut *præced. art.* retulimus, præter hoc inquam, existimat probabile esse peccatum originale in reprobis esse causam denegandi auxilium efficax; obicit autem *num. 10.* peccatum originale multis reprobis esse remissum; & sic saltem in illis non erit causa negandi gratiam; & respondet posse esse causam talis negationis, etiam originale dimissum, sicut est causa mortis, & aliarum pœnarum, quæ etiam iustis infliguntur in vi talis peccati. Quam sententiam alius Recentior Author extendit, Ruiz *disp. 14. de prædest. sect. 4. & seq.* affirmans ob peccatum originale proprium, quemlibet reprobari, & negari illi auxilium congruum ad perseverandum. Et objectioni de peccato originali iam remisso, respondet *sect. 6.* ob illud Deum voluisse ab æterno denegare perseverantiam, licet de facto voluerit remittere originale: de se enim peccatum illud merebatur perpetuo carere gloria, & perseverantia in bono, potuitque Deus ob illud sic præsum nolle dare perseverantiam, licet de facto remitteretur. Et ulterius virgienti argumento, an Deus homini ià iustificato, & originali remisso denegeret in pœnam illud auxilium, cum culpa sit iam remissa, respondet *sect. 7. num. 5. & 7.* & alibi sæpe, quod talis denegatio si fiat ante remissum peccatum, erit in pœnam illius: si post peccatum remissum, non habebit rationem pœnæ, sed effectus peccati, qui manet etiam in iustificatis, sicut manet concupiscentia, & mors, & aliæ pœnalitates, quæ in renatis, & iustificatis nō sūt peccati pœnæ, sed pœnalitates, & effectus relictii.

Secundò, alij distinguunt de peccato originali, 11 prout consideratur in primo parente, & vocatur ab aliquibus peccatum originans, seu quasi actuum, & causans peccatum in paruulis, & de peccato originali in filiis Adæ iam contracto, & ipsis passivè communicato. Hoc secundo modo consideratum peccatum originale, prout in paruulis, si semel sit remissum, dicunt non posse esse causam reprobationis, aut negationis gratiæ. Et idem dicunt de quocumque peccato actuali iam remisso, quod non potest esse causa motiva denegandi gratiam, & reprobandi illum cui remissum est, etiam peccatum ipsum Adæ quatenus personale fuit in ipso. At verò primo modo considerato peccato Adami, ut est peccatum capitis, quod est punibile in filiis tanquam in membris suis, dicunt esse rationem motivam, quare Deus reprobat aliquem à gratia congrua, seu permittit illum cadere in peccatum: omnia enim hæc sunt in pœnam peccati Adami. Ita ex Vasquez *hic disp. 95. c. 4. & ex aliis* docet Alarcon *hic tract. 4. disp. 5. c. 3. conclus. 2. & 3.* Imò Vasquez *c. 6.* loquens de paruulis, quibus nullum est prouisum remedium, docet ipsos reprobari reprobatione exclusivâ à gloria ex peccato primi parentis, ut ex parte Adami se tenet, quia contractio illius peccati, ut irremissibilis in isto, ex illo peccato Adam derivatur: imò omnis contractio peccati originalis, seu denegatio gratiæ iustificantis ex intentione, & affectu puniendi peccatum Adami procedere videtur, ut docet Alarcon, *ubi supra c. 5. concl. 1.*

Denique alij comminiscuntur quandam pœnam debitam peccato originali, quasi dispositionem quandam, propter quam permittitur aliquis cadere in peccatum, & non perseverare, quam pœnam, & dispositionem dicunt manere in reprobis, & non in prædestinatis, & propter illam dicunt reprobari, sed radicaliter propter peccatum originale, quod est causa, & radix talis dispositionis, seu pœnæ. Quem modum refert Bannez *ubi supra* inter

inter modos explicandi sententiam August. & est quartus inter illos. Ad quem modum reducitur illa sententia, quam refert Gonzalez *vbi supra*, eorum qui dicebant Deum prauidisse in reprobis aliquam malam dispositionem, seu carentiam dispositionis bonæ, quam non præsciuit prædestinatis, & propterea istos elegit, alios reliquit. Quam etiam sententiam refert P. Suarez *lib. 5. de reprobatione, c. 5.* & tribuit Henrico, Gabrieli. & Ocham. Quod verò aliqui dixerunt non ipsum peccatū originale, sed effectus aliqui qui ex eo relinquuntur, & sunt vulnera naturæ, esse causam reprobationis, omnino insulsum est: hæc enim vulnera non sunt demerita, nec habent rationem culpæ; & præterea omnibus tam prædestinatis quam reprobis communes sunt.

13 De sententiis P. Suarez, & P. Vasqu. iam diximus *art. precedenti*. Nam Vasqu. omnino negat dari in Deo reprobationem efficacem exclusiuam à gloria, quæ non supponat indignitatem ipsius reprobi, atque aded habere causam motiuam ex parte ipsius, docet, scil. peccatum in quo vita finitur. Reprobationem verò, seu reiectionem à gratia, docet non habere causam in reprobo specialem pertinentem ad reprobationem, licet in nobis possit habere causam generalem ex peccato primi parentis in quo omnem bonam cogitationem amisimus. Suarez verò distinguit reprobationem negatiuam, & positiuam, & illam priorem constituit in illa nolitione dandi gloriam aliquibus, quando alios elegit, cuius negatiuæ reprobationis nullam dari causam ex parte reprobi docet, sed ad Dei reduci voluntatem. Positiuam verò constituit in actu punitio per æternam damnationem, & huius docet dari causam in reprobo, non quidem solum peccatum originale, sed in his qui propter illud damnantur, peccatum originale vt non remissum, in aliis peccatum actuale finale. Ita habet *lib. 5. de Reprobatione, c. 5. & 6.*

Resolutio.

14 Dico primò, loquendo de reprobatione absolute, & secundum se (qualis in Angelis executæ est) dicit in sui prima intentione, & voluntate exclusionem à gloria ante præuisa peccata tanquam causam motiuam, sed solum habet pro motiuo aliquid ex parte Dei, scil. eius gloriam in ostensione iustitiæ, & ex parte creaturæ supponit seu connotat esse sibi indebitum beneficium. Et hæc reprobatio seu exclusio licet vocari possit negatiua ex parte obiecti, seu effectus, quem ponit in creatura, verè tamen ex parte Dei est actus positiuus, & ad positiuam eius prouidentiam spectat. Hæc conclusio est sine dubio S. Thom. *in locis preced. art. allegatis*, & præcipue ponderari potest locus ille *ex 1. ad Anib. dist. 41. qu. unica art. 3.* vbi totam conclusionem manifestè docet: postquam enim in duobus argumentis, sed contra probauerat quòd non datur in nobis causa reprobationis, quia nec datur prædestinationis, & quia voluntatis diuinæ non est assignare causam, explicat totum hoc *in corp. art. hoc modo: Respondeo dicendum, quod voluntati diuinæ de salute hominum duplex voluntas opponi videtur: scil. voluntas de contradictorio, secundum quod vult aliquem non saluare, & voluntas de contrario, secundum quod vult damnare aliquem. Prima quidem voluntas non requirit aliquam rationem ex parte voliti, cum salus gloria non sit debitum humane nature. Non enim requiritur ratio, quare non demaliciis, cui dare non debeo. Sed voluntas damnationis respicit rationem voliti in damnato, cum damnatio ex debito in-*

feratur, quia finis damnationis est Dei iustitia. Detrimendum autem damnationis ex parte nostra, non solum sunt opera mala huius, vel illius, sed etiam natura infectio. Reprobatio ergo, quæ utramque prædictarum voluntatum includit, habet causam quasi finem, diuinam iustitiam, habet verò quasi rationem voliti, non de necessitate præscientiæ operationum, sed ad hoc sufficit præscientia imperfectionis nature. Et per hoc patet solutio ad obiecta. Nam primæ rationes concludunt quòd reprobatio habeat pro ratione voliti præscientiam operationum, vel cuiuscumque ex quo iuste damnatio sequatur. Secunda verò concludunt quòd opera præscita non sint causa reprobationis principalis, sed magis diuina iustitia, quæ est quasi finis, & concernit debitum ex parte damnandi. Hæc D. Thom. Vbi intelligentia mentis eius in hac difficultate de causa reprobationis habetur ex illa distinctione duplicis voluntatis circa salutem hominum, alteram per modum contradictorii, scil. non velle salutem seu non applicare causas salutis huic personæ, applicando aliis, alteram per modum contrarii, scil. volendo istum punire, & damnare propter illa in quæ incurrit semel derelictus à Deo. Et prima voluntas est ex sola voluntate diuina ante omne motiuum ex parte creaturæ. Secunda autem voluntas supponit aliquid ex parte creaturæ, scil. rationem meriti, vel demeriti. Atque ita voluntas diuina semper incipit à gratuitis, vel negatione gratuitorum, & potest inde terminari in ea quæ sunt iustitiæ, inò Deus nunquam vitur forma iustitiæ, nisi supponendo tanquam fundamentum aliquid gratuito collatum, vt rectè obseruat S. Thom. *supr. qu. 21. art. 14.* Et prior illa voluntas dicitur etiam reprobatio à D. Thom. quia versatur circa exclusionem ab ultimo fine, quia vult aliquem non saluare. Et est efficax, quia in re sortitur effectum: reuerà enim quando de facto quosdam eligit ad gloriam, denegare aliis, est denegatio efficax. Et est positiva, non positiva punitiva, sed positiva exclusiva à gratuito beneficio ex parte finis, quatenus non applicat Deus voluntatem, nec apponit cor suum erga illos, quod D. Thom. explicat dicendo quòd vult non saluare, & *ly velle*, positiuum est, & inde originatur prouidentia circa deficientes à fine ultimo, quam dari fatetur D. Thom. *hæc artic. 3. & 3. contra Gentil. cap. ultimo.* Quomodo autem exclusio ista tunc intelligatur, statim explicabimus.

Eandem doctrinam latè tradit S. Doctor *in hac qu. artic. 5. ad 3.* vbi totam rationem prædestinationis aliquorum, & reprobationis aliorum reducit ad ipsam diuinam bonitatem, quam Deus per misericordiam vult repræsentare in prædestinatis, & per iustitiam in reprobis. Et hæc, inquit, est causa quare quosdam eligit, quosdam reprobat, eamque dicit assignari ab Apostolo Roman. 9. dicente, *Volens Deus ostendere iram, id est, vindictam iustitiæ, sustinuit, id est, permisit in multa patientia vasa ira apta in interitum, vt ostenderet diuitias gloriæ suæ in vasa misericordiæ, quæ preparauit in gloriam.* Et hoc ibi latè ostendit, ita vt dubitari non possit esse sententiam D. Thom. quòd reprobatio, non vt punitio, sed vt denegatio electionis opposita electioni prædestinatorum, & vt tenet se ex parte intentionis circa finem denegando illum, seu non applicando se ad inducendum in illum, non habet rationem ex parte demeritorum reprobi, sed ex sola voluntate diuina volente ostendere suam iustitiam in his, sicut misericordiam in illis.

Eadem mens D. Thom. elicitur ex traditis ab ipso *in hac qu. art. 3. vbi in corp. art.* reprobationem docet esse partem prouidentie, respectu illorum qui

qui à fine vitæ æternæ deficiunt, & *solut. ad 1.* docet quodd inquantum non vult aliquibus vitam æternam, dicitur eos habere odio, vel reprobare; quæ utique reprobatio non est sola exclusio à gratia, sed est exclusio ab ipsa vita æterna, ut est finis ultimus, gratia verò non est finis ultimus. Rursus de ista reprobatione, dicit quodd includit voluntatem permittendi cadere in culpam, & inferendi damnationis poenam. Quæ voluntates sunt effectus talis reprobationis, quia ut se explicat *solut. ad 2.* *Reprobatio non est causa eius quod est in presenti, scilicet culpa, sed est causa derelictionis à Deo; est tamen causa eius quod redditur in futuro, scilicet poena æterna, sed culpa provenit ex libero arbitrio eius, qui reprobatur, & à gratia deseritur;* Ergo secundum D. Thomam reprobatio antecedit permissionem seu derelictionem gratiæ, quod utique fit in hac vita, licet non sit causa eius quod inde sequitur ex libero arbitrio, scilicet culpæ: ergo antequam consideretur culpa in libero arbitrio, datur reprobatio ex parte Dei, scilicet illa quæ est causa derelictionis, & desertionis gratiæ, quæ utique nondum est reprobatio punitiva, sed negatio rei gratuitæ, seu quædam voluntatis diuinæ separatio, & auersio non apponendi cor, nec procedendi ad eligendum istos cum aliis, ut mox ex Caiet. declarabimus.

17 Licet loca ista D. Thom. aded sint expressa, respondent tamen aliqui non vrgere loquendo de istis duobus ultimis locis. Et occurrunt primo loco *ex articulo quinto huius questionis ad tertium*, quodd loquitur D. Thom. de hominibus ut de facto sunt maculati peccato originali, quorum aliquos prædestinat ex pura misericordia; alios reprobatur, seu damnatur ex iustitia propter peccatum originale, non ex sola sua voluntate excludit à gloria, licet inscrutabile sit iudicium Dei, cur ex eadem massa perditionis istum prædestinet, alium reprobet. Secundo loco *ex art. 3. eiusdem quest.* occurrunt, quodd reprobatio negatiua præsupponit aliquod peccatum, & cum D. Thom. dicit quodd includit voluntatem permittendi aliquem cadere in culpam, & non intelligit in primam culpam, seu primam permissionem, sed vltiorem; & inferendi damnationis poenam pro culpa, hoc est negat Deus auxilium congruum in poenam peccati præcedentis, & potest esse ex affectu puniendi poena æterna illud prius peccatum, non affectu efficaci, sed inefficaci. Sic glossant hi respondentes.

18 Cæterum extra mentem D. Thom. vagantur responsiones istæ, & curte, atque constrictè tam amplam doctrinam complectuntur. Do primæ solutioni, quodd loquatur in illo loco D. Thom. de hominibus descendantibus ab Adam, sed nulloatenus quadrat eius doctrinæ ita generaliter, & aditæ de omni reprobatione hominum, quodd velit omnem reprobationem eorum esse ex iustitia propter peccatum originale, quodd reprobatio supponit, cum in multis peccatum originale remissum sit, & non possit tale peccatum esse motium, & ratio reprobationis negatiuæ excludendi à gloria, veletiam denegandi gratiam ut peccet peccato actuali, nisi velimus mentem D. Thom. in illam absurditatem, & cæcitatem coniicere, ut velit peccatum remissum, esse rationem alicuius damnationis, & punitiois æternæ, quæ solum propter peccatum

Ioan. à S. Thoma in 1. part. D. Thomæ.

non remissum infertur, quo nihil absurdius dici potest, nec à mente D. Thom. extorriat. Vnde ipse *in illo loco*, nec leniter insinuat quodd propter peccatum originale quoddam reprobatur, seu non eligit, sed totum oppositum, cum dicit loquens de reprobatione comparatiua: *Sed quare hos elegit, illos reprobavit, non habet rationem nisi diuinam voluntatem.* Vnde August. dicit super Ioannem. *Quare istum trahit, illum non trahit, noli velle diiudicare, si non vis errare.* Si ergo dicit non habere rationem, nisi diuinam voluntatem, & exceptio firmat regulam in contrarium, nonne est contra mentem D. Thom. Assignat, aliam rationem præter diuinam voluntatem, scilicet peccatum originale loquendo de hominibus descendantibus ex Adam?

Secunda autem solutio est omninò inepta; tum ex comparatione D. Thom. inter prædestinationem, & reprobationem: dicit enim, quodd *Sicut prædestinatio includit voluntatem conferendi gratiam, & gloriam, ita reprobatio includit voluntatem permittendi culpam, & inferendi damnationis poenam.* Si ergo ly *permittendi culpam*, glossatur non de omni culpa, etiam prima, sed de vltiori ad primam, pari modo glossari potest quodd prædestinatio non includit voluntatem dandi primam gratiam, sed sequentem, quodd est omnino absurdum. Non est autem maior ratio quodd illa glossa applicetur reprobationi, quam prædestinationi. Quodd enim postea dicit D. Thom. *ad 2.* quodd *Reprobatio non est causa culpæ, prædestinatio autem est causa gratiæ*, nihil obstat, quia nullius culpæ nec primæ, nec posterioris Deus est causa, derelictionis autem, seu permissionis Deum esse causam, *ibi* expressè dicit S. Thom. sed loquitur de omni derelictione, sine restrictione, sicut de omni gratia pro prædestinatione. Tum secundò est falsa ista solutio, quia D. Thom. tradit doctrinam generalem de omni reprobatione; contingit autem sæpe quodd propter primum, & vnicum peccatum quis damnatur, aut propter solum originale, ut paruuli, aut post remissum originale, propter primum peccatum actuale, ut aliqui adulti, aut simpliciter propter primum peccatum, ut Angeli. In his ergo quomodo saluatur doctrina D. Thom. quodd reprobatio includit voluntatem permittendi cadere in culpam, si id glossatur, non de prima, sed de vltiori culpa? Et tamen aliqui reprobantur non propter vltiorem culpam, sed propter primam.

Fundamentum huius conclusionis non potest non esse immobile apud Thomistas, & eos qui sentiunt electionem ad gloriam dari in Deo ante electionem ad gratiam, quam *suprà* diff. 8. latè confirmauimus: sicut è contra, qui sentiunt præcedere electionem ad gratiam ante electionem ad gloriam, consequenter debent dicere quodd reprobatio exclusiua à gloria sequatur semper post exclusionem, seu denegationem gratiæ; atque aded post peccatum præuisum. Illam ergo sententiam de præcedentia electionis ad gloriam in ordine intentionis *suprà* firmauimus. Ex illa verò sequi per necessariam consequentiam quodd etiam reprobatio exclusiua à gloria præcedat permissionem, & præuisionem peccati, manifestissimum est. Nam Deus quando in ordine intentionis eligit ad gloriam efficaciter, solum aliquos eligit determinatè, non omnes ex tota massa hominum, aut ex tota multitudine Angelorum: ergo oportet

L I

100

tet quoddam in illa electione efficaci inclusiva aliquorum, & non omnium, sit etiam efficax separatio, seu aversio voluntatis diuinæ ab aliis. Patet consequentia, quia illa electio efficax non est absoluta, sed comparatiua, scilicet vnius præ alio, & relinquendo aliquos: ergo voluntas diuina non se applicat ad illos in ratione volendi eis vitam æternam; atque adeo efficaciter illos relinquit, quia de facto non eligit, nondum quidem puniendo, & damnando, sed non applicando illis suam voluntatem ad dandum ea per quæ possint euadere damnationem, ut rectè Caiet. obseruat in hac q. art. 5. §. Circa hanc partem, & in calce art. Hæc autem voluntas est reprobatiua, quia est exclusiua à gloria, seu potius non applicatiua voluntatis diuinæ ad dandum eis, & eligendum ad gloriam, ad quam eligit alios. Et hæc voluntas antecedit peccata, ut motiuium, & ut rationem illius exclusionis, quia antecedit exclusionem à gratia, seu permissionem peccati, quæ est negatio gratiæ. Quod in Angelis manifestum est, cum nullum in eis præcesserit peccatum, sed gratia in omnibus: præcessit autem quorundam electio. Peccatum verò futurum non poterat operari ut præuisum, quia hoc ipsum ex permissione dependebat, & permissio ex auersione, & separatione voluntatis futura. Ex quo ergo motiuo erat illa separatio post quorundam electionem? Homines verò qui in peccatis concipiuntur, non ita apparet quomodo in eis non præcesserit peccatum, ut dans motiuium illi reprobationi. Sed quia fuit æquale in omnibus, & in multis remissum est de facto, qui tamen reprobatii sunt, videtur Deum non fuisse usum hoc motiuo ad reprobandum vnum præ alio, licet illo uti potuerit si vellet, de quo seq. conclusione. Est etiam hæc voluntas efficax, & positiua, quia efficaciter Deus eligit hos determinatè præ aliis, & apponit erga illos cor suum in dando gloriam: ergo efficaciter, id est de facto, relinquit alios, & separat seu auertit ab illis cor, unde sequitur quoddam postea etiam auerrat in deneganda gratia, ut statim dicemus. Nec potest dici, quoddam Deus eligit efficaciter istos, sed circa alios suspendit reiectionem quousque videat peccatum; & sic pro tunc nec eligit, nec reiicit. Hoc, inquam, dici non potest, quia facta electione eorum qui sunt ad vitam, reliqui non manent eligibiles, quia si eligi deberent, utique cum aliis electis includerentur, quia electorum omnium vna est electio in Christo: ergo non manet suspensum ita ut adhuc eligi possint. Si autem eligi non possunt, utique reiecti manent. Tam efficax ergo est ista auersio seu reiectione, sicut illa electio, utraque enim de facto fit, & in re effectum habet. Est denique positiua, quia ex parte voluntatis diuinæ non se habet merè suspensiuè circa illos, sed determinatè non vult illos eligere sicut creaturas possibiles determinatè non vult producere. Nec solum se habet circa illos, sicut si relinquerentur in puris naturalibus, quia supponuntur omnes eleuati ad finem supernaturalem, & voluntate antecedenti inefficaci vult Deus illos omnes saluare, & proponit finem ac media ad id sufficientia, multisque ea procurat, etiam specialissima, sicut Iudæ dedit Apostolatum, Luciferi maximam gratiam inter Angelos, & tamen eos reprobatur: ergo non se habet illa auersio diuinæ voluntatis, & illud non apponere cor, sicut si relinqueret homines illos in puris naturalibus, sed sicut si eleuatos, & ordinatos ad gloriam non curat eligere quando alios efficaciter eligit. Et exinde incipit prouidentia diuina circa deficientes

ab illo fine, quæ ex tali diuinæ voluntatis separatione, & non appositione cordis circa electionem ad gloriam descendit ad non apponendum cor, ut det illis gratiam, vel si dat, non det perseuerantiam, unde sibi reiecti peccant, & super peccatum cadit iustitia punitiua, in qua terminatur reprobatio puniendo, quæ incepit à gratuitis, non applicando voluntatem circa beneficium illud indebitum. Et sic reprobatio terminatiue est punitio, & fit secundum iustitiam, reprobatio initiatiue est circa gratuita, non apponendo cor, nec applicando voluntatem in eligendis istis, quando alios solum eligit, & istos relinquit. Unde non contrariantur voluntas denegandi gloriam ut beneficium indebitum in ordine intentionis, & finis, & voluntas priuandi illa propter peccatum, & in vi damnationis in executione, quia prior illa voluntas non respicit indignitatem personæ reiiciendæ, sed meram & solam voluntatem dantis, quæ ob sui libertatem applicat suam voluntatē ad dandum beneficium indebitum, vel denegandū, quia non tenetur applicare omnibus voluntatem suam æqualiter, non propter peccata, aut demerita personarū, sed propter suam libertatem & fines quos sibi proponit. Voluntas autem posterior non respicit applicationem, vel separationem suæ voluntatis erga istos vel illos, sed respicit id quod ipsi commiserunt ex suo libero arbitrio deserto à gratia, scilicet peccatum, & super illud cadit voluntas puniens, & priuans regno in executione.

Dices: Esto Deus negatiue se habeat circa electionem aliquorum ad gloriam, quando alios eligit comparatiue ad istos, & quoad negandam illis gloriæ electionem sit illa separatio diuinæ voluntatis efficax, id est, de facto non eligens: tamen ex hoc non sequitur, quoddam sit efficax ut ex hoc fine non eligendi sequatur infallibiliter voluntas permittendi peccatum, & denegandi gratiam: hoc enim esset Deum ita crudelē se gerere erga illos miseros, quos non eligit, ut velit se obligare, *empennarse*, ad hoc ut labantur in peccatum, ut voluntas sua reprobatiua impleatur; quod certè valde abhorret à pietate diuina, quam ita mirificè nobis prædicat Scriptura. Sufficit ergo voluntas, seu affectus inefficax, & antecedens puniendi eos qui non reliquerint peccata sua, ut exinde sequatur illa permissio, non verò ex illa efficaci reiectione, & reprobatione à gloria.

Resp. ex illa reiectione negatiua à gloria sequi infallibiliter Deum non curare de procurandis mediis efficacibus ad consecutionem gloriæ, etsi multa sufficientia non neget: illa enim voluntas non eligendi istos ad gloriam radicaliter est voluntas non eligendi ad media efficacia, sed deserendi illos, etiam in gratia, sicut deserit in eligendo ad gloriam, cum gratia perseuerans sit infallibiliter connexa cum gloria. Repugnat ergo quoddam detur reiectione à gloria efficax non eligendo aliquos ad illam, & non detur efficax reiectione à gratia efficaci, & perseueranti, cum illa sit virtualis reiectione istius, sicut qui efficaciter non vult ignem, efficaciter in vi huius non vult calorem ut octo, & qui non vult hominem, non vult risibile. Et idem rectè dixit S. Thom. reprobationem esse causam derelictionis Dei, & includere voluntatem permittendi cadere in culpam, & inferendi damnationis pœnam. Neque ex hoc Deus se obligat ad hoc ut labantur in peccata, sed solum se obligat ad negandū gratiam efficacē, quia hoc virtualiter, & radicaliter continetur in priori reiectione

iectione, peccatum autem prouenit ex libero arbitrio eius qui deferitur à gratia, & reprobatur, ideoque, vt aduertit D. Thom. in hoc art. 3. ad 2. dicitur perditio esse ex nobis, & non ex Deo. Neque sufficit ad hoc illa simplex voluntas, & quasi conditionata puniendi eos qui non deseruerint peccata: hæc enim voluntas est communis, etiam pro prædestinatis, sicut è contra voluntas saluandi omnes conditionatè, si per ipsos non steterit, est communis etiam reprobis; & sic ex illa non sequitur negatio efficacis gratiæ magis in his, quàm in illis: inefficax enim voluntas finis, vt sæpè *suprà* diximus, infœcunda est, nec parit quidquam circa media. Et præterea si Deus efficaciter eligit istos determinatè præ aliis, non stat ineffaciter solum se habere circa alios quos non eligit, cum de facto, & efficaciter relinquat illos, non suspendat, & differat, vt *suprà* ostensum est, cum omnes electi simul eligantur.

22 Præter fundamentum hoc quod est apud nos conuincens, cum per necessariam consequentiam deducatur ex sententia à nobis admissa, & probata *suprà* de electione ad gloriam ante præiudicia merita, hoc ipsum fundatur in ipso connaturali ordine prouidentiae diuinæ circa res gratuitas, & beneficia indebita, & supernaturalia, quæ semper incipiunt à fine vel collato, vel denegato, imò, vt *suprà* dicebamus ex D. Thom. *quest. 11. artic. 4.* omne quod ex iustitia retribuitur à Deo, supponit, & fundatur in aliquo gratuito, vnde incipit. Fundatur deinde in eo quod peccatum vt irremissibile, quod est peccatum finale, debet esse effectus reprobationis, non eius causa, & motiuum; constat autem quod reprobatio si aliquod peccatum debet habere pro motiuo, debet esse peccatum non remittendum: nam quod remissum vel remittendum est, non est sufficiens motiuum pro reprobatione punitiua, & exclusiua ab æterna gloria. Fundatur denique in locutione ipsa Scripturæ, quæ hoc ipsum significat ad Rom. 9.

23 Primum horum explicatum est in *præced. art.* explicando rationem quare reprobatio non sumitur solum pro actu iustitiæ punitiue, sed etiam pro exclusionem negatiua efficaci à gloria, cuius effectus sit permissio peccati. Nam constat quod connaturalis modus prouidentiae, quæ versatur circa media, supponit voluntatem de fine ordine intentionis efficacem, quia inefficax voluntas non habet connexionem per se cum electione mediorum, & effectu subsecuto, sed si sequitur, erit per accidens, & non ex intentione: ergo si est prouidentia circa bonum indebitum, & gratuitum, non petit de se illa prouidentia quod talis voluntas volendi illum finem sit pro omnibus vt efficaciter, & absolutè consequendum, licet ineffaciter, & sub quadam conditione aut abstractione consideratus possit esse volitus pro omnibus: Ergo de se, & ex ipsa natura talis prouidentiae de re gratuita proponenda ad consequendum, stat quod pro aliquibus talis finis eligatur, vt assequendus, pro aliis non, & respectu istorum sit reprobatio, seu exclusio à fine ordine intentionis, id est, non intendere hunc finem pro istis, nec apponere cor, vt pro isto fine eligantur. Nec potest dici quod prædestinatio, & reprobatio non sint circa gratuita, quia vt merces proponitur gloria; & sic ex debito, & à fortiori supplicium. Dicimus enim quod prædestinatio, & reprobatio dicuntur à D. Thom. pertinere ad gratuita in art. 5. huius q. ad 3. quia versantur

Ioan. à S. Thoma in 1. part. D. Thome.

circa supernaturalia, quæ sunt indebita naturæ, licet gloria se habeat vt merces, non respectu naturæ, sed respectu gratiæ, & respectu operum, quæ fiunt ex gratia. Vnde ordinare naturam ad talem finem qui ipsam excedit, & dare gratiam seu principium pro quo talis natura proportionetur, & reddat sibi debitum talem finem, gratuitum beneficium Dei est; & sic prouidentia eius etiam aliquos non admittit ad talem finem, sed permittit deficere; quia rem ita indebitam non omnibus dare vult. Vnde sicut talis prouidentia debet incipere à voluntate intentionis admittente aliquos ad talem finem, ita è conuerso reprobatiua prouidentia incipit à voluntate non opponente cor, nec eligente tales homines circa illum finem. Et de hoc nulla alia ratio debet assignari, quàm simplex Dei voluntas, non motiuum ex parte creaturæ: sicut enim quod Deus ex innumerabilibus creaturis possibilibus & infinitis mundis, has solum creaturas elegerit vt in esse produceret, reliquas sub non esse reliquit, nec apposuit erga eas cor suum, non ob aliam rationem quàm ob liberrimam voluntatem suam in dando, vel denegando esse: ita non est querenda alia ratio quàm voluntas diuina in apponendo cor ad dandum, vel denegandum esse gloriæ, & gratiæ.

Secundum verò explicatur ex hoc, quia permissio peccati vt non remittendi, seu peccati finalis, debet esse effectus alicuius prouidentiae in Deo; non prouidentiae generalis solum, non prouidentiae prædestinantis ad regnum: ergo prouidentiae reprobantis. Patet conseq. quia non dantur plures prouidentiae, nisi vel generalis, quæ communis est reprobis, & prædestinatis, siue in genere naturæ, vel specialis, quæ versatur circa eos qui de facto saluantur, vel circa eos qui de facto excidunt à salute. Maior etiam manifesta est, quia si omnis permissio peccati est ex prouidentia Dei, quia non fit talis permissio, nisi Deo sciente, & volente, & propter aliquem finem sic disponente, quantò magis peccatum finale quod nunquam remittendum est ex Dei dispositione, & ordinatione permittitur? Minor verò prob. Non est illa permissio effectus prouidentiae generalis, quia hæc prouidentia est communis reprobis, & prædestinatis, & sic solum respicit effectus qui possunt illis esse communes: permissio autem peccati irremissibilis non potest inueniri in prædestinatis, quia si inueniretur, damnarentur: ergo est solum reproborum; & sic non est effectus communis: ergo nec causatur à prouidentia communi. Nec est effectus prædestinationis, cum sit effectus oppositus perseverantiæ finali, & consequenter est oppositus fini prædestinationis, quia habet infallibilem connexionem cum damnatione. Nec potest dici quod est effectus prædestinationis, in quantum cedit in maiorem gloriam prædestinati, quod permittantur aliqui sic peccare, à quibus laqueis ipsi liberantur. Contra enim est, tum quia hoc modo etiam ipsa damnatio poenæ æternæ diceretur esse effectus prædestinationis, quia ab ea liberantur iusti, & cedit in gloriam eorum, *laturus enim iustus, cum viderit vindictam, & manus suas lauabit in sanguine peccatoris.* Si ergo hoc non obstante illatio æternæ poenæ est effectus reprobationis, etiam in sententia opposita, vtrique etiam permissio æternæ culpæ, seu peccati nunquam remittendi, erit effectus reprobationis. Tum quia si illa permissio est effe-

Ll 2

ctus

Etus tam specialis providentiæ, qualis est prædestinatio, ut ipsis cedat in gloriam, cur non erit effectus specialis providentiæ reprobatiæ, ut cedat in gloriam Dei in ostensione suæ iustitiæ? Si autem semel habemus quoddam permissio finalis peccati est effectus reprobationis: ergo supponitur reprobatio ante talem permissionem, & ante tale peccatum finale: ergo datur exclusio à gloria ante peccatum finale: ergo & ante omne aliud demeritum, quia nulla culpa potest esse sufficiens motuum excludendi à gloria, & damnandi in æternum, nisi culpa finalis, & irremissibilis, non remissa vel remittenda.

25 Tertium denique sumitur ex ipso contextu capis. 9. ad Roman. ubi Apostolus intendit ostendere quoddam negotium prædestinationis, & consecutio hæreditatis diuinæ est ex pura Dei misericordia, & ex eius voluntate eligentis hos, & relinquentis illos, non ex aliquo præsupposito ex parte nostra. Et hoc inducit tres consequentias.

Primam ab exemplo duorum geminorum Iacob & Esau, qui cum nondum nati essent, nec aliquid boni, vel mali fecissent, non ex operibus, sed ex vocante (id est consulente) vocationem præueniente, & ei respondente dictum est quoddam maior serviet minori, & quoddam unum dilexit, alterum odio habuit. Quod dictum ex Genesi, & Malachia Apostolus affert, ubi licet secundum corticem litteræ Scriptura loquatur de aliquo temporali pertinente ad hæreditatem utriusque fratris, tamen Apostolus utitur illo testimonio tanquam altiori principio, ut inferat non esse in Deo iniquitatem si ex voluntate sua unus misereatur, & non alterius, etiam in ordine ad hæreditatem spirituales, quæ est in Christo, de qua ibi Apostolus principaliter intendebat. Et sic cum non sit iniquitas apud Deum, sed misereatur cui vult, ut Moyse dixit, infert Apostolus quoddam non est volentis, neque currentis, sed misereantis Dei. Quæ consequentia non solum tenet in his quæ pertinent ad temporalem hæreditatem Esau, & Iacob, sed quæ pertinent vniuersaliter ad providentiam Dei, & specialiter circa negotium prædestinationis, & reprobationis. Optimè autem Apostolus hunc latentem, & spirituales sensum ex illis verbis eduxit, quia dicitur, ibi, Esau odio habui: Deus autem non habet odio aliquem, nisi propter peccatum: nihil enim odit eorum quæ fecit. Nec dicitur odio habere, quia repellit ab hæreditate temporali, aut dat minora bona alicui, aliàs diceretur Lunam, aut Stellas odisse, quia dat eis minorem lucem, quam Soli, ut argumentatur August. lib. 1. ad Simplic. quæst. 2. Rectè ergo ex illo verbo, Esau odio habui, inferatur non loqui Scripturam de sola hæreditate temporali quæ negata est Esau, sed de spirituali, quæ ratione peccati negatur, & solum est capax odij Dei.

Secundam consequentiam deducit ab exemplo Pharaonis, cum dicit Scriptura: Quia in hoc ipsum excitavi te, ut ostendam in te virtutem meam, & ut annuntietur nomen meum in vniuersa terra. Ex quo infert Apostolus: Ergo cuius vult misereatur, & quem vult indurat, quæ utique misericordia, & induratio non pertinent ad aliquid temporale, sed ad spirituale bonum gratiæ vel peccati, induratio enim solum in peccato verificatur per negationem gratiæ, quod totum reducit ad voluntatem Dei.

Postremam consequentiam facit aduersus repli-

cam, quæ inde confurgit, quoddam videlicet Deus conqueri non potest, si totum hoc ex eius voluntate pendet, quia voluntati eius quis potest resistere? Contra quam inducit Apostolus exemplum de figulo, & figmento, seu luto, ex cap. 45. Iai. & Ierem. 18. habet enim potestatem figulus pro suo placito facere ex eadem massa unum vas pulchrum, & in honorem, & aliud vile, & in contumeliam. Et nihilominus titulum iustæ querelæ habet Deus ex differentia, quæ inter reprobos, & prædestinatos versatur, quia etsi totum hoc negotium ex voluntate Dei dependeat, tamen est lata differentia quoddam ad ostendendam iustitiam, & potentiam suam sustinuit, id est, permisit, & patienter tulit vasa iræ facere quæ volunt; ad ostendendum autem diuitias gloriæ in vasa misericordiæ, præparavit illa in gloriam. Vnde quia hæc præparavit, illa verò sustinuit, habet de illis querelam, quia patientiam, habet de istis gloriam, quia dedit illis gloriam. Apostolus ergo, ut patet ex calce, & fine huius discursus, intendit reducere totum hoc negotium prædestinationis, & reprobationis ad voluntatem Dei, à qua vnicè dependet (quod clarius elucescit in prædestinatione, & reprobatione Angelorum, in quibus nullum præcessit peccatum) & ostendit hoc non fieri ex præsuppositione aliquorum operum, neque desumendum esse motuum ex parte nostra, sed ex fine quem Deus statuit, scilicet ut nota fiat eius potentia, vel misericordia, & quia summam habet potestatem faciendi, & disponendi quæcumque vult.

Hæc etiam sententia, & expositio Pauli non solum est D. Thom. in hac q. art. 5. ad 3. ubi sic exponit Apostolum, sed etiam August. qui, si diligenter legatur, hanc eandem sententiam tenet, & hoc modo Apostolum exponit loquendo de reprobatione secundum se, & ut facta est in Angelis. Nam quomodo facta sit in hominibus præcedente originali peccato, an in pœnam illius reprobatum sint, & ex iudicio punitionis processerit decretum reprobationis postea tractabitur. Igitur Augustin. in libro de prædestinatione & gratia, postquam latè tractavit hunc locum Pauli ad Rom. 9. & ex illo ostendit prædestinationem Dei ex nullis meritis processisse, etiam reprobationem, etiam in Dei voluntatem, & non in demerita hominum, sine vlla Dei iniustitia reducendam; dicit enim in fine capit. 15. Hic quicumque respondet, illi ut mutaretur assuisse diuinum, huic ut induraretur defuisse præsidium, & hoc contendit iniustum propter quod rerum ipsarum fines in Dei voluntate constituens Apostolus dixit. Cuius vult misereatur, & quem vult indurat, dicente Domino, sine me nihil potestis facere; intelligat illa omnia, vel adiuuante Domino perfici, vel deserente per-mitti, ut nouerit tamen volente Domino nihil prorsus admitti. Vbi August. ad solam voluntatem Dei, & non ad demerita super quæ cadat illa reprobatio, discretionem istam reducit. Et clarius cap. 16. seq. ubi loquitur de reprobatione, quæ fieret nullo existente peccato originali, qui est casus nostræ conclusionis, ubi loquitur de reprobatione secundum se. Verba Augustin. sunt. Si humanum genus, quod creatum primitus constat ex nihilo, non cum debita mortis, & peccati origine nasceretur, & ex eis Creator omnipotens non nullos damnare vellet in interitum, quis omnipotenti Creatori diceret, quare sic fecisti? Qui enim cum non essent, esse donauerat, quo fine essent habuit potestatem: nec dicerent ceteri, cur paribus omnium

omnium meritis diuinum discreparet arbitrium, quia potestatem habet figulus ex eadem massa facere aliud quidem vas in honorem, aliud in contumeliam. Ecce manifestissime Augustin. independentem à peccato originali ponit reiectionem aliquorum, non solum à gratia, sed etiam à gloria, cum loquatur de damnatione in interitum, & in hoc sensu explicat Apostoli verba de potestate figuli, etiam independentem à peccato originali, atque adeo à reprobatione, quæ fit in forma, & modo iudicii. Eandem doctrinam confirmat Augustin. loquens de reiectione primi hominis à gratia, & diaboli à beatitudine quæ ad solam Dei voluntatem, & non ad aliquod iudicium ex priori demerito processit. Idem autem videtur iudicium de exclusione à gloria via intentionis, & de exclusione à perseverantia, de qua ibi loquitur Augustin. Verba sunt: *Si propterea non habuit perseverantiam primus homo, quia non accepit, quid ipse non perseverando peccauit, qui perseverantiam non accepit? Neque enim dici potest, idcirco non accepisse, quia non est discretus à massa perditionis, gratia largitate. Nondum quippe erat illa in genere humano perditionis massa antequam peccasset, ex quo tracta est origo vitia- ta. Quapropter saluberrimè confitemur, quod rectissime credimus, Deum Dominumque rerum omnium, qui creauit omnia bona valde, & mala ex bonis exortura esse præsciuit, & scivit magis ad suam omnipotentissimam bonitatem pertinere etiam de malis benefacere, quam mala esse non sinere, sic ordinasse Angelorum hominumque vitam, ut in ea prius ostenderet quid eorum liberum arbitrium, deinde quid posset sue gratiæ beneficium, iustitiæque iudicium. Ecce ubi, remoto omni peccato originali, astruit Augustin. reprobationis ordinem tam in Angelis, quam in homine, ex sola Dei voluntate volente ostendere omnipotentiam suam, ex fragilitate liberi arbitrii multa bona eliciendo; & sic permittere, seu finire quod cadat, deinde verò quid possit gratia, & tandem id terminari in iustitiæ iudicio. In illa ergo priori intentione, lapsus permissus fuit, non ex aliquo demerito, aut præiusto, aut præcedente, sed ex solo fine diuinæ gloriæ, & omnipotentia, & idem est de exclusione à gloria, neque enim permissio peccati in Angelo ab exclusione gloriæ seiuncta fuit, cum fuerit peccatum irremissibile. Ergo manifestum est sententiam D. Thom. esse etiam Augustini, quamuis ipse solum citet illum locum ex tract. 26. in Ioannem, *Quare istum trahat, illum non trahat, noli diiudicare, si non vis errare*; quod pertinet ad reiectionem à gratia.*

27 Non vacat longam aliquorum digressionem persequi, volenti etiam vim argumēti ex loco Pauli frangere, dicendo quod non loquitur de prædestinatione Iacobi, & reprobatione Esaii, quia probabilissimum putant Esaii non fuisse reprobatum à regno cælorum, sed solum loquitur de repulsa ab hæreditate temporali. *Quia posui, inquit, montes eius in solitudinem, & hæreditatem eius in dracones deserti.* Malach. 1. Ex hoc autem argumentatur Paulus ad ostendendum quod vocatio congrua ad gratiam est ex voluntate Dei, & similiter eius negatio; & sic non ut iniquitas apud Deum. De reiectione verò à gloria nihil Paulum exprimere ibi constat.

Sed utrumque horum non flectit rationem factam. Nam quidquid sit de repulsa Esaii ab hæreditate, & bonis temporalibus, & benedictione paterna, in quo non dubitamus populum Israël-

Ioan. à S. Thoma in 1. part. D. Thoma.

ticum fuisse prælatum Idumæo, & oraculum illud Genes. 25. Rebecca redditum non respexisse personas singulares Iacob, & Esaii, sed populos ex illis nascituros, sicut scriptum est. Duæ gentes sunt in utero tuo, & duo populi ex utero tuo diuidentur, populusque populum superabit, & maior seruiet minori, quod certe ibi non de personis dicitur, sed de regnis, seu populis inde descendentibus, nec in ipsis personis verificatum est, quia Esaii nunquam legitur victus à Iacob, eique seruisse personaliter, sed verificatum est tempore Dauid 2. Reg. 8. *Facta est vniuersa Idumæa seruiens Dauid*; tamen Apostolus mystica disputatione locum hunc tractauit, ut inquit Hieronymus supra 1. *Malachia*, & ad spirituales hæreditatem induxit, ut etiam sentit Aug. *Epist. 105.* & videri potest q. 2. ad Simplicianum, ut supra ponderauimus. Quod verò respiciat etiam personas Iacob, & Esaii, deducitur ex illis verbis; *Ut secundum electionem propositum Dei maneret, non ex operibus, sed ex vocante dictum est.* Hæc autem opera ex quibus non est dictum, non fuerunt opera populorum, sed ipsarum personarum Iacob, & Esaii. Ad illos ergo deriuat sensum suum Apostolus; alias non legitimum sensum facit; & in illis, electionem secundum propositum Dei manere dixit, quæ utique electio ex proposito Dei, electionem prædestinatiua designat, ut frequens est apud Paulum. Loquitur ergo de electione ad gloriam, quam Paulus spiritualiter, seu mysticè latere sub illis verbis *Maiores seruiet minori*, &c. intellexit, ut supra diximus. Certe totum illum discursum Pauli deductum ab exemplo duorum geminorum, ab exemplo Pharaonis, ab exemplo figuli, ex eadem massa formantis vasa honoris, & vasa contumeliæ in hoc collimare certum est, quod Deus in negotio prædestinationis, & reprobationis hominum (quod utique designat in vasis misericordiæ & iræ) ex sua mera voluntate procedit, & ad eam totum hoc reducit. Hoc ergo nobis sufficit, nec oportet sollicitari amplius de intelligentia illius testimonij ex Genesi, & ex Malachia, si solum secundum corticem litteræ consideretur an ibi loquatur de hæreditate temporali, vel spirituali. Sufficit quod in illo testimonio inuenerit Apostolus in mystico, & spirituali sensu, unde deduxerit sufficiens argumentum pro his quæ pertinent ad gratiam prædestinationis, & ad reprobationem, quæ omnia ad diuinæ voluntatis nutum deuoluuntur. De Esaii, an fuerit personaliter reprobatus à vita æterna, quid ad nos interest? cum non ex hoc dependeat vis Apostolici discursus, & textus, ut vidimus. Certe Apostolus ad Hebr. 12. Esaii inter peccatores, & impenitentes numerat, an hoc sufficiat ad reprobationem, quis non iudicabit? *Ne quis, inquit, fornicator, aut profanus, ut Esaii qui propter unam escam vendidit primitiua sua; scitote enim quoniam, & postea cupiens hæreditare benedictionem, reprobatus est: non enim inuenit penitentia locum, quamquam cum lachrymis inquisisset eam.* Scio aliquos interpretari de penitentia apud Isaac patrem suum, & de reprobatione ab eius benedictione, quod significant Theophylactus, & Caietan. super istum locum, licet Chrysost. homil. 31. ad Hebr. D. Thom. super cap. 12. eiusdem epistolæ, non veram penitentiam habuisse erga Deum sentiant.

Quid de reprobatione præsupponente in nobis peccatum originale?

28 Dico secundò, In hominibus de facto in quibus præcessit peccatum originale ordinem reprobationis, fuit quidem ex parte peccati originalis in ipsis præuissi, & in Adam, sufficiens causa ad reprobandum eos à gloria, etiam per modum punitionis, vel omnes, vel aliquos quos vellet. Non tamen de facto usus est Deus hoc motiui ut ratione adæquata ad reprobationem omnium qui reprobantur, nec ad reprobandum comparatiuè vnum præ alio. Si qui tamen damnantur propter peccatum originale, vel propter illud eis denegatur auxilium sufficiens ad credendum, peccatum originale est causa talis reprobationis. Nullo autem modo peccatum semel remissum est causa alicuius reprobationis siue à gloria, siue à gratia. Hæc conclusio ponitur ad explicandam reprobationem sub eo modo quo de facto contingit in hominibus, & ad expendendum mentem Aug. qui videtur in pluribus locis docere reprobationem hominum fuisse relictionem in massa perditionis ex iusto iudicio Dei punientis in eis originale peccatum. Supponimus autem quòd reprobatio, ut de facto contingit in nobis, facta est post præuissum, & permissum peccatum originale, & destructionem status innocentie. Itaque gratia illa pro statu innocentie, & statu ipse non ex prædestinatione causabatur, sed ex prouidentia generali in ordine supernaturali, & ex eodem principio lapsus ille à tali statu, & gratia permissus est, & non ex reprobatione, deinde verò toto humano genere iam infecto, reprobatio & prædestinatio facta est. Hoc præsuppositum debet necessariò admitti, posito quòd electio hominum ad gloriam non est facta, nisi in Christo, ut Redemptore, nec ipsi prædestinati sunt, nisi ut redempti, & per media redemptiua. Quod ut certum debet supponi, siue decretum Incarnationis, & Aduentus Christi fuerit determinatus ante præuissum originale peccatum, siue post: quidquid enim de hoc sit, tamen de facto nullus est prædestinatus, & electus ad gloriam pro statu innocentie, quia ille status non durauit, nec est electus nisi in Christo ut Redemptore, & post decretatū munus Redemptoris (quidquid sit, an alias veniret, etiam si non veniret ad redimendum) quia in Christo elegit nos Deus ante mundi constitutionem, & pro omnibus mortuus est, ut viuificaret omnes, nec nisi in eius sanguine iustificati sumus. Electio ergo, & prædestinatio efficax non nisi per modum redemptionis facta est: ergo quando est facta, iam supponebat peccatum à quo redimeret, & eriperet electos: si enim non supponeretur peccatum, non poterat intelligi redemptio qualis facta est, & ordinatio modo fit. Rursus reprobatio exclusiua à gloria non est facta, nisi post electionem: ex eo enim aliqui reiecti, & reprobatii sunt, quia alij electi: si enim prius esset reiectio quam electio, vel esset reiectio omnium efficax, & tunc non possent ex illis aliqui eligi, vel esset aliquorum tantum reiectio, & tunc esset discretio ab aliis non reiectis, & non per Christum: ergo si electio, quia erat redemptiua, supposuit peccatum, à fortiori reprobatio peccatum illud supposuit quod supponebat electio, & hoc erat peccatum originale.

29 Ex his manet probata prima pars conclusionis. Si enim reprobatio, ut de facto contingit in nobis, post electionem redemptiuam in Christo supposuit peccatum originale: ergo supposuit sufficiens

motiuum, & rationem ad puniendum illos, quos Deus reprobabat. Patet conseq. quia peccatum originale est sufficiens ad excludendum hominem à gloria, quia reddit hominem peccatorem priuatum gratia, & odio dignum: ergo sufficiens motiuum damnationis, & punitionis in se habet ad excludendum à gloria quemcumque Deus excludere voluerit propter tale peccatum, quia ex vi illius debitor est æternæ mortis, & de facto multi propter illud solum damnantur, ut paruuli. Quòd si non omnes voluerit punire, sed misericorditer liberare, gratia erit diuinæ, non tamen alios punire iniustitie erit iniquæ, quia ex pluribus debitoribus potest creditor vni donare, & ab altero exigere sine vlla iniustitia.

30 Secunda verò pars conclusionis, quòd Deus non fuerit usus peccato originali, ut ratione adæquata reprobationis omnium, patet, tum quia pluribus remissum est tale peccatum, qui tamen damnantur: ergo non potest tale peccatum remissum, esse ratio, & motiuum damnandi, seu reiciendi à gloria per modum damnationis, quia culpa remissa non potest damnatione puniri, nec potest in Deo componi decretum remittendi peccatum cum decreto damnandi, & puniendi illud, nihil enim damnationis est his qui sunt in Christo Iesu, ut dicitur Rom. 8. & in renatis nihil odit Deus, ut dicit Concil. Trident. sess. 5. can. 5. multum autem odiret, si propter peccatum remissum damnaret. Tum etiam quia multi damnantur ut adulti propter peccata actualia, siue illis sit remissum originale, siue remissum non sit: ergo peccatum originale quod solum præcedit in humano genere ante prædestinationem, & reprobationem; non potest esse adæquata causa reprobationis hominum, cum propter alia etiam peccata multi damnentur in executione, & sic vel ratione peccati originalis præuissi sit tota, & integra reprobatio, vel non. Primum stare non potest, cum in re propter peccata actualia damnentur multi tanquam adulti. Si secundum: ergo non est adæquata ratio reprobandi peccatum originale, sed alia actualia. Hæc autem licet radicaliter à peccato originali deriuentur, tamen non operantur ad actum punitionis, & condemnationis propterea sunt in illa radice quasi in potentia: nullus enim punitur actuali exclusionem propter peccata, quæ solum sunt in potentia, & nondum considerantur in actu, pro illo tunc, quando consideratur exclusio illa punitiua. Vel oportebit ponere exclusionem à regno antecedenter ad illa peccata, propter quæ postea in re, & in executione condemnabitur, & tamen quod antecedenter ad illa propter peccatum originale tantum reprobatur, quod est pro illo priori reprobari ut paruulum, & postea in executione damnari ut adultum propter peccata actualia; & sic dimidiatam facere reprobationem. Tum denique non vitur Deus peccato originali ut motiui ad reprobandum reprobatione comparatiua, quia cum æquale sit pro omnibus non præbet de se motiuum inæqualis discretionis, ut scil. vnus præ alio assumatur, & sic reduci debet ista comparatiua reprobatio ad voluntatem Dei, licet ea posita, in his quos relinquit, & reicit, iudicium exercere possit ratione peccati originalis, dummodo nec illud sit remissum, nec propter alia actualia facienda sit reprobatio.

31 Tertia pars conclusionis ponitur ad explicanda quedam loca August. in quibus videtur docere reprobationem hominum factam esse à Deo per modum iudicii ob peccatum originale, & in peccatam eius obdurari, & relinqui à Deo illos, qui non iustifican

iustificantur per gratiam, ex misericordia autem liberari quicumque liberantur. Sed August. intelligendus est de his, quibus peccatum originale non est remissum, aut certe solum vult docere quod in his qui à Deo relinquuntur, & reprobantur, cum alij saluentur, nulla est causa iustæ querelæ, aut iniustitiæ ex parte Dei, cum ad eos damnandos, & reprobandos habeat sufficientem causam, si velit illa uti in peccato originali, qua tamen de facto in aliquibus vitur, quibus tale peccatum non remittitur in aliis, non quibus illud remittit, vel propter alia condemnat. Loquitur etiam in pluribus locis de reprobatione ut punitiva, quæ peccatum originale punit, quando non est remissum.

32 Igitur respectu eorum quibus peccatum originale non remittitur, optime posse Deum uti tali peccato ut motivo ad excludendum eos à regno etiam per modum intentionis, & auertendo cor suum ab illis, patet, quia nulla in hoc apparet repugnantia: potest enim Deus, quando ex tali massa damnabili, & quæ meretur damnationem æternam aliquos misericorditer eligit, alios relinquere etiam attendendo ad talem culpam, & demeritum quod in illis est, quod non vult remittere in perpetuum, & consequenter vult illos reprobare, seu non eligere propter tale peccatum, ita quod etiam ipsa non electio, & ipsum nolle uti misericordia, sit punitio talis culpæ: id enim totum meretur illa culpa, ut Deus nullo modo misereatur illius. Quod si id meretur, quis prohibet Deum tali motivo uti, & sic per modum iudicii, & punitiois denegare misericordiam, & non eligere illos, sicut in executione propter idem peccatum eos damnat, & punit?

33 Quod verò attinet ad sensum August. cum Pelagiani, & Semipelagiani obicerent non posse ex eadem massa in qua æqualiter omnes sunt infecti, quosdam à Deo eligi, alios reici pro sola voluntate sua, sine acceptione personarum, & aliquo genere iniustitiæ, conatus fuit August. hac nota diuinam voluntatem liberare, ostendendo quod si omnes damnationem merentur ex peccato originali, misericordiæ, & gratiæ diuinæ est, quod aliquos eligat, sed si alios relinquat, non habent conqueri, nec iniustitiæ Deum arguere, quia ex duobus debitoribus quod vni remittatur debitum, ab alio exigatur, nulla est iniquitas, neque personarum acceptio. Hoc autem fortius currit, & ad vnguem in his quibus peccatum originale non remittitur, qui hi totaliter relinquuntur in massa perditionis, tam quoad gratiam remissam, quam quoad gloriam, & idè in his vrgentius currebat argumentum hæreticorum. Nam illi quibus originale peccatum remittitur, iam eripiuntur misericorditer à massa damnabili, & illis fit gratia, & remittitur debitum, sed ipsi sponte sua iterum labuntur in perditionem per peccatum actuale, & ob illud in executione damnantur. Et idè in illis non poterant Pelagiani ita vrgere quod esset acceptio personarum apud Deum, relinquendo istos, & eligendo alios: erat enim plana responsio, quod etiam isti non sunt relict, cum eis misericorditer Deus peccatum indulgeret. Si verò ipsi iterum voluerunt se perdere, quid mirum quod damnentur? Et ita non videtur quod argumentum hæreticorum loquebatur de illis: sed solum posset aliud argumentum formari, quomodo ex duobus iustis, seu ex duobus quibus peccatum est remissum, vnus relinquitur, alter assumitur, vni datur gratia ut perseueret, alij non; sicut poterat fieri argumentum in Angelis, quod totum August. reducit ad inscrutabile Dei iudicium, ut in mille locis patet, non autem reducit ad peccatum

originale. Quando ergo docet ratione peccati originalis vnum reici, cum alter misericorditer eligatur, loquitur de his quibus tale peccatum non est remissum, de quibus argumentum hæreticorum poterat vrgere.

Loquendo ergo de his quibus originale peccatum non est remissum, plerumque docet August. eis denegari gratiam, aut in massa perditionis relinquere ex debito iudicio Dei, & ex merito culpæ suæ, scil. originalis, propter quam possent omnes damnari, ut in *epist. 105. & 106. & in Enchiridio c. 98. & 99 lib. de predestinatione SS. c. 14. & de bono pers. c. 6. & alibi sæpe*. Quæ tamen loca sine vlla inflexione, sed in plano sensu intelligi possunt de reprobatione, ut executiva, & punitiva, ita quod vnus effectus, scil. denegatio gratiæ ad credendum, vel damnatio vltima habeat pro causa, & motivo peccatum originale in his, quibus remissum non est, & in hoc nullum apparet inconueniens, & August. sufficienter hoc modo satisfaciebat hæreticis volentibus esse in Deo acceptionem personarum, si vnum eligit, alterum relinquit pro sua voluntate: respondetur enim quod in executione non punit, neque reprobat damnatiue pro sua voluntate, sed pro nostra culpa. Cæterum loquendo de tota collectione effectuum reprobationis, & de ipsa reprobatione non in executione, sed in intentione, non apparet quod August. ponat pro eius causa, & motivo peccatum originale, loquendo generaliter, & absolute. Eodem modo intelligendus est S. Th. quando dicit 2.2. q. 2. art. 5. ad 1. quod *Auxilium gratiæ ad credendum, quibuscumque datur misericorditer datur, quibus autem non datur ex iustitia non datur in pœnam antecedentis peccati, & saltem peccati originalis, ut docet August. lib. de corrept. & gratia*; loquitur enim D. Thom. sicut, & Aug. de his, quibus peccatum originale remissum non est, & de denegatione gratiæ in executione, & per modum punitiois facta in pœnam alterius peccati. Et similiter ibidem q. 10. art. 1. inquit quod *Infidelitas purè negatiua non est peccatum, sed pœna, quia talis ignorantia diuinorum ex peccato primi parentis consecuta est*. Vbi loquitur de ipsa mera carentia fidei, quæ tunc solum datur, quando alicui non est sufficienter proposita fides: si enim sufficienter sit proposita, & non credat, est infidelitas priuatiua, & peccatum. Cui autem non est proposita fides, supponitur quod nec fuerit baptizatus, nec originale ei fuerit remissum, & tunc bene potest in pœnam talis peccati non remitti, & fides negari, & gratia, & gloria; & sic reprobari. Quod si paruulus baptizetur, sed nutriatur inter infideles, vel in syluis, & non credat infidelitate merè negatiua ex defectu instruendi; tunc illa infidelitas seu ignorantia, in reatione ignorantia est effectus peccati originalis, sicut quælibet alia ignorantia, quæ est vulnus ex peccato relictum. Negatio autem auxilij ad habendam fidem, & exuendam istam ignorantiam non est in pœnam peccati originalis in isto baptizato, sed ex occulto iudicio Dei. Quando autem in 3. contra Gentil. c. 159. dicit D. Thom. *relinqui hominem à Deo propter impedimentum quod præstat gratia*, non est sensus quod reprobatio Dei habeat pro causa, & motivo tale impedimentum, sed quod in executione denegatur à Deo gratia propter impedimentum saltem concomitans, sicut propter vnum effectum reprobationis aut prædestinationis fit alter.

Solum superest difficilior locus Aug. pui versans illum locum Apostoli *Iacob dilexi, Esau autem odio habui*, dicit, *Deum non odio habere Esau hominem, sed Esau peccatorum*. Addit autem: *Cur ergo Iacob*

cob dilexit? nunquid peccator non erat? Sed dilexit in eo non culpam quam debebat, sed gratiam quam donabat. Ita habet lib. 1. ad Simpl. q. 2. In Enchiridio autem c. 98. ostendens de quo peccato Esau loqueretur, cum dixit, Esau odio habuit, planè de peccato eius originali loqui docet, cum inquit: *Ambo itaque gemini naturâ filij iræ nascebantur, nullis quidem operibus propriis, sed originaliter ex Adam vinculo damnationis obstricti. Sed qui dixit, miserebor cui miserus ero, Iacob dilexit per misericordiam gratuitam, Esau odio habuit per iudicium debitum.* Fit ergo argumentum. Quando August. dicit quod odio habuit non Esau hominem, sed Esau peccatorem, vel loquitur de Esau peccatore peccatis actualibus, & ut adultus, vel peccato originali. Primum est contra ipsum Apostolum qui dicit. *Cum nihil boni aut mali fecissent, non ex operibus, sed ex vocante dictum est Iacob dilexi, Esau autem odio habui;* ubi non solum ex operibus iam factis, sed neque ex futuris, & præiis Esau esse reprobatum, & odio habitum August. docet. Si secundum, ut ipse significat August. loco cit. ergo iam propter peccatum originale etiam remissum aliquis reprobat, quia Esau circumcissus est, sicut Iacob à patre suo Isaac, & ei remissum est originale peccatum; & iterum cum Esau sit reprobatus ut adultus, & non ut paruulus; ergo in sententia August. etiam pro adultis peccatum originale est causa reprobationis adæquata, nō reprobationis ut punitio est in executione: sic enim etiam pro actualibus puniuntur: ergo reprobationis ut est denegatio beneficii indebiti.

Respon. quod in primo loco August. loquitur de Esau peccatore, non determinatè pro peccato actuali, vel originali, sed indefinitè. Et potest intelligi quod odit Deus Esau peccatorem, non quia præsuppositivè esset peccator ante primam intentionem reprobandi, seu non eligendi, vel si erat peccator ob originalem culpam, quod Deus videretur illa culpa ut motivo, siquidem volebat illam remittere, sed quod odit Esau peccatorem peccato consequenti, siquidem ex tali odio, seu aversione Dei consequendum erat ut permitteretur labi in peccatum, & hoc odit Deus; sicut dici potest quod Angelos peccatores odit, & bonos diligit, non quod præsuppositivè essent peccatores, cum omnes sint creati in gratia, sed quod consequenter peccatores essent. Et sic non ex operibus, etiam futuris, & præiis Deus odio habuit Esau tanquam ex motuivis, & causa odio habendi, sed potius ex aversione, & odio illo negatiivo, seu non electione, & non dilectione, consecuta est permissio peccati quod Deus positivè odio habuit in Esau. In posteriori autem loco, ubi videtur August. loqui de Esau ut peccatore peccato originali æqualiter cum Iacob, dicimus quod licet Aug. pacificet illos quantum ad hoc quod nascerentur obstricti peccato originali, & filij iræ, tamen quando postea dicit quod Esau odio habuit per iudicium debitum quod de se debebatur ambobus, ibi abstraxit ab hoc quod Esau fuerit, vel non fuerit circumcissus, & locutus est de eo, non ratione suæ personæ, sed ut gerit personam eorum qui in massa perditionis fuerunt relictī sine remissione originalis: locutus est enim de Iacob, & Esau in statu quo considerabantur nati ex Adam, & vinculo damnationis obstricti, ut patet in prioribus verbis. Cum autem hic status non duraverit in eorum personis, quia per circumcisionem peccatum originale remissum est, restat ut loquatur de illis, non in suis personis, sed ut gerunt personam eorum quibus hoc peccatum remissum non est, & pro eo statu, quo non est remissum.

Denique ex his innotescit ultimum quod in conclusionem dicimus, scil. propter originale remissum, neminem reprobari. Quod patet. Nam si loquamur de reprobatione ut punitiva in exercitio, impossibile est quod peccatum originale remissum in Baptismo sit causa huius punitiois: sic enim esset causa damnationis, cum ratione illius inferretur tanta damnatio, qualis est æterna punitio; & sic multum damnationis inesset in renatis, cum esset adhuc aliquid dignum puniri damnatione æterna, quod est expresse contra Concilium Trident. sess. 5. & contra Apost. ad Rom. 8. dicentem, *Nihil damnationis est his qui sunt in Christo Iesu.* Ergo peccatum remissum in renatis non est causa reprobationis æternæ ut punitivæ.

Dices, non est causa immediata punitiois, quasi propter ipsum peccatum remissum irrogetur pœna: hoc enim repugnat si iam remissum est, sed est causa mediata, quatenus ob peccatum originale etiam remissum sit, & in pœnam illius Deus privat aliquem gratia congrua, & efficaci, & permittit labi in peccatum propter quod puniatur æternaliter, sicut propter peccatum, etiam remissum, & in pœnam illius irrogatur mors, rebellio, fomēsque appetitus, & alia mala corporis, quæ sunt effectus, & pœna peccati, etiam remissi. Sed contra, quia mors, & alia pœnalitates corporis non irrogantur de nouo propter peccatum remissum: sic enim eadem curreret difficultas, nec remanent in homine iustificato ut pœnæ ipsius personæ, sed ut pœnalitates naturæ. In ipso autem puncto contractionis peccati consequuntur, ut pœnæ, quia cum prius peccatum tunc non solum gratia sanctificante, sed etiam dono iustitiæ originalis, quæ vires corporis continebat omnino subiectas animæ, & iuvabatur corpus esu ligni vitæ ad reparanda intrinseca damna, & protectione Dei ad evitanda extrinseca; ideo etiam si redeat gratia sanctificans remittens peccatum, quia tamen non redit donum iustitiæ originalis, neque illa extrinseca protectio, & alia remedia contra mortem, relinquuntur pœnalitates prius irrogatæ propter peccatum, non de nouo incuruntur. De quo videri potest D. Thom. 1. 2. q. 85. art. 5. ad 2. & art. 3. & q. 5. de malo, art. 4. & 5. Non enim per gratiam tolluntur statim omnes pœnæ peccati, sed tollendæ relinquuntur in alia vita. At verò denegatio gratiæ congruæ est aliqua carentia de nouo irrogata, & non antè incurra; licet enim manente, & stante peccato, iuste omnis gratia denegetur peccatori in pœnam talis peccati, tamen quod peccatum ipsum mereatur, quod etiam post sanctificationem, & post gratiam quæ extinguit peccatum, & reatum, in pœnam eius gratia congrua denegetur, hoc est impossibile, quia remissio peccato omnis ratio demeriti extinguitur, siquidem omnis ratio indignitatis tollitur: homo enim manet simpliciter dignus, & Deo charus perinde ac si peccatum non fuisset: sublata autem indignitate tollitur ratio, & relatio demeriti: ergo implicat quod illa denegatio gratiæ sit in pœnam illius peccati remissi, quia pœna intrinsece dicit relationē ad demeritum, & culpam. Non ergo peccatum semel remissum est causa puniendi, & denegandi gratiam per modum pœnæ, & multo minus reprobandi punitivè: dicere autem quod Deus habet voluntatem reprobandi propter peccatum originale, & tamen de facto remittendi illud, est ponere contradictionem manifestam, quia quando executioni datur illa reprobatio, vel illud peccatum originale habet connexionem, & conducentiam ad illam reprobationem, vel non. Si non habet: ergo non propter illud reprobat, ut punitivè. Si habet: ergo non potest supponi

supponi remissum tunc, quando fit executio, quia peccatum remissum nihil damnationis, & demeriti habere potest, cum sit extinctum.

37 Quod si dicatur, non operari peccatum originale remissum ad reprobationem, ut punientem in executione, sed ipsum peccatum esse causam reprobandi reprobatione negativa, & ordine intentionis quoad denegationem electionis ad gloriam, licet postea in tempore remittatur peccatum, & ita tunc non operatur, nec mouet ad intentionem excludendi peccatum ut remissum: sic enim mouere non potest ad excludendum, sed peccatum secundum se.

Contra est, quia si peccatum originale est motuum excludendi à gloria, & non eligendi: ergo iam talis exclusio, & non electio est punitiua, & per modum iustitiæ vindicantis illata, siquidem est damnum illatum propter culpam, seu peccatum, & ob illius demeritum, & indignitatem: ergo nihil illi deest ut sit punitio: ergo si postea Deus remittit tale peccatum in tempore, quando aduenit in executione illa exclusio, iam non subsistit causa punitiui, propter quam facta est ab æterno; & sic illa causa quæ mouit Deum ut non eligeret, sed excluderet per modum intentionis, non operatur aliquid ad exclusionem in exercitio. Quomodo ergo potest concipi quod Deus velit, & intendat excludere aliquem perpetuò à gloria propter peccatum, & demeritum remittendum, id est propter peccatum quod in ipsa executione exclusionis iam non est, nec operari potest ad talem punitiōem? Inconueniens, autem est quod motuum quo Deus mouetur ad excludendum aliquem æternaliter à gloria, non perseveret, nec conducat ad ipsam executionem punitiōis, sicut è conuerso absurdum esset moueri Deum ad eligendum ad gloriam propter merita, quæ in ipsa executione dandi gloriam extincta sunt, & carent vi. Nos enim qui ponimus Deum in illa simplici denegatione exclusiua à regno moueri ob suæ iustitiæ ostensionem, affirmamus eandem causam manere quando in executione quis damnatur: ibi enim executiue ostenditur Dei iustitia, & fit vindicta de peccato.

38 Ex dictis etiam constat qualiter accipienda sit illa distinctio P. Suarez de reprobatione negativa, & positiua. Nam si negativa reprobatio accipiat pro nuda, & mera negatione nullam importante efficaciam aut influxum in effectus reprobationis, & in permissionem peccati, illa abusuè dicitur reprobatio, quia nondum efficaciter intelliguntur homines illi reiecti ab ea gloria, ad quam alij sunt electi; & sic solum intelligitur voluntas diuina se habere in suspensio, & quasi indeterminatè erga istos: si enim nondum sunt efficaciter reiecti, neque efficaciter sunt discreti ab electis: ergo adhuc considerantur ut capaces ad electionem: possunt enim eligi, quandiu efficaciter, & determinatè non sunt reiecti. Talis ergo negativa reprobatio inefficax, nondum est reprobatio, sed est continuatio status eligibilitatis ad gloriam, licet nondum de facto sint electi. Qui tamen status repugnat post factam electionem bonorum à massa perditionis, quia illa electio tangit omnes quotquot saluandi sunt: semel enim elegit Deus omnes quos eligit: facta ergo electione nulli manent sub dubio, & suspensione ut eligi possint: manent ergo efficaciter exclusi quicumque non ibi electi; & sic illa negatio non potest non esse efficax exclusio. Quod & ipse Suarez videtur agnoscere, dum ex hac negativa exclusionem ponit dimanare aliquam permissionem peccati, seu negationem auxilij congrui, ut docet lib. 5. de reprob. c. 7. num. 13. Sic tamen ponendo negatiuam

reprobationem, idem argumentum tenetur soluere quod nos, videlicet quomodo ante demerita præuisa Deus excludat vnum præ alio: si enim efficaciter excludit, quid interest quod negatiue, aut positiue id explicetur? Igitur negatiuam hanc exclusionem sumendo non purè suspensiuè, sed efficaciter, & determinatè quoddam reiciendo præ alijs, dicimus talem negatiuam reprobationem esse positiuam voluntatem determinatam nolendi istos eligere, seu excludendi illos à gloria, sicut habuit Deus positiuam voluntatem non dandi esse creaturis merè possibilibus. E. hæc voluntas pertinet ad positiuam prouidentiam reprobatiuam, quæ specialis prouidentia est; non per modum punitiōis in executione, quia non supponit tanquam motuum culpam præcedentem, ut patet in Angelis, & in hominibus quibus peccatum originale est remissum, sed per modum auersionis, & negationis beneficii indebiti, seu per modum non apponendi cor ad eligendum istos, in quo etiam respicit Deus finem ostensionis suæ iustitiæ, ut docet S. Thom. *hic art. 6. ad 3.* quæ postea per modum punitiōis exercenda est. Quare positiua, & negativa reprobatio non debent distingui per puram negationem, seu suspensionem ex parte Dei, & per efficacem voluntatem reiciendi, sed penes efficacem voluntatem non eligendi aliquos ad finem, quæ est negativa reprobatio, quia respicit pro obiecto negationem finis, & penes efficacem voluntatem inferendi pœnam & permittendi culpam in executione, & hæc est positiua, quæ habet pro obiecto positionem mediorum, & executionem damnationis.

Soluantur argumenta.

Primò arguitur argumento inducto ab authoritate. Cuius tota vis ad hoc reducitur, quia Patres, & Concilia assignant discrimen inter prædestinationem, & reprobationem, quod illius non datur causa ex parte nostri, neque in se, neque quoad primum eius effectum, sed totum est ex gratia Dei; huius autem assignatur causa ex parte nostri siue secundum se, siue quoad primum eius effectum: nec est credibile non agnouisse Patres reprobationem, nisi tantum executiuam, & punitiuam in re, non autem ut prouidentia est in mente reprobantis, & ut contraponitur electioni ad gloriam, cum illam, & electioni, & prædestinationi contraponat prædestinatio autem ad prouidentiam, pertinet, & electio ad gloriam ad intentionem erga finem. In illa ergo causam assignant ex parte nostri. Maior huius discursus notissima est: nam in primis S. August. ut *suprà* vidimus perpetuò assignat causam reprobationis ex parte eorum qui damnantur, originale peccatum; & ita liberationem prædestinationis tribuit gratiæ, & liberalitati diuinæ, damnationem, & reiectionem iustitiæ, quia supponit causam, & demeritum. Vnde dicit *epist. 105. Querimus causam prædestinationis, & inuenire non possumus, querimus meritum derelictionis, & inuenimus.* Idem docet S. Prosper, ut patet ad obiectiones Vincenianas *obiectione secunda, Quod multi pereunt, pereuntis est de meritum, quod multi saluantur, saluantis est donum, & ad 12. obiectionem: Quia præsciti sunt casuri, non sunt prædestinati, & idem habet ad excerpta Genuenium dub. 8. ad capitula Gallorum c. 3. & c. 8. S. Fulgentius lib. 1. ad Monimum c. 23. Quos præsciuit Deus hanc vitam in peccato terminatos, prædestinavit supplicio interminabili puniendos, ubi loquitur de reprobatione non solum ut executiuam sed in ratione prouidentiae, quam prædestinationem vocat,*

vocat, id est, decretum providentiæ. Quod idem affirmat Auctor Hypognosticon apud S. August. lib. 6. Et D. Thom. idem docet *super epist. ad Rom. lect. 2. in fine*, quod *Præscientia peccatorum est aliquantulum causa reprobationis*. Ex q. 6. de verit. art. 2. ad 9. quod *Peccatum originale est causa reprobationis secundum August.* Et de denegatione auxilij ad credendum, quæ est primus effectus reprobationis dicit dari causam in nobis peccatum originale 2. 2. q. 2. art. 5. ad 1. & de infidelitate negativa quod habet rationem p. nã propter peccatum originale, eadem 2. 2. q. 10. art. 1. ergo sentit primos effectus reprobationis habere causam in nobis, idem autem est reprobationem habere causam, & primum effectum reprobationis habere causam in nobis, quia inde inchoatur tota reprobatio. Denique Concilium Valentinum sub Benedicto III. & Lothario Imperatore in cap. 3. sic ponit differentiam inter prædestinationem bonorum, & impiorum, *quod in electione bonorum misericordia Dei præcedit omne meritum bonum, in damnatione autem malorum, meritum malum præcedit iudicium*. Sentit ergo quod reprobatio in eo in quo contraponitur prædestinationi, supponit causam ex parte nostri; & sic non solum ut in executione punitiva est, sed ut providentia, & ut denegatio beneficii indebiti habet causam.

40 Confir. hoc argumentum ex aliquibus testimoniis Scripturæ, quæ significant Deum nullo modo velle mortem, neque damnationem hominum, sed ex se omnibus proponere vitam æternam, & rursum nullum excludere aut reiicere à gloria nisi propter peccata. *Vult enim omnes homines salvos fieri* 1. ad Timoth. 2. *non vult aliquem perire, sed omnes ad penitentiam reverti*, 2. Petr. 3. *non vult mortem peccatoris, sed ut convertatur, & vivat*. Ezech. 18. Si autem Deus ante prævisa demerita vult efficaciter aliquos non eligere, sed reiicere à regno cælesti, quomodo stat prior voluntas, quod ex se vult illos saluare, si ex se, & ante prævisa demerita vult efficaciter non saluare? Addo quod non effugitur iniquitas, & acceptio personarum si Deus ante omnia prævisa demerita aliquem reiicit à regno, quia ut dicit August. epist. 106. *Si hac massa generis humani ita esset media, ut quemadmodum nihil boni, ita nec mali aliquid mereretur, non frustra videretur iniquitas, ut ex ea fierent vasa in contumeliam*; sed pro illo statu, & instanti, quo Deus intelligitur reprobare, seu non eligere negando gloriam ut beneficium indebitum, nulla videntur demerita, nec aliquid mali: ergo pro tunc facere vasa contumeliæ, seu reiectionis à regno, iniquitas videtur.

Respon. has autoritates, & similes loqui non de reprobatione secundum se, & ex natura sua, sed provt de facto accidit in hominibus. Nam ex se non postulare ista demerita ostensum est in prima conclusione etiam ex mente August. exemplo reprobationis Angelorum, & permissionis peccati Adam in statu innocentie, quæ loca Aug. ibi adduximus. Loquendo autem de reprobatione, ut de facto accidit in nobis, in quibus præsuppositum est peccatum originale de facto ante ordinem reprobationis, respondemus iuxta dicta, triplici modo exponendas esse prædictas autoritates.

Primo, quod loquuntur de reprobatione inadæquatè sumpta pro actu punitivo sub ratione punitivæ, quæ explicatio debet applicari illis autoritatibus, quæ utuntur verbo punitivæ, damnationis, supplicij, ut autoritates ex lib. 6. Hypognosticon, ex S. Fulgentio, & aliquæ ex Prospero; imò, & Concilium Valentinum sic loquitur de damnatione malorum. Et tunc contraponunt hi PP. repro-

bationem ipsi prædestinationi quantum ad hoc quod prædestinatio etiam in exercendo electionem ordine executionis inchoatur à gratia, & dono Dei, non ab aliquo præsupposito ex parte nostra, reprobatio autem in exercendo punitivam, & damnationem aliquid præsupponit ex parte nostra præscitum, & non causatum à Deo, scil. peccatum.

Secundo explicantur istæ autoritates de reprobatione, etiam ut providentia est, & tunc intelliguntur quod reprobatio supponit ex parte nostra causam, & demeritum quoad sufficientiam, scil. peccatum originale propter quod sufficienter posset Deus, si vellet, omnes punire, quoad applicationem autem, non semper reprobatio utitur tali causa, sed in his quibus tale peccatum remissum non est. Unde neque loquuntur istæ autoritates in tanta universalitate, & distributione, quod comprehendant omnes omnino reprobos, sed loquuntur indefinite, & possunt intelligi sub distinctione posita, quod pro omnibus supponit reprobatio nostra causam, & demeritum sufficiens ex parte nostra scil. originale peccatum, de facto tamen non pro omnibus usus est Deus illa, sed pro his quibus remissum non est: quibus enim est remissum iam ipsi misericorditer fuerunt erepti à massa perditionis, sed sua voluntate iterum in illam se devoluerunt. Et hæc solutio applicari potest illis locis quæ non utuntur nomine punitivæ, vel damnationis, nec sub distributiva universalitate loquuntur, sed indefinite.

42 Tertia expositio est, quod quando loquuntur istæ autoritates de demeritis aut præscientia demeritorum propter quæ aliqui reprobantur, loquuntur de demeritis, vel præscientia consequenti, non antecedenti ad ipsam primam denegationem electionis ad gloriam, vel donationis gratiæ, ita quod Deus non respicit demerita ut motiva antecedentia ad auerendum cor suum ab istis quos reprobat, sed potius ex eo quod auerit cor ab eis, consequitur & permissio peccati, & præscientia demeriti iuxta illud Psal. 29. *Avertisti faciem tuam à me, & factus sum conturbatus*, non tamen conturbatio præcessit auersionem cordis, & faciei, imò licet ipsum peccatum originale ut contractum, & ut sufficiens causa reprobationis antecesserit reprobationem, tamen peccatum originale, ut non remittendum, vel derelictum in illo ex auersione illa Dei reprobatiua consecutum est. Non est autem peccatum originale causa punitivæ æternæ solum ut permissum, sed ut non remissum, & sub hac formalitate consequitur, non antecedit reprobationem. Sed in hoc, inquit, parificatur prædestinatio, & reprobatio, quia etiam prædestinatio est ex meritis consequentibus illam electionem, non antecedentibus. Patres autem, & præsertim Concilium Valentinum ponunt differentiam inter prædestinationem, & reprobationem, quod illa nullum supponit meritum, hæc verò supponit: ergo loquuntur de meritis antecedentibus, non subsequentibus. Fateor parificari in hoc, quod merita in vno, & permissio demeritorum in alio consequuntur, non antecedunt; sed maximè differunt in eo, quod in prædestinatione id quod præcedit gloriam, scil. ipsum meritum, est ex gratia Dei, & ad ipsum meritum Dei gratia præexigitur; & sic non solum præscientia meritorum, sed & causatio requiritur ex parte Dei. At verò ad iudicium, & damnationem, id quod præcedit non est ex operatione Dei, sed ex permissione, & solum præscitur à Deo, non causatur. Et sic præcedit aliquid ex parte nostra ad effectum ultimum reprobationis, nihil autem nostrum,

nostrum, sed totum ex Deo est quod præcedit omnes prædestinationis effectus, etiam glorificationem. Et sic Concilium Valentinum cum dixisset quod in electione saluandorum misericordia Dei præcedit meritum bonum, signanter non dixit quod in reiectione, seu non electione periturorum præcedit meritum malum, sed dixit quod in damnatione periturorum meritum malum præcedit iudicium iustum Dei, quasi contraponens effectum reprobationis, qui in punitione, & damnatione exercetur, ipsi electioni bonorum.

43 Vnde est generalis solutio D. Thom. ad similes auctoritates in q. 6. de verit. art. 2. ad 10. soluens auctoritatem Augustin. quod *Voluntas Dei quæ unum reiecit, alterum eligit, non potest esse iniusta, quia venit de occultissimis meritis*, dicit, quod *Si est sustinenda, referendum est id ad effectum reprobationis vel prædestinationis, quod habet aliquam causam meritoriam vel dispositiuam*. Et sic ubicumque inuenitur scriptum quod merita vel præscientia demeritorum præcedit reprobationem, intelligendum est secundum D. Thom. de reprobatione pro effectu requirente causam demeritoriam, qualis est ipsa damnatio, non de reprobatione pro ipsa prima Dei auersione ab eo qui reprobat. Et addit D. Thom. solut. ad 11. quod *Præscientia abusus gratia non fuit causa reprobationis in Iuda, nisi forte ex parte effectus, videlicet quoad effectum damnationis*. Et eodem modo loquitur super c. 9. ad Rom. lect. 2. quod contra nos adducitur in argumento: loquitur enim de causa reprobationis quoad effectum damnationis, quia expressè loquitur de reprobatione ex parte poenæ, & hæc sine dubio habet causam ex parte nostra. Ad illum autem locum qui adducitur *ex eadem q. 6. de verit. art. 2. ad 9.* quod D. Thom. assignat rationem reprobationis in hominibus peccatum originale, dico quod oportet legere totum locum D. Thom. dicit enim sic: *Ratio autem reprobationis est in hominibus peccatum originale, ut dicit August. vel in futuro per hoc ipsum quod est non habere debitum ad hoc quod eis gratia conferatur; rationabiliter autem possum velle denegare aliquid alicui, quod sibi non debetur*. Vbi S. D. loquitur disiunctiue, quod peccatum originale est ratio reprobationis, vel non habere debitum ut sibi gratia conferatur, quia in his quibus peccatum originale non remittitur, potest esse causa reprobationis, in aliis autem sufficit pro causa non esse sibi debitum illud beneficium. Videatur *ibi solut. ad 8.* Quando verò denegationem auxiliij ad credendum, vel infidelitatem negatiuam docet esse poenam originalis peccati, iam *suprà* diximus quod loquitur de his, quibus peccatum originale non est remissum, in quibus ipsum peccatum originale potest esse ratio, & causa reprobationis, seu primi effectus reprobationis.

44 Ad Conf. Respon. voluntatem illam Dei de saluandis omnibus esse voluntatem inefficacem, & antecedentem, & ex primaria intentione Dei, ut inquit Damasc. quia solum habet pro motiuo ipsam Dei bonitatem secundum se, & finem ad quem dirigit creaturam intellectualem ut intellectualis est. Cui non contrariatur voluntas consequens, & efficax, & de secunda intentione Dei, quæ attendit ad alias circumstantias creaturæ, & illis suppositis discernit Deus non admittere aliquos ad gloriam, vel ad gratiam, aut ad eius perseverantiam. Ad hoc autem non est necesse præsupponere culpam, & peccatum præuisum, quia non solum dicuntur de secunda intentione Dei esse ea quæ supponunt culpam ex parte nostri (licet in his ponat exemplum Damasc. quia ibi clariùs elucescit id quod

Deus vult ex secunda intentione) sed etiam ea quæ aliquid supponunt ex parte creaturæ, licet non sit culpa, dummodo non sit ipsa sola bonitas Dei, aut directio ad eam, ut ad finem. Creatura enim rationalis, & habet dirigi ad finem suum, qui est participatio Dei, & bonitatis eius, & hæc est prima intentio de creatura, & secundum hanc considerationem vult Deus omnibus se præbere in finem, quod est velle omnes saluos fieri: & secundò habet considerari in ea defectibilitas, contingentia & ratio indebiti, quia ei non est debita gratia; quod totum conuenit illi secundariò, quia conuenit ei ut est ex nihilo, & deinde etiam conuenit ei culpa, & peccatum de facto. Deus ergo ut eiiciat creaturam, seu non eligat ad gloriam, vel ad gratiam, non est necesse quod consideret in ea peccatum de facto (licet id sit necesse ut puniat) sed sufficit quod respiciat defectibilitatem, contingentiam, & ipsam rationem indebiti, ut dicit D. Thom. loco *suprà* cit. ex q. 6. de verit. art. 2. ad 9. quoniam contingentia, & defectibili creaturæ non est debitum quod nunquā permittatur deficere, sed connaturalius est ut aliqui defectus permittantur, etiam æterni, ubi etiam ostendatur diuina iustitia. Et ideo hæc voluntas, quæ est consequens, & de secunda intentione Dei, etiam ante præuisionem peccati, non contrariatur primæ, quæ est antecedens, & inefficax, & de primaria intentione tantum.

Ad illam verò consequ. ex D. August. Respon. optimè dici quod si massa humani generis ita esset media, quod nec boni aliquid, nec mali mereretur, iniquitas esset eam damnare, intelligitur si ita esset media quod nec antecederet ad illam reprobationem, neque consequenter haberet aliquid mali aut boni, & unico verbo, si talis esset quod non esset capax boni aut mali, iniustum esset damnare illam. In eo autem instanti quo Deus non eligit, seu reprobatur aliquos, licet non sint præuisa demerita, & peccata, est tamen præuisa capacitas, & defectibilitas, & ita licet peccata antecederet non se habeant ut motiua, consequenter tamen subsequuntur ut ratio puniendi, licet non ut motiuum primæ auersionis, & reiectionis Dei, quod in voluntate reiiciendi à prima gratia omnes admittunt, & eadem ratio est de reiectione à gloria in ratione beneficii indebiti, licet non in ratione supplicij, ut mox ampliùs dicetur.

Secundò arguit, quia exclusio à regno cælesti est maximum malum quod homini inferri potest à Deo, ut pater quando in executione ei irrogatur, quia est maxima poena, & supplicium, quo punit Deus peccatorem: ergo non docet diuinam bonitatem, sed maximam redolet crudelitatem velle illam inferre antecederet ad demerita, & culpam præuisam, etiam si id fiat propter ostensionem iustitiæ, aut propter libertatem Dei ostendendam, aut ex aliquo alio motiuo. Conseq. prob. quia velle alicui malum nulla attempta indignitate, & demeritis subiecti, & intendere illud, est contra ipsam rationem boni, quod est communicatiuum, & diffusiuum sui: velle autem malum nulla præsupposita indignitate subiecti, non est communicatio boni. Nec id fieri potest propter ostensionem iustitiæ, tum quia hæc ostensio iustitiæ non est ostensio iustitiæ in communi, sed determinatè, & in particulari, scil. iustitiæ vindicatiuæ, & punitiuæ; velle autem, & intendere punitionem, & vindictam, antequam sit malum quod puniatur, omnino præposterum est, quia iustitia vindicatiua reddit poenam ex debito, debitum autem poenæ est culpa: ergo ante culpam, & ante debitum velle punire, omnino est contra rationem iustitiæ; quod verò propter exercen

exercendam punitionem, velit Deus se obligare ad permittendum malum, ut puniat illud, maioris crudelitatis, & feritatis est, quia sic delectaretur Deus pœnis hominum, & malis, contra illud Sapient. 1. *Nec delectatur in perditione vinorum*: ita enim amaret punitionem, ut propter illam permetteret delicta ut haberet quod puniret, omnino autem crudele est sic delectari, & velle pœnas, quod propter illas irrogandas permittantur peccata. Tum etiam quia dato quod vellet Deus ostendere suam iustitiam, tamen ex hac intentione contra omnem rationem est velle prius ipsum supplicium efficaciter, & postea quærere culpas, aut permittere ut supplicium illud iustificetur. Exclusio autem à regno cælesti est ipsummet supplicium, & summum damnum, quod hominibus inferri potest: ergo si prius vult Deus exclusionem istam, quam prævideat culpas, prius efficaciter vult supplicium, & postea ad executionem eius permittit culpas, quod est signum illam priorem voluntatem non fuisse in se iustam, siquidem ut iustificetur in executione, quæruntur culpæ, quæ ante non erant prævisæ. Tum etiam quia non videtur admodum sincera diuina voluntas erga nos, ex vna parte velle omnes saluare, & hoc ineffaciter, si per ipsos non steterit, & ex alia parte antequam per ipsos stet, nec aliquid mali in eis prævideatur velle illos damnare, seu excludere à gloria, & hoc efficaciter: imò hoc esset hominem creare, & efficaciter producere, ut puniat, seu ut periret, quia ex illa voluntate efficaci puniendi ad hoc mouetur, quod communiter negat S. Prosper *respons. ad 3. objectionem Vincentianam*, & *respon. 11. & Damasc. lib. 2. de fide c. 29.* ubi inquit, *non supplicij causa Deus nos fingit*, & alij SS. PP. communiter, & ipsa Scriptura docet Sapient. 1. *Creauit ut essent omnia.*

47 Confirm. primò, quia illa voluntas efficax excludendi ante præuisa demerita nunquam est mandanda executioni illo titulo denegandi beneficium indebitum, sed alio titulo, scilicet per modum punitionis, & damnationis: hoc enim modo, & non alio exequitur Deus exclusionem illam in reprobis: ergo frustra imponitur à nobis ille titulus denegandi gloriam ob rationem indebiti beneficii. Pater consequi quia quod non est exequendum in re, non est efficaciter volitum: ergo si illo titulo non est excludendus in re aliquis, sed titulo damnationis, frustra propter illum dicitur aliquis efficaciter excludi in illa prima intentione.

Confir. secundò, quia si Deus ante præuisa peccata vult aliquem excludere à regno cælesti, & hoc postea exercendum est per modum punitionis, & vindictæ: ergo tenetur Deus ex vi talis voluntatis obligare se ad permittendum peccatum, quia solum peccatum est quod punitur tali exclusionem, imò non solum permissionem tenetur velle, sed ipsummet peccatum, quod est implicatorium. Pater, quia illud tenetur velle quod conducit ad punitionem, & prout ad illam conducit; non conducit autem permissio, sed peccatum ipsum, quia permissio non est punibilis, sed culpa permissa, & illud conducit ad punitionem quod est punibile: ergo ipsam culpam tenetur Deus velle, & non solum permissionem.

Respon. ad principale argumentum, quod omnia ista inconuenientia debent non minus solui in alia sententia, quam in nostra. Etenim si Deus non reiecit aliquos ab electione gloriæ, nisi prius præuiso peccato, inquiri de ipso peccato quomodo permittitur, & prævidetur à Deo: non propter aliud peccatum, quia idem de illo inquiram; & sic in infinitum, quousque deueniatur ad aliquam permis-

sionem peccati, quam Deus ex sola sua voluntate, & non ex alio motiuo, vel demerito nostro habet. Nam si modò in nobis peccata permittit propter peccatum originale, de ipso peccato originali inquiram, quomodo in Adam permittit illud, cum ante non præcesserit in eo peccatum, & in Angelis permittit primum peccatum, cum ante nullum in eis esset peccatum. Et tamen peccatum, per quod tollitur gratia est maximum malum, & maius quauis pœna, præsertim peccatum irremissibile, quale fuit in Angelis, & permissio cadendi est subtractio gratiæ, quæ est maximum bonum. Quomodo ergo Deus tantum bonum tollit, tantum malum permittit, nullo antecedente demerito nostro, quia illud primum demeritum est ante quod non fuit aliud? Si ergo ibi nihil est crudelitatis, nihil contra diuinam bonitatem, nihil iniustitiæ, similiter neque in illa prima exclusionem, seu non electionem ad gloriam: parificantur enim exclusio à gloria, & permissio peccati irremissibilis. Intelligamus ergo pertinere ad Deum, ut ad summum rerum omnium gubernatorem, & factorem multa dare, & multos defectus permittere nullis aliis præsuppositis, quia primi defectus alios priores non supponunt. Eligant ergo quod velint; vel primi defectus, quos Deus permittit, pertinent ad negationem gratiæ, sicut quibusdam Angelis fuit denegata gratia irremissibiliter ante omne aliud peccatum, & primo parenti pro vniuerso genere humano fuit denegata conseruatio gratiæ; vel pertinent ad exclusionem à gloria ante omnem aliam culpam prius præuisam. Si hoc secundum, est nostra sententia. Si primum idem inconueniens tementur soluere, tum quia exclusio à gratia, & permissio peccati non est minus malum quam exclusio à gloria; tum quia non poterat Angelus excludi irremissibiliter à gratia, nisi supponendo quod esset non electus ad gloriam efficaciter: si enim esset efficaciter electus, non posset irremissibiliter cadere à gratia. Præcedere ergo debuit exclusio, seu negatio efficax electionis ad gloriam, permissionem decidendi à gratia; & sic fuit ante omne demeritum præcedens, & præuisum ut causam. Imò in omnium sententia etiam si Deus reprobet aliquem post præuisa peccata, numquid tamen in manu eius non erat sic res disponere, ut illa peccata impedirentur, & non præuiderentur. Quare ergo non fecit? An crudelis fuit? Ergo in omni sententia querela ista diluenda est, nec cessare potest, nisi considerando quod ad Deum ut supremum Dominum pertinet de omnibus disponere, & vnicuique dare locum suum, nec omnes æquè admittere ad eandem gratiam, & beneficium, ut suis iustitiæ locus detur.

48 Quare ad argumentum negamus consequi. Ad prob. dicimus quod velle alicui malum directè, & ut malum illius est primò, & per se, non decet bonitatem diuinam, velle autem illud ex conducentia alterius finis pertinentis etiam ad bonitatem Dei, cum quo non potest compati illud bonum particulare, non est contra bonitatem diuinam vniuersaliter consideratam. Sed si bonitas diuina multa particulari bona non vellet omittere, non posset gubernari mūdus, nec vniuersalitas bonitatis eius representari, sicut non possent res generari de nouo, si aliæ non corrumperentur, nec sustentari aliæ, nisi aliæ desinerent: sic similiter bonum iustitiæ non posset splendescere si omnes creaturæ intellectuales sine villo defectu persisterent, nec earum contingentia, & libertas ita apparet, si nunquam permittenterentur deficere, neque gratia Dei, & magnitudo beneficiorum eius aestimari, cum indebita sit, si omnibus daretur. Quare ut hæc bona conser-

uentur, quæ etiam maxima bona sunt; pertinet ad prouidentiam diuinam non eligere omnes homines ad gloriam, vel ad gratiam, sed aliquos suæ naturæ relinquere, ut in illis talia possint exerceri.

Et ad replicas, quæ sunt contra hoc.

Ad primam dicitur, quod in primis non mouetur Deus ex solo isto motiuo ostensionis iustitiæ ad excludendum aliquos à regno, sed etiam ex motiuo ostendendi suam libertatem, & supremum dominium, & gratuitum beneficium, quia nulli debet illam gloriam, & dat cui vult, & negat cui vult, quia Dominus est, sicut tam infinitis creaturis possibilibus denegauit productionem, & esse, & his paucis voluit dare in hoc vniuerso, solum quia voluit. Et in hac solutione non currit argumentum, quia prius ex aliis motiuis Deus permittit illos defectus, seu denagat sua beneficia, & postea ex motiuo iustitiæ vult peccata ex tali permissione secuta punire illa exclusione ut executi, utiturque illamet in re ut supplicio. Denique addimus quod etiam vult ostensionem suæ iustitiæ tanquam motiuum, ut docet S. Thom. hic art. 5. & in particulari vult ostensionem iustitiæ vindicatiuæ, seu retributiua pro malis. Cum verò dicitur, quod, Deum velle ostensionem suæ iustitiæ antequam sint mala, omnino præposterum est, & iniustum, distinguo; antequam sint mala purè antecedenter, & ut motiua istius voluntatis, nego; antequam sint mala, etiam consequenter, & ut permittenda pro executione iustitiæ, concedo. Quando enim Deus intendit ostensionem suæ iustitiæ, non accipit pro motiuo ipsa mala, seu peccata iam existentia, & permittit, siquidem ut permittantur, aliquem finem priorem supponunt, propter quem permittuntur, & inter illos fines etiam est ostensio iustitiæ, & ita non præcedunt mala ut motiua huius intentionis. Cæterum non vult Deus hanc iustitiam exercere, nisi circa mala, quia hæc sunt propria materia huius iustitiæ, & ita oportet quod mala consequenter se habeant ad illam voluntatem, quatenus ex ipsa nascitur voluntas permittendi mala, & hoc sufficit ut dicatur Deus non velle suam iustitiam antequam sint mala, id est, non velle, nec intendere quod iustitia illa exerceatur, nisi suppositis malis, non tamen motiuum quod habet ad ostendendum & ponendum in re suam iustitiam, est ipsum malum, seu peccatum. Vnde aliud est motiuum manifestandi, & ostendendi iustitiam, aliud motiuum exercendi. Exercetur enim ratione debiti recompensandi, & hoc debitum in vindicatione, seu punitione oritur ex culpa. Intenditur autem eius ostensio, non ratione huius debiti, sed propter suam præstantiam, & virtutem, qua congruit pulchritudini Vniuersi; & sic propter debitum vniuersi eius ostensio intenditur, non propter debitum mali recompensandum.

Cum verò instatur, quod si Deus propter hanc ostensionem punitiua iustitiæ se obligat ad permittendum mala, delectatur in pœnis hominū, siquidem propter illas inferendas permittit mala. Resp. quod Deus non delectatur in pœnis hominum quatenus pœnæ ipsorum sunt, sed delectatur in ipso ordine, & virtute iustitiæ, quæ est coercitiua, & recompensatiua malorum, ut optimè docet S. Thom. 2. 2. q. 25. art. 6. ad 3. *Iustus enim Dominus, & iustitias dilexit*, & 1. 2. q. 79. art. 4. ad 1. & ista virtus est omnino necessaria ipsi Vniuerso, nisi Deus velit suo speciali beneficio naturam sic continere, ut in nullum defectum labatur. Vnde habet Deus hoc

Ioan. à S. Thoma in 1. part. D. Thoma.

iudicium. Ordo iustitiæ necessarius, & perfectissimus est pro defectibus reparandis, & ad debitum ordinem reducendis, nisi mea misericordia aut nullum velim malum permittere, aut omnia remittere. Hoc secundum non est consentaneum naturali rerum cursui, & pulchritudini Vniuersi; & sic eligo primum, scilicet quod ordo iustitiæ ponatur in rerum natura; & sic aliqui defectus permittantur, quod est conformius naturæ contingenti creaturæ liberæ; & sic non omnes misericordia absumantur, sed aliqui referuntur iustitiæ. Vnde oportet aliquos non eligere ad statum gloriæ in quo non exercetur iustitia punitiua, sed relinquere illos mutabilitati suæ naturæ. In hoc iudicio non proceditur ex delectatione de pœnis hominum, sed ex amore ordinis iustitiæ, & dispositioni Vniuersi conformi, & consentaneo rerum humanarum, & creaturarum intellectualium cursui, quem stabilire maximè pertinet ad supremum gubernatorem. Et propter hunc ordinem seruandum non propter illationem pœnarum permittit mala, & non vult speciali beneficio omnia mala detinere, quia id omnino extraordinarium foret, & extra communem cursum rerum defectibilem.

Delectari ergo de pœnis hominum quatenus sunt afflictivæ, & propter hoc velle mala permittere, ut homines crucientur, feritas, & crudelitas est. Delectari autem de ordine, & pulchritudine iustitiæ, & propter hanc permittere mala in natura defectibili, & quæ iuxta cursum suæ defectibilitatis, & contingentiae exigit quandoque talem permissionem, carere verò omni malo est omnino indebitum, & extraordinaria gratia, hoc omnino pertinet ad summam æquitatem supremi gubernatoris sic disponentis omnium naturas iuxta suum connaturalem cursum, & excludentis aliquos à gratia omnino indebita, ut ordo iustitiæ seruetur. Si autem Deus propter seruandam iustitiam vellet mala aliqua permittere contra cursum ordinarium naturæ mutabilis vel contingentis, posset argumentum habere apparentiam: sed velle relinquere naturam cursui ordinario, & nolle omnibus gratiam ita extraordinariam facere, quod nullus defectus punibilis permittatur, sed ordo iustitiæ suum locum habeat in vniuerso, hoc nullius est crudelitatis, sed summæ prouidentiae. Nec tamen hoc pertinet ad creatam prouidentiam, quia Princeps humanus non gubernat omnem collectionem entium, & rerum vniuersitatem, ut vnicuique suum locum assignet; & sic non pertinet ad ipsum intendere bonum iustitiæ, nisi supposito malo, quod per iustitiam vindicandum est, non verò intendere ordinem Vniuersi, ut ex hoc permittantur mala, quia sic congruit naturæ contingenti, quia ad ipsum non spectat naturas disponere, sed supponere; & sic non committitur ipsi permittere mala secundum quod exigit contingentia, & mutabilitas creaturæ liberæ, sed solum si fiant mala, punire per iustitiam, licet non omnia punire debeat, & ob hoc dicitur aliqua permittere non puniendo. Ad iustitiam verò Dei pertinet aliqua mala permittere iuxta dispositionem naturæ mutabilis, & contingentis; & sic potest ex altiori fine disponi huiusmodi permissio, & non solum supponi. Videantur quæ *disputationes prædedemi* diximus de poenitentia, & humilitate propter quam potest à Deo permitti peccatum.

Ad secundam Replicam dicitur Deum non velle prius supplicium aut damnationem, quam præuideat culpas. Illa autem prima exclusio à

M m regno

410 Quæst. XXIII. De Reprobatione,

regno non est supplicium, sed solum denegatio beneficij, quod si concederetur, nullum locum haberet iustitia punitiva, nec defectus punibiles darentur. Si enim omnes eligerentur ad gloriam, vel omnibus concederetur gratia cum perseverantia, omnes saluarentur; & sic nullus defectus æternaliter puniendus relinqueretur. Quare oportet non omnes eligi efficaciter, sed aliquos excludi ab illa electione, vel à gratia (quod etiam maximum malum est) ut maneat personæ aliquæ habiles ad ostensionem iustitiæ. Itaque, ut optime Caiet. aduertit in *calce commentarij huius artic. 5. in hac quæst. 23.* Reprobatio dicitur duos actus, scilicet punire quoad ultimum effectum, & denegare misericordiam quoad primum. Et ratione istius primi actus reprobatio etiam pertinet ad gratuita: denegat enim rem indebitam. Materia autem utriusque actus eadem est, scilicet gloria æterna, aut ultima perseverantia vel data, vel negata: si enim Deus non denegaret misericordiam, quæ est electio gratuita ad gloriam, non posset habere locum punitio, & iustitia. Et sic denegatio electionis quoad aliquos est necessaria conditio ut possit exerceri iustitia. Deus ergo in illa prima exclusionem non respicit illam ut malum, & damnum est creaturæ, sed præcisè respicit constituere creaturam in statu, & capacitate sui cursus ordinarij, non dando illi tale beneficium quod excludit ab illa omnem miseriam, & defectum, & ad hoc est necesse ut non eligat illam ad gloriam. Quare illa exclusio non est directè executio denegationis gloriæ: hæc enim solum fit propter peccata, sed est denegatio electionis ad gloriam, seu non obligatio Dei, aut non oppositio cordis ad dandam gloriam, quæ non electio, & non obligatio Dei est conditio requisita, ut istud subiectum sit capax cadendi in defectus punibiles, & recompensabiles per iustitiam, quia si esset electus ad gloriam, non esset in statu habendi istos defectus æternos. Denegatio ergo illius beneficij non eligendi ad gloriam, & relinquendi homines in statu habendi defectus, & punibilitatem, non est supplicium, sed solum conditio requisita ut maneat in ordine, & cursu descendi, eadem autem denegatio ut damnificativa, & privativa affectionis gloriæ in executione, infertur à Deo ex iustitia, & per modum punitionis; & sic supponit peccatum, sicut intentio dandi gloriam ex meritis in executione, pro intentione habenda non habet pro motivo meriti, pro executione verò supponit illa, & ex illis datur à Deo secundum formam iustitiæ, ita multo magis intentio denegandi illud beneficium indebitum quod constitueret hominem exemptum à peccato æterno, & punibilitate, non supponit demerita, nec datur per modum supplicij, sed est voluta à Deo ut quid necessariò requisitum ut homo relinquatur in statu punibili; executio autem eius in creatura est ex demeritis, & secundum iustitiam punitivam, supponitque peccatum. Et hoc idè quia in vnum coincidunt id cuius affectio est finis ultimus, & cuius denegatio requiritur essentialiter ut homo sit in statu defectibili, & punibili.

53 Ad tertiam replicam dicitur voluntatem divinam saluandi omnes non contrariari voluntati reprobandi, seu non eligendi aliquos etiam ante præuisa demerita, ut motiva, nec sinceritatem divinam obnubilare, magis autem ostendere in-

finiæ illius viscera pietatis, & altissimam incomprehensibilemque providentiam, quia attendendo ipsam hominum, intellectualiumque creaturarum naturam, & perfectionem, quæ respicit pro fine ultimo Dei visionem, omnes ad hunc finem ordinavit, & eis illum voluit, considerando id quod naturæ intellectualis est, & quod bonitatis divinæ, & ordinationis eorum ad suum finem. At verò considerando alias circumstantias, scilicet eorum mutabilitatem, defectibilitatem, contingentiam, & quod indebitum est, quod gratia sua consummata ab omni malo eripiens, omnibus passim detur, nec id cursus ordinarius creaturarum exigit, locum dedit iustitiæ, nec tantam gratiam voluit omnibus facere, sed aliquos ab ea excludere, quia naturæ, & cursui rerum debitum non est; sicut Rex, aut Iudex omnibus sibi subiectis vult benefacere in quantum sui sunt, sed in quantum deficientes, peccatores, aut ingrati vult eos punire, nec istæ duæ voluntates insincere sunt. Quod ergo in Rege creato respicit illas duas rationes hominis, & peccatoris, in Deo supremo conditore respicit non solum hominem peccatorem de facto, sed peccabilem, & defectibilem, ut non velit omnibus dare talem gratiam, quæ defectum, & peccatum punibile impediatur, quia sufficit non esse debitum beneficium ut negetur.

54 Nec propterea verificatur quod Deus creat hominem ut puniat, vel ut pereat, sed hominem in quantum hominem creat ut fruatur se, & ad vitam æternam tendat ut ad finem, nec enim finis creandi hominem est supplicium, vel exclusio à vita æterna, sed finis ad quem omnes ordinantur ex se est beatitudo. Cæterum hunc finem ad quem omnes Deus ordinavit, & propter quem omnes finxit, non voluit ut omnes de facto assequerentur: considerando enim hominem, ut defectibilem, mutabilem, & contingentiam subiectum, non voluit vniuersaliter beneficio illo donare, quo ab omnibus miseriis, & defectibus tandem eximeretur, quæ est gloria, sed eam aliquibus denegare, ut iuxta ordinarium cursum etiam locum daret iustitiæ. Vnde ut rectè dicit S. Prosper *Resp. 11. ad obiectiones Vincent. Deus non prædestinavit homines ad peccata, neque ad malignitates, & casus ruentium, neque ad hoc illos excitavit aut impulit, sed prædestinavit iudicium suum quo unicuique retribuitur ut prout gessit.* Ut autem prædestinaret seu decerneret hoc iudicium, non negat S. Prosper, sed supponit denegasse Deum prius beneficium gloriæ illis hominibus, & exinde permisisse mala, seu peccata, non ad illa impulsisse. Quomodo autem etiam in his reprobis verificetur petitio illa orationis Dominicæ, *Fiat voluntas tua,* cum ipsi pro voluntate Dei efficaci non possint petere, quia sic peterent suam reprobationem, pro voluntate autem antecedenti frustra peterent, quia hæc nunquam implenda est, nec per orationes eorum. Respondeo, in communi petere omnes ut fiant voluntas Dei, id est, id quod ad maiorem eius gloriam iuxta divinæ suæ sapientiæ dispositionem pertinet; in singulari autem petere ut fiat voluntas Dei ad sanctificationem, & glorificationem nostram, quia hæc est voluntas Dei sanctificationis nostra, & quia nescimus an nobis per orationes nostras danda sit, semper id petendum est; nec enim oratio nostra regulatur penes id quod in re efficaciter evenit quod nescimus, sed per id, ad quod Deus iubet nos tendere, & quod præcipit facere.

Ad

ARTICVLVS III.

Qui sint effectus Reprobationis.

DE tribus generibus rerum potest esse difficultas, an pertineant ad effectus reprobationis, scilicet de malis poenae, tam quae irrogantur in alia vita, ubi est certa damnatio, quam quae irrogantur in hac vita, & ad illam damnationem conducunt, ut mors reprobi in statu peccati, amissio usus rationis, negatio sufficientis auxilij, aut occasionum conducentium ad conuersionem, & similia. Aliud genus est malorum culpae, in quo genere ponuntur omnia quae pertinent ad permissionem Dei, qua labitur quis in peccatum. Tertium genus est bonorum temporalium siue pertineant ad ipsam substantiam praedestinati, siue ad aliqua eius accidentia, siue intrinseca, siue extrinseca; quia in omnibus his potest aliquid accidere, quod pertineat, saltem materialiter, vel ad culpam reprobi, vel ad poenam. Vnde formaliter loquendo quidquid pertinet ad effectum reprobationis, vel est permissio culpae, vel illatio poenae, & damnationis: ad haec enim duo capita omnes istos effectus reduxit S. Thomas in presenti art. 3.

Supponit haec difficultas quid nomine effectus reprobationis intelligamus, vel quid requiratur, ut aliquid sit effectus reprobationis. Hoc enim tanquam regula debet accipi, qua utamur ad dignoscendum quidnam sit reprobationis effectus. Licet autem iuxta diuersas sententias de reprobatione, in quo consistat, sit etiam diuersitas sentiendi circa effectus reprobationis, quoniam sint, ut art. 1. retulimus, tamen in hoc puncto omnes conuenire debent, & hoc tanquam fixa regula in hac parte haberi debet, quod à simili diximus supra disput. 9. artic. 1. explicantes condiciones requisitas ut aliquid sit effectus praedestinationis, videlicet quod ut aliquid sit effectus reprobationis, debet effectiue esse à Deo ex voluntate excludente hominem à gloria; Secundò, debet pertinere ad creaturam rationalem. Tertiò, debet conducere ad talem finem, seu ad exclusionem à tali fine, ita quod coordinetur, aut continuetur, vel dicat ordinem cum ultimo medio pariente ipsam executionem finis assecuti, sicut omnes effectus praedestinationis, & media ad ipsam conducentia debent coordinari, & continuari cum vltima perseverantia. Et sic illas quatuor condiciones, quas ibi proposuimus pro effectu praedestinationis, hic reducimus ad istas tres pro effectu reprobationis, in quibus omnes illae includuntur: nam ex parte efficientis requiritur quod effectus reprobationis sit à Deo, & sit à voluntate excludente à fine ultimo non eligente ad illum: quae enim non procedunt à voluntate reprobante, effectus reprobationis non sunt; & sic peccata quae à nulla Dei voluntate sunt, non possunt esse effectus reprobationis: in se enim peccata solum sunt defectus; & idè à summo efficiente esse non possunt, sed solum permitti, quae permissio est denegatio gratiae, qua impederetur peccatum, & hac à Deo esse potest. Ex parte verò subiecti requiritur quod pertineat ad creaturam rationalem, eo quod sola illa est capax exclusionis à beatitudine, sicut est capax trans-

M m 2

Ad primam Confirm. Respond. quod in re non alio titulo exequenda est exclusio à gloria, nisi per viam damnationis: illa autem exclusio in intentione non est titulus denegandi gloriam, sed est appositio conditionis ex parte finis, quae si non poneretur, nunquam posset postea in re executioni punitio mandari: si enim semel esset electus ad gloriam, non posset postea puniri reiectione à gloria executiue, sicut si non supponatur finis intentus & volitus, non potest executiue esse assecutus, sic si non supponatur relictus & non volitus, non potest executiue esse negatus. Et in illa prima intentione efficaciter debet esse exclusio via intentionis, quia in re illa exclusio exequenda est, sed titulo punitiois, qui pertinet ad executionem. In prima autem intentione finis, vel reiectione illius non attenditur titulus intendendi, quia ad intendendum non datur titulus, sed bonitas finis mouet, & pro illo reiicitur, aut eligitur persona; ad exequendum autem datur titulus ex parte personae, cui res datur, sicut in meritis ad gloriam dicimus. Et sic in prima electione ad finem, vel reiectione Deus procedit ex mera sua voluntate, & ex motiuo bonitatis, & ostensionis iustitiae, ut postea in executione titulus meritorum consequatur, vel demeritorum permittatur. Et sic illa prima intentio est efficax in suo ordine, id est, per viam intentionis, & finis, nec ut in illo ordine sit efficax, requiritur quod ibi praecedat titulus, & modus, quo in re ponendum est, sed sufficit quod ex illo originetur modus, & media, quibus postea in re exequendum est; & sic est efficax originatiue in intentione, completiue, & realiter autem postea in executione.

Ad secundam Conf. Resp. quod sicut diximus disp. praec. agentes de poenitentia, an sit effectus praedestinationis, licet ad exercendam iustitiam requiratur peccatum ut materia debiti puniendi, sicut ad poenitentiam requiritur ut materia destruenda peccatum, tamen Deus intendens iustitiam, & poenitentiam non tenetur velle peccatum, sed solum permittere, quia peccatum non est ponibile in re per volitionem Dei, sed per permissionem, & suspensionem concursus: seu denegationem gratiae. Vnde solum tenetur velle permissionem, seu non dare gratiam. Praesertim, quia in his quae habent pro materia vel conditione requisita aliquod malum, nunquam intenduntur absolute, sed cum aliqua connotatione, seu conditione, v. g. volo iustitiam pro malis vindicandis, non absolute volo iustitiam. Vnde quia est volita non absolute sed pro his malis; qui vult iustitiam non tenetur velle omnia, quae ad illam conducunt, sed sufficit non apponere impedimenta malorum, id est, gratiam, & expectare quod ab aliis fiant, quia non est de genere eorum quae absolute sunt volita, & ut sibi bona, sed pro his scilicet malis, si fuerint. Non tamen tenetur aliquis velle iustitiam praesupponendo quod mala iam existant, & antecedant, sed sufficit quod consequenter exitura praeuideantur ex permissione Dei, & defectu creaturae à quo deriuantur. Vide quae cit. loco diximus de poenitentia, eadem enim ratio hic currit.

Ioan. à S. Thoma in 1. part. D. Thoma.

transmissionis ad illam. Ex parte verò finis quòd ad talem exclusionem conducatur, quia si ad illam non conducit, nec etiam effectus erit illius voluntatis, quæ talem finem intendit & procurat.

3 Hinc nascitur varietas sententiarum, ut retulimus *articulo primo*. Qui enim sentiunt reprobationem positivam solum esse voluntatem excludentem à regno punitivè, & per modum damnationis, sentiunt etiam pro effectu reprobationis solum posse assignari pœnam ipsam damnationis æternæ: reliqua enim quæ ad permissiones peccatorum pertinent supponuntur, non efficiuntur à iustitia punitiva. Quæ verò ad pœnalitates huius vitæ pertinent, non sunt pœnæ reproborum propriæ, quia non sunt æternæ, & ita sunt communes reprobis & prædestinatis. Qui verò sentiunt reprobationem non esse solum voluntatem punitivam, sed etiam providentiam circa creaturas deficientes ab ultimo fine, assignant pro effectu non solum pœnam damnativam, sed etiam permissionem incurrendi in culpam tanquam quid ortum ex illa voluntate excludente, seu non eligente ad gloriam, & conducens ad hoc ut executioni mandetur illa exclusio per modum pœnæ. Et istæ sunt extremæ sententiæ in hac parte. Pro hac secunda sententia retulimus *art. 1.* D. Thomam, pluresque Thomistas. Pro prima multos alios retulimus *ibi dem*, tam ex antiquis, quam ex modernis, & in ratione reprobationis positivæ & efficacis ut exclusivæ à beatitudine in eandem etiam conveniunt Vasquez, Suarez, & alij quos *ibi* retulimus.

4 Inter has sententias extremas duæ quasi mediæ se offerunt. Altera quæ sentit quòd etsi permissio peccati, seu negatio auxilij, congrui in reprobo non sit effectus reprobationis positivæ, est tamen effectus negativæ, seu illius primæ reiectionis, aut non electionis reproborum ad gloriam, quæ est sententia P. Suarez *libro 5. de Reprobatione cap. 7. num. 13.* Vasquez autem etsi non ponat reprobationem negativam, quæ sit causa huius permissionis, nec aliquam efficacem exclusionem à gloria ante præmissum peccatum in quo reprobis vitam finit; & sic non facit aliquam permissionem peccati effectum reprobationis efficacis, sed præsuppositum, tamen quandam simplicem voluntatem in Deo ponit communem reprobis, & prædestinatis, ex qua dimanant permissiones peccatorum in reprobis, scilicet ex voluntate puniendi peccatum primi parentis, in Angelis autem id derivatur ex mera voluntate Dei. Respectu autem aliquorum parvulorum, quibus Deus denegavit omne remedium salutis, etiam ex simplici affectu excludendi illos à gloria, dicit emanasse permissionem contrahendi peccatum originale irremissibiliter, & propterea sic est effectus illius exclusionis inefficacis à gloria, propterea ex ipso Vasquez *hic disput. 95. retulimus art. 1.*

5 Altera sententia etiam mediæ, quæ aliquo modo agnoscit permissionem peccati esse effectum reprobationis, tradita est à P. Alarcon *tract. 4. disp. 5. c. 5.* quæ ferè est explicatio sententiæ Vasquez: & pro illa ex parte alios Authores adducit, Ruiz, Erize, &c. distinguit de reprobatione efficaci à gloria, & de reprobatione inefficaci. De reprobatione efficaci à gloria, dicit in calce capitis non habere regulariter alium effectum quam ipsam privationem gloriæ à parte rei, id est, ipsam pœnam damni, quæ propter omnia peccata morte consummata infertur. De reprobatione inefficaci docet & supponit quòd pro

quolibet peccato mortali, siue originali, siue actuali est in Deo voluntas excludendi illum à gloria, & afficiendi morte æterna, quia tale peccatum ea pœna est dignum. Sed vocatur hæc voluntas antecedens, & simplex, quia est communis omnibus, tam reprobis quam prædestinatis, nec in omnibus habet executionem efficacem, licet de se omni peccato mortali sit debita. Ex hac voluntate simplici docet oriri in primis negationem gratiæ habitualis in quolibet parvulo cum concipitur in pœnam peccati Adæ, quo meretur exclusionem à gloria: ipsa enim negatio gratiæ physicè & secundum se considerata sine respectu morali ad voluntatem, pœna est. Docet deinde eandem privationem gratiæ esse effectum reprobationis, & oriri ex illa voluntate simplici exclusivæ à gloria in parvulis, qui moriuntur sine Baptismo, & in pœnam peccati proprii, & peccati Adæ inferri à Deo, imò in adultis qui decedunt in peccato originali, etiam negatio auxiliorum quibus possent à peccato resurgere & iustificari est effectus reprobationis ab eadem simplici voluntate descendens, & in pœnam peccati illata; eo quod tam ista negatio auxiliorum, quam illa negatio gratiæ habitualis est utilis ad illum finem excludendi à gloria, quia sine gratia & sine auxiliis non consequetur salutem; de se autem tales negationes non dicunt ordinem ad peccatum. Cæterum si homini adultæ sit remissum peccatum, & sit iustificatus, & iterum permittatur labi in peccatum, illa permissio, seu negatio auxilij, quæ peccatum vitaret, dicit quòd non est effectus illius simplicis reprobationis, neque in pœnam peccati proprii, vel Adami, & quòd illa permissio in homine iam iustificato, & aliàs non habente peccatum dignum morte, non potest esse utilis ad finem reprobationis, nisi per ordinem ad novum peccatum quo mediante fiat dignus illa exclusionem à gloria: ergo non potest Deus amare illam permissionem ex ordine ad talem finem, nisi amet ipsum peccatum per quod sit utilis ad talem exclusionem, & non aliàs, hoc autem est impossibile: ergo, &c.

6 De morte temporali reprobi, & aliis ad eum pertinentibus, ut privatione usus rationis, malo ingenio, aut temperamento, & similibus, an sit idem auctor, esse reprobationis illius simplicis, seu negativæ effectum, quia hæc omnia vitia sunt ad illum finem, & non conducunt medio peccato, sed ex se, P. Suarez *lib. 5. de Reprob. cap. 7. num. 11.* censet mortem non esse effectum reprobationis positivæ regulariter loquendo, sed potius Deum positivè reprobare, punire damnatione æterna post præmissam mortem ex aliqua naturali causa accidentem; aliquando tamen aliquas extraordinarias mortes, ut in Dathan, & Abiron, & similibus, esse effectus reprobationis, & contingere ex voluntate efficaci excludendi à gloria. Idemque sentire videtur Villegas *Contra. 16. disp. 2. c. 2.*

Resolutio ex mente D. Thomæ. Pœna & aliæ res naturales quæ sunt effectus reprobationis?

7 Dico primò, Æterna damnatio tam quoad pœnam damni, quam sensus, insuper, & mors reprobi in statu peccati, sunt effectus reprobationis. De 1. parte conclusionis apud nullos authores est dubiū, cum nullus certior effectus reprobationis sit etiam pro

pro ea parte qua reprobatio dicitur actum punitivum, quam aeterna damnatio, quia hæc est p[ar]t[is] passivæ in ipso reprobo inflictæ à Deo & est perpetua exclusio à gloria: ergo procedit à Deo actiue puniente punitione perpetuæ exclusivæ, hæc autem est reprobatio: ergo illa p[ar]t[is] sic inflictæ est effectus manifestissimus reprobationis, etiamsi reprobatio sumatur in strictissima & inadæquata acceptione pro sola voluntate puniendi, & non solum pro providentia circa eos qui deficiunt à fine ultimo: iam enim *supra* sæpè diximus actum punitivum in reprobatione non esse totam & adæquatam rationem reprobationis, sed includere alios actus qui pertinent ad dispositionem & providentiam circa reprobos. Et sic D. Thom. in art. 3. huius q. ponit pro effectu reprobationis, inflictionem p[ar]t[is] damnationis pro culpa.

8 De secunda parte conclusionis, non est ita constans, ut vidimus, sententia inter Authores. Suppono autem extraditis à D. Thom. 1. 2. q. 85. art. 5. & 6. & 2. 2. q. 164. art. 1. & in q. 5. de malo art. 4. & 5. & aliis in locis, mortem esse p[ar]t[is] peccati originalis, quia etsi mors naturalis sit homini ex parte corporis, seu materiæ, quatenus corpus illud constat ex contrariis, & est corpus alterabile, & generabile, & consequenter corruptibile, & anima licet si spiritualis, tamen modo corruptibili informat corpus iuxta exigentiam talis materiæ; quia debet reddere illud sensibile, & non potest sensibile esse, nisi ab obiectis sit alterabile, ceterum attento dono originalis iustitiæ, & auxiliis ei correspondentibus divinæ protectionis, esu ligni vitæ, quo reparabantur defectus corruptionis humidi radicalis; homo in statu illo innocentiae, mortem non gustasset. Vnde sicut in p[ar]t[is] peccati originalis subtractum est donum originale iustitiæ, & omnia illud concernentia, ita mors, & alij defectus corporis, qui à tali dono detinebantur, subtracto illo, naturaliter redierunt in p[ar]t[is] peccati. Quare mors secundum se, aliæque p[ar]t[is]nalitates, quæ in hac vita reprobis accidunt, non sunt effectus reprobationis, sed communes sunt reprobis & prædestinatis, & ex generali providentia oriuntur in p[ar]t[is] peccati originalis, propt[er] omnibus communis est, & iuxta principia naturæ corruptibilis. Non est ergo difficultas de morte secundum se, & quoad substantiam, quod non sit immediate, & elicitive effectus reprobationis. Sed loquitur de morte hominis pro tali statu, id est, propt[er] in peccato mortali, & ut conditio requisita ad finalem impenitentiam, & consequenter ad æternam damnationem, & propt[er] sic conducens; & sic dicimus imperativè esse à reprobatione, sicut mortem prædestinati diximus esse à prædestinatione imperativè. Et dico esse à reprobatione, & ut providentia specialis est circa reprobos, & ut exercet actum puniendi, seu ad illum disponit executionem punitionis. Nec solum est effectus reprobationis mors reprobi, ut facta per causas extraordinarias, & supra naturæ exigentiam, sed generaliter ut conducit ad executionem damnationis, & supplicij reprobi, quia non ponitur à nobis effectus reprobationis mors, ut supra naturam, vel extraordinario modo accidens, sed ut conducens ad supplicium æternum, & hoc est generale omni morti reprobi.

9 Sic ergo probatur hæc pars conclusionis, quia in primis id significat Scriptura pluribus locis, Job 20. *Detrahetur in die furoris Dei, hæc est pars hominis impij à Deo, & hereditas verborum eius à domino.* Vbi ly in die furoris, significat Ioan. à S. Thoma in 1. part. D. Thomæ,

diem condemnationis, & reprobationis divinæ. Super quem locum D. Thom. lect. 2. in illud c. *Detrahetur, scilicet (inquit) de hac vita, in die furoris Domini, id est in die vindictæ.* Ergo deductio ab ista vita, quod utique per mortem fit, est pars hominis impij à Deo, quod est esse effectum reprobationis eius, quia tanquam hæreditas impietatis, & pars eius datur ei à Deo. Item Psalm. 35. *Vultus Domini super facientes malum perdat de terra memoriam ipsorum.* Vbi iterum D. Thom. super istum Psalm. dicit, *loqui de providentia divina erga malos, quæ utique reprobatio est.* Vultus inquit Domini super malos Proverb. 15. *Infernus, & perditio coram eo: Et dicit vultus, quia designat cum quadam ira respicere in seipsos malos.* Sed ad quid super eos respicit? Certe ut perdat de terra memoriam eorum, quod dupliciter potest intelligi, vel quia potest referri ad terram præsentem, vel potest referri ad terram viventium. Sed perdere de terra præsentem, est per mortem: ergo ipsa subtractio de terra, & ipsa mors, effectus est divinæ indignationis, & reprobationis in malis. Denique idem significatur Matth. 24. de servo nequam. *Veniet Dominus servi illius in die qua non sperat, & hora quam ignorat, & dividet eum, partemque eius ponet cum hypocritis.* Vbi divisio rectè intelligitur separatio animæ à corpore, quæ ponitur effectus aduentus Domini ad iudicandum, & condemnandum servum pravam; sicut etiam Lucæ 12. dicitur de alio diuite reprobo, *Stulte hac nocte repetam animam tuam à te;* quasi animæ separatio in reprobo fiat ex eo quod reperitur in iudicio divino, & talis iudicii effectus est. Hoc autem iudicium est reprobatio.

Ratio autem huius est, quia mors non solum 16 consideranda est ut quædam naturalis corruptio in quo convenit cum morte omnium animalium, & pertinet ad generalem totius Univerſi gubernationem, & providentiam, sed etiam se habet ut terminus viæ, qua meremur, vel demeremur beatitudinem, & sine qua nec gratia habet ultimam perseverantiam, neque peccatum ultimam obdurationem, & impenitentiam, neque executioni potest mandari iudicium divinum siue circa bonos, siue circa malos: ergo sub ista consideratione ad illam providentiam spectabit mors ad quam spectat disponere, & providere de via tendente, vel auertente se à beatitudine; hoc autem pertinet ad specialem providentiam, vel prædestinationis pro via iustorum, vel reprobationis pro via peccatorum: ergo ad eandem specialem providentiam pertinebit disponere, & gubernare mortem, ut terminum huius viæ. Denique ad eandem providentiam, & potestatem ad quam pertinet ferre sententiam de aliquo reo, & condemnare, pertinet executionem supplicij imperare, & dirigere; sicut ex potestate qua Iudex reum mortis condemnat, ex eadem ordinat quod educatur de carcere, & ducatur ad locum supplicij; sed reprobos per mortem educitur de carcere corporis, & huius viæ, duciturque ad locum supplicij: ergo mors reprobi, ut habet rationem talis educationis, est ordinata per providentiam reprobationis, & condemnationis. Vnde hæc est vera causalis, idèo iste homo moritur in peccato, quia non est electus ad gloriam: si enim electus esset, non sic moreretur in peccato. Rursum hic effectus mortis in peccato habet infallibilem connexionem cum damnatione æterna, & ad illam conducit, sicut ad finalem impenitentiam:

M m 3 ergo

ergo in quantum sic connexa mors cum damnatione alicuius, prouidentiae effectus est, quæ talem connexionem facit, nec alia esse potest quam reprobatio, quia ad hanc solam pertinet damnatio æterna, & ex consequenti, quidquid connexionem infallibilem habet cum illa. Et licet Deus mortem non fecerit, ut dicitur Sap. 1. quia videlicet ab initio, quando creauit hominem, dedit illi donum originalis iustitiæ contra mortem, tamen posito peccato ordinata est à Deo mors, & alij defectus secundum iustitiam Dei punientis, ut docet S. Thom. 1. 2. *quæst.* 85. *art.* 5. ergo etiam in reprobo potest ordinari ex speciali punitione Dei prout habet connexionem cum damnatione æterna.

11 De aliis defectibus aut pœnalitatibus corporalibus reprobatorum, ut malo temperamento, duro ingenio, & indisciplinabili, pronitate ad concupiscendum, vel vindicandum, & similibus, quæ valde iuuant ad peccandum, & perseverandum in peccatis, dico, quod isti defectus possunt considerari dupliciter, primo secundum se, & quoad substantiam; & sic non sunt effectus reprobationis, quia communes sunt reprobis, & prædestinatis, unde in aliquibus per gratiam vincuntur, & mores valde agrestes, & feri mansuescunt. Secundò, possunt considerari ut de facto conducentes, & coadiuuantes ad lapsum, & continuationem peccatorum, & ut impediētes operationem diuinorum auxiliorum, ne conuertatur quis ad Deum, nec ita facile disponatur; & sic possunt considerari, vel quatenus hoc habent ex abusu, & malitia ipsius peccantis, quia sua praua dispositione male vitur. Et hoc modo non sunt effectus reprobationis, quia non ex intentione Dei ad hoc dantur, sed per accidens ex abusu, & malitia aliorum in id cedunt. Vel possunt considerari ut pars quædam, vel conditio permissionis diuinæ denegantis gratiam, quatenus plerumque mensuram gratiæ, & auxilij accommodat iuxta naturalis capacitatis modum, nec vult dare gratiam extraordinariam, quæ talem vincat modum. Et sub hoc respectu pertinebunt tales effectus ad reprobationem, sicut permissiones peccatorum, quatenus cum illis connectuntur, & disponunt, vel conducunt ad denegandam gratiam illam extraordinariam, & possunt ex illo fine descendere, ex quo ipsa permissio. Unde probatio huius, & explicatio dependet ex dicendis circa permissiones peccatorum an sint effectus reprobationis: nomine enim permissionis etiam intelligendum venit quidquid connectitur, vel disponit ad talem permissionem. Nam ad ipsam condemnationem non conducunt nisi mediante conducentia ad peccatum.

Denique circa substantiam reprobi, aliæque naturalia ad ipsum spectantia (ut hoc etiam statim expedit) videri posset esse effectum reprobationis, vel quatenus nunc cedunt in abusum & deceptionem peccatorum, vel quatenus in futuro cedent in pœnam damnatorum omnia ista, & primo modo pertinere possunt & conducere ad permissionem culpæ; secundo modo ad punitionem pœnæ.

12 Cæterum hæc ratio nimis generalis videtur, ut propter hoc dicamus hæc omnia esse effectus reprobationis, etiam mediātē, & imperatiuē, cum Deus neminem creet, aut idē res vniuersi producat, ut aliqui pereant, & damnentur, ut ex Prospero *respons. ad 3. objectionem Vincentianam*, Damasceno, & aliis *supra* diximus. Quare res naturales nō subiiciuntur damnationi ut fini, sicut subiiciuntur

tur gloriæ filiorum Dei, cuius reuelationem omnia creatura expectat, ut ait Apostolus ad Rom. 8. Et idēd possunt res naturales sub hoc respectu esse effectus prædestinationis mediātē, & imperatiuē, quatenus ordinantur ad illam gloriam, ut ad finem à quo perficiuntur. Cæterum ad oppositum, scilicet ad exclusionem à gloria, quod pertinet ad reprobationem, non ordinantur creaturæ tanquam ad finem à quo perficiuntur; & sic non habemus fundamentum, & dicamus creati propter finem reprobationis. Sunt tamen aliquæ creaturæ, quæ specialiter præparatæ sunt à Deo in tormentum, & cruciatum reprobatorum, sicut ignis Inferni, qui paratus est Diabolo, & Angelis eius, & cum igne præparata sunt alia multa quæ ad tormentum confluent, & congerentur in illo loco supplicij, sicut dicitur Isai. 30. *Præparata est ab heri Topheth, à rege præparata, profunda, & dilatata. Nutrimenta eius ignis, & ligna multa: Spiritus Domini tanquam torrens sulphuris succendens eam.* Et Plal. 20. *Pluet super peccatores laqueos ignis, & sulphur, & spiritus procellarum pars calicis eorum.* Hæc enim quia sunt instrumenta cruciatu reprobatorum, & specialiter à Deo ad hunc finem præparata, pro hac parte effectus sunt reprobationis. Imò ut D. Thom. in 4. *dist.* 50. *quæst.* 2. *art.* 3. adducit ex D. Basilio, *quidquid faculentum, & ignobile est, in infernum proicitur ad pœnam damnatorum.* Alia autem quæ solum per accidens, & occasionaliter cedent in pœnam damnatorum, aut in præsentem sunt eis in musculam, & deceptionem, non possunt dici effectus reprobationis specialiter, & propriē, etiam mediātē, & imperatiuē, quia non ex intentione Dei ad hoc fiunt, aut tali fini subiiciuntur, sed ex eorum praua indispositione, & abusu, aut in peccando in præsentem, aut accipiendo pœnam ex diuina ordinatione in futuro: sic enim corpora sua, & ea quæ viderunt, aut possederunt in hoc mundo, & fuerunt occasio peccandi, & quidquid eis delectabile est, in hac vita, erit pœnale in futura, iuxta illud Iacob. 20. *Panis eius in utero eius vertetur in fel aspidum intrinsecus; diuinitas quam deuorauit, euomet, & de utero illius extrahet illas Deus.* Sed hoc modo etiam Sol, & Luna, & sidera, & herbæ, & metalla possent dici effectus reprobationis, quia ex omnibus sumere possunt in hoc mundo occasionem peccandi, & in futuro erunt eis pœnalia, quia omnes creaturæ erunt damnatis materia tristitiæ, sicut beatis materia gaudij, ut dicit S. Thom. in 4. *dist.* 50. *quæst.* 2. *art.* 3. *quæstiunc.* 1. Unde dicitur Sapient. 5. quod *Deus armabit creaturam ad ultionem inimicorum, & quod pugnabit orbis terra contra insensatos*, imò & ipsa gloria beatorum est eis valde pœnalis, & ipsa humanitas Christi, & Deus ipse: Quæ omnia non possunt dici effectus reprobationis, quia ad hoc non sufficit quod per accidens, & occasionaliter ad pœnam deferuiant, vel ad culpam, sed requiritur quod per se ex intentione Dei propter finem reprobationis ordinentur, & ad illum conducant, vel mensurent aliquem effectum eius.

Permissiones peccatorum, & denegatio gratiæ efficaci sunt effectus reprobationis.

Dico secundò, Permissio cadendi in peccatum (quæ est denegatio efficaci auxilij) obduratio, & derelictio in illo, verè, & propriē est effectus reprobationis

probationis, si sit permissio aut obduratio peccati, non remittendi, ita quod cum finali impenitentia continetur, vel ad illam ordinem dicat; permissio autem peccati remittendi non est effectus reprobationis quando plenè est remissum. Est autem effectus reprobationis, non quantum ad actum punitivum, sed ut est providentia Dei circa reprobos. In hac conclusione non omnes conveniunt, etiam ex eis qui tenent permissionem peccati, & non solum pœnam damnationis esse effectum reprobationis, quia aliqui nimis ample omnem permissionem peccati, siue sit primum, siue ultimum, siue remissum, siue non remittendum, sentiunt esse effectum reprobationis, quod aliquibus ex antiquis tribuitur, ut Gregorio, Marfilio, Driedoni, & ex Recentioribus tenet Granados *tract. 8. de Reprob. disp. unica, sect. 4.* loquens in specie de peccato originali remisso, sicut fuit remissum Esau in circumcisione, & tamen propter ipsum sentit August. fuisse odio habitum, & reprobatum à Deo. Aliqui autem ita moderantur hanc sententiam, quod solum primi peccati permissionem putant non esse effectum reprobationis, eo quod non supponit aliud peccatum prius in cuius vindictam, & pœnam permittatur aliud, reliqua verò peccata post primum iam inveniunt aliquid in cuius pœnam permittantur; reprobatio autem cum sit pars iustitiæ vindictivæ non habet effectus, nisi per modum pœnæ & vindicationis. Et hoc videtur procedere non solum de primo peccato simpliciter in toto initio vitæ, sed de quocumque primo peccato post iustificationem, & plenè remissum peccatum. Quæ sententia attribuitur Zumel 1. p. q. 23. art. 3. disp. 6. & de ea videri potest Arrubal. *disp. 89. c. 2. & 3.* alique quos ipse citat, & refert Villegas *hic contron. 16. disp. 2. c. 1.*

14 Nostra conclusio (quæ videri potest apud M. Gonzalez *hic disp. 77. sect. 2.*) sumitur ex D. Thom. qui in hac q. 23. art. 3. inquit, quod *Reprobatio includit voluntatem permittendi aliquem cadere in culpam, & inferendi damnationis pœnam pro culpa.* Quæ verba sumo in sentu copulativo, ita ut utrumque concurret ad hoc ut permissio peccati sit effectus reprobationis, scil. quod permittat aliquem cadere in culpam, & habeat voluntatem inferendi damnationis pœnam pro culpa, id est pro illa culpa, quam permittit ex vi reprobationis: ergo permissio culpæ pro qua non vult Deus inferre damnationis pœnam non includitur in voluntate reprobationis; & sic non est effectus illius. Apertius hoc sumitur ex ipso D. S. 1. 2. q. 79. art. 4. ubi inquit, quod *Excacatio* (quæ est idem ac permissio peccati) *sui natura ordinatur ad damnationem eius qui excacatur, propter quod ponitur etiam reprobationis effectus: sed ex divina misericordia excacatio ad tempus ordinatur medicinaliter ad salutem eorum qui excacantur, sed hac misericordia non omnibus impenditur, sed prædestinatis solum.* Ergo manifestè S. Thom. ponit excacationem esse effectum reprobationis, quando iuxta suam naturam ordinatur ad damnationem eius qui excacatur: sed non ordinatur ad damnationem æternam peccatum quod remittitur: si enim est remissum totaliter, tollitur reatus æternæ pœnæ. Unde dicit S. Thom. in 4. dist. 22. q. 1. art. 4. quod *Peccata dimissa non adducuntur in iudicium, nec Deus ea adduceret si quis inconfessus moreretur post recidivum, sed damnaretur solum pro peccato, quo recidivavit.* Ergo secundum D. Thom. peccatum dimissum non pertinet ad damnationem: ergo non ordinatur à Deo ad illam: ergo non est effectus reprobationis, iuxta id quod dicit in loco 1. 2. cit. Imò, & de peccatis per pœnitentiam

deletis, sentit M. sentent. in 4. disp. 43. rationabile esse quod in electis non manifestabuntur in die iudicii. Quod certè ad confitendum peccata multum animare debet.

Fundamentum conclusionis quantum ad primam partem, scil. quod permissio peccati, ut irremissibilis, sit effectus reprobationis, illud est, quia talis permissio peccati nunquam remittendi antecedere debet voluntatem damnandi damnatione perpetua, siquidem non inferitur damnatio nisi propter peccatum irremittendum: antecedenter ergo ad actum punitivum, & illativum damnationis datur permissio peccati non remittendi. Talis autem peccati permissio, quatenus tale est, est effectus alicuius providentiæ divinæ: nec enim illa permissio à Deo fortuitò, & temerarie fit, sed ex prudenti & debita dispositione, & non potest esse effectus providentiæ generalis, neque prædestinationis: ergo reprobationis, seu alicuius providentiæ specialis contrapositiæ ipsi prædestinationi, & quæ versatur circa deficientes à fine ultimo, & hoc vocamus reprobationem. Totus discursus est legitimus. Et minor illa, quod non sit effectus generalis providentiæ, nec prædestinationis, patet, quia effectus generalis providentiæ sunt communes reprobis, & prædestinatis, permissio autem peccati ut non remittendi non potest inveniri nisi in reprobis secundum præsentem statum rerum: licet enim si Deus statuisset creare aut relinquere hominem in puris naturalibus, & neque ei dare gloriam, neque damnare propter peccatum tali excusatione, tunc peccatum non remissum non esset effectus reprobationis, eo quod non daretur tunc reprobatio; tamen rebus ut nunc, cum homines ordinantur ad gloriam, impossibile est quod permissio peccati non remittendi non habeat specialem oppositionem cum assecutione gloriæ, seu cum prædestinatione, & connexionem inevitabilem cum pœna damni: ergo provt talem connexionem habens, impossibile est quod non sit ordinata à speciali providentia reprobatiua, atque adeò effectus illius. Similiter non potest esse effectus prædestinationis, neque directè, quia non est talis permissio cadens in ipsos prædestinatos, aut ad eos pertineans, cum ipsi in quantum tales, non sint capaces talis peccati irremissibilis, neque indirectè, quasi aliquid cedens in gloriam beatorum, licet pertineat propriè ad defectum, & miseriam reproborum, quia hoc quod est cedere in bonum beatorum non tollit quin directè pertineat ad aliam providentiam ad quam pertinent ipsi reprobi: nam etiam ipsa damnatio, & inflictiō vindictivæ reproborum cedit in electorum gloriam, & lætitiā: *Latabitur enim iustus cum viderit vindictam, manus suas lavabit in sanguine peccatoris,* & tamen hoc non obstante talis damnatio est effectus reprobationis: ergo etiam non obstante quod permissio peccati non remittendi cedat in gloriam beatorum, pertinebit nihilominus directè ad aliam providentiam, & non ad communem, & generalem pro reprobis, & prædestinatis: ergo ad propriam reproborum. Imò, & res omnes naturales cedent in gloriam beatorum, quia omnis creatura expectat revelationem filiorum Dei, ut dicitur Roman. 8. & tamen non propter hoc est dicendum quod solum sint effectus prædestinationis, & non providentiæ naturalis, cum non pertineant ad prædestinationem nisi imperativè; & sic supponitur ad aliam providentiam pertinere, quæ imperetur ab illa. Similiter ergo si permissio peccati non remittendi pro reprobis pertinet ad providentiam prædestinationis indirectè, quatenus cedit in bonum, & in gloriam prædestinatorum: ergo non pertinet

416 Quæst. XXIII. De Reprobatione.

elicitivè ad prædestinationem, quia non est aliquid supernaturale pertinens ad prædestinatos, neque medium quo ducantur ad gloriam, sed pertinebit imperativè, sicut aliæ res non supernaturales pertinentes ad alios, quæ solum imperativè sunt à prædestinatione, quatenus cedunt in bonum, & gloriam prædestinatorum. Si autem solum imperativè est effectus prædestinationis illa permissio: ergo supponit pertinere elicitivè, seu proximè, & immediate ad aliam providentiam, cui prædestinatio imperet, & non ad providentiam generalem, ut ostensum est: ergo ad reprobationem.

16 Secunda pars conclusionis, quod solum permissio peccati non remittendi, seu quod continuatur, aut dicit ordinem ad peccatum finale non remittendum sit effectus reprobationis, probatur, quia peccatum semel remissum nunquam punitur pena damnationis aternæ, eo quod per gratiam sanctificantem euacuatur omnis reatus pœnæ aternæ: ergo tale peccatum ut remissum, non coordinatur fini reprobationis, quæ est exclusio perpetua à regno Dei: id autem quod non coordinatur, neque continuatur fini, & effectui ultimo alicuius providentiæ, non est effectus eius, quia hoc ipso quod non coordinatur illi, non se habet ut conducens ad illum: si enim conduceret, ordinem ad illum diceret, eique coordinaretur, quod autem non est conducens, neque ordinatum ad illum finem, non est effectus eius, neque à voluntate intendente talem finem, derivatur, quia ut sit effectus illius voluntatis, debet ab illa derivari, & ad finem eius conducere.

17 Dices: Potest conducere peccatum remissum ad finem reprobationis, eique coordinari; primò, quia peccatum illud licet remissum, potest in memoriam reuocatum iterum inclinare ad aliud peccatum; & sic conducere ad permissionem novi lapsus: deinde quia ille qui reciduat in peccatum, trahit ex præcedenti peccato remisso circumstantiam ingratitudinis aggravantem; & sic influit in aliquid damnationis, saltem ut circumstantia, & modus illius. Tertio, quia etiam peccatum ut remissum, est materia maioris doloris, & pœnæ accidentalis in infirmo, sicut etiam vocationes inefficaces, & gratia interrupta in prædestinato sunt effectus prædestinationis, ut *suprà* diximus, quia deseruiunt pro materia gaudij accidentalis in cælo: ergo similiter si peccata interrupta, & remissa per gratiam deseruiunt pro materia doloris, & pœnæ accidentalis in Inferno, cur non erunt effectus reprobationis?

18 Respon. ad primam instantiam, quod ibi non operatur peccatum remissum formaliter in ratione culpæ, sed materia peccati præteriti ut alliciens, & tentans de nouo ad aliud peccatum. Et talis tentatio iam non spectat ad peccatum præcedens remissum, seu ad id quod remissum est de peccato, scil. ad culpam, quod est formale in peccato: hoc enim non influit aliquo modo in finem damnationis, nec est id quod tentat, & allicit, sed materia illa circa quam peccatum fuit quatenus de nouo proponitur, & reuocata in memoriam tentat; permissio autem diuina respectu illius peccati quando commissum est, non fuit respectu materiæ peccati, sed respectu eius quod formale est in peccato, scil. auersionis: ergo hæc permissio non influit iam, neque conducit ad effectum reprobationis, quia id quod tentat de nouo non est memoria illius permissionis, nec memoria illius auersionis, sed materia illa delectabilis aut utilis, quæ pulsatur iterum cor. In quo differt à vocationibus inefficacibus in prædestinato, quia ista etiam proxi à Deo descendunt

sunt beneficia, quæ reuocata in memoriam operantur in prædestinato ad bonum. Quod si aliquis ita perversæ malitiæ sit, quod ex ipsa permissione peccati remissi, & ex ipsa auersione secuta moueatur ad offendendum Deum de nouo, & non ex materia ipsa peccati in qua deliquit; adhuc non obstat, quia hoc non est ex ipsa permissione diuina per se, neque ex intentione qua à Deo processit, sed ex abusu, & malitia ipsius peccantis, quæ multò deterior est, & ad hunc abusum, & malitiam noua, & distincta permissio Dei requiritur. Illa autem prior permissio respectu peccati remissi non descendit à Deo ea intentione ut reuocata in memoriam prouocaret ad nouum lapsum multo deteriore, scil. ad peccandum ex memoria, & delectatione de ipsa auersione formali, ut auersio est, sed id ex abusu, & malitia peccantis ortum est; & sic per accidens se habet ad primam permissionem. Ut autem aliqua permissio, vocatio, vel quodlibet beneficium Dei sit effectus prædestinationis, aut reprobationis ex eo quod operatur ut reuocatum in memoriam, requiritur quod ea intentione, & voluntate à Deo descendat, ut reuocatum in memoriam sic operetur.

Ad secundam instantiam dicitur quod illa circumstantia ingratitudinis in recidivante non fundatur in ipsa permissione peccati remissi, sed potius in ipsa remissione facta à Deo, quia ingratitudo fundatur in mala correspondentia beneficiati ad beneficium sibi collatum: beneficium autem collatum huic reprobo fuit remissio peccati in quod incidit, non permissio prima, qua incidit. Et sic si ingratitudo est ratio pertinendi ad finem reprobationis, illud peccatum, non permissio eius, sed remissio deberet esse effectus huius reprobationis, quatenus super tale beneficium iste recidivauit offensam. Sed hac ratione omnia beneficia Dei essent effectus reprobationis, quia respectu omnium crescit ingratitudo, quod nimis generale est, nec speciali modo constituit effectum reprobationis, quia non ex intentione damnandi aut reprobandi illa beneficia descendunt. Aut si descendunt, non pertinet ad præsens, ubi agimus non de remissione peccati, quæ fuit beneficium, sed de permissione quæ fuit subtractio beneficii, an sit effectus reprobationis.

Ad tertiam instantiam dicitur quod peccatum remissum est materia doloris, & pœnæ in damnatis, non ut materia punitionis ratione culpæ, quia hæc euacuata est, sed ratione beneficii accepti in remissione ipsa, quo ita male usus est ipse reprobus. Sed hoc generale est omni beneficio diuino, nec nos in præsentia agimus de ipso beneficio remissionis an sit effectus reprobationis, sed de ipsa permissione peccati, quod postea remissum est, an ista permissio operetur ad damnationem facta remissione. Et dicimus non operari, sicut nec ipsam culpam in ratione culpæ, & ad hanc solum conduxit permissio. Quod verò beneficium remissionis postea sit materia doloris, hoc non pertinet ad præsens, sed ad generalem rationem omnium beneficiorum Dei, quæ sunt ipsi reprobo, imò de omnibus quæ sunt aliis: nam omnia erunt materia doloris in damnatis, licet specialiter beneficia sibi facta fundent materiam ingratitudinis. Vocationes autem inefficaces, & gratia interrupta in prædestinatis sunt beneficia Dei, & per se conducunt ad materiam gaudij in beatis; & sic sunt effectus prædestinationis, quia prædestinatio est beneficiorum præparatio. Reprobatio autem non præparat beneficia, licet ex illis per accidens capiat reprobos vel abusum, vel dolorem: sed hinc non agimus de beneficiis,

ciis, sed de permissione peccati remissi, an sit effectus reprobationis, ut permissio est, & ad culpam conducens: sic enim non est beneficium, sed beneficii subtractio.

21 Instabis. Sit casus quod alicui remittatur peccatum, vel plura peccata per modicam attritionem in confessione, ita ut remaneat multa poena temporalis soluenda in purgatorio, & dum illa non est soluta, nec satisfacta in hac vita, reincidat ille homo in peccatum mortale; & sic moriatur, tunc illa poena quae restabat soluenda pro peccatis iam remissis infligetur isti homini: nec enim illi remittitur, & non in purgatorio, quia mittitur in infernum, & in inferno non datur poena temporalis, sed aeterna: temporalis enim poena solum in purgatorio soluitur: ergo in aliquo casu punietur peccatum remissum poena damnationis aeternae; & sic erit effectus reprobationis, non obstante remissione quoad culpam.

Respon. casum hunc esse valde ordinarium, licet non inueniam in Auctoribus eius resolutionem tractari. Sed in primis posset dici quod tale peccatum, licet sit remissum quoad culpam, non tamen plene quoad poenam. Nos autem loquimur de peccato plene, & simpliciter remissio, quod non est effectus reprobationis. Deinde cum aliquandiu haesitarem, inueni pleniorum eius resolutionem in D. Thom. qui sentit talia peccata in inferno puniri, sed temporaliter; & sic non esse inconueniens quod aliqua poena accidentaliter diminuat in inferno, sicut, & augetur aliqua usque ad diem iudicii, non quia ibi mala valeant ad demeritum, sicut nec bona in beatis ad meritum, ut docet 1. 2. q. 13. art. 4. ad 2. Sed propter ipsam conditionem status qui usque ad diem iudicii illas vicissitudines admittit. Dicit ergo sic S. D. in 4. dist. 22. quest. 1. art. 1. ad 5. *Ad quintum dicendum, quod pro illa parte poena, quae sibi dimissa est in confessione vel contritione nunquam punietur, sed pro residua, in aeternum tamen, ut quidam dicunt, quia ratione fori in quo puniatur aeterna poena debetur, sicut est in venialibus, quae in purgatorio puniuntur poena temporalis, & in Inferno, aeterna. Sed hoc non videtur simile, quia veniale ideo in Inferno aeternaliter puniatur, quia semper manet, cum non sit ibi aliquid quod culpam delere possit; sed poena ex hoc ipso quod soluitur expiatur. Et ideo alij dicunt, quod poena, cuius est aliquis debitor post culpam remissam in aeterno, puniatur temporaliter. Nec propter hoc sequitur quod sit in Inferno redemptio, quia poena quae soluitur, non redimitur. Nec est inconueniens, quod quantum ad aliquid accidentaliter poena inferni minuat usque ad diem iudicii, sicut etiam augetur. Ita D. Thom. Ex quo patet, illam poenam peccati iam remissi, non esse formaliter effectum reprobationis, quia non pertinet ad poenam aeternam, quae proprie est reprobatiua. Poenae autem quae finiuntur, & poni possunt, & cessare in damnatis non sunt reprobationis effectus, licet materialiter ad reprobatum pertineant, & in inferni igne luantur. Poenae autem accidentales quae semper durant; & semper cruciant, vel in se, vel in effectu, quem relinquunt, effectus sunt reprobationis, sicut gaudia accidentaliter in beatis effectus sunt praedestinationis, quia perpetua sunt, vel in se, vel in effectu quem relinquunt, quia illo gaudio uti semper possunt in se, vel in eius recordatione.*

22 Contra priorem partem conclusionis solum restat soluere fundamentum oppositae sententiae, quae non assignat pro effectu reprobationis aliquam permissionem culpae, nisi forte habere possit rationem aliquam poenae, ut quando datur in poenam

alicuius prioris peccati, vel ipsius Adam, vel ipsius reprobati, quod tamen in peccato Angeli, quod fuit irremissibile, & in peccato hominis iam iustificati, qui reprobat, locum non habet, & tamen ibi currit ratio facta, quia illius peccati permissio ex aliqua speciali prouidentia debet oriri propter connexionem inuitabilem quam habet cum fine illo speciali, qui est exclusio gloria. Igitur fundamentum oppositae sententiae illud est, quia permissio non conducit ad finem reprobationis, nisi mediante peccato in ratione peccati: ergo si Deus vult permissionem ex illo fine reprobationis, & ostensionis iustitiae, tenetur amare, & velle ex tali fine illud peccatum; hoc autem est impossibile: ergo, &c. Consequ. prob. quia nullus amat aliquod medium in ordine ad aliquem finem, nisi in quantum ad talem finem conducit: ergo ratio illa propter quam conducit magis est amabilis: si ergo permissio non conducit ad illum finem nisi ratione ipsius peccati, impossibile est diligere permissionem ex illo fine, nisi teneatur Deus diligere peccatum. Antec. verò certum est, quia punio, & damnatio, & exclusio a regno non fit propter permissionem, sed propter peccatum quod solum est punibile, quia materia punitionis solum est culpa ut culpa, non permissio.

Confirm. quia actus reprobationis non est actus misericordiae, sed iustitiae vindicativae, prima autem permissio peccati propter quod aliquis damnatur, ut in Angelo, & in eo qui propter originale damnatur, non potest procedere ex iustitia vindicativa, quia cum sit primum peccatum, non supponit aliud prius quod puniat, & in cuius poenam permittatur: ergo non potest esse effectus reprobationis, quia si est actus iustitiae vindicativae, omnes effectus eius sub hac ratione formali debent ab ea procedere. Et licet paruulus, qui damnatur propter originale peccatum, contrahat illud ex Adam, cuius peccatum puniri potest in isto paruulo, tamen permissio qua iste paruulus contrahit peccatum non est alia à permissione qua in Adam peccauit, & ille ut caput istius paruuli lapsus est: illa autem permissio in Adam non fuit effectus reprobationis, tum quia antecessit praedestinationem hominum quae facta est in Christo ut Redemptore, & consequenter iam supponente peccatum: ergo à fortiori antecessit reprobationem: tum quia si illa permissio peccati Adam ut capitis esset effectus reprobationis, omnes ex Adam manerent reprobi, quia omnes participant illam permissionem, sicut & peccatum.

Resp. hoc argumentum saepe à nobis esse solutum, & supra tractatum disput. preced. agendo de poenitentia quae essentialiter supponit peccatum, an sit effectus praedestinationis, idem nunc dicimus de iustitia punitiua supponente essentialiter culpam in reprobatione. Dicimus ergo ad antecedens argumenti: Permissio non conducit nisi mediante peccato, distinguo; nisi mediante peccato, ut medio operante, & tendente ad assecutionem talis finis, nego: ut medio destruendo, & relinquendo seu materia destruenda, & relinquenda à tali fine, transeat. Ad consequ. Ergo tenetur ex vi talis finis amare, & velle peccatum, nego consequ. Ad probat. dico quod nullus amat aliquod medium nisi prout conducit ad finem; & sic ratio conducendi magis amatur. Negamus autem quod ratio qua permissio conducit ad finem reprobationis sit peccatum, quia peccatum non causatur, aut consequitur per aliquam influentiam ex ipsa permissione denegante gratiam, sed permissio solum se habet ut remouens impedimentum quo

quo alter detinebatur ne peccaret. Vnde peccatum pūe causatur ab homine, quia perditio ex re, & sic interrumpitur conducētia, & influentia inter permissionem, & peccatum, quia ex permissione ad peccatum nulla influentia datur. Vnde neque sumitur ratio conducendi ad finem iustitiæ, & reprobationis in permissione ex ipso peccato, sed tota ratio conducētiæ sistit in hoc quod est negare, seu detinere aliquod indebitum beneficium gratiæ, quod est impeditium peccati: conducit enim ad ostensionem iustitiæ, non solum ponere media positivè causantia vel influentia in suum finem, sed etiam negare beneficia indebita, quæ si ponantur, excludent materiam exercendi iustitiam, quæ materia non est exhibenda, & causanda à Deo, eo quod sunt peccata. Vnde denegatio gratiæ impeditiæ peccatorum non conducit ad finem reprobationis, seu ad ostensionem iustitiæ ratione ipsius peccati ut causandi à se, vel propter aliquem influxum in ipsum peccatum, sed ut conditio requisita ad ostensionem iustitiæ, quia si non denegetur gratia, & indebitum beneficium, non relinquetur locus iustitiæ exercendæ, eo quod nulli erunt defectus æterni. Solum ergo ex vi illius finis intendit Deus relinquere creaturas in eo statu, in quo non maneant impedita omnia peccata, & hæc est ratio conducens in sua permissione ad finem iustitiæ, punitiæ, ad quam non solum requiritur peccatum, ut materia super quam cadat iustitia, sed etiam antecederet ad hoc requiritur homines esse in statu non impossibili, nec impediēte peccata, & hic status potest esse volitus à Deo, sine hoc quod sit volitum ipsum peccatum, quia peccatum in tali statu non contingit ex influentia Dei, sed ex defectu voluntatis nostræ. Velle autem statum illum naturæ defectibilis in quo non sit impedita ad deficiendum si velit, hoc pertinet ad Deum, quia cum creatura ex sua limitatione sit prona ad defectum, & solum per gratiam, & beneficium indebitum Dei possit contineri, & sustentari ne deficiat, non tenetur Deus semper hunc statum dare creaturæ, sed potest relinquere illam in statu suo defectibili, sine hoc quod vllō modo velit peccatum, quia adhuc posito illo statu, totum peccatum est ex sola voluntate creata, & nullo modo ex divina: ergo bene stat Deum constituere hominem in illo statu, & non constituere neque causare peccatum: ergo nec velle, quia Deus solum vult, quæ causat. Permissio autem solum constituit hominem in statu non impediēte peccatum, quia solum habet denegare gratiam qua impediretur, non autem constituit hominem in statu influxivo, & causativo peccati, quia totus influxus in peccatum ex homine est. Ergo ex volitione permissionis ob finem reprobationis, solum infertur, quod Deus tenetur velle in homine statum non impeditium peccati, & hunc statum vult, non autem sequitur quod teneatur velle ipsum peccatum, quia in illum non influit permissio. Et cum dicitur quod permissio solum conducit ad finem reprobationis ratione peccati, negatur hoc: conducit enim etiam ratione status in quo relinquit hominem sine gratia impediēte peccatum: hic enim status etiam conducit ad ostensionem iustitiæ, quia requiritur antecederet ad peccatum, & ille est volitus à Deo.

24 Cum verò instatur, quod iustitia non punit permissionem, sed peccatum ipsum; & sic permissio non conducit ad reprobationis finem, nisi ratione peccati. Respon. quod ad ipsum actum puniendi formaliter, non conducit permissio nisi ratione peccati: solum enim peccatum est materia punitio- nis. Cæterum ad aliquid antecedens ipsum actum

punitiois conducit permissio, scil. ad constituendum hominem in statu non impedito ad peccandum, in quo scil. denegatur beneficium indebitum, seu gratia detinens, & impediens peccatum, & hunc statum potest Deus velle, licet non ipsum peccatum, quia non tenetur illud beneficium semper homini dare: & ex fine reprobationis, seu ostensionis iustitiæ vult talem statum, quia reprobatio non dicit solum actum punitivum, sed etiam providentiam de omni eo quod constituit hominem in statu requisito ad suam iustitiam: ad providentiam enim summam Dei pertinet omnia attingere quæ ad aliquem finem requiruntur; vnum autem ex requisitis ad ostensionem iustitiæ est, ut homines in tali statu sint, in quo non sint impediti per beneficia divina ad delinquendum, & deficiendum.

25 Quia ergo solum hunc statum tenetur Deus velle ex vi talis permissionis, reliquum quod consequitur ex defectu creaturæ (licet infallibiliter sequatur posita denegatione gratiæ, sicut sequitur annihilatio posita suspensione concursus) non vult Deus, sed permittit, quia nec peccatum ex voluntate Dei est, sed ex permissione, nec peccatum se habet ut medium influens in consecutionem finis iustitiæ, sed ut materia destruenda, & relinquenda, quia culpa per iustitiam punitur, & sit æqualitas, tolliturque inæqualitas, quam culpa constituit. Vnde non est aliquid diligendum ab intendente finem iustitiæ, sed relinquendum; & ideo qui vult iustitiæ ostensionem, non tenetur velle peccatum, sed solum permittere, & permissionem ipsam velle, quia non vult illud ut medium assecutivum finis, sed ut materiam destruendam per finem iustitiæ, & hæc sufficit quod sit permissa, non volita, sicut non est volitus terminus à quo in motu, sed derelictus.

26 Ad Confirm. Respon. quod actus reprobationis non est misericordiæ, sed iustitiæ, non tamen iustitiæ solum ministerialiter, & quoad exercitium punitiois, sed etiam eminenter, & architectonicè, scil. providendo, & disponendo de ipsa virtute iustitiæ, eiusque ostensione, & requisitis, ut ei detur locus in rerum natura. Et sic non omnes actus reprobationis procedunt sub ratione vindicandi, & puniendi in exercitio, sed quidam puniendo, & inferendo damnationis poenam, quidam disponendo, & constituendo statum capacem ut possit natura libera deficere, permittendo cadere in culpam, ut dicit D. Thom. hic ar. 3. quod est denegare gratiam, & beneficium indebitum quo detineretur, & impediretur natura ne deficeret: hoc enim beneficium non tenetur Deus semper dare, neque in hoc statu semper hominem constituere; & hoc facit permissio. Et sic permissio, etiam in Angelo peccante, & in homine iustificato qui postea cadit, & damnatur, est effectus reprobationis, non sub formalitate vindictæ, & punitiois in executione, sed formalitate providentiæ disponentis, & providentis ea quæ sunt requisita ad ostensionem virtutis iustitiæ; & sic ex tali fine operantis.

Negatio sufficientis auxilij effectus est reprobationis.

27 Sæpius in hoc opere, & in preced. tomo disp. 20. meminimus auxilij sufficientis, & efficacis, pertinetque ad sufficiens dare posse, seu actum primum ad aliquam operationem: nomine enim sufficientiæ potestas intelligitur, & virtus, quæ ad actum primum pertinet; ad efficacem autem spectat dare ipsam applicationem, & deductionem potentie usque

vsque ad executionem actus secundi. Est autem necessarium ponere tale auxilium dans sufficientiam, & posse, quia ad potestatem, & vim operandi non sufficit ipsa capacitas obedientialis, quam habet naturalis potentia ut eleuetur ad opera supernaturalia, sed requiritur facultas proxima, & proportionata ad operandum. Hæc autem non consistit in aliquo vno, aut indivisibili aliqua virtute, sed multa concurrunt tum intrinseca, tum extrinseca: Intrinseca sunt duo; ex parte intellectus, notitia, ex parte voluntatis, facultas seu proportionata vires ut sufficientiam, ut potestatem quis habere dicatur ad aliquid faciendum: nam voluntas nihil potest operari nisi præsupponendo cognitionem ex parte intellectus, & in se habendo virtutem, & adiutorium proportionatum operi supernaturali faciendo; & sic utrumque horum pertinet ad sufficientiam auxilium; & præterea requiruntur plura extrinseca, ut quod occurrat obiectum, quod possit notitiam convenientem præbere, ut quod prædicetur Evangelium, quod non occurrant impedimenta extrinseca notitiam illam impediunt, ministri sacramenti recipienti, materia illius, quod homo non sit impeditus audire, & suscipere res fidei, ut infirmitate, incarceratione, exilio, & aliis sexcentis impedimentis, quæ possunt occurrere, & potentiam tollunt ad rectè operandum, & ad consequendam peccatorum remissionem.

28 Ex his autem quæ tam multa sunt, & concurrunt ad constituendam sufficientiam, & potentiam operandi, possunt aliquando à Deo negari aliqua ex illis, aliquando omnia. Possunt aliqua negari in se formaliter, & immediatè, sed concedi mediatè, & in sua causa, sicut plura ex illis non habemus ex negligentia nostra, vel parentum, aut ad quorum curam pertinemus, & tamen in promptu erat habere si diligentia adhiberetur, sicut aliqui ex negligentia non audiunt Evangelium, & tamen possent audire, quia extat concionator: alij etiam adhuc peius, eliciunt à se ministros veræ fidei, & nolunt eos audire, & id continuatur ab illis in alios per multum tempus, & manent sic integræ civitates, provinciae, & regiones sine notitia fidei modò inveniuntur, & consequenter sine sufficienti auxilio ad salutem in vi prioris negligentiae, aut contemptus priorum, unde manat, & continuatur in alios. Et isti de facto non recipiunt sufficientiam auxilium proximè, & immediatè, sed tamen receperunt in sua causa, quia si illi priores quibus ipsi succedunt non haberent illam negligentiam, non deesset ipsis notitia fidei. Similiter parvuli multi de facto carent sacramento Baptismi, aut quia deest aqua quæ est materia, aut quia deest minister, qui sciat formam, quia licet ista remedia sint in rerum natura, tamè hîc & nunc applicata non sunt, sed hic applicationis defectus communiter reducitur ad aliquas causas, in quarum potestate erat eum euitare, v. g. si prægnans potuit euitare ne tempore partus esset in loco, ubi infans natus, aqua vel ministro careret pro Baptismo, vel si id non potuit euitare mulier, saltem alij ad quorum curam, vel potestatem pertinebat, potuerunt id euitare. Similiter si ex aliquo motu, vel alteratione, aut qualibet alia mutatione infans in utero est suffocatus, & mortuus, sicque caruit Baptismo, & fuit in manu mulieris vel aliorum id euitare, tunc censetur habuisse auxilium sufficientem mediâtè, & radicaliter, seu in causa sua, & ex negligentia, aut culpa aliorum illud non habuisse proximè.

29 His suppositis aliqui absolutè existimant Deum denegare aliquibus aliquando auxilia sufficientia in hac vita ne possint converteri, licet quoad implenda

præcepta quæ occurrunt, nunquam desit auxilium sufficientem, quale requiritur, & quali modo requiritur ut præceptum obliget, & iste non excusetur à peccato. Ita stant pro hac sententia Henricus quodlibet. 8. qu. 5. Abulensis in c. 4. Exodi, Richardus, Bannez, Gonzalez, hîc disp. 77. sect. 5. Villegas controu. 16. disp. 2. c. 3. Alij existimant nulli quantumcumque infideli, & obdurato denegari sufficientem auxilium. Ita Mol. Suarez, Bellarm. Valentia, Arrubal, Lessius, Vasquez, quos sequitur, & citat Alarcon tract. 4. disp. 5. c. 8. num. 2. & apud Villegas videri possunt c. 2. Et tamen Vasquez licet 1. par. disp. 97. c. 3. illam teneat sententiam, tamen 1. 2. disp. 120. c. 3. docet posse in aliquibus dari ignorantiam invincibilem mysteriorum fidei, quod sine denegatione auxilij sufficientis ad credendum, stare non potest. Quæ sententia in adultis vniuersalius currit, quia cum ipsi propriis actibus iustificandi sint, multique ex illis actibus sint in præcepto, evidentiùs ibi apparet non posse auxilium sufficientem illis denegari ut præcepto obligentur, neque illuminationem eis deesse (nisi sua negligentia, & cæcitate velint luminis esse rebelles) ut possint converteri, quia lux vera est qua illuminat omnem hominem venientem in hunc mundum, Ioan. 1. In parvulis qui non illuminatione interna, neque præcepto aguntur, sed ministerio aliorum sibi debet exhiberi remedium salutis, non ita vniuersaliter procedit hæc sententia, sed dividuntur Authores. Nam quidam existimant omnibus parvulis, etiam qui decedunt in utero materno prout fuisse auxilium sufficientem, saltem remotè, & in cura, seu actionibus parentum, vel eorum quibus interest. Ita Bellarm. 2. de gratia, & libero arbitrio. c. 5. Valencia 1. 2. disp. 8. qu. 3. puncto 4. Lessius de prædestin. sect. 6. assert. 1. Arrubal disp. 91. At verò Suarez lib. 4. de providentia erga reprobos c. 4. num. 4. etsi dicat magnam partem huius controuersie esse de modo loquendi, tamen num. 15. fatetur Baptismum qui ex humana diligentia pendet, non potuisse antecederet omnibus parvulis applicari. Quod est in aliam sententiam inclinare. Et sic alij sentiunt, Deum non prouidisse multis parvulis auxilium sufficientem, ut in eis peccatum originale deleteretur. Quod sentiunt Vasquez 1. par. disp. 96. c. 2. citatque Driedonem, Gregorium, Gabrielem, Soto, & sequitur etiam Alarcon ubi supra cap. 9. conclus. 5.

Nihilominus in hac difficultate duo dico.

Primum est: Si loquamur de auxilio sufficienti in communi, & ex parte ipsius remedij quod datur, & proponitur à Deo tum in Sacramento pro parvulis, tum in Sacramentis, & doctrina atque oblatione virium sufficientium pro adultis, omnibus paratum est, & donatum à Deo auxilium sufficientem, vel in se proximè, vel in suis causis, ut in meritis, & virtute passionis Christi, in Ecclesia Catholica omnibus communi, & parenti de se, in prædicatione, & notitia sufficienti facta per totum mundum, licet negligentia, & incuria hominum in diuersis terris euauerit, & denique, in aliis causis remotis, id est, non proximè applicatis.

Secundum est: Si loquamur de auxilio sufficienti in particulari, scilicet in isto vel illo subiecto singulari recipitur, aut proximè receptibile, & applicabile illi est, non omnibus datur à Deo auxilium sufficientem (ita ut proximè, & formaliter aliquis non sit potens saluari) non solum parvulis, sed nec etiam adultis pro omni tempore quo instat salutis consecutio; sed tamen pro omni tempore quo instat adultis præceptum, non denegatur ei à Deo, sed offertur auxilium sufficientem ex parte sua, licet non semper aduertatur aut recipiatur ab adultis, sed

sed vel ab illo diuertat, vel ei repugnet, aut omittat.

31 Primum dictum negari non potest salua fide, cum innitatur vniuersalissimæ virtuti redemptionis Christi, vniuersalitati Ecclesiæ Catholicæ, vniuersalitati illuminationis diuinæ, tam in ordine naturali, quàm supernaturali, vniuersalitati prædicationis Apostolorum, & aliorum ministrorum, & aliis similibus causis quæ in omnes de se influxuæ sunt saltem remotè, nisi hominum aut negligentia aut peccatis impediuntur. Nam redemptio Christi pro omnibus hominibus facta est quoad sufficientiam, & Sacramenta omnibus proposita, & omnes virtutem habent, 1. Ioan. 2. *Ipse est propitiatio pro peccatis nostris, non pro nostris autem tantum, sed & totius mundi*; 1. ad Timoth. 2. *Qui dedit redemptionem seipsum pro omnibus*, 2. ad Corinth. 5. *Si vnus pro omnibus mortuus est: ergo omnes mortui sunt, & pro omnibus mortuus est Christus*, & ad Hebr. 2. *Vt pro omnibus gustaret mortem*. Similiter sacramenta in Ecclesiâ Catholica, cuiusque doctrina omnibus proposita sunt, nec aliquem excipiunt: est enim fons ille, de quo dicitur Zachar. 13. *In die illa erit fons patens domui David, & habitantibus Ierusalem in ablutionem peccatoris, & menstruata*; vnde, & confitemur vnum baptisma in remissionem peccatorum, non huius, vel illius, sed simpliciter quorumcumque peccatorum. Et Sacramentum pœnitentiæ pro remissione omnium post Baptismum institutum est Ioan. 20. *Quorum remisistis peccata remittuntur eis*. Et illuminatio Dei, saltem interna, ad omnes se extendit, Ioan. 1. *Erat lux vera quæ illuminat omnem hominem venientem in hunc mundum*. Et Roman. 1. *Inuisibilia Dei per ea quæ facta sunt intellecta conspiciuntur, sempiterna quoque eius virtus, & diuinitas, ita vt sint inexcusabiles*. Et Iob 25. *Super quem non surget lumen illius*. Prædicationis quoque Apostolorum omnibus facta est, & toti orbi manifestata: nam *In omnem terram exiit sonus eorum, & in fines orbis terra verba eorum*, ad Roman. 10. Et Paulus Atheniensibus prædicans Actorum 17. *Nunc, inquit, annunciat hominibus, vt omnes ubique pœnitentiam agant: vbi ly omnes, & ly ubique vniuersalitatem designat prædicationis, & remedij, quod & omnes personas, & loca omnia complectitur*. Itaque quoad remedium sufficientis auxilij, quasi in vniuersali quadam apotheca pro omnibus locis, & hominibus positum, & datum est à Deo. An verò omnes possint ad talia remedia accedere, an verò aliqui ita impediuntur vt sine potentia maneant ad vtendum talibus remediis, hoc pertinet ad secundum dictum.

32 Oppones: Etiam in ratione remedij non pro omnibus institutum est: nam Baptismi non sunt capaces infantes nondum nati: renasci enim non potest nisi natus: ergo pro illis non est aliquod remedium quandiu ibi sunt, in tota virtute Passionis Christi, & Sacramentorum Christi: nihil enim est eis applicabile sub eo statu, & tamen in illo multi moriuntur: ergo multi sunt pro quibus non est remedium in apotheca Christi, & tamen illi sub eius potestate sunt, quia ab eo puniendi, & iudicandi sunt, & generaliter dicit Christus orans ad Patrem Ioan. 17. *Sicut dedisti ei potestatem omnis carnis*, & tamen pro illa carne paruulorum in vtero non est relictum remedium.

Respon. quòd pro illis prout sunt in vtero reduplicatiue, & quatenus sub illo statu non est remedium, quia non est necessarium neque commodè, & decenter applicari posset illis infantibus remedium aliquod sensibile, & humano modo, seu

per sacramenta applicabile. Sed tamen illi paruuli absolute, & simpliciter sunt capaces remedij, quia sunt capaces vt extrahantur ab illo loco, vel per naturalem natiuitatem, vel per abscissionem vteri, si mater motiatur. Quòd si ipsi ante talem extractionem moriantur, hoc non arguit, quòd non sit remedium pro ipsis simpliciter loquendo, sed quòd applicatio talis remedij sit aliquibus impedita, & impossibilis reddita, quòd multis etiam natis ex vtero contingit, imò, & adultis: multi enim paruuli aliquando sic deferuntur, vt nullo modo possit eis subueniri aut defectu ministri, aut defectu materiæ Baptismi, aut quia non potest ad eos accedi. Et adulti qui priuantur vsu rationis omni remedio carent pro illo statu, nec est possibile eis applicari. Hoc ergo non pertinet ad insufficientiam remedij, sed ad defectum applicationis, vt iam dicemus.

33 Secundum ergo dictum supra positum probatur per suas partes. Prima dicit quòd aliquibus denegatur auxilium sufficiens ad salutem, quantum ad applicationem, & receptionem talis auxilij in ipsis, in quo existimo veram sententiam M. Bannez. hic artic. 8. dub. 3. conclus. 8. & M. Gonzalez ubi supra, quòd si dare auxilium sufficiens sumatur correlatiue ad recipere, id est ita detur à Deo, quòd recipiatur, & applicetur homini, non omnibus auxilium sufficiens datur; licet si dare sit idem quòd offerre, omnibus proponatur communiter, & offeratur, quantum est ex parte Dei. Et præsertim hoc auxilium sufficiens quòd negatur, est notitia quæ exigitur ad bene operandum: inde enim incipit prima sufficientia, & potestas, vel etiam in paruulis negatur sacramentum Baptismi quo regenerentur, & negatur potestas accipiendi illud. Probatur ergo hæc pars, primò ex D. Thom. qui loquens de paruulis in maternis vteris qui non possunt baptizari, sic dicit in 4. dist. 6. quæst. 1. artic. 1. ad 1. *Ad primum dicendum quòd non est ex defectu diuinæ misericordie quòd in maternis vteris existentibus remedium non exhibetur, sed quia non sunt capaces illius remedij per quod secundum legem communem participes passionis Christi efficiantur, à qua est remissio peccatorum, quia non possunt subiici operationi ministrorum Ecclesiæ, per quos talia remedia ministrantur*. Sentit ergo S. Thom. pro illo statu infantes esse incapaces remedij, & consequenter non posse eis dari auxilium sufficiens, & ita qui moriuntur in illo statu, moriuntur in statu incapaci salutis: ergo carente potentia ad salutem: ergo, & auxilio sufficiente. Nec soluitur hoc, dicendo quòd caret auxilio sufficiente in se immediatè, & proximè, non remotè, & in suis causis, quia possent parentes sic gubernari vt non moreretur fœtus in vtero, sed nasceretur, & capax remedij redderetur. Contra enim est, quia illa euitatio abusus, & mortis infantis, aliquando accidit independentè ab omni cura parentum, ita vt prorsus sit impossibilis humano modo, & secundum cursum causarum naturalium illi applicari remedium, & auxilium sufficiens, aut euitari mors, vt patet cum ex casu fortuito, & nullo modo præuiso prægnans moritur aut occiditur, vt si cadat super illam dormientem tectum, si fulmine feriat, aut alio fortuito casu, qui in nullius hominis manu, & potestate esse potuit; aut si ex ipsa debilitate virtutis seminalis, aut sanguinis corruptione, ita fœtus generatur quòd parturiri non potest, aut ipsa fœmina virtute sufficienti ad enitendum caret, quia debilissimæ complexionis est; in talibus, & similibus casibus mors est inuitabilis, & remedium omne humano modo inapplicabile. Et sic quantumcumque Deus habeat voluntatem

voluntatem antecedentem, & inefficacem saluandi illum paruulum, tamen si iuxta causas creatas, & modum humanum reliquit applicabile omne remedium, & omne auxilium sufficiens, ita quod nisi miraculose non potest illi subueniri: ergo simpliciter voluit illi denegare potentiam proximam, & humano modo expeditam ad salutem, quod est negare applicationem, seu receptionem auxilij sufficientis. Quod enim possit modo diuino, & per miraculum saluari, & quantum est ex vi voluntatis antecedentis diuinæ, hoc nihil est: nam alias etiam damnati in inferno dicerentur habere auxilium sufficiens, & nos habere potentiam ad videndum Deum in hac vita, vel ad volandum, quia per miraculum possunt fieri hæc omnia.

34 Denique ad hoc faciunt autoritates Prosperi, & Aug. Nam S. Prosper in *carmine de ingratis* c. 30. dicit, *multos sanctis a genitoribus ortos, nullo saluari studio potuisse suorum*. Et S. August. *lib. de natura & gratia* c. 8. Ego, inquit, dico, paruulum natum in eo loco, ubi ei non potuit per baptismum Christi subueniri, morte preuentum, idcirco talem fuisse, id est, sine lauacro regenerationis exisse, quia esse aliud non potuit. Et inf. Recte ergo ea damnatione, quæ per uniuersam massam currit, non admittitur in regnum calorum, quauis Christianus non solum non fuerit, sed nec esse potuerit. Idem c. seq. docet de adulto, qui in ea terra mortuus est, ubi Christi nomen audire non potuit. Quibus locis August. manifestè docet tales caruisse auxilio sufficienti ad salutem, quia non solum non fuit, inquit, sed nec esse potuit Christianus, sed auxiliū quo aliquis est Christianus, est auxilium efficax, auxilium quo potest esse, est sufficiens, ergo si non solum non fuit, sed nec esse potuit, caruit auxilio sufficiente. Vnde quæcumque explicatio ad istum locum, exploditur ex ipsis verbis Aug. ut quod loquatur de potestate morali, seu consequenti, non de antecedenti, sicut dicitur quod ille qui non habet auxilium efficax, non potest conuerti, potestate scil. consequenti, non antecedenti. Contra enim est, quod Aug. manifestè distinguit de eo qui non potest ex defectu possibilitatis, aut ex defectu voluntatis; imò Pelagius sic distinguebat, & relinquit quæstionem de eo quod non est tale ex defectu voluntatis, solum disputabat de eo, qui non habet possibilitatem, ut patet in c. 7. antecedenti in illis verbis: Prius distinguit (S. Pelagius) aliud esse querere, an possit aliquid esse quod ad solam possibilitatem pertinet, aliud utrumne sit? Hanc distinctionem veram esse nemo ambigit: consequens enim est ut quod est, esse potuerit, non est autem consequens, ut quod esse potest, etiam sit. Quia enim Dominus Lazarum suscitauit, sine dubio potuit; quia vero Iudam non suscitauit, nunquid dicendum est non potuit? Potuit ergo, sed noluit. Et statim: Nos, inquit, de sola possibilitate tractamus, &c. Ergo quando Augustinus respondens Pelagio iuxta distinctionem ab eo datam, dicit paruulum illum non potuisse esse Christianum, non loquitur de possibilitate consequenti, sed de antecedenti, quæ dat posse, & pertinet ad auxilium sufficiens. Patet consequ. nam in illa distinctione ponitur differentia inter id quod nō est ex defectu possibilitatis, & quod est ex defectu voluntatis; & tamen ubi non est voluntas, non potest aliquid fieri potestate consequente: si enim non est voluntas, non est auxilium efficax, quo non posito, non potest fieri effectus potestate consequente; & tamen non loquitur de illa potestate August. neque procedebat de illa quæstio

Ioan. à S. Thoma in 1. part. D. Thoma.

Pelagij: ergo loquitur de defectu auxilij sufficientis.

Idem quod dicitur de paruulis, siue nondum natis, siue iam natis, sed non in loco quo possit eis subueniri, quod eis denegatur auxilium sufficiens ad salutem, constat etiam verificari in aliquibus adultis, præsertim in duplici casu, tum in egredientibus ex hac vita, tum in ingredientibus. In egredientibus quidem, quia aliquando existens in peccato priuatur usu rationis; & sic moritur, quia nullum naturale remedium habet, nec potest sanari ab illa infirmitate, nisi per miraculum: talis hoc ipso quod priuatur usu rationis incurabiliter, priuatur etiam omni auxilio sufficienti, quia est incapax operationis; & sic non solum priuatur ipsa efficacia, & operatione bona propter voluntatem malam, sed priuatur potestate, quia redditur incapax pro illo flatu: ergo caret auxilio sufficiente. In aliis etiam ingredientibus hanc vitam, vel etiam continuantibus in ea constat denegari omnem notitiam fidei, ita quod nihil omnino de Christo, & Euangelio audierunt; & sunt infideles infidelitate negatiua, quæ non est culpa infidelitatis, sed pœna ignorantie, ut docet S. Thom. 2. 2. qu. 10. artic. 1. ergo carent auxilio sufficienti ad suam conuersionem, & iustificationem. Patet consequ. quia primum à quo incipit sufficientia nostra, seu potestas operandi, est ex cognitione: in incognitum enim non potest ferri voluntas: ergo qui caret notitia requisita ad credendum, caret potentia, & auxilio sufficienti ut conuertatur in Deum. Non stat ergo admittere infidelitatem negatiuam, quæ est ignorantia inuincibilis in rebus fidei, nisi ponendo quod aliqui carent omni propositione, & auditu competenti rerum fidei, quod est carere potentia ad volendum credere, & multo magis ad credendum, & consequenter ad salutem: qui enim non crediderit, condemnabitur. Talem autem negatiuam infidelitatem admittit D. Th. cit. loco, & super c. 10. ad Rom. lect. 3. ubi docet eos ad quos non peruenit prædicatio Euangelij, excusationem habere de peccato infidelitatis. Et idem docet Aug. de *correp. & gratia* cap. 7. in principio, loquens de his, qui non audierunt Euangelium, eos etsi non exculat à damnatione, quia caruerunt remedio, bene tamen à peccato infidelitatis. Et apertius c. 11. eiusdem libri docet de auxilio sufficienti, quod si deesset homini vel Angelo, sine culpa cecidissent, adiutorium quippe defuisset, sine quo manere non possent: nunc autem quibus deest tale adiutorium pœna peccati est. Censet aliquando non dari hoc adiutorium & tunc non esse culpam, sed pœnam.

Et ratio est manifesta, quia isti qui nihil audiuit de fide, neque est voluntarium non credere, neque possibile, quia cum non possit credere, nisi volens, & circa incognitum non possit ferri voluntas, consequenter non est ei possibile credere, neque voluntarium non credere: ergo neque culpabilis illa infidelitas; caret ergo potestate credendi, & supernaturaliter operandi; & sic caret auxilio sufficienti, & dante potentiam ad salutem.

Secunda pars huius 2. dicti docet pro præceptis adimplendis indultis semper dari sufficiens auxilium. Et hoc constat, quia si deesset, non peccaret homo, ut dicit Aug. loco cit. talium præceptorum adimplentione; & sic frustra essent præcepta. Et lib. de *gratia, & libero arbitrio* c. 16. addit, Non inberet Deus quod sciret ab homine fieri non posse. Quis hoc nesciat? Sed ideo inbet aliqua quæ non possumus, ut nouerimus

N n

quid

422 Quæst. XXVIII. De Reprobatione,

quid ab eo petere debeamus. Vnde sumpsit Concilium Trident. sess. 6. cap. 11. illam definitionem, quod *Deus impossibilia non iubet, sed iubendo monet & facere quod possis, & petere quod non possis, & adiuuat ut possis.* Vbi pondero illud verbum, *iubendo monet*, &c. nam ipsa iussione, & præcepto notificato, & cognito inuoluit Concilium auxilium sufficiens ad eius impletionem, scilicet admonitio ad faciendum quod possimus, & ad petendum quod non possimus, quod tenet se ex parte intellectus, & adiuuat ut possimus, quod est adiutorium, seu vires, quæ tenent se ex parte voluntatis. Et quando dicimus Deum non denegare auxilium sufficiens, posito, & instante præcepto, non intelligimus quod semper utrique potentia, scilicet intellectui, & voluntati præbeat utrumque adiutorium, ita ut recipiatur de facto in utraque potentia, sed ad minus recipit auxilium sufficiens ex parte intellectus, vel saltem effertur ei unde possit habere, nisi velit dissimulare, & supinam, seu affectatam ignorantiam habere. Ex parte autem voluntatis non semper sequitur aut recipitur adiutorium aut vires, seu spiritus ad operandum, quia plerumque aut voluntas est infirma, & suis cupiditatibus victa, aut ita obdurata, & pertinax, ut posita illa notitia præcepti, non solum non sentiat vires ad obediendum in voluntate, sed de industria dicat Deo, *Recede à nobis, scientiam viarum tuarum nolumus*, & ut alter Pharaon respondet proponenti sibi præceptum Dei, *Nescio Dominum, & Israël non dimittam*, Exodi 5. Et de talibus dicit Augustin. 5. contra Iulian. cap. 4. *Reos fieri, ac verè peccare eos, qui deserti à Deo suis cupiditatibus seruiunt, & à Diabolo superantur.*

- 37 Quod autem denegatio auxilij sufficientis quando denegatur à Deo ad afflictionem salutis, sit effectus reprobationis; patet, tum quia hæc denegatio est in pœnam alicuius peccati, saltem originalis, ut de infidelitate negativa docet S. Thom. 2. 2. quæst. 10. artic. 1. & sic est denegatio punitiva, & reprobatiua; tum quia illa denegatio est maior denegatio gratiæ, & maior obduratio quàm sola efficacis auxilij denegatio, & permissio; & sic magis ordinata ad condemnationem, & finalem impœnitentiam: ergo multò magis est effectus reprobationis.

Dua obiectiones.

- 38 Contra resolutionem datam duo præcipue obijci possunt. Primò, quia in sententia D. Thom. quicumque perueniens ad vsum rationis tenetur conuerti ad Deum conuersione iustificatiua, in tantum quod si non iustificetur, tunc non solum manebit in peccato originali, sed etiam in actuali, ut docet 1. 2. quæst. 89. art. 6. & quæst. 14. de veris. art. 11. ad 1. ergo debet omnis homo habere auxilium sufficiens ad finem, & ad supernaturalem conuersionem. Patet, quia habet præceptum de tali conuersione protunc: ergo & auxilium sufficiens, iuxta id quod nuper diximus. Vnde vterius sequitur contradicere ibi D. Thomam ponendo quod aliqui venientes ad vsum rationis habent infidelitatem negativam: nam si habent præceptum & consequenter auxilium sufficiens ad credendum, & ad conuertendum se supernaturaliter in Deum, quod sine fide stare non potest: ergo oportet quod aliquam illuminationem vel propositionem habeant de rebus fidei, aliàs sine omni notitia fidei quomodo habent auxilium sufficiens

ad credendum? Posita autem notitia fidei, si non creditur illi, iam infidelitas est culpa: ergo non est infidelitas negativa, quæ est solum pœna: Nec dici potest quod ille non habet præceptum de conuersione supernaturali formaliter, & immediate, sed solum de naturali, quam si implenerit, illuminabitur à Deo supernaturaliter, ut dicit D. Thom. cit. loco de veris. Contra enim est, quia vel facit, & implet id quod naturale est ex auxilio, & viribus gratiæ supernaturalis, vel ex viribus naturæ. Si primum: Ergo iam supponitur cognitio supernaturalis, quæ utique est de rebus fidei, quia auxilium supernaturale incipit à cognitione, & excitante gratia. Si secundum, non est certum quod facienti quod est in se ex viribus naturæ Deus dabit gratiam: nec enim viribus naturæ annexa est gratia & illuminatio: ergo non est certum quod ille iustificabitur, etiam si impleat præceptum naturale; & sic poterit manere sine peccato actuali in solo originali, quod negat D. Thom.

39 Secundò obijciatur, quia damnati carent omni auxilio ad bonum, etiam sufficienti, cum ipsi positi sint extra terminum viæ, & sic sunt incapaces boni, & conuertibiles: ergo non datur illis auxilium quo possint conuerti; & tamen peccant, quia habent continuum odium Dei, & superbiam, iuxta illud, *Superbia eorum qui te oderunt ascendit semper*: ergo malè probamus ex denegatione auxilij sufficientis homines non peccaturos. Addo, quod ex hac conclusione sequitur contra primam, in qua dicimus denegari aliquibus etiam adultis auxilium sufficiens ad salutem, quia si denegatur eis auxilium sufficiens ad salutem, etiam denegatur ad implendum præcepta: repugnat enim quod habeant auxilium sufficiens ad præcepta, & non habeant ad salutem consequendam, qui enim seruat mandata, ingreditur ad vitam: ergo qui potest per auxilium sufficiens seruare mandata, potest saluari. Nullus autem quantumcumque obduratus datur, qui non possit implere mandata, & saluari, aliàs non peccaret, & commodum reportaret ex obduratione sua, cum tamen de maximè obduratis constet eos peccasse, ut Pharaon qui se peccasse agnoscebat Exodi 9. & 10. & ipsi intimabantur præcepta Dei, & dicebatur illi, *Vsq̃uequo non vis subiici mihi?* Et infideles sæpè mouentur ad bona opera facienda; & sic non carent auxilio sufficienti. Denique generales Scripturæ locutiones significant etiam istis maximè induratis dari auxilia sufficientia, quia & possunt conuerti, & peccant si non conuertantur, & iustificentur; sicut dicitur 2. Petri 3. *Patienter agit Deus nolens aliquos perire, sed omnes ad pœnitentiam conuerti*: ergo nulli negat auxilium sufficiens ad salutem. Et de maximè obduratis Ierem. 3. dicitur, *Frons meretricis facta est tibi, nolisti erubescere; saltem amodo voca me*, Isai. 31. *Conuertimini filij Israël, sicut in profundum recesseratis*. Nulli ergo negatur auxilium sufficiens ad conuersionem, & iustificationem à peccatis, sicut nec ad implenda præcepta, sed sicut peccant homines obdurati non implendo præcepta, & secundum impœnitens cor thesaurizant sibi iram, ut dicitur Romani 2. utique aggrauando peccata, quia verè peccant deserti à Deo, ut dicit August. ubi supra, ita, & peccant non conuertendo se, & salutem consequendo.

Ad primum Resp. concedendo quod perueniens ad vsum rationis habet præceptum conuertendi se

se ad Deum, & acceptandi totam eius legem, quæ tunc sibi ponitur, saltem implicite, & in illis communioribus præceptis. Declina à malo, & fac bonum. Operare secundum rationem, & non secundum appetitum, &c. hoc enim est pervenire ad usum rationis, notificari sibi legem, qua debet vivere in tota vita secundum rationem. Cæterum non proponitur sibi immediate, & in particulari statim supernaturalis fides explicite, sed proponitur implicite aliquid de obiecto fidei supernaturali, saltem illa duo commissima, quæ oportet cognoscere accedentem ad Deum, ut Apostolus dicit ad Hebr. 10. scilicet quod *Deus est, & remunerator est*, non quia tunc in illo imperfectissimo statu distincte cognoscatur Deus, eiusque remuneratio, sed quia iste cui tota lex vivendi secundum rationem proponitur, non potest acceptare illam nisi proponatur sibi aliquid magnum esse totam illam legem servare, & propter aliquid magnum esse faciendum, quod ipse plene non potest attingere, & hoc est supernaturale quod tunc implicite proponitur. Et hoc ideo, quia non potest in hoc statu naturæ lapsæ tota lex impleri, & acceptari, ut impleatur ex solis viribus naturæ, sed ex auxilio gratiæ, eo quod servantibus mandata promissa est vita æterna; & sic non potest separari impletio mandatorum à Deo sine supernaturali; & deinde quia totius legis impletio est opus hominis sani, & similiter acceptatio totius legis ad servandum illam, quia hoc est servare totam in intentione, & proposito: non potest autem sanari quis nisi per gratiam. Vnde ut iste qui pervenit ad usum rationis acceptet totam illam legem, indiget stimulari eius voluntatem aliquo superiori, & grandi motivo, sine quo non acceptabit illam; & sic indiget supernaturali auxilio ut totam legem acceptet volens implere: sic enim plenitudo legis est dilectio. Vnde qui in illo primo instanti acceptant legem, & implent præceptum naturale de tota lege, signum manifestum est eos accepisse auxilium supernaturale, quia vires naturæ non sufficiunt. Et tales certissime illuminabuntur, & accipient notitiam eorum mysteriorum, quæ requiritur ad iustificationem, & salutem, siue per Angelum, siue per prædicatorem, sicut Petrus missus est ad Cornelium, Act. 10. sed si paucissimi sunt ex his qui non degunt inter Catholicos, qui etiam ante usum rationis edoceri solent de Deo, & de rebus fidei.

41 Ex quibus patet, nec in dictis D. Thom. esse contrarietatem, nec esse infallibile illuminari eos supernaturaliter, qui ex solis viribus naturæ operantur. Non est in dictis D. Thom. contrarietas, quia in primo instanti usus rationis, omnes accipiunt sufficiens auxilium ad acceptandam legem, & ad res fidei implicite tunc propositas, & per modum præmij superioris pro observantibus legem, sed non omnibus proponuntur res fidei in particulari, & determinatè; & sic non accipiunt sufficiens auxilium ad explicite, & particulariter credendum, neque sub motivo fidei divinæ, & hoc ex culpa sua, quia resistunt priori auxilio, nec volunt acceptare legem, neque converti ad Deum; & sic reddunt se indignos propositione rerum fidei sub motivo explicite fidei. Sed tamen isti non incurrunt infidelitatem privativam, quæ est culpa specialis contra fidem, licet ex culpa non acceptandi, seu non obediendi legi, fidei propositio denegetur; quia ad hanc infidelitatem requiritur resistencia, seu non acceptatio fidei divinæ sufficienter propositæ in particulari, & explicite, aut saltem sub motivo Dei dicentis, & testificantis, ita quod testimonium Dei non acceptetur ab isto: Si enim nihil sibi proponitur in particulari ut testificatum, & dictum à Deo, non utique resistit iste Deo testificanti; & sic non incurrit culpam infidelitatis, quæ consistit in hoc, quod aliquis non acquiescat testimonio Dei, sicut proponitur à Deo. In primo autem instanti usus rationis quando aliquis nihil de Deo audit in particulari, non proponitur testificatio divina circa aliquod obiectum, in particulari, sed solum proponitur lex ut acceptetur sub motivo alicuius magni præmij. Et ratio huius est, quia tunc proponitur primum initium fidei, quod est motuum pij affectus ad credulitatem: præcedit enim pia affectio fidem, & piam affectionem propositio ex parte intellectus, non utique credendo, & assentiendo: sic enim ante piam affectionem esset fides sed proponendo aliqua per modum boni repromissi, ut inquit S. Thom. 14. de verit. art. 2. ad 10. & hoc adhuc in illo primo instanti non proponitur ut testificatum à Deo, & sub motivo fidei determinatè, & explicite, sed valde implicite, & sub ratione alicuius præmij vel magni boni. Vnde qui tunc non acceptat legem, etiam sub illo motivo, nondum resistit propositioni rerum fidei, sed quasi inductivo ad pium affectum credulitatis sub quadam implicita ratione. Et sic ex nota acceptance talis motui, & implicitæ propositionis fidei non sub motivo testificationis divinæ, sed sub ratione cuiusdam magni præmij, aut alterius similis rationis, non committitur infidelitatis culpa. Similiter qui illuminatur à Deo, & iustificatur, non est ex eo quod operatur ex viribus naturæ tantum, sed quia ex auxilio supernaturali requisito ad acceptance totius legis, saltem implicite; quod si acceptetur, proponuntur ei explicite materia ad salutem necessaria, & iustificabitur.

Ad secundum Respond. quod damnati carent 42 auxilio sufficienti affectivo, & quod tenet se ex parte voluntatis, aut quod in illam influere potest, eamque afficere, & convertere, non tamen carent auxilio sufficienti ex parte intellectus, & speculationis: Dæmones enim credunt, & contremiscunt. Et sic habent sufficientem notitiam ad peccandum: nec enim damnati ignorant legem naturalem, præsertim dæmones, multi etiam retinent memoriam rerum fidei, etsi sine fide. At verò viatores in hoc differunt à damnatis, quod recipiunt ad bene operandum auxilium sufficiens non solum purè speculativum, sed etiam affectivum, & influxivum in voluntatem, id est, de se potens stimulare, & excitare voluntatem, quia sunt in statu convertendi se ad Deum, licet aliqui tanta obduratione aut ignavia recipiant hoc auxilium, ut non relinquunt locum dari sibi adiutorium, & vires in voluntate. Peccant ergo & damnati, & obdurati in hac vita, licet isti possint converti ex vi auxilij, non illi, quia licet cognoscitium habeant auxilium damnati, sed non affectivum.

Ad replicam quod sequitur ex hac conclusione 43 contradictio ad primam. Resp. nullam contradictionem esse, quia prima conclusio de denegatione medij ad salutem consequendam procedit in casu quo negatur aliquid quod est necessarium ut medium, & non ut præceptum, seu non ratione præcepti, secunda verò procedit à converso: sicut v. g. Baptismus in parvulo requiritur necessitate medij, & non necessitate præcepti respectu ipsius parvuli; similiter in adulto peccatore, qui amittit usum rationis irrecuperabiliter, requiritur ad iustificationem necessitate medij gratia, & poenitentia, sed pro tunc iam non currit præceptum

Ioan. à S. Thoma in 1. part. D. Thoma.

N n 2

præceptum

præceptum de pœnitentia respectu illius, quia est incapax ratione status. Et fides requiritur necessitate medijs ad iustificationem in adultis; & tamen si non audit aliquid de fide Christi, non obligat præceptum; & tamen cum non crediderit condemnabitur. Itaque auxilium sufficiens quod pertinet præcisè ad rationem medijs ad salutem, denegatur aliquando siue parulis, siue adultis siue noua culpa. Auxilium verò sufficiens ad implenda præcepta non denegatur alicui, corrente, seu stante præcepto. Sed aliquando non corrente, aut non obligante præcepto potest negari id quod pertinet ad medium consequendæ salutis, ut in casibus allatis, tam pro parulis, quam pro adultis. Et quando dicitur quod qui potest implere omnia mandata, & ad id habet auxilium sufficiens, potest ingredi ad vitam, & saluari; dico quod id intelligitur de eo qui potest implere omnia mandata, corrente, & obligante præcepto, quia tunc etiam in talibus præceptis includuntur omnia media requisita ad salutem, quia hæc etiam sunt in præcepto, quando homo est in statu possibilitatis adimplendi. Sed per accidens potest aliquis poni in statu impossibilitatis adimplendi præcepta, & adhibendi media, & tunc si est in peccato, perit sine remedio, ut in casibus allatis. Neque ista sufficientia media negantur magis obduratis, & conceduntur minus obduratis, sed Deus cuius vult miseretur, & quem vult indurat. Vnde Pharaoni concessum est auxilium sufficiens ad implenda præcepta Dei, quia erat in statu possibilitatis adimplendi illa. Et generales locutiones Scripturæ, quæ etiam quoscunque obduratos ad pœnitentiam vocat, & eos peccare si non conuertantur, & thesaurizare iram significat, clarè loquuntur de obduratis in statu possibilitatis proximæ, & corrente obligatione præcepti, non si per accidens in aliquo casu præceptum non currat, & tamen medium necessarium non concedatur, ut in casu amissionis usus rationis in peccatore, aut non auditionis, & notitiæ denegatæ de rebus fidei ad credendum.

ARTICVLVS IV.

Quid de immutabilitate reprobationis, & prædestinationis, & numero eorum?

1 **C**ertitudo alicuius providentiæ, qualis est prædestinatio, vel reprobatio, & immutabilitas, potest esse vel præscientiæ solius sine causalitate, & antecedentia erga obiectum, sicut nos possumus esse certi, etiam de illis quæ non causamus, nec facimus, sed tamen certa notitia videmus ut cælum, & elementa; vel potest esse certitudo præscientiæ, & causalitatis simul, quia videlicet ipsa causalitas modo infallibili operatur, & super talem causalitatem fundatur præscientia, eo quod tunc præscientia est de re causanda ab ipsamet providentia. Et talis certitudo dicitur prædefinitionis, & causalitatis, quia ex determinatione voluntatis diuinæ tanquam ex causa oritur determinatio, & certitudo obiecti prouisi, & præuisi.

2 Igitur Massilienses inter alios errores etiam istum docebant, quod non erat certus numerus prædestinatorum, sed poterat augeri vel minui, eo quod nullum donum Dei etiam perseverantiæ existimabant esse tale, quod non posset nostra voluntate frustrari, & de facto aliquando frustraretur. Constat hoc ex epistolis Prosperi, & Hilarij ad S. Aug. ante librum de prædestinatione SS. In quo manifestè er-

rabant, tum in ipsa conclusione, tum in fundamento. In conclusione, quia aduersatur expressè Scripturæ, 2. ad Timoth. 2. *Firmum fundamentum Dei stat, habens signaculum hoc; cognouit Dominus qui sunt eius.* Item electi dicuntur habere sua nomina scripta in libro vitæ, ad Philip. IV. *Quorum nomina sunt in libro vite.* Et iterum Dominus ad Apostolos suos Luc. 10. *Gaudete, quia nomina vestra scripta sunt in calis.* Vbi autem sunt omnia nomina scripta, certitudo habetur manifesta, nec potest ibi aliquid de nouo scribi, quia ab æterno scripta sunt illa omnia. Vnde & pro certitudine ista commendanda dicitur Lucæ 12. quod *Omnes capilli nostri numerati sunt.* Et Aug. lib. de correp. & gratia c. 13. dicit, *Certus est numerus prædestinatorum ut nec addatur eis quisquam, nec minuatur ex eis.* Et de bono perseuer. c. 14. *Prædestinatio est præscientia, & præparatio, quibus certissime liberantur, quicumque liberantur.* Certè cum hæc prædestinatio Dei æterna sit (si quidem elegit nos in ipso ante mundi constitutionem, ad Ephes. 1.) ergo & immutabilis est: ergo cum per illam comprehendat omnes prædestinatos, quia ad omnes se extendit eius providentia, & præscientia, utique immutabiliter eos tenet apud se, licet ipsi in tempore, quo versantur, mutabiliter sint in se, sicut & aliæ creaturæ contingentes. Vnde patet ignorantiam aliquorum esse vehementem, qui ex hac immutabilitate prædestinationis in quandam desperationem aut socordiam impelluntur, quia si iam, inquit, sum prædestinatus, aut reprobatus, sic ero quidquid me eruiem. Stultissima cogitatio: idem enim possent dicere de quacunque re, quæ in hoc mundo contingenter accidit, ut quod fructus terræ abundanter nascantur, vel destruantur, quod hoc animal nunc moriatur, vel viuatur, moveatur, vel quiescat, & quacunque alia accidunt in hoc mundo, omnia ab æterno, & immutabiliter sunt præordinata à Deo: ergo non debemus curare, quia sic accident; stulta consequentia; cum hoc ipsum quod est nos curare vel relinquere, prouisum & præuisum sit ab æterno, & per hæc media accidunt res vel non accidunt; media autem illa etiam prouisa à Deo sunt. Sed hæc cogitatio infirmarum mentium est, quia non cogitatur quod Deus est æternus, sed effectus eius sunt temporales; & sic bene stat quod providentia, & præscientia eius de rebus sit æterna, atque aded immutabilis, sed omnes effectus prouisi sint in se mutabiles, & temporales; & hæc tota mutabilitas apud Deum immutabiliter, & æternaliter videtur, & prouidetur. Nec etiam Deus prouidit aut præuidit quod infallibiliter hæc fiant absolute, & nullo habito respectu, sed per talia media, & tali vel tali modo, quia & modus, & media à Deo sunt; & ided est infallibilis illa providentia, quia vniuersalis, & dat omnia, non quia tollit nostram contingentiam. Vnde si me eruiem, & operer, sicut Deus iubet, consequar salutem, quia sic prædestinatur, & prouidetur à Deo ab æterno, ut hoc faciam. Quod si lædit immutabilitas prædestinationis mutabilitatem nostram: ergo dicent quod Deum esse æternum lædit temporalitatem, & mutabilitatem creaturarum. Quid stultius?

In fundamento autem suo peius errabant Massilienses, quia ided prædestinatorum numerum dicebant certum non esse, ne locum apud infideles, & negligentes cohortantium incitamenta non habeant: ita enim posset unusquisque ad correctionem aut ad profectum vocari, si se sciat sua diligentia bonum esse posse, ut refert Prosper ubi supra. Quod est planè enacuare gratiam Dei, quasi nos ex nobis, seu ex nostra diligentia, & viribus

viribus, boni esse possimus, & adhortationibus sanctis acquiescere, & non ex gratia Dei, cum Ecclesiastes 7. scriptum sit, *Considera quod nemo potest corrigere, quem ille despexerit*, quod & latissime multis Scripturæ authoritatibus Aug. probat *totolib. de correp. & gratia*.

Iam verò supposita Catholica fide de certitudine, & immutabilitate prædestinatorum, & reprobatorum restabat difficultas, an certitudo ista, & infallibilitas cum sit infallibilitas cuiusdam decreti, & providentiæ diuinæ sumatur in vi causalitatis, & efficaciæ intrinsicæ ipsius decreti ad causandum vel permittendum ea, quæ per tale decretum attingit, & ordinat, an in vi solius præscientiæ, quia videlicet Deus ante omnem efficaciam, & causalitatem decreti sui præsciat per scientiam mediam id quod factura est libera voluntas, & tunc supposita ista præscientia decernat illud ipsum facere quod præsciuit, & sic tale decretum sit efficax, & certum ut innixum illi præscientiæ. Sed de hoc latissime egimus *suprà disput. 3. & 5. & 7.* Nec est aliquid quod addamus in præsentia.

Eodem modo cognoscitur conciliatio libertatis nostræ cum certitudine, & efficacia prædestinationis: nec enim indiget aliquo conciliante per præuisionem eius quod libertas nostra factura est, sed ipsamet efficacia diuina, quæ sua vniuersalissima ratione, & causalitate non solum habet esse principium, & causare substantiam actus nostri, sed etiam modum, indifferentiamque libertatis ut *suprà disp. 5. & 7.* satis superque ex D. Aug. & Thoma tradidimus. Vnde cum sit radix, & principium etiam libertatis ipsius actus, non tollit libertatem, sed dat, ut *prædictis locis* latè docuimus.

Quæres: Cur ergo in reprobatione dicuntur reprobi præsciti, & sola præscientia ibi operatur, si decretum, & providentia reprobatiua est ex sua natura ab intrinseco efficax?

Resp. quod in reprobatione licet Deus decreto suo præparet, & inferat pœnam, non tamen præparat, vel disponit demerita quæ sunt peccata, nec illa causat aut prædefinit, sed tantum permittit. Et ided quia reprobatio respicit mala propter quæ infert damnationem, dicuntur reprobi solum præsciti, quia eorum demerita non causantur, sed præsciuntur; & sic non præparantur, sicut merita bonorum; istæ autem providentiæ, quia versantur circa media, maxime denominantur ab eo quod præparatur in illis, vel non præparatur, sed præsciuntur. Deus tamen permissionem ipsam decernit in reprobis, licet non ipsum peccatum. Videatur D. Thom. *hic art. 3. ad 2. & q. 6. de verit. art. 1. ad 10. & in 1. dist. 41.*

De quantitate, seu numero electorum præ reprobis aliqui solliciti sunt, an sit maior numerus prædestinatorum, quam reprobatorum. Quæ quidem difficultas, loquendo de hominibus (nam de Angelis maiorem partem saluatam esse videtur certius) & facile soluitur in genere loquendo, quod ex toto hominum genere pauciores sunt qui saluantur: *Multi enim sunt vocati; pauci vero electi*, Matth. 20. & iterum Matth. 7. *Quam angusta porta & arcta est via quæ ducit ad vitam, & pauci sunt qui inueniunt eam*. Et Angelus ad Esdras, 4. *Esdras 8.* (licet liber non sit canonicus.) *Hoc sæculum fecit Deus propter multos, futurum propter paucos*. Quomodo autem interrogabis terram, & dicet tibi, quoniam dabit terram multam, magis unde fiat fictile, paruum autem pulueris unde aurum fit, sic & actus præsentis sæculi. *Multi quidem creati sunt, pauci autem saluabuntur*. Constat tamen electos dici paucos non absolute, sed comparative ad numero-

Ioan. à S. Thoma in 1. part. D. Thomæ.

rum reprobatorum. Nam absolute multos esse, ipsa Scriptura aperte docet Matth. 8. *Dico vobis, quod multi venient ab Oriente, & Occidente, & recumbent cum Abraham, & Isaac, & Iacob*. Et Apocalyp. 7. *Vidi turbam magnam, quam dinumerare nemo poterat ex omnibus gentibus stantes ante thronum*. Et de electis intelligi illud Psalm. 146. *Qui numerat multitudinem stellarum*, docet Aug. *super prædictum Psalmum*; *Manifestum, inquit, est, fratres, aliquid velle Deum intelligere nos in eo quod ait: Qui numerat multitudinem stellarum, & omnibus eis nomina vocat, omnes secum regnatos, omnes aggregandos corpori Vniuersi sui*. Itaque hæc duo certa habemus ex Scripturis, scilicet plures esse ex hominibus qui damnantur, quam qui saluantur: prædestinatos etiam in se multos esse, sed respectu reprobatorum paucos. Quo sensu Scripturæ diuersa testimonia conciliat August. *lib. 3. contra Cresconium cap. 66. tomo 7.*

Cæterum aliqui vltius ad particularia descendunt, ut multitudinem electorum aliquo modo metiri possint. Et quidam comparant ad Angelos, videturque aliquibus, tot esse saluandos, quot Angeli ceciderunt, ut eorum ruinæ reparentur. Quidam, tot esse saluandos, quot Angeli remanserunt; ut sint homines sicut Angeli in cælo, & *constituatur terminus populorum iuxta numerum filiorum Dei*, Deuter. 32. iuxta versionem LXX. Alij, tot esse saluandos quot Angeli sunt creati: nam etiam si nulli Angeli cecidissent, homines saluaretur. Quas opiniones refert D. Thom. *hic art. 7.* & nulli acquiescit, quia omnes dubio fundamento nituntur. Recentiores Doctores relicta comparatione cum Angelis, de numero ipsorum hominum inter se disputant, an ex ipsis fidelibus plures saluentur quam damnentur: (nam includendo infideles, & hæreticos, totum genus humanum includitur; & sic plures sunt qui pereunt) & multi censent maiorem partem dampnari etiam ex his qui in Ecclesia sunt. Videatur Maldonatus in *cap. 22. Matth. versu 14.* Lyra, & Interlinealis citati à Vasq. *super a. 7. huius q. & Molina super eundem art.* Imò Caiet. *super cap. 23. Matth.* exponens parabolam Virginum, sentit ex his fidelibus qui profitentur vacare bonis operibus, & Deum ut sponsum expectant, dimidiam partem perdi. Alij in partem mitiorem propendent, & plures ex Catholicis saluari putant, præsertim includendo paruulos, qui cum Baptismo decedunt, de quo videri potest P. Suarez *de Prædestin. lib. 6. c. 3.* & Granados *tract. 12. disp. 6.* qui plures citat, & Alarcon *tract. 4. disp. 6. c. 2.* & Ruiz *disput. 54. de prædestinatione*, qui addit ex adultis fidelibus non plures saluari, inter hos autem plures fœminas esse prædestinatas, quam viros.

Sed *Quis hominum scire potest consilium Dei, aut quis consiliarius eius fuit?* ut ait Apostolus, præsertim in mysterio omnium secretissimo, & occultissimo. Accipiamus ergo sobriam S. Thomæ sententiam *hic art. 7.* qui cum Ecclesia sentiens: *Melius inquit: dicitur, quod soli Deo est cognitus numerus electorum in superna felicitate locandus*. Certè quæstiones istas Dominus ipse amputauit, nec sollicitos de illarum solutione nos esse voluit, cum interroganti cuidam, Luc. 13. *Domine si pauci sunt, qui saluantur?* respondit ipse Dominus: *Contendite intrare per angustam portam, quia multi, dico vobis, querunt intrare, & non poterunt*. Ecce quod ipsa Veritatis responsio collimat, nempe noluit ipsi difficultati respondere, sed animos, & radici, unde plerumque talium quæstionum nascitur disputatio. Volumus enim solatium

Nn 3 aliquod

426 Quæst. XXV. De diuina Potentia.

aliquid captare, & nostræ desidiæ aliquantulum obsecundare, dum ex vna parte videntes maiorem partem fidelium non admodum asperam vitam ducere, & ex alia parte asserendo maiorem partem fidelium saluari, aliqualem fiduciam capiamus, quod etsi negligentiores simus, nec admodum in nos seueri, sed etsi aliquando consentiamus delectationibus sæculi frui, adhuc saluabimur, & poenitiæ locus dabitur. Domipus autem radices has præscindere cupiens, & omnem à nobis excutere socordiam ac negligentiam, erexit oculos nostros ad difficultatem adipiscendæ salutis:

Contendite, inquit, intrare per angustam portam: quasi dicat; Nolite solatium quærere pro vestra incuria, & desidia, cogitando quodd plures saluantur, etiam mediocri cura, & studio, sed alacres estote, & valde solliciti ad contendendum intrare per angustam portam, *quia multi querent intrare, & non poterunt*, id est, quia etiam ex his qui non omnino torpescunt, & iacent in suis vitiis, sed etiam solliciti sunt, & quærunt intrare in cælum, non poterunt. Ergo nihil de pluralitate electorum anxie in particulari quæramus, sed per electorum semitas ambulare solliciti simus.



Q V Æ S T I O XXV.

De Diuina Potentia.

S V M M A T E X T V S.



ECTO ordine S. Thom. post explicata hucusque ea attributa quæ pertinent ad voluntatem, & intellectum in Deo, & important actus immanentes, nunc transit ad explicandam potentiam executiuam Dei, quæ explicatur per actionem transeuntem in effectu.

Circa attributum ergo omnipotentia tria facit D. Thom. Nam primo art. expedit quæstionem, an est, ostendendo dari in Deo potentiam actiuam in effectus. Secundo & tertio articulo explicat qualis sit, nempe in artic. 2. quodd sit infinita, & in 3. quodd sit omnipotens: sunt enim ista duo

difficultates distinctæ, quia infinitas potentia in 2. articulo sumitur pro infinitate intensiua, vt bene notat Caiet. in art. 2. In tertio pro extensiua, ostendendo quodd circa omnia possibilia versatur, non comparatiue ad hanc vel illam potentiam, sed absolute circa omnia quæ quoquo modo possibilia sunt. Denique in reliquis tribus articulis ostendit quomodo aliqua possit, vel non possit Deus quæ specialem difficultatem habent, vt quodd præterita non fuerint, quodd aliqua possit facere quæ non facit, quodd possit meliora quàm fecit.

Igitur in art. 1. ostendit dari in Deo potentiam non passiuam, sed actiuam, nam Deus est summus, & purus actus. Vnde nulla potentialitas ei conuenit in qua fundatur potentia passiuam, sed conuenit summa actualitas, in qua fundatur potentia actiuam.

In art. secundo ostendit hanc potentiam esse infinitam, quia essentia ipsa, & natura in qua fundatur, infinita est in actualitate: ergo & in actiuitate.

In tertio ostendit quodd Deus est omnipotens, id est, omnia possibilia amplectitur, non solum omnia comparatiue ad aliquam potentiam creatam, quia omnem creatam potentiam ipse excedit, nec comparatiue ad suam potentiam: sic enim esset circulus, quodd illa essent possibilia in quæ potest Deus, & in illa potest, quæ sunt possibilia: sed potest in omnia quæ sunt possibilia absolute, id est ex ipsis terminis entitatis suæ, ex quibus non habent repugnantiam, nec implicationem contradictionis.

In art. 4. ostendit non posse Deum facere quodd præterita non fuerint, quia implicat contradictionem: si enim non fuerint, hoc ipso non sunt præterita.

In art. 5. ostendit posse Deum multa facere, quæ non fuit, quia hæc quæ facit sunt determinata per ordinem sapientia suæ, quæ operatur iuxta finem, quem vult, & determinat sibi, non autem operatur ex necessitate natura omnia quæ potest.

In art. 6. ostendit quodd Deus potest facere meliora quàm ea quæ fecit ex parte rerum factarum, non ex parte ordinis, & modi, quo facit, aut finis propter quem facit.

Q V Æ S T I O



QVÆSTIO XXVI.

De Dei Beatitudine.




X omnibus perfectionibus diuinis hucusque explicatis colligitur, & coalescit, Deum summè esse perfectum in suo esse, & in suo operari; & sic esse summè felicem, & beatum, quia beatitudo in perfectione operationis consistit.

Quatuor ergo tradit. Primum in art. 1. quòd Deo competit beatitudo, quia beatitudo est perfectum bonum intellectualis naturæ, Deus autem excellentissimè, & perfectissimè habet intellectualis naturæ bonum.

In art. 2. ostendit quòd hæc beatitudo attribuenda est Deo secundum intellectum, quia perfectissima operatio naturæ intellectualis est secundum intellectum: Deus autem habet infinitam perfectionem intelligendi: suum enim esse est suum intelligere; & sic alij beati per similitudinem ad eius beatitudinem beati sunt.

In art. 3. ostendit quòd Deus non solum est beatus, sed est beatitudo aliorum, non formalis pro actu beatitudinis: hic enim est ipsum intelligere beati quod est actus creatus, sed est beatitudo obiectiua, quia ex hoc aliquis est beatus, quòd Deum attingit.

In art. 4. ostendit in Dei beatitudine omnem aliam beatitudinem includi eminentissimè, quia in eo est omnis perfectio cuiuscumque beatitudinis.



DISPUTATIO XI.

De Omnipotentia Dei.

ARTICVLVS I.

Quid sit omnipotentia, quid possibilitas creatura, & quæ connexio inter utrumque.



EVm omnipotentem esse absoluta fides est, & fidei articulus. Non defuisse tamen, qui Dei potentiam diminuerint, & decurtauerint, graues Authores referunt. Nam M. sententiarum in 1. dist. 43. aliquos suppresso nomine refert dixisse, Deum non posse facere alia quam quæ nunc facit, quòd certè erat tollere ab ipso omnipotentiam, cum multa non fecerit, quæ tamen potuit facere: Christus enim petiuit tanquam possibile ipsi Patri, quòd transiret ab eo calix, tamen id factum non est. Tenuisse hunc errorem Abaylardum, aliqui referunt, Thomas Vvaldensis tomo 1. lib. 1. art. 1. cap. 10. Castro de hæresibus, verbo Deus, hæresis 4. & refert D. Thomam eum errorem attribuere Abaylaro. Non citat ipse locum D. Thom. sed in qu. 1. de potentia art. 5. S. Thom. dicit imponi hunc errorem Magistro Petro Almalareo. Qui an sit idem cum Abaylaro, ego ignoro. Iterum verò idè Castro verbo, Futurum contingens, eandem hæresim tribuit Abaylaro, Vaitclessio, & Luthero; sed Lutherus, & VVitclessus ex diuerso motiuo ducuntur quàm Abaylardus, vel Almalareus à D. Thom. citatus: nam illi ex eo ducebantur, quòd omnia necessitate absoluta existimabant euenire, unde fit consequens, solum ea posse fieri, quæ de facto sunt. Et idè in Concilio Constantensi inter articulos Vvitclessi damnatos 27. sic habet: Om-

nia de necessitate absoluta eueniunt. Et hic error ut dicit S. Thom. citato loco, fuit olim quorundam Philosophorum, qui dicebant Deum agere ex necessitate naturæ. Vnde sequebatur, eum non posse agere nisi quæ de facto agit. Almalareus autem ducebatur alio motiuo, scil. quia Deus non potest præterire ordinem suæ sapientiæ, & iustitiæ, & cum secundum illum ordinem res modò fiant, non potest ab illo Deus recedere. Quasi non possit pluribus, & diuersis viis, diuersus ordo sapientiæ seruari: At verò de Abaylaro non inuenio neque apud S. Bernardum qui eius erroris capitula refutauit epist. 190. neque apud Concilium Senonense tempore Innocentij II. anno 1140. vbi damnata est eius doctrina, neque in epistola Innocentij, vbi confirmata est damnatio Concilij, expressè dixisse Deum non posse aliud facere quàm facit. Sed inuenio ipsum sic attribuisse Deo Patri omnipotentiam, quòd eam denegauerit Filio, & Spiritui S. affirmans in Patre esse plenam potentiam, in Filio quandam potentiam, seu semipotentiam, in Spiritu S. nullam potentiam. Vnde consequens fit quòd non absolute negauerit Deum habere omnipotentiam, & posse plura facere, quàm modò facit, sed non omni personæ hoc conuenire. De eius autem motiuo ponendi, & diuidendi sic potentiam, & semipotentiam, & nullam potentiam, dicemus infr. seq. disp. art. 1. tractando de eius errore circa mysterium Trinitatis, ad eum enim locum directè pertinet.

Fides autem Catholica ita firmiter omnipotentiam Deo attribuit, quòd in ipso initio Symboli fidei quòd in omnium ore habetur, ab isto attributo incipiat, dum dicit: Credo in unum Deum Patrem omnipotentem. Et passim in Scriptura omnipotentia hæc attribuitur Deo, Genes. 17. Ego Deus omnipotens, & 35. Ego Deus omnipotens, cresce, & multiplicare. Exodi 15. Omnipotens nomen eius. Esther 13. Domine Rex omnipotens, in ditione enim tua cuncta sunt posita. Ecclesiastici 43. Gloriantes ad quid valebimus, ipse enim omnipotens super omnia opera sua. Terribilis Dominus, & magnus vehementer, & mirabilis potentia ipse. Apocalyp. 4. Dominus Deus

omnipotens qui erat, & qui est, & qui venturus est, &c. 19. Quoniam regnavit Dominus Deus noster omnipotens. Ut omittam innumera alia loca in Iob, in Machabæis, & aliis plurimis, ubi ista Dei omnipotentia perpetuo prædicatur.

3 Quod verò ita Deus sit omnipotens, quod possit plura facere quam modo facit, non est difficile ex Scriptura ostendere: nam in primis, ut dixit Angelus ad Virginem Luc. 1. *Non erit impossibile apud Deum omne verbum*: constat autem multa esse verba de his quæ possent esse, & de facto non sunt, sicut sunt omnia futura conditionata, quæ passim in Scriptura narrantur, & de facto non fuerunt, & sicut est illud Matth. 26. *An putas, quia non possum rogare Patrem, & exhibebit mihi modò plusquam duodecim legiones Angelorum?* Et tamen de facto illæ non fuerunt exhibitæ. Et Christus Dominus oravit ad Patrem ut calicem transferret à se, quia omnia, inquit, tibi possibilia sunt, nec tamen calix ille translatus est. Et Baruch 3. dicitur, *Si in via Dei ambulasses, habitasses utique in pace sempiterna*: quæ tamen de facto non sunt posita in rerum natura; sicut, & illud quod Samuël dixit ad Saül, 1. Reg. 13. *Quod si non fecisses, iam nunc præparasset Dominus regnum tuum super Israël in sempiternum, sed nequaquam regnum tuum ultra consurget*: ergo aliquid potuit Deus facere, quod de facto non fecit. Denique Sapient. 11. dicitur: *Non enim impossibilis erat omnipotens manus tua, quæ creavit orbem terrarum ex materia inuisa, immittere illis multitudinem vrsorum, aut audaces leones, aut novi generis iraplenas ignotas bestias, &c.* Et infra. *Multum enim valere, tibi supererat semper, & virtuti brachij tui quis resistet?* Ergo non est dubium quin possit Deus plura facere, quam de facto facit, & quod sit omnipotens.

Possibilitas creaturarum unde sumatur?

4 Cæterum licet ita constans sit, & stabilita per fidem omnipotentia Dei, tamen, ut inquit S. Thom. hic art. 3. rationem omnipotentia assignare, videtur difficile, non quidem ex parte ipsius Dei, quia cum sit infinitæ perfectionis, etiam eius virtus, & potentia infinita esse debet, & ad omnia se extendere: si enim ad aliquid non extenderetur, in illo minùs perfectionis haberet. Sed tota difficultas est ex parte ipsius obiecti circa quod versatur omnipotentia: Cum enim potentia dicatur ad possibile, & omnipotentia ad omne possibile, dubium est quid sit ista possibilitas, & in quo consistat. Et difficultas est in duobus.

Primum, an ista possibilitas sit aliquod prædicatum intrinsecum, & reale in ipsis creaturis, & antecedens ipsam potentiam Dei, & præsuppositum ab ipsa, sicut quælibet potentia supponit suum obiectum.

Secundum, an dicat talem connexionem, & essentialem ordinem potentia diuina ad hanc possibilitatem, ut destructa possibilitate alicuius creaturæ, destrueretur omnipotentia Dei. Ex quibus colligemus quomodo dicatur omnipotentia Dei terminari ad non entia, & quomodo colligi possit dari in Deo omnipotentiam, seu infinitam potentiam.

5 De his difficultatibus aliqua attigimus præced. tom. præsertim disp. 48. art. 1. & disp. 15. art. 3. sed breuiter, & per trāsennam, quantum pro aliis difficultatibus ibi tractandis supponi opus erat. Nunc autem supponendo quæ ibi distinximus de possibilitate rerum quantum ad statum, & quantum ad entitatem, seu obiectum id quod modo in difficul-

tatem vertitur, est, an possibilitas illa intrinseca quæ aliquid constituitur obiectum omnipotentia, & discernitur ab ente ficto, aut ab implicatione contradictionis, antecedit omnipotentiam, an subsequatur, & à quo attributo proveniat. Et supponimus distinctionem illam allatam à D. Thom. in præsent. art. 3. ex Arist. in 5. met. quod possibile potest sumi vel relatiuè seu comparative ad aliquam potentiam, vel absolute, & in se. Relatiuè ad potentiam dicitur aliquid possibile, ex eo quod alicui potentia subicitur; & sic supponit ipsam potentiam, & ab ea accipit denominationem extrinsecam, ad eamque habet relationem subiectionis, & ab aliis vocatur hæc possibilitas physica. Absolute dicitur aliquid possibile ex eo quod in se, & ex habitudine terminorum non habet repugnantiam ut sit; & dicitur ab aliis possibilitas logica, quia non consideratur ista possibilitas secundum subiectionem ad potentiam, & influxum eius physicum, sed secundum habitudinem terminorum per modum non repugnantia, quæ est quid rationis. Et non explicamus hoc per habitudinem, seu relationem ad esse, quia hæc tendentia ad esse dependet ab efficiente dirigente per influxum suum ad existentiam, sed explicatur per capacitatem ad esse, & capacitas quædam non repugnantia est ad id cuius est capax. Verumque modum possibilitatis explicauimus disp. illa 18. art. 1. per hoc quod possibilitas rerum includit non repugnantiam intrinsecam ut sit, quæ fundamentaliter est aliquid reale, & denominationem extrinsecam à potentia, respectu cuius possibilis est.

His suppositis quatuor sunt sententiæ circa possibilitatem creaturarum.

6 Prima, quod possibilitas ista in creaturis cum non sit aliquid reale in rerum natura, quia ante existentiam nihil reale datur, non est aliud, quam denominatio quædam extrinseca proveniens ab ipsa potentia Dei, sicque aliquid dicitur possibile, quia Deus potest illud producere, sicut dicitur visum ex visione ipsius videntis, quod est sumere possibile solum relatiuè, & comparative ad potentiam. Ita attribuitur Gabrieli in 1. dist. 43. q. 2.

7 Secunda sententia docet possibilitatem esse prædicatum intrinsecum ipsarum creaturarum, non minùs quam ipsa entitas, & veritas, aliique gradus, & prædicata quibus constituitur: in hoc enim maxime differtens reale, & verum ab ante ficto vel chimerico, quod hoc est impossibile, & incapax productionis, illud possibile, & capax existendi: hæc ergo capacitas aliquid verum, reale, & intrinsecum est. Hæc est communior sententia inter Thomistas, & alios, videturque esse S. Thomæ, qui in præsent. art. 3. docet possibilitatem creaturarum absolutam esse id quod habet rationem entis; pro eadem sententia plures citat Basilium Pontius tom. 2. variarum disput. q. 8. scholasticæ c. 8. Caietanum, Sotum, Enricum, Liqueum, Valquez, qui sequitur Enricum disp. 104. c. 4. Granados tract. de diuina potentia disp. 7. sect. 2. Eandem sequuntur, qui tenent possibilitatem logicam esse ex Deo in genere causæ exemplaris aut finalis, quod non stat, nisi sit aliquid reale, & verum; quam sententiam tenet Aureolus in 1. dist. 43. artic. 3. sequitur Granados, ubi supra, Gonzalez hic art. 3. in relatione textus, conclus. 6. remittitque se ad disput. 37. sect. 2. ubi vix id attingit num. 29.

8 Tertia sententia est Scoti in 1. dist. 43. quæst. unica, §. Aliiter dico, ubi sentit possibilitatem creaturarum, (scilicet absolutam seu logicam, non denominationem antecedere potentiam diuinam executiuam, & provenire ab intellectu diuino cognoscente, quatenus

quatenus intelligendo creaturas reddit illas productas in esse quodam intelligibili, quod ipse vocat esse diminutum, & non est aliud quam res in esse cogniti, & ex hoc redduntur res illæ possibiles, id est producibiles in esse existentiae. Fortassis Scotus non voluit aliud quam res esse possibiles, ut ideabiles, seu ut subiectæ ideis, ex quo postea subiiciuntur productioni.

9 Quarta sententia docet possibilitatem logicam seu absolutam non esse aliquid reale derivatum à Deo per modum influxus vel efficientiae: hoc enim repugnat, cum esse factibile, seu possibile antecedit factionem, & efficientiam, sed derivatum à Deo exemplariter, seu idealiter, vel per quandam sequelam, & consequentiam ex ipso posse actiuo, seu actiuitate Dei emanante. In hoc autem diuiduntur Authores huius sententiae, qui censent possibilitatem logicam antecedere conceptum omnipotentiae. Nam quidam dicunt causari ab ideis diuinis exemplariter in quantum exemplar habet rationem causae formalis extrinsecæ. Ita Aureolus *ubi supra*, & sequitur Granados, & Gonzales citati. Alij censent derivari possibilitatem logicam ab ipso posse actiuo Dei, ita quod Deus prius habeat in se posse actiuum omnino absolutum, & perfectum, & inde sequatur per locum intrinsecum possibile passuum creaturarum, quod est possibile logicum. Quo autem genere causalitatis sequatur, non explicant. Ita Henricus *quodlib. 6. art. 3.* quam sequitur Vasquez *hic disp. 104. cap. 4. num. 12.* & videtur sequi Basilus Pontius *ubi supra*, dum inquit, possibilitatem hanc non esse per actuale effluxum à Deo, sed ex eo quod potest res producere. Et hi Authores si loquantur de posse actiuo proximo, & formali, quod est attributum omnipotentiae, frustra existimant possibilitatem creaturarum logicam antecedere ipsam potentiam, sicut obiectum eius, nec videntur discedere à prima sententia, quæ dicit possibilitatem esse denominationem ortam à potentia: nec enim sequitur hæc possibilitas à potentia effluxiue: ergo tantum denominatione. Si autem illud posse actiuum sumitur non pro ipsa potentia, & attributo formali, sed pro potentia radicali, quæ est ipsa essentia diuina, ut participabilis à creaturis, coincidit cum priori sententia de possibilitate ut causata ab ideis, vel non explicat modum quo causatur possibilitas, & derivatur à Deo, quia præter effluxum rerum à Deo per modum efficientiae, non est alius, nisi vel per denominationem extrinsecam, seu per modum consequentiae, aut per modum causae formalis extrinsecæ, & imitabilitatis.

10 Sit conclusio. Secundum mentem D. Thom. possibilitas absoluta, seu logica ratione cuius aliquid est obiectum proprium omnipotentiae, consistit in habitudine terminorum, qua prædicatum non repugnat subiecto; & hæc habitudo terminorum præsupponitur ad omnipotentiam, ut est vis executiua, & attributum distinctum ab aliis, sed consequitur ad ipsam omnipotentiam radicalem, quæ est ipsum esse, seu essentia diuina ut participabilis, & imitabilis est à creaturis, sicque consequitur ad ideas diuinas per necessariam consequentiam in ratione rei ideabilis, & participabilis, nec inuenitur realiter actu in creaturis ante earum productionem, sed in potentia ipsa Creatoris, solum autem est in creaturis obiectiue, & in potentia. Tres partes continet conclusio.

Prima quod ista possibilitas absoluta, & logica consistat in habitudine terminorum.

Secunda quod ista habitudo sit participata per necessariam consequentiam ex essentia diuina ut

imitabili, seu ideis diuinis antecederet ad potentiam ut executiuam, & ut attributum.

Tertia quod realiter actu non inueniatur ista possibilitas, nisi in ipsa potentia Creatoris, & in essentia diuina ut imitabili, & participabili, & continente creaturas. In ipsis autem creaturis non inuenitur actu, sed in potentia obiectiua. Et per has tres partes explicamus etiam ea, quæ de possibilitate creaturarum diximus *preced. tomo disput. 18. artic. 1.*

Prima pars constat ex verbis ipsis S. Thom. *hic art. 3.* Dicitur, inquit, *aliquid possibile vel impossibile absolute ex habitudine terminorum. Possibile quidem, quia prædicatum non repugnat subiecto, ut Sortem sedere. Impossibile autem absolute, quia prædicatum repugnat subiecto, ut hominem esse asinum.* Idem est autem prædicatum aliquod repugnare subiecto, atque implicare contradictionem, quod tale subiectum possit esse cum tali prædicato, & implicatio contradictionis est aliquid simul esse, & non esse, quæ est prima radix, & origo impossibilitatis, eo quod tanquam primum principium in metaphysica habetur ipso lumine naturali notum; *Impossibile est idem simul esse, & non esse*, quod principium est ita per se notum, quod si negetur, nullo modo probari potest, sed ex ipsis terminis notum est, quia quod ponitur per esse, tollitur per non esse, & sic simul esse, & non esse, est poni, & tolli simul, quod ex ipsis terminis apparet impossibile. Si autem prædicatum repugnat subiecto, opponitur ei, & destruit illud; & sic impossibile est poni, quia si ponitur, erit, & si repugnat, non erit, quia repugnans destruit id cui repugnat, alioquin non repugnaret si simul cum illo esset. Igitur recte dicit D. Thom. totam rationem, & originem impossibilitatis nasci ex repugnantia terminorum, ita quod vnus terminus destruat alterum, seu illi repugnet, & possibilitatem nasci ex opposito, scilicet ex non repugnantia terminorum: vbi enim termini non repugnant, simul esse possunt: hoc enim est repugnare: hæc est autem possibilitas, esse posse: ergo vbi non est repugnantia terminorum, est possibilitas, quia esse possunt.

Confir. ex D. Thom. *qu. 1. de potentia art. 3.* quia omne quod est possibile, aut est possibile ut sit, vel ut non sit: omnis enim actio directe & per se ponit aliquid in esse, quia producit illud, ex consequenti autem potest ponere in non esse, in quantum destruit aliquid, & corrumpit; & sic cum omnis terminus actionis, aut sit producendo, aut ex consequenti non esse corrumpendo, sit, quod omne possibile aut est possibile esse tanquam terminus per se generationis, & productionis, aut possibile non esse tanquam terminus corruptionis, & destructionis, qui ex consequenti sequitur ad actionem. Si autem prædicatum repugnat subiecto, ita quod eius positio inuoluit implicationem quod simul sit affirmatio, & negatio, neque principaliter, neque ex consequenti potest esse terminus alicuius: ergo non est factibile, nec subiicibile alicui agenti, quod est non esse possibile. Non est principalis terminus, quia hoc est aliquod esse, & si simul non est ob repugnantiam prædicati, tollitur hoc esse per non esse. Nec est terminus ex consequenti, quia non esse tollitur per ipsum esse; & sic nec est terminus actionis principaliter, neque ex consequenti: ergo nullo modo, & sic est impossibilis. Ergo e conuerso ratio possibilis sumitur ex eo quod non repugnet prædicatum subiecto, sed determinate habeat esse, vel non esse, non vtrumque simul, quod est non implicare contradictionem: sic enim potest esse terminus alicuius actionis:

nis : ergo alicuius potentie : ergo est possibile.

12 Secunda pars conclusionis deducitur ex duobus locis D. Thom. Primus est in hoc art. 3. ubi inquit, quod *Esse diuinum super quod fundatur ratio diuinæ potentie, est esse infinitum, non limitatum ad aliquod genus entis, sed præhabens in se totius esse perfectionem. Vnde quidquid potest habere rationem entis, continetur sub possibilibus absolutis, respectu quorum Deus dicitur omnipotens.* Vbi aperte loquitur D. Thom. de eo quod se habet antecederet ad conceptum omnipotentie, ut attributum est, quia loquitur de esse diuino super quod fundatur ratio diuinæ potentie; essentia autem ut fundans diuinam potentiam, non est attributum potentie, sed antecederet se habens, utpote fundamentum potentie, & radicaliter potentia, non formaliter. Et quia hoc esse diuinum continet, seu præhabet in se perfectionem totius esse, quidquid potest habere rationem entis, habet possibilitatem absolutam. Quæ causalis necessariam consequentiam importat: nam si ex hoc continetur aliquid sub ratione possibilis, quia essentia Dei præhabet in se perfectionem totius esse, manifestè sequitur ipsa possibilitas, seu ratio entis possibilis necessariò ex illa continentia Dei, quia hæc ante omnem liberam actionem continet omnem perfectionem entis. Et ad hoc deseruit secundus locus D. Thom. in qu. 3. de verit. art. 6. ubi inquit quod *Idea diuina ad ea qua aliquo tempore exitura sunt, determinatur ex proposito diuinæ voluntatis ad ea producenda, non autem ad ea que nec sunt, nec erunt, nec fuerant, quæ utique sunt purè possibilis.* Et de his subdit *solutione ad 4. quod Idea que non sunt determinata ad producendum de facto, non sunt ordinata ad hoc ut secundum eas aliquid fiat, sed ad hoc quod secundum eas aliquid fieri possit.* Ergo ex ordinatione idearum antecederet ad determinationem voluntatis aliquid fieri potest, hoc autem est esse possibile, quia possibile est quod fieri potest: ergo ista possibilitas derivatur ex ordinatione idearum: sed id quod antecedit liberam determinationem voluntatis diuinæ solum per necessariam consequentiam habetur, quia ante liberam Dei operationem non datur causalitas libera: ergo per derivationem, & consequentiam necessariam possibilitas creaturæ participatur à Deo, quia antecederet ad omnem liberam determinationem. Vnde optimè dixit ipse D. Thom. in hac 1. p. qu. 15. art. 4. quod *Idea secundum opinionem Platonis, & erat principium generationis, & principium cognitionis, & ad utrumque se habet idea in Deo.* Dicitur autem principium generationis quatenus per influxum, & actuale actionem efficit, principium autem cognitionis, quatenus est principium veritatis, circa quæ versatur cognitio. Et secundum quod est principium generationis vocatur à D. Th. exemplar in actu, quatenus non solum formaliter, sed etiam effectiue procedit: utrumque enim genus causæ pertinet ad ideam ut exemplar in exercitio practicum est. Ut autem est principium cognoscendi, vocatur ratio, quia sic consideratur solum secundum id quod formale, & specificatum est, & hoc pertinet ad rationem rei, seu quidditatis.

13 Et fundamentum huius secundæ partis conclusionis sumitur ex dictis, quia omnia prædicata essentialia, eorumque connexio, & constructio quod totum pertinet ad quidditatem, & veritatem intrinsecam rei, conuenit illi ex participatione diuinæ essentiae; siquidè vnaquæque realis entitas, & quidditas creata habet suos limites, & terminos, distinctionemque ab alia ex diuersa imitabilitate, & participatione primi entis: vnaquæque enim res secundum speciem, & quidditatem suam habet di-

uersam nobilitatem, & perfectionem, & diuersam imitationem Dei, quæ perfectio maior, & nobilitas ex maiori participatione, & accessu ad Deum desumitur: ergo essentialia prædicata, & connexio, & constructio eorum ex participatione Dei desumitur. Sed hoc ipso quod alicui conuenit aliquod prædicatum verum, & reale ex participatione, & derivatione primi entis, continetur sub ratione entis creabilis, & factibilis, & capacis ad existendum, siquidem in hoc distinguitur intrinsecè, & essentialiter ens verum, & reale ab ente ficto, & chimerico, quod illud est capax existentie, & factibilitatis, non istud: ergo ipsa possibilitas seu capacitas existendi, sicut, & ipsa realitas, & veritas est ex derivatione, & participatione diuina, ex qua reliqua omnia prædicata, & eorum connexio conuenit alicui: nam etiam possibilitas ipsa, & capacitas necessariò realitati, & veritati entis connectitur, quia per hoc distinguitur ab ente ficto, & chimerico.

14 Quod verò per necessariam consequentiam participetur à Deo ista possibilitas, constat: tum quia antecedit omnem actum liberum Dei, & est independens ab illo: sine enim Deus velit producere, siue non velit producere aliquam entitatem, semper manet res illa possibilis, & connexio prædicatorum essentialium vera, & distinctio realis entitatis à ficta, constans: ergo si id habet per participationem à Deo, & independentem à libera voluntate, per necessariam participationem habebit: tum etiam, quia Deum præhabere in se omnem perfectionem entis est necessarium: ergo, & tale ens esse possibile cuius perfectionem continet. Anteced. constat, quia diuina essentia est infinitæ perfectionis: ergo nulla perfectio sibi deesse potest, semotis omnibus imperfectionibus: ergo præhabere omnem perfectionem entis, necessarium est. Consequentia verò prob. quia si aliqua perfectio creata esset impossibilis, hoc ipso non esset perfectio, quia quod est impossibile, non est ens: ergo neque perfectio, si non esset perfectio, neque contineretur in Deo, quia non continet nisi perfectiones: ergo ut contineatur in Deo debet esse possibilis, & si non est possibilis, non continetur in Deo: ergo tam necessariò perfectio aliqua creata est possibilis, quam necessariò illa perfectio continetur in Deo, & omnis perfectio continetur necessariò: ergo omnis perfectio necessariò est possibilis. Ex quo etiam colligimus *infr.* quod ex destructione possibilitatis creaturæ, sequitur per consequentiam necessariam destructio omnipotentie Dei; ex quo hæc pars amplius probabitur.

15 Quod verò hæc necessaria consequentia, seu participatio possibilitatis in creaturis sit ex diuinis ideis, quatenus habent vim, seu virtutem causæ formalis extrinsecæ, & non efficientis, patet: nam quod attinet ad efficientiam, manifestum est non influere possibilitatem, quia omnis efficientia supponit rem quam efficit esse factibilem: ergo, & possibilem: repugnat ergo quod per efficientiam, & influxum factibilitas seu possibilitas constituatur. Efficientia siquidem, & effluxus actualis à causa efficiente ponit existentiam in termino, quia efficere est extra causas ponere, & reddere in actu id quod est in potentia; possibilitas autem antecedit existentiam, & detinet rem intra causas, non actu subiicit actioni agentis, quæ extra causas ponit: ergo non potest conuenire possibilitas rebus per aliquam causalitatem, & effluxum actualem agentis. Quod verò attinet ad formalem rationem idearum, illa non exercetur actu erga possibilitatem, sed continet in virtute regulam, & mensuram omnis entitatis, & veritatis creatæ, ita quod omnis creatura

creatura habet suam determinatam speciem, seu quidditatem, & suam veritatem per conformitatem ad ideas; ut latè ostendimus *disp. 1. art. 1. & 2. & disp. 2. art. 1. & ultimo*, ubi specialiter videri potest, quomodo veritates creatæ dicantur æternæ per ordinem ad ideas diuinas penes quas formantur, & regulantur, & determinantur in suis quidditatibus, & speciebus. Idem autem est reddere rem veram transcendentaliter, & entitative, ac reddere illam non fictam, seu realem, esse autem realem obiectivè est esse possibilem realitate considerata ante productionem, & existentiam: Ergo si in rebus veritas, & formatio quidditatis sumitur per ordinem ad ideas, etiam ante productionem actualem, quia veritas non dependet ab existentia: similiter & possibilitas ad esse inde sumetur, quia hæc sequitur realitatem, & realitas veritatem rei supponit, ut distinguit à re ficta, & non reali. Est autem idea diuina summa, & prima regula totius veritatis creatæ, ergo per hoc res redduntur absolute possibiles, quia id quod excogitat Deus, & format, ut imitabile à se est quod unicuique rei congruum, & conveniens est, nec sibi repugnans: ergo est possibile, quia illud est possibile rei quod non est repugnans illi. Antecedenter autem ad ideas diuinas, nihil intelligitur ut determinatè, & distinctè formabile, nec rebus distributa sua prædicata quæ eis sint debita, vel convenientia: hoc enim fit à Deo artificiosè, & intelligibiliter, non naturaliter, quia fit eo modo quo res ipsæ formabiles sunt à Deo, solum autem per artem formabiles sunt. Antecedenter verò ad artem, & intellectum diuinum solum radicaliter intelliguntur formabiles, & possibiles, quatenus scilicet in infinito esse Dei, omnis ratio entis, & perfectio radicaliter intelligitur esse contenta: ad eius enim essentiae participationem res sunt factibiles.

16 Neque ad hoc, ut res dicantur formabiles, & ideatæ, ac contentæ in virtute idearum tanquam in regula, & mensura eorum, quæ sibi convenire possunt, requiritur aliqua causalitas per modum actionis transeuntis, sed sufficit ipsa formatio rerum in mente diuina per modum actus immanentis, per quem res dicuntur formatæ, & contentæ in virtute idearum diuinarum, & sicut per actum necessarium intellectus diuini antecedenter ad omnem actum liberum voluntatis eas format intra se, ita per necessariam consequentiam ipsæ dicuntur formatæ, & contentæ in virtute idearum ut factibiles ab ipsis: ergo habent possibilitatem logicam, hoc est non repugnantiam suorum prædicatorum, & connexionem atque convenientiam eorum per hoc solum quod sint formatæ, & regulatæ intra Deum: ibi enim habet unaquæque res suam distinctionem, & limitationem iuxta formationem diuinæ ideæ, & habet sua prædicata determinata, quæ sibi conveniunt, & alia quæ repugnant: ex convenientia autem vel repugnantia prædicati ad subiectum oritur possibilitas vel impossibilitas logica quæ est ex habitudine terminorum: non potest autem intelligi quod ista prædicata conveniant, seu non repugnent, alia autem repugnent, nisi intelligantur res inter se distinctæ, & formatæ, & mensuratæ, unaquæque iuxta id quod sibi debetur, vel convenire potest: hoc autem non intelligitur nisi per ideas diuinas, non ante illas, quia illæ sunt prima mensura, & regula, unde unicuique rei tribuitur id quod sibi debitum est, & convenire potest. Ergo antecedenter ad ideas non discernitur quodnam prædicatum sit repugnans, vel non repugnans, debitum, vel indebitum, & consequenter neque ratio possibilitatis, vel impossibilitatis. Per

ideas verò statim habetur non formando res ad extra, sed intra conceptum Dei per actum immanentem, qui sufficit ad continendum in sua virtute, & in ratione formæ exemplaris, & mensurantis, atque specificantis res omnes ideabiles, non producendo, sed continendo, & mensurando intra se, & unicuique rei intra actum immanentem dando quod sibi convenit, & non quod repugnat, quod est habere possibilitatem participatam à mensuratione idearum Dei. Inde verò respiciuntur tales res à potentia executiva in quantum executiva, quod est denominatione esse possibiles, & comparativè ad potentiam exequentem, quæ physicè debet influere, & producere in esse, & sic per ordinem ad illam dicuntur res physicè possibiles, postquam absolute, & logicè sunt possibiles ex participatione formæ mensurantis, & formantis, id est, ab ideis. An verò hæc possibilitas absoluta dicat aliquid præter denominationem extrinsecam, statim dicemus.

Denique tertia pars conclusionis habetur expressè in D. Thom. *hac 1. p. qu. 9. art. 2.* ubi inquit; *Omnes creatura antequam essent, non erant possibiles esse per aliquam potentiam creatam, cum nullum creatum sit æternum, sed per solam potentiam diuinam, in quantum Deus poterat eas in esse producere.* Ergo possibilitas actu non est aliquid repertum extra Deum, sed solum in potentia Creatoris cum connotatione ad res ut obiectivè possibiles. Ad idem facit quod docet S. Thom. *quest. 16. supra artic. 7.* quod *Veritates create non sunt æternæ actu, & positivè, nisi in intellectu æterno: in se autem solum obiectivè.* Pro quo videantur ea quæ latè diximus *disp. 2. art. ultimo.*

Fundamentum est, quia res non dicuntur possibiles per hoc quod sint extra causas: sic enim non sunt solum producibiles, sed productæ: dicuntur ergo possibiles per hoc quod sint intra causas, & in potentia ut sint: ergo possibilitas non debet convenire actu extra Deum, sed solum intra Deum ut causam contineri; in se verò solum obiectivè & in potentia dici possunt res producibiles seu possibiles: ergo actu esse possibiles, est actu contineri intra causas, & non actu extra causas aliquid habere. Contineri autem intra causas est ipsa potentia, & actualitas causæ continens: ratione enim eius dicuntur res contineri. Possibilitas ergo rerum non habet actu aliquid, nisi ipsam potentiam causæ ut continentem.

Et confirm. ratione insinuata à D. Thoma, quia nihil extra Deum datur in actu ab æterno, creat enim Deus res ex puro nihilo in tempore: ergo possibilitas rerum non est aliquid actu extra Deum; in tempore autem non incipit esse actu, quia possibilitas non est facta in tempore, in quocumque enim tempore fieret, antea erat verum dicere quod erat possibile fieri, cum possibilitas sit prædicatum essentiale, & necessario connexum, & independens à tempore. Quod autem sit tempore non est possibilitas, sed existentia, cum fiat per veram actionem. Ergo possibilitas non est actu nisi intra Deum, & in potentia Dei.

Ex his sequitur, quomodo verum sit quod diximus *preced. tomo disput. 18. artic. 1.* de possibilitate creaturarum. Potest enim sumi possibilitas pro statu, vel pro entitate rei possibilis. Pro statu contraponitur futuritioni, vel præteritioni, aut præsentiae rei; & sic non est aliud quam negatio existendi pro quacumque duratione, & differentia temporis. Pro entitate possibili dicitur duo; scilicet non repugnantiam prædicatorum seu terminorum inter se, in quantum aliquid non involvit contradi-

ctionem

tionem seu repugnantiam conueniendi prædicata, & tunc non inuoluit repugnantiam, quando dicit rationem entis participati à Deo, quia implicatio contradictionis, seu repugnantia est esse, & non esse simul, & hæc non habet rationem entis, sed est distinctio entis, & sic non est à Deo. Et secundò, includit denominationem extrinsecam ortam ex omnipotentia, quæ est attributum: quod enim sub potentia continetur est possibile, sicut visibile denominatur à potentia visiva, & visum à visione: sed tamen possibile fundamentaliter seu obiectiue, seu possibile absolutum, & logicum antecedit hanc possibilitatem denominatiuam, quia potentia executiua non tendit, nec denominat ut contentum sub se, nisi supponendo quod aliquid non sit repugnans, seu impossibile.

Dices: Etiam possibilitas illa absoluta, seu fundamentalis non est aliud quam denominatio extrinseca, quatenus res dicitur cognita, & formata ab ideis: ergo in creatura non ponit hæc possibilitas logica aliquid intrinsecum, sed denominationem extrinsecam, sicut respectu potentie executiue.

Respon. quòd ab idea duo derinantur in creaturam, scil. esse cognitum, seu formatum à cognitione, & esse menturatum in sua qualitate, & veritate, quod est specificari ab ideis ut exemplaribus. Primo modo res solum extrinsecè denominatur ab ideis, scilicet in esse cogniti, sicut possibile à potentia. Secundo modo, aliquid præter denominationem extrinsecam habetur, scil. ipsa prædicatorum essentialium commensuratio, & connexio, seu constructio, ita quod non sit ibi aliquid repugnans, & illa non repugnantia, non est sola denominatio extrinseca, licet non nisi intra intellectum formantem res, & intra causam inueniatur talis connexio.

*Ex destructione possibilitatis create,
quomodo sequatur destructio
omnipotentie.*

19 In hoc hæsit Vasquez *disput. 104. cap. 5. num. 26.* & cum eo multi, qui hoc valde magnificant, putantque Deum non postulare ullam creaturam esse possibilem ut ipse sit, eo quòd magis necessarium est Deum esse, quam creaturam aliquam esse possibilem, siquidem ex esse Dei deriuatur quòd creatura sit possibilis, & quòd contradictionem non implicet, ut inquit S. Thom. *hic artic. 3.* non verò è conuerso, quia creatura non implicat, Deus est. Absolutius ergo, & independentius est esse diuinum, quam possibilitas creaturæ; & sic firmior, & maior est veritas diuini esse, quam possibilitatis creaturæ. Sed maior, & firmior veritas non habet connexionem necessariam cum minori, alias æquales in necessitate essent, nec ista esset minor illa, siquidem non staret hanc tolli, quin illa tolleretur: ergo ex destructione possibilitatis creaturæ, nõ destruitur omnipotentia, & essentia Dei. Deinde, non colligitur per locum intrinsecum quòd si simia non esset possibilis, Deus non esset existens: ergo ex destructione possibilitatis illius, non sequitur destructio existentie Dei. Anteced. probatur: Non sequitur per locum intrinsecum, simia non est possibilis: ergo homo non est possibilis: multò ergo minùs sequitur, simia non est possibilis: ergo Deus non est possibilis, quia Deus magis necessarium ens est, quam homo, idem autem est in Deo esse actu, & possibilem esse. Præterea, posito, quòd hominem esse implicaret contradictionem, quod est destrui eius

possibilitatem, adhuc Deus maneret omnipotens: ergo ex eo destrueretur omnipotentia. Consequ. est manifesta, Anteced. patet, adhuc posset Deus in omne quod contradictionem non implicat, licet non posset in hominem qui tunc contradictionem implicaret: ergo adhuc maneret omnipotens, quia omnipotentia tantum hoc exigit ut possit id omne quod contradictionem non implicat. Quare ex eo quòd Deus non posset producere hominem, si ille implicaret contradictionem, nihil adimitur de eius perfectione, & omnipotentia, quia non posse producere id quod contradictionem implicat, non est perfectio, neque virtus. Denique magis falsum est dicere Deum non esse quam creaturam non esse possibilem: vnum enim potest esse magis falsum quam aliud, ut docet Aristot. 4. *met.* sicut magis falsum est quòd duo sint mille, quam quòd sint quatuor. Si autem esset necessaria, & mutua connexio, & relatio inter veritatem diuinam, & possibilitatem creaturarum, æquè falsum esset vnum, atque aliud. Ex his infert Vasquez nullam esse relationem siue secundum esse, siue transcendentalem, aut secundum dici inter Deum, & creaturas, quia nulla est connexio Dei ad illas, neque dependentia, ergo neque relatio, quia hæc connexionem dicit inter extrema, & ordinem.

Nihilominus dicendum est, quòd Dei ad creaturas nulla datur relatio realis neque prædicamentalis, neque transcendentalis, sed solum rationis, ut perpetuò affirmat D. Thom. & videri potest *quæst. 7. de potentia artic. 10. & in hac 1. part. quæst. 13. art. 7.* ubi id expressè affirmat; sed tamen si possibilitas alicuius creaturæ destrueretur, ita quòd ex possibili redderetur impossibilis, seu implicans, destrueretur potentia, & essentia Dei. Primam partem de negatione relationis realis ex eo confirmamus quia omnis respectus realis non solum importat connexionem cum alio, ad quod terminatur, sed etiam dependentiam vel æqualitatem aut ordinem cum illo. Quod autem ita est superius ad aliquid, quod est extra totum ordinem eius, nec illi æquale, aut inferius vel dependens ab illo est absolutum ab eo, & non ordinatum ad ipsum, sed è contra alterum ordinatum, & dependens à se, licet conexio detur inter utrumque; sicut manifestè patet in relationibus tertij generis inter mensuram, & mensuratum quæ non sunt relationes mutue, sed solum ex parte mensurati datur respectus, & ordo realis ad mensuram, non è conuerso, eo quòd mensuratum perficitur, & regulatur per mensuram, non verò mensura per mensuratum; & sic obiectum visibile non refertur realiter ad visum, sed bene visus ad visibile. Cum ergo Deus sit suprema regula, & perfectio omnium creaturarum, ex cuius participatione, & imitatione omnis creatura est, non verò ex creaturis perficitur, nulla relatione reali ordinatur ad creaturam, sed creatura ad ipsum, in se autem absolutissimus est ab omni creatura.

Secunda verò pars nostræ conclusionis, quòd sit 21 talis connexio inter Deum, & possibilitatem creaturarum, quòd si possibilitas illa tolleretur, & verteretur in impossibilitatem, mutaretur, & destrueretur omnipotentia, latè probata est à nobis *citato loco disput. 15. artic. 3. præced. tomo.* Breuiter nunc explicatur ex opposito principio ad sententiam Vasquez, quia bene stat aliquam veritatem esse firmiorem, & principaliorem altera, & tamen necessariò exigi minorem veritatem ad illam, non ratione sui, sed ratione consecutionis, & continentie in altera. Quia enim est veritas superior, & altior continet

continet sub se alias veritates, quæ ab illa dependent, & consequuntur; & hoc ipso sunt veritates participatæ & minores, quia dependentes, & consecutæ; & idè quia minores sunt, ab illis superior veritas non dependet, si secundum se considerentur, habet tamen necessariam connexionem cum consecutione illarum à se, quod non tam est habere immediatam connexionem cum illis, quàm de se postulare ex propria & essentiali sua ratione habere vim, ex qua tales inferiores veritates consequantur, ita quòd si non consequerentur, non maneret illa veritas ita superior, & contentiva earum. Connexio ergo illa est cum suavi contentiva & consecutione inferiorum veritatum, non cum ipsis veritatibus secundum se, & ratione sui, sed tamen quia non stat illam consecutionem & vim contentivam dari, nisi ipsæ res contentæ dentur, idè ex destructione possibilitatis talium rerum, sequitur mediata destructio illius vis, seu potentiae contentivæ. Vnde fit quòd destructio talis possibilitatis non potest intelligi, nisi incipiat ab ipsamet potentia, possibilitas enim illa non est aliquid in se actu extra potentiam causæ, vnde in se non potest destrui, sed solum intra causam: intra causam autem non destruitur, nisi quia vis causæ in ordine ad illam amittatur, ita quòd non sit ab ipsa causa participabilis. Sic ergo ex destructione illarum intra causam rectè sequitur destructio ipsius causæ. Argumenta autem Vasquez procedunt ac si possibilitas creaturarum destrueretur in se, tanquam aliquid extra causas, & redderetur in se impicatoria; & sic ex tali destructione rei in se sequeretur destructio Dei. Non est autem sic, sed possibilitas illa cum sit intra causam, non stat, nec intelligi potest destructio eius, nisi intra causam, & ex tali destructione rectè sequitur destructio causæ. Et hæc est ratio quasi à priori.

22 Ad hanc autem rationem seu explicationem, additur alia non minoris ponderis, quæ confirmat præcedentem. Veritas conclusionis quæ deducitur ex principiis per se notis minus certa & firma est, quàm veritas ipsorum principiorum: constat enim quòd veritas conclusionis est propter præmissas, & derivata ex præmissis, & propter quod unumquodque tale, & illud magis, quo axiome utitur Philosophus probans hoc ipsum quod dicimus, in 1. *Posteriorum*, quòd præmissæ, seu principia sunt certiora conclusionibus, & res ipsa est satis omnibus nota: sed sic est quòd non obstante quòd veritas principiorum est maior veritate conclusionum, tamen ex destructione, & negatione veritatis consequentis, sequitur destructio antecedentis, si consequens per necessariam consequentiam inferatur ex antecedenti: ergo bene stat veritatem maiorem ita esse connexam cum minori, quòd tamen ex destructione minoris destruat maior, non propter dependentiam maioris veritatis à minori, sed propter consequentiam, seu consecutionem unius ex alia, quæ cōsecutio intima est veritati maiori, & ex visceribus eius essentialiter deducitur. Minor certa est, & tanquam principium in dialectica omnibus notum, quòd à destructione consequentis sequitur destructio antecedentis, quia in bona consequentia non stat antecedens esse verum, & consequens falsum: ergo non stat destrui, seu negari consequens quod est esse falsum, & non destrui, seu negari antecedens. Totus hic discursus demonstrativus est, cum ininitatur maiori, & minori, quæ sunt prima principia in Logica, & per bonam consequentiam ex illis colligat. Vnde manet omnino diversū fundamentū Vasq.

Joan. à S. Thoma in 1. part. D. Thoma.

quòd videlicet non potest maior veritas destrui ex destructione minoris, alioquin æquales essent, cum totum oppositum sit evidens.

23 Applicemus hoc Deo, & possibilitati creaturarum. Ex divina omnipotentia tanquā ex principio seu antecedenti certiori, & firmiori, sequitur per bonam consequentiam possibilitas creaturarum, quia hæc est bona, & necessaria consequentia, Deus habet potentiam creaturam: ergo potest aliqua creare: ergo illa aliqua possunt creati, seu possibilia sunt creati. Hæc consequentia est bona, & necessaria, nec instari potest, utpote ab activa ad passivā, quæ inter se aut sunt idem, aut essentialiter inseparabilia, & connexa, & ubi est essentialis cōnexio, est legitima consequentia. Sed in bona consequentia à destructione consequentis sequitur destructio antecedentis quantumque antecedens sit maior, & firmior veritas, scil. veritas principij, ut ostensum est, quia est principium per se notū in Logica: ergo in hac cōsequentia ex destructione possibilitatis creaturæ, quæ est cōsequens, sequitur destructio omnipotentiae creaturæ, quæ est antecedens; & sic datur connexio inter potentiam Dei, & possibilitatē creaturæ, quòd si destruat, hæc destruitur, & negatur illa. Et idem est, destrui possibilitatē omnium creaturarum, vel unius tantum, quia Deus si nec habet connexionem cum possibilitate unius creaturæ, neque cum omnibus; nec minus ex potentia creativa Dei inferitur per bonam consequentiam possibilitas unius, quàm omnium. Hic discursus si non est demonstratio, nescio quæ demonstrationes in scientiis inveniri possunt. Rationes verò Vasq. demonstrationes non esse, statim constabit. Plura pro hac parte videri possunt cit. loco præced. tom. ubi ostendimus ad oculum ex destructione alicuius veritatis creatæ saltem conditionalis, destrui omnipotentiam Dei.

24 Argumenta Vasquez parum ponderant. Ad primum, Respond. non esse dubium quòd veritas divina sit firmior, & perfectior veritate creata. Negamus tamen quòd ex destructione veritatis minus firmæ, & minus perfectæ non destruat firmior, & principalior, quando per necessariam consequentiam inferatur ex illa, & quando destructio minoris veritatis non potest fieri in se, sed in causa sua, & incipiendo à destructione causæ: sicut explicatum est. Nec per hoc sequitur quòd maior veritas dependeat à maiori, & divina à creata, aut sint æquales inter se, quia hæc destructio non sequitur ex eo quòd tollatur aliquis influxus aut constitutio inferioris veritatis in maiorem, sed ex eo quòd tollatur ipsa contentiva maioris veritatis super inferiorem, & consequentia, quæ deducitur ex ipsa maiori in inferiorem. Si autem tollitur talis consecutio, & contentiva superioris veritatis, quid mirum, quòd ipsa superior veritas, & virtus destruat. Itaque non ex destructione veritatis minoris, & inferioris secundum se considerata tollitur veritas maior, & firmior, sed ex destructione veritatis illius ut consecutæ per necessariam consequentiam ex maiori, & ut contentæ in illa, quia in se destrui nō potest extra causas, sed ut intra causas, in quibus continetur res ut possibilis, seu ut in potētia. Et quia destructio veritatis creatæ incipere debet ex ipsa causa, & radice in qua continetur, ex tali destructione bene sequitur destructio causæ, nec tamen depēdet veritas superior ab inferiori, sed è cōtra, nec illi equalis est secundum se, sed consecutio, & contentiva intra ipsam causā sibi æqualis est, quia sibi intima.

Ad 2. negatur anteced. Ad probationem dicitur, quòd ex impossibilitate simiæ immediatè, & formaliter

O o

maliter

434 Quæst. XXVI. De Potentia diuina,

maliter per locum intrinsecum non sequitur impossibilitas hominis, quia hæc duo disparatè se habent, non ut continens, & contentum, inferens, & illatū. Sequitur tamen impossibilitas, & destructio Dei, quia licet sit maior, & firmiter veritas, tamē est cōtinens, & inferens minorē, & radix seu principium eius, nec destruitur veritas illata, & contenta in illa, nisi destruendo ipsam radicem, & principium eius, & consecutionem ex tali causa; atque aded non se habent disparatè, sicut impossibilitas simiæ, & hominis, sed consequentur, & illatiuē. Et tamen mediātē ex impossibilitate simiæ sequitur impossibilitas hominis, quia sequitur imminutio, seu destructio omnipotentie Dei, quia sublata, etiā possibilitas hominis destruitur, mediātē, & materialiter.

26 Ad tertium negatur anteced. Ad probationem dicitur omnipotentiam esse, quæ potest in omne quod non implicat contradictionem absolutē, & simpliciter, non ex suppositione, & secundum quid. Si autem possibilitas hominis tolleretur, & redderetur implicans, reliqua quæ manebant possibilia non constituerent omnipotentiam, nisi ex suppositione quod illa sunt omnia, & per accidens, non simpliciter, & secundum infinitatem quam de se postulat omnipotentia; aliās si solum musca maneret possibilis, æquē diceretur Deus omnipotens atque modò, quia posset in omne possibile, & sola musca esset possibilis, sed tunc est omne possibile per accidens, & ex suppositione quod aliorū possibilitas sit destructa. Est simile in vbiuitate, seu immensitate: si enim solum esset granum milij in toto vniuerso, diceretur illud esse vbiq̃ue, quia non esset aliud vbi, & illud esset omne vbi; ut notat S. Thom. *supra quæst. 8. artic. 4.* sed illud esset vbiq̃ue per accidens, & ex suppositione, non simpliciter, nec vbiq̃ue infinitum, sicut si daretur corpus infinitum, aut sicut est Deus. Sic si solum musca esset possibilis, & reliqua implicarent contradictionem, qui posset producere muscam esset omnipotens per accidens, & ex suppositione, quia est illud solum possibile, non simpliciter, quia non est infinitum possibile. Itaque ad omnipotentiam pertinet posse in omne possibile, non quomodo-cumque sumatur ly *omne possibile*, sed etiam conservando possibilitatem cuiuscumque ne destruat: nam si non conservat illam, nec continet, hoc ipso frangitur, & imminuitur omnipotentia.

27 Ad quartum dicitur sicut ad primum: eadem enim est ratio de maiori, & minori veritate, atque de maiori, & minori falsitate. Non enim æquē est falsum vnum atque aliud, sed tamen si redditur vnum falsum quod infertur, & connectitur cum alio, quatenus sic connexum, destruitur etiam id quod maius est, ex vi consequentiae, non ex vi æqualitatis cum alio secundum se; imò ex destructione consequentis sequitur destructio antecedentis, licet minor falsitas sit destructio vnius quàm alterius, propter connexionem consequentiae, non propter connexionem dependentiae.

Quomodo dicatur omnipotentia posse in non ens?

28 D. Tho. in *presenti a. 3.* assignat pro obiecto omnipotentiae omne possibile absolutum, seu quod ex terminorum habitudine non repugnat, nec implicat. Illud autem dicit non implicare, quod participat rationem entis. Quod verò rationem entis participare non potest, à ratione possibilis excludit. Idem habet 2. *contra Gentil. cap. 22. ratione 2.* Cum autem ens dupliciter sumatur, scil. pro entitate, ut explicat essentiam tantum, quod dicitur ens essentialiter, vel pro entitate ut existente,

quod dicitur ens participialiter, id est existens, conueniunt interpretes S. Thom. Caiet. *hio*, & Ferrar. *dicto loco contra Gentil.* quod S. Thom. quando dicit quod ea quæ in se habent rationē non entis, non sunt possibilia, nec pertinent ad omnipotentiam, loquitur de eo quod est non ens quantum ad essentiam, ita quod caret essentia vera & propria, & solum est ens fictum aut contradictionem implicans, non autem de non ente pro negatione existentiae, cum potius constet Deum operari res ex nihilo, id est, ex nullo præsupposito, seu existente; & sic potest in res non existentes, producendo illas ex nihilo tanquam ex termino à quo: & rursus potest res existentes reducere in nihilum per suspensionem concursus, & ita ipsum nihil existentiae potest etiam tenere se ex parte termini ad quem omnipotentia diuina, saltem ut terminus consequenter se habens, sicut corruptio vnius est terminus consequens ad generationē alterius, quia ratione etiam ipsū non ens pertinere ad omnipotentiam Dei, quatenus potest annihilare creaturā, quod vtrique pertinet ad desitionem existentiae, affirmat D. Th. *q. 1. de potentia art. 3.* Et ita in omnibus locis solum subtrahit ab omnipotentiae obiecto non ens, id est id quod implicationem inuoluit, & nullā rationem veræ essentiae participat, quod est esse non ens essentialiter. Quam doctrinam etiam acceptat Vasquez *hic disp. 104. art. 5. num. 17. & 18.*

Cæterum addit ipse Vasquez quod omnipotentia 29 etiam aliquo modo dici potest quod versatur circa non ens, etiam sumptum essentialiter eo modo, quo versatur visus circa tenebras, non quidem exercendo actum visionis circa illas, sed potius habendo negationem actus, tanquam in proprio subiecto, & sic est priuatio visionis; eodem modo omnipotentia Dei habet negationem actus producendi circa non ens essentialiter, seu circa id quod est impossibile seu implicans contradictionem. At verò non ens sumptum pro existentia est directē contentum sub omnipotentia, quia omnipotentia ita respicit tanquam obiectum proprium rem esse, sicut rem non esse, quia per subtractionem concursus facit rem non esse, & ided non ens non continetur sub omnipotentia sicut tenebræ sub potentia visiva, quia tenebræ non sunt obiectum propriè visus, sed directē oppositæ obiecto visus, quod dicit immeritò negare Caiet.

Sed tamen in vtroque dicto deficit Vasquez: in 30 primo enim fatemur quod circa ea quæ implicant contradictionem est in Deo negatio actus, imò & negatio potentiae, quia non solum non producit, sed nec producere potest tale non ens. Sed negamus hoc sufficere ut possit dici quod aliquo modo omnipotentia versatur circa illud, sicut visus circa tenebras, vel auditus circa silentium. Istæ enim potentiae versantur circa istas priuationes, non solum per merā negationē actus: sic enim etiā dici posset quod visus versatur circa Angelum, vel circa sonū, quia habet negationē videndi illa, quod tamen non sufficit ut dicatur visus aliquo modo attingere Angelū, sicut attingit tenebras, sed dicitur versari circa tenebras, quia se habet priuatiuē, & opposito modo ad lucem; & ita aliquo modo iudicat de illis (iudicio imperfecto, quod magis dicit aduertentiam) non cognoscendo illas in se, sed sub oppositione ad lucem; & ita habet aliquem actū circa illas, quatenus aduertit, & percipit non esse lucem. Unde quatenus oppositum luci, etiam sub obiecto proprio visus continentur ex illa regula communi, quod Oppositorum eadem est ratio. Quæ verò non ut opposita se habent, sed ut disparata, nullo modo attinguntur à visu, etiam si habeat circa illa negatio

negationem actus videndi. Vnde Philos. 2. de anima textu 96. & apertius textu 103. affirmat visum esse etiam de tenebris, & iudicare illas, & D. Th. idem docet super illa loca, eo quod potentia cognoscitiva est oppositorum, & iudicat de utroque vel iudicio perfecto, ut potentia interiores, vel imperfecto, ut exteriores, quæ initium præbent iudicio interiorum. At verò potentia factiva rerum non versatur villo modo circa ea quæ implicant contradictionem, quia cum non procedat cognoscendo, & indicando, non exercet actum circa res, seu circa obiecta attingendo illa intra se, & provt in apprehensione, sed solum provt ad extra: Ad extra autem nullo modo sunt attingibilia ea quæ contradictionem implicant, quia nec possunt fieri in esse, quia implicant, nec annihilari in non esse, quia sic supponerent esse à quo deciderent, neque attinguntur ut terminus à quo, quia impossibilia non sunt terminus à quo possibilium: nec enim Deus facit Angelum ex implicatione Angeli. Quare nullo modo attingit potentia executiva sua opposita, sicut potentia cognoscitiva, sicut ignis non attingit aquam aut frigidum ex parte termini ad quem, neque homo rem inanimatam, sed hæc se habent ad eorum potentias productivas, sicut aliquid disparatum, licet habeant negationem actionis productivæ circa illa, sed hoc non sufficit ut dicatur aliquo modo ea attingere, quin potius ex hoc magis se retrahit ab attingendo illa, quia negationem producendi illa habet. Potentia verò cognoscitiva, quia non producit ad extra, sed intra se attingit iudicando, seu decernendo ea quæ attingit, oportet quod si attingit unum, etiam oppositum attingat, etiam ex parte obiecti attacti, quasi ex parte termini ad quem, quatenus ad discretionem, vel iudicium de altero conducit.

31 Et hinc patet in secundo dicto defecisse Vasquez in eo quod dicit non ens respici ab omnipotentia, ut obiectum proprium factum ab ipsa, quia facit rem non esse per subtractionem concursus. Sed tamen subtractio concursus non est facere, sed oppositum actioni, scilicet non facere: ergo sicut non facere seu subtrahere concursum non continetur sub omnipotentia ut actio, sed ut oppositum actioni, ita non factum, seu non ens, quod est terminus, seu obiectum suspensionis concursus, non continetur ut obiectum proprium sub omnipotentia, sed ut oppositum obiecto omnipotentia. Itaque illud est propriè obiectum omnipotentia, quod est propriè obiectum actionis eius. Actionis autem non est propriè obiectum non ens, seu non factum, sed ens existens, & factum. Non existens ergo, seu annihilatum, & non factum non continetur propriè sub omnipotentia, sed consequenter, quatenus per non actionem, & subtractionem concursus resultat; & ita docet S. Tho. q. 1. de potentia art. 3. non autem est obiectum directè factum ab omnipotentia, sed oppositum obiecto quod directè fit, & illud est directè obiectum, quod directè est factibile, non quod resultat, & consequitur ex non facere. Et sic rectè dixit Caiet. in hoc art. 3. quod non ens continetur sub omnipotentia sicut obiectum oppositum, id est, non ens sumptum pro non existente, quod non implicat contradictionem, & sub non implicantibus contradictionem includitur. Nec meminit quoad hoc illius similitudinis de visu erga tenebras, dicendo quod sunt proprium obiectum visus.

Ioan. à S. Thoma in 1. part. D. Thoma.

D. Thomas in presenti art. 2. probat infinitatem divinæ potentia ex subiecto, quia consequitur ad 32 essentiam infinitam. Vasquez hic disput. 103. cap. 2. contendit cum Gregorio eam infinitatem probandam esse ex obiecto in quod potest, & non sufficienter probari ex infinitate subiecti. Non probatur sufficienter ex subiecto, quia licet potentia infinita, si daretur, non posset competere essentia finitæ, tamen quod detur talis potentia infinita petendum est ex obiecto: si enim obiectum infinitum non sit possibile, non dabitur potentia infinita, licet subiectum infinitæ essentia sit. Probatur quidem ex essentia infinitas potentia in ratione entis, quia identificatur cum entitate infinita, sed non probatur infinitas in ratione virtutis, & actunitatis. Ipse verò Vasquez cum Gregorio ex obiecto probat infinitatem potentia, quia dantur obiecta, quæ non possunt esse, nisi à potentia infinita: ergo datur potentia infinita. Consequens est nota. Anteced. probari potest. Primum quia species rerum producibiles sunt infinitæ, licet simul produci non possent. Sed hoc est dubium apud multos, inquit Vasquez, quia multi negant esse posibles infinitas species rerum, & saltem hoc non probatur ab his Authoribus. Secundò probat Vasq. (& placet ei ista probatio) quia quodlibet corpus est habile ut moveatur velocius, ac velocius sine termino: ergo aliqua potentia debet dari à qua possit velocius ac velocius sine termino moveri: ergo illa est infinita, quia si esset finita haberet terminum in movendo velociter; & sic non posset velocitas crescere in infinitum. Tertiò ponit exemplum, quia potentia Dei potest singularia in infinitum sine termino producere, non solum decursu temporis, sed etiam simul: si autem terminum haberet, non posset ultra illum producere plura simul.

Cæterum istæ rationes debilissimæ sunt, & 33 valde dubium fundamentum assumunt ad probandum rem ætissimam, qualis est infinitas omnipotentia Dei, quæ est infinitas non ad aliquem effectum determinatum, & in genere determinato tantum, sed simpliciter in omni genere. Et relicta prima ratione, quam ipse etiam Vasq. reiicit, secunda nihil ponderis habet. Nam in primis circa assumptum potest aliquis hære an possit corpus velocius ac velocius moveri in infinitum sine termino: naturaliter enim sicut omnia corpora in aliis formis & qualitatibus, & motibus suum terminum habent, ita & in velocitate: supernaturaliter autem, & ratione potentia obediens posse in infinitum moveri, est idem ac dicere quod in ordine ad potentiam infinitam Dei possunt in infinitum moveri. Sed hoc est supponere quod datur potentia infinita; & sic petitur principium.

Sed quidquid sit de hoc: adhuc dato illo antecedente, quod debet dari potentia infinita ad movendum infinita velocitate corpus, certè illa non datur ad movendum infinita velocitate in actu, & categorematicè: hæc enim, ut ipse Vasquez dicit, non potest dari: destrueret enim motum, quia moveret in instanti, sed est ad movendum infinita velocitate, syncategorematicè, id est, maiori ac maiori sine termino, quæ tamen debet actu dari in aliqua virtute quæ possit omnem illam velocitatem efficere. Sed ex tali velocitate syncategorematicè infinita, non inferitur potentia infinita simpliciter, de qua infinitate loquimur

in præfenti, qualis est infinitas virtutis Dei. Patet hoc in primis, quia solum infertur infinitas in effectu determinato, scilicet in velocitate motus corporalis: ergo solum infertur virtus infinita in genere determinato, scilicet in genere mouendi corpus. Rursus cum ista velocitas infinita, solum sit syncategorematica, non infert potentiam infinitam infinitate increata, sed sufficit creata, quia quacumque potentia creata posita, quæ potest velociter mouere, potest alia creata superior fieri, quæ velocius moueat, v. g. dato vno Angelo, qui velociter moueat hoc corpus velocitate vt tria, potest creari superior, qui velocitate vt quatuor moueat, & alius qui vt quinque; & sic in infinitum intra limites angelicæ, & creatæ virtutis: ergo ex eo quod corpus sit in infinitum velocis mobile, non infertur quod detur potentia infinita infinitate creatata, sed infinitate creata syncategorematicè maiori, ac maiori in infinitum.

34 Postrema ratio Vasqu. nihilomagus probat; tum quia assumit pro fundamento ad probandum rem certissimam, scilicet infinitatem simpliciter diuinæ potentia, rem incertissimam, scilicet quod sit producibile infinitum simul, seu infinitum categorematicè, quod est opinionis valde incertæ; tum dato quod essent producibilia infinita singularia simul, vel illa essent infinita singularia in vna specie tantum, v. g. infiniti lapides, vel leones, vel infinita individua in infinitis speciebus possibilibus. Hoc secundum est supponere probandum, scilicet quod possint dari infinitæ species rerum, quod, vt Vasqu. dicit, multi dubitant, nec est stare in ratione allata de infinitate singularium præcisè, sed adiuncta infinitate specierum possibilium, quod assumitur, sed non probatur. Si verò dicatur primum, ex eo non colligitur infinita virtus simpliciter, sed solum in illo genere, & secundum quid: potest enim virtus superioris ordinis facere omnia quæ sunt inferioris ordinis, sicut cælum habet virtutem ad omnem alterationem, & ad omnia generabilia, & consequenter ad infinita illius generis. Et præterea quod cælum successivè produceret infinita generabilia, vt si cælum esset ab æterno, non infert infinitam virtutem in cælo, vt rectè ipse Vasquez, *ibi c. 1.* obseruat contra Durandum volentem infinitam potentiam Dei colligere ex infinitorum productione successivè: ergo neque ex productione infinitorum simul: nam quod illa quæ producuntur successivè durent, seu conserventur simul postquæ producta sunt, aut non durent, per accidens est virtuti producenti, nec eam auget, aut minuit; & similiter quod omnes illos effectus simul producat, non exigit infinitatem simpliciter, sed virtutem ad omnia quæ sunt illius speciei, & applicationem materiae ad omnia illa requisita, quæ si non detur, non ex defectu virtutis desinent illa produci, sed ex defectu materiae, & ita eandem virtutem supponunt in agète, ac si infinita producerentur, & illa tota categorematicè, & simul existit in subiecto; licet effectus successivè producantur.

35 Quare ratio D. Thom. est quæ efficaciter probat infinitatem potentia diuinæ, non quidem ex infinitate obiectorum possibilium: est enim id probare per aliquid ignotius: vnde enim constat hæc obiecta esse infinita? præsertim cum possibilitas eorum non præsupponatur ad essentiam diuinam, sed ex participatione eius derivetur. Quare vt efficacia rationis D. Thom. perspicua sit, sic explicari debet. Deus habet esse seu essentiam infinitam: ergo est infinitis modis imitabilis & participabilis, quia nullum finitum, nec finitus nu-

merus perfectionum potest adæquare infinitam perfectionem, & essentiam, quam Deus habet: ergo si à finitis & limitatis creaturis participabilis est, vt participari videmus, oportet quod infinitis viis participabilis, & imitabilis sit, quia in se infinita perfectionis est. Rursus ergo potentia executiva talis essentia, infinita virtutis est. Patet, tum quia potentia executiva in primo ente non est accidens, sed ipsamet substantia, & essentia Dei, & ita si essentia est infinitis modis participabilis, ista est infinitis modis executiva; tum quia etiam si esset distincta, est vna: ergo tam infinita est in exequendo, & agendo per modum virtutis, sicut essentia per modum continentia, & radice. Ratio ergo D. Thom. probat infinitatem potentia in actiuitate, & virtute operativa vt virtus est, & infinitatem in obiectis possibilibus, quia horum possibilitas, & imitabilitas infinita ex infinitate essentia desumitur.

An verò ex creatione, seu modo operandi ex nihilo, & modo conservandi creaturas cum tanta dependentia, quod ex suspensione concursus possint creatura annihilari, probetur infinitas in modo operandi, & consequenter in virtute & potentia operativa, dicemus circa qu. 45. inf. agendo de creatione.

Et nota quod ex ratione D. Thom. sic intellecta infertur infinitas potentia, tam intensiva, quam extensiva. Nam infert infinitam participabilitatem, & infinitos modos participationis in re creata, seu ente finito ab infinita continentia, & imitabilitate Dei. Inter modos autem participabilitatis, & est intensio, & extensio: qui enim potest omnia, potest omni modo, quia in ly *Omnia*, etiam modi includuntur: hi enim etiam ad participationem Dei pertinent. Differunt tamen infinitas intensiva, & extensiva potentia, quod infinitas extensiva respicit numerum, seu multitudinem rerum producibilium, intensiva autem respicit graduationem maioris ac maioris perfectionis sine termino, tam in eadem specie, seu genere (sicut calor potest magis ac magis intendi) quam in diuersis, sicut vna species aut genus graduatur supra alia. Et totum hoc habetur ex diuersa participatione, & imitatione Dei, qua secundum diuersos gradus seu perfectiones imitabilis est ab infinitis rebus. Intensio autem virtutis non ex parte effectuum producibilium, sed ex parte efficaciarum ipsius actionis, & modi operandi sumitur, non ex parte actionis, vt est in operante, sed vt attingit effectum, vt optimè dicit S. Thom. *quæst. 1. de potentia art. 3.* quia vt est in operante, est idem cum entitate diuina; & sic semper est infinita, nec potest intendi, aut remitti, vel diuersas graduationes habere. Potest autem secundum quod attingit effectum, diuersas graduationes in perfectionibus dandis attingere; & sic magis ac magis intensivè vsque in infinitum operari; quod totum provenit ex diuersa participabilitate, & imitatione diuinæ perfectionis, quæ etiam diuersa graduatione perfectionum imitabilis est, sicut & diuersa extensione, seu numeratione rerum producibilium, quia data qualibet, potest alia fieri in numero, & extensione, sicut in intensione, qualibet perfectione graduata, potest alia maioris graduationis fieri. Videatur D. Thom. *cit. q. 1. de potentia, art. 3.*

ARTICVLVS II.

Utrum potentia executiua distinguatur in Deo, nostro modo intelligendi, ab intellectu, & voluntate?

1 **S**upponimus dari in Deo potentiam actiuam per modum principij respectu effectuum, licet non respectu actionis, ut *supra disp. 4. art. 2.* probauimus, & D. Thom. docet in *hac qu. art. 1. ad 3.* Et dari tale principium creaturarum, quia creaturae procedunt à Deo, & sunt effectus eius, & participat ab ipso: ergo datur principium in Deo à quo sunt creaturae. Difficultas est, an hoc principium prout exequens, & operans effectus ad extra sit distinctum attributum ab intellectu, & voluntate.

Multi (etiam ex Recentioribus) sentiunt cum Durando in *1. disp. 38. qu. 1.* distinguere in Deo attributum potentiae exequentis ab intellectu, & voluntate, sicut in nobis distinguitur realiter potentia motiua executiua à cognoscitiua dirigente, & voluntate inclinante; sic in Deo distinguuntur illa attributa ratione, non realiter.

2 Fundamentum vnicum est, quia in Deo datur fundamentum ad distinguendum ratione attributum potentiae à voluntate, & intellectu, non minus quam alia attributa: ergo non est negandum distinguere. Consequens est certa. Antec. prob. tum quia intellectus respicit, & attingit tam rem increatam, quae est Deus, quam creatam, possibilis, & impossibilis, voluntas etiam attingit Deum, & creaturas, & voluntate inefficaci etiam impossibilia; potentia autem executiua solum rem creatam possibilem attingit: ergo habent sufficiens fundamentum ut distinguantur ratione; tum quia intellectus, & voluntas secundum suas proprias rationes dicunt actus immanentes, ille quidem cognoscendo, & dirigendo, ista liberè volendo, executiua autem potentia dicit actionem transeuntem, & non est formaliter volitio, sed ex volitione deriuatur: hac enim causalis est vera, Deus creat, quia vult, & à fortiori quia cognoscit: ergo distinguitur à voluntate, & intellectu ratione: tum denique quia voluntas, & omnipotentia considerantur in Deo per connotationem ad potentias quae sunt in nobis, in nobis autem distinguitur voluntas à potentia executiua, seu motiua: ergo & in Deo per considerationem nostram. Fauet huic sententiae D. Thom. *hic art. 1. ad 4. in prima solutione.*

3 Molina *hic art. 1. disp. 2.* tenet potentiam, seu principium operandi in Deo non esse intellectum, & voluntatem diuinam immediatè, ut sunt potentiae intelligendi, & volendi, sed ipsum actum liberum Dei, quo Deus determinatè vult hoc esse in tali, vel tali tempore, esse immediatum principium creaturarum. Nam iste actus est efficax respectu obiecti sic voliti, & quacumque alia potentia exclusa, ex se est sufficienter efficax ut res fiant; quia hoc factum est quod ipse voluisti, Iudith 9. & Psalm. 142. *Omnia quaecumque voluit Dominus fecit.* & voluntati eius non est qui resistat: ergo posita voluntate efficaci, nihil aliud requiritur ut res fiat. Et sic melius intelligitur, quomodo Deus immutabili actu res omnes immutat, quando, & quomodo vult, solum quia vult, sine hoc quod intercedat alia actio, in qua hoc non ita commodè intelligitur.

4 Nihilominus in hac parte distinguendum est,

quod potentiam executiuam in Deo possumus distinguere ab intellectu, & voluntate dupliciter. Vno modo secundum inadæquatas considerationes, & diuersas connotationes extrinsecas. Alio modo secundum diuersam rationem potentiae ad potentiam, ita quod una potentia se habeat ut consequens ad aliam, vel operans ex alia, sicut voluntas comparatur ad intellectum. Et vno verbo, vel potest sumi distinctio attributorum secundum diuersas formalitates actuum, seu principiorum formalium intra eandem potentiam, ita quod omnes illae formalitates vel actus pertineant ad eandem potentiam quasi inadæquatè: vel potest sumi distinctio attributorum secundum rationem diuersae potentiae, & diuersas rationes adæquatas, & non solum secundum inadæquatas rationes eiusdem potentiae, licet intra eandem diuersam rationem inadæquatam principij vel actus habeant: sicut intra intellectum diuinum diuersa attributa distinguimus, tanquam inadæquatas rationes eiusdem intellectus virtutis, v.g. sapientia, ars, prouidentia, & alia similia attributa distinguuntur à nobis ratione, sed intra eandem potentiam intellectus. Et in potentia voluntatis distinguitur iustitia, misericordia, gaudium, amor, & similia ut distincta quidem attributa, vel actus secundum rationem, sed intra eandem potentiam, non ut potentiae distinctae, sicut sunt voluntas, & intellectus. Et aliqua attributa se habent ut adæquatè distincta, licet non sint potentiae, sicut aeternitas, immensitas, vnitatis, bonitas, non autem se habent ut includens, & inclusum, ut inadæquatae rationes intra idem attributum, seu potentiam. Sic ergo aliud est inquirere, an omnipotentia, ut vis executiua distinguatur ratione ab aliis attributis, ut tamen ratio inadæquatè inclusa intra potentiam intellectiuam, aliud an sit attributum ita distinctum, quod se habeat nostro modo intelligendi ut potentia distincta à voluntate, & intellectu, sicut in nobis potentia motiua à voluntate. Quibus suppositis.

Conclusio nostra est: Potentia executiua in Deo non distinguitur ab intellectu, & voluntate tanquam potentia diuersa, & attributum adæquatè diuersum ab illis; benè tamen distinguitur ratione tanquam attributum inadæquatum intra potentiam intellectiuam, quatenus dicit connotationem diuersi effectus, & formalitatem diuersi principij; scilicet intellectus ut intelligens, vel ut practice, & imperatiue exequens, & produciens dicendo, non tamen potentia executiua est formaliter ipse actus liber voluntatis; licet illum praesupponat, & requiratur. Tres partes habet conclusio.

Prima negatiua, quod non distinguitur ab intellectu, & voluntate adæquatè ut potentia diuersa.

Secunda affirmatiua, quod distinguitur inadæquatè, & ut aliquid pertinens ad intellectum, additque supra scientiam, rationem principij productiui ad creaturas, quod utique exercetur per actum intellectus practici, qui est ipsum dicere efficax Dei.

Tertia etiam negatiua, quod non est solus actus liber voluntatis formaliter, licet illum praesupponat.

Prima pars sumitur ex D. Thom. qui id affirmat de Deo, & etiam de Angelis, quod in eis non datur potentia motiua distincta ab intellectu. De Deo id affirmat in *hac qu. art. 1. ad 4.* ubi licet videatur ponere duplicem solutionem, reuerà tamen secunda est maior explicatio primae: dicit enim S. Thom. quod *Potentia non ponitur in Deo, ut aliquid differens à scientia, & voluntate secundum rem, sed solum*

secundum rationem, in quantum scilicet potentia importat rationem principij exequentis id quod voluntas imperat, & quod scientia dirigit. Vbi solum loquitur vniuersali modo, quod est aliquid differens secundum rationem, & non explicat determinatè, an sit differens tanquam attributum adæquatè distinctum, & potentia in ratione potentia diuersa à voluntate, & intellectu; an verò tanquam aliqua ratio inadæquata, & petinens ad eandem potentiam secundum inadæquatam tamen connotationem, & ut inclusum in includente. Id verò deinde explicat, addendo: *Vel dicendum quod ipsa scientia, vel voluntas diuina secundum quod est principium effectiui habet rationem potentia; Vnde consideratio scientia & voluntatis precedit in Deo considerationem potentia sicut causa precedit operationem, & effectum.* Vbi apertè docet quomodo potentia executiua distinguatur à scientia, & voluntate, scilicet non sicut diuersa potentia, sed ut ipsamet scientia sub consideratione, & formalitate principij effectiui. Quod est non omnem distinctionem negare secundum intellectus considerationem, sed modum quo distinguatur exponere, scilicet sub consideratione quadam inadæquata ipsius intellectus, vel voluntatis. De Angelis verò quod in eis non sit potentia motiua distincta ab intellectu, disertè affirmat *opuscul. 12. art. 3.* dum inquit: *Angelos mouere celos conceptione sui intellectus efficaci*, quod non esset, si per potentiam distinctam mouerèt celum, quia actio talis potentia non esset conceptio. Hanc eandem partem cum D. Thom. docent eius discipuli *hic* Caiet. Nazarius, Gonzalez *disp. 79.* Scotus *in 1. dist. 37. qu. 1.* Vasqu. *hic disp. 102. c. 2.* quamuis ipse sentiat operari Deum immediatè per actum voluntatis, non per actum intellectus, qui sit imperium efficax, cuius oppositum ostendimus *supra disput. 7.* agentes de hoc actu imperij, & statim iterum attingemus *in 1. parte conclusionis.*

7 Fundamentum huius partis est quia potentia executiua non ponitur distincta à volitiua, vel imperatiua, nisi propter aliquam imperfectionem in potentia ipsa: nam potentia exequens quando est distincta à dirigente, & imperante, se habet ut instrumentum obediens voluntati: de se enim non est potentia cognoscens, aut volens, sed exequens ut naturalis potentia, sed subiecta, & regulata per potentiam imperantem, ideòque directioni eius subicitur, & se habet ut obediens illi, & ut instrumentum eius: si enim non obediret, cæco modo operaretur, & secundum totam suam vim ut virtus naturalis. Sic ergo potentia executiua quando est distincta à directiua, seu imperante, solum seruit ut instrumentum ad obediendum illi, & exequendum, non in his quæ pertinent propriè ad se, sed in his quæ pertinent ad potentiam dirigentem, & imperantem, quatenus per se exequi non potest ea, quæ ad se pertinent: & sic exequitur per alterum. Nam aliquando vna potentia imperat alteri, non ut purè exequenti, sed etiam ut operanti proprias actiones suas, licet quia dependentiam, & coordinationem habent cum aliis potentiis, ab eis moueri, & dirigi possint: sic enim intellectus mouet voluntatem, & voluntas intellectum, aut etiam appetitum, tamen ista potentia mota, etiam habent suas proprias operationes, nec sunt potentia merè executiua alterius imperantis, & dirigentis. Nos autem loquimur de potentia merè executiua eorum quæ pertinent ad vim dirigentem, ita quod non habeat aliam operationem quam exequi id quod ab altero imperatur, vel ordinatur. Talis potentia dicimus quod nunquam est distincta ab altera ordinante, & imperante, nisi propter aliquam

imperfectionem, tum ex parte potentia imperantis, tum ex parte ipsius exequentis. Ex parte quidè ipsius imperantis, quia non habet in se sufficientem efficaciam ut res mandetur executioni, nec res ipsa ad extra perfectè ei obediunt, & subiiciuntur, ideò indiget aliquo distincto à se, quo tanquam instrumento res illa sibi subiiciantur, & executionem habeat, sicut quia homo manu sua non habet vim sciendi aut frangendi aliud, indiget gladio, vel malleo ad id exequendum, & quia suæ imaginationi, & appetitui non perfectè subiiciuntur organa corporis, & multo minus corpora extra se, indiget virtute motiua, quæ organa moueat, & corpora ad extra impellat. Ex parte autem ipsius virtutis executiua est imperfectio, quia non est virtus se mouens, & agens, etiam in sua linea, & ordine, sed purè obediens, & mota, & per modum instrumenti se habens respectu potentia dirigentis, & imperantis. Potentia autem, quæ principaliter, & per se solum sunt instrumenta, & mota, imperfectionem important, & non possunt sic transferri in Deum ut distincta ab aliis, quia ex ipsa distinctione contrahunt prædictam imperfectionem.

Ad rem ergo: Si in Deo habemus fundamentum ad distinguendum potentiam merè executiua à potentia dirigente, & imperante, habemus fundamentum ad ponendum potentiam per modum instrumenti, & operantem tantum obediendo, quod imperfectionem potentialitatis importat, utpote cum se habeat ut purè mota, si se habet ut distincta per rationem: erit enim per rationem mota, & instrumentalis, & potentialis. Rursus ex parte ipsius potentia imperantis ponimus efficaciam minus plenam, & perfectam, & cui non plenè subiiciantur, & obediunt res ad extra, & ita indiget compleri quoad istam efficaciam alia potentia, quæ illi res ad extra subiiciat, & sic exequatur. Dei autem voluntati, & imperio perfectissimè creatura subiecta sunt multò magis quam illa potentia executiua, si in Deo daretur: hæc enim esset diuina, & sic non operaretur ex subiectione ad intellectum imperantem; creatura autem ex plenissima subiectione ad Deum operatur: ergo immediatè voluntas seu intellectus Dei imperans agit in illa, non autem datur potentia executiua in Deo, quia non datur potentia subiecta, & ex subiectione operans; etiam per intellectum, nisi fictè; executiua autem potentia si distinguitur ab imperante, hoc ipso operatur ex subiectione ad illam, & supponit rem ad extra non plenè subiici efficacie imperantis secundum se, quia indiget medio quo exequatur, & faciat sibi subiici id quod vult, & imperat. Vnde videmus quod voluntas ad mouendum intellectum, vel appetitum non indiget aliquo instrumento, vel potentia media exequente talem motionem, sed per se immediatè vna potentia mouet, & determinat aliam, siue id fiat per aliquam sympathiam, ut multi putant, siue per aliquam actionem, & impressionem vnius potentia in aliam, ut nos ex mente D. Thom. ostendimus *lib. de anima quæst. 12.* sed quidquid de hoc sit: tamen vna ex his potentiis mouet aliam per seipsam, & non medio alio instrumento, quia de se perfectam efficaciam habet circa aliam, & alia perfectè ei subordinatur, vel coordinatur. Si ergo creatura perfectissimè Deo subordinatur, multò magis quam noster intellectus, vel appetitus voluntati, & voluntas vel intellectus imperans habent plenissimam efficaciam de se, utique sine media potentia exequantur, & mouebunt, sed immediatè per seipsas.

Dices: Non obstante hoc requiritur distincta potentia, non propter defectum efficaciarum, vel subordinationem

ordinationis, sed propter necessitatem actionis, quia videlicet ad exequendum, & operandum ad extra, requiritur actio transiens; intellectus autem, & voluntas solum habet actiones immanentes; & sic requiritur diuersum principium, & potentia. Sed hæc replica in nostra sententia locum non habet, qui cit. loco de Anima, ostendimus actionem immanentem non repugnare quod habeat vim transeuntis, tum propter eminentiam super transeuntem, quia altior, & perfectior illa est; tum quia de se est directiua transeuntis, & coordinatur illi, aut subordinat eam sibi; unde de se petit habere vim mouendi, & tangendi aliquid extra se, id est imprimendi in aliam potentiam quam dirigit, & subordinat sibi: si enim potentia immanentes ex natura sua coordinantur, aut subordinantur, natura quoque non debet deficere in necessariis, ut videlicet possit agere, & imprimere in id quod sibi subordinatur, quia aliter non potest commodè dirigere, & mouere illam; & si habeat plenam, & perfectam efficaciam dirigendi, & subordinandi, habebit quoque vim exequendi talem motum, quod est illam actionem virtualiter esse transeuntem, seu imprimentem in aliud. Sed esto, non fiat hoc per actionem transeuntem, saltem sit per sympathiam: videmus enim quod intellectus mouet voluntatem, & voluntas intellectum, & appetitum, & ipsam vim motiuam etiam mouet, & dirigit ut obediat ei. Si hæc motio sit per aliquam impressionem actionis transeuntis, habemus intentum, quod actio immanens virtualiter est transiens, vel saltem ipsamet potentia, quæ immanenter operatur, etiam transeunter mouet per seipsam; & sic poterit etiam agere in exteriores res, si ipsa potentia sit perfectè efficax, & res exteriores plenè ei subiiciantur, sicut potentia interiores. Si sit per sympathiam sine actione media transeunte, multò magis habemus intentum, quia hæc sympathia fundatur in colligatione, & subordinatione potentiarum ita perfectæ, & in tali subiectione vnius ad aliud, quod superiore potentia operante aut volente, inferior statim ei pareat, & operatur. Ergo quod hæc sympathia non intercedat, & ista obedientia, erit ex defectu subiectionis, & subordinationis vnius ad aliud, & ex defectu efficacis in superiori, respectu inferioris. Creaturæ autem multò magis subiiciuntur, & subordinantur Deo, quàm appetitus noster voluntati, & potentia motiua appetitui, & Deus plenior effiaciam de se habet in illas: ergo similiter per se ipsam diuina voluntas, & scientia habebunt executionem in illas, sine alia media potentia executiua. Et eadem ratione Angeli, quia sunt perfecti spiritus, & ex natura sua ordinati ad regenda, & mouenda corpora, ex se habent sufficientem efficaciam, & corpora sufficientem subiectionem, ut ab illis moueantur sine alia potentia executiua intermedia.

10 Secunda pars nostræ conclusionis ex argumentis factis pro sententia Durandi probata manet: constat enim ad distinguendum in ipsa potentia intelligendi vel volendi rationem principij emitentis, & producentis creaturas ad extra sufficientissimum fundamentum intercedere, ad distinguendum formalitatem, & rationem principij producentis, licet non rationem potentia motæ, & obedientis, siue subiectæ dirigenti, sicut exigit potentia executiua quando est distincta in ratione potentia ab imperante, & dirigente. Itaque respectu effectus ad extra diuersa connotatio, & sufficiens fundamentum est ad distinguendum principium dandi esse effectui ad extra, aut intelligendi

ipsum ad intra, principium actus purè immanentis, aut virtualiter transeuntis, attingentis tam Deum, quàm creaturas, & impossibilia, aut solum res creatas possibiles dando illis esse, denique principium speculandi aut practicandi cum efficacia ponendi in re, vel solum volendi, & inclinandi in talem rem per modum: id enim est causa producendi, non ipsum producere. Et sicut sapientia, & ars, & prouidentia distinguuntur inter eandem petentiam intellectiuam, ut rationes inadæquatæ eiusdem intelligibilitatis, & virtutis intellectiua, & similiter in voluntate sunt diuersa attributa eiusdem potentia, sic vis productiua in intellectu practico, vel in voluntate distingui potest, ut inadæquata ratio eiusdem potentia, non ut potentia distincta, & mota à voluntate: Importare autem potentiam executiuam rationem principij productiui erga creaturas; & sic distingui secundum rationem ab intellectu, ut est principium intelligendi, vel voluntate ut est principium volendi, S. Thom. affirmat hic art. 1. ad 4. & q. 1. de potentia art. 1. ad 9.

Tertia denique pars conclusionis quod potentia executiua sumpta per modum principij operantis ad extra non sit ipsa volitio libera, licet præsupponatur volitio ad producendum, rectè probatur contra sententiam Molinæ à Vasquez hic disput. 102. cap. 4. quia potentia executiua, seu principium producendi creaturas ad extra est aliquod prædicatum necessariò conueniens Deo, quia est perfectio intrinseca Dei esse omnipotentem; actio autem libera sub formalitate, & denominatione liberi potest non conuenire Deo; ut autem dicit ipsam entitatem actus voluntatis diuinæ, quæ necessariò est in Deo, sic est ipsamet voluntas per modum actus puri indifferens ad volendum, & nolendum; producendum, & non producendum; & sic non ipse actus liber, sed ipsa facultas voluntatis erit facultas, seu principium exequendi, ut habet virtutem efficaciter nolendi vsque ad executionem. Præterea, Volitio libera est causa, & ratio agendi, quia inclinat ad operandum, & producendum, & sic significatur ut causa actionis, sicut Psalm. 17. *Saluum me fecit, quoniam voluit me.* Et ad hoc deseruiunt ea, quæ supra disput. 4. latè diximus de constitutio actus liberi, quod non est ipsa connotatio productionis ad extra, eo quod volitio antecedit productionem tanquam inclinans, & causans illam; & sic facultas producendi non est ipsa volitio libera. Neque volitio significatur per modum facultatis, & principij, sed per modum actionis; & sic si pertinet ad executionem, magis est ut actio executiua, quàm ut principium; ipsa verò voluntas erit principium, seu facultas exequendi.

Si inquiras: Ex his duabus facultatibus, voluntatis, & intellectus, per quam proximè exercetur ipsa productio, & omissio creaturarum?

Respon. Vasquez hic disputat. 102. cap. 3. censere quod voluntas est magis immediatum principium, quia appetitus est qui immediatè mouet, intellectus autem solum excitat, & dirigit appetitum. In cap. autem 4. non vult quod imperium intellectus sit ipsa potentia exequens; tum quia existimat talem actum imperij non dari; tum quia si datur est actus liber, qui posset abesse à Deo: ergo non est ipsa potentia, seu principium exequendi ob eandem rationem, quia diximus hanc potentiam non esse ipsam volitionem liberam.

Nihilominus, in hoc quod ipsa potentia non sit actus

440 Quæst. XXVI. De Potentia diuina,

actus imperij, vt actus liber est formaliter, libenter cum Valquez conuenio: est enim eadem ratio ac de volitione libera voluntatis. Existimo tamen actionem immediatè tangentem, & producentem creaturas esse actum intellectus practicum, quo imperat Deus, & ad imperium efficax sequitur effectus: iste autem actus imperij præsupponit antecedenter actum voluntatis, & elicitive est actus intellectus, voluntatis autem solum est vt inclinantis, & mouentis. Quare facultas, seu principium exequendi pertinet ad vim ipsam intellectiuam, quatenus practica, & imperatiua, ad quam concurrunt ars vt factiua, & prouidentia vt præparatiua, & idea vt exemplar; & ab his procedit imperium efficax vt actus sua efficacia non solum dirigens, sed etiam efficiens in tempore id quod imperat; & sic talis actus non est facultas ipsa, seu virtus, sed talis virtutis actio, & executio. Quem actum imperij dari, ostendimus *suprà disput. 7. art. 2.* agendo de actu in quo consistit prædestinatio, & ostendimus voluntatem non immediatè operari ad extra, nisi medio imperio ordinatiuo, & efficaci respectu effectus faciendi, & latius de hoc agemus *1. 2. circa quæst. 13. & 17.* Sic ergo ex opposito fundamento Valquez, oppositum inferimus, nempe quia datur talis actus imperij ab intellectu elicitus, & ex motione voluntatis præsupposita originatus, vt possit operatio ipsa ordinatè fieri, & quia efficax est efficacia à voluntate orta, & antecedenti, vique ad effectum ponendum se extendit; quod ibi latius ostendimus. Certè D. Thom. *opusc. 11. suprà citato* affirmat, Angelos mouere cœlos actu intellectus, scilicet ipsa conceptione efficaci, qua practice intelligunt. Et Scriptura indicat Deum per actum intellectus operari, quia *Ipsè dixit, & facta sunt, ipse mandauit, & creata sunt*, Psalm. 148. Dicere autem est actus intellectus, & mandare est actus imperij. Et *Portat omnia verbo virtutis suæ*, ad Hebr. 1. & *Verbo Domini celi firmati sunt*, Psalm. 32. Benè video, non ita strictè ista loca probare quòd Deus oporetur per intellectum, quòd debeat necessariò intelligi de immediata elicentia, & productione: posset enim dici quòd loquuntur de productione mediata, quia ad ipsum dicere intellectus sequitur immediatè efficacia voluntatis, sicut etiam aliquando insinuat Scriptura quòd ipsa volitione Deus operatur, vt Psalm. 134. *Omnia quacumque voluit Dominus fecit*; Iudith 9. *Et illud factum est quod ipse voluisti*, ad Ephes. 1. *Qui operatur omnia secundum consilium voluntatis suæ*; & tamen nos exponimus ista loca de efficientia mediata, licet reuera non aliud significant, quàm quod omnia fiunt ad nutum diuinæ voluntatis, siue hoc immediatè per voluntatem fiat, siue non. Cur ergo non idem dicemus, quando Scriptura significat quòd verbo Dei, & ipso dicere eius res fiant? Quare dicimus quòd Scriptura tam volitioni quàm dictioni, seu imperio Dei attribuit productionem rerum, quia reuera ad vtrumque pertinet, quoad efficaciam, ad voluntatem, quoad ordinationem, & dispositionem, ad vim practicam intellectus. Sed quodnam ex his sit immediatius productioni, & eliciat executionem effectuum, Scriptura non determinat, sed hoc reliquitur disputationi Theologicæ iuxta naturam ipsam voluntatis in mouendo, & imperij in ordinando, & intimando hanc efficaciam, quòd videtur immediatius, & propinquius effectui, quia ipsa efficacia non peruenit, neque coniungitur aliis po-

tentis, vel agentibus, nisi vt manifestata, & ordinata per intimationem talis efficacix, & hoc facit intellectus.

Postremò aduerte quòd Valquez, *in hac disp. 13. 102. cap. 5. contra Caietan.* affirmat per actionem transeuntem nihil nouum resultare in agente præter relationem ad effectum vel passum, tum quia Aristot. dicit *5. Met. cap. 11. Relationes secundæ generis esse tantum potentias, & actiones*; non ergo aliquid nouum præter actionem in ipso agente resultans; tum quia aliàs agens, in quantum agit, moueretur recipiendo illud absolutum, quod de nouo confurgit, quod negat Aristot. *4. Physic. cap. 3.* tum quia non potest explicari, quid sit illud absolutum in agente in quo fundatur talis relatio. Sed hæc leuia sunt, nec quidquam probant, vt ostendimus *3. Physic. quæst. 14. artic. 4.* Certè nec ipse Valquez explicare potest quomodo relatio illa fundetur de nouo in agente, si in ipso nihil est de nouo: nam in ipsa potentia immediatè fundari non potest, eum de se sit indifferens ad agendum, vel non agendum, & non semper in ea est relatio ad effectum. Et sic non sufficit poni ipsum effectum in rerum natura, vt confurgat relatio in potentia, sicut posita de nouo albedine, confurgit in alia albedine similitudo; quia albedo determinata est de se ad similitudinem cum alia albedine; & sic sufficit ipsam albedinem poni vt terminum: potentia verò non est determinata ad effectum, sed indifferens ad agendum, vel non agendum: indiget ergo in se determinari vt confurgat relatio. Ergo quando est talis relatio aliquid pro fundamento habet præter nudam indifferentiam potentix, scilicet modum aliquem quo determinatur, & transiit illa potentia de potentia ad actum, de otio ad operationem; & sic manet determinata quandiu agit; qui modus, aut determinatio, vt ibi diximus, non est actio pro motu, seu actio effecta, & consummata: hæc enim cum termino seu effectui identificatur, sed est inchoatio actionis, seu determinatio agentis, & actualitas in agendo.

Et ad testimonium primum Aristot. dicitur quòd relatiua secundæ generis sunt potentix, & actiones, sed non potentix nude, & in statu indifferentiæ ad agere, vel non agere, sed determinatæ, & actualatæ vt ab illis egrediatur actio.

Ad secundum dicimus non sequi, quòd agens, in quantum agit, moueatur, sed solum in quantum agit mouet; sed si ipsum agens sit in potentia, & indifferens ad agendum, prout sic etiam indiget mutari, & transire de otio in actum; & sic nouitas actionis facit aliquam mutationem in agente, non vt agens, sed prout est exiens de otio in actum, vt inquit S. Thom. *2. contra Gent. cap. 35. & in 2. dist. 1. quæst. 1. artic. 5. ad 11.* Nec tamen etiam agens prout sic in potentia mouetur illamet actione, prout est motus, & prout est actio effecta: sic enim non est in agente, sed in passio, ubi est terminus motus, sed mutatur, & actualatur illa actio; prout est actualitas agentis, & determinatio quædam eius, seu transitus de otio in actum, de potentialitate in actualitatem, & de tali potentialitate in actum mouetur ab alio agente à quo excitatur vel applicatur ad agendum, scilicet à Deo, qui vltimò determinat agentia creata, quæ sunt in potentia, & mouet illa ad actum; & sic non mouentur in quantum agunt, sed vt sunt in potentia ad agendum; & prout sunt in potentia, non mouentur illamet actione sua vt motus est, & est in passio, sed illa actualitate, & determinatione, quæ ex applicatione, seu motione superioris causæ determinationis oritur, & in ipso

ipso agen te inchoat operationem, quatenus remouet à se realiter otium, & effluxum effectus inchoat, & constituit agens in statu non quiescendi, & ille status est modus aliquis in agente, qui inchoatiue est actio, & facit formaliter transire agens de potentia ad actum, cum applicatio, & motio Dei id faciat efficienter; & sic potius est mutatio quædam metaphysica, id est, communis omni agenti, tam physico, quam spiritali, quam motus physicus qui solum est in passo; & de hoc solum negat Philosophus moueri agens, vt agens, non de illa priori, quæ est mutatio agentis, vt in potentia est.

Ad tertium constat ex dictis, quid sit illud nouum quod fit in agente, scilicet modus, seu status operandi, quo determinatur, & manet in actu, & non in pura potentia, & otio, quæ determinatio, & modus prouenit à potentia vt mota, & excitata, seu applicata à Deo: sic enim reducitur in actum secundum, & denominatur actu operans actualitate intrinseca sibi, dum actu operatur, cum antea esset in potentia tantum, & statu otij, & quietis non agendo; & cum in se intrinsecè esset non agens, in se intrinsecè debet mutari, vt agens sit, vt citato loco physice diximus.

Argumenta Durandi probant secundam partem nostræ conclusionis, scilicet distinctionem rationis in potentia executiua per modum inadæquatæ rationis, & formalitatis principij operandi intra eandem potentiam intellectus, & voluntatis, non per modum potentiæ adæquatè distinctæ, & subordinatæ efficaciz voluntatis.

Argumenta verò Molinæ probant actum volitionis diuinæ esse efficacem in suo genere, per modum scilicet mouentis, & inclinantis ad operandum, & illa efficacia attingit effectum vt actus mouens mediante imperio, & mediante ipso dicere intellectus quo immediate tangitur effectus. Non tamen probat ipsum actum esse principium, & facultatem exequendi, sed vel esse ipsam executionem in actu, vel motionem actualem inclinantem intellectum vt dicat imperatiue, & dicendo operetur. Et sic Deus immutabiliter operatur, & quia vult, non volitione illa vt facultate, & principio, sed vt actione vel mouente, & inclinante intellectum, vel actu exequente.

ARTICVLVS III.

Quid sint in Deo potentia ordinata, ordinaria, & absoluta?

Multi pro eodem accipiunt potentiam ordinatam, & ordinariam, quia ordinatam potentiam vocant, quæ aliquo ordine legis præfigitur, & ordinatur, & quæ sub lege est, ordinaria etiam est. Quare absoluta potentia est quæ lege absoluitur lata à Deo, vt si modò decerneret aliquem damnatum ex inferno eripere, id faceret secundum absolutam potentiam, non secundum ordinatam, seu ordinariam. Et antiqui Theologi solum ordinatam potentiam videntur

Ioan. à S. Thoma in 1. part. D. Thoma.

agnoscere, & appellare, & contraponere absolutæ, non autem potentiam ordinariam, vt patet apud D. Thom. hic artic. 5. ad 1. & 3. contra Gentil. cap. 98. & apud Scotum in 1. dist. 44. quest. 1. eo quod omnis potentia ordinata etiam est ordinata per sapientiam diuinam, licet non omnis ordinata est, & recta; & sic sub ipsa ordinata comprehendunt ordinariam.

Nihilominus tamen rectè distinguitur potentia vt ordinata, & ordinaria secundum diuersos respectus. Absoluta verò potest dici vel secundum quod absoluitur ab vno respectu, vel ab alio, vel ab omni, si secundum se consideretur, licet in re nunquam possit potentia in exercitio absolui ab omni respectu. Explico singula. Ordinata potentia dicitur illa quæ subiecitur ordini, & regulæ sapientiæ dirigentis, & opponitur ei quod ordinatum non est, siue purè negatiue per absentiam regulæ, siue priuatiue per earentiam eius regulationis quæ debetur. Regula autem, & ordo quo ordinatur potentia executiua, est sapientia, & prudentia, seu consilium quo voluntas rectificatur, & executio disponitur. Ordinaria potentia dicitur illa, quæ communi modo, & lege operatur, & contraponitur speciali legi, vel privilegio, vel extraordinariæ dispositioni de re: non ordinationi. Nam etiam si dispositio extraordinaria sit, est tamen ordinata per sapientiam, quia sapientia, & prudentia diuersos ordines, & dispositiones habent, & ipsum dispensare, & specialia priuilegia facere, secundum sapientiam Dei ordinatum est. Absoluta potentia, est ipsa vis executiua considerata secundum se absque his respectibus, vel legis communis, vel ordinationis, & dispositionis specialis; & potest præscindere ab vno, vel alio respectu, ab isto, vel illo ordine legis, & determinationis sapientiæ, vel considerari sine villo ex his respectibus, sed vnde secundum se tantum.

His suppositis, dicimus quod potentia ordinata est illa quæ operatur secundum aliquem ordinem, & dispositionem seu regulam diuinæ sapientiæ siue ordinariam, siue extraordinariam, & specialem: cum enim sapientia diuina infinitos rerum ordines habeat, secundum quos potest de rebus tractare, & disponere, licet vnum relinquat, & alium assumat, secundum quemcumque operetur, ordinatè facit, & per regulas rectas, & prudentes; & sic ordinata erit potentia, quæ id exequitur. Vnde si modò Deus crearet nouum mundum, nouam stellam, aut aliquem ex Inferno eriperet, aut quodcumque miraculum faceret, nihilominus secundum ordinatam potentiam faceret, quia hæc omnia regulata sunt per sapientiam diuinam.

Secundò addo, quod ordinaria potentia dicit non solum potentiam ordinatam secundum sapientiam diuinam, sed operantem secundum leges communes, & cursum communem rerum, non secundum aliquid speciale, & extraordinarium respectu illius legis communis. Si verò facit aliquid extra has leges communes, vt miraculum, licet faciat ordinatè, & secundum dispositionem rationis, rectè tamen non facit modo ordinario, & secundum potentiam ordinariam, sed specialem; & sic absoluitur à modo ordinario, recidit tamen in alium ordinem sapientiæ diuinæ, à quo dicitur ordinata illa potentia, licet non ordinaria, id est,

P p

442 Quæstio XXVI. De Potentia diuina,

est, modo communi, & ordinario operans.

Denique potentia absoluta dicitur, quæ absoluitur ab his respectibus, seu legibus, & secundum se solum consideratur. Et quidem in re potest absolui à modo ordinario operandi, & non ut potentia ordinaria, ut cum facit miraculum, non tamen potest in re esse absoluta ab omni ordine sapientiæ diuinæ, sed si relinquit vnum ordinem, assumit alium; & sic semper operatur in re ut ordinata, quia nunquam potest Deus aliquid in exercitio facere, nisi secundum dispositionem sapientiæ suæ. Potest tamen secundum nostram considerationem intelligi potentia executiua secundum se ut infinitæ virtutis est sine aliquo ordine ad regulas diuinæ sapientiæ; sed hoc solum fit per intellectum: in re enim non potest ab omni isto ordine præscindere, dicitur tamen posse ali-

quid facere secundum potentiam absolutam, id est, non ordinario modo operantem, sed absolutam à legibus communibus, sed secundum aliquem ordinem sapientiæ, ad quod tamen requiritur vis infinita.

Quæ dicit D. Thom. *artic. 4.* quod præterita non potest fieri quod non fuerint, satis manifesta est implicatio in littera. Et nos tractauimus hoc in *lib. de generatione quæst. 12.* videatur *ibi*, & Gonzalez *hic disput. 8.* Res non est difficilis: nec enim docet D. Thom. rem præteritam non posse redire, sed præteritionem ipsam non posse tolli.

Quod Deus possit facere meliora ex parte rerum factarum, licet non ex parte ordinis, & modi faciendi, qui est à summa sapientiæ difficultate etiam caret, & sufficiunt dicta *art. 2.*

F I N I S.





INDEX

RERVM ET VERBORVM

Prioris partis huius secundi Tomi in
primam Partem D. Thomæ.

Prior numerus paginam, posterior illius paragraphum indicat.

A
ACCIDENTIA propria suas habent speciales, & proprias ideas. 28.n.15.
Accidentia communia quomodo generantur. 29.n.22.23
Actio diuina quomodo attingit creaturas. 20.n.33
Actio diuina non solum vt executiua ad extra, sed etiam prout manet ad intra, attingit, & respicit creaturas. 125.n.9
Actus intra Deum non distinguitur realiter à Deo. 101.n.2.
Actus virtualis à Deo excludendus, sicut & conceptus, & potentialitas. 106.n.18. & seqq.
Actuum notionalium duplex consideratio, entitatiua & relatiua. 109.n.30
Ad Actus notionales datur in Deo potentia, & principium notionale. ibid.
Circa Actum Dei liberum sententiæ, & difficultates enodantur, & elucidantur. 111.112. & seqq.
Vide voluntas, volitio.
Actu in libero cur attingentia obiecti contingens est, & variari potest. 133.n.18.
Actus suspensio in Deo quam imperfectionem habeat. 138.n.29
Actus idemmet inuariatus quomodo possit idem velle, & non velle in Deo. 160.n.40
Actus determinatio est in potestate voluntatis. 238.
Actus omnes Dei ab eius amore pendent. 138. *summ. lit.*
Actus naturales sunt effectus prædestinationis. 376. n.15.16
Afficere & efficere quomodo amori conueniant. 150. n.6
Affectus simplex est ante actum intentionis. 154. numero. 19.
Agens intellectuale per quid operatur, & in quo ab agente naturali differat. 1. in *summ. lit.* & pag. 2. n.2
Amare liberè, & amare necessariò, quid. 133. numero. 16
Quid simplici complacentiâ. ibid.n.17
Amicitia quid. 243.n.11
Amoris efficacis, & inefficacis distinctio vnde petenda. 150.n.6
Amor causalitatis duplex genus in nobis exercet. 150. n.6
Amor efficax non multum occupatur circa delectationem, sed circa ordinationem eorum per quæ assequendus est. 151.n.6
Ioan. à S. Thoma in 1. part. D. Thomæ.

Amor in Deo esse probatur. 238. *summ.*
Ad quæ obiecta se extendit circa creaturas. ibid.
Amor in Deo non est metaphoricus. 139.n.1
An vt condistinctus à gaudio. n.2
Amor concupiscentiæ, & amicitiae explicatur. 241. n.10
Vterque in Deo negatur. 242.n.11.12
Amor personarum diuinarum, quis. 242. n.14
Angelus compositionis & diuisionis expers. 60.n.43
Animas ante corpora extitisse, & iuxta merita vel demerita incorporatas, Origenis error. 343.n.2
Error item Priscillianistarum, & Manichæorum, eas in caelesti habitatione peccasse, & in corpora deiectas. ibid.
Annihilatio non est odium Dei, sed relatio dandi esse. 246.n.12
Appetitus innatus quid, & vnde nascitur. 102.n.11
Quid item, & vnde Appetitus elicitus. ibid.
Apprehensio in simplici quomodo reperiatur veritas. 57.n.21
Apprehensionis, & iudicij distinctio. 55.n.11
Arbitrium liberum quibus titulis ab hæreticis huius temporis impugnatum. 91.n.1
Arbitrij liberi motus est gratiæ diuinæ effectus. 194. n.10.
Arbitrium liberum posito decreto Dei efficaci potentiam retinet ad oppositum. 215.n.50
Arbitrij liberi bonus vsus vt se tenet ex parte nostra est effectus prædestinationis. 367.n.2. & seqq.
Ars & scientia Dei quid discriminis habeant. 21.n.41.42
Attributorum diuinorum distinctio non formatur in intellectu diuino. 20.n.34
Attributum in Deo quid assignet. 22.n.47
Attributi vox quid sonet in Deo. 23.n.50
Auxiliorum diuinorum de efficacia disputare aut tractatus edere ab Urbano VII. prohibitum. 66
Auxilium diuinum, & concursus diuinus an idem sint. 81. num. 1
Auxilium sufficiens quid. 83.n.14
Datum fuit primo homini. 85
Ad missum fuit à Pelagianis. n.15
Sub qua calliditate. n.10
Auxilium diuinum operans est respectu primi actus voluntatis, & cooperans respectu actus ad quem voluntas se mouet, & sibi imperat. 184.n.8
Auxilium diuinum quomodo est in nostra potestate 212.n.39
Auxilium diuinum an frustrari possit. 216.n.53.54
Auxilij sufficientis negatio est effectus reprobationis. 419.n.27. & seqq.

Index Rerum,

B

- B** *Asilidis* hæresis tangitur. 67.n.5
Beatitudo cur competit Deo. 427.summ.q.26
 Ei tribuenda est secundum intellectum. ibid.
 Complectitur omnem aliam beatitudinem. ibid.
Bonitas in rebus est ante ordinem ad appetitum. 61.
 num.2
Bonitatis diuinæ est vt omnibus beatitudinem velit,
 & suæ iustitiæ provideat. 342.n.23
 An deceat ipsam quibusdam dare merita, aliis non.
 ibid.
Bonum & verum in quo differunt n.32
 Bonum est in rebus, non in appetitu. 34.n.2. Quid ad-
 dat super ens. 39.n.22
 Bonum in quo consistit. 54.n.10
 Bonum aliud absolutum, & aliud relatum. 60.n.2
 In quo vtrumque fundatur. 61.n.eod.
 Bonum pro integritate rei sumptum non est passio
 entis. 61.n.3
 An consistat in integritate entis, an addat respectum
 ad appetitum. ibid.n.4.
 Bonum est in rebus, verum autem in compositione,
 & diuisione intellectus. 61.n.5
 Quomodo sit prius quàm verum. ibid.
 Est obiectum appetitus. 62.n.6
 Bonum non mouet voluntatem nisi per sui diffusio-
 nem. 239.n.39
 Quomodo habet statum appetibilitatis. ibid.
 Bona quæ conducunt ad Dei gloriam sunt duplicis
 generis. 148.n.21

C

- C** *Caluini* error de libero arbitrio ob efficaciam
 diuinæ gratiæ excutitur. 92.n.3
 In quo cum Pelagio conueniat. n.2
 Eius æquiuocatio in negatione liberi arbitrij ob inef-
 ficaciam diuinæ voluntatis. 93.n.14
Caluini hæresis, libertatem nostram tolli per auxilium
 gratiæ efficacis, à Concilio Trident. iugulatur. 197.
 n.18.19
Caluini error de reprobatione. 393.n.20
 Falsò Thomistis obiectus. n.21
Catherini error & Massiliensium de prædestinatione
 refellitur. 290.n.28.291.n.29
Causa physica cur vehementius influat quàm mora-
 lis. 222.n.69
Christus vt homo prædestinatus est ad opera sibi præ-
 cepta, & tamen liberè obediuit, & passus est. 190.
 num.1
 In Christo est iustitia commutatiua. 255.n.20
 Christi satisfactio ex qua iustitia processerit. ibid.
 Christi oratio, & deficientia Petri quomodo conci-
 liantur. 314.n.7
 Christus quorum fratrum dicatur primogenitus. 319.
 num.5
 Christus quomodo meruerit gratiam antiquis Patri-
 bus. 353.n.29
 Eius Incarnatio, & merita sunt causa nostræ prædesti-
 nationis, vt tenet se ex parte nostra. 355
 Christi merita an fuerint causa electionis comparati-
 uè sumptæ, & in indiuiduo. 356.n.5
Cognitionis veritas vnde petenda. 62.n.11
Cognoscere vnum per aliud quando non est imperfe-
 ctio. 24.n.53
 Cognoscere in actu exercito, & signato quid. 56.n.18
Commutatiuum non potest esse inter Deum, & homi-
 nes. 256.n.21. Vide *Iustitia*.
Complacentia simplex quid, & ad quid dirigatur. 133.
 num.17

- Complacentia* simplex quomodo fertur in obiectum
 sub ratione existentiae, & esse. 139.n.40
Compositionis & diuisionis actus apprehensio, & indi-
 cium. 55.n.11
 Compositio quibus speciebus formanda. 60.n.33
Conceptus obiectiuus, & formalis quid? 2.n.5
 Conceptus formalis quando dicatur idea. 3.n.7. quan-
 do non. num.10
 Ex Conceptu à nobis formato quid resultat. 3. nu-
 mero 12
 Conceptus realitatis munus duplex. 8.n.34
 Conceptus formalis Dei non habet rationem ideæ. 9.
 n.3.4
 Conceptus obiectiuus, & formalis quid? 43.n.1
 An in Conceptu formali consistat veritas formalis.
 62.n.10
Concilij Senonensis autoritas infirmatur. 201.n.8
 Eius sensus de efficacia diuinæ voluntatis explicatur.
 202.n.9
 Quid de ea Concilium Tridentinum senserit. n.11
Concupiscentia amor quid. 241.n.10.242.n.12
 Repugnat Deo. n.13. Vide *Amor*.
Concursus diuinus quomodo dat libertatem. 213. nu-
 mero 41
 Concursu in simultaneo generalitas, & influentia in
 actionem consideranda. 82.n.5
 Concursus simultaneus formaliter non est communis
 bonis, & malis actibus in quantum mali sunt. 84.
 n.13
 Concursus diuinus, & auxilium diuinum in quo dif-
 crepent. 81.n.1
 Concursus simultaneus quomodo influit. An eum ne-
 gauerit Pelagius. 81.84.n.14
Connexiones essentielles quomodo dicuntur veritates
 æternæ. 64.n.19
Contingentia rerum in diuina voluntate originatur.
 181.n.1. 182.n.2
Contradictoria duo de eadem re in multis materiis
 soluuntur in diuinis. 160.n.40
 Non absolute de Deo dicuntur. 161.n.41
Creatura quomodo Deo cognita. 12.n.18. Non ha-
 bent perfectam ideam in Deo rationem. ibid. n.17.
 n.19
 Creaturæ possibiles quomodo dicantur bonæ. 138.
 n.32
 Creaturarum possibilitas vnde sumatur. 428.n.4
 Quid sit illa. n.6
 Est prædicatum intrinsecum creaturarum. n.7
 Creaturarum possibilitas in quo consistit. 429.n.10
 Quomodo participetur à Deo. 430.n.14.15
 Ex eius destructione sequitur destructio omnipoten-
 tiæ. 432.433.n.19. & seqq.

D

- D** *Amnatio* æterna est effectus reprobationis. 412.
 numero 7
Damnati carent auxilio sufficienti effectiuo ad bonum.
 423.n.42
 In quo ab ipsis viatores eo nomine differant. ibid.
Debitum quid respiciat. 248.n.3
Decretorum diuinorum efficacium, & infallibilium du-
 plex genus. 96.n.17
 Decreta conditionata dantur in Deo. 159.n.37.160.
 n.38
 Decreta absoluta ex parte Dei, & conditionata ex parte
 obiecti ad cognoscenda futura conditionata, neces-
 sariò admittenda. 160.n.39
 Decreta diuina circa actus nostros liberos vt sic, quo-
 modo efficacia sint. 163.n.1
 Decretum

Decretum indifferens in Deo quid connotet. 164.
num. 4
Non potest reddi efficax ex determinatione causæ
creatæ. ibid.
Quid illa determinatio causæ creatæ. 165. n. eod.
Decreta Dei nihil expectant, vel supponunt ex no-
stra voluntate, vt determinatè, & efficaciter ope-
rentur, quia quod diuinum est totum causat, nihil
à creatura expectat. 172. n. 1
Decreta indifferentia non stant nisi in scientia media:
172. num. 1
Quæ ex ipsis inconuenientia resultent. 173. n. 2. 175. n.
7. 177. n. 12. 179. n. 20
Decreta ex natura sua efficacia, & determinata, non
ex consensu subsecuto efficacis denominationem
sumentia dantur in Deo. 181. n. 1
Decretum diuinum est infallibile cui resisti non po-
test. 194. n. 12
Decreta conditionata quæ. 212. n. 1
Deo nec repugnantiam, nec indecentiam vllam indu-
cunt. ibid.
Cur defensores scientiæ mediæ ea censent impossibi-
lia. ibid.
Probatur quòd non conducant ad infallibilem rei li-
beræ cognitionem. 223. n. 2
Quoad effectum absolutum inefficacia sunt. 223. nu-
mero 4
Non repugnant Deo, nec ex parte obiecti sui. 224.
num. 5
Nec ex parte connotati. n. 6
Nec ex parte prudentiæ, & gubernationis diuinæ. n. 7
Nec ex parte determinationis voluntatis Dei decer-
nentis. n. 8
Decreta conditionata in Deo probantur non inutilia
nec otiosa. 226. n. 11. 12
Decretum Dei an importet necessitatem anteceden-
tem. 308. n. 40
Defectus vel pœnalitates reprobatorum quomodo con-
siderari debeant. 414. n. 11. & quomodo sint effe-
ctus reprobationis. n. 12
Desiderium an Deo tribuendum. 239. n. 2
In quo distinguatur à gaudio. n. 3
Destinationis acceptio duplex ex Scriptura explicatur.
Vide *Prædestinatio*.
Deus in quo differt ab agente naturali, & an ideæ sit
capax 1. in *summ. lit.*
Plures in eo dantur ideæ non entitatiuè, sed respectiue
ad res ideatas, & eorum omnium quæ facit. ibid.
Deus non cognoscit creaturas per ideas extra se exi-
stentes, aut ab illis acceptas. 11. n. 14
Deus quomodo per intellectum suum apprehendit
quod naturæ debitum est. 12. n. 18
In Deo res sunt vt in causa secundum modum cau-
sæ. 13. n. 23
Deus quomodo intelligit se intelligere multa per es-
sentiam suam. 17. 1. 18
Deus quibus de rebus habeat propriam, & per se
ideam. 25. art. 4
Deus an habeat ideam de purè possibilibus. 25. num.
2. 3
Deus non solum est verus, sed ipsa veritas. 32
Deus habet summum gradum vitæ. 33. q. 8
An in intelligentia Dei, quæ simplicissima est, veritas
inueniatur. 43. n. 14
Deus quomodo seipsum vult. 65. *sum. q. 19*
Deus est liberi arbitrij. 66. *sum. q. 20*
Dei efficacia, & necessitas à Pelagio negata. 66. nu-
mero 1
Donum Dei vt sic, ita est efficax vt non stet cum op-
posito actu voluntatis, licet potentiam ad actum
non lædat. 99. n. 33
Deus potest aliquid priuatiuum morale facere. ibid.
Ioan. à S. Thoma in 1. part. D. Thomæ.

Deus æterno, & immutabili suo decreto omnes actio-
nes nostras tam bonas quàm malas prædestinit, &
prædeterminat, propositio quomodo intelligenda:
100. n. 34
In Deo an detur potentia distincta ab actu, distinctio-
ne rationis. 101. n. 2. Vide *Potentia*
Deo quid sit aliquid attribui secundum modum si-
gnificandi quid ex parte rei significatæ. 103. n. 14
In Deo quomodo dari potest potentia condistincta.
ab actu. 107. n. 24
In Deo datur ratio obiecti, & speciei, non ratio po-
tentis seu principij ex parte rei significatæ. 109. n.
32
Deum mouere seipsum, seu motus in Deo quomodo
intelligendus. n. 34
Deus libere vult & operatur. 110. 1. 1. eius libertas ex
eius misericordia, & nostrarum pteum exauditione
probat. ibid. tum ex eius cognitione finis vniuer-
salissima & perfectissima. n. 3
Deus quomodo dicatur operari secundum consilium
sue voluntatis. 120. n. 11
Deus an creaturas possibiles diligat inefficaci quodam
amore, seu simplici complacentia. 129. n. 2
Deus nullo modo amat creaturas possibiles. 230. n. 4.
131. n. 10. 132. n. 11 & seqq.
Deus an possit suspendere omnem actum circa esse,
seu circa rem vt ordinatam ad esse. 134. n. 21
Deus an possit habere actum voluntatis reflexum quo
velit actum suum suspendere circa determinatum
obiectum. 138. n. 3
Deus quomodo dicatur velle omnes saluos fieri. 139.
n. 36
Deus quomodo diligendo suam potentiam nihil vult
sibi impossibile. 241. n. 45
Quomodo gaudet de possibilitate creaturarum. 142.
n. 47
Diligit necessariò seipsum, & quæ intra se sunt. 143.
n. 1. & seqq.
Deus clarè visus cur necessariò diligitur. 144. n. 5
Deus duplici modo res potest facere. 146. num.
14. 15.
Dei decreta, & actus liberi an in nobis distingui
possint, & qua regula vtendum est ad ea distin-
guenda. 158. n. 30. & seqq.
In Deo quomodo perfectiones, actus, aut decreta
distinguantur. 162. n. 47
Deus an respectu actuum liberorum vt sic habeat
voluntatem efficacem antecedentem, quæ ex na-
tura sua, & virtute causatiua determinet actum
liberum. 164. n. 3
Deus agit in causas secundas, ipsasque mouet, &
applicat ad operandum. 182. num. 4. & 183. n. 5. &
seqq.
Deus intra corda nostra operatur motum nostræ vo-
luntatis, & auersas voluntates conuertit. 186
n. 14. & seqq.
Dei infallibilitas exigit decretum ex natura sua effi-
cax, & antecedenter ad nostrum consensum, &
determinationem. 192. n. 6
Deus an motum intra voluntatem nostram causare
debeat. 192. n. 9
Deus non deest, nisi homines ei defuerint, propositio
Concilij Trident. verificata tum de gratia habituali
sanctificante, tum de actuali auxiliante. 205. n. 19
Deus quid ultra debuit facere, & non fecit, explicatur.
207. n. 24
Deus quomodo inter causas internas voluntatis com-
putatur. 211. n. 33
Dei concursus datus, vel negatus non tollit liberta-
tem. 214. n. 45. 46
Deus non influit in malitiam peccati. 220. n. 66. 222.
n. 69

Index Rerum,

Deum habere decreta conditionata ex Scriptura probatur. 225.n.9
 Potest variari obiectum, nec variatur eius voluntas. n.10
Deus vult omnes homines salvos fieri, Scripturæ locus quas patitur explicationes. 236.n.31.& 237
 Deus quomodo se diligit. 239.n.1
 In Deo amor, & gaudium distinguuntur. ibid.n.3
 Deus proprie & formaliter amat. n.4
 Non potest se amare nisi vt præsentem. 240.n.7.241.n.8
 Nec amore concupiscentiæ siue amicitia. 242.n.11.12
 Deus est passionum incapax. 143.n.1
 Deus non potest habere odium, vt contrarium amori, & ab omni amore purificatum. 244.n.5
 Deus tristitiæ incapax. 245.n.8
 Quomodo abominatur peccatum. n.10
 Deo quomodo ira tribui possit. 247.n.14.15
 In Deo non datur iustitia commutativa, sed distributiva. 249.n.4
 In Deo datur iustitia propria distincta à metaphorica. 253.n.16.17. & seqq.
 Deus non est capax obligationis & debiti. 255.n.20
 In Deo datur iustitia distributiva. 259.n.7
 Quod nullam dicit imperfectionem. 260.10
 Deus qua lege, & debito peccata puniat. 265. num. 25
 In eo an locum non habeat vindictio. ibid.n.24
 Deus an aliquem reprobet. 269. summ. q. 23
 Deus quomodo est imperij capax. 293.n.36.37
 Deus ex simplici voluntate finis non præordinat, sed ex efficaci, & determinata intentione. 300.n.19. & seqq.
 Deus non prædefinit peccata. 319.n.49
 Non obligatur permittere malum ex vi suæ prædefinitionis. 312.n.52
 Deus an prius eligat vnum præ alio ad gratiam, & ad media, seu merita, & vltimò ad gloriam. 315
 Deus habet summam, & vniuersalissimam providentiam à qua omnia pendent. 328.n.7
 Deus eligit ad gloriam vt ad coronam, & præmium, non vt ad donum gratuitum, quomodo intelligendum. 337.n.10
Gratis Deus eligit ad gloriam, & Deus eligit ad gloriam dandam gratis quid æquiuocationis includat. 340.n.17.
 Deus non est auctor peccati, quamvis sit auctor prædestinationis. 359.n.4
 Deus quomodo elicit bonum ex aliquo malo. 381. n.14
 Deus an ex motiuo iustitiæ punitiæ à regno suo excludat. 390.n.9
 Deus non ex solo motiuo iustitiæ, sed & ostendendi suam libertatem, & supremum dominium mouetur ad aliquos à regno suo excludendos. 409.n.49.50
 Dei voluntas saluandi omnes non repugnat voluntati puniendi, seu eligendi aliquos. 410.n.53
 Non creat hominem vt puniat, sed vt fruatur se, & ad beatitudinem. n.54
 Deus quomodo omnia possibilia complectitur. 426. summ. q. 25
 Non potest facere quòd præterita non fuerint. ibid.
 Potest multa facere quæ non facit, & meliora. ibid.
 Deus non solus est beatus, sed beatitudo aliorum. 427. summ. q. 26
 Est omnipotens ex fide. ibid.n.1.2
 Qui eius potestatem decurrarint auctores. ibid.
 Distinctio in Deo siue in eius actibus quomodo formanda. 162.n.45

E

Effectus à Deo tripliciter procedunt. 164.n.2
Efficacia diuina duplex respectu liberi nostri arbitrij. 93.n.7
 In quo consistat. n.8
 Probatur inenitabilis, nec tamen læsua nostræ libertatis. 94.n.10
 Infallibilis est non ex coactione, & coartatione causarum inferiorum. 94.n.11.95.n.15
 Sensus D. Thom. super hanc efficaciam explicatur. 94. n.12
 Item duplex eius inenitabilitas. n.13
 Efficacia in antecedenti quomodo dissentiat Calvinus à Thomistis. 96.n.15
 Qua ratione à quibusdam probatur hæc efficacia destruere libertatem nostram. 96.n.16
 Efficacia diuinæ gratiæ in nobis ex omnipotentia, & dominio Dei posita est. 97.n.20
 Efficacia interna diuinæ voluntatis causatiua, non suppositiua nostri consensus quibus principiis Theologicis nitatur. 194.num.1.2. vide *Voluntas diuina*.
 Efficacia antecedens quomodo efficax ad operandum 217.n.58
 Efficacia infallibilis qua Deus operatur reducitur ad diuinam prædefinitionem. 298.n.11.12
 Ad summam potestatem, & dominium quod habet in homines. n.13
 Efficacia intentionis est executiua finaliter, non effectiue. 338.n.13
Electio absoluta ad gloriam an sit ante præuisa merita, vel subsequatur. 315.n.1. & seqq.
 Electio ad gloriam, seu ad finem præcedit prædestinationem meritorum, & gratiæ non communem reprobis, & prædestinatis. 324.n.20
 Electio ad gratiam efficacem, & ad auxilia congrua est voluntas circa media. 324.n.21
 Electio personarum in particulari ad Christum pertinet. 357.n.6.7
 Ens rationis quomodo consistat in cognosci, & dicatur habere esse per rationem. 20.n.35
 Entis rationis ad formationem quid requiratur. 23.n. 53.24.n.56
 Ens rationis quomodo cognoscitur à Deo antecederet ad intellectum nostrum. 25.n.58
 Ens antecederet ad verum quomodo dicit ordinem ad intellectum. 55.n.10
 Entis differentia possibile & necessarium. 181. numero 1
Entitate carentia, & ei opposita non habent ideam in Deo. 26.n.4
Essentia diuina quomodo ad creaturas comparata à nobis intelligenda. 10.n.9
 Qualis est eius cum eis similitudo. 11. numero 16
 Essentia diuina vt cognita, & attacta seu expressa non est idea, sed vt cognoscens, & exprimens. 12. n.22
 Est similis creaturæ similitudine eminentiali, & inadæquata, non formali & limitata. 13.n.25
 Essentia diuina non exercet officium ideæ secundum ipsam essentiam absolutè sumptam, sed comparatiue ad creaturas. 14.n.29
 Essentiæ diuinæ ad creaturas comparatio duplex eminentialis, & formalis, vtrique explicatur. 21.n.38.
Esseni Iudæorum secta quid de gratia & libero arbitrio sentirent. 66.n.2
Executionis ordo est decretum, & actus voluntatis ab ordine intentionis distinctus & deriuatus. 155.n.22

Non

& Verborum.

Non debet solum inueniri in re, sed in voluntate
ibid.

Exemplar externum non est formaliter idea, & quid
si esset obiectiue, & fundamentaliter exemplar. 8.
num. 34

Internum & externum quomodo species emittendo
concurrant. ibid.

Existencia rei à duplici principio dependet. 151. n. 8

F

Falsitas à fallentia dicta. 33. q. 17

An sit in rebus extra intellectum. ibid.

Non innentur formaliter in sensu. ibid.

Opponitur contrariè veritati. ibid.

Falsum non est in rebus, sed in mente. 40. num. 29.

Vbi falsitas inuenienda. n. 27

Falsitas ibi est, vbi veritas. 40. n. 29

Non datur transcendentalis. ibid.

Falsitas in quo vero est contraria. ibid.

Falsitatis seu fictionis negatio veritatem non consti-
tuit, sed supponit. 42. n. 38

Falsum non est obiectum intellectus. 53. n. 3. 4

Falsum in rebus non datur, nisi in ordine ad intelle-
ctum nostrum. 53. n. 67

Falsitas & veritas in sola compositione & diuisione
proprie reperitur. 56. n. 16

De *Fato* & libero arbitrio Pharisei & Sadducei quid
sentirent. 67. n. 2. 3

Finis efficacia antecedit efficaciam, & efficientiam
causae efficientis. 154. n. 20

Finis determinatio est in potestate liberi arbitrii. 210.
num. 33

Finis electio, & dilectio praecedat preparationem me-
diorum, & praedestinationem. 323. n. 18

Forma intelligibilis quid, quid naturalis, & quomodo
vtraque operetur. 2. n. 2

Formae munus est actuare, & distinguere id quod in-
format. 15. n. 7

Forma extrinseca debet entitatiue distingui ab effectu
formali, vel nulla daretur. n. 9

Formae substantiales non subsistentes, & accidentales
propriae quando habent proprias, & adaequatas
ideas. 28. n. 15. 17

Formae apprehensae consideratio duplex. 102. n. 10

Quomodo informat intellectum. ibid.

G

Gaudium in quo distinguatur à desiderio. 239.
n. 3. 4. In quo ab amore. 240. n. 5

Gloria quomodo gratia dicatur. 318. n. 3

Gloria ex miseratione & gratis, non ex meritis data,
quem sensum patitur. 318. n. 4

Gloria est causa finalis gratiae & meritorum. 337. n. 10

Gloria ut corona & praeium quid importat. n. 11

Glorificatio seu consecutio finis est effectus praedesti-
nationis. 360. n. 1

Glorificationis nomine quid veniat? ibid. n. 3

Glorificatio reprobos à praedestinis distinguit, & qui
ad eam effectus. 361. n. 5

Gratia appellatione quid veniat, quot eius genera, &
quomodo eam acceperit Pelagius. 70. num. 5. 6. &
seqq.

Gratiae praeuenientis decretum de se solo est efficax
& independens à libero arbitrio. 98. n. 24

Quomodo eo proposito non possumus non velle dis-
sentire aut resistere. n. 25

Gratia cui aequaliter impertitur, aequaliter cum ea co-
nari debet. 98. n. 29

Gratiam oblatam acceptare liberum est, sed non effica-
cem vel inefficacem reddere. 99. n. 30

Ioan. à S. Thoma in 1. part. D. Thoma.

Gratia est adaequata nostrae conuersionis causa. nu-
mero 31

Gratia & efficacia diuina libertatis nostrae radix est,
nec cum in voluntatem influit, libertatem tollit.
100. n. 33

Gratiae & diuini auxilij efficaciam explicare non licet.
192. n. 17

Gratia efficax potest in vacuum recipi. 205. n. 20

Gratia sola non operamur, sed ex libero arbitrio.
208. n. 29

Gratiae & praedestinationis infallibilitas vnde petenda.
314. n. 6. & seqq. Vide *Praedestinatio*.

Facienti quod in se est Deus non denegat Gratiam. Scri-
pturae locus explicatur. 343. n. 5

Gratia interrupta per peccatum dupliciter confide-
randa. 361. n. 1

An sit effectus praedestinationis. num. 2. 363. nume-
ro 7

Gratia ut primò collata non pertinet ad solam proui-
dentiam generalem in praedestinato. 365. n. 10

Gratitudinis acceptio duplex quomodo est in Deo.
263. n. 19

H

Habitudo ad volita creata non est necessaria in
Deo. 107. n. 1

Homo non potest sine efficaci auxilio operari, quomò-
do intelligendum. 98. n. 27

Homo quòd ex inaequalitate gratiae alius saluatur, alius
non, quomodo explicatur in sensu Catholico. 98.
num. 29

Homo non ita agitur à Deo, ut à libertate sua excidat.
205. n. 21

Homo per quid meretur. 264. n. 22

Hominem viribus naturae aliqua bona opera moralia
facere non repugnat. 351. n. 24

I

Idea dantur in Deo, quia est agens intellectuale.
p. 1

Dantur plures non entitatiue, sed respectiue ad res
ideatas. ibid.

Dantur eorum omnium quae Deus facit ideae practicae,
respectu eorum quae de facto fiunt, respectu vero
possibilitium cognoscitiue tantum. ibid.

Idea diuinae, vide *Deus*.

Idea appellatione quid veniat. pag. 1. n. 1

Huius nominis vsus tam in Scriptura, quam in PP. &
Scholasticis. ibid.

Idearum necessitas declaratur. 2. n. 2

Ideae in Deo ponendi, & praedestinationes praedeter-
minatiuae, eadem est ratio. 2. n. 4

Idea definitio expenditur. 2. num. 5. an sit conceptus
obiectiuius. num. 6. est conceptus formalis. 3. n. 7.

& forma in mente artificis. n. 8. quo modo confi-
sit in conceptu. 4. n. 13. & seqq.

Idea causalitatis differentiae. 5. n. 17. & seqq.

Cur ei causalitas formalis extrinseca tribuenda. 6. nu-
mero 23

In *Idea* quomodo concurrat ratio causae efficientis. nu-
mero 27

Formatur ex intentione ponendi aliquid in esse,
ibid.

Quomodo respicit pro obiecto ipsum ideatum. 7. nu-
mero 30

Idea diuina non est homogenea, & adaequata crea-
turae, representatiue tamen, & causatiue totum
quod in creatura est continet. 8. n. 32

Quomodo in Deo plures ideae probantur. 9. n. 4. 12.
n. 20. 21.

Index Rerum,

- Idea in Deo non est creatura cognita obiectiue. 9.
num. 5
- Idea quo sensu diuina essentia nuncupatur. 10.n.7
- Idea est diuina essentia vt est similitudo rerum eminentialis. 11.n.14
- Est principium operandi artificis vt cognoscenti, & intendenti n.15
- Idea potest esse rei dissimilis. 13.n.26
- Idearum pluralitas in Deo à D.Thoma subtiliter probatur. 16.n.11
- Ex quibus respectibus petenda. ibid.n.12
- Et in quo respectus illi fundari debeant. n.13
- Sumitur ex essentia diuina, non vt est ratio cognoscendi ipsas creaturas, sed vt est res cognita diuersimodè comparabilis, & participabilis à creaturis. n.14.15
- Idearum in Deo plures sunt non realiter, & entitatiue, sed formaliter, & in officio ideandi. 14.5
- Idearum multiplicitas non officit diuinæ simplicitati. n.6
- Ex Scripturis & Patribus probatur. 15.num.6.ratione, n.7.
- in Ideis ratio cognoscendi, & ratio causæ exemplaris quomodo distinguenda. 17.n.20
- Idea, scientia, & ars diuina differunt. 21.n.41.42
- Idearum pluralitas cur sumatur ex pluralitate materiali obiectorum, & non ex ratione formali. 21.n.41
- Idea quomodo est attributum & conceptus Dei. 23.n.50
- Idea de purè possibilibus an detur in Deo. 25.n.2
- Idearum officium duplex. ibid.
- Idea nisi fuisset ab æterno in Deo, nulla daretur veritas ab æterno. 63.n.15
- Idearum per prædefinitiones explicatæ. 294.n.1
- Ignorantia est vulnus à peccato relictum. 403.n.34
- Imperium an sit penes Deum, & quomodo. 293.n.36.37
- Incarnatio & merita Christi sunt causa prædestinationis. 355.n.1
- Individuorum omnium dantur idearum in Deo. 29.n.24.25
- Influxus Dei simultaneus à Pelagio negatus, à D. Augustino adstruitur, & quid sit. 82. n. 4. & seqq.
- Influxus diuinus quomodo repelli potest. 212.40
- Influxus diuinus in peccati malitiam non cadit. 220 n.66.221.n.67
- Instantia seu prioritates rationis in Deo quomodo assignanda. 161.n.44
- Intellectus Dei non format aliquod ens rationis nec respectus ideales. 19.n.30.31.& 20.n.36
- Intellectus quomodo circa verum & falsum versetur. 54.n.8
- Quomodo respiciat verum. n.10
- Intellectus simplex quomodo dicatur vnus. 57.n.20
- Intellectus quomodo plura simul cognoscere possit. 59.n.30
- Intellectus in discursu non intelligit plura per modum vnius. 60.n.36
- Intellectus diuinus cur decipi non possit. 62.n.11
- Intellectus constituitur per formam intelligibilem 101.n.8
- Intentionis ordo, & executionis in voluntate diuina assignantur. 152.n.12
- An intentionis ordo quatenus finem respicit ante media, sit efficax. n.13.& 153.n.14.& seqq.
- Ordo executionis an sit aliquod decretum in mente habitum distinctum à decreto quo Deus vult aliquid per modum intentionis. ibid.
- Intentio non est simplex actus volendi, sed volendi finem. 151.n.6
- Intentionis ordo circa quid versatur. 156.n.24
- Intentionis ordo, & executionis quomodo in Deo distinguuntur. 157.n.28
- Ioniniani hæretici dogmata attinguntur. 68.n.7
- Ira quid? 246.n.14
- Quomodo Deo tribui possit. ibid.
- Includit tristitiam, & dolorem. 247.n.25
- Iudeorum error, gratiam ad iustificationem non requiri, sed Legem sufficere. 66.n.1
- Eorum sectæ tres præcipuæ, Essenorum, Phariseorum, & Sadduceorum. ibid.n.2
- Iuda proditoris casus, frustrabile esse nostra voluntate diuinum auxilium ostendit. 209.n.30
- Ius commutatum quid. 250.num.9.in quo consistit. 254.n.18.255.n.21
- Iustificationis nostræ causa finalis est gloria Dei, & Christi, & vita æterna. 329.n.10
- Iustitia in Deo dari probatur, 238. summ.
- Iustitia quid? 238.n.1
- Datur in Deo. ibid.
- Eius species duplex, distributiva, & commutativa. ibid.
- Eius partes potentiales. ibid.
- Quid iustitia rigorosa. ibid.
- Iustitia legalis quæ, & vnde sic dicta. 248.n.2
- Quomodo est in Principe, & quomodo in Deo, ibid.
- An includat imperfectionem quoddam iustitiæ commutativa duo attribuantur. ibid.n.3
- Probatur non dari. 249.n.5
- Vnde peti posset ista imperfectio. 250.n.7
- Iustitiam commutatiuam à distributiva quæ conditiones distinguant. 256.n.22
- Principales earum differentia. 257.n.1.2.3
- Iustitiæ distributivæ perfectiones. 260.n.10
- Imperfectiones n.11. quæ non sunt de eius intrinseca, & formali ratione. 262.n.12
- Ab extrinseco quid respicit. 262.n.15
- Iustitia vindicativa quæ, & quomodo pars iustitiæ commutativæ. 265.n.24
- L.
- L**iber vitæ metaphora est. 269. summ. q.24
- Est ipsa Dei notitia. 270. ibid.
- Est solum pro vita gloriæ. ibid.
- In eo quidam simpliciter scripti; quidam secundum quid. ibid.
- Libertas in Deo manifesta est modus totius libertatis intricatissimus. 110.n.1
- Libertas, & dominium in operando est intellectus naturalis proprium. 110.n.2
- Libertas humana in quo posita est. 111.n.5
- Quid libertas diuina. ibid.
- De ea hæreticorum quorundam sententia. ibid.
- Libertas volitionis diuinæ consistit in summa, & absoluta independentia à creaturis quas respicit vt obiecta inadæquata. 118.n.5
- Est perfectissima, actualissima, & intima. n.6
- Libertatis diuinæ indifferentia non potest dari penes egredi, vel non egredi à potentia voluntatis, sed penes tangere, vel non tangere obiectum creatum. 122.n.1
- Libertati diuinæ non obstat quoddam indiuisibili æternitatis mensura mensuretur. 125.n.7
- Libertatem nostram cum intrinseca diuinæ voluntatis efficacia componi non implicat. 190.n.1
- Liberum primò & per se quid. 118.n.4
- Lutheri sententia de libero arbitrio. 92.n.2
- Lutherani molliores quid de libero arbitrio sentiant. 92.n.2
- Malum

& Verborum.

M

- M**alum non habet ideam in Deo. 26.4
Manichæorum asserta hæretica. 69.n.1
 Manichæorum hæresis de animarum in corpora deiectione ob peccata ab iis in cælo prius perpetrata. 343.n.2
 Quomodo dicimur esse in *Manu* Dei. 207.n.25
Massilienses hæretici qui, & quo tempore. 87.n.2
 Eorum hæresis Prædestinatorum dicta. ibid.
 Massiliensium error de prædestinatione 290. num. 27.
 Refellitur. n.28.29
 Massiliensium error circa electionem, & prædestinationem. 321.n.11
 Massiliensium error de bonorum operum executione. 343.n.4
 Massiliensium error de numero prædestinatorum. 424
 Materia prima habet ideam in Deo. 26.n.5. 6.7. sub diverso respectu. num. 8. Est incapax existentiae ibid.
 Ordo Materiæ ad formam est aliquid factibile à Deo. 27.11
 Habitudo Materiæ primæ est realis, & ideata à Deo. n.13
 Materia prima vt adiuncta formæ ideam habet. 17. n.14
 Media moraliter ad finem inducentia, & physica in quo differant. 326.
 Media quibus Prædestinatio nostra perficitur, à Deo procedunt. 366.n.1
 Mensura duplex quantitatis, & perfectionis, vtrique explicatur. 15.n.10
 ad Meritum quomodo necessariò sit ordinatio, & pactum aliquod, seu promissio ex parte Dei. 261. n.17.
 Merita, & gratia pertinent ad media ordinata ad finem. 324.n.19
 Merita Christi causa sunt prædestinationis nostræ. 357. n.8
 Meriti valor in homine iusto procedit à gratia quæ à Deo datur. 353.n.27
 Meriti principium non cadit sub meritum. 354. n.30
 Metaphorica aliquando de Deo dicuntur. 239.n.1
 Misericordia Dei est adæquata nostræ conuersionis causa. 99.n.31
 Misericordia in Deo probatur. 238. summ.
 Omnia Dei opera sunt Misericordia, & veritas. 239. summ.
 Misericordia quomodo Deo tribuenda. 267.n.1
 Respicit malum alienum vt subleuandum. ibid.
 Non est in Deo prout importat dolorem appetitus sensitui. n.2
 Moralitas quomodo de bona in malam per obiecti mutationem variatur. 49.n.38
 Mors in statu peccati est effectus reprobationis. 413
 Mors naturalis est pœna peccati originalis. 424. n.8
 Dupliciter considerata, vel vt corruptio naturalis, vel vt terminus viæ ad beatitudinem, vel ad pœnam n.10
 Motio moralis qua Deus mouet prædestinatos in quo consistit. 294.n.38
 Vt quid ab alio quid Mouetur. 34.q.18

O

- N**abuchodonozoris cum Pharaone comparatio. 208.n.29.
 Necessitas infallibilitatis quæ? 98.n.29
 Necessitatem aliquam in Deo ponere erga obiecta

creata nullum inconueniens. 145. num. 8. 9. & seqq.

- Necessitas in Deo quoad specificationem non oritur ex parte creaturarum. 147.n.18.19
 Necessitas & contingentia rerum in diuina voluntate originantur. 181.n.1
 Necessitas antecedens libertatem tollit, non consequens. 206.n.21. Quod explicatur, & quid sit illa necessitas antecedens. 207.n.25
 Necessitas ab aliquo priori est necessitas absoluta, explicatur. 211.n.35
 Necessitas antecedens quæ? 308.n.40
 Nolitio in Deo est solum circa existentiam possibilem, non circa earum possibilitatem aut quidditatem. 129.n.3

O

- O**bligatiois nomen quid importet. 248.n.3
 Odium formaliter in Deo reperitur. 243.n.1
 metaphoricè, & consecutiue. 244.4
 Duplex est, abominationis, & inimicitiae. ibid.
 Quomodo vtrumque Deo conueniat. 244.n.3
 Odium importat nolitionem boni, & volitionem mali. 244.n.5
 Eius definitio. ibid.
 Quomodo nascitur ex amore. n.6
 Quo nomine Deo repugnet. 245.n.7
 Omnipotentia non passiuæ, sed actiuæ in Deo datur. 426. summ. q.25
 Omnipotentia quomodo dicatur posse in non ens. 434.n.28. & seqq.
 Operationis & cooperationis rerum inferiorum causa & principium est Deus. 183.n.6.7
 Operatio quid importat, & quomodo Deo tribuitur. 105.n.18
 Operatio in Deo quomodo dicatur voluntas signis. 229.n.4
 Operari liberè, & indifferenter quid? 118.n.4
 Opera Dei omnia sunt misericordia, & veritas. 239. summ.
 Operum bonorum appellatione quid veniat. 336.n.7.
 Vide meritum.
 Opera moraliter bona ordinis naturalis, neque ex pacto Christi cum Patre, neque propter auxilium datum per Christum habent infallibilem connectionem cum gratia. 345.n.11
 Opera bona naturalia non habent congruitatem fundatam in aliquo merito, sed in mera misericordia Dei. 352.n.25
 Opus bonum hominis procedit à prima gratia vt à principio. 363.n.29.
 Opera bona naturalis ordinis an sint effectus prædestinationis. 372. art. 5. toto
 Opera bona moralia naturalis ordinis sunt effectus prædestinationis. 377. num. 19. Etiam mortua. n.20
 Origenes de sufficientia liberi arbitrij quid senserit. 68. n.7
 Origenis error animas ante corpora extitisse, & pro suis vel meritis vel demeritis in corpora deiectas. 343.n.2

P

- P**assiones Deo attribui non possunt. 432.n.1
 Peccator à peccato resurgens an semper resurgat ad totam gratiam quam amisit. 364.n.9.10
 in Peccatis duo reperiuntur, aliud ad priuationem spectans, aliud ad positium, vtrumque explicatur. 220.n.65
 in Peccati malitiam Deus nullo modo influunt. 220.n.66

PP 5

Peccatum

Index Rerum,

- Peccatum quomodo odit Deus. 246.n.13
 Peccata non prædefiniuntur à Deo. 310.n.49
 Peccati materiale non potest esse in rerum natura sine malitia. 311.n.51
 Nec Peccatum, nec effectus eius à Deo prædestinatur. 359.n.4.5
 Peccati permissio ex parte Dei quid. 377.n.1
 An sit effectus prædestinationis. 378.num.3.379.n.4.& seqq.
 Peccatum formaliter pro malitia, non est effectus prædestinationis. 378.n.2
 Peccati permissio ex motivo pœnitentiæ an possit esse effectus prædestinationis. 382.& seqq.
 Peccatum originale an sit causa reprobationis. 394.n.5.& seqq.
 In quibus. 402.n.28
 Peccato originali Deus non usus est ut ratione adæquata reprobationis omnium. 402.n.30
 Senius D. Augustini aperitur. 403.n.32.33
 Peccati permissio, & denegatio gratiæ efficacia sunt effectus reprobationis. 415.n.13.& seqq.
 Pelagianorum error de sufficientia liberi arbitrij. 343.n.3.
 Pelagius Dei efficaciam, & necessitatis primus negator. 66.n.1
 Pelagij hæresis ex Origenis, & Ioviniani errore conflata. 68.n.8
 Superiorum hereseon collunies, & farrago. n.9
 Pelagius ex Scotia oriundus, in Orientem migrans Monachum agit, de eoque Isidori Pelusiotæ testimonium. ibid.
 Eius hæresis præcipua. 69.n.1
 Pelagij auxilij sufficientis explicatio. 86.n.19
 Eius discipulorum de gratia adiuvante, & sublequente sensus. n.20
 Pelagius ad actiones naturales diuinum auxilium, & gratiam omnino negat. 69.n.3
 Deinde requiri solum ad facilius, non ad simpliciter. n.4
 Quid nomine gratiæ intellexerit. 70.n.5
 Pelagij sententia de gratia non data ex meritis, & de gratia remissiua peccatorum. 70.n.7.& seqq.
 Item quoddam gratia ad singulos actus datur. 73.n.19.& seqq.
 Quo dolo gratiam internam confessus est. 74.n.22.& seqq.
 Quid de simultaneo Dei concursu, & de sufficienti auxilio senserit, quid item eius discipuli. 84.n.14.& seqq. 86.n.21.
 Perfectiones naturales sunt effectus prædestinationis. 375.n.13
 Perseuerantia auxilium est inamissibile, & hominem reddit immobilem in bono independentem à libero arbitrio, quam patitur explicationem hæc propositio. 99.n.32
 Perseuerantiæ ad infallibilitatem quid requiratur. 314.n.7
 Perseuerantia non est titulus, sed conditio dandi merita. 327.n.5
 Pharaonis & Nabuchodonozoris paritas, & disparitas. 208.n.29
 Pharisaorum error de Deo, & fato. 66.n.2
 Pœnitentia, redemptio, punitio, &c. quomodo sint effectus prædestinationis. 382.n.18
 Possibilia nec liberè, nec necessariò amantur. 132.n.12
 Possibilitas creaturarum quid. 428.n.6.& seqq.
 Vide *Creatura*.
 Possibilitatis status nullam bonitatis rationem includit. 130.n.5.& seqq.
 Possibilitas ad esse duplex, actiua, & passiua, utraque explicatur. 131.n.9
 Possibilitatis status qui. 27.num.10. Non impedit dari ideam de re possibili. ibid.
 Potentia antecedens, & consequens quid. 98.n.25.
 Potentiæ vera, & propria ratio respectu rerum procedentium à diuina voluntate siue notionaliter ad intra, siue essentialiter ad extra in Deo saluatur. 103.n.1
 Item ratio potentiæ respectu actus secundi. n.2
 Potentia virtualis in Deo quid. 104.n.8
 Quid potentia logica, quid physica. n.9.10
 Potentia physica, & influxiua in Deo quid. 104.n.12
 Potentia sub qua consideratione in Deo significatur. 105.n.15.17
 Potestatis diuinæ erga voluntatem nostram efficacia ostenditur. 195.n.14. Vide *Deus, voluntas*.
 Potentia Dei passiua non est, sed actiua, & infinita. 426.sum.q.25.
 Potentia actiua datur in Deo. 437.n.1
 An Potentia executiua distinguatur in eo, nostro modo concipiendi ab intellectu, & voluntate n.2. & seqq.
 Potentia ordinata, ordinaria, & absoluta in Deo quid sint. 441.art.3.per tot.
 Omnia à Deo *Prædefinienda* & determinanda. 296.n.6.
Prædefinitionis nomen quid sonet? 294.n.1
 Prædefinitionum vis à S. Dionysio expressa. ibid.
 Quid designent. 295.n.2
 Prædefinitio circa actus liberos creatos an detur in Deo. 295.n.3
 Qui tenent affirmatiuam. n.4
 Prædefinitionum efficacium positio inenitabilis probatur. 299.n.15
 Probatur item ex causalitate vniuersalissima Diuinæ voluntatis omnia causantis, & operantis. n.16
 Prædefinitiones antecedentes efficaciter operantes dantur in Deo, ut & decreta infallibilia. 315.n.3
Prædestinationis appellatione quid veniat. 88.n.3. quid de ea senserint Semipelagiani. ibid.
 Prædestinatio in Deo datur. 268.sum.q.23
 Quid Prædestinatio. 269
 Eius comparatio ad reprobationem. ibid.
 Prædestinatio ex parte effectuum inuari potest. 269.sum.q.23.
 Prædestinationis comparatio ad suas causas. ibid.
 Nulla eius datur causa ex parte nostri. ibid.
 Eius certitudo. ibid.
 Prædestinatio de fide est in Deo ponenda. 270.n.2
 Eius impugnatores Gentiles, Atheistæ, & hæretici. ibid.
 Prædestinatio ex duplici destinationis significatione derivatur. 270.n.1.2
 Prædestinationis duplex definitio expenditur. 271.n.2
 Reiciuntur quædam recentiorum definitiones n.3
 Eius obiectum adæquatum quid includat. 272.n.5.
 Vnde petatur eius obiectum formale. n.6
 In prædestinatione Christi distinguitur subiectum, & terminus. 273.n.8
 Prædestinationis præscientia, præparatio, & certitudo quomodo intelligantur. 273.n.9
 Prædestinatio an sit distinctum attributum à prouidentia. 275.n.15.& 276
 An consistat in actibus intellectus vel voluntatis. 276.n.1
 Prædestinatio pertinet ad vim cognoscitiuam, scilicet ad præscientiam. 278.n.8
 Includit

& Verborum.

Includit efficaciam ordinatiuam ac preparatiuam me-
diorum. 281.n.1
Prudentiæ actus ad cognitionem spectat. 279.n.1
Prædestinatio in intellectu pertinet ad partem practi-
cam. 282.n.7
Prædestinatio non solum ordinem rebus imponit ad
finem, sed & ipsum exitum, & euentum ordinar.
287.n.16
Non differt à nō prædestinatione solum ex præscientia
euentus, sed ex ipso ordine, & electione præ-
destinantis ad talem euentum. ibid.
Prædestinationis effectus distinctio. 313.n.1
Prædestinationis diuinæ certitudo ex quibus peti-
tur. n.2.& seqq.
Prædestinationis causæ ex parte Dei, & ex nostra su-
mendæ. 315.disp.8
Prædestinatio secundum rationem electionem præ-
supponit, & electio dilectionem. 323.n.19
Prædestinationis an detur aliqua causa ex parte nostra.
343.& seqq.
Prædestinationis causa repugnat ex parte nostra. 344.
n.7.& seqq.
Prædestinationis efficacia non incipit à nobis. 347.
n.17
Prædestinationis subiectum, & effectus quomodo di-
stinguantur. 358.n.1
Effectus ad tria capita reducendi. n.2
Quæ conditiones requirantur vt aliquid sit effectus
prædestinationis. n.3.359.n.4
Prædestinatio est transmissio efficax creaturæ rationa-
lis in beatitudinem. 360.n.1
Prædestinationis effectus spirituales qui? ibid.
Prædestinationis effectus omnes tam communes sunt
reprobis, quàm prædestinatis præter vltimam per-
seuerantiam. 365.n.11
Prædestinationis effectus aliquid potest esse duplici-
ter. 372.n.1
Prædestinationis opus est ex pura Dei misericordia, &
voluntate. 400.n.25
Prædestinationis immutabilitas statuitur. 424.n.1
Prædestinatum inter, & non prædestinatum an discre-
tio efficax incipiat à gloria, an à gratia. 315.n.5.&
seqq.
Scripturæ Sacræ, & D. Augustini mens aperitur. 317
n.1.& seqq.
Prædestinatorum hæresis quæ. 271.n.2
Prædestinatorum numerus certus, & definitus apud
Deum. 269.summ.g.23
Prædestinatorum numerus quomodo Deo certus di-
citur. 313.n.4
Prædestinatorum electio ad gloriam, quoad materia-
lem designationem vnus præ alio, est ex meritis
Christi efficaciter applicatis istis potius quàm illis
356.n.6
Prædestinati substantia non potest quomodocumque
sumatur esse prædestinationis effectus. 372.n.1.&
seqq.
Prædestinatorum de numero quid sentiendum. 425.n.
7.& seqq.
Prædeterminatio. Vide *Prædefinitio*.
De *Præordinatione*, prædeterminatione, & prædefini-
tione quid supponat D. Thom. 297.n.9. Vide *Præ-
definitio*.
Primum in intentione est vltimum in executione, expli-
catur. 156.n.27
Priscillianistarum error animas in cælo peccasse, & ob
id in corpora deiectas. 343.n.2
Promissionis Dei infallibilitas vnde petatur. 314.n.7
Propositio quando de vera in falsam, vel è conuer-
so mutatur, quid mutetur. 47.n.29
Providentia duplex acceptio. 276.n.15
Providentia Deo conuenit. 268.summ.g.22

Eius extensio. ibid.
Eius modus vt se tenet ex parte Dei, & ex parte
creaturarum. ibid.
Providentia debet consistere in actu ordinatiuo exe-
cutionis, qui sequitur post electionem, & impe-
rium vocatur. 288.n.21
Providentia, & prudentia non potest consistere in
notitia simplici aut conditionata mediorum, prove-
nit autem omne decretum liberum. 280.n.12
Providentia an consistat in actibus intellectus, vel vo-
luntatis. 276.n.1.& seqq.
Consistit formaliter in actu intellectus præsuppo-
nente actum voluntatis. 278.n.6
Providentia est pars prudentiæ. ibid.n.7
Præparat media ad finem. 183.n.4
Providentia diuina debet se extendere ad omnia quæ
quocumque modo habent esse, & nihil respicit nisi
vt à se ordinatum. 285.n.10
Prudentia & *providentia* ad intellectum pertinent.
278.n.7
Earum finis. 282.n.2
Prudentia est verè, & formaliter in Deo. 289.
n.22.
In quo constituitur. ibid.n.23

Q

Qualitates iudicio rationis subiacentes, non tol-
lunt libertatem. 211.num.35. Vide *Liber-
tas*, *Arbitrium*.
Quidditas nuda secundum se nec existere, nec ama-
ri potest sub statu puræ possibilitatis. 132.n.10

R

Rationis instantia, & signa quomodo in Deo di-
stinguantur, & secundum quæ connotata. 157.
n.29.& seqq.
Rectitudo naturalis quomodo obligat. 255.n.21
Relatio rationis, & relatio veritatis quid sint. 35.
n.6
Relatio quomodo mutari potest in oppositam. 47.
n.29.
Relationes fundatæ in actu immanente attingente
creaturas ad intra, mutari non possunt, nisi mu-
tetur actus vt immanens. 125.n.9
Reprobationis variæ acceptiones, iuxta eius causas, &
effectus. 388.n.1
Est actus specialis dispositionis seu *providentiæ* di-
uinæ circa exclusos à vita æterna. ibid.& n.2
Quid importat tam ex parte intellectus quàm volun-
tatis. ibid.
Est præscientia malitiæ, & præparatio pœnæ. 389.
n.4
Reprobationis positivæ, & negativæ distinctio. 390.
n.10.11
Reprobatio paruulorum, & adultorum an distinga-
tur. ibid.n.12
Reprobatio formaliter, & essentialiter, & adæquatè
dicit *providentiam* diuinam circa creaturas defi-
cientes ab æterna vita cum voluntate permittendi
culpam non remittendam, & præparandi pœnam
non terminandam. 390.n.13
Reprobatio negatiua *providentia* non est, sed pri-
uatio electionis. 391.n.15
Reprobationis causa an detur ex parte reprobi. 393.
tot.art.2
Reprobatio siue exclusio à gloria spectat ad positivam
Dei *providentiam*. 396.n.14.& seqq.
Reprobatio positiva, & negatiua per quid distingan-
tur. 405.n.38
Reprobatio duos actus dicit, scilicet punitiois, &
denegationis

Index Rerum,

denegationis misericordiae. 410.n.52
 Reprobationis effectus nomine quid intelligendum sit. 411.n.1
 Reprobationis actus est iustitiae vindictivae, non misericordiae. 418.n.26
Reprobi cur dicantur in reprobatione praesciti. 425.n.6
Resolvere privative, & omissivè quid. 135.n.25
Respectus rationis cur non constituunt ideas formaliter. 18.n.21.22
 Quomodo sunt formalis ratio eas multiplicandi. n.25
 Respectus ideales non formantur ab intellectu divino. 19.n.28.33
 Respectus ideales quomodo se habent in idea. 22.47. & sint ab aeterno. 24.n.55
 Praemiorum *Restitutio* vel distributio quomodo fit à Deo. 263.n.18. Vide *Iustitia*.

S

S *Adducorum* error de Deo, & fato. 66.n.2
Sanitas in quo differt à sanatio. 36.n.8
Scientia, ars, & idea divina in quo differant. 24.n.41.42
 Scientia practica quæ. 30.n.27
 Scientia siue cognitio, & veritas quomodo cum obiecto commensurentur. 48.n.37
Semipelagiani qui, & unde sic dicti. 87.n.1
 Unde eorum hæresis orta. ibid.
 Semipelagiani circa peccatum originale, & gratiae necessitatem à Pelagio maximè dissentiebant. 88.n.2
 Quid de prædestinatione sentirent. 88.n.3
 Quid circa liberum arbitrium. ibid. num. 4. 89. num. 56
 Semipelagianorum error circa electionem ante prærita merita. 323.n.16.17
 Semipelagianorum error de bonorum operum executione. 543.n.5
Sensus cur non potest cognoscere veritatem. 56. numero. 18
Signa simplicia aeterna quomodo veritatem significant. 57.n.23
Similitudo qua essentia divina creaturas continet, explicatur. 11.n.16
Simon Magus liberum arbitrium ex efficacia divinae voluntatis negans, à Petro Apostolo docetur. 67.n.4
Spes in Deum non cadit. 247.n.26
Supplicia à Deo ex qua iustitia, & virtute reddantur. 259.n.6

T

T *Consensus* in *Tentationem* unde oritur. 208.n.29
Timor, audacia, desperatio, &c. in Deum cadere non possunt. 247.n.16
Thomista cum Calvino de efficacia divinorum decretorum cum libertate nostra incompatibili, ex P. Vastidae sententia consentientes coram sua Sanctitate vindicantur. 98.n.23. & seqq.
Tristitia in Deum non cadit. 245.n.8
Transcendentium natura quæ? 34.3

V

V *Alentini* antiquissimi hæretici error tangitur. 67.n.5
 P. *Vastida* adversus Thomistas propositiones coram sua Sanctitate refelluntur. 97.98. & seqq.
Verbum divinum est conceptus Dei, an eius idea.

3. numero 6.9
Veritas qua mensura, & regula attingi potest. 16. num. 19
 Veritas formaliter est in intellectu, obiectivè in rebus. 32.9.16
 Quomodo cum ente convertitur. ibid.
 Est una, aeterna, & immutabilis. ibid.
 Verum & bonum licet entitativè sint idem, secundum suos respectus differunt. 32
 Veritas opponitur contrariè falsitati. 33
 Veritatis nomine quid significetur. 34.n.1
 Eius acceptiones. ibid.
 Veritas in cognoscendo cur dicatur formalis, veritas autem transcendentalis, & entitativa minimè. 34. num. 2
 Eius formalitas unde desumenda. ibid.
 Est formaliter in intellectu. ibid.
 In quo consistat, & quid sit veritas transcendentalis. 34.n.3
 An aliquid addat supra ens. n.5
 Addit aliquid rationis, & quid illud sit. 35.n.6
 Veritas transcendentalis idem est ac veritas fundamentalis respectu veritatis. 35.n.8
 Est aliquid intrinsecum in rebus, nec consistit in sola denominatione extrinseca. num. 9. 36. numero 11.12
 Eius duplex habitudo explicatur. n.10. & variae definitiones. n.13
 Verum addit super ens duplicem habitudinem, nempe ad intellectum divinum, & ad intellectum creatum, & quid sit illa utraque habitudo. 37.n.14. & 15. 39.n.22
 Veritas prima non importat habitudinem conformitatis cum intellectu divino, sed summam cum eo unitatem. 37.n.16
 Quænam huius habitudinis causæ & fundamentum. 38.
 Veritas creata qua arte à falsitate, & fictione dignoscenda. 37.n.16
 Ab accidentibus à priori iudicari non potest. n.17
 Non importat conceptum entitatis sub ratione absoluta, sed respectiva, nempe sub regulatione ad mensuram. 38.n.18
 In naturalibus regula illa idea divina est, in artificialibus idea artis. ibid.
 Veritas transcendentalis non est extrinseca denominationi à veritate formali. 38.n.19
 Eius habitudo ad intellectum nostrum est rationis. ibid. n.21.
 Rectè dicitur passio entis. 39.n.23
 Veritas primariò, & propriè in intellectu reperitur. 39.n.24
 Verum & falsum non est in rebus, sed in mente. 40.n.26
 Veritatem cognoscere aliud est, aliud eam in se constituere, & suis principiis commensurare. 41. numero 38
 Veritas in aliquo dupliciter invenitur. 40.n.28
 Veritas transcendentalis est intrinsecè in rebus, formalis verò in intellectu. ibid.
 Veritas ut sanitati comparatur. 42.n.43
 Veritas transcendentalis in quo consistit. 43. numero 44
 In quo ei contrariatur falsitas. 45
 Veritas formalis per se in adæquatione, & conformitate indicij consistit, non conceptus obiectivi. 44.6
 Pertinet ad intellectum non ut est, sed ut cognoscit verum. n.7
 Veritas est primò inter rem obiectivè affectam, & seipsam in re. 45.n.16
 Est conformitas ad rem informatam similitudine. ibid.
 Veritas

& Verborum.

- Veritas & falsitas nullam important entitatem absolutam ipsi actui, seu iudicio rationis superadditam. 46.n.21
- Eius acceptio quando magna, & ultima intellectus perfectio dicitur. 47.n.28
- Veritas quomodo cum obiecto commensuretur. 48.n.37
- Veritatis relatio an realis, vel rationis. 48.n.33. 49.n.39. & seqq.
- Veritatis speculativæ relatio realis est. 49.n.42
- Et quæ dicatur veritas speculativa. ibid.
- Veritas Dei, respectu creaturarum rationis est. ibid.
- In Veritate formali triplex relatio attendenda. n.43
- Veritatis relatio ex quo defectu non sit realis. 50.n.52
- Veritas formalis an perfectior quàm transcendentalis. 51.n.55. & seqq.
- Veritas secundum se pro præcisa relatione conformitatis, & adæquationis considerata, in indivisibili consistit. 51.n.60
- Veritatis immutabilitas in intellectu divino præcipue reperitur. 52.n.63
- Veritas creata perfectius in rebus invenitur, quàm in intellectu. 52.n.62
- Veritas transcendentalis propriè, & formaliter est in rebus, & propriè veritas appellanda. 52.n.64
- Veritas quod prius sit in intellectu quàm in rebus, explicatur. 53.n.68
- Ad eam pertinet non solum ratio mensurati, sed mensurantis, & ex se alias veritates derivantis. 69
- Veritati transcendentali convenit esse obiectum intellectus. 53.n.1. non falsitati. n.3
- Verum an sit obiectum adæquatum intellectus. 53.n.2. & seqq.
- Veritas formalis invenitur in compositione intellectus. 54.n.6.7
- Veritas an solum inveniat in compositione, & divisione. 55.n.12. & seqq.
- An in apprehensione. n.15
- Veritas formaliter in actu indicativo consistit. 57.n.24.
- Est in actu entitativè vno. 58.n.25. & seqq.
- Verum est prius bono. 60.n.1
- Veritas est primò & per se in intellectu, denominativè verò in rebus. 61.n.2
- Veritas prius se habet ad verum quàm ad bonum. 61.n.4
- Veritas transcendens quomodo est in re. 62.num.7.63.n.12
- Veritas formalis apprehendit rem ut in se est. ibid.
- Non consistit in conformitate conceptus obiectivi. n.10
- Veritas æterna nulla est nisi in intellectu divino. 63.n.13
- Veritas omnis quomodo probetur æterna. n.14
- Quomodo res omnes dicantur veræ. n.16
- Veritas transcendentalis consistit in conformitate cum ideis divinis. 63.n.15
- Veritates creatæ non possunt dici æternæ. 63.n.17
- Vnde colligitur aliquas dici posse ab æterno. 64.n.18
- Veritas creata necessaria, non dicitur æterna positivè. n.19
- Veritates contingentes siue futuræ, siue non futuræ, vnde veritatem suam sortiantur. 64.n.20
- Vindicatio quomodo locum habeat in Deo. 265.n.24. Vide *Iustitia*.
- Virtutes quænam dicantur partes potentiales iustitiæ. 248.n.1
- Vitalis Semipelagianismi inventoz. 87.n.1
- Vita in viventibus est prædicatum substantiale, non accidentale. 33.q.18
- Vitam in Deo habent omnia quæ ab ipso sunt, & procedunt? ibid.
- Vitæ summus gradus est à nullo moveri. ibid.
- Viventia per quid differant à non viventibus. 33.q.18
- Vnitatis conceptus ab unitate speciei sumenda. 59.n.31
- Vnitatis conceptus entitativa sequitur unitatem operationis. 60.n.34
- Vniversalitatis status duplex consideratio. 140. numero.43
- Vocatio inefficax dupliciter consideranda. 361.n.2
- Est effectus prædestinationis. 362.n.5. 363.n.7.
- Volitio quomodo in Deo ab eius voluntate distinguenda. 102.n.8
- Volitio Dei libera in eo habet entitatem, & perfectionem necessariam. 110.n.35
- Volitio Dei ut libera, & ut à ratione volitionis necessariæ distincta, est actus immanens, & intrinsecus in Deo, & à ratione actus necessarij distinguitur. 117.n.2
- Volitio in Deo ut sic, & ut distincta à nolitione, vel in quantum est magis vnum quàm ad aliud, vnde id habet. 119.n.7.8
- Volendi vnum, & aliud nolendi eadem ratio est in Deo. ibid.
- Volitio divina quomodo ad volita creata comparatur. 120.n.10
- Volitio omnis, etiam simplicis complacentiæ circa aliquam rationem boni versari debet. 130.n.5
- Voluntas datur in Deo, quia datur intellectus. 65. *summ. quest. 19*
- Eius obiectum Deus ipse est, & creaturæ ut ad ipsum ordinatæ. ibid.
- Voluntas divina est causa rerum. 65
- Eius nulla est causa ex parte volentis, sed volitorum. ibid.
- Eius efficacia, & immutabilitas ostenditur. ibid.
- Voluntatis divinæ impeccabilitas, & indeficientia ostenditur. 65.66
- Voluntas propriè dicta, & voluntas signi in Deo quid? 66. *summ. quest. 19*
- Voluntatis divinæ signa quinque. ibid.
- Voluntatis divinæ efficacia quomodo cum libertate nostra componitur, ex Apostolorum doctrina. 67.n.4. & 5
- Voluntas posito decreto prævenientis gratiæ necessariò operatur. 98.n.29
- Voluntas in Deo statuitur, & probatur. 100.n.1
- Ad perfectionem pertinet. n.2
- Vbi est intellectus ibi est voluntas. n.3
- Voluntas est inclinatio totius suppositi, & nascitur à potentia ei propria eliciente actum volendi. 101.n.5. 102.n.12
- Voluntas Dei non habet actum amoris circa creaturas possibiles in seipsis, sed actum nolitionis. 129.n.3
- Voluntas divina an feratur aliquo modo in creaturas possibiles sub statu possibilitatis. 129. & seqq.
- Voluntas divina ferri nequit in possibilia. 132.n.13. 150. & seqq.
- Nostri verò necessitari ad illa. n.14
- Voluntas non potest necessariò ferri in obiectum, nisi sibi illud necessarium indicet. 134.n.19
- Voluntas quomodo potest se habere circa suspensionem actus. 135.n.13. 138.n.27
- Voluntatis necessitas vnde petenda. 143.n.2
- Voluntatis divinæ status duplex. 146.n.13
- Voluntatis variæ acceptiones expenduntur. 149.n.1
- Quibus


Index Rerum, & Verborum.

- | | |
|---|--|
| <p>Quibus ipsius efficacia significatur. n. 2</p> <p>Voluntatis consequentis, & antecedentis differentia. 149.n.2.150.n.4</p> <p>Voluntas efficax quæ. n.3.&4</p> <p>Voluntatis efficacia non in omnibus est eadem. 151.n.7</p> <p>Voluntas efficiens, & efficax differunt. 151.n.9</p> <p>Voluntatis efficacia pluribus actibus perficitur. 152.n.11</p> <p>Voluntas diuina prius attingit bonitatem suam, quàm creatam. 163.n.49</p> <p><i>Voluntas si se determinauerit, dabo concursum ad consensum, quem sensum patiatur.</i> 169.n.18</p> <p>Voluntatis diuinæ elegans consideratio. 181.n.1</p> <p>Voluntatis creatæ libertas in operando, & contingencia in causam primam, vt in radicem reducitur. ibid.</p> <p>Voluntas diuina respectu nostræ se habet vt principium operandi, & vt ipsum velle. 182.n.3</p> <p>Voluntas diuina ob efficaciam suam libertatem conseruat, nec mensurat voluntatem. 184.n.9</p> <p>Voluntatis nostræ dominium, & libertas in quo ponitur. 185.n.10</p> <p>Voluntas diuina quomodo habeat efficaciam circa liberos cordis nostri actus antecedenter ad consensum nostrum. 186.n.13</p> <p>In Voluntatem nostram duplici via influi potest. 192.n.8</p> <p>Deus eam præuenire debet vt moneat, & qua præuentione. 193.n.96</p> <p>Voluntatis diuinæ efficacia ostenditur. 195.n.13.196.n.14.& seqq.</p> <p>Voluntas ad quid necessitari potest. 209.n.32</p> <p>Differentia inter potentias quæ se habent ad multa, & voluntatem nostram in quo posita est. 215.n.51</p> <p>Voluntatis diuinæ efficaciam an resistere possimus. 216.n.55</p> <p>Quid discriminis inter frustrari, & resistere. ibid.</p> | <p>Voluntatis inefficacis in Deo modus explicatur. 223.n.4</p> <p>Voluntas beneplaciti in Deo duplex, antecedens, & consequens. ibid.</p> <p>Voluntas signi est tantum in eo metaphoricè. ibid. & 229.n.2</p> <p>Per quinque signa diuiditur. n.3</p> <p>Voluntas antecedens beneplaciti quid. 229.n.5</p> <p>An solum sit inefficax, & conditionata. n.6.230.n.7</p> <p>Vnde petitur distinctio voluntatis diuinæ antecedens, & consequens. ibid.</p> <p>Voluntas antecedens & inefficax Dei non est voluntas signi. 232.n.13.14.& seqq.</p> <p>Licet careat effectu, non caret ordine, & bonitate ad illum. 233.n.19.234.n.23</p> <p>Circa quod versetur. 235.n.26.27</p> <p>Habet aliquid efficacitatis sibi annexum. n.28</p> <p>Voluntatis efficacia vnde oritur. 282.n.20</p> <p>Voluntatis actus primus est simplex alicuius finis volitio. 283.n.3</p> <p>Secundus est intentio finis. ibid.</p> <p>Tertius est eius electio. ibid.</p> <p>Quartus executio seu vsus mediorum, & applicatio potentiarum exsequentium. ibid.</p> <p>Voluntas, & intellectus se habent vt potentiæ ad inuicem se mouentes. 284.n.7</p> <p>Voluntas præexistens de fine ante ordinationem mediorum non est sola dilectio finis. 324.n.10</p> <p>Voluntas inefficax in Deo quid. 330.n.11</p> <p>Voluntas reprobatiua quid respicit. 389.n.4</p> <p>Quid complectitur. n.5</p> <p>In quo consistat. n.6</p> <p>Voluntas conditionalis non datur in Deo excludendi aliquos à gloria. 389.n.8</p> <p>Voluntas Dei quæ vnum reiecit, & alterum eligit non potest esse iniusta. 407.n.43</p> <p><i>Voces ad quid institutæ, & quid representent.</i> 45.n.11</p> |
|---|--|



F I N I S.

lur. 22.3.
ens, &
ibid.
e. ibid.
n. 3
219.n.5
230.n.7
occidens,
ibid.
oluntas
& legq.
omitate
4.n.13
n.16.17
n.18
2.n.20
is vo-
83.n.3
ibid.
ibid.
applicatio
ibid.
ntie ad
84.n.7
n me-
4.n.10
c.n.11
89.n.4
n.5
n.6
ndendi
89.n.8
n.igit
87.n.43
43.



R.^{MI} P. IOANNIS

A S^{TO} THOMA

ORD. PRÆDICATORVM,
DOCTORIS THEOLOGICI,

IN COMPLVTENSI ACADEMIA PROFESSORIS PRIMARIJ.

Supremi fidei Censoris, & tandem PHILIPPI IV. Magni Hispaniarum
Regis à Confessionibus.


CVRSVS THEOLOGICI

In Primam Partem D. Thomæ.

TOMI SECVNDI PARS ALTERA:

A QVÆSTIONE VIGESIMA SEPTIMA
ad finem vsque eiusdem partis.

Editio vltima ab innumeris expurgata mendis, & amplissimis Indicibus illustrata.



LVGDVNI,

Sumptibus PHILIPPI BORDE, LAVRENTII ARNAVD,
PETRI BORDE, & GVILIELMI BARBIER.

M DC. LXIII.

CVM PRIVILEGIO REGIS.



I N D E X

DISPUTATIONVM ET ARTICVLORVM Posterioris huius partis in primam partem D. Thomæ.

TRACTATVS DE SACRO TRINITATIS

Myfterio.

QVÆSTIO XXVII.

De processione diuinarum personarum. pag. 1

DISPUTATIO XII.

De processionibus intra Deum.

ARTICVLVS I.

Qui errores fuerint circa processionem personarum, & mysterium Trinitatis. 2



HÆRESIS Sabelliana, & origo eius. ibid. n. 3

Arrij hæresis. 3. n. 5

Prima Arrij moderatio. 4. n. 8

Secunda moderatio Arrij, & Eusebij Cæsariensis. 5. n. 9

Tertia moderatio Semiarianorum, & dissensio discipulorum Arrij. 6. n. 12

Macedonij hæresis circa Spiritum S. 7. n. 16

Quid Mahumetes, Abaylardus, & alij de Trinitatis mysterio senserint. 8. n. 17

Quid noui hæretici, & Transilvani de Trinitatis mysterio senserint. 9. n. 21

ARTICVLVS II.

Vera de Trinitatis mysterio fides stabilitur. 9

Distinctio trium personarum vera, & realis. 10. n. 3

Consubstantialitas, & vnitas naturæ contra Arianos. 13. n. 12

ARTICVLVS III.

Expediuntur ea quæ contra hoc mysterium ab hæreticis, & infidelibus obiiciuntur. 18

Non repugnat diuinæ naturæ multiplicatio personarum ad intra. 23. n. 18

Non contrariatur principiis luminis naturalis hoc mysterium. 26. n. 28

Sophismata hæreticorum futilia. 30. n. 17

ARTICVLVS IV.

Vtrum sint necessaria processionem reales ad distinctionem personarum, & D. Thomas rectè illas dari probauerit. 33

Distinctio personarum necessariò exigit processionem. 34. n. 3

Rectè probat D. Thomas dari processionem ad intra in Deo. 37. n. 18

ARTICVLVS V.

Vtrum processionem diuinam sint formaliter operationes vitales, & quæ, an emanationes naturæ? 45

Opiniones circa vtramque difficultatem. ibid. n. 1
Ioan. à S. Th. in 1. p. D. Th. Tom. II. P. ult.

Philosophica præsupposita. 46. n. 4

Resolutio Theologica circa processionem diuinam. 52. n. 17

Fundamenta Durandi, & Scoti conuulsa. 57. n. 33

ARTICVLVS VI.

Vtrum processio Verbi sit formaliter, & in 4. modo per se generatio? 59

Definitio generationis quomodo accommodetur Filio. 60. n. 2

Processio Verbi in Deo formaliter in 4. modo per se est generatio. 62. n. 10

ARTICVLVS VII.

Qua ratione processio Spiritus S. non sit generatio. 69

Duo præsupposita Philosophica. 70. n. 3

Rationes D. Thomæ efficaciter probant processionem Spiritus S. non esse generationem. 74. n. 15

QVÆSTIO XXVIII.

De Relationibus diuinis. 83

DISPUTATIO XIII.

De Relationibus diuinis.

ARTICVLVS I.

Quomodo essentia diuina, & relationes distinguuntur. 84

Vnum præsuppositum de fide, alterum ex Philosophia. ibid. n. 2

Relationes diuinæ sola ratione distinguuntur ab essentia. 86. n. 7

Alia distinctio virtualis à modernis inuenta reicitur. 90. n. 20

ARTICVLVS II.

An relationes sint de conceptu essentia, & è conuerso. 91

ARTICVLVS III.

Vtrum tres relationes dicant tres perfectiones, existentias, & alia similia attributa multiplicent. 101

Relationes diuinæ quomodo dicant perfectionem. ibid. n. 2

Existentia non multiplicatur in relationibus. 107. n. 20

Veritas, bonitas, infinitas, sanctitas non multiplicantur. 109. n. 29

QVÆSTIO XXIX.

De personis diuinis.

2 2

QVÆ

Index Disputationum,

QVÆSTIO XXX.
De pluralitate personarum. 114

QVÆSTIO XXXI.
De his quæ ad unitatem, vel pluralitatem
pertinent in diuinis. ibid.

QVÆSTIO XXXII.
De diuinarum Personarum cognitione. 115

DISPUTATIO XIV.
De personis diuinis, & notionibus in
communi.

ARTICVLVS I.
Explicatur quid sit persona, hypostasis, sub-
sistentia, & substantia. 116

Quæ sint præsupponenda. n.1
Definitio personæ explicata, & defensa. 117.n.6
Quid sit personalitas in communi, quid personali-
tas diuina, & quomodo tribus personis sit com-
munis. 118.n.12

ARTICVLVS II.
Vtrum detur in Deo subsistentia absoluta
præter tres relatiuas. 123

Mens D. Thomæ. 124.n.5
Fundamentum ex ratione. 125.n.10
Corollaria ex dictis. 126.n.15
Soluuntur argumenta. 127.n.18

ARTICVLVS III.
Vtrum sint ponenda in Deo quinque notio-
nes, quatuor relationes, & tres proprie-
tates. 121.n.1

Ex naturalibus effectibus est incognoscibilis Tri-
nitas. ibid.n.2
Difficultates circa notionum, & relationum nu-
merum. 134.n.16.138.n.32

ARTICVLVS IV.
Quomodo sit utendum nominibus significan-
tibus unitatem, vel pluralitatem, concre-
tum, aut abstractum in diuinis. 141

Quid de aliis nominibus significantibus plurali-
tatem, vel unitatem. 142.n.8

QVÆSTIO XXXIII.
De persona Patris. 145

QVÆSTIO XXXIV. & XXXV.
De persona Filij. ibid.

QVÆSTIO XXXVI. XXXVII.
& XXXVIII.
De persona Spiritus Sancti. 146

DISPUTATIO XV.
De personis diuinis in speciali. ibid.

ARTICVLVS I.
Quid importet formaliter ratio ingeni in
Patre. ibid.

ARTICVLVS II.
Vtrum Verbum diuinum procedat in quarto

modo per se ex cognitione omnium perso-
narum diuinarum, & creaturarum. 152

ARTICVLVS III.
Vtrum si Spiritus S. non procederet à Filio,
distingueretur ab illo. 161

Græcorum error circa processionem Spiritus S.
reiectus. ibid.n.1
Si Spiritus S. non procederet à Filio, non distin-
gueretur ab illo. 166.n.21
Expediuntur fundamenta Scoti. 170.n.31
Fundamenta Græcorum extirpantur. 173.n.38

ARTICVLVS IV.
Vtrum Spiritus S. ex sua characteristica pro-
prietate petat procedere à duabus perso-
nis, & unico principio spiratore. 174

Spiritus S. per se quarto modo procedit ex dua-
bus personis. 175.n.2
Vnus spirator est Pater, & Filius, non vna substi-
stentia spiratiua, nec vnum indiuiduum substi-
stens, qui sit hic spirator. 179.n.16
Virtus spiratiua quomodo sit immediatè in Patre,
& Filio. 184.n.30

ARTICVLVS V.
Vtrum Pater, & Filius diligant se Spiritu
Sancto. 186

QVÆSTIO XXXIX.
De personis ad essentiam relatis. 188

Regulæ pro prædicationibus diuinis. ibid.

QVÆSTIO XL.
De personis in comparatione ad relationes,
& proprietates. 190

QVÆSTIO XLI.
De personis in comparatione ad actus notio-
nales. 191

QVÆSTIO XLII.
De æqualitate, & similitudine diuinarum
personarum. 192

DISPUTATIO XVI.
De constitutio personarum, & actibus
notionalibus. ibid.

ARTICVLVS I.
Quæ sit forma constituens personas in diui-
nis. ibid.

Punctus difficultatis, & expeditio eius quoad per-
sonas procedentes. 193.n.5
Paternitas sub conceptu paternitatis constituit
primam personam non procedentem. 195.n.15

ARTICVLVS II.
Quomodo ratio voluntarij inueniatur in
actibus notionalibus. 205

ARTICVLVS III.
Quid sit potentia generatiua, & spiratiua
in Deo. 207

ARTICVLVS IV.
Quibus modis dicatur vna persona esse in
alia, & æqualis, vel similis alteri. 211
Quæ

Quæ prioritas concedenda, vel neganda sit in personis diuinis. 213.n.6
Relatio æqualitatis, & similitudinis qualis sit in diuinis. 214.n.13

QVÆSTIO XLIII.

De missione personarum diuinarum. 216

DISPUTATIO XVII.

De missione personarum diuinarum.

ARTICVLVS I.

Quid sit missio, & quibus personis conueniat. 217

ARTICVLVS II.

Quos effectus connotet missio, & quomodo diuidatur in visibilem, & in inuisibilem. 221

ARTICVLVS III.

Vtrum non solum dona gratiæ, sed etiam ipsa persona diuina detur, & existat realiter in anima ex vi missionis. 228

Variæ sententiæ circa difficultatem, cuiusque resolutio. 229.n.3

TRACTATVS DE CREATIONE.

QVÆSTIO XLIV.

De processione creaturarum à Deo. 236

QVÆSTIO XLV.

De modo emanationis rerum à primo principio. ibid.

QVÆSTIO XLVI.

De principio durationis rerum creatarum. 237

QVÆSTIO XLVII.

De rerum distinctione in communi. 238

QVÆSTIO XLVIII.

De rerum distinctione in speciali. ibid.

QVÆSTIO XLIX.

De causa mali. 239

DISPUTATIO XVIII.

De creatione rerum. ibid.

ARTICVLVS I.

Quid fides doceat circa creationem, & articulum Dei creatoris. ibid.

Quid fides in hac parte probet, quid ratio. 240.n.5

ARTICVLVS II.

Quid sit creatio ipsa tam actiue ex parte Dei, quam passiue ex parte creaturæ. 245

Creatio ex parte Dei est actio externa entitatiue, & temporalis denominatiue. 246.n.4

Creatio ex parte creaturæ non esse aliquid medium inter Deum, & rem creatam. 248.n.12

Creatio non est mutatio realis, nec de prædicatione actionis. 251.n.23

ARTICVLVS III.

Quæ res propriè creentur. 255

ARTICVLVS IV.

Vtrum potentia creatiua principaliter, vel instrumentaliter possit creatura communicari. 261

Implicat creaturam vi natiua creare. n.2
Implicat dari instrumentum creationis physicum. 268. n.17

TRACTATVS DE ANGELIS.

QVÆSTIO I.

De substantia Angelorum absolute. 275

QVÆSTIO LI.

De comparatione Angelorum ad corpora. 276

DISPUTATIO XIX.

De existentia, & quidditate Angelorum.

ARTICVLVS I.

Quid fides doceat circa existentiam, & naturam Angelorum. 276

Quid de Angelis per certam consequentiam colligatur ex Scriptura. 277.n.3

Difficultates circa corporeitatem Angelorum enodantur. 281.n.17

ARTICVLVS II.

Vtrum Angelus careat omni compositione materiæ, & formæ. 283

Sententia D. Thomæ. n.2
Soluuntur argumenta. n.10. & seqq.

ARTICVLVS III.

Vtrum repugnet dari plures Angelos solo numero differentes. 288

Implicatio multiplicationis indiuidualis naturæ Angelicæ. ibid.n.2

Ratio implicationis. 289.n.8

Soluuntur argumenta. 291.n.15

Angeli non essent de facto multiplicati numero, etiamsi multiplicatio eorum esset possibilis. 295.n.24

Index Disputationum,

ARTICVLVS IV.

*Vtrum Angeli sint, per naturam incorrupti-
bilis.* 297

QVÆSTIO LII.

De comparatione Angelorum ad loca. 300

QVÆSTIO LIII.

De motu locali Angelorum. ibid.

DISPVATIO XX.

De loco, & motu Angelorum. 301

ARTICVLVS I.

Qua sit in Angelo ratio existendi in loco.
ibid.

Varia sententiæ. 302.n.5
Resolutio ex mente D. Thomæ. 303.n.9

ARTICVLVS II.

*Expediuntur difficultates contra sententiam
propositam artic. precedenti.* 310

ARTICVLVS III.

*Vtrum repugnet unum Angelum esse in plu-
ribus locis, vel plures in uno.* 315

Angelus potest esse in maiori vel minori loco in-
tra eandem sphaeram. ibid.n.1

Angelus non potest esse simul in pluribus locis
adæquatis. 317.n.9

Angelus quomodo possit esse in duplici loco
inadæquato. 318.n.17

Non possunt Angeli esse simul in eodem loco for-
mali. 321.n.27

ARTICVLVS IV.

*Vtrum Angelus in suo motu necessario debeat
transire per media.* 323

Non repugnat Angelum moueri de vno loco ad
aliu non transeundo per medium. 326.n.11

Soluuntur argumenta. 329.n.20

ARTICVLVS V.

*Vtrum motus Angeli in spatio possit fieri in
instanti.* 332

Varia sententiæ. n.4
Resolutio. n.5

QVÆSTIO LIV.

De cognitione Angelorum. 239

QVÆSTIO LV.

De medio cognitionis Angelicæ. 340

DISPVATIO XXI.

De intellectu, & speciebus Angelorum.

ARTICVLVS I.

*Quid de potentia intellectiua, & intelligere
Angeli D. Thom. probauerit.* ibid.

Rectè probat D. Thomas intelligere Angeli non
esse eius substantiam. ibid.n.1

Rectè probat D. Thomas quod intelligere Angeli
non sit eius esse. 346.n.20

Quod potentia intellectiua non sit substantia An-
geli. 349.n.27

ARTICVLVS II.

*Vtrum Angelus indigeat specie intelligibili
superaddita ad intelligendum se.* 353

Varia sententiæ. 354.n.4

Resolutio. ibid.n.6

Secunda pars conclusionis de accidentibus An-
geli. 359.n.18

ARTICVLVS III.

*Vtrum respectu aliorum obiectorum habeat
Angelus species infusas, vel acquisitas.*
361

Angelus indiget speciebus superadditis, idque ef-
ficaciter probatur à D. Thomæ: ibid.n.1

Angeli non acquirunt alias species ab obiectis, sed
à Deo habent illas infusas. 365.n.13

Species Angelicæ non sunt propriæ passionis in
rigore loquendo, sed accidentia inseparabilia.
371.n.50.

ARTICVLVS IV.

*Vtrum superiores Angeli intelligant per spe-
cies vniuersaliores, & quomodo.* 375

Species Angelicæ quânto superiores, tantò vni-
uersaliores, etiam respectu diuersarum quiddi-
tatum. 376.n.9

QVÆSTIO LVI.

*De cognitione Angelorum respectu immate-
rialium.* 385

QVÆSTIO LVII.

*De Angelorum cognitione respectu rerum
materialium.* 386

QVÆSTIO LVIII.

De modo cognitionis Angelicæ. 383

DISPVATIO XXII.

*De obiecto, & modo cognitionis Angeli-
cæ.* 388

ARTICVLVS I.

*Vtrum Angelus comprehensiuè cognoscat tam
res inferiores, quàm Angelos superiores.*
ibid.

Quid certum sit in hac parte. ibid.n.4

Quomodo Angelus inferior cognoscat superio-
rem. 390.n.9

Funda

Et Articulorum.

Fundamenta opposita soluuntur. 394. numero 23.

ARTICVLVS II.

Quomodo Angelus futura, & praterita cognoscat. 396

Supponuntur certa. ibid.n.2
In quo sit difficultas, eiusque resolutio. 398.n.7
Corollaria ex dictis. 403.n.22
Soluuntur difficultates à principio. 407.n.37

ARTICVLVS III.

Qua ratione Angelus non cognoscat naturaliter cogitationes cordis. 408

Examinatur ratio incognoscibilitatis in his secretis. 409.n.5

ARTICVLVS IV.

Vtrum Angelus possit intelligere aliud discurrendo vel componendo, & diuidendo. 416

Quid sit supponendum. ibid.n.1
Quid sit tenendum. 417.n.5
De compositione, & diuisione intellectus in Angelo. 424.n.26
Duo corollaria. 425.n.32

QVÆSTIO LIX.

De voluntate Angelorum. 427

QVÆSTIO LX.

De amore, & dilectione Angelorum. ibid.

QVÆSTIO LXI.

De productione Angelorum in esse natura. 428

QVÆSTIO LXII.

De perfectione Angelorum in esse gratia, & gloria. ibid.

QVÆSTIO LXIII.

De Angelorum malitia. 429

DISPVATIO XXIII.

De merito, & peccato Angelorum. 430

ARTICVLVS I.

Vtrum dari possit creatura ex sua natura im-peccabilis. ibid.

Resolutio ex D. Thoma. n.2
Secunda conclusio. 434.n.15
Soluuntur argumenta. 438.n.25

ARTICVLVS II.

Vtrum Angelus potuerit peccare in primo instanti. 441

Varia sententia. 442.n.3
Eligitur sententia D. Thomæ, ostenditur aliorum Authorum inefficaces esse rationes. 442.n.3
Efficacia rationis D. Thomæ. 445.n.12
Soluuntur argumenta. 449.n.24

ARTICVLVS III.

Quo genere peccati, & circa quod obiectum peccauerit Angelus. 456

Genus peccati Angeli. ibid.n.1
Species peccati Angeli. 459.n.9
Singularitas peccati Angeli circa quod obiectum determinatè superbierit. 463.n.17
Quid de appetitu vnionis hypostaticæ. 466. num. 27

QVÆSTIO LXIV.

De pœna Dæmonum. 471

DISPVATIO XXIV.

De termino viæ Angelorum, & damnatione Dæmonum. ibid.

ARTICVLVS I.

Quot instantibus viæ Angelorum fuerit terminata. 471

Primum initium viæ, seu primum instans solum durauit per durationem correspondentem nostro instanti. 472.n.2
Progressus viæ Angelorum in malis fuit duobus instantibus ante terminum, in bonis vno. 475.n.12
Terminatio viæ fuit in bonis Angelis, & in malis in distincto instanti à merito. 479.n.23

ARTICVLVS II.

Qua sit causa obstinationis in Dæmonibus. 483

Subtractio omnis auxilij ad bonum est causa obstinationis Dæmonum. 484
Inflexibilitas Angeli in malo, vel bono post plenam electionem, & iudicium. 486.n.8

ARTICVLVS III.

Quomodo spiritus torqueantur ab igne. 497

Duo præsupposita. n.1
Varia sententia. n.5
Resolutio. n.8

QVÆ

Index Disputationum, & Articulorum.

QVÆSTIO CVI. & CVII.

De illuminatione, & locutione Angelorum.
507

Punctus difficultatis, & diuersitas sententiarum.
508.n.2
Resolutio ex mente D.Thomæ. 511.n.12
Soluuntur argumenta. 514.n.23

DISPUTATIO XXV.

De locutione, & illuminatione Angelorum.

ARTICVLVS I.

*Quomodo spiritualiter loquantur Angeli
inter se.* ibid.

ARTICVLVS II.

*Quid sit illuminatio in Angelis, & quibus
conueniat.* 518

Materia circa quam fiat illuminatio. 521.
num. 10
Ad quos pertineat illuminare. 522.n.15



TRACTA



TRACTATUS DE SACRO TRINITATIS MYSTERIO.

QVÆSTIO XXVII.

De processione Diuinarum Personarum.

S V M M A L I T E R Æ.



QU A ratione S. Thomas mysterium Trinitatis explicaturus à processionibus, & relationibus diuinis has primas duas quæstiones inchoauerit, diximus *præced. Tomo, in Isagoge doctrinae D. Thom. circa ordinem primæ partis*: Sunt enim ista duo quasi duo præsupposita, & principia, quibus omnis personarum in Deo distinctio fundatur, quia sine processionibus non est fundamentum relationum, & sine relationibus non posset esse distinctio in personis, quin esset in ipsa substantia, & essentia Dei, quod esset subuertere mysterium Trinitatis: hoc enim in personis distinctum, & in substantia vnum fides Catholica profitemur.

Igitur in hac q. 27. de processionibus diuinis duo præcipua tractat D. Thom. Primò quoad quæstionem *an est*, An detur processio in diuinis. Secundò, quoad numerum, differentiàmque processionum, quot & quales sint. Primum expedit primo art. Secundum, per reliquos quatuor articulos declarat.

In primo art. ostendit S. Doctor quòd iuxta Scripturam diuinam processionem in Deo ponendam sunt, non sicut procedunt creaturæ, quæ sunt extra Deum, sed tanquam res manentes intra Deum. Vnde non solum est processio, sicut effectus à causa, sic enim Filius procedens non esset Deus, quod tamen Scriptura docet; nec est processio secundum quòd causa procedit in effectum; & iuxta diuersos effectus quos facit, diuersas denominationes assumit: sic enim non distinguerentur personæ procedentes, sed essent vna persona sub diuersis officiis vel denominationibus, cuius oppositum Scriptura dicit. Est ergo processio in diuinis ad intra, ita quòd procedens & principium sunt diuersæ personæ; & tamen in vnitæte substantiæ sunt vnum, quia processio intellectualis est per actus immanentes, & ad intra: ex hoc enim quòd aliquis intelligit, conceptio procedit intra ipsum, quæ tantò est perfectior, quantò magis vna, & intima, & similis ipsi speciei, & principio intelligenti. Cum ergo Deus sit naturæ intellectualis, vtrumque habet, & quòd aliquid procedat intra ipsum, ex hoc quòd intelligit, & quòd sit summè vnum cum intelligente, quia est perfectissima intellectio.

Iean. à S. Thom. in 1. part. D. Th. Tomus alter.

A

In


2 Quæst. XXVII. De sacro Trin. myst.

In art. 2. ostendit quòd aliqua processio in Deo est generatio, scilicet processio Verbi: quia habet omnes conditiones generationis propriissimæ: est enim processio vitalis viuentis à viuento, & à principio coniuncto, scilicet ab ipsomet intelligente fecundato per speciem, & in similitudinem, quia est expressa similitudo speciei, & in eadem natura, quia intelligere & intelligi est ipsum substantiale esse Dei.

In art. 3. ostendit præter processionem Verbi dari aliam in Deo, quia in nobis, & in natura intellectuali non solum procedit aliquid per actionem intellectus concipiendo, sed etiam per actum voluntatis spirando & inclinando in rem amatam. Datur ergo in Deo secundum voluntatem & amorem, Spiritus procedens, quasi impulsus, sicut secundum intellectum Verbum expressum, vt imago.

In art. 4. ostendit S. Thom. hanc secundam processionem amoris non esse generationem, eo quòd non conuenit illi quòd sit processio secundum similitudinem in natura ex sua formali ratione, & modo talis processionis, sed solum ex sua formali ratione habet esse per modum impulsus, & inclinationis: omnis autem inclinatio supponit formam, seu naturam, cuius est inclinatio, non formaliter naturam constituit; & sic procedens secundum inclinationem, non procedit vt genitum, licet, quia in Deo inclinatio, & natura, forma, & voluntas sunt idem, habeat identicè eandem naturam id quod sic procedit.

In art. 5. ostendit non esse plures processionem quàm istas duas, quia processionem attenduntur secundum actiones. Non sunt autem in natura diuina aliæ actiones quàm intelligere, & velle, quæ sint actiones ad intra, & sic non sunt nisi duo genera processionum, scilicet per intellectum & per voluntatem, seu amorem. Et in quolibet genere, non est nisi vnica processio numero, quia quælibet est infinita in suo genere, & vnica exhaurit totum, quia summè perfecta est.



DISPUTATIO XII.

De Processionibus intra Deum.

ANTEQUAM Scholasticas magis que metaphysicas quæstiones circa hoc mysterium disputemus, prius in ipsius mysterij veritate firmanda & defendenda immorabimur aliquantulum, nec id vitio vertendum est, quia vt rectè monet Caiet. in hac q. 27. art. 1. *Principium prolixum esse decet secundum Platonis præcepta, quatenus ex principiis bene discussis facilius sit ad reliqua aditus.*

ARTICVLVS I.

Qui errores fuerint circa processionem personarum & mysterium Trinitatis.

RELICTIS erroribus, vel potius cæcitate aliquorum Gentilium & infidelium Iudæorum, qui hoc mysterium vel nullo modo agnoscunt, vel pertinaciter negant, etiam si vnum Deum fateantur lumine naturali, vt Philosophi Gentiles, vel parentum traditione, aut ex sacra Scriptura conuicti, vt etiam infideles Iudæi qui nunc sunt, tamen inter hæreticos, qui de hoc mysterio controuersiam habuerunt cum Catholicis, constat duo præcipua fuisse capita, & quasi fontes, vnde errores omnes, vel saltem præcipui, qui circa hoc mysterium famosiores sunt, emanarunt, vt etiam D. Thom. insinuat in hac quæst. art. 1. scilicet errorem Sabellianorum, & Arrianorum: illi enim ex vnitatem omnimoda essentiae inferebant vnitatem etiam personarum, ita quòd ea quæ distinctionem personarum in Scriptura designant, non ad diuersitatem ipsarum personarum in se, sed ad differentiam officiorum, vel actionum eiusdem personæ referebant, v. g. quòd eadem persona prout in-

genita, & principium creandi diceretur Pater prout incarnata diceretur Filius, prout sanctificans creaturas, diceretur Spiritus sanctus, quasi extensione quadam, & dilatazione eiusdem personæ in diuersos effectus sic enim refert Athanasius oratione contra Gregales Sabellij & oratione contra Arrium, explicans illud: *Deus de Deo*, vbi illa verba Sabellianorum ponit: *Dilatari Patrem in Filium sumendo carnem, & in Spiritum sanctum sanctificando homines.* Et ad idem alludit illud Nazianzeni in tract. de fide, *Nec extensionem partis alicuius ex parte, vt quidam putauerunt, Dei Filium dicimus.* Alij verò, scilicet Arriani, per aliud extremum ex distinctione personarum intulerunt etiam distinctionem essentiae & naturæ, & consubstantialitatem negauerunt, quæ in Concilio Nicæno, & Ecclesia Catholica stabilita est. Vnde est illa vox Arrij apud Athanasium oratione 1. contra Arrianos; *Cum omnia sint ex nihilo, etiam Dei Filius ex nihilo emerfit, & cum omnia prius non essent, sed postea extiterint, fuit profectò, cum Verbum non erat, quod & natura mutabile fuit, sed libero arbitrio bonum remansit.*

Cæterum, nec hæreses istæ in Sabellio & Arrio inceptum, nec eodem modo postea à suis sectatoribus explicatæ & defensæ sunt, sed variis, diuersisque astutiis, & subterfugiis exponebantur, & proponebantur, vt simplices quosque deciperent. Antiquior fuit Sabellij hæresis errore Arrianorum, sed Arrij venenum, ita per totum orbem se diffudit, & tanta contentione & pertinacia multorum assertus error est, vt priorem Sabellianorum videatur absorbuisse.

Hæresis Sabelliana: & origo illius.

Igitur primus qui circa Trinitatis mysterium & personarum distinctionem in apertam hæresim prorupit, & expressè illud oppugnauit, fuit Praxeas, circa Tertulliani tempora, contra quem & ipse librum scripsit, in quo rectè de mysterio Trinitatis

Trinitatis disputat, licet iam Montani hæresi tinctus esset, & à Catholicis, quos ipse Psychicos vocat, declinasset. Et dico primum contra mysterium Trinitatis erupisse Praxeam, quia licet ante ipsum fuerit Ebion, & Cerinthus, qui Christi Domini diuinitatem negauerunt, quos postea secuti sunt Paulus Samosatenus, Photinus, & alij; tamen isti hæretici non cogebantur ex hoc negare mysterium Trinitatis, id est, tres veras personas in vna diuinitate, sed mysterium Incarnationis destruebant: poterant enim affirmando quod in Deo dantur tres personæ, negare quod nulla illarum fuerit incarnata, sed Christum esse personam creatam. Vnde non numeramus istos inter hæreticos, qui aperte mysterium Trinitatis negauerunt. Sed primus qui illud negauit, & destruere conatus est, fuit Praxeas, qui à Tertulliano inter 25. hæreses, quas in libro de *Præscriptionibus* recenset, vltimus collocatur cap. 53. Insinuat autem idem Tertullianus ibi, inter Cataphrygas, quorum author fuit Montanus, vt docet S. August. lib. de *hæresibus*, hæresi 26. etiam hunc Praxeæ errorem inualuisse, qui paulò ante exorti fuerunt, & à regione in qua versabantur, scilicet à Phrygia, nominati sunt, & inde dicti Cataphryges, quasi Latine dicamus secundum Phrygas. Hi in duas sectas diuisi, quidam Proclum, quidam Æschinem secuti sunt. Et illi qui secundum Æschinem nominati, hanc peculiarem blasphemiam seu errorem inuenerunt, quod Christus ipse sit Filius & Pater, has duas personas confundentes. Quod apud neminem alium reperi, quam apud Tertullianum notat Pamelius in lib. de *Præscriptionibus* notatione 3. 7. circa finem. Inde videtur Praxeas errorem bibisse & diuulgasse: qui fortè apud eos, qui secundum Æschinem nominabantur, occultior latebat. Et eò fortè alludit Tertullianus in initio libri contra Praxeam, dum de ipso inquit, cap. 1. *Iste primus ex Asia hoc genus peruersitatis intulit Romanæ humo.* In Asia autem Phrygiam esse, ex cuius regione Cataphrygas nominatos esse diximus, nullus ignorat. Eos ergo secutus Praxeas; dixit, Patrem & filium non duas esse personas; sed vnā, qui cum Deus omnipotens sit, ipsemet in tempore natus, & passus, Christus nominatur. Propter quod Praxeam Patripassianum appellat B. Optatus Mileuitanus lib. 5. aduersus *Parmenianum*, quia Patrem passum dixit, sicut Noëtiani etiam ob eundem errorem Patripassiani vocati sunt. Vnde & S. Cyprianus epist. 73. ad Iubaianum, primo loco ponit Patripassianos, quod de Praxeas, & eius asseclis intellexisse, notat Pamelius annotatione 1. in librum Tertulliani aduersus Praxeam, & super prædictam epistolam Cypriani, num. 21.

Praxeæ errorem Victorius quidam corroborauit, vt Tertullianus refert in fine libri de *Præscriptionibus*, & secutus est Noëtus, & celebriorem fecit Sabellius Noëti discipulus, qui quidem in hoc conuenerunt quod non essent duæ personæ in Deo, Pater & Filius, sed vna; licet Sabellius à Noëto in eo videatur differre, vt S. Epiphanius refert, quod Sabellius non dicebat Patrem esse passum, sicut Noëtus: Sabelliani, inquit, *similia Noëto dogmatizantes, præter hoc quod dicunt Patrem non esse passum.* Quæ verba referens August. lib. de *hæresibus*, hæresi 41. Epiphanius non assentit, Cum Sabelliani, inquit, sic innotuerint dicere Patrem passum, vt Patripassiani, quàm Sabelliani crebrius nuncuentur. Sed & Philastrius vt ibidem refert Augustin. Sabellianos affirmat Patripassianos esse appellatos. Nec aliud intelligi potest à S. Th. in 1. part. D. Th. Tomus alter.

test, cum Sabellius, sicut & Noëtus eandem personam dicant esse Patrem & Filium, vnde si Filium passum fuisse fatentur, etiam Patrem passum diffiteri non possunt. Itaque non est dubium eisdem fuisse Patripassianos, & Sabellianos, & quicumque non distinxerunt personam Patris à Filio. Vnde & ipsum Praxeam, qui hanc hæresim prius euulgauit, Patripassianum fuisse Tertullianus affirmat libro contra Praxeam, cap. 1. *Paracletum, inquit, fugauit, & Patrem crucifixit.* Hucusque de hæresi Sabellij, eiusque origine; quam postea in Hispania Priscillianistæ tenuerunt, vt S. Augustin. refert lib. de *hæresibus*, hæresi 10. in fine, & nostris temporibus Michaël Seruetus suscitare conatus est, vt inf. à dicemus. Sed & Prisciliano Samosatensi hæresim tribuit Concil. Bracharense Primum can. 3. Et Priscillianistas dixisse dari Trinitatem Trinitatis, idem Concil. refert. can. 2. nec tamen, quæ fuerit illa Trinitas ab illis asserta explicat.

Arrij hæresis.

Circa alterum hæresim, quæ per extremum Sabellio opponitur, affirmando plures esse personas, & veram processionem in Deo admitendo, sed consubstantialitatem in vnitatem essentiae negando, notandum est quod illa communiter Arrij attribuitur, quia ab eo latius confirmata, & longè celebrior reddita est, ita vt totum ferè orbem eius ignis incendium corripuerit, tamen etiam antè incepisse certum est. Nam August. lib. de *Ecclesiasticis dogmatibus*, cap. 3. Dionysium quendam Arrij fontem nominat; Nihil inquit, *creatum aut seruientem in Trinitate credamus, vt vult Dionysius Arrij fons.* Et fuerunt ante Arrium quidam hæretici Alogi seu Alogiani, vt refert Epiphanius hæresi 51. & Augustin. hæresi 30. sic dicti, quia negabant in Deo Verbum. Et fuerunt circa tempora Soteris Papæ & Commodi Principis. De quibus etiam agit Castro de *hæresibus*, Verbo Deus, hæresi 7. Alij Origenem putant doctrinam Arrij primitus tenuisse. Epiphanius enim apud Augustin. lib. de *hæresibus*, hæresi 43. de Origenistis qui ab isto Origene deriuati sunt, inquit, *Quod Christum & Spiritum sanctum creaturam dicunt.* Et ipse August. ibidem de eodem Origene sic subdit. *Dicit præterea Origenes, quod Filius Dei sanctis hominibus comparatus, veritas sit, Patri collatus mendacium, & quantum distat Apostoli à Filio, tantum Filius à Patre.* Vnde nec orandus est Filius cum Patre, quia non est author indulgendarum petitionum, sed supplicator. Et S. Hieronymus epist. 59. ad Auitum pro primo errore Origenis ponit, quod Christum Filium Dei non natum, sed factum esse dixerit. Et D. Thom. in hac 1. part. quæst. 34. art. 1. ad 1. cum posuisset in argumento auctoritatem quandam ex Origene super Ioannem, vbi dicit *Verbum metaphoricè dici in diuinis*, Originem dicit fontem fuisse Arrianorum. Et idem sentiunt alij antiqui authores, licet defensores Origenis, vt August. cit. loco inquit, dicant eum rectè de consubstantialitate sensisse, vt Pamphilus in Apologia pro Origene, Ruffinus, Socrates, & alij, & si quæ loca in Origene oppositum subolere videntur, ab hæreticis deprauata esse dicunt; in aliis autem locis vt in 1. *Periarchon* c. 2. & 3. non videtur malè de hoc puncto sentire: vnde & Athanasius in epistola de decretis Nicænæ Synodi, Origenem pro Catholica sententia adducit. Ex antiquiori tamen principio, quàm ab Origene errorem istum deducit D. Thom. 4. contra Gent. c. 6. in fine, scilicet à Platonicorum

corum dictis, qui ponebant summum Deum Patrem & Creatorem omnium rerum, à quo primitus effluxisse dicebant quandam mentem, in qua essent omnium rerum formæ, quam paternum intellectum nominabāt. Quæ ergo de Filio Dei in Scripturis dicuntur, hæretici de hac mente creata, & quæ suprema creaturarum esset, accipiebant.

6 Sed quidquid de istis Arrio antiquioribus authoribus sit, vnde ipse suum hauserit venenum, certe ipse apertius cæteris & celebrius errorem istum euulgavit, & consubstantialitatem Filij cum Patre negavit, innixus tam ipsi processioni Patris à Filio, quam sine distinctione substantiæ, seu naturæ non potuit intelligere, tum quibusdam authoritatibus Scripturæ, quæ minoratione aliquam, seu inferioritatem Filio Dei attribuere videntur, & intelliguntur de Filio in natura assumpta pro nobis, quas omnes latè collegit S. Tho. 4. *contra Gent. cit. c. 6.* & optimè dissolvit c. 8. & ante ipsum idem fecit Idacius Clarus lib. *contra Varimandum* tomo 4. *Biblioth. Fulgentius in libro* contra obiectiones Arrianorum, & alij Patres qui contra Arrium disputarunt, inter quos acerrimè ei restitit Athanasius in Nicæna Synodo, & in pluribus opusculis contra ipsum euulgatis.

7 Cæterum non eodem modo, nec in eodem statu Arrij error ab eo, & ab eius discipulis assertus est, sed sicut *suprà* disp. 3. ostendimus Pelagianam hæresim varios habuisse status, & moderationem aliquam, tum ipsum, tum eius discipulos admisisse, licet nunquam ad hoc peruenirent ut faterentur gratiam quæ per subministrationem spiritus ipsi voluntati infunditur, & ex nolentibus & resistentibus volentes facit: ita Arriani variis modis hæresim suam explicarunt, nunquam tamen ad hoc peruenirent ut Filium consubstantialem Patri faterentur. Nam ipse Arrius cum primùm in blasphemiam hanc erupit, ut Filium verum Deum negaret, non solum consubstantialem esse dissenfit, sed etiam Patri similem esse negavit, non de eius substantia, sed de nihilo, non æternum, sicut ille, sed in tempore creatum affirmans, illòque vulgato apud ipsos Arrianos proloquio vtens, *Erat quando Filius non erat*; quod est ipsum Patri coæternum negare, & sic etiam Patrem dicebant temporaliter esse Patrem, cum non semper habuerit Filium. Quod sanè ex epistola B. Alexandri Patriarchæ Alexandrini, sub quo primùm Arrius hæresim suam euulgavit, atque in Concilio Alexandria coacto damnatus est, innotescere poterit. Sic ergo inquit Alexander *in ea epistola* quam recitat Socrates lib. 1. *historia c. 3.* & ex eo Baronius anno Christi 318. n. 60. *Qui defecerunt ab Ecclesia sunt Arrius, Achillas, Aitbales, Carponas, &c.* Quam verò isti contra Scripturas excogitauerint, temerarièque effutuerint, sic accipitote. Deum non semper Patrem fuisse, sed tempus aliquando exiisse, cum Deus non esset Pater; non ab æterno Verbum Dei fuisse, sed ex nihilo ortum esse: nam Deum qui est, eum cum non erat ex eo quod non est, procreasse; & propterea tempus fuisse aliquando, cum non esset: Creatum enim & factum esse Filium neque essentiâ Patri similem, neque naturâ verum Patris Verbum, neque veram eius sapientiam esse, sed per abusionem Verbum & sapientiam dici: ipsum factum esse proprio Dei Verbo, & sapientia, quæ in Deo est, per quam cum cætera omnia, tum illum ipsum fecit Deus. Hæc Alexander.

Vbi vides, tum primam hæretici huius insaniam negando Filio Dei omnia quæ ad diuinitatem pertinent, nō solum consubstantialitatem & coæternitatem, sed etiam similitudinem cum Patre, & proprietatem in ratione Verbi; tum magnam astutiam & calliditatem hæretici, qui cum videret apertè

conuinci ex Scriptura suum errorem, quod Verbum diuinum seu Filius sit creatura, & aliquid factum, cum dicatur Ioannis 1. quod *omnia per ipsum facta sunt*, atque adeo ipse non est factus, cum omnia quæ facta sunt ab ipso sint, distinxit inter hoc quod est esse Verbum, seu sapientiam Dei propriè, & in rigore, quale est Verbum & Sapientia, quæ intra Deum est, seu ipsa essentia Dei est, & absoluta eius perfectio, & inter Filium, qui est procedens à Deo. Et hunc filium dicebat esse extra Deum, nec per ipsum facta esse omnia, nec ipsum esse Verbum propriè, sed abusiue, quasi verbum, seu vocem externam. Vnde dicebat quod per filium non sunt facta omnia, nisi instrumentaliter, sed per Verbum internum Dei, quod propriè est Verbum. Et per hoc deludere conabantur vim argumentorum, quæ ex Scripturis contra ipsos proferebantur, non vnum verbum in Deo ponentes, sed multa, idque in suis cantuunculis & conuiujs cum facietis & diceris contra Catholicos iactabant. Ita Athanasius in decretis Nicæna Synodi contra hæresim Arrianam, Arrius, inquit, in suis cantuunculis, & conuiujs libro per speciem subdubitando fabulatur, Multa, inquit, verba profert Deus. Quod nā igitur ex istis verbis Filium, & Verbum unigenitum Patris esse recipimus? Et iterum in eodem libro Athanasius: Illi porro (Arriani) quin sit Dei verbum non insciantur, sed id pro Dei filio non agnoscunt; quia nimirum, aliud intelligebant Verbum, aliud Filium. Vnde etiam S. Ambrosius lib. de Incarnat. Domini cap. 6. Nonnulli etiam (inquit) aliud Dei Verbum, alium verum Dei Filium crediderunt. Ethæc aduerterim, ut Theologus, cui præcipuè incumbit veræ fidei defensionem suscipere, non oscitanter, nec segniter hæreticorum calliditates & diuerticula studeat indagare, ne forte ex ignorantia eorum, quæ ipsi docent, & quibus suum errorem volunt palliare, minùs solidè arguantur ex Scripturis, & delusis testimonijs in risum & opprobrium velint Fidem Catholicam traducere

Prima Arrij moderatio.

Conuictus Arrius damnatusque in Concilio Alexandria à S. Alexandro Patriarcha coacto, incepit suam hæresim versutiâ maximâ tegere, & æquiocationibus variis celare, ut iniuste damnatus videretur, & apud alios Episcopos refugium posset inuenire. Et primò quidem scripsit ad Eusebium Nicomediensem Episcopum (is alius est ab Eusebio Cæsariensi, qui & ipse Arrij patrocinium impensè suscepit) epistolam de fide sua, propter quam iniuste ab Alexandro exagitari querebatur. Recitat eam Epiphanius hæresi 69. & Theodoretus lib. 1. *historia cap. 5.* vbi inter alia inquit: Nos quæ sit nostra sententia sensusque & docuimus, & docemus; Filium neque ingenuitum esse, neque partem ingenui ullo modo, neque ex ullo subiecto, sed voluntate & consilio ante tempora & ante sæcula plenum Deum exiisse (vide tergiuersationem hæretici) unigenitum, immutabilem, & antequam gigneretur, aut conderetur aut præsineretur, aut fundaretur, non fuisse, nam ingenuus non erat. Exagitamur igitur, quod Filium principium habere, Deum Patrem carere principio dicimus. Atque tum hac de causa, tum quod dicimus eum ex nihilo constare, nos persequuntur aduersarij. Istud verò sic ideò assernimus, quod non sit pars Dei Patris, neque ex ullo subiecto existat. Vide quomodo se tegeret & spiris implicaret coluber, ex vna parte dicens Filium Deum esse ex nihilo, quod utique est esse creaturam, ex alia vocans eum plenum Deum ante tempora & ante sæcula; vbi iam moderabatur id quod prius dixerat. Erat quando Filius non erat, sed tamen voluntate & consilio Dei exiisse.

extitisse. Ingenitum etiam negabat, sed nomine ingeni intelligenbat increatum, ut post videbimus. Hinc est, quod ipsum Filium dicebant substitutum fuisse voluntati Dei, ut creaturam perfectam & immutabilem, sed non ut unam creaturarum; quod epistola quadam alterius Eusebij Casariensis, validi Arriani futoris ad Alexandrum Patriarcham data declarat, cuius fragmenta recitantur in Concilio Nicæno II. actione 6. Ibi, inquit, *Arrium eiusque studiosos accusari ab Alexandro, quod Filium ex non ente instar unius omnium factum esse dixerint; illi vero exponentes fidem suam his verbis confiteri, quæ sentiunt; Deum legis & Prophetarum ante sempiterna sæcula generasse sibi Filium unigenitum per quem & sæcula, & omnia fecit. Generasse autem non videtur, sed in veritate propria voluntati substituisse immutabilem & inalterabilem creaturam Dei perfectam, verumtamen non ut unam creaturarum. Tua vero epistola accusat eos quasi dixerint, quod Filius factus sit tanquam unus omnium, cum tamen hoc non dixerint, sed aperte pronuncient, non unam creaturarum.* Sic Eusebius ille in epistola ad Alexandrum. Sed & Arrius ipse cum collegis suis exauthoratus, graduque Presbyterij deiectus ad eundem Alexandrum Episcopum suum officiosas litteras dederunt, quas recitat S. Epiphanius hæresi 69. eadem est astutia & subdola calliditate celantes, ut viderentur rectam fidem non deseruisse, sed tamen tali æquiuocatione, aut etiam mendacio utentes, ut nullo modo Filium Patri consubstantiali faterentur, sed creaturam incommutabilem, & ante tempora. Deum, inquit, genuisse Filium unigenitum ante tempora ætæ, per quem & sæcula, & reliqua fecit genuisse autem non in apparentia, sed in veritate: substituisse vero propria voluntate immutabilem & inalterabilem creaturam Dei perfectam, sed non velut unam ex creaturis, futuram, sed non velut unam ex foetibus sine genituris. Et inf. Sed sicut dicimus voluntate Dei ante tempora & ante sæcula creatum esse, & vivere, ac esse à Patre accepisse, ita ut Pater simul substituerit ipsi glorias. Addebant infra: Filius sine tempore genitus est à Patre, & ante sæcula creatus ac fundatus: non erat antequam gigneretur, sed sine tempore ante omnia genitus solus à Patre substitit. Neque enim est sempiternus, aut consempiternus, aut coingenitus Patri, neque simul cum Patre ipsum esse habet, velut quidam de his, quæ ad aliquid appellantur, dicunt, duo ingenta principia introducentes. Sed sicut unitas est principium omnium, ita Deus præ omnibus est & ante Christum est, velut à te didicimus in media Ecclesia prædicante. Sic illi. Vbi clarè apparet hæretici huius vafrities, & quomodo suam hæresim moderari conatus est, non ita absolute Filium Dei creaturam pronuncians, sed immutabilem & perfectam creaturam, & non sicut unam ex creaturis, & ante omnia tempora genitum à Patre, sed ex alia parte non ei sempiternum affirmabat, neque simul cum Patre habere esse, quod est eius consubstantialitatem negare; & tamen per ipsum omnia facta esse dicebat, in quo callidissime suum occultabat venenum, intelligens per ipsum omnia esse facta tanquam per instrumentum, non tanquam per supremam virtutem & omnipotentiam. Quod egregie in epistola supra citata B. Alexander detexit, cum ex persona Arrij inquit eum dixisse, suam ipsius essentiam ut est, Filium non percipere, quippe Filium nostra causa factum esse, ut Deus per ipsum, tanquam per instrumentum nos crearet, neque extitisse aliquando, nisi Deus nos creare in animum induxisset: Dicebant ergo per ipsum facta esse omnia, tanquam per instrumentum, & ad hoc Deum fecisse, seu creasse

Ioan. à S. Th. in 1. part. D. Th. Tomus alter.

Filium, ut instrumentum haberet quo reliqua crearet.

Secunda moderatio Arrij, & Eusebij Casariensis.

Adeo totum Orientem Arriana impietatis flamma corripuit, ut S. Sylvestro, & Constantino Magno, causa hæc generali & Oecumenico Concilio digna visa sit, coactaque est Nicæa Synodus 318. Patrum, qui ex toto orbe clarissimi & præstantissimi habiti sunt. Ibi hæresis Arriana damnata est, sed non furor eius aduersus, licet ad tempus consopiri visa sit. Cumque Patres subdolum hæreticorum mentem, & vafrum ingenium perspexissent, & quot, quantisque subterfugiis veritatem obscurarent, nec facile iis posse omnem aditum occludi, quominus ipsi viderentur veram fidem profiteri, cum tamen in suo permanerent errore, accuratissime in Concilio tractatum est qua voce & quo nomine fides Catholica significaret diuinitatem Filij, taliter quod nullatenus cum Arrio communicaret, sed ab eius errore prorsus segregaretur. Cumque Synodus in hoc esset (inquit S. Athanasius in epistola de decretis Nicæna Synodi contra hæresim Arrianam) ut Arrianorum impia vocabula tolleretur, & voces adhibere vellet, quæ sine controversia sacrarum Litterarum essent, nimirum enim Filium esse, & nequaquam ex non entibus esse, sed ex Deo, cumque Verbum esse & sapientiam, ac nequaquam creaturam aut facturam, sed germen proprium sui Patris. Eusebiani pro inueterata sua & prava opinione volebant illud, Ex Deo esse, commune esse, & ad homines quoque pertinere. Hinc factum est ut Patres clarioribus verbis rem tantum explicare volentibus, addiderint ly ex Deo esse, idem esse ac Filium ex substantia Dei esse. Deinde affirmantibus Orthodoxis Episcopis scribi debere, quod Filius esset potentia & imago Patris, & similis illi, immutabilis per omnia, æternus, indiuisus in Patre, &c. neque hoc Eusebiani abnuebant, quia esse similem, & esse imaginem Dei, etiam de homine id pronunciat Scriptura, & sic non omnino discernebat Filium Dei à creaturis, ideo Patres considerata illorum vafritie & hypocrisis (addit Athanasius) ubi supra, necessitate coacti sunt sententiam earum rerum ex Scripturis colligere, & quæ prius dixerant apertioribus verbis repetere, & scribere. Filium consubstantiali esse Patri, ut non solum similem similitudine, sed eundem ea voce, quæ ex Patre esse dicitur, significarent. Qua quidem voce omnis Arriana impietas iugulata est, & licet eam exoticam, seu nouam esse calumniarentur, nec in sacris litteris reperiri, tamen ab antiquioribus Patribus usurpatam, & eius significationem ex Scriptura depromptam; pluribus Athanasius docet ubi supra. Et quod magis mirandum est, ab ipsismet fidei hostibus vox ista accepta est, ut non solum in funda, & lapide contra Gigantem præualeret Ecclesia, sed suo ipsius gladio impij Goliath caput amputaretur. Ut enim inquit Ambrosius lib. 3. de fide ad Gratianum cap. vlt. Auctor ipsorum Eusebius Nicomediensis epistola sua prodidit dicens: Si verum Filium Dei increatum dicimus, Homension, consubstantiali cum Patre incipimus confiteri. Hæc cum lecta esset epistola in Concilio Nicæno, hoc verbum in tractatu fidei posuerunt Patres, quod viderunt aduersariis esse formidini, ut tanquam enaginato ab ipsis gladio, ipsum nefandæ caput hæresis amputarent. Sic Amb.

Ut Autem possent Arriani aliquod subterfugium inuenire, postularunt ut Pater solum diceretur ingenuus, nempe ut per consequentiam deducere

ducere possent Filium non esse increatum, quia non erat ingenuus, pro eodem diuulgantes ingenuum & increatum, seu non factum, genitum autem idem quod factum. Sed S. Synodus sic Filium genitum pronunciauit, ut adiecerit *non factum*, ad eorum imposturam deludendam, & sic in Symbolo positum est, *Genitum non factum consubstantiali Patri*.

11 Occlusi undique Arriani cesserunt ad tempus, definitionique Synodi consenserunt, & subscripserunt, præsertim ob Constantini timorem, & licet aliqui eorum aliquantisper hæsitarent, & Eusebius Cæsariensis, alij etiam irriserint vocem *Homousion*, & restiterint præsertim subscriptioni damnationis Arrij, tandem tamen ipsam fidei regulam à S. Concilio definitam susceperunt, sed subdole, & fallaciter. Nam, ut constat ex litteris Eusebij Cæsariensis ad Ecclesiam suam missis, quas recitat Socrates *lib. 1. cap. 5.* simpliciter in primis confessus est Filium esse Deum, Dei Verbum, ante omnia sæcula genitum, per quem omnia facta sunt; sed in voce *consubstantialis*, & *non facti* admittenda dolositatem suam explicauit. Dixit enim dupliciter intelligi à se illam vocem *consubstantialis*, & *ly ex substantia Dei esse*. Primò, quod non aliud significaret, quàm Filium ex Patre esse, & non diuisum, seu non partem aliquam Patris esse. Secundò, quod Filius nullam haberet similitudinem ad reliquias creaturas, sed vnus Patris qui illum genuit omnino similem esse, neque ex alia, quàm ex Patris substantia & essentia genitum. Similiter illam vocem *Genitum non factum*, sic se approbasse dicebat, quatenus Filius non esset factus sicut reliquæ creaturæ, quæ per ipsum factæ sunt, nec earum simile quicquam haberet, sed præstantioris esset substantiæ, quàm vlla creatura, sed non absolute negabat esse factum & creatum. Ita Eusebius in epistola citata. Vnde patet, quod Arriani, licet voces illas admiserint, ut specie tenus viderentur à Concilio non dissentire, tamen veram consubstantialitatis significationem & sensum quo à Patribus Concilij posita est, non admiserunt, sed in alium longè diuersum sensum detorserunt. Et sic nunquam Arriani verè, & sincere consubstantialitatem professi sunt. In hoc tamen eorum errorem amplius moderatus est Eusebius in hac epistola, quod Filium omnino similem Patri esse docuit, & ex eius substantia & essentia genitum dixit, & ante omnia sæcula, licet non in eadem numero essentia, & substantia, quod est negare consubstantialitatem. In quo ad Semiarianos videtur declinasse, ut iam ex eorum errore videbimus.

Tertia moderatio Semiarianorum, & dissensio discipulorum Arrij.

12 Extincto Constantinopoli Arrio, & in morem Iudæ in secessu effusus eius visceribus; non tamen statim eius discipuli, & fautores contra Nicenæ fidei regulam quidquam statuere ausi sunt, sed consubstantialitatis vocem, viuente Constantino Nicenæ fidei acerrimo defensore, saltem quoad speciem tenuerunt. Sublatus est autem Arrius vno anno ante Constantini obitum. Post quem, regnante Constantio, Arrianorum fautore in Anthiochena Synodo, vbi plusquam nonaginta Episcopi ad Encæniam, seu dedicationem Templi à Constantino incepti, & post mortem eius absoluti, conuenerunt, cœpit ab Eusebianis formula Nicenæ fidei mutari, sublata consubstantialitatis voce, ipsis semper infensissima (licet faterentur se Arrij sectato-

res non esse, sed potius Arrium ad ipsos reuertentem fuisse admissum) & licet plures ex illis Episcopis Orthodoxi essent, tamen ab Eusebianis, qui triginta sex erant, diuersa forma fidei concepta & tradita est, nec vna tantum, sed quatuor diuersæ formæ traditæ sunt, ut Socrates *lib. 2. cap. 7.* & ante ipsum S. Athanasius *lib. De Sinodis* tradit. In prima formula, neque consubstantialitatem Filij cum Patre, neque ex substantia Patris esse dixerunt, licet ante sæcula genitum, & vnà cum Patre qui eum genuerat extitisse dixerint. Sed quia nimis parçè & ieiunè de diuinitate Filij sibi videbantur egisse, ac proinde facile in Arrianismi suspicionem venire posse, aliam amplioribus verbis ediderunt, vbi plura attributa Filij explicarunt, nempe esse Deum de Deo, ante sæcula genitum, vitam, lucem, sapientiam, &c. Quod verò attinet ad vocem *consubstantialis*, ea omitta, dixerunt eum esse expressam diuinitatis, essentia, virtutis, consilij, gloriæ Patris imaginem. Hanc formam fidei sub titulo Luciani Martyris, qui multò antè passus fuerat, & apud quem dicebatur scripta, euulgarunt, ut tradit Sozomenus *lib. 3. histor. cap. 5.* Ariæ verò duæ formulæ *ib. dem* ab Eusebianis statutæ, nihil de consubstantialitate, aut similitudine substantiæ in Filio addiderunt, sed eum esse Deum genitum ante sæcula ex Patre, & cum Patre existentem, aliæque eius attributa prædicabant. Ne verò aliquis putet Arrianos cum Filium dicerent Deum, hoc ipso negasse quod esset creatura, sciat ipsos nomine Dei non abstinuisse, sicut nec nomine imaginis aut similitudinis Dei, quia etiam hoc nomen Deus, aliquando inuenitur creaturis attributum in Scripturis, ut Psal. 81. *Ego dixi Deus es*, Exodi 4. *Constituete Deum Pharaonis*, scilicet Deum participatiuè. Quæ autem creaturis aliquo modo attribuuntur, non abnuebant Filio concedere.

13 Occasione autem illius secundæ formulæ fidei, in qua Filium expressam similitudinem essentia seu substantiæ Patris nominabant, factum est ut vocem *Homousion*, quæ consubstantialitatem significat, quasi emollito rigore in *Homisison*, hoc est similem in substantia commutarent, ita ut ipsa similitudine vocis, & adsonantia plerisque fallerent, quasi voce Catholica vtentes.

Cæterum hinc videtur orta Semiarianorū secta, qui moderatius quàm Arriani loquebantur in hac parte, neque cū Arrianis sentientes, neque cum Catholicis. Alij etiā exorsi sunt, qui ad antiquū rigore erroris Arriani reuertentes, primā Arrij impietatem iterum euulgarunt, dissimilem omnino Filium ipsi Patri profitentes. Nam Semiariani, tum in dicta Synodo Antiochena, quæ dicta est in Encænias, tum in Synodo Sirmiana, Ancyrana, & aliis; immo, & in Synodo Ariminensi, suam formam fidei proposuerunt, dicebantque Filium esse similem per omnia Patri, etiam in essentia, nec esse ex nihilo, seu ex non ente, nec ex alia substantia, quàm ex substantia Dei, nec fuisse aliquod tempus in quo non esset Filius. Solūm verò negabant consubstantialitatem Patri esse Filiū, seu *homousion*, sed *homisison*, idest similem substantiæ Patri, atque ita essentialem, sed non coessentialitatem dicebant Filium Patri prout tradit Epiphanius *heresi 73.* Et Hilarius in libro de Synodis. Et quidem hi qui Filium ex substantia Patris dicebant, ut minùs nociui ab aliquibus Catholicis tolerabantur. Sed erāt alij deteriores, qui nec vocem *consubstantialis* in Filio, nec vocem substantiæ admittere volebant, sed vtramque vocem ablegandam, & solūm fatebantur Filium similem Patri, aliquādo quidem dicendo per omnia esse similem

milem, aliquando solum similem, aliquando autem nec verè, nec propriè similem, & tandem aliqui, vt diximus, in apertam proruperunt insaniam, vt omnino dissimilem dicerent.

14 Constat hoc manifestè, nam cum, authore Constantino, indicta esset Oecumonica Synodus sub cōsulatu Eusebij, & Hypatij, qui accidit anno Christi 359. sub Liberio Papa, sed magna calliditate Arrianorum, in duas partes Synodus diuisa est, vt testatur S. Athanasius in lib. de Synodis, ita vt pars Synodi, seu vna Synodus ageretur Arimini in Italia, alia Seleucia in Isauria. Et in Ariminensi Synodo, vbi maior pars Orthodoxorum erat, Catholicè quoque primò processerunt. Sed postea vehementissimè instatibus Vrsacio, & Valète, aliisque Arrianæ impietatis antesignanis, id tandem actū est, vt vox cōsubstantialitatis, & substantiæ ablegaretur sub colore pacis & cōcordiæ, & loco eius similis Patri diceretur. Sed ipsi hæretici legatos ad Imperatorem mittentes fidei suæ formulā quam Arimini proposuerant, vbi Patri Filium per omnia similem dicerent, sic in deterius temperarunt, vt tantum ponerent similem, & illud excogitarunt commentū vt Nicæa aliqui Episcopi conuenirent, ibique ex fidei formula eximerent voces illas substantiæ & consubstantialitatis, & loco earum Filium dicerent similem Patri, & hanc formulam tanquam Nicænæ Synodi vendita rent, vt refert Theodoretus lib. 2. histor. cap. 21. Sed & in Sirmiana Synodo duobus ante annis, vbi Osius dicitur minis fractus Arrianis fauisse, cum prius in formula fidei Filius ex substantia Dei esse diceretur, postea secunda forma facta est, in qua vox *homousion*, & *homoousion* ablegata est, vt nec consubstantialis, nec similis in substantia diceretur, vt Athanasius in libro de Synodis, & Hilarius in libro item de Synodis, & Socrates lib. 2. histor. cap. 25. referunt. In Concilio autem Seleuciano in prouincia Isauriæ, per idem tempus quo Ariminense celebrato, multo proteruius debacchati sunt hæretici, tum Semiariani, tum Arriani, qui cum Acacio, & Aëtio sentiebant, & Christum dissimilem Patri, & eius substantiæ expertem esse volebant, sed tamen quia fateri publicè Christum dissimilem Patri valde odiosum erat, & primæ blasphemiarum Arrij incutiebat horrorem, ab eo Acacius ibi abstinuit, & ablegata voce consubstantialis, & æquiconsubstantialis, etiam dissimilem Patri esse negauit, & simile confessus est in sua fidei formula. Sed delusoriè, & vana calliditate interrogatus à Semiarianis Acacius, qua in re intelligeret Filium Patri similem, respondit non in substantia, sed sola volūtate ei similem esse (quasi affectu & voluntate concors & seruans Patri) cum tamen à contraria parte argueretur quod in libris suis dixisset Filium per omnia similem Patri, nunc autem sola voluntate similem fateretur, prout refert Socrates lib. 2. histor. cap. 31. & 32. Sed & S. Athanasius in lib. de Synodis, ipsos hæreticos expostulat, quod cum in Synodo Antiochena in Encaniis, Filium ex substantia Patris, seu similem ei in substantia esse dicerent, postea in Isauria, id est Concilio Seleuciæ, vtrumque nomen ablegarunt & *Homousion* seu consubstantiale, & *homoousion*, id est similem in substantia.

15 Postremò, Aëtius impudentissimus & lutulentus hæreticus simul cum Eudoxio socio suo, & Eunomio discipulo suo (à quo Eunomiani dicti sunt) & qui tantæ impuritatis erat, vt fornicationi, & cuiuslibet insanæ carnis voluptati nullum inesse peccatum diceret, & tamen se diuinas res comprehendere putabat, iste Aëtius dixit, Filium esse dissimilem Patri, idque coram Constantio Imperatore confessus est, propter quod & ab ipso missus est

in exilium, vt refert Theodoretus lib. 2. histor. cap. 27. qui & cap. 29. de Eunomio idem sentiente agit. Ab isto Aëtio deriuati sunt hæretici dicti Aëtiani, sicut ab Eudoxio Eudoxiani, qui tamen Eudoxius ab Aëtio dixit se sumpsisse formulam fidei, in qua Christum dissimilem Patri diuulgabat, frequentius tamen ab Eunomio denominati sunt Eunomiani, qui & Anomæi, & nomine Eunomij magis innotuerunt, vt inquit August. lib. de hæresibus, hæresi 54.

Macedonij hæresis circa Spiritum Sanctum.

16 Excepit Semiarianorum errorem hæresis Macedonij, cum enim Acacius, & qui ab eius partibus stabant contra Semiarianos, qui similem in substantia Filium Patri dicebant, immane odium concepissent, ad hoc processerunt, vt Macedonium Episcopum Constantinopolitanum Episcopatu deiicerent fauore Constantij Imperatoris, apud quem malè acceptus erat, vt referunt Sozomenus lib. 4. cap. 23. & Socrates lib. 2. cap. 34. Depositus Macedonius, ipse cum Semiarianis in deterius lapsus, fatetur quidem Filium similem esse in substantia Patri, sed erumpunt in blasphemiam negando diuinitatem Spiritus S. dicendo eum esse famulum & ministrū Dei, & de illo ea dici posse, quæ de Angelis, vnde & Pneumatomachi dicti sunt, quasi de Spiritu S. litigantes, inquit August. lib. de hæresibus hæresi 52. quos potius quidam Semiarianos vocat, quod ex parte nobiscum sint, ex parte cum illis. Sed addit August. à nonnullis perhiberi Macedonianos non Deum, sed deitatem Patris & Filij dicere Spiritum S. & nullam propriam habere substantiam. Cæterum Athanasius in epistola ad Serapionem refert ipsum Serapionem scripsisse sibi de hac hæresi tunc recenter orta, quod dicerent isti hæretici Spiritum S. non solum creaturam esse, sed vnum quoque ex spiritibus ministris, & gradu tantum à cæteris Angelis differre. Sed & VI. Synodus Generalis aët. 18. id ipsum testatur. Macedonius, inquit, spiritus deitatem negabat, & Dominum, eumque consensum prædicabat. Quare si id quod Aug. ex aliorum relatu de Macedonianis narrat, verum fuit, forsitan ipsi priorem sensum, & sententiam mutarunt, conuicti Scripturarum manifestissimis testimoniis, sicut frequens est hæreticorum mos, in nullo stabiles esse, sed omni vento doctrinæ circumferri, vtpote à petra soliditate diuulsi. Vt est certè Athanasius à Serapione illo magno Thmuis Episcopo admonitus, primus in nefariam hæresim pro Spiritu S. Diuinitate fulmen veritatis contorsit, & vexillum fidei leuauit. Nihilominus propagata est valde hæresis ista, tam in Oriente quam in Occidente, tum primum accessione multorum qui ab Acacianis damnati sunt, & Macedonio fauebant, præcipuè Eleusius, Eustathius, Basilus, Ancyranus & alij: tum etiam vitæ suæ instituto, grauitate & modestia, nam vitam (inquit Sozomenus lib. 4. cap. 26.) cui populus maxime solet animum attendere, non malè instituebant: tum denique aliquibus portentis & signis mendacibus, & præstigiis, præsertim Cyzici, vbi Eleusius Episcopus erat, atque ita ibidem propagauit, fundauitque Macedonianorum sectam, vt propterea vrbs illa dicta sit ciuitas Macedonianorum. Aliquas eorum præstigias & signa huiusmodi refert Anastasius Nicænus quæst. 23. tomo 6. Bibliothecæ. Denique adeo hæresis illa inualuit, & multorum accessione potentior facta est, vt generalis Concilij falce præscindi oportuerit, quod ex 150. Patribus Constantinopoli collectum fuit, cui & S. Gregorius

Gregorius Nazianzenus interfuit, & à Damaso Papa confirmatum est, ibi Macedonianorum hæresis damnata est, sed & Apollinaris, Arrianorum & Semiarianorum, aliorumque malè de Trinitate sentientium errores extirpati sunt, qui & antea in Concilio Romano sub eodem Damaso anno eius septimo, id est, Christi 373. condemnati fuerant, in cuius anathematismis exactè tradita, & explicata est fides de S. Trinitatis misterio, & personarum diuinitate, præsertim contra Apollinarem, & alios hæreticos.

Quid Mahumetes, Abaylardus, & alij de Trinitatis misterio senserint

17 Circa annum Christi 630. temporibus Heraclij Imperatoris, vel paulò ante apparuit monstrum hoc Mahumetes scelestissimus nebulo, non tam notitia aliqua Scripturarum aut subtilitate discursus, quàm crassissima sensus hebetudine, fere omnium antecedentium hæresum farraginem, & errorum sentinam coaceruans; quidquid grossum, & sæculentum in illis erat, spurcissimus impostor conflauit, & ex his sectam ignobilissimam, non rationum pondere, sed ignorantiae nebulis obcæcatam, & peruicacia obferatam, mundo inuexit. Inter alia ex Sabellio & Arrio in Sanctæ Trinitatis misterium blasphemiam euomuit. Nec enim potuit impurissimus, & cæno carnis obuolutus canis stolidissimus tam subtilem, immaterialem, & claram deitatis lucem crassa mente percipere. Dixit inter alia ut refer S. Damasc. lib. de hæresibus circa finem, vnum esse Deum vniuersi auctorem, qui neque genitus sit, neque generauerit. Vnde constantissimè negat & deridet Christum esse Deum, filium Dei, licet Verbum esse fateatur, in hoc imitatus Arrij vafritiem, qui, ut supra vidimus, etiam Verbum esse fatebatur in Deo, sed non Filium. Ideo tamen lutosus porcus negauit Deum habere filium, quia non habet, inquit, uxorem, ut de ipso refert Fr. Ricoldus Florentinus in libello contra legem Saracenorum; & in hoc conuenit Mahumetes cum Carpocrate hæretico, quasi in nobis conceptus & verbum non pariat ab intellectu sine uxore; Deo autem solum intellectus actualis partus tribui potest. Sed iste intellectum non habuit, ut id aduerteret. Dixit tamen Christum esse Verbum Dei & eius Spiritum, sed creatum atque seruum, eumque fatetur ex Maria sine semine generatum, ait enim quòd cum Verbum, & Spiritus Dei in Mariam introissent, genuit Filium, qui Dei Propheta, & seruus est. Et cum Iudæi voluissent eum in crucem agere, pro ipso vnam eius tenuisse & egisse in crucem, ipsum verò non fuisse mortuum, sed in cælum à Deo translatum, & sic omnem ex Christi passione redemptionem, & Sacramentorum efficaciam negat. Ita refert loco cit. S. Damascenus. Negauit etiam cum Macedonio Spiritum Sanctum esse Deum, sed dixit creaturam esse. Ac per hoc totum sanctissimæ Trinitatis misterium penitus abnegauit.

18 Cum istius sectæ hominibus vix disputationi locus datur, quia ipsi imperitissimi sunt, & rationum pondere non ducuntur. Sed ut ibi admonet Damasc. quærendum est ab ipsis, unde, & quo testimonio, vel quibus miraculis aut autoritate habeant illum Mahumetè fuisse verum Prophetam, & à Deo missum specialiter, sicut constitit mundo de Moysè, & alijs Prophetis, & de ipso Iesu, quem valde Mahumetes honorat, licet non ut Deum. Ipsi autem dicunt Mahumetem hæc accepisse à Deo, nullis alijs testibus, sed cum quieti se daret,

& dormiret. Dormiisse quidem ipsum & somniasse, cum tam vana, monstruosa effutiret & sterneret, bene credo; sed cum ipse in commentariis, & scriptis suis vetuerit ne aliquid facerent aut scriberent sine arbitris, ut ibi dicit Damasc. cur ab eo non petunt testimonium prophetiæ suæ, aut miracula, sed ita irrationabiliter velut pecudes credunt homini dicenti se à Deo missum. Cæterum quia ipse in Alchorano suo testimonium perhibet de Euangelio, ex ipso, & ex alijs Scripturis ipse cum suis reuincendus est, quia non est ratio cur in aliquo admittant Euangelium, in alio negent, videlicet ubi tractat de Filio Dei, & quòd Christus sit Deus, & quòd sit passus, & mortuus, &c. Quòd si Euangelium non admitterent, tractandi essent sicut Ethnici, & per miracula, aliàsque rationes extrinsecas conuincendi. Magis autem procurandum est, ostendere eis falsitatem & absurditatem sectæ suæ in nullo conformem rationi, neque Euangelio, aut Scripturis, quàm in nostræ Religionis probatione laborandum, quia probationes non admittunt, ut etiam admonet Ricoldus ubi supra.

Sed post istum ignorantissimum impostorem, 19 surrexit temporibus D. Bernardi Petrus Abaylardus, qui inter alios errores suos etiam malè de Trinitatis misterio sensit. Cuius sententiam sic explicat Bernardus epist. 190. ad Innocentium Papam II. ibique late eam refutat: *Ponit in Trinitate gradus, in Maiestate modos, numeros in aternitate. Constituit Denique Patrem plenam esse potentiam, Filium quandam potentiam, Spiritum S. nullam potentiam. Atque hoc esse Filium ad Patrem, quod quandam potentiam ad potentiam, quod speciem ad genus, quod materiam ad materiam, quod hominem ad animal, quod æreum sigillum ad æs. Nonne plusquam Arrius hic? Quis hæc ferat? Quis non claudat aures ad voces sacrilegas? Quis non horreat prophanas nouitates, & vocum & sensuum? Dicit etiam Spiritum S. procedere quidem ex Patre & Filio, sed minime ex Patris, Filiique substantia. Vnde ergo? an forte ex nihilo sicut & vniuersa, quæ facta sunt? Secutus est Abaylardum discipulus eius Arnoldus de Brixia, qui, ut idem Bernardus refert epist. 195. omnes eius errores ab Ecclesia iam deprensos atque damnatos cum illo & pro illo defendere acriter, & pertinaciter conabatur. Cæterum licet Abaylardus cum Arrio saperet in sensu, longè tamen illi dissimilis causa fuit. Non enim ille Verbum Dei dicebat creaturam, sicut Arrius, aut Spiritum S. ministrum sicut Macedonius, sed homo nouitatum audax, attributa diuina inter personas partitus est, non adaptatione seu appropriatione tantum, ut communiter Theologi, sed partione & consignatione, ut ipse singulariter opinabatur. Et sic, ut epistola cit. 190. dicit Bernardus, dixit Patri competere omnipotentiam, Filio sapientiam, Spiritui S. benignitatem. Et quia sapientia aliquid potentiæ dicit, quia dirigit, formatque potentiam ad id quod exequendum est, dixit Filium esse quandam potentiam, sed non plenam. At verò Spiritum S. nullam potentiam esse dicebat, sed solum amorem, seu benignitatem, quia nec est illa potentia directiua, sicut sapientia, quæ est Filius, nec illa executiua, quæ est Pater. Quod tamen, ut bene Bernardus redarguit in eadem epist. 190. contra Scripturam apertissimè dicitur, cum Isai. 11. dicatur *Spiritus sapientiæ & fortitudinis*, fortitudo autem potentia est. Est etiam spiritus creator, non creatus: ergo habet potentiam creandi.*

Per idem tempus inualuit (licet longè ante ceperit) Græcorum error de processione Spiritus S. qui quidem non negabat Spiritus Sancti diuinitatem. 20

tatem, sed processionem ex Filio, & solum à Patre dicebant procedere, contra quos in pluribus Conciliis actum est, & demum latissime in Concilio Florentino. Sed de hoc errore, eiusque Authoribus, & intelligentia specialiter à nobis agendum est *infra circa q. 36. tractando de processione Spiritus S.* Eò id differimus. Possumus & ad Græcorum errores referre insaniam Anastasij Imperatoris, qui, ut aliqui referunt, non Trinitatem, sed quaternitatem, aut etiam maiorem numerum in Deo posuit. Sed hoc vix est qui sequatur. Fuit & quædam Peratarum hæresis apud Theodoretum *lib. 1. hæreticarum fabularum*, qui tres personas dicebant tres Deos. Et idem Ioanni Philopono attribuit Suidas verbo *Ioannes Grammaticus*, & Nicephorus *lib. 18. historia cap. 48.* Fuit autem Philoponus temporibus Phocæ Imperatoris, denique Abbas Ioachimus circa annum Domini 1190. asseruit tres personas non esse vnā essentiam numero, sed solum per collectionem, sicut fideles sunt vna Ecclesia, ut in Concil. Lateran. *can. 2.* damnatum est. Et Raymundus Lullus dixit tres personas esse tres essentias, ut *tom. preced. disp. 11. art. 3.* ex Heimerico & Bernardo Lucemburgo, ostendimus.

Quid noui hæretici & Transyluani de Trinitatis mysterio senserint.

Nihil ferè in tota antiquarum hæresum colluuie dispersum est, quod non in nostri temporis Nouatores, quasi in sentinam confluxerit. Vnde etiam Sabellianæ, Arrianæque peruersitatis dogmata tanto iam temporis decursu consumpta, nunc velut putrida ossa ab impietatis tumulo exhumata iterum lucem infecerunt, & inter hæreticorum nostrorum zizania infelices auenæ repullularunt. Fuerunt enim hoc tempore duo ex præcipuis hæresiarchis, quorum vnus Sabellij, alter Arrij damnatas olim hæreses suscitauerunt. Primus fuit Michaël Seruetus, eiusque sequaces ministri Transyluani, qui Sabellio inhærentes, negarunt in Deo tres personas distinctas. Alter fuit Valentinus Gentilis, qui declinauit ad Arrianismum, dixitque Filium, & Spiritum S. esse Dei essentiâ inferiores, & solum Patrem esse vnum & solum Deum.

Itaque Seruetus de Christo tria docuit *in libris quos inscripsit de erroribus Trinitatis.*

Primò, dixit non esse in Deo personalem distinctionem, imitatus Sabellium.

Secundò, dixit Christum appellari Dei Filium quod ex ipsa Dei substantia caro eius in vtero Virginis sit concepta, ipsamque diuinitatem esse communicatam Christo per vñctionem & inhabitationem gratiæ, secutus in hoc Nestorium, sicque docet Christum esse Deum factum, non æternum, sed temporalem.

Tertiò, ex hoc collegit Christum ante Incarnationem nihil fuisse nisi ideam in mente diuina. Secuti eum sunt ministri quidam, qui in Transyluania sedem posuerunt, ut Franciscus David, Georgius Blandratta, & alij: Qui tamen inter se dissident, non de negatione mysterij Trinitatis, sed de inuocatione Christi an sit facienda, & quomodo, quia si non est verus & summus Deus, non est inuocandus. Extinctus est impudentissimus hæreticus Seruetus Geneuæ, à Caluino damnatus & viuus exustus.

At verò Valentinus Gentilis nolens cum Catholicis in fide de Trinitate conuenire, nec tamen Serueti doctrinæ se subiicere, aliud extremum secutus est, & docuit etiam tria.

Primò, in Deo non solum esse personarum distinctionem, sed etiam tres personas esse tres spiritus æternos. Et sic diuidebat naturas. Sed cum hoc ipsi Scripturæ palam videret aduersari; Secundò, dixit Patrem longè esse cæteris eminentiorem, illumque solum esse verum, & summum Deum seu essentiatorem, alias personas essentiatas. Sic minorem Patre Filium constituit Arrij discipulus. Tertiò dixit Filium non esse factum ex nihilo, sed ex Patris substantia, & ab æterno. Quod etiam mitigati Arriani, seu Semiariani admiserunt, ut *suprà* vidimus. Traditus est impius vltimo supplicio Bernæ, vndecimo post Serueti mortem anno, qui primum se Martyrem fore iactabat, non pro Christi gloria, ut cæteri Martyres, sed pro Patris eminentia. Sed mortis nuncio audito, ita consternatus est, ut euadendi supplicij omnes aditus quæsierit, etiam suæ recantatione doctrinæ. Nec tamen obtinuit.

Pluribus contra hos nouos Tricheistas doctissime agit Cardinalis Bellarminus *controuersia 2. generali, lib. 1. de Christo*, ex quo ista hausimus. Sed & in præfatione ostendit hæreticos qui Valentino & Serueto è diametro aduersantur, scriptisque exagitant pro defensione mysterij Trinitatis, ut Caluinus, Beza, Malancton, Simlerus, Aretius, Stancarus, Petrus Melius, Hyperius, & alij plures, non modicas blasphemias in ipsas personas, & diuinitatis naturam mysteriumque Trinitatis eructare & effutire; & Trinitatis nomen in Deo fastidisse Caluinum ex eius scriptis palam à multis refertur.

ARTICVLVS II.

Vera de Trinitatis mysterio fides stabilitur.

Quæ hucusque retulimus, satis ostendunt quam variè Diabolus æmulatus sit diuinissimæ Trinitatis gloriam, quam subdolè, quam fallaciter, quam impensè in illam paternæ substantiæ imaginem, in illum gloriæ splendorem, & Vnigeniti Filij maiestatem insurrexerit coluber tortuosus, tentans, si quo modo per hominum mentes, quasi per quædam totius falsitatis organa, possit illius summæ veritatis lucem obumbrare, & quasi caligine quadam inuoluere, ut sicut de illo dicitur Iob. 41. *Sub ipso sint radij Solis, & sternat sibi aurum quasi lutum.* Quod enim per semetipsum in cælo nequissimus ille Spiritus non est ausus, ut iudicium inferret blasphemiae contra Filium Dei, nunc inter homines serpens factus, rationum inuolucris, & obscuritate quasi quibusdam se spiris circumuoluens, etiam in ipsum cælum per homines scandala iaculatur, & fiduciam habet ut Filium mulieris deuorare possit. Dum enim in cælo peccauit, seipsum Altissimo similem videri contendit. Nunc in terram proiectus, & vsque ad Inferos detractus per impiorum hominum sectas & doctrinas, prauitatem suam extendit, ut non seipsum Altissimo similem, sed Altissimum sibi similem facere velit, Dei Filium creaturam esse sollicitans. Hæc enim est miseræ superbiæ declinatio, dum in inuidiam infelicitè erumpit, ut cum non possit altitudinem consequi, quam desiderat, saltem illum, cui comparari non potest, tentet per deiectionem & contemptum, ad suam inferioritatem diminuere.

Duo ergo sunt ex fide stabilienda.

Primum

- 2 Primum est, dari in Deo distinctionem veram & processionem personarum contra Sabellium. Secundum est, personas istas ita esse realiter distinctas, & ad intra procedentes, ut naturam, & substantiam non solum similem, sed indiuisibiliter eandem habeant, quia processio illa est ad intra, non extra Deum; & sic non diuidit naturam, sed eandem communicat, quod optimè contra Arrium nomine consubstantialitatis ab Ecclesia expressum est. Nec oportet huius rei similitudinem aliquam perfectam in creatis processionibus quærere, quia in huius processionis modo supereminet Deus omnem creaturam, & est propriissima diuinitatis in ratione diuini, quia omnes creaturarum processionem sunt per emissionem rei procedentis extra suum principium, saltem in entitatis distinctione. Solum in ista processione non fit diuisio à suo principio in natura, sed plena, & omnimoda illius communicatio & identitas.

Distinctio trium Personarum vera & realis.

- 3 Primò ergo contra Sabellium distinctio vera & realis personarum probanda est. Et ut punctus difficultatis videatur, & quomodo id ex Scripturis eliciatur, & exinde ab Ecclesia sit definitum, supponendum est, quòd saluà Scriptura non potest ab ullo, quantumuis pertinaci & proteruo, negari quòd in Deo aliqua distinctio & diuersitas ponatur; sed oportet ostendere ex ipsa Scriptura, quòd illa distinctio personarum sit, non officiorum, non nominum, non attributorum, non virtutum, non denique diuersarum connotationum aut respectuum ad diuersos effectus. Et quia non solum agimus contra hæreticos, qui vtrumque testamentum admittunt, sed etiam contra Iudæos, qui solum vetus, & contra Paganos, qui neutrum, oportet vtriusque autoritatibus uti, & Paganis rem hanc non esse impossibilem ostendere.
- 4 Quòd ergo distinctio aliqua in Deo detur, Scriptura satis apertè docet: nam in Deo affirmat dari alium, & aliud, docet non esse solum, ponit associationem vnus cum alio, processionem, primogenituram, filiationem, numerum. Quæ omnia cum Scriptura planè, & sine figura, aut tropo dicat, sed locutione propria, sine distinctione vera, & realitate non possunt: alioquin ruit tota Scripturæ autoritas, & vsus eius, si non loquitur in sensu proprio & plano, & inter homines vsuali, præsertim in re tam ardua & diuina. Dicit Scriptura alium & alium in Deo, ut Ioan. 5. *Alius est qui testimonium perhibet de me.* Et inf. *Et qui misit me Pater, ipse testimonium perhibet de me:* ergo ille alius est Pater. Et de Spiritu S. dicitur Ioan. 14. *Ego rogabo Patrem & alium Paraclitum dabit vobis,* quem Spiritum S. esse Deum postea ostendemus, & ibi satis significat Dominus, qui vocat eum Spiritum veritatis, qui à Patre procedit, qui docebit omnem veritatem & suggeret omnia, quod est proprium Dei. Dicit Scriptura non esse solum, Ioan. 16. *Non sum solus quia Pater mecum est.* Et c. 8. *Qui me misit, mecum est, & non reliquit me solum,* vbi autem non est solitudo, pluralitas, seu multitudo est. Ponit Scriptura associationem in primis in veteri testamento, Psal. 109. *Dixit Dominus Domino meo, sede à dextris meis,* quo loco Christus vsus est ad probandam suam diuinitatem contra Iudæos, Matth. 22. & sic fuisse intellectum à Iudæis supponere videtur Petrus Actorum 2. vbi probat locum illum non loqui de Dauid, sed de Christo vero Deo, qui associationem habet cum Patre in ipsa diuinitate & gloria; & sic ex isto loco probauit ipsis Iudæis diuinitatem

Christi, dum dicit; *Non enim Dauid ascendit in cælum; dixit autem ipse: Dixit Dominus Domino meo, sede à dextris meis, docet ponam inimicos tuos scabellum pedum tuorum.* Certissime ergo sciat omnis domus Israël, quia & Dominum eum, & Christum fecit Deus hunc Iesum, quem vos crucifixistis. Ergo ex isto loco tanquam ex probatione certissima ostendit Petrus dari in Deo personam aliquam associatam alteri, sedentem iuxta alteram, quod sine distinctione, & diuersitate intelligi non potest. Idem sumitur ex illo Genes. 19. *Pluit Dominus super Sodomam ignem à Domino de cælo;* vbi illa particula *Dominus à Domino* distinctionem, societatemque significat. Nec possunt illa verba exponi de Angelis, quasi vnus Angelus ab alio Angelo ordinaretur ad pluendum ignem de cælo, & quòd illi Angeli vocantur Dominus, & Dominus. Contra hoc enim est, quia illud verbum *Dominus* simpliciter designat Deum, & in Hebræo vtrumque nomine ineffabili *Iehonah* notatur, quod solum Deum summum significat. Similiter Genes. 1. dicitur *Faciamus hominem ad imaginem & similitudinem nostram,* vbi illud verbum *faciamus*, designat pluralitatem facientium & consortium: homo autem à solo Deo est conditus & factus: ergo consortium, & pluralitas in faciente hominem, est consortium & pluralitas in ipso vero Deo, non secundum diuinam naturam, quia hæc purificari non potest: ergo secundum personas. Diceret autem quòd *ly faciamus* ponitur in plurali, non propter pluralitatem, & distinctionem personarum facientium, sed propter dignitatem facientis: nam etiam apud nos, Principes, & Superiores nomine plurali se nominant: hoc non habet vim, quia non est consuetum in Scripturis Deum nomine plurali explicare actiones suas, sed nomine singulari, non dicendo, nos fecimus hoc aut illud, sed Dominus fecit, Deus saluauit, creauit, pugnavit, &c. ut passim videre est in Scriptura. Imò potius consuetudinis Hebraicæ est verbum ponere in singulari, & nomen in plurali, quando illud nomen magnam personam significat, ut cum dicitur Genes. 1. *In principio creauit Elohim,* seu Dij, aut Iudices. Et Genes. 24. vbi dicitur *Posuit manum suam super femur Abraham domini sui,* in Hebræo habetur super femur Abraham dominorum suorum. Psal. 36. *Dominus irridebit eum,* in Hebræo *Dominus irridebit.* Itaque Hebraica lingua potius opposito modo procedit ac nos, quòd cum loquitur de magnis & illustribus personis, ponit nomen in plurali, & verbum in singulari, quia in ipso nomine excellentiam personæ vult significare per modum cuiusdam multitudinis & pluralitatis. In nostra autem lingua ponimus verbum in plurali, cum illustres personæ loquuntur. Si ergo non est consuetudo in Scriptura neque in Hebræo nominare verbo plurali dignitatem personæ loquentis vel operantis, manifestum fit, quòd cum dicit *Faciamus hominem,* pluralitatem, & distinctionem personarum designat, non solam dignitatem. Quare optimè Concilium Syrmiense, apud Hilarium in libro de Synodis, anathema indixit his qui aliter explicant loca citata ex Genesi, qualia sunt quæ attulimus, & illud Genes. 11. *Venite descendamus & confundamus linguam eorum.* & c. 3. *Ecce Adam quasi vnus ex nobis factus est.* Eandem vim, & associationem personarum explicant alia loca Scripturæ, ut Osee. 1. *Dicit dominus, Saluabo eos in Domino Deo suo.* Zachar. 3. *Dixit dominus ad Sathan: Increpet Dominus in te.* Et Proverb. 8. de Sapientia dicitur, *Dominus possedit me,* & inf. *Cum es eram cuncta componens,* quæ omnia societatem quandam

quandam designant. Et in nouo testamento Ioan. 1.4. *Pater meus diligit eum, & ad eum venimus, & mansionem apud eum faciemus.* Ioan. 5. *Pater meus usque modo operatur, & ego operor.* Ioannis 1. *Verbum erat apud Deum.* Et *Vnigenitus qui est in sinu Patris, ipse enarrauit, vbi ly apud, & ly in,* intelligi non possunt sine aliqua confociatione, & distinctione; quia idem non dicitur esse apud se, & in sinu suo, quantumcumque diuersa officia, & effectus exerceat, sicut licet Rex Hispaniæ sit simul Comes Flandriæ, vel dux Mediolani, non rectè dicitur Comitem Flandriæ esse apud Regem Hispaniæ, vel in sinu eius, & cum eo operari & componere omnia.

Diximus etiam, quòd ponit Scriptura processione, filiationem, primogenituram in Deo; quod patet, tum in veteri testamento, tum in nouo. In veteri testamento, vt cum dicitur Psalm. 2. *Dominus dixit ad me, Filius meus es tu, ego hodie genui te.* Quo loco de Christo, & vero Filio Dei esse sermonem, & non de Dauid, vel alio Propheta, aut creatura declarauit Apostolus Paulus Act. 13. v. 34. ex isto loco probans diuinitatem, & resurrectionem Christi. Et manifestè non quadrat in alium, quia de illo met qui dicitur ibi Filius, subditur, *Dabo tibi gentes hereditatem tuam, & possessionem tuam terminos terre,* quòd certè nulli Prophetæ, nulli Regi, nulli creaturæ concessum est, quem enim constituit alium super terram, aut quem posuit super orbem quem fabricatus est? Iob 34. Item Proverb. 30. aperte hæc filiatio in Deo affirmatur cum dicitur, *Quod est nomen eius, & quod nomen Filij eius si nosti?* Item Sap. 2. dicitur de quibusdam impijs contra Filium Dei blasphemantibus, *Gloriatur patrem se habere Deum.* Videamus ergo si sermones istius veri sunt: si enim est verus Filius Dei, suscipiet illum, &c. Vbi clarè apparet difficultatem istorum non fuisse, an esset filius Dei participatiuè aut adoptiuè, quod est commune multis, sed an esset verus filius Dei, id est, in eadem natura Dei & veritate. Et de ipsa Sapientia diuina dicitur Eccl. 24. *Ego ex ore Altissimi prouidi, primogenita ante omnem creaturam;* vbi processio & primogenitura aliquam in Deo esse distinctionem significant. Et quòd illa primogenita Sapientia sic prouidens ex ore Altissimi, non sit aliquid creatum procedens extra Deum, sed verè quid diuinum, patet ex subiunctis. Dicit enim, *Ego feci in calis, & oriretur lumen indeficiens;* lux autem à nulla creatura facta est, sed à Deo, sicut habetur Gen. 1. *Dixit autem Deus, Fiat lux, & facta est lux.* In illo ergo Deo qui fecit lucem datur processio & primogenitura. Quibus consonant quæ in nouo testamento habentur de ista processione, & generatione. Nam Ioan. 1. dicitur, quòd *Verbum erat apud Deum, & Deus erat verbum.* Et de hoc eodem Verbo ostenditur quòd sit Filius, dum subditur quòd *Verbum carofactum est, & vidimus gloriam eius, gloriam quasi Vnigeniti à Patre.* Et rursum, *Vnigenitus qui est in sinu Patris, ipse enarrauit.* Et iterum Ioan. 8. *Ego ex Deo processi & veni.* Et Ioan. 16. *Exiui à Patre & veni in mundum.* Vt omittam passim appellari in testamento nouo Filium Dei, non quomodocumq; sed Deo æqualem, & vnum cum Deo. Quem enim Petrus confessus est *Filium Dei veri.* Matth. 16. Paulus æqualem Deo affirmat, ad Philipp. 2. *Qui cum in forma Dei esset, non rapinam arbitratus est esse se æqualem Deo.* Et ipse Dominus non modo æqualem, sed vnum se esse dixit cum Patre, Ioan. 10. *Ego & Pater vnum sumus.* Constat ergo in ipso vero Deo ponere Scripturam aliquid, quod sine distinctione vera expli-

cari non potest, sicut filiatio, primogeniura, processio, non eius quod creatum, & extra Deum est, sed eius quod diuinum & intra Deum, quia illum qui procedit, Deum & æqualem Deo dicit.

Denique numerum intra Deum poni, aperte 6 Scriptura affirmat, sicut Isai. 6. *Sanctus, sanctus, sanctus Dominus Deus Sabaoth.* &c. Et Isai. 48. *Dominus Deus misit me, & spiritus eius,* vbi numerus aperte signatur. Clarius in nouo testamento Ioan. 8. *In lege vestra scriptum est, quia duorum hominum testimonium verum est. Ego sum qui testimonium perhibeo de meipso, & testimonium perhibet de me, qui misit me Pater.* Vbi Christus Dominus totum pondus veritatis in testimonio humano reducit ad numerum & multiplicationem testium, & vult similem vim esse in testimonio diuino, quia non est vnus tantum testimonium, sed plurium: ergo si non est pluralitas & distinctio in diuinis ruit tota probatio Christi. Ponitur etiam apertissime numerus, & pluralitas in diuinis 1. Ioan. 5. *Tres sunt qui testimonium dant in celo, Pater, Verbum, & spiritus S. & hi tres vnum sunt.* Et Matth. 28. *Baptizantes eos in nomine Patris, & Filij & Spiritus S.* Quæ omnia clarissime distinctionem, & pluralitatem ostendunt in diuinis: saluari enim non possunt ista quæ de eo asseruntur in Scriptura, numerus, processio, filiatio, generatio, associatio, alietas, &c. sine distinctione & pluralitate. Alioquin his locutionibus nihil nobis significaretur in Scriptura intra Deum, nisi id quod in Deo non esset, si significat pluralitatem & distinctionem quæ in Deo non datur: Si verò significat solum connotationes diuersorum effectuum; contra est, quia plerumque Scriptura significat istam distinctionem ante omnem considerationem creaturæ, seu effectus, vt cum dicitur. Primogenita ante omnem creaturam, Verbum esse apud Deum, & in sinu Patris in principio, *Dominus possedit me in initio viarum suarum, antequam quidquam faceret.* Aliquando significat istam sociationem plurium respectu eiusdemmet effectus, vt cum dicitur Patrem & Filium tanquam duos testes ferre testimonium, & quòd *tres sunt qui testimonium dant in celo,* & quòd *Filius facit quacumque Pater facit.* Ioan. 5. & quòd *portat omnia verbo virtutis sue,* ad Heb. 1. & quòd *omnia per ipsum facta sunt.* Ioan. 1. & quòd *erat cum eo cuncta componens.* Proverb. 8. in his omnibus respectu eiusdem numero effectus, immò respectu omnium quæ fiunt, supponitur pluralitas in Deo faciente: ergo ista pluralitas & distinctio non sumitur in Scriptura penes connotationes diuersorum effectuum, cum etiam respectu cuiuscumque indiuisibilis effectus eadem pluralitas supponatur.

Cum ergo teneamus in Scriptura distinctionem & pluralitatem aliquam in diuinis poni, restat videre quomodo deducatur ex ipsa Scriptura hanc distinctionem esse personarum. Nam cum Scriptura, ipso personæ nomine non vtatur, cum istam distinctionem in Deo ponit, posset hæreticus, aut Iudæus subterfugere, & dicere primò quòd ista distinctio non probatur esse de rebus intra Deum procedentibus & distinctis, sed distinctionis numerum poni ratione alicuius rei creatæ adiunctæ. Secundò, quòd ista distinctio non est personarum aut relationum, sed attributorum seu virtutum, quæ sola ratione in Deo distinguuntur, sed explicantur apud nos modo nostro, sicut si verè distinguerentur, quia diuersos effectus faciunt. Tertiò, quòd illa distinctio est personarum non entitatiuè, & realiter, sed secundum diuersa officia seu munera, pro quibus diuersas gerit personas

sonas, & in eminentia Dei infinita, vna persona simplex in entitate omnia illa præstare potest, quæ plures personæ apud nos, & sic nominatur ac si essent plures personæ.

Hæc subterfugia præcluduntur à D. Thom. 4. contra Gent. c. 5. in fin. ostendendo, quòd ubi ponitur vera filiatio & paternitas, debet poni diuersum suppositum seu persona. Nam Scriptura ponit in Deo verum filium, & non solum metaphoricum 1. Ioan. ult. *Vt simus in vero Filio eius Iesu Christo*: Sapient. 2. *Si enim est verus filius Dei, suscipiet eum*. Propria autem, & vera filiatio non dicitur nisi de supposito: non enim pes, vel manus, & multò minùs accidens, vt color vel calor dicitur filius alterius, sed solum est filius id quod est simile alteri, vt persona, quasi propagatum in similitudinem alterius. Ergo si iuxta Scripturam verus Filius in Deo est; & consequenter verus Pater, oportet quòd distinctio ista non sit virtutum, vel attributorum, aut effectuum ad extra, sed personarum. Quod explicatur amplius, quia in diuinis ponitur à Scriptura non quælibet distinctio, sed cum processione vnus ex alio, & cum illis terminis & significationibus quibus significantur, vel demonstrantur personæ, non formæ aut potentia, aut virtutes vel effectus: nam ponuntur articuli demonstratiui personarum quando ponitur illa distinctio, vt *Ego, Tu, Hic, Ille, Alius*, & similia, quibus non demonstrantur nisi personæ, & supposita, non partes, non accidentia, aut attributa, non officia aut virtutes: nam hic homo, ille homo &c. indiuidua ipsa, & supposita demonstrant: nec vtendum est nominibus, & significationibus pro libito, sed iuxta modum communem loquendi & vtendi. Dicitur etiam vnum illorum esse *cum alio*, *apud alium*, *in alio*, quod solum de personis dici consuevit; & vno verbo istæ res distinctæ in Deo eodem prorsus modo significantur, sicut cum distincti homines, vel Angeli nominantur, quos distinctas esse personas, & supposita nullus nisi infans dubitare potest; & tamen Scriptura etiam non exprimit ipsos nomine personæ: ergo neque dubitari potest quòd illæ tres res, quas distinguit in Deo sint personæ, licet nomine isto personæ non exprimantur. Hoc ex testimoniis relatis manifestum sit: nam de Filio & Patre dicitur Psal. 2. *Ego hodie genui te*, & de seipso Christus Dominus Ioan. 8. *Ego ex Deo processi*, vbi ly *Ego*, & ly *Te*, significant distinctionem propter processionem, quia nullus gignit se; ergo & distinctionem personalem propter pronomina demonstratiua: nec enim istis pronominebus designantur nisi personæ si ergo res illæ distinctæ in Deo sunt capaces istorum pronominum, sunt personæ: nec enim manus, vel pes potest dicere, *Ego feci hoc*, vel *Tu fac illud*. Similiter proponitur pronomen *Ille*, & *Hic*, nam dicitur Matthæi 3. & 17. & Lucæ 9. fuisse auditam vocem Patris, *Hic est Filius meus dilectus*, vbi ly *Hic*, demonstrat personam, & non ipsum Patrem, quia non demonstrabat seipsum, nec vt audiretur se proponebat: ergo aliam personam designabat. Et similiter inuenitur pronomen *Ille*, & ly *Alius*, vt cum de Spiritu S. dicitur Ioan. 16. *Ille me clarificabit, quia de meo accipiet, ille vos docebit omnia quaecumque mandauimus vobis; alium Patraclitum mittam vobis*. Et Ioan. 5. *Alius testimonium perhibet de me*. Præterea, quando dicitur Ioan.

8. *Quia duorum hominum testimonium verum est*, manifestè loquitur de diuersis suppositis seu personis, id est, de testimonio duorum hominum: ergo cum statim subdit, quòd *ego testimonium perhibeo de meipso, & testimonium perhibet de me qui*

misi me Pater, eodem modo ponit distinctionem personalem inter se, & Patrem; alioquin ineptè duceret argumentum ex pluralitate personarum in hominibus ad firmandam veritatem testimonij, ex eo, quia plurium personarum testimonium est, si quando infert, suum & Patris testimonium similiter habendum esse pro vero, quia plurium est, non loqueretur de pluralitate personarum, sed diuersorum officiorum, aut attributorum eiusdem personæ, cum tota firmitas testimonij fundetur in eo quod feratur, & testificetur à pluribus personis. Vnde fit quòd in aliis etiam testimoniis, in quibus hoc ipsum dicitur, vt Ioan. 15. de Spiritu S. *Ille testimonium perhibebit de me*, & 1. Ioan. ult. *Tres sunt qui testimonium dant in celo: Pater, Verbum & Spiritus S.* aperte distinctionem personalem designent illa verba, quia testimonium illud, vt firmum sit, exigit pluralitatem in personis testificantibus; & illa particula *Tres* in masculino personas designat, non officia, aut proprietates, vel connotationes eiusdem personæ; hæc enim omnia non sufficiunt ad verificandum quòd sunt tres ferentes testimonium.

Denique in Scriptura significatur ista distinctio eo modo, quo distinctio inter personas apud nos, & non eo modo quo diuersa officia, vel connotationes aut respectus, & hoc etiam ante ipsam Incarnationem, vel ante quemcumque effectum Dei aut creaturarum: ergo intra ipsum Deum ponitur realis, & vera distinctio personarum, & non solum ex diuersa connotatione, aut respectu ad effectus ad extra, vel ad Incarnationem. Anteced. constat: nam etiam loquendo ante Incarnationem dicitur Verbum seu Filius esse apud Patrem, cum Deo, in Deo, possessus à Patre, genitus à Patre, & sedens cum ipso, vt patet in autoritatibus suprâ, inductis Ioan. 1. *In principio erat Verbum, & Verbum erat apud Deum; Vnigenitus qui est in sinu Patris*. Ioan. 17. *Clarifica me Pater claritate quam habui, priusquam mundus esset, apud te*. Prouerb. 8. *Dominus possedit me in initio viarum suarum antequam quidquam faceret à principio*. Et inf. *Cum eo eram cuncta componens*. Et Psal. 109. *Ante luciferum genui te*. Et ille ipse qui est genitus ante Luciferum dicitur sedere à dextris Dei. Similiter dicitur ille ipse distinctus à Patre facere omnia quæ Pater. Ioanis 1. *Omnia per ipsum facta sunt*. Ioannis 5. *Pater meus usque modo operatur, & ego operor*. Et inf. *Quaecumque ille fecerit, hæc, & Filius similiter facit*. Ad Heb. 1. *Portans omnia verbo virtutis sue*. Ex quibus deducitur argumentum: Res illæ quæ distinctæ & plures nominantur in diuinis, ita nominantur distinctæ, quòd vna est apud aliam, cum alia, sedens cum illa, componens aut faciens cum illa, genita & procedens ab illa. Hæc autem etiam in communi modo loquendi non verificantur de diuersis connotationibus, respectibus, officiis, aut proprietatibus eiusdem rei, sed de diuersis personis: ergo illæ res quæ ponuntur sic distinctæ in diuinis à Scriptura, sunt personæ diuersæ, non connotationes, aut officia eiusdem personæ. Maior continetur in locis allatis ex Scriptura. Minor ipsa experientia, & communi loquendi vsu constat. Quis enim dicere potest de mearisibilitate, aut intellectu, aut potentia visiva quòd est apud me, sedet apud me, est genita à me? sed quòd inhaeret mihi, aut inest in me. Et si est eadem persona iuxta diuersa officia seu effectus aut connotationes illorum, sicut Sabellius dicit esse Patrem vt Creatorem omnipotentem, Filium vt incarnatum, Spiritum sanctum vt sanctificantem, quomodo potest etiam ante incarnationem dici

07 dici quod ille Filius est apud Patrem, est cum Patre, est in sinu Patris, est genitus ab illo ante Luciferum: Nunquid ut *supra* dicebamus, si vnus Rex exercet plura officia & munera diuersorum Regnorum, vt Rex Hispaniæ, qui est Rex Neapolitis, & Siciliae, & Comes Flandriæ, potest dici, quod illamet persona Regis, Comes Flandriæ est apud Regem Hispaniæ, sed & apud ipsum, est genitus ab ipso, componit cum ipso, est in sinu eius? Nonne hæc esset insensata locutio? Quare ex ipso modo loquendi Scripturæ non solum significatur distinctio quæcumque in diuinis, sed etiam distinctio personarum, licet ipsum nomen personæ non exprimat, cum eodem modo loquatur de ista pluralitate in diuinis, sicut de pluralitate inter homines, in quibus personalis distinctio reperitur, & tamen in illis non exprimitur ipsum nomen personæ.

10 Et sic soluuntur instantiæ *supra* allatæ, pro subterfugiendis locis Scripturæ. Dicitur enim ad primam, quod illa distinctio, quæ in diuinis ponitur à Scriptura, non est ratione alicuius rei creatæ adiunctæ ipsi Deo, sed intra Deum antecederet ad omnia creatæ, & ante Incarnationem vel Sanctificationem creaturæ, tum quia ponitur processio & generatio in diuinis ante omnem creaturam: ergo & pluralitas seu distinctio ista poni debet ante omnem creaturam. Patet consequentia, quia nihil generat se aut procedit ex se nisi generatio sit ficta & chimærica, quàm nefas est à Scriptura poni in Deo. Anteced. verò constat, cum dicatur Filius ante Luciferum genitus, & Sapientia proditiisse ex ore Altissimi, primogenita ante omnem creaturam, & Verbum esse in principio apud Deum; tum etiam quia per illudmet quod ponitur distinctum & genitum à Patre dicuntur facta omnia, Ioan. 1. & ad Heb. 1. Prouerb. 8. *Cum eo earum cuncta componens.* Ad Colloss. 1. *Qui est imago Dei inuisibilis primogenitus omnis creaturæ, & omnia per ipsum & in ipso creatæ sunt.* Psal. 32. *Verbo Domini celi firmati sunt, & spiritu oris eius omnis virtus eorum.* Ergo ante creaturam aliquam iam illud Verbum distinctum dicitur in Deo, in ipso ponitur vt distinctum, scilicet vt genitum, vt imago, vt procedens, & tamen omnia creatæ faciens: non ergo ratione creaturæ adiunctæ distinctum ponitur in Deo, sed ante.

11 Ad secundam instantiam dicitur, non posse verificari illam distinctionem penes attributa, virtutes aut potentias, quæ sola ratione in Deo differunt; tum quia aliàs non ponetur vera generatio, & processio in Deo, sed ficta & chimærica, cum tamen dicatur Filius vnigenitus, & ante sæcula, & ante luciferum genitus, & ex Deo processisse, & spiritus veritatis à Patre procedere, Ioan. 15. Vnum autem attributum non procedit ab alio, nec à Deo: sic enim distingueretur ab illo, & diuisio fieret in natura, non solum in personis. Dicere autem quod non est vera processio, vt non sit vera distinctio personarum, est facere mendacem Scripturam, vt hæresis firmetur. Tum quia cum dicit Scriptura quod apud Deum est Verbum, quod in sinu Patris est vnigenitus, quod sedet à dextris eius ille qui est genitus ante Luciferum, quod cum eo est componens omnia, istæ locutiones non possunt verificari de eo, quod se habet vt attributum, vt virtus & potentia Dei: hæc enim non rectè dicitur, sedens à dextris eius, non in sinu eius, non apud ipsum, non genita ab ipso, non cum ipso operans, & faciens, præsertim cum Ioannis 5. dicat Christus quod *Filius non potest facere quidquam, sed quod Ioan. à S. Th. in 1. part. D. Th. Tomus alter.*

viderit Patrem facientem. Quod autem se habet vt forma & virtus seu principium quo faciendi, non conuenienter dicitur quod facit id quod viderit Patrem facientem, sed est ipsa ratio & forma faciendi: ergo non potest nomine Filij à Patre distincti accipi, id quod se habet vt virtus vel attributum aut potentia faciendi sola ratione distincta à Patre.

Ad tertiam instantiam constat ex dictis, quod in diuinis ponitur distinctio etiam ante Incarnationem, & ante productionem cuiuscumque creaturæ: ergo non potest dici quod est eadem persona, solum ratione diuersæ connotationis ad diuersos effectus distincta, cum ante tales effectus, & consequenter ante connotationem ad illos distinctio illa personarum ponatur.

Consubstantialitas & unitas naturæ contra Arrianos.

Consubstantialitas & unitas naturæ in personis ex duplici capite potest negari, vel quia existimant personam aliquam ex illis, v. g. Filium aut Spiritum Sanctum non habere veram diuinitatem, sed esse naturæ creatæ; vel quia existimant verè diuinam naturam habere, sed diuisam, & distinctam, ponendo, quod diuina essentia admittit diuisionem, & non est vna, ita quod tres diuinæ personæ non sint vnus Deus, sed plures dii. Si enim in nulla personarum est creatæ natura, sed diuina, & illa non est diuisa, sed vna & eadem numero, hoc est idem ac dicere quod consubstantialis est, id est, vnius naturæ numero, & indiuisa.

Hoc ergo secundum Arriani non sunt ausi dicere, licet Semiariani illi, qui dicebant Filium esse similem Patri in substantia, sed non consubstantialem, in hoc declinare videntur quod ponerent diuisam substantiam, & essentiam Dei & plures Deos, quod tamen expresse concedere non audebant: nam ponere plures Deos, manifestè pertinet ad Paganismum; licet aliqui etiam hæretici duo, vel plura summa principia, seu Deos posuerint, vt in *preced. tomo disp. 11. art. 3.* retulimus. Sed error iste ita palmaris est, vt non possit affirmari, nisi ipsa Scriptura & ratio euidentis naturalis clarè negetur, vt *citato loco ostendimus.* Et nihil est in Scriptura frequentius quàm Deum esse vnum; & sic in ipsa lege proponitur, vt Deuter. 6. *Audi Israël, Deus vnus, Deus vnus est,* & ad Ephes. 4. *Vnus Deus & Pater omnium, qui est super omnia, & per omnia, & in omnibus nobis.* Nec per pluralitatem personarum, istam unitatem diuidi, ipsamet Scriptura testatur, cum dicitur Ioannis 10. *Ego & Pater vnum sumus.* Et 1. Ioan. ultimo. *Et hi tres vnum sunt.* Immo & inter ipsos Gentiles, vnum summum Deum agnatum fuisse, ita vt imperium summæ dominationis esset penes vnum, officia penes multos, disertè affirmat Tertulianus in *Apologet. c. 24.*

Relicta ergo hac secunda via quæ ita inuia est, 13 & Scripturæ contraria introducendo plures Deos, quod nec ipsi Arriani ausi sunt dicere, & his temporibus Valentinus Gentilis, cum primò posuisset, in Deo esse tres spiritus æternos, videns id apertissimè contrariari Scripturæ, declinauit ad Arrianismum, posuitque Filium inferiorè Patre, & solum Patrem esse Deum. Et sic hæretici qui confitendo distinctionem personarum negant consubstantialitatem, coacti sunt personam aliquam facere creaturam, & extraneam à natura diuinæ:

B

nam

14 Quæst. XXVII. De sacro Trin. myst.

nam, ut ipsemet Eusebius Nicomediensis in *epistola ad Concilium Nicanum* scripsit, si ponitur Verbum increatum, reliquum est ut consubstantialis cum Patre ponatur, ut refert S. Ambr. *lib. 3. de fide, c. vlt.* Et licet Deum aliquando nominent, & similem Deo, & non sicut reliquas creaturas, ut fecerunt Arriani; tamen verè & propriè creaturam in sua entitate esse posuerunt, licet propter aliquam excellentiam peculiarem, metaphoricè & participatiuè vocarent Deum. Quare restat contra hos hæreticos probare veram & propriam diuinitatem Filij, & Spiritus S. supra omnem creaturam, (de Patre enim nulla est dubitatio) ea enim probata, vnitas omnimoda cum Patre in natura diuina, quod est esse ei consubstantialem, manet probata.

14 Igitur diuinitas Filij vera & propria manifestatur in Scriptura præcipuè quatuor viis.

Primò, simpliciter ipsum appellando Deum, eo modo quo Patrem ipsum, Deum appellat.

Secundò, æqualem illi eum asserendo.

Tertiò, potestatem & virtutem eandem illi tribuendo; virtus autem cum sequatur formam & naturam rei, idem est tribuere Filio eandem virtutem, atque tribuere eandem substantiam & naturam.

Quartò, tribuendo ei superioritatem ad omnem creaturam, & inferioritatem creaturæ ei denegando.

15 Primum ostenditur sic, tum ex testimoniis quibus Christus, & Apostoli probauerunt apud Iudæos diuinitatem Filij, tum ex his quæ ipsi dixerunt. Supponimus autem quoddam intentum Christi erat probare diuinitatem suam esse veram, & talem, qualis est in Patre: nam de hoc solum erat dubium apud Iudæos; ideò enim dicebant eum blasphemare, quod faceret seipsum Deum, Ioan. 10. & iterum Ioan. 5. *Propterea magis querebant eum Iudæi interficere, quia non solum soluebat Sabbathum, sed & Patrem suum dicebat Deum, æqualem se faciens Deo*: ergo intelligebant loqui de vero Deo, & de vera diuinitate: nam si non faceret se verum Deum, sed creaturatum, licet excellentem, blasphemia non esset, nec æqualem se faceret Deo. Item quia Apostolus prædicabat Iesum esse Deum, taliter quod non rapinam arbitraretur esse se æqualem Deo, ut patet ad Phil. 2. ergo probationes quas adducunt, & testimonia ad probandum quod Christus sit Deus; de vero Deo, & de vera diuinitate loquuntur. Vnde dicit Irenæus *lib. 3. cap. 6.* quod *neque Dominus, neque Spiritus S. neque Apostoli, eum qui non esset Deus definitiue & absolute nominassent Deum aliquando, nisi esset verus Deus.* Et idem docet *cap. 8* Testimonia ergo quæ simpliciter Christum vocant Deum ea diuinitate qua Pater, in veteri quidem testamento sunt, in primis Psalm. 109. *Dixit Dominus Domino meo, sede à dextris meis*; vbi David eodem & pari modo vocat Dominum illum qui dicit (qui vtiq; est Pater) & illum cui dicit, nempe Filium: ergo si tam Dominus est qui dicit, quàm cui dicit, tam verus Deus est Pater, quàm Filius, quia potestas illa supremi dominij in deitate fundatur. Hoc loco vsus est Christus Dominus ad probandum suam diuinitatem, Matth. 22. Petrus Apostolus Act. 2. Paulus ad Heb. 1. Vnde efficacissimus debet censer. Et Paulus optimè ponderat illam particulam. *Sede à dextris meis*, quæ contra ponitur omni creaturæ quantumcumque excellentissimæ: nulla enim sedet ex propria dignitate, & meritis, sed ministrat. *Ad quem*, inquit, *Angelorum dicit, sede à dextris meis, de-*

nec ponam inimicos tuos scabellum pedum tuorum? Nonne omnes sunt administratorij spiritus in ministerium missi, &c. Inde ducitur argumentum. Ille qui est Dominus, & sedens à dextris Dei, non reputatur respectu Dei ut minister & inferior, quia minister respectu eius cuius est minister, non potest dominus nominari, sed Filius non dicitur minister respectu Dei, sed Dominus: ergo non est creatura. Minor constat, quia creatura quantumcumque excellentissima, est ministra Dei, quia dependet ab illo ut effectus, ut ex nihilo facta, ut non habens esse à se, nec operationem: ergo non potest nominari Dominus coram Deo. Ad idem deseruit ille locus Genes. 19. *Pluit Dominus ignem, & sulphur super Sodomam à Domino*; vbi vtrique persona Dominus eodem modo vocatur, & est ibi in Hebræo nomen Iehouah, ut iam supra diximus, quod significat summum Deum. Idem habetur ex Psalm. 44. vbi ad litteram est sermo de Christo, & vocatur Deus in illis verbis, *Sedes tua Deus in seculum seculi, virga directionis, virga regni tui*, quem locum adducit Paulus ad Hebræos 1. ad probandam diuinitatem Christi. Et additur *infra in eodem Psalmo. Quoniam ipse est Dominus Deus tuus, & adorabunt eum.* Nusquam autem in Scriptura ponitur adoratio facta ad Deum, nisi sit verus & proprius Deus, non participatiuè tantum. Vnde & Apostolus ad Hebr. 1. probat diuinitatem Christi ex eo quod de Filio Dei dicitur, Psalm. 96. *Et adorent eum omnes Angeli Dei.* Quem enim omnes Angeli adorant, vtiq; verus & summus Deus est: nec enim ipsi habent supra se creaturam aliquam, quam adorent, quia supra omnes Angelos, non restat aliquis alius creatus Spiritus. Item Isai. 45. loquens de Salvatore, qui vtiq; est Christus, & quem adorabunt, & deprecabuntur Gentes, aperte ipsum vocat Deum dicens, *Hac diuinitas Domini: Labor Aegypti, & negotiatio Aethiopia, & Sabaiam viri sublimis ad te transibunt, & tui erunt: Post te ambulabunt, vincenti manicis pergent, & te adorabunt, teque deprecabuntur: Tantum in te est Deus, & non est absque te Deus. Verè tu es Deus absconditus, Deus Israel Saluator.* Vbi ad litteram loqui de Christo, ex ipso contextu liquet, præsertim ab illis verbis antecedentibus; *Rorate cali desuper, & nubes pluant iustum, aperiatur terra, & germinet Saluatorem*: & continuata serie de illo Salvatore loquitur vsque ad illa verba, vbi aperte dicitur esse Deus. Et denique Baruch. 3. dicitur *Hic est Deus noster, & non astimabitur alius aduersus eum*; vbi manifestè loquitur de summo Deo. De eodem autem subdit: *Post hæc in terris visus est, & cum hominibus conuersatus est.* Qui autem visus est in terris, est Filius Dei, & Verbum, quod caro factum est, & habitauit in nobis: ergo ille est verus Deus.

Correspondent istis locis veteris Testamenti alia plura in testamento nouo, immò totum Testamentum nouum ad hoc ordinatur, ut Christi diuinitas probetur. Sufficit autem nobis duo vel tria ponderare. Ioannis 1. *Verbum erat apud Deum, & Deus erat Verbum.* Vbi illa particula *apud* distinctionem personæ designat, & illudmet Verbum quod est apud Deum, non solum dicitur Deus, sed potius Deus ipse dicitur Verbum: si enim dixisset Ioannes quod Verbum erat Deus, posset tergiuersari hæreticus, & dicere quod erat Deus participatiuè, & non verè. Nunc autem dicendo quod erat Verbum, nulla datur euasio:

nara

Nam Deus ille apud quem est Verbum, est Deus summus, utpote Deus Pater, de quo nullus dubitat quod est Deus verus, sed illemet dicitur esse Verbum: ergo diuinitas, quæ Verbo conuenit, & quæ Verbum est, summa & vera diuinitas est. Item 1. Ioan. ultimo in fine dicitur, *Et finis in uero Filio eius. Hic est uerus Deus, & uita æterna*; ergo Filius habet illam summam diuinitatem qua constituitur uerus Deus, & in qua consistit uita æterna. Et Ioan. 20 dixit Apostolus Thomas Christo, *Dominus meus, & Deus meus*. Et 1. Ioan. 3. *In hoc cognouimus charitatem Dei, quia ille pro nobis animam suam posuit*. Ille ergo qui animam posuit Deus est. Sic etiam Paulus nominat Christum Deum, Roman. 9. *Ex quibus Christus est secundum carnem, qui est super omnia Deus Benedictus in sæcula*; & ad Titum 2. *Expectantes beatam spem & aduentum gloriæ magni Dei, & Saluatoris nostri Iesu Christi*. Non potest autem dici magnus Deus, & ita magnus, quod est super omnia, nisi sit Deus, non participatiue, sed essentialiter: ergo & consubstantialiter cum Patre, quia si non est eiusdem substantiæ, sed diuersæ, non est Deus.

17 Ex secundo principio probatur Filium esse uerum Deum, sicut Pater, quia est æqualis illi, si autem non haberet ueram diuinitatem, sed participatam, non esset illi æqualis, sed multo minor. Quod sit ei æqualis, patet, quia dicitur ad Philip. 1. *Qui cum in forma Dei esset, non rapinam arbitratus est esse se æqualem Deo, sed semetipsum exinanivit*. Ergo licet in forma hominis Christus sit minor Patre, & exinanitus; tamen in forma Dei æqualis Deo est, sine ulla Dei iniuria. Item ille est æqualis alteri, in quo totum quod in alio est, plenè inuenitur in isto: sic enim nihil minus est in isto, quam in illo, quod est esse illi æqualem, seu non minorem, sed quidquid in uero, & summo Deo est, est in Filio: ergo est ei æqualis. Minor probatur: nam quidquid est in summo Deo, est plenitudo ipsius diuinitatis, sunt omnes diuitiæ, & thesauri eius, sunt omnia quæ ad ipsum pertinent, & sua sunt: nihil enim amplius in aliquo potest excogitari. De primo dicitur ad Colossens. 2. *In Christo inhabitat omnis plenitudo diuinitatis corporaliter*, id est uerè, & substantialiter, non umbraticè, non accidentaliter. De secundo dicitur ibidem. *In Christo sunt omnes thesauri sapientiæ, & scientiæ absconditi*. Isti autem sunt omnes thesauri diuinitatis: ubi enim sunt omnes thesauri sapientiæ, est totalis & perfecta comprehensio Dei, quia si non esset comprehensio, non omnes thesauri essent sapientiæ, sed multæ deessent diuitiæ, scilicet quidquid sciendum restat usque ad comprehensionem, quod utique est infinitum. Vbi autem comprehensio Dei est, quia omnes thesauri sunt, summa diuinitas est, & æqualitas cum Deo. De tertio dicitur Ioan. 16. *Omnia quæ habet Pater mea sunt, & Ioanis 17. ipse Filius ad Patrem dicit, Omnia quæ mecum sunt, & tua mea sunt*. Ergo quidquid est Patris, quidquid suum est, totum est in Filio: sed Patris est essentia diuina: hæc enim est natura sua: ergo natura diuina quæ Patris est, in Filio est, & in illo inuenitur; alioquin non verificatur, quod omnia quæ habet Pater sunt Filij. Vbi autem totum quod est in aliquo, inuenitur, & capi potest in alio, ibi æqualitas est, nec unum est minus alio. Filius autem habet totum quod est Patris, & omnia quæ sunt in Patre: ergo æqualis ipsi est; & sic non est Deus participatiue & metaphoricè, sed Deus essentialiter & consubstantialiter, id est, eiusdem

Ioan à S. Thom. in 1. part. D. Th. Thomus alter.

substantiæ & naturæ, quia diuina natura non potest diuidi.

Ex tertio principio deducitur diuinitas Filij ex 18 eius uirtute & potestate, quæ diuina est. Patet hoc, quia est omnipotens & summa uirtus; facit enim omnia quæ Pater, & eodem modo quod Pater: ergo habet uirtutem diuinam: ergo & naturam. Antecedens prob. Nam in omnipotentia seu uirtute diuina consideratur & extensio ad obiecta infinita, id est, ad omnia factabilia, nullo excepto, & modus faciendi, scilicet tanquam causa principalis & suprema, non ut inferior & instrumentalis. Quoad extensionem conuenit Verbo diuino omnipotentia, Ioan. 1. *Omnia per ipsum facta sunt, & sine ipso factum est nihil*, ubi ly omnia comprehendit uniuersalissimè quidquid creatum est, seu fit, aut factibile est à Deo, siquidem quod sine ipso factum est, nihil est. Et ad Colossens. 1. *Omnia per ipsum, & in ipso creata sunt, & ipse est ante omnes, & omnia in ipso constant*. Et Hebr. 1. *Portans omnia uerbo uirtutis suæ*. Ioan. 5. *Quicumque ille fecerit, hæc & Filius similiter facit*. Sed quia occurrere possunt hæretici dicendo, Filium quidem facere omnia, quæ Pater, sed ut instrumentum eius, & consequenter ut creatura eius substituta & subordinata uoluntati eius, quod Arriani dixerunt.

19 Huic responsioni, validè, & neruose occurrit S. Thom. 4. contra Gentil. cap. 7. & ex ea elicitur infinitas uirtutis, & potentiæ Filij Dei, non solum respectu extensionis, & multitudinis obiectorum, sed etiam quoad modum, & intentionem, rationemque faciendi. Nam in primis dicitur, quod ea quæ facit Pater, Filius similiter facit: si similiter: ergo eodem modo quo Pater, non ut instrumentum eius: instrumentum enim dissimiliter à principali agente operatur. Deinde quia eosdem effectus quos operatur Pater, operatur & Filius: facit enim quæcumque facit Pater. Quando autem duo agentia producant, & attingunt eundem effectum, aut est quia uirtus operatiua congregatur & conflatur ex diuersis uirtutibus ipsorum agentium, quarum qualibet est insufficiens, sed coniuncta cum alia fit perfecta, sicut plures trahentes nauem, faciunt eundem effectum, quem singuli non possunt, & in animalibus ex mare & fœmina colligitur una uirtus elaboratiua fœtus & generatiua, aut est quia uirtus est perfecta & sufficiens in uno, sed in alio solum inuenitur instrumentaliter & participatiue, & sic valde dissimiliter atque in principali: Aut tandem in utroque agente inuenitur æquè perfecta & sufficiens uirtus, licet diuisa & distincta; ita tamen quod quidquid operatur una, eodem modo, & simili potestate facit & altera. Hoc tertium dici non potest, nisi ponendo superfluitatem in altero istorum agentium, quia si totum quod operatur unum agens, operatur & aliud, eodem prorsus modo, alterum superfluit, quia illud est superfluum, sine quo æquè bene effectus fieri potest, si autem ista uirtus idem operatur, & eodem modo quo alia: ergo etiam si ista non esset, æquè bene fieret effectus, & hoc est esse superfluum. Dicere autem quod Deus ad omnia quæ facit, adhibet uirtutem superfluum, est absurdissimum. Si dicatur secundum, erit imperfecta uirtus in Filio, & valde dissimilis Patri, utpote cum instrumentaliter agere dicatur, & Pater principaliter. Vnde quæcumque facit Pater, non facit Filius similiter, sed dissimiliter. Item non faciet Filius uerbo uirtutis suæ,

B 2

sed

sed verbo virtutis paternæ, quia instrumentum, & minister non operatur in vi proprii verbi, sed in verbo hîc imperantis. Dicit autem Apostolus ad Hebr. 1. quod *portat omnia verbo virtutis sue*. Item instrumentum & minister non operatur ut vult, sed secundum dispositionem alterius voluntatis sibi imperantis, unde nec similis aut tantus honor deferretur ministro, sicut domino imperanti. Dicitur autem Ioan. 5. quod *sicut Pater mortuos viuificat, ita & Filius quos vult viuificat, & Pater omne iudicium dedit Filio, ut omnes honorificent Filium, sicut honorificant Patrem*: ergo non operatur ut minister, sed ex proprio iudicio, & arbitrio, & voluntate, & cum pari honore atque Pater, quod nequam conuenit ministro & instrumento. Si verò dicatur primum, sequitur quod virtus Filij secundum se, & Patris seorsim, & secundum se sint virtutes imperfectæ, quia ex illis conflatur vna virtus integra & perfectæ: ergo virtus Patris etiam non erit diuina, sed creata, quia imperfecta ex se & insufficiens.

20 Denique totum illud figmentum Arrianorum, quod Filius sit instrumentum Patris, minor illo, creatura facta ab illo, licet non sicut vna creaturarum, sed cæteris excellentior, ex eo reuincitur, quia talis creatura, vel est facta à solo Patre, vel non est facta ab ipso. Si non est facta ab ipso, à quo ergo? Non à se, quia repugnat aliquid seipsum producere. Non ab alio, quis enim præter Patrem est Deus, qui talem & tam excellentem creaturam (ut ipsi dicebant) crearet, cum Pater ipse omnipotens sit? Si ergo creatum est Verbum, utique à Patre creatum est, & à solo Patre, quia ab ipso Verbo non poterat fieri, aliàs fieret à seipso, & esset antequam fieret, quod implicat. Si autem à solo Patre factum est: ergo aliquid facit Pater, quod non facit Filius, scilicet ipsum Filium, seu Verbum factum, & non omnia per ipsum Verbum facta sunt, ita ut sine ipso factum sit nihil, siquidem aliquid factum est, & non per ipsum, sed sine ipso, scilicet ipsum Verbum seu ipse Filius, quæ sunt propositiones immediatè contradictoriæ ipsi Scripturæ.

21 Dices: Omnia esse facta per Verbum internum quod est ipsa Dei sapientia, non per Filium, qui est aliquid procedens à Deo, & extra Deum. Per hunc enim non sunt facta omnia, quia ipse non est factus à se; sed præter se facta sunt alia per Filium tanquam per instrumentum. Per Verbum autem internum omnia simpliciter facta sunt: Sic enim plura Verba distinxisse Arrium *suprà artic. 1.* retulimus. Sed hæc figmenta insipientium sunt & araneorum telæ, quibus impietas tegere se non potest, nec defendere. Nam Scriptura illud ipsum Verbum, per quod dicit omnia facta esse, vnigenitum vocat, seu Filium: nam de eodem Verbo quod Ioannes dixerat esse apud Deum, & Deum esse Verbum, & omnia per ipsum facta esse, subdit immediatè; *Verbum caro factum est, & habitauit in nobis, & vidimus gloriam eius, gloriam quasi Vnigeniti à Patre*; illud ergo Verbum genitum est: ergo & Filius: ergo illud Verbum per quod facta sunt omnia, Filius est. Præterea Ioan. 5. dicitur, quod *quacumque facit Pater, hac & Filius similiter facit*, ergo idem dicit Scriptura de Verbo & de Filio, quod omnia per ipsum fiunt. Et Paulus tum ad Colossens. 1. vbi de Filio loquitur, qui est imago Dei inuisibilis, dicit, quod *omnia per ipsum, & in ipso creata sunt*, & omnia in ipso constant: tum ad Hebr. 1. loquens de filio *quem constituit heredem*

vniformem, per quem fecit & secula, addit quod est *portans omnia verbo virtutis sue*; ergo non minus facta sunt omnia per Filium, quam per Verbum, sed idem formalissimè est Verbum & Filius.

22 Futilius est quod respondent noui Arriani huius temporis, scilicet quod in istis locis in quibus dicitur per Verbum facta esse omnia, creata esse omnia, portari omnia, &c. non esse sermonem de creatione rerum facta à solo Deo, sed de restauratione Ecclesiæ, & redemptione hominum facta per Christum hominem. Sed contrà, quia Paulus disertè affirmat ad Colossens. 10. *Omnia condita esse in ipso, & creata per ipsum in cælo & in terra, visibilia & inuisibilia, siue Throni, siue Dominationes, siue Principatus, siue Potestates*. Creatio autem istorum non est renouatio & redemptio hominum; de hac enim postea subiungit Paulus, *Quia per ipsum placuit reconciliare omnia in ipsum, pacificans per sanguinem crucis eius, siue qua in terris, siue qua in cælis*: ergo cum dicit in ipso esse condita omnia, & creata, de creatione loquitur, non de reconciliatione: sic enim idem repeteret. Nec ex ista restauratione rectè probaret Paulus quod ipse est ante omnes, quia omnia creauit, si ly *creauit* est idem quod *restaurauit*, cum possint etiam restaurari, quæ ante nos fuerunt. Denique ad Hebr. 1. dicit Apostolus quod *per Filium fecit Deus secula*. Et inf. *Tu Domine terram fundasti & opera manuum tuarum sunt celi*. Non ergo solum redemptio hominum, sed celi ipsi & terra creata sunt ab eo: est ergo Creator sicut Pater, non creatura.

23 Denique ex dictis ostenditur quantum principium, quo Scriptura nobis ostendit Filij diuinitatem, scilicet quia tollit ab illo omnem inferioritatem creaturæ, & attribuit omnem superioritatem Dei. Tollit quidem omnem inferioritatem creaturæ, quia omnem creaturam ei subiicit, & ab eo creatam dicit, & in ipso constare, ut *locis nuper allegatis* constat ad Colossens. 1. ad Heb. 1. Ioannis. 1. & omnia illi esse subiecta habetur 1. Corinth. 15. ad Heb. 2. Tollitur etiam inferioritas creaturæ, dum æqualitas eius cum Deo asseritur ad Philip. 2. & vocatur splendor gloriæ, & figura, seu imago substantiæ Dei ad Hebr. 1. quod non nisi actui puro conuenire potest: omnes enim creaturæ vmbra sunt, non splendor Dei, vestigium seu imago accidentalis, non substantialis Dei, scilicet in esse, vel in operationibus. Attribuit superioritatem Dei ipsi Filio, quia eundem honorem & adorationem ei tribuit, ac Patri; *Ut omnes honorificent Filium sicut honorificant Patrem*. Ioan. 5. Et in Psalm. 55. dicitur. *Adorabunt eum omnes Reges, omnes gentes seruiant ei*, & Psalm. 96. *Adorate eum omnes Angeli eius*, quod de Filio intelligit Apost. Ad Hebr. 1. dicitur in Filio esse beatitudo nostra & vita æterna, quod utique solum vero Deo & fini vltimo conuenit, Ioan. 17. *Hæc est vita æterna, ut cognoscant te solum Deum verum, & quem misisti Iesum Christum*, Et 1. Ioan. vlt. dicitur de Filio, *Hic est verus Deus & vita æterna*. Ergo Filius Dei qui est Iesus Christus verus Deus est, & increatus; & sic consubstantialis Patri.

24 De Spiritu sancti diuinitate & consubstantialitate, eadem prorsus probatio ex Scripturis deducitur, ac de Filio, ut latè, & eruditissimè tradit S. Thom. 4. *contra Gentil. cap. 17.* Nam in primis Spiritus sanctus expressè nominatur Deus in Scriptura, ut Actorum 5. vbi Petrus dicit Ananiam, *Cur tentauit Sathanas cor tuum mentiri Spiritui*

Spiritui S. ? Non es mentitus hominibus, sed Deo. ergo Spiritus S. est Deus. Et 1. Corinth. 12. dicitur, *Diuisiones operationum sunt, idem verò Deus, qui operatur omnia in omnibus.* Et postea subditur: *Hac omnia operatur vnus atque idem spiritus diuidens singulis prout vult.* Idem ergo qui vocatur Spiritus, Deus est. Et sic expresse mentiuntur Transsylviani seu noui Arriani, dicentes nusquam Spiritum S. vocari Deum in Scriptura. Item quia ille idem Dominus exercituum, qui Isai. 6. dicit *Vade, dic populo huic, Audite audientes, & nolite intelligere,* vocatur Spiritus S. Actorum vlt. vbi referens Paulus hunc locum Isaia, inquit, *Bene Spiritus S. locutus est per Isaia, dicens, Vade ad populum istum, & dic eis, Aure audietis, & non intelligetis.* Similiter ille qui locutus est per Prophetas fuit summus & verus Deus, Deus legis & prophetarum, de quo dicitur Luc. 1. *Benedictus Deus Israël, &c. Sicut locutus est per os Sanctorum, qui à saculo sunt Prophetarum eius.* Sed illemet qui locutus est per Prophetas, dicitur Spiritus S. 2. Petri 1. *Spiritu S. inspirati locuti sunt sancti Dei homines;* ergo Spiritus S. est summus Deus.

25 Ex aequalitate cum Deo idem probatur, quia Spiritus S. dicitur esse vnus cum Patre & Filio: ergo & aequalis. 1. Ioan. vlt. *Tres sunt qui testimonium dant in calo. Pater, Verbum, & Spiritus S. & hi tres vnus sunt.* Et eodem nomine seu dignitate numerantur Matth. 28. *Baptizantes eos in nomine Patris, & Filij, & Spiritus S.* Similiter ponitur immensus Spiritus S. ergo & aequalis Deo, quia nihil minus habet quam ipse, si immensus est; dicitur autem Sapientiae 1. *Spiritus Domini repleuit orbem terrarum, & hoc quod continet omnia scientiam habet vocis.* Dicitur etiam aequalis Deo in scientia, quia omnia scit, quæ Deus. 1. Corinth. 2. *Spiritus omnia scrutatur, etiam profunda Dei.* Et inf. *Quæ Dei sunt, nemo cognouit nisi Spiritus Dei.* Est ergo illi aequalis si omnem scientiam Dei adæquat, & comprehendit omnia.

26 Ex potestate & virtute idem probatur, quia Spiritui S. attribuuntur omnes actiones quæ sunt propriae Dei, vt creare, sanctificare, etiam ipsam Christi humanitatem, loqui per prophetas, & mittere illos, facere miracula, regere Ecclesiam. De creatione habetur Psal. 103. *Emittes spiritum tuum, & creabuntur, & renouabis faciem terra,* vbi distinguitur renouatio contra creationem; Ps. 32. *Verbo Domini caeli firmati sunt, & spiritus oris eius omnis virtus eorum.* Iob. 33. *Spiritus Domini fecit me, & c. 26. Spiritus eius ornavit calos.* Quod totum pertinet ad vim & opus creationis huius Vniuersi, non ad restaurationem & sanctificationem hominis, & sic ante opus restaurationis inuenitur Spiritus S. tanquam creator, & consequenter vt habens omnipotentiam eandem cum Patre. Nec potest dici quod Spiritus creat vt instrumentum, & minister; tum quia Scriptura sine vlla diminutione aut restrictione, sed simpliciter, & absolute dicit ipsum creare, firmare, & ornare calos: nulla est ergo ratio cur discamus id facere ministerialiter; tum quia dicitur firmare calos vt Spiritus oris Dei, non ergo vt minister, & instrumentum illius: sic enim esset extranea persona, non ipsius oris diuini Spiritus. Dicitur Spiritus S. sanctificare 1. Cor. 6. *Iustificati estis in nomine Domini Iesu Christi, & in Spiritu Dei nostri.* Isai. 11. *Requiescet super eum Spiritus Domini, Spiritus sapientia & intellectus, &c. & c. 6. 1. Spiritus Domini super me eo quod vnxit me, euangelizare pauperibus misit me;* quam prophetiam Lucæ 4. impletam fuisse, Dominus testatus est, & Lucæ 1. dicitur de Baptista, *Replebitur Spiritu S. adhuc ex utero matris suæ.* Ioan. à S. Thom in 1. part. D. Th. Tomus alter.

Dicitur Spiritus S. loqui per Prophetas, & mittere illos 2. Petri 1. *Spiritu S. inspirante locuti sunt sancti Dei homines.* Isai. 48. *Et nunc Dominus Deus misit me, & spiritus eius.* Dicitur facere miracula tanquam Deus, in primis summum miraculorum, scilicet incarnationem ipse fecit Luc. 1. *Spiritus S. superueniet in te, & virtus Altissimi obumbrabit tibi* Matth. 1. *Quod in eanatum est, de Spiritu S. est;* vbi parificatur Spiritus S. & virtus Altissimi in illo maximo opere faciendo. Item resuscitatio Christi, & nostra attribuitur Spiritui S. ad Rom. 8. *Si Spiritus eius qui suscitauit Iesum à mortuis habitat in vobis qui suscitauit Iesum Christum à mortuis, viuificabit & mortalia corpora vestra, propter inhabitantem Spiritum eius in vobis.* Et Dominus de seipso dicit facere miracula in Spiritu S. Matth. 12. *Si in Spiritu Dei eiicio demonia.* Et Paulus 1. ad Corinth. 12. omnia genera linguarum, sanitatum, discretionis spirituum, &c. attribuit Spiritu S. Dicitur Spiritus S. regere Ecclesiam, Act. 20. *In quo vos Spiritus S. posuit Episcopos regere Ecclesiam Dei.* Act. 15. *Visum est Spiritui S. & nobis, & c. 13. dixit Spiritus S. Segregate mihi Paulum & Barnabam in opus ad quod assumpsi eos.* Vtique ad ministerium Ecclesiæ. Est ergo Spiritus S. Deus, quia ad ipsum pertinet gubernare totam Ecclesiam, & disponere de illa, & distribuere dona eius prout vult, id est, tanquam Dominus, non tanquam minister.

Denique ex eo diuinitas Spiritus S. constat in Scriptura, quia non attribuitur ei inferioritas creaturæ, & attribuitur superioritas Dei, sicut est habere templum, esse beatitudinem nostram, & sanctificare nos, & alia similia. Nam inferioritas creaturæ nusquam attribuitur Spiritui S. cum tamen pluribus locis numerentur creaturæ Dei, etiam excellentissimæ, vt Throni, & Potestates, & Cherubim & Seraphim, nusquam illis annumeratur Spiritus S. Attribuitur autem ei templum, & adoratio quæ est propria Dei, 1. Cor. 6. *An nescitis quia membra vestra templum sunt Spiritus S. qui in vobis est, quem habetis à Deo, & non estis vestri? Empti enim estis pretio magno, glorificate & portate Deum in corpore vestro.* Vbi Spiritus S. cui membra assignantur pro templo, dicitur Deus, quia de ipso subditur quod portemus Deum in corpore nostro, vt pote tanquam in templo: Talis etiam veneratio debetur Spiritui S. quod eius iniuria est iniuria Dei, & peccatum irremissibile, ad Heb. 10. *Quanto putatis deteriora mereri supplicia qui Filium Dei conculcauerit, & sanguinem testamenti pollutum duxerit, & spiritui gratia contumeliam fecerit?* Ergo contumelia quæ fit Spiritui S. est sicut iniuria quæ fit Filio Dei: ergo supponit quod veneratio quæ debetur Spiritui S. est adoratio, quæ debetur Deo. Similiter Matth. 12. dicitur, *Quicumque dixerit Verbum contra Filium hominis, remittetur ei; qui autem dixerit contra Spiritum S. non remittetur ei, &c.* Ergo Spiritus S. est Deus, quia peccatur in ipsum, sicut & in Filium, imò & grauius. Denique Spiritus S. est ipsa beatitudo, quia dicitur 1. Petri 1. *Nunc nuntiata sunt vobis per eos qui euangelizauerunt vobis Spiritu S. misso de calo, in quem desiderant Angeli prospicere;* sed ille in quem desiderant prospicere est eorum beatitudo, & finis vltimus, qui est Deus: ergo Spiritus S. Deus est.

Sequitur tanta Scripturarum testimonia concors Ecclesiæ Catholicæ sensus & assensus in explicando hoc mysterio, in quo simpliciter fatetur esse tres personas realiter distinctas consubstantiales, & in vna essentia deitatis identificatas. Quod & Patres vnanimiter testantur, & Concilia omnia à Nicæno Cōcilio vsque nunc, dā perpetuò eandē formulam

fidei, quæ in Symbolo est, profitentur, & admittunt: in symbolo autem apertè continetur hoc mysterium Trinitatis. Et inter alia disertè hoc mysterium contra omnes errores explicatur in Concilio Romano sub Damaso, in Concilio Toletano III. IV. & XI. & in Bracharensi I. & in Concilio Lateranensi sub Innoc. III. ut habetur in *can. Firmiter, de summa Trinitate & fide Catholica, & c. Damnamus, eod. tit.* & in aliis multis Conciliis, & hanc esse traditionem & doctrinam ab exordio nascentis Ecclesiæ apertè docet Tertull. *aduersus Praxeam cap. 2.* ubi mysterium Trinitatis explicans, & proponens: *Hanc, inquit, regulam ab initio Evangelij decurrisse, etiam ante priores quosque hereticos, nedum ante Praxeam hesternum; probabit iam ipsa posteritas omnium hereticorum, quam ipsa nouellitas Praxeæ hesterni.*

29 Hactenus testimonia contra hereticos, & Iudæos, aliosque qui Scripturas agnoscunt pro mysterio hoc, & vera fide stabilienda adduximus. Pro Paganis autem, & Ethnicis, qui Scripturas non agnoscunt, non potest hoc mysterium conuinci, sed solum persuaderi, & tanquam credibile proponi, sicut & aliæ res fidei. Duo tamen possunt Paganis euidenter ostendi de hoc mysterio, cum ipsis proponitur fides.

Primum est, hoc mysterium inter articulos nostræ fidei verè contineri, ac proinde non posse veram & supernaturalem fidem ab ipsis acceptari, nisi hoc mysterium credatur, quia si Deo per Scripturas loquenti debent credere, constat hoc mysterium ibi contineri, & sic similiter credi debere, licet nihil simile illi sit in rebus creatis, quia non est mirum aliquid debere esse in creatore ita magnum, & sublime, quod nihil illi simile sit in creaturis: ac proinde non esse regulandum per ea quæ de creaturis, & earum processionibus cognoscimus, vel discimus.

Secundum est, posse euidenter defendi hoc mysterium à difficultatibus, quæ contra illud obijciuntur, & sic non debere iudicari impossibile, cum sit euidenter defendibile. Vnde præcipua vis ad persuadendum hoc mysterium Paganis, ex solutione difficultatum in contrarium increfcet, quas *seq. art.* recitabimus. Modus autem declarandi ipsum mysterium, & ea quæ circa processionem, & relationes, ac singularum personarum proprietates, & constitutiva se offerunt, deinceps per totum tractatum explicabuntur.

ARTICVLVS III.

Expediuntur ea quæ contra hoc mysterium ab Hereticis, & infidelibus obijciuntur.

Contra hanc veritatem Catholicam ex quatuor præcipuis capitibus possunt obijci argumenta & difficultates.

Primo ex locis Scripturæ, quibus hæretici videbantur moueri.

Secundo ex speciali repugnantia diuinæ naturæ ad istam distinctionem personarum.

Tertio, ex eo quod hoc mysterium videtur destruere principia euidentia, & necessaria naturalis luminis.

Quarto, ex aliquibus sophismatibus, quæ videntur ex positione talis mysterij induci, illisque vtitur Valentinus, Gentilis, alique nostri temporis noui Arriani, & Sabelliani.

Loca Scripturæ explicantur.

Primo obijci possunt quædam loca, quæ positivè videntur, Filio Dei attribueri inferioritatem ad Patrem, & illum dicere creaturam.

Secundo, alia loca quæ videntur enervare ea, quibus nos eius diuinitatem, & consubstantialitatem volumus asstruere. Et aduertendum est quod eadem ferè loca quæ nituntur probare Christum, & Spiritum sanctum non esse Deum, sed solum Patrem, seruiunt pro Sabellianis ad probandum non dari nisi vnâ personam in Deo quæ verè sit Deus, non plures.

Prioris ergo generis sunt illa loca quæ Christum minorem, & inferiorem Patre affirmant, sicut dicitur Ioan. 14. *Quia Pater maior me est*, & Apostolus dicit de Filio, 1. Corinth. 15. *Cum autem subiecta fuerint illi omnia, tunc & ipse Filius subiectus erit ei qui subiecit sibi omnia.* Quod certè non potest intelligi de humana natura assumpta: nam in hac multo magis fuit illi subiectus ante glorificationem suam, quam cum omnem potestatem sibi datam ostendit. Item dicitur creatura, Ecclesiastici 1. *Prior omnium creata est Sapientia.* Et cap. 24. *Creator omnium & qui creauit me, requieuit in tabernaculo meo.* Et in eodem. *Ego ex ore Altissimi prodii primogenita ante omnem creaturam.* Et Apost. ad Coloss. 1. *Qui est primogenitus omnis creature.* Quibus locis fit mentio de Filio, non ratione Incarnationis, sed secundum se, & ut procedens à Deo, & tamen nominatur creatura. Si ergo nos facimus argumentum, quod ex eo quod nominatur Deus, debet intelligi pro vero Deo, cur similiter ex eo quod nominatur creatura, non intelligatur de vera creatura in omni proprietate?

Conf. primo, quia Scriptura soli Patri tribuit diuinitatem: ergo excludit ab illa Filium, & sic solum dabitur vna persona diuina. Antec. prob. ex illo Ioan. 17. *Hæc est vita æterna, ut cognoscant te solum Deum verum, & quem misisti Iesum Christum;* ubi solus Pater nominatur verus Deus, etiam comparatione Iesu Christi missi: excluditur ergo ille à ratione veri Dei. Et Apost. 1. ad Timotheum ultimo, loquens de Christo comparatione ad Patrem, inquit: *Quem suis temporibus ostendit beatus & solus potens Rex Regum, & Dominus Dominarum, qui solus habet immortalitatem, & lucem habitat inaccessibilem.* Ergo contra Scripturam est velle alium facere Deum, si solus Pater est Deus.

Conf. secundo, quia Filio tribuitur ignorantia dei iudicij, Marci 13. *de die autem illa nemo scit, neque Angeli in celo, neque Filius, nisi Pater.* Tribuitur etiam impotentia Matth. 20. *Sedere ad dexteram vel ad sinistram non est meum dare vobis, sed quibus paratum est à Patre meo.* Et Ioan. 5. *Non potest Filius à se facere quidquam, nisi quod viderit Patrem facientem:* ergo ipse in se non est Deus: sic enim faceret à se. Et in huius consequentiam dicitur Filius audire à Patre, & pater ei demonstrare, & tradere omnia; quod utique supponit non esse Deum, sed in se esse indigentem, & carentem eo quod sibi datur à Deo. Quod si dicitur Filius facere, & creare, & operari id quod Pater, tamen non modo diuino, sed instrumentali, & inferiori, ut cum dicitur per ipsum fieri sæcula, per ipsum esse omnia, sed non ex ipso. Vbi particula *per*, designat ministerium, & inferioritatem.

Resp. authoritates illas quæ Filium minorem Patre esse affirmant, loqui de Filio in natura assumpta, in qua minoratus est, non solum respectu Patris, sed etiam paulò minus ab Angelis, scilicet in

in natura passibili, in qua natura etiam dicitur seruus Patris non seruitute vili ex peccato orta, sed generali omni rei creatæ, & similiter dicitur obedire Patri, & ab eo mandatum accipere, &c. Ex ipso textu constat, in hoc sensu loqui Christum, cum dicit, *Pater maior me est*, præmiserat enim, *Si diligeritis me, gauderetis utique quia vado ad Patrem, quia Pater maior me est*. Ire autem ad Patrem solum conuenit Filio in natura assumpta, in propria enim non vadit, nec mouetur ad Patrem, sed in illo est semper. Similiter cum dicit Apostolus quod tunc, & ipse Filius subiectus erit ei, manifestè loquitur de Filio vt homine: loquitur enim Apostolus in verbis antecedentibus de resurrectione Christi, quæ utique ei conuenit vt homo, & de regno quod tradet Patri cum euacuauerit omnem principatum, & potestatem, quod regnum dicit fore tale, quod omnia erunt subiecta sub pedibus eius. Quæ utique subiectio fiet per operationem diuinam, quæ Christo homini subiiciet omnia, iuxta illud ad Philipp. 3. *Qui reformabit corpus humilitatis nostræ configuratum corpori claritatis sue secundum operationem, quæ passu subiicere sibi omnia*. Illa ergo operatio subiiciens omnia Christo vt homini erit operatio diuina, non humana. Vnde quando sic omnia subiicientur Christo, tunc & ipse Filius in eadem natura humana in qua resurrexit, & in qua omnia sibi subiecta, erunt, etiam ipsi Deo subiectus erit, quia manifestabitur operationem illam non procedere ab humanitate Christi, nisi vt ab instrumento diuinitatis, quod si instrumentum eius est: ergo & subiectum. Apparebit ergo tanta claritas Christi vt hominis, quod ostendatur ipsam humanitatem esse instrumentum coniunctum diuinitati ad vniuersalem administrationem omnium quatenus subiicit sibi omnia, & sic Filius vt homo subiectus erit ei qui subiicit sibi omnia, vt instrumentum principale, vt sit Deus omnia in omnibus, id est, vt omnia tribuantur Deo. Nunc autem etsi maior subiectio Christi apparuerit in patiēdo: sed non maior subiectio Deo in agendo, & subiiciendo sibi omnia, sicut tunc apparebit, cum Christus vt homo ex subordinatione ad operationem, & influentiam Dei subiiciet sibi omnia. Videatur D. Thom. super hunc locum Pauli 1. ad Corinth. 15. & 4. contra Gent. cap. 8.

Ad id quod dicitur appellari Verbum, seu Filium Dei creaturam. Resp. iuxta S. Th. in fine dist. 8. cap. 8. & 1. p. q. 4. art. 2. ad 2. vbi docet illas auctoritates, quæ sapientiam dicunt creatam, loqui non de sapientia quæ est Filius, sed de sapientia quam indidit creaturis, sicut dicitur Ecclesiastici 1. *Ipsæ creauit eam* (scilicet sapientiam) *in Spiritu S. & effudit illam super omnia opera sua*. Et dicitur prior creata sapientia, scilicet in Angelis, qui sunt priores creaturæ. Quod si aliquæ auctoritates specialiter loquuntur de sapientia quæ est Filius, & procedit à Deo, & illam dicunt creatam, loquuntur de Filio in humana natura assumpta, sicut cum dicitur. *Qui creauit me, requieuit in tabernaculo meo*. Tabernaculum autem Creatoris, fuit Christi humanitas & corpus. Vt autem inquit D. Thom. loco nuper cit. vocatur aliquando in Scripturis processio Verbi, generatio, aliquando creatio, vt ex vtroque sumatur aliquid perfectionis, ad integrè explicandam generationem illam: nam generatio eandem substantiam communicat genito, sed cum mutatione: creatio diuersam substantiam communicat creaturæ, sed sine mutatione creantis. Processio autem Verbi est sine mutatione in eadem substantia generatio. Quæ expositio fuit cu-

iusdam Concilij Orientalis, vt ex Hilario in lib. de Synodus refert S. Thom. citatus. Cum autem dicitur primogenita ante omnem creaturam, & primogenitus omnis creaturæ, si referatur ad Filium in natura diuina, dicitur primogenitus omnis creaturæ, quia ipse est Filius, & non est creatura. Nam si respectu omnis creaturæ, seu omnis collectionis creaturæ primogenitus est, utique extra omnem creaturam est. Vnde tunc constructio litteræ est: Ego ex ore Altissimi primogenita, prodiui ante omnem creaturam, ita quod ly *ante omnem creaturam* construatur cum ly *prodiui*. Et in Paulo notanda est illa causalis, *Primogenitus omnis creaturæ, quoniam in ipso condita sunt vniuersa*. Si idem dicitur primogenitus, quia in ipso vniuersa sunt condita: ergo ipse non est conditus, sed solum genitus, quia vniuersa condidit. Si verò intelligatur de Filio in natura humana, dicitur primogenitus omnis creaturæ, quia primus prædestinatus est: de ipso enim in capite libri scriptum est, & in ipso elegit Deus reliquos electos; & sic antecedit omnem creaturam quasi omnium caput, & Princeps, & primogenitus. Et ex hoc sumitur disparitas, pro qua instat argumentum, cur si Scriptura vocat Filium Deum, & vocat creaturam, nos intelligimus esse Deum in omni proprietate, non autem creaturam, nisi tantum in natura assumpta? Dicimus in promptu rationem esse, quia si natura propria esset creatura, non posset verificari quod esset Deus: nec enim per assumptionem naturæ potest esse Deus, sed si est Deus, necessariò & ab æterno est Deus. Ergo oportet quod si dicitur Deus, & creatura, hoc secundum dicatur in natura assumpta, & non in propria: sic enim falsificaretur quod esset Deus. Creatura autem potest verificari solum per assumptionem naturæ de nouo factam. Et conuenienter appellatur creatura, non obstante quod in se est Deus, vt ostendatur quid dignatus est esse pro nobis, & Incarnationis mysterium insinuetur, simul & prædestinationis, quia in natura humana constitutus, & creatus, est caput omnium hominum & Angelorum, & omnis creaturæ. Quod autem prædestinatur, dicitur creari, quia ex non meritis, & gratuito beneficio conceditur, & præparatur, & illud sic præparari creari est.

Ad primam Conf. Resp. quod in illo loco, *Vt cognoscant te solum verum Deum*, ly *solum* sumi potest vel vt aduerbium, vel vt nomen adiectiuum. Primo modo non habet difficultatem, quia facit sensum quod Pater tantum est Deus, Christus autem quem misit non solum est Deus, sed etiam homo; Pater autem nihil aliud est quam Deus. Secundo modo, sensus etiam est facilis, sumiturque ex Chrysost. super hunc locum Ioan. & Amb. lib. 5. de fide cap. 2. cognoscant te solum verum Deum cum Christo quem misisti, quasi ipse solus cum Christo misso sit verus Deus, non ipse solus sine Christo. Et in ly *misso* subintelligitur etiã Spiritus S. quia ipse misit Christum vt hominem iuxta illud Isai. 48. *Et nunc Dominus misit me & Spiritus eius*. Sicut etiam 1. Corinth. 9. dicitur, *An ego solus, & Barnabas non habemus potestatem*; quasi dicat. Ego solus cum Barnaba, vbi non excluditur Barnabas per ly *solum*, sed adiicitur & coniungitur illi; & est communis modus loquendi, vt cum dico Solus ego & Petrus fecimus hoc vel illud. Quare exclusiua *Solus* etiam adiectiuè nunquam excludit tres personas, quia inseparabiliter sunt in essentia, sed personas extraneas. Et sic cum dicitur quod Solus habet immortalitatem, Solus est potens, &c. ly *Solus* non excludit personas diuinas à consortio immortalitatis & potentie, sed personas creatas, &

Deum, qui est illæ tres personæ, immortalitatem dicit habere, &c.

Ad secundam Conf. dicitur, quod Filius nihil potest ignorare, cum in ipso sint omnes thesauri scientiæ & sapientiæ, sed dicitur ignorare diem iudicii, ut bene *cit. loco ex 3. contra Gent. dicit S. Thom.* quia ad modum ignorantis se habuit ut homo, quia de illo die tacuit, seu non reuelavit. Qui enim aliquid tacet seu occultat, videtur respectu aliorum quasi ignorans, seu admodum ignorantis se habens, dum non manifestat quod sciat. Et tamen Pater hoc etiam modo dicitur scire, quia manifestat illum diem Filio, etiam ut homini. Filius autem manifestat quidem Spiritui sancto, sed ut Deus, non ut homo: sic enim nulli manifestat. Si autem Angeli in celo scirent, non possent scire nisi manifestando aliis, quia in Angelis scientia descendit in inferiores ex illuminatione & influenza superiorum. Sed de hoc latius 3. p. 9. 15. Ad illud de impotentia concedendi discipulis sessionem ad dexteram, & sinistram. Resp. quod Dominus non dixit ad suam potestatem non pertinere illam distributionem, sed non pertinere sic, id est, ratione propinquitatis carnalis, sed ex debita præparatione, & dispositione Patris, & consequenter sua, quia quæcumque Pater facit, & Filius similiter facit, & omnia dedit ei Pater in manus. Et ideo signanter dicit *dare vobis*: nam *ly vobis* determinat personas petentes in quantum tales, quia propinqui erant. Quibus ergo paratum est à Patre, & similiter à se, dare illis suum est, qui reddet unicuique secundum opera sua, & sic sedes illæ à dextris, & à sinistris ex prædestinatione Dei dependent. Sine illa non est meum, inquit Christus, dare, nec ob propinquitatem in carne, & sanguine, quia nec Patris est sic dare. Quod verò dicitur ex Ioan. 5. non posse Filium facere quidquam à semetipso, sine villo omnipotentis præiudicio dictum est, sed solum significatur, quod id quod Filius operatur & habet, per generationem accipit à Patre, non à se, nam & essentiam ipsam & diuinitatem non à se habet, sed per generationem accipit, non per creationem. Et sic Filium non posse facere quidquam à semetipso, sed quod viderit Patrem facientem, non significat quod non faciat propria, & diuina virtute, quæ tota est à se, id est, increata, & non ab alio extraneo participata, sed solum quod non potest facere à se ut persona ingenerata, sed ut nata, & orta à Patre, & consequenter prout viderit Patrem facientem. Quod verò dicitur Filium audire, & accipere à Patre, non propter indigentiam Filij dicitur, sed propter sibi communicatam intelligentiam, quia ipsum intelligere Patris & ipsam sapientiam accipit per generationem, & accipit eandem quæ in Patre est, non aliam, quia diuina est, & partiri non potest. Ad id quod dicitur Filium dici in Scriptura quod faciat omnia quæ Pater, modo instrumentali, & inferiori, quia dicitur Pater facere per ipsum. In primis, respondemus Scripturam non solum dicere creaturas esse conditas per Filium, sed etiam in ipso omnia constare, ipsum cum Patre componere omnia, & similiter facere sicut Pater, omnia portare verbo virtutis suæ, ut videri potest ad Colossens. 1. *In ipso condita sunt vniuersa, omnia per ipsum & in ipso creata sunt, omnia in ipso constant.* Et ad Heb. 1. *Portans omnia verbo virtutis suæ*; Et inf. *Tu initio Domine terram fundasti, &c.* Prouerb. 8. *Cum ipso eram cuncta componens.* Ioan. 5. *Quacumque Pater facit, & Filius similiter facit.* Non ergo dicitur esse omnia per ipsum ita aride & ieiunc, sicut per instru-

mentum, & ministrum, sed tanquam per virtutem principalem & coessentiali cum Patre, sed ab ipso deriuatam & acceptam generatione; & ideo significatur illa præpositione *Per*. Secundò dicitur ex D. Thom. inf. 9. 36. art. 3. quod præpositio *Per* denotat medium, seu ordinem aliquem in processione, seu actione alicuius rei. Et potest esse medium in virtute, & autoritate, vel in instrumento, & ministerio; potest etiam virtus esse eadem, sed solum ordo in suppositis seu personis. Est ordo in autoritate & virtute, sicut cum dicitur quod Balluius operatur per Regem, seu per autoritatem Regis. E contra verò cum dicitur quod Rex operatur per suum Ballium, *ly per* significat ministerium & instrumentum. In diuinis Pater operatur per Filium tanquam per personam à se genitam, sed eadem virtute, & autoritate cum illa, & ita est ordo in personis, non in virtute & potentia operatiua.

Secundò arguit, quia loca quæ à nobis inducuntur ad ostendendam diuinitatem Filij & Spiritus S. vel distinctionem personarum, non cogunt: ergo &c. Anteced. probatur, nam si quæ loca maxime ostendunt diuinitatem vnam personarum & distinctionem inter se, sunt illa Ioan. 10. *Ego & Pater vnum sumus.* 1. Ioannis ult. *Tres sunt qui testimonium dant in celo, Pater, Verbum & Spiritus S. & hi tres vnum sunt.* Matth. 28. *Baptizantes eos in nomine Patris & Filij & Spiritus S.* Hæc autem loca non probant. Nam in primo loco non intendit probare Christus vnitatem realem essentia in personis, sed vnitatem moralem seu affectus & officij, sicut Princeps, & minister sunt vnum in operatione, quæ per ministrum exercetur: ut constat ex subiuncta probatione Christi, qua explicauit Iudæis, qua ratione dixisset se, & patrem esse vnum: *Si illos dixit deos, ad quos sermo Dei factus est, vos dicitis quia blasphemias, quia dixi, Filius Dei sum?* Quæ probatio non cogit nisi ad vnitatem moralem seu affectiuam eorum qui sunt missi à Deo, & vnum dicuntur cum Deo, seu vocantur dii, ex hoc autem inferre vnitatem omnimodam in essentia, nulla consequentia est. Secundus, & tertius locus non probant vnitatem omnimodam: nam tertius solum dicit quod baptizant in nomine Patris, &c. vbi *ly nomen* dignitatem vnam designare potest, non essentiam. Secundus dicit, quod illi tres vnum sunt, sed quomodo vnum sint, non exprimit; colligitur autem non esse vnum in substantia, quia subditur, *Et tres sunt qui testimonium dant in terra; Spiritus, aqua, & sanguis. & hi tres vnum sunt*; sed hi tres non sunt vnum in substantia: ergo neque Pater & verbum, & Spiritus Sanctus. Vnde & ipse Dominus Ioan. 17. ad Patrem orans dicit, *Claritatem quam dedisti mihi, dedi eis, ut sint vnum, sicut & nos vnum sumus.* Sed ipsi discipuli non erant vnum essentia & realitate, sed affectu & voluntate: ergo nihil amplius sunt vnum Pater & Filius.

Confirm. primò pro parte Sabellij & ministrorum Transyluaniæ, qui hoc tempore Sabellianismum introduxerunt per Seruetum. Nam in Scripturis ponitur omnimoda vnitas, & solitudo Dei, quod stare non potest, nisi sit vna tantum persona diuina: vbi est enim pluralitas personarum, ibi est simpliciter multitudo & non vnitas tantum. Dicitur autem Deuter. 6. *Audi Israël, Dominus Deus noster Dominus vnus est.* Et c. 32. *Videte quod ego sim solus, & non sit alius Deus præter me.* Isai. 45. *Quia ego Deus, & non est alius.* Ioan. 5. *Pater in me manes, ipse facit opera.* Et c. 14. *Qui videt me, videt & Patrem, non credis, quia ego in Patre, & Pater*

Pater in me est ? Quod utique verificari non potest, nisi quia Pater & Filius in se idem sunt, solum autem quoad connotata, & effectus diuersificantur. Et ad idem accipiunt alias auctoritates, quæ unitatem Dei explicant, ut Paulus 1. Corinth. 8. *Nobis tamen unus est Deus Pater, ex quo omnia*, & Ioan. 17. *Ut cognoscant te solum Deum*; & alia similia: videtur enim ipso termino unitatis excludi pluralitatem personarum in Deo. Addunt Transsylvani: Scriptura non nouit alium Christum, quam natum ex Virgine, passum, mortuum, &c. nec Apostoli & Euangelistæ narrant aliquod Christi gestum ante carnem: ergo non datur Christus qui sit Deus ab æterno, sed illa persona Patris, quæ est ab æterno, dicitur Christus, cum in tempore carnem sumpsit. Vnde, & Iesus dicitur factus in tempore Dominus, & Christus à Deo, iuxta illud Petri Actuum 2. *Certissime sciat omnis domus Israël, quia & Dominum & Christum fecit Deus hunc Iesum, quem vos crucifixistis*; ergo non datur persona veri Christi quæ fuerit ab æterno: qui enim est æternus Deus, non potest fieri in tempore Dominus, & Christus, quia id semper naturaliter fuisse. Et ad idem faciunt auctoritates supra adductæ, quæ verum Christum non solum factum, sed creatum, & creaturam dicunt: talis enim persona non potuit esse ab æterno, sed solum ex connotatione effectus temporalis sic denominatur.

8 Conf. secundò, quia Dominus dixit *Beatus est dare, quam accipere*, Act. 20. sed Pater dat, & Filius accipit, & sibi datum fatetur. Matth. 28. *Data est mihi omnis potestas in calo & in terra*, & Ioan. 5. *Dedit ei vitam habere in semetipso*. Ioan. 10. *Pater quod dedit mihi, maius omnibus est*: ergo Pater est beator Filius. Nec obstat quod naturaliter, & necessario det Filio, quia etiam in necessariis perfectius est dare quam accipere, ut patet in causa, & causato. Omitto nugæ quasdam & sophismata istorum hæreticorum, ut est illud, Christus est Filius veri Dei: ergo qui non habet Filium Christum non est verus Deus, sed sola Trinitas non habet Christum verum Filium: ergo tota Trinitas non est verus Deus. Item Christus est mediator veri Dei, sed solum est mediator ad Patrem, & non ad Trinitatem, vnde orationes Ecclesiæ diriguntur ad Patrem per Christum: ergo Pater & non Trinitas est verus Deus. Omitto & mendacia, sicut cum dicunt Ebionitas dixisse quod Christus æternus descendit in hominem Iesum, nec faciebant Christum purum hominem, & sic non esse Ebionitas dicunt, qui dicimus Christum esse personam æternam distinctam à Patre.

9 Resp. ad principale argumentum, loca à nobis inducta esse certissima, nec obstat ea, quæ in contrarium obiciuntur: nam ad ea quæ opponuntur contra primum locum, dicimus Christum duo intendisse explicare Iudæis in illo loco; alterum se esse verè Deum, & consequenter vnus naturæ cum Patre, non extraneæ. Et hoc paulatim induxit, dicendo prius quod id quod sibi dederat Pater maius omnibus est (quod utique non est nisi vera diuinitas: hæc enim sola est omnibus rebus maior) & deinde addidit hoc magis explicans, *Ego & Pater vnum sumus*: quod certè si non intelligeretur de unitate omnimoda in diuina natura, infirmaretur quod prius dixerat, illud sibi datum esse maius omnibus. Vnde & Iudæi intellexerunt ipsum de vera diuinitate fuisse locutum, quia dixerunt blasphemasse, *quia cum esset homo, se faceret Deum*. Alterum est, manifestare Iudæis se non blasphemasse, nec illa verba sua continere blasphemiam.

Et ad hoc induxit probationem allatam in argumento, quasi à minori ad maius: Si lex vocat Deos ad quos sermo Dei factus est, & non potest solui Scriptura, nec blasphemiam continet, à fortiori non erit blasphemia appellare me Deum qui specialiter sanctificatus, & missus sum à Patre in mundum. Vnde hæc probatio non tendit directè ad probandum se esse Deum, aut id quod dixerat se esse vnum cum Patre, sed ad probandum in illis verbis non contineri blasphemiam, non verò ut diminuat & reformet id quod dixerat se esse vnum cum Deo, quasi vellet se esse vnum ministerialiter, sicut illi ad quos Dei sermo factus est, non substantialiter. Nam quod non voluerit hoc diminueret, patet manifestè, quia probato quod in suis verbis non esset blasphemia, redit ad manifestandum se esse verum Deum in verbis sequentibus: *Si non facio opera Patris mei, nolite credere mihi. Si autem facio, & mihi non vultis credere, operibus credite, ut cognoscatis, & credatis quia Pater in me est, & ego in Patre*. Quæ verba stare non possunt, si solum esset Deus participatiue, sicut minister, & non substantialiter, quia esse in Patre, & Patrem in ipso, de nullo ministro verificari potest. Et licet per Sacramentum dicat Christus se esse in nobis, & nos in ipso, tamen manifestè id docet fieri per manducationem, quæ unitatem essentiali excludit. Hic autem dicit Patrem esse in ipso, & ipsum in Patre, quia facit opera Patris, quod est esse in ipso per communicationem eiusdem virtutis, atque adeo & naturæ.

De secundo & tertio loco allato in argumento dicimus efficacia esse. Nam in illo loco *baptizantes eos in nomine Patris*, &c. dico quod *ly in nomine* non dicit nudum nomen, & vacuum, nec dignitatem accidentalem, sed supremam & diuinam, atque adeo substantialem. De illo autem loco, *Tres sunt qui testimonium dant in calo, & hi tres vnum sunt*, dicimus etiam efficaciter probare hanc unitatem substantialem, quia simpliciter & sine aliquo addito accidentali vnum esse affirmat. Nec obstat quod subditur in similitudinem huius unitatis, *Et tres sunt qui testimonium dant in terra*, &c. Hoc enim ab aliquibus transfertur & explicatur ex Græcò. *Et hi tres in vnum sunt*; vbi non designatur quod sint vnum, sicut cum dicitur Pater, Verbum, & Spiritus Sanctus vnum sunt. Ita P. Vasquez hîc disp. 109. cap. 2. num. 132. Sed tamen cum nostra vulgata non ponat illam particulam *In vnum sunt*, sed simpliciter vnum sunt, & hæc vulgata defendenda est, non est cur recurramus ad illam Græcam lectionem. Sensus ergo planus est, quod Spiritus, aqua, & sanguis, quæ tempore passionis Christi testificata sunt de ipso, Spiritus quidem cum clamando expirauit, aqua verò & sanguis, quia fluxerunt de latere eius, hæc tria pertinent ad componendam vnā substantiam humanam in Christo; & similiter Pater, Verbum, & Spiritus S. pertinent ad vnā substantiam, non quidem compositam, quia diuina est, sed summè vnā & simplicem. Si verò loquatur ibi Ioannes de sacramento Baptismi, sensus erit quod Spiritus, aqua, & sanguis sunt vnum in ratione Sacramenti, quia non dicunt aliam naturam in qua vnum sint; at verò Pater, Verbum & Spiritus Sanctus sunt etiam vnum, non quidem in ratione Sacramenti, quod ibi locum non habet, sed in ratione diuinitatis.

Ad primam Conf. Resp. omnia illa loca quæ vnum Deum affirmant, non esse contra nos, quia tres personæ non sunt tres dii, sed vnus Deus. Ex eo ergo quod vnus Deus affirmetur, non tollitur

litur distinctio personarum, sed illas personas plures deos esse negatur. Loca autem quæ Deū solum esse affirmant, non est per exclusionem personarū, quæ sunt idemmet solus Deus, sed aliorum deorū, seu per exclusionem extraneæ naturæ, & eorum quæ illam habent. Quando autem dicitur Pater manere in Filio, esse in Filio, videri viso Filio, & contra, non inde probatur unitas personæ in Deo, sed solum naturæ; quin potius esse, vel manere in Filio aut Filium in Patre, non dicitur congruè de eadem persona, sed de distincta: nemo enim dicitur manere in seipso, esse in seipso, &c. ut bene notat S. Th. soluens hoc argumentum Sabellianorum 4. *cont. Gent. c. 9.* Ad id verò, quod addunt Transylviani, facilis est responsio: agnoscunt enim Apostoli Christum ab æterno in persona, licet in tempore factus sit homo, ut Paulus ad Hebr. 13. *Iesus Christus heri & hodie ipse & in sæcula*, & Ioan. 1. *In principio erat Verbum.* Quæ autem ante carnem gesserit, manifestè dicunt; *Omnia per ipsum facta sunt*, Ioan. 1. *Omnia per ipsum, & in ipso creata sunt, & omnia in ipso constant*, ad Coloss. 1. *Per quem fecit & sæcula*, portans omnia verbo virtutis suæ, ad Heb. 1. Et iterum ibi, *Tu in initio terram fundasti, & opera manuum tuarum sunt cali.* Denique, *Quæcumque Pater facit & Filius similiter facit*, Ioan. 5. Quod verò dixit Petrus hunc Iesum factum fuisse Dominum, & Christum à Deo, dicimus factum esse Dominum ut hominem: nam etiam in humana natura accepit nomen super omne nomen, quod in hoc sæculo, & in futuro nominatur, ut dicit Paulus. Hoc autem non fuit ab æterno, quia ab æterno fuit Dominus tanquam Deus, idque naturaliter, postea ut homo fuit Dominus beneficio Dei. Reliquas auctoritates supra adductas contra Christi diuinitatem, ibi soluimus.

12 Ad secundam Conf. Resp. quod beatius est dare, quàm accipere, quando id quod datur non est tantum, nec idem quod ipsemet dans, quando autem id quod accipitur est vnum, & idem cum ipsemet dante, non est minus beatum accipere, quàm dare, quia non minus accipitur in eo cui datur, quàm sit in eo qui dat: identificat enim in sua natura ipsam totam & integram substantiam dantis. Vnde non solum nitimur in eo quod naturaliter, & necessariò Deus dat Filio suam generationem, sed in eo potius, quia ista donatio totum quod se tenet ex parte substantiæ dantis, communicat, & sic ille qui accipit non manet distinctus à dante, nisi in oppositione relationis, quæ est inter dantem & accipientem, inter procedentem, & producentem, in substantia autem & perfectione non manet distinctus, sed idem. Itaque quando datur aliquid per identitatem cum dante, non est beatius dare quàm accipere: siquidem manent idem in perfectione, quando autem distinctum est id quod datur ab eo qui dat, beatius est dare quàm accipere, quia tunc accipiens est in aliqua potentialitate & indigentia respectu dantis. Vbi autem nulla est indigentia accipientis, non est beatius dare quàm accipere, ut dicit Aug. lib. 3. *contra Maximum c. 24.*

13 Ad ea quæ sophisticè obijciuntur, facilis est responsio. Prima enim consequentia peccat à non distributo ad distributum ex affirmatiua inferendo negatiuam, ut si dicas: Qui est Grammaticus est verus homo: ergo qui non est Grammaticus, non est verus homo: Paulus est filius veri hominis: ergo qui non habet Paulum filium, non est verus homo. Secunda consequentia peccat eodem modo à non distributo ad distributum, ab affirma-

tiua ad negatiuam. Stat enim bene quod Christus sit mediator veri Dei, qui est Pater, & tamen quod alius sit verus Deus, erga quem non sit mediator, ut Spiritus S. Sed veritas est, quod Christus ut homo est mediator respectu totius Trinitatis, sicut à tota Trinitate missus est Christus ut homo, & incarnatio à tota Trinitate facta est, ut ipsi Trinitati fieret satisfactio, & ab ipsa gratiam Christus mereatur pro nobis. Quod autem orationes dirigantur ad Patrem, dicimus id esse, quia in Patre, ut in prima persona tota Trinitas intenditur; & tamen ne aliæ personæ maneant exclusæ, concluduntur orationes, dicendo *Qui cum uiuit, & regnat in unitate Spiritus Sancti.* Mendacia Transylvianorum non debemus curare: nam Ebionem dixisse quod Iesus fuit homo purus, constat ex S. Ignatio. *epistola ad Philadelphenses*, ex Ireneo lib. 3. cap. 20. & lib. 1. cap. 25. & 26. ex Tertulliano lib. de Carne Christi, & lib. de præscriptionibus hæreticorum cap. 48. & August. lib. de hæresibus, hæres. 10. & aliis.

14 Vltimò arguitur auctoritatibus contra diuinitatem Spiritus S. Nam significatur Spiritus Sanctus esse factus, & creatura, ut cum dicitur Amos 4. *Ego firmans tonitruum, & creans spiritum*; Ioëlis 2. *Effundam de spiritu meo*, quæ effusio non fit nisi per processionem ad extra; & Ioannis 1. *Omnia per ipsum facta sunt.* Vbi ly omnia nihil excipit, etiam Spiritum S. Item significatur esse minor Deo, tum quia dicitur postulare pro nobis, Rom. 7. *Ipsè Spiritus postulat pro nobis gemitibus inenarrabilibus.* Dicitur etiam mitti à Deo, missio autem seruorum & ministrorum est, quia per imperium mittentis fit: Ioan. 15. *Spiritus veritatis quem ego mittam vobis à Patre.* Denique conf. quia solum Filius procedit in Deo per naturam; ergo Spiritus Sanctus non per modum naturæ procedit, sed libero arbitrio, & arte. Hoc autem proprium est creaturæ.

Resp. in illo loco Amos, non sumi pro Spiritu S. sed pro vento, qui etiam spiritus appellatur, ut Exodi 15. *Flauit spiritus tuus, & operuit eos mare*; & Psalm. 106. *Dixit, & stetit spiritus procella*, & Psalm. 148. *Spiritus procellarum quæ faciunt verbum eius.* Expositio est Hieron. Theodoret, Ruperti super illum locum, & Basilij lib. 3. *contra Eunomium.* In illo loco Ioëlis, si effusio spiritus sumatur pro gratia & charitate, quæ in nobis per Spiritum S. diffunditur, aliquid creatum est; si pro ipsa persona Spiritus S. effusio illa est idem quod missio, quæ est processio interna personæ cum connotatione noui effectus ad extra, in quo designatur illa missio, & sic conuenit personis diuinis procedentibus, ut mox dicemus. Locus Ioannis non vrget, quia loquitur de omni factibili, non de omni ente, aliàs etiam ipse Pater esset factus & creatus. Ad id quod obijciatur de inferioritate Spiritus S. dicimus illum non postulare formaliter, sed causaliter, quia facit nos postulare. Quæ expositio traditur ab August. lib. 1. *contra Maximum non longè à principio; Quia ipse de quo dixit Apostolus clamantem Abba Pater, in alio loco dicit; In quo clamamus Abba Pater, ita quod exposuit quid sit clamantem, dicendo in quo clamamus, quia scilicet facit nos clamare.* Quod verò dicitur Spiritus S. missus, sicut, & Filius, in neutro loquitur de missione facta ex imperio, sed missio est processio cum aliqua manifestatione & signo visibili facto in tempore. Talis autem missio non obstat diuinitati personæ missæ, quia non mittitur vbi antea non erat, sed ut manifestetur vbi antè non manifestabatur in aliquo nouo effectu.

Nam

Nam quod Spiritus non mitratur, vbi antea non erat, patet ex illo Psal. 138. *Quo ibo à spiritu tuo?* Et Filius missus est in mundum, vbi antea erat Ioan. 1. *In mundo erat, & mundus eum non cognouit in propria venit, &c.*

- 15 Ad Conf. Resp. quod procedere per modum naturæ dicitur duo, scilicet procedere necessario, seu naturaliter, & procedere per modum imaginis, & similitudinis sui principij. Vtrumque simul inuenitur in processione Verbi diuini; & ideo est Filius, vt *inf.* dicitur. In processione autem Spiritus Sancti inuenitur primum, scilicet processio naturali & necessario modo, sed non secundum, quia procedit per modum impulsus, non imaginis. Nec tamen omnis processio voluntatis est libera, aut per artem, sed etiam naturalis & necessaria dari potest, quando est per amorem obiecti quod est summum bonum, vt in amore fruitionis diuinæ.

Non repugnat diuina natura multiplicatio personarum ad intra.

- 16 Inter difficultates quæ circa hoc mysterium oriuntur (plures proponit S. Thom. 4. *contra Gent.* c. 10. & soluit c. 14.) vna est quia hoc misterium quod propter summam eminentiam & perfectionem Deo tribuitur, videtur potius eminentiæ summæ diuinitatis repugnare. Nam in primis processiones ad intra si veræ & reales sunt aliquam distinctionem in ipsa substantia debent ponere. Nam relationes ipsæ in eo ipso in quo distinguuntur inter se, adhuc aliquid reale sunt, alias realiter non distinguerentur. Illud ergo reale in quo distinguuntur non est aliquid reale accidens: hoc enim in Deo non datur: est ergo realis substantia. Quomodo ergo euadere volumus, quod non datur distinctio in substantia, sed in relatione, si ipsa relatio etiam vt distinguitur realiter ab alia, & in eo in quo distinguitur, substantia est? Ad hæc processiones istæ in Deo ideo sunt reales, quia versantur inter extrema realiter distincta: id enim est de essentiali ratione processionis realis, & ista extrema non sunt realiter distincta in substantia, & natura, sed solum in relatione. Et rursus relationes ideo sunt realiter distinctæ, quia fundantur in processionibus realibus: ergo committitur circulus, aut petitur principium.

- 17 Confir. quia licet natura intellectualis ex sua fecunditate & abundantia sit productiua Verbi; tamen quando natura intellectualis est actus purus, & in in ultimo totius actualitatis per seipsam est species expressa, & Verbum, & terminus intelligendi: ergo tali naturæ repugnat productio, & processio verbi, cum per seipsam in vi & ratione actus puri sit ipsum Verbum, & species expressa, & ita sicut homini qui formauit verbum non conuenit per contemplationem amplius producere, sed in Verbo producto cōtemplari, ita diuinæ naturæ non conuenit producere Verbum, sed in seipsa cōtemplari. Quod si ex abundantia & fecunditate producit illud, non apparet ratio, cum etiam ipsa persona Verbi, & Spiritus Sancti non producant ex eadem fecunditate illud Verbum, & illud aliud vsque in infinitum: quod vtique inconueniens est.

- 18 Conf. secundò quia repugnat intelligere processionem seu productionem non habendo esse ab alio, & repugnat intelligere esse diuinum quin sit à se. Quomodo ergo potest intelligi quod persona sit diuina, & sit ab alio cum communicatio ne ipsius esse diuini? Et præsertim, quia Ver-

hum & Spiritus S. identicè sunt ipsa essentia Dei, & necessariò. Quando ergo intelligimus naturam seu essentiam in Patre, iam ibi identificatur Filius & Spiritus S. Non ergo est intelligibile quod accipiant illud esse diuinum per communicationem, & productionem, cum habeant illud per summam identitatem cum essentia. Similiter productio petit, quod in quod procedit sit dependens à producente, sit posterius illo, sit transiens de actu primo ad secundum, seu de non esse ad esse, quia id quod est ens necessarium, & independens, & à se, tale est quod omni alio circumscripto habet esse; quod autem est procedens & productum ab alio, non habet esse secluso suo producente: Ergo repugnat in ente necessario seu diuino intelligere productionem seu processionem.

Resp. negando quod processiones ponant in diuinis diuersitatem in substantia, sed solum in respectu & relatione prout opposita, licet ipsæ relationes oppositæ, & distinctæ relatiuè, habeant eandem essentiam substantialiter. Et ad instantiam, quod etiam illæ relationes, vt oppositæ, & distinctæ inter se, sunt substantia, distinguo, sunt substantia identicè, & realiter in se, transeat; explicite & formaliter sub conceptu respectiuo, nego; sub hoc enim conceptu non explicant substantiam, sed ordinem & respectum vt ad alterum; substantia autem dicitur ad se. Vnde implicat quod relatio, quæ est substantia, distinguatur à suo correlatiuo seu à relatione cui opponitur in ratione substantiæ, sed in ipso *Ad*, sub formalitate & exercitio *Ad*: nam distinguitur solum vt ad alterum, in ratione autem substantiæ non explicatur nisi ratio ad se: repugnat ergo in substantia distingui vel opponi; licet etiam vt distinguitur & opponitur, in re & identicè substantia sit. Itaque illa substantia diuina quia infinita & illimitata est, in se simplex existens entitatiuè, eminenter æquiualeat pluribus, & sic continet etiam relatiuum genus, & non solum substantiale, & vnica substantia pluribus relationibus esse præbet, easque constituit in essentia & natura sua, ita quod id quod plures entitates accidentales, & plura. In faciunt in relationibus creatis, vnica substantia simplex propter infinitatem suam facit in relationibus, quæ sunt in Deo. Et quia de ratione realis relationis est quod sit ad alterum, & non ad se, necesse est quod illa vnica substantia pluralitatem relationum sub ratione *Ad* realis contineat, relinquens quod inter se exerceant oppositionem correlatiuam in ipsa ratione *Ad*: totum hoc enim complectitur substantia infinita, quæ hoc ipso quod præbet esse relationibus, easque continet, oportet quod in substantia illa sint vnum, quia eadem & simplicissima existens complectitur in sua infinita essentia plures relationes, & quod in ratione *Ad*, in qua opponuntur, distinctæ maneat; nec tamen illud *Ad* est fictum aut separatum à substantia & accedente, sed est *Ad* reale realiter oppositum alteri, & realiter distinctum ab eo, & realitates illæ non sunt accidentia, sed substantia ipsa, sed non plures substantiæ, licet plures relationes, quia vt plurificetur realitas relationum, sufficit plurificari oppositiones, & ipsum exercitium *Ad* quod in re est substantia, nō tamen ipsa ratio substantiæ multiplicatur, quia hæc non est ad alterum; & cum sit infinita & non limitata & diuersa contineat, etiam substantiam & esse alterius relationis; ideo vtriusque relationis eadem est substantia, licet realitas respectuum & *Ad* sit multiplex, quia oppositiones illæ dantur in re. Vt autem substantia diuidatur

24 Quæst. XXVII. De sacro Trin. myst.

tur, non sufficit diuidere & multiplicare relationes, quæ sunt ipsa substantia in ratione *Ad*, seu prout ad alterum, sed etiam in ordine ad se, quia substantia ad se dicitur, licet propter suam infinitatem substantia illa etiam relatio sit, nec tamen diuisibilis, ut substantia, sed distinguibilis, ut relatio secundum rationem *Ad*. De quo videatur S. Thom. 4. *contra Gent. cap. 14. solut. ad 6. 7. & 8.* ubi hoc latè explicat.

20 Ad id quod additur de circulo & petitione principij in processibus & rationalibus. Resp. quod processiones diuinæ sunt inter extrema realiter distincta, non que ante ipsas processiones distincta sunt, sed quæ ipsis processibus distincta redduntur. Nec committitur circulus distinguendo processiones ob relationes, & relationes ob processiones: quia proceditur in diuerso genere causæ, & sic cessat vitium circuli: causæ enim ad inuicem sunt causæ: & demonstratio quæ regreditur à conclusione ad principia cognoscendo conclusionem per diuersum medium, non demonstrat idem per idem, & sic non fit circulus vitiosus, ut ostendimus in *Logica quæst. 25. art. 3.* In presenti relationes intra Deum sunt realiter distinctæ, quia sunt oppositæ inter se relatiuè: sunt autem oppositæ, quia fundatæ in processione & origine, ubi immediata causa distinctionis est oppositio, & ipsa ratio relationis realis, quæ est ad alterum, & non ad se; remota verò est ipsa processio, seu origo, illamque habet pro fundamento. Cum verò è contra dicitur, quod origo & processio idèò realis est, quia est inter extrema distincta, tunc non assignatur causa totalis, neque causa quæ sit fundamentum, sed quæ sit conditio requisita ut processio realis sit. Causa enim realis processionis est, quia fit per reales actus, & reale principium: requirit autem tanquam conditionem quod extrema sint realiter distincta. Vnde non proceditur in eodem genere causæ neque secundum causam adæquatam ab vno ad aliud, & ita non committitur circulus vitiosus.

21 Ad primam Confes. quod verbum seu species expressa duo facit in nobis. Primum est reddere obiectum intellectum per modum termini, sicut species impressa reddit illud intelligibile per modum principij: secundum est reddere obiectum dictum & locutum, seu loqui & manifestare illud intra re. Et quando obiectum non est in se tantæ immaterialitatis, & spiritualitatis, ut sit suum esse intelligibile, & intellectum, indiget prius formari in specie expressa, & in illa dici seu manifestari (illa enim formatio, manifestatio & dictio est) ut ex hoc reddatur intellectum in actu, & sic propter indigentiam obiecti, & intellectus formatur verbum, & hoc est dicere imperfectum, quando aliquis idèò dicit ut intelligat, quia supponitur nondum intelligere. Sed tamen dictio seu locutio de se non solum fit propter istam indigentiam, sed etiam post plenam intelligentiam iterum fieri potest locutio, non ad intelligendum vel melius percipiendum, sed ad manifestandum & communicandum id quod intelligit: naturaliter enim intellectus est communicatiuus & manifestiuius, quia lux est. Vnde ex *abundantia cordis os loquitur*, ut Dominus dicit, & in *Psal. 44.* de diuino Verbo dicitur *Eruclauit cor meum verbum bonum*, quia sicut eruclat os quando nimis plenum est corpus, ita mens ex plenitudine summa loquitur in Deo, non ex indigentia aliqua. Sic ergo dimus, quod diuina natura, ex eo quod est actus purus, in ipso intelligibili esse

non producit Verbum ut intelligat, nec ex indigentia aliqua, sed ex plenitudine intelligentiæ; & sic Pater non est sapiens sapientia genita, ut docet Aug. in 7. *de Trinit. cap. 1.* Negamus tamen quod non conueniat naturæ intellectuali sic perfectæ, & in actu puro producere verbum, & loqui ex abundantia & plenitudine intelligendi, si enim de se intellectualis natura communicatiua est, & manifestatiua eorum quæ intelligit, & tanto magis quanto magis intelligit: sic enim melius manifestat, sicut lux quæ de se manifestatiua est, quanto est plenior, & perfectior, quomodo illa intellectualitas, quæ est summa in intelligendo, non erit maximè communicatiua & manifestatiua, etiam intra se, & consequenter potest dicere & habere verbum. Vnde dicitur *Isai. 66. Nunquid ego qui alios parere facio, ipse non pariam, dicit Dominus? Si ego qui generationem cæteris tribuo, sterilis ero, ait Dominus Deus tuus?* Non ergo intellectualitati, quæ est actus purus, repugnat productio Verbi, non ad formandum obiectum in esse intellectuali, & immateriali, sed ad manifestandum & loquendum, & exprimendum id quod intelligit: nec enim qui formauit verbum, & in ipso formato contemplatur, cessat ibi, sed iterum ex perfecta intelligentia & contemplatione potest loqui, & manifestare verbo id quod intelligit, quia intellectus noster de se semper manifestatiuus est & locutiuius. Et sic optime S. Thom. dixit in *hoc art. 1.* quod quicumque intelligit, ex eo quod intelligit, aliquid procedit intra ipsum: quasi dicat, quod ex hoc quod est naturæ intellectualis, debet esse productiuius Verbi siue ex indigentia ad formandum obiectum & reddendum intellectum in actu, quando per seipsum non est sic in actu intellectum, siue ex abundantia & perfectione, quando solum ordinatur locutio, & productio Verbi ad manifestandum & loquendum, non ad formandum obiectum & intelligendum.

Ad id autem quod inquiritur, cur Verbum, & Spiritus Sanctus non producant aliud Verbum, siquidem habent eandem fecunditatem?

Resp. id provenire ex infinita perfectione istarum personarum, & ex ipso modo notionali quem habent, non ex defectu virtutis & perfectionis, ut docet S. Thom. in *quæst. 41. art. 6.* Ex perfectione quidem istarum personarum, quia si Filius haberet aliud Filium, & Spiritus Sanctus similiter, vel essent vna filiatio, vel distincta, & diuersa. Si diuersa, vna non haberet id quod alia; & sic neutra esset infinita in sua linea, & in suo genere filiationis. Vnde curreret hic eadem ratio propter quam non multiplicamus in Deo plures sapientias, plures immensitates, plures naturas, quia si multiplicantur, neutra esset summa, siquidem non multiplicantur ex oppositione, sicut modo Pater & Filius; duæ enim filiationes non essent inter se oppositæ. Si non sunt duæ filiationes, sed vna: ergo & vnus Filius. Ex ipso autem modo notionali repugnat Filio & Spiritui Sancto producere aliud Filium seu Verbum, quia filiatio non potest producere aliud Filium, quia Filius ut Filius non habet aliud Filium, neque generat, sed est genitus, nisi etiam sit Pater. Ut ergo Filius produceret aliud Filium non solum deberet esse Filius, sed etiam Pater, ut scilicet aliud Filium habeat respectu cuius est Pater, quia generat ipsum. Igitur persona & notio Filij ut purè est Filius, & non aliud, quàm Filius, non generat. Si autem dicatur quod etiam est Pater, & non habet nudam filiationem, sed etiam paternitatem, inciditur in aliud

aliud maius inconueniens. Quia illa paternitas quam habet Filius ad generandum alium Filiū, vel est ipsamet paternitas primæ personæ, à qua est genitus, vel diuersa. Si eadē, non potest communicari & conuenire Filio, quia opponitur illi: generauit enim illū, & correlatiuē se habet ad illum: & iterū si est eadem paternitas, generabit eundem filium nō diuersum, aut illū quem habet, nō generauit perfectissimum, & infinitū, quia alius restabat ei generāndus. Si est diuersa paternitatis à paternitate primæ personæ, hoc est impossibile, tū quia ista paternitas & paternitas primæ personæ, nō sūt relationes oppositæ, nec correlatiuæ: ergo neq; diuersæ, quia ubi nō obuiat oppositio, omnia sūt vnū in diuinis, sicut spiratio actiua & paternitas, quia non opponuntur, vnū sunt: tum etiam quia tunc prima paternitas nō esset infinita, quia non generaret totū quod generabile est in Deo: relinqueret enim locū alij paternitati, & alij filio generando, & sic non esset summa & infinita paternitas in ratione patris.

23 Ad secundam Conf. Resp. quod habere esse ab alio communicatum non repugnat ei quod est habere esse a se increatum, quia per has processiones communicatur illū dmet esse quod est in suo principio, non aliquod extra Deum; & sic non communicatur aliquod esse factum, sed illū dmet diuinum quod est in Deo: illud autem non est factum, sed à se, & sic communicatur esse à se, non à se, id est, non communicatum, sed à se, id est, non factum, sed illū dmet non factum communicatur per processionem ad intra, non per creationem ad extra.

Ad id quod dicitur has personas identificari cum essentia, & sic non per processionem habere esse diuinum, si habent per identitatem.

Resp. has personas identificari cum essentia, non quomodocumque, sed vt procedentes, & simul cum ipsa processione, siquidem talem personam esse procedentem est nota característica ipsius qua dignoscitur, & distinguitur ab alia non procedente, vel nō sic procedente, & sine qua processione non potest multiplicari in Deo realis relatio, vt postea dicitur. Vnde repugnat quod relatio Filij identificetur cum essentia, nisi vt procedens à Patre. Talis ergo communicatio, & processio non repugnant cum identificatione, nec est inconueniens filiationem esse identificatam cum essentia, quia ei non opponitur, & hanc essentiam cui identificatur habere per processionem, & communicationem, quia relatio procedentis est, & sic, identificationem habet vt procedens. Vnde in illo signo in quo intelligimus essentiam in Patre, intelligimus in illa essentia identificatam personam Filij, & Spiritus S. distinguo, si in illo signo intelligamus etiam Filium, & Spiritum S. procedens, concedo, si nondum intelligamus procedentes, nego, quia si non intelligimus procedentes, nec vt Filium, & Spiritum S. intelligimus. Si autem iam in illo signo intelligimus Filium identificari vt procedentem, & non absolutē: non ergo contrariantur habere essentiam per identificationem, & communicationem, si id quod identificatur, vt procedens, & communicans identificatur, & non alio modo.

24 Quod verò dicitur productum debere esse posterius suo producente, dependens ab illo, & transiens de actu primo ad secundum; dico has condiciones conuenire productioni imperfectæ & per quam accipitur distinctum & diuersum esse à suo producente. Vbi verò processio est ad habendum, & communicandum illū dmet esse, quod est in suo principio à quo procedit, & cū quo ipse procedens identificatur, non interueniunt ibi conditiones.

Ioan. à S. Thom. in 1. part. D. Th. Tomus alter.

ditiones istæ. Et sic nō fit ibi transitus de actu primo ad actum secundum, sed est idem actus secundus, & actus purus, qui ibi communicatur, sine dependentia aut prioritate durationis vel naturæ, quia est idem esse in ipsa re procedente, & principio à quo procedit. Ipsa autem relatio procedens cū non habeat esse distinctum ab essentia quia ei non opponitur, cum suo autem correlatiuo cui opponitur, & à quo procedit habet simultatem, quia relatiua sunt simul naturæ: idē ex nulla parte fundatur prioritas in istis processionibus, sed solū ordo originis cū totali simultate, imō identitate in essentia; simultate autem in relationibus vt correlatiua sunt.

25 Secundò potest ostendi repugnantia ex parte naturæ diuinæ ad processionem istas, & pluralitatem personarum ex aliquibus conditionibus requisitis ad veram processionem, & pluralitatem personarū, repugnantibus autem Deo, v.g. quia generatio est mutatio, & quæcumque productio, mutatio quædam est, mutabilitas autem repugnat naturæ diuinæ. Item non potest eadem numero natura communicari à Patre alteri supposito, neque illa recipi, seu poni in illo, quia primum si fit per transfusionem naturæ in aliud suppositum, desinet esse in Patre, si per exuberantiam aut extensionem in aliud, ponimus diuisibilitatē, aut partes & augmentum in essentia diuina. Secundum autem repugnat ipsi supposito procedenti, quia sic esset in potentia ad naturam quā reciperet, & distingueretur ab illa, quia nihil recipit. Itē si plures personæ sunt vnus Deus, ille vnus Deus est ratione suæ Deitatis subsistēs, cū sit perfectissima forma, non incompleta, vel inahærens: forma autem subsistens intellectualis est persona; conueniunt ergo Pater & Filius non solū in vna natura, sed in vna persona, erūntque quatuor personæ in Deo, quod est hæreticum.

26 Conf. quia in duobus correlatiuis inuenitur dependentia vnus relatiui à suo correlatiuo, vt à termino; inuenitur etiam diuersitas prædicatorum, quæ exigunt diuersam essentiam: pater enim est Deus ingenuus, & generans, Filius est Deus genitus, & non generans, paternitas est incommunicabilis, essentia communicabilis, ergo Filius, & Pater non possunt esse vnus Deus, nec essentia, & persona vna res. Nec enim possunt esse in Deo istæ relationes, nisi sint aliquid diuinum & ipsa diuina essentia. Diuina autem essentia est communis Patri & Filio: ergo si ipsa relatio est diuina essentia, relatio erit communis sicut essentia, aut si communis non est, & tamen in eo in quo non est communis, est res aliqua; erit res, quæ non est essentia diuina. Et dato quod in ratione relationis oppositæ sint diuersæ relationes, & diuersæ res, tamen istæ relationes debent fundari in aliquo absoluto, & illud absolutum vel est vnum, vel diuersum. Si diuersum, diuidetur essentia diuina; si vnum non potest fundare plures & oppositas relationes, quia diuersitas relationum ex fundamentis sumitur.

Resp. hæc omnia argumenta solui à D. Thom. 4. contra Gent. c. 14. ex eius doctrina non est difficile ad illa respondere.

27 Ad primum ergo de mutatione, dicimus, generationem esse mutationem quando procedit de potentia ad actum, quæ est generatio imperfecta, & prout inuenitur in creaturis. Si autem non transfertur in Deum, sed semotis imperfectionibus, & solū quantum ad rationem processionis viuētis à viuente in similitudinem naturæ, sine vlla potentialitate, sed transeundo de actu secundo ad actum secundum, quia est Deus de Deo, & lumen de lumine, sicut etiam sapientia, & iustitia ponuntur in Deo, non per modum qualitatis

C

tatis & accidentis, sicut sunt in nobis, sed his imperfectionibus remotis.

Ad secundam partem argumenti dicitur quod Pater non communicat Filio partem naturæ, quia diuinitas non habet partes, sed est simplicissima entitas, sed totam suam naturam communicat. Nec tamen definit esse in Patre, quia non communicatur Filio ut supposito, seu personæ extraneæ, sed quæ est idē cū ipsa essentia diuina. Et sic cū essentia diuina ob suam infinitam eminentiā omnes relationes, & personas in se identificet eo modo quo in se sunt, scil. ut procedentes, quia sine processione distinctæ esse non possunt, communicatio naturæ, quam Pater dat Filio procedenti, non tollit à Patre naturam quam communicat Filio, sed in ipso manet. Illa autem natura sic communicata non recipitur in Filio, quia non comparatur ad illum ut forma ad materiam, vel actus ad potentiam, sed ut actus purus continens omnem perfectionem, quarum una est relatio illa realis ut opposita suo correlatiuo, & procedens ab illo, & identificata cum ipsa diuina natura, non illam recipiens, quia si esset receptibilis, non esset actus purus.

Ad 3. partem argumenti dicitur quod essentia diuina secundum se etiam est res subsistens, sed non persona, ut expresse docet S. Th. 4. *contra Gent. c. 14. in solutione 5. rationis*, & nos *infra* dicemus. Quia persona non est quodcumque subsistens in natura intellectuali, sed subsistens communicabiliter respectu vltioris termini. Natura autem diuina communicatur vltiori termino, scil. personis, seu relationibus, & pro ista parte non est persona. Est autem subsistens, quia habet esse per se, nec se habet per modum formæ incompletæ, inhaerentis, aut informantis, vel ab alio in suo esse dependentis, sed in se est plenum, & perfectum esse, & per se existit, non per personas, & hoc sufficit ut dicatur subsistens, scil. per se existens, licet non per modum personæ incommunicabilis. Et sic non sunt in Deo quatuor personæ.

Ad Conf. Resp. quod relatio in Deo non est dependens, neque quantum ad esse, quia suum esse est ipsa substantia Dei, non adueniens illi; neque quantum ad exercitium respiciendi & rationem *Ad*, quia, *Ad*, ut *Ad*, seu relatio, ut respiciens, non habet esse à termino, quia potius illi relatiue opponitur; nec causatur ab eo, quia potius relatiua sunt simul naturæ, non vnum prius altero: si autem vnum dependeret ab altero, esset posterius illo in eo in quo dependet. Habet ergo relatio cum suo termino connexionem, & correspondentiam; non dependentiam, sicut etiam essentia habet connexionem cum suis propriis passionibus, non dependentiam ab ipsis, quia ad dependentiam requiritur connexio cum potentialitate, & imperfectione habendi aliquid ab alio ut indigens illo quoad suum esse, & inferius illo.

Ad aliam partem argumenti, Resp. illam diuersitatem prædicatorum non postulare diuersam essentiam, sed diuersam relationem, quia illa oppositio prædicatorum est relatiua. Et sic Deus generans, & Deus genitus sunt idem Deus essentialiter, non idē personaliter, scil. quantum ad id in quo opponuntur relatiue generans, & genitum, non quantum ad id quod sunt in natura. Et eadem res, quæ est essentia, est comunicabilis quoad naturam, est incommunicabilis quoad relationem propter eminentiam ipsius diuinæ essentiae, quæ cū sit infinita, in se vnica existens omnia genera continet perfectionum seu rationum ei non repugantiū. Et sic continet genus relatiuum, quod de se dicit incommunicabilitatem suo correlatiuo, cui opponitur. Ergo hoc ipso quod

diuina essentia admittit in se relationes, debet sub aliqua consideratione admittere incommunicabilitatem, & sub alia comunicabilitatem, sed hoc facit diuina substantia vnica existens, quia propter suam infinitatem implet munera plurium, quæ apud nos sunt.

Et ad instantiam, quod si relatio, seu persona est essentia, & essentia est communis, persona erit communis. Negatur consequentia, quia mutatur *quid* in *ad aliquid*, reduciturque ad defectum appellationis. Cū enim diuina essentia, licet simplex sit, propter suam tamen eminentiam æquiualeenter sit multa, perinde est ad consequentias procedere à formalitate relatiui ad absolutum, vel e contra, ac si esset plura in re formaliter, quia in consequentiis non attenditur realitas, sed formalitas. Est ergo illa vnica res, quæ est essentia diuina, & communis sub consideratione essentiae, & non communis sub formalitate personæ, licet vnicum simplicissimum sit natura, & persona in esse rei. Et quando dicitur quod illa relatio, etiam in quantū non communis, est res aliqua: Respondeo quod est res ipsa quæ est essentia diuina, non res extra essentiam diuinā, sed res illa, quæ est essentia diuina, non est solum res communis, seu comunicabilis, sed etiam est res quæ est incommunicabilis, id est, relatio, qui a sua infinitate totum hoc complectitur, & genus absolutum, secundum quas perfectiones est communis tribus personis, & genus relatiuum, secundum quod illamet res quæ est essentia, non est communis sed opposita correlatiuo: id enim exigit ex sua essentiali ratione genus relatiuum, quod necessariò est ad alterum sibi oppositum, & à se distinctum. Et tamen omnes illæ relationes sunt vnum in esse & substantia, quia vnica substantia infinita est sufficiens dare esse pluribus rationibus, quas in sua eminentia continet.

Et ad id quod dicitur de fundamento. Resp. quod illæ relationes habent fundamentum absolutum quod est vnum entitatiue, scilicet ipsa diuina essentia secundum operationes intelligendi, & volendi, quæ in re sunt, sed eminenter plura, ita quod ex fecunditate sua fundare possunt plures relationes secundum diuersas processiones & origines. Quod in creaturis esse non potest, quia non potest vna essentia esse infinita eminenter, & diuersa ista fundamenta continere. Et tamen videmus quod vna res materialiter vna, diuersas relationes fundat, ut eadem quantitas rationem æqualis, relationem similis ad aliam quantitatem eiusdem speciei, relationem mensuræ, aut mensurati ad ea quæ per talem quantitatem mensurantur, vel eam mensurant.

Non contrariatur principis luminis naturalis hoc mysterium.

Ex tertio *c. supra posito* obiicitur cōtra hoc mysteriū, quia eius positio destruit principia ipso lumine naturali euidentia, quod stare non potest: sic enim fides conaretur inducere aliquid repugnans: Deus enim qui est author naturæ, & principia naturalia nobis indidit, non destruit illa per mysteriū suæ diuinitatis. Positio autem huius mysterij in primis destruit illud principium quod *duo contradictoria non possunt de eadem re simul verificari*. In hoc autē mysterio verificantur, quia eadē prorsus res simplicissima admittit contradictoria prædicata, v.g. quod sit simul comunicabilis & incommunicabilis res, quæ est essentia, si principium ingeniū, quod est Pater, sit genitum, quod est Filius. Nec sufficienter respondetur per eminentiā infinitā, diuinæ essentiae, quia nulla eminentia, quantumcumque infinita, potest duo

duo contradictoria verificare de eadem re à parte rei, quia ex ipsis terminis repugnant duo contradictoria simul in quacunque natura: id enim quod affirmatio ponit, negatio tollit. Nec sufficit de eadem re sub diuersis formalitatibus, & considerationibus verificare duo contradictoria, quia negatio quæ cadit sub aliquam rem à parte rei, non sub formalitatem, & considerationem nostram cadit, sed absolute; & sic tollit absolute quod affirmatio ponit.

Secundum principium naturali lumine notum, quod destruit hoc mysterium, est illud, *Quacunque sunt eadem uni tertio, sunt eadem inter se*, super quod tota ratio syllogistica artis fundatur, & omnis firmitas illationis, & consequentiæ. Hoc autem principium negatur in hoc mysterio, quia tres personæ sunt vnum & idem in essentia diuina: inter se autem differunt, & vnum non sunt.

Tertium principium est: *Per eandem entitatem qua aliquid constituitur, differt ab aliis*. Hoc principium destruitur in hoc mysterio, quia Paternitas constituitur per essentiam diuinam, cum non habeat aliam realitatem, & entitatem, quam diuinam, & intra Deum sit, & differt realiter à Filiatione, nec tamen differt ab illa per essentiam diuinam, quia in hac conuenit cum Patre. Quid est ergo illa realitas in qua differt ab alia persona, si non est diuina essentia, seu diuina entitas? quia in hac conueniunt, creata verò entitas esse non potest, quia intra Deum nihil creatum dari potest.

Quartum principium lumine naturali notum, est, quod *Vbi est ordo processionis, & originis vnius ab alio, non potest esse simul natura*, licet possit esse simultas in duratione, & tempore: Si enim sunt simul natura, non est maior ratio cur iste procedat ab illo, quam è conuerso; in tempore autem possunt esse simul, quia in productione instantanea potest esse simul causa, & effectus. In hoc autem mysterio Pater, & Filius sunt simul, non solum duratione, sed etiam natura: habent enim eandem naturam, & tamen dicitur Filius procedere à Patre. Si ergo sunt simul natura, cur potius dicemus personam Patris producere personam Filij, quam è contra? An quia iste est Filij, & ille Pater? sed de hoc est difficultas cur potius iste sit Filius, quam Pater, cum vtraque personas simul, & per identitatem sit eadem essentia, & eiusdem virtutis, & potentia; & sic non est maior ratio ex parte naturæ, & virtutis, cur vnus producat, quam quod producat. Diuersa autem relatio, in vno Patris, in altero Filij, non potest intelligi, nisi antecederet ad relationem aliqua diuersitas sit in vna persona, quæ non sit in alia, ut possit illam diuersam relationem fundare. Præter relationes autem nihil diuersum inuenitur in vno, quam in alio, quia præter relationes, quidquid restat est absoluta perfectio, & omne absolutum est vnum & idem in omnibus personis.

Et hinc nascitur quintum principium, quod destruitur, *Quia nulla res producit suum esse*, aut per processionem illud communicat, sed si producit, diuersum esse à se producit. In hoc autem mysterio Pater producit Filium, & Filius per processionem à Patre habet esse, & tamen illud esse quod habet non est esse productum, sed est illudmet esse quod habet Pater, scilicet diuinum, & Filius dicitur genitus, & tamen esse quod habet non est genitum, sed est ipsa diuina essentia. Et realitas illa relationis in ratione relationis, & respectus diuiditur, & multiplicatur, quia sunt tres res, non autem multiplicantur veritates, bonitates, & ipsum esse talium relationum. Quomodo possunt hæc stare sine manifesta repugnantia? Et quomodo potest intelligi quod realitates relationum in ratione rei, seu in ratione entis multiplicentur, quia sunt tres

res, & non ratione talis entis, scilicet substantiæ, vel accidentis, boni, & veri, ita quod sint tres veritates aut bonitates? siquidem multiplicato gradu superiori multiplicantur differentiæ inferiores, & proprietates gradus superioris, sicut sint proprietates transcendentales respectu entis, ut verum & bonum.

Sextum principium est, quod *Relatio non potest intelligi ante suum fundamentum*. Hoc principium est lumine naturali notum, quia relatio à fundamento habet esse: si ergo esset ante suum fundamentum, esset antequam esset. Hoc principium destruitur in hoc mysterio. Nam Paternitas est relatio fundata in generatione actiua: ergo non est talis relatio ante argumentum. Et rursus relatio Patris præcedit generationem, quia persona Patris constituitur per relationem, non per absolutum, constituitur enim per illud per quod opponitur Filio: non opponitur autem Filio nisi secundum relationem Patris: est ergo illa persona Patris ante generationem, & sic est relatio ante suum fundamentum. Hæc ferè sunt principia, quæ ex lumine naturæ nota, difficultatem faciunt in hoc mysterio. Ex eorum tamen solutione, clarior apparebit defensio, quam Theologia facit circa mysterium ita sublime & eleuatum.

Ad primum Resp. Illud principium naturale quod duo contradictoria non possunt verificari de eodem, manere illæsum in hoc mysterio: quia *ly de eodem* intelligitur formalissimè in quantum idem. Nunc autem res illas quæ est essentia diuina habens in se pluriū rerum, seu generum perfectiones, licet vna & eadem sit, non tamè est communicabilis, & incommunicabilis secundum idem: si enim secundum rationem naturæ, & perfectionis absolutæ esset communicabilis, & incommunicabilis, contradictio esset; sed quod sit communicabilis secundum rationem naturæ, & incommunicabilis secundum rationem personæ, & relationis, nulla contradictio est. Et ita dicit D. Tho. inf. q. 39. a. 1. ad 2. quod *In quantum essentia, & persona differunt in diuinis secundum intelligentiam rationem, sequitur quod aliquid possit affirmari de vno, quod negari de altero*. Contradictio ergo est affirmatio & negatio eiusdem de eodem in quantum idem, seu secundum idem. Vbi autem possunt diuersæ formalitates considerari, & secundum rationem distingui, licet in re sint, vnū, possunt contradictoria prædicata vbi verificari: sicut in eadem specie, gradus specificus seu differentialis, & gradus genericus in re sunt vna entitas, & solum virtualiter distinguuntur, actualiter autem per intellectum, & tamen de illa entitate, secundum genericam rationem, dicitur aliquid, quod non secundum gradum specificum, vel è contra, sicut homo, in quantum rationalis, discurret, & intelligit, non in quantum animal. Sic ergo eadem entitas essentia diuinæ ut relatiua non communicaretur, ut absoluta communicatur, neque ibi est contradictio, quia formalissimè loquendo, non sunt eiusdem de eodem, quia non secundum idem. An verò idem possit dici de attributis absolutis, quod ratione huius virtualis distinctionis dicatur aliquid de vno, & non de altero, dico quod in sensu formali potest dici, non in sensu idetico, sicut dicimus quod Deus per intellectum generat, non per voluntatem, per misericordiam non punit, sed per iustitiā. Idetice tamen per vtramque idem facit.

Ad replicam primam contra hoc dicitur, quod nulla eminentia facere potest quod contradictoria verificentur, si semper fiant sub eadem ratione, ita quod formaliter sint eiusdem de eodem. Et ita si absolute, & in sensu etiam idetico dicatur res, quæ est essentia, est communicabilis, res quæ est essentia,

28 Quæst. XXVII. De sacro Trin. myst.

non est communicabilis, contradictoria sunt, & hæc secunda est falsa, quia negatio illa facit sensum, quod nullo modo essentia est communicabilis, quod est falsum: aliquo enim modo, scilicet ut absoluta communicabilis est. Cæterum eminentia illa diuina hoc præstat, ut licet sit vnica res simplicissima, virtualiter tamen sit multiplex, & plurium generum, seu perfectionum munus gerat. Et ita sub distinctis formalitatibus concipiendo rem illam, possit aliquid affirmari, & negari sine contradictione, quod non esset, si illa entitas talem eminentiam, & virtualement multiplicitatem non haberet, quia sic non sunt eiusdem de eodem formaliter.

Ad aliam verò replicam dicitur; quod illæ formalitates sub quibus fit affirmatio & negatio, etiã in ipsa re inueniuntur, licet non actualiter distinctæ in re, sed virtualiter, & intellectu actualiter. Sed tamen negatio quæ fertur in rem, non est necesse quod feratur secundum omnem rationem repertam in tali re, sed aliquando potest ferri in totam rem absolute, & negando totum sub omni respectu, aliquando sub respectu alicuius formalitatis tantum, & non alterius, & sub præcisione, quia cum affirmatio, & negatio formantur in intellectu, ubi illæ formalitates distinguuntur formaliter, quæ in re sunt vnum, potest sub diuersa præcisione & appellatione moderari istam negationem, & in re correspondere illi, non tota res absolute, sed illa res, prout exercet vnã formalitatem, & munus, non ut exercet aliud, licet res vna sit entitatiuè quæ omnia illa munera exercet. Vnde potest ferri in ipsam rem negatio, non tamen absolute, sed sub aliqua consideratione & respectu, prout fundant virtualement distinctionem vnius rationis ab alia. Et sic non sunt affirmatio, & negatio eiusdem de eodem formaliter, & secundum idem, licet in re entitatiuè totum sit idem, sed virtualiter, & fundamentaliter multiplex propter eminentiam, & non sub omni ratione, quæ est in re, fertur negatio.

Ad secundum, Resp. ex D. Thom. inf. q. 28. art. 3. ad 1. quod illud principium, *Quacumque sunt eadem vni tertio*, &c. intelligitur à Philos. *Physic. textu 21.* de his, quæ sunt eadem vni tertio, re, & ratione, non autem de his quæ differunt ratione. Idem principium explicat aliter S. Doctor in 1. distinct. 33. q. art. 1. ad 2. quod intelligitur, *ea quæ sunt eadem vni tertio, sunt idem inter se*, eo modo, quo sunt eadem illi tertio, & non aliter, nec alio modo. Et sic tres personæ sunt idem vni tertio, scilicet substantiæ diuinæ, in ratione absolute, & inter se etiam sunt vnum in eadem ratione absolute & substantiali, non tamen sunt inter se vnum relatiuè, quia nec in illo tertio sunt vnum relatiuè, sed solum absolute. Saluat ergo mysterium hoc illud principium naturale, quod *quæ sunt eadem vni tertio, sunt eadem inter se*, videlicet eo modo, quo sunt eadem vni tertio, alio autem modo non est necesse quod sint eadem inter se, sed eo solum, quo in illo tertio vnum sunt.

Alij explicant illud principium sic: *Quæ sunt eadem vni tertio, sunt eadem inter se*, si sint eadem vni tertio adæquatè, & simpliciter, non verò si sint eadem vni tertio inadæquatè. Relationes autem diuinæ inadæquatè se habent respectu essentia, quia quælibet illarum ita afficit essentiam, quod alteri locum relinquit; & sic omnes tres personæ adæquant illam, non vna tantum. Quæ explicatio ferè coincidit cum priori explicatione D. Thom.

Alij dicunt illud principium sic esse intelligendum, quod, *quæ sunt eadem vni tertio, sunt eadem inter se*, nisi obstat aliqua oppositio inter illa ex-

trema, ut sint vnum inter se magis, quàm illa vnitas, qua sunt idem in vno tertio. Denique P. Suarez lib. 4. de Trinit. cap. 3. negat illud principium esse verum, nisi in rebus creatis propter suam limitationem, falsum tamen si extendatur ad diuinam, propter suam infinitatem, in qua locum habet & perfectio absoluta, in qua omnia sunt vnum, & relatiua inter quæ est oppositio. Quod etiam docet P. Vasq. 2. tomo in 1. p. dist. 123. c. 2. & alij, qui docent illud principium tenere solum, ubi est limitata virtus, non ubi est eminentia infinita completens genus absolutum cum summa vnitate, & relatiuum cum oppositione correlatiua. Ex quibus omnibus constat quomodo illud naturale principium in hoc mysterio non destruat, sed maneat illæsum, intelligendo illud in sua veritate, & legitimo sensu.

Solum aduertendum est, quod in illa prima explicatione D. Thom. quando dicit ex Philos. quod ea quæ sunt idem vni tertio, sunt idem inter se, si sint idem re, & ratione, videtur pati instantiam, tum quia aliàs syllogismi solum possent fieri syllogismi in terminis synonymis, & in his, quæ sunt vnum, taliter quod nec re, nec ratione differunt, quod est contra communem vsum syllogizandi: sunt enim syllogismi etiam in terminis, qui ratione distinguuntur, ut si dicas;

Omnis homo est animal,

Omne animal est sensibile,

Ergo omnis homo est sensibilis.

Et tamen ly *homo* & ly *animal* ratione differunt: ergo non est necesse ut aliqua sint idem inter se quod sint idem in vno tertio, re, & ratione: tum etiam quia attributa diuina differunt ratione, ab essentia, & inter se & tamen sunt idem in essentia & inter se: non ergo requiritur, ut sint idem inter se, quod re, & relatione sint idem in vno tertio: Et ipse D. Thom. in 2. contra Gentil. cap. 9. colligit quod potentia & actio in Deo sunt idem, quia, *Quæ sunt eadem vni tertio, sunt idem inter se*, & tamen ratione differunt ab essentia, & non sunt idem cum illa, re, & ratione.

Resp. concedendo omnes istas instantias, sed dicimus non esse contra D. Thom. quia quando dicit quod quæcumque vni, & eidem sunt eadem, sibi inuicem sunt eadem in his quæ sunt idem, re, & ratione, ly *re*, & *ratione* non est construendum cum ly *sunt*, sed cum illo tertio in quo sunt idem; ita quod quando illud tertium est vnum & idem secundum rem, & secundum rationem, id est, secundum formalitatem, non autem est virtualiter multiplex, tunc ex identitate cum tali tertio, sequitur identitas eorum inter se: si autem identificentur cum aliquo habente diuersas formalitates, & rationes, seu respectus, & vnum identificatur sub vno respectu & formalitate, aliud sub alia, non sequitur ex tali identificatione cum illo tertio, identitas eorum inter se; quin potius ex hoc contingunt plures paralogismi, & defectus variationis appellationis, quia ex identitate sua aliquo respectu, & non simpliciter, & absolute inferitur identitas inter se simpliciter, sicut non valet similitudo est idem cum qualitate: qualitas est intensa: ergo similitudo est intensa. Actio, & passio sunt idem cum motu: actio crucifigenrium Christum fuit pessima: ergo passio Christi fuit pessima. Et similiter non valet; Pater & Filius sunt idem in essentia: ergo idem inter se, quia essentia est virtualiter multiplex, & sub ratione absoluta sunt idem, sub respectiua opponuntur: & sic si relationes sunt idem cum absoluta essentia, sunt idem inter se secundum entitatem absolutam, in qua non differunt

ant inter se, non secundum respectum correlationem. Oportet ergo quod ea quae sunt eadem uni tertio, identificetur cum eo simpliciter, & sub eadem ratione, non sub diuersis, ut identificentur inter se; non autem est necesse quod ita identificentur, quod nec per intellectum differant, & sint omnino synonyma: hoc enim nec somniauit D. Thom. nec requiri ad verificationem illius principij constat ex instantiis allatis. Exemplum autem quod adducit D. Thom. de his quae sunt eadem uni tertio, re, & ratione, sicut tunica, & indumentum, quod fuit exemplum allatum à Philosoph. non est adductum ad hoc ut solum ea quae sunt idem ratione, sicut duo synonyma, quae solum ratione ratiocinate distinguuntur, sunt idem inter se, sed ad hoc quod ea quae sunt eadem, re, & ratione uni tertio, id est, in vno tertio, quod est vnum secundum rem, & secundum rationem, id est, secundum eandem formalitatem, & non secundum virtutalem multipliciter, quam multipliciter non habent tunica, & indumentum, & ad hoc adducuntur à Philosopho (cuius enim est exemplum 3. *Physic. text. 21.* - & à D. Thom. licet inter se sint synonyma, & sola ratione ratiocinante distinguantur, & ad hoc non adducuntur à D. Thom.

33 Ad tertium Respon. illud principium illatum, etiam manere in hoc mysterio. Paternitas enim constituitur per essentiam diuinam, non sub conceptu absoluto, sed relatiuo, & per eandem sub conceptu etiam relatiuo differt à Filiatione. Per essentiam autem diuinam sub conceptu absoluto conuenit cum Filio, nec distinguitur ab illo, sed tamen in ratione paternitatis, & personae non constituitur per essentiam diuinam sub illo conceptu absoluto, sed sub illo relatiuo: in ratione autem diuini esse, & substantiae per essentiam diuinam ut absolutam constituitur, sed in hac non differt à Filio. Et cum dicitur, quid est illa realitas in qua differt à Filio, creata, an diuina? Deo esse diuinam non sub conceptu absoluto, sed relatiuo: in essentia enim non conueniunt Pater, & Filius sub illo relatiuo conceptu, sed sub absoluto sub relatiuo autem opponuntur, & sic distinguuntur. Diuina autem essentia propter suam infinitam eminentiam vtrumque genus complectitur, & absolutum, & relatiuum.

34 Ad quartum. Respon. principium illud intelligi de origine, & processione diuersae naturae, aut entitatis absolutae, ab ea quae est in suo principio. Quando autem id quod procedit, & principium à quo procedit solum sunt diuersae relationes habentes eandem naturam, illud principium non tenet, sed potest inter illa duo dari similitudo, cum ordine originis, eo quod relatiua, in quantum relatiua, sunt simul natura, non solum relatiua quae fundantur in vnitatem, & conuenientiam, sicut similitudo, & aequalitas, sed etiam quae fundantur in origine, & actione, sicut paternitas, & filiatio: haec enim relatiua etiam in creatis in quantum talia, sunt simul natura, & tamen fundantur in origine, quia Filius procedit à Patre. Et tales relationes si essent personae subsistentes, procederet vna ab alia, & tamen in ratione relatiuorum, & correlationum essent simul naturae. Et cum instatur quod si sunt simul naturae, non est maior ratio cur ista procedat ab illa, quam è contra, dico quod est maior ratio ratione fundamenti talium relationum, quia licet in quantum relatiua, sint simul natura, quia tamen sunt relationes fundatae in origine, & processione vnius ab alio, necesse est quod vna se habeat ut principium, & alia ut procedens, vna originans, & alia originata, quia ex se, & ex suo

Ioan. à S. Th. in 1. part. D. Th. Tomus alter.

fundamento tales relationes sunt. Et quando dicitur quod haec est difficultas cur iste potius sit Filius, quam Pater, cum vtraque relatio sit identificata in essentia, & eiusdem virtutis, & potentiae; Respondeo quod vtraque est identificata, non quomodocumque, sed cum processione, & origine, quod est fundamentum suum, nec identificatur relatio, nisi ut fundata. Ipsa autem origo, & processio petit ut vna identificetur tanquam principium, & alia ut principiata, & illa sit paternitas, haec filiatio. Et sic habent eandem virtutem, & potentiam absolutam, sed non eandem notionaliter, seu quoad modificationem relatiuam, & personalem, quae omnino requiritur ut vna sit procedens, seu ab alio, & alia sit principium, & à quo aliud. In Patre ergo, seu in relatione, quae est principium, inuenitur virtus, ut foecunda ad principiandum ex se aliam personam. In Filio autem inuenitur virtus eadem, ut ratio nascendi, & exprimendi suum principium; & sic est eadem virtus sub diuersa modificatione, & notione. Et sic intelligitur diuersitas in relatione secundum se formaliter, antecedenter autem ad relationes, intelligitur ista diuersitas fundamentaliter in ipsis fundamentis relationum, quae sunt origines actiuae, vel passivae, non essentia ipsa praecise sub conceptu absoluto: sic enim est communis omnibus personis, non speciale fundamentum cuiuslibet, neque sub conceptu formaliter, & explicitè relatiuo, sed sub conceptu fundandi relationes, id est sub conceptu originum: sic enim sicut est fundamentaliter relatio, est fundamentaliter oppositio, & distinctio, quia distinctio per relationes est.

Ad quintum Respon. illud principium, *Nulla res producit summet esse*, certissimum manere, nec infringi per hoc mysterium: Pater enim non producit suum esse absolutum, quia hoc est improducibile, licet sit communicabile alteri personae; neque producit suum esse relatiuum, id est, suam relationem, tum quia non producit paternitatem, quae est relatio sua, tum quia esse relationum, seu personarum probabilius est quod est vnum, nempe ipsum esse absolutum, quo essentia existit ut ens à se, & actus purus. Ceterum hoc esse absolutum per processionem, communicabile est personae procedenti: nam persona procedens identificatur illi esse, non quomodocumque, sed ut persona, quae est ab alio: oportet ergo quod illudmet esse sibi communicetur, cui per processionem, & sub ratione procedentis identificatur; & sic dicitur Deus genitus in concreto ratione suppositi generati, licet essentia non dicatur genita, nec ipsum esse absolutum, quia alias distingueretur diuinitas in ipsa ratione naturae, seu diuinitatis à suo generante, cum tamen natura nulli intra Deum opponatur, & sic à nullo distinguitur, sed est omnibus communis.

Ad id verò quod dicitur realitates relationum multiplicari, non multiplicatis perfectionibus veritatis, bonitatis, & existentiae, &c. Respon. hoc non repugnare, ut *infra* latius dicemus, quia omnes perfectiones absolutas siue transcendentales sunt, siue non, multiplicari repugnat, sicut ipsamet essentiam quae absoluta est, licet ipsis relationibus conueniant ipsae perfectiones, sed indiuisè, & consubstantialiter, ut vnum. Quod verò dicitur non posse multiplicari gradum superiorem, v. g. quod sint tres res, & non inferiores differentias, & proprietates: Dico multiplicari differentias inferiores, aut proprietates, quae etiam ratione ipsius oppositionis relatiuae conueniunt; & sic multiplicantur tres res, seu tres realitates, aut entitates, & multiplicatur ali-

C 3 . quis

30 Quæst. XXVII. De sacro Trin. myst.

quis gradus inferior ad rationem entis, scil. conceptus relationis: hic enim inferior est ad conceptum entis, & rei, & sic aliquid inferius ad ens multiplicatur. Et relationes ipsæ per diuersas species, seu quasi species multiplicantur, vt quod vna sit paternitas, alia Filiatio, alia spiratio, & similiter multiplicantur in diuiduo, scil. quod sit ista paternitas, ista filiatio, &c. Quare multiplicationem ponimus non solum in gradu superiori entis, vel rei, sed etiam in inferiori, sed in illo dumtaxat qui oppositionem relatiuam potest exprimere. Cur autem non possit multiplicari gradus inferior sub ratione substantiæ, & accidentis? Ratio est in promptu, quia istæ rationes, seu conceptus non exprimunt oppositionem relatiuam, seu rationem *Ad*, sed id quod tenet se ex parte *In*, seu ex parte ipsius esse, & essentiae vt absolute existit. Et quidem ratio accidentis non potest hic multiplicari, quia in Deo accidens locum non habet. Ratio autem substantiæ manifestè dicitur ad se, & non exprimit oppositionem, & *Ad*: subordinatur enim enti vt existens per se, & secundum id quod actualitatis, & perfectionis est, & hoc non multiplicatur. Et similiter proprietates transcendentes, quæ sequuntur ad ens sub ratione perfectionis alicuius, vt bonitas, quæ sequitur ad plenitudinem, & perfectionem essendi, & veritas seu cognoscibilitas, quæ sequitur ad immaterialitatem rei, & connexionem prædicatorum, hæc non multiplicantur, quia non exprimunt oppositionem relatiuam, nec illam consequuntur.

36 Ad sextum dicitur latius circa qu. 40. tractando constitutio personarum, & specialiter personæ Patris. Dicimus ergo quod illa propositio, *Relatio non potest intelligi ante suum fundamentum*, etiam in hoc mysterio verificatur, sed in sensu omnino formali, scil. relatio, vt respiciens, seu vt exercens rationem *Ad*, non secundum alias considerationes, v.g. relatio vt subsistens, seu per se existens: hoc enim non est de conceptu relationis secundum se, nec ad hoc vt relatio sit subsistens indiget fundamento, sed identificatione cum natura diuina. Fundamentum enim exigitur in relatione propter duo. Primum, & per se propter ipsum exercitium respiciendi, & tendendi ad aliud: ad hoc enim necessarium est fundamentum quo aliquod subiectum proportionetur, & coordinetur tali, vel tali modo erga alterum. Secundum, quando relatio accidens est, quia habet in genere accidentis esse debilissimum, & imperfectissimum, vnde indiget non solum subiecto, sed etiam fundamento à quo habeat esse, eo quod non habet illud solum per ordinem ad subiectum, vt reliqua accidentia absoluta, sed etiam in ordine ad terminum, & sic indiget fundamento aliquo præter subiectum, de quo videri potest S. Thom. 4. contra Gentil. c. 14. ad 9. rationem. Sic ergo in diuinis relatio Patris quoad exercitium relationis, quæ respicit, & tangit terminum suum, qui est Filius, non intelligitur ante suum fundamentum, quod est generatio actiua: quia enim generat, respicit, & sic relatio Patris, vt respiciens, seu in exercitio respiciendi non est ante suum fundamentum. Relatio autem illa non vt respiciens, & tangens terminum, sed vt subsistens, & afficiens subiectum, non est inconueniens quod antecedit fundamentum, quod est generatio, quia ab subsistendum non indiget fundamento, sed ad respiciendum: non enim subsistit, quia generat, sed generat, quia subsistit, & est persona Patris. Licet autem relatio nihil aliud sit quam respectus ad terminum, tamen quia etiam afficit subiectum, & in creatis habet inesse, in diuinis subsistere, non so-

lùm considerari potest vt respiciens, sed etiam vt in se, & ex parte subiecti. De quo latius cit. loco dicetur sumus.

Sophismata hereticorum futilia.

Plura obiecerunt Valentinus, Gentilis, & Mini- 37
stri Transyluani, quæ latè affert, & refutat Bellarminus *tomo 1. lib. 2. de Christo, à c. 7. & deinceps*. Ferè autem tota vis eorum ex discussione superiorum liquet. Nam obiciunt hoc mysterium destruere principia naturalia, vt *Quicumque sunt eadem vni tertio, sunt eadem inter se Omne est, vel non est*: nam Paternitas est essentia, & non est essentia, quia non est filiatio, cum filiatio sit essentia. Iam totum hoc solutum est *suprà*. Paternitas est essentia, seu Deus sub conceptu absoluto, & relatio paternitatis, non sub conceptu sibi opposito, & correlatiuo, qui est Filius, & Spiritus S. & sic falsa est negatiua quod non sit essentia absolute loquendo, sicut absolute negatur ibi, licet non sit filiatio, quæ est essentia sub conceptu sibi opposito, & correlatiuo. Non est autem inconueniens, quod eadem essentia, & substantia propter suam eminentiam, & infinitatem contineat genus relatiuum, & præbeat suum esse pluribus relationibus oppositis, quia genus relationis, necessario exigit correlatiuum, vt alterum & distinctum; & sic idem est in essentia diuina inueniri genus relatiuum, & inueniri correlatiuum, atque adeò oppositionem, & distinctionem cum unitate omnimoda in absoluto. Esse autem admittendum hoc genus relatiuum in Deo, constat, quia Scriptura docet in Deo esse Patrem, & Filium, quæ sunt reatiua, & quia in hoc genere admittendo nulla imperfectione inuenitur, dummodo relatio illa non accidens.

38 Secundum, obiciunt ad idem, quia aliquid conuenit vti personæ quod non alteri: vna enim generat, alia non; vna generatur vel procedit, alia non: non ergo possunt esse vna, & eadem substantia. Item intellectio, & volitio sunt idem prorsus in Deo: ergo procedentes per intellectum, & voluntatem etiam idem sunt, & non diuersæ personæ. Item quælibet persona est infinita in ratione, & linea personæ: ergo est vna: sicut enim ex infinitate essentiae sequitur unitas, quia si diuideretur, neutra pars diuisa esset infinita, quia vna haberet aliquid, quod non alia, ita ex infinitate personæ debet sequi unitas illius, alias vna haberet aliquid quod non alia, & sic neutra esset infinita. Item vel persona in diuinis dicit perfectionem, vel non. Si non, cur est in Deo: erit enim meliori conditionis humana persona, quæ perfectionem dicit, quam diuina. Si autem dicit perfectionem: ergo aliqua perfectio est in vna persona, quæ non in alia: ergo multiplicantur perfectiones in diuinis.

Resp. ad primum Sophisma distinguendo maiorem: Aliquid conuenit vni personæ, quod non alteri, aliquid notiale, & relatiuum sub respectu, & ratione relatiui, concedo; aliquid absolutum, & perfectum sub conceptu perfectionis, & essentiae, nego: Ergo non sunt vna substantia, nego consequentiam, eadem enim substantia ob sui eminentiam, & habet rationem absolutam vnā, & relatiuam oppositam, & in ratione oppositi multiplicatam.

Ad secundum, conceditur quod procedentes per volitionem, & intellectionem sunt vnum in essentia, & substantia, in qua etiam intelligere, & velle vnum sunt, non autem relatiue, & notionaliter sunt vnum, scilicet in quantum opposita relatiue.

Ad

Ad tertium quamlibet personam esse infinitam: & sic non multiplicare perfectionem personæ, sed solum oppositionem relatiuam. Et quælibet persona est infinita in esse personæ, & sic multiplicat infinitatem, sicut quælibet persona est Deus, non tamen multiplicat deitatem. Sicut ergo ex infinitate essentiæ sequitur unitas absoluta, ita ex infinitate personæ sequitur unitas quoad perfectionem personæ, sed remanet oppositio in respectu, & oppositione, quod non habet essentia secundum se; & ita in ratione oppositi respectus multiplicatur, non multiplicata infinitate, & perfectione personæ in ratione perfectionis, quia relatio ex parte perfectionis, & *In*, non opponitur, nec diuiditur ab alia relatione, solum ut dicit *Ad*, & sub hac ratione multiplicatur illa realitas ut relatiua, non perfectio eius sub conceptu perfectionis, in qua oppositio non exercetur, sed sub conceptu respectus in quo est oppositio.

Ad quartum dicemus *infra* tractando an relationes dicant perfectionem relatiuam in suo conceptu, eamque multiplicent, sicut multiplicantur res. Nunc dicimus relationem dicere perfectionem, sed ex parte *In*, ex parte vero *Ad*, non explicat eam, licet ibi eam habeat, quia in ordine ad alterum non explicat quid est, sed contra quid est, & pure respicit, seu tendit ad aliud, non perfectionem exprimit, licet eam habeat in se. Relationes autem non multiplicantur in Deo penes rationem *In*, secundum quam non opponuntur, sed penes rationem *Ad*, licet illud *Ad*, reale sit, sed ut tangit alterum, solum est oppositum, non perfectum, & sic habent perfectionem: sed non distinctam, & diuersam, quia nec oppositam in quantum perfectio est. De quo latius *infra* dicetur.

39 Tertium obiciunt: Qui non generat, nec gignitur, nec procedit, non est verus Deus, essentia diuina, nec gignit, nec gignitur, nec procedit: ergo illud quod dicitur vnus Deus in essentia non est verus Deus: Pater autem, & Filius, & Spiritus S. sunt verus Deus: ergo non sunt vnus Deus in essentia. Minor primi syllogismi constat ex communi modo loquendi Theologorum, sumpto ex Concilio Lateranensi c. 2. quod essentia nec generat, nec generatur, aliàs essentia duæ essentia. Maior prob. quia nullus est Deus præter Patrem, & Filium, & Spiritum S. sed Pater gignit, Filius gignitur, Spiritus S. procedit: ergo qui non gignit, nec gignitur, nec procedit, non est verus Deus. Item quia essentia diuina, Pater, Filius, & Spiritus S. sunt quatuor nomina non synonyma: ergo illis correspondent quatuor res distinctæ: essentia enim est res, & non est Pater, quia non gignit, nec Filius, quia non gignitur, nec Spiritus S. quia non procedit, sunt ergo quatuor res, & sic est quaternitas non Trinitas. Et præsertim cum essentia se habeat ut fons, & radix personarum, seu relationum, & fundamentum earum, distinguitur autem radix, & fons ab eo quod emanat. Item Ingenitum, & genitum differunt, sicut generabile, & ingenerabile, quæ plusquam genere differunt, & sic Pater, & Filius different plusquam genere, quomodo ergo sunt vnus Deus? præsertim quia si sunt vnus Deus, ille Deus erit genitus in Filio, & non genitus in Patre, quæ est contradictio, genitum, & non genitum. Et ipsum esse genitum, & ingenitum, vel est accedens, vel substantia. Si substantia, differunt substantialiter, & sic non sunt vna substantia. Si accedens, hoc repugnat Deo: esset enim compositus ex accidenti, & substantia.

Respon. ad primum sophisma, minorem esse certam, quod essentia non generat, nec generatur, ut

constat ex Concilio Lateranensi c. 2. *Damnamus*, de summa Trinitate. licet Pater qui generat sit essentia, & Filius qui gignitur sit essentia, nec tamen generat essentia, sed res illa quæ est essentia; incidit enim hic fallacia accidentis, seu defectus appellationis, quia cum essentia realiter, & identice complectatur genus absolutum, & relatiuum, formaliter autem nomine essentiæ non explicetur nisi absolutum, sit transitus à *quid* in *ad aliquid*, & sub diuersis formalitatibus proceditur, & sic essentia sub conceptu essentiæ, id est, ut exprimit rationem absolutam non generat, nec generatur, sed relatio, vel potius relatiuum in concreto generat, & generatur, quæ tamen est essentia identice, seu est res, quæ est essentia, non tamen sub conceptu essentiæ, quæ exprimit quid absolutum, sed sub conceptu relatiuo generat, vel generatur. Et in hoc paralogizant ista sophismata, quia transitur à conceptu essentiæ sub appellatione, & formalitate absoluti ad conceptum relatiui, vel ad id quod solum identice est essentia. Quare ad maiorem argumenti respondendum est, quod ille qui non gignit, nec gignitur, nec procedit non est verus Deus, si ly *verus Deus*, & ly *ille*, sumatur personaliter, verum est, si sumatur assentialiter, falsum est: persona enim in Deo quæ non gignit, nec gignitur, nec procedit est verus Deus, scilicet essentia diuina sub conceptu essentiæ, quæ tamen identice est res illa quæ gignit, & gignitur, & procedit, quia illa essentia est Pater, & Filius, & Spiritus S. Ad probationem autem dicitur quod nullus est Deus præter Patrem, & Filium, & Spiritum S. quia etiam vnus Deus est Pater, & Filius, & Spiritus S. & sic non est præter eos. Cum autem inferatur: Ergo qui non gignit, nec gignitur, nec procedit, non est verus Deus, distinguo consequens, qui non gignit, nec gignitur, nec procedit, neque formaliter, neque identice, & ita est aliquid in præter gignentem, & genitum, & procedentem, concedo, qui non gignit, nec gignitur formaliter, bene tamen identice non est Deus nego: essentia enim sub conceptu essentiæ formaliter non gignit, est tamen identice res quæ gignit, & res quæ gignitur, id est, ipsæ personæ, quia essentia identice est ipsa relatio; & ita identice est res quæ gignit, & gignitur, licet non formaliter sub conceptu, & expressione essentiæ.

Ad secundum sophisma. Respon. illa quatuor nomina non esse synonyma, quia non significant idem sub eodem conceptu, & consideratione, licet in re vnum ex illis, nempe essentia, sit idem, & vnum, cum aliis tribus. Et sic, ut dicitur in Concilio Lateranensi c. *Damnamus*, de summa Trinitate. *In Deo solum est Trinitas non quaternitas, quia quælibet trium personarum est illa res, videlicet substantia, essentia, seu natura diuina.* Nam etiam sapientia, & iustitia, intellectus, & voluntas non sunt nomina synonyma in Deo, & tamen significant id quod in re, & identice est vnum, significant tamen diuersos conceptus, & rationes formales. Vnde licet illa quatuor omnia significant realitatem veram, non tamen omnia significant realitatem distinctam, & oppositam aliis: tria enim priora nomina Pater, & Filius, & Spiritus S. quia relatiua sunt, & inter se opposita, significant tres res distinctas relatiue; essentia vero quia non significet relationem oppositam aliis, sed perfectionem absolutam, significat quidem rem, sed non oppositam personis, & ita identificatam cum illis; licet autem essentia non generet, & Pater generet, hoc non arguit distinctionem; quia non inducit oppositionem rerum, sed diuersam explicationem formalitatum, & conceptuum: res enim quæ est essentia generat, & ge-

32 Quæst. XXVII. De sacro Trin. myst.

neratur, quia relationes identicæ sunt res, quæ est essentia. Sed tamen non dicendo res, quæ est essentia, sed tantum essentia, explicat formalitatem conceptus essentia, ut distinguitur à conceptu relationum, & sic sub hac præcisione neque generat, neque generatur, ut in Conc. Later. loco cit. habetur. Ut autem distingueretur essentia non generans à Patre generante, necesse erat, quod non solum formaliter, id est, sub conceptu essentia, sed nec identicè generaret, hoc autem secundum est falsum. Quod verò dicitur essentiam esse radicem, & fontem personarum, non intelligitur hoc per veram emanationem, sicut res procedens fluit à suo principio, sed per quandam similitudinem, sicut essentia dicitur radix attributorum, & ens suarum passionum, quæ tamen non distinguuntur, sed idendificantur cum illo.

42 Ad tertium sophisma dicitur quod genitum, & ingentum per communicationem in eadem natura consubstantialiter non differunt genere, nec specie, nec numero in substantia, sed solum relatione notionali in personis. Quæ autem se habent ut generabile, & ingenerabile in diuersis naturis, differunt genere, ut cælum, & elementa. Et cum dicitur quod si sunt vnus Deus, ille Deus erit genitus, & non genitus. Respon. quod illa negatiua non est concedenda, Deus non est genitus, quia ly *non* facit sensum absolutum, nullo modo est genitus, in nullo supposito est genitus, & ista est falsa. Sed si sumatur in vi affirmationis, pro eo quod est ingentus, sic idem Deus est genitus, & ingentus respectu diuersarum personarum cum quibus identificatur Deus, quia in Patre est ingentus, seu generans, in Filio est genitus, & procedens. Quod vero additur, an esse genitum, & ingentum sit accidens, vel substantia, dico formaliter neutrum explicare, sed solum relationem sub conceptu correlationis, & oppositionis ad alterum, qui conceptus, prout sic, non explicat rationem *In*, neque substantiam aut accidens, quod pertinet ad subiectum, ad id præcisè quod ad terminum: identicè autem includit substantiam, & non accidens, quia identificatur substantia, quæ est essentia Dei, in quo nullum accidens datur.

43 Quartò, obijciunt, Generare ex perfectio viuentis, hæc non conuenit Filio: ergo Filius non est æqualis Patri in perfectione: ergo neque in natura, & sic non sunt plures personæ eiusdem naturæ. Item quando Filius genitus est, vel erat, vel non erat. Si erat, ut quid generabatur? Si non erat: ergo ex non existente genitus est: ergo processit de potentia ad actum, & non erat actu, quando à Patre generabatur; & sic non est Deus verus, quia aliquando non erat. Et modò vel gignitur actu, vel iam est genitus, & aliquando non fuit genitus, & gignebatur, vel semper fuit genitus. Si modo etiam gignitur: ergo modò nondum habet vltimum terminum suæ perfectionis. Si iam est genitus, & non amplius gignitur, transit eius generatio, & sic non est æterna, quia desit, & si aliquando non fuit genitus, aliquando non fuit perfectus in esse. Si semper fuit genitus, quando ergo fuit generatio? & quomodo fuit in termino sine via? Item Filius debet esse similis gignenti, verbum autem est similem obiecto quod exprimit, non intellectui à quo emanat: ergo non est Filius, quia Filius debet esse similis gignenti. Quod si ratione identitatis est similis Patri, quia est idem cum obiecto, hac ratione etiam Spiritus S. erit similis Patri, & Filius eius, quia identificatur in eadem essentia. Item vel essentia illa communis tribus personis habet substantiam in se, vel non habet: si non habet, caret perfe-

ctione aliqua, quia substantia est perfectio substantia, & iterum erit forma quædam incompleta, & imperfectior forma subsistente, ut Angelus: Si habet substantiam: ergo est incommunicabilis, & sic non communicabitur tribus personis; Et iterum erunt quatuor substantia, tres personarum, & vna essentia communis, quod est esse quatuor personas; aut personæ non habebunt proprias substantias, sed eam, quæ essentia est; & sic erit tantum vna persona. Item, quia iste est syllogismus expositivus. Hæc essentia est Pater, vel, Hic Deus est Pater: hic Deus est Filius: ergo Filius est Pater, ubi omnes propositiones constant termino singulari, nec syllogismus habet defectum: ergo si consequentia est mala, idè est, quia præmissæ sunt falsæ, scilicet quia Hic Deus sit Filius, & Pater. Nec potest dici quod inadæquatè est Pater, & inadæquatè est Filius, ideoque syllogismus non tenet: nam contra est, quia tota realitas quæ est in Patre, est in Filio, aliàs aliquid haberet Pater quod non haberet Filius, & consequenter aliquam perfectionem haberet Pater, quam non habet Filius: ergo adæquatè est totum in toto, & in quolibet illorum. Vnde neque Pater distinguitur à Filio, si tota realitas vnus est in alio.

Respon. ad primum Sophisma, quod generare est perfectio non nuda, sed affecta relatione, seu respectu notionali ad genitum; & idè tota perfectio generationis est in Filio: at non sub respectu generantis, sed sub respectu geniti; ideoque ipse non generat, sed est genitus, & tanta perfectio est in Deo esse generantem, sicut esse genitum, licet sit diuersa modificatio, seu respectus, quia ad perfectionem summam diuinitatis pertinet esse Trinum in personis, quarum vna est generans, & alia genita, & alia procedens: non ergo minùs perfectionis est in Deo generare, quàm generari. Et totum quod perfectionis dicit ly *generare*, & totum quod perfectionis est in generari vel procedere, totum est in omnibus tribus personis, quia ista perfectio est ipsa essentia diuina, quæ est ratio habendi talem perfectionem; sed quod relationis & respectus requiritur ad generare, vel generari, non totum est in omnibus personis, sed quælibet suam relationem habet correlatam, & oppositam alteri: & idè non omnes personæ generant, licet omnes habeant id quod perfectionis est in generare, non tamen id quod respectus, & relationis ad id requiritur.

45 Ad secundum sophisma dicitur, quod quando Filius genitus est, erat, distingo, erat per ipsam generationem, concedo, erat sine ipsa generatione, vel supponebatur ante generationem, nego, sed ipsa generatione est id quod est. Cum autem dicitur: Si erat, ut quid generabatur? Dico quod si erat sine generatione, vel ante generationem, frustra generabatur: si autem solum erat per generationem, non frustra generabatur, siquidem ipsa generatione erat. Si autem dicatur, quod quando generabatur iam erat, seu præsupponebatur ante generationem, tunc negamus suppositum, scilicet, quod ante generationem illam aliquid esset, vel aliqua duratio esset, in qua Filius non esset, quia illa generatio est æterna, & coæterna suo generanti; & sic non potest sumi aliquid ante illam, nec est imaginabilis duratio vel instans aliquid ante illam, in qua vel supponeretur iam existere Filius, vel nihil esse, ut ex nihilo fieret, sed semper erat, quia generatio semper erat, nunquam autem verificatur dictum Arrianorum quod erat, quando Filius non erat, sed in quocumque principio Verbum erat apud Deum, & Deus erat verbum,

Quando

Quando autem inquiritur an modò gignatur Filius, an sit genitus, & transierit generatio, dico cum Aug. *epist. 174. Semper gignit Pater, & semper nascitur Filius.* Illa enim generatio non est aliquod fieri, & via quæ transiit adueniente termino, cum non sit generatio facta per motum & successionem, sed est generatio æterna, perfectissima, sine motu, & successione; & sic non transit, sed indiuisibiliter durat eadem, aliàs æterna non esset, nec tamen modò est sine suo termino, quia illa generatio cum semper sit perfecta, semper est cum suo termino, non in potentia, & via, seu fieri ad terminum: sicut ergo æternitas modò, & ab æterno eadem prorsus est, ita & generatio illa æterna tam eadem ea modò quam ab æterno; & sic generatio illa modò durat, nec desinit esse, aliàs æterna & diuina non esset. Et sicut modò & ab æterno est generatio, ita & terminus eius modò est, & ab æterno, nec modò amplius perficitur, aut existit, quam ante, sed sèper illa generatio est cum suo termino & ab æterno sic est, quia perfectissima est, & nò per motu & successionem generat. Et sic quando inquiritur, si semper est genitus, quando fuit generatio? Dico quòd generatio, & terminus simul & vnum sunt, nec generatio illa est motus & transitus, seu via, vt sit genitum, sed sine motu, & imperfectione simul est generatio & genitum: vtrumque enim est æternum.

Ad tertium sophisma dicemus *infra* latius tractando an sit in Deo subsistentia absoluta. Interim dicimus id quòd *suprà* retulimus ex D. Th. 4. *cont. Gent. c. 14. solut. ad 5.* quòd essentia secundum se est subsistens, si ly *subsistens* sumatur pro eo quòd est per se existens, & non inhærens, nec per aliud existens: sic enim diuina essentia nò solum per se est existens, sed etiam est ipsu esse, & ipsa existentia. Non tamen est subsistens, si ly *subsistens* sumatur pro eo quòd est incommunicabile vltiori termino: essentia enim diuina comunicabilis est personis. Et habemus aliquale huius rei exemplum in creatis, licet ex alia parte sit valde deficiens: nam anima rationalis est per se subsistens, quatenus potest separata à corpore existere, non tamen est persona, quia comunicabilis est corpori, & supposito integro, qui est homo. Deficit tamen exemplum, quia anima rationalis est forma informans & incompleta in se, diuina autem essentia non est forma informans & incompleta, sed est tota plenitudo essendi; & ita petit ex se illas tres personalitates relatiuas, vt in illis reddatur incommunicabilis, sicque personalitates illæ se habent vt termini vltimi, & ex se præbent incommunicabilitatem, quia præbent oppositionem relatiuam, quæ ratione oppositionis incommunicabilitatem facit: habent autem ab essentia ipsam rationem existendi per se, quia essentia est ipsum esse à se. Vnde non sequitur quòd sint quatuor personæ, quia persona dicit subsistentiam vt incommunicabilem, & in vltimo termino; subsistentia autem absoluta comunicabilis est tribus personis, scil. Hic Deus, quia talis subsistentia non dicit aliud, quam singularem substantiam, vt per se existentem. Nec sequitur quòd sit tantum vna persona, scil. subsistentia absoluta, sed quòd sint tres personæ cum vno esse, seu existentia per se, quæ est subsistentia absoluta. Sed de hoc latius *infra* tractandum est.

Ad quartum sophisma dicitur, illum syllogismum expository habere manifestum defectum, quia medium non perfecte singularizetur: sicut enim in syllogismis de termino communi, requiritur quòd medium perfecte distribuatur, ita in syllogismo expository requiritur quòd medium perfecte singularizetur: sicut non valet iste syllogismus: Aliquis homo est Paulus: aliquis homo est Petrus: ergo Pe-

trus est Paulus. In præsentia ergo ille terminus. *Hic Deus, hæc essentia diuina*, licet sint termini singulares, habent tamen vim termini communis, quia illa singularis essentia comunicatur pluribus suppositis, seu personis, quòd est proprium termini communis; & sic non debemus vt illo termino tanquam medio ad syllogismum expository, quia non perfecte singularizatur, sed vtendum est illo tanquam termino communi, sed tunc debet perfecte distribui, vt si dicas, Omne quòd est Deus, est Pater: aliquid quòd est Deus est Filius, &c. sed tunc maior est falsa. Ad id verò quòd dicitur, quòd tota realitas, quæ est in Patre, est in Filio, &c. dico quòd tota realitas absoluta quæ est in Patre, est in Filio, nò tota realitas relatiua; & sic non est adæquatè totus Deus in Patre, quia etiam est in Filio. Quomodo autem non sint tres veritates, aut bonitates, licet sint tres res relatiuæ, sed solum sint tres res veræ, & bonæ adiectiuè sicut tres res diuinæ, iam *suprà* attigimus, & aliquid *inferius* dicemus; *seq. disp.* tractando quænam prædicata multiplicentur cum personis.

ARTICVLVS IV.

Vtrum sint necessaria processiones reales ad distinctionem personarum, & D. Thom. rectè illas dari probauerit?

Hucusque veritas mysterij huius declarata & defensa à nobis est quantum ad distinctionem personarum cum omnimoda vnitatem personæ. Deinceps pro explicanda amplius ista distinctione personarum, oportet videre an ad illam necessariu sit ponere processiones in diuinis, & quomodo tales processiones dari S. Th. probauerit, vt deinceps in articulis seqq. de istarum processionum distinctione & ratione specialius disseramus.

Totus punctus istarum difficultatum versatur circa duas consequentias, quas fecit S. Thom. Alteram *inf. q. 33. a. 4. ad 4.* vbi probauit ex Hilario nò posse in Deo esse plures personas improductas, sed necessariò vnā debere procedere ab alia, quia aliàs illæ duæ personæ improductæ non distinguerentur oppositione relatiua, sed diuersitate naturæ. Ex qua consequentia, si recta est, conficitur hanc conditionalem esse veram; Si in personis diuinis datur realis distinctio, debet dari realis processio; & ita necessariò requiritur realis processio, quòd si illa non datur, non dabitur realis distinctio inter personas.

Alteram consequentiam formauit S. Th. *in hac q. 27. a. 1.* vbi probauit dari de facto processiones reales intra Deum, ita quòd per eas non mittatur, nec producat aliquid extra, sed ita aliquid procedat quòd intra maneat: Quia omni processio attenditur secundum aliquam actionem; & sicut secundum actionem quæ tendit in exteriorem materiam attenditur processio ad extra, ita secundum actionem quæ manet in agente, attenditur processio ad intra. Quod maxime patet intellectu, & actione intelligendi, quia quicumque intelligit ex hoc quòd intelligit procedit aliquid intra ipsum, quòd est conceptio rei intellectæ ex vi intellectiua, & ex eius notitia procedens, quæ dicitur verbum cordis. In Deo autem non est intelligenda processio nisi secundum emanationem intelligibilem, non secundum sensibilem, & corporalem, quia Deus caret corpore. Et iuuat ista processio intelligibilis ad seruandam identitatem in natura cum principio à quo procedit, quia licet in processione rei ad extra, debeat esse diuersitas in procedente

procedente ab eo, à quo procedit, tamen in emanatione intelligibili potius intelligens fit vnum cum re intellecta exprimendo illam in verbo, & quanto magis fit vnum, perfectius intelligitur. Vnde intelligere perfectissimū, erit summē vnū cum re intellecta. Deus autem seipsum intelligit tanquam præcipuū obiectum intelligendi; & sic Verbum debet esse maximē vnū cum ipso Deo vt obiecto intellecto.

Istæ consequentiæ suas habent difficultates, ex quarum solutione clariùs apparebit dari in Deo processiones, & personarum distinctionem, quæ ex processione omnino pendet.

Distinctio personarum necessario exigit processiones.

3 Igitur circa primam consequentiam D. Tho. aduertendum est illā constare duplici illatione: Inquit enim sic D. Th. loco cit. q. 3. *Si essent duo innascibiles, vnus eorū non esset ab alio, & sic non distingueretur oppositione relatiua, oporteret igitur quod distingueretur diuersitate nature.* Quæ illationes aliquibus Auctoribus difficiles videntur, præsertim Scoto in 1. dist. 2. q. 3. Nam in primis possent duæ personæ improductæ, & quarum vna nō procederet ab alia distinguendo relationibus non oppositis inter se, sed disparatē se habētibus, verē tamen distinctis; & nō impressione fundatis, sicut in opinione quæ dicit Spiritum S. distinguendū à Filio, etiā si non procederet ab illo, non fundaretur in processione distinctio, sed in relatione disparata; & tamen hoc non est contra fidem: ergo non potest esse contra fidem quod etiam si essent duæ personæ improductæ distinguerentur; & sic infirma est consequentia D. Thom.

4 Deinde vrgetur illa consequentia, quia non sequitur quod distinguerentur diuersitate nature: restarent enim alij modi distinguendi, scil. vel per duas relationes improductas, & disparatē se habentes, sicut filiatio distinguitur à spiratione passiuā, etiam si ista nō procederet ab illa apud Scotum; vel per hoc quod vna persona esset absoluta, altera relatiua: quid enim inconueniens est quod illa relatio terminaretur ad absolutum: vel tandem per hoc quod vtraque persona esset absoluta, & immediatē conueniret Deo, sine hoc quod vna procederet ab alio. Nec tunc distinguerentur diuersitate nature, sed sola diuersitate personæ absolutæ. Et quando dicitur quod absoluta in Deo non distinguuntur, sed solum vbi obstat relationis oppositio, diceret aliquis id intelligi de absoluto pertinente ad rationem nature, non ad rationem personæ: cur enim repugnabit Deo aliqua ratio absoluta personalis, quæ in ratione personæ tantum diuersa sit non in ratione nature; & sic plures personæ absolutæ conuenirent Deo immediatē, sine hoc quod vna procedat ab alia.

5 Conf. quia persona Patris intelligitur conuenire nature diuinæ, etiam in esse proprio specifico, & relatiuo Patris ante omnem processionem; & originem tam passiuā, quia ipse Pater non procedit ab aliquo, quā actiuā, quia generatio supponit personam Patris à qua est: ergo ante processionem actiuā Patris debet intelligi eius persona in ratione relationis conueniens Deitati, & quasi pullulans ex essentia, ad eum modum quo dicuntur attributa esse ex essentia, vt ex radice sine processione, & emanatione reali: ergo sicut illa prima persona conuenit immediatē essentia sine processione, sic reliquæ possunt conuenire. Patet consequens quia essentia Dei est infinita, & ex se habet vim complectendi omnes personas, quibus est capax terminari: ergo immediatē potest illas habere, & non vnā mediante alia, seu mediante processione ex alia. Tum etiam quia pro illo signo quo intelligitur

persona Patris, & nondum generatio, debet intelligi persona Filij, quia sunt correlatiua, & consequenter simul cognitione: ergo repugnat pro aliquo priori intelligi Patrem sub conceptu & relatione Patris, quin intelligatur Filius: sicut ergo immediatē conuenit diuinæ essentia persona Patris, ita & persona Filij sine media processione, ita quod processio non sit ratio conueniendi essentia. Quod si dicatur relationem Patris conuenire essentia pro illo priori in ratione subsistentis, quia ad hoc non indiget fundamento, cum subsistens sit, non tamen in ratione exercitij, relationis, & respectus. Contra est, quia hoc modo etiam relatio Filij, quatenus subsistens est, non indiget fundamento; & sic potest ante processionem, & originem intelligi vt conueniens essentia; & sic immediatē conuenire essentia plures personas, non mediante processione, & origine, licet ad exercendum respectus, & relationes istas, fundamento indigeant.

6 Conf. secundō, quia si per impossibile tres personæ immediatē pullularent ab essentia, & non media processione, & origine, possent super tales personas fundari relationes aequalitatis, & similitudinis: verē enim tunc æquales essent, & similes cum haberent eandem essentiam; & tamen illæ relationes non procederent, sed immediatē conuenirent personis: ergo bene possunt intelligi in Deo plures relationes distinctæ sine processione; & sic licet de facto processiones sint in Deo, non tamen videtur quod ideō debeant poni vi personæ distinguantur, quia etiam independentē à processione possunt distinctæ intelligi. Et præsertim, quia incommunicabilitas est de ratione intrinseca personalitatis, seu subsistentia, ita quod independentē ab aliquo extrinseco illi conuenit, sed ex ipsa essentiali ratione personalitatis, quæ formaliter non dicitur ad alterum, sed ad se, cum subsistentia sit proprius modus substantia, & substantia vt substantia est ad se: Non ergo ex processione multiplicantur personæ, sed ex ipsa intima ratione incommunicabilis substantia id habent.

Nihilominus consequentia hæc, & illationes S. Thomæ inconcussam veritatem habent, illamque desumpsit ex S. Hilario in lib. de Synodis explicatione 4. confessionis fidei num. 26 & similiter eā tradit Fulgentius in libro ad obiectiones Arrianorū in principio, & ad obiectionem 6. indicatque Athanasius oratione contra Gregales Sabellij. Et quidem supponenda sunt antequam certa de fide duo.

7 Alterum est, intra Deum veram & realem processionem dari, non fictam, aut metaphoricā, Ioan. 8. *Ego ex Deo processi, & veni;* Ioannis 15. *Spiritum veritatis, qui à Patre procedit;* Sap. 7. *Vapor est virtutis Dei, & emanatio quadam claritatis omnipotentis Dei sincera;* Ecclesiastici 24. *Ego ex ore Altissimi prodii primogenita ante omnem creaturā; & alia multis locis a. 2. relatis* id continetur. Sunt autem istæ processiones intra Deum manentes, & non extratū quia eadem Scriptura docet res sic procedentes non esse creatas, sed Deum ipsum & æquales Deo, vt supra ostensum est, quidquid autem nō est creatura, sed Deus, intra Deum est, tum etiam quia de Filio procedente, & de Patre à quo procedit, dicit Filius quod ego in Patre, & Pater in me est, & ego, & Pater vnum sumus, & iterū quod Pater, & Filius, & Spiritus S. vnū sunt, quod stare nō potest, si id quod per istas processiones procedit intra Deū non est.

Alterum quod supponimus de fide est, solā personam Patris esse improductā & ingēnitā, reliquas duas procedere, Filium à solo Patre, Spiritum S. à Patre, & Filio, & vt habetur in symbolo Athanasij *Pater nullo est factus, nec creatus, nec genitus, Filius à Patre*

à *Patre solo est*, &c. Et idem definitur in Concilio Lateranensi sub Innocentio III. in c. *Firmiter*, de summa Trinitate, & in Concilio Florentino, in litteris vnionis, & in aliis. Sed difficultas est reddere rationem intrinsecam, & propriam, cur in Deo non possint intelligi plures personæ improductæ, siue absolutæ, siue relatiuæ, & quomodo in hoc firma sit consequentia, & ratio D. Thom. Alias enim rationes, quas ex Henrico & Scoto affert, & latè ventilat atque explicat P. Suarez lib. 1. de Trinitate. c. 4. non vacat in præsentem ad longum aut firmare, aut refutare. Sufficit legitimam, quæ D. Thomæ est, & ex S. Hilario, aliisque Patribus acceptam in præsentem defendere.

8 Igitur in illa consequentia D. Th. prima illatio illius est, quod si essent duo innascibiles, vnus non esset ab alio, & sic non distinguerentur oppositione relatiua. Et secunda illatio est: ergo oportet quod distinguerentur diuersitate naturæ. Quasi dicat, Aut non distinguerentur duæ innascibiles personæ, seu improductæ, quia non distinguerentur oppositione relatiua sicut personæ, quæ nunc sunt, aut distinguerentur diuersitate naturæ, quod est impossibile in diuinis. In prima itaque illatione, considerata est formalitas eius: non enim intulit D. Th. quod non distinguerentur relationibus quomodocumque, sed intulit quod non distinguerentur oppositione relatiua, quæ illatio valde formalis est, nec ab aliquo negari potest, quia oppositio relatiua non potest dari inter duas relationes disparatè se habentes, sed inter relationes correlatiuas, quia oppositio relationis solùm est ad suum terminum correlatiuum: ad illum enim est oppositio, ad quem est tendentia, & contra quem respicit, hoc autem solùm est correlatiuum. Si autem ponantur duæ personæ & relationes æquè improductæ, & quarum vna non procedit ab alia, sed disparatè se habent, vna non est correlatiua alterius; ergo non distinguerentur ex vi oppositionis correlatiuæ. An verò alio modo distingui possint, sine tali oppositione, scilicet ex sola relatione etiam disparatè se habente, non deducitur à D. Thomæ in hac prima illatione, sed virtualiter id infertur ex secunda, vt statim explicabimus.

9 Dices: Etiam potest dari oppositio inter relationes, quin vna procedat ab alia, vt patet in relationibus similitudinis vt æqualitatis, mensuræ & mensurati, in quibus etiam datur oppositio, nec tamen datur processio, quia bene stat vnum esse simile alteri, quin procedat ab illo, sicut vnum ouum est simile alteri ouo; & tamen habet oppositionem cum illo, quia est correlatiuum eius: ergo deficit probatio S. Th. ex eo quod sint duæ personæ, seu relationes improductæ, ita quod vna non procedat ab alia, inferens, quod non distinguerentur oppositione relatiua absolute, cum solùm inferatur, quod non differant oppositione relatiua originis, seu processionis, non alio modo. Resp. discursum D. Th. aliud probare directè & formaliter, seu implicite, aliud virtualiter & implicite. Formaliter probat duas personas improductas non differre oppositione relatiua originis. Implicite & virtualiter probat nulla oppositione relatiua differre, quia reliquerat probatum antea, videlicet in q. 28. a. 4. quod relationes reales in Deo solùm possunt fundari super actione, seu origine, non super quantitate, aut alio fundamento. Vnde cum hoc iam præsupponeret probatum, optimè intulit quod inter duas personas improductas non posset esse oppositio relatiua: supponebat enim super alio fundamento non posse fundari relationes reales in Deo. Illud autem præsuppositum est certum, quia ex tribus fundamentis quæ concurrere possunt ad omne genus relationis realis,

solùm relatio, quæ fundatur super actione, potest sine imperfectione versari inter extrema realiter diuersa, quod omnino requiritur ad relationem realem, quia eiusdem ad se relatio realis non est, sed ad alterum.

Fundamenta autem relationum sunt tria, quæ Philosophus enumerat in 5. metaph.

Primum est relationum, quæ fundantur super quantitate, vel vnitate, id est conuenientia, vt æqualitas, similitudo, inæqualitas, vel dissimilitudo, &c.

Secundum fundamentum est relationum quæ fundantur super actione & passione, seu quacumque origine.

Tertium est super mensura & mensurabili. Hoc tertium non potest habere locum in diuinis, tum quia non est genus relationis mutua; & sic altera relatio in illis non est realis: mensura enim non respicit realiter mensuratum, sed è contra: tum quia in his relationibus quando reales sunt vnum extremum est perfectius altero: mensura enim perfectior est mensurabili: in diuinis autem vbi est summa vnitas non est vnum perfectius altero, aut mensura eius. Vnde æternitas, quæ in Deo mensuram durationis importat, realis relatio non est, sed rationis, vt deduximus *preced. tomo disp. 9. a. 1.* Primum verò genus in Deo esse non potest per modum constituenti extrema realia, sed supponendi: quia si est relatio inæqualitatis & dissimilitudinis, supponit aliquam minorationem, seu inferioritatem aut deficientiam in altero extremo, ratione cuius sibi inæquale est, aut dissimile; & sic non sunt perfectè vnum neque conueniunt. Si verò est relatio similitudinis, vel æqualitatis, ista non facit extrema diuersa, sed supponit si realis relatio est: nec enim ipsæ relationes secundum se sunt relationes disquiparantiæ, vt oppositionem exerceant in vi relationis. De se ergo similitudo non facit extrema diuersa, sed potius vnit, & in vnum redigit, quantum potest de se, & ex vi sui fundamētis; sed si fundatur similitudo, realis est, quia supponuntur dari extrema distincta, ita quod non fundetur similitudo super omnimodā identitate, sed super conuenientia diuersorum, supponendo ipsa extrema diuersa: Ante relationes autem personales, non est in Deo nisi summa identitas essentialis, sine aliqua diuersitate. Non ergo in illa potest fundari aut exerceri similitudo realis, nec per realem relationem similitudinis potest primò & per se constitui personarum distinctio, quia ex sua formalissima ratione fundatur inconuenientia diuersorum: debet ergo ad similitudinem supponi diuersitas in extremis, non ab ipsa constitui. Relinquitur ergo, quod solùm super actione, seu origine potest fundari realis relatio, quia ipsamet origine, seu actione possunt fieri extrema distincta, scilicet ipsamet personæ seu relationes subsistentes. Et sic solùm istæ possunt in Deo distingui oppositione relatiua.

10 Sed restat tunc secundam illationem D. Tho. probare. Si non distinguuntur oppositione relatiua, distinguetur diuersitate naturæ, quæ illatio istatis *supra* allatis videtur infirmari. Sed Resp. illatione esse efficacem, quia ad omnem distinctionem requiritur aliqua oppositio, cum omnis distinctio separationem & diuisionem importet eorum, quæ distinguuntur, quæ separatio & diuisio intelligi non potest nisi penes aliquod esse, vel non esse, seu aliquam incommunicabilitatem vnus cum alio, à quo diuiditur, & hoc oppositionem dicit. Omnis autem oppositio, vel est in relatiuis, vel in absolutis. Si in relatiuis, iam habemus relatiuam oppositionem. Si verò relatiua oppositio non est, restat quod debeat esse in absolutis, quæ vtique pertinent ad naturā. In absolutis autem non est oppositio penes respicere, sed penes esse

36 Quæst. XXVII. De sacro Trin. myst.

esse, & non esse, esse hoc, & non esse illud, quod est distinctum à se: ergo si esset distinctio in absolutis, & in natura Dei, esset diuisio in ipso esse diuino, essentque plures dii.

11 Ad instantiam autem primam dicitur, quod est impossibile distinguere duas personas relationibus disparatis, & sine processione vnius personæ ab alia. Etenim relationes non dicunt incommunicabilitatem nisi respectu sui termini, quem respiciunt, sui que correlatiui: At verò relationes disparatè se habentes, sed non correlatiuè, non important incommunicabilitatem, quia nec oppositionem; omnia autem quæ in Deo habent communicabilitatem, seu non oppositionem, habent etiam unitatem, quia non datur intra Deum communicabilitas per compositionem, aut unionem vnius cum alio, sed per summam simplicitatem & identitatem; & sic idem est non esse relationes incommunicabiles, atque esse vnum, sicut spiratio actiua, & paternitas vnum sunt, quia non opponuntur, nec sunt incommunicabiles. Solum autem relatio est incommunicabilis suo opposito termino correlatiuo, suo verò subiecto incommunicabilis non est, cum ipsum afficiat, nec aliis formis seu relationibus existentibus in subiecto, quia nec illis contrariatur, cum è subiecto non expellat, nec illas respicit ex opposito, cum non sint terminus respicientiæ suæ. Et sic nihil est quod incommunicabilitatem fundet inter illas: ergo sunt communicabiles intra Deum: ergo vnum & idem. Quod verò aliqua opinio salua fide dicit Spiritum S. distinguere posse à Filio, etiam si ab illo non procederet, de hoc agemus *infra circa q. 36*. Sed tamen debet aduerti quod ista opinio non loquitur de personis omni modo improductis, sicut loquimur in præsentibus: nam relationes totaliter improductas non negat Scotus, neque aliqua opinio, identificari inter se, sicut paternitas & spiratio actiua. Sed loquitur in specie hæc opinio de vna persona producta, scilicet Filio, quæ semel ex vi productionis & processione à Patre constituitur in ratione personæ ex vi characteristica proprietatis, quæ est Filiatio. Vnde semel constituta personâ in esse, & caractere personæ per filiationem, iam distincta manebit à quacumque alia persona, & etiam non procedente à se, quia iam per suam processionem supponitur totaliter, & omni modo distincta. In hoc potest salua fide dari opinio, an persona semel per suam processionem constituta in sua proprietate characteristica talis personæ, indigeat ad distinctionem ab alia persona, quod etiam inter illas sit processio. Quod autem dentur duæ personæ totaliter, & omni modo improductæ, & ipsa prima sui improductione distinguantur, in hoc non est opinio.

12 Ad secundam Replicam quod restant alij modi distinguendi personas improductas, quam per diuersitatem naturæ. Resp. modos illos diuersitatis seu diuersificandi personas omnes reduci ad diuersitatem naturæ, quam ibi D. Thom. ponit; & idè idem est distinguere diuersitate naturæ, ac distinguere absolute, seu penes absolutum, & relatiuum: nam primus ille modus distinguendi personas per plures relationes improductas, & sine vlla processione iam manet exclusus. Et à fortiori ex eodem principio excluditur distinctio penes duas personas absolutas, vel vnam absolutam, aliam relatiuam. Cuius ratio est, quia non potest fieri distinctio in aliquo absoluto intra Deum, nisi inter ipsa absoluta sit aliqua oppositio seu ratio separandi & diuidendi vnum ab alio. Quia si nulla est oppositio, vel negatio vnius de alio, totum erit vnum & idem. Cum autem non possit ibi dari oppositio

per respicientiam: hoc enim pertinet ad relationem, necesse est quod oppositio fiat penes contrarietatem aut negationem, seu priuationem in aliquo esse absoluto substantiæ diuinæ. Vtrumque autem repugnat rei diuinæ & infinitæ, quia contrarietas est inter formas se expellentes, & non compatibiles in eodem subiecto; & ita vna non est tantæ perfectionis, sicut alia, & cum essent infinitæ intensionis in Deo, non esset vtraque simul, sed altera tantum: & priuatio est negatio alicuius perfectionis seu formæ debitæ, quod totum nefas est in re diuina imaginari, quæ summè perfecta & simplex & vna est. Quod autem vna forma habeat negationem alterius intra eandem speciem, seu genus, est ob limitationem formarum inter se, quia deest illi aliqua perfectio, quæ est in alia, & sic limitantur perfectiones: si enim omnes perfectiones, quæ sunt in vno essent in alio, non distinguerentur, sed essent vnum & idem numero. Vnde eadem repugnantia est in distinguendo absolutas substantias, seu personas in Deo, atque in distinguendo naturam. Et præsertim quia in Deo substantia absoluta est ipsa natura, sicut & existentia; & sic perinde est fieri diuersitatem in substantia absoluta Dei, ita quod sint plures substantiæ absolutæ, atque fieri diuersitatem in natura.

Dices: totum hoc currit in personis relatiuis, & tamen ponimus plures in Deo: nam etiam illud esse relatiuum, seu perfectio, seu quidquid sit, quod est vna relatio, non est in altera, & vna habet negationem alterius, & tamen vtraque est infinita: ergo quod dicimus de personis absolutis, soluendum nobis est in relatiuis. Similiter sicut substantia absoluta est ipsa natura diuina, ita & relatiua: sicut ergo ex multiplicatione, & distinctione substantiæ relatiuæ non sequitur distinctio in natura, sic neque ex distinctione substantiæ absolutæ, licet sit ipsa natura, sequetur diuersitas in natura.

Sed contra primum est, quia ad propriam, & essentialem rationem relatiuorum pertinet quod sint ad alterum, ad rationem autem absoluti quod sit ad se. Vnde ipsa perfectio relatiuorum stare non potest sine pluralitate, quia realis respicientia ad alterum est, & sic multiplicatio in illis est perfectio, vel propria ratio illorum; & negatio vnius in altero non est prima ratio distinguendi vnum relatiuum ab alio, sed est quid consecutum, ipsa quippe respicientia est prima ratio distinguendi, quia opponitur alteri, & sic saluant ista relatiua omnem identitatem, & unitatem in essentia, & perfectione absoluta, quia solum in oppositione relatiua distinguuntur, ipsæque relationes constituunt extrema distincta per oppositionem suam, non supponunt. At verò ratio seu perfectio absoluta est in ordine ad se; & idè ex sua propria ratione non petit multiplicari nisi supposita limitatione, quia in vno non saluatur tota perfectio, & ratio illius absoluti, sed aliquid negatur, & tollitur ab illo absoluto, & ponitur in alio; & sic ipsa negatio alicuius perfectionis, vel rationis pertinentis ad tale absolutum pertinet ad primam rationem distinguendi, & hoc pertinet ad imperfectionem, qua ratione dixit optimè D. Thom. in 1. ad Arrubald. *distinct. 26. q. 2. art. 2.* quod *distinctio orta ex contrarietate, negatione, aut priuatione, imperfectionem dicit.* Vnde si id quod absolutum est in sua linea & ordine ita crescat quod perueniat ad infinitum, repugnat quod diuidatur, & multiplicetur, quia omnem perfectionem trahit, & dicit in ordine ad se, non in ordine ad alterum, vnde si multiplicatur in ratione absoluti, est quia id quod est in vno, non est in

in altero ; & sic non omnem perfectionem illius generis habet. Perfectio autem relatiua cum sit ex propria ratione ad alterum, si infinita est, petit necessario duo infinita in genere correlatiui, cum unitate in ratione perfectionis in esse.

14 Ex quo manet secunda responsio expuncta, quia licet substantia absoluta, & relatiua sint ipsamet natura Dei, tamen una ex sua infinita perfectione, seu propria ratione exigit in se adunare omnem perfectionem illius generis, nec eam diuidere potest, nisi per negationem aliquam limitatiuam : alia autem, scilicet relatiua, exigit ex suo genere, & propria ratione explicari in ordine ad alterum ; & sic multiplicari, & non manere vnum, si genus relatiuum saluatur, unde crescente infinitate, & perfectione in relatione tanto magis exigit istam distinctionem in ipsa oppositione relatiua, manente unitate in omni perfectione absoluta. Si vero ipsa absoluta substantia in ratione absoluti diuideretur, ipsa quoque natura, & non solum ratio personae diuideretur, quia si quaecumque perfectio, vel ratio absoluta diuidi potest non obstante infinitate in suo ordine, eadem ratione poterit quaelibet perfectio naturae non obstante sua infinitate sic diuidi.

15 Ad primam Conf. Respon. ibi tangi difficultatem valde controuersam de constitutione personae Patris pro illo signo quo intelligitur persona, ex qua debet oriri generatio, de qua *infra. circa q. 40.* agendum est. Pro nunc negamus consequ.

Et ad primam probat. dicitur quod essentia habet vim complectendi omnes personas eo modo quo sunt, & secundum omnia quae exigunt ; sunt autem personae procedentes, quia una est Pater, alia Filius, & Filius essentialiter est procedens à Patre, nec alio modo possunt istae relationes fundari, & multiplicari in diuinis, quam secundum originem. Vnde quia essentia diuina complectitur istas relationes, non quomodocumque, sed ut fundatas sic, & includentes suas processiones, & origines, non includit illas ut aequè immediatas aut disparatas inter se, sed ut ordine quodam originatas.

Ad secundam probationem dicitur quod persona Filij cointelligitur simul personae Patris cum omni simultate naturae, temporis, & cognitionis, sed cum ordine originis, quia Filius est, & ut Filius, à Patre est ; & ideo non conuenit Filiatio diuinæ essentiae, ita immediate, sicut Paternitas, si immediatio opponatur ordini originis, bene tamen aequè immediate quoad communicationem, & identitatem naturae ; & ideo licet in ratione proprietatis substantientis paternitas sine fundamento generationis conueniat Deo, quia hoc fundamentum solum exigitur ad exercitium relationis, non ad constitutionem personae in ratione principij generantis, licet ibi radicaliter sit totum exercitium relationis, quia non constituitur ut ad se, & ut maneat, & sistat sibi, sed ut respiciat alterum, tamen persona Filij, etiam ut constituens personam secundam, & genitam, praesupponit ordinem originis passiuam, quia illa relatio, & proprietas substantientis Filij non constituit personam quomodocumque, sed personam secundam natam, & originatam, quae sit proprietas characteristica huius personae, sicut proprietas Patris constituit primam personam in ratione primae, & principij generantis. Vnde ex suo proprio characterē potest constituere personam Patris antecedenter ad originem, seu generationem actiuam formaliter, & explicitè, quia licet in illa fundetur explicita, & formalis tendentia ad Filium, non tamen fundatur radix ta-

Ioan. à S. Thom. in 1. part. D. Th. Tomus alter.

lis generationis : pertinet autem ad propriam rationem Patris non solum constituere respectum explicitum, & formalem, sed etiam radicalem ad Filium, id est, ipsam rationem principij. Filiatio autem cum debeat constituere personam secundam, quae est persona nata, & praesupponens primam, non potest constituere illam ut radicaliter secundam, seu radicem, & principium secundae : hoc enim est prima, quae illam generat, sed solum debet constituere, ut formaliter secundam, atque adeo ut natam, & originatam ; & sic supponere debet originem passiuam, etiam ad constitutionem personae, ut persona secunda est, & nata seu originata.

Ad secundam Conf. quod dato illo impossibili 16 relationes aequalitatis, & similitudinis vel non essent reales secundum sententiam S. Thom. *infra q. 42. art. 1. ad 4.* quia aequalitas illa personarum cum sit omnimoda, fundatur in identitate naturae, & perfectionum, quae omnibus sunt communes, & indiuisae, & super fundamentum omnimodae identitatis non fundatur realis relatio, vel si reales relationes essent secundum Scotum, illae non essent primò distinctivae, & constitutivae personarum, quia supponunt illas constitutas. Vnde si non supponerentur personae constitutae, istis relationibus aequalitatis, vel similitudinis primò, & per se non possent constitui vel distingui, quia talis aequalitas, vel similitudo immediate fundaretur in omnimoda unitate, & identitate essentiae, & consubstantialitate illius, nec supponeret aliquas relationes, seu proprietates personales, de quibus diceretur quod essent aequales, unde manifestum est quod solum posset esse relatio rationis, quia non fundatur in diuersitate extremorum habentium conuenientiam in natura, aut perfectione, sed in omnimoda identitate. Et quia in relationibus per se non fundantur aliae relationes reales aequalitatis vel inaequalitatis, alias esset processus in infinitum, cum rursus illae relationes similitudinis similes essent, &c. At denique si immediate in natura fundarentur relationes reales aequalitatis, vel similitudinis, non supponentes personas constitutas, non esset principium ad determinandas certas relationes aequalitatis, vel similitudinis, sed essent infinitae.

Ad id verò quod dicitur de incommunicabilitate, quod conuenit substantiae per se, & ratione sui, & non ratione processionis, dico quod conuenit per se substantiae, ut dicenti oppositionem cum aliquo termino cui incommunicabilis est. Substantia autem diuina ut sit incommunicabilis personae creatae, sufficit extraneitas personae, & naturae, cui ex ipsa extraneitate incommunicabilis est & opposita, sicut increatum creato ; imò & substantia absoluta, si in Deo datur (de quo *infra*) hoc modo etiam incommunicabilis est personae creatae, quia terminus est incommunicabilis substantiae illi extraneae. Ut autem substantia diuina alteri diuinæ substantiae sit incommunicabilis, opposita illi esse debet, nec datur oppositio realis in Deo nisi relatiua, nec ista nisi fundata in processione, ut ostensum est.

Recte probat D. Thom. dari processionem ad intra in Deo.

Ad probandum dari intra Deum processionem 18 realem, duo praesupponit D. Thom.

Primum est, processionem attendi secundum aliquam actionem, & hanc esse in Deo per intellectum, & voluntatem.

Secundum est quod sicut secundum actionem quae tendit in exteriorum materiam, est aliqua processio

D

cessio

cessio ad extra, ita secundum actionem quæ manet in agente, attenditur processio quædam ad intra, ut maximè patet in intellectu, in quo actio eius, quæ est intelligere, manet in agente, & ex eo quod quis intelligit, procedit conceptio intra intelligentem. Quod autem etiam in voluntate procedat aliquid per amorem, *infra art. 3.* ostenditur.

Ex his duobus præsuppositis assurgit S. Thom. ad probandum dari processionem ad intra in ipso Deo sic : Processio in Deo non est intelligenda modo corporali & sensibili, nec secundum modum inferiorum creaturarum, sed secundum perfectissimam processionem, qualis inuenitur in supremis creaturis, & adhuc ista similitudo deficit à perfectione diuinorum: est ergo accipienda processio in Deo secundum emanationem intelligibilem, sicut Verbum manet in intelligente. Et sic datur in Deo processio secundum fidem. Quod verò ista processio intelligibilis perfectionem dicat de se, sine vlla imperfectione, valde subtiliter insinuat S. Thom. & probauit vnico verbo, quia scilicet conuenit intelligenti cuicumque ex eo quod intelligit, non quia omnis intelligens semper producat verbum, quia aliquando id potest suppleri vel supponi, sed quia quicumque intelligens illud producit, ex eo quod intelligit, producit, siquidem manifestare, & exprimere conceptum ex vi, & perfectione intelligendi prouenit, dicente Domino *Ex abundantia cordis os loquitur.* Et sic ad diuinitatem transferri debet ista perfectio, si transferatur intelligere; qua ratione dixit Cyrillus l. 2. *The-sauri c. 1. Non potest esse perfecta Deitas nisi Filium habeat, & fructum ex se proferat.*

19 Circa hunc discursum D. Thom. dubitari potest, & de præsuppositis, quæ supponit, & de ipsa ratione in se quantum valeat. Et quidem primum præsuppositum, scilicet quod processio attendi debet secundum aliquam actionem, *seq. articulo* tractandum est quia non clarè apparet quomodo attendi debet processio secundum aliquam actionem, an videlicet ipsa processio sit ipsamet actio, an solum secundum actionem attendi, & mensurari debeat, & an sit formaliter ipsa vitalis actio amoris & intellectionis, an aliqui aliud. Secundum autem præsuppositum probatur *in presenti* à D. Tho. exemplo intellectus, ubi præcipuè apparet processio immanens, & interior quia quicumque intelligit ex hoc ipso quod intelligit procedit aliquid intra ipsum, quod est conceptio rei intellectæ, &c. Quæ propositio ita vniuersaliter sumpta de quocumque intelligente videtur habere plures instantias, quas sæpius soluimus, ut in *libris de Anima q. 12. & præced. tomo diff. 13. art. ultimo*, negantes formationem Verbi in Beatis. Summa instantiarum est, quia actus intelligendi non est actio productiua, sed qualitas, qua afficitur intellectus ut formaliter reddatur intelligens, unde Philoph. in 3. de *Anima*, dicit, quod *Intelligere est quoddam pati*, & D. Thom. dicit *infra q. 34. art. 1. ad 3.* quod *Intelligere importat solam habitudinem intelligentis ad rem intellectam, in qua nulla ratio originis importatur, sed solum informatio quædam in intellectu nostro.* Non ergo intelligens ex eo quod intelligit, agit, vel aliquid procedit intra ipsum, sed solum informatur in genere intelligibili.

Instatur secundò, quia non omnis qui intelligit, ex eo quod intelligit, procedit aliquid intra ipsum: nam Spiritus S. intelligit, & Filius intelligit, & essentia diuina, intelligit, seu, Hic Deus absolute sumptus, & tamen ex hoc intelligere nihil procedit. Et in nostra sententia Beati in visione gloriæ intelligunt, & ex hoc intelligere non formatur Verbum:

& nos postquam verbum, seu conceptum formauimus, intelligimus contemplando in verbo formato, & tunc non producimus verbum, quia iam productum est. Quomodo ergo verificatur quod quicumque intelligens, ex eo quod intelligit, procedit aliquid in ipso?

Deinde datis, & admissis his præsuppositis, restat ponderare quantum valeat discursus S. Thom. inferens ex illis dari in Deo processionem ad intra. Et intendit D. Thom. probare duo.

Primum est tales processionem dari in Deo, quoad hoc quod personæ, seu res procedentes sint distinctæ discursu supra posito.

Secundum quod persona procedens maneat consubstantialis, & eiusdem naturæ cum suo principio: hoc enim *in solutione ad 2.* exprimit D. Th. dum dicit quod id quod procedit ad intra processione intelligibili, non oportet esse diuersum, sed tanto magis est vnum, quanto perfectius procedit quia conceptio intellectualis tanto magis est intima intelligenti, quanto aliquid perfectius intelligitur. Vnde cum diuinum intelligere sit infinite perfectum, necesse est quod Verbum diuinum sit perfecte vnum cum eo à quo procedit.

Cæterum in hoc discursu neutrum videtur D. Thom. plenè, & efficaciter probasse. Nam quod attinet ad distinctionem rei procedentis à suo principio propter quam ponitur processio realis in Deo, non conuincitur eam dari ex eo quod quicumque intelligens ex eo quod intelligit aliquid procedit ab ipso quod dicitur conceptio. Nam in intelligente tunc procedit conceptio intra ipsum, quando non supponitur obiectum intellectum, & conceptum, seu representatum formaliter, & per modum termini intellecti. Si ergo supponatur, non procedit: in Deo autem supponitur obiectum intellectum, & conceptum, quia obiectum est essentia diuina; hæc autem ex propria ratione actus puri in genere intelligibili nihil potentialitatis habet; & sic non solum est intelligibilis in actu primo, sed etiam intellecta in actu secundo ex se: Nō ergo in tali natura procedit conceptio, seu verbum, siquidem ibi intelligitur obiectum quod ex se & in ratione actus puri in esse intelligibili, & ante omnem processionem est intellectum in actu, atque adeò per conceptionem, seu verbum non redditur intellectum.

Si dicas non ad hoc poni Verbum in diuinis, ut per illud reddatur essentia Dei intellecta, nec Patrem esse sapientem sapientia genita, sed potius ex eo quod intellecta est essentia in actu perfecto produci Verbum tanquam imaginem, & manifestationem seu splendorem istius gloriæ, non ut per illud reddatur intelligens Pater, vel intellecta essentia.

Contra est, quia hoc modo probat D. Thom. processionem in Deo ex aliqua processione creata, & naturali sub ea ratione, qua omnino repugnat in Deo esse; & sic processio ista in intellectu, quam adducit D. Thom. nihil omnino seruit ad probandam processionem in Deo. Anteced. prob. nam D. Thom. intendit talem processionem probare in Deo, quæ importet Verbum ut personam distinctam à suo principio: ergo id debet probare ex processione postulante verbum distinctum à suo principio. Sed processio quæ in nobis ponit verbum distinctum ab obiecto, seu specie intelligibili omnino repugnat Deo: ergo non potest inferre processionem quæ dicat verbum distinctum à suo principio in Deo. Minor patet, quia idèd verbum in nobis distinguitur à specie, & obiecto quod exprimit, quia non habet illud obiectum in se totam actua

actualem, seu totum esse intelligibile in actu secundo per modum intellecti, & expressi, hoc autem repugnat Deo, cum ex se, & ante omnem processionem notionalem sit intelligibilis in actu ultimo, & puro: ergo ex processione Verbi, ut distincti ab eo à quo procedit, & exprimitur, incongrue assurgimus ad ponendam in Deo processionem Verbi ut distincti à suo principio. Quod si alio modo procedit Verbum distinctum in Deo, quam in nobis, ille modus est latens, nec probatur ex processione qua in nobis Verbum procedit; & sic oportebit ad aliam rationem recurrere, & istam D. Thomæ omittere.

Et Conf. quia D. Thom. vult manuducere nos ad processionem internam, & immanentem Dei ex processione, quæ inuenitur in supremis creaturis, scilicet intellectibus. In his autem solum inuenitur processio verbi, quando procedunt cum imperfectione, & indigentia, quia scilicet necesse habent exprimere in actu secundo id, quod solum in actu primo est in specie; & sic videmus quod creaturæ non semper producant verbum, sed quando interuenit aliqua imperfectio, in visione autem beatifica nos admittimus quod non producantur: ergo non probat D. Thom. dari in Deo processionem ex intelligere nostro perfectum, sed ex imperfecto, quia quando intelligere nostrum est perfectum, non procedit verbum in nobis. Cum ergo in Deo solum sit intelligere perfectum, ex ista ratione non ostenditur dari processio in Deo, sed magis non dari.

Quod verò attinet ad consubstantialitatem Verbi procedentis cum suo principio, aut non probatur à D. Thom. aut si probat aliquid, destruit probationem prioris, & principalis intenti, scilicet quod Verbum procedat ut distinctum personaliter, & notionaliter à suo principio.

Probatur quia si est de ratione cognitionis infinitæ, quod id quod procedit sit summè vnum, & consequenter vnum in substantia cum suo principio: ergo non erit de ratione talis cognitionis infinitæ quod id quod procedit ex vi sua sit diuersum in persona: ergo ratio qua D. Thom. intendit probare consubstantialitatem Filij ex infinitate cognitionis, destruit eam, qua probat diuersitatem personæ.

Prima consequens probatur quia Verbum ad hoc ponitur ut sit imago intelligibilis representans obiectum, & vicem illius supplens, & consequenter ut faciens vnum representatiuè cum obiecto; ergo si de ratione talis infinitæ cognitionis est facere vnum in substantia, quomodo de ratione eius erit fundare distinctionem talis Verbi procedentis à suo principio in ratione Verbi, & quod ex vi talis processionis vnum sit?

Conf. quia licet cognitio diuina essentialis illam summam, & substantialem unitatem petat inter intelligentem, & obiectum, tamen ex hoc non probat D. Thom. quod cognitio notionalis, & productiua Verbi ex vi sua habeat inducere consubstantialitatem eius cum suo principio, sed solum relatiuam oppositionem, & diuersitatem. Nam in Deo intelligere non habet summam unitatem inter obiectum, & intellectum in vi conceptionis, & Verbi procedentis: nec enim personalitas, & relatio in Deo est ratio illius unitatis substantialis: ergo ex vi processionis talis conceptus, non inducitur illa unitas summa, sed supponitur ex vi essentialis cognitionis. Et sic processio Verbi non formaliter, sed solum identice habebit consubstantialitatem cum Patre, sicut etiam habet Spiritus S. quod est tollere ab illo rationem formalem Filij. In summa,

Ioan. & S. Thom. in 1. part. D. Tb. Tomus alter.

probatio ista D. Thom. æquiuocat inter cognitionem essentialem, & notionalem Dei. Quia unitas illa summa, & consubstantialitas provenit quidem, & datur in Deo ex ipsa absoluta, & essentiali ratione intelligibilitatis diuinæ, quæ cum sit infinita, est summè, & substantialiter vnum intelligens, & intellectum. Cæterum notionalis cognitio, quæ est productiua Verbi ex vi sua solum fundat diuersitatem, & oppositionem relatiuam inter procedens, & principium suum. Quod verò detur summa unitas inter tale Verbum procedens, & suum principium à quo procedit in substantia cum diuersitate in substantia, hoc ex vi talis processionis non probatur, quia tale Verbum procedens non est ratio illius cognitionis, qua Pater cognoscit, & consequenter neque est ratio unionis seu unitatis illius consubstantialis inter ipsum, & Patrem in essentia, aut si est ratio illius summæ unitatis, cum illa unitas consubstantialis sit, non erit ratio oppositionis, & distinctionis relatiuæ ut relatiua est: nec enim ex eodem principio oritur unitas in substantia, & oppositio, seu distinctio in relationibus.

Propter hæc multi tenent hanc rationem, & discursum S. Thomæ efficacem non esse, sed solum exemplo quodam ducto ex his, quæ in nobis exprimitur in intelligendo, voluisse manuducere, ad hoc ut in Deo processionem ad intra astrueremus. Cæterum, hoc mihi videtur minus perspicaciter dictum, & magnum sequi inconueniens si hæc ratio S. Thom. quæ in defensionem fidei Catholicæ contra Arrianos validissima est, efficacia destituitur, & solum ad quamdam congruentiam, eamque valde urgentem redigitur. Nec enim intentum S. D. est probare efficaciter quod in Deo dentur processionem ad intra cum distinctione personarum: id enim sola fide tenetur, & ex Scriptura probatum reliquit S. Thom. *Ego ex Deo processi, & veni*, Ioan. 8. Sed quia Arius dicebat processionem non esse ad intra in Deo, quia hæc impossibilis est, quia sine diuisione naturæ, non poterat ab ipso intelligi. Vnde, ex hac impossibilitate ductus locutiones Scripturæ de processione, intelligi debere de processione ad extra, sit necessario, quod, ut fides Catholica occludat Arrio hoc effugium, efficaciter debeat probare contra ipsum non repugnare, necesse impossibilem processionem ad intra in Deo. Et hoc solum potest efficaciter probari hac ratione D. Thom. quia talis processio nullam dicit imperfectionem, quia competit naturæ intelligenti, ex eo quod intelligens est, ut in nobis videmus, esse autem intelligentem nulla imperfectio est: ergo. Dicendum ergo est rationem D. Thom. efficacem esse quantum ad intentum huius articuli, in quo non intendit S. D. processionem in Deo probare absolute ex processionibus, quæ in creaturis sunt, sed processionem quas Scriptura Deo attribuit, ex his quæ in nobis sunt declarare, & ostendere contra hæreticos, quod intra Deum sint, & non ad extra, neque hoc repugnare Deo. Itaque dati processionem in Deo supponit D. Thom. non probat: nec enim id probari potest ex naturali ratione, & ex his quæ in creaturis videmus, cum mysterium Trinitatis ex creaturis inuestigare non possit, quia in affectibus ad extra non exprimitur, nisi quod in Deo omnibus personis commune est: sed D. Thom. hanc rationem explicandi Trinitatem personarum ex processione Verbi, & amoris ex August. accepit, & meliorem securus est, non ut demonstratiuam Trinitatis, ut docet *infra qu. 32. artic. 1. arg. 2.*

D 2

Quare

Quare processionem dari in Deo ex Scriptura supponit D. Thom. *initio artic.* Deinde verò modum quo istæ processionem in Deo esse possint declarat, reiiciendo prius explicationes erroneas hæreticorum, qui solùm agnoscebant in Deo processionem per ordinem ad extra, qua procedunt effectus à causa, vel causa se manifestat in effectibus. Intra Deum verò processionem non agnoscebant, quæ distinctionem inter rem procedentem, & suum principium ponat, & tamen unitatem in substantia seu essentia seruet. Ad explicandum ergo quomodo intra Deum processio saluari possit sine diminutione aut diuisione in ipsa natura, accipit D. Thom. processionem quæ est secundum actionem immanentem spiritua-lem, qualis est intelligere, & velle, secundum quas dari processionem intra suum principium manentes & non ad extra exeuntes manifestum est, idque præcipuè in intelligibili actu videre est, secundum quem procedit conceptio intra nos. Quod verò istæ processionis immanentes dentur, & quod ad perfectionem naturæ intelligentis pertineant, id optimè ostendit S. Thom. non per congruentiam, sed per efficacem rationem, quia in nobis, (& idem est in quocumque intelligente) conceptio quæ procedit ad intra, procedit ex eo quod intelligit, & ratione ipsius intelligere conuenit cuicumque conuenit (sive in omni indiuiduo, & in omni intelligere conueniat, sive non) sufficit stabilire quod si conuenit, ex eo quod intelligit, conuenit: ex abundantia enim cordis, os loquitur: ergo ex perfectione simpliciter, & non repugnante Deo, quia intelligere maxima perfectio est, & quod conuenit ex eo quod intelligit, perfectum esse debet: sicut probamus Deum esse bonum aut sapientem, quia hæc ad perfectionem sequitur, & hæc probatio efficax est, non congruentia tantum. Cum ergo totus iste decursus non ordinetur nisi ad explicandum modum quo possit intelligi processio in Deo, quam ponit Scriptura, non ad probandum illam dari, nihil obstant imperfectiones quibus actiones istæ immanentes reperiuntur in creaturis, quia tales imperfectiones id Deum transferendæ non sunt, sed iuxta perfectissimam eius naturam sunt accommodandæ, quantum ad id quod perfectionis est.

Quare tota elucidatio discursus D. Thom. ex responsione ad obiectiones propositas clarius manifestabitur. Et relictis his quæ pertinent ad primum præsuppositum, de quibus *seq. art.* agitur. Ad instantias quæ contra secundum afferuntur.

Ad primam, dico quod actus immanens ita est
 24 qualitas quod eminenter est actio, quatenus est qualitas per modum actus secundi, & actus secundus vim habet actionis; & sic aliquid producere potest effectiue, & non solùm formaliter; & ratione sui constituere, imò si constituit tanquam actus secundus id facit, atque adeò tanquam habens totam actualitatem, & vim actionis, licet in se qualitas sit. De quo plura diximus in *lib. de anima q. 11*. Ad id quod dicitur ex Philosopho, quod intelligere est quoddam pati, dicemus id verificari causaliter, & præsuppositiue ad intelligere, non formaliter; quia antecedenter ad actum ipsum intelligendi debet intellectus informari obiecto, seu specie intelligibili; & sic factus intellectus, in actu operatur actiue, & emanatiue ipsum actum intelligendi sicut potentia visiva informata specie coloris, elicit actum visionis; quod si elicit, non passiue se habet ad talem actum, quasi tantum recipiens illum, sed actiue, quia emanat à se. Et hic sensus est tam manifestus in ipso Philosopho, ut mirari non possim viros doctos sic axioma istud accepisse, quod intelligere

est quoddam pati, quasi voluerit Philosophus formalem rationem intelligendi non in operatione emanante, sed in informatione passiva constituere. Nam Philosophi verba in *3. de Anima textu 2. lect. 7.* apud D. Thom. sic se habent: *Si igitur est intelligere sicut sentire, aut pati, quoddam erit ab intelligibili, aut aliquid huiusmodi alterum. Impassibilem ergo oportet esse, susceptivum autem speciei, & potentia tale.* Vbi Aristoteles apertissime dicit ipsum intelligere esse quoddam pati, quatenus patitur ab intelligibili, & suscipit speciem, sicut etiam dixerat de sentire quod est pati quoddam à sensibili in *lib. 2. de Anima textu 5.* ut constat ex D. Thom. *super illud locum lect. 7. & 1. p. q. 79. art. 2. & q. 14. art. 2. ad 2.* Hoc autem quod est sensum informari specie, & intellectum intelligibili, præcedit ipsum actuale sentire, & actuale intelligere, siquidem sentimus, & intelligimus per sensum, & intellectum informatum ipsa specie, cum à potentia, & obiecto pariatur notitia. Et constat, quod ante notitiam non dicitur potentia cognoscens intelligere, vel cognoscere in actu. Si ergo Philosophus ea solùm ratione dicit quod intelligere est quoddam pati, quatenus intellectus suscipit speciem, & informatur ab intelligibili, tale informari, & tale pati non est ipsa notitia, nec ipsum intelligere, siquidem ex intellectu sic informato emanat, & paritur intellectio, & notitia: Esse enim operationem, & actionem potentia cognoscitiua ipsum cognoscere Philosophi ibi passim docet, & specialiter potest videri in *eodem 3. de anima textu 140. & in eodemmet loco cit.* quo dicit intelligere esse quoddam pati, addit *quod intellectus est id quo opinatur, & intelligit anima.* Quare autem Philosophus etiam explicet intelligere per pati, & informari à specie, & non per operari quod emanat ab intellectu sic actuato, & informato, ea ratio est quia explicat intellectum possibilem prout distinguitur ab intellectu agente: Intellectus autem agens dicitur talis, quatenus agit, & producit species in intellectu possibili; sicque reducit eum de potentia ad actum, ut intellectus factus in actu operetur, & cognoscat. Vnde loquendo de intellectu per ordinem ad intellectum agentem, dicitur passivus seu passibilis respectu specierum, quæ illi ab agente imprimuntur antecedenter ad intelligere, quia intellectus sic formatus speciebus in operationem intelligendi procedit. Eodem modo intelligitur dictum S. Thom. *infr. q. 34. cit. in argumento* cum dicit quod intelligere importat solùm habitudinem intelligentis ad rem intellectam, in quo nulla ratio originis importatur: nec enim dicit S. D. quod ipsum intelligere, quod est operatio, non dicat emanationem, & processum ab intellectu, ut à virtute actiua à qua egreditur, sed dicit quod istud intelligere, (quod utique est operatio) importat solam habitudinem intelligentis ad rem intellectam, in quo nulla ratio originis importatur, scilicet respectu rei intellectæ, & cognitæ: ad hanc enim non comparatur intelligens secundum habitudinem originis: intelligens enim per hoc quod intelligit non originat, aut deriuat à se obiectum intellectum, & cognitum, sed ab eo, ut formali termino, & specificatiuo, & motiuo informatur, & perficitur; imò ad hoc ipsum ordinatur ipsa operatio, quæ est intelligere, ut per ipsam tanquam per notitiam, & per conceptum eius tanquam per terminum, ipse intellectus in actu secundo fiat ipsum obiectum intellectum, & ei in actu secundo vnatur intelligibiliter expressè, sicut per speciem impressam vnatur intelligibiliter in actu primo, & impressè ipsi obiecto. At verò in ipso intelligere quatenus est dicere, importatur ordo originis ad verbum, seu conceptum, quia dicere est proferre verbum

verbum, & verbum est originatum à dicente, cum tamen in intelligere res intellecta non sit originata ab intelligente, sed potius res intellecta comparatur ad intelligentem, ut forma obiectiva informans, & perficiens ipsum, siue in actu primo per speciem impressam, siue in actu secundo per expressam, & per ipsum intelligere.

Ceterum quod intelligere ipsum non sit passio, sed operatio vitalis elicitā, & procedens actuē ab intelligente, ipse D. Thom. nullatenus negat, ut patet in 2. contra Gentil. cap. 60. & in 3. de anima, lectione 7. §. Ostendit differentiam, ubi inquit: *Intellectus ergo possibilis est quo hic homo formaliter intelligit. Illud autem quo aliquid operatur sicut actus principis (id est mouente) potest secundum esse separari ab eo quod operatur, ut si dicamus quod Ballius operatur per Regem, quia Rex mouet eum ad operandum; sed impossibile est illud quo aliquid operatur formaliter, separari ab eo secundum esse. Quod ideo est, quia nihil agit in actu, nisi secundum quod est actu, &c.* Manifeste ergo D. Thom. appellat ipsum intelligere operationem, quæ emanat vitaliter ab intelligente, & intelligens operando, & agendo dicitur intelligere, non patiēdo, licet respectu obiecti, seu rei intellectæ non significet intelligere operationem per modum originis, sed per modum vnitionis cum ipso obiecto, à quo ut à specificatiuo, & ut à termino formatur, & perficitur. Vnde in 4. contra Gentil. c. 11. dicit D. Thom. quod *Ipsū intelligere significat apprehensionem eius quod intelligitur per intellectum.* Itaque in hac operatione vitali, quatenus intellectus comparatur ad obiectum ut apprehendens illud intentionaliter, consistit formaliter intelligere.

25 Ad secundā instantiam sapē à nobis responsum est, quod non est intentum S. Thom. probare quod per omnem intellectiōem quoquo modo cōsideratam procedit Verbum, sed per intellectiōem fecundam, & quæ conuenit alicui tanquam principio exprimēti & manifestanti id quod intelligit. Hoc enim totum includit D. Th. in illa causali. *Quicumque intelligit ex hoc ipso quod intelligit procedit aliquid, &c. ex vi intellectiua proueniēs, & ex eius notitia procedens.* Quæcūque ergo natura intellectiua ex hac vi intelligēdi, & actiuitate in tota sua perfectione, & modo considerata petit quod aliquid procedat intra se, quatenus nō solum est vis apprehensiuā, sed etiā manifestatiua, & expressiua, licet aliquando possit reperiri intellectio, & nō expressio, ob aliquem particulare modum, quo inuenitur. Sufficit ad propositum D. Th. ostendere, quod in quacumque natura intelligente ratio, & principii quare producit Verbum, quando producit est ex eo quod intelligit: sic enim ad perfectionē pertinet processio ad intra, cum ioriatur ex ratione intelligēdi, & cōuenit ex vi talis perfectionis processio cōceptionis ad intra, saltē ut exprimat & manifestetur res intellecta: hoc enim non est imperfectio in natura intellectiua, quod manifestatiua, & expressiua sit rei intellectæ: hoc enim pertinet ad fecunditatem, & plenitudinē intellectus, & ad latitudinē, ut eructet verbum bonū, id est, perfectum. Vnde cum ex vna parte Scriptura ponat in Deo processionē, & ex alia ad perfectionē naturæ intellectiue pertineat habere fecunditatem ad exprimendum, & manifestandū nec id sit imperfectio, cōcluditur in Deo esse ponendam, & explicandā processionem, quā ponit Scriptura per modū huius processionis Verbi, & cōceptus ad intra. Ad hoc autem non requiritur quod quicumque intelligit producat, & exprimat verbum distribuendo ly *Quicumque* pro Ioan. à S. Thom. in 1. part. D. Th. Tomus alter.

singulis generum, & pro quocumque intelligere indiuidualiter sumpto, sed sufficit, quod ly *Quicumque* distribuat pro generibus singulorum, seu pro quacumque natura intelligente, quia intentum D. Thom. non est nisi probare quod in Deo detur ista processio, non quod in qualibet persona detur, aut in quacumque intellectu indiuidualiter sumpta, alias vellet probare quod etiam Verbum, & Spiritus S. producerent Verbum; ad hoc autem sufficiebat ostendere quod ista processio conuenit cuicumque intelligenti, ex eo quod intelligit, tanquam ex radice & principio, licet non semper: sic enim conuenit ex perfectione naturæ intelligentis, & ad eius perfectionem pertinet manifestare, & exprimere verbum: ergo hæc perfectio non debet deesse Deo, qui habet naturam intellectiuam, nisi aliās obstaret non posse in Deo esse processionem, hanc autem Scriptura aperuit dari in Deo: ergo secundum istam processionem, quæ est perfectissima, ut pote conueniens naturæ intelligenti, ex eo quod intelligit, & intelligendo manifestat, ponenda est. Hic est discursus D. Thom. & neruolus.

26 Et non enervatur iste discursus ex instātia argumenti, quia aliqua personæ in Deo perfectissime intelligunt, & ex tali intellectu non procedit Verbum, ut patet ex intellectu essentiali, quæ conuenit huic Deo, ut abstrahit à personis, & conuenit Verbo, Spiritui Sancto, nec tamen Verbum producit: Dicitur enim quod in his intelligere non producit, quia non est ibi intelligere cum modo fecunditatis, seu cum modo requisito ad fecunditatem, qui modus solum est in Patre. Vnde licet intelligere quantum est ex vi, & natura sua petat processionem Verbi, tamen si modus requisitus ad expressionem, & processionem desit in aliqua persona, dabitur intelligere, prout ibi sine tali processione, sed tamen petet ex se, quod talis natura intellectiua habeat modum requisitum ad talem processionem, & fecunditatem, sicut habet in persona Patris. Modus autem requisitus ad processionem est, quod detur distinctio inter procedētē, & principium à quo fit processio; cum enim duo concurrant ad processionem, seu productionem, scilicet virtus, secundum quam fit processio, & extrema distincta inter quæ fit, quia si extrema non sint realiter distincta, neque processio realis est, oportet quod quicumque intelligit ex eo quod intelligit procedat aliquid ab eo, quantum est ex parte virtutis, & perfectionis, quæ est radix huius processionis, dummodo tamen non desint conditiones requisitæ ad distinguendum extrema, scilicet quod habeat oppositionem sufficientem ut distinguatur à re, seu termino procedente, quod est habere intellectiōem per modum principij fecundi ad exprimendum. Hoc autem principium non habetur in hoc Deo absolute sumpto, & præscindendo à personis, quia sic abstrahit ab omni relatione, & consequenter ab omni oppositione relatiua, quæ sola est principium distinctionis in Deo, ut probatum manet. Verbum autem habet quidem intelligere ratione diuinæ naturæ, quam accipit vi suæ processionis, sed non habet modum principij fecundi, quia ex parte suæ relationis solum se habet ut conceptus, & genitus, non ut cōcipiens, & exprimens; & sic non opponitur Verbo exprimendo à se, aliās non solum esset Filius, sed Pater respectu alterius Verbi, ut iam supra deduximus. Similiter Spiritus sanctus habet quidē intelligere ratione diuinæ naturæ sibi per identitatem cum spiratione, & impulsu communicatæ, sed ex vi suæ relationis solum se habet ut spiratus, quia solam relationem spirati habet, non autem habet relationem intelligentis

gentis, & dicentis per modum principij fecundi, alias non solum esset spiritus, seu spiratus, sed etiam Pater. Vnde ex vi suæ characterificæ proprietatis, nec Spiritus S. nec Filius habent unde distinguantur, & opponantur alteri Verbo; & consequenter non habent sic intelligere, quod habeant dicere, & exprimere, seu generare. Vnde illa propositio vniuersalis D. Thom. *Quicumque intelligit, ex eo quod intelligit habet aliquid procedere intra ipsum, intelligitur, & limitatur ad quemcumque intelligentem per modum principij fecundi, id est, non solum habentis virtutem, & perfectionem, seu actualitatem ad producendum (actualitas enim omnibus personis communis est) sed etiam distinctionem ab extremo procedente; atque adeo oppositionem relationem cum illo, quia sine oppositione non datur distinctio. Et quod hæc restrictio & limitatio sit opponenda illi propositioni, non solum ex ipsa ratione habetur, sed ab ipso met D. Th. opposita est. Nam inf. 9. 34. a. 2. ponit quartum argumentum sic: *Quicumque intelligit, intelligendo concipit Verbum, sed Filius intelligit. Ergo Filius est aliquod Verbum; & sic non est proprium Filij esse Verbum.* Respondet S. D. *Ad quartum dicendum quod eo modo conuenit Filio esse intelligentem, quo conuenit esse Deum, cum intelligere essentialiter dicatur in diuinis, ut dictum est. Est autem Filius Deus genitus, non autem Deus generans; Vnde est quidem intelligens, non ut producat Verbum, sed ut Verbum procedens.* Ecce propositio D. Thom. restricta ad quemcumque intelligentem cum fecunditate, & principio distinguente à suo procedente, sine qua distinctione ut omnino requisita, processio stare non potest.*

37 Quod verò dicitur de Beatis non producentibus verbum in nostra sententia: dicimus non producere verbum, quia suppletur, & vnitur ipsis; & sic eorum intelligere fertur ad verbum ut vnitum, non ut productum. Vnde per se omne intelligere petit quod procedat Verbum, nisi vniatur, & suppleatur per unionem processio; sicut omnis natura substantialis petit subsistentiam ex se resultantem, nisi suppleatur per subsistentiam diuinam. De illo autem qui Verbum produxit, & in eo contemplatur: dico huiusmodi non producere verbum de nouo, sed continuare productum, vel si producit de nouo, erit ad manifestandum rem intellectam, non ut intellectam reddat.

Ad ea quæ obijciuntur contra discursum ipsum D. Thom. Resp. ad primum, solutione ibi data, quæ vera, & legitima est, eo quod conceptus, seu species expressa nobis, & verbum ad duo munera ponitur: Primum, ut obiectum intra intellectum reddatur intelligibile in actu secundo, & per modum termini in quo ab intellectu apprehendatur, eo quod obiectum per se non est sufficienter intelligibile, & immateriale, ut per se ipsum attingatur ab intellectu, ut terminus intellectus: nam licet per speciem impressam obiectum reddatur intelligibile, & vniatur intellectui, tamen in illa specie solum redditur obiectum intelligibile per modum principij intellectionis, non per modum termini intellecti. Oportet autem quod intellectum attingat obiectum per modum termini, & rei intellectæ, & non in specie impressa quia ibi solum continetur per modum principij intelligibilis, quo actuatur potentia ad eliciendum intellectionem, non per modum termini intellecti, nec poterat obiectum intelligi in specie impressa, nisi reflexè, quod supponeret directè esse actum; & sic esset eadem difficultas

quomodo attingitur directè. Nec etiam potest attingi obiectum prout extra intellectum in se, tum quia ibi plerumque est quid corporeum & non spiritualizatum; & sic non proportionatum spirituali cognitioni: tum quia etiam si obiectum spirituale sit entitatiuè, non tamen intentionaliter in actu secundo, & per modum rei intellectæ in actu terminantis cognitionem, quia hoc dependet ab ipso intelligere & intelligi, seu ab ipsa actuali luce, & manifestatione spirituali intellectiua, quæ solum intra intellectum fit, non extra intellectum egreditur; & sic obiectum esse illustratum, & manifestatum per modum termini, & rei cognitæ intra intellectum, non conuenit obiecto ad extra. Vnde ut obiectum reddatur intellectum, procedit conceptus seu species expressa, in qua repræsentatur obiectum, ut intellectum, & cognitum & manifestatum, seu expressum in actu, sicut in specie impressa, ut intelligibile in actu primo. Et hoc munus exercet in nobis conceptio intellectus circa obiectum ut sit intellectum in actu per modum termini, & secundum hoc vocatur propriè species expressa, & conceptus. Aliud munus exercet, non in proportionando, & spiritualizando obiectum in esse cogniti, & intellecti per modum termini, sed præcisè in manifestando, & loquendo rem iam intellectam, & cognitam sicque propriè dicitur Verbum, seu sermo, & lux, quia omne quod manifestatur, lumen est, quamuis, & secundum prius officium, etiam verbum vocari soleat, & manifestatio sit, sed ibi exprimitur conceptus ad intelligendum, seu contemplandum rem ut per modum termini reddatur intellecta. Secundo modo, non ad intelligendum, sed quia intellecta est ex plenitudine cordis, & abundantia os loquitur. Et hoc modo procedit Verbum, ut inquit Augustin. *non ex indigentia, sed ex intelligentia.* pertinetque ad perfectionem intellectus sic manifestare rem intellectam.

Igitur D. Thom. non probat in Deo dari processionem Verbi propter primum munus, quia essentia diuina seipsa, & in vi sui absoluti conceptus, & non ratione personæ Verbi est intelligens, & intellecta, & ipsum intelligere in actu puro, & proportionato sibi, etiam per modum rei intellectæ; & sic Pater non est sapiens sapientiæ genitæ, ut dicit Aug. sed potius ipsa sapientia genita ex plenitudine sapientiæ Patris procedit, & ut similis illi in sapientia. Solum ergo intendit probare processionem Verbi in Deo quantum ad secundum munus, quod est manifestare, seu esse locutionem & expressionem, seu splendorem sui principij, & rei intellectæ. Et ad hoc etiam in nobis requiritur quod verbum sit distinctum ab eo à quo procedit, nec tamen imperfectionem ullam supponit, sed maximam perfectionem, & abundantiam intelligendi, quia licet supponatur imperfectio intelligibilitatis in obiecto, & potentialitas, quando indiget verbo, seu specie expressa, ut reddatur intellectum in actu secundo, & per modum termini, & non intelligibile solum in actu primo, quia ex se tantam immaterialitatem, & puritatem non habet, sed per speciem expressam purificatur, tamen ut per verbum, seu locutionem internam dicatur, manifestetur, seu exprimitur id quod iam supponitur intellectum, & cognitum, ibi nulla interuenit imperfectio, nec ex parte intellectus cognoscentis, quia ex abundantia cordis os loquitur, & verbum bonum eructatur ex corde, quasi ex repletionem cordis procedens; nec ex parte

parte rei cognita, quia non solum supponitur intelligibilis, sed etiam intellecta, & cognita in actu, nec ex parte ipsius verbi, quia manifestatio fit per splendorem & actualem expressionem, quæ nihil imperfectionis dicit. Et hoc totum, etiam quoad hoc munus manifestandi, & loquendi fit per verbum distinctum, quia fit per verbum procedens ab intelligente: ergo recte ex processione Verbi pro ea parte qua fit sine imperfectione, assurgit D. Thom. ad manifestandum processionem intelligibilem in Deo. Et in hoc sensu processisse D. Thom. constat, quia loquitur de conceptione nostra, ut procedens ex notitia, & vi intellectiva, quam conceptionem, inquit, vox significat. Verbum autem, seu conceptio procedens ex notitia, supponit rem cognitam, & intellectam; & sic non loquitur de conceptione, ut præcisè seruit ad reddendum obiectum intellectum in actu, sed ut supponit rem esse cognitam, & ex notitia illa procedit verbum, utique ad munus loquendi, & manifestandi id quod cognitum est, secundum quod ex abundantia cordis os loquitur: locutio enim & formatio verbi, quando est non ex abundantia, sed ex indigentia, ut quando aliquis loquitur inquirendo intra se, vel ab aliis querendo, nec dum tamen perfecte formando & abundanter cognoscendo, est locutio & expressio verbi imperfecta. Non autem assurgit D. Thom. ex processione conceptus nostri ad Deum, nisi semotis imperfectionibus.

29 Hinc patet ad replicam argumenti, dicimus enim D. Thom. procedere ex processione naturali, seu creata pro ea parte, qua dicit perfectionem non repugnantem Deo, scilicet quatenus dicit locutionem ex abundantia, & notitia cordis procedentem. Et ad probationem dicimus D. Thomam intendere probare processionem Verbi ut personæ distinctæ. Negamus autem quod processio verbi ut distincti sæpe imperfectionem dicat in nobis: nam licet verbum procedens ad hoc ut formetur obiectum in ratione termini, & rei intellectæ imperfectionem supponat ex parte obiecti quod secundum se non est in actu ultimo intelligibili, vel etiam ex parte intelligentis, qui adhuc plenè non cognoscit, sed inquit & paulatim format verbum, ut perfecte cognoscat, tamen quando verbum procedit ex abundantia cordis, & ex notitia plena, solumque formatur ad manifestandum, & loquendum etiam intra se id quod iam est cognitum, talis processio & formatio imperfectionem non dicit in nobis, nec aliquid quod repugnet transferri in Deum, quia si aliquid repugnaret, esset distinctio extremorum, quæ requiritur ad processionem realem, & propter hoc non potest inuestigari per rationem naturalem quod in Deo dentur tres personæ. Sed ratio D. Th. procedit ex suppositione fidei, cum ex Scriptura constet attribui illi, non verò repugnare processionem. Nec alio modo procedit Verbum, quam intelligibili hac processione, quæ etiam in nobis est, semotis tamen imperfectionibus, quæ apud nos sunt: ex genere enim suo imperfectionem non dicit talis processio, sicut nec alia attributa ut sapientia, iustitia, misericordia, &c. quæ apud nos sunt, & sine nostris imperfectionibus in Deum transferuntur. In alio verò est latentior, & sacrator illa processio in Deo, quia ibi distinguuntur extrema penes relativam oppositionem tantum, apud nos autem Verbum procedens, etiam quando ex plena intelligentia procedit, non in sola ratione consistit. Et in hoc non potest processio creata assurgere ad manifestandam divinam, nec in hoc laboravit probatio D. Th. sed supponens in initio corporis art. ex Scriptura dari in Deo processionem

(quæ utique non potest nisi inter extrema relativam dari) probatio eius solum discurrit circa modum processionis ad intra, ostendens debere esse illam, sicut ea quæ in intellectualibus creaturis datur intra intellectum, semotis imperfectionibus.

Ad Conf. Resp. in creaturis inveniri processio- 30 nem verbi utroque modo, & propter indigentiam seu imperfectionem rei intellectæ, & principij intelligentis, & propter abundantiam, seu perfectionem intelligendi, quia plena notitia est, & vult se manifestare, & communicare, prius loquendo sibi intus, deinde ad alios; & hoc fecunditatem supponit in intelligendo, non imperfectionem, aut defectum: nec enim semper ex imperfectione loquimur, aut dicimus id quod intelligimus. Quod si ad alios extra nos non semper cum imperfectione loquimur, sed ex abundantia cordis: ergo etiam intra nos non semper cum imperfectione loquimur, & conceptions producimus, quia locutio ad extra per vocem, supponit locutionem ad intra per verbum, & si illa sine imperfectione manifestatur, etiam ista sine imperfectione procedit, quæ manifestatur per illam. Quod autem Beati non formant Verbum, iam diximus non esse ex nimia perfectione ipsius intelligere, sed quia illud sibi unitum habent à Deo non productum à se; & sic suppletur, quod procedere debebat à mente creata, ubi autem suppletur, non formatur. Et deinde quod non formetur ibi Verbum est ex impossibilitate, quia representatio illa Dei in esse intelligibili, & intellecto ipsius, ut est in se, est impossibilis in specie, seu entitate creata, quæ tantæ representationis, & intelligibilitatis capax non est. Vnde quia ipsum intelligere creatum non æquatur representationi, & intelligibilitati obiecti, & verbi producendi; ideo non formatur ibi verbum à mente creata, sed suppletur à Deo, non verò propter perfectionem ipsius in elligere cessat formatio verbi, sed propter improprietatem, & inadæquationem ipsius intelligere creati, cum ipso intelligi, seu intellecto esse obiecti quod formatur in verbo: nequit enim subintelligi, seu intelligibilitate talis intelligere creati formari obiectum in specie expressa, & representari id quod in se habet intelligibilitatem increatam, & actus puri, & sub illa videtur immediate ab ipso intellectu. Vnde cum per tale intelligere creatum non possit aptari tale intelligi increatum obiecto representato in Verbo, quod est Deus in se sub sua intelligibilitate propria & actus puri, qualem habet in se, non sub aliena, & creata, qualis est quæ ex tali intelligere creato formari potest, ideo non formatur verbum seu representatio Dei in se à beatis, neque ad constituendum obiectum intellectum in esse intelligibili, neque ad manifestandum & loquendum, quia locutio per representationem, & verbum fit.

Ad id quod obiicitur contra consubstantialitatem. Resp. rationem D. Th. qua probat consubstantialitatem Verbi procedentis cum suo principio, procedere valde formaliter, nec destruere oppositionem, & distinctionem relativam. Nam probat D. Thom. quod in processione intelligibili, id quod procedit ex vi ipsius processionis petit unitatem eandem numero cum obiecto à quo paritur, & procedit, petit inquam unitatem in esse intelligibili, & ulterius inde potest inferri quod sit unitas in substantia, & perfectione, quando esse intelligibile ad substantiam pertinet, ut in Deo: vnde non destruit diversitatem in persona, quæ solum est relativam, sed processio illa utrumque infert in vi sua secundum diversas considerationes.

D 4

Nam

Nam ut est processio realis, infert, & requirit extrema realiter opposita, & distincta; non sunt autem opposita nisi relative. In quantum autem est processio intelligibilis secundum intelligibilitatem divinam, & increatam in actu puro, oportet quod exprimat in se rem intellectam ut eandem numero in esse intelligibili seu in intelligi; & hoc ex vi processionis illius intelligibilis, quia ex ipso modo talis processionis habet esse assimilativum, seu manifestativum obiecti intellecti, per se quidem & directe assimilatione identificante sibi obiectum in esse intelligibili tanta identificatione, quantum ipsum esse intelligibile patitur, id est, si esse intelligibile sit accidentale ipsi rei, erit identificatio accidentalis, si esse intelligibile sit ipsa substantia rei, processio conceptionis in illo ordine, scilicet prout intelligibilis, vi sua petit consubstantialitatem simpliciter. Per accidens autem, & propter imperfectionem istius esse intelligibilis, assimilatio, & expressio verbi non attingit consubstantialitatem simpliciter cum suo obiecto, seu principio à quo procedit, sicut contingit in nobis, & in aliis intellectibus creatis. Itaque processio ista vi sua est ratio consubstantialitatis rei procedentis cum suo principio, non solum identice, quia quidquid procedit, intra Deum, & secundum esse intelligibile est unum, & idem substantialiter, sed ex ipsa vi & formali ratione processionis intelligibilis ut infinitæ & purificatæ ab omni potentialitate, & imperfectione extranea à sua linea intelligibili, & tamen eadem processio ut realis est, & ex ratione generali processionis realis petit extrema realiter distinguere in relatione opposita, quæ sola est ratio distinguendi in divinis. Hæc est viva mens D. Thom.

32 Et ratio huius est, quia in ordine & linea intelligibili assimilatio intellectus ad obiectum, siue in specie impressa, quando fecundatur, & actuatur ab obiecto, siue in specie expressa quando paritur, & manifestatur idem obiectum, semper tendit, & per se loquendo respicit identificationem non in esse entitativo, sed intelligibili. Nam intellectus per similitudinem speciei intendit ab ipsomet obiecto actuari, quatenus in illa similitudine, seu specie intelligibiliter continetur, ita quod non aliud simile, sed ipsummet obiectum numero quod est in se, illud transformatur in alio esse, scilicet intelligibile in intellectum, ita quod intelligens est ipsummet obiectum, per speciem quidem impressam in actu primo, per expressam in actu secundo. Et quanto perfectius intelligit, & ipsum esse intelligibile perfectius est, tanto magis dicitur fieri ipsummet obiectum numero. Et sic ex suo genere, intelligibilis ordo tendit ad identificationem intellectus cum obiecto; sed non in esse entitativo in creaturis, quia non est possibile, sed in esse intentionali, & intelligibili quod in illis distinguitur ab esse entitativo, quia non est actus purus. Vnde fit quod si ordo intelligibilis intra suam lineam crescat, & ita purificetur quod perveniat ad actum purum, idem erit esse intelligibile quod substantiale & entitativum, & sic assimilatio in esse intelligibili ad obiectum erit ad identificandum illud sibi in esse substantiali supposito, quod esse intelligibile substantiale est in illo actu puro, & identificans sibi obiectum in illo esse intelligibili, identificat in substantia. Ergo illa processio quæ est infinita, & fit secundum hoc esse intelligibile purificatum ab omni potentialitate, & quod est actus purus, in ipsomet conceptu sic exprimente, & manifestante obiectum in suo proprio intelligibili esse in actu puro, pe-

tit identificationem cum ipso in esse substantiali, quia illud esse intelligibile, substantiale est. Substantia autem Patris est intelligibilitas ipsa in actu puro: ergo Verbum quod procedit ut manifestativum eius in esse intelligibili, procedit ut consubstantiale ipsi, quia esse intelligibile substantiale est, ut splendor gloriæ in manifestatione, ut figura substantiæ in representatione identificante intelligibilitatem, quæ est substantia in Patre, licet quia processio realis est, & inter extrema realiter distincta, suam oppositionem relativam servet & petat.

Et hinc patet ad Conf. argumenti, quia in Deo 33 intelligere & intellectus, & obiectum intellectum non ratione processionis aut personæ Verbi, sed quia sunt actus puri in linea intelligibili sunt omnino unum, sed processio Verbi, quæ per expressionem & manifestationem huius obiecti in esse intelligibili intendit idemmet obiectum, sicut est in se representare & manifestare in eodem esse intelligibili, cum manifestet illud infinito modo, & perfectione, & illud esse intelligibile in quo trahit ad se, & representat illud numero obiectum, sit substantiale esse ipsiusmet obiecti quod exprimit, sit ut substantialiter, seu in esse substantiali quod est eius esse intelligibile, sit idem cum obiecto quod est ipsa substantia Patris, non solum identice, sed formaliter ex vi talis processionis intelligibilis.

Vnde patet quid dicendum sit an ex vi proces- 34 sionis notionalis detur summa unio consubstantialis inter Verbum, & Patrem, & inter obiectum cognitum & cognitionem, seu inter substantiam ipsam & Verbum cui communicatur. Dicendum est enim nullam dari unionem in divinis proprie loquendo, quæ est distinctorum extremorum coniunctio ad aliquod tertium constituendum, quasi ipsa unio partium sit ratio alicuius unitatis resultantis in illo tertio. Hoc nullo modo datur in divinis, sed si aliquando nomine unionis utimur in divinis, est absolute, nomine unionis intelligendo identitatem, vel unitatem summam, non unionem coniungentem extrema ad componendam unitatem resultantem. Hoc patet, quia essentia divina non unitur cum personis, quasi cum distinctis à se, siquidem sunt identificata & maxime unum, sicut dixit Christus. *Ego & Pater unum sumus*, non dixit unitum. Relationes ipsæ inter se non uniuntur, quia opponuntur & discriminantur inter se, sunt autem unum in ratione essentiæ, in quantum autem opponuntur non uniuntur. In linea autem intelligibili obiectum non unitur potentia vel cognitioni in divinis, mediante verbo & processione notionali, quia ibi cognitio, seu intelligere, & intellectus, & res intellecta sunt unum omnimoda identitate ex se, & in quantum actus purus in esse intelligibili, non mediante Verbo productio: nec enim Verbum ponitur ex indigentia ut essentia divina reddatur intelligibilis aut unita, & representata intellectui Patris, aut ut ipse Pater sit sapiens, & intelligens: totum hoc enim habet ex se & ex infinita ratione actus puri in esse intelligibili, quam infinitatem non accepit essentia à personis, sed potius per essentiam eam habet personæ. Et nihilo minus processio illa verbi modo intelligibili orta ex fecunditate & plenitudine intelligentiæ ad manifestandum rem intellectam, non ad constituendum in esse intellecti, ex vi suæ processionis consubstantialitatem petit ipsius Verbi cum Patre generante ob rationem dictam, quia est processio intelligibilis quæ tendit ad hoc ut sit idem numero cum obiecto quod representat in esse intelligibili. Et quia

quia est processio intelligibilis in actu puro, & secundum esse intelligibile, quod est substantia, & idem atque esse entitativum obiecti, ex sua propria ratione talis processionis petit idem numero esse cum obiecto in substantia, sicut in intelligibilitate quam exprimit. Unde fit quod Filius est idem cum Patre in essentia, non solum ratione illa communi, qua omnia sunt unum in essentia divina, quia actus purus est, excepta relativa oppositione, sed etiam speciali ratione processionis intelligibilis, quæ ad hoc per se tendit in vi talis processionis, ut unum numero sit cum suo obiecto in esse intelligibili, & si hoc esse intelligibile est purum, & substantiale per se, tendit ad unitatem in esse substantiali quod est consubstantialitas, non diuidendo substantiam per propagationem, sed eandem substantiam numero, quæ est in obiecto communicando quando ipsa substantia est esse intelligibile, & intellectum in actu puro.

ARTICVLVS V.

Utrum processionem diuinam sint formaliter operationes vitales, & quæ, an emanationes naturæ?

Examinanda venit in hoc art. prima illa propositio, quam præsupponit S. Thom. in art. 1. huius q. ad declarandas processionem in Deo, scilicet quod omnis processio est secundum aliquam actionem, & sicut datur processio secundum actionem ad extra, ita secundum actionem ad intra datur processio, quæ utique est secundum actionem immanentem.

Est itaque duplex huius difficultatis caput, & præcipue partes.

Prima, an processionem istam formaliter veræ actiones sint per modum originis emittentes personas procedentes vitaliter.

Secunda, dato quod sint actiones, an sint formaliter actus intelligendi, & volendi, seu ipsum intelligere, & velle, an aliquæ distinctæ actiones præter ipsum velle, & intelligere.

Opiniones circa utramque difficultatem.

Circa primum punctum fuit opinio Durandi in 1. dist. 6. q. 2. contra D. Tho. quod processionem personarum in diuinis non sint ipsi actus intelligendi, & volendi, sed ex fecunditate ipsius naturæ diuinæ produci Filium à Patre, & Spiritum S. à Patre & Filio, non per actus intelligendi, aut volendi, quia isti actus sunt essentiales, non notionales: essentiales enim actus omnibus personis competunt, non tamen omnibus competunt generare Filium, & spirare Spiritum S. imò censet productioni notionali personarum obstare actum intelligendi, & volendi, quia omnis productio fundatur in aliqua fecunditate, actus autem intelligendi, & volendi non sunt fecundi, nec alicuius rei productiui, nec ex eis aliquid consequitur, ut dicitur in 9. met. Cæterum licet ratio producendi Filium, & Spiritum S. non sint actus intelligendi, & volendi ex parte actionis, & virtutis producendi, sed fecunditas ipsa naturæ, tamen explicatur inquit Durand. à Doctorib. istæ emanationes per quandam adaptationem ad actum intellectus, & voluntatis, tum ex parte suppositorum producentium, tum ex parte modi producendi. Ex parte quidem suppositorum, quia Filius procedit ab vno

tantum sicut ea quæ procedunt per modum naturæ, at verò Spiritus S. procedit à pluribus suppositoris. Et hoc modo se habent ea quæ procedunt per voluntatem, quia possunt fieri à pluribus per voluntatem suam concurrentibus. Ex parte autem modi quia Filius procedit prima emanatione diuina, Spiritus S. autem secunda, sicut in processu intellectualis naturæ, primò est cognitio, deinde amor, & ibi terminatur emanatio intelligentis naturæ.

Ad hanc opinionem Durandi videntur accedere qui dicunt emanationem Filij à Patre esse emanationem à viuente, sed non vitalem: nec enim omnia quæ à viuente sunt, vitali actione debent provenire, ut in animalibus egestio superfluitatum, ac per hoc euadunt quod processio Filij non sit formaliter per ipsum vitalem actum intelligendi.

P. Molina in hac q. art. 3. disp. 4. §. Quod verò, & §. Postremo censet processionem diuinam non esse ipsas actiones aut operationes immanentes, quæ sunt intelligere, & velle, sed esse secundum operationes aut actiones immanentes, aut accipi secundum ipsas. Productionem autem istam actiuam non esse intelligere aut velle, sed relationem in Patre, quæ cum intelligere complet rationem dicentis per intellectum, & relationem in Patre, & Filio, quæ cum diligere dicit actionem productiuam Spiritus S. Imaginatur itaque Molina, ut ipse dicit ibidem, §. Tertium est, tres personas diuinas hoc modo conuenire Deo. Primam quidem personam quæ est relatio Patris resultare à parte essentiae per intellectum in illo priori quo essentia se intelligit per ipsum intellectum, ex qua relatione, & essentia constituitur persona Patris, quæ producit tanquam principium Quod ipsum Filium sua essentia, atque intellectu tanquam principis Quo. Rursus sicut à parte essentiae per intellectum resultat hæc prima persona, ita à parte intelligere sapientiae essentialis, ac essentiae, quæ ita comunicatur Patris influxu, actiuamque productione Verbi, resultat relatio eius qui ab alio, ex qua, & ex intelligere, seu sapientia essentiali, ac essentia ita communicatis constituitur Filius, qui est id quod producit à Patre. Similiter licet Pater, & Filius diligendo producant per voluntatem Spiritum S. tamen diligere essentialis, & absolutum non est productio actiuam Spiritus S. sed spirare est producere Spiritum S. & completur ipsum diligere per relationem producentis ad rem eo modo productum quæ relatio significata per modum actionis in Patre, & Filio est, quæ dicitur productio actiuam Spiritus S. Hæc est tota meditatio Molinæ, quæ ob sui nouitatem, & obscuritatem in tanto mysterio explicando non leuiter attentionem sollicitat.

Circa secundum punctum est celebris sententia Scoti in 1. dist. 2. q. 7. §. Obicitur contra, & sumitur etiam ex quodlib. 14. §. Hic intelligendum, qui quidem fatetur Filium producere per intellectum, & Spiritum S. per voluntatem, sed negat procedere Filium formaliter per intellectionem, aut Spiritum S. per amorem, sed Filium per dicere, & Spiritum S. per spirare, quos censet se habere ut distinctos actus ab intelligere, & amare, ita ut nullum ordinem vel causalitatis, vel prioritatis, aut emanationis inter se habeant, & sic saluat quod licet intelligere, & velle sint communes omnibus personis, tamen dicere, & spirare non sunt communes, sed dicere solum conuenit Patri tanquam principio generanti, spirare soli Patri, & Filio, ut principio spiranti: De qua Scoti opinione quomodo intelligenda sit, postea dicam.

Huic

46 Quæst. XXVII. De Sac. Trinit. Myst.

Huic Scoti sententiæ annecto sententiam, quæ attribuitur Henrico 2. p. *summa* art. 59. qu. 9. atque Argentina, Mai filio, Richardo, & aliis, qui non distinguunt duos actus in intellectu, alterum qui sit cognitio, alterum qui sit dictio, sicut Scotus, sed duas cogitationes seu intellectiones, alteram communem toti Trinitati, quæ nihil producat, alteram solius Patris, quæ generat, & hæc est notionalis. Et hanc secundam perfectè manifestatiuam rei cognitæ, primam quasi simplicem, indeterminatam, & confusam, seu passiuam, sicut in nobis est simplex apprehensio ab Henrico vocari *quod lib. 6. q. 1.* aliqui referunt. Quod Deo attribuere nefas est.

3 Constante oppositum tenet cum D. Thom. & eius discipulis maior, & currentior Theologorum pars, nempe processiones istas in Deo esse actus vitales ab intellectu, & voluntate manantes, nec generationem seu distinctionem Verbi, aut spirationem Spiritus S. esse formaliter alios actus, quam veræ propriæ intellectiōis, verique amoris. Et Durandi sententiam multi censura graui inurunt in re tanti ponderis. Pro hac sententia videri potest D. S. in hac q. 27. art. 1. & 5. ibi. Caiet. Bannez Zumel, Nazarius, Ripa, Nauarrette, Carmelitani, & alij, P. Suar. *lib. 1. de Trinit. c. 5. 6. & 7.* Vasq. *disp. 112.* Arrubal *disp. 97.* Ruiz *disp. 59. sect. 2. & disp. 60. sect. 1. & 2.* & plures alij.

Ceterum in explicando isto actu quo intellectio dicit & generat Verbum, & quo pacto intellectio sit, valde inter se Authores isti dissentiunt, quod totum manat ex dissentientibus opinionibus, quæ in Philosophia versantur circa rationem intellectiōis, & dictiōis, in quo consistant, & quomodo perficiantur, an per actionem productiuam, an per informationem qualitatis repræsentantis, & similiter dictio in quo consistat, an in prolatione verbi, & sermonis, an in informatione verbi, & significatione rei dictæ. Hoc enim conducit ad videndum an processiones istæ per modum actionis, & productionis consideratæ sint formaliter ipsa intellectio, & amor, si etiam amor, & intellectio operationes, & actiones sunt, an solum concomitanter productio seu processio sit intellectio, quia intellectio intelligitur vt informatio, processio vt productio. De quo statim dicemus.

Solum aduerto P. Suarez independentem ab istis opinionibus de intellectu, & locutione an sint informatio, vel actio, seu productio, existimare, quod actus intelligendi, & amandi se habent in istis processionibus diuinis, vt principia quo, producendi, non vt ipsa productio, secutus in hoc Henricum *quod lib. 6. q. 1.* Ita Docet in l. 1. de Trinit. c. 8.

Philosophica præsupposita.

Vt ad Theologicam resolutionem in explicandis his processionibus immanentibus, & interioribus procedamus, per Philosophicas difficultates necessariò aperienda nobis est via, non vt illas hic ex professo discutiamus, sed vt ex disputatis in *libris de Anima* eas hic delibemus, & proponamus, quia ea quæ de processionibus diuinis ad intra in hoc mysterio tractantur, solum iuxta ea quæ in nostro intellectu contingunt, possumus explicare.

4 Supponendum est ergo tanquam apud omnes notum, pertinere ad intellectum nostrum, & intelligere, & dicere, seu manifestare id quod intelligit. Quod intelligat intellectus, tam certum est, quam oculum videre, aurem audire. Quod dicat, seu loquatur, experientia quotidiana est. Nec locutio so-

lum est exterior, & per voces, sed etiam intus in corde; inde enim deriuatur ad voces, quia istæ significant id quod loquimur in corde. Vnde sæpius huius locutionis interioris fit mentio in Scriptura, vt Psal. 4. *Qua dicitis in cordibus vestris, & in cubilibus vestris compungimini.* Isai. 14. *Qui dicebas in corde tuo, super astra Dei exaltabo solium meum.* Sapient. 2. *Dixerunt enim cogitantes apud se,* Psal. 52. *Dixit insipiens in corde suo, &c.* Et similiter attribuit Scriptura Deo dicere internum, Psal. 2. *Domine dixit ad me, Filius meus es tu.* Et Filius dicitur audire à Patre, quod non verificatur, nisi Pater loquatur ipsi, Ioan. 5. *Sicut audio, sic iudico,* & Ioan. 15. *Omnia quaecumque audiui à Patre meo nota feci vobis.*

Suppono secundo, ex his quæ diximus *præced. 5 tomo disp. 13. art. 5. & in lib. de anima q. 11.* non solum poni in nobis verbum, seu speciem expressam, vt actio intelligendi habeat terminum productum, vel vt ipso verbo tanquam qualitate repræsentatiua informatus intellectus constitutur formaliter intelligens: nec enim de se actio immanens, præsertim visio, & contemplatio intellectus productio est formaliter licet non repugnet vim habere productionis; nec in informatione qualitatis repræsentatiuæ consistit intellectio, vt *infra* dicemus; sed ponitur verbum, vel propter indigentiam obiecti, vt formetur, & præfès reddatur intra intellectum, vbi solum potest attingi intellectualiter, vel propter vim intellectus fecundi, qui ex abundantia sua loquitur, & manifestat, quod intelligi verbo, ratione cuius verbum est manifestatiuum, & repræsentatiuum, & sicut splendor intellectus. Et hoc secundo modo verbum subsequitur ad intelligere etiam perfectum. Primo verò modo requiritur verbum ad intelligendum, vt intra se habeat proportionatum obiectum, vt ad illud terminetur cognitio intellectus, quia non potest terminari nisi ad obiectum factum intelligibile, nec potest intelligibile esse nisi immaterializatum, & spirituale, non solum sicut in specie impressa, vbi obiectum solum per modum principij relucet fecundantis intellectum, sed per modum termini intellecti. Non potest autem esse terminus intellectus, & sub immateriali, & spirituali esse attactus, nisi intra intellectum, quia si est res materialis in se, & extra intellectum, non proportionatur actu ipsi intelligere, quod est immateriale; si autem est res spiritualis in se, & extra intellectum, non tamen per seipsam potest intentionaliter informare intellectum, & multò minus esse terminus intellectus per seipsam intra mentem, quia per seipsam non est suum intelligere, & intelligi à quo dependet rem esse intellectam. Quare hoc quod est esse terminum intellectum solum potest obiectum habere vbi ipsum intelligere habetur, hoc est intra intellectum, non extra: nam & intellectus ipse non intelligit nisi trahendo res ad se, & intra se considerando, non extra se inspicendo. Et D. Thom. docet rem intellectam non posse esse rem vt ad extra, sed vt intra, & vt est vnū cum intellectu vt *qu. 9. de potent. art. 5. & qu. 8. art. 1. & locis infr. citandis.* Indiget ergo repræsentatione in qua obiectum sibi proponatur vt terminus intellectus, quæ vocatur species expressa, sicut indiget repræsentatione vniente sibi obiectum vt patiatur notitia, quæ vocatur species impressa. Et hæc species expressa dicitur conceptus, seu verbum, tanquam quid formatum ab intellectu, & locum, seu dictum ab ipso, vt ibi obiectum attingat tanquam in medio formaliter repræsentante, non vt in medio prius cognito: nec enim prius attingitur cōceptus, &

& deinde obiectum, sed in ipso immediate res cognita attingitur, sicut media specie impressa obiectum unitur, quin attingatur ipsa species. Et hanc necessitatem ponendi verbum, seu speciem expressam distinctam ab impressa tanquam terminum, operationis intelligibilis assignat S. Thom. 1. contra Gentil. capit. 55. & 4. contra Gent. cap. 11. & opusc. 13. & 14. & aliis locis. Quomodo autem intellectus formet istam speciem expressam seu conceptum intelligendo, cum sit necessaria ad intelligendum declarat S. Thom. 1. contra Gentil. cit. Ex hoc, inquit, quod intentio illa est similis alicui rei, sequitur quod intellectus formando huiusmodi intentionem, rem illam intelligat. Et question. quart. de veritate art. secund. Verbum, inquit, intellectus nobis duo habet de sui ratione scilicet, quod est intellectum, & quod est ab alio expressum. Et solum ad quid, dicere in nobis non solum significat intelligere, sed intelligere cum hoc quod est ex se exprimere conceptionem, nec aliter possumus intelligere nisi huiusmodi conceptionem exprimendo; & ideo omne intelligere in nobis proprie est dicere. Et vberius opusculo 14. Cum intellectus noster, inquit, informatus specie natus sit agere, terminus autem cuiuslibet actionis est eius obiectum, obiectum autem non adest ipsi anima illa specie informata, cum obiectum sit extra in natura sua, actio autem anima non est ab extra, quia intelligere est motus a animam, tum ex natura speciei, quae in talem quidditatem ducit, tum ex natura intellectus, cuius actio non est ad extra; prima autem actio eius per speciem est formatio sui obiecti, quo formato intelligit, simul tamen tempore ipse format, & formatum est, & simul intelligit, quia ista non sunt motus de potentia ad actum, quia iam factus est intellectus in actu per speciem, sed processus perfectus de actu in actum, ubi non requiritur aliqua species motus. Et infra addit S. D. Verbum igitur cordis est ultimum quod potest intellectus in se operari. Ad ipsum enim in quo quidditas rei recipitur, imò quia ipsemet est quidditatis similitudo, terminatur intelligere: sic enim habet rationem obiecti intellectus; ut vero est per intellectum expressum ei coniungitur dicere; & sic idem ipsum verbum est effectus actus intellectus, qui est formativus obiecti, & ipsius dicere.

Ex quibus patet pertinere ad ipsum intellectum suo actu, qui est intelligere, formare sibi obiectum in aliqua similitudine representante, & intra se ponere, ibique unire per modum termini seu obiecti ad quod intelligere terminatur, siue per speciem impressam unitur, ut principium determinans intellectum ad pariendam notitiam. Ille autem actus quo formatur obiectum est cognitio: cognoscendo enim format obiectum, & formando intelligit, quia simul format, & formatum est, & intelligit sicut si visus videndo formaret parietem, simul videret, & formaret obiectum visus. Igitur verbum seu species expressa quando supponit obiectum non esse secundum se intellectum, & sufficienter proportionatum in esse immateriali, & intelligibili, seu intentionali ut intelligatur, format & representat illud obiectum in ratione obiecti intellecti, & per modum termini ad quod tendit intellectus; & sic ponitur ob indigentiam ipsius obiecti, & ipsius intelligentis, ut obiectum proportionatum habeat per modum termini attracti. Vnde si obiectum ex se sit perfectum, & sit intellectum in actu, sicut divina essentia, quae est suum intelligere, & suum intelligi, tale obiectum quando in se immediate videtur non indiget verbo superaddito, nec in aliquo verbo creato potest reddi formata; & intellecta ea intelligibilitate, quae est in se. Sed rursus quia intellectus non solum cognoscendo, sed etiam exprimendo, & loquendo format verbum, & conceptio-

nem suam pertinet ad intellectum loqui, & producere verbum, non solum ob indigentiam, & necessitatem formandi obiectum intelligibile in ratione termini, sed etiam ob manifestationem, & communicationem, quatenus ex abundantia cordis os loquitur. Nec est inconueniens quod circa eandem rem plures conceptus, & verba exprimat intellectus, vnum magis perfectum alio, vnum propter indigentiam, aliud propter multam abundantiam; imò hoc necesse est ponere quodcumque intellectus procedit de imperfecto ad perfectum, & de potentia ad actum, & quotidie id experimur in intelligentiis, & notitiis, quas formamus. Primum enim confusum, & inuolutum aliquid concipimus, deinde clarius, & perfectius, & tandem plenè, & in hoc processu, sicut meliorantur conceptus, sic diuersi formantur, & quodlibet eorum potest loqui, & manifestare intellectus, & tandem cum plenè intelligit, aut cessat inquirere, potest formare verbum, non ad melius penetrandum, & formandum obiectum, sed ad manifestandum, & exprimendum locutione quod conceptum, & intellectum est notitia.

Suppono tertio, apud D. Thomam esse manifestum 6
distigui debere in intellectu nostro ista quatuor, Potentia intellectiva, species impressa, actus intelligendi, seu operatio, quae vocari solet intellectio, sicut actus, & operatio videndi visio, & tandem verbum seu conceptus, qui est species expressa in qua representatur obiectum ut formatum in ratione termini intellecti, & ut expressum seu locutum, & dictum. Hoc ex pluribus locis D. Thomae manifestum est, sed praecipue considerari possunt duo loca. Alterum est opusc. 13. alterum question. octava de potentia art. primo. In priori loco sic inquit: In intellectu tria sunt, scilicet ipsa potentia intellectus, species rei intellecta, quae est forma eius se habens ad ipsum intellectum, sicut species caloris ad pupillam, & intelligere, quod est operatio intellectus. Nullum vero istorum significatur verbo exteriori prolatum, &c. Illud ergo proprie dicitur verbum interius, quod intelligens intelligendo format, &c. Istud ergo sic formatum, & expressum in anima dicitur verbum interius; & ideo comparatur ad intellectum, non sicut quo intellectus intelligit, sed sicut in quo intelligit quia in isto sic expresso, & formato videt naturam rei, intellecta. In posteriori autem loco sic inquit: Conceptio differt a re intellecta, quia res intellecta est interdum extra intellectum, conceptio autem intellectus non est nisi in intellectu. Et iterum conceptio intellectus ordinatur ad rem intellectam, sicut ad finem. Propter hoc enim intellectus conceptionem rei in se format, ut rem intellectam cognoscat. Differt autem a specie intelligibili; nam species intelligibilis, quae sit intellectus in actu, consideratur ut principium actionis intellectus, cum omne agens agat secundum quod est in actu, actu autem sit per aliquam formam, quam oportet esse actionis principium. Differt autem ab actione intellectus, quia praedicta conceptio consideratur ut terminus actionis, & quasi quoddam per ipsum constitutum. Hac autem conceptio intellectus, in nobis proprie verbum dicitur. Huiusmodi ergo verbum seu conceptio, quae intellectus noster intelligit rem aliam a se, ab alio exoritur, & aliud representat. Oritur quidem ab intellectu per suum actum; est vero similitudo rei intellecta. Ita D. Thomas. Quae de eodem videri potest libro primo contra Gentil. capit. 53. & quodlib. quint. articul. nono & question. nona de potentia art. ult. quint. ubi semper distinguit speciem impressam, & expressam tanquam duas similitudines obiecti, vnam per modum principij, aliam per modum termini, seu obiecti formati per operationem, seu actionem intellectus. Ipsam vero operationem nusquam

nusquam S. Thom. appellat similitudinem rei cognitæ, quia similitudo propriè est res, non actio: significatur enim actio ut via, vel ut actus secundus quo agens denominatur agere; similitudo autem alterius rei significatur ut res, vel repræsentatiuè, vel entitatiuè, alteri similis. Appellat tamen ipsam operationem cognitionem, seu notitiam, dum in verbis citatis *opusc. 13.* dicit quod *Intelligere est operatio intellectus, & nullum horum significatur verbo exteriori.* Et subdit statim quod *Intelligere non est actio progrediens ab intelligente, sed in ipso manens.* Et in hac *q. 27. art. 1.* dicit quod *Conceptio rei intellecta est ex vi intellectiva proueniens, & ex noticia eius procedens.* Procedit autem per operationem intellectus: ergo operatio est notitia. Et sic in *quodlib. 5. cit.* dicit quod *per primam operationem, quæ est indiuisibilium intelligentia, formatur verbum.* Et hac. *1. part. q. 54. art. 1.* docet quod *intelligere est actio immanens.*

7 Dubitant verò aliqui an ista operatio, seu actio immanens, quæ vocatur à D. Thom. *intelligere*, sit qualitas, an actio vitalis de prædicamento actionis? Quod si qualitas est, cur non erit similitudo, & consequenter Verbum, seu species expressa, aut si ipsa cognitio est qualitas, & verbum, seu species expressa, qualitas etiam est repræsentatiua: ergo erit duplex actio in intellectu, quia est duplex qualitas producta, ut redarguit Thomistas P. Suarez *lib. 1. de Trinit. cap. 6.* quod malè Scotum impugnent ponentem duas actiones in intellectu, alteram intellectionem, alteram dictionem, cum ipsi duas qualitates ponant, quarum quælibet indiget actione, & non erit vtraque actio cognitio. Quæ tamen redargutio neruo caret, cum non sit nouum vnā actionem posse duos terminos inadæquatos attingere: si autem illæ duæ qualitates vna actione, seu emanatione attingerentur, ut ordinatæ inter se attingerentur, quia ad habendam cognitionem perfectè, & consummatè ordinantur; & sic non repugnabit vnica actione, seu emanatione attingi. Sed veritas est quod Thomistæ, illam operationem, quam ponunt qualitatem, quia actio immanens est, dicunt ita esse qualitatem, quod eminenter habet vim actionis; non quia sit actio per modum viæ, & motus, quod est imperfectio, sed per modum actus secundus, quod est actualitas, & perfectio; & sic habet id quod perfectionis, & actualitatis est in actione, sicque habet vim ad producendum terminum, quantum ad id quod virtutis, & actualitatis est in producendo; non autem habet id quod potentialitatis, & motus seu imperfectionis est in actione? Et sic actiones immanentes ex suo conceptu, & ratione non postulant habere terminum productum, possunt tamen habere. Cuius rationem optime reddit S. Thom. *1. contra Gentil. capit. 100. per operationem, inquit, immanentem non fit aliud præter ipsam operationem, sicut videre, & audire; huiusmodi enim perfectiones sunt eorum, quorum sunt operationes, & possunt esse ultimi, quia non ordinantur ad aliquod factum quod sit finis; operatio verò, vel actio, ex qua sequitur aliquid actu præter ipsam, est perfectio operati, non operantis, & comparatur ad ipsum sicut ad finem.* Quia ergo sunt actus secundus perfecti, & non per modum motus, & viæ, seu potentialitatis, adhuc vltiorem perfectionem petentis, sed ipsi sunt vltimi; idè neque sunt actiones de prædicamento actionis; in quo solum ponitur actio, quæ est via, & causalitas, sed de prædicamento qualitatis, quia disponunt subiectum quod est operans, & perficiunt, seu qualificant quoad vltimam actualitatem accidentalem in genere operationis, sicut vltima actualitas visus est videre, & perfici in se, non perficere aliud, & vltima felicitas intellectus est con-

templari, atque intelligere, & intra se perficit; non tem operatam perficere: atque ita Suarez in *met. disputat. 48. sect. secund. numero nono* supponit actiones immanentes esse qualitates, docet tamen *numero 12.* dari actionem prædicamentalem ad illas producendas, neque etiam sunt de necessitate productiones, quia eorum finis non est perficere rem aliquam, operatam, sed ipsum operantem, & intra illum manere, illumque in vltima actualitate constituere. Possunt tamen aliquid formare, & producere, quatenus ipsa actualitas actus secundus vim habet actionis, & productionis, quia actus secundus est, & sic videmus quod in sensibus ex visione mittuntur species in sensus interiores, & in phantasia firmantur idola, & in intellectu conceptus, seu species expressa, tum ad formandum obiectum intra, quando ex se non est intellectum in actu, tum ad manifestandum, & loquendum illud sibi, vel alteri; & denique actus ipsi generant habitus, possuntque imperare, & dirigere alios. Quas omnes actiones, formationes, vel productiones D. Thom. fatetur, tum in *locis citatis*, ubi loquitur de formatione, & productione, seu processu verbi, præsertim cum in hac *quæstion. art. primo* dicit quod sicut secundum actionem ad extra attenditur aliqua processio, ita secundum actionem immanentem attenditur aliqua processio ad intra: tum in *prima secunda quæstion. 5. art. secund.* ubi loquitur de productione habituum ex actibus, licet aliqui putent actus non esse productiones habituum, sed principia producendi habitus, ut refert, & sentit Suarez *loco cit. met.* tum quia ipso imperio, quod est actus intellectus, Angelos mouere cælos docet *opusc. 11. art. 3.* Vnde patet in doctrina S. Thom. actus immanentes esse virtualiter, & eminenter actiones productiuas, nec indigere Verbum ad sui productionem alia actione, quam ipso actu immanente, qui est cognitio.

Et ex hoc vltius colligitur, quod ille actus intellectus quo formatur Verbum, & qui est cognitio, distinguiturque à D. Thoma à specie impressa, & à verbo, non debet esse similitudo formaliter repræsentans, & quasi pictura quædam obiecti, sicut species expressa, quia videlicet similitudo vel est expressa, & nata à cognoscente, vel est impressa, & per modum principij, ut oriatur cognitio. Ratio similitudinis impressæ non conuenit actui intelligendi, cum actus non concurrat cum potentia, ut principium cognoscendi, sed à tali principio oriatur, & à tali specie. Ratio verò similitudinis expressæ illi non conuenit, quia est formatio talis similitudinis, aut est contemplatio in similitudine iam formata, estque ipsa attingentia obiecti per modum operationis, non ipsummet obiectum attractum, seu id in quo obiectum attractum repræsentantur cognitioni. Quod sic explicatur, quia similitudo expressa, & repræsentatiua obiecti, debet intra intellectum formari per aliquem actum, qui sit formatio eius, & ille actus qui sit formatio talis similitudinis, non potest esse ipsamet forma repræsentans, siquidem formatio eius est. Nec potest alius actus formare illam similitudinem, nisi actus ille, qui est intelligere, & cognoscere, quia illa similitudo exprimitur iuxta notitiam, & cognitionem exprimentis, & sic quanto melius cognoscitur, perfectior est expressio, idè quod dicitur à D. Thom. quod procedit ex noticia intellectiva, & Patres communiter sentiunt nos non nisi cogitando, & cognoscendo dicere verbum, ut Aug. *15. de Trinit. capit. septim.* Fulgentius *lib. 3. ad Monim. capit. sept. ut refert Suarez libro 1. de Trinit. cap. 6.* Et tandem de Thom. *4. contra gentil. c. 11. Intellectus, inquit, intelligendo format, & concipit intentionem*

intentionem seu rationem intellectam, quæ est verbum interius. Et q. 4. de verit. art. 2. ad 5. Dicere, non solum signifi. at intelligere sed intelligere cum hoc quod est ex se exprimere conceptionem: nam ipsa species expressa repræsentat rem vt intellectam: ergo debet formari per actum qui sit intelligere, aut ipsum supponere, & sic ipsum intelligere non erit similitudo repræsentatiua expressa, quia hæc exprimit obiectum vt intellectum; & sic ipsum intelligere exprimit. Similiter id quod est repræsentatiua similitudo expressa repræsentat obiectum alicui, & non alij quam potentia vt contemplanti, & cognoscenti. Non ergo ipsa contemplatio & cognitio formaliter est repræsentatio, siquidem repræsentatio ipsi cognitioni fit. Quare munus huius qualitatis, quæ est actus distinctus à specie expressa, & impressa, quæ sunt repræsentationes, non est esse similitudinem repræsentatiuam, sed esse actum secundum intellectus, quo attingit, & contemplatur obiectum repræsentatum in verbo, & etiam format ipsum verbum, siue cum primò ipsum exprimit ad constituendum obiectum intra se, siue cum post intelligentiam obiecti procedit ad manifestandum, & loquendum id quod iam intellexit.

9 Ex his præsuppositis facile deuenitur ad id quod in controuersia est apud Authores, præsertim apud Recentiores, in quo formaliter consistat intelligere seu intellectio, & in quo formaliter consistat dictio, seu locutio.

Circa ipsam intellectionem, seu intelligere diuiduntur Authores, quorum quidam putant non esse actionem de prædicamento actionis, quæ producat verbum, seu qualitas repræsentatiua, sed ipsam esse qualitatem, quæ seipsa oritur ab intellectu, quia constituunt actionem immanentem in qualitate, non in transitu, nec in motu, aut productione. Alij sentiunt qualitatem repræsentatiuam in intellectu produci per actionem, quæ sit de prædicamento actionis, & non qualitatis. Et hi diuiduntur in constituenda intellectione, in quo formaliter consistat. Et est duplex eorum ententia.

Prima, quod intellectio est formaliter productio ipsa, & actio, quæ talis qualitas repræsentatiua fit ab intellectu. Quæ sententia attribuitur Caiet. Bannez, Molinæ, Zumel, & alijs *super hanc q. 17. art. 1.*

Secunda sententia est, quod intelligere, seu intellectio est ipsum informari intellectum qualitate illa repræsentatiua, quæ per veram actionem producit ab intellectu, sed tamen non in ipsa quatenus producit, sed quatenus ab ea intellectus informatur, consistit intelligere. Ita Vasqu. *hic disp. 141. c. 4.* Ruiz *de scientia Dei disp. 87. sect. 6.* Suarez *lib. 1. de Trinit. c. 6. n. 5.* & videri potest *lib. 3. de anima c. 5.* Et hoc idè, quia putat Suarez verbum mentale non esse aliud, quam ipsum actum immanentem, qui est qualitas prout in facto esse. Et ista qualitas, seu actus immanens apud ipsum producit vera, & propria actione de prædicamento actionis. Et quia actio immanens producit terminum in ipsa potentia operante qui terminus in ea recipitur, illamque informat; idè actio illa, vt productiua est, est dicere verbum, ipsa verò informatio, quæ terminus ille sic productus recipitur, & informat intellectum, dicitur intelligere, quæ sic illi repræsentat actu obiectum, & manifestat: in manifestatione autem consistet intelligere, seu in præceptione obiecti manifestati. Et idè Philosophus dicit quod intelligere est quoddam pati, & S. Tho. dicit quod in intelligere, vt distinguitur à dicere, non importatur ordo originis, sed informatio quædam, *inf. q. 10. a. 2. S. Thom. in 1. part. D. Th. Tomus alter.*

34. a. 1. ad 3. Vnde addunt aliqui, quod si conceptus, seu verbum produceretur ab alio intellectu, & videretur meo, ego per illam informationem intelligere, quia formaliter mihi manifestaret obiectum. Quod tamen alij negant, quia ad intelligere, requiritur vitalis influxus. Ex quibus ductus P. Alarcon, sequens sententiam Vasqu. *tract. 5. de Trinit. disp. 8. c. 3. n. 6.* sentit ita consistere cognitionem in illa informatione qualitatis repræsentatiuæ, & non in actione productiua, quod actio productiua verbi solum sit cognitio effectiua, id est, effectio cognitionis, non autem formaliter sit cognitio, sed id quod producit per talem actionem est cognitio, & est terminus eius actionis, vt actio est, non vt cognitio. Quid autem sit formaliter illa actio, si cognitio, formaliter non est? non ita explicant hi Authores, solumque dicent esse productionem cognitionis, non cognitionem, sicut actio calfactiua non est calor productus.

Circa ipsam verò locutionem censent hi Authores quod productio verbi ab intellectu non est formaliter locutio, & dictio quanquam Suarez *cit. loco de Trinit.* distinguat dicere ab intelligere, quia dicere est producere verbum, intelligere verò informari ab eo. Vasquez autem *citata disp. 141.* quem sequitur Alarcon *cit.* & alij, censet locutionem, seu dictionem formaliter non esse productionem verbi, esse formalem illam informationem quæ verbum significat rem dictam menti. Nec enim quærenti quid dicis, aut quid loqueris: respondebitur, dico qualitatem, vel dico vocem, sed dico talem vel talem historiam, aut rem de qua est sermo.

Nihilominus nos breuiter dicimus, intellectionem apud D. Tho. non esse solam informationem actus, vel qualitatis repræsentatiuæ, licet illa interueniat, aut requiratur ad nostram intellectionem, sed formaliter esse operationem ipsam, etiam prout vitalis egressio est ab intelligente, quæ operatione percipit, vel apprehendit obiectum. Dictionem verò, seu locutionem esse ipsam operationem, vt formatiuam & expressiuam verbi, seu rei intellectæ in verbo.

Prima pars de ipso intelligere in doctrina S. Thom. negari non potest, nusquam enim intellectionem, seu intelligere constituit in informatione verbi, seu qualitatis repræsentatiuæ, licet bene in informatione obiecti, seu rei intellectæ mediante operatione & apprehensione ipsius, perpetuoque distinguit intelligere à verbo. Et fuit magna hallucinatio in aliquibus Authoribus non distinguere apud D. Thom. informationem obiecti, seu rei intellectæ quæ in ipso verbo repræsentatur ab informatione qualitatis illius repræsentatiuæ, vt iam *supra præced. art.* aduertimus. Loquendo autem de ipso intelligere formaliter, vt distinguitur à verbo, seu à similitudine expressa, dicit D. Thom. 4. *contra Gentil. c. 11.* quod *Significat ipsum intelligere apprehensionem eius quod intelligitur per intellectum.* Non dicit informationem qualitatis repræsentatiuæ, sed apprehensionem eius quod intelligitur significare. Et *quæst. 8. de potentia artic. 1. Intelligens,* inquit, *ad quatuor potest habere ordinem, scilicet ad rem quæ intelligitur, ad speciem intelligibilem, quia fit intellectus, in actu ad suum intelligere; & ad conceptionem intellectus, quæ quidem conceptio à tribus prædictis differt, &c.* Et ponens differentiam ab intelligere dicit: *differt autem ab actione intellectus, quia prædicta conceptio consideratur vt terminus actionis, & quasi quoddam per ipsam constitutum; intellectus enim informat rei definitionem, vel etiam propositionem. Hæc autem conceptio intellectus proprie verbum dicitur: hoc enim est quod verbo exteriori significatur: vox enim exterior neque significat ipsum intellectum*

Intellectum, neque speciem intelligibilem, neque actum intellectus, sed intellectus conceptionem. Et infra: Oritur quidem huiusmodi conceptio ab intellectu per suum actum; est verò similitudo res intellecta. Et inf. Huiusmodi verbum est intrinsecum ab esse ipsius intellectus: non enim est de essentia, sed est quasi passio ipsius; non tamen est extrinsecum ab ipso intelligere, cum ipsum intelligere compleri non possit sine verbo prædicto. Sic D. Thom. explicat verbum, & intelligere, ubi nihil minus dicit D. Thom. quàm quòd intelligere sit ipsa informatio verbi, seu qualitatis repræsentantis, sed quòd per ipsum intelligere formatur verbum, seu intentio, & similitudo rei intellectæ, & illud ipsum quod vocat intelligere, vocat actum, seu actionem intellectus. Et similiter in opusc. 13. dicit, Intelligere esse operationem intellectus, & in hoc distinguit intelligere à verbo. Et addit, quòd Verbum interius comparatur ad intellectum, non sicut quo intellectus intelligit, sed sicut in quo intelligit, quia in isto sic expresso, & formato videt naturam rei intellectæ. Et idem habet opusc. 14. dicens quòd formato obiecto per verbum intelligit, & quòd ad ipsum terminatur intelligere. Sed intellectus videt, seu intelligit obiectum in verbo inherente sibi, & informante se: ergo intelligere non est, inherencia ipsa, seu informatio verbi, aut qualitatis repræsentantis, sed operatio apprehendens in verbo rem expressam & repræsentatam. Postremò, intellectus apud D. Thom. format verbum intelligendo, ut supra deduximus, & affirmat expressè 4. contra Gentiles cap. 11. Intellectus, inquit, intelligendo concipit, & format intentionem sine rationem intellectam, quæ est interius verbum. Et 1. contra Gentiles cap. 53. Intellectus formando huiusmodi intentionem rem intelligit. Ergo intelligere non consistit in informatione illius similitudinis expressæ, sed magis in ipsa formatione eius iam intelligit, videlicet per ipsam operationem, qua dicit habitudinem ad rem intellectam, apprehendendo illam.

12 De 2. autem parte conclusionis, quòd dicere est ipsa operatio, ut expressiva verbi, videri potest S. Thom. tum opusc. 14. ubi inquit: *Ad ipsum verbum in quo quiditas rei recipitur, imò quia est quiditatis similitudo, terminatur intelligere: sic enim habet rationem obiecti intellectus: ut verò est per intellectum expressum, ei coniungitur dicere; & sic idem ipsum verbum est effectus actus intellectus, qui est formativus obiecti, & ipsum dicere.* Sed ex professo idem tractat S. Thom. illo ipso loco, quem pro se afferunt contrarii, hac 1. part. quæst. 34. art. 1. ad 3. ubi inquit: *Dicere & intelligere differre, quia intelligere importat solam habitudinem intelligentis ad rem intellectam, in qua nulla ratio originis importatur, (scilicet ad rem intellectam, quæ non originatur ab intellectu) sed solum informatio quedam in intellectu nostro, prout intellectus noster fit in actu per formam rei intellectæ. Sed dicere importat principaliter habitudinem ad verbum conceptum: nihil enim est aliud dicere, quàm proferre verbum, sed mediante verbo importat habitudinem ad rem intellectam, quæ in verbo prolato manifestatur intelligenti.* Vbi pondero quòd quando D. Thom. loquitur de ipso intelligere, nullam mentionem facit de informatione conceptus, vel qualitatis repræsentantis, aut de habitudine ad ipsam, sed de habitudine, & informatione rei intellectæ, quæ utique non informat inherendo, aut entitativè se uniendo, sed per unionem apprehensivam, quatenus intellectus apprehendendo rem, informatur illa; unde, & vulgò notitiam accipere, informati animum dicimus. Quando verò loquitur D.

Thom. de ipso dicere, in eo in quo distinguitur ab intelligere, dicit quòd dicere importat habitudinem ad verbum & mediante verbo, ad rem intellectam, quæ verbo manifestatur, ubi ipsam habitudinem dicendi per ordinem ad verbum, & ad qualitatem manifestatiuam explicat, sicut ipsum intelligere, non per habitudinem ad verbum, sed ad rem intellectam explicauerat. Et hanc habitudinem dictionis ad verbum non ponit in hoc quòd intellectus informetur verbo, seu conceptu locuto, sed quòd proferat illud. Quod autem non solum res dicta proferatur, & dicatur, sed etiam verbum ipsum quod quis loquitur, paulò ante dixerat D. Thom. eodem loco. *Dicitur, inquit, non solum verbum, sed etiam res quæ verbo intelligitur, vel significatur.* Et idem pluribus aliis locis docet. Et certè in hoc nulla potest esse dubitatio, quòd verbum ipsum verè & propriè dicatur, & sic locutum, quia est prolato & expressum, sicut loquimur verbum vocale proferendo, & exprimendo ipsum ore. Constat enim quòd etiam quando non intelligimus significationem verborum, aut etiam cum quis profert verba non significatiua, dicimus verè, & propriè quòd talis loquitur & verba profert: nam tunc interroganti quid loquitur ille, dicimus nos ignorare quid loquatur, nescimus quid loquitur, supponimus ergo quòd loquitur, & verbum profert, sed non intelligimus significationem verbi. Quare nullus dubitat quòd verbum ipsum dicatur, & locutione proferatur, supposito quòd percipit ipsum loqui, & inquit de significato verbi locuti; imò quia per se notum supponitur nos dicere, & loqui verba, non respondemus interroganti, & quærenti quid loqueris, nos loqui verba: hoc enim ita per se notum supponitur, quòd nemo de hoc interrogare præsumitur, sed solum de eo quod significatur, per verba sic prolata, & dicta: sed supponendo semper quòd verba ipsa dicuntur, & locutione proferuntur: nam, ut dicit August. tract. 1. in Ioannem. *Affidue dicendo nomina verborum, quasi viluerunt, verba;* & sicut ore dicimus verba quæ sunt voces, & soni quidam ore animalis formati, ita intellectu dicimus verba quæ sunt qualitates expressivæ. Et ad hoc quòd verba sunt locuta, & dicta tanquam de aliquo per se noto non inquirimus nec dubitamus, sed solum significationem & res verbo prolato significatas curamus scire, & intelligere, sicut in conuiuio verè apponuntur mensæ, & mappæ, & scutellæ, & vasa, sed non curatur de illis, sed de cibo aut potu in illis illato, quia ista sunt quæ comeduntur aut bibuntur. Et sic sententia Vasquez pro hac parte, quatenus negat verbum à nobis dici, sed res per verbum, nec dictionem aut locutionem consistere in prolato verbi, sed in informatione aut manifestatione eius reiicienda omnino est.

13 Quòd verò de informatione verbi, seu qualitatis repræsentatiuæ dicunt Suarez, & Vasq. quòd in ipsa consistat intelligere formaliter, non in operatione, seu actu intellectus, ut distinguitur ab informatione verbi, & tendit in ipsam rem verbo repræsentatam, ex doctrina S. Thomæ relata reiicitur. Nam constat intellectum videre rem & cognoscere ut repræsentatam in verbo, seu conceptu, non quia ly *repræsentata* dicat aliquid ex parte obiecti cogniti, sed ex parte medij, quo intellectui præsens fit, & ipse conceptus repræsentat, & manifestat rem, non potentiæ nudæ, sed potentiæ cognoscenti, seu ipsi cognitioni potentiæ, sed non repræsentat cognitioni verbum, & qualitas illa, nisi ut informans

mans, & inhærens ipsi potentia cui manifestat; siquidem accidens est, nec existere potest nisi inhærendo, nec manifestare nisi existendo. Ergo si ipsi cognitioni manifestat, cognitio formaliter aliud est a verbo ut inhærente & informante.

Et conf. quia intelligere ut intelligere est actus vitalis, seu actualis vita intelligentis, sicut sentire est actualis vita sentientis, & quicumque alius motus vitalis est actualis vita viventis, sed formalis ratio vitalitatis non explicatur in ipso actu, & in ipso vivente per pati & informari, sed per agere, & à se emittere, quia vitalitas formaliter consistit in se mouere: hoc autem quod est informare, & potentiam informari à qualitate est commune viuenti, & non viuenti: nam etiam non viuens informatur à qualitatibus suis: ergo si intelligere formaliter est viuere & vita actualis, non potest consistere in eo quod est pati, & informari potentiam à qualitate, sed in eo quod est agere & operari, ut est actiue à potentia, non ut in genere causæ formalis actuat, licet etiam ista informatio requiratur quia cum sit actus immanens, in ipsa potentia inhære debet, sed tamen non quatenus inhæret, & informat actus, sed quatenus egreditur, & denominat operantem, vitaliter constituit intellectionem; aut saltem si actus, & operatio, ut formans, & inhærens, est intelligere, non ex informatione qualitatis repræsentatiuæ, quæ est terminus, & verbum sed ex coniunctione, & informatione ipsius operationis, & actus egredientis vitaliter à potentia denominatur intelligere.

Vnde sequitur quod etiam si daretur quod ad repræsentandum obiectum potentia sufficit informatio qualitatis repræsentatiuæ, etiam si talis qualitas, & similitudo non procedat ab ipsa potentia vivente, tamen ut al quis dicatur intelligens, & intellectio ipsa, seu intelligere conueniat subiecto, non sufficit informatio, & inhærentia actus, vel conceptus, sed requiritur processio & egressio actus ab operante: quia intelligere formalissimè est actus vitalis, & actus viventis ut viuens est, vitalitas autem non conuenit actui pro ea parte præcisè qua inhæret in vivente, quia hoc passiuum est, & passiuum ut passiuum non est vitale, sed pro ea parte qua actiue est à vivente, quia de ratione viventis formalissimè est ut moueat se, non ut patiat: ergo cum intelligere sit viuere, formalissimè erit mouere se, non pati, & informari per qualitatem, licet per ipsam operationem dicatur informari ab obiecto, quatenus apprehendit illud, & sit vnum cum eo.

Quare dicimus cum D. Th. præsertim in hoc loc. cit. 9. 34. inf. quod intelligere neque est actio intellectus, ut est productio verbi, neque est informatio qua informatur, & patitur ab ipsa qualitate verbi per inhærentiam eius, sed est ipsamet operatio, ut apprehendens, & attingens obiectum repræsentatum in verbo. Itaque operatio intellectus, & versatur circa verbum, producendo illud, seu formando, & exprimendo, & hoc est dicere, seu loqui verbum, quia, ut dicit S. Th. nihil aliud est dicere quam proferre verbum: & secundò versatur circa obiectum quod repræsentatur in verbo, & circa hoc non versatur producendo, quia intellectus non immutat, neque tangit rem cognitam in vi intellectionis, sed versatur apprehendendo obiectum, & trahendo ad se, seu faciendo illud vnum sibi, ita ut intelligere sit esse ipsummet obiectum apprehensiuè. Et hoc est intelligere, seu ipsa operatio vitalis ut apprehendens: significat enim intelligere apprehendere

Ioan. à S. Thom. in 1 part. D. Th. Thomus alter.

obiectum, ut ex D. Th. diximus sup. 4. contra Gent. c. 11. Et quia prout apprehendens, & intelligens nihil producit, aut facit in re intellecta; ideo dicitur à D. Th. quod respectu rei intellectæ non importat ordinem originis, hoc quod est intelligere. Dicitur autem importare ordinem seu habitudinem informationis, non informationis à qualitate repræsentatiua (hoc nusquam dixit S. Th.) sed informationis rei intellectæ, quæ non est informatio causæ formalis intrinsecæ, sed formalis obiectiuæ, quæ solum informat specificando, & tanquam terminus intellectus fit vnum apprehensiuè cum ipso intelligere, seu vnum obiectiuè, & hoc fieri vnum vocatur informatio, scilicet informatio obiectiuæ.

Nec fundamenta Vasquez & Suar. aliquid probant contra hoc. Nam præcipuum est, quia intelligere est quoddam pati secundum Philosoph. & non importat ordinem originis, sed informationis secundum D. Th. Sed hoc iam satis à nobis expositum est ex ipsis verbis Aristot. & D. Th. quod intelligere, & sentire dicuntur pati, antecedenter, & præsuppositiuè, non formaliter; quia ad intelligendum, & sentiendum præsupponitur quod intellectus, & sensus recipiant species quod est pati ab obiectis. Et intelligere importat informationem ab ipso obiecto, quia ad hoc ordinatur intelligere ut apprehendat obiectum, & fiat vnum cum ipso obiectiuè, & apprehensiuè, non informatione entitatiua.

Deinde obiici potest, quia si intellectio esset productio illius qualitatis, quæ est verbum, sicut dicitur producere qualitatem, diceretur illam intelligere: non intelligimus autem nisi obiectum, non qualitatem illam: ergo neque productio eius est intellectio. Et præsertim, quia intellectio est repræsentatio, & manifestatio actualis alicuius rei, & tunc intelligit obiectum quando sibi manifestatur, & repræsentatur, & tanto perfectius intelligit, quanto magis manifestatur, hæc autem repræsentatio multo melius fit in ipsa qualitate producta, quam in eius productione, quia ibi solum est in fieri, & tendentia: ergo per informationem ipsius qualitatis fiet hæc manifestatio & intellectio.

Confirm. quia Arist. 3. de anima c. 7. docet, quod intelligere est actus perfecti; actio autem ut actio, & productio est via, & transitus de potentia ad actum, quæ est actus imperfectus: ergo in actione & productione non consistit intelligere. Neque consistit in operatione quæ sit qualitas, & productiua alterius qualitatis, quæ sit verbum: sic enim essent duæ qualitates repræsentatiuæ per modum expressionis; nam actus ille, qui est qualitas, etiam similitudo est, cum dicat Aug. 15. de Trinit. c. 16. Cogitatio nostra perueniens ad id quod scimus, & inde formata, verbum nostrum verum est, & Anselmus in Monologio c. 3. dicit, imaginem nasci in cognitione, imò ipsam cognitionem sui esse imaginem.

Resp. quod intellectio, quæ est operatio intellectus, non secundum eandem formalitatem est intelligere, & producere verbum, sed sub diuersa, ut ex D. Th. sup. diximus licet, utramque simul exerceat, quia intelligendo dicit, & dicendo intelligit. Itaque illa operatio intellectus, quæ diximus intellectionem, & intelligere, duo respicit, scilicet rem intellectam, seu repræsentatam sibi, & verbum, in quo sibi fit repræsentatio. Secundum habitudinem ad rem intellectam non est productio, neque dicitur habitudinem originis, ut dicit S. Th. inf. 9. 34. sed solum dicit apprehensionem obiecti, & facit illud vnum sibi apprehensiuè. Secunda habitudo est ad verbum

E 2

immediatè

immediatè dicendo, & proferendo illud quod est procedere, & sic est dictio, & productio, & importat habitudinem originis, ut idem D. Thom. dicit. Et propter hoc verbum dicitur notionaliter, & processivè, seu relatiuè in diuinis, non absolute. Quare ad argumentum dicitur quod intellectio formaliter non est productio verbi, quatenus intellectio: sic enim solum respicit obiectum intellectum, sed quatenus dictio, unde non sequitur quod ut productio intelligat verbum, sed quod dicat illud. Et hoc verum est.

Ad secundum dicitur quod intellectio formaliter non est representatio aut manifestatio, sed apprehensio rei representatæ, & manifestatæ: Representatio enim fit à representante, scilicet ab ipsa similitudine, in qua manifestatur res representata, cognitio fit ab ipso cognoscente, qui percipit illam representationem; unde si representatio fit ipsi cognitioni, cognitio non est representatio formaliter. Et fateamur hanc representationem melius fieri à representante, quam à productione ipsius, sed productio, ut productio, non est intellectio.

Ad Conf. Resp. quod intellectio non consistit in actione, ut est productio, & via ad verbum, sed in actu ipso secundo, ut est apprehensio, & attingentia obiecti in verbo representanti, & formati. Et hæc non est actus imperfecti, sed perfecti, quia non est via, & tendentia ad producendum obiectum, sed est tractio obiecti ad se, & unio cum illo, & sic non est fieri, sed est actualitas ultima intelligentis; & sic intelligere est actus, ut est ad obiectum, ut non ad verbum producendum: sic enim est dictio; licet etiam ut intellectio attingat verbum, ut in quo continetur obiectum.

16 Quod verò dicitur qualitatem non esse productionem, dico qualitatem, quæ est actus secundus; esse eminenter productionem in vi actualitatis suæ, quia ad intelligendum in actu 2. ordinatur formatio, & prolatio verbi, quæ est productio. Nec sequitur quod sunt duæ qualitates representatiuæ, quia intellectio formaliter non representat, sed apprehendit, & percipit rem representatam, ut *suprà* diximus. Verbum autem est qualitas representans, in qua intellectus contemplatur rem intellectam, & simul dum format, & dicit, illud intelligit in eo, sicut si videndo fieret color, simul videretur & produceretur. Illi autem Patres cum dicunt cognitionem nostram esse similitudinem, posset vno verbo dici ex D. Thom. *infr. qu. 34. artic. 1. ad 2.* quod cum dicitur quod verbum est notitia, non accipitur notitia pro actu intellectus cognoscentis, sed pro eo quod intellectus concipit cognoscendo. Itaque cognitio aliquando sumitur pro ipso termino, in quo fit cognitio, quia ibi terminatur, aliquando pro ipso actu ad illum terminato. Specialiter August. *in illo loco* non dicit cognitionem esse verbum, sed potius *cogitatio, est cognitio fluctuans, & nondum fixa, quæ quando pervenit ad id quod scimus, & inde formata est, verbum dicitur; sed ly formata aliud dicitur ab ipsa cogitatione, scilicet id quod per illam formatum est quod verbum est.* Anselmus autem dicit similitudinem nasci in ipsa cognitione, quæ utrique similitudo nata, verbum est, cognitionem autem esse similitudinem non formaliter, sed effectivè, quia similitudinis huius productio est.

Resolutio Theologica circa processionem diuinam.

Supposita tota hac philosophia, quæ in doctrina D. Thom. manifesta est circa verbum mentis, intellectionem, & dictionem, accedamus ad resoluendum punctum difficultatis in initio art. propositum.

Dico ergo primò, Sententia Durandi *suprà* relata omnino relinenda est, meritoque à gravibus Authoribus temeritatis notâ inuitur, imò est proxima errori. Eodem modo loqui debemus de alia sententia, quæ processionem Filij Dei non vitalem emanationem dicit, licet fateatur esse emanationem à vivente. Censuram propositam illi sententiæ incurrunt Bannez *hic q. 27. art. 5. dub. 1.* Suar. *lib. 1. de Trinit. c. 5.* qui dicit in hoc convenire recentiores Doctores, & de eodem videri potest Molina *hic q. 27. art. 5. disp. 2. Vasq. disp. 1. 1. c. 2. Ruiz disp. 2. sect. 2. Alarcon tract. 5. disp. 8. c. 1.* Fundatur falsitas & censura temeritatis quia est contra communem sententiam Patrum, & Scholasticorum in re tam gravi. Censura erroris, seu quod sit proxima errori, quia opponitur propriæ locutioni, & sensui Scripturæ in locis ubi explicat hoc mysterium, & per bonam consequentiam opponitur ipsis principiis fidei, quibus tradit veritatem huius mysterij. Ergo ad minus est proxima errori aut erronea. Explicantur singula: nam Doctores communiter apud M. sententiarum *disp. 13. primi libri,* & apud D. Thom. *in hac q. art. 4.* docent ex Sanctis Patribus processionem Filij esse generationem, non verò processionem Spiritus Sancti, & illum dici natum, non istum, quia Filius procedit per opus intellectus tanquam imago, & similitudo, non autem Spiritus S. qui procedit per opus voluntatis, scilicet tanquam amor, & amicitia, nexûsq; duorum. De quo videri possunt Authores antiqui, qui citantur à præfatis modernis, & Sancti Patres communiter super illud Ioannis 1. *In principio erat Verbum,* ibi August. *tra. 1. & 15. de Trin. cap. 10.* ubi Verbum esse in principio apud Deum ex similitudine verbi, seu similitudinis intra nostrum intellectum procedentis explicat, & c. 17. vocat Spiritum S. amorem procedentem. Videri etiam potest Augustin. *lib. 5. de Trinit. c. 6. 13. & 14. & aliis multis locis,* Cyrillus *lib. 1. in Ioan. c. 5. & lib. 7. thesauri cap. 5.* Nomen, inquit, verbi elegit, quia est maxime proprium, & significativum divinitatis, processionis propriæ secundæ personæ. Basiliius *homil. in caput. 1. Ioannis,* Irenæus *lib. 2. cap. 48.* Damasc. *lib. 1. de fide cap. 9.* Anselmus *in Monologio c. 45. & seqq.* Gregorius Papa *homil. 30. in Evangelia,* de Spiritu S. dicit, *Ipse quippe Spiritus Sanctus amor est.*

Quod sit sententia proxima errori, vel error, patet, quia si processio Verbi est emanatio à natura, & non est operatio, & emanatio intellectus, tollit propriam rationem Verbi ab illa persona, licet ei concedat rationem Filij propter naturalem processionem, sed solum per approbationem eum Verbum vocat, non propriè, & verè, quod est in modo loquendi convenire cum hæreticis: Alogiani enim Arrio antiquiores, negaverunt in Deo Verbum, ut refert August. *hæresi 30. & Epiphanius hæresi 51. & contra eos agit Castro lib. 4. adversus hæreses. Verbo, Dem, hæresi 7.* Arriani quoque ut *suprà* art. 1. vidimus, Filium dicebant non esse illud verbum quod est intra Deum, & Deus est, sed verbum creatum, & factum à Deo. Sed

Duran d'us

Durandus, licet non dicat Filium esse factum à Deo, sed naturaliter emanantem ab ipso, negat tamen illi propriam rationem Verbi, & solum per appropriationem concedere potest, quia Verbum propriè ad locutionem pertinet, & hæc est opus mentis, & intelligentiæ, non emanatio naturæ, ut distinguitur ab intelligentia. Vnde λόγος, quod nos verbū dicimus, etiam sermo appellatur, quia locutio est. At Scriptura vocat Filium, seu secundam personam Verbum, Ioan. 1. *In principio erat Verbum*, & illud ipsum vocat Filium seu unigenitum, dum subdit. *Vidimus gloriam eius, gloriam quasi unigeniti à Patre*: ergo emanatio Filij propriè debet esse emanatio Verbi in Deo. Et ita sapientia genita dicit de se Ecclesiast. 24. *Ego ex ore Altissimi prodidi*. Non potest autem prodire ex ore Dei, nisi sit locutio Dei, quod enim naturæ emanatione, & non locutione, & operatione intellectus procedit, non procedit ex ore loquente. Nec valet dicere quod Filius dicitur procedere per intellectum, & Spiritus S. per voluntatem, quia illius processio est prior ista, sicut cognitio præcedit voluntatem. Hoc enim solum est per quandam appropriationem, & remotissimam analogiam Filium Verbum dicere, & Spiritum S. amorem: sic enim quidquid se habet ut prius, & quidquid posterius, posset illis appropriari; & sic cum Scriptura Filium vocat verbum, solum vult dicere quod eius processio est prior processione Spiritus S. secundum originem, non verò quod propriè, & verè in se verbum sit. In re autem ita graui, accipere verba Scripturæ in sensu improprio, & appropriatiuo, non in vero proprio gradis periculi est; quia cum hoc mysterium sit difficillimum, & eleuatissimum, si semel admittimus quod verba, quibus illud tradit Scriptura, in sensu appropriationis, & metaphoricè intelligantur, ubicumque difficultas se obtulerit, quæ non faciliè capi potest ad sensus metaphoricos detorquebitur, & dicemus non illud significari quod ita difficile apparet, solum metaphoricè id esse accipiendum. Nec potest Durandus reddere rationē cur in illa emanatione naturæ, vna sit prior origine, quàm alia, cur Filius sit solum à Patre, & Spiritus S. à Patre, & Filio, cur vna sit generatio, non alia, si vtraque immediatè est ex fecunditate naturæ ante operationem intellectus, & voluntatis. Et si recurrat ad authoritates Scripturæ, & Patrum qui id dicant, poterit responderi quod loquuntur secundum appropriationem, & metaphoricè. Cur enim quādo Scriptura vocat Verbum, non intelligitur de proprio, & vero verbo, neque de propria locutione, sed de impropria, & cum vocat Filium, non etiam intelligitur metaphoricè, per quandam appropriationem. Et sic destruit totum fundamentum quo nobis innotescit veritas huius mysterij.

Denique vrgetur ratio contra Durandum, quia illæ processiones, & communicationes in diuinis vel intelliguntur per aliquas veras operationes immanentes, vel transeuntes, vel per solam emanationē, quæ non sit propriè operatio, sicut proprietates emanant natura. Si hoc secundum dicatur, non sufficit ut dicatur prima processio generatio, quia generatio essentialiter facit simile in natura, emanatio autem proprietatum, non est emanatio rei similis in natura, sed alicuius proprietatis annexæ ipsi naturæ à qua emanat. Non inuenitur autem emanatio à natura, quæ vera, & propria operatio non sit, nisi emanatio proprietatum, & passionum. Quæ enim procedunt ab aliqua natura, non vi proprietatis eius, sed ut similitudo illius, vel genitum ab eo, aut productum, per operationem veram, & propriè dictam pro-

cedunt, non per emanationem quæ operatio non sit. Quod si insistatur, quod illæ personæ procedunt per emanationem, non ut proprietates, sed ut personæ procedentes, nec tamen per operationem veram & propriam procedunt, sed per sequelam quandam, & emanationem similem emanationi proprietatum, tunc non apparet qua ratione distinguantur istæ emanationes, & quod vna sit generatio, & producat Filium, alia spiratio, seu impulsio quæ Filium non producat, cum in emanatione à natura, quæ non sit per operationem propriam, sed per sequelam, & connexionem, eadem ratio sit in omni emanatione: eodem enim modo emanat à natura hominis intellectus, & voluntas, & risibilitas, cæteræque passionēs, nec emanatio intellectus potest dici generatio magis, quàm emanatio voluntatis, aut alterius proprietatis; quia omnes istæ emanationes fundantur in eadē ratione, scilicet in connexione vnius erga aliud. Ac denique quia in Deo personæ procedentes non procedunt neque emanant à natura, seu ab essentia: sic enim essentia generaret, distinguerenturque ab essentia, quod in Concilio Lateranensi damnatum est. Procedit ergo vna persona ab alia persona, vi distincta à se: ergo ut opposita sibi: sic enim distinguitur: sed vna relatio non dimanat à suo correlatiuo per sequelam, & emanationem sine vera operatione, cum potius ex oppositione se habeant: ergo non potest ista processio explicari per solam emanationem.

Nec obstat quod in nostra sententia ipsum intelligere constituat formalissimè naturam sub gradu naturæ; & sic emanatio per intelligere, est emanatio immediatè à natura, dicimus enim, quod etsi intelligere in Deo constituat naturam, consideratum in ratione gradus lineæ intellectus, infinitæ, & in actu puro; tamen etiam habet vim, & eminentiam operationis, sub hac consideratione operationis in intelligere, & volendi in voluntate, dicimus dari processiones, non sub emanatione ab intelligere ut gradus est, sicut in ipsa processione Spiritus S. videri potest, quæ si est per actum voluntatis, non est ex gradu naturæ, ut natura est, licet illi identificetur.

Si autem dicatur procedere per emanationem, quæ sit vera operatio, illa vel est transiens, vel immanens. Si transiens ponit terminum extra Deum, quod est facere illum creaturam. Si immanens, debet esse actus immanens spiritualis, quia corporeus Deo repugnat: spiritualis autem operatio immanens non est alia, quàm intellectus, vel voluntatis: ergo secundum illis debet processio constitui in Deo.

Ex eodem fundamento reicitur alia sententia quæ negat hanc emanationem esse actum vitalem, licet sit processio à viuentē: Tum quia omnis processio à viuentē, si est vera operatio, actus vitalis est, siue sit motus transiens, siue sit operatio immanens: nam etiam motus progressiuus animalis, & motus pulsationis, aut emissionis superfluitatum actus vitales sunt, cum per potentiam vitalem in illis subiectum se moueat, nec requiritur amplius ad actum, seu motum vitalem: ubicumque enim aliquid operatur mouendo se, illa operatio est vitalis. Tum quia si processio Verbi non est actus, seu operatio vitalis, aut est operatio propriè dicta, & vera, aut emanatio, & sequela, licet non operatio propriè dicta. Si hoc secundum, non est ibi distinguere processionem, quæ est generatio, ab ea, quæ non est, sed vtraque eiusdem rationis erit, & sequuntur omnia inconuenientia contra Durandum adducta, nec saluatur tunc propria ratio Ver-

qi in Filio Dei, quia verbum est quid procedens per locutionem, & locutio est operatio vera. Si dicatur primum, illa operatio non est transiens: sic enim res per illam generata esset extra Deum: est ergo immanens, & non corporea, sed spiritalis: ergo operatio intellectus vel voluntatis, utraque autem est essentialiter actus vitalis, quia est operatio à principio vitæ, & qua viuens dicitur vivere: ergo qui negaret esse actum vitalem, negaret esse operationem intellectus, vel voluntatis, quod est incidere in opinionem Durandi, atque aded, & in eius censuram.

21 Dico secundò, sententia Molinæ omnino rejicienda est, quia in re aded graui, & mysterio omnium diuinissimo, & difficillimo, nouis ambagibus verborum, & obscuritatibus vititur, quæ possunt occasionem sinistrae intelligentiæ præbere. Et ob hoc nō videtur aliqua specie temeritatis carere, quia in rebus dogmaticis, & præsertim tam difficilis explicationis, nec in ipsis verbis ab vñtata Sanctorum, & probatorū Authorum locutione recedendum est, cum ex verbis inordinate prolatis incuratur hæresis. Eam sententiam suppresso nomine Suarez reiecit lib. 8. de Trinit. c. 1. quantum ad hoc punctū quod personam Patris, seu relationem paternitatis dicat Molina resultare à parte essentiæ per intellectum in illo priori quo se intelligit, quasi ex ipso intelligere essentiali resultet relatio Patris: (nam ex notionali non potest, cum notionale intelligere, sit dictio quæ à Patre procedit, non quæ paternitatē fundat (quod Suarez in nullo authore antiquo, sed solum in quodā moderno (Molina) se inuenisse affirmat, nec vllum eius fundamentum apud ipsum reperisse. Sine fundamento autē, & cum tanta nouitate, & singularitate loqui in hac materia, non leue temeritatis indicium est.

Ego tria inuenio in illa meditatione Molinæ valde insolita.

Primum, quod dicit processionem diuinam non esse actionem immanentes, scil. intelligere, & velle, sed secundum ipsas. Et addit non aliud reperiri apud D. Thom. Sed has actiua processionem esse relationes, quæ cum intelligere, & velle complent rationem dicentis, & spirantis, & hæc relatio significata per modum actionis est productio actiua.

Secundum est, quod persona Patris resultat à parte essentiæ per intellectum in illo priori quo essentia intelligit se.

Tertium est, quod à parte intelligere, & sapientiæ ac essentiæ quæ communicatur influxu Patris, & productione Verbi actiua, resultat relatio eius, qui ab alio, ex qua cum essentia constituitur Filius, qui est id quod producit à Patre.

22 Primum dictum quantum ad hoc quod negat processionem diuinam non esse actionem immanentes, sed secundum ipsas, ita quod actiua processionem sint relationes, & ipsa actiua productio sit relatio significata per modum actionis, impropriatatem habet in eo quod negat ipsas processionem in recto esse actus immanentes, scil. intelligere, & velle, & valde accedit ad modum loquendi Durandi. Nec enim solum istæ processionem secundum actus immanentes accipiendæ sunt, quasi in obliquo tantum ad ipsos actus se habentes, sed etiam in recto sunt ipsæmet actus immanentes, licet nō absolute sumpti, sed cum relatione originis. Et D. Th. utroque modo nominat processionem istas: nam, & secundum illos actus sumi dicitur ut in hac qu. art. 3. & 5. & alias sæpe, & illas processionem actus ipsos esse dicit, ut cum in hac qu. art. 2. dicit, quod *Processio Verbi in diuinis habet*

rationem generationis: procedit enim per modum intelligibilis actionis, quæ est operatio vitæ. Igitur ipsa processio est actio, & operatio, sicut est generatio, licet non sit actio sine relatione, & origine. Et 4. contra Gētil. c. 13. dicit quod *Generatio in diuinis est intelligibilis verbi conceptio, secundum quod Deus intelligit seipsum.* Et ratio huius est, tum quia hæc est vera prædicatio. Processio in Deo est operatio (loquendo in recto,) & non solum processio est secundum operationem, siquidem processio est aliqua emanatio à suo principio, & non est emanatio, non operatiua, sicut emanatio passionum, sed emanatio, quæ est operatio, ut contra Durandum ostendimus, & illa operatio est immanens, non transiens: ergo est operatio quæ est intelligere, & velle: nec enim aliæ operationes immanentes in Deo sunt: tum quia non dicimus formaliter quod in Deo relatio sit operatio, sed est solum respicientia; Et sic dicit D. Thom. infr. qu. 41. art. 1. ad 2. quod *Actus notionales secundum modum significandi differunt à relationibus, sed re sunt idem;* cum tamen ut ibi dicit, *actio personalis producens personam nihil aliud sit, quam habitudo principij ad personam, quæ est à principio: sed quia apud nos actiones distinguuntur à relationibus, oportuit seorsum significare habitudines per modum actus, & per modum relationum.* Quare secundum formalem modum significandi, & recipiendi, relatio non dicitur actio, seu operatio; & tamen processio dicitur operatio, licet non absoluta, sed cum relatione originis; & sic est productio notionalis personæ procedentis. Tum denique, quia ad idem pertinent actus seu operatio, & potentia talis operationis. Potentia autem ad generationem, seu processionem, & id quo Pater generat, non est relatio in recto, sed essentia cum adiuncta relatione principij: ergo, & processio ipsa est actus intelligendi, qui est essentia, licet cum relatione originis; & sic non debet negare quod processio sit operatio, & actus intelligendi in recto, nec dici quod actio sit relatio formaliter loquendo per modum actionis cum ipso intelligere, & velle, sed potius quod sit ipsum intelligere quod est actus vitalis cum relatione originis.

23 Secundum dictum Molinæ sua obscuritate vix intelligitur. Quid enim est resultare personam Patris à parte essentiæ per intellectum? Quid est à parte essentiæ, & quid est resultare per intellectum? Et quidem resultantiam ipsæmet Molina explicat, quod non est productio, seu emanatio realis, sed sicut attributa emanare intelliguntur ab essentia. Sed tunc non videtur bene coherere quod dicit resultare per intellectum in illo priori quo essentia se intelligit: nam resultantia ista, seu emanatio importat connexionem, & sequela vnius ex alio, saltem secundum rationem nostram, qua illa distinguimus. Non est autem connexio ista formaliter bene fundata inter intelligere essentiali, & paternitatem, quatenus intelligere significatur per modum operationis; licet, ut dicitur rationem naturæ, bene intelligatur ex illa resultare paternitatem sicut, & attributa. Sed tunc quare dicitur quod resultat per intellectum pro illo priori, quo intelligit: ibi enim designatur quædam resultantia per operationem, quasi Paternitas ex intelligentiæ essentiali procedat, sicut Filius ex notionali. Cæterum paternitas cum sit terminus personalis improductus, non intelligitur resultare ut terminus operationis, seu intellectus, etiam essentialis, sed resultat ut terminus substantiæ secundum quod est natura fecunda ad dicendum, seu loquendum; & sic postulat

stulat in se habere relationem, quæ sit principium verbi dicti, & procedentis. Et deinde quia cognitio notionalis, qua Pater generat Verbum, & essentialis eadem formalissimè cognitio sunt, ut *infra* dicemus, ostendendo contra Scotum quod dictio formaliter est intellectio. Non igitur capi potest quod Pater ex cognitione essentiali resultet; & postea ipse sit principium quod illius cognitionis, qua producit Verbum, cum hæc cognitio, etiam si notionalis sit, & dictio, non sit alia à cognitione essentiali, quæ necessariò comparatur ad personam Patris, ut ad principium quod cognoscendi, sicut, & dicendi: non ergo ut ad terminum ex cognitione resultantem. Quare Molina videtur verbis valde ambiguis, & parum conducentibus ad explicandum hoc mysterium, quia dicit resultare personam Patris per intellectum in illo priori quo intelligit, & sic significat resultare ut terminum intellectionis essentialis, quod omnino insolitum est, quia Pater non est terminus intellectionis; nec procedit aut resultat per operationem, cum sit omnino ingenuus, nec est terminus intellectionis essentialis, sed principium notionalis omnino à se. Habet se autem ut terminus substantiæ per modum substantiæ, non procedentis ab aliquo; & ideo non ex operatione, ut operatio est, sed ex substantia, seu natura, ut natura, resultare intelligitur tanquam terminus personalis. Resultat autem ut paternitas, quia resultat ut substantia naturæ intellectualis fecundæ, non solum ad intelligendum essentialiter, sed ad dicendum, & producendum verbum.

24 Tertium dictum Molina omnino videtur intelligibile, & complicatum: nam dicendo quod à parte ipsius intelligere, & essentiæ, quæ influxu Patris, & actiua productione Verbi communicatur, resultat relatio eius qui ab alio distinguit inter relationem resultantem, & productionem Verbi, quia dicit actiua productione Verbi, & influxu Patris communicantis essentiæ, resultare relationem. Quæ est ista relatio resultans ex productione Verbi actiua? quasi Verbum producat, & relatio resultet. Atqui Verbum, ut productum, non est aliud quam relatio illa personalis, quia solum relatio procedere, & produci potest, cum sola distinguatur à suo principio. Quomodo ergo intelligitur verbum produci, & relationem resultare? Et deinde, quid est resultare ex parte ipsius intelligere, & essentiæ essentialis, ac essentiæ? Si enim resultare est idem quod procedere per veram, & realem actionem; sic non ex parte ipsius intelligere, & essentiæ essentialis procedit, sed procedit à Patre: nec enim aliam processionem fides nos docet in Filio, quam à Patre; *Filius*, inquit Symbolum Athanasij, à Patre solo est. Ab essentiæ autem seu à parte essentiæ non procedit Filius, alias essentiæ generaret, si ab illa Filius procederet, quod damnat Concilium Lateranense in c. *Damnamus*, de summa Trinitate. Si autem ly *resultare* non est idem quod procedere per veram, & realem actionem, sed veluti emanare, sicut proprietas emanat à natura, sicut attributum intelligitur emanare ab essentiæ, ad quid est ista resultantia relationis personalis Verbi à natura, si verè, & realiter procedit à Patre? Nec enim persona Verbi habet connexionem cum natura, & essentiæ, nisi mediante processione, & productione generatiua, qua procedit à Patre, qua sublata, relatio Verbi non resultat ab essentiæ sicut attributum, quia intrinsecè est persona realiter procedens, & genita; & sic non potest resultare, & habere connexionem cum essentiæ, nisi ut procedens processione reali. Quare illa resul-

tantia à parte essentiæ, si est resultantia distincta à processione reali à Patre, videtur hic omnino implicatoria, & solum occasionem dare labendi in intelligentia vera, & currenti harum processionum. Quod ulterius complicat Molina cum dicit quod ex ista relatione resultante à parte essentiæ, & ex ipso intelligere, & essentiæ constituitur Filius, qui est id quod producit. Si constitutum ex relatione illa, & essentiæ est id quod producit, & non potest produci ratione eius quod essentialiter est, sed ratione eius quod relatiuum, quia hoc solum opponitur, & distinguitur à principio à quo procedit: ergo relatio illa non resultat ex parte essentiæ, sed procedit, & producit realiter à Patre in eadem essentiæ. Quare ista meditatio Molina ab explanatione huius mysterij omnino aliena est, & in multis angustias, & periculosas nouitates nos impellit.

Dico 3. Sententia Scoti in eo solum reiicienda est, quod dictionem ponit ut distinctam à cognitione, quasi ipsa dictio, & productio Verbi in se cognitio non sit, sed omnino asserendum est quod dictio intrinsecè sit cognitio. Sententia autem Henrici quod sit duplex cognitio, altera essentialis, altera notionalis, nullo modo sustinenda est.

Pro intelligentia primæ partis, prout tangit sententiam Scoti, est aduertendum quod, ut bene notat Suarez, lib. 1. de Trinit. c. 7. plura continentur in sententia Scoti, quæ non omnia falsa sunt. Præsupponit enim Scotus Patrem producere Verbum dicendo quod omnino verum est: nec enim verbum nisi dicendo, & loquendo producit, cum sit terminus locutionis. Præsupponit secundo, *dicere*, & *intelligere* aliquo modo distingui, quod expressè etiam affirmat S. Thomas in 1. q. 34. art. 1. ad 3. & q. 37. art. 1. cum *intelligere* sit essentialiter tribus personis, & solum importet habitudinem ad rem intellectam, *dicere* autem solum conueniat Patri, seu ei qui habet Filium in diuinis, & importet habitudinem ad verbum, ut dictum, & procedens à principio loquente. Quibus suppositis dicit Scotus, dictionem, & intellectionem se habere tanquam duas actiones, aut productiones, seu emanationes, in nobis quidem realiter distinctas, in Deo autem, aut virtualiter, aut ex natura rei, iuxta modum quo Scotus distinguit in Deo attributa. Distinguit autem Scotus istas actiones, taliter quod inter se non habent ordinem causalitatis, vel emanationis, ita quod una non sit ex alia, vel è contra, sed quod habent meram concomitantiam, quia utraque procedit ab intellectu fecundo in actu primo. Et hoc ideo quia intellectus dicit verbum seu speciem expressam, & non intelligit illam, sed obiectum: ergo ut dictio, seu productio non est intellectio, licet simul, & concomittanter intelligat obiectum, sed formaliter ut dictio, & respectu termini producti intellectio non est.

In hoc puncto dissentimus à sententia Scoti, & communiter ab illa recedunt Theologi, ut *supra* citauimus, illam referendo. Sed asserendum nobis est eundem actum secundum intellectus, qui est cognitio, ut apprehendens obiectum, & tendens ad illud, est productio verbi, ut formatiua qualitatis representatiuæ, nec esse actus distinctos, licet actus ipse producat Verbum qualitas sit, nec requirit aliquam actionem priorem terminatam ad se, sed seipso est actus secundus, ut iam *supra* diximus.

Ratio est quia dictio essentialiter est locutio expressiua rei intellectæ; & sic de se reddit rem representatam, & in actu ultimo intellectam, vel ut intellectam manifestat: ergo oportet quod ipsa

actio sic expressiua, & formatiua verbi, sit etiam cognoscitiua. Patet conseq. quia obiectum formatur cognoscendo ipsum, nec enim formatur, & exprimitur obiectum in esse, entitatiuo, sed in esse intelligibili intra ipsum verbum: ergo verbum ut repræsentatiuum intelligibiliter, & in ratione termini intellectionis dependet ab ipso intelligere: est enim verbum formalis manifestatio rei intellectæ, ubi res ipsa intelligibiliter relucet, & manifestatur: ergo verbum in se debet formaliter, & actu participare lucem intelligibilem quia non solum in actu primo, sed in actu secundo resplendet, & manifestatur res in verbo, non solum ut intelligibilis, sicut in specie impressa, sed ut intellecta: lux autem qua resplendet, & manifestatur in actu secundo res cognita, est lux spiritualis interna, nec est aliud quam ipsum intelligere, quia intelligere est summa actualitas intellectus, & illa est lux intelligibilis: Ergo verbum non potest repræsentare rem ut intellectam in actu secundo; & sic manifestare ipsam in actu secundo, nisi dependentet ab intelligere, & intelligi: ergo vel debet intra se includere ipsum intelligere tanquam lucem qua manifestat intelligibiliter obiectum, vel debet à tali intelligere dependere, & ab eo procedere, & formari. Actio ergo formatiua verbi est intelligere; siquidem in ipso verbo participatur, & resplendet ratio intellecti, manifestatio, & lux intelligibilis, & obiectum ut actu intellectum, quod non nisi per dependentiam, & ordinem ad ipsum intelligere habere potest.

27 Et confirm. hoc, tum ex munere, & officio ipsius conceptus, seu Verbi, quia eius munus est reddere intellectum concipientem, reddere obiectum manifestum, & repræsentatum intellectui; atque adeo vnum cum illo: ergo tale verbum non potest procedere ab intellectu, nisi mediante cognitione, & dependentet à cognitione. Patet consequentia, quia non potest istos effectus præbere intellectui, nisi in vi eius rationis, & naturæ, quam participat ab intellectu; siquidem est expressio quædam, & proles ipsius intellectus: ergo si præbet intellectui hunc effectum, quod est reddere ipsum concipientem, & cognitionem eius terminatam, & obiectum manifestatum intelligibiliter, & hoc totum participat ex processione ab intellectu, euidens est quod hoc participat ab intellectu ut intelligente, & ratione ipsius intelligere: ergo ab intelligere dependet, ab eoque nascitur, & participat. Vnde, & in Deo ipsum verbum dicitur sapientia genita, & veritas ipsa, quod est formalitas, & ratio intelligibilitatis, & cognitionis: dependet ergo verbum ab intellectu sub ratione sapientis, & intelligentis, & ipsius intelligentiæ, & cognitionis, si in se sapientia est, & veritas. Tum etiam hoc deducitur ex ipsa formali actione producendi verbum, quia formalissimè vitalis est, cum formalissimè generatio sit in diuinis, & est vitalis non vitalitate voluntatis sed intellectus, & in gradu, & linea intelligibili, nec in vitalitate communi intellectui, & voluntati, sed propria intellectus, quia est locutio, & manifestatio, quæ est propria lucis intelligibilis, & hæc ad intellectum pertinet; sed in intellectu, ut distinguitur à voluntate, non est vitalitas, nisi cognitionis, quia intellectus viuit vita cognoscitiua tantum, non alio modo viuendi, & mouendi: ergo actus vitalis intellectus propria vitalitate ipsius est actus cognitionis, nec potest esse alius à cognitione distinctus, & solum concomitans cognitionem, quia remota vitalitate intrinseca cognitionis, non scimus quam vitalitatem demus illi actui, tantumque erit actus intellectus materialiter, non

ut intellectus est formaliter.

Dices: probare hunc discursum, quod dicere 28 subordinatur ipsi intelligere, & præsupponit ipsum, non tamen quod formaliter sit intelligere, quia intellectus prius intelligens; & tangens obiectum utitur illa actione dicendi, & loquendi tanquam ministra, & subordinata sibi ad exprimendum quod intelligimus, & ita ex participatione intellectionis dictio exprimit, & manifestat id quod intelligit. Non tamen sequitur quod formaliter sit intelligere. Et ex eadem intellectione participat vitalitatem eius, quasi actio ei subordinata. Vnde & S. Thom. dicit in præsentia, quod conceptio est proueniens ex notitia intellectiua: Sentit ergo non esse formaliter ipsam notitiam, quia ex illa procedit.

Et confirm. quia in nostra sententia ipse actus intellectionis est qualitas, quam dicimus eminenter esse actionem productiuam, quia est actus secundus intellectus. Repugnat autem quod qualitas sit formaliter, seu in exercitio productio alterius qualitatibus quam dicimus Verbum: ergo illud verbum non producit per illum actum, qui est intelligere, sed per aliam actionem, quæ est productio, & non intellectio. Minor prob. quia productio identificatur cum termino producto, illique inest, quia reddit illum productum: qualitas autem non identificatur cum alia qualitate. Et in opinione quæ dicit non consistere intellectionem in productione verbi, sed in informatione eius ad intellectum, qua manifestat illi, à fortiori non potest dici quod productio verbi sit intellectio, & cognitio, cum sit informatio ipsius verbi: ergo in illa sententia totus discursus contra Scotum corruit. Et miror quomodo qui sententiam Vasquez tenent, quod scilicet intellectio formaliter sit informatio, qua verbum informat, & actuat intellectum manifestando illi, non in actione, qua producit Verbum, ex alia parte dicant contra Scotum actum quo producit Verbum in diuinis esse formaliter cognitionem, & intellectionem, sicut spiratio qua producit Spiritus S. est dilectio.

29 Resp. illam actuum subordinationem & multiplicationem superflue poni in præsentia, nec posse in intellectu multiplicari actus, nisi multiplicentur cognitiones, quia non possumus euadere, quin ipsum intelligere ut intelligere sub formalitate, & ratione intellectionis influat in ipsum verbum quod producit, quia ipsum verbum participat rationem notitiæ & intelligibilitatis; & lucis spiritualis, quod utique non nisi ex influxu, & participatione ipsius intellectionis habere potest. Quod autem hoc faciat media actione interposita, quæ intellectio non est, non euacuat difficultatem, sed implicat: nam quomodo illa inferior, & secunda actio participat influxum ab ipso intelligere ut possit transfundere in verbum ea quæ intelligibilitatis sunt? illa enim actio de se, non est intellectio: ergo de se, & ex propriis meritis non potest communicare verbo à se producto intelligibilitatem in actu, & lucem ipsam intelligibilem, aut si communicat ex se, intellectio est ex se. Communicat ergo illam, & transfundit ex participatione, & deriuatione ab intelligere.

Restat ergo explicare duo.

Primum quid sit illud, quod talis actio productiua, & inferior ex meritis propriis communicat verbo à se dicto, & quid resplendet in verbo correspondens isti actioni, quod non correspondeat ipsi intelligere, estne aliquid vitale, an non vitale, ad intelligibilitatis lineam pertinens, an non? quid est

est illud, quod cognitionis splendor non sit? An forte sunt tenebrae.

Secundum est quomodo ipsum intelligere communicet illi actioni, quae non est intellectio, vim transfundendi rationem; intelligibilitatis in verbum, facitne cognoscendo, an non cognoscendo? Si cognoscendo, eadem ratione potest producere verbum, communicando ei intelligibilitatem, sicut cognoscendo communicat illi inferiori actioni vim transfundendi intelligibilitatem in verbum, quod ex proprii meritis non habet. Si non cognoscendo: ergo erit alia actio à cognitione, & de illa fiet idem argumentum quomodo accipit vim dandi cognoscibilitatis, & intelligibilitatis, modum ipsi verbo, procedeturque in infinitum. Vnde nec video Scotum vti hac subordinatione actionum, sed pura concomitantia, quasi sit duplex actus concomitanter, sine subordinatione vnius ad alteram, sed tunc vrgetur argumentis factis, quomodo actio, quae intellectio non est, sine influxu intellectiois possit verbo communicare esse intelligibile, & lucem intelligibilitatis in actu. Si autem influxum ab intellectioe habet, subordinatur illi.

Quod verò D. Thom. dicit conceptionem procedere ex notitia, verissimum est, quia notitia est actio productiva illius, non quia ex notitia, vt ex principio agendi, vel quasi ex actione superiori, & inferiorem mouente, procedat, sed ex notitia procedit, tanquam ex ipso actu formante, & producente verbum: est enim eminenter, & virtualiter productio. Potest etiam aliquando contingere quod post notitiam producat verbum, quatenus de vna notitia imperfecta procedimus ad aliam perfectiorem, vel quatenus post notitiam habitam etiam perfectam vult aliquis producere illius manifestationem, & verbum, sed tunc illa productio verbi erit in se quaedam cognitio manifestatiua, & locutiua ex priori procedens, quod nullum inconueniens habet.

Ad Confirm. Resp. non repugnare quod qualitas sit productio actiua, quia haec non identificatur cum re producta, sed solum productio passiva: haec autem non est aliud quam dependentia rei productae à causa sua producente, quia in actionibus ubi non est motus, non relinquitur aliud, quam habitudo principij ad principiatum, & principiatum, seu producti ad suum principium, vt S. Thom. dicit *inf. quest. 41. art. 1. ad 2.* & in actione qua Deus creat, solum ex parte Dei est productio actiua, seu actus secundus creandi, & ex parte creaturae dependentia in esse à Deo. Cum ergo intelligere non sit actio imperfecta, & per modum motus, sed perfecta, & sine motu, in se est actus quidam secundus, scilicet intelligere, qui est qualitas, & non petit respectu obiecti habere productionem; sed tamen potest esse productio actiua verbi, & talis productio non identificatur cum re producta, sed tenet se ex parte producentis; ex parte autem rei productae est productio passiva, scilicet dependentia ab agente, & ab eius actu secundo, & haec identificatur cum termino producto.

Ad fundamentum autem Scoti quod insinuauimus *supra in hac 3. conclusione*, Resp. quod dictio, seu productio verbi non intelligit verbum in sua entitate, sed obiectum representatum in verbo, & intelligendo obiectum producit verbum: sed quia verbum continet in se obiectum formatum per modum intellecti, & cogniti in actu, idem non producit nec formatur istud verbum nisi intelligen-

do obiectum, & communicando ipsi Verbo, vt illud tanquam intellectum representet. Vnde solum sequitur quod formalitas producendi seu dicendi verbum sit diuersa à formalitate intelligendi, quae solum dicit habitudinem ad obiectum intellectum, non tamen quod sit distincta actio, cum non nisi per cognitionem, & intellectionem formari possit verbum secundum esse intelligibile, & intellecti in actu ipsius obiecti.

De sententia Henrici non est quod multa dicamus: Nec enim distingui potest in Deo intelligere absolutum, & notionale, quasi duplicatum etiam nostro modo concipiendi in ipsa ratione intelligendi, sed intelligere absolutum, & notionale idem est, solumque redditur notionale per additionem relationis, seu originis quasi modificatum. Itaque idem intelligere diuinum, quod est commune, toti Trinitati, dicitur intelligere paternum, & notionale, non quia sit nouum intelligere, & in ipsa ratione intelligendi distinctum, sed per hoc quod illud intelligere modificatur relatione ac personalitate Patris redditur notionale & paternum pro persona Patris, & vt redditur communicatum per generationem est notionale Filij.

Ratio est quia essentialia, & absoluta non duplicantur per hoc quod personis communicentur, sed solum modificata à personis redduntur, alia si ponimus duplex intelligere, vnum notionale, alterum essentialia, & absolutum, similiter ponemus duplicem sapientiam, duplicem iustitiam, & voluntatem, & duplicem Deitatem, aliam essentialem, aliam notionalis, sicque Deus Pater erit Deus notionalis, alius à Deo absolute sumpto, quae omnia sunt absurdissima. Non est autem maior ratio de ipso intelligere, aut velle, quam de ipsa natura, & aliis attributis, vel perfectionibus absolutis, quod si est duplex intelligere, & velle, aliud essentialia, aliud notionale, etiam de aliis perfectionibus absolutis: idem dicatur. Vel si hoc solum verificatur in ipso intelligere, & velle, quia per modum operationum se habent, nihil per hoc eleuatur ratio facta, quia etiam operationes, in quantum tales, suam actualitatem, & perfectionem habent absolutam, & essentialem, seu specificam, nec habent solam relationem, quia relatio, vt relatio operatiua, & productiua non est, esse enim operatiua pertinet ad actiuitatem, & actiuitas fundatur in actualitate, & haec pertinet ad naturam. Si ergo datur operatio notionalis distincta in ratione operationis ab essentiali, oportet quod detur actiuitas, seu actualitas notionalis distincta ab essentiali. Et illud quod actiuitatis, & actualitatis est in tali operatione notionali, vel est commune omnibus tribus personis, vel proprium vnius. Si commune, est ipsa essentialis operatio quantum ad id quod actualitatis habet. Si proprium: ergo praeter oppositionem relationis aliquid est in vna persona ex parte actualitatis, & actiuitatis, quod non alia, quod repugnat.

Fundamenta Durandi, & Scoti conuulsa.

Conueniunt Durandus, & Scotus in vno fundamento communi, & quilibet deinde habet suum proprium. Commune fundamentum est, quia actus intelligendi sunt communes tribus personis, processiones verò non sunt communes: nec enim Verbum generat, nec Spiritus Sanctus spirat. Ex hoc principio infert Durandus: Ergo antecedenter ad omnem operationem intellectus, aut voluntatis dantur processiones istae; sed antecedenter ad tales operationes nihil restat, nisi

nisi natura eiusque fecunditas: ergo per fecunditatem naturæ antecederet ad intelligere, & velle sunt istæ processiones. Ex eodem principio infert Scotus. Ergo dicere quo procedit Verbum, & spirare, quo procedit Spiritus S. non sunt formaliter velle, & intelligere, quia velle & intelligere prout sic communes sunt omnibus: dicere ergo, & spirare quæ non sunt actiones communes, distinctæ debent esse ab intelligere & velle.

34 Præter istud fundamentum commune utrique sententiæ, est speciale fundamentum pro sententia Durandi, quia naturæ creatæ, & ex vi suæ naturæ, & non ex operatione intelligendi fecunditatem habent ad se communicandum, unde, & generatio dicitur opus naturæ, & in Deo communiter dicunt sancti Filium procedere natura: ergo similiter fecunditas in Deo ad generationem, & processionem antecederet se habet ad intelligere, & velle. Quod autem in creaturis ex fecunditate creaturæ proveniat ista communicatio, & non ex actionibus immanentibus, patet quia istæ operationes nihil producant. Ad Deum autem transferimus istas actiones, & processiones, sicut sunt in creaturis, semota limitatione & imperfectione: ergo similiter in Deo operationes, immanentes non erunt productivæ.

Conf. quia divinam naturam esse in tribus personis eiusque communicari provenit immediate ex infinitate ipsius essentiae: ergo ex eadem infinitate proveniet, quod una persona procedat ex alia, non ex operationibus intellectus, & voluntatis.

35 Speciale autem fundamentum Scoti sumitur similiter ex natura actus immanentis, quia de se non est operatio productiva, verbi gratia intellectio, eo quod isti actus sunt ultima actualitas in qua quiescit agens, non in qua operatur; unde, & se habet intelligere, ut perfectio ultima intelligentis, non ut actio ordinata ad ulteriorem terminum, seu finem, sicut ordinatur actio productiva, cuius finis est terminus. Si ergo invenitur operatio productiva in intellectu, illa non erit actus immanens, neque ipsa intellectio formaliter, sed alia operatio distincta.

Conf. quia intellectus, & voluntas, & eorum operationes, scilicet intelligere, & velle sunt omnino idem realiter, quia sunt absolutæ, & inter se non oppositæ formæ. ergo non sunt aptæ ut per tales operationes tam diversæ processiones resultent. Nam si processiones sunt ipsæmet operationes intelligendi, & volendi, & velle, & intelligere sunt idem inter se, quomodo processiones sunt realiter distinctæ inter se, & non idem? Ut ergo processiones sint realiter distinctæ oportet quod processiones non sint illæ operationes, nec secundum illas fiant, quæ realiter sunt idem.

36 Ad primum fundamentum Respon. quod intelligere, & velle sunt communes omnibus tribus personis secundum perfectionem quam dicunt, non secundum modificationem quam habent prout in tali vel tali persona; sic enim sunt ipsum dicere in intellectu, & spirare in voluntate; non autem distinguitur operatio dicendi ab intelligere, & operatio spirandi à velle, sed per ipsammet intellectionem, & volitionem tali relatione originis affectam, id quod est intelligere, remanet expressivum, & locutivum, seu prolativum. Verbi, & amor spirativus personæ procedentis. Solum ergo sequitur quod modificationes istæ

non sint communes, non verò quod operationes sint distinctæ ab intelligere, & velle sicut nec sunt distinctæ ab essentia. Ad fecunditatem autem, & processionem duo requiruntur, scilicet virtus, seu actiuitas, & distinctio extremorum inter quæ exercetur processio, aliàs realis processio non erit, si extrema non distinguuntur realiter. Quod ergo virtutis, & actiuitatis est in ista processione, commune est omnibus personis. Quod distinctionis, peculiare, & proprium, cuius ratio est, quia distinctio fit solum per oppositionem relativam, quia alia esse non potest in Deo: virtus autem convenit ratione actualitatis, quia virtus actiuitas est. Actualitas autem in Deo est actus purus; & hic communis est, quia est absoluta perfectio. Et hac ergo parte intelligere potest esse commune quoad id quod virtutis, & actualitatis dicit, licet ex parte distinctionis, & originis, quo ipsum intelligere processionem fundat, relativam modificationem in eo ponat. Immo retorquetur argumentum contra Durandum, quia non minus natura communis est personis, quam intelligere, & velle: ergo secundum fecunditatem naturæ ante ipsum intelligere, & velle, non potest sumi distinctio processionum, quia istæ communes non sunt. Et consequentia Scoti eodem vitio laborat, quia actiones dicendi, & spirandi, dato quod non sint intelligere, nec velle, sunt tamen actiones intellectus, & voluntatis: ergo de se tam communes erunt, quam intelligere & velle.

Ad secundum fundamentum Durandi Respon. 37 in naturis creatis fecunditatem attendi penes communicationem rei genitæ à se distinctæ; & sic per actionem transeuntem fecunditas ista germinat, & parturit, potestque præcedere actiones immanentes, quia non est fecunditas ad communicationem immanentem, & ad intra, sed ad germinandum, & producendum aliquid distinctum à se, Et ita licet antecedit actionem immanentem illa fecunditas naturæ creatæ, non tamen actionem transeuntem, sed per illam fit communicatio: sine aliqua enim actione vel immanenti, vel transeunti nulla est fecunditatis communicatio. In divina autem natura fecunditas est ad germinandum intra se, & cum communicatione eiusdem substantiæ, & ideo non potest fieri per actionem transeuntem, sed immanentem, quæ est ad intra, sine vlla autem actione nec immanenti, nec transeunti intelligi nullo modo potest.

Ad Confirm. Resp. ex infinitate divinæ essentiae provenire quod fit illa natura in tribus personis, eique communicetur, non excludendo operationes intellectus, & voluntatis, per quas debent procedere personæ. Essentia autem divina non est in tribus personis quomodocumque, sed in duabus ut procedentibus, & in alia ut ingenta; & sic infinitas essentiae ad existendum in tribus personis petit infinitatem essentiae, & processionum, & hæc petit infinitatem operationum.

Ad fundamentum speciale Scoti. Resp. quod actus immanens, & præsertim intellectio habet duplicem habitudinem, alteram ad obiectum quod intelligit, alteram ad Verbum in quo representatur res intellecta, & exprimitur. Secundum primam habitudinem operatio illa non est productiva, nec dicitur habitudinem originis ad obiectum quia obiectum non procedit ab illa, sed potius obiectum se habet ut specificativum, & formale respectu

respectu actus; & sic solum habet fieri vnum cum obiecto, tanquam cum suo formali termino, quod potius importat habitudinem informationis, ut dicit D. Thom. sed extrinsecæ, quia obiectum est forma extrinsecæ. Secundum alteram habitudinem actus immanens, & intellectio productio actiua est; & sic dicitur expressio, & locutio, ibique importatur habitudo originis ad verbum prolatum, & dictum. Et istæ sunt duæ habitudines, & formalitates eiusdem operationis, sed non operationes diuersæ. Nec sufficiunt ad distinguendum duas rationes formales, licet vna pertineat ad genus causæ formalis, alia ad genus actiue originis, & quasi efficientis, quia intelligere non est purè forma informans, sed est vera operatio, quæ tamen respectu obiecti, quatenus illud apprehendit, importat habitudinem causæ formalis, non quia in se vera operatio vitalis non sit, ut in superioribus declarauimus. Quando autem productio vnius termini necessariò dependet ab alia attingentia, seu termino attracto, vtraque attingentia conuenire potest in eadem operatione, nec est necesse multiplicare operationes, neque in intellectu multiplicari possunt, cum omnis operatio intellectus sit vitalis vitalitate eadem, nempe intellectiua, ut iam *suprà* latius ponderauimus: sicut etiam eadem actio illuminatiua solis est calefactiua in materia capaci caloris, nec calefactio est alia operatio ab illuminatione, quia ut est calefactio à sole, dependet ab eius luce: sic ergo formatio verbi representatiua, & expressiua obiecti, prout intellecti, dependet ab intelligere. Vnde non est necesse multiplicare operationes, sed eadem operatio, quæ est intelligere, est expressio, & productio verbi, quatenus ista formatio subordinatur ipsi intelligere, & ab eo dependet. Ex alia autem parte, licet intelligeret sit actualitas vltima, & immanens, & respectu obiecti quiescere faciat intellectum, tamen quia actus secundus est eminenter, est productio, seu actio productiua actiue: tota enim ratio productionis actiue sumpta consistit in ratione actus secundi ex parte agentis. Eadem ergo operatio, & actualitas secunda immanens, quæ est intelligere, ob suam eminentiam est etiam productio, & expressio verbi, licet id non semper requiratur ad rationem actionis immanentis nec sit eadem formalitas, & habitudo intelligere ut intelligere, & ut dicere, seu producere, ut explicatum est.

Ad Confirm. Respon. quòd licet intelligere, & velle propter suam infinitatem, ut simplicitatis est, sint vnum entitatiue, propter eandem infinitatem, ut fecunditatis, possunt fundare relationes diuersarum processionum; & sic sunt aptæ, ut per ipsas procedant diuersæ processionem verbi, & spiritus, dicti, & spirati cum omnimoda communicatione in eadem natura. Nam quia infinitas illa est infinitas simplicitatis, ipsumque intelligere, & velle vnum sunt entitatiue, id quod procedit per illas, procedit ut vnum in eadem essentia, & cum communicatione consubstantiali in eadem natura. Quia verò est infinitas fecunditatis, quia ad perfectionem ipsius intelligere, & velle pertinet fecunditas se communicandi, tum exprimendo, & dicendo in intellectu, tum spirando in voluntate, pertinet ad istud intelligere, & velle quæ substantialiter sunt vnum, propter sui eminentiam fundare relationes processionis, quæ sunt oppositæ, & distinctæ; & primò ex ipsa natura ut habente hanc eminentiam consurgit prima persona relatiua, & originatiua aliarum, quæ est Pater, qua relatione, persona supposita, & ante omnem processionem habita ex vi infinitæ eminen-

tia, & fecunditatis diuinæ, etiam ipsum intelligere, & velle possunt processionem habere distinctas, non distinctas in ipsa substantia intelligendi, & volendi, sed in ipsa oppositione originis, & relatione, quæ fundantur super eminentia infinita illius essentia quæ etiam complectitur esse relatiuum. Et ita ex parte relationum, & originum habent distinctionem, ex parte verò intelligendi, & volendi vim, & actualitatem, & speciem ut talis, vel talis terminus procedat, scilicet intellectus, vel spiratus.

ARTICVLVS. VI.

Utrum processio Verbi sit formaliter, & in quarto modo per se generatio?

PRæsupponit ista difficultas, secundum fidem Catholicam, processionem secundæ personæ, quæ est Verbum, esse generationem substantialem Filij, & disquirat sub qua formalissima ratione sit generatio quæ plures formalitates, seu respectus in illa processione considerari possunt, ut statim dicemus.

Quod ergo processio illa Verbi sit generatio, & productio Filij contra Arium stabiluit fides, Catholica, quia hæreticus, ut *suprà articulo primo* vidimus, fatebatur Verbum esse intra Deum, per quod facta sunt omnia, sed illud non esse Filium, quia non procedebat à Deo; quod autem erat procedens à Deo, & Filius, dicebant non esse Verbum sed creaturam, solum autem dici Verbum ministerialiter, & tanquam instrumentum Dei, sicut vox externa apud nos est verbum significans verbum internum. Vnde & ipse dixit in libro *Conuincialium*, ut refert S. Athanasius à nobis citato loco dicto: *Multa in Deo sunt verba, quodnam ex eis Filium dicemus?* Cæterum fides Catholica illud ipsum Verbum quod in principio est apud Deum, & per quod omnia facta sunt, Filium confiteretur, quia illud ipsum Verbum dicit Ioannes factum esse carnem, & vidiſſe gloriam eius gloriam quasi vnigeniti à Patre, Verbum ergo vnigenitum Dei est, & consequenter Filius. Nec ista processio Filij est processio ad extra communicans illi diuersam naturam, sed processio ad intra quæ Filium generat, non solum substantialem, & similem Patri, ut dicebant Semiariani, sed consubstantialem & in eademmet natura Patris subsistentem, ut fides Catholica docet.

Supposito ergo quòd processio secundæ personæ, seu Verbi est processio Filij secundum fidem, & consequenter generatio, quia ipse qui procedit verè est genitus, inquirat theologia, sub qua formalitate induit illa processio vim, & rationem generationis? Nam ut sit generatio, & ut ipse procedens sit Filius, debet esse substantia similis Patri, & in similitudinem eius procedens, seu expressiua illius imago. Et quidem quod secunda persona procedens sit similitudo expressiua substantiæ Patris, & imago eius, bene intelligitur quod id habeat ex vi, & formalitate Verbi, quia Verbum est imago quædam intelligibilis, & similitudo representatiua rei intellectæ. Quòd verò sit substantialis imago, & representatiua Patris intelligentis, non solum

essentiæ

effentiæ intellectæ, habet ex eo quod eſt diuina, ubi omnia iſta identificantur; & ſic non videtur formaliter, & in quarto modo per ſe proceſſionem Verbi eſſe generationem, ſed ſolum identicè, quatenus diuina.

Deſcriptio generationis quomodo accommodetur Filio.

2 Antequam in difficultate propoſita ſententia, euoluamus, & reſolutionem tradamus, oportet generationis veræ & propriæ definitionem ſupponere, eamque proceſſioni Filij accommodare, vt inde videamus, ſub qua formalitate illa proceſſio induere poſſit rationem generationis. Et oportet accommodare Filio illam definitionem generationis, quæ communiter tridit de viuentibus: nam ſi ea generatio, ſemotis imperfectionibus limitationis & creatura, non attribuitur Deo, non reſtat nobi quomodo concipiamus in Deo verum, & proprium Filium, quod fides docet, ſi illa filiatio, & illa generatio non habet in ſubſtantia illas conditiones, quas habet filiatio & generatio, quam ex creaturi accipimus, ſed ſolum nomine, & æquiuocè dicitur generatio, ſicut ſi in Deo non eſſet vera, & propria ratio, & quidditas ſapientiæ, quam apud nos videmus, licet non cum imperfectionibus, & limitationibus, quæ apud nos eſt, non poſſemus ſimpliciter pronunciare Deum ſapientem, ſed aliquid aliud, quod non eſt ſapientia & nominatur ſapientia, Deo attribueremus.

3 Igitur reſta generatione communiter dicta, & in lata ſignificatione prout reperitur in viuentibus, & non viuentibus, quæ eſt *mutatio de non eſſe ad eſſe in aliquo ſubiecto*, vel quæ eſt *mutatio huius totius in illud totum nullo ſenſibili manente vt ſubiecto*, ſicut definit Ariſt. 1. de generat. c. 4. iſtæ enim definitiones ſolum ſunt de generationibus materialibus, & quæ ſunt cum mutatione, quod nullo modo poſſet conuenire Deo; loquimur in præſenti de generatione ſtrictiori, & quæ ſolum conuenit viuentibus, neque in ſuo conceptu explicat quoddam ſit cum mutatione, ſed ſolum definitur quoddam ſit *origo viuentis à viuente à principio vitæ coniuncto in ſimilitudinem naturæ*, quam definitionem tradit S. Thom. in præſenti art. 2. & cum eo admittunt omnes ſcholæſtici, noſque eam explicauimus in lib. de generat. q. 1. a. 1. præſertim quantum ad duas particulas, quæ explicatione indigent, ſcilicet quoddam ſit *à principio vitæ coniuncto*, & quoddam ſit *in ſimilitudinem naturæ*. Nunc breuiter dicimus in tribus particulis definitionis explicari omnes quatuor cauſas quæ ad generationem concurrunt, & eo modo quo concurrere debent. Nam in prima particula *origo viuentis à viuente* explicatur vis, & proceſſio effectiua, qua vnum originatur, ſeu producit ab alio, vt à principio effectiuo vitali. Secunda particula, *à principio vitæ coniuncto* explicat cauſam materiale ex qua elaboratur, & procedit genitum: oportet enim quoddam generans effectiuum ex ſua ſubſtantia, ſeu ex aliquo ſibi coniuncto producat ſuum genitum, illudque ſibi habeat coniunctum, & alligatum, vel ſemper dum genitum exiſtit, ſicut contingit in vita cognofcitua, vel ſaltem à principio quando elaboratur proles, ſicut in generatione animalium videmus in quibus foetus colligatur ſuo generanti à principio, licet ab illo ſeparetur per partum, & ex ſemine generantis, quod eſt ſubſtantia à generante decifa colligitur materia, ex qua elaboratur foetus, & virtus ipſa formatiua foetus in ſemine ſeu in partibus eius ſubtilioribus, & ſpirituofis inſita, atque ex principio ipſi vitali prin-

cipio coniuncto, id eſt, ex ipſa ſubſtantia generantis, generatur proles. Et licet in animalibus perfectis, in quibus generans integratur ex duobus, ſcilicet ex mare, & foemina, non ſit foetus colligatus vtrique à principio ante partum, ſed ſolum vni, ſcilicet matri, tamun quia ſemen decifum à mare, & ex ſubſtantia eius profluens, virtutemque formatiuam deferens commiſcet ſemini, & ſanguini matris, in matre colligatur foetus ipſi materiæ, & virtuti vtriuſque generantis, licet non perſonæ vtriuſque, ſed matris tantum. In vita autem cognofcitua, vt in ſenſu, & intellectu id quod procedit cum fiat per actionem immanentem, ſit perfectior colligatio cum principio ſuo à quo procedit, vt *ci loco de generatione* expendimus, quatenus ex ſpeciebus coniunctis, & vnitatis ipſi potentiæ procedit cognitio, vel etiam ſimilitudo verbi manens intra intellectum. Tertia denique particula, *in ſimilitudinem naturæ*, & finalem, & formalem cauſam ſpecificatiuam generationis declarat. Finale quidem, quia ſinis generationis eſt propagatio generantis in indiuiduo ſibi ſimili, & eiſdem naturæ; inclinatur enim natura ad propagationem ſui, vt perpetuetur, quantum fieri poſſet, ſi non in eodem indiuiduo, ſaltem in diuerſis eiſdem ſpeciei. Formalem autem, & ſpecificatiuam cauſam designat, quia generatio ſpecificatur à forma geniti, vt ſimili, & expreſſa à generante, ita quoddam actio generatiua ex ſua ſpecifica ratione ſit aſſimilatiua; & ita genitum non ſolum debet eſſe ſimile generanti in ſe eſſentialiter, & in primo modo dicendi per ſe, ſed etiam per viam aſſimilationis debet ab eo procedere, & in quarto modo per ſe, ita vt hæc ſit tam formalis in quarto modo. Generans aſſimilat, ſicut ædificator ædificat, calidum calefacit: quia tota formalitas generationis conſiſtit in expreſſione ſimilitudinis, ſeu propagatione naturæ, nec aliud eſt generare quam ſimilitudinem propagatiuam ſui exprimere, ſicut dicitur Genef. 5. *Adam genuit imaginem & ſimilitudinem ſuam*. Itaque quod facit artifex per idem ad ſimilitudinem exemplaris, facit natura per generationem ad ſimilitudinem naturæ, quia facit propagationem illius in ſuo ſimili.

Vt autem videamus quomodo proceſſioni Verbi 4 bi conueniant iſtæ conditiones.

Obiicies primò, Nam in Deo non datur proceſſio ex principio vitæ coniuncto, quia ex ſubſtantia generantis non procedit Filius; quia vel intelligitur procedere ex ſubſtantia quæ eſt eſſentia, vel ex ſubſtantia, quæ eſt relatio Patris. Ex ſubſtantia, quæ eſt eſſentia, non procedit Filius, quia eſſentia eſt terminus communicatus Filio: ergo non principium à quo procedit. Nec intelligitur bene quomodo ex ſubſtantia Patris generetur Filius, quia illa ſubſtantia non aliter concurrat ad generationem, quam eo modo quo ſpecies foecundat intellectum, & ex ea intellectus elicit, & exprimit verbum, diciturque ex ſubſtantia ſpeciei procedere verbum quia ex obiecto repræſentato in ſpecie formatur idem obiectum in eſſe intellecto in Verbo. Sic autem nihil formatur in verbo diuino, quia ſpectes illa, vt foecundans intellectum Patris omnem perfectionem, & formationem habet in actu vltimo, cum ſit actus purus in eſſe intelligibili: non ergo ex ſubſtantia illa, quæ eſt ſpecies, procedit Filius, quia nihil eſt in illa ſubſtantia quod formetur, ſed quod formatum, & intellectum communicetur. Ac denique quia hac ratione intellectus Patris potiùs dicitur debere mater, quam Pater Verbi æterni, tum quia intellectus parit verbum ex ſpecie foecundante, tum quia

quia fecundatur ab essentia habente vicem speciei: fecundari autem, & parere proprium est matris. Quid est ergo ibi quod vocetur pater, cum persona illa prima sit parens, & fecundata ab essentia; essentia autem fecundans Pater non est? At verò ex substantia, quæ est relatio, non procedit Filius, quia relatio Patris opponitur Filio, ab eoque distinguitur, non Filium constituit: substantia autem ex qua fit genitum constituit illum, & manet in illo.

Secundò obicitur ex illa particula. *In similitudinem naturæ*, quia hæc non convenit generationi diuinæ, quia Verbum procedit ut consubstantialia Patri: ergo ut idem: ergo non ut simile in natura: in persona autem dissimilis est, quia oppositus in relatione; & sic excedit rationem generationis illa processio, quia excedit rationem similitudinis, & transit in unitatem identitatis. Denique quia non potest convenire aliqua species alicui cui, non convenit genus: ergo neque species generationis viventis, cui non convenit genus eius; genus autem huius generationis est generatio communiter dicta, ut communis est viventibus, & non viventibus; sed hæc generatio communiter dicta non convenit generationi Verbi, quia illa communiter dicta est mutatio, quæ non potest dici de generatione Verbi, & in illa invenitur aliquid prius, & posterius: si enim æquæ simul est generans, & genitum non est maior ratio cur iste procedat ab illo, quam è contra, quod totum deest in processione Verbi: ergo deest illi genus, seu ratio communis generationis.

Ad primum Respon. Filium procedere ex substantia, quæ est essentia, non quia sit de essentia tanquam de principio *Quod* actiuo: sic enim procedit ex Patre ut ex principio *Quod* producente, nec ex substantia, prout est relatio, procedit, nisi ut ex constituyente personam, quæ est principium *Quod* generandi, sed quia sit de substantia, seu essentia Patris, ut ex principio formali sibi communicato, & per quod substantia ipsa Filij constituitur, ex eadem quippe substantia est Filius ex qua constituitur Pater. Vnde non obstat quod sit terminus communicatus, quia idem quod est in Patre essentiale, & substantiale communicatur Filio; & sic prout in Patre, est principium communicandi, & prout in Filio, est terminus communicatus, sed prout communicatus non est principium, quia *ly communicatus* est idem quod genitus, & Deus ut genitus non dicit solam essentiam, sed essentiam modificatam tali relatione, & prout in tali relatione geniti, non est principium communicandi, sed terminus, licet eadem substantia sit in principio communicante, & in termino communicato; & sic est à principio vitæ coniuncto, & summe coniuncto, seu vno cum ipso generante, quod est essentia, & hæc ipsa communicatur Filio. Vnde cum dicitur Filius procedere ex substantia, vel de substantia Patris; *ly de* non designat materiam, seu materiale principium, de quo Filius constituitur, sicut in generationibus creatis, quia in Deo non datur materia ex qua fiat aliqua persona diuina. Sed designat formale principium, & integram ac totalem naturam præter personam producentem, eo quod generatio ista non solum tendit ad similitudinem, sed etiam ad consubstantialitatem. Vnde ex substantia debet procedere ut sibi totaliter communicanda, & integrè, non ut ex materia generantis formanda; & sic consubstantialis generatio non procedit ex principio materiali generantis; sed formali. Quando autem ex materia generantis formatur genitum, materia illa decidit, & separatur

Ioan. à S. Thom. in 1. part. D. Th. Tomus alter.

à generante, ut semen ab animali; & sic non remanet summe vnum, & coniunctum cum generante, quia decidit. Designat ergo *ly de substantia* principium formale, ut rectè obseruat S. Thom. *infr. qu. 41. art. 3. ad 2.* & ibi Caiet. nec retinet aliquam conditionem materiæ, ut sustinuit D. Thom. *in 1. dist. 3. qu. 2. art. 1.* quia fieri de aliquo etiam potest intelligi de forma, ut si ex anima iam creata fiat vnio ad materiam nouam; & sic tota forma, quæ est natura in Filio, accipitur à Patre, & non materia. Et idè *ly de substantia*, designat perfectissimam consubstantialitatem, quia non aliqua pars generantis aut materia communicatur Filio, sed forma ipsa quæ est tota natura. Et sic procedit Filius ex substantia quæ est natura Patris, non ut tendens ad distinctam naturam tanquam ad terminum propagatum, sed ut eandem communicans.

Vnde patet ad primam replicam quæ fit in argumento. Dicimus enim procedere Filium ex essentia Patris tanquam ex specie fecundante intellectum seu vicem speciei habente, non tamen ex speciei imperfecta, & formabili, quasi ex actu primo transeunte in secundum, & ex intelligibili ad intellectum, sed ex specie perfectissima, & in actu secundo, & habente totam, & summam perfectionem intelligibilem se communicante per modum locutionis, & expressionis, & ut essentia dicta, & manifestata, non ut magis formata per expressionem in esse intelligibili. Vnde cum dicitur: nihil est in illas specie quod formetur, etiam in esse intelligibili, concedimus: ergo non procedit Filius ex illa substantia, nego consequentiam: procedit enim ex illa, non ut formetur substantia, sed ut manifestetur, seu dicatur in verbo, non distinctam propagando, sed eadem communicando ipsi verbo manifestanti, & procedenti.

Ad secundam autem replicam, Respon. quod potius in diuinis dicitur pater, quam mater, quia mater importat principium passiuum, & potentiale, respectu prolis, nec solum parturire prolem quomodocumque constituit matrem, sed parturire sic, scil. ex fecunditate aliunde recepta, & patiendò illam Nam, & arbores pariunt flores, nec tamen ratione talis partus dicuntur matres florum, quia non pariunt illos ex receptione passiva seminis aut fecunditatis ed elaborandum, & pariendum scilicet. Cum ergo diuinus intellectus non pariat verbum ex aliqua fecunditate recepta, sed ex ipsa substantia sua, & vi actiua, quam habet ad communicandam vitam suam, quam habet in semetipso proli à se procedenti, potius denominatur pater, quam mater, parere autem ex propria, & actiua virtute non est contra rationem patris. Imò, & intellectus noster, licet recipiat à phantasmatibus species, & sit passiuus respectu specierum, idè quæ dicatur possibilis, seu possibilis intellectus, & intellectus agens quasi actiue effundat istas species in finem intellectus, tamen adhuc intellectus in exprimendo verbum non dicitur se habere ut mater, quia tota vitalitas, & spiritalis intelligibilitas, quæ est in illo conceptu, ex intellectu ipso intelligente, & operante, non ex speciebus venit. Vnde D. Thom. 4. contra Gent. c. 11 in fine: Cum processio, inquit, Verbi secundum hæc dicta sit esse, quod Deus se ipsam intelligit, ipsum autem diuinum intelligere non est per aliquam virtutem passiuam, sed quasi actiuam, quia intellectus diuinus non est in potentia, sed in actu tantum; idè in generatione Verbi Dei non competit hoc ratione matris, sed solum patris. Vnde quæ in generatione carnali distinctè patri, & matri conveniunt, omnia in generatione Verbi patri attribuntur in sacris Scripturis: dicitur enim pater &

dare Filio vitam, & concipere, & parturire.

Ad secundum Respon. verè, & propriè procedere Verbum in similitudinem naturæ, & omnia illa Verbum in similitudinem naturæ, & omnia illa verificantur in Verbo secundum diuersas considerationes, scil. quòd in natura absolute sumpta sit idem omninò cum Patre. *Ego, & Pater unum sumus*, quòd in relatione sit filius opposita Patri, & distinctus sit Filius ab illo, *Alius est qui testimonium perhibet de me Pater*: & denique quòd persona sit procedens, & sic accipiens naturam à Patre, sit eius similitudo, & imago, *cum sit figura substantia eius, & imago Dei inuisibilis*. Nec repugnat ista in eodem secundum diuersas considerationes. Nam quatenus consideratur natura, & quidquid absolute perfectionis est in Filio, non est similis, sed omnino idem: quatenus consideratur relatio filiationis, vt correlatiua, & vt terminus oppositus paternitati, non est similis, sed dissimilis: quatenus consideratur illa persona sic distincta, vt accipiens eandem naturam modo expressiuo, & manifestatiuo (qui est assimilatiuus) dicitur perfectè similis Patri in vi suæ caracteristicæ proprietatis. Nam vt aliqua sint similia, non requiritur quòd forma in quo conueniunt, sit diuersa, sed quòd subiecta diuersa sint, licet forma sit eadem numero; sicut si Deus poneret in duobus lapidibus eandem albedinem, illi duo lapides essent similes in quantum albi, & in hoc simillimi; & si in duobus lignis poneretur eademmet quantitas, essent æqualia. Et si aliquid ex vi alicuius actionis intenderet peruenire ad habendum non solum albedinem sicut alterum, sed eandem quæ est in altero, illa actio esset summè assimilatiua. Sic ergo Verbum procedit in similitudinem quatenus licet persona sit distincta, forma tamen quam accipit à Patre est omninò vna cum ipso, & ex vi suæ processionis accipit illam modo assimilatiuo, id est, exprimendo hanc similitudinem, & intendendo eam accipere vt vnam intelligibiliter, & manifestatiuè cum Patre. An verò ista similitudo sit relatio realis? Inferius exquiratur circa qu. 42. vbi in art. 1. ad 4. D. Thom. tenet esse relationem rationis quia fundatur in vnitatem perfectæ essentia. Vnde etiam potest dici, quòd inter Filium, & Patrem non est similitudo communis & ordinaria, seu formalis, sed eminentialis, quia est summa similitudo, quæ identitatem habet in eadem forma, licet personæ sint diuersæ. Et hæc similitudo eminentialis sufficit ad veram, & propriam generationem, imò quanto magis est vnum in forma genitum cum generante, dummodo supposita sit distincta, magis saluatur proprietas generationis.

Ad vltimum dicitur quòd id quod est commune in generatione viuientium per modum imperfectionis non inuenitur in generatione diuina. Quod verò est commune, & genericum per modum perfectionis inuenitur. Et hoc prædicatum, commune, quod non dicit imperfectionem, est origo seu processio, & hoc conuenit generationi diuinæ. At verò mutatio, & prioritas, aliæque similia sunt prædicata communia imperfecta, & potentialia, solumque conueniunt generationi imperfectæ, & creatæ, non verò diuinæ, vt supra etiam art. 3. ostendimus.

Processio Verbi in Deo formaliter in quarto modo per se est generatio.

10 Ostenso quòd definitio generationis viuientis, & particulæ illius conueniunt processionem Verbi diuini secundum quam verè, & propriè Filius est, restat videre secundum quam formalitatem, &

considerationem generatio substantialis sit: occurrunt enim in processione Verbi diuini duo.

Primum quod sit in linea intelligibilis, ex qua habet quòd sit expressio quadam & representatio intentionalis seu intelligibilis sui obiecti seu principij à quo procedit. Et ex vi huius generis, seu lineæ habet quidem esse imago intentionalis, sed non pertingit ad hoc quod substantialis sit, vnde non potest in vi huius formalitatis esse per se in quarto modo generatio, quia generatio in quarto modo per se est substantialis propagatio.

Secundum quod occurrit in hac processione est quòd sit diuina, & ex hac parte habet quidem esse processio substantialis, sed propter identitatem cum ipsa natura diuina, quia quidquid in Deo est, substantia est. Hac autem ratione etiam processio Spiritus S. quatenus diuina, substantialis est, quia prout diuina est intra diuinam naturam, vbi nihil accidentale est: Ergo si hoc sufficit vt processio intelligibilis reddatur generatio, cur non sufficiet, vt processio impulsiva etiam generatio sit, quia substantialis est, prout diuina.

Hæc difficultas in varias sententias Authores detorsit.

Quidam dicunt hanc processionem esse generationem seu substantialem emanationem quatenus diuina. Esse autem diuinam est quasi materialiter, & vt differentia extranea reperiuntur in illa processione, quia diuinitas intellectus penes diuinam, angelicam, & humanam est diuinitas formæ per subiecta, seu quasi accidentis in subiecta, & hoc est materialiter, seu subiectiue se habere ad intellectionem hoc quod est esse diuinam. Est tamen illa processio generatiua, quia ex modo procedendi assimilatiua est, licet esse assimilatiuam in substantia habeat quatenus diuina. Ita attribui solet Caietano, tum in hac quæst. 27. art. 2. tum infra qu. 35. art. 2.

Alij docent intellectionem illam non solum quatenus diuina est, & ipsamet substantia identicè, & materialiter, sed etiam in sua linea formalissima intelligendi, prout perfectissima, & in summo gradu talis lineæ esse substantialem, & substantia-liter generare, licet hoc quod est perfectissimam esse, & in summo gradu non habeat, nisi sit diuina. Ita Ferrar. 4. contra Gentil. c. 11. Ad quam sententiam accedere videtur P. Suarez lib. 1. de Trinit. c. 5. num. 14. & 15. vbi docet, quòd vt aliqua productio sit generatio, non requiritur, quòd secundum communem, & analogam rationem generatio sit, sed secundum particularem, & contractam; & sic intellectio, seu dictio ex sua communi ratione vt abstrahit à creatâ, & increata non est generatio, sed operatio assimilatiua intentionaliter. Vt autem particularizatur, & contrahitur ad talem intellectionem, qualis est in Deo, substantialis est, & generatio redditur. Quòd autem ex genere suo solum sit assimilatiua intentionaliter, in particulari verò transeat ad similitudinem substantialem, id habet, quatenus est perfectissima similitudo, & ita operatio intellectiua, quæ de se tendit ad assimilandum cum perfectissima est, transit in perfectissimam similitudinem quæ est substantialis, & generatiua. Quod est ad sententiam Ferrariensis reduci.

P. Vasquez hic disp. 113. c. 6. reiecit sententias Caiet. & Ferrar. quia existimat in processionibus diuinis non se habere materialiter, & identicè tantum hoc quod est esse diuinum, sed formaliter, & intrinsecè. Vnde existimat ex hac parte omnino parificari intellectionem, & spirationem, seu amorem diuinum, quia vtraque ex vi sua habet constituere terminum procedentem consubstantialem cum

cum suo principio, & eiusdem naturæ, & essentia, ita quod tam sit in quarto modo per se ista propositio Spiritus S. ex vi suæ processione procedit ut Deus, seu æqualis, & similis Deo, sicut ista, Verbum ex vi suæ processione procedit ut Deus, quia si in utraque processione consideretur ratio communis, & analogica, quæ abstrahit à creato, & increato, scilicet intellectio, & volitio, neutra producit terminum consubstantialem. Si utraque consideretur ut determinata, & increata, utraque ex vi processione increatæ habet attingere esse increatum, quia habet attingere esse intelligibile, & esse amabile, & utrumque esse substantiale est, nec ratio D. Thom. urgentior est in vno, quam in alio: probat enim quod Verbum procedit ut simile in substantia, quia procedit per intellectionem, & intellectio esse Dei, similiter autem dilectio est esse Dei.

13 Igitur Vasq. formalitatem processione Filij, & generationis reducit ad aliud principium, scilicet quia generatio viventium per se primo tendit ad exprimendum imaginem, quæ sit representatiua sui principij; licet enim filius generetur ut substantialis terminus generationis, tamen ut filius, & sub formalitate filij dicit expressionem quandam, & representationem patris, & in hoc consistit specialis relatio filij, ut filij, quod non solum sit effectus substantialis, sed representatiuus sui principij; unde videmus quod ignis genitus ab alio igne, licet emanet ut similis igni generanti in substantia, non tamen est Filius ignis, quia non procedit ut imago expressiva illius. Igitur processio Verbi diuini supponit quidem quod substantialis processio sit, & in hoc conuenit cum processione Spiritus S. sicut generatio hominis conuenit in ratione substantialis processione cum generatione ignis, sed quia processio substantialis secundæ personæ habet ex ipsa formali ratione Verbi quod sit processio expressiva, & in ratione imaginis, quod non habet processio substantialis tertiæ personæ illa est generatio non ista.

14 Caterum adhuc in ista sententia Vasquez restabat vnum explicandum ex cuius defectu difficultas manet integra. Nam licet verissimum sit quod de ratione Filij sit processio per modum imaginis, ut docet S. Thom. *infr. qu. 35. art. 2.* & ita Filius est imago, quia est natus, non autem Spiritus S. licet habeat eandem diuitatem; tamen ut recte in eodem loco soluit ad 3. aduertit S. Thom. imago dupliciter in aliquo inuenitur. Vno modo in re alterius naturæ, sicut imago Regis in denario, & hæc imago ordinatur pure ad representandum; alio modo in re eiusdem naturæ, sicut imago Regis in filio suo; & hæc est perfecta imago, nec ordinatur solum ad representandum, sed ad propagandum naturam sui principij. Itaque filius est imago nata, non ab arte adumbrata, cum tamen imago picta, & adumbrata magis ordinetur ad representandum, quam imago nata, quia hæc ordinatur ad propagandam naturam: id enim per generationem intenditur, scilicet ut natura propagetur, & communicetur, in creaturis quidem per multiplicationem naturæ, in diuinis per consubstantialitatem communicationem eiusdem. Cum ergo inueniamus Verbum utroque modo esse imaginem, in creaturis quidem ut imago representatiua, seu ad representandum ordinata, quatenus est representatio accidentalis, & in re alterius naturæ à suo obiecto representato: In diuinis autem ut imago nata, & propagatiua, non in naturæ multiplicatione, sed in eiusdem consubstantialitate, restat P. Vasquez integra, & tota difficultas, unde, & per quam formalitatem S. Thom. in 1. part. D. Th. Thomus alter.

litem habet processio imaginis intentionalis quod solum dicit verbum ex suo conceptu communi transire ad rationem imaginis propagatiuæ, & substantialis in eadem natura, quod prorsus requiritur ad rationem imaginis, quæ est Filius? Nam si hoc habet quia diuina, incidit in sententiam Caietani quam impugnatur. Esse autem diuinam non habet intellectio ex sua analogica, & communi ratione, sed ex contracta, & particulari, quia est in tali subiecto, & in tali natura, ut dixit Caiet. Et restat explicare, quare processio Spiritus S. licet ex suo analogo, & communi conceptu non sit processio imaginis representatiuæ, tamen quia ex conceptu particulari in quantum diuina, habet producere terminum omnino similem in substantia, ex hac etiam formalitate talis processione, non habeat induere rationem imaginis propagatiuæ in eadem natura, cum ad hoc quod sit imago, sufficiat quod similitudinem habeat eiusdem naturæ ex vi sui principij, & sic representante illud. Si autem habet Verbum esse imago nata, & propagatiua substantialiter, non autem pure representatiua ex ipso genere intelligibilis representationis, quatenus summa, & perfectissima est in ea linea, incidit in sententiam Ferrariensis, quam reiicit.

Quara resolutorie dicendum est cum sententia 15 Ferrar. qui in hoc puncto attingit mentem S. D. quod processio verbi stando præcisè in linea intelligibili, & ex vi formalitatis suæ, & non considerando differentiam aliquam extraneam vel identicam quatenus talis, sed solum purificando ipsam rationem intelligibilis processione ab omni potentialitate, & imperfectione, ex ipsamet proprietate, & intimis visceribus intelligibilis processione redditur substantialis, & generatiua. Itaque processio intelligibilis ex perfectione propria, quæ est assimilatiua sui obiecti, & ad eius unitatem tendens petit substantialem unitatem, & assimilationem, & consequenter quod eius assimilatio sit expressio imaginis propagatiuæ. Ex defectu vero & imperfectione eius est quod sit imago accidentalis, & tantum representatiua sicut in nobis, in quibus esse intelligibile non est ipsa substantia rei, sed aliquid accidentale, & sic non est querendum quomodo imago, quæ solum est intentionalis, & representatiua, & quasi picta sicut in nobis Verbum transeat ad hoc ut sit imago nata, & substantialiter propagata, sicut requiritur ad generationem, in quo maior vis difficultatis hic consistit, nec apparet quomodo hoc conueniat imaginis intelligibili ex vi Verbi, & formali ratione lineæ intelligibilis, sed ratione subiecti in quo est, scilicet quia est diuina, quod videtur, ex parte materiali se tenere. Sed nos dicimus intentionalem imaginem ex sua formali linea, & ratione intellectualitatis esse substantialem; ex imperfectione vero quæ est in creaturis esse accidentalem, & pictam, nec eleuari per depurationem ab imperfectionibus ad hoc ut substantialis sit, sed vindicari, restituique naturæ suæ intelligibile, & ad id quod petit ex puritate intellectualitatis. Unde licet ex eo quod processio sit diuina, petat per identitatem in natura substantiali quod processio substantialis sit, & hoc sit commune omni processioni diuinæ, tamen ex eo quod intelligibilis in actu puro, formalissime loquendo, etiam substantialis est, & generatio, quia est assimilatio intelligibilis summo modo, & unitatem summam faciens cum obiecto.

Fundamentum, & ratio huius desumitur ex ratione ipsa D. Thom. in hoc art. 2. adiunctis his quæ tradit in art. 1. solut. ad 2. Explicans enim S. D. in art. 2. quomodo processio Verbi sit per modum si-

17 Quod si dicas, quia in sententia dicente quod natura diuina non est intelligere, sed intellectualitas, seu intelligere radicale, tunc intelligere est operatio & intellectus est attributum; & sic supponunt substantiam, & naturam constitutam, non ipsa formaliter sunt substantia, sed identicè, & sic procedens per intellectum formaliter procedet vt simile in attributo, non vt simile in natura, nisi tantum identicè, & hoc conuenit Spiritui S.

Vnde explicans S. Thom. *in hac quæst. artic. 1. ad 2.* quomodo Verbum diuinum non sit diuersum in natura, sed consubstantialiale Patri ex eo quod procedit ad intra, id probat, quia quanto aliquis perfectius intelligit, tanto conceptio eius est magis intima, & magis vnum cum intelligente: nam intelligere ad hoc tendit vt fiat vnum cum intellecto, id est, cum obiecto, ab obiecto autem simul cum intellectu paritur notitia. Vnde quando intelligere est in fine perfectionis, seu summè perfectum, sicut est intelligere diuinum, verbum quod procedit per tale intelligere, necesse est quòd sit summè vnum cum eo à quo procedit, id est, cum Patre in obiecto intellecto, quod est eius essentia. Ecce quomodo D. Thom. ex ipsa summa perfectione intellectus intra lineam intelligendi, & ordinis intelligibilis, & secundum propriam formalitatem intelligendi, quæ est fieri vnum cum obiecto intellecto infert, quòd est summè vnum cum tali essentia, quod est esse substantialiter vnum, vt mox ostendemus De eodem videri potest D. Thom. *in 4. contra Gentil. c. 11.*

18

Si autem aliquid obiectum ita est sine potentialitate quod per seipsum, & secundum suam substantiam, non per aliquid superadditum, intelligibilitatem suam habet in actu ultimo, id quod procedit per tale intelligere ex propria vi sua, & formali ratione intelligendi procedit ut unum, & simile in substantia. Patet hoc, & simul probatur consequentia *supra* facta, quia intellectualitas ex formali suo conceptu est gradus constitutivus naturæ viventis substantialis, ut patet in nobis. Quod verò sit talis intellectualitas quod indigeat specie impressa, aut expressa accidentali, & intellectione tanquam actu accidentali superaddito, provenit ex imperfectiōne istius intellectualitatis in linea intelligibili, quia est intellectualitas cum potentialitate; & sic non est per seipsam formata in suo obiecto, & in suo intelligere, sed indiget specie superveniente, & actu

actu superaddito distincto, vt optimè aduertit S. Thom. *suprà* 9. 14. a. 2. Si ergo intra lineam intellectualē depuretur ab omni ista potentialitate, & defectu, sicut per seipsam intellectualitas est gradus naturæ substantialis, ita ex ipsis visceribus, & linea intellectualitatis erit intelligibilis, & intellecta, habebitque omne esse intelligibile, non accidentale, & accidentaliter sibi adueniens, sed substantiale, & substantialiter constituens illum gradum intellectualitatis in actu vltimo. Rursus omnis processio intelligibilis, quæ sit secundum intelligere internum, est processio tendens ad vnitatem intelligibilem cum obiecto exprimendam, & faciendam in eodemmet numero obiecto: ergo si procedit vt depurata ab omni potentialitate in linea intelligibili, ex eadem formalissima ratione tendit ad faciendam vnitatem cum obiecto in substantia, & ad consubstantialitatem cum obiecto quia intelligibilitas ipsa ex perfectione ipsa, & summa puritate in esse intelligibili substantia est, & processio intelligibilis vnum facit cum illa.

18 Dices primò, restare nobis eandem difficultatem quæ in sententia Vasquez, & in sententia Caiet. quia hoc ipsum quod est purificari intellectualitatem, & intelligibilitatem ab omni potentialitate, non habet ex linea ipsa, & genere intelligibili, sed ex eo quod diuina: ergo etiam quod sit substantialis generatio habet ex eo quod diuina, & quasi identicè tantum non formaliter, & in quarto modo per se.

Dices secundò, discursum factum solum probare quod vbi intelligibilitas depuratur ab omni potentialitate, sit omnino vnum per locum intrinsecum, & in eadem linea intelligens, & obiectum intellectum, species impressa & expressa, quæ est verbum, non verò quod processio ipsa intelligibilis substantialis sit. Diceret enim aliquis quod natura intelligens quando est summè perfecta, & depurata ab omni potentialitate habet quidem summam & substantialem vnitatem intelligens, & intellectum, obiectum, & intelligere, sed tamen non habet realem processionem, quia non per processionem redditur obiectum intellectum in actu. Si autem processio realis in tali intelligere admittenda est, illa erit solum ordinata ad manifestationem, & expressionem rei intellectæ; & sic sufficit quod accidentalis sit, quia non ordinatur ad constituendam intelligibilitatem obiecti in actu vltimo, sed ad manifestandum constitutam, vel si substantialis est illa processio, quia intra Deum, accidens reperiri non potest, iam non per locum intrinsecum illa processio, vt processio intelligibilis, substantialis erit, sed solum identicè, quia diuina est, & intra Deum, quod etiam conuenit Spiritui S.

19 Ad primum dicitur quod licet intellectualitas, sicut & quodlibet aliud prædicatum intra Deum non purificetur ab omni potentialitate, nisi diuinum sit, & identificatum cum esse, & entitate Dei, tamen reuera intra suam propriam lineam, & formalem rationem vnumquodque prædicatum purificatur à potentialitate, & redditur actus purus, & illa purificatio, & denudatio à potentialitate, & ab omni imperfectione non censetur extranea, & solum materialiter, & identicè ei conuenire, sed intra formalem rationem suæ lineæ. Et hoc ideò quia exclusio omnis potentialitatis, & denudatio ab illa in quolibet prædicato, & in quolibet genere etiam si præcisè intra illam lineam, & genus consideretur, & non vt identificatum in re cum aliis generibus, & prædicatis, est exclusio eius, quod imperfectio est, & defectus, & potentialitas in tali genere, & linea, & solum remanet id quod perfectionis, & actualitatis est in sua puritate. Quod autem in vno

Ioan. à S. Thom. in 1. part. D. Thom. Tomus alter.

quoque genere consideretur ratio perfectionis, & actualitas illius, ad formalem eius rationem pertinet: imò hæc est formalissima eius consideratio, quia talis abstractio, & præcisio, qua aliquid denudatur à suis imperfectionibus, & potentialitate, est abstractio formalis, nunquam autem id quod est imperfectionis, & potentialitatis pertinet ad formalem rationem rei, nec exclusio illius excludit formalem rationem rei, igitur licet verum sit quod intelligibilitas, & intellectualitas non depuretur ab omni potentialitate in re, nec sit actus purus, nisi sit esse diuinum in re, & identificetur cum omnibus aliis prædicatis, & attributis Dei; tamen adhuc intra lineam, & genus proprium suum, scil. in linea intelligibili esse purum actum, & ab omni potentialitate depurari, non extrahit ipsum à tali linea, nec extraneum illi censetur, sed intra ipsam lineam intelligibilitatis formalissimè se habet, sicut etiam alia attributa, vt sapientia, & iustitia, & misericordia in Deo intra suam formalitatem considerantur, quando considerantur vt in actu puro intra rationem, & lineam sapientiæ, vel iustitiæ, adhuc formaliter considerantur, & non secundum aliquid adiunctum quasi sibi extraneum, & identificatum, sed intra suam formalem rationem id habent; & hoc ideò, quia ratio actus puri, & increati, aut creati intra omnem formalitatem possunt imbibere, nec tanquam aliquid extraneum reputantur, licet verum sit quod hæc ratio actus puri necessariò postulet identificari cum omni alio quod diuinum est, nec aliter in re reperiri possit: sed nos non consideramus omnia quæ habet intelligibilitas ratione diuinitatis identificata sibi, sed solum id perfectionis quod intra suam lineam habet ex ipsa purificatione actualitatis suæ propriæ in illo genere intelligibili. 20

Ad secundum dicitur, quod discursus factus solum probat quod intelligere, & intelligi in actu puro summam, & substantialem vnitatem petit, & habet cum obiecto intellecto. Et ita si secundum tale intelligere sit aliqua processio, illa debet esse substantialis, & non solum representatiua, sicut accidens representat substantiam, sed propagatiua, sicut substantia Filij representat substantiam Patris, eandem communicando sibi. Quod verò detur processio de facto, hic discursus non probat, sed ex fide supponit. Sed cum ipsa fides personam vnā procedentem dicat esse Verbum, quod pertinet ad expressionem intellectuam, nec dicatur esse verbum externum, sicut voces apud nos, sed internum, quod est apud Deum, & quod Deus est verbum, discursus ipse nos ducit vt hac intelligibili processione supposita, necessariò ipsam ex vitalis intelligibilitatis etiam intra lineam, & ordinem intelligibilem dicamus esse consubstantialem, seu secundum vnitatem in substantia, ita quod illa expressio verbi non sit solum processio imaginis representatiuæ, sed propagatiuæ, non in diuer a natura, sed in eadem propagando personam. Et licet processionem hanc esse sola fides ostendat, non ratio demonstret, tamen supposita fide, eaque non repugnante persuadet ratio hanc processionem optimè conuenire Deo quia intellectualis natura de se est manifestatiua, seu locutiua eius quod intelligit, & fecunditatem habere ad manifestandum magna perfectio est, quā Deo nō deesse cōuenientissimū est, nec eam ex indigētia habet vt obiectū reddatur intellectū in actu, sed ex intelligētia, & abundantia cordis eructat verbū bonū.

Cum autem instatur, quod si ita est, hæc processio manifestatiua non erit per locum intrinsecum substantialis, quia ex se non requiritur ad substantiam intelligibilitatis, sed si substantialis est, solum id habebit, quia est intra Deum. 21

F 3

Resp.

Respond. esse substantialem per locum intrinsecum, non quia ad constituendam intellectualitatem in actu puro requiratur processio, sed quia verbum ipsum essentialiter, & per locum intrinsecum est intelligibilis terminus, & representatio continens obiectum intellectum, & sub intelligibili esse expressum: ergo si intelligibilitas illa in qua fit expressio ex suo formali conceptu, & per locum intrinsecum est substantia, quia est actus purus intellectualitatis, & intelligibilitatis, etiam per locum intrinsecum ipsum verbum est vnum cum suo obiecto in esse substantiali, quia per locum intrinsecum procedit ut vnum in esse intelligibili cum obiecto, ita quod sit vnum numero cum obiecto in illo esse: nec enim aliud numero, sed ipsummet obiectum representat, & continet intra se in esse intelligibili verbum, sed esse intelligibile illius obiecti quod exprimit Verbum diuinum per locum intrinsecum est esse substantiale eius, siquidem obiectum eius formale primum, & specificum est ipsa diuina essentia, & esse intelligibile illius ex ipsa ratione actus puri intra suam lineam est substantiale, ut ostensum est: ergo processio Verbi quando est purificata ab omni potentialitate, substantialis processio est intra lineam suam, & formalem ordinem intelligibilis processionis.

22 Ex his deducitur id quod *supra* proposuimus probandum, processionem intelligibilem ex sua perfectione consideratam, & non ex adiectione potentialitatis, & imperfectionum, quæ illi aggregantur in creaturis, non solum esse productiuam imaginis representatiuæ, quæ purè munus representationis exerceat, sicut pictura, & sicut imago arte adumbrata, sed esse productiuam imaginis propagatiuæ, & substantialis, imò de se petere ut terminus procedens sit consubstantialis in eadem numero substantia, & natura. Ex defectu autem intelligibilis processionis esse quod imago procedens sit solum representatiua per modum accidentalis expressionis, & quasi picturæ; quia processio intelligibilis de se tendit ad hoc quod intelligens sit vnum cum ipso obiecto intellecto, non vnum in specie, sicut cum vnus homo producit alium hominem, qui solum in specie est idem, sed vnum numero, quia intelligens aliquod obiectum, & penetrans illud cum illo obiecto eodem numero coniungitur, & vnum cum illo sit, non entitatiuè per conuersionem, & transmutationem in illud, sed sine transmutatione per intelligibilem apprehensionem, & representationem: Ergo intelligibilis processio de se petit, & tendit ad identitatem cum obiecto in esse intelligibili: vbi ergo inuenit quod esse intelligibile est substantiale, & ipsa substantia obiecti, maximè tendit ad consubstantialitatem, quia tendit ad identitatem in substantia, id est in illo esse intelligibili, quod substantiale est, & cum tendat intelligibilis processio, ut sit vnum cum re intellecta, vbi perfectissimè tendit, perfectissimè facit vnum: ergo substantialiter idem, quia hoc est perfectissimè vnum; & sic maximè seruit ad generationem personæ consubstantialis in eadem natura, sicut est in diuinis.

23 Sequitur secundò, explicatio rationis S. Thom. *hic* art. 2. quæ maximè formalis, & intrinseca est, cum probat processionem Verbi esse generationem. Applicat enim illi omnes particulas generationis. Quod enim sit origo viuens à viuentem, patet, quia est processio per modum actionis intelligibilis, quæ est operatio vitæ. Quod sit à principio vitæ coniuncto, constat, quia est ex substantia Patris: substantia

enim Patris est obiectum eius quod substantialiter est intelligibile, & intellectum in actu puro; ex obiecto autem cognito, & intellecto formatur verbum quod est manifestatio intelligibilis talis obiecti. Quod sit in similitudinem, patet, quia est conceptio intellectus, & similitudo rei intellectæ, quæ quidem in nobis est similitudo accidentaliter, & purè representans, quia esse intelligibile accidentaliter conuenit rei intellectæ, eiusque intellectualitati, in Deo autem est similitudo substantialis, & propagatiua, quia facit vnitatem cum obiecto in esse intelligibili quod in obiecto increato est esse substantiale. Et denique est in eadem natura, quia intelligere, & esse est idem, vbi *ly in eadem natura* intelligitur in eadem numero substantialiter; & *ly est idem intelligere, & esse*, intelligitur de esse substantiali specifico, non solum per identitatem vno cum intelligere, sicut omnia quæ intra Deum sunt, vnum, & idem sunt, sed formaliter ex vi intelligibilitatis in actu puro, quæ hoc ipso quod caret potentialitate, consolidatur ipsi intellectualitati, quæ est gradus constitutiuus, & specificus naturæ substantialis, ita quod ipsa natura, & substantia non solum seipsa est intellectualis, sed seipsa est intelligibilis, & intellecta, quia sine vlla potentialitate habet totum quod pertinet ad lineam intelligibilem. Et sic parum refert ad hanc rationem D. Thom. quod natura diuina consistat in intelligere in actu 2. vel in intellectualitate in actu primo, sufficit quod esse quiditatum & specificatum naturæ diuinæ sit intellectualitas in actu puro; ita quod sit suum esse intelligibile substantialiter. Vnde idem est procedere in actu puro intelligibili, ac procedere in esse substantiali, quod est formalissimum in ipsa natura intellectuali, ut actus purus est, quod non currit in aliis attributis, & perfectionibus, quæ solum quia diuinæ, sunt substantiales, non quia ad ipsum gradum intellectualitatis pertinent substantialiter ut in actu puro. Et ex eadem ratione communicatur Verbo ex vi suæ processionis non solum intelligi, passivum in actu 2. sed etiam intelligibile in actu 1. & intelligere actiuum, quia hæc omnia in actu puro intelligibilitatis idem sunt, & solum ratione alicuius potentialitatis diuiduntur, & differunt, ut S. Thom. *supra* quæst. 14. art. 2. Et sic cum ipsum intelligere Dei sit obiectum sui, si ex vi processionis communicatur identitas obiecti, communicatur formaliter ipsum intelligere, & non solum ipsum intelligi.

Soluuntur argumenta.

Præcipuum argumentum sumitur ex purificatione processionis Verbi diuini ut substantialis est cum processione Spiritus Sancti, ut substantialis etiam est, probando quod vel vtrique id habet identicè, & non formaliter, vel vtrique id debet habere in quarto modo per se. Et summa discursus reducitur ad hoc, quod processionem istam consideratam non in communi, & secundum conceptum analogum ut abstrahunt à creatura, & increata: sic enim neutra ex vitalis conceptus est substantialis productio, aliàs in omni inferiori esset generatio, seu substantialis productio, quod apertè patet esse falsum in processione intellectus creati; sed consideratæ in particulari & contractè, ut sunt processionem personarum diuinarum ex vi suæ processionis formaliter, & in quarto modo sunt substantiales, & in similitudinem naturæ, quia sunt processionem personæ increatæ diuinæ, & per quas communicatur ipsa diuina natura

natura, & habetur ipsa Deitas pro principio talis communicationis & processio: ergo si ex eo processio Verbi diuini est processio generatiua & substantialis, & processio Filij, quia ex vi suae processio in quarto modo procedit ut Deus, & similis suo principio, idem habebit Spiritus S. Quod si Spiritus Sanctus non habet, neque Verbum. Ergo totum quod adducimus de intelligibilitate, & de processione in esse intelligibili, & per modum similitudinis representantis frustraneè, & superflue adducitur, quia totum hoc pertinet ad processionem similitudinis, & representationis intentionalis, quae de se, & ex conceptu suo solum est processio per modum cuiusdam accidentalis representationis, sicut fit in nobis. Quod verò ista processio similitudinis intentionalis transeat ad aliam lineam, nempe ut sit processio similitudinis substantialis, & propagatiua, non habetur ex vi lineae intelligibilis, sed ex eo quod processio diuina. Ex hac autem ratione etiam processio amoris, & impulsus, quae secundum se, & prout in nobis est pondus quoddam, & amor accidentalis, ut diuina processio est substantialis, & communicatiua eiusdem naturae, & id quod procedit tali modo procedit ex vi suae processio, ut persona increata, & ut Deus, non ut accidens, aut creatura: ergo ex hac parte non discernitur inter processionem Verbi, & Spiritus Sancti. Et illustratur exemplo vulgari: Nam processio, & emanatio picturae, est productio similitudinis representatiuae ex se, & ex propria ratione; & tamen si cresceret in perfectione ista processio ut per eandem artem picturae produceret hominem similem in substantia, non ex hoc esset filius magis, quam si actione ambulatoria, aut alio modo motiua illum produceret. Intellectus autem ex genere intellectiuo solum producit imaginem per modum picturae, & adumbrationis: ergo quod perueniat ad hoc ut producat similem in substantia, non magis constituet processionem Filij in quarto modo per se, quam si ipsa spiratio & inclinatio voluntatis eandem substantiam, & naturam communicet.

25 Respond. hoc argumentum *seq. articulo* ubi de processione Spiritus Sancti agitur soluendum esse. Pro difficultate autem praesenti, qua intendimus quod ex formali, & propria ratione processio intelligibilis quatenus perfecta, & depurata intra lineam suam ab omni potentialitate ipsa processio imaginis, & similitudinis intentionalis, est processio similitudinis substantialis, & per modum propagationis, & non merae representationis, dicimus non parificari quoad hoc processionem intellectus, & voluntatis, considerando utramque in sua linea, & formali ratione praecise etiam ut depurata ab omni potentialitate, & imperfectione: nam processio per intellectum expressiua, & intelligibilis, & processio per voluntatem spiratiua, & volibilis conueniunt in eo, quod tenet se ex parte principij producentis, & operantis, & differunt valde in eo, quod ex parte obiecti se tenet, & per modum principij formalis ad processionem istas concurrunt. Ex parte principij operatiui conueniunt in hoc, quod utraque processio est intra ipsum principium operans, quia operatio immanens est, unde si tale principium est incapax accidentis; & tamen est capax alicuius procedentis intra se, ex vi talis processio quantum ad hanc formalitatem, & considerationem, erit illa processio substantialis, quia virtus illa non est productiua intra se alicuius accidentis, sed suum esse substantiale debet esse quidquid in se est; & sic si est operatiua ali-

cuius realiter procedentis à se, debet esse operatiua substantialiter. Ex parte verò obiecti quod se habet ut forma, seu ut formale principium in hac processione, aliter se habet processio intellectus, & voluntatis, quia in intellectu paritur notitia à potentia, & obiecto, & obiectum praebet specificationem actui, & est forma secundum quam fit processio ista intelligibilis, & expressio in verbo. In voluntate autem non patitur amor, & inclinatio ab obiecto vnito, & coniuncto voluntati, eamque fecundante, sed potentia allicitur ab obiecto proposito per intellectum, & propendet, seu inclinatur in illud; & ita obiectum propositum mouet quidem voluntatem, inclinando illam, & alliciendo, non tamen praebendo illi id ex quo formari, aut exprimi debet similitudo rei, sed res ipsa procedens: sicut enim generans ex sua substantia decidit partem quam vi formatiua elaborat in factum, & imaginem propagatiuam sui, sic intelligens ex obiecto sibi vnito intelligibiliter in specie impressa, vel ex suamet essentia, si ipse est res intellecta, ut in Deo format, & exprimit propagationem intelligibilem in conceptu rei intellectae, quasi in quodam factu intelligibili. Voluntas autem producit quidem actum, & impulsu spiratum intra se, & ex se, ut ex principio actiuo operante supposita propositione, & allicientia obiecti, non tamen praebendo ex se substantiam, siue per modum principij formalis, siue materialis ut formandam, & exprimendam in similitudinem eius à quo procedit. Unde id quod procedit in voluntate si est substantia sicut suum principium, id habet ex identificatione cum suo principio actiuo, quod non est capax accidentis, neque alterius substantiae. Quod verò procedit per intellectum non solum est substantia ex identificatione cum suo principio actiuo, quia actus immanens est, sed etiam cum suo formali principio, ex quo formatur, & exprimitur in similitudinem eius, scilicet cum obiecto, cuius expressio fit in Verbo. Et haec secunda consubstantialitas requiritur ad generationem, scilicet quod ex substantia geniti, tanquam ex materia, vel ex natura formata, seu ex formali principio, formetur, seu exprimat similitudo talis naturae, & principij. Quare processio voluntatis solum est substantialis processio, & communicat ipsam diuinam naturam, quia est intra Deum, & ex ipsa voluntate procedit, & non ex nihilo, quia per actum immanentem procedit, & ex vi huius processio, ut immanens intra Deum, procedit quidem ut Deus spiratus, non ut genitus, quia non est processio substantialis ex vi processio à suo formali principio, quod est obiectum, neque consubstantialis illi, sed solum procedit substantialiter, & ut consubstantialis suo principio productiuo, seu operatiuo per identitatem, quatenus actio immanens est, nec procedit ad extra ut effectus, sed intra manet, scilicet intra naturam ubi non potest procedere accidens, nec aliquid diuersum in substantia, sed ut consubstantialis in eadem.

26 Ex his soluitur in forma argumentum: Processiones diuinae non sunt substantiales, quatenus abstrahunt à creata & increata abstractione quadam analoga, & per modum totius potentialis concedo: ergo quatenus diuinae, concedo, quia esse diuinas omnino requiritur ut procedant per modum actus puri; & sic ly *quatenus* dicit conditionem omnino requisitam, & annexam ut substantialis illa processio, formaliter autem id habet quia est actus purus in sua linea. Cum verò instatur quod in quantum diuinae ex vi processio, & in quarto modo formaliter est substantia

substantialis, & similis suo principio, negatur hoc assumptum, quia esse diuinam illam processionem stat dupliciter, vt dictum est, vel ex identitate cum principio, vt operatiuo, & productiuo quasi actiue, vel ex identitate cum principio formali, ex quo formatur & exprimitur similitudo rei procedentis. Ad hoc autem vt in quarto modo per se aliquid procedat tale, non sufficit quod fiat tale ex aliqua conditione inuenta in agente concomitanter, & identicè, sed ex vi ipsius formæ, seu principij formalis quo agit, sicut cum dicimus calidum calefacit, est in quarto modo per se, quia explicatur ibi formalem principium quo illud agens producit calorem. Si autem dicamus. Existens calefacit, applicatum calefacit, non fit propositio in quarto modo per se, quia licet explicetur conditio requisita ad operandum, non tamen ipsa formalis ratio operandi, quæ sola facit formalitatem in quarto modo per se. Sic ergo cum dicitur quod processio voluntatis, vt diuinæ, est processio substantiæ, nondum facit sensum formalem in quarto modo per se, quia non exprimit principium formale, quod sit ratio processionis substantiæ, sed solum principium actiuum, & quasi operatiuum, quod ex incapacitate habendi accidens, vel substantiam à se diuersam, producit terminum, qui sit suamet substantia, quia intra se manet. Cum verò dicitur processio intelligibilis, vt diuinæ, seu prout in actu puro est processio substantialis, facit sensum formalem in quarto modo per se, quia exprimit principium formale, quod est ratio processionis substantiæ, scilicet ipsum obiectum, quod est essentia diuinæ, & se habet vt formale principium, ex quo exprimitur, seu emanat similitudo in ipso esse intelligibili, quod ex vi perfectionis intelligibilis, & deputationis ab omni potentialitate est esse substantiale; & sic ex vi, & formali ratione processionis in esse intelligibili puro quod est substantia, illa processio substantialis est.

27 Quod verò dicitur processionem intelligibilem ex suo formali conceptu solum esse processionem per modum similitudinis intentionalis, nec transire ad lineam processionis substantialis, nisi in quantum diuinæ, secundum quam rationem etiam processio amoris transit ad lineam processionis substantialis, Respond. ex dictis dupliciter. Primo, quod similitudo intentionalis de se, & intra viscera sua, & intra lineam intelligibilitatis nullo alio extraneo adiuncto petit & habet sufficientem vim vt processio sit substantialis, si ipsum esse intelligibile careat potentialitate, & sic in actu puro: sic enim substantiale est, & non accidentale, & consequenter processio secundum illud esse, & expressio similitudinis eius est processio substantialis formaliter, non solum ex aliquo identicè concomitante, sed ex ipsa formali ratione intelligibilis esse in sua perfectione considerati sine potentialitate & imperfectione adiuncta. Vnde non indiget transire de linea intentionalis ad lineam substantialem per aliquid extraneum, & solum concomitanter adiunctum, sed intra suam lineam manendo, & purificando se ab omni potentialitate, & imperfectione adiunctæ, ipsum esse intelligibile petit de se quod sit substantiale, & quod expressio similitudinis in esse intelligibili sit processio in esse substantiali formaliter.

Secundò, dicitur quod voluntas diuinæ, etiam prout diuinæ, non habet quod processio amoris substantialis sit, seu consubstantialis suo principio formali, sed solum suo principio actiuo, seu operatiuo, videlicet ex eo quod actus ille immanens est, & fit processio secundum actum immanentem in tali principio, quod non est capax

accidentis, nec alterius substantiæ, non autem ex eo quod formale principium secundum quod fit processio, & expressio in ipso esse substantiali expressionem istam faciat in similitudinem obiecti, sicut facit processio intelligibilis. Vnde ex eo quod processio est diuinæ, identicè & secundum identitatem in principio actiuo res procedens substantia est, non ex eo quod formaliter in linea formalis principij similitudinem intendentis substantia sit, sicut est res procedens in esse intelligibili purificato ab omni potentialitate. Ad id verò quod dicitur Spiritum S. procedere, vt Deum, & non vt creaturam per se, in quarto modo, dicemus *art. seq.* quomodo intelligendum sit.

Ad exemplum quod adducitur de pictura 28 dicimus esse diuersam rationem, quia siue similitudo facta per picturam sit solum accidentalis, siue sit similitudo substantialis, & viuæ, semper esset facta, & elaborata per artem, non expressio naturalis; ad generationem autem requiritur quod sit processio naturalis eius quod est simile in natura. Nam si homo haberet virtutem à Deo elaborandi manibus suis corpus humanum, cui infunderetur anima, sicut corpus Adam est elaboratum à terra, ille homo sic elaboratus non esset filius, quia non modo naturali procederet, sed artificioso, quantumcumque alias esset similis secundum suam substantiam suo producenti. Sic similiter si efformando picturam faceret aliquis verum hominem, non esset substantialis processio per modum filij, quia non esset naturalis eius emanatio à suo principio, sed artificialis. At verò processio intelligibilis non est elaboratio imaginis per modum picturæ, & artis, sed per modum naturalis expressionis, & emanationis in esse intelligibili, in quo petit non solum similem, sed eandemmet naturam, seu obiectum in se exprimere, & formare, quæ est in ipsa re intellecta, sed non in eodem esse entitatiuo, sed in esse intelligibili, quale illud fuerit. Vnde si ipsum esse intelligibile fuerit etiam esse suabstantiale, & non superadditum, neque accidentaliter expressibile, & representabile, ex vi suæ formalis processionis, & sine aliquo extraneo sibi adiuncto redditur substantialis processio in quarto modo per se, & ex vi sui formalis principij.

29 Secundò arguitur, quia Verbum ex vi suæ formalissimæ processionis solum habet esse intellectum passiuè, non intelligens actiuè, sed non est simile Patri generanti ex eo quod est intellectum, nisi etiam sit intelligens: ergo ex vi formalissimæ suæ processionis, & in quarto modo dicendi per se non est simile suo generanti substantialiter, & in ipsa natura. Minor, & conseq. patent, quia natura intellectualis, vt substantia, & natura dicit gradum viuæ vite intellectiue, cui conuenit operatio vitalis, seu operatio vitæ debita tali gradui, & tali viuenti. Operatio autem vitæ intellectiue est intelligere: ergo id quod procedit vt simile in natura, & in substantia suo principio intelligenti, debet procedere vt intelligens actiuè, & non solum vt intellectum passiuè. Maior autem probatur, quia Verbum vt verbum procedit tanquam terminus intellectionis, & expressio illius, non in esse intelligibili in actu primo, sed in esse rei intellectæ: de ratione autem termini intellectionis est quod sit intellectum, non intelligens: ergo id quod ex vi suæ processionis etiam in linea intelligibili procedit vt terminus intellectionis, procedit vt intellectum, non vt intelligens. Quod si intelligens est, id erit concomitanter, & identicè quia illa processio diuinæ est, sicut etiam Spiritus S. est intelligens. Esse autem

autem diuinam illam intellectionem materialiter se habet ad rationem, & formam intelligibilem, quia diuisio intellectionis, & intelligibilitatis per diuinam, angelicam, & humanam est diuisio per subiecta.

30 Conf. quia intelligi, seu esse intellectum ponit solum denominationem extrinsecam in re intellecta: ergo ex suo formali conceptu ly *intelligi* non dat esse reale, & multo minus substantiale ipsi verbo, sed id solum habebit verbum, non ex eo quod proprium, & formale est ipsi in linea intelligendi, sed ex eo quod est concomitanter, & identice, scilicet quia intra Deum manet, & procedit, sicut id habet Spiritus S. Vnde videmus quod etiam creaturæ obiectiue existentes in Deo habent intelligi ab ipso, nec tamen habent esse substantiale Dei: ergo neque Verbum ex eo præcisè quod habeat intelligi; sed oportet vterius quod ei communicetur ipsum intelligere actiue, quod vtrique non ex vi, & formali ratione verbi sibi communicatur. Nec potest idemmet intelligere præbere esse ipsi verbo, quia est esse ipsius intellectus, ipso factus in actu per cognitionem: ergo non ipsius verbi, quia duorum realiter distinctorum non est idem esse.

Respond. negando maiorem. Ad probat. dicitur quod verbum ex suo formali conceptu procedit, vt terminus intellectionis, distinguo; vt terminus intellectionis depuratus ab omni potentialitate, & substantialiter vnum cum suo principio, concedo, vt accidentaliter solum repræsentans, & vt terminus accidentalis, & cum imperfectione, & potentialitate, nego. Quando autem terminus intellectionis procedit secundum esse intelligibile depuratum ab omni potentialitate, & quod est esse substantiale, hoc ipso ex vi suæ formalissimæ processionis procedit vt substantia, & vt substantialiter vnum cum suo obiecto quod se habet vt formale principium intelligendi: Si autem procedit vt substantia, & substantialiter vnum cum tali principio, quod est essentia ipsa diuina, hoc ipso procedit formalissimè, non solum vt intellectum, sed vt intelligens, quia procedit vt substantia in ordine intelligibili, & intellectuali, substantia autem in illo ordine intelligibili non solum est res intellecta, sed etiam intelligens, & viuens; & sic procedit vt perfectè simile Patri, non solum in esse intellecto, sed in ratione intelligentis.

Quod verò dicitur intellectionem illam esse diuinam materialiter, & identice, & quasi ex parte, subiecti; Respond. intellectionem illam si consideretur, vt abstrahens ab increata, & creata, angelica, humana, & diuina, sic diuidi quasi materialiter, & diuisione formæ in subiecta per diuinam, angelicam, & humanam. Si autem consideretur vt intellectio purificata ab omni potentialitate, & quæ est actus purus intra suam lineam intelligibilem, sic non est materialiter, sed formalissimè diuina, & formalissimè ex vi sua habet esse substantialis, & substantialem processionem fundare, & similitudinem in esse substantiali exprimere, quia ex ipsa depuratione intelligibilitatis ab omni potentialitate intra suam lineam præcisè procedendo, & omni alio respectu, vel formalitate sublata, habet illud esse intelligibile reddi substantiale, & sine vlla ratione accidentali, vt explicatum est; & sic verbum procedens habet esse intellectum, & intelligens.

Ad Conf. Respond. quod intelligi potest comparari ad duo, scilicet ad obiectum quod est extrinsecum intellectui, & in hoc non ponit nisi denominationem extrinsecam, sicut esse visum, esse cognitum. Secundò, comparatur ad verbum, seu spe-

ciem expressam, in qua repræsentatur obiectum intellectum, & ipsa repræsentatio, passiuè est dicta, & expressa, & ea ratione vocatur intellecta passiuè, quia est dicta, & in se repræsentat rem vt intellectam; & hoc non ponit dominationem extrinsecam, sed veram realitatem producit, & ipsum obiectum realiter repræsentatum, & intellectum dicitur in illo verbo. Et præsertim hoc verificatur in essentia diuina, quæ per suamet substantiam, & entitatem est suum esse intelligibile, & intellectum in actu puro, & ipsum esse intellectum constituit illam in actu secundo, intelligibilem, petitque vt ipsum intelligere sit sibi intrinsecum; Et hoc totum aliquid reale est. Quod verò dicitur de creaturis existentibus obiectiue in intellectu Dei, dicimus illas reddi intellectas à Deo tanquam obiectum extrinsecum, & secundarium, quod non est suum intelligere, & intelligi; & sic non dat eis tale intelligi aliquid esse reale, vel substantiale. Intelligi autem verbi est ipsum esse intellectum diuinæ essentiæ, quæ per seipsam est suum esse intelligibile in actu ultimo, & consequenter in intelligi; & hoc ipsum in verbo est expressum, & dictum, seu repræsentatum passiuè, quod vtrique aliquid reale est in verbo. Quod verò dicitur non posse distinctorum idem esse dari, falsum est: nam distinctæ res si inter se vniuntur, & componant idem, vt in rebus compositis contingit; & sic cum intelligere, & intelligi omnino inter se coordinentur in linea intelligibili, eodem esse intelligibili actuantur, & exprimuntur in verbo. Et multo fortius hoc currit in verbo diuino, cui idem esse quod est in Patre seu eadem essentia, & idem esse intelligibile quod substantiale est, communicatur, & vnum omnino sunt in esse.

ARTICVLVS VII.

Qua ratione processio Spiritus S. non sit generatio

TAm certum est de fide processionem Spiritus S. non esse generationem, quam certum est ipsum non esse genitum, nec Filium. Quod autem filius non sit, constat: sic enim Filius Dei non esset vnigenitus, si plures essent geniti. Vnde dicitur in Symbolo Athanasij, *Spiritus S. à Patre, & Filio, non factus, nec creatus, nec genitus, sed procedens*. Ceterum ex cuius particulæ pertinentis ad definitionem generationis defectu, processio ista non sit generatio, valde controuersum, & difficile est, ita vt non de fuerint tam ex Patribus, quam ex Authoribus antiquioribus qui rem hanc inscrutabilem, & inaccessiblem existimauerint, ita vt nullam de eo rationem posse inueniri faterentur, vt Damasc. lib. 1. de fide cap. 10. & Bernardus serm. 1. Pentecostes dicit, *processionem Spiritus S. posuisse tenebras latibulum suum*. Eandem inscrutabilitatem docet Nazianzenus orat. 5. theologia, quæ est 37. August. lib. 3. contra Maximinum c. 14. Anastasius Synaita lib. de rectis fidei dogmatibus, Magister sententiarum in 1. dict. 13. alique plures. Non tamen propterea cessatum est à Catholicis Patribus, vel Doctoribus huius inscrutabilis maiestatis & processionis occultissimæ explicare rationem, quare generatio non sit, vt contra hæreticos veritas Catholica defendatur, & quantum tenuitas fragilitatis nostræ potest in illius splendoris immensam abyssum oculum coniiciat.

Cum ergo definitio generationis, quæ à nobis 2 pro

pro creata generatione traditur, semota omni imperfectione in tota sua propria, & formalissima ratione accommodata sit Filio, restat modò videre quomodo remoueat à processione Spiritus S. Et hoc difficile est. Nam generatio dicitur *Origo uiuentis à uiuente à principio uitæ coniuncto in similitudinem naturæ*. Omnes particulæ videntur quadrare isti processioni Spiritus S. Est enim origo uiuentis, quia Spiritus S. est uita ipsa. Est à uiuente, id est ab ipso Deo Patre, & Filio. Est à principio coniuncto ipsi uitæ, seu ipsi Deo, quia non est ex nihilo, nec de substantia creata: ergo de diuina. Est in similitudinem naturæ, quia ex vi talis processionis procedit ut persona diuina, & ut Deus, non ut creatura: procedit enim ut aliquid, & non ut aliquid creatum: ergo ut diuinum: ergo ut simile. Et totum hoc habet ex vi suæ processionis, quia processio illa vim habet communicandi hanc naturam, & similitudinem Spiritui S. Ergo qua ratione habet vim producendi hanc personam ut diuinam, habet vim communicandi hanc naturam, & similitudinem: ergo sicut ex vi processionis procedit, ut persona diuina, & tertia persona Trinitatis, procedit ut similis.

Duo præsupposita philosophica.

Antequam examinemus rationem D. Thom. quare processio Spiritus S. generatio non sit, examinanda sunt duo, quæ ad cognoscendam rationem huius processionis Spiritus valde conducunt, & quia ad voluntatem etiam creatam pertinent, philosophica sunt. Nos autem non possumus theologicè defendere, & explicare ea quæ ad hoc eleuatissimum mysterium pertinent, nisi ratione ducta ex his, quæ in nostro intellectu, & voluntate cognoscimus. Duo ergo oportet videre, quæ in nostra voluntate interueniunt.

Alterum an per actum amoris immanentem producat intra nos aliquis terminus tanquam operatum per illum actum, & ad quid deferuiat.

Secundum an talis terminus proueniat actiue à conceptione intellectus, & Verbo, sicut in diuinis Spiritus S. procedit à Verbo ut à producente, & spirante actiue.

4 Circa primum est expressa sententia S. Thom. per actum voluntatis produci aliquem terminum quo res amata dicatur esse in voluntate, non per modum similitudinis, sed per modum ponderis, & inclinationis determinatæ erga hoc obiectum. Teneat hanc sententiam in hac q. 27. art. 3. & infra q. 37. art. 1. & 4. contra Gentil. cap. 19. quibus locis non solum id docet, sed ex proposito explicat, & probat. Et quidem in intellectu est manifesta ratio ponendi verbum tanquam terminum intellectio- nis, tum quia obiectum quod intelligitur, debet esse intra intellectum, & intra ipsum attingi, quia intellectio fit trahendo obiectum ad se, & vnum faci- endo cum illo in esse intelligibili, tum quia obiectum debet esse manifestatum, & dictum, quia intellectus ex sua perfectione, & natura est manifestatiuus, & locutiuus; & sic oportet quod ad manifestandum exprimat in se representationem, quæ est verbum, & per illud loquatur sibi. At verò in voluntate non ita apparet quare ponatur aliquis terminus productus per amorem (omitto nunc habitum, qui assuetudine producit: de illo enim non loquitur, quia producit ut principium aliorum actuum, non præcisè ut terminus cuiuslibet actus in singulari) quia actus immanentes non sunt de se productiui, & immutatiui alicuius ter-

mini: amor ergo qui est actus immanens non petit processionem alicuius termini intra se. Deinde neque ut obiectum sit intra voluntatem, quia voluntas non trahit obiectum ad se sicut intellectus, sed ad illud tendit per inclinationem, & pondus, & sic obiectum appetibile non est intra voluntatem. Et hæc est differentia inter verum, & bonum, ut dicit Philosoph. 6. met. textu 8. quod *verum est in mente, bonum in rebus*: non ergo indiget aliquo termino, quo res amata sit in amante: nec enim res amata in amante est per similitudinem, & representationem, sicut in intellectu. Quomodo ergo est in illo, nec enim alius modus percipi potest, quo aliquid est in alio, nisi vel per seipsum, vel per suam virtutem, vel per suam representationem, & similitudinem, sicut effectus representat causam, aut vestigium pedem, aut imago prototypum. Non est autem amatum in amante per similitudinem, & imaginem: id enim est proprium intellectus, neque per virtutem suam, quia obiectum non dat virtutem voluntati ad eliciendum actum: ex se enim habet voluntas vim eliciendi, quæ vitalis est, & ab obiecto non prouenit talis virtus, quia obiectum extrinsecum est. Multò minus obiectum est per seipsum intra voluntatem, cum extra maneat, & voluntas per amorem impellitur ad quærendam rem amatam. Nec sufficit ponere obiectum, aut aliquam virtutem eius in voluntate ad attrahendum illam, vel ad faciendum pondus, & inclinationem in illa; tum quia allicientia sit ab obiecto proposito, & ex ipsa conceptione intellectus in qua repletur obiectum, agitur desiderium in voluntate in genere causæ finalis allicientis; tum quia ad ponderandum in obiectum, & inclinandum, sufficit potentia, & habitus voluntatis, quæ important vim, & facultatem inclinationis. At verò ille terminus productus non est pondus, & inclinatio, quia non se habet ut principium impellendi, sed ut terminus per actum inclinationis, & volitionis productus: non ergo ille terminus se habet ut impulsus faciens impelli: impulsus enim sagittæ impressus est vis mouens sagittam, ille autem terminus productus non est vis mouens voluntatem: sic enim esset principium motus eius, sed est terminus talis motus, & actus. Ad quid ergo ponitur illa qualitas ut terminus productus per actum voluntatis.

Confidenique ex D. Thom. q. 4. de verit. art. 2. ad 7. ubi docet voluntatem non habere aliquid progrediens à se, nisi per modum operationis, & in hoc differt ab intellectu, quod in isto procedit aliquid non solum per modum operationis, sed operari: ergo falsò dicitur quod procedit aliquid per modum termini, sicut verbum in intellectu.

Nihilominus dicendum est necessariò esse ponendum istum terminum in actu voluntatis; imò, & in quocumque actu appetitus elicit propter rationem assignatam à D. Thom. locis præallegatis, quæ ut intelligatur supponendum est quod cum hæc sit vulgata differentia inter intellectum, & voluntatem, quod intellectus trahit obiectum ad se, & sic habet eius similitudinem, appetitus verò allicitur, & trahitur ab obiecto; & sic obiectum est pondus eius; inde est quod in omni appetitu, quo fit pondus, & inclinatio in aliquid, oportet quod ex parte ipsius ponderis in terminum detur aliqua proportio, & conuenientia cum re illa in quam tanquam in terminum tendit: Ex eo enim id quod est graue ponderat in centrum, & in locum inferiorem, quia in se habet proportionem, & conuenientiam cum loco inferiori, qui sibi debetur, potius quam cum superiori, in quem inclinatur leue.

Ex

Ex tali enim conuenientia, & proportionione nascitur quòd ponderet, & feratur in talem locum aut in talem terminum ad quem datur talis appetitus. Sed hæc proportio in appetitu innato, & ex ipsa forma entitativa orto, est etiam determinata, & ad vnum, sicut & ipsa natura semper operatur vnum. Vnde non indiget aliquo alio pondere, seu proportionione superaddita, vt determinatiue tendat in hoc obiectum & inueniatur illi proportionata, & conueniens. At verò appetitus elicitus nascitur ex sua forma vt potentia determinabilis ab obiecto per formam intentionalem, & apprehensam, de se autem solum dicit potentiam indifferentem, & indeterminatam ad volendum, non quidem quòd omnis appetitus habeat indifferentiam dominij quòd pertinet ad libertatem, sed quòd habeat indifferentiam indeterminationis, & confusionis, quæ dependet, & tollitur per formam apprehensam, quæ cum existat solum in apprehensione, oportet vterius in ipsa potentia appetitiua ponere determinatam proportionem, & conuenientiam cum hoc obiecto potius quàm cum illo, & talis determinata proportio orta ex forma apprehensa per intrinsecum actum vocatur qualitas, seu terminus productus per actum elicitum à se, quo determinatè ponderat, & relinquitur potentia inclinata intrinseco, & elicto actu sic terminato in tale pondus, & impulsus.

6 Secundò supponendum est, quòd iste impulsus, seu pondus, quo voluntas seu appetitus determinatè proportionatur, & impellitur in tale obiectum debet oriri per actum voluntatis, qui sit in se intrinseco, & essentialiter amor, sed prout producit talem terminum dicitur actus ille spiratio, seu impulsio, sicut in intellectu idemmet actus, qui est intellectio respectu obiecti, est dictio, & expressio respectu verbi quod profert, & in quo representatur obiectum tanquam res intellecta, & dicta.

Ratio huius est, quia non fit ille impulsus, seu illud pondus, aut proportio in voluntate, nisi respectu alicuius determinati obiecti ad quod inclinatur voluntas, nec formari potest talis impulsus nisi per inclinationem voluntatis erga tale obiectum: sicut enim intellectus apprehendendo, & intelligendo obiectum format verbum, & loquitur, ita voluntas tendendo ad obiectum format impulsus quo redditur proportionata, & affecta ipsi obiecto; & sic affecta ponderat determinatè in illud potius quàm in aliud, quia illud sibi conueniens apparet, & aptatur sibi; & sic voluntas coaptata obiecto amat, & amando se coaptat, sicut intelligendo dicit, & dicendo intelligit, quod quidem totum est simul, & eodem actu, sed diuersa habitudine vt *suprà art. 5. ex D. Thom.* ostendimus, quia intelligere est habitudo ad obiectum, non per modum originis, sed per modum cuiusdam intelligibilis informationis; dicere autem est habitudo ad verbum quod exprimitur, & dicitur, quæ est habitudo originis. Sic amare, & spirare differunt in eodem actu voluntatis, vt S. Thom. docet *infr. q. 37. art. 1. & 4. contra Gentil. c. 19.* quia amare, seu diligere importat habitudinem amantis ad rem amatam per modum cuiusdam inclinationis, & vnionis affectiue erga ipsum. Spirare autem importat non solum habitudinem ad obiectum in quod impellit, & spirat, sed vterius importat habitudinem ad suum principium, scilicet ad formam apprehensam in intellectu, & ad ipsam voluntatem, quatenus per intrinsecum, & vitalem motum voluntatis cum ordine, & respectu ad formam seu rem apprehensam formatur intra se, seu procedit quædam determinata proportio, & conuenientia voluntatis erga tale

obiectum visum, quo sentit se ponderare, & trahi, seu impelli ab intrinseco, & vitaliter in rem amatam; & sic pondus, seu impulsus vitalis vt impressus voluntari, & procedens ab illa, & à forma concepta, & apprehensa, dicitur spiritus seu spiratio, licet tam processio spirationis, & impulsus, quàm emanatio actus amandi, amor sit, quia est actus vitalis per modum inclinationis egrediens à voluntate.

Ex his sequitur quædam notanda differentia inter modum quo existit res in generante tanquam in principio, & virtute seminali vt producat, & modum quo existit res in inclinatione, & pondere alicuius rei, vt tendat, & inclinetur in rem aliquam, vt egregiè aduertit S. Thom. *loco cit. contra Gentil.* quod res existit in generante per modum similitudinis in sua forma, & in sua substantia ex qua tanquam ex simili propagatur genitum. Res autem existit in suo ponderante seu inclinante tanquam in principio habente proportionem, & coaptationem cum re ad quam inclinatur, & mediante tali proportionem dicitur res amata esse in sua inclinatione, seu in principio inclinante, sicut dicitur rem exequendam esse prius in intentione, & postea sequi in executione; v.g. in igne, seu terra, & datur virtus generatiua alterius ignis vel terræ, & datur pondus in vno leuitatis, in altero grauitatis ad sua loca. Per virtutem generatiuam continet in se genitum virtualiter, & seminaliter, per virtutem ponderatiuam continet locum ad quem tendit virtualiter, & respectiue, quatenus continet proportionem, & respectum ad talem locum, & ad illum inclinat. Prima continentia generantis est per similitudinem, secunda non, sed per proportionem, & conuenientiam, seu coaptationem ad rem in quam ponderat, quia generans per suam formam generat, & de sua substantia, si est viuens, seminaliter emanat genitum ab ipso, forma autem generantis & substantia ex qua deceditur semen est quid simile ipsi genito, qui eandem substantiam formamque participat, & protegat. Inclinatione autem in locum sursum vel deorsum non fit per aliquam formam quæ etiam locus sit, sed per quandam coaptationem, & proportionem rei quæ inclinatur, cum termino ad quem est inclinatio. Vnde res illa ad quam fit inclinatio non est in inclinante, & ponderante per suam similitudinem, sed sicut res proportionata, in sua proportionem, & coaptationem, sicut res dicitur esse in intentione antequam sit in se. Plura circa hoc diximus in *Physica 9. 13.* agendo de fine, vbi explicauimus quæ S. Thom. *1. 2. q. 26. & 28.* tradit circa hanc vnionem affectiuam qua res amata est in amante, & quomodo vnitur voluntati ad hoc vt amet.

His ergo præsuppositis satis apparet ratio D. 8 Thom. & responsio ad obiecta *suprà* facta: reducit enim ratio D. Thom. ad hoc. Voluntas est potentia, seu facultas tendens per modum ponderis, & inclinationis in obiectum appetibile tanquam in terminum sibi conuenientem, & proportionatum: sed omnis conuenientia, & proportio, seu coaptatio debet esse reciproca, & mutua, ita quòd si vnum extremum, v.g. obiectum proportionatur voluntati, etiam ipsa voluntas coaptari, & proportionari debet illi obiecto; & sic illud amare, quia amor non fertur nisi in rem sibi conuenientem, & proportionatam. Sed voluntas ex se, & ex propria facultate est indifferens ad omne obiectum volubile, nec magis ponderat de facto in vnum, quàm in aliud: ergo oportet quòd vt amet, & tendat in actu secundo per amorem, reddatur proportionata, & coaptata seu affecta isti obiecto potius quàm

alteri: ergo debet in se suscipere impressionem huius proportionis, & ponderis ab ipso obiecto apprehenso, quod est forma determinans inclinationem voluntatis erga hoc obiectum potius, quam illud, eo modo quo determinari potest voluntas, ab obiecto, scilicet alliciendo ipsam, & relinquendo sibi dominium indifferentiæ, ut possit à se excutere talem inclinationem, & pondus, quando voluerit, sed tamen suauitate ipsa, & convenientia ligat voluntatem ut feratur, non, necessitate. Et tandem Deus in genere causæ efficientis, & quoad exercitium determinat, libertate retenta. Ergo oportet quod hæc impressio, & impulsus, seu coaptatio, & proportio erga obiectum nascatur in voluntate, & producat per actum ipsius cum dependentia, & ordine ad rem conceptam. Patet conse. quia illa impressio, seu proportio, & coaptatio, quæ fit in voluntate, non est impulsus violentus, & extrinsecus, sed voluntarius, & vitalis, quia facit voluntariè ponderare: ergo debet nasci per actum vitalem voluntatis. Iste autem actus est inclinatio, & amor: nec enim alium habere potest voluntas: ergo per actum amoris producit aliquis terminus per modum vitalis impulsus, & spiritus, ut tendatur in obiectum amatum.

- 9 Itaque sicut si aliquod mixtum, v.g. lignum, vel folium esset de se indifferens, ut moueretur per sua principia intrinseca ad locum sursum, vel ad locum deorsum, non posset de facto moueri determinatè ad locum sursum, nisi poneretur in eo leuitas, quæ est inclinatio, & pondus quo coaptatur istud corpus illi loco, nec moueri ad locum deorsum, nisi ponatur in eo grauitas, quæ est pondus, & coaptatio ad locum deorsum: ita in appetitu elicitio, qui de se, & modo naturali non ponderat in hoc, vel illud obiectum, nisi prout allicitur, & trahitur à forma apprehensa, per quam regulatur illa ponderatio, oportet quod non solum in ipso intellectu ubi est res cognita, sed etiam in ipsa voluntate, ubi est vitalis inclinatio, & ponderatio in obiectum, sit aliqua impressio, seu impulsus, qui constituat voluntatem coaptatam, & proportionatam determinatè isti obiecto; & sic cum tali proportionem ponderet in rem illam. Et quia vitalis ponderatio, & coaptatio est, prouenire debet ab intrinseco per actum voluntatis, eique imprimi, & sic per actum amoris produci, quia est pondus non quomodocumque, sed vitale, & voluntarium, seu ab ipsa voluntate ortum, quia inclinatur se mouendo, & se impellendo, sicut si graue deberet habere grauitatem vitalem, ut ponderaret in centrum, à seipso, & per motum suum grauitatem deberet habere, & non à generante, quia à se vitaliter debebat reddi graue.

Ad obiectiones in contrarium.

- 10 Ad primam dicimus actus immanentes non esse productiuos circa sua obiecta quæ attingunt, bene tamen circa suos effectus quos intra potentiam habent, & produunt: licet enim ex sua natura non postulent actus immanentes producere effectum intra potentiam, non tamen repugnat quod producant, quia actus secundi sunt, & eminenter habent vim actionis ad producendum, ut sæpè à nobis explicatum est *suprà*.

Ad secundam instantiam, qua dicitur obiectum voluntatis non debere esse intra illam, nec trahi ab illa, sicut in intellectu, fatemur obiectum non trahi ad voluntatem, sicut ad intellectum per similitudinem, & unionem representatiuam, & intelligibilem, bene tamen impelli ab obiecto, & reddi proportionatam, & coaptatam voluntatem obiecto, ut ponderet, & inclinatur in illud, & ratione huius coaptationis, & ponderis dicitur obiectum esse in voluntate, & amatum in amante sicut ter-

minus ad quem est in inclinatione ad se virtualiter, & tanquam in principio per modum proportionis, & convenientiæ efficientis, & impellentis ad terminum. Sic ergo obiectum debet esse in voluntate per modum impulsus, & ponderis, non per modum similitudinis, & representationis. Et Aristoteles dixit bonum esse in rebus, sed non dixit impulsus ad bonum, & pondus ad ipsum esse in rebus, sed in illo qui ad tale bonum inclinatur, & tendit, & hæc est voluntas, quæ tamen quia non tendit ad bonum, neque sistit in illo, prout est in mente, sed prout in rebus, quia ad hoc operatur voluntatis inclinatio ut res ipsas assequatur; idè dicitur bonum esse in rebus, idest bonum ut acquirendum ultimatè, & terminatiuè, licet principium inclinans ad acquirendum illud in voluntate sit è conuerso autem perceptio, & acquisitio veritatis ultimatè, & perfectè intra intellectum debet esse, quia obiectum non cognoscitur, nec contemplatione attingitur, nisi intra intellectum.

Et ad instantiam qua inquiritur quomodo obiectum est in voluntate? Dicimus quod non est per seipsum, nec per similitudinem, & representationem, sicut in intellectu, sed per modum proportionis, & coaptationis ad obiectum, quo voluntas redditur ponderans, & affecta erga ipsum, & talis coaptatio ad obiectum respectiue, & proportionaliter obiectum ipsum est. Et cum replicatur, quod ad faciendum istud pondus, & inclinationem: seu impulsus sufficit obiectum representatum in mente, ex quo agitur desiderium in anima.

Respon. obiectum hoc non posse operari in voluntate, nisi sequatur in ipsa, & intra ipsam aliqua impressio, & coaptatio erga tale obiectum, ratione cuius elicituè ponderet voluntas, quia licet obiectum alliciendo trahat voluntatem, tamen ipsa effectiue, & elicituè non ponderat in obiectum, nisi ex se vitaliter oriatur ille motus, & tendentia, neque ista oriri potest, nisi in se determinetur per aliquam unionem, vel proportionem aut coaptationem erga istud obiectum tanquam per quoddam determinatum pondus ad tendendum in illud. Et hoc pondus debet esse in ipsa voluntate, & non solum in apprehensione mentis, quia ipsa voluntas est quæ illo pondere agitur iuxta illud August. 13. *Confessio c. 9. Ponderibus suis aguntur omnia, pondus meum amor meus, eo feror quocumque feror.* Ex obiecto ergo apprehenso fit ponderatio, seu spiratio in voluntate, qua tendat in tale obiectum per internam inclinationem. Cum verò instatur quod ad hoc sufficit ipsa potentia voluntatis, iam dictum est non sufficere, quia voluntas non est potentia determinata ad vnum tantum, imò nec quilibet appetitus elicitus, qui potest iuxta diuersas formas apprehensas in diuersa obiecta ferri. Vnde indiget determinato pondere, & impulsu proportionante, & coaptante potentiam ad hoc obiectum potius quam ad aliud; imò etiam si voluntas necessariò feratur in obiectum, ut diuina voluntas in suam essentiam, & beatus in Deum clarè visum, tamen quia hæc necessitas oritur in voluntate mediante forma apprehensa, & non entitatiue ex se sine obiecto, indiget impulsu orto ex obiecto, & maximo impulsu si necessariò fertur. Et cum dicitur quod iste impulsus, seu impressio, aut pondus voluntatis non est principium, & vis impellens, sed terminus. Respondeo quod ille impulsus est terminus actionis voluntatis ut spiratiuæ, & ut vitaliter se inclinantis in obiectum, sed iterum est ratio, & vis ponderans ut continetur amor, vel iterum eliciatur, aut ut crescat, prout efficacius aut tenacius inhaerere voluntati

voluntati ista impressio de obiecto cognito, sicut impellens sagittam, aut lapidem prius motu suo tangit lapidem, imprimens illi impulsus, & ex tali impulsu continuatur motus lapidis, & elicitur usque ad locum destinatum. Et ita dicit S. Thom. 4. contra Gentil. c. 19. in fine, quod *Amatum in voluntate existit ut inclinans & quodammodo impellens intrinsecus amantem in ipsam rem amatam*; quod utique est habere se ut principium ad amorem eliciendum, vel continuandum, quia inclinatio illa amor est: sicut etiam intellectus intelligendo verbum dicit, & rursus in verbo dicto contemplatur, & de nouo elicit, vel continuat intelligentiam: nec enim voluntas se impellit, aut determinat, & ponderosa redditur, nisi vitali modo ut supra diximus, & vitali voluntario, seu spontaneo, talis autem motus inclinationis voluntariae substantialiter amor est; & sic differt ab intellectu, qui non potest per cognitionem fecundari, sed per speciem impressam ab alio infusam vel productam, & non per cognitionem, quia in fecundatione non se mouet intellectus, sed patitur ab obiecto; & ideo Philosophus dixit quod intelligere est pari, scilicet causaliter, & in sua fecundatione. Voluntas autem non determinat se, nec impellitur patiendi, sed voluntarie & ab intrinseco inclinando, & determinando, & hoc est iam amare dum spirat & impellit se.

12 Ad Conf. Resp. sensum D. Th. esse quod in voluntate non procedit aliquid per modum operati in quo ultimo sistat, sicut in intellectu procedit aliquid per modum operati, ubi repraesentatur obiectum tanquam ultimum actum, & intellectum, & ibi intra verbum intelligitur obiectum, sed bonum non amatur ut intra voluntatem, licet per id quod in voluntate productum est, ametur res ad extra. Vnde non negat absolute D. Th. aliquid operatum in voluntate, sed aliquid sic operatum, sicut in intellectu, in quo videlicet contineatur obiectum, ita quod ad illud prout intra se terminetur cognitio: dicit enim hoc ideo esse quia operatio intellectus terminatur in mente, in qua est verum vel falsum, operatio vero voluntatis terminatur ad res, in quibus est bonum vel malum; & ideo amor significatur in Deo ut operatio, non ut res operata, verbum autem ut res operata, & subsistens, sicque amor non dicitur personaliter in Deo. Ad hoc ergo negat D. Th. procedere aliquid in voluntate ut operatum, quia id quod procedit non procedit ut terminus in quo obiectum ametur, & ibi sistat amor, sed ut impulsus quo voluntas ponderet & inclinatur in obiectum ad extra, non vero negat procedere aliquid operatum a voluntate, ut vitaliter impellatur ab illo, & quasi pondus vitale accipiat respectu alicuius obiecti cui coaptatur, & proportionatur.

13 Quod si queras, an talis terminus vitalis spirationis possit suppleri a Deo, ut ipsum obiectum amabile per seipsum vniatur voluntati, & faciat hanc ponderationem, & inclinationem, sicut nos tenemus quod in intellectu Beati Deus seipso supplet verbum, seu speciem expressam, ut in ipso videatur essentia diuina, & non in verbo, seu repraesentatione creata.

Resp. non posse, & esse disparem rationem inter verbum, quod est terminus intellectionis, & impulsus illum, qui est terminus amoris; quod verbum non solum est terminus vitalis productionis, & locutionis, sed etiam repraesentatio intentionalis ipsius obiecti expressa, ita quod continet ipsum obiectum in esse intentionali, & intelligibili formando illud in se sub ea intelligibilitate, & immaterialitate, quam habet in se obiectum; unde quando intelligibilitas,

Ioan. a S. Thom. in 1. part. D. Th. Tonus alter.

& immaterialitas obiecti tanta est, & tam diuina, quod omnis intelligibilitas, & immaterialitas creata non solum potest adaequare, sed in infinitum remanet distans ab illa, oportet per ipsam immaterialitatem diuinam hoc suppleri. Verbum ergo seu terminus intellectionis quantum ad hoc quod est continere, & repraesentare obiectum in esse intelligibili, sicut in se est, non potest per imaginem creatam, & productam id habere, sed seipso debet diuina intelligibilitas id supplere, quia nihil est creatum tantae intelligibilitatis capax, nec imago aliqua quam ponamus ei. Quantum autem ad hoc quod est esse terminum productum, & locutum vitaliter ab intellectione, & dictione, nullo modo potest id suppleri per essentiam diuinam, nec in beatis diuina essentia vnitur ut terminus productus, & locutus per intellectionem beati: implicat enim quod producat ab aliqua actione creata id quod diuinum est, & implicat quod id quod solum vnitur, & non procedit, dicatur terminus productus, aut dictus. Vnde quantum ad hunc effectum termini producti, nec essentia diuina supplet vicem verbi in beatis, nec visio beata aliquem terminum habet a se dictum, vel productum, sed solum vnitum in quo contemplatur obiectum, scilicet ipsam essentiam diuinam vice verbi. At vero terminus productus in voluntate non habet rationem imaginis trahentis, & continentis in se per repraesentationem obiectum, ut ex hac parte ipsum obiectum suppleat per seipsum intelligibilitate sua id quod impossibile est alicui creatae imagini, sed solum habet rationem vitalis procedentis, & emanantis ab ipsa voluntate, & impressus ex obiecto apprehenso in conceptu, qui causat tale pondus vitale in ipsa voluntate: dependet enim illa impressio, & immutatio voluntatis ab obiecto appetibili, ut a fine, & obiecto, sed realiter vitaliter elicitur, a voluntate; unde & D. Tho. vocat illam coactionem ad obiectum, complacentiam, quae utique a voluntate elici debet, de quo videatur ipse D. Thom. cap. 2. quest. 26. art. 2. & ea quae diximus in Physica 9. 13. art. 2. Et in hac 1. p. 9. 37. art. 1. dicit S. Thom. hanc impressionem rei amatae in affectu amantis provenire ex eo quod aliquis amat: ergo vitaliter procedit. Vnde non est ibi aliquid quod essentia diuina suppleat per semetipsam, quia impulsus iste non potest esse impulsus, & pondus vnitum, sed vitale, & vitaliter, seu ab intra voluntati impressum, quia in tantum ponderat, in quantum est voluntarium, & non ab extra: voluntas enim solum inclinatur voluntarie. Vnde non potest inclinari per pondus, & impulsus sibi vnitum, sed a se productum: diuina ergo essentia ut principium agens, & per modum effectuum poterit inclinare voluntatem, sicut inclinat intus operando ut ipsa operetur tanquam radix voluntatis, non autem per modam formae vitalis formaliter reddentis inclinatam, & ponderosam in obiectum. Quidquid autem processionis, & vitalitatis est procedentis non suppletur formaliter a Deo, neque in verbo mentis, nec in impulsu voluntatis, sed solum quod imaginis, & repraesentationis intelligibilis est, seu ex parte obiecti se tenet ut vniatur obiectum intellectui, non quod processionis vitalis est. Et quia ad actum intellectionis non requiritur processio verbi ab intelligente, sed solum contemplatio erga obiectum repraesentatum in verbo sibi vnito, ideo saluatur, & suppletur verbum, sine hoc quod vitaliter procedat, solum per hoc quod intellectui vniatur, & ad illud intellectio contemplando terminetur, quae ut intellectio sit, non requiritur quod habeat terminum

G productum

productum, sed sufficit quod contemplatum, quod totum secus se habet in impulsu voluntatis, qui in tantum impulsus est in quantum voluntarius, & vitaliter à voluntate ortus.

14 Secundum quod *suprà* diximus hîc debere præsupponi, est, an iste impulsus & spiratio voluntatis, seu amor procedat actiue à conceptione mentis, an solum specificatiue, quia obiectum est, & finalizatiue, quia finis alliciens est. Communiter enim tenetur, quod solum in hoc duplici genere causæ, scilicet formalis extrinsecæ, seu obiectiue, & finalizantis dependet à conceptu mentis actus voluntatis, & spiratio, seu impulsus eius. Addidit Caietanus in hac 1. p. quæst. 80. artic. 2. quod etiam actiue seu efficienter dependet actus amoris ab appetibili apprehenso, prout enim apprehensum in anima agit desiderium, & sic effectiue causat in appetitu specificationem ad talem actum, ad quam specificationem est potentia, nec apparet alia causa à qua affectiue reducatur in actum. Sed de hoc puncto agendum est 1. 2. quæst. 9 & 10. Pro præsentis puncto in quo inuenimus spirationem passiuam, seu Spiritum Sanctum esse à Verbo diuino, non solum in genere causæ formalis extrinsecæ, aut finalis, sed per modum principij actiui spirantis, aduertendum est quod licet verum sit quod amor procedat à verbo, & à conceptione mentis, & sic Spiritus S. debet procedere à Filio, vt docet *infra* quæst. 36. artic. 2. & 4. contra Gentil. cap. 19. tamen quo genere causalitatis procedat à Verbo, *ibi* non exprimit. Dicimus ergo quod à verbo potest intelligi quod procedat, & origenetur amor, & ratione obiecti in verbo repræsentati circa quod versatur amor, & ratione ipsius essentia seu naturæ diuinæ, eiusque voluntatis, quam habet illud verbum in quantum est subsistens persona in Deo; sicque operatur per intellectum, & voluntatem, & potentiam tanquam persona agens, & operans, vt principium quod. Itaque verbum & est principium quo manifestandi obiectum, seu proponendi voluntati, & est principium quod operandi per voluntatem. Primo modo, vt purè manifestatiuum est obiecti non habet amor, seu spiratio voluntatis procedere à verbo, nisi in genere causæ formalis obiectiue, & finalizatiue, quia hoc modo solum consideratur processio, seu emanatio ab obiecto, à quo solum, vt à formali, & finali causa dependet. Secundo modo spiratio procedit à Verbo, & à Patre quasi actiue per eandem virtutem spiratiuam, & per eandem voluntatem, quæ respectu amoris, seu actionis spiratiuæ consideratur vt operans actiue, non vt finis vel obiectum.

Rationes D. Thom. efficaciter probant processionem Spiritus S. non esse generationem.

His prælibatis, non est animus prosequi, aut explicare omnes rationes, quæ accumulari solent ad probandum Spiritum S. non procedere vt genitum, nec eius processionem esse generationem; plures affert P. Vasq. hic disp. 113. c. 2. & 3.

15 Dicimus ergo ex D. Th. processionem Spiritus S. excludi à ratione generationis, quia etsi per illam processionem habeat Spiritus S. eandem substantiam, & diuinitatem tanta identificatione, & vnitate sibi connexam sicut Filius, sed non eadem formalitate, seu formali ratione communicatam, & ex diuersa ratione formali, & modo communicandi in vna processione, & in alia, dicitur vna processio generatio, alia non: Reduci autem hanc differentiam ad diuersum modum & rationem

communicandi, quia scilicet ex vi modi procedendi non communicatur Spiritui S. similitudo naturæ, sicut Filio, docet S. Tho. aperte in 1. ad Arribal. dist. 13. q. unica, a. 3. vbi inquit: Sic igitur processio Spiritus S. ex ratione modi procedendi non dicit conformitatem naturæ quam dicit generatio. Vbi conformitas naturæ idem est quod similitudo. Et idem docet 4. contra Gent. cap. 23. in fine, vbi docet quod si duplici modo posset vnus homo facere alterum hominem, scilicet per genituram, aut alio modo, scilicet modo artificiali ex propria carne ille diceretur filius, non iste, licet uterque esset similis in substantia solum propter diuersum modum procedendi.

Et si quæras, qui sit iste diuersus modus, seu diuersa ratio formalis, ratione cuius processio Spiritus S. generatio non sit, & per quam particulam excludatur à definitione generationis?

Respondeo excludi ex defectu duplicis particulæ, quæ in definitione generationis deest processioni Spiritus S. Primo enim deest illa particula *In similitudinem*. Secundò, illa particula *naturæ*, quia formaliter, & ex vi formalis processionis formalitate quarti modi per se, nec procedit in similitudinem, nec procedit sub formali ratione naturæ, sed alicuius consecuti ad naturam, licet in primo modo per se Spiritus Sanctus essentialiter sit natura diuina, & similitudinem, vel potius identitatem illius habeat. Vtrumque modum excludendi definitione generationis à processione Spiritus S. posuit S. Th. Nam quod non sit generatio ex eo quod non procedat formaliter in similitudinem, se per modum similitudinis, posuit hic a. 4. & in 3. contra Gent. c. 19. & aliis locis, vbi de ista processione tractat. Quod verò non procedat formaliter per modum naturæ, docet in 1. dist. 13. q. 1. artic. 3. ad 4. vbi inquit quod *Natura non est principium processionis Spiritus S. sub ratione naturæ, sed sub ratione voluntatis à qua procedit amor.*

16 Hinc factum est, quod Caietanus, & alij interpretes D. Thom. communiter dicant requiri ad generationem quod id quod procedit non solum sit simile, sed sit simile ex vi generationis. Quod D. Tho. expressit illis verbis *suprà* citatis in 1. ad Arribal. quod ex ratione modi procedendi procedat in similitudinem seu conformitatem naturæ. Vnde licet in processione Spiritus S. id quod procedit sit simile, quia tamen non habet similitudinem ex vi, seu ex modo ipso processionis, idè non est generatio. Quid sit autem procedere vt simile, ex vi seu ex modo processionis, postea ex argumentis declarabitur. Nunc dicimus quod ly *ex modo procedendi*, non est aliud, quàm quod ex ipsa formali ratione procedendi, modo assimilatiuo procedat, ita quod actio ipsa assimilatiua, & tam in quarto modo per se ista generans assimilatur, sicut calidum calefacit, generans generat. Nec tamen addimus definitioni generationis nouam particulam, dicendo *ex vi processionis*, sed explicamus his verbis vim illius particulæ *in similitudinem*, quæ tunc rectè intelligitur, quando formalis ratio termini generationis est ipsa similitudo naturæ, seu facere simile, vt simile, seu generare ad imaginem, vt dicitur de Adam Genes. 5. quod *genuit ad imaginem & similitudinem suam*. Quod si ipsa similitudo, seu facere simile, est iquod formaliter intendit generatio, oportet quod ex ipsa vi, & formali ratione procedendi habeatur similitudo, ita quod in quarto modo per se procedat simile, & non sufficit quod id quod procedit simile in primo modo per se ipsi producenti, vt iam explicamus.

Fundamentum ergo nostrum ad ostendendum quod processio Spiritus S. nō sit generatio est, quia non

non conuenit illi duplex illa particula, scilicet *in similitudinem*, & *ly natura*, ita quod non procedit in similitudinem naturæ, quod ponitur in definitione generationis.

Ratio est quia particula *in similitudinem*, quæ ponitur in tali definitione importat formalem rationem sub qua terminus procedens est terminus generationis: ergo oportet quod processio, quæ est generatio ex sua formali ratione, & tendentia respiciat illam similitudinem: ergo licet actiue producat res similis, & terminus procedens essentialiter, & in primo modo per se habeat similitudinem, imò & identitatem, & unitatem cum natura sui principij, tamen si actio sub formalitate sua, & in quarto modo per se non assimilatiua, & modo assimilatiua procedens, non est generatio. Antecedens probatur, tum quia definitio generationis non dicit quod sit processio vel productio rei similis quomodocumque, sed quod sit in similitudinem, ubi illa particula *in* dicit formalem rationem termini generationis, quia scilicet ad hoc tendit generatio, ut simile fiat: esset autem diminuta definitio si explicaret processionem istam secundum formalitatem, quæ est à suo principio actiua, scilicet à viuente, & à substantia, seu materia ex qua fit, & ex parte termini ad quem tendit, non declararet formalem rationem sub qua terminus attingitur, dicendo in similitudinem, sed diuerteret ab ea. Tum etiam hoc petit ipsa formalis ratio generationis, quia ex sua natura, & propria ratione est processio propagatiua sui generantis: non propagatur autem aliquid, nisi per id quod producit ut alterum se, & in quo ipsemet producat quasi remanet, & præsentatur. Et ideo viuencia generant ex propria substantia, ut quasi eadem substantia extendatur in suum genitum, & ibi quasi ipsemet qui produxit continetur, & perpetuetur: ergo tota formalis ratio, quæ intenditur à generante, est illud formale, quod est propagatiuum producentis: non propagatur autem nisi in suo simili, quia in eo in quo deficit à similitudine, & conuenientia in natura non propagatur, sed discontinuatur, & deficit, ne idem qui produxit, repræsentetur & continetur in ipso genito. Ego *in similitudinem*, formalem rationem dicit ipsius termini generationis. Tum denique quia hæc re ne explicat Scriptura ior generationem dum dicit Genesis 5. de Adam: *Et genuit ad imaginem, & similitudinem suam, vocauitque nomen eius Seth*; id ergo quod intendit generatio Adam fuit imaginem, & similitudinem sui propagare: & *ly in similitudinem* dicit formalem rationem termini generationis.

Consequenter verò argumenti facti probatur, quia si formalis terminus generationis est similitudo, aliqua actio, seu processio debet ei correspondere quæ specificetur à tali termino, & ex sua propria specificatione talem terminum respiciat. Non est autem alia, quam generatio, quia ad hoc natura generationem instituit, ut ex sua specie, & propria ratione esset propagatiua naturæ; & ideo generatio dicitur conseruatiua speciei, sicut nutritio conseruatiua indiuidui. Propria ergo & formalis ratio generationis explicatur in illa particula *in similitudinem*, quia ab ipsa similitudine, ut propagatiua naturæ, specificatur generatio. Unde sequitur secunda consequentia, quod ad rationem generationis non sufficit quod sit actio producat efficienter, vel actiue aliquem terminum, qui in se sit similis, sed quod specificatiue, seu in quarto modo per se producat simile, ita quod sicut ista est per se in quarto modo: cali-

Ioan. à S. Thom. in 1. part. D. Th. Tomus alter.

dum calefacit, ita sit ista in quarto modo per se generatio assimilatiua, seu propagatiua in similitudinem. Ergo oportet quod ex vi processionis procedat simile, non solum ex vi quasi productiua, & actiua, seu in genere producentis, sed ex vi rationis formalis, seu specificantis, ita quod sit in quarto modo per se. Quod si aliquo alio modo aliqua actio producat simile etiam si talis terminus productus essentialiter similis, aut eiusdem substantiæ cum alio, non tamen generatione dicitur illud producere, sed alia actione. Exemplum ponit S. Thom. 4. contra Gentil. cap. 23. in fine, si aliquis homo acciperet à Deo virtutem, ut artificiali modo, & manibus suis posset formare ex carne sua, aut sanguine alium hominem, sicut Eua formata est ex costa Adami, si ille homo produceret unum hominem ordinatio modo ex connexionem cum foemina, & alterum elaborando illum ex carne sua, uterque produceretur ab isto homine similis ipsi, quantum est ex vi productionis actiue seu efficienter, & tamen primis esset genitor, & Filius, secundus non quia licet iste esset eiusdem speciei & naturæ essentialiter cum suo producente, non tamen procederet modo propagatiuo naturali, sed artificiali: ergo signum manifestum est non sufficere ad generationem productionem aliquius rei similis in natura ex parte rei productæ, sed ex parte modi producendi, & ex vi processionis, non solum affectiue, seu actiue, sed etiam specificatiue, & in quarto modo per se.

Secundum quod diximus non inueniri in processione Spiritus S. quod pertinet ad definitionem generationis, est *ly Natura*, quod procedat in similitudinem naturæ formaliter in eo, in quo talis natura constituitur, non in aliquo quod consequitur ad naturam, licet identice non distinguatur à natura. Nam generatio speciem intendit primò, & per se, non proprietates rei: istæ enim generationem sequuntur, si cur & formam, quæ est terminus generationis primò, & per se. Itaque generatio habet pro formali termino formam substantialem, & esse substantiale, quia formalissimè substantialis actio est. Unde requirit quod principium eius sit forma ipsa substantialis generantis, licet utatur tantum, quam virtute, & instrumento potentia generatiua quæ est ipsi formæ virtus agendi accidentalis. Non autem potest formale principium generandi esse aliquid consecutum ad formam substantialem, quia id quod est consecutum ex vi sui formalis conceptus, præsupponit naturam, quia aliquid consecutum est ad ipsam: ergo non potest tali consecuto fundari generatio, siquidem generatio tendit ad formam substantialem, qua constituitur ipsum esse substantiale. In natura autem cognoscitiua, appetitus habet se ut consequens naturam, seu rationem constitutiua naturæ, non ut forma constituens, quia appetitus ex suo formali conceptu est inclinatio quædam, & pondus in appetibile: omnis autem inclinatio consequitur aliquam formam, non ipsam constituit, & iuxta diuersas formas, diuersæ sequuntur inclinationes sicut etiam in naturalibus videmus quod alia est inclinatio terræ, alia ignis, alia equi, alia leonis propter diuersas formas ad quas sequitur inclinatio. Et ita Philoph. in lib. de anima distinguit tres gradus viuentiū vegetatiuum, sensitium, intellectuum; appetituum autem non numerat inter gradus distinguentes naturas viuentiū, quia appetituum non constituit, sed consequitur formam constituentem. Hinc sequitur quod cum natura diuina siue constituatur ipso intelligere in actu secundo, siue intellectualitate in actu primo, siue quolibet alio conceptu anteriori, tamen

ipso velle non constituitur, quia voluntas supponit intellectum: nihil enim volitum quin cognitum: ergo & naturam intellectivam supponit, quæ vel est antecedens intellectum, vel in ipso intelligere consistit; licet identice: idem esse habeant in Deo intelligere, & velle, sicut omnia quæ in Deo sunt, Deus sunt. Ergo illa processio, quæ habet pro formali principio voluntatem, ut voluntas est, non intellectualitatem, ut gradus est constitutus naturæ, non potest esse generatio, quia procedit secundum illud quod ex suo essentiali conceptu supponit naturam constitutam, & est aliquid consecutum ad ipsam.

20 Ex quo colligitur hanc rationem D. Tho. quam communiter sequuntur eius discipuli, esse veriorē, formaliorem, & magis intimam, nec bene impugnari à Vasquez, nec propriam huius rei rationem ab eo assignari. Constat hoc, quia ratio D. Thom. reddit ipsam formalissimam rationem quare non sit generatio hæc processio Spiritus sancti, videlicet, quia non conveniunt ei particulae essentielles definitionis generationis, hæc enim propriissima ratio est excludendi à processione ista rationem generationis. Quod verò excludantur illæ duæ particulae scilicet *in similitudinem* & *ly natura* secundum rectam intelligentiam huius definitionis, in qua sumi, debet *ly in similitudinem* formalissimè pro termino formali rei genitæ, & pro ratione formali ipsius processionis, ita ut procedat res genita ut similis in quarto modo per se, & ut similis in natura in eo quod formaliter natura est, non in eo quod consecutum ad naturam, eamque præsupponit, satis superque ostensum est.

Cæterum displicuit Vasquez *hic disp. 113. cap. 7.* explicatio hæc quæ est Caiet. & Ferrar. & communiter Thomistarum, eo quod ibi persuadet processionem Spiritus S. etiam in quarto modo per se esse processionē rei similis in substantia, cum sit processio increata, & divinæ personæ, quæ ex vi suæ processionis substantialiter est similis, immò unius & eiusdem substantiæ cum suo principio, quæ argumenta partim articulo præced. sunt proposita partim proponuntur statim. Ipse verò cum Canariensi super hanc quæst. 17. art. 2. dicit rationem, quare Spiritus S. non sit filius, non esse quia non procedat ut similis in natura ex vi processionis, sed quia non procedit ut imago, & ad representandum: existimant enim rationem imaginis in eo consistere quod est habere munus representandi, & quia Verbum de se est representativum, non Spiritus S. idèd non habet rationem imaginis. Ex hoc autem quod non est imago, neque est Filius, quia specialis relatio Filij inquit, non est in eo quod sit affectus Patris, & causatus ab illo: sic enim etiam unus ignis causatur ab alio igne, nec dicitur Filius eius, & rami propagantur vitaliter à trunco, nec sunt filij eius. Consistit ergo relatio Filij, qua talis, in eo quod sit representans Patrem, & imago eius; & sic representationem sequitur filiatio.

Cæterum, ut optimè advertit Suarez 11. libro de Trin. cap. 5. num. 7. contra istam opinionem, Patres qui docent Filium debere esse imaginem, ut sit Filius procedem accipiunt imaginem, & similitudinem, nec nos negamus Filium procedere ut imaginem, quando dicimus procedere in similitudinem, cum imago sit propria ratio, & nomen filij, ut docet S. Thom. *infra q. 35.* Et Scriptura generationem humanam ex Adam æquè explicavit per imaginem, & per similitudinem in loco illo Genes. 5. *E. genuit Adam ad imaginem, & similitudinem suam: vocavitque nomen eius Seth.* Et op-

timè Anselmus in Monologio c. 53. inquit, *Verbum esse filium, quia præ se fert rationem imaginis, & Spiritum S. non esse Filium, quia præ se fert rationem similitudinis*, pro eodem accipiens similitudinem, & imaginem. Sed cum imago sit duplex, altera purè representativa, altera representativa, & propagativa, imago primo modo non sufficit ad generationem, cum inveniatur etiam in ministro representante Principem, & in denario, ubi ponitur imago Cæsaris, & in pictura ubi representatur Rex. Imago autem secundo modo sufficit ad rationem generationis, sed non sufficienter explicat Vasquez, quomodo distinguatur à similitudine naturæ, in qua fit propagatio, & quare non conveniat processionem Spiritus S. si ex vi sua procedit ut similis in substantia suo principio. Quid enim illi deest ad propagandum, & representandum substantialiter? Verbum enim de se est representativum, sed tantum intentionaliter, & intelligibiliter: redditur autè substantialiter representativum apud hos Auctores, non aliunde, quam quia divinum est, & divina processione dimanat. Ex eodem fonte habet Spiritus S. emanare, ut similis substantialiter per te, scilicet ex vi suæ processionis divinæ, & ex eodem accipit esse similis in substantia, & propagare naturam, cur ergo non accipiet ipsum representare substantialiter ut imago, si per te accipit esse similem ex vi processionis? Ac denique virgetur hæc sententia, & retorquetur in ipsam telum quod in Caietanum Vasquez contorquet, & sibi videtur, validdè; videlicet Philosophus in definitione generationis non posuit quod sit processio in similitudinem ex vi processionis: ergo illa particula ex vi processionis non ad definitionem spectat, sed ad glossam, adiectionemque Caietani. Unde stando in sola, & mera definitione Philosophi, quæ ipsam quiditatem generationis exprimit, non habet Caietanus quomodo à processione Spiritus S. definitionem generationis excludat. Retorqueo. Aristoteles non posuit in definitione generationis quod procedat aliquid in similitudinem naturæ per modum imaginis, & representationis: ergo illa particula *per modum imaginis & representationis* non pertinet ad definitionem generationis, sed ad glossam, & adiectionem Canariensis, & Vasquez. Quomodo ergo saluant ipsi quod processio Spiritus S. non est generatio, stando in mera definitione Philosophi. Dicent, se non addere definitioni, sed explicare vim illius particulae *in similitudinem*. Bene. Cur ergo D. Thomæ, Caiet. Ferrar. cæterisque eius discipulis non licuit explicare *ly in similitudinem* in sensu formali, id est, ex vi processionis, & in quarto modo per se, ita quod generatio, ut generatio sit modo assimilatio debeat procedere, cum hoc congruentissimum sit ipsi rationi generationis?

Quare concludimus cum D. Thoma doctrina²¹ hucusque explicata, Spiritum S. non procedere ex vi suæ processionis ut similis in natura formaliter, licet identice, & quasi materialiter, seu realiter non solum similis, sed idem in natura sit, & consubstantialis. Et tollendæ sunt duæ æquivocationes, quibus totum hoc clarificatur. Prima in illo termino *esse identice simile non formaliter*. Secunda, in illo termino *ex vi processionis*. Et prima æquivocatio tollitur per hoc quod non negamus Spiritum S. formaliter esse Deum, & formalissimè consubstantialem Patri, & Filio formalitate primi modi per se, non formaliter formalitate quarti modi per se. Nam primus modus per se solum explicat perfectitatem connexionis essentialis, & prædicationis: at verò quartus modus per se non explicat perfectitatem connexionis essentialis inter prædicata,

prædicata, sed, perfectiorem operationis ergo formalem terminum operatum. Cum enim forma sit principium constituendi, & operandi; quatenus constituit, fundat intrinsecam connexionem prædicatorum in illa natura constituta concurrentium; quatenus operatur, seu quatenus est principium quo operationis, fundat conducentiam, seu proportionem, & coaptationem per se, & formalem cum termino sibi formaliter correspondente. Et iste est quartus modus per se, qui non est modus prædicationis, & connexionis, sed operationis, & agentiae: sicut calor est forma constituens calidum, & in constituendo fundat connexionem omnium prædicatorum sibi essentialium, & in hac linea constituit primum modum per se; & sic dicitur per se de calore quod sit qualitas, quod sit passio, vel patibilis qualitas, quod sit sensibilis, &c. Est etiam calor forma operans. Sed quid per se operatur calor; per se calefacit, quia ad calefaciendum exprimit formalem proportionem, & conducentiam: si autem dicatur, calidum mouetur, vel calidum ædificat, non explicatur perfectio operationis. Sic ergo Spiritus S. procedit ut similis suo principio, & ut consubstantialis ei in primo modo per se, quia producit personam quæ essentialiter est Deus, sed non formaliter in quarto modo per se, quia formalis ratio, & modus quo procedit non est assimilatiuus in natura sub formali conceptu naturæ, ita quod formalis ratio ad quam terminatur, sit id quo constituitur natura in Deo, & ut sit similis suo principio, sicut in Filio, ratio verbi ex ipso modo procedendi est expressiui, & assimilatiui suo principio intelligibili. Et si illud principium intelligibile in ratione intelligibilis sit substantia, & expressio ipsa sit perfecta, & denudata ab omni potentialitate, ex vi suæ assimilationis est substantialis similitudo, & propagatio naturæ; cum tamen impulsio, & spiratio solum sit impulsiva intra Deum in genere volibili, quod verò sit substantia, non habet ex eo quod genus volibile in Deo substantia sit, & ipsa processio sit impulsus perfectissimus, quia non procedit impulsus ad assimilandum, & exprimendum esse volibile, sed ad ponderandum, & inclinandum in illud; & ita si est substantia, id habet quia intra Deum est, in quo nullum est accidens, non ex vi expressionis, & actionis suæ, ut volitiua est. Et ad hoc deseruit exemplum supra allatum ex D. Thom. de duobus hominibus procedentibus ab eodem homine, uno per virtutem seminalem, & partum naturalem, alio per virtutem artificiosam formandi ex terra, vel ex costa ipsius hominis, aut ex sanguine suis manibus alium hominem, iste non esset filius, & primus esset filius, licet uterque esset similis suo principio in humana natura similitudine in primo modo per se, sed unus etiam quarto modo per se esset similis, & filius; alter non.

22 Secunda æquiuocatio est in illo termino *ex vi processionis* potest enim *ly ex vi processionis* significare vim, seu virtutem solum ut efficientem, seu actiuam respectu actionis, & termini procedentis, vel potest significare vim, aut virtutem productiuam secundum id quod formalis rationis, & conducentiæ, seu proportionis est in ordine ad speciem actus, & termini, & ad formalem rationem sub qua attingitur, ita quod non solum explicetur in ipsa productione, & vi productiua vis agens in exercitio, & ut respicit existet in termino seu esse, quod exercitium causæ efficientis spectat, sed explicetur ipsa formalis ratio specifica, & ipsa species, seu specificatio termini in re procedente, quod pertinet ad quartum modum per se, ut cum dicitur Ioan. 4 S. Thom. in 1. part. D. Tb. Tonus alter.

calidum calefacit, ædificator ædificat, ubi designatur, & vis actiua, & formalis proportio, seu ratio, & conducentia ad talem terminum. Igitur cum dicitur, Spiritum S. ex vi processionis non procedere ut similem, *ly ex vi processionis* non denotat principium, seu virtutem ut actiuam solum, sic enim ex actiua illa virtute spirandi procedit Spiritus secundum omnem consubstantialitatem, quæ sibi communicatur in re, & identice; & sic procedit Spiritus S. & accipit ex tali virtute actiua similitudinem imò, & identitatem, sed *ly ex vi processionis* denotare debet formalem rationem, seu conducentiam, & coaptationem formæ operantis ad terminum formalem. Omnis autem ratio formalis, quæ in illa processione considerari potest, est quod sit diuina, & quod sit spiratiua. Ex eo quod sit diuina & intra Deum non habet processio illa originare, & derivare ex se terminum, neque discernere propriam, & formalem rationem vnius processionis ab alia, ut rectè dixit S. Thom. in hac qu. art. 4. ad 1. Ratio est quia processio ut diuina non respicit terminum procedentem, ut sibi oppositum, & à se distinctum, sed solum respicit naturam diuinam quam communicat, & in cuius unitate reddit vnum substantialiter vtrumque extremum: Si enim processio ut diuina originaret, & produceret, respiceret diuinitatem ut distinctam à principio, à quo procedit, quod omnino implicat, cum in ipsa diuina natura, & in ratione ipsa diuinitatis nulla possit esse distinctio, benè tamen communicatio. Atque ita cum in processionibus illis duo reperiantur, scilicet, & quod sit productio, seu originatione termini distincti, & quod sit diuina, seu intra Deum, pro hac secunda parte processio ut diuina solum respicit diuinum, seu diuinitatem ut rationem formalem; diuinitas autem, seu natura diuina potest quidem esse communicata per processionem, sed non producta, neque se habere ut terminus procedens oppositus, & distinctus, quia in diuina natura sub conceptu diuinitatis non explicatur oppositio relatiua, & distinctio ad principium originans. Ex hoc ergo quod processio consideretur ut diuina, non explicatur formalitas ipsius processionis respectu termini producti, & distincti, sed respectu rei communicatæ, & identificatæ. Ex hac ergo parte non discernitur quæ sit formalis ratio talis processionis, & quid sit ex vi processionis in quarto modo per se, quia perfectio operationis, & formalis eius ratio solum explicatur per ordinem ad terminum procedentem, & distinctum ab operante, non penes rem communicatam; quia perfectio quarti modi est conducentia ad terminum producendum, cui ex sua formali ratione talem rem communicat. Neque ex hoc quod illa processio sit diuina, explicatur propria ratio cuiuslibet processionis, quia esse diuinam est commune omnibus illis processionibus: ergo in vi diuinæ non explicatur propria ratio formalis, & quartus modus per se talis operationis; quia quartus modus per se fundatur in ipsa ratione formali specifica operantis, & termini procedentis, non in ratione communi, sicut cum dico calidum calefacit, ibi explicatur formalis, & specifica ratio operationis caloris; & sic explicatur quartus modus per se. Si autem solum dicam rationem communem, v.g. calidum agit, seu causat; calidum ut substantia calefacit, non dico formalem rationem quarti modi per se. Similiter ergo si solum dico, Processio ut diuina producit terminum similem, non dico formalitatem quarti modi per se, sed de eo reduplicare propriam, & specificam rationem, in qua vna processio distinguitur ab alia, & videre an secundum illam propriam rationem procedat

cedat aliquid vt simile, & hoc est ex vi processionis. Sic ergo formalitas processionis in vi processionis sumi debet, non ex eo quod diuina præcisè, sed ex eo quod talis, v.g. spiratiua, vel intellectiua, & sub hac formalitate vt spiratiua, clarum est quod non procedit formaliter vt simile, sed vt spiratum, & amatum.

23 Quod si dicas; Inam processionem diuinam, etiam secundum suas particulares, & específicas rationes consideratæ, v.g. vt spiratiua, vel intellectiua non possunt tendere ad suum terminum formalem præscindendo ab hoc quod est esse diuinum, sed id includendo, siquidem non producant suum terminum formalem, v.g. impulsus infinitum, aut Verbum vt perfectissimè, & in actu puro repræsentans, nisi consideretur illa processio, vt in actu puro siue intelligibili, siue volibili, vnaquæque in sua linea, ergo in ipsa formali, & specifica ratione, & in vi processionis vt in quarto modo per se, includitur hoc quod est processionem illam esse diuinam, & id quod habet in quantum diuina.

Respon. quod processionem istam in suis particularibus rationibus: & in sua propria linea præsupponunt rationem diuinam, & actus puri, sed tanquam rationem communem non vt formalem specificam: species enim semper supponit genus, & ratio particularis, communem. Vnde dicimus quod processionem istam secundum suas particulares, & específicas rationes non præscindunt ad hoc quod est esse diuinum, & à ratione actus puri: distinguo, non præscindunt ab illa, vt à ratione præsupposita, & communi, transeat; vt à ratione formali explicatiua eius quod proprium est in sua linea, & ordine, nego. Hæc enim ratio formalis non est sola ratio actus puri, & sola ratio processionis diuinæ vt diuinæ, sed diuinæ vt contractæ, & determinatæ ad talem lineam, scil. vt diuinæ intellectiua, vel vt diuinæ spiratiua, &c. In his processionibus sic consideratis sub hac specifica, & formali determinatione consideratur differentia hæc, quod diuina vt intellectiua ex sua formali, & specifica ratione vltima, est assimilatiua, & cum ex ratione diuina depuratur illa linea intelligibilis ab omni potentialitate est assimilatiua summo modo, & in ipsa substantia, quia intelligibilitas pura substantia est. Processio autem diuina vt spiratiua, ex sua vltima, & specifica ratione formali non est assimilatiua, sed inclinatiua, & ponderosa, & ex ratione diuina purificatur ab omni potentialitate, & redditur infinitè inclinans, & impellens, sed non assimilans; & ideo generatio non est, est tamen identificatiua, & in vnum communicans cum diuina natura, quia infinita, & quia intra Deum, vt dictum est.

Soluuntur argumenta.

24 Præcipuæ obiectiones contra istum modum distinguendi processionem Spiritus S. à generatione ad duplex caput reduci possunt.

Primum est ostendendo quod Spiritus S. etiam ex vi processionis suæ, & formaliter in quarto modo per se est processio similitudinis in substantia.

Secundum, quod si Spiritus S. ex vi suæ processionis non procedit vt simile formaliter, sed solum identicè, etiam Verbum solum hoc modo procedit: vt simile, atque adeo si hoc non obstante processio Verbi est generatio, etiam processio Spiritus S. generatio erit.

Primum vrgetur sic: Spiritus S. quicquid accipit, & communicatur sibi in processione à Patre, &

Filio, communicatur sibi ex vi processionis, sed communicatur sibi à Patre, & Filio quod sit viuens, & substantia ipsa intellectualis diuina, & quod sit tertia persona Trinitatis: ergo ex vi processionis suæ procedit vt similis, & in similitudinem naturæ, eo modo quo id requiritur ad definitionem, & rationem generationis, in qua Philosophus non posuit illam particulam. *Ex vi processionis*, sed superadditur à Caiet. & aliis Thomistis ad euitandas difficultates, cum tamen id quod non ponitur in definitione generationis pro creaturis, non debeat addi pro generatione diuina, siquidem dari in Deo propriam, & formalem rationem generationis non potest colligi, nisi accommodando illi generationem, quæ in creaturis reperitur, non addendo nouam particulam, sed remouendo imperfectiones. Maior huius argumenti prob. tum quia id quod Spiritus S. accipit procedendo à Patre, & Filio, non ex accedenti accipit, sed ex virtute propria & per se talis processionis, tum quia omne quod procedit ab alio, habet ex vi suæ productionis id quo constituitur formaliter in ratione talis effectus, seu talis termini procedentis: ergo id quo Spiritus S. constituitur in ratione talis personæ, & naturæ quam habet in quantum Spiritus S. ex vi processionis suæ habet, & in vi alicuius principij formaliter proportionati, & conducentis ad productionem talis termini, qui est Spiritus S. Minor verò prob. tum quia Spiritus S. formaliter in quantum talis, & in vi suæ processionis accipit id quo constituitur in ratione Spiritus S. seu in ratione termini formalis talis processionis, id autem quo constituitur in ratione Spiritus S. siue in ratione tertiæ personæ, siue in ratione naturæ est diuina substantia, & Deus ipse in quantum spiratus: ergo etiam principium formale; & per se in quarto modo talis processionis est Deitas vt spirans: ergo ex vi processionis suæ formaliter, & in quarto modo, per se procedit vt Deus spiratus, sed Deus spiratus formalissimè vt talis, est similis deitati vt spiranti: ergo per se in quarto modo, & ex vi formæ seu formalis principij sui procedit vt similis suo principio, & vt genitus, ita quod esse genitum coincadat in hac processione cum esse spirato, quia procedit vt amor increatus ex vi suæ formalis processionis, & non ex accidenti: ergo procedit ex vi talis processionis vt similis in natura ipsa deitatis, quia sufficit esse similem in ratione deitatis spiratæ. Tum etiam, quia Spiritus S. ex vi formalissimæ suæ processionis procedit vt persona subsistens secundum characteristicam proprietatem tertiæ personæ: ergo procedit vt similis in natura. Anteced. probatur, quia procedit formalissimè, vt Spiritus S. ergo vt relative oppositus principio spiranti: ergo vt incommunicabilis, ergo vt persona diuina spirata: id enim pertinet ad characterem illius tertiæ personæ. Consequ. verò prob. quia de ratione formalissimæ personæ est quod sit rationalis naturæ indiuidua substantia: ergo quod formaliter procedit vt persona diuina procedit formaliter vt persona intellectualis substantiæ: ergo vt similis personæ originanti se, quæ in eadem natura est persona subsistens. Et hinc fundantur consequentiæ, quæ in hac parte fieri solent, vt quod Spiritus S. procedit formaliter vt Deus, siquidem non procedit vt creatura: ergo vt similis, quia Deus formaliter est similis Deo. Nec obstat quod procedat vt Deus spiratus, non vt natus, quia esse spiratum nullo modo diminuit de illius similitudine, siquidem nihil minuit de Deitate.

Respon. ad argumentum negando maiorem, & similiter minorem, loquendo de communicatione, &

& processione formaliter formalitate quarti modi per se, seu ex vi processionis: ad hoc enim ponitur ista particula, ut ly *ex vi processionis* non sit addita definitioni, sed subintellecta, tanquam eius explicatio necessaria, quia nullus potest negare quod definitio generationis procedat de eo quod est ex alio in similitudinem naturæ formaliter in quarto modo per se.

25 Ad primam probationem maioris dicitur, quod totum quod accipit Spiritus S. non accipit ex accidenti, id est, ex aliqua virtute accidentali, seu accidentaliter conueniente suo principio, neque accipit illud tanquam sibi accidentale, & non essentialiter conueniens in primo modo per se, sed accipit illud ut identicè, & concomitanter; & ita si ly *ex accidenti* intelligatur pro eo quod est identicè tantum, & concomitanter, sic concedendum est quod multa ex accidenti accipit, & non per se in quarto modo. Si verò ly *ex accidenti* intelligatur ex aliquo accidentali, & extraneo, sic negatur quod ex accidenti aliquid accipiat. Et quia ly *ex accidenti* hoc secundum videtur sonare: & oportet malas species verborum euitare, simpliciter concedi debet, quod nihil accipit Spiritus S. ex accidenti. Ad consequentiam: Ergo per se, & virtute propria accipit, distinguo: per se perfectate quarti modi nego, per se in primo modo, concedo; quia id quod accipit essentialiter est sibi: & intrinsecum, & simile Deo, imò vnum cum Deo, non tamen assimilatiuo modo, neque sub ratione formali assimilandi, & in quarto modo per se. Aliàs probaretur quod Spiritus S. vel Filius procedit formaliter in quarto modo per se, ut immensus, vel iustus, aut misericors, & generaliter sub omni attributo procederet formaliter, & per se, quia nullum habet ex accidenti, sed virtute propria, sed non omnia accipit in quarto modo per se, quia non omnia explicant formalem rationem sub qua procedit. Et sic etiam dicitur ad secundam probationem maioris, quod id quo formaliter constituitur Spiritus S. in ratione termini formalis, & specifici huius processionis habetur ex vi processionis formalis, & in quarto modo per se, non tamen omne id quo constituitur Spiritus S. & quilibet terminus procedens in sua essentiali natura, & essentialibus prædicatis habet ex vi processionis formaliter in 4. modo per se: nec enim omne quod dat alicui termino naturam, & essentialia prædicata, & quidquid ei conuenit in primo modo per se, dat illud formaliter in quarto modo per se, sed ad formalitatem quarti modi per se requiritur conuenientia, seu proportio, & specificatio formalis inter rationem producendi, & terminum productum, si enim homo produceretur ex terra, vel ex costa, aut carne ipsius hominis procederet in quarto modo, ut homo arte factus, non ut homo natus aut filius; & modo in transubstantiatione attingitur corpus Christi, ut conuersum & transubstantiatum, non ut homo, aut animal in quarto modo per se, & Deus cum creat hominem in quarto modo, formaliter attingit totam rationem entis, & materialiter rationem hominis, licet in omnibus istis exemplis, & aliis similibus causæ æquiuocæ, per processionem illam conferatur termino procedenti sua natura, & prædicata essentialia, sed non formaliter in quarto modo per se, id est, ex vi rationis formalis sub qua procedit ille terminus. Sic Spiritus S. ex vi suæ processionis in quarto modo per se accipit quod sit Deus spiratus, non quod sit natus, licet in Deo spirato accipiat per talem præcessionem totam naturam, & similitudinem Dei identicè.

26 Ad primam probationem minoris concedimus

quod ex vi processionis accipit Spiritus S. id quo constituitur in ratione Spiritus S. & in ratione formalis termini talis processionis, & similiter quod accipit ex vi formalis processionis quod sit Deus spiratus: id enim est quo constituitur Spiritus S. in ratione formalis, talis termini. Similiter concedimus quod procedit ex Deitate ut spirante tanquam ex formali principio, & in quarto modo per se. Cum autem dicitur quod Deus spiratus est formalissimè similis Deo spiranti, distinguo, formaliter similis in primo modo per se, id est in suis prædicatis essentialibus, concedo, formaliter similis in quarto modo per se, id est, quod procedat modo assimilatiuo, nego. Ad rationem enim formalis Dei spirantis, & spirati solum formaliter conducit quod sit Deitas, ut faciens inclinationem, & pondus; quod verò sit similis in natura, non magis conducit, quàm quod sit iustus vel misericors, aut immensus, licet totum hoc sit identicè in re, & essentialiter. Et similiter licet procedat ut amor increatus, non procedit formaliter ut similis in natura, & Deitate spirata, quia ut sit formaliter similis in quarto modo per se, non sufficit habere in se similitudinem naturæ, etiam essentialiter, & in primo modo per se, sed requiritur quod assimilatiuo modo eam habeat, & ex ipsa formali conducencia operationis ad assimilandum, ut in exemplo de homine producto seminaliter, aut artificiosè, vel per creationem, explicatum est.

Ad secundam prob. dicitur distinguendo antecedens Ex vi processionis procedit ut persona subsistens spirata, concedo; ut nata, & propagata, nego: ergo ut similis, distinguo consequens, ut similis in primo modo per se, & ut essentialiter tale, transeat, ut similis in quarto modo per se, & ex vi conducencie formalis in operatione ad talem terminum, nego. Cum verò dicitur quod de ratione formali personæ est quod sit similis alteri personæ in eadem natura subsistenti, dico quod id est de ratione personæ in primo modo per se, non tamen est de ratione personæ ut in quarto modo per se sic procedat sicut constituitur, seu sub ipsa ratione formali similitudinis procedat, ita quod assimilatiuo modo procedat, ut toties instatum est in exemplo allato à D. Thom. si homo produceret manibus suis alterum hominem etiam si illum produceret ex carne sua, talis homo essentialiter, & in primo modo per se esset persona, & haberet naturam rationalem similem suo producenti, nec esset filius quia formaliter in quarto modo non procederet in similitudinem, ut persona nata, sed ut arte facta, sic Spiritus procedit ut persona spirata, id est, secundum inclinationem amoris, non ut nata, & similis ex vi modi procedendi. Ad id quod persona, & suppositum non dicunt formalem rationem procedendi in termino producto, sed id quod se habet ut *Quod*; & sic ex eo quod procedat ex vi processionis aliqua persona, non sumitur formæ ratio specifica, & quarti modi per se: est enim commune omni termino procedenti in genere substantiæ, quod procedat ut subsistens ex parte termini procedentis ut *Quod*; & sic etiam Spiritus S. procedit ut persona subsistens tanquam terminus procedens ut *Quod*. Cæterum formalis ratio processionis in quarto modo per se, non sumitur ex illo quod se habet ut *Quod*, sed ex ipsa formali ratione sub qua aliquid est terminus actionis; & sic ad ipsam formam, seu formalem rationem termini, & ad id quo constituitur ut procedens debet attendi, ut per illud reguletur processio an sit in quarto modo per se, an non; ipsa verò persona seu subsistens ut *Quod*, non est formalis ratio termini

G 4 Et

Et sic licet Spiritus S. procedat ut persona, non tamen ly *ut* reduplicat formalem rationem ut *quo*, sed ipsum terminum ut *quod*.

28 Ad illam verò conseq. Procedit ut Deus: ergo ut similis. Respon. distinguendo anteced. procedit ut Deus spiratus, seu ut quid diuinum per modum impulsus, concedo; ut Deus natus, nego. Ad consequent. Ergo procedit ut similis, distinguo; ut similis in primo modo per se, transeat; ut similis in quarto modo per se, quod est procedere modo assimilatiuo, nego. Vnde non dicimus quod procedit ut creatura, sed neque ut Deus absolute, sed ut Deus spiratus, seu ut quid spiratum diuinum, quia Deus sub ratione Deitatis non est terminus productionis, licet sit res communicata per processionem; procedit tamen hoc spiratum, & impulsus ut Deus in re, & identice, non verò ut formaliter in quarto modo per se, sed ut Deus in primo modo per se, sicut procederet homo ut essentialiter homo, & in primo modo per se, etiam si fieret per manus alterius hominis, sed non ut similis in quarto modo per se. Et in Eucharistia, corpus Christi ponitur ex vi verborum ut corpus, ut animatum verò per concomitantiam, licet in re, & identice animatum sit essentialiter. Et cum dicitur quod esse spiratum non diminuit de similitudine, distinguo; non diminuit de illa in primo modo per se, concedo; in quarto modo per se, nego: procedere enim, & spiratum, est non terminare formaliter processionem sub ratione similitudinis, & expressionis naturæ, sed sub ratione inclinationis. Et licet inclinatio sit natura ipsa in re, & identice, non tamen sub conceptu naturæ, sed sub conceptu inclinationis formaliter terminat, & procedit: inclinatio autem de se sequitur ad naturam.

29 Secundò arguit. ex secundo capite quia Verbum non magis formaliter est Deus, quàm Spiritus sanctus nec magis habet procedere ut Deus ex vi suæ processionis, quàm Spiritus sanctus aut ut similis: ergo sicut est generatio processio Verbi, ita erit processio Spiritus sanctus generatio. Anteced. quoad primam partem constat, quia Spiritus non minùs, nec alio modo est Deus, quàm Verbum, cum in Trinitate nulla sit inæqualitas, sed summa vnitas: ergo tam formaliter est Deus Spiritus sanctus sicut Filius. Quoad secundam partem probatur, tum ex adductis *preced. art.* ubi adduximus argumenta ad probandum Verbum diuinum non procedere ex vi suæ processionis, ut simile in substantia, nisi quatenus illa processio est diuina; & in hoc parificari cum processione Spiritus sancti. Nam processio Verbi ut abstrahit à creato, & increato, est quidem similitudo intentionalis, & repræsentatiua obiecti, sed non propagatiua, & substantialis, & in eadem natura, & similiter amor est impulsus, non substantia. Processio autem Verbi ut increata, & diuina est processio in similitudine substantiæ ex vi processionis, non quatenus intellectiua, ut sic, sed quatenus talis, id est diuina: similiter impulsus non quatenus amor, ut sic, sed quatenus diuinus ex vi talis processionis procedit, non ut accidens, sed ut ipsum velle, quod est esse substantiale Dei. Nec D. Thom. in *hoc art. 2.* alia ratione probauit Verbum procedere ut simile in substantia, nisi quia procedit secundum intelligere, & intelligere est esse Dei, sed non minùs velle est esse Dei substantiale quàm intelligere. Ergo eadem ratione concludetur quod Spiritus S. ex vi suæ processionis procedit ut similiter in substantia.

30 Conf. Quidquid per se requiritur ex parte principij in actu primo ad aliquem terminum producendum, requiritur per se in quarto modo, quia ne-

cessariò ex parte termini producti respondere debet aliquid tali actui primo ex parte principij se tenenti, sed Deitas est forma per se constituens potentiam generatiuam fecundam ad generandum, & in ratione potentiæ notionalis, & similiter potentiam spiratiuam: ergo terminus qui per vtramque potentiam emanat, per se quarto modo emanat ut Deus, & ut similis, quia ex vi Deitatis ut constituentis per se vtramque potentiam emanat. Minor prob. quia potentia notionalis dicit virtutem producendi, & emittendi personas: ergo non supponit pro relatione, sed pro Deitate, licet relationem connotet, quia relatio, ut relatio, non dicit virtutem, sed purum respectum. Et sicut Deitas est virtus potentiæ notionalis, ita Verbum, & Spiritus S. sunt ipsa Deitas, ut contracti tali ratione, scilicet filiationis, vel spirationis: ergo Spiritus sanctus ex vi suæ processionis, & characteristica proprietatis procedit ut Deus cum tali relatione: ergo ut similis.

Conf. secundò, quia non minùs pertinet ad essentiam, & naturam diuinam intellectio, quàm volitio: vtrique enim est ipsum esse Dei, nec minùs intelligere est esse Dei, quàm velle, ut multis locis docet S. Thom. præsertim 1. *part. quæst. 19. art. 1.* & *quæst. 27. art. 3.* & 4. *contra Genil. cap. 19.* & alibi sæpè: ergo quod procedit ex vi suæ processionis, ut amor, & ut velle procedit ex vi suæ processionis, ut essentia, & natura diuina: ergo ut similis suo principio. Ac denique quia amor procedit ex similitudine, & similitudo ex causa amoris, ut docet S. Thom. 1. 2. *quæst. 27. art. 3.* ergo quod procedit per amorem formaliter procedit ex similitudine, & in similitudinem.

Respon. ex dictis distinguendo antecedens, non minùs formaliter Filius est Deus, quàm Spiritus, non minùs formaliter in primo modo per se, concedo; in quarto modo per se, nego. Nam Filius, & Spiritus sanctus æquè essentialiter, & formaliter in se sunt Deus, & ipsa Deitas in actu puro: sed ex vi processionis vnus procedit ut Deus spiratus, & amatus, & modo impulsiuo, alter ut Deus natus, & modo assimilatiuo in substantia, & sic vnus procedit ut similis, & Deus in quarto modo per se, alter ut Deus identice, qui est Deus formaliter in primo modo per se, sed in quarto modo solum ut Spiritus, & ut impulsus: sicut non minùs formaliter est corpus viuens, & animatum Corpus Christi in Sacramento, quàm in manibus Virginis fuit, vel modo est in cælo, & tamen in quarto modo per se, non procedit in Eucharistia ut viuens, & animatum, sed purè ut corpus conuersum ex pane, ut autem processit ex Virgine, processit in quarto modo per se ut animatum, & ut humanum. Ex quo patet ad primam probationem antecedentis, quod in Trinitate non est inæqualitas, nec magis, aut minus, sed æquè formaliter in primo modo per se, id est, æquè essentialiter Filius est Deus, & Spiritus sanctus est Deus, sed in modo procedendi est diuersitas, quia vnus procedit ut natus, & ut Filius, & consequenter ut similis in quarto modo per se, id est assimilatiuo modo, alter non. Vnde sicut vnus est Filius, & alter non, sine præiudicio æqualitatis, ita in formalitate procedendi est diuersitas sine inæqualitatis damno.

Ad secundam probationem dicitur, quod processio Verbi, non quatenus diuina identice, aut formaliter, sed quatenus intelligibilis sine potentialitate, & imperfectione, & solum ut diuina præsuppositiue habet producere simile in substantia. Quod est dicere, processionem Verbi intra suam lineam, & ordinem intelligibilitatis quatenus in actu

actu puro, & sine potentialitate est procedere in quarto modo per se ut similem, seu consubstantialiter in esse intelligibili, quod est substantiale; licet ad hoc ut linea illa intelligibilis purificetur ab omni potentialitate, debet praesupponi quod sit divina. Unde patet ad purificationem quae fit inter hanc processionem Filij & Spiritus S. dicimus enim quod licet purificentur in hoc quod abstrahendo à creato, & increato, nec processio Verbi sit substantialis, nec processio impulsus substantiam producat; tamen contrahendo has processiones ad increatum & divinum, valde differunt in modo procedendi, & producendi, quia intellectiva processio intra lineam suam purificata ab omni potentialitate habet in quarto modo per se, & in vi formalis rationis operandi producere simile substantialiter, quia assimilatio modo procedit in summo, id est, assimilatiue sine vlla potentialitate; atque adeo substantialiter, quia assimilatio secundum accidens, potentialitatem, & imperfectionem dicit, ut late *supra* ponderatum est. At verò processio volitiva intra suam lineam purificata ab omni potentialitate, & imperfectione non peruenit ad hoc ut assimilatio modo procedat, nec tendat in similitudinem naturae, ut in formalem rationem quarto modo specificantem processionem, ed procedit modo impulsivo in impulsu, seu spiritum divinum, seu intra Deum, qui est impulsus infinitus, & substantia ipsa divina, quia ibi nullum accidens est. Unde in quarto modo per se non procedit ut substantia, aut ut similis, aut ut Deus, sed ut spiritus, seu impulsus infinitus, & purificatus ab omni potentialitate, qui in re, & identice imò & essentialiter, & in primo modo per se est Deus, sed non in quarto modo per se, sicut corpus Christi procedit in Eucharistia ut corpus conversum in quarto modo per se, non ut animatum, vel in animatum, licet essentialiter, & in primo modo per se modò sit animatum. Itaque in utraque processione esse divinam non se habet ut ratio formalis propria, & specifica utriusque processionis, sed ut communis, & praesupposita: sicut enim in actionibus creatis esse creatam non est propria, & formalis ratio, sed transcendentalis, & communis, ita esse increatam, & divinam in processionibus divinis non est propria, & specifica ratio, nec constituit quantum modum per se, sed est communis ratio utrique processionis, & praesupposita. Sed haec ratio sic praesupposita, & reddens unamquamque processionem in sua linea purificatam ab omni potentialitate hoc operatur, ut unaquaeque processio iuxta suam formalem rationem summo, & infinito modo procedat, & non in genere accidentali, sed substantiali. Unde cum processionis intellectivae propria formalis ratio sit assimilatio, procedit terminus eius ut simile quarto modo in substantia; & cum processionis volitivae formalis ratio sit impulsus, procedit terminus eius, non ut simile in quarto modo per se, sed ut inclinatio, & impulsus infinitus, qui in re est substantia. Praeter quam quod processionem esse divinam formaliter non respicit terminum productum, sed communicatum, quia divinitas non producitur, & sic ex ratione divini, ut divinum, non sumitur formalitas, & ratio quarti modi per se, quia haec exercetur respectu termini procedentis, & producti, non respectu communicati.

Et cum sit instantia, quod procedit formaliter ut velle, seu secundum rationem ipsius velle, quod est esse Dei, sicut Verbum secundum intelligere, quod est esse Dei, nec aliam consequentiam

fecit S. Thom. ut probaret Verbum procedere secundum esse substantiale, quam quod procedit secundum intelligere, quod est esse Dei, dico consequentiam S. Thomae optimam esse, & tenere formaliter in ipso intelligere respectu processionis Verbi, & solum identice pro ipso velle respectu processionis Spiritus sancti, debet enim in propositione D. Thom. subintelligi id quod aliis locis ipse explicavit, ut statim dicemus, & iam *supra* insinuavimus, quod intelligere est esse Dei ut primum, & pertinens ad esse naturae, & ad gradum constitutum viventis. Velle autem est esse Dei, ut praesupponens conceptum naturae, & ut consecutum ad intelligere, quia essentialiter amor supponit cognitionem, & inclinatio formam, seu naturam ad quam sequitur; & sic velle est esse Dei identice, & consecutivè ad naturam, non ut formaliter esse naturae; & ut intrans conceptum naturae, qui est intellectualitas, & eius proprius, & per se actus est intelligere in actu puro, quod est substantiale: sicut etiam attributa sunt esse Dei identice, & consecutivè, quia se habent ut proprietates, & sic si procederet aliquis ut iustus vel misericors formaliter, procederet quidem secundum id quod est esse Dei identice, & in re, non formaliter secundum conceptum naturae, quia conceptus naturae non est formaliter conceptus attributorum.

Et si inquis, an saltem concedi debet absolute ista propositio Spiritus Sanctus procedit ut Deus ex vi suae processionis: Quidam absolute negant, quia non est Deus, nisi in quantum unum cum procedente, non ut distinctus ab illo, esse autem unum cum procedente non habet formaliter per originem, nec ex vi processionis, sed ex identitate omnium quae in Deo sunt: quomodo enim ratio originis explicatur formaliter inter extrema in quantum unum sunt? Alij affirmant, eo quod Spiritus sanctus procedit formaliter ut aliquid, & non ut ens creatum: ergo ut increatum, & ut Deus. Sed ex dictis distinguenda est haec propositio, quod quando dicitur procedit ut Deus, ly *ut* potest reduplicare formalitatem essendi ipsius termini procedentis, seu essentialem eius rationem, & id quod est in primo modo per se vel potest explicare formalitatem procedendi, & emanandi, seu id quod pertinet ad quantum modum per se. Primo modo Spiritus sanctus procedit ut Deus, quia procedit ut habens pro essentiali, & constitutivo praedicato Deitatem: nec enim constituitur per praedicata creata, sed divina, nec procedit ut creatura. Secundo modo non procedit ut Deus, nec Deitas est formalis ratio terminandi illam processionem, sed procedit ut impulsus infinitus, qui in re est Deus, sed non quatenus Deus, sicut per generationem hominis procedit formaliter ut homo in quarto modo per se, non ut animal, aut ens creatum, licet in re sit essentialiter animal & creatura. Et corpus Christi non convertitur ut animatum in quarto modo per se, sed ut corpus, licet essentialiter sit animatum & in primo modo per se. Nec enim in quarto modo per se est necesse explicare omne quod essentialiter convenit termino, sed id precise quod formaliter, & specificatiue in linea efficiendi, seu procedendi conducit ut terminus sit. Et cum dicitur quod non procedit ut creatura: ergo ut Deus, dico quod in quarto modo per se nec ut Deus, nec ut creatura, sed ut impulsus qui identice est Deus, seu ut Deus spiratus, ut *supra* dicebamus, quia in formalitate illa quarti modi per se,

nec

nec explicatur conceptus Dei, nec creaturæ, licet ibi includatur quod sit Deus in re, sicut in generatione hominis non explicatur quod procedat ut animal, vel ut creatura sub formalitate qua est terminus illius generationis, licet ibi hoc includatur: stante enim appellatione, seu formalitate conceptus non est necesse alterum oppositorum concedere, sicut homo secundum se nec est bonus, nec malus, licet in re alterum sit.

34 Ad Conf. primam Resp. concedendo maiorem de eo quod se tenet ex parte principij ut forma, seu ratio formalis operandi: id enim per se concurrat, & requiritur in quarto modo. Ad minorem autem dico, quod Deitas constituit potentiam notionalem siue generatiuam, siue spiratiuam, distinguo, constituit Deitas utramque potentiam, sub eadem ratione formali, & specificatione, nego, sub diuersa, transeat: Deitas enim sub conceptu naturæ, & gradus intelligibilis fecundantis constituit potentiam generatiuam; & sic procedens per illam, procedit ut genitum, & simile in natura in quarto modo per se. Deitas autem sub conceptu spirantis, & amantis constituit potentiam spiratiuam; & sic procedens per illam, procedit formaliter in quarto modo per se ut impulsus infinitus, identice autem ut natura diuina, vel similis in natura. Et Spiritus sanctus dicitur ex vi suæ proprietatis characteristica Deitas, ut contracta tali relatione, scilicet spirationis; & sic ex vi talis processionis procedit ut Deus spiratus, non ut Deus quomodocumque in quantum vnum cum suo principio, nec ut Deus natus.

35 Ad secundam Conf. Respon. ex dictis quod esse Dei est suum intelligere, & velle, & omnia sua attributa, quatenus omnia identificantur in eodem esse entitativo, & quasi transcendentali essentia, quia esse increatum omni quod in Deo est, conuenit intimè. Sed secundum quod in isto esse, & in ista entitate diuina distinguitur id quod est conceptus naturæ, & conceptus attributi, seu consecuti ad naturam, sic non eodem modo intelligere est esse, & velle est esse, sed intelligere est esse ut pertinet ad conceptum naturæ, & velle est esse ut consecutum, & præsupponens naturam, quatenus præsupponit intelligere, & consequenter naturam intellectiuam, siue constituatur formaliter per ipsum intelligere, siue antecedenter per ipsam intellectualitatem. Et D. Thom. quando dicit quod velle est ipsum esse, & substantia Dei, sicut intelligere, loquitur de esse, & substantia transcendentaliter sumptis, sicut est commune ipsum esse naturæ, & attributis, & personis, & eo modo quo etiam quodlibet attributum est esse Dei, non eo modo quo esse sumitur pro natura, ut distinguitur à proprietatibus, & personis. Et hoc latè tradidimus *præced. tomo disp. 16. art. 3.* Sufficit modò locus D. Thom. *suprà* allatus in 1. *distin. 13. quæst. 1. artic. 3. ad 4.* ubi inquit, quod *Natura non est principium processionis Spiritus sancti sub ratione naturæ, sed sub ratione voluntatis, à qua procedit amor.* Quid clarius ad distinguendum conceptum naturæ à conceptu voluntatis?

Ad id quod vltimò subiungitur de similitudine, quæ est causa amoris; imò ipsum Verbum ut simile est causa amoris. Respond. quod similitudo rei amata, ut obiectum, & Verbum representans illam, est causa amoris, alliciendo, & inclinando, non propagando, & producendo simile in natura. Et Verbum representans obiectum,

causat amorem, non per impressionem similitudinis, sed ponderis, & inclinationis ad amandum.

An possit Spiritus sanctus dici filius naturalis ratione sanctitatis diuina, qua sanctus est?

Impatiens nouitatum amor in sinistros sæpè doctrinæ fœtus degenerat. Id experiri licet in recenti quadam, & ferè hesternæ doctrinæ apud aliquas Complutenses disputationes nouiter producta, nempe Christum in sua sanctificatione dici Filium Dei naturalem respectu totius Trinitatis, & non solius personæ Patris, per hoc solum quod sanctificatur, non aliquo dono creato, sed ipsa communicatione Deitatis mediante vnione hypostatica, eo quod censent hanc filiationem naturalem non consistere in origine, sicut filiatione quæ generationem consequitur, sed in consortio, & communicatione sanctitatis, qua aliquis constituitur hæres bonorum Dei. Vnde si persona Patris, aut Spiritus sancti incarnaretur, non minùs homo ille diceretur Filius Dei naturalis, quàm modò Christus, ob diuinitatis consortium in eadem persona.

Deducta est ex hac doctrina consequentia difficilis, sed efficax, & nervosa. Ergo persona Spiritus S. dicitur Filius Dei naturalis, ob communicationem diuinitatis multo magis intimam, & consubstantialem, quàm quæ sit per missionem hypostaticam in humanitate, cum hæc communicatio Incarnationis fiat vnione, illa Spiritus S. summa vnitate; hæc sit libera, & temporalis, illa necessaria, & æterna, & in tota diuinitatis plenitudine: nam & specialiter tertia persona dicitur sancta: nominatur enim Spiritus sanctus. Trepidatum est ad hanc consequentiam, quia illam admittere periculosum fidei videbatur, & illam negare, superiori doctrinæ aduersum. Tandem in distinctionem videtur erupisse, videlicet non magni horroris esse admittere Spiritum S. dici Filium naturalem sanctificatione, non propagatione, hæreditate, non origine. Nec potest nouitas hæc antiqua generationis definitione, & filiationis processione præscribi, aut elidi, quia negat filiationem hanc processione constitui, sed communicatione Deitatis, quam in Spiritus S. reperiri fides docet.

Hæc opinio quantum ad principale punctum de filiatione naturali Christi ut homo extra locum istum tractanda est, videlicet *3. part. quæst. 23.* Quoad consequentiam verò quæ potest tangere filiationem naturalem Spiritus sancti, breuiter conclusionem negatiua nunc præcludenda est, & stigmatè ad minùs temeritatis, & occasionis labendi in hæresim, aut certè ut communicans in verbis, & modo loquendi cum hæresi inurenda est. Temeritatis nota ei imponitur, quia fundamento destituta, quia noua, & in re grauissima sine Authorum fulcimento inauditam rem introducit in mysterio Trinitatis, in quo non licet propter summam quæ illi debetur reuerentiam, aliter loqui, quàm in Ecclesia, & Sanctorum Patrum dictis consuetum est. At Spiritum sanctum nominare Filium Dei naturalem, cum Scriptura Verbum Dei vnigenitum apertè pronunciet, quocumque modo dicatur, aut explicetur illa filiatione, non solum inconuetum, sed & temerarium, & insolens est. Deinde quod sit occasio hæresis, & erroris, imò, si formaliter non est error proxime illi accedat, illique faueat, & in verbis communicet, patet, quia hæc propositio absoluta prolata *Spiritus sanctus est Filius Dei naturalis*, est aperta hæresis, cum sit fides Catholica Filium

Filium in diuinis, seu secundam personam esse unigenitum, & Spiritum S. non esse natum aut genitum, sed procedentem. Explicare autem rationem filij naturalis, non de filiatione per modum originis, sed de filiatione per modum sanctitatis, quia filiatione originis non potest sine hæresi attribui Spiritui S. est subterfugium quærendo errori, & verbis illi communicare, nouisque vocum ambiguitatibus sensum inauditum fingere; nam Ecclesia non solum Spiritum S. negat esse genitum, & natum à Deo, quod pertinet ad filiationem originis; sed absolute negat esse Filium, nec alium Filium posse dici in Trinitate quam unum, nec alium Patrem, quam unum, ut patet in Symbolo Athanasij. *Vnus ergo Pater, non tres Patres. unus Filius, non tres Filij.* Sed in hac sententia potest dici. Non vnus Filius, sed duo Filij, vel etiam tres (nam eodem modo Pater dicitur Filius, non origine, sed sanctitate, & communicatione diuinæ naturæ, quia licet non ab alio sibi communicetur, verè tamen illam habet eadem identitate, qua Filius, & Spiritus S.) ergo manifestè opponitur Symbolo quæcumque Filiatio præter vnā, cum simpliciter dicatur vnus Filius, non tres filij: quocumque ergo modo ponantur tres, vel duo filij contradicitur huic propositioni fidei saltem in modo loquendi, et si in sensu diuertatur.

39 Sed tamen si in rebus istis dogmaticis ita liberè liceat loqui, & ea quæ communi sensu omnium accepta sunt, & significatione communi tenentur, alio sensu accipere, & nouas fingere acceptiones nominum, seu rerum alienas à communibus definitionibus, vix aliquid certi in Ecclesiæ definitionibus stare poterit, & semper patebunt hæreticis subterfugia, & occultari poterunt errores, & palliari sub specie diuersorum sensuum. Ecclesia autem quando aliquid absolute definit, non potest attendere ad acceptiones nominum, aut ad sensus propositionum, qui pro libito cuiuscumque fingi vel accommodari possunt, sed omnes istas acceptiones reiicit, seu non admittit, hoc ipso quod rem aliquam sub illis terminis, & nominibus absolute definit, v. g. determinat Ecclesia non esse in Christo personam creatam contra Nestorium; si aliquis diceret in Christo esse personam creatam intelligendo nomine personæ non indiuiduam substantiam incommunicabilem, ut communiter intelligitur, &

definitur, sed substantiam ut sustentatiuam vel capacem accidentium, nonne damnetur illa propositio ut de se opposita definitioni Ecclesiæ, licet isto nouo subterfugio vellet occultari, & euadere sensum hæreticum? Similiter Ecclesia definit quod essentia diuina seu Deitas non generat, neque generatur, sed Deus in concreto in *ca. Damnamus de summa Trinitate*. Si autem aliquis diceret quod Deitas generat, & generatur sumendo generationem non pro origine, & processione, sed pro communicatione sui, aut manifestatione aut sanctificatione, nunquid propterea admittendus esset, & non magis damnandus? id dicere Spiritum S. Filium, & genitum non secundum originem, sed secundum iustificationem nullo modo admittendum est; alioquin & Filius diceretur Pater non origine, sed dignitate, quia eandem habet quam Pater, aut alio simili titulo; & omnia erunt confusa in personarum notionibus, & pro libito, & sensu cuiuscumque inconcussa vocabula mutabuntur.

Nec obstat quod concedimus Christum esse creaturam, non absolute, ne conueniamus cum Arrianis, 40 nis, sed cum addito, in quantum homo, & Spiritum S. posse dici ingentum, sumendo ingentum pro sola negatione geniti, docet Tho *inf. q. 33. art. 4. ad 2.* Cur ergo similiter non poterit dici Spiritus S. Filius, non absolute, nec secundum processionem originis, sed cum addito, in quantum sanctificatus Deitate? Resp. esse disparē rationem, quia esse Filium de se, & ex communi usu loquentium significat processionem, & originem, etiam cum dicitur de Filio adoptiuo, & de quocumque habente denominationem Filij; Et de Spiritu S. secundum originem siue naturalem, & propriam, siue metaphoricam, & adoptiuam, nullo modo dici potest. Illa verò acceptio filiationis pro sanctificatione facta per diuinam naturam nullo modo dicit analogiam ad originem, nec rationem originis talis filiatione habet, sed solum communicationem naturæ cum iure, seu communicatione hereditatis: Et sic nomine filij talis communicatio non venit intelligendi significatum huius nominis *Filius*. At verò esse creaturam in quantum hominē, ingentum in quantum priuatum generatione, non extrahit omnia illa à proprio significato, sed significatum proprium cum quadam restrictione attribuit subiecto, quæ restrictio etiam est vera & propria.

QVÆSTIO XXVIII.

De Relationibus diuinis.

SUMMA LITTERÆ.



PROCESSIONIBVS ad relationes recto ordine transit D. Thom. quia processionēs se habent ut fundamenta relationum realiter distinctarum, & relationes oppositæ, & incommunicabiles sunt formæ personales.

Duo præcipua capita tractat D. Thom. in quæstione.

Primum an sint, & quid sint relationes reales in Deo.

Secundum quod sint. Primum expedit duobus prioribus articuli. Secundum, duobus ultimis.

In primo articulo affirmat esse in Deo reales relationes.

Ratio est quia realiter Deus est Pater & Filius: ergo realiter habet relationes paternitatis, & filiationis. Rursus ubi fundamenta sunt realia, relationes resultantes reales sunt: in Deo dantur fundamenta realia, nempe processionēs intra eandem naturam, & ordinem diuinum, ut ostensum est *art. præcedenti*: ergo & relationes reales.

In

In 1. artic. affirmat quid sint istæ relationes reales, & qua realitate, & esse gaudeant, nempe ipsa realitate, & esse diuinæ essentia.

Ratio est, quia relationes reales licet sint ad terminum, verè tamen, & realiter sunt in subiecto quod referunt, & denominant. Sed relationes non possunt inesse Deo ut accidentia inhærentia, & superaddita, quia est incapax accidentium diuina substantia, cum non habeat potentialitatem ad illa recipienda. Ergo sunt ipsa Dei substantia.

In art. 3. docet relationes plures esse debere in Deo & non vnā tantum.

Ratio est, quia relatio realis solum datur in ordine ad terminum realiter distinctum, quia eiusdem ad se non datur relatio realis. Terminus iste distinctus non aliquid creatum extra Deum, quia istæ relationes sunt ad intra, & ante omnem creaturam: ergo ad aliquid diuinum, non absolutum, quia in absolutis nulla datur distinctio, sed summa vnitas; ergo in relatiuis.

In art. 4. docet esse quatuor relationes reales, non plures, nec pauciores.

Ratio est quia sunt duæ processiones reales, & quælibet habet duo extrema realiter distincta, quæ extrema non possunt esse nisi relationes: absoluta enim tantum habent vnitatem: ergo quælibet processio exigit duas relationes; & sic cum sint duæ processiones, erunt quatuor relationes. Non tamen nisi tres personæ, quia vna istarum relationum non est incommunicabilis, scilicet spiratio actiua: communicatur enim Patri, & Filio; & sic non constituit personam seorsum ab illis. Relationes ergo quatuor sunt, Paternitas, Filiatio, Spiratio actiua, & Spiratio passiua, sed personæ sunt tres Pater, & Filius, & Spiritus S. quia in Patre & Filio est Spiratio actiua.



DISPUTATIO XIII.

De Relationibus diuinis.

ARTICVLVS. I.

Quomodo essentia diuina, & relationes distinguantur

IN præsentia se offerunt difficultates, quæ propter sui affinitatem, & similitudinem ordine quodam à nobis agitandæ sunt.

Prima est circa distinctionem relationum ab essentia qualis sit, & quatenus admitenda, quæ difficultas licet communis sit pro omnibus attributis quomodo distinguantur ab essentia, & inter se, specialem tamen difficultatem in relationibus habet, propter maiorem vim quam in eis habet affirmatio, & negatio, quæ est principium distinctionis, quia ibi clarissime apparet essentiam communicari, non communicata relatione in re, & ante omnem intellectus operationem.

Secunda difficultas est, dato quodd ante intellectum non distinguantur ab essentia, quomodo in suis conceptibus includatur, an essentia includatur in conceptu relationum, & an relationes sint de conceptu essentia, an non? De hac secunda agemus art. seq. De prima in isto.

Verum præsuppositum de fide, & alterum ex philosophia.

2 Dari in Deo relationes reales certa fide tenendum est. Hoc est primum præsuppositum. Dari in creaturis relationes reales distinctas à rebus absolutis ex certa philosophia præsupponendum est, & sine Theologiæ dispendio non videtur posse negari. Hoc est secundum.

Primum constat definitione Ecclesiæ, deducturque ex Scriptura. Definitio Ecclesiæ sumitur in primis ex Concilio Toletano I. in confessione, ubi inuenitur expressè nominari relationes in Sancta Trinitate, cum dicitur: *In relatiuis verò personarum nominibus Pater ad Filium, Filius ad Patrem, Spiritus S. ad utrosque refertur; quæcumque relatiue tres persona dicantur, vna tamen natura per substantiam creditur. Et infr. Quod enim Pater est, non ad se, sed ad Filium est, & quod Filius est non ad se, sed ad Patrem est: similiter, & Spiritus S. non ad se, sed ad Patrem, & Filium relatiue refertur.* Quo loco relationes in diuinis proprio relationis nomine exprimuntur. Citatur etiam ad hoc sexta Synodus actione 11. in epistola Sophronij in illo Concilio recepta, & Concilium Lateranense sub Innocentio III. in c. *Firmiter*, & Florentinum sess. 18. & 19. & in litteris unionis. Caterum in his locis non ita expressum habetur nomen relationis, sicut in prædicto Concilio Toletano, quia in epistola Sophronij dicitur *in Sancta Trinitate esse vnā naturā in tribus subsistentis*, non verò relationis mentio fit. Et in c. *Firmiter* dicitur esse hanc Sanctam Trinitatem secundum communem essentiam indiuiduam, & secundum personales proprietates discretam, sed relationis nomen ibi non exprimitur, sed neque in c. *Damnatus sequenti*, ubi licet dicatur quod *Pater Filium generando suam substantiam ei dedit*, non tamen additur præter relationem, ut aliqui ex illo textu citant, sed malè: ibi enim non additur talis particula. In Concilio Florentino, in litteris unionis dicit Eugenius Papa, quod omnia quæ Patris sunt, ipse Pater vnigenito suo dedit, præter esse Patrem, sed non dicitur præter relationem, licet esse Patrem relatio sit, sed à Pontifice non exprimitur nomine relationis. Verum quidem est quod in sessione 17. 18. & 19. frequenter nomine relationum; & hypostasum vtitur Concilium, sed tamen in illis sessionibus nihil definitiue protulit Concilium, sed solum disputationes doctrinales habentur, ex quibus conflata fuit definitio, quæ postea in litteris unionis ab Eugenio posita est, ubi nomine relationis non vtitur. Similiter in Concilio Rhemensis sub Eugenio III. editum est quoddam symbolum à Patribus pronunciatum, hoc est Episcopis, ubi contra propositiones

propositiones Gilberti dicitur inter alia : *Nec aliquas omnino res, siue relationes, siue proprietates dicantur adesse Deo, & quod non sint Deus*, ubi mentio relationum fit. Sed quam vim habeat hoc symbolum illius Concilij, & an fuerit approbatum à Papa, diximus *preced. tomo disp. 4. art. 6.*

3 Cæterum communem esse sensum Ecclesiæ quod relationes in Deo dentur ad distinguendas personas constat ex modo communi loquendi Sanctorum Patrum, August. *5. de Trinit. c. 8. & 9.* affirmat *solum substantiam, & relationem propriè reperiri in Deo, & 15. de Trinit. c. 3.* Quod de Deo dicitur non secundum substantiam, relatiuè dici; Boëtius *lib. de Trinit.* habet illam celebrem sententiam. *Substantia præbet unitatem, relatio multiplicat Trinitatem, & toto illo libro sæpè relationes in Deo dari affirmat.* S. Anselmus *lib. de Incarnat. c. 3.* de hoc mysterio loquens infert pro inconuenienti contra illum contra quem disputat, quod *nulla erit in Deo relatio, & sic plures non erunt persone.* S. Bernardus *epist. 190.* contra errores Petri Abaylardi, sæpius repetit relationes has in Deo esse. Denique M. sententiarum *in 1. dist. 26. & 27.* & vniuersi Doctores Scholastici, & D. Thom. *in hac. quæst. 28.* & denique omnes Catholici Doctores in his relationibus asserendis, & ponendis vniuersimodò conueniunt.

Hæc autem assertio ex ipsa Scriptura deducitur, quæ euidenter relatiuis nominibus explicat personarum distinctionem, vt Patris, & Filij, vt cum dicitur *Baptizantes eos in nomine Patris, & Filij, & Spiritus S. Matth. 28. Tres sunt qui testimonium dant in cælo, Pater, Verbum, & Spiritus S. 1. Ioan. vlt. & multis aliis locis ex quibus mysterium Trinitatis colligitur, & nomine Patris, ac Filij significatur.* Istis autem nominibus apud nos relationes explicantur, Pater enim, & Filius relatiuè dicuntur: ergo in diuinis etiam inueniuntur relationes, seu genus relatiuum, siquidem nomina significantia relationes personis assignantur. Non possunt autem illis nominibus significari relationes fictæ, seu rationis, tum quia paternitas, & filiatio apud nos relationes reales sunt: ergo si Deo attribuntur propriè, & non metaphoricè, nec in ordine ad creaturas quæ sunt extra se, sed in ordine ad personas, quæ diuinæ sunt, utique reales relationes attribui debent; tum quia Deus realiter est Pater, & Filius non fictè, & solum secundum rationem, aliàs esset in tantum vnum & idem Pater, & Filius, quia non realiter, sed per intellectum diceretur Pater, & Filius; atque adeò non realiter distinguerentur Filius, & Pater in esse, & ratione personæ, & multò minùs in ipsa ratione diuinitatis, seu perfectione absoluta, quæ diuidi non potest: ergo erit eadem persona id quod dicitur Pater, & Filius, quæ est hæresis Sabelliana. Vnde explicatur magis hæc ratio, quia de fide est personas distinguere realiter: ergo secundum aliquam realitatem, quæ sit in vna, & non in alia. Sed hæc realitas non potest esse absoluta, quia sic diuideretur diuina essentia, nec esset eadem numero in personis sed diuersa, quod esset ponere plures Deos: ergo est realitas relatiua. Tum denique quia in diuinis datur realis processio, & origo, datur enim genitum, & generans, ergo datur reale fundamentum relationum, datur etiam terminus distinctus, quia datur personæ distinctæ intra Deum: ergo datur quicquid requiritur ad realem relationem, scil. reale fundamentum, & terminus.

5 Secundum quod supponimus ex metaphysica, & à nobis tractatum est *in Logica quæst. 17. art. 1.* est dari veras relationes reales distinctas à genere absoluto ex mente S. Thomæ, qui sæpè docet relatio-

Ioan. à S. Thom. in 1. part. D. Th. Tomus alter.

nes esse accidentia inhærentia subiecto, & ita distincta, quod faciant compositionem cum subiecto. Videatur *in 1. dist. 33. quæst. 1. art. 1. in fine corporis.* ubi inquit, *In relationibus realibus aliud est esse relationis, & substantia, quæ refertur; & idè dicuntur inesse, & secundum quod insunt, compositionem faciunt accidentis ad subiectum. Et in hac quæst. art. 2. in corp. Relatio, inquit, secundum quod est accidens sic est inhærens subiecto, & habens esse accidentale in ipso.* Et idem docet *4. contra Gentil. cap. 14. circa 9. rationem, & quæst. 8. de potentia art. 1.* Quæ omnia ibi probauimus, tum ex naturalibus, tum ex theologicis, scil. ex hoc mysterio in quo relationes reales inueniuntur. Et in hoc dicimus non posse sine Theologiæ dispendio negari relationes reales prædicamentales, seu secundum esse, & quæ puræ relationes sint, nec posse explicari rationem relationis, solum per conceptum vnius extremi absoluti cum connotatione alterius, vel cum extrinseca denominatione, vt aliqui putant. Nam hæc imaginatio (licet falsò) posset in creatis fingi, in diuinis autem stante hoc mysterio Trinitatis, non potest. Nam si relatio, non est aliud quàm duorum absolutorum assistentia, & connotatio, vt æqualitas est duarum quantitates, non se excedentes, similitudo duarum qualitates conuenientes, da mihi intra Deum duo extrema realiter distincta, quorum assistentia, & connotatio relationem constituat: nam vel illa extrema distincta sunt relationes, vel absolutæ entitates, si absolutæ, diuidis, & distinguis essentiam in eo in quo absoluta est. Si sunt relationes: ergo non in connotatione, & coassistencia duorum consistit relatio, sed ante ipsam connotationem fateris relationes, quia ipsa extrema quæ connotare se debent, & coassistere, non nisi per rationem relatiuam sunt realiter distincta, non autem per aliquid absolutum, quia hoc non est nisi vnum in diuinis. Itaque in Deo dantur extrema realiter distincta, videlicet personæ, & dantur etiam relationes reales, ista extrema non distinguuntur per rationes absolutas, quia quod absolutum est in Deo, distinguere non potest, quia opponi non potest: distinguuntur ergo per relationes: ergo non potest relatio in diuinis consistere in connotatione, aut assistencia duorum extremorum, vel denominatione extrinseca illorum, quia extrema ipsa, inter quæ debet esse connotatio, non sunt extrema distincta, nisi per relationes; ante connotationem ergo duorum datur relatio; & sic relatio non potest stare in compositione aut coassistencia duorum extremorum absolutorum, cum in diuinis sine distinctione absolutorum saluari debeat per distinctionem ipsarum relationum. Relationes ergo aliquid sunt præter connotationem absolutorum. Et sicut in diuinis genus relatiuum inuenitur distinctum à connotatione, & compositione absolutorum, sic in creaturis relationes prædicamentales aliquid sunt præter plurium absolutorum connotationem, & præter genus absolutum, seu præter vnum quodque absolutum in ordine ad se. Et hoc ipsum vrgetur ex Theologia, quia non alio fundamento Concilia, & Patres definiunt in diuinis dari relationes, & distinguere non secundum absoluta, sed præcisè secundum relationes, quia in Scripturis significantur personæ nominibus relatiuis, scil. patris, & filij, &c. nam ipsum nomen relationis in Scriptura non exprimitur: ergo si pater, & filius apud nos non significant nisi extrema absoluta cum connotatione, seu denominatione extrinseca, etiam in diuinis non ponentur relationes, sed tantum extrema absoluta cum connotatione, quod est ponere distinctionem in absolutis.

Nec obstat quod formaliter intelligi possunt 6

H conue

conuenire omnia quæ de relatiuis dicuntur, sine ista entitate relatiua superaddita, solum per plurimum absolutorum positionem, & eorum connotationem, sicut posito Patre generante, & Filio genito, iste formaliter, & proprie est Pater, quia formaliter genuit, ille filius, quia formaliter processit ab illo, & tamen Pater qui generat, & generatio ipsa, & filius qui genitus est, aliquid absolutum sunt: positis duabus quantitibus se non excedentibus formaliter æquales sunt, quia formaliter vna non est minor altera: ergo formaliter sunt æquales. Et idem est de duobus similibus, & de quibuscumque aliis relatiuis. Superflue ergo ponuntur istæ entitates relatiuæ superadditæ, si sine ipsis totum exercetur, quod nos per ipsas exerceri ponimus.

Respond. quod sine entitate relatiua resultante non dicuntur de illis extremis omnia, quæ dicuntur posita illa entitate relatiua: deest enim saltem vnum prædicatum formale, scilicet respicientia, & ordo, quo comparatur vnum extremum ad aliud. Nam posito Patre generante, & generatione, & filio genito, ille dicitur Pater, & iste filius causatiue, non relatiue; fundamentaliter, non formaliter: dicitur enim ille homo causans filium, non tamen dicitur relatiue, & formaliter pater, formalitate comparatiua. Et duæ quantitates ita conuenientes, quod nulla est minor altera, sunt duæ quantitates æquales quantitatiue, non relatiue, fundamentaliter, non formaliter; & vna non superat aliam, nec est minor illa entitatiue, & quoad quantitatem, non relatiue, & per comparisonem realem: constat enim hoc non habere minus de quantitate, quam aliud, sed non ordinatur ad aliud, nec respicit illud tanquam non minus, & inferius illo quousque habeat relatiuam entitatem, quæ formaliter ordinetur erga illud. Sed totum hoc pertinet ad fundamentum relationis, non ad ipsam formalitatem respiciendi, in qua consistit relatio; sed hoc habet per entitatem relatiuam superadditam ad connotationem, & distinctionem extremorum absolutorum.

Relationes diuina sola ratione distiguntur ab essentia.

7 De hoc puncto egimus *præd. tomo disp. 4. art. 6.* agendo de distinctione attributorum tum inter se, tum ab essentia. Relationes enim licet non computentur inter attributa, quia attributa communia sunt omnibus personis, & ad absolutam perfectionem pertinent, personales verò relationes non tamen quia diuinæ sunt, & intra Deum repertæ, eodem diuino esse gaudere debent sicut attributa, & sic esse idem cum essentia. Breuiter dico ex omnibus distinctionibus quæ inueniri possunt suos produxisse Authores, qui aliquam ex illis tenuerint dari inter attributa, inter essentiam, & relationes. Est enim distinctio realis, sicut inter duas res. Est distinctio modalis sicut inter rem, & modum, inter sessionem, & sedentem. Est distinctio formalis actualis, quia nimirum ante opus intellectus vnum non includit aliud. Est distinctio rationis cum fundamento in re, quæ vocatur distinctio rationis ratiocinata. Est denique distinctio rationis sine fundamento in re, quæ dicitur rationis ratiocinantis.

Primam distinctionem realem inter essentiam, & personas, seu relationes posuit Gilbertus Porretanus, ut refert B. Thom. *hic art. 2.* Et ante ipsum eam expressius videtur docuisse Gualterus quidam, qui absolute inter essentiam, & attributa docebat esse distinctionem realem, ut refert Suarez

lib. 1. de essentia Dei c. 10. & Vasquez hic disp. 116. c. 2. Specialiter tamen Gilbertus loquebatur de distinctione inter relationes, & essentiam, non de attributis, sicut Gualterus. In illa tamen distinctione relationum ab essentia idem sensisse videtur cum Gualtero, licet Vasquez illum à reali ista distinctione liberare conetur *disp. 120.*

Secundam distinctionem modalem posuit Durandus in *1. dist. 33. q. 1. & dist. 24. q. 2.*

Tertiam distinctionem posuit Scotus in *1. dist. 2. quæst. 7. §. Sed hic restat, & dist. 8. qu. 4. & dist. 26. qu. 2. & aliis locis quæ præced. tomo disp. 4. art. 6. citauimus.*

Quartam distinctionem ponit D. Thom. loquens de attributis in *1. dist. 2. qu. 1. art. 3. & loquens de personis, & essentia in hac qu. art. 2. & qu. 39. art. 2. ad 2. & in 1. dist. 34. qu. 2. art. 1. ad 2.* Et sequuntur communiter Thomistæ, quos loco citato adduximus.

Quintam distinctionem tenuerunt aliqui quos refert D. Thom. in *1. dist. 2. qu. 1. art. 2.* eamque attribuit Auicennæ, & Rabbi Moyse, & eam videntur postea secuti Gregorius in *1. dist. 8. qu. 2. art. 1. & 2. & Aureolus ibidem artic. 6.* quatenus solum concedunt distinctionem in attributis quæ connotet diuersos effectus in creaturis, ex parte verò Dei nihil eis correspondeat, nisi diuersitas nominis.

Contra primam sententiam Gilberti actum est in Concilio Rhemenfi sub Eugenio III. & ibi damnata est propositio Gilberti, quæ talis erat, quod *Tres personæ sunt tres res æternæ, & ad inuicem à diuina substantia in numero differentes.* Si numero differunt à diuina substantia: ergo realiter ab illa differunt, & extrinsecæ illi sunt. Vnde ad comprimendum hunc errorem, & expungendam propositionem Gilberti, primò compositum est symbolum ab Episcopis prouinciarum interuentu S. Patris Bernardi, qui in Concilio illo præfens fuit, & posita fuit ex aduerso hæc propositio; quod *Nullæ relationes siue proprietates, vel unitates ponantur, quæ sint æternæ, & non sint Deus.* Ex quo clare constabat relationes, seu personas à diuina substantia realiter non differre: sic enim non essent Deus, sed aliquid diuersum à Deo. Sed tamen quia hoc symbolum non videtur fuisse à Concilio acceptatum, ut ex Othone Frisingensi docet Seuerinus Binius in *notis ad illud Concilium, tomo 3. Concil. in 2. p. sub Eugenio III.* eo quod sine interuentu Cardinalium ab Episcopis fuerit confectum, qui de hoc valde conquesti sunt apud Pontificem; tamen ut ibi dicitur circa vnam ex propositionibus Gilberti sic Pontifex definiuit. *Ne aliqua ratio in Theologia (id est nullum argumentum, aut sententia, vel opinio) inter personam, & essentiam diuideret, neue Deus diuina essentia diceretur in casu ablatiuo tantum, sed etiam nominatiui:* id est quod abstracta prædicarentur de concretis in nominatiuo, ut quod Deus est Deitas seu diuina essentia, non verò solum in ablatiuo quod Deitate est Deus. Quare non est dubitandum quod Gilbertus illam sententiam tenuerit de distinctione personarum ab essentia, licet postea recantauerit, quidquid Vasquez *hic disp. 120. ex Othone citato,* velit illum ab hac sententia exonerare. Magis enim credendum est ipsis Actis, & Symbolo à S. Bernardo, & Episcopis confecto contra Gilbertum, & D. Thom. *hic art. 2. & D. Bonnauenturæ, Alexandro de Ales, & aliis antiquioribus,* qui propinqui fuerunt temporibus Gilberti, & in eisdem locis quibus ille, vixerunt, & docuerunt, quam Vasquez credat Othoni, qui tamen non omnia gesta in illo Concilio, aut à Gilberto asserta obligabatur

batur narrare in historia sua. Vnde Suarez *lib. 4. de Trinitate c. 2.* iure inuehitur in illos, qui existimant S. Thomam, & Bonauent. hæc imposuisse Gilberto.

9 Conuincitur autem manifestè error hic, quia vel personæ diuinæ sunt realitates creatæ, vel increatæ. Si creatæ, non sunt personæ Dei, sed factæ ab ipso, & inciditur in hæresim Arij, & Macedonij. Si increatæ: ergo sunt Deus, & actus purus nihil potentialitatis habentes: ergo non distinguuntur ab entitate, & esse diuino, quia esse diuinum cum sit infinitum, & actus purus, omnem rationem diuinam in vnica, & indiuisibili ratione continet, nec per compositionem sibi aggregat: si, enim in illa ratione actus puri, & diuinæ naturæ non inuenitur omne quod diuinum est, sed aliquid ab illa distinguitur, eique aduenire potest, iam in illa sua ratione, infinitæ perfectionis, & puritatis non est, siquidem aliquid illi deest in illo conceptu, & realitate quæ aduenire illi potest. Ergo dicendum est quoddam essentia, & personæ distingui non possunt, si ipsæ personæ increatæ sunt. Vnde tandem confitetur quia inter essentiam, & relationem non est oppositio, neque relatiua, quia nomine essentia non explicatur aliquid correlatiuum, sed id solum quod absolutum est, neque priuatiua, aut contraria vel negatiua, quia hæc omnia limitationem, & imperfectionem important: aliquid enim deest vni quoddam est in alio, & è contra: ergo nulla est distinctio, quia hæc fundatur in aliqua oppositio-

10 Eodem fundamento expungitur sententia Durandi de distinctione modali inter essentiam, & personas. Quia modus ille sic modaliter distinctus à natura vel est creatus, vel increatus. Si creatus non potest naturam diuinam afficere, & modificare: esset enim magna imperfectio modificari, & informari aliquo creato. Si est increatus, est actus purus: ergo summa entitas: ergo non est modus qui est infima entitas, & minor accidente, sed substantia, quæ est nobilior. Quod si substantia, vel distinguitur realiter ab essentia diuina, & non modaliter tantum, & inciditur in errorem Gilberti, vel est omnino idem cum Deitate essentialiter, & formaliter, & sic est falsa sententia Durandi, parumque distat à Gilberti sensu.

11 Fundamenta Gilberti sunt, quia aliquid conuenit personæ, quod non naturæ, & hoc non per intellectum nostrum, sed in re: dicimus enim quod persona generat, non natura, persona Filij est incarnata non essentia: ergo habent distinctionem in re. Et ad idem reducitur quod proponit Durandus, quia ex natura rei, & ante negotiationem intellectus Pater est formaliter Pater per paternitatem, & non per essentiam, alias non distingueretur formaliter à Filio, nec per essentiam respicit, & opponitur Filio, sed per paternitatem; essentia siquidem est etiam in Filio. Vnde essentia est in plus quam paternitas, quia paternitas est essentia, sed essentia est paternitas, & aliquid plus, scilicet filio, ad quam non extenditur paternitas, sed illi opponitur, & hoc totum in re: ergo aliquid in re est paternitas quod non essentia. Item quæcumque sunt eadem vni tertio, sunt idem realiter inter se: sed tres personæ sunt idem realiter in essentia, quia non distinguuntur ad illa per se: ergo sunt idem realiter inter se. Consequens est hæreticum: ergo aliqua præmissarum falsa. Non maior, quia est principium lumine naturali notum: ergo minor; & sic dicendum est quod distinguuntur essentia, & relationes. Denique faciunt pro Durando aliquæ autoritates ex Damasceno, & Augusti. Nam Damasc. *lib. 1. fidei c. 9.* sic Ioan. à S. Thom. in 1. part. D. Th. Tomus alter.

dicat: Omnia quæcumque habet Pater filij sunt, præter generationem, quæ non significat substantia differentiam, neque dignitatem, sed modum existentia. Et c. 13. Ingenium, & genitum, & processibile non substantia sunt significatiua, sed eius quæ ad inuicem est habitudinis, & existentia modi. Ergo persona modum significat, & tanquam modus distinguitur à substantia essentia. Similiter S. August. 7. de Trinitate c. 1. inquit, quoddam Omnia res quæ relatiue dicuntur, est aliquid excepto relatiuo seu relatione. Ex quo concludit quoddam in Patre præter paternitatem est aliquid, scilicet essentia. Et in c. 4. dicit, quoddam Non est idem Deum esse, & Patrem esse: ergo paternitas, & Deitas secundum beatum August. non sunt penitus idem. Et idem docet super Psal. 98.

Respond. ad principale argumentum, & ad secundam, replicam de his quæ sunt eadem vni tertio, satis superque à nobis actum esse, & solutum art. 3. præced. Et iterum venit soluenda illa prima replica pro sententia Scoti: eodem enim fundamento nititur, ut etiam aduertimus præced. *tomo disp. 4. art. 6.* ubi hæc omnia soluta sunt: Breuiter dicimus, ad illam affirmationem, & negationem sufficere distinctionem rationis, ut docet S. Thom. *infrà q. 39. art. 1. ad 2. & in 1. dist. 34. quæst. 2. art. 1. ad 2.* non autem requiri distinctionem actualem in re, sed sufficit in re esse fundamentalem, & eminentialem distinctionem, id est, rem tantæ eminentiæ, quæ æqualeat pluribus rebus, quibus conueniunt diuersæ illæ, & oppositæ conditiones, ita tamen quoddam quando propositio negatiua ponitur, non negat prædicatum de subiecto secundum omnem rationem, etiam realiter, & identice, sed solum in sensu formali, sicut cum dicitur Pater generat, Deitas, seu essentia non generat, ista negatiua verificatur in sensu formali, id est, essentia, vel Deitas quatenus significatur tali modo, id est, in abstracto; & quia propositiones, si absolute proferantur, semper in sensu formali procedunt, ideo absolute negandum est quoddam essentia vel Deitas generat, sicut negatur in Concilio Lateranensi c. *Damnamus, de summa Trinit.* Cæterum negatiua in sensu identico est falsa, ut si dicatur, Nulla res quæ est essentia generat, & in concreto, Deus non generat, falsæ sunt, quia essentia diuina est res illa quæ generat. Quare ad hoc non requiritur distinctio realis in actu inter illa extrema, sed sufficit eminentialis, quoddam scilicet eadem res sit simul essentia, & relationes, & vtriusque generis absoluti, & relatiui munus gerat. Et quia essentia non solum est Paternitas quæ generat, sed etiam filio, quæ generatur, ideo dicitur quoddam non est adæquatè paternitas, id est, non est solum paternitas, nec est adæquatè filio, sed vtrumque simul. Et cum infert Durandus quoddam est in plus essentia, quam paternitas, distingo, in plus identice, & realiter, nego (est enim eadem simplicissima realitas) formaliter ex modo significandi, transeat. Et non dico formaliter, formalitate reali distincta, quæ est modus, sed formaliter ex modo significandi, quod in eadem realitate locum habet propter suam summam eminentiam. Et ad consequentiam, quoddam sunt eadem vni tertio, &c. Dico quoddam defectus illius syllogismi non est in minori, sed in maiori malè intellecta; & sic infert consequentiam defectuosam. Nam maior intelligenda est de his quæ sunt eadem vni tertio sub eadem appellatione, & formalitate, non sub diuersa, & quod eo modo erunt eadem inter se quo fuerint in illo tertio, & non aliter; & sic personæ erunt idem inter se essentialiter, non relatiue, quia solum sunt eadem vni tertio essentialiter, non relatiue, ut pluribus tractauimus *disp. præced. art. 3.*

13 Ad loca S. Damasceni, & August. Respond. nulloatenus hos Patres asserere personas esse modos, & non substantiam ipsam diuinam: expressè enim S. August. *lib. 7. de Trinit. c. 6.* dicit *Cum dicimus personam Patris, non aliud dicimus quam substantiam Patris.* Cum ergo Damascen. generationem dicit esse modum, non substantiæ differentiam, & quod ingenitum, & genitum non substantiæ sunt significatiua, sed modi, loquitur de his notionalibus ex parte modi significandi, non ex parte rei significatæ, prout in re est, & secundum id quod identicè, & entitatè est. Et licet ex modo significationis significant modum substantiæ, non significant modum superadditum, & distinctum, sed identificatum, & diuinum, qui ipsa substantia est, sicut cum significamus aliquam virtutem in Deo, vt iustitiam, misericordiam, &c. non substantiam significamus, sed proprietatem, & virtutem, quæ tamen in re, & identicè substantia, & essentia ipsa est, sed ex modo significandi significatur vt aliquid consecutum ad essentiam, & supponens illam: sic relatio, & persona significatur in Deo, non vt proprietas seu virtus, sed vt terminus existentia: id enim est subsistentia. Et quia terminus apud nos habet rationem modi respectu substantiæ, ideò translata in Deum, sicut habet rationem termini, ita intelligitur, & significatur à nobis secundum rationem modi, licet modaliter non differat.

14 Ad locum primum August. *ex 7. de Trinit. c. 1.* respondet D. Thom. *in hac quæst. art. 2. ad 2.* vbi pro argumento affert illum locum, & explicat illum, quod quando August. dicit, quod omnis res quæ relatiuè dicitur, est etiam aliquid excepto relatiuo, intelligitur iuxta distributionem accommodatam, id est, non eodem modo in rebus creatis, & in Deo: nam in rebus creatis inuenitur præter relationem aliquid absolutum tanquam relationis subiectum, quod est alia res à relatione. In Deo autem inuenitur etiam aliquid absolutum, sed non tanquam alia res à relatione, quia res illa, quæ est Deus, æquiualeat absoluto, & relatiuo simul. Est autem aliquid excepto relatiuo secundum virtuales distinctionem, & secundum considerationem nostram, non secundum actuales distinctionem in re. Ad secundum locum August. respondet S. Thom. *quæst. 8. de potentia art. 2. ad 14.* vbi locum illum August. explicat, quod quando August. dicit non eo esse Patrem quo Deum, intelligit non eo, non quoad realitatem, & entitatem, sed quoad modum significandi, quia relatio non significatur vt id quo aliquid est in se, sed vt id quo ad aliquid est, Deitas autem significatur vt id quo in se est, & quo constituitur in se, quia significatur vt substantia ipsa qua Deus est. Itaque ex parte rei significatæ, eo quo est Pater, est Deus, sed ex modo significandi, non, quia Paternitate significatur vt ad alterum se habens, Deitate vt ad se, & iste modus significandi est proprius substantiæ.

15 Circa distinctionem Scoti, quam ipse vocat formalem, seu ex natura rei ante negotiationem intellectus, Durandus *citato loco distinct. 13. q. 1. num. 28* referens hanc Scoti sententiam, dixit se istam formalitatem differentia ex natura rei non intelligere, nisi in eo quod dicunt non esse idem formaliter, sed differre formaliter ex natura rei, includant illud quod quidam dicunt quod non sunt idem adæquatè, & id quod alij dicunt, scil. quod differunt, sicut res, & modus. Quare aliqui sic intellexerunt Scotum in hac distinctione formali, quasi ipse ponat aliquam distinctionem extremorum à parte rei, & ante operationem rationis. Quam si ponit, omnino videtur stare non posse, nisi illa di-

stinctio sit realis, id est à parte rei, vel sicut duæ res, vel sicut res, & modus: & tunc eodem modo impugnatur sicut sententia Gilberti, & Durandi, vt-pote omnino repugnans simplicitati diuinæ, & actui puro, quæ sunt fundamenta ex quibus omne genus distinctionis antecedentis operationem intellectus reiecit, *præced. tomodisp. 4. art. 6.* Si autem Scotus distinctionem omnem à parte rei, seu realem denegat Deo, vt denegare videtur, vt *ibi* diximus, & statim asseremus; & ulterius non sola distinctione rationis contentus fuit, sed introducere voluit distinctionem quandam mediam inter distinctionem realem, & rationis, vt aliqui ei accumulanti conuicti ex eius dictis, quia nec realem, nec modalem voluit esse istam distinctionem, nec etiam solius rationis, sed ante operationem intellectus, planè monstrum in Metaphysica, & Theologia introduceret. Nam omnis distinctio, sicut, & vnitas sequitur entitatem, sed nulla entitas fingi potest media inter ens reale, & rationis: ergo nec distinctio.

Quare ego semper existimaui sententiam Scoti non tam explicari debere per distinctionem, seu separationem extremorum siue realem siue modalem, quam per non inclusionem, seu non identificationem formalis rationis vnus in formali ratione alterius, hoc est quod vnus non sit de conceptu alterius, ita quod licet dici possit quod hoc est hoc, v. g. sapientia est iustitia, vel est ipsa Deitas aut è contra, tamen non potest dici quod includitur à parte rei ratio formalis vnus in ratione formali alterius, ita quod ex eadem ratione formali includatur ex natura sua in conceptu formali, seu ratione formali alterius. Et sic realiter identificantur ista extrema, scil. relatio, & essentia, sed non sub omni formalitate identificantur, neque vnus includit aliud, & sub illa formalitate, qua non includuntur, distinguuntur, & cum ex natura rei, & ratione sui non includantur, distinguuntur etiam à parte rei, seu ex natura rei. Quod est ponere distinctionem à parte rei, seu ex natura rei, non fundatam in oppositione aliqua, vt nos ponimus, sed in non inclusione huius in alio ex parte alicuius rationis formalis, sub qua illa inclusio non fit, licet fiat identitas sub alia. Ita ostendi ex ipso Scoto, & ex Arretino *præced. tomodisp. 4. art. 6.* Et sic Scoti sententia, vt distinguitur à sententia Durandi, & Gilberti, magis pertinet ad subtilitatem quandam, quam ad veram distinctionem stabiliendam. Nam Scotus *in illa dist. 2. quæst. 7. §. Sed hic restat, in 1. sentent.* distinctionem realem, & modalem in diuinis reiecit, idque etiam sic intellexit Durandus referens eius sententiam *vbi supra*, & solum posuit distinctionem illam formalem ex natura rei, quam tandem docet esse virtuales, & posse vocari rationis. Et sic Scotus, pressè sumptus, non videtur differre à communi sententia D. Thom. licet in modo loquendi valde differat, & per distinctionem ex natura rei, seu ante operationem intellectus intellexit solum duo. Primum quod aliqua, non omni formalitate identificentur, licet in se vnus sint in entitate, & realitate. Secundum, quod duo contradictoria in re illa verificentur ante operationem intellectus, vt quod essentia sit communicabilis, relatio non. Hæc enim duo videntur aliquam distinctionem, seu aliquam non unitatem aliquo modo ponere, siquidem si aliqua extrema sub aliqua formalitate non sunt vnus, & idem, sub illa formalitate restant diuersa, seu non vnus, licet in re vnus sint: hoc est ergo formaliter diuersificari. Et si de aliquo dicitur quod non communicatur in re, & sub alia formalitate com-

municatur

municatur in re, illa oppositio, seu affirmatio, & negatio aliquam videtur diuersitatem inducere.

17 Cæterum de tota hac Scoti distinctione, seu non identificatione formali diximus satis superque *tomo preced. disp. 4. art. 6. concl. 3.* & plura etiam contra distinctionem modalem Durandi, & realem Gilberti *ibidem* videri possunt: nec enim aliud in presenti addendum occurrit pro impugnandis istis distinctionibus. Solum aduerto, omnia quæ ibi dicta sunt de attributis inter se, & cum essentia, hæc esse dicendum de relationibus, seu personis, quia licet personæ inter se distinguantur, quia opponuntur, tamen inter personas, & essentiam nulla datur oppositio, quia non se habent correlatiue, sed sicut relatio creata taliter est respectus ad alterum, quod etiam est accidens alicuius, & hoc quod est esse accidens, seu ipsa ratio *In*, non opponitur rationi *Ad*, sed intrinsecè imbibitur in illa: ita in diuinis relatio quæ respicit alterum vt terminum, non opponitur ipsi rationi *In*, quæ est substantia diuina, atque ipsamet realitas relationis. Si ergo inter essentiam, & relationem nulla est oppositio, sed summa identificatio actualis, & in re, idem censendum est distinctione inter attributa, & essentiam, atque inter relationes, & essentiam. Qua ergo eadem diuina substantia absolutum genus continet, & relatiuum, atque vtriusque gerit munus, & officium, illa contradictio quæ formatur dicendo quod essentia est communicabilis, non persona, solum requirit, & sufficit ad illam diuersitas muneris, & officij, non entitatum, sed eadem simplicissima entitas ob sui eminentiam habet vicem plurium rerum; & sic habet capacitatem verificandi illam contradictionem, dummodo in sensu formali, & sub appellatione formali ponantur, non verò si terminis identicis significetur, vt latè ostendimus *cit. loco*, & de se manifestè patet, quia si formo contradictoria in his terminis, Res quæ est diuina essentia, res quæ est paternitas, verificatur quod res quæ est paternitas, communicatur, licet paternitas non communicetur, & verificatur quod res quæ est essentia non communicatur, licet paternitas communicetur. Et sic signum est, quod illa contradictio, seu affirmatio, & negatio, scilicet paternitas non communicatur, essentia communicatur, non petit diuersitatem seu distinctionem ex natura rei in ipsis extremis de quibus dicitur, scilicet in paternitate, & essentia, sed in officio, & munere seu formalitatibus, quæ in eadem eminentissima entitate distinctionem non habent, sed plurium æquivalentiam, quia solum in formali sensu horum terminorum fit illa affirmatio, & negatio, non in sensu identico, seu in terminis facientibus sensum identicum. Nec obstat quod communicari, & non communicari dicunt inter se distinctionem, saltem negatiuam in re, quia opponuntur contradictoriè: ergo ista duo contradictoria communicata illi rei quæ est Deus, faciet aliquam distinctionem, saltem negatiuam in re in ipso Deo quatenus essentia, & quatenus persona. Negamus consequentiam, vt negauimus in *Logica quest. 3. art. 6. ad 1. in fine*, sed oppositio ista fundat distinctionem negatiuam inter ipsa extrema oppositionis, scilicet communicari, & non communicari, hæc enim in re non sunt idem, non tamen in ipso subiecto cui conueniunt, quia non est effectus formalis istius contradictionis reddere subiectum diuisum in entitate sua (licet inter se illa contradictio diuisa extrema dicat) si infinitum sit, & eminens ad vtrumque munus communicandi, & non communicandi, sed solum si limitatum sit, vt diximus *preced. tomo disp. 4. artic. 6.* Ad introducendum autem distinctionem actu in ipsa re ante operationem intellectus, non sufficit affirmatio, & negatio in aliquo sensu, & formalitate, vel appellatione, sed affirmatio, & negatio in ipsa re, etiam identicè, & absolute significata, quia affirmatio, & negatio sub aliqua formalitate, seu in aliquo sensu tantum, & non in ipsa re etiam in sensu identico significata, potest verificari, manente eadem vnitatem rei, & nullo modo diuisa, quin potius omnino vna propter suam summam eminentiam, quæ indistincta, & indiuisa æquualet pluribus.

Et addo, quod si hoc fundamentum quo Scotus mouetur, & in quo aliqui vim faciunt ad introducendam distinctionem actualem, aliquid probat, probat sententiam Gilberti ab Ecclesia damnatam. Nec enim ipse aliud fundamentum habuit, quàm quod de eadem re non potest idem affirmari: & negari, quod etiam currit loquendo de eadem re entitatiue, & secundum se: nam duo contradictoria de eadem re entitatiue, & à parte rei non verificantur, aut si verificantur de eadem re propter diuersam, formalitatem, & diuersam considerationem, quæ de eadem re haberi potest, licet res illa in se vna sit, frustra ex hoc fundamento astruit Scotus distinctionem actualem ex natura rei, siquidem stante indistinctione, & vnitatem sine vlla oppositione, & diuisione in re, potest eadem simplicissima entitas propter suam eminentiam pari affirmationem, & negationem de eodem secundum diuersam formalitatem, vel considerationem, quatenus illa entitas æquualet pluribus, & gerit vicem plurium sine diuisione in plura; & sic in sensu formali explicante illa diuersa munera, & non diuersam entitatem fit affirmatio, & negatio, ad quam sufficit illa pluralitas eminentialis, seu virtualis, quæ nihil aliud est quàm fundamentum quod est in aliqua entitate, vt per intellectum possit ratio distinguere, & sic affirmare, & negare diuersa; non autem actualis distinctio, quæ actu diuidat ante operationem intellectus.

Fundamenta autem huius Scoticæ distinctionis, omnia adducta, & soluta sunt *citato loco preced. tomi* agendo de distinctione attributorum *disput. 4. art. 6.*

Quod attinet ad distinctionem rationis, quam D. Thom. ponit inter attributa, & essentiam, & inter essentiam, & personas cum fundamento in re, quæ est distinctio rationis ratiocinatæ, eam *citata disp. 4.* satis explicauimus, & ostendimus quantum ad duo.

Primum quod non est sola distinctio rationis ratiocinantis, quæ est sine fundamento in re, & solum se tenet ex parte modi significandi eandem rem, sicut nomina synonyma, vt vestis, & indumentum non distinguunt rem aliquam, neque extrema diuersa faciunt in conceptibus, sed conceptum de eadem re multiplicant.

Secundum est dari distinctionem rationis ratiocinatæ, seu fundatæ in ipso obiecto, & nostra limitatione intelligendi, quatenus tanta eminentia non potest vnico conceptu nostræ limitationis attingi; & sic conceptus diuiditur iuxta diuersas formalitates, seu rationes explicatas in illis conceptibus, licet in re sint vnum eminentialiter complectens omnes illas rationes, quæ à nobis non nisi cum ordine, & connotatione ad rationes creatas, & limitatas explicari possunt. Hæc duo latè *ibi* probata sunt *citata disput. 4. precedentis tomi*, & difficultates in oppositum solutæ, nec est aliquid quod amplius addatur.

Alia distinctio virtualis à modernis inuenta reuocatur.

20 Nihilominus ita plurimum mentes pupugit illud fundamentum Gilberti Porretani, Durandi, & Scoti quod non potest de eadem re omnino vna verificari affirmatio, & negatio eiusdem rei, seu contradictio, ut quod essentia sit communicabilis, & paternitas incommunicabilis à parte rei, & secundum quod à Deo, & à Beatis videtur hoc mysterium in se, ut semper insistant inponenda aliqua distinctione ante operationem intellectus, quam Gilbertus, & Gualterus sine ambagibus dixerunt realem, & ab Ecclesiæ definitione oppressi sunt; alij modalem, sed non realem, ut Durandus, qui eadem ferè damnatione tenetur; alij ad euitandam calumniam, nec realem, nec modalem, sed formalem obscure posuerunt ut Scotus, qui in re non aliud quam non identitatem voluit ponere, & de facto virtualem distinctionem appellauit ut vidimus. Alij tandem huius temporis Authores negantes etiam formalem distinctionem in attributis ante operationem intellectus, nihilominus aliquam aliam distinctionem ante opus intellectus dari in diuinis affirmarunt. Sed quam aliam? Si verba attendas, pluribus nominibus opulentanti nostris distinctionem pepererunt: si rem, sensumque aperias, nil nisi vel Scoticum, vel Porretanicum inuenies. Vocant hanc distinctionem initiatiuam, appetituali, fundamentalem, sed communius virtualem, quo nomine magis inuidiam declinent. Quam sententiam late defendit Egidius à præsentatione l. 5. de Beatit. q. 5. art. 6. §. 2. & 3. multosque pro illa refert. Eam obuiis manibus quasi de cælo lapsam tanta veneratione excepit Erice disp. 2. c. 3. n. 18. & disp. 12. c. 1. n. 4. & disp. 50. c. 2. à n. 23. quod hanc distinctionem inuentum diuinum appellet ad explicandas insuperabiles difficultates, quæ in materia de Trinitate occurrunt. Et alij Recentiores idem sequuntur. Vocant hanc distinctionem inchoatiuam, & fundamentalem, quia radix est distinctionis actualis, quæ per intellectum concipitur. Quare ratione virtualem etiam, appellant seu eminentialem realem, sed tamen quoad munus, & officium idem præstare docent atque distinctionem actualem, quia ratione eius potest esse vnum ubi non est aliud, perinde ac si extrema essent realiter distincta. Et corroborantur argumento, quia non solum in re communicatur essentia, & non Paternitas, sed etiam Deus videt in se suam essentiam communicari, & paternitatem non communicari, & non distinguit per rationem paternitatem ab essentia, quia non format Deus distinctionem rationis: ergo ante distinctionem rationis in eadem indiuisibili entitate verificantur duo contradictoria; & sic debet dari aliqua distinctio antecedens operationem rationis in ipsa entitate diuina, quia etiam visa in se immediate, illas contradictorias fundat.

21 Cæterum ista sententia si nomine distinctionis virtualis, & ante operationem intellectus non aliud intelligit quam quod in sententia Thomistarum nomine virtualis distinctionis intelligi solet, & in Schola Scoti nomine distinctionis antecedentis operationem intellectus, nihil noui affert. Si aliquid aliud intelligit, aut nihil dicit, aut in istas recidit sententias. Hanc ergo distinctionem virtualem egregie impugnat P. Alarcon tract. 5. de Trinit. disp. 2. c. 7. & 10. Nos breuiter duo dicimus.

Primum, apud antiquam sententiam D. Thomæ & Thomistarum, imò, & Scoti inueniri mentionem virtualis distinctionis. Nam cum omne id quod dicitur virtualiter tale, dicatur necessario per ordinem

ad id quod actualiter est tale, potest virtualis distinctio dici, vel respectu actualis quam res aliqua potest recipere, & habere in se, vel respectu actualis quam potest facere: sententia Thomistarum fatetur vir ualem distinctionem in attributis Dei respectu actualis, quæ potest fieri per rationem; & sic non est aliud quam ipsum fundamentum, quod se tenet ex parte rei, ut cum distinctione concipitur. Et hoc fundamentum remanet in se ante operationem intellectus omnino vnum, & indiuisum sine aliqua distinctione in actu; & sic si contradictoria verificantur de illo, utique verificantur de aliquo quod ante operationem intellectus est omnino vnum, & solum habet pluralitatem comparatione ad conceptus nostros distinguentes, quod est nullam distinctionem dari ante operationem intellectus ad verificanda illa contradictoria, sed de eodem secundum diuersam formalitatem ratione distinguibilem, & ante operationem intellectus formaliter, & actualiter vnum, contradictoria verificari. Hæc dicit sententia Thomistarum de virtuali distinctione, quæ sanè virtualis est per ordinem ad actualem, quæ potest in ipsa re fieri ab intellectu. Si verò virtualem distinctionem sumat hæc noua sententia, non per ordinem ad actualem, quæ fiat per rationem, sed in ordine ad actualem quam ipsa possit facere in ipsis rebus ante operationem intellectus incidit in opiniones Scoti, vel Durandi, aut Gilberti, nec potest se ab illis expedire, ut iam dicimus.

Secundum ergo quod addimus est, istam sententiam, cum conetur inducere per hanc nouam distinctionem virtualem aliquid, quod ante operationem intellectus operetur verificationem duplicis contradictoriae, cum sufficienti distinctione, & vult fugere sententiam Scoti, Durandi, & Gilberti de distinctione actuali à parte rei, & ex alia parte amplius vult dicere, quam distinctionem rationis cum fundamento in re, quæ est virtualis distinctio Thomistarum, planè inexplicabile se reddere, & tandem aut nihil nisi voces dicit, aut in vnum ex istis extremis, quæ vult euitare redicere. Nam cum inquirimus, quid est virtualis distinctio in Deo ante operationem intellectus? Dicunt, non esse aliud, quam Deum secundum se, & ante operationem intellectus æquiuale re pluribus, & distinctis, ita quod illa virtualis distinctio sit quoddam perinde valere plurium, & ipsum Deum, plurium ac distinctorum gerere munus. Bene. Hoc ipsum non negant Thomistæ. Neque eminentia hæc diuina, quod simplicissima existens pluribus, & infinitis perfectionibus æquiualeat ab aliquo negari potest. Sed premimus vterius: In hac eminentia remanetne vnica, & indiuisibilis ratio, seu entitas ante operationem intellectus, super quam cadat illa affirmatio, & negatio, an aliquid est actu distinctum à parte rei, super quod tanquam super extrema ante opus intellectus distincta, cadit affirmatio, & negatio? Si à parte rei est aliquid actu distinctum tanquam extrema aliquam distinctionem habentia ante opus intellectus, super quæ cadat illa affirmatio, & negatio, iam non est sola distinctio virtualis, sed actualis ante operationem intellectus, & illa actualis distinctio vel debet esse formalis, sicut est apud Scotum, vel modalis, ut apud Durandum, vel realis, ut apud Gilbertum, nec alio modo. Quod si dicant à parte rei nullam esse actualem distinctionem, nec actu esse plura, sed virtualiter plura, & actu vnum: in isto semper, quid sit illud virtualiter plura, ultra hoc quod est esse fundamentum distinctionis rationis. Nihil enim inuenietur in illa pluralitate virtuali, quod ante operationem intellectus extrahat illam entitatem

entitatem ab unitate, reducat in aliquam distinctionem in actu: ergo præter id quod est vnum in re, & fundamentum distinctionis rationis, quæ consistit in eo quod illa eminentia æquivalet pluribus, nihil amplius inuenitur, quod illa voce *virtualis distinctionis* significetur. Si autem à parte rei, & ante operationem intellectus non inuenitur nisi vnica, & indiuisibilis ratio in actu, nec rumpitur illa unitas in aliquam distinctionem actualem, sed totum manet in fundamento, & in radice quousque veniat conceptus rationis distinguens: ergo hæc sententia relinquit intactas omnes difficultates huius mysterij, & illam verificationem duplici contradictoriæ, nec maiorem lucem affert ad hoc soluendum, quàm distinctio virtualis, & rationis ratiocinata, quam ponunt Thomistæ; siquidem tota difficultas, quæ mouit Gilbertum, Durandum, & Scotum ad ponendum distinctionem ex natura rei ante operationem intellectus, est quia in re non possunt duo contradictoria verificari de eadem re omnino indiuisibili, & vna; & propterea conati sunt in illa entitate vna aliquid distinctionis inducere ante operationem intellectus, vt assignarentur aliqua extrema actu ante illam operationem, super quæ caderet illa affirmatio, & negatio; sed totum quod ista sententia ponit ante operationem intellectus est ratio omnino vna, & illa virtualitas distinctionis non extrahit à tali unitate, nec reducit ad distinctionem actu ante operationem intellectus illam virtualitatem: ergo eandem patitur difficultates de verificatione contradictoriarum respectu vnus, & eiusdem extremi non plurificati actu. Dicere autem quod illud vnum extremum in re, est virtualiter duo, non actu. Hoc non est explicare sensum, sed multiplicare verba: inquirimus enim an ly *virtualiter duo*, ponat in re duo actu, an solum relinquat vnum actu, quod tamen per rationem potest esse multiplex: nam si actu non relinquit nisi vnum, quid obstat hoc verificationi duarum contradictoriarum, quæ non fit nisi in vno extremo, non in pluribus à parte rei?

Quare nos distinctionem virtualem, quæ non est aliud quàm distinctio rationis cum fundamento à parte rei, admittimus, quæ est sententia Thomistarum; distinctionem autem virtualem mediam inter distinctionem istam rationis, quæ ratione sui fundamenti virtualis dicitur, & distinctionem actualem ante opus intellectus, siue formalem: siue realem, intelligimus, nec video quid explicet in his difficultatibus nisi pura verba.

23 Ad fundamentum insinuatam oppositæ sententiæ dicimus Deum, & Beatos visione sua intuitiua videre id ipsum quod à parte rei datur in Deo, & eo modo quo datur, non eo modo quo nos concipimus, qui imperfecta cognitione ducitur. Videt ergo Deus paternitatem vt relatiue oppositam Filio, seu relationem illam secundum rationem *Ad*, non communicari Filio, essentiam verò, & attributa, & omnem perfectionem absolutam communicare siue vlla distinctione inter essentiam, & paternitatem, & cum distinctione inter paternitatem, & filiationem. Nec ex hoc format distinctionem rationis inter essentiam, & paternitatem, quia non tangit illa pluribus conceptibus, nec ad instar eorum quæ in nobis distincta sunt, sed vt sunt vnum in se, quia etiam secundum hanc sententiam quam impugnamus, essentia, & paternitas in re, & actu vnum sunt. Videt ergo Deus essentiam suam ita esse infinitam, & eminentem entitatem quod exercet oppositionem, & respectum sub ratione relatiui, & vt paternitas est respectu filiationis, & non exercet respectu ipsius essentia, vt absoluta est; & sic videt

communicari, & non communicari id quod est vnica, & eadem entitas diuina secundum diuersas considerationes, distinguibiles quidem actu secundum nostros conceptus, in se verò non actu distinctas, sed solum fundamentaliter, seu virtualiter, eo quod non communicari non conuenit ei absolute, & secundum totum, quod identice est in re, sed solum sub præcisione, videlicet vt relatiue opponitur: alias enim si negatio sic proferatur. Quidquid est essentia diuina, siue formaliter, siue identice non communicatur, falsum est: Deus ergo videt id quod communicatur absolute, & non communicatur prout relatiue, non facere distinctionem in re, sed eminentiam esse vnus rei includentis multas illas præcisiones.

ARTICVLVS II.

*An Relationes sint de conceptu essentia;
& è conuerso.*

IN relatione reali duo includuntur, seu duplici formaliter aut consideratione explicantur, & per ordinem ad subiectum, quod dicitur *In relationis*, eo quod relationes quæ sunt accidentia, inhaerent subiecto; illudque afficiunt. Vnde omne quod relationi conuenit ex parte subiecti, siue cui inhaeret, siue in quo subsistit, vocatur *In relationis*; & secundò consideratur relatio realis per ordinem ad terminum, & sub hac consideratione appellatur *Ad*. Et in relationibus realibus, quæ à parte rei inueniuntur, relatio secundum vtramque formalitatem realis est, & realitatem dicit, non solum relationes diuinæ, quæ realissimæ, & substantiales sunt, sed etiam creatæ. Et quidem P. Suarez lib. 5. de Trinitate, docet disputari apud Thomistas: an relationes diuinæ sint reales secundum esse *Ad*, in quantum *Ad*, non solum secundum esse *In*, quod in eis est esse subsistens. Quia Caiet. (inquit) in hoc art. 1. q. 18. existimat secundum esse *Ad*, illas relationes non esse aliquid reale; & idem attribuit Capreolo in 1. dist. 33. Sed Caiet. non loquitur de relationibus diuinis, imò neque de realibus relationibus secundum *Ad*, vt tale, putà reale (verba eius sunt) sed quantum est ex ratione *Ad*, secundum se. Et mens Caiet. & Thomistarum in hac parte est, quod relatio realis secundum vtrumque conceptum, sed formalitatem *In*, & *Ad*, realis & vera est, non ficta, sed illam realitatem non explicat in conceptu *Ad*, per ordinem ad terminum, licet ibi illam retineat, & habeat: nam in ordine ad terminum solum explicat contra quid sit, non quid sit ille respectus, realitas autem propriè pertinet ad id quod est, non ad id contra quod est. Vnde prout explicat *Ad* formaliter erga terminum, non explicat realitatem quam habet, licet ibi eam habeat; sed istius realitatis oppositionem. Illa tamen oppositio per realem, & veram formam exercetur, quæ est relatio, etiam vt ad terminum, quia per hoc quod sit ad terminum non amittit, nec exuit realitatem, nec exercet aliquid quod realitate exerceri non possit. Nec D. Thom. dixit in presenti art. 1. quod solum in prædicamento relationis inuenitur aliquid secundum rationem, vt Suarez citat pro sententia Thomistarum: Sed non sic se habent verba D. Thom. sed solum dicit, *Solum in his quæ dicuntur ad aliquid inueniuntur aliqua secundum rationem tantum, & non secundum rem, quod non contingit in aliis generibus, &c.* Vbi licet videatur S. Thom. relationem contraponere aliis generibus; & sic loqui de prædicamento

relationis, tamen non otiosè D. Thom. abstinent à nomine prædicamenti, & solum dicit, *In his quæ dicuntur ad aliquid*, abstrahens à relatione, quæ est in prædicamento, & solum de ipso conceptu relationis loquens, quæ aliquando inuenitur secundum esse reale, & in prædicamento, aliquando non, sed extra prædicamentum, & secundum rationem, quod non contingit in aliis generibus, cuius formalis conceptus non nisi in reali prædicamento inuenitur.

Nec est necesse ad realitatem istius respectus *Ad*, multiplicare ipsum *In*, ita quod aliud sit *In* commune, & generale omni relationi, vel in diuinis omni personæ, quale est ipsamet essentia diuina, cui omnes identificantur in conceptu absoluto; aliud verò sit *In* ipsius respectus, in eo quod *Ad*, & in eo in quo disconuenit, & opponitur vna relatio alteri. Hoc non est necesse; tum quia illud *In*, quo redditur reale ipsum *Ad*, est transcendens realitas, & est conceptus in quo conueniunt omnes relationes: ergo non est necesse quod multiplicetur in eadem relatione, sed vnum sit, quia vna forma est ipsa relatio, & ipsum *Ad*, quæ per *In* existit; tum quia existentia non multiplicatur in relationibus, vt *infra* dicitur: ergo neque *In*, licet multiplicentur realitates; quod totum magis explicabitur *art. 3. sequenti.*

² Cum ergo conceptus relationis vtramque formalitatem *In*, & *Ad*, realiter includat, & relatio diuina loco *In*, quod in nostris relationibus est inherens, habeat esse diuinum subsistens, & identificatum cum ipsa essentia, quia essentia diuinæ hoc ipso quod est actus purus, nihil potest realiter aduenire tanquam distinctum à se; restat controversia præsens an relationes non solum secundum conceptum *In*, qui est conceptus earum vt subsistentes sunt, sed etiam secundum conceptum *Ad*, quo respiciunt terminum, non solum realiter identificentur cum essentia, sed etiam in suo formali conceptu, & in ratione essentiali ingrediantur. Nam relationes identificari realiter, & modaliter cum essentia diuina, constat ex *suprà* dictis contra Gilbertum, & Durandum, quia non distinguuntur ab illa: ergo identificantur cum illa. Vnde in Concil. Lateranen. in c. *Damnatus* dicitur quod *Pater, & Filius, & Spiritus S. sunt omnino idem, & vna substantia*. Nunc vltèr procedimus, & inquirimus an hæc relatio, quæ non distinguitur, sed est idem & vnum cum illa substantia diuina, ingrediatu etiam in conceptum formalem, & essentialem talis substantiæ, & rursus ipsa substantia diuina ingrediatu essentialem, & formalem conceptum ipsius relationis: licet hoc secundum facilius intelligatur, quia essentia diuina se habet vt quid intrinsecum, & quasi commune omnibus, quæ in Deo sunt, siue attributis, siue relationibus, sicut animal est de intrinseco conceptu hominis, & aliarum specierum. Primum verò difficilius se habet, quod relationes sint de conceptu ipsius essentia, cum potius illam præsupponant secundum suum formalem conceptum, sicut attributa, & proprietates supponunt naturam, & sicut terminus subsistentiæ supponit substantiam, sicut species hominis supponit genus animalis, non constituit, nec in eius formalem conceptum ingreditur.

³ Propter hoc diuisi sunt Authores, præsertim moderni in hac parte.

Quidam vtrumque negant, scil. nec essentiam esse de conceptu formali, & essentiali relationum, neque relationes de conceptu, & essentiali ratione essentia, sed habere se sicut diuersas lineas attributorum, & rationum, quæ in Deo sunt, & vnum non

est de conceptu formali alterius, licet realiter identificentur, sicut iustitia non est de conceptu sapientia, vel è contra, nec voluntas de conceptu intellectus. Ita docet P. Vasquez *hic disp. 121. cap. 2. & 4.* quem sequitur Alarcon *tract. 5. de Trinit. disp. 2. c. 11. & 13.* citatque Becanum, Turrianum, Gillium, & alios. Alij tenent essentiam quidem esse de conceptu formali relationum, sed relationes non esse de conceptu essentia. Pro hac secunda parte præter Vasquez, & alios citat etiam Suarez *l. 4. de Trinit. c. 5. Arrubal disp. 101. c. 3. Granados tract. 3. disp. 4. sect. 3. & alij*. Pro prima verò parte, scil. quod essentia sit de conceptu relationum stat idem Suarez, Arrubal, Granados, Canariensis, Bellarminus, & alij quos citat, & sequitur Ruiz *hic disput. 13. quæst. 1. & sequentibus*. Eos etiam citat Alarcon *ubi supra cap. 13.*

Tandem alij dicunt tam essentiam esse de conceptu relationum, quam relationes de conceptu essentia. Pro qua sententia citat Suarez *ubi supra* aliquos modernos expositores D. Thom. Et reuera communis est Thomistarum, doceturque à Caiet. *hic quæst. 27. art. 2. circa 3. à Bannez q. 28. art. 2. dub. 3. circa 6. argumentum*, Nauarrete *tomo 3. controu. 18.* estque omnium aliorum qui tenent non posse videri in Deo essentiam sine personis, quia pertinent personæ ad essentiam diuinitatis. Ferrar. tamen *2. contra Gentil. c. 9.* ponit distinctionem inter attributa, & relationes, quod attributa docet esse de conceptu Deitatis, si secundum se concipiatur, quia perfectionem important, relationes autem non sunt de ratione Deitatis, etiam si secundum se concipiatur, quia perfectionem in suo conceptu non important.

⁴ Pro huius tamen resolutione aduertendum est, diuinam essentiam dupliciter posse concipi. Vno modo conceptu quasi transcendentali prout præcisè dicit rationem entis increati, & actus puri, qui transcendentalis dicitur, non quia est communis Deo, & creaturis, sed solum omnibus perfectionibus diuinis, & omni rei diuinæ sicut ens creatum transcendentaliter se habet ad substantiam, & accidens, & ad omnes perfectiones creatas, quia in omnibus imbibitur non solum ratio entis, vt sic, sed ratio entis creati; sic ratio entis increati intimè imbibitur in omni perfectione, & attributo quod diuinum est, & in omni eo quod intra Deum est siue sic natura, siue attributum, siue persona, siue operatio. Alio modo sumitur diuina essentia pro conceptu specifico, & proprio, prout significat rationem diuinæ naturæ sub eo conceptu, & linea, qua distinguitur à conceptu, & linea attributorum, quæ se habent per modum proprietatis, & à conceptu personarum, seu relationum, quæ se habent vt termini subsistentes; & sic attributa, & personæ ex suo proprio conceptu supponunt naturam in linea, & conceptu naturæ. Et hanc distinctionem alij aliter ponunt, dicentes quod aliud est personas, & attributa esse de essentia diuinitatis, seu essentialiter ad eam pertinere, aliud personas esse de conceptu diuinitatis, vtique de conceptu proprio, & specifico, qui est conceptus diuinitatis vt naturæ.

⁵ Secundò est aduertendum quod aliter transcendentaliter creatum imbibitur intimè in omnibus ad quos transcendit, aliter diuinum: transcendentaliter enim creatum ingreditur conceptus formales suorum inferiorum, non vt pertinentium ad suam perfectionem, & constitutionem, quia ille conceptus transcendentalis est analogus, & communis, nec in illa sua abstractione, & analogia constituitur per analogata, nec connectitur cum illis, sed inferiora

riora connexionem essentialem habent ad ipsum, Ceterum diuina entitas non est transcendentalis ad omnes perfectiones diuinas, tanquam quid analogum, & commune, sed ut entitas omnino singularis, & indiuidua, seu hæc. Vnde non potest ad omnes illas perfectiones transcendere, easque in se imbibere, nisi quia ad suam essentiam singularem pertinent, & ei essentialiter conueniunt, alias non apparet quomodo res singularis in eis imbibatur transcendentaliter, nisi etiam essentialiter, id est, propter aliquam essentialem connexionem cum talibus perfectionibus, sicut res transcendentalis vniuersalis non imbibitur in inferioribus, nisi propter essentialem connexionem, quam res inferiores habent cum illo superiori, ita quando transcendale est quid singulare, non imbibitur in his, in quibus transcendit, nisi ad inuicem sit reciproca connexio essentialis, quatenus hoc singulare petit ex sua intrinseca, & essentiali ratione omnes illas perfectiones. Et hoc ideo est in Deo, quia essentia sua est actus purus ex suo proprio, & essentiali conceptu, unde ex vi talis conceptus nullam habet potentialitatem, nec ad aliquam perfectionem, & actualitatem est in potentia: ergo omnem perfectionem ex vi essentialis conceptus habet in actu, siquidem nulla caret; & sic essentialiter connectitur cum omni eo quod sibi potest conuenire, alioquin si essentialiter non connecteretur, & tamen posset illi conuenire, ex vi essentialis conceptus, careret illo, & esset in potentia ad illud. Sic ergo si actui puro conuenit aliquod attributum, vel persona, seu relatio, & ex vi, & ratione actus puri in suo essentiali conceptu non connectitur cum illis: ergo ex vi essentialis conceptus est in potentia ad illa, & caret illis, siquidem ex vi essentialis conceptus non habet actu illa, & tamen potest habere ut sibi identificata, sed non ex vi connexionis.

6 His suppositis duabus conclusionibus respondeo.

Prima est si diuinitas seu diuina essentia sumatur in vi conceptus naturæ, secundum quod ly *natura* dicit conceptum specificum, & proprium condistinctum à proprietatibus, operationibus, & personalitatibus, sic neque attributa, neque relationes sunt de conceptu formali naturæ diuinæ, neque è conuerso conceptus naturæ est de formali conceptu relationum & attributorum.

Secunda conclusio: Si essentia diuina sumatur in vi conceptus entis increati, ut sic, seu actus puri, qui est conceptus transcendentalis ad omne quod in Deo est, & increatum esse habet, sic non solum diuina essentia est de conceptu essentiali personarum, & relationum, atque attributorum, sed etiam attributa, & relationes sunt de essentiali ratione, & connexionem cum ipsa essentia diuina; aliter tamen, & aliter: nam essentia est de conceptu relationum tanquam intrinsecum constitutum, seu tanquam entitas, relationes autem sunt de conceptu, seu de essentiali ratione essentiae diuinæ, tanquam modi, seu termini, ipsius essentiae diuinæ, non ut constitutum, nec quælibet relatio est adæquatè intrinseca, & essentialis diuinæ essentiae, sed in adæquatè, tota autem collectio relationum adæquatè.

7 Per istas duas conclusiones conciliantur varia loca D. Thomæ in hac parte, quæ videntur contraria, & aperitur mens eius. Ad quam penetrandam præ oculis habendum est, distinguere in Doctrina D. Thomæ, esse aliquid, seu prædicari essentialiter de Deo, aut includi in eius substantia ex parte modi significandi, vel ex parte rei significatæ. Ex parte modi significandi non omnia quæ sunt in Deo, &

sunt ipsa substantia Dei significantur per modum substantiæ, & essentiae, sed ut modus aut proprietatis essentiae. Ex parte autem rei significatæ quid est Deus, essentialiter est Deus, & si ipsi Deo conuenit aliquod prædicatum, v. g. quod sit Pater, aut Filius, quod sit iustus, aut sapiens, essentialiter illi conuenit, & de eo prædicatur. Sumitur hæc doctrina ex ipso D. Thom. qu. 8. de potentia art. 2. ad 4. ubi inquit, quod *Relationes diuinæ licet significant id quod est diuina essentia, non tamen per modum essentiae, quia non per modum inexistens, sed se habentis ad aliud.* Et ad 5. inquit quod *Licet relatio sit substantia diuina, non tamen significat per modum substantiæ; & ideo non dicitur secundum substantiam, quia dici secundum substantiam pertinet ad modum significandi.* Et idem docet in hac qu. 28. art. 2. ad 1.

Iuxta hanc ergo distinctionem, & eam quam ponimus in his duabus conclusionibus intelligi potest mens S. Thomæ. Nam loquendo de relationibus, & attributis, & essentia ex parte rei significatæ, & secundum quod essentia sumitur pro entitate diuina, quasi modo transcendentali, semper docet relationes essentialiter conuenire essentiae, & è conuerso, facereque prædicationem per se. Nam *infr. qu. 39. art. 6. ad 2. affirmat, quod Sicut ista propositio est per se, Pater est Deus ita & ista, Deus est Pater, & nullo modo per accidens.* Et hoc collegit D. Thom. ex eo quod cum dicitur Deus, vel essentia diuina est Pater, est prædictio per identitatem, non sicut inferioris de superiore. Vbi S. Doctor prædicationem illam per identitatem etiam essentialem esse docuit, seu per se, non autem est per se in quarto modo, neque in secundo, sed in primo. Non in quarto modo per se, quia quartus modus per se est perfectitas operationis, non prædicationis: in istis autem propositionibus nulla significatur operatio. Non per se in secundo modo, quia ista perfectitas est proprietatis, quæ comparatur ad subiectum accidentaliter, seu ut accidens, licet necessario illi connexum, in illa autem propositione essentia diuina est Pater, ly *Pater*, non comparatur ut accidens ad subiectum, nec ut attributum, & proprietatis, sed ut persona: non ergo est connexio, & perfectitas in secundo modo, & sic solum debet esse in primo, qui est connexionis essentialis. Vnde & D. Thom. dicit quod ita est per se, sicut ista, Pater est Deus, ubi ly *Deus* non prædicatur ut proprietatis Patris, sed ut naturæ; & sic non est in secundo modo per se; nec paternitas est proprietatis naturæ, sed substantia. Vnde si prædicatur per se ratione identitatis, non in secundo modo ut proprietatis, sed ut essentialiter conueniens in primo modo per se prædicatur.

Deinde ipse D. Thom. *suprà qu. 27. art. 2. ad 3.* docet quod *In ipsa perfectione diuini esse continetur verbum, & principium verbi, sicut quæcumque ad eius perfectionem pertinent, sicut suprà dictum est.* Vbi loquitur de continentia in esse diuino, quatenus esse diuinum imbibitur in omni quod diuinum est: sic enim modo quasi transcendentali se habet. Et in hac qu. art. 2. dicit quod *Relatio realiter existens in Deo habet esse essentia diuina, idem omnino existens.* Aliis autem locis quæ postea in *solutione argumentorum* subiiciemus, docet non includi proprietates, seu relationes in conceptu essentiae, vel quia ex modo significandi non includuntur, vel quia sumitur conceptus essentiae pro conceptu proprio, & formali specifico essentiae ut natura est, condistinguiturque formaliter à conceptu attributorum, & relationum.

Fauent etiam locutiones Sanctorum Patrum, licet

licet non minus adducantur pro vna parte, quam pro alia. Quia aliquando Patres attendentes ad nostrum modum intelligendi, qui proprietates, seu attributa quasi accidentia, seu accidentia ad Dei substantiam intelligimus, & relationes vt ad aliud, non ad se vt substantiam explicamus, dicunt substantialiter ista non nomini, seu substantiam non explicare. Nam, vt rectè admonuit Cyrillus, lib. 11. *The. sauri: Non omnia quæ in Deo sunt, & de Deo dicuntur, substantiam significant. Reliquum est igitur, vt voce, modoque dicendi accidentia esse dicamus, quoniam modo accidentia ea intelligimus. Sapienter quidem dicitur nihil accidere substantiæ Dei, quoniam in se ipsa perfecta est: nostra autem proprio modo intelligimus, & loquimur: ex his quæ in nobis sunt, quasi per exempla, maiora, id est diuina intelligentes.* Vbi planè Cyrillus mentis nobis Sanctorum aperuit, quam D. Thom. Scholasticis terminus postea delineauit, scilicet. ex modo nostro significandi, non vt substantiam, seu essentiam Dei ea significari; ex parte autem rei significatæ esse ipsam substantiam Dei, nec essentialiter, & intrinsecè posse aliud esse quàm Deus, nec Deus aliud ipsa. Optima sunt verba Bernardi *serm. 80. in Cantica*, vbi loquens contra Gilbertum; *Recedant, inquit, nouelli, non dialectici, sed heretici, qui magnitudinem, quæ magnus est Deus, & item bonitatem, quæ bonus, sed & sapientiam, quæ sapiens, & iustitiam, quæ iustus est, postremò diuinitatem, quæ Deus est, Deum non esse impiissimè disputant. Sed si Deus non est? Et infr. Absit vt essentialiter Catholica Ecclesia, esse, esse videlicet substantiam, vel aliquam omnino rem quæ Deus sit, & quæ non sit Deus.* Sed Deus paternitate est Pater: ergo paternitas Deus est. Dicunt; Paternitas Deus est realiter, non essentialiter. Urgeo consequentiam Bernardi: Si essentialiter Deus non est, quid essentialiter est? Nam essentialiter aliquid est: & illud aliquid si Deus non est essentialiter, nihil essentialiter, est. Vnde tandem August. lib. 7. de Trinit. cap. 6. *Cum dicimus inquit, personam Patris, non aliud dicimus quàm substantiam Patris.* Si non aliud dicimus ergo essentialiter substantia illa est.

11 Ad locum Nazianz. in argumento allatum, dicimus extra rem adduci: Sentus enim eius est planus, quòd personæ substantiam non secernunt, id est, non diuidunt substantiam, sed circa ipsam secernuntur, quia inter se distinguuntur, non ab ipsa substantia. Explicauit enim Theologus vim illius nominis substantiæ, quæ tunc temporis controuertebatur an significaret hypostasim; & sic multiplicaretur in Deo; an naturam, & sic non diuideretur. Et ita in æquiuocatione huius nominis valde tunc laboratum est propter Arrianorum dolositatem illos simplices decipientium, vt plures substantias in Deo concedendo, ipsi diuersas naturas inferrent. Vnde Nazianz rectè dixit, substantiam non secerni per personas; quia nomen naturæ est, nec illa per personas diuiditur. Sed hoc quid ad præsentem controuersiam? Ad locum Athanasij dicitur generationem non esse aliquid essentialiter, quia est notionale: distinguimus enim notionalia ab essentialibus, non quia essentiali connexionione de essentia non prædicentur, sed quia conceptu relatiuo dicuntur, & sunt propria personarum, cum essentialia sint absoluta, & communia. Eadem est explicatio Isidori, scilicet. Deum non esse essentialiter, quod relatiue est, quia relatiuum est notionale, non essentialiter; & sic distinguit essentialiter esse contra notionaliter esse, non tamen negat essentialiter conuenire notionalibus, seu relatiuis in quod esse diuini est. Ad Damascenum iam *suprà* diximus

quòd hypostases non sunt naturæ sub conceptu naturæ proprio, & specifico, & secundum modum significandi, quatenus natura significatur modo communicabili, hypostases modo incommunicabili, non tamen negat esse naturam, sumpta natura pro essentia, seu esse diuino, modo quasi transcendentali se habendo ad omnia, quæ in Deo sunt. Et sic sensus est quòd characteristica in Deo; seu notionalia, non sunt naturæ, id est, non sub conceptu naturæ sed ad hypostasim seu personam pertinent. Ad Cyrillum dicitur relationem extrinsecè se habere ad essentiam, tum ex parte modi significandi, quia non per modum essentiæ, sed extra illum significatur; tum quoad conceptum proprium, & specificum essentiæ in ratione naturæ, cui conceptui formaliter, & quoad sui expressionem extrinsecè se habet relatio, licet in ratione conceptus transcendentalis, & entitatis increatæ intrinsecè illam in se includat.

Fundamentum vtriusque conclusionis sumitur ex dictis. Nam primæ fundamentum est quia formalis conceptus naturæ distinguitur à formali conceptu attributorum, & relationum, & præsupponitur natura ex ipsa formali ratione, & modo significandi ad personalitates: ergo repugnat quòd persona sit de formali conceptu naturæ, vel è contra. Consequentia patet quia esse vnum de formali conceptu alterius, nihil aliud est, quàm ingredi, & pertinere ad illud quod formale est in conceptu proprio & specifico talis rei. Illud autem est formale in conceptu naturæ, vel cuiuscumque attributi, quod exprimitur in tali conceptu tanquam formæ propria, seu formalis ratio illius attributi vel naturæ: quod enim commune est aliis attributis, vel naturæ, non est formale, & proprium talis conceptus, sed commune, & præsuppositum, forma autem est quæ distinguit; & idèd illud dicitur formaliter, seu formaliter pertinere ad conceptum cuiusque attributi, vel naturæ, in qua distinguitur ab alio attributo, vel à formalitate ipsius naturæ, aut à formali conceptu relationis, seu personæ, & hoc est quod formaliter in eo conceptu exprimitur; sicut conceptus sapientiæ formaliter distinguitur à conceptu iustitiæ, vel misericordiæ, &c. Anteced. verò manifestè constat, quia conceptus naturæ personæ seu attributorum ita se habent, quòd natura consideratur sub conceptu naturæ, vt fundamentum, & radix attributum, & operationem, & vt quid præsuppositum ad personam, quia intelligitur vt aliquid terminabile per personalitatem tanquam per terminum ergo explicat conceptum sub aliqua formali ratione distinctum à conceptu personæ, & attributorum. Ergo persona, & relatio non potest ingredi neque pertinere ad formalem conceptum talis naturæ. Repugnat enim sub ea formalitate ingredi conceptum, sub quo ab illo distinguitur. Distinguitur autem secundum formalem conceptum ab illo: ergo sub illa ratione non est de conceptu eius.

Fundamentum secundæ conclusionis habet duas 13 partes.

Prima est quòd essentia diuina sub amplo, & quasi transcendentali conceptu entitatis diuinæ, essentialiter includatur in relationibus tanquam intrinsecum, & entitatum prædicarum earum.

14 Secunda, quòd relationes etiam includantur essentialiter, seu connectantur essentialiter ipsi essentiæ. Et prima pars constat, quia relationes illæ essentialiter sunt entia increata: ergo essentialiter sunt essentia diuina, & Deitas. Pater consequ. quia essentia diuina, seu Deitas, est ipsa ratio actus puri, & esse

& esse diuini, seu entis increati: ergo quod est essentialiter ens increatum, est essentialiter esse diuinum: ergo Deus, seu Deitas ipsa. Anteced. constat, quia relatio illa essentialiter est aliquod ens, & essentialiter est ens non creatum: ergo essentialiter est ens increatum. Vnde est firmissima illa consequentia quam facit Petr. Suarez *ubi supra lib. 4. de Trinit. c. 7.* Paternitas est Deus: ergo essentialiter Deus: ergo in suo essentiali conceptu includit Deitatem. Prima consequentia patet, quia id quod est Deus, non potest esse Deus accidentaliter, tanquam accidens à se distinctum, nec tanquam prædicatum à se distinctum, cum non sit aliquid per compositionem, & per modum actus, & potentiae, sed per summam identitatem actus puri: ergo per connectionem necessariam, & immutabilem, & tanquam omnino idem: ergo tanquam essentialiter connexum. Secunda verò consequ. etiam est manifesta, quia quod est essentialiter tale, in suo essentiali conceptu illud includit: ergo si essentialiter Pater est Deus, in suo essentiali conceptu Pater includit Deitatem.

15 Et hinc sumitur secundæ partis probatio, quia quidquid conuenit Deo realiter, & in se, essentialiter illi conuenit, ita quod hæc est legitima consequ. Deus est iustus aut sapiens: ergo essentialiter est sapiens, & iustus, Deus est Pater: ergo essentialiter est Pater, quia quidquid Deus est essentialiter, & intrinsecè est, & essentialiter illi conuenit, sed Deo conuenit formaliter, & à parte rei esse Patrem, & Filium, non minùs quàm esse iustum aut æternum ita quod hæc est vera secundum fidem, Deus est Pater, Deus est Filius, dicitur enim Ioan. 1. *Deus erat verbum*, ergo Verbum, seu Pater essentialiter Deo conuenit. Minor est de fide, & consequ. est in *dary*. Maior probatur. Quidquid Deo conuenit in se, & formaliter increatum, & diuinum est, & actus purus, quia, vt probauimus, essentia, seu esse diuinum est essentialiter Patri, & relationibus, & attributis; sed omne esse diuinum, & increatum est essentialiter ipsi Deo, seu essentia diuinæ in quantum ens diuinum, seu esse diuinum est: ergo paternitas & relationes, quæ essentialiter sunt entia diuina, & esse diuinum, essentialiter conueniunt diuinitati, quia omne esse diuinum est essentialiter essentia diuinæ.

Et confirm. quia Deo essentialiter conuenit esse actum purum: ergo essentialiter conuenit quidquid actus purus ex suo conceptu essentiali habet: sed ex essentiali conceptu actus puri conuenit ei ad nihil esse in potentia, sed omnem perfectionem sibi conuenire, & omne quod in ipso est, ergo ex vi sui essentialis conceptus est quidquid est: sed essentia diuina, seu Deus actu est Pater, & Filius, & ad eius perfectionem pertinet hoc mysterium quod scilicet sit trinus in personis, & non vnā tantum personam habeat, nec solum genus absolutum, sed etiam relatiuum: ergo essentialiter est ipsa relatio, & ipsæ personæ. Sed tamen cum includat tres personas correlatiue oppositas, licet essentialiter essentia sit persona, non tamen adæquatè est quælibet persona, quia ita est hæc persona, quod etiam est alia, sicut ens licet transcendentaliter includat accidens, & substantiam, non tamen adæquatè alterum, sed adæquatè vtrumque.

16 Vnde patet Authores, qui primam partem huius conclusionis concedunt, vt Suarez, & alij, & negant secundam, inconsequenter loqui, quia per euidentem consequentiam deducitur, quod si persona essentialiter est Deus, & esse diuinum, necessariò sequitur essentiam diuinam seu Deitatem essentialiter esse personam, quia essentialiter est

omne esse diuinum, imò est quasi identica, esse diuinum est esse diuinum.

Respondent tamen oppositi Authores qui primam partem huius conclusionis negant, quod licet à parte rei quælibet relatio sit diuina, & quodlibet attributum sit essentialiter Deus, & non creatura, tamen sub illo statu præcisionis, quo consideratur secundum se nec est diuinum, neque creatum, quia neutrum explicat, sed tantum suam formalem rationem exprimit: sicut homo secundum se nec est albus, nec est non albus, sed abstrahit; & magis ad rem, homo, vel animal sub illo præciso conceptu, nec est quid productum, neque improductum, licet in re essentialiter quid creatum, & productum sit; & Spiritus S. sub formalitate processionis neque procedit vt creatura, nec vt Deus in quarto modo per se, licet in re, & in primo modo per se sit essentialiter Deus. Eodem modo relationes sub illo conceptu non includunt essentialiter naturam, licet in re essentialiter natura diuina sint, & Deus sint.

Cæterum hæc responsio maximè indicat, quam 17 in retortum, & in vertiginem agatur opposita sententia vi argumenti oppressa. Etenim licet trita philosophia sit, quod res aliqua sub aliqua præcisione considerata, alia prædicata non explicat, quam quæ in illa præcisione explicantur, & ad illam per se conducunt, tamen etiam in omni philosophia est certum quod quando inquirimus an aliquod prædicatum essentialiter includatur, & pertineat ad aliquam rem non procedimus cum præcisione, sed simpliciter ea quæ intrinsecè cum tali re connexa sunt, explicamus; v. g. animal sub præcisa, & formali ratione animalis non explicat rationem corporis vel substantiæ, aut creaturæ, tamen si inquiramus an essentialiter includatur substantia in animali, ita quod essentialiter prædicetur de animali, & similiter ens creatum, quis poterit dubitare quod hæc sit essentialis prædicatio. Animal est substantia, est creatura, est corpus: quia ad hoc vt sit prædicatio essentialis, sufficit essentialis, seu intrinsecæ connexio extremorum. Cum ergo in hac secunda conclusione non procedamus sub præcisione, & appellatione formalis conceptus: id enim pertinet ad primam conclusionem, sed simpliciter an essentialiter in re prædicetur, & connectatur essentia tum personis, & personæ cum essentia, ita vt istæ prædicationes in re sint per se in primo modo Deus est Pater, Pater est Deus, sicut si inquireremus an corpus, & substantia prædicentur in re essentialiter de animali, & nunc etiam inquirimus an paternitas sit prædicatum essentialiter Deitatis, & Deitas essentialiter prædicatum paternitatis, ita vt essentialiter sint connexa, quid oportet diuertere responsionem ad prædicationem factam de aliquo sub præcisione aliqua, & appellatione?

Soluntur argumenta.

18 Primò arguit. autoritatibus tum SS. PP. tum D. Thom. qui planè videntur sentire nec relationes, nec attributa esse de substantia diuinitatis, nec ad eius essentiam pertinere. Autoritate ex Patribus sunt: August. in 7. de Trinit. c. 2. & 4. & super Psal. 98. dicit *Patrem alio esse Patrem, alio Deum, quia quod est, ad se dicitur, Pater autem ad Filium dicitur*. Et similiter docet Verbum non eo esse Sapientiam, quo Verbum, & idem est de essentia. Item in 5. de Trinit. c. 6. docet relationes dici de Deo, non secundum substantiam, nec secundum accidens, sed vt ad aliquid: Ergo de conceptu relationis non est substantia diuina, neque de conceptu substantiæ

substantiæ relationes Item Nazianz. oratione 44. loquens de personis: *Neque substantiam*, inquit, *secernunt, verum circa substantiam secernuntur*, Athanasius Dialogo 2. de Trinit. contra Anomæum, inquit, *Generationem non esse quiddam essentialē*, ergo non pertinet ad essentialitatem Dei. Isidorus 7. *Ethymolog. c. 1. Deum non esse essentialiter, quod relatiuē ad quamcumque personam est*. Damasc. lib. 3. de fide c. 6. *Characteristica, hypostaseos, non natura sunt*. Cyrillus Alexandrinus 2. *Thesauri c. 3.* docet extrinsecē se habere ad essentialitatem relationem qua distinguitur persona. Anselmus in *Monolog. cap. 14. Si quid de summanatura dicitur relatiuē, non est eius significatum*.

Conf. ex D. Thom. qui in 1. dist. 34. q. 1. art. 1. ad 4. expressē dicit, quod *De intellectu persona oportet esse aliquam rationem, scilicet relationem, quæ non est de intellectu essentiali*. Et in 1. ad Anibald. dist. 33. unica art. 4. docet, quod *Proprietas ad essentialitatem se habet disparatē, ad personam autem se habet per modum forme*. Quomodo ergo est de conceptu essentiali, & essentialiter prædicatur de illa, si disparatē se habet? Adhuc virgentius in qu. 8. de potentia art. 2. ad 6, dicit *hanc prædicationem non esse per se: essentialis est paternitas*: ergo non est de conceptu essentiali formaliter. Item in hac 1. p. q. 33. art. 3. ad 1. inquit, *quod Communia absolute includuntur in intellectu propriorum, sed non e conuerso. In intellectu enim persona Patris intelligitur Deus, sed non conuertitur*. Quid clarius potuit D. Thom. dicere contra secundam partem nostræ secundæ conclusionis.

Respon. ad primam authoritatem August. quod illam expressē sibi obiicit D. Thom. qu. 8. de potentia art. 2. in argumento 14. Et respondet S. D. At 14. *Dicendum quod Deus dicitur non eo Deus, quo Pater, propter diuersum modum significandi diuinitatis, & paternitatis, ut expositum est*. Exposuerunt autem solutione ad 4. quod relationes diuinæ licet significant id quod est diuina essentialitas, non tamen per modum essentialitatis, quia non per modum inexistētis, sed per modum se habentis ad aliud. Quare cum dicit August. alio esse Patrem, alio Deum, intelligitur de alio ex parte modi significandi, non ex parte rei significatæ. Ex hac enim parte dicit Aug. 7. de Trinit. c. 6. quod *Cum dicimus personam Patris, non aliud dicimus quam substantiam Patris*. Secundum locum August. eodem modo interpretatur S. Th. loco citat. ad 13. & in hac qu. ar. 2. ad 1. utrobique enim illum sibi obiecit, & soluit, dicendo quod relationes non dicuntur de Deo substantialiter, seu quoad substantiam ex parte modi significandi, quia non modo substantiæ significantur, ut per se, & ad se sed modo relatiuē, ut ad alterum. Ex parte tamen rei significatæ substantia sunt. Eodem sensu accipe quoties apud aliquos PP. audieris attributa Dei non significare substantiam, sed aliquid circa substantiam, ut apud Damasc. lib. 1. de fide c. 4. Basilium lib. 1. contra Eunomium, Nazianzenum orat. 38. & 42. Iustinum q. 3. Gentil. & alios: intelliguntur enim significare substantiam in modo significandi, non in ipsa re significata.

19 Ad locum Nazianz. in argumento allatum, dicimus extra rem adduci: Sensus enim eius est planus, quod personæ substantiam non secernunt, id est, non diuidunt substantiam, sed circa ipsam secernuntur, quia inter se distinguuntur, non ab ipsa substantia. Explicauit enim Theologus vim illius nominis substantiæ, quæ tunc temporis controuertebatur an significaret hypostasim; & sic multiplicaretur in Deo; an naturam, & sic non diuideretur. Et ita in æquiuocatione huius nominis valde tunc laboratum est propter Arrianorum dolositatem il-

los simplices decipientium, ut plures substantias in Deo concedendo, ipsi diuersas naturas inferrent. Vnde Nazianz rectē dixit, substantiam non secerni per personas; quia nomen naturæ est, nec illa per personas diuiditur. Sed hoc quid ad præsentem controuersiam? Ad locum Athanasij dicitur generationem non esse aliquid essentialē, quia est notionale: distinguimus enim notionalia ab essentialibus, non quia essentiali connexionē de essentiali non prædicentur, sed quia conceptu relatiuē dicuntur, & sunt propria personarum, cum essentialia sint absoluta, & communia. Eadem est explicatio Isidori, scilicet Deum non esse essentialiter, quod relatiuē est, quia relatiuum est notionale, non essentialē; & sic distinguit essentialiter esse contra notionaliter esse, non tamen negat essentialiter conuenire notionalibus, seu relatiuis in quod esse diuini est. Ad Damascenum iam supra diximus quod hypostases non sunt naturæ sub conceptu naturæ propriæ, & specifico, & secundum modum significandi, quatenus natura significatur modo communicabili, hypostases modo incommunicabili, non tamen negat esse naturam, sumpta natura pro essentiali, seu esse diuino, modo quasi transcendentali se habendo ad omnia, quæ in Deo sunt. Et sic sensus est quod characteristica in Deo, seu notionalia, non sunt naturæ, id est, non sub conceptu naturæ sed ad hypostasim seu personam pertinent. Ad Cyrillum dicitur relationem extrinsecē se habere ad essentialitatem, tum ex parte modi significandi, quia non per modum essentialitatis, sed extra illum significatur; tum quoad conceptum proprium, & specificum essentialitatis in ratione naturæ, cui conceptui formaliter, & quoad sui expressionem extrinsecē se habet relatiuē, licet in ratione conceptus transcendentalis, & entitatis increatæ intrinsecē illam in se includat.

Ad Conf. ex variis locis D. Thom. Resp. in 10 primo loco, cum dicit relationem esse de intellectu personæ, non de intellectu essentiali, loqui de relatione ex parte modi significandi, non ex parte rei significatæ; Et iterum loqui de essentiali pro conceptu naturæ proprio, & specifico, ut natura est condistincta ab attributis, non de conceptu essentiali pro omni esse diuino, & actu puro. Et hinc etiam apparet quod quando D. Thom. in aliquo ex his locis docet relationem contraponi essentiali, quod plus sonat, quam distinguere ratione ab illa: nam attributa distinguuntur, & non contraponuntur: dicit enim ly *contraponi* esse oppositum; & sic videtur dicere quod in quantum contraponitur non est de conceptu eius. Sed resp. quod ly *contraponi* est ex parte modi significandi opponi, non ex parte rei significatæ; & sic solum sequitur quod ex modo significandi, scilicet substantia, ut ad se, relatio ut non ad se, seu ad aliud contraponuntur in ly *ad se*, & non ad se absolute dici, & non absolute, licet ex parte rei significatæ non contraponantur. Vel secundò, relatio non est de conceptu essentiali, tanquam prædicatum adæquatum, & conuersibile cum ipsa, & ut constitutum essentialis rationis. Non tamen negat esse de conceptu essentiali tanquam quid inadæquatum illi, siquidem essentialitas ita includit in se vnam relationem, quod non excludit aliam, debet enim habere correlatiuum. Nec repugnat in vno conceptu essentiali dari vnum prædicatum magis amplum de se, ut animal, aliud minus amplum, illique inadæquatum, scilicet rationale, licet in hoc non teneat exemplum, quia animal, ut est in homine singularizatum, & determinatum adæquatur rationali; ut autem ab-

strahit

strahit, & genericè sumitur, non adequatur illi. Essentia autem diuina in se singularis existens communis est tribus personis. Vnde habet privilegium rei vniuersalis abstractæ, v. g. generis, ita quod essentialiter connectatur cum personis, seu relationibus, nec tamen conuertibiliter; sicut si daretur animal abstractum à parte rei, vt posuit Plato, identificaret sibi differentias específicas, nec tamen conuertibiliter, & adequatè cum qualibet earum se haberet. Denique relatio non ingreditur conceptum essentiae vt prædicatum constituens, sed vt terminans; & sic essentialiter illi conuenit tanquam modus, & terminus eius. Sic autem intelligimus S. Thomam, quia ipse sic explicat in eodem loco, qui citatur *dist. 34.* hoc eodem exemplo de vniuersali respectu inferiorum, licet cum differentia dicta. Et sic ponit non esse relationem de intellectu essentiae quo nullo modo ab ipsa differt; quod est non esse de intellectu eius per adæquationem, & per modum prædicati constitutiuum, non modificatiuum, cum aliis locis *suprà* relatis explicauerit essentialiter, & per se relationes prædicari de Deo.

20 Ad secundum locum ex *q. 8. de potentia*, S. Thom. dicit hanc propositionem non esse per se *Essentia est paternitas*, ex parte modi significandi, non ex parte rei significatæ: nam expressè concedit in *hac 1. p. q. 39. art. 6. ad 2.* quod *tam ista est per se. Pater est Deus, quam ista Deus est Pater.* Non est etiam per se, sumendo essentiam pro conceptu formali essentiae, seu naturæ, vt distinguitur à conceptu formali attributorum, & personarum, sub hac præcisione, & formalitate non est per se, quia non conducit, aut pertinet ad illam formalitatem, seu præcisionem conceptus, licet illi rei conceptæ per se connectatur, & de illa essentialiter prædicetur. Vnde D. Thom. in illo eod. loco dicit quod, *nec etiam essentia prædicatur per se de paternitate*; cum tamen relatio non habeat aliam essentiam quam diuinam; & sic constat quod pacificat semper D. Thom. has propositiones, Deus est Pater & Pater est Deus, vel essentia diuina, quia vtramque facit per se, in *hac quæst. 39.* vtramque non per se, in *quæst. 8. de potentia*, quod est euidentis signum locutum fuisse D. Thom. sub diuersis considerationibus, in *q. 39.* ex parte rei significatæ, in *q. 8. de potentia* ex parte modi significandi, vel etiam secundum præcisionem, & formalitatem proprii conceptus quod satis indicat ibi S. D. dum dicit *per se prædicari aliquid de aliquo quod prædicatur de eo secundum propriam rationem*, hoc est sub formalitate proprii conceptus.

21 Ad tertium locum Respond. quod ibi negat D. Thom. propria esse de conceptu communium, loquendo de conceptu sub formalitate, & præcisione eius quod est commune; & eius quod est proprium, non de conceptu absolute, & secundum realitatem, & essentiam; vt est in se. Et patet hoc, quia loquitur de communibus, & propriis, secundum ordinem intellectus nostri, qui vtrique non ponit ordinem, id est, prius, & posterius in istis conceptibus nisi quatenus vnumquodque intelligit secundum propriam formalitatem, & præcisionem, accipiendo naturam sub conceptu naturæ, & attributum sub conceptu proprietatis, & relationem sub conceptu terminantis, &c. sic enim ea quæ sunt priora sunt de conceptu posteriorum, & communium, quia essentialiter illa præsupponunt secundum suos formales conceptus, sed non è conuerso posteriora non supponunt priora; & sic non sunt de conceptu illorum, quia etiam ratione in ipsis prædicatis absolutis potest id reperiri, quia voluntas essentialiter supponit intellectum, seu intellectiuam naturam, non è

Ioan. a S. Thom. in 1. part. D. To. Tomus alter.

conuerso, & æternitas supponit immutabilitatem, non è conuerso. Itaque attendendo ad ordinem intellectus nostri, & loquendo sub hac formalitate, quatenus ponit ordinem in istis conceptibus, communia sunt de intellectu priorum, non è conuerso. Et sic idem est dicere, quod intelligitur in conceptu personæ patris Deus, ac dicere quod præintelligitur, seu præsupponitur ad conceptum Patris, sicut animal ad conceptum hominis. Et hoc deducitur ex illis verbis S. Tho. in initio illius solutionis ad 1. quod communia absolute dicta secundum ordinem intellectus nostri sunt priora, quam propria. Si ergo secundum ordinem intellectus nostri procedit etiam inclusio in intellectu priorum, est secundum illum ordinem, & prioritatem, id est, præsuppositiuè includuntur, non è conuerso. Potest etiam dici quod communia includuntur, & sunt de intellectu priorum, non solum præsuppositiuè, sed etiam formaliter, quia absoluta, & communia sunt constitutiuæ priorum, & similiter propria non sunt de intellectu communium, sicut persona Patris non intelligitur in conceptu Dei, scil. adæquatè, & conuertibiliter cum ipso, aut tanquam constitutiuum naturæ Dei, bene tamen inadæquatè, & tanquam modus seu terminus diuinæ essentiae, vt explicatum est.

Secundò arguitur ex Patre Suarez ratione quæ ipsi videtur euidentis. Quidquid est de essentia Dei, est de essentia singularum personarum, illisque communicatur, sed tres relationes non sunt de essentia singularum personarum, quin potius vna persona opponitur, & non communicatur alteri: ergo non sunt de essentia Dei. Maior prob. tum quia singulæ personæ sunt verus Deus: ergo quidquid essentialiter conuenit, & prædicatur de Deo, conuenit personis, tum quia in Concilio Lateranensi c. *Damnatus* & in Florentino, dicitur Patrem communicasse Filio totam essentiam, non verò hoc quod est esse Patrem: ergo paternitas non potest pertinere ad conceptum, & constitutionem essentiae, quia sine paternitate inuenitur, & communicatur tota essentia. Minor autem manifesta est, quia vna persona, & vna relatio non est alia: ergo non est de conceptu, & essentia alterius, siquidem ei opponitur.

Conf. In illo priori originis quo Pater intelligitur constitutus, & potens generare, & nondum intelligitur Filius generatus, intelligitur tota, & integra, & perfecta diuinitas, & tamen non omnes relationes, & personæ ibi intelliguntur: ergo non omnes relationes sunt de essentia, & conceptu diuinitatis, etiam inadæquatè. Conseq. est certa, quia tunc nondum intelligitur Filius, & intelligitur essentia plenè, & perfecte: ergo filiatio non intrat constitutionem, & plenitudinem istius essentiae. Anteced. verò prob. quia in illo priori intelligitur in Patre totum, quod potest communicare Filio ex vi generationis: communicat autem totam essentiam plenam, & perfectam: ergo tota essentia pro illo priori plenè constituta, & essentialiter intelligitur, nec tamen intelligitur tunc filiatio.

Conf. 2. quia essentia est vna, & simplex, nec in ratione essentiae vllam distinctionem admittit, relationes autem distinctionem admittunt; similiter essentia est absoluta, & constituitur absoluto: ergo relationes non possunt pertinere ad constitutum essentiae: ergo neque de eius essentiali conceptu esse. Et in hoc fundatur argumentum quod communiter solet fieri quia tota essentia communicatur Filio, & non communicatur paternitas: ergo paternitas non est de conceptu, & essentiali constitutione essentiae.

Denique quia, si relationes essent de conceptu essentiae, non posset vnum præcindere ab alio,

I

sicut

sicut conceptus hominis non praescindit à rationali, quia est de essentiali ratione hominis; at conceptus essentialiter praescindit à relatione, & è contrariis: ergo unum non est de conceptu alterius, aliàs omnia essent in Deo formaliter idem, & non solum identice, si unum esset de formali, & essentiali conceptu alterius.

Resp. argumentum illud quod Suarez videtur euidens, & planè sophisticum, & peccare mutando *quid, in ad aliquid*, quod S. Thom. vocat fallaciam accidentis in diuinis. Igitur distinguenda est maior. Quidquid est de essentia Dei, est de essentia singulorum personarum, distinguo, quidquid est de essentia Dei tanquam quid, seu per modum quiditatis, concedo: hoc enim commune est omnibus personis: quidquid est de essentia Dei tanquam modus, tanquam ad aliquid quod est modus inadæquatus (quælibet enim relatio non adæquat totam essentiam, cum debeat in illa dare locum suo correlatiuo) nego. Et sicut est sophisticum argumentum quod formant hæretici: Quidquid entitativè, seu realiter est Deus, aut essentia Dei, est in qualibet persona, v. g. in Patre: sed filiatio est realiter, seu entitativè essentia Dei: ergo filiatio est Pater; in quo sophismate euidenter mutatur *quid, in ad quid*, & maior neganda est absolute, aut distinguenda: Quidquid entitativè est essentia diuina per modum quiditatis, est in Patre, verum est; quidquid est essentia diuina per modum relationis, seu ad aliquid, nego. Prorsus idem peccatum inuenies in argumento Suarez, solum mutando illum terminum *entitativè, & realiter* in illum terminum *essentialiter*, & dicendo: Quidquid est essentialiter Deus, seu de essentia Dei, est in qualibet persona, v. g. in Patre, filiatio est essentialiter Deus, seu de essentia Dei: ergo est in Patre. Posse autem loco illius termini entitativè poni ly *essentialiter*, & sic utrumque sophisma eodem pede claudicare constat, quia Deus quidquid est, essentialiter est: sicut enim ipse Suarez concedit *suprà c. 7.* quod ista est bona consequentia Pater est Deus: ergo est essentialiter Deus: similiter ergo ista erit bona, Deus est Pater: ergo essentialiter est Pater, quidquid enim Deus est, essentialiter est: nullum enim prædicatum Deo conuenit accidentaliter, sed per intimam, & essentialissimam connexionem, siquidem ex vi sui essentialis, & formalis conceptus, qui est actus purus, habet sibi annexum quidquid sibi conuenit: ergo idem est conuenire Deo aliquid in re, & conuenire essentialiter, quia connexio diuina cum suis prædicatis est summa; & sic essentialissima. Et hoc argumentum sic soluit S. Thom. & in eisdem ferè terminis proponit

23 Dices: Implicat quod aliquid sit essentialiter connexum alicui, & ingrediatur conceptum essentialem eius; & tamen sit ei inadæquatum, sicut si modus unionis ingreditur constitutionem hominis, tanquam modus, implicat quod non sit illi adæquatus, & inueniatur vbicumpue inuenitur homo: ergo hoc quod dicimus de essentiali adæquato vel inadæquato est merum commentum ad eludendam vim argumenti.

Resp. negando antecedens, quando essentia aliqua ob sui amplitudinem, & eminentiam, non vno solum modo, sed pluribus petit terminari. Et de hoc non possumus exemplum omnino quadrans inuenire in rebus creatis, sed inueniremus simile, si genera, & species, ut posuit Plato, essent à parte rei subsistentia: tunc enim essentialiter identificarent sibi inferiora sua, siquidem essentialiter essent vniuersalia, peterentque inferiora, & inadæquate ef-

sent cum quolibet inferiori diuisione sumpto. Essentia autem diuina habet vim termini communis respectu personarum, licet singularis, & subsistens forma sit; unde admittit illam rationem connexionis essentialis inadæquate, vel adæquate, ut dictum est, quod in rebus creatis non est videre. Et hoc totum nascitur ex illo fundamento, quod Deus quidquid realiter est, essentialiter est: constat autem quod essentia diuina realiter, & entitativè est Pater, & non est adæquate Pater, id est solum Pater, quia etiam est Filius: ergo est inadæquate: ergo etiam est essentialiter inadæquate, quia hæc est diuinitatis vis, ut idem sit in ea esse realiter tale, & essentialiter tale, id est, per summam connexionem.

Ad 1. Confirm. Resp. quod in illo priori originis intelligitur à nobis tota essentia diuina, sed non totaliter, quia non explicatur pro illo signo omne quod pertinet ad essentiam diuinam, etiam tanquam modificatiuum, & terminatiuum eius inadæquate: quia enim illa prioritas non est prioritas rei, sed intelligentiæ, & rationis, ibi tunc est essentia cum omni eo quod pertinet ad se, etiam notionaliter, & relatiue; sed quia nos per nostram intelligentiam diuidimus id quod ibi est, concipimus id quod essentia quantum ad absoluta, & quantum ad id quod communicabile est per generationem, non quantum ad relatiua, & modificatiua essentia, quod est non totaliter exprimere quæ ad essentiam pertinent, licet tota essentia exprimat. Et licet pro illo priori Pater intelligatur comprehendere se, & totum quod est in Deo, non tamen hoc conuincit quod pro illo priori intelligatur persona filij, ut producta, licet intelligatur obiectiue, Patre attacta, & cognita, siquidem ex cognitione sui, & creaturarum procedit, ut *infra disp. 15.* ostendimus: ergo prius intelligitur cognosci ut obiectum, quam exprimi, & procedere ut genitum, quia ex cognitione Patris generatur.

Ad secundam Confirm. Respond. quod essentia vna existens non admittit distinctionem in absolutis, bene tamen in relatiuis: Vnde quoad absoluta non constituitur relatione sub formalitate, & præcisione absoluti. Sed absolutum, ut est ratio non sistens in ratione absoluti, sed completens etiam genus relatiuum ob sui eminentiam, sic etiam in relatiuo constituitur, quia pertinet ad illam essentiam, ut est actus purus, & ambiens omnem perfectionem, & rationem diuinam, etiam essentialiter continere relationem, quia si realiter continet, etiam essentialiter, & ab intinseco. Et sic essentia, ut dicit præcisè conceptum naturæ condistinguitur à relatione, nec per eam constituitur in tali conceptu, quia relatio pertinet ad munus, & conceptum personæ, non naturæ, ut autem dicit rationem quasi transcendentem actus puri, & entis increati, sic utrumque genus includit, & absolutum, & relatiuum, relationesque essentialiter includit ut terminos, & modificatiua quadam essentia.

Et cum vrgetur commune argumentum, quod communicatur tota essentia, & non paternitas; distinguo, communicatur essentia sub conceptu absoluto, & sub præcisa ratione essentia, concedo; sub omni modo, & inclusione talis essentia, nego, quia non sub modo paternitatis. Item communicatur tota essentia, sed non totaliter, id est, non sub omni modo incluso in tali essentia pertinente ad eius terminationem, & subsistentiam. Et sic relatio non est de conceptu essentia, constituens rationem absolutam, & quiditatiuam, est tamen de conceptu essentia ut modificatiuum, & terminatiuum eius.

Ad

²⁶ Ad id quod ultimò proponitur. Resp. quòd id quod est essentialē, & intrinsecum alicui, potest ab eo præscindere, si inadæquato, & imperfecto conceptu concipiatur, non si perfecto, & adæquato, sicut qui concipit hominem sub conceptu generis proximi, v. g. animalis, & differentia ultimæ, scilicet rationalis, essentialē hominis concipit, licet non explicet gradus superiores ut corpus, substantiam, &c. Et tamen quis neget hos gradus esse homini essentialē? Nec tamen ab illis præscindit essentialē hominis præcisione exclusivā, quasi illos non includat, aut impotentia ad eos sit, sed præcisione non expressivā, seu per non explicationem, quia licet ibi includantur, non tamen ibi explicantur. Vt enim advertimus *præced. tomo disput. 4. art. 6.* duplex est præcisio, alia per non inclusionem, quando aliquid ita segregatur ab alio, quòd solum remanet in potentia ad illud: alia per solam non expressionem, quando aliquid actu quidem includit aliud, sed non explicat illud, qua ratione transcendentia præscindunt ab inferioribus, & actus purus, seu diuina essentialē à suis attributis, & rationibus quas includit, nunquam ab illis sic præscindit, quòd remaneat in potentia, sed potest sic explicare unum, quòd non aliud, licet omnia essentialiter includat: quia non plenè, & totaliter explicatur totum quod pertinet ad essentialē. Cùm verò dicitur quòd sic omnia erunt in Deo, formaliter idem, & non solum identicè. Respond. quòd omnia sunt formaliter idem, si ly *formaliter* sit idem quòd essentialiter, seu in primo modo per se: non enim aliter sunt idem. Sed non omnia sunt formaliter idem formalitate præcisionis, & appellationis, sicut nec in quarto modo per se.

²⁷ Secundò arguit. ex P. Vasquez *hic disput. 121. cap. 2.* Relatio concipitur aduenire essentialē: ergo non includere illam formaliter; aliàs si includeret, quomodo ei adueniret. Et præsertim, quia relatio ita concipitur aduenire essentialē, quòd determinat eam: id autem quòd determinatur, non continetur in conceptu determinantis, vel è contra. Nec obstat exemplum de ente, quòd determinatur per modos contrahentes, & tamen in illis includitur. Contra enim est, quia ens non significat aliquam rationem communem, quæ determinatur per particulares, sed solum nomen est commune; in præsentem autem essentialē realiter, & verè communis est personis.

Confirm. 1. quia si essentialē includeretur in conceptu relationis, hæc esset vera, Paternitas est essentialē, unde sequeretur quòd paternitate Deus intelligeret, & paternitate esset sapiens, & similiter filiatione seu verbo, quia essentialē est paternitas, & essentialē est sapiens, & intelligens. Non conceditur autem à Theologis, quòd Deus est sapiens sapientia genita.

Confirm. secundo, quia si relatio includeret essentialē, sequeretur quòd relatio non constituit personam. Consequen- non admittimus, ergo. Sequela probatur, quia persona non est aliud quàm essentialē determinata per ipsam relationem; si ergo relatio includit essentialē, iam relatio est persona: ergo non est id quo constituitur persona, siquidem persona non constituitur persona tanquam forma, sed est res constituta.

Resp. quòd relatio intelligitur aduenire essentialē, non ut aliquid extrinsecum, & totaliter præcisum ab ipsa, quasi essentialē maneat in potentia, & non habeat in se actu ipsam relationem, cùm essentialē sit actus purus, & ad nihil in potentia:

Ioan. a S. Thom. in 1. part. D. Tb. Tomus alter.

dicitur ergo aduenire, & determinare essentialē, non sicut differentia determinat genus ad quòd comparatur tanquam actus ad potentiam, sed ut aliquid magis explicitum, id quòd est minus explicitum, & magis in confuso significatum. Essentialē quippe diuina sub hoc nomine significata solum significat esse diuinum in tota sua amplitudine, & ut in confuso includit omnem perfectionem, cùm verò explicatur relatio, determinatur, & explicatur id quòd determinatam quandam perfectionem aut rationem explicat in Deo, quæ priori conceptu essentialē non explicabatur, licet ibi includebatur, non verò additur aliquid quòd in essentialē vel natura actu, & essentiali connectione non includeretur. Itaque determinatio ista, & aduentus relationis, non fit per additionem unius ad aliud, quia in Deo est impossibilis omnis compositio, etiam per intellectum nostrum, cùm repugnet summæ simplicitati, & actui puro; & consequenter est impossibilis omnis additio, seu accumulatio unius ad aliud, sed ratione actus puri, quidquid diuinum est, actu includit. Fit ergo aduentus, & determinatio relationis ad essentialē per nouam explicationem eius quòd antea non exprimebatur in conceptu illius rei, licet includebatur, non per additionem, aut compositionem unius cum alio. Quòd verò dicitur ens solo nomine esse commune, est dicere, quòd ens non est analogum, sed purè æquiuocum, cuius contrarium ex D. Thom. ostendimus in *Logica q. 13. & 14.*

Ad primam Conf. Resp. veram esse illam propositionem, Paternitas est essentialē, sed non conceduntur aliæ propositiones Paternitate Deus est sapiens, aut filiatione, vel verbo, quia ex modo significandi, fit ibi formalis significatio, & applicatio paternitatis sub proprio, & formali conceptu relativo, sub quo distinguitur ab absoluto. Et sub conceptu relativo constituit Deum relatum, seu Patrem, non sapientem, qui est conceptus perfectionis absolutæ. Vnde cùm significatur aliquid sub formalitate, & præcisione proprii conceptus, non potest concedi, quòd sub illa formalitate, & præcisione tribuat effectum formalem, qui pertinet ad alteram præcisionem, seu formalitatem. Et licet essentialē diuina in re sit totum hoc; & identicè illa re, quæ est paternitas, sit sapiens, & illa re, quæ est sapientia, sit Pater; tamen quia in illa essentialē propter suam eminentiam plures rationes, & perfectiones distinguuntur, & significantur nostro modo intelligendi; idè ex modo significandi aliquem terminum sub aliqua formalitate, & præcisione, non concedimus aliquas propositiones, licet sint circa eandem rem, quæ essentialiter est omnia illa, & intrinsecè, ob diuersum modum significandi. Non enim dicimus quòd per voluntatem procedit Filius, sed per intellectum, & Spiritus S. per voluntatem, & tamen voluntas, & intellectus in Deo sunt omninò unum, & idem essentialiter. Certè non potest negare Vasq. quòd Deitas sit de conceptu intrinsecò, & essentiali Dei, quia per Deitatem essentialiter constituitur, & tamen in doctrina fidei Deus generat, & Deitas non generat, propter diuersum modum significandi terminorum: ergo non mirum quòd licet paternitas sit de essentiali conceptu diuinæ essentialē, & sapientia, &c. tamen paternitas non sit sapiens, sed essentialē propter diuersum modum significandi, & diuersam formalitatem, & præcisionem, qua explicatur unum, & aliud.

Ad secundam Confirm. Resp. illud argumentum esse planè sophisticum, & instari manifestè in

I 2 exemplo

exemplo allato de Deo, & Deitate. Nam Deitate constituitur Deus tanquam forma, & tamen Deitas ipsa est Deus, etiam in concreto: nam quidquid in Deo est, Deus est, & dicere quod diuinitas non sit Deus, impiissimum est, ut Bernardus *serm. 80. in Cantica* dicit contra Gilbertum. Similiter relatione constituitur persona, & ipsa relatio est persona, & est essentia, & est Deus, nec tamen persona constituitur persona, sed personalitate, & relatione, sicut nec Deus constituitur Deo, sed Deitate ut forma; licet etiam ipsa Deitas Deus sit. Quia in diuinis abstracta prædicantur de concretis, & e contra, eo quod ista non differant nisi secundum modum significandi, non ex parte rei significata. Sic ergo ad argumentum in forma dicimus negando sequelam. Ad probationem; Persona non est aliud quam essentia determinata per relationem, distinguo, nihil aliud est quam essentia sub conceptu communi, & quasi transcendentali essentia, nego; sub conceptu essentia, ut est natura terminabilis per personalitates relatiuas, transeat Ad consequentiam: ergo si relatio includit essentiam, iam relatio erit persona, distinguo: si relatio includit essentiam sub conceptu naturæ terminabilis à personabilitate, erit persona, concedo, si includit solum sub communi, & transcendentali conceptu entis increati, quod est commune omni rei diuinæ, sequitur quod sit persona, nego; sed sufficit quod sit personalitas, seu forma terminans, & constituens personam, quæ quidem identicè, & realiter persona est, sed ex modo significandi, solum significatur ut forma, seu terminus personæ, non ut persona ipsa constituta, sicut Deitas significatur ut forma constituens Deum, ex modo significandi, licet ex parte rei significatæ Deus sit. Vnde cum infertur, quod relatio erit persona, si includit essentiam, quia persona non constituitur persona, distinguo, erit persona si includit essentiam cum tali modo significandi, quod significetur per modum constituti ex essentia, ut natura, & relatione, ut termino, concedo; si cum tali modo significandi quod significetur per modum formæ, seu termini constituentis, & includentis essentiam modo communi, & quasi transcendentali tantum, nego; sic enim est essentia per modum formæ personam constituentis, non per modum personæ constitutæ. Et quia essentia diuina omnibus istis modis significari potest, in concreto, & in abstracto, ut forma constituens, & ut res constituta, quia omnia ista Deus sunt cum intra Deum sint, sit quod ex inclusione essentia in relatione quomodocunque, non sequitur quod sit persona, nisi etiam ex modo significandi, significetur ut constitutum, non ut forma constituens. Si autem includat essentiam, & significetur ut forma, non sequitur quod sit persona, sed personalitas.

- 29 Ex his manent etiam soluta quædam inconuenientia quæ tanquam sophismata obici possunt contra nostram sententiam. Nam primò sequitur quod posset filiatio esse de conceptu paternitatis, si est de conceptu essentia: nam essentia est de conceptu patris, filiatio est de conceptu essentia: ergo filiatio est de conceptu Patris. Secundò, sequitur quod essentia posset concipi conceptu relatiuo: consequens est absurdum: ergo & nostra sententia. Sequela prob. quia essentia potest concipi eo conceptu quo constituitur, & est de eius essentia, sed per se constituitur relatione: ergo potest concipi conceptu relatiuo. Minor patet, quia conceptus relatiuus est incommunicabilis, conceptus verò essentia est communicabilis, & ideo essentia non generat, nec generatur, quia relatiue non

se habet. Tertiò sequitur quod aliquid sit de conceptu essentia in Patre, quod non est de conceptu essentia in filio, consequens est absurdum: ergo. Minor patet, quia aliàs non esset eadem essentia in Patre & Filio, siquidem aliquid haberet de conceptu essentiali in vno, quod non in altero. Et sequela prob. quia paternitas est de conceptu essentia non adæquatè, prout in omnibus personis, aliàs paternitas communicaretur Filio, quod est hæreticum: solum ergo est de conceptu essentia inadæquatè sumptæ, scilicet prout in Patre: non ergo est de conceptu essentia, prout in Filio: aliquid ergo est de conceptu essentia in Patre, quod non est de eius conceptu prout in Filio. Quarto, sequitur illud vulgare inconueniens quod Pater non communicaret Filio totam essentiam, quia non communicaret totum quod est de conceptu essentia, scilicet relationem.

Hæc & alia similia sophismata ex dictis solvuntur. 30

Ad primum dicitur peccare illud sophisma sicut & illud vulgare, Pater est hæc essentia diuina: hæc essentia diuina est Filius: ergo Pater est filius; consequentia non valet, etiam loquendo realiter, & identicè, quia mutatur quid in aliquid quæ est fallacia accidentis: ita enim Pater est hæc essentia, & hæc essentia est Pater, quod non adæquatè est Pater, sed etiam Filius, unde non sequitur ex identificatione Patris cum essentia, quod identificetur cum omni alia relatione essentia. Idem peccatum est in eadem consequentia, addito *ly essentialiter*, quia in diuinis perinde se habet quod Pater sit Deus realiter, & quod sit essentialiter, vel etiam Deus sit Pater essentialiter: quidquid enim Deus est, essentialiter est.

Ad secundum distinguitur sequela: sequitur quod essentia possit concipi conceptu relatiuo, sub præciso, & explicito conceptu essentia, & ex modo significandi essentiam, nego; sub alio conceptu explicante modum, & terminationem personalem essentia, transeat: sed hoc non erit sub conceptu essentia, nec ut significatur illo nomine essentia. Et ad probationem quod essentia potest concipi eo conceptu quo constituitur, distinguo, si adæquatè concipiatur, & explicetur, concedo; si inadæquatè, nego; nec enim in conceptu inadæquato, & præciso oportet explicari omne quo constituitur in se, sed omne quo constituitur sub illa præcisione, & explicatione. Essentia autem explicat omne quod est constitutum essentia, sub ratione, *quid*, sed non omne constitutum sub ratione *ad aliquid*, seu sub ratione modi, quia non explicat omne quod est modificatum talis essentia, & hoc modificatum etiam essentialiter est Deus, seu essentia diuina, quia non habet aliam essentiam, & essentia diuina ob suæ perfectionis illimitationem, etiam talem modum essentialiter includit, quia omne esse diuinum essentialiter includit; sed non sub omni conceptu explicat totum quod essentialiter includit; & sic prout explicatur sub conceptu essentia, in quo præscindit à modificatiuis, non explicatur conceptu relatiuo, & incommunicabili, licet relatiuam rationem ibi includat.

Ad tertium Respond. distinguendo sequelam: aliquid est de conceptu essentia, prout in Patre, quod non est de conceptu essentia prout in Filio, distinguo, quantum ad modificationem essentia, transeat, quantum ad constitutiuam essentia, nego, id est quantum *ad aliquid*, sed non quantum *ad quid*. Et sic cum infertur, quod erit alterius rationis essentia in Patre, quam in Filio, distinguo, alterius rationis quantum ad constitutiuam essentia, & quantum ad quid, nego; alterius rationis, quantum ad modi

modificatiuum, & quantum ad aliquid, transeat; opponitur enim vna relatio alteri, & sic quoad hoc est alterius rationis. Vnde non potest sequi, quod aliquid sit de conceptu essentiae in vna persona, quod non sit in alia simpliciter loquendo, sed solum quoad modificationem inadaequatam, & relatiuam.

Ad quartum iam supra responsum est quod Pater communicat totam essentiam Filio, sed non totaliter, & sub omni modificatione, idest, totam quantum ad quid, sed non quantum ad aliquid.

ARTICVLVS III.

Utrum tres relationes dicant tres perfectiones, existentias, & alia similia attributa multiplicent?

Certum est quod sicut diuinitas multiplicari non potest in personis substantiue, ita nec attributa, quae omnino absoluta sunt, & non communiter praedicantur de relatiuo, & absoluto, multiplicari non possunt substantiue.

Et ratio est manifesta, quia in perfectionibus absolutis, nulla datur oppositio, nec relatiua, quia absolutae sunt, nec priuatiua, aut negatiua, vel contraria, quia illimitata sunt, nec ista oppositio per negationem aut priuationem fundari potest nisi in limitatione, & imperfectione, vt *disp. praeced. art. 4.* ponderatum est. Quare attributa ista non magis multiplicari possunt, & distinguere quam diuinitas ipsa. Vnde in Symbolo Athanasij dicitur: *Nontres aeterni, sed vnus aeternus, non tres omnipotentes, sed vnus omnipotens*, &c. quod intelligitur substantiue: nam adiectiue multiplicantur ad solam multiplicationem suppositorum, vnde dicimus esse tres personas diuinas, increatas, coaeternas, coaequales; & in *c. firmiter*, dicuntur omnipotentes, consubstantialis, &c. quod est manifestum, adiectiue ista multiplicari. Sed difficultas est de aliis attributis seu praedicatis, quae non sunt omnino absoluta, sed etiam communiter praedicari solent de relatiuis, & absolutis, quia per modum transcendentalem praedicantur, vt tres res, tres entitates reales, tres vnitates relatiuae, & similia. In quibus aliqua non exprimunt determinatam perfectionem, vt tres realitates, tres vnitates relatiuae, alia perfectionem exprimunt, vt tres bonitates, tres veritates, tres existentiae, tres infinitates, & similia. Et ideo difficultas est, quae nam ex his multiplicari possint, quae non.

Quia tamen fere omnes istae quaestiones dependent ex vna priori difficultate, scilicet an relationes secundum suum proprium conceptum formalem, & non solum ratione essentiae diuinae cui identificantur, sed in sua praecisione, & in sua linea dicant perfectionem; ideo hoc prius discutiendum est, & deinde discutiendum per attributa, seu praedicata, quae possunt relatiue multiplicari.

Relationes diuinae quomodo dicant perfectionem.

Loquendo ergo de relationibus diuinis, non ratione essentiae cui identificantur, sed ratione sui formalis, & praecisi conceptus, vt relatio est, & vt distincta ab aliis generibus, & attributis, duplex est principalis sententia.

Prima tenet relationes secundum suum formalem, & *Ioan. a S. Thom. in 1. part. D. Th. Thomus alter*

lem conceptum, & praecisum, seu quatenus explicant formalitatem *Ad*, non dicere perfectionem, seu non explicare ipsam. Haec sententia attribuitur pluribus Thomistis, Capreolo in *1. disp. 7. qui. 1. ad 3. contra primam conclusionem*, Caiet. *hic art. 2.* Bannez *ibidem*, Ferrar, *2. contra Gentil. c. 9.* & aliis locis, Eandem tenet Scotus in *1. dist. 3. qu. 1. ad 4.* sequitur Molina in *hac qu. 28. art. 2. disp. ultima*, Bellarminus *lib. 2. de Christo c. 12.* Imo & P. Vasquez *hic disp. 122. c. 6.* tenet quidem relationes in Deo dicere perfectionem, sed non perfectiones distinctas, etiam relatiuas, sed vnicam. Quia duplex est bonitas, altera absoluta, & non est aliud quam perfectio integritatis, qua vnaquaeque res habet plenè id quod ad suam rationem formalem, & constitutionem pertinet; alia est bonitas relatiua, scilicet vt aliquid est conueniens alteri. Prior bonitas inuenitur in relationibus quatenus pertinent ad integram, & perfectam Dei constitutionem, quia sine ipsis integer, & perfectus Deus non esset. Sed haec bonitas non sumitur ex relationibus tanquam ex partibus, sed per summam identitatem, vnde non multiplicatur in relationibus, sed est vna, & eadem. Bonitas autem relatiua non conuenit relationibus realiter, quia non distinguuntur ab essentia, vnde non conueniunt illi, nisi secundum respectum rationis, qualis inuenitur eiusdem ad se ipsum. Hanc sententiam Vasquez reputat probabilem P. Alarcon *tract. 5. disp. 3. c. 4. num. 9.* eamque tenet Ruiz *disp. 30. sect. 2.*

Secunda sententia non solum affirmat relationes diuinas importare in suo conceptu perfectionem, sed etiam has perfectiones multiplicari in quantum relatiuas; & sic sub conceptu magis explicito relationis, & sub ipsa formalitate *Ad*, vt *Ad*, importare perfectionem. Ita tenet P. Suarez *lib. 3. de Trinitate c. 9. num. 14 & sequentiis*, & pro ea citat Gabrielem, Heruæum, & alios. Eandem sequuntur aliqui Thomistae, vt Cabrera *3. part. qu. 2. disp. 4.* & in eandem inclinatur Ledesma *de perfectione diuina qu. 3. art. 2.* qui tamen addit non esse admittendum quod aliqua perfectio infinita, etiam relatiua sit ponenda in Patre, quae non sit in Filio, vel è contra, quia licet illa perfectio in re sit infinita, tamen in quantum explicat ipsum *Ad* relationis, non explicat rationem infiniti. Sequitur eandem sententiam M. Cano, & Torres citati à M. Bannez *hic art. 2. dub. 1.* Eandem sententiam vt probabilem defendit P. Alarcon *ubi supra num. 10.* pluresque alios pro ea citat Ruiz *ubi supra sect. 1.* licet ipse *sect. 4. n. 16. & sect. 9. n. 21.* existimet, improprie dici multiplicari in Deo reales perfectiones simpliciter simplices.

Rationes quae in hac parte difficultatem faciunt, pro prima sententia sunt. Inprimis est illud vulgare argumentum à posteriori, quia si relatio, vt relatio, est perfectio: ergo vt opposita, & distincta ab alia, perfectio est, quia relatio, vt relatio opposita est suo correlatiuo: ergo idem est dicere quod sit perfectio, vt relatio, ac dicere quod sit perfectio, vt correlatiua, & vt distincta, seu in quantum distincta ab alia relatione. Quo posito sit argumentum: Sequitur ex hoc quod aliqua perfectio sit in Patre, quae non sit in Filio, consequens est falsum ergo. Sequela prob. Est aliqua relatio in Patre, quae non sit in Filio, Sed in quantum est in Patre, & non in Filio, seu vt distinguitur à Filio est perfectio: ergo aliqua perfectio est in Patre, quae non sit in Filio. Et sicut valet ista consequentia: Relatio prout in Patre, & vt distincta à Filio, est substantia, seu personalitas: ergo multiplicata relatione multiplicatur substantia, cur non valebit eadem



eadem consequentia loquendo de perfectione, si relatio illa, etiam ut opposita, & incommunicabilis alteri perfectionem dicit, & ipsum opponi, & multiplicari, perfectio est? Vnde non potest fieri instantia de ipsa essentia diuina, quia Paternitas est essentia, etiam ut distinguitur à Filio, & tamen non est aliqua essentia diuina in Patre, quæ non sit in Filio. Relicitur tamen hæc instantia, quia essentia diuina non est terminus explicans relationem, nec in essentia opponuntur relationes, sed identificantur, unde prout opponitur paternitas, non dicit essentiam, licet in re illam supponat. At verò opposita sententia dicit quod relatio, etiam ut opponitur alteri, & distinguitur ab illa, & sub formali conceptu relatiuo explicante oppositionem, dicit perfectionem: ergo aliqua perfectio relatiua est in Patre, quæ non in filio. Minor verò argumenti facti probatur, quia si aliqua perfectio relatiua est in ista relatione, v.g. in paternitate, quæ non in filiatione: ergo relatio paternitatis non est infinita in linea, & genere relationis. Patet consequ. Non habet omnem perfectionem illius generis, siquidem aliqua perfectio est in relatione patris, quæ non est in Filio: ergo non est infinita, quia illud est infinitum quod continet omnem perfectionem, nec aliqua ei deest in illo genere, in quo est. Nec potest dici quod relatio Patris eminenter, & virtualiter continet perfectionem, quæ est in relatione filij, licet non sit formaliter relatio filij. Contra enim est quia paternitas non est forma eminentior filiatione, sed omnino æqualis ei: ergo non potest eminenter continere illam, sed vel formaliter debet continere, vel nullo modo.

A priori verò vrget illa ratio: quia relatio licet in subiecto, in quo est sit perfectio ipsius subiecti, tamen respectu termini nullam perfectionem ponit, sed solum suam ei opponit: terminus enim non est aliquid perfectibile à relatione, siquidem perfectibile non opponitur suæ perfectioni, sed eam suscipit, relatio autem opponitur termino: ergo respectu eius perfectionem non explicat; & sic pro ut *Ad* perfectionem non dicit, sed prout *In*, scil. respectu subiecti. Quod non est sic accipiendum, quasi ipsum *Ad* in se perfectionem non dicat, cum reuera *Ad* in subiecto sit, & includat *In*, sed quia illam perfectionem quam dicit, respectu subiecti dicit, non respectu termini. Sed relatio non distinguitur ab alia relatione ex parte sui *In*, quia hoc habet ratione essentiae, sed ratione sui *Ad*, ut tangit terminum, non ut subsistit in se, vel ut est in subiecto: ergo si ratione *Ad* non explicat perfectionem, neque perfectio multiplicatur.

Denique ad explicationem huius mysterij non congruit hæc multiplicatio relationum, sed magis ad illam conducit, quod perfectio semper maneat vna, sicut manet perfectio absoluta, & essentia, sed quod solum in esse respectiuo multiplicentur: ergo si non potest saluari quod perfectio non multiplicetur, licet vna, & eadem omnibus conveniat, multò congruentius est.

Pro secunda autem sententia est illud vulgare argumentum, quia multiplicata entitate reali, necesse est multiplicari id quod ad talem entitatem pertinet; ad ens autem sequitur bonitas vel perfectio: ergo sicut dantur tres reales entitates relationes, sic dabuntur tres perfectiones relatiuæ, quia relatio est passio entis. Et vrgetur hoc amplius relationibus diuinis, quia relatio, etiam ut distinguitur ab alia relatione, in Deo inuenitur formaliter: ergo est capax alicuius perfectionis: nam quod est capax perfectionis maximè elongatur à Deo, qui est summa perfectio: ergo si relatio prout distincta

est formaliter in Deo, oportet quod, prout sic, sit capax perfectionis: ergo distincta perfectionis, quia prout relatio distincta est. Si ergo relatio prout distincta, est capax perfectionis: ergo de facto habet illam, quia quod est capax perfectionis, & de facto non habet, caret illa; & sic erit res imperfecta.

Secundò hoc vrgetur, quia mysterium Trinitatis pertinet ad magnam, & intrinsecam perfectionem Dei, ita quod si careret illo, careret magna perfectione, cum in hoc mysterio eleuetur Deus super omne quod à creaturis imitabile est de Deo. Ergo non solum id quod pertinet ad unitatem Dei absolutam, sed etiam quod pertinet ad distinctionem personarum, & relationum perfectionem importat in Deo: ergo id quod distinctionis est in relationibus, seu relationes, ut distinctæ, perfectiones dicunt in Deo. Et vrgetur seu confirmatur amplius, quia si mysterium Trinitatis est perfectio Dei: ergo paternitas ut distinguitur à filiatione est perfectio in Deo, siquidem sine ipsa, ut distincta Deus trinus non esset: ergo etiam paternitas ut distincta à filiatione est perfectio simpliciter simplex. Patet consequ. quia integrat, & constituit perfectum simpliciter simplex, scilicet mysterium Trinitatis, quia in Deo melius est ipsum mysterium quam non ipsum, & melior est relatio paternitatis, quam non ipsa, quæ est definitio perfectionis simpliciter simplicis. Et in hoc videntur dicta Patrum conuenire, qui dicunt sine personis Deitatem manere imperfectam; Vnde dicit Athanasius oratione contra Gregales Sabellij: *Res condita si non sint, non diminuunt conditorem: proles autem si non coeternaliter coexistat cum Patre, detrimentum affert perfectioni illius substantia.* Et Nazianz. *Non esset Deus, si imperfecta esset; perfecta autem quomodo erit, in qua ad perfectionem aliquid desideraretur: desideratur autem si sanctitate careat, quam quomodo habebit, si spiritum non habeat.* Et denique Cyrillus 2. *Thesauri c. 1. Non potest esse perfecta Deus, nisi Filium habeat, & fructum ex se pariat.* Et sic disput. preced. art. 4. probauimus fecunditatem, & generationem in diuinis ad perfectionem pertinere. Damasc. etiam lib. 1. de fide cap. 11. dicit *Patrem, & Filium distinguere perfectionibus personalibus.* Multiplicationem ergo perfectionum agnoscit. Et in Epistola Agathonis Papæ in 6. Synodo, actione 4. dicitur *diuinitatem Patris, & Filij, & Spiritus S. esse in tribus perfectis subsistentiis, sine in tribus perfectis personis.*

Vltimò: Tres relationes sunt tres subsistentiæ relatiuæ, seu personalitates: subsistentia autem est terminus substantiæ, & ad eius perfectionem spectat: ergo etiam in diuinis subsistentia, quæ est relatio tanquam vltimus terminus incommunicabilis perfectionem importat in quantum incommunicabilis est: ergo in quantum distincta ab alia relatione, & subsistentia: ergo distinctam perfectionem habet vna relatio ab alia.

Et confir. quia si solum in Deo esset vna subsistentia, & personalitas, illa sine dubio esset perfectio, utpote reddens naturam illam vltimò completam, & terminatam: ergo si tres relationes veræ, & propriæ sunt tres subsistentiæ, & personalitates, cur amittent rationem perfectionis in quantum diuersæ, quam haberent si solum essent vna?

Confir. secundò, nam in diuina natura esse communicabilem, maxima perfectio est, & propria talis naturæ: ergo etiam personæ diuinæ in quantum plures dicunt perfectionem. Patet consequ. quia in quantum plures, & distinctæ sunt capaces illius perfectionis infinitæ, quæ sibi communicatur, &

illi

illi perfectioni identificantur, habere autem perfectionem infinitam eique identificari non modica perfectio est, sed maxima. Ergo personæ etiam ut plures, & quælibet ut distincta ab alia maxima perfectio fuit; & sic personalitas Verbi communicata humanitati Christi etiam ut distincta à Patre (paternitas enim communicata non fuit) maximam illi perfectionem contulit, & personæ ipsæ etiam ut distinctæ, & quælibet earum seorsum ratione sui maximo amore, & veneratione sunt dignæ cum adorentur latria: ergo sunt maxime perfectæ.

8 Inter has sententias probabilius iudico secundum mentem S. Thom. relationes etiam secundum se, & in linea, & formalitate relationis perfectionem dicere, sed non explicare illam per ordinem ad terminum, sed per ordinem ad subiectum, & fundamentum. Et consequenter non multiplicari istas perfectiones in tribus relationibus, seu personis, quia non multiplicatur fundamentum, sed eadem perfectione etiam ut relativa est gaudere.

Prima pars conclusionis desumitur imprimis ex D. Thom. *suprà qu. 27. art. 2. ad 3.* ubi inquit quod *In ipsa perfectione diuini esse continetur, & Verbum intelligibiliter procedens, & principium Verbi, sicut, & quacumque ad eius perfectionem pertinent; Sed Verbum, & principium Verbi sunt personæ, & relationes ut distinctæ: ergo si continentur in perfectione diuini esse, sicut quæcumque ad eius perfectionem pertinent, utique Verbum, & principium Verbi ad perfectionem pertinent. Et qu. 8. de potentia, artic. 1. ad 1.* inquit, quod *Diuina essentia quia comprehendit omnium generum perfectiones, nihil prohibet relationem in ea inueniri. Quæ ratio nihil valet, si relatio non dicat perfectionem. Item infr. qu. 29. art. 3.* dicit S. Thom. quod *Persona significat id quod perfectissimum est in tota natura, scil. subsistens in natura rationali. Vnde cum omne illud quod est perfectionis Deo sit attribuendum, eo quod eius essentia continet in se omnem perfectionem, conueniens est, ut hoc nomen persona de Deo dicatur. In art. autem 4. immediato dicit quod Persona in diuinis significans relationem secundum quod facit distinctionem, & significat illam ut subsistentem. Igitur relatio ut subsistens, & ut personalis, quod utique conuenit relationi diuinæ secundum se, & in linea, & formalitate relationis, licet non sub exercitio ad terminum, sed ut fundata est in suo fundamento, perfectionem dicit, siquidem nomen personæ, ut dicit S. Thom. est nomen perfectionis, ideoque attribuitur Deo ut persona relativa est, & relatione constituta. Videndus est etiam S. D. qu. 9. de potentia art. 3. ubi distinguit in persona naturam, & modum quo existit natura. Et quid natura est dignissima, scil. intellectualis, modus autem existendi, quem importat persona est dignissimus, scil. ut sic per se existens, & cum omne quod est dignissimum in creaturis sit Deo attribuendum, consequens est ut nomen personæ attribatur Deo. Igitur D. Thom. ex eo quod modus subsistendi dicit perfectionem, attribuit illum Deo; sed relatio prout distinguitur nostro modo intelligendi à natura est formaliter, inodus iste per se existendi, & incommunicabilis subsistentiæ, quia ipsa est quæ formaliter constituit personam in ratione personæ subsistentis incommunicabiliter, & distinctæ ab aliis personis, ergo relatio intra lineam relationis in Deo perfectionem importat hoc ipso quod modum personalitatis importat. Denique in 4. contra Gentil. c. 14. circa 9. & 10. argumentum fatetur D. Thom. quod relatio in creaturis habet esse dependens non solum à substantia, sed etiam ab aliis accidentibus, ideoque imperfectissimum, & postremum; sed in diuinis re-*

latio non habet esse dependens, neque imperfectum. Ex quo colligit, quod *Ex imperfectione, quæ in relationibus creatis esse videtur, non sequitur, quod persona diuina sint imperfecta, quæ relationibus distinguuntur, sed sequitur quod personarum diuinarum minima sit discretio. Si ergo ex relatione etiam ut distinguente personas non sequitur imperfectio in diuinis: relatio ergo perfectionem debet importare in vi conceptus sui, etiam quatenus relatio distincta seu distinguens est.*

Quod verò hanc perfectionem non explicet per ordinem ad terminum, & sub exercitio *Ad*, ut ly *Ad* tangit terminum, sed ut tangitur, & nascitur ex fundamento, sumitur ex ipso D. Thom. in 1. dist. 26. qu. 2. art. 2. ad 3. & 4. ubi dicit, quod *Quamuis relationi ex hoc quod ad alterum dicitur, non debeatur quod sit res quadam; est tamen res aliqua secundum quod habet fundamentum in eo quod refertur; & ex hoc ulterius habet in quantum diuina, quod sit hypostasis, vel substantia: & ideo facit realem hypostasum distinctionem. Et clarius in 1. ad Anibald. eadem dist. 26. qu. 2. art. 1.* Sciendum, inquit, quod relatio dupliciter potest considerari. Vno modo, quantum ad id ad quod dicitur, ex quo non habet quod ponat aliquid, quamuis etiam ex hoc non habeat quod nihil sit: sunt enim aliqui respectus, qui sunt aliquid secundum rem, quidam verò qui nihil, quod in aliis generibus non inuenitur. Alio modo quantum ad id in quo est; & sic quando habet causam in subiecto realiter inest, & ipse respectus est realis. Et idem ferè tradit in hac qu. 28. art. 1. Et ratio huius manifesta est, quia illud *Ad*, quod in se reale est, & in se perfectio est respectu termini, non ponit nisi respicientiam, & contra ipsum est: ergo non explicat, prout sic, realitatem, quæ sit, sed ad quam realitatem sit, nec respicientia ponit quidquam in termino, nisi esse respectu, nec à termino accipit perfectionem, sed solum correspondentiam, & correlationem, nec comparatur ad ipsum ut perfectibile ad perfectionem, sed ut parus terminus. In se ergo realitatem habere potest ratione fundamenti, quia ex ipso habet esse, & actualitatem, omnis autem perfectio dicitur ratione alienius esse, vel actualitatis, omnis realitas aliquam existentiam respicit, per terminum autem non habet esse, neque existentiam, seu actualitatem, sed tantum terminationem, ex ipso ergo non habet realitatem, sed ad ipsum. Et ita fundamentum est causa realitatis, terminus autem conditio, seu id circa quod exercetur realis oppositio, quia sine termino realis respicientia, & oppositio non esset. Vnde D. Thom. dicit qu. 8. de potentia art. 1. ad 3. quod *In quod est proprium relationis, scilicet opponi, & distinguere, realiter in diuinis inuenitur. Quare non negat D. Thom. nec ullus eius discipulus negare potest quod relatio, ut relatio, & ut exercet *Ad*, & ut tangit terminum, realis sit, & oppositio, atque distinctio eius sit realis, sed dicimus quod realitatem hanc, & esse, & actualitatem, & consequenter perfectionem habet ratione fundamenti, & in illo ponit id quod est. Respectu verò termini exercet hanc realitatem quam ex fundamento habet, non ponendo eam in illo, sed contraponendo illi, aut respiciendo, & hoc est non explicare eam per ordinem ad terminum, quasi in eo ponendo, aut ab eo habendo.*

Quoad secundam verò partem conclusionis, 10 quod perfectio quam dicit relatio, & quam ex fundamento haurit, & secundum quam respicit oppositum correlatiuum, non multiplicetur, sumitur imprimis ex S. Thom. in 1. p. qu. art. 4. ad 2. ubi dicit: *Sicut eadem essentia qua in Patre est paternitas, in Filio est filiatio, ita eadem dignitas, qua in Patre*

est paternitas, in filio est filiatio. Vnde dicitur, quod quidquid dignitatis habet Pater, habet Filius, nec sequitur, paternitatem habet Pater: ergo paternitatem habet Filius: mutatur enim quid in ad aliquid: eadem enim est essentia, & dignitas Patris, & Filij; sed in Patre est secundum relationem dantis, in Filio secundum relationem accipientis. Vnde fit argumentum: Quæcumque perfectio, etiam relatiua, quæ est in Patre, pertinet ad dignitatem eius: nam esse Patrem, seu principium personarum dignitas eius est, & hoc est quid relatiuum, sed dicit S. Thom. quod eadem est dignitas paternitatis, & filiationis: ergo eadem perfectio relatiua. Item in *qu. 8. de potentia art. 1. ad 11.* dicit S. Thom. quod *Nulla modo concedendum est, quod aliud sit esse relationis in diuinis, & aliud essentia. Ratio autem non significat esse, sed esse quid, id est quid aliquid est. Vnde due rationes rei non demonstrant duplex esse eius.* Si ergo esse relationis, in Deo nullo modo concedendum est quod sit aliud ab esse essentia, licet sit alia ratio relationis, & essentia, & omnis perfectio, & bonitas secundum D. Thom. *1. par. qu. 5. art. 2.* sumitur ex ordine ad esse, oportet quod secundum D. Thom. perfectio, & esse relationis, etiam ut relatiuum, non multiplicetur.

Denique videndus est S. D. in *1. dist. 33. quæst. 1. art. 1. ad 2.* ubi inquit, quod *Sicut in Filio est esse essentia, est esse paternitatis, quia in diuinis non est nisi unum esse.* Vnum manifestum est, quod condistinguendo esse essentia ab esse paternitatis, non potest accipi esse paternitatis, nisi pro esse relatiuo: dicit autem S. D. quod sicut est in Filio esse essentia, ita est esse paternitatis: ergo illudmet esse relatiuum quod est Patris, est Filij, & non solum esse absolutum quod est essentia. Et reddit rationem quia est tantum unum esse: ergo sentit, quod esse relatiuum est tantum unum, & non multiplicatur, etiam ut distinguitur ab esse essentia. Perfectio autem relatiua regulatur penes esse, seu actualitatem relatiua, sicut perfectio absoluta penes esse, & actualitatem essentia: ergo sentit D. Thom. non multiplicari perfectionem relatiua in Deo, licet multiplicetur respectus, & relatio distinguatur: nam postquam D. Thom. dixit quod esse paternitatis est in Filio, quia est tantum unum esse, subdit, quod *Paternitas habet rationem paternitatis, quæ est alia à ratione essentia: unde secundum suam rationem potest respectus esse in Patre, & non in Filio, scilicet distinguere Patrem à Filio.* Ecce quomodo officium distinguendi secundum rationem respectus, & relationis, faretur D. Thom. esse in relationibus diuinis, non distinguendo, nec multiplicando esse ipsius relationis, seu paternitatis ut distinguitur ab esse essentia: ergo pari forma perfectio relatiua non multiplicabitur, licet relatio secundum oppositionem multiplicetur realiter.

Rationem huius ex ipsis visceribus nature relationis videtur reddidisse S. Thom. cum ait *qu. 8. de potentia art. 1. ad 12.* quod *Cum relatio sit accidens in creaturis, esse suum est inesse; unde esse suum non est ad aliud se habere.* Quæ ratio fortius currit in diuinis, quia si in creaturis esse relationis est in esse, in diuinis, est subsistere, unde esse suum non est ad aliud, siquidem in se subsistit, & ad se est illud esse prout subsistens: sed tota ratio multiplicandi relationes seu respectus, est oppositio, & correspondentia ad suum correlatiuum: ergo si ipsum esse relationis solum est per ordinem ad subiectum, quando est accidens in hærens, vel per ordinem ad se si est subsistens, manifestè deducitur, quod tale esse in vi oppositionis relatiua multiplicari non potest: ergo si in Deo ex nullo alio

principio potest multiplicari aliquid, quàm ex oppositione relatiua, ubi illa cessat, cessat multiplicatio; quod non est in creatis, in quibus cum relatio addat esse accidentale supra ipsum subiectum, seu fundamentum, potest multiplicari relatio ex diuerso esse limitato quod habet quælibet relatio, etiam ex parte sui fundamenti, & in ordine ad subiectum, non multiplicata oppositione correlatiua: nam etiam relationes disparatæ, & non correlatiuæ multiplicantur in aliquo subiecto, & non per oppositionem correlatiua inter se, quod in Deo non contingit, quia si relationes aliquæ non opponuntur, hoc ipso identificantur, ut patet in paternitate, & spiratione actiua. Si ergo ex parte fundamenti, & esse quod ex illo relationes habent, non datur aliqua oppositio in relatione diuina cum suo fundamento, ex hac parte multiplicari non possunt, quia deest multiplicationis principium, quod est oppositio. Ergo si tota perfectio relationis, etiam ut relatiua ex fundamento, & subiecto desumitur, repugnat multiplicari in ratione perfectionis, licet in ratione respectus oppositi, & distinguentis multiplicentur.

Confirm. quia bene stat relationem in Deo distinguere, & opponi cum alia sibi correlatiua in ratione respectus oppositi, & tamen in ratione entitatis relatiua, & aliarum perfectionum etiam relatiuarum identificari cum aliis relationibus, quibus non opponitur, ut patet in spiratione actiua, quæ opponitur Spiritui sancto procedenti, non autem opponitur, sed identificatur etiam quoad rem relatiua, & esse relatiuum cum paternitate, & filiatione, quibus non opponitur: ergo si ipsæ relationes personales non opponuntur in perfectione relatiua prout hausta, & imbibita à fundamento, in quo oppositionem non habent, sed solum prout opposita termino, seu correlatiuo, non est mirum quod in ipsa perfectione prout relatiua identificentur, & unum sint, licet relationes in officio distinguendi, & opponendi correlatiue sint plures.

Dices: Etiam relatio ex termino non habet realitatem, & tamen multiplicat illam, licet terminus non præbeat illam: cur ergo non multiplicabit perfectionem, licet ex termino non habeat illam, sed ex fundamento?

Respon. quod licet ex termino non habeat relatio realitatem quoad esse ut ex D. Thom. in *1. ad Anib. dist. 26. supra* vidimus, tamen circa illum habet oppositionem realem, & consequenter distinctionem realem, quæ formaliter sequitur ex oppositione, ut ex ipso D. Thom. *qu. 8. de potentia art. 1. ad 3. supra* etiam retulimus. At ipsa perfectio relatiua neque habet realitatem ex termino, neque oppositionem. Non realitatem, quia hanc ex fundamento sortitur, quia ab illo habet existentiam, & illud respicit, ut perfectibile suum, & radicem à qua oritur, quod non habet in termino. Non oppositionem, quia perfectio relationis non conuenit, neque exercetur per ordinem ad terminum, sed ad fundamentum, ratione cuius habetur: terminus enim non comparatur ut perfectibile vel perfectiuium respectu relationis, sed ut aliquid merè contrapositum, & correlatiuum quod respicit, non quod perficit, quia nihil in termino ponit, nec terminus in relatione, sed solum contraponuntur, & se respiciunt, fundamentum autem perficitur à relatione, quia in eo ponitur, & perficit relationem, quia ab eo oritur. Vbi ergo relatio non habet esse in hærens subiecto, & limitatum, atque distinctum à fundamento, & aliàs ei non opponitur, non potest multiplicare perfectionem quam habet ex illo in realitate

realitate sua. Relationes autem diuinae in fundamento non opponuntur, quia fundamentum est aliquid absolutum: nec enim fundantur super alia relatione. Absoluta autem in Deo nec opponuntur, nec multiplicantur: ergo nec perfectiones ex fundamento relationibus conuenientes.

14 Quod si his adiunxeris doctrinam S. Thom. *supra* q. 5. art. 3. ad 3. quod non est inconueniens, quod alicui enti sub aliqua consideratione, vel formalitate non conueniat bonitas, licet in re conueniat, quia bonitas sequitur ad ens, non quomodo-cunque, sed sub ea ratione qua explicat esse, & actualitatem, qua potest alii ere, & mouere voluntatem. sicut mathematica sub ea abstractione bonitatem non explicat, quam tamen in re habent in ratione quantitatis naturalis; videbis quomodo intelligi possit quod relatio habens in se perfectionem ex suo fundamento, si tamen ab eo non distinguitur sicut relationes diuinae, non distinctam, neque multiplicatam perfectionem habeant ex ipso. Ex comparatione autem relationis ad terminum sortitur quidem oppositionem, & distinctionem in respiciendo, sed non in perfectione, & actualitate, quia hanc non exercet sub formalitate ad terminum, licet in se, & in re perfectionem habeat, sed vnicam non multiplicatam, quia comparatione ad subiectum illam habet. Ratio autem P. Vas. probantis ex eo perfectionem relationum esse vnam, quia integrant, & constituunt eandem perfectionem Dei, parum vrget, quia non bene sequitur ex hoc, quod saltem inadæquatam bonitatem non habeant, quia ipsum integrare bonitatem; perfectio, & bonitas est; sicut etiam attributa Dei eandem indiuisibilem Dei bonitatem integrant, & tamen vnum quodque in sua linea, & formalitate perfectum est, ut etiam contra ipsum Vasq. probabile esse sentit Alarcon *tract. 5. disp. 4. c. 4. n. 10.*

Ex his habes intellectam propositionem S. Th. *in a. 1. huius q.* quæ multis obscura visa est, scil. quod solum in his, quæ sunt ad aliquid, inuenitur secundum propriam rationem aliquid secundum rationem, & non realiter, quod in aliis generibus, non est inuenire. Quod difficultatem habet, eo quod si loquitur D. Thom. de relatione prædicamentali, seu de ipso prædicamento, constat falsum esse, quia prædicamentum relationis non nisi ex realibus relationibus constat, nec in illo relationes rationis dari possunt. Si autem loquitur de relatione prout abstrahit à reali, & rationis, quid mirum quod in ea possit inueniri relatio non realis? Sed hoc etiam in aliis generibus inuenitur: quantitas enim ut abstrahit à reali, & imaginaria, etiam quantitatem rationis admittit, & locus ut abstrahit à vero, vel imaginario, &c.

15 Sed Resp. D. Th. nunquam dixisse quod in prædicamento relationis inuenitur relatio rationis, ut aliqui non attendentes ad verba S. Thom. malè referunt, sed solum dicit quod *in his quæ sunt ad aliquid inuenitur aliquid rationis*; & sensus est, quod relatio ex illa parte qua exercetur ad terminum, & tangit illum, non ponit realitatem nec excludit, aut tollit eam, ut S. Thom. se declarauit *in 1. ad Anibal. dist. 26. supra relata.* Et ideo pro ea parte præcisè considerata relatio, & non attendendo ad fundamentum non repugnat dari relationes rationis; & sic loquitur de relatione non adæquatè considerata, & secundum omne quod includit tam ex parte subiecti, & fundamenti, quam termini, siue prout est in prædicamento, siue prout abstrahit à reali, & rationis, sed de relatione præcisè, & inadæquatè considerata sub illa præcisa formalitate qua exercetur ad alterum. Quod non contingit in aliis generi-

bus, in quibus si aliquid rationis, & imaginarium inuenitur, non est ex ipso conceptu aut formalitate talis generis, quæ de se locum det entitati non reali, sed quia nos aliquas negationes, & meras fictiones ad instar entium realium effingimus, sicut motem aureum, chimæram, lineam infinitam, & similia, non quia ipse mons, aut aurum, aut linea, de se in aliquo conceptu realitatem non explicant, sed quia illa quæ nihil sunt ad instar istorum quæ realia sunt imaginamur. Relationem verò per hoc præcisè quod inadæquatè consideremus, id est pro ea parte solum, quæ consideratur ad terminum, reddere possumus non realem, tollendo id quod est ex parte fundamenti, unde tota eius realitas desumitur.

Ad fundamenta opposita pro ea parte qua probant nostram conclusionem, scilicet relationes dicere perfectionem, admittimus. Pro ea verò parte qua impugnant, scilicet vel probando quod non dicat illam, vel quod multiplicentur; Responderetur.

Ad primum pro prima sententia Respon. quod relatio ut relatio, & ut opposita suo correlatiuo perfectio est in se entitatiuè, vel subiectiuè, sed non terminatiuè, hoc est habet in se perfectionem, & retinet, sed ex subiecto, & fundamento desumptam, non ex termino, nec ratione termini; unde non est necesse quod multiplicet perfectionem, sed solum terminationem, quia solum respectu termini oppositionem habet, quæ oppositio realis est respectu termini, & realiter exercetur ergo terminum, sed non oritur eius esse, & realitas ex termino, sed ex fundamento. Nec est mirum quod in eadem entitate relatiua multiplicemus respectus, & non perfectiones, cum etiam non multiplicemus essentias, licet ipsa relatio, sit omnino identificata cum essentia diuina. Et ad id quod opponitur contra istam instantiam seu exemplum dicitur nihil euincere, quia licet *ly essentia* non sit terminus relatiuus formaliter, est tamen relatio identicè; & sic licet non explicetur essentia in explicito conceptu relationis, præsupponitur tamen, & includitur in illo. Similiter perfectio, etiam relatiua, includitur in conceptu relationis, sed non explicatur in ordine ad terminationem, quia solum conuenit relationi eo modo quo conuenit illi esse, & actualitas, quia bonitas, & perfectio sequitur ad ens, non prout in potentia, sed prout in actu, & in esse. Habemus autem regulam *supra* datam ex D. Thom. q. 8. de potentia art. 1. ad 12. quod quia esse relationis est inesse, non habet esse per ordinem ad aliud, sed per ordinem ad subiectum seu fundamentum. Et ita perfectio, seu esse etiam relatiuum non multiplicatur, quia non opponitur, nec competit relationi sub conceptu explicante oppositionem, & exercitium ad terminum. Quare eodem modo loquendum est de perfectione relatiua, atque de essentia, quia ex fundamento quod est essentia sumitur perfectio in relatione. Et ad consequentiam de subsistentia, quæ multiplicatur multiplicata relatione; dico quod subsistentia prout distinguitur ab existentia solum dicit terminum naturæ prout incommunicabilem incommunicabile autem dicit oppositionem; & sic sub ipso formali conceptu distinctionis constituitur subsistentia; atque adeo non mirum quod multiplicetur ratione, & conceptu subsistentiæ licet non in ipso esse, seu perfectione: in hoc enim habet se ut relatio. Perfectio autem non dicit incommunicabilitatem de se, nec conuenit relationi, prout opposita correlatiuo, sed prout fundata in suo fundamento, & ex hac parte habet unitatem, non multiplicationem.

Ad 2. rationem, Resp. stare pro nobis, & probare quod 17

quod perfectio relationis inuenitur quidem, sed non multiplicatur in tribus personis. Cum quo tamen stat, quod relatio, etiam in ipso *Ad* perfectionem habet imbibitam, sicut & realitatem, & entitatem, non tamen multiplicat perfectionem, quia ipsum *Ad* intrinsecè habet imbibitam suum fundamentum, & suum *In*, & quidquid ratione fundamenti sibi competit, sed præter fundamentum etiam tangit terminum ut correlatiuum. Et quidquid sibi conuenit pro parte, & consideratione tangendi terminum, multiplicatur, ut est distinctio, & oppositio correlatiuorum; quidquid autem pro parte, & consideratione fundamenti sibi conuenit, non multiplicatur, quia inde oppositionem non habet, licet in ipso *Ad* semper includatur, & inueniatur, sicut inuenitur, & identificatur essentia, sed non multiplicatur.

18 Ad ultimum dicimus probare nostram conclusionem pro ea parte qua non multiplicamus perfectiones etiam relatiuas, & etiam in ipso *Ad*, quia perfectio competit ipsi *Ad*, ut fundato, & ratione fundamenti, non verò explicatur in ipso ut terminato, seu in ordine ad terminum.

Ad primum pro 2. sententia, Resp. quod multiplicata entitate multiplicari debet quod ad eam sequitur, distingo, si sequatur sub ea formalitate, & consideratione qua multiplicatur entitas, concedo; si sub ea qua non opponitur, nec distinguitur, sed identificatur, nego. Perfectio autem sequitur relationem ut fundatam, & ex parte fundamenti, ut dictum est quia inde habet esse, & actualitatem, & consequenter perfectionem; ex parte autem fundamenti neque oppositionem habet, neque distinctionem. Et sic si relatio adæquatè, & ex omni parte multiplicaretur, id est, tam ex parte sui correlatiui, quam ex parte sui fundamenti, tam ex parte oppositionis, quam foundationis, bene sequeretur multiplicari perfectiones; sed in diuinis relatio solum multiplicatur ubi obuiat oppositio; ideo non amplius extenditur ista multiplicatio, quam extendatur illa oppositio; & sic quantumcumque alia prædicata identificentur, vel consequantur, aut imbibantur in relatione, si ad illa, pro subsunt suæ præcisioni, & formali rationi, non extenditur oppositio, non valet inferre, quod extendatur ad illa multiplicatio, & sic in istis relationibus diuinis facile argumenta peccant fallaciâ accidentis, arguendo ab his quæ sibi competunt, in quantum distinctæ, & oppositæ sunt, ad ea quæ sibi competunt, vel absolute, vel in quantum non oppositæ. Concedimus ergo relationes esse tres res, vel tres entitates oppositas relatiuè, quia oppositio realiter, & entitatiuè exercetur ad terminum, non fictè, & sic etiam ut opposita relatio, & ad terminum realis est. Cæterum quando concedimus has res esse bonas, & veras, & perfectas, non tamen esse bonas dicimus perfectione, veritate, aut bonitate multiplicata, sed eadem, quia in bonitate, & veritate non opponuntur. Et sic ista attributa conueniunt relationibus, seu realitatibus oppositis, sed non oppositè, quia in his non datur correlatio: sicut etiam eadem essentia, & substantia, & diuinitate substantiales, & diuinæ sunt, quia in substantia, & Deitate oppositionem non exercent. Vnde ad Conf. seu instantiam huius primi argumenti, Resp. quod relatio prout distincta, & opposita suo correlatiuo, est capax perfectionis, sed non est capax diuidendi perfectiones, quia in ea non fit oppositio, sicut filio ut distincta, & opposita paternitati est capax diuinitatis, non tamen est capax diuidendi diuinitatem, quia non potest in illa fieri oppositio. Et cum instatur, prout sic, scilicet, ut

opposita est capax perfectionis: ergo est capax distinctæ perfectionis; negatur consequ. quia ut esset capax distinctæ perfectionis, deberet esse capax diuidendi perfectionem, & ad hoc necesse erat facere oppositionem in ratione perfectionis. Dicitur ergo prout distincta, capax perfectionis, quia retinet, & includit illam, siquidem includit suam realitatè, sed non opponit illam, neque in vi oppositionis illam explicat, sed solum includit, sicut includit diuinitatem, & ratione entis increati, & sapienciæ, & æternitatis, non tamen habet vim opponendi illa, neque in vi oppositionis correlatiuæ ista explicat, licet includat, sed solum explicat ipsum *Ad*, reale, non fictum respectu termini in respiciendo, & nihil amplius. 19

Ad 2. concedimus mysterium Trinitatis, atque adeo non solum unitatè essentia, quoad absoluta, sed ipsas etiam personas quoad relatiua perfectione dicere, sed non multiplicatam, sed eandem, quæ ad omnes pertinet relationes, omnesque perfectas reddit, sed non distinguit perfectiones, quia in illis non fit oppositio, & correlatio, quatenus perfectiones sunt. Et ad instantiam quæ vrgetur, dico quod paternitas, ut distincta à filiatione, est perfectio in Deo, distingo, perfectione opposita, & distincta à perfectione filiationis, nego; perfectione non opposita, sed identificata cum perfectione filiationis, concedo; & perfectio quam habet filio, ut distincta est perfectio simpliciter simplex, sed non est perfectio distincta. Et sic filio ut distincta in ratione filiationis adhuc retinet, & includit perfectionem non distinctam in ratione perfectionis, quia nec oppositam. Vnde variatio illius particulæ *ut distincta*, quæ modò cadit super filiationem distinctam, modò super perfectionem distinctam, variat appellationem, sicut instatur illa consequentia. Paternitas ut distincta à filiatione est Deus, seu est diuina: ergo habet distincta diuinitatem à filiatione; consequentia non valet, & tamen antecedens est certum, quia paternitas ut distincta à filiatione est ens singulare, & determinatum, non ens creatum: ergo diuinum. Idem ergo de perfectione dicimus. Dicta SS. Patrum probant relationes ad perfectionem Deitatis pertinere, sed non ad distinctam. Dictum autem Damasceni, quod Pater, & Filius perfectionibus personalibus distinguuntur, non sic inuenitur in illo loco citato à Suarez, sed dicit quod *In proprietatibus paternitatis, & filiationis, & processionis persona perfectionem; id est, existendi, modum agnoscimus*. Vbi Damascenus se expli. auit quid nomine perfectionis intelligat, scilicet existendi modum; quod verò ista perfectio relatiua multiplicetur, nec in numero plurali nominetur, non dicit. Ad locum ex epistola Agathonis dicitur nos etiam fateri esse diuinitatem in tribus personis perfectis, imò & diuinis, sed non diuersa, & multiplicata perfectione, sicut nec multiplicata diuinitate.

Ad 3. Resp. esse tres substantias relatiuas in ratione termini incommunicabilis, sed vnus perfectionis communicabilis, etiam relatiuè, quia perfectio relatiua communicabilis est, ut pote non opposita in genere perfectionis. Et sic etiam tres substantiæ in quantum incommunicabiles, & distinctæ important perfectione, distingo, (sicut de relationibus diximus) important perfectionem etiam incommunicabilem in ratione perfectionis, nego; communicabilem in ratione perfectionis, licet substantia, & relatio, quæ perfectionem includit incommunicabilis sit in ratione respectus, & terminationis, sed non in ratione perfectionis, transeat.

Ad 1. Conf. dicimus quod si esset vna tantum substantia, esset perfecta, & modò tres substantiæ, & relationes etiam perfectæ sunt, sed non diuersa

diuersa perfectione, sed eadem; eo quod in ipsa perfectione, oppositio non est, sicut si esset vna substantia esset Deus, & diuina, eo modo tres substantiae sunt diuinae, sed eadem diuinitate, non distincta, & multiplicata, quia nec opposita: idem ergo erit de perfectione etiam generis relatiui, quia in ea non exercetur oppositio.

Ad 2. Conf. Resp. eodem modo, quod personae in quantum distinctae, sunt perfectae, sed non perfectiune distincta, & sunt capaces identificationis cum essentia, quod vtrique maxima perfectio est, sed non per distinctam perfectionem sunt capaces, sed per eandem. Et qualibet personae distincta habet hanc maximam perfectionem, & confert illam, sed non confert perfectionem distinctam à perfectione Patris, & adorantur atque amantur personae secundum quod plures non multiplicata perfectione, & bonitate, etiam relatiua, sed communicata, seu communi omnibus,

Existencia non multiplicatur in relationibus.

20 Ex fundamentis iactis facile poterit formari iudicium de aliquibus praedicatis, quae aut transcendentia sunt, aut illis annexa, & similia an multiplicentur ad multiplicationem realium relationum in Deo. Et occurrit primò existencia, quae licet inter transcendentia non numeretur, cum in creaturis praedicatum contingens sit, tamen quia omne ens reale est capax illius, & si est extra causas, habet illam, merito de illa agimus, sicut de transcendentibus quoad hoc punctum an multiplicetur in diuinis.

Et supponimus vt certum, in Deo dari existentiam absolutam vnam, quam male aliqui cum substantia confundentes, negauerunt dari in Deo, sicut negant plerique dari vnam substantiam absolutam, sed solum tres relatiuas. Sed de substantia quidquid sit an concedenda vel neganda sit essentialiter in Deo, tamen de existencia nullo modo negari potest sine errore, cum nomine existentiae intelligamus esse quod aliquid est extra nihil, & extra puram possibilitatem in actu; & sic se habet vt vltimum in ratione actus entitatis, quia vltimum quod intendit agens est esse, id est, ponere rem actu in se extra causas, vel extra nihil. Deus autem secundum essentiam suam absolutam est ens à se, ita quod seipso caret omni potentialitate, & est extra nihil; & sic existere in Deo non est praedicatum contingens, sed intrinsecum & essentialiter: ergo conuenit essentiae secundum absolutam rationem consideratae, quae est ens à se, & essentia existens essentialiter, & ratione sui. Et sic dicitur ipsum esse tanquam nomen proprium Dei

21 Exod. 4. *Ego sum qui sum; Qui est, misit me ad vos.*

Difficultas ergo est, an praeter existentiam istam absolutam, qua essentia diuina est ens à se quaelibet relatio, sicut est entitas realis distincta ab alia relatione, sit etiam distincta existencia relatiua, ita quod sicut sunt tres entitates reales, ita sint tres existentiae relatiuae. In quo multi Authores, qui tenent existentiam non esse aliud, quam ens actu, & extra nihil nec nisi per rationem distinguunt essentiam ab existencia, tenet etiam multiplicari existentias relatiuas, quia multiplicantur tres entitates reales, & actuales. Est sententia P. Suarez 1. tomo 3. p. disp. 8. sect. 3. ad 1. disp. 11. sect. 2. disp. 36. sect. 1. & lib. 3. de Trinit. c. 5. & lib. 5. cap. 2. adiunctis his quae docet disp. 31. metaph. sect. 4. de indistinctione essentiae, & existentiae; Quam sententiam plures ex Recentioribus sequuntur. Et M. Medina 3. p. q. 3. art. 2. concedit tres existentias relatiuas ex alio fundamento, quia existimat non distinguere existentiam à substantia,

& sic multiplicatis substantiis relatiuis, necesse est multiplicari existentias. Sed tamen modò supponimus existentiam non esse idem quod substantiam, sed diuersos effectus formales habere: existencia enim ponit rem extra causas, seu extra nihil, substantia terminat, & complet naturam, vt sit per se, & non in alio, & si sit substantia completa; & suppositalis, facit incommunicabilem naturam. Similiter existencia inuenitur tam in substantia, quam in accidente, tam in substantiis completis, quam incompletis, substantia solum in substantiis completis, seu per se existentibus: ergo non sunt idem.

Contrariam sententiam tenent communiter illi Authores qui distinguunt essentiam ab existencia, & per existentiam totius sentiunt existere partes, & quidquid est in composito, etiam tenent in Deo non distinguunt tres relatiuas existentias, sed vnica essentiae diuinae existencia omnia diuina existere. Et hoc sequuntur Thomistae, qui sentiunt existentiam distinguere ab ea, cuius est existencia, nec multiplicari existentiam iuxta quamcumque entitatum distinctionem. Hos Authores adduxi *preced. tomo disp. 4. art. 3. §. In ista difficultate.* Et praeterea ex Authoribus qui tenent existentiam non distinguere ab entitate actuali, adhuc in diuinis negant iuxta tres entitates relatiuas debere multiplicari existentias relatiuas, sed solum habere vnum esse. Quod sentit Vasquez *hic disp. 126. cap. 2. & 3.* Ruiz *disp. 25. sect. 3. & 4.* Granados *tract. 5. disp. 1. sect. 3.* qui adducunt plures ex Thomistis.

25 Hae secunda sententia est planè D. Thom. qui in q. 8. de potentia art. 1. ad 1. inquit: *In diuinis nullo modo est esse, nisi essentia, sicut nec intelligere nisi intellectus.* Et inf. *Nullo modo concedendum est quod aliud sit esse relationis in diuinis, & aliud essentiae; ratio autem non significat esse, sed esse quid, id est, quid aliquid est.* Vbi distinguit S. Thom. de esse quod est existere, & de essentia, seu quiditate, quae est ratio, seu quid, & existentiam dicit, non esse aliam in relationibus, quam in essentia: sumit enim esse prout distinguitur à qualitate seu essentia, quae est ratio. Et in q. 9. de potentia a. 5. ad 19. sic ait: *Nullo modo concedendum est, quod in diuinis sit nisi vnum esse, cum esse semper ad essentiam pertineat, & praecipue in Deo, cuius esse est sua essentia. Relationes autem quae distinguunt supposita in diuinis, non adducunt aliud esse super esse essentiae, quia non faciunt compositionem cum essentia, vt dictum est.* Et concludit: *Diuersitas ergo secundum esse sequitur pluralitatem suppositorum, sicut & diuersitas essentiae in rebus creatis. Neutram autem in diuinis.* Quo loco apertissime loquitur D. Tho. excludens distincta esse à relationibus distinguentibus supposita in diuinis, & vnum tantum esse concedens. Et 3. p. q. 17. art. 2. ad 3. cum proposuisset argumentum, quod in Trinitate quamuis sint tres personae, est tamen vnum esse propter unitatem naturae. Respondet, quod quia persona diuina est idem, cum natura in personis diuinis, non est aliud esse persona praeter esse naturae; & ideo tres personae non habent nisi vnum esse. *Esset autem triplex esse, si in eis esset aliud persona, & aliud esse natura.* Sed si daretur in personis aliud esse ab esse naturae, illud esse personale esset relatiuum: ergo si negat personis triplex esse quod haberent, si distingueretur earum esse ab esse naturae, negat eis triplex esse relatiuum. Nec potest hic responderi quod aliquid dicunt D. Tho. sumere ly esse pro subsistere, & hoc subsistere intendit quod sit vnum in natura. Contra enim est, quia D. Thom. dicit, quod tres personae non habent nisi vnum esse; si autem sumeret esse pro subsistere, falsum esset illa exclusiuas quae

quia tres personæ et si sint vnum in vna substantia absoluta, tamen verè sunt plures substantiæ relatiuæ: ergo sumit esse pro existentia, vt distinguitur à substantia. Et præterea falsa esset illa condicionalis, quando dicit, quod esset triplex esse in personis, si in eis esset aliud esse personæ, & naturæ: faceret enim hunc sensum, quod esset triplex subsistere in personis, si esset aliud esse personæ, id est, subsistere personæ, & naturæ, siquidem sumit esse pro subsistere: hoc autem omnino falsum est quod esset triplex subsistere personarum, si distingueretur esse personæ, & naturæ: nec enim vllam consequentiam hoc habet loquendo de substantia cum modò sit triplex substantia relatiua, etiam si idem sit esse naturæ, & personæ, subsistere autem absolutum non ex hoc esset triplex quia esse personæ distingueretur ab esse naturæ.

24 Fundamentum huius sumitur ex duplici principio.

Primum est generale ex ipso conceptu existentia secundum se, etiam vt communis est creatæ & increatæ, licet applicetur maiori vi existentia diuinæ.

Secundum est specialiter ex conceptu relationis vt opponitur, & distinguitur à suo correlatiuo, sub quo conceptu non possunt multiplicare existentiam, quia hæc non opponitur, sed excluditur in relatione quæ opponitur.

Primum principium explicatur sic: Quia existentia, seu esse non consequitur ad entitatem rei secundum se, aut quomodocumque consideratam, sed in rebus creatis sequitur ad entitatem iuxta suum fieri, & produci, in diuinis autem sequitur entitatem, vt est à se, non vt fit ab alio; quia existentia habet pro effectu formali ponere rem extra causas, & extra nihil; & sic consequitur ad entitatem non absolute, sed sub illa formalitate, qua egreditur à causis, scilicet sub ipso produci, vel sub ipso improduci, & esse à se. Vnde ad ponendum vnam existentiam, vel plures, non debemus attendere ad vnitatem vel pluralitatem entitatum secundum se, sed prout ordinatur in vno fieri, & in vno produci, vel pluribus, & in vno esse à se, & increato, vel in pluribus. Et hæc est ratio quare in creaturis esse existentia sit proprium suppositi, & in vno supposito solum sit vnum esse: vt sæpius docet D. Thom. & nos ostendimus *preced. tomo dist. 4. art. 4.* quia in creaturis id quod directè, & per se producit, est ipsum suppositum, seu ipsum totum: partes enim non producantur per se, sed comproducantur. Vnde per se ipsum suppositum habet esse, partes verò ex illo, aut in illo participant esse, & existunt. In Deo autem est è conuerso, quia id quod primò, & per se existit est ipsa essentia, quæ est ipsum esse, quia est ens à se, ita quod esse est prædicatum essentialle in Deo, atque adeò prius conuenit ipsi essentia, quæ tali prædicato constituitur, quam supposito, quod constitutam essentiam supponit, & terminat.

25 Ex quibus conficitur argumentum ad non multiplicandum existentias, relatiuas, quia illæ plures existentia relatiuæ, etiam vt plures, vel sunt existentia creatæ, vel increatæ. Creatæ esse non possunt, alias personæ essent entitates creatæ in quantum plures, & in quantum relatiuæ, si creatæ, existentias haberent, quod est hæreticum; & repugnat Deo quod aliquid intra ipsum existat per existentiam creatam. Increatæ autem existentia si multiplicantur: ergo erunt tria esse increata relatiua; & sic erunt tres increati substantiæ (in hoc enim sensu loquitur illa sententia, cum ponat tres existentias, & non solum tres existentes (quod est contra illud

Symboli Athanasij *Non tres increati, nec tres im-
mensi, sed vnus increatus.* Vnde P. Suarez *lib. 3. de
Trin. t. cap. 12. num. 5.* non audet concedere in diuinis tria increata, sed vnum, quia esse increatum conuenit ratione naturæ, & substantiæ, quæ consistit in ipso esse à se, & est suum esse per essentiam. Si ergo non debet concedi triplex esse increatum; nec triplex existentia increata relatiua, quia ly *relatiua* non diminuit de ratione increati. Et ratio est quia existentia hoc ipso quod increata est, est ipsū esse à se, & ipsa essentia diuina: ergo est prædicatum essentialle Dei, & non relatiuum, seu notionale: ergo repugnat multiplicari existentiam increatam prout relatiuam, & multiplicari in ratione increatæ existentia, nisi multiplicetur in ratione ipsius esse à se, atque adeò in ratione actus puri.

26 Secundum principium explicatur sic, quia vt S. Thom. *q. 8. de potent. art. 1. ad 12. Esse, seu existentia, quæ conuenit relationi nunquam est relatiua, vt ad terminum, sed est ad se, vel ad subiectum.* Et in hoc contingit magna deceptio oppositæ sententiæ, & profunditas mira rationis D. Thom. qui relationis existentiam dicit non esse ad aliquid, ita quod licet dici possit relatiua entitati, quia existentia relationis est, non tamen oppositiuè; cuius rationem breuissimè reddidit S. Thom. *citato loco*, dicens, quod *cum relatio sit accidens in creaturis, esse suum, est inesse; unde esse suum non est ad aliud se habere.* Quod est dicere existentiam conuenire relationi per ordinem ad subiectum, non per oppositionem ad terminum, quia existentia eius est in subiecto, cum sit accidens inherens, terminus autem non est subiectum relationis in quo ponitur, sed est id cui contraponitur. Quare existentia licet sit relationis, & hac ratione dici possit relatiua, non tamen est relatiuè opposita, ita quod licet conueniat ipsi *Ad*, relationis (quod reale est) non tamen constituit in eo *Ad*, sed *In*, nec ipsa induit oppositionem *Ad*, quia non se habet erga terminum, sed positionem *In*, quia se habet erga subiectum. Si ergo existentia relationis non opponitur, nec terdit ad terminum, sed inheret subiecto, existentia relationis non tangitur principio distinctionis, quæ est oppositio relatiua, sed principii vnitatis, quæ est fundamentum, & subiectum. Vnde cum in diuinis relatio non sit inherens vt accidens, sed subsistens, & ad se, multò magis existentia eius non est relatiua per modum *Ad*, nec per modum oppositionis; & sic non distinguitur, nec multiplicatur, quia non opponitur correlatiuè, licet afficiat, & constituat relationem in ipsa entitate subsistenti. Et sic cum careat nppositione, licet multiplicetur realitas relatiua, & in ratione *Ad*, non multiplicatur existentia, quæ ipsi *Ad* conuenit vt inherenti vel subsistenti, quia intra ipsum *Ad*, vt reale, imbibitur *In*.

27 Quod amplius confirmatur, & explicatur, quia relationes in Deo habent sibi identificatam ipsam essentiam diuinam, quæ est ipsummet esse per essentiam: ergo ex tali identificatione sibi intrinseca existentes redduntur esse illo perfectissimo, & increato quod est actus purus. Et istud esse quo per identificationem redduntur relationes existentes, & in se positæ in actu non multiplicatur quantumcumque relatio correlatiuè, & oppositiuè multiplicetur, quia hoc est mysterium Trinitatis, quod essentia quantumcumque intrinseca, & essentialiter in relationibus imbibita, ipsis multiplicatis non multiplicetur: ergo verè, & propriè, & intrinsecè redduntur relationes existentes, & in actu positæ, etiam per existentiam non multiplicatam, sed vnam essentialem, & sibi identificatam. Ad quid

quid ergo necesse est superraddi tres existentias in illis tribus realitatibus, quæ per vnam non multiplicatam, sed sibi identificatam supponuntur existentes? Aut quem effectum formalem faciunt tales existentia in relationibus, quod existentes supponuntur in vi suæ intimæ essentia, & esse sibi identificati? Et vrgetur hoc, quia quando esse illud essentia ita imbibitur, & identificatur relationibus, quod reddit illas existentes, sed tamen relationes ipsæ non possunt eam dividere, & multiplicare oppositione sua, inquiri, existentia illæ diuisæ, & multiplicatæ, quæ ultra hoc esse identificatum resultant, suntne existentia eiusdem rationis, puritatis, & actualitatis, ac ipsa existentia communis, & essentialis, an non? Si sunt eiusdem actualitatis, & puritatis, sunt ipsummet esse actus puri essentialis, & repugnabit eodem modo multiplicari atque ipsum esse secundum se. Si non sunt, ergo non sunt existentia increatæ, & diuinæ, sed inferiores, quia aliquid minus de actualitate habent, quam ipsum esse Dei. Vbi autem est minus seu diminutio, creatum est, non diuinum. Existentia autem creatæ exulare debent à Deo, & ab eius personis.

91 Vnde soluitur fundamentum contrarium, quod solum innititur multiplicationi entitatum realium in Deo, quæ sine multiplicatione existentia stare non potest, cum existentia non sit aliud, quam entitas in actu; & sic cum sint plures entitates in actu illæ relationes, erunt plures existentia. Nec est intelligibile quod multiplicentur realitates in ratione *Ad*, & illa realitas, ut multiplicata, sit nihil: ergo, ut multiplicata, est extra nihil: ergo multiplicatur existentia, sicut multiplicatur *ly extra nihil*; esse autem extra nihil, effectus formalis est existentia.

Respon. realitates, multiplicari, sed non actualitates, quibus illæ entitates actuales dicuntur, quia ut aliquid sit realitas, sufficit quod sit capax existendi in actu per propriam vel adiunctam, & identificatam actualitatem: quomodocumque enim aliquid existat in actu, aut sit capax existendi, hoc ipso non est nihil, sed reale ens, quia nihil neque est actu ens, neque capacitatem habet existendi, neque existit ratione sui, nec per aliquid adiunctum sibi, sed omnino repugnat existentia. Quod autem existit, vel per se, & per propriam existentiam, vel per adiunctam, & identificatam realitas est. Vnde potest multiplicari realitas, non multiplicata existentia, dummodo omnes realitates sub illa existentia sint, & cum illa identificentur, vel ei subordinentur. Et cum instatur quod existentia est ens actu, concedimus; & multiplicantur plures entitates in actu, distinguo, multiplicantur ex parte oppositionis correlatiuæ, concedo, ex parte actualitatis, nego, sed sic multiplicatæ afficiuntur eadem actualitate comprehendente omnes, & per eandem actualitatem sibi identificata, & communicatam omnes afficiuntur, sicut eadem diuinitate omnes tres relationes sunt diuinæ, & increatæ intrinsecè, etiam in ipso *Ad*. Nec est inconueniens eadem forma aut termino vel existentia affici plures partes aut entitates, quæ in vnum ordinantur, aut aliàs identificantur, sicut eadem substantia omnes partes compositi terminantur, & eadem forma informantur plures partes in homine, & eadem existentia existunt, ut latè probauimus *præced. como disp. 4.*

art. 4. Et sic multiplicari potest effectus formalis inadæquatus, & partialis, vna existente forma adæquata, quæ omnes illas partes, & inadæquatos effectus complectitur, sicut eadem anima indiuisibilis, & spiritualis tam multos effectus in esse animati,

Ioan. à S. Thom. in 1. part. D. Th. Tomus alter.

& vitalitatis præbet, ut in carne sentire, in oculis videre, &c. Sic ab eodem esse diuinitatis, & essentia est à se, & absolutè, & relationes existunt etiam ut multiplicatæ, per communicationem tamen, & identificationem eiusdem esse.

Et ad vltimam instantiam, quod si sunt tres realitates sunt tria extra nihil; & multiplicatur ipsum extra nihil, concedimus. Ad consequentiam: Ergo multiplicatur existentia, nego. Et ad probationem, quod esse extra nihil est effectus formalis existentia, concedo; sed multiplicato hoc effectus formali, scilicet esse extra nihil multiplicatur forma; distinguo; si multiplicatur effectus formalis adæquatus, multiplicatur forma, concedo; si multiplicatur effectus inadæquatus tantum, nego. Esse autem extra nihil in tribus relationibus est effectus formalis inadæquatus ipsius esse diuini, non adæquatus. Nam esse diuinum complectitur genus relatiuum, & absolutum, & ab eodem esse vtrumque genus constituitur in actu puro. Vnde sumendo solum relationes, seu genus relatiuum in Deo non habet omnem effectum adæquatum illius formæ, quæ est existentia diuina. Et sic licet multiplicetur effectus ille formalis, qui est esse extra nihil in relationibus, quatenus sunt tres reales entitates, non tamen est necesse multiplicari formam, quia illi effectus inadæquati sunt respectu ipsius, sicut etiam ab eadem actione possunt plures effectus inadæquati procedere. Et sic non inferunt multiplicationem formæ, seu existentia, sed identificationem eiusdem formæ, cum illis tribus realitatibus, quia talis perfectionis, & infinitatis est, ut omnes illas realitates complectitur.

Quæ diximus de existentia, dicendum est de duratione, quia duratio est ipsamet existentia propterea non discontinuata. In quacumque tamen sententia non est multiplicanda æternitas, etiam dato quod multiplicetur existentia vel duratio, quia æternitas non dicit durationem tantum, sed vniuersitatem durationis per modum mensuræ immutabilis. Hæc autem vniuersitas eadem est in omnibus illis durationibus, quia eadem est immutabilitas.

*Veritas, bonitas, infinitas, sanctitas,
non multiplicantur.*

De veritate dico primò: Non multiplicatur veritas in tribus personis, ita ut sint veritates, nec formales nec transcendentales. De veritate formali, quæ est veritas in cognoscendo, aut in dicendo non est controuersia, quia talis veritas consistit in notitia, seu actu intellectus intelligente, & manifestante, seu dicente. Actus autem intelligendi idem est in omnibus personis, quia eadem natura intellectiua, idemque intellectus, & intelligere eis conuenit, sicut Pater, & Filius eodem amore producent Spiritum S. Locutio autem, & dictio, si sit ad extra, est reuelatio quæ aliquid reuelatur creaturæ. Et hæc fit indiuisè à tribus personis; & sic est vna veritas in dicendo ad extra. Locutio autem seu dictio ad intra solum est vna, quia solus Pater loquitur notionaliter producendo Verbum. Aliæ personæ non loquuntur notionaliter, sed intelligunt essentialiter. Et sic eadem est veritas in cognoscendo, & in dicendo in tribus personis.

De veritate transcendentali, quæ non est intellectio actiua, sed intelligibilitas passiuæ seu entitas ut cognoscibilis, est maior difficultas. Et multi censent multiplicari hanc veritatem in tribus personis, quia est transcendens, & sicut sunt tres entitates relatiuæ, ita & tres veritates transcendentales; & sic Pater ut est distinctum suppositum à Filio,

K

est

est verè cognoscibile vt distinctum : ergo distincta veritate à Filio cognoscibile est , quia veritas transcendens , cognoscibilitas est. Ita Vasqu. *hic disp. 121. c. 7.* & Suarez *3. de Trinit. c. 81.* quos sequitur Alarcon *tract. 5. disp. 5. c. 5. num. 5.* Ruizius autem negat esse tres veritates in personis *disp. 27. cap. 5.* quia existimat veritatem non esse transcendentalem; & sic non multiplicari realiter. Vasqu. mouetur ex eo quod putat veritatem , quæ est passio entis , esse denominationem extrinsecam prouenientem ex intellectu verè cognoscente , & hæc denominatio multiplicatur in tribus relationibus. Suarez quia existimat veritatem non sequi naturam aut suppositum , sed quancumque entitatem , hoc ipso quod ficta non est , sed realis : sic enim est vera. Sunt autem tres relationes , tres entitates veræ , & non fictæ. Et de ipso Filio Dei dicitur 1. Ioan. ult. *Vt simus in verò Filio eius , hic est verus Deus ;* ergo duplici ratione datur veritas in Filio , scil. ratione filiationis , & ratione Deitatis. Addo quod in Deo sunt quinque notiones quibus designantur personæ , & innotescunt , seu significantur diuersimodè , vt docet S. Thom. *infr. qu. 12. art. 2. & 3.* Ergo fundant diuersam cognoscibilitatem , quia notio cognoscibilitas est , qua aliquid innotescit.

31 Caterum D. Thom. absolute censet , quod veritas in tribus personis est vna tantum , nec veritas personaliter dicitur in diuinis , vt patet *in qu. 1. de verit. art. 7.* ad quod adducit illud August. 8. *de Trinit. c. 1. Trium personarum est vna veritas.* Quod licet possit exponi de veritate essentiali , non relatiua ; tamen cum ibi August. ostendat quod non est plus veritatis in vna persona vel duabus , quam in tribus , videtur etiam comprehendere relatiuas veritates , si essent , quia aliàs illis non numeratis , non posset ferre iudicium de veritate personarum , quomodo non sit plus veritatis in vna persona , quam in tribus , si plures veritates in tribus sunt quam in vna. In præfato autem artic. absolute docet D. Thom. quod veritas , si propriè accipiatur , in diuinis essentialiter dicitur , sed solum metaphoricè appropriari solet veritas Filio , quatenus est summa imitatio sui principij , scil. Patris. Si ergo veritas propriè sumpta in Deo essentialiter dicitur , & non notionaliter veritas propriè non multiplicatur etiam si multiplicentur entitates relatiuæ.

Et ratio huius est , quia vt latè tradidimus *suprà disp. 2.* ex D. Thom. veritas transcendentalis est adæquatio quædam , & commensuratio seu imitatio rei cum suo principio , quod est in intellectu , seu cum suo originali. Et quia in Deo non est entitas deriuabilis ab intellectu , vel intellectione Dei , sed idem omnino cum intelligere diuino , est ibi summa , & vnica veritas , sicut vnum intelligere identificatum cum omni entitate diuina. Sed relationes diuinæ quantumcumque multiplicentur non habent diuersam adæquationem , & commensurationem cum intellectu diuino , quia vnico , & eodem modo identificantur illi : ergo eandem veritatem , quia eandem adæquationem , & commensurationem habent , scil. per identitatem. Item fundamentum veritatis huius siue sit adæquatio , cum intellectu , siue sit ratio entitatis non fictæ , aut aliquid aliud , est vnum , & idem in tribus relationibus : ergo , & veritas eadem. Anteced. probatur , quia illud est fundamentum veritatis , in quo veritas habet firmitatem , & certitudinem à parte rei , ita sit ens ratum , & fixum , non fictum , & bene fundamentum in essendo. At totum fundamentum , tota firmitas , & connexio veritatis , & necessitas eius conuenit relationibus ex essentia , & ex immutabilitate , & indefectibilitate summa , quæ utique est ipsum

esse actus puri , quo est à se , & independenter à quolibet alio , & immutabile in essendo. Ergo tota ratio veritatis transcendentalis sumitur , & fundatur in essentia : ergo non est multiplicanda veritas magis , quam essentia ipsa , licet multiplicetur relatio realis personarum. Et sic personæ esse veras , & non fictas considerari debet non solum ratione relationis , vt multiplicatæ , & oppositæ alteri , sed ratione ipsius reale esse , quod habent , & firmitatis in essendo : in tantum enim receditur ab esse ficto , in quantum habetur esse à parte rei , & in tantum est ens reale vt distinguitur ab ente rationis , & ficto , & in quantum est capax existentia , seu esse realis. Per ipsum ergo esse quod habent personæ , sunt non fictæ , sed veræ personæ , imò & ipsa oppositio relationum in quantum est existens , est realis , & vera , & non ficta : Sed esse seu existentia non multiplicatur in relationibus diuinis , vt ostensum est , etiam si dicatur existentia relatiua : ergo neque veritas personarum multiplicatur quatenus dicuntur veræ , & non fictæ , etiam in ipsa realitate relationum.

Denique veritas personarum vel sumitur pro cognoscibilitate seu intelligibilitate passiuæ , qua in se cognosci possunt , vel pro realitate qua distinguuntur ab ente ficto , & à relationibus rationis , vel pro commensuratione , & adæquatione cum suo originali , & cum iudicio vero , quod est in intellectu.

Primum non multiplicatur in personis loquendo de intelligibilitate propria fundata in ipsa entitate rei , non de extranea , qua sunt intelligibiles ad modum alterius : hæc enim non est propria veritas rei , sed aliena , illi tamen accommodata , & de hac non loquimur. Propria autem intelligibilitas , seu veritas multiplicari non potest , quia intelligibilitas sequitur entitatem ratione immaterialitatis quam habet , quia sic proportionata est intellectui ; immaterialitas autem non multiplicatur in relationibus , sed est vna , quia pertinet ad spiritualitatem , & carentiam materiæ , seu potentialitatis , quod conuenit Deo ratione actus puri , & ex tali immaterialitate probauit D. Thom. Deum esse intelligibilem , & intelligentem *suprà quæst. 14. art. 1.* Et talis perfectio non multiplicatur in Deo.

Secundum , scil. realitas vt distinguitur ab ente ficto multiplicatur quidem in diuinis relationibus , sed sub eodem esse , & firmitate quod est esse actus puri , & immutabilitas eius. Realitates autem non dicuntur veræ secundum quod verum distinguitur à ficto , nisi per ordinem ad esse quo existunt à parte rei , vel capaces sunt existendi : ergo non multiplicato hoc esse , nec immutabilitate eius , non multiplicatur veritas , & firmitas vt excludit fictionem.

Tertium , scil. commensuratio , & adæquatio cum originali vel cum iudicio , & mensura intellectus , non multiplicatur in relationibus , quia veritas in illis est increata , & prima : non enim creata esse potest. Veritas autem prima , & increata non est mensurata per aliam regulam , sed est ipsa omnium regula ; et sic quia Deus est suus intellectus , & suum intelligere non habet veritatem per imitationem , & adæquationem cum alio , sed per se est summa , & prima veritas. Aut ergo veritas , quæ multiplicatur in relationibus , est veritas prima , & increata , aut secunda , & creata seu mensurata. Creatam ponere in personis , nefas est. Increatam , & primam multiplicare , impossibile ; nec ipse Suarez id concedit , sed negat illa *cap. 8. num. 5.* quia veritas prima est suprema , & hæc est essentialis in Deo ; unde solum concedendæ sunt , inquit , tres veritates cum addito , id est

est relatiua. Quasi verò esse tres relatiuas, diminuat aliquid de suprema veritate. Si enim sunt tres veritates relatiuæ, vel sunt increatæ, & sic sunt supremae, & non erit vna sola veritas prima, & suprema. Vel sunt creatæ, & hoc non potest cogitari. Debet ergo esse vna.

33 Ad fundamenta opposita patet ex dictis. Ad id quod dicitur de cognoscibilitate personarum, dicimus, quod cognoscibilitas propria, quam ex se fundant, & qua possunt cognosci in se, esse vnā, quia fundatur in eadem immaterialitate, quæ est radix intelligibilitatis. Vnde repugnat videri in se vnā personam sine alia, aut essentiam sine personis, quin cognoscibilitas omnium est vna, vt diximus *preced. tomo disp. 25*. Si verò loquantur non de cognoscibilitate propria, qua in se sunt intelligibiles, sed de aliena, & per connotatiuos conceptus, illa non est veritas propria personarum, sed à nobis formata; & de tali non loquimur. Ad id quod dicit Vasqu. quod veritas quæ est passio entis, est solum denominatio extrinseca à iudicio intellectus proueniens, latè responsum est *suprà disp. 2*. & ostensum est hoc falsum.

34 Ad motiua Suarez Respon. Ad illud de realitate qua entitas dicitur vera, id est non ficta, iam responsum est quod sunt quidem tres realitates veræ, & non fictæ, non autem tres veritates, quia fundamentum, & firmitas talis veritatis, vt opponitur fictionis, seu enti rationis, vnum est, scilicet esse reale, & actuale per quod recedit ab ente ficto, quod non est capax existentie actualis, & similiter immutabilitas eius, & hoc est vnum in relationibus diuinis. Ad locum illum 1. Ioan. vlt. dicitur illum nullo modo posse aptari sententia Suarez, quia cum dicit *Vi simus in vero Filio eius, hic est verus Deus*, ibi non distinguuntur duæ veritates, altera filiationis, altera Deitatis, quia in nulla sententia veritas essentialis, quæ est diuinitatis, & filiationis, quæ est personalis distinguuntur, sicut inter essentiam diuinam, & personam nulla est distinctio realis. Difficultas est an veritas paternitatis, & filiationis sint distinctæ, non veritas Dei, seu Deitatis, & filiationis. Ex illo autem loco, in quo dicitur esse verum Deum, & verum Filium, quomodo colligi possit esse distinctas veritates paternitatem, & filiationem, omnino non video: sed dicimus omnino Deum esse verum Deum, & verum Patrem, & verum Filium eadem veritate, quæ omnia illa amplectitur, sicut eodem esse, & diuinitate existunt.

35 Ad vltimum Respon. illa notiones non postulare plures veritates, imò neque plures entitates postulant, quia non omnes sunt oppositæ, sicut spiratio actiua, & paternitas sunt duæ notiones, non tamen duæ entitates, etiam relatiuæ, quia non sunt oppositæ. Dicimus ergo quod notiones sunt quædam notæ, seu designationes, quibus personas aut ea quæ ad personas pertinent, dignoscimus. Et possunt dari plures sub eodem esse, & entitate, & veritate; sicut è conuerso sunt plura attributa absoluta, quibus essentiam variis conceptibus significamus, nec tamen illa plures veritates, aut plura esse habent, sed idem.

36 Dico secundò, Bonitas in relationibus diuinis non multiplicatur, etiam relatiuè. Hæc conclusio difficultatem non habet ex *suprà* dictis: ostendimus enim in Deo non posse dari plures perfectiones, nec plura esse, etiam relatiuè, quia in perfectione, & esse non opponuntur relationes. Bonitas autem conuenit alicui secundum quod perfectum, & ratione perfectionis, & esse: ergo si non sunt plures perfectiones, neque plures bonitates. Ad hæc, boni-

Ioan. à S. Thom. in 1. part. D. Th. Tomus alter.

tas si multiplicaretur in relationibus, deberet multiplicari vt increata, & summa bonitas: nam vt creata non est ad rem. Summa autem, & increata bonitas implicat multiplicari, tum quia est summa perfectio, & sic omnem perfectionem includit, vnde dicit actum purum, & non solum genus relatiuum, sed etiam absolutum includit, hoc autem repugnat multiplicari: tum quia bonitas increata, & diuina est vltimus finis, ergo si multiplicatur, erunt plures vltimi fines, quia plures bonitates increatæ hoc autem repugnat: ergo.

Quare omnia transcendentalia quæ conueniunt 37
enti ratione alicuius perfectionis, multiplicari non possunt, quia hoc ipso quod perfectio est, diuina, & increata, & summa perfectio est, & ubi hac ratione repugnat multiplicari. Ex quo sequitur, realitatem, entitatem, vnitatem, aliquid, seu res, & ens, multiplicari posse, quia hæc de suo conceptu perfectionem non dicunt in suo formali conceptu, sed res, ens, & aliquid solum important communissimam rationem entis, prout dicit conceptum pertinentem ad quid, seu ad posituum datum à parte rei, quidquid illud sit, siue perfectum, siue imperfectum, potentiale vel actuale, sufficit quod sit capax existendi in re, siue per propriam, siue per alienam existentiam: nam hoc ipso est res prout opponitur nihilo, seu enti ficto. Et sub hoc conceptu multiplicari potest in Deo, sed existere per idem esse. Vnum autem dicit indiuisiōem, & per multiplicationem entitatis multiplicatur; & sic dicimus tres personas, & dicendo tres multiplicamus vnitatem. Vnde dicit D. Thom. *suprà quest. 6. art. 3. ad 1.* quod vnum non importat rationem perfectionis, sed indiuisiōis; & sic per hoc quod multiplicetur vnitatis ex vi talis conceptus, non multiplicatur perfectio, sed solum tollitur indiuisiō. Multiplicatio ergo relatiua cum sit multiplicatio realitatis, vt oppositæ, sub qua oppositione non explicatur perfectio, nec quid relatio sit, sed ad quid sit non multiplicat perfectionem, licet diuidat realitatem sub ratione *d.*

Dico tertio. Non est multiplicanda infinita 38
etiam relatiua in personis. Pro intelligentia huius conclusionis aduertendum est quod P. Suarez *lib. 3. de Trinit. c. 12. num. 7.* Duplicem infinitatem distinguit. Aliam simpliciter in genere entis, aliam propriam in vnoquoque genere, sicut de quolibet attributo secundum proprium genus dicimus esse infinitum in suo genere, sicut dicimus sapientiam esse infinitam in suo genere, & iustitiam in suo, &c. Ergo similiter relationes in suo genere infinitatem habebunt, & eo modo multiplicabitur infinitas, quod perfectio, quia infinitas ad quantitatem pertinet perfectionis. Et sic qui concedunt multiplicari perfectiones relatiuas, vrgentur multiplicare infinitates, quia perfectiones illæ multiplicatæ finitæ non sunt, cum non sint creatæ: ergo infinitæ in suo proprio genere; sic enim dicimus Verbum procedere vt terminum intellectiōis infinitæ, Spiritum S. amoris infiniti. Sed poni instantiam Suarez de ipsa existentia, quam multiplicat in relationibus, quia vel sunt creatæ, vel increatæ. Primum non potest poni in Deo. Secundum ponit plus existentias increatas, quod est absurdum. Et respondet, quod creatum, & increatum conuenit supposito ratione naturæ, sicut esse generabile vel corruptibile. Vnde non multiplicatur ratio increati in diuinis, sed solum conuenit ratione naturæ.

Cæterum nostra conclusio sequitur ex oppositis principiis *suprà* stabilitis, quia infinitas est quantitas perfectionis: ergo non multiplicata perfectione non multiplicatur infinitas: *suprà* autem ostendi

ostendimus perfectiones etiam relatiuas non multiplicari, quia in eis non opponuntur relationes, multo minus opponuntur in infinitate. Quod verò vnum quodque attributum infinitum sit, verissimum est, sed tamen non multiplicatur in eis infinitas, sed eadem infinitate omnia in suo genere infinita sunt. Idem ergo dicemus de relationibus, quia etsi opponantur in ipso *Ad*, vt correlatiuo, tamen in infinitate suæ perfectionis non opponuntur: ergo non multiplicatur: & ita in hoc in quo non opponuntur, æquiparantur relationes attributis. Specialiter autem virget hîc illud magnum inconueniens, quia si multiplicaretur infinitas relatiua, non posset vna persona habere omnem perfectionem alterius, nec formaliter, nec eminenter: & sic aliqua perfectio esset in vna, quæ non esset in altera. Non esset formaliter, quia entitas relationis Patris non est formaliter relatio Filij, sed illi opponitur, & ab ea distinguitur: ergo infinitas Patris relatiua non est formaliter infinitas relatiua Filij; aliàs esset eadem, & vna formaliter perfectio, atque aded non multiplicaretur. Non esset eminenter in vna quod in altera, quia continentia eminentialis est, quando vna forma est eminentior altera, & excedit illam, si autem sit omnino æqualis, non potest eminenter continere, quia non potest esse eminentior illa. Sed si vtraque habet suam infinitatem relatiuam separatam ab alia, vtraque infinitas relatiua æqualis est, & eiusdem omnino perfectionis infinitæ in ratione relatiuæ: ergo non potest eminenter continere, vt non bene concedit P. Suarez *ubi supra* c. 11. sed vel nullo modo continet perfectionem aliter infinitam, à qua distinguitur, vel continet formaliter, quod repugnat, & ponderatum est, cum formaliter opponantur. Ex multiplicatione ergo infinitatis, sequitur perfectionem vnius non esse in alia. A qua consequentia non se expediunt, qui perfectiones relatiuas docent multiplicari. Vnde tandem aliqui concedunt aliquam perfectionem relatiuam esse in vna relatione, quæ non est in altera. Sed ex hoc sequitur, neutram esse infinitam in genere relatiuo, quia tunc aliqua perfectio est infinita in aliquo genere, quando nulla perfectio illius generis illi deest: sed in hac relatione Patris non est omnis perfectio generis relatiui, quia aliqua perfectio sibi deest, scilicet perfectio, & infinitas relatiua Filij: ergo neutra est infinita in genere relatiuo. Nisi fortè dicatur, vnamquamque esse infinitam in sua specie, v. g. specie filiationis, vel paternitatis tantum, licet conueniant in genere relatiuo, sicut sapientia est infinita in specie sapientia, non in specie prudentia, licet vtraque sit in genere intellectiuo. Sed exemplum non quadrat, quia sapientia non habet distinctam infinitatem à prudentia, sed vtraque in genere intelligibili infinita est, & solum per rationem distinguitur illa infinitas. At in personis diuinis multiplicatio est realis; & sic perfectio infinita, quæ est in vna relatione, non erit in alia; & sic quidquid sit an in sua specie paternitatis vel filiationis remaneant infinitæ, in genere tamen relatiuo, infinitæ non erunt, sicut sapientia, & prudentia sunt infinitæ in genere intellectiuo. Quod ergo Verbum procedat vt terminus infinitus in genere intellectiōis, Spiritus S. vt infinitus in genere amoris, non diuidit eos in infinitate, sed in oppositione relatiua solum.

Dico quartò, Sanctitas personalis, & relatiua non multiplicatur in personis diuinis, sed Sanctitas pertinet ad attributum essentiale, sicut bonitas; & sic conuenit ratione naturæ. Aliqui existimant multiplicari sanctitates relatiuas: tum quia sanctificatio pertinet ad ipsa principia operandi quæ rectificari

debent per sanctitatem; principium autem operandi non solum est principium *quo*, sed etiam principium *quod*, scilicet persona, vel suppositum, & cum ista principia multiplicentur in diuinis, etiam sanctitates personales multiplicabuntur. Tum quia Verbum diuinum ratione suæ relatiuæ personæ sanctificauit humanitatem assumptam sanctitate personalis, præter illam quam habuit formalem accidentalem ex gratia, vt dici solet 3. p. q. 7. Ergo non solum pertinet ratio sanctitatis ad naturam, sed etiam ad personas.

Ceterum de hoc pertinet tractare ad prædictum locum 3. p. Nunc breuiter dico, quod quidquid sit an detur sanctitas personalis, præter attributalem, qua voluntas, seu operatio videtur rectificari; tamen non inuenio personales relationes opponi in sanctitate, sicut nec in perfectione, & in esse actuali: pertinet autem sanctitas etiam si sit personalis ad puritatem, & rectitudinem operantis, & sic maxime sequitur perfectionem, non oppositionem relationis personalis. In perfectione autem non opponuntur relationes, licet illam includant, ergo neque in sanctitate opponuntur, & sic sanctitas non multiplicatur, licet conueniat personis, & in eis includatur, easque reddat personaliter rectas, & sanctas: sicut esse constituit eas existentes, nec tamen multiplicatur, quia ex parte fundamenti se tenet, non ex parte attingentiæ ad terminum, & correlationis. Certius tamen videtur, quod sanctitas pure est attributalis, quia in Deo dicit indefectibilitatem, & puritatem intellectualem, & moralem, seu in intellectu, & voluntate. Ratio autem intellectui pertinet ad naturam diuinam sub conceptu naturæ, & moralitas pertinet ad attributa voluntatis, scilicet ad virtutes, vt misericordia, iustitia, &c. Ergo rectitudo tam ex parte intellectus dirigentis, quam moralitatis regulatæ in voluntate ad rationem naturæ vel attributi pertinet, & hoc est de conceptu sanctitatis. Vnde gratia quæ in nobis facit animam sanctam supernaturaliter tanquam participatio diuinæ sanctitatis, est participatio, & consortium diuinæ naturæ, iuxta illud 1. Petri 1. *Ve per hac efficiamini diuina consortis natura*: ergo sanctitas in Deo ad naturam pertinet, & attributa.

Rationes verò dubitandi non mouent.

Ad primam enim dicitur quod sanctificatio pertinet ad principia, quæ rectificari debent, per modum perfectionis, & moralitatis eorum, non per modum distinctionis, & oppositionis: non enim pertinet ad sanctitatem distinguere principia operatiua, aut relationes opponere inter se, sed omni malitiæ, & defectui, & impuritati morali opponere. Hoc autem est commune personis, non particulare alicui, quia hoc habent ex plenitudine actionis, seu actualitatis voluntariæ, & intellectualis, vnde rectitudo omnis dimanat.

Ad secundam dicitur, quod Verbum sanctificauit humanitatem ratione personalis sanctitatis, distinguo, ita quod ly *personalis* dicat rationem formalem sanctitatis, nego; ita quod dicat modum, seu terminum talis sanctitatis, concedo. Hic autem terminus, seu modus includit ipsam sanctitatem identicè, eamque modificat tanquam subsistentia, & principium *quod* illius. Vnde communicata humanitati subsistentia mediata communicatur sanctitas vt in tali subsistentia modificata: sicut in sententia D. Thom. communicatur humanitati existentia diuina vt modificata personalitati Verbi, non absolute.

Subsistentia

Subsistentia multiplicantur in personis.

De hoc amplius dicemus *seq. disp.* Nunc solum dico substantiam sumi pro termino complente, & personante naturam; & sic inveniuntur plures substantiæ attribui personis, & simpliciter fateri plures esse in Deo substantias, ut patet in epistola Sophronij, quæ lecta, & recapta est in VI. Synodo *actione* 6. ubi sæpius nominantur tres substantiæ in Deo. Cum ergo pluralitatem in substantiis teneamus, videndum est quomodo id stare possit cum unitate ipsius existentiae per se. Et dico substantiam duo posse importare. Primo existentiam per se, ut opponitur enti in alio, seu accidenti inhaerenti, & parti substantiali non subsistenti. Secundo sumitur pro termino ultimo incommunicabili, ut expresse docet S. Th. *inf. q. 29. a. 3. ad 4.* & nos dicemus *seq. disp.* Dicit enim de se terminum

pertinentem ad suppositum seu hypostasiam, quia subsistens est quasi sub alio sistens; & sic dicit terminum ultimi sub aliis positi, & quod habet rationem ultimi, terminum importat respectu eorum quæ super ipsum ponuntur, ut non communicentur alteri termino. Primo ergo modo non multiplicatur substantia in diuinis, quia non est aliud quam existentia per se, seu independens ab alio cui inhaereat aut insit. Et sic datur substantia absoluta in Deo, ut dicemus *disp. seq.* Secundo verò modo non datur substantia absoluta, & dantur tres relatiuæ, quia incommunicabilitas necessariò requirit oppositionem cum ulteriori termino; sublata enim oppositione, omnia sunt vnum, & consequenter se communicant, & identificant. Ergo sub hoc conceptu substantia relatiua debet multiplicari, quia debet oppositionem dicere, & sub oppositione exercere rationem termini.

Q V Æ S T I O XXIX.

De Personis diuinis.

S V M M A L I T T E R Æ.



GI T S. Thom. post explicatas processiones, & relationes, quæ sunt sicut principia ponendi personas distinctas in Deo, de ipsis personis. Et primò de his quæ pertinent ad omnes personas in communi quatuor quæstionibus sequentibus. Deinde de his quæ pertinent ad singulas specialiter.

Primum ergo occurrit de ipsis personis in communi est agere de personis secundum se, & in quo consistat, quid uè significetur hoc nomine *Persona*. Et sic tractat quatuor. Primò, definitionem personæ in communi explicat. Secundo, quomodo comparatur ad substantiam & essentiam & hypostasim. Tertiò, quomodo inueniatur in diuinis. Quartò, an significet ibi relationem vel essentiam.

Igitur in 1. articulo explicat definitionem personæ assignatam à Boëtio, quod est rationalis naturæ indiuidua substantia: dicitur enim substantia indiuidua, quatenus significat singulare in genere substantiæ. Dicitur autem rationalis naturæ quia non quodlibet indiuiduum substantiale, sed quod est naturæ intellectualis seu rationalis, persona vocatur.

In art. 2. ad melius explicandum rationem personæ, comparat illam cum tribus, quæ in substantiis singularibus concurrunt. Inuenitur enim in aliquo indiuiduo substantia sumpta pro quiditate, & tunc est idem quod essentia: deinde inuenitur substantia quæ pertinet ad modum existendi, scil. quatenus per se existit. Et 3. resultat hypostasis seu suppositum, quo nomine significatur res illa, seu indiuiduum, prout subest, seu subternitur accidentibus & prædicatis superioribus, sed accidentibus susternitur realiter ut formis inhaerentibus; & sic dicitur res naturæ, seu hypostasis, id est sub aliis positum, quo nomine etiam substantia solet significari, ut sit idem quod sub aliis stans. Prædicatis autem superioribus subest, non realiter, sed logicè, & secundum intentiones rationis; & sic dicitur suppositum, quasi suppositionem faciens. Nunc autem communiter pro eodem accipitur suppositum, hypostasis, res naturæ, subsistens completè, &c. Persona autem est idem quod hypostasis vel subsistens completum in genere naturæ intellectualis.

In art. 3. ostendit Deo conuenire significatum huius nominis persona, quia conuenit ei esse subsistens completum & perfectum in natura diuina, quæ est natura intellectualis. Hoc enim, quod est subsistere in intellectuali natura, nullam imperfectionem importat, sed perfectionem maximam, id est completam & terminatam. Esse autem indiuiduam substantiam non conuenit Deo ratione alicuius materiæ, sed ratione incommunicabilitatis, ut dicit *solutione ad 4.* Et licet conceptus formalis personæ, ut relatio est ad aliud, perfectionem non explicet, explicat tamen perfectissimum in natura, scil. esse terminatum in natura intellectuali, & terminus, seu modus perfectionis in Deo est. Hic tamen abstrahit D. hom. ab eo quod particulariter constituit personam in Deo, & solum vult significatum huius nominis *persona* Deo conuenire, quia conuenit perfectissimæ naturæ, quæ est intellectualis.

In art. 4. docet quòd persona in diuinis significat relationem vt formam constituentem personam , non quatenus relatio significatur exercendo oppositionem ad alterum , sed quatenus significatur relatio subsistens, & distinctionem faciens ab alio , persona quippe est indiuidua substantia , & illud est indiuiduum quod est in se indistinctum , & ab aliis distinctum in aliqua natura. Hoc autem facit relatio: nam est subsistens , siquidem relatio in Deo non inhæret, & est distinguens quia sola relatio in diuinis distinguit à correlatiuo.



QVÆSTIO XXX.

De pluralitate Personarum.

S V M M A L I T T E R Æ.



ECVNDVM quod tractandum est de personis in communi, est de earum pluralitate, & numero. In quo quatuor explicat D. Thom. Primum an sint plures. Secundum, quot sit personæ. Tertium, quomodo significant in Deo termini numerales. Quartum, an pluribus personis sit communis ipsa ratio personæ.

In 1. ergo articulo ostendit esse in Deo plures personas, quia sunt plures relationes subsistentes: relationes enim distinguuntur realiter secundum processiones. Sunt ergo plura substantia realiter distincta, & hoc in natura intellectuali, ergo plures personæ.

In art. 2. ostendit non esse plures personas quàm tres, scil. Patrem, Verbum, & Spiritum S. quia solum sunt tres proprietates, id est relationes oppositæ inter se, scil. paternitas, & filiation, quæ reciprocè opponuntur, spiratio actiua, & passiuæ, quæ etiam opponuntur. Sed ex his duabus vna, quæ est spiratio actiua, non opponitur paternitati, & filiationi, quia nec procedit ab illis, nec illæ ab ipsa. Et sic si non opponitur, identificatur cum eis. Spiratio autem passiuæ opponitur illis vt spirantibus, tum quia identificaretur spiratio passiuæ paternitati, & filiationi, vtraque diceretur spirari, & procedere per amorem. Et rursus cum identificarent sibi spirationem actiuam, procederent à se, quod est absurdissimum. Restat ergo quòd tres relationes constituent tres relationes oppositas, & consequenter proprietates personales: spiratio autem actiua non sit proprietas, quia est communis duobus.

In art. 3. docet quid pluralitas, seu multitudo in diuinis, quæ per terminos numerales significatur, non importat nisi plures vnitates, & significat res quæ dicuntur vnæ cum indiuisione circa vnāquamque. Et sic solum est ibi multitudo transcendentalis, quæ constat ex entibus distinctis, non numerus, qui est species quantitatis.

In art. 4. ostendit quòd hoc nomen *persona* est commune tribus personis communitate rationis, seu prædicationis, id est tanquam commune prædicabile, non tamen vt genus aut species, sed tanquam indiuiduum vagum vt aliquis homo, eo quod persona indiuiduam substantiam importat, & sic est commune tanquam indiuiduum in communi consideratum.



QVÆSTIO XXXI.

De His quæ ad unitatem, vel pluralitatem pertinent in diuinis.

S V M M A L I T T E R Æ.



ERTIVM quod consideratur circa personas in communi, est modus significandi & vtendi nominibus, quæ vel pluralitatem significant, vel exclusionem pluralitatis. In quo quatuor considerat. Primò, de hoc nomine *Trinitatis*. Secundò de hoc nomine *alius*, an sit dicendum in diuinis. Tertiò de hac exclusiua *solum tantum*, & similia, an sit adhibenda termino essentiali, vt solus Deus est bonus

bonus, est Creator, &c. Quartò an è conuerso possit adiungi termino personali, vt, solus Pater est Deus.

In art. 1. docet quòd hoc nomen *Trinitas* dici potest de Deo, non tamen de singulis personis, vt Pater, & Trinitas, quia significat pluralitatem determinatam personarum in vna essentia, scil. pluralitatem in numero ternario, & hæc verè dicitur de Deo, non de qualibet persona.

In art. 2. ostendit quòd rectè dicitur Filius alius à Patre, & Pater alius à Filio, non aliud, & aliud, quia ly *alius* significat distinctionem in persona, ly *aliud* in natura, seu substantia. Et similiter alia nomina excludentia distinctionem personarum, vt esse vnicum, esse solitarium, vel diuisionem ponentiæ, in natura, vt nomen separationis, diuisionis, differentia vitanda sunt.

In art. 3. docet quòd hoc nomen *Solus*, si sit idem quòd solitarius, & excludat consortium personarum eiusdem naturæ, non est apponendum Deo. Si non excludat consortium personarum, sed consortium aliorum, extra Deum, potest adiungi termino essentiali, vt cum dicitur, Solus Deus est æternus, Solus est immortalis.

In art. 4. docet quòd hæc dictio *Solus* propriè non est adiungenda termino personali, vt si dicatur, Solus Pater est Deus, quia excludit alias personas à consortio prædicati. Si autem ponatur aduerbium, vt, Pater solùm est Deus, est vera, quia excludit aliud, non alium à diuinitatis consortio.



Q V Æ S T I O XXXII.

De diuinarum personarum cognitione.

S V M M A L I T T E R Æ.

QUARTVM quòd in diuinis personis consideratur in communi, est de earum cognoscibilitate, in quo etiam includuntur notæ, seu notiones, quibus personæ discernuntur, tum inter se, tum ab essentia. Et inquit quatuor. Primò, generaliter, an Trinitatis mysterium sit naturali ratione inuestigabile. Secundò, an dentur, notiones seu notæ aliquæ, quibus singulæ personæ discernantur. Tertiò, quæ sint istæ notiones? Quartò, an liceat circa eas diuersimodè aut contrariè opinari.

Igitur in 1. articulo docet mysterium Trinitatis non posse vlla ratione naturali inuestigari, quia nullus effectus naturalis & qui naturali ratione attingi potest, manifestare potest Deum, nisi vt causam talis effectus. Est autem Deus creaturarum ratione suæ virtutis, & potentiæ, & artis, quæ omnia sunt Dei in quantum vnus, non vt Trinus; Trinitatis ergo ratione naturali inuestigabilis non est.

In art. 2. docet esse ponendas notiones in diuinis, id est, formas, seu notas quibus discernantur ea quæ personalia sunt ab essentialibus, vt distinguamus in quo personæ diuinæ sint vnum, & in quo sint plures. Et vt iterum in persona, quæ est vna, vt Pater, discernatur id quod est proprium, scilicet paternitas, & id quod commune, scilicet spiratio actiua. Et has notiones, proprietates, & notas tanquam quasdam formas, etiam in abstracto significamus.

In art. 3. docet has notiones rerum personalium esse quinque. Quia notiones sunt formæ, seu notæ, quibus personæ innotescunt, & discernuntur. Innotescit autem persona Patris dupliciter, & per negationem existendi ab alio; & sic est innascibilitas, & per principium originandi aliud; & sic vt est principium Filij, est paternitas, vt principium Spiritus S. est spiratio actiua, quæ etiam est communis Filio. Filius autem innotescit notione propria, quæ est Filiatio, in quantum genitus; vt autem spirator innotescit notione communi cum Patre, scilicet spiratione actiua. Denique Spiritus S. innotescit notione procedendi per modum amoris, quæ est spiratio passiva.

In art. 4. docet quòd circa notiones licitum est contrariè opinari, in his in quibus non sequitur aliquid contrarium fidei, & determinatis per Ecclesiam. Secus verò in his in quibus sequitur.

DISPUTATIO XIV.

De personis diuinis, & notionibus
in communi.

ARTICVLVS I.

*Explicatur quid sit Persona, hypostasis;
subsistentia, & substantia.*

Non est animus de singulis istis dis-
serere, & difficultates varias, quæ
circa subsistentiam seu personalita-
tem, & existentiam excitari solent
hic explicare. Præstitutum id à nobis
est *præced. como disp. 4. & in Physicis*
9.7. Nunc solum hæc breuiter delibamus, quatenus
conducunt ad explicandam rationem personæ di-
uinæ in quo consistat, & quid ad eam requiratur.

Quæ sint præsupponenda.

Est ergo notandum apud omnes pro certo, &
comperto haberi, rationem personæ, hypostasis,
suppositi, subsistentiæ, & primæ substantiæ, ad
singulare in genere substantiæ pertinere. Vnde &
definitio Boëtij de persona per indiuiduationem
procedit, dum inquit quod *Persona est rationalis*
natura, indiuidua substantia. Et definitio Richardi
de S. Victore *lib. 1. de Trinit. cap. 18. & 23.* cuius
mentionem fecit S. Thom. *hic q. 29. art. 3. ad 4.* ubi
definiuit personam diuinam, quod *est diuina na-*
tura incommunicabilis existentia, ubi quod Boëtius
vocaui indiuiduam, Richardus vocat incommu-
nicabilem, quia non potest indiuiduatio intelligi
sine aliqua communicabilitate, siquidem vniuersali-
tas communicabilitatem dicit, & sic eius oppositum,
quod est singulare, seu indiuiduum aliquam in-
communicabilitatem debet habere; & id quod per-
fecte, & completè indiuiduum est, sicut suppositum,
vel persona, completè incommunicabile est, vt
iam explicauimus.

Ex hoc ergo principio, & præsupposito apud
omnes certo, quod suppositum vel subsistens per-
tinet ad rationem singularis, sed indiuidui, vltorius
nascitur differentia valde consideranda inter singu-
lare accidentis, & substantiæ, quod indiuiduum qui-
dem accidentis habet singularizare, & determinare
prædicata quiditativa superiora tanquam vltima
determinatio, & infimus gradus in serie prædicato-
rum, quia indiuiduatio est id quod omnibus gradi-
bus subiicitur in hac serie; sed tamen quia per se non
potest existere, sed indiget alteri inhaerere, cuius
adminiculo, & beneficio sustentetur, idè non po-
test tale accidens etiam prout indiuiduum, esse om-
nino incommunicabile, sed indiget alicui subiecto
communicari, vt ibi sustentetur. At verò singulare
substantiæ non solum dicit rationem infimi gradus
in serie, & linea prædicatorum, & graduum consti-
tuentium, sed etiam dicit rationem existentis per se,
& in se sine indigentia adminiculi alterius in quo
sustentetur. Vnde non debet vltorius communicari
alteri tanquam termino vel subiecto, sed sistere in
se, & præter hoc præbere accidentibus, & for-

mis adiacentibus vltimam rationem subiecti cui
inhæreant, & sic debet sub illis poni, & sub illis ef-
se tanquam subiectum, & sustentatiuum eorum. Et
quia hæc duo officia, seu munera facit, scilicet in se
sistere communicationem, quatenus non commu-
nicatur alteri, nec vltiori subiecto applicatur, sed
in tanquam in vltimo sistit, & sub aliis formis poni
tanquam subiectum earum, resultauit hoc nomen
subsistentia, quasi sub aliis sistencia, ita quod singu-
lare, seu indiuiduum, quod in se sistit communica-
tionem, & esse, ne vltra communicetur, & sub aliis
ponitur, & subiicitur, vt alia sibi communicent, dicitur
subsistens, & suppositum, & res naturæ, & prima
substantia, & hypostasis, etsi sit in natura rationali,
dicitur persona. Omnia tamen ista idem significant,
& eodem effectus faciunt, scilicet illos duos, quod
est non communicari alij subiecto, seu termino, &
recipere in se aliarum formarum communicationem.
Et idè materia dicitur in rebus compositis princi-
pium indiuiduationis substantialis, quia est vltimum
subiectum omnium formarum vltra quod alteri
subiecto non communicantur. In rebus autem spi-
ritualibus forma vt incommunicabilis, est princi-
pium indiuiduationis.

Sic ergo distinguenda sunt nomina omni singu-
lari conuenientia siue sit accidens, siue substantia,
siue pars, siue totum, à nominibus peculiaribus sub-
stantiæ, quæ non est pars, sed totum. Nomina com-
munia sunt, Singulare, Particulare, Indiuiduum: hæc
enim etiam accidenti adaptantur, si cut hæc albedo,
hæc quantitas, &c. & adaptantur etiam parti, vt hæc
manus, hic oculus, ista auris. Et humanitas Christi
singularis, & indiuidua est, sed non suppositum. No-
mina verò specialia significantia indiuiduum, quod
in genere substantiæ est totum, & completum seu
terminatum, non verò pars, & consequenter non est
communicabile, sed incommunicabile, quia hoc ip-
so quod est terminatum, & clausum in se, incommu-
nicabile est, significatur nominibus designantibus
subiectum, fundamentum, & vltimum, seu termina-
tum in substantia, vt subsistens, suppositum, prima
substantia, &c. quæ *suprà* numerata sunt. Et quod
ista nomina significantia singulare, completum, &
totale in genere substantiæ importent incommu-
nicabilitatem, tam obuium est apud Authores vt
mirandum sit posse aliquem de hoc dubitare, nisi
qui ab eorum libris aspectum auertat. Ita affirmat
S. Thom. *in hac q. 29. art. 3. ad 4.* & ad id adducit de-
finitionem Richardi de persona, ubi explicatur
incommunicabilitas, licet in definitione Boëtij non
explicetur. Et Scotus *in 1. dist. 23. q. 1.* hanc defini-
tionem Richardi multum commendat, & præfert
eam definitioni Boëtij, quia vtitur nomine incommu-
nicabilis potius quam indiuiduæ. Eadem que de-
finitione Richardi de incommunicabilitate vsus est
Ioannes Theologus contra Marcum Ephesium in
Concilio Florentino *sessione 19.* Videatur Suarez
lib. 1. de Trinit. c. 1. Vasquez super hanc q. 29. art. 1.
in commentario articuli Caiet. super eandem q. art. 1.
Torres *ibi*, & communiter omnes interpretes S.
Thom. super eundem locum explicantes, & defen-
dentes definitionem Boëtij, quam mox explicabi-
mus.

Et ratio facta id probat, quia singulare substan-
tiæ significat aliquid completum, & totum, atque
adè in se clausum, & non communicabile alteri,
Vnde in vsu communi non vocamus partes, per-
sonas, aut supposita, sicut oculum, aut manum non
dicimus esse personam, quia partes incommunicabi-
les sunt, non persona, & idem est de anima sepa-
rata

rata, quia etsi sit subsistens, id est, per se existens, non tamen persona, & suppositum, quia communicabilis, & vnibilis est vt forma, seu pars.

Quod si petas, quam communicabilitatem excludat suppositum, seu persona, quando dicitur incommunicabilis? Nam si reddit naturam incommunicabilem, sequitur subsistentias relatiuas in Deo non esse personas, quia natura diuina per personam Patris incommunicabilis non est personae Filij.

4 Resp. ex D. Thom. in 3. ad Anibald. distinct. 5. q. vnica art. 2. in fine, quod persona, seu indiuiduum in substantia excludit triplicem communicabilitatem. Primò vniuersalis ad inferiora, quia indiuiduum (præsertim designatum, non loquendo de indiuiduo vago) non potest esse vniuersale, nec habere inferiora. Secundò, partis ad totum, quia est completa, & terminata substantia. Tertiò, assumptibilis ad aliquid dignius, seu terminabilis vltiori termino: quia etsi natura possit assumi, tamen persona assumi non potest. Hinc dicitur ad instantiam de personis diuinis, quæ relinquunt naturam communicabilem; & tamen sunt personæ dicimus enim quod relinquunt naturam communicabilem vt naturam, non vt personam: nam ipsa persona Patris non est incommunicabilis; sufficit autem ad rationem personæ, quod ipse a persona, seu natura vt personata non sit communicabilis, licet vt natura communicabilis sit. Ex hoc ideo fit in diuinis, non in personis creati, quia personalitates diuinæ sunt relatiuæ, non absolutæ. De ratione autem relatiui est quod habeat correlatiuum, licet distinctum à se in quantum oppositum sibi, non tamen distinctum natura, quia non oppositum illi. Vnde quia correlatiuum terminum habet intra eandem naturam, non potest quælibet relatio esse terminus adæquatus naturæ, sed inadæquatus, quia debet dare consortium alteri correlatiuo. Vnde ratio personæ relatiuæ, non est reddere naturam incommunicabilem, quatenus natura est, sed ipsam personam relatiuam reddit incommunicabilem, & naturam, quatenus personata est, non absolute, quia inadæquatus terminus eius est, vt pote relatiuus. Terminus autem seu personalitas creata, quia absoluta est, adæquata est. Vnde reddit naturam absolute incommunicabilem; & sic quando assumpta est natura humana à Verbo, creata personalitas impedita est. Quare nomen suppositi, & personæ, & alia quæ primam substantiam designant incommunicabilitatem in ipsa re, seu substantia singulari important.

5 De nomine hypostasis, & substantiæ, maior apud antiquos controuersia fuit vt docet S. Thom. in hac q. art. 2. & art. 3. ad 3. Videtur enim directè correspondere nomini hypostasis hoc nomen substantia, eo quod apud Græcos hoc nomen *Vsia* significat essentiam, seu quidditatem, aut naturam, & hypostasis dicitur quasi *subusia*, seu *subessentia* & idem significare videtur substantia, quia est quasi sub alio stans, & videtur explicare officium substandi. Ex alia verò parte, opponitur accidenti, & significat id quod intimum, & substantiale est in aliquo, ad differentiam accidentium quæ exterioritatem faciunt. Vnde factum est quod plures hoc nomine hypostasis, seu substantiæ olim deciperentur, quia plures attendentes ad rationem substandi, & non ad rationem vsiæ, seu essentiæ, simpliciter admittebant tres hypostases, vel tres substantias. Deinde verò in vi significationis vsiæ, & substantialitatis cogebantur fateri tres essentias in Deo, & hoc erat hæreticum. Postmodum vsu Catholicorum Patrum, & Doctorum tam in Conciliis, quam

extra lis ista composita est, vt nomen hypostasis personalitatibus, seu subsistentiis deputetur; nomen substantiæ, vsiæ, seu essentiæ, quia visum est in nomine substantiæ magis debere attendi ad contrapositionem cum accidentibus exterioribus, quam ad officium substandi seu sustentandi accidentia: in nomine verò hypostasis ipsum subesse, seu subistere magis explicari.

Definitio personæ explicata, & defensa.

Ex his explicari potest definitio personæ *suprà* tradita à Boëtio, quod *Persona est rationalis natura indiuidua substantia*. Dicitur indiuidua substantia, hoc est prima substantia, ita quod ly *substantia* significat conceptum substantiæ, & de se communem ad primam, & secundam substantiam, & per ly *indiuiduam* trahitur ad standum pro prima substantia, vt docet S. Thom. in hac quest. 29. art. 1. ad 2. & qu. 30. art. 1. ad 1. dicit quod *substantia in definitione personæ non significat essentiam, sed suppositum*. Et ita indiuidua substantia significat substantiam singularem completam, & quæ est totum & consequenter quæ incommunicabiliter, seu totaliter subsistit. Dicitur autem *rationalis natura*, quia non quodlibet suppositum est persona, sed in genere intellectuali. Et hoc ideo, quia vt S. Th. aduertit in hac quest. 29. art. 3. ad 2. & in dist. 23. qu. 1. art. 1. in fine corp. idem adducit ex Boëtio lib. de duabus naturis, nomen personæ primò impositum est à personando, quia in tragicædiis, seu comædiis recitatores, qui famosos viros representabant quandam sibi laruam imponebant; & sic representabant, seu personabant illorum dicta, & gesta. Sic representantes dicebantur personæ, seu alicuius dignioris viri personam gerere, Inde tractum est nomen ad significandum dignitatem aliquam eorum qui personæ dicuntur. Et quia inter omnes substantias, quæ intellectuales sunt digniores sunt, ad eorum dignitatem explicandam, personæ dicti sunt.

Ex duplici tamen parte hæc definitio impugnata est à Scoto, à Richardo de S. Victore, à Laurentio Valla. Scotus & Richardus, obijciunt contra illam particulam *indiuidua*. Valla contra illam particulam *substantia*. Obijcit Scotus *vbi suprà*, quia definitio illa conuenit animæ rationali separatæ, & tamen non est persona: ergo non est bona. Maior prob. quia anima separata est substantia, vt de se liquet: est indiuidua, quia est singularis: est rationalis natura, quia est intellectiua. Obijcit Richardus, quia illa definitio competit Deitati, seu diuinæ naturæ, & huic Deo: nam diuinitas est substantia, & est indiuidua, quia singularis, & est rationalis natura, quia intellectiua, & tamen non est persona, sed tribus personis communis: ergo. Obijcit Valla lib. 6. *Elegant. cap. 34.* quia vna, & eadem res, seu substantia plures dicitur gerere personas, quia plures representat, aut vice earum fungitur. Persona ergo ad qualitatem spectat, seu ad officium, non ad substantiam, & ita incongruè definitur per substantiam. Et hinc factum est quod Sabellius non multum curaret Deo attribuere plures personas, licet solum fateretur vnum suppositum vnumque subsistens, quia plures sustinebat personas seu pluriū munere fungebatur eadem Dei subsistentia apud ipsum. Vnde & plures antiquorum, vt refert S. Gregorius Nazianz. orat. 21. in Athanasium circa finem, recusabant solum concedere Deo plures personas, ne in Sabellij errorem viderentur declinare, qui pluriū munerum, seu officiorum exercitio fungi eundem Deum dicebat

118 Quæstio XXIX.&c. De Personis diuin.

cebat, & sic plures sustinere personas. Existimabant ergo personam, qualitatem seu representationem importare non substantiam.

8 Ad Scotum Resp. quod Boëtius nomine indiuiduæ substantiæ intellexit substantiam primam, quæ cæteris omnibus substat, seu sub aliis omnibus est; Et ita in ly *indiuidua* venit intelligendum indiuiduum completum, seu totale, quod est indiuiduum simpliciter in genere substantiæ, vt S. Th. explicat in 1. dist. 23. q. 1. art. 2. & in hac q. 23. art. 3. ad 4. & q. 30. art. 1. ad 1. Et sic intelligendo ly *indiuiduum* pro indiuiduo completo, & terminato, seu, quod idem est incommunicabili, non conuenit animæ separatæ definitio personæ, quia non est indiuiduum completum, & incommunicabiliter subsistens, sed vniuersalis, & communicabilis vt forma.

9 Ad Richardum dicimus eodem modo, quod Deitas, seu hic Deus, est aliquid singulare, & per se, imò à se existens, & ipsamet essentialis existentia, sed tamen non est singulare terminatum, & incommunicabile intra se, & ita non est indiuiduum per modum suppositi, & primæ substantiæ, sed per modum essentiæ, & naturæ, atque adeò non conuenit ei definitio personæ traditæ à Boëtio, qui sumit indiuiduam substantiam pro indiuidua completè, & totaliter, seu per modum suppositi. Quod amplius declarauit Richardus, loco indiuiduæ, ponens incommunicabilem, & S. Thom. hac q. 29. art. 3. ad 4. adducit.

10 Ad Vallam Resp. ipsum in hoc pessimè sentire, quod persona solam qualitatem significet, seu representationem, & officium. Nam vt rectè obseruat S. Thom. loco cit. in 1. dist. 23. q. 1. art. 2. ad 1. iudicium de nomine non debet esse secundum hoc à quo imponitur, sed secundum id ad quod significandum instituitur. Vnde licet nomen personæ sit impositum à representatione, tamen est impositum ad significandam substantiam completam in natura intellectuali subsistentem, & hoc Deo conuenit. Quapropter grauiter in hoc reprehenditur Valla, quod dixerit non magis in Deo esse personam, quam in brutis animantibus, ex hac pure grammaticali æquiocatione deceptus, cum expressè fides doceat, & Ecclesia definiat in Deo esse tres personas, & vnam essentiam in c. *Firmiter*, & c. *Damnatus*, de summa Trinit. & in Concilio Florentino, & aliis multis locis. Nec latuit Boëtium hoc in quo à Valla reprehenditur, quod scilicet persona non à substantia, sed à representatione seu munere, & officio imponatur, cum hoc ipsum dicat Boëtius in lib. de duabus naturis paulo ante medium, quod *Nomen personæ impositum est à personando, quia in comædiis recitatores ad representandum aliquem, cuius gestare citabant, larua quadam faciem velabant; & sic recitationem suam personabant.* Id ergo est à quo nomen etymologizat, sed non ad id significandum est impositum, sed ad significandos ipsos homines substantialiter in se, & hoc modo frequens est vsus huius vocis in iure ciuili, cum agitur de actione, seu iniuria personarum, & in Scriptura, vt cum dicitur Sapient. 6. *Non subtrahet personam cuiusquam Deus*, vbi nomen personæ ad omnes extenditur, & Deuter. 10. *Deus qui personam non accipit, nec munera*; Act. 10. *Non est personarum acceptor Deus.* Et in Patribus hæc vox persona pro substantiali subsistentia sumitur, & in Deo verè ponitur, vt constat ex Symbolo Athanasij: *Alia est persona Patris, alia Filij, &c.* Et Nazianz. vbi supra eandem vocem Athanasium approbasse refert. Et vbi habetur in Symbolo, *neque confundentes personas*, Græcè dicitur *πρόσωπον*, quæ

vox vt D. Thom. docet in 1. dist. 23. q. 1. art. 1. in fine corporis, deriuatur, sicut persona à facie larvata, qua representabantur personæ in comædiis. Eadem voce vtuntur Tertullianus contra Praxeam, Hilarius lib. de Synodis, Hieronym. Epist. 57. Aug. lib. 4. de Trinit. c. 8. & 9. Leo Papa serm. 2. de Pentecoste, Damasus in confessione fidei ad Paulinum, Concil. Toletanum II. in confessione fidei Laceranense in c. *Firmiter* & c. *Damnatus* vbi supra.

Concludimus ergo de fide esse dari in Deo personas, nec sine ipsis stare mysterium Trinitatis, esseque rectè adaptari definitionem Boëtij, quia sunt supposita, seu primæ substantiæ in natura intellectuali diuina. Solum aduertendum est ne nimis scrupulo vocum hæreamus, cum dicitur subsistentia, suppositum, hypostasis, quod totum sonat aliquid subsistens, & subiectum, sustentans formas superuenientes, quæ accidentales sunt, quod tamen in Deo non inuenitur, quia accidentium capax non est, non ob hoc, significatum istorum nominum deesse Deo. Dicimus enim ex D. Thom. in hac q. 29. art. 3. ad 3. & in 1. dist. 23. q. 1. art. 2. ad vltimum, quod hypostasis, & suppositum non sunt in Deo quantum ad munus sustentandi accidentia, à quo nomen illud impositum, & originatum est, sed quantum ad rem significatam, scilicet completum subsistens in natura rationali. Et ob id Richardus in sua definitione, loco indiuiduæ substantiæ, posuit incommunicabilem existentiam ad designandum substantiam in Deo, non vt substantem aliis, sed vt existentem in se, & per se incommunicabiliter, & completè. Distinguuntur autem ista nomina hypostasis, subsistentia, suppositum, res, naturæ, etiam in creatis non ex parte rei significatæ, nec tamen sunt synonyma, quia habent originem ex diuersis principiis, & possunt in vsum significationemque illorum venire, si aliquis velit sic applicare, & vt illis pro significatione talium formalitatum seu munerum, scilicet substandi aut per se existendi; & sic non habent vsum synonymum, licet eandem rem significant.

Quid sit personalitas in communi, quid personalitas diuina, & quomodo tribus personis sit communis?

Personalitas, cum sit id quo formaliter constituitur persona, nihil aliud importat in natura rationali, quam subsistentia, & suppositalitas in quacumque substantia. Est enim terminus, seu complementum substantiæ, qua redditur vltimò completa, & terminata, sicut quantitas terminatur superficie, linea, punctis. Et quidquid illud sit, constat terminum hunc, seu subsistentiam non pertinere ad prædicatum constitutum naturæ, sed constitutæ terminatiuum. Constat hoc manifestè, nam in Christo Domino est integra humana natura in ratione naturæ: nam est verè, & integrè homo, non esset autem si aliquod constitutum prædicatum illi deesset: variaretur enim essentia; & tamen suppositalitem seu substantiam creatam non habet. Ergo non pertinet subsistentia ad constitutionem naturæ, sed ad terminationem naturæ constitutæ.

Quid autem sit hoc quod præter naturam importat subsistentia, & suppositalitas, aut personalitas, an sit aliquid reale, an aliquid rationis, an modus, vel quid tandem sit, diximus præced. toto disp. 4. art. 1. circa 2. Difficultatem. Ex hoc enim dependet scire quid significet, & pro quo supponat ly *Indiuidua substantia* in definitione personæ. Nam quidam nomine

nomine *individa*, intelligunt relationem rationis, scilicet subiicibilitatem ad prædicata superiora, quod tribuitur Durando in 1. dist. 23. q. 1. num. 24. Itaque sumit ly *individa* logicè, non physicè. Individuum autem logicè sumptum contraponitur vniuersali logicè sumpto. Vniuersale autem logicum dicit relationem ad inferiora per modum superioris, & prædicabilis. Individuum ergo logicum dicit relationem per modum inferioris, & subiicibilis; & sic in definitione personæ individa substantia est substantia vt subiicibilis prædicatis superioribus.

14 Alij dicunt non sumi ly *individa* logicè pro secunda intentione, seu pro relatione rationis, sed pro prima intentione, seu pro eo quod habet in re individuum substantiale. Et dicunt quod in re non addit *supra* naturam aliquid positium, sed aliquid negatium, scilicet incommunicabilitatem, seu negationem communicationis, non solum per modum vniuersalis, ad inferiora, sed per modum partis incompletæ ad totum; debet tamen connotare aliquid positium supra quod fundetur ista negatio, sicut in diuinis connotat relationem in qua fundatur ista negatio incommunicabilitatis. Et hæc est opinio Scoti in dist. 25. q. 1. Alij dicunt ly *individa* in definitione personæ, atque aded ipsam personalitatem seu supposititalitatem importare aliquid positium superadditum ipsi naturæ, illamque terminans, & complens, quæ est communior sententia, & inter Thomistas fundatissima, vt cit. loco ostendimus. Reuera enim persona seu suppositum est aliquid positium verè, & realiter inuentum à parte rei. Non potest autem aliquid à parte rei repertum formaliter, & per se primo constitui ente rationis quod est negatio, aut intentione secunda, quæ solum conuenit rei in esse cognito, siquidem conuenit esse personam à parte rei, & Christo conuenit à parte rei non habere personam creatam, non solum in esse cognito. Vnde S. Thom. hic quest. 30. art. 4. docet nomen personæ, non esse nomen intentionis, sed rei. Et idem affirmat in 1. dist. 23. & dist. 25. Bene verum est quod in aliquo constituto reali inuenitur aliquando aliqua negatio, seu priuatio, vel aliquid rationis includi tanquam connotatum, seu modum, supponendo tamen formam realiter, seu à parte rei constituentem. Et sic cum persona à parte rei constituatur, aliquid reale assignari debet pro formali constituyente, licet fundet illam negationem communicabilitatis, & illam secundam intentionem subiicibilitatis. Non potest autem illud formale constituens suppositum, seu personam esse natura sub conceptu naturæ, cum sit tota, & integra natura, quoad prædicata constitutiva an humanitate Christi, & non sit persona creata: ergo aliquid positium, & reale est id quod persona addit super naturam.

15 An verò illa positiua realitas sit modus, seu aliquid solum modaliter distinctum à natura, an aliquid distinctum tanquam res à re, in citato loco disp. 4. ostendimus ex mente D. Thom. & Caiet. & aliorum Thomistarum, & ex ratione, esse modum substantialem superadditum naturæ, reductiuèque pertinentem ad prædicamentum substantiæ, tanquam modus terminans, & complementum naturæ, sicut punctum est reductiuè in prædicamento quantitatis vt terminus lineæ, & modus intensiōis & remissionis reductiuè in prædicamento qualitatis pro formis intensiōis capibus. Vnde dicit S. Th. in hac qu. 29. a. 1. ad 3. quod *Individuum ponitur in definitione personæ ad designandum modum subsistendi, qui competit substan-*

tiis particularibus. Competit autem substantiis particularibus indiuiduari per se, non sicut accidentia quæ indiuidantur, per aliud, in quo sunt, scilicet per subiectum, vt dixerat in corp. art. Et partes indiuidantur, non per subiectum in quo sunt, sed per totum quod componunt.

Et si inquiratur, quem effectum faciat modus iste, seu realitas quam addit personalitas seu supposititalitas super naturam? Respondeo duos effectus formales præstare, quorum vnus aliquando separatut ab alio, si totaliter, & adæquatè non sit completum individuum: est enim modus existendi per se, & est modus existendi incommunicabiliter alteri supposito quatenus habet statum totius vt distinguitur à parte, quæ communicabiliter se habet ad totum. Et anima rationalis separata, licet per se existat, non tamen vt totum incommunicabile; & sic non est persona; id autem quod est persona, & suppositum incommunicabiliter se habet, & tanquam quodam totum in se clausum, & completum. Et vocatur subsistentia, quatenus per se existit, hypostasis verò, seu suppositum, quatenus aliis accidentibus, aut prædicatis supponitur, & sustentat ea vt docet S. Thom. in hac q. 29. art. 2. in corp. Et similiter declarat istos duos effectus modi subsistentiæ, seu supposititalitatis completæ in aliis locis. Dicit enim in q. 9. de potentia art. 2. quod *Persona significat naturam cum quodam modo existendi, quod modus est esse per se existens.* Idemque habet in 1. dist. 23. q. 1. art. ad 2. At verò in hac q. 30. art. 4. ad 2. dicit, quod *Licet persona sit incommunicabilis, tamen ipse modus existendi incommunicabiliter potest esse communis multis.* Quare subsistentia, seu supposititalitas adæquatè sumpta hos duos effectus importat, scilicet facere, per se existere, & ultimo completum, & incommunicabile reddere subiectum: quia iste secundus effectus necessariò petit & supponit primum: nec enim potest incommunicabile esse, quod per se non existit, sed in alio: licet aliquando inueniatur aliquid inadæquatè habere istum modum subsistendi, solum quoad primum effectum existendi per se, non quoad secundum existendi incommunicabiliter, vt anima separata per se existit, & non est suppositum seu persona, quia communicabilis est. Ex eo autem quod existit per se, sequitur quod possit sustentare accidentia in esse, & subsistere illis continendo in esse, etiamsi incommunicabile suppositum non sit, sicut anima sustentat sua accidentia, quia per se existit, licet non sit suppositum.

His autem explicatis circa rationem personæ 16 seu supposititalitatis, & subsistentiæ in communi, restat videre, quid in Deo personalitas, seu ratio personæ formaliter, & directè importet, relationem an essentiam? loquendo de subsistentia, seu modo personalitatis, non solum inadæquatè, & quoad effectum existendi per se sed adæquatè, & quoad effectum etiam incommunicabilitatis. Nam vtrum inueniatur in hoc Deo, seu in Deitate secundum se antecederet ad personas relatiuas subsistentia absoluta quoad effectum existendi per se, sequenti art. disquiretur.

17 In hoc ergo puncto manifestissima est sententia D. Thom. in hac qu. 29. art. 4. vbi concludit S. D. quod *Persona diuina significat relationem vt subsistentem*, & hoc est significare relationem per modum substantiæ, quæ est hypostasis subsistens in natura diuina, licet subsistens in natura diuina non sit aliud, quàm natura diuina, & secundum hoc verum est, quod hoc nomen *persona* significat relationem in recto, & essentia in obliquo, non tamen relationem in quantum est relatio, sed in

in quantum significatur per modum hypostasis. Hoc est non in quantum exercetur relatio circa terminum, sed ut tenet se ex parte respicientis, seu subiecti, vel ipsa potius relatio subiecto non indiget, quia subsistens est.

Ratio est quia sola relatio in diuinis incommunicabilitatem fundare potest ad suum correlatiuum, eo quod cum ipso oppositionem habet, reliqua præter relatiuas oppositiones, unum sunt in Deo. Similiter est terminus substantialis, ipsamque naturam diuinam substantialiter reddit terminatam, quia relatio illa accidens non est, nec etiam est natura, aut prædicatum constitutum, & essentiale naturæ, cum tota natura secundum conceptum naturæ communicetur Filio, non communicata relatione Patris: ergo est terminus, seu modus naturæ substantialiter, quia præter accidens, & prædicata naturæ, seu quiditatem naturæ, aliud non restat. Et hoc ipsum ex suis visceribus exigit relatio quando non est accidentale aliquid, sed substantiale, quia talis substantialitas non importat substantiam pro essentia, quia substantia pro essentia communicatur personis, & est una in tribus, non autem relatio, sed importat substantiam pro existentia per se, siquidem non est accidens, & conuenit illi terminatio, quia incommunicabilitas ad ulteriorem terminum, & cum sit incommunicabilitas substantialis, est terminatio substantialis: sistit enim in substantia, quidquid substantialiter incommunicabilitatem ponit. Ergo habet relatio subsistens quidquid requiritur, ut terminus substantialis incommunicabiliter respectu eius cui opponitur.

18 Ex quo colligitur tres relationes personales, seu proprietates, scil. paternitatem, filiationem, & spirationem passiuam, quæ incommunicabiles, & oppositæ sunt, esse tres subsistentias, & tres personalitates: Sunt enim constitutivæ trium personarum distinctarum in esse personali: sunt ergo tres personalitates: nam personalitas est forma constitutiva personæ in esse, & ratione personali: sunt ergo in Deo tres personalitates, sicut sunt tres personæ. Personalitas autem, seu suppositivitas est subsistentia in natura rationali: ergo si sunt tres personalitates, sunt tres subsistentiæ. Nec nomen subsistentiæ est nomen absolutæ perfectionis, sed terminationis naturæ, quæ terminatio in Deo relatiua est. Licet enim subsistentia videatur inuoluere existentiam, quia subsistentia dicitur existentia per se, & subsistens per se existens, tamen non est subsistentia ipsa existentia directè, sed modus eius, id est perfectas existentia: per se autem dicit modum quo habetur illa existentia, scil. non in alio, nec dependentem ab alio, ut à subiecto sustentante, sed sustentatam in seipso, seu terminatam in se, & incommunicabilem, si completa, & totalis sit. Quare substantia modum dicit terminationis, atque adeo magis ad incommunicabilitatem pertinet, quia ubi est incommunicabilitas, est terminatio, & perfectas: Cum ergo relationes faciant incommunicabilitatem substantialem, quia oppositionem substantialem dicunt, consequenter subsistentias multiplicant, quantum ad modos perfectitatis, & terminationis, licet neque existentiam, neque substantiam multiplicent, quæ sunt modificata per modum, & perfectitatem subsistendi. Et Patres communiter subsistentias plurali nomine significant, præsertim post sedatam antiquam litem de differentia hypostasis, & vsiæ. & tandem hypostasis pro subsistentia, seu supposito, vsiæ pro essentia, sicut & substantia pro essentia communiter acceptata est. Vnde in epistola Agathonis Papæ in VI. Synodo actione 4. dicitur esse in Deo trium subsistentiarum, seu personarum unam

substantiam, vel, ut antiqua editio habet unam subsistentiam, & in epistola Sophronij, quæ in eadem Synodo actione 6. recitata, & acceptata fuit sæpius plures substantiæ Deo ascribuntur. Et Martinus I. in Concilio Lateranensi consultatione 5. canone 1. explicauit Deum esse unum in tribus subsistentiis. Quare rectè Iustinianus Imperator in edicto fidei ad Ioannem II. dixit, Omnes sancti Patres consonanter nos, docent, aliud esse naturam seu substantiam, & formam, aliud subsistentiam siue personam. Subsistentia ergo personaliter, & completè sumpta multiplicatur in Deo, licet aliqui id negauerint, sed malè. An verò præter personales, & completas subsistentias relatiuas, detur aliqua absoluta in Deo communicabilis tribus personis, seq. art. dicitur.

Sed obiicies primò, quia relatio non potest constitui in Deo omnes personas, præsertim primam personam Patris, quia debet persona præsupponi generationi, seu origini, cum ab alia prodeat generatio, ut à principio generante. Relatio autem paternitatis supponit originem, & generationem, quia super illam fundatur: ergo ante relationem est persona, sicut ante originem.

Secundò, quia persona debet constitui formaliter per incommunicabilitatem, vel per relationem ut exercitam ad terminum, non subsistentem: ergo malè constituitur per aliquid positium, vel per relationem ut subsistentem. Anteced. probatur, tum quia persona in tantum constituitur relatione, in quantum est opposita, est autem opposita prout exercens respectum ad alterum, non prout in se subsistens, aut ut hypostasis: ergo ut relatio exercita constituit personam; Vel si non constituit, ut exercens respicientiam, sed ut subsistens: ergo ratione ipsius in constituit, non ratione ipsius ad, quia subsistentia conuenit relationi diuinæ, prout correspondet inhærentiæ in relatione creata, inhærentia autem pertinet ad ipsum in, in relatione creata: ergo, & subsistentia in diuina. in autem magis pertinet ad esse, & ad absolutum conceptum essentia quam ad relatiuum. Tum quia illud formaliter constituit personam, quod formaliter constituit indiuiduum, cum in definitione personæ ponatur indiuidua substantia. Formale autem constitutum indiuidui est incommunicabilitas vel relatio subiicitivitatatis, videmus enim quod per incommunicabilitatem primò & per se differt prima substantia à secunda, seu ab vniuersali. Videmus etiam, quod in diuersis naturis, per diuersa principia fit indiuiduatio, sicut in substantia corporea per materiam signatam, & diuisam quantitate, in Angelis per irreceptibilitatem formæ, in Deo per relationes; formale verò in omnibus istis est esse incommunicabilem inferioribus, quia non habent illa, & subiicibilem superioribus, quia prædicantur de illa. Ergo id formaliter erit persona.

Tertiò; Persona potest accipi ut communis ad tres personas communitate prædicationis, ut S. Thom. docet quæst. 30. art. 4. Si autem esset aliquid reale, vel illud esset primò diuersum in quolibet indiuiduo; & sic non daretur vnus conceptus communis essentialiter prædicabilis de tribus personis vel non esset primò diuersum in quolibet indiuiduo, sed in aliquo conuenirent, & illud cum sit reale si, erit prædicatū essentialiter personæ, & consequenter se habebit ut genus vel species respectu personæ, quod repugnat, quia sic persona haberet aliud genus aut speciem quam natura, & haberet sua constitutiva, & seriem prædicatorum seorsum, quod est duo prædicamenta ponere in indiuiduis substantialibus, alterum naturæ, alterum personæ.

Ad pri

20 Ad 1. Respondebitur *infra disp.* 16. agendo de constitutio personæ Patris. Et summa solutionis est quod relatio non indiget fundamento ad existendum, sed ad recipiendum: in se enim subsistens est sine alio fundamento. Ad respiciendum autem subsequitur generationem, ad subsistendum verò præcedit. De quo ibi latius dicemus.

Ad 2. dicitur quod, ut docet S. Thom. 9. 30. art. 4. persona in communi non solum dicit, aut de formali incommunicabilitatem pro negatione, aut intentionem rationis, quæ est relatio subiicibilitatis, quia hoc nomen *persona* neque est nomen negationis, neque intentionis, sed nomen rei. Nihil autem absurdius quàm dicere personas esse nihil, & ens rationis, aut non ens, cum oculis & sensibus apertè videamus aliquid esse personam non tantquam carentiam aliquam, sicut cæcitatem, sed ut aliquid integrum, & plenum. Et præterea ista negatio debet esse fundata in aliquo positivo, aliàs esset purum nihil, & non fundatur immediatè in natura, siquidem potius naturæ communicabilis est de se, & sine illa inuenitur natura in Christo; fundatur ergo in aliquo superaddito naturæ positivo, illud ergo, & non pura negatio erit formale constitutum personæ, licet negatio incommunicabilitatis comitetur. Negamus ergo anteced. argumenti.

Ad primam prob. dicitur quod relatio constituit personam prout opposita; distinguo, prout opposita specificatiuè, & secundum se, concedo; prout opposita reduplicatiuè, & in exercitio, nego. Itaque forma de se dicens oppositionem, & sumpta ut tangit subiectum constituit personam, quia sic subsistit, non autem ratione exercitij oppositionis, ut tangit terminum. Ipsa quippe oppositio, quæ erga terminum exercetur, ipsamet in subiecto subsistit, & ut tenet se ex parte subiecti etiam opposita, & distincta est à suo correlatiuo, sed non consideratur ibi eius exercitium in oppositione ad terminum, sed in affectione, seu adhæensione ad subiectum. Remanet autem distinctio in illa forma relatiua hoc ipso quod in se habet oppositionem, siue consideretur ut afficiens subiectum, vel subsistens, siue ut exercens illam erga terminum. Et ad instantiam quod subsistere conuenit ratione *In*, distinguo, subsistere ut dicit conceptum incommunicabilis, nego; & sic pertinet ad personam, & relationem; subsistere, ut dicit per se existere præcisè, transeat; & sic etiam conuenit subsistentiæ absolutæ. Correspondet autem inhærentiæ accidentis, non solum ratione existentis, qua inhærentia est in alio, sed etiam ratione incommunicabilitatis, quia inhærentia est communicabilis.

Ad 2. prob. constat ex dictis personam & indiuiduum non dicere solam subiicibilitatem rationis ad superiora, aut negationem incommunicabilitatis, sed etiam fundamentum eius positium. Nec prima substantia differt à secunda sola negatione communicabilitatis, sed etiam positua differentia indiuiduationis à qua abstrahit, & subsistentiæ qua terminatur; imò potius prima substantia non solum opponitur vniuersali, seu secundæ substantiæ, sed etiam parti, quia completa substantia est; vnde eius constitutio per solam negationem aut contrapositionem ad vniuersale non fit. Ad secundam verò probationem dicitur quod formale indiuidui, non est sola subiicibilitas aut negatio, sed etiam positua illa differentia, qua singulare contrahit speciem, & redditur singulare verum, & reale, & illa terminatio qua redditur subsistens adæquatè, & totaliter, vnde nascitur incommunicabilitas, quod est subsistere suppositaliter seu personaliter.

Ioan. a S. Thom. in 1. part. D. Tb. Tomus alter.

Ad tertium Respon. valde inter se pugnare in hac parte Vasquez, & Suarez; ille enim contendit personam, seu subsistentiam non esse conceptum commune ad personas diuinas, qui ab ipsis abstrahat, & de eis quiditatiuè prædicetur. Ita docet *hic disput.* 130. cap. 2. & *disput.* 138. cap. 7. Suarez verò *lib. 1. de Trinit. cap. 3.* sentit dari conceptum commune personæ ad personas diuinas, illumque esse vniucum, non tamen vniuersale generis, aut speciei, sed quasi transcendens, quem sequitur Ruiz *disput.* 35. *sect. 1. numero 8.* Valentia, & alij. Alarcon *tract. 5. disput. 4. cap. 2.* distinguit de persona in communi quando prædicatur de personis particularibus sub hoc nomine persona, ut dicendo hæc persona est persona, vel sub aliis nominibus, ut Filius est persona, Pater est persona, &c.

Et primam dicit esse prædicationem essentialem, nec id negari à Vasquez, eamque esse mentem S. Thom. in hac 9. 30. art. 4. & eorum qui docent personam esse communem per modum vniuersalis quiditatiuè de tribus personis. Addit tamen hanc prædicationem nec esse propriè vniucam, nec analogam, sed quasi analogam, sentiens in hoc cum Ruiz *ubi supra à sect. 3.*

Secundam verò prædicationem dicit etiam esse essentialem, & non denominatiuam, seu accidentalem, in quo contra Vasquez se sentire dicit, non tamen esse vniucam prædicationem, sed quasi analogam.

Nos resolutionem huius habemus apud D. 21 Thom. in hac 9. 30. art. 4. ubi inquit, quod persona est nomen commune communitate rationis, non sicut genus, aut species, sed sicut indiuiduum vagum ut aliquis homo. Aduertit tamen Caietan. in *commentario illius art.* & bene quod cum dicitur Pater est persona, licet ly *persona* comparatiuè ad naturam Patris, & ad Deum se habeat ut modus, & ut indiuiduum vagum, tamen respectu illius subiecti, scilicet respectu Patris, essentialis prædictio est, tum ratione communi, quia modus subsistentiæ essentialis est singularibus substantiæ, tum ratione speciali, quia persona diuina significat relationem, & hæc prædicatur essentialiter de paternitate. Sed hæc 2. ratio non multum vrget, quia relatio prædicat ipsum genus relatiuum, quod de relationibus paternitatis, & filiationis prædicatur, quasi de specie diuersis, magisque prædicat naturam, sed formalem quiditatem relationis, quàm modum singularitatis vel personæ.

Quapropter reiicienda est inutilis illa distinctio 22 de prædicatione personæ, ut sic de tribus personis sub nomine personarum, vel sub nomine Patris, & Filij, & Spiritus S. Quid enim magis interest nomine Patris nominare subiectum illius propositionis quàm nomine primæ personæ, vel huius personæ? sicut idem est dicere Petrum, vel hunc hominem designato Petro: Petrus enim, & hic homo æquipollent, & pro eodem supponunt, & quidquid essentialiter prædicatur de hoc homine, essentialiter dicitur de Petro. Ergo si persona essentialiter dicitur de hac persona sub nomine personæ, ut dicendo. Hæc persona est persona, prima persona est persona, etiam essentialis prædictio erit, Pater est persona, Filius est persona, quia Pater essentialiter pro eodem supponit atque prima persona, vel hæc persona. Et hoc solum est variare nomina dicendo Patrem vel primam personam: quoad rem enim idem sunt.

De prædicatione verò ipsa, an sit vniuoca vel 23 analogica, vniuersalis, vel particulatis, essentialis, vel accidentalis, dicimus directè, & propriè nullam horum

L rum

rum esse, sed reductiue pertinere ad speciem, seu ad vniuersale vniuocum, eliquid tamen participare de transcendentali, & modo analogo, & simpliciter essentiali esse. Hoc totum includitur in illa resolutione D. Thom. quod non prædicatur tanquam genus, vel species, sed vt indiuiduum vagum. Et pro eius explicatione aduerte quod persona, seu substantia non est per se in prædicamento, sed reductiue, vt complementum, & terminus eius; sicque prædicatio eius est reductiue vniuersalis de illo prædicamento. Similiter singulare, seu indiuiduum pertinet ad seriem prædicamenti per se, vt subiectibile, non vt prædicabile, nisi tantum de vno. Si ergo ipsa ratio singularitatis accipitur in communi, extrahitur à recta serie, & linea sui prædicamenti, seu à loco quem in illo sortitur; & sic non mirum quod non prædicetur vt genus, vel species, aut sicut commune, & vniuersale directe, sed reductiue. Ex hoc ergo probatur hanc prædicationem, quia indiuiduum, vel persona prædicatur de hac vel illa persona, non esse directe, & per se prædicationem generis, vel speciei, aut vniuocam, vel vniuersalem, sed solum reductiue, quia iste modus indiuiduationis, & personalitatis non pertinet directe ad prædicamentum, nec illud per se constituit: ergo non potest nisi reductiue importare rationem communem, & vniuersalem, sed solum reductiue; sicut etiam differentia possunt concipi in communi, vt rationale in communi ad hoc & illud rationale, & sensitium ad hoc vel illud sensitium, nec tamen habent rationem generis, aut speciei, quæ per alias differentias contrahatur; sic enim esset abire in infinitum, cum illæ differentia contrahentes rursus contraherentur per alias, & illæ aliæ per alias; & sic in infinitum; sed quælibet differentia est conceptus simplex, qui non resoluitur in genus & differentiam. Indiuiduatio autem differentia quædam est, & personalitas, seu substantia est terminatio huius indiuiduationis, & ad lineam indiuiduationis pertinet. Non ergo erit per se vniuersale aut vniuocum tanquam genus vel species abstrahens à differentiis & contrahibilis per illas: hoc enim eodem modo repugnat in indiuiduatione, sicut in aliis differentiis, quia & ipsa indiuiduatio differentia quædam individualis est.

24 Quomodo ergo concipitur conceptus communi, & quid est reductiue esse vniuersale, esse genus, aut speciem?

Respondeo esse commune ad modum transcendentis, sed non perfecte analogum, neque perfecte vniuersale vniuocum: dupliciter enim aliquid concipitur conceptus communi. Vno modo per totalem separationem ab inferioribus, & ab eorum differentiis, sicut genera, & species præscindunt à differentiis, quibus contrahuntur ad sua inferiora. Alio modo concipitur aliquid conceptus communi, non per totalem separationem, & præcisionem ab inferioribus, sed includendo, & retinendo illa actu, non tamen exprimendo, & explicando omnia, quæ ibi in illo obiecto sunt, quia talis conceptus non omnia potest complecti; aut non vult, sed considerat rem aliquam sub aliqua confusione, & non sub omnimoda expressione. Quo præscindendi modo vsi sumus explicando attributorum distinctionem in Deo præced. tomo disput. 4. articulo 6. & explicando conceptum communem entis in logica quæst. 13. Et sumitur iste modus præscindendi penes confusum, & explicitum, non penes diuersarum rerum, seu obiectorum separationem, tum ex his quæ accidunt in sensu, tum in intellectu. In sensu qui-

dem: nam videmus aliquando aliquid à longè sub quædam confusione, & non discernendo omnia distincte: cum verò accedit prope, distinguimus, & discernimus eandem rem; & quando in confuso cognoscebamus, res illa non in abstracto, & in potentia continebat id quod postea cum expressione cognoscitur, sed totum illud in actu ibi habebatur, sed non omni modo & distinctè exprimebatur attingendo & complectendo sigillatim omnia quæ ibi sunt. Similiter transcendentia non possunt præscindere ab inferioribus remanendo in potentia ad inferiora, si quidem etiam includuntur in illis, & ita nunquam possunt perfecte ab illis segregari, sed solum dicitur præcisio, quia est confusa cognitio omnium in illa ratione communissima entis, quæ postea explicatur & exprimitur in inferioribus, singula cognoscendo. Et attributa diuina cum sint actus puri, vnum non est in potentia ad aliud, sed actu est vnumquodque, quia tamen conceptus noster non valet totum quod est in illo obiecto penetrare, separat vnum attributum ab alio, id est, exprimit vnius formalitatem tantum, relinquendo alteram ibi actu inclusam, sed in confuso attractam, & sic ab actuali explicatione præcisam, non ab actuali inclusione.

Igitur singulare, seu indiuiduum, seu differentia 25 individualis, & similiter persona, seu substantia, quæ est incommunicabilis terminatio indiuidui non concipitur in communi per conceptum totaliter præcisum ab inferioribus, & qui maneat in potentia, vt per additionem differentia inferioris contrahatur, sed solum per conceptum ipsiusmet singularis; seu singularitatis in confuso, qui tamen determinatur per expressionem ipsius singularis vt designati & determinati, sicut dicit D. Thom. in hac quæst. 30. articulo 4. quod *Indiuiduum in communi seu indiuiduum vagum dicitur modum singularitatis, scilicet quod sit subsistens distinctum ab aliis, sed in nomine singularis designati significatur determinatum distinguens, vt in nomine Socratis hæc caro, & hoc os.* Conceptus ergo singularis in communi, & in particulari est penes confusum, & determinatum, scilicet repræsentare rationem singularis subsistentis, sed nondum explicitè designare, ita quod in conceptu singularis in communi includitur actu hoc & illud singulare, sed nondum explicatur designatè, sicut quod videtur à longè videtur in confuso, sed nondum explicitè determinatur, licet actu includat illud. Et hoc ob duplicem rationem, tum quia indiuiduatio seu singularitas habet se vt differentia vltima: conceptus autem differentia non contrahitur per aliam differentiam, nec est resolubilis in duos conceptus, alterum genericum, alterum differentiale, ne sit processus in infinitum, vt diximus. Non potest ergo singularitas abstrahere ab hac & illa singularitate quasi conceptus contrahibilis per additionem differentiarum, sed vt conceptus magis confusus, vel magis expressus eiusdem simplicis differentia. Tum quia quando concipitur singularitas in communi, non restant alia principia indiuiduationis ad designandum & contrahendum illud singulare, & ad singularizandum amplius: ergo iam in illo conceptu singularitatis includebatur actu hoc singulare, quia principia indiuiduationis eius ibi includebantur, sed nondum designatio exprimebatur.

Quare conceptus ille communis se habet vt transcendens, seu per modum conceptus differentia, qui non est resolubilis in duos conceptus

26 tus, alterum genericum, alterum differentialem, sed eodem conceptu concipitur in communi penes conceptum confusum, & in particulari penes magis determinatum & explicitum.

Quod si quæritur, an sit analogum? Respondetur non esse, quia analogum requirit inæqualitatem in participantibus illud, ita ut in vno sit simpliciter, in alio secundum quid, in vno per attributionem & denominationem, in alio essentialiter. Singulare autem seu singularitas in communi, non respicit inferiora, scilicet hoc & illud singulare designatum ut inæqualia, quia omnia singularia æqualia sunt, non solum in natura, sed etiam in singularitate, non vnum secundum quid & aliud simpliciter. Habet tamen modum analogi, quantum ad hoc quod est includi in inferioribus, & per modum transcendentis se habere ad omnes modos inferiores: sed quia illa inferiora non sunt inæqualia, non peruenit ad rationem analogi simpliciter. Quod autem diximus de singularitate, eodem modo dicimus de persona, quæ est terminatio singularitatis. Et à fortiori dicimus de personis diuinis, quia personæ diuinæ sunt omnino æquales, & ita licet persona diuina in communi includatur intimè in ipsa determinatione & differentia inferiori, quia tamen inæqualitatem non habent, nec ipsa ratio communis inæqualitatem facit, analogum non est.

Nec obstat quod illæ personæ determinatæ, seu singularia sint primò diuersa, quia sunt primò diuersa ut omnino æqualia in esse, & solum in oppositione correlatiua primò diuersa, & ita ratio communis inæqualitatem non causat, quod est non esse analogum, sicut ens respectu Petri & Pauli, seu duorum indiuiduorum eiusdem speciei non est analogum in esse, quia inferiora in esse sunt omnino æqualia; & idè iste conceptus communis singularitatis habet aliquid de analogo in quantum se habet tanquam transcendens, & aliquid de vniuoco, ut dicit æqualitatem inferiorum, & ita reductiue est vniuersale vniuocum, non simpliciter.

Quod verò sit conceptus essentialis persona in communi, & indiuiduum in communi respectu huius & illius, ex dictis manet probatum, quia est prædicatum quiditatum persona in communi, respectu huius & illius personæ, si quidem est formale constitutum eius, & prædicatum intrinsecè & necessariò connexum: nec enim potest definiti aut concipi constituta hæc persona, & hoc singulare, nisi includendo personam in communi.

ARTICVLVS. II.

Verum detur in Deo substantia absoluta præter tres relatiuas?

NE quæstio ista solum reddatur de nomine, an videlicet illud, quod tribus relatiuis personis & substantiis commune est in Deo, sit vocandum substantia, an non, Supponimus, circa ipsam rem significatam nomine substantiæ quatuor considerari seu inueniri.

Primum est singularitas, quia res in vniuersali non subsistunt, sed secundæ substantiæ mediis primis subsistunt & substant.

Secundum est incommunicabilitas, ut in supposito, seu persona, quæ est totaliter, & completè subsistens, ubi inuenitur sic naturam subsistere

Ioan. à S. Thom. in 1. part. D. Th. Thomus alter.

in supposito, quod vltiori termino in quantum sic suppositata & terminata, communicabilis non est.

Tertium est modus existendi per se, qui etiam solet vocari substantia, distinguiturque ab ipsa suppositualitate ut incommunicabili, sicut videmus in anima rationali, quæ est per se subsistens separata à corpore, nec tamen est suppositum, aut persona incommunicabilis, sed est forma vnibilis.

Quartum est ipsum concretum naturæ per modum habentis ipsam, quod est explicare naturam non solum per modum principij quo, & per modum formæ, qua aliquid constituitur, ut Deitas, humanitas, sed etiam per modum quod, seu habentis naturam, ut Deus, homo; nam homo sumptus in communi & sine suppositis etiam est in concreto habens humanitatem.

Igitur apud omnes primò certum est, quod remotis substantiis relatiuis, & considerata forma Deitatis secundum se, est aliquid singulare, quia non est aliquid vniuersale, sed habet vnitatem singularem à parte rei, siquidem à parte rei est vnus Deus in tribus personis, ut docet fides. Vnitatem ergo singularem à tribus personis non habet, sed ex se vnus Deus singularis est: sicut ex se & non à personis singulare & determinatum esse habet.

Secundò certum est quod illa natura secundum se est existens existentia independenti ab omni alio extra se, imò est ipsum esse à se, & per se, cum sit actus purus, de cuius formalissimo conceptu est existentia & esse à se.

Tertiò est certum naturam diuinam, seu hunc Deum secundum se, & remotis personalitatibus relatiuis non esse suppositum, seu personam incommunicabilem, alias essent quatuor personæ, imò essentia ipsa si esset persona incommunicabilis, non communicaretur tribus relatiuis personis sed esset opposita illis, & sic ipsæ personæ relatiuæ non essent Deus, neque diuinæ, quod est hæreticum. Vnde rectè Eymericus 2. parte directorij qu. 2. art. 7. & 12. erroris damnat assertum illud quod attribuitur Raymundo Lullio, nempe quod hic Deus, seu Deitas sit quoddam suppositum vel persona communis tribus personis. Et D. Thom. in hac quæst. 30. art. 4. infert pro magno inconuenienti quod in Deo sit vna persona trium personarum, sicut est vna essentia. Et quæst. 30. art. 3. docet quod, remotis proprietatibus personalibus, non remanet hypostasis, seu persona in diuina natura.

His ergo tanquam certis stantibus, remanet difficultas an id quod accipitur remotis personalitatibus in Deo, seu id quod est commune tribus personalitatibus ex vi sui formalis conceptus Deitatis, & essentia non solum sit essentia significata per modum naturæ, & formæ, seu ut principium quo ipsius Dei, sed etiam sit essentia significata per modum quod, & ut concretum subsistens quantum ad rationem per se existendi, ita quod hæc perfectio per se existendi non sit solum radicaliter in essentia & formaliter per subsequentem conceptum relationis conueniat, sed formaliter in ipso conceptu Deitatis includatur, ita quod hoc sufficiat ut subsistens formaliter dicatur hic Deus, & hæc Deitas, licet non sit subsistens incommunicabiliter, sicut suppositum & persona: sicut etiam datur subsistens quod non sit persona, scilicet anima rationalis, quia communicabilis est; licet sit valde dissimile exemplum, quia anima non subsistit completè, quia forma incompleta est, & indiget componere ut pars cum materia ut compositum resultet, & suppositum reddatur. At verò

L 2

diuina

diuina natura, non ex ratione formæ incompletæ aut partis componentis communicabilior subsistit, sed ex summa perfectione, quia includit intra se formaliter genus relatiuum, quod sine pluribus relationibus stare non potest, & earum oppositio- ne inter se debet ultimam terminationem sortiri, ipsis autem relationibus debet ipsa essentia identi- ficari, atque aded respectu illarum incommuni- cabilis esse non debet, sed per illas incommunica- bilitatem sortiri.

- 4 In hac ergo difficultate duplex est sententia. Prima affirmat hunc Deum communem tribus personalitatibus relatiuis, illisque identificatum, secundum se, seu in genere absoluti esse indiui- dum subsistens, & concretum Deitatis, ut quod, licet subsistentia illa sit communicabilis. Hanc sententiam tenet Caiet. in hac 1. p. q. 29. art. 4. & q. 39. art. 4. & in 3. p. q. 2. art. 2. & q. 3. a. 2. & 3. Eum sequuntur Cabrera 3. p. q. 2. a. 2. disp. 2. §. 5. Aluarez 3. p. q. 3. art. 3. Nazarius 1. p. q. 39. art. 4. controu. 1. Nauarrete hic controu. 22. & Suarez 3. p. disp. 11. sect. 3. & lib. 4. de Trin. c. 11. Granados hic disp. 5. sect. 3. qui citat Bañez, & Zumel, & alios, idemque late confirmant, & tenent Carmelitani hic tract. 6. disp. 9. dub. 5.

Secunda sententia negat aliquid esse in Deo se- cundum absolutam essentiam sumpta, & præcisè à tribus personalitatibus relatiuis, quod nomen aut minus subsistentiæ mereatur, sed solum esse tres subsistentias relatiuas, sicut tres hypostases, eo quod subsistentia, & hypostasis idem sunt. Ita P. Vasquez hic disp. 125. c. 3. Arrubal disp. 109. c. 2. Becanus c. 3. q. 9. n. 6. Alarcon tract. 5. disp. 4. c. 4. Ruiz disp. 34. sect. 5. Lorca 3. p. disp. 14. Arauso 2. tomo metaph. lib. 7. q. 2. art. 3. n. 11.

Mens D. Thomæ.

- 5 Sententia D. Th. est, dari in hoc Deo communi tribus personis singularitatem, & subsistentiam absolutam, quæ tamen communicabilis est tribus personis relatiuis. Sunt plura loca, ubi id apertissi- mè docet S. D. vocans ipsam essentiam, & diuinam secundum se, & remotis tribus personalitatibus subsistentem. Ita docet in 1. dist. 21 q. 2. ar. 1. ubi in- quit, quod *Iste terminus Deus predicat naturam diuinam de tribus personis, quæ etiam in se est habens esse subsistens, nulla intellecta personarum distinctione.* Et in 4. contra Gentil. cap. 14. ad 5. inquit, *Essentia diuina etsi subsistens sit, non tamen potest à relatione separari: huiusmodi autem relationes non sunt acciden- tia in Deo, sed res subsistentes: Deo enim nihil accidere potest, ut supra ostensum est: sunt ergo plures res sub- sistentes, si relationes considerentur, est autem una res subsistens, si consideretur essentia. Et propter hoc dici- mus unum Deum esse, quia est una essentia subsistens, & plures personas propter distinctionem subsistentium re- lationum.* Et concludit, *Non ergo dicenda est una persona propter unitatem essentia subsistentis, sed plu- res propter relationes.* Et in 3. dist. 6. q. 2. art. 1. ad 2. sic inquit: *Aliud est de Deo, & de omnibus aliis re- bus, quia in Deo ipsa essentia subsistens est. Vnde sibi secundum se debetur esse, immò ipsa est suum esse subsi- stens.* Quæ loca manifestè tribuunt diuinæ essen- tiæ subsistentiam, etiam independentem à tribus personalitatibus.

- 6 Luculenter etiam rem hanc prosequitur D. S. in quæst. 9. de potentia art. 5. ad 13. sic inquit: *In rebus creatis principia indiuiduantia duo habent, quo- rum unum est quod sunt principium subsistendi: natu- ra enim communis de se non subsistit nisi in singula- ribus: aliud est quod per principia indiuiduantia,*

supposita natura communis ab inuicem distinguuntur. In diuinis autem proprietates personales hoc solum habent, quod supposita diuina natura ab inuicem di- stinguuntur, non autem sunt principium subsistendi diuinæ essentia: ipsa enim diuina essentia est secundum se subsistens, sed è conuerso proprietates personales ha- bent quod subsistant ab essentia: ex eo enim paternitas habet quod sit res subsistens, quia essentia diuina cui est idem secundum rem, est res subsistens. Et conclu- dit: *Licet autem diuina essentia secundum seipsam ut ita dicam, indiuiduetur quantum ad hoc quod est per se subsistere, tamen ipsa una existente secundum numerum, sunt plura supposita in diuinis subsistentia secundum numerum.* Ita D. Thomas. Qui locus ma- nifestissimus est.

7 Occurrit autem Vasq. omnibus istis locis, vni- co verbo, dicens disp. cit. c. 1. quod congerunt ali- qui innumera loca S. Thomæ pro hac sententia, quæ consultò prætermitto, quia ille ubique lo- quitur de actu existendi, quem appellat existen- tiam seu esse. Addo quod si hæc loca D. Thom. probant de subsistentia ut distinguitur ab existen- tia, aut probant in Deo esse personam absolutam, aut nihil probant. Patet hoc, nam quando D. Th. locutus est de substantia propriè, & rigorosè di- xit, quod si in Deo datur subsistentia abstractis personalitatibus, illa erit persona: ergo quando negat vnā esse personam absolutam in Deo, & ponit diuinam essentiam subsistere, loquitur non de subsistentia rigorosè, sed pro existentia. Minor probatur expresso testimonio D. Thom. in 3. part. q. 3. art. 3. ad 1. ubi inquit, *Quidquid eorum quæ attri- buuntur Deo in abstracto secundum se consideretur, aliis circumscriptis, erit aliquid subsistens, & per con- sequens persona cum sit in natura intellectiua.* Sicut igitur nunc positis in Deo proprietatibus personalibus dicimus tres personas: ita exclusis per intellectum pro- prietatibus personalibus, remanebit in consideratione nostra diuina natura ut subsistens, & ut persona. Qui locus satis manifestus est, & urgentior cæteris, quia est ex summa Theologia, unde postremam D. Thom. determinationem accipimus.

8 Ad Vasquez Resp. responsionem illam ita gene- ralem minus accuratam esse pro tot locis D. Th. in quibus ita expressè loquitur de natura diuina subsistente independentem à relationibus, ut mi- rum sit velle Vasq. nobis obtrudere existentiam pro subsistentia in tam clavis, & expressis verbis D. Th. Nam expressè dicit quod diuina essentia est suum esse subsistens, vel habet esse subsistens. Vbi si ly *subsistens* est idem quod existens, sensus erit quod Deus est suum esse existens, vel existentia existens, quod certè est inutiles repetitio. Præterea docet quod relationes sunt tres res subsistentes, & essentia est vna res subsistens, quod principium subsistendi ipsis relationibus est essentia, ipsæ ve- rò relationes sunt principia distinguenda suppo- sita. Quod non potest accommodari existentia, cum loquatur de eo quod proprium est relatio- nis, ut relatio est, & ut constituit suppositum, exi- stentia autem non constituit in relatione suppo- situm, nec specialiter pertinet ad relationes, & personas, sed ad attributa, & ad operationes, & ad omnia quæ in Deo sunt, nec ad existentiam perti- net constituere relationes subsistentes, sed exi- stentes, seu extra nihil: quomodo ergo de existen- tia loquitur, quando dicit quod ex essentia red- duntur subsistentes relationes? Quomodo etiam dicit, quod licet essentia sit subsistens, non tamen est vna persona, sicut tres relationes, si essen- tiam subsistentem acciperet pro existente? ex eo enim præcisè quod existens sit, nulla inuoluitur dubitatio

dubitatio quod persona esse possit, magis quam de quocumque attributo, quod etiam existens est. Sensus ergo est quod D. Thom. loquitur de substantia, ut distinguitur contra existentiam: de hac enim dubitatio esse poterat, an sit persona si est subsistens, quod de existentia non poterat dubitari. Ac denique intolerabile inconueniens est dicere quod D. Thom. qui tam formaliter, & ad normam scholasticæ regulæ loquitur, ita abusive, & improprie loquatur, ut substantiam sumat pro existentia, præsertim cum S. Thom. declarare velit non solum quod essentia sit existens, sed modum proprium talis existentiae, nempe quod sit per se, quod est substantia proprie.

9 Ad id quod additur *ex loco 3. p.* dicimus S. Thomam ibi loqui de consideratione naturæ diuinæ circumscriptis personalitatibus negatiue, quia loquitur de ea præcisione, quatenus maneret diuina essentia, sicut Iudæi illam intelligunt, & qui non habent fidem Trinitatis, ut dicit ibi *sol. ad 2. & idē affirmat in 3. dist. 5. q. 2. art. 3.* ubi eandem prorsus difficultatem tractat. Non autem loquitur de essentia diuina considerata solum præcisiue, & secundum id quod habet ex se, cum in aliis innumeris locis affirmat naturam sic consideratam esse subsistentem. Imò si perspicaciter consideretur D. Thomæ mens in illo loco 3. p. potius ex illo confirmatur sententia dicta, quod in Deo secundum se datur substantia absoluta, tum quia non solum de essentia, sed de quocumque attributo, & de quacumque re, quæ attribuitur Deo, dicit, quod est subsistens, & suppositum, & persona, quia in Deo idem est *quo est, & quod est*. Et tamen constat quod attributa significata, ut propriæ quædam passiones ut misericordia, iustitia, immensitas, potentia, &c. non significantur ut personæ incommunicabiles, & totaliter completæ licet sint subsistentes communicabiliter ut quod. Non ergo sumit ibi personam pro subsistente incommunicabili, sed pro subsistente rationalis naturæ, siue communicabiliter se habeat, siue non: dicit enim ibi D. Thom. quod *Quidquid attribuitur Deo, est subsistens, & per consequens persona, quia est intellectualis natura*. Solum ergo sumit personam pro subsistente naturæ intellectualis, & non amplius. Tum etiam quia D. Th. loquitur de substantia diuinæ naturæ qualiter maneret, si circumscriberentur personalitates relatiue. Et dicit, quod illis circumscriptis (sc. negatiue) maneret natura diuina ut subsistens, & persona, quia videlicet tunc non haberet relationes quibus incommunicabilis remaneret, nec oppositionem inter se haberent tres personæ distinctæ; & sic per seipsam esset incommunicabilis, & assumere posset ad se naturam humanam. Ergo modò illa natura habet tres personalitates, & talem substantiam, quæ tunc remotis illis esset persona, & pro illo casu quo tollerentur personalitates vocatur à D. Thom. persona: Ergo pro nunc substantiam veram, & propriam habet, non solum existentiam, quia illam modò habet, quæ tunc esset persona, siquidem ipsa natura modò per seipsam est *quo & quod*, ut ibi dicit *soluzione ad 1.* & ex hoc habet esse subsistens. Modò ergo habet esse subsistens, quod tunc (scilicet remotis relationibus) esset persona.

Fundamentum ex ratione.

10 Quod esse diuinum, & diuina essentia ex sua absoluta ratione, & perfectione sit subsistens, & independens in ratione existendi per se à relationibus, probatur, quia diuina natura ex se, & inde-

Ioh. à S. Thom. in 1. part. D. Th. Tomus alter.

pendenter à relationibus est actus purus, & constituitur per ipsum esse tanquam per prædicatum essentiale, & intrinsecum: ergo habet esse per se, & independens, seu absolutum ab omni existentia in alio, siue tanquam pars in toto, siue tanquam accidens in subiecto; Patet consequentia, quia natura diuina nunquam potest concipi ut pars, & multo minus ut accidens nec esse illius ut parziale, aut dependens à relationibus, ut per illas, & ratione illarum esse naturæ reddatur perfectum, & independens, & per se, sed totam perfectionem existentiae & substantiæ habet à se, & ex prædicatis essentialibus, & quiditatiuis. Ergo si ex se, & ex vi generis absoluti antequam intelligatur genus relatiuum in Deo habet esse perfectissimum, & infinitum, & in actu puro, & independenter à relationibus quia habet illud tanquam prædicatum essentiale, & omne essentiale est anterius ad notionalia, & relatiua; consequenter illud esse absolutum antecedenter ad omnem conceptum relatiuum, est esse non in alio, nec tanquam pars, nec tanquam accidens, quia utrumque est conceptus imperfecti esse, & repugnat cum esse per modum actus puri, & perfectissimi, & à se. Antecedens autem *supra* positum est per se notum, scil. quod diuina essentia per seipsam sit actus purus, & ipsum esse, cum per hoc discernatur esse diuinum à creato quod diuinum est ipsum esse à se, & omni potentialitate carens, nec est aliud diuina essentia, quam ipsum esse, nec per alium conceptum, sed per seipsam essentialiter, & intrinsecè est esse actus puri: nec enim per relationes essentia diuina habet esse, sed per ipsam relationes esse habent.

Ex hac autem consequentia, quæ omnino indubitata est, sequitur alia non minoris certitudinis: Ergo essentia diuina ex vi sui formalissimi conceptus, & ante conceptum relatiuum est subsistens. Patet ista consequentia, quia conceptus, qui ex vi sua petit, & habet existentiam cum exclusione omnis modi imperfecti existendi in alio, siue tanquam pars, siue tanquam accidens, ex eodem conceptu habet modum existendi perfectè, & per se, & tanquam quod, qui est modus substantiæ, quatenus substantia dicit modum existendi per se exclusiuum modi existendi in alio: nam impossibile est illum conceptum qui includit esse cum tanta perfectione quod excludit omnem modum existendi in alio, non includere modum existendi per se, quia modus existendi in alio excluditur à modo existendi per se, sed conceptus essentiae ante relationes includit esse, quia est actus purus, & excludit omnem modum existentiae in alio: ergo idemmet conceptus includit modum existendi per se, & subsistendi: subsistere enim est esse per se.

Dices: Conceptum illum essentiae non includere modum existendi per se formaliter, sed solum radicaliter, & pro alio posteriori conceptu formaliter: pro illo autem conceptu nondum formaliter explicatur, neque modus existendi in alio, neque per se, sed formaliter, & quasi in quarto modo per se neutrum explicat pro illo signo, licet radicaliter iam includat modum existendi per se, & radicaliter excludat modum existendi in alio: sed formaliter illum modum subsistendi habebit per conceptum relationum: nam relationes etiam ad perfectionem Dei pertinent; & sic non est inconueniens quod sub aliqua præcisione nondum intelligatur essentia cum ista perfectione modi existendi per se, sed solum cum conceptu ipsius esse, & essentiae explicetur autem modus iste subsistendi in alio: conceptu, sicut explicatur modus personalitatis in-

L 3 comm.

communicabilis, & sicut in conceptu naturæ, & intellectualitatis diuinæ nondum intelligitur actus volendi, licet sit perfectio intellectualitatis, sed sufficit quodd radicaliter contineatur in ipso intelligere. Et hac solutione eneruat opposita sententia omnia argumenta quæ ex perfectione diuinæ essentia deducuntur: fatetur enim subsistentiam pertinere ad perfectionem, sed negat debere formaliter explicari hanc perfectionem in omni conceptu, & præcisione; sed sufficit radicaliter contineri in conceptu essentia, explicari verò formaliter in conceptu posteriori personæ.

13 Sed contra hanc solutionem instauro argumentum, & confirmo, (est enim in hoc rotus cardo, & punctum difficultatis) quia in formali conceptu essentia non solum radicaliter, sed formaliter explicatur ipsa existentia, & ipsum esse actus puri: ergo etiam explicatur modus essendi per se, qui est subsistentia. Probo consequentiam, quia in illo conceptu explicatur esse, seu existentia ut essentiale prædicatum diuinitatis: ergo explicatur modus essentialiter conueniendi, quia conuenit in primo modo per se, & explicatur modus singularitatis, quia ille conceptus diuinæ essentia non est communis, sed individualis, & singularis: ergo etiam explicat modum non existendi in alio, sed subsistendi per se, qui inter modos per se à Philosopho enumeratos est tertius. Patet hæc consequentia, quia existentia concepta in singulari, seu cum modo singularitatis & cum connexionione essentiali, & per se cum ipsa diuinitate, imò quæ est ipsa diuinitas, ex vi talis conceptus, & sine additione alterius, habet summam independentiam ab alio conceptu posteriori, nec per illum explicatur aliqua eius maior independentia, ut exerceatur, quia hoc ipso quodd existentia per se, & essentialiter conuenit essentia, independentens redditur ab omni alio, ut conueniat, & exerceatur in ipsa essentia, & similiter explicatur in illo conceptu, non solum radicaliter, sed etiam formaliter quodd ille conceptus sit actus purus, & infinitum esse. Ergo non dependet ab alio conceptu posteriori, ut formaliter sit subsistens, & explicetur modus subsistentia. Nam modus subsistentia, ut dicit hoc quod est existere per se, non explicat alium conceptum, quam modum singularitatis cum independentia ab alio in existendo, & in exercendo ipsum esse: nam iste modus est modus existendi, non in alio, sed per se, hoc autem habetur formaliter per formalem conceptum ipsius esse ut independentis, ut autem illud esse formaliter explicetur ut independentens, non debet expectare vltiorem conceptum, sed sufficit essentialis connexio, & per se cum essentia, seu potius quodd ipsum esse sit essentia.

14 Quodd si instetur in ipsa personalitate ut relatiua, & incommunicabili: nam etiam hæc pertinet ad perfectionem existendi, nec tamen conuenit ex vi conceptus essentialis, sed ex vi relatiui.

Respon. esse disparem rationem, & valde notandam differentiam, quia essentia ex relationibus non habet perfectitatem, & independentiam in esse sed distinctionem, & oppositionem incommunicabilitatis relatiuam. Non autem est conditio, aut prærequisitum ad habendum esse per se, & independentem ipsa relatio, & eius incommunicabilitas. Vnde ex incommunicabilitate non ponitur ratio existendi, nec eius perfectio, aut independentia crescit, sed ipse modus habendi existentiam per se, & non in alio pertinet ad modum perfectionis, & independentia intimæ ipsius existentia, quia non potest intelligi ut plena, & perfecta si est in alio, & si est summè independentens, & perfecta, non

potest intelligi nisi ut per se, nec indiget termino incommunicabili ut per se sit, sed ipsa summa independentia, & essentialis connexio existentia cum essentia reddit illam per se, quia ad per se formaliter, sufficit non per aliud, nec in alio: esse autem cum summa independentia, summo modo, & formalissimè, excludit omne quod est per aliud, vel in alio, quia isti sunt modi dependentia, & inferioritatis in esse: per se autem, & sine dependentia ab alio subiecto, vel composito, aut termino pertinet ad perfectionem ipsius esse, quia pertinet ad exclusionem modi imperfecti, qui est in alio. Relatiua autem incommunicabilitas, & distinctio non pertinet ad exclusionem imperfectionis, seu modi imperfecti existendi, qui est in alio, vel per aliud, sed ad multiplicationem suppositorum, & personarum. Multiplicatio autem personarum pertinet quidem ad fecunditatem, & abundantiam perfectionis in ipsa Deitate, sed non ad primum fundamentum perfectionis, quæ est per exclusionem imperfectionis. Et idè magis intimè pertinet modus perfectitatis in existendo, quod est subsistere, quam modus incommunicabilitatis suppositi, seu personæ, quod est sic relatiuè terminari. Et idè subsistentia pertinet formaliter, & non radicaliter solum ad primum fundamentum essentia diuinæ, & ad ipsam intimam rationem existentia, ut summè independentis in esse, & ut actus purus est, quia esse per se directè, & formaliter non solum radicaliter excludit imperfectionem existendi in alio, & per aliud, esse verò incommunicabiliter in pluribus relationibus pertinet ad puram rationem terminandi, & multiplicandi personas, in quibus est ipsa natura, quod pertinet ad abundantiam, & fecunditatem. Prius est autem in re perfecta excludere omnem modum imperfectionis, quam extendere, & multiplicare fecunditatem.

Corrollaria ex dictis.

Vnde deducuntur tria valde notanda, quæ magis explicant vim solidam huius doctrinae D. Thom.

Primum est quodd esse, seu existentia, ut sæpius dicit D. Thom. est propria suppositi, seu subsistentis, quodd adeò verum est quodd esse diuinum quodd est in Deo prædicatum essentialiter, & conuenit ipsi naturæ diuinæ quidditatiuè, necessariò supponit rationem subsistendi in ipsa essentia, nec conueniret illi, nisi subsisteret. Itaque cum natura, seu essentia diuina sit id quod Deus est, & id quod est per se ipsam, & ab intrinseco, tamen ipsum esse, seu ipsa existentia à se non correspondet diuinæ essentia quatenus consideratur ut principium quodd essendi, sed quatenus consideratur ut principium quodd subsistens. Et ita in doctrina S. Thomæ est solida consequentia, cui conuenit esse simpliciter, præsupponitur conuenire subsistere, seu esse principium quodd, & habens modum per se existendi, atque ita subsistentia non potest esse conceptus consecutus, & posterior ipso esse, sed antecedens, & præsuppositus, & sic si conceptui diuinæ essentia conuenit formaliter, & non radicaliter ipsum esse, seu existentia, neque subsistentia conuenit radicaliter, & pro alio posteriori conceptu, sed antecederet, & prærequisitè; atque adeò à fortiori conuenit formaliter.

Ratio est, quia esse est prædicatum essentialiter diuinitatis, nō quomodocumque, sed ut perfectum, & independentens, & in actu puro, ita quodd istæ conditiones perfecti, & independentis esse, non radicaliter solum, sed formaliter habeantur, & concomitantur

mitentur ipsum esse, quia formaliter, & non radicaliter est actus purus. Inter istos autem duos conceptus, scilicet formæ ut *quo* aliquid est, & formæ ut *quod* est, perfectius, & independentius, & formalius est habere esse ut *quod*, quam ut *quo*, siquidem esse ut *quo* ordinatur ad esse ut *quod*: hoc enim simpliciter est. Vnde ut esse intelligatur simpliciter, & perfecte, atque independenter, debet convenire aliquid ut *quod*, & non præcisè respondere conceptui formæ ut *quo*. Vera est igitur hæc propositio quod esse, seu existentia, ut perfecta sit, & simpliciter ac independenter dicatur aliquid esse, debet supponi quod se habeat tanquam esse *quod*, non ut ratio habendi ut *quo*. Et sic modus subsistendi, seu habendi se ut *quod*, præcedere, & prærequiri debet ut aliquid habeat esse simpliciter, & perfecte, ita ut sit id quod est, non id quo est tantum: Esse autem subsistenter, & esse ut *quod* idem est, quia id quod est ut *quod*, est per se, & non in alio, id autem quod tantum se habet ut principium *quo* existendi, ex vi talis conceptus non excludit esse in alio, vel tanquam pars componens, vel tanquam accidens inhærens, quia omnia ista habent esse ut *quo*. Incipit autem discerni id quod simpliciter est, ab eo quod imperfectè est, per hoc quod est habere esse ut *quod*. Cum ergo in formali conceptu essentia diuinæ intret esse simpliciter, & perfectum, & quod est actus purus, in illo conceptu præsupponitur modus ipse, & ratio habendi se ut *quod*, seu subsistendi.

16 Secundum quod colligimus est, quod in diuinis relationes terminantes, & incommunicabiles, quod pertinet ad rationem personæ, non sunt medium, & prærequiritum ad habendum esse sicut in rebus creatis suppositum præcedit ipsum esse, nec dicitur aliquid simpliciter esse, & existere nisi suppositum quod dat perfectitatem, & completum modum existendi ipsi substantiæ. Et hoc idè, quia existere simpliciter, & perfecte non inuenitur in rebus creatis, nisi tanquam prædicatum contingens, & dependens, ac deriuatum ab agente; Vnde cum agens non producat rem in facto esse, & ut *quod* productum nisi ipsum suppositum, huic etiam communicat per se, & directe esse, & non dicitur aliquid esse nisi præsupponatur terminatiue suppositum. At verò in Deo cum ipsum esse sit à se, & independens, ac simpliciter, & perfectissimè existens, non dependet à terminatione relatiua, & suppositali quod illud esse habeat perfectum modum essendi, & tanquam *quod*, quia ex se est ipsum esse perfectissimum, atque adèd cum modo perfectissimo, qui est per se. Relatiue ergo terminationes, & personales modi consequuntur in Deo ad ipsum esse, non præcedunt, scilicet ex abundantia, & fecunditate ipsius infiniti esse, quatenus continet non solum genus absolutum perfectionum, sed etiam relatiuum; & sic oportet quod essentia identificetur ipsis, eisquè det esse per summam identificationem, ipsæ verò relationes inter se opponantur, & distinguantur, quod est incommunicabiliter se habere. Vnde hoc ex consequenti se habet in diuina substantia, & ex abundantia ipsius esse, non ut prærequiritum, ut esse diuinum sit esse independens ex se, & ut *quod*.

17 Tertium quod colligimus est, non esse in Deo quatuor distinctas subsistentias, licet detur subsistentia absoluta, quia illa identificatur cum tribus relatiuis, nec opponitur illis; & sic non fecit numerum cum illis, sicut essentia, & relationes non sunt quatuor res, sed tres res, & una summa res quæ identificatur cum illis; quod provenit ex appellatione illius termini numeralis *quatuor*, qui appellat

supra distinctionem, & rationem formalem distinguendi, quæ est oppositio, & ubi nulla est oppositio, nulla est numeratio. Subsistentia autem diuina, sicut & essentia nullo modo opponitur tribus subsistentiis; & sic non facit numerum cum illis. Secus est de relationibus, quæ sunt quatuor, licet non quatuor personæ, quia sunt quatuor oppositæ terminationes, & inde denominantur numerus relationum, licet spiratio actiua, quæ spirationi actiue opponitur, identificetur cum paternitate, & filiatione; & sic non est ex omni parte incommunicabilis, sed solum spirationi passiuæ, & hoc sufficit ut relatiue multiplicetur ratione terminationis diuersæ.

Soluntur argumenta.

Obiicis primò ex Vasquez; Subsistentia secundum communem usum loquendi Ecclesiæ, & SS. PP. est idem quod hypostasis, sed in Deo, ut communi tribus personis, non datur una hypostasis absoluta; ergo neque subsistentia. Minor est D. Th. *infra* q. 40. art. 3. ubi docet quod remotis proprietatibus personalibus non remanet intellectus hypostasis; hypostasis enim significat aliquid distinctum in diuinis, cum sit substantia indiuidua; & sic idem est conceptus hypostasis atque personæ, & sicut non datur in Deo una persona, sic neque datur una hypostasis. Maior autem probatur ex communi usu Patrum. Nam in epistola Agathonis Papæ, quæ habetur in VI. Synodo *actiōe* 4. indiscriminatim hypostasis vocatur persona, ita quod correspondet hypostasis personalitati seu subsistentiæ. Et Martinus I. in Concilio Lateranensi *consultatione* 5. *canone* 1. explicat quomodo sit unitas in Trinitate, dicens quod *est Deus in tribus subsistentiis, quasi Græcè dicatur hypostasibus*. Et in *edicto* fidei Iustiniani Imperatoris ad Ioannem II. dicitur quod *Omnes SS. PP. consonanter nos docent, aliud esse naturam, siue substantiam, & formam, aliud subsistentiam, siue personam*. Semper ergo sumitur subsistentia ex parte hypostasis siue personæ, non ex parte essentia siue substantia quæ tribus personis communis est. Idem docet Damasc. *lib. de decretis primæ institut. c. 2. Unusquisque homo est hypostasis, id est res per se existens*. Et clarius S. Athanasius *sermone in Evangelium de sanctissima Deipara; Hypostasis*, inquit *sua interpretatione significat id quod subsistit*. Sic ergo cum non debeamus in alia significatione accipere subsistentiam, quam in ea quæ est in usu Patrum, & Conciliorum, & Ecclesiæ, præsertim post compositam litem, quæ olim in Ecclesia Orientali fuit de hoc nomine hypostasis, non possumus nos ad libitum uti nomine subsistentia, & eam ponere absolutam in Deo, cum non ponamus hypostasim, nec personam absolutam.

Respond. negando maiorem, vel potius distinguendo: si subsistentia sumatur pro subsistere incommunicabili, & terminato, sic est idem quod persona, seu hypostasis; & sic sunt solum tres subsistentia relatiue in Deo. Si sumatur subsistere pro eo quod est præcisè existere per se, seu existere ut *quod*, & independenter ut contraponitur ei quod est existere in alio, seu per aliud; sic non dicunt Patres quod subsistentia est idem quod hypostasis, quin potius oppositum insinuant, præsertim Hieronymus, Hilarius, August. & D. Thom. Nam S. Hieronymus in *epist. 57. ad Damasum*, hypostasim non dicit esse idem quod subsistentiam, sed idem quod substantiam, seu *vsiam*, iuxta sæcularium litterarum eloquentiam. *Tota, inquit, sæcularium litterarum schola nihil aliud hypostasim, nisi vsiam nonit.*

L 4 Et

Et certè interpretatio Græca illi è Latino correspondens magis substantiam sonat, quàm subsistentiam. Dicitur enim *ὕποστασις*, seu *ὕπστασις*, ab *ὕπο*, quod est sub, & *στασις*, quod est essentia, quasi subessentia, vel subessentia, quod directè est substantia. Et sic D. Thom. in hac quæst. 29 art. 2. ad 2. & art. 3. ad 3. docet quòd substantia secundum propriam significationem correspondet hypostasi. Et quia nomine substantiæ nos significamus essentiam, contendebant olim Arriani sub hoc vocabulo hypostasis, tres substantias, seu *ὕπσας*, & essentias in Deo introducere; propter quod dicit Hieronym. *ibid.* sub hoc nomine hypostasis venenum latere, quia videlicet illo directè significabatur substantia, & non ita clarè subsistentia. Loquendo verò de subsistentia, ut à nobis accipitur, subdit Hieronym. *loco cit.* *Vna est Dei, & sola natura, quæ verè est: id enim quòd subsistit, non aliunde habet, sed sum est.* Vbi ly *natura quæ verè est*, idem est ac natura quæ perfectè est, quæ simpliciter dicitur esse, & non in alio esse. Et cum addit; *id quòd subsistit, non aliunde habet*, ly *non aliunde*, intelligitur non ex alio conceptu, sed ex proprio talis naturæ. Fatetur ergo in Deo absolutam subsistentiam, seu in esse naturæ, quidquid sit de significatione hypostasis, quæ tunc ambigua erat, nec sumebatur etiam ab illis antiquis pro subsistentia, quæ est esse per se, sed pro substantia, vel persona. Et dicebant Catholici, ut ibi refert Hieronym. *Si hypostasis est substantia, non sunt tres hypostases, si persona subsistens, sunt tres hypostases.* De subsistentia verò non personali, sed pro per se existente, & ut quod, non fuit conuersa, sed asserta fuit à Patribus, ut patet in Hieronym. cit.

Idem dicitur ex Hilario 7. de Trinit. circa finem ubi loquens de Patre, & Filio dicit, *inesse sibi inuicem ut subsistentia natura habeant perfectam unitatem*, vel, ut alij legunt, *subsistentiis natura*, idem enim sensus est quòd sit naturæ subsistentis unitas, vel subsistentiæ naturæ: si enim natura est subsistens, datur subsistentia naturæ. Et subiicit Hilarius de natura diuina, *ita esse ac subsistere, ut in subsistente insit, ita verò inesse, ut & ipsa subsistat.* Item August. 7. de Trinit. cap. 4. *Omnis res ad seipsam subsistit quanto magis Deus*, quæ propositio affirmatiua non tollit quòd etiam relatiuè subsistat, sed affirmat quòd etiam absolutè, ut omittam dictum Agathonis Papæ in epist. quæ habetur in 6. Synodo act. 4. ubi dicit *tres personas esse unum Deum, non trium nominum subsistentiam, sed trium subsistentiarum seu personarum unam subsistentiam.* Sic enim habet antiqua lectio, noua verò quæ habetur in Conciliis Colonia 1606. legit *trium personarum unam substantiam*, sed non præiudicat hæc lectio priori: quare enim condemnabimus antiquam lectionem tot annorum usu firmatam? De sensu D. Thom. iam factis diximus. Quare constat Patres si quando videantur negare in Deo subsistentiam vnā, loqui de subsistentia personali, & completa, non de subsistentia communicabili personis. Nomen autem hypostasis postea ex communi usu Ecclesiæ pro personali supposito, seu subsistentia completa sumptum est, & in hoc sensu loquuntur auctoritates adductæ à Vasquez, sicque substantiæ nomen pro vna seu essentia, hypostasis pro persona in Ecclesia relictum est.

Quòd verò quidam respondent ad nostras auctoritates sumere Patres aliquando subsistentiam pro substantia, vel subsistere pro existere; & sic vnum in Deo fatentur, omnino futile est: cur enim Patres non loquentur etiam propriè sumendo subsistentiam, & subsistere, pro per se existere, quod

non est solum existere, sed modus existendi, scilicet per se, licet communicabiliter? Hoc enim negare Patribus, est negare eis proprietatem locutionis, & ad impropria diuertere.

Secundò arguit, pro sententia Vasq. quia essentia diuina secundum se, & præcisè relationibus potest quidem considerari ut existens, quia est actus purus, & non est in statu puræ possibilitatis, sed tamen illa essentia sic considerata non potest considerari ut per se, sed ut communicabilis tribus personis, in quibus esse dicatur: ergo prout sic non concipitur cum modo existendi per se, atque aded neque cum subsistentia absoluta, cuius munus est constituere ens per se. Consequ. probatur, quia illa natura ex vi talis conceptus sic præcisè consideratur ut terminabilis alio termino, scilicet relatione, ergo nondum per se. Nec sufficit dicere quòd consideratur per se secundum quod ly *per se* opponitur huic, quod est esse in alio, ut in subiecto, non ei quod est esse in alio, ut in supposito, vel, ut alij dicunt, est per se communicabiliter, non incommunicabiliter: Contra hoc enim est tum quia hoc non sufficit ad rationem subsistentiæ, aliàs humanitas in Christo diceretur habere subsistentiam creatam, quod est hæreticum. Et sequela patet, quia illa natura humana excludit hoc quod est esse in alio, ut in subiecto: nec enim est accidens, sed non excludit esse in alio, ut in supposito, quia terminata non est, nec incommunicabilis: ergo non sufficit habere existentiam non in alio, ut dicatur habere subsistentiam: Tum etiam quia in hoc consistit implicatio, quòd dicatur aliquid habere subsistentiam, & tamen maneat communicabile. Nam id quod est communicabile alteri, habet esse ut *quo*, non ut *quod*, nec habet existentiam aut subsistentiam perfectè, & completè, sed incopterè, sicut anima rationalis, quæ subsistit communicabiliter, sed hoc idè est quia subsistit partialiter, seu ut pars ordinata ad totum. Nos autem non concedimus diuinæ naturæ subsistentiam partialem, & incompletam, sed perfectissimam: ergo implicamus in dictis, ex vna parte ponendo in diuina essentia subsistentiam absolutam, eamque perfectam, & non partialem, nec incompletam, ex alia dicendo esse communicabilem, cum in ipsis visceribus communicabilis subsistentiæ imbibatur esse imperfectam, & partialem, & incompletam.

Et confirm. amplius ista ratio, quia vel essentia diuina, quando afficitur personalibus relationibus, redditur per illas subsistens, vel non: si non redditur subsistens: ergo relationes illæ subsistentiæ non sunt, quod negauimus *suprà*, & verè negandum est, cum sint personalitates. Consequ. patet, quia si subsistentiæ essent, redderent naturam quam afficiunt subsistentem: si ergo subsistentem non reddunt, subsistentiæ non sunt. Si verò reddunt subsistentem naturam: ergo afficiunt ipsam subsistentiam absolutam, ipsamque subsistentem reddunt, siquidem naturam afficiunt secundum omnia quæ habet, & consequenter subsistentiam ipsam absolutam afficiunt. Subsistentia autem non potest affici vltiori subsistentia, nisi sit in se incompleta, & imperfecta, seu partialis, quia subsistere per aliam subsistentiam, est reddi subsistentem per illam; & sic non existere per se, sed ab vltiori termino dependere, cui communicari potest, quod est contra rationem cuiuscumque formæ, quæ non potest per aliam similem formari, nisi in se imperfecta sit; sicut vna figura non potest vltius figurari, vna actio alia actione produci, vna vnio alia vnione vnitri, vna species impressa, vel expressa alia specie reddi intelligibilis, & representatiua.

Confir.

Confirm. secundò, quia ista absoluta subsistentia habet se vt attributum respectu essentiae: ergo potest concipi essentia cum præcisione à tali attributo, sicut à quolibet alio. Facta ergo tali præcisione, illa essentia manet ens increatum, & actus purus, & consequenter vt existentia, & esse ipsum à se, & tamen non concipitur subsistens: ergo potest dari cōceptus essentiae, & ipsius esse in Deo sine subsistentia: & tamen ille cōceptus est de re perfectissima, scilicet de esse diuino. Sicut ergo tale esse potest concipi sine subsistentia sua absoluta, ita quod subsistentiam habeat per aliquod attributum, cur non poterit eadem essentia, & idemmet esse concipi vt perfectum, & tamen quòd non habeat ex vi illius formalis cōceptus subsistentiam, sed ex relationibus, sicut in nostra sententia habet ex attributo adiuncto, sine quo concipi potest. Et idem argumentum fit de cōceptu naturæ diuinæ, quæ concipi potest vt principium quo, & in ratione naturæ, & non concipi vt quod, & tunc concipitur vt est ipsum esse, & nondum vt subsistens: ergo subsistentia subsequi potest ad cōceptum perfectum ipsius esse, & consequenter non repugnat illi conuenire per relationes.

Respon. ad principale argumentum, quòd essentia diuina ex suo formali cōceptu non solum habet esse, prout opponitur statui possibilitatis, & ipsi nihilo præcisè, sed etiam vt opponitur esse imperfecto, & dependenti, seu habenti illud, vt in alio, siue vt accidens subiecto, siue vt pars totius: sed per se habet esse vt quod, communicabile tamen suppositis relatiuis, vt terminantibus, & incommunicabilem reddentibus naturam sic personatam. Sed tamen non est communicabilis essentia diuina relationibus, vt per illas fortietur esse simpliciter, quasi per seipsam solum essentia insit relationibus, terminata autem per relationes non solum insit, sed simpliciter sit, & habeat per se esse. Non sic est, sed natura diuina à se habens purum, & infinitum atque independens esse, communicat illud relationibus vt sint, & ab ipsis solum accipit terminationem, & distinctionem suppositalem, in quibus vna sit. Cuius signum est quia natura sic communicata non multiplicatur, nec in se, nec in suo esse, sed idem esse retinet in tribus personis. Non ergo communicat illis esse solum vt quo, sed etiam vt quod, quia retinet vnitatem suam in tribus illis personis, & vnum esse.

Ex quo patet ad probationes seu replicas, quæ fiunt contra hoc.

Ad primam dicimus sufficere hoc ad rationem subsistentiæ quando sufficit ad rationem independentis existentiae, & perfectissimæ, quæ non potest concipi sine exclusione modi essendi in alio, & per aliud. Et ad instantiam de humanitate Christi, dicimus ipsam omni carere subsistentia, quia non excludit omnem rationem existendi in alio: licet enim excludat existentiam in alio, vt accidens in subiecto non tamen existentiam in alio, vt forma, & pars in supposito: solum etiam explicatur nomine humanitatis principium quo homo constituitur vt forma totali, & natura. Vnde neque ex se dicit esse simpliciter, & per se, sicut id quod est, sed sicut id quo aliquid est, mediante autem supposito existit vt quod, & sic non habet ex se esse omnino independens à supposito, imò in sententia S. Thomæ nullum esse habet, nisi mediante supposito: natura autem diuina independenter à supposito est ipsum esse ex se omnino independens, & perfectum, & per se; & sic

ex vi sui cōceptus nec habet esse in alio, vt in subiecto, nec dependenter ab alio vt à supposito, licet communicetur supposito, non vt dependens ab illo non esse, sed vt ipsi communicans, esse ex se, & per se.

Ad secundam replicam dicitur non implicare, quòd aliquid habeat subsistentiam, & sit communicabilis, non solum sicut anima rationalis, quæ subsistit vt forma incompleta, & informatiua materiæ, sed etiam vt forma perfecta, & in se habens esse perfectissimum, & independens: dupliciter enim potest aliqua forma, seu esse communicari. Vno modo ob indigentiam sui, & ordinem ad aliquid perfectius, ad quod de se ordinatur; alio modo ex abundantia sui; & perfectissima fecunditate, & infinitate, quia bonum de se est communicatum, sicut subsistentia, & existentia diuina communicantur humanitati, & essentia diuina in ratione formæ intelligibilis intellectui creato, non ex indigentia sui, sed ex abundantia perfectionis suæ, non accipiendo ab illis esse, sed dando illis perfectionem. Dicimus ergo quòd si natura diuina esset communicabilis personis, vt imperfectum perfectiori, vt pars toti, & forma, seu principium quo præcisè ipsi composito, & subsistenti, bene probaret argumentum esse impossibile, quòd esset communicabilis, sic & quòd esset subsistens. Si autem est communicabilis personis vt habens in se omnem perfectionem, & eam illis communicans per identificationem, talis communicabilitas non tollit subsistentiam, in eo quod communicatur, sed solum quòd subsistentia illa non habeat oppositionem, & incommunicabilitatem cum eo cui communicatur. Argumentum verò procedit in his quæ communicantur tanquam res imperfectæ, & ordinatæ ad vltius esse, seu ab aliquo, in quo, vel per quod habent esse.

Ad primam Confirm. Respond. essentiam diuinam per relationes reddi subsistentem terminatiue, & incommunicabiliter, non quia ipsa essentia in ratione naturæ non maneat communicabilis alteri personæ relatiuæ, cum sit communicabilis tribus personis, & non possit habere vnum terminum relatiuum, nisi habeat alium correlatiuum, sed quia essentia diuina vt personata, & illo termino relatiuo affecta, non sit alteri communicabilis, sed opposita. Redditur ergo natura ex se absolute, & communicabiliter subsistens, relatiue verò, & incommunicabiliter per relatiuam subsistentiam, non absolute subsistens, & quantum ad independentiam in esse, seu modum essendi, & existendi per se, & non in alio, & vt quod; hoc enim se habet, sed communicatur relatiuæ subsistentiæ vt termino distinguenti, & incommunicabilitatem facienti inter terminos relatiuos, quia oppositionem habet inter illos. Et quando dicitur quòd subsistentia seu natura subsistens non potest affici alia subsistentia, distinguo, alia eiusdem ordinis, & lineæ, & secundum eisdem effectus formales, concedo; alia diuersæ rationis, & lineæ, & secundum diuersos effectus formales, nego. Subsistentia autem absoluta habet in sua linea, & ratione reddere diuinum esse per se, & non in alio existens, non tamen oppositionem facere, & distinctionem, & incommunicabilitatem, quia hoc pertinet ad lineam relatiuam. Et licet subsistentia absoluta respectu creatæ subsistentiæ sufficientem distinctionem, & incommunicabilitatem habeat, non tamen intra diuinam

diuinam naturam habet incommunicabilitatem, nisi mediante oppositione, quæ solum pertinet ad lineam relatiuam. Neque ob hoc ipsa substantia absoluta est incompleta & imperfecta, quia vltiori substantia, scilicet relatiua terminari potest, quia hoc solum habet locum, quando substantia ex tali terminatione perficitur in esse; si autem ex tali terminatione non acquirit esse, sed solum distinctionem, & incommunicabilitatem, & oppositionem in esse quod in se præhabet plenè, & perfectè, utpote actum purum, non quod vltius acquirit, talis vltior terminatio non supponit imperfectionem in substantia communicabili, sed solum quod non habet incommunicabilitatem, & oppositionem. Vnde constat quod substantia absoluta est perfecta, licet sit communicabilis, quia incommunicabilitas solum addit terminationem, & distinctionem, quæ ex oppositione relatiua dimanat, non actualitatem, & esse; & sic absoluta substantia omnem perfectionem substantiæ habet, non omnem terminationem. Exempla autem quæ in argumento adducuntur de figura, & actione, & specie, non vrgent, quia ibi sunt formæ eiusdem prorsus lineæ, & ordinis, & sic posita vna, datur incapacitas ad alteram.

25 Ad secundam Conf. Resp. quod substantia absoluta non se habet ut attributum, sed ut modus independentiæ, & perfectiatis in ipso esse diuino, secundum quod tale esse est actus purus, & à se, & in suo perfectissimo conceptu excludit omnem modum existendi in alio, vel per aliud. Et hæc exclusio non fit per attributum superadditum, sed per ipsummet conceptum perfecti esse, & actus puri; præsertim quia attributa se habent ut proprietates, quæ consequuntur naturam tanquam perfectiones superadditæ, aut principia operandi: hæc autem substantia absoluta pertinet ad ipsum esse quatenus perfectum est in ipsa linea existendi, & essendi, ita quod sicut ipsum esse ratione sui est independentens, est perfectum, est non in alio, nec tamen independentia, perfectio, aut exclusio essendi in alio non sunt attributa, sed eiusdem conceptus explicationes, & modi; ita substantia absoluta, quæ in his consistit, attributum non est, sed eiusdem conceptus diuini est modus, & explicatio. Fatemur tamen quod ex nostro modo diuerso significandi, & non ratione diuersæ rei significatæ potest ille conceptus essentia, seu esse diuini significari in concreto, & in abstracto, per modum formæ, seu principij *quod*, & per modum principij *quo*. Sed hoc totum non est per modum attributi, seu per modum distinctæ rei significatæ, sed per modum diuersæ significationis eiusdem prorsus rei, quod scilicet idem esse, seu essentia diuina significetur, ut diuinitas qua est Deus in abstracto, & ut id quod est Deus, & habens esse diuinum in concreto, quod non addit diuersam rationem ex parte rei significatæ, sed diuersum modum significandi ex parte nostra, quatenus sub modo abstracto, & concreto idem significamus. Et sic patet ad argumentum de distinctione conceptus naturæ ut *quo*, & ut *quod*: sunt enim diuersi conceptus ex parte modi significandi, non rei significatæ. Ut autem aliquid sit attributum, debet dicere aliquam rationem nostro modo concipiendi, diuersam ex parte rei significatæ, quia concipitur ut proprietas superaddita naturæ.

26 Tertiò arguitur. Essentia diuina semotis personalitatibus non potest concipi ut principium operandi *quod*: ergo neque ut subsistens. Patet consequenter quia substantia reddit naturam quæ subsi-

stitit tanquam principium *quod* in essendo: ergo & in operando: nam operatio sequitur esse, & esse ut *quod*, operatio ut *quod*, Anteced. verò probatur, quia essentia diuina semotis personis relatiuis non generat, neque generatur, ut definitur in *can. Damnamus, de summa Trinit.* neque creat res ad extra, quia personæ creantes sunt Pater, & Filius, & Spiritus sanctus. Vnde de Filio dicitur, quod *Omnia per ipsum facta sunt*. Non ergo Deitas sub conceptu præciso à personalitatibus operatur ut *quod*, & consequenter neque existit ut *quod*.

Confirm. à simili, quia sicut hic Deus significatur in concreto ut habens Deitatem, ita hic spirator ut habens vim spirandi, sed *ly spirator* non affert propter hoc substantiam seorsum à substantia relatiua, sed subsistit in substantia Patris & Filij: ergo neque hic Deus.

Confirm. secundò: nam D. Thom. 3. part. qu. 2. art. 2. probat naturam humanam debere vniri in persona, & non in natura, quia non datur medium inter naturam, & personam; & sic vnio non est facta in natura diuina, quæ est facta in persona. At si datur substantia absoluta, hæc ratio est inefficax, quia potest fieri vnio, nec in persona, nec in natura, sed in illa absoluta substantia: ergo vel ratio D. Thom. qua probat veritatem Catholicam, est vana, vel debet negari substantia absoluta. Et in 1. distinct. 26. quæst. 1. art. 2. dicit, quod *Remota relatione non manet subsistens relationis*. Et sic concludit ad 4. quod *Remota relatione neque Pater est quis, neque Filius est quis*. Si autem natura diuina secundum se esset subsistens, utique subsisteret relationi, non autem relatio primò, & per se subsisteret, sed adueniret subsistenti.

Respond. negando anteced. Et ad probationem dicitur, quod diuina essentia præintellecta personis non generat nec operatur ut *quod* notionaliter, sed operatur ut *quod* essentialiter, sicut intelligit, amat, creat, prouidet, &c. quia ad istas actiones non requiruntur per se personæ relatiuæ, sed hic Deus ut subsistens operatur, & ut vnus, concomitanter autem ut Trinus. Non est autem necesse ad hoc ut hic Deus sit subsistens, quod operetur ut *quod*, etiam notionaliter, sufficit quod operetur essentialiter. Nam ad operationem notionalem requiritur non solum virtus operandi, nec solum principium *quod* quomodocumque, sed oppositum correlatiue suo termino procedenti, siquidem debet producere aliquid distinctum ad intra, nec potest distinctum esse nisi per oppositionem relatiuam.

Ad primam Conf. Resp. non esse simile, quia *ly Hic spirator* non importat ipsam naturam, & esse absolutum Dei, sed potentiam, seu principium spirandi, quod pertinet ad actionem notionalem. Vnde non potest subsistere nisi notionaliter, non absolute. Substantia autem notionalis non datur, nisi sit persona; & sic *ly spirator* non potest per se habere substantiam seorsum à Patre, & Filio, quia non est persona relatiua per se, & consequenter neque substantia relatiua. At ipsa natura, & esse, per se, & ratione sui dicit esse independentens, & non in alio; & sic potest subsistere substantia non relatiua, neque notionalis, sed absoluta, licet communicabili, ut dictum est.

Ad secundam Confirm. Respond. D. Thomam non facere illam consequentiam, sed hanc; Natura humana vnita est Verbo secundum fidem Catholicam: sed non est vnita Verbo in natura: ergo in persona, quia in Verbo non est aliud quam in

quàm personalitas, & natura; & ita si in natura ei non vnitur, debet vniri in persona. Quare D. Tho. non procedit absolutè ex negatione vnionis in natura diuina, quòd vnio debeat fieri in persona, sed supponendo ex fide vnionem factam Verbo, discurret, & probat euidenter quòd si non est facta in natura Verbi, est facta in persona, quia in Verbo non sunt nisi ista duo, personalitas, & natura. Nec dicit S. Thom. non dari medium inter naturam abstractè sumptam, seu vt quo, & personam, & quando id diceret, & intelligeretur de medio secundum rem; & tanquam quid distinctum: nam subsistentia absoluta non distinguitur à relatione.

Ad secundum locum Resp. quòd remota relatione, non remanet subsistens relationi, id est, subsistens supposititaliter, & per modum hypostasis, vt ibi dicit: ratio enim hypostasis dicit incommunicabilitatem, sicut persona; sine relatione autem non datur incommunicabilitas. Et remota relatione, Pater non est quis, neque Filius, quia tunc non manet persona Patris, aut Filij, quæ relatione constituitur, sed manet hic Deus, & ille erit quis tanquam subsistens subsistentia absoluta, non quis tanquam persona, & vt Pater.

ARTICVLVS. III.

Verum sint ponenda in Deo quinque notiones, quatuor relationes, & tres proprietates.

NOtiones sunt quæ pertinent ad dignoscenda, & distinguenda ea quæ relatiua, & personalia sunt in Deo. Vnde oportet videre quæ, & quid sint istæ notiones, & quomodo de eis loquendum, prælibando tamen prius, quomodo à nobis Trinitatis mysterium possit cognosci.

Ex naturalibus effectibus est incognoscibilis Trinitas.

Vt tractet D. Th. 9. 3. 2. de notionibus, quibus distinguimus, & discernimus in Deo relatiua ab essentialibus, & personas inter se, præmittit, quomodo mysterium Trinitatis à nobis cognoscibile sit per naturales rationes. Dicuntur autem naturales rationes illæ quæ deducuntur ex effectibus ordinis naturalis. Ex effectibus autem supernaturalibus deduci possunt rationes altiores, quæ si discursu nostro acquisitæ sint, pertinent ad Theologiam. Solet autem agitari ista quæstio agendo de mysterio Incarnationis ad 9. 1. in 3. p. & quæ ibi dicuntur procedunt communiter respectu omnis entis supernaturalis. Specialiter autem in præsentia quia hoc mysterium non est aliquid factum, sed increatum, & intra Deum; est difficultas, an per aliquem effectum manifestari possit, siue naturalem, siue supernaturalem. Et quidem de effectu supernaturali, sicut est visio Dei actus fidei quo creditur Trinitatis mysterium, & aliis similibus, solet id disputari 3. part. qu. 11. vbi agitur, an Christus per scientiam infusam cognouerit euidenter mysterium Trinitatis quoad an est. Nec aliud in præsentia tractari potest, quàm de cognitione huius mysterij quoad an est: quid tamen euidenter non potest attingi, nisi per visionem claram Dei.

Supposita distinctione data quòd aliqui effectus sunt naturales, alij supernaturales, adhuc isti affectus supernaturales possunt considerari dupli-

citer. Primò vt præcisè sunt effectus, & respiciunt omnipotentiam Dei vt causam efficientem, eamque terminant. Secundò, vt respiciunt Deum tanquam obiectum, & causam formalem specificantem, sicut visio beata respicit Deum vt obiectum specificatum suum, non solum vt est vnus, sed etiam vt est trinus; & fides respicit idem obiectum vt proprium, & immediatum; & vnio hypostatica, quæ facta est, respicit personam relatiuam Verbi vt terminum vnitum.

Dico ergo nullum effectum, neque naturalem, neque supernaturalem in vi effectus, & secundum respectum ad Deum, vt ad causam efficientem, posse manifestare nobis nec euidenter nec probabiliter mysterium Trinitatis, etiam quoad an est. At verò aliqui effectus supernaturales possunt manifestare euidenter mysterium Trinitatis quoad an est per connexionem necessariam cum ipso tanquam cum obiecto, aut extremo vnito, sicut visio beatifica, quæ respicit Trinitatem vt obiectum, vnio hypostatica, quæ respicit personam vt extremum vnitum. Facta autem reuelatione huius mysterij, & congruentiis illius cognitis, benè potest aliquis ex motiuo naturali, relicto supernaturali, circa hoc mysterium duci, sicut circa alia supernaturalia.

Tres partes habet hæc conclusio.

Et prima, videlicet nullum effectum in vi effectus posse manifestare hoc mysterium, sumitur ex D. Thom. hic 9. 3. 2. art. 1.

Et probatur, quia nullus effectus habet connexionem in vi effectus cum personis diuinis prout distinctis inter se relatiuè, sed prout sunt vnus Deus absolutè: ergo non potest manifestare hoc mysterium. Consequenter probatur, quia nullus effectus potest manifestare suum principium, & causam nisi ratione alicuius connexionis cum illo, quia effectus eius est, & ab eo procedit, reliqua omnia cum quibus connexionem non habet, non potest manifestare quantumcumque alias sit connexum cum sua causa, illique conueniens, sicut affectus procedens ab artifice, v. g. domus ab ædificatore, potest quidem manifestare artem à qua procedit, & hominem in quantum artificem, sed non potest manifestare alia accidentia ipsius non pertinentia ad talem artem, v. g. an fuerit talis artifex albus, vel fuscus, parua, vel magna statura, pinguis, an gracilis, indutus veste rubea, vel viridi, totum hoc per talem effectum non est manifestabile, quia licet processerit ab artifice habente tales condiciones, & accidentia, quia tamen non procedit ab illo ratione talium accidentium, nec connexionem habet cum illis, non manifestat illa. Anteced. verò prob. quia nullus effectus procedit ad extra, nisi per potentiam Dei creatiuam, & artem Dei, seu Ideas: ergo solum connectitur, & respicit Deum vt creatorem, & artificem, esse autem Deum creatorem, & artificem cuiuscumque effectus etiam supernaturalis, est commune omnibus personis diuinis, quia procedit per attributum commune, quod est omnipotentia, & ars, per intellectum vt dirigentem, & potentiam vt exequentem: ergo non potest manifestare aliquid in quantum effectus, seu in quantum procedens à Deo, vt ab efficiente, nisi commune tribus personis, quia solum procedit ab eo quod commune est; ea verò quæ sunt distincta, & propria in personis, manifestare non potest. Itaque personæ vt distinctæ, & correlatiuæ inter se non influunt in creaturas, quia non vt correlatiuæ, sed vt creaturæ respiciunt creaturas: vt correlatiuæ enim solum ad inuicem se respiciunt, quatenus vna est principium, & alia

alia ex principio. Quod verò respiciant creaturas, & quòd influant in creaturas, non habent per respectus vt oppositos, & distinguentes inter se, sed vt sunt vnum in creando, & operando ad extra. Non ergo effectus ad extra procedens habet connexionem cum relationibus personalibus, vt ad intra oppositis, & distinctis, quia esse distinctos nihil conlucit ad influendum ad extra.

5 Dices: Etiam Spiritus sanctus procedit à Patre, & Filio, vt sunt vnum principium spirandi, & tamen qui cognosceret vim spiratitiam, deberet cognoscere duas personas, in quibus vis spiratitia est: ergo similiter licet creaturæ procedant à tribus personis, vt sunt vnum principium creandi, tamen qui cognosceret istam vim creandi, cognosceret personas in quibus est. Sed contra, quia vis spiratitia licet sit vna in Patre & Filio, tamen ex sua formali ratione, & proprio charactere requirit distinctionem personarum, quia procedit Spiritus sanctus ex personis, vt se mutuo amantibus, licet vnico amore, quia procedit ex amore amabili; qui requirit plures personas reciprocè se amantes. At verò virtus creatiua non est notionalis, sed purè absoluta, nec requirit pluralitatem personarum, etiam vt conditionem intrinsecam ad creandum, licet concomitanter se habeant tres personæ, sed non influxiue, aut cum connexionem per se cum creaturis procedentibus, quia præcisè procedunt ab eo quod absolutum est.

6 Instabis: In sententia eorum qui dicunt in Deo non esse aliquam substantiam absolutam, nisi tres relatiuas, & deitatem secundum rationem absolutam solum se habere vt principium *quo*, non vt *quod*, creaturæ non procedunt à natura diuina tantum, sed etiam à personis, quia procedunt à Deo, non solum vt principio *quo*, sed etiam vt à principio *quod*. Effectus autem non solum de se manifestant causam suam ex parte principij *quo*, sed etiam ex parte principij *quod*. Ergo si in Deo principium *quod* non est vna solum persona communis, quia non datur, sed tria supposita, & tres personæ relatiuæ, effectus procedentes à Deo tales personas manifestabunt, quantum est de se, licet nos de facto non cognoscamus hanc manifestationem, tum quia valde occulta est, tum quia ex æquo conuenit tribus personis, nec vnam seorsum & distinctè ab alia manifestat: sicut etiam multa alia occulta Dei iudicia, imò & causarum creaturarum rationes, vt cogitationes cordis, & alia similia non cognoscimus, licet per effectus manifestabilia sint.

Resp. quòd quidquid sit de illa sententia negante substantiam absolutam, tamen certissimum est quòd in Deo dantur veræ & reales operationes, seu actus habentes sufficienter principium *quod*, & *quo*, independentè à tribus personis, sicut hic Deus amat, & intelligit, Pater generat, Filius, & Pater spirant, nec tamen istæ actiones procedunt à tribus personis. Similiter est certum quòd in ordine ad creandum tantum virtutis, & potentiae habet vna persona, quantum omnes tres simul, vnde ad constituendum principium *quod* creandi: sufficit vna persona, nec magis confert concomitantia trium. Concedimus ergo quòd effectus manifestant de se principium *quod* à procedunt, sed sub eo modo quo conducit, & confert ad talem processionem, & non amplius. Dato ergo quòd non sit substantia absoluta, tamen quia vt operationes, & processionem dentur à Deo, non requiritur concursus trium personarum, sed sufficit hic Deus, vel aliqua persona, quia vna sola habet totam vim producendi, & sufficientem ra-

tionem substantiae, & principij *quod*; & sic reliquæ ex vi talis processionis non manifestantur: sicut si ego euidenter scirem aliquem effectum procedere ab homine, vt vidente, seu audiente, non tamen ex hoc præcisè potero colligere quòd videt duobus oculis, vel audit duabus auribus, quia etiam si vnum claudat, æquè bene videt.

Ex quo sequitur malè Vasquez in *presenti* 8 *disput. 132. cap. 1.* affirmare contra D. Thomam in *hac quæst. 32. artic. 1.* aliquos Philosophos cognouisse hoc mysterium: Et omnia testimonia quæ adducit, nihil aliud significant, quàm quòd D. Thom. ex Aristotele, Platone, & Trismegisto in *primo argumento, articulo primo*, adducit, & soluit, ostendens non fuisse Philosophos illos locutos de ipsis personis, & processionibus diuinis, sed de quibusdam attributis, quæ personis appropriantur; & ferè semper locuti sunt de processionibus ad extra, & circa creaturas, non ad intra, & circa personas, nec vnquam assecuti sunt ex naturali discursu vnam essentiam in tribus distinctis personis, sed si plures personas distinxerunt, etiam & naturas. Vnde non tam cognouerunt, quàm errauerunt circa hoc mysterium diuinæ generationis, errauerunt ab vtero, locuti sunt falsa. Si quid verò cognouerunt ex Sacra Scriptura, quam aliqui eorum legerunt, accepta fuere. Certè Paulus 1. *ad Corinth. 2.* dicit *se loqui sapientiam in mysterio, quam nemo Principum huius sæculi cognouit*; nec videtur aliquod esse augustius, & occultius mysterium, quàm hoc, atque adeò minùs cognitum est à Principibus huius sæculi, qui, vt inquit Glossa, sunt Philosophi, principes vtique sæcularis doctrinæ, aut si sæculi Principes sunt dæmones, & ipsi ex naturali lumine mysterium hoc non cognouerunt multo minus Philosophi.

De possibilitate huius mysterij positiua, idem dicendum est quòd de ipsa existentia, seu de an 9 est illius. Nam si hoc mysterium possibile est Deo, vtique de facto est, quia quidquid Deo est possibile, de facto ei conuenit, si intra ipsum esse debet. De possibilitate negatiua, scil. quòd non implicet contradictionem hoc mysterium, idem dicimus quòd non potest naturali ratione demonstrari, quia hoc supponit notitiam ipsius mysterij, quomodo enim ostendi potest non implicare, nisi cognoscendo prius famam eius, & an est ipse? Hoc verò ex nullis effectibus per naturalem rationem haberi potest. Et quidquid non implicat in Deo, perfectio debet esse, atque adeò ei conuenire. Et sic perinde se habet possibilitas negatiua, & positiua.

Secunda pars conclusionis, scil. quòd per effectus supernaturales habentes connexionem cum 10 personis, vel cum aliqua persona Trinitatis, quatenus respiciunt illam pro obiecto, vel pro extremo vnito intelligitur, quando ipsi effectus supernaturales euidenter cognoscuntur in se, vt si videatur, seu cognoscatur in se quiditativè ipsa visio beata, qua videtur hoc mysterium. Et ita in hac parte est duplex sententia. Altera negat etiam per istos effectus posse cognosci euidenter mysterium Trinitatis, etiam quoad an est, eo quòd non habet connexionem per se cum Trinitate tantquam effectus vel causa eius. Quam sententiam sequitur Torres 2.2. *disput. 9. dub. 1.2. & 3.* Et idem videtur sentire P. Vasquez *hic disput. 135. cap. 4. & in 3. part. disput. 53. capite 1. num. 5. & 6.* Sed tamen eius mens sic explicatur à P. Alarcon *hic tract. 5. disput. 1. capite 5. num. 9.* quòd non absolute neget mysterium Trinitatis non posse cognosci ex euidenti & clara notitia visionis beatæ,

aut

aut reuelationis mysterij Trinitatis, sed negat dari posse euentem notitiam huius visionis, aut luminis gloriæ, & similem effectum, quibus quiditatiue attingitur Deus Trinus in se, nisi Deus ipse videatur in se: eo quod non potest quiditatiue cognosci ista visio, nisi iudicetur esse conformis suo obiecto: ergo si ipsa videtur vt quiditatiue attingens Deum in se, & videtur vt conformis suo obiecto, necesse est tale obiectum quiditatiue videri, quia illi vt quiditatiue est in se, conformatur talis visio. Quod secus est de actu fidei, quo credimus Deum esse trinum, quia licet certus sit ita quod ei non potest subesse falsum, tamen non repræsentat Deum vt in se est; & sic vt iudicetur conformis suo obiecto, non est necesse videre illud intuitiue in se, sed sufficit aliunde constare quod Deus trinus est. Altera sententia affirmat per hos effectus posse cognosci euidenter mysterium Trinitatis quoad an est, & de facto habuisse Christum euidentiam, de illo quoad an est per scientiam infusam. Quod communiter tenent Thomistæ ad 3. par. 9. 11. ibi Pater Suarez disp. 27. sect. 3. & 3. Arrubal hic disp. 116. c. 3. & 4.

11 Nos de hac difficultate hic latius tractanda superfedemus, in eoloco 3. part. de ea acturi. Solum aduertimus pro explicatione huius secundæ partis conclusionis, quod absolute negari non potest, ex talibus effectibus euidenter cognitis, ipsum mysterium Trinitatis, quoad an est, euidenter deduci. Quod patet, quia est necessaria connexio inter illum actum visionis Dei, & mysterium Trinitatis, quod est eius proprium, & immediatum obiectum: ergo non potest saluari ratio formalis, & specifica talis actus, nisi detur tale obiectum: ergo qui cognoscit euidenter, & quiditatiue talem actum, cognoscit euidenter dari tale obiectum, quia ad illud obiectum tendit, & ab illo specificatur, sicut etiam qui cognoscit aliquam speciem vel repræsentationem, cognoscit ibi contineri rem repræsentatam, quæ est obiectum eius; & sic euidenter cognoscit dari tale obiectum, si videt repræsentationem aut specificationem factam à tali obiecto in ipso actu. Nec est necesse ad hoc quod cognoscatur aliquid euidenter, quoad an est, quod cognoscatur per medium quod sit causa vel effectus eius, sufficit quod interueniat necessaria connexio, ita quod hoc sine illo dari non possit; sic enim euidenter est illud dari, licet non cognoscatur quiditatiue, sed solum quoad an est. Vnde in mathematicis fiunt multe demonstrationes euidentes per media, quæ non sunt causa, vel effectus, sicut probatur super quamlibet lineam rectam posse fieri triangulum æqui laterum, quia possunt ab extremitatibus cuiuscunque lineæ rectæ deduci duo circuli se contingentes, & lineæ ab eorum centris ductæ erunt æquales inter se. Concurfus autem duorum circulorum circa aliquam lineam neque est effectus, neque causa eius, vel trianguli. Certè si tota vis demonstrationis nititur in connexione necessaria extremorum, quomodocunque inueniatur ista connexio, demonstratio fiet, quia cogetur intellectus vno dato, alteri assentiri. Vbi autem intellectus cogitur, ibi est necessitas, & connexio veritatum. Præterquam quod obiectum respectu actus habet vim causæ, quia se habet vt specificatiuum eius, quod pertinet ad causam formalem extrinsecam.

An verò possit dari euidenter, & quiditatiua cognitio istorum effectuum supernaturalium, v.g. luminis gloriæ, visionis beatificæ, vnionis hypostaticæ sine visione clara ipsius Dei, & in homine purè viatore? Certè in hoc ego nullam video implicationem.

Ioan. à S. Thom. in 1. part. D. Th. Tomus alter.

tionem: nulla enim creatura datur, quæ sui ipsius copiam intellectui facere non possit, & sit intimè, & quiditatiue cognoscibilis, vt est in se per aliquam speciem, & lumen proprium, saltem supernaturale extra visionem Dei. Si ergo ratione suæ creatæ entitatis, intelligibilis est per propriam speciem, & intelligibilitatem suam, atque adeò quiditatiue, & euidenter: Et hanc entitatem habet distinctam ab ipso Deo in se, cur non poterit cognosci in se quiditatiue, non viso Deo in se, sed prout continetur in tali effectui, scilicet in ipsamet visione, aut reuelatione?

13 Quod verò dicitur necesse esse videre illud extremum cui conformatur visio, vt iudicetur illi esse conformem, friuolum est. Ad iudicandum enim quod detur tale obiectum, & quod illud sit obiectum talis visionis, sufficit videre obiectum, non seorsum in se, sed vt contentum in tali actu, seu effectui: ex hoc enim planè constat eius esse obiectum, & debere dari tale obiectum, vt verè, & non fictè versetur circa illud, sed tamen non est necesse videre obiectum ipsum in se, sed sufficit aliunde cognoscere quod ille actus visionis est intrinsecè verus, & certè atque euidenter non fictè versatur circa suum obiectum; & sic videndo quod obiectum illud vt contentum, seu actum, à tali actu, licet non in se, plenè iudicatur tale obiectum dari in re, sicut ibi continetur: nec oportet obiectum ipsum in se videre, sed colligere per discursum dari in re, quia continetur, seu attingitur à tali actu, & actus ille verus est, quod totum sine visione rei in se potest attingi: sicut Angelus cognoscere potest virtutem Solis ad producendum aurum, etiam si nullum aurum videat in se, & virtutem oculi ad colores videndos, & lucem, etiam antequam sit producta lux, vel color, quia videt illa obiecta vt contenta, seu acta ab istis potentiis, & in proportionem earum ad illa.

14 Dices: In Deo esse ipsum est quiditas, ergo si euidenter cognoscitur esse Trinitatis, seu Trinitas quoad an est, cognoscitur quiditas Trinitatis euidenter, eo vtique modo quo cognoscitur esse, si abstractiue, abstractiue; si intuitiue, intuitiue.

Respon. quod si argumentum aliquid probaret etiam probaret quod ex effectibus naturalibus ex quibus cognoscimus essentiam Dei vt vnā, etiam cognosceremus Deum quiditatiue, quia eius esse est eius quiditas. Eodem ergo modo nos respondemus quod esse Dei, est eius quiditas prout est in se. Vt autem manifestatur in effectibus eius esse, sic manifestatur quoad an est, & imperfectè atque connotatiue non est quiditas Dei. Itaque si manifestaretur esse Dei perfectè, vt est in se, etiam manifestaretur quiditas Dei, & quiditatiue manifestaretur: At verò esse Dei manifestatur imperfectè, & prout in effectibus, non manifestat ipsam quiditatem diuinam in se. Bene tamen ex tali esse sic imperfectè manifestato, potest quiditas Dei quoad essentiam vel quoad personas imperfectè, & per alias species, & connotatiue manifestari, sicut nos ratione naturali discurremus circa attributa, & quiditatem Dei, sic qui cognosceret Trinitatem euidenter quoad an est etiam circa quiditatem relationum, & processionum posset discurre, sed non quiditatiue in se cognoscere.

15 Tertia pars conclusionis, scil. quod facta reuelatione potest aliquis naturali discursu probabiliter de isto mysterio cognoscere, à nemine videtur negari posse. Tum quia Dæmones credunt, & contremiscunt, quia scil. non ex pio affectu, sed indiciis & signis quoad credulitatem coacti, quasi tremantes credunt, non quidem fide supernaturali, sed

M

natu

naturali. Tum quia hæreticus non credens alios articulos, & credens Trinitatis mysterium, non credit fide supernaturali, & tamen assentitur huic mysterio. Tum quia potest aliquis paganus legens vel audiens hoc mysterium, & quomodo in Ecclesia tenetur, & explicatur, assentiri ipsi, ductus congruentiis, & explicationibus, quæ de ipso dantur, & tamen non assentiri ex fide supernaturali, nec ipsam fidem, & religionem Christianam acceptare, ob alios fines. Sed de his latius in materia de fide.

Difficultates circa notionum, & relationum numerum.

Circa numerum notionum, relationum, & proprietatum duæ sunt difficultates.

Prima circa numerum notionum, an sint solum quinque.

Secunda circa relationes an sint verè, & in re quatuor relationes reales.

16 Circa primam, communiter designantur à Theologis quinque notiones, quatuor positivæ, & una negatiua. Positivæ sunt *Paternitas, Filiatio, Spiratio actiua, & Spiratio passiva*. Negatiua est *Innascibilitas*, seu esse Ingenitum. Dicuntur notiones, quia istis quinque nominibus, seu notis specialiter discernimus, & dignoscimus personas. Paternitas convenit soli Patri, & Filiatio soli Filio: spiratio actiua utrique personæ, Patri, & Filio, quia utraque spirat Spiritum S. Spiratio passiva soli Spiritui S. Innascibilitas convenit soli Patri, seu esse Ingenitum, quia hoc nomine non solum significamus exclusionem generationis, & natiuitatis, sed omnis processioneis ab alio. Et hoc modo est proprius character, & notio Patris, seu primæ personæ.

17 Hinc ortus est scrupulus Scoti in 1. dist. 2. §. 1. ad 3. cur etiam inspirabilitas, quæ significat negationem procedendi tali modo, scil. per spirationem non sit notio, quæ conveniat duabus primis personis, quæ non procedunt per spirationem: sicut enim pertinet ad dignitatem primæ personæ, quod nullo modo procedat ab aliquo, ita pertinet ad dignitatem primæ, & secundæ, quod non procedant tali modo, scil. per spirationem: cur ergo non erit notio inspirabilitas, sicut innascibilitas. Quod si innascibilitas sumatur pro sola negatione generationis, & natiuitatis, utique non erit propria solius Patris, sed etiam Spiritus S. quia non convenit ei generari, & nasci. Ad hæc, sicut est dignitas Patris non procedere ab aliquo, ita est dignitas Spiritus S. non producere aliquam personam: ergo esse improductivum, erit notio Spiritus S. Tertio plura alia nomina sunt designatiua personarum, tum quoad origines, tum quoad personas. Nam generatio, & natiuitas significant originem, & possunt designare Patrem generantem, & Filium nascentem: cur ergo non erant notiones? Similiter nomen Verbi, & nomen imaginis in filio, nomen doni, & nomen amoris spirati in Spiritu S. sunt nomina notionalia, & designant personas. Cur ergo non erant notiones? Denique oportet explicare in ipsa notione negatiua innascibilitatis quid formaliter significet, an positivum, an negativum: Nam si est sola negatio, non discernit, nec innotescere facit aliquid de persona. Si est positivum, oportet explicare quid sit, an aliquid absolutum, & tunc non est notio, sed aliquid omnibus commune, an aliquid relativum, & tunc erit idem quod paternitas.

18 Circa secundam difficultatem, illud commune occurrit, quomodo sint quatuor relationes reales, si non sunt quatuor res relativæ: multiplicato enim

inferiori, necesse est multiplicari superius, sicut multiplicato homine, & equo, multiplicatur animal; sed res est superior ad relationem, sicut ens: ergo multiplicata relatione, ita quod sint quatuor relationes, multiplicantur quatuor res relativæ. Hoc autem est falsum, quia sic essent quatuor personæ, si sunt quatuor res oppositæ: quælibet enim res relativæ distincta est subsistens incommunicabiliter, & res naturæ, quod est esse personam. Et præterea, quia spiratio actiua non est res distincta à paternitate, & filiatione: ergo non sunt quatuor res, quia non est alia res spiratio actiua à paternitate.

Hinc ortus est alter scrupulus & Durando, & Scoto. Nam Durandus in 1. dist. 13. quæst. 2. vult spirationem actiuam distinguere realiter à paternitate, & filiatione; & sic esse quatuor res relativæ, licet sint solum tres personæ. Scotus verò quodlib. 5. art. 2. in fine, vult distinguere has relationes ex natura rei: distinguit enim Durandus quod aliud est in diuinis differre realiter relativè, aliud differre realiter personaliter, seu tanquam duo supposita. Relationes enim reales, ut ipse putat, differunt realiter se ipsis, sed non constituunt diversas personas, nisi differant incommunicabiliter, & secundum oppositionem, cum autem spiratio actiua non sit opposita paternitati, & filiationi, nec eis incommunicabilis, licet differat realiter, non constituet personam. Et est fundamentum pro sententia Durandi, & Scoti (licet Durandus plura congerat argumenta pro ista parte) quia non est identitas inter paternitatem, & spirationem, inter generare, & spirare: ergo est diversitas. Consequentia patet. Anteced. probatur: nam ista prædicatio est falsa, Paternitas est spiratio, siquidem hæc est falsa, generare est spirare, generari est spirari nam filius generatur, non spiratur, & Spiritus S. è contra: ergo non habent identitatem: ubi enim est identitas, ibi est vera prædicatio unius de alio. Et sic generare est à Patre terminatum ad filium, spirare verò terminatum ad Spiritum S. differt ergo unum ab alio. Ad hæc Paternitas, seu generatio, & spiratio habent inter se ordinem originis, quia generatio est per intellectum, spiratio per voluntatem, & voluntas supponit intellectum: ergo est distinctio, quia ubi est ratio originis, est ratio distinctionis. Tertio, Relationes istæ paternitatis, filiationis, & spirationis sunt specie distinctæ, quia habent fundamenta, & terminos distinctos: siquidem paternitas fundatur in generatione, & terminatur ad Filium, spiratio in amore, & terminatur ad Spiritum S. Quæ autem distinguuntur specificè, distinguuntur realiter, & sic non requiritur oppositio relativæ ut distinguantur, si ex se habent distinctionem specificam. Quod ergo sufficit ad distinctionem specificam, sufficit ad distinctionem realem in relationibus. Denique pro sententia Scoti urget, quia aliqua prædicata conveniunt paternitati, quæ non spirationi activæ, & è converso: ergo distinguuntur ex natura rei. Consequ. patet, quia distinctio ex natura rei solum ob hoc ponitur, quia ante omne opus intellectus verificatur unum prædicatum de uno, quod non de alio, sicut communicabile verificatur de essentia, & non de paternitate; & sic distinguuntur ex natura rei apud Scotum. Anteced. verò constat: nam paternitas constituit personam, non spiratio actiua, spiratio formaliter, & directè opponitur spirationi passivæ; paternitas autem, & filiatione non nisi radicaliter, & quatenus continent in se spirationem: ergo aliquod prædicatum convenit uni in re, quod non alteri.

Prima

Prima difficultati responderetur.

20 Dico primò, Numerus notionum rectè constituitur, scil. quòd sunt tantum quinque notionis *suprà* numeratæ. Pro intelligentia huius conclusionis supponenda est propria ratio, & definitio notionis in communi, ut ex eius visceribus colligamus, quibus convenire possit talis ratio notionis. Definitur ergo notio à D. Thom. *quest. 32. art. 3.* quòd est, *propria ratio cognoscendi divinam personam.* Potest autem cognosci divina persona, & discerni, vel à creatura, vel à divina natura, seu ab eo quod essentiale est in Deo, vel una persona divina ab alia persona. Discretio, seu notio distinguens personam divinam à creatura non est aliquid proprium personæ alicuius, sed commune omnibus, scil. ipsa essentia divina, & esse increatum, per hoc enim distinguitur à qualibet creatura. Distinctio etiam personarum ab essentia divina sufficienter fit per generalem, & communem rationem personæ, & relationis, cum essentia in Deo dicat id quod pertinet ad genus absolutum, quidquid verò ad genus relatum, & personale pertinet, discernit, & distinguit à ratione absoluta. Quare ad hoc non exigitur aliqua nota, seu character, aut notio specialis quæ distinguat personalia ab essentialibus, cum aliquid commune omnibus personis in genere relatum, & personali sufficienter hoc discernat, sicut hoc nomen *relatio, persona, origo, suppositum, &c.* Notio ergo debet esse aliqua specialis nota, seu character discernens inter personas, per quam scil. aliquid speciale in personis significetur: quod enim est principium, seu ratio innotescendi, aliquid speciale esse debet, ut S. Thom. dicit in *hac quest. 32. art. 3. ad 5.* Et sic videmus quòd omnes notionis distinguunt unam personam vel ab aliis omnibus, vel saltem duas ab una, ut spiratio activa distinguit Patrem, & Filium à Spiritu S.

21 Secundò advertendum est quòd notio cum de se dicat aliquid pertinens ad cognoscendam, discernendamque personam in sua propria ratione, non sumitur hic notio pro ipsa formali cognitione, qua fit ista discretio à cognoscente, sed pro ipsa formali ratione obiectiva, id est, quæ ex parte obiecti se tenet, seu ex parte ipsius personæ secundum quod importat aliquam specialem notam, & characterem discernendi unam personam, vel plures ab aliis. Quæ nota, seu character, aut forma per quam sic innotescit, & designatur una persona ab alia non est necesse quòd sit alia distincta à relatione, vel proprietate, qua constituitur, sed eadem esse potest, licet sub diverso respectu dicatur relatio, proprietas, aut notio, quia, ut dicit S. Thom. in *1. dist. 26. q. 2. art. 3.* *Paternitas dicitur relatio secundum quod ad Filium refertur, dicitur autem proprietas in quantum soli Patri convenit; dicitur notio in quantum est principium formale innotescendi Patrem.* Igitur ipsamet ratio, seu forma aut characteristica proprietas unius personæ erit notio, quatenus in se importat formale principium innotescendi talem personam.

22 Quid autem requiratur, ut aliqua nota seu forma sit principium innotescendi, & discernendi talem personam, D. Thom. in loco cit. paulo post illa verba sic explicat: *Ad hoc quod aliquid dicatur notio personæ, tria requiruntur. Primò quòd ad originem pertineat, quia relationibus originis personæ distinguuntur. Secundò quòd pertineat ad dignitatem, quia persona est hypostasis, distincta proprietate ad dignitatem pertinente. Tertiò, quòd dicat aliquid speciale, quia commune non est sufficiens principium innotescendi.* Quæ conditiones valde rationabiliter ponuntur, & Ioan. à S. Thom. in *1. part. D. Th. Tomus alter.*

conformiter ad munus, & officium notionis, quia cum ponantur notionis tanquam propriæ rationes cognoscendi seu innotescendi personam. Personæ autem dicunt aliquid distinctum relatione originis, & iterum ratio personæ addit super hypostasim, seu suppositum aliquid ad dignitatem spectans, cum dicat subsistens in natura dignissima, scil. intellectuali: idè illud debet sumi tanquam propria ratio innotescendi personam, quod dignitatem sonet, & ad rationem originis spectet; & denique debet esse aliquid speciale in tali persona, id est quod neque sit commune omnibus, cum notio sit propria ratio cognoscendi personam, neque solum pertineat inadæquatè, & minus principaliter ad talem notionem, quia illud manifestat, & innotescere facit quod magis eminet aut excedit in aliquo, non quod minus, & quasi inadæquatè in alio innotescitur, & includitur. Constat enim quòd eadem relatio Patris, & habet referri ad filium, & constituere personam, & pertinere ad potentiam generativam, ipsamque generationem elicere, sed non quodlibet munus ex istis facere debet distinctam notionem, sed omnia illa conflunt in unam notionem integram Patris. Similiter filius, & habet referri ad Patrem, & procedere, & constituere secundam personam, & in ratione filij includere quod sit imago, & intellectuale verbum, & rationem generati, sed hæc omnia non dicunt speciales rationes innotescendi hanc personam, sed inadæquatas, & omnes pertinent ad unam adæquatam notionem Filij, quæ rationem originati, & procedentis à Patre plenè notificat. Illa ergo ratio quæ in relatione aut ordine originis aliquid speciale, & principale repræsentat, & manifestat, vel ex parte principij originantis, vel ex parte termini originati, notionem specialem constituit, licet in tali ratione plures aliæ inadæquatæ formalitates, aut respectus, vel officia concurrant, quarum singula notionem non faciunt, sed ad notionem conducunt.

Tertiò denique supponendum est dari istas notiones, easque esse necessarias ad explicationem, designationemque personarum, & illis communiter Patres esse v. os. Necessitas quidem ponendi notionis optimè explicatur à D. Thom. *hic art. 2. contra Prepositum*, quia inuenitur in Deo una essentia cum tribus personis, & iterum una persona cum pluribus relationibus, seu rationibus principij originantis, aut termini originati, & procedentis. Oportet ergo in essentia, & personis designare, & distinguere id quo essentia est una, scil. ipsa divinitate, & rationes quibus personæ sunt tres, & inter se discernuntur, & distinguuntur, scil. relatione Patris, & Filij, quæ unico nomine dicitur Paternitas, & filiatio. Similiter cum in una persona inveniatur diversæ relationes principij, aut relationem principij, & termini originati, oportet discernere qua ratione est unum principium, & qua aliud, qua ratione est procedens, qua principians: licet enim una relatio possit respicere plures terminos inadæquatos, & partiales, etiam si partialiter, & inadæquatè differant specie, materialiter, & partialiter; tamen plures terminos adæquatos, & specie adæquata diversos, non potest unica relatio respicere: sic enim bis diceretur ad aliud una relatio, quòd negat Philof. 5. *metaph. c. de Ad aliquid*, quia tota essentia relationis est ad aliud se habere, & sic si dicitur bis, est duplex ad aliud. Cum ergo Pater sit principium Filij, & Spiritus S. & Filius sit terminus Patris, & principium cum Patre Spiritus S. & istæ relationes adæquatæ sint cum suis terminis, & non respiciat una terminos partiales, oportet aliquibus rationibus, seu notis, aut characteribus

discernere istas personas in ratione talium principiorum, & relationum, seu officiorum. Et Patres sunt vsi istis notionibus, vt videri potest apud S. Basilium lib. 2. *aduersus Eunomium*, & *epist.* 37. *ad Gregorium fratrem*; Pater, inquit, qui super omnia Deus est, peculiarem hypostaseos sua notionem solus habet, quod Pater est, & quod ex nulla omnino causa subsistit, atque isto iterum iudicio, & ipse propriè ac separatim agnoscitur. August. 5. de Trinit. c. 6. *Alia notio est qua intelligitur genitor, alia qua ingenuus.* Damasc. lib. 3. de fide c. 5. & citatur à D. Thom. hic art. 2. *Differentiam hypostaseon, id est personarum in tribus proprietatibus, id est paternali, & filiali, & processionali recognoscimus.*

²⁴ His suppositis conclusio posita, quæ est D. Thom. in *presenti quæst.* 32. art. 3. & in 1. dist. 26. q. 2. art. 3. & aliis multis locis, sic ab ipso colligitur, præfertim istis duobus locis. Personæ diuinæ distinguuntur, & multiplicantur secundum originem, & processionem vnius ex alio. Ad processionem autem, & originem duo pertinent; alterum ex parte principij à quo est alius, alterum ex parte termini qui ab alio. Et vtrumque potest innotescere, vel affirmatiuè, vel negatiuè. Affirmatiuè, secundum influxum, & processionem ipsam, negatiuè per negationem procedendi ab alio, vel producendi, vel originandi aliud, quod est vel negare rationem principij, vel rationem procedentis. Si ergo affirmatiuè, & positiuè sumamus originem, & processionem, constat in Deo esse solum duas processiones, alteram intellectus, alteram voluntatis. Ergo solum ponendum est duplex principium, & duplex terminus; & consequenter duplex relatio principij originantis, & duplex relatio termini originati; & sic fiunt quatuor notæ, seu formæ distinguentes istas relationes, & personas secundum rationem principij, & termini, scil. paternitas tanquam principium Filij, & filiatio tanquam terminus paternitatis: similiter spiratio actiua vt principium Spiritus S. & spiratio passiuæ vt terminus eius. Et istæ notiones sunt relatiuæ seu relationes: Non tamen omnes quatuor sunt proprietates, quia spiratio actiua est communis Patri, & Filio, cum eis non opponatur. Nec iterum omnes istæ sunt notiones personales, id est constitutiua personarum, licet personis conueniant, quia communis spiratio non potest constituere personam seorsum à Patre, & Filio, cum eis non opponantur, & consequenter eis identificetur.

²⁵ Si autem ea quæ ad originem pertinent sumantur negatiuè, tres negationes inueniemus ad processionem pertinentes in diuinis.

Prima est negatio principij, scil. quod aliqua persona sit nihil producat, sicut est in Spiritu S.

Secunda negatio est procedendi, scil. quod sit aliqua persona non procedens. Et hoc dupliciter, vel quia simpliciter non procedit villo modo, sicut Pater, vel quia non procedit tali speciali modo, sicut Filius non procedit spiratiuè; & sic est non spiratus, & inspirabilitas illi conuenit, & à fortiori conuenit Patri: sunt enim spirator, non spirati, & in generari conuenit Spiritui S. & à fortiori Patri, qui etiam non generatur. Prima negatio, scil. non esse producentem personam, non pertinet ad notionem, quia ex vna parte illa negatio solum declarat formaliter quid non sit, non verò quid sit: virtualiter autem, & per circumloquium non exprimit aliquid notabile, & ad dignitatem pertinens, quia non producere, vt sic, nihil dignitatis specialis affert. Vt autem sit notio, debet vel formaliter, vel implicitè, & virtualiter explicare quid aliquid sit, non purè quid non sit: ideo enim, & nomina infinita exclu-

duntur à ratione nominis, quia non sunt notamen rei: nec enim designant aut notant aliquid in re, sed solum quid non sit dicunt. Eodem autem modo negatio producendi non absolutè, & simpliciter, sed non producendi isto modo, v.g. generatiuè, sicut Filius non generat, licet alio modo producat, scil. spiratiuè, nihil authoritatis aut dignitatis in hac præcisa negatione explicat. Tertia negatio, scil. non procedendi ab aliquo, non simpliciter, sed tali speciali modo, scil. non spiratiuè, non dicit aliquam deculiatem dignitatem, quia formaliter solum explicat quid non sit illa persona, scil. non spirata, virtualiter autem, & per circumloquium non explicatur aliquid dignitatis specialis quia supposito quod illa persona procedat, æquè dignum est non procedere per voluntatem ac procedere per intellectum. Secunda denique negatio, scil. nullo modo procedere, notio est propria Patris, & nomine ingenui, seu innascibilis designata, quia licet de formali solum explicet quod non sit Pater, iuxta quod dicit August. 5. de Trinit. c. 3. quod *Cum ingenuus dicitur Pater, non quid sit, sed quid non sit, dicitur*; tamen ex alia parte per hanc negationem circumloquimur magnam dignitatem, & authoritatem principij per modum capitis, & fontis omnium processionum diuinarum nullam aliam habentis originem ab alio; semper enim quod est caput, & quasi primum, negationem emanandi ab alio debet habere, & talis negatio circumloquitur magnam dignitatem, sicut infinitum, increatum, ineffabile, licet negationibus explicentur, magnam tamen perfectionem per illas negationes circumloquimur. Quæ dignitas, non est in Filio eo modo quo in Patre, sed est tanta dignitas alio modo, scil. per modum geniti, & exprimentis totum quod est in Patre. Ita colligit S. Thom. has notiones, præsertim quæ ad negationes pertinent loco cit. ex 1. sentent. dist. 26. Et sic sunt quinque tantum notiones; Vna negatiua, & propria Patris, non tamen personalis, scil. innascibilitas. Quatuor positiuæ, scil. paternitas, quæ etiam est propria Patris, & personalis, filiatio propria, filij, & personalis: spiratio actiua non propria, sed communis Patri, & Filio, & non personalis: spiratio passiuæ propria tertie personæ, & personalis. Dicitur personis, quæ constituit personam.

Fuit præterea necessarium assignari Patri notio- ²⁶
nem illam negatiuam innascibilis propter Arrianos, qui contendeant Patrem distinguere à Filio, non solum relatione, sed etiam substantia, eo quod ly *ingenuum* cum non significet relationem, inferebant ipsi concernere substantiam, sicut ly *increatum*; & sic differre Patrem à Filio in substantia, quia differt in ratione ingenui. Sed responder Aug. 5. de Trinit. c. 3. ingenuum non dicere substantiam, sed negare relationem procedentis ab alio. Vnde concludit c. 7. *Non receditur à predicamento relatiuo cum ingenuus dicitur*; videlicet quia esse ingenuum in Patre solum negat relationem ab alio, & ita ly *ingenuum* est notio relatiua negatiuè, non positiuè.

Ad fundamenta, & obiectiones contra hanc primam difficultatem ex dictis constat.

Ad primum de inspirabilitate dicimus hanc ne- ²⁷
gationem non importare specialem manifestationem alicuius dignitatis in personis procedentibus: non enim significat quod nullo modo procedant, sicut ingenuum in Patre, sed tantum quod tali modo non procedant, puta per spirationem, vel per natiuitatem. Negare autem talem modum procedendi tantum, si alias procedunt personæ, non est explicare in eis aliquid specialis authoritatis, sed purè quid non sint. Hoc autem non sufficit ad notionem vt declaratum est. Nec innascibilitas quæ est notio Patris

Patris significat solum negationem natiuitatis: sic enim etiam conuenit Spiritui S. sed negationem omnis processionis ab alio: sic enim significat caput & fontem omnis originis, & processionis in Deo, & est notio primæ personæ, ut prima est.

28 Ad 2. etiam ex dictis patet quod non producere, per se non est dignitas aliqua, sed negatio fecunditatis, ut docet S. Tho. *bic. a. 3. ad 4.* negatio autem essendi ab alio de se explicat dignitatem primi, quia Pater est prima persona in diuinis. Vide etiam quæ dicimus *infra* circa solutionem ultimi argumenti in fine huius difficultatis. Nec ex hoc inferas, quod non producere in Spiritu S. est imperfectio, seu indignitas, aut quod aliqua dignitas ei deest, scilicet illa quæ est in Patre, & non in ipso. Resp. enim quod in Spiritu S. non est imperfectio, aut indignitas non producere, quia non spectat ad ipsum relatio producentis, sed relatio seu correlatio termini producti. Ad relationem autem termini non pertinet relatio principij, sicut ad relationem principij non spectat relatio termini. Nec est indignitas, aut imperfectio esse terminum principij diuini, quando terminus eadem naturam, & æqualitatem habet cum principio. Vnde non deest illi dignitas Patris, sed habet eandem dignitatem Patris sub alio modo: id enim quod in Patre est dignitas principij, in Spiritu S. est dignitas termini, quia potest tantum principium terminare, & ei adæquatè correspondere. Caterum hæc dignitas non explicatur per non producere, sed per spirari, & procedere. Dignitas autem primæ personæ, ut primæ, explicatur per non procedere, seu per ingeneratum, ut negat omnem processionem ab alio.

29 Ad 3. Resp. illa omnia non pertinere ad notiones, nec in vim notionum à SS. PP. esse accepta. Nam nomina significantia origines quasi in fieri, & tendentia non notificant personas, sed actus earum, actus autem supponunt personas, & consequenter supponunt distinctiua earum, & ea per quæ innotescere possunt in seipsis. Vnde origines ipsæ significata per modum actionis, & fieri, & tendentia non sunt primò, & per se distinctæ personarum, quia nec constitutiua, cum significantur ut in via, & tendentia, non ut in se, & per se stantes: Ergo neque sunt notiones primò, & per se, sed supponunt alias formas, & notas distinguentes, & constituentes. Et solum reductiue pertinere poterunt ad notiones tanquam quid consecutum, & ortum à persona, vel ad illam tendens; & sic accessorie sunt notiones, non primò, & per se. Idem quod dicimus de actibus significatis per modum originis, & tendentia, dicimus de potentia generatiua, & spiratiua, quia hæc non significatur ut persona, sed ut virtus personæ; & sic supponit aliquid aliud, quo innotescit persona, & quæ est notio principaliter, & simpliciter. Ea verò nomina quæ designant personas, & non sunt notiones, ut imago, verbum, splendor, & similia, ideò notiones non sunt, quia inadæquatè pertinent ad vnā, & eandem proprietatem, imbibunturque, & includuntur in nomine Filij, seu filiationis, quæ omnia illa adæquatè includit; & ideò non sunt notiones distinctæ, sed conditiones, aut inadæquatæ rationes eiusdem proprietatis. Sumitur hoc ex D. Th. *inf. q. 34. art. 2. ad 3.* ubi inquit quod *Ipsa natiuitas Filij, quæ est proprietas personalis eius diuersis nominibus significatur ad exprimendum diuersimodè perfectionem eius. Nam ut ostendatur connaturalis Patri, dicitur Filius, ut ostendatur coeternus, dicitur splendor, ut ostendatur omnino similis, dicitur imago, ut ostendatur immaterialiter genitus, dicitur Verbum. Non autem potuit vnum nomen inueniri per quod omnia ista designarentur. Quare illa nomina Verbi, imaginis, amoris, &c. licet specialibus personis conue-*
Ioan à S. Thom. in 1. part. D. Th. Tomus alter.

niant, non tamen dicuntur speciales notiones quia omnes includuntur in vna proprietate, & notione filiationis aut spirationis, quæ secundum diuersas, & inadæquatas conditiones seu formalitates omnia illa includit.

Ad vltimum in quo inquiritur quid de formali dicat ingeneratum, seu inamaleabilitas, an negationem; an aliquid positium, quia specialem difficultatem habet, pertinetque specialiter ad personam Patris, *seq. disp. art. 1. tractabitur* Nunc solum dicimus ingeneratum importare de formali negationem processionis ab aliquo principio, non tamen hanc negationem nudè importare, sed ut fundatam, & præsupponentem rationem personæ, & principij quod tamen non pertinet ad rationem formalem ingenerati, quasi constitutiua eius, sed quasi præsuppositam, ut D. Th. docet *in 1. dist. 28. q. 1. a. 1. ad 1. nec negat, sed potius confirmat. inf. q. 33. a. 4. in corp. & ad 1. primum, dum ponit significari per ly ingeneratum principium non de principio. Pura enim negatio essendi ab alio non potest dignitatem exprimere, cum hoc etiam inueniatur in his quæ nihil sunt; & sic ab alio non sunt, sed negatio essendi ab alio in eo quod est persona aut principium, dignitatem eius designat explicando id quod primum est per negationem alterius prioris. Quod verò ly ingeneratum importet de materiali personam illam, vel principium sub particulari conceptu Patris vel principij sic vel sic influentis, & propterea relati ad tales personas, hoc alia questio est, de quo discutietur citato loco *inf. disp. q. art. 1.**

Quod si demum inquiras, quomodo spiratio actiua dicatur notio Patris, & Filij, cum non sit proprietas, ut D. Th. docet *in hac. q. 32. a. 3.* & tamen notio dicitur quod est propria ratio dignoscendi personam: si autem sufficit esse proprietatem duorum, & non vnus tantum, simili ratione non spiratum ut fundatur, & supponit duas personas, scilicet Patrem, & Filium, quibus tanquam suppositis conuenit, dicitur notio Patris, & Filij.

Resp. non requiri ad notionem quod sit propria ratio dignoscendi personam tantum vnā, sed sufficit quod sit ratio propria dignoscendi personam, siue vnā, siue plures propterea ab aliqua alia discernuntur, sicut bipes est proprium hominis, sed non solius hominis, sed etiam auis propterea tam homo quam auis à quadrupede differunt. Quo exemplo vtitur S. Th. ad explicandum hoc *in opusc. 2. c. 59.* Addo quod spiratio communis est propria notio duarum personarum non quatenus plures personæ sunt, sed quatenus conueniunt, & sunt vnum in ratione principij spiratiui: sic enim est notio Patris, & Filij, non et Pater, & Filius, sed ut vnus spirator. De ratione autem non spirati passiuè, iam diximus quod licet duabus personis conueniat, nihil tamen dignitatis aut principij vel termini originis explicat; & sic notionem non designat. Imò non spiratum includitur in ipsa ratione spiratoris, & spirationis actiua, quia hoc ipso quod est spirator, opponitur spirato passiuè; & sic non est spiratum passiuè, quia opponitur illi. Inspirabilitas ergo, seu non spiratum non est notio seorsum, & per se, quia est inclusa, & inuoluta in spiratione actiua, sicut non genitum, seu non filius includitur in paternitate, nec est notio distincta. Quod secus est de ingenerato absolute: nam in ipsa ratione principij quod habet in quantum Pater, non inuoluitur quod non sit ab alio vllò modo, sed solum quod non sit genitus sicut Filius cui opponitur. Et ideò debuit distincta notione explicari quod sit omnino innascibilis, id est à nullo alio procedens ut explicaretur quod esset prima persona in ratione primæ. Quod etiam oportet notare pro discrimine inter innascibilitatem Patris, & inspirabilitatem, quod illa sit notio, non ista.

Secunda difficultati satisfi.

32 Dico 2. Rectè ponuntur quatuor relationes reales in Deo, non tamen omnes sunt realiter distinctæ, & ita non sunt concedendæ quatuor res relatiuæ in Deo. Conclusio quoad omnes partes est D. T. Nam quod relationes reales sint quatuor, affirmat *suprà* q. 28. a. 4. & q. 30. art. 2. ad 1. ubi etiam affirmat vnâ istarum relationum, scil. spirationem actiuam non separari à persona Patris & Filij, & similiter quod sint relationes reales, relatio Patris ad Filium, & ad Spiritum S. docet in hac q. 32. art. 2. & quod identificentur, docet *infra* q. 40. art. 1. ad 1. Ac denique quod non sint duæ res paternitas, & spiratio actiua, licet sint duæ relationes, docet in 1. dist. 27. q. 1. a. 1. ubi inquit, quod *Paternitas, & filiatio sunt duæ res, & similiter Pater & Filius, sed paternitas, & communis spiratio non sunt duæ res, quia non opponuntur relatiuè, sed tantum duæ relationes, quia distinguuntur differentiis relationis in quantum est relatio.* Et idem sumitur ex c. *Damnatus de summa Trinitate*, ubi definitur, *essentiam & tres personas non esse quatuor res, nec in diuinis concedendam esse quaternitatem.* Eadem autem ratio est de essentia, & tribus personis, atque de spiratione actiua, & de personis: si enim esset distincta res ab illis, essent quatuor res in Deo. Nec responsio Durandi valet, quod loquatur Concil. de quatuor rebus quæ sint quatuor personæ, vel tres personæ, & vna essentia: nam si Concilium damnat essentiam, & tres personas esse quatuor res, eadem ratione debet negare quod spiratio communis, & tres personæ sint quatuor res; eadem enim currit ratio. Præterquam quod si spiratio actiua est res distincta à tribus personis, erit illis incommunicabilis in re, & consequenter persona quarta, quia distincta, & incommunicabilis. Et antecedens probatur, quia relatio illa sic distincta debet esse subsistens. Subsistens autem distinctum est incommunicabile his à quibus distinguitur, quia aliter non potest distinguì subsistens, nisi incommunicabile sit, imò si talis res est distincta à Patre, & Filio, & tamen communicatur illis realiter: ergo vnitur illis: ergo facit aliquam compositionem cum illis, quia duæ distinctæ res non est intelligibile quod vniantur, & communicentur sine aliqua compositione. Hæc autem obstat summæ simplicitati Dei: ergo vndique vrgetur Durandus, vel ponendo spirationem distinctam communicari Patri & Filio; & sic ponet compositionem, & tollet simplicitatem, vel non communicari; & sic erit subsistens incommunicabile, & consequenter persona; & sic erunt quatuor personæ; Et iterum non procedet Spiritus S. à Patre & Filio, si eis non communicatur spiratio actiua, quæ est principium productionis Spiritus S. Quæ omnes consequentiæ sunt contra fidem.

33 Hæc aduersus Durandum probant non esse quatuor res relatiuas in diuinis, nec distinguì realiter spirationem actiuam à Patre, & Filio, quia eis relatiuè non opponitur, & sic debet esse vnum cum eis.

Contra Scotum autem probatur non distinguì ex natura rei ante opus intellectus, ea generali ratione qua id probatur de essentia, & relationibus, vel attributis: eadem enim militat ratio de spiratione, & paternitate, cum non minùs vnum sint, quàm essentia, & paternitas.

Sed restat modò ostendere, quomodo ex vna parte sint quatuor relationes reales, & ex alia non sint quatuor res, sed spiratio actiua vnum fiat cum duabus ex illis, scil. cum paternitate, & relatione. Nam quod reales relationes sint dubitari non potest, quia Pater & Filius reali relatione respiciunt Spiritum S. & non relatione rationis, cum realiter ab eo distinguantur: ergo & realiter opponantur: ergo correlatiuè

se habent, quia non est alia oppositio realis ibi, quàm relatiua. Rursus, non respiciunt realiter Spiritum S. paternitate, & filiatione: istæ enim relationes solum inter se opponuntur, & referuntur: pater enim, vt pater, solum se habet ad filium, & filius ad patrem. Ergo Spiritum S. respiciunt vt spirantes, seu vt spirator: ergo relatio spiratoris realis est vt pote in reali possessione fundata, qua procedit Spiritus S. à spiratore, qui est Pater, & Filius: & illa relatio spiratoris non multiplicatur in duabus personis, cum vtraque sit vnicum principium Spiritus S. ergo est vna relatio realis in Patre, & Filio ad Spiritum S. quæ non est relatio paternitatis, & filiationis. Et sic oportet ponere in Patre, & Filio præter relationem paternitatis, & filiationis, aliam relationem spirationis, quæ sit alia, non per separationem, seu non identificationem entitatiuam, & realem cum istis duabus; siquidem eis non opponitur sed per terminationem ad aliud terminum, ad quem neutra earum terminatur formaliter, quia paternitas terminatur ad solum Filium, filiatio ad solum Patrem. Sic ergo quatuor relationes reales dari constat, non plures quia non sunt plura fundamenta quàm duæ processiones reales; quæ necessariò inter quatuor terminos esse debent, nec plures correlationes, & terminationes exigunt. Non pauciores, quia nec pauciores processiones dantur, quæ sunt istarum relationum fundamenta, & quælibet processio inter duos terminos versari debet.

Sed quia solum tres ex istis relationibus sunt perfectæ modo, & vnde quaque inter se oppositæ; vna verò, scil. spiratio communis inuenitur non opponi paternitati, & filiationi, & sic ab illis non distinguì, sed identificari, merito inquiritur quomodo istæ relationes vnum sint cum illa spiratione communi, ita quod multiplicetur relatio, & non multiplicentur res vt sint quatuor subsistentiæ seu res relatiuæ. Et communiter dici solet quod distinguuntur formaliter realiter in esse relationis, sunt autem vnum in esse rei in quo inuenit difficultatem Valsq. *hic disp.* 138. c. 1. *in fin.* & c. 2. quia si illæ rationes distinguuntur formaliter in esse relationis, etiam distinguuntur in esse rei ob argumentum *suprà* factum, quia multiplicato inferiori, diuiditur quoque, & multiplicatur in eis gradus superior. Alij dicunt multiplicari quatuor relationes in esse *Ad*, non in esse *In*, sed in hoc illas duas relationes paternitatis, & spirationis identificari. Alij sentiunt spirationem, & paternitatem identificari in vno tertio respectiuo, quod ad vtrumque terminum se habet, quia scil. non est vna relatio tertia, sed vna res respectiua, & duplex ratione terminorum. Quod aliqui explicant exemplo eiusdem albi, quod est simile respectu alterius albi, & dissimile respectu nigri, & tamen illa relatio similitudinis, & dissimilitudinis identificantur in albo in esse rei.

Caterum istæ explicationes conantur punctum attingere veritatis, & non perueniunt, diuertendo ab illo, & diminutè rem explicando. Considerandum est enim quod in rebus creatis relationes distinguuntur realiter, tum ratione oppositionis ad correlatiuum, tum ratione limitationis, quia vna relatio non habet nisi vnâ speciem, & perfectionem ad illam pertinentem, quia cum limitata, & creata sit, non potest plurium perfectiones in se adunare. Et cum tota ratio, & perfectio relationis sit ad alterum, non solum non potest vna relatio creata habere speciem sui termini correlatiui, sed neque speciem aliarum relationum, ita quod terminos disparatos respiciat vna & eadem res relatiua, & fungatur vice plurium relationum, obistente ad hoc ip. à limitatione creatæ realitatis relatiuæ. At verò in diuinis non est ratio distinguendi relationes ex limitatione entitatiua, & in ratione rei, sed solum

solum ex oppositione correlativa fundata super originem; quia videlicet in origine, & processione reali non potest eadem res procedere realiter à seipsa, sed si aliquid realiter procedit, debet esse realiter distinctum, & cum non possit res absoluta procedere & distinguere ab alia, solum res relativa sine lesione perfectionis absolutae distinguitur secundum oppositionem relativam processionis. Remota autem oppositione correlativa, ipsa infinitas, & omnis limitationis negatio adunat, & identificat in esse rei totum quod ad entitatem, & realitatem pertinet in relationibus; & sic vnam entitas potest omnem speciem relationis adunare, dummodo opposita sibi non sit; & sic varios terminos respicere potest disparatè, non correlativè se habentes, & plurium relationum vice fungi, quod totum ad eminentiam infinitatis spectat, quæ etiam in genere relativo in Deo est. Et hæc doctrina valde observanda est, contra eos qui putant posse in divinis relationes seipsis distinguere, etiam sine oppositione, & processione unius ab alia, contra quos agemus *disp. seq.* tractando de distinctione Spiritus S. si à Filio non procederet. Radix enim, & principium contra eos desumitur ex eminentia, & infinitate divina, etiam in genere relativo, quæ postulat adunare, & identificare omnem speciem, & perfectionem illius generis in entitate, & realitate, dummodo oppositio non interueniat, quia infinitas unitatem facit, & postulat, si est infinitas simpliciter.

36 Ex quibus liquidd colligitur quomodo spiratio activa, & paternitas sint una res relativa, & duæ relationes reales, non ita quod *ly duæ* cadat super *ly reales*, id est, quod realiter sint duæ, sed *ly duæ* cadit super *ly relationes*, id est, quod illa entitas realis, quæ respicit realiter terminos, duplicis relationis realis vim habet, & munus, & realiter à parte rei respicit illos terminos, sed quia inter se non sunt oppositi, & relatio illa non est entitas finita, & limitata, potest eadem entitas relativa duplicis relationis realis vim habere. Dicuntur tamen quatuor relationes reales absolute, & simpliciter, quia *ly relatio* semper appellat suum formalem conceptum super terminum, non super subiectum, eo quod propria, & formalis ratio relationis in eo in quo à cæteris generibus differt, est habere se ad terminum; & quia significatio illius termini. Relatio semper intelligitur in formali sensu, & conceptu, id est, cum relatio numeratur, sub appellatione ad terminum numeratur, quidquid sit, an entitativè sit una res, vel plures. Quod etiam pro prædicationibus relationum observandum est; est enim illa prædictio, Paternitas est spiratio, sicut hæc attributum sapientiæ est attributum iustitiæ: utraque enim formalem sensum, & appellationem facit; in sensu autem simplici vel identico sapientiæ est iustitia, vel est res quæ est iustitia, spiratio est res quæ est paternitas, valent.

37 Colligitur 2. eodem modo loquendum esse de multiplicatione relationum, atque de multiplicatione attributorum: sicut enim dicimus iustitiam, & misericordiam esse duo attributa realia, aut virtutes reales in Deo, non tamen esse duas realitates, quia *ly duo* appellat supra formalitatem attributi, & supponit realitatem, ita cum dico quatuor relationes reales, vel spirationem, & paternitatem duas relationes reales, *ly duas* appellat supra formalitatem relationis, ut exercetur ad terminum, *ly reales*, seu realitas non multiplicatur seu formalizatur ibi, sed supponitur, quia ille respectus qui exercetur ad diversos terminos realis est, sed eadem realitate, non diversa sicut eadem divinitate divinus est, & eodem esse increatus est.

38 Colligitur tertio, omnes illos modos dicendi, & explicandi hanc unitatem rei relativæ, & distincta-

tem in formali appellatione relationis, ex parte continere veritatem, & ex parte deficere.

Nam primus modus qui dicit relationes illas in esse rei, esse unum, & in esse relationis formaliter, distinguere realiter, quantum ad hoc verè dicit, quod relationes illæ entitativè non differunt, sed terminativè tantum, quia exercent respectus ad diversos terminos realiter. Sed in hoc deficit quod formalitatem istam, & munus relationis vult distinguere realiter, ita quod etiam realitas cadat super multiplicationem relationum, cum tamen realiter non multiplicentur, sed una maneat, & ita realiter non multiplicetur id quod formale est in relatione, licet realiter exercentur ad multiplicatos, & plures terminos.

Secundus verò modus dicendi, quantum ad hoc quod relationes illæ multiplicentur in esse *Ad*, non in esse *In*; si sumatur esse *In* pro ratione ipsa communi relationis in ratione accidentis, & ratio *Ad*, pro ratione particulari relationis, & quasi specifica, deficit, quia non solum spiratio, & paternitas identificantur secundum rationem communem, sed etiam secundum particulares, & proprias rationes, quia etiam in quantum tales specificè, & in ipsa speciali ratione *Ad* non opponuntur: ergo sunt unum, & identificantur, quatenus tales relationes sunt *E* contra autem si dicatur esse plures relationes separando *Ad* ab *In*, ita quod non sint plures, illæ relationes, etiam retinendo realitatem, quæ illis convenit ex ratione *In*, licet non multiplicentur illam, falsum est, quod non sint quatuor relationes reales, etiam retinendo *In* reale, & non separando, quia nunquam essentia, quæ dat rationem *In* relationi, separatur in re; licet non multiplicetur, retinendo tamen ipsum *In* essentiale. Est autem vera illa sententia, si intelligatur quod illæ relationes tam quoad rationem communem, quam quoad particularem in ratione talis *Ad* sunt unum entitativè, & provt efficiunt subiectum, eique tribuunt effectum formalem determinatum, & specificum: sunt autem plures terminativè provt ad diversos terminos realiter terminantur, & appellant conceptum suum; ergo illos.

Denique tertius modus dicendi in hoc deficit quod videtur illas duas relationes, quasi in unam confunderè, cum tamen inconfusa sit relatio paternitatis, & spirationis activæ, & utraque explicitè, & inconfusè tendit ad suum terminum, nec datur aliqua relatio communis, seu eminens, quæ nec sit formaliter paternitas, nec formaliter spiratio, sed Pater formaliter est pater, & provt pater formaliter dicitur solum ad Filium, & Pater formaliter est spirator, & sub hac relatione dicitur solum ad Spiritum S. Non verò datur una relatio tertia in qua istæ duæ confundantur, quæ simul respiciat utrumque, scilicet Filium, & Spiritum S. ut terminum adæquatum, sed terminus adæquatus paternitatis est Filius, & terminus adæquatus spirationis est Spiritus S. Similiter deficit exemplum de albo in quo identificantur relatio similitudinis, & dissimilitudinis, quia album est aliquid absolutum, & per modum fundamenti remoti, non proximi, in quo non est mirum quod concurrere possint plures relationes: sicut non est quæstio quod in essentia divina, seu in ipso Deo absolute sumpto identificetur relatio paternitatis, & spirationis, imò & filiationis. Cæterum in hoc videtur ad veritatem accedere ille modus dicendi, quod relatio spirationis, & paternitatis entitativè etiam in genere relativo sunt unica res relativa, quia non opponuntur inter se, sed sunt plures relationes terminativè, & secundum quod relatio appellat suum conceptum super terminum, sunt plures relationes, quia habent suos terminos distinctos adæquatè, explicitè & realiter. Quare non debet concedi quod istæ relationes

M. 4 adunam

adunantur in vno tertio respectivo, quia nec in formalitate respiciendi, & relationis adunantur, sed impermixtæ, & inconfusæ permanent sub appellatione relationis, sicut, & impermixtas terminationes habent; nec in vno tertio datur adunatio, quia hoc quod est tertium, sonat aliquid quod nec sit formaliter paternitas, nec spiratio, sed aliud tertium eminenter continens illa duo: quod est falsum, quia illa eadem res relatiua formaliter est paternitas, & formaliter spiratio, licet entitatiue sit vnum, & terminatiue plures relationes. Ex quibus patet tum ad rationem dubitandi *suprà* propositam in initio huius difficultatis, tum ad motiua Durandi, & Scoti.

39 Ad rationem dubitandi dicitur quod multiplicato inferiori multiplicatur superius, si multiplicetur inferius realiter, & entitatiue, concedo; si multiplicetur inferius solum terminatiue, & non entitatiue, nego. Relationes autem spirationis, & paternitatis multiplicantur sub appellatione formali ad terminos, non secundum oppositionem realem aut limitationem. Vnde non entitatiue, sed terminatiue multiplicantur. Ex hoc autem non sequitur quod sint plures res, sed quod vna res relatiua in esse rei habeat vicem plurium, & sit relatiue multiplex ad diuersos terminos propter infinitatem entitatis suæ, vt explicatum est.

Sed instat Durandus: quia si sic esset, eadem relatio diceretur bis, & haberet in re plures terminos adæquatos, quod repugnat, quia relatio essentialiter se habet ad terminum: ergo variato termino specificè, variatur relatio. Non ergo paternitas, quæ respicit Filium adæquatè, & spiratio, quæ respicit Spiritum S. possunt esse vna res relatiua, seu vna relatio.

Sed facile Respond. ex dictis, quod eadem relatio sub appellatione, & formalitate relationis quæ est ad terminum, nec dicitur bis, nec habet plures terminos adæquatos, sed distinguitur terminatiue iuxta diuersos terminos ad quos tendit. Eadem tamen res relatiua, si limitata non sit, nec oppositionem realem habeat, bene potest diuersos terminos inter se non oppositos, nec correlatiuos, respicere, quia ob sui eminentiam omnem illius generis relatiui perfectionem, & specificationem in vna entitate habet. Et sic ad argumentum: Relatio essentialiter se habet ad terminum, concedo: Ergo variato termino specificè, variatur relatio, distingo; variato termino specifico variatur relatio si sit limitata ad illum terminum in sua entitate, transeat; si sit infinita, & illimitata, nego. Hæc enim non diuersificat entitatem, nisi in vi oppositionis, quia in vi limitationis non potest. Vnde cessante oppositione licet termini varientur, entitas relatiua non multiplicatur.

Ad motiua Durandi.

40 Ad primum negatur antecedens. Ad probationem Resp. aliquos admittere illam prædicationem, Paternitas est spiratio, propter identitatem in esse rei, sicut propter eandem identitatem admittitur quod misericordia est Sapientia, vel est iustitia. Sed melius S. Thom. eam negat in hac q. 32. art. 3. ad 3. quem ibi sequitur Caiet. & Interpretes, *Sicut etiam*, inquit, *non dicimus quod attributum potentie sit attributum scientie*. Quod exemplum non placet Scoto quodlib. 5. art. 2. quia ly *attributum* est nomen secundæ intentionis, & appellat supra conceptum nostrum, quo distincte concipimus vnā perfectionem diuinā, ab alia: At verò paternitas, & filiatio non sunt nomina intentionis, nec appellant conceptus nostros distinctos, sed sunt nomina

rei, sicut bonitas, sapientia, &c. Ergo sicut ista ad inuicem prædicantur, ita & illa propter identitatem rei vtroque repertam. Sed firma est solutio, exemplumque D. Thom. Licet enim relatio sit nomen rei, & non secundæ intentionis, tamen ex propria, & formali ratione sua affert secum appellationem supra terminum, eo quod relatio in hoc propriè differt à reliquis generibus, quia non dicitur ad se, sed ad terminum. Quare cum significatio termini semper sumatur in suo formali sensu, significatio etiam termini relatiui sumitur sub formali sensu, & appellatione ad terminum; & cum sub ista appellatione non detur identitas, sed diuersitas inter relationem paternitatis, & spirationis, consequenter sub hac appellatione non fit prædicatio propter eandem rationem, qua non fit inter attributum iustitiæ, & misericordiæ, prout significantur sub nomine attributi, non quod relationes illæ sint nomina secundæ intentionis, sed quia important appellationem illam, & formalem sensum super terminos distinctos, sicut illa attributa super conceptus distinctos. Si autem termini extrahantur ab illa appellatione, & significatione formali, trahanturque ad sensum omnino identicum, prædicatio erit vera, vt si dicas Paternitas, est res quæ est spiratio. Cum autem volumus prædicare attributa, non oportet sic significare identitatem, dicendo, Bonitas est res quæ est sapientia, sed etiam si simpliciter proferatur, Bonitas est sapientia, prædicatio est vera, quia cum sint nomina absoluta, tantum prædicant perfectionem suam, vt est in se & ad se, non vt se habet ad aliud in quo appellatur distinctio. Et ideo ratione suæ significationis, nulla est repugnantia quod prædicentur ad inuicem, quæ tamen est in relationibus propter appellationem supra distinctos terminos, & ideo magis assimilatur illa prædicatio illis propositionibus. Attributum sapientiæ est attributum iustitiæ, & similibus, vbi importatur appellatio ad distinctos conceptus.

Ad secundum negatur quod paternitas, & spiratio habeant inter se ordinem originis, & processionis realis, cum vna nō procedat ab alia, licet enim amor spiratus procedat à cognitione, seu verbo, tamen voluntas non procedit ab intellectu, sed idem sunt, & consequenter neque spiratio actiua à generatione actiua, quia ista duo vt actiua, nō habent inter se ordinem originis, nec oppositionem. Quod verò voluntas præsupponat intellectum, hoc nō est secundum originem realem, sed secundum ordinem rationis.

Ad tertium Resp. in diuinis non esse propriam distinctionem specificam, nec inter relationes, nec inter attributa, quia vbi non est genus, nec est differentia, nec species, sed dicuntur aliqua species, vel specificè se habere, quia ad modum diuersarum specierum concipiuntur, vt misericordia, & iustitia, bonitas, & sapientia; sed in Deo ista non se habent vt species diuersæ, quia non sunt limitatæ, sed vt actus purus vnus, & simplicissimus omni speciei supereminens, & infinite omnem perfectionem continens. Cum autem dicitur quod ea quæ specie distinguuntur, realiter differunt, distingo, quæ specie distinguuntur formaliter, & limitate, transeat; quæ specie distinguuntur solum eminenter, & virtualiter, reuera autè, & entitatiue sunt vnus actus purus, & infinita entitas, nō distinguuntur realiter, nisi interueniat realis oppositio.

Ad vltimū quod pro sententia Scoti vrgetur, sapientia respondens est quod prædicatum aliquod dici de vno, quod non de alio, nō arguit distinctionem à parte rei, & entitatiuam, sed solum virtuale, & fundamentale: sufficit enim quod non sub omni sensu, & formalitate non identificetur, licet entitatiue sint omnino vnum, & idem; & sic non distinguantur actualiter.

liter in re. Cum enim prædicatio fiat secundum sensum formalem quem significant termini, non secundum identitatem entitativam quam habent in re, sufficit ad prædicandum de aliquo vnum prædicatum, & non aliud, distinctio illa virtualis, seu non identificatio sub illa ratione, licet in re entitativa identificatio sit: sicut etiam dicimus quod essentia non generat, & pater generat, licet eadem entitas sit pater, & essentia: id enim quod de istis dicimus, & supra diximus, dicendum est de relationibus spirationis, & paternitatis quantum ad entitativam suam.

44 Ex dictis patet latius patere notiones, quam relationes, & relationes quæ proprietates in divinis. Omnes enim proprietates sunt relationes, siquidem proprietates sunt formæ constituentes personas, & istæ personales formæ relationes sunt, quia relativiè oppositæ, utpote distinctæ. Sed non omnes relationes constituunt personas; & ita non sunt proprietates, sicut spiratio activa est relatio spiratoris ad Spiritum S. sed non constituit personam, quia non est incommunicabilis Patri, & Filio, sed vnum est cum illis; & sic non habet personam seorsum ab illis. Omnes tamen relationes sunt notiones, quia peculiariter notificant personas, relationes quidem personales, suas proprias personas quas constituunt: Spiratio autem activa, non designat peculiarem personam, sed peculiare principium notionale, quod est in duabus personis, & illas etiam notificat ut oppositas, & distinctas à Spiritu S. licet non ut oppositas inter se. Non tamen omnes notiones sunt relationes, ut patet de innascibilitate, quæ notificat primam personam ut primam, seu in quantum non est à principio. Nec oportet plures notiones addere, quia si quæ sunt alia nomina notionalia, in istis includuntur, & ad ista, ut ad principalia reducuntur. Persona autem, vel ratio divina in communi non est notio, sed prædicatum commune inclusum in particularibus notionibus, non autem explicat propriam rationem innotescendi personas, sicut dicit definitio notionis, sed communem.

ARTICVLVS. IV.

Quomodo sit utendum nominibus significantibus unitatem, vel pluralitatem, concretum, aut abstractum in divinis?

ETiam ad notionum explicationem pertinet discernere, quomodo nominibus istis utendum sit in divinis. Nam ex indebito usu talium nominum, contingit errare aliquos circa divinas notiones, & nomina, quæ numerum vel unitatem designant in divinis.

Igitur nomina, quibus in isto mysterio utimur, alia sunt speciales ipsæ notiones, quæ, ut diximus, sunt quinque, artic. præced. stabilitæ. Alia quæ ipsis notionibus seu personis, aut relationibus adiunguntur, & significare possunt vel unitatem in Deo, vel pluralitatem, vel singularitatem, aut solitudinem, aut exclusivam, vel alia similia.

Circa nomina designantia ipsas notiones, solum vna difficultas occurrit, quomodo scilicet ponendæ sint notiones in abstracto, & in concreto in divinis, & quid possit de illis prædicari in abstracto, quid in concreto. Notiones enim sunt nomina in abstracto sumpta, scilicet illa forma, seu nota, qua ut ratione formali innotescit nobis, & distinguitur propria aliqua ratio personæ, ut paternitas, filio, &c. Personæ vero in concreto non sunt notiones, sed res

illæ quæ notionibus innotescunt. Hinc orta est dissensio in duobus.

Primum, an sint distinguenda ista concreta, & abstracta in divinis.

Secundum quid possit applicari, & prædicari de abstractis, & quid de concretis.

Circa primum, ponimus vnam regulam: Dantur in divinis abstracta, & concreta solo nostro modo significandi diversa, non autem diversitatem aliquam realem, seu à parte rei ex parte rei significatæ inducunt.

Priorem partem huius regulæ negavit Præpositivus, ne ista distinctio abstracti, & concreti divinæ simplicitati præiudicaret, contra quem agit S. Th. hic qu. 32. art. 2.

Posteriorem partem negavit Aureolus apud Capreolum & in 1. dist. 26. apud Caiet. in hoc art. 2. existimans distinctionem abstracti, & concreti aliquam diversitatem inducere ex parte rei significatæ, & non solum ex parte modi significandi, quia alias si solum ex parte modi significandi distinguerentur, quidquid verificatur de vno, verificaretur de alio.

Sed utrumque est falsum. Et primum contra Præpositivum constat, quia in Deo procedimus iuxta nostrum modum intelligendi præscindendo, & diuidendo, & componendo, quia vnico simplici intuitu non possumus rem tantam comprehendere. Cum autem in Deo inveniatur & simplicissima forma, quia nihil compositionis habet, & completissima, & absolutissima substantia in se independens, & incommunicabilis, habet & perfectionem suppositi completè subsistentis, & simplicitatem formæ. Ergo possumus istos conceptus diuidere, & intelligere in divinitate id quod est formæ ad modum formæ, & suppositum ad modum habentis illam; & sic formam ad modum formæ secundum se consideratam vocamus abstractum, suppositum vero, seu id quod est ut subsistens, & per modum quod significatur, vocamus concretum. Quare hoc non magis derogat simplicitati divinæ, quam ipsa distinctio attributorum, quæ distinguimus ob imperfectionem nostrorum conceptuum non valentium illam eminentissimam perfectionem vnico modo, sicut in se est, attingere.

Ex hoc autem deducitur per eandem consequentiam, quod sicut in prædicatis absolutis, & natura divina distinguitur iste conceptus quo, & quod, ratio formæ constituentis, & ratio habentis formam, ita in conceptu personæ, & in eo quod personale & notionale est, uterque conceptus distingui potest concretus, & abstractus, quo, & quod; quia etiam persona ipsa relatiua, & subsistens personaliter, constituitur in ratione talis personæ; & idè inuenitur ibi, & ratio constituens, & res constituta, & in quantum concipitur ut constituta persona, & ut quod, dicatur seu significetur per modum concreti, in quantum vero concipitur ut ratio, & forma constituens personam in esse relatiuo personæ, quæ est ipsa personalitas, significetur in abstracto, & ut quo, seu ut forma personalis, sicut paternitas, filiatio, &c. Specialiter verò, ut inquit D. Th. in art. 2. qu. 32. hoc fuit necessarium distinguere in divinis personis, tum quia fuit necessarium explicare, & significare id in quo personæ sunt vnæ, & id in quo sunt plures: dicimus enim personas in Deitate, & essetia esse vnum, & in personalitatibus seu relationibus, tres. Rectè ergo significantur nomina ista relatiua in abstracto, ut significantur formæ, seu rationes multiplicandi personas: tum quia inuenitur vna persona, v.g. Pater respicere duas personas, scilicet Filium, & Spiritum S. & differre ab utraque. Si ergo interro

interrogemur, quo differt Pater à Filio, & quo à Spiritu S. quo respicit Filium, & quo Spiritum S. oportet assignare formalitates seu notiones, quibus id significetur, & exprimatur, nempe quod paternitate differt à Filio, & spiratione à Spiritu S.

4 Secundum verò probatur contra Aureolum, quia diuina forma ita est per se, & in se existens, quod ut reddatur concreta, & ut *quod*, non indiget aliquo à se distincto, sed seipsa immediatè est *quo*, & *quod*, quia in se est omnino perfecta, & in actu puro secundum esse, & secundum modum suum. Ergo ut significetur in abstracto, & in concreto, ut *quo*, & ut *quod*, non indiget diuersitate aliqua ex parte rei significatæ, sed eadem omnino res in se, & in sua linea utrumque ob suam perfectissimam rationem includens, nostro modo concipiendi, & significandi præcisè diuiditur, & diuerso modo concipitur in abstracto, & in concreto. Nec obstat, quod aliquid attribuimus istis formis in concreto, quod non in abstracto: id enim non est propter diuersitatem rei significatæ, sed ex parte modi significandi, qui etiam attenditur in verificatione propositionum: sit enim verificatio, & prædicatio iuxta nostrum modum concipiendi. Et sufficit eminentia vnius rei, quæ æquiualeat multis ad formandas illas diuersas prædicationes in sensu formali, licet vnum, & idem sint in identico, ut sæpe diximus, agendo de distinctione attributorum, & personarum ab essentia. Et si quæras, quid exprimat nomen abstractum, quid concretum? Respon. quod abstractum in illa forma diuina, quæ in se ob suam perfectionem infinitam est *quod*, & *quo*, solum exprimit munus formæ, & rationem naturæ, omittendo modum suppositi, seu subsistentis, & habentis illam ut *quod*. Concretum autem exprimit eandem naturam cum modo subsistendi, & habendi, seu existendi ut *quod*.

5 Restat secundum, quod circa hanc difficultatem proposuimus, explicare, videlicet quid verificari, & prædicari possit de istis nominibus in abstracto, quid in concreto? Circa quod duæ regulæ assignari solent.

Prima: Actiones, vel productiones significatæ per modum actionis non possunt prædicari de relationibus, & notionibus in abstracto, bene tamè in concreto: sicut ista non est bona prædicatio Paternitas generat; filiatio spirat, filiatio generatur: ista autem prædicatio est bona, Pater generat, filius generatur.

Secunda regula: Propositiones significantes non actionem in vi actionis, sed convenientiã, & identitatem vnius ad alterum, æquè prædicantur de abstractis, ac de concretis, nisi prædicetur vna relatio de altera: talis enim prædicatio semper est falsa. Exemplum primi: Paternitas est pater, vel est Deus, vel est Deitas, & similes, omnes sunt veræ. Exemplum secundi: Paternitas est spiratio actiua, est falsa, ut *suprà* diximus *præced. art.* Multo magis falsa est, si vna relatio prædicetur de sua opposita, ut paternitas est filiatio, hæc enim non solum est falsa, sed hæretica quia destruit mysterium. Vtraque regula sumitur ex S. Thoma in hac q. 32. art. 2. ad 2. ubi negat actiones tribui notionibus in abstracto, ut paternitas generat, paternitas creat: posse tamen propter identitatem substantiua personalia, & essentialia dici de notionibus.

6 Ratio primæ regulæ illa est, quia actiones non possunt verè attribui, nisi principiis operatiuis. Principium autem operandi in concreto, & ut *quod* est ipsum suppositum seu subsistens: principium operandi ut *quo*, est forma, quæ est ratio agendi, & pertinet ad naturam, seu virtutem operandi, sicut intellectu dicimur intelligere, voluntate velle. At verò

subsistentia, seu personalitas sumpta in abstracto, neque est principium agendi ut *quod*, & in concreto, quia significatur in abstracto, neque ut *quo*, & ut formale principium, quia nō est virtus, & actiuitas naturæ, sed solum est terminus, seu modus complens naturam, ut agat, tanquā subsistens: ergo ipsi sic in abstracto non potest tribui actio, ne significetur esse principium *quo* agendi, seu forma, & virtus qua agens agit: id enim significatur per principium *quo* actionis, & illud quod in abstracto significatur agere, significatur ut forma, & principium *quo* agendi. Vnde si concederetur ista propositio. Paternitas generat, esset sensus quod paternitas est id quo Pater generat, seu est ratio generandi, quod est falsum. Et sic licet pater, & paternitas sint idem ex parte rei significatæ, ex parte tamen modi significandi interuenit talis formalitas seu appellatio, quod falsificatur propositio; in eius enim verificatione etiam attenditur modus significandi. Si autem remoueaturs modus abstractionis, & formalitas significandi, solumque in sensu identico dicatur, Res quæ est paternitas generat, vera est propositio.

Ratio verò secundæ regulæ est, quia prædicatio illa fundatur in idēitate; sunt autem omnino idem in diuinis abstractum, & concretum, essentialia, & personalia: ergo ratione talis identitatis poterit fieri prædicatio, cum ibi non obstat appellatio illa actionis, quæ ex formali modo significandi, quando attribuitur formæ in abstracto, significatur illam esse principium *quo* agendi, seu id quod agens agit, quod de subsistentia seu personalitate verificari non potest, quia solum est conditio requisita ad agendum, seu modus aut terminus, non formalis ratio, & actiuitas seu virtus.

Quid de aliis nominibus significantibus pluralitatem vel unitatem.

8 Circa secundum punctum huius articuli, considerari debent alia nomina, quæ notionibus solent adiungi, seu personis, & pertinet ad unitatem, pluralitatem, vel solitudinem, aut exclusionem, sicut Patrem esse alium à Filio, Deum esse solum, esse Trinum, &c. de quibus agit S. Thom. in q. 31. Sunt autem quatuor ordines seu classes horum terminorum. Quidam pertinent ad identitatem, vel alietatem ei oppositam, ut hoc nomen *Idem*, *vnus*, hoc nomen *alius*, *aliud*, &c. Alij pertinent ad singularitatem, ut *ly vnicus*, *singularis*. Alij ad exclusionem, ut *ly Solus*, *tantum*, &c. Alij ad multiplicitem, & diuersitatem, ut *diuersum*, *different*, *trinus*, *triplex*, *multiplex*, & similia. Fiunt ergo quatuor regulæ.

9 Prima regula est: Nomen *alius* masculinè ad iungitur personis, non verò aliud neutraliter seu substantiuè. E contra verò *ly vnus* substantiuè rectè dicitur de personis, non *vnus* masculinè, nisi adiungatur terminus trahens ad naturā diuinam, ut cum dicitur Pater, & Filius, sunt vnus Deus: significatur enim vnitas in diuina natura. Eodem modo loquendum est de hoc nomine *Idem*, quod masculinè non attribuitur personis, nisi adiungatur ille terminus *Deus*, ut cum dicitur sunt idem Deus, neutraliter autem attribuitur illis absolutè. Cautius tamè utendum est hoc nomine *idem*, quàm hoc nomine *vnus*: tum quia eadem voce, & terminatione pronunciaturs masculinè, & neutraliter: tum quia est nomen relatiuum, & refert suum anteedens, & potest aliquando referre idem in persona, & est falsum, vel in natura, & est verum. Hæc regula desumitur ex D. Thom. hic q. 31. a. 2. eamque desumpsit ex Aug. de fide ad Petrum c. 2. Et in Scriptura dicitur de hoc nomine *Alius*; Rogabo Patrem meum, & alium paraclitum

ritum dabit vobis, Ioan. 14. & iterum Ioan. 5. *Alius est qui testimonium perhibet de me*. Et de nomine vnus dicitur Ioan. 10. *Ego, & Pater vnum sumus*, & 1. Ioan. 5. *Et hi tres vnum sunt*. Et hoc idem est, quia nomine neutro significatur aliquid magis confusum, & nondum formatum, nomine autem masculino aliquid magis formatum, & distinctum. Et quia proprium est suppositi, seu personæ distinguere, & ultimo completere, nomina masculina magis attribuuntur personis, neutraliter autem naturæ, vt non explicat suppositionem. Ad designandum ergo distinctionem in personis vtitur hoc nomine *Alius* masculinè & non adhibemus hoc nomen *Vnum*: è contra verò ad significandum vnitatem naturæ dicimus esse vnum, & ad euitandam distinctionem in natura negamus esse aliud.

Hic verò se offerebat occasio disputandi an vnitatis, seu ratio vnus dicat de formali aliquid posituum, vel aliquam negationem connotando posituum quod aliqui in præsentī disputant, occasione eius quod tractat D. Thom. in 9. 30. art. 3. an termini numerales ponant aliquid in Deo posituum, an negatiuum, an aliquid sumptum à specie numeri, qui est quantitas, an à multitudine quæ est transcendens? Sed nos de hoc egimus præced. tomo circa q. 11. disp. 11. art. 1. vbi latè ostendimus ex D. Thom. quod licet vnum non superaddat enti, nisi negationem, tamen formaliter non consistit in eo solo quod superaddit, sed in ipsa positua ratione entis vt connotante negationem diuisionis.

10 Solùm posset esse difficultas circa pluralitatem vnitatum in personis, quia istæ vnitates multiplicantur in diuinis, siquidem est de fide esse in Deo tres personas, 1. Ioan. ultimo, *Et hi tres vnum sunt*: Multiplicato autem aliquo numero, vel plurificata vnitates, videtur dari in illis plus, & minus, quia plus sunt tres, quàm vnum, vel duo, saltem extensiuè, & consequenter erit aliqua compositio, non per modum vniionis aut coniunctionis, sed per modum numeri, quia ille ternarius numerus personarum componitur ex pluribus vnitatibus: nec enim est simplex vnitates: ergo est numerus ex vnitatibus resultans. Aliquid ergo compositum, saltem per modum numeri in Deo ponimus: Ex quo ulterius sequitur dari ibi totum, & partes, quia datur compositio ex pluribus: ergo datur totum quod est compositum, & partes quæ sunt plures vnitates: omne autem totum est maius sua parte, & rursus omnis numerus mensuratur per vnitatem tanquam per aliquid simplicius. Erit ergo in diuinis maius, & minus saltem extensiuè, mensuratum, & mensura, quæ omnia absurda sunt, & sic aliquando SS. PP. reiciunt numerum à diuinis, vt in Concilio Tolet. II. in confessione fidei dicitur: *Hæc sancta Trinitas, nec recedit à numero, nec capitur numero*. Iuxta hoc ergo quaeritur, quæ imperfectio importetur in numero, à qua debeat purificari vt ponatur in diuinis, & attribuiatur personis.

Resp. quod numerus personarum in diuinis solùm datur penes vnā formalitatem, seu officium numeri, scil. penes diuidere realitatem relatiuam, & pluralitatem facere. Penes alia autem officia quæ aliquid imperfectionis important, vt est componere vnum ex pluribus, addere aliquid per aggregationem in vno numero super aliud, mensurare multa per vnum, tanquam per aliquid simplicius, hoc ibi non inuenitur. Multò minus ea quæ sunt propria numeri quantitatiui, seu quod est quantitatis diuinitatis inueniuntur in numero diuinarum personarum, vt quod ex diuisione resultet, quod per multiplicationem quantitatiuam crescat, & quantitatiuo modo mensuretur, &c. Qui ergo sentiunt relatio-

nes in diuinis non solùm distingui secundum realitates, sed etiam importare diuersas perfectiones, & diuersas existentias relatiuas, vix possunt se expedire, quin in numero trium relationum, seu personarum sit aggregatio, & compositio per modum totius, & partis, ita quod saltem extensiuè crescat perfectio relatiua, & non solùm sit plus realitatis relatiuæ in tribus personis, quàm in duabus, vel in vna, sed etiam plus perfectionis relatiuæ, saltem quoad extensionem, quia hæc addit super illam aliquam perfectionem relatiuam, quæ in alia non est, sed duæ perfectiones sunt, & vbi datur plus perfectionis, datur aggregatio, & compositio, & totalitas, & partialitas, quia hoc aggregatum trium, est quoddam totum, & singulæ vnitates sunt singulæ partes illius aggregati, & qualibet minor suo aggregato, quia totum est.

Nos ergo, qui in omni rigore intelligimus illud 11 symboli Athanasij, *In hac Trinitate nihil maius, aut minus*, etiam relatiuè, dicimus numerum in diuinis facere diuersitatem realem relatiuam, & pluralitatem in realitate, sed non maius aut minus, neque additionem aut aggregationem, aut compositionem, totum aut partem, neque pluralitatem mensurabilem per vnum.

Ratio est, quia facere pluralitatem realem est de conceptu essentiali numeri, seu multitudinis, prout opponitur vnitati: dicit enim vnitates indiuisiōem in realitate, seu entitate; numerus autem, & multitudo multiplicat, & diuersificat. Sed tamen quod in hac pluralitate, & diuersitate reali, vnum addat ad alterum, & faciat maius; & sic fiat aggregatio, & compositio, & consequenter resultet totum ex partibus, seu partialibus vnitatibus dependet ex alio principio, nempe quod diuisio, & multiplicatio non solùm fiat in realitate, sed etiam in ipsa essentia, & quiditate, & perfectione: si enim perfectio diuiditur, & ipsum esse, & natura, clarum est quod hæc adiuncta alteri facit maius in perfectione, & addit super aliam, quia non est idem cum illa, etiam in eo in quo attenditur maius, & minus, scil. penes perfectionem, & essentiam. At verò relationes diuinæ in omni esse, in omni perfectione, in omni virtute, & natura identificantur, & sunt vnum, nec vna addit alteri. Non ergo ex multiplicatione, & numeratione eorum resultat totum, & pars, maius, & minus, nec aliqua aggregatio vel compositio, quasi additione vniuntur, & crescant, quia in nullo crescent, si id quod affert vnum eorum est in altero per identitatem omnimodam præter oppositionem relatiuam in ratione respectus: hoc enim seruit ad faciendam pluralitatem in ratione realitatis, non compositionem, & additionem in ratione maioris, aut in ratione perfectionis extensiuæ, & multiplicatæ; quasi vnum crescat super aliud, & numerus ille aggregatiuus sit, & compositiuus alicuius totius ex partibus. Quæ cum filiatio aduenit Paternitati, sit pluralitas relationum, & nihil crescit; & adueniente Spiritu S. nihil maius est, quia totum quod perfectionis, & esse est in vno, est in duobus aut tribus, quia in perfectione identificantur. Et hoc est esse numerum in diuinis, sine illis imperfectionibus, nec mensurari multitudinem per vnum, quia tam simplex, & inconfusum est vnum, quàm plures, & plures quàm vnum, cum idem esse habeant, & perfectionem. Hæc autem additio, & augmentatio in numero, & exerescentia super vnitates est solùm in numero diuidente perfectiones, & esse rerum numeratarum.

Quæ doctrina est expressa S. Thom. qui com- 12 muniter hunc numerum sic ponit distinctum, & diuersitatem realem facientem, quod nec additionem

nem, nec compositionem facit, nec maius aut minus (quod ad multiplicationem perfectionis pertinet) sed solum pluralitatem, quæ est realitatum multiplicatio. Videri potest *quæst. 9. de potentia art. 5. ad 15.* ubi ponitur argumentum, quod non potest dari pluralitas rerum sine compositione, quod repugnat diuinæ simplicitati, respondet quod *Pluralitas rerum in diuinis est pluralitas relationum subsistentium oppositarum, ex quo non sequitur compositio in diuinis. Nam relatio comparata ad essentiam diuinam, non differt re, sed ratione solum, unde non facit compositionem cum ipsa, sicut nec bonitas, nec aliud essentialium attributorum. Sed per comparisonem ad oppositam relationem est pluralitas rerum, non tamen compositio, quia relationes oppositæ in quantum huiusmodi ab invicem distinguuntur. Compositio verò non est ex aliquibus distinctis in quantum distincta sunt.* Et hoc rectè dicitur, quia compositio fit quidem ex diuersis, sed ut vnibilia, non præcisè ut distincta. Et in *1. dist. 24. q. 1. art. 2.* sciendum est, inquit, quod in diuinis non est numerus simplex, qui est per diuisionem essentiae vel quantitatis; sed est numerus quidam, scilicet numerus relationum. Quod luculentius exprimit in *1. ad Anibaldum dist. 24. q. 1. art. 1.* Quædam, inquit, sunt quæ diuiduntur simpliciter, quia secundum materiam, & quantitatem, siue secundum essentiam, & formam. Et ideo in istis est numerus simpliciter. Quædam autem sunt quæ secundum quid diuiduntur, quia secundum proprietates accidentales, vel secundum proprietates absolutas, sicut Sortes albus dicitur alius à se nigro: vel secundum relatiuas, sicut Sortes dexter est alius à se sinistro, & in his est numerus secundum quid. Sic ergo numerus simpliciter importat separationem, & distinctionem, sed numerus secundum quid importat solum distinctionem. Cum ergo in diuinis sit personarum distinctio per proprietates relatiuas, & non separatio secundum essentiam, in diuinis est numerus personarum secundum quid, non numerus simpliciter, scilicet essentiarum, & quiditatum. Idem sumitur ex ipso D. Thom. in hac *q. 30. art. 1. ad 4.* licet ibi numerum simplicem, & absolutum sumat pro numero numerante, qui est in intellectu, numerum numeratum pro eo qui est in rebus, & in eis facit aggregationem & compositionem, & maius aut minus. Et sic etiam Patres, qui aliquando affirmant dari numerum in Deo, loquuntur de numero quoad distinctionem relationum præcisè. Qui aliquando negant numerum, intelligunt cum ea imperfectione, & compositione, quæ est in creatis.

Secunda regula: Nomina, *alienum, diuersum, extraneum, differens, alterum*, & similia, non sunt in proprietate attribuenda personis. Ita ex D. Thom. in *q. 31. art. 2.*

13 Ratio est, quia ista significant aliquid diuersum in natura. Quare non possunt ista nomina applicari personis, nisi addatur restrictio trahens ad relationes, ut si dicatur, personæ sunt differentes, aut diuersæ notionaliter, seu relatiuè, vna est extranea alteri relatiuè, non tamen si absolute ponantur, quia illa nomina absolute prolata indicant distinctionem cum aliqua distantia, & disconuenientia in esse, vel in natura, sicut *ly aliter*, vel *alterum* propriè significat distinctionem in qualitate, quæ alterum, seu alteratum facere solet. Et sic ne detur errandi occasio, cautè illis vtendum est, & si quando inueniuntur in Auctoribus probatis, in bono sensu explicanda sunt. Propriè verò personæ dicendæ sunt distinctæ vel discretæ, quod nihil de naturæ diuersitate designat.

14 Tertia Regula circa nomina significantia multitudinem. Nomen *triplex*, aut *multiplex* non ponitur absolute in diuinis, sed cum addito, scilicet adhibendo terminum relatiuum aut notionalem. Hoc tamen

nomen *Trinus*, & *Trinitas* absolute, & sine aliqua restrictione dicitur. Sumitur hæc regula ex D. Th. hic *q. 31. art. 1. ad 3. & art. 2.* idque docet ex Hilario.

Et ratio est, quia *ly multiplex* aut *triplex* aut *duplex* opponuntur simplicitati, quod enim est simplex non est duplex aut multiplex, & ita ista nomina aliquid compositionis important, vel, ut dicit S. Thom. in æqualitatem proportionis: affirmare autem de Deo aliquid quod opponitur simplicitati, vel inducit inæqualitatem, error est. At verò hoc nomen *Trinus* seu *Trinitas* dicit absolute numerum trium, sine additione inæqualitatis, vel diminutione simplicitatis, & sic absolute Deo tribuitur, quatenus Deus subsistit in tribus personis, non tamen quælibet persona, v.g. Pater, aut Filius dicitur *trinus*, quia *trinitas*, ut inquit S. Th. hic *q. 31. art. 1. ad 1.* secundum proprietatem vocabuli magis significat numerum personarum vnius essentiae. Et propter hoc non possumus dicere quod Pater est *Trinitas*. Et hæc differentia inter *ly triplex*, & *ly Trinus* vel *Trinitas* sumitur ex Aug. 6. de *Trinit. c. 7.* ubi inquit: *Nec quoniam Trinitas est, triplex putandus est, alioquin minor erit Pater solus, aut Filius solus, quam simul Pater, & Filius.* Et c. 8. ob eandem rationem inquit, quod *Trinitas potius est, quam triplex.* Et lib. 15. c. 3. *Etiā in hoc libro apparuit Trinitatis æqualitas, & non Deus triplex sed Trinitas.* Et Concil. Toletanum II in confessione fidei. *Hæc, inquit, est sanctæ Trinitatis relata narratio, quæ non triplex, sed Trinitas, & dici, & credi debet.* Aliquando tamen nomine duplicis vtitur D. Thom. ut cum in *q. 10. de potent. art. 2.* concedit esse duplicem emanationem in Deo, & Patres aliquando eodem termino vtuntur, aut triplicem personam appellant, sumendo triplex vel duplex, pro simplici nomine duorum vel trium, idque applicant non ipsi Deo immediate asserendo Deum esse triplicem, sicut dicitur *Trinus*, sed personis seu subsistentiis relatiuis.

Quarta Regula: Termini significantes exclusi-
nem, ut *ly solus*, *ly tantum*, & similes, possunt dici de terminis essentialibus in Deo syncategorematicè, non categorematicè. De personalibus verò non possunt dici, si *ly solus* ponatur ex parte subiecti, & ex parte prædicati aliquid commune. Tunc *ly solus* dicitur categorematicè quando ponitur ex parte prædicati ut nomen, & importat solitudinem, ut dicendo Pater est solus, Deus est solus, id est sine comitatu. Syncategorematicè est cum ponitur à parte subiecti, per modum aduerbij, & significat aliquid alicui soli conuenire, ut cum dicitur solus Deus est incomprehensibilis. Vnde est falsum dicere Pater est solus: significat enim esse solitarium, nec habere consortium. Et Christus Dominus dixit Ioan. 8. *Quia solus non sum.* Et si prædicantur termini essentialis de personis, non potest poni *ly solus* ex parte subiecti syncategorematicè, ut dicendo, Solus Pater est Deus, quia facit sensum nullus alius est Deus, quod est falsum. Et hoc præcipuè intendit S. Th. *q. 31. art. 4.* ut patet ex initio art. Eadem ratione est falsa propositio in qua aliquid notionale commune prædicatur de persona, ponendo *ly solus* ex parte subiecti, ut si dicas, Solus Pater spirat, est falsa, quia etiam Filius spirat. Secus si prædicetur aliquid notionale proprium, ut, Solus Pater generat. Quomodo verò intelligatur illud Ioan. 17. *Vt cognoscant te solum Deum verum*, diximus disp. præced. art. 3.

De hoc nomine *singularis*, videtur sine periculo posse de Deo dici, quia ex communi vsu solum significat indiuiduationem, quæ etiam naturæ conuenit. Si tamen *ly singularis*, *ly vnicus* excluderet multitudinem personarum, negandum est, quo pacto multi Patres dicunt in Deo nec esse singularitatem, nec diuersitatem.

QVÆ

QVÆSTIO XXXIII.

De Persona Patris.

S V M M A L I T T E R .



B hac quæstione incipit agere S. Thom. de personis in speciali. Et primò de persona Patris, de qua tria ostendit, scil. quòd sit principium, quòd sit Pater, quòd sit ingenuus.

In articulo primo ostendit quòd Pater sit principium, quia ab eo aliæ personæ procedunt; non tamen habet rationem causæ, quia non habet diuersitatem substantiæ, nec aliæ personæ ad ipso dependentiam.

In articulo secundo ostendit proprium esse primæ personæ quòd sit Pater, quia paternitate distinguitur ab aliis, cum solus ipse generet. Nihil autem tam proprium alicuius, quàm id quo ab aliis distinguitur.

In articulo tertio ostendit nomen paternitatis principalius & prius dici de Patre secundum quod dicitur relatiue ad personam Filij, quàm secundum quod respicit creaturas, respectu quarum dicitur Author & Pater. Propriissime enim dicitur Pater respectu termini geniti, & personæ quæ est Filius simpliciter.

In articulo quarto ostendit quòd esse ingenuum est proprium Patri secundum quod ly *ingenuum* dicit negationem cuiuscumque processionis ab alio, ita quod designatur esse principium sine principio notionaliter, non secundum quod significat esse increatum, quia sic essentialiter dicitur.

QVÆSTIO XXXIV.

& XXXV.



N his duabus quæstionibus agit de his quæ pertinent ad secundam personam Filij, nempe de ratione Verbi in *quæst.* 34. & de ratione imaginis in 35.

Circa rationem verbi inquit in art. 1. An Verbum dicatur in diuinis personaliter, seu relatiue, an essentialiter, seu absolute Et respondet quòd Verbum propriè sumptum, scil. pro conceptus cordis vt dicto dicitur relatiue ad dicentem; & sic personaliter & non essentialiter se habet, intelligere verò essentialiter dicitur.

In art. 2. ostendit quòd nomen Verbi est proprium Filij in diuinis, quia Verbum propriè, & personaliter dictum est per emanationem intellectus, Filius autem in tantum est Filius, in quantum generatur & emanat per intellectum.

In art. 3. ostendit Verbum sic respicere Patrem vt dicentem respectu reali, quod est expressiuum omnium quæ Deus intelligit, etiam creaturarum; & sic respicit illas respectu rationis tanquam expressiuum & factiuum earum.

Circa rationem imaginis, ostendit duo in *quæst.* 35.

Primum quòd imago ponitur in diuinis personaliter, & non essentialiter, eo quod de ratione imaginis est similitudo vt procedens, processio autem solum in personalibus inuenitur.

Secundum, quòd ratio imaginis solum conuenit Filio, & non Spiritui S. quia licet Spiritus Sanctus in vi suæ processionis accipiat naturam Patris eandem quam accipit Filius, non tamen dicitur natus, nec de ratione eius est similitudo, sicut de ratione Verbi.



QVÆSTIO XXXVI.

XXXVII. & XXXVIII.



In his tribus quæstionibus agitur de persona Spiritus sancti quantum ad tria quæ illi attribuuntur, scilicet esse Spiritum procedentem à Patre & Filio, esse amorem vtriusque, esse donum.

Circa rationem Spiritus sancti ostendit primò in art. 1. hoc nomen Spiritus sancti esse proprium tertiæ personæ procedentis per voluntatem: proprium enim voluntatis est impulsus, inclinatio, & pondus, quæ nomine spiritus significantur, & nomine etiam sanctitatis, cuius proprium est ordinare in Deum per amorem.

In 2. art. ostendit Spiritum sanctum procedere à Filio, & non solum à Patre, tum quia ab eo distinguitur: ergo illi opponitur relatiuè; omnis autem relatiua oppositio est in vi originis & processionis fundata, & cum Filius non procedat à Spiritu sancto, debet è conuerso Spiritus sanctus procedere à Filio, tum quia de ratione amoris est quòd à verbo seu conceptione mentis procedat: nihil enim amatur, nisi secundum quod conceptione intellectus apprehenditur.

In art. 3. ostendit verificari quòd Spiritus sanctus procedat à Patre per Filium, quia licet in utroque sit eadem virtus spiratiua Spiritus sancti, tamen Filius est distincta persona à Patre, habetque ex Patre hanc virtutem.

In art. 4. docet quòd Pater vt Filius sunt vnum principium Spiritus sancti, quia hoc nomen *principium* sumitur substantiuè, & in eo non habent oppositionem Pater & Filius. Et similiter sunt vnus spirator, licet duo spirantes, quia ly *spirator* est substantivum, ly *spirantes*, adiectivum.

Circa rationem Amoris, quæ attribuitur Spiritui sancto, duo ostendit in quæst. 37.

Primum, quòd amor essentialiter sumptus pro habitudine amantis ad amatum, non est personale nomen. Sumptus autem notionaliter pro habitudine ad principium, à quo spiratiuè procedit, dicitur personaliter, & est proprium Spiritus sancti, qui per amorem procedit.

Secundum est, quòd verè dicitur Patrem & Filium diligere se Spiritu sancto, non sumendo ly *diligere* essentialiter, sed notionaliter: essentialiter enim diligunt se suam et essentia, notionaliter autem spirant amorem Spiritu sancto, sicut Pater dicit Verbo, & arbor floret floribus, licet non intelligat Verbo, sed seipso.

Circa rationem doni, ostendit etiam duo quæst. 38.

Primum est, quòd hoc nomen *donum* secundum quod procedit à donante vt à principio à quo datur, est nomen personale, quia explicatur secundum relationem processionis.

Secundum est, quòd donum est propriè nomen Spiritus sancti, quia donum importat gratuitam donationem. Quod autem gratuito datur primò & principaliter, est ipse amor dantis, qui est ipsa gratia seu gratuita voluntas, quam inclinat accipienti donum; Et sic cum Spiritus procedat per amorem est ipsa prima & increata gratia, seu gratuita voluntas Dei.



DISPUTATIO XV.

De Personis diuinis in speciali.

ARTICVLVS I.

Quid importet formaliter ratio ingenti in Patre?



Ex tribus notionibus quæ Patri attribuuntur, scilicet paternitas, spiratio actiua, & innascibilitas, seu esse ingentum, quælibet suas particulares sortiuntur difficultates. Paternitas, quomodo constituat personam Patris antecedenter ad generationem. Spiratio, quomodo conueniat Filio simul cum Patre, ita quòd sint vnum principium Spiritus S. & quomodo à Filio distingueretur Spiritus sanctus, si spirator non esset. Innascibilitas, quomodo explicetur, & constitutur formaliter per negationem, aut quid de formali importet in persona Patris. De duobus primis suis locis agendum est, scilicet de primo disp. seq. de secundo in sequentibus articulis huius disp.

disput. De tertio in hoc articulo agendum est.

1 Est autem supponendum quod hoc nomen *ingenitum*, cum ex propria significatione dicat negationem generationis, extenditur tamen ad negationem productionis, vel creationis, aut cuiuscumque processionis ab alio, ita ut aliquando *ingenitum* sit idem quod increatum, aliquando idem quod improductum, aut nullo modo procedens, aliquando idem quod non generatum, seu non natum, quo pacto etiam in creatis dicitur *ingenitum* seu *ingenerabile*, quidquid generatione non producit, ut Angelus, cælum, &c. In presenti non sumimus *ingenitum* pro increato: sic enim erit nomen essenziale, & commune omnibus tribus personis: In hac enim acceptione sumebant *ingenitum* Arriani, quando conati sunt in Concilio Nicæno obtinere ut diceretur solus Pater *ingenitus* ut *supra disput. 12. artic. 1.* retulimus, nempe ut simplices fallerent, & inferrent Filium esse factum, & creatum, quia non erat *ingenitus*, sumendo *ingenitum* pro eo quod est non factum, seu non creatum. Sancta autem Synodus dolositatem eorum perspiciebat abstinuit à nomine *ingeniti*, nec illud Patri tunc attribuit, sed in Symbolo ita Filium nominavit *genitum* quod addidit *non factum*, ut ex hoc perspicuum redderet, quod *ingenitum* quod Patri soli attribuitur, non accipitur pro increato, seu non facto, id enim etiam adscribitur Filio. Quare ly *ingenitum* sumi debet in presenti non pro *ingenito* essentialiter, quod est idem atque increatum, sed pro *ingenito* notionaliter, quod est non procedens secundum originem relatiuam. Et potest sumi vel omnino strictè prout præcisè negat generationem seu esse natum, & hoc modo non conuenit soli Patri, nec est notio illius, sed etiam conuenit Spiritui S. qui non est natus, sed procedens. Ut ergo sit propria notio Patris, oportet quod ly *ingenitum* sumatur pro negatione omnis processionis, & originis relatiuæ, ita quod sit persona à nullo principio procedens. Hoc enim proprium est primæ personæ. Et sic August. lib. 5. de Trinit. cap. 3. dicit, *Ingenitum non dicere substantiam, sed negare relationem.* Et cap. 7. concludit: *Non ergo receditur à predicamento relatiuo cum ingenitus dicitur*, videlicet quia negatio reduciue pertinet ad suum positium.

2 His suppositis difficultas est circa hanc rationem *ingeniti*, seu notionem innascibilitatis propriam Patris, an significet solam, & nudam negationem procedendi ab alio, an etiam aliquid positium, saltem de materiali. Nam ex vna parte significare solam, & puram negationem est significare purum nihil: nam etiam id quod nihil est, importat hanc negationem procedendi ab alio. Si ergo per ly *ingenitum* hoc solum volumus significare, scilicet Patrem non esse ab alio, nihil in Patre significamus, quod non etiam in pura negatione significati possit; nec ibi exprimitur aliqua dignitas, seu autoritas, nisi aliquid amplius addatur in eo quod est non esse ab alio. Debet autem aliquid dignitatis exprimi, cum sit notio Patris, quæ non potest notificare aliquid peculiare, nisi dignitatem aliquam exprimat, quæ in pura negatione, & in puro nihil stare non potest. Vnde S. Thom. in hac *quest. 33. artic. 4. ad 1.* inquit, quod ut ly *ingenitum* sit proprium soli Patri, oportet in nomine *ingeniti* intelligere quod conueniat alicui personæ diuinæ, quæ sit principium alterius personæ: quod utique positium

3 aliquid est.

Ioan. a S. Thom. in 1. part. D. Th. Tomus alter.

Quod si dicatur ly *ingenitum* importare aliquid positium, saltem de materiali, licet de formali exprimat solam negationem processionis, vel illud positium est aliquid absolutum, vel relatiuum. Absolutum esse non potest, quia absoluta non pertinent ad notiones proprias personarum; & sic non potest per tale positium discerni id quod proprium est Patris, sed id commune est omnibus personis, pertinetque ad essentialia conceptum absolutum, non ad notionalem personæ. Si autem est relatiuum, illud non potest esse rationis, quia relatio rationis non magis est notio, nec magis dignitatem explicat quam negatio pura: nam etiam negatio ens rationis est. Nec potest illa relatio rationis fundari, nisi in aliquo positio, & de illo, quatenus sic fundat, restabit idem argumentum, an sit absolutum vel relatiuum, &c. Si autem est relatiuum reale, nihil aliud erit quam ipsa paternitas, vel spiratio actiua, aut ratio principij, quæ utrique communis est; & sic confundetur illa notio innascibilitatis cum ista paternitatis, vel spirationis: nam tertiam aliam relationem dari in Patre nec imaginari possumus, cum alia processio non sit præter illas duas, in qua noua possit fundari relatio.

Propter hoc diuisi sunt Authores in explicando quid importetur in formali ratione huius notionis *Ingeniti*, & quid de materiali, & ex parte connotati. Nam videntur in hac parte fuisse olim duæ sententiæ, ut colligitur ex D. Thoma in hac *quest. 33. artic. 4. ad 1.* Nam aliqui dicebant ly *ingenitum* importare aliquid positium, & non solum negatiue dici. Hoc autem positium dicebant esse rationem principij aliorum, & alij explicabant dicendo quod erat vniuersalis autoritas vel fontalis plenitudo, quod totum in idem redit, quia fontalitas, & autoritas non est aliud quam principium originis. Quæ sententia attribuitur S. Bonauenturæ in 1. distinct. 24. *quest. 4. & distinct. 28. artic. unico quest. 1.* & aliis antiquis, Alij verò dicebant solum importare aliquid negatiuum, scilicet non esse ab alio principio, non autem importare rationem principij aliorum, ut sic: ista enim ratio principij communiter accepti includitur tanquam quid commune in ratione speciali paternitatis, & filiationis; & sic non differret ab eis ista notio *ingeniti*. Quæ est sententia S. Thom. in hac *quest. 33. artic. 4. ad 1.* eamque sequuntur communiter eius discipuli, & interpretes, ubi videri potest Nauarrete *controuers. 26.* Suarez lib. 5. de Trinit. cap. 10. num. 6. & lib. 8. cap. 2. num. 9. Arrubal *hic disput. 117. cap. 2.* Granado *tract. 7. disput. 2. numero 5.* Molina *questione 32. artic. 3. disput. 1.*

5 Nihilominus illa prior sententia, quod innascibilitas importet aliquid positium quod sic in communi vocatur fontalis plenitudo, seu vniuersalis autoritas, variis modis ab Authoribus aliquibus tum antiquis tum modernis declarata est, assignando in speciali quid sit illud positium. Et in primis inter antiquos refertur Præpositium tenuisse cum aliis Scholasticis, innascibilitatem significare relationem quamdam distinctam ab aliis, oppositam relationi geniti. Quod tamen omnium iudicio reiicitur, imò & censuratur ad minus ut temerarium, quia est contra omnes Scholasticos, qui solum quatuor relationes reales in Deo ponunt, eo quod solum duæ sunt processionis. Illam autem quintam relationem realem præter paternitatem in Patre, ratione cuius dicatur principium, non agnoscunt,

N 2

agnoscunt,

agnoscunt, quia ut sit principium Filij, sufficit paternitas, ut sit principium Spiritus S. sufficit spiratio, ultra hæc autem non est alia relatio realis per modum principij.

- 6 Caterum P. Vasquez licet fateatur *disp. 137. cap. 5. num. 14.* innascibilitatem de formali significare negationem processionis personalis, tamen pro materiali, & directo significato dicit importare modum positium specialis substantiæ, qui in Patre est specialis dignitas positiua, scilicet esse vniuersale principium, & fontalem originem Trinitatis. In explicando autem quid sit hoc positium in speciali, multus est Vasquez, tum *cit. loco*, tum *disput. 140. cap. 3.* tum *disp. 159. cap. 7.* In summa ad tres propositiones videtur totus eius sensus reduci.

Prima est negatiua: Positium hoc importatum in nomine innascibilis, seu ingeni, non est conceptus paternitatis aut spirationis sub explicato conceptu paternitatis, vel spirationis.

Secunda, illud positium est ipse conceptus primi principij, seu primæ personæ, qui conceptus non est conceptus principij in communi abstracti à principio quod est paternitas, & quod est spiratio, quo sensu S. Thomas impugnat opinionem Bonauenturæ *ubi supra*, sed est conceptus ipse paternitatis, non sub relatione explicata, & determinata Patris: sic enim præcisè respicit Filium, sed sub conceptu Patris in eo signo antequam generet, & tamen prima persona concipitur.

- 7 Tertia propositio: Pro illo signo seu conceptu apprehenditur illa prima persona ut principium relatum, non sub expressa relatione paternitatis, quia nondum tunc exprimitur paternitas ut generans, & ad Filium, sed sub alia relatione primi, & vniuersalis principij respectu omnium personarum, quæ est relatio non realis, sed rationis, eo quod per intellectum distinguitur ab expressa relatione paternitatis. Primam propositionem habet *disput. 137. cap. 5. num. 16. in fine.* Secundam habet *ibi num. 18. & disput. 140. cap. 3.* Tertiam habet *c. illo 5. cit. disp. 137. & disp. 159. cap. 7.* easque refert latè, & explicat P. Alarcon *tract. 5. disp. 7. cap. 3.* Ex quibus colligit prædicta *disput. 140.* non probasse D. Thomam ratione sua contra Bonauent. rationem ingeni non importare aliquid positium, quia D. Bonauent. cum affirmet importare aliquid negatiuum, & positium, non ex æquo utrumque importari dixit, sed negatiuum de formali, positium autem de materiali non indirectè, & in connotato sicut subiectum, sed directè, & per se. Hoc autem materiale positium, quod Bonauent. dixit esse fontalem plenitudinem, non intellexit esse rationem communem communitate prædicationis per modum generis ad paternitatem, & spirationem, quo sensu illum intellexit, & impugnauit S. Thom. sed esse rationem primi, & vniuersalis principij in Trinitate, quod pertinet ad primam personam.

Hæc Vasquez sententia pluribus etiam ex suis durior visa est, eamque breuiter refutat P. Suarez *lib. 8. de Trinit. cap. 2. num. 11.* & vocat improbabilem fugam, dum vult pro materiali, seu pro fundamento illius negationis ingeni ponere relationem rationis, cum tamen relatio rationis non dicat maiorem dignitatem quam priuatio: si ergo propter dignitatem ponitur, illud positium, quid dignitatis est in relatione rationis magis quam in priuatione?

- 8 Propter hoc fontalis ista dignitas, & plenitudo,

qua Pater dicitur primum, & vniuersale principium personarum procedentium intra Deum, & in nomine *Ingeni* dicitur importari, aliter explicatur ab aliis discipulis Vasquez præsertim à P. Alarcon *ubi supra c. 1. num. 18. & toto cap. 2.* prolixè valde dicunt ergo relationem illam rationis, qua P. Vasquez explicauit fontalem plenitudinem posituiam, esse relationem quandam transcendentalem in prima persona, quæ ratione nostra distinguitur à paternitate, seu potentia generatiua, & à potentia spiratiua, seu relatione spirationis, & terminus talis relationis transcendentalis sunt indiuisibiliter Filius, & Spiritus S. ut possibiles produci radicaliter à Patre. Addit tamen *cap. 3. num. 4.* hanc relationem transcendentalem non vocari à Vasquez realem quia sola ratione nostra distinguitur ab aliis relationibus, & frequenter relatio transcendentalis vocatur relatio secundum dici, licet etiam possit dici quod sit ipsemet conceptus paternitatis sub alia connotatione, scilicet primi principij, & fontalis originis, quatenus concipitur in illo signo antequam generet ut primum principium potens ad omnes personas. Caterum relatio Paternitatis sub expressa explicatione Paternitatis non potest esse ratio primi principij, quia paternitas solum explicat conceptum relationis ad Filium, non autem rationem primi principij aut improducti ab alio, aut producentis omnes alias personas.

Viam sternunt hi Authores pro stabilienda sententia sua *inf. sequenti disp.* tractandam, quod persona Patris constituitur antecederet ad originem generationis, non conceptus Paternitatis ut subsistenti, sed conceptu innascibilitatis, non pro ea parte, qua dicit de formali negationem, sed qua importat posituiam rationem primi principij.

Sit nihilominus conclusio: Innascibilitas seu ingentum de formali solum importat, negationem processionis passiua ab alio. De materiali verò directo (idem est materiale directum, quod fundamentum) non importat rationem vniuersalis principij, vel rationem paternitatis aut spirationis, etiam per modum relationis rationis ad personas procedentes, & multò minùs relationem illam transcendentalem ad Filium, & ad Spiritum S. indiuisè. Sed materiale directum est persona Patris ut in genere personali, seu notionali à se existens.

Prima pars de formali significato ingeni, quod sit illa negatio processionis passiua, constat, tum ex ipsa formali significatione nominis, quæ importat formalitatem geniti negatam: genitum autem passiuam processionem dicit: tum ex parte rei significata, quia Pater in diuinis habet producere, & non procedere, nec esse ab alio: ergo utrumque potest in ipso designari formaliter: sicut ergo paternitas significat de formali principium originis generatiua, ita ingentum, seu innascibile significat carentiam omnis processionis passiua: illa ergo formaliter significatur.

Secunda pars, quod positium directum, quod tanquam connotatum huius negationis se habet, & ut fundamentum non sit illa ratio vniuersalis principij, vel paternitatis, siue per modum relationis siue transcendentalis, siue quocumque modo explicetur habitudo fontalis plenitudinis, & principij personalis, probatur: quia omnis ratio principij actiui, & fontalis plenitudinis sumpta positiue, & actiue, necessariò debet importare rationem principij realiter influentis in suum terminum, quia non potest intra Deum dari principium originis, nisi per ordinem ad terminum, quem à se deriuat,

&

& in quem influit realiter, aliàs si non originat illum, non est principium actiuum eius. In persona autem Patris non est nisi essentia absoluta, & persona relatiua. Ad essentiam absolutam non pertinet esse principium originis, cum essentia sit communis omnibus, quod autem dicit originem ut principium importat oppositionem ad suum terminum, atque adeò non est commune omnibus, sed proprium sibi. Ad personam relatiuam pertinet ipsa relatiua oppositio paternitatis erga Filium, & spirationis ad Spiritum S. quibus Pater constituitur influens in istas personas, per quod designatur quidem ut origo illarum, sed nondum ibi exprimitur quòd sit prima origo, & ab alio non deriuata, sed solum quòd deriuat alia à se. Si verò accipiat ibi alia ratio principij primi in illa persona antequam intelligatur generans, & explicans rationem paternitatis, vel explicans vim spirationis talis ratio non potest intelligi ut realiter influens in terminum quem respicit: ergo non se habet ut principium. Conseq. est nota, quia principium actiuum est idem quod principium influens, illud autem principium quod consideratur in Patre debet esse actiuum, quia significatur nomine fontis, seu fontalis plenitudinis omnium personarum; fontale autem principium actiuam influentiam dicit. Anteced. autem certum est, quia non datur aliquis influxus vniuersalis à Patre procedens in Filium, & Spiritum S. indiuisè, siquidem per Paternitatem plenè, & adequatissimè generat Filium sine alio influxu, & per spirationem in se, & in Filio existentem completissimè influit, & producit Spiritum S. Nec requiritur alius influxus utriusque productioni communis: nec enim est ratio aliqua communior, vel superior in producendo, quæ utrique personæ communis sit: ergo neque datur principium aut relatio respiciens indiuisè utramque personam producentem Filium, & Spiritum S. bene enim valet à negatione influendi ad negationem originandi, & respiciendi. Quod si dicatur dari rationem communem principij respectu paternitatis, & spirationis, non per modum vniuersalitatis in influendo, & producendo, sed tanquam ratio communis in prædicando. Fatemur hoc, sed talis ratio communis includitur in utraque relatione paternitatis, & spirationis, ut arguit D. Thom. in hac quæst. 33. art. 4. ad 1. Et sic innascibilitas non erit alia notio à paternitate, & spiratione, sed includetur in illis tanquam commune in particulari, nec erit notio innascibilitatis, singularis notio Patris, sed prædicatum quoddam commune paternitatis, & spirationis; quod negat Vasquez & qui eum sequuntur.

¹² Denique ratio illa positiua quam dicunt significari nomine Ingeniti, neque potest esse relatio rationis, ut insinuat Vasquez, neque relatio transcendentalis ad Filium, & Spiritum S. ut dicit Alarcon, neque ipsamet Paternitas inadæquatè considerata, & pro illo signo antequam generet, neque aliquid absolutum. Non relatio rationis, tum quia hæc non plus dignitatis importat, quàm priuatio, cum etiam priuatio ens rationis sit; & ita si relatio rationis accipitur aliquando pro dignitate, & honore, ut esse Iudicem, esse Doctorem, etiam priuatio accipitur pro honore, & dignitate, ut esse exemptum, & deobligatum à seruitute, & alia similia. Tum etiam, quia relatio rationis nihil iuuat ad fontalem illam plenitudinem, & auctoritatem vniuersalis principij, quia illa fontalitas, & principium est respectu personarum realiter à Patre procedentium, respectu quarum relatio rationis non dicit ordinem principij

Ioan. a S. Thom. in 1. part. D. Th. Tomus alter.

realis: nam si principium realem ordinem non habeat, principium reale non est in diuinis, licet respectu creaturarum Deus sit principium non per ordinem realem ad ipsas, sed per respectum rationis, eo quod creaturæ sunt diuersi ordinis, & dependent à Deo, Deus verò ad ipsas non ordinatur. Hoc autem modo non potest Pater esse principium, & fons personarum diuinarum: esset enim principium earum, sicut est principium creaturarum, non respiciendo ipsas realiter, sed per respectum rationis, cum tamen personæ ipsæ procedentes realiter respiciunt Patrem ut principium: sic enim creaturæ se habent ad Deum, & Deus est principium earum. Quare si Pater consideretur ut fons, & principium Trinitatis vniuersale, oportet quòd talis fontalitas, & auctoritas principij vniuersalis habeat rationem principij realis realiter influentis, & respicientis suos terminos: ergo ad hoc perperam recurritur ad respectum rationis, cum iste non constituat relationem principij, & fontis diuinarum personarum.

Non potest etiam dici quòd positiua illa ratio ¹³ sit relatio transcendentalis ex parte Patris ad duos terminos, scilicet Filium & Spiritum S. pro indiuiso. Etenim relatio ista transcendens non potest respicere Filium, & Spiritum S. per modum principij influentis, ut ostensum est, quia non datur influxus aliquis pro indiuiso, & eodem modo influens in Filium & Spiritum S. siquidem Filius adæquatè, & integrè procedit per intellectum, & Spiritus S. per voluntatem, nec datur alia tertia ratio influendi indiuisè in ipsos, quæ nec sit per intellectum, nec per voluntatem, quia talis influxus, & actio non datur intra Deum, nec assignabilis est. Neque illa relatio transcendentalis est ratio primæ personæ ut subsistentis, quia ut sit persona non conducit relatio transcendens, sed prædicamentalis, scilicet illa quæ facit oppositionem cum alia relatione correlatiua, sicut est paternitas, quia persona dicit incommunicabilitatem in ratione personæ, & oppositionem, quod est proprium relationis prædicamentalis; esse autem primam non habet per respectum transcendentalem ad personas sequentes, & procedentes, sed per negationem prioris: hoc enim est esse primam: nam respicere aliquid ut sequens, & procedens à se, non constituit rationem primi, sicut Filius est persona quæ respicit aliam procedentem à se, nec est prima. Quod verò respiciat omnes procedentes in Deo ut procedentes à se, & consequenter nulla est à qua ipse Pater procedat, hoc idè constituit primam personam, quia importat negationem, non procedendi ab aliqua, non verò quia positiuè dicit alias procedere à se. Nec alias procedentes à se respicit relatione transcendentali, quia in tantum respicit ut procedentes à se, quantum est influens in illas: non est autem influens per relationem transcendentalem, sed per relationes originis, quæ sunt secundum esse in Deo & notionales, utpote oppositionem relatiuam dicentes. Vbi est ergo illa transcendentalis relatio, aut quomodo competit personæ illi. Denique transcendentalis relatio in re aliquid absolutum est sicut actus, & habitus transcendentaliter respiciunt obiectum, & materia formam, & partes totum. In Deo autem id quod est absolutum non constituit rationem notionalem, & propriam Patris, cum sit commune omnibus, & consequenter neque rationem fontalis & vniuersalis principij ad personas procedentes. Id autem quod est relatiuum, & non absolutum in Patre non est aliud quàm paternitas, & spiratio, quæ non transcendentaliter, sed prædicamenta-

N 3 liter

liter, & secundum esse relatiua sunt, vtpote relatiue opposita suis terminis. Ergo talis relatio transcendentalis non explicat rationem illam fontalis principij, & positivæ authoritatis importatæ in recto in nomine ing. niti.

14 Denique non est hoc positivum ipsa relatio Paternitatis inadæquatè considerata antequam generet, neque est aliquid absolutum. Non absolutum, ob rationem dictam, quia absolutum non est notio in diuinis, sed est commune omnibus personis, non propria Patris notæ, & character. Non relatio Patris inadæquatè considerata, quia sic innascibilitas non erit notio distincta à Paternitate, sed in illa inclusa, & quasi pars illius. Urget enim hinc eadem illa ratio, quam format D. Thom. in hac q. 33. art. 4. ad 1. quod si ratio principij sit aliquid commune paternitati, & spirationi, illa includetur in ipsis, nec erit ingentum sumptum pro principio sic commune, aliquid distinctum à paternitate, & spiratione: ergo eadem ratione, si est conceptus paternitatis inadæquatè sumptus, erit *ly ingentum* notio inclusa in paternitate, non ab illa distincta. Et præterea, quia conceptu paternitatis etiam inadæquatè sumptus, & post generationem non refertur nisi ad Filium, nec exprimit rationem primæ personæ, sed solum personæ generantis; & sic solum se habet ad Filium, non ad Spiritum S. formaliter: id enim habet per spirationem: ergo prout sic non explicat rationem vniuersalis principij, & fontalis plenitudinis ad omnes personas: ergo etiam inadæquatè concepta paternitas, & in illo signo antequam generet, non concipitur ut prima persona, & ut fontalis plenitudo per modum principij vniuersalis: si enim id haberet pro illo inadæquato signo, utique pro alio signo posteriori in quo adæquatè concipitur, id non amitteret.

15 Denique tertia pars conclusionis *suprà* positæ, scil. quod positivum directum huius notionis sit persona Patris, ut in genere personali existens à se. probatur, quia eodem modo concipimus constitui primum principium personale inter personas, quo primum principium, & primum ens inter naturas: utrobique enim primum principium datur; ibi personarum præcisè, hinc naturarum, & entium. Constituitur autem Deus in ratione primi principij entitati per hoc quod sit ens, & natura à nullo alio ente existens, quæ est negatio formaliter importata in nomine primi principij, & quod sit existens à se quod pertinet ad positivum connotatum. Ergo similiter constitueretur in diuinis primum principium personale, seu in linea, & genere diuinarum personarum, per hoc quod de formali sit persona, non ab alio principio, & de materiali, seu pro fundamento sit existens notionaliter, id est, in ratione principij notionalis à se.

Et confirm. quia his duobus positis, & omni alia formalitate, & ratione cessante, manet illa persona prima, & ingenta. Ad rationem enim ing. niti, & primi non attenditur per se, quod alia sint ab ipso, & consequenter quod sit fons, & principium aliorum, quia iste respectu pertinet ad rationem principij ut influens in alia, quæ ex se deriuantur, non autem ut in se primum sit, quod est per negationem anterioris à quo deriuatur existendo in se, & à se. Et præterea esse fontem, & principium aliorum, licet dici possit primum per hoc quod sit principium omnium præter se nullo excepto, tamen hoc magis est explicare rationem primi principij præsuppositivè, vel consecutivè, quàm formaliter, quia scil. non stat esse principium omnium præter se, nisi excludendo quod non sit ab alio, eo quod non restat aliud à quo sit. propter hoc ergo, quia infertur

hoc non esse ab alio, ex eo quod sit omnium principium, deducitur, quod sit primum: formaliter ergo, & magis per se est in ratione primi seu ingenti, non esse ab alio, quàm alia omnia esse ab ipso.

Et si inquiras: hoc positivum, quod est esse à se 16 notionaliter quod connotatur directè in *ly ingentum*, cui notioni relatiuæ per se primò pertinet, paternitati an spirationi actiuæ: nam etiam spiratio ista ab alio non est, nec ab alio conuenit Patri

Respon. conuenire illud positivum per se primò paternitati: tum quia paternitas non solum est notio, sed est proprietas, quia soli primæ personæ conuenit tanquam positiva relatio: spiratio autem conuenit etiam Filio, estque illi communicabilis, & cum Filius sit persona ab alio, consequenter spiratio, ut conueniens personæ ab alio, & non purè sistens in persona à se, videtur minuere rationem primi in toto rigore. Tum etiam quia paternitas constituit personam, non spiratio actiuæ, & sic spiratio actiuæ conuenit illi tanquam principio quod radicaliter opposito Spiritui S. est ergo paternitas ut primum, & à se existens in linea personali, & per modum personæ primæ spiratio autem non ut persona nec ut prima personæ existens, sed ut quid adiectum seu adueniens existenti, & subsistenti, consideratur. Et fortasse propter hoc Patres appellant Patrem fontem Trinitatis, & fontalem Deitatem, quia paternitas ipsa est primum existens à se unde deriuantur aliæ personæ, filius per paternitatem formaliter, Spiritus S. per spirationem formaliter, & per paternitatem radicaliter. Unde esse fontem Trinitatis non est specialis notio, sed in paternitate, quatenus primum principium est, imbibitur. Notio autem ingenti non dicit fontalitatem per modum principij, sed negationem ab alio in persona existente à se.

Ex quibus sequitur quomodo intelligendus sit 17 S. Thom. in hac q. 33. art. 4. ad 2. in assignando positivum inclusio in ratione ingenti. Nam dicit duo; primum quod si ratio ingenti sumatur pro negatione geniti, seu generati (loquendo de generatione strictè) sic etiam conuenit Spiritui S. nec est propria Patri, nisi in nomine ingenti intelligatur persona quæ sit principium alterius personæ: sic enim non conuenit Spiritui S. quia non est principium alterius personæ, & conuenit Patri, quia ab ipso est alia persona, & ipse non est genitus. Secundum est, quod si sumatur ingentum pro negatione, omnis processionis, & non solius generationis, sic conuenit soli Patri, non Spiritui S. quia est persona subsistens ab alio, nec essentia diuinæ, quæ prout in Filio, & Spiritu S. est communicata ab alio. Dixerat autem *solutione ad primum*, quod ingentum non importat rationem principij seu fontalis plenitudinis, sed importat negationem generationis passiuæ, quia *ly ingentum* tantum valet quantum non filius, & sic est propria notio Patris. Cæterum hæc facile conciliantur, quia in *solut. ad primum* S. Thomas explicauit *ly ingentum* ex parte formalis significati, ut restringitur ad standum pro negatione geniti, seu generationis filij præcisè: importat enim de formali negationem geniti. Addidit autem *solutione ad 2.* quod hoc non sufficit ad hoc ut sit propria notio Patris, nisi intelligatur talis negatio filiationis, seu generationis passiuæ ut conueniens personæ producenti quæ est principium aliarum: sic enim nec Spiritui S. conuenit, neque Filio: Sed tamen hoc exigitur in illa negatione generationis tanquam conditio requisita ut sit propria notio Patris, quia si sumatur sine tali subiecto, scil. sine persona, quæ est principium aliarum: in tali enim persona, negatio illa non procedendi per generationem

tionem peculiaris notio est, nec conuenit Spiritui S. cum non sit principium productiuum. Negat autem in *solutione ad 1.* notionem illam ingenti importare illam rationem principij aliorum, quasi directe significatam in nomine ingenti, non ut conditionem requisitam: hæc enim directe non significatur ab ingento. Addit denique *solut. ad 2.* quod si significatam de ly *ingenitum* est negatio non solum generationis, sed omnis processionis, sic est notio Patris, & propria eius. Non designat autem D. Thom. illud positium quod tale nomen directe, & pro fundamento significet, sed facili colligitur esse ipsam primam personam Patris quatenus à se existens, & ut habent vitam in semetipso: sic enim ex tali formalitate immediate consequitur, & fundatur negatio omnis processionis ab alio, sicut ex eo quod aliquid positum rationale sit, consequitur negatio irrationalis, & bruti: illud enim pro positio fundamento alicuius negationis ponendum est, quod immediatam, & per se connexionem habet cum tali negatione. Quod autem immediate, & per se connectitur cum negatione omnis processionis ab alio, est esse positium quod habetur à se, seu existens, & viuens à se notionaliter seu personaliter.

18 Sed obijciens: Notio ingenti non sufficienter explicatur in suo formali conceptu per solam negationem procedendi ab alio, tum quia non esse ab alio, ut sic, etiam conuenit essentia; tum quia negatio prout talis, non explicat dignitatem, & auctoritatem aliquam, quia de se nihil est; & sic etiam ipsum nihil, & creatura mere possibile non sunt ab alio, per hoc tamen non significantur in aliquo: ergo requiritur ad formalem conceptum notionis includere præter negationem aliquid positium. Rursus illud positium non potest esse absolutum, & essenziale, quia hoc commune est omnibus personis, non peculiaris nota, & character alicuius, nec iterum ipsa ratio ingenti, de qua loquimur in *presenti* pertinet ad reddendam ingentiam ipsam essentiam in ratione essentia, & naturæ, sed ad reddendam ingentiam personam in ratione substantia, & personæ: ergo ad hoc impertinens est positium absolutum, sed nec esse est recurrere ad relatum. Hoc autem relatum non est conceptus paternitatis, neque ut expressus, & exercitè respiciens Filium, quod est adæquatè concipere paternitatem, neque ut præcisè dicens rationem substantia, & personalitatis primæ, seu relationis illius ut subsistens, ante exercitum generandi, & respiciendi filium quod est inadæquatè concipere paternitatem. Nam quomodocumque concipiatur paternitas est distincta notio à ratione ingenti: ergo per hoc quod includat paternitatem, ut est determinata, & indiuidua quadam relatio, non redditur ly *ingenitum* distincta notio: vel enim includit conceptum paternitatis solum quantum ad rationem communem, & genericam principij, prout communis est paternitati, & spirationi, vel quantum ad particularem paternitatis, licet non sub exercitio respiciendi, & tangendi filium, sed sub formalitate subsistendi in se. Primo modo non constituit notionem distinctam, & particularem ly *ingenitum*, sed solum coniungitur rationi genericæ, & communi, duarum notionum paternitatis, & spirationis, ac per hoc imbibitur in paternitate, & spiratione, non ab illis distinguitur, ut S. Thomas virget in *art. 4. ad 1. quest. 33.* Secundo modo, idem inconueniens sequitur, quia non constituit ingentium distinctam notionem à paternitate, sed erit paternitas inadæquatè sumpta, id est paternitas ut subsistens, & sub conceptu subsistentis, & sic notio ingenti erit paterni-

tas ut subsistens, notio verò paternitatis est eadem ut respiciens, seu ut exercens respectum ad Filium, quod est non distinguere istas notionis nisi penes inadæquatos conceptus eiusdemmet notionis, quæ est paternitas. Relinquitur ergo quod illud positium quod importat notio ingenti non sit relatum personale paternitatis, & spirationis: erit ergo relatum transcendente, quatenus per eandem rationem indiuisibiliter tangentem filium, & Spiritum S. est principium vniuersale in Trinitate.

Confirm. quia non est dubium Patres appellare 19 communiter fontem, seu formalem plenitudinem Trinitatis ipsum Patrem. ut Dionys. 2. c. de diuinis nominibus, Athanasius oratione contra Gregales Sabellij, Nazianz. orat. 13. August. 4. de Trinit. c. 20. Concil. Tolet. II. & Eugenius IV. in Concilio Florentino in litteris vniuersis, S. Thom. infra q. 39. art. 5. ad 6. Ergo pertinet ad propriam notionem Patris esse fontem, & principium vniuersale in personis diuinis, cum hoc ipsi soli conueniat: sed hoc non conuenit ipsi ratione paternitatis, vel spirationis, quia paternitas solum est principium productiuum Filij. per intellectum: nec enim alia prædicata requiruntur ad esse Patris, quam virtus generatiua Filij spiratio solum est productiua Spiritus S. & præterea est notio communis Patri, & Filio, esse autem fontem totius Trinitatis, dicit aliquam rationem respicientem omnes personas procedentes, ergo debet ratio fontalitatis conuenire alteri notioni Patris, quæ est esse ingentium: nec enim alia notiones sunt in Patre nisi paternitas, quæ est ipsi propria, spiratio actiua quæ Patri, & Filio est communis, & innascibilitas, si ergo esse fontem seu fontalem plenitudinem Trinitatis est proprium Patris, & non ratione paternitatis vel spirationis, propria erit ratione innascibilitatis: ergo innascibilitas non importat solum negationem processionis, sed etiam positium principium per modum fontalis plenitudinis. Et hoc erit relatio aliqua transcendens vel relatio rationis ad Filium & Spiritum S. quia paternitas, & spiratio esse non potest, & alias debet ista ratio ingenti seu fontalis principij ipsi personæ seu substantia Patris conuenire: nam nomen primæ personæ per innascibilitatem, & rationem ingenti Patres explicant, ut Damasc. lib. 1. fidei c. 9. Iustinus in expositione fidei de Trinitate, Nissenus in lib. de differentia essentia & hypostaseos, & alij.

Respond. notionem ingenti non explicari per negationem puram, & ab omni fundamento remotam, sed per negationem fundatam in aliquo positio: sine hoc enim nullam dignitatem importat nuda illa negatio, ut rectè probat argumentum. Ad instantiam verò inquirentem de hoc positio quidnam sit: dicimus non esse prædicatum essenziale, & pertinens ad naturam, sed notionale, & pertinens ad substantiam, nec est inconueniens quod eadem substantia, & persona fundet plures notiones, si quidem plures illi conueniunt: ergo & plures fundantur in illa. Nec per hoc confunduntur notiones, quia non includitur vna in alia formaliter, sed vnaquæque sub distincta formalitate manens potest fundamentaliter, & materialiter illam includere, & connotare. Cum verò instatur, quod non potest esse hoc positium ipsa paternitas sub conceptu Paternitatis, neque adæquato, & exercitè respiciente filium, neque inadæquato, & ut præcisè subsistenti, dico quod est persona Patris, non sub ratione principij influentis, aut respicientis, siue solum filium, siue filium, & Spiritum S. neque quatenus est subsistens in ratione talis principij; sed

quatenus est persona positiuè fundans repugnantiam, & oppositionem omni generationi passiuæ. Est enim considerandum quòd persona Patris est subsistentia quædam relatiua, quæ reddit subsistentes plures rationes in ea concurrentes: reddit enim subsistentem rationem principij vt influentis in Filium, & reddit subsistentem rationem principij influentis in Spiritum S. & reddit subsistentes ipsas origines, & reddit subsistentiam ipsam impossibilitatem, & repugnantiam quam habet, seu incapacitatem cum passiuæ origine. Et sic vt subsistentia illa fundat istam incapacitatem, est positium notionale in quo fundatur negatio ingenti; & sic importat dignitatem quandam, quia est persona cum esse fundante, non esse ab alio. Neque tunc currit consequentia D. Thom. in solutione illa ad primum, quia ibi probat S. D. notionem ingenti non includere positium, neque in sua ratione formali, neque in suo connotato directo sub ratione principij, siue paternitatis, siue spirationis, quia cum istæ duæ sint notiones quatenus principia influentia, si ly *ingenitum* diceret positium per modum principij, rectè infert D. Thom. quòd includeretur ingenitum formaliter in aliis notionibus, quia includeretur in ipsis quatenus principia. Si verò includatur ingenitum in subsistentia positiua Patris, quatenus fundat esse cum incapacitate, & oppositione ad passiuam generationem, non includitur formaliter in aliis notionibus, quia aliæ non sunt notiones vt præcisè subsistunt, & fundant illam incapacitatem, sed vt principia influentia, & originantia suos terminos. Vnde cum infertur quòd ingenitum erit paternitas vt subsistens, distingo, vt subsistens relationi, & influentia in Filium, nego, vt subsistens negationi procedendi ab alio, & fundanti illam, concedo; & hoc modo est distincta notio ab ipsa, vt paternitas est. Vnde relinquitur quòd Ingenitum non est relatio transcendentalis per modum principij influentis ad vtramque personam procedentem indiuisè.

21 Ad Confir. Respond. Patrem esse fontalem plenitudinem, & fontem totius Trinitatis non per notionem Ingeniti, sed per notionem ipsam paternitatis secundum adequatum conceptum sumptæ, scil. quatenus est persona habens à se principium generandi Filium, & spirandi Spiritum S. Licet enim Filius habeat etiam principium spirandi Spiritum S. tamen non habet illam à se, sed communicatam à Patre: & sic non habet illam per modum fontis, quia non à se, sed per modum communicate ab alio, quod opponitur rationi fontis. Et sic esse fontem in Patre non addit nouam rationem principij influentis, sed solum dicit ipsam rationem paternitatis, & spirationis, quæ sunt principia influentia cum illo connotato à se: ly enim *a se* in vtroque principio constituit fontem: fontalitas enim, & auctoritas nihil aliud significant in diuinis, quàm principium originis, vt dicit S. Thom. illa q. 33. art. 4. ad 1. sed debet esse principium originis à se: si enim est deriuatum, amittit rationem fontis, & habet se vt riuus, vel vt splendor, quo nomine significatur Filius, non propter diminutionem, sed propter deriuationem, alioquin lux est de luce, & lumen de lumine, scil. totum lumen Patris vt deriuatum dicitur splendor in Verbo. Nec ly *esse à se* importat diuersam rationem principij à paternitate, & spiratione in ratione influendi, sed modum connotationemque eius, seu conditionem vt principia illa in Patre fons sint, & non splendor.

ARTICVLVS II.

Verum Verbum diuinum procedat in quarto modo per se ex cognitione omnium personarum diuinarum, & creaturarum?

1 Sensus difficultatis percipietur ex distinctione scilicet quod conuenit processioni Verbi in primo modo per se, & quæ in quarto modo. Ea dicuntur conuenire in primo modo per se, quæ essentialiter, & intrinsecè conueniunt quantum ad quiditatem, & essentialem conceptum siue identicè conueniant, siue formaliter. Ea conueniunt in quarto modo per se, quæ conueniunt sub formali ratione conducente ad aliquam operationem, & non identicè tantum v. g. homo per se discurrit, ignis per se calefacit. Homini discurrenti conuenit intrinsecè, & essentialiter esse animal, & corpus, aliàs homo quiditatiuè non erit, non tamen in quarto modo per se conueniunt ad discursum, quia non discurre animalitate vel corporeitate vt forma, & ratione discurrendi. Ignis etiam per se calefacit, & vt calefaciat debet esse substantia, & corpus, & tale corpus, scil. elementum ignituum, & calefactiuum, & hoc totum intrinsecè, & essentialiter ei conuenit, & in primo modo per se. Non tamen quodlibet prædicatum ex his concurrat in quarto modo per se ad igniendum, vel calefaciendum: nec enim corporeitate calefacit, vel substantialitate, sed calido licet corpus sit quod calefacit. Itaque in perfectate quarti modi per se non prædicatur forma de suo constituto formaliter, & quiditatiuè per ipsam, sed de suo effectu tanquam id quo effectus fit vt ratione formali faciendi, & principio per se conducente ad effectum, non concomitante, aut solum identicè se habente.

2 Hinc difficultatis nodus, & punctus elucescit: Processio Verbi diuini est processio, & generatio substantialis, & diuina per intellectum, constat quod illa cognitio qua procedit, & forma qua fecundatur intellectus paternus ad exprimendum, & producendum Verbum est infinita, & non solum essentia diuina, & attributorum, & personarum, sed etiam creaturarum comprehensua ob suam infinitatem, & hoc essentialiter habet, & intrinsecè in primo modo per se: sed inquirimus, an ista forma, seu species, qua fecundatur intellectus diuinus ad generandum, & ista cognitio, qua exprimitur Verbum, concurrat ad illud producendum formaliter formalitate quarti modi per se, secundum omnia illa obiecta, etiam secundum quod attingit personas, & creaturas, an per se formaliter in quarto modo solum concurrat cognitio alicuius personæ, & ipsius essentia: reliqua verò ibi reperta concomitanter se habeant, non formaliter in perfectate producendi verbum, sed etiam si per impossibile non cognosceret Deus creaturas, vel talem personam, adhuc produceretur Verbum: sicut est certum quòd modò illa cognitio, qua Verbum procedit, attingit creaturas futuras, & tamen etiam si creaturæ futuræ non essent (liberè enim futuræ sunt) adhuc Verbum procederet; & sic cognitio futurorum per se in quarto modo non requiritur.

3 In hac ergo difficultate Scotus in 2. dist. 1. quæst. 1. §. Quantum ad primum, & quodlibet 14. §. Hic intelligendum, docet Verbum solum procedere ex vi cognitionis obiecti primarij. Nomine autem obiecti primarij, intelligit Scotus non solum essentiam diuinam excludendo creaturas, quæ in omnium opinione

opinione pertinent ad obiectum secundariū, sed etiā excludendo personas, quia ipse sentit in 1. dist. 27.

9. 3. personas non esse conceptu obiecti primarij. Fundamentum huius sententiæ est duplex.

Primum, quo Scotus directè excludit Filium ab hac cognitione, pro illo signo quo procedit Verbum.

Secundum, ad excludendum cognitionem Patris & Spiritus S. pro illo signo. Deducitur primum fundamentum ex eo quod ipse putat dictionem seu productionem Verbi esse actionem distinctam à cognitione, seu intellectione. In illo autem priori in quo intelligitur intellectio, & non dictio, nondum intelligitur Verbum, quia nondum intelligitur dictum, & tamen intelligitur cognitio: ergo cum procedat Verbum ex cognitione quæ præintelligitur dictioni, quia dictio secundum ipsum est actio distincta, & præsupponens intellectionem, consequenter non procedit ex cognitione præsupposita Verbi, neque intuitiva, quia pro illo priori non intelligitur dictum; neque abstractiva, quia Verbum non potest intelligi ut possibile, & non ut existens, quia existentia de eius essentia est. Secundum fundamentum est quia Pater non potest producere Filium ex cognitione ipsius Filij, nec Spiritus S. ergo neq; ex cognitione Patris: ergo ex nullius personæ cognitione. Antec. probatur, quia si Filius procederet ex cognitione sui, haberet se ut obiectum cognitum respectu suæ processionis, & similiter Spiritus S. ergo ut principium ex quo procedit, quia illud quod est obiectum, est principium ex quo formatur cognitio: ergo si procedit ex cognitione sui ut obiecti, habet se tale obiectum ut principium, ex quo fit talis cognitio. Si autem ipsemet Filius & Spiritus S. se habent ut principium suæ processionis, & cognitionis: ergo est imago sui, & Spiritus S. quia verbum est imago illius à quo procedit ut à principio. Filius autem solum est imago Patris sui. Ergo non procedit Filius ex cognitione sui, & Spiritus S. Prima verò conseq. probatur, quia Pater non potest cognosci non cognito Filio, cum se habeant correlatiue, & vnū sine alio cognosci non potest: Ergo si pro illo priori non cognoscitur Filius, neq; Pater cognoscitur ut Pater.

Secunda sententia est P. Vasq. hic disp. 142. c. 4. qui tenet, Verbum ex sua characteristica proprietate ut Verbum est non procedere in 4. modo per se ex cognitione personæ Spiritus S. sed solum ex cognitione essentiæ diuinæ attributorum, & personæ Patris, ac Filij, cognitionem autem Spiritus S. concomitanter, & identicè ibi se habere, non formaliter in 4. modo. Idem sentit de cognitione creaturarum disp. 143. c. 3. quod non procedit ex cognitione earum tanquam ex cognitione requisita in 4. modo per se, sed solum concomitanter, & identicè. Et in hoc ipsum sequitur Arrubal hic disp. 125. cap. 5. Et quod vtrumque, Alarcon tract. 5. disp. 8. c. 8. & 9.

Fundamentum eius est quia id solum per se requiritur ad processionem, & generationem Verbi quod ex parte principij se habet ut ratio, & principium assimilatiuum, ex parte autem termini ut assimilatum, quia tota formalis ratio actionis assimilatiuæ inter principium assimilatiuum, & terminum assimilatum per se, & formaliter discurrit, nec amplius requiritur in formalitate, & perfectitate talis actionis. Verbum autem procedens ex notitia Patris solū assimilatur ipsi Patri, eiusque naturæ, non verò assimilatur Spiritui S. neque creaturis: ergo cognitio creaturarum & Spiritus S. non concurrunt per se in 4. modo ut principium formale producendi Verbum, quia nec ut principium assimilatiuum, neque ut terminus assimilatus. Principium enim assimilatiuum ut quo est essentia, ut quod est Pater; terminus assimilatus ut quod est Verbum, ut quo est natura ut

communicata sibi: ergo quicquid aliud ibi interuenit, non in quarto modo per se interuenit, & ut forma ac principium per se, & formaliter conducent, sed solum identicè. Alia argumenta postea soluendo hoc fundamentum adducemus.

Tertia sententia est procedere Verbum diuinum 5 per se formaliter ex cognitione diuinæ essentiæ omniumque personarum, etiam Spiritus S. imò & omnium creaturarum: ita tenent communiter discipuli D. Thom. super banc q. 34. a. 3. ibi Caiet. Bannez, Zumel, Nazarius, Nauarrete, contr. 27. Carmelitani 2. tomo tract. 6. de Trinit. disp. 12. dub. 1. & 2. Suarez lib. 9. de Trinit. c. 4. & 6. Valentia 1. p. disp. 2. de Trin. q. 8. punct. 2. Gran. tract. 9. disp. 5. sect. 5. & alij multi.

Resolutio ex mente D. Thomæ.

Dico primò. Non possumus assignare pro formali 6 processione Verbi solam cognitionem essentiæ, excludendo ab illo obiecto personas omnes. Sumitur ex D. Th. in hac q. 34. a. 1. ad 3. ubi inquit: Dicitur conuenit cuilibet personæ; dicitur enim non solum verbum, sed res quæ verbo intelligitur, vel significatur. Sic ergo vni soli personæ in diuinis conuenit dici, eo modo quo dicitur Verbum. Eo verò modo quo res dicitur in verbo intellecto, cuilibet personæ conuenit dici: Pater enim intelligendo se, & Filium, & Spiritum S. & omnia alia quæ eius scientia continentur, concipit Verbum, ut sic tota Trinitas verbo dicatur, & etiam omnis creatura; sicut intellectus hominis verbo quod concipit lapidem, dicitur. Et a. 3. docet quod sicut Dei scientia, Dei quidem est cognoscitiua tantum, creaturarum autem cognoscitiua, & factiua, ita Verbum Dei, eius quod in Deo Patre est, est expressiuum tantum, creaturarum verò est expressiuum, & operatiuum. Quod etiam affirmat q. 4. de verit. a. 4. & quodlib. 4. art. 6. Vbi pondero excludere S. D. tum sententiam Scoti tum Vasq. sententiam quidem Scoti dum inquit, quod Pater intelligendo se & Filium & Spiritum S. & ea quæ eius scientia continentur concipit Verbum. Pro illo ergo priori rationis quo intelligit antequam dicat seu concipiat Verbum, omnes personas, & creaturas cognoscit, alias non conciperet Verbum ex intelligentia omnium, quæ in scientia Dei continentur. Sententiam autem Vasq. excludit, ponendo quod cuilibet personæ conuenit dici & exprimi in Verbo, sicut nos verbo quo concepimus lapidem, dicimus. Si ergo personis conuenit dici in verbo: ergo per se in quarto modo conuenit verbo procedere ex cognitione talium personarum, quia quando ea prædicata quæ per se formaliter relucunt in aliquo effectu, formaliter correspondent in principio, tale principium secundum talia prædicata per se in quatto modo comparatur ad effectum, sicut si aliquid est per se calor ut effectus, calidum quod est eius principium, per se producit calorem in quarto modo, & si aliquid est in se medicabile, per se fit à Medico. Si ergo Verbum per se est expressiuum Patris, & Spiritus S. & creaturarum, oportet quod principium generans, & exprimens tale Verbum concurrat in 4. modo per se, non solum ut representatiuum essentiæ, & personæ Patris, sed etiam Filij, & Spiritus S. & creaturarum. Et non dico procedere per se à creaturis, vel à Spiritu S. falsum enim est, sed per se à representatiuo, & contētiuo creaturarum, & omnium personarum. Et rursus docet D. Th. Verbum diuinum esse ex se expressiuum, & factiuum creaturarum. Non dixit actū faciens, sed factiū, ut hinc intelligeremus non pertinere per se ad processionē Verbi cognitionem creaturarum ut factum vel futurarum de facto: istæ enim propter sic non solum respiciunt principium, ut factiū, sed ut faciens. Verbum ergo procedit ut factiū creaturarum, in quantum Verbum intellectuale Dei: ergo

ergo secundum D. Thom. debet procedere ex cognitione, & principio representante non solum diuinam naturam quam accipit, & per omnes, quæ in ea sunt, sed etiam rationem factiuam creaturarum, atque adeo principium exprimens Verbum per se, & formaliter concurrit ut attingens creaturas in ratione ipsa factiua earum, quæ per se communicatur Verbo, ut Verbum est per quod fiunt omnia.

Hinc fundamentum sumimus contra Scotum ex duplici principio.

7 Primum quia pro illo signo, & prioritate qua intelligitur cognitio in Patre ad dicendum, & ante ipsam dictionem, Pater intelligitur ut cognoscens cognitione beata, & comprehensiuâ Dei, liquidem ex illa fecundatur ad dicendum verbum comprehensiuum totius diuinitatis: quidquid enim intellectu suo Deus comprehendit, totum in verbo dicit, & exprimit. Requiritur ergo per se ad tale verbum, quod fecundetur Pater à comprehensiuâ cognitione sui: ergo etiam antecedenter ad dicere, oportet quod ipsa Patris cognitio, ex qua procedit dictio, attingat omnia quæ ad comprehensionem requiruntur, & quæ in ipsum Verbum tanquam in thesaurum debent inferri (*in ipso enim sunt omnes thesauri sapientiæ, & scientiæ absconditi*): ergo cum comprehensio Dei inuoluat omnium attributorum, & personatum; & creaturarum attingentiam, imò & visio beata Dei attingat Deum quiditativè, & intuitivè ut est Trinus & vnus, si pro illo signo anteriori ad dictionem debet præsupponi comprehensiuâ cognitio Dei, necessariò debet præsupponi cognitio personarum, & creaturarum. Et cum sententia Scoti non neget pro illo signo cognitionem personarum ex eo quod non requirantur 4. modo per se ad generationem Verbi, sicut sententia Vasquez, sed ex eo quod sentit non pertinere ad obiectum primarium diuinæ cognitionis, & quia pro illo tunc nondum intelligitur Filius ut generatus in facto esse, currit fortius ista ratio, quanquam & contra Vasquez virgeri potest, quia pro illo signo etiam conducit ad generationem Verbi quod cognitio illa comprehensiuâ sit, quia comprehensiuum Verbum generari debet ex illa, & exprimens in se omnia quæ pro quocumque signo Deus intelligit: Deus autem intelligit personas, & creaturas, idque requiritur ad comprehensiuam cognitionem, & non solum obiectum primarium: ergo si pro illo signo præcedit comprehensiuâ cognitio Dei, ut inferat, & generet comprehensiuum Verbum, oportet quod ibi reluceant omnes personæ, & creaturæ.

Secundum principium contra Scotum sumitur ex eo quia Filius formalissimè procedit ut imago Patris, iuxta quod dicitur ad Colossens. 1. *Qui est imago Dei inuisibilis*, & ad Hebr. 1. *Qui cuncta sit splendor gloriæ, & figura substantiæ eius*, id est, imago personæ, seu hypostasis: id enim significat ibi *ly substantia*, id est prima substantia: nec enim est imago naturæ præcisè ut natura est, quia de ratione imaginis est non solum quod sit similis alteri, sed alteri ut principio, seu exemplari suo, & consequenter quod ab illo oriatur, & procedat, non procedit autem filius à natura, seu essentia ut à principio processionis, cuius imago sit: nec enim essentia generat, aliàs filius genitus distingueretur ab essentia. Est ergo imago Filius personæ Patris: ergo procedit per se, & formaliter ex cognitione Patris; Patet consequentia, quia ista imago est intellectualis, & procedit ut similis intelligibiliter, sed non procedit aliquid per intellectum ut simile, nisi obiecto cognito, procedit enim ex cognitione eius cuius est imago, quia per cognitionem exprimitur similitudo eius quod impressum est in intellectu ad co-

gnoscendum, quod autem impressum est, est obiectum quod cognoscitur. Ergo imago procedit ex cognitione eius cuius est imago. Si ergo est imago Patris, quia Pater est intelligens, & intellectum seu obiectum cognitum, & cognoscens: ergo exprimit Patrem intelligibiliter, & ut cognitum: ergo ex cognitione Patris procedit, quia idem est exprimere illum ut cognitum atque ex cognitione eius procedere, & exprimi Rursus non potest Pater cognoscere perfectè, & in se, nisi visio, & cognito Filio, quia sunt correlatiua, quæ sunt simul cognitione: & cum generet ipsum ut imaginem similem sibi, necesse est quod cognoscat Patrem ut principium exprimendum in imagine: ergo & ipsam imaginem sic exprimentem, quia expressio imaginis essentialiter est inter duos terminos, scilicet inter principium exprimens, & terminum expressum: ergo qui intelligibiliter exprimit imaginem cum perfectâ comprehensione expressionis, & principium exprimens, & terminum, qui est imago ipsa debet attingere.

Dices: Nos exprimimus conceptum tanquam imaginem, & tamen illam non cognoscimus, nisi per alium conceptum reflexum, non ea cognitione, & operatione qua ipse directus conceptus producit: ergo formaliter, & per se loquendo non exigitur quod imago intelligibilis procedat ex cognitione sui, etiam ut termini; & sic ratio facta non probat quod per se petat processio Verbi cognitionem sui, etiam ut imago est.

Resp. quod omissa nunc illa difficultate, an nos cognoscamus verbum, & conceptum quando directè cognoscimus obiectum, an solum obiectum ipsum in verbo representatum attingatur, & verbum se habeat ut medium in quo, tamen in presenti non potest esse dubium quod attingatur Verbum ut terminus expressionis, quia quando species expressa est aliquid distinctum ab obiecto cognito, & expresso in illo, & solum se habet ut accidentaliter representatio, & vices gerens obiecti, non mirum quod attingatur obiectum non attacta imagine, seu specie representatiua, eo quod species non deseruit per se ut obiectum principale quod cognoscatur, sed ut representatio, & vicarium quid, in quo obiectum principale attingatur. Caterum in illa intelligibilitate in qua non datur species distincta, sed obiectum seipso est intelligibile, & intellectum in actu, idem est attingere obiectum, atque attingere speciem, seu verbum: licet enim verbum notionaliter, & relatiuè distinguatur à Patre, qui est eius principium produciens, non tamen ab essentia, quæ est obiectum seu species, distinctio verò à Patre nihil impedit quod cognoscatur Verbum ut imago, quia correlatiuè se habent Pater & Filius; & sic cognito Patre, cognosci debet Filius: quod totum non currit in expressione nostri verbi. Et præterea cum cognitio qua procedit verbum sit comprehensiuâ, & cognoscitiua perfectè omnis interioris, & immanentis actus, cognoscit perfectè ipsam operationem qua procedit verbum, & expressionem eius, quod stare non potest nisi cognoscendo verbum quod format. Imò non solum Deus, sed Angelus quando intelligit, quia intuitivè, & comprehensiuè seipsum videt. & omnes actus suos non producit Verbum, & conceptum, nisi simul cognoscendo, & attingendo ipsum, & obiectum in ipso. Quod verò nos non attingamus, ex imperfectione nostra est, quia non purè intelligibiliter procedimus, & cognoscendo ac videndo interiores actus, sed dependenter à phantasmatibus, & ad instar eorum formando.

Dico secundò; Verbum diuinum procedit per se in quarto modo ex cognitione Spiritus S. & non solum per se formaliter concurrit ad processionem Verbi

bi cognitio Patris, & Filij, personæ autem Spiritus S. cognitio, identicè: sed ista etiam concurrunt formaliter in quarto modo per se, tanquam res cognita, non ut species ipsa, & forma, seu ratio cognoscendi. Hæc est contra sententiam. P. Vasquez. Et oportet benè advertere hoc ultimum quod ponimus in conclusionem, quod non loquitur de eo quod per se quarto modo requiritur ad exprimendum verbum per modum formæ, seu speciei concurrentis cum intellectu, sed per modum rei cognitæ, seu contentæ in tali specie. Cum enim species sit forma qua intellectus exprimit, seu ad cuius similitudinem exprimit Verbum, non est putandum quod ut aliquod obiectum dicatur in quarto modo per se requiri ad processionem Verbi, illud se habeat ut species: sic enim cum non omnia attributa Dei habeant munus speciei, sequeretur quod non omnia attributa per se quarto modo concurrerent ad generationem Verbi: & rursus cum relatio Patris & Filij non habeant rationem speciei, quia potius persona Patris fecundatur essentia tanquam specie, & Filius procedit ab intellectu sic fecundato, non rationem speciei fecundantis dicit, si requireretur ad hoc quod aliquid per se quarto modo concurreret ad processionem Verbi, quod se haberet ut species, nec procederet ex cognitione personæ Patris, neque Filij ipsum verbum in quarto modo per se, quod tamen Vasquez negat. Sensus ergo quæstionis est, disquirere inter ipsa obiecta representata in specie, seu ibi contenta, quodnam ex illis provt sic, representatum, & cognitum concurrat per se formaliter ad productionem Verbi, & quodnam identicè? Et sic dicimus personam Spiritus S. tanquam rem, & obiectum cognitum, & contentum in specie fecundante intellectum Patris, non identicè tantum, sed formaliter per se concurrere ad productionem Verbi.

Hoc supposito, fundamentum nostræ conclusionis reducitur ad unum principium in quo Vasquez convenire nobiscum debet, & ipse admittit nempe ad productionem Verbi per se 4. modo requiri solum cognitionem principij, & termini procedentis nempe personæ Patris & Filij in eo præcisè in quo est terminus, & in eo præcisè in quo hoc est principium: hac enim ratione debet per se 4. modo cognosci essentia, & attributa essentialia, quia essentia per se communicatur Filio: constituitur enim in ratione Filij per naturam, & essentiam sibi communicatam, & in illa similis est Patri formaliter, & substantialiter, ipsumque repræsentat, & exprimit. Debet autem per se, & formaliter ex vi talis processionis cognosci id in quo Filius assimilatur Patri, & in quo est imago eius, alias non produceretur, & exprimeretur per cognitionem imago illa perfecte similis suo principio, si id in quo assimilatur suo principio non attingeretur per cognitionem: id enim exprimitur quod attingitur ut pertinens ad assimilationem talis imaginis, pertinet autem ad assimilationem talis imaginis omne illud quod est in Patre ut communicabile Filio: ergo per se in quarto modo debet procedere Filius ex cognitione omnis eius rei, quæ sibi est communicabilis à Patre, & in quo assimilatur Patri tanquam Filius eius.

Ex quo principio sic formatur discursus contra sententiam Vasquez: Quidquid Pater communicat Filio, & in quo Filius assimilatur Patri debet in 4. modo per se cognosci à Patre ut formaliter generante Filium, sed virtus spirativa, & relatio spiratoris actini communicatur Filio à Patre, & in illa assimilatur Patri: ergo procedit Filius ex cognitione spirativæ virtutis in 4. modo per se: ergo etiam ex cognitione Spiritus S. Maior manifesta est ex dictis, quia illa imago intellectiva est, & intellectualiter procedens:

ergo omne illud per se pertinebit in 4. modo ad talem processionem, quod per se, & formaliter concurrat in constitutione talis imaginis: per se autem constituitur imago in assimilatione ad suum principium: ergo omne illud in quo assimilatur illi principio; per se debet cognosci in formatione, & processione talis imaginis, quia per se requiritur ut imago illius sit plenè, & perfecte. Minor probatur, quia in omni illo Verbum assimilatur Patri, quod est communicabile sibi à Patre, communicatur autem sibi à Patre omne illud quod sibi non opponitur, & ut dicit Concilium Florentinum in litteris unionis, *Omnia communicavit Pater Filio suo præter paternitatem*: ergo communicat illi spirationem actiuam, & in hoc quod est habere spirationem actiuam similis est Patri, sicut in hoc quod est habere essentiam, quæ est in Patre, assimilatur illi: ergo per se in quarto modo cognoscit Pater vim spirativam quam communicat Filio, non quod Pater in quantum spirator producat Filium, sed quia ut cognoscens spiratorem producit Filium: id enim quod per se exprimit gignendo Filium, per se cognoscit: cognoscendo enim communicat, & exprimit: ergo si per se communicat ei esse spiratorem, per se cognoscit esse spiratorem, & ex cognitione illius tanquam rei cognitæ procedit Verbum. Ultima verò consequentia, scilicet quod procedat per se ex cognitione personæ Spiritus S. probatur, quia virtus spirativa, & relatio spiratoris non potest cognosci sine suo termino, qui est spiratio passiva, tum quia relativa sunt simul cognitione, & non potest unum cognosci sine alio: ergo neque relatio spiratoris sine suo correlativo Spiritu S. tum quia Pater communicat vim spirativam cognoscendo illam perfectam: ergo ut distinguitur à generativa & creativa. Non distinguuntur autem entitativè, & ex parte subiecti, sed ratione diversorum terminorum, quia vis spirativa est solum ad Spiritum S. vis generativa solum ad Filium, vis creativa solum ad creaturas: ergo si cognoscit Pater ad generandum Filium quod ei communicat vim spirativam, quæ non est ad producendum creaturas, sed personam Spiritus S. necessariò debet, & per se quarto modo cognoscere personam Spiritus S. sicut per se cognoscit vim spirativam, hanc ut rem communicatam Filio, illam ut terminum talis spirationis, sine qua spirativa vis non discernitur, nec cognoscitur esse spirativam. Et videtur denique hæc consequentia contra Vasquez, quia si idè concedit, bene sequi quod Pater producit per se Verbum ex cognitione ipsius Verbi, & non solius Patris, quia si cognoscit Patrem, debet eadem formalitate cognoscere Filium, quia correlativè se habet ad Patrem: ergo similiter est bona consequentia quod si per se in quarto modo cognoscit spirationem actiuam ut communicet eam Filio, etiam eadem perfectate cognoscere debet Spiritum S. quia correlativè se habet ad spirationem actiuam.

Respondebis ex Vasq. *suprà à num. 24.* & ex Alarcon *suprà cit. c. 8. num. 8. & sequentibus* Filium in ratione filij per se quarto modo non procedere ex cognitione Spiritus S. secus verò in ratione spiratoris: sic enim in quantum spirator omnino annexam habet cognitionem Spiritus S. qui est terminus correlativus spiratoris, sed Filius sub eo signo, & formalitate, qua procedit ut Filius, non procedit ut spirator, sed prius intelligitur filius in esse filij, quam in esse spiratoris. Et ut sit Filius solum requiritur in quarto modo per se cognitio Patris, & naturæ sibi communicatæ, & termini cui communicatur. De reliquis obiectis, intercedit quidem ibi cognitio, eaque Perfectissima, & comprehensiva, sed

sed non omnia obiecti ibi comprehensa eodem modo, eademque perfectate concurrunt ad generationem Filij, & inter alia vnum ex obiectis, non per se concurrentibus, licet ibi comprehensis, est esse spiratorem, eo quod ratio spiratoris æquè primò inuenitur in Patre, & Filio, non autem prius intelligitur esse in Patre, & sic communicari Filio, sed æquè primò est in Filio, atque in Patre, quia de ratione spiratoris est quod non sit vnum suppositum, sed duo. Prius ergo intelligitur Filius esse, quàm Pater & Filius spirator sint. In illo ergo priori intelligitur procedere ut Filius, sed nondum ei communicari spirationem actiuam, & consequenter neque pro illo signo cognoscitur spiratio, sed pro alio posteriori, in quo spiratio actiua intelligitur simul in Patre & Filio, licet in Filio à Patre, non tamen pro illo signo quo Filius in esse Filij præcisè intelligitur, spiratio etiam intelligitur, quia non præsupponitur in Patre.

14 Sed contra hanc solutionem instatur, quia si velit ista solutio rationem spiratoris, & vim spiratiuam esse simul in Patre & Filio simultate durationis, aut simultate conditionis requisitæ ut Spiritus S. procedat, quia non potest procedere nisi à duabus personis, & fatemur hoc ita esse: si autem velit excludere quod spiratio actiua, & virtus spiratiua non sit in Filio per communicationem originis derivatam à Patre, sed quod Pater producit Filium præcisè in ratione Filij, & virtus spirandi, seu ipsa spiratio tunc ponitur indiuisè in Patre & Filio, non tamen ut communicata à Patre, aperte est contra id quod decernitur in Concilio Florentino in *litteris sanctæ unionis*. Et quoniam omnia quæ Patris sunt ipse Pater unigenito Filio suo gignendo dedit, præter esse Patrem, hoc ipsum quod Spiritus S. procedit ex Filio, ipse Filius à Patre æternaliter habet, à quo æternaliter etiam genitus est. Ita Pontifex: sed spiratio actiua est per quam à Filio procedit Spiritus S. ipsa enim est processio actiua Spiritus S. ergo hanc spirationem Filius à Patre habet: ergo non potest intelligi Filius productus in esse Filij, & quod tunc spiratio actiua conueniat utrique personæ Patri, & Filio pro indiuiso, non tamen quod ut præhabita, & contenta in Patre in ipsum deriuetur: sic enim non haberet Filius à Patre hanc spirationem, seu hoc ipsum quod est Spiritus S. procedere à Filio: à quo ergo principio, vel qua ratione conuenit Patri & Filio indiuisè ista spiratio? Numquid conuenit utrique æquè immediatè, & non ex principio, sicut potentia generatiua conuenit Patri à se, & innascibiliter? sed hoc est contra definitionem illam, quia spirare, & procedere Spiritum S. conuenit Filio, ut sibi datū à Patre, sicque Filius non esset spirator natus, sed spirator innascibilis sicut Pater, quod est monstrum ponere in Trinitate, ut Filius sit natus, & spirator innascibilis: cum tamen dicat Pontifex quod gignendo Pater dedit Filio omnia, & consequenter ipsam spirationem, seu procedere Spiritum S. ergo est spirator genitus, seu ex vi generationis.

15 Quod si denique velit hæc solutio Filium accipere quidem à Patre tam esse Filium quàm esse spiratorem: negari enim non potest quod esse spiratorem Filio communicetur à Patre sicut esse Deum; sed tamen sub aliquo signo, seu priori procedere ut Filium, & sub alio posteriori procedere ut spiratorem, ita quod illa processio duos inadæquatos conceptus habeat, primum quo processio illa attingit Filium in ratione Filij, & ad hanc terminationem inadæquatam non requiritur per se in quarto modo cognitio spiratoris: secundum quo procedat ut spirator, & sic esse spiratorem non prius intelligitur in Patre quàm in Filio, sed in utroque simul existit,

quia Pater non est spirator, nisi cum Filio simul.

Contra hoc est, quia Pater non communicat Filio spirationem quatenus spirator est, sed quatenus Pater intelligendo, & generando, quia non per actum voluntatis quo producit spiratio, sed per expressionem intellectus communicat Filio, & naturam, & voluntatem; atque aded, & spirationem, quæ voluntatis actu perficitur. Et Pontifex dicit quod gignendo dedit omnia Filio; & consequenter hoc quod est Spiritum S. procedere ab eo; ergo Filium esse spirationem Pater gignendo communicat Filio: ergo exprimendo, & cognoscendo spiratorem producit Filium ut spiratorem: ergo ad hunc inadæquatum conceptum processionis Filij quo procedit ut spirator, cum procedat per generationem, & gignendo ei communicetur, per se in quarto modo requiritur cognitio spiratoris; & cognitio Spiritus S. quia id quod per se communicatur est esse spiratorem. Ergo adæquata processio Filij qua procedit ut Filius, & spirator per se in quarto modo procedit ex cognitione non solum Filij, sed etiam spiratoris, & Spiritus S. quia adæquata processio secundæ personæ est ut Filij, & spiratoris. Rursus: illa inadæquatus, & posterior conceptus quo dicitur procedere Filius ut spirator, etiam pertinet ad generationem, & natiuitatem Filij; siquidem accipit spiratorem esse per generationem à Patre: gignendo enim Pater dedit Filio suo hoc quod est procedere Spiritum S. ergo Filius cum intelligitur accipere filiationem, & nondum spirationem actiuam, nondum intelligitur perfectè, & completè genitus, sed adhuc generatio continuatur, quia pro alio posteriori etiam gignendo datur sibi à Patre spiratoris esse: ergo adhuc in alio posteriori non supponitur genitum in factò esse, sed adhuc gignitur, quia gignendo datur id quod in alio posteriori datur: ergo cum spirator gignendo datur, Filius gignitur, quia non datur gignendo aliquid nisi genito ut genito: ergo Filio ut Filio: ergo non ita intelligitur filiatio in illo priori, quod non etiam intelligatur ut filius in signo posteriori, quia ut genitus. Si autem in utroque signo ut filius attingitur, & procedit, sed intelligitur in vno signo inadæquatè accipere naturam, & in alio accipere spirationem; hoc parum interest, quia sufficit ad perfectam similitudinem Filij requiri quod accipiat à Patre omnia illa, quia in illis omnibus assimilatur Patri; & sic filiatio perfectè, & completè sumpta ex omnibus illis est, licet inadæquatè possit nostro modo intelligendi concipi quod pro vno signo communicatur sibi à Patre vnum attributum, & pro alio signo aliud, quo non obstante, ex omnium attributorum cognitione per se in 4. modo procedit Verbum. Quod si non potest diuidi ista prioritas, & posterioritas in attributis, quia inter se ordinem, & distinctionem non habet, eodè modo neque spiratio actiua in alio posteriori comunicabitur, quia inter ipsam, & essentiam seu attributa nullus ordo est, nec alia distinctio quàm inter attributa.

Denique falsum est spirationem actiuam non 16 præintelligi in Patre ut communicetur Filio, quia non est spiratio, nec potest intelligi in solo Patre, aut prius in Patre, sed æquè primò in utroque. Nam sicut essentia intelligitur in Patre prius quàm in Filio, & à Patre communicatur Filio, ita & spiratio actiua, & eodem modo præhaberi debet in Patre spiratio sicut essentia; probat enim Concilium, & Pontifex *ubi supra*, quod idè Pater filio suo communicat hoc quod est procedere Spiritum S. à Filio, quia omnia quæ habet gignendo ei dat: ergo illa spiratio est vnum ex contentis inter illa omnia quæ Patris sunt, alioquin non bene probaret hanc spirationem dari à Patre, ex eo quod dat omnia

nia quæ Patris sunt: si autem dat illam tanquam aliquid quod Patris est, & dat illam per originem, & generationem, quando Pater intelligitur generare, iam aliquid suum est spiratio: nihil enim per generationem dat tanquam suum, quod intelligatur sibi conuenire, & in se habere, ut per generationem detur, & origine ipsa deriuetur.

17 Dico tertio, Verbum procedit per se in quarto modo ex cognitione creaturarum tanquam ex cognitione obiecti, seu rei cognitæ, ita quod species seu forma qua intellectus paternus producit Verbum, concurret ad ipsum formaliter, & per se ut representat secundario creaturas. Et in quantum Filius etiam sic procedit per se ex cognitione creaturarum, quia eadem formalitas est Filij intellectualis seu intelligibilis, & Verbi.

Fundamentum huius conclusionis eodem modo sumi debet atque præcedentis. Non enim solum urgemus contra sententiam Vasquez rationem cognitionis perfectæ, infinitæ, comprehensivæ, quæ necessario exigit creaturarum attingentiam, & cum ex illa procedat Verbum, videtur necessario procedere ex cognitione creaturarum. Non hoc tantum urgemus, quia nec oppositi Authores negant requiri cognitionem comprehensivam utpote perfectissimam, & infinitam: sed dicunt non omnia quæ in hac cognitione comprehensiva ingrediuntur eodem modo requiri, sed quædam concomitanter, quædam formaliter, & per se, sicut ad processionem Spiritus S. non influit per se amor creaturarum, sed solum Dei, nec ad processionem Verbi scientia visionis creaturarum, seu cognitio futurorum, quia liberè conuenit Deo; & tamen concomitanter etiam in comprehensiva illa scientia inuenitur. Et denique omnium creaturarum cognitio est cognitio de obiecto secundario, non primario; & sic non se habet ut per se assimilans Verbum in substantia generantis, quod solum requiritur per se quarto modo ad generationem substantialem illius: solum enim assimilatur substantialiter Patri in natura diuina, & hoc solum est de ratione generationis quatenus talis. Quod verò ultra hoc etiam creaturas attingat, inuenietur quidem in cognitione illa quatenus diuina, & infinita est, non quatenus substantialiter generatiua, quæ est alia formalitas, licet præsupponat illam concomitantiam ut conditionem.

18 Quare ulterius premimus fundamentum nostrum, & ostendimus etiam in formalitate illa notitiæ ut generatiuæ, & substantialiter productivæ Verbi, influere in quarto modo per se cognitionem creaturarum, licet per modum obiecti secundarij. Et deducitur ex simili probatione præced. conclusionis, insinuatque à D. Thom. loco supra cit. in hac quæst. 34. art. 3. Quia Verbum diuinum ex vi suæ caracteristicæ proprietatis procedit ut Verbum perfectè, & summè simile Patri, quia procedit ut splendor gloriæ, & figura substantiæ Dei, ut dicitur ad Hebr. 1. Sed non est perfectè simile Patri, nisi quatenus procedit ut Verbum factiuum omnium creaturarum, & ut Verbum omnipotens: procedit enim ut summa sapientia, proprium autem est sapientiæ summæ etiam se habere ut artem faciendi omnia, hoc enim etiam in sapientia summa includitur, & procedit ut omnipotens ad exequendum sapientiam suam, & ut habens virtutem creandi, & faciendi omnia, & ideas omnium creaturarum, quæ in ipsa diuina sapientia exprimuntur: hæc enim omnia pertinent ad intrinsecam similitudinem, & formalem rationem, qua Verbum procedit simile Patri in essentia, & attributis. Requiritur ergo per se quarto modo in cognitione gene-

Joan. à S. Thom. in 1. part. D. Th. Tomus alter.

rante Verbum cognitio sapientiæ diuinæ, etiam ut ars factiua est creaturarum, & ut habet ideas, & cognitio omnipotentia: si enim omnium attributorum essentialium cognitio per se requiritur ad processionem Verbi, ut Vasquez fatetur, quare non requiret cognitio omnipotentia, quæ est vnum ex attributis? Sed non potest stare cognitio omnipotentia, & idearum, & artis factivæ, nisi attingantur creaturæ, quæ se habent ut terminus omnipotentia, & idearum, & artis factivæ, nec discerni potest virtus creatiua à spiratiua vel generatiua ad intra, nisi quia illa est circa creaturas, iste circa personas: ergo si per se quarto modo requiritur cognitio potentia creatiua, ut creatiua, & ut discernitur à spiratiua, ut communicetur Filio, quia eum exprimit ut similem sibi, imò ut consubstantialem in creando, necessario in eodem modo perfectitatis requiritur attingentia creaturarum, ut terminus penes quem discernitur creatiuum à spiratiuo, & generatiuo, & exprimitur Verbum ut factiuum creaturarum. Nec requiritur ad hoc potentiam creatiuam realiter respicere creaturas, quia non consistit illa virtus causatiua in respectu reali ad effectum, imò quanto independentior ab affectibus, tanto potentior, quia magis effectus dependent ab illa, sed tamen quia illa virtus non potest intelligi ut causatiua, nisi alicuius causatiua sit, ideo si videtur ut creatiua, necesse est etiam videre cuius rei creatiua sit, scilicet creaturarum: & præsertim quia Pater videt se communicare Filio potentiam creatiuam, & non generatiuam in quarto modo per se, ergo in eadem perfectitate videt, & discernit creatiuam à generatiua, quod illa est creaturarum ad extra, hæc personæ genitæ ad intra: ergo attingit per se terminos utriusque potentia.

Denique Verbum diuinum procedit quarto modo per se ut expressio creaturarum, & ideas earum in se habens, cum sit imago intelligibilis, & similitudo expressa diuinæ sapientiæ, & hoc habent ideas per intrinsecam, & realem representationem, siquidem est naturalis representatio, & exemplar creaturæ formandæ, representatio autem naturalis, realis, & intrinseca est, non sicut significatio ad placitum, quæ est denominatio extrinseca; unde malè aliqui concedunt representationem idearum esse extrinsecam, & non intrinsecam, cum sit naturalis conceptus, & representatio sui ideati, non per dependentiam ab ideato, sed potius per dependentiam ideati ab ipsa; imò tunc est maior realitas in causa, quando minus dependet ab effectu, effectus autem magis ab ipsa: sed non potest communicari Verbo per se in quarto modo quod habeat representationem, & expressionem naturalem creaturarum, vel ideationem earum, nisi cognoscantur creaturæ quas exprimere, & ideare debet, & quomodo & qualiter ideandæ, & faciendæ sunt, nisi etiam ipsæ creaturæ ideatæ, & representatæ attingantur: nec enim intelligi potest cognitio perfectæ alicuius imaginis, & representationis, nisi cognoscatur id cuius est imago, & representatio: unde sicut non potest intelligi quod Deus alicui det virtutem ad aliquem effectum, nisi cognoscendo talem effectum ad quem datur illa virtus, nec quod infundat Angelo speciem representationis leonis, nisi intelligat leonem, cuius speciem, & representationem in mentem Angeli fundit, sic multo à fortiori non potest intelligi quod Deus generet Filium cui communicat omnium creaturarum ideas, & quod non intelligat ex vi talis processionis, & eadem perfectitate quarti modi ipsas creaturas, quarum sunt ideas expressivæ, cum hoc in ipso conceptu, & cognitione idearum inuoluatur.

Q

Soluntur

20 Ad fundamenta *suprà* posita pro sententia Scoti, & Vasquez prius respondendum est.

Ad primum fundamentum Scoti Respon. in primis non procedere in nostra sententia in qua dictio non est alia operatio, seu actio à cognitione, sed formaliter cognitio est, & sic non antecedit cognitio dictionem, sed ipsa cognitio dicitur Verbum, & cognoscitur dictum. Sed adhuc eius sententia admissa, non habet vim illa consequentia Scoti: Pro illo priori non intelligitur Verbum dictum: ergo pro illo priori non intelligitur Verbum, neque intuitiue, quia in illo non intelligitur dictum, neque abstractiue, quia Verbum sine existentia, seu abstrahendo ab existentia non potest intelligi: distingo antecedens, nō intelligitur Verbum dictum, terminatiue in se, & secundum reale exercitium originis, transeat, nō intelligitur obiectiue, nego: idem enim verbum, quod in alio posteriori originatur, & realiter procedit, in illo priori obiectiue attingitur, quia illa intellectio etsi à nobis concipiatur in illo priori, non tamen fertur in id solum quod in illo priori continetur, sed etiam in ea quæ ad alia signa posteriora pertinent: licet pro illis posterioribus signis exercenda, sed tamen etiam in illo priori cognoscibilia. Et ad instantiam, quia pro illo priori non videtur intuitiue, quia nōdum est, dico quod pro illo priori videtur intuitiue, quia illa prioritas non est durationis, & existentia, seu realitatis, sed intelligentia, & inadæquati conceptus; esse autem intuitiuam cognitionem non regulatur penes præcisionem, & inadæquationem nostrorum conceptuum, sed penes id quod est in re. Vnde cum illa prioritas nostræ intelligentia non excludat, quod in re sit existens, adhuc illa prioritas retinet intuitionem, quia retinet similitudinem cum ipsa realitate durationis, quæ in re existens est, licet ex vi præcisionis, & prioritatis rationis non importetur, aut non explicetur existentia, quia formalitas ibi præscinditur, non duratio consideratur: sufficit autem ad intuitionem, quod in re, & secundum durationem existens, & præsens sit id quod in illo priori consideratur.

21 Ad secundum fundamentum negatur antecedens. Ad probationem dicimus quod Filius in illa processione habet se vt obiectum cognitum, distingo, vt obiectum cognitum terminatiue, & vt res dicta transeat, motiue, & per modum speciei fecundantis intellectum, nego: Ergo est imago sui, nego consequentiam.

Ratio est, quia imago procedens per intellectum non dicitur imago respectu cuiuscunque obiecti, quod cognoscitur, aut exprimitur in illo, sed illius obiecti, quod se habet vt principium fecundans intellectum exprimentem. Obiecta autem quæ continentur in obiecto sic fecundante, & formante intellectum ad expressionem non se habent vt principium imaginis, vel vt id cuius talis est imago, sicut si formatur imago hominis, qui est pater filiorum, aut in signis, in litteris, vel bellicis rebus, ita vt qui videt imaginem, videt illum hominem vt insignem authorem talium factorum, vel patrem filiorum, non tamen imago illa est imago illorum filiorum, vel factorum, sed solum imago illius hominis, quia ad illius imitationem exprimitur. Sic ergo licet Deus ad exprimendum, & producendum Verbum cognoscat plura obiecta circa quæ terminatur talis cognitio, tamen obiectum cui per se assimilatur est essentia diuina vt fecundans intellectum Patris, reliqua verò obiecta attingit vt contenta in essentia, nec omnia illa

exercent rationem speciei fecundantis, sed solum essentia in quantum ipsa est per se primò intelligibilis, & intellecta, & ratione eius persona, & attributa, & reliqua omnia intelligibilia redduntur, sicut, & immaterialia, & sic Pater vt fecundatus essentia diuina, intelligibili producit imaginem suæ substantiæ cui directè assimilatur Verbum, reliqua verò exprimit quidem, & habet illa vt obiecta per se acta, sed non vt rationem, per se motiuam, & cui assimilatur vt principio, & consequenter nec dicitur imago illorum, sed tantum substantiæ Patris.

Ad fundamentum sententiæ P. Vasq. *suprà* allatum Respond. principium per se in quarto modo concurrens ad generationem Verbi esse id in quo assimilatur Patri, nec procedere ex notitia Spiritus S. & creaturarum tãquam ex principiis quibus assimilatur, & quorum sit imago; sed tamen procedere ea notitia horum obiectorum, tanquam ex omnino requisitis ad cognoscendum id in quo assimilatur Patri: sicut *suprà* ponderauimus quod debet assimilari Patri in virtute spiratiua, & hæc non potest cognosci à Patre sine attingentia Spiritus S. qui est terminus illius spirationis. Et debet assimilari Patri in omnipotentia, & in sapientia, vt factiua creaturarum, quæ nō possunt cognosci ab ipso vt communicentur Filio, nisi cognoscendo quorum sit potentia alia, & ars factiua, scil. creaturarum. Itaque multa obiecta cognosci debent per se perfectate quarti modi à generante, nō solum quia sunt id in quo directè Verbum assimilatur Patri, sed quia id in quo assimilatur Patri non cognoscitur sine illis propter connexionem impræcisibilem, sicut virtus spiratiua vt propriè spiratiua, & non creatiua nō potest intelligi sine termino talis spirationis, qui est Spiritus S. nec creatiua potentia, & ars factiua creaturarum sine creaturis vt terminis istarum potentiarum. Ergo si per se in quarto modo requiritur cognitio eius in quo assimilatur Filio Patri, per se etiam requiritur cognitio eius sine quo hoc assimilatum non potest intelligi. Vnde per se requiritur ad productionem Verbi cognitio virtutis spiratiuæ, & creatiuæ, quia in his Verbum assimilatur Patri; cognitio autem Spiritus S. & creaturarum non tanquam id cui Filius assimilatur, sed vt terminus per se connexus cum ista virtute, in qua Filius assimilatur Patri.

23 Secundò, obiici potest in fauorem sententiæ Vasquez. Prius origine intelligitur in Deo processio Verbi, quàm processio Spiritus S. siquidem processio Spiritus ex sua characteristica ratione supponit Verbum vt productum, quia ab illo est vt à principio quod simul cum Patre debet procedere: ergo pro illo puncto, & signo, quo nondum intelligitur produci Spiritus S. neque intelligitur cognosci. Patet consequentia. Productio Verbi est cognitio: ergo pro illo signo quo est prior vt productio, etiam est prior vt cognitio, & quidquid pro illo signo non conducit ad productionem, etiam non conducit ad cognitionem, productio siquidē illa est cognitio: sed pro illo signo Spiritus S. non est terminus productionis, & multò minùs vt principium: ergo neque pro illo signo est terminus cognitionis, quia procedit Verbum, neque principium: ergo nec per se in quarto modo requiritur, quia solum requiritur per se in quarto modo illud quod se habet vt principium aut terminus. Quod secus accidit in cognitione, quia Pater intelligitur cognoscens in eo signo antequam intelligatur Filius passiuè productus, quia etiam pro illo signo, & antecedētia intelligitur cognitio Patris vt notionalis, & generatiua, licet Filius nondum intelligatur generatus

nitus passivè, & existens. Actio autem seu cognitio ut generatiua hoc ipso quod concipitur ut via, & origo, concipitur ut per se quarto modo includens terminum suum, & cum Verbum sit terminus talis cognitionis, per illam attingitur in quarto modo per se. At verò Spiritus sanctus pro illo signo productionis Filij nec intelligitur ut terminus, neque ut principium illius productionis: ergo neque illius cognitionis.

24 *Confir.* quia si per se procederet in quarto modo ex cognitione Spiritus sancti esset Filius imago Spiritus S. nam Verbum modò exprimit, & repræsentat Spiritum S. & creaturas. Non ergo deficit illi ratio imaginis ex defectu similitudinis: solum ergo deficere potest ex eo quod Spiritus S. non se habet ut principium huius assimilationis: ergo si se habet ut obiectum per se quarto modo requisitum, & motuum, nihil ei deest ut sit imago illius: nec enim aliter imagines ab hominibus depictæ sunt imagines alicuius obiecti, nisi quia accipitur ut obiectum per se mouens ad talem expressionem.

Confirm. secundò, quia si intelligeremus per impossibile non dari personam Spiritus sancti, neque creaturas esse possibiles, & cognititas, adhuc saluaretur generatio Verbi, & processio per intellectum: ergo cognitio Spiritus sancti, & creaturarum non requiritur per se quarto modo. Conseq. patet, quia illud solum requiritur per se quarto modo, quo posito sequitur actio, & effectus, & quo ablato, tollitur. Ergo si non considerato Spiritu S. & creaturis, adhuc remanet generatio Verbi, non requiritur per se cognitio illius. Antec. verò prob. quia remote Spiritu S. adhuc remanet principium generationis Verbi, & terminus, principium, quia manet Pater cum natura diuina communicabili per intellectum; terminus, quia manet Verbum: ergo remanet quidquid per se requiritur ad generationem filij. Nam quod tunc non consideretur ut spirator, non obstat, quia prius est esse Filium, quam spiratorem: nec enim sub ratione spiratoris est terminus generationis paternæ, sed sub ratione filij ad spiratorem enim per se non terminatur generatio, sicut Græci intelligunt Filium procedere ut filium, nec tamen esse spiratorem, quia apud ipsos non procedit Spiritus S. à Filio, sed à Patre solum, & tamen secundum ipsos secunda persona procedit ut filius, non ergo per se in quarto modo filius petit cognitionem spiratoris, neque Spiritus S.

25 *Respon.* ad principale argumentum negando consequent. Ad probat. dicitur quod productio Verbi est cognitio, sed non est cognitio solius Verbi, aut principij, & naturæ cui assimilatur Verbum sed etiam omnis obiecti, sine quo id quod communicatur Verbo non potest intelligi, sicut non potest intelligi vis spiratiua sine Spiritu sancto virtus creatiua sine creaturis. Quando autem infertur quod sicut productio Verbi est prior processione Spiritus sancti, ita & cognitio, concedimus: & similiter quod quidquid non conducit ad productionem, non conducit ad cognitionem illam prout generatiua, & expressiua est in quarto modo per se. Et eum additur quod pro illo signo Spiritus sancti non conducit, neque ut terminus productionis, neque ut principium, distinguo, ut terminus productionis formaliter, & immediatè productus in illa processione Verbi, concedo; mediatè, & virtualiter productus, seu potius producendus, nego: licet enim per processionem, & generationem Verbi, terminus illius productionis sit solum Verbum, tanquam terminus genitus, tamen quia communicatur ex vi talis generationis Verbo, quod sit spirator, & in virtute spiratiua continetur terminus eius, qui est Spiritus sanctus etiam ex vi talis generationis Spiritus sanctus conducit non ut terminus productus formaliter, & genitus, sed ut terminus spirabilis, & virtualiter contentus in virtute spiratiua quæ pro illo signo communicatur Filio. Vnde cum infertur: Ergo pro illo signo non conducit Spiritus sanctus, ut cognitio si non conducit ut productus, distinguo, non conducit ut cognitio per modum termini spirabilis, & virtualiter contenti in virtute spiratiua, nego; ut terminus in illo signo genitus vel productus formaliter, concedo. Non conducit autem in quarto modo per se solum ille terminus, qui in illo signo formaliter producitur, sed etiam ille terminus qui virtualiter continetur in virtute per se quarto modo communicata Verbo pro illo signo suæ generationis, quia talis virtus nec potest communicari sine continentia sui termini, neque sine illo cognosci, quia talis virtus essentialiter petit talem terminum, nec sine illo cognoscitur. Ergo si per se quarto modo cognoscitur virtus, cognoscitur, & terminus, non ut ibi productus, sed ut in illa virtute contentus.

Ad primam *Confir.* *Respon.* ex *supra* dictis ad 26 fundamentum Scoti. Et instatur illud argumentum in ipsa sententia Vasquez, quia ipse fatetur ad generationem Verbi requiri quarto modo per se cognitionem ipsiusmet Verbi, & tamen non est imago sui: ergo non est imago omnis obiecti ex cuius notitia procedit, sed tantum illius quod se habet ut principium fecundans intellectum, & per modum rationis formalis exprimentis, non illius quod se habet ut contentum, aut connexum, vel requisitum ad tale principium; non tamen ex illo dicitur procedere, nec illud imitari imago quæ exprimitur. Quare Spiritus sanctus non dicitur esse obiectum per se quarto modo requisitum ad generationem Verbi ut obiectum motuum, vel ut ratio formalis cognoscendi, sed ut obiectum terminatiuum per se annexum, & correlatiuè se habens cum obiecto motiuo, seu cum eo quod per se quarto modo communicatur Verbo, scilicet cum spiratione actiua. Et ideo non est Filius imago illius, quia non est principium cui directè assimilatur, & à quo exprimitur, est tamen per se quarto modo requisitum, quia per se connexum, & correlatiuum cum eo quod per se communicatur, scilicet cum vi spiratiua. Imagines autem quæ ab hominibus depinguntur solum habent pro obiecto motiuo id ad cuius instar fiunt, & illius imagines per se dicuntur. Si autem aliquid aliud expriment ut per se illi obiecto annexum, non dicuntur imagines illius.

Ad secundam *Confir.* *Respon.* negando anteced. Ad probationem dicitur, quod si per impossibile non esset Spiritus sanctus aut filio non communicaretur à Patre quod esset spirator, non maneret principium Filij secundum omnia quæ sibi debentur communicari, quia licet maneret natura diuina communicabilis per intellectum, non tamen plene communicabilis, si non communicaretur virtus eius spiratiua, sicut si non communicaretur Filio voluntas, aut non esset plena, & perfecta diuina natura, si in se vim spiratiuam non haberet, sicut si voluntatem non haberet. Quod si, & voluntatem, & vim spiratiuam haberet, esset implicatio in adiectis dicere quod Spiritus S. esset impossibilis, si maneret virtus spirandi ipsum, aut quod cognoscereetur vis spiratiua, & ipsa spiratio actiua, & non Spiritus S. cum correlatiua sint. Et ad instantiam, quod prius est esse Filium quam esse spiratorem, negamus: nam si Filius est perfecte similis, & consubstantialis Patri, implicat esse Filium, & non spiratorem.

Q. 2

toem, sicut repugnat esse Filium, & non habere naturam diuinam, & attributa. Et cum dicitur quod non est terminus generationis ut spirator, sed ut Filius, dicimus quod non est terminus productus, & genitus ut spirator, sed ut Filius, tamen ut sit Filius debet esse spirator genitus, sicut debet esse Deus genitus, eo quod esse spiratorem licet non sit terminus productus, est tamen terminus communicatus, sicut D. itas ipsa, & attributa: omnia enim quæ habet pater præter se patrem communicat Filio per se, & in quarto modo ut perfecte sit simili sibi; habet autem inter alia esse spiratorem. Nec obstat quod Græci intelligunt Filium esse Filium, & non spiratorem: hoc enim falsum est, & non obstat, nec præiudicat nostræ sententiæ, quia Græci non solum dicunt quod filius non est spirator in quarto modo per se, sed quod in re spirator non est, & sic debent cogi ut fateantur Filium non manere perfecte similem Patri, quia non omnia quæ Patris sunt participat. Sed sententia Vasquez cum in re admittat Filio communicari spirationem actiuam, ut fides docet, debet cogi fateri quod si in re communicatur, etiam in quarto modo per se communicatur, quia illa communicatio pertinet ad perfectam similitudinem Filij cum Patre: sicut si aliquis diceret non communicari immensitatem aut æternitatem Filio, non præiudicaret illa falsitas nostræ sententiæ, qua dicimus per se quarto modo communicari Filio, quia per se pertinet ad similitudinem perfectam Filij cum Patre in natura: sic est spiratio actiua.

Dices: Pater prius intelligitur Pater, quæ spirator, sicut prius intelligitur intelligens, quæ volens, & prius origine generat, quæ spirat: generat enim solus, spirat autem simul cum Filio: ergo etiam prius intelligitur Filius in esse Filij, quæ spirator, cum Pater in ratione Patris correlatiue intelligatur ad Filium.

Respond. Patrem prius intelligi generare quæ spirare, & nostro modo intelligendi prius intelligere, quæ velle, si sumatur ly *velle* elicitiue, non tamen si sumatur obiectiue, quia cum intelligit, habet pro obiecto intellecto non solum essentiam, & intelligentiam, sed etiam voluntatem, & ipsum velle, & cum generat, licet nondum spirare elicitiue, & exercite intelligatur, iam tamen habet vim spiratiuam, & ipsam communicat Filio, & consequenter cognoscit ipsam, & ipsam spirationem ut obiectum, & ut aliquid per se communicabile Filio, & ibi includitur etiam eadem perfectitate cognitio Spiritus S. ut termini talis spirationis.

28 Vltimò arguit ad probandum creaturarum cognitionem per se non requiri ad generationem Verbi. Et vrgeri possunt, tum ea quæ adduximus pro Spiritu S. quia alias esset imago creaturarum, & haberet illas pro principio, si per se ex earum notitia procederet; tum quia creaturæ futuræ non per se requiruntur ad generationem Verbi, sed solum concomitanter, quia sine illis posset æquè bene generari Verbum per ea quæ habet ad intra: ergo similiter sine creaturis possibilibus, quia non minus sunt extra diuinam naturam, quæ creaturæ futuræ: tum quia etiam si aliqua creatura redderetur impossibilis, adhuc Verbum procederet intra Deum, alias si creaturæ non essent possibles, Verbum non procederet, quod est facere eius processionem dependentem à possibilitate creaturarum, & cum possibilitas illa non sit Deus, quia creaturarum possibilitas est, dependeret processio Verbi ab aliquo extra: ergo si esset processio Verbi non stante possibilitate creaturarum, non influit cognitio earum in quarto modo per se. Tum denique quia ef-

sentia diuina secundum se, & secundum absolutam perfectionem considerata ita perfecta est, ut sine creaturis possibilibus æquè diuina, & perfecta maneat sicut modò: ergo æquè fecunda ad communicandum seipsam per generationem: ergo processio Verbi secundum suam formalem rationem independens est à creaturis possibilibus; & sic non requiritur earum cognitio in quarto modo per se.

Confirm. ex D. Anselmo in *monologio* cap. 29. ubi inquit, quod siue cogitetur Deus nulla alia existente creatura, siue aliis existentibus, necesse est Verbum coæternum illi esse cum illo. Item D. Thom. in *quæst. 4. de verit. art. 5. in fine corp.* dicit, quod *Principaliter, & quasi per se Verbum refertur ad Patrem, sed ex consequenti, & quasi per accidens refertur ad creaturas: accidit enim Verbo, ut per ipsum creatura dicatur.* Et solut. ad 5. inquit, quod *Verbum ex respectu reali originis quem importat, efficitur personale, ex quo ad creaturam habitudinem non habet.* Quomodo ergo nos dicimus per se in quarto modo procedere Verbum ex cognitione creaturarum, si dicit D. Thom. quod hoc accidit Verbo, & quod ex respectu reali originis habitudinem non habet ad creaturam, & tamen sola habitudo originis sufficit ad saluandam generationem Verbi: ergo non requirit per se in quarto modo habitudinem ad creaturas, & cognitionem earum, cum sine ipsa saluetur generatio Verbi.

Respond. ad primam probationem ex *suprà* dictis, & ex D. Thom. in *hac quæst. 34. art. 3. ad 3. & in quæst. 4. de verit. art. 5. ad 2.* quod Verbum est creaturæ, sed non à creatura, quia cognitio qua Verbum procedit non sumitur à creaturis, sed ab essentia Dei, quæ est forma, qua intellectus diuinus cognoscit, & consequenter cuius similitudinem exprimit Verbum tanquam principium à quo est; & idè est eius imago. Creaturas verò exprimit, non tanquam principium à quo est, sed tanquam obiectum terminatum, ad quod potentia creatiua se habet, & circa quod versatur. Vnde ratione essentia diuinæ, & omnipotentia quam accipit Verbum à Patre se habet ad creaturas, ut dicit S. Thom. *loco cit. quæst. 34. in corp. artic.* Naturam autem diuinam, & omnipotentiam accipit Verbum in quarto modo per se.

Ad secundam probationem negatur consequent. 30 Et est disparitas inter creaturas futuras, & possibles, quod creaturas esse futuras dependet à voluntate libera Dei; creaturas verò esse possibles antecedit omnem voluntatem, & actum liberum eius, & præcisè dependet ab ideis diuinis, & omnipotentia executiua earum. Terminatio autem libera Dei ad obiectum cum possit abesse, & adesse, implicat quod per se requiratur ad generationem necessariam, & naturalem, qualis est generatio Verbi. Possibilitas autem creaturarum est omnino necessaria, & per se connexa cum ideis, & omnipotentia, nec potest ista perfecte cognosci sine illa, ut latè tractauimus *suprà* disp. 11.

Ad tertiam probationem dicitur Verbi processionem non dependere à creaturarum possibilitate, sed à cognitione essentia reddente creaturas possibles per suas ideas, & per suam potentiam. Quod si essentia diuina per ideas non redderet creaturam aliquam possibilem, sed remaneret impossibilis, non esset eadem essentia quæ nunc, quia non esset participabilis eo modo quo nunc; & sic non propter impossibilitatem creaturarum, sed propter imparticipabilitatem diuinæ essentia esset alia essentia, & consequenter alia Verbi generatio. Neque ex hoc inferitur quod sit tam necessaria possibilitas

bilitas creaturarum, sicut natura diuina, aut quod hæc sit dependens à creaturis. Neutrum sequitur: nam non est ita necessaria possibilitas, quia possibilitatis necessitas est consecuta ex necessitate diuinæ essentiae; & sic minor ipsa, sed tamen ita illi connexa, ut non possit tolli vna, nisi tollatur alia, sicut veritas conclusionis est minus necessaria, quam veritas principiorum, & tamen si conclusio non posset sequi ex principiis, veritas principiorum deficeret. Nec est dependens necessitas Dei à creaturis, sed è contra, sed tamen ex Deo sine vlla dependentia à creaturis, sequitur de necessitate possibilitas creaturarum, immò etiam vna persona diuina dimanat necessariò ex alia, nec tamen dependet ab illa, sed hæc resultantia est per abundantiam diuinæ participabilitatis, & infinitatis erga creaturas, non per dependentiam, quæ tamen abundantia si in Deo non esset, plenus Deus non esset. Et quia per se exigitur ad generationem Verbi cognitio illius abundantiae, per se etiam exigitur cognitio creaturarum quæ inde participantur.

32 Ad quartam probat. distinguimus antec. Essentia diuina est æquè perfecta sine creaturis, & sine possibilitate earum sicut modò est, distinguo, sine creaturis ut consecutis à se, nego; ut constituentibus se, transeat. Nec enim exigitur ad constituendam diuinam essentiam possibilitas creaturarum; requiritur tamen quòd possibilitas creaturarum consequatur ex Deo, & ipsa essentia diuina ut participabilis à creaturis est intrinsecè pertinens ad perfectionem Dei. Vnde non potest perfectè cognosci essentia, & potentia Dei, nisi cognoscatur ut participabilis à creaturis, nec ut participabilis attingi potest, non attractis creaturis ut termino talis participabilitatis. Sic ergo antecedenter ad creaturas inuenitur in Deo omnis perfectio, & fecunditas ad generandum, sed consequenter requirit creaturas tanquam terminum per se annexum illi perfectioni, qua Deus constituitur in se, eo quòd illa perfectio qua Deus constituitur est superabundans, & participabilis à creaturis, nec ut talis potest intelligi sine creaturis ut consecutis à se, non ut constituentibus vel perficientibus se, sed à se perfectibilibus.

Ad Conf. Resp. inprimis Anselmum in illo loco solum loqui de creatura existente, non de possibili, & ita non est ad rem. Secundò, tam ipse Anselmus quàm D. Thom. solum intendunt creaturas non requiri per se, & in 4. modo tanquam ratio, & obiectum primum, & ut principium ipsius Verbi, non tamen ut terminus connotatus, & consecutus de necessitate ad potentiam, & ideas, quæ communicantur Verbo in 4. modo per se, & sine creaturis ut consecutis, & connotatis non possunt cognosci, quia esse creatorem, & factuum creaturarum, quomodo stat sine attingentia illarum? Tertiò, D. Thom. non dicit Verbum non procedere per se ex cognitione creaturarum, & hoc accidere ipsi, sed dicit non referri per se ad creaturas, sed principaliter, & per se ad Patrem à quo originatur, ex consequenti verò, & secundariò, & quasi per accidens ad creaturas, id est, per aliud, non per accidens, ut opponitur necessariò, & per se, quod verissimum est, cum ad Patrem referatur relatione reali originis ut ad principium suum, ad creaturas relatione rationis, ut ad quid consecutum. Et cum dicit *solutione ad 5.* quòd Verbum ex relatione ad Patrem habitudinem non habet ad creaturas, hoc verum est quòd ex illa habitudine non habet nisi originari, & esse Filium, sed quòd se habeat ad creaturas non habet ex relatione ad Patrem, sed ex natura diuina, & omnipotentia quæ sibi communicatur à Patre, *Joan. à S. Thom. in 1. part. D. Th. Tomus alter.*

ut dicit S. Thom. in hac q. 34. art. 3. ad 1. ex eo videlicet quòd est genitus Deus, vel genitus Creator. Et per hunc modum, inquit, importatur relatio ad creaturam nomine Verbi. Si per hunc modum: ergo 4. modo per se, quia esse Deum genitum, & Creatorem genitum per se in 4. modo conuenit Verbo. Et sic probatio nostra qua contra Vasquez probamus procedere Verbum per se in quarto modo ex cognitione creaturarum, quia ex cognitione creaturæ potentia D. Thom. est.

De processione Spiritus S. quòd non procedat 33 ex amore libero creaturarum existentium, constat ex dictis, quia abesse potest ille amor, non autem processio Spiritus S. licet concomitanter ipse amor Spiritus S. liberè se habeat ad creaturas. Ex amore autem libero creaturarum possibilitum non procedit, quia talis amor non datur, ut *suprà circa q. 19.* latè ostendimus. Si tamen liber ille amor esset non conduceret ad processionem Spiritus S. quia hæc omnino necessaria est; & ita amor creaturarum nunquam pertinet ad perfectionem amoris diuini, nec nisi concomitanter in processione Spiritus S. dari potest. Nec Scotus posuit processionem Spiritus S. esse liberam, sumendo liberum pro contingente quod deesse potest, sed pro voluntario, seu non coacto, ut opponitur violento, non ut opponitur necessario. Cognitio autem creaturarum pertinet ad perfectionem diuinæ cognitionis qua se comprehendit, & qua per se quarto modo attingit potentiam creaturam quam communicat Filio.

ARTICVLVS. III.

Utrum si Spiritus S. non procederet à Filio, distingueretur ab illo?

Dvo in hoc articulo inuoluuntur. Alterum quod supponit; alterum quod inquit. Supponit Spiritum S. procedere à Filio. Inquit an distingueretur ab illo, si ab eo non procederet. Illud primum licet supponatur de fide, tamen quia circa ipsum valde tenaciter à Græcis erratum est, operæ pretium videtur, punctum erroris eorum aperire, & Ecclesiæ contra ipsos stabilire definitionem.

Græcorum error circa processionem Spiritus S. reiectus.

Post hæresim Macedonij, qui Spiritus S. diuinitatem apertè negauit, ut *suprà disp. 12. art. 1.* vidimus, exurrexit in Concilio Ephesino nouus Græcorum error circa processionem Spiritus S. nam Theodoretus obiecit D. Cyrillo in contradictione 9. anathematis, quòd Spiritus S. non procedit à Filio, quia id Scriptura non dicit, sed quòd à Patre procedit, & eodem modo id ponitur in Symbolo Concilij Nicani primi, & Constantinopolitani. Ita habetur obiectio Theodoretis in ipso Concilio Ephesino *tomo 2. cap. 31.* Qui errori sic insurgenti primus restitit S. Cyrillus Alexandrinus in *defensione eiusdem noni anathematis, & in epist. la 10. & in lib. 1. de fide ad Reginas, aliisque pluribus locis.* Ut autem docet S. Th. in hac q. 36. a. 2. ad 3. fuit primus expressus hic error à Nestorio, & Nestorianis in quodam Symbolo ab ipsis introducto, à Synodo Ephesina damnato, vnde sumpsit Theodoretus. Sed tamen Theodoretus abdicato à Nestorianis studio, eorum quoque errorè condemnauit, verèque ab eis resipuit, ut ex pluribus eius epistolis doctè colligit

colligit Cardinalis Baronius anno Christi 436. n. 11. Sed & omnia Theodoretæ scripta contra S. Cyrillum in V. Synodo generali Sanctorum Patrum sententia condemnata sunt in collatione 1. ubi vocantur impia scripta Theodoretæ, quæ contra rectam fidem, & Ephesinam primam sanctam Synodum, & contra sanctæ memoriæ Cyrillum, & eius duodecim capitula exposuit. Et tamen in fine collationis quinta, addit S. Synodus non ante fuisse Theodoretum à Chalcedonensi Concilio susceptum, nisi prius anathematizasset Nestorium. Quare cum à Nestorij Symbolo illum errorem hauserit Theodoretus, & ipsum in contradictione non anathematizari contra Cyrillum defenderit, cum omnia hæc damnata ab ipso referantur in V. Synodo generali, eiusque scripta contradicentia Cyrilli anathematismis fuerint condemnata, videtur in ipso exorientis huius erroris initio ipsum omnino fuisse sopitum aut repressum, etiam ab ipsis Patribus Græcis.

Cæterum inuenitur repullulasse hinc error in posterioribus Græcis Authoribus, etsi cum aliqua moderatione. Nam D. Thom. in hac eadem quæst. 36. art. 3. ad 3. respondens argumento deducto ex autoritate Damasceni lib. 1. de fide cap. 11. ubi dicit, quod Spiritum S. ex Filio non dicimus, Spiritum vero Filij nominamus, responder plures in hoc fuisse secutos Theodoricum Nestorianum (Theodoretum legendum puto) inter quos fuit etiam Damascenus. Quare hic error ita propagatus est, quod tamen sese explicuerit, non omnino negando Spiritum S. dicere ordinem ad Filium, quod tamen in primo initio huius erroris videtur negasse Theodoretus, non solum negando Spiritum S. procedere ex Filio, sed neque per Filium. Vnde D. Thom. non absolute dixit Damasc. habuisse errorem Theodoretæ, sed secutum esse ipsum (scilicet in aliquo) nec enim in omnibus esse secutum idem D. Thom. agnoscit quæst. 10. de potentia art. 4. ad ultimum, ubi refert epistolam Theodoretæ, dicentis Spiritum S. neque à Filio esse, neque per Filium; cum tamen Damascenus ponat esse per Filium, sed non à Filio. Et sic aliquantulum moderati sunt posteriores Græci priorem errorem, agnoscendo esse per Filium, & esse Spiritum Filij, sed non à Filio. Alij verò Patres Græci, qui circa tempora Damasceni, vel paulò antè floruerunt, ut Anastasius Synaita, qui fuit ante sextam Synodum generalem, & Sophronius, qui ante eandem Synodum floruit, & Tharastius Patriarcha quia fuit ante septimam Synodum, rectè de hoc puncto videntur sensisse, nec contrarium dogma propugnasse.

Luculentius postea hanc Græcorum doctrinam, & explicationem expressit Theophylactus, Ioanne quidem Damasceno, & alijs Patribus relatis recentior, licet de tempore quo vixerit, & floruerit non omnino constet, alijs quidem ut Panuino in Fastis sub Basilio seniore sub annum 881. alijs, ut Sixto Senensi sub Michaële Porphyrogenito circa annum 842. alijs verò, ut Baronius sub Michaële Duca ad annum Christi 1071. ut in eodem anno numero 15. & sequentibus pluribus probat, & quidem satis probabilibus coniecturis. Ut ut est, is author Græcorum errorem suo tempore vigentem circa hunc articulum de processione Spiritus S. ita declarauit ac distinxit super c. 3. Ioannis ad illa verba. Non enim ad mensuram dat Deus spiritum. Latini, inquit, malè hæc exponentes, & minus rectè intelligentes dicunt quod Spiritus etiam ex Filio procedat. Nos autem hoc primum dicimus ad eos, quoad aliud sit ex quopiam, &

aliud esse cuiusdam; ut Spiritus est quidem Spiritus Filij absque dubio, & ab omni Scriptura approbatur: ceterum esse ex Filio, nulla scriptura testatur ut ne duo principia Spiritus introducamus Patrem, & Filium. Et infra: Dicitur autem Spiritus esse Filij, secundum quod virtus, & veritas, & sapientia. Spiritus autem sanctus, & veritatis, & fortitudinis, & sapientia Spiritus ab Isaia describitur. Et aliter, quia per Filium hominibus datur, propterea Filij dicitur. Crede igitur tu à Patre Spiritum quidem proficisci, per Filium autem dari creaturæ. Hæc Theophylactus.

Feruebat per id tempus Græcorum schisma, quod 4 apertè proruperat temporibus Leonis IX. sub annum 1053. atque validè Græcorum Doctores inter quos Theophylactus, quæstionem hanc de Spiritu S. processione ventilabant, ita ut non modicum Latinis Catholicis negotium facerent. Vnde in Concilio Barensi (apud Barium in Apulia) coacto ab Urbano Papa II. circa annum 1097. cum quæstio satis inuolueretur, Græcis non improbabili occurrentibus) ut inquit Vvillhelmus Malmesburiensis de gestis Pontificum Anglorum lib. 1. Pontifex Anselmi recordatus, exclamat: Pater & Magister Anselme Anglorum Archiepiscopo, ubi es? Ille ubi se vocari audiuit, in pedes constitit. Quem Apostolicus compellens: Nunc, inquit, Magister opus est scientia, opus eloquentia tua opera. Veni, ascende huc, & defende matrem tuam Ecclesiam, quam Græci labefactare conantur. Sic S. Anselmum ad disputandum cum Græcis Papa Urbanus tunc accendit. Nec intento suo fraudatus est. Nam illos S. Anselmus omnino conuicit. Et quidem illius Consilij acta perierunt Sed Anselmi disputatio & rationes in libro quem de Processione Spiritus S. edidit permanent.

Deinde verò contra Græcos actum est tum 5 in Concilio Lateranensi sub Innocentio III. tum in Lugdunensi sub Gregorio X. tum denique in Florentino sub Eugenio IV. in quibus constanter definitum semper fuit Spiritum S. ex Patre, & Filio procedere. Sed Græci explicauerunt amplius mentem suam, nempe se nolle concedere quod Spiritus S. procederet etiam ex Filio, quia existimabant per hoc poni à Latinis duo principia Spiritus S. nec esse vtramque personam vnicum illius emanationis principium, quia processio ex aliquo apud ipsos designabat processionem ex aliquo ut à primo principio, non accipiente ex alio. Vnde aliquo modo concedebant respectum emanationis à Filio, dummodo non significaretur procedere ex illo, sed per illum. Et sic multi concedebant procedere à Patre per Filium, hauriri, scaturire, profluere à Filio, sed non procedere à Filio. Et hunc modum loquendi viguisse apud Græcos D. Thomas annotauit, tum in opusc. 1. contra errores Græcorum post c. 32. §. Volunt autem, ubi refert Græcos dicere, quod quamuis probetur Spiritum S. esse, existere, spirari, emanare, & profluere à Filio, non tamen est concedendum quod à Filio procedat; hoc enim, inquit, in nulla præmissarum autoritatum continetur; neque etiam in autoritate Sacre Scripturæ. Et in hac q. 36. art. 2. Etiam, inquit, ipsi Græci processionem Spiritus S. aliquem ordinem habere ad Filium intelligunt: concedunt enim Spiritum S. esse à Patre per Filium. Et quidam eorum dicuntur concedere, quod sit à Filio, vel profluat ab eo, non tamen quod procedat. Quod videtur vel ex ignorantia, vel ex proteruitate esse. Ita D. Thom.

Quapropter res ista in Concilio Florentino summa diligentia pertractata est, & per plures sessiones disputata, præsertim quoad duo, in quibus Græci à Latinis dissentiebant.

Primum

Primum, quod licet in Nicæno, & Constanti-
nopolitano Conciliis non fuerit in Symbolo ex-
pressa illa particula *ex Filio*, licuisse tamen id postea
addere, & expressè ponere, quia ista non est addi-
tio ad fidem antiquam, sed eiusdem maior explica-
tio, & expressio.

Secundum, quod Filius non procedit ex Pa-
tre, & Filio tanquam ex duobus principiis, aut cau-
sis, ut ipsi loquebantur, sed tanquam ex vno princi-
pio, quia vnica virtute spiritali, & vnica ratione spi-
rationis procedit Spiritus S. à Patre, & Filio, & idem
est procedere ex vno atque ex alio quia vtraque
persona æquè primò est principium Spiritus S. nec
est maior vis, & significatio in Verbo *profluere*, &
emanare, quàm in verbo *procedere*, nec vnum magis
exprimitur in Scriptura, quàm aliud. Nec propterea
Filium esse causam Spiritus Sancti, quia ab eo pro-
cedat, sicut nec Pater est causa ipsius, aut causa Filij,
quia procedunt ab eo.

7 Quare in Concilio Florentino in ultima sessio-
ne, cum de componenda pace inter Græcos, & Lati-
nos ageretur, præcipui inter ipsos agnouerunt Lati-
nos verè, & iuxta Scripturas, & SS. PP. asserere quod
Spiritus S. ex Patre, Filioque procedit, quando-
quidem ipsi iuxta sacros Doctores etiam fateban-
tur ex Patre per Filium procedere, à Filio mitti,
profluere, scaturire, quod totum erat in veritate di-
cere quod ex Filio, & Patre accipiebat esse, & quod
Latini non ponebant Patrem, & Filium esse duas
causas aut principia Spiritus S. sed vnicum prin-
cipium; & sic cum ipsis concordari debere etiam
in illa voce *ex Filioque procedit*. Ita ibi coram Im-
peratore Orientali affirmavit Gregorius Schola-
rius vir inter eos doctissimus, Iosephus Patriarcha
Constantinopolitanus, Ruthenus Episcopus,
Cardinalis Bessarion, Mytilenensis Præsul, alii-
que qui præcipui habebantur, & tandem omnes
alii, qui ante vehementissimè repugnabant, ex-
cepto Marco Ephesio, qui in sua perfidia per-
mansit. Sic ergo quæstio ista disputationibus ven-
tilata est, ut ad differentiam in verbis cum aliquo-
rum proteruia deuoluta sit, & ut rectè dixit S.
Thom. *quest. 1. de potentia artic. 4. Si quis rectè con-*
sideret dicta Græcorum, inueniet quod à nobis magis
differunt in verbis, quàm in sensu. Verbum enim
procedendi, ut ipse D. Thom. inquit in hac *quest.*
36. art. 2. communissimum est inter omnia, quæ ad
originem pertinent. Vnde qui concedunt à Filio
profluere aut quomodocumque oriri Spiritum
Sanctum necesse est quod ab ipso procedere di-
cant.

8 Licet autem veritas hæc in pluribus Conciliis
definita sit ab Ecclesia, post schisma quidem Græ-
corum quod temporibus Leonis I X. prorupit in
Concilio Barenfi sub Urbano II. in Lateranensi
sub Innocentio III. in Lugdunensi sub Gregorio
X. in Florentino sub Eugenio IV. ipsis Græcis con-
sentientibus, & concordantibus; ante schisma verò
in Concilio Nicæno I. in confessione fidei, videtur-
que virtualiter tradita in aliis Conciliis, vbi appro-
bata est epistola 10. Cyrilli, vbi expressis verbis do-
cuit Spiritum S. à Filio effundi, aut emitti, aut proce-
dere; illa autem epistola approbata est in VI. Syno-
do *actione 17.* & in V. Synodo *actione 6.* & in Ephe-
sina 2. *tomo cap. 3. & 5.* Et sic refertur in decretis de
consecratione dist. 5. can. penultimo, vbi Gratianus ex
epistola illius Concilij Ephesini ad Nestorium dicit,
quod *Spiritus Sanctus ex Filio, sicut ex Patre proce-*
dit. Attamen inquirere potest aliquis, quibus funda-
mentis Ecclesia in his Conciliis ducta sit ad hoc de-
finiendum.

Dicimus ergo Ecclesiam inuenisse sufficiens
fundamentum ad hoc definiendum & declaran-
dum, tum in Scriptura, tum in concordia Patrum
expositione ante ortum schisma Græcorum, quæ
æquiualeat traditioni Ecclesiasticæ & Apostolicæ.
Quibus additæ sunt Theologicæ rationes ex prin-
cipiis fidei deductæ, quas latius tradit S. Thom. 4.
contra Gent. cap. 24. & in præsentis quæst. 36. art. 2. re-
duxit ad tres.

Fundamentum verò ex Scriptura, & Patribus late
adduxit S. Thom. *opuscul. 1.* quod contra errores Græ-
corum composuit de mandato Urbani I V. & plura
testimonia adducit à *cap. 32.* Post modum verò in
ultima definitione qua Ecclesia rem hanc determi-
nauit, prolixè, & latissimè authoritates adductæ sunt
in Concilio Florentino per plures sessiones. Nos so-
lùm summam aliqua præcipua testimonia carpe-
mus. Qui plura videre voluerit, ad prædictos fontes
recurrat.

Ex Scriptura ergo habentur tres propositiones, 10
quæ stare non possunt sine vera processione Spi-
ritus S. à Filio. Prima, quia Christus dicit quod *Spi-*
ritus S. de meo accipiet. Ioan. 16. Secunda quod dicit
se missurum Spiritum S. Ioan. 15. & 16. Tertia quia
Spiritus S. dicitur *Spiritus Filij* ad Galat. 4. *Misit*
Deus Spiritum Filij sui in corda vestra, Roman. 8.
Siquis Spiritum Christi non habet, hic non est eius.
Quod verò istæ locutiones stare non possint sine
vera, & reali processione, sic patet. Nam nulla per-
sona accipit aliquid ab alia, nisi procedendo ab illa,
sed Spiritus Sanctus accipit à Filio: ergo procedit ab
illo. Minor constat ex dicto loco Ioan. 16. *Ille me*
clarificabit, quia de meo accipiet. Maior constat, quia
nullus accipit quidquam ab alio, nisi id quod accipit
ab alio per aliquam actionem, seu motum ab illo
emanet, siue per actionem accidentalem siue sub-
stantialem, sed Spiritus S. non accipit à Filio ali-
quid accidentale, aut per actionem accidentalem
cum sit Deus expers omnis accidentis, ergo acci-
pit substantiam à Filio per actionem substantia-
lem, quod est procedere in esse, & substantia à Filio.
Nec dici potest quod illud verbum *de meo accipiet*,
non est idem quod *de me accipiet*, sed *de*
meo, id est, *de meo Patre*, vel *de meo*, id est, *de sub-*
stantia diuina, quæ etiam est mea, sed à solo Patre.
Contra hoc enim reuincitur ex subiunctis à Chri-
sto Domino: *Omnia quacumque habet Pater mea*
sunt, propterea dixi vobis, quia de meo accipiet. Si
ergo propterea dictum est *de meo accipiet*, quia
quacumque habet Pater mea sunt: ergo etiam
vim producendi Spiritum S. habet Filius sicut Pa-
ter, quia omnia habet quæ Pater, alias non omnia
haberet, si illa virtute careret. Vnde hanc Christi
Domini rationem sic intellexerunt Athanasius
in epistola ad Serapionem, Didymus in lib. de Spi-
ritu S. & citatur à Thom. in catena Ioannis 16. Hi-
larius 8. de Trinit. sumiturque ex Basilio libro 3.
& 5. contra Eunomium, & citatur à D. Thoma
prædicto *opuscul. 1. citat. post caput 32.* Et tandem
hac ratione usus est Papa Eugenius IV. in litteris
unionis, cum definiuit procedere Spiritum S. à
Filio.

Ex secunda propositione idem deducitur, quia 11
Filius non potest mittere, neque dare in quod
à se non egreditur, sicut non potest dici quod
mittat Patrem, quia Pater non procedit à Filio;
Quod ergo mittitur à mittente egreditur, &
egredi procedere est: nec enim vna persona egre-
ditur ab alia per actionem accidentalem, vel
motum localem, cuius capax non est: si ergo
egreditur, est per processionem substantialem: Sed

Spiritus S. mittitur à Filio, Ioan. 15. *Cum venerit Paraclitus, quem ego mittam vobis à Patre, &c.* 16. *Si autem abiero, mittam eum ad vos; & similiter Apostolis dedit Spiritum S.* Ioan. 20. *Accipite Spiritum S.* Et sic intellexit ista loca Athanasius in *præfata epistola ad Serapionem*, inquit: *Hic est ordo natura diuina à Patre, & Filio, ut qui à nullo est, à nullo mittatur, & qui est ab alio, in nomine suo non veniat, sed in nomine eius à quo existit: Ita Spiritus S. quia à se non est, à se venire non debuit, sed in nomine illius à quo est, & à quo habet ut hypostasi sit Deus, quemadmodum de eo dicit Filius: Paraclitus Spiritus S. quem mittet Pater in nomine meo.* Et Nicetas *super Ioannem* quem citat D. Thom. *præfato opusculo*. 1. cit. §. *Similiter autem*, inquit: *Non alia proprietate Pater mittit Spiritum, qua proprietate non mittat Filius, vel aliqua alia proprietate Filius mittit Spiritum S. qua non mittit, & Pater.* Et iterum idem Nicetas: *Filius Spiritum S. de se dat ut Pater.* Nec potest dici quod Filius solum dat, vel mittit donum creatum gratiæ, non personam increatam Spiritus S. Nam certum est personas diuinas inhabitare nobiscum, & dari nobis ut maneant in nobis, non solum ut effectus eius in nobis sint, cum dicatur Ioan. 14. *Ad eum veniemus, & mansionem apud eum faciemus:* nec proprie donum illud creatum quod qualitas quædam est, mitti dicitur, sed mitti pertinet ad aliquam personam, quæ mittitur & egreditur ab alia: ergo non solum dona gratiæ, sed personæ ipsæ mittuntur, præsertim cum dicat Athanasius in quodam sermone Nicæni Concilij, & in *epistola citata ad Serapionem*, ut citat D. Thom. *præfato opusculo*. quod *Datur nobis Spiritus S. à Filio de sua essentia, & ut coessentialis sibi;* quod de nullo dono creato verificari potest.

- 12 Denique tertia propositio, scilicet quod Spiritus S. sit spiritus Filij, constat ex *supra allegatis locis*, & Act. 16. *Tentabant ire in Bithiniam, & non permiserunt eos spiritus Iesu;* & quia dicitur spiritus veritatis, qui à Patre procedit, Ioan. 15. ipse autem Christus est veritas. Et dicitur Psalm. 32. *Et spiritu oris eius omnis virtus eorum:* os enim Patris filius dicitur. Nec sunt diuersi spiritus, alter Patris, alter Filij, cum sit solum vna persona Spiritus Sancti, non duo Spiritus S. quomodo autem teneat illa consequentia: Spiritus S. est Filij: ergo procedit ab illo, quàm Theophylactus, & alij Græci negant, quia esse Filij dicitur quasi possessiue, sed non processiue: dicimus tenere hanc consequentiam, quia Spiritus S. possidetur à Filio, & est spiritus Filij, sicut persona ab ipso distincta: si ergo non est ab ipso existens, vel è conuerso, non est fundamentum ut dicatur esse eius, quia non dicitur Spiritus S. esse Filij, quasi persona ei subiecta, & serua, sed ut æqualis: ergo quia pertinet ad ipsum per aliquam relationem, & originem; & sic, vel quia est ab ipso Filio, quod nos intendimus, vel quia Filius à Spiritu S. quod nec Græci possunt dicere. Vnde & hoc pacto intelligit hoc Athanasius, & Cyrillus *super Ioannem, & aliis locis*, quæ allegat S. Thom. *opusculo*. 1. citat.

- 13 Eandem veritatem accepit Ecclesia ex concordi Patrum sententia, ut tandem ipsi Græci viderunt, & confessi sunt in *ultima sessione Concilij Florentini*. Et præter Athanasium quem toties D. Thom. citat, tum in *epistola ad Serapionem*, tum in *sermonibus Concilij Nicæni, & aliis locis*, ubi apertissime dicit Spiritum S. esse à Filio, & sufficit nobis id quod in suo Symbolo expressissime

ponit, *Spiritus S. à Patre, & Filio non factus, nec genitus, sed procedens* & præter Cyrillum Alexandrinum, qui expressè in hoc puncto restitit Theodoro in *defensione noni anathematis*, & in *epistola* 10. & aliis locis *supra allegatis*, præter istos inquam qui inter Sanctos Patres præsertim ex Græcis duces primi sunt, multi alij idem docent, ut Nazianz. *oratione* 24. ubi inquit, *Filius accepisse à Patre omnia quæ Pater habet, excepta sola causalitate sua*, id est, processione sua, & Basilii lib. 3. *contra Eunomium*, dicit Spiritum S. esse dignitate secundum à Filio, cum ab ipso esse habeat, imò & pendeat, ubi ly pendeat idem est quod procedat secundum originem. Et Chrysost. *homil.* 1. & 2. *de Symbolo*, *tomo* 5. Item Epiphanius in *Anchorato, & de hæresibus, hæresi* 69. & Cyrillus Hierosolymitanus *catechesi* 16. Omitto Patres Latinos, qui hoc sine dubio perpetuò docent, nec de illis dubitatum est, pluresque in disputationibus Concilij Florentini citati sunt in *sine sessionis* 24. ut Leo Papa, Gregorius, Ambrosius, Hieronymus, Augustinus; sed quia non ita cogit eorum auctoritas Græcos: qui in hoc fatentur se contra Latinos sentire, ideò non facimus vim nisi in auctoritate Græcorum Patrum ad ipsos reuincendos. Conducit tamen auctoritas Latinorum Patrum ad intelligendum fuisse hoc quasi perpetuam Ecclesiæ traditionem, ex qua cum locis Scripturæ *supra adiunctis*, veritas hæc definita est ab Ecclesia. Videatur etiam de his Bellarminus *tomo* 1. *libro secundo, de Christo, à capite vigesimo, usque ad finem.*

Quod attinet ad rationes Theologicas, diximus ¹⁴ *supra*, præcipuas reduxisse D. Thomam ad tres in hac q. 36. art. 2.

Prima ducitur ab inconuenienti, quod destruit totum mysterium Trinitatis, videlicet quia aliàs non distingueretur Spiritus à Filio, si ab illo non procederet; & sic non essent tres personæ distinctæ in Deo. Quæ consequentia, quia multis difficilis visa est, postea expendenda latius à nobis est.

Secunda & tertia ratio ducitur ex positiua congruentia, & maiori conformitate ad ea quæ naturalis ordo rerum videtur exigere. Vnde D. Thomas adducens has duas rationes, non adduxit eas tanquam efficaciter probatiuas, sed quia huic consonat ratio processionis vtriusque, scilicet Filij & Spiritus sancti. Et bene hoc aduertit D. Thomas, quia in rebus fidei probandis nulla ratio naturalis, nec discursus sufficiens est; & solum possunt congruentes rationes adaptari.

Secunda ergo ratio D. Thom. sic ab ipso proponitur: Filius procedit per intellectum ut Verbum, & conceptus, & Spiritus sanctus ut amor, sed necesse est quod amor procedat à Verbo, siquidem non amamus aliquid, nisi secundum quod conceptione mentis apprehendimus: ergo Spiritus S. procedit à Verbo, seu à Filio.

Tertia ratio est: Si Spiritus S. procederet à solo Patre, & non mediante Filio, procederent à Patre duæ illæ personæ sine aliquo ordine inter se: sed ab vno principio non procedunt plura sine ordine inter se, nisi sint materialiter distincta, sicut vnus artifex producit multos cultellos nulum ordinem inter se habentes, & vnus Pater plures filios, qui tantum materialiter distinguuntur. Vbi autem non est materialis distinctio tantum, semper inuenitur ordo inter res ipsas procedentes, ut vna procedat ex alia, & non omnia

æque

æquæ ex vno principio. Non potest autem inter istas duas personas reperiri sola materialis distinctio, vt de se patet, cum careant omni materia, & potentialitate: ergo conueniens est inueniri ordinem vnius ad aliam. Non est autem alius ordo quàm eius qui ab alio. Ergo oportet dicere quòd inter istas duas personas datur ordo processionis, vt vna sit ab alia; non Filius à Spiritu S. ergo Spiritus S. à Filio.

15 Istæ rationes adductæ sunt à D. Thoma tanquam manifestantes principia secundum quæ potest rectè intelligi id quod fides Catholica tradit de hac processione Spiritus S. nempe quòd sit à Filio, quia amor est à Verbo, & non sit à solo Patre, quia est tertia persona, & tam ipse, quàm Filius non debent æquè immediatè ab vno principio procedere sine aliquo ordine inter se, quia non sola materiali distinctione distinguuntur: inter ea enim quæ materialiter tantum distinguuntur, ordo non requiritur, sicut inter ea quæ formaliter, & præsertim relatiuè.

Cæterum contra priorem rationem potest obijci, & quantum ad antecedens, & quantum ad consequentiam. In antecedenti non est certa illa propositio quòd amor procedit à conceptione, seu Verbo, tum quia non procedit nisi à re ipsa apprehensa, & ab ipso fine: apprehensio verò solum se habet vt conditio ad finalizandum, & mouendum voluntatem, tum quia ad hanc apprehensionem sufficit notitia ipsa, & cognitio, nec requiritur verbum, seu conceptus, vt patet in visione beatifica, in qua non producit verbum, & à visione spiratur amor: tum denique quia in Deo ad apprehensionem rei volendæ datur essentialis cognitio, quæ sufficit ad amorem, & vt verificetur quòd amor est ex influentia cognitionis; sed vnde infertur, ergo est à verbo notionali: Quoad consequentiam verò fit instantia, quia vel infertur quòd Verbum producit Spiritum S. quasi elicitiuè, & vitaliter, & vt principium quod subsistens, vel vt finis solum apprehensiuè mouens, & finaliter, & vt principium quo apprehendendi. Hoc secundum non est ad rem, quia intentum non est probare nisi quòd procedat Spiritus S. à Filio vt à persona producente, sicut à Patre, & per virtutem spiratiuam, quæ etiam est in Patre, non verò vt à fine apprehenso, seu à conditione finis finalizantis, quæ est cognitio.

16 Si dicatur primum, omnino illa consequentia est nulla, quia ex conceptione rei intellectæ, quæ non influit elicitiuè, aut effectiuè in amorem, nec vt principium quod subsistens, infert quòd conceptio diuina, quæ est Filius, influit isto modo. & spirat Spiritum S. quod est à disparatis procedere: nam ad influendum hoc modo elicitiuè, requiritur voluntas, & virtus spiratiua; ex illa autem ratione, qua dicitur à conceptione dependere amorem, non infertur quòd tali modo pendeat, id est elicitiuè, nec infertur: ergo illa conceptio habet voluntatem qua spiret, quandiu autem non probatur Verbum habere voluntatem, non probatur spirare Spiritum S.

Contra posteriorem verò rationem potest obijci, quia non repugnat plura procedere à Deo sine ordine inter se, sicut plures mundi, aut si omnia immediatè per se produceret: similiter possunt plures res immateriales immediatè, & sine ordine inter se produci, vt si Deus produceret plures Gabrieles, aut si producantur plures intellectiones eiusdem Gabreilis, quæ inter se ordinem non habent, & materiali distinctione non distinguuntur cum immaterialia sint.

Has obiectiones ferè omnes proponit in præsentia Caietan. q. 36. art. 2. & benè resoluit. Vnde ad ea quæ obijciuntur contra antecedens assumptum à D. Thoma, negamus antecedens.

Ad primam probationem dicitur, quòd amor procedit à re apprehensa iuxta modum apprehendendi, non quòd ab apprehensione habeat appetibilitatem, & vim ipsam motiuam, sed conditionem modumque mouendi, seu applicationem, aut potius esse, quo res ipsa vestitur vt tangat voluntatem. Et hoc sufficit vt dicatur amor dependens à cognitione, vt à causante per modum motionis allicientis, nec distinguimus ibi apprehensionem à re apprehensa, sed totum illud, scil. res sub apprehensione mouet ad amorem. Sed est speciale hoc in Deo, quia ibi verbum, seu conceptus, & res apprehensa est vnum, & idem, ac per hoc non differt quòd moueat conceptus, vel quòd moueat res apprehensa: idem enim est; & sic bene assumit D. Thom. quòd amor est à conceptione mentis, quia non amamus nisi secundum quod concipimus: & cum Deus concipiat seipsum, suumque conceptum vt obiectum, fit vt à suo conceptu seu Verbo petat oriri amor, non solum vt à conditione requisita, sed vt à formali ratione motiuam.

Ad secundam probationem dicitur, nullam cognitionem dari sine verbo, vel producto vel vnito, aut concomitanti cognitionem. Et in visione beatifica eo modo mouet verbum vnitum in ratione conceptus, seu speciei expressæ, quo mouet ipsa essentia cognita, & in verbo seu conceptu ipso intellecta. Præterquam quod responsio etiam est in promptu quòd cognitio, seu notitia cum conceptu, seu verbo mouet voluntatem vbi conceptus fuerit: vbi autem conceptus non est, per accidens non mouet conceptus, sed sola cognitio, seu res apprehensa per cognitionem, & non expressa per verbum: vbi autem datur conceptus exprimens, non est quod excludatur à ratione mouendi, sicut res ipsa expressa, & representata in conceptu.

Ad tertiam probationem dicitur quòd in Deo datur essentialis cognitio ad amorem essentialem, sed non est cur notionalis cognitio excludatur ab amore notionali, non ex indigentia, sed ex abundantia: sufficit enim rationi D. Thom. quòd per se amor à cognitione sit: sic enim etiam cognitio notionalis habebit spirare amorem, quia non est cur excludatur à generali conditione cognitionis, quæ per se habet in amorem influere: ergo & cognitio notionalis, licet non ex necessitate, sed ex fecunditate.

Ad obiectiones contra consequentiam D. Thom. 18 Respond. D. Thom. explicitè non inferre nisi originem seu ordinem amoris ad cognitionem, & conceptionem, modum verò procedendi non explicasse, sed reliquisse inferendum iuxta exigentiam ipsius conceptionis, & verbi: nam si Verbum solum se habeat vt forma, & vt principium quo exprimendi, & representandi obiectum amandum, solum influet in voluntatem specificatiuè, & obiectiuè, seu ratione obiecti representati alliciendo voluntatem ad amorem, non verò eliciendo per voluntatem ipsum amorem, & hoc solum petit verbum ex genere, & linea intelligibili, quatenus præcisè sistit in intellectu, vt forma eius, nec ultra hoc amplius habet participando naturam, & substantiam atque proprietates ipsius intelligenti; sicut ex hac præcisâ ratione non habet Verbum intelligere actiuè, sed intelligi, & tamen ex eo quod est in actu puro eandem naturam habens cum suo producente, non solum passiuè dicit intelligi, sed etiam actiuè dicit intelligere. Et ob eandem rationem Verbum secundum

secundum se solum habet dirigere ad executionem, & productionem effectus ad extra, non vero effectiue producere ut principium quod; si vero consideretur Verbum ut perfectissimum, & crescens usque ad hoc quod est esse personam substantentem in natura intellectuali, tale Verbum etiam effectiue habebit omnipotentiam, & producet effectiue creaturas. Sic ergo Verbum ex præciso, & analogo conceptu verbi, prout solum dicit formam exprimentem, & expressam rei intellectæ, non dicit nisi manifestationem obiecti amabilis, & influentiam formalem, & quasi specificatiuam, aut finalem in amorem: at vero verbum non præcisè exprimens obiectum intelligentis, sed ipsum obiectum consubstantialiter existens, & in eo subsistens, etiam personaliter, & elicituè habet influere in amorem, ratione talis naturæ quam habet. Et quia verbum sic depurari, & ad talem perfectionem ascendere ut consubstantialiter sit obiectum intelligibile, & intellectum, & ipsa natura intelligentis non est per accidens in Verbo diuino, sed per se intra lineam intelligibilem ut depuratam ab omni imperfectione; ideo Verbum spirare amorem non solum specificatiuè, & formaliter, sed etiam elicituè, & personaliter, non est extraneum à ratione formali verbi, & ideo optimè S. Thomas ex eo quod absolute amor pendet à conceptione mentis, intulit, quod à verbo, seu conceptione mentis personali, & communicante in eadem natura cum intelligente producit spiratim, & elicituè amor, quia habendo naturam, habet voluntatem, & non solum intelligibiliter mouet voluntatem.

19 Ad obiectionem contra posteriorem rationem. Respond. quod ratio D. Thom. est congruentissima, & iuxta exigentiam producendi res ordinate. Quod intelligitur cum duabus conditionibus; altera est quod res aliqua procedant ut contentæ sub aliquo ordine, v. g. ut pertinentes aut conducentes ad aliquem vnum finem, vel ad vnum aliquid totum construendum vel perficiendum: altera est, quod non sit materialiter tantum distincta, id est, individualiter, ita quod *ly materialiter distingui*, non contraponitur huic quod est spiritualiter, sed huic quod est specificè seu formaliter, ut bene hic aduertit Caiet. Quæ ergo specificè distinguuntur, & sub aliquo ordine, vel totalitate producuntur, de se exigunt ordinate produci, & vnum ex alio, licet immutando exigentiam naturatum, & productionis ordinatæ, & loquendo de potentia absoluta bene possint plura à Deo produci sine ordinatione vnius ab alio inter se; sed tamen connaturalis, & suavis rerum dispositio exigit istam ordinationem: Vnde etiam dicitur Iudith 9. *Tu fecisti priora, & illa post illa cogitasti, & hoc factum est quod ipse voluisti: omnes enim via tua parata sunt, & tua iudicia in tua providentia constituisi.* Itaque paratura, & dispositio viarum Dei id connaturaliter petit, ut vnum post aliud fiat, & ordinate inter se non plura sine ordine, & concatenatione ad inuicem. Ratio autem congruentiæ non debuit procedere ex eo quod de absoluta potentia fieri potest in agentibus, sed de eo quod secundum exigentiam ordinationis connaturalis fieri potest: nam ex hoc deducitur optimè argumentum ad Deum, in quo omnia ordinatissima sunt, & in summa perfectione, quod etiam ibi processiones diuinæ ordinato modo debent procedere, ita ut vna connectatur alteri, & coordinetur illi, siquidem omnes illæ processiones sub eodem ordine diuino continentur, & sub eodem toto, scil. sub vno Deo, ad cuius perfectionem pertinent. Si ergo omnia quæ in hoc vniuerso continentur ita procedunt, & operantur,

quod vnum ex alio deducitur, & deriuatur, non omnia æquè immediatè procedunt ab vno, quanto magis processiones, quæ intra vnum, & eundem Deum sunt, qui magis vnus est, quam totum vniuersum, ordinate procedunt, & vna ex alia, non æquè immediatè ab vno, præsertim cum ipsæ processiones non solum numero, & quasi materialiter distinguantur, sed etiam formaliter, & quasi specificè.

Sic ergo soluuntur instantiæ. Nam si Deus plures mundos produceret, non ordinatos inter se, non essent sub vno ordine contenti, & quasi vnum corpus vniuersi facientes, sed plura vniuersa; & sic in ratione multiplicis vniuersi quasi materialiter, & numericè multiplicarentur, id est, essent plures mundi numero, & sic non currit casus. Similiter si omnia immediatè Deus faceret per seipsum, id quidem esset de potentia absoluta, sed non iuxta exigentiam connaturalem rerum, quæ petunt vnam causam subordinari alij, & infima ex mediis procedere, & per media summis coniungi. Si Deus produceret plures Gabrieles, aut cum dantur plures intellectiones eiusdem Gabrielis, si istæ intellectiones, & illi Gabrieles solo numero differunt, materialiter distinctione differunt, licet spirituales sint, secundum quod *ly materiale* est idem quod non specificè. Si vero non differunt solo numero, & sic est in sententia S. Thom. non admittentis plures naturas individuales Gabrielis, aut alterius Angeli, tunc dicitur quod plures Angeli, imò & corpora cælestia æquè primò procedunt à Deo quoad creationem, sed non æquè primò quoad subordinationem inter se, quatenus vnus influit in alium, & subordinatur illi, & vna causa est supra aliam, licet plures species rerum possint inter se non subordinari, sicut lapis ligno, vel equus homini, quia istæ species non procedunt immediatè ab vno agente, sed equus ab equo, & homo ab homine: vnde non mirum quod inter se non subordinentur; propositio autem Diuus Thom. procedit in his quæ ab vno principio procedunt, & inter se specie distinguuntur, & sic vnum subordinatur alteri, vel in prima processione si sit capax huius, vel si non, quia vtrumque est per creationem, saltem in influentia quam vnum habet super aliud. In diuinis autem non potest esse influentia vnius personæ erga aliam, nisi in ipsa sui egressione prima, & in relatione originis, quia non est ibi alia influentia, nisi qua vna persona procedit, & accipit totum quod potest accipere, scil. essentiam infinitam.

Si Spiritus sanctus non procederet à Filio, non distingueretur ab illo.

Accedamus iam ad præcipuam rationem explicandam, qua ostenditur Spiritum sanctum procedere à Filio, quia aliàs non distingueretur ab illo. Vnde elicitæ est illa conditionalis, quæ in disputationem Theologicam toties introducit, an si per impossibile Spiritus S. non procederet à Filio, adhuc distingueretur ab illo. Circa quàm conditionalem aliqui dubitant, quo sensu accipienda sit, eo quod putant non posse illam hypothesim admitti, nisi destruendo positionem Spiritus S. qui nunc est, & alium ponendo, qui non haberet proprietates, quas modò habet, nec Filius eas quas habet, quia saltem non esset spirator, ut modò, seu fecundus ad spirandum, nec terminaret relationem Spiritus S. ut modò; & similiter Spiritus S. non eadem processione procederet qua modò, nec eadem linea, ut ita dicam, quia procederet tunc à solo Patre, & ita non respiceret pro adæquato termino Patrem, & Filium,

Filius sicut modò, & sic non esset amor mutuus, & amicalis, & nexus utriusque, sicut modò est: ergo non maneret idem numero Spiritus S. sicut nec esset idem homo numero, si procederet à solo Patre, & non à Patre, & matre. Nec tunc Filius esset idem numero, qui modò propter variationem dictam. Et sic sentit Suarez lib. 10. de Trinitate c. 2. num. 10. quòd non maneret idem numero Filius, & Spiritus S. qui modò, data illa hypothese, nec illa conditionalis potest procedere stante eadem filiatione, & spiratione passiva quæ modò.

22 Nihilominus dicendum est hoc dubium in duplici sensu posse controuerti.

Primò, loquendo de Spiritu S. secundum communem rationem personæ diuinæ, an quæcumque persona diuina, siue Spiritus S. siue Filius, siue ille qui modò est, siue alius qui tunc esset, an possit intelligi quod distinguatur à persona, à qua non procedit, ita quod alia ratione, quàm per processionis originem relationes in Deo possint opponi, & distinguui; & sic an processio vnus ab alio sit per locum intrinsecum, & formaliter per se conditio requisita vt vna persona, quæcumque illa sit, intra Deum distinguatur ab alia, an verò alia ratione distinguui possint, licet ista ratio processionis concomitetur. Hic est vnus sensus, & meo videri præcipue intentus à Sanctis, qui ea ratione contra Græcos vsi sunt: intendunt enim probare, non quòd solum destrueretur hic numero Spiritus S. si à Filio non procederet, sed quod absolute nulla tertia persona maneret à Filio distincta, si ab eo non procederet, sicut Filius non esset distinctus à Patre, si ab eo non procederet.

Secundò, potest controuerti ista difficultas loquendo de Spiritu S. in singulari, & supponendo suas characteristicas proprietates, quatenus modò sunt indiuiduales, & distinctiue personaliter eius à Filio, an sub hac ratione formali distinguendi, & indiuiduandi exigant processionem à Filio, an verò remota processione, omnes illæ proprietates distinctiue non essent, nec indiuiduantes. Et tunc disputatio hæc solum procedit, & est utilis ad veniendam rationem formalem constituendi, & distinguendi vnā indiuiduam personam ab alia in Deo in ratione formali talis indiuiui, non solum in genere, & ratione personæ: licet in re, si de facto Spiritus S. non procederet, sicut modò, non solum esset alius numero, sed neque Spiritus S. esset, neque Deus esset, quia in re, & essentialiter, seu in primo modo per se exigit processionem à Filio, vt Spiritus S. sit. Et in hoc sensu procedunt rationes dubitandi, nempe quod si in re daretur Spiritus S. non procedens à Filio, cum tamen modò procedat, esset alius ab eo qui modò sic procedit. Sed hoc est supponere quod modò procedit à Filio. Nos autem inquirimus absolute de distinctione personæ Spiritus S. à Filio, & de formali ratione constituendi hoc indiuiduum in sua singularitate talis personæ, an videlicet in istis dependeat à processione à Filio, an sine illa possit intelligi, vel constitui distinctio personæ, & singularitas talis personæ cum suis proprietatibus.

23 Est ergo in hac parte duplex celebris sententia.

Prima Scoti in 1. dist. 12. quest. vbi absolute censet, adhuc illa hypothese data posse Spiritum S. seu tertiam personam (quæcumque tunc esset) distinguui realiter à Filio à quo non procederet, quia existimat ad distinctionem sufficere intrinsecam relationem, quæ secundum se est alia à quacumque alia relatione, etiam disparatè se habente, & non secundum oppositionem, & processionem originis,

sicut filiatio vt filiatio, quæ solum respicit Patrem, per se tamen constituit personam; & sic debet distinguui à spiratione passiva, quæ aliam personam constituit.

Oppositam sententiam tenet S. Thom. in hac q. 36. art. 2. quem communiter sequuntur eius discipuli, Caiet. hic, M. Bannez, Ferrar. 4. contra Gentil. cap. 24. Suarez lib. 10. de Trinit. cap. 2. Vasquez, hic disp. 148. cap. 4. Arrubal disp. 131. c. 2. Molina, Ripa, Nazarius, Zumel super istam quest. 36. art. 2. & alij commentatores D. Thom. quos referunt, & sequuntur PP. Carmelitani in 2. corso cursus Theologici, tract. 6. disp. 13. dub. 3. n. 76.

Hæc sententia S. Thom. indubitatè tenenda est, 24 quia hac ratione vsi sunt Sancti, & Concilia in discernendo isto puncto contra Græcos; & sic huius rationis vis magna, & efficacissima putanda est, quia ad illam Ecclesia respexit vt in te tanti momenti duceretur ad definitionem: licet enim definitio Ecclesiæ principaliter Scripturarum auctoritati, earumque explicationi, & traditioni per manus SS. Patrum innixa sit, tamen quando ratione aliqua Theologica vitur, eamque etiam adducit vt conducentem ad ipsam definitionem, sine dubio magni facienda est, quia vt magni momenti ab Ecclesia reputatur. Igitur hac ratione vsus est Anselmus in libro suo de processione Spiritus S. c. 2. & 3. vbi pluralitatem, distinctionemque personarum, qualis est distinctio Spiritus S. à Filio reducit ad oppositionem relationis, quæ oppositio tollitur, si non datur origo vnus ex alio. Dicit enim ibi Anselm. c. 3. *Supradictæ relationis oppositio, quæ ex eo nascitur, quia supradictis duobus modis Deus de Deo est, prohibet Patrem, & Filium, & Spiritum S. de inuicem dici, & propria singulorum aliis attribui.* Ille autem liber Anselmi de processione Spiritus S. continet eas rationes, & probationes Anselmi, quibus in Concilio Barenfi coram summo Pontifice Urbano II. contra Græcos disputauit, eosque conuicit, idque ad instantiam Summi Pontificis, indeque determinatum est contra Græcos in illo Concilio, cuius Acta etsi perierint, tamen quæ ibi disputata sunt contra Græcos, in illo libro, Anselmus litteris mandauit. Quare rationes Anselmi, & præsertim ista, magni faciendæ sunt, utpote disputationes Concilij, quibus ad hanc determinationem motum est, cum assistentia ipsius Summi Pontificis, qui Concilium illud celebrauit, licet generale non fuerit. Rursus in Concilio Florentino generali coram Papa Eugenio IV. vbi res ista accuratissimè per plures sessiones ventilata est in sessione 18. vbi specialiter de processione Spiritus S. à Filio incepit disputari, cum antea prolixè de additione facta ad symbolum in illo verbo *Filiusque* tractatum esset. In hac ergo sessione Ioannes Prouincialis ex parte Latinorum contra Marcum Episcopum Ephesium ex parte Græcorum disputans hac eadem ratione explicauit distinctionem Spiritus S. à Filio fundari in processione ab illo, vtens illo principio tanquam communiter recepto apud omnes Doctores tam Latinos quàm Græcos, quod sola relatio diuina processione multiplicat personas, per hæc verba: *Sola namque relatio, quam principalem habitudinem superius nominauimus apud omnes tam Græcos, quàm Latinos Doctores diuina processione personas multiplicat, cui etiam duo illa à quo, & ad quod, de quibus est supra dictum, conueniunt. Siquidem igitur relationes huiusmodi personas multiplicat, ita vt nulla alia ratione, quàm vi relationis Pater à Filio, ac vna persona ab alia differant, quem quidem modum, Spiritus etiam ab alio est, necesse est iuxta omnes supradictos Doctores, sic intelligere, vt idcirco persona hæc, id est Spiritus*

spiritus dicatur accipere atque esse, quod ab alio est. In qua doctrina sic à Ioanne Prouinciali exposita nullus Græcorum, nec etiam ipse Marcus Ephesiorum Episcopus, qui acerrimus inter Græcos disputator habebatur, vlllo modo contradixit. In ea autem clarissimè constat quòd tanquam principium pro disputatione Concilij habitum est, tum quòd relatio diuina processione multiplicat personas, atque ad eò cessante processione, cessat multiplicatio: tum quòd vi relationis tantum dicuntur personæ differre, & in hunc modum dicitur Spiritus S. esse ab alio: Ergo pro eodem sumebatur à Patribus Concilij esse ab alio, & vi relationis differre: ergo ab eo non differt vi relationis Spiritus S. à quo non est.

25 Scio Concilium nec in ea sessione, nec aliis sequentibus quidquam definiisse vsque ad ultimam in litteris vnionis ab Eugenio IV. sed solum disputasse de hoc dogmate. Sed tamen vis nostræ rationis non fit in eo quod ibi definita sit ratio S. Thomæ, sed quòd ea potissimum utebatur Concilium in suis disputationibus, & tanquam rem communiter acceptatam à Doctoribus Græcis, & Latinis proponebat, nec in hoc aliquo modo ei contradicendum fuit à Græcis, aut ab aliquo. Constat autem quòd si hæc ratio solum pertineret ad opinatum discursum, non tanta vis in ea fieret in Concilio, nec ita admitteretur in eius disputationibus, vt irrefragabiliter acceptatum principium apud Græcos, & Latinos, quòd relatio sola processione multiplicat personas,

Nonnihil etiam iuari potest pondus huius rationis ex eo quod habetur in Concilio Toletano II. celebrato *era* 713. id est *anno Domini* 675. sub Vvamba Principe; In confessione enim fidei in qua latè explicat totum hoc SS. Trinitatis mysterium, sic inter alia dicitur. *In relatione personarum numerus cernitur, in diuinitatis verò substantia, quid numeratum sit non comprehenditur. Ergo hoc solum numerum insinuat, quod ad inuicem sunt, & in hoc numero carent, quod ad se sunt.* Vbi pondero, quòd cum prius dixisset Concilium quòd in relatione personarum numerus cernitur, subdit quòd hoc solum numerum insinuant, quòd ad inuicem sunt; quasi significans, non quoquo modo relationem sufficere ad multiplicandum numerum, sed relationes quæ ad inuicem sunt. Sunt autem ad inuicem solum relationes oppositæ: & opponuntur in diuinis solum illæ in quibus est originis processio.

26 Ex his ergo procedimus ad dilucidandam defendendamque S. Doctoris rationem, quæ tanti ponderis in diuersis Conciliis visa est, quam etiam indicant SS. PP. Athanasius *lib. de vnica Deitate Trinit.* Basilii *lib. 3. contra Eunomium circa principium*, Nissenus *libro ad Ablabium*, Cyrillus *lib. 7. Theauri cap. 1.* alique Patres. Et tota rationis vis deuoluitur ad hoc, quia relationes non distinguuntur in diuinis, nec distinguunt personas, nisi prout sunt oppositæ, & correlatiuæ inter se: sed non possunt opponi nisi secundum originem, & processionem, quia vna persona est ex alia, & procedit ab alia: ergo si Spiritus S. non procedit à Filio, non habet relationem oppositam Filio: ergo non est persona ab eo distincta, sed vna, & eadem, quod est destruere mysterium Trinitatis. Maior constat, tum ex communi Theologorum proloquio, ex Boëtio *lib. de Trinitate. In diuinis omnia sunt vnum, vbi non obuiat relationis oppositio*: ergo ad distinguendum personas non sufficiunt relationes quomodocumque, sed requiritur oppositio relationum, seu quòd relationes sint oppositæ; tum quia

in Patre relatio spirationis actiua vera, & realis relatio est, cum sit correlatiua relationis Spiritus S. & reale illius principium, & tamen non distinguitur realiter à Paternitate, quia non opponitur illi, nec alia ratio assignari potest, idè autem non opponitur, quia nec procedit à Patre, nec è contra: ergo manifestè requiritur oppositio relationum ad distinguendas personas: tum denique quia de ratione personæ est incommunicabilitas ad vltiorem terminum, relatio autem solum suo termino incommunicabilis est, cum quo oppositionem habet, quia est ad illum. Ea autem quæ non se habent vt terminus eius, non habet vnde sit eis incommunicabilis relatio, nisi vel quia non sunt in eodem subiecto, vel quia non habent idem esse, sed vnaquæque relatio habet suum esse limitatum, & diuisum ab alia, sicut relationes creatæ, quæ etiam si relatiuè non opponantur, seu correlatiuè, vt relatio, & terminus, tamen distinguuntur tanquam duo accidentia limitata, & habentia diuersum esse. In diuinis autem relationes non habent diuersum esse, nec limitatum, cum identificentur in eadem natura, & sint infinitæ, nec habent diuersum subiectum, cum non sint accidentia: ergo non distinguuntur ex alio capite quam ex oppositione relatiua. Nec enim aliunde distinguuntur, quam vel ex oppositione relatiua, vel ex limitatione in esse; hæc secunda non interuenit: ergo prima requiritur.

Minor prob. quòd videlicet non possint opponi 27 relationes in diuinis, nisi secundum processionem originis, quia non possunt opponi relationes, nisi in quantum se habent vt relatio, & terminus, seu vt correlatiua, quia nulla relatio exercet suam oppositionem relatiuam, nisi ad suum terminum correlatiuum, sicut Pater opponitur Filio correlatiuè, non autem opponitur simili, vel æquali, siquidem illa opponuntur, quæ repugnant esse simul, duæ autem relationes non correlatiuæ possunt esse simul, sicut idem homo potest esse Pater, & similis respectu eiusdem, non autem potest esse simul Pater, & Filius respectu eiusdem: sic ergo relatiua oppositio, solum exercetur inter correlatiua. Sed in diuinis non potest dari correlatio, nisi vbi datur processio: ergo neque oppositio. Minor probatur, quia correlatio realis requirit extrema realiter distincta: eiusdem enim ad seipsum realis relatio non est; hæc autem extrema vel supponuntur distincta ante relationem, & ante fundamentum relationis, vel ipsa relatione, aut fundamento eius ponuntur. Si ante relationem, & foundationem eius supponuntur distincta: ergo cum ante relationem, & foundationem eius non sit in Deo nisi absoluta entitas, sequitur quòd supponitur distinctio inter extrema absoluta, & in ipsa entitate absoluta datur diuisio, quod est ponere plures Deitates aut Deos absolutè. Si ipsa relatione aut foundatione eius ponuntur: ergo originantur, seu producantur extrema relatione, & foundatione eius: ergo solum possunt esse relationes reales fundatæ in origine, & processione, quia solum possunt esse relationes non supponentes extrema distincta in genere absoluto, sed ipsa relatione distinguuntur: ergo sunt, seu originantur extrema ipsa relatione, & sic in sola origine, & processione relationes correlatiuæ fundantur in Deo. Alias rationes adduximus *suprà disp. 12. art. 4.* vbi ostendimus nec in mensura, nec in vnitæte posse fundari relationes reales in Deo, sed solum in actione, seu origine; & sic solum datur oppositio, & correlatio inter relationes quæ habent processionem.

Dices: sufficere ad distinguenda supposita in diuinis oppositionem relatiuam, seu notionalem ex parte

parte originis diuersæ, non ex parte relationum inter se oppositarum, ita quod si dantur duæ processiones, seu origines totales, & diuersæ in ratione, & modo originandi, hoc ipso termini earum diuersi erunt inter se personaliter, quia diuersis viis producuntur: nam hoc ipso tendunt ad diuersos terminos, qui termini inter se opponuntur, sicut & ipsæ viæ, & habebunt se vt constituentes diuersas personas; quando verò relationes non constituunt diuersas personas, sicut paternitas, & spiratio actiua, nec procedunt diuersis viis, quia nec paternitas, nec spiratio actiua procedunt ab aliquo, non mirum quod non distinguantur, sed sunt iidem. Quæ solutio sumitur ex Anselmo *lib. de processione Spiritus S. c. 2.* dicente quod *Etsi Filius, & Spiritus S. per aliud non essent plures, tamen per hoc essent diuersi, quod alter nascendo, alter procedendo existit.* Et sicut si vnus homo procederet per generationem, alter fieret per artificium, hoc ipso essent diuersi, ita & in diuinis, hoc ipso quod vna persona nascitur, altera spiratur, diuersæ sunt. 2. dici potest requiri quidem ad distinctionem personarum oppositionem, sed non correlatiuam, sed sufficere oppositionem affirmatiuam, & negatiuam, qualis inuenitur etiam inter relationes disparatas, quarum non vna est alia ex sua propria ratione.

29 Sed contra primam solutionem stat firma ratio facta, quia origines tunc sunt diuersæ quando termini ipsi diuersi sunt inter se: nam si termini alijs diuersi non sint, non diuersificantur per origines, seu processiones diuersas, sicut idem homo, v.g. Adam, si fieret per generationem ab alio homine, vel per formationem de terra, sicut factus est à Deo, vel per creationem ex nihilo, vel per transubstantiationem, seu conuersionem totalem ex alio in se, non ob hoc esset diuersus, licet omnes istæ actiones, & modi producendi diuersa essent in ratione originis: & actionis ergo diuersitas originis, seu viæ producendi non facit diuersitatem, nisi supponatur diuersitas in ipsis terminis, cum potius distinctio vel vnitas actionis ex vnitate vel diuersitate terminorum sumatur è contra. Instatur 2. quia illa solutio petit principium manifestè: nam supponit quod si Spiritus S. non procederet à Filio, essent diuersæ realiter origines, generatio, & processio, quod tamen non probat, nec potest subsistere, quia id ipsum est quod negamus, sc. quod tunc nec personæ essent diuersæ, neque origines, quia hoc ipso quod personæ non sunt diuersæ, neque origines diuersæ esse possunt: nam origines nihil aliud sunt quam personæ seu relationes, consideratæ, vt in fieri, & in via: si ergo negantur distinctæ personæ in facto esse, etiā negantur distinctæ personæ in fieri: ergo & origines distinctæ.

Et ratio est, quia origines nihil aliud sunt in substantia, quam ipsæ actiones intellectus, & voluntatis, vt notionales, seu vt modificatæ relationibus: nam vt *suprà disp. 1.* probauimus contra Durandum, & Scotum, processiones personarum sunt ipsi actus immanentes intellectus, & voluntatis, & modificati relationibus. Si ergo relationes non sunt oppositæ nec diuersæ inter se, non modificant istas actiones diuerso modo: ergo non reddunt processiones notionaliter diuersas. Non ergo in ratione originis differunt, si relationibus non differunt. Et sic non sunt præsupponendæ origines diuersæ, nisi prius relationes ipsæ diuersæ supponantur, ratione quarum, vel in ordine ad quas redduntur origines diuersæ, non verò independentes, & antecedentes ad relationes, ipsæ origines diuersificantur supponuntur, ex illis relationes diuersæ reddantur, etiam sine oppositione inter se, cum antecedentes ad rationes, ipsæ origines non sint aliud quam actus absolutus intellectus, & voluntatis, qui secundum se, & secundum absoluta

Ioan. à S. Thom. in 1. part. D. Th. Tomus alter.

antecedentes ad modificationem relatiuorum non sunt nisi vnum, quia absolutam solum rationem important intellectus, & volitionis. Ad Anselmum autem *inf. in solut. argumentorum.* respondebitur.

Secunda verò solutio omnino deficit, quia remota oppositione teatiua, non potest penes affirmationem, & negationem distinctio, & pluralitas poni in aliquibus extremis, nisi penes diuisionem in aliquo esse, quatenus scilicet hoc habet aliquid quod alter non habet; & sic talis diuisio fundat limitationem, & finitatem. Infinitas autem in aliquo esse, seu in aliquo genere obstat isti diuisioni, quæ fit penes esse, & non esse, seu penes esse hoc, & esse illud cum negatione alterius: si enim est esse infinitum omne esse occupat, & nullum diuidit. Cum ergo relatio diuina sit infinita in esse, & genere relationis, non potest in illo genere, & in illo esse diuisionem habere, nisi habeat limitationem in ipso esse relatiuo, aut oppositionem cum suo correlatiuo. Remota ergo oppositione, seu correlatione, & sumendo relationes disparatas, & non correlatiuas inter se, solum potest esse diuisio inter relationes penes esse, & penes ipsum *In* relationis, quod est relationes esse limitatas in sua natura, & in suo esse, quia ex seipsis petunt non habere totum esse, & totam perfectionem relatiui generis, & non solum ex vi oppositionis.

Quod si dicas, quando vnum relatiuum est ad alterum, hoc ipso quod opponitur illi, non habet esse relatiui illius: ergo taliter est vna relatio quod non est alia sibi opposita: ergo habet limitatum esse in genere relatiui, quia non habet totum esse relatiui generis: nam quod habeat negationem illius esse ex vi oppositionis, vel ex alia causa, parum interest, dummodo enim careat aliquo esse illius generis, limitationem habet, vnde cumque id proveniat: si ergo posita oppositione relatiua, vnum relatiuum non est aliud, quid refert quod remota tali oppositione, & solum positis relationibus disparatis vnum non sit aliud? Aut si non obstante hac oppositione relatiua, vnumquodque relatiuum retinet infinitatem, cur eandem non retinebit posita disparitate relatiuorum sine oppositione inter se?

Resp. quod quando vnum relatiuum non est aliud, solum ex vi oppositionis, & correlationis, nihil obstat ipsi infinitati generis relatiui, quia communicant in ipso esse, & perfectione, quæ infinita, & vna est in vtroque: in ipso enim esse non opponuntur. Multiplicantur autem solum in oppositione, non in perfectione, in realitate vt opposita, non in actualitate, nec in ipso *in* relationis. Quare datur locus in talibus relatiuis, vt tam perfectum sit vnum sicut aliud, si solum ratione oppositionis, & correlationis distinguuntur, non ex parte perfectionis, & ipsius *In*, quia in hoc oppositionem non habent. Si autem præter ipsam oppositionem relatiuam etiam relationes disparatæ distinguuntur, oportet quod ex parte ipsius esse, & ipsius *In*, & perfectionis relatiuæ vnum importet incommunicationem ad alterum; & sic limitationem dicant, quia ipsa perfectio, & ipsum *in* secundum se multiplicatur. Negamus ergo quod in correlatiuis, & oppositis relationibus multiplicetur perfectio, & esse in ratione perfectionis, sed solum in ratione oppositionis; & sic non obstat infinitati cuiuscumque relatiui habere correlatiuum; obstat autem ex alia ratione, quam ex vi oppositionis distinguere, sicut distinguerentur relationes disparatæ.

Vnde S. Th. omnem aliam distinctionem excludens in diuinis siue ex parte oppositionis contrariæ siue priuatiuæ, siue contradictoriæ, & solum ex parte oppositionis relatiuæ eam admittens, sic inquit *in 1. dist. 26. q. 2. art. 2. ad Anibaldum: Omnis alia distinctio imperfectione in*

P

imperfectiorem importat in altero distinctiorum, aut in utroque: nam alia est distinctio secundum materiam, & quantitatem; & sic in utroque ponit partialitatem: vel est secundum oppositionem formalem, qua quidem si attendatur secundum affirmationem, & negationem, vel privationem, & habitum constat quod in altero ponit defectum. Similiter si attendatur secundum contrarietatem: nam alterum horum contrariorum semper est imperfectum secundum Philosophos, & quasi privatio respectu alterius. Sola autem oppositio relationis potest esse sine imperfectione ex utraque parte. Nam cum in Deo nulla sit imperfectio, per solam relationem potest esse in diuinis distinctio Ita D.Th. Et de eodem videri potest q. 10. de potentia art. 5.

Exp. diuntur fundamenta Scoti.

31 Primò arguitur, quia filiatio secundum se est ratio formalis constitutiva personæ in quantum filiatio, ergo etiam si ab ea non procederet Spiritus S. & maneret filiatio, personam constitueret; sed posita & constituta persona per seipsam & omni alio remoto debet distinguì à persona & omni alio remoto debet distinguì à persona Spiritus S. ergo etiam si non procederet, distingueretur. Primò autem antecedens prob. quia filiatio secundum se & omni alio remoto constituit Filium: ergo constituit terminum genitum, seu terminum generationis, quia Filius ut Filius procedit formalissimè ut terminus generationis. & similis generanti ergo ut persona, & suppositum, quia non potest esse terminus similis generanti perfectè, & totaliter, nisi sit totale suppositum, siquidem generans persona est, & suppositum: ergo si genitum est ei totaliter, & perfectè simile, persona est. Prima verò consequentia conitatur, quia etiam si Spiritus S. non procederet à Filio, adhuc maneret filiatio, ut supponimus, quia adhuc maneret generatio Patris, & consequenter filius procedens, & genitus: ergo & filiatio perfectà, & perfectè similis Patri: ergo & persona procedens ab illo. Secundum verò antecedens prob. quia posita, & constituta persona, de ratione eius essentiali est quod sit incommunicabilis alteri personæ, seu ulteriori termino: ergo & personæ Spiritus S. ergo persona Filij distincta esset tunc à persona Spiritus S. etiam si non procederet ab illo.

Conf. quia eodem principio quo aliquid constituitur in esse personæ, distinguitur ab alia, & eisdem processibus seu viis, quibus res diuerso modo procedunt, etiam diuerso modo constituuntur, sed tunc essent diuersa constitutiva personarum Filij, & Spiritus S. & diuersæ etiam processiones seu origines: ergo & diuersæ personæ constitutæ & procedentes.

Minor probatur; tunc esset constitutum personæ, nempe filiatio: hæc enim constituit terminum genitum, qui terminus necessariò est suppositum, & persona, aliàs terminus generationis non esset: ergo & distinctum à qualibet alia persona, & consequenter à persona Spiritus S. quia idem est constitutum, & distinctum alicuius. Similiter essent diuersæ processiones. & origines, quia esset generatio, & spiratio: ergo esset persona genita, & spirata: ergo duæ personæ, & non una: nec enim eadem persona posset procedere per intellectum, & voluntatem, esse genita, & spirata.

Conf. secundò, ex authoritate Anselmi *suprà* inducta lib. de processione Spiritus S. c. 2. quod si per aliud non essent plures, per hoc solum essent diuersi, quod unus nascendo, alter existit procedendo: ergo etiam si unus non procederet ab alio, istæ solum diuersæ origines processionis, & generationis diuersas inducerent personas Filium genitum, & Spiritum. S. procedentem.

Resp. ad principale argumentum, concedendo, 2. antec. quod filiatio constituit personam. Et distingo primum consequens: Ergo etiam si non procederet ab eo Spiritus S. & maneret filiatio, constitueret personam, distingo, constitueret personam identificatam, indistinctam à spiratione passiva, concedo distinctam ab illa, nego, sicut modo non constituit personam distinctam à spiratione actiua, sed identificatam illi.

Ad secundum anteced. Posita & constituta persona Filij, debet distinguì à persona Spiritus S. omni alio secluso, distingo antecedens, si esset dabilis talis persona seorsum à filiatione, concedo; si non esset dabilis, nego. In illo autem casu non esset dabilis persona Spiritus S. distincta à persona Filij, sed eadem. Unde negamus suppositum quod tunc esset persona Spiritus S. distincta à Filio, sicut modò spiratio actiua non est persona distincta à Patre & Filio. Itaque filiatio est constitutiva personæ in quantum filiatio opposita, ita quod ipsa oppositio est conditio essentialiter imbibita in constitutivo personæ, & ita prout fuerit talis filiatio opposita sic constituet, & distinguet personam, seu constituet personam ut distinctam, & prout non fuerit opposita, constituet personam identificatam. De se autem filiatio solum habet esse passivè procedens à Patre per generationem, & ut opposita illi correlatiuè, ab eo distinguì: ut autem sit distinctiva personæ alterius, à qua non procedit passivè, oportet quod talis filiatio sit actiua, & secunda respectu illius. & sic radicaliter de se sit spiratiua, & habeat adiunctam spirationem actiuam formalem, ut si opposita formaliter illi, sine qua spiratione ut conditione requisita non constitueretur ut persona opposita Spiritui S. sed ut identificans illum sibi: sicut si Filius posset producere, & generare alium filium, non intelligeretur ut distinctus ab ipso, neque constitui ut persona distincta à Filio generando, nisi in quantum generator illius, & fecundus ad illum, non ut præcisè genitus & filius sui patris. Et quando dicitur quod de ratione personæ est ut sit incommunicabilis alteri termino, seu personæ, distingo, si talis persona, & terminus detur, concedo; si non detur, nego. Et in tali casu non esset persona distincta Spiritui S. sicut nec modò est spiratio actiua: nec esset incommunicabilis illi, quia non esset oppositio ad illum, ut dictum est.

Ad primam Conf. Resp. in primis ad maiorem, quod eodem principio quo aliquid constituitur, etiam 3. ab alio distinguitur, intelligi debet, quod ab alio distinguitur cui opponitur, seu cui non identificatur: nam si identificatur, illud etiam pertinebit ad constitutum eius, non ut extraneum habebitur; & sic ab illo non distinguetur, sicut rationale constituit hominem, sed non distinguit illum ab animali, quia identificat animal sibi, sed distinguit ab irrationali, cui opponitur. Si autem aliquid constitutum opponitur alteri, vel ratione alicuius negationis, seu limitationis in se imbibita, vel ratione relationis oppositæ, aut alterius oppositionis sic idem quod est constitutum, est etiam distinctum, quia constituit cum oppositione ad alterum, vel negatione illius, non sine illa. Hinc ad minorem dicimus quod filiatio est constitutiva personæ, distingo, includendo simul oppositionem requisitam erga alias personas, concedo, non includendo illam, nego. Ad consequentiam: Ergo seipsa, & per suum constitutum distinguitur ab omni alia persona, distingo, ab omni alia quæ verè sit alia, & verè distincta, concedo; ab omni cum qua identificatur, & cui non opponitur, nego. Et sic negandum est suppositum, quod sit alia persona Spiritus S. in illo casu. Ad rationem autem constitutivi pertinet esse distinctum

distinctum respectu eius quod distinguibile est, non quod identificabile. Ut autem aliquid sit distinguibile ab aliquo, supponitur quod sit aliqua oppositio inter illa siue contradictoria, quæ est affirmationis, & negationis, siue contrarietatis siue relationis. Sumendo autem constitutum rei siue oppositione, non distinguit, quia non consideratur in ordine ad suum distinguibile, respectu cuius siue oppositione considerari non potest. Cum ergo in eo casu filio constitutiva Filij, licet consideretur ut opposita Patri, non tamen consideratur ut opposita Spiritui S. sed ut identificabilis illi, hinc est quod taliter esset constitutiva Filij, quod non distinctiva à Spiritu S. quia illum identificaret sibi: constitutum autem non est distinctum ab omni re, sed ab omni re distinguibili, non ab omni identificabili sibi. Et ita ut filio sit constitutiva Filij, non quomodo-cumque, sed taliter quod non sit identificabilis Spiritui S. oportet quod sit constitutiva, ut filio spiratio, seu ut radicaliter spiratio: ut autem sit constitutiva cum identificatione Spiritus S. sufficit filio non spiratio, sed tunc non distinguitur à Spiritu S. quia non constituitur cum oppositione, & negatione eius, quod requiritur ut constitutum distinguat. Ad id verò quod dicitur, quod tunc essent diuersæ processiones, & origines generatio, & spiratio: Respond. quod non essent diuersæ realiter, sed vnica, & eadem realis processio cum duplici conceptu, sicut intellectus, & voluntas, intellectio, & volitio sunt idemmet actus in Deo, sola ratione nostra distinguibilis, & sic in eo casu terminus vtriusque actus esset idem, & vnus, qui ad volitionem, & intellectionem pertinebit adæquatè. Nec magis variaretur tunc spiratio, & generatio, quam nunc volitio, & intellectio essentialiter considerata, nec alter procederet nascendo, alter procedendo, quia non esset alter, & alter, sed vnus & idem terminus simul genitus, & spiratus, quia simul esset volitio, & intellectio illa generatio, & spiratio, eo quod spiratio non esset à generatione seu à termino per generationem producta, ut ab eo distingueretur Spiritus S. & spiratio à generatione, sed esset vnus & idem, sicut est volitio & intellectio.

32 Instabis: istæ duæ processiones nullo modo possunt identificari in vnum, nec personæ per illas procedentes, quia istæ processiones de se petunt terminos diuersos, nec potest intelligi quod idem terminus procedat per intellectionem, & per amorem, generetur, & spiretur simul, cum per vnicam actionem totaliter, & adæquatè producatur seu originetur eique communicetur tota diuinitas: ergo altera actio seu processio superfluit; nihil autem superfluum ponendum est in Deo: ergo non est intelligibile quod in Deo eadem persona sit genita, & spirata, & in vnum identifcentur illæ duæ relationes, & illæ duæ processiones.

Respond. negando semper suppositum, quod tunc essent duæ processiones, aut duo termini seu personæ procedentes: sed tunc esset vna, & eadem processio complectens indiuisibiliter generationem, & spirationem, sicut nunc intellectio, & volitio sunt idem actus realiter, & spiratio actiua, & paternitas eadem relatio entitatiue, & realiter, licet non terminatiue. Tunc autem eodem modo generatio passiva, id est, filio, & spiratio passiva, id est, Spiritus S. essent vnici, & idem terminus, respicerentque vnicam processionem, quæ adæquatè esset voluntatis, & intellectus generatio, & spiratio, non duæ, sicut modò. Et verum est quod duæ processiones sicut modò sunt duæ, non possunt in vnum conuenire, quia in-

Joan. à S. Thom. in 1. part. D. Th. Tomus alter.

ter se ita se habent quod vna procedit ex alia, & opponitur illi, sed tunc sublatâ oppositione non essent duæ, sed vna. Et cum instatur quod tunc quælibet illarum esset adæquata, & totalis actio communicatiua diuinæ naturæ; & sic altera superflueret: dico quod tunc non esset adæquata & totalis actio, generatio, neque totalis, & adæquata actio spiratio, sed esset tantum vna actio productiua termini illius, qui tunc procederet. Et hoc idem, quia tunc produceretur terminus genitus, v.g. Filius, non ut præcisè, filius, sed filius, ut identificans sibi Spiritum S. seu spirationem passiuam, sicut nunc producit ut identificans, sibi spirationem actiuam, ut oppositus autem spirationi passivæ. Vnde filius tunc ut procedens cum identificatione Spiritus S. non procederet adæquate per generationem, & per intellectum, sed generatione, & spiratione, per intellectum, & voluntatem, quia ut identificans vtrumque, & non ut solum communicationem naturæ accipiens per generationem procederet.

33 Et totam hanc doctrinam accipimus ex D. Tho. qui in q. 9. de potentia art. 4. ad 15. ita inquit: *Ad 15. dicendum quod forte modus ille processionis diuersus quo dicitur Filius procedere per modum intellectus, Spiritus S. verò per modum voluntatis, non sufficit ad distinguendum personaliter Spiritum S. à Filio, cum voluntas, & intellectus non distinguantur personaliter in diuinis. Quare istæ processiones, ut præcisè sunt voluntatis, & intellectus, nisi etiam addatur quod vna sit ex alia, non magis distinguunt personas, nec distinguuntur inter se, quam ipsa intellectio, & volitio ut essentielles actus sunt; & sic sunt omnino idem realiter, licet virtualiter distinguantur.*

Nec obstat, quod tunc procederet Filius ut persona, de cuius ratione est quod sit terminus incommunicabilis: Dicitur enim quod de ratione personæ est quod sit incommunicabilis alij à se distincto, non alij sibi identificabili, sicut modo procedit Filius ut persona, nec tamen ut incommunicabilis spirationis actiue, quia est identificabilis illi, sic in illo casu procederet ut identificabilis Spiritui S. seu spirationi passivæ, quia procederet ut non oppositus illi; & sic non procederet ut persona ab illo distincta, ut dictum est.

Ad 2. Conf. supra relata ex Anselmo, Resp. ex D. Th. tum in hac q. 36. art. 2. ad 7. tum in q. 20. de potentia art. 5. quod verbum Anselmi procedit supponendo quod origines Filij, & Spiritus, secundum quas vnus nascendo, alter procedendo oriuntur, essent diuersæ in re, ut Pater in verbis pauldantè positus ab Anselmo, ubi inquit. *Nam quomodo filius existit ex Deo nascendo, Spiritus S. procedendo ipsi diuersitate naturæ, & processionis referunt ad inuicem.* Supponit ergo quod natiuitas, processio maneat diuersæ, & tali diuersitate quod ad inuicem referantur, quod stare non potest, nisi sit ex alia, & opponantur in se. Sic ergo supponendo diuersitatem processionum nascendi, & procedendi, optime infert illam conditionalem: Si per aliud non essent plures, per hoc solum essent diuersi, scil. per ipsas diuersas processiones nascendi, & procedendi taliter positas, ut ponit Anselmus; quod ad inuicem referrentur, & opponerentur; & vna esset ex alia, quia sine hoc quod vna esset ex alia diuersæ originis non essent, sed, sed solum vna.

34 Quod si dicas: Si Anselmus loquitur supponendo origines sic esse diuersas, ut vna esset ex alia, & opponeretur illi: ergo supponit ipsas quoque personas in suis relationibus esse oppositas, & diuersas, & vnâ esse ex alia, quomodo ergo posset tunc dicere quod si per aliud non essent plures, per hoc solum,

solum essent diuersæ: si enim sunt origines cum processionem vnius ex alio, non remaneret aliquid aliud per quod essent plures.

Respon. quod quando dicit *si per aliud non essent plures*, & iterum, *per hoc solum essent diuersæ*, *ly per aliud*, & *ly per hoc solum*, significant per alias proprietates, seu notiones, & *ly per hoc solum* significat origines ipsas in ratione originis, & viæ; proprietates autem, & notiones sunt relationes, & notiones in facto esse, ita quod si per istas per impossibile non differrent, & haberent diuersas origines seu vias, quarum vna esset ex alia, adhuc diuersi essent, licet hoc sit impossibile in re sine illo primo.

Ex ista autem Anselmi explicatione manet explicatus August. lib. 5. de Trinit. c. 14. & lib. de fide ad Petrum c. 1. vbi ex ipsis originibus, & processibus distinguit Filium, & Spiritum S. sed intelligitur de originibus, sicut modò sunt, id est quatum vna est ex alia, non quomodo tunc essent quando plures non essent. Eodem modo loquitur Damasc. lib. 1. de fide c. 2. 10. & 11.

35 Secundo, arguitur in fauorem Scoti: Si Spiritus S. procederet à solo Filio, & non à Patre, adhuc distingueretur à Patre: ergo non requiritur per locum intrinsecum procedere ab aliqua persona vt distinguatur ab ipsa: ergo si non procederet à Filio, sed à solo Patre, adhuc distingueretur à Filio. Primum antecedens probatur, quia in illo casu adhuc Pater esset persona innascibilis: ergo adhuc identificabilis cum persona procedente, quæ est Spiritus sanctus, cum nec etiam identice possit esse procedens, si totaliter est innascibilis; nec est intelligibile, sed omnino implicatorium quod si Filius procedit à Patre, & Spiritus S. à solo Filio, identificetur cum Patre: sic enim identice procederet Pater à Filio per spirationem, per quam procederet Spiritus S. vt identificatus Patri. Prima verò consequentia patet, quia inueniretur ibi Spiritus S. distinctus à persona, à qua non procederet, scilicet à Patre: ergo per se, & formaliter non requirit procedere ab aliqua persona vt distinguatur ab illa. Ex quo etiam patet secunda consequentia paritate rationis: nam sicut Pater constituitur in esse personæ per paternitatem, ita filius per filiationem, & sicut Pater est innascibilis, ex se absolute, ita Filius est inspirabilis: ergo sicut Pater non est identificabilis cum persona Spiritus S. procedente, ita nec Filius cum persona spirata, quia ipse inspirabilis est & in quantum filius solum potest gigni, & nasci, & per intellectum procedere: ergo in quantum filius non potest spirari, & per voluntatem procedere, sed in quantum filius, & in quantum natus constituit secundam personam: ergo repugnat quod illa persona etiam dato quod Spiritus S. ab illa non procederet, esset simul genita, & spirata, cum in quantum Filius esset persona, & in quantum filius solum esset genitus. Et sic in illo casu Pater esset vna persona emittens ex se diuersis emanationibus diuersas personas, quia licet esset vna persona entitativè, esset tamen multiplex principium virtualiter, & eminenter propter infinitatem suam ad respiciendum diuersas personas.

Confirm. quia nunc spiratio passiva non est correlatiua filiationis, vt filiatio est, nec paternitatis, vt paternitas est, sed spirationis, & tamen distinguitur realiter à filiatione vt filiatio est, & similiter à paternitate: ergo non fundatur distinctio per se loquendo, & per locum intrinsecum in sola oppositione formali, & processione vnius ex alio; & sic adhuc remota oppositione stare potest distinctio.

36 Respon. quod in illo casu Pater distingueretur à

Spiritu S. quia Spiritus S. mediata esset, & procederet ab illo, licet non immediate eo quod daret Filio virtutem, qua spiraret Spiritum S. & mediante tali virtute procederet à Patre radicaliter, & sic saluaretur quod pater esset adhuc fons, & origo personarum in diuinis. Non autem ex eo solum distingueretur, quia esset innascibilis: licet enim quia esset inna cibilis non posset procedere, & produci ab aliqua persona, posset tamen communicari personæ procedenti, sicut essentia communicatur, & tamen in se innascibilis est, id est improducibilis: sufficit autem posse communicari vt identificetur cum eo cui communicatur, sicut essentia diuina identificatur cum Filio, & cum Spiritu S. licet essentia non producat, sed solum communicetur. Itaque ex hoc præcisè quod Pater esset innascibilis non probatur quod distingueretur à Spiritu S. si ab illo non procederet, quia posset ei communicari, & sic identificari cum illo. Quod ergo distingueretur in eo casu, aliunde prouenit, scilicet quia produceret Filium, eique communicaret virtutem spiratiuam Spiritus S. quæ virtus esset opposita, & non communicabilis Spiritui S. ratione relationis spirandi quam importat. Hanc autem relationem Pater communicaret Filio: ergo esset Pater radicaliter, & virtualiter oppositus Spiritui S. sicut Filius, quatenus, licet non esset habens in se relationem spiratiuam, esset tamen dans, seu communicans talem relationem Filio, æquiualeat autem ad oppositionem habere relationem oppositam, vel dare illam per processionem, quia dans virtualiter habet.

Et si instes: nam essentia diuina dat Patri paternitatem, quia via immediate resultat ab essentia, & tamen non opponitur Filio: ergo ruit prædictum fundamentum.

Respon. quod essentia non dat paternitatem per processionem paternitatis a se, & consequenter neque per oppositionem cum Patre, sed per omnimodam identificationem, & virtuale emanationem, sicut attributa emanant ab essentia. Ex hoc autem non sequitur quod essentia opponatur Filio, quia nec opponitur Paternitati. In nostro autem casu Pater communicaret Filio vim, & relationem spiratiuam per processionem, & oppositionem cum Filio, atque adeo cum virtuali processione, & oppositione cum Spiritu S.

Ad probationem secundæ consequentia. Respon. 37 quod Filius in illo casu non esset inspirabilis realiter, & identice loquendo, licet formaliter sub reduplicatione, & appellatione Filij non esset spirabilis, sed tantum procederet vt genitus per intellectum: sed realiter, & identice etiam esset spirabilis, & procedens per voluntatem, quia non opponeretur illi, solumque ibi Filius vt genitus, seu persona genita, & spirata per rationem distinguerentur. Nec dici posset quod spiratio passiva solum ei esset communicabilis, sicut paternitas casu quo procederet à Filio, & non à Patre, & sic Filius non esset spirabilis, licet spiratio ei esset communicabilis. Hoc inquam dici non posset, quia in tali casu spiratio passiva non præsupponeretur processioni Filij, & sic non esset res communicabilis eo modo quo natura, vel paternitas in illo casu, sed si esset communicabilis, deberet esse per productionem, quia illa spiratio esset producibilis, & non vt distincta persona à Filio: ergo persona Filij esset sic producibilis, quod est esse spirabilem: paternitas autem in illo casu non esset producibilis; & sic solum esset communicabilis. Et quando dicitur quod in quantum Filius est persona genita, & nata, & sic non esset persona spirata; Dico quod in quantum Filius in illo casu esset persona genita, distingo, persona genita cum identi

identificatione spirationis passivæ, concedo; cum oppositione, & relatione spirationis activæ, nego; ergo non esset spirata illa persona, distinguo, realiter, & identice, nego; formaliter, & reduplicative sub appellatione Filij, concedo; & sic simul esset spiratus, & genitus, sicut simul est volitio, & intellectio. Nec potest intelligi Pater ut duplex principium fundans diversas origines reales inter se, nisi inter se opponantur, & una sit ex alia, ut ostensum est.

Ad Confr. Respon. quod filiatio nunc opponitur in quantum filiatio spirationi passivæ oppositione radicali, spiratio activa oppositione formali, & idem est de paternitate ut paternitas est. Hoc est dicere, paternitas, & filiatio sub explicatione istorum conceptuum relatiuorum non explicant formalem oppositionem cum Spiritu S. sed inter se, Pater enim est correlativum filij, & est contra, non amplius. Cæterum quia tam Pater, quam Filius petunt ex suis propriis relationibus habere vim, & relationem spirationis; ideo ex tali exigentia sunt radicaliter oppositi Spiritui S. quia sunt fundamentum spirationis, illamque petunt ex se. Si autem Spiritus S. non procederet à Filio, nec radicaliter, nec formaliter illi opponeretur.

Et si instes: quod si per impossibile Filius non produceret Spiritum S. sed solum radicaliter posset producere, distinguereturne ab illo ex sola potestate producendi?

Respon. quod in ista suppositione, admittendo per impossibile, quod non procederet tunc de facto, vel cum virtute spirativa fingeretur retinere relationem spirationis, sed non originem, & actualement emanationem, vel neque emanationem, neque relationem retinere. Si retineret relationem spirationis, distingueretur à Spiritu S. ratione radicalis oppositionis ex parte filiationis, & virtutis spirativæ cum relatione, quia tota oppositio in relatione saluatur. Si autem non retineret relationem spiratoris, neque actualement emanationem, non distingueretur actu, quia non referretur, nec haberet oppositionem actu. Radicalis autem oppositio sine actuali relatione saltem comitante, nihil operatur ad distinctionem; modò autem filiatio radicaliter ex se opponitur, sed retinet relationem spiratoris.

Fundamenta Græcorum extirpantur

Præcipua fundamenta Græcorum, quibus ita tenaciter suo errori adhaerint, fuerunt duo.

- 38 Alterum ex negativa autoritate, quia Spiritum S. procedere à Filio non est expressum in Scriptura, neque fuit positum à Patribus Concilij Nicæni, & Constantinopolitani in symbolo: nam Concilium Nicænum solum posuit *Credo in Spiritum S. Constantinopolitanum autem addit ex Patre procedentem*, & omittitur illa particula *Filioque*, quam postea addiderunt Latini ad symbolum; & conabantur ex hoc duo ostendere; alterum quod autoritas negativa in hac parte debet magni ponderis censeretur, eo quod de tam sublimi mysterio non est fas aliquid dicere, nisi quod traditum est à Scriptura, & Conciliis; unde si in ipsis non habetur talis processio ex Filio, utique nefas erit id dicere: alterum est non licuisse Latinis eam additionem facere ad symbolum, eo quod anathemate feriuntur, qui ausi fuerint aliam fidem, seu symbolum componere, tum in Concilio illo Constantinopolitano in Ephesino *tomo 2. c. 33. & tomo 5. c. 6.* tum in Calcedonensi *actione 5. in secunda fidei definitione.* Vnde Ioan. a S. Thom. in 1. part. D. Tn. Tomus alter.

de etiam in Concilio Florentino; ut apparet in *sessione ultima* cum tractaretur de concordia, & pace utriusque Ecclesiæ Orientalis, & Occidentalis, multi Græcorum, qui concedebant Spiritum S. ex Filio profluere, emanare, & procedere, recusabant tamen convenire in hoc quod in symbolo adderetur, sed quod symbolum sine tali particula recitaretur. Nec videbatur illis necessarium, omnia quæ de nouo definiuntur adici symbolo, sicut in Concilio Ephesino definitum est sanctam Virginem esse Deiparam, nec tamen in symbolo, ubi dicitur natus ex Maria Virgine, additum est *Deipara*: & multa alia sunt ab Ecclesia definita de fide, nec tamen addita sunt symbolo. In hoc puncto valde contenderunt Græci in Concilio prædicto.

Alterum fundamentum quo Græci ducebantur, 39 erat, quia si concederent Spiritum S. ex Filio procedere, videbantur concedi duo principia Spiritus S. nec solum duo principia, sed æquè immediata, & non unum ex alio, quod dicebant significari illa particula *Ex*, dicendo procedere ex filio, quod indicat filium esse primum principium, non ab alio accipiens ut spiraret Spiritum S. Hoc autem est magnus error, cum quidquid Filius habet, non à semetipso, sed ex Patre habeat: ergo non est ponenda illa particula *ex Filio*, ne occasio detur huius erroris, significando aut duo principia Spiritus S. aut æquè innascibilia, & ex se, & non unum ab alio, dicendo ex æquo procedere à Patre, & Filio. Unde ad hoc evitandum dicebant aliqui eorum posse concedi Spiritum Sanctum procedere à Patre per Filium, non autem à Patre Filioque, quasi ex æquo, & per se, primo.

Utique fundamento satisfactum est in Concilio Florentino in *litteris unionis* ab Eugenio IV. editis, quæ habentur post sessionem ultimam Concilij. Et quoad additionem Symboli, sic dicitur: *Definimus insuper explicationem verborum illorum, Filioque veritatis declaranda gratia, & imminente tunc necessitate, licite ac rationabiliter Symbolo fuisse oppositam.* Certè in hoc inanis fuit querela Græcorum. Nam ipsi negare non possunt in Ecclesia esse potestatem disponendi Symbolum, & explicandi formulam fidei, addendo aliquid, vel tollendo iuxta temporum varietatem, & occurrentiam necessitatis, quæ ad hoc cogit: manifestum est enim quod Nicænum Concilium addidit aliquid ad Symbolum Apostolorum, videlicet illam particulam *genitum non factum consubstantialem Patri*, ubi vox *Homousion*, seu consubstantialis introducta est in Symbolum quantumcumque Arriani reclamauerint, & restituerint. Deinde in Concilio Constantinopolitano I. in Symbolo additum est *Credo in Spiritum S. ex Patre procedentem*, ut constat ex *sine eiusdem Concilij*, ubi habetur hoc Symbolum cum illa additione *Ex Patre procedentem*, quæ non habebatur in Symbolo Concilij Nicæni. Tandem in VII. Synodo, seu in Concilio Nicæno II. sub Adriano I. Pontifice, & Constantino, atque Irene Imperatoribus anno 787. editum est Symbolum, ubi opposita est illa particula *Qui ex Patre Filioque procedit*, ut patet in Concilio in *actione, seu ultima in titulo, Definitionis sanctæ magnæ, & univærsalis Synodi in Nicæa secunda.* Quamvis etiam ante hæc tempora in Hispania solitum fuerit in Symbolo fidei illam particulam apponi *ex Filioque*, ut constat ex confessione fidei in Concilio Toletano VIII. celebrato sub Reccisvintho Principe, *era 691. id est, anno Domini 1653.* quæ confessio habetur in titulo I. illius Concilij, & ut ibi dicitur *In sacris Missarum* P 3 *solemnis*

solemnitatibus concordi voce profitebatur, & dicebatur. Erat ergo hoc iam in Hispania tunc receptum, & verisimile est non à se incepisse, sed traditum accepisse. Cur ergo non fuit licitum ab eadem Ecclesiæ potestate addere in symbolo ista verba, ut magis explicaretur mysterium huius processionis Spiritus S. præsertim excitato hoc dubio & crescente hoc errore? Cur verò id Ecclesia non fecerit in aliis rebus quas de fide definiuit? Notum non est de Ecclesiæ facto iudicare, sed id quod decreuit reuerentes suscipere, & ipse definiuit in supradictis verbis rationabiliter id factum esse. Certè in symbolo fidei non omnes res quæ de fide sunt contineri debent: sic enim cresceret in immensum, cum tamen symbolum breue esse debeat, & ea præcipuè continere quæ circa ipsum Deum ac mysterium Trinitatis, & Incarnationis versantur. Vnde in iis præcipuè articulis adiciere aliquid Ecclesia consuevit, quæ ad ipsas personas diuinas pertinent, ut circa Patrem addidit quod sit creator visibilium, & inuisibilium propter hæresim Manichæorum, qui negabant Deum esse creatorem rerum corporalium; circa Filium quod sit consubstantialis Patri, & genitus non factus contra Arium: circa Spiritum S. quod ex Patre procedat, & illi sit cōadorandus contra Macedonium, & quod ex Patre Filioque procedat contra Græcos; cum tamen multa ex his in symbolo primo Apostolorum, aut Nicæno non habeantur. Quod specialius in hoc articulo faciendum fuit, quia ex hoc ipso quod non inueniretur expressum in Symbolo, Græci faciebant argumentum quod non ita sentiendum esset, negabantque posse id ab Ecclesia in Symbolo poni: debuit ergo Ecclesia suam in hoc ostendere potestatem, nec Græcorum cedere argumento vel querelæ. Quod autem in Ephesino, & Chalcedonensi Concilio fuerit anathema impositum mutantibus symbolum, seu formulam fidei, id factum est vel contra eos qui priuata authoritate id facerent, vel etiam qui contrarium ipsi fidei adicerent: aliàs quomodo Concilium generale potuit prohibere ne ab alia simili potestate qualis est alterius Concilij generalis, vel à confirmatore Concilij generalis, qui est Papa id non possit fieri, cum par in parem, & multos minus in superiorem, potestatem non habeat? Similiter id quod maioris explicacionis gratia Symbolo adicitur, non mutatio fidei est, sed explicatio.

40 Secundo fundamento satisfecit Concilium Florentinum in litteris unionis dicendo, quod Latini affirmauerunt non se hac mente dicere Spiritum S. ex Filio procedere, ut excludant Patrem, quin sit fons, & principium totius Deitatis, scil. Filij, & Spiritus S. aut quod id, quod Spiritus S. procedit ex Filio, Filius à Patre non habeat, sine quod duo ponant esse principia, seu duas spirationes, sed unum tantum asserant esse principium unicamque spirationem Spiritus S. prout hactenus asseruerunt. Ita Concilium, iuxta quam doctrinam definiuit Spiritum S. à Patre, & Filio tanquam ab vno principio, unicamque spiratione procedere, & quod hoc ipsum quod est Spiritum S. à Filio procedere ex Patre habet, à quo æternaliter genitus est. Quare ly *procedere ex alio*, non dicit, quod illud principium ex quo procedit non possit etiam ex alio esse, cum verè sit principium de principio, & quidquid verè principium est, hoc dicit, quod id quod principiatur, & originatur ex illo procedat, & sit præsertim cum illud ipsum principium Patris ex quo procedit Spiritus S. idem sit quod in Filio, licet à Patre ei communicatum, & ita si Spiritus S. procedit ex Patre, etiam procedet ex Filio.

Nec ex hoc quod Pater habeat vim spiratiuam quam communicat Filio, sequitur quod prius origine sit ab ipso Spiritus S. quàm à Filio, eo quod illam vim spiratiuam quam habet Pater non habet nisi in actu secundo, & cum suo fructu, & termino producto qui est Spiritus S. ergo pro illo priori quo est in Patre vis spiratiua, etiam est productus Spiritus S. & sic iam intelligitur esse, antequam producat Filium.

Sed Respon. quod in re, & pro proprietate in quo, totum est simul, scilicet virtus spiratiua in Patre, & in Filio, & spiratio eius ut à Patre, & Filio tanquam ab vno principio spiratore. Et hoc sufficit ut actus purus spiratiuæ virtutis nunquam sit sine fructu, & actu secundo producendi Spiritum S. Pro prioritate autem originis qua Pater generat Filium communicat illi virtutem spiratiuam, quæ notionaliter, & respectu personæ est potentia & non exercetur notionaliter à solo Patre, sed à Patre, & Filio; essentialiter autem est in actu secundo, & in actu puro, & sic à Patre communicata est Filio, quia totum hoc exigit vis spiratiua ex sua perfectione notionali, ut communicetur à Patre, & non exerceatur notionaliter, nisi in duobus suppositis, ut artic. sequ. dicetur infine.

ARTICVLVS IV.

Vtrum Spiritus S. ex sua characteristicâ proprietate petat procedere à duabus personis, & vno principio spiratore?

Cum in vnoquoque producente inueniatur & concurret principium quod, seu suppositum subsistens, & principium quo, seu forma, aut virtus producendi; hoc quoque in processione Spiritus S. certum est inueniri. Nam, & Spiritus S. procedit à subsistente principio illi opposito relatiuè, & virtus spiratiua qua producit in illo principio datur. Cæterum cum in hac Spiritus S. processione inueniatur duplex suppositum spirans, & mutuo amans, scil. Pater, & Filius, inueniatur autem vna relatio spirationis actiuæ, qua illa duo supposita constituuntur vnus spirator; inueniatur etiam vna voluntas, seu virtus spiratiua ut principium quo, difficultas est, tum circa ipsa supposita spirantia, tum circa ipsam relationem spiratoris, seu circa hoc principium quod dicitur spirator, tum circa ipsam virtutem spiratiuam, seu principium quo spirandi. Et est triplex difficultas.

Prima, an requirantur duæ personæ amantes seu spirantes ad productionem Spiritus S. solum ut conditio requisita tenens se ex parte subsistentiæ seu subsistentiarum in Deo, an ut pertinet ad rationem formalem ex parte ipsius amoris sic spirati. Cum enim ad producendum aliquid requiratur, & conditio tenens se ex parte subsistentiæ, quia suppositum est id quod producit, & formalis ratio per se influens in quarto modo per se respectu rei procedentis, punctus difficultatis est an duo supposita, seu duæ personæ Pater, & Filius requirantur solum ex parte conditionis, quæ tenet se ex parte suppositi, & merè concomitanter se habeant, sicut ad productionem creaturarum tres personæ non concurrunt ut ratio per se creandi, quia Deus creat ut vnus, & æquè bene crearet si tantum esset vnus suppositum, sicque concomitanter solum se habent illæ tres personæ ad creandum: an, verò duæ illæ personæ

personæ Pater, & Filius speciali aliqua ratione requirantur per se, & non merè concomitantur ad productionem Spiritus S.

Secunda difficultas est circa spirationem, seu spiratorem, an sit principium subsistens spirandi, an duæ personæ possint dici duo spiratores absolute, an vnus tantum spirator, qui sit indiuiduum subsistens, & relatio ipsa per se spirans: & quid nomine spiratoris includatur.

Tertia difficultas est circa ipsam virtutem spirationem, seu principium quo spirandi quid importet, & pro quo supponat, pro relatione an pro essentia, quæ difficultas est communis ipsi, & potentia generatiuæ, quæ *infr. seq. disp.* tractanda est. Specialis verò difficultas est circa ipsam virtutem, & principium quo spirandi, an sit æquè primò in Patre, & Filio, an prius origine in Patre. Alia verò difficultas restabat an processio Spiritus S. sit voluntaria, licet non sit libera, sicut amor beatificus voluntarius est, & necessarius. Sed hæc non est magna difficultas, & *seq. disp.* generaliter inquiretur, an actus notionales voluntarij sint.

Spiritus S. per se quarto modo procedit ex duabus personis.

2 Præsupposita fide, quòd Spiritus S. procedit à Patre, & Filio tanquam à personis originantibus, & procedentibus ipsum, vt venari possimus, & intelligere qua ratione requirantur ad talem processionem duæ istæ personæ, oportet prius proponere & explicare titulos quibus hæc processio petat pluralitatem personarum spirantium.

Primus est quia Spiritus S. procedit vt tertia persona Trinitatis ex sua característica proprietate; & sic supponit duas personas, non antecedentia durationis, sed proprietate originis, nec potest esse tertia persona distincta à duabus primis, nisi procedat ab vtraque, vt satis superque contra Græcos, *præced. art.* ostensum est. Ex hac ergo ratione procedendi vt tertia persona distincta à prima, & secunda exigit procedere à duabus personis.

Secundus titulus est quia Spiritus S. procedit vt amor notionalis per voluntatem, sicut Filius per intellectum. Ex propria autem ratione sua amor supponit cognitionem: ergo amor notionalis cognitionem notionalem, cognitio autem notionalis nequit esse sine termino expresso, & producto, scil. sine Verbo: per se ergo supponit amor notionalis vt principium sui Patrem exprimentem, seu dicentem, & Verbum expressum à quibus procedat amor, non tam ratione sui, quàm ratione cognitionis ad amorem requisiti, & præsuppositi, quæ est cognitio notionalis, cognitio autem notionalis non stat sine duplici persona, scil. Patre dicente, & Verbo expresso, seu dicto.

Tertius titulus est ratione subsistentiæ requisitæ ad producendum Spiritum S. quia principium spirandi quod dicitur spirator, non est aliquod indiuiduum subsistens per se, & seorsum à Patre, & Filio, sicut hic Deus, quia si esset ratione sui subsistens esset subsistentia relatiua, ac proinde opposita aliis subsistentiis, quia esset persona; & sic ponerentur quatuor personæ in Deo. Vt ergo principium illud spirandi reddatur subsistens, indiget duplici persona, quia in vna tantum persona stare non potest, cum principium spirandi sit communicabile illis, & non oppositum alicui earum. Et præpterea quia Spiritus S. refertur ad Patrem, & Filium: ergo per se requirit quòd Pater, & Filius referantur ad ipsum.

Quartus titulus, & ratio propter quam petit

duas personas processio Spiritus S. est quia ipse amor quo spirator, est amor mutuus, & amor amicitia, seu nexus duorum, vt communiter Patres dicunt; & patet quia amor amicitia est perfectior amore concupiscentia, & Deus est capax talis amoris, quia habet plures personas, scil. Patrem, & Filium, qui notionaliter amare se possunt amore reciproco, & mutuo: ergo non est illi denegandus hic amor amicitia, qui maximè competit amori notionali, quia supponit plures personas inter quas exerceatur.

3 Ex his rationibus propter quas attribuitur Spiritui S. necessitas procedendi à duobus suppositis, omnes quidem habent aliquam conducentiam per se ad talem processionem, quæ sine dubio exigit quòd sit à duabus personis, quia in se procedit cum talibus conditionibus, quòd necessariò exigunt quòd processio à duobus sit. Sed tamen non æquè immediatè, nec æquè formaliter omnes requiruntur. Nam quòd sit tertia persona distincta à duabus, exigit quòd procedat ab vtraque, non propter ipsam formalem rationem, & peculiarem Spiritus S. Sed propter communem rationem, quia nulla persona distinguitur ab alia, nisi procedat ab illa, vel alia à se. Quòd verò sit notionalis amor Spiritus S. præsupponit quidem notionalem cognitionem, quæ est cognitio dicens & exprimens in Patre, & consequenter Verbum dictum in Filio, sed quòd præsupponat illas duas personas vt elicientes illum amorem, & spirantes, non ex hoc immediatè infertur, sed ex quadam conditione identicè, & materialiter se habente, scil. quia vtraque persona habet eandem voluntatem, quia consubstantiales sunt; non ex ipsa ratione formali amoris id petitur, quia etiam si non procederet à Verbo, vt à persona spirante, notionalis amor intelligeretur, id est relatiuè se habens, & procedens.

4 Restat ergo vt videamus an propter vltimum titulum competat Spiritui S. procedere à duobus suppositis: sic enim in quarto modo per se procedet ab illis, quia ex ipsa formali ratione amoris spirati id petit, & non ratione alicuius conditionis adiunctæ vel materialiter tantum, & concomitantè concurrentis, sicut materialiter concurrunt tres personæ ad creationem ad extra: & eodem modo se habebunt duæ personæ, si solum concurrunt vt dantes subsistentiam naturæ: vna enim sola sufficienter id faceret. In hac ergo parte Scotus in 1. dist. 12. qu. 2. tenuit Spiritum S. non petere hunc duorum suppositorum concursum per se formaliter, seu in quarto modo, sed quasi materialiter, & concomitantè, sicut se habent tres personæ ad creationem, ad quam non requiruntur formaliter, & in quarto modo per se, quia Deus creat in quantum vnus, non in quantum trinus, & tamen ipsæ tres personæ creant vt personæ, & supposita subsistentia illius virtutis creatis. Cum Scotus sentit Durandus in 1. dist. 11. qu. 3. Sequitur Bellarminus *tomo 1. lib. 1. de Christo c. 27.* Molina *in hac qu. 36. art. 4. disp. 5.* At verò P. Arrubal *hic disp. 130. licet in c. 2.* supponat processionem Spiritus S. necessariò exigere duo supposita, tamen in reddenda huius rei ratione in c. 3. recurrit non ad ipsam rationem amoris, vt vnitiuus, & amabilis est, sed vt notionalis: sic enim in quantum notionalis præsupponit cognitionem notionalem, quæ non nisi in duabus personis inueniri potest, cum cognitio notionalis sit illa quæ procedit à Patre producendo, & exprimendo Filium; & quia Spiritus S. producit vt amor subsistens, & terminus qui est persona distincta ab aliis, ita etiam postulat voluntatem prius existentem in duobus suppositis, vt procedat tan-

quam distincta persona ab illis Et P. Suarez lib. 10. D. Trinitat. c. 6. hanc rationem propter quam processio Spiritus S. petit plura supposita ad hoc reducit quod Spiritus S. procedit ut dicens relationem ad Patrem, & Filium, nec habet aliquod principium productivum sui subsistens commune Patri, & Filio, sed immediatum subsistens productivum huius processionis est utraque persona. Quæ rationes tam Arrubalis quam Suarez non ostendunt ita immediatè per se in quarto modo requiri duarum personarum concursum ad processionem Spiritus S. nam etiam si à solo Patre, & non à Filio procederet, ut Græci fingeant, vel à solo Filio, & non à Patre, adhuc notionalis esset ille amor, & notionalis modo distinctus, qui adhuc persona esset, & tamen non esset à duobus. Non ergo probatur quasi per locum intrinsecum, & in quarto modo per se requiri quod procedat à Filio ex eo præcisè quod præsupponit cognitionem notionalem: potest enim illam supponere, & intelligi quod à solo Patre procedat quantum ex vi processionis, ut notionalis sit, id est, personalis, & relatiua. Similiter quod persona Spiritus S. sit distincta à persona Patris, & Filij, & procedat ut terminus, & persona subsistens, non arguit quod per se in quarto modo procedat à duabus personis Patre, & Filio, quia licet de facto duæ personæ sint, quæ reddunt subsistens ipsum principium spirandi, tamen non ostenditur quod etiam si per impossibile non procederet à duabus personis, sed ab una tantum, non sufficeret subsistere illud principium in una tantum persona, ut produceretur Spiritus S. Nec ad hoc ut procedat tanquam persona tertia seu ultima in Trinitate ostenditur per requiri quod procedat à duabus personis, ex propria, & formali ratione talis personæ quia tertia est, nisi fortè ex generali ratione quia distinguere non potest ab ea à qua non procedit, quod non est per se requirere in quarto modo, ex eo quod talis persona est, procedere à duabus, quia etiam in sententia Græcorum, si solum procederet Spiritus S. à Patre, procederet ut persona distincta, imò si per impossibile fingatur sic procedere, adhuc in sententia Scoti distingueretur à Filio: ergo non ostenditur contra Scotum exigere illam processionem Spiritus S. quod à duabus personis procedat, ad hoc ut distincta persona sit, cum in suppositione Scoti, etiam non procederet nisi ab una, distincta foret, Quare istæ sententiæ Arrubalis & Suares valde inclinant in sententiam Scoti.

5 Oppositam ergo sententiam, nempe processionem Spiritus S. per se, & in quarto modo exigere quod sit à duobus suppositis, simpliciter tenet S. Thom. in hac qu. 36. art. 4. ad primum; & in 1. dist. 11. qu. 1. artic. 4. ad 2. ponit differentiam inter creationem, & spirationem, quod creatio non petit tres personas per se, spiratio verò petit duas. Et idem habet dist. 29. qu. 1. art. ultimo ad 2. Et qu. 10. de potentia artic. 2. ad 15. ubi ex eo quod Spiritus S. sit amor mutuus, & nexus duorum dicit, quod à duobus suppositis debet procedere. Sequuntur communiter discipuli S. Thom. Caiet. loco cit. prima partis, & ibidem Bannez, Zumel, Nazarius, Ripa, Torres, Ferrar. 4. contra Gentil. c. 25. Capreolus in 1. dist. 12. quæst. 1. Valqu. bñc disp. 150. c. 2. & alij plures quos citat, & sequitur Collegium Carmelit. tract. 6. de Trinit. disp. 15. dub. 5.

6 Fundamentum S. Thom. sumitur ex formali ipsa ratione amoris mutui, quæ ita essentialiter petit duorum suppositorum concursum, ut nullo modo nec fingendo casum impossibilem possit procedere ab uno. Et hæc formalis ratio est, quia ille

amor quo procedit Spiritus S. est amor amicitiae mutuus, & quasi nexus duorum, sed non est mutuus ex parte actuum amandi, quia actus amoris unus est, & una virtus spiratiua, unicæque relationi spirationis actiue: ergo esse mutuum, nexumque duorum solum habere potest ratione plurium personarum, inter quas mutua, & reciproca ratio amoris esse potest. Minor certa est, cum in processione Spiritus S. nec duplex actus amoris, nec duplex spiratio esse possit, quia Pater, & Filius unica virtute spirant Spiritum S. ergo non restat unde sumatur pluralitas ad rationem mutui amoris requisita, & ad rationem amicitiae, & nexus duorum, nisi ex parte pluralitatis personarum, Maior est communiter recepta inter Theologos, traditurque ab Aug. lib. 6. de Trinit. c. 5. & à Prospero in libro sentiarum, sententia, 371. Richardo de S. Victore lib. 3. de Trinit. Anselmo in monologio c. 48. & 52. Bernardo in serm. 3. de Pentecoste, & ab aliis pluribus.

Et ratio potest sumi ex eo, quia supposita distinctione personarum in Deo species amoris, amicitiae est ei possibilis, propter diuersitatem personarum amantium, licet voluntas sit una quæ non minuit, sed auget amorem amicitiae, cum illa sit perfectior amicitia, ubi magis concordantes sunt voluntates: illa ergo perfectissima erit, ubi unum fuerit voluntas. Unde amicitiae amor, semota imperfectione diuersitatis in actibus nullam imperfectionem dicit ex qua repugnet Deo. Sed Spiritus S. procedit ex perfectissimo amore notionali, & personali: ergo si perfectissima species amoris quæ esse potest, est amor amabilis, & amicitiae, quando est inter personas, videtur quod ex illo debet procedere Spiritus S.

Dices primò, ex Arrubale, hanc rationem petere principium: nihil enim est aliud Spiritum S. esse nexum duorum, & amorem mutuum, quam procedere à duobus: ergo probare quod procedit à duobus, quia est nexus duorum, est probare idem per idem.

Dices secundò: Esto procedat ut amor amicitiae ad alterum, sufficit quod sit amor amicitiae erga ipsum Spiritum S. procedentem, non autem Patris, & Filij inter se: cum etiam amor amicitiae inter Patrem, & Spiritum S. sit: ergo bene potest saluari ista formalis ratio quod sit amor amicitiae, & inter duas personas, & tamen quod sit procedens ab una tantum persona, si autem amicitia illa inter personam à qua procedit, & ipsum Spiritum S. qui procedit.

Dices tertio, amorem illum habere quod non est nexus duorum in quantum amor essentialis est, non in quantum notionalis, & spiratiuus, seu per modum impulsus: ergo non probatur hanc rationem nexus, & mutuae coniunctionis esse ratione personarum, quia istæ solum requiruntur ad amorem notionalem, non ad essentialem.

Ad primam instantiam Respon. non esse idem esse nexum duorum, & procedere à duobus, licet hoc secundum requiratur ad illud primum, sed non è contra: Stat enim bene quod duo habeant amorem, & si in utrisque fuerit eadem voluntas, habeant eundem actum amoris, & tamen non sequatur ex hoc quod habeant amorem ad inuicem sed unusquisque amat seipsum, non ad inuicem unus alium: ergo probare quod amor Spiritus S. procedit per se à duobus, quia per se, & ex specie sua est unitiuus, & nexus duorum, non est probare idem per idem nec petere principium, sed procedere sicut ab inferiori ad superius, sicut cum probatur hoc esse animal, quia est homo, sic probatur amorem esse à duobus, qui est unitiuus, &

tuus, nexūque duorum, & non sunt duo amores: ergo duæ personæ amantes. Quare cum amorem procedere à duobus possit intelligi dupliciter, videlicet mutuò, & non mutuò, reciproce, seu amicaliter, & non reciproce, seu non ad inuicem, sed unusquisque se amando, non est idem formaliter amorem esse mutuum, seu vnitiuum, & procedere à duobus; & sic potest probari quòd sit à duobus, quia est vnitiuus procedendo ab inferiori ad superius. Et secundò, potest amor esse mutuus dupliciter, vno modo, quia est duplex amor, & sic mutuus, & reciprocus, & amicalis ex parte actus sicut est in nobis; & sic non probatur quòd procedat ex duobus idem amor, sed quilibet secundum se procedat ex suo operante. Alio modo amor est mutuus, & amicalis sine multiplicatione actus, sed idem omnino existens, & ab eadem voluntate procedens, & talis amor non potest esse mutuus, & vnitiuus, nisi ratione personarum, & procedendo à duobus suppositis, quia reciprocatio, & amicalitas non est parte actuum, sed personarum. Vnde non est idem esse amorem vnitiuum, seu nexum duorum, & procedere à duobus Spiritum S. ex eo præcisè quia amor ille vnitiuus est, sed supponendo quòd est amor vnus ex parte actus, & tamen mutuus, & amicalis seu vnitiuus, infert quòd talis amor non obstante quòd est vnus, debet procedere à duobus suppositis quia vnitiuus, & amicalis est, & solum potest hoc esse ratione plurium suppositorum, non plurium actuum.

Ad secundam instantiam dicitur, quòd ille amor mutuus, & amicalis non saluatur sufficienter per hoc quod versetur solum inter personam spirantem (etiam si esset vna tantum) & ipsum Spiritum S. procedentem vt terminum spirationis; sed requiritur quòd ex parte principij procedentis duplex persona sit mutuò inter se communicans, & amicaliter spirans.

Cuius ratio est, quia persona procedens solum se habet vt terminus amoris notionalis, seu vt communicans cum aliis personis terminatiue solum, non actiue in genere notionali: nec enim Spiritus S. aliquid communicat notionaliter aliis personis, tribuendo eis aut producendo, neque per se solum, neque simul cum alia persona, sicut Filius communicat cum Patre in spirando, & communicando inter se productionem Spiritus S. & Pater communicat Filio tribuendo ei per generationem naturam, & vim spiratiuam. Si ergo Spiritus S. notionaliter non communicat aliquid Patri & Filio, sed tantum terminatiue accipit ab ipsis, non est inter ipsum, & suum principium mutuus, & reciprocus amor notionalis actiue communicatiuus, sed solum ex vna parte communicatio notionalis est erga Spiritum S. non autem ex parte Spiritus S. erga Patrem & Filium, quia nihil à Spiritu S. notionaliter procedit, sed solum terminat omnes processiones ad intra. Vnde in casu argumenti ex vi suæ originis seu productionis ille amor non esset amicitia, sed solum post terminationem ad Spiritum S. resultabit amor amicitia inter Spiritum S. & alias personas, & hoc non in tota sua latitudine, & exigentia amicitia, scilicet cum redamatione, & communicatione mutua actiua, & notionali, & secundum eandem rationem, seu æquiparantiam, sed ex parte vnus extremi dando, & communicando, ex parte alterius tantum recipiendo, seu terminando communicationem. Vnde vt saluetur amicitia amor in Deo, etiam quoad hanc extensionem, & modum amicitia, qui est cum

mutua redamatione, & communicatione, actiua, oportet quòd non solum ponatur amicitia inter personam producentem, & productam, spirantem, & spiratam, quasi inter principium, & terminum, sed etiam ex vi ipsius originis detur in ipso principio spiratio duplex persona, inter quas sit communicatio ad inuicem mutua, & reciproca; & sic in ipsamet originatione, & ex vi principij, & originis producentis procedat Spiritus S. ex amore amicali, non autem solum conueniat illi amori esse amicitiam per quandam conlectionem, & sequellam, scilicet postquam terminus est positus, non proxi originatur.

Et si dicas: nam etiam Filius nihil communicat, ¹⁰ aut dat Patri, sed solum ab eo per æternam generationem accipit: ergo adhuc non saluamus mutuam communicationem notionalis in ipso principio originante Spiritum S. & sic non euitamus inconueniens.

Resp. quòd Filius nihil communicat Patri quoad suam personam, sed communicat aliquid Patri quoad suum exercitium spirandi Spiritum S. quia Pater non potest spirare Spiritum S. sine Filio, cum virtus spiratiua sit in vtraque persona; & sic aliquid communicat Patri, quia exhibet ei id sine quo spirare non potest, scilicet personam suam vt spirantem, sine qua Pater non producit Spiritum S.

Ad tertiam instantiam Resp. quòd amor vt ¹¹ essentialis non est nexus plurium, nec mutuus, & amicalis erga ipsum Deum, sed prout notionalis, qui supponit distinctas personas inter quas nexus, & communicatio sit. Vnde & in Scriptura Spiritus S. vocatur communicatio, 2. ad Corinth. 13. *Gratia Domini nostri Iesu Christi, & charitas Dei & communicatio sancti Spiritus*, &c. Nam ratio ista nexus, & communicationis mutua si realis est, exigit distinctionem aliquam inter extrema, & hæc distinctio non potest esse nisi inter actus ipsos, quibus sit communicatio, vel inter personas: in amore essentiali neutra distinctio datur, quia in essentialibus nondum intelliguntur personæ distinctæ, actus autem ipse diuidi, & multiplicari non potest: oportet ergo quòd solum inueniatur in amore notionali, in quo etsi actus non diuiditur, tamen personæ multiplicantur, & ratione earum mutua illa communicatio, & reciprocus amicitia nexus est.

Nec denique obstat, quòd etiam si non sit amor ¹² amicitia in Deo, adhuc perfectio amoris in Deo est: sufficit enim amor Dei ad seipsum vt perfectissimus sit,

Resp. enim quòd licet ille amor perfectus sit quo Deus seipsum diligit absolute ex parte rei amata, & sine explicita ratione amicitia, tamen etiam amor amicitia ex seipso modo amandi perfectus est, imò perfectissimus, & maxime proprius naturæ intellectualis, cum amicitia non inueniatur in brutis: ergo non debet ista perfectio deesse Deo, licet alia etiam non excludatur. Et sic maxime debet exerceri in amore notionali, qui est inter personas distinctas, atque adeò Spiritus S. debet procedere ex illo, sicut in intellectu, licet dari debeat scientia, & prouidentia, & sapientia, non debet deesse processioni Verbi diuini quòd procedat per actum sapientia, quia ipse est sapientia genita. Sic Spiritus S. debet procedere per amorem amicitia qui perfectissimus est licet etiam sit in Deo amor absolutus ad se, qui etiam perfectissimus est in suo ordine, & linea. Nec solum concomitanter inueniatur ille amor amicitia in ista processione, quia amorem esse amicitiam est intrinseca perfectio, cum sit differentia essentialis diuidens

dens amorem : ergo si inuenitur in Deo , tanquam formalis , & intrinseca differentia , & non vt aliquid purè concomitans inuenitur.

- 13 Obiicies pro sententia Scoti : In Patre solo est perfectissima , & completissima virtus spiratiua : ergo per se , & ex formali ratione talis processionis non exigit duo supposita. Consequentia patet : nam vbicumque inuenitur integra , & perfecta virtus ad agendum potest operari : ergo si in solo Patre inuenitur perfecta , & completa virtus spiratiua , in solo Patre poterit operari , quantum est ex formali ratione virtutis , & quarto modo per se , licet in re , & concomitanter duo supposita exigit , quia sic inueniuntur in re , & voluntas spiratiua est in illis de facto , non quia ex formali sua ratione id exigit. Anteced. verò probatur , quia virtus quæ est in Patre ad spirandum non accipit aliquam perfectionem vel complementum ex eo quod sit in Filio , cum totum quod habet Filius , à Patre habeat : ergo prout in Patre solo completissima , & perfectissima est ; imò & infinita ; atque adeò si prout ibi est infinita , vtique integra est , & completa ad spirandum.

Conf. quia processio Spiritus S. neque in quantum procedens ex cognitione notionali , neque in quantum amor mutuus exigit per se quarto modo quod procedat à duobus , neque in quantum ille duæ personæ dant subsistentiam virtuti spiratiuæ : ergo ex nullo capite id exigitur formaliter , & per se. Anteced. probatur : Non ex eo quod notionalis est , quia ad hoc non influit per se pluralitas personarum , quia etsi per impossibile Pater intelligendo non produceret Verbum , & per voluntatem spiraret Spiritum S. ille amor esset notionalis , nec tamen procederet à duabus personis. Non ex eo quod amor sit mutuus , quia esse mutuum est denominatio extrinseca in amore. Si enim ego diligo amicum , nihil reale ponitur in illo amore ex eo quod ab alio vicissim amatus sim , sed hæc est extrinseca denominatio : ergo ille amor quo diligo amicum , idem remaneret intrinsecè , etiamsi non essem redamatus ; similiter ergo amor quo spiratur à Patre Spiritus S. idem intrinsecè remaneret , etiamsi mutuo non procederet à Filio : non ergo per se in quarto modo requiritur quod procedat à duobus. Denique ex eo quod natura diuina redatur subsistens illa duplici persona Patris , & Filij , non sequitur quod per se vtrique persona requiratur , sed materialiter , & concomitanter , sicut pro creatione , & productione creaturarum inuenitur natura diuina subsistens in tribus personis , & tamen non per se formaliter requiruntur tres personæ ad creandum , quia creaturæ procedunt à Deo in quantum vnus.

- 14 Resp. quod esse in aliquo supposito integram , & totalem , & completam virtutem ad operandum stat dupliciter : Vno modo integram virtutem , & completam totalitate virtutis quoad actiuitatem , & vim operandi : alio modo totalitate non solum virtutis , sed etiam conditionis requisitæ , vt talis virtus operetur ; sicut licet voluntas sit integra , & totalis virtus elicitua amoris quantum ad vim productiuam , non tamen habet conditionem per se requisitam scil. cognitionem obiecti sine intellectu , & tamen intellectus non dat virtutem voluntati eliciendi amorem , sed conditionem sine qua non eliciet. Et potentia visiva in ratione virtutis est tota , & completa vis elicitua visionis , & tamen sine obiecto , & medio illustrato non potest videre. Sic ergo tota vis spiratiua in Patre est perfecta , & completa quantum ad vim , & actiuitatem spiran-

di , vt probat argumentum , quia eadem numero , & non maior , neque auctior redditur ex eo quod est in Filio ; sed quantum ad conditionem , & modificationem quandam quæ requiritur vt amor ille spiretur tanquam amor mutuus duorum , & à conceptione notionali dependens , quæ est Verbum , sic per se requirit duo supposita , nec inuenitur completè , & totaliter in Patre , licet inueniatur tota , & completa virtus in ratione , & actualitate virtutis , sed non tota , & completa conditio vt spiraret , an hæc conditio requiratur per se ad illuminationem procedat propter rationem dictam. Si autem amorem , quia amor est , an quia diuinus ? Dico quod non solum quia amor , nec solum quia diuinus , sed quia diuinus notionalis , & mutuus : ad has enim conditiones necessariò exigitur quod virtus illa spiratiua non sit in vno tantum supposito , sed in duobus , cum non sit mutuus ex duplicitate actus , sed ex pluralitate suppositorum , nec sit notionalis , nisi supponendo duas personas secundum processionem intellectus , sed habentes eandem voluntatem , & spirationem ; & sic in vno tantum supposito licet sit tota virtus spirandi , non tamen omni modo , & omni conditione requisita ad spirandum.

Ad Conf. Resp. processionem Spiritus S. requirere duo supposita , tum quia notionalis , tum quia mutuus , & amabilis ; nec rationes istæ disiungendæ sunt , sed coniungendæ , quia amor mutuus esse non potest , nisi notionalis sit : essentialis enim amor , nec ratione actuum , nec ratione personarum distinctionem habet , vt mutuus , & amabilis esse possit. Et cum dicitur quod etiamsi procederet à solo Patre , adhuc notionalis esse posset , distingo , esset notionalis quoad distinctionem personæ procedentis , seu spiratæ ab spirante transeat ; esset notionalis quantum ad rationem amoris mutui , & amabilis , nego , vt explicatum est. Quod verò additur , formalitatem mutui esse denominationem extrinsecam. Resp. quod amorem esse mutuum dupliciter consideratur. Vno modo respectiue inter ipsos actus , & sic vnus in altero nihil reale ponit. Alio modo secundum quod vnus est conditio præsupposita , & requisita vt alter eliciatur , eo quod amor amicitie fundatur super , communicatione bonorum ad inuicem , & ita amicus amat alium , quia alter se communicat mihi , & prima communicatio amor est , & rursus ille alius amat amicum , quia vicissim amatur ab illo. Amor ergo in alio est conditio requisita in persona , vt amabilius ametur. Et hoc modo mutuus amor vt conditio reciproca tenens se ex parte personarum vt amabilius ametur , quia se communicant communicatione amoris , fundat realem , & intrinsecam perfectionem amoris , quatenus specificat per sona sic se communicans , & amans amorem amicitie , qui non ferretur in personam amabilius , nisi supponeret in illo istam conditionem , scil. quod esset amans , & se communicans , licet ille amor nihil in me ponat , nisi me esse amatum ; est tamen conditio requisita , vt persona sic amans sit obiectum amoris amicitie qui est realis amor , & species intrinseca amoris. Non est autem inconueniens , quod realis actus , & amor ex parte obiecti supponat aliquam conditionem , quæ sit denominatio extrinseca , vel negatio , imò multæ denominationes extrinsecæ , & entia ficta actibus veris , & realibus attinguntur. Specialiter verò in Deo in quo amor ille non est mutuus ex distinctione actuum , sed personarum , in se verò vnus , non consistit ratio mutui in denominatione extrinseca , sed in processionem

cessionem reale eiusdem amoris à duobus suppositis. Quod verò dicitur duplici persona requisita ad illam spirationem ut principium quod subsistens, iam diximus non propter hoc solum requiri, sicut ad creationem requiruntur tres personæ, sed per se formaliter, ut ille amor mutus, & notionalis sit, quod in creaturis non currit, quia solum procedunt à Deo ut artificata ab artifice: tres autem personæ unam potentiam, & artem habent, nec ex aliqua formalitate processionis artificati petunt concursus trium personarum.

Venus Spirator est Pater, & Filius, non una subsistentia spirativa, nec unum individuum subsistens, qui sit hic spirator.

16 Supponendum est tanquam certum, Patrem & Filium non esse plura principia Spiritus S. sed unicum principium, & unam spirationem ab illis procedere Spiritum S. non solum quia actus spirandi, & virtus spirativa, seu principium quo est unum, sed etiam quia relatio spiratoris una est, & ita tam quoad relationem, quam quoad virtutem spiratio una est. Constat hoc ex definitionibus Concilij Lugdunensis sub Gregorio X. & Concilij Florentini sub Eugenio IV. Definitio Concilij Lugdunensis habetur in c. *Fideli*, de summa Trinitate in 6. sub his verbis, *Fideli*, ac deuota professione fatemur quod Spiritus S. aternaliter ex Patre & Filio, non tanquam ex duobus principijs, sed tanquam ex uno principio, non duabus spirationibus, sed unica spiratione procedit. Et inf. *Damnatus qui temerario ausu asserere presumpserint quod Spiritus S. à Patre & Filio tanquam ex duobus principijs, & non tanquam ex uno procedat.* Definitio verò Concilij Florentini in litteris unionis ferè eodem tenore verborum habetur: *Definimus, quod Spiritus S. à Patre & Filio aternaliter est, & essentiam suam, suumque esse subsistens habet ex Patre simul & Filio, & ex utroque aternaliter tanquam ab uno principio, & unica spiratione procedit.*

17 Quare licet non defuerint aliqui authores qui senserint in rigore posse concedi plura principia Spiritus S. propter plura supposita spirantia seu originantia Spiritum S. tamen stantibus his definitionibus nullo modo potest concedi duplex principium, licet plures sint personæ principiantes, & originantes Spiritum S. Et consequenter dicendum est quod cum nomina adiectiua multiplicentur in diuinis, non autem substantiua, sicut dicuntur tres personæ diuinæ, licet non tres Dij, dicuntur tres sapientes, & iusti, & veri, non tres sapientiæ, iustitiæ, & veritates, consequenter ex prædictis definitionibus deducitur hoc nomen principium, & spiratio esse substantiua, non adiectiua, quia plura principia Spiritus S. nequaquam concedi possunt, sed ibi damnantur.

Quid autem nomine principij importetur, & nomine spirationis, ut videamus, in quo sunt unum, & in quo remanent plures illi qui spirant Spiritum S. cum plures personæ requirantur etiam per se ad hanc processionem, dubitari potest. Cæterum in significatione huius nominis, cum origo aliqua includatur, quia principium de se importat ordinem ad principiatum, seu ad id quod est, & procedit à principio, tria in ratione principij possunt designari, sc. forma, seu virtus, quæ est principium quo; relatio, seu oppositio, & distinctio principij originantis à re procedente seu originata; subsistens seu principium quod originandi. Hæc enim omnia concurrunt in principio, seu origine alicuius rei. Sed tamen omnia ista importantur in nomine principij per modum cuiusdam ordinis ad id quod est ex alio, quia principium

secundum se, ut docet S. Tho. *suprà* q. 43. a. 1. nihil aliud significat, quam id à quo aliquid procedit, & non dicit semper influentiam in rem principiatam, aut dependentiam, vel distantiam aut inferioritatem rei principiatæ à suo principio, sed solum ordinem quendam, sicut etiam punctum est principium lineæ, frons libri est principium libri, sine vlla influentia. Dicitur tamen principium tam ipsum agentis quod, quam ipsa potentia, seu forma, quæ est principium quo, ut dicit S. Th. *inf.* q. 41. a. 5. ad 1. sed sub habitudine, & ordine ad principiatum, & secundum quod ordo principij vnus est, licet ea quæ concurrunt ad originem, & processionem in se plura sint, si tamen sub eodem ordine, & habitudine tendunt, & respiciunt principiatum, dicitur principium unum, quia sub illo ordine processio una est, & consequenter principium sub formalitate principij, & sub officio, & munere principij vnum est.

Si ergo inquiratur: Vnde sumit unitatem hoc nomen principium in diuinis, cum dicitur esse unum principium Spiritus S. ex unitate virtutis, seu formæ qua producit Spiritus S. an ex unitate relationis qua respicitur? Nam ex unitate suppositi esse non potest, cum plura supposita ad eius processionem concurrant, non solum tanquam conditio materialiter, & identicè requisita, quia ex parte subsistendi reddunt Deum subsistentem, ut spiret utraque persona Patris, & Filij, sed etiam est conditio formaliter requisita, & ex parte speciei ipsius amoris, ut mutus, & amabilis sit, ut dictum est.

Resp. quod ut docet D. Tho. in hac q. 36. art. 4. sicut Pater, & Filius sunt vnus Deus propter unitatem formæ significatæ per hoc nomen *Deus*, ita sunt unum principium Spiritus S. propter unitatem proprietatis significatæ in hoc nomine *principium*. Et *solutione ad 1.* inquit, quod *Si attendatur virtus spirativa Spiritus S. procedit à Patre, & Filio in quantum sunt unum in virtute spirativa, quæ quodammodo significat naturam cum proprietate.* Sic ergo unitas principij, seu identitas sumitur ex parte proprietatis, quæ una existit in duobus suppositis, ut ibi S. Th. docet, & hæc est spiratio actiua, seu virtus spirativa, quæ includit naturam, quantum ad vim, seu virtutem quod pertinet ad actualitatem, & actiuitatem, & relationem quod pertinet ad modificationem, & conditionem requisitam, & sit propria duarum personarum, & non communis omnibus, sed oppositionem fundet, & distinctionem respectu termini procedentis per illam, quod sine relatione distinguente stare non potest. Cum ergo sit una relatio spirationis ad terminum spiratum, & una virtus quoad vim spiratiuam, relinquitur quod est unum principium Spiritus S. quia unitas principij sumitur ex unitate formæ, qua aliquid originatur, & procedit ab alio, quæ forma est proprietas, & virtus spirativa, sicut unitas naturæ diuinæ, quæ est principium primum & radicale, sumitur ex unitate formæ, & sic est vnus Deus.

Si autem instes; quia etiam suppositum dicit rationem principij tanquam principium quod, sicut forma dicit rationem principij per modum principij quo. Cur ergo potius dicatur unum principium ratione unitatis formæ, seu virtutis spiratiuæ, quæ se habet ut quo, quam plura principia ratione plurium suppositorum, quæ se habent etiam ut principia tanquam quod? Nec valet instantia de principio creationis, quod simpliciter dicitur unum, licet personæ sint tres. Nam illud principium unum non solum est principium ut forma, & ut quo, sed est unum ut quod, & ut subsistens subsistentia absoluta; & sic ex omni parte est unum in ratione principij. At verò principium spiratiuum, non est unum individuum

diuiduum subsistens, neque subsistentia absoluta, quia non importat naturam, sed relationem, neque relatiua, vi *infra* dicimus: ergo potius dicenda sunt duo principia ratione duplicis personæ.

Conf. quia aliàs Pater dici posset duplex principium, quia habet duplicem virtutem principiandi scilicet generatiuam, & spiratiuam, & duplicem relationem, scilicet paternitatis ad Filium, & spirationis ad Spiritum S. Si ergo ratio unitatis, & diuersitatis principij sumitur ex parte proprietatis, & formæ, si illa multiplicatur in Patre, erit duplex principium.

Conf. secundò, quia Spiritus S. non æquè immediatè procedit à Patre, & Filio: ergo non sub eadem ratione principij. Patet conseq. quia si datur medium in procedendo: non ergo principium est vnum. Anteced. prob. quia communiter dicunt Patres Spiritum S. procedere à Patre per Filium, vt videri potest apud Cyrillum *lib. 21. in Ioannem c. 1.* Damascenum *lib. 1. fidei c. 18.* Nyssenum *oratione Quod tres Deos dicere non oporteat*, vbi dicit, *Filium sine medio esse à Patre, Spiritum S. verò per id quod immediatè, & ex continentis est.* Ergo non immediatè procedit ab utroque, sed à Patre mediante Filio.

Resp. ad principale argumentum, quòd illud videtur esse fundamentum Durandi, qui in 1. *dist. 29. q. 2.* tenet quòd in rigore plura sunt principia Spiritus S. propter pluralitatem personarum, licet propter unitatem termini producti, qui est vnica persona Spiritus S. & propter unitatem virtutis spiratiuæ, dicitur esse vnum principium; & sic Patres loquuntur. Et licet Durandus fuerit ante Concilium Florentinum, vbi plenissimè hic articulus tractatus, & definitus est, tamen fuit post Concilium Lugdunense, vbi iam fuerat definitum procedere Spiritum S. à Patre, & Filio tanquam ab vnico principio, & vnica spiratione. Et tamen Durandus explicauit non absolutè id definiisse Concilium, sed sub illa particula *tanquam* dum dicit *tanquam ab vnico principio*, quòd diminutionem quandam sonat. Et ita alij Scholastici, vt Grabriel, & Ocham, quos citat Suarez, *lib. 10. de Trinit. cap. 7.* dicunt posse dici vnum principium, & plura principia Spiritus S. Sub diuersis respectibus.

Nihilominus iste modus loquendi non potest excusari à censura, & Suarez *vbi supra* vocat temerariam locutionem hanc. Sed certè multò grauiorem censuram mereri videtur: est enim contra directam definitionem vtriusque Concilij, vbi aperte definitur procedere Spiritum S. ex Patre, & Filio tanquam ex vnico principio, & vnica spiratione, & specialiter in Lugdunensi damnatur qui ausi fuerint dicere, quòd procedit Spiritus S. ex Patre & Filio tanquam ex pluribus principiis: sed cum dicit Durandus, & alij, quòd in rigore Pater & Filius sunt plura principia Spiritus S. necessariò fateretur quòd in rigore procedit ex illis tanquam ex pluribus principiis: ergo in rigore damnatur à Concilio; & sic aperte opponitur definitioni eius, quòd est hæreticum. Nec euadit censuram faciendò vim illa particula *tanquam*, quasi sit diminutiua, & non absoluta, nam *ly tanquam*, & *ly quasi* non semper significant diminutiue esse aliquid, sed sunt idem ac *ly sicut*, vt cum Ioannis 1. dicitur *Quasi vnigeniti à Patre*, Act. 2. *tanquam aduenientis spiritus vehementis*, 2. ad Corinth. 3. *Transformamur à charitate in charitatem tanquam à Domini spiritu.* Vbi *ly tanquam* est idem quòd *ly sicut*, non autem diminutiue significat. In illis autem Conciliis, si *ly tanquam* accipiat in sensu diminu-

tio, Concilium non determinasset, nec responderet ad difficultatem Græcorum: nam ipsi insistebant nos ponere duo principia Spiritus S. Concilium docet non eam fuisse mentem Latinorum, sed solum ponere vnum principium: Si ergo *ly tanquam* sumitur diminutiue, erit sensus, quòd Spiritus S. in re procedit à duobus principiis, sed similitudinariè, & secundum quid dicuntur vnum, quòd est planè incidere in inconueniens, quòd Græci inferunt contra nos, & subdola quidam æquiuocatione eos fallere, quòd absit.

Ad argumentum autem propositum in fauorem Durandi, Resp. quòd licet supposita sint principium *quod*, non tamen ad multiplicationem suppositorum multiplicatur ratio principij quia est nomen substantiuum, sicut *ly Pater*, *ly generator*, *ly Filius*; nec enim significant adiacendo: de ratione autem nominis substantiuus est quòd non multiplicetur ad solam multiplicationem suppositorum, nisi etiam multiplicentur formæ; forma autem constituens principium est proprietas, & virtus spiratiua, quæ non multiplicatur, cum non opponantur in Patre & Filio. Non ergo multiplicatur principium multiplicato supposito, quia etsi suppositum dicatur principium vt *quod*, tamen quia principium est substantiuum, & de formali importat formam principiantem, non sufficit multiplicari hoc principium *quod*, seu suppositum, vt dicatur multiplex principium: sicut etiam subsistentia est substantia vt *quod*, & tamen non multiplicatur substantia in Deo propter multiplicationem suppositorum, quia in substantiis ex parte formarum debet fieri multiplicatio. Vnde non recurrimus ad exemplum illud de principio creationis, sed in quocumque principio, & in quocumque nomine substantiuo tenet ista regula, quòd non multiplicatur ad solam multiplicationem suppositorum, sed etiam formarum.

Ad primam conformationem. Resp. Patrem non dici duplex principium, licet sit principium generandi, & spirandi, vt etiam negat. S. Thom. in hac *quæst. 36. a. 4. ad 2. quia implicaretur* (inquit) *pluralitas suppositorum.* Quia licet substantia multiplicari non possint, nisi multiplicata forma, tamen etiam requiritur ad istam multiplicationem multiplicatio suppositorum, licet non sufficiat illa sola; Eo quòd formæ substantiæ affertur secum sua supposita, si modo sibi proprio, & connaturali ponantur. Si autem formæ multiplicentur in eodem supposito non multiplicatur substantiuum, sicut artifex habens plures artes non dicitur plures artifices, quia deest conditio ad pluralitatem necessaria, scilicet multiplicatio suppositi. Et eadem ratione Pater non dicitur plura principia, licet habeat plures proprietates principiantes.

Ad secundam confirmationem Resp. Spiritum sanctum æquè immediatè procedere à Filio, & à Patre, quia procedit per eandem virtutem spiratiuam, quæ est voluntas fecunda, quæ tam propriè, & principaliter est in Filio, sicut in Patre; siquidem Pater communicat Filio omnia quæ in se habet, præter Paternitatem. Et quia communicat voluntatem fecundam, seu spiratiuam, quæ ante generationem Verbi non producit, eo quòd actum voluntatis sequitur ad intellectum; idèd quando intelligitur voluntas Patris producens Spiritum S. præsupponitur consummata generatio Verbi, & ipsa voluntas spirans, non est in solo Patre, sed etiam in Verbo; & sic æquè immediatè procedit ex utroque, quia virtus qua spiratur in utroque, est quando spirat. Quòd verò Patres & Sancti dicunt Spiritum sanctum procedere à Patre per Filium,

Filius, ly *per* non designat mediationem aliquam virtutis, aut distinctionem, sed quod Filius habet illam communicatam à Patre per generationem: Sic enim id declaravit Concilium Florentinum in *litteris unionis*, ibi: *Declarantes quod id quod Sancti Doctores & Patres dicunt ex patre per Filium procedere Spiritum Sanctum, ad hanc intelligentiam tendit, ut per hoc significetur Filium quoque esse secundum Græcos quidem causam, secundum Latinos verò principium substantiæ Spiritus Sancti, sicut & Patrem. Et quoniam omnia quæ Patris sunt ipse Pater unigenito Filio suo gignendo dedit, præter esse Patrem, hoc ipsum quod Spiritus Sanctus procedit ex Filio, ipse Filius à Patre æternaliter habet.* Ita Pontifex, quare cum mens Sanctorum Patrum in hac parte ab ipsamet Ecclesia declarata sit, non possumus nos aliam solutionem adhibere.

21 Ex dictis colligi potest quid dicendum sit de hoc nomine *spirator*, an Pater, & Filius sint plures spiratores, an vnus spirator, quia id dependet ex significatione illius nominis *spirator*. Si enim sit nomen adiectiuum, idem erit dicere plures spiratores, ac plures spirantes; & plures spirantes communiter conceditur: Si autem sit substantiuum, sicut *Creator, generator*, &c. non sunt plures spiratores, sed vnus spirator. Sicut & vnica spiratio. Et quidem Concilia Lugdunense, & Florentinum solum definierunt Spiritum Sanctum procedere à Patre, & Filio vt ab vno principio, & vnica spiratione: de nomine verò spiratoris non se intromiserunt, quia hoc dependet ex significatione grammaticali illius nominis *spirator*. Et idem S. Thom. aliquando accepit illud nomen adiectiuè; & sic concessit Patrem, & Filium esse duos spiratores in 1. dist. 11. art. 4. & dist. 12. art. 3. aliquando verò attendens ad modum significandi, accepit illud substantiuè, & sic concessit esse vnum spiratorem, & non plures 1. p. qu. 36. art. 4. ad 7. Et hoc (inquit D. Thom.) *melius est quia spirator substantiuè accipitur, sicut creator, & Generator, & similes*: & exponit Hilarium dicentem quod Spiritus sanctus est à Patre, & Filio auctoribus, quod posuit substantiuum pro adiectiuo.

22 Restat explicare pro quo supponat iste terminus *spirator* in diuinis substantiuè acceptus, seu spiratio actiua, an videlicet supponat immediatè pro persona Patris, & Filij indiuisè; seu confusè, vt loquitur D. Thom. citandus, an verò supponat pro quodam singulari indiuiduo quod sit immediatum principium quod, & subsistens, à quo procedit Spiritus Sanctus, licet non sit persona, quia communicatur personæ Patris, & Filij: fuerunt enim aliqui antiqui, vt Ocham, & Gabriel in 1. dist. 12. qui tenuerunt hoc nomen *spirator* esse quoddam indiuiduum subsistens, quod esset principium Spiritus Sancti, sicut philosophamur de hoc Deo, qui etiam abstractis personalitatibus relatiuis remanet indiuiduum subsistens absolutum in natura diuina, licet non persona, quia est communicabile tribus personis. Idem dicunt de hoc spiratore, quod est indiuiduum subsistens, etiam abstractis personalitatibus Patris, & Filij. Quam sententiam sequitur Molina 1. p. qu. 36. art. 4. disp. 2. & Nazareus ibi *controuersia* 2. qui censent spiratorem esse quoddam indiuiduum constitutum ex essentia, & relatione spirationis, & sic subsistens in natura diuina: quam sententiam etiam sequitur Becanus tract. de Trinit. c. 6.

23 Nihilominus opposita sententia sumitur ex D. Thom. in hac qu. 36. art. 4. præsertim solut. ad 4. & 5. Vbi docet quod principium spirandi non habet determinatam suppositionem, sed confusam pro duabus personis simul; & idem repetit solut. ad 6. Ioan à S. Thom. in 1. part. D. Th. Tomus alter.

& 7. quod quidem non posset dici, si spirator esset indiuiduum subsistens in ipsa natura diuina præter subsistentiam Patris & Filij. Sic enim supponeret immediatè pro ipso subsistente spiratore, quia supponeret pro illo subsistente, & indiuiduo quod immediatè significat, sicut hic Deus non supponit immediatè pro tribus personis, sed pro indiuiduo ipsius deitatis vt vnus est, vt cum dico Deus est æternus, est immensus, est creator, &c. Vbi non supponitur immediatè pro subsistente relatiuo, seu pro tribus personis. Cæterum hic spirator immediatè supponit pro Patre, & Filio, quia non habet determinatam suppositionem, sed confusam pro duabus personis, vt dicit D. Thom. vbi ly *confusam* idem est quod *indiuisam*, id est non secundum particulares rationes Patris, & Filij, quibus opponuntur inter se, sed secundum quod sunt vnum in vnitæ proprietatis spiratiuæ, vt dixerat idem D. Thom. in fine corporis art. Ex quo sequitur, quod ratio principij spiratiui non habet vim termini collectiui, vt malè putauit Suarez lib. 10. de Trinitate c. 7. quia terminus collectiuus significat multa prout sunt vnum collectione, non autem indiuisibili vnitæ, sicut ly *populus* ly *ciuitas* ly *respublica*: at verò Pater, & Filius non solum collectiuè, seu vnitæ collectionis sunt vnum principium Spiritus sancti, sed propter vnitatem proprietatis significatæ in hoc nomine *principium*, vt inquit D. Thom. in art. 4. cit. in fine corporis. D. Thomam sequuntur communiter eius discipuli super hanc qu. 36. art. 45. ibi. Bannez, Zumel, Ripa, Nauarr. *Controuers.* 31. Carmelitani tractatu de Trinit. disp. 15. dub. 4. Suarez lib. 10. de Trinit. cap. 4. Vasq. disp. 149. c. 4. Granados in 1. p. tract. 10. disp. 6. & alij plures.

Fundamentum huius sententiæ non sumitur ex 24 eo quod relatio spiratoris si esset subsistens per se, darentur quatuor subsistentiæ relatiuæ, & consequenter quatuor personalitates, quod est ponere quatuor personas: hoc enim fundamentum inefficax est, quia dato quod illa relatio esset per se subsistens in natura diuina, tamen quia est communis duabus personis, licet sit subsistentia, non est personalitas, quia non est incommunicabilis aliis personis, nempe Patri, & Filio, cum non sit illis opposita. De ratione autem personalitatis est, quod sit terminus incommunicabilis vltiori termino, seu personæ, sed subsistentiæ vt sic non repugnat communicari, sicut subsistentia absoluta Deitatis communicatur tribus personis, vt supra latè tractatum est. Eodem ergo modo illa subsistentia si daretur, posset quidem esse subsistentia, sed non personalitas, quia communicabilis esset.

Ratio ergo desumenda est ex ipsa intrinseca natura huius rationis spirandi, quia neque conuenit immediatè ipsi naturæ, sed subsistentiis relatiuis Patris, & Filij, neque ex ipsa procedit tanquam à principio quod actus spirandi, sed à Patre, & filio prout vniuntur in illa relatione: ergo ly *spirator*, seu *spiratio actiua* non constituit principium quod subsistens seorsum à subsistentia Patris, & filij. Consequentia patet, quia subsistens constituitur ex natura, & subsistentia, siquidem subsistentia est terminus naturæ: ergo vt illa relatio spiratoris sit subsistentia, oportet quod immediatè sit terminus naturæ, vt hoc modo ex natura, & ex ipsa relatione vt termino constituatur subsistens. Similiter id quod est subsistens vt quod, est operatiuum vt quod, quia cum natura sit principium operandi vt quo, natura terminata per subsistentiam est operatiua vt quod. Si ergo relatio spirationis, neque est immediatus terminus naturæ, neque est principium quod immediatum

mediatum spirandi seu produçendi Spiritum Sanctum nullo modo habet rationem subsistentiæ, neque constituit indiuiduum subsistens seorsum à Patre, & Filio, ita quod ratione spirationis subsistens sit.

Antecedens quoad primam partem, nempe quòd illa relatio spirationis non sit immediatus terminus naturæ, sicut paternitas, & filiatio, probatur, quia omnis terminus immediatus naturæ in genere subsistendi, aut est quia reddit illam per se existentem, & non in alio, aut quia reddit illam incommunicabilem vltiori termino, seu personæ: hæc enim sunt duo munera seu officia subsistentiæ; nec potest ad aliquid aliud poni in natura, nisi propter vnum ex his duobus: sed illa relatio spirationis non ponitur in natura diuina propter primum, nempe vt natura illa reddatur per se existens, id est, non in alio, nec per modum partis, quia hoc habet natura diuina per suummet esse, quatenus est esse à se, & actus purus, id est, à nullo alio dependens, vnde nec etiam ipsæ relationes paternitatis, & filiationis hoc modo reddunt subsistentem naturam diuinam, quia natura diuina non per relationes habet esse independens, & perfectum, seu non existens in alio, sed per seipsam, quatenus est ipsum esse à se, & solum ponuntur illæ relationes esse subsistentiæ, quia reddunt naturam incommunicabilem vltiori termino: ergo si illa relatio spirationis habet vim, & rationem subsistentiæ, solum erit ad modum aliarum relationum, scilicet non vt reddat esse diuinum per se, & non in alio, sed vt reddat illud incommunicabile. Quòd autem hoc non habeat illa relatio quòd pertinet ad secundam munus subsistentiæ, manifestè patet, quia relatio spirationis est incommunicabilis vltiori termino, nempe Personæ Patris, & Filij: ergo non potest reddere naturam incommunicabilem, ergo nulum munus habet subsistentiæ respectu naturæ diuinæ.

25 Quoad secundam autem partem probatur idem antecedens, nempe quòd spirator, seu spiratio actiua non importet principium quod immediatam operandi, seu spirandi Spiritum Sanctum, ita quòd si per impossibile non essent Pater, & Filius, adhuc daretur principium subsistens, & vt quod produçens Spiritum Sanctum, vt videtur velle Molina. Sed contrarium est certum, quia si non intelligerentur illæ duæ personæ Patris, & Filij, sed solum illud subsistens spiratoris, non daretur principium quod spirandi amorem mutuum, & amicabilem, qui est de ratione formali Spiritus Sancti; tum quia amor mutuus est inter duos: ergo ab illo spiratore non procederet talis amor: ergo immediatè postulat procedere à duobus, quia *suprà*, vt diximus, ille amor non est mutuus ratione duplicis actus amandi, sed ratione duarum personarum amantium: ergo remotis duabus personis, & solum posito spiratore subsistenti, non procederet Spiritus sanctus, qui est amor mutuus: tum etiam quia illud est principium immediatum quod amandi quod est principium quod cognoscendi, siquidem ex cognitione oritur amor, sed illud indiuiduum spiratoris non est per se immediatè intelligens, in quantum spirator, quia Pater, & Filius non intelligunt in quantum sunt spirator, neque essentialiter, quia hoc habent in quantum Deus, neque notionaliter, quia hoc habent in quantum generans, & genitum: intelligere enim notionale est generare, & intelligi notionale, est generari: Spirator autem actiue neque generat, neque generatur: ergo spirator non est principium quod intelligendi: ergo neque amandi, quia ab eodem principio quod proce-

dit amor à quo cognitio. Tum denique quia si spirator esset indiuiduum subsistens vt quod immediatè opponeretur illi Spiritus Sanctus vt relationi, sed etiam vt subsistenti, & produçenti se tanquam principium quod: ergo non esset ratio quare opponeretur Spiritus Sanctus relatiue paternitati, & filiationi, quia paternitas, & filiatio in vi relationis, & exercitij formaliter respiciendi solum, sunt opposita inter se, non verò Spiritui Sancto: & si daretur spirator subsistens vt indiuiduum à quo procederet neque etiam radicaliter essent oppositæ Spiritui Sancto, quia in tantum sunt radicaliter oppositæ, in quantum habent esse principium quod processionis Spiritus Sancti, quia sine processione radicali, vel formali non datur oppositio, & consequenter nec distinctio: sed tunc præter Patrem, & Filium daretur principium quod produçendi Spiritum Sanctum, nempe indiuiduum subsistens spiratoris: ergo nullum remanet fundamentum, vt opponatur paternitas, & filiatio Spiritui Sancto; sed solum remanet mera concomitantia illarum duarum personarum cum indiuiduo spiratoris, quæ non sufficit ad realem, & propriam oppositionem. Si autem non opponantur, neque distinguuntur; & sic paternitas, & spiratio actiua identificabuntur, quod dici non potest.

Inquires: quid ergo importat ly *spirator*, & quomodo constituit vnum principium spirandi, si non constituit vnum indiuiduum subsistens, quod dicatur vnicum principium spirandi?

26 Respon. ly *spiratorem* non importare vnitatem indiuiduationis, & subsistentiæ in ipso principio spirandi, sed vnitatem proprietatis, & relationis communis duplici personæ subsistenti. Itaque spiratio actiua est proprietas ordinans duas subsistentias ad amorem mutuum, non vnum subsistens constituit ad spirandum, & produçendum amorem, quia cum ille amor productus, & spiratus essentialiter sit nexus duorum, qui dicitur communicatio Spiritus Sancti, essentialiter quoque postulat non procedere ab vno indiuiduo subsistente, sed à duplici persona se osculante, & complectente vnica proprietate spirationis. Et sic est spiratio illa osculum quasi actiuum duorum subsistentium, non subsistentia duarum personarum, ex qua proprietate sic actiue osculante, & spirante procedit nexus, & osculum personale, quod est Spiritus Sanctus.

27 Sed obiicies pro sententia opposita: nam spiratio actiua est principium Spiritus Sancti subsistens per se in ipsa natura diuina: ergo constituit indiuiduum subsistens, quod est spirator. Consequenter patet, quia spiratio subsistens in natura non constituit aliud indiuiduum, quàm spiratorem, ergo. Antecedens probatur, quia principium Spiritus Sancti non est paternitas, & filiatio ratione sui, sed sub ea ratione qua opponuntur relatiue Spiritui Sancto, sed solum opponuntur ratione spirationis: ergo spiratio est relatio per modum principij produçendi Spiritum Sanctum. Illa autem relatio est per se subsistens, quia est relatio per modum subsistentiæ, cum non sit accidens: ergo per modum subsistentiæ. Patet consequentia, quia non est substantia per modum naturæ, aliàs esset communis omnibus tribus personis, & esset: quid absolutum: ergo per modum subsistentiæ: ergo est relatio subsistens.

Confirmatur, quia Pater, & Filius sunt vnus numero spirator in indiuiduo, sicut sunt vnus numero Deus, sed hic Deus communis Patri, & Filio est vnum indiuiduum subsistens in natura diuina: ergo hic numero spirator est vnum indiuiduum subsistens in proprietate, & principio spirandi. Maior proba

probat, quia Pater, & Filius non sunt plures spiratores: ergo vnus numero spirator: ergo vnum subsistens in ratione spiratoris. Patet consequentia, tum à paritate rationis, quia hic Deus est vnum individuum subsistens in Deitate antecedenter ad subsistentias relatiuas, quia est vna numero natura per se existens per modum substantiæ: ergo etiam hic spirator erit vnum individuum subsistens, quia est vna virtus spirandi, & vna relatio per modum substantiæ. Et sicut natura diuina vt consistit in intelligere, seu in intelligibilitate actuali se ipsa redditur subsistens, & petit relationem paternitatis ad generandum, & exprimendum verbum, ita etiam eadem natura diuina, quatenus amans, erit subsistens, & petit relationem spirationis per modum subsistentis quod ad spirandum, licet communicabile duabus Personis Patris, & Filij. Tum etiam quia spiratio actiua, quæ significatur in abstracto, etiam debet significari in concreto per modum per se existentis, quia concretum, & abstractum in Deo idem sunt, & sicut aliæ relationes, & proprietates habent suum concretum, & abstractum, ita etiam ly *spiratio*; concretum autem in Deo est per se existens, & essentiam includit: ergo etiam est subsistens.

28

Respon. distinguendo primum antecedens: spiratio actiua est principium subsistens, Dist. subsistens identice, & ratione subsistentiæ sibi adiunctæ Patris, & filij concedo: est subsistens formaliter, & ratione sui præcisè, nego antecedens. Ad probationem, concedo quod paternitas, & filiatio non est principium Spiritus sancti, quantum ad proprietatem, & virtutem spirandi, seu quantum ad rationem principij formalis, nisi ratione spirationis actiue, licet per se sit principium radicale, & radicaliter oppositum Spiritui sancto tanquam principium quod petens ex se spirationem actiuam. Et dicimus quod illa relatio est substantia non per modum naturæ, neque subsistentiæ, sed per modum proprietatis notionalis diuinæ, quia hoc ipso quod diuina est, est substantia, & subsistentia identice, non formaliter; vnde non pertinet ad ipsam constituere individuum ex sua propria linea, & formali ratione, sed solum identificari cum individuo subsistente ad spirandum, quod est Pater, & Filius: neque enim per se est personalitas constitutiva personæ, & consequenter neque est subsistentia relatiua vt ostensum est, sed solum proprietas relatiua duarum personarum: non est autem necesse, quod omnis ratio, aut virtus, quæ est in Deo, constituat individuum subsistens formaliter, sed sufficit quod identice sit substantia subsistens, sicut pater in aliis attributis, vt esse immensum, vel æternum, vel iustum non dicit distinctum individuum subsistens, licet omnia ista attributa sint substantia, & subsistentia identice.

Ad confir. Respon. Verum esse quod Pater, & Filius sunt vnum numero spirator, & vna numero spiratio actiua propter vnitatem proprietatis significatæ per hoc nomen *principium Spiritus sancti*, vt S. Thom. affirmat in hac quæst. 36. art. 4. non propter vnitatem subsistentiæ importatæ formaliter in nomine spiratoris, seu spirationis actiue. Vnde ad probationem maioris dicitur, quod licet sint vnus numero spirator Pater, & Filius, non tamen vnum subsistens in vi spiratoris formaliter. Et ad primam probationem dicitur esse disparem rationem de hoc Deo, & de hoc spiratore, quod hic Deus formaliter, & ex suo conceptu importat ipsum esse diuinum vt per se existens, & non in alio; vnde ex vitalis conceptus formalis importat subsistentiam quantum ad munus existendi per se,

Ioan à S. Thom. in 1. part. D. Th. Tomus alter.

licet non quantum ad munus incommunicabilitatis: hoc enim solum habetur per subsistentias relatiuas. Cæterum hic spirator ex suo formali conceptu non explicat naturam, & esse diuinum sub ratione essendi absolute, & per se, sed sub ratione proprietatis personalis, seu virtutis, & relationis spiratiue: vnde non habet per se formaliter constituere subsistens quantum ad id quod est perfectatis in essendo, sicut subsistentia absoluta, neque quantum ad incommunicabilitatem sicut relatiua. Et ad paritatem allatam inter intelligere, & velle.

Respondetur quod intelligere diuinum, non in quantum intelligere præcisè, sed in quantum natura substantialis est à se, & per se existens, habet subsistentiam absolutam: & in quantum infinitæ perfectionis, & fecunditatis est, habet relationem Paternitatis, non solum ad generandum, sed etiam ad spirandum, quia spirare pertinet ad intelligentem. Et sic quando dicitur quod etiam ex ipso velle debet resultare relatio subsistens: Dico, quod formaliter solum resultat relatio per modum proprietatis notionalis, quia voluntas fecunda est, sed non per modum subsistentis formaliter ex vi sui conceptus, sed solum identice, quia tota ratio subsistentiæ præsupponitur in ipsa paternitate, & filiatione, quæ sunt radicaliter, & vt quod ipsa spiratio. Quod amplius explicatur ex D. Thom. *infr. qu. 40. art. 4.* vbi docet, quod actus notionalis spirandi, præcedit secundum intellectum relationem communem spirationis: ergo non resultat ista ex natura immediate, sed ex actu notionali, qui vtique personarum est.

Ad secundam probationem dicitur quod abstractum spirationis habet suum concretum, nempe spirans, vel spirator, & hoc concretum est per se existens, & subsistens identice, non formaliter, id est, non quasi forma subsistentiæ, & constituens in Deo distinctum subsistens, sed quia entitatiue est aliquid diuinum quod non est accidens, sed substantia, & consequenter subsistens: formaliter autem solum facit concretum virtutis, seu proprietatis relatiue, sicut etiam alia concreta attributorum aut nominum significantium origines, & non relationes.

Secundò, obijciens: relatio spirationis actiue est 29 omnino indiuisibilis in patre & filio, ita quod neque etiam per rationem est partialis, & partibilis: ergo debet esse subsistens secundum se: & tanquam principium quod. Probat, consequentia, quia id quod communicatur pluribus suppositis tanquam forma, & principium quo præcisè, virtualiter multiplicatur in illis, saltem propter diuersam communicationem: ergo vt nullo modo, etiam virtualiter, & per rationem diuidatur oportet quod communicetur tanquam principium quod, sicut natura diuina pro indiuiso est in tribus personis, quia communicatur vt natura subsistens subsistentia absoluta.

Confirmatur, quia spiratio non conuenit Patri & Filio secundum quod opponuntur inter se, sed quatenus conueniunt, siquidem solum datur vnicum principium Spiritus sancti, sed Pater, & Filius non conueniunt nisi in natura diuina: ergo conuenit eis *spiratio* actiua ratione naturæ diuinæ, ita quod ex naturâ diuinâ in qua conueniunt Pater & Filius, & ex ipsa relatione spirationis immediate resultat aliquod individuum, quod non est aliud nisi spirator, & hoc debet esse subsistens quia immediate afficit naturam, vt relatio, & terminus.

Confir. secundò, ex D. Thom. in 1. ad Anibal. dum dist. 29. q. 1. art. 4. ad 2. vbi cum obieciſſet

Q 2

quod

quodd in diuinis relationes sunt subsistentes: sed spiratio est quædam relatio: ergo est subsistens, & persona. Respondet, quodd *Sicut diuinitas in diuinis non est nisi subsistens, & tamen una Deitas est Patris, & Filij: quia sunt duo subsistentes ex alia ratione distincti; Similiter, & de communi spiratione oportet intelligi* Ergo secundum D. Thom. spiratio est subsistens sicut diuinitas, & consequenter spirator est subsistens, sicut hic Deus.

Respondetur negando conseq. Ad prob. dicitur quodd forma quæ communicatur personis pro indiuiso, & per modum vnius proprietatis, vel vnius essentia, & attributi communicatur vnico modo, & vnico esse, sicque non multiplicatur etiam virtualiter, quia esse talis formæ, nec virtualiter est multiplex, cum sit esse actus puri, & ad hoc sufficit quodd sit subsistens identice, sicut sunt omnia attributa, & etiam ipsa proprietas spirationis actiua, non autem requiritur quodd sit subsistens tanquam constituens formaliter, & per modum subsistentia ipsam subsistens, sicut patet in omnibus aliis formis vel attributis: quæ communicantur personis.

Ad primam confir. Respondetur spirationem diuinam conuenire Patri, & Filio, non vt opponuntur inter se, sed vt supponuntur distincti, & oppositi: vniuntur autem in proprietate notionali spirandi Spiritum sanctum. Et quando instatur quodd Pater, & Filius solum conueniunt in Deitate, distinguo, solum in Deitate vt absoluta, & per modum naturæ significata, nego; vt etiam fecunda in voluntate ad spirandum, concedo, quia in hac ratione etiam non opponuntur, & consequenter in ea conueniunt. Vnde relatio spirationis quæ conuenit Patri, & Filio ex parte voluntatis fecundæ non afficit immediatè naturam sub conceptu naturæ; & sic non constituit indiuiduum subsistens, sed afficit immediatè personas vt habentes voluntatem fecundam; & sic supponit earum subsistentias, & solum per modum proprietatis notionalis illas afficit, quæ proprietas est idem cum voluntate, & consequenter est identice subsistens sicut ipsa voluntas secundum subsistentiam absolutam, & communem; & vltèius secundum subsistentias incommunicabiles Patris, & Filij, quia etiam est idem cum illis.

Ad secundam confir. Respondetur quodd potiùs illa autoritas est pro nobis, quia D. Thom. ex vno antecedenti certo, nempe quodd relationes sunt subsistentes, proponit argumentum fallax, inferens conclusionem hæreticam, nempe quodd spiratio actiua sit persona subsistens. Et respondet concedendo antecedens, & negando consequentiam. Explicat verò antecedens, nempe quodd relatio sit subsistens, sicut diuinitas ipsa subsistens est, & quodd hoc modo oportet intelligi de spiratione: vbi ly *hoc modo* non dicit quodd formaliter spiratio constituat subsistens relatiuum, qui sit spirator: sic enim concederet consequentiam, quodd intendit negare: sed ly *hoc modo* est idem quodd spirationem actiuam esse subsistentem identice subsistentia illa absoluta Deitatis, quæ ipsa in se est formaliter natura subsistens.

Virtus spiratiua quomodo sit immediatè in Patre, & Filio.

30 Circa tertiam difficultatem huius articuli omis-
sis aliis, quæ in principio articuli remisimus explicanda disputatione sequenti, hoc solum restat inquirendum in præsentia, quomodo ipsa virtus spiratiua, quæ est principium quo spirandi Spiritum sanctum conueniat immediatè Patri, & Filio. Et

idem est de relatione spirationis, quia potentia seu virtus spiratiua ita importat voluntatem, seu essentiam, quodd connotat ipsam relationem, sicut de potentia generatiua docet D. Thom. *infra quæst. 41. art. 5.*

In præsentia erga vnum est certum, & commune inter authores, & de alio dubitant aliqui. Certum est ipsum actum, & exercitium spirandi, & producendi Spiritum S. non priùs conuenire Patri quàm Filio, ita quodd intelligatur priùs etiam prioritate originis, vel etiam rationis Spiritum S. procedere à Patre, quàm à Filio.

Et ratio euidens est: tum quia Spiritus sanctus non procedit nisi per amorem mutuum, & amicabilem, & qui sit nexus duorum, vt *suprà* ostensum est: Si autem in prioritate originis, quando intelligitur Pater antequam generet Filium, Spiritus sanctus procederet à Patre, esset pro illo priori à solo Patre: ergo pro illo priori non esset amor mutuus, sed tantum vnius: & cum non sit mutuus ille amor ratione diuersi actus, vel diuersæ spirationis, etiam virtualiter, oportet quodd solum sit mutuus ratione diuersarum personarum: ergo pro illo priori, quo solum intelligitur vna persona, non potest intelligi procedere Spiritum S. Tum etiam quia Spiritus S. procedit à Patre, & Filio vnica spiratione, & tanquam ab vnico principio, vt definiunt Concilia Lugdunense, & Florentinum *suprà* citata: ergo non potest intelligi ista spiratio pro aliqua prioritate, non procedens à Filio, & procedens à Patre, siquidem illa spiratio qua procedit à Filio est eadem qua procedit à Patre: ergo pro illo priori quo nondum intelligitur Filius, neque etiam intelligitur spiratio, quæ sine Filio non est.

Dubitant verò aliqui de ipsa virtute spirandi, 31
quam putant non esse priùs origine in Patre quàm in Filio, sed posita vtrique persona ex ipsa Deitate resultare in Patre, & Filio æquè immediatè virtutem spirandi, non verò quasi priùs intelligatur esse in Patre, & à Patre deriuari in Filio per generationem, sed in eo sensu dici communicari virtutem spirandi à Patre ipsi Filio, quia à Patre generatur Filius, & accipit Deitatem, & quia ex Deitate sic communicata, & supposito generato resultat illa virtus, dicitur communicari à Patre per generationem ipsam virtutem spiratiuam. Ita tenet Pater Alarcon *tractatu 5. de Trinit. disput. 9. cap. 2.* & citat Ruiz *disp. 69. sect. 2. num. 7. & disp. 71. sect. 3. num. 6. & 12.*

Et fundamentum videtur esse quia si potentia spiratiua priùs est in Patre, quàm in Filio, etiam actus, & exercitium spirandi priùs erit in Patre, quàm in Filio, siquidem potentia illa non est in actu primo, sed in actu secundo spiratiua: ergo vbi intelligitur pro aliquo priori potentia spiratiua existere, etiam actus secundus spirandi.

Et secundò, quia potentia spiratiua, & principium spirandi formaliter est potentia duorum supposito-
rum, cum sit potentia spirandi amorem mutuum, qui non est mutuus, nisi ratione duarum personarum, quæ ad illum concurrunt: ergo implicat intelligere hanc potentiam esse tantum in vna persona: ergo neque priùs existet in Patre quàm in Filio, sed æquè immediatè in vtroque.

Contraria tamen sententia omnino tenenda est, vt communiter tenent Theologi cum D. Thom. *in hac. qu. 36. art. 3.* & ibi Caietanus, & communiter interpretes D. Thom. Vasqu. *ibidem in notationibus art. n. 10.* & Suarez *lib. 10. de Trinit. c. 3. num. 6.* & alij communiter, & expresse id docet D. Thom. *ibidem in calce corporis*, & ad 2. vbi dicit quodd Fi-
lius

lius habet hanc virtutem ad spirandum Spiritum sanctum à Patre. Et ratio principalis est, quia opposita sententia non videtur in proprio sensu saluare definitionem Concilij Florentini in litteris vni-
onis, vbi dicitur, *Et quoniam omnia quæ Patris sunt ipse Pater unigenito Filio suo gignendo dedit, præter esse Patrem, hoc ipsum quod Spiritus Sanctus procedit ex Filio ipse Filius à Patre æternaliter habet.* Vbi illa causalis Concilij non potest saluari nisi hoc ipsum quod est procedere Spiritum Sanctum à Filio aliquid Patris sit, quod per generationem Filio tribuatur, siquidem Pater solum tribuit Filio ea quæ Patris sunt, præter Paternitatem; & quia tribuit ea quæ sua sunt; idè Filius habet à Patre hoc quod est spirare Spiritum Sanctum: ergo non quia resultat à Deitate in ipso Patre & Filio immediatè spiratio, sed quia Patris est, & à Patre tribuitur Filio, idè Filius illam habet: sed id quod Patris est, prius origine conuenit Patri quàm Filio, siquidem per originem & generationem tribuitur Filio: ergo si idè Filius habet spirare quia ea quæ sunt Patris, Filio per generationem tribuuntur, manifestum est quod spiratio actiua prius origine est in Patre quàm in Filio. Et ratio manifesta est, quia Pater per generationem tribuit Filio non solum intellectum, sed etiam voluntatem, sicut & omnia alia attributa, & non tribuit voluntatem infœcundam, sed cum fœcunditate, siquidem tribuit voluntatem, qualis est in ipso Patre, & sicut apta est esse in Filio; voluntas autem coniuncta paternitati, & communicabilis Filio est voluntas fœcunda, neque enim minùs pertinet ad paternitatem quod voluntas sit spiratiua, & fœcunda, quàm ad filiationem: ergo si Pater communicat Filio voluntatem, etiam communicat illam ut fœcundam: ergo ut spiratiuam.

Confirmatur quia Filius non spirat Spiritum S. ut spirator innascibilis, sed ut spirator genitus: ergo ut accipiens per generationem non solum Deitatem, ex qua resultat virtus spirandi, sed ipsam etiam virtutem spirandi. Patet consequentia, quia si virtus spirandi non tribuitur illi per generationem: ergo nec per generationem constituitur spirator: ergo in quantum spirator est innascibilis, siquidem ut dicunt oppositi authores æquè immediatè resultat ab ipsa Deitate spiratio in Patre & in Filio, & ratione huius resultantiæ Pater est spirator innascibilis: ergo & Filius: hoc autem est inconueniens & contra Scripturam, quæ dicit quod *Filius nihil potest facere à semetipso* Ioannis 5. & Ioannis 16. loquens in specie de processione Spiritus Sancti, *Ille (inquit) de meo accipiet, & annuntiabit vobis. Omnia quæcunque habet Pater mea sunt, propterea dixi quia de meo accipiet*: ergo si propterea accipit Spiritus S. à Filio, quia quæcunque habet Pater sunt Filij, non spirat Filius ut spirator innascibilis, & à semetipso, sed ut spirator genitus, & à se non faciens quidquam: ergo neque spirans à se, neque per immediatam resultantiam ab essentia sibi data.

Quod verò dicatur accipere spirationem à Patre, quia accipit ab illo Deitatem, & personalitatem Filij, non est ad propositum; siquidem ipsa virtus spiratiua, quæ formaliter constituit spiratorem in tali casu non prouenit ei à Patre, sed innascibiliter eam habet per resultantiam à Deitate, sicut Pater: ergo formaliter, & in rigore veritatis non est spirator genitus, sed innascibilis, atque adèd in rigore veritatis aliquid facit Filius à se, sicut Pater, nempe spirare Spiritum Sanctum, quæ est contradictoria illius non potest Filius à se facere quidquam.

Joan. à S. Thom. in 1. part. D. Th. Tomus alter

Ad primum fundamentum oppositum Respondetur virtutem spiratiuam in Patre non esse in actu primo potenciali, sed in actu secundo; & sic communicari Filio, siquidem communicatur ut actus purus, & consequenter in actu vltimo, & nullo modo potenciali. Vnde nulla virtus, nec potentia in Deo est potentia ad actum, sed ad terminum, qui est distinctus ab ipso producente. Qua ratione Concilium non dixit *vbi supra*, quod Pater communicat Filio virtutem spiratiuam, sed quod habet Filius à Patre hoc ipsum quod Spiritus S. ab eo procedat, id est ipsum actu procedere habet à Patre. Et Aug. 15. de Trinitate cap. 27. Hoc, inquit, *Pater Filio dedit, ut quemadmodum de se, ita de illo quoque procedat.* Et hoc modo intelligitur quod virtus illa non est in actu primo, neque ut potentia respectu actionis, seu actus secundi, sed est virtus respectu termini, id est, respectu personæ procedentis, sicque communicatur Filio à Patre virtus spiratiua in actu secundo, & ipse actus secundus quantus ad actualitatem intelligitur ordine originis prius in Patre, & sic communicatur Filio, ita quod nullo modo est in potentia ad actum secundum, considerata essentialiter. Sed tamen respectu termini producendi, qui est persona, sic illa virtus spiratiua non intelligitur terminari exercitè & in facto esse ad Spiritum S. nisi prout est à Filio simul cum Patre ut notionaliter terminata. Itaque virtus spiratiua essentialiter, seu quoad actualitatem & perfectionem absolutam in actu secundo, est in Patre prius origine, quàm in Filio; & sic prout in actu secundo communicatur Filio. Notionaliter verò, id est prout relatiuè & processionaliter terminata ad personam Spiritus S. solum communicatur ut virtus, non ut in exercitio terminata, quia non exercetur spiratio notionaliter, nec terminatur, ad Spiritum S. prius à Patre, quàm à Filio, sed simul ab utroque: licet autem in Deo non sit potentia & virtus respectu actionis, seu respectu actus secundi, bene tamen respectu termini, qui procedit ut distinctus à suo principio; actus verò secundus non distinguitur ab actu primo, ut *suprà disp. 4. & 11.* tractatum est, & expresse docet S. Thom. *infra quest. 41. art. 4.*

Ad secundum fundamentum distingo anteceden- 34
dens. Potentia spiratiua est formaliter potentia duorum suppositorum, distingo cum communicatione vnius ex alio, & deriuatione ab vna persona in aliam, concedo, æquè innascibiliter & immediatè in vtraque, nego. Itaque potentia illa petit existere, & operari in duobus suppositis, non tamen in sui emanatione, & resultantia petit immediatè resultare in duobus, sed ex vno communicari ad aliud. Et ita est potentia ad amorem mutuum & amicabilem, repugnâtque existere, & operari in vna persona tantum quantum ad sui existentiam, & subiectum proprium, sed quantum ad sui deriuationem & resultantiam non repugnat prius origine esse in vna persona tanquam in principio, & subiecto inadæquato ad communicandum illam alteri personæ, non ut in subiecto ad existendum & denominandum completè & adæquatè, & ad operandum terminatiuè notionaliter.

ARTICVLVS V.

Utrum Pater & Filius diligant se Spiritu Sancto.

Ista difficultas multum pertinet ad modum loquendi, quia sic communiter loqui solent Theologi cum Magistro in 1. dist. 32. idque sumpserunt ex Augustino, qui hoc sæpe in libris de Trinit. usurpat, præsertim lib. 6. cap. 5. & lib. 15. cap. 17. eamque defendit S. Thom. quæst. 37. art. 2. & communiter alij Scholastici. Eius verò difficultas insinuata est à D. Thom. loco cit. quia cum ponitur constructio ablatiui, semper significari solet aliqua ratio causæ formalis, vel saltem causæ actiue efficientis, non autem ratio termini producti, vel effectus, verbi gratia cum dicitur homo est albus albedine, est videns visione, importatur ibi ratio causæ formalis in illo ablatiuo: Cum autem dicitur homo intelligit intellectu, artifex operatur manu, vel operatur arte, intelligitur ibi habitudo causæ efficientis. Neutra autem habitudo intelligitur, cum dicimus quod Pater & Filius diligunt se Spiritu Sancto. Non enim intelligitur habitudo causæ formalis, quia Spiritus Sanctus non informat Patrem, & Filium, cum non identificetur cum illis, neque illis inhæreat, sed opponatur illis, forma autem non opponitur subiecto. Neque etiam importatur habitudo causæ efficientis, quia Spiritus Sanctus non est principium in Patre & Filio producendi amorem, sed est terminus productus. Ergo nullo modo verificari potest, quod diligant se Spiritu Sancto.

Ad hæc sunt aliquæ propositiones similes isti, quæ nullo modo verificari possunt, & velde difficilis redditur disparitas inter illas & istam: sicut hæc est falsa, Pater intelligit Verbo, generat Verbo, spirat Spiritu Sancto: ergo etiam non erit vera ista propositio, Pater diligit Filium Spiritu Sancto. Quid enim aliud est diligere quam spirare in Patre & Filio? & D. August. illam propositionem Pater est Sapiens sapientia genita, retractauit in 2. Retractionum cap. 26. Ergo etiam hæc erit falsa, Pater est diligens Filium Spiritu Sancto, vel diligunt Spiritum Sanctum Spiritu Sancto: omnes enim eiusdem rationis sunt, & similis formæ, quia non important habitudinem causæ formalis. Et licet hæc concedatur, Pater dicit seipsum Verbo; hoc tamen ideo est, quia in Verbo importatur habitudo representationis ad obiectum: at verò in ly diligere, etiam notionaliter sumpto, non importatur habitudo representationis ad obiectum, sed solum habitudo ad ipsum diligentem: habitudinem autem ad obiectum dilectum non habet Pater medio Spiritu S. sed prius origine per amorem quem habet in se diligit obiectum, & spirat Spiritum S. non verò per ipsum Spiritum S. qui est terminus passiuè, & terminatiuè procedens, diligit obiecta.

Propter hoc ista propositio variè à diuersis authoribus exposita est. Nam D. Thom. in qu. 37. art. 2. quinque expositiones illius propositionis affert, & reiicit; & plerique detorquent illam ad sensus improprios, & aliqui etiam falsam existimant illam propositionem absolutè, & retractam esse ab Augustino in sua simili, quando negauit Patrem esse sapientem sapientia genita: nam pari modo non est diligens dilectione spirata. Alij verò in alio extremo dixerunt, quod Pater diligit Filium Spiritu Sancto, secundum habitudinem causæ formalis, quia Spiritu S. est amor, quo

Pater & Filius mutud se diligunt. Alij verò voluerunt eam propositionem saluare secundum improprios sensus dicendo, quod Pater diligit Spiritu S. id est amore essentiali qui appropriatur Spiritui S. Ad quod reducitur quod alij dicunt, sensum illius propositionis esse, quod Pater & Filius diligendo se spirant Spiritum S. Alij verò exponunt quod diligunt se Spiritu S. quasi signo amoris, quia productio Spiritus S. est signum quod se diligunt. Ad quod etiam accedit expositio, quam ex Richardo de S. Victore refert Suarez lib. 11. de Trinit. cap. 3. num. 6. quod Pater dicitur dilgere Spiritu S. non quod per eum amorem habeat, sed quod exhibeat, non quod per eum amorem accipiat, sed impendat; quam explicationem Suarez tanquam piam, & probabilem admittit, & ad sensum proprium pertinentem, cum tamen impendere amorem, & exhibere magis pertineat ad effectum, & signum amoris, quam ad ipsum amorem formalem. Et licet explicari posset quod erga creaturas Pater & Filius impendant amorem per Spiritum S. tamen quid Pater impendat Filio, vel Filius Patri per Spiritum S. explicari non potest.

Quare melius alij, quorum sensum sequitur D. Thom. & in illum tandem conuenit Suarez, hanc propositionem admittunt, vt iacet, & explicant illam non in sensu causæ formalis extrinsecæ, quasi Spiritus S. sit id quo Pater & Filius diligunt, sed in sensu rei, seu termini producti, quatenus potest habere rationem causæ formalis extrinsecæ terminantis, quod non contingit in omni effectui, seu termino producto per actionem; sed quando concurrunt aliquæ conditiones, quas statim explicabimus. Supponit tamen hæc expositio propositionem illam, vt iacet esse admittendam, quia ita habetur in Augustino lib. 6. de Trinit. capit. 5. quem citat Diuus Thom. citato loco in argumento, Sed contra. Et tamen Suarez loco allegato numer. 3. dicit fortasse non inueniri formaliter in Augustino; cum tamen expressè Augustinus dicat, quod Spiritus S. est quo uterque coniungitur, quo genitus à gignente diligitur, generantemque suum diligit. Clare ergo deducitur illam propositionem esse Augustini.

Vt autem proprium eius sensum explicemus, dicendum est, locutionem istam non verificari in sensu causæ formalis intrinsecæ, & per modum principij quo, quasi Spiritus S. sit forma qua Pater & Filius se diligunt, sed verificari, quod diligunt se Spiritu S. quasi termino producto; quia hoc ipso induit aliquem modum formæ respectu diligentis, saltem per modum formæ terminantis, eo quod, vt probatum est in ratione dubitandi, ablatiuus ille semper construitur in ratione alicuius causæ formalis. sed non semper exigitur causa formalis intrinsecæ, sed sufficit aliquando terminatiua, qualis inueniri potest in effectui, seu termino producto respectu sui agentis, sicut arbor dicitur florere floribus, & homo dicitur loqui historiam verbo.

Cæterum quia non in quacumque actione contingit quod terminus eius possit denominare per modum formæ ipsum agens à quo producitur, oportet quod ad hoc concurrant tres conditiones, & si aliqua desit, non verificatur prædicatio in sensu ablatiui.

Prima est, quod in ipso verbo ex quo fit propositio, significetur productio, alioquin non fiet denominatio à termino producto.

Secunda quod etiam effectus ipse, seu terminus productus importetur determinatè in significatione propositionis, & verbi, alioquin non fiet ab illo denominatio. Nec sufficit importare illum quasi

quasi in communi, & in confuso, sicut quaecumque actio respicit effectum generaliter, sed per modum determinati & specificatiui termini, ratione cuius aliquantulum induat modum causae formalis, & non maneat in pura ratione effectus?

Tertia conditio est quod effectus, seu terminus productus importetur cum aliqua habitudine ad denominandum agens in se, vel ut per ipsum terminum productum tendat ad aliquod obiectum ad quod agens respicit per suum terminum. Quae conditiones desumuntur ex D. Thom. *citato loco in corpore art. & ad 3. v. g.* arbor dicitur florere floribus, non tamen producere flores floribus: dicitur aliquis diligere amicum amore, dicere historiam Verbo, non tamen dicitur amore producere amorem, verbo producere conceptum, seu intellectionem, quia *ly producere* non importat ad terminum productum nisi respectum, & ordinem agentis ad terminum, ubi sitit actio, non tamen respicit terminum ut medium, vel causam, qua mediante agens denominationem aliquam accipiat, vel tendentiam ad aliquod obiectum, mediante illo termino attingendo. At vero cum dicitur arborem florere, importatur emissio florum, non quomodocumque, sed ut vestiunt arborem, & denominant illam floridam. Similiter in hoc verbo *diligere* sumpto notionaliter, importatur non solum productio amoris, sed etiam tendentia per amorem productum ad rem dilectam, ut S. Thom. *dicat. qu. 37. art. 2. ad 3.* Similiter *dicere* importat productionem verbi, non quomodocumque, sed ordinando verbum ad representandum, & exprimendum rem dictam, quod tamen non importatur in *ly intelligere*, seu in hoc quod est esse sapientem, vel intelligentem quia *ly sapiens*, aut *intelligens* solum explicant ordinem ad obiectum, non ad verbum productum, & dictum.

7 Quia ergo Spiritus S. est terminus spiratus per amorem tanquam pondus, & inclinatio erga rem amatam, sicut Verbum est terminus expressus per cognitionem representans rem dictam, & intellectam, idem dicuntur Pater, & Filius diligere rem amatam, scilicet seipsos, & alia Spiritu S. sumendo *ly diligere* notionaliter, ut dicit D. Thom. non pro diligere essentiali: sic enim non diligunt se Spiritu S. sed amore essentiali, sicut nec Pater intelligit Verbo, licet dicat, & exprimat Verbo rem representatam in illo. Et sic est sensus quod Pater, & Filius Spiritu S. tanquam pondere, & inclinatione mutua tendunt amore in seipsos. Vbi iam explicatur aliqua ratio causae formalis saltem per modum termini, quo mediante tenditur in obiectum: non tamen dici potest quod producant Spiritum S. ipso Spiritu S. nec verbum producere verbo, quia in *ly producere* non importatur ille ablativus, nisi ut forma, & principium quo, non ut terminus, nec in verbo procedere importatur nisi ordo agendi ad effectum, seu terminum in ratione termini producti, non tanquam ad medium, quod tendat ad ulterius obiectum, & sic diuersa appellatio importata in denominatione de *ly produco* vel de *ly diligo* efficiunt in hac parte hanc diuersitatem propo-

tionum. Ad denique non est concedendum quod Spiritus Sanctus diligat Patrem, vel filium aut alia Spiritus S. quia non comparatur ad seipsum ut ad terminum productum, vel ad causam formalem amoris notionalis, neque ipse notionaliter spirat Spiritum S. sed solum amore essentiali diligit Patrem & Filium, & seipsum. Cum autem dicit D. Thom. *in hoc articulo 2.* quod diligere notionaliter nihil aliud est, quam spirare amorem, non vult dicere, quod est solum producere, sed in *ly spirare* inuoluitur etiam tendentia ad rem amatam, quia spirare amorem amare est. Plura videri possunt apud Caietanum *in hac q. 37. art. 2.* Vbi respondet obiectionibus Scoti *in 1. dist. 32. q. 1.* contra sententiam D. Thom. quae tamen ex dictis solvuntur.

Vnde patet responsio ad rationes dubitandi à principio propositas.

Ad primam dicitur verum esse quod Spiritus S. non potest importare, nec significari in vi causae formalis intrinsecae reddentis Patrem & Filium diligentes, bene tamen potest habere habitudinem causae formalis terminativae, quatenus ad ipsum Patrem & Filium comparatur tanquam terminus quidam productus per modum ponderis, & inclinationis; & consequenter ut medium uniendi in affectu ipsum obiectum dilectum personae diligenti, quod sufficit, ut in constructione ablativi possit praedicari de ipsis personis diligentibus talis praedicatio. Ad hunc autem modum causae formalis non requiritur identificatio vel inherencia, sed potius terminatio, & passiva processio per modum termini producti distincti.

Ad secundam dicitur quod illa propositio Pater est sapiens, sapientia genita negatur, quia in *ly sapiens*, & *intelligens* non importatur aliqua actio notionalis respiciens terminum productum, sed solum actus absolutus respiciens obiectum intellectum, ad intellectionem autem absolutam Pater non indiget verbo, sicut nec ad amorem absolutum Spiritu S. autem *ly intelligere* significaretur notionaliter, sicut *ly dicere*, *ly exprimere*. tunc bene concederetur quod Pater dicit Verbo res intellectas, exprimit illas verbo, &c. diligere autem etiam notionaliter significatur, & non solum essentialiter. Illa autem propositio Pater generat Verbo, spirat Spiritu S. negatur, quia ibi solum significatur habitudo producendi terminum, quod utique fit forma intrinseca, & principio, non mediante termino significatur respectus tendendi ad aliud obiectum, vel denominandi ipsum agens, sed praecise attenditur habitudo effectus, vel termini producti. Et falsum est in amore spirato non importari habitudinem ad obiectum amatum, sicut in verbo ad obiectum representatum quia, ut dicit D. Thom. *loco cit.* dilectio notionalis dicit habitudinem ad personam productam per modum termini, qui dicit ordinem ad rem dilectam. Amor ergo cum sit impulsus ad rem amatam, dicit habitudinem ad tale obiectum, non per modum representationis, sed per modum ponderis, & inclinationis, sicut verbum per modum expressionis, in quo datur respectus ad obiectum, & idem est in amore spirato.



QVÆSTIO XXXIX.

De Personis ad essentiam relatis.

S V M M A L I T T E R Æ.



B hac q. incipit agere D. Thom. de comparatione personarum, in quibus quintuplex comparatio considerari potest.

Prima est personarum ad essentiam cum qua identificantur.

Secunda per ordinem ad proprietates quibus in esse personæ constituuntur.

Tertia in ordine ad actus notionales qui à personis emanant, vel per quos emanant personæ.

Quarta ipsarum personarum ad inuicem.

Quinta ipsarum ad creaturas.

Primam comparationem expedit S. Thom. in hac quest. 39. Et consistit hæc comparatio in hoc quod personæ ita comparentur ad essentiam quod sint idem cum ipsa, & consequenter tres personæ, sint eiusdem essentiae, quod in art. 1. probat ex diuina simplicitate, & ex alia parte quia relationes non sunt accidentia; unde sequitur quod sine compositione sint idem cum essentia quantum ad rem, sint autem distinctæ quatenus oppositæ inter se. Quod verò sint vnius essentiae tres personæ, & vna essentia trium personarum probat, quia secundum nostrum modum significandi, & intelligendi natura in diuinis significatur vt forma, & persona vt suppositum habens illam: & idè potest dici quod personæ sunt vnius essentiae tanquam formæ, & quod essentia est trium personarum tanquam ab illis suppositata, & formata. Et hoc ostendit art. 2.

Ex hoc verò sequuntur duo, quæ per sex articulos sequentes latius tractat D. Thom.

Primum quomodo sit facienda prædicatio inter nomina essentialia, id est, significantia essentiam absolutam, & notionalia significantia personas relatiuas, vel ea quæ ad relationes pertinent: quia licet sint idem secundum rem, & identicè persona, & essentia, tamen secundum modum significandi differunt. Et sic explicat quomodo ista prædicatio sit facienda. Quod præsertim habet difficultatem in duobus. Alterum est quantum ad multiplicationem, vel vnitatem, quomodo, scilicet multiplicanda sint nomina, vel non multiplicanda, quando dicuntur essentialia de personis: Alterum est quoad modum significandi in concreto, & in abstracto, quomodo possint ad inuicem prædicari, vel supponere essentialia nomina pro personis, & prædicari, tum in concreto, tum in abstracto.

Secundum est quomodo nomina essentialia sint approprianda personis, eo quod essentialia attributa Dei sunt nobis magis manifesta ex creaturis, quàm personæ, & idè aliqua essentialia attributa appropriamus personis, vt per ea melius manifestentur quoad nos, sicut Patri appropriatur omnipotentia, Filio, Sapientia, Spiritui S. bonitas, seu amor. Hoc secundum tractat D. Thom. duobus vltimis art. 7. & 8. Illud primum quatuor articulis, à tertio vsque ad septimum.

Pro faciliiori autem intelligentia eorum quæ hîc de prædicationibus diuinis dicuntur, ad sequentes regulas ea reducimus.

Regula pro prædicationibus diuinis.

Prima regula pro multiplicatione, vel vnitatem nominum quæ prædicantur: *Nomina substantiua non multiplicantur, nisi multiplicentur forma per substantiuum nomen significata, requirunt tamen etiam ultra hoc multiplicari supposita, seu subiecta: nomina verò adiectiua non exigunt ad sui multiplicationem multiplicari formas, sed solum subiecta.* Traditur hæc regula generaliter à D. Thoma in hac qu. 39. art. 3. & tradita fuerat supra quest. 36. art. 4. & loquitur tum de substantiuis, tum de adiectiuis. Quod autem substantiua ad sui multiplicationem requirant, etiam multiplicationem suppositorum, & non solum formarum docet idem S. D. 3. quest. 3. art. 7. ad 2. vbi generaliter docet nunquam nomen ab aliqua forma impositum pluraliter dici, nisi propter pluralitatem suppositorum. Itaque pluralitas suppositorum, seu subiectorum semper requiritur tam pro substantiuis, quàm adiectiuis, sed ad plurificandum substantiua requiritur etiam plurificatio formæ, non vero ad plurificandum adiectiua. Et illa intelligimus substantiua, quæ significant aliquid modo substantiæ, id est, per se stando, adiectiua verò quæ significant modo accidentis, id est, alteri adiacendo. Et procedit regula de substantiuis in concreto: nam in abstracto solum significant

significant formam, non concernendo subiectum, & sine ordine ad illud; & sic non petit multiplicationem subiectorum.

Ratio verò regulæ sumitur à D. Thom. ex ipso modo significandi nominis adiectiui, & substantiui: utrumque enim de formali significat aliquam naturam, vel formam; & quia concretum est, connotat suppositum aliquod vel subiectum. Modus autem significandi substantiui est per modum substantiæ per se stando, & modus significandi adiectiui est per modum accidentis adiacendo; sed substantia habet unitatem, vel pluralitatem per se ratione formæ suæ: ergo nomina substantiua debent significare unitatem vel pluralitatem ratione formæ. E contra verò quia accidentia non habent esse per se; neque unitatem vel pluralitatem accipiunt ratione formæ tantum, & per se, sed ex adiacentia ad subiectum; & sic adiectiua, quia significant formam modo accidentis adiacentem, ex ipsa adiacentia sumunt multiplicationem vel unitatem.

Quod verò non solum adiectiua, sed etiam substantiua concreta requirant pluralitatem suppositorum, quod negat Vasquez *hic disp. 155 cap. 4.* constat ex eo, quod sicut proprium est substantiæ habere esse, & unitatem, vel pluralitatem per se, & ratione ipsius naturæ, seu formæ, ita petit afferre secum suppositum, si modo proprio, & connaturali se habeat: ergo nomina substantiua, quæ significant formam per modum substantiæ, id est iuxta modum proprium, & connaturalem ipsius substantiæ, oportet quod non solum habeant unitatem, vel pluralitatem ratione formæ, sed etiam quælibet forma importet suum suppositum, atque adeo ad multiplicationem substantiui concurrat etiam pluralitas suppositorum: totum hoc enim pertinet, ad modum substantiæ, scilicet quod ex vi formæ, seu naturæ habeat per se stare & hoc stare per se sic afferre suum suppositum; & ita per hoc quod exigit substantiui unitatem vel pluralitatem ex ipsa ratione formæ, non tollitur, sed potius petitur quod habeat pluralitatem suppositorum si multiplicatur. Vnde non obstat quod S. Thom. in art. 3. *huius q. dixerit*, quod *singularitas, vel pluralitas nominis substantiui attenditur penes formam significatam per nomen*: attendi autem est ex illa solum desumi. Quem locum urget Vasq. sed immerito, quia verum est pluralitatem, & unitatem substantiui solum attendi secundum formam, & ex illa desumi, ut ex ratione formali, non tamen hoc solum importare, quia ex ipsa illa forma secundum quam hoc attenditur, est forma substantiua, ex ipsamet autem ratione formæ substantiæ consequitur quod importet secum suppositum; unde in hoc ipso quod dicitur attendi secundum formam, tacite significatur, quod attenditur etiam secundum supposita, quia forma secundum quam attenditur illa pluralitas, est forma substantiua, quæ ex sua natura affert secum suppositum. Et ita id explicuit S. Thom. esse necessarium in 3. p. q. 3. cit. & supra qu. 36. art. 4. ad 2. ubi ostendit Patrem non esse plura principia, licet habeat plures proprietates, quia est unum suppositum, sicut qui habet plures artes, non est plures artifices, & qui habet plura indumenta, non est plures induti.

II. Regula, quæ ex ista prima deducitur: *Nomina essentialia in diuinis adiectiue sumpta possunt multiplicari, non autem substantiue*. Vocamus nomina essentialia ea quæ significant naturam vel pertinentia ad naturam, scilicet perfectiones absolutas. Hæc igitur in tribus personis multiplicantur adiectiue, non substantiue tantum Exemplum primi: sicut verè dicimus esse tres personas diuinas (ly diuinas adiectiue) esse tres existentes, immensas, immutabiles, æternas, sumendo hæc nomina adiectiue. Exemplum secundi: non verè dicimus esse tres Deos, tres creatores, prædestinatores, &c. Nec dicimus tres increatos, tres immensos, tres omnipotentes, sumendo hoc substantiue: id enim aperte negatur in symbolo Athanasij. Nec solum hoc negatur propter periculum conueniendi cum hæreticis, sed propter rigorem veritatis, & proprietatem sermonis, eo quod, ut dictum est, substantiua nomina ex modo significandi petunt multiplicari ratione formæ, eo quod ipsa forma substantiua esse debet, seu per modum substantiæ significatur, & ita si multiplicatur ut substantiua ratione sui debet multiplicari, & tanquam per se existens, & in se diuisa non ex adiacentia ad aliud. Et qui diceret in rigore sermonis verum esse dari plures Deos, non euaderet errorem, quia idem esset ac fateri in re esse plures Deos, & solum à nobis id occultari aut negari, ne conueniamus cum hæreticis.

III. Regula pro concretis ad videndum pro quo supponant, & verificentur: *Nomina essentialia non solum supponunt pro hoc Deo, sed etiam possunt supponere pro persona*. Ita D. Thom. *hic art. 4.*

Ratio est, quia concretum essentialiale v.g. Deus, significat habens Deitatem, sicut homo significat habens humanitatem: ergo ex vi, & modo suæ significationis potest supponere pro quocumque habente Deitatem. Deitas autem non solum habetur in se quatenus est per se existens, sed etiam habetur in personis quatenus terminatur per illas. Potest ergo supponere non solum pro eo quod est natura diuina absolute, sed etiam pro personis relatiue.

IV. Regula, *Ex ipso predicato habet hoc nomen Deus trahi seu determinari ad supponendum pro Deo absolute, vel pro persona relatiua, aliquando pro vna, aliquando pro duabus, aliquando pro omnibus*. Ita D. Thom. art. 4. in fine corporis. Constat hoc exemplis, & ratione. Exemplis, ut cum dicitur Deus est creator, Deus est æternus, ly Deus stat pro Deo absolute. Si dicatur, Deus generat, stat pro persona Patris tantum: Deus generatur, pro solo Filio: Deus spirat, pro Patre, & Filio simul: solus Deus est Trinitas, soli Deo honor, & gloria, pro tribus personis.

Ratio verò sumitur ex traditis ibi ad 1. & ad 3. quod hoc nomen Deus habet vim termini communis, eo quod est in pluribus suppositis, licet ex parte rei significatæ sit singularis. Sed tamen cum hac differentia ab hoc nomine homo, & aliis nominibus creatis, quod concretum hominis in re solum inuenitur in personis, in communi autem solum inuenitur per rationem: natura autem diuina etiam ut communis ad tres personas inuenitur in re. Vnde homo sumptus in concreto per se loquendo stat pro suppositis, ratione autem alicuius additi trahitur ad standum pro natura communi, ut quando dicitur, *homo est species* rat verò hoc nomen Deus per se stat pro absoluto, sed ex predicato adiuncto determinari non potest ad personam, ut quando dicitur *Deus generat*, verificatur pro Patre; *Deus generatur*, pro Filio. Vnde ut quod si negatur aliquis actus notionalis de hoc nomine Deus, ut si dicatur, *Deus non generat, Deus non generatur*, Propositiones redduntur falsæ, & non se habent sicut particulares, & sicut subcontrariæ respectu affirmatiuarum, quasi istæ sint simul veræ, *Deus generat, Deus non generat*, sicut istæ particulares, *aliquis homo currit, aliquis homo non currit*.

Ratio est, quia ille terminus Deus de se non supponit pro personis, nisi ad id constringatur ratione sui prædictæ

prædicari. Vnde si prædicatum sit negatio actus notionalis, ut cum dicitur *Deus non generat*, illa negatio non trahit ad supponendum pro personis, vel pro aliqua determinata persona, & relinquit eum in significatione communi, ut amplectitur omnes personas, vel ut significat naturam communem omnibus; & sic facit sensum, quod naturæ diuinæ, seu Deo communiter sumpto ad omnes personas, non conuenit ille actus notionalis generandi, quod est falsum, quia pro aliqua persona conuenit Deo. Affirmatiua autem, *Deus generat*, potest trahi ad standum pro persona Patris, & in illa verificatur.

V. Regula: *Nomina essentialia in abstracto sumpta ut essentia, Deitas, natura, non possunt supponere pro personis, nec illis attribui actus notionales: nec ea quæ notionalia sunt illis possunt attribui: bene tamen possunt abstracta essentialia prædicari de personis, vel abstracta personarum de essentia tam in concreto, quam in abstracto.* Itaque formaliter non possunt supponere pro personis abstracta essentialia, bene tamen identicè.

Prima pars regulæ patet exemplis, & ratione: exemplis, sicut hæc est falsa, *essentia generat, vel est genita*, ut contra Abbatem Ioachim definitur in c. *Dannames, de summa Trinitate*, quod est Concilij Lateranensis sub Innocentio III.

Ratio verò est, quia licet Deus, & Deitas, concretum, & abstractum in Deo sint omnino idem ex parte rei significatæ, tamen ex modo significandi valde differunt; quia abstractum non significat habens ipsam naturam, & consequenter si sit nomen naturæ, seu formæ essentialis, ex modo significandi non significat personam, & sic ex vi talis modi significandi non potest supponere pro ipsa personæ: ergo neque potest de illo verificari actus notionalis, qui est proprius personæ, ut generare, & generari. Vnde si nomen abstractum non sit essentialis, sed notionale, ut *paternitas, filiatio*, in ratione huius regulæ non comprehenditur, ut si dicatur *paternitas generat, filiatio generatur*, quia illud abstractum est idem quod persona. An verò ex alia parte istæ locutiones sint falsæ? D. Thom. falsas esse affirmat *suprà quæst. 32. art. 2. ad 2.* quando prædicatur de illis aliqua actio seu ordo ad actionem, ut *paternitas generat: Filiatio generatur*, quia ex modo significandi non significantur ut res, vel virtutes agendi, sed ut relationes, quæ ex modo significandi non agunt, licet habeant esse, ut *infr. qu. 41. art. 5.* docet D. Thom. & quod ad esse pertinet de illis dicitur, ut esse diuinæ, esse Deum, &c.

Secunda pars regulæ etiam exemplis constat, & ratione: nam si suppositio in istis nominibus non sumatur ex formali modo significandi, sed ratione identitatis, verificantur notionalia de abstractis essentialibus, ut si dicatur, *Deitas est res generans: essentia est res genita*, quia solum ibi designatur identitas vnius cum alio, & hæc identificatio vera est, ubi non obstat oppositio relationis, sicut reuera non est inter essentiam, & relationes. Ex quo ulterius deducitur quod illæ propositiones, in quibus solum explicatur prædicatio vnius de alio quoad esse, non autem aliquid per modum actionis, & passionis notionalis attribuitur essentiæ, bene possunt essentialia in abstracto prædicari de personis, & personæ de illis, & sic supponunt pro eodem ad inuicem, ut cum dicitur *Deitas est Pater*, vel *Pater est Deitas*, *Paternitas est Deus*, vel contra: omnes istæ prædicationes veræ sunt, quia ibi solum significatur identitas, ratione cuius vnum est aliud, & è contra. Omnia autem sunt vnum in diuinis, excepta oppositione relatiua. Identicè ergo possunt abstracta supponere pro personis, sed formaliter, & ex modo significandi non possunt; & ideo actiones, vel passionis notionales, ut generare, aut esse genitum non possunt attribui essentiæ in concreto, quia actus conueniunt supposito ratione formæ.

Et si quæras: an istæ sint concedendæ *Essentia est relatiua*, est respectiua, vel respicit terminum, sicut conceditur identicè, *Essentia est relatio*, est persona, est res relatiua, &c.

Respon. illas non esse concedendas, quia licet relatio entitatiuè considerata, & significata, ut res & entitas quædam, ut in hoc nomine *relatio*, prædicari possit de essentia, & Deitate in abstracto, tamen in *ly respiciens*, & *ly relatiua*, explicatur exercitium, respiciendi, quod licet non sit actio, est tamen notionale exercitium, & sic facit appellationem, & non conuenit essentialibus nominibus sub conceptu absoluto, & essentiali significatis, ut est *ly essentia*, sicut non dicitur quod essentia est generans, aut generat, bene tamen quod est generatio, aut res generans: ita nec est respiciens, sed res respiciens.



QVÆSTIO XL.

De Personis in comparatione ad relationes, & proprietates.

S V M M A L I T T E R A.



QVATVOR determinat S. Thom. in hac quæstione, quæ pertinent ad constitutionem personarum per proprietates, seu relationes, & origines.

Primum est in articulo 1. quod relatio sit idem quod persona, eo quod ad personam pertinet proprietas, quæ per relationem significatur: & sic dicuntur personæ esse proprietates propter identitatem, & proprietates esse in personis quia significantur ut formæ in illis.

Secundum in articulo 2. docet, quod distinguuntur, & constituuntur formaliter personæ per relationes, non per origines: nam quod per essentiam non distinguantur constat, quia in ea conueniunt: originibus autem etiam distinguuntur, sed quia significantur tanquam actus aut viæ, melius dicitur per relationes formaliter distingui, & constitui tanquam

tanquam formis per se stantibus, & oppositè respicientibus quàm sub formalitate originis significatis.

Tertium est in art. 3. quòd remotis relationibus non remanent supposita vel hypostasès in diuinis, sicut aliqui dixerunt, quòd Pater per negationem originis ab alio constituebatur in esse hypostasis, relatio autem Patris quasi ad dignitatem pertinens constituebat personam. Sed hoc est falsum, quia proprietates ipsæ, seu relationes sunt personalitates subsistentes, quia subsistunt in natura intellectuali; & sic conceptus hypostasis in tali natura iam est persona.

Quartum est in art. 4. quomodo actus notionales præsupponant vel sequantur ad proprietates seu relationes personales. Et dicit quòd actus isti seu origines significatæ passiuè prius intelliguntur, quàm personæ per illas procedentes, quia fundantur, & sequuntur ad illas. Origines autem significatæ actiuè sunt priores relatione non personali, vt spirare est prius relatione spiratoris. Respectu autem relationis constituentis personam (vt generatio respectu paternitatis) actus notionalis est prior exercitio relationis, est autem consecuta ad rationem relationis vt constitutiuam personæ.



Q V Æ S T I O X L I.

De Personis comparatione ad actus notionales.

S V M M A L I T T E R Æ.

COMPARATIONEM personarum ad actus notionales sex articulis considerat D. Thom. In 1. supponit, & explicat quomodo actus notionales sint attribuendi personis videlicet quia distinctio personarum attenditur secundum originem, & origo designatur per actus notionales, vt generatio, natiuitas, processio, &c. qui actus, seu origines non distinguuntur à relationibus seu personis.

In 2. art. ostendit actus notionales, esse naturales, & necessarios, non voluntarios per modum liberi, ita quòd voluntas, vt liberè operans sit principium illorum: hoc enim processionis creaturarum proprium est. Vnde etiam Spiritus Sanctus procedit à voluntate vt natura.

In art. 3. ostendit actus notionales non producere ex nihilo, sed ex ipsa diuina substantia, quia producere ex nihilo est producere esse creatum, & sicut artifex producit ex materia externa, & illud quod producit, licet sit simile ideæ, non tamen naturæ suæ, ita Deus producit ex nihilo tanquam artifex, & id quod hoc modo producit est creatura, quod autem procedit vt verus Filius non potest ex aliena substantia esse vel de nihilo, & idem est de Spiritu S qui est intra Deum verus Deus.

In art. 4. ostendit dari in Deo potentiam ad istas processiones internas, scil. ad generandum, & spirandum, quæ non designat nisi principium quo talium processionum. Hoc autem principium distinguitur quidem, & est reale principium respectu termini præcedentis, non autem realiter distinguitur ab actu intelligendi vel volendi, quo fit processio.

In art. 5. ostendit potentiam hanc notionalem, v. g. potentiam generatiuam in recto importare essentiam, quatenus dicit ipsam vim producendi, & id ratione cuius terminus procedit simile generanti, vel idem cum suo principio; connotat autem relationem, & oppositionem, quatenus requiritur ad distinctionem. Non tamen relatio est id quo generans generat, quia relatio non designat virtutem operandi, sed oppositionem.

In art. 6. ostendit actus notionales non posse habere plures terminos, sed vnum tantum, v. g. non posse habere plures Filios, nec plures Spiritus S. id enim postulat infinitas & perfectio cuiuslibet processionis, vt vnica totum hauriat.

Q V Æ S I T O

QVÆSTIO XLII.

De æqualitate, & similitudine diuinarum personarum

S V M M A L I T E R Æ.



OMPARAT in hac qu. D. Thom. personas inter se præsertim quoad æqualitatem, & ordinem, atque existentiam vnius in alia.

Igitur in 1. articulo docet dari inter diuinas personas æqualitatem, quia non est maius, & minus, non quidem æqualitas quantitatis, sed perfectionis, & virtutis, quæ est essentia Dei. Non tamen hæc æqualitas, & similitudo est in Deo relatio realis distincta à relationibus personarum.

In art. 2. ostendit personas esse æquales in æternitate, seu coæternas inter se, eo quod processio earum est à principio perfecto, & non impedito, & necessario seu naturaliter operante in his processionibus: ergo idem est in Deo esse, & producere personas.

In artic. 3. ostendit quod non obstante coæternitate personarum est in eis ordo originis, quia vna persona est ab alia, sed non est prioritas qua alter sit prior altero, sed quia vnum est ex altero.

In artic. 4. ostendit personas diuinas esse æquales secundum magnitudinem, quia magnitudo in Deo non est quantitatis, sed perfectionis, & hæc eadem est in Patre, & Filio, quia non per incrementum crescit Filius ad æqualitatem Patris, sed natiuitate ipsa totum quod in Patre est, accipit.

In artic. 5. ostendit quomodo vna persona sit in alia, scil. triplici modo; primo, ratione essentia, quia essentia vnius communicatur alteri, & est in illa. Secundo, ratione relationis, quia vnum relatiuum est in suo correlatiuo ratione oppositionis, & tendentiæ. Tercio, ratione originis, quia procedunt personæ per actus immanentes, de quorum ratione est quod terminus procedens maneat intra ipsum à quo procedit.

In artic. 6. ostendit personas esse æquales in potentia, quia habent eandem naturam, & perfectionem: ergo eandem virtutem, & potentiam, quia hæc pertinet ad naturam.



DISPUTATIO XVI.

De constitutio Personarum,
& actibus notio-
nalibus.

ARTICVLVS. I.

*Quæ sit forma constituens Personas in
diuinis.*



VPPONIT hæc difficultas duo.

Primum deberi in qualibet persona diuina assignari formam personalem constitutiuam personæ in esse personæ, quam vocamus proprietatem personalem, eo quod forma constituens personam non potest esse communis aliis personis, cum vna persona sit distincta ab alia, & opposita illi, atque adeo, in quantum persona, debet per aliquid proprium constitui quia idem est constitutiuum, & distinctiuum rei. Vt autem supra qu. 32. art. 2. ostendit D. Thom. contra Præpositiuum, qui negabat dari proprietates in diuinis per modum formarum constituentium personas, eo quod non

distinguitur forma constituens à re constituta oportet proprietates istas fateri, & per modum formarum eas significare, quibus personæ ipsæ constituentur in esse personali secundum quod vna persona distinguitur ab alia. Et quidem dari tales proprietates. Ecclesia fatetur, cum inquit (in præfatione Trinitatis) *ut in personis proprietas, & in essentia unitas, & in maiestate adoretur æqualitas.* Et in Concilio Lateranensi sub Innocentio III. in cap. *Firmiter*, de summa Trinitate dicitur: *hæc Sancta Trinitas secundum essentiam vna, & secundum proprietates discreta.* Et in epistola Sophronij, quæ habetur in VI. Synodo Generali, actione I. dicitur quod *Sicut esse Deum vnaquæque in conuertibiliter possidet, ita & proprietatem per quam ipsa persona figuratur immutabilem, & immobilem obinet, quæ eidem soli est insita, & ab aliis personis eam discerni.* Et in Concilio Toletano II. in confessione fidei dicitur: *Est tamen unicuique persona sua proprietas.* Quod verò istæ proprietates significantur ut formæ constituentes personas, & non solum significantur in abstracto sumendo abstractum pro concreto, ut dicebat Præpositiuus, constat ex prædictis testimoniis, quia significantur proprietates ut existentes in personis. Non minus autem requiritur distinctio ut vnum dicatur esse in aliquo, quam ut dicatur, & confiteatur ut forma illius. Si ergo propter indistinctionem negatur proprietates significari debere ut formas personarum, etiam deberet negari quod sunt in personis, quod est apertè contradicere dictis Conciliis. Quare sine dubio fatendum est assignandas

assignandas esse proprietates tanquam formas constituentes personas in esse personali, non quidem constitutione importante compositionem: hæc enim supponit distinctionem extremorum componentium, sed constitutionem formæ rei simplicis nostro modo intelligendi conceptâ, sicut dicimus Deum constitui Deitate, & constitui omnipotentem omnipotentia, & immensum immensitate, sic constituitur persona proprietate, prout latius *suprà d. 14. a. 3.* expendimus.

2 Secundum quod supponimus est, hanc formam, seu proprietatem constitutiuam personæ in esse personæ, non posse esse entitatem sub conceptu absoluto seu essentiali, neque sub aliquo conceptu, qui neque sit essentialis, neque notionalis, & multò minùs quod non sit realiter constitutiuus. Non potest esse conceptus essentialis seu absolutus, ut refertur tenuisse Ioannes de Ripis, eamque non improbabilem existimauit Scotus in 1. dist. 26. q. 1. §. *Tertia opinio.* Sed omnino reiicienda est, quia id constituit personas formaliter, quod discriminat & discernit illas ab inuicem in esse personæ, quia quælibet persona debet constitui ut distincta ab alia in eo quod proprium & peculiare est sibi, eo quod debet constitui in esse personæ in quantum incommunicabilis, quia incommunicabilitas est de ratione personæ. Id autem quod essentialis & absolutum est, non discernit, nec distinguit, neque multiplicat personas, quia essentialia omnibus sunt communia, sola autem relatio multiplicat Trinitatem, ut ex Boëtio docent communiter Theologi, idque etiam sumpserunt ex Anselmo, præsertim in libro de processione Spiritus S. ubi frequenter docet omnia in Deo esse vnū, ubi non obuiat relatiua oppositio. Supponit ergo in essentialibus & extra notionalem oppositionem omnia esse non solum communia, sed vnum. Et in Concilio Lateranensi, sub Innoc. III. in c. *Firmiter*, dicitur. *Hæc sancta Trinitas secundum communem essentiam indiuidua, & secundum personales proprietates discreta:* ergo discretio, & distinctio personarum non per essentialia, quæ indiuisa sunt & vnū, sed per proprietates, quæ aliquid notionale sunt, discreta, & multiplicata constituitur. Similiter in Concilio Toletano II. in confessione fidei dicitur quod in relatione personarum numerus cernitur. Et inf. *Hoc solo numerum insinuant, quod ad inuicem sunt & in hoc numero carent, quod ad se sunt.* Omitto authoritates ex Concilio Florentino, quia licet pluribus locis, præsertim *sessione 18. & 19.* dicatur solam relationem multiplicare personas, tamē ut sæpè monuimus, in illis sessionibus, nihil à Concilio definitum est, sed tantum disputatum, definitio verò in literis vnionis continetur.

3 Quod verò constitutiuum personarum non possit esse aliquod tertium quod neque essentialis, neque notionale sit, constat, quia talis ratio non est imaginabilis: omne enim quod est in Deo, aut est commune & vnum in omnibus personis, aut proprium & peculiare alicuius, & consequenter incommunicabile, nec in ista diuisione est dare medium. Quidquid proprium & incommunicabile est, dicitur notionale, siue pertineat ad ipsas relationes sub conceptu formæ relatiuæ, siue sub conceptu, & formalitate originis, siue sub ratione cuiuscunque alterius notionis. Quidquid communicabile est omnibus personis, nec proprium alicuius, vel aliquantum essentialis est, nec potest specialiter constituere personas, quia pertinet ad omnes communiter: ergo non potest fingi aliquod tertium, quod nec sit essentialis, neque notionale pro constitutiuo personarum.

4 Denique quod constitutiuum personarum debeat esse aliquid reale & constitutionem realem facere, non rationis, ut malè aliqui imponunt Caietano, & Fertar. constat, quia aliud est proprietatem constituentem solum ratione distingui ab ipsis personis. *Ioan. à S. Thom. in 1. part. D. Th. Tomus alter.*

sonis: aliud est tantum ponere constitutionem rationis. Primum verum est, nec ab aliquo negari potest, cum proprietas Patris, sc. Paternitas non sit aliquid realiter distinctum ab ipsa persona Patris, sed solum ratione. Secundum autem est falsum, quia res constituta realissima est, scil. persona diuina: ergo eius constitutio non potest esse ficta, neque à ratione tantum elaborata, sed in re inuenta, semotis tamen imperfectionibus, & omni potentialitate, sed per suam simplicitatem cum ipso constituto.

*Punctus difficultatis, & expeditio eius
quoad personas procedentes.*

His suppositis punctus præsentis difficultatis est, ut relictis attributis, & perfectionibus essentialibus inter ea quæ notionalia sunt inquiramus, quodnam ex illis possit habere vim & rationem formæ constituentis personam diuinam in ratione personæ: requiritur enim ad constituendam personam formaliter, quod principium seu ratio qua reddatur Deus realiter subsistens incommunicabiliter, & indiuidualiter secundum indiuiduam, & propriam rationem vnus personæ, qua discernitur ab alia, & in sua peculiari ratione personali constituitur: Sicut in rebus creatis modus subsistentiæ, qui per modum termini reddit naturam terminatam, & incommunicabilem, dicitur forma constitutiuam suppositi, seu personæ in ratione, & esse Personæ, ut distinguitur à constitutiuo naturæ, quia natura constituitur per formam essentialem, & quidditatiuam talis naturæ. Persona autem constituitur per terminationem, qua redditur natura terminata, & incommunicabilis alteri personæ. Et hunc terminum, seu formam incommunicabilem intendimus designare, & quærimus illum inter ea quæ notionalia sunt, quia in essentialibus non reperitur, quia incommunicabilia non sunt.

Inter ea autem quæ sub nomine notionali comprehenduntur, & ad ordinem notionalem pertinent, tria inueniuntur ad quæ possunt omnia reduci. Primum est relatio. Secundum origo. Tertium notio aliqua negatiua, ut innascibilitas in Patre, & si quid aliud ad modum notionis negatiue explicari potest. Nomen autem personæ, & subsistentiæ, & hypostasis, licet ad notionalia pertineant, tamen non numeramus illa modò inter notionalia, & de quibus in præsentia agimus, quia ista se habent ut constituta. In præsentia autem inquirimus de forma constituyente personam seu hypostasim, & sub quo conceptu illam constituat. Igitur relatio in diuinis accipitur per formam, qua redditur aliquid respiciens, & tendens ad terminum correlatiuum, ut paternitas, filiatio, spiratio, &c. Origo dicitur ipsa processio, seu actio qua producitur vna persona ab alia. Et licet non distinguatur à relatione realiter, differt tamen sub diuerso conceptu formali, quia relatio tendit ad correlatiuum respiciendum, origo producendo, vel procedendo. Vnde sequitur alia differentia, quod origo significatur ut via, vel actio: relatio ut res, seu forma per se stans, seu forma respiciens siue posita, & tenens se ex parte termini, siue ex parte principij. Et significatur origo dupliciter, tum actiue, tum passiuè. Actiue significatur ut productio, & tenet se ex parte agentis, seu originantis, sicut generatio in Patre, spiratio actiua in Patre & Filio. Passiuè significatur, ut processio ab alio, sicut natiuitas in Filio, seu esse genitum, spiratio passiuæ in Spiritu sancto.

Præter relationem & originem inueniuntur aliæ notiones, ut innascibilitas in Patre, quæ est notio negatiua; inspirabilitas etiam in Filio, & improductio, seu infecunditas ad producendum in Spiritu sancto: quæ duæ non sunt propriæ notiones, ut su-

prælatè tractauimus *disp.* 14. Pertinet etiam ad ordinem notionalium non solum actus ipsi notionales, sed etiam potentia, vt potentia generatiua, & spiratiua, quæ significantur vt principium quo actus ipsi notionales eliciuntur. Sed tamen istæ potentia in ipsa ratione originis inuoluuntur: Origo enim actiue sumpta est productio ex parte principij agentis, vbi ipsa potentia productiua designatur, quæ est principium, quo procedendi. Et cum in Deo non inueniatur potentia in actu primo, sed in actu secundo, idem est designare originem actiue pro productione ex parte agentis, ac designare potentiam productiuam: & ita generatio actiue est potentia generatiua. Spiratio actiua est virtus spiratiua.

8 Igitur aliqui tenuerunt formam constitutiua personarum esse originem, non relationem; quæ sententia communiter attribuitur D. Bonau. in 1. *dist.* 46. q. 2. & Ricardo de S. Victore lib. 4. de *Trinit.* c. 15. Cuius fundamentum est, tum quia Patres communiter explicant constitutionem personarum per origines, sicut inquit Aug. lib. de *fide ad Petrum* c. 1. Quia igitur aliud est genuisse quam natum esse, aliudque est procedere quam genuisse; vel natum esse, manifestum est quoniam alius est Pater, alius Filius, alius Spiritus S. & S. Damasc. lib. 1. de *fide* c. 2. Pater (inquit) Filius, & Spiritus S. omnino sunt unum, excepta ingenti generationis & processionis proprietate. Tum etiã, quia origo est fundamentum relationis: fundantur enim relationes istæ diuinæ in actione naturali, & nõ in actione purè absoluta & essentiali: nam intelligere & velle essentialia, etiam inueniuntur in Filio & Spiritu S. & tamen nec ille generat, neque iste spirat, sed solum fundantur in actione notionali, quæ est ipsamet origo: ergo ante relationem fundatam supponitur origo: ergo & persona: ergo relatio non potest constituere personam, sed origo quæ est fundamentum eius. Et aliàs non est minus subsistens origo, quam relatio si consideretur vt res, & in actu signato, si verò vt in exercitio produciens, etiam relatio vt in exercitio respiciens non constituit personam, sed supponit, in eaque fundatur: ergo non minus inter formas notionales constituere potest origo personas quam relatio.

9 Nihilominus oppositum apertè tenet D. Th. in hac q. art. 2. & 4. & in 1. *dist.* 26. q. 2. a. 2. & q. 8. de potentia art. 3. Et eandem sequuntur communiter Theologi in 1. *dist.* 26. & interpretes D. Th. in hac q. 40. art. 2. quos latè referunt Carmelitanus cursus tract. de *Trinit.* *disp.* 18. dub. 3. n. 45. Ruiz *disp.* 87. sect. 5. n. 14. Omitto eam sententiam, quam D. Th. in art. 3. huius q. 40. refert, & refutat, scilicet quòd origines constituent hypostasies, relationes autem personas, distinguendo inter hypostasim & personam, quòd illa solum dicat suppositum, seu subsistentiam, persona addat dignitatem; & ad hanc dicebant relationem concurrere, v.g. paternitatem, quæ dignitatem quandam significat: ad primam verò sufficere originem, v.g. generationem. Sed hoc omnino falsum est, quia idem est in natura intellectuali hypostasis, & persona, neque maiorem dignitatem exigit persona, quam quòd hypostasis seu subsistentia, si sit in natura intellectuali; hoc enim ipso persona est.

10 Fundamentum ergo D. Th. citato loco huius q. 4. est duplex. Primum, quia est contra rationem personæ constitui origine. Secundum, quia est contra rationem originis quòd constituat personam: ergo ex omni parte hoc repugnat.

Primum fundamentum explicatur sic, quia persona intelligitur vt terminus intrinsecus nature quæ efficit & subsistere facit: origo autem non significatur vt terminus, sed vt via, siue per modum actionis, siue per modum passionis, vt generatio, & natiuitas: ergo ex ipsa formali ratione significandi non potest esse forma constituens personam. Consequentia patet,

quia forma constituens personam est terminus: ergo non est via, nec significari debet per modum viæ. Maior constat quia forma constituens personam est subsistentia seu personalitas: hæc autem terminat naturam in facto esse, quia reddit illam incommunicabilem permanentem, & in se: ergo non per modum viæ, & tendentiæ ad terminum, sed per seipsam terminus esse debet. Maior probatur ex ipsa essentiali ratione personæ, quæ est subsistentia incommunicabilis, seu substantia indiuidua nature rationalis, id est, prima subsistentia. De ratione autem subsistentiæ incommunicabilis est quòd sit terminus nature, quia non relinquit illam ulterius communicari, & terminari, sed in se sistit: ergo habet rationem termini. Est autem terminus intrinsecus, quia afficit ipsam naturam in se, & reddit illam in facto esse terminatam. Minor autem constat, quia generatio, v.g. significatur vt via quædam ad rem genitam, & vt progressio à generante: ergo significatur vt via à re, vel ad rem. Et propterea dicit S. D. quòd origo non significatur vt aliquid intrinsecum: non quia intra Deum origo non sit aliquid intrinsecum, cum sit actus immanens, sed quia significatur per modum viæ, exiens à producente, & tendens ad rem productam: vbi ipsum exire significatur per modum non intrinseci respectu rei à qua exit, & vt via ad terminum ad quem, & consequenter non vt constituens in facto esse intrinsecè.

Secundum fundamentum explicatur ex eo, quia origo vt dictum est, vel significatur actiue, vel passiuè: si actiue, comparatur ad principium à quo exiit. Exit autem à supposito subsistente, quia actus sunt suppositorum, nec potest aliquod principium, vt quo producere, nisi supponatur principium quod, à quo procedit actio: ergo ex suomet conceptu formali origo actiue sumpta supponit personam agentem: ergo non constituit illam formaliter. Si autem sumatur passiuè, nihil aliud est quam via, & tendentia ad personam procedentem: est enim via ad aliquem terminum, & non ad seipsam: ille autem terminus est persona procedens, sicut persona Filij, & Spiritus S. est persona procedens: ergo id quod significatur vt via ad talem personam, non potest ex tali formali ratione viæ constituere ipsamet personam procedentem, quia via est ad illam, non ipsamet in facto esse, & sic non constituit illam vt in facto esse.

Ad fundamentum oppositum Respondetur. 12

Ad 1. ex autoritatibus Sanctorum dicimus, ibi non exprimere formale constitutum personarum, sed solum id quod pertinet ad ea, quæ propria sunt personarum, siue per modum constitutiui in facto esse, siue in fieri, & via. Et hoc modo etiã pertinet ad origines personas distinguere, quatenus aliquid notionale sunt, & proprium personarum, & vt via significantur ad ipsas: alias enim sæpè etiã docent relationibus discerni & multiplicari personas, vt supra ex multis locis Conciliorum ostendimus. Vel etiã per nomina originum intelligunt aliquando ipsamet relationes, quæ in origine fundantur, vel originem fundant. Quo sensu explicat Augustinum D. Th. q. 8. de pot. a. 3. ad 14.

Ad 2. fundamentum dicitur, quòd relationes constituentes personas (de his enim tantum loquimur in præsentia) aliæ sunt procedentes, vt filiatio, & spiratio passiuæ, aliæ non procedunt, sed originant, vt paternitas. De primis non est difficultas, quòd subsequatur originem per quã producuntur, & in illa fundantur. Ex hoc tamè non sequitur quòd origo constituat personam: potius enim antecedit illam, quia est via ad ipsam. Atque adeo præcedit constitutum eius formale; & sic tales personæ procedentes fundantur quidem in origine quantum ad suam relationem, non tamen formaliter constituuntur per originem. Et licet origo etiam sit subsistens, sicut relatio ipsa, tamen propter modum significandi vt via, & tendentia

dentia, & non in facto esse, vt res & suppositum non constituit formaliter personam, sicut relatio. Si autem loquamur de relatione non procedente vt paternitas, dicimus quod illa, inquantum subsistens, & constituens personam non presupponit fundamentum, neque quoad hoc fundatur in actione, sed potius actio egreditur ab illa: sed tamen in quantum respiciens, & in exercitio tendens ad suum terminum; sic fundatur in actione, & presupponit generationem, non tamen presupponit illam vt constitutiuam personae, sed vt actum egredientem à Persona constituta, & vt praequisitum ad ipsum exercitium respiciendi: vt statim amplius explicabitur. Et cum instatur parificando relationem & originem, quod exercitè, seu quod exercitum respiciendi, & producendi, neutra constituit; signatè autem, seu in quantum res subsistens, non est cur origo repellatur à constituendo. Respond. verum esse quod in exercitio neutra constituit personam, sed exercet se erga alterum, relatio respiciendo, origo producendo; constitutio autem personae est prout in se, & ad se, considerata autem per modum subsistentis, est dispar vtriusque ratio; tum quia origo solum est subsistens identicè, scil. quia est aliquid diuinum, & intra Deum, non verò est formaliter ipsa subsistentia, sicut relatio, quae ex suo formali conceptu est opposita & incommunicabilis; & sic est subsistentia formaliter, & vt quo, & per modum formae: constitutiuum autem personae non solum debet esse subsistens identicè, sed formaliter, nempe ipsa subsistentia, seu personalitas: Tum etiam, quia ex modo significandi, origo, etiam vt subsistens, significatur vt via & tendentia, relatio vt in facto esse. Constitutiuum autem personae debet significari vt in facto esse, quia sic significatur ipsa persona constituta.

14 Ex quibus colligitur quod difficultas praesens de constitutiuo personarum non vrget circa personas procedentes, quia relationes, quae tales personas possunt constituere, inueniuntur in se subsistentes, quia ipsamet sunt subsistentiae relatiuae; & sic ex hac parte non repugnat constituere formaliter personas, quae ipsis subsistentiis formaliter constitui debent in esse personae. Similiter possunt supponere sua fundamenta antequam constituent personas, quia fundantur in origine, per quam procedunt, siquidem relationes istae ex sua formali, & specifica ratione sunt relationes termini producti ad suum procedentem, & constituunt personas vt procedentes: in hoc enim distinguitur Persona Filij à Persona Patris quod est persona genita, & ab illo existens: ergo formale constitutiuum illius debet esse relatio fundata in generatione passiuua. Quare tales relationes personarum procedentium, & quantum ad rationem respiciendi, illiusque exercitium, & quantum ad rationem subsistendi, & quantum ad ipsam entitatem formae relatiuae presupponunt origines tanquam fundamenta. Vnde non est difficile intelligere, quomodo ipse relationes constituent personas, presupponendo sua fundamenta, cum ex ipsa intrinseca ratione talis personae constitutae, quia persona procedens est, praerequirat & presupponat originem passiuam sui, in qua fundatur. Reliquum est vt deueniamus ad praecipuam difficultatem, quae est de constitutiuo personae non procedentis, quae est Pater.

15 *Paternitas sub conceptu paternitatis constituit primam personam non procedentem.*

Deuoluitur ergo summa totius difficultatis (& ipsa difficultas summa est) ad constitutiuum primae personae non procedentis, quae est Pater, quomodo possit per

Ioan. à S. Thom. in 1. part. D. Th. Tomus alter.

relatione constitui tanquam per formam. Et ferè tota difficultas reducitur ad duo puncta. Alterum ex parte fundamenti relationis: alterum ex parte termini.

Ex parte fundamenti difficultas est, quia relatio paternitatis est relatio fundata in generatione, siquidem non est relatio fundata in vnitatem, vel mensuram, sed in actione, & passione, & in nulla alia actione, quam in generatione: ergo non potest intelligi talis relatio formaliter consurgens, & existens ante tale fundamentum, quia relatio formaliter sumpta supponit fundamentum. Ex alia autem parte persona Patris debet intelligi constituta ante generationem, quia generatio procedit à Persona generante, ergo si illa persona constituitur per relationem Patris, vt Patris, debet constitui ante generationem, & consequenter relatio esse ante fundamentum, vel generatio esse ante personam generantem. Neque potest dici quod constituitur persona Patris per conceptum relationis secundum se, & in communi sumptam, non vt paternitas est in speciali. Contra enim est, quia personae non constituuntur per formam aliquam in communi sumptam, sed in speciali & determinatè, quia id quod constituunt, determinatè, & speciale est, & distinctum ab alia persona: persona autem Patris non distinguitur à persona Filij penes relationem communiter sumptam, quia haec etiam conuenit Filio: ergo penes relationem paternitatis, vt paternitas est, sed constituitur vt distincta à Filio: ergo constitui debet per relationem sub conceptu paternitatis, vt paternitas est, & vt opposita Filio: non enim est distincta, nisi vt opposita: haec autem supponit generationem pro fundamento: ergo.

16 Ex parte termini consurgit secundò difficultas quia Pater, & Filius sunt correlatiua: ergo sunt simul cognitione: ergo si in illo priori quo intelligitur constitui persona Patris ante generationem, intelligitur constitui per relationem paternitatis, in illo priori intelligitur simul natura cum Filio, & simul cognitione, quia non potest pro aliquo signo intelligi relatio Patris non terminata ad Filium, & simul cum illo: ergo pro illo signo quo intelligitur persona Patris constitui per relationem paternitatis, intelligitur in eo signo correlatiuum eius quod est Filius, siue intelligatur relatio paternitatis vt signata, siue vt exercita, siue secundum conceptum ad, siue secundum conceptum in, quomodocumque concipiatur, si conceptus paternitatis datur, etiam & Filij, qui est correlatiuum, dari debet: sed pro tunc nondum intelligitur generatio, neque presupponitur antea praecessisse, quia tunc primò intelligitur constitui persona generantis à qua generatio debet procedere: ergo intelligitur Filius ante generationem, quod implicat. Sequela patet, quia intelligitur ante generationem persona Patris constitui per conceptum paternitatis, qui est conceptus correlatiuus, & simul cognitione cum Filio.

17 Denique augetur difficultas, quia productio ipsa personae terminatur ad personam vt productam, quae est terminus productionis, non ad eam vt reatam, quia ad relationem per se, & directè non est motus: ergo ex parte termini prius intelligitur persona procedens producta, quam relata: ergo prius intelligitur constituta, quam relatione affecta. Relatio ergo non constituit formaliter. Haec sunt praecipuae difficultates.

Solutio D. Th. ad hanc difficultatem paucis verbis tradita est in hac q. 40. a. 4. dum inquit; *Proprietas personalis Patris potest considerari dupliciter: vno modo, vt est relatio; & sic iterum secundum intellectum presupponit actum notionalem, qui est relatio, in quantum huiusmodi fundatur super actum: alio modo secundum quod est constitutiuum personae; & sic iterum oportet*

A a 2

oportet

oportet quod praeintelligatur relatio actiui notionalis, sicut Persona agens praeintelligitur actioni. Ita D. Th. Quam distinctionem de relatione secundum munus subsistendi vel respiciendi acriter impugnat Durandus in 1. dist. 26. q. 1. Scotus dist. 28. q. ultima in fine: & contra ipsos defendunt Caiet. in hac quest. 40. art. 2. & 4. & Capreolus. in 1. dist. 26. quest. 1. Ferrar. 4. contra Gentil. cap. 26. & alij.

- 18 Et quidem solutio D. Thom. difficultatem facit, quia quando considerat relationem ut subsistentem, & non ut respicientem, seu ut relatio est, denudat illam fundamento suo, & termino, quia sub illa ratione consideratur ante generationem, quae est fundamentum illius, ut respiciens est, & ante terminum productum, seu genitum, qui est terminus correlatiuus talis generationis. Denudare autem aliquam relationem suo termino & suo fundamento, est destruere suam essentialem rationem, & specialem, & proprium conceptum Paternitatis. Quomodo enim potest concipi quidditatiua ratio relationis, cuius totum suum esse est ad aliud sine termino ad quem est, & sine fundamento, ratione cuius est?

Et rursus specialis relatio, qualis est Paternitas quomodo potest concipi sine suo specificatiuo, quod est fundamentum & terminus, ut in esse Patris constituatur? Quod si relatio, ut concipitur subsistens, denudatur istis duobus requisitis ad eius essentiam: ergo per talem conceptum subsistendi remouetur a suo conceptu essentiali, vel nondum, concipitur prout sic sub suo conceptu essentiali. Vnde non potest verificari quod si per illum conceptum subsistendi constituitur Persona Patris, quod constituatur in ratione talis personae per conceptum paternitatis, ut specialis conceptus paternitatis est.

- 19 Propter hoc valde diuisi sunt authores in explicanda hac solutione D. Thom. qui omnes solliciti sunt diuidere illum conceptum relationis, & secundum unam rationem ponere illam, ut constituentem Personam; & sic praecedere generationem, secundum verò aliam subsequi ad generationem, in eaque fundare, & correlatiue se habere ad terminum. Sed quae sint istae rationes inadaequatae in conceptu relationis, vix conueniunt, & facilius se implicant, quam explicant authores. Et ferè omnes conati sunt in illo conceptu constitutiui personae Patris inuenire formalitatem aliquam, secundum quam & relatio maneat, & terminum non respiciat expresse & explicitè, seu exercitè: nam sub conceptu explicito ad terminum non potest euadi, quin simul natura & cognitione sit cum termino, & subsequatur ad fundamentum talis respicientiae, quae est generatio, & origo. Qui labor in assignando conceptu relationis, in constituenda persona, & non attingendo terminum, firmatur ex doctrina D. Augusti. qui in 7. de Trinit. cap. 7. dicit quod, *Cum dicimus personam Patris, non aliud dicimus, quam substantiam Patris, ad se quippe dicitur persona, non ad Filium.* Et sic constitutiui personae sub hac formalitate, non attingit terminum correlatiuum, quia prout sic ad se dicitur persona, non ad correlatiuum. Vnde D. Thom. supra quest. 29. art. 4. ad 1. explicans hoc dictum Augustini, inquit. *quod Persona dicitur ad se, non ad alterum, quia significat relationem, non per modum relationis, sed per modum substantiae, quae est hypostasis.* Sequendo ergo doctrinam DD. Augusti. & Thomae, omnes tenentur in constitutiui personae sub formalitate constitutiui, non exercere relationem, neque attingere terminum eius, sub modo & formalitate

respiciendi, qui est modus relationis, quia constituere personam non est exerceri ad alterum formaliter, sed in se manere, & stare.

Reducuntur ergo praecipuae sententiae authorum in hac parte ad tres.

Prima affirmat constitutiui personae Patris esse quidem aliquid proprium Patris, sed non ipsam paternitatem, nec quantum ad exercitium ad, nec quantum ad conceptum in, vel conceptum subsistendi, sed constitui per notionem innascibilitatis, quae est propria Patris, & constituit ipsum non sub ratione Patris, sed sub ratione primae personae fecundae ad generandum; & sic intelligitur constituta persona Patris antequam generet, licet ratio & respectus Patris subsequatur ad ipsum generare. Haec est sententia Vasquez hic disput. 159. cap. 5. Sed quia innascibilitas de formali importat negationem non essendi ab aliquo, conatus est Vasquez, & eius sequaces, isti notioni supponere aliquid positium, non quidem de formali significato, quia hoc esse non potest; sed de materiali, intrinsecè tamen pertinente ad ipsam notionem, quod explicant per rationem fontalis principij, non quidem sumpto principio in communi ad paternitatem & spirationem, sed prout specialiter dicit rationem primi principij, seu fontis aliarum personarum, quatenus unico respectu, & indiuiso respicit duas personas procedentes, quem respectum Vasquez dixit esse rationes. Sed quia ineptus videtur respectus rationis, & inanis ad constituendam personam tam realem, sicut est prima persona Trinitatis, nec plus afferens de entitate, quam negatio, quae etiam ens rationis est, consolidarunt illum alij discipuli Vasquez, & praesertim P. Alarcon, vocando illum respectum transcendentalem, sola ratione distinctum à paternitate, & respicientem pro termino indiuiso Filium & Spiritum Sanctum. Quam sententiam latè adduximus & impugnauius disput. praec. art. 1.

Pater Suarez lib. 7. de Trinit. cap. 7. cum Arrubale disput. 112. cap. 3. docet Personam Patris constitui quidem per relationem diuinam, secundum propriam rationem relationis, sed tamen non concipi à nobis tunc ut relata ad suum terminum, & sic non concipitur conceptu proprio, & distincto, nec secundum expressam, & formalem constitutionem suam, sed conceptu confuso, addita aliqua negatione, vel connotatione; quod explicat in hunc modum: quod quia in humanis persona Patris prius est quam generet, & prius generat quam sit Pater, ad hunc ordinem adaptamus modum, quo aeternum Patrem concipimus, ac proinde tunc nec distinctè concipimus constitutionem eius, nec de illo formamus conceptum omnino positium, secundum quem sit generatione prior, sed concipimus tantum illum sub ratione primae personae, ubi ly primam, negationem dicit, & hoc affirmat vocari à D. Thom. relationem ut formam hypostaticam. Prima enim personalitas nihil aliud, quidem est quam relatio, ut tamen concipitur sub conceptu personali, non proprio, sed communi: nam in eo conuenit cum aliis relationibus & subsistentiis personalibus. Quia verò sub hac ratione confusa non potest sufficere ad constituendam personam particularem, additur negatio, quae significatur, cum dicitur prima personalitas, quia posituam rationem propriam addere non possumus, donec proprium eius respectum concipiamus: & sic praeintelligi potest prima persona

persona constituta, antequam relata, quod non obstat quominus per se ac propriè per relationem ut relatio est, constituatur. Ita Suarez.

22 Istæ duæ sententiæ in hoc conueniunt, quod constituunt personam Patris per aliquod proprium ipsius, non tamen sub ratione personæ Patris, sed sub ratione primæ personæ. Sed Vasquez id deduxit ad notionem innascibilitatis cōceptam cum aliquo positivo pro materiali. Suarez autem ad rationem communem relationis ut subsistens est cum connotatione negationis, quæ pertinet ad rationem primæ personalitatis, quo conceptu affecta persona, constituitur in esse personæ primæ, licet non in ratione relata, licet id quo constituitur, relatio sit. Vnde tandem per hoc vltimum debet Suarez recidere in sententiam Caietani de relatione concepta, & exercita, vel in sententiam Ferrar. de relatione sub conceptu *in* subsistenti, qui est conceptus communis, vel sub conceptu *ad* respicienti, qui est conceptus Patris.

23 Secunda ergo sententia est eorum qui ponunt constitutiuum personæ Patris per ipsam relationem paternitatis, & constitutum eius esse personam Patris, non solum sub conceptu primæ personæ, quæ est connotatio negationis, sed sub conceptu speciali, & proprio personæ Patris secundum conceptum positiuum. Et hi authores diuidunt illos duos conceptus relationis, quos ponit S. Thom. de relatione, ut subsistens, & ut relatio, quod sit idem ac relatio sub conceptu *in*, & absolutum, vel sub conceptu *ad*: & primo modo antecedit generationem: Secundo modo subsequitur. Ita Capreol. & Ferrar. *suprà* citati, & sequitur cursus Carmelitani *tract. 6. de Trinit. disp. 18. dub. 4. num. 67*. Loquendo de personis diuinis, ut concipiuntur per nostros conceptus confusos: nam si concipiantur conceptu proprio, & in se, seu per conceptus perfectos, docent constitui per relationes, etiam ut exprimunt ipsum *ad*. Et aliqui putant relationem constituere personam per conceptum abstrahentem ab absoluto, & relatiuo, quod attribuitur Tannero *disp. 4. q. 3. dubio 6*.

24 Tertia sententia est Caietani *in hac qu. 40. art. 1.* quam plures ex Thomistis sequuntur, de quo videri potest Nauarrete *hic Controu. 33*. sentit igitur Caiet. personam Patris constitui ipsa relatione Patris, non solum in communi concepta, & confusè, sed etiam in particulari, & distinctè, non solum per ipsum conceptum *in*, sed etiam per ipsum conceptum proprium *ad*, paternitatis, ut paternitas est; & illos duos conceptus, quos S. Thom. diuidit, intelligit Caiet. locum habere, etiam in eo quod proprium est relationis, & in ipso *ad* paternitatis expresso, & determinato, ita quod ipsummet *ad* diuidendum est, & inquit hunc conceptum particularem, & expressum paternitatis, & ipsummet *ad* Patris dupliciter posse considerari, primò ut signatum, & conceptum; secundò, ut exercitum. Et primus conceptus est conceptus ipsius relationis, etiam in specie infima, sed per modum quidditatis, & formæ, sub quo conceptu non respicit terminum ut *quod*, & exercendo respectum, sed, ut *quo*, quatenus est forma, qua refertur subiectum affectum relatione ad terminum. Secundus verò conceptus est conceptus ipsius relationis, ut actu tendens, & attingens terminum tanquam id quod respicit, & attingit, & sic inuoluit relatio ipsum subiectum, & quasi defert ad terminum, & exercet ad alterum, non consideratur tantum in se, cuius exemplum est in ipsa relatione, quæ est genus supremum: hæc enim, prout genus supremum, non habet terminum in quem actu, & exercitè se explicet, sed

Ioan. à S. Thom. in 1. part. D. Th. Tomus alter.

solum habet quidditatem relationis conceptam per modum quidditatis, & ut *quo* respicientem, non ut *quod*, paternitas ergo etiam secundum suum conceptum *ad* specificum, & particularem, secundum quod intelligitur ut forma, & solum respiciens ut *quo*, constituit Patrem, quia non est forma, & principium *quo* inherendi, sed subsistendi, & ita sub hac consideratione solum explicat officium formæ hypostaticæ, & subsistentis, non autem explicat exercitè attingentiam termini ad quem est, quia prout hic non applicat se ad terminum, sed applicat ipsum *ad* subiecto, seu potius subiectum ipsum subsistens constituit. Et sic antecedit generationem. Sub secundo autem conceptu concipitur ut exercens ipsum respectum *ad* terminum per modum respicientis, & explicantis se in ipsum; & sic præsupponit generationem, & in ea fundatur, & simul est cum termino.

Hæc vltima sententia Caietani videtur directius attingere mentem D. Thom. rectèque explicare indæquatos illos conceptus relationis, ut relatio est, & ut subsistens est, attribuendo hoc totum ipsi relationi, etiam sub conceptu *ad* paternitatis. Vnde resolutio nostra duobus dictis continetur.

Dico primò, constitutiuum formale personæ 25 Patris non potest esse aliqua notio præter relationem paternitatis: neque ipsa relatio paternitatis cum sola connotatione negationis in confuso concepta; & sic constituente primam personam: neque eadem relatio sub conceptu absoluto, aut conceptu *In*, excludendo ipsam explicatam, & formalem rationem *Ad*.

Fundamentum huius conclusionis sumitur ex vno principio, vnde ad omnes partes conclusionis probatio deriuatur. Et principium est hoc, quia persona Patris in illo priori antequam intelligatur ab eo nasci Filius, debet constitui in ratione personæ specialis condistrictæ à subsistentia essentiali, & à reliquis subsistentiis personalibus, & habent fecunditatem generatiuam ad producendum Filium: & hoc siue concipiatur à nobis confusè, siue distinctè, quia constitutio cum sit in re, non est regulanda penes nostros conceptus confusos, vel distinctos, sed penes id quod ipsum constitutum petit ex se, & ex sua formali ratione. Vnde prius statuendum est quidnam se habet formaliter, & per se in aliqua quidditate, & quomodocumque à nobis intelligatur siue confusè, siue distinctè, illud assignandum est pro formali constitutiuo. Sicut etiam in assignando constitutiuo naturæ diuinæ sub conceptu naturæ, solum attendimus ad id, quod formaliter se habet, & per se in conceptu, & quidditate talis naturæ, & illud assignamus pro constitutiuo ipsius, siue concipiatur confusè, siue distinctè. Sic si relatio secundum formalitatem ipsius *ad* pertinet per se, & intrinsecè ad conceptum personæ, non est cur excludatur à formali constitutiuo illius, siue confusè siue distinctè concipiatur illa persona, & eius constitutiuum.

Quòd ergo constitutiuum personæ Patris requiratur, & includat condiciones illas *suprà* dictas, manifestè constat, quia persona Patris debet constitui non solum in ratione primæ personæ prout excludit aliam priorem, sed etiam pro ut generatiua est, & specialiter opposita Filio, ab illòque distincta, siquidem debet constitui ut talis persona, quæ ex se habeat fecunditatem, & potentiam generatiuam, quia quandiu sic non constituitur, non consideratur secundum suam vltimam, & specificam differentiam in ratione talis personæ: quantumcumque enim intelligatur in ratione primæ

Aa 3 perso

personæ, non intelligitur ut potens, & fecunda ad generandum Filium, quia esse primam præcisè, & formaliter habetur per hoc, quod non sit alia prior antecederet ad ipsam, quod verò subsequatur alia, & quod hæc emanet ab ipsa, vel quod emanet per generationem, totum hoc non pertinet ad conceptum primæ personæ, ut prima est præcisè, sed ut fecunda, & ut generans, & ut Pater, & sic totum hoc pertinet ad constitutionem personæ Patris secundum ultimam differentiam eius, siquidem ad differentiam specificam personæ Patris, non solum pertinet in communi esse principium fontale aliarum personarum, & non habere aliam personam priorem à qua procedat, sed etiam specialiter esse principium generativum Filij, & personam distinctam ab illo; Tum quia specie distinguitur à filiatione; & sic in sua specifica constitutione petit id quo specialiter differt à Filio. Tum quia in illo signo in quo intelligitur constitui persona Patris antequam actu generet, intelligitur ibi ut fecunda ad generandum: ergo ad constitutum personæ Patris pertinet id quod est constitutum personæ fecundæ ad generandum, & per quod opponi potest ipsi Filio: ergo illud quod solum explicat constitutum personæ, ut prima, non ut fecunda, vel generativa, vel ut specialiter opponitur Filio, non constituit formaliter, & quoad speciem ultimam, personam Patris.

27 Ex hoc fundamento omnes tres partes conclusionis probantur. Prima, scilicet quod notio innascibilitatis non constituit personam Patris, probatur: nam, ut rectè dixit S. Thom. in 1. ad Anib. dist. 27. quest. 1. art. 3. ad 2. contra hanc sententiam Vasquez: *Per hoc quod Pater est ingenuus, non potest distinguere, nisi à genito, quod esse non potest, paternitate remota. Unde in divinis intellectus ingenui sequitur intellectum paternitatis.* Et ratio est, quia talis notio vel sumitur quoad suum formale significatum, quod est negatio procedendi ab alio priori, vel sumitur ut explicat aliquid positivum per modum principij fontalis omnium aliarum personarum, siue hoc positivum dicatur esse respectus rationis, siue respectus transcendentalis erga duas personas procedentes respiciendo illas pro indiviso. Si primum dicatur, illa notio non potest constituere formaliter personam, tum quia est negatio, seu ens rationis, quod nullo modo potest esse formale constitutum alicuius realis constituti, quale est persona. Tum quia sub ratione huius notionis nondum concipitur ratio termini incommunicabilis aliis personis, quia nondum concipitur aliqua oppositio cum illis in illa negatione innascibilis; sola autem oppositio constituit terminum incommunicabilem in divinis per modum substantiæ: ergo innascibilitas, ut præcisè explicat negationem existendi ab alio, licet soli Patri conveniat, non tamen potest esse formalis ipsa ratio constituendi terminum substantialem incommunicabilem aliis personis, quia hoc stare non potest sine oppositione relativa ad illas, quæ oppositio relativa non importatur in illo conceptu innascibilitatis ut negatio est. Si dicatur secundum: contra est, quia illa ratio fontalis principij, neque importat oppositionem relativam, & incommunicabilem Filio, & Spiritui Sancto, neque specialiter distinguit Patrem in ratione generantis à Filio. Non facit oppositionem relativam, quia oppositio realis relativa non pertinet ad respectum rationis vel transcendentalem, sed ad relationem secundum esse, nec talis oppositio datur in Patre pro indiviso ad utramque personam Filij, & Spiritus Sancti, quia non datur una processio pro indiviso utriusque personæ, sed unaquæque

procedit per suam distinctam processionem: ergo neque fundat unam oppositionem relativam pro indiviso. Neque etiam distinguit specialiter Patrem à Filio, quia in illo fontali principio nondum importatur fecunditas ut generativa Filij, & ut specialiter opposita Filio: ergo, neque ut distincta in sua specie à persona Filij: ergo neque ut constituta in ultima ratione specifica. Quod si pro illo signo intelligitur non solum fontalitas, & ratio principij ad utramque personam procedentem, sed ratio fecunditatis generativæ, vel illa fecunditas & principium intelligitur ut relativa, & subsistens, seu opposita suo termino ad quem est fecunda, vel non. Si intelligitur ut relativa subsistens, hæc est relatio Patris ut constituens personam, & restat tunc eadem difficultas, quomodo illa relatio constituat personam Patris, quæ currit in ipsamet relatione paternitatis. Si non est relativa subsistens, vel est aliquid absolutum; & sic erit commune omnibus personis, non proprium constitutum primæ personæ Patris, vel erit aliqua negatio, aut relatio rationis (nam creata entitas esse non potest) neutra autem potest formaliter constituere personam realem ut subsistentem, & incommunicabilem.

28 Secunda pars conclusionis, scilicet quod relatio Patris in confuso cum connotatione negationis alterius prioris, non sit constitutiva formaliter personæ Patris, probatur ex dictis, quia illa persona non solum debet constitui in ratione primæ personæ, ut prima est, sed ut specialiter opposita, & incommunicabilis aliis personis, & ultimam differentiam specificam habens condistinctam à persona Filij. Nam etiam pertinet ad constitutionem illius personæ differentia eius specifica, qua distinguitur à persona Filij, siquidem personæ istæ divinæ differunt inter se, non solum numero, sicut duæ relationes Patris, vel duæ relationes Filij, sed sicut relationes specie differentes: ergo persona Patris non solum debet constitui in ratione primæ personæ, quæ est unum ex prædicatis eius intrinsicis, sed etiam in esse talis personæ relativæ condistinctæ in sua differentia specifica, & ultima à persona Filij: ergo quandiu non concipitur sub hoc speciali conceptu sic constituto, & distincto, non concipitur ut formaliter constituta in esse talis personæ: ergo non sufficit concipere illam in ratione primæ personæ, sed oportet concipere illam sub ratione talis personæ relativæ, ut incommunicabilis, & oppositæ filiationi, & habens in se fecunditatem generativam. Deinde in hac sententia P. Suarez non potest intelligi quod negatio quam dicit prima persona, in quantum prima, sit formale constitutum illius personæ realis. Oportet ergo quod talis negatio solum sit connotata, vel concomitanter inclusa, sicut negatio lapidis includitur in homine, nec tamen constituit formaliter illum. Ergo oportet assignare præter negationem prioritatis aliquam formam realem constitutivam personæ Patris, quæ utique non est aliquid absolutum commune omnibus, neque relatio rationis aut transcendentalis, quam non admittit Suarez, & est impugnata in sententia Vasquez, sed est relatio ipsa secundum proprium conceptum relationis ut Suarez ipse admittit loco cit. conclusione 1. Si ergo relatio secundum propriam rationem relationis constituit, compone mihi quomodo verum est id quod ipse auctor dicit ibidem in fine secundæ assertionis: quod præintelligi potest prima persona constituta antequam relata, quod non obstat quominus per se, & propriè per relationem, ut relatio est, constituatur. Si ergo per relationem propriè ut relatio est constituitur, quomodo non intelligitur habere effectum

etum formalem referendi ad terminum? Siquidem dicit quod non intelligitur relata persona, & tamen intelligitur constituta per relationem, quod stare non potest, nisi intelligatur affecta relatione, ergo cum effectu eius formali, qui est esse relatum; aut debet incidere in sententiam Caiet. quam impugnatur de relatione signata, vel exercita.

29 Denique tertia pars conclusionis, scilicet, quod persona non constituitur solum per conceptum relationis, quantum ad id quod dicit de ratione *in*, seu de ratione absoluta, sed etiam quantum ad id quod dicit de ratione *ad*, probatur, quia relatio non constituit personam solum secundum rationem aliquam communem, sed secundum rationem specialem talis personae, & secundum rationem incommunicabilitatis, & oppositionis erga alias personas, siquidem persona constituta, est persona specialis, & constituitur secundum ultimam differentiam specificam secundum quam distinguitur ab aliis personis: sed non potest concipi relatio specialis specialiter constituens, nisi secundum rationem *ad*, quia specificatum relationis, & distinctum eius ab alia relatione sumitur penes ordinem ad terminum, & penes diuersum *ad*: quod enim tenet se ex parte *in*, est commune, sicut quod relationes diuinae sint subsistentes est commune omnibus relationibus: ergo non potest per hoc constitui aliqua persona specialiter, ut specialis persona est, & secundum differentiam ultimam specificatuum; qua distinguitur ab aliis personis, & ut distincta constituitur in se. Rursus relatio non est incommunicabilis, & opposita alteri, secundum id quod habet de *In*, sed secundum id quod dicit de *Ad*, quia in tantum opponitur alteri, in quantum se habet ad illud ut ad terminum correlatiuum sibi: relatio autem erga terminum correlatiuum solum, se habet per modum *Ad*, quia per *In* solum se habet ad subiectum: ergo solum opponitur per rationem ipsius *Ad*: ergo, & incommunicabilitatem dicit per rationem ipsius *Ad*; siquidem incommunicabilitas ratione oppositionis habetur: ubi enim oppositio non obuiat, omnia sunt vnum: sed non constituitur persona in ratione, & esse personae, nisi per subsistentiam ut incommunicabilem, quia incommunicabilitas est de ratione personae: ergo & oppositio, seu distinctio: ergo, & ratio *Ad*. Quare repugnat ipsam rationem *Ad* excludi a constitutione specialis personae, ut specialis est, qualis est persona Patris. Et quantumcumque concipiatur haec constitutio personae in confuso, & imperfecte, si concipitur ut vera, & quidditatiua constitutio personae, debet concipi ut constitutio personae incommunicabilis incommunicabilitate relatiua (non enim alia est) & consequenter ut opposita, & ut dicens *Ad* in ordine relatiuo. Difficultas est quomodo exprimat istud *Ad* antecedenter ad terminum genitum, & originem generantem, cum S. Thom. dicat non constituere personam, ut relatio est, quod videtur intelligi secundum quod explicat *Ad*.

30 Dico secundum. Relatio paternitatis, etiam secundum quod dicit ipsum *Ad*, seu ipsam relationem specialem, & secundum suam ultimam differentiam relatiuam paternitatis, adhuc admittit illos duos inadaequatos conceptus relationis, ut subsistentis, & ut respicientis, seu ut relatio, quod bene explicat Caietanus per relationem ut signatam, seu conceptam, & ut exercitam, & sub vno conceptu antecedit generationem, & terminum genitum, scilicet secundum conceptum signatum subsistendi; secundum alium sequitur generationem, & concomitatur terminum ad quem est. Haec conclusio explicat sententiam D. Thom. in hac qu. 40. art. 4. &

Caietan. *ibidem*. Quam sententiam perpetuo D. Thom. explicat eisdem terminis, quod scilicet relatio, ut relatio, non constituit personam, sed in quantum subsistens est, & diuina. & secundum quod subsistens est, praecedit generationem, ut autem relatio est, subsequitur generationem, ut patet in qu. 10. de potentia artic. 10. & 1. distinct. 27. qu. 1. artic. 2. & *ibid.* ad Anibaldum. Et dicimus, quod quando S. Thom. distinguit in relatione diuina illos duos conceptus subsistendi, & respicienti, seu relationis, ut relatio est, & ut subsistens est, non distinguit in relatione id quod est *in*, & id quod est *ad*, sed etiam relationem, ut est *ad*, distinguit in ipsum exercitum, ut tangit terminum, & in ipsum *ad*, ut subsistens est, & tangit subiectum. Sed quia ipsum *in* nihil aliud est quam relationem seu *ad* tangere subiectum, & ex parte subiecti se tenere, non apparet quomodo in ipsa relatione *ad*, ut distinguitur ab *in*, locum habeat ista distinctio ipsius *ad*, ut subsistentis, vel ut respicientis, ut exercita, vel ut signata, cum ipsum esse subsistens, & esse signatam pertineat ad rationem *in*: ergo in ipso *ad* non potest iterum hoc distingui. Et sic vellet nolit sententia Caiet. debet recidere in sententiam Ferrariensis, vel nihil dicit, cum inexplicabile videatur, quod in ipso *ad*, ut distinguitur ab *in*, iterum concipiamus id quod est subsistens, & ex parte subiecti se tenet tanquam relatio signata, seu concepta, & hoc ipsum non sit ipsum *in*. Nec audiendi sunt qui dicunt Caietanum per relationem conceptam, seu signatam intelligere relationem secundum suam quidditatem, sed debet intelligi relationem conceptam, seu signatam esse ipsam relationem ut subsistentem; tum quia id expresse dicitur a D. Thom. dum inquit in hac qu. 40. artic. 4. ad 1. quod relatio secundum quod significat personam subsistentem praecedit generationem: & supra qu. 29. art. 4. ad 1. dicit quod Persona significat relationem, non per modum relationis, sed per modum substantiae, quae est hypostasis. Tum quia si relatio signata est relatio pro quidditate, vel est pro quidditate in abstracto, ita quod relatio signata sit quidditas cum tali modo, id est, cum modo abstractionis, vel significat quidditatem ut in concreto. Quidditas in abstracto non potest constituere personam Patris; quia persona Patris non est aliquid abstractum, sed concretum, & sic debet constitui per relationem. Quidditas autem in concreto non est aliud quam ipsa relatio secundum se, & ut subsistens, & sic remanet eadem difficultas, quomodo relatio secundum suam quidditatem praecedat generationem, quae est fundamentum, & terminum genitum, qui est correlatiuum. Et vno verbo, relatio pro quidditate est relatio secundum sua praedicata quidditatiua; & sic dicere quod relatio signata constituit, est dicere quod relatio habens talem quidditatem constituit, quod non est soluere difficultatem, quia hoc ipsum est quod inquiritur, quomodo relatio secundum sua praedicata quidditatiua possit constituere, cum ipsa constitutio personae debeat praecedere generationem, & terminum genitum, quae tamen ex sua quidditate relatio ipsa praesupponit, & includit.

Quare dicimus quod in ipso *ad*, ut distinguitur ab *in*, adhuc inuenitur duplex ratio seu conceptus, quorum vnus magis explicat alium, ita quod vterque explicitus est per comparisonem ad ipsum *in*: sed in ipsomet *ad* vnus magis explicat alium in ordine ad terminum. Quando enim primo distinguimus in relatione id quod est *ad*, & id quod est *in*, illa ratio *in* non solum importat inhaerentiam, vel subsistentiam ipsius *ad*, sed etiam importat id quod

quod pertinet ad essentiam, & prædicata intrinseca entis creati, vel increati: ita quod si relatio sit accidentalis, importat rationem entis creati limitari, dependentis, potentialis, &c. & etiam ipsam inhærentiam, & perfectionem, vel imperfectionem talis accidentis. Si autem sit relatio increata, importat entitatem diuinam cum omnibus prædicatis, & perfectionibus diuinis, quæ in *ly diuina* includuntur, ita quod non solum lineam relationis dicit, sed etiam lineam rei absolutæ, quæ diuinitas ipsa est, & perfectio eius, in qua communicat cum aliis personis: *in* enim relationis pertinet ad esse diuinum, quod omnibus personis commune est, & etiam importat quod subsistens sit, & non inhærens: sed tamen cum hac differentia quod ea quæ perfectionis sunt, & pertinent ad ipsam rationem essendi, & existendi, non transeunt ad ipsum *ad*, ita quod in ipsa ratione *ad*, multiplicentur, quia totum quod diuinitatis, & perfectionis est, manet vnum, & commune tribus personis, ita quod in eo non opponuntur relationes. At verò esse subsistens, & esse reale etiam transit, & inuenitur formaliter in ipso *ad*, licet radicaliter id habeat ex eo quod diuina est. Et hoc ideo quia in ratione subsistentiæ, & realitatis multiplicantur relationes in diuinis, eo quod ad subsistentiam pertinet terminatio incommunicabilis: & incommunicabilitas per oppositionem habetur, & consequenter per distinctionem, & per ipsum *ad*, vt *ad*. Et similiter realitas exercetur in ordine ad terminum, quia realiter respicitur, & attingitur ad differentiam relationis rationis, quæ realiter ad terminum non est; & sic realitas multiplicatur in diuinis, licet quod realis sit illa relatio, habeat radicaliter ex eo quod diuina est, sicut relationes creatæ realitatem habent ex fundamento, quasi ex radice. Itaque vno verbo, quidquid oppositionis est, & multiplicationis, etiam si reale sit, pertinet ad ipsum *ad* sub conceptu *ad*, vt distinguitur ab *in*. Quidquid ad perfectionem, ad essentiam, ad diuinitatem, ad esse pertinet in relationibus diuinis, tenet se ex parte ipsius *in*, & non multiplicatur in relationibus, sed identice inuenitur in illis; licet verum sit quod realitas, & subsistentia, & personalitas, quæ multiplicatur ipso *ad*, & ad eius formalem rationem spectat, formaliter quidem inueniatur in ipso conceptu *ad*, vt distincto, & explicito ab *in*, sed radicaliter oriatur ex ipso *in*: sicut in relationibus creatis oritur ex fundamento, sed in diuinis esse relationis non pendet à fundamento, sed ab identificatione cum essentia diuina; fundamentum autem solum requiritur ad exercitium relationis in respiciendo prout transit ad terminum.

32 Ex his explico sententiam Caietani in eo in quo subtilissime distinguitur à sententia Ferrar. Et dico quod relatio primo diuiditur inadæquatè in conceptum *in*, & in conceptum *ad*. Pro conceptu *in*, deseruiunt quæcumque ad perfectionem, ad essentiam, diuinitatem, esse, & identificationem cum attributis pertinent, & quidquid non multiplicatur in relationibus, & lineam absolutorum inuoluit. Pro conceptu *ad*, vt distincto, & explicito ab isto conceptu *in* (licet in illo radicato, & fundato) pertinent quæcumque multiplicantur in relationibus, & ex parte oppositionis se tenent, sicut est subsistentia, quæ ad incommunicabilitatem, & oppositionem realem in ratione termini substantialis spectat, sicut est realitas respicientiæ ad terminum, distinctio, oppositioque realis, &c. In hoc ergo conceptu *ad*, sic distincto à conceptu *in*, cum multa includantur, quæ oppositionem, distinctionemque patiuntur, non repugnat iterum diuidere inadæquatos conceptus, & concipere ipsum *ad*, vt exer-

cet munus subsistentiæ, non quomodocumque, sed incommunicabiliter, & cum oppositione, & distinctione ab alio termino personali, & similiter concipere ipsum *ad*, vt exercet munus respicientiæ secundum attingentiam termini correlatiui, quæ est ipsa explicatissima ratio *ad*, seu relationis, vt relatio est, quæ quidem realis est, & tamen in correlatiuo nihil realitatis ponit, sed purè respicit, in se tamen realis respicientia est. Cum ergo omnes istæ considerationes locum habeant in *ad*, vt *ad*, non repugnat considerare illud secundum vnam, & non secundum aliam, scilicet considerare illud vt subsistens, & non vt respiciens, seu attingens terminum: nam vt subsistens etiam includit terminum, sed eo modo quo exigitur ad subsistendum incommunicabiliter, non eo modo quo exigitur ad purè respiciendum: ad subsistendum enim incommunicabiliter requiritur relatio, quæ quidem non sit accidens, & hoc habet ex eo quod est diuina radicaliter, seu quia identificatur cum diuino esse, & rursum quod in se habeat incommunicabilitatem cum vltiori termino. Et hoc habet ex eo quod appositum est ad suum terminum correlatiuum: sed tamen ista oppositio, & impossibilitas, seu incommunicabilitas cum termino correlatiuo, non solum inuenitur in ipsa explicatione respectus, & attingentiæ ad terminum, sed etiam in ipsa realitate, & entitate ipsius *ad*, vt entitas, & realitas est in se, & vt ex parte subiecti se tenet, inuenitur impossibilitas cum tali termino. Vnde etiam antequam exerceatur, & consideretur ipsa attingentia respicientiæ erga terminum suum, iam ipsum *ad* entitatiuè, & quoad realitatem consideratum impossibile, & incommunicabile est suo termino. Et sic inuoluit terminum in ipsa incommunicabilitate entitatis, non vt exercitè, & explicitè attactum per modum tendentiæ ad illum, sed vt entitati, & realitati ipsi relationis in ratione *ad*, impossibilem; & sic redditur illa entitas subsistens ex vi talis conceptus, incommunicabilis termino vltiori. Quare sicut relatio ex eo quod identificatur cum essentia trahit perfectionem, rationemque subsistendi, ita ex eo quod ordinatur ad terminum, trahit impossibilitatem, distinctionemque ab ipso: ordinari autem nondum est respiciendo attingere terminum, sed respiciendo in se esse.

33 Quia ergo forma præbens plures effectus formales, non repugnat sub vna consideratione, & formalitate præbere vnum, sub qua non præbet alterum, & secundum priorem supponi ad seipsam sub posteriore, sicut anima prius actuatur materiam, & constituit corpus in ratione organici, deinde viuificat, in ratione animæ; ideo etiam in relatione illa diuina, cuius realitas non solum identice est substantia, & diuina, sed etiam in formalitate ipsius *ad* est realis subsistentia distincta ab alia, licet esse subsistentiam habeat radicaliter ex eo quod diuina, & quod sit distincta, & incommunicabilis alteri, ex eo quod opposita, & ordinata; inueniemus hoc ipsum, quod prius intelligitur præbere effectum formalem subsistendi incommunicabiliter respectu aliarum subsistentiarum, deinde per modum tendentiæ, attingere terminum: & hoc exercitium tendentiæ non est idem quod ipsum esse incommunicabiliter oppositum, & subsistentem in sua entitate, & realitate, quia aliud est habere se ad terminum tendendo, aliud impossibilitatem cum termino in sua realitate habendo. Et illud secundum dicitur relatio vt exercita, seu relatio vt relatio: primum verò est relatio, vt in sua entitate incommunicabilis, & subsistens opposito modo ad terminum. Ad hoc autem vt ista relatio exerceatur per

per modum tendentiæ ad terminum requiritur fundamentum, quod est ipsa generatio: ideo enim tendit ad terminum, ut ad Filium, quia generat ipsum. Et similiter ista tendentia est simul cum suo termino correlatiuo, qui est Filius ut genitus. At verò secundum primam considerationem non requirit fundamentum, quia relationes in diuinis non habent suum esse, & suum subsistere ex fundamento, sed ex identificatione cum natura diuina: sed tamen hæc subsistentia orta ex identificatione cum natura diuina, habet rationem incommunicabilitatis ex ipsa realitate *ad*, ut opposita & impossibilis cum suo termino: ubi etiam inuoluitur & includitur terminus, non ut actus per modum tendentiæ, sed ut exclusus ab ipsa realitate *ad*, quia est illi impossibilis. Et hoc modo constituit personam Patris ut subsistentia paternitatis opposita, excludendo à se terminum filiationis, non tangendo illum. Et hoc bene nota, quia hinc pendet tota explicatio diuidendi hos conceptus in ipso *ad*, etiam ut condistincto ab *in*, quia conceptus *in* non excludit, neque opponit suo correlatiuo, sed est quid commune relationibus, inuoluitque esse absolutum. Ipsum verò dicit subsistentiam oppositam, & incommunicabilem termino. Et hoc duplici formalitate. Primò, ut res in se excludens, & impossibilis termino; & sic est in se incommunicabilis, & opposita Filio, & paternitas subsistens; & sic constituit personam Patris ad se, & in se. Secundò, ut tangit ipsum terminum respectu suo; & sic quasi egreditur à se, & tangit alterum. Et prout sic non constituit in se, sed exercetur extra se.

- 34 Ex quo manifestè constat non recidere hanc sententiam Caietani in sententiam Ferrariensis, sed longè ab ea differre, quia illa relatio ut concepta, & signata non pertinet ad conceptum *in* relationis, quatenus conceptus *in*, est conceptus absolutus, & communis, non multiplicabilis in relationibus: sed pertinet ad conceptum *ad*, non tamen sub omni formalitate ipsius *ad*, sed quatenus est realitas subsistens incommunicabiliter, quod pertinere dicitur ad conceptum *ad*, quia pertinet ad ea quæ multiplicantur in relationibus: nihil autem multiplicatur, nisi ex parte conceptus *ad*, seu ratione oppositionis: ipsum autem subsistens relatiuum multiplicatur etiam ut subsistens incommunicabile; & sic relatio ut subsistens ad ipsum *ad* pertinet.

Soluuntur argumenta.

- 35 Ex dictis solutæ manent rationes dubitandi à principio propositæ.

Ad primam dicimus paternitatem esse relationem fundatam in generatione, quantum ad exercitium ipsius respectus per modum tendentiæ, & attingentiæ sui termini, sic enim supponit generationem, & est simul cum termino genito, tum natura, tum cognitione: at verò paternitas sub conceptu realitatis subsistentis incommunicabiliter non indiget fundamento, sed identificatione cum natura diuina, à qua radicaliter habet quòd sit subsistens formaliter: ipsa autem realitas relationis etiam secundum ipsam realitatem *ad*, reddit hoc subsistere paternitatis incommunicabile, & pertinet hoc ad conceptum relationis, ut relatio est, & ut *ad*, ut explicatum est: & ibi nondum explicatur fundamentum, sed potius fundamentum consequitur, & oritur ex tali realitate relationis ut subsistentis, quia actus notionalis generationis ex ipsa persona, ut subsistente consequitur;

atque adeò ex ipsa relatione ut realiter incommunicabili.

Ad secundam rationem respondetur, quòd relationes Patris, & Filij sunt simul cognitione, & natura secundum exercitium respiciendi, & attingendi terminum: sub ratione autem subsistendi, & realitatis ipsius *ad*, ut incommunicabilis non sunt simul cognitione, quia non consideratur ibi terminus ut actus per tendentiam, sed ut exclusus à realitate ipsius *ad*, quatenus constituitur in se oppositus. Itaque semper innoluitur aliquo modo terminus in conceptu ipsius *ad*, sed non semper eodem modo, quia aliquando correlatiuè, aliquando exclusiuè: correlatiuè quando intelligitur ut tendens, & tangens terminum quasi ipso respectu deosculans, & tangens: Exclusiuè, quando intelligitur ut realitas incommunicabilis, & in se subsistens, & in realitate oppositionis constituta in se. Et hoc modo non est simul cum termino simultate quasi coexistentiæ, & attingentiæ, sed potius ut excludens illum, & impossibilis illi in sua constitutione, sicut homo etiam dum constituitur, excludit equum, licet non ut oppositus relatiuè.

Quòd si vrgeas: *Ad*, ut *ad* condistinctum ab *in*, 37 præcisè dicit ipsum respicere, & tendere ad terminum, quia relatio solum se habet erga subiectum, & erga terminum. Erga subiectum se habet per *in*: ergo illo remoto nihil restat de ipso *ad*, nisi respicere, & tendere ad terminum: ergo repugnat quòd in ipso respicere distinguamus aliquid quòd respicere non sit, sed subsistere, vel excludere terminum.

Resp. distinguendo antecedens; Conceptus ipsius *ad* ut *ad*, solum est respicere terminum, distinguo; cum oppositione, & incommunicabilitate ad illum, concedo; per solam rationem attingentiæ, & tendentiæ ad terminum; nego. Ex hoc autem quòd oppositionem habeat, & exclusionem termini, redditur illa realitas ipsius *ad* incommunicabilis, & impossibilis suo termino. Vnde si sit realitas subsistens, & intra conceptum ipsius *ad* multiplicans subsistentiam (licet subsistere radicaliter habeat ex eo quòd diuina) manifestum est, quòd potest ipsa realitas conceptus *ad*, quòd est respicere, concipi, non secundum exercitium istius respicientiæ in attingendo terminum, sed secundum realitatem illius *in*, excludendo terminum, & supponendo se illi, & subsistendo incommunicabiliter; & sic constituendo. Non remouetur autem ratio respectus per hoc quòd non attingere terminum ex parte termini, sed constitui in se, & ad se, cum exclusionem termini ad respiciendum terminatiuè ipsum, intelligatur.

Ad tertiam rationem dubitandi, Respondetur, quòd productio non prius terminatur ad personam productam, quam relata, si ly *relata* sumatur entitatiuè, & in esse conceptu, seu signato, quia entitas termini producti entitas relationis est, nec alia realitas producit, quam realitas relationis. Si autem ly *relata* sumatur exercitè, prout attingens suum correlatiuum, sic prius intelligitur terminari productionem ad relationem ut productam, quam ut exercitè respicientem, & tangentem suum principium. Et cum dicitur quòd ad relationem non datur per se motus, dicitur quòd ad relationem subsistentem per se datur motus, seu actus, & est notionalis processio: ad relationem autem non subsistentem, sed præcisè consequutam ex fundamento non datur per se motus. Et præterea ad relationem sub exercitio respiciendi non datur per se motus, quia sic consequitur suum fundamentum, quòd est generatio, benè tamen ad realitatem illam relationis

lationis ut conceptam, & in se, & ad se constituentem potest dari per se motus in relationibus diuinis, quæ subsistunt.

38 Secundò obijciens: Impossibile est concipere formam aliquam constituere aliquid, & non tribuere illi suum effectum formalem, sed effectus formalis rationis est tendere ad aliud in exercitio: ergo impossibile est quòd intelligatur relatio ut forma constituens personam, etiam ut signata, siue per modum quidditatis, siue per modum subsistentis, & non intelligatur tribuere illi effectum illum formalem respiciendi in exercitio. Minor prob. quia relatio non habet pro effectum simili posse respicere quasi in actu primo, sed ipsum actu respicere, quia eius definitio non traditur per posse respicere, sed per ipsum actuale respicere, id est, per hoc quod est ad aliud se habere, itaque exercitium relationis non est aliud quàm ipsemet effectus formalis relationis, quo res ipsa constituitur exercitè respiciens terminum præscindendo a rem ab isto exercitio, id quod remanet non est nisi absolutum: ergo frustra distinguit Caietanus relationem ut conceptam, & ut exercitam, cum hoc nihil aliud sit, quàm relatio, & effectus eius formalis, quem non possumus præscindere ab ipsa forma ut constituyente personam.

Confirmatur, quia relatio non habet quòd sit subsistens, nisi in quantum diuina, & identificata cum essentia, sed in quantum subsistens constituit personam: ergo in quantum diuina, seu identificata cum essentia constituit, & consequenter ratione perfectionis absolutæ sibi adiunctæ, & identificatæ, non ratione relationis secundum quod forma relatiua est, constituit.

Denique non est ratio cur relatio ut exercita indigeat fundamento, & non ut concepta, quia in creatis utroque modo indiget fundamento, siquidem utroque modo habet eandem essentiam, & formam relationis: ergo illa distinctio Caietani de relatione exercita, & ut concepta, nulla est.

Respond. quod forma dat effectum formalem subiecto quod afficit, & constituit iuxta modum ipsius subiecti, vel constituti, quia quando ex vna forma proueniunt plures effectus formales, bene stat quòd in aliquo signo, vel prioritate intelligatur afficere subiectum dando vnum effectum, & nondum considerando dare alium. Itaque forma existens in subiecto effectus suos formales præbet in re, sed non omnes pro omni prioritate, & intelligentia nostra, sicut gratia cum ponitur in subiecto omnes effectus suos formales præbet, sed pro aliqua prioritate intelligitur dare vnum effectum, pro qua non dat alium, sicut pro aliquo priori intelligitur constituere subiectum gratum, pro quo non intelligitur remissum peccatum, vel etiam pro quo intelligitur iustificare, & nondum intelligitur facere filium adoptiuum, quia hoc pertinet ad suppositum. Et anima rationalis intelligitur pro aliquo priori informare corpus in ratione vegetatiui, & non in ratione sensitiui, vel rationalis. Sic ergo relatio paternitatis secundum proprium, & formalem conceptum ipsius paternitatis, & ipsius *ad*, in re totum suum effectum formalem dat, sed pro aliquo priori intelligentiæ nostræ prius intelligitur dare effectum formalem subsistendi incommunicabiliter, quàm attingere suum terminum in exercitio, & per modum attingentiæ: licet in illo priori etiam attingat ipsum terminum excludendo illum à realitate ipsius *ad*, quæ, ut incommunicabilis, & opposita termino, constituitur, non autem exercitè terminando in illum. Et hoc præcipue contingit in formis relati-

uis, quia relatio non habet entitatem, & esse per terminum ad quem est, sed ad subiectum in quo est, vel in ordine ad se, si entitas subsistens sit. Non potest autem intelligi, quod prius tangat terminum illa entitas, quàm in se sit, quia quando attingit, aliqua entitate attingit: ergo prius debet intelli effectus ille formalis, ut ex parte subiecti se tenet, & ut subiectum afficit, vel ut in se subsistit, quàm ut attingit terminum extra se. Hoc ipso autem quòd illa entitas in se constituitur, & in se habet esse, debet illam entitatem habere ut oppositā, & impossibilem termino, quia si talis entitas sic non esset, non posset respicere terminum correlatiuè.

Et cum dicitur quòd effectus formalis relationis non est referre subiectum in potentia, & in actu primo.

Respondeo, in re ita esse, sed distingui per nostros conceptus ipsam relationem ut comparatam subiecto, vel ut attingentem terminum, ut est ipsum respicere actuale tanquam *quo*, vel ut actu tenditur, & attingitur terminus exercitè, & ut *quod*: sicut enim calor non calefacit, exercitè, ut *quod*, sed ut *quo*, ita nec relatio respicit ut *quod*, sed ut *quo*. Et ut *quo* consideratur ut in se constituitur; ut *quod*, ut exercetur. Vtroque autem modo est ipsum respicere actu, non in potentia. Et primo modo considerata relatio actualis ut *quo*, vel per ordinem ad subiectum, tam intelligitur constitui ut opposita, & incommunicabilis suo termino: & si entitas ipsius *ad* sit subsistens, redditur pro ut sic incommunicabilis in ipsa realitate subsistendi, & ut excludens terminum, licet non ut attingens, & consequenter ut sic, est constitutiva personæ. Et quia iste effectus formalis ipsius *ad* non explicatur in attingentia ad terminum, sed in ipsa entitate relationis, & *ad*, ut in se incommunicabilis, & opposita constituitur, dicitur iste effectus non esse ipsius relationis ut exercitæ, sed ut signatæ in sua entitate, & quidditate, & relationis ut *quo*, & secundum se. At verò secundo modo intelligitur ipsa relatio, & ipsum *ad* dare effectum formalem respiciendi in exercitio, & in actu secundo, ipsum terminum attingendo, & tendendo in illum, non solum constituendo ipsam entitatem *ad*, ut impossibilem, & oppositam termino in se, & constitutiue, & ut *quo*.

Quòd si instes: Nam prius est in ipso *ad* respicere terminum, quàm reddere entitatem ipsam incommunicabilem, & oppositam: hoc enim sequitur ad ipsum respicere. Et hoc exercitium respiciendi est actualissimum, quod in relatione inuenitur: ergo per illud debet formalissimè constitui persona, quia constitutum personæ debet esse formalissimum, & actualissimum in relatione.

Respond. negando anteced. nam in ipsa respicientia, seu in ipso *ad*, & actuali respicere non solum inuenitur attingentia termini, sed etiam ipsius entitatis *ad* oppositio, & incommunicabilitas, ut in se, & prius est atque intimius id quod ex parte entitatis se tenet, quàm id quod ex parte termini *ad quem*, quia terminus *ad quem* quasi ad extra se habet; & sic prius est constitui in ipsa entitate relatiua secundum se & ut opposita termino, quàm actualiter rãgere ipsum terminum. Et sic per suam entitatem redditur subsistens incommunicabiliter, quod est constitui personam, & deinde attingitur terminus exercitè, & ipse respectus consideratur ut tenens se ex parte termini, & non solum

ut

ut in sua entitate subsistens. Et cum dicitur quod actualissimum in relatione est ipsum attingere terminum in exercitio, distinguo, est actualissimum terminatiue, & sub formalitate terminandi relationem, transeat: est actualissimum entitatiue, & in ratione incommunicabilitatis, & oppositionis, ut constituitur in se, nego. Hoc autem conducit ad subsistentiam, & personalitatem in entitate relatiua, & per hoc formaliter redditur constituta persona, nec enim ad constituendum aliquid debet accipi quod actualissimum est in quacunque consideratione, sed quod actualissimum est in illa formalitate, & linea in qua consideratur constituere, & prout ad illam conducit. Et sic exercitium respiciendi actualissimum, & explicatissimum est in relatione, sed oportet quod hoc actualissimum consideretur constitutiue in ordine ad se; & sic constituit personam, vel terminatiue, ut tangit terminum; & sic exercetur ad extra se, & non constituit.

Quod si dicas: Nam opponi in relatione nascitur ex respicere: est enim illa oppositio huius relatiui ad illud correlatiuum: ergo ex eo relatio opponitur, quia respicit. Prius ergo est respicere terminum, quam opponi termino.

Respond. quod opponi in exercitio nascitur ex respicere in exercitio: opponi autem entitatiue, & secundum se presupponitur ad exercitium respiciendi, quia illa entitas respicit terminum, quæ in se entitatiue est impossibilis termino. Ex hoc autem redditur subsistens incommunicabiliter, quia entitatiue in se illi termino impossibilis, & incommunicabilis est, quia subsistere non penes exercitium ad extra, sed penes entitatem in se accipitur ut præcisè excludit terminum à se; & sic constituitur in se ut opposita, non ut tangit illum extra se; & sic exercetur ad illum.

Ad confirm. distinguo anteced. Est subsistens ut diuina, radicaliter, concedo, formaliter, nego; sed formaliter est subsistens, quia relatio est infinita, & purificata à potentialitate, & sic repugnat illi esse accidens, quod sine potentialitate non est: sed tamen hoc ipsum quod est purificari ab omni potentialitate, & substantiam esse, habet radicaliter ab essentia diuina, & quia identificata est cum illa: sicut omnia alia attributa ex eo quod entitas diuina sunt, & actus purus, substantia sunt, & non accidens; & si non constituit paternitas personam diuinam secundum rationem absolutam & communem multis, quæ est ratio in, sed secundum propriam & specialem sui ad, secundum quam in suo proprio conceptu habet esse subsistentia relatiua, siquidem ratio substantiæ multiplicatur in relatiuis, quod esse non posset, nisi substantia pertineret ad conceptum formalem relationis secundum ipsum conceptum ad, quia solum secundum hoc multiplicari potest.

40 Ad id quod dicitur de relatione concepta, quare non indigeat fundamento, sicut exercita, cum in relationibus creatis utroque modo indigeat illo.

Respond. quod relatio creata etiam entitatiue considerata est accidens, & indiget subiecto ad existendum, & fundamento ad resultandum, quia non potest habere esse primò, & per se productum, cum ad relationem non sit per se motus, sed solum resultans, & ita indiget fundamento, ad quod consequatur. Relatio autem diuina est ex se subsistens; unde non indiget fundamento ut oriatur, & resultet in esse, sed per

seipsam hoc habet; & sic per seipsam potest constituere personam antecederet ad generationem, quæ est fundamentum relationis: sed hoc fundamentum solum requiritur ut respectus exerceatur ad suum terminum, & hoc modo generatio antecedit relationem secundum quod exercitè se habet ad terminum attingendo illum.

Ex dictis soluantur alia minutiora argumenta, quæ contra istam distinctionem Caietani de relatione ut signata seu concepta, & exercita opponuntur, quia non penetrant aliqui vim huius distinctionis, sed superficialiter illam intelligunt: argumentantur enim, quia propria, & essentialis ratio relationis, & vltima eius differentia est esse ad aliud, & per hanc distinguitur ab aliis relationibus, & opponitur suo correlatiuo, ex quo principio multæ educuntur consequentiæ.

Primà, quod relatio quam dicimus conceptam cum præscindat à termino, non dicit specificam rationem relationis.

Secunda, quod Paternitas ut ad aliud exercitè supponit actum notionalem generandi: ergo quando concipitur ut antecedens actum notionalem, non concipitur ut in actu exercito ad aliud: ergo non concipitur secundum essentiam relationis, quæ essentialiter est ad aliud.

Tertia, quia sequitur quod relatio ut concepta, & signata nondum concipiatur incommunicabilis, neque ut distincta à suo correlatiuo: ergo neque ut constituens personam. Patet consequentia, quia persona constituitur per subsistentiam, ut incommunicabilem: ergo in conceptu ubi non relucet incommunicabilitas, non relucet conceptus constitutiuus personæ. Anteced. autem patet, quia tota incommunicabilitas conuenit relationi per oppositionem: ubi enim non est oppositio, omnia sunt vnum: Oppositio autem non conuenit relationi ut conceptæ, sed ut exercitæ, quia ut concepta consideratur per modum absoluti, & ad se: oppositio autem est prout respicit aliud quod pertinet ad rationem exerciti.

Quarta, quia sequitur quod prius sit relatio ut exercita, quam ut signata, & concepta, & consequenter si constituit personam, in quantum concepta, non constituit ante exercitium relationis, sed post. Anteced. probatur, quia prius intelligitur quælibet forma constituta in se, quam ut afficiens subiectum: Esse autem ad aliud exercitè, & attingere ipsum terminum pertinet ad rationem propriam relationis: ergo prius intelligitur in relatione, quam afficere subiectum. Relatio autem ut exercita est relatio ut attingens terminum: relatio autem ut concepta est ut subsistens, seu ut afficiens subiectum, ergo prout sic est posterior.

Omnes istæ consequentiæ ex dictis manent solutæ. Nos enim non negamus quod pertinet ad propriam, & essentialem rationem relationis tendere ad aliud, & respicere terminum tanquam quo, id est, tanquam forma, qua aliud redditur respiciens terminum: sed in exercendo istum respectum per modum tendentiæ ad talem terminum, dicimus prius esse quod entitas relatiua in sua entitate constituatur cum exclusionem, & impossibilitate intrinseca cum suo termino, deinde verò quod actualiter tendat ad terminum.

Cuius

Cuius ratio est, quia actualis tendentia, & exercitium sic dicit ordinem ad terminum, quod non potest stare in re, nisi in aliquo tendente, & respiciente ut *quod*: Paternitas enim considerata ut *quo*, non respicit exercitè, sed est ratio respiciendi, sicut calor non calefacit in exercitio, sed est id quo calidum calefacit: respiciens autem, seu exercens ipsum respicere est Pater, seu subiectum paternitatis: quare relatio ipsa secundum exercitium respiciendi præsupponit seipsam inhærentem, & afficientem subiectum, vel in se subsistentem si subsistens sit, ut hoc modo possit exerceri respectus ut *quod* erga terminum.

43 Prima ergo consequentia soluitur dicendo quod ratio specifica relationis est habere se ad aliud, distinguo; habere se ad aliud, ut *quo*, & tanquam entitas informans in respiciendo, concedo: ut *quod*, & exercitè attingendo terminum, nego. Vnde ulterius sequitur, quod relatio in aliqua prioritate afficit subiectum, vel in se redditur subsistens, si subiectum non habet, quàm attingat terminum ut *quod*, & in exercitio, quia hoc exercitium dependet ex esse quod habet in subiecto. Et tertio sequitur quod entitas relatiua ut afficiens subiectum, vel subsistens in se iam est entitas impossibilis cum suo termino, & distincta ab illo entitatiuè, licet nondum exerceat respectum, & oppositionem ut *quod* in attingendo terminum, quia iam entitas illa est vera entitas relatiua, quæ exercere petit illum respectum: ergo iam est entitas impossibilis termino. Et hoc est distinguere relationem ut conceptam, & ut exercitam, ut informantem subiectum, vel ut attingentem terminum, non quod relatio ut concepta præscindat à termino ut *quo*, sed præscindat ab attingentia, & exercitio attingendi terminum ut *quod*, & rursus in entitate sua, ut informat subiectum, etiam habet terminum ut exclusum à se, & impossibilem sibi, non ut attractum per tendentiam ad terminum exercitè, & ut *quod*; & sic esse relationis est actu respicere, & non in potentia, id est, respicere ut *quo*, non ut *quod*. Et quando consideratur ut *quo*, nondum respicit exercitè, sed constituitur ut exerceat.

44 Secunda consequentia soluitur dicendo, quod Paternitas, ut relatio supponit generationem, si ly *ut relatio*, dicat exercitium respiciendi, ut *quod*, & attingendi terminum: Si autem ly *ut relatio*, dicat entitatem relationis, ut subsistentem in se, & informantem subiectum in esse reali, sic non supponit generationem, sed præcedit, quia cum subsistens sit, non supponit fundamentum ad existendum, sed respiciendum.

45 Ad tertiam consequentiam, dicitur quod tota incommunicabilitas, & oppositio inuenitur entitatiuè in relatione ut concepta, & ex parte subiecti se tenente; incommunicabilitas autem, & oppositio, ut exercita, & per modum tendentiæ ut *quod* ad terminum inuenitur in relatione ut exercita. Nam etiam ipsa entitas relatiua, ut entitatiuè concepta, & ex parte subiecti opposita est, & impossibilis cum termino entitatiuè, & ut *quo*, & sic informat subiectum vel subsistit ut opposita entitatiuè suo termino, vnde negamus quod relatio ut concepta se habeat per modum absoluti entitatiuè, quia verè entitas relatiua est, licet nondum intelligatur ut exercitè tendens per modum *quod* ad suum terminum; & quantum ad hoc ad instar absoluti se habet.

46 Ad quartam neg. antec. Et ad probationem dicitur, verum esse quod prius est formam constitui, quàm afficere subiectum: sed negamus

quod constitutio formæ relatiuæ sit per ipsum respicere exercitè terminum per modum attingentis & respicientis illum, ut *quod*, sed eius constitutio est esse formam respicientem, ut *quo*. Et tunc iam excludit in se, & impossibilis est termino, licet nondum illum exercitè attingat. Vnde sequitur quod prius debeat afficere subiectum, vel si non habet subiectum subsistere in se, quàm exercere respectum per modum *quod* ad terminum: sicut albedo prius est segregatiua visus ut *quo*, quàm afficiat subiectum, sed non prius segregat exercitè, & ut *quod*, & deinde afficit subiectum, sed è contra.

Postremo in hac difficultate aduertendum est, 47 quod cum dicimus personas constitui per relationes, tanquam per formas, hoc nihil obstat simplicitati diuinæ, quasi ipsum constitutum sit compositum, aut minus simplex, siquidem resoluitur in extrema constituentia, ut in aliquid simplicius: Ex alia autem parte relatio includit in se essentiam cum respectu, hoc autem, & nihil amplius dicit persona, scilicet naturam cum respectu: ergo idem formaliter important constituens, & constitutum.

Sed Resp. facile ad priorem partem, quod non distinguimus constituens, & constitutum ex parte rei significatæ, quasi vnum sit ut pars, aliud ut totum, sed ex parte modi significandi quatenus vnum explicatur per modum formæ, aliud per modum totius, seu concreti, licet ex parte ipsius rei tantum includat vnum quod alterum, sed non eodem modo, quia diuerso modo explicatur vnum atque aliud; sicut diuersa attributa explicant diuersas rationes in Deo, & non totam eminentiam perfectionis eius, licet eadem res includatur in vna atque in altera. Et ad posteriorem partem dicitur quod relatio significat essentiam, & respectum identicè, formaliter autem solum respectum, quia hic est formaliter significatus nomine relationis. Persona autem significat formaliter, & non solum identicè naturam, quia significat primam substantiam, seu indiuiduum naturæ rationalis, & ex ipsa natura, & termino subsistentiæ eius intelligitur resultare.

Denique, licet origo videatur significare actum 48 secundum relationis, & sic habeat se ut actualissimum, seu actualitas secunda in genere notionali, quod videtur esse aptius ad constituendam personam sicut intelligere, quod est actus secundus, constituit naturam intellectualem in actu puro: tamen origo significatur ut mera productio, & via ad terminum: intelligere verò non significatur ut productio, sed ut actus immanens vltimus in actualitate intelligibili, ideòque est aptum ad constituendum naturam in vltima actualitate purificatam, origo verò non constituit personam, quæ solum in facto esse, & per modum per se stantis designatur, non per modum viæ.

* * *

ARTICVLVS II.

Quomodo ratio voluntarij inueniatur in actibus notionalibus.

Resolutio D. Thomæ in hac qu. 41. art. 2. est quod actus notionales, seu ad intra possunt esse voluntarij voluntate concomitante ipsos, non tamen voluntate vt principio illorum: quod etiam verificari docet in processione Spiritus S. quia licet Spiritus S. procedat per voluntatem, non tamen vt voluntariè liberè, sed vt voluntariè necessariò, seu naturaliter vult, siquidem omnes actus notionales necessarij sunt, cum per illos procedant personæ quæ necessariò existunt in Deo, & non existunt nisi procedendo. Sensus ergo D. Thomæ est quod actus notionales possunt esse obiectum volitum à Deo ea voluntate qua seipsum, & omnia quæ intra se sunt diligit: sic enim personæ ipsæ dilectæ sunt à Deo, & consequenter processionem seu origines. Et cum circa omnem processionem inueniatur ista voluntas, quia quælibet processio complacet Deo, & est obiectum diligibile, consequenter ponenda est voluntas concomitans in actibus notionalibus, id est complacentia circa illos, tanquam circa obiecta diligibilia, quia perfectiones sunt, & realitates intra Deum: non tamen possunt actus notionales esse à voluntate libera tanquam à principio, in hoc sensu quod procedant ex motione, & imperio voluntatis, vel per liberam elicientiam eius: hoc enim est procedere à voluntate vt distinguitur contra procedere naturaliter, seu per naturam.

Ex quo sequitur quod actus voluntatis, seu amoris, quo procedit Spiritus S. non potest esse voluntarius obiectiue respectu alterius actus, qui in nostra consideratione sit prior, sed solum potest esse obiectum volitum respectu sui.

2 Ratio est, quia processio Spiritus S. est primus actus voluntatis, cum sit actus necessarius, & naturalissimus, & consequenter primus in voluntate: actus autem notionalis quo generatur Filius à Patre potest esse obiectum volitum ab alio actu distincto à se, scilicet ab actu voluntatis concomitante, vel subsequente, quia cum generatio sit actus intellectus, iam ex hoc habet esse distinctus actus ab actu voluntatis quo est volitus. Et sic distincto actu à se potest esse volitus tanquam obiectum.

3 Duo tamen possunt breuiter controuerti.

Primum est, an voluntas ista concomitans qua complacet generatio Filij, aliquo modo præcesserit ipsum actum notionalem generationis, ita quod Pater prius voluerit generare, seu complacuerit sibi generatio, quam generet in exercitio: vel saltem si Patri non conueniat notionaliter velle generationem antequam notionaliter intelligat, quod est ipsum generare; saltem huic Deo, in quantum communis est tribus personis, conueniat voluntas generandi, & complacentia de ipsa generatione antequam Pater intelligatur generare Filium.

Ratio dubitandi est, quia ex vna parte videtur, quod voluntas, & complacentia generationis debeat procedere: tum quia hæc voluntas est essentialis amor: est enim communis tribus personis: ergo præcedit actus notionales, quia essentialia, & absoluta nostro modo intelligendi præcedunt notionalia: ille autem amor essentialis pro illa prioritate consideratus complectitur pro obiecto totum quod in Deo est, etiam personas: quia amor essen-

Ioan. à S. Thom. in 1. part. D. Th. Tomus alter.

tialis in Deo regulatur per cognitionem essentialem; cognitio autem essentialis etiam pro illo signo ante actus notionales cognoscit non solum essentialiam, sed etiam personas, quia est cognitio comprehensiva Dei, & beata, quæ essentialiter petit cognitionem personarum: ergo & amor essentialis, qui necessariò consequitur ad talem cognitionem pro illo signo fertur in omnes personas, & processionem earum, quia totum hoc pertinet ad intra ad Deum: Nec requiritur ad amorem personarum quod supponat illas productas in re, sed sufficit quod præsupponat illas obiectiue cognititas, & pro alio posteriori productas: Tum etiam quia Pater æternus generando Verbum communicat illi voluntatem, & omnia quæ ad voluntatem pertinent, scilicet ipsum actum amoris, & attributa voluntatis, quæ sunt virtutes, vt iustitia, misericordia, &c. ergo prius intelligitur habere actum voluntatis quam generare Filium, siquidem per generationem ipsum amorem ei communicat, id est voluntatem in actu secundo. Iste autem amor circa aliqua obiecta versatur, & non circa solam essentialiam, sed etiam circa personas quæ entitatiue sunt indentificatæ ipsi essentiali.

Ex alia parte videtur non posse vlllo modo præcedere voluntatem istam actum notionalem generandi, quia voluntas non potest antecedere cognitionem, sed cognitio voluntatem: sed hoc ipso quod intelligitur cognitio in Deo, præsertim in Patre, seu in prima persona, statim intelligitur expressio, seu generatio verbi, quia est ipsemet actus intelligendi, pro vt in Patre: & posito actu intellectus cum plena, & infinita cognitione in Patre antecedenter ad omnem actum voluntatis, qui consequitur ad intellectionem, non stat quin ponatur ipsa processio verbi: ergo in Patre non antecedit voluntas generandi ipsam generationem, sed generatio ita præcedit voluntatem, sicut cognitio, quia generatio cognitio est. Aliæ autem personæ non habent voluntatem generandi, quia ipsæ non possunt generare: ergo neque volunt.

Confirm. quia voluntatis actus in Deo non est prior origine, quam Filius, vel quam generatio Filij: ergo non potest etiam nostro modo intelligendi illum præcedere. Consequentia constat, quia non præcedit originem vel personam, nisi id quod est prius origine in diuinis, quod autem prius origine non est, non conducit ad illud, nec fundare potest præcedentiam. Antecedens verò probatur, quia Deus non potest voluntate sua tendere in Filium, & Spiritum Sanctum, vt possibile, vel futuros, sed solum vt determinatè existentes: ergo non potest voluntas habere prioritatem originis erga ipsos, sed solum vt præsentem, & coexistentem respicere potest, quod est concomitanter se habere, vel subsequenter ad tales actus, non antecedenter, & sub aliqua prioritate.

Circa hoc punctum valde diuisi sunt Theologi, vt videri potest apud M. Bannez hic quæst. 41. artic. 2. dubio 1. Suarez lib. 6. de Trinit. cap. 3. & 4. Vasqu. disp. 160. cap. 3. & 4. Nauarrete hic controuers. 34. Ruiz disp. 93. sect. 1. & 2. Summa sententiarum est, quod aliqui sentiunt Patrem in illo priori originis sicut habet scientiam, & intelligentiam perfectam sui, & omnium personarum, ita & amorem, & consequenter velle earum processionem: ita quod attingat ipsas personas procedentes, etsi non vt iam productas actu; tamen quasi producendas, seu quasi futuras. Qui actus amoris inuenitur in ipso Patre in illa prioritate originis, antequam intelligatur generare Filium: & à fortiori

B b

inuenitur

inuenitur in hoc Deo absoluto ut communi toti Trinitati. Quam sententiam tenet Caietanus in hac *questione 41. art. 2. & ibi citat Scotum in 1. dist. 6. quest. 1.* Et eandem sententiam sequitur Nazarius *ibi, & alij.* Et quando D. Thomas dicit voluntate concomitantis solum illos actus notionales esse voluntarios, non autem voluntate antecedenti, seu ut principio, intelligit Caietanus voluntatem comitantem esse illam, quæ respicit actus notionales, ut obiecta volita, etiam si inueniatur in illo priori originis, quo Pater generat. Voluntatem autem præcedentem, seu per modum principij intelligit voluntatem ut causam; quo etiam sensu loquitur *qu. 10. de potentia art. 3.* Qua etiam ratione multi Patres negant Filij generationem esse ex voluntate, aut quia voluit Pater, sicut Sanctus Cyrillus *lib. 1. Thesauri cap. 8.* Non ideo, inquit, Pater generat, quia vult generare. Et concilium Toletanum II. in confessione fidei, *Voluntas, inquit, sapientiam genitam non præuenit.* Et Hilarius in *lib. De synodis, Omnibus, inquit, creaturis substantiam Dei voluntas attulit, sed naturam dedit Filio ex impassibili, & non data substantiâ perfecta natiuitas.* Hi enim Patres contra Arianos dicentes Filium voluntate Patris fuisse productum, ut inde creaturam esse colligerent, si ex voluntate tanquam ex causa procederet, negant generationem Filij ex voluntate emanare, non tamen negant voluntatis diuinæ obiectum fuisse id quod generatione naturali ortum est.

6 Alia sententia tenet, nullo modo præcedere voluntatem generandi Filium ipsam generationem, neque origine, neque natura, sed postquam genitus est Filius complacere, & gaudere de illa, sed hunc amorem esse communem toti Trinitati. Ita Suarez, Vasquez, Nauarrete *suprà* relati, & alij qui ipsos sequuntur. Et videtur etiam conuenire Ruiz *ubi supra*, probans quod ante generationem Verbi, non potest præcedere actus voluntatis ex parte principij productiui, sed tamen *sectione 2. numero 14.* concedit ex eo quod Filius procedit ex cognitione omnium attributorum Dei rectè colligi præcedere prioritate quadam originis voluntatem generandi, ut principium per se generationis, quia tale attributum est commune totius Trinitatis. Hoc autem valde impugnat Alarcon *tract. 5. de Trinit. disp. 6. c. 8. a. num. 3.* quia in Deo non potest voluntas generandi per modum desiderij esse, & tanquam de re futura: desiderium enim imperfectiorem importat, cum sit de re absenti: solum ergo est in Deo voluntas de generatione per modum rei præsentis: & iam habitæ, de qua est amor per modum gaudij: talis autem voluntas de generatione ut habitæ, non potest esse principium ipsius, ut procedat, & habeatur.

7 Caterum quia in fauorem sententiæ Caietani semper vrget illa ratio, quod in illo priori originis, quo intelligitur Pater fecundus ad generandum, sed nondum productus Filius, intelligitur plenè intelligens se, & personas, cur ergo non poterit intelligi etiam volens, cum intelligatur etiam pro tunc habere voluntatem, & non otiosam, nec in actu primo, vel in potentia, sed in actu secundo, cum amore essentiali: & ille amor habet pro obiecto se, & personas; ideo tandem reducit P. Alarcon *ubi supra* suam sententiam ad duo puncta, scilicet quod solum neget non dari amorem in Deo pro illo priori tanquam desiderium de re absenti, & futura, quia tale desiderium non potest poni per solam diuersam prioritatem originis, vel naturæ, sed solum per ordinem ad prioritatem vel posterioritatem durationis, & realis absentiæ, quod omnino Deo repugnat. Vnde infertur quod amor Dei circa

notionales actus debet supponere illos, & subsequi ad illos. Et secundo intendit Vasquez quod etiam si daretur tale desiderium in prima persona respectu generationis futuræ, adhuc non præcederet prioritate originis, & naturæ realis ipsam generationem quia nec distinguitur ab illa, nec per se in quarto modo ad illam requiritur ex parte principij. Et in hoc etiam aliqui multam vim faciunt, quod non debeat præcedere amor de his notionalibus prioritate originis ipsa notionalia, quia inter essentiam, & actus notionales non est prioritas, originis, sed solum est identitas, & simultas. Quod verò præcedat amor generationis ipsum actum notionalem eo modo quo essentia, & attributa dicuntur præcedere notionalia, non abnuat concedere Caietano P. Alarcon *ubi supra n. 11.*

8 Non est tamen, quod multum immoremur in hac questione. Nam neque Caietanus intendit ponere in Deo verum, & formale desiderium respectu generationis in Patre, aut futuritatem aliquam vel absentiam in Filio (quis hoc diceret nisi Arrium sapiens) neque prioritatem aliquam originis inter essentialia, & notionalia conatur introducere, sed summam identitatem & simultatem: sed cum hoc stat quod in illa prioritate originis in qua Pater intelligitur habens essentiam fecundam ad generandum, intelligatur quoque habere plenum, & perfectum intelligere suæ essentiæ, & personarum, & similiter essentialem amorem, seu velle, non solum circa essentiam, sed etiam circa personas, & processiones: & hic amor non intelligitur prior generatione diuina secundum aliquam prioritatem originis, sed secundum prioritatem, seu distinctionem rationis, eo modo quo dicimus essentialia esse priora in Deo notionalibus, quia illa communia sunt, hæc propria, & prius sunt communia quam propria. Non tamen inter ipsa essentialia, & hæc notionalia, est ordo aliquis, & prioritas originis, sed identitas, & simultas. Et in hoc sensu dixit D. Th. esse concomitantem actum volendi generationem cum ipsa generatione, quia ea quæ essentialia, & absoluta sunt, identificantur, & communicantur notionalibus; & cum communicatur amor essentialis, non communicatur amor non habens obiectum, sed illud attingens, & hoc non sola essentia, sed etiam personæ, & processiones: omnia enim quæ intra Deum sunt, amore essentiali, & necessario amantur. Vnde non est iste amor posterior actibus notionalibus, nec habent actus notionales aliquam prioritatem originis respectu amoris essentialis, cum essentialia non procedant ab ipsis, imò nec per modum obiecti formalis præcedunt, quia obiectum formale illius amoris est ipsa bonitas diuina, & essentia, personæ autem tanquam aliquid identificatum illi, quæ habent eandem bonitatem identicè, & concomitanter. Necesse est autem ponere hunc amorem essentialem, etiam circa personas, & processiones earum in illo priori antequam intelligatur generatio procedere, quia sicut præcedit pro illo priori intelligere essentialia in Patre, quia ex intelligentia sua producit Verbum, ita & velle, seu amor qui immediatè sequitur ad intelligere: nec enim iste amor essentialis conuenit Deo post notionalia, vel dependenter ab actibus notionalibus, sed cum ipsa essentia, & voluntate semper intelligitur amor in actu, quia voluntas non est in actu primo, sed in actu secundo essentiali: & sic communicatur à Patre ipsi Filio: ergo non est posterior actibus notionalibus, sed antecedit. Quod si antecedit actus: ergo etiam attingentia eius erga obiectum, quia amor sine obiecto non est, & amor perfectissimus, ut est ille, & infinitus, non habet pro illo

illo signo vnum obiectum, & postea addit aliud, sed pro illo signo totum obiectum suum attinget. Inter obiecta autem, vnum est ipsa personae, & processiones earum: ergo amantur à Deo, etiam antequam produci intelligantur.

9 Vnde soluitur ratio dubitandi pro opposita parte: dicimus enim quod amor sequitur cognitionem, sed amor essentialis cognitionem essentialem; & pro eo signo quo intelligitur cognitio essentialis in Deo, siue in hoc Deo absolute sumpto, siue in Patre, hoc ipso datur velle, seu amor essentialis, etiam nondum intellecta processione notionali. Et cum dicitur, quod hoc ipso quod datur cognitio in Deo, datur generatio, seu expressio Verbi. Respon. quod hoc ipso quod datur in Deo cum fecunditate, & relatione Patris, datur expressio Verbi: non hoc ipso quod intelligitur in Deo quoad essentialia praecise; sed pro illo signo intelligitur cognitio essentialis, & amor essentialis: & nondum intelligitur expressio, seu notionalis processio, quia essentialia sunt priora pro aliquo signo, notionalibus. Et tunc licet in Deo intelligatur amor, seu volitio generationis, non tamen hic Deus vult illam, ut in se, absolute, sed ut in Patre, sicut nec Filius & Spiritus S. vult eam sibi: id enim est impossibile, sed volunt illam Patri.

Ad Confir. patet ex dictis quod actus amoris non habet praecedentiam, aut prioritatem originis respectu generationis Filij, sicut nec respectu Patris, habet tamen prioritatem intelligentiae, sicut omnia essentialia, & absoluta praecedunt notionalia, & relatiua, & sic amor essentialis nostro modo intelligendi praecedit generationem Filij, quam amat. Et cum dicitur quod ille actus non redit in Filium, & Spiritum S. ut futuros, vel possibiles, nec per modum desiderij. Respon. ibi non dari desiderium formaliter, & cum imperfectione futuritionis vel absentiae obiecti: haec enim pertinent ad prioritates durationis, & existentiae, in quo nullam habet antecedentiam ille actus, sed summam simultatem, & identitatem, sed solum inuenitur ibi prioritas, seu distinctio rationis. Nec Caiet. posuit ibi actum desiderij, licet explicauerit exemplo desiderij in nobis, quod potest voluntas antecedens obiectum prioritate rationis, dici ex parte nostra concomitans. Caterum in Deo formale desiderium non datur, sed ille actus in se est gaudij, & delectationis de processione, quia ad hoc sufficit quod in re processio existens, & praesens sit, & nulum sit instans in re, quo non attingatur illud obiectum ut praesens; sed tamen non oportet quod pro omni signo prioritatis, & praecisionis intelligatur ille actus sub formalitate, & denominatione gaudij de re illa considerata, ut iam producta, licet in se gaudium sit, sed in illa praecisione, & signo consideratur illud quod est gaudium de re praesenti sub formalitate, & denominatione amoris, non gaudij; sed nec etiam est ille actus, prout sic desiderij, quia licet non explicetur circa praesens, ut praesens, non tamen explicatur circa futurum ut futurum, quod requiritur ad rationem desiderij, quia ibi futuritio non est, sed praescindit prout ibi à futuro, vel praesenti, & solum attingit bonitatem, ut in se, quod amoris est. Vide, quae diximus supra circa q. 10. disp. 7. agendo de actu amoris diuini.

10 Secundò dubitari potest, an processio Spiritus S. possit dici libera, vel solum procedat à voluntate, ut natura? Sed in hac parte controuersia, quae est cum Scotus, solum potest esse de modo loquendi: nam in re nullus dicere potest, quod illa processio sit libera in hoc sensu quod possit esse contingens, & non dari talem processionem. Et quidem Scotus

Ioan. à S. Thom. in 1. part. D. Th. Tomus alter.

in 1. dist. 10. qu. 1. & quodlib. 16. art. 2. cum vult processionem Spiritus S. esse liberam, non sumit liberum ut opponitur necessario, quin potius fatetur processionem illam esse necessariam: cum enim Spiritus S. verè sit Deus, & hoc communicetur illi per suam processionem, non potest esse liberè productus, prout liberum opponitur necessario, sed est ens necessarium, quia est Deus. Solum ergo sumit Scotus liberum prout opponitur coacto, vel prout opponitur naturali inanimato: constat enim illam processionem esse à voluntate, non solum non violenta, vel coacta, sed toto impetu, & pondere voluntatis: sed tamen est à voluntate, ut naturaliter, seu necessario volente necessitare, quae oritur ex plenitudine voluntatis, & infinitate bonitatis obiecti. Et talis necessitas est perfectior libertate, quae supponit aliquam limitationem in obiecto, quatenus ab illo non adaequatur voluntas. Vnde quando dicit D. Thom. in hac qu. 41. art. 2. quod illa processio est à voluntate ut natura, non sumit naturam pro appetitu innato, & non elicitu, seu appetitu inani, sed pro appetitu elicitu, licet non arbitrariè, & contingenter, sed cum plena necessitate, & adaequatione: voluntas enim etiam habet suam naturam, & naturaliter elicituè fertur in aliqua, tum necessitate quoad specificationem, tum quoad exercitium, ut circa Deum clarè visum. De quo latius dici solet in 9. q. 82 & 12. q. 9. & nos dicimus in libris de anima q. 12.

ARTICVLVS III.

Quid sit potentia generatiua, & spiratiua in Deo.

Nomine potentiae intelligimus principium quo producendi personas: sicut enim constat dari in Deo personas producentes à quibus aliae procedunt, & ipsae personae sic producentes se habent ut principium quod producendi, ita oportet assignare principium quo, nostro modo intelligendi, eo modo quo datur in Deo potentia creatiua, qua creat, quae non consideratur ut principium quod, seu ut persona producens, sed ut attributum per modum virtutis, qua ipse Deus creat tanquam principio quo: ergo similiter debet dari in Deo potentia generatiua, & spiratiua, qua tanquam virtute producat personam. Immerito autem negarunt hanc potentiam Aureolus in 1. dist. 7. qu. 1. art. 2. & idem tribuitur Gregorio super eandem distinctionem q. 2. art. 2. ea ratione ducti, quia in Deo non datur realis actio distincta à potentia: ergo non est realis potentia. Vnde dixit Gregorius dari in Deo potentiam veram, & realem respectu personae productae, non respectu actus producendi. Quod si hoc solum voluit, non dissentimus: reuera enim D. Thom. fatetur dari in Deo principium reale respectu rei procedentis, quae distincta est à principio quod, non verò dari principium respectu actus, nisi secundum rationem, ut affirmat in hac qu. 41. art. 4. ad 3. & sup. q. 25. art. 1. ad 3. & nos tractauimus supra disp. 11. Vnde ratio Aureoli solum conuincit, non dari in Deo potentiam, seu principium quo distinctum ab actione, & realiter oppositam ipsi actui, sed identitatem cum illo. Caterum absolute negare potentiam, etiam indistinctam ab actione, omnino falsum est, & aliqui censent esse temerarium, cum sit contra omnes scholasticos, imò, & errori proximum: nam salua fide negari non potest Filium realiter procedere à Patre, sed nihil potest realiter

Bb 2 proce

procedere ab alio, nisi possit ab illo procedere, & posse procedere, & habere potentiam per quam procedat idem est: ergo si procedit à Patre, potentia est in Patre, ut procedat. Vnde & in Concilio Florentino *sess. 18. & 19.* sapius repetitur in Patre esse principium generatiuum *quo* Filium generat, licet verum sit, quod in illis sessionibus Concilium non procedat diffinitiuè, sed disputatiuè.

² Difficultas est, quid sit hæc potentia, an aliquid absolutum vel relatiuum? Nam ex vna parte videtur esse relatiuum, siquidem non est communis omnibus tribus personis: Filius enim, & Spiritus S. non possunt generare. Vnde dicit Damasc. *lib. de duabus Christi voluntatibus: Omnia quæ habet Pater Filij sunt, sola gignendi vi excepta.* Vis ergo generatiua non est in Filio, sed quidquid absolutum, & essentiale est in Deo, communicatur Filio: ergo potentia generatiua non est aliquid absolutum. Et secundò, quia potentia productiua debet esse distincta à termino producto, cum terminus productus egrediatur realiter ab ipsa: ergo potentia generatiua Filij debet distinguì realiter ab ipso Filio, & solum inueniri in Patre tanquam aliquid proprium, & incommunicabile in illo: ergo est aliquid relatiuum, & non absolutum.

³ Ex alia parte fortius instari videtur, quod potentia generatiua non sit aliquid relatiuum: tum quia relatio est ipsa subsistentia, & terminus naturæ constituens personam, ut *suprà* diximus: Subsistentia autem seu personalitas non est principium *quo*, nec potentia producendi, quia non se habet ut virtus naturæ, sed ut terminus constituens ipsum principium *quod*. Vnde naturæ humanæ communicatur subsistentia diuina, quæ terminat naturam humanam, & constituit principium *quod* operandi, non autem potest communicari virtus diuina, ita ut operetur per illam homo tanquam per principium *quo*. Ergo si relatio in Deo ponitur pro potentia, confunditur principium *quod* cum principio *quo*; tum etiam quia in quacumque re forma seu natura est ratio agendi: est enim natura principium motus, seu actus, scilicet principium *quo*; quia illud est forma, & ratio agendi, in quo agens assimilatur sibi terminum, ergo similiter in Diuinis, illud erit ratio agendi, seu potentia generatiua, in quo productum assimilatur producenti. Sed Filius non assimilatur Patri in personalitate, seu relatione, quia in illa dissimilis est ipsi, siquidem opponitur illi secundum relationem: ergo solum assimilatur in natura, quia hæc solum est sibi communicabilis. Ergo potentia generatiua non est relatio, sed natura. Vnde citatis locis Concilij Florentini dicitur, quod principium *quo*, seu per quod ipsa persona generat, est id quod solum communicabile est, & additur, *diuinam naturam esse principium generatiuum, quo Pater Filium generat.* Et Cyrillus *lib. 1. Thesauri cap. 7.* dicit, *generatiuam virtutem esse essentiam Dei.* Tum denique est vrgens ratio, quia si aliqua relatio sub conceptu relatiuo ut distinguitur ab absoluto, esset potentia generatiua, maxime ipsa relatio paternitatis: hæc autem non potest esse potentia generatiua. Quod patet manifestè, quia paternitas sub conceptu expresso paternitatis, & relatiua fundatur in potentia generatiua: ideo enim Pater refertur in exercitio, quia genuit: si autem dicatur quod paternitas, seu relatio illa, non ut exercita, sed ut concepta seu signata, est potentia generatiua: contra est, quia prout sic solum est entitas relatiua ut subsistens, & constituens principium *quod*, non ut virtus ad alterum, seu ut principium *quo*.

⁴ Propter has difficultates valde diuisi sunt Theo-

logi: quidam censent potentiam generatiuam esse solam relationem, seu proprietatem personalem exclusam essentia: quod tribuitur Bonauenturæ *in 1. dist. 7. qu. 1.* & Durando *ibidem qu. 2.* Alij sentiunt potentiam generatiuam esse ipsam diuinam naturam solam sine alia connotatione: quod tribuitur Gabrieli *in 1. dist. 7. qu. 1. 2. & 3.* Sed quia non est possibile præscindere potentiam generatiuam ab omni relatione: tum quia potentia non dicitur ad se, sed ad terminum per ipsam producendum: tum quia si solum diceret essentiam, & nullo modo importaret relationem, potentia generatiua non esset propria Patris, quod repugnat, cum in Filio inueniri non possit: ideo conati sunt Authores explicare, quomodo relatio ista pertinet ad conceptum potentie generatiue. Et communis sententia Theologorum est, potentiam generatiuam dicere in recto naturam, seu essentiam tanquam virtutem assimilatiuam, & generatiuam, de connotato autem dicere relationem tanquam conditionem requisitam ex parte subiecti. Quæ est sententia S. Thom. *in hac q. 41. art. 5.* & Caiet. *ibi*, omniumque Thomistarum. Consentit Scotus *in 1. dist. 7. qu. 1.* qui requirit proprietatem personalem tanquam conditionem requisitam ad potentiam generatiuam, & solum differt à sententia D. Thom. quod non debet dicere potentia generatiua naturam, ut distinguitur ab attributis, scilicet ab intellectu, voluntate, &c. cum tamen S. Thom. non accipiat naturam in illa rigorosa præcisione, sed prout etiam includit attributa. Docet eandem sententiam Suarez *lib. 6. de Trinit. c. 5.* & videri potest Valentia *hic q. 15. puncto 2.* Arubal *disp. 143. cap. 3.* Granados *tract. 13. disp. 3. sect. 3.* Ruiz *disp. 100. sect. 2. & 3.* Vasquez, *disp. 164. cap. 3.*

Cæterum hanc sententiam quæ communis est ⁵ inter Theologos, ex mente ipsius Vasq. ita explicauit Alarcon *hic tract. 4. disp. 6. c. 2. n. 11.* & *seqq.* quod affirmat relationem quam connotat potentia, non esse relationem prædicamentalem seu secundum esse paternitatis, quia hanc dicit fundari in ipsa potentia generatiua, sicque illam supponit, sed esse relationem transcendentalem quæ inuenitur in prima persona, speciali modo ad Filium. Nam, ut *art. 1.* vidimus putat iste Author Patrem in ratione primæ personæ subsistentis constitui per innascibilitatem, quatenus dicit fontalem originem personarum, quod dicit pertinere ad relationem non prædicamentalem ipsius Paternitatis, quia hæc supponit pro fundamento ipsam generationem, sed transcendentalem quatenus est principium vtriusque personæ procedentis in Deo, & pro indiuiso respicit Patrem, & Filium ut personas procedentes à se. Sed quia vidit, quod ista relatio transcendens non est pro solo Filio, sed indiuisè ad Filium, & Spiritum S. & consequenter non est conueniens ad constituendam potentiam generatiuam, quæ est solum ad Filium, quia est solum generatiua: ideo addidit præter relationem transcendentalem primæ personæ in ratione fontalis principij ad Filium, & Spiritum S. aliam transcendentalem ad Filium tantum, & per talem relationem affecta diuina essentia, dicitur proxima potentia generatiua. Et relatio transcendentalis ad Spiritum S. quæ communiter est in Patre, & Filio coniuncta essentia, constituit potentiam spiratiuam.

⁶ Nihilominus tamen sententia D. Thom. & communis Theologorum defendenda est, quod potentia generatiua est ipsa essentia, & diuina natura per modum virtutis fecundæ, quæ super ipsam essentiam, eiusque vim, & actualitatem solum addit connotationem quandam relationis paternitatis, seu relatio

relationis personalis. Et illa introductio relationum transcendentalium præter relationes reales secundum esse, id est, præter quatuor relationes paternitatis, filiationis, spirationis activæ, & passivæ, omnino eicienda est. Nec fas est in tam sacrosancto, & elevatissimo mysterio alias voces introducere, quæ à Sanctis PP. Conciliis, atque probatissimis, & antiquis Theologis, non sunt traditæ.

6 Igitur transcendentalis ista relatio nullo modo ponenda est, quia vel ista relatio est ipsius entitatis divinæ sub conceptu relatio, & personali, id est, ipsa paternitas vel filio, vel est ipsius naturæ secundum conceptum absolutum naturæ, & substantiæ, sicut apud nos inveniuntur relationes transcendentales, quæ sunt entitates absolutæ, & non relationes prædicamentales; ut relatio materiæ ad formam, patris ad totum, scientiæ ad scibile, potentiæ ad obiectum. Si primo modo se habeat: ergo ista relatio transcendentalis est ipsamet prædicamentalis relatio vel secundum esse, siquidem est entitas divina sub conceptu relatio, non absoluto. Entitas autem divina, ut relatio, est ipsa relatio prædicamentalis, scilicet paternitas vel filio, & illa quæ dicitur transcendentalis est ipsamet relatio paternitatis. Quid ergo respicit paternitas transcendentaliter, quod non respiciat prædicamentally? vel ad quem terminum, aut ad quem modum respiciendi ponitur paternitas transcendentaliter, ad quem, aut sub quo modo non se habeat prædicamentally? sicut apud nos superflue poneretur paternitas transcendentaliter respiciens Filium, si respicit prædicamentally, ita quod totum esse est ad Filium. Nec dici potest, quod illa relatio transcendentalis respicit pro indiviso Filium, & Spiritum S. & sic non se habet per modum paternitatis, sed fontalis principij totius processions in divinis: nam modò non loquimur de ista relatione, quam *suprà* satis impugnauimus: hæc enim non deseruit ad potentiam generatiuam, quia potentia generatiua non se habet pro indiviso ad Filium, & Spiritum S. sed solum generatiua est: ergo solum respicit ipsum genitum, & consequenter ipsum Filium; circa ipsum autem Spiritum S. versari non potest generatiua potentia, quia Spiritus S. generari non potest: ergo relatio quæ indivisè se habet ad principiandum Spiritum S. & Filium, non constituit, nec per se conducit ad potentiam generatiuam. Solum ergo conducit illa quæ respicit Filium, & se habet solum ad genitum. Ista autem relatio transcendentalis non potest convenire ipsi paternitati, ita quod dicatur ipsa paternitas respicere transcendentaliter Filium, quia si in quantum prædicamentalis totum suum esse est ad Filium, ad quid servit relatio transcendentalis, etiam ad Filium, imbibita in ipsa relatione prædicamentally? Bene verum est quod in creatis Pater quantum causa productiva Filij, transcendentaliter ipsum respicit, sicut quælibet causa suum effectum: sed hoc est quia supponitur in Patre creato persona absoluta, & virtus causatiua etiam absoluta propria ipsius, & non communis filio, & talis virtus, & causa possunt transcendentaliter respicere effectum sicut terminum à quo specificantur, imò idèd transcendentaliter respiciunt, quia res absolutæ sunt, & non relationes prædicamentales. Ipsa autem relatio prædicamentally ipsius paternitatis non potest transcendentaliter respicere terminum ultra hoc quod est respicere prædicamentally, quia ad nihil servit talis respicientia, siquidem relatio prædicamentally solum respicit terminum ut purum terminum, & correlativum, transcendentalis verò respicit ut effectum, vel obiectum: ergo relatio

Ioan. à S. Thom. in 1. part. D. Th. Tomus alter.

prædicamentally non potest habere superadditam relationem transcendentalem. Et ulterius in divinis sola relatio, quæ respicit purum terminum, habet oppositionem, & distinctionem à suo correlativo, transcendentalis verò non importat oppositionem cum termino, quia non respicit illum ut correlativum, & purum terminum: ergo non est talis relatio notionalis, & propria Patris, neque conducens ad potentiam generatiuam, quia in hanc solum conducit relatio, quæ distinguat illam à Filio ex parte sui connotati, & reddat illam propriam Patris.

7 Quod si dicatur: illam relationem transcendentalem non esse ipsiusmet paternitatis erga Filium, neque entitatis divinæ, ut relatio est, sed ut absoluta, nihil ad propositum potentiæ generatiuæ est, quia essentia absoluta, in quantum absoluta, non est propria Patris, sed communis omnibus personis, nec fundat rationem transcendentalem ad Filium, ut ad terminum productum, & distinctum, quia essentia secundum entitatem absolutam non generat, nec producit, sed summè identificatur cum Filio. Non ergo habet relationem transcendentem ad Filium; nec si haberet, illa conducirer ad potentiam generatiuam constituendam, siquidem provt sic non est relatio propria Patris, sed essentiæ, seu absolutæ entitatis erga Filium: non ergo conducit ad constitutionem potentiæ generatiuæ, quia hæc est propria Patris, in quantum distinguitur à Filio, quia non communicatur ei potentia generatiua: ergo relatio quam connotat, vel dicit in obliquo, debet esse talis, quæ sit in solo Patre, & in ea distinguatur à Filio, seu incommunicabilis sit Filio. Relatio autem transcendens, si est ipsa absoluta entitas, & essentia Dei, non autem paternitas, seu relatio alia opposita, & prædicamentally, non est propria solius Patris, aut si est propria, debet esse opposita Filio, & respicere illum ut purum terminum, & opponi ei tanquam relatio secundum esse, atque adèd desinet esse transcendentalis.

8 Quod si dicas: nam Pater non solum respicit Filium, ut Filium sibi similem, sed ut terminum productum: ergo non solum refertur ad illum ut ad purum terminum correlativum, sed ut ad productum: ergo relatione transcendentali respicit illum ut productum, licet prædicamentally respiciat illum, ut correlativum, seu relatione secundum esse.

Resp. distinguendo anteced. respicit illum ut terminum productum, distinguo, ut productum in ipso esse relatio, seu correlatio prædicamentally filiationis, concedo; ut productum in esse absoluto, vel in aliquo esse dependenti, nego. Ad respiciendum autem terminum productum, qui non est aliud quam relatio prædicamentally opposita, non est necessaria relatio transcendentalis, sed ipsa prædicamentally sufficit, quia in quantum talis in Deo subsistens est, & producere potens in ratione principij subsistens, terminum suum correlativum, & ex hoc etiam habet esse aliquid de connotato requisitum ad potentiam generatiuam, ut iam explicamus.

9 Quare relicta hac transcendentali relatione, & solum agnoscendo quatuor relationes reales in Deo, quæ prædicamentales sunt, siue reales secundum esse, ut *suprà disp. 13.* ostendimus, redeundum nobis est ad sententiam D. Thom. Iuxta quam dicimus potentiam generatiuam importare in recto essentiam, seu virtutem divinam absolutam, & de connotato, seu in obliquo dicere relationem quatenus non potest essentia ipsa dici fecunda ad generandum, nisi in subiecto, seu persona apta ad tale munus. Non est autem apta, nisi habeat in se rationem oppositionis, & distinctionis à termino generando, neque oppositio ista haberi potest nisi

B b 3 in

in vi relationis prædicamentalis, quæ sola oppositionem realem fundat in diuinis. Ergo illa requiritur vt conditio ex parte subiecti, seu personæ generantis, vt virtus, seu potentia generatiua sit. Itaque potentia generatiua, & importat virtutem producendi, & assimilandi terminum genitum ipsi generanti, & requirit tanquam conditionem, vt sit distinctus, & egreditur tanquam distinctus à suo producente, & generante *quod*: nam ab ipsa forma, seu natura, quæ est actualitas, seu actiuitas producendi, siue radicalis, siue proxima, non requirit distinctionem, cum potius in processionibus diuinis ad hoc detur processio, vt communicetur eadem natura, eo quod consubstantialitè esse debet vtrumque extremum, tam procedens, quam producens. Si ergo potentia generatiua consideretur vt virtus, seu actiuitas producendi, hæc non potest esse relatio, tum quia relatio non est actiua, sed purè respectiua; & sic habet terminum vt purè correlatiuum, non vt productum; tum quia relatio tenet se ex parte subsistentiæ, cum relatio sit forma, qua persona constituitur in esse personæ terminatæ, & incommunicabilis: subsistentia autem non se habet vt virtus, & ratio agendi, nec vt forma cui correspondeat assimilatio, & specifica ratio in termino producto, vel in operatione: species enim operationis sumitur ex natura, vt ex radice, quia natura est principium motus, seu operationis, sed habet se vt terminus constituens principium *quod*: ergo ipsa non est virtus generatiua: tum denique quia potentia, seu virtus agendi, & generandi, vel est virtus radicalis, & hæc est natura, vel est virtus proxima, sicut potentia, quæ est attributum, & propria passio, & hæc non potest esse relatio, quia hæc virtus consideratur vt actiuitas proxima ipsius naturæ, & sicut instrumentum eius influxuum in terminum. Vnde potentia generatiua debet esse id in quo terminus productus, & genitus assimilatur generanti si sumatur pro potentia radicali, & remota, quæ est ipsa natura: in hac enim assimilatur genitum generanti. Si verò sumatur pro potentia proxima, in ea non fit assimilatio, sed est medium, & instrumentum, quo effluit à natura assimilatio. Sed in Deo, vbi datur summa actualitas, & actiuitas in natura, non est potentia proxima tanquam medium superadditum, & instrumentum operandi: vnde id in quo fit assimilatio, scilicet natura, est immediatum operationum. Cum ergo non fiat assimilatio in relatione, quia potius in relatione Pater, & Filius sunt dissimiles, cum sint oppositi, & distincti, sequitur quod ipsa relatio non est id quo fit generatio tanquam principio *quo*, & virtute influxiua.

10 Quod verò requirat relationem tanquam connotatum, vel conditionem, vt virtus illa sit potentia generatiua, & sit fecunda ad producendum, patet, tum quia sine relatione non datur oppositio, neque distinctio inter rem procedentem, & producentem: potentia autem generatiua est ad producendum Filium, qui est persona distincta à persona generante: ergo requirit illa potentia hanc conditionem ex parte personæ generantis vt distincta sit à re genita, quod solum habet per relationem; tum quia potentia generatiua sub ratione seu appellatione generatiuæ non est communicabilis Filio, neque Spiritui S. cum ipsi generare non possint alium Filium, sed est propria Patris, nihil autem est proprium vnius personæ, & incommunicabilis alteri, nisi per relationem, quæ sola oppositionem, & incommunicabilitatem facit in diuinis: aliàs enim omnia

sunt vnum: ergo potentia generatiua relationem debet includere de connotato, & in obliquo, & tanquam conditionem, & non aliam relationem, quam quæ oppositionem facit cum correlatiuo, quæ est relatio prædicamentalis, non transcendentalis. Itaque eademnet forma prout in vno subiecto, seu prout sic modificata, præbet vnum effectum, quem non præbet in alio subiecto, seu aliter modificata, sicut species visibiles in aëre non informant intentionaliter & representatiuè, sicut informant, & representant potentiæ visuæ; gratia in nobis, qui sumus persona extranea, constituit Filium adoptiuum, non in Christo; qui est persona diuina; calor in animali generat carnem, non in igne: sic ergo essentia modificata paternitate est virtus generatiua, & Deus generans; in Filio non est potentia generatiua, sed Deus genitus. Et hæc modificatio, seu connotatio intrinseca est ipsi virtuti generatiuæ, id est intrinsecè est requisita ad ipsam generatiuam virtutem, quia sine ipsa non datur distinctio inter producens, & productum; sine distinctione autem non datur generatio intrinsecè, & essentialiter, sed hoc se habet per modum conditionis requisitæ, quia ex parte personæ agentis se tenet; non vt forma ipsa seu virtus formaliter influxiua, & assimilatiua, vt ostensum est.

Ad rationes dubitandi à principio. Resp. ad primam quod potentia generatiua ita est propria Patris, quod non est in Filio sub formalitate, & appellatione potentiæ generatiuæ; sed tamen totum quod virtutis, & perfectionis est in potentia generatiua est in Filio, totum quod connotationis, & relationis connotatæ, seu per modum conditionis requisitæ, non est in Filio, sed ipsamet essentia, & virtus quæ est in Patre, vt generans, est in Filio vt terminans, & complens generationem, & vt res genita; & in Deo patris, & eiusdem perfectionis est principiari generationem, & terminare, & principiari est Patris, terminare, Filij. Neque hoc mirum est de potentia generatiua: nam etiam ipsa essentia, & natura diuina, & ipse Deus vt generans, id est, vt modificatus, & affectus paternitate, non est Filius, quia Filius est Deus vt genitus, non vt generans: sic cum potentia generatiua dicat essentiam diuinam, non quomodocumque, sed vt modificatam relatione ipsa Paternitatis, ita propria efficitur Patris potentia generatiua ratione modificationis, & connotationis, quam importat, sicut Deus vt generans: nam sicut Deus vt generans non est in Filio, licet totum quod est Dei, sit in Filio, ita Deitas vt principium *quo* generandi non est in Filio, licet tota Deitas, & tota virtus illius potentiæ sit in Filio: sufficit enim vt dicatur aliquid absolutum proprium alicuius personæ, quod sit proprium, non ratione absoluti, sed ratione modificationis relatiuæ importatæ in obliquo, & de connotato: prout enim sic modificata essentia vel virtus, restringitur ad illam personam, seu relationem cuius modificationem importat, & non communicatur alteri, prout sic modificata, licet aliàs ex se, & ex parte conceptus absoluti communicabilis sit.

12 Ad 2. Resp. ex D. Tho. in hac q. 41. art. 5. ad 1. quod in hac generatione diuina quæ infinite perfecta est, & consubstantialis, id quod est principium *quo* generandi, non debet distingui ab ipso genito, sed ei communicari, quia si genitum procedit vt consubstantialitè suo principio, procedit vt accipiens in se, & identificans sibi id quod naturæ, & actualitatis, & virtutis est in suo principio; hoc autem est potentia, & virtus generatiua, siue proximè, siue

sive radicaliter consideretur. Itaque tantum abest quoddam potentia generatiua, à quo procedit genitum debeat esse distincta ex parte formæ, & virtutis ab ipso genito, quod potius in eo quoddam virtutis, & formæ est, debet ei esse consubstantialis, & identificata. Solum ergo debet esse distincta à genito ex parte relationis connotatæ, quod pertinet ad conditionem ex parte personæ, & principij quod se tenentem. Et quando dicitur quoddam genitum, seu terminus progreditur realiter ab ipsa: ergo debet distinguere ab ipsa: distinguo antecedit, progreditur ut realiter distincta ab ipsa in relatione connata, cōcedo, in forma, & virtute qua producit, nego, quia secundum hanc procedit terminus ut consubstantialis suo generanti, distinctus autem solum in relatione, & principio quod. Et hoc solum quod ex parte principij quod se tenet, est incommunicabile in potentia generatiua: reliquum vero quod ex parte virtutis, & formæ, & naturæ se tenet communicabile, & consubstantiale est Patri & Filio. Et sic potentia generatiua formaliter, & sub propria appellatione sumpta non est in Filio, tota verò virtus, & actualitas huius potentie est in Filio, sed sub alia modificatione, scilicet ut terminans, non ut principians generationem.

Ad rationes dubitandi, quæ pro altera parte afferuntur, duas Primas concedimus; quia probant nostram sententiam pro ea parte, qua asserimus potentiam generatiuam importare in recto essentiam secundum vim intellectiuam, & expressiuam. Quod verò non importet relationem etiam ex parte connotati, & tanquam conditionem ex parte subiecti, seu personæ, & principij quod se tenentem, non impugnant.

Ad ultimam verò rationem, qua probatur non posse etiam de connotato importari relationem prædicamentalem, sed transcendentalem, respondetur ex dictis, non debere importari nisi relationem oppositam, & distinctam realiter à termino genito, & hæc relatio prædicamentalis, seu secundum esse, non transcendentalis. Et ad instantiam, quod paternitas sub conceptu expresso paternitatis fundatur in potentia generatiua; Resp. ex dictis art. 1. quod fundatur in potentia generatiua, & in ipso actu generationis paternitas quantum ad exercitiū attingendi terminum, sed præcedit generationem, & potentiam generatiuam in quantum relatio subsistens, & in ratione hypostasis, ut dicit S. Tho. q. 40. art. 4. & nos supra art. 1. ostendimus. Et relatio, ut subsistens sufficit ad connotationem, & ad conditionem requisitam ex parte subiecti ad potentiam generatiuam: nam potentia generatiua non requirit connotationem relationis, nisi quatenus illa relatio facit personam subsistentem, & incommunicabilem in sua entitate, & consequenter in entitate sua distinctam à persona genita, qua distinctione ex parte personæ, ipsamet essentia habet vim producendi ut principium quo, & per modum virtutis aliam personam quæ distincta sit personaliter, & relatiue à persona generante, sed non à potentia generatiua quantum ad ipsam formam & virtutem qua producit, quia hæc virtus & forma consubstantialiter esse debet in ipsa re genita. Non autem requiritur ad potentiam generatiuam quod habeat pro connotato, & conditione requisita ipsam relationem Patris, ut in exercitio respiciendi tangit terminum, sed pro ut in entitate relationis subsistens est, & entitas incommunicabilis, & opposita; hoc enim habet antecederet ad generationem seu potentiam generatiuam, quia est secundum se illa entitas distincta & opposita, & subsistens secundum conceptum relationis signatæ, non exercitæ, ut art. 1. dictum est.

ARCICVLVS IV.

Quibus modis dicatur una persona esse in alia, & prior alia, & equalis, vel similis alteri?

VNam personam diuinam esse in alia, absolutam fides est: dicitur enim Ioan. 14. *Non creditis quia ego in Patre, & Pater in me est?* Vocant Theologi communiter hanc existentiam vnius personæ in alia circuminfectionem, id est, reciprocam, & mutuam existentiam vnius personæ in alia. De modo verò quo intelligenda sit hæc existentia vnius personæ in alia, non levis difficultas est. Nam respectu alicuius tertij, scilicet respectu creaturæ, bene intelligitur quomodo omnes tres personæ simul in ea existant, quia cum operatio omnium personarum sit una, & existentia immensitatis, quæ in operatione fundatur, sit eadem, ubi existit una persona, existit & alia, & cum ipsa operatio Dei intimè sit in omni ente, & in omni re operata à se, & dependente à se in esse, consequenter omnes tres personæ simul existunt intimè, & indissolubiler in quacumque creatura. Sed in presenti non agimus de hoc modo inexistendi, sed quomodo una persona sit in alia reciproce, etiam remotis creaturis, & operatione ad extra, cum inter se ipsæ personæ non reciproce operentur, quia licet ab una procedat alia, non tamen è contra; præter processionem autem non est alia operatio vnius personæ in alia.

Respondeo ergo, optimè dici, quod una persona sit in alia illo triplici modo, quem S. Thom. assignat in hac q. 42. art. 5.

Primò quidem ratione essentiae quæ omnibus personis communis est.

Secundò ratione correlationis mutue, qua vnum relatiuum intelligitur esse in alio secundum intellectum.

Tertiò ratione originis secundum quod per actus immanentes ipsa origo ad intra procedit, & de ratione actus immanentis est, ut id quod procedit maneat in eo à quo procedit.

Ratio est, quia ut vnum sit in alio solum requiritur ex parte extremorum distinctio, & ex parte rationis existendi coniunctio; sed hoc designatur illis tribus modis: nam Pater habet entitatem personalem relatiuam distinctam à Filio, & habet rationem coniunctionis ad Filium, & existendi in illo summè intimam, nempe ipsam essentiam vtrique communem ad inuicem, nihil autem intimius coniungit, & ad inuicem copulat, quam mutua eiusdem essentiae communicatio. Vnde bene notat Caiet. in hac q. 42. art. 5. quod non infert D. Thom. vnam personam esse in alia ex eo præcisè, quod quilibet identificetur cum essentia, sed ex eo quoddam vnica, & eadem essentia sit communis vtrique: sic enim est ratio ut ad inuicem personæ sint coniunctæ & una sit in alia consubstantialiter. Sola enim identitas essentiae, & relationum non explicat istam circuminfectionem, & inexistentiā vnius in alio, quia per istam identitatem solum cognoscitur quod omnia hæc sunt vnum in essentia, non verò vnum in alio: sed hoc bene intelligitur supponendo distinctionem extremorum, seu personarum, & considerando essentiam, ut est ratio communicationis vtriusque: quatenus distinctionem retinendo consubstantialiter idem sunt; & idè circuminfectio, & inexistentiā personarum est de numero notionalium mixtorum ex essentialibus, sicut potentia generatiua

generatiua, & spiratiua, quæ importat aliquid de notionali constans ex essentiali cum connotatione relatiui: sic circuminfectio, seu inexistencia personarum importat aliquid de notionali, nempe personas distinctas, mixtum ex essentiali, quatenus ipsa essentia sumitur ut ratio existendi consubstantialiter personarum inter se. Nec tamen in hoc modo existendi personæ dicuntur inexistere adinuicem secundum aliquid sui tantum, sed secundum se totas, licet ratio existendi sic essentia, quia modus iste existendi consubstantialis est; & sic per rationem substantiæ exercetur, quæ totalis, & indiuisibilis est.

Secundo modo, dicitur vna persona existere in alia ratione relationis, ita quod non solum ipsa personæ relatiuæ sint extrema huius inexistentiæ, & circuminfectionis, sed etiam ipsa relatio sit formalis ratio existendi in alio. Potest autem intelligi vnum relatiuum esse in alio correlatiuo, vel ratione realis tendentiæ, & respectus ad illud, vel ratione simultatis, & coniunctionis inter se quatenus sunt simul natura & cognitione, seu diffinitione. Primo modo vnum relatiuum non dicitur esse in alio, sed ad aliud, quia sub illa tendentiā exercet oppositionem ad aliud, quam secundum suam entitatem retinet; & sic propriè non est in alio, sed ad aliud. Secundo modo dicitur vnum relatiuum esse in alio, quia in diffinitione vnius relatiui cadit aliud; & sic sunt simul cognitione, & vnum in cognitione, seu diffinitione alterius, ut notat S. Thom. in art. 5. citato. & Caiet. ibi, respondens argumentis Aureoli, & Durandi. Solum ob stare videtur huic modo inexistentiæ, & circuminfectionis secundum formalem rationem relationis, quomodo Spiritus S. dicatur esse in Patre & Filio secundum paternitatem, & filiationem, quia paternitas non est correlatiua spirationis passiue, nec similiter filiatio: ergo non erit Spiritus S. in Patre & Filio formaliter in quantum tales relationes sunt, sed solum in quantum spirator.

Respondet Caiet. hinc art. 5. cit. nullum esse inconueniens concedere Spiritum S. non esse in Patre & Filio secundum relationem, nisi in quantum spirantes sunt, seu in quantum vnus spirator. Et reuera ita est, loquendo de relatione formaliter opposita Spiritui S. quia hæc sola intrat in diffinitione illius correlatiui, non autem relatio paternitatis, & filiationis. Vnde si solum iste modus inexistendi est secundum quod vnum relatiuum intrat in diffinitione alterius, non potest secundum istum modum esse spiratio passiva in Paternitate, & Filiatione formaliter, quia non intrat in diffinitione illarum. Sed tamen licet filiatio, & paternitas non sint formaliter correlatiuæ Spiritus S. sunt tamen identice, & radicaliter, non solum ea identitate, quæ est inter essentiam, & relationes: hæc enim non sufficit ut essentia dicatur esse in illis, cum non sit extremum distinctum; sed ea identitate, quæ est inter personam, & relationem sibi adiunctam, quam ex se radicaliter postulant sibi identificari, quatenus sunt personæ ad intellectualem processionem pertinentes, & sicut intellectus est radix voluntatis nostro modo intelligendi, ita notionaliter personæ intellectuæ sunt radicale principium spirationis passiue quatenus ab ipsis procedere debet ut à principio personali amoris notionalis. Vnde tanquam principium quod debent illi opponi, & sic ut radicaliter respectiue ad Spiritum Sanctum, etiam correlatiue sunt in illo radicaliter, ratione autem spirationis sunt correlatiue in illo formaliter

Quod si dicas, modum istum existendi in alio reciproce non esse proprium personarum diuinarum: conuenit enim etiam relationi creatæ: Vna enim relatio etiam in diffinitione correlatiui ponitur.

Resp. conuenire quidem in relationibus creatis, sed non esse proprium diuinarum personarum habere mutuam existentiam quomodocumque ut relationes, sed ut personas. Extra Deum autem nullæ relationes sunt personæ; & sic nullæ personæ sic inexistunt modo relatiuorum: sed relationes creatæ cum sint accidentia, petunt diuersa subiecta, & sic impeditur circuminfectio earum, & multo minus circumsedent ut personæ.

Denique ratione originis constat vnam personam esse in alia, seu intra aliam, quia cum illa origo operetur ratione actionis immanentis, ad ipsam pertinet, quod persona procedens non sit extra producentem, sed maneat in illa, quia non procedit extra illam: ergo est in illa, sicut conceptus intra intellectum, amor intra voluntatem. Solum in hoc modo existendi vnam personam in alia est difficultas ex ratione dubitandi supra proposita, quia hoc modo intelligitur personam procedentem, v.g. Verbum esse à Patre à quo procedit immanenter, non tamen reciproce Patrem esse in Filio, quia cum non procedat ab illo, nec sit mutua ista origo, non potest ratione originis immanentis Pater esse in Filio, vel Pater, & Filius in Spiritu Sancto, quia ab eo non procedunt.

Sed responderetur quod non dicitur Pater manere in Filio tanquam in principio suæ originis, sed tanquam in termino, quia ut dicit D. Thom. super Ioan. cap. 16. lect. 4. *Quidquid habet Pater, habet Filius, non tamen eodem ordine: nam Filius habet sicut ab alio accipiens, Pater verò sicut alij dans.* Quare modus essendi per originem immanentem vtrumque includit, & existentiam termini in principio, & existentiam principij in termino; & licet in rebus creatis terminus actionis immanentis non possit in se habere principium à quo procedit, sed ipse est in principio ut manens, & inhærens in illo, tamen quando terminus procedens est subsistens, sicut dicitur manere in suo principio, non per inhæssionem, sed per processionem, ita dicitur principium manere in ipso termino per terminationem in ipso, non per inhæssionem.

Ex quibus soluitur alia quæstio, quæ hic solet annexi, an videlicet dicatur vna persona esse in alia, non solum tota, sed etiam totaliter. Nam quod tota sit, non est dubium: cum persona illa partes non habeat, sed indiuisibiliter sit, vbicumque est. Sed dubium est an sit totaliter, id est, omnimodo, & secundum omnem rationem aut omne quod in se est, in alia. Nam aliqui sentiunt vnam personam esse in alia, non quia ipsa proprietates relatiue sit in alia, sed quia essentia vnius sit in alia, quasi per essentiam colligentur, & reciproco modo sint in se, non verò per ipsas proprietates, sicut homo potest dici vinculatus, & alligatus alteri, licet solum in pedibus aut manibus vincula habeat.

Sed nos dicimus, non solum personas inexistere ad inuicem, & reciproco modo vna in alia ratione essentiæ, seu per aliquid sui, sed etiam ratione ipsius proprietatis relatiue, & ratione originis actus immanentis, ut dictum est. Et sic in omni sensu verificatur, quod Ecclesia canit in hymno secunda Feria, in Laudibus, *In Patre totus Filius, & totus in Verbo Pater.* Ratio est, quia personæ diuine sunt mutuo inter se summo, & infinito modo, & mutuo,

mutuò se comprehendentes. Ergo cum non solum ratione essentiae possint mutuò inexistere, quod pertinet ad consubstantialitatem, sed etiam ratione relationis, quatenus mutuò se includit, & ratione originis immanentis, quatenus principium, & terminus, in se inuicem manent; nec quisquam ex his modis existendi imperfectiorem habeat, sed necessario consequatur ipsam naturam relatiuorum, & talium originum, dicendum est quod proprietates, & relatiuae personarum totae, & totaliter existunt in se ad inuicem, non solum secundum aliquid sui, idest, quantum ad essentiam, sed etiam secundum id quod proprietatis est; & relatiuum, tam quoad relationes ipsas, quam quoad origines. Non quod una persona, seu proprietas informet aliam, aut inhareat alteri, sed quod respiciat se mutuò, & includatur una in notitia alterius, & una originet intra se, & alia terminet proprietatem alterius, & unius essentia communis sit utrique ex tali processione, & communicatione.

Quae prioritas concedenda, vel neganda sit in personis diuinis?

6 Quatuor modos prioritatis possumus in praesenti distinguere.

Prima prioritas est durationis, ut quando aliquid incipit, vel est in sua duratione ante aliud, quae vocatur prioritas *In quo*.

Secunda est prioritas naturae, quando aliqua natura, vel ratio praesupponitur alteri, quia ab ea dependet vel causatur, licet utrumque sit simul tempore, seu duratione, sicut sol prior est luce in causando, sed non in existendo.

Tertia est prioritas originis, quatenus unum se habet, ut id a quo est aliud, & per modum principij alterius, siue sint eiusdem naturae, & durationis, siue diuersae, sicut Pater respectu Filij.

Quarta est prioritas rationis, seu intelligentiae, qua unum intelligitur ut distinctum ab alio, & sine illo; ubi autem unum accipitur sine alio, prius illo potest intelligi, prioritate se tenente ex parte nostrorum actuum, quia diuersis, & successiuis actibus rem aliquam intelligimus, & eius rationes, seu formalitates distinguimus.

7 De primis duabus prioritatibus, certum est relegandas esse à diuinis personis. Prioritas quidem durationis, quia personae diuinae coeternae sunt, nec una habet durationem succedentem alteri: ergo una non est prior altera in esse, & duratione, alias haberent esse diuisum, & non unum.

Secunda verò prioritas relegatur à Deo, quia est prioritas causalitatis, & dependentiae: dicitur enim unum prius naturā quam alterum, quando alterum est in natura, & esse posterius, & consequenter dependens, & causatum ab altero; in personis autem diuinis, natura & esse est unum, & idem: ergo secundum ordinem naturae unum non est prius altero, nec alterum posterius. Vnde dicitur in symbolo Athanasij: *In hac Trinitate nihil prius aut posterius*.

8 De duabus aliis prioritatibus difficultas esse potest: nam D. Thom. *qu. 42. art. 3.* expresse docet in Deo solum esse ordinem originis, qua una persona est ex alia, sed non esse prioritatem neque secundum naturam, neque secundum intellectum: ille enim ordo originis non est ordo naturae qui fundat prioritatem, sed est solum ordo emanationis, & principij: non tamen habens principiatum, neque habens aliquid posterius, sed idem esse, & naturam communicans; unde nec proprie datur ibi prius. Et ex hoc probat D. Thom. suam sententiam, quia in

personis non est nisi essentia, & relatio. Secundum essentiam nulla est prioritas, quia est omnimoda unitas. Secundum relationes est simultas, quia relationes sunt simul natura, & cognitione: ergo nulla est ibi prioritas rigorose loquendo de prioritate, licet sit ordo unius ex alio, eo quod prioritas rigorose sumpta relatè se habet ad posterius: in Deo autem nihil est posterius, quia hoc dicit quandam inferioritatem, & diminutionem. Vnde hoc magis consonat verbis ex Athanasio adductis in symbolo, quae absolute, & sine vlla distinctione dicunt, *in Trinitate nihil esse prius aut posterius*. Et August. *lib. 3. aduersus Maximinum cap. 14.* dicit, *Inter Patrem, & Filium esse ordinem naturae, non quo alter esset prior altero, sed quo alter esset ab alio*. Solum ergo admittit S. Thom. ordinem inter personas, non prioritatem loquendo de prioritate rigorosa.

Contra hoc sentit Scotus in *1. dist. 28. q. ultima*,⁹ quem sequitur Vasqu. *diff. 167. c. 3.* & alij. Et probant, quia hoc ipso, quod datur ordo in diuinis personis secundum originem, debet concedi prioritas, & posterioritas, non absolute, sed cum addito, prioritas originis: nam ratione huius ordinis absolute dicimus Patrem esse primam personam, & Filium secundam: Si ergo datur primum, & secundum ratione originis, cur non dabitur prius, & posterius secundum eandem originem. Et praesertim cum hoc prius, & posterius non opponatur simultati secundum naturam, & intellectum: ergo potest concedi in Deo. Deinde quia ipse D. Thom. sibi contradicit: nam in *q. 40. art. ultim.* dicit quod persona Patris secundum conceptum hypostasis est prior generatione, & consequenter Filio genito: in *hac autem qu. 42. art. 3.* dicit, quod non est prioritas inter personas, etiam secundum intellectum: ergo contradicit sibi, praesertim cum prioritas secundum intellectum non sit aliud quam distinctio rationis, & consideratio unius sine alio, quae non solum inter diuinas personas, sed etiam inter attributa ipsa negari non potest.

Nihilominus licet haec dissensio ad solum modum loquendi pertineat, tamen, ut bene notat Caiet. in *hac q. 42. art. 3.* cohibenda est lingua, quia locutio illa de priori, & posteriori in diuinis non nihil periculi aut dissonantiae videtur habere: quia licet prioritas in aliquo forsitan sensu sustineri posset, tamen posterioritas semper diminutionem aliquam, & minoritatem designat. Et cum in symbolo Athanasij (quod est publicum Ecclesiae testimonium, & professio) tam aduertenter ponatur, quod in Trinitate nihil est prius, & posterius, sine dubio securius loquitur D. Thomas qui omnem prioritatem, & posterioritatem reiecit, & solum utitur nomine ordinis, dicendo dari ordinem originis, non prioritatem. Et reuera solum id videtur Scotus intendere loco citato, & aliis, qui ex ipso citari solent. Ex Patribus verò, hi quos allegat Vasquez, videlicet Basilii *lib. 1. contra Eunomium, non longè à fine, & lib. 3. in principio*, & Epiphanius allegatus à D. Thom. *opuscul. 1. contra errores Graecorum cap. 2.* & Nazianzenus allegatus ab eodem *c. 9.* non ita clarè loquuntur: solum enim dicunt filium esse medium inter Patrem, & Spiritum S. quia videlicet est secunda persona Trinitatis, quod nullus negare potest; sed non est idem esse secundam, & tertiam personam atque esse posteriorem, quia in *ly secunda* solum importatur ordo numerationis, in *ly posterius*, aliquid diminutionis respectu prioris. Solum Basilii in illo priori loco ex *lib. 1. contra Eunomium* prioritatem, & posterioritatem nominat in origine personarum: sed non mirum, quia etiam causam, & causatum ibi esse dicit: *Non intervallo*, inquit, *haec disse*

disseparantes, sed cogitatione prius quam causatum, causam intelligentes. Sicut ergo causam, & causatum in latiori significatione sumit pro origine principij, & procedentis, ita prius, & posterius sumit non in rigorosa, sed in lata acceptione pro eo quod est primum, & secundum iuxta ordinem numerationis, non secundum prius, & posterius absolute, etiam in ipsa origine, quia etiam in origine ly *posterius* dicit aliquam diminutionem: & ita cum absolute negatur alias in symbolo Athanasij, & ab Aug. *vbi supra*, cautiùs, & securiùs loquimur, absolute eam negando: dicere autem quod solum negant PP. prius, & posterius in duratione, vt Vasqu. explicat, non video quo fundamento probet. Nam ad negandum prius, & posterius in duratione sufficit negare successionem durationis, & coeternas eas personas dicere: Athanasius autem in symbolo prius dicit has personas coeternas esse, & coequales; postea autem addit quod in hac Trinitate nihil est prius aut posterius: si autem intelligeret, solum non esse prius & posterius in duratione, esset repetere quod sunt coeternae.

11 Ad fundamenta autem Vasquez, & Scoti, ex dictis Respon.

Ad primum dicimus, quod esse primum, & secundum in processione, & origine solum designat ordinem processionis realem cum numeratione: vbi enim est numerus realis, ibi est primum, & secundum: nec enim est vnicum tantum.

Et cum instat Vasq. quod ex natura rei vna est prima, & alia secunda, non verò ex sola numeratione, quia in numerando aequè bene possemus incipere numerationem à Spiritu S. & à Filio, illumque vocare primam personam à qua inciperemus numerare.

Respondeo, quod ista numeratio realis fit etiam cum ordine processionis, & originis, ideòque nominatur, & numeratur prima illa persona, non solum à qua nostro arbitrio numerare incipimus, sed à qua ordo processionis incipit: sed non sequitur ex hoc quod sit prius, & posterius, quia bene stat quod sit origo, & ordo inter personas, licet nulla sit posterior altera, sed omnino simul, tum propter unitatem naturae; tum propter simultatem relationum, licet ipse ordo originis, qui petit quod vna procedat ab alia, & non è contra, etiam petit quod incipiamus numerare ab vna à qua omnes aliae procedunt, & ipsa à nulla priori, & propter hoc debetur ipsi quod sit prima, & alteri, quod sit secunda, non prioritatem, sed ordine originis, & processionis in qua est numerus.

12 Ad secundum verò quod deducitur ex contradictione D. Th. Respondetur, nullam esse contradictionem, quia quando D. Th. negat prioritatem secundum intellectum, loquitur de intellectu vt adaequatè concipiente, & definiente ipsas relationes: sic enim vna est de intellectu alterius, vnde non est prior secundum intellectum, sed simul cum altera. Quando autem dicit quod persona Patris secundum conceptum hypostasis est prior generatione, & consequenter Filio, loquitur de conceptu Paternitatis inadaequato, & secundum diuersa munerata, seu formalitates eiusdem relationis, vt subsistentis, & vt exercitè respicientis suum terminum. Et sic nulla est contradictio in dictis D. Th. Quod autem dicitur distinctionem rationis non posse negari, etiam inter attributa, & consequenter neque prioritatem rationis. Respondetur, distinctionem rationis in praesenti non habere locum, quia loquimur de relationibus realiter distinctis inter se, & supposita hac diuersitate, inquirimus an inter eas habeat locum prius, & posterius in aliquo sensu, ita

quod inueniatur in re, quia non indigent distinguere ratione: sed prioritas secundum intellectum aliud dicit, quàm distinctionem rationis, scilicet quod secundum intellectum non sint simul, nec omnino vnum, sed vnum posterius respectu alterius, quod diminutionem quandam designat, quam nec per intellectum possumus diuinis personis tribuere.

Relatio aequalitatis, & similitudinis qualis sit in diuinis?

13 Aequalitatem dari inter diuinas personas, ex symbolo Athanasij habetur, vbi dicitur, quod *Tres personae coeternae sibi sunt & coequales.* Sed & de ipso Filio dicit Paulus ad Philipenses 1. *Qui cum in forma Dei esset, non rapinam arbitratus est esse se aequalem Deo.* Sed & similem esse Patri ex Scriptura diuina constat, cum dicitur *Filius imago Dei inuisibilis*, ad Coloss. 1. & *figura substantiae Dei*, ad Heb. 1. Catholici tamen magis utebantur in explicanda consubstantialitate Filij, nomine aequalitatis, quàm similitudinis, eo quod similem Patri etiam Arriani fatebantur, sed aequalem nullo modo; cum tamen Catholici dicerent non solum vnam esse naturam in Patre, & Filio, sed in vtroque esse aequè perfectam, vt S. Thom. aduertit in hac q. 42. art. 1. ad 2. quod est vtrumque esse aequalem.

Rationem autem reddit D. Th. *ibidem*, huius qualitatis, tum quia in diuinis nihil est maius aut minus: ergo est aequale; tum quia inaequalium non potest esse vna, & eadem quantitas numero. In diuinis autem non est quantitas partium, & extensionis, sed perfectionis, & virtutis: perfectio autem est diuina essentia in personis, quia ex ipsa essentia habent totum esse, & actualitatem: ergo inaequalitatem habere non possunt, si habent eandem quantitatem perfectionis, & virtutis.

14 Ex quibus deducitur primum, aequalitatem, & similitudinem in diuinis personis solum requirere distinctionem extremorum, quae aequalia, vel similia dicuntur, non autem requirere distinctionem in ipsa quantitate, vel perfectione, ratione cuius aequalia vel similia denominantur. Aequalitas quippe vel similitudo non est eiusdem ad seipsum tanquam extremi, quasi idem extremum possit esse simile sibi ipsi: est enim plus quàm simile, scilicet idem. Sed tamen positis extremis distinctis, si ratio formalis, ratione cuius similia vel aequalia dicuntur, sit vna & eadem numero in vtroque extremo, tantò similitudo, & aequalitas erit maior, & dicetur similitudo eminentior, quia vniuntur maximo modo, quo possunt citra identitatem extremorum; similitudo autem petit, & fundatur in unitate, & conuenientia rationis formalis, dummodo ad identitatem non perueniat: non peruenit autem ad identitatem si extrema manent distincta, quia sic non est eiusdem ad se, & in ipsa ratione formali crescit unitas, quae magis conducit ad similitudinem: & aequalitatem. Vnde si in duobus lapidibus ponatur eadem numero quantitas, vel albedo manente distinctione extremorum, erunt summe aequales, vel similes.

15 Sequitur secundò, hanc summam, & perfectissimam aequalitatem personarum valde difficile explicari, si perfectiones relationum multiplicentur, & sunt diuersae in relationibus.

Ratio est, quia perfectiones relationum non solo numero, & materiali diuersitate multiplicentur, sed formali, eo quod relationes ipsae in ratione relationis quasi specificè diuersae sunt, & formaliter: non enim differunt Pater, & Filius, sicut duo filij, vel duo patres in ratione relationis loquendo: in Deo enim non datur materialis diuisio, sed quidquid differt, ibi

ibi formaliter debet differre, cum omnis potentia-
litas, sine qua materialis diuisio non datur, longè
exulet à Deo. Ponendo autem diuersitatem forma-
lem, & quasi specificam in relationibus, & quod ha-
bēt perfectiones relatiuas distinctas, vix saluari po-
test quin sit inæqualitas relatiuæ perfectionis, quia
istæ perfectiones non solo numero differunt, sed
modo specifico, in his autem quæ specie differunt,
& formaliter semper est aliqua inæqualitas, & diffi-
militudo, quia species sunt sicut numeri, & ipsum
differre plusquam numero extra æqualitatem est, &
extra omnimodam similitudinem, cum vna perfe-
ctio relatiua, quæ est in vno, non sit in altero extre-
mo. Nec sufficit dicere quod sunt æquales ratione
fundamenti. Non inquam sufficit, quia si fundamētū
est essentia, quoad suum esse absolutum, non du-
bitamus esse non solū æquale, sed idem in omnibus
personis; sed loquimur de perfectionibus relatiuis
vt relatiuæ, quas illa sententia ponit esse diuersas
non obstante omnimoda vnitate essentiae absolute;
& in illis dicimus non posse seruari omnem æqua-
litem, sed aliquam inæqualitatem esse, saltem re-
latiuam. Si autem loquamur de fundamento notio-
nali, scilicet de ipsa origine, vt quod generatio sit fun-
damentum relationis paternitatis, spiritalia proces-
sus relationis spiritoris, &c. tunc non soluitur diffi-
cultas, sed augetur: de hoc enim fundamēto notio-
nali restat difficultas, an dicat perfectionem, vel nō
dicat? Si non dicit, neque perfectionem dicent rela-
tiones, quæ in eis fundantur: nec enim perfectior de-
bet esse relatio, quàm fundamentum suum. Si dicit,
ita quod multiplicatur perfectio notionalis in ipsis
originibus, eodem modo inæqualitatem dicent si-
cut perfectiones relatiuæ, quia non solo numero
differunt, sed formaliter, sicut diuersæ species.

16 Sequitur tertio, relationem similitudinis, &
æqualitatis fundatam super ipsas personas, realem
non esse, sed rationis. Quod D. Th. affirmat in hac q.
42. art. 1. ad. 4. & in 1. ad Anibald. dist. 31. q. unica
art. 4. vtroque ex duplici fundamēto. Altero sum-
pto ex parte ipsius rationis fundandi æqualitatem,
altero sumpto ex parte ipsorum extremorum, quæ
æqualia dicuntur, quæ sunt relationes personales.
Causa, seu ratio fundandi æqualitatem in diuinis
est vnitas essentiae, & perfectionis, sed eiusdem ad
seipsum non est relatio realis, nec vnum, & idē po-
test esse ratio fundandi realem relationem ad se;
vnde licet extrema sint diuersa realiter, si tamen ra-
tio fundandi sit eadem, v.g. eadem albedo, vel quā-
titas in vtrisque, non fundabunt realem relationem
similitudinis, seu æqualitatis, licet res ipsæ seu ex-
trema similia dicantur propter communicationem
ipsius formæ. Cuius rationem reddidimus in Logi-
ca q. 17. art. 2. ex Caiet. hic q. 42. art. 1. quia in re-
latiuis idēd extrema materialia, seu subiecta refe-
runtur realiter, quia ipsæ formæ, seu rationes fun-
dandi realiter referuntur: si enim albedines non re-
ferantur secundum similitudinem, neque alba ipsa
referentur: non referentur autem albedines realiter,
si sunt vna, & eadem albedo in pluribus subiectis,
non multiplicata. Vnde neque extrema ipsa dicen-
tur formaliter similia, seu formaliter relata in simi-
litudine, si rationes fundandi relatiuè non se habēt,
sed identicè, quia sunt eadem numero forma. Et sic
in personis diuinis non est realiter æqualitas, nisi
ratione fundamenti, vt sumitur ex D. Th. loco cit. ad
Anibald. dicente, quod *Quamuis æqualitas non sit
relatio realis, tamē id rationē cuius attribuitur æqua-
litas, realiter est in Deo*, quod vtique est ratione fun-
damenti esse æqualem realiter, seu fundamentaliter,
non formaliter relatiuè, sed formaliter ex parte ma-
gnitudinis, & essentiae, quæ est ratio fundandi.

Altera ratio D. Th. est, quia vna relatio realis non 17
potest fundari in alia; eo quod aliàs sequeretur pro-
cessus in infinitum, quia qualibet relatione data,
posset supra illam fundari alia siue similitudinis, si-
ue dissimilitudinis. Quam rationem ponderauimus
in Logica q. 17. art. 3. circa primam difficultatem; &
reddidimus rationem à priori (præter hoc inconue-
niens multiplicandi relationes in infinitum, quæ est
quasi ratio à posteriori) quia omne fundamentum
debet esse perfectius eo quod fundatur, omnes au-
tem relationes sunt æquales in modo essendi rela-
tiuò; & sic vna non potest esse fundamentum alte-
rius. Cuius rationis vis in eo consistit, quod ibi in-
finuatum est, quia fundamentum non est causa pu-
rè materialis, & receptiua relationis, sicut materia
prima respectu formæ, sed sicut specificatiuum, vel
sicut præbens esse, & realitatem ipsi fundamēto, ad
eum modum quo accidentia habent substantiam
tanquam subiectum non purè recipiens, sicut ma-
teria prima, sed sicut subiectum sustentatiuum in
esse ipsius accidentis, tanquam habens esse perfe-
ctius, & simpliciter in se subsistens, ita vt esse acci-
dentis quod est esse secundum quid, perficiatur ex
dependentia ab illo, tanquam ex formaliore, & per-
fectiori esse. Relatio autem non solum quatenus ac-
cidens est, indiget sustentari à subiecto tanquam à
perfectiori esse in se subsistente, sed quia minima
entitas est inter omnia entia, indiget præter subie-
ctum in quo inhaeret, & à quo sustentatur in esse,
fundamento à quo tanquam à causa specificatiua,
& determinatiua fundetur, vt realiter dicatur ad
aliud, vt explicauimus cit. loco logica art. 2. quia cum
relatio sit entitas tertia, & media inter duo extre-
ma, dependet ex illis eius specificatio, & non solum
à subiecto eius inhaerentia, & existentia.

Ex hoc autem deducitur quod licet inter ipsas 18
relationes vna sit perfectior altera in sua specie, nō
tamen potest vna fundare alteram, quia hoc quod
est relationem requirere fundamentum perfectius
se & specificatiuum sui, oritur ex ratione communi
toti generi relatiuorum, quia videlicet tam minime
entitatis est, quod nec sibi sufficiat sola, nec solum
subiectum illi sufficiat, sed adhuc indigeat coordi-
natione extremorum, & fundamento accepto ex
entitate absoluta, siquidem totum genus relationū
realium exigit fundamentum, quod vtique debet
esse aliquid non relatiuum, cum sit extra totum ge-
nus relationis: exigitur enim à toto illo genere, non
ratione huius, vel illius specialis relationis: ergo li-
cēt vna relatio sit perfectior altera in ipso genere
ad, propter perfectiorem terminum vel fundamen-
tum, tamen in hoc quod est dependere in suo esse,
& specificatione non solum à subiecto, sicut reli-
qua accidentia, sed etiam à fundamento, omnes re-
lationes æquales sunt, quia hoc competit illis ex
ipsa ratione communi generis relatiui, quia tam mi-
nimæ entitatis est, vt fundamento indigeat. Vnde
perfectio vnius relationis in sua specie præ alia non
sufficit ad præbendum fundamētum relationi, quia
fundamentum perfectius esse debet in ipso modo
essendi, quàm modus essendi totius generis relati-
ui. Sicut vnum accidens licet sit perfectius altero in
linea, & ordine accidentis, tamen non potest vnum
accidens esse subiectum sustentatiuum, seu substans
alteri, in ipso esse, licet possit esse medium, vt vnum
accidens recipiatur in alio, sicut quantitas ad reci-
piendum colorem, & potentia ad recipiendum ha-
bitum vel actum. Et hoc idēd, quia subiectum su-
stentans, seu substans debet habere perfectius esse
quàm esse accidentis inhaerentis. Similiter ergo re-
latio ex genere suo non est sufficiens ad fundan-
dum aliam relationem, quia fundamentum debet
esse

perfectius, cum idē illud requirat relatio quia minimae entitatis est ex genere suo, & idē indiget non solum subiecto cui inhaereat, sed etiam entitate, ex qua resultet per comparationem ad aliud extremum, & hoc non pro hac, vel illa ratione, sed pro toto genere relationum.

Obicit Scotus: si in Deo esset inaequalitas illa, esset relatio realis: ergo etiam si est aequalitas; imō tunc est perfectissima aequalitas, & similitudo, quando est magis una quantitas, vel natura in qua fundatur: ergo ubi est perfectissima unitas in quantitate, erit perfectissima aequalitas. Quod verō sit realis relatio, patet, quia extrema sunt realiter distincta, & fundamentum est reale, & conuenit extremis absque opere intellectus: ergo habet omnes condiciones, ut sit relatio realis.

Confirmatur, quia secluso omni opere intellectus, Filius est realiter aequalis, & similis Patri: ergo per aliquam aequalitatem realem: sed aequalitas est relatio: ergo illa relatio est realis.

Et denique, quia aequalitas est perfectio simpliciter, & conuenit Filio ex vi productionis: ergo est realis. Neque est ratio cur in aliis generibus possit fundari relatio quantumcumque sint diminutae entitatis, non possint autē fundari in entitate ipsa relatiua. Et in diuinis relationes originis non fundantur immediatē super essentia: sic enim non essent distinctae inter se, quia fundamentum esset vnum, nempe essentia: ergo fundantur immediatē super relationes.

Respon. ad primum quod si esset in Deo inaequalitas, esset in Deo distincta quantitas, seu perfectio, & consequenter realis relatio. Nunc autem aequalitas resultat ex quantitate perfectionis, quae est omnino una; & sic non est relatio realis. Et cum dicitur quod est perfectissima aequalitas, ubi est perfectissima unitas; Respondeo quod est perfectissima aequalitas, perfectione quantitatis, & adaequationis, non formalitate respectus; perfectio autem, & conuenientia, seu unitas quantitatis solum est fundamentum relatiuae aequalitatis, non ipsa formalis respicientia: haec enim non est realiter in Deo, ut D. Th. docet loco cit. ad Anibaldum.

Ad secundum dicitur, quod inter condiciones

relationis realis debent computari extrema realiter distincta, non solum entitatiuē, & materialiter, sed etiam formaliter, scil. ut fundantia relationem, & ita fundamentum debet esse reale, non solum in entitate, sed etiam in distinctione, quia realiter debet esse distinctum, sicut & ipsa extrema, quia ex eo referuntur extrema realiter, quia fundamenta ipsa referuntur ut causa, & ratio, ex parte cuiuslibet extremi se tenens. Idem autem non potest esse ratio respiciendi seipsum realiter.

Ad confirm. Respon. Filium esse realiter aequalem Patri secundum realem respicientiam, nego; secundum realem conuenientiam, & communicationem adaequatam formae, concedo. Vnde sequitur quod per aequalitatem realem sint aequales, scil. per aequalitatem fundamentalem, seu entitatiuam in ratione unitatis, non per formalem respicientiam aequalitatis, & illa aequalitas per quam realiter sunt aequales, relatio non est, sed omnimoda unitas in eadem perfectione, & forma.

Ad tertiam dicitur, quod aequalitas est perfectio simpliciter sumpta pro unitate, & conuenientia reali perfectionis, & virtutis, quae est quantitas virtualis in Deo, non pro respicientia reali: sic enim potius aliquid imperfectionis exigit, scil. aliquam realem diuisionem in ipsa quantitate fundante talem respectum, ut bene notat Caiet. in hac q. 42. art. 1. in calce commentarij. Cur autem in aliis generibus non repugnet fundari relationes, & repugnet in ipsis relationibus fundari, alias iam supra diximus, rationemque adduximus ex D. Thom. De relationibus originis dicimus, non dari relationes originis fundatas super relationes personales: nec enim origines habent alias relationes quam ipsarum personarum, imō origines sunt ipsae relationes personales, ut generatio actiua est paternitas, solumque differunt, quia significantur origines, ut actio, & via producendi, relationes verō ut ratio in facto esse respiciendi: potiusque relationes ipsae personales fundantur in originibus, seu actionibus producendi, aut procedendi quantum ad exercitium respiciendi; & sic nunquam datur relatio realis fundata super aliam relationem.

QVÆSTIO XLIII.

De missione Personarum diuinarum.

SUMMA LITTERÆ.



LTIMA consideratio comparatiua Personarum diuinarum est in ordine ad creaturas, secundum quod dicuntur Personae ad creaturas mitti, vel ad eas venire, non quidem ad existendum in eis solum per immensitatem, & operationem creatiuam, qua existunt in omnibus creaturis, sed secundum manifestationem sui, & inhabitationem in creaturis. Et idē missio solum fit ad creaturas rationales. Et de hac missione tractat D. Thom. in hac quæst.

In articulo primo ostendit aliquibus personis diuinis conuenire mitti, quia & habent procedere à mittente, & habent aliquid de nouo ponere in creatura, quod pertinet ad terminum missionis, sicut habitudo ad mittentem pertinet ad originem, & processionem.

In artic. 2. ostendit quod missio non est æterna, sed temporalis, propter connotationem termini ad quem est missio, qui de nouo fit in creatura, licet supponat processionem ab æterno intra ipsum Deum, sed hæc non denominatur missio quousque ponatur terminus temporalis ad quem est missio.

In artic. 3. ostendit quòd missio inuisibilis ad animam solùm fit connotando effectum gratiæ sanctificantis, eo quòd missio inuisibilis est ad hoc vt personæ inhabitent in anima, taliter quòd illis possit anima frui, quod solùm habetur per gratiam sanctificantem.

In art. 4. ostendit quòd Pater non dicitur mitti, licet se communicet, & inhabitet per gratiam in anima, quòd persona Patris non procedit ab alio, & sic non est in anima per missionem quæ processionem ab alio importat.

In art. 5. ostendit quòd etiam Filio conuenit mitti inuisibiliter per gratiam ad animam, eo quòd inhabitat in anima, & anima fruitur illo, & ad hunc effectum procedit ab alia persona, scilicet à Patre, & hoc sufficit ad missionem.

In art. 6. ostendit quòd ad omnes qui sunt in gratia fit missio inuisibilis personarum, quatenus nouo modo per gratiam in illis existunt, & ad hoc procedunt.

In art. 7. ostendit quòd etiam Spiritui Sancto conuenit mitti visibiliter, & non solùm Filio: Filius enim missus est visibiliter per Incarnationem, per quam apparuit visibilis in carne, tanquam totius sanctificationis author. Spiritus S. autem missus est visibiliter apparendo in aliquibus signis sanctificationis, non autem assumendo naturam visibilem in vnitate suæ personæ.

In art. 8. ostendit quòd persona missa solùm mittitur ab ea à qua procedit quantum ad habitudinem processionis quam importat missio: sed tanquam ad terminum ad quem, seu effectum de nouo quem connotat, etiam à persona à qua non procedit, talis effectus fit, cum à tota Trinitate fiat.



DISPUTATIO XVII.

De missione Personarum diuinarum.

ARTICVLVS I.

Quid sit missio, & quibus personis conueniat?

MITTI diuinas personas frequentissime in Scriptura legitur, vt Ioan. 8. *Testimonium perhibet qui misit me* Pater. Ioan. 10. *Quem Pater sanctificauit, & misit in mundum*, & de Spiritu S. dicitur Ioan. 14. *Quem mittet Pater in nomine meo*, & Ioan. 16. *Si non abiero Paraclitus non veniet ad vos, si autem abiero, mittam eum ad vos*, & sic constat istas duas personas Filij & Spiritus S. ad creaturas mitti, siue missio ipsa visibilem effectum & manifestationem habeat, sicut cum Filius missus est ad incarnandum; siue inuisibilem, sicut cum mittitur ad sanctificandum animam, de quo dicemus postea. *Solus Pater*, vt dicit Aug. 2. *de Trinitate*, cap. 5. *nunquam legitur missus*.

Vt autem explicemus quid sit ista missio, & quibus personis conueniat, notandum est, missionem in communi loquendo, significare processionem, seu egressionem ab aliquo cum destinatione ad aliquem effectum, vel ad aliquem locum de nouo: ad id enim quod ante iam aliquis faciebat, vel vbi iam erat, non dicitur mitti, sicut legatus, vel procurator dicitur mitti à Principe ad aliquem locum cum potestate vel commissione, & nuntius dicitur mitti cum litteris ad alium. Vnde ad missionem concurrunt quatuor, scil. persona mittens, seu destinans, persona missa, terminus ad quem de nouo mittitur, egressio, seu processio eius, qui mittitur ad suam functionem. Potest autem dupliciter fieri ista missio, seu egressio ex parte personæ mittentis. Vno modo per imperium, quando scil. persona missa mouetur ad aliquid, & procedit vt subiecta, & inferior, sicut cum seruus ad aliquid faciendum, vel alicubi existendum mittitur. Secundo modo datur missio per modum puræ egressionis, seu originis sine imperio,

Ioan. à S. Thom. in 1. part. D. Th. Tom. alter.

sicut radius emittitur à sole, fluuius à fonte, & sic missio, seu emissio est emanatio ad aliquem terminum, vbi de nouo res ponitur, vel operatur.

Cum ergo missio importet istas duas habitudines, & origines ad mittentem, & connotationis noui effectus, seu noui modi existendi respectu termini ad quem mittitur, meritò queritur, quid principaliter, & formaliter importet missio, an ipsam processionem, & originem à persona mittente quæ in se æterna est, an functionem sui muneris, & effectum ipsum qui temporaliter fit, & pro quo ex his supponat missio? Ex quo dependent aliæ quæstiones, quæ ex resolutione huius dissoluentur, videlicet an missio sit formaliter aliquid notionale in Deo, quia si dicit positionem nouam effectus, pertinet ad virtutem efficiendi illum, quæ aliquid essenziale est; si vero dicit egressionem, vel originem à mittente, aliquid notionale est. Similiter an eadem persona possit mittere se, an solùm eam quæ procedit à se, & an solùm Trinitas mittat personas, vel vna persona aliâ: effectus enim missionis sunt cõmunes toti Trinitati.

Sunt duæ sententiæ in hac parte.

Prima dicit missionem supponere pro ipsa causatione effectus, quæ temporalis est. Hæc tribuitur Magistro in 1. dist. 15. & ibidem Bonauent. Scoto, & aliis, & idem sentire videtur ibidem D. Tho. q. 1. a. 2. approbans opinionem quæ dicit consistere missionem non in aliquo notionali, sed essentiali. *Et hoc*, inquit, *mihi verius videtur cõsiderata virtute vocabili: missio enim secundum rationem sui nominis non dicit exitum ab aliquo, sicut à principio à quo missio esse habeat, sed solùm in ordine ad effectum missionis ponitur auctoritas alicuius ad missum*. Et in 1. ad Anibal. dist. 15. q. unica art. 2. Alij, inquit, dicunt quod missio principaliter significat quod essenziale est, & hoc videtur verius: ponitque eandem rationem quam ex alio loco citauimus. Si ergo principaliter importat missio noui effectus designationem, & hic procedit non ab origine personarum, sed ab omnipotentia Dei, & in quantum vnus est: non ergo potest consistere formaliter in origine personæ & de connotato in effectum, sed positio effectus illius, est formaliter ipsa missio.

Fundamentum huius sententiæ sumitur ex duobus.

Primum ex eo quod insinuat *locus cit.* à D. Th. quia missio non importat exitum ab alio secundum originem, & productionem sui in esse: nec enim dicitur mitti aliquid per hoc quod producat, & fiat,

Cc sed

sed res quæ mittitur præsupponitur esse, & existere in se, & cum existens est, mittitur, vt patet cum mittitur seruus à suo domino: per talem enim missionem non producit, sed productus supponitur, & ad aliquod ministerium destinatur: sed per originem diuinam, personæ procedentes exeunt à suo principio quoad esse suum quod eis communicatur: ergo talis exitus, & origo non egressio est missionis, neque missio potest supponere pro tali exitu, qui sit origo secundum productionem, & esse.

Conf. quia missio simpliciter est temporalis, & supponit pro aliquo temporali, iuxta illud Galat. 4. *Quando venit plenitudo temporis misit Deus Filium suum*, &c. sed exitus, & origo notionalis personarum est æterna: ergo missio non supponit pro tali egressione.

Conf. secundò quia origines & processiones notionales in Deo sunt etiam naturales, & secundum actus naturales & necessarios ad intra: at verò missio est processio, seu egressio ab aliquo moralis, & morali modo facta, id est, secundum destinationem ad aliquod ministerium quod fit vel rogando, vel consulendo, vel inducendo, aut imperando ad modum, quo legati vel nuncij mittuntur, vnde dicitur Abdia 1. *Auditum audiui à Domino, & legatum ad genus misit*, vbi Glossa per legatum intelligit Christum Dominum qui mittitur: legatio autem non destinatur per actum naturalem, & productionem originis, sed per moralem actionem & influxum sic destinantem. Et multò minùs seruit ad missionem origo, seu exitus notionalis personarum à suo principio, quia per istam originem personæ manent intra mittentem, nec exeunt extra illum: Filius enim in Patre manet: de ratione autem missionis est quòd exeat & separetur à mittente, vt ex D. Hieronymo effert S. Tho. in 1. ad Anib. d. 15. q. 1. a. 1. ad 1. nam Hieronymus super c. 16. *Ezechielis*, ad illa verba, *Còuertam restituens ea*, sic inquit; *Quod coniunctum est & in vno corpore copulatum mitti non potest*: ergo processio illa quæ productum ponit intra mittentem, nequaquã seruit pro vera, & propria missione, sed est sola manifestatio effectus qui de nouo fit, ratione cuius mitti dicuntur personæ quæ per eos manifestantur.

Alia sententia, & à nobis tenenda, est quòd missio dicit, & supponit pro ipsa origine personarum, non quatenus sistit in personis originatis, & productis in se, sed quatenus extenditur ad temporalem personarum manifestationem & communicationem in creatura rationali, qui est nouus effectus, & modus essendi in creaturis, & hic effectus est quidem factus communiter à tota Trinitate, sed est conditio, & connotatio quædam requisita vt processio illa diuinæ personæ sit missio, sicut connotatio effectus creati est conditio requisita vt actus voluntatis diuinæ dicatur liber, qui in se entitatiuè necessarius est. Hæc conclusio deducitur ex D. Th. hic art. 2. præsertim solut. ad 3. docet enim S. Th. quòd missio importat habitudinem ad principium in ordine ad terminum temporalem; generatio autem & processio important habitudinem ad principium in ordine ad terminum æternum, quatenus procedunt intra Deum. Et addit solut. ad 2. quòd *Missio includit processionem æternam, & aliquid addit, scil. temporalem effectum: habitudo enim diuinæ personæ ad suum principium non est nisi ab æterno. Vnde gemina dicitur processio, æterna scil. & temporalis, non propter hoc quod habitudo ad principium gemitur, sed geminatio est ex parte termini temporalis & æterni.* Ita D. T. vbi satis clarè in ipsa processione æterna cum connotatione ad effectum temporalem ponit missionem, ita quòd eadem origo est processio, & missio, sed ex parte termini est diuersa, quia prout æterna, sistit in emanatione personæ, prout missio

extenditur ad manifestationem temporalem. Eadè ratione docet art. 4. Patrem non mitti, quia non importat originem ab alio, sicut Filius & Spiritus S. licet etiam faciat effectum temporalem, quem connotat missio aliarum personarum, scil. gratiam. Idem significat art. 8. dicens, quòd *non qualibet persona mittit, sed ea à qua est processio*. Eadem est sententia Durandi in 1. dist. 15. q. 3. & sine dubio Caiet. in hac q. art. 1. & 8. vbi ponit ad primariam intentionem, seu formalitatem missionis pertinere, quòd sit processio missi à mittente: sequitur Ferrar. 4. cōtra Gentil. c. 13. Bannez super art. 2. huius q. & communiter Thomistæ. Estque iste modus sentiendi conformior Scripturæ, & PP. & rationi. Scripturæ quidem, quia dicitur Ioan. 8. *Ego ex Deo processi & veni*. Ioan. 16. *Exiui à Patre & veni in mundum*; vbi ipsum venire in mundum mitti est, dicente Aug. lib. 2. de Trinit. c. 5. *A Patre exire, & venire in hunc mundum mitti est*. Hoc autem venire coniungitur cum processione ipsa, & egressione à Patre, quæ est ipsa eius notionalis origo. Est conformior Patribus: nā imprimis Hilarius lib. 9. de Trinit. hunc ipsū locum Ioan. 16. explanans: *A Patre, inquit, in hunc mundum venerat, quia à Deo exierat. Nam vt natiuitatem suam in exitione significasse intelligeret, subiicit se à Patre venisse; & cum per id à Patre venerit, quod à Deo exierit, exitio eius absoluta natiuitas est, quam paterni nominis est professio consecuta. Vbi ly per id à Patre venerit, quod à Deo exierit, manifestè ostendit venisse à Patre, quod pertinet ad missionem, esse ipsū exire à Patre cum professione, seu manifestatione paterni nominis.* Item Aug. 4. de Trinit. c. 20. *Non secundum imparem potestatem, vel substantiā, vel aliquid quod Deo Patri non sit æquale, missus est, sed secundum id quòd Filius à Patre est, non Pater à Filio: Verbum enim Patris est Filius, quod & Filius eius dicitur. Quid ergo mirum si mittitur, non quia inæqualis est Patri, sed quia est emanatio quedam claritatis Dei sincera?* Et inf. *Ab illo mittitur Dei Verbum, cuius est Verbum. Ab illo mittitur de quo natura est. Mittit qui genuit, mittitur quod genitum est. Et tunc unicuique mittitur, cum à quoquam cognoscitur, atque percipitur. Non ergo eo ipso quo de Patre natus est, missus dicitur Filius, sed vel eo quod apparuit huic mundo verbum caro factum, vnde dixit: Exiui à Patre, & veni in mundum, vel ex eo quod ex tempore cuiusque mente percipitur, sicut dictum est, mitte, illam vt mecum sit, & mecum laboret.* Vbi clarè Aug. totam nostram tradit sententiam.

Adiicio Gregorium Magnum homil. 26. in Euangelia super illud. *Sicut misit me viuens Pater. Eo ipso, inquit, à Patre Filius mitti dicitur, cum à Patre generatur.* Et infra loquens de Spiritu S. *Eius missio, ipsa processio est: quia de Patre procedit, & Filius.* Et Beda homilia 2. Dominica prima post Ascensionem lib. 2. homiliarum. *Cum gratia Spiritus S. datur hominibus, profectò mittitur Spiritus S. à Patre, & à Filio: à Filio procedit, & Patre, quia eius missio est ipsa processio.* Denique in Concilio Florentino cum in sess. 23. Marcus Ephesus proposuisset auctoritates quasdam ex S. Basilio, & S. Gregorio Nazianzeno, à quibus dicebatur Spiritum S. à Patre, & Filio mitti, non tamen procedere: in sessione 24. responsum est pro parte Latinorum à Ioanne Theologo, his Verbis: *Verbum, mittam, quid aliud obsecro significat, quàm quòd ex aliquo mittitur? Qui verò quidpiam mittit, is suum mittere videtur, & id quòd mittitur ex ipso esse. Ita etiam filius qui cum in generatione à consubstantiali Patre Spiritum S. accepisset, eandem & paternam facultatem, & naturam habens, eundem Spiritum mittere creditur.* Vbi responsio illa manifestè supponit missionem Spiritus

Spiritus S. à Filio probare processionem eius ab ipso, atque aded missionem pro ipsa origine, & processione notionali supponere, licet connotet effectum temporalem. Videndus est Athanasius in epistola ad Serapionem, quem citat S. Thom. opusc. 1. in titulo. *Quod Filius mittit Spiritum S. ubi inquit, Hic est ordo diuine nature à Patre & Filio, ut qui à nullo est, à nullo mittatur, & qui ab alio est, in nomine suo non veniat, sed in nomine illius à quo existit.*

7 Ratio denique pro hac parte suffragatur, quia ex Scriptura constat dari missionem personarum diuinarum, quæ missio non potest intelligi sine habitudine ad mittentem, à quo exit res missa, & habitudinem ad terminum quo mittitur & destinatur, ut de nouo ibi sit, vel aliquid faciat. Rursus ista missio, seu exitus à mittente non potest esse nisi vel moralis, & per moralem aliquem influxum aut destinationem, vel per physicam, & naturalem egressionem missi à mittente. Sed personæ diuinæ non potest intelligi quodd egrediantur per moralem destinationem & influxum: ergo per naturalem originem. Minor probatur: nam moralis destinatio & emissio vel est per imperium, sicut mittuntur inferiores, & Angeli dicuntur à Deo mitti, & hæc missio non conuenit personis diuinis, cum inferiores non sint. Vel est per orationem, & preces, sicut mittitur æqualis, vel superior, & hæc etiam non conuenit personis diuinis, quia vna persona non orat ad aliam, neque rogat, quia rogare indigentis est. Et cum Christus dicit. *Rogabo Patrem & alium Paraclitum dabit vobis*, de assumptæ carnis ministerio loquitur. Vel denique potest esse moralis missio per inductionem aut suasionem, vel commissionem alicuius autoritatis. Et hoc non conuenit personis diuinis, quia non possunt induci aut suaderi: ut enim argumentatur Aug. 2. *De Trinit. cap. 5. Quomodo misit Deus Filium suum? Insit ut veniret, an rogauit, an tantummodo admonuit? Sed quodlibet horum sit, verbo vtrique factum est. Dei autem verbum ipse est Dei filius.* Quare nulla moralis motio missionem hanc efficit: talis enim motio fit per propositionem obiecti, & representationem qua aliquid tanquam conueniens proponitur, ut alter moueatur, quod etiam in personis diuinis locum non habet, cum ex noua propositione obiecti persuaderi non possint, & consequenter neque ex vi moralis persuasionis mitti; & multo minus per commissionem alicuius autoritatis, quia personæ diuinæ non sunt capaces autoritatis commissæ, quia supremam & eandem habent autoritatem, sed solum possunt eam habere communicatam, sed hæc communicatio est per naturalem & notionalem originem. Nec obstat quod nos oramus Deum, & morali modo eum inducimus ad subueniendum nobis. Nam, ut S. Thom. dicit 2. 2. *quest. 83. art. 2. ad 1. & 2. Non est necessarium nos Deo preces porrigere, ut ei nostras ingentias, vel desideria manifestemus, sed ut nos ipsi consideremus in his ad diuinum auxilium esse recurrendum. Non oratio nostra ordinatur ad immutationem diuinæ dispositionis, sed ut obtineatur nostris precibus quod Deus disposuit.* Tales autem preces non habent locum in diuinis personis, quia eadem autoritate, dispositione, intelligentia & prouidentia vtuntur.

Conf. quia si missio non supponeret pro origine seu exitu à mittente, sed tantum pro manifestatione personæ in aliquo effectum, non esset ratio cur Pater non diceretur mitti, quod negat Aug. 2. *de Trinit. cap. 5. siquidem Pater etiam manifestatur & cognoscitur in aliquo effectum de nouo, in quo alia personæ manifestantur: solum autem non di-*

Ioan. à S. Thom. in 1. part. D. Th. Tomus alter,

citur mitti ex eo quod non habet originem ab illo sicut ipse Aug. dicit 4. *de Trinit. c. 20. Pater cum in tempore à quoquam cognoscitur, non dicitur missus: non enim habet de quo sit, aut ex quo procedat.* Ergo processio ab aliquo est de ratione missionis. Moralis est exclusa: ergo naturalis requiritur.

Ex quo soluntur fundamenta oppositæ sententiæ. Ad primum dicimus quod D. Thom. statuit in illis locis missionem, secundum denominationem quam habet ex termino ad quem: inde enim accipit denominationem missionis temporali; ipsa processio, seu origo personæ: nam, ut dicit in hac 9. art. 2. *Ea que important originem secundum habitudinem ad principium possunt determinare processionis terminum, & aliquando determinant terminum æternum, sicut ly generatio, & ly processio, aliquando temporalem, ut missio.* Sic ergo missio considerata secundum se, & secundum id quod dicit directe est processio notionalis; secundum denominationem autem qua denominatur missio, sic dicit effectum temporalem seu terminum, qui vtrique aliquid absolutum importat, scilicet effectum Dei ad extra. Vnde S. Thom. dist. illa 15. cit. in argumento, non dixit quod missio absolute, & simpliciter consistit in aliquo essentiali, & non in notionali, sed dixit quod *Missio considerata virtute vocabuli, videtur importare aliquid essentiali, scilicet productionem effectus*; eo quod missio non dicit processionem ad esse, sistendo in hoc, & sumendo denominationem missionis ex hoc solum quod sit processio quoad esse: hoc enim est considerare processionem secundum habitudinem ad terminum æternum, sed ex eo quod ista processio connotat terminum temporalem, quem connotat, & ad quem extenditur ipsa processio, ut in eo manifestetur, sic denominationem accipit missionis. Et sic considerauit illam in illis locis ex 1. sententiarum. Explicatius tamen in hac 9. eam considerauit secundum principalem, & essentiali rationem, seu, ut dixit Caietanus, secundum id quod est de prima intentione missionis, scilicet secundum habitudinem ad mittentem, à quo exit, quod pertinet ad originem, connotando tamen effectum temporalem, unde accipit denominationem.

Ad primum fundamentum ex ratione. Resp. 2 quod missio non est productio in esse ipsius rei missæ, quasi sistendo in ipso esse, ut in termino missionis, quem connotat, & à quo fit denominatio; bene tamen potest missio esse productio rei missæ cum connotatione, & extensione ad terminum temporalem extrinsecum, in quo manifestatur. Et licet in rebus creatis non detur talis missio, quia Deus non mittit creaturam, nisi per imperium, & secundum influxum, & destinationem, seu egressionem moralem, quæ supponit productionem physicam; unde neque Angeli ipsa creatione dicuntur mitti, sed postquam creati sunt: tamen in diuinis, ubi non potest esse missio per imperium, aut alium moralem influxum, ut ostensum est, oportet recurrere ad personarum processionem, & originem, quæ sua infinitate, & perfectione etiam missionem complectitur, prout extendi potest ad terminum temporalem, quem connotat pro sua manifestatione, sicut terminum æternum respicit pro sui emanatione; nec tamen specificatur missio ab illo termino temporali, quia secundarium quid est, & illum connotat ut effectum, sine quo denominatio missionis non est: sicut actus liber in Deo est ipsemet actus necessarius voluntatis prout extenditur liberè ad creaturam, habetque illam non pro obiecto specificatiuo sui, etiam ut liber est, sed pro connotato, & effectum, requisito tamen ad denominationem actus ut liber dicatur.

Cc 2

Ad

Ad primam Conf. Resp. missionem esse simpliciter temporalem, sicut productio, & creatio Dei dicuntur esse in tempore, quia denominatio fit ab actione cum termino producto, non sine illo, sic missio quia temporalem terminum habet, ab illo denominatur temporalis, licet in se sit ipsa notionalis & aeterna processio; & sic cum dicitur quod origo ista est aeterna, distingo, entitatiue concedo, terminatiue, respectu termini secundarij, nego. Eadem enim processio quae est aeterna in se & respectu termini primarij procedentis in esse, est ad terminum temporalem secundum quandam extensionem & connotationem, & ab eo denominatur missio temporalis.

Ad secundam Conf. Resp. processiones diuinas esse naturales in se, & respectu termini producti ab aeterno, non respectu termini connotati in tempore, & liberè facti: nam respectu eius solum respiciunt manifestationem sui, quae per liberos effectus fit, & hunc terminum connotat illa processio, vt missio sit. Nec requiritur quod missio fiat formaliter per influxum, & destinationem moralem, sed sufficit quod sit per naturalem emanationem, dummodo terminetur ad effectum temporalem liberè factum, vt in illo fiat manifestatio processionis aeternae. Missio autem creaturarum morali modo fit, quia per imperium aut inductionem, seu consultationem; & sic mittitur seruus, vel legatus, aut nuncius. Illud autem Abdiæ, *Legatum misit ad gentes*, vel intelligitur de missione ipsiusmet Prophetæ, vel si intelligitur de missione Christi, intelligi debet de missione ipsius in quantum homo: sic enim missus est à tota Trinitate per modum præcepti, & imperij, & potest habere rationem legati seu nuncij, vnde dicitur magni consilij Angelus, id est nuncius. Missio autem ipsius Filij vt fieret homo, non est per imperium, sed per processionem cum connotatione effectus manifestantis ipsum. Et cum dicitur quod processio est ad intra, & missio ad extra: Resp. hoc esse ratione diuersorum terminorum: dicitur enim esse ad intra secundum se, & vt attingit terminum aeternum, ad extra verò prout extenditur & connotat terminum temporalem, in quo manifestatur, sicut ratione primi termini est aeterna, ratione secundi, temporalis. Ad auctoritatem Hieronymi respondet D. Thom. *illo eodem loco*, quod loquitur de missione rei creatæ, & inferioris, quæ habet annexam hanc imperfectionem, vt separaretur à suo mittente, diuinæ autem personæ per missionem non separantur à mittente, sed manifestantur ad extra.

Corollaria ex dictis.

10 Ex his colligitur primò, quæ personæ dicantur mitti in diuinis; nimirum solæ personæ procedentes dicuntur mitti, quando manifestantur in aliquo opere ad extra: Pater verò non dicitur mitti, etsi manifestetur etiam ad extra, & seipsum det, aut veniat ad inhabitandum in anima cum alijs personis.

Ratio est, quia licet ille effectus ad extra, in quo fit manifestatio, aut communicatio personarum ad creaturas, sit communiter ab omnibus personis, tamen in illo manifestantur quædam personæ vt procedentes, persona verò Patris vt à nullo: ergo personæ procedentes in illo effectus, & manifestatione se habent vt missæ, id est, vt procedentes ad talem manifestationem, seu in illo effectus manifestatæ vt procedentes. Dicitur tamen in illo gratiæ effectus Pater venire, & inhabitare in creatura, sicut aliæ personæ, iuxta

illud Ioan. 14. *Si quis diligit me, diligetur à Patre meo, & ad eum veniemus, & mansionem apud eum faciemus*: non tamen per hoc dicitur Pater mitti, quia non manifestatur in illo effectus vt procedens ab alio, sed aliæ personæ ab ipso; & sic non vt missus manifestatur, sed vt mittens, vt ex Aug. 4. *de Trinit. c. 20. supra* retulimus, & D. Thom. affirmat *hic art. 4.*

Colligitur secundò non posse vnā personam, 12 mittere se, licet possit dare se, nec personas mitti à tota Trinitate, licet Christus, vt homo dici possit missus à Spiritu S. & à tota Trinitate.

Prima pars constat ex dictis, quia nulla persona procedit à se, ergo nec mittitur à se, quia missio exitum ab alio significat. Potest tamen missio inadæquatè sumpta, scil. pro sola productione effectus in quo manifestatur missio, attribui ipsimet personæ missæ, ita quod dicatur mittere seipsam, id est producere effectum in quo ipsa missio, seu communicatio personæ manifestetur, quo sensu id admittit S. Thom. *in 1. ad Anibal. dist. 15. quest. unica, art. 4.* Quare potest multo melius persona dare seipsam, etiam si non procedat ab alia, sicut Pater liberaliter se communicat creaturæ vt fruatur se, sicut docet D. Thom. *hic art. 4. ad 1.*

Secunda pars probatur, quia Christus, vt homo subiectus est Patri, & inferior, & minor Patri, & minister eius, iuxta illud Rom. 15. *Dice enim Christum Iesum ministrum fuisse circumcisionis*. Ergo potest mitti vt minister per præceptum, & imperium, & sic à tota Trinitate mittitur, quia tota Trinitas ei imperat, vnde etiam secundum quod homo mitti dicitur à Spiritu S. à quo aeternaliter non procedit iuxta illud Isai. 48. *Nunc autem misit me Dominus Deus, & Spiritus eius*, quod de Christo quoad humanam naturam intelligit D. Thom. *hic art. 8.* licet etiam intelligi aliquo modo possit quod persona Filij mittitur à Spiritu Sancto vt fiat homo, sicut & à se, scil. ratione effectus connotati, qui à tota Trinitate factus est, id est ipsius Incarnationis, vt S. Thom. *ibi* docet, & *in 1. dist. 15. quest. 3. art. 2.* quæ est missio sumpta pro eo quod secundarium & connotatum est in ea.

Colligitur tertio quomodo missio dicatur & pro quo supponat, an pro aliquo notionali, vel essentiali? de hoc enim D. Thom. *in sententiariis loco supra cit. circa dist. 1.* sentire videtur quod de principali non significat aliquid notionale, id est, ipsam processionem originis, qua vna persona procedit ab alia, sed aliquid essentielle, scil. productionem effectus, in quo manifestatur, processionem autem notionalem significare ex consequenti. Sed tamen *in hac qu. art. 1.* simpliciter fatetur D. Thom. missionem importare originem à mittente; saluat tamen *art. 8.* opinionem, quæ dicit personam mitti etiam ab ea, à qua non procedit, & consequenter non requirere seu explicare rationem originis, quatenus missio sumi potest inadæquatè pro effectus productione, ad quem terminatur missio vt ad manifestatum personæ. Et Caiet. dixit *ibi* quod D. Thom. saluat hanc opinionem considerando missionem, non secundum primariam rationem seu intentionem, sed iuxta secundariam, quæ explicat id quod de connotato significat missio ex parte termini. Et sic D. Thom. explicauit in hoc, quo sensu illam opinionem secutus fuerit *in sententiariis*, quam etiam saluat hic, nempe loquendo de missione ex parte termini connotati, à quo sumit processio aeterna denominationem missionis temporalis, vt iam *supra* explicauimus. Et in eodem sensu secutus est *in sententiariis* quod persona aliqua mittit se sumendo

do missionem pro effectu connotato producto, & ad missionem requisito.

ARTICVLVS II.

Quos effectus connotet missio, & quomodo diuidatur in visibilem, & in inuisibilem?

Supponendum est tanquam certum quod missio personarum non connotat solum effectum ordinis naturalis, & qui pertinet ad beneficium, & donum creationis.

Ratio huius est quia per creationem, & naturalium donorum largitionem manifestatur Deus in quantum vnus, scilicet eius bonitas, & sapientia, quia omnia opera ad extra procedunt a tota Trinitate per vnicam virtutem, & secundum eandem efficientiam qua accipiunt esse a Deo, non vero manifestant ipsam Trinitatem personarum. Ergo secundum talem processionem, personae non dicuntur mitti. Patet consequentia, quia missio personarum ordinatur ad hoc, ut personae nouae, & peculiari modo sint in creaturis, quo ante non erant. Hic autem nouus modus non consistit in hoc quod personae solum producant, & dent esse ad extra efficienter quodcumque illud sit: nam totum hoc pertinet ad existentiam earum in creaturis, ut sunt vnum per immensitatem, & operationem, qua cuiusque rei intime assistit diuinitas, & personae, prout sunt vnum in diuinitate dando illi esse. Et quia hoc fit per vnicam virtutem, & operationem, & vnicum attributum immensitatis, non per hoc personae existunt in creaturis ut distinctae, nec speciali modo quatenus plures, & distinctae sunt, nec ut manifestatae creaturis.

Quare ut optime S. Thom. aduertit in 1. dist. 15. qu. 4. art. 1. processio diuinae personae, quae dicitur missio, non attenditur in exitu rerum a suo principio, in quantum repraesentatur per similitudinem bonitas diuina in creatura; sed in reductione rationalis creaturae in Deum intelligitur processio diuinae personae quae est missio, praesertim missio inuisibilis in quantum propria relatio ipsius personae diuinae representatur in anima per lumen aliquod receptum, quod est exemplatum, & originatum ab ipsa Trinitate ad manifestandum se. Itaque effectus quem connotat missio personae, & quem requirit ut in creaturam persona diuina mittatur, non est considerandus praecise, secundum esse in quo effectiue procedit a Deo, & secundum respectum ad Deum, ut ad causam efficientem: sic enim sub hoc respectu non est necessaria missio personae, sed operationis efficientia: omnis autem operatio effectiua ad extra procedit ab omnipotentia Dei, & ab essentiali eius virtute ut vna, non autem secundum distinctionem, & originem personarum secundum quod vna est ab alia notionaliter: hoc enim ad efficientiam, & ad omnipotentiam non spectat, solum autem per omnipotentiam egreditur efficietia, & operatio. Sed oportet considerare effectum, qui respiciat Deum ut finem fruendum, & sic regrediatur ad ipsum in se, & in tali regressu ad Deum potius quam in egressu creaturae, vel gratiae a Deo attenditur communicatio, & manifestatio personae ipsi creaturae rationali facta, & haec missio quia in hoc est processio personae ut manifestata, nec enim manifestatur persona nisi ut comunicata, & fruenda; & sic gratia etiam ut habens esse a Deo, & effectiue manans ab ipso, non aliam communicatio-

nem, & manifestationem, seu modum existendi ipsius Dei petit, quam qui communis est omnibus creaturis, quatenus Deus est in ipsamet gratia tanquam in re effecta a se, & cui praebet esse per operationem suam. Sed quatenus per gratiam conuertimur ad Deum ut ad finem a nobis fruendum, sic respicit illum ut finem sibi communicatum, ut est in se, & Deus est in anima speciali modo, scilicet ut causa finalis fruenda, non solum ut efficiens, & dans esse. Et hoc modo procedunt personae usque ad creaturas quatenus eis manifestantur processiones illae, & distinctio personarum, quae sine processionibus non est. Quomodo vero in missione visibili personarum inueniatur ista conuersio creaturae rationalis ad personas, statim explicabitur.

His suppositis dicendum est primo. Missio ex parte effectuum temporalium, quos connotat, recte diuiditur in missionem visibilem, & inuisibilem. De vtraque agit S. Thom. in hac qu. & Theologi communiter in 1. dist. 15. Dicitur missio visibilis processio alicuius personae manifestatis se per effectus visibiles, sicut in incarnatione missus est Filius Dei, ut appareret in carne; & in missione Spiritus S. apparuit in specie columbae super Christum, quando baptizatus est, & in specie ignis super Apostolos in die Pentecostes. Missio inuisibilis est processio personae ad sanctificandum creaturam rationalem per donum gratiae inuisibilis. Et mediante hoc dono gratiae manifestatur ipsa persona procedens, & comunicatur ut fruenda, & possidenda ab anima hic in spe, in patria in re. Dari has duas missiones constat ex Scriptura. Nam de missione visibili per incarnationem constat ex supra dictis, ut cum dicitur Ioan. 10. *Quem Pater sanctificauit, & misit in mundum*; Galat. 4. *Quando venit plenitudo temporis, misit Deus Filium suum*. De missione autem Spiritus S. Ioan. 14. dicitur, *Quem mittet Pater in nomine meo*, & Ioan. 15. *Cum venerit Paraclitus quem ego mittam vobis a Patre*, &c. De missione inuisibili quae fit intus in corda dicitur Galat. 4. *Quoniam autem estis filii, misit Deus Spiritum Filii sui in corda vestra clamantem Abba Pater*. Et de ipsa genita sapientia dicitur Sapient. 9. *Mitte illam de caelis sanctis tuis, & a sede magnitudinis tuae; ut tecum sit, & tecum laboret*; & ut inquit August. 4. de Trinit. cap. 20. *Tunc Filius inuisibiliter mittitur, cum a quoquam cognoscitur atque percipitur*. Dicitur autem mitti ut laboret, inquit ibi August. id est, ut doceat me laborare, ne laborem: labores enim eius, virtutes sunt. De missione autem Spiritus S. constat quod ad sanctificandum rationalem creaturam missus est, quatenus in illa missione induti sunt Apostoli virtute ex alto, sicut illis Dominus promissit Actor. 1. itaque ut August. cit. loco, inquit, *per missionem inuisibilem gratia mittitur sapientia diuina, ut sit cum homine, per inuisibilem incarnationis missionem missa est sapientia, ut ipsa esset homo*.

Dico secundum: duae istae missiones, scilicet visibilis, & inuisibilis in tribus conueniunt, & in aliis tribus differunt.

Conueniunt primo in hoc quod vtraque ordinatur ad manifestationem personae diuinae missae & processionis eius.

Secundo, quod vtraque ordinatur ad communicationem specialem personarum diuinarum in creatura ad quam mittitur.

Tertio, quod vtraque ordinatur ad sanctificationem creaturae rationalis, per quam conuertitur in suum finem.

Differunt primo, quod missio visibilis fit in aliquo effectu sensibilibus exhibente & representante personam, siue assumendo illam in unitatem

personæ substantialiter, ut in Incarnatione, siue apparendo in illa, ut in signo talis personæ, & sanctificationis quam facit, ut in Spiritu S. Missio autem inuisibilis fit in aliquo effectu spirituali, & inuisibili, quo eleuatur creatura rationalis ad participationem ordinis diuini, & ad cognoscendum, & fruendum personis.

Secundò quòd per missionem visibilem persona diuina venit in hunc mundum, per inuisibilem autem non venit in mundum, sed facit homines esse extra mundum, & ad æternitatem transfert.

Tertiò quòd in missione visibili mittitur vna persona, & manifestatur sine alia: in missione autem inuisibili numquam vna sola persona mittitur, sed duæ procedentes, & Pater licet non mittatur, quia mitti non potest, venit tamen, & communicat se cum aliis ipsi animæ.

4 Prima pars huius conclusionis de conuenientiis vtriusque missionis declaratur: Nam missio personarum idè specialiter conuenit personis, quia aliquid specialiter per hoc eis cõuenit ad extra, quod non per communem operationem diuinitatis in creaturas: per efficientiam enim communem omnes personæ operantur ut vnum, & sic non potest ibi intelligi, quòd vna mittatur ab alia pro effectu illo faciendo. Debet ergo vna mitti ab alia, quando in effectu aliquo manifestatur vna persona esse ab alia. Hoc autem manifestatur in missione visibili, quia in humanitate assumpta manifesta est persona Filij quæ sola incarnata est, ex consequenti autem manifestatus est Pater, cuius Filius est, & Spiritus S. cuius virtute incarnatus est. In missione autem inuisibili manifestantur personæ, quia cognoscuntur, & possidentur ad fruitionem sui, hinc per fidem, postea per speciẽ. De secunda conuenientia constat, quia in incarnatione cõmunicata est persona Filij humanæ naturæ, assumendo illã in vnitatem personæ, & communicando illi suammet substantiam. In missione autem inuisibili communicantur personæ ut fruendæ, & possidendæ intus in corde, de quo *seq. art.* sicut dicitur Ioan. 14. *Ad eum veniemus, & mansionem apud eum faciemus:* & 1. Petri 1. *Magna & pretiosa nobis promissa donauit, ut per hac efficiamini diuinæ consortes naturæ,* quæ est maxima communicatio. De tertia conuenientia constat: nã missio visibilis Filij ordinata est ad redemptionem nostram, & sanctificationem, iuxta illud Galat. 4. *Misit Deus Filium suum factum ex muliere, factum sub lege, ut eos qui sub lege erant redimeret.* Missio etiam visibilis Spiritus S. ad sanctificandum Ecclesiam, & Apostolos ordinata est: nam, ut dicitur Act. 2. *Apparuerunt illis dispersitæ lingue tanquam ignis, seditque supra singulos eorum & repleti sunt omnes Spiritu S.* quæ vtrique repletio, sanctificatio fuit, promissa à Christo, Act. 1. *donec induamini virtute ex alio.* Missio autem inuisibilis tota est ad sanctificationem, quia solum est per gratiam sanctificantem, ut postea dicitur, & constat, quia missio inuisibilis diuinæ sapientiæ dicitur esse ut nobiscum sit, & nobiscum laboret. Sapient. 9. Et iterum de Spiritu S. Rom. 8. *Charitas Dei diffusa est in cordibus nostris per Spiritum S. qui datus est nobis,* & iterum ad Galat. 4. *Quoniam estis filij misit Deus Spiritum Filij sui in corda vestra.* Vnde rectè dicit D. Thom. in hac qu. art. 7. quòd Filius visibiliter missus est tanquam sanctificationis author, sed Spiritus S. tanquam sanctificationis indicium, quia videlicet apparuit in igne, & columba, ut ostenderet se sanctificare eos, ad quos mittebatur.

5 Secunda pars conclusionis etiam declaratur. Et quidem quoad primam differentiam satis manife-

sta est, cum in hoc differant missio visibilis, & inuisibilis, quod effectus vnus appareat extra, sicut Christus Dominus visus est in carne sensibilis, & Spiritus S. in specie columbæ, & ignis, quod totum oculis patuit, quamuis de illo igne an Spiritu tantum visus sit, an etiam oculis carnis, quæstionẽ esse posse August. dicat 2. de Trinit. c. 6. Sed ut est, corporalis manifestatio illa fuit, etiam si in imaginatione fait. Missio autem inuisibilis per gratiam intus in corde fit, nec per externam perficitur apparentiam. Secunda differentia ponitur propter auctoritatem August. 4. de Trinit. c. 20. vbi inquit. *Cum in carne manifestatus est Filius Dei, in hunc mundum missus est in plenitudine temporis factus ex femina. Cum autem ex tempore cuiusquam profectus mente percipitur, mitti quidem dicitur, sed non in hunc mundum: neque enim sensibilibus apparet, id est corporeis sensibus præsto est. Quia & nos secundum quòd mente aliquid æternum quantum possumus capimus, non in hoc mundo sumus. Et omnium iustorum spiritus etiam adhuc in carne viuendum in quantum diuina sapiunt non sunt in hoc mundo.* Quem locum adducit Magister in 1. dist. 15. & optimè id explicat S. Thom. ibidem qu. 4. art. 3. non quòd essentialiter, seu substantialiter anima ponatur extra mundum, cum in corpore sit quod informat, seu per conformationem est extra mundum, quia nõ conformatur affectus noster rebus mundanis, & caducis, sed iuxta quod Apost. dicit ad Philip. 3. *Nostri conuersatio in caelis est.* Sic ergo missio visibilis ad hoc ordinatur ut id quod diuinum est in mundo sit iuxta illud Ioan. 16. *Exiui à Patre, & veni in mundum.* Missio autem inuisibilis ordinatur, ad hoc ut noster affectus non sit de mundo, & tandem in plenitudine gloriæ etiam corporaliter sit supra mundum, iuxta quod subdit Christus ibidem: *Iterum relinquo mundum, & vado ad Patrem.* Denique de tertia differentia constat, quod per missionem visibilem vna persona est missa sine alia quoad effectum visibilis manifestationis: solus enim Filius visibilis apparuit quando incarnatus est, & solus Spiritus S. in specie columbæ & in igneis linguis apparuit, licet effectum ipsum incarnationis, & sanctificationis tota Trinitas operata sit. At verò in missione inuisibili, quæ fit per gratiam sanctificantem non mittitur vna persona sine alia: tum quia in habentibus gratiam omnes personæ simul inhabitant, non vna sine alia, iuxta illud Ioan. 14. *Si quis diligit me, diligetur à Patre meo, & ad eum veniemus, & mansionem apud eum faciemus,* sed inter has personas inhabitantes, duæ sunt procedentes: ergo, & missa in tali in habitatione. Patet consequentia, quia personæ quæ procedunt, & in aliquo speciali effectu manifestantur, hoc ipso dicuntur missæ: tum etiã quia in habentibus gratiam dona Spiritus S. tam ad intellectum quam voluntatem pertinentia connexa sunt: omnes enim qui sunt in gratia, habent omnia dona Spiritus S. ut docet S. Thom. 1. a. qu. 68. art. 2. & 5. Inter illa autem dona, quædam pertinent ad intellectum, ut donum intellectus, scientiæ, sapientiæ, consilij: alia ad voluntatẽ, ut fortitudinis, pietatis, timoris. Et quoad prima attẽditur missio Verbi, cuius processio est per intellectum; quoad secunda, missio Spiritus S. qui procedit per amorem. Vnde dicit D. Thom. in hac qu. art. 5. ad 3. quòd *Communicant duæ missiones in radice gratiæ sed distinguuntur in effectibus gratiæ, qui sunt illuminatio intellectus, & inflammatiõ affectus.* Et sic manifestum est quòd vna non potest esse sine alia, quia neutra est sine gratia gratum faciente, nec vna persona separatur ab alia. Idem docet in 1. dist. 15. qu. 4. art. 2. *Quia amor, inquit, semper sequitur notitiã perfectam,*

fectam, secundum quam est: & missio Filij semper inducit in amorem. Et videndus est etiam in 1. ad Anibal d. dist. 15. qu. unica art. 5.

6 Nec obstat quod aliquando videntur ista dona separari, & consequenter missio personarum, quæ secundum illa fit. Separantur quidem: nam dona pertinentia ad intellectum abundant in quibusdā, in quibus non est gratia, ut sunt omnes gratiæ gratis datæ, ut prophetia: sermo, scientiæ, interpretatio sermonum, loqui linguis, &c. quæ sunt gratiæ gratis datæ, nec per se requirunt gratiam sanctificantem. In aliis è conuerso abundat gratia sanctificans, & feruor Spiritus, & tamen sunt hebetes, & idiotæ; & sic non resplendet in ipsis missio Filij, quæ fit secundum dona sapientiæ, & intellectus: ut enim dicit S. Thom. *loco cit. ad Annibald. in argumento, Sed contra*, Filius præcipue mittitur, cū sapientia datur: ergo ubi non datur sapientia, nō datur missio Filij. Nec videtur posse dari istas missiones purè cōcomitanter, sed eo ordine quo procedūt in diuinis istæ personæ, scil. ut prius mittatur Filius quàm Spiritus S. cum quo non stat, quod primum donum sit ipse amor, & Spiritus S. ut dicit S. Thom. *supr. quest. 38. art. 1. si prius mittitur Filius, & consequenter datur.*

7 Respon. negando primum anteced. Et ad probationem, dico quod dona gratis data, quando sunt sine gratia sanctificante, non sufficiunt ad missionem personæ diuinæ simpliciter loquendo, sed secundum quid, quia, ut docet S. Thom. *in 1. dist. 15. qu. 4. art. 1. ad 3. & art. 2.* missio verbi fit ad hoc ut Verbum possideatur & habeatur ab homine, & in eo manifestetur. Verbum autem procedit ex cognitione ita perfectæ, quod spirat amorem. Vnde tunc perfectè habetur, & mittitur, cū manifestatur secundum cognitionem inductiuam amoris, secundum quem amorem coniungitur homo ipsi amato, quod solum fit per gratiam sanctificantem. Vnde sine tali dono, propriè non mittitur Filius. Videatur etiam 2. 2. qu. 8. art. 5. ad 3. ubi docet, quod *In Prophetis, qui non sunt in gratia, non est illustratio mentis quæ faciat rectam estimationem de ultimo fine:* quod propriè pertinet ad dona Spiritus S. in intellectu. Ad id verò quod dicitur de idiotis, & hebetibus, qui non videntur habere missionem Filij quæ fit secundum sapientiam, licet habeant gratiam: Respon. quod tales licet videantur idiotæ, & stulti quoad mundum, & quoad scientiam acquisitam, tamen habent scientiam Sanctorum, & prudentiam dirigendi vitam suam sine querela, & crimine, quod summæ prudentiæ, & magni consilij est, nec nisi à dono Spiritus S. procedit. Vnde dicit S. Thom. *dist. 15. cit. qu. 4. art. 2. ad 4.* quod illa *notitia ex qua procedit amor, viget in feruentibus diuino amore, quia scil. cognoscunt diuinam bonitatem in quantum est finis, & in quantum est in eos profluens largissimè sua beneficia, & talem notitiam perfectè non habent, qui amore ipsius non accenduntur.* Videatur quoque S. Thom. 2. 2. quest. 8. art. 4. ubi ostendit omnes qui sunt in gratia habere donum intellectus: licet enim patiantur hebetudinem circa aliqua quæ non sunt de necessitate salutis, tamen circa ea quæ sunt de necessitate salutis, sufficienter instruantur à Spiritu S. secundum illud 1. Ioannis 2. *Vntio docet vos de omnibus.* Vnde, & Apocolyp. 2. dicitur, *Dabo illi calculum candidum* (donum clarū, seu candorem intellectus,) & *in calculo nomen nouum, quod nemo scit nisi qui accipit.*

Ad id quod dicitur de ordine quo fiunt istæ missiones, cū primum donum sit amor, seu Spiritus S. dico, quod ex parte dantis primum donum quo inclinatur quis ad dandum, est ipse amor, sed ex

parte effectus dati, primum quod infunditur recipienti, non est amor, sed notitia qua cognoscat ut amet. Ille enim ad quem mittitur donum amoris non potest in amorem induci, nisi incipiat à notitia. Missio autem, & ordo eius magis attenditur secundum connotationem effectuum, quàm secundum dantis inclinationem. Quæ est solutio S. Th. *in 1. dist. 15. cit. qu. 4. art. 2. ad 2.*

Dico tertio: Missio inuisibilis simpliciter, & absolute non attenditur, nisi secundum dona gratiæ gratum facientis, licet secundum quid, & imperfectè etiam in non habentibus gratiam possit missio inuisibilis attendi.

Prima pars docetur clarè à D. Thom. *in hac qu. art. 3. ubi inquit, an missio inuisibilis fiat solum secundum donum gratiæ gratum facientis.* Et resoluit quod sic, & idem habet *in 1. dist. 14. qu. 2. art. 1.* Vnde superfluit eius verba adducere si specialem de hoc mouet quæstionem, & pro hac parte resoluit. Et est communis sententia inter Theologos, & videri possunt commentatores D. Thomæ *super artic. 3. huius q. ibi*, Bannez, Zumel, Nazarius, Torres, Molina, Vasquez, Suarez. *lib. 12. de Trinit. c. 5. Collegium Carmelitanum tract. 6. de Trinit. disp. 19. dub. 4.*

Fundamentum sumitur tum ex Scriptura, & PP. tum ex ratione D. Thom. supposito quod missio, ut dictum est, importat exitum seu processionem personæ ad existendum, vel manendum in creatura alio modo quo antea nō erat: missio enim ad aliquem terminum de nouo est, ubi ante non erat, vel non eo modo erat ille qui mittitur. Deus autem cū ubique sit per suam immensitatem, non potest mitti ad locum, ubi ante non erat, sed in omni loco existens, mitti dicitur ad nouo modo existendum, quo ante non erat in creatura: missio enim ad creaturam est, quia ad extra se est: ad intra enim non indiget mitti, cū semper in se maneat. Hoc supposito, constat ex Scriptura, quod ubi non est gratia, & sanctitas, Deus non dicitur esse, sed abesse, quia quantumcumque alia dona etiam supernaturalia in homine sint, quandiu non est gratia sanctificans, Deus est auersus, & longè ab homine: ergo non ad eum missus, nec in eo habitans. Minor. prob. nam ut dicitur Prouerb. 15. *longè est ab impiis Dominus, & Psal. 118. Longè à peccatoribus salus*, Sapient. 1. *In maleuolam animam non introibit sapientia, nec habitabit in corpore subdito peccatis.* Et iterum ibi, *Spiritus S. Disciplina effugiet fictum.* Cæterum est ergo quod ubi non est gratia sanctificans, Deus non est speciali modo existens, sed quasi elongatur, & abest non communicans illi animæ seipsum: ergo neque mittitur persona diuina ad existendum per specialem communicationē: nam non potest esse, quod fugiat ab aliquo, seu recedat, aut elongetur habendo illum pro termino à quo secundum specialem modum, & tamen mittatur, & accedat ad illum ut ad terminum ad quem, sed manendo ibi, & communicando se ibi speciali modo. E contra verò, quando quis est amicus Dei, & in eius gratia per charitatem, & verum amorem, Deus manet, & inhabitat ibi tanquam cum amico, speciali modo ei communicans, & conueniens illi: nā dicitur Ioan. 14. *Si quis diligit me, diligetur à Patre meo, & Pater meus diligit eum, & ad eum veniemus, & mansionem apud eum faciemus; & 1. Ioan. 4. Qui manet in charitate in Deo manet, & Deus in eo; & Roman. 5. Charitas Dei diffusa est in cordibus nostris per spiritum S. qui datus est nobis.* Vnde Aug. 15. de Trinit. c. 18. inquit, quod *Dantur alia munera per Spiritum S. sed sine charitate nihil profunt. Nisi ergo tantum imperietur cuique spiritus, et cum Dei*

& proximi faciat amatorem, non transfertur ad dexteram, neque spiritus propriè dicitur donum nisi propter dilectionem. Ex quibus authoritatibus constat, quòd nec sine gratia personæ mittuntur ad inhabitandum in anima, neque posita gratia stat non mitti personas, & inhabitare: solùm ergo per gratiam sanctificantem ista missio inuisibilis fit.

9 Secundò probatur eadem pars ratione D. Thom. in hac qu. art. 3. quia personæ diuinæ dicuntur mitti ad creaturas secundùm specialem modum, quo sunt in eis, præter communem modum, quo sunt in omnibus per immensitatem suam, qui modus existendi fundatur in operatione, & efficiètia, qua Deus immediatè dat omnibus esse, & vitam, & inspirationem & omnia, quia in ipso viuimus, & mouemur, & sumus, ut dicitur Actorum 17. & nos latè probauimus præced. tomo disp. 8. Præter hunc autem modum communem quo Deus existit in omnibus, datur specialis modus quo existit in creatura habitando in ea tanquam in templo, iuxta illud 1. ad Corinth. 3. *Nescitis quia templum Dei estis, & Spiritus S. habitat in vobis*, quatenus videlicet Deus intus in corde colitur, & adoratur tanquam vltimus finis per cognitionem, & amorem, seu fide, & operibus, sine quibus Deus interiùs nō colitur; & rursus homo coniungitur Deo, ut fini fruendo à se, & accipit potestatem ut liberè fruatur diuina persona: *dedi enim potestatem filios Dei fieri his qui credunt in nomine eius, qui non ex sanguinibus, neque ex voluntate carnis, neque ex voluntate viri, sed ex Deo nati sunt.* Ergo iste est specialis modus quo Deus est in creatura rationali sicut inhabitans in templo ubi colitur, & sicut manens in creatura, & communicans se illi ut fruendus. Hoc autem non habetur nisi per gratiam sanctificantem, quia solùm per illam homo coniungitur Deo, ut fini fruendo; & sic habet Deum inhabitantem in se ut finis cui coniungitur, & quem colit tanquam fruendus ab eo: solùm enim qui natus est ex Deo hanc habet potestatem: ergo solùm per hunc modum intelligitur persona mitti ad existendum in creatura: per hunc enim modum non solùm creatura exit à Deo effectiue, & habet esse ab ipso, sed etiam conuertitur ad Deum ut ad finem fruendum à se.

10 Secunda pars conclusionis, scil. quòd secundùm quid mittitur aut datur Spiritus S. per alia dona supernaturalia, quæ non sunt gratia sanctificans, sumitur ex D. Thom. in hac qu. art. 3. ad 2. & 3. ubi fatetur quòd *Filius licet cognosci possit à nobis per aliquos effectus, ut per fidem, vel scientiam, non tamen per istos effectus nos inhabitat, vel habetur à nobis.* Et cum dicat August. quòd tunc Filius mittitur, cum ex tempore mente percipitur, manifestum est quòd si percipitur aliquo modo extra gratiam, etiam aliquo modo mittitur. Vnde addit D. Thom. ibi ad 3. quòd si gratia miraculorū daretur sine gratia sanctificante, non diceretur dari simpliciter Spiritus S. nisi fortè cum aliqua determinatione. Datur ergo secundùm quid Spiritus S. licet non simpliciter sine gratia, nec principaliter, ut dicit etiam in 1. dist. 14. qu. 2. art. 2. ad 1.

Et ratio est, quia licet per fidem, & illuminationes, & alia auxilia supernaturalia nondum dicatur Deus esse in nobis ut inhabitans, & ut dans potestatem fruendi ipso: hæc enim potestas solùm datur his qui ita credunt, quòd etiam ex Deo nati sunt, est tamen ut mouens, & disponens ad hanc sanctificationem, & inhabitationem: ergo est iam ipsa sanctificatio ut in fieri, & initiatiue: ergo & inhabitatio, & missio personarum, quæ tunc mittuntur quando sanctificamur: ergo tunc dicuntur mitti inchoatiue, & in fieri, seu secundum quid,

quando incipit nos mouere, & disponere ad hanc inhabitationem. Vnde sequitur quòd cum per naturales effectus, & beneficia prout sunt purè ordinis naturæ non moueamur, nec disponamur ad gratiam, etiam remote, tanquam dispositione eiusdem ordinis, manifestum est quòd per ea etiam inchoatiue non dicuntur mitti personæ.

Dico quartò, Non solùm quando primò sanctificatur homo, sed etiam postquam sanctificatus est, quoties de nouo proficit homo in aliquo nouo statu, seu augmento gratiæ, siue extensiue, siue intensiue, fit noua missio personarum ad animam, seu creaturam intellectualem. Ita sumitur ex D. Tho. in hac qu. art. 6. ad 3. & 4. Et in hac conclusione duo sunt certa.

Primum est, missionem fieri etiam postquam quis sanctificatus est, superueniente nouo effectui, quatenus nouo modo aduenire dicuntur personæ & mitti. Constat hoc, nam B. Virgo sancta, & sanctissima erat, & gratia plena quando concepit Dei Filium, & tamen dixit illi Angelus Spiritus S. *superueniet in te*; superuentio autem Spiritus S. sine missione eius non est. Et Apostoli mundi erant, & in gratia in nocte cœnæ, & tamen dicebat illis Christus, quòd *mitteret ad eos Spiritum veritatis Paracletum, qui doceret eos omnem veritatem* Ioan. 15. & 16. & de facto sic fuit missus in die Pentecostes, Actorum 2. ergo datur noua missio, etiam post primam sanctificationem.

Secundum est quod ad missionem inuisibilem personarum, non solùm requiritur sanctificatio creaturæ rationalis, ratione cuius persona missa existat, & inhabitet in creatura ut colenda, & fruenda ab ipsa, sed etiam requiritur innouatio quædam seu nouitas existendi, eo quod missio sèper est ad hoc ut missus vel sit, ubi antea nō fuerat si per talem missionem moueatur ut res creata, vel si non moueatur ille qui mittitur, quia ubique est, saltem moueatur, seu immutetur de nouo ille ad quem mittitur, & sic nouo modo incipiat esse in eo ad quem mittitur, saltem per mutationem termini ad quem, si non per mutationem ipsius missi. Et hoc commune est etiam missioni visibili; sicut in incarnatione non fuit missus filius per mutationem sui, sed per mutationem creaturæ ad quam missus est. Et ita ad missionem, aliqua innouatio, seu nouitas in modo existendi requiritur, ut bene S. Thom. aduertit in hac quæst. art. 6. Si enim nulla nouitas est, sed supponitur persona illic esse, & supponitur eodem modo esse, sicut antea, non potest intelligi quòd mittatur: ad id enim quod iam habetur, & tali modo habetur, ita ut nihil restet de nouo quomodo missio intelligi potest? cum missio in rebus creatis sit motus ipsius missi ad aliquem terminum; motus autem essentialiter tendit ad terminum non habitum de facto, sed ad quem est in via, & in quo nondum quiescit; in rebus autem diuinis missio fit per motum non ipsiusmet missi, sed eius ad quem est missio, ut ratione huius nouitatis dicatur nouo modo esse is qui mittitur in tali re.

Difficultas esse potest, quando, aut quomodo intelligatur in creatura talis nouus modus proficiendi in ipsa sanctificatione, siue intensiue, siue extensiue, quod ratione illius persona de nouo detur & mittatur. Dicimus ergo cum D. Thom. art. 6. cit. ad 2. quòd in hac vita fit missio inuisibilis, etiam secundùm profectum virtutis aut augmentum gratiæ. Dicit enim August. 4. de Trinit. cap. 20. quòd *Tunc cuiquam mittitur Filius, cum à quoquam cognoscitur, atque percipitur quantum cognosci, & percipi potest pro capto, vel proficientis anima in Deum; vel*

vel perfecta anima rationalis in Deum. Vbi indifferenter, & absolute loquitur D. Thom. & D. Aug. de quocumque profectu, & augmento gratiae, tam intensiuo, quam extensiuo. Subdit autem S. D. quod *Secundum illud augmentum gratiae praecipue missio inuisibilis attenditur, quando aliquis proficit in aliquem nouum actum, vel nouum statum gratiae, ut puta cum proficit in gratia miraculorum aut prophetiae, vel in hoc quod ex fere charitatis exponit se martyrio, aut abrenunciat his quae possidet, aut quocumque opus arduum aggreditur.* Ita D. Thom. vbi secundum haec dicit praecipue attendi missionem inuisibilem, insinuans ex hoc, quod etiam secundum minutiora augmenta attenditur missio, sed non ita praecipue.

Ratio autem est, quia ex Scriptura constat mitti de nouo Spiritum S. ad eos qui iam sanctificati supponuntur: ergo fit missio ratione noui augmenti, quod vel esse potest intensiuum, ut cum in eadem gratia fit aliquis perfectior & radicalior, vel extensiuum, ut cum ad nouum aliquod munus, vel statum, aut gratiam gratis datam assumitur, ut cum accipit prophetiam, aut donum miraculorum, supponendo quod est in gratia. Eadem autem ratio currit de quocumque augmento gratiae, quia ibi concurrunt omnes conditiones ad missionem requisitae. Nam supponitur hominem esse in gratia, & accipere augmentum in ea, ratione cuius ipsa persona nouo & perfectiori modo se tradit fruendam, & sui perceptionem atque copiam facit maiorem, suique amorem feruentius excitat: ergo nouo modo se manifestat, aut communicat, vel transfert in animam: ergo mittitur, quia ad missionem sufficit quod aliqua persona detur ab alia secundum nouum modum existendi, & communicandi se creaturae, quod totum inuenitur vbicumque nouo augmento gratiae proficit anima. Praefertim vero cum excellentioribus actibus Deo appropinquat, & ex donis Spiritus S. operatur praefertim actus illos praestantiores donorum, qui vocantur beatitudines, ut cum omnibus renunciat, religiosusque efficitur, cum opera perfectionis facit, quibus aureolam specialem meretur, & similia, quibus familiariter Deo inhaeret.

¹³ Caterum quod attinet ad beatos, in quibus est gratia consummata, & perfecta, multo minus dubitari potest quod fiat ad eos missio inuisibilis, tum in initio beatitudinis, vbi perfectissimo & consummato modo Deus vnitur mentibus beatorum, eisque se manifestant personae, tum post beatitudinem adeptam penes varia charismata, & dona gratiae, quibus non iam intensiuè crescere potest, sed quoad aliquam extensionem. Sumitur haec resolutio ex D. Thom. *cit. art. 6. ad 3.* vbi inquit: *Ad beatos facta est missio inuisibilis in ipso principio beatitudinis. Postmodum autem ad eos fit missio inuisibilis, non secundum intensiorem gratiae, sed secundum quod aliqua mysteria eis reuelantur de nouo, quod est usque ad diem iudicii; quod quidem augmentum attenditur secundum intensiorem gratiae ad plura se extendentis.* Ratio autem huius est, quia in beatitudinis principio nouo modo incipit Deus esse intra beatos, scilicet per unionem essentiae suae in ratione speciei intelligibilis, & manifestationem suae diuinitatis, qua tunc fruitur beatus: ergo concurrunt omnia quae requiruntur ad missionem personarum, siquidem personae nouo modo manifestantur & communicantur creaturae secundum sanctificationem eius, & conuersionem creaturae ad Deum ut ad vltimum finem, quo fruitur tunc actualiter. Postmodum vero in progressu beatitudinis, accipit beatus aliquas nouas reuelationes extra ver-

bum, iuxta dispensationem diuinæ largitatis, & munificentiae, in quibus etiam communicatur Deus nouo modo secundum manifestationem aliquorum effectuum, qui ad ipsum statum beatitudinis ordinantur, vel iuxta illum debent cognosci à beato. Vnde si mitti dicitur persona diuina, quando fit noua manifestatio veritatis pertinentis ad statum, & ordinem gratiae, Spiritus S. missus est ad Apostolos, ut doceret eos omnem veritatem, ut dicitur Ioannis. 15. & 16. & similiter 1. Ioan. 2. dicitur *Vnctio docet vos de omnibus*, & ipse Filius dicit *se venisse in mundum ut testimonium perhibeat veritati*, Ioan. 18. & ad Prophetas frequenter dicitur factum esse verbum Domini. Factam esse manum Domini, &c. Si hoc ergo sufficit ut dicatur mitti persona diuina ad animam, quando sic proficit in agnitionem veritatis, supponendo gratiam sanctificantem in subiecto, quanto, magis cum in statu beatitudinis, vbi est consummata gratia sanctitatis plenissimae, & clarissimae reuelationes etiam extra verbum fiunt, dicuntur mitti de nouo personae quae talibus reuelationibus manifestant ea, quae pertinent ad ordinem gratiae, & docent tunc consummate omnem veritatem?

Soluntur argumenta.

Primo arguitur contra ea quae dicta sunt de missione visibili. Nam per missionem visibilem per se loquendo, in quantum visibilis, non fit manifestatio diuinæ personae, neque conuersio creaturae rationalis in Deum ut in finem vltimum, sed si id habetur, est per missionem inuisibilem gratiae, quae illi adiungitur: ergo per se, & ex propriis missio visibilis non est proprie missio. Consequenter probatur ex *suprà dictis* à nobis ex D. Thom. *in 1. dist. 15. quest. 4. art. 1.* quod missio attenditur in creatura rationali, non secundum processum creaturae à Deo in genere causae efficientis quoad est; sed secundum conuersionem & regressum creaturae rationalis in Deum ut in finem: si ergo hoc est commune omni missioni, oportet quod inueniatur in missione visibili, ut talis est, & ita si per se non inuenitur, per se missio non est. Anteced. vero prob. quia bene potest fieri incarnatio, sine manifestatione personae, ut si nemini Deus talem incarnationem reuelet, & manifestet, etiam ipsi animae assumptae: tunc enim mittetur persona ad incarnandum, & non ad se manifestandum. Similiter potest fieri incarnatio sine vlllo dono gratiae collato naturae assumptae, ut si assumeret naturam irrationalem, aut etiam naturam rationalem sine donis gratiae potest assumere, nec talem incarnationem ordinare ad hoc ut creaturae rationales sanctificentur, seu redimantur: ergo non est necesse quod missio fiat secundum sanctificationem, & conuersionem hominis in Deum.

¹⁵ Conf. quia ad Eucharistiam facta consecratione fit missio personae Filij, siquidem ibi existit de nouo corpus Christi ex vi conuersionis, & persona diuina per concomitantiam; & tamen illa missio nec est visibilis, quia ibi Christus non ponitur visibiliter, sed modo inuisibili; nec est inuisibilis, quia non est secundum infusionem gratiae in animam, quia ibi non est anima, sed solum substantia panis, quae conuertitur in corpus Christi, & accidentia eius, quae remanent. Et in sacramentis dicit D. Thomas non esse gratiam ut in subiecto, sed ut in instrumento: missio autem non fit nisi respectu termini in quo est gratia; unde ad sacramenta non fit missio

missio personarum diuinarum, ut docet S. Thom. in hac q. art. 6. ad 4. sed Eucharistia est Sacramentum: ergo ad illam non fit missio gratiarum quae est missio inuisibilis.

16 Conf. secundò, quia missio Spiritus S. etiam est visibilis, ut patet in die Pentecostes cum apparuit in igneis linguis, & super Christum, cum apparuit in specie columbae: sed in talibus creaturis non est facta aliqua manifestatio vel peculiaris modus existendi ipsius personae: ergo id non requiritur ad missionem, vel illa non fuit vera missio personae. Minor prob. nam in ipsis creaturis non fuit gratia sanctificans, quia erant creaturae irrationales, nec erant capaces gratiarum, quod autem per eas significaretur gratia sanctificans, quae daretur hominibus, non sufficit ad missionem visibilem: nam etiam hoc modo est gratia in Sacramentis ut in signis practicis gratiarum, nec tamen ad Sacramenta fit missio, ut iam diximus ex D. Tho. Nec etiam fuit in praedictis creaturis unio aliqua, & communicatio personarum diuinarum, quia non assumuntur ad unitatem personarum diuinarum. Quòd verò Deus sit in illis ut signum in suo signato, non petit missionem ipsiusmet personae realiter loquendo, quia signatum in signo non est realiter, sed intentionaliter & repraesentatiue, non fit autem realis missio si solum est repraesentatiua, quia in repraesentatione non requiritur quòd sit praesens persona repraesentata; praesertim si illae creaturae in quibus apparuit Spiritus S. non fuerunt verae, sed imaginariae.

Resp. ad principale argumentum, quòd missio visibilis etiam de se ordinatur ad sanctificationem creaturae rationalis, & manifestationem personae diuinae, licet per accidens possit actualiter non manifestare se ex parte intellectus creati: sufficit ad missionem quòd ponat effectum de se manifestatum: hoc autem incarnatio habet, quòd de se est manifestatiua personae incarnatae, & non Deitatis solum, ut una est. Similiter de se ordinatur ad sanctificandum creaturam, si sit capax sanctificationis, tum sanctificando naturam assumptam, etiam si omni dono accidentali careat per ipsam substantialem sanctitatem personae, tum in alios deriuando dona gratiarum tanquam author sanctificationis, & plenus gratia. Si autem vni-
ret sibi persona diuina naturam irrationalem & incapacem gratiarum, esset quidem ibi persona illa nouo modo in ratione suppositi, sed non in ratione personae, quia non mitteretur ad existendum & communicandum se illi, ut persona, & secundum dignitatem personae, sed praecise ut suppositum, & ut supplens vicem suppositi quod non est persona, quia naturae irrationalis est. Proprie autem non mittitur suppositum, sed persona, quia in missione operatur res missa ut intelligens, & cognoscens. Vnde licet in illo casu ille qui mittitur persona sit, tamen quia non mittitur in quantum personae gerit vices, sed ut supplens vicem suppositi, & non personae, idè illa proprie, & simpliciter non est missio, sed physica communicatio sui, seu nouus modus existendi ex parte noui effectus physici, non ex parte modi existendi, quasi illi cohabitans & coexistens, etiam morali modo & conuictu, qui est proprius personae intelligentis: licet enim non consistat missio in morali egressione ab alio per imperium, vel suasionem, requirit tamen ut is qui mittitur modo intellectuali, & ut persona, exeat, & procedat ad id ad quod mittitur. Vel secundò, dici potest quòd illa assumptio naturae inanimatae esset missio, quia licet non sanctificet

illam naturam formaliter in se, quia incapax est, est tamen de se illa actio ordinabilis ad sanctificandum alios, & hoc sufficit; sicut apparitio Spiritus Sancti in creaturis irrationabilibus, ut in columba, vel linguis igneis fuit missio, quia ordinabatur ad sanctificandum Apostolos, quanto magis si illas creaturas in unitatem personae assumeret. Et de facto Filius Dei in triduo mortis assumpsit corpus mortuum, & fuit missio, quia ordinabatur illa mors ad nostram sanctificationem, & nobis fuit salutaris.

Ad primam Conf. Resp. quòd de Sacramento Eucharistiae possumus loqui, vel quoad sumptionem, vel quoad consecrationem, quando ibi conuertitur panis in corpus Christi. Si loquamur de Sacramento quoad sumptionem, non est difficultas: sic enim mittitur persona, non ad ipsum Sacramentum (sicut nec ad alia quae in ipso usu, & operatione perficiuntur, quia ibi non est gratia: sed instrumenta sunt gratiae, ut ex D. Thoma, supra diximus,) sed ad personam sumentem Eucharistiam, quia datur ei gratiae augmentum: & consequenter mittuntur personae, sicut quandocumque datur gratia, aut augmentum gratiae, licet speciali modo mittatur ibi persona Filij, mediante carne sua sibi personaliter unita, & quae realiter sub illis speciebus coniungitur corpori sumentis. Sed tamen tota haec missio personae diuinae ad animam sumentis Eucharistiam mediante gratia fit. Si autem loquamur de existentia corporis Christi in Sacramento, per conuersionem panis in ipsum, duplex solutio adhiberi potest.

Prima quòd illa non est missio specialis personae Filij ad Sacramentum, sed est missio ipsius Christi ut homo, seu corporis eius, ut ibi existat: aliud est enim missio ipsius personae, ut nouo modo sit in aliquo, aliud est missio ipsius humanitatis, seu corporis Christi, quod tanquam quid creatum mittitur.

Secunda solutio est, quòd dato quòd illa conuersio, & transubstantiatio sit missio personae, pertinet ad missionem visibilem reductiue, quatenus corpus Christi, licet inuisibili modo hic sit, tamen in se sensibile est quoad substantiam, & hic visibilis redditur sub aliena specie; & sic est visibilis per aliud, non per se. Haec 2. solutio ex eo stabilitur, quia ista conuersio non est missio personae ad animam, sed ad existendum in Sacramento idem corpus, quod existit in caelo; ergo si ipsa persona hic mittitur ad corpus ut sacramentum, non est missio inuisibilis, quae est ad animam per gratiam, sed visibilis, quia est ad corpus, non suo modo proprio, sed modo alieno, id est, specie aliena manifestatum. Prima verò solutio explicatur sic, quòd licet corpus Christi alio modo existat in hoc Sacramento, quam in se; & sic mittatur ut sit ibi nouo modo, non per motum localem, sed per conuersionem panis in ipsum, tamen ipsa persona diuina non existit nouo modo in ipso corpore, & humanitate assumpta, sed per eandem unionem, qua in Incarnatione unita fuit persona Verbi illi corpori, eadem, & non alia, nec nouo modo unitur, & communicatur illi corpori in Sacramento, quia idem corpus est: non ergo de nouo mittitur persona diuina ad illud corpus, seu naturam assumptam, licet ipsum corpus nouo modo ponatur in Sacramento; sicut ex eo quòd corpus Christi in propria specie immutaretur, v. g. immutatione glorificationis in Transfiguratione, vel Resurrectione, aut immutatione Passionis, non ex hoc fiebat noua missio personae
ad

ad ipsum, quia non ex hoc immutabatur modus, quo persona diuina illam naturam, & corpus assumpsit.

18 Ad secundam Conf. Resp. negando minorem.

Ad probat. dicitur quod non dicitur fieri missio Spiritus S. ad illas creaturas visibiles, ut per eas demonstraretur gratia, sicut per Sacramenta, nec ut in eis esset gratia, sicut in anima ad quam fit missio inuisibilis, sed ut significaretur ipsa persona diuina in illo signo visibilis, quod ad hoc formatum fuit tunc, non ut repræsentaret gratiam, sed ut significaret personam Spiritus S. licet à tota Trinitate formata sit, imò, & ministerio Angelorum, sed non ad repræsentandum totam Trinitatem, vel Angelum, sed personam Spiritus S. Sacramenta autem sunt signa visibilia, non repræsentatiua diuinæ personæ, sed gratiæ, ad quam significandam imponuntur seu destinantur à Deo, & idè visibiliter dicitur apparere, & mitti Spiritus S. in istis creaturis, & non in Sacramentis. Quæ est solutio D. Thom. in hac q. art. 7. ad 2. & 5. Addit S. D. in 1. dist. 16. q. 1. art. 1. ad 1. missionem visibilem Spiritus S. fuisse in illam creaturam, non ut in id ad quod fit missio, sed ut ostendens solum missionem inuisibilem factam in aliquem; & idè non esse in illa creatura nouo modo, nisi ut in signo, sed est nouo modo in eo ad quem fit missio. Vbi ly *solum* non excludit à concomitantibus, scil. quod repræsentetur ibi etiam persona ipsa Spiritus S. non ut assumens illam naturam, sicut in Christo, sed ut sanctificans alios, & dans eis gratiam missione inuisibili.

19 Ad id autem quod dicitur Deum esse in illa creatura solum ut signatum in signo, quod non requirit realem missionem, sicut cum realiter vnitur natura personæ: Respon. quod licet illa missio non sit secundum tantam communicationem, sicut cum creatura assumitur in unitatem personæ, est tamen sufficiens ad missionem, quia in illa creatura repræsentatur Spiritus S. non ut absens, & solum repræsentatiue, ut in imagine picta, sed ut præsens, & ibi specialiter operans, sicut thronus in quo Rex sedet, & corona quam habet in capite repræsentant eius maiestatem, ut præsensem, & sic non est Rex in throno repræsentatiue, sed realiter, licet thronus repræsentatio sit sublimitatis eius: sic Spiritus S. in illis visibilibus creaturis tanquam in speciali suæ pietatis, & maiestatis throno repræsentatus est pro sanctificatione creaturæ, & idè specialiter ad illas ut ad repræsentatiuas visibiliter suæ maiestatis missus est. Illæ autem creaturæ non per solam imaginationem, sed visibiliter omnium oculis apparuerunt, & repræsentarunt Spiritum S. ut ex Aug. 2. de Trinit. cap. 6. docet S. Thom. in art. 7. cit. ad 2. quidquid sit an ille ignis fuerit verum elementum ignis, an exhalatio aliqua ignea: saltem enim fuit verum corpus, non imaginarium; & columbam illam quæ in Baptismo Christi apparuit fuisse verum animal, docet ex August. D. Thom. 3. p. q. 39. art. 7.

20 Secundò, arguit. Deus speciali modo potest esse in creaturis independenter à gratia sanctificante, vel saltem simili modo atque est per gratiam sanctificantem, sed tamen sine illa: ergo falsa est tertia conclusio, quod solum per gratiam sanctificantem fit missio diuinarum personarum. Anteced. probatur variis exemplis.

Primò, in B. Virgine, quæ ut esset mater Dei, & maneret virgo, Spiritus S. specialiter ad illam missus est, iuxta illud Luc. 1. *Spiritus S. superueniet in te*, &c. Ad rationem autem maternitatis diuinæ

secundum se non requiritur gratia sanctificans: bene enim posset nasci Christus ex matre non habente gratiam sanctificantem: ergo bene potest dari missio Spiritus S. inuisibilis sine gratia.

Secundò, in conuersione ad Deum, ut ad finem vltimum naturalem per cognitionem & amorem naturalem: ibi enim creatura conuertitur ad Deum ut ad finem, non solum exit ab ipso, ut ab efficiente, & Deus est in creatura ut amatum, & cognitum in cognoscente & amante, qui est specialis modus, quo Deus existit in creaturis rationalibus, ergo etiam sine gratia sanctificante personæ peculiari modo sunt in anima: ergo mittuntur ad illam. Et præsertim hoc vrget, quia in quibuscumque donis, etiam naturalibus datur ipse Dei amor, qui est primum liberalitatis donum, & in quocumque dono sic liberaliter collato, respicit creatura Deum speciali modo quo ante non respiciebat. Cur ergo hoc non sufficiet ut Deus speciali modo sit in creatura, & consequenter persona mittatur ad creaturam, si per amorem datur illi: quod enim sufficit ut detur, sufficit ut mittatur?

Tertiò, si aliquis haberet actum charitatis, & non gratiam in essentia animæ, diffunderetur charitas in illo per Spiritum S. ergo daretur Spiritus S. sine gratia; & sic sine illa mitteretur. Et qui iustificaretur per visionem beatificam sine habitu gratiæ, etiam haberet missionem Spiritus S. factam ad se, quia speciali modo esset in illa anima per iustificationem & beatitudinem: non ergo ista missio fit per sola dona gratiæ sanctificantis, sed etiam sine illis.

Quartò, qui habent fidem, & spem, prophetica cognitionem, & alias gratias gratis datas, non continuo habent gratiam, & tamen habent Deum ut amatum in amante, & cognitum in cognoscente etiam supernaturali cognitione: ergo Deus venit ad tales, & personæ mittuntur ad eos, ut modo speciali ibi sint, scil. ut amatum in amante. E contra verò potest quis esse in gratia, & non amare nec cognoscere Deum, ut paruuli baptizati: ergo esse in gratia, non facit Deum esse illo speciali modo ut amatum in amante, & cognitum in cognoscente, quia ly *cognito*, & ly *amatum* dicit actu amari & cognosci.

Resp. negando antecedens.

Ad primam probat. dicitur, quod Spiritus S. superuenit in Virgine, ut esset mater Dei, & attingeret sic ordinem hypostaticum, supponendo illam esse plenam gratia: sic enim prius Angelus eam gratia plenam nominauit, quam diceret Spiritum S. superuenturum in illam. Et sic dignitas maternitatis congruè & connaturaliter exigit sanctitatem, quia peruenit ad ipsum ordinem hypostaticum qui de se altiore formam sanctitatis importat. Quod si de potentia absoluta esset maternitas sine sanctitate, tunc non superueniret in eam Spiritus S. per modum missionis simpliciter, quia non inhabitaret in ea, sed secundum missionem secundum quid, quatenus efficeret tale donum maternitatis simul cum aliis personis, ratione cuius exigebat ad eam disponi per gratiam, & per ipsam missionem personarum; & sic in ipsa maternitate aliquid de personarum missione exigitur, saltem sicut ad alia dona supernaturalia disponentia ad gratiam, aut cum illa congruitatem habentia, ut de fide & spe, aliisque diuinis illustrationibus dicemus.

Ad secundam probationem dicimus, quod conuersio hominis ad Deum, ut finem naturalem cognitum, & amatum, non sufficit ad missionem personarum diuinarum, ob duplicem rationem. Primò quidem quia per cognitionem naturalem non manifestantur

nifestantur diuinæ personæ, nec cognoscuntur, sed solum per supernaturalem reuelationem, missio autem personarum diuinarum fit secundum effectus manifestatiuos earum. Secundò quia per cognitionem, & amorem naturalem dicitur quidem Deus cognitus & amatus denominatione quadam extrinseca, tanquam obiectum extra manens, non tamen ut cohabitans, & conuiuens ipsi homini, & ut fruendus ab eo, quod tamen ad missionem inuisibilem requiritur, per quam Deus est in homine, ut in templo, in quo colitur, & habitat, & ut fruendus ab homine, & in ipso mansionem habens iuxta illud Ioann. 14. *Ad eum veniemus, & mansionem apud eum faciemus.* Quod totum non fit per cognitionem, & amorem naturalem, per quem non datur ius & potestas filios Dei fieri.

Ad tertiam probationem: Resp. quòd in illo casu quo quis iustificaretur per actum visionis, vel charitatis sine qualitate gratiæ in essentia animæ recepta, haberet tamen virtualiter, & quasi radicaliter gratiam, quia haberet consummationem gratiæ sufficientem ad remissionem peccatorum, & actus connaturaliter, & de se exigentes gratiam in subiecto, & sic æquiualerent ipsi gratiæ, atque adeò missionem personarum haberent, quæ solum datur cum donis sanctificantis gratiæ, vel formaliter, vel æquiualeuter efficientis subiectum. Si autem illi actus non sufficerent reddere hominem iustificatum, saltem quoad omnes effectus iustificationis, diceretur mitti Spiritus S. non simpliciter, & perfectè, sed secundum quid, sicut in aliis effectibus supernaturalibus, qui non perueniunt ad gratiam iustificationis & sanctitatem perfectam.

Ad quartam probationem dicitur quod per fidem, & spem, prophetiam, & alia dona supernaturalia extra gratiam non mittuntur personæ diuinæ simpliciter, sed secundum quid, ut *suprà* explicauimus, quia licet per fidem, & prophetiam cognoscatur de Deo, & per spem desideretur Deus, tamen non perfectè amatur super omnia. Vnde secundum talem cognitionem & amorem non tractatur Deus, nec habetur ut inhabitans & manens intra, quia nondum à nobis habetur ut finis ultimi super omnia amatus, & consequenter nec ut fruendus, & amicabiliter nobis coniunctus; & sic non conuiuit nobiscum, sed cognoscitur ut extraneus, & desideratur languido, & efficaci amore, non sicut diligere & tractari debet Deus. Et ita adhuc longè est à tali corde in ratione conuiuentis & cohabitantis. Quòd si longè est, non accedit, nec coniungitur, ac proinde nec mittitur, quia missio ad accedendum est. Per fidem autem non viuam, sed mortuam non acceditur, nec tangitur Deus, licet attingatur & cognoscatur, & potius premitur quàm tangitur. Qui verò habitum gratiæ habent, & non actum, ut paruuli, vel dementes, habent in se Deum, & mittuntur ad eos personæ secundum talia dona, non quia actu ametur, sed habitu: hoc enim sufficit ut dicatur esse amatum in amante, scil. actu vel habitu, quia etiam ratione habitus gratiæ dedit eis potestatem, & ius fruendi Deo, scil. ut Filij Dei fiant, unde iam habet in se & intra se personas diuinas, ratione illius iuris, & potestatis, quam sibi dat gratia & filiatio Dei, ratione cuius habet intra se id quo debet frui, id est Deum; *regnum enim Dei intra vos est*, inquit Christus Dominus, Lucæ 17.

ARTICVLVS III.

Utum non solum dona gratiæ, sed etiam ipsa persona diuina detur, & existat realiter in anima ex vi missionis.

DE hac difficultate nonnulla tetigimus *præced.* *Tom. circa q. 8. d. 8. a. 6.* eiusque plenior resolutionem in hunc locum remisimus. In eius autem resolutione tradenda, vnum supponimus, & aliud controuertimus. Supponimus ut certum, quòd cum mittuntur personæ diuinæ, & dantur nobis, non solum dona creata gratiæ, sed etiam ipsa persona diuina & increata nobis datur, & peculiari aliquo modo est in anima, sic iusta & sancta, quo non est in aliis rebus in quibus generali modo suæ immensitatis est per essentiam, præsentiam, & potentiam. Difficultas verò est de modo isto peculiari quo est in anima sanctificata per gratiam, an sit præsentia realis & entiatua, ab immensitatis præsentia diuersa, sicut in humanitate Christi realis, & substantialis vnio datur præter immensitatis præsentiam; quod explicatur illa conditionali, an si per impossibile Deus non intelligeretur immensus, & vbique, tametsi infunderet alicui gratiam, deberet ei esse præsens realiter & intimè in sua substantia.

Præsuppositum, quod tanquam certum habemus, constat ex his quæ diximus *loco cit. præcedentis tom.* Et à D. Thom. ita habetur pro certo, ut oppositum errori adscribat, cum *in hac qu. art. 3. in argumento 1.* inferat pro inconuenienti, quod non donabitur ipsa persona diuina: quod, inquit, *est error dicentium, Spiritum S. non dari, sed dona eius.* Et eodem modo *in 1. dist. 14. in prima diuisione textus*, inquit, *Magistrum excludere ibi errorem dicentium Spiritum S. non dari in processione temporali, sed tantum dona eius.* Et ratio est, quia hoc planè Scriptura significat, tum quia dicit personas diuinas in nobis habitare, & ad nos venire. Ioan. 14. *Ad eum veniemus, & mansionem apud eum faciemus*; & de Spiritu S. dicit postea: *Apud vos manebit, & in vobis erit*: quod certè de donis gratiæ creatis non potest verificari, cum de ipsis personis dicatur, quod manebunt, & venient ad nos; de donis autem creatis id verificari non potest: tum quia dicitur Spiritus S. esse in nobis, ut in templo suo 1. ad Corinth. 3. *Nescitis, quia membra vestra templum sunt Spiritus S.* Et c. 6. *Membra vestra templum sunt Spiritus S. quem habetis à Deo, qui in vobis est*, &c. Tum denique, quia expressè distinguit Scriptura inter hoc quod est dari dona creata gratiæ, & dari ipsam personam increatam Spiritus S. cum dicitur Roman. 5. *Charitas Dei diffusa est in cordibus nostris per Spiritum S. qui datus est nobis*; quod frustra distingueretur inter charitatem diffusam, & Spiritum S. datum, si dari Spiritum S. non esset aliud, quàm dari dona gratiæ, seu charitatem diffundi. Ad stipulatur etiam autoritas Aug. 15. *de Trinitate c. 26.* vbi apertè dicit, *ipsum Deum dari, cum datur Spiritus S.* Et Ambrosij lib. 1. *de Spiritu S. c. 4.* vbi Spiritum S. qui datur dicit esse ipsum Deum, qui simplex est in substantia, & vbique totus, & concludit, *Quis ergo dubitet diuinum esse quod infunditur simul pluribus, nec videtur? gratia autem creata non infunditur simul pluribus, sed diuiditur singulis, prout Spiritus S. vult, ut ait Apostolus.* Has autoritates recitat Magister *in 1. dist. 14.*

Varia

*Varia sententia circa difficultatem,
eiusque resolutio.*

3 Duplex ergo sententia circa difficultatem supra positam versatur.

Prima tenet, missionem personarum ita personas ipsas dare in se, quod realem, & entitativam suae substantiae praesentiam habent in anima, praeter illam communem, quam ratione immensitatis in omni creatura Deus habet. Ita communiter discipuli D. Thom. Videri potest M. Gonzalez 1. p. qu. 8. disp. 18. Suarez lib. 12. de Trinit. cap. 5. Collegium Carmelitanum tract. 6. de Trinit. disp. 19. dub. 5. n. 80. qui citat Cornelium à Lapide super c. 1. Osee n. 12. & alios.

4 Secunda sententia tenet hunc peculiarem modum existentiae Dei in sanctis per gratiam de se non requirere praesentiam realem ipsius substantiae divinae in anima per coniunctionem, & unionem aliquam realem praeter praesentiam immensitatis, ita quod si Deus per impossibile non intelligeretur immensus, non sequeretur per locum intrinsecum, quod ratione gratiae sanctificantis, & amicitiae supernaturalis esset realiter praesens animae: quia unio gratiae, & amoris solum est effectiva, non substantialis. Ita P. Vasqu. 1. tom. 1. p. disp. 30. c. 3. & super hanc qu. 43. art. 3. in notatione art. & sequitur Pet. Alarcón hic tract. 5. de Trinit. disp. 9. cap. 9. qui citat Ruizium disp. 109. sect. 3. n. 8. qui tamen n. 11. oppositam probabilem censet.

Nostra conclusio sit: Missio diuinarum personarum etiam inuisibilis, & ratione gratiae facta in animam, necessario petit realem, & intimam praesentiam personae missae in ipsa anima praeter praesentiam communem immensitatis: haec enim manet etiam extincta gratia in homine peccatore. Requirit tamen praesuppositionem, & tanquam conditionem necessariam, immensitatem, quae remota, non posset illa praesentia realis erga gratiam resultare. Haec sententia sumitur ex D. Thom. quoad utramque partem. Et primo quoad primam partem desumitur in primis ex generalibus locutionibus, quia istum modum existendi per gratiam in creatura rationali ponit tanquam specialem, & potiorum ipso modo existendi communiter per immensitatem, quod non esset, si non esset existentia intima, & realis: nam sola praesentia moralis, quae comparatur cum absentia physica, non potest comparari cum praesentia illa reali, & intima per immensitatem, & tamen dicit D. Thom. supra qu. 8. art. 3. ad 4. quod *Sola gratia facit singularem modum essendi Deum in rebus*. Qui modus licet explicetur à D. Thoma per hoc quod sit sicut obiectum cognitum, & amatum, tamen cognitum, & amatum qui facit esse in rebus, plus dicit quam existentiam, seu praesentiam moralem. Et hunc ipsum modum explicans in 1. disp. 37. qu. 1. art. 2. illum numerat inter modos, quibus creatura realiter coniungitur Deo. Inquit enim quod *Isti modi quibus Deus existit in rebus distinguuntur ex parte creaturae in quantum diverso modo ordinatur in Deum, & coniungitur ei, non diversitate rationis tantum, sed realiter: cum enim Deus in rebus esse dicatur secundum quod eis aliquo modo applicatur, oportet, ut ubi est diversus coniunctionis, vel applicationis modus, ibi sit diversus modus essendi: Coniungitur autem creatura Deo tripliciter. Primo modo secundum similitudinem tantum, in quantum inuenitur in creatura aliqua similitudo divinae bonitatis, non quod attingat ipsum Deum secundum substantiam, & ista coniunctio inuenitur in omnibus creaturis divinam bonitatem assimilantibus; &*
Ioan. à S. Thom. in 1. part. D. Th. Tomus alter.

sic erit modus communis, quo Deus est in omnibus creaturis per essentiam, praesentiam, & potentiam. Secundo creatura attingit ad ipsum Deum secundum substantiam suam consideratum, & non secundum similitudinem tantum, & hoc est per operationem, scilicet quando aliquis fide adhaeret ipsi primae veritati, & charitate ipsi summae bonitati; & sic est alius modus quo Deus specialiter est in sanctis per gratiam. Ecce quam manifeste ponit D. Thom. etiam istum modum existendi per gratiam pertinere ad realem existentiam Dei in creatura, & specialem praesentiam ultra illam quae est in omnibus per immensitatem. Vnde dicit 4. contra Gentil. c. 18. quod *Spiritus S. secundum substantiam suam inhabitat mentem*. Et in 1. ad Anibal. disp. 14. qu. unica art. 3. quod *habetur aliquid per aliquem modum unionis, sicut habetur vestimentum vel albedo* (qui sunt modi praesentiae realis) *homo autem quando iustificatur, non solum unitur dono Dei, quod formaliter in anima recipitur, sed ipsi Deo per cognitionem, & amorem actualiter, quia qui adhaeret Deo unus spiritus est* 1. ad Corinth. 6. Denique id deducitur ex perfectissima ratione amoris, qui non est contentus affectiva unione ad obiectum amatum propterea tale obiectum est in apprehensione, sed quaerit unionem effectivam, & realem, qua coniungitur obiecto ipsi quantum potest, propterea tradit S. Thom. 1. 2. qu. 28. art. 1. & haec effectiva, & realis unio nascitur ex priori effectiva, & intentionali. Vnde cum missio Spiritus S. sit per amorem perfectissimum, non debuit sistere in unione effectiva, & morali, sed realem, & intimam exhibere, per suae substantiae praesentiam.

Nec obstat quod res spirituales à loco, & praesentia reali non dependent, ut se cognoscant, & se fruuntur, sicut duo Angeli possunt se frui, & seque communicare independentes à praesentia locali: ergo etiam Deus, si alias per impossibile immensus non esset, posset communicari, & possideri à creatura, etiam si praesens ei localiter, & substantialiter non esset.

Sed Respon. quod duo Angeli possunt se frui, & communicare quantum ad intentionalem communicationem, & quantum ad cognitionem, & amorem, etiam si sint absentes, non tamen quoad alias actiones, quae ex motu locali possunt dependere, & in quibus Angeli etiam communicare possunt, sicut unus Angelus potest alium mouere, religare, detinere, aut confortare viribus, & contra alium defendere: quae omnia sine praesentia locali fieri non possunt, & in his etiam communicare possunt Angeli, & sic ad perfectam communicationem requiritur praesentia localis, aut potestas, & libertas utendi illa: quin potius in hoc maxime puniuntur Angeli poena sensus ab igne, quia non relinquuntur libere uti sua praesentia motiva, & locali, ut infr. disp. 24. art. 3. dicitur. Deus autem etiam ad cognitionem sui, & fruitionem immediatam indiget intima praesentia, eo quod uniri debet per essentiam suam loco speciei menti creatae ut videatur, non sicut unus Angelus videt alium per speciem intentionalem; & interim dum non reuelatur, & unitur Deus menti beati, est tamen per gratiam iam possessus ab anima cum potestate, & iure talis unionis, quia quotquot receperunt eum, dedit eis potestatem filios Dei fieri, si autem filij, & haeredes, haereditas autem est visio Dei in se. De hoc postea plenius agetur.

Quoad secundam partem, quod iste modus, quo specialiter Deus est in anima, cum ad illam mittitur per gratiam, requirit, & praesupponit immensitatem, sine qua tanquam sine requisito non consurgeret iste novus, & specialis modus existendi

in anima, est etiam D. Thom. in 1. dist. 37. qu. 1. art. 1. ad 3. ubi inquit, quod *illi tres modi* (scilicet existendi per essentiam, præsentiam, & potentiam) *omnem creaturam consequuntur, & præsupponuntur etiam in aliis modis. In quo enim est Deus per unionem, etiam est per gratiam, & ubi est per gratiam, etiam est per essentiam, præsentiam, & potentiam.* Videri etiam potest in 1. ad Anibald. distinct. 37. quæst. 1. artic. 2. ad 1. & 3.

7 Fundamentum conclusionis sumitur ex duobus quæ in ista missione personarum, & inhabitatione per gratiam concurrunt, quæ sine reali, & intima Dei præsentia saluari non possunt. Nec enim præsentia hæc in Deo potest intelligi per aliquam mutationem in ipso, quasi de nouo acquirat eam in se, sed per nouam mutationem creaturæ, quatenus nascitur in ea nouus respectus realis coniunctionis ad Deum, & ista realis coniunctio, & immutatio creaturæ ad Deum, dicitur præsentia, seu existentia eius realis, & specialis, ut optimè notat D. Thom. in 1. dist. 14. qu. 2. art. 1. ad 1. & 2. & 3. Quare non solum attendimus ad nouum effectum positum in creatura, quatenus recipit in se dona gratiæ, sed ad nouum respectum, quo creatura non sinit in ipsis donis, sed tendit in eum à quo dantur dona, ut ibidem dicit ad 2. Et sic pro ista noua vnione reali ad Deum, sufficit assignare in creatura nouum ordinem, & respectum, quo creatura vnitur Deo, seu præsens illi sit: omnis enim præsentia Dei ad creaturam fit per aliquem effectum, seu mutationem ex parte creaturæ, quo coniungitur Deo in se, sicut mediante esse quod recipit à Deo fit præsens ei præsentia communi immensitatis, & mediante assumptione vnitiua, & applicatiua humanitatis ad personalitatem Verbi fit ei coniuncta in persona, & specialissimè præsens, & mediante gratia, & lumine gloriæ fit ei coniunctus & vnitus Deus. Restat ergo pro fundamento conclusionis explicare, qua vnione fiat præsens Deus mediante effectui gratiæ, quia hæc non ita manifesta est sicut in vnione personæ diuinæ ad humanitatem in esse personali, & in præsentia immensitatis ad existentes creaturas, & ad esse quod illis datur.

8 Dico ergo, quod vnio ista, & præsentia specialis Dei in anima supra præsentiam immensitatis est, & distincta ab illa, licet necessariò illam præsupponat. Consideratur autem dupliciter: Primò, quando est perfecta, & consummata, scilicet in gloria, & tunc manifestè constat esse vnionem realem in ratione obiecti intelligibilis, quia vnitur ibi diuina essentia loco speciei, redditque intellectum intimè formarum ipsa diuinitate in ratione obiecti intelligibilis, ubi præsentiam hanc, & vnionem Dei ad animam realem esse dubitari non potest, cum ipsa diuina essentia vicem speciei, seu formæ intelligibilis habeat in quantum obiectum est concurrens intimè cum ipsa potentia intellectiua ad eliciendum actum visionis, quod sine actuacione, & informatione ipsius intellectus in esse intelligibili stare non potest, ut latè explicauimus *preced. tomo disp. 12.* Est autem distincta præsentia, & coniunctio Dei ab ipso contactu, & præsentia quam habet per immensitatem, tum quia tota hæc præsentia immensitatis habetur in anima nostra sine visione gloriæ, ut patet in nobis quando sumus in via: tum quia præsentia, & contactus immensitatis habetur per hoc quod Deus coniungitur in ratione agentis dantis immediatè, & intimè ipsum esse effectibus, & sic sine vlla dispositione media redditur Deus præsens; sed quia immediatè est operans in omnia. At verò vnio, & præsentia Dei in ratione speciei intelligibilis ad intellectum non est in ra-

tione agentis, sed obiecti manifestati; & sic supponit esse, & existentiam in eo cui manifestatur: ergo, & contactum immensitatis, quo operatur dando esse illi rei, cui est præsens. Supponit etiam in intellectu beati, cui coniungitur, dispositionem aliquam, media qua fit illa vnio, & præsentia Dei, & sine illa non fit, nempe lumen gloriæ. Et sic diuersus contactus est iste, & præsentia ab ea quæ fit per immensitatem, quæ dispositionem vllam non requirit ex parte creaturæ, cum totum esse det: licet supponat contactum istum in ratione agentis dantis esse, quatenus ipsum lumen gloriæ, & ipsam gratiam Deus efficit, & dando illi esse, tangit illam in ratione agentis, sicut alia omnia quibus esse dat.

Secundò consideratur hæc præsentia Dei non ita perfecta, & consummata, sed adhuc imperfecta, & in via, quando ambulamus per fidem, & non per speciem, & ita non vnitur Deus realiter nostro intellectui in ratione speciei intelligibilis, nec in ratione obiecti quo fruimur de facto, & consummatè, & idèò difficilè intelligitur alius modus vnionis seu præsentia realis præter immensitatem, & præter contactum illum, quo producit gratiam in esse, & existit in illa. Et quidem D. Thom. explicat hunc modum specialem essendi præsentia in anima per hoc quod est in ipsa, sicut cognitum in cognoscente, & amatum in amante. Quod idèò fecit D. Thom. ut per hoc poneret differentiam inter hanc præsentiam, & præsentiam immensitatis, per quam est præsens, & habet contactum sicut causa agens suo effectui immediato, per istam verò est præsens Deus ut obiectum cognitum, & amatum intra animam, diuersa autem præsentia est agentis, & obiecti. Cæterum in duobus est difficultas ad explicandam hanc realem præsentiam ex vi huius præsentia in ratione cogniti, & amati. Primò quidem quia esse cognitum, & amatum solum dicunt denominationem extrinsecam in obiecto quantumcumque cognoscatur Deus per gratiam, & supernaturalem cognitionem. Vnde ergo inferunt realem, & intimam præsentiam? Quod si hoc explicetur de cognitione, & amore fructiuo, in primis obstat, quod pro hac vita non fruimur Deo realiter, sed in spe, & in radice gratiæ: ergo talis fructio non requirit coniunctionem realem: nam etiam inter duos homines, quando fruuntur se se, solum in intentione, & spe, non requiritur præsentia realis, & corporea: obstat secundo quod ad fruitionem rerum spiritualium nihil conducit præsentia locorum, & realis, quia potest vnus Angelus perfectissimè alterum contemplari, & amare etiam si longè sit distans. Ergo si per impossibile Deus non esset ubique, sed absens in cælo, possemus per fidem, & charitatem ipsi coniungi, & eo frui fruitione imperfecta viæ, sicut coniungitur Christi humanitati per fidem, & amorem, & Beatissimæ Virgini, qui tamen corporaliter, & realiter sunt in cælo. Secundò est difficultas, quia licet amor quando perfectus est, desideret, & quærat ardentè præsentiam amati, idèòque ex vnione affectiua fiat tendentia ad præsentiam effectiuam, & realem, ut bene S. Tho. dicit 1. 2. qu. 28. art. 1. tamen quādo ipsa realis præsentia amati consequitur, non per ipsum amorem fit tanquam per rationem formalem, neque tanquam per dispositionem mediante qua amatum fit præsens, sicut mediante lumine gloriæ diuina essentia vnitur intellectui: sed quando amans peruenit ad præsentiam amati, habet illam per corporalem contactum, si sit res corporea, sicut habetur pecunia, vel vxor, non per ipsum actum amoris, tanquam per rationem formalem vel dispositionem,

nem, mediante qua vniatur, & coniungatur sibi res possessa, sed per præsentiā, vel contactum corporeum appropinquat vel coniungitur res amata ipsi amanti, licet ex amore, si perfectus, & efficax sit, moueatur amans ad quærendam præsentiā rei amatae, quæ tamen præsentiā per corporalem contactum exhibetur. Et in hoc puncto videntur laborare difficultate ferè omnes qui istam præsentiā, & vniōem realem Dei ad animam conantur explicare per ipsum amorem quatenus perfectissimus est, & exigit præsentiā amicabilem ipsorum amantium: hoc enim verum est quod amor talem præsentiā exigit, & quærit, sed non formaliter facit: nec enim solus amor est ratio faciendi præsentes realiter ipsos amantes, sed quando fiunt realiter præsentes, id fit per contactum, & præsentiā corporealem, quam amans ex amore quærit, non amore constituitur præsens. Restat ergo his Authoribus assignare formalem rationem, qua Deus nos amans amore illo perfecto realiter coniungatur animæ amanti in ratione cogniti, & amati: vt etiam notauimus citata disp. 8. art. 6. in tomo preced.

Quare D. Thom. qui præter illum communem modum existendi per immensitatem in rebus, quem in præsenti q. art. 3. dicit esse sicut existentiam causæ in effectibus participantibus bonitatem ipsius, posuit specialem modum existendi per gratiam, quod fit tanquam cognitum in cognoscente, & amatum in amante, addidit, quod *debet Deus existere in anima tanquam habitus, & possessus ab ipsa, & tunc aliquid dicimur habere, quando potestatem habemus eo liberè vtendi, vel fruendi*, nec possumus liberè frui eo quod in nobis non est. Hoc quomodo inferat præsentiā realem Dei secundum substantiam ex vi huius, etiam si aliàs immensus non consideraretur, præsertim cum in rebus spiritalibus, tentio ista, & possessio non videatur dependens à præsentiā intima secundum substantiam, operosius inquirendum est.

10 Dico ergo, quod iste modus existendi licet sit distinctus à modo existendi per immensitatem, & superaddat ad illum, tamen necessariò præsupponit illum, & supposito contactu, & existentia Dei intima intra animam, nouo modo efficitur Deus præsens mediante gratia vt obiectum experimentaliter cognoscibile, & fruibile intra animam, sicut si anima nostra quam intimè nobis præsensem habemus, vt radicem, & principium omnium operationum, reddatur etiam nobis præsens, & manifestata vt obiectum, non quomodocumque cognitum, & obiectiue attactum, sed vt obiectum nobis intimum, & quod est radix nostri esse, nostræque operationis; & sic cognoscitur quodam experimentaliter tactu, & cognitione: sicut etiam substantia Angeli dupliciter vnitur suo intellectui, & vt subiectum, seu radix illius cui intellectus inhæret, sicut omnia accidentia, & proprietates quæ vniuntur substantiæ, & ab ea dimanant, & vt obiectum quatenus informat intellectum vice speciei; & sic est in intellectu vt obiectum cognitum, & amatum, non quomodocumque, sed vt cognitum, & amatum intra, & per quandam intimam experientiam sui, sicut id quod est radix, & principium sui intrinsecum. Sed hæc experimentalis cognitio suæ substantiæ in Angelo est semper manifesta, & intuitiua, quia caret corpore, à cuius conuersione dependeat in cognoscendo; in nostra autem anima potest esse experimentalis cognitio, sed obscura quantum ad quidditatem quandiu sumus dependentes à corpore in cognoscendo. Talis ergo modus experimentalis cognitionis, & amoris respectu alicuius obiecti cogniti, & amati, vt radicis, & prin-

Ioan. à S. Thom. in 1. part. D. Th. Tomus alter.

cipij intimi sui proprii esse, necessariò exigit realem, & substantialem præsentiā in esse obiecti, quia aliter non potest esse cognitum experimentaliter, & intimè, siue hæc experimentalis cognitio sit adhuc ineuidens, & latens, siue sit intuitiua, & clara, quia est cognitio experimentalis rei sibi omnino intimæ, & quæ est radix sui esse; sed non exercet præsentiā solum influendo, & agendo, sed influentiam, & præsentiā hanc manifestando, & ostendendo, & in ratione obiecti intimi, & præsensis se fruendo.

11 Applicando ergo istam doctrinam præsentiæ diuinæ, considerandum est, quod Deus ratione suæ immensitatis, & contactus, quo intimè tangit omnes effectus, & dat illis esse, habet se vt radix omnis creaturæ, & vt vitis influens in palmites, non per modum formæ informantis, sicut anima nostra adest nobis, sed sicut agens à quo datur, & influit totum esse in creaturas, vt ab vniuersali principio, & radice omnium: sic enim appellatur in Scriptura, vt cum dicitur ad Hebr. 1. *Portans omnia verbo virtutis suæ*; & ad Roman. 11. *Non tu radicem portas, sed radix es*; ad Colossens. 1. *Ipsa est ante omnes, & omnia in ipso constant*; Actorum 17. *Non longe est ab unoquoque nostrum: in ipso enim viuimus, & mouemur, & sumus*. Hoc ergo modo existit Deus in omnibus quasi radix occulta, & principium omnibus dans esse magis intimum, quam forma quælibet suæ materiæ, & substantia accidenti, quia omnia intimè replet, & penetrat dando esse; nec se habet secundum hanc considerationem, vt amicus conuiuens aut particulariter se communicans, sed vt principium vniuersale omnium creaturarum in esse; & sic omnibus præsens, & coniunctus intimè est. Cum ergo mediante gratia se manifestat, incipit id quod est radix, & principium comparari vt obiectum se manifestans ipsimet intellectui creato, cui adest vt radix, & principium influens esse, & sic manifestat seipsum vt obiectum, non quomodocumque, sed omnino intimum, vt pote radix totius illius esse. Vnde talis manifestatio, & familiaritas, & conuictus necessariò importat nouum modum præsentiæ, nempe non solum per modum radicis, & principij influentis esse, sed per modum personæ conuiuens, & seipsam manifestantis in ratione obiecti; sed talis præsentiā realis, & intima esse debet, quia est manifestatio, non cuiuscumque obiecti, sed obiecti nobis maximè intimi, & qui cognoscitur vt radix, & principium totius nostri esse, & per experientiam, & familiaritatem sui cognosci, & amari se faciens: sicut substantia Angeli seipsam manifestat, & vnitur intellectui, vt obiectum, non qualecumque, sed ipsi intellectui intimum, & tale obiectum sic cognitum, & amatum vt intimum, & vt principium sui intellectus etiam in quantum obiectum realiter, & non solum intentionaliter præsens est, quia seipso, & sua realitate reddit se manifestatum, & cognitum, & experimentaliter sui cognitione attactum.

12 Quod verò istum contactum obiectiuum realem, & intimum habeat Deus, non solum quando intuitiue, & clarè videtur, & per modum speciei vnitur, sicut cum substantia Angeli suo intellectui vnitur vt obiectum, sed etiam cum fide obscura cognoscitur, & experimentaliter quadam cognitione occulta attingitur, sicut cum anima nostra nobis in hac vita manifestatur, constat quia Deus non solum cognoscitur per fidem, sicut communiter contingit in peccatoribus, & iustis, sed etiam per donum sapientiæ, quasi per gustum, & experientiam quandam internam, sicut ab omnibus existentibus in gratia, vt docet S. Thom. 2. 2. q. 45. art. 4. & 5. &

Dd 2 hæc

hæc sapientia habetur ex quadam vnione, & con-
naturalitate ad diuina, id est, ex quadam intima ex-
perientia diuinorum, sicut de Ierotheo dixit D.
Dionysius c. 2. de diuinis nominibus, quod *Erat per-
fectus in diuinis, non tantum dicens, sed & patiens di-
uina*, vt ibi affert S. D. art. 2. Pati autem diuina, &
experimentalem cognitionem de Deo habere, non
solum pertinet ad statum gloriæ, vbi intuitiue Deus
videtur, sed etiam ad statum viæ, vbi adhuc Iero-
theus erat, & vbi Deus, etsi obscure, & per fidem
cognitus, tamen quasi experimentali quodam
tactu cognoscitur, etsi non visu, sicut animam no-
stram non videmus, & tamen experientiam anima-
tionis sentimus, quasi obiectum præsens, quia &
informat nos realiter, & informationis indicia no-
bis præsentat, sic Deus suæ intimæ præsentia quam
habet vt agens, & principium totius esse per im-
mensitatem, nobis specialiter per gratiam demon-
strat tanquam obiectum intimè, & experimentaliter
cognoscibile, hinc occultè, & per indicia, in pa-
tria per visionem, sed tamen iam nobis speciali-
ter, & realiter præsens, & quasi stans post parie-
tem.

Vnde D. Thom. qui hunc specialem modum
existendi Deum in nobis per gratiam dixit esse in-
quantum est obiectum cognitum, & amatum, tan-
dem id reduxit ad cognitionem, non qualemcum-
que, sed experimentalem ipsius Dei, quæ solum ha-
betur per gratiam, & per donum sapientiæ, quo
cognoscimus de Deo per quadam connaturalita-
tem, & coniunctionem cum eo, tanquam viuifi-
cante nos, sicut si esset vita vitæ nostræ, & anima
animæ nostræ per intimam præsentiam sui qua in-
fluit nobis non solum esse naturale, sed etiam esse
gratiæ, quo ipsas personas in nobis tanquam præ-
sentes agnoscimus, etiam si nondum videamus. Di-
cit enim sic in 1. dist. 14. qu. 2. art. 2. ad 3. quod *Non
qualiscumque cognitio sufficit ad rationem missionis,
sed solum illa qua accipitur ex aliquo dono appro-
priato personæ, per quod efficitur nobis coniun-
ctio ad Deum secundum modum proprium illius perso-
næ, scilicet per amorem, quando Spiritus S. datur; unde
cognitio ista est quasi experimentalis*. Non ergo
quolibet modo esse obiectum cognitum, & ama-
tum, sed esse cognitum experimentaliter, & per ip-
sius præsentia tactum pertinet ad hunc specialem
modum, quo persona dicitur missa. Non potest au-
tem cognosci experimentaliter nisi vt habitus, &
possessus, & coniunctus intimè, nec coniunctus esse
intimè, nisi supponendo contactum immensitatis,
quo influit esse in animam, non solum esse natura-
le, quod est commune omnibus, sed etiam esse gra-
tiæ supernaturale, quo ita dat esse supernaturale,
quod se manifestat vt obiectum ipsi præsens; atque
adeo speciali modo dicitur ibi esse tanquam non
solum viuificans influendo, & agendo, sed etiam vi-
uificationem ipsam præsentem prodens, & manife-
stans, nunc per indicia, & experimentalem con-
iunctionem ad animam, licet obscuram, in patria
per intuitionem.

31 Vnde probatur etiam secunda pars conclusionis
suprà positæ, quod videlicet iste specialis modus
existendi per gratiam in nobis præsupponat, & re-
quirat necessariò præsentiam realem Dei per im-
mensitatem, & sine ipsa saluari non posse, licet sit
distincta ab ipsa. Nam in primis hæc specialis præ-
sentia supponit ipsam creaturam habere in se esse
productum à Deo, tum naturale quoad suam na-
turam, tum supernaturale quoad gratiam: omnis
autem productio Dei, & influxus quoad esse fit
per contactum operationis, qui pertinet ad im-
mensitatem, ita quod etiam ipsa productio gratiæ

in anima, quatenus fit per operationem Dei, con-
tactum immensitatis eius requirit, per quem Deus
est intimè in ipsa gratia, & in anima, vbi illa pro-
ducitur tanquam in effectu suo, & conseruatur in
esse: sine quo nulla specialis præsentia dabitur in
creaturis. Vnde si per impossibile consideretur
Deus sine immensitate, considerabitur vt non pro-
ducens in esse naturam, & gratiam, & consequen-
ter vt non fundans aliam præsentiam superaddi-
tam isti esse, & mediante gratia ortam in creatura
ex noua habitudine ad Deum. Deinde præsuppo-
nitur iste contactus operatiuus Dei, seu contactus
immensitatis, tam prout dat esse naturale, quam su-
pernaturale per gratiam, quia per gratiam manife-
statur Deus, & personæ, non quomodocumque,
sed vt experimentaliter cognita, & vt intima ra-
dix, & principium vitæ animæ tam in esse naturali,
quam supernaturali, quatenus ex eius influxu de-
pendet, & deriuatur omne esse: hæc autem deriuatio,
& operatio constituit contactum immensitatis
vt latè probatum est *præced. tomo disp. 8. Vt ergo
manifestentur personæ, non quomodocumque co-
gnita, sed vt intimè præsentia, & experimentaliter
cognitione coniuncta, oportet quod ista manife-
statio fiat secundum aliquem contactum præsen-
tialem, quo Deus tangit interius, qui contactus
operationis alicuius est, & consequenter ad im-
mensitatem pertinet, quia existentia, & contactus
immensitatis in operatione Dei fundantur, vt D.
Thom. docet *suprà qu. 8. art. 1.* ita quod sicut con-
tactus animæ quo experimentaliter sentitur, etiam si
in sua substantia non videatur, est informatio, &
animatio, qua corpus reddit viuum, & animatum,
ita contactus Dei quo sentitur experimentaliter,
& vt obiectum coniunctum etiam antequam vi-
deatur intuitiue in se, est contactus operationis in-
timæ, qua operatur intra cor, ita vt sentiat, & ex-
perimentaliter manifestetur, eo quod *Vnctio ipsa
docet nos de omnibus*, vt dicitur 1. Ioan. 4. Hoc autem
requirit, & præsupponit Deum operari intus ope-
ratione influente intra animam, non solum esse na-
turale, quod est commune omnibus, etiam non
cognoscentibus Deum, sed etiam esse supernatu-
rale ex quo oritur in anima noua habitudo ad
Deum, sic intimè operantem, vt cognoscat eum, &
afficiatur illi, & ad personas, vt fruendas à se, & si-
bi intimè coniunctas, vt principium intimè influens
esse naturale, & supernaturale; & sic illo affectu, &
cognitione sentit Deum vt sibi intimè coniunctum
& experimentaliter notum; quæ experientia sola
cognitione non habetur, sed etiam affectu, & gu-
stu, quia est per fruitionem, licet imperfectam, qua-
lis haberi potest in hac vita. Et sic non sufficit co-
gnoscere, & experiri Deum vt absentem, sicut co-
gnosceretur, si per impossibile immensus non esset,
sed oportet habere cognitionem Dei vt præsentis,
& viuificantis, quæ per operationes vitæ superna-
turalis habetur. Vita autem supernaturalis, & expe-
rientia eius non habetur per solam cognitionem,
sed per affectum, & gustum, quod pertinet ad cha-
ritatem: hoc enim donum nemo scit, nisi qui acci-
pit, vt dicitur Apocalyp. 2.*

14 Quare S. Thom. explicans intimiùs quomodo
fit ista vnio ad personas missas in animam, dicit, *cit.
dist. 14. qu. 2. art. 2. ad 2.* quod *Non sufficit noua re-
latio qualiscumque creaturæ ad Deum, sed oportet
quod referatur ad ipsum sicut ad habitum, quia quod
datur alicui, habetur aliquo modo ab ipso. Persona au-
tem diuina non potest haberi à nobis, nisi vel ad fru-
ctum perfectum, & sic habetur per donum gloriæ, aut
secundum fructum imperfectum; & sic habetur per
donum gratiæ gratum facientis. Vel potius sicut id per
quod*

quod fruibili coniungitur, in quantum ipsa persona diuina quadam sui sigillatione relinquunt in nobis dona quadam, quibus formaliter fruimur, scil. amore & sapientia, propter quod Spiritus S. dicitur esse pignus hereditatis nostrae. Quibus verbis manifestè explicat D. Thom. quomodo personae diuinæ dicantur habitæ, & possessæ ab anima, sicut aliquid fruibile ab ipsa, quatenus sua sigillatione relinquunt in nobis quadam dona. Hæc autem sigillatio personarum, operatio est, quibus personæ manifestantur nobis experimentaliter quadam cognitione, & tactu sui, quibus cognoscimus animam nostram viuere vita superiori sibi coniuncta, & altiori modo agi, tam in intellectu, quàm in affectu, seu gustu; unde & Apostolus dicebat, *An experimentum queritis eius qui in me loquitur Christus?* Et iterum, *Vino ego, iam nō ego, uiuit uerò in me Christus.* Et iterum Rom. 8. *Ipse Spiritus testimonium reddit Spiritui nostro, quod filij Dei sumus;* quod totum pertinet ad sigillationem quadam, seu experimentalem tactum, quo personæ ipsæ per aliquam operationem intimam ita tangunt cor, quod se manifestant ut præsentem tanquam illius uiuificationis principium. Operatio autem pertinet ad contactum Dei, ut agentis, quod pertinet ad immensitatem: sed contactus quo se faciunt sentire personæ diuinæ, ut præsentem, addit supra præsentiam agendi, quæ est præsentia Dei, ut est vnus; præsentiam manifestandi personas, non manifestatione quomodocumque, sed experimentaliter, & intima, licet nondum intuitiua, sicut anima sentitur modò à nobis. Et hoc est esse Deum ut cognitum, & amatum, scil. cognitione, & amore experimentaliter, & contactum intimum operante in nobis.

15 Dices: Per ipsam missionem personæ dicuntur esse in nobis sicut conuiuentes, & habitantes nobiscum, non ut principium influens, & radix totius esse, quod pertinet ad generalem modum præsentiae immensitatis. Unde dicuntur personæ non tam in nobis esse, quàm nobiscum, sicut cum dicitur Sapient. 7. *Mitte illam de celis sanctis tuis, ut mecum sit, & mecum laboret.* Et Angelus ad Virginem Lucæ 1. *Dominus tecum,* ita ut comparetur per missionem persona diuina ad nos, non ut generale principium dans esse, sed ut altera persona particularis nobiscum familiaris, & cohabitans: ergo malè recurrimus ad contactum illum immensitatis, quo Deus tangit per operationem suam creaturas, ut influens, & dans illis esse, & ut radix earum, sed ut persona supponens esse, quia mittitur ut nobiscum sit, non ut nobis det esse.

Resp. argumentum probare quod missio personarum, & existentia specialis Dei in anima non fit formaliter per contactum immensitatis, non tamen quod præsuppositiue non requiratur, sicut ad hoc ut anima nostra sit nobis præsens obiectiue, prærequiritur quod sit præsens informatiue, & pro ut sic præsens sentitur ipsa experientiâ animationis, & motu vitali, cum tamen aliud sit animam informare, & dare esse vitaliter ut forma, aliud obiectiue apprehendi illam, quæ informans est; & utraque præsentia informatiua, & obiectiua distinguuntur, potestque vna manere sine alia, sicut in dormientibus, & amentibus anima est præsens informando, non tamen cognoscitur, nec sentitur. Sic in peccatoribus Deus est intimè dans esse naturale, imò, & dona fidei supernaturalia, sed tamen dormiunt, & non sentiunt vitam Dei. Qui autem euigilat, illuminatur à Christo, & sentit ipsum iuxta illud Apostoli, *Surge qui dormis, & exurge à mortuis, & illuminabit te Christus.* Quando ergo incipit quis habere obiectiuam, & experimentalem Dei præsentiam, incipit nouo modo esse in anima, scil. obiectiue illemet qui est per conta-

Ioan. à S. Thom. in 1. part. D. Th. Tom. alter.

ctum operatiue, & influendo esse. Dicitur autem esse nobiscum tanquam amicus, & persona conuiuens, & familiaris nobis, non quia definat per hoc esse radix, & principium vitæ nostræ, sed quia manifestatur ut persona distincta, imò & tota distinctio personarum manifestatur ut nos comitans & assistens, & cohabitans: nec enim ita nobis dat esse sicut forma, & sicut anima, sed sicut agens, & persona distincta; & sic manifestatur nobis ut persona conuiuens, & assistens nobis, licet maneat etiam intimè assistens, ut influens nobis totum esse. Unde utrumque significatur in Scriptura in hac missione personarum, & quod coassistat nobis ut persona amica, & cohabitans nobis, veniens, & mansionem faciens apud nos, Ioannis 14. & quod intimè det nobis vitam quasi principium, & radix vitæ nostræ, Isai. 57. *In sancto habitans, & cum contrito, & humili spiritu, ut uiuificet Spiritum humilium, & uiuificet cor contritorum.* Et iterum Ioan. 6. *Sicut misit me uiuens Pater, & ego uino propter Patrem, & qui manducat me, & ipse uiuet propter me.* Missio ergo personæ diuinæ ad inhabitandum est, sed etiam ad uiuificandum, & ut uiuamus ex Deo, non ut ex forma, sed ut ex agente, & influente vitam æternam. Et sic coniunctio ista specialis per missionem, & gratiam non potest præscindere à contactu operationis, & immensitatis, sed supra ipsum addere obiectiuam manifestationem, quod nullo meliori exemplo explicari videtur, quàm animæ nostræ prout informantis, & obiectiue cognitæ.

16 Ex dictis possunt solui quædam minutiores obiectiones, quæ contra sententiam, & conclusionem nostram possunt fieri. Nam imprimis non apparet quomodo ipsæ personæ mittantur, & procedant ad animam iusti, cum ubique sint, & intimè illi præsentem per immensitatem. Si autem dicatur quod de nouo sunt, non per hoc quod sint de nouo, ubi antea non erant, sed per hoc quod creaturæ ipsæ nouo modo immutentur à personis, & respiciant ipsas, quo antea non respiciebant, quæ est solutio D. Tho. in 1. dist. 14. q. 2. art. 1. ad 1. & 3. Contra est, quia iste nouus effectus, seu mutatio creaturæ, quæ fit per gratiam est effectus operationis diuinæ: ergo medio illo dicitur Deus esse in anima tanquam medio contactu operatiuo: hoc autem etiam pertinet ad immensitatem: nam in omni effectus suo est Deus per essentiam, præsentiam, & potentiam, etiam si effectus ille sit supernaturalis, & gratia ipsa, quia effectus licet sint nobiliores, nō excludunt contactum Dei, & dependentiam ab influxu illius dante esse, qui contactus est communis respectu omnis creaturæ, & pertinet ad immensitatem. Ergo per illum non possunt personæ diuinæ esse speciali modo in creaturis, & mitti ad illas. Patet hæc conseq. quia iste effectus, & iste contactus, seu præsentia est à Deo in quantum vnus: ergo ex vi illius non est in creatura ut trinus formaliter, sed solum concomitanter, & identicè, quod non sufficit ad missionem, quia per missionem specialiter sunt personæ in anima, & Deus in quantum trinus.

Conf. quia Deus non potest esse speciali modo in creatura nisi vel tanquā principium agens, vel tanquam finis fruendus. Ut principium agens est per immensitatem ratione suæ operationis, & hoc modo non est Deus formaliter ut trinus, sed ut vnus, quia ut vnus operatur. Ut finis non requiritur quod sit realiter substantia Dei intra animam, ita quod personæ ipsæ ut distinctæ sic specialiter sint intra; tum quia hoc modo solum est Deus ut cognitus, & amatus, hic quidem per species

D d 3 obscuras

obscuras, in patria autem per propriam, & intuitiuam; ad hoc autem parum conducit præsentia realis, quia etiam si per impossibile Deus esset distans, amari & cognosci posset per species alienas, & etiam per propriam in sententia quæ docet dari posse speciem creatam, qua videatur Deus. Vnde hoc quod dicitur de existentia Dei reali intra animam per gloriam, non habet maiorem certitudinem, quam quod non possit dari species repræsentatiua Dei in se; existentia autem Dei in anima per gratiam cum per alienas species cognoscatur, nullo modo infert præsentiam realem, & intimam, per se loquendo, personarum: nam etiam res distans potest intelligi, & amari. Tum etiam quia Deus ut finis fruendus non est omnino certum quod de necessitate includat personas, cum sustineri possit opinio quod Deus sine personis videri possit. Ergo ex hoc existentia Dei in anima per modum finis, non infertur per locum intrinsecum quod mittantur personæ, & intime existant intra animam, cum non implicet fruitionem Dei dari, non visis personis.

Resp. ad principale argumentum, solutione *ibi* data.

Ad replicam Resp. quod ille nouus effectus, & immutatio creaturæ in quantum effectus Dei est, procedit à tota Trinitate, & à Deo ut vno, ut autem est ratio manifestandi personas, est effectus connotatus à missione illarum, quæ ad hoc mittuntur, & procedunt in creaturam rationalem, ut manifestentur. Necessè est autem in omni missione etiam visibili, ut in ipsa incarnatione, effectum aliquem, & immutationem creaturæ fieri, quæ sit à tota Trinitate, sed quia mediante tali effectu intenditur manifestatio alicuius personæ procedentis, dicitur illa mitti, seu procedere in creaturam ut manifestanda in illa, sic in effectu gratiæ, licet gratia sit à tota Trinitate, & procedat à Deo ut vno, tamen ordo creaturæ, & conuersio non sistit in ipsis donis gratiæ, sed tendit ad personas, quæ sibi manifestantur per gratiam, ut rectè obseruat D. Thom. *cit. dist. 14. quest. 2. art. 1. ad 2.* & hac ratione dicitur persona dari, & mitti in creaturam, non solum dona eius, licet sine illis non detur, nec mittatur. Et sic licet ille contactus Dei in gratiam, & in animam, cui illam infundit, sit contactus operatiuus, & pertineat ad Deum ut vnum, & ut immensum, ut effectiue à Deo est, tamen manifestatio Dei quæ fit per conuersionem creaturæ ad Deum ortam ex tali gratia, non est manifestatio Dei solum ut vnus est, & quoad essentiam, sed etiam quoad personas, quia ad hoc datur gratia ut manifestentur personæ, sicut per incarnationem effectiue factam à tota Trinitate manifestatur solum verbum ut persona illius humanitatis; & sicut anima informat corpus per suam substantiam ut vna, & indiuisibilis est, sed manifestatur ut multiplex in virtute, aliter per visum, aliter per auditum, aliter per tactum, &c.

¹⁷ Ad Conf. Resp. Deum esse speciali modo in anima ut finem fruendum, qui necessariò præsupponit & requirit quod sit agens primum, & dans totum esse; & sic intime præsens in anima. Vnde negamus quod ad talem finem fruendum & cognoscendum cognitione experimentalis, & ut intime dans esse, non solum naturale, sed supernaturale, parum conducat eius realis, & intima præsentia; sicut ad cognoscendam animam ut viuificantem corpus experimentalis quadam præsentia, valde conducit quod præsens intime sit.

Ad primam Replicam dicitur quod ad cognitionem, & amorem finis cognitione quasi speculatiua

& purè extrinsecè se habente ad rem cognitam, & amatam parum conducit eius realis præsentia intra cognoscentem, & amantem, sed sufficit intentionalis præsentia: sed ad cognoscendum, & amandum cognitione, & affectu quodam experimentalis, & quasi spiritum intus viuificantem, non sufficit intentionalis præsentia cum reali distantia, sed requiritur connaturalitas quadam, & vnio interior, ex cuius gustu, & tactu nascitur illa experimentalis cognitio Spiritus diuini viuificantis cor, sicut ex vnione informatiua animæ nascitur experimentalis cognitio ipsius animæ, ut obiecti quod est forma interne viuificans & informans. Quod autem hoc fiat cognoscendo Deum per alienas species, ut hic in via, vel per intuitiuam, & propriam, ut in patria, non interest: quia non loquimur solum de manifestatione personarum, ut intuitiua, vel non intuitiua, sed ut experimentalis, sicut dicit S. Thom. *cit. dist. 14. quest. 2. art. 2. ad 3.* Et hæc datur etiam si res intuitiue non videatur in se, sufficit quod per proprios effectus, quasi per tactum, & viuificationem sentiatur; sicut animam nostram experimentaliter cognoscimus, etiam si intuitiue eius substantiam non videamus. Sic ergo quoad intuitiuam cognitionem seu visionem, per species alienas videtur Deus in hac vita, & sic pro hac parte non exigit præsentiam realem, sed quoad experimentalem cognitionem Dei ut viuificantis nos, & per modum influentis, & dantis esse intime multò magis, quam anima, licet in genere causæ efficientis sic requirit præsentiam realem, ut *suprà* explicatum est. Cum autem intuitiue videtur hæc eadem substantia diuina, multò clarius apparet eius realis vnio præter præsentiam immensitatis, eo quod certius est non dari de facto speciem creatam repræsentantem Deum in se, & probabilius dari non posse, sed tamen eius intima præsentia per experimentalem vnionem, & connaturalitatē ab hoc modo dependet.

Ad secundam probationem dicitur, quod quidquid sit, an potentia absoluta possit Deus videri sine personis, tamen de facto est certum de fide videri à beatis: *hæc est enim vita æterna, ut cognoscant se solum Deum, & quem misisti Iesum Christum*, inquit Christus ad Patrem Ioann. 17. & connaturaliter id exigit visio beata: ergo Deus ut de facto, & connaturali modo fruendus, missionem exigit, & manifestationem personarum.

Secundò obiicies id quod *suprà* iam insinuatum ¹⁸ est, quia inter spirituales substantias potest dari cognitio perfecta, & amor fructiuus independenter ab omni loco, & præsentia reali, ut patet inter duos Angelos, qui possunt se videre, & amare, etiam si longissimè distent quoad localem præsentiam, & vera amicitia frui, & communicare se per locutionem, quia localis distantia non impedit locutionem in Angelis, ut docet S. Tho. *inf. q. 107. art. 4.* ergo multò minùs impedit alias communicationes amicales purè spirituales, quia ferè omnes ad locutionem, & illuminationem redeuntur. Ergo multò minùs impediatur amicitia vera, & communicatio Dei ad animam ex defectu præsentia localis; vnde per impossibile remota immensitate, adhuc Deus diceretur ratione amicitia, & amoris coniunctus animæ, ita quod per locum intrinsecum ex vi amicitia, & communicationis spiritualis id nõ requiratur. Sed neque ratione missionis, aut aduentus ad creaturam, quia hæc omnia per absentiam geri possunt, sicut tutor, & legatus rectè dicuntur mitti, licet per absentiam, clientis & domini negotia tractent. Denique D. Tho. non agnoscit præter præsentiam immensitatis, qua Deus est intra animam, alium specialem modum præsentia in

in iustis, quàm vt cognitum, & amatum, ad hoc autem vt Deus sit cognitus, & amatus, non exigitur per locum intrinsecum realis præsentiæ: ergo præter præsentiæ immensitatis non ponit D. Tho. aliam realem præsentiæ ratione gratiæ: nec est explicabilis quænam illa sit, immensitate remota.

Resp. fruitionem, & amorem inter res spirituales nullam inter se habentes dependentiam aut ordinem posse dari independentem à præsentiæ, & coniunctione reali, quia vnus fruatur alio tanquam persona particulari à qua non habet esse, nec vitam; & sic vtitur aut fruatur illo tanquam re sibi extranea, & aduentitia. Ad hoc autem non indigent spirituales substantiæ præsentiæ locali, sed colloqui, & communicare ad inuicem possunt, & se videre, & amare, quacumque distantia non impediens, quanquam ad alias actiones, quæ pendunt à motu locali non possint communicare inter se Angeli sine præsentiæ locali, quæ ad motum requiritur, sicut nec etiam Angeli custodes nobiscum perfecte communicant, nisi frequenter ad nos descendant, nec cum animabus purgatorij, nisi ad illas descendant, vt eas releuent, & in cælum deferant. Vnde similiter si vnus Angelus amicus alterius velit illum defendere ab alijs, secum portare, & apprehendere, debet illi propinquare, & præsens fieri, sicut è contrario ad arcendum demones ab aliquo loco, vel persona, illos apprehendunt, & mouent de loco, sicut Tobia 8. dicitur, quod *Angelus Raphaël apprehendit demonium, & reliquit illud*, &c. Quare perfecta amicitia inter Angelos etiam communicationem requirit secundum præsentiæ realem, quando opus fuerit, quanquam illa præsentiæ, non mediante amore sit formaliter, sed medio contactu virtuali, vt *inf. disp. 20.* dicitur. Caterum communicatio amicabile cum Deo non est tanquam cum persona particulari, & omnino extranea, sed tanquam cum principio vniuersalissimo, & radice totius esse nostri tam naturalis, quàm supernaturalis. Vnde non potest præsentiæ obiectiua quam habemus de ipso, per cognitionem, & amorem præscindere ab ista præsentiæ, quam præsupponit contactus illius influxiui totius esse, quod habetur per immensitatem, sed super illum contactum addit, quod obiectiue etiam sit præsens id quod operatiue est intimum, sicut cognitio, & amor circa animam nostram non est sicut circa rem distantem, sed nobis intimam, & supponitur informatio ipsius intra nos, superadditur verò cognitio quædam ipsius, quæ si experimentalis est, & penes connaturalitatem ad animam, etiam ex ipso cognoscendi modo petit non esse ad rem distantem, & hoc modo se habet cognitio, & amor quo Deus dicitur speciali modo esse in nobis, & personæ mittuntur ad nos, scilicet cognitio experimentalis, quæ sit penes connaturalitatem, & vniõnem ad Deum in quo viuimus, vt sæpe ex D. Thom. dictum est.

Qui modus experimentalis cognitionis, & connaturalitatis non est inter duos Angelos, quia vnus alteri non dat esse nec vitam, sed solum est communicatio vt ad extraneum. Vnde ex simili communicatione non potest trahi argumentum ad communicationem familiarem cum Deo quæ est tanquam cum vita vitæ suæ, & principio totius esse sui. Et idem maximus est iste amor charitatis ad Deum, quia est plusquam animæ, & vitæ propriæ, & rei sibi maximè intimæ, & diligibilis.

Vnde patet, exemplum de tutore & legato qui mittuntur & gerunt negotia etiam in absentia, nullo modo esse ad rem. Quid enim apparentiæ ista habent cum Deo, qui mittitur vt habitet cum corde contrito, ad viuificandum eum; qui mittitur vt viuamus in illo & propter illum, vt agnoscamus eum, & manifestetur nobis per experimentalem cognitionem, & quasi connaturalitatem, qui est intimum principium, & radix totius esse plusquam anima nostra, & plusquam vita nostra? An potest hoc sentiri & connaturalizari, posita distantia & absentia reali.

Quod verò dicitur D. Thomam non agnouisse nisi præsentiæ immensitatis, & super hanc solum addere quod Deus sit præsens vt cognitus & amatus, quod à præsentiæ reali non dependet; dico quod D. Thom. agnouit quidem præsupponi debere contactum illum operatiuum & influxiui Dei, qui pertinet ad immensitatem, & superaddi ad illum istum modum existendi per gratiam, sed in hoc non dixisse, quod consistit in qualicumque cognitione & amore Dei, sed quæ habetur per quandam experientiam, & connaturalitatem ad Deum vt ad præsensem per modum agentis & principij vitæ nostræ, sicut habemus cognitionem de anima nostra vt viuificante nos per ipsam experientiam vitalium motuum. Et ista experientia sic cognoscitiua Dei, vt nobis per contactum immensitatis coniunctum, est præsentiæ obiectiua, quam addit gratia super præsentiæ illam contactus diuini in his qui non sentiunt Deum, aut quia non cognoscunt, aut quia experimentaliter non tangunt, nec finunt se ab eo viuificari. Eleganter Aug. *tract. 76. in Ioannem: Ecce facit in sanctis cum Patre & Filio Sanctus etiam Spiritus mansionem, intus vique tanquam Deus in templo suo. Deus trinitas, Pater & Filius & Spiritus S. veniunt ad nos, dum venimus ad eos; veniunt subueniendo, venimus obediendo; veniunt illuminando, venimus intuendo; veniunt implendo, venimus capiendo, vt sit eorum non extranea visio, sed interna, & in nobis eorum non transitoria mansio, sed æterna.* Requiritur ergo secundum Aug. ad istam inhabitationem personarum, reciproca actiones ex parte Dei, & ex parte nostra. Illas non facit Deus sine contactu immensitatis, & operationis, istas non facimus, nisi tanquam ad intraneum, & ad principium omnis vitæ nostræ ipsam gustando, & experiendo.

TRACTATUS DE CREATIONE.

QVÆSTIO XLIV.

De Processione creaturarum à Deo.

SVMMALITTERÆ.



VO MODO tractatum hunc de processione creaturarum, earumque distinctione & gubernatione D. Thom. partitus sit ab hac quæst. 44. vique ad finem 1. partis, latè tractauimus in *Isagoge Theologia, in tomo preced.*

Nunc circa processionem creaturarum à Deo per tres quæstiones tria disputat. Primò, in hac quæst. de ipsa prima causa creante. Secundò in seq. de ipsa creatione, seu emanatione creaturarum à Deo. Tertiò, in q. 46. de tempore seu duratione qua creaturæ à Deo processerunt.

Igitur in art. 1. huius quæst. 44. ostendit Deum esse primam causam efficientem, & reliqua omnia esse ab ipso, eo quod solus Deus est suum esse à se, reliqua habent esse per participationem: ergo sunt facta quia participata in esse.

In art. 2. ostendit Deum non præsupponere materiam ad producendum res, sed etiam ipsam materiam primam ex qua res per generationem procedunt, à Deo produci, & sic non supponere illam: quia quidquid est ens, & capax esse, quomodocumque est participatum à Deo, & tanto magis ab eo dependens, quanto in se magis indigens & dependens, sicut est materia prima.

In art. 3. ostendit Deum etiam esse causam exemplarem creaturarum, quia determinat Deus formas rerum per suam sapientiam tanquam artifex, quia facit omnia in intellectu; determinatio autem formarum per intellectum fit à causa exemplari.

In art. 4. ostendit Deum esse causam finalem omnium, siquidem omni agenti conuenit agere propter finem, alioqui non determinabitur ad hoc magis quàm ad illud, sed fortuitò eueniet quidquid aget: sed tamen agens imperfectum operatur ut finem sibi acquirat, agens summum, ut bonitatem suam aliis communicet, & hoc solum intendit, scil. aliis communicare suam perfectionem.

QVÆSTIO XLV.

De modo emanationis rerum à primo principio.

SVMMALITTERÆ.



EQVITVR agere de ipsa creatione, & modo quo res procedunt à Deo. Et tractatum de ipsa creatione, tum de his quibus conuenit creari, tum de his quibus conuenit creare actiue.

Igitur in art. 1. ostendit quid sit creatio, scil. quòd sit facere ex nihilo, eo quòd in omni emanatione supponitur non esse id quòd fit & emanat, sicut si fit homo, non erat homo. In emanatione ergo vniuersalissima totius entis nullum ens præsupponitur; hæc autem vniuersalis emanatio est creatio: est ergo ex nihilo.

In art. 2. ostendit Deum posse creare, imò necesse est quòd omnia quæ creata sunt, ab ipso sint, quia qui facit ex aliquo, illud ex quo facit præsupponit, non causat: si ergo

Deus

Deus facit omnia, quia nihil est à se præter Deum, & omnia sunt ex ipso, necesse est, quòd nihil præsupponat; & sic ex nihilo faciat, quod est creare.

In artic. 3. ostendit quid sit creatio ex parte creaturæ passivè tenta, nempe non esse mutationem aliquam, seu motum, quia nihil supponitur quod sit subiectum talis mutationis, sed totum quod producitur est terminus actionis creaturæ. Remoto ergo motu, restat quod sit relatio seu dependentia termini à suo agente.

In art. 4. ostendit quod creari proprium est subsistentium, & habentium esse, quia eis convenit fieri, quibus convenit esse, cum fieri sit tendentia ad esse: habere autem esse convenit subsistenti quia hoc habet esse ut quod, forma autem, vel accidens habet esse ut quo, unde ei magis convenit concreari, seu cum alio creari, quam simpliciter creari.

In art. 5. ostendit, quòd creare ita est proprium solius Dei, quod nulli creaturæ potest competere, neque ut causæ principali, quia creare est producere ens absolute in quantum ens, quòd dicit uniuersalissimum modum producendi, quod nulli creaturæ competere potest: neque ut causæ instrumentali, quia causa instrumentalis est quæ ministerialiter, & dispositivè operatur ad effectum principalis agentis, ubi autem producitur totum esse ex nihilo nihil præsupponitur circa quod operetur illa ministerialis dispositio instrumenti.

In art. 6. ostendit quòd creare non est proprium alicuius personæ divinæ, sed omnium indiuisè, eo quod Deus causat in quantum primum ens, esse autem primum ens seu ipsum esse est commune toti Trinitati. Quia tamen Deus producit per intellectum & voluntatem, secundum quas attenditur processio personarum, ex ipsa ratione suæ processionis dicunt ordinem ad causalitatem creaturarum, quatenus hæc attributa includunt.

In art. 7. ostendit quomodo in creaturis inueniatur vestigium aliquod Trinitatis, quatenus in creatura inuenitur ratio causæ & principij, ratio speciei, seu formæ quæ formatur, & constituitur; & inclinatio seu ordo ad aliquid. Et primum repræsentat Patrem qui est principium. Secundum Filium qui est species, seu forma expressiua omnium, Tertium, Spiritum S. qui est amor, & inclinatio.

In art. 8. ostendit, quòd in opere naturæ, hoc est in generatione rerum, & in opere artis quod supponit naturam, non interuenit creatio, sedeductio formæ ex materia quæ in potentia continet formas, quia nec formæ fiunt per creationem, cum creari solum sit subsistentium non formarum, neque cum materia creatæ sunt, & modò latitant in ea, sed ex potentia materiæ educuntur.



QVÆSTIO XLVI.

De Principio durationis rerum creatarum.

S V M M A L I T T E R Æ.



RI A tractat D. Thom. in hac quæstione. In art. 1. ostendit nullam creaturam ab æterno fuisse: nec enim mundus processit à Deo de necessitate, sed ex libera voluntate. Vnde productus fuit quando ipse voluit, non voluit autem quod esset nisi in tempore. Nec potest ostendi quod aliquis motus, & res ab æterno fuerit.

In articulo 2. ostendit quòd mundum incepisse in tempore ex fide habetur, quia dicitur, *In principio creauit Deus cælum, & terram*: hoc autem demonstratiuè probari potest, quia mundum produci nunc vel ante, pendet ex nuda voluntate Dei, cuius ratio, & motuum de necessitate demonstrati non potest ex creaturis.

In artic. 3. ostendit creationem rerum non solum non fuisse ab æterno, sed fuisse in initio temporis, non solum quoad spirituales creaturas, sed etiam quoad corporeas, & omnes processisse ab unico principio, quod significatur illis verbis Genes. 1. *In principio (scil. temporis) creauit Deus (scil. vnicus Deus) cælum, & terram*, quæ sunt creaturæ corporeales.

QVÆSTIO

QVÆSTIO XLVII.

De rerum distinctione in communi.

S V M M A L I T T E R Æ.



B hac quæst. incipit D. Thom. tractare de rebus ipsis procedentibus à Deo, quæ in tota vniuersitate mundi includuntur, & in varias species distinguuntur. Et primò agit de distinctione rerum in communi in hac q. deinde in speciali de distinctione boni, & mali, de distinctione spiritualis, & corporalis creaturæ.

In primo ergo articulo huius quæstionis ostendit quòd multitudo, & distinctio rerum à Deo intentæ sunt. Non enim provenit solùm ex diuersitate materiæ, quia hæc diuersitas dependet à formis, & tam formæ, quàm materia ex Deo. Nec ex secundis agentibus, quasi Deus solùm primam creaturam faciat, & illa alias, quia nulla creatura creare potest: multa autem præter primam creaturam per creationem fiunt. Ex intentione ergo Dei provenit multitudo creaturarum, quia in vna sola tota eius bonitas repræsentari non potest.

In 2. art. ostendit quòd etiam inæqualitas creaturarum ex Deo est: per se enim intenditur varietas formarum, & specierum, & non solùm indiuiduorum in hoc vniuerso, cùm ex variis speciebus componatur; specifica autem distinctio semper inæqualitatem importat, quia sunt species sicut numeri.

In 3. artic. ostendit mundum esse vnum non obstante tanta multitudine, & inæqualitate rerum, non vnitatem entitativam, sed vnitatem ordinis ad vnum finem, & sapientiam ordinantem.

QVÆSTIO XLVIII.

De rerum distinctione in speciali.

S V M M A L I T T E R Æ.



P R I M A distinctio creaturarum sumitur penes perfectum, & imperfectum seu defectuosum, quod est bonum, & malum; & ideò hîc agit de eorum distinctione, & in seq. quæst. de causa mali.

Igitur in 1. articulo inquirat de malo, an sit natura quædam. Et docet quòd nomine mali non significat naturam aliquam habentem esse, quia omne ens est bonum in quantum ens, sed significare absentiam, seu defectum boni.

In art. 2. ostendit inueniri malum in rebus, quia quædam bona sunt quæ deficere non possunt, alia quæ deficere possunt, malum autem est defectus à bono. Quæ ergo deficient malum habent, id est defectum. Loquitur D. Thom. de malo simpliciter seu priuatiuè.

In artic. 3. ostendit quòd subiectum mali est bonum, quia malum est priuatio boni, & non purum nihil, seu pura negatio. Priuatio autem est in subiecto capaci, seu quod est in potentia ad formam, & ex hoc ipso est bonum quod dicit ordinem ad bonum.

In art. 4. ostendit quòd malum non destruit totaliter bonum: licet enim priuet bono opposito, non tamen destruit subiectum in quo est, neque habilitatem seu capacitatem eius ad bonum, licet hanc diminuat, quia penitus tolli non potest, nisi subiectum destruat.

In artic. 5. ostendit sufficienter diuidi malum per malum culpæ, & poenæ, quia forma, seu actus est duplex, primus, & secundus. Primus pertinet ad entitatem rei, secundus ad operationem. Si est indebita operatio, quia caret ordine debito, & est in subiecto rationali, habet rationem culpæ. Si est subtractio alicuius pertinentis ad entitatem, vel ad accidentia rei, est damnum, & habet rationem poenæ.

In

In art. 6. ostendit malum culpæ habere plus de ratione mali, quàm pœnam : tum quia per culpam redditur aliquis simpliciter malus, non per pœnam; sed per hoc fit dignus pœna : tum quia malum culpæ contrariatur Deo, cuius voluntatem non implet; pœna autem bono creato, quod tollit ab aliquo.

QVÆSTIO XLIX.

De causa mali.

S V M M A L I T T E R A E.



R I A facit in hac quæstione. In artic. 1. inquit an bonum possit esse causa mali. Et docet, quod malum habet ex parte causæ materialis bonum, ut dictum est, ex parte causæ formalis non habet bonum pro forma, sed defectum boni. Ex parte causæ agentis habet causam per accidens, scil. efficiens cum defectu alicuius principij, aut impedimento alicuius causæ.

In articulo 2. docet quod summum bonum, id est Deus, nō est causa mali in operationibus, quia nullo modo est agens defectuosum, nec radix defectus in agentibus. Mali autē quod, est in effectibus (sicut est corruptio aliquorū, & malū pœnæ) bene potest Deus esse causa ex consequenti, quatenus ordo vniuersi non potest conseruari sine aliquarum rerum corruptione.

In articulo 3. ostendit non posse dari vnū principium malum, seu summū malum, tum quia debet habere entitatē, aliās esset nihil, & pro hac parte aliquid bonitatis retineret: tum quia nullū est malum quod integrē consumat omne bonum: sic enim se destrueret, cū maneret nihil: & sic implicat malum esse summū, id est sine vllō bono, & sine vllō ente: tū quia malum semper supponit aliquod bonum, ex quo tanquam ex causa saltem per accidens causetur: ergo repugnat quod sit prima causa, & primū principium efficiens.

DISPUTATIO XVIII.

De Creatione rerum.

ARTICVLVS I.

Quid fides doceat circa creationem, & articulum Dei creatoris?



D E V M creatorem esse totius vniuersi absoluta fides est; imō totius Scripturæ, & fidei initium ab hac creationis notitia incipit, cū inquit Genes. 1. *In principio creauit Deus cælum, & terram:* Isai 40. *Leuate in excelsum oculos vestros, & videte quis creauit hac?* Ierem. 32. *Eccce tu fecisti cælum, & terram in fortitudine tua magna, & in brachio tuo extento.* Et 2. Machab. 7. *Pero, nate, ut aspicias ad cælum, & terram, & ad omnia que in ea sunt, & intelligas, quia ex nihilo fecit illa Deus, & hominum genus.* Et Paulus Actorum 17. *Dens qui fecit mundum, & omnia que in eo sunt.* Et passim in Scriptura vocatur Deus factor cæli, & terræ, & omnium. Vnde tandem in symbolum fidei articulus hic relatus est, dum dicitur. *Credo in Deum Patrem omnipotentem factorem cæli, & terræ, visibilium omnium, & invisibilium;* & in Concilio Lateranensi sub Innocentio III. in c. *Firmiter*, de summa Trinitate, definitur, *Deum sua omnipotenti virtute in*

initio temporis utramque de nihilo condidisse creaturam spiritualem, & corporalem, Angelicam videlicet & mundanam, &c.

Cæterum licet hæc veritas fidei ita stabilita sit, fuerunt tamen plurimi errores tum antiquorum Philosophorum, tum hæreticorum qui illam euertere conati sunt, quos refert S. Thom. *opusc. 5. & 8. & opusc. 23. & 2. contra Gentil. c. 16. & 31. & in 2. dist. 1. qu. 1. art. 1. & 5. & in presenti qu. 44. & 45. & seqq.* Ad tria autem capita possumus errores omnes reducere in hac parte.

Primum est circa ipsam creationem ex nihilo, quam aliqui negauerunt, præsertim ex antiquis Philosophis apud quos erat tritum proloquium: *Ex nihilo nihil fieri*, & ita materiam aut materialem causam æquē videntur associasse efficiēti.

Secundum est circa res productas, in quibus aliqui non omnia à Deo esse facta, aut non ab vno primo principio, sed à diuersis, aut non immediate ab ipso, sed mediantibus Angelis plura esse facta: aut non ex primaria intentione omnia, sed ex accidenti aliqua esse facta dixerunt.

Tertium est circa circumstantiam temporis, quia multi dixerunt non in principio temporis, sed ab æterno fuisse mundum, aut creationem eius. Vnde Fides Catholica in his tribus maximè explicat articulum Dei creatoris, scil. quod sit vnus creator omnium, quod ex nihilo creauerit, quod non ab æterno, sed in initio temporis.

Igitur circa primum, scil. circa creationem rerū prout ex nihilo, errauerunt præcipuè antiqui Philosophi. Qui communiter conuenientes in illo principio quod ex nihilo nihil fit, cogebantur ponere materiam aliquā esse increatam. Sed quia in materia

materia corporali transmutationes fieri videmus, hærebant valdè, & diuidebantur, in assignando principio, seu causa istarum transmutationum: si enim materia esset increata, quis haberet potestatem ad eam transmutandam? Et diuisi sunt in tres classes.

Primò dixerunt aliqui vt Democritus, & Epicurus, non esse quærendam causam per se harum diuersitatum, & transmutationum, sed casu, & fortuna ex plurium corporum concursu resultasse; & sic non oportere aliam causam assignare, quàm materialem, scilicet ipsam pluralitatem corporum, quia corpora pro materia agnoscebant, ponentes materiam esse aliquid sensibile, & actuale, transmutationes autem solùm esse accidentales.

Secundò alij assignauerunt aliquam causam agentem harum transmutationum, sed tamen adhuc supponendo, quòd substantia corporum creata non erat, sed primum principium, sed tamen transmutationes, segregationes, & diuisiones, quæ in ea dantur, & accidentales solùm esse putabant, & secundum ea quæ apparent, dicebant ex aliquo agente, sicut Empedocles posuit tanquam prima agentia duo contraria, scilicet amicitiam, & litem, & Pythagoras bonum, & malum, vnde postea repululauit error Manichæorum de duobus primis principiis, altero bono, altero malo. Alij etiam posuerunt hanc segregationem, & mutationem rerum fieri ab aliquo intellectu, sicut Anaxagoras, qui primus inter Philosophos posuit quoddam incorporale principium scilicet intellectum, licet cum aliis naturalibus Philosophis poneret principia rerum corporalia, & infinitas partes minimas, ex quibus res fiebant, vt dicitur 1. *Physicæ*. & S. Thom. refert *opusc. 15. c. 1.*

Tertiò tandem aliqui agnouerunt transmutationem substantialem, & materiam quæ susciperet substantiales formas, sicque fieret substantialis generatio, sed non peruenierunt ad cognoscendam creationem ex nihilo, quia ipsam materiam factam & creatam esse non perceperunt, iudicantes certissimum esse illud axioma, *ex nihilo nihil fieri*. Vnde quodcumque factum debet supponere aliquid ex quo fiat; & sic etiam primum agens debet supponere materiam, non facere. Et hæc fuit sententia Anaxagoræ & Platonis, qui posuerunt pro primis principiis materiam, & agens, sed quod ipsum agens non erat principium materiæ, sed supponebat eam. Plato autem addidit tertium principium ad illa duo, scilicet ideas, seu exemplaria, quorum nullum erat causa alterius; & per hæc tria, dicebat causari mundum, & res ex quibus constat mundus. Ita sumitur ex D. Thom. in 2. *dist. 1. q. 1. art. 1.* & in *opusc. 5. in explicatione articuli Creatoris*, & hinc *quæst. 44. art. 2.* Verum est quod Marsilius Ficinus in *compendio Timæi Platonis*, cap. 9. & seqq. intentat excusare Platonem ab eo errore, quòd materia non sit facta, sed quòd dixerit Plato materiam esse factam à Deo immediatius, quàm res cæteræ. Sed tamen D. Thom. non hoc imposuit Platoni: nam hoc ei attribuunt grauissimi Authores, & PP. quibus potius credendum est quàm Ficino. Hi sunt Iustinus in *oratione parænetica ad Gentes*, Ambrosius lib. 1. *Hexameron* cap. 19. Athanasius lib. de *In-carnatione Verbi in principio*, Epiphanius *heresi* 7. Vnde possunt ex Philosophis Philoponus 1. *Physicæ* textu 6. & ibi Themistius textu 32. Alcinoüs lib. de *doctrina Platonis* c. 9.

3 Circa secundum caput diuersimodè à diuersis hæreticis erratum est. Nam antiquissimi hæretici, vt Simon Magus, & Menander eius discipulus, quos secuti sunt Basilides, Saturninus, Carpocra-

tes, Cerinthus, & denique Gnostici, dixerunt visibilem mundum ab Angelis creatum fuisse, non à Deo ipso, licet variis modis, & fabulis, hoc declarauerint, aut circa hoc delirauerint; de quibus videri possunt PP. qui hæreticorum errores, & catalogos adnotarunt, vt Tertullianus de *prescriptionibus* c. 46. & seqq. Theodoretus lib. 1. *hereticarum fabularum*, August. lib. de *heresibus*, Epiphanius lib. de *heresibus*, *heresi* 20. & seqq. Irenæus lib. 1. c. 20. & seqq. Philastrius, Isidorus, Damascenus, & alij. Post hos Cerdon, Marcion, Appelles, & alij, duos ponebant Deos, seu summa principia, vnum bonum, alterum malum; & hunc faciebant corporum conditorem, seu visibilis mundi, de quo videri potest Tertull. lib. de *prescriptionibus* c. 5. & in *libris contra Marcionem*. Et heresi Manichæorum idem communiter tribuitur, qui malum Deum visibilium creatorem constituit, vt videri potest apud Epiphanius *heresi* 66. & apud Theophylactum in cap. 6. *Ioan.* & indicat Theodoretus lib. 1. *hereticarum fabularum*. Concilium etiam Bracharense I. hoc dogma per plures canones in Manichæo, & Priscilliano damnat, & S. Leo Papa *epist.* 91. vel 93. ad *Toribium Episcopum*. Quam Manichæorum hæresim repululasse in Albanensibus, seu Albigen-sibus contra quos infatigabili studio sanctissimus P. noster Dominicus in partibus Tholosæ, & in Concilio Lateranensi coram Innocentio III. depugnauit, vt S. Antoninus refert 3. *p. historie tit.* 19. c. 1. licet aliquantulum dubitet, an iidem fuerint Albanenses qui & Albigenes. In Italia autem, præsertim in Insubria hic error valde tunc propagatus est, contra quem valide decertauit, & suo sanguine deuicit inclytus ac gloriosissimus pugil S. Petrus Martyr. Denique Origenes, vt refert S. Thomas *opusc.* 13. & in *presenti quæst.* 47. art. 2. posuit Deum primò creasse creaturas spirituales, easque æquales, deinde ob peccata quorundam fabricasse mundum visibilem, & corporeum, cuius creaturis alligauit spirituales peccantes, & hac occasione quasi in pœnam peccati fuisse conditum visibilem mundum.

4 Circa tertium fuit error multorum Philosophorum, qui posuerunt mundum ab æterno, licet differenter, & non vno modo id asseruerunt: aliter enim processerunt quidam Philosophi ante Aristotelem, aliter Aristoteles ipse. Nam ante Aristotelem quidam posuerunt res aliquas fuisse ab æterno, sed per infinitum tempus quiescisse, & fuisse sine motu, & postea per intellectum cœperunt moueri extrahentem, & segregantem vnum ab alio, quæ fuit opinio Anaxagoræ. Alij verò dixerunt ita esse generabile totum hoc vniuersum, & corruptibile, sicut quælibet pars illius, & consequenter semper aliquid supponi debere ex quo generatio fieret totius, quod vtique æternum esset, quæ fuit opinio Empedoclis. Alij dixerunt quòd ab æterno non solùm erant res, sed etiam motus earum, inordinatus tamen, & confusus: fuit autem in ordinem redactus vel casu, vt Democritus dixit, vel ab agente diuino, & ideis, vt Plato, vt dicitur in 3. *decalog.* Alij verò vt Aristoteles, & qui eum in hoc sequuntur, posuerunt res esse ab æterno sub eo statu, & in eo modo generationis, & motus quo nunc sunt. Ita refert S. Thom. in 2. *dist. 1. q. 1. art. 5.*

Quid fides in hac parte probet,
quid ratio.

Contra hæc tria, docet Catholica fides id quod iam *suprà* diximus de Deo creatore.

Primum quòd detur vera creatio ex nihilo.

Secun-

Secundum, quodd omnia tam inuisibilia quàm visibilia Deus vnus creauit, nec ab alio aliquid creatum sit tanquam à summo principio.

Tertium, quodd non ab æterno, sed ab initio temporis creatus sit mundus.

Et quidem licet omnia ista tria definita sint in Concilio Lateranensi sub Innocentio III. vt constat ex c. *Firmiter supra citato*, vbi definitur quodd *Deus est creator omnium visibilium, & inuisibilium, spiritualium, & corporalium, qui sua omnipotenti virtute simul ab initio temporis vtramque de nihilo condidit creaturam, & spiritualem, & corporalem, angelicam videlicet, & mundanam, ac deinde humanam, quasi communem ex spiritu, & corpore constitutam*: licet, inquam, ista tria in hac definitione contenta sint, eadem tamen ex ipsa Scriptura apertissime constant, non solum quia Scriptura nomine creationis vtitur attribuendo Deo creationem omnium, vt cum dicitur *In principio creauit Deus celum, & terram*, Ecclesiast. 18. *Qui viuit in æternum creauit omnia simul*, & c. 24. *Tunc praecepit mihi creator omnium*, &c. Sed etiam, quia expressè addit Scriptura de nihilo fecisse hæc; & licet hoc non exprimeret, tamen dicendo quodd creauit omnia, & fecit omnia, hoc ipso dictum manet quodd ex nihilo fecit, quia vltra omnia nihil est. Vnde non facimus vim in sola proprietate verbi *creandi*, quodd in rigore significat productionem ex nihilo, aliquando tamen sumitur laxiori significatione, qua etiam vtitur Scriptura pro quacumque productione, etiam quæ non producit substantiam ex nihilo, quodd solum pertinet ad rigorosam creationem, vt cum dicitur Isai. 45. *Ego Dominus formans lucem, & creans tenebras*: &c. 57. *Creauit fructum laborum pacem*, Psalm. 50. *Cor mundum crea in me Deus*: ad Ephes. 2. *Creati in Christo Iesu in operibus bonis*. Sed tamen productionem ex nihilo apertè ipsa Scriptura ponit, 2. Machab. 7. *Peto nate, vt aspicias ad celum & terram, & ad omnia quæ in eis sunt, & intelligas quodd ex nihilo fecit illa Deus, & hominum genus*. Et hoc pertinet ad primum punctum creationis ex nihilo. Ad secundum pertinet quodd Deus ipse creauerit omnes: ex hoc autem constare potest quodd si omnia creauit, nihil ab alio creatum est, & iterum quodd necesse est aliquid fieri ex nihilo. Hæ duæ consequentiæ patent, quia si Deus creauit omnia: ergo nihil ab alio creatum est, aliàs si alter creauit aliquid, non potuit Deus omnia creasse. Et iterum si creauit omnia: ergo nihil præsupposuit non factum à se: ergo necesse est aliquid esse factum ex nihilo, quia si esset factum ex aliquo, de illo aliquo inquiram an sit factum, an non. Si non est factum: ergo non omnia sunt facta ab ipso, aut illud erit Deus, & ens à se. Si est factum: ergo vel iterum ex alio; & sic erit processus in infinitum, quodd non potest admitti, vel erit ex nihilo; & sic est intentum. Circulus autem non potest admitti, vt scilicet vnum fiat ex aliquo, & istud ex illo, aut quodd aliquid fiat de substantia ipsius Dei. Nam si vnum sit ex alio, non potest habere esse ex illo nisi supponatur existens id ex quo fit, aut aliàs esset ex nihilo. Illud verò si existens supponitur, non potest fieri cum existens sit; si verò existens non sit: ergo ex illo vt existente non est factum aliud. Præterquam quodd in materia prima hoc verificari non potest: cum etiam sit primum subiectum, ex nullo alio tanquam ex subiecto fieri potest. De substantia, autem Dei fieri aliquid non potest tanquam ex subiecto: sic enim transmutaretur, essetque subiectum formarum, componeretque cum forma

Ioan. à S. Thom. in 1. part. D. Th. Tomus alter.

creata, quodd totum absurdum est in Deo ponere. Quare hoc ipso quodd dicitur Deus creasse omnia, tacitè dicitur ex nihilo creasse. Anteced. verò, scilicet quodd dicat Scriptura Deum creasse omnia, passim in Scriptura reperitur, ad Hebr. 3. *Qui autem omnia creauit, Deus est*: & c. 1. *Portans omnia verbo virtutis sue*, Ioann. 1. *Omnia per ipsum facta sunt, & sine ipso factum est nihil*: ad Coloss. 1. *Quoniam in ipso condita sunt vniuersa in celo, & in terra, visibilia, & inuisibilia, & omnia in ipso constant*. Et alia multa loca sūt super quæ supra citauimus. Ex quibus etiam deducitur Deum solum esse creatorem, & de facto creasse sine alicuius confortio: dicitur enim creasse omnia, & nulli alij attribuitur ratio, & potestas creandi, imò dicitur Isai. 44. *Ego Dominus faciens omnia, excedens celos solus, stabiliens celos, & nullus mecum*. An verò alicui creaturæ communicabilis sit potestas creandi, vel tanquam causæ principali, vel tanquam instrumento, disquiretur artic. 4. seq.

Denique tertium, scilicet mundum factum esse in tempore, constat ex illo Genes. 1. *In principio fecit Deus celum, & terram*; constat etiam non semper fuisse mundum; & sic non esse æternum, Psalm. 89. *Præquam montes fierent, aut firmaretur terra, & orbis*; Proverb. 8. *Ab antiquis ordinata sum antequam terra fieret, nondum erant abyssi, & ego iam concepta eram*. Ecclesiast. 24. *Ego ex ore Altissimi prodixi primogenita ante omnem creaturam*: Ioan. 17. *Clarifica me Pater claritate quam habui præquam mundus fieret apud te*. Ipsa etiam mundi constructio per dies numeratur, quodd pertinet ad successionem temporum, & non ad æternitatem, poniturque ibi numerus dierum finitus, quibus Deus operatus est mundum, Exodi 20. *Sex diebus fecit Deus celum, & terram, & mare, & omnia quæ in eis sunt, & die septimo requieuit*. Et Genes. 2. *Compleuit Deus die septimo opus suum*: ergo initium temporis habuit creatio mundi, quia finitus dierum numerus computatur vsque ad completionem totius operis: ergo initium illius fuit septem diebus ante: ergo incepit mundus in tempore, & illud *In principio* conuincitur ex ipso textu esse initium temporis, quia datur terminus huius constructionis, scil. septimus dies.

Si quæras an aliquid istorum ratione naturali possit probari? Resp. illud primum, scil. creationem ex nihilo ostendi posse ratione naturali, similiter & secundum, scil. quodd omnia à Deo creata sint. At verò tertium, scil. de inceptione in tempore non potest dari demonstratio sufficiens ex ratione naturali. Vtraque pars est D. Tho. & primam expressè affirmat in 2. dist. 1. q. 1. art. 2. vbi inquit, quodd *creatione esse nō tantum fides docet, sed etiam ratio demonstrat*. Idem sumitur ex his quæ docet hac qu. 44. a. 2. vbi ostendit materiā primam factā esse à Deo, quodd stare non potest, nisi demonstretur dari creationem ex nihilo, quia remota materia, quæ est vltimum subiectum, non restat aliquid ex quo res fiat. Et qu. 45. a. 1. & 2. ostendit dari creationem ex nihilo, & ad Deum pertinere talem creationem. Et idem ostendit 2. contra Gent. c. 15. & c. 21. & similiter in q. 3. de potentia art. 3. Sumitur autem præcipua, & fundamentalis ratio ex hoc, quia creatio est productio ex nihilo, sed necesse est ponere aliquam productionem ex nihilo: ergo & creationem. Minor prob. quia si non poneretur aliqua productio ex nihilo, omnis productio esset ex aliquo ente præsupposito, sed ex hoc sequeretur vel processus in infinitum in causis, & effectibus, vel quodd aliquod ens extra Deum nō sit factū, neque creatura, quorū vtrumq; est apertè falsum: ergo necesse est ponere creationem ex nihilo.

Ee Sequela

Sequela probatur, quia si omnis productio, & processio rerum est ex aliquo præsupposito, de quocumque præsupposito inquiram an sit ex alio, an ex nihilo, an à se: nec enim est dare medium. Si à se, non est factum, neque creatura; & sic vel erit Deus, vel nihil, quia omne ens vel est creatum vel increatum. Si ex nihilo, habemus intentum quodd datur processio alicuius rei ex nihilo. Si ex alio, de illo alio ex quo est, rursus inquiram an sit factum ex alio, vel ex nihilo, vel habeat esse à se; & sic vel deueniemus ad aliquid, quod ex nihilo sit, vel procedemus in infinitum. Nec potest admitti circulus in istis effectibus, ita ut dicamus vnum esse ex alio, & illud aliud esse ex isto: id enim manifestam implicationem inuoluit, ut *suprà* ponderauimus, quia sic idem præsupponeretur esse, & non esse respectu eiusdem; præsupponeretur esse, ut ex illo fiat hoc, & præsupponeretur non esse, ut illud fiat ex hoc. Multo minus potest dici quodd res fiunt ex substantia Dei tanquam ex subiecto præsupposito, cum repugnet Deum esse subiectum transmutationis, & susceptum formarum.

8 Quodd verò vtrumque consequens sit manifestum, & absurdum, & implicatorium, probatur, quia processus in infinitum in causis impedit causationem determinatorum effectuum: si enim ut produceretur hic effectus numero, qui modò sit, v. g. hic ignis, hoc animal, necesse est præcedere infinitas materias, nunquam potest designari aliqua quæ inceperit: ergo neque effectus iste hic, & hunc incipere poterit. Patet consequentia, quia ea à quibus dependet hic effectus, ut incipiat, nunquam inceperunt, sed quocumque dato aliud prius, & prius fuit antè sine principio: ergo ut iste effectus incipiat, semper restat aliquid accipiendum: ergo nunquam verificabitur quod incipit iste effectus: semper enim aliquid deest ut incipiat, quia semper restabit aliquid accipere ex requisitis ad incipiendum, cum sint infinita prius quàm hoc fiat, de quo videri possunt quæ diximus circa similem rationem ad probandum dari vnā primā causā, primūque motore, *præced. tomo quæst. 2. disp. 3. art. 2.* Si enim processus in infinitum admittitur in causis, cessat demonstratio qua probatur dari Deum: ergo si ex eodem principio probatur debere dari creationem, tam demonstrabile est creationem dari, quàm Deum. Quodd verò sit inconueniens quodd deueniatur ad aliquod subiectum primum, quodd à Deo non sit factum, patet, quia sic Deus non esset omnium rerum creator, ac per consequens nec omnipotens, quia non posset omnia, nec primum ens, quia non omnia entia essent ex participatione ab ipso. Et vltèrius, illud subiectum vel esset ens potentiale, & limitatum, vel infinitum, & actus purus. Si hoc secundum, esset Deus, & à se, atque adeò non posset esse subiectum primum ex quo alia fierent, quia subiectum hoc debet esse transmutabile, & consequenter potentiale, & non actus purus. Si primum: ergo haberet esse limitatum, & finitum, & consequenter ab alio, & non à se: ergo esset ens creatum.

9 Ex quo sequitur eadē ratione probari Deum creare ex nihilo, & esse factorem omnium. Sequitur etiam materiam primā esse à Deo, & non aliquid non factum, & præsuppositum. Patet hoc quia necesse est ponere quod materia prima non sit purum nihil, sed ens reale, utpote susceptiua formarum substantialium, & compositiua cum forma, tanquā cum altera parte totius compositi, & capax existentie realis mediante forma, necesse est etiam ponere quodd sit ens reale extra Deum, & ens participatum, utpote ens potentiale, & non actus purus: & similiter quodd à Deo, in quantum primum ens, participa-

tur, & deriuatur omne ens extra se limitatum, & creatur: ergo oportet ponere quodd materia prima sit deriuata à Deo, utpote ens non participatum, & non à se, aliās esset actus purus: si autem participatum est, utique à primo ente, & à primo principio participari debet, à quo est omne ens quod quoquo modo participat esse.

Statim verò se offerebat difficultas, quomodo materia prima creetur à Deo ex nihilo, cum non sit creabile, nisi ens subsistens, & habens esse per modū totius, ut docet S. T. *in hac q. 45. a. 4.* & nos dicemus *inf. a. 3.* imò ex hoc cōsurgit difficultas, quomodo corpora creari possint, cum constent ex duabus partibus, quarum neutra creari potest, & vna supponitur ad aliam & totū resultat ex ipsis; & sic ipsum totum supponit aliquid, nempe partes; & sic non videtur fieri ex puro nihilo. Sed de hoc commodiùs ibi tractabitur. Sufficit modò dicere quodd materia prima non creatur per se seorsum, sed ut coniuncta formæ, & sub illa, quia sic creatur sicut habet esse, non autem habet esse nisi sub forma; & ideò creatio materie semper attingit illā, ut de facto subiectā alicui formæ, ita tamen materia sublunaris formæ subiicitur quod manet in potentia ad alias, potestque successiue per generationes acquirere nouas formas, & exuere alias, etiam primā, sub qua creata est, quia esse materie, ut correspondet creationi, est solum esse potentiale, quod in actum reducibile est per diuersas generationes, quibus diuersæ formæ introducuntur, & reducunt illam potentialitatem in actum; & sic actuale esse quod habet materia, modò non dependet à creatione, quia hoc actuale esse variatur iuxta variationem formarum; sed potentiale esse non potest haberi nisi in vi actionis creatiue, quæ prout tangit materiam est partialis creatio, seu concreatio. Sed quia potentiale esse non potest sine aliquo actuali in rerum natura inueniri, oportet quodd illud esse potentiale, seu capacitas quam habet materia ad omnes formas, & ad esse actuale illarum quando primò producitur, sub aliqua forma à Deo producat, quæ sub illam actionem creatiuam tunc cadat, & cum materia concreatur; ita tamen creatur sub illo esse, quodd non accipit illud ut adæquatum, sed ut mutabile, & per aliam formam, cuius etiam est capax subrogabile, eo quod plurimum capax producit, & non tantum illius primæ, sub qua fuit creata.

Secundam verò partem huius nostre assertionis, scil. quodd non sit demonstrabile per rationem naturalem mundum factum esse in initio temporis, docet S. Thom. *in præsent. q. 46. art. 2. & in 2. dist. 1. quæst. 1. artic. 5.* Et supponit quodd etiam stando in ratione naturali non potest demonstrari quodd mundus sit ab æterno, nec rationes Aristotelis id efficaciter probant, ut ostendit S. Thom. *cit. qu. 45. art. 1.* cæque soluit, imò, ut ibi ostendit, Aristoteles circa æternitatem mundi præcipue intendit destruere quorundam Philosophorum positiones, qui ponebant mundum incepisse quibusdam impossibilibus modis, & veritati repugnantibus; quodd verò de facto ab æterno mundus fuerit, nusquam demonstratiue probauit, imò inter problemata dialectica id numerat *in lib. 1. Topicorum cap. 9.* Hoc ergo supposito, quodd reuera ita est, quodd non possit dari demonstratio, nec ratio aliqua probans mundum esse ab æterno, cum id non possit deduci ex quidditate ipsa, & natura mundi, nec ex necessitate Dei agentis, sed ex voluntate eius pendeat, per quam factus est mundus, consequenter neque demonstrari potest per rationes naturales quodd in tempore inceperit, vel in quo tempore, quia res illa omnino dependet

ex mera voluntate Dei libera : de libero autem vt libero , demonstratio dari non potest , & multo minus de libero diuino ex creaturis , quia nullam necessariam connexionem habet cum illis, sine connectione autem necessaria , demonstratio non subsistit. Rationes autem quæ multiplicari possunt, vel ad probandum creationem mundi ab æterno , vel conantes demonstrare quòd in tempore sit productus, optimè soluit S. Tho. in hac q. 46. art. 1. & 2. & 2. contra Gentil. c. 34. & 37. & q. 3. de potentia art. 17. Non est necesse eas hic transcribere.

Soluuntur obiectiones.

10 Primò obicitur commune Philosoph. axiomat: Ex nihilo nihil fieri, quod ex natura rei videtur certum, cum inter nihil, & aliquid nulla sit proportio, nec determinatio ad hoc potius quam ad illud.

Conf. quia si Deus crearet ex nihilo , maximè propter rationem D. Tho. quam affert in hac q. 44. art. 1. & q. 45. art. 2. quia Deus est causa totius entis, eo quod habet ipsum esse à se, & hoc solum potest esse vnum, reliqua omnia sunt ens per participationem, & sic sunt ab illo, quod est ipsum esse à se, quia omne quod participatiuè est tale, causatur ab eo quod essentialiter est tale, sicut ferrum esse ignitum causatur ab igne. Ex hoc autem sequitur quod Deus operetur ex nihilo, quia qui facit ex aliquo, præsupponit illud, ex quo operatur: si ergo Deus aliquid præsupponeret, non faceret illud; & sic non faceret omnia: sed hæc ratio non probat: ergo. Minor prob. quia imprimis non bene infertur quòd ab eo quod est essentialiter tale, causetur id quod per participationem est tale, sicut ignis essentialiter est ignis, non tamen omne ignitum causatur ab igne: potest enim causari à sole, vel per antiperistasis, aut collisionem duorum lapidum sine igne. Item homo essentialiter est animal, non tamen causat omne animatum, & Angelus essentialiter intellectiuus, non tamen causat omnem rationem intelligibilem, nec omnem naturam intellectiuam, sicut est anima rationalis. Quod si dicatur quod etiam homo essentialiter est rationalis, & non per participationem: Contra est, quia etiam creaturæ sunt essentialiter entia, & suam quidditatem habent in ratione entis aut substantiæ: ergo similiter non infertur quòd erunt causata à Deo, saltem quoad quidditatem. Et secundò, dato quòd Deus non solum essentialiter sit ens, sed ipsum esse per essentiam, vnde sequitur: ergo est causa efficiens cæterorum entium? Nam solum ex ipso esse per essentiam inferri potest quòd sit causa formalis, sicut si esset albedo separata, esset causa omnium alborum, sed non effectiua: & ideæ, quas posuit Plato, si darentur essent causæ singularium per participationem sui, non per efficientiam. Et denique tertio; dato toto hoc, solum sequitur quòd creaturæ sint à Deo quantum ad existentiam, non quantum ad potentialitatem, quia ex eo quod Deus sit suum esse, solum sequitur quòd omne esse creatum sit participatum. At materia non habet esse, sed est pura potentia, & solum per formam participat esse. Vnde ergo infertur quod materia sit à Deo? Si autem non hoc infertur: ergo neque quòd producat ex nihilo, sed ex materia quæ non habet esse in se immediatè, & consequenter neque à Deo.

Resp. quòd, vt dicit S. Thom. in hac q. 45. art. 2. ad illud axiomat Philosophorum procedit in causis particularibus, à quibus res emanant secundum transmutationem de vno esse ad aliud, sicut cum fit homo ex non homine, & ignis ex non igne, non autem in prima emanatione ab vniuersa Ioan. à S. Thom. in 1. part. D. Th. Tomus alter.

li, & primo principio, à quo emanant res secundum omnem rationem entis. Itaque ex nihilo nihil fit, distinguo, per transmutationem de vno in aliud, sicut agunt causæ creatæ, & particulares, concedo: sine transmutatione de vno in aliud, sed per simplicem emanationem totius entis, sicut agit causa prima, & primum ens nego. Philosophi autem antiqui solum intellexerunt fieri rerum per transmutationem, & multi eorum non valebant intelligere transmutationem substantialem in materia prima, sed solum accidentalem in subiecto in actu. Loquendo ergo de transmutatione in subiecto rectè procedit dictum axiomat, quòd *ex nihilo nihil fit*. Sed est altior modus operandi, quod primum principium operatur, in quantum ab illo procedit ens in quantum ens, id est totum quod habet rationem entis in re producta; & sic non supponit subiectum quod transmutet, sed totum facit quidquid est. Et ex hoc discerni potest quid sit procedere aliquid per modum totius entis ab alio, & quid sit procedere per modum entis simpliciter. Nam bene stat quòd aliquid procedat ab alio, tanquam ens simpliciter, non tamen procedat per modum totius entis, vt ens est. Procedit vt ens simpliciter, quod ex vi suæ processionis accipit primum esse actuale quod est esse substantiæ, ad quod non requiritur dare totam rationem entis, sed formam substantialem introducere, & consequenter supponit aliquam entitatem quam non facit, sed potentialem, qualis est materia prima. Cæterum procedere aliquid in quantum ens, seu in ratione totius entis, est processionem esse talem quæ totum quod entitatis est præbeat, & totum quod quomodocumque participat ens, & habet rationem entis realis; & sic nihil præsupponat neque entitatis actualis neque potentialis, sed totum faciat, quod est ex non ente facere.

Ad Conf. Resp. rationem D. Th. optimam esse. 11

Ad primam instantiam dicitur quod essentialiter esse tale, & per participationem esse tale, non contraponuntur tanquam essentialiter, & non essentialiter, sed tanquam quod purè, & abstractè est tale, seu impermixtè, ab eo quod contractè, & mixtè cum alio; atque adeò limitatè, & ex parte: id enim participationis nomen sonat, quod est partem capere, id est non in tota plenitudine, sed in parte, seu participatione; tunc autem aliquid recipitur in partem quando aliquo alieno miscetur; & sic non manet in tota sua puritate; quando autem est immixtum, & purum, tunc dicitur manere non participatum, sed per se tale, non solum perfectitate intrinseca, & essentiali, sed perfectitate solitudinis, seu singularitatis, quia est sine altero, & sine consortio alicuius mixtionis, quod est esse abstractum. Et ad hoc adducitur exemplum de igne, & ignito, quatenus ignitum aliquid dicit præter essentiam ignis, ignis autem solam essentiam ignis dicit, licet non importet formam in abstracto: sufficit quòd comparetur vt impermixtum, & solam essentiam rei habens, ei qui habet cum limitatione, & consortio alterius limitantis, sicut ignitum respectu ignis. Et hoc modo, quod sic essentialiter est tale, est causa eius quòd participatiuè est tale, quia pars à toto deriuatur, & quod est per aliud naturaliter subordinatur ei quod est per se, non determinando modò in quo genere causæ: de hoc enim statim dicemus.

Sic ergo patet ad primam instantiam, quòd omne ignitum est ab igne per se, loquendo, vel ab eo quod est ignis eminenter, sicut Sol, vel virtualiter, sicut à calore quæ est virtus ignis, vel

E e 2 ab

ab ipso deriuata, vel à motu lapidum cum subordinatione ad causam vniuersalem, quæ est cælum, quod est eminenter ignis, & ignituum. Ad exemplum de homine, & Angelo dicitur quod essentialiter sunt animal, & intellectuum, sed essentialiter contractè, & limitatè, non essentialiter abstractè, & purè, non sunt ipsa animalitas, & ipsa intellectualitas, sed determinatum animal, & determinatè intellectuum in tali, vel tali participatione, seu gradu, & ita ly *essentialiter tale* non contraponitur ibi ei, quod est participatiuè tale, sed ei quod accidentaliter tale. Vt enim ly *essentialiter* opponatur ei quod est participatiuè, oportet quod sumatur ly *essentialiter* purè, & impermixtè, seu abstractè, & sine alia concretionem seu consortio limitante: vt autem opponitur huic quod est accidentaliter, sufficit quod habeat connexionem quidditatuam, & intrinsecam, non tamen ex hoc sequitur quod sit causa aliorum participantium talem rationem, quia ratio causalitatis huius non fundatur in essentiali conuenientia, & connexionem prædicatorum, sed in perfectitate, & conuenientia alicuius prædicati ita pura, & impermixta, quod alia comparentur ad ipsa vt minus, & participata, & ex permixtione seu receptione in alio limitatiora, sicut esse in actu puro, quod est in Deo, comparatur ad esse creatum, vt ad permixtum potentialitate, & receptibilitate, vnde oritur limitatio. Et quidem bene potest esse quod id quod essentialiter est tale, etiam in concreto, & non in abstracto possit comparari vt causa eorum quæ participantur ab illo, sicut in exemplo quod adducit D. Thom. de igne, qui est causa omnium ignitorum, & tamen ignis non est abstractum, sed concretum, non igneitas, sed ignis. Sed hoc ideo est, quia ignis licet sit concretum, & non abstractum quantum ad formam ipsam constitutiuam naturæ ignis, quia habet formam in materia, tamen est impermixtum, & purum quantum ad consortium extraneæ substantiæ quæ caret ignitum autem dicit naturam ignis, non quomodocumque, sed permixtam alteri extraneæ substantiæ quam afficit, & quasi vestit, sicut dicitur ferrum ignitum, lapis ignitus, & respectu horum se habet vt per se tale, respectu eius quod participatiuè est tale, quia etiam ratione homo potest dici causa omnium quæ humana sunt, & Angelus respectu omnium quæ sunt angelica, quia comparatur ad illa vt ad participantia, & recipientia id quod hominis vel Angeli est. Et sic inter participatiuè tale, & formaliter, seu essentialiter tale, solum debet attendi id quod plenè, & purè est tale, & id quod partim aut permixtè, quia sic limitat, & contrahit illam puritatem; & à plenitudine ad partialitatè, ab eo quod totaliter, & simpliciter est tale ad id quod partialiter aut participatiuè, semper interuenit causalitas seu deriuatio aliqua, licet in alia consideratione etiam id quod simpliciter est tale concretum sit; sed quia abstractis, & remotis ab omni concretionem, & materia facilius intelligitur totalitas, & puritas formæ, plerumque hoc quod est essentialiter esse tale, respectu eius quod participatiuè est tale, attribuimus formis abstractis, & in abstractione subsistentibus. Vnde etiam non obstat quod creaturæ habeant suam quidditatem essentialiter, & secundum connexionem essentialem: fatemur enim quod habent illam, & essentialiter, id est, intrinsecè, & non accidentaliter illis conuenit sua quidditas, & entitas, sed non purè, & impermixtè, sed cum admixtione potentialitatis, & receptione aliqua; & sic sunt participatiuè entia, & causata ab eo quod purè, & impermixtè est ens in actu.

Ad secundam instantiam dicitur, quod Deus esse causam effectiuam, supposito quod sit ipsum esse per essentiam, tanquam quid notissimum reliquit D. Th. Nam cum causa efficiens in ratione efficientis fundetur super actualitatem, & perfectionem, quia vnumquodque agit in quantum ens actu, & per eandem formam, qua aliquid constituitur in esse, operatur in actu, si Deus est ipsum esse per essentiam, & actus purus, nec potest aliquid actualius excogitari, aut perfectius: ergo neque actiuus, & efficientius, quia tota radix actiuitatis, & efficientiæ, actualitas est. Quod si ad Deum qui est summa actualitas non pertinet actiuitas, & efficientia, ad quem pertinebit? Et albedo separata si daretur, eandem efficientiam haberet respectu alborum, si albedo qualitas actiua est; & ideæ Platonis efficienter ideata, si eo modo essent ideæ quo deberent esse in vi actualitatis suæ, & quales sunt modò in Deo, non quales à Platone ponebantur, vt vniuersalia in prædicando, non in causando.

Ad tertiam instantiam dico, quod ex eo quod Deus est ipsum esse per essentiam, sequitur quod sit causa, non solum entis creati, vt habentis esse actuale immediatè in se, sed cuiuscumque habentis esse immediatè vel mediatè, vt receptiuum eius, vel vt forma eius, id est vt principium quo receptiuum, vel formale. Materia autem prima licet immediatè in se non habeat esse, nec sit principium quo formale illius, habet tamen mediatè, & vt principium quo receptiuum. Et sic de se dicit ordinem, & capacitatem ad esse, saltem mediatè, id est mediante forma. Et hoc sufficit quod sit ens participatum à primo ente, & à primo esse, quia est ens capax esse, & habens ordinem ad esse saltem mediatè.

Secundò arguit. Nam si ob aliquam rationem ponimus Deum esse creatorem ex nihilo, maximè ob authoritatem Scripturæ, ex qua motum fuit Concilium Lateranense ad illam definitionem *suprà* relata. Authoritas autem Scripturæ non cogit ad asserendum quod illa creatio est ex nihilo, aut quod omnia comprehendit, aut quod solus Deus creat: ergo. Minor prob. quia verbum *creare* quo vtitur Scriptura, ambiguum est, nec semper sumitur pro rigoroſa productione ex nihilo, sed indifferenter applicatur productioni de nouo, etiam si ex nihilo non sit, vt aliquibus locis ex Scriptura *suprà* ostendimus, & in ipsamet historia productionis mundi vtitur Scriptura verbo creandi, etiam vbi clarè constat non esse productionem ex nihilo, vt patet in opere quintæ diei, cum dicitur, *Creauitque Deus cete grandia, & omnem animam viuentem atque natabilem*, quam tamen ex aquis, & non ex nihilo produxit. Et de homine dicitur, *Ad imaginem Dei creauit illum*, quem tamen de limo terræ produxit. Ergo si verbum *creare* indifferenter sumitur pro productione ex nihilo, & ex aliquo, vnde infertur quod illud *In principio creauit Deus*, &c. sumitur pro creatione ex nihilo? Item ibi habetur in plurali *In principio creauit Elohim*, id est Iudices, *cælum & terram*, vbi non solus summus Deus significatur fecisse illa, sed cum aliorum consortio: ergo vel solus non creat, sed alij creatores sunt, aut ibi non intelligitur creatio in rigoroſa significatione. Aut cur in toto rigore intelligitur verbum *creare* quod sit ex nihilo, & non in toto rigore intelligitur verbum *Elohim*, seu *Iudices*, quod comprehendat alios præter Deum? Denique ipsa corpora, & res visibiles non videntur capaces creationis ex nihilo, ob rationem *suprà* insinuatam, quia sunt per suas partes, quarum neutra creatur, non materia, quia de se non habet esse, nec totale esse, cum sit pars: non forma, quia producitur vt dependens à materia,

& vnita illi, & educta ex illa: ergo in corporibus non habet locū creatio, & sic nō est creator omniū.

Respon. negando minorem. Ad probationem dicitur verbū illud *creare* debere sumi in toto rigore, vt *supra* iam ponderauimus, quia licet verum sit quod verbum *creare* aliquando in Scriptura non sumitur pro creatione in toto rigore, sed pro productione facta à Deo cum summo imperio, tamen cum dicitur *In principio creauit*, necessariò intelligitur nihil ante præcessisse, tum quia Scriptura se explicat dicendo quod fecit Deus ista ex nihilo 2. Machab. 7. & quod solus fecit, & nullus alius secum, Isai. 44. tum quia sæpius dicitur Deum creasse omnia, fecisse omnia, &c. Qui autem factor est omnium, nihil præsupponit non factum à se, alias illud non factum esset Deus, vel si esset creatum ens, Deus non fecisset omnia, si illud non esset factum à se, sed præsuppositum. Ergo in principio creandi omnia, necesse est quod ex nihilo fecerit, & sic illud *In principio creauit*, de creatione ex nihilo debet intelligi, licet post illud principium creatio applicari possit, etiā in his, quæ non ex nihilo fiunt: quamuis homo ad imaginem Dei creari dicitur ratione animæ, quæ est ex nihilo. Vnde sufficiens fundamentum habuit in Scriptura Concilium Lateranense, vt hanc veritatem definiret, & sic communiter tradidere Patres, cum determinant contra Arium Verbum non esse ex nihilo, seu ex non entibus, sicut est creatura. Videatur Athanasius lib. de incarnat. Verbi, in principio, Cirillus lib. 5. Thesauri cap. 4. Chrysostomus homil. 2. in Genes. Basilii, Ambr. in suis Hexameron, & alij.

16 Ad secundam probat. dicitur quod verbum *Elohim* in plurali positum in illis verbis *In principio creauit Deus*, non significat alios extra Deū creatores, aut cooperatores creationis, cum constet Isai. 44. quod Dominus solus extendit cælos, stabilinit terram, & nullus secum. Vnde nec dicitur ibi *creauerunt* in plurali, sed in singulari *creauit*, quod est signum nomen *Elohim* significare non plures creatores, sed vnum principium. Ponitur tamen in plurali, iuxta Hebraicam phrasim, quæ significat rem magnam per pluralitatem, seu multitudinem, quasi sit sensus, ille Deus qui est ita magnus, sicut multitudo Deorum, aut Iudicum creauit cælum. Alij dicunt ibi insinuari in nomine plurali mysterium Trinitatis, quod nescio an consueuerit Scriptura personas diuinas nomine Deorum appellare. Vt vt est, argumentum parui momenti est.

Ad tertiam probat. Dicemus art. 3. agendo de his quæ capacia sunt crari.

ARTICVLVS II.

Quid sit creatio ipsa tam actiue ex parte Dei, quàm passiue ex parte creaturæ?

17 **D**Vo dicta inuenimus apud D. Tho. circa creationem ipsam, quæ in præsentī examinanda sunt.

Alterum circa creationem actiue sumptam ex parte creatoris.

Alterum circa creationem passiue sumptam ex parte creaturæ.

Primum dictum est: Creatio ex parte Dei est actio æterna, ex qua tamen non sequitur effectus æternus, sed temporalis, qualem scil. Deus voluit iuxta id quod conceptum, & prædefinitum est. Habetur hæc propositio in hac quæst. 46. art. 1. ad Ioan. à S. Thom. in 1. part. D. Th. Tomus alter.

10. & 2. contra Gentil. cap. 35. & quæst. 1. de potentia art. 1. ad 8. vbi docet quod *Potentia Dei semper est coniuncta operationi, sed operatio Dei non semper est coniuncta effectui*. Et quod actio Dei sit æterna, sed effectus temporalis, iterum repetit qu. 3. de potentia art. 17. ad 12. & 26.

Secundum dictum est. Creatio ex parte Dei non addit supra creaturam, quæ est terminus productus, nisi relationem ad creatorem vt ad principium sui esse, sicut in passione, quæ est motus, importatur relatio ad principium motus. Ita habet in hac qu. 45. art. 3. & qu. 3. de potentia art. 3.

Circa primum dictum, est illa communis difficultas, quomodo actio possit esse sine termino, cum ex intrinseco suo conceptu sit tendentia ad illud, & productio illius; si autem terminum non habet actu, tendentia, & productio actualis ad illud non est: ergo non stat actionem in actu esse æternam, & effectum temporalem. Quod si dicatur actionem istam non identificari cum termino, sed esse actualitatem agentis. Contra est, quia vel actualitas ista pertinet ad actum primum ex parte agentis, vel ad actum secundum, quo emittitur, & procedit res operata. Si ad actum primum, non est actio sed virtus, seu potentia, si est actus secundus producendi, & ipsa processio rei operatæ: ergo non est sine termino procedente illa actio, & consequenter si est actio æterna in actu secundo, erit etiam processio creaturarum æterna, quod est heresis manifesta.

Secundò augetur eadem difficultas, quia si actio per modum actualis productionis in Deo est ab æterno: ergo & denominatio agendi ab æterno erit, quia non potest intelligi formam aliquam in subiecto esse actu, & non denominare; sed denominatio agendi est esse creatoris, & dici creantem: ergo Deus ab æterno creator est, & creans, quod concedi non potest, nihil enim creat ab æterno: ergo creator non est. Vnde huiusmodi denominationes & relationes ex tempore de Deo dicuntur vt D. Thom. ostendit *supra quæst. 13. art. 7.*

Circa secundum dissentit à D. Thom. Molina *super quæst. 45. art. 3.* & Suarez in *metaphysica disp. 10. sect. 5.* quantum ad duo.

Primum quod creatio ex parte creaturæ se reuens non addit solam relationem supra creaturam procedentem: nam hæc relatio super aliqua dependentia fundari debet, non immediatè super ipsam entitatem rei creatæ, nisi quatenus dependens est. Hanc autem dependentiam, seu quidquid illud sit quod supponitur ad fundandam relationem dicunt esse modum superadditum rei creatæ, sicut in omnibus aliis effectibus.

Secundum est quod hæc dependentia creaturæ vt est quædam emanatio, seu effluxus à Deo est actio transiens verè, & propriè, quæ identificatur cum ipso termino. Neque hoc derogat perfectioni diuinæ potentiæ, quia potentia diuina ita est actiua quod non perficitur per actionem, sed ipsa potius actio à potentia recipit perfectionem: nec ipsum mediare inter potentiam Dei, & effectum magis derogat diuinæ potentiæ, quàm quod mediet dependentia inter creaturam factam, & Deū. In summa, creationem explicat hæc sententia sicut actionem quamlibet instantaneam, quæ ab agente creato procedit, remoto motu successiuo, & mutatione ex materia seu subiecto aliquid operante, quia in creatione subiectum non supponitur, ex quo aliquid fiat, sed totum fit ex nihilo.

Iuxta hoc potest etiam esse dubium, an creatio sit mutatio, non quidem alicuius subiecti educendo ex illo formam, & per modum passionis receptæ

E c 3 in

in materia, sed mutatio termini, quatenus illum creando transfert de non esse ad esse, & ipsemet terminus recipit in se esse, & dependentiam à Deo: ipsum autem recipere quoddam pati, & quoddam mutari est, saltem largè loquendo de mutatione.

Creatio ex parte Dei est actio aeterna entitatiuè, & temporalis denominatiuè.

- 4 Pro intelligentia creationis, ut tenet se ex parte Dei, est aduertendum, quod in actione tres habitudines considerentur in quantum actio præcisè.

Prima est ad terminum *ad quem*, & sic est influxus causæ agentis per modum *Ad*.

Secunda est ad ipsum agens, & sic est influxus causæ agentis ut dicit *Ab*.

Tertia est ad terminum *à quo*, & sic non consideratur ut influxus, sed ut destructio vel recessus ab illo termino, quia in illum non influit, sed relinquit aut tollit. In actionibus autem inducentibus passionem in subiectum, seu materiam induci ut alius respectus illius influxus, ut in passo ab agente, sed hic respectus potius pertinet ad illam ut passio, vel motus est, quā ut actio: id enim quod actionis est præcisè concipitur per hoc quod sit influxus à causa agente ad aliquem terminum ex termino relicto seu destructo. Et hic habet respicere terminum *ad quem* influendo, & terminum *à quo* destruendo, seu relinquendo, & agens, egrediendo: quos respectus explicamus per *Ad*, respectu termini ad quem tenditur; per *Ab* respectu agentis à quo egreditur, per *Ex* respectu termini *à quo* qui relinquitur.

Inquirimus ergo quid sit in actione creativa Dei influxus ut dicit egressionem à Deo, seu prout dicit respectum *Ab*. Nam in creaturis agentibus inuenimus hunc influxum quasi partitum, seu duplex munus habentem & duplicem formalitatem, nimirum & actualitatem agentis, quatenus reducitur de potentia ad actum, de otio in operationem: agens enim de se est solum in actu primo, perficitur autem & quasi extenditur ad influendum dum fit in actu secundo, seu reducitur de potentia ad actum; & hæc actualitas quia egreditur à potentia ipsa, quasi actus secundus à primo, etiam importat *Ab*. Et secundo iste influxus tangit ipsum terminum, quia inducit & influit esse in ipsum, & ut tenet se ex parte termini etiam dicit *Ab* quia etiam terminus mediante influxu egreditur ab agente. Istæ autem duæ formalitates non sunt, in una & eadem re, licet una sequatur ad alteram, & coordinetur illi; nam influxus prout tangit terminum, identificatur cum illo, & ubi est terminus est ille influxus, si terminus est in passo, ibi est influxus, si terminus est sine passo in ipso termino influxus est dans illi esse extra ipsum agens quando producit aliquid extra ipsum. Influxus autem ille prout est actus secundus agentis, pertinet ad ipsum agens, eiusque potentiam, quæ de se est in actu primo, reducitur & constituit in actu secundo. Et sic distinguitur actio, seu influxus ut faciens, & ut effectus, ut faciens est in agente, ut effectus in termino. De quibus videri possunt quæ diximus in *Physica quæst. 14. art. 3.* ubi hæc omnia ex D. Thom. probauimus, & iterum *suprà* adduximus plura *disp. 11.*

- 5 Dico ergo, his suppositis, quod actio, ut tenet se ex parte Dei, est actualitas eius sine ulla potentialitate, vel actu primo; & sic est actus secundus ex parte agentis se tenens, nec est aliud ab enti-

tate eius, sicque est actus secundus æternus, nec indiget potentia diuina reduci in actum, aut amplius actuari, & perfici, ut influit, sed seipsa influit. Non tamen influxus ex parte termini ipsum tangens ipsique dans esse ponitur nisi in tempore, & denominatio agendi, quæ est relatio ad creaturam & ab isto influxu terminatio resultat, sine quo non denominatur agens, temporalis est, non æterna. Sumitur hæc conclusio ex Caiet. in hac quæst. 46. art. 1. explicans solutionem ad 10. D. Thom. Et quæ ipsius D. Thom. locis *suprà* allegatis, ponendo hoc primum dictum ipsius, & in hac quæst. 45. art. 3. ad 1. ubi dicit, quod creatio actiue significat actionem diuinam, quæ est essentia Dei cum relatione ad creaturam. Et declaratur etiam ab ipso in 2. contra Gentil. cap. 9. quia *Actio*, inquit, alicuius rei, est quoddam cōplementum potentie eius: comparatur enim ad potentiam sicut actus secundus ad primum, diuina autem potentia non completur alia quàm seipsa, cū sit ipsa Dei essentia: igitur non est aliud potentia quàm actio. Confirmat ex hoc quod diuina potentia est essentia Dei, & eius agere est eius esse, & eius esse est substantia: & sic actio eius est eius substantia. Ac denique quia actio, quæ non substantia est, est accidens quod inest agenti, unde cum in Deo non sit accidens, non inest ei actio, sed est eius substantia. Ex quibus deducitur quod secundum D. Tho. actio prout est actus secundus respectu potentie, quæ est actus primus, complet potentiam, eamque in actum reducit formaliter illi inexistendo, aliàs nō bene inferret quod est substantia Dei, quia actio inest agenti, & in Deo non est accidens: in agentibus autem creatis ista secunda actualitas etiam effluit, & emanat à prima, seu ab actu primo, cumque actuatur quando effectus etiam effluit, & cessat consummato effectui, quia tunc non amplius operatur causa. Unde dicit D. Tho. *suprà* quæst. 25. a. 1. ad 3. quod potentia in rebus creatis non solum est principium actionis, sed etiam effectus: in Deo autem saluatur ratio potentie quantum ad hoc quod est principium effectus, sed non quantum ad hoc quod est principium actionis, quæ est diuina essentia, nisi forte secundum modum intelligendi prout diuina essentia potest intelligi & sub ratione actionis, & sub ratione potentie. Igitur actualitas illa actionis quæ causam creatam constituit in actu secundo operantem, est à potentia ut à principio sui; & sic ex illa dimanat: in Deo autem non emanat à potentia: sic enim esset aliquid ab illa distinctum; & cum dicat D. Th. quod ipsa actio, seu actus secundus agendi est ipsum esse, seu essentia Dei, si actio emanaret à potentia, essentia emanaret ab essentia, quod est implicitorium.

Ex his ergo sit manifestum quod actio Dei, seu creatio, prout est actus secundus ex parte Dei, se tenens, est entitatiuè æterna, siquidem ista actio ut ex parte agentis se tenet entitatiuè est ipse actus secundus agentis, & ipsum esse Dei, non autem aliquid reducens virtutem Dei actiuam de potentia ad actum, de acta primo ad secundum, de otio in operationem, sed virtus Dei per seipsam est in actu secundo tum essendi, tum operandi, quia est actus purus, & ad nihil actualitatis est in potentia: ergo actualitas illa secunda, qua dicitur potentia esse actu in quantum agens, & operans, æterna est in Deo, imò est eius esse, quia in Deo virtus agendi, & substantia, & ipsum esse, & ipsum agere, seu actualitas secunda essendi, & agendi est prorsus eadem, nec per aliam actualitatem est operans, & existens; actualitas autem secunda in agendo est actio: ergo actio in Deo est æterna in sua entitate & actualitate.

Dices:

7 Dices: Non sufficit hæc actualitas sic considerata, propterea est idem cum esse Dei ad constituendam rationem actionis. Nam etiam si Deus nihil vellet de facto producere, sed omnia concludere sub statu puræ possibilitatis, adhuc illa actualitas sic maneret in actu secundo, sicut modò: nec enim ex volitione Dei libera mutari potest: ergo etiam modò datur comparatione ad purè possibilis; sed non dicitur Deus habere actionem ad purè possibilis, sed solum potentiam: ergo nec ad alia, quousque in re ponantur & fiat, sed tota illa actualitas respectu rei nondum existentis, & productæ in se non habet vim actionis, sed solum virtutis, & potentia.

Resp. quòd respectu possibilium sub puro statu possibilitatis actio Dei manet sub eadem actualitate entitativa, & ex parte subiecti, non terminativa, & ex parte obiecti, quia actio hæc de se respiciens, & complectens omne creabile, determinatur ad particulares effectus iuxta suæ voluntatis decretum, quo operatur, & partitur singulis propterea vult. Et hæc determinatio actionis non addit aliquid supra ipsam, aut supra potentiam, sed est ipsamet actio ut libera volitionis terminatione gaudens, quia actio qua Deus actualiter dicitur operans, non est alia ab actione immanenti suæ voluntatis, & imperij: & sicut actus voluntatis, qui in se est necessarius suæ eminentia determinatur liberè ad has creaturas potius quam ad illas, cum tamen posset se determinare ad plures, vel ad omnes, ita actio, quæ de se potest circa omnia possibilis versari, ut liberè determinata respicit ista efficaciter, & applicatè, reliqua quoad sufficientiam actualitatis, & virtutis, sed hæc applicatio & efficax determinatio non magis addit supra actualitatem actionis quam libera determinatio actus voluntatis supra actum voluntatis necessarium. Sed tam ipsa actualitas actionis secundum vim actualitatis, quam ipsa applicatio seu determinatio ut libera, æterna est, & æternitate mensuratur. Vnde nec etiam pro hac parte incipit convenire in tempore, sed ipsa actualitas secunda actionis Dei tam quoad rationem actualitatis, quam quoad determinationem & applicationem efficacem respectu earum creaturarum, & non aliarum æterna est, sicut ipse actus liber.

8 Et ex hoc concluditur & explicatur secunda pars conclusionis, quòd denominativè illa actio non dicitur de Deo ab æterno, sed temporaliter, scilicet quando effectus ipse ponitur executivè in esse in sua propria duratione, & mensura. Et probatur, quia denominatio agendi, seu creandi non sumitur ab actualitate actionis, ut in agente est, sed ut terminum tangit, & ponit in esse, seu ab actione ut consummata est in termino, non ut incipiens ab agente, aut actuans ipsum.

Et ratio huius est quia denominatio agendi, vel creandi non est solum denominatio in genere causæ formalis, sed effectivæ, quia reddit & constituit causam efficientem. Ad denominationem autè causæ formalis sufficit quòd forma sit in subiecto, eamque actuet, & informet, ad denominationem verò causæ efficientis non sufficit subiectum actuari, & informari à forma, sed terminum effici & attingi ab efficientia, quia efficiens non denominatur efficere nihil, sed aliquid ex parte termini, non ex parte subiecti, quia id quòd efficitur non est subiectum agens, sed effectus: Si autem nihil ex parte termini efficit, non efficit: ergo ut denominet efficere, oportet quòd effectus sit aliquid factum, & terminus ex vi efficientiæ positus. Ergo actio non denominat Deum agentem, seu

creantem nisi posito termino, & attacto per ipsam actionem, quia denominatio ista est denominatio qua dicitur efficiens, non qua solum dicitur actualis in se, & in actu secundo ad effectum. Licet ergo ista denominatio agendi, & operandi in se sit formalis & proveniat à forma inherente, quæ est ipsa actio, ut est actus secundus agentis, tamen quia est formalis denominatio non sistens purè in causalitate formali, sed involvens secum causalitatem effectivam, quia ipsa est causalitas efficiendi, pro hac parte dependet à termino effecto, sine quo non denominatur aliquid efficere: sunt enim aliquæ formæ, quæ in præbendo suum effectum formalem dependent ab aliquo extrinseco, ut actio ab effectu, passio ab agente, ubi à locante, vestitum à veste circumdante, & sic de aliis. Et hac ratione actio Dei quæ ex parte sua est actualitas æterna, ut denominet non solum Deum actuatum seu potentiam Dei existentem in actu, sed etiam efficientem & creantem, expectat illationem passionis seu effectus, ut dicatur aliquid facere, non verò nihil.

Solum est difficultas, quomodo in Deo sit ista actualitas actionis in actu secundo ex parte Dei separata ab influxu ut tangente terminum, & inferente passionem, quod in agentibus creatis non videmus, & idèò difficile id concipimus in Deo, qui opposito modo se habet in hac parte quam creaturæ. Sed hoc melius constabit ex solutione argumentorum.

Ad rationes ergo dubitandi pro hac parte à principio positas, Resp.

Ad primam dico, actionem illam, ut tenet se ex parte agentis, esse tendentiam ad terminum, distinguo, tendentiam activam, concedo, passivam, seu formalem, nego. Et hæc tendentia tenet se ex parte agentis, & non identificatur cum termino formaliter, sed causaliter & originativè, quia scilicet ex ista actualitate originatur ipse influxus, qui cum termino, seu effectu identificatur, & sic causaliter, non formaliter identificatur cum effectu. Sed differentia est inter actionem divinam & creatam, quòd creata procedit à virtute causæ tanquam à principio, & reducit illam de potentia ad actum, de actu primo ad secundum. Et quia virtus, seu potentia causæ non est semper in actu secundo, sed quandoque dormit, idèò iste actus secundus non est semper in agente, sed solum dum non est in otio, sed in operatione, & actu. At verò actio divina non procedit à potentia Dei, sed est ipse actus secundus, seu actus purus Dei secundum se, ita ut non indigeat aliquo reducente de nouo actum primum ad secundum, & potentiam ad actum, sed per seipsam est actus ultimus activus, quia purus, & sine vlla potentialitate, sed tamen ita eminens & superior ad effectum, quòd emittit illum & exequitur quando vult, & propterea vult, sicut in Deo est actus liber tantæ eminentiæ quòd non consistit eius libertas in exire, vel non exire à potentia libera, sed postquam est in actu, libertatem habet ut terminetur, vel non terminetur ad obiectum subiiciendo illud sibi, vel relinquendo: sic actio ipsa ita reddit Deum in actu secundo activum, quòd tamè ex activitate hac in actu secundo potest exire effectus quo tempore voluerit: nec enim est actualitas per modum actus transiens quæ est alligata effectui, sed per modum actus puri, quæ est independens ab effectu, & effectus sequitur iuxta voluntatem talis actus puri, nec indiget nova determinatione, ut in tempore sequatur actus potius quam alio, sed sua eminentia, & actualitate complectitur omne tempus & determinat

minat illud, & sic egreditur actus quando vult; sicut idem actus sua eminentia est nolitio, & volitio, & seipso determinat quod obiectum sit vel non sit.

10 Ad secundam Resp. ex dictis, denominationem agendi non convenire Deo ab æterno, quia licet actio sit æterna in Deo, quantum ad actualitatem ex parte agentis se tenentem, non tamen quantum ad omnem conditionem requisitam ad efficientiam consummatam, quia ille influxus, seu actus secundus agentis nondum intelligitur attingere terminum, & ex parte termini se tenere, licet intelligatur ex parte agentis actuare, seu reddere ipsum in actu secundo: denominatio autem agendi, licet sit in agente, ut à quo, vel in quo est, requirit tamen attingentiam termini ut ad quæ terminatur, eo quod denominat non purè formalizando, & in vi causæ formalis, sed efficiendo, & constituendo causam ut efficientem: efficere autem non stat, nisi attingendo aliquid quod sit, tanquam terminum, quia efficere nihil, est non efficere, & efficere aliquid, est terminum attingere. Vnde antequam efficientia attingat aliquid terminativè, non denominat subiectum efficere, quamvis denominet ipsum in actu secundo, seu actum in actu ultimo ad efficiendum: eo quod illa prima denominatio efficiendi requirit pro conditione ad denominandum terminativam attingentiam termini, & non sufficit actio actualitatis actionis, ut ex parte agentis se tenet, sine illa conditione ad denominandum efficere, quia istæ formæ sunt talis conditionis quod non denominant per absolutam sui informationem, sed cum dependentia ab aliquo extrinseco, ut supra explicatum est in actione, passione ubi, veste, &c.

11 Dices: si dependet aliqua forma ab extrinseco in denominando, etiam dependebit in informando, & ita ante illam conditionem termini extrinseci positam non dabitur talis forma, sicut nō datur in creatis actio in agente, antequam detur terminus influxu eodem actus. In Deo autem non erit ista actio influxus aliquis ex parte Dei, sed solum ex parte creaturæ se tenens, & denominans extrinsecè Deum.

Resp. in creatis agentibus ita esse, quia cum actio, etiam ut actus secundus agentis est, emanat à potentia & virtute, quæ est in actu primo, non autem emanat actus secundus sine termino, quia ab eo specificatur, & ad illum essentialiter se habet, consequenter emanat etiam ipse effectus, seu terminus actionis, & sic non est una emanatio sine alia. At verò in Deo non emanat actio in quantum actus secundus à potentia divina, sed ipsa secundum se est actus secundus, quia actus purus, & est omnino independens à creatura faciendâ, nec ab illa specificatur, sed ipsa specificat & determinat creaturam: & sic ad existendum in subiecto non dependet ab attingentia creaturæ & effluxu actuali illius, sed ipsum causat prout voluerit. Nec potest ista actio in sola denominatione extrinseca poni respectu Dei, quia esse in actu 2. ad operandum nō est denominatio extrinseca, sed realis actualitas, quia ratione illius operatur causa realiter.

Creatio ex parte creaturæ non est aliquid medium inter Deum & rem creatam.

Dico secundò. Ex parte creaturæ creatio est ipsamet creatura, ut per se immediatè dependens à Deo in esse: nec datur aliquod medium inter Deum & creaturam superadditum ipsi creaturæ quasi medium influens & ratio producendi, sed

solum importat novitatem termini facti ut à Deo cum relatione dependentiæ consecuta, non cum dependentia ut medium. Hæc conclusio est expressa D. Thom. in quæst. 3. de poten. art. 3. & idem confirmat in hac quæst. 45 art. 3. Docet ergo D. Th. in dicto loco, quod *In omni mutatione, & motu est duplex processus Vnus ab uno termino motus in alium, sicut ab albedine in nigredinem, alius ab agente in patientem, sicut à faciente in factum. Sed hic processus non similiter se habent in ipso moveri, & in termino motus. Nam in ipso moveri id quod movetur recedit ab uno termino motus, & accedit ad alterum, quod non est in termino motus, ut patet in eo quod movetur de albedine in nigredinem, quia in ipso termino motus iam non accedit ad nigredinem, sed incipit esse nigrum. Similiter dum est in ipso moveri, patientem transmutatur ab agente, cum autem est in termino motus, nō ulterius transmutatur ab agente, sed consequitur factam quandam relationem ad agentem, prout habet esse ab ipso, & prout est ei simile quoquo modo, sicut in termino generationis humanæ consequitur natus filiationem. Creatio autem non potest accipi ut moveri quod est ante terminum motus, sed accipitur ut in facto esse. Vnde in ipsa creatione non importatur accessus ad esse, nec transmutatio à creatore, sed solummodo inceptio essendi, & relatio ad creatorem, à quo esse habet. Et sic creatio nihil est aliud realiter, quam relatio quedam ad Deum cum novitate essendi.* Hæc D. Thom. Ex cuius verbis constat quod non potest intelligi quod creatio sit aliquid antecedens ipsum factum esse creaturæ, tanquam fieri eius, & consequenter si realiter mediat aliquid inter Deum creatorem & creaturam productam, illud debet antecedere ipsum factum esse creaturæ, & sic vel debet esse antecedens per modum cuiusdam fieri, vel per modum alicuius rei, seu modi in facto esse, neutrum autem intelligi potest nec omnino concipi quod id quod purè se habet ut terminus actionis sit subiectum eius, sumendo actionem passivè, siue prout in fieri.

Ratio, & fundamentum huius sumitur præcipue ex duobus.

Primum ex eo quod ista factio, seu dependentia, aut quidquid illud sit, si consideretur ut tenet se ex parte creaturæ, non potest accipi ut medium quo res creatur, nisi vel se habeat per modum fieri ipsius creaturæ, quæ est terminus, vel per modum alicuius in facto esse, quod sit entitas inherens, aut modificans ipsam rem creatam & constituens illam in creato esse. Nam substantia esse non potest, quia hæc indigeret creari in alia creatione, nec virtus efficiens recepta in aliquo, quia in ipsa re creata, quæ est terminus, non potest recipi virtus effectiva sui; in alia autem creatura nō potest recipi virtus creandi, ut art. 4. dicimus; modò autem non est præsens difficultas de virtute sed de actione.

Secundum est quia creatio est influxus universalissimus totius entis quod fit ex nihilo, & repugnat hunc influxum ita universalem esse creatum, & passivè recipi in re producta per creationem.

Primum ostenditur sic, quia istud medium quo res dicitur creari, seu passivè esse creata, debet recipi in aliquo subiecto, vel inherendo, si est accidens, vel modificando, si est modus, nam substantia, ut diximus esse non potest: quomodo enim una substantia est in alio reddens ipsam creatam? & rursus ista substantia cum non esset Deus deberet esse creata: alia ergo creatione, & alia substantia, & esset processus in infinitum, aut deveniret ad substantiam, quæ sine villo modo passivè in

in se recepto crearetur, quod etiam dici posset de illa substantia quæ primò creatur. Si ergo est accidens vel modus identificatus cum re creata: ergo ut realiter ibi sit tale accidens, vel modus, debet supponere quòd ipsa res creata, seu subiectum sit existens: nec enim subiectari potest in nihilo, nec realiter esse, nisi in subiecto: ergo non potest esse medium quo talis res creetur, & ponatur in facto esse: nam medium quo res fit antecedere debet ipsam in facto esse, cum accipiat ut medium ad hoc ut fiat; non potest autem subiectari in illo, nisi sit in facto esse: ergo repugnat quòd id quod est medium faciendi recipiatur in ipso facto, & in ipso termino.

15 Dices: quòd est sicut existentia, quæ recipitur in re quam existentem reddit, non supponit, sic creatio passiuè sumpta reddit rem creatam in facto esse, non in facto esse supponit.

Sed contra, quia existentia non se habet per modum influxus, & medij quo res fit, sed per modum termini, quo redditur formaliter in actu extra causas, seu extra potentialitatem; & idè pertinet ad ipsam rem creatam, & in illa recipitur, non supponendo existentem, sed constituendo formaliter, seu terminatiuè. At verò influxus ille, seu creatio passiuè consideratur ut medium effectiuum, quo tanquam ratione effectiua ex parte effectus se tenente ipse effectus creatur, & procedat in esse. Ratio autem effectiua ex parte effectus se tenens, cum sit medium, seu causalitas efficiens, non potest formaliter constituere rem existentem: sic enim esset existentia effecta, sed effectiua, seu influxiua, quia est medium ut sit effecta, non forma. Omne autem effectiuum, & influxiuum, per modum causæ efficientis supponit existentiam, & si est accidens, vel modus, debet esse in subiecto existente: ergo si istud medium influxiuum actu influit, & effectiua mediat ad hoc ut res fiat, oportet quòd existat in aliquo, dum influit, sed non est aliud quàm terminus ipse qui creatur, & fit, siquidem sit ex nihilo, & nihil prius, & ante se supponit: ergo vel subiectatur in isto termino iam facto, & in facto esse existente, vel antequam sit in facto esse. Antequam sit in facto esse est purum nihil: nec enim datur aliquod subiectum quod sit in potentia, & tendentia ad ipsum, nec datur fieri quod antecedit factum esse realiter, cum non fiat per motum aut mutationem. Si verò subiectatur in ipso termino, ut in facto esse existente, iam illud non est mediū, nec ratio ut terminus ipse fiat, quia quod est in facto esse, non potest habere mediū quo fiat, sed solum est in illo aliquid consecutum ad talè terminum in facto esse, & hæc est relatio consecuta, non aliquid antecedens tanquam medium ut fiat. Et hac ratione D. Th. in hac q. 45. a. 3. reputat quòd est impossibile quòd eiusdem accidentis seu actionis, quæ est accidens, idem sit subiectum quod sustentat accidens existendo, & terminus qui produciatur per talem actionem; & sic supponitur non existens, & si non est existens, non sustentat illam. Solum ergo ubi supponitur materia, seu subiectum aliquod ex quo res fiat, & in quo sit mutatio, potest antecedere ipsum factum esse, & se habere ut medium ut res fiat, quia ut dicit S. Thom. in hac q. 45. art. 3. ad 3. *Si creatio significetur ut mutatio, habet creaturam pro termino, sed secundum quod verè est relatio habet creaturam pro subiecto.* Ergo in quantum fieri, seu in quantum influxus effectiuus in ipsam creaturam, non potest habere terminum pro subiecto, quia nihil comparatur effectiua, & influxiua in subiectum in quo est.

16 Confirm. hoc, quia entitas illa media, quæ

ponitur inter Deum creatorem, & creaturam factam, ex parte autem creaturæ se tenens, vel est factio actiua sumpta ex parte ipsius agentis, vel est factio passiuè sumpta ex parte facti, quod est fieri ipsius, vel est entitas aliqua in facto esse qua mediante dicitur Deus attingere terminum factum.

Primum non est ad rem, quia nunc non loquimur de eo quod dicit creatio ex parte Dei agentis: sic enim non est medium inter Deum creatorem & creaturam factam, sed est ipsa actualitas Dei agentis, & facere eius.

Secundum dici non potest cum in creatione non detur fieri distinctum à facto esse, & medium inter Deum facientem, & rem factam, cum non detur motus aliquis, vel mutatio in creatione.

Et huius ratio est, quia in creatione solum est transitus de nihilo ad aliquid, illud autem fieri non est purum nihil, sed tendentia aliqua, & via ad ipsum esse rei creatæ, alioquin si est nihil, non est fieri, sed ipse terminus à quo relinquendus, si autem est aliquid ultra terminum à quo, iam est aliquid, saltem ut via, & tendentia ad esse, & nondum ipsum esse, qui est terminus totius factionis, quia est medium ad tale esse: ergo iam ipsum esse prius est in potentia reali quàm in actu, & non solum in puro nihilo: transire autem de potentia ad actum est mutari, seu moueri. Nec potest illud fieri si aliquid reale est realiter inueniri, nisi in aliquo subiecto, & non in nihilo, neque extra omne subiectum; non est autem in ipso termino ut facto, seu ut in facto esse, quia est medium ad illud factum esse, & antecedit illud; & iterum quia res in facto esse iam non suscipit ipsum fieri: nec enim fit, neque tendit ad esse quod est in facto esse; præter ipsum autem terminum in facto esse, non restat aliquid aliud quod sit subiectum, cum fiat ex puro nihilo; atque adeo si quod est subiectum, ipsum etiam sit per creationem; ergo nulli recipitur tale fieri; & sic est in nihilo, atque adeo nihil etiam est.

Tertium denique dici non potest, quia entitas illa in facto esse non potest esse medium faciendi rem creatam, & influens in illam, quia talis res in facto esse siue sit res, siue modus, debet esse aliquid factum, & ad illud requireretur alia actio, & aliud medium, eritque processus in infinitum. Vel si non requiritur, sed per seipsam res illa, seu modus attingitur tanquam ratio faciendi aliud; & sic immediate fit per actionem creatiuam; ergo id quod primò attingitur ut res facta in termino creationis, est modus ille, qui utique est aliquid minus quàm substantia quæ creatur: ergo non incipit creatio, nec immediate, & formaliter attingit totum ens, & vniuersaliter ipsum ens, sed aliquid particulare, seu quod est minus toto ente, sed formalissima ratio creationis est attingere ens in quantum ens sub vniuersalissimo influxu totius entis: ergo non debet incipere ab eo quod est minus, & tanquam pars, sed à toto, ut totum est: ergo non indiget modo illo, seu entitate ut re prius facta, & attacta, ut media ipsa attingat totum, sed prius attingit totum ut formalissimum terminum suum, & quicquid illi coniungitur, ut superadditum, & accessorium. Ac denique currit hic ratio facta, quia cum ille modus, seu res in facto esse non sit substantia per se existens: sic enim non posset esse ipsi substantiæ creandæ ratio ut fieret, erit utique accidens, vel modus; & sic non potest intelligi, nisi aliqui inhaerens, seu inexistens, non alteri quàm ipsi termino, quia nihil ei præsupponitur: si

si autem ipsi inhæret: ergo est consequens ad ipsum, & posterius ad ipsum, supponitque illud esse existens: ergo non est medium, neque ratio faciendi, & ponendi illud in esse.

- 17 Ex secundo capite hoc idem deducitur, quia creatio influit totam entitatem, nihil præsupponens, sed totum faciens in suo termino, & ex hoc dicitur vniuersalissimus influxus, quia omnia prædicata, & entitatem quæ in termino est, facit, & nihil supponit; & ideo ex modo producendi nullum ens est quod non possit facere creatio, quia difficultas faciendi aliquod ens, est vel ex defectu materiæ, & dispositionum, vel ex defectu virtutis non potentis disponere, & ordinare ea quæ facienda sunt: virtus autem quæ ex nihilo facit, non requirit materiam aut dispositiones ad faciendum terminum; & sic in nullo ente faciundo difficultatem habebit ortam ex defectu materiæ, vel dispositionum; neque ortam ex defectu virtutis, quia virtus quæ potest ex nihilo facere, ex nullo retardari potest, ne faciat, quia nihil requirit ad faciendum, & summam vim, & actualitatem debet habere, quia vincit summam distantiam, & improprietatem inter extrema, scilicet inter nihil, & ens, ut dicemus *art. 4. ubi hoc explicabitur*. Ex parte ergo virtutis qui aliquid potest semel creare ex nihilo, potest & quodlibet ens. Et hac ratione dicitur ille influxus vniuersalissimus, quia est maximus, qui potest dari respectu productionis rei creatæ, & limitatæ. Ex hoc autem deducimus non posse communicari talem influxum rei producendæ mediante aliquo modo, seu qualibet alia entitate creatâ, sed ipsam rem immediatè debere emanare ab ipso influxu actiuo Dei, ideoque omnis creatura debet immediatè Deo coniungi, & Deus omni creaturæ immediatè adesse, quia non potest per aliquod medium creatum communicare tam vniuersalem influxum, ut ostendimus *præced. tomo disp. 3. art. 1.*

Et ratio huius est, quia causalitas illa, seu modus, aut quidquid illud sit quod ponitur ut medium creandi ex parte creaturæ se tenens est entitas minor tota entitate termini producti, & non adæquans illam, quia se habet ut modus eius, vel entitas illi inhærens, non sicut ipsa substantia producenda: ergo non potest esse influxus vniuersalis in totum ens, neque ex nihilo. Patet consequentia: non potest esse influxus in totum ens, quia, ut ostendimus, & amplius dicemus *art. 4.* influxus qui sufficit creare aliquod ens, v. g. formicam, sufficit creare quodcumque ens, etiam Angelum, quia in creatione non attenditur in termino producendo particularis gradus entis, quantum ad nobilitatem, & perfectionem particularem, sed totalitas entis, quia totum ens facit, nihil supponendo ex quo faciat, vel quod disponat ad talem vel tatem perfectionem faciendam: influxus autem seu virtus quæ de se sufficit ad quodcumque creabile non potest esse aliqua entitas determinata, & limitata, quia non potest limitata virtus adæquare, & respicere totum creabile. Et hac ratione probauimus *disput. 8. cit.* non posse aliquam virtutem diffusam extra Deum operari totum ens modo illo vniuersalissimo, quo Deus creat, & creaturæ dependent à Deo, quia virtus diffusa extra Deum, hoc ipso est virtus creata, & effectus quidam Dei: ergo hoc ipso non operatur vniuersalissimo modo in ens, in quantum ens, sed particulari ad determinatum ens, & multò minus potest de se in totum ens creabile: ergo idem erit de causalitate creata, quia si virtus creata, & extra Deum non habet modum vniuersalem operandi, neque ipse influxus, & causalitas id habebit. Non operatur etiam

ex nihilo, quia influit, & operatur ut causalitas recepta, scilicet inhærens rei, aut modificans, non per se existens: ergo influit ex nihilo, sed ex aliquo subiecto, quia virtus, seu sentitas recepta non potest operari nisi ut existens in eo in quo recipitur, quia si manet extra illud in alio subiecto, non potest ex illo attingere id quod extra se est, nisi vel illi communicando alium similem influxum, & de illo erit eadem difficultas, vel nullum communicando, sed in altero manendo, & sic multò melius id faciet operatio Dei, & actualitas in eo manens, & sine alio medio operans. Si ergo recipitur in aliquo, non recipitur nisi in ipso termino creato, & producto, quia ante ipsum non datur aliquod subiectum in quo illa causalitas recipiatur, cum sit causalitas faciendi totum, atque adeò nihil de illa re supponit, cui inhæreat. Si autem inhæret aut recipitur in ipso termino, & non influit nisi ut existens in illo, prius ergo est existens modus quàm influat: ergo & terminus in quo recipitur prius est existens: ergo non influit in illud totum esse, nec facit quod existat. Et præterea omnis virtus vel influxus qui operatur ut receptus in subiecto, operari non potest nisi ex subiecto, & per mutationem, non ex nihilo, quia semper modus influendi, & operandi sequitur modum essendi ipsius virtutis aut entitatis unde profluit, ut amplius *art. 4.* dicemus.

Sed dices: etiam in generatione substantiali 18 actio, seu causalitas agentis identificatur cum termino & in eo recipitur, & tamen causat illum, nec recipitur in sola materia prima, quia illa non recipit accidentia, sed totum compositum, solum enim recipit immediatè formam substantialem: ergo bene potest etiam causalitas Dei creantis recipi in termino creato, & tamen influere in illum per modum causalitatis totum esse.

Resp. ex D. Thom. *quæst. 2. de potentia art. 3. ad 4.* quod in generatione, & est mutatio, & est relatio, quæ refertur genitum ad generans. Ratione ergo mutationis non habet subiectum ipsum generatum, sed eius materiam, sed ratione relationis habet subiectum ipsum generatum. In creatione verò est relatio, & non mutatio, & ideo non est simile. Ita D. Thom. Quare in generatione datur fieri, quod est mutari, & factum esse quod est terminus ex tali fieri resultans. Fieri quod est mutari si sumatur pro fieri dispositiuo, sic manifestum est quod dispositiones antecedentes (quæ solum pertinent ad fieri, nam consequentes sequuntur ad formam iam factam) subieciuntur non in ipso genito, sed in eo subiecto quod corrumpendum est, & via corruptionis vadit. Fieri verò, seu mutari substantiale quod est in ipso instanti generationis, in quo materia transit de vna forma substantiali ad aliam, habet pro subiecto materiam tanquam subiectum quo ipsius mutationis, & fieri, sed quia principium quo recipiendi non est sine aliquo principio quod, quia materia illa ad aliquod compositum pertinet, ideo in illo instanti reali actio illa, & causalitas generationis est in ipso genito tanquam in subiecto quod inhærens in re, quia subiectum quod non potest esse sola materia, sed compositum subsistens: sed tamen hæc ipsa mutatio, & actio quæ est in ipso composito, ut in subiecto quod inhærens, est prius natura in materia, ut in subiecto quo mutationis, & hoc modo antecedit prioritate naturæ istud fieri, seu mutari, quod conuenit materiæ ipsum factum esse, quod est compositum, & forma, vel eius unio; & bene potest antecedere hoc fieri ex parte materiæ, quia materia per generationem non fit, sed supponitur; & sic potest esse

esse subiectum quo mutationis. At verò in creatione etiam materia fit, & est terminus, non subiectum. Vnde neque datur subiectum quod, neque quo ipsius fieri, & mutationis, nec etiam sub aliqua prioritate, & antecedentia naturæ, quia nullo modo præsupponitur actioni, ut recipiat ipsum fieri ad hoc ut influat in factum esse, & sic non datur aliquod medium inter creatorem, & rem factam, in quo subiectetur ipsum fieri ad influendum in factum esse, sed totum quod ibi est terminus est, & factum esse est: nihil verò est subiectum præsuppositum ipsius fieri. Et sic immediate totum ens factum, est ab ipsa actiuitate agentis, & influxu eius, ut ex parte Dei se tenet.

19 Dico tertio, hæc relatio consecuta ad terminum creationis, qui est res facta, & producta à creatore, est relatio accidens, seu prædicamentalis, non relatio transcendentalis, seu quæ est ipsa substantia: inseparabilis tamen est ab ipsa creatura, nisi destruaturs ipsum eius subiectum. Hæc conclusio est contra Scotum in 2. distinct. 1. quæst. 5. quem sequitur Vasquez hic disput. 173. capite 3. & ducuntur eo fundamento, quia ista dependentia, seu relatio creaturæ ad Deum est inseparabilis à creatura etiam de potentia Dei absoluta: ergo est indistincta entitatiue. Patet consequentia, quia signum indistinctionis realis inter duo extrema est inseparabilitas, etiam de potentia absoluta: ergo ista relatio entitatiue est ipsa substantia rei creatæ, & factæ ut dependens à Deo, quod est esse transcendentalem relationem. Et præterea, quia substantia est prior accidente tempore, & natura. Si ergo hæc relatio esset accidens respectu creaturæ, esset prior tempore substantia creaturæ quam relatio seu dependentia ipsa à creatore, atque adeo posset intelligi tota substantia rei creatæ sine actuali dependentia à creatore, quod est implicatorium.

20 Oppositum tamen huius tenet expressè D. Thom. in hac quæst. 45. art. 3. in solutione ad 3. ubi ponens argumentum quod relatio, si est accidens, debet esse in subiecto, si autem res creata est subiectum illius, idem esset subiectum, & terminus respectu actionis, quod est impossibile. Respondet, quod *Creatio significata ut mutatio habet creaturam pro termino, sed secundum quod verè relatio est, habet creaturam pro subiecto, & est prior ea in esse, sicut subiectum accidente.* Expressius in quæst. 3. de potentia artic. 3. ad 3. ubi inquit, quod *illa relatio (scilicet creatoris) accidens est, & secundum suum esse considerata prout inhaeret subiecto posterior est quam res creata, sicut accidens subiecto intellectui, & natura posterius est, quamvis non sit tale accidens quod causetur ex principiis subiecti.* Et solut. ad 7. inquit quod *id ex quo acquiritur relatio creationis principaliter est res subsistens, à qua differt ipsa creationis relatio, quæ & ipsa creatura est, & non principaliter, sed quasi secundariò sicut quid creatum.*

Ratio huius est ea quæ insinuat in verbis adductis à D. Thom. quia ista relatio non est aliquid causatum ex principiis subiecti, seu naturæ in qua est, & multo minus non est ipsa natura, seu substantia rei creatæ in se: ergo non est transcendentalis relatio, sed accidentalis, & superueniens: nam relatio transcendentalis est intima, & imbibita ipsi entitati, nec superadditur ipsi substantiæ rei, sed est ipsamet substantia ut ordinata per se ad alterum, sicut materia ordinatur ad formam, & è contra, caput ad capitatum, partes ad totum. Et potentiæ & actus per suam entitatem, & speci-

ficationem se habent ad obiecta. At verò substantia creata neque per suam speciem, & quidditatem est tendentia ad Deum, neque ex principiis eius per necessariam connexionem oritur hæc relatio seu dependentia, sed accidentaliter creaturæ conuenit, sicut esse ipsum existentia, & deriuatio; seu participatio à Deo, quæ libera est, & prædicatum contingens ipsius creaturæ: ergo relatio super eam fundata accidens est; & sic est relatio de prædicamento relationis. Non tamen potest hæc relatio destrui, nisi destructa creatura, quia relatio non desinit esse, nisi vel ex desitione termini, vel subiecti, seu fundamenti. Terminus non potest desinere, quia est ipse Deus; fundamentum non potest cessare permanente subiecto, quia est ipsa deriuatio, & emanatio à Deo, quæ durat quandiu creatura durat: ergo solum ex desitione subiecti deesse potest.

Est tamen aduertendum, quod omnis relatio cum exigit fundamentum in suo subiecto, ratione cuius oriatur talis relatio, hoc fundamentum etiam debet assignari pro ista relatione creationis. Et tale fundamentum, seu proxima ratio fundandi non potest esse aliquid omnino absolutum, & ad se, neque purè relatiuum, quod est ad terminum ut existentem, sed est sicut relatiuum secundum dici, quod in se quidem absolutum est, nec totum eius esse est ad alterum, dicitur tamen seu explicatur per aliud, seu per ordinem ad aliud, quam distinctionem expressè ponit S. Thom. supra q. 13. art. 7. ad 1. ubi inquit, quod *quædam nomina sunt imposita ad significandas ipsas habitudines relatiuas, ut dominus, seruum, pater & filius, & huiusmodi; & hæc vocantur relatiua secundum esse. Quædam verò sunt imposita ad significandum res quas consequuntur quædam habitudines sicut mouens, & motum, caput, & capitatum, quæ dicuntur relatiua secundum dici.* Vbi vides, relatiua secundum dici, vocari ipsa fundamenta relationum, id est, ipsas res ad quas consequuntur relationes: quæ quidem explicari non possunt omnino ad se, sed ad aliud, licet in se, & quoad suum esse absolutæ res sint. Et ideo ista fundamenta licet accidentaliter superueniant subiecto in quo sunt, tamen in se, & intrinsecè ordinem, & dependentiam habent erga aliud, sicut mouens ad terminum, & ad mobile, & caput ut pars ad alias partes; ideoque in se respectus ille transcendentalis dicitur, & in idem coincidit respectu huius fundamenti relatio transcendentalis, & secundum dici, ut etiam aduertimus in Logica quæst. 17. art. 2. In creatione ergo, licet relatio illa fundetur in creatura ut existenti, & deriuata secundum esse à Deo, & sic accidentalis relatio sit respectu essentia, tamen ipsum factum esse, & ipsa existentia relatiua secundum dici dicuntur, quatenus creata, & participata à Deo, & sic fundant illam relationem accidentalem. Et hac ratione creatura intrinsecam habitudinem habet ad Deum, sicut omnis effectus ad suam causam; quia hoc ipso quod se habet ad illam sub ratione causæ vel effectus, & non sub ratione puri termini respicit non secundum relationem prædicamentalem, quæ est secundum esse, sed secundum dici seu transcendentalem. Et ideo S. Thom. in verbis supra relatis ex quæstion. 3. de potentia artic. 3. ad 7. assignauit pro fundamento huius relationis, ex quo ipsa relatio acquiritur, ipsam rem, ut subsistentem, id est per se existentem, & ipsam existentiam includentem, quæ vtrique tanquam prædicatum contingens se habet respectu rei creatæ, de se tamen subordinata est ipsi agenti, ab eoque deriuatur, & per ordinem ad illum dicitur relatio

relatione secundum dici, fundat tamen prædicamentalem respectum & accidentalem relationem, quia accidentale fundamentum habet.

Vnde patet ad fundamenta Scoti & Vasquez.

- 22 Ad primum enim fatemur esse inseparabilem istam relationem à creatura non destructa creatura, quia ipsum non destrui creaturam, seu permanere in esse fundamentum est huius relationis, & terminus *ad quem* est ipse Deus, qui desinere non potest. Ex hoc tamen non sequitur esse idem, & non distingui realiter à creatura, quia inseparabilitas non est signum evidens indistinctionis, sed solum connexionis necessariae, sicut in nostra sententia materia non potest spoliari omni forma; & tamen distinguitur realiter ab omni forma, & in sententia Scoti totum non potest separari, à partibus unitis & tamen sentit ipse differre realiter ab illis, ut contra eum obiicit Caiet. *in hac quæst. 45. artic. 3.*

Ad secundum dicitur non requiri, quod omne accidens sit posterius tempore, seu duratione substantiæ in qua subiektatur, sufficit quod sit posterius substantiæ à qua efficitur, & aliquando etiam substantiæ in qua subiektatur sicut accidens separabile & aduentitium non congenitum; quod autem substantia sit prior tempore omni accidenti in se subiektato, non est verum, cum substantia in ipso primo instanti suæ generationis habeat suas proprietates, ut sol lucem, ignis calorem, Angelus intellectum, ita ut nullo tempore inueniatur substantia sine istis proprietatibus, nec per unum instans. Est tamen aliqua substantia prior tempore seu duratione istis accidentibus, nempe illa à qua effectiue processit substantia habens prædicta accidentia, quia ab eodem generante procedit substantia, & proprietates eius.

Creatio non est mutatio realis, nec de prædicamento actionis.

- 23 Expressa D. Thom. sententia est creationem non esse mutationem, licet ad modum mutationis à nobis intelligatur. Docet id *in hac q. 45. artic. 2. ad 2. Creatio*, inquit, *non est mutatio nisi secundum modum intelligendi tantum. Et quæst. 3. de potentia artic. 2. idem ostendit.*

Ratio huius est, quia pugnat conceptus mutationis proprius, & essentialis cum conceptu processionis, & effectiōis totalis ex nihilo, ita ut per actionem totum fiat, & nihil præsupponatur. Nam omnis mutatio vel supponit aliquod subiektum in quo formæ succedant, & transeat de vna ad aliam, vel supponit terminum *à quo*, qui transit in terminum *ad quem*, sicut in conuersione transubstantiatiua; & prima est conuersione formalis, secunda totalis, quia in prima mutatur subiektum penes diuersas formas; in secunda non solum forma mutatur, & conuertitur in aliam, sed etiam subiektum conuertitur in alterum subiektum. Manet tamen in vtraque mutatione seu conuersione aliquid commune vtrique extremo, in prima mutatione aliquid commune physicè, & per modum subiekti receptiui, siue sit materia prima pro diuersis formis substantialibus, siue subiektum in actu pro diuersis formis accidentalibus: in secunda autem conuersione manet subiektum commune metaphysicè, scilicet idem genus, v. g. corpus, substantia, aut etiam ens quod est commune prædicabiliter vtrique extremo mutationis, seu conuersionis. In creatione autem nihil horum commune datur vtrique extremo. Non primum, quia non datur aliquod subiektum ex quo, & in quo

fiat vna forma, seu natura, & expellatur altera, aut saltem quod mutetur de priuatione ad formam, hoc enim sufficere posset ad mutationem, dummodo subiektum daretur transiens de vno statu ad alium, de priuatione ad formam: creatio autem nullum tale subiektum supponit, sed totum facit ex nihilo. Non datur etiam secundum; quia terminus *à quo* creationis est purum nihil, & terminus *ad quem* est ens in quantum ens: enti autem, & nihilo, non datur aliquod prædicatum commune, siquidem datur pura, & sola contradictio inter nihil, & ens: ergo nullum prædicatum commune. Non ergo saluatur aliqua ratio mutationis neque physica, neque metaphysica propriè loquendo.

Dices: saluatur mutatio ex parte termini *ad quem*, in quantum accipit esse ex non esse, transitus autem de non esse ad esse aliqua mutatio est, quia rei immutabili non potest conuenire, & quia annihilatio, quæ est transitus de esse ad non esse, est mutatio, quia res definit esse, & sic mutatur: ergo etiam è conuerso transitus de non esse ad esse est mutatio, quia est eadem ratio, & eadem contradictio inter vtrumque extremum, nec aliquid commune est illis, etiam quando fit annihilatio: ergo si hæc est mutatio, etiam & creatio.

Respond. probare hoc argumentum quod creatio admittit aliquam mutationem secundum intelligentiam nostram, non realiter, ut admittit S. Thom. *locis supra cit.* Vocatur mutatio secundum intelligentiam nostram vicissitudo, seu variatio aliqua in esse, seu nouitas essendi, quæ etiam immutabilitati opponitur, & est quid distinctum à mutatione, dicente Iacobo *in epist. Catholicæ c. 1. Apud quem non est mutatio, nec vicissitudinis obumbratio*, ubi vicissitudo condistinguitur contra mutationem. Et reuera distinguitur, quia vicissitudo est diuersorum statuum alternatio, seu nouitas in esse, quæ attenditur etiam penes esse, & non esse, ut quando aliquid in eodem esse non permanet, sed variatur esse: tunc enim intellectus apprehendit rem sub esse, & sub non esse, licet sub non esse non sit res ipsa, sed desitio rei, seu exclusio rei. At verò mutatio realis & propria supponit aliquid sub vtroque statu quod transit de vno in aliud, aut saltem aliquid super quod cadat variatio & desitio essendi, quia oportet quod sit transitus de vno ad aliud, non autem transit quod non est, sed quod est. Itaque ad vicissitudinem sufficit nouitas in esse, seu desitio in esse. Ad mutationem requiritur successio, seu transitus alicuius de vno in aliud. Si autem ex nihilo sit, non transit, nec succedit aliquid sub hoc, & sub illo; sed solum primò fit, seu incipit aliquid, sine hoc quod præcedat aliquid cui succedatur, & quod transeat. Vnde ad replicam dicitur quod accipere esse ex non esse nihil præsupponendo non est transitus, nec successio, sed pura inceptio seu nouitas essendi ex statu negatiuo non essendi. Et hæc etiam rei immutabili repugnat, quia esse immutabile est omnino idem sine vlla potentialitate, sed sub actu puro, quod repugnat vicissitudini, & alternationi in esse: sic enim in Deo non est vicissitudinis obumbratio, quia non est inceptio aut desitio, seu nouitas alicuius rei in essendo.

Ad instantiam de annihilatione, dicitur quod etiam annihilatio non est propriè mutatio, sed desitio, seu non permanentia in esse, non autem mutatio per modum transitus, & commutationis extremorum, quæ conuenientiam aliquam in eis postulat. Et vno verbo, idem dicendum est quoad hoc de annihilatione atque de creatione, quia annihilatio

nihilatio est vniuerso modo creatio, ita vt id quod se habet vt terminus à quo in vna, sit terminus ad quem in alia, & vice versa. Sed tamen mutatio secundum nostrum modum intelligendi maius fundamentum habet in annihilatione quam in creatione, eo quod annihilatio præsupponit aliquid positium quod definit esse per annihilationem: creatio autem facit positium quod in eo se tenet ex parte termini ad quem. Magis autem attenditur mutatio quantum ad positium ex parte eius quod præsupponitur, & antecedit, vel ex parte subiecti, vel ex parte termini à quo quam ex parte termini ad quem, eo quod in mutatione magis attenditur quod detur aliquid, quod fiat hoc vel illud, aut definat, quam quod de illo aliquid fiat.

25 Ex dictis etiam colligitur ad quod prædicamentum pertineat creatio, an videlicet sit de prædicamento actionis? Quod non procedit de actione actiue sumpta, vt ex parte Dei se tenet: sic enim est ipse Deus, non accidens aliquod, nec entitas ponibilis in prædicamento: sed difficultas est de actione effecta, provt ex parte creaturæ se tenet. Et dicimus talem creationem non esse de prædicamento actionis, licet sit vera productio, & inceptio seu nouitas essendi in ipsa creatura.

Ratio est, quia ad actionem de prædicamento actionis requiruntur duæ conditiones, quæ defunt creationi, & solum inueniuntur in mutatione, quæ subiectum supponit. Prima est quod actio debet se habere per modum tendentiæ, & viæ ad terminum; non per modum alicuius rationis præsupponentis ipsum in facto esse. Secunda est, quod sit actus accidentalis, & consequenter inhærens, & si est influentia, vel tendentia, inhærendo tendit, & influit. Cum autem non detur actio inhærens Deo, quia incapax est accidentium, oportet quod si actio ista inhæret, extra Deum sit, & consequenter habeat subiectum; non potest autem habere pro subiecto terminum quem facit, & in quem influit, quia si influit, & facit illum, non supponit, nec inhæret illi, quia non inhæret nisi existenti, vt existens, siquidem ab eo cui inhæret, esse habet, non autem influit, neque facit, nisi quod nondum existit; & sic repugnat vtramque conditionem coniungere respectu termini creationis: ergo repugnat quod creatio vt ex parte creaturæ se tenet, sit de prædicamento actionis. Solum ergo ad hoc prædicamentum pertinent actiones, quæ in materiam subiectam agunt, & ex illa educunt formas, quod pertinet ad mutationem, quia supponunt aliquid cui inhæreant antecedenter ad terminum suum, saltem vt subiectum quo, vt supra explicatum est. Creatio ergo solum est accidens inhærens termino habenti existentiam in facto esse; & sic non est actio quæ pertinet ad fieri, sed relatio quæ est dependentia rei in facto esse.

Soluuntur argumenta.

26 Primò arguitur ad probandum creationem esse aliquid distinctum à creatura tanquam medium, & influxus tendens ad eius esse: etenim in omni causa efficiente debet dari causalitas, & influxus eius in effectum, quia causa sine causalitate non operatur; & hæc causalitas, seu influxus non est ipsemet effectus, cum effectus ex influxu nascatur, & procedat, nihil autem procedit à seipso, & effectus habet dependentiam à causa, nihil autem dependet à se: ergo iste influxus, & tendentia seu dependentia debet esse distincta ab effectu producto & dependenti, tanquam quoddam fieri, seu

Ioan. a S. Thom. in 1. part. D. Th. Tom. alter.

via per quam ipse effectus fit. Quod inductione constat in omnibus effectibus causatis à causis efficientibus, in quibus ipsa dependentia, & influxus in effectum distinguitur ab illo vt medium ad hoc vt procedat, & fiat talis effectus: ergo idem erit in creatione, quia non minus est effectus, nec minus dependens ab influxu, & causalitate suæ efficientis. Nec potest dici quod hæc dependentia reducitur ad ipsam rem, quæ creatur, & est de essentia eius; quia non creatio est substantia, aut qualitas, sed via ad illam, & productio eius: substantia autem est quid absolutum & per se stans: ergo creatio vt actio, & vt dependentia distinguitur à substantia tanquam via & tendentia in illam.

Et Conf. quia esse actu non est de essentia, & conceptu substantiæ creatæ: ergo nec actu dependere, imò multò minus ipsa dependentia, quam ipsum esse, quia dependentia est variabilis, manente re in eodem esse, vt patet, quia modò conseruat Deus quantitatem in Eucharistia sine subiecto, distincta conseruatione, qua antè in subiecto eam conseruabat: ergo si è contrario prius Deus crearet quantitatem extra subiectum, & postea illam vniret subiecto, & conseruaret dependenter ab illo, distincta dependentia conseruaret quam prius produxerat, & tamen res esset eadem.

Resp. distinguendo maiorem: in omni effectu debet dari causalitas, & influxus, distingo, influxus non solum actiue, & tenens se ex parte causæ; sed etiam extra causam receptus, nego; influxus saltem actiue ex parte causæ se tenens, licet non sit receptus extra causam, transeat. In creatione solum datur influxus actiue, & ex parte causæ se tenens, quia totum facit, & extra se nihil supponit vbi influxus aliquis subiectetur; terminus autem factus & productus non potest esse subiectum huius influxus, vt est in fieri, & vt productiue, sed solum vt supponit terminum existentem, & in facto esse, & tunc iam non datur actio in fieri, & in tendentia. In aliis autem actionibus præter creationem quia subiectum supponunt, aut terminum à quo positium, circa quæ operantur, potest dari influxus, non solum ex parte causæ se tenens, sed extra causam receptus & influens. Vnde inductio quæ in aliis actionibus, & causis efficientibus fieri potest, insufficiens est, cum procedat in actionibus omnino dissimilibus, & opposito modo procedentibus, atque creatio quoad hanc partem, siquidem procedunt ex aliquo positio, creatio verò ex nihilo, & sic inductio ex illis actionibus nihil infert in ista, cum dissimiles sint. Ad id quod dicitur, hanc dependentiam non esse substantiam, sed viam ad illam. Respond. hanc dependentiam neque esse substantiam ipsam creatam, quia hæc est effectus, non actio, neque viam, & tendentiam ad ipsam, quia non habet vbi recipiatur antequam terminus sit in facto esse existens, & tunc non indiget actione tendente ad factum esse. Vnde restat quod dependentia hæc sit relatio ipsa qua res in facto esse dependet à sua causa, à qua deriuatur. Hæc autem deriuatio non est aliquid extra Deum, & passiuè receptum in creatura, sed actualitas ipsa Dei infinita, quæ potest totum ens producere, & consequenter sine aliquo medio producendi extra se posito, quia non est vbi ponatur, nec requiescat vbi pes eius. Nec obstat quod omnis actio & tendentia, seu mutatio reducitur ad genus sui termini, vt Philosophus dicit in 3. *Physic. textu 7.* & sic videtur quod creatio reduci debet ad genus substantiæ. Respondet enim S. T. q. 3. de potentia art. 3. ad 8. quod *Motus reducitur ad genus sui termini, in quantum proceditur de potentia in actum.*

Et

nam

nam in ipso motu terminus motus est in potentia, & potentia, & actus reducuntur ad idem genus: in creatione autem non est exitus de potentia ad actum, & ideo non est simile. Quæ ratio D. Thom. adæquatissima est, & probat apertè creationem non esse medium ad producendam substantiam, quia hoc medium debet reduci ad aliquod genus ex suis extremis, vel ad agens à quo procedit, vel ad terminum quem caulat. Ad agens non potest reduci, quia est aliquid creatum. Nec ad terminum, cum non se habeat ut processio de potentia ad actum, ratione cuius reducitur motus ad suum terminum, quia actus, & potentia sunt in eodem genere.

Ad conf. Resp. quòd esse seu existentia in actu non est de essentia rei creatæ, sed accidentale prædicatum, & ipsum dependere in facto esse à Deo, etiam non est prædicatum essentiale, quia est relatio superaddita rei creatæ, & accidens illius, non prædicatum essentiale. Hinc tamen non deducitur, quòd creatio sit distincta à re creatâ, taliter quòd se habet ut quid præuium, & medium, seu via, qua tendatur ad ipsum terminum, ut fieri; ad factum esse, ut potentia ad actum propter rationem toties ponderatam. Ad id quod additur, dependentiam creaturæ esse variabilem ipsa re eadem permanente. Resp. quòd dependentiam creaturæ à Deo in ratione entis, & ut habet esse ex influxu generalissimo Dei, tanquam à principio totius esse, nullo modo est variabilis, sed dependentiæ à causis particularibus variabiles sunt, sunt quòd Deus conseruet quantitatem media substantia cui inhæret, vel lucem medio Sole à quo diffunditur, hoc variari potest, quia sunt dependentiæ à causis particularibus particulari & limitatio modo causantibus supra quas omnes est causa vniuersalissima increata à qua res omnes profluunt secundum rationem totius esse, & ita potest seipso supplere omnem influxum & dependentiam à causa creatâ. Cæterum ipsa dependentia creaturæ à generalissimo influxu Dei, à quo conseruatur in esse, & per cuius suspensionem potest res annihilari, hæc variari non potest, nisi annihilata creatura, quia est influxus respiciens indiuisibiliter totum esse rei; & sic si tollatur, annihilatur creatura, non potest autem variari nisi tollatur, quia si variatur non permanet idem. Vnde si Deus produceret se solo quantitatem sine subiecto, & postea vniret illam subiecto, non variaretur concursus vniuersalis Dei conseruantis, sed solum particulari causæ conseruandam quantitatem de nouo subiicit: cuius signum est, quia adhuc vnitam subiecto Deus annihilare potest: annihilatio autem fit per suspensionem concursus dantis totum esse: ergo ille non variatur, sed perseverat, etiam si vniatur quantitas.

27 Secundo arguitur: quia relatio non est causalitas seu ratio agendi vel influxus causæ in effectum, neque dependentia, quia relatio non est actiua, sed pure respectiua, neque dependentem facit effectum à sua causa, sed supponit, quia in ipsa dependentia fundatur; & iterum hæc relatio est posterior re crata, quia subiectatur in illa; dependentia autem, & emanatio à Deo est prior, quia est via ad terminum, & deriuatio eius à Deo: ergo non potest creatio ut emanatio, & dependentia rei creatæ à Deo consistere in relatione, quæ posterior est ipsa re emanante, & resultat posito fundamento, & termino, dependentia autem quæ est creatio non resultat ex fundamento, & termino, sed est via, & emanatio rei creatæ à suo princio: nec enim negandum est emanationem istam dari, quia res creatæ verè sunt emanatæ, & deriuatæ à Deo: ergo da-

tur vera emanatio: ergo prout emanatio est, via est, & ratio ut res emanatæ sint, hæc autem non est relatio, quæ fundatur in re iam facta, & emanata.

Confirm. quia actiones transeuntes non manent in agente, sed in passo, vel termino, qui est extra agens, ut docet Philosoph. 9. Met. textu 16. ergo creatio cum ponat rem factam extra Deum verè in ipso termino existit sicut calefactio, quia est fluxus caloris ab igne, cum ipso calore identificatur: ergo etiam fluxus creaturæ à Deo cum re creatâ identificatur. Neque hoc obstat perfectioni diuinæ, quia actio transiens non perficit agens, sed passum, vel terminum, & quidquid perfectionis in actione est, ab agente est: ergo non magis derogat perfectioni diuinæ quòd actio profluat à Deo, quam quòd effectus. Et in ipsis instrumentis quæ à Deo mouentur magis id patet, quia actio eorum est à Deo, & tamen est aliquid in instrumentis præter effectum ipsum causatum: ergo non repugnat dari actionem Dei ad extra, sicut & effectum. Hanc autem actionem esse transeuntem patet, quia non est actus immanens intellectus aut voluntatis, sed potestati executivæ ad extra, quæ transeuntem operatur.

Respon. concedendo quòd relatio ista non est causalitas, neque emanatio, aut influxus Dei in creaturam, sed solum respicientia creaturæ factæ, & productæ, quæ respicit Deum per modum dependentis, & deriuatæ ab ipso. Et cum dicitur quòd supponit creaturam dependentem, & fundatur super dependentia, supponitur dependentem ratione ipsius esse recepti, & participati à Deo, concedo; ratione alicuius influxus aut tendentiæ ex parte creaturæ se tenentis, qui sit influxus creatus, & fieri creatum, nego: sufficit enim ad creationem influxus actiuus ex parte Dei se tenens, non in creatura receptus, quia non est ubi recipiatur, cum totum faciat etiam ipsum subiectum: ex parte autem creaturæ sufficit quòd ipsum esse; & totum ens sit acceptum, & deriuatum ab isto influxu actiuo, tanquam effectus eius, nec aliquid ex parte creaturæ est, quod effectus non sit, & res facta, non influxus, & fieri tendens ad factum esse. Quod autem dicitur relationem esse posteriorem creatura, fatemur, ut etiam fatetur D. Thom. in hac qu. 45. art. 3. ad 3. & qu. 3. de potentia art. 3. ad 3. Et concedimus similiter quòd talis relatio non est emanatio, seu dependentia à Deo per modum viæ, & tendentiæ, sed per modum respicientiæ, qua res emanans respicit suum principium; nec datur alia emanatio per modum viæ, & tendentiæ antecedentis rem ipsam creatam, sed solum datur ipsum esse deriuatum à Deo, cum inceptione, seu nouitate essendi. Et cum additur, non posse negari hanc emanationem, quia datur res emanata, & deriuata à Deo. Respon. dari quidem emanationem, & processionem creaturæ à Deo, sed non per modum tendentiæ alicuius, & viæ mediantis inter Deum ut principium, & rem procedentem, quasi sit processio in fieri, & de potentia ad actum, sed per modum effectus in ratione entis, & in facto esse deriuati, & dependentis ab actiuo influxu Dei, sine interuentu alterius tendentiæ mediæ, sicut sine illa procedunt personæ in Deo, & datur in eis emanatio, & processio. Solum autem ubi datur mutatio, datur ista tendentia mediæ, & fieri respectu rei factæ, quatenus datur subiectum tendens, seu transiens de vno extremo ad aliud: sine mutatione autem processio datur per immediatam deriuationem, & dependentiam noui esse, & rei factæ à suo actiuo effluxu ex parte Dei se tenentis, ut ponderatum est. In personis autem diuinis datur processio, etiam sine dependentia,

dentia, sed per communicationem eiusdem essentiae.

28 Ad Confir. Respond. actiones transeuntes, de quibus Philosophus loquitur, & quas ipse agnovit, esse mutationes, non autem simplices dependentias, & receptiones ipsius esse à suo universali principio, & hoc modo ponitur res creata extra Deum, non per aliquem fluxum mediū inter principium à quo procedit, & rem procedentem, & ita in hoc non tenet exemplum de productione caloris per calefactionem, quia calefactio est alteratio, & mutatio, non processio totius esse. Et non dicimus quod derogat perfectioni divinae ista actio pro ea parte, qua consideratur ut aliquid effectum, & derivatum à Deo, sicut causalitas, sed pro ea parte qua universalis effluxus est, totum faciens, & nihil supponens, & sic non habens ubi subiectionetur extra Deum ad hoc ut faciat, & influat totum esse. Et ad id quod dicitur de instrumentis Dei; Resp. instrumenta recipere virtutem seu concursum Dei elevatum ad faciendum aliquid ultra id quod ex se possunt, sed non ad influendum sine actione immutativa, seu per actionem creativam, & ex nihilo, quia ad hoc non potest dari instrumentum, ut art. 4. dicitur. Et sic non est simile de actione, seu cōcursu cum instrumentis, & de creatione. Quod verò insinuat de actione Dei transeunte, & non immanente, iam *suprà* disp. 11. agentes de omnipotentia Dei, ostendimus non dari in Deo actionem purè transeuntem, sed ipsum imperium Dei esse virtualiter practicum, & actionem esse ipsam puram actualitatem Dei, quae seipsa est in actu secundo, & non per reductionem de potentia ad actum, seu de actu primo ad secundum.

ARTICVLVS III.

Qua res propriè creentur?

1 **R**es quae creari possunt duas condiciones habere debent.

Prima est ex parte termini *ad quem*, quod totum esse, & quidquid ad rationem entis in eis pertinet, ex vi actionis, seu productionis accipiant. Secunda ex parte termini *à quo*, quod ex nihilo producat, ita quod nihil eorū præsupponatur. Et quia hæc duo coniungere solum pertinet ad primum, & universalissimum principium quod est causa, & fons totius esse; idèd tertium requisitum addi potest, quod scil. illud esse quod per creationem habetur, ex Deo immediatè promanat, quae est conditio ex parte causae efficiētis requisita. Sed de hac conditione abundantius dicitur *seq. art.* quia dubitari potest an aliqua creatura saltem de absoluta potentia creare possit.

Potest ergo difficultas esse circa aliquas creaturas, an propriè per creationem fiant, aut fieri possint, partim quia immediatè à Deo procedunt, partim quia non ita clarè apparet, an possint accipere esse ex nihilo, partim quia non habent esse simpliciter, sed secundum quid, quod primò, & per se non fit, & consequenter neque creatur. In his ergo ex parte accidentium est difficultas de gratia, & donis supernaturalibus, quia à solo Deo infunduntur, & significantur creari in Scriptura, ut Psal. 50. *Cor mundum crea in me Deus*, ad Ephes. 2. *Creari in Christo Iesu in operibus bonis*. Ex parte verò substantiarum potest esse difficultas de substantiis incompletis, ut de materia quomodo creetur, & de formis, sicut de anima rationali, & de aliis, si per se sine materia producerentur. Potest etiam esse diffi-

cultas de ipsis substantiis compositis in quantum composita sunt, an possint creari, eo quod in ratione compositi supponunt partes, & non videntur fieri ex nihilo, sed ex aliquo.

In hac parte sententia D. Thom. *in hac q. 45. art. 4.* est, quod creari proprium est rerum subsistentium, siue sint composita, siue simplicia. Formae autem, & accidentia propriè non creantur, quia non habent esse ut *quod*, sed ut *quo*, seu sunt partes, quae potius dicuntur concreari, quàm creari. Quae sententia ut melius explicetur, sequentes elicio conclusiones.

Prima conclusio. Gratia, & alia dona supernaturalia, & quaecumq; accidentia quae fiunt ut inherrentia in subiecto etiam si immediatè à Deo fiant, non creantur. Sumitur ex *loc. citat.* D. Thom. Specialiter autem, quod gratia non creetur, sed fiat actione educitiva docet S. Thom. *q. 27. de verit. art. 3. ad 9.* ubi respondet rationi oppositæ, quae ponebat idèd gratiam non causari à creatura, quia non educitur de potentia materiae, sed fit per creationem. Et respondet S. D. quod. *Illam rationem non est usquequaque sufficiens: nam creari propriè est rei subsistentis, cuius est propriè esse, & fieri: forma autem non subsistentes sine substantiales, siue accidentales non propriè creantur, sed concreantur, sicut nec esse habent per se, sed in alio. Et quamvis non habeant materiam ex qua, quae sit pars earum, habent tamen materiam in qua, à qua dependent, & per cuius mutationem in esse educuntur, ut sic eorum fieri sit propriè subiecta earum transmutari.* Ita D. Thom. qui etiam videri potest *1. 2. q. 110. art. 2. ad 3. & q. 3. de potentia art. 8. ad 3.* Vbi ratio, & fundamentum conclusionis insinuat; quia gratia fit in anima per educationem eius de subiecto, & per mutationem veram, & propriam: ergo non per creationem. Conseq. patet quia creatio est ex nihilo, non ex potentia subiecti educens: quod enim in potentia subiecti, & per transmutationem eius fit, non fit ex nihilo, sed ex aliquo. Anteced. verò prob. quia fit ut dependens à subiecto, siquidem non habet esse per se, sed ut inherens illi: ergo producit ut habens causam materiale receptivam sui: ergo per transmutationem ipsius subiecti fit, quia ex se non habet illam formam, & modo habet; similiter educitur de potentia subiecti, non quidem de potentia naturali, sed obedientiali, quia anima est subiectum capax illius. Dummodo per potentiam supernaturalem fiat, quia ab agente naturali fieri non potest, & sic neque in potentia naturali subiecti continetur, bene autem in potentia obedientiali, quia secundum potentiam obedientialem recipitur, & sic ex illa educitur. Quod autem ex potentia obedientiali fit non ex nihilo fit, quia potentia obedientialis non est nihil, sed aliquid.

Contra hanc conclusionem senserunt aliqui antiqui Scholastici, quos citat P. Vasq. *hic disp. 174. c. 1.* quorum tamen plurimi non dicunt gratiam creari, sed concreari, quia propriè accidens non fit per se, sed dicitur aliquid fieri secundum illud. Et D. Thom. hoc modo loquendi utitur, ut *suprà* vidimus. Quid autem intelligatur per hoc quod est concreari gratiam, cum reuera nullo modo fiat ex nihilo, nec per se solā, nec cū subiecto, aliqui difficultatem inveniunt, & praesertim quia aliquando infunditur gratia seorsum ab omni creatione subiecti, ut cum homo iam existens baptizatur, aut quouis modo iustificatur: tunc enim quomodo cōcreatur gratia, cum nulli rei, quae tunc creatur, eiusve creationi adiuncta sit eius productio, nō potest autem dici quod concreatur gratia, nisi sit aliquid quod creetur, quia cōcreari est simul cū alio creari.

F f 2

Respon

Respond. ergo quod D. Thom. dicit concreari non solum gratiâ, sed etiam alias formas siue substantiales, siue accidentales, quia non habent esse per se. Vnde cum hoc commune sit omnibus istis formis, ut patet in verbis *suprà* adductis ex D. Thom. q. 27. de verit. frustra Vasq. *suprà* citat. c. 2. laborat in impugnando eos qui dicunt dari causâ instrumentalem gratiâ, scilicet sacramenta, & ex alia parte negant posse dari instrumentum ad aliquid creandum, quia non potest concreari gratia, nisi simul creetur aliquod totum, quod simul cum gratia creetur. Cæterum S. Thom. cum dicit concreari gratiam, non loquitur specialiter de gratia, sed generaliter de quacunque forma substantiali, vel accidentali, quæ non creatur, quia non habet esse per se, sed concreatur, quia habet esse in alio; & tamen non est dubium quod aliæ formæ accidentales, vel substantiales possunt produci, vel instrumentaliter, vel principaliter à creaturis: ergo hoc quod est gratiam posse instrumentaliter produci, non infirmatur per ly *concreari*, cum æqualiter dicat D. Thom. concreari gratiam, & alias formas non subsistentes, accidentales, vel substantiales. Veritas ergo est, quod quando substantia aliqua creatur cum suis accidentibus, etiam cum gratia, v.g. Angelus, vel anima Christi, tunc dicuntur propriè concreari accidentia, & gratiam, quia vnica, & eadem actione attinguntur (simul concedens naturam, & largiens gratiam, dixit August. de Angelis) quia eadem actione qua producitur natura, seu forma, producuntur consequentia ad formam, id est accidentia. Et in tali casu non datur instrumentum ad illam concreationem, sicut nec ad principalem creationem. Cæterum quando gratia subiecto iam producto infunditur, tunc non concreatur propriè, & strictè loquendo, sed educitur de potentia obedientiali subiecti, & ad talem productionem potest dari instrumentum physicum, quia actioeductiua est.

3 Dico secundò: Res simplices subsistentes, siue subsistentiâ completâ, & suppositali, siue non, ut anima rationalis, & quæcunque habent modum essendi sine subiecto, creari possunt. Hæc sumitur ex generali regula D. Thom. tam in hac q. 45. art. 4. quam in aliis locis cit. quod subsistentia siue simplicia siue composita creari possunt, quia eius propriè, & directè est fieri, cuius proprium est esse, illa autem propriè habent esse quæ existunt ut quod: sic enim in se habent esse, quæ verò solum existunt ut quo, non propriè dicuntur existere, quia non in se habent esse, sed ex illis aliquid existit, & illud aliquid est quod existit. Quæ regula complectitur generaliter omnia quæ habent existere ut quod, & per se, non ut præcisè coexistens, seu ut principium quo existendi se habent.

Ratio verò sumitur ex dictis, quia tales res simplices, & subsistentes, seu ad modum subsistentium se habent, habent esse per modum rei, non educit ex alia, ut ex subiecto, sed in se, & per se subsistentes, & aliæ fiunt ex nihilo, quia ex subiecto non pendent à quo educantur, & in quo contineantur: ergo non fiunt de potentia ad actum, sed de nihilo fiunt, & immediatè à Deo accipiunt esse: ergo verè, & propriè creantur, quia omnes conditiones veræ creationis in eis concurrunt. Et discurrendo per singula id manifestatur, quia Angeli qui sunt formæ simplices subsistentes suppositali-ter verè, & propriè creantur, quia non fiunt ex aliquo subiecto, nec ex aliquo præsupposito, cum in se partibus careant: in extrinseco autem subiecto non recipiuntur, nec ab eo dependent, cum sint formæ subsistentes, non inhaerentes. Similiter anima

rationalis per se subsistit independenter à corpore, licet ei uniatur, & infundatur, sed tamen in se habet esse, & separata à corpore subsistit: ergo non educitur de materia tanquam de subiecto in quo contineatur, & à quo educatur, nec habet in se partes ex quibus fiat: ego fit ex nihilo, quod est creari. Et licet habeat communicari corpori, hoc non tollit quin esse suum non sit dependens à corpore, nec ab illo eductum, quia est spirituale, & subsistens in se: ergo non tollit quominus sit factum de nihilo, & creatum, licet communicabile. Tandem formæ substantiales, & accidentales, si sine subiecto, & dependentia actuali à materia vel subiecto producantur (ut produci possunt) accipient esse à Deo independenter à subiecto, & non unitum illi: ergo propterea sic non educantur de subiecto: ergo fiunt ex nihilo. Nec obstat quod accipiant esse à subiecto dependens ex se, & potens subiecto uniri, licet actu ei non unitum: ergo tale esse non est creatum, sed ordinem dicens ab subiectum cui postulat uniri. Respond. enim totum hoc habere in aptitudine, & in potentia, actu verò esse independens à subiecto, & produci independenter ab illo, quod est actu non educi à subiecto, licet ei possit uniri: ergo actu non fit ex subiecto, quia illud fit ex subiecto, quod dependenter ab illo; ergo actu fit ex nihilo, licet cum potentia, & aptitudine ut reddatur dependens à subiecto, sed tunc conseruabitur perinde ac si esset eductum ab illo: si verò producitur independenter ab illo, producitur ex nihilo.

Dico tertio: Composita subsistentia, etiam pro- 4 ut composita, verè, & propriè creantur per modum cuiusdam totius quod primò, & per se fit, non solum ratione alicuius partis, quæ per creationem est, v.g. cum fuit creatum cælum, & terra, ipsa terra ut quoddam compositum est, & per modum totius vnica actione facta est, & similiter cælum, non quia materia prima eorum creata est, ideò solum creari dicuntur. Hæc est contra P. Vasq. *ubi supra* cap. 4. qui sentit singularum partium esse singulas productiones, & alteram totius, quia ex compositione conflatur. Vnde quia hæc productio totius supponit partes ex quibus fit, & resultat, non fit ex nihilo, sed ex aliquo præsupposito: ergo illa unio partium in qua consistit ratio compositi non est de nihilo. Et idem est de conseruatione talis compositi, seu unionis: illa enim conseruatio, quædam continuatio est primæ productionis compositi, & unionis ex partibus.

Cæterum hæc sententia, & eius fundamentum 5 è diametro pugnat cum D. Thom. Nam in art. 4. huius q. 45. docuit oppositum, & in solutione ad 2. respondit ad fundamentum ipsum Vasquez: dixit enim in corp. art. quod *illis propriè conuenit creari, & fieri quibus conuenit esse; quod quidem conuenit propriè subsistentibus, siue sint simplicia, siue sint composita, sicut substantia separata*: constat autem quod esse subsistens, & esse quoddam totum completum non conuenit partibus, quæ entia incompleta sunt (excipio animam rationalem, quæ in se subsistens est) sed ipsi composito ut quoddam totum est: ergo ut compositum, & ut totum, debet terminare creationem, & propriè fieri, & creari: in solutione autem ad 2. soluit fundamentum Vasq. proposuerat enim tale argumentum: *Composita non sunt ex nihilo, sed ex suis componentibus: ergo compositis non conuenit creari*. Respondet: *Ad 2. dicendum quod creatio non dicit constitutionem rei ex principiis præexistentibus: sed compositum sic dicitur creari quod simul cum omnibus suis principiis in esse produciuntur*. Et fundamentum huius sententiæ est, quia creatio est productio

productio totius entis ex nihilo, ita quod procedat res per creationem secundum vniuersalissimum influxum totius esse à Deo : ergo illud per se primò creatur, quod per se primò est totum, & habet esse per modum totius, hoc autem est ipsum totum, nō partes eius, quia pars vt pars in composito non habet esse per se, nec induit rationē totius: ergo creatio non potest terminari ad partes, vt habent rationem partis, sed ad ipsum totum quod est compositum, quia hoc habet esse per modū totius, partes non nisi vt pertinentes ad hoc totū. Ergo illa actio quæ tendit ad esse, & respicit illud in quantū totū & integrum ens, non potest incipere à partibus & ex illis constare totum, sed potius à toto descendere ad partes. Quod explicatur ampliùs, quia procedere à partibus ad totū conflando illud ex coniunctione partū, est proprius modus particularis agentis, & procedētis ab imperfecto ad perfectū, à potētia ad actū, quia partes sunt imperfectiores toto, & in potentia ad illud : omne enim totum est maius suis partibus, quod si maius, ergo & perfectius. Actio igitur quæ prius attingit partes, & ex partibus conflatur, & componit totum procedit ab eo quod imperfectum, & potēiale est, ad id quod est maius, & perfectius. At verò creatio non procedit ab imperfecto ad perfectum, nec à potēiali ad actuale, quia est actio agentis infiniti operantis per vniuersalissimū influxum totū esse rei, & totum ens, prout ens est: ergo non incipit à partibus, & inde componit totū, sed immediatē ad ipsum totum respicit, & ad id quod primò, & per se habet esse, nō ad partes, & ad id quod habet esse secundum quid, & vt quo, seu vt pars, non esse simpliciter completē, & plenē, sicut ipsū totū constans ex partibus. Denique istæ partes ex quibus consurgit totum, non se habent vt terminus à quo, quia non relinquuntur à creatione, sed comproducentur in ipso termino ad quem; nec se habent vt subiectum præsuppositum, super quod cadat actio creatiua, & conflatiua ipsius compositi, seu suppositi : id enim propriū est actionis, quæ est mutatio, & generatio, quod ex subiecto, & ex præsuppositis partibus faciat, & construat totū, sicut generatio hominis, aut resuscitatio illius: ergo si in creatione partes non se habent vt subiectum, seu materia ex qua educitur totum, nec vt terminus à quo: ergo bene compatitur cum hoc quod compositum sit ex partibus, vt ex constituentibus extremis, quod non sit ex aliquo vt ex termino à quo, vel vt ex materia à qua educatur ipsum compositum: ergo simpliciter erit ex nihilo, & erit creatio, noneductio, etiam vt tangit compositum.

9 Quare si illa actio, prout facit compositum, nō est creatio, sed sicut generatio, aut resuscitatio, & per modum mutationis se habens, non poterit esse realiter eadem actio cum creatione partium, quia non possunt in vnum consolidari actio mutatio, & actio non mutatio, seu ex nihilo. At verò ipsa partium productio si sumatur pro se sola, & prout præcisè partes attingit, creatio non est, quia ipsæ non habent esse simpliciter, nec in se habent illud, saltem perfectē, & completē. Vnde sola partium productio nō est productio completa, & perfectæ, nec totius entis, sed est productio procedens de imperfecto ad perfectū, & attingens prius quod potēiale est, quàm quod actuale, & totum : constat enim quod si pars non producit vt subsistens in se, & sicut anima rationalis, sed vt coniuncta ipsi toti, actio attingens illam sic, est dependens ab ulteriori terminatione, quia non sistit in productione illius partis, dans illi esse, sed transit ad totum, in quo ipsa pars inuenitur vt constituens illud : ergo non est actio perfectæ in dando esse, sed solū

Ioan. à S. Thom. in 1. part. D. Th. Tomus alter.

partialiter se habens, & potentialiter respectu totius entis: quod est concreari, non per se creati: ergo nec in partibus, nec in toto saluabitur creatio propriè, & directè, quæ est creatio totius entis, & actio perfectissima in dando, & influendo esse, & omnino independens, quia est ex nihilo; vnde actio quæ sufficit creare aliquod, ens quantūuis minimū, v. g. formicā, sufficit creare quodcumque ens, v. g. Angelum, quia hoc ipso quod ex nihilo, & independenter ab aliquo facit, perinde est facere multum, vel paucum, de quo plura dicemus seq. artic.

Dico quartò: Materia prima non creatur propriè à Deo, & per se, sed concreatur, vt dependens à forma in suo esse, illa autem concreatio non est ex aliquo, sed ex nihilo ex parte termini à quo, licet sit dependens à forma in suo esse ex parte termini ad quem. Forma autem substantialis in prima creatione rei compositæ non creatur propriè, nec educitur de potentia materiæ, sed concreatur ad creationē totius. Hæc est contra Vasquez cit. loco, qui supponit materiam non esse puram potētiā in genere entitatio, sed in genere formali, & ita putat creati à Deo sicut creatur anima rationis, licet cum dependentia in sua connaturali conseruatione à forma substantiali, cum tamen anima naturaliter possit conseruari sine corpore: imò ratione materiæ dicit conuenire compositis quod creentur.

Cæterum nostra conclusio est expressa D. Tho. qui in quest. 3. de potētia artic. 2. ad 12. inquit, quod *Neque materia, neque forma, neque accidens propriè dicuntur fieri, sed id quod fit, est res subsistens: cum enim fieri terminetur ad esse, propriè ei conuenit fieri, cui conuenit per se esse, scilicet rei subsistenti; vnde neque materia, neque forma, neque accidens dicuntur propriè creari, sed concreari.* Et artic. 5. ad 3. inquit, quod *Materia prima per se non creatur, sed ex hoc non sequitur quod non creatur sub forma.* Idem docet in hac 1. p. q. 44. art. 2. ad 3. quod *Materia prima est creata, sed non sine forma.* Et in hac qu. 45. art. 4. ad 3. cum proposuisset argumentum ad probandum quod materia prima est quæ propriè creatur, & nō compositum, quæ est sententia Vasq. Respondet quod *Ratio illa non probat quod sola materia creetur, sed quod materia non sit nisi ex creatione: nam creatio est productio totius esse, & non solius materiæ.* In sentētia autem Vasq. sola materia creatur, forma verò educitur, & compositum ex vtriusque vnione conflatur: Ergo opponitur sententiæ D. Thom. Similiter secundam partem cōclusionis, quod formæ in prima productione non sunt eductæ de potentia materiæ, sed concreatæ à Deo, affirmatur clarè à D. Th. inf. q. 65. a. 4. in corp. vbi inquit, quod *In prima creatura corporalis productione nō consideratur aliqua transmutatio de potētia ad actum, & ideo formæ corporales, quæ in prima productione corpora humana habuerunt, sunt immediatè à Deo productæ.*

Ratio primæ partis est, quia illud dicitur creati directè, & per se, quod non producit vt adiunctum, vel accessorium ad alterum, sed ratione sui; quod enim se habet vt adiunctum alteri, dicitur concreari, aut comproduci, eo quod creatio est actio dans esse. Igitur eo modo quo aliquid habet esse, dicitur creati, scilicet si habet esse per se, & directè dicitur primò, & per se creati, si habet esse vt coniunctum, & coexistens alteri, dicitur cōcreari, aut comproduci: constat autē quod materia essentialiter est pars, & ens incompletū, & in genere entis incompleti est imperfectius formā, cum sit in potentia ad illā, & actuetur per illā. Vnde si formæ (excepta anima rationali) non habēt esse subsistēs, & per se, multò minùs materia. Quare potentialitas materiæ vel est tanta quod per se, & immediatè

F f 3 caret

caret omni esse, & solum mediare est capax illius, scilicet mediante forma, ut sentit S. Thom. vel est talis potentialitas, quod in se solum habet esse entitativum incompletum: est autem in potentia ad formas, ut cum earum actualitate formali componat totum. Si primum, extra controuersiam est quod non creetur nisi sub forma, & dependenter ab illa; & sic concreatur cum illa. Si secundum, solum accipit esse incompletum, & de se coniungibile cum forma, & non in se subsistens; quia materia si habet esse entitativum in se, non est perfectius ipso esse formæ, cum citra omnem dubitationem, forma perfectior sit in ratione entis, quam materia. Vnde si forma habet esse incompletum, & non subsistens (præter animam rationalem) & consequenter forma non per se, & directe creatur; sed concreatur in toto, à fortiori materia prima etiam non creabitur, sed concreabitur, etiam si illi demus tantum esse entitativum, quantum habet ipsa forma substantialis: maius enim dare non possumus, alioquin materia perfectior erit forma, & non infimum ens, nec aptum generationi substantiali, si in suo esse est subsistens; & sic esse illi adueniens, & productum per generationem non erit esse simpliciter; & per se primum, sed accidentale, & secundarium, ut pote aliud primum præsupponens. Quare in omni euentu materia non creatur directe, & per se, sed concreatur, quia non per se, & simpliciter existit, sed coexistit.

8 Secunda pars conclusionis probata à nobis est 1. *Physic. qu. 4. art. 2.* quia in prima rerum corporaliū productione non fuerunt facta illa corpora per transmutationem materiæ, sed per creationem simpliciter: ergo formæ non fuerunteductæ ex materia, sed ad creationem totius concreatæ. Consequenter probatur, quia forma non educitur de materia, nisi in quantum materia reducitur de potentia in actum seu id quod ex parte materiæ est in potentia ad formam, in actum formæ reducitur: hoc autem sine mutatione materiæ intelligi non potest: nam siue materia præcedat duratione, & tempore ipsam generationem formæ, siue solum prioritate naturæ, tamen si verè forma educitur de potentia materiæ, oportet quod ipsa materia sub utroque statu consideretur, scilicet sub statu potentiæ, & sub statu actus seu formæ, & transeat de vno ad alium, eo quod, non educitur forma de potentia materiæ, nisi prius ipsa forma sit in potentiâ, & postea in actu, esse autem formam in potentia, est materiam esse in potentia ad formam; requiritur ergo ad educationem formæ de potentia materiæ, quod transeat materia de potentia ad actum, & hoc est transmutari, quia aliter est quam prius, cum prius est in potentia saltem prioritate naturæ, & postea in actu. Anteced. autem prob. quia illa transmutatio materiæ non poterat fieri ab aliquo agente creato, cum esset prima rerum productio, & ita non supponebat agens creatum à quo fieret: & præterea non poterat modo naturali transmutari materia, quia hæc transmutatio fit mediantibus accidentibus, quibus alteratur, & disponitur materia ad hanc formam potius quam ad aliam; tunc autem in illo primo instanti producebatur materia, non seorsum, & per se existens, sed sub forma: ergo non erat locus, ut tunc educeretur ab agente creato illam formam per transmutationem materiæ. Neque rursus ab ipso Deo immediate debebat sic educi, quia hoc non esset propriè, & simpliciter creare, nec creare talia corpora, v. g. cælum, terram, &c. quia illa nec actio ut creatiua materiæ non daret illi esse, sed esset dependens à productione formæ, à qua esse haberet, & cum alia productio esseteductio, con-

sequenter creatio, quæ non daret esse ut creatio materiæ est, esset dependens ab illa actioneeductiua, ut completa, & consummata esset in dando esse, siquidem prout creatiue tangit materiam, non dat illi esse, quia iuxta sententiam D. Tho. materia non est capax habendi esse, nisi per formam: ergo si hæc habet per educationem, ipsa actio quatenus creatiua non dat esse; & sic imperficatur, & impeditur in ratione creandi, siquidem educatione formæ datur esse materiæ, sicque esset sicut creatio animæ Christi, quæ, in quantum creatio, fuit impedita dare proprium esse, & subsistentiam animæ, & suppleta fuit per assumptionem; ad eum faceret Deus, si crearet materiam, & creatione non attingeret formam, sed educatione: sic enim compleretur illa creatio in dando esse educatione formæ, sicut creatio animæ Christi assumptione ad personam, & esse diuinum consummata fuit. Et hac ratione admisimus in prædicto loco *Physicorum* posse Deum in instanti generationis, quo educenda est forma, creare materiam ex qua fiat edudio, sed talis creatio non erit completa, sed dependens ab educatione formæ, ut sub illa existat materia, sicut creatio animæ Christi completa est assumptione in subsistere, & in esse. Et qui in schola D. Tho. defendunt in speciebus Eucharistiæ pro instanti corruptionis earum poni materiam per creationem, talem incompletam creationem debent ponere. Sed quia hoc minus apparentiæ habet, idèd probabilius censuit D. Thom. non creari de nouo materiam, sed quantitatem Eucharisticam conuerti in illam ex vi prioris conuersionis, ita quod conuersione, non creatione fiat, quæ conuersione non dat immediatum esse materiæ, sed subiicit illam formæ, ut ab ea esse habeat.

Quia ergo creatio materiæ coniuncta educationi formæ in instanti creationis minus connaturaliter se habet, quia necesse est creationem imperficere, & impediri, ac suppleri per educationem, idèd ne talem creationem ponamus in initio rerum, sed creationem absolutam, & perfectam qualem verba Scripturæ sonant, cum dicit *In principio creauit Deus cælum, & terram*, cum ex hoc loco colligamus perfectam, & absolutam Dei creationem; idèd ponendum est quod formas substantiales tunc non eduxit, sed concreauit, directe faciendo, & influendo totum esse ipsi composito, seu supposito, quod simpliciter habet, & accipit esse, partibus autem ut coexistentibus, & contentis in ipso toto.

Soluntur argumenta.

Contra primam conclusionem potest argui primo, quia gratia, & dona supernaturalia non possunt educi de potentia subiecti: ergo debent creari. Consequenter est certa, quia omne quod producit, aut fit ex subiecto; & sic esteductio, aut non ex subiecto; & sic est ex nihilo, quod est creatio. Anteced. prob. quia illud educitur de potentia alicuius subiecti, quod dependet in suo esse ab illo, & continetur intra latitudinem, & spheram illius, sed gratia à nulla natura dependet, neque illi est debita, sed superat omnem conditionem naturæ: ergo non educitur de potentia alicuius subiecti, & rei naturalis, alioquin illi rei naturali à cuius potentia educitur, erit debita, & connaturalis gratia, quod est Pelagianum.

Consequenter quia gratia in Scriptura dicitur creari: ergo fit per creationem propriè dictam, quia verba Scripturæ in proprietate accipienda sunt. Anteced. patet, ut cum dicitur ad Ephes. 2. *Creati in Christo Iesu in operibus bonis*, & Ps. 10. *Cor mundum crea in me Deus*.

Resp.

Resp. quòd gratia educitur de potentia subiecti obedientiali, non naturali, & ita educitur educatione supernaturali, non naturali. Et ad probationem dicitur, quòd gratia dependet à subiecto secundum potentiam obedientialem, & per respectum ad Deum authorem supernaturalem, non per respectum ad aliquod agens naturale. Imò in hoc consistit potètia obedientialis, quòd reduci non possit ab aliquo agente naturali, sed à supernaturali. Vnde tales formæ non continentur intra latitudinē propriā, & naturalis sphaeræ rei naturalis, nec illi sunt debitæ, quia non respicit illas ut proportionatas, & ab aliquo naturali agente producibiles, sed solum per ordinem ad agens supernaturale. Et sic non sunt ipsi debitæ, quia solum de obedientiali potentia sunt educibiles, & per ordinem ad agens supernaturale. Neque circa hoc Pelagiana hæresis aliquid docuit, quia non fuit cum ea controuersia circa educationem istam: supposito enim quòd non est debita naturæ, nec de potentia naturali, sed obedientiali educitur, nihil cum Pelagio in hac parte sentitur, sed ab eo longè receditur. Et hæc est mens D. Thom. quam explicuit *quæst. 3. de potentia art. 8. ad 3.* ubi inquit, quòd *Gratia propriè non creatur per modum quo substantia per se subsistentes creantur: infusio tamen gratia accedit ad rationem creationis, in quantum gratia non habet causam in subiecto, nec efficientem, nec talem materiam in qua sit hoc modo in potentia, quòd per agens naturale educi possit in actum, sicut est de aliis formis naturalibus.* Vnde,

Ad Confirm. Resp. quòd dicimur creati in bonis operibus, & gratiam creati in nobis, quatenus sine ullis meritis nostris datur; & sic pro nihilo datur nobis, & hoc est creati moraliter loquendo, non physice.

Contra tertiam conclus. obiicies secundò. Composita substantialia quantum ad formalitatem suæ compositionis non fiunt ex nihilo: ergo pro ut sic non creantur. Conseq. est perspicua. Et anteced. probatur, quia compositum prout tale fit ex partibus quibus constituitur: ergo præsupponuntur partes, saltem prioritate naturæ: ergo pro illo priori non purum nihil, sed aliquid præsupponitur. Ad hoc autem ut actio dicatur esse ex nihilo, vel ex aliquo, non est necesse quòd illud aliquid duratione præcedat, sed sufficit quòd prioritate naturæ: ergo si pro illo priori supponitur aliquid ex quo fiat, non fit ex nihilo.

Conf. quia partes non fiunt simul cum toto, siquidem inter totum, & partes datur ordo, & causalitas, quia totum est ex partibus, nec etiam partes sunt posteriores, quia totum componitur ex illis, non partes resultant ex toto: si enim supponitur totum, iam partes non indigent resultare: ergo partes præcedunt: ergo si fit totum ex partibus, fit ex aliquo posituo præsupposito, & prioritate naturæ præcedente: non ergo fit ex nihilo in quantum compositum est.

Resp. negando anteced. Ad prob. dicitur quòd compositum fit ex partibus, distinguo, tanquam ex constituentibus, concedo, tanquam ex subiecto à quo educatur aliquid, vel termino à quo qui relinquatur, nego. Quòd autem in creatione constituit formaliter actionem ex nihilo, est quòd res non fiat ex aliqua potentia subiecti, vel ex termino à quo posituo. Quòd autem fiat ex aliquo posituo tanquam ex constituyente intrinseco, & tanquam ex partibus, hoc non tollit quòd fiat ex nihilo. Cuius ratio est, quia illæ partes, & illa constitutiva tenent se ex parte ipsius rei factæ, atque aded ex parte termini ad quem. Terminus autem ad quem in crea-

tione aliquid posituum est, & solum terminus à quo est nihil, & subiectum nullum de quo educatur. Fiunt ergo partes ipsamet actione qua fit totum, non tanquam ex præsuppositis in ipso fieri, & produci, sed tanquam ex componentibus, & constituentibus in facto esse, quia in ista actione creativa non prius fiunt partes per ipsam actionem, & postea conflatur totum, sed immediate attingitur totum, & in eo partes, non prius partes, & ex eis totum, & eo quòd ista actio est vniuersaliter productiva totius entis, nec procedit ab imperfecto ad perfectum, sicut est processus à partibus ad totum, sed ex sua primaria, & formali ratione, & attingentia respicit id quòd perfectum est, scilicet ipsum totum, & vniuersalem influxum ipsius esse, quòd conuenit toti: & quia in toto continentur partes tanquam quid incompletum, & minus perfectum, attingit illas ut sunt aliquid ipsius totius, & prout in eo ut imperfectum in perfecto continentur.

Ad Confirm. Resp. quòd in hac actione creativa partes fiunt tanquam quid contentum in toto, & derivatæ, seu consecutæ ad totum, & minus illo, non ut quid præsuppositum ad componendum, & causandum totum: licet enim partes præcedant totum ordine generationis, & processionis de potentia ad actum, & de imperfecto ad perfectum, tamen ordine perfectionis totum præcedit partes, & ipsas causat, & perficit in esse. Et hoc ideo est, quia esse per se primò conuenit toti, partibus autem ut contentis in toto, eique coexistentibus, & quia esse est perfectissimus actus entitativus; ideo communicatio ipsius esse quòd conuenit toti ad partes ut contentas in toto, & minores toto, est processus ordine perfectionis à perfecto ad imperfectum, & in hoc ordine prius est totum quàm partes, id est, esse totius est prius quàm esse partium, quia partes propriè non habent esse, sed subordinantur ipsi esse totius, & ab eo participant. Cæterum ordine inuerso proceditur à partibus ad totum tanquam de imperfecto ad perfectum, & de potètia ad actum, quatenus disponuntur, & habilitantur partes ad conflandum, & causandum totum. Actio ergo, quæ disponendo procedit, & de imperfecto ad perfectum, & de potentia ad actum, prius attingit partes, ut sunt aliquid tendens ad ipsum totum, & ex quarum vnione totum resultat; & sic præcedunt partes prioritate naturæ totum. Et sic procedit generatio, aliæque actiones educivæ. At verò actio quæ procedit influendo totum esse, & ipsum totum faciendo, non prius attingit partes, & ex illis componit totum, quia influxus ipsius esse non prius est ad partes, cum immediate ipsum esse conueniat toti, & inde communicetur partibus ut continentur in toto, & sunt aliquid minus toto. Et sic partes secundariò attinguntur, non sicut proprietates, sed ut communicantes in esse totius, & in ipso toto contentæ. Nec obstat quòd etiam in hac actione creativa totum componitur ex partibus, & partes causant totum, quatenus ex illis conflatur: dicimus enim quòd partes causant totum quidditatiuè, & entitatiuè; & sic producendo totum via perfectionis, & prout est continens ipsas partes, etiam ipsa compositio partium causatur, & ipsamet partes causant totum in diuerso genere causæ, quia partes quasi materialiter se habent ad totum, & in potentia, & via imperfectionis, totum autem ad partes formaliter, & via perfectionis. Et licet utraque ista causalitas, & partium ad totum, & totius ad partes per hanc actionem communicetur,

F f 4 tamen

tamen directè, & per se prius attingit id quod formalius est, & ex parte totius se tenet, deriuaturque ad partes, quàm è conuerso, quia iste processus creatiuus non est de potentia ad actum, & de imperfecto ad perfectum, sed è contra; & idè non prius attingit partes, & deinde totum, sed attingit directè totum, & in ipso toto partes vt còponentes totum, & materialiter se habentes ad esse.

12 Terriò arguit. contra quartam conclusionem Nam materia prima non potest produci nisi ex nihilo, cum non supponat aliam priorem materiam ex qua fiat: ergo per creationem: ergo secundum se recipit aliquod esse antecederet ad esse compositi. Patet conseq. quia est intelligibile quòd creatio terminetur ad aliquod ens, & non det illi esse: ergo si creatio tangit materiam, dat illi esse, aut illa creatio nihil producat. Quod euidentius apparet, si fiat materia per creationem, & forma educatur ab aliquo agente creato, sicut fieri potest à Deo, & quotidie fit in speciebus Eucharisticis, cum corrumpuntur, & ex eis generatur aliquid, tunc in instanti quo species illæ desinunt, & generatur aliquid ex illis; creatur à Deo materia quæ feruiat pro compositione ipsius rei genitæ: neque enim in eo manet quantitas loco materiæ, sed vera substantia materiæ: ergo in illo instanti generationis ponitur ibi materia, & non nisi per creationem, quia est ex nihilo, & tamen forma non fit tunc per creationem, sed per generationem, & educationem è subiecto: ergo potest creatio dari præcisè ad materiam, & sic dabit illi esse: alia verò actio producit formam educendo illam è materia. Nec potest dici quòd creatio tangit materiam, & dat illi esse, sicut ipsa est capax, id est mediata, seu mediante forma, à qua producit materia dependens. Sed contra instatur hoc in primis in casu allato, quando ipsa materia fit à Deo, & ex illa per generationem fit aliqua forma. Secundò, quia si sic fieret, quælibet forma adueniens daret nouum esse materiæ, quia esset noua forma: ergo mutaretur materia, quia diuersum esse acciperet. Terriò, quia tunc materia non còseruaretur aut dependeret solùm à Deo per creationem aut còseruationem illius, sed etiam ab agente naturali, quod educendo formam, induceret nouum esse in materiam; & sic mediante tali esse, non à creatione continuata, sed ab isto sic generante dependeret. Quartò, quia aliàs cum materia crearetur cum forma, non fieret ex nihilo, quia fieret ex forma, utpote habens esse ex illa.

Confirm. quia quando creatur materia, non potest fieri forma per creationem nisi sit anima rationalis: ergo falsa est secunda pars conclusionis. Anteced. prob. quia illa forma fit tunc dependens à materia, & non vt subsistens: ergo fit per educationem à potentia materiæ, si quidem illa forma educitur, quæ in sui productione fit vt dependens à materia.

Respond. negando quòd materia recipiat esse immediatè per creationem, sed mediante forma Vnde actio attingens materiam numquam est creatio, sed concreatio, quamuis vt attingit materiam ex nihilo sit, vt à termino à quo, sed tamen non ponitur materia in esse, nec redditur producta ex parte termini ad quem, nisi vt coniuncta productioni formæ siue concreatæ cum ipsa materia, si ipsum totum creetur, siue educatæ ex materia, si ipsum totum generetur, vt admissò casu quem affert argumentum de materia subrogata in speciebus Eucharisticis, quando aliquid ex eis ge-

neratur. Itaque creatio absolutè dat esse ipsi tori primò, & per se creat, partibus autè non dat esse seorsum, & secundum se, sed vt in toto, atque ita materiæ non tam dat esse, quàm subesse formæ, seu dat esse dependenter à forma, tam ab illa sub qua creatur, quàm à cæteris succedentibus per generationem. & loco prioris subrogatis. Et hoc non est creationem nihil facere, sed est dare esse materiæ, sed mediata, & dependenter à forma, non immediatè in se, eo quòd materia solùm habet esse vt ens porientale, & mediante forma actuabili ab existentia, sicut anima est operatiua mediante potentia. Et quando producit à Deo materia in instanti generationis ex speciebus Eucharisticis, si talis productio fit per creationem, non fit per creationem absolutè, sed dependenter ab educatione formæ, ita quòd creatio subiiciat materiam formæ, & per educationem actionem præbeat esse materiæ, quod per se non præbet, sed actio illa creandi coniungitur actioni educationis, vt per ipsam consumetur, & esse præbeat, sicut creatio animæ rationalis in Christo non dedit ei subsistentiam, nec in sententia D. Thom. existentiam, sed quoad hoc suppleta fuit, & consummata per assumptionem, quæ subsistentiam Verbi ei vnuit. Quod exemplum ostendit non repugnare quòd vna actio in aliquo esse dando consummetur per aliam.

Ad instantias autem allatas contra hanc respon- 13 sionem, quòd materia prima non accipit esse per creationem mediata, & dependenter à forma, sed immediatè in se.

Ad primam iam responsum est ex nuper dictis.

Ad secundam dicitur, quòd per quamcumque formam de nouo aduenientem accipit materia diuersum esse, & amittit aliud quod habebat per aliam formam, non tamen corrumpitur aut generatur de nouo, quia non amittit, nec acquirit ipsam entitalem potentialem, quam habet ad omnes formas, sed intra latitudinem formarum à quibus potest habere esse, trāsmutat causas formales, per quas còseruatur in esse. Non dicitur autem aliquid corrumpi, aut generari simpliciter per hoc quod trāsmutat esse, vel modum essendi, si vtriusque est capax, sed si de nouo accipiat esse, ita quòd antè non fuerit, dicitur generari, seu produci; & si amiserit esse, ita quòd aliud non accipiat, dicitur corrumpi, sicut in sententia S. Tho. quòd humanitas in Verbo non solùm subsistat, sed existat, si humanitas mea assumeretur modò à persona spoliaretur propria subsistentia, & existentia, nec tamen desineret esse, nec corrumpere, quia subrogaretur alia loco illius eundem effectum faciens. Itaque materia per quamcumque formam potest existere, nec adæquatè per istam determinatam existit, sed per quamcumque earum, quarum est capax existere potest. Vnde mutatio de vna in aliam non est corruptio, seu desitio, & generatio, sed sub diuersis existentis, & formis continuatio. Et hoc ponit quidè trāsmutationem in materia, quia subiectum mutationis est, sed non corruptionem, & productionem eiusdem in sua entitate potentiali.

Ad tertiam instantiam dicitur materiam pendere à solo Deo efficienter, quantum ad ipsum fieri, seu concreari ex nihilo, sed in facto esse pendere à forma, quia sic efficienter est à Deo quòd fit vt subiecta, & dependens à forma, à qua in genere causæ formalis dependet. Agens autem naturale, licet introducat in materiam esse formale, & existentiam, quæ ad eam sequitur, non tamen dicitur producere materiam, aut còseruare simpliciter, quia non est causa ipsius entitatis potentialis materiæ, nec ipsius con- 14 creationis

creationis ex nihilo, sed solum formæ, quatenus determinat, & communicat existentiam ipsi toti, & materiæ; & sic complet productionem eius in esse, quantum ad determinationem existentia, ipsam quippe indifferentiam, & capacitatem omnium formarum, quæ est entitas potentialis materiæ, agens naturale non producit, sed hoc à Deo est ipsi materiæ cum dependentia tamen à forma producta per agens naturale, ut complente, seu determinante esse sub quo determinatè materia existit. Vnde agens naturale non simpliciter producit, aut concreat materiam, sed complet, seu determinat quoad esse.

15 Ad quartam dicitur, quod licet materia fiat dependens à forma, ut à determinante esse illius, non tamen ut à subiecto ex quo fiat, vel ut à termino à quo, & ideo talis dependentia non tollit, quin ex nihilo fiat, ut ex præsupposito; & tamen non redditur ex nihilo dependens, sed dependet à forma. Videantur plura de his in *Physica* q. 2. art. 3.

Ad Conf. diximus *ibidem* q. 4. art. 2. quod non est idem formam fieri dependentem à materia, & fieri per educationem: nam si Deus totam substantiam panis converteret in totam substantiam lapidis, forma lapidis esset dependens à materia, sed non tameneducta, sed ex conversione alterius facta. Et si Deus produceret accidens separatum, & postea illud uniret subiecto, faceret dependere, nec tamen educeret. Ad educationem ergo requiritur quod forma fiat dependens à subiecto per transmutationem materiæ, & reductionem potentialitatis eius in actum, non per hoc quod fiat aliunde, & ei uniatur, etiam si uniatur ei cum dependentia.

ARTICVLVS IV.

Verum potentia creatiua principaliter, vel instrumentaliter possit creaturæ communicari?

1 S Vpponendum est tanquam certum de fide nullam creaturam de facto aliquid creare, vel creasse, ut *suprà* art. 1. ostendimus: hoc enim pertinet propriè ad omnipotentiam Dei, & virtutem illius infinitam, sicut dicitur Ieremiæ 32. *Ecce Domine tu fecisti calum, & terram in fortitudine tua magna, & in brachio tuo extenso.* Et Isai. 44. *Ego Dominus faciens omnia, extendens calos solus, stabiliens calos, & nullus mecum.* Posuerunt tamen aliqui, ut Auicenna, quem citat S. Thom. *hac* q. 45. art. 5. quod licet creare sit propriè actio primæ causæ, tamen in virtute eius potest aliqua inferior causa creare; & sic quod prima substantia separata creat aliam post se, & substantiam orbis, & animam eius, & substantia orbis creat materiam inferiorum corporum. Sensit etiam Arrius quod Verbum Dei erat factum, ut ei deferuaret ad faciendum omnia, tanquam instrumentum; & sic non convincebatur Verbum esse Deum, ex eo quod omnia sint facta per ipsum, & sic ipse non erat factus: dicebat enim omnia facta esse per ipsum tanquam per instrumentum, ut *suprà* disp. 12. art. 1. vidimus. Cæterum hoc omnino fides Catholica eliminat, & soli Deo tribuit creationem rerum, sine alicuius consortio, ut in locis allegatis Scriptura dicitur. Vnde inquit Athanasius *ser. 3. contra Arrianos*, quod *Condere & creare solius Deus est, eiusque Verbi & Sapientia.* Et Aug. 3. de *Trinit. c. 6. dicit* quod *Neque Angeli boni,*

neque mali possunt esse creatores alicuius rei.

Difficultas est, an de potentia absoluta possit 2 communicari alicui creaturæ potestas creatiua, vel per modum causæ principalis, vel instrumentalis? In qua communis Theologorum sententia est, non posse dari creaturam, quæ nativa virtute, & ut causa principalis creare possit, contra Durandum in 2. dist. 1. q. 4. qui affirmat id esse possibile, quia oppositum non ostenditur implicare. Et ideo totus labor est in reddenda ratione implicationis huius: Circa instrumentalem verò causam creationis, sensit Magister in 4. dist. 5. c. ultimo, possibilem esse instrumentalem causam creationis: eumque secutus est D. Thom. *ibid.* q. 1. art. 3. *quæstionum* 3. ad 4. & in 2. dist. 1. q. 1. art. 3. & plures Recentiores hoc ipsum defendere affirmat Vasqu. *hic* disp. 176. c. 1. in eamque ut probabilior tandem inclinatur Suarez in *Met. disp. 20. sect. 3.* & uterque tam Suarez, quam Vasquez inefficaces reputant rationes D. Thomæ tam ad probandum non posse dari creaturam, quæ nativa virtute creet, quam quæ instrumentali, idemque impugnat Molina *super hanc* q. 45. art. 5. circa rationem probantem non dari causam instrumentalem creationis. Qui Authores in hac ratione impugnanda sequuntur Scotum in 4. dist. 1. q. 1. Est tamen communis sententia non posse dari instrumentum creationis, quam secutus est D. Thom. (priori relicta) in *hac* q. 45. art. 5. & ibi communiter eius discipuli, Caietan. & alij *super istum locum*. Ferrar. 2. contra *Gentiles* c. 12. Scotus loco cit. §. *Ideo dici potest*, Richardus, & alij quos citat, & sequitur Vasqu. *disp. 176. c. 2.* Nos ergo solum intrèdimus in præsentem implicationem utramque, tam de potentia nativa, & principali, quam de instrumentali, ad creandum, quam D. Thom. affert, defendere, & explicare.

Implicat creaturam vi nativa creare.

Præcipuæ rationes quibus D. Thom. hanc implicationem concludit, reducuntur ad duas, quarum viam explicat in *hac* q. 45. art. 5. & 2. contra *Gent. c. 21.* & q. 3. de *potentia* art. 4.

Prima, quia actio creatiua perit intrinsecè, & essentialiter virtutem infinitam, si sit principalis causa creandi: ergo repugnat alicui creaturæ conuenire.

Secunda, quia actio creatiua est essentialiter prima, & vniuersalissima actio influens per seipsam esse: ergo requirit virtutem primam, & vniuersalissimam in principio creante: ergo nulli creaturæ conuenire potest.

Prima ratio non habet difficultatem in consequ. 3 sed in antecedente, vnde videlicet deducatur quod virtus creatiua debeat esse infinita. Licet enim virtus creatiua si sit ita plena, & ampla quod respiciat totam collectionem entis creabilis, infinita esse debeat, tamen ad creandum vnam tantum creaturam, v.g. Leonem ex nihilo, cur ad hoc requiritur virtus infinita, cum effectus ipse finitus sit? Modus item causandi, scilicet ex nihilo non videtur petere infinitatem in ipsa virtute sic producente, quia inter nihilum, & ens finitum non potest esse distantia infinita, quia non est maior distantia quam quæ sit pertranscunda usque ad terminum distantia: terminus autem finitus, & limitatus est: ergo finita via attingibilis, aliàs non esset maior distantia à nihilo in Deum, quam à nihilo in creaturam.

Et conf. quia non est intelligibile quod sit eiusdem virtutis creare formicam, & creare Angelum, vel totum vniuersum. Hæc autem latitudo secundum quam maioris operis est vna creatio, quam alia,

alia, oritur ex ipsa diuersitate terminorum, & distinctione eorum specifica: ergo creatio determinati effectus, & vnius potius quam alterius, finita est, & sic non petit ex sua ratione infinitam virtutem vel operationem. Rationes ergo D. Thom. quibus probat infinitatem huius virtutis, quia infinita distantia est inter nihil, & aliquod esse, vel quia creatio est influxus vniuersalissimus in esse, minus efficaces sunt, nec probant creationem cuiuslibet effectus determinati petere infinitam virtutem, sed ad summum id petere creationem vniuersalissimam, id est virtus illa quæ fuerit creatiua totius collectionis entis creabilis.

4 Nihilominus solida, & constans est ratio D. Tho. probatq; efficaciter quamlibet actionem creatiuam cuiuscumque entis determinati, & particularis, hoc ipso quod nihil præsupponit vt agat, debere operari infinita virtute. Pro quo est aduertendum quod infinitas potentia, seu virtutis potest pensari vel ex parte ipsius rei factæ in se, vel ex parte ipsius fieri, seu modi faciendi; res quippe facta in seipsa semper est limitata, & finita, imò tota collectio creaturarum quidditatiuè cōsiderata finita est in se. Sed tamen amplitudo virtutis, & potentia attenditur ex ipso etiam modo faciendi, quatenus debet plura vel pauciora præsupponere ad operandum, & quanto plura præsupponit, minus vniuersalis virtus est, quia ea quæ præsupponit, non efficit, si verò minus præsupponit, plus efficit; & sic magis ampla, & indifferens potentia est ad faciendum: atque adeò si nihil præsupponit, sed totum facit vniuersalius operatur. Quare infinitas virtutis ad creandum non est pensanda ex limitatione, vel infinitate termini *ad quem*, qui producit, sed ex ipso fieri, & modo quo producit, & vniuersalitate atque indifferentia quam supponit erga totum ens, hoc ipso quod vnum ens facit ex nihilo: In hoc enim principio omnes conueniunt, quod virtus, seu potentia, quæ potest super omnem collectionem entis creati, est infinita. De hoc non est dubium: nec enim aliam maiorem infinitatem habet potentia, & virtus diuina, in quantum virtus, nisi posse super totam collectionem entis creabilis. Subsumimus sub hac maiori: Sed hoc ipso quod aliqua virtus ex sua formali, & propria ratione potest vnum tantum ens producere ex nihilo, debet habere vim, & potentiam vniuersalem, & indifferentem ad omnem collectionem entis creati: ergo debet esse infinita.

Minor, in qua est difficultas, probatur: quia virtus producētis, & agentis non habet amplitudinē, & vniuersalitatem in agēdo, vel determinationem & constrictionem solum ex limitatione termini producti in se, sed ex proportionē, vel impropor-tione termini *à quo* ad terminum *ad quem*, & materiæ, seu materialium principiorum ad talem rem faciendam, quia cum terminus, seu res producta, non quomodocumque fiat, sed ex aliquo termino vnde educitur, seu reducit ad esse, oportet quod in vincēda impropor-tione, seu indifferentia, & distantia termini *à quo* ad terminum *ad quem*, attendatur maior vel minor virtus agentis. Quod si ab vno termino *à quo* non sit maior distātia ad vnum terminum *ad quem*, quam ad alium, eadem virtus quæ potest vincere distātia ad vnum terminum, poterit vincere distātia ad alium, si non sit maior impropor-tio, & difficultas in vno, quā in alio; sicut si vnum agens potest vincere distātia vnius lenæ, vbicumque fuerit illa distātia cum simili difficultate itineris, & non alia, poterit illā vincere. Sed sic est quod vbi nihil præsupponitur ad operandum, est æqualis distātia, & difficultas ex

nihilo ad quodcumque ens: ergo virtus quæ potest vincere distātia, & impropor-tionem, ac difficultatem ex non esse ad aliquod ens, poterit vincere distātia, & difficultatem ad quodcumque ens, quia non est maior distātia, & difficultas ad maius ens, quā ad minus procedendo ex nihilo. Probat minor, quia nihil est carentia negatiua, & totalis omnis esse, & omnis entitatis: ergo in illo non datur maior approximatō, & determinatō ad vnum ens, quā ad aliud: ergo agens quod procedit ex nihilo, procedit ex termino *à quo* æquē distāte à quolibet ente, & à quolibet esse, ergo ex vi illius non est magis factibile vnum quā aliud ex tota collectione entis factibilis, quia ab omni ente factibili æquē distat, cum æqualem carentiam habeat omnis entis factibilis, nempe puram negationem, nec habeat determinationē aut approximationem maiorem ad vnum quā ad aliud. Omne autem agens habet virtutem suam conformatam distātia, & determinationi quæ versatur inter terminum *à quo*, & *ad quem*, vnde educenda est forma, & similiter inter potentiam seu subiectum ipsum, & formam, quia inde sumitur proportio operandi, & ex proportionē maior vel minor virtus. Ergo illa virtus quæ operatur, & producit aliquid ex nulla proportionē, sed ex puro nihilo, operari potest ex vi sua quodcumque ens, quia æqualis distātia, & impropor-tio est inter nihil, & vnum ens, atque inter nihil, & quodcumque ens; & sic virtus potens vincere distātia, & impropor-tionem inter nihil, & aliquod ens, debet esse potens vincere distātia, & impropor-tionem inter nihil, & quodcumque ens; & sic habere potentiam, & virtutem super omne ens.

Dices: non esse verum quod est æqualis distātia, & impropor-tio inter nihil, & vnum ens minimum, atque inter nihil, & ens maximum. Quis enim capiat non esse maiorem distātia inter nihil, & cælum, seu Angelum, aut totum vniuersum, quā inter nihil, & granū millij? Hoc enim videtur esse contra ipsum lumen rationis; atque adeò fundamus in re valde dura cōclusionem nostram, scil. quod ad creandum ex nihilo quodcumque ens, necessaria sit infinita potentia, & quod sit distātia tanta, & tam infinita inter nihil, & formicam, quā inter nihil, & totum vniuersum.

Ceterum hæc responsio procedit ex infirmitate imaginationis, quæ à generatione rerum paralogizat ad creationem ex nihilo: vt enim fiat granū millij, vel formica ex præparatione, & apparatu eorum quæ requiruntur ad sui consistentiam, sicut fit per generationem vel artem, & vt fiat cælum, vel totum vniuersum ex præparatione etiam materiæ, & eorum quæ requiruntur ad eius compositionem, omnino esset præposterum omni lumini rationis, tantum apparatus, & distātia require-re ad vnum effectum quantum ad alium. Ceterum in agente ex nulla præparatione, & apparatu materiæ, sed producente totum etiā est contra ipsum lumen rationis restringere, & coarctare eius potē-tiam ad vnum determinatum ens, potius quā ad aliud, supposito quod operatur nihil præsupponendo, sed totum operando.

Et ratio id manifestè conuincit, quia vbi nulla præparatio vel apparatus materiæ præsupponitur, non determinatur agēs ad tantum vel tantum effectum producendum ex aliquo extrinseco, seu ex passo super quod operatur eius virtus, siquidem nullum tale passum vel materia datur: ergo quod operetur granum arenæ, vel operetur cælum, aut totū vniuersum, non est ex dispositione materiæ, sed ex mera voluntate, & determinatione ipsius agentis:

agentis : ergo oportet quòd ista virtus de se sit vniuersalissima, & indifferens ad totum ens : siquidem ab extrinseco passio, vel materia non determinatur, vt tantum vel tale ens producat, nec in ipso nihilo est maior distantia, aut improportio ad multum, quam ad paucum, ad magnum, quam ad paruum, cum totius entis parui, & magni sit pura carentia, & negatio ; & sic non habet maiorem coaptationem aut determinationem erga vnum, quam erga aliud. Ab intrinseca autem ratione ipsius agentis non potest accipi ista coarctatio, & determinatio ad creandum vnam speciem tantum entis, & non aliam, quia ratio operandi in agente non potest habere pro formali ratione operandi ipsam speciem, & ad eam determinari, & coarctari, si primò, & per se operatur ex nihilo, quia sic oportet quod primò, & per se etiam operetur rationem genericam, non solum quatenus est contenta in specie, sed per se, & directè, quia non præsупponit illam, sed per se facit : ergo non est factiua primò, & per se, & in quarto modo speciei, seu rationis specificæ, sed etiam rationis genericæ, imò, & rationis generalissimæ entis, quia illud per se facit, quod per se non supponit, per se autem nihil supponit : ergo per se etiam genus facit, vt magis ponderabitur in secunda ratione. Et deinde quia omne agens in sua intrinseca virtute commensuratur proportioni, & distantie vincendæ inter terminum à quo, & terminum ad quem, siquidem ad eius rationem, & virtutem pertinet non solum respicere terminum ad quem quomodocumque, sed vt ex tali termino à quo faciendum, quia agens non solum respicit terminum, sed viam, qua res facienda est, & consequenter distantiam ac proportionem, quæ est inter terminum à quo, & ad quem : hæc enim est via ex vno ad aliud. Ab isto autem termino à quo, qui est nihil, tanta indifferentia, & improportio, seu distantia est ad vnum terminum, seu ens creatum, quam ad aliud, & æquè indifferenter se habet ad hoc, quam ad illud, cum sit pura negatio omnium, nec ex pura negatione possit duci, & inchoari via magis ad hoc determinatum ens, quam ad aliud, sed solum ad quodlibet ens, quia nihil supponitur de ente, neque in potentia, neque in actu, sed totum fit. Ergo inter istos duos terminos, nihil ex parte termini à quo, aliquid ex parte termini ad quem, nulla est determinata proportio, & distantia ad hoc determinatum ens potius, quam ad illud, ad paruum quam ad magnum. Ergo si virtus agentis in sua perfectione, & ratione conformatur distantie vincendæ, & pertranseundæ à termino à quo ad terminum ad quem, si ista distantia est ita indifferens, & indeterminata ad omne ens, etiam & ipsa virtus indifferens debet esse ad omne ens. Vnde si ex tali termino à quo producit aliquod ens, æquè bene potest quodlibet producere, quia ad quodlibet indifferens est ; & sicut terminus à quo est indifferens per negationem, ita efficiens per positionem, non potentialitatis, quia non est materia, sed actualitatis quia est efficiens, & consequenter est indifferentia vniuersalitatis super omne ens.

6 Denique distantia, seu improportio inter nihil & ens, quodcumque illud sit, non regulatur penes magnum, vel paruum, magis, vel minus ipsius rei productæ, vt quod sit granum millij, vel cælum integrum, sed penes hoc quòd terminus à quo distat ab omnibus prædicatis inclusis in re producenda, & nullum eorum supponat, sed omnia faciat : in hoc enim terminus à quo, qui est nihil, æquè distat à grano millij, & à toto cælo, quia etiam in grano millij, & in arena terræ includuntur sua prædicata à genere supremo, & ab ente vsque ad indiuidua-

tionem, sicut includuntur in reliquis entibus, licet illud granum sit minoris quantitatis. Vnde si ad producendum vnum granum, & formicam proceditur ex nihilo, oportet quòd nullum ex illis prædicatis supponatur, sed omnia fiant, & similiter si fiat cælum, & fiat Angelus, nullum ex prædicatis eius communibus vel particularibus supponitur, sed omnia fiunt : ergo quoad ipsam substantiam rei faciendam tantum distat à nihilo granum millij, quam totum cælum, licet hoc in quantitate excedat, quia nullum prædicatum etiam commune, & genericum fit in vno, quod non fiat in alio, & hoc per se primò, quia non solum fit prædicatum genericum vt contentum, & identificatum cum specifico, & ratione specifici, sed per se, & ratione sui fit, quia per se non præsупponitur gradus genericus, cum nihil supponatur : ergo per se fit. Si autem per se fiunt prædicata communia, & generica, non minus quam particularia : ergo agens quod habet virtutem faciendi per se gradum illum, & prædicatum genericum, debet habere virtutem ad faciendum quodcumque prædicatum specificum sub genere contentum, quia eius virtus non specificatur, & determinatur ex specifico prædicato, sed vniuersalior est, vt pote tangens generalem rationem communem, & per se faciens illam : ergo non est coarctatum ad vnam speciem : ergo si non solum gradum genericum, sed etiam analogum, quod est gradus entis, per se facit, ad omnia sub ente factibili contenta vniuersalitatem habet, quod est comprehendere, & respicere omne ens factibile, & virtus respiciens omne factibile infinita est ; quod amplius ex seq. ratione manifestum erit.

Secunda ergo ratio, seu principium probans impossibile esse quòd virtus aliqua creata, sit per se creatiua ex propria, & natia virtute, tanquam causa principalis, participata tamen à Deo, est quia actio creatiua est vniuersalissima, & influens ipsum esse quarto modo per se : nulla autem virtus creata potest esse prima, & vniuersalissima in influendo esse. De hac autem propositione, quòd esse est proprius, & per se primò effectus Dei, plura diximus præced. tomo disp. 8. art. 2. quæ hinc præsupponenda sunt. Modò solum oportet videre, quomodo creatio respiciat esse existentie, non prout tale, vel tale, v.g. prout esse hominis, vel leonis, vel lapidis, sed absolute secundum omnem generationem ipsius esse, & secundum talem influxum in esse quod per solam suspensionem eius, res annihilabitur nulla entitate, aut esse remanente, neque in actu, neque in potentia. Ex hoc enim deducuntur duo.

Primum, quòd creatiua potentia debet attingere omnem rationem entis in effectum non prout continetur in hac, vel illa ratione specifica, seu particulari, sed secundum generalem rationem entis ; & sic ad omne ens creabile debet extendi.

Secundum, quòd ad creandum ex parte agentis ipsa virtus, seu forma agendi est ipsa existentia, quod nulli creaturæ conuenire potest. Explicatur hoc : Nam vnumquodque agens illud per se, & directè efficit in aliquo effectum, quod non supponit, nec alteri causæ reinitit, à cuius concursu dependet, ita quòd licet plures causæ concurrant ad aliquem effectum, tamen vnaquæque efficit per se primò aliquid, quod ei particulariter correspondet, vniuersalior quidem causa efficiendo id quod vniuersalioris rationis est in effectum, particularis verò id quod particulare est, vnaquæque secundum propriam rationem suam : semper enim vniuersaliores effectus, & qui ad plura se extendunt, vniuersalioribus causis correspondent. Vnde vnaquæque

que causa quanto magis particularis, & determinata est, tanto magis dependet à causis superioribus, & omnes causæ creatæ à Deo, & ista subordinatio, & dependentia tam essentialis, & per se est in causis particularibus, & determinatis, sicut est essentialis in effectibus habere diuersa prædicata, secundum quæ correspondet diuersis causis, sicut ignis qui generatur correspondet igni generanti secundum rationem determinatam, & particularem suæ speciei: sic enim fit ab igne, & non ab alio agente, & secundum rationem corporis correspondet cælo, & secundum rationem entis Deo. Et quia Deus producit sub ratione ita vniuersali, & communi, ipse solus sufficit dare esse effectui absolute, & simpliciter, aliæ verò causæ dant esse ex virtute ipsius, & participando ab ipso hoc quod est causare. Illa ergo causa dicitur causare esse per se primo, & tanquam proprium effectum, quæ in aliquo effectui causat totum quod pertinet ad esse, & omnia prædicata, quæ quomodocumque esse participant, ita quod de eo quod est esse, nihil supponat ab alia causa attactum, sed totum faciat, quia si aliquid supponit, vel alteri causæ remittit, & ei correspondet, iam non simpliciter, & absolute facit esse, sed solum aliquam particularem rationem essendi. Esse ergo in quacumque re est proprius effectus Dei, scilicet esse simpliciter, esse ut comprehendit omnia prædicata, esse non secundum aliquam particularem rationem essendi, aut secundum aliquem gradum illum entis, sed secundum omnes; & sic ab vniuersali influxu deriuari dicitur, quatenus fit ab agente quod nihil de illo esse supponit, sed totum facit, & si aliqua alia causa dicitur cum illo agere, est quia hæc causa participat ab illo hoc ipsum, quod est causare; & sic dicitur quod per se primo est effectus talis agentis, quia in tantum est effectus in quantum fit, & non supponitur, & si quoad omnia fit, & quoad nihil supponitur, sic per se, & directe dicitur esse effectus talis agentis, & non per aliud, seu ratione alterius prædicati, vel rationis adiunctæ, v.g. quia est esse hominis, vel equi, aut ignis, quia hoc pertinet ad productionem esse secundum determinatam formam, & rationem, & ut correspondet determinatæ, & particulari causæ. Vnde est effectus causæ creatæ ratione formæ cui adiungitur esse; & sic transmutando formam, facit etiam esse per transmutationem, non per se totum esse influendo, ut ponderauimus *cit. disp. 8. art. 2.*

8 Hoc supposito duo restant probanda. Primum, quod esse hoc modo consideratum, & descriptum solum possit fieri à virtute creatiua, nec proprie creat quod sic non producit esse. Alterum est, quod esse hoc modo sumptum solum deriuari potest à Deo, nec alterius causæ creatæ effectus esse potest.

Primum ostenditur, quia ad rationem nihil præsupponitur, quia est productio ex nihilo: ergo totum quod est in effectui de esse facit. Patet consequentia, tum quia quicquid non supponitur factum ab aliqua causa, debet ab ea fieri, aut relinquatur infectum: ergo causa quæ ex nihilo operatur, nihil præsupponit factum: ergo totum facit: tum quia influxus creatiuus talis est quod per eius suspensionem res annihilatur: ergo ex tali influxu totum esse pendet, siquidem ex subtractione eius nihil de esse remanet: ergo facit totum esse secundum omnem rationem entis, siquidem si sic non faceret, non posset ex sola suspensione talis influxus annihilari ille effectus: indigeret enim etiam alterius causæ influxum remoueri, si ex alia etiam causa penderet secundum aliquam rationem esse istius effectus. Vnde ulterius fit quod influxus

creatiuus ita est vniuersalis, & supremus, quod repugnat compati cum illo dependentiam ab alia causa, nec concursum alterius causæ, sed ipsa debet dare totum esse, & totaliter, ita quod si alia causa concurrat, debet esse ex causatione, & participatione eius. Patet hoc, quia influxus creatiuus dat totum esse ex nihilo, ita quod per suspensionem, & remotionem talis influxus decidit res in nihilum: ergo non potest aliquid ex parte illius esse, & illius effectus correspondere alteri causæ, nec dependere ab alterius superioris concursu, & influxu, quia si dependeret, non posset ex sola suspensione influxus creantis decidere res in nihilum: restabat enim recursus ad aliam causam superiorem, cuius influxus si non tolleretur, res non penitus destrueretur: ergo repugnat quod influxus creantis sit dependens ab alio superiori, & non sit supremus, siquidem debet esse talis quod ex suspensione eius res annihilatur: correspondent enim sibi mutuo creatio, & annihilatio: ubi est creatio ex nihilo, cessatio creationis est decidere in nihilum, quia creatio est influxus totius esse, & remoto influxu totius esse, annihilatur.

Ex quo probatur manifestè secundum, scilicet quod hic influxus totius esse solum possit esse à Deo, quia vniuersalissimus est, ut ait S. Thom. *in art. 5. huius qu. 45.* Et ratio deducitur clarè, quia influxus supremus, & dependens à causa superiori non potest esse creatus, sed est proprius solius Dei, influxus creatiuus est ita vniuersalis in ipsum esse, quod repugnat admittere consortium, & dependentiam ab influxu superioris agentis, & causæ: ergo repugnat quod sit influxus creatus, & creatiuus, seu quod sit à causa creata, quia causa creata essentialiter est subordinata causæ superiori.

Dices: Si influxus iste ita est vniuersalis quod attingit totum esse, & totaliter, ita ut totum faciat, nec relinquit quod aliquid fiat ab alia causa, sed totum quod in effectui est, facit: ergo influxus Dei non admittet consortium alterius causæ, quia si totum facit, & nihil supponit, nec remittit alteri causæ: superfluit ergo quacumque alia causa. Sed non superfluit, siquidem cum Deo etiam aliæ causæ cooperantur: ergo signum est quod ille influxus creatiuus non est ita vniuersalis quod omnem rationem faciendi esse comprehendat, sed aliquid relinquit pro aliis causis; & sic fundamentum nostrum non subsistit, quasi non sit communicabilis creaturæ influxus creandi, quia debet per creationem totum esse facere, & omni modo facere, nec supponere quod ab alia causa aliquid fiat.

Confirm. quia causæ creatæ quando producunt effectum de nouo, verè faciunt, & dant esse effectui, & dando esse illi quantumcumque secundum gradum inferiorem, etiam omnes gradus, & prædicata sua priora esse recipiunt: nec enim gradus inferior fit seorsum à gradu superiori: nam gradus isti non distinguuntur, sed sunt eadem res: ergo eodem esse gaudent, & sic qui facit vnum, facit alterum. Non ergo est solida illa distinctio, quod vni agentis correspondet esse secundum vnum gradum, & alij secundum alium.

Respon. quod in influxu creatiuo, & vniuersalissimo præcipuum quod vrgemus in presenti, est, quod est supremus, & independens à superiori causa, ita quod repugnat ei admittere consortium causæ, & influxus à quo dependeat in operando, eo quod si est creatiuus, etiam debet esse annihilatiuus per solam sui suspensionem, aliàs creatiuus non est: quod verò admittat causas inferiores dependentes à se, & quibus ipsa causa vniuersalis communicet hoc, quod est causare, & influere, non est contra vniuersa

yniuersalissimam rationem influxus diuini, sed pro illo, quia inter alia quæ causat ille influxus, est quoddam causæ inferiores sint causæ, nec in eis aliquid præsupponit, aut ex illis, accipit, sed totum quod causant, dat eis. Vnde si Deus velit annihilare aliquid causatum per generationem à causa inferiori, æquè bene potest, ac si à se solo causaretur, & tunc per subtractionem influxus etiam suspendit Deus inferiores causas, ne operentur in effectum quem ipse annihilare vellet. Quoddam tamen non posset causa creatiua, si esset creata, quia dependens esset à superiori causa diuina, cuius influxum suspendere per se non posset; & sic per sui concursus suspensionem res non annihilaretur, quod est manifestum signum non esse conuulsam creatiuam. Licet autem influxus Dei non impediat causas inferiores, sed iuuat, tamen quando operatur creando, non potest admittere consortium, etiam causæ inferioris, quia creatio nihil relinquit in effectum, quod fiat ab alia causa, cum faciat totum ex nihilo, nec subiectum aliquod supponit circa quod posset causa creata dispositiue, & instrumentaliter se habere, vt statim dicemus.

Ad Conf. Resp. quòd quando forma aliqua produ-
citur à particulari agente secundum gradum de-
terminatum, facit alios gradus, & prædicata in tali
re contenta, & identificata, non per se primò, & for-
maliter, sed identicè, vt sunt entitatiuè vnum cum
alio, & per modum particularem, scil. per transmuta-
tionem materiæ, ac per hoc non omnia facit, scil.
ipsum subiectum, seu ens potentiale, quod est ma-
teria. Vt autem ea prædicata superiora etiam per se
fiant, operatur causa particularis in virtute causæ
superioris, cui tanquam altiori conuenit per se re-
spicere vniuersaliores effectus, & rationes.

10 Secundum autem quod diximus *suprà*, deduci ex ista ratione, est quod existentia sit forma per se producendi esse, & creandi, quod nulli creaturæ competere potest, quod explicauimus *cit. disp. 8. art. 3.* quia in vnaque re formalis ratio agendi est forma illa qua natura talis rei constituitur: natura enim est principium motus, & quietis. Existentia autem in nulla re creata potest esse forma constitutiuua naturæ, cum omni creaturæ accidentaliter sit, & sic potest quidem esse conditio requisita vt forma operetur effectiuè, quia quod non est, non operatur, non tamen potest esse forma, & ratio operandi, quia in nulla creatura potest naturam constituere, sed ei aduenire, eamque extra causas ponere, quod est prædicatum accidentale, quidditatem supponens, non constituens: ergo neque potest constituere formam principiumque agendi; sed ille dicitur effectus per se, & in quarto modo alicuius agentis, qui correspondet formaliter, & adequatur formæ, quæ est principium operandi, quia inde sumitur formalis ratio efficiendi conducentis, & coaptans processionem effectus ipsi causæ, ergo repugnat quoddam esse seu existentia sit effectus per se primò, & in 4. modo alicuius agentis creati, quia implicat quoddam aliquod agens creatum habeat existentiam pro forma, seu principio formali agendi, sed solum pro conditione. Rursus in creatione formalis ratio agendi est ipsum esse, quia creatio non respicit hanc vel illam quidditatem, tale vel tale ens, in quantum tale, pro ratione formali, sed totum ens, atque adeò habet formalem rationem comprehendentem omne ens, & hoc solum est esse: ergo formalis ratio quam respicit creans primò, & per se, est esse, non sicut in generationibus, in quibus respicitur esse vt consecutum, & alligatum alicui formæ, & in vi formæ quæ produci-
tur, in creatione autem respicitur primò, & per

Ioan. à. S. Thom. in 1. part. D. Th. Tomus alter.

se ipsum esse, forma autem, & species rei, vt quid
contentum, & subiectū ipsi esse. Ergo oportet quod
forma seu principium formale agendi in principio
creante sit esse, seu existentia: hæc autem in nulla re
creata potest esse forma, & principium agendi, nisi
tantum conditio, quia in re creata supponit naturā
constitutam, solum autem in Deo est essentialis, &
intrinsicā forma: ergo solus Deus creat, quia solus
producit esse vt 1. & per se, & in 4. modo productū.

Denique accumulari potest pro hac parte alia repugnancia, quia actio creatiua non potest esse accidens, sed substantia, in nullo autem creato potest operatio esse substantia, sed accidens: nulla ergo creatura potest creare. Minor patet, quia nulla creatura est actus purus, sed operatio comparatur ad ipsam, ut actus secundus ad actum primum, & ut actus procedens ab ipso agente: ergo non constituit eius substantiam, sed accedit illi, quia procedit ab eo: ergo supponit illud. Et sic agens creatum quandoque est in potentia, quandoque in actu, quod est signum non esse eius substantiam. Maior probatur, quia operatio creatiua non recipitur in aliquo subiecto extra se cum ex nihilo producat; neque in ipso agente, quia hoc ipso quod subiectaretur in ipso tanquam accidens, educeretur ex ipso per mutationem eius, & sic creatio in se esset quaedam mutatio agentis seu creatantis. Actio autem quae est mutatio in agente, multo magis erit mutatio in ipso termino producto, quia ex vi suae processionis, & originis procedit ut mutatio, etiam ut est in agente, & procedit de potentia ad actum: ergo etiam in suo termino procedente ab ipsa se habebit ut mutatio, & ut respiciens potentialitatem quam reducat in actum, quia non potest in termino operari, nisi iuxta modum quem habet ex vi sui principij à quo procedit, procedit autem ut mutatio agentis: ergo ut mutatio termini producti, quia terminus sic procedit sicut actio, siquidem actio identificatur cum termino: si ergo actio procedit ut mutatio: ergo terminatur ut mutatio, & sicut recepta in illo termino: ergo non ut ex nihilo. Sed de hac ratione statim amplius agemus tractando an possit dari instrumentum creationis.

Ad rationes dubitandi *sup.* positas Resp. quòd vir-
tus creatiua non solum si exerceatur respectu omnis
collectionis creaturarum, sed etiam in quocumque
effectu, & in quacumque creatura determinata petit
vim infinitam, & sufficientem ad totam creaturarum
collectionem ex vi modi producendi: quia hoc ipso
quod producit ex nihilo totum ens, & influit esse
totaliter in effectum aequè facillè potest quodcumq;
ens producere, & tanta difficultas est in producendo
ex nihilo minimum ens. ac magnum, vt satis pon-
deratum est. Et cum dicitur quòd non est distantia
infinita inter nihilum, & ens finitum. Respondeo quòd
non est infinita distantia ratione rei factæ, seu ter-
mini in quem definit distantia, sed ratione termini
à quo, quia non est reperire aliquid vnde illa distan-
tia incipiat; & sic nunquam incipit distantia, & si
nunquam incipit est infinita à parte termini à quo,
quia non habet terminum ex hac parte. Nam infini-
tas potest aliquando esse à parte antè, aliquando à
parte pòst, sicut si mundus esset ab aeterno, haberet
infininitatem à parte antè, & Angelus, vel anima nunc
producta habent infinitatem à parte pòst. Deus autè
habet infinitatem simpliciter, & ex omni parte. Vn-
de inter nihilum, & Deum est infinitas ex parte ip-
sius rei, seu extremi ad quem est distantia, & hæc in-
finitas est talis simpliciter. Et in hoc sensu dixit D.
Th. in 4. dist. 5. q. 1. art. 3. ad 5. in secunda responsione
argumenti, quòd inter ens, & non ens non est distantia
infinita ex parte ipsius entis, nisi ens sit infinitum: sed
verum est quod dicta distantia est quodammodo infi-

५७

mita

nita ex parte non entis simpliciter, eo quod neque determinatam distantiam ab aliquo ente signato transcendit, quia nihil potest magis distare ab ente, quam non ens. Ita D. Thom. in 2. solutione, licet in prima, sequens sententiam Magistri, videatur dicere quod non est distantia infinita inter ens, & non ens. Quare inter nihil, & rem creatam solum est infinita distantia ex parte termini à quo, & est distantia negatiua, quia non est unde incipiat determinata distantia, & sic nunquam incipit distare, & hoc sufficit ut finita distantia non sit, sed infinita, quia non est initium distantiae, ubi nihil est, à quo incipiat.

Ad Confirm. Respond. ex dictis, quod potius non est intelligibile quod sit maioris virtutis creatio Angeli, quam vnius formicæ, vel totius vniuersi, quam vnius entis particularis, quia creatio per se directe non respicit determinatam speciem rei quam creat, nec supponit aliquod subiectum, seu materiam, aut dispositionem ratione cuius determinetur ad hanc speciem potius quam illam, sed ex vi modi operandi respicit totum ens in effectu quem producit, quia de illo nihil supponit, & ex nihilo facit: ergo totum facit, in illo autem ente sunt quædam prædicata generica, & superiora, quædam specifica, & individualia; si ergo per se omnia respicit, implicat quod sit solum productiuum tale agens alicuius speciei determinatæ per se, & sumendo ex illa specie rationem formalem agendi, quia ipsa productio hoc ipso quod per se operatur rationes superiores, & magis vniuersales, non potest per se primò specificari, & determinari à ratione particulari, & specifica; & sic non debet esse productiuum solum illius, hoc ipso quod altiore rationem per se primò attingit, & sub illa procedit, & operatur. Non enim vniuersalis ratio, & superius prædicatum debet produci in abstracto, & in vniuersali, sed tamè dicitur vniuersalior ratio attingi in effectu, quando sub vniuersaliori ratione effectus attingitur: Si ergo potentia creatiua per se primò operatur totum, & nihil supponit, repugnat per se solum esse virtutem ad determinatam aliquam speciem producendam; & sic eadem virtus, quæ creat magis, creat minus, & tam facile est creare formicam, quam Angelum, hoc ipso quod ex nullo præsupposito fit, quia maius, & minus in entibus sumitur ex eorum differentiis specificis, vel genericis, & hæc materialiter se habent in creatione, non ut formalis ratio.

13 Dices: illa potentia creatiua erit productiuum totius entis, & omnium prædicatorum, quæ in tali specie continentur, non extra illam. Vnde licet producat vniuersaliores rationes, seu gradus, & quidquid in tali specie continetur, non sequitur quod alias species producere possit; sicut etiam virtus factiua tritici è terra, non solum producit speciem tritici, sed etiam gradum viuientis per se loquendo, non tamen omnia quæ sub viuente continentur, poterit producere. Sic ergo cur implicabit communicari à Deo potentiam creatiuam inadæquatè, id est, non totius entis in tota sua latitudine, sed totius entis, & omnium graduum, & prædicatorum pertinentium ad aliquam speciem rei, ita quod nihil de ea supponat, sed totum faciat, atque adeò ex nihilo? Vnde non sequitur infinitam potentiam requiri ad creandum aliquem effectum, quia non sequitur quod ista potentia creatiua sit omnis collectionis entium productiuum.

Respond. repugnare, quod potentia aliqua sit factiua totius entis, seu omnium prædicatorum eius per se primò, & non sit factiua aliarum specierum, sed solum illius quam determinatè operatur. Dupliciter enim potest aliquod agens producere gradum superiorem, seu rationem commu-

nem. Primò quatenus alligatum, & inclusum in aliqua ratione, seu forma specifica, & quia à forma eadem proueniunt omnes gradus, tam generici, quam specifici, quodlibet agens producat formam, producit omnes gradus in tali forma inclusos, seu ab ea prouenientes, & comunicatos materiæ, seu composito. Et hæc quidem productio gradus superioris, per se illum attingit, sed non per se primò, & ut rationem formalem in quarto modo, sed ut inclusum, & alligatum formæ, & gradui specifico, ad cuius attingentiam attingitur superior gradus. Alio modo potest attingi gradus superior, non ratione alterius cui adiungitur, sed per se immediatè, & primò, quia vis agentis, & operationis tanta est, & tam vniuersalis, ut etiam ipsam entitatem ut potentialem, & indifferentem ad plura non supponat, sed producat, & faciat: tunc enim impossibile est quod illa actio primò attingat, & immediatè per se specificam rationem, & differentiam vltimam, quia cum ad eam nihil præsupponat, etiam per modum potentialitatis, sed totum ex nihilo faciat, necesse est quod antequam attingat differentiam specificam, præcedat attingentia superioris gradus, & entitatis, etiam ut potentialis est, & indifferens ad plura, siquidem ista potentialitas non supponitur, sed efficitur, cum totum ex nihilo fiat tam potentiale, quam actuale. Cuius signum euidentius est, quia qui per creationem produceret leonem, deberet producere materiam leonis, & non solum formam. Si autem producit materiam leonis, producit in illa potentiam ad omnes formas, quia illa materia quæ est in leone, cum sit materia prima, est capax omnium formarum: ergo illa actio creatiua, etiam ut creatiua leonis, debet esse productiuum capacitatis ad omnes formas: ergo non potest per se primò esse productiuum gradus specifici aut gradus superioris, quatenus specifico alligati, & ad formam consecuti, sed prius, & antè, debet esse productiuum ipsius potentiæ, & capacitatis omnium formarum, quæ est materia, quia prius attingitur in creatione id quod est prope nihil, nempe materia, quam id quod est in actu, nempe forma, cum creatio procedat ex nihilo. Ex hoc autem quod manifestum est in creatione rei materialis quod per creationem debet attingi materia, eleuamus discursum ad inferendum, quod in quocumque ente quod creatur, oportet quod fiat gradus, & ratio ipsa generica, etiam quantum ad id quod potentialitatis habet genus, ita quod fiat per se primò, quia nihil talis potentialitatis supponitur in actione creatiua, & sicut fit materia prima in creatione rei materialis, ita & potentia metaphysica quæ est genus, correspondetque materiæ.

Ex hoc autem vltèrius fit, quod si actio creatiua 14 non per se primò attingit formam, vel gradum specificum, sed materiam, vel gradum genericum quatenus potentialis est, & indifferens ad plura, siquidem quantum ad hanc potentialitatem etiam non supponitur, sed fit; necesse est quod talis actio creatiua vim habeat super omnes formas in tali materia contentas, & super omnes differentias específicas in tali genere radicas, & non solum producat gradus genericos, & superiores, quatenus in aliqua specie inclusos.

Ratio est, quia actio producat aliquam potentiam ad plura se habentem, & indifferentem, quatenus talis, non debet coartari, & determinari, nec incipere actionem suam à forma aliqua determinata, ad quam dicit illa potentia indifferentiam, cum ex attingentia talis formæ non adæquet indifferentiam, & capacitatem totius potentiæ.

Debet

Debet ergo operari, non ut alligata, & determinata ad aliquam formam talis potentia, sed ut indifferens ad omnes. Ergo si producendo talem potentiam, & capacitatem potest aliquam formam attingere ex illis ad quas est capax, & indifferens, poterit attingere omnes, quia non est maior ratio, neque maior distantia ad unam, quam ad aliam, si quidem procedit ex vniuersalitate, & indifferentia super omnes, non ex determinatione ad unam. Et notanter dico *si potest attingere aliquam formam ex contentis in tali potentia*, quia quando agens producit aliquam potentiam, sed nullam ex formis, seu obiectis circa quae potest, producit, non tenet discursus factus, sicut qui producit oculum potentem videre omnes colores, non sequitur quod possit omnes colores producere, quia ad generantem non non pertinet producere illam potentiam visiuam, nisi ut tenet se ex parte subiecti generati, cuius potentia est, & proprietas, non quatenus ab obiecto, quod est illi extrinsecum, perficitur; & ideo non producit tale generans aliquam formam, seu obiectum, quia extrinsecum illi est. Caterum si aliquod agens producendo potentiam indifferentem attingit aliquam formam illius (ut reuera attingit creatio) oportet quod in vi talis actionis possit omnes attingere, quia si virtus productiua illius materiae, vel potentiae, tanta est, ut possit totam illam capacitatem, & indifferentiam potentiae producere, & etiam actualitatem formae in illa contentae, utrumque attingit ex vi suae virtutis, & actiuitatis ita indifferentis, & vniuersalis, quod nulli formae determinatae alligatur: ergo qua ratione facit unam, poterit facere omnes, quia virtus vniuersalis est, cum indifferens sit ad omnes, id est, nulli alligata determinate, & tamen potens actualitatem ipsam formae producere.

15 Ad argumentum ergo ex dictis, Resp. quod non stat potentiam creatiuam procedentem ex nihilo in sua productione producere vniuersaliores rationes, solum prout inueniuntur, & coarctantur ad aliquam determinatam speciem ob rationem iam dictam. Nec est simile de generante formam, & in ea tangente gradus tam específicos, quam genericos, quia, ut diximus, gradus superiores non attinguntur per se primo ab agente particulari, & secundum potentialitatem, & indifferentiam superioris gradus ad plura, sed quatenus superior gradus alligatus est, & inclusus in specifico, & inferiori, ad quem per se primo respicit agens particulare. Et quod sit necessarium ad actionem creatiuam attingere per se primo superiorem gradum ut potentialiter se habet ad plura, iam ostensum est. Itaque in gradu superiori possumus considerare, & id quod actualis rationis est, licet imperfectae, & haec alligatur inferiori, ut contrahenti, & perficienti, quia gradus superior imperfectior est, & contrahibilis ab inferiori, qui perfectior est utpote determinans illum; & possumus considerare amplitudinem illius gradus, seu capacitatem (licet potentialem) ad plura, sicut materia prima, & habet entitatem imperfectam respectu formae a qua determinatur, & actuatur, & similiter habet capacitatem, & extensionem ad plures formas. Gradus ergo genericus, & superior, quantum ad id quod actualitatis habet, & entitatis in se, simul producit ad producentem formam, nec requiritur ad hoc creatio, sed generatio, quia ad hoc sufficit producere formam ad quam tales gradus sequuntur prout tales, id est, prout magis, vel minus perfecti. Et sic generans triticum non solum producit speciem, & formam tritici, sed etiam gradum viuientis, videlicet prout sequitur ad formam, & in ea includitur: sic enim faciens formam, efficit gradus

Ioan. à S. Thom. in 1. part. D. Th. Tomus alter.

qui illam comitantur, & sequuntur. At vero gradus superior primo modo consideratus non per se primo attingitur ab actione generantis, nec a producente formam, quia istam extensionem, & potentialitatem non habet a forma, sed praesupponitur ad formam, sed agens quod potest producere materiam ex nihilo, potest potentiam capacitatis eius attingere, & similiter generis latitudinem, & consequenter ad omnes formas se extendere, quia non operatur aliquam ex determinatione, & constrictione rationis suae formalis ad illam, sed ex vniuersalitate quam habet super capacitatem ad omnes, ut ostendimus. Quod si vniuersalitas causae creatis est talis quod ex nihilo operatur totum ens, tam potentiale, quam actuale (cum generatio est conuerso supponat potentiale, & ex illo educat actuale, tam quoad gradus imperfectos, quam perfectos, tam superiores, quam inferiores) necesse est quod incipiat a potentialiori, & vniuersaliori, scilicet ab ente, ut ens est, quia totum facit in gradibus, etiam quoad potentialitatem, & vniuersalitatem, quia nihil supponit; & consequenter talis virtus creatiua si potest in omnes formas ad quas potentialitas, & capacitas rationis genericae se extendit, si ipsum gradum entis cum sua potentialitate facit, ad omnes actualitates, & formas, & species entis se extendit, & hoc est esse infinitam potentiam, quae omnem entis collectionem respicit. Generans autem, licet faciat istos gradus, & procedendo ab imperfecto ad perfectum, possit prius attingere gradum imperfectionem, qui est superior, quam perfectiorem, qui est inferior, & specificus; tamen quia hos omnes attingit, ut in forma identificatos, & consequenter est materia eductos, non ipsam amplitudinem potentialitatis, & capacitatis per se primo attingendo, inde est quod non incipit a gradibus superioribus vniuersalitate operationis, & virtutis, sed imperfectione, & potentialitate educationis.

16 Quod si adhuc dicas, quia si potentia creatiua attingit per se primo illum gradum vniuersalissimum entis, ut ens est: ergo debet attingere Deum. Pater consequentia, quia Deus continetur sub hoc praedicato, & gradu vniuersalissimo: ergo si illa regula tenet, quod attingens capacitatem vniuersalem alicuius praedicati, & gradus, attingit quidquid sub illo continetur: ergo cum Deus contineatur sub ente, attinget Deum. Quod si dicatur quod creatio solum attingit gradum vniuersalissimum entis creati, non gradum abstrahentem a creato, & increato, sed quatenus ens includitur in ente creabili. Contra est, quia hoc modo infringitur ratio D. Thom. quia eadem ratione poterit quis dicere, quod potentia creandi communicata creaturae non attingit ens creabile in tota sua vniuersalitate, sed ut includitur in tali ente creato, ad quod, & non ad aliud se extendit ista potentia: quae enim in hoc est implicatio: cum ex ratione creationis praecise non arguatur, quod necesse sit tangere vniuersalem rationem entis in tota sua transcendentia.

Et denique confirm. quia licet bene probetur inter potentiam eductiuam ex subiecto, & productiuam ex nihilo nullam dari proportionem, & in hoc sensu distare in infinitum, tamen inde non infertur infinitas simpliciter in potentia, quae sola repugnat creaturae, sed infinitas secundum quid, id est, quod sit potentia alterius ordinis; & semper res alterius ordinis improporionate, & infinite excedunt rem inferioris ordinis, & aequivalent infinitis operationibus eius, non tamen petunt infinitatem simpliciter,

G g 2 sicut

sicut Angelus excedit omnem vim corpoream, non tamen est infinitus, & gratia infinitas res naturales.

Resp. ad principale argumentum negando sequelam, ut in solutione assignata negatur.

Ad probat. dicitur, creationem debere attingere ens, ut ens, seu totum ens loquendo in terminis propriis, & habilibus, id est, ens sibi non repugnans, & consequenter creabile. Vnde non dicimus quod attingit gradum entis communissimum, ut etiam communem enti increato, sed quod incipit sua formalis ratio, & per se primò ab ente creabili, quia in illa altiori abstractione, ut abstrahit à creato, & increato non potest inuenire rationem sibi competentem, sed repugnantem: vnde non respicit ens in tali abstractione, sed ens creabile in tota sua latitudine. Et instantia contra hoc non valet, quia ens creabile ut contractum, seu ut determinatum, iam supponit aliquam rationem entis superiorem creabilem, seu habilem attingi à potentia creatiua, quam tamen actio illa non faceret, & sic non faceret totum ens quod posset fieri, sed aliquid supponeret non factum à se, atque adeò non ex nihilo procederet, nec totam potentialitatem, & actualitatem factibilem attingeret. Quod autem gradum abstrahentem à creato, & increato non attingat, mirum non est, quia illud factibile non est: non debet autem creatio attingere nisi creabile.

Ad Confirm. Respond. quod rationes factæ non solum probant excessum, & improprietatem actionis creatiue ad eductiuam, ad quem excessum vincendum sufficeret infinitas secundum quid, & quod illa actio esset alterius ordinis. Ceterum creatio non solum exigit quod sit alterius ordinis, sed etiam quod extendatur ad omne contentum sub ratione entis creabilis, & quod sit potentia à nullo dependens in agendo, ita ut per solam eius suspensionem res decidat in nihilum, quod petit infinitatem simpliciter, ut dictum est.

Ex quibus manent explicatæ implicationes, quas affert D. Thom. ad hoc ut non sit communicabilis alicui creaturæ potentia creandi, neque adæquatè, & totaliter, id est, ad omne ens creabile, neque inadæquatè, & partialiter, id est, ad producendam creatiue aliquam rem determinatam, & non aliam, cum in hoc partibilis non sit potentia creatiua, sed si datur pro indiuiso, respicit totum ens, & vniuersalissimum influxum postulat, sine hoc quod dependeat ab aliqua alia causa res sic producta, cum ex sola eius influxus suspensione res annihilatur. Et omnes instantiæ quæ contra has rationes adducuntur à P. Suarez *disp. illa 20. Metaphysicæ*, solutæ sunt.

Implicat dari instrumentum creationis physicum.

Licet D. Thom. cum Magistro in 4. *dist. 5. & locis supra in initio articuli citatis*, senserit non esse impossibile causam instrumentalem creationis, tamen in *presenti quæst. 45. art. 5. & 2. contra Gentil. c. 21. & q. 3. de potent. a. 4.* oppositum apertè docet; & idèò implicationem eius oportet examinare.

Tota autem implicatio reducitur ad hanc rationem. Illa dicitur causa instrumentalis, quæ dispositiue operatur ad effectum participialis agentis: ita quod secundum quod operatur instrumentum, eleuatur talis operatio ad causandum effectum principalis agentis: Sed effectus proprius Dei creantis est id quod præsupponitur omnibus aliis, scilicet ipsum esse tam potentiale, quam

actuale, ante quod nihil est quod possit disponi per operationem causæ instrumentalis, cum creatio operetur ex nihilo: ergo non potest in creatione interuenire causalitas causæ instrumentalis. Et addit D. Thom. hoc à fortiori procedere, si id quod assumitur ut instrumentum, sit corpus, quia propria operatio corporis non est nisi tangendo, & mouendo; & sic requirit in sua actione aliquid præexistens, quod possit tangi, & moueri, & hoc est contra rationem creationis. In summa, contradictio seu implicatio stat in hoc, quod creatio essentialiter est actio ex nihilo, & causalitas instrumentalis essentialiter est ex aliquo, seu in aliquo, cum sit actio præsupposita ad effectum principalis agentis, & dispositiue se habens ad illud.

In hac ratione D. Tho. illa difficultas occurrit, 18 eamque Suarez expendit *cit. loco Metaph. sect. 4.* quia rectè concludit de instrumentis naturalibus, & quæ natura sua habent virtutes ordinatas ad aliquem effectum, non de supernaturalibus, in quibus tantum supponitur obedientialis potentia ad hoc ut eleuentur ad effectus improprietatis, & superiores. Instrumenta naturalia, seu quæ ex ipsa natura ordinantur ad effectum principalis agentis sunt sicut semen, aut virtus ab agente diffusa, mediante qua suum operatur effectum. Supernaturalia autem instrumenta sunt quæ ex natura sua ordinem non habent ad aliquem effectum principalis agentis, habent tamen obedientialem potentiam ut ad illum eleuentur. Ratio ergo D. Tho. solum videtur concludere de instrumentis prioris generis, non de secundis. Nam hoc quod est dispositiue operari ad effectum principalis agentis, est proprium instrumenti naturalis, quia operatione sua vel determinat actionem principalis agentis, vel eam iuuat, & disponit ad eius effectum inducendum. Et de his loqui D. Thomam, deducitur ex probatione subiuncta, scil. quia si nihil ageret instrumentum, secundum id quod est sibi proprium, frustra adhiberetur ad agendum, nec oporteret esse determinata instrumenta determinatarum actionum. Quæ ratio solum habet locum in instrumentis naturæ, quæ requiruntur determinata esse ad determinatos effectus: in instrumentis autem supernaturalibus nihil tale determinatum requiritur, sed sufficit obedientialis potentia, qua eleuari potest ad quoscumque effectus, ad quos nullam determinationem, neque dispositiuam operationem habet talis causa: ergo in his non tenet ratio facta.

Secundò vrgetur contra hanc rationem D. Tho. 19 quia in eius doctrina negari non potest quod in instrumentis supernaturalibus, & eleuatis à Deo non requiritur aliqua actio præuia circa subiectum, in quo ponitur effectus principalis agentis, nec quod illud tangant, aut in illo sint, imò neque quod operentur ex subiecto: ergo respectu instrumenti obedientialis, & eleuabilis à Deo ratio facta non currit, sed solum respectu instrumenti connaturalis, de quo rectè probatur non dari, quia nulla creatura connaturalem vim habet ad concurrendum, & influendum instrumentaliter in creationem.

Consequentia patet, quia si non requiritur quod instrumentum operetur in illo subiecto ubi fit effectus, sed quod existens in alio, vel operando circa aliud, producat effectum ubi non est: ergo similiter poterit producere ubi nihil est, & ubi nihil præsupponit de eo quod operari debet; quia si idèò non potest dispositiue operari ad creationem, quia id quod per creationem fit præsupponitur, & antecedit omnes alios effectus, quia

quia est ipsum esse : ergo si non est necesse quod dispositiue operetur circa ipsam rem faciendam, sed sufficit quod disponat, seu operetur circa aliud, nihil obstat quod effectus creationis sit prior aliis, & nihil præsupponat, cum non sit necesse instrumentum aliquid in eo operari. Anteced. autem constat: nam Sacramenta operantur gratiam in anima, in qua nullam habent actionem propriam dispositiue, & præuiam, sed tangendo corpus, animam lauant, & ignis inferni nullam præuiam actionem habet in spiritum, quem torquet; & tamen agit in illum ut instrumentum diuinæ iustitiæ. Item in sententia S. Thom. 2. 2. qu. 178. art. 1. ad 1. potest Deus assumere pro instrumento actum immanentem ut cogitationem, vel visionem, & tamen constat quod isti actus nihil ponunt in subiecto ad extra, circa quod operantur. Item quia transubstantiatio est actio operans ex non subiecto, ut docet S. Thom. 3. p. qu. 75. art. 8. & tamen datur instrumentum ad illam, non quidem instrumentum connaturale, quia virtus ad transubstantiandum nulli creaturæ connaturalis est, sed supernaturale, cui communicabilis est ista virtus.

20 Nec dici potest quod creatio differt ab istis, quia producit ens, in quantum ens; & sic nihil de ente supponit, instrumentalis autem actio aliquid ens supponit, scilicet ipsum instrumentum in quo recipitur. Et si est virtus, seu actio recepta, hoc ipso non potest operari ex nihilo, quia est accidens; & sic operatur ut in subiecto existens: ergo ut ex subiecto, quia iuxta suam naturam facit.

Sed contra est, quia ad rationem creationis sufficit quod producat totum ens, quod pertinet ad ipsam rem productam, non quod est extra illam, sicut cum Deus modò creat animam, non supponit aliquid illius animæ, bene tamen alia entia supponit, quæ non sunt anima illa: ergo etiam supponere potest instrumentum per quod operetur talem animam, sine præiudicio producendi totum ens, quod ad talem animam spectat. Quod verò operatio illa sit accidens, & requirat subiectum, solum ostendit debere dari subiectum in quo inhaereat talis actio, nempe ipsum instrumentum à quo egreditur, vel terminus cum quo passiuè indentificatur; non verò quod debeat dari subiectum ex quo educat formam, sed poterit ex nihilo producere terminum: nec enim ostenditur quod sit actio, ut accidens petat subiectum in quo sit, petat etiam subiectum ex quo operetur.

21 Accumulantur denique aliæ instantiæ quas Vasquez vrget hic disp. 176. c. 2. Primò quia intellectus sine habitu luminis gloriæ cum solo auxilio diuino potest videre Deum in sententia D. Thom. & tunc comparatur ad Deum, tanquam instrumentum, nec tamen habet operationem præuiam, sed vnicam, scilicet ipsam visionem. Item phantasma in sententia eiusdem D. Thom. est instrumentum intellectus agentis ad producendum speciem in intellectu possibili, & tamen nullam operationem præuiam habet circa ipsum intellectum. Similiter si sacramenta sunt instrumenta physica gratiæ, nullam actionem habent conducentem ad gratiæ productionem, idem est autem non habere operationem conducentem, ac nullam operationem habere, & sicut Deus per aquam abluentem producit gratiam, ita posset per aquam imnotam, & non abluentem. Addit Molina quod in effectibus artis, ut in serra, vel securi, tota actio tribuitur agenti principali, à quo instrumentum mouetur, non autem securis aliquid secundum se agit, sed ut impulsæ ab artifice, & in igne calefaciente per aërem, totus effectus attribuitur igni, nihil verò aër ex propriis

Ioan. à S. Thom. in 1. part. D. Th. Tomus alter.

operatur ad talem effectum: ergo non requiritur actio aliqua præuiam ad hoc ut instrumentum operetur dispositiue ad effectum principalis agentis.

Quare in assignanda instrumentali causalitate differunt Scotus cum Vasquez cit. loco c. 6. Thomistæ, & Suarez, alique recentiores in hoc, quod Scotus putat non dari instrumenta physica, nisi quæ virtute sua natina disponunt aliquo modo ad effectum principalis agentis; & ita solum admittit instrumenta naturæ, & artis, negat verò dari instrumenta physica gratiæ, quia nullum datur instrumentum quod operetur aliquid conducent, & disponens ad ipsam gratiam, quod ex Scoto in 4. dist. 5. §. Ad primam questionem, & dist. 6. qu. 5. §. Circa tertium principale, affert Vasquez. Thomistæ verò dicunt requiri ad instrumentum quod operetur aliquid, ita tamen quod instrumentis naturalibus, seu determinatis à natura requiritur, quod operetur aliquid conducent, & disponens de se ad effectum naturæ; in instrumentis verò eleuatis à Deo, sufficit quod operetur aliquid quodcumque illud sit. Et in hoc aliqui dicunt necesse esse quod instrumentum producat, seu operetur aliquid distinctum ab effectum causæ principalis, alij verò non, sed sufficere quod eundem terminum producat, licet modo sibi particulari, ut retulimus in Physica qu. 26. art. 2. At verò P. Suarez intelligit ad rationem instrumenti eleuabilis à Deo sufficere entitatem rei, sine vlla operatione propria, & præuiam, sed secundum potentiam obedientem, qua eleuabilis est à Deo ad operandum effectum aliquem supernaturalem.

Nihilominus ratio quam adducit D. Thom. ad 21 probandam implicationem instrumenti creationis efficax est. Ad cuius explicationem est aduertendum, quod instrumentum physicum dupliciter potest se habere in ordine ad effectum principalis agentis. Vno modo quia conducit ad talem effectum, & principale agens indiget illo ad effectus suos producendos, sicut artifex ad faciendum scamnum, vel cathedram, indiget scindente. Alio modo, quia communicat in operando cum principali agente, licet principale agens eo non indigeat, tamen suam virtutem aut potestatem ei communicat, ut operetur per illum, sicut Princeps loquitur per interpretem, aut scribit per alium, etiam si possit vtrumque facere per se; in creatis tamen causis non potest inueniri exemplum quod adæquate quadret modo operandi causarum instrumentarium respectu Dei eleuantis, & vrentis illis, eo quod Deus nihil supponit in causis quod non det; atque adeò quidquid causæ instrumentales faciunt ex pura communicatione Dei faciunt, non ex eo quod aliquid ei conferant. Sed tamen quia Deus hoc communicat instrumentis, si physica instrumenta sunt, ut ex ipsis oriatur, & egrediatur physice effectus (si enim moralia instrumenta sunt, non ex ipsis procedit effectus, sed ad præsentiam eorum ex voluntate, aut pacto Dei, vel statuto ipsius sit effectus physice à solo Deo) oportet quod virtus, seu motio communicata à Deo ipsi instrumento contemperetur, & constringatur ad modum ipsius instrumenti, quod cum creatum sit, non est capax virtutis motionis Dei, nisi modo limitato, & proprio ipsius instrumenti. Et rursum si instrumentum debet ministrare causæ principali, & eius actionem, seu motionem deferre, & applicare effectui agendo in hoc ultra proprias vires, oportet quod non solum virtutem accipiat à principali agente, & ex illa præcisè agat propria entitate mere passiuè se habente, ita quod solum eleuetur ad

Gg 3 patien

patiendum, & recipiendum virtutem superiorem, sed oportet quod etiam aliquid ex propriis agat, & illa actio eleuetur ad maiorem, & excellentiorem effectum, quia aliàs non se habebit ministerialiter in ordine ad talem effectum, sed præcisè tale instrumentum emittet effectum, seu pariet illum virtute illi communicata à superiori agente, non autem illi ministerialiter deferuiet, si ex se nullam actionem habet in qua ei ministret: aliàs enim vix intelligi potest quomodo sufficiat ad rationem instrumenti, quod de se ministerium importat: hoc autem quod est præcisè emittere effectum per virtutem communicatam ab alio agente, etiam inuenitur in agentibus non instrumentalis, sicut Luna emittit lucem, non tanquam instrumentum, sed ut luminosum, & ut principale agens, quia illi lux emissa assimilatur, & tamen non illuminat ex propriis, sed luce recepta à Sole, & ferrum calefacit per calorem receptum ab igne, nec tamen se habet ut instrumentum in calefaciendo, quia sibi ut calido assimilatur effectus ille caloris; ut latius tradidimus in *Physica* q. 26. art. 2.

Igitur tota vis rationis D. Thom. ad hoc reducitur quod instrumentum physicum debet esse agens inferius ad agens principale, & operari modo inferiori ad illud, & tamen effectus principalis agentis debet physicè nasci, & procedere à tali instrumento, utpote vltimatè, & proximè attingente effectum. Quæ duæ propositiones sunt per se euidenter. Prima ex natura ipsa instrumenti: nam instrumentum de se, & ex proprio conceptu semper est aliquid minus suo principali, cum operetur ut motum ab illo, & subordinatum illi, non quomodo cumque, sed ut ministrans, & deferuiens illi, aliàs si inferiori modo non operaretur, vel esset æquale suo principali, vel saltem ut causa principalis se haberet, si non æquè primò, tamen ut causa secunda, quæ etiam operatur ex subordinatione ad primam, sed non ut præcisè mota, & ministerialiter operans, sed ut assimilans sibi effectum, non verò soli causæ principali, sicut contingit in instrumento, cui effectus non assimilatur, sed principali. Secunda verò ex ratione ipsa instrumenti physici notissima est, quia si ab eo non procedit physicè effectus, sed solum à causa principali: ergo instrumentum illud solum se habebit tanquam id ad cuius præsentiam effectus procedit physicè à sola causa principali: ergo tale instrumentum physicè non conducit ad egressionem effectus, nisi fortè antecederet disponat physicè subiectum, ut effectus fiat à causa principali, quod in præsentia locum non habet, cum in creatione non possit præintelligi aliquod subiectum, quod disponatur ad faciendum effectum creationis, aliàs diceretur semen se habere ut instrumentum creationis animæ humanæ, quia disponit corpus, ad cuius dispositionem Deus illam creat. Nec differret instrumentum physicum à morali, quia influentia moralis in hoc consistit quod effectus non oriatur physicè ab ipso instrumento, sed ad eius præsentiam, vel orationem oriatur effectus à causa principali. Physicum ergo instrumentum tale esse debet quod ab ipso physicè procedat effectus causæ principalis, sicut à securi fit scamnum, licet virtute communicata à causa principali.

24 Ex his duabus propositionibus, quæ debent supponi tanquam euidenter, & explicantes requisita ad rationem causæ instrumentalis physica, inferitur per bonam consequentiam quod si aliquis effectus qui creatur, procedit ab aliquo instrumento, necesse est quod procedat ab instrumento modo inferiori, quàm à causa principali, modus autè in-

ferior est, quia ista modo creato, & limitato agit, (si enim inferior est ad Deum, modus creatus esse debet) Deus autem modo increato, & illimitato, & vniuersalissimo. Vnde virtus, seu influxus, aut motio Dei impressa instrumento, oportet quod contemperet se, & constringatur ad modum ipsius causæ secundæ instrumentalis: nam si manet illa virtus in tota illa amplitudine, & vniuersalitate, qua procedit à causa prima, non procedet ipse effectus inferiori modo à causa instrumentali, quàm à principali, nec virtus illa erit impressa instrumento, quia non erit aliquid extra Deum, si tam vniuersalis, & illimitata manet in suo modo operandi, sicut est in Deo. Si autem non imprimatur aliqua virtus in instrumento, non poterit ab illo physicè procedere, & exire effectus, quia à virtute propria ipsius instrumenti non potest exire effectus superioris ordinis & improporionatus, nec contentus in tali virtute inferiori: ergo oportet quod exeat à virtute maiori communicata instrumento à causa principali, vel non procedat physicè ab illo, quia idem est procedere physicè ab illo, atque procedere à virtute in qua continetur proportionatè, & physicè.

Inferitur secundò quod operatio illa instrumentalis per quam sic procederet physicè res creata, debet esse operatio creata, quæ sit accidens, & indigeat subiecto in quo existat, & ex quo operetur, & per modum mutationis se habeat. Vnde directè, & implicatoriè pugnat cum ratione creationis. Quod debeat esse operatio creata, constat, quia oritur ab instrumento creato, siquidem hoc ipso quod instrumentum illud est physicum, physicè procedit effectus ab ipso: ergo & actio qua vltimatè nascitur, & emanat talis effectus: quod si emanat ab instrumento creato: ergo non est actio increata, sed creata. Quod sit accidens, deducitur ex eodem principio: nam actio creata est causalitas agentis procedens ab ipso tanquam medium, quo effectus ipse producit: hoc autem medium, seu causalitas neque est substantia operantis, cum ab eo procedat, neque substantia operati, cum sit medium quo procedit, & sit, non ipsamet substantia, quæ sit aut prædicatum eius substantiale: sic enim esset ei intrinsecum, & essenziale, non contingenter conueniens, cum tamen esse factum sit prædicatum contingens: nec est aliqua substantia tertia quæ mediet inter substantiam procedentem, & operantem, quia de ratione actionis creatæ est quod emanet ab agente tanquam via, & causalitas, quæ identificatur cum termino procedente: de ratione autem substantiæ est quod sit ens per se existens, aut pars componens in facto esse, & sic non potest esse via, & transitus, sicut est actio, nec componit aliquid cum substantia ipsa operantis, vel cum substantia rei operatæ, quia est quid transiens.

25 Ex hoc autem, quod actio illa creata sit accidens, sequitur manifestè quod indigeat subiecto in quo inhæreat, quia accidens est. Et similiter subiecto ex quo operetur, quia medium operandi, & via est, seu fieri ad ipsum effectum, & sic antecedere ipsum debet, quia omne fieri antecederet se habere ad factum: nec potest antecederet se habere, nisi illud fieri, & illa via, & illud medium in aliqua entitate exerceatur, quæ potentialiter se habeat, & de potentia ad actum transeat respectu ipsius facti. Declaratur hoc, quia hoc ipso quod actio sit accidens non solum tenet se ex parte agentis, ut actus eius secundus, sed etiam ex parte termini facti, ut quodam fieri, & tendentiâ seu viâ ad ipsum terminum; siquidem actio quæ est accidens specificatur à termino sicut procedit à principio, & dependet

det ab utroque, respicitque ipsum terminum tanquam quædam ipsius factio, quæ cum termino identificatur: non enim talis actio est aliud quam terminus, seu res ipsa ut in fieri, nec actio ipsa emanare potest ab agente sine termino per talem actionem procedente, quia ipsa actio emanatio est termini à suo principio, & causalitas mediata qua causa facit terminum. Et licet actio etiam constituat ipsum agens in actu secundo operandi; tamen cum non sit actus independens à termino, sed ad ipsum tendens, ab ipsoque specificatus, nec specificatur ab ipso ut à termino extrinsecus attacto, sicut obiectum actus cognoscendi, vel amandi, sed ut intrinsecè immutato, & facto siue producto aut conuerso per talem actionem, necesse est dari ibi actionem, quæ sit tendentia, & factio termini, cum eoque identificetur, aliàs non erit ipsa actio consummata, neque denominare poterit agentem, nisi cum effectu, seu termino identificetur tanquam factio, & productio eius, quia essentialiter actio, que est accidens, dependet à termino, illumque respicit tanquam id à quo specificatur, & ad quem est via, & tendentia, & causalitas. Rursus, non potest actio ista identificari cum termino, tanquam aliquid consecutum ad terminum, & posterius illo, cum essentialiter sit causalitas, & factio talis effectus, & consequenter sit aliquid prius illo, & respiciat illum ut terminum à se emittendum, & producendum: ergo necessariò postulat subiectum antecedenter ad ipsum terminum faciendum, in quo sit talis actio, prout ex parte ipsius rei factæ se tenet, quia talis actio prout in termino est, & cum illo identificatur accidens est, & sic subiectum postulat: ergo talis res facta aliquid sui præsupponit, in quo subiectetur actio illa, quæ accidens est: ergo non potest esse ex nihilo cum aliquid præsupponat.

26 Dices: totum hoc in sententia opposita reperitur in creatione, quia etiam dicunt quod est actio subiectata, seu identificata cum termino, qui creatur tanquam causalitas, & factio eius, & tamen creat illum ex nihilo: ergo in hac sententia non potest convincere ratio facta quod non sit possibile instrumentum creationis. Et dato quod actio creativa non ponat aliquid in re creata, quod habeat rationem actionis, sed solum actio teneat se ex parte agentis, cur repugnabit quod Deus communicet causæ creatæ instrumentali aliquam rationem actionis longè diuersæ ab ea quam videmus in rebus naturalibus, scilicet actionem, quæ non sit motus, nec ex parte termini se teneat, sed solum ex parte agentis, indeque deriuat ex se terminum per influxum vniuersalem totius esse.

Respond. in sententia opposita si admittitur, actionem ex parte termini se tenentem esse accidens, non posse saluari quod creatio sit ex nihilo, quia, ut ponderauimus art. 2. hoc ipso quod est accidens, non operatur nisi ut subiectata, & consequenter non facit ipsum subiectum in quo est, sed supponit, & sic non facit omnia talis actio; quod si non facit omnia, non est creatio, quia non est ex nihilo. Vnde quantumcumque opposita sententia teneat quod creatio est actio subiectata in termino producto tanquam medium, & via, seu tendentia, & fieri ipsius termini, tamen hoc ipso redditur tã sufficiens implicatio, quàm sufficienter per hoc impugnatur præcedens sententia, quod actio illa si est subiectata in ipso termino tanquam factio illius, & tendentia ad talem terminum, oportet quod præsupponat subiectum in ipso termino in quo sit antequam faciat, & producat id quod debet producere; atque adeò non faciat totum quod in sub-

iecto est, quia nõ facit id quod præsupponit. Quæ consequentiæ sunt ita præcisæ quod quidquid sentiat opposita sententia, tamen implicationem efficacem afferunt ad non ponendum pro creatione actionem quæ accidens sit, & consequenter quod repugnat esse in instrumento, quia in illo non nisi accidens esse potest actio instrumentalis. Sed præterea vrget hæc ratio potius in instrumentali causa, & in quacunque causa creata, ne creatiuam actionem habere possit, quàm in Deo, quia sententia opposita quæ ponit creationem esse tendentiam, & viam tanquam quædam causalitas, & quoddam medium, seu fieri ipsius rei creatæ, dicit hanc actionem esse quoddam accidens in re creata emanans immediatè à summa, & infinita actualitate Dei, & sic producit simul cum ipsa re quæ creatur, hoc accidens, seu hic modus procedendi à Deo ex nihilo, tanquam modus quidam agendi, habens participatiuè infinitatem quandam ex parte modi agendi, quia oritur ex ipsa infinita Dei actualitate, quæ est immediata ratio agendi, & producendi rem sub illo modo. At verò in causa creata, & instrumentali actio identificata cum termino oritur ex virtute, & actualitate causæ, seu actione agentis, quæ accidens est, & inhærens ipsi agenti, ipsumque reducens de potentia ad actum; vnde in ipso agente supponitur habere limitationem, & constrictionem in modo procedendi, quia se habet ut accidens inhærens, & reducens causam de potentia ad actum; vnde influxus secutus ex tali accidente, & identificatus cum termino, non potest esse influxus totius esse, & entis in quantum ens, sed limitatus, & constrictus, sicut ipsum accidens, & ipsa virtus, & actus secundus agentis à quo emanat, nec potest ille influxus etiam participatiuè habere aliquid infinitatis, cum emanet immediatè à principio limitato, & finito, scilicet à virtute illa, & actu secundo, quæ aliquid accidentale sunt.

Vnde soluitur secunda replica, & simul confrimatur nostra ratio, quia videlicet est impossibile aliud genus actionis fingere, quæ sit accidens, & solum teneat se per modum actus secundi ex parte agentis, & non teneat se ex parte termini producti tanquam actio, seu factio identificata cum illo: nam hoc ipso quod accidens est talis actus secundus ex parte agentis se tenens, debet esse dependens non solum à subiecto agente, sed etiam à termino producto, à quo specificatur; vnde oportet quod identificetur cum illo, non ut quid consecutum, & posterius termino producto, sed ut factio illius est, & tendentia ad illum, quia prout sic specificatur, dependetque ab illo, quod non currit in actione Dei, quæ est independens ab omni re extra se, & producenda à se, vnde non specificatur à termino, nec se habet ut factio identificata cum illo, sed immediatè ex se producit, & influit totum esse in rem creatam, non influxu creato rem ipsam faciens, quia talis influxus debet supponere subiectum in quo sit, non illud facere, influxus autem creatiuus totum facit, & nihil supponit ex parte termini; vnde non potest talis influxus esse accidens subiectatus in termino, sed substantia ex parte agentis infiniti, quia si est accidens, supponit subiectum, & non facit, ac per hoc non creat ex nihilo faciendo totum ens. Repugnat ergo quod Deus communicet causæ creatæ, etiam instrumentali, vim, seu actionem, quæ sit accidens, & actione accidentali agat, & influat, & ex alia parte quod creet & faciat totum, siquidem hoc ipso quod facit, & influit tanquam accidens, debet influere, ut subiectata, & sic saltem subiectum non debet facere, sed

supponere, cum id quod facit ut subiectata faciat, & ut accidens; si autem supponit subiectum, & non facit illud, non creat.

28 Denique ex hoc sequitur manifestè explicatio rationis D. Thom. & efficacia illius quæ consistit in duabus propositionibus monstrantibus implicationem, scilicet quòd instrumentum operatur dispositiue ad effectum principalis agentis, & secundò, quòd effectus factus à creatione, antecedit omnia, quæ in effectum esse possunt, quia producit ipsum esse absolutè, ut comprehendit esse potètiæ, & actuale, & ita ad hunc effectum nihil potest dispositiue operari. Non dixit D. Thom. quòd instrumentum debet dispositionem aliquam operari ad effectum principalis agentis, nec quòd debet dispositionem aliquam ponere in ipsa re, quæ est effectus principalis agentis. Nihil horum dixit, sed solum quòd instrumentum debet operari dispositiue ad effectum principalis agentis, id est, ministerialiter se habendo, & inferiori modo in agendo quàm se habeat ipsum principale agens; vnde virtus, & influxus principalis agentis debet coarctari, & attemperari ad modum ipsius instrumenti, à quo proximè debet nasci, & exire physicè effectus. Quare sufficit ad propositionem D. Thom. quòd instrumentum in modo operandi dispositiue, & ministerialiter se habeat, non ex parte rei operatæ, quasi diuersam rem producat ab effectum principalis agentis, quæ sit dispositio ad illam, & recipiatur in eadè re vel subiecto in quo sit effectus principalis agentis: hoc enim non dixit D. Thom. nec ad veritatem propositionis eius requiritur, quia loquitur vniuersaliter de omni instrumento siue connaturali, siue obedientiali, & solum supernaturaliter elevato, respectu quorum instrumentorum non requirit D. Thom. quòd producant dispositionem aliquam in eodem subiecto in quo sit effectus principalis agentis, ut patet in operatione instrumentali Sacramentorum, de quibus dicit D. Thom. 3. q. 62. art. 1. ad 2. quòd *Per propriam operationem quam exercent circa corpus quod tangunt, efficiunt operationem instrumentalem virtute diuina circa animam*, & sicut dicit *infr. q. 64. art. 4. ad 3.* quòd ab igne inferni puniuntur Dæmones in isto aère, licet actu non alligentur illi igni: & sicut docet 2. 2. q. 1. 8. art. 1. ad primum, quòd per actum immanentem Deus potest operari miraculum in re ad extra, & tamen visio aut cogitatio nihil operantur ex se quòd disponat rem ad extra ad effectum principalis agentis. Quare in sententia D. Thom. dubitandum non est quòd non requiritur ad instrumentalem causam Dei operantis quòd habeat operationem quæ propriè, & connaturaliter disponat ad effectum principalis agentis; sufficit quòd habeat quamcumque operationem, etiam circa aliud subiectum, & illa diuinitus eleuetur ad faciendam quodcumque opus Deus voluerit, siue in illo subiecto, siue in aliquo distante: sicut enim potest per ignem existentem Compluti calefacere lignum, quod est Romæ, ita potest per eundem ignem, qui est Compluti, facere miraculum Romæ. Et per humanitatem Christi quæ est in cælo, certum est operari omnes effectus gratiæ, etiam qui fiunt in terra, sicut quando erat in terra pendens in ligno fecit miracula in cælo, obscurando Solem.

29 Quòd si inquiras: Cur ergo nõ poterit per operationem quæ hic fit ab homine, vel à ligno creare Angelum, siquidem necesse non est quòd operetur aliquid illa actio instrumenti in tali re, quæ creatur, aut in subiecto circa quod sit operatio principalis agentis? Et tandem quomodo verifica-

tur quod dicit S. Thom. quòd instrumentum operatur dispositiue ad effectum principalis agentis, si nihil operatur quòd dispositio sit, nec requiritur quòd actionem propriam habeat, sed solum operationem, & effectum principalis agentis?

Respond. quòd etiam si operatio instrumenti non sit necesse quòd operetur aliquid circa subiectum, in quo est effectus principalis agentis, necessarium tamen est quòd illa operatio circa quodcumque versetur modo suo, & inferiori ad ipsum Deum, ut principale agens est istius effectus, operetur, & sic etiam respectu obiecti distantis, vel non existentis, operetur tanquam operatio accidentaliter exigens subiectum ex parte rei operatæ; atque adeò per modum immutationis procedens, quòd totaliter repugnat cum modo creationis, quæ est ex puro non esse, & ex nullo præsupposito. Quare etiam si instrumentum operetur circa vnum subiectum, non tamen potest circa aliud operari modo non immutatio, seu ex nihilo, quia respectu talis operati etiam se habet ut accidentaliter operatio, & sic physicè producit illud: ergo ut inherens termino: ergo ut supponens subiectum, & non ut faciens totum.

Ex quo sequitur quid sit apud D. Thom. operari dispositiue ad effectum principalis agentis, hoc est ministerialiter, & inferiori modo ad ipsam causam principalem, ut iam diximus. Hoc autem secundum duplicem sententiam, dupliciter intelligi potest. Quidam enim, etiam inter Thomistas, tenent requiri ad causam instrumentalem quòd habeat actionem propriam verè elicitam à se, & rigorosè sumptam, quæ licet non operetur dispositionem aliquam per se conducentem ad effectum principalis agentis, sed omninò disparatā, tamen illa eleuari potest à Deo ad operandum quemcumque effectum voluerit, quia virtus principalis, quantò est efficacior, tantò potest uti instrumento minus proportionato, & ita cum virtus Dei sit summa, & cui nihil obstat nec resistit, potest uti instrumento, etiam omninò disparato, & nihil conducente, imò contrario ipsi effectui, sicut potest calefacere per aquam, & infrigidare per ignem, & luto cæcitatem aperire, & alia similia. Et hanc sententiam secuti sumus in *Physica q. 26. art. 2.* ex D. Thom. & ratione. Alij existimant non requiri ad instrumentum diuinum aliquid propriè, & rigorosè operans, sed sufficere quamcumque entitatem eleuabilem à Deo ad effectum quem voluerit, etiam si secundum propria nihil operetur. Et vtrique dicunt, sufficere ad instrumentum, quòd producat eundem effectum, quem principale agens, sed inferiori modo, & ministerialiter deseruiendo, non tamen requiri quòd distinctum effectum aut dispositionem ad effectum principalis agentis conducentem producat. Et similiter in vtraque sententia saluatur quòd instrumentum operatur dispositiue ad effectum principalis agentis, licet dispositionem ad illum conducentem non operetur, id est quòd operetur dispositiue ex parte modi operandi, licet non ex parte rei operatæ, & hoc sufficit ut opponatur creationi, quia petit subiectum, & supponit, non facit. Nam si teneamus requiri quòd ex propria virtute instrumenti procedat aliqua actio ad hoc ut eleuetur à Deo, non quidem quia res operata per illam conducat per se, & connaturaliter ad effectum principalis agentis, sed quia conduit ut verificetur quòd instrumentum operatur ultra propriam virtutem, & operationem, manifestum est quòd cum talis operatio egrediatur ab instrumento tanquam accidentaliter quædam

quædam operatio, & determinata, atque constri-
cta ad modum proprium suæ virtutis, suæque
operationis, necessariò operatur per modum ope-
rationis subiectæ in aliquo subiecto, secundum
quod ex parte termini se tenet, & sic solum per
modum mutationis, seu motus se habebit, non fa-
ciendo ex nihilo totum ens, sed supponendo
aliquid; scilicet subiectum. Si verò teneamus,
non requiri actionem propriè dictam, & pro-
cedentem à propria virtute instrumenti, sed so-
lum entitatem, quæ obedientialiter eleuetur à
Deo ad operandum effectum principalem, tam-
en illa entitas debet operari inferiori modo
ad ipsum principale agens, quia instrumentaliter,
& ministerialiter ad ipsum se debet habere,
& consequenter illa eleuatio, seu virtus
quam recipit à principali agente, debet esse par-
ticipata, & particularizata, non tam vniuer-
salis influxus, & tam in actu puro, sicut virtus di-
uina: sed potius vt virtus operans procedendo de
actu primo ad secundum. Ergo ille actus se-
cundus non erit ipsa substantia instrumenti, &
virtutis eius, sed accidentalis actio, seu operatio:
ergo operans ex subiecto; & sic supponens sub-
iectum, non faciens: ergo contraponitur
creationi, quæ est ex non subiecto, & dispositi-
uè solum operatur ad talem effectum ex modo
operandi.

Ad rationes dubitandi à principio facile Re-
spond.

31 Ad primam ex P. Suarez dicitur quòd ratio D.
Thom. concludit de omnibus instrumentis, quia
omnia instrumenta operantur modo inferiori ad
principale agens, & eius virtutem atque influ-
xum limitando, & trahendo ad modum pro-
prium quo ipsa operantur, licet non omnia ope-
rentur dispositionem aliquam conducentem ad ef-
fectum principalis agentis, sicut faciunt instrumen-
ta naturalia. Et hoc quod est operari modo illo
inferiori, & limitare atque coarctare influxum
causæ principalis ad suum modum operandi est
dispositiuè operari ad effectum principalis agen-
tis, non quidem operando dispositiuè ex parte rei
operatæ, quasi dispositionem aliquam ad id ope-
rando, sed dispositiuè ex parte modi operandi, quia
sic limitando, & ad modum suum coarctando in-
fluxum causæ principalis, dispositiuè se habent in
ordine ad operandum, quia sic disponunt, seu re-
stringunt ad modum suum, influxum superioris
causæ. Nec obstat quòd hoc modo etiam causæ se-
cundæ principales dicuntur dispositiuè se habere ad
causam primam, quia limitant; & coarctant eius
vniuersalem influxum. Respon. enim quòd causæ
secundæ hoc etiam habent, sed non hoc solum,
sed etiam virtute sua operari effectum, assimilando
illum sibi, & non virtute causæ primæ, licet
influxum eius requirant tanquam conditionem, &
motionem requisitam vt operentur suum effectum
proprium. At verò instrumenta hoc solum ha-
bent quòd est dispositiuè se habere ad effectum
principalis agentis, quia tota ratio operandi in eis
est motio, & impressio causæ principalis, & to-
tum quod ex parte sua conferunt ministerialiter se
habet, & est limitatio, & coarctatio istius virtutis
ad modum proprium, non virtutem exhibent, cui
effectus assimiletur.

Ad id verò quod adducitur ex probatione D.
Thom. Resp. quòd probauit D. Thom. requiri ad
determinatos effectus determinata instrumenta,
quasi manu ducens ex hoc quod manifestum est
in naturalibus instrumentis ad concludendum
vniuersaliter quòd omnia instrumenta debent ali-

quid operari ministerialiter, & dispositiuè ad effe-
ctum principalis agentis, vel operando aliquam
dispositionem ad id conducentem, sicut instrumen-
ta naturalia; vel saltem dispositiuè se habendo ex
parte modi operandi, & ad suum modum trahendo,
& limitando influxum causæ principalis, vt in-
strumenta obedientialia, & eleuata à Deo.

Ad secundum Respond. distinguendo antece-
dens. In instrumentis supernaturalibus non re-
quiritur aliqua actio præuia, taliter quòd produ-
cat aliquem effectum, seu dispositionem distin-
ctam ab effectum principalis agentis, transeat; tali-
ter quod modo proprio limitet, & coarctet in-
fluxum principalis agentis ad modum suum ope-
randi, quod est largo modo operari, & dispositiuè
se habere, saltem ex parte modi operandi, nego.
Vnde patet ad probationes antecedentis: conce-
dimus enim, quod in sacramentis, in igne inferni,
in actione immanente quando assumitur vt instru-
mentum, non est aliquis effectus, seu dispositio
facta per virtutem propriam instrumenti in ipso
subiecto in quo fit effectus principalis agentis, est
tamen aliqua operatio procedens modo illo pro-
prio, & limitato instrumenti; & sic dispositiuè se
habet ad effectum principalis agentis, vt explica-
tum est. Ad id verò quòd dicitur de transubstan-
tiatione quod dicit D. Thom. non esse ex subiecto,
Respond. manifestè loqui D. Thom. de subiecto
communi vtrique extremo, ita quòd idem sub-
iectum maneat sub pane, & sub corpore Christi:
hoc enim non datur, & in hoc conuenit cum crea-
tione; non tamen negat dari subiectum mutatum,
& concursus de vno extremo ad aliud, quia ma-
teria panis transit in corpus Christi, & ratione
huius subiecti non manentis, sed conuersi potest
attingi ab aliquo instrumento ista conuersio: vt
dicit S. Th. in 4. distinct. 8. q. 2. art. 3. ad 3. quia crea-
tura, inquit, accipit virtutem instrumentalem ope-
randi in id quod in corpus Christi transubstantiatur.
Habet ergo instrumentalis actio aliquid præsuppo-
situm in quod operetur; & sic non ex puro nihilo
agit, nec totum agit, sed aliquod subiectum con-
uerit in aliud; & sic ratio communis entis suppo-
nitur.

Ad id verò quod dicitur de creatione quòd licet
accidentaliter actio sit, potest tamen ex nihilo pro-
ducere; & licet supponat subiectum in quo inhæ-
reat, non tamen ex quo educat, iam constat ex
suprà dictis quòd hoc ipso quòd accidens est, de-
bet habere subiectum, non solum ex parte agen-
tis in quantum est actus secundus eius, sed etiam
ex parte rei factæ in quantum est causalitas, & fa-
ctio, mediante qua res ipsa producit, vt latè ex-
plicatum est. Repugnat autem quòd aliqua actio
accidens sit in quantum causalitas, seu factio rei
productæ est, & habeat subiectum in quo sit ex
parte termini, seu rei factæ, & tamen sit creatio,
quia sic non totum quod in ipso termino est, pro-
ducit, sed aliquid supponit; & sic non potest esse
creatio, quia non facit totum, atque adeò neque
procedit ex nihilo, neque facit esse quòd omnia
alia antecedit, quod est esse vt comprehendit tam
potentiale quam actuale, tam secundum commu-
nem rationem, quam secundum particularem. Qua-
re si in subiecto est illa actio ex parte termini, seu
rei factæ, etiam ex subiecto est.

Ad inconuenientia allata ex P. Vasquez Resp. 34

Ad primum quòd intellectus adiutus diuino
auxilio eleuante, seu lumine gloriæ dato transeun-
ter, & per modum auxilij non operatur vt instru-
mentum Dei, sed vt causa principalis, quia se
mouet, & non purè mouetur, cū vitaliter ope-
retur

retur, de quo pluribus egimus *præced. tomo disp. 14.* Et dato quod esset instrumentum Dei, non esset de quo in præsentia agimus, quia non est instrumentum ad efficiendum ad extra, sed ad intelligendum; & ideo non requiritur ibi prævia actio ex propriis instrumentis, quia non datur ibi actio transiens operatiua effectus, sed purè immanens, & intelligens.

Ad secundam instantiam de phantasmate diximus *quæst. 26. Physic. art. 2. & quæst. 10. de Anima art. 3. in fine*, quod phantasma non habet vim effectiuam, sed obiectiuam, id est, non physicam operationem, sed intentionalem, quatenus repræsentat obiectum corporeum ipsi phantasiæ, & de se natum est producere aliam speciem, seu repræsentationem, sicut una species formatur ex alia, & emittitur ex alia. Et hæc operatio intentionalis in phantasmate non est de se sufficiens ad producendam speciem intelligibilem, sed id fit virtute intellectus agentis, sic deputantis repræsentationem phantasmatis, supponit tamen aliquid præuium in phantasmate, non circa intellectum, sed circa ipsam phantasiam cui repræsentat, & inde elicit intelligibilem speciem intellectus agens.

Ad tertiam instantiam de Sacramentis, dicimus similiter, ibi non supponi actionem propriam circa animam, bene tamen circa corpus, sicut Baptismus corpus tangit, & cor abluit; & sic actionem aliquam supponit. Et licet illa non conducat ad effectum principalis agentis, conducentia se tenente ex parte dispositionis productæ ad principalem effectum, bene tamen se tenente ex parte modi operandi, ut principalis influxus se accomodet instrumento, ut dictum est.

Ad instantiam Molinæ dicitur, quod in securi tota actio attribuitur principali agenti, ut artificiosè impellenti, non ut simpliciter scindenti: nam ad scindendum sufficit ipsum acumen securis, etiamsi naturaliter cadat, & non artificiosè impellatur. Supponitur ergo aliqua propria actio securis, id est, scindere ex se, etiamsi non artificiosè. Aer verò vel aqua calefacta faciunt calorem in vi ignis, vel tanquam causæ principales ex calore recepto; vel supponendo ad modum instrumenti aliquid proprium, scilicet deferre calorem, & sua densitate, vel raritate magis, vel minus modificatur, & crescit, vel temperatur calor.



TRACTATUS DE ANGELIS.

QVÆSTIO L.

De substantia Angelorum absolute.

SVMMALITTERÆ.



OSTENDIT QVAM D. Thomas egit de creatione rerum in communi, hinc incipit agere de creaturis procedentibus, & de earum distinctione in spirituales, & corporales, & ex his compositam, quæ est homo.

Et primò agit de creatura purè spirituali, quam antiqui Philosophi Intelligentiam, Theologi Angelum vocant. Et de hoc disputat S. Doctor ab ista quæstione usque ad 36. Eo ordine & methodo quam in præcedenti tomo circa connexionem partium D. Thom. expressimus.

Incipit ergo in hac quæstione materiam istam de Angelis à consideratione substantiæ eorum, primò absolute in se, deinde tribus sequentibus quæstionibus de ea comparative, tum ad corpora, quæ assumunt, tum ad locum in quo sunt, tum ad motum quem circa locum exercent. Et in hac quæstione in qua considerat substantiam Angelorum absolute, & secundum se, præcipuè considerat S. D. ea quæ pertinent ad exclusionem materiæ, & conditionem eius, sicut quòd Angeli sint incorporei, simplices formæ, carentes numerica diuisione, quæ sumitur ex materia, licet sint multi in multiplicatione, & numero desumpto ex formæ multiplicatione; ac denique quòd sint incorruptibiles, quia etiam corruptio desumitur ex materia.

Igitur in art. primo ostendit dari substantias omnino incorporeas, id est, quæ neque in se corporeæ sint, neque corpori vnibiles, sicut anima nostra. Et probat dari tales substantias, quia datur substantia intelligens, sicut anima nostra, & intelligere de se non indiget corpore, imò tantò est perfectius, quantò magis abstractum est à corpore: ergo dabilis est substantia intellectualis perfecta, quæ corpori non sit coniuncta, & conueniens est quòd detur ut vniuersum sit perfectum.

In art. 2. ostendit has substantias esse simplices, id est, non compositas ex materia, & forma, neque sumpta materia pro materia corporea, quia hæc non diuiditur nisi per quantitatem, & partes, quæ longè abest à substantiis incorporeis; neque sumpta materia pro quacumque alia materia, quia operatio intellectualis de se immaterialis est, & sic de se petit substantiam immaterialem, si perfectè intellectualis est.

In art. 3. ostendit Angelos esse in magno numero, non secundum numerum specierum sensibilium, sicut Plato posuit substantias separatas: neque secundum numerum primorum mobilium, id est, cælorum, quorum motores sunt Angeli, ut posuit Aristoteles, sed secundum ordinationem Dei, qui produxit superiores substantias secundum maiorem excessum, quàm inferiores, ita quod sicut corpora incorruptibilia, id est, cæli excedunt incomparabiliter magnitudine corpora corruptibilia, ita substantiæ immateriales excedunt incomparabiliter in numero, materiales substantias.

In art. 4. ostendit Angelos differre, & multiplicari solum secundum speciem, non verò esse vnus speciei, nec sola indiuiduatione multiplicari, eo quòd carent omni materia, & totum quod sunt, formæ sunt: ergo totum quo differunt, formaliter differunt, hoc est specificè, quia distinctio indiuidualis materialis est, & ex parte materiæ fit, non formalis.

In art. 5. ostendit Angelos simpliciter esse incorruptibiles, licet sint annihilabiles, quia ad hoc secundum sufficit suspensio, & retractio concursus causæ efficientis dantis eis esse: ad primum verò requiritur materia, quæ recepta vna forma excludat aliam, & corruptat, quia corruptio sine generatione non est.

QVÆSTIO

QVÆSTIO LI.

De comparatione Angelorum ad corpora.

S V M M A L I T T E R Æ.



RIA tractat S. Thomas in hac quæstione.

In art. primo ostendit Angelos non habere corpora naturaliter sibi vnita, in quo perfectam Angelorum naturam explicat, vt distinguitur ab anima rationali, quæ corpori naturaliter vnitur vt forma: Angeli autem sunt formæ non vnibiles corpori, sed subsistentes in se, quia forma intellectualis non vnitur corpori propter perfectionem intelligendi, quin potius per abstractionem à corpore, & materia perficitur intellectio: inconueniens est autem quod totum genus naturæ intellectualis inueniatur in anima humana cum coniunctione ad corpus, quod imperficit, & infirmat operationem intellectualem, & non detur natura intellectualis non vnita corpori, quod pertinet ad perfectionem intellectualis.

In art. 2. ostendit D. Thomas Angelos assumere corpora, non quidem substantialiter in vnitatem personæ, neque vniendo ea sibi, vt formæ, sed vt motori, quia ea formant, & mouent; & sic non solum secundum imaginationem nostram, sed secundum realitatem externam apparent in corporibus assumptis, & motis, sicut aliquando ita apparent vt videantur ab omnibus, vt Angelus, qui apparuit Tobia, & qui apparuerunt Abraham, & Loth: quando autem multis apparent, non est imaginatio, sed visio. Aliquando tamen non apparent oculis, nec assumunt corpora, sed imaginationem deludunt.

In artic. 3. ostendit S. D. operationes quas Angeli exercent in corporibus assumptis non esse vitales ex parte ipsorum corporum, sicut loqui, deambulare, videre, &c. quia non informantur ista corpora vitaliter, sed possunt in eis aliquos motus locales exercere, mediante impulsu, & motu, quæ actiones communes sunt viuentibus, & non viuentibus, & possunt esse similes motibus vitalibus ex parte effectuum, non ex parte modi vitalis.

DISPUTATIO XIX.

De existentia & quidditate Angelorum.

ARTICVLVS I.

Quid fides doceat circa existentiam, & naturam Angelorum?



MULTA circa nomina Angelorum, & ea quæ de ipsis antiqui Philosophi dixerunt omittenda nobis sunt, & solum ex Scriptura supponendum substantias immateriales quas Gentiles, & Philosophi, vel Deos, vel Genios, vel Dæmonas, vel intelligentias, vel aliis similibus nominibus appellabant, in Scriptura vocari Angelos, & spiritus, sicut dicitur Psalmo 103. *Qui facit Angelos suos spiritus.* & ad Hebræos 1. *Nonne omnes sunt administratorij spiritus in ministerium missi,* &c. Vbi vtrumque nomen spiritus, & Angeli accommodatur his substantiis spiritualibus, & intellectualibus, de quibus nunc agimus. Nam licet hoc nomen *Angelus* per antonomasiam, & communem usum Scripturæ, & Patrum, & Ecclesiæ

accommodetur istis substantiis ita vt, sicut dixit Gregorius homilia 34. in Euangelia, *Angelos & Archangelos pene omnes sacri eloquij pagina testentur*; tamen ex se vocabulum *Angelus*, vt ibidem notat Sanctus Gregorius *nomen est officij, non naturæ*; nam Sancti illi celestis patriæ spiritus semper quidem sunt spiritus, sed semper vocari Angeli nequaquam possunt; quia tunc solum sunt Angeli cum per eos aliqua nunciantur. Quare nomen Angelus per se solum non designat nobis substantias illas spirituales, nisi cum etiam nomine spiritus designantur. Et quia ministerium nunciandi committitur à Deo communiter spiritibus celestibus; & ideo per antonomasiam nomine Angelorum intelligimus spiritus celestes, licet aliquando etiam nomen Angeli quantum ad officium nunciandi hominibus tribuatur, sicut Ioannes Baptista dicitur Angelus Malachiæ 3. & Matthæi 11. Sacerdotes etiam dicuntur Angeli, Malachiæ 2. *Labia Sacerdotis custodiunt scientiam, & legem requirent ex ore eius, quia Angelus Domini est.* Apostolus quoque 1. ad Corint. 11. præcipit velari capita mulierum propter Angelos, id est, Sacerdotes.

Ex his ergo Angelis seu spiritibus aliqua certo constant in Scriptura, aliqua deducuntur ex illa per certam consequentiam, aliqua etiam probabiliter.

Certum est primò in Scriptura dari Angelos qui sint superiores hominibus, vt constat ad Hebr. 2. & Psal. 8. vbi loquendo de homine dicitur: *Minuisti eum paulò minus ab Angelis*, & 2. Petri 2. *Angeli*

Angeli fortitudine, & virute cum sint maiores, &c.

Constat secundo has substantias Angelicas esse creaturas, quod absurdissime negauit quidam Hermanus Batauius, vt refert Castro lib. 2. de Heresibus, verbo *Angelus*, qui dicebat Angelos non esse à Deo creatos, quia hoc nusquam Scriptura asserit. Quod omnino falsum est, cum Psalmo 103. dicatur, *Qui facit Angelos suos spiritus*. Quem locum adducit Paulus ad Hebr. 1. ad probandum superioritatem Christi supra Angelos, quia Christus est Filius Dei, Angeli autem sunt ministri facti à Deo, sic enim ait: *Et ad Angelos quidem dicit, qui facit Angelos suos spiritus, & ministros suos flammam ignis: ad Filium autem; thronus tuus Deus in seculum seculi.* & ad Colossens. 1. dicitur. *Quoniam in ipso condita sunt vniuersa in calis, & in terra, visibilia, & inuisibilia, siue Throni, siue Dominationes, siue Principatus, siue Potestates, omnia per ipsum, & in ipso creata sunt.* Ac denique Concilium Lateran. sub Innocentio III. in can. *firmiter*, de summa Trinitate definitiuit, quod *Deus sua omnipotentia virute simul ab initio temporis vtramque de nihilo condidit creaturam, spiritualem, & corporalem, Angelicam videlicet, & mundanam.*

Constat tertio ex Scriptura, varia esse Angelorum nomina, tum designantia diuersa ministeria, seu Hierarchias eorum: tum designantia proprias personas. Quæ designant ordines Angelorum sunt nouem, quæ D. Gregor. loco cit. colligit ex Scriptura, scilicet Angelos, Archangelos, Principatus, Potestates, Virtutes, Dominationes, Thronos, Cherubim, & Seraphim; de eorum distinctione latè, & optimè tractat S. Thomas *infra quest. 107. artic. 5.* Similiter varia ministeria Angelorum traduntur in Scriptura, vt quod alij sint assistentes, alij ministrantes, Daniel. 7. licet omnes administratorij spiritus nominentur generali nomine ad Hebr. 1. quia etiam assistere ministrorum est. Quod mittantur à Deo tanquã legati seu nuncij, Lucæ 1. *Missus est Angelus Gabriel à Deo.* Quod custodiant homines, & eos gubernent, Matth. 18. *Angeli eorum semper vident faciem Patris.* Et alia similia ministeria passim traduntur in Scriptura. Nomina designantia proprias personas solum in Scriptura sunt tria, scilicet *Michaël, Gabriël, & Raphaël*; nec aliis nominibus Angelorum publicè possumus uti, & inuocare iuxta decisionem Concilij Romani sub Zacharia Papa anno Domini 745. licet enim in lib. 4. Esdræ inueniatur *Angelus Uriel*, cap. 4. & 5. tamen liber iste non est canonicus: & sic alia Angelorum nomina quæ fortasse apud aliquos auctores inueniuntur, vel etiam ex aliquorum reuelationibus referuntur, probanda non sunt.

Certum est quarto Angelos esse substantias immobiles, idque motu velocissimo, & aliquando esse in cælo, aliquando in terra, & posse se ostendere hominibus in aliquo corpore assumpto, & ab eis occultari: Omnia hæc ex variis locis Scripturæ deducuntur: nam de motu Angelorum dicitur Exod. 14. *Tollensque se Angelus Domini, qui præcedebat castra Israël, abiit post eos.* Danielis 3. *Angelus autem Domini descendit cum Azaria, & sociis eius, & Zachariæ 2. Angelus qui loquebatur in me, egrediebatur, & Angelus alius egrediebatur in occursum eius.* De eorum mira celeritate est illud Iob 1. Vbi Diabolus dicit, *Circumui terram, & perambulauit eam, & Esaïæ 6. Et volauit ad me vnus de Seraphim.* Et Esaï. 18. *Ite Angeli veloces,* Psalm. 103. *Qui facit Angelos suos spiritus, & ministros suos ignem vrentem.* Danielis 13. *Et apprehendit eum Angelus Domini in vertice eius, & portauit eum ca-*

Ioan. à S. Thom. in 1. part. D. Th. Tom. alter.

pillo capitis sui, posuitque eum in Babylone supra lacum in impetu spiritus sui: quod utique magnam celeritatem designat, sicut etiam quod frequenter descendant de cælo in terram, sicut dicitur Matth. 28. Angelus autem Domini descendit de cælo. Ioann. 5. *Angelus autem Domini descendebat de cælo.* Multa etiam mirabilia per Angelos fieri in multis capitibus Apocalypsis demonstratur, quæ longum esset referre. Similiter posse plures Angelos esse in valde paruo spatio, vel corpore constat ex illo Lucæ 8. Vbi dicitur *in eodem homine fuisse legionem Demoniorum, quia intrauerant Dæmonia multa in eum.* Quod appareant sapius hominibus, & etiam euascent ab eis, constat, quia Tobia 12. Angelus Raphaël videbatur à Tobia patre, & filio, & postea ablatus est ab aspectu eorum, & ultra eum videre potuerunt. Et Iudicum 6. *Angelus Domini, qui apparuit Gedeoni euasit ex oculis eius.* Ex quibus constat substantias Angelicas esse superioris virtutis ad ea, quæ in corporibus videmus, & ita habere potestatem mirabilem superiorem ad homines, & ad virtutes corporeas.

Certum est quinto, Angelos esse intellectuales, & liberi arbitrij, & peccabiles. Constat hoc, quia Angelis attribuitur visio Dei, Matthæi 18. *Angeli eorum semper vident faciem Patris;* quod utique ad intellectualem cognitionem spectat. Similiter attribuitur illis actus docendi, vt Danielis 8. *Gabriel fac istum intelligere visionem.* Et denique attribuitur actus loquendi 1. Corinth. 13. *Si linguis hominum loquar, & Angelorum, & Zachariæ 1. Ee dixit Angelus, qui loquebatur in me.* Quod etiam sint peccabiles, & pro peccato puniantur, quod non potest esse nisi sint liberi arbitrij, constat ex illo 2. Petri 2. *Deus Angelis peccantibus non pepercit, sed rudentibus inferni detractos in tartarum tradidit cruciandos.* Et in Epistola Iudæ: *Angelos qui non seruauerunt suum principatum, sed dereliquerunt suum domicilium in iudicium magni diei vinculis æternis sub caligine reseruauit.* Et Iob. 4. *In Angelis suis reperit prauitatem.*

Quid de Angelis per certam consequentiam colligatur ex Scriptura?

Quæ hucusque retulimus de Angelis ita sunt expressa in Scriptura, vt ea negare aperta hæresis sit. Aliqua verò sunt quæ etsi non ita expressè in Scriptura habeantur, tamen per consequentiam ex his quæ in ea dicuntur, deduci possunt.

Primum est, an Angeli sint aliquo modo corporei, vel puri spiritus. De qua re aliqui dubitauerunt ex antiquis, & etiam ex Patribus ante Concilium Lateranense sub Innocentio III. Aliqui etiam post ipsum Concilium idem senserunt. Id apertè defendit Rupertus Abbas lib. 1. de Trinit. & eius operibus in caput 11. Genesis, & lib. 1. de victoria Verbi Dei cap. 28. Inter opinabilia id ponit S. Bernardus lib. 5. de consideratione. *Quamquam (inquit) de corporibus horum non solum vnde sint, sed etiam an aliquatenus sint, hæret sententia aliquorum. Vnde si quis inter opinabilia magis id ponendum censuerit, non contendo.* In id etiam inclinat homilia 5. in Cantica. In quam etiam sententiam videntur incidisse illi, qui existimarunt filios Dei, qui Genesis 6. dicuntur ingressi ad filias hominum, Angelos fuisse, de quo Lactantius 2. lib. diuinarum institutionum cap. 14. Irenæus lib. 4. c. 70. Philo libro de Gigantibus, Iosephus, & alij Antiqui, inter quos, & Tertullianus, cum in lib. de velandis virginibus cap. 7. inquit, *Velanda est facies, quæ vsque in calum scandala iaculata est.* Omitto plures ex Sanctis Patribus, qui sæ-

H h

pius

pius videntur dicere, Angelos esse corporeos, ut Nazianz. Basil. Hilarius, Augustinus, & alij; qui tamen non in eo sensu intelligunt Angelos esse corporeos, sicut in præsentia loquimur, sed vel intelligunt esse corporeos, id est subsistentes, verasque substantias, quia apud antiquos res vera nomine corporalis rei designabatur. Iuxta quod Paulus dicit ad Colossenses 2. *habitare in Christo plenitudinem diuinitatis corporaliter*, id est verè, & realiter. Vel intelligebant esse corporeos, id est limitatos, & potentiales, quia solum Deum purè incorporeum faciebant, id est nullo modo potentialem, & hoc sensu cæteras creaturas ita esse corporeas, quod ad Dei immaterialitatem non attingunt. Post Concilium autem Lateranense aliqui Authores videntur Angelis seu Dæmonibus aliquod corpus tribuere, ut Caietan. *super c. 2. ad Ephesios ad illa verba secundum Principem potestatis aëris huius*, &c. dicit, consonare veræ Philosophiæ quod Dæmones sint spiritus aërei, non huius aëris elementaliter, sed quasi subtile corpus nostris sensibus ignotum. Oppositum tamen idem Caietanus tenet *super c. 1. ad Heb. ad illa verba, Qui facit Angelos suos spiritus*, & in hac 1. p. quæst. 50. art. 1. & qu. 51. art. 1. Tribuitur tamen ista sententia Eugubino lib. 1. de perenni Philosophia cap. 27. & 30. & videndus est Franciscus Georgius libro 1. *Problematum capite 57. & 74.*

4 Dicendum nihilominus est primò ita certum esse, & deduci ex Scriptura Angelos esse omnino spirituales, & sine vlllo corpore, quod oppositum omnino est temerarium, & probabile est esse erroneum, & hæresi proximum.

Ratio est, quia absolute Scriptura eos vocat spiritus, & definitio Ecclesiæ videtur intellexisse hanc spiritualitatem in sensu proprio, eo etiam modo, quo anima rationalis definitur esse immortalis, & independens à corpore in Concilio Lateranen. sub Leone X. *sess. 8.* Constat primum ex Scriptura Psal. 103. & ad Hebr. 1. *qui facit Angelos suos spiritus*; quem locum adducit S. Thom. in hoc art. 1. in argumento, *Sed contra*, ad probandum Angelos esse incorporeos, & ad idem vtuntur illo loco multi SS. PP. ut Hilarius 5. de Trinit. circa finem. Hieron. *suprà cap. 63.* Esaiæ, Ambros. in 1. ad Hebr. nec tamen improbabilis est expositio, quæ dicit, ibi sumi spiritum pro vento, seu aëre, ita vt sit sensus qui facit Angelos suos veloces quasi ventum, & ministros suos quasi ignem, vbi etiam sumitur ignis pro igne corporeo: quæ expositio placuit S. Thom. *super caput 1. ad Hebr. lect. 3.* vbi inquit, *Angelos secundum quod sunt nuntij simili aëri, qui nuntij debent bene recipere, & referre quæ nuntiant, secundum verò quod sunt ministri comparantur igni, qui summè est actiuus, & sic debent esse ministri.*

5 Nihilominus sæpe aliàs Scriptura nominat Angelos spiritus absolute, & sine comparatione ad aërem vel ventum, vt ad Hebræos 1. *Omnes sunt administratorij spiritus* Apoc. 1. *Et à septem spiritibus qui in conspectu throni eius sunt*, Lucæ 11. *Assumit alios septem spiritus nequiores se.* Vbi cum simpliciter, & sine addito Scriptura loquatur, sumit illud Verbum spiritus in omni proprietate pro substantia spirituali, quia eodem modo vocat Angelos spiritus, sicut Deus, & animæ humanæ spiritus dicuntur, vt Ioann. 4. *Spiritus est Deus*, & de animabus nostris Daniëlis 3. *Benedicite spiritus, & animæ iustorum Domino.* Matth. 27. *clamans voce magna emisit spiritum.* Quibus locis sumitur spiritus pro substantia spirituali propriè, aliàs ex istis locis non probaretur sufficienter animam nostram esse spiritualement, & independentem à corpore, sicut diffi-

niuit Concilium Lateranen. *vbi suprà.*

Denique quod amplius est, sic videtur intellexisse Ecclesia: definit enim in c. *firmiter*, de summa Trinitate, quod Deus simul ab initio temporis *utramque de nihilo condidit creaturam, spiritualement, & corporealem, Angelicam videlicet, & mundanam, & deinde humanam quasi communem ex spiritu, & corpore constitutam.* Vbi pondero Concilium loqui de spirituali creatura pro incorporea, non autem sumere spiritum pro aëre, vel corpore subtili, quia condistinguitur spiritualis creatura contra corporealem, ventus autem, seu aër, vel quodcunque aliud corpus subtile sub corporali creatura continetur: ergo spiritualis creatura, quæ est Angelica, vt supponitur in Concilio, non sumitur pro spiritu, qui est corpus subtile. Vnde multò minus probari debet, quod aliqui dixerunt, Angelos ex aëre esse factos, cum Concilium dicat spiritualement creaturam, siue Angelicam, de nihilo esse factam. Et denique pondero loqui Concilium de Angelica, & spirituali creatura, non composita ex admixtione alicuius corporis, sed ab omni corporeitate absoluta, quia condistinguit ab illa creatura humanam vt constitutam ex spiritu, & corpore: ergo supponit quod illa quam dixerat spiritualement, & Angelicam, non est constituta ex spiritu, & corpore, aliàs esset sicut humana creatura: ergo cum dicatur spiritualis creatura, non corporea, erit spiritualis purè, non autem composita ex spiritu, & corpore.

Ex quo colligitur hanc veritatem ita esse certam quod opposita plus quàm temeraria est, & vel erronea, vel proximè ad hæresim accedens, eo quod Concilium videtur omnia illa sub definitione sua comprehendere, nec solum obiter tangere. Dicit enim in initio totius clausulæ sic. *Firmiter credimus, & simpliciter confitemur*, &c. quæ verba ad definitionem pertinet; & sic quæcunque sub illa clausula comprehenduntur, & ad illam pertinent, sub eadem confessione, & definitione comprehendi videntur. Concilium autem sub ista clausula cum eodem tonore verborum ponit ea quæ spectant ad Trinitatem personarum, & attributa diuina, atque illa quæ pertinent ad creationem rerum spiritualium, & temporalium dicendo vnum vniuersorum principium, creator spiritualium, & corporalium, qui sua omnipotenti virtute simul ab initio temporis utramque de nihilo condidit creaturam spiritualement, & corporealem, Angelicam videlicet, & mundanam, quæ omnia eodem tonore verborum dicuntur, ac proinde eodem modo videntur sub illa definitione comprehendi, nec est aliquod verbum in tota serie textus, propter quod dicamus quædam verba illius clausulæ definitionem fidei importare, alia verò non.

Cæterum non est omnino certum rem hanc esse definitam ab Ecclesia, quia directè intentio Concilij solum est definire Deum esse vniuersalem rerum omnium creatorem in initio temporis. Quam vniuersitatem creaturarum comprehendit Concilium sub creatura corporali, spirituali, & ex his composita. Quomodo verò creatura illa quæ spiritualis dicitur, spiritualis sit, an per omnimodam separationem à corpore, an cum aliqua corporis inclusionem, non videtur pertinere ad directam intentionem Concilij, sed obiter tangi. Et sic existimant graues authores rem hanc nondum esse definitam ab Ecclesia, vt Cano lib. 5. de locis c. 5. qu. 4. in fine, Sixtus Senensis lib. 5. Bibliot. annotatione 8. Carranza annotat. ad. 7. Synodum actione 5. Suar. lib. 1. de Angelis c. 6. Vasqu. disp. 178. c. 2. & D. Thom. 2. 2. c. 91. in fine, licet pro errore damnet eos, qui dicunt spiritum non esse, non tamen vocat errorem, positio

positionem eorum, qui dicebant nullum spiritum sine corpore dari, præter Deum. Restamen ad minus temeraria est, vel etiam, ut diximus, erronea, quia Concilium multum in id ponderat, & est iam communis Theologorum sententia, præter supra relatos. Sed quia possent aliqui subterfugere dicendo Angelos esse quidem Spiritus, sed non alios quam animas hominum separatas, idè contra hanc positionem.

8 Dicendum est secundò, de fide esse aut saltem per euidenter consequentiam ex principiis fidei deduci, Angelos de quibus loquitur Scriptura, & de quibus loquimur in præsentia non esse animas separatas à corporibus humanis, sed distinctas substantias separatas. Circa hoc videtur errasse Philo in lib. de Gigantibus, qui Angelos, Genios, & animas non re differre, sed nominibus dixit. Origenes etiam sensit, animas, & Angelos esse eiusdem speciei, & ab initio æquales fuisse creatos, sed ex diversitate meritorum processisse, quòd quidam spiritus sint missi in corpora, eisque uniti, alij non. Contra quem videndus est S. Thom. 1. p. q. 7. art. 6. & 2. contra Gentiles c. 49. Sed & S. Chrysostomus in 8. cap. Matth. dicit esse perniciosum dogma dicere quòd anima morientium sunt Dæmones, ut refert S. Thom. opusc. 15. c. ultimo. Ostenditur autem per euidenter consequentiam esse contra Scripturam hunc errorem, quia de fide constat omnes homines esse resurrecturos, 1. Corinth. 15. Omnes quidem resurgemus, sed non omnes immutabimur: ergo in vnoquoque homine erit sua anima, quæ separata fuit per mortem, & suum corpus, aliàs non resurgeret, idem homo numero, qui vixit. Rursus constat quòd resuscitatis omnibus hominibus adhuc dabuntur Angeli, & Dæmones: ergo Angeli, & Dæmones aliquæ substantiæ sunt præter omnes animas hominum. Erunt quidem Angeli, tum quia venturus dicitur Christus in maiestate sua, & Patris, & Sanctorum Angelorum, Lucæ 9. ille autem aduentus erit in resurrectione omnium hominum; tum quia Matth. 22. dicitur quòd In resurrectione non nubent neque nubentur, sed erunt sicut Angeli in cælo: ergo Angeli distincti erunt ab hominibus, & animabus, etiam post resurrectionem. Similiter Dæmones diversi erunt ab hominibus damnatis: nam post resurrectionem dicetur ipsis damnatis, Ite in ignem æternum, qui paratus est Diabolo, & Angelis eius, Matth. 25. ergo præter homines resuscitados, quibus illa verba dicentur, & consequenter præter animas eorum, dantur aliqui spiritus, qui sunt Dæmones.

9 Dicendum est terriò esse de fide, vel per euidenter consequentiam ex principiis fidei deduci Angelicam creaturam esse omnium supremam inter eas quæ à Deo conditæ sunt inter substantias vniuersi. Nam sicut dicit August. 11. de ciuit. c. 15. Angelica creatura omnia cetera, quæ Deus condidit, naturæ dignitate præcedit. Constat hoc quia Angeli sunt perfectiores naturâ corporeâ, quia sunt perfectiores naturâ humanâ, iuxta illud Psalm. 8. Minus est eum paulò minus ab Angelis & 2. Petri 2. Angeli virtute, & fortitudine cum sint maiores: homo autem est perfectior omni creatura corporea: ergo si Angeli sunt supra homines, sunt supra omnem creaturam corpoream, & consequenter supra omnem creaturam simpliciter, quia omnis creatura vel est corporea, vel incorporea, vel ex illis composita, ut homo, sicut dicitur in Concil. Lateran. in can. firmiter, de summa Trinitate. Minor probat. Nam respectu creaturæ corporeæ corruptibilis, & pertinentis ad hæc inferiora, constat hominem esse superiorem illis, iuxta illud Genesis 1. Faciamus hominem à S. Thom. in 1. part. D. Thom. Tomus alter.

minem ad imaginem, & similitudinem nostrâ, ut præsit piscibus maris, & volatilibus cæli, & bestiis, vniuersæque terræ, omnique reptili, quod mouetur in terra. Et Psalm. 8. Omnia subiecisti sub pedibus eius. Vnde etiam sequitur quòd sit superior corporibus cælestibus: tum quia cælum ordinatur ad seruiendum homini pro habitatione, vbi erunt corpora sanctorum post resurrectionem: tum quia Deuter. 4. dicitur non esse adorandum Solem, & Lunam, & omnia astra cæli, quia creata sunt in ministerium omnium gentium, quod utique ministerium inferioritatem dicit, quia adorationem, seu cultum non admittit. Angeli autem licet dicantur missi in ministerium, tamen adorari passim in Scriptura inueniuntur, sicut Gen. 18. Abraham adorauit tres Angelos, & Iosue 5. Cecidit pronus in terram, & adorauit Angelum: ergo certum est Angelos esse superiores cælis, & aliis creaturis corporalibus, ac etiâ ipsis hominibus: ergo sunt supremi omnium creaturarum.

Quòd si dicatur, vnde constat nobis de fide quòd supra Angelos non sit aliqua alia creatura simpliciter perfectior, sicut per gratiam Beata Virgo, & humanitas Christi excedunt omnes Angelos.

Respon. id constare manifestè ex definitione citata Concilij Lateran. c. Firmiter: ibi enim definitur Deum esse principium omnium creaturarum, dicendo, quòd Est vnum omnium vniuersorum principium, creator omnium visibilium, & inuisibilium, spiritualium, & corporalium, qui sua omnipotenti virtute simul ab initio temporis utramque de nihilo condidit creaturam spiritualem, & corpoream, Angelicam, videlicet, & mundanam, ac deinde humanam, quasi communem spiritui, & corpore constitutam. Ex quo fit argumentum, Concilium numerat in hoc loco omnia genera creaturarum, aliàs non sufficienter ostenderet Deum esse creatorem omnium, si omitteret aliquam creaturam supra omnes istas; sic enim non ostenderetur Deus esse creator illius. Sed inter omnes quas hîc numerat, Angelica est suprema, ut probatum est: excedit enim corpoream, & similiter constitutam ex corpore, & spiritu, qualis est homo: ergo est suprema inter omnes creaturas simpliciter. In cuius etiam confirmationem dicitur Iob. 40. Loquendo de Diabolo: Ipse est principium viarum Dei, id est omnium processionum Dei ad extra primus.

Dicendum est quartò, deduci per consequentiam, magis probabilem, & ferè certam, Angelos non esse creatos ante hoc vniuersum, quantum ad tempus suæ creationis, neque extra hoc vniuersum, sed in cælo, quantum ad locum. Et quidem non fuisse creatos ab æterno, certa fides est, cum nulla creatura fuerit ab æterno, sed in principio temporis, ut definitur in Concilio Lateran. citato, Utramque Deus in initio temporis de nihilo condidit creaturam spiritualem, & corpoream Angelicam, & mundanam. Quando verò creati fuerint Angeli, determinatè, supponendo quòd non sunt ab æterno, an in eodem tempore, quo istud vniuersum, an verò ante creaturam corpoream, non est ita certum, quòd oppositum sit reputandum erroneum; ut expressè docet S. Thom. infra qu. 61. art. 2. præcipue propter sententiam S. Gregorij Nazianz. & aliorum Doctorum Græcorum, qui, ut ibi S. Tho. dicit ad 1. omnes hoc concorditer sentiunt, quòd Angeli sunt ante mundum corporeum creati. Quantò verò antea fuerint creati, non omnino constat inter ipsos. Ex Scriptura autem non constat determinatè, quòd Angeli fuerint creati simul cū corporibus, sed solum dicitur Genes. 1. quòd In principio

principio fecit Deus cælum, & terram. Vbi nulla mentio fit de Angelis ad litteram. Et Ecclesiast 18. *Qui vivit in æternum creavit omnia simul:* Vbi ly *simul* non constat omnino quod sumatur pro similitudine temporis, sed pro similitudine collectionis in unum uniuersum construendum, quasi in simul vel in unum omnia sint creata. Si enim velimus ly *simul* in toto rigore sumere pro similitudine durationis omnimoda, inconueniens est, cum non in eodem puncto temporis, sed per successionem septem dierum sint omnia creata, vt probabilius est ex littera Genes. Quare ex præcisa littera Scripturæ non omnino constat contrariari illi sententiam Græcorum in hac parte, ideoque à D. Thom. liberata est à nota erroris.

12 Cæterum dubitant aliqui an in illa definitione Concilij Lateran. desumpta ex *c. firmiter* sæpius allato sit certum Angelos non fuisse creatos ante mundum corporeum, ita vt oppositum sit de fide, vel saltem erroneum, aut temerarium. Aliqui enim quos refert Caietan. *infra qu. 61. c. 3.* dicunt quod si S. Th. recolisset sensum huius decretalis quando scripsit illum articulum, non dixisset sententiam Græcorum non esse reputandam erroneam: nam Concilium docet *Deum simul ab initio vitamque condidisse creaturam spirituales, & corpoream, Angelicam videlicet, & mundanam.* Ergo contra Concilij mentem, & decisionem sustinetur sententia Græcorum. Propter quod P. Suarez *lib. 1. de Angelis c. 3. n. 14.* sentit, quod licet non sit de fide Angelos fuisse creatos cum hoc uniuerso; sine temeritate tamen negari non posse propter dicta verba Concilij. Et idem sentit Valentia *hic qu. 12. puncto 2.* & Molina *infra qu. 61. art. 2.* Oppositum autem tenet Vasq. *disp. 224. c. 2.* qui in hoc sequitur Caietan. *loco cit.* & Sixtum Senensem, quem ipse Vasquez citat, eandemque Vasquez sententiam sequuntur Arrubal, Granados, Alarcó, & alij. Et mihi videtur sententia tenenda, quia D. Thom. omnino vidit illam decretalem, imo interpretatus est illam *opuscul. 33.* (quod inter opuscula indubitata S. D. circumfertur.) Vbi explicans verba citata Concilij scilicet, quod *simul ab initio temporis, &c.* dicit in illis verbis Concilium duplicem errorem excludere, tum Aristotelis, qui posuit omnia esse ab æterno; & ideò ponitur *ab initio temporis:* Tum Origenis, qui posuit creaturas spirituales per se fuisse creatas à Deo, illis verò peccantibus creasse corpora, quasi vincula quædam quibus substantiæ spirituales alligarentur. Et propterea dicit Concilium, *simul vitamque condidisse naturam.*

13 Quod verò admittendo quod Angeli non fuerint creati ab æterno, an in sua duratione propria creati sint, ante tempus tamen corporeum, quod est motus cæli, Concil. non se intromisit. Vnde ly *ab initio temporis* solum significat ab initio creatæ durationis, & non ab æterno. Neque enim Concilia solent aliquid definire, nisi contra errores determinatos: nullus autem error erat in hac sententia Græcorum, & S. Greg. Nazianz. vt D. Thom. docet; & ideò etiam post dictam decretalem rectè sensit, nihil contra illam esse definitum. Neque obiter Concil. explicauit mentem suam circa productionem Angelorum simul cum uniuerso, quasi ex hoc opposita sententia sit temeraria, solum quia obiter id dixerit Concilium, quia vt temeraria sit opposita sententia, deberet Concil. expressioribus verbis loqui contra prædictam sententiam, & non illis generalibus, quibus solum significat non fuisse spirituales creaturas factas ab æterno, quando dicit *ab initio temporis creatam*, vt ponderatum est.

Nihilominus sententia Græcorum licet erroris, aut temeritatis notam non habeat propter dicta; saltem taliter quod certò temeraria sit, tamen hodie vix aliquid habet probabilitatis, tum quia in contrarium ponderat omnis fere autoritas Doctorum Latinorum; tum quia congruentior est locutioni Scripturæ, & decisioni Concilij, quia licet non sit expressè locutum contra hanc sententiam de creatione Angelorum ante corpora, tamen illud Verbum *ab initio temporis* videtur sumplisse in significatione vsuali, & communi, qua nomen *temporis*, sumitur pro duratione, & mensura motus cæli. Et Scriptura dicendo quod omnia creauit simul, etiam ly *simul*, sumendum est in propria, & rigorosa significatione quatenus significat coexistentiam durationis, & temporis, etsi non instantaneam, quasi eodem instanti omnia creata sint, saltem similitudine temporis non discontinuati. Vnde simpliciter hæc sententia conformius loquitur ad Scripturam, & Concilium. Tum denique quia constat Angelos peccantes cecidisse de cælo in infernum, Lucæ 10. *Videbam Sathanam tanquam fulgur de cælo cadentem.* Esaiæ 14. *Quomodo cecidisti de cælo Lucifer, qui mane oriebaris?* Apocal. 12. *Draco pugnat, & Angeli eius, & non valuerunt, neque locus inuentus est eorum amplius in cælo.* Constat autem quod Dæmones statim post creationem suam peccauerunt, quia dicitur Ioan. 8. *Ille homicida erat ab initio, & in veritate non stetit:* ergo quando Angeli creati sunt, in cælo creati sunt, aut certè paulò post in cælo fuerunt, quia de cælo ceciderunt, quando peccauerunt; peccauerunt autem ab initio paulò post creationem suam: fuerunt ergo creati cum rebus corporeis, quia cælum ex quo deiectioni sunt, corporeum est, & infernus in quem sunt proiecti, & ignis qui Diabolo paratus est, res corporeæ sunt.

Ex hoc autem etiam deducitur, valde probabilis, 15 & ferè certa consequentia, Angelos fuisse creatos in cælo, siquidem ceciderunt de cælo, & ceciderunt paulò post creationem suam: ergo verisimile est in ipso cælo fuisse creatos. Quod etiam ex autoritate Strabi *super illud Gen. 1. In principio creauit Deus cælum, & terram*, probat D. Thom. *infra qu. 61. art. 4.* & ratio id etiam persuadet, quia Angeli etiam sunt partes huius uniuersi, & connexionem habent cum corporibus eius, quia mouent cælos, & ad hæc inferiora sæpè mittuntur, & corpora assumunt vt constat ex Scriptura, inconueniens est autem dicere, quod creentur aliqua, quæ pertinent ad hoc uniuersum sine cōnexionem ad illud, sed omnino separata, siue quoad tempus, siue quoad locum: ergo in hoc uniuerso corporeo conditi sunt Angeli, sicut ad gubernandum, & ministrandum in illo ordinati sunt.

In quo autem cælo Angeli fuerunt creati, an in 16 supremo, cælo, quod est empyreum, an in aliis cælis, vel in suprema parte aeris, non omnino constat ex Scriptura, quæ solum dicit Angelos de cælo cecidisse; nomine autem cæli non solum intelligitur cælum supremum, sed etiam alij. Communiter tamen tenetur quod in supremo cælo creati sunt; tum quia spirituales substantiæ excedunt dignitate sua, omnia corporea, locus autem semper dignitati responderet, vt patet in ipsis corporibus, quæ quanto sunt nobiliora, tanto in superiori loco collocantur. Cur ergo hunc ordinem prætermisisset Deus in substantiis spiritualibus respectu corporum? tum etiam quia id dicunt S. Isidorus, & Strabus citati à D. Thom. *qu. 61. art. 4.* Tum denique quia id significatur in Scriptura, Ezechielis 28. Vbi sub figura principis Tyri loquitur de primo Angelo ante suum

suum lapsum de illo, *In deliciis paradisi Dei fuisse, tu Cherub extensus, & protegens, & posui te in monte sancto Dei.* Et infra. *Et eieci te de monte Dei, & perdidisti, o Cherub protegens;* sed Cherub, seu Angelus peccans proiectus est de cælo, ut constat ex præcitaris testimoniis Scripturæ: ergo ille mons, & ille paradysus de quo loquitur Ezechiel est cælum; cælum autem quod est paradysus non est cælum aëreum, sed cælum empyreum, in quo erunt omnes Sancti: ergo in illo creati sunt Angeli. Sentit autem D. Thom. loco nuper citato ad 2. propter quandam auctoritatem Augustini. 3. super Genes. ad litteram cap. 10. nulum esse inconueniens quod superiores Angeli qui habent virtutem eleuatam, & vniuersalem supra omnia corpora sint in supremo creaturæ corporeæ creati: alij verò habentes virtutes magis particulares sint creati in inferioribus corporibus.

Difficultates circa corporeitatem Angelorum enodantur.

17 Explicauimus *suprà* quo sensu multi sanctorum Patrum quos ibi retulimus, asserant Angelos corporeos esse, aut saltem id inter opinabilia ponant, aliqui etiam Filios Dei, qui in Scriptura dicuntur generasse gigantes ex filiabus hominum, Angelos esse dicunt: sed tamen quod generauerint propria vi, an semine aliunde excepto, non exprimunt, certius tamen est filios Dei ibi non intelligi Angelos, sed veræ religionis ac fidei homines ex progenie Seth descendentes, nec enim filij Dei vocari possent Dæmones, sed boni Angeli, boni autem Angeli ex mulieribus non generassent, etiam desumpto aliunde semine. Difficultatem etiam facit quod in VII. Synodo, Generali actione 5. cuiusdam Ioannis Episcopi testimonium approbatum est à sancta Synodo, dicentis Angelos posse depingi, quia corporei sunt & pictura ipsa imitabiles. Quod utique de corporeitate vera procedit, nam aliàs frustra illa ratio adduceretur ad probandum quod possint depingi pictura verè & propriè corporali, qualis est apud nos. Ad quod etiam accumulatur alia motiua, ut quod Dæmones torqueantur igne corporeo, quod non videtur posse intelligi, nisi ipsi aliquod corpus habeant: tum quia aliquibus rebus corporeis fugantur Dæmones, ut fumo iecoris piscis cuiusdam, Tobie 6. & similiter ad melodiam citharæ Dauid spiritus malus recedebat à Saul, 1. Reg. 16.

18 Secundò, est difficultas in hac parte circa rationem, qua D. Thom. probauit in art. 1. Angelos esse incorporeos opposito modo, quo probauit *suprà* quest. 14. Deum esse intellectualem, videlicet, quia est immaterialis, seu incorporeus; hinc autem vice versa probat Angelos esse incorporeos, quia sunt intellectuales. *Conueniens* (inquit) *est dari creaturas intellectuales: ergo incorporeas.* Quod verò debeant dari creaturæ intellectuales ex eo probat, quia conueniens est dari aliquas creaturas, quæ assimilentur Deo, non solum quantum ad esse, & operari, sed etiam quantum ad modum operandi, Deus enim causat per intellectum, & voluntatem quasi ex fine præintel-
Ioan. à S. Thom. in 1. part. D. Th. Tomus alter.

lecto agens, & seipsum mouens: ergo oportet quod aliquæ creaturæ sic operentur. Hanc rationem quasi minus efficacem omittit Vasquez quia solum quandam congruentiam affert. Ipse verò probat Angelos esse incorporeos, tum ex magna velocitate, qua mouentur, sicut Iob. 1. dixit Sathan, *Circuui terram & perambulauit eam:* tum ex eo quod intrant in humana corpora: & ea penetrant sine diuisione, quod non possunt facere si non essent corporei. Instatur autem contra rationem D. Thomæ: non enim sequitur quod si aliqua causa producat effectum sibi similem in esse, & in operari, producat etiam effectum sibi similem, etiam in modo operandi, cum potius causa æquiuoca (qualis est Deus) semper producat effectum sibi dissimilem in modo operandi, & essendi: & dato quod producat Deus entitatem sibi similem in tali modo operandi, sicut operatur Deus, nempe per intellectum, non sequitur quod produxerit Angelos seu creaturas purè intellectuales, & incorporeas: sufficit enim ad hoc ut habeatur ista perfectio intellectualitatis in vniuerso, quod produxerit creaturas intellectuales alicui corpori vnitas, sicut anima hominis vnitur corpori humano, aut sicut aliqui existimarunt intelligentias esse vnitas corporibus cælestibus, vel corporibus aëreis, vel igneis. Ac denique totum hoc solum procedit ex quadam congruentia, quia in his quæ Deus liberè facit, non potest adduci ratio sufficiens ex natura rei, quare hoc vel illud fecerit, sed solum ex iudicio suæ sapientiæ: productio autem Angelorum est omnino libera.

Ad primam, quantum ad difficultatem ex PP. 19 iam *suprà* respondimus. Ad illud autem testimonium ex VII. Synodo, Respondetur in primis quod illud testimonium non fuit approbatum à Concilio: sed Patriarcha Tarasius, postquam lectus est liber, in quo continebatur illud testimonium, significauit Synodo, & dixit quod *Ille pater ostendit in illo libro quod & Angelos pingere oporteat quando circumscribi possunt, & ut homines apparere.* Et Synodus respondit: *Etiā domine.* Itaque Synodus non approbat illum librum Episcopi Ioannis, ubi illud testimonium habetur, sed solum respondet Patriarchæ quod ita habetur in illo libro, sicut ipse dixit. Vnde non oportet quod rationem illam approbauerit quare Angeli deberent depingi, scilicet quia sunt corporei, sed solum illud testimonium accepit, quantum ad hoc quod est Angelos posse depingi, quia circumscribi possunt, & quia apparuerunt in figura humana, quod totum verum est: sed quod ipsi sint corporei hoc non approbauit Concilium: sufficiebat enim pro illo articulo, qui tunc tractabatur in Concilio, nempe de adoratione imaginum, & quod licet possent depingi imagines Angelorum, quod ita asseruisset ille Episcopus, cuius testimonium recitabatur, & quod Angeli apparuissent in forma corporea, licet in se corporei non sint. Quod verò etiam admiserit Concilium rationem ibi insinuatam, quod Angeli corporei sint, non solum in apparentia & in corporibus, quæ assumunt, sed etiam in substantia sua, hoc neque Concilium admisit, neque pertinebat ad suum institutum.

Ad ea verò quæ obijciuntur ex parte poenæ, 20 Dæmonum, Respondetur quod spiritus patiuntur ab igne corporeo, ut instrumentum est

diuinæ operationis alligantis eos, & cruciantis per illum ignem corporeum: non autem quod ignis ille ratione suæ actiuitatis corporeæ agat in ipsos: alioquin probaretur etiam quod anima humana non esset substantia spiritalis, quia quando separata est, etiam cruciatur igne illo. De modo autem quo ignis ille agit in spiritus diuina virtute, dicemus *infra circa quæstionem 64.*

21 Ad illud verò quod dicitur de rebus corporeis, quibus Dæmones fugantur. Respondetur ex D. Thom. *q. 6. de potentia art. 10. & hic q. 115. art. 5.* quod huiusmodi res corporeæ non operantur in ipsos Dæmones virtute propria, sed vel virtute diuina, seu superioris Angeli, qui potest cogere ipsos Dæmones, vel quia ipsi Dæmones alliciuntur rebus corporalibus tanquam signis quibusdam, quia exhibentur eis in signum honoris diuini, cuius sunt cupidi, vt ex D. August. *ibi docet 21. de Ciuit. cap. 6.* Quare fumus illius iecoris Tobie 6. non fugauit Dæmonem virtute sua corporeæ, sed vt dicitur *cap. 8.* quando Tobias protulit partem iecoris, posuitque eam super carbones viuos, *tunc* (inquit textus) *Raphael Angelus apprehendit Daemonium, & religauit illud in deserto superioris Ægypti.* Non ergo fumus iecoris fugauit Dæmonem, sed ad positionem illius (& fortasse propter mysterium quod significabat) virtute superioris Angeli, scilicet Raphaëlis, Dæmon ille apprehensus, & religatus est. Illud autem quod dicitur de musica David, Respondetur, quod spiritus ille malus recedebat cantante David, & pulsante citharam virtute diuina, vel propter hymnos illos, & psalmos quos canebat David, qui erant verba sacra, ad quorum deprecationem virtus diuina fugabat Dæmones: vel etiam disponebat animam Saülis per musicam, vt reduceretur ad statum magis pacatum, & sic excitaretur magis ad Deum, & minus esset dispositus vt spiritus malus exagitaret illum; id enim virtute musicæ fieri posse, & propter hoc excogitatum esse quod in omni cultu diuino aliquid consonantiæ musicæ exerceatur, vt animus hominis excitetur ad Deum, docet S. Thom. *super Psalm. 32.* explicans illud verbum *Constituimini Domino in cithara, &c.*

22 Ad secundum Respond. D. Thom. congruentissimam rationem reddidisse ex parte ipsius vniuersi, quod postulat esse perfectum, & integrum in suis partibus, & gradibus, ex quibus constat, inter quos præcipuus est gradus spiritalium substantiarum. Congruentiæ autem P. Vasquez nullius momenti sunt, nec aliquatenus probant spiritalitatem Angelorum, quæ efficaciter probari non potest, nisi ex operatione per se spiritali, qualis est intellectio. Velocitas autem quantumcumque magna, non probat spiritalitatem, quia etiam corpora maxima velocitate moueri possunt, vt patet in corpore graui quando multum ponderosum est, quod incredibili velocitate mouetur, & longè maiori cælum ipsum: nam, vt astrologi notant, stellæ quæ sunt in circulo maiori firmamenti tanta celeritate voluntur, vt in minutæ horæ pertranseant plusquam septingenta millia leucarum; quod est plusquam centies circuire totam terram in minuto horæ. Quod verò intrent Angeli in corpora, dici potest id tribui subtilitati suorum corporum, sicut aer intrat per poros, vel quia possunt adeo subtiliter diui-

dere corpus, vt ad illud intrent quin sentiantur. Quod autem in vno homine possint esse multi Dæmones, non probat efficaciter spiritalitatem, cum possit subtile corpus in minorem locum contrahi, vel in maius extendi. Quare istæ congruentiæ Vasquez valde infirmæ sunt ad probandum Angelos carere omni corpore, sed solum probant carere corpore crassiori, & imperfecto. Ratio autem Diui Thomæ optimè probat incorporeitatem in Angelis ex operatione maximè incorporea, qualis est intelligere, cum quo tamen stat quod etiam optimè probauerit Deum esse intelligentem, quia est immaterialis, & incorporeus, quia ibi processit à priori, hinc à posteriori, eo quod ex effectibus creatis prius nobis innotescit Deum carere corpore, seu esse immaterialem, quia est primus motor, non motus ab alio; atque adeo carens potentialitate: ergo materialitate. In Angelis verò magis est nobis notum quod intelligatur, eo quod effectus eorum apud nos ex locutione, & aliis intelligentiæ actibus magis innotescunt, & ex intellectualitate rectè probatur spiritalitas: quod verò ita sine puri spiritus quod nullum corpus informet, ex eo probatur, quia sunt substantiæ intellectuales perfectæ, & non sicut nos. Vnde cum intellectualitas de se abstrahat à corpore, nec petat illud, sed potius impediatur per corpus, necesse est quod si dantur creaturæ intellectuales cum vnione ad corpus, quod imperfectiorem in eo genere dicit, dabiles sint aliquæ creaturæ in illo genere intelligendi perfectæ, atque adeo omni tempore, & corporeo affectu carentes.

Ad instantiam verò contra rationem Diui Thomæ qua probat debere dari has creaturas intellectuales, vt dentur aliquæ creaturæ quæ perfectè assimilantur Deo in modo operandi, Respondetur, optimè sequi quod causa perfectè assimilans sibi effectum, debet illi communicare suum modum essendi, & agendi, quantum fuerit possibile, scilicet causa vnioca secundum eandem speciem atomam: æquioca verò secundum analogiam, & proportionem similitudinis quantum ad gradum, non quantum ad speciem, & sic intra illum gradum debet assimilare sibi effectum modo sibi possibili: tunc autem assimilatur, quando facit illum non solum existentem, sed etiam operantem. Modus autem operandi est duplex, scilicet executiuus tantum, sicut qui operantur sine cognitione: executiuus directiuus, sicut qui operantur per intellectum qui dirigit, & per potentiam mouentem quæ exequitur. Et hic est altior modus assimilandi Deo in tantum quod natura intellectualis dicitur facta ad similitudinem, & imaginem Dei. Sicut ergo non est contra analogiam ad Deum causantem quod producat aliquis effectus non solum existens, sed etiam operans, ita non est contra analogiam Dei ad creaturam, quod producat aliqua creatura, quæ sit similis Deo in operando directiue, seu per intellectum, cum distantia tamen infinita in ipso ordine naturæ.

Ad alteram verò instantiam Respondetur, 24 quod D. Thom. *in hoc art.* solum probauit debere dari creaturas spirituales, & incorporeas, quæ sunt Angeli. Quod verò totaliter, & perfectè sint spirituales

spirituales, nec habeant corpora sibi naturaliter unita, probat *questione sequenti, articulo primo*, ex perfecta assimilatione ad Deum in gradu intellectuali, eo quod inconueniens est dari naturam intellectualem creatam solum in gradu imperfecto, & deesse perfectum gradum in linea intellectuali, quæ tunc est perfecta, quando caret omni corpore, quia intelligere ex adiunctione corporis imperficitur, & ex abstractione ab illo constituitur. Hæc autem ratio non probat efficaciter Deum de facto produxisse Angelos, sed solum probat id connaturaliter exigi ad perfectionem vniuersi, & ad perfectionem lineæ intellectualis. Vnde solum procedit ex suppositione quod Dei perfecta sunt opera, & maximè integrum est opus totius vniuersi.

ARTICVLVS II.

Vtrum Angelus careat omni compositione materiae, & formæ.

ET si D. Thom. in art. 1. huius *quest.* probatum reliquerit dari creaturas spirituales omnino incorporeas, quæ sunt Angeli, quia intellectuales: restabat tamen dubium, an ista entitas spiritalis sit omnino expers omnis compositionis ex materia, & forma, ita quod sit forma simplex subsistens, an verò detur in eis aliqua materia, siue similis nostræ, siue alterius rationis, siue corporea, siue spiritalis: licet enim apud D. Thom. idem sit aliquid esse corpus, & esse compositum ex materia, tamen apud alios non est idem: nam Auerrhoës sensit cælum non esse compositum ex materia, & forma licet sit corpus, quia extensum est, ut videmus, & Avicbron in *lib. fontis vitæ*, quem citat D. Thom. *opuscul. 15. cap. 5.* & in hac *questione artic. 3.* dixit substantias spirituales, quales sunt Angeli, esse compositas ex materia, & forma, ut ratione materiæ conueniant cum natura corporea; & quidam ex Theologis Scholasticis etiam admittunt dari in Angelis materiam, ex qua componantur, sed spiritualem, & distinctam à natura corporali, quod tribuitur Alesii 1. p. *quest. 20. membro 1. in fine*, & qu. 44. *membro 2.* D. Bonnauen. in 2. *dist. 3. art. 1. qu. 1. ad 2.* Aureol. apud Capr. in 2. *dist. 3. quest. 1. circa 1. conclus.* & aliis. Quare distinctam difficultatem debuit D. Thom. excitare circa corporeitatem Angelorum, & circa simplicitatem, seu incompositionem ex materia, & forma, sicut etiam *suprà quest. 3.* disputando de Deo primò ostendit in Deo non esse corpus, deinde non esse compositum ex materia, & forma.

Sententia Diui Thomæ.

Certa nihilominus est D. Thom. sententia, quæ duas continet partes.

Prima, Angeli non sunt compositi ex materia, & formaloquendo de materia corporali, qualis inuenitur apud nos.

Secunda Angeli ex nulla materia sunt compositi, etiam si fingatur dari materiam spiritualem, quæ quantitati subiecta non sit. Illa enim dicitur materia corporea, quæ quantitate afficitur, quia omne quod est extensum, corpus est; unde sequitur Angelos esse formas simplices, id est,

non habentes aliam entitatem quàm formæ, in qua subsistunt quasi formæ completæ, & non facientes compositionem cum aliqua alia parte quæ dicitur materia. Probat. D. Thom. hanc sententiam primò generaliter ostendendo quod Angeli sunt formæ simplices, & consequenter omni materia carent. Secundò discurrendo per utramque materiam, siue nostram corporalem, siue alterius rationis spiritualem, & singulas excludendo.

Primum probat D. Thom. *opusculo 15. cap. 18.* ex Scriptura, & PP. Ex Scriptura quidem, quia Angeli nominantur virtutes, sicut dicitur Psal. 102. *Benedicite Domino omnes Angeli eius, benedicite Domino omnes virtutes eius*: Et Luca 21. *Virtutes cælorum commonebantur*; quod de sanctis Angelis omnes Doctores exponunt. Si autem Angeli essent materiales ex quacumque materia, non possent dici virtutes, sed habentes virtutes: virtus enim est forma operatiua; nihil autem compositum ex forma, & materia dicitur sua forma, sicut homo non dicitur sua humanitas, vel sua anima, vel sua virtus: esset enim incongrua prædicatio, *homo est anima, homo est virtus*, sed est habens animam, & habens virtutem: ergo si Scriptura Angelos nominat virtutes, sicut etiam nominat Potestates & Principatus, manifestum est quod sentit eos esse formas, non autem compositos ex materia, & forma, aut loquitur Scriptura in sensu improprio, quod sine vlllo fundamento in hac parte diceretur, cum aliunde nobis non constet ex ipsa Scriptura Angelos esse compositos, ut dicamus improprie loqui quando illos vocat virtutes.

Ex Patribus hoc idem probat D. Thom. & præcipuè ex D. Dionysio, qui cæteris abundantius Angelorum notitiam nobis tradidit. Eamque doctrinam ex Apostolis hausit, præcipuè ex Paulo, cuius discipulus fuit. Inquit ergo S. Dionysius de Angelis loquens in 4. *cap. de diuinis nominibus*, quod *Intellectuales substantia ab vniuersa corruptione, morte, & materia munda existunt, & sicut incorporeales, & immateriales intelliguntur*. Vbi non solum excludit Dionysius corporeitatem ab Angelis, sed etiam omnem aliam materiam: tum quia ab vniuersa materia dicit esse immunes: tum quia non solum incorporeales, sed etiam immateriales nominat. Similiter in 1. *cap. de celesti Hierarchia*, Hierarchias materialibus figuris variis tradidit, & in 2. *cap. eiusdem libri*: quærit quare sacri Doctores ad corporealem formationem incorporaliū, scilicet Angelorum venientes, non figurauerunt ea pretiosissimis figuris, sed immaterialibus substantiis, & deiformibus simplicitatibus terrenas figuras imposuerunt. Vbi aperte supponit, Angelos ita esse immateriales, quod sunt simplices, & consequenter omni compositione carent. Quod est esse solum formas, quia non possunt Angeli esse sola materia, quia Angeli operatiui sunt, materia autem sola non est operatiua, sed receptiua; & ita operatio sequitur formam. Si ergo Angelus est simplex, & operatiuus: ergo est forma, non materia. Citat enim D. Thomas Augustinum 2. *super Genesim ad litteram*, ubi dicit, quod *Conditio spiritalis, & intellectualis creatura lucis appellatone intimatur, quæ primo die est condita, in qua natura intelliguntur omnes sancti Angeli, atque virtutes*. Et Damascenum, qui dicit, quod *Angelus est substantia intellectualis, & incorporea*. Et sumit incorporeum pro eo, quod est immateriale: subdit enim,

Hh 4 quod

quod *Incorporeus*, & *immaterialis* dicitur Angelus quoad nos : omne enim comparatum ad Deum crassum, & materiale inuenitur. Sentit ergo Damasc. quod Angelus caret materia corporea, & quacumque alia materia compositiua, qualem nos habemus, quia non solum incorporeum, sed etiam immaterialem dicit respectu nostri. Quod autem comparatione ad Deum dicatur materialis, non est quia habeat materiam, quæ est pars compositi, sed quia non adæquat diuinam simplicitatem eo quod est compositus ex esse, & essentia, ex natura, & subsistentia, habetque potentialitatem, & non est actus purus, potentialitas autem modum habet materiæ, seu materialis subiecti respectu accidentium.

5 Secundò prob. sententia D. Thom. excludendo omnem rationem materiæ ab Angelis, & primò excludit materiam corporalem, qualis est in nobis in art. 2. huius quæst. & opusculo citato 15. cap. 6. & 7. Nam si in Angelis esset materia corporalis, non posset eadem pars, seu entitas materiæ informari à forma Angelica spiritali, & à corporali: sic enim resurgeret vnum per accidens ex duplici forma, spiritali, & corporali, quia haberet duplicem speciem, cum vnaquæque forma suam speciem daret. Quare sicut anima hominis, quæ spiritalis est, nullo modo informat materiam cum aliis corporalibus formis constituentibus diuersam speciem, sed habet suam materiam segregatam ab illis, ita si Angelus componeretur ex materia nostra, & forma spiritali Angelica, non deberet eandem materiam informare, quam aliæ formæ corporales, sed partem aliquam seorsum. Si autem materia illa quæ informaretur forma Angeli, esset diuersa, & segregata à materia, quæ est sub forma corporea: ergo etiam erit capax vt diuidatur ab illa parte materiæ, quæ est in corpore eo modo quo vna pars materiæ diuiditur ab alia, scilicet per quantitatem: nec enim alio modo materia, quæ in nobis est, diuiditur & segregatur in portiones materiæ, quæ sunt sub diuersis formis, nisi per quantitatem: ergo si portio materiæ quæ informatur ab Angelo segregata est, & diuisa ab ea quæ informatur formis corporeis ratione quantitatis diuisa erit, & segregata: ergo Angelus, qui est compositus ex tali materia, actus est diuisus ab aliis corporibus per quantitatem. Et vterius cum materia sit eiusdem rationis cum nostra, capax erit quantitatis, sicut nostra, saltem radicaliter: imò si actu est diuisa vna pars materiæ ab alia per quantitatem, actu debet habere illam, aliàs non diceretur diuidi per illam: si non afficitur illa. Sed Angelus, vt ostensum est *precedenti artic.* est omnino incorporeus cum sit substantia intellectualis perfecta, cum intellectualitati obstat corporalitas, redditque minus perfectam substantiam intellectualem: ergo repugnat etiam quod Angelus sit compositus ex materia simili nostræ, sed pro eodem debet reputari, quod careat corporeitate, & quod careat materia, quia non potest materia secundum aliquam partem sui vniri spiritali formæ Angeli, nisi separetur per quantitatem; atque aded afficiatur illa; vbi autem est quantitas, ibi est corpus.

6 Quoad secundam verò partem probatur à D. Thoma dupliciter, non posse esse in Angelo materiam alterius rationis à nostra, etiam si fingatur esse materia spiritalis. Primò ex eius operatione, quæ nullam exigit materiam, & consequenter neque substantia Angeli quæ talis operationis radix est. Secundò ex impossibilitate materiæ spiritalis.

Primum ostenditur, quia operatio propria, intellectualis substantiæ est intelligere: intelligere autem est operatio immaterialis, quia perficitur per denudationem sui obiecti à conditionibus materiæ, non solum vt materia dicit corporeitatem, sed prout dicit modum recipiendi coarctatum ad formas proprias, id est, ad recipiendum formas entitativæ, & ad componendum vnum tertium siue substantiale, siue accidentale, non vt fiat alia à se, vt natura cognoscens, vt latè ostendimus *precedenti tomo circa quæst. 14. disp. 16. a. 1.* Et breuiter patet, quia intellectus recipit species intentionales modo immateriali, quia nō recipit illas, sicut materia recipit formam ad constituendam vnam tertiam entitatem, sed recipit illas representativè, ita vt totum quod est in obiecto, sit in intellectu; & sic intellectus fiat aliud à se. Ergo operatio intellectus, tam ex parte obiecti quod potest intelligere in vniuersali, quàm ex parte modi respiciendi species & informationes obiecti representati in illis, immaterialis est, quia modus recipiendi informationem obiecti non est secundum materiales conditiones, vt *loco citato* explicauimus: & obiectum in vniuersali abstrahit à conditionibus indiuidualibus, quæ sunt materiales conditiones. Ergo si operatio intellectualis non exigit materiam, præsertim quando ita perfecte est, sicut in Angelo, neque etiam substantia eius eam exigit, quia substantia, seu natura est radix, & principium operationis: ergo si ad operationem illam intelligendi non exigitur materia, neque ad constituendum eius principium in ipsa ratione naturæ spiritalis id exigitur. Et si fuerit perfecta in ratione intellectuali, & in spiritualitate, neque ex illa componi, neque cum illa componere, seu illi vniri exigit, sicut exigit anima nostra, propter imperfectionem suam in intelligendo, & dependentiam in accipiendo obiecta à sensibus. Vterius verò deducitur implicatio, & repugnantia spiritalis materiæ ex hac parte, & sistendo in hac ratione intelligibilitatis: quia ipsa conditio materiæ primæ, vt sic in communi sumptæ, etiam si abstrahat à corporea, & spiritali, directe opponitur spiritalitati: ergo repugnat materiam primam esse spiritualem. Cōsequ. patet, quia ratio contrahens non debet repugnare, & opponi rationi communi contrahibili cum simul vniantur, & componant. Anteced. verò patet, quia modus materiæ primæ in communi sumptæ est esse receptiuam formarum stricto, & coarctato modo, scilicet faciendo illas sibi proprias, & componendo aliquod tertium entitativum ex eis, siue substantiale, siue accidentale: modus verò spiritualitatis, prout talis est, excedere istum modum sic strictum, & posse recipere formas intentionales, id est cum tanta amplitudine vt faciat alia à se, & vniat sibi res, etiam quæ secum non componunt, sed extra se sunt obiectivæ, & intelligibiles, quia spiritualitas fundat intelligibilitatem: ergo modus spiritualitatis pugnat cum modo materiæ primæ.

7 Alterum principium quod tangit spiritalis materiæ impossibilitatem vt distincta à corporali traditur à D. Thom. in dicto opusculo 15. cap. 7. cuius vis consistit in hoc, quod si materia illa distinguitur à tota materia corporali, neque potest in corporibus inueniri, necesse est quod sit spiritalis; ergo oportet quod excedat materiam corporalem non solum ratione diuersæ potentialitatis sicut materia cœlestis excedit sublunarem in sententia quod ab illa distinguitur specie, sed etiam ratione maioris abstractionis, & actualitatis eo quod materia illa non est corporea, sed spiritalis (vt ponitur)

tur: (ergo abstrahit ab omni ratione corporea, & excedit illam, siue sit forma, siue materia, quia entitas spiritualis altioris ordinis est quam corporalis: ergo quælibet substantia spiritualis, vt spiritualis sit, depurari debet ab omni eo quod corporeum est, & altioris ac perfectioris ordinis esse, sed forma corporea est actus, & non pura potentia, sicut materia: ergo si exceditur à materia spirituali, quia spiritualis substantia est, oportet quod illa materia actualior sit, seu magis habeat de actu quàm quælibet forma corporea. Si autem non est pura potentia, sed habet in se actualitatem, quatenus est perfectior quacumque entitate corporali, siue forma siue materia: ergo non potest esse materia substantialis constituens cum forma compositum substantiale per se, quia de ratione formæ substantialis componentis substantialiter, & per se vnum, est quod det primum esse, quia si dat esse substantiale, illud debet esse primum, quia illud dicitur substantiale, quod substat aliis, & est fundamentum cæterorum, & consequenter est primum: ergo materia cum qua componit forma substantialis dando primum esse, necesse est quod sit pura potentia, & nullum habeat actum, aliàs si habet illum, forma illi adueniens non dat primum esse, siquidem superuenit materiæ habenti actum, & esse. Et hoc currit in quacumque materia siue spirituali siue corporea hoc ipso quod est materia ordinata ad componendum cum forma vnum ens substantiale, & per se, accipiendo primum esse ab ipsa forma.

Solum responderi potest, vel quod non est necesse quod materia prima careat omni actu, saltem entitativo, licet careat esse formali. Vnde ex hoc non conuincitur, quod non possit dari materia spiritualis eo quod non sit pura potentia, & sit excellentior omni actu corporeo: Semper enim manet in pura potetia ad formas spirituales, licet comparatione ad genus corporeum sit superior, & actualior illo, sicut cælum in ratione corporis incorruptibilis est excellentius homine, licet simpliciter sit inferius, scilicet in esse viuentis. Vel secundò dicitur quod materia illa spiritualis non est actus spiritualis, sed in potentia sicut materia nostra non est actu corpus, sed in potentia, quia susceptiua est formæ corporeæ; & tamen cum hoc stat quod sit perfectior materia, & altior quàm corporea, quia dicit ordinem ad formam altiore, scilicet ad spirituales, & modo altiori, quàm nostra, sicut in opinione S. Thom. materia cæli est nobilior sublunari, non quia sit in se entitas actualis perfectior, sed quia dicit ordinem, & capacitatem ad perfectionem formam, & sub modo perfectiori, scilicet modo incorruptibili.

8 Sed contra primam responsionem in primis instari potest ex generali doctrina à nobis tradita in 1. Physic. & in 1. de generat. & aliis locis, quod materia prima necessario debet carere omni actu entitativo, si caret omni actu formali, eo quod actus entitativus, qui est existentia, nullo modo conuenire potest, nisi mediante formali: tum quia forma est actus primus, & existentia vltimus in ordine entitativo, cum sit vltimum quod intendit agens, & tunc cessat actio, quando ponitur existentia, & terminus in facto esse: tum quia existentia non habet determinatam speciem nisi ratione formæ ad quæ sequitur, quæ est prima ratio specificandi, vnde perinde est ponere actum entitativum sine forma ac ponere existentiam sine specie à parte rei: materia enim ex se nullam habet speciem in actu determinatam, quia nullam habet formam, quæ est ratio & principium cuiuscumque specificationis, sed so-

lum est capax cuiuscumque speciei, sicut cuiuscumque formæ. Sed dato quod materia prima habeat ex se actum entitativum, fortius instauratur nostrum argumentum, quia in tali casu materia spiritualis haberet actum entitativum spirituales: sed actus entitativus, seu esse spirituale excedit quodcumque esse, & quamcumque existentiam corporealem, siue sit formæ, siue materiæ, quia superioris ordinis est: ergo ipsa materia spiritualis quæ tam perfectum esse habet ex se, etiam ex se superat in actualitate omnem formam corpoream: quod autem est entitas actualior quàm forma quævis corporea, non potest esse pura potentia in ratione substantiæ, sicut requiritur ad rationem materiæ substantialiter componentis, quia tunc non solum excedit actum entitativum, sed etiam formalem, nempe formas corporeas: ergo non solum est actus entitativus, sed plusquam formalis, quod est contra rationem materiæ quæ in genere substantiæ debet esse pura potentia, saltem excludendo omnem actum, & perfectionem formalem. Et licet formæ corporeæ possint esse in alio genere nobiliores, scilicet in informando, tamen ad exclusionem materiæ sufficit quod in genere substantiæ non sit pura potentia.

Contra secundam autem responsionem instatur, 9 quia licet vna materia possit differre ab alia per ordinem ad formam extrinsecam, quam respicit, & penes modum diuersum recipiendi, tamen semper in se debet supponi quod sit pura potentia in genere substantiali, eo quod potest componere cum forma substantiali recipiendo ab ipsa primum esse simpliciter; hoc autem non consequitur si semel ponimus dari materiam spirituales, quia licet intelligi possit quod in comparatione ad formas spirituales sit in potentia vel imperfectior illis, tamē comparatione ad naturam corpoream necessario debet habere maiorem perfectionem quàm illa, quia eleuatur supra omnem ordinem naturæ corporeæ, & abstrahit ab omni imperfectione corporalis naturæ: ergo hoc non potest intelligi, nisi habeat actualitatem entitativam, & substantialem, quæ excedat actualitatem naturæ corporeæ, quia per solam puram potentiam non posset habere perfectionem supra totam actualitatem ordinis corporei: perfectio enim sequitur ad actualitatem, non ad potentialitatem in entibus: sicut etiam videmus quod intellectus possibilis nostræ animæ, licet sit in pura potentia intelligibili ad omnes formas intelligibiles, tamen quia spiritualis entitas est, excedit in perfectione omnes formas corporeas, & habet actualitatem perfectiorē illis: ergo similiter materia spiritualis licet esset in potentia ad formas spirituales, tamen in se deberet habere actualitatem superantem omnem actualitatem corpoream, & consequenter in genere substantiæ deberet habere aliquem actum; & sic non posset componere cum forma substantiali accipiendo ab ipsa primum esse simpliciter in genere substantiæ.

Vnde patet, non esse simile de materia cælesti, & sublunari, quia materia cælestis etiam si specie distinguatur à sublunari, tamen cum corporea sit non est necesse quod habeat eleuationem secundum actualitatem supra formas corporeas, sed quod maneat in pura potentia, solumque distinguatur à materia sublunari per ordinem ad diuersam formam quam recipere potest, & diuersum modum recipiendi illam quàm materia sublunaris, scilicet modo incorruptibili: materia autem spiritualis si daretur, ex vi suæ spiritualitatis non solum eleuaretur supra materiam corporealem, sed etiam supra formas corporales, vt ostensum est, quod

quod non posset esse, manendo in pura potentia substantiali, sed retinendo actualitatem, etiam formalem, scil. supra illas formas.

Soluntur argumenta.

10 Primò arguitur ad probandum dari in Angelis materiam physicam similem nostræ: quia substantia Angeli, etiam in ratione substantiæ, aliquam habet compositionem, alioquin si omni compositione careret in genere substantiæ æquaretur simplicitati diuinæ, quantum ad id quod substantiæ est, sed materia non est aliud quàm potentia substantialis pertinet ad compositionem: ergo si in genere substantiæ admittunt potentialitatem, etiam admittunt rationem materiæ. Vnde remota materia non apparet quomodo distinguatur Angelus à Creatore, & ab eius simplicitate, si nulla duplicitas inuenitur in substantia Angeli tanquam partes eius, sed totum quod substantia est, simplex est. Nec poterit esse medium inter purum actum, & puram potètiā, nisi participet utroque extremo, sed purus actus est Deus, & pura potentia est materia: ergo Angelus, qui est medium inter illa de utroque debet participare, & sic aliquid debet habere de materia.

Confit. quia Angelus est compositus ex genere, & differentia, cum sit in prædicamento substantiæ, & per varias species distinguatur: sed genus sumitur à materia, & differentia à forma, & non sumitur à materia, quæ est subiectum accidentium, sed quæ est subiectum formarum substantialium, quia genus substantiale est, & sic à materia substantiali debet sumi: ergo in Angelis datur materia substantialis, & similis nostræ, qua per eam conuenit vniuocè in genere cum substantia corporea. Nec sufficit dicere quòd conueniunt in materia metaphysica, non physica: nam materia metaphysica est ipsum genus: ergo si hæc sumitur à materia metaphysica, idem erit dicere quòd genus sumitur à materia, ac dicere quòd genus sumitur ex genere.

Secundò confirmatur ex illo dicto Augusti 12. *confessionum cap. 21.* quòd *Deus fecit materiam communem visibilem, & inuisibilem*: nomine autem inuisibilem intelligitur Angeli. Et similiter Boëtius in 1. de Trinit. dicit, quòd *forma simplex subiectum esse non potest*: sed Angelus est subiectum multorum accidentium: ergo non est forma simplex: ergo aliquid compositum ex materia, & forma.

Respondetur, quòd Angelus in genere substantiæ aliquam habet compositionem, non quidè ex partibus substantialibus, quia est sola forma subsistens, sed ex ipsa forma, & subsistentia, ex substantia, & esse, quod etiam pertinet ad compositionem substantialem, & intra genus substantiæ, quia subsistentia licet non sit pars compositiua substantiæ, est tamen terminus, & similiter ipsa existentia. Et hæc etiam vocatur compositio metaphysica in quantum distinguitur à partibus physicis, & sic natura substantialis dicitur materia metaphysica respectu subsistentiæ, & existentiæ, id est, res terminabilis ab illis. Et præterea etiam in genere substantiæ habet potentialitatem, quatenus est subiectum accidentium: nam esse subiectum pertinet ad substantiam, caret tamen subiecto susceptiuo formæ substantialis, non tamen ex hoc æquatur simplicitati diuinæ, etiam in genere substantiæ, quia substantia diuina nec ad partes, nec ad subsistentiam, nec ad existentiam, nec ad accidentia, vel operationes est in potentia, & sic est actus purus,

etiam in genere substantiali: materia autem dicitur potentia substantialis, non quomodocumque, sed in ordine ad componendum cum forma substantiale tanquam cum parte, & principio specificationis, cum quo componit ipsam naturam seu speciem. Potentia autem ad recipiendum existentiam & subsistentiam, qui sunt termini substantiales, etiam substantialis potentia est. Vnde ut distinguatur simplicitas Angeli à simplicitate substantiæ diuinæ, non indiget habere partes duplicatas, nec materiam compositiuam naturæ, sed sufficit habere substantiam, quæ non sit ipsum esse, sed sit in potentia ad esse, & ad subsistere, ut benè tradit D. Th. *opusc. 15. c. 8. solutione ad 4.*

Ad primam confirmationem respondetur, quòd, ut ostendimus in *Logica q. 4.* genus non sumitur à materia physica, quæ est altera pars compositi, sed ab ipso toto, quatenus in eo inuenitur aliquid de potentia, & aliquid de actu determinante, & contrahente hanc potètiā. Nec dicimus genus sumi à materia metaphysica, quæ est ipsummet genus, sed ab ipso toto, quatenus habet rationem potentialitatis respectu alicuius gradus, seu prædicati contrahentis: ad quod etiam conducit ipsa potentialitas substantiæ ad suum esse, & ad suum subsistere, quia quod est in potentia ad existentiam, & subsistentiam potest concipi sine indiuiduatione, & consequenter in abstracto. Et ulterius in ipsa ratione abstracta potest concipi aliquid, quod est commune cum multis, & quod est propriū istius. Et illud commune dicitur potentiale, & genericū, & loco materiæ habetur. Vnde non sumitur genus à seipso, quando dicitur sumi à materia metaphysica, quia sumitur à potentialitate alicuius naturæ, secundum quam conuenit cum pluribus. Quæ potentialitas etiam vocatur materia metaphysica, quia non est potentialitas ad componendum cum forma substantiali, quæ est materia physica, sed est potentialitas vnius prædicati ad aliud, vel ipsius naturæ ad esse, vel ad subsistere. Constat autem quòd in accidentibus datur genus, & differentia intra suam propriam quidditatem, & lineam, & tamen in sua quidditate non componuntur ex materia, licet accidens dicat ordinem ad subiectum ut ad causam materialem, non ergo genus sumitur semper ex materia physica.

Ad secundam confirmationem, bene respondet D. Thom. *q. 1. de spiritualibus creaturis art. 1. ad 4.* quòd Aug. in illo loco non intendit dicere quòd sit eadem materia numero, visibilem, & inuisibilem, sed quòd etiam in spiritualibus potest intelligi aliquid informe quod nomine materiæ appelletur. Non autem dicit quòd Deus fecit materiam communem visibilem, & inuisibilem, sed quòd terra inuisibilis, & incomposita, & tenebræ super faciem abyssi potest intelligi quòd hoc totū quod cælum, & terra appellatum est, adhuc informis, & tenebrosa materia erat, vnde fieret cælum intelligibile, & terra, scilicet. omnis natura corporea, quod non est dicere utramque naturam, scilicet corpoream, & spiritalem esse factam ex eadem materia, sed quod potest intelligi, & appellari informis, & tenebrosa materia quatenus utraque sub statu alicuius informitatis, & potentialitatis potest intelligi. Ad autoritatem autem Boëtij respondet ibi D. Thom. *ad 1.* quòd forma simplex, quæ non est subiectum, intelligitur de forma simplici, non solum quæ caret materia componente, sed etiam quæ caret potentialitate, & est actus purus. Reliquæ autem formæ quæ habent aliquid potentialitatis, non dicuntur formæ simplices omnino, saltē metaphysicè. Et hoc modo Angeli possunt suscipere.

pere accidentia, quia sunt formæ, cum potentialitate ad recipienda accidentia.

12 Secundò arguitur ad probandum quòd Angeli debeant constare aliqua materia, saltem materiali. Nam nulla est implicatio, quòd detur talis materia: Nam si aliqua esset, maximè quia impedit rationem intellectualitatis, hoc autem non currit in præsentia, quia materia quæ impedit intellectualitatem est materia cum conditionibus corporeis: illa autem materia spiritualis careret istis conditionibus, quia spiritualis est. Ex parte autem ipsius materiæ, & ex parte ordinis ipsius ad formam, non est repugnantia istius materiæ spiritualis, quia valde probabilis est sententia D. Thomæ, quia dicit materiam cælestem specie distingui à sublunari, & illa specifica distinctio est ex diuerso ordine ipsius materiæ ad suam formam: ergo etiam repugnabit ex parte materiæ, & ordinis eius ad formam dari materiam propriam, & peculiarem in ordine spirituali, quæ dicetur materia spiritualis, quia solum spiritualium formarum susceptiua erit. Quòd si semel ponatur non implicare hanc materiam spirituales, non est cur negetur Angelis; nec enim nobis constat non esse productam talem materiam. Et conuenientius est sic ponere, eo quod substantia Angeli ponitur in prædicamento; principia autem prædicamenti substantiæ sunt materia, & forma, ut sumitur ex Boëtio in commento prædicamentorum, ubi dicit, quòd Aristot. in prædicamento substantiæ, relictis extremis, scilicet materia, & forma, agit de medio, scilicet de composito, per quod dat intelligere, quod sola substantia composita, est in prædicamento: ergo Angelus qui est in prædicamento, non est forma simplex.

Confirmatur ex eo quod dicit Aristot. 8. *Metaphys.* quem citat D. Thom. *q. de spiritualibus creat. art. 1. in argum. 5.* quòd si qua substantia est sine materia, statim est ens, & vnum, & non est ex alia causa, ut sit ens, & vnum: ergo idem est esse sine materia, & esse sine causa suæ entitatis. Angelus autem habet causam suæ entitatis: ergo habet materiam, non corporalem: ergo spiritua-

lem. Et secundò confirmari potest ex illo communi axiomate, quòd actus & potentia sunt in eodem genere, sed in genere spirituali datur actus, seu forma substantialis: ergo etiam dabitur potentia substantialis in eodem genere, & hæc est materia.

Respondetur: implicationem materiæ spiritualis iam à nobis esse traditam, tum ex eo quod impedit intellectualitatem, saltem in se, quam non deberet impedire, si spiritualis est; tum quia superaret omnem actum formalem corporeum, ut explicauimus: licet enim ad intelligibilitatem non conducat quæcumque materia, nec etiam materia ipsa corporalis impedit intellectualitatem ex parte formæ, quæ sibi vniretur, sicut non impeditur intellectualitas nostræ animæ ex eo, quòd vnietur materiæ corporali, tamen materia non solum impedit intellectualitatem, quia corporea est, sed quia modo entitatio recipit formas, id est in ordine ad componendum vnum tertium, & non modo intelligibili, id est ad representandum in se, & transformandum representatiuè obiecta. Vnde materia quæcumque, etiam spiritualis, si daretur, recipit formas coarctando illas ad se, & ad proprium esse quod opponitur, seu impedit modum recipiendi intelligibiliter, qui petit amplitudinem ad recipiendum non solum formas proprias, sed etiam alienas, ut latè ex D. Thoma expendimus *præcedenti tomo disp. 16. art. 1.* Vnde cum materia spiritualis si dare-

tur, etiam hoc modo entitatio reciperet formas, & non solum modo intelligibili, licet non excluderet formam intellectualem, tamen in seipsa impediret spiritualitatem, quia spiritualitas est ratio intelligibilitatis, & quòd non est seipso intelligibile, aut intellectuale, non est seipso, & in substantia spirituale: modus autem recipiendi intelligibiliter, & proprius spiritualitatis, est oppositus modo recipiendi materiæ primæ, ut *supra* ponderatum est, quia materia prima solum recipit formas entitatio ad componendum cum illis aliquam tertiam entitatem, modus verò recipiendi spiritualiter, & intelligibiliter est recipere alia à se, & non ad componendum, neque coarctando formas ad se; non ergo potest esse modus sic oppositus materiæ primæ, ei conuenire.

Ad id quod dicitur de repugnantia istius materiæ ex parte ordinis eius ad formam, dicimus ex parte huius ordinis non repugnare quòd dentur materiæ specie diuersæ. Repugnare autem quòd aliqua materia sit pura potentia in genere substantiali, & sit eleuata, & perfectior omni actualitate corporali: sic enim non potest manere pura potentia in genere substantiæ, cum ista perfectio non possit conuenire nisi ratione actualitatis formalis, vel plusquam formalis, quia excedit formas corporeas.

Ad conuenientias verò quæ afferuntur pro hac materia statuenda. Respondetur nullas esse: constat enim non esse productam talem materiam ex rationibus *supra* allatis ex D. Thom. & fatemur substantiam Angeli poni in prædicamento. Negamus autem quòd de ratione substantiæ, quæ est genus, sit esse compositam ex materia, & forma, nec id intendit Boëtius, ut rectè explicat D. Thom. *qu. 1. de spiritualibus creat. art. 1. ad 23.* cum substantia prædicamentalis sit de consideratione Metaphysici, non Physici, qui considerat materiam; & sic sensus Boëtij est, quòd Philosophus relictæ substantia incompleta, quæ sunt extrema, & partes componentes, ut materia, & forma, & agit solum in prædicamento de substantia totali, & completa, qualis est composita ex materia, & forma. Non tamen ex hoc deducitur quòd substantia spiritualis completa, etiam si careat materia, non sit in prædicamento, cum genus non sumatur à materia physica, ut explicatum est, & constat in accidentibus.

Ad primam confir. Respondetur, illud dictum Philosophi explicari à D. Thom. *citato loco de spiritualibus creat. ad 5.* quòd substantia, quæ non habet materiam, statim est ens, & non est ei alia causa, ut sit ens, id est alia causa formalis, non autem causa efficiens, quia seipso est forma, non tamen à se est ens; & sic Angeli carentes materia habent causam efficientem à qua sint, non formalem in se receptam, quia per se formæ sunt, habent tamen causam efficientem, & influentem sibi esse.

Ad secundam confir. dicitur, illud axioma procedere de actu receptibili in aliqua potentia, non autem de actu completo, & subsistenti, cui non debet correspondere materia, seu potentia susceptiua. Et sic non sequitur dari materiam spirituales, quia datur actus substantialis spiritualis, cum hic actus sit completus, & subsistens. An verò semper potentia, & actus sint in eodem genere, & quomodo illud axioma intelligendum sit, explicauimus in *lib. Physicorum, & de generat.* quod intelligitur de potentia per se ordinata ad actum; & ad quem dicit essentialem ordinem. Vel etiam quòd in quocumque genere inuenitur potentia, & actus, non tamen intelligitur quòd si in aliquo genere est actus totalis, & completus debeat in eo

genere

genere inueniri potentia quæ sit materia componens & recipiens talem actum.

ARTICVLVS III.

Vtrum repugnet dari plures Angelos solo numero differentes?

DVplex in hac parte potest esse difficultas. Prima & principalis est, supposito quod in Angelis nulla datur materia neque corporea, neque spiritalis, sed sint formæ subsistentes, vtrum habeant in se principium multiplicationis indiuidualis, an verò careant illo, hoc ipso quod careant omni materia. Quæ controuersia non solum respicit id quod naturaliter esse potest, sed etiam id quod de potentia absoluta, quia si caret natura Angelica principio multiplicationis, non solum ex natura rei, sed etiam de potentia absoluta, non poterunt multiplicari, quia principium multiplicationis debet conuenire rei, quæ multiplicatur per sua intrinseca, eo quod indiuiduatio est prædicatum intrinsecum ipsius indiuidui, & consequenter multiplicatio eius per principia intrinseca fieri debet, & ita principium indiuiduationis, & multiplicationis indiuiduorum non potest per extrinsecum principium suppleri, & ab extrinseco aduenire. Quare idem est inquirere vtrum natura Angelica careat principio multiplicationis indiuidualis in sua intrinseca substantia, atque inquirere an possit de quacumque potentia dari multiplicatio indiuidualis Angelorum intra eandem speciem.

Secunda difficultas est ex suppositione quod natura Angelica non careat principio multiplicationis indiuidualis, eo quod tale principium non sumatur à materia, an saltem propter intrinsecum finem non expediat, quod de facto multiplicentur intra eandem speciem: sicut Sol, & Luna sunt indiuidua habentia materiam, quæ est principium multiplicationis indiuidualis, & tamen de facto multiplicata non sunt, quia non conuenit ex fine extrinseco vniuersi, in quo non bene coaptarentur plures Soles habendo vniuersalem influentiam, quam iste modò habet in hæc inferiora. Neque etiam conducit ad finem proprium ipsius naturæ Solis, quia cum sit incorruptibilis, non indiget multiplicatione indiuiduorum ad conseruandam speciem, propter quem finem multiplicantur indiuidua in istis inferioribus. Eodem modo potest inquiri, etiam dato quod natura Angelica non careat principio multiplicationis indiuidualis, intrinseco, an saltem propter incorruptibilitatem naturæ Angelicæ, & propter ordinem vniuersi non dentur de facto multi Angeli eiusdem speciei, quod in eo casu solum reduceretur ad coniecturas aliquas, quia præcipua ratio reducitur ad voluntatem Dei, de qua nobis constare non potest, nisi per eius reuelationem. Prius ergo tractanda nobis est prior controuersia. Deinde aliquid circa secundam disquiremus.

Implicatio multiplicationis indiuidualis naturæ Angelicæ.

2 Duplex ergo circa priorem controuersiam, sententia versatur. Prima negat implicare contradictionem. Secunda affirmat. Quarum sententiarum præcipua fundamenta consistunt in reddenda, vel expugnanda implicatione.

Primam sententiam, scilicet non implicare, te-

nent Scotus in 2. dist. 3. qu. 7. Durandus ibi quæst. 3. D. Bonau. in 2. dist. 9. qu. 1. art. 1. Vafqu. in præsentia disp. 181. c. 3. Alarcon tract. 6. de Angelis disp. 1. c. 7. Suarez in Metaph. disp. 5. sect. 2. num. 28. & lib. 1. de Angelis cap. 15. & probabilem censent Capreolus in 2. dist. 3. qu. 1. Bannez super hanc quæst. 50. art. 4. dub. 2. Ferrar. 2. contra Gent. c. 93. Bubalus in præsentia quæstio 1. difficultat. 3. §. 1. alique Thomistæ.

Secundam verò sententiam sequuntur communiter Thomistæ, Capreol. loco cit. ad 2. arg. Durandi contra 2. concl. dicitque esse de mente D. Thom. Caietan. de ente, & essentia cap. 5. quæst. 9. Herbeus in 2. dist. 3. qu. 1. art. 2. Nazarius in hac q. 50. art. 4. contron. 2. Granados contron. 7. generali, tract. 1. disp. 4. n. 9. Collegium Carmel. tract. 7. de Angelis disp. 1. dub. 7. alique plures.

De mente S. D. dubitatum etiam est in hac parte, quia in opus. 16. §. ult. dicit contra Auerrhoistas, quod valde ruditer argumentantur ad ostendendum quod Deus non possit facere quod sint multi intellectus eiusdem speciei, credentes hoc includere contradictionem. Dato enim (inquit S. D.) quod non esset de natura intellectus quod multiplicaretur, non propter hoc oportet quod intellectum multiplicari includeret contradictionem: nihil enim prohibet aliquid non habere in sua natura causam alicuius, quod tamen habet illud ex alia causa, sicut graue habet ex sua natura quod non sit sursum, tamen graue esse sursum non includit contradictionem, sed graue esse sursum secundum suam naturam contradictionem includeret. Sic ergo intellectus si naturaliter esset unus omnium, quia non haberet naturalem causam multiplicationis, posset tamen sortiri multiplicationem ex supernaturali causa. Nec esset implicatio contradictionis. Quem locum ita ponderat Pater Suarez vt velit iuxta sententiam D. Thom. non solum esse falsum, sed etiam valde rude, & improbabile dicere, quod implicet Angelos multiplicari in eadem specie.

Ex alia parte obstat non solum expressa authoritas D. Thom. Sed quod multò ponderosius est, eius ratio, quæ si aliquid probat, impossibilitatem huius multiplicationis simpliciter, & in ordine ad potentiam absolutam probat. Et ita rectè dixit Scotus ubi supra, quod si sequamur rationem D. Thom. tenendum est Angelos non posse solum numero differre. Anthoritas expressa D. Thom. est in q. de spiritualibus creaturis art. 8. ubi inquit quod si Angelus est forma simplex abstracta à materia, impossibile est etiam fingere quod sint plures Angeli vnius speciei. Et in hac 1. p. q. 65. art. 7. dicit, non posse Angelos, & animas esse eiusdem speciei, quia cum Angeli non sint compositi ex materia, & forma, sed sint formæ subsistentes, manifestum est quod necesse erit in eis esse diuersitatem in specie: non enim potest intelligi quod aliqua forma separata sit, nisi vna vnius speciei, sicut si esset albedo separata, non posset esse nisi vna tantum. Et qu. 76. sequenti art. 2. ad 1. ponens D. Thom. differentiam inter animas rationales, & Angelos, inquit, quod licet anima intellectiua non habeat materiam ex qua sit, sicut nec Angelus, tamen est forma materiæ alicuius, quod Angelo non conuenit; & ideo secundum diuisionem materiæ sunt multe anime vnius speciei: multi autem Angeli vnius speciei omnino esse non possunt.

In quibus auctoritatibus in primis pondero D. Thom. agere ex proposito, & specialiter de multiplicatione Angelorum; & ita magis est accipienda mens eius ex istis locis, ubi ex professo id tractat, quam ex vno illo loco opus. 16. Vbi non agit specialiter de Angelis, sed de natura intellectuali in communi, seu potius de intellectu qui conuenit hominibus, quem Auerrhoiste dicebant esse vnum pro

pro omnibus, & ita vnum, quod implicaret multiplicari ex vi ipsius naturæ intellectus, quod omnino falsum est, cum ex præcisa natura intellectus id non repugnet. In istis autem locis à nobis citatis non procedit D. Thom. ex eo quod Angeli sint formæ intellectuales, sed quia sunt formæ separatae subsistentes, & carentes omni materia, & ordine ad illam. Vnde ponit exemplum, etiam in forma non intellectuali, dummodo separata subsistat, vt si albedo ex natura sua esset separata: procedit ergo in istis locis in opusculo 16. ex diuersis principiis; ibi ex sola ratione intellectus, hic ex ratione formæ separatae subsistentis, & carentis omni materia: ergo potius iudicandum est de mente S. D. quoad multiplicationem numeralem Angelorum ex istis locis, quam ex illo opusculo.

5 Secundò pondero in locis allegatis D. Thomam vti verbis significantibus impossibilitatem simpliciter circa multiplicationem numericam Angelorum: dicit enim quod *Omnino non possunt esse vnius speciei: quod non potest intelligi quod aliqua forma separata sit nisi vna vnius speciei, quod impossibile est etiam fingere quod plures Angeli sint vnius speciei.* Quod autem neque intelligi, nec fingi potest, quomodo dicetur esse possibile, etiam de potentia absoluta, quia quod sic est possibile intelligi potest? Denique rationes D. Thom. quibus in hac q. 50. art. 4. & in 2. contra Gent. c. 93. & in 2. dist. 3. q. 1. art. 3. probat non posse esse plures Angelos eiusdem speciei, ita ab intrinseco procedunt, quod vel nihil probant, vel probant omnino implicare talem multiplicationem numeralem, quas rationes statim expendemus.

6 Prius tamen oportet respondere ad locum allegatum ex opusc. 16. cit. in quo loco supponendū est expresse agere D. Th. non de multiplicatione Angelorum, quatenus sunt formæ irreceptibiles, sed de substantia intellectuali, qualis est anima rationalis, respectu cuius ponebant Auerrhoistæ non posse multiplicari intellectum, sed esse separatum, & vnum, & nullo modo multiplicari posse, quia in se materialis forma non est: formam autem immaterialem dicebant non posse multiplicari etiam per ordinem ad materiam, sed hoc implicare contradictionem, quia habere materiam dicebant requiri ad multiplicationem materialem. Ad quod D. Th. dicit quod substantiæ separatae sunt indiuiduæ, & singulares, non autem indiuiduari ex materia, sed ex hoc ipso quod non sint natae in alio esse, & per consequens nec participari à multis. Ex quo, inquit, sequitur, quod sit aliqua forma nata est participari ab aliquo, ita quod sit actus alicuius materie, illa potest indiuiduari, & multiplicari per comparisonem ad materiam. Ostensum est autem quod intellectus est virtus anime, quæ est actus corporis: in multis igitur corporibus sunt multa anime. Ita D. Th. Ex quo patet intentum illius in prædicto loco esse, quod non repugnat intellectualem naturam ex eo quod intellectualis est multiplicari, dummodo dicat ordinem ad materiam. De Angelis autem nihil ibi tractat, quia repugnantia multiplicationis eorum non oritur ex natura intellectuali, quia immaterialis, & incorporea est, sed quia omnino separata, & irreceptibilis, ita quod neque materiam includat, nec ordinem dicat ad materiam, quæ ratio currit in quacumque forma, etiam si intellectualis non sit, vt si albedo esset separata ex natura sua.

7 Sed maius dubium est, quia dicit D. Tho. quod dato quod non esset natura intellectus, quod multiplicaretur, non propter hoc oporteret quod multiplicari intellectum includat implicationem, quia licet ex sua natura causam multiplicationis non haberet, haberet

Ioan. à. S. Thom. in 1. part. D. Th. Tomus alter.

tamen illam ex alia causa, & sic si intellectus naturaliter esset vnus omnium, quia non haberet naturalem causam multiplicationis, posset tamen sortiri multiplicationem ex supernaturali causa, nec esset implicatio contradictionis. Ergo sentit D. Th. quod etiam Angeli licet in sua natura non habeant causam multiplicationis, supernaturaliter tamen eam possunt habere, quia eadem consequentia est hic, & ibi.

Respon. D. Th. in his verbis præcipue intendere reprobare illam consequentiam, & formam argumentandi, quod si aliquid ex natura sua repugnat alicui, etiam contradictionem implicet, & supernaturaliter repugnet. Quam consequentiam merito D. Th. rudem argumentationem vocat. Et expresse ibi inquit, *se id notare, ne hac argumentandi forma ad alia extendatur: sic enim, inquit, possemus concludere quod Deus non potest facere, quod mortui resurgant, quia id ex natura sua non habent.* Signum ergo est quod præcipuum intentum D. Th. est illam formam argumentandi reprobare: sic enim etiam in Angelis non valet, quod si ex natura sua non possunt multiplicari, id repugnet etiam ex potentia absoluta Dei. Si enim in hoc præcisè fundaretur nostra sententia, ruditer, & improbabiler argumentaremur. Ceterum ex alio fundamento & principio, scilicet ex carentia omnis materiæ, & ordinis ad illam, non negat D. Tho. in illo loco id repugnare etiam supernaturaliter, sicut affirmat in aliis locis à nobis citatis. Et ad vim illius consequentiæ D. Tho. dicit quod etiam si ex natura sua intellectus non esset multiplicabilis numero, posset tamen ex causa supernaturali multiplicari, ergo licet Angeli careant materia, quæ secundum naturam est principium multiplicationis indiuidualis, non infertur quod supernaturaliter ex alia causa multiplicari non possint. Respondetur, non esse similem consequentiam, sicut neque ista est similis; Sol naturaliter non potest multiplicari indiuidualiter, quia incorruptibilis natura id non petit: ergo non potest multiplicari supernaturaliter, quia retinet materiam: quæ est capax diuisionis, & multiplicationis, saltem supernaturaliter, quando ex aliquo fine extrinseco naturali id non potest. Quare oportet bene perpendere vim consequentiæ S. D. vt in verbis eius supra relatis videri potest: solum enim dicit non esse bonam consequentiam, quod si non est de natura intellectus multiplicari: ergo implicat contradictionem multiplicari, si non habet causam naturalem multiplicationis: ergo ex causa supernaturali non potest multiplicari. Has consequentias negat D. Tho. & verè negandæ sunt. At verò Angelus, & quælibet forma quæ nec est in materia, nec dicit ordinem ad materiam non ex eo est immultiplicabilis quia non habet causam naturalem multiplicationis, nec ex eo quod intellectualis est quomodocumque, sed ex eo quod ab omni materia, & ab ordine ad materiam forma separata est. Esse autem sic separatam siue sit forma intellectualis, siue non, solum est non habere causam naturalem multiplicationis, sed repugnare eius quidditati, vt statim ostendemus. Bona autem consequentia est, repugnat quidditati multiplicationis: ergo nec supernaturaliter dari potest.

Ratio implicationis.

Vnica ratione perpetuò vtitur D. Thom. ad affirmandum, quod est impossibile Angelos multiplicari numero, quæ ex hoc ipso quod vnica est, & semper affertur à D. Th. magni ponderis censeretur debet: demonstrator enim non multiplicat media, vt inquit Arist.

Ratio ergo D. Th. talis est; Angeli sunt formæ simplices carentes materia, siue ex qua componan-

li

tur

tur, siue quam informant, & ad quam ordinentur: ergo carent omni principio distinctionis numericæ, & solum habent principium distinctionis specificæ. Addo aliam consequentiam ex illa priori concessa euidenter deductam: Sed si carent omni principio distinctionis numericæ ex natura sua, & propria quidditate, repugnat illis ab extrinseco conuenire aliquod principium multiplicationis numericæ, id est, aliquam materiam vel ordinem ad materiam, seu aliquod principium materialis diuisionis, nisi destruat eorum natura, & propria quidditas: ergo impossibile est stante natura Angelica, & eius prædicatis intrinsecis dari plures Angelos solo numero differentes. His duabus consequentiis tota ista implicatio pendet, in quibus solæ duæ propositiones probandæ à nobis sunt.

Prima est illa consequentia primi enthymematis: nam antecedens scilicet Angelos carere omni materia, & omni ordine ad materiam, fusè à nobis probatum est *art. præced.* nec in eo dissensio nobis est cum opposita sententia, sed in illo etiam nobiscum conueniunt. Quod verò difficultatem facit est illa consequentia: ergo carent omni principio distinctionis numericæ.

Secunda propositio est illud antecedens secundi enthymematis: repugnat Angelis adiungi aliunde principium multiplicationis numericæ. His enim probatis, reliqua per se sunt manifesta.

2 Circa primam propositionem est aduertendum quòd D. Thomas non probat eam hic, sed supponit, quia pertinet eius probatio ad controuersiam de principio indiuiduationis, de qua nos egimus in libris de generatione quæst. 9. Eam tamen propositionem desumpsit S. Thomas ex Philosopho, qui 12. *Metaph. cap. 18. textu 49* loquens de unitate numerica primi principij, qui est Deus, sic inquit; *Quæcumque numero sunt multa materiam habent: una enim, & eadem ratio multorum, ut hominis, Socrates verò vnus; ipsum verò quid erat esse primum, non habet materiam, cum actus sit: vnum ergo, tum ratione, tum numero.* Itaque Philosophus unitatem numericam, & indiuisibilem in plura numero desumpsit ex carentia materiæ, & sic D. Th. solum usus est principiis Peripateticis, & ex lumine naturali petitis ad inuestigandum principium multiplicationis numericæ, & stando in illis conuincit ratio D. Thom. quòd etiam in Angelis non datur principium diuisionis numericæ, quia datur carentia omnis materiæ, & ordinis ad illam. Quàm verò constans sit Aristoteles in hæc sententia, quòd materia sit principium diuisionis numericæ, constat: nam etiam 5. *Metaph. textu 12.* dicit, quòd *Numero sunt vnum, quorum materia vna.* Et in pluribus aliis locis id docet. Ne verò explicentur de rebus corporeis; ideò principaliter argumentum deducimus ex loco citato 12. *Metaph.* ubi loquitur de principio qui est Deus, quem Aristoteles incorporeum, & immaterialem admisit, & tamen dixit esse vnum numero, & non plures, quia caret materia.

10 Ex hoc verò sic conficitur argumentum Philosophi: lumine naturali agnouerunt dari vnum Deum, non solum in specie, sed etiam numero, quia hoc pertinet ad plenam cognitionem dignitatis eius: si enim plures Deos agnoscerent, non attingerent veram diuinitatem: ergo ratio, qua perueniunt lumine naturali ad cognoscendam Deum esse vnum, & immultiplicabilem, etiam numero, omnino admittenda est: sed hæc ratio est ob carentiam materiæ, & ordinis ad materiam: ergo carentia materiæ est principium omnimodæ indiuisibilitatis materiæ.

Primum antecedens est certum, & constat ex

Apostolo ad Romanos 1. Vbi inquit, quòd *Indiuisibilia Dei à creatura mundi per ea quæ facta sunt intellecta conspiciuntur, sempiterna quoque eius virtus, & diuinitas, ita ut sint inexcusabiles, quia cum cognouissent Deum, non sicut Deum glorificauerunt, aut gratias egerunt, & mutauerunt gloriam incorruptibilis Dei in similitudinem imaginis corruptibilis hominis, & volucrum, & quadrupedum, & serpentium.* Ergo constat ex Apost. cognouisse Philosophos veram diuinitatem Dei, & consequenter unitatem eius, quia si non cognouissent ut vnum, neque cognouissent ut verum. Sed Aristoteles qui præcipue de Deo cognouit, & inuestigauit, deduxit esse vnum numero, quia caret materia, quæ est principium diuisionis numericæ: ergo eius consequentia admittenda est. Ergo similiter bene deduxit D. Thom. quòd si Angelici carent materia, & ordine ad materiam, etiam carent principio diuisionis numericæ, illisque repugnat; aut si ista consequentia in Angelis non tenet, enervatur principium quo in doctrina Peripatetica, & in solidiori Philosophia naturali probatur unitas numerica veri Dei, sine quo vera eius diuinitas non esset agnita à Philosophis, quod tamen est contra Apostolum.

11 Premittit hoc argumentum nimis auctores qui viam Aristotelis, scholamque eius sequuntur. Et quidem Scotus interpretatur Philosophum, quòd nomine materiæ intelligit non materiam primam, sed differentiam numericam, quam vocat hæccitatem, quæ materialiter se habet respectu specificæ naturæ, quam contrahit. Alij, ut Vasq. 2. *tom. 1. partis disp. 181. cap. 1.* ingenuè fatentur Aristotelem loqui de materia prima, sed Aristot. omittit, nec eius locum interpretatur, sed interponit argumentum aliud ad probandum quòd distinctio numerica fit per diuisionem continui, seu quantitatis; cui respondet, id intelligi in his quæ distinguuntur numero quantitatiuè, sed non de multiplicatione numerica substantiali. Sed quid hoc ad locum Aristotelis. Alij, ut P. Suarez lib. 1. de Angelis, c. 15. & disp. *Metaph. sect. 2. à n. 23.* dicunt formas istas indiuiduari seipsis entitatiuè. Sed ad istum locum Arist. ex 12. *Metaph.* nihil respondet, sed solum ad varia loca, quæ sumuntur ex 7. *Metaph. & 3. de anima*, in quibus modò non facimus vim.

12 Quare authores isti tacite, vel clare Aristotelem relinquunt in hac parte; & sic solum oportet probare quòd Aristoteles per materiam non intelligit hæccitatem, sed materiam illam, quæ est pars compositi, & reddit naturam materialem, & corpoream. Contra alios authores, quòd substantiæ non multiplicantur numero solum ratione entitatis sine alio principio materiali, quòd sit ratio talis multiplicationis. Et primum patet manifestè, quia si Philosophus nomine materiæ intelligit hæccitatem, petit principium, & non probat intentum: dicit enim, quòd ideò Deus est vnus numero tantum, quia non habet materiam. Si ergo nomine materiæ intelligit hæccitatem, sensus est; ideò Deus est vnus numero, & non plures, quia non habet hæccitates, seu differentias indiuiduales. Sed hoc ipsum est probandum, quia de hoc est difficultas, quare non sint in Deo plures differentiæ indiuiduales: ergo petit principium. Et secundo confirmatur, quia Philosophus probat non habere Deum materiam, quia est actus, seu forma pura, & incorporea: ergo id intelligit per materiam, per cuius carentiam redditur Deus incorporeus, seu spiritualis, & forma pura, sed non redditur spiritualis, & incorporeus per carentiam hæccitatis: nam per carentiam huius dicitur aliquid vniuersale, non incorporeum, vel spirituale, neque actus purus: ergo Philosophus

lofophus loquitur de vera materia substantiali, per cuius carentiam res dicitur incorporea, & vera potentialitate, per cuius carentiam dicitur actus purus seu spiritualis.

13 Contra alios autem authores probatur non posse aliquid multiplicari numericè ratione suæ entitatis quomodocunque consideratæ, sed ratione alicuius principij materialis, quod nisi conueniat tali entitati, non poterit multiplicari indiuidualiter, retinendo eandem speciem, & differendo substantialiter, seu entitatiuè. Etenim differentia indiuiduales, & indiuidualiter multiplicantes taliter se habent, quod sine qualibet illius determinatè sumpta saluatur species, seu quidditas specifica alicuius substantiæ, & tamen ipsa diuisio & multiplicatio substantialis est, sicut Petrus, & Paulus differunt tanquam duæ substantiæ realiter distinctæ, & tamen non specificè diuersæ: ergo oportet pro principio, & radice huius distinctionis accipere aliquid quod in se substantiale sit, diuidatque substantias realiter; & tamen eius diuisio materialiter, & per accidens se habeat ad speciem, ita vt sine tali multiplicatione, & diuisione in quolibet indiuiduo possit saluari specifica natura, nec requiratur quodlibet determinatum indiuiduum in quantum tale ad saluandam rationem specificam; atque adeo non sit differentia indiuidualis constitutiua diuersæ naturæ, sed eiusdem multiplicatiua materialiter, & non quantum ad speciem: in hoc enim distinguuntur differentia indiuiduales à specificis, quod etsi possit sine qualibet illarum saluari genus, & quantum ad hoc dicantur generi accidere, tamen constituunt intrinsecè quidditatem, & naturam specificam in ratione quidditatis, & naturæ tanquam vltimæ differentia essentialis facientes formaliter, & quidditatiuè differre naturam, ideoque debent provenire ab ipsa entitate rei secundum rationem aliquam formalem, vt formalis est. Indiuiduales autem differentia si multiplicantur in aliqua natura, oportet quod ita conueniant entitati, quod entitatiuè quidem, & substantialiter illam diuidant, & multiplicent, non tamen constituent naturam in ipsa ratione quidditatiua, & formali, quia differentia speciei atomæ est vltima in genere quidditatiuo, & essentiali, cuius manifestum signum est, quia duo indiuidua non differunt quidditatiuè, & essentialiter, licet diuersæ substantiæ sint: ergo necesse est quod faciant differentiam materialem in ipso genere substantiæ. Vnde in natura specifica habent se indiuidua sicut partes integrales in vno supposito, quæ sunt quidem substantiales, tamen multiplicatio earum non requiritur per se ad ipsam quidditatem totius: & ideò diuersa indiuidua resultant per diuisionem partium integralium, quod est signum ita multiplicari indiuidua, & diuidere ipsam naturam specificam, sicut partes integrales se habent ad ipsam substantiam totius, & sicut partes integrales non multiplicantur sine materia, ita neque indiuidua sine diuisione materiali. Malè ergo dicitur quod quælibet entitas seipsa indiuiduatur, & multiplicatur, non assignando aliud principium pro multiplicatione, quam ipsam entitatem secundum se, quia in entitate, & datur principium constituendi, ac distinguendi formaliter, seu specificè ab aliis speciebus, & datur principium multiplicandi substantiam sine distinctione, & diuisione specifica. Et hæc duplex distinctio non potest ab eisdem principiis provenire, quia principia constitutiua speciei, quæ nos dicimus

Ioan. à. S. Thom. in 1. part. D. Th. Tomus alter.

formalia, quia forma est quæ dat speciem rei, ita distinguunt substantiam, quod diuidunt quidditatem specificè, & entitatiuè. At verò principia indiuidualia ita multiplicant substantiam, quod non distinguunt quidditatiuè, & specificè ipsam naturam, neque formam in ratione, & officio formæ, quod est dare speciem, sed solum diuidunt naturam materialiter: ergo debent tales differentia indiuiduales sumi penes principia materialia, seu ordinem ad materiam, non per formam secundum quod exercet officium formæ, & specificationis.

Totus hic discursus applicatur speciebus Angelicis ostendendo quod principia multiplicationis indiuidualis illis repugnent, quia principium indiuidualis multiplicationis non potest esse sola entitas rei considerata secundum se, sed iuxta munus, & officium, quod facit diuisio indiuidualis, vt distinguitur à diuisione specifica, quia videlicet ita diuidit substantiam substantialiter, quod non formaliter & quidditatiuè, seu specificè: ergo non sufficit ad hoc forma, seu principium formale vt exercet munus & officium formæ, quod est specificare, & formaliter constituere ac distinguere, sed debet esse entitas, seu forma, non vt exercet officium formæ, sed per ordinem ad materiam, vel ratione alicuius materialis principij distinguitur: diuisio enim materiæ sic distinguit substantiam quod non diuidit speciem specificè. Sed natura Angelica non solum excludit materiam, & principia materialia substantialia à sua compositione, sed etiam à sua connotatione, quia neque componitur ex materia, nec est forma receptibilis in illa, aut dicens aliquem ordinem ad illam, quia quicumque ordo ad materiam, est tanquam ad recipientem: ergo debet esse ordo alicuius rei receptibilis: ergo formæ omnino irreceptibilis, sicut sunt Angeli, carentes omni ordine ad materiam: ergo carent omni principio multiplicandi materialiter substantiam, & non specificè: quia remoto omni ordine ad materiam solum restat forma in ratione, & officio formæ, hoc est in ratione specificandi, & formalizandi: hoc enim est munus formæ, scilicet dare speciem rei. Et non potest intelligi quod forma sub hoc respectu, & consideratione formæ & sine villo ordine ad materiale principium diuidatur, & non specificè & formaliter.

Circa secundam propositionem, scilicet quod repugnet Angelis adiungi ab extrinseco aliud principium, quod non sit materia, per quod fiat multiplicatio indiuidualis, *infra circa solutionem secundi argumenti*, ostendemus id repugnare.

Soluuntur argumenta.

Primò obiicies fundamentum oppositæ sententia. Ab eadem entitate, seu forma provenit gradus genericus, specificus, & indiuidualis, siquidem isti gradus metaphysici non distinguuntur realiter, sed sunt idem à parte rei in eodem subiecto: ergo proveniunt ab eadem forma, & principio: ergo non indiget indiuidualis multiplicatio distincto principio à specifico, ita vt sumatur distinctio numerica à materia, quæ est altera pars compositi, sed in qualibet re simplicissima hæc tria inveniuntur, genus, species, & indiuiduum, ita quod vnum prædicatur de alio: non minus enim genus prædicatur de specie, quàm species de indiuiduo: ergo ab eadem forma à qua sumitur genus, & species, sumitur etiam indiuiduatio. Et

11 2

rursus

rursus, sicut genus, ut multiplicetur secundum speciem, non est necesse distinguere secundum rem principium generis, & speciei, seu distinctionis specificæ, nec etiam oportebit quod distinguatur secundum rem principium multiplicationis indiuidui à forma, seu entitate à qua sumitur species & eius multiplicatio.

Hanc objectionem ponit P. Vasq. *ubi supra*, tanquam fundamentum suæ sententiæ, intendens quod tam in substantiis simplicibus, quam compositis non debet esse principium indiuiduationis distinctum ab ipsa specie. Nihilominus respondetur verum esse quod ab eadem entitate totali sumitur ratio generis, speciei, & indiuidui, sed non secundum eundem respectum, & ordinem, nec secundum easdem formalitates, vel condiciones, quia ad hoc ut sit principium gradus generici, vel speciei, sufficit forma secundum officium formæ, seu formalem rationem magis, vel minus contracte, seu determinate accepta; atque adeo secundum statum magis potentialem, & indifferentem quod pertinet ad rationem generis, vel magis determinatum, & actuale, quod pertinet ad rationem speciei, quia tam genus quam species constituunt ac diuidunt quidditatiue, eorumque variatio, additio, vel multiplicatio variat essentiam quidditatiue. Ad gradum verò indiuidualem requiritur forma, non secundum officium formæ, qui est modus constituendi formaliter specificè; sic enim repugnat quod multiplicatio formæ, secundum hoc munus, & officium formæ, possit esse radix, & principium, seu ratio distinguendi aliquam substantiam formaliter, & specificè, sed substantialiter, & indiuidualiter, cum sub ista formalitate, & consideratione forma solum exerceat illud quod est formæ, & specificationis. Oportet ergo quod si forma indiuiduatur, extrahatur ab ista consideratione formalizandi, & specificandi, quod est proprium munus formæ, & accipiat secundum ordinem ad materiam, vel secundum condiciones diuisibilitatis substantialis penes principia materialia, eo quod principium, seu ratio multiplicationis indiuidualis, intrinsecè, & per se requirit illas duas condiciones *supra* positas, scilicet quod sit ratio multiplicandi substantialiter, & non formaliter seu specificè, quod solum inuenitur in principio substantiali, quatenus est capax plurium partium, quæ in eodem toto coniunctæ integrant ipsum substantialiter, & tamen sine aliqua illarum potest saluari natura illa, ut homo sine brachio, vel sine manu: diuise autem constituunt diuersa indiuidua, seu supposita, quæ essentialem quidditatem speciei non variant, licet substantialiter multiplicent; quare illæ naturæ, quæ puræ formæ sunt, ita quod omni ordine ad materiam carent, carent etiam omni principio multiplicandi indiuiduationem, & per hoc solum quod sunt irreceptibiles, & incommunicabiles in se unicam suam indiuiduationem accipiunt.

16 Quapropter ad argumentum in forma dicimus, quod ab eadem entitate sumitur gradus specificus, & numericus, distinguo; ab eadem entitate sub eodem respectu & consideratione, nego; sub diuerso, transeat; & sic ab eadem entitate, ut induit respectum ad materiam substantialem, vel ad condiciones materialis principij, sumitur gradus indiuiduus, & multiplicatio eius: ab eadem autem entitate secundum respectum, & munus rationis formalis sumitur gradus specificus, vel genericus prout forma habet rationem, vel munus specificandi & formalizandi magis, vel minus deter-

minate, quia proprium munus formæ est determinare, & actuare, & consequenter distinguere essentiam diuersa actuatione & determinatione essentiali, sicut proprium munus est materiæ diuisionem partium facere secundum diuersam incommunicabilitatem, quia de se est vltimum subiectum vltimius incommunicabile, quæ diuersitas, & distinctio per modum incommunicabilitatis propria est indiuiduorum, quæ dicunt gradum vltimum, & incommunicabilem.

Nec obstat quod à materia sumitur genus, & sic non poterit ab eo sumi indiuiduatio: dicitur enim quod genus non sumitur à materia physica, sumendo materiam pro altera parte compositi, sed pro eo quod magis potentiale, & indeterminatum est in ipsa natura, seu forma. Et dato quod sumeretur à materia, non tamen sub eadem consideratione qua indiuiduatio, vel multiplicatio eius. Genus sumitur à materia ut aliquid potentiale est ad plures formas, & formaliter determinabilis. Indiuiduatio à materia, ut vltimum subiectum incommunicabile. Multiplicatio ab ea, ut diuisibilis est substantialiter per partes, & non specificè.

Secundò dicitur ad maiorem explicationem huius quod ab eadem entitate, & forma sumitur gradus specificus, & indiuidualis, distinguo; gradus indiuidualis, cuius est capax talis natura, concedo; gradus indiuidualis, ut multiplicati per varia indiuidua, nego: hæc enim multiplicatio, & distinctio exigit præter entitatem indiuiduandam, principium aliquod, & radicem in natura, ratione cuius sit multiplicabilis in substantia, & non in specie. Itaque in natura Angelica indiuiduatio datur, sed vnica, non multiplicata, & hæc indiuiduatio sumitur ab eadem entitate, seu forma quatenus irreceptibilis est, & incommunicabilis alicui materiæ, quia forma completa est, & subsistens. Et sic ex eodem principio formali, non quatenus multiplicabilis est formaliter, sed quatenus incommunicabilis, & irreceptibilis est in se redditur vltimatè indiuiduatus. Cæterum multiplicatio indiuiduationis non potest habere pro principio id quod est ratio formalis specificationis, sed sub diuersis respectibus, & considerationibus entitas aliqua est multiplicabilis specificè, & numericè. Itaque aliud est dicere, in eodem indiuiduo, seu subiecto sumitur ab eadem entitate gradus specificus, & indiuidualis, aliud verò, quod ab eodem principio sumatur multiplicatio indiuidualis, & specifica. Hoc secundum est manifesta implicatio, & non potest verificari in aliqua natura, siue spiritali, siue corporea, cum petant oppositas condiciones isti duo modi multiplicandi. Primum verò etiam in Angelis inuenitur. Sed quia ille gradus indiuidualis sumitur à forma ut irreceptibilis, & incommunicabilis est materiæ, & ista incommunicabilitas non est alicuius rei habentis partes materiæ, quarum diuisio non multiplicat specificam naturam, sed alicuius formæ omnino separatæ, quæ si diuiditur, & formaliter multiplicabitur; inde est quod principium indiuiduationis in Angelo caret omni ratione multiplicationis in indiuiduo, licet in se indiuiduum sit.

17 Secundò arguitur. Etiam dato quod principium multiplicationis indiuidualis sit distinctum à principio multiplicationis specificæ, adhuc inuenitur in Angelis principium talis multiplicationis indiuidualis: ergo non est quod negetur illis, saltem de potentia absoluta, licet de facto in illis non sit propter aliquos fines extrinsecos, sicut non sunt plures

res Soles, & plures Lunæ Antecedens probatur.

Primò quia possunt plures hæcçitates poni in natura Angelica, & cum diuersis hæcçitatibus à Deo produci, & tunc multiplicabuntur indiuidualiter sine alio principio, seu radice, quia ipsa hæcçitas est formaliter constitutiva indiuidui, & plures hæcçitates plurius indiuiduorum.

Secundò, quia natura Angelica licet nò habeat materiam ex qua componatur substantialiter, habet tamen causam materialem susceptiuam accidentium: accidentia autem sunt proprietates indiuiduales, vt patet in proprietatibus quas assignat Porphyrius in cap. de specie, & in rebus corporeis per ipsam quantitatem signatur materia, & diuiditur ad distinguenda plura indiuidua: ergo non repugnat naturam Angelicam etiam signari diuersis proprietatibus indiuidualibus; atque adeò multiplicari indiuidualiter. Patet consequentia, quia possunt in Angelo esse plura accidentia numero distincta, vt plures actus intellectus, plures motus, aut vbi, & diuersæ aliæ qualitates, quæ à Deo poni possunt in essentia Angeli: ergo in ordine ad ista accidentia potest signari natura Angeli, & diuidi indiuidualiter per ipsam naturam, vt susceptiuum est diuersorum accidentium.

Tertiò natura Angelica est capax substantiæ, & existentia, quæ possunt ab ea tolli, vt si persona diuina assumeret naturam Angelicam, & iterum potest resultare alia substantia, seu personalitas si dimitteretur à persona diuina: ergo est capax illa natura diuersarum personalitatum numero distinctarum, quarum vna succedat alteri. Cur ergo non erit capax plurius indiuiduationum; siquidem est capax diuersæ substantiæ, vt est terminus indiuiduationis substantialis.

Respond. negando antecedens.

18 Ad primam probationem Resp. quòd diuersæ hæcçitates nò sunt aliud, quàm plures indiuiduationes, seu plures differentia indiuiduales substantiales: istæ autem non possunt conuenire alicui naturæ, nisi ratione alicuius principij, ex quo habeant multiplicari, & conuenire tali naturæ, sicut differentia specificæ, & genericæ ex aliquo principio sumuntur. Non est ergo dubium, quin si plures hæcçitates conuenirent alicui naturæ, & inuenirentur in Angelo, multiplicaretur numericè: hoc enim non est aliud quàm dicere quòd si haberet plures indiuiduationes, seu plures differentias indiuiduales, multiplicaretur indiuidualiter. Sed quia argumentum non ostendit quòd tale principium detur in Angelo, idèd negamus suppositum, nempe quòd dentur plures hæcçitates, aut dari possint, supposito quòd non habet principium, vnde illæ resultent: sicut si homo haberet hincibilitatem, esset sicut equus, & si haberet alas, esset auis, tamen habere ista repugnat sibi, & si in eodem Angelo essent plures differentia specificæ, idem Angelus differret specie, sed est impossibile quòd idem Angelus id habeat. Sic hæcçitates plurificatæ repugnant Angelo, quas tamen si haberet, plurificaretur.

19 Instabis: Cur repugnat Deum supernaturaliter, seu de potentia absoluta alio modo multiplicare indiuiduationem in Angelo, quàm per istam diuisionem materiæ, & sic sine illa per plures hæcçitates multiplicare Angelum?

Respondetur, quòd vt benè in hac parte notat Vasquez ubi supra, si in aliqua specie multiplicatur indiuidua id non posset esse per aliquod principium extrinsecum, & supernaturaliter superueniens, eo quòd indiuiduatio in substantiis est gradus intrinsecus, & substantialis, & sic intrinsecum

Ioan. à S. Thom. in 1. part. D. Th. Tomus alter.

principium postulat, & substantiale. Nihil autem substantiale addi potest ab extrinsecò, & supernaturaliter, siquidem vnum indiuiduum intrinsecò, & substantiali distinctione ab alio differre debet: ergo non est possibile quòd id fiat sine aliquo substantiali principio, & tali quòd possit distinguere substantiam entitativè, seu substantialiter, & materialiter, non distinguendo speciem formaliter, & ita non potest esse principium formale, neque ipsa forma secundum officium formæ: ergo solum potest esse secundum principium materiale, seu per ordinem ad illud, quia modus huius diuisionis est proprius materiæ secundum habitudinem ad partes quibus diuisibilis est. Nihil autem tale potest aduenire naturæ per supernaturale principium, quia non potest supernaturalis additio substantiam materialem Angelo præbere, vel substantiale principium mutare.

Ad secundam probationem Respond. substan-²⁰ tiam Angelicam esse capacem diuersorum accidentium siue specie, siue numero distinctorum pertinentium ad idem subiectum, non tamen diuidendum illud, & indiuidualiter multiplicandum; non enim accidentia, seu proprietates indiuiduales sunt principia multiplicandi indiuidua, siquidem multiplicatio indiuidualis substantialis est, & non potest pro principio, & radice habere accidentia: sed illæ accidentales proprietates sunt effectus consequenti, vel conditiones requisitæ ad indiuiduationem, vnde præsupponunt principium substantiale, quod habeat capacitatem, & radicem distinguendi substantiam entitativè, & non specificè, quod non conuenit formali principio, vt formale est, nec substantiæ ipsi, vt materiale susceptiuum est accidentium, nisi aliquid amplius habeat, scilicet partes quæ per talia accidentia signari, & diuidi possunt, sicut materia prima habet partes diuisibiles, & sic quantitate signari possunt. Et ex talibus partibus sic diuisis resultare possunt diuersa illa accidentia, & proprietates indiuiduales, ita quòd tota substantialis distinctio indiuiduorum reducatur per se ad diuersum principium substantiale; accidentia autem, & proprietates etiam quibus designatur ista indiuiduatio solum se habent vt conditiones requisitæ, vel concomitantes ad talem indiuiduationem, vel multiplicationem. Vnde cum in Angelis proprietates illæ, seu accidentia non supponant in substantia habilitatem, seu capacitatem vt diuidi possit entitativè materialiter, & non formaliter specificè, consequenter plurius accidentium receptio non est signatura, & diuisio plurius indiuiduorum substantialiter: nec enim quælibet receptio diuersorum accidentium constituit, aut designat diuersa indiuidua substantialia, cum constet idem subiectum, sine vlla diuisione sui, susceptiuum esse plurius accidentium. Ista ergo pluralitas præcisè ex eo quòd recipiatur in substantia, non importat, neque facit distinctionem, & multiplicationem indiuidualem, nisi addatur principium materiale, quod sit partibile substantialiter, & tunc diuersa accidentia, seu proprietates designabunt, non constituent illa plura indiuidua.

Ad tertiam prob. dicitur quòd substantia Angeli²¹ est capax plurius personalitatum succedentium in eadem natura, distinguo; respectu eiusdem indiuidui, concedo; respectu diuersorum, nego. Itaque eadem substantia, seu natura indiuidualis habet in se principium habendi substantiam, tantquam terminum, taliter quòd si ille terminus tollatur, resultat alius pertinens ad idem indiuiduum, quia nascitur ab eisdem principiis indiuidualibus

dualibus. Vnde talis multiplicatio subsistentiarum non infert multiplicationem indiuiduorum, quia sunt subsistentiæ eiusdem indiuiduationis, quarum una subrogatur in locum alterius ut pertinet ad idem indiuiduum, sicut resultat frigus in aqua tanquam pertinet ad eandem aquam, & ab eadem linea, si auferretur punctus terminans, resultaret alius; vnde talis Angelus à quo pluries resultaret personalitas, seu subsistentia, non esset diuersa persona, sed eadē, quia illæ plures personalitates non censentur diuersæ in officio constituendi personam, licet entitatiuè diuersæ sint, quia succedunt, & oriuntur ex eisdem principiis indiuidualibus. Subsistentiæ autem quæ constituerent diuersas personas, etiam multiplicarēt diuersa indiuidua, quia orirentur ex diuersis principiis indiuidualibus. Et talis multiplicatio subsistentiarum cum respectu ad diuersa principia indiuidualia, & ut constituentes diuersas personas repugnant Angelo.

Diuersæ autem subsistentiæ cum respectu ad eadem principia indiuidualia, & non constituentes diuersas personas, sed sibi succedentes in officio, & munere constituendi eandem personam, non repugnant Angelo, quia sic pertinent ad idem indiuiduum. Et ex eadem ratione apparet, quod subsistentia ut subsistentia, non multiplicat indiuidua, quia non est principium indiuiduationis, sed terminus. Vnde nisi supponat diuersum principium indiuiduandi, per se solum non multiplicat indiuidua. Et sic videmus, quod eadem subsistentia diuina potest plures naturas specie aut numero diuersas assumere, nec tamen facit ynam indiuiduam naturam ex omnibus illis, & e converso plures subsistentiæ eandem naturam possunt assumere, nec tamen plurificant illam: ergo ex subsistentiis non sumitur multiplicatio indiuiduorum. Et ex eadem doctrina soluitur fundamentum Durandi in 2. dist. 3. q. 3. probantis posse Deum multiplicare Angelos, quia potest multiplicare actiones annihilando modò Angelum, & postea producendo; sed dico quod ista multiplicatio est circa eundem Angelum producendum, & reproducendum, non circa distinctos numeraliter diuersos, sicut circa idem numero corpus Christi versatur actio generatiua in Incarnatione, & transubstantiatiua in Eucharistia. De existētia verò dicimus quod illa non resultat ex propriis principiis naturæ, sed à Deo datur, & recipitur in natura, & idèd hæc multiplicari potest toties quoties Deus voluerit annihilare, & reproducere eundem numero Angelum. Nō tamen multiplicatio existentiarum multiplicat indiuidua sed supponit ex principiis substantialibus multiplicata, si talis multiplicatio possibilis est.

22 Tertiò arguitur: In Angelo inuenitur vera indiuiduatio, & tamen non habet materiam: ergo materia non est essentialiter principium indiuiduationis in Angelo: ergo neque multiplicationis. Patet consequentia, quia idèd in rebus corporalibus multiplicatio fit per materiam, quia etiam indiuiduatio fit per illam, & sicut materia est principium indiuiduationis, ita & multiplicationis: ergo e converso si in Angelis non est principium indiuiduationis, sed aliquid loco illius indiuiduat, etiam aliquid loco illius multiplicabit, & sic non est cur negetur Angelo principium multiplicationis absque materia, sicut neque illi negatur principium indiuiduationis absque illa.

Confirm. quia anima intellectiua est forma spiritualis carens in se omni materia, & corporeitate, & tamen multiplicatur indiuidualiter: ergo etiam forma spiritualis completa qualis est Angelus. Nec potest dici, quod anima multiplicatur propter or-

dinem ad materiam quam informare potest, quo ordine caret Angelus: contra enim est, quia materia est extrinseca ipsi animæ, & ordo ad illam non potest indiuiduare substantialiter, quia indiuiduatio substantialis non est per ordinem ad alterum, sed per ordinem ad se, cum ipsa anima res substantialis sit, & ad se dicatur. Ergo indiuiduatio illa, & multiplicatio non sumitur per ordinem ad materiam, sed antecedenter ad illam: idem ergo erit in Angelo.

Respondetur quod indiuiduatio sine multipli- 23 catione naturæ non exigit materiam, neque materiale principium, neque ordinem ad illud, sed sufficit formam ipsam esse completam, & irreceptibilem, seu non dicere ordinem ad aliquid in quo recipiatur, sed in se manere: hoc enim ipso habet in se vim indiuiduandi, quia habet vim constituendi gradum ulterius incommunicabilem, & sic solum prædicabilem de vno, quod est ipsamet ratio indiuiduationis; quod totum patet in Deo, qui habet indiuiduationem, & singularitatem, sine aliqua materia, vel ordine ad illam, & sine aliqua capacitate multiplicationis. At verò ad indiuiduationem multiplicabilem numericè non sufficit incommunicabilitas naturæ, seu formæ, sed requiritur materia diuisibilis, seu ordo ad illam, quia requiritur principium fundans diuisionem substantiæ sine diuisione, & distinctione speciei formali. Tale autem principium non est sola incommunicabilitas formæ, sed debet esse aliqua substantia seu principium substantiale diuisibile tali modo. Forma autem si incommunicabilis est, non est diuisibilis in quantum incommunicabilis, & sic non est diuisibilis materialiter. Solum ergo erit diuisibilis in vi formæ, & modo formali, quod est specificè esse diuisibilem. Remota ergo materia, & omni ordine ad materiam manet remotum omne principium diuisionis numeralis, non specificæ, & consequenter non dabitur in Angelo principium talis multiplicationis indiuidualis, licet detur principium indiuiduandi sine materia. Quare in rebus corporeis non idèd materia est principium multiplicationis, quia est principium indiuiduationis quomodocumque, sed quia est principium indiuiduationis, & diuisibilitatis materialis, quæ est diuisibilitas substantialis sine diuisione, & distinctione formali. Indiuiduatio enim absolute sufficienter fit per principium incommunicabilitatis in aliqua substantia etiam si sit in ipsa forma, quia hoc ipso quod est incommunicabilis, constituit gradum indiuiduum. Multiplicatio autem plus petit quàm incommunicabilitatem, scilicet diuisionem tali modo factam.

Ad confir. Respondetur solutione ibi data.

Ad replicam dicitur quod ordo formæ ad materiam non est relatio prædicamentalis, sed transcendentalis, pertinetque ad ipsum genus substantiæ incompletæ, & licet substantia dicatur ad se, tamen substantia incompleta, & partialis non est purè ad se completè, & determinatiuè, sicut substantia completa, sed dicit ordinem ad aliam partem, & ad totum, etiam si substantialis pars sit. Vnde anima quæ est substantia incompleta, ipsa sua natura substantiali non est omnino ad se, sed ad alterum cui coaptatur, & coordinatur, non ut relatio prædicamentalis, sed ut pars, & idèd potest indiuiduari per ordinem ad corpus, cuius est forma substantialis, & consequenter multiplicata materia multiplicabitur etiam anima, in quantum forma illius est quod totum non currit in Angelo.

Angeli non essent de facto multiplicati numero, etiamsi multiplicatio eorum esset possibilis.

24 Et suppositione oppositæ sententiæ quam hucusque defendimus, restat difficultas, an illâ datâ de facto darentur plures Angeli numero distincti. Quæ quæstio solum potest reduci in tali casu ad voluntatem Dei, de qua nobis certò constare non potest nisi per reuelationem. Vnde dicit Damasc. lib. 2. de fide c. 3. loquens de Angelis, *Æquales natura inter se, an dispares sint haud quaquam comperit habemus, solus ille scit qui eos creauit Deus.* Et August. lib. contra Priscillianistas cap. ultimo. *Esse Angelos, inquit, Principatus, & Virtutes libenter me scire fateor, quid autem sint, & qualiter sint, aut quomodo distinguantur, prorsus ignoro.* Quare in hac parte solum proponemus coniecturas, quæ pro vtraque parte se offerunt, vt lector eligat quas firmiores esse iudicauerit, licet nobis probabiliiores, & firmiores videantur illæ, quæ partem negatiuam suadent. Et obiter etiam soluemus aliqua Patrum testimonia, quæ obici possent contra sententiam supra positam de impossibilitate multiplicationis Angelorum in eadem specie, quia si aliquid probant, etiam probarent de facto dari.

25 Igitur pro hac parte negatiua quod non essent plures Angeli numero de facto, etiam si essent possibiles, sumitur coniectura in primis ex similitudine corporum cælestium; videmus enim quòd licet corpora cælestia vt Sol, & Luna, possent multiplicari numero, quia materia, & quantitate non carent, de facto tamen vnus Sol, & vna Luna datur, & quælibet sphaera cælestis cum suo planeta, vel astris, diuersæ speciei est, & vnicus tantum planeta in qualibet sphaera, sicut vnus Sol in sua; & in firmamento licet sint plures stellæ, quæ videntur solo numero distingui, tamen verius est stellæ esse partes eiusdem cæli densiores, non autem globos illi affixos, vt nunc suppono ex Philosophia. Hoc autem idè est, quia illa corpora sunt incorruptibilia; ergo nõ indiget quælibet species illorum multiplicatione individuali, quæ ad hoc præcipue ordinatur iuxta finem naturalem, vt species conseruetur, quòd sufficienter fit in vnico individuo, quando natura est incorruptibilis, & illi individuo datur tota, & vniuersalis virtus illius speciei, vt Soli; ergo à fortiori sufficiet vnicum individuum in qualibet specie Angelica, quia incorruptibiles sunt multo nobilius quàm cæli, licet aliàs non repugnaret eos multiplicari.

26 Secundò deducitur, & explicatur ampliùs ista coniectura, quia cum natura semper studeat paucitati, & breuitati, numquam inducit pluralitatè individuum, nisi propter bonum speciei, quia scilicet ad eius conseruationem necesse est multiplicari individua, quod quidem non currit in rebus corruptibilibus. Sed præsertim in Angelis, in quibus quodlibet individuum perit totam suam perfectionem habere à principio, nec eam per successiones & mutationes acquirit transeundo de imperfecto ad perfectum; ergo quodlibet individuum petit totâ perfectionem debitam speciei, & si alterum individuum daretur, eandem prorsus perfectionem haberet, quam aliud: si enim quodlibet individuum haberet diuersas perfectiones, quàm aliud, vnus haberet plus, & alter minus, & ille qui haberet minus, esset capax habendi maiorem, cum esset eiusdem speciei cum alio; & sic eiusdem perfectionis capax; ergo esset minus perfectum, & capax maioris perfectionis; ergo in Angelis dabile

esset quod procederent de imperfecto ad perfectum in perfectionibus suæ naturæ acquirendis. Vnde consequenter peterent discursum qui fundatur in natura intellectuali, procedente de imperfecto ad perfectum, & non habente statim à principio omnem suam perfectionem, quod totum est contrarium naturæ Angelicæ: ergo etiam conformius est naturæ suæ, quòd vnum tantum individuum datur in qualibet specie, quod totam perfectionem habet suæ naturæ debitam, & si aliud daretur, non adderet nouam perfectionem, sed omnino esset similis alteri, & sic superflueret.

27 Denique perfectior ordo videtur si multiplicatio Angelorum fiat per diuersas species, siquidem si omnes Angeli, qui nunc sunt, specie differunt, maxima erit perfectionum varietas: quilibet enim addit super alterum diuersam perfectionem specificam, quæ non tanta esset, si multi eorū solo numero differrent, maior quippe est si illi qui plures sunt numero, etiam specie differrent. Ad quod etiam videtur facere autoritas illa S. Dionysij in 5. cap. de cælesti Hierarch. vbi inquit: *Enunciant sanctorum voluminum traditiones, superiores substantias esse graduum inter se celsitudine differentes.* Differentia autem gradualis ad minus significat differentiam specificam: nam plura individua solo numero differentia non differunt inter se diuersis gradibus, sed graduum celsitudine.

28 Pro opposita sententia aliquas coniecturas affert P. Suarez, lib. 1. de Ang. cap. 15. & P. Vasquez, hic disp. 18. cap. 3. In primis ducuntur autoritate aliquorum Patrum, qui tamen vix aliud dicunt, quàm quòd Angeli sunt vnus naturæ, vel essentiæ, quod de natura intellectuali generica sufficienter intelligitur, nec cogunt intelligi de natura vna specie atoma. Sic Loquuntur Nazianzenus oratione in laudem virginis, vbi de Angelis loquens inquit, *Idem quisque sibi, natura est omnibus vna.* S. Basilus lib. 3. contra Eunomium, *Angeli omnes vt appellationis vnus, sic eiusdem sunt naturæ inter se.* Anselmus lib. 2. cur Deus homo cap. 21. *Omnes Angeli sunt vnus naturæ.* S. Gregorius Nissenus lib. de creatione hominis cap. 18. Vbi dicit, *In finita Angelorum millia consistere in eadem essentia.* S. August. in enchirid. cap. 29. inquit, *non fuisse eandem rationem reparationis in Angelis sicut in homine, eo quod non tota Angelorum natura corruerit.* Quæ auctoritates non cogunt nos intelligere de natura specifica atoma, sed de natura generica. August. tamen in illa auctoritate non dicit quòd tota natura Angelorum non corruerit, sed quòd tota multitudo Angelorum, quod multo minus vrget. Nissenus autè in illo cap. 18. nihil tale dicit, sed cap. 17. inquit, quòd *Angeli ad infinita prope millia sunt diffusi, & vna natura, & multi esse numero possunt.* Vbi ly multi numero, non est idem quod solo numero differentes, sed multitudinem magnam habentes siue specie differant, siue non. Et similia verba habet idem sanctus oratione 4. in Cant. circa finem.

29 Difficilius potest obici Athanasius in questionibus ad Antiochum, quest. 8. dicentis: *Vna, & eadem est essentia Angelorum, sicut & hominum.* Et iterum, *Sicut Angeli vnus speciei sunt, ita credimus de nostra natura.* Constat autem nostram naturam esse eiusdem speciei atomæ. Et Damasc. lib. 2. institut. cap. 7. inquit, *cas qua sola individua continent species infimas vocari, cuiusmodi sunt Angeli, homo, & equus:* ergo sentit non omnes Angelos specie differre. Sed Respondetur D. Athanasium sumere essentiam Angelorum genericè prout est vna in ratione intellectualis, & spiritualis sine villo corpore, sicque condistinguitur à natura hominum,

hominum, quæ non est purè spiritualis. Et comparatur, atque condistinguitur species subalterna Angelorum cum specie infima hominum, non autem species infima Angeli, eo quod species illa subalterna Angelorum in modo essendi comparatur, & distinguitur à specie hominum tanquam vnum extremum propter vnum modum essendi spiritualiter sine corpore. Vel etiam potest dici secundum solutionem quam assignat D. Thom. *quæst. de spiritual. creat. art. 8. ad 1.* soluens auctoritatem August. *suprà* allatam, quod sancti quando comparant naturam Angelorum cum natura humana, non considerant eorum distinctionem secundum esse naturæ, sed secundum ordinem quem habent ad beatitudinem, in quo omnes sunt eiusdem rationis. Aliàs verò loquens Athanasius de distinctione istorum in genere naturæ *in tractatu quodam ad illa. verba Matthæi: Omnia mihi tradita sunt à Patre meo*, inquit, quod *Homines qui similes sunt inter se hominibus, hoc est eiusdem substantia censerent debent, Angeli quoque inter se generis ratione, & eiusdem naturæ.* Vbi solum genericam rationem communem illi distribuit, & ex hoc loco explicandus est locus in argumento allatus. Damascen. autem affert inter exempla speciei infimæ Angelum, sicut hominem, & equum, & bene, quia in Angelis datur species infima; sed quod illa species habeat plura individua, Damascenus ibi non dicit: licet loquendo de aliis speciebus, vt homine, & equo, & generaliter de specie infima dicat, quod est illa quæ sola individua continet, quia de se species individua multa potest continere, non tamen in omni specie necesse est quod plura dentur.

30 Secunda coniectura est quia multitudo indiuiduorum pertinet etiam ad perfectionem vniuersi.

Tertia quia ad politicam gubernationem principis pertinet; quod sint in omni ordine, seu gradu plures personæ.

Quarta id etiam pertinet ad ordinem amicitia: vt habeant similes in eadem specie.

Quinta quia inueniuntur plures beati eiusdem gloriæ in eodem gradu: ergo, & plures Angeli in eadem specie. Denique quia aliàs si in qualibet specie non essent plures Angeli, sequeretur quod plures species totaliter damnarentur, quod videtur incongruum diuinæ pietati.

Respondetur has omnes coniecturas parum probare: illa enim secunda non tenet in rebus incorruptibilibus, in quibus multitudo indiuidualis non conducit ad ordinem vniuersi, vt patet in Sole, & Luna.

Ad tertiam dicitur quod cælestis politia, & amicitia sufficiens saluatur in diuersis speciebus Angelorum, quia est politia incorruptibilium substantiarum, quarum quælibet sua perfectione implet totam speciem, neque exigit plura individua eiusdem speciei. Et sicut Angeli, & animæ separatæ vnā politiam constituunt, licet inter se animæ, & Angelus specie differant, ita & plures Angeli inter se. Vnde soluitur.

Quarta coniectura quia ordo amicitia: solum requirit communicationem intellectualem, siue naturæ ipsæ specie atoma differant, siue non, cum sit amicitia substantiarum incorruptibilium, quæ non exigunt ex se multiplicationem indiuidualem, præsertim cum omnes ordinentur ad eundem finem beatitudinis, in quo conuenient eodem modo, possuntque habere communicationem eiusdem rationis inter se, & cum hominibus.

Ad quintam dicitur quod Beati siue habeant æqualem visionem, siue inæqualem, tamen illa visio

eiusdem speciei est in omnibus, siue Angelis, siue hominibus. Vnde ex hoc non potest fieri argumentum ad distinctionem, quam habent in genere naturæ.

Ad vltimam dicitur quod sicut non est inconueniens quod tota aliqua species integrè beatificetur in quolibet Angelo beatitudinem consequente, ita non debet reputari inconueniens quod tota aliqua species damnetur: re compensatur enim integra damnatio aliquarum specierum, integra aliarum beatificatione.

Tandem circa hunc articulum inquiri potest de numero Angelorum, seu multitudine, siue distinguantur specificè, siue numericè, an videlicet multitudo eorum excedat multitudinem rerum corporearum. De qua re certum est secundum sacros Doctores numerum Angelorum excedere rerum materialium numerum: nam iuxta antiquos Philosophos intelligentiæ, seu substantiæ separatæ multiplicantur iuxta numerum aliquarum rerum sensibilium: sicut Plato, qui substantias separatæ ponebat esse ideas rerum sensibilium, & consequenter esse tot quot species sensibiles Aristoteles autem posuit intelligentias separatæ iuxta numerum primorum motuum, qui sunt in orbibus cælestibus, vt patet in 12. *Metaph. c. 10. & 8.* quem secutus est Rabbi Moyses quantum ad numerum substantiarum purè spiritualium; sed tamen addit multo plures numerari Angelos in Scriptura, quia ibi dicuntur Angeli etiam homines diuina nunciantes, vt omitam Algazalem inter cuius errores refertur in 2. p. *Directorij Inquisitorum qu. 4.* quod dixerit tantum esse decem Angelos. Et alios hæreticos refert D. Thom. in 2. *dist. 10. quæst. 1. art. 1.* qui dixerunt solum esse vnicum Angelum, qui varia ministeria exercet; & idè multorum nomine nominatur.

Apud sacros autem Doctores constat numerum Angelorum esse in maxima multitudine, quia dicitur Danielis 7. *Millia millium ministrabant ei, & decies millies centena millia assistebant ei.* Et Diuus Dionysius cap. 9. *cælest. Hierarch.* quod *Beati exercitus supernarum mentium excedunt infirmam, & constrictam nostrorum materialium numerorum commensurationem; & cap. 14.* dicit, quod *Transcendit multitudo Angelorum omnem materialem multitudinem.* Et D. Thom. in hac *quæst. 50. art. 3.* inquit, *Rationabile esse quod substantiæ immateriales excedant secundum multitudinem substantias materiales incomparabiliter.* Et idem affirmat *infra qu. 112. artic. 4. ad 2. & 2. contra Gentiles cap. 92.* & videri potest D. Gregor. lib. 17. *Moral. cap. 9.* & D. Hieronymus in caput 7. *Danielis*, & scholastici communiter hoc sequuntur. Et D. Thom. communiter vtitur illa comparatione, quod sicut corpora quanto superiora sunt, tanto amplius in quantitate excedunt inferiora, ita vt respectu supremi cæli totus globus terræ sit instar puncti: ita superiora entia, quæ sunt substantiæ spirituales, debent secundum multitudinem excedere omnes res materiales, & corporeas. Et Caietanus *super hunc art. 3. quæst. 50.* intelligit de mente S. Thom. quod multitudo Angelorum non excedat numerum indiuidualem omnium corporum, v. g. omnes arenas maris, & lapillos, & puluerem terræ, & omnia grana frumentorum, &c. quia hoc videtur magna absurditas; sed quod excedunt incomparabiliter omnes species rerum corporearum, quod expressit S. Thom. *quæst. 6. de potentia art. 6.* dicens quod *Excedunt omnes species materialium.* Numerum ergo specierum excedunt incomparabiliter, non tamen perueniunt ad hoc vt excedant numerum omnium indiuiduorum totius rei

rei corporeæ. Quantum autem excedant numerum specierum, cum dicitur quod incomparabiliter excedant omnes naturas, seu species materiales, quis hominum poterit cognoscere? cum sit proprium Dei id quod dicitur Esaiæ 40. *Qui educit in numero militiam eorum* (Angelorum) & omnes ex nomine vocat.

ARTICVLVS IV.

Vtrum Angeli sint per naturam incorruptibiles.

DVo in hac parte sunt extra omnem contro-
uersiam.

Primum est Angelos naturâ suâ esse physicè incorruptibiles, & immortales respectu cuiuscunque agentis creati, & sumendo ly *corruptibile* prout opponitur generabili: sicut enim corruptio opponitur generationi, ita & corruptibile opponitur generabili. Vnde sicut Angelus nullo modo est generabilis, quia caret materia, ita nullo modo est corruptibilis corruptione physica, quæ est per separationem formæ à materia. Vnde cum nullum agens creatum operari possit nisi ex materia, quia nullus potest creare ex nihilo, ut *disp. preced.* ostensum est, manifestum est quod sicut Angelus caret corruptione physica, & materiali, ita in suo esse est independens ab omni agente creato. Vnde sicut definitur in Concilio Later. sub Leone X. *sect. 8.* animam rationalem esse immortalem natura sua, ita à simili certum esse debet Angelos esse immortales natura sua per respectum ad quamcumque potentiam agentis creati.

2 Secundò. Certum est Angelos esse annihilabiles à Deo, sicut sunt creabiles, & ita per eandem extrinsecam potentiam, qua sunt creabiles à Deo, sunt etiâ annihilabiles, ita quod sicut beneficio Dei creati sunt, ita eodè beneficio conseruantur in esse, quod beneficium cum liberum sit, potest Deus subtrahere cum velit, ideòque gratiâ Dei creatoris dicuntur naturaliter permanere. Vnde nulla creatura est quæ possit dici absolute immortalis, id est, independens in suo esse à beneficio creatoris, sed *solum Deus habet immortalitatem*, ut dicitur 1. ad Timot. 2. Qua ratione etiam multi sancti dicunt Angelos esse immortales gratia, & non natura, non quod ly *gratia* pertineat ad donum supernaturale, quo ordinamur ad beatitudinem, sed ly *gratia* sumitur per dono creationis, quod etiam gratuitum beneficium est; & sic nulla creatura datur, cuius naturæ repugnet desinere esse: sed omnis natura creata sicut est capax existendi per beneficium Creatoris & liberam voluntatem Dei, iuxta illud Sapientiæ 11. *Quomodo posset aliquid permanere nisi tu voluisses, aut quod à te vocatum non esset, conseruaretur?* ita est capax desinendi esse, si Deus velit suspendere concursum.

3 Punctus ergo difficultatis solum reducit ad hoc, an hæc capacitas, qua Angeli sunt annihilabiles à Deo constituat illos natura sua corruptibiles, non quidem physica corruptione per separationem formæ à materia, cuius capaces non sunt, supposito quod sunt formæ simplices; sed corruptione annihilatiua per ordinem ad omnipotentiam Dei, ita quod non solum ab extrinseco per potentiam Dei dicantur annihilabiles, sed etiam ex natura sua intrinseca corruptibiles dicantur, quasi corruptionem annihilationis potiùs ex natura sua petentes, quam continentiam in esse; solum autem incorruptibiles gratia Dei conseruantis eos in esse.

In quo puncto P. Vasq. *hic disp. 182. c. 2.* tenet Angelos natura sua non posse dici immortales, & incorruptibiles, sed gratia Dei, si sumatur corrup-

tibile, & mortale relatè ad potentiam Dei, à qua conseruatur, & sine qua desinere potest, & corrumpi. Si verò sumatur relatè ad potentiam creatam, natura sua immortales & incorruptibiles sunt. At verò D. Tho. in *hoc art. 5.* absolute docet Angelum per naturam suam esse incorruptibilem, & immortalem, ita quod in se caret omni principio corruptionis, & solum potest corrumpi per potentiam Dei extrinsecam, quæ potest subtrahere suam conseruationem, & idem affirmat *suprà 9. 9. art. 2. & 2. contra Gent. c. 30.* Caiet. & Ferrar. ad ista loca D. Th. & eius expositores. Collegium Carmel. *tract. 7. de Angelis disp. 1. dub. 8.* Nauarrete 3. *tomo controu. 41.* Suar. *lib. 1. de Angelis cap. 9. & 10.* qui affirmat annihilationem Angeli ita esse miraculosam, sicut si igni negetur concursus ad calefaciendum.

Et licet ista quæstio, & dissidium sententiarum multum habeat de modo loquendi, tamen si aliquid difficultatis habet, in hoc solo puncto constat, vtrum Angelus secundum suam naturam ita recipiat existentiam per influxum Dei, quod ex natura sua, & connaturalitate ad esse illud petat ex suppositione quod creatus est, & fieret illi violentia, essetque *suprà* leges naturæ, & miraculosum annihilare Angelum, sicut ignis supposita sua productione, & existentia, connaturaliter petit concursum Dei ad calefaciendum, ita quod esset miraculum illum denegare igni, quia pertinet hoc ad legem naturæ, licet beneficio Dei tota natura habeat influxum ipsius quoad esse, & concursum quoad agere. Et sicut ignis habet naturalem inclinationem ad calefaciendum, & consequenter ad concursum Dei requisitum ad calefaciendum, licet Deus liberè illum conferat, possitque suspendere, ita oportet videre vtrum Angelus inclinetur naturaliter ad ipsum esse perpetuū, & ad influxum Dei quo sibi confertur, licet Deus liberè illum det, possitque tollere, si velit.

Sit conclusio: Angeli etiam hoc modo sunt incorruptibiles natura sua, & solum dicuntur annihilabiles per potentiam Dei extrinsecam, quatenus liberè præbet concursum, neque est alligatus legibus naturæ ad conseruandum esse, non tamen in Angelo est naturalis ordo ad desitionem, sed potiùs naturalis inclinatio, & ordo eius est ad existendum, supposita eius creatione, licet totum hoc habeant ex libera voluntate, & beneficio Dei, non supperaddito naturæ, & ipsi improporcionado, sed iuxta eorum naturam, & proportionatum illi, non tamen debito. Hæc conclusio directè est contra intentionem sententiæ Vasquez, qui ex hoc quod Angeli beneficio creationis, & gratuita voluntate Dei habent esse, collegit quod non per naturam suam, sed per gratiam Dei habent incorruptibilitatem, seu perpetuitatem essendi, loquendo de Angelis per ordinem ad potentiam Dei, qua possunt annihilari, non per ordinem ad agentia, à quibus non possunt corrumpi. Sed tamen etiam D. Th. hanc mentem Vasqu. præuidit *inf. 9. 105. art. 4.* ubi ostendit nihil ex rebus creatis annihilari à Deo, quia hoc neque pertinet ad cursum naturalem rerum, neque ad miraculorum. Non ad naturalem, quia res si sunt immateriales, non est in eis potentia ad non esse, si verò sunt materiales, saltè ratione materiæ sunt incorruptibiles, quia materia non corrumpitur. Ratione verò miraculi non annihilatur aliquid à Deo, quia non pertinet hoc ad manifestationem gratiæ in ordine ad quam solum fiunt miracula. Sentit ergo quod annihilatione, si fiat, non est iuxta naturam rerum, quia est in rebus potentia ad non esse: specialiter autem ponit ipsum fundamentum Vasq. *9. 5. de potentia art. 3. arg. 12.* quia scilicet. *Res incorruptibiles dependent à voluntate Dei: ergo non sunt simpliciter necessaria. sed liberè causantur à Deo: ex quo dicto videtur sequi quod nihil*

nihil sit in creaturis simpliciter incorruptibile, sed quod omnia sint corruptibilia, quod est inconueniens. Et respondet S.D. Ad 12. dicendum quod licet creatura incorruptibiles ex Dei voluntate dependant, qua potest eis esse præbere, & non præbere, consequuntur tamen ex diuina voluntate absolutam necessitatem essendi, in quantum in tali natura causantur, in qua non sit possibilitas ad non esse, talia enim sunt cuncta creata, qualia Deus esse ea voluit, ut Hilarius dicit lib. de Synodis. Et solutione ad 9. distinguit de his quæ sunt incorruptibilia per naturam, vel per gratiam, quia in illis, inquit, quæ sunt per naturam incorruptibilia, non præinteligitur potentia ad non esse, quæ tollatur per aliquid à Deo receptum, sed in illis quæ sunt incorruptibilia per gratiam subest possibilitas ad non esse in ipsa natura, quæ tamen totaliter reprimatur ex virtute Dei.

6 Ex quo sumitur fundamentum huius sententiæ, tum à priori, tum à posteriori. A priori quidem, quia tunc aliquid habetur per gratiam ut distinguitur à natura quando est super principia ipsius naturæ, & supra exigentia ipsius naturæ, licet etiam ipsa natura creata, sit quoddam beneficium liberè collatum à Deo, quod tamen simpliciter non dicitur gratia, quia licet totum quod natura est ex Dei participatione, & deriuatione sit, tamen quia ipsamet voluntas Dei dat quibusdam naturis necessitatem, & exigentiam alicuius rei, aliis verò contingentiam, non dicitur facere gratiam, & beneficium condistinctum à natura in eo quod ei datur iuxta exigentiam, & necessitatem talis naturæ, sicut non est gratia quod Sol oriatur, & illuminet, vel quod ignis calefaciat, quia licet totum hoc ex libera Dei emanatione dependeat, tamen quia sit iuxta exigentiam, & proportionem naturæ, non dicitur fieri ex gratia superaddita naturæ. Tunc autem dicitur Deus præbere necessitatem naturæ, & non ex gratia superaddita aliquid illi conferre, quando facit naturam sine potentia, vel inclinatione ad oppositum, sed solum cum ordine ad vnum, licet hoc vnum Deus ipse possit tollere, si velit, sed quod non tollat, non est gratia superaddita naturæ, sed in ipsamet naturæ largitione continetur, quæ solum generalissimo modo dicitur gratia, non gratia ut distinguitur à natura, de qua solum loquimur in præsentia, quando disputamus vtrum Angeli sint incorruptibiles per naturam, vel per gratiam, id est, per gratiam, ut condistinctam à natura, & superadditam illi.

7 Quod autem natura Angeli ita sit creata ex voluntate libera Dei, quod tamen non habeat potentiam, & inclinationem ad non esse, sed solum ut *locus cit.* dicit S. Thom. ex eo constat, quia in Angelo non est potentia ad aliquam formam, per quam tollatur suum esse quod habet à Deo per creationem: ergo neque habet naturam aliquam inclinantem ad non esse. Patet consequentia, quia nulla inclinatio, & potentia potest esse primò, & per se ad non esse, quia esset inclinatio ad nihil, & consequenter esset nulla inclinatio, sed omnis inclinatio, vel potentia ad non esse est secundariò, quatenus est ad aliquam formam, ex qua non esse alterius sequitur, vel quia habet potentiam deficientem, quæ modo defectibili tendit ad aliquod esse. Respectu autem ipsius esse quod natura Angeli per creationem recipit à Deo, potentiam, & inclinationem habet determinatam, quia vnumquodque propendit in suum esse, & in suam conseruationem, & hoc ex Deo habet: ergo si à Deo non recipit potentiam ad aliquam formam tollentem suum esse, nec inclinationem immediatè, & per se ad non esse, sed inclinationem ad ipsum esse,

consequens est, quod Angelus non indiget aliqua gratia superaddita ipsi naturæ ad hoc, quod incorruptibilis sit, sed solum ipsa naturæ largitione, quæ etiam largo modo potest dici gratia, sed non distincta à natura: homines autem quando redduntur incorruptibiles in resurrectione, id erit per gratiam superadditam naturæ, quia id natura hominis ex suis principiis non petit. Condistinguentia est ergo incorruptibilitas corporis gloriosi ab immortalitate Angeli, quod illud ex gratia, hic ex natura (licet beneficio Dei accepta) incorruptibilis sit.

8 A posteriori autem deducitur ratio, quia igni vel Soli non dicitur fieri gratia per hoc quod detur sibi concursus ad calefaciendum, vel illuminandum, quia hoc est debitum naturæ ex vi suæ primæ creationis, licet liberè conferatur à Deo, etiam supposita creatione, sed totum hoc pertinet ad gratiam creationis, quæ non est simpliciter gratia, quia non est distincta, & superaddita naturæ, & sic non appellatur à Patribus simpliciter gratia, sed gratia creationis. Sed supposita creatione Angeli, & aliarum rerum incorruptibilium similiter non requiritur gratia superaddita naturæ, ut conseruetur in esse magis quam requiratur concursus igni, ad comburendum, sed sufficit gratia indistincta à collatione naturæ, & primæ creationis: ergo Angeli non sunt per gratiam incorruptibiles, sed per naturam, licet à Dei voluntate productam, sicut ignis non est calefactiuus per gratiam (id esset magnum absurdum) sed per naturam, licet totum hoc ex libero Dei concursu, & beneficio pendeat. Nobis autem sufficit contra Vasq. probare quod Angelus ita sit incorruptibilis per naturam, & non per gratiam, sicut ignis est calefactiuus per naturam, & non per gratiam. Minor prob. quia prima creatio Angeli non fuit gratia superaddita naturæ, sed fuit solum gratia creationis, qua producta est natura. Conseruatio autem in esse non est aliud quam continuo primæ creationis: ergo non est alia gratia, & beneficium à gratia creationis: continuatio enim ista non fit contra aliquam naturam, seu formam, quæ petat non continuari talem gratiam primæ creationis, nec contra potentiam aliquam, quæ sit in ipsa natura Angeli ad oppositum, sed iuxta inclinationem ipsius naturæ ad suum esse, quia non est minor quam ad suum operari, sed multo intimior, quia vnaquæque res naturaliter inclinatur ad conseruandum suum esse, multò magis quam ad operari, quia operari sequitur esse; sed ignis habet ex vi suæ primæ creationis inclinationem naturalem ad suum operari; & idèò concursus ei debitus ad calefaciendum non est gratia superaddita naturæ, & dono creationis, ergo si inclinatio naturæ Angeli ad suum esse quod habet à Deo, non est minor quam inclinatio ignis ad suum operari quod etiam habet ex concursu Dei, cur dicemus non esse istam conseruationem naturalem, & non ex gratia superaddita naturæ, sicut illa operatio ignis, & concursus ad illam est naturalis, & non gratuitus?

9 Ex dictis autem conuelluntur fundamenta oppositæ sententiæ. Nam primò fundatur in hoc quod aliqui Patres simpliciter affirmant conseruationem rei existentis, etiam Angeli, esse ex gratia Dei, non ex natura rerum, quia scilicet gratiam à Deo sortiti sunt, qui immortalitatem eis largitur, & incorruptibilitatem: ergo denegatio conseruationis Angelo non est ei violenta, neque contra naturam, & sic conseruatio gratuita erit, & non naturalis. Antecedens passim asseritur à Patribus, & videri potest Cyrillus Alexand. lib. 4. *Theauri cap. 2.* Damasc. libro 2. de fide capite 3. Sophron. in epistola relata in

VI. Synod. act. 51. & recepta act. 13. Consequentia verò patet, quia in sensu Patrum id quod naturæ debetur, non vocatur simpliciter gratia, sed gratia creationis: ergo si simpliciter dicunt Angelos habere immortalitatem ex gratia, & non per naturam non censent esse gratiam quæ pertineat ad donum creationis.


Secundò; Quoniam Angelus nunc existens non petit naturaliter durationem crastinam, neque potentia actiua, neque passiva, non actiua, quia non se conseruat: non passiva, quia Angelus hodie existens non recipit actionem perseverantem cras, quia est eadem actio existens hodie, & cras, & quòd duret cras, solum est intrinseca denominatio. quia iam existit hodie, & non producit de nouo cras: ergo non est debita illa actio crastina Angelo, sed ex mera Dei voluntate illam habet, sicut & hodiernam, nec recipit illam quæ cras erit in actione, qua conseruatur hodie: ergo non inclinatur ad talem conseruationem crastinam secundum existentiam quam habet sua natura. Essentia autem Angeli remota existentia, tantum est essentia secundum prædicata quidditatiua, & secundum esse possibile: hoc autem nullam inclinationem habet ad existentiam magis, quam ad non existentiam, alioquin fieret violentia rebus possibilibus, quæ non accipiunt esse: ergo Angelo nulla fit violentia, ex eo quod annihiletur: ergo quòd non annihiletur gratia Dei est.

Confirmatur, quia antecederet ad omnipotentiam Dei dicitur res aliqua possibilis ex non repugnantia, ut sit, non potentia physica, & receptiua, sed logica, & obiectiua: ergo similiter dicitur Angelus corruptibilis ex non repugnantia naturali, & intrinseca quam habet, ut non sit.

Ad primam Resp. Patres loqui de gratia largè accepta pro dono creationis, quando dicunt res omnes, etiam Angelos per gratiam Dei conseruari, & permanere in esse, id est ex voluntate Dei per quam sunt omnia, iuxta illud Apocal. 4. *Tu creasti omnia, & propter voluntatem tuam erant, & creata sunt.* Non autem loquuntur de gratia distincta à dono creationis, cum reuerà per donum creationis acceperint esse, & id quod naturæ est, non aliquid superadditum naturæ. Et licet donum creationis non vocetur à Patribus simpliciter gratia, quando agunt de gratia ad salutem requisita contra Pelagium, tamen quando non agunt contra ipsum, sed de eo quod est in re, simpliciter vocant donum creationis beneficium, & gratiam Dei, quia verè sic est.

Ad secundam dicitur, quòd Angelus non habet durationem crastinam, neque hesternam propriè loquendo, quia non mensuratur præterito, & futuro quod pertinet ad tempus, sed æuo quod est supra tempus, & non habet præteritum, neque futurum; & sic iuxta naturam suam supposita creatione petit hanc durationem continuatam, & perseverantem per modum æui, non potentia actiua, qua se conseruet in esse, sed potentia passiva, qua recipit conseruationem. Et cum instatur, quòd Angelus existens non recipit conseruationem crastinam, quia non est distincta ab existentia, & conseruatione hodierna. Respondetur quòd non recipit illam de nouo, sed recipit continuationem eius, & ad istam continuationem inclinatur ex natura sua, sicut quælibet res inclinatur ad sui conseruationem, quæ non est inclinatio ad recipiendum de nouo, sed ad continuandum esse iam receptum, & ad non habendum contrarium. Inclinatio autem naturalis non solum est ad recipiendum aliquid de nouo, sed etiam ad quiescendum in recepto, sicut res quæ acquisiuit suum finem, quiescit in illo. Et D. Thom. *supra quest. 19. art. 1.* dicit, quòd *Qualibet res hanc habet habitudinem ad suam formam naturalem, ut quando non habet ipsam, tendat in eam, & quando habet, quiescat in ea.* Nec tamen Deus violentiam inferret Angelo per annihilationem, nec cuicunque rei naturali tollendo ab illa esse, quia Deo, ut primo principio omnia obediunt, & nihil illi resistit siue efficiendo, siue tollendo ab eis; & sic propriè non fit violentia à Deo, quia licet faciat contra inclinationem propriam naturalem, non tamen contra vniuersalem naturæ ad obediendum creatori, quando operatur ut primum principium omnium, sicut nec aquæ fit violentia ascendendo ad replendum vacuum, licet sit contra inclinationem particularem eius, quia in hoc seruit vniuersali bono naturæ ad quod magis inclinatur; & quandiu sit aliquid iuxta inclinationem saltem vniuersalem, non fit violentia.

Ad Conf. Resp. in Angelo esse non repugnantiam ad annihilationem, non per intrinsecam potentiam inclinantem ad non esse, sed per dependentiam à voluntate Dei à qua omnis natura accipit esse non necessitate, sed voluntate eius. Et ita pertinebit incorruptibilitas Angeli ad gratiam Dei, quæ est donum creationis, non ad aliquam gratiam superadditam naturæ, & dono creationis.



QVÆSTIO LII.

De comparatione Angelorum ad loca.

S V M M A L I T T E R Æ.



TRACTAT hic D. Thom. secundam comparationem Angelorum ad res corporales, scilicet non tanquam ad aliquid à se assumptum, sicut corpora in quibus apparent, sed vt aliquid cui assistunt, vel in quo existunt per modum loci.

Tractat autem de loco Angeli per tres articulos.

In 1. inquit vtrum Angelus sit in loco, & resoluit esse in loco, non tamen eo modo, quo corpus, sed æquiuocè cum illo, quia corpus est in loco per contactum quantitatis, quo commensuratur loco; Angelus verò per contactum seu applicationem virtutis; nec enim in Angelis est quantitas molis, sed virtutis.

In 2. art. inquit vtrum Angelus possit esse in pluribus locis? & Respondet quòd solum potest esse in vno loco, cui applicatur sua virtus, non vbique, neque in pluribus simul, quia cum sit virtus finita, non potest nisi ad aliquid finitum, & determinatum applicari, & illud determinatum cui applicatur, correspondet ei tanquam vnus locus siue sit punctum, siue sit aliquid diuisibile.

In 3. inquit, an è conuerso plures Angeli possint esse in eodem loco? & Respondet non posse, quia sunt in loco per applicationem virtutis tanquam motores seu continentes locum, non contenti à loco: continent autem locum tanquam perfectæ virtutes, cum Angeli sint supremæ causæ creatæ in vniuerso: ergo eodem modo repugnabit esse plures Angelos in eodem loco, sicut plures causas perfectas, & adæquatas respectu eiusdem effectus, vel passi. Non potest autem idem effectus procedere à duplici causa totali, & perfecta: ergo neque plures Angeli habere rationem existendi in eodem loco formali, id est in eodem vt operatum, & contentum ab illis.



QVÆSTIO LIII.

De motu locali Angelorum.

S V M M A L I T T E R Æ.



EQVITVR tertia comparatio Angelorum ad rem corpoream tanquam ad rem motam. Agendo enim de loco Angeli, oportebat agere de motu, quo & loca mutant, & se mouent, & corpora.

Inquit autem tria. In 1. artic. an possit Angelus moueri localiter? & Respondet posse: modum autem mouendi dicit proportionari debere modo existendi in loco: sicut enim est in loco per contactum virtutis, ita & mouetur penes diuersos contactus suæ virtutis ad loca: vnde non habent diuisibilitatem ex parte Angeli, sed ex parte locorum, quæ tangit, qui contactus si sint continui ex parte locorum dicetur continuo moueri in loco, si verò sint discreti, ita vt totus locus simul deferatur, & alius acquiratur, dicetur motus discretus.

In art. 2. inquit vtrum Angelus moueatur transeundo per medium? Respondet, quòd si mouetur motu continuo, impossibile est quòd transeat ad extemum nisi per medium: si verò mouetur motu discreto, potest moueri de vno ad aliud non transeundo per medium, quia non alligatur legibus loci, & commensurationi illius, cum non contineatur à loco, sed contineat illum.

In 3. art. inquit, an motus Angeli sit in instanti? & Respondet non posse, siue moueatur motu discreto, siue continuo, eo quòd in vno nunc, seu in vno instanti non potest esse motus, si toto tempore ante quieuit mobile, sed oportet quòd nunc aliter se habeat quàm ante, si verè mouetur. Vbi autem sunt plura nunc, est tempus, siue discretum, si illa plura instantia non continuentur partibus intermediis, siue continuum, si continuentur: ergo omnis motus Angeli in instanti non est.

DISPUT.

DISPUTATIO XX.

De loco, & motu Angelorum.

ARTICVLVS I.

Quæ sit in Angelo ratio existendi in loco.

DUPLEX in Philosophia solet distinguere locus, alter intrinsecus rei locatæ, qui abusuè dicitur locus, propriè autem est ubi; alter extrinsecus, qui est ipsum corpus, seu superficies externa, cui assistit locatum in aliquo spatio, & ex tali coexistentia ad illud corpus à quo circumdatur resultat in locato ille modus, qui dicitur ubi, qui est ipsa præsentia formalis, qua res adstat ipsi corpori locanti in tali spatio, & circumdatur, seu ubicatur ab illo in tali distantia.

Quare tria concurrunt ad hoc quod aliquid sit in loco. Primum est ipsum subiectum, seu substantia rei quæ ponitur in loco. Secundum est ratio illa per quam res tangit locum, cui astat, seu ab illo ubicatur, & coniungitur illi in aliqua distantia, sicut corpora ratione quantitatis replent, & tangunt locum, quatenus illi commensurantur. Tertium est ipsa præsentia, seu ubi, quod est modus quidam resultans in re locata ex eo quod astat loco, & coniungitur in tali distantia illi. Et hic modus, seu ubi, vel præsentia, est id quod acquiritur, vel deperditur per motum: non enim per motum localem acquiritur subiectum, seu substantia quæ est in loco, nec quantitas, seu ratio tangendi locum, siue sit quantitas molis, siue virtutis: hæc enim per motum localem non variatur, sed id quod acquiritur, vel perditur per motum est præsentia ipsa, & ubi.

In præsentia non est difficultas de primo, scilicet de subiecto existente in loco: nullus enim dubitat substantiam Angeli præsentem fieri loco, vel absentem, tanquam subiectum, seu res quæ est in loco, vel mouetur aut remouetur à loco, non autem sola operatio vel effectus Angeli dicitur esse in loco, aut Angelus ratione illius, ita quod sua substantia abstrahat à loco, id est loco præsens non sit. De hoc dubium esse non potest: verè enim substantia Angeli mouetur de loco ad locum, vt *infra* ostendimus tractantes de ipso motu Angeli. Et est expressa sententia S. Thom. quia, vt docet 3. p. q. 5. 2. art. 2. anima Christi Domini descendit ad Limbum Patrum per suam realem præsentiam, & substantiam; ad infernum autem damnatorum per suos effectus, aliàs non verè descenderet, si secundum suam substantiam eò non accederet. Vnde Durandus non bene audit, qui ausus est negare animam Christi ad inferos descendisse secundum suam realem substantiam, sed secundum effectus tantum, quem latè impugnât Caietan. loco cit. 3. p. & ibidem Suarez disp. 43. sect. 2. & nos diximus in lib. de anima q. 12. art. ult. Sic enim semper intellectum est ab Ecclesia illud verbum Symboli de vero, & proprio descensu ad inferos; secundum substantiam animæ, non verò quod anima Christi dicatur mansisse in terra, & solum descendisse ad inferos metaphorice, quia ibi effectum aliquem operata est: Ioan. à S. Thom. in 1. part. D. Th. Tomus alter.

hac enim ratione posset etiam dici quod tunc non solum descendit ad inferos, sed etiam quod ascendit ad cælos in illo triduo, vel quod iuerit ad paradysum terrestrem, vel in Hierusalem, aut ad alia loca, in quibus operabatur anima Christi in illo triduo aliquos effectus, sicut in inferno. Dicitur ergo specialiter descendisse ad infernum, quia ibi præsentiam suam posuit. Eodem autem genere motus mouetur Angelus, quo anima separata; & multò melius, quia perfectior substantia est, & actiuor quàm anima, & sic per motum potest substantiam suam mouere mutando locum, & præsentiam quam habet, quia vt dicit S. Thom. loco citato 3. p. art. 1. ad 3. Anima Christi descendit ad inferos eo genere motus quo Angeli mouentur, vt in 1. p. dictum est. Sentit ergo quod mouentur Angeli, & consequenter existunt in loco, vel mutant illum applicando illi præsentiam suam, & substantiam. Et in hoc sensu non controuertitur ista quæstio: imò in hoc sensu videtur damnata opposita sententia, quæ asserit substantiam Angeli non esse in loco, aut non mutare locum, quæ non est D. Thomæ, inter articulos quosdam Parisienses, quos refert Henricus quodlibet. 2. q. 9. & ex eo Suarez lib. 4. de Angelis c. 4.

Secundò, non est difficultas, aliquam præsentiam, seu modum dari quem acquirat Angelus in loco, quia mouetur intrinsecè in sua substantia, & non solum secundum aliquem effectum extrinsecum, ipsa substantia immobili permanente, de qua præsentia, seu modo, plura dicemus art. 4. agentes de motu Angeli: conuincitur enim dari istum modum, seu præsentiam intrinsecam in Angelo, quia præsentia Angeli ad locum est mutabilis, quæcumque illa sit, & per motum localem Angeli acquiritur aliqua præsentia, & amittitur alia, quia duæ præsentiae simul in eodem loco inueniri non possunt, & multò minus eadem præsentia pro duobus locis: ergo modus præsentiae per modum termini motus, quo formaliter Angelus in se denominatur præsens, nullo modo negari potest. Quæ præsentia superaddita est ipsi substantiæ Angeli, & rationi formali qua contactum habet ad locum, sicut anima nostra præter rationem formalem informandi corpus, quæ est ratio causæ formalis, habet rationem præsentiae seu vnionis ad corpus, & mediante illo ad locum corporis. In Angelo autem clarè apparet quod substantia, & virtus Angeli manet eadem, præsentia autem mutatur per motum, sicut in corporibus perditur, & acquiritur ubi modificans ipsum corpus, permanente eadem substantia, & quantitate, quæ est ratio contactus corporei. Nec dici potest quod hoc ubi, seu præsentia est in loco intrinsecè, & in Angelo extrinsecè, quia locus non mouetur, sed Angelus: ergo si intrinsecè mouetur intrinsecè habet mutatum esse; ergo & præsentiam. Hæc enim acquiritur per motum localem. Est autem illa præsentia in se spiritualis ex parte subiecti, & terminatiuè diuisibilis ex parte rei quam tangit, vt in fine articuli dicemus, quia ista præsentia, non est commensurationis ad corpus, sed continentiae, & superioritatis ad ipsum. Vnde ex parte sua spiritualis, & superior esse debet, & consequenter indiuisibilis, in subiecto in quo est, scil. in Angelo, ex parte autem effectuum, & termini attacki potest esse diuisibilis.

Quare qui dicunt Angelum esse in loco per ubi, seu per modum præsentiae superadditum substantiæ, verum dicunt, nec contra sententiam D. Thom. nam etiam D. Thom. admittit ubi Angelicum, quod vocat diffinitiuum, opusc. 48. tract. de ubi, cap. 1. vt *infra* latius videbimus. Multi autem difficul-

K K rates

tates istas confundunt, & existimant illos, qui dicunt Angelum existere in loco per operationem, seu contactum virtutis, negare quod Angelus sit in loco per *vbi* intrinsecum: quod etiam illis videtur tribuere P. Suarez *lib. 4. de Angelis, cap. 2.* Sed nihil minus illi dicunt; sicut enim qui dicit corpora esse in loco per quantitatem, non negat esse per *vbi* intrinsecum, quia quantitas est ratio formalis contactus rei ad corpus immediatum à quo ambitur, vel locatur; ita qui dicit Angelum esse in loco per quantitatem virtutem, quæ tangit rem sibi immediatam, non per commensurationem quantitatis ad quantitatem, sed per virtutem operantem, non negat præsentiam formalem, quæ motu ipso acquiritur, vel deperditur, licet ipsa virtus non perdat aut acquiratur, sicut quantitas in corporibus non acquiritur, vel amittitur per motum localem, sed solum ipsa præsentia localis, seu *vbi*, quod acquiritur per motum, & resultat ex positione in tali spatio, & circumscriptione corporis ambientis. In Angelis autem non potest resultare ex circumscriptione corporis adiacentis, in cuius spatio ponitur præsens, sed oportet inquirere aliam rationem formalem, quæ sit fundamentum illius *vbi*, seu præsentiae quam motu suo Angelus acquirit vel amittit, quidquid illud sit.

Reducitur ergo punctus difficultatis ad assignandum fundamentum huius *vbi*, sed præsentiae localis in Angelo, & rationem formalem habendi contactum cum corporibus: ex modo enim quo Angelus contactum potest habere cum corpore, dependet modus habendi præsentiam localem ad ipsa corpora, & consequenter acquirendi præsentiam localem in ipso corpore, quia hæc ex contactu nascitur: cum enim Angelus sit substantia indivisibilis, & tamen possit tangere rem divisibilem corpoream, & eius spatio correspondere, difficile apparet modum huius præsentiae, & fundamentum eius assignare: licet enim anima nostra spiritalis sit, & corpori quantitativo uniri possit, tamen non correspondet spatio immediate per seipsam, sed mediante corpore sibi unito; & similiter etiam corpus Christi Sacramentatum non correspondet loco, & spatio, nisi mediantibus speciebus accidentium, quibus colligatur, & sub quibus continetur. Angelus autem cum sit spiritus, non unitus corpori, valde difficile percipitur quomodo possit immediate correspondere corpori, ita quod in se sit modo indivisibili: & tamen correspondeat rei divisibili.

Varia sententia.

Mirum est, quantum in hac parte authores inter se disconveniant: principales tamen sententiae ad quatuor præcipuas reducuntur.

5 Prima affirmat, Angelum esse in loco ratione suæ substantiae, & per suam voluntatem, quia voluntas est causa effectiva qua Angelus ponitur in loco, substantia autem ratio formalis, nec alia forma querenda est, qua reddatur præsens loco, sicut quantitas in corporibus per seipsam est in loco immediate: substantia autem Angeli per seipsam habet id quod quantitas in corporibus. Hæc est sententia Scoti *in 2. dist. 2. qu. 6.* Bonau. Gabr. Gregorij, & aliorum. Omitto opinionem Durandi qui *in 1. dist. 37. qu. 1. circa 2. part. dist.* tenet quod Angelus est præsens omni corpori quod potest movere, non quidem per suam substantiam vel operationem, sed per ordinem ad illa, ita quod illud quod est situatio in corporibus, est ordo in Angelis. Moveri autem Angelum dicit, non per suam substan-

tiam, & per suos effectus, seu quoad manifestationem, quod fit per operationem Angeli circa locum, ut inquit *ibidem qu. 2.*

Secunda sententia est quod Angeli existunt in loco per contactum virtutis, id est per virtutem suam ut operantem circa corpus. Quæ sententia communis est inter Thomistas, ut fundatur in D. Thom. qui id ita affirmat *in hac qu. 52. art. 1. & locis postea citandis.* Sed diuiduntur in ea explicanda Authores, quia aliqui dicunt Angelum esse in loco per ipsam formalem operationem, qua operantur in corpore, ut Ferrar. *3. contra Gent. cap. 68.* Egidius, & alij, qui videntur ipsum *vbi*, seu præsentiam Angeli ponere non pertinentem ad ordinem essendi, sed ad ordinem operandi, ac proinde non distingui formaliter ab ipsa operatione, seu contactu virtutis, ut existimant Carmelitani Salmanticenses *tract. 7. de Angelis disp. 2. dub. 5. assert. 2.* Alij verò dicunt Angelum esse in loco per aliquid antecedens operationem, & ad instar operationis se habens, scilicet per applicationem virtutis suæ ad inchoandam operationem ex aliquo corpore. Ita attribuitur Caiet. *in præsentia qu. 52. art. 1.* (de cuius tamen mente statim dicam) Capreolo, Argentina, & aliis pluribus, quos citant P. Suarez & Vasquez statim citandi.

Tertia sententia est quod Angeli sunt in loco per aliquam formam sibi superadditam antecedenter ad eorum operationem, quæ immediate recipitur in ipsa substantia, quæ forma non est aliud quam modus, seu præsentia, aut *vbi* Angelicum, quod est sibi formalis ratio existendi in loco, nec aliam assignat rationem formalem, quæ sit fundamentum huius præsentiae, seu *vbi*, & formalis ratio contactus, in quo valde ab ipso differimus. Hoc autem *vbi*, seu præsentia est modus quidam intrinsecus cum connotatione, seu dependentia ad spatium determinatum divisibile, licet ex parte subiecti indivisibilis sit; & ita variato spatio quod connotat tanquam terminum, variatur iste modus, seu præsentia intrinseca, & hoc fit ad voluntatem Angeli. Et quia connotat, seu respicit determinatum spatium, dicitur præsentia diffinitiva, id est determinata ad tale spatium, & consequenter potest ratione talis determinatæ præsentiae habere propinquitatem, & distantiam, etiam sine interuentu corporum quibus coexistunt. Ita Pater Suarez *lib. 4. de Angelis c. 2. & 3. & c. 7. & 8.* & antea eam explicuerat *in Metaph. disp. 51. sect. 3. & 4.* Eademque est sententia Molina *super hanc qu. 52. art. 1. disp. 1. memb. 5.* Arrubal. *disp. 154. c. 3.* Granados *tract. 9. disp. 3. sect. 2.* & aliorum recentiorum.

Quarta sententia est Angelum non posse esse præsentem in spatio nisi mediante aliquo corpore cui uniat. Et in hoc conuenit cum anima rationali, quæ etiam non potest esse præsens loco, & spatio nisi mediante corpore cui unitur. Neque corpus Christi Sacramentatum est præsens spatio, nisi mediantibus speciebus quantitativis, quibus unitur. Ita Angelus non redditur præsens loco per seipsum immediate, sed mediante unione eius ad corpus. Sed quia ista unio Angeli non est informativa sicut anima, nec Sacramentalis, sicut corporis Christi ad species, restat quod sit unio operatiua, quatenus Angelus per operationem aliquam circa corpus producit modum quendam spirituales in seipso, per quem unitur corpori, cui sic unitus redditur præsens loco, *vbi* est corpus. Ita P. Vasquez *hic disp. 188. c. 7. & 195. c. 4.* quem latissime impugnatur Suarez *vbi supra c. 6.* & sententiam Vasquez sequitur Alarcon *tract. 6. de Angelis disp. 6. cap. 5. & 6.* qui cum in c. 2. retulisset sententiam Thomistarum,

starum, qui dicunt Angelum esse in loco per operationem transeuntem, & contactum virtutis, in eamque efferatur falsam esse censeret, imò risu quodam exciperet eorum responsionem, qui dicunt operari Angelos in aliquibus corporibus aliquas qualitates occultas, remittit tamē factus in c. 5. docet operationem istam transeuntem in corpus, vel applicationem virtutis, quam Philosophi, & Theologi antiquiores posuerunt pro præsentia Angelorum ad locum, venerandam, & sequendam esse sentit, quia sic conducit ad opinionem P. Vasquez, non ut Angelus per operationem, vel applicationem virtutis habeat rationem contactus, ut dicunt Thomistæ, sed ut Angelus per talem operationem producat illam unionem ad corpus, qua mediante existat in loco, ut dicit Vasquez.

Resolutio ex mente D. Thomæ.

9 Dico primò. Absolutè loquendo Angeli sunt in loco. Hæc conclusio simpliciter pertinet ad fidē. Vnde D. Th. in 1. dist. 37. q. 3. art. 1. dicit esse hæreticam opinionem quorundam Philosophorum dicentium, quod Angeli, vel Intelligentiæ nullo modo sunt in loco. Dicit autem D. Th. esse hæreticam, quia secundum fidem nostram ponimus Angelos immediate circa nos operari. Et hoc constat de fide ex pluribus locis Scripturæ, in quibus referuntur aliquæ actiones Angelorum factæ immediate circa nos, & mouendo se de loco ad locum, sicut Genes. 18. & 19. dicitur *Angelos venisse ad Abraham, & Loth.* & Iudicum 2. dicitur *Angelum ascendisse de Galgalis ad locum Flentium.* Et Tobie 8. dicitur quod *Raphaël Angelus apprehendit Demonium, & reliquit illud in deserto superioris Egypti,* & Apocal. 12. dicitur de Diabolo, & Angelis eius, *Neque locus inuentus est eorum amplius in calo.* Et infra: *Et proiectus est in terra, & Angeli eius cum eo missi sunt,* & Lucæ 10. *Videbam Satanam sicut fulgur de calo cadentem.* Idem communiter docent Patres, ut Nazianzenus relatus à D. Th. loco citato dist. 37. Athanasius in epist. ad Serapionem, Basilii de Spiritu sancto c. 16. Gregor. lib. 2. moral. c. 2. & hom. 24. in Euang. Damasc. lib. 2. de fide c. 3. & lib. 1. c. 17.

Et ratio est manifesta, quia Angeli nō sunt ubique, sed mouentur, habentque propinquitatem, & distantiam, & etiam contactum ad corpora, ut patet ex multis operationibus Angelorum, quæ in prædictis locis Scripturæ, & in aliis referuntur, & quia spirituales substantiæ ex natura sua operatiuæ sunt circa corpora, illaque possunt regere ac mouere, id enim non repugnat spirituali substantiæ, cum videamus animam nostram esse spiritualem, & vniri corpori, illudque regere ac mouere, ergo Angeli, qui sunt perfectiores spiritus, multò melius poterunt corpora mouere eaque tangere, non quidem informando, sicut anima, neque contactu quantitatis, quia carent illa, sed contactu aliquius virtutis, vel spiritualitatis, qua supra ipsa corpora operari possunt. Sed hoc ipso quod possunt vniri corpori, vel iuxta illud poni aut tangere, & ab illo recedere, & distare, oportet quod dicant præsentiam vel absentiam ad locum in quo est tale corpus: ergo Angelis cōuenit esse in loco.

10 Ex quo colliguntur duo.

Primum est quod Angelis debet cōuenire causa effectiua, qua ponantur in loco, vel ab eo recedant, quæ est voluntas, cum sufficienti potestate ad immutandum corpora, & mouendum se circa illa, vel accedendo, vel recedendo, aliàs essent Angeli substantiæ immobiles, & cum non sint ubique nō Ioh. à S. Thom. in 1. part. D. Thom. Tomus alter

possent operari in diuersis locis, ad quæ esset opus accedere, vel recedere. An verò ista potestas effectiua sit ipsa voluntas cum imperio practico intellectus, ita quod per actum immanētem moueat corpora, an verò per virtutem superadditam, quæ sit vis motiua distincta ab intellectu, & voluntate, postea attingetur: de quo etiam diximus in lib. de anima q. 12. art. 7. in fine, & supra dist. 11. tractando de potentia Dei actiua.

Secundum est, quod Angeli non possunt esse in loco eo modo, quo sunt corpora, quia ista existunt in loco tanquam commensurata illi iuxta mensuram quantitatis ad quantitatem, seu ad superficiem corporis locantis, vnde sunt contenta in loco tanquam mensuratum sub mensura quantitatiua. Angeli autem carent quantitate, & cōsequenter omni tali commensuratione, sed solum debent esse in loco tanquam aliquid superius, & independens ab illo, non ut commensuratum illi, sicut anima nostra est in corpore, & sicut ipsum corpus Christi hoc ipso quod est in Sacramento non modo quantitatiuo, sed ad modum rei spiritualis, non est ibi tanquam in loco eo modo quo corpora, sed longè diuerso, ita Angeli longè alio modo sunt, quam res corporeæ in loco. Et ita esse in loco non potest vnicum, & vniuocum modum significare pro Angelis, & pro corporibus. Et hac ratione D. Th. frequenter dicit quod Angelus est in loco æquiuocè, ac corpus, ut patet in hac q. 52. art. 1. & q. 53. art. 1. & in 1. dist. 37. supra cit. Vbi id confirmat ex Nazianzeno.

Dico secundò: substantia Angeli secundum se, & remota operatione non est formalis, & immediata ratio contactus Angelici ad locum, neque immediatum, & proximum fundamentum præsentiae localis, sed solum radicale principium in quantum est radix operationis, & virtutis. Per seipsam autem illa substantia non est quantitas virtualis. Hæc cōclusio est expressa D. Th. in multis locis quæ postea citabimus, vbi docet Angelum esse in loco per contactum suæ virtutis, & operationis. Constat autem quod virtus Angeli, & eius operatio non est eius substantia, & esse, ut docet S. Th. infra q. 54. art. 2. Specialiter autem pro ista conclusione, quatenus negat substantiam Angeli esse rationem unionis, & præsentiae Angeli ad corpus, ponderari potest locus D. Thom. infra q. 76. art. 6. ad 3. vbi ponit hanc differentiam inter animam, & Angelum, quod *Angelus vnitur corpori solum ut motor, & ideo vnitur ei per potentiam, vel virtutem, anima autem intellectiua vnitur corpori ut forma per suam essentiam.* Intelligit ergo D. Thom. quod ratio qua Angelus est in corpore, non est substantia, sed virtus, qua mouet corpus. Qua ratione etiam hoc excludit in 1. dist. 37. q. 3. art. 1. dicens, quod Angelus non est secundum formam in re locali, quia non est actus corporis. Nec D. Thom. agnoscit quod ipsa substantia Angeli sit quantitas virtualis, quia quantitatem virtualem semper ponit in Angelis ratione virtutis operatiuæ, quia id quod in corporibus est quantitas dimensiuæ, in Angelis dicit esse virtutem operatiuam, ut constabit ex locis postea citandis.

Fundamentum huius conclusionis est, quia contactus Angeli, & præsentia eius ad corpus, est aliquid accidentale in Angelo, & variabile, quia potest modò esse in vno loco, modò in alio, & modò esse in maiori, modò in minori corpore multò melius quam anima rationalis, quæ aliquando informat paruum corpus, aliquando maius, illique afficit: ergo non potest talis præsentia, & contactus fieri immediate per ipsam substantiam Angeli.

K k 2

Parec

Patet consequentia, quia vnio, seu contactus accidentalis non potest fundari immediate in ipsa substantia inquantum substantia est, quia substantia non potest vniri alteri rei, nisi tanquam substantia incompleta (scil. forma aut materia) vel tanquam completa (scil. vt subiectum, vel vt efficiens) quia omnis ista coniunctio debet esse in aliquo genere causæ, & non est causalitas substantiæ præter istas. Primo modo non potest vniri Angelus corpori, & illud tangere, tum quia est substantia completa, tum quia nec est forma corporis, nec eius materia. Secundo modo non vnitur tanquam subiectum corpori, cum corpus non sit eius accidens: Ergo vnitur, & tangit vt efficiens, & agens: ergo mediante virtute, & operatione non per substantiam suam. Item substantia in suo esse substantiali semper manet eadem in Angelo: ergo non potest esse ratio existendi modo diuerso in loco, seu commensuratione ad alterum, vt modò sit in loco maiori, & modò in minori, sine aliquo superaddito quo ista variatio fiat: nam & corpus ipsum non tangit locum per suam substantiam, sed per quantitatem.

13 Dices: substantiam Angeli secundum se non habere istam variationem, sed secundum diuersam applicationem suæ voluntatis, qua ad determinatum locum applicari potest, aut ad alium determinari. Et iuxta diuersam determinationem potest applicari maiori vel minori loco, magis vel minus adæquato sibi, sicut etiam anima rationalis per suam substantiam immediate informat corpus, & potest modò informare corpus maius, modò minus, non tamen sequitur quòd ista vnio, & præsentia fiat mediante aliquo accidente, sed per ipsam animam immediate solum, supposita diuersa dispositione corporis. Et eadē ratione corpus Christi Sacramentatum potest modò vniri maioribus, modò minoribus speciebus iuxta quod tales species illi applicantur, & iuxta voluntatem consecrantis, vel diuidentis species.

Sed contra est, quia si substantia Angeli per se immediate est ratio existendi in loco, non iuxta dispositionem loci, cui vnitur, sed iuxta suam voluntatem, necesse est quòd ipsa ratio formalis existendi in loco, & tangendi, sit per seipsam capax huius inæqualitatis, nō autem solum id reducat ad voluntatem Angeli vt ad rationem formalem, quia ista voluntas solum est applicatiua, & per modum causæ efficientis se habet in constituendo Angelum in loco: nam si se haberet per modum causæ formalis, hoc ipso incideretur in sententiam D. Tho. quòd Angelus esset in loco per operationem suæ virtutis. Quare voluntas Angeli solum effectiue, & applicatiue se habet ad talem contactum: supponit ergo rationem formalem per quam contactus fiat. Si ergo contactus inæqualiter fieri potest iuxta applicationem ipsius Angeli, nunc in magis, nunc in minus, necesse est quòd ipsa substantia Angeli non sit immediata ratio ponendi in loco, quia substantia in se est vna, & eiusdē rationis, nec potest magis vel minus habere ex ipsa ratione substantiæ, & sic applicatio illius non potest esse nisi iuxta naturam eius, quæ semper est vna. Exemplū autem de anima rationali, & de corpore Christi Sacramentato non quadrat, quia anima rationalis non est prohibito suo in maiori, vel minori corpore, vnde non indiget ratione formali subordinata ipsi voluntati, & applicabili ab ipsa ad diuersam materiam, & locum, sed ista vnio animæ est naturalis iuxta quod materia apponitur ipsi formæ cū dispositionibus requisitis vt informetur ab illa, & sic prout maior, vel minor materia illi apponitur

ipsa magis vel minus corpus informat eique assistit, & vnitur, quia vnio illa est per modum substantiæ incompletæ informantis, non vt substantiæ completæ tangentis, sicut Angelus. Et similiter corpus Christi ponitur sub speciebus iuxta modum materiæ consecrabilis, ita quod sub tantis speciebus continetur corpus Christi, quanta fuerit materia, quæ ibi apponitur consecranda, & conuertenda in corpus Christi. Quare vtraque præsentia tam animæ rationalis, quàm corporis Christi potest fieri immediate per substantiam sic inuisibiliter se habentem, & tamen esse ad maiorem, vel minorem quantitatem corporis, vel specierum, quia hæc præsentia non habetur per positionem, & coaptationem ipsius animæ ad corpus, vel corporis Christi ad species, sed per coniunctionem ipsius materiæ vel vniendæ, & informandæ ab anima, vel consecrandæ, & conuertendæ in corpus Christi, & iuxta diuersam quantitatem ipsius materiæ sic vniendæ, vel cōuersæ dicitur esse anima vel corpus Christi in maiori, vel minori quantitate præsentia quadam per accidens in ipsa anima, resultante ex vnione substantiali quæ potest esse ad maius, vel minus, non ex se, aut per contactum proprium, sed ex quantitate materiæ sibi vniendæ, vel consecrandæ. At verò Angelus opposito modo procedit: nā etiam stante eadem quantitate corporis non sibi vniri, substantialiter potest contactu suo attingere, & applicari magis vel minus, in maiori vel minori quantitate corporis: Ergo oportet quòd ratio formalis huius contactus non sit substantia vnibilis in vi substantiæ, sed in vi alicuius accidentaliter virtutis plus vel minus applicabilis.

14 Dico tertio sententiæ Suarez, & Vasquez *supra* relata non explicant sufficienter præsentiam Angeli in loco, & rationem formalem existendi in illo. Et quidem sententia P. Suarez, quæ est etiam Molina, explicat quidem formam ipsam *vbi* intrinseci, quo Angelus formaliter redditur præsens loco, non tamen explicat fundamentū istius præsentia, & rationem formalem habendi contactum ad corpora, & loca, quibus Angelus assistit: sine contactu autem nō potest explicari, quomodo, & qualis sit illa præsentia Angelica, & in quo distinguatur à præsentia corporali. Nam quòd Angelus habeat præsentiam ad loca in quibus est, vel ad quæ mouetur, nulli dubium esse potest: sed tota difficultas est in explicando modum quo ista præsentia ponitur, & distinguitur à præsentia corporali, quod sine aliqua ratione contactus intelligi nō potest, quia iuxta modum habendi cōtactum erga alias res variatur modus habendi præsentiam, sicut alio modo habet præsentiam vñ corpus ad alterum per quantitatem, qua illi cōmensuratur; Alio modo anima rationalis, quæ habet contactum ad corpus informando: Alio modo spiritus increatus per immensitatem; alio modo spiritus creatus per contactum virtutis, non molis, nec quantitatis: ergo oportet explicare in quo consistat ille diuersus cōtactus, & diuerso modo factus ab vno, & ab alio, ratione cuius illa diuersa præsentia resultat. Itaque hæc sententia in eo est diminuta, quia explicat præsentiam seu *vbi* in Angelo, sed non contactum erga corpora, cum tamen non possit explicari vnum sine altero, quia præsentia localis, seu *vbi* resultat ex aliqua coniunctione ad locum, & hæc coniunctio sine contactu non fit. Et præterea quia Angelus potest agere in corpora, & mouere illa de loco ad locum, & mouere se in talibus locis, & corporibus: ergo oportet quòd habeat aliquem contactum ad talia corpora, in quæ agit, & habendo contactum, habet præsentiam: ergo non sufficit explicare existentiam

existentiam Angeli in loco per hoc solum quod habeat *ubi*, seu praesentiam ad locum, sed etiam oportet explicare quomodo habeat contactum sine quo non est praesentia. Denique *ubi* est modus existendi in loco, qui resultat ex accessu, & coniunctione rei locatae cum loco, quae coniunctio per aliquem contactum, vel unionem fit, in corporibus quidem per contactum circumscriptivum, quo tangitur, & commensuratur una quantitas alteri: in anima autem nostra erga corpus per informationem: in corpore Christi Sacramentato per colligationem cum speciebus, quatenus continetur sub illis loco substantiae conuersae: ergo etiam in Angelo oportet assignare modum habendi contactum, & coniunctionem cum corpore, ut resultet *ubi*. Ponere autem *ubi*, seu modum praesentiae non resultantem ex coniunctione ad corpus, & ad locum, est tollere rationem *ubi*, & aliam rationem praesentiae inducere, quae non est praesentia localis, seu *ubi*, & ideo sine explicatione contactus Angeli insufficiens est sententia quae solum explicat hanc existentiam, seu contactum in loco per praesentiam in loco: nihil enim aliud est *ubi* quod ponit Suarez, quam praesentia in loco.

15 Secunda pars conclusionis contra sententiam Vasq. in primis probatur, quia multum derogat perfectioni Angelicae, quod ad existendum in loco dependeat ex unionem ad corpus. Quod graviter reprehendit D. Tho. 9. 3. de potentia art. 19. ubi inquit: *Quidam antiqui dixerunt, quod illud quod non est in loco, non est, ut in 4. Physic. dicitur. Et ex simili errore quidam moderni dixerunt quod Angeli absque creatura corporali esse non possunt, intelligentes Angelos tanquam ea quae imaginaverunt sensualiter distincta, quod quidem praedicit sententia antiquorum qui Angelos ante mundum fuisse posuerunt: praedicit etiam dignitati Angelicae naturae, quae cum naturaliter sit prior, quam creatura corporalis, nullo modo a creatura corporali dependet.* Ita D. Thom. ergo in sententia Vasq. in qua Angelus non potest per seipsum assistere loco, nisi prius uniatur corpori, praedicitur dignitati Angelicae, quia non potest per seipsum independentem a corpore seu unionem ad corpus praesens esse alicui loco.

16 Deinde quia Angelus ex se, & non ratione corporis adiuncti est forma activa, & motiva corporum immediate, sicut patet quod Angeli movent caelos, & ipsa corpora possunt assumere, & immutare illa: naturaliter enim natura corporalis regitur per spirituales, ut saepius ex August. docet D. Th. ergo oportet quod Angelus seipso, & non solum ratione corporis adiuncti possit assistere ipsi corpori, & movere illud, & movere seipsum: ergo etiam mutare locum, quia motus localis circa locum est, & sicut forma spiritualis informans, quae est anima rationalis habet per se immediatam habitudinem ad corpus, ita forma spiritualis activa, & motiva corporum debet habere immediatam habitudinem ad corpus quod potest movere: ergo per seipsum Angelus, & non mediante corpore sibi unito potest praesens, vel absens reddi alicui corpori seu loco. Confirmatur hoc: quia omnis unio supponit extrema unibilia, id est, habilia, & apta ut uniatur, & sic oportet quod ipsa uno fiat inter extrema secundum aliquam proportionem quam habet inter se, sicut uniuntur aliqua tanquam forma, & materia, actus, & potentia, vel tanquam agens & passum, vel ut duae quantitates contiguae, & commensuratae. Oportet ergo explicare qualis sit ista unio Angeli ad corpus, & in quo fundetur, non autem solum in communi dicere quod per unionem ad corpus est in loco. Potest enim haec unio bene vel male explicari, aut nihil

Ioan. a S. Thom. in 1. part. D. Th. Tomus alter.

de illa explicari: Si enim est per modum formae, & materiae, aut quantitatis, vel partium se commensurantium, est falsa, cum nihil tale sit inter Angelum & corpus. Si est unio causae agentis, & operantis ad passum mediante operatione, est nostra sententia. Si nihil horum dicit, nihil est.

Denique haec sententia ponendo istum modum 17 unionis incidit in sententiam, quam vult euitare, & impugnare, scilicet quod Angelus existat in loco per contactum, & operationem virtutis: nam ideo authores oppositi negant rationem formalem praesentiae Angelicae esse operationem, quia ad operationem requiritur simultas, seu coniunctio operantis cum passum, sed ille modus quo Angelus unitur loco, consequitur ad operationem Angeli, quia scilicet per voluntatem suam producit illum modum unionis ad corpus, mediante quo substantia Angeli unita corpori existit in loco: ergo non potest ille modus unionis esse ratio formalis Angelo existendi in loco. Patet consequenter quia ante illum modum requiritur operatio productiva illius, & unitiva ad talem locum: ergo praecedit simultas seu coniunctio Angeli agentis, seu producentis modum illum respectu corporis in quo illum producit: ergo & praesentia: nam coniunctio, seu simultas agentis cum passum non potest intelligi sine praesentia, & contactu erga passum. Restat ergo explicare, quando Angelus producit istum modum unionis in corpore, quomodo habet contactum erga illud, redditurque illi praesens, & coniunctum ut producere possit illam unionem ad illud corpus, nisi per virtutem ipsam operativam, quae est virtualis contactus formae spiritualis activae. Restat etiam alia difficultas in ista sententia quando Angelus non voluntate sua activa, sed vi alterius passivae in se recepta alligatur alicui corpori, sicut Tob. 8. dicitur, quod Raphaël Angelus alligavit Daemonium in deserto superioris Aegypti: Quomodo tunc existat in loco per unionem ab alio productam, & non per voluntatem propriam, & quomodo possit imprimi ille modus in Angelo ab alio superiori ut alligetur, & uniatur corpori? Non ergo universaliter est verum quod Angelus existit in loco per modum unionis ad corpus sua productum voluntate. Ac denique confirmatur, quia inconueniens est quod substantia Angeli, quae est nobilissima, non possit per se esse in aliquo loco nisi per accidens. Et sequela patet, quia Angelus antequam uniatur corpori, non potest esse in loco, & remoto omni corpore ut in vacuo, Angelus non potest moveri, quia non potest esse in loco, & consequenter neque illum acquirere, quod est moveri: ergo per se, id est ratione sui non est in loco, vel non adest, aut tangit locum, sed solum per aliud, id est, per corpus cui unitur.

Hoc autem esse inconueniens constat, quia An- 18 gelus per se, seu ratione sui est superior omni corpore, potestque illud movere: movet enim caelos: potest ergo comparari ad illud per modum motoris, atque adeo medio modo se habet inter Deum, qui est productus ipsius corporis in esse, & animae, quae est informativa corporis: sed Deus ratione sui habet praesentiam ad corpus per immensitatem, & operationem, quae est productus corporis: anima etiam per se in quantum informativa est, potest habere praesentiam ad corpus: ergo similiter spiritus non informator corporis, ut anima, nec productus corporis, ut Deus, sed motor illius potest per se habere immediatam praesentiam, seu contactum ad corpus, quia motor illius est, non solum quia unitus, nisi unio illa sit ipse

K k 3

contactus

contactus mouentis, seu agentis, quod est per operationem esse in loco.

19 Dico secundò, formalis ratio contactus Angeli ad corpus, in quo fundatur *vbi*, seu præsentia Angelica si connaturali modo fiat, est virtus operatiua Angeli ad corpus, ex quo, vel in quo agit, ita quòd eadem virtus, & operatio Angeli, & est applicatio Angeli, & formalis ratio existendi in corpore. Si autè modo præternaturali existat in corpore, potest etiam per passiuam receptionem, vel alligationem ad corpus esse in illo. Dicimus *ex quo*, vel in quo agit Angelus, id est, vnde incipit operatio illius: nam bene potest mediante virtute à se diffusa operari in locum remotum, atque aded non existet in illo per præsentiam suæ substantiæ, & tamen operari in illud. Sed tamen quia non incipit inde operatio Angeli, sed solum ibi terminatur, non dicitur esse vbi operatur quomodocumque, sed vbi incipit operatio. Hæc conclusio aliquantulò conciliat diuersas Thomistarum opiniones, & explicat sensum S. Thom. inter discipulos enim S. D. est differentia in hoc, quòd aliqui existimant requiri ad hoc quòd Angelus sit in aliquo loco operationem propriè, & formaliter dictam: alij sufficere operationem largo modo sumptam, id est applicationem ordinatam ad operandum. Caietan. autem in præsentia art. 1. & 2. Sed aduertendum, vtrumque conciliare intendit, supponens quòd in Angelo est duplex præsentia, scilicet præsentia ordinis, & præsentia operationis. Prima est præsentia inchoata, & incompleta, seu in actu primo, quæ solum dicit ipsum actum practicum intellectus, & expeditionem voluntatis ad operandum aliquid, seu in aliquo corpore. Secunda verò est præsentia operationis, quando scilicet actualiter incipit operari in aliquo passo, redditur ibi substantia Angeli completè collocata: tunc enim est perfectè coniunctus ipsi corpori, atque aded præsens illi ea præsentia, quæ Angelo competere potest, qualis est continentis ad contentum, agentis ad passum, quæ tunc est perfecta, quando actu elicit operationem ex passo; tunc autem inchoata, quando coordinatur seu applicatur illi vt eliciat.

20 Hæc ergo conclusio sic explicata est de mente S. Tho. qui perpetuò docet Angelum esse in loco per contactum virtutis, vt patet in hac q. 52. art. 1. vbi condistinguit contactum quantitatum contra contactum virtutis, & sic concludit, quòd per applicationem virtutis Angelicæ ad aliquem locum qualitercunque dicitur Angelus esse in loco corporeo. Et quòd hæc virtus qua Angelus habet contactum non possit explicari de virtute radicali, quæ est substantia Angeli, sed de formali, quæ est potentia superaddita, ostendit locus *suprà* citatus ex q. 76. art. 6. quòd quia Angelus vnitur vt motor, vnitur per potentiam, vel virtutem; anima autem quia vnitur vt forma, vnitur per essentiam suam, id est, per substantiam suam: ergo condistinguit vnionem Angeli per virtutem, ab vnione per substantiam, quæ est virtus radicalis: ergo illa virtus, qua Angelus vnitur, est virtus formalis. Item in 1. dist. 37. q. 3. art. 1. inquit quòd Angelus & qualibet substantia spiritalis non potest esse in corpore, vel in loco, nisi per operationem qua effectum aliquem in eo causat. Operatio autem quæ effectum causat in corpore, est propria operatio, & procedit ab Angelo mediante virtute operatiua: ergo per istam virtutem superadditam, Angelus est in loco, sicut corpus per quantitatem superadditam. Quod expressit etiam D. Thom. in quodl. 1. art. 4. vbi inquit, quòd Contactus corporis est per

quantitatem dimensiuam, qua in Angelo non inuenitur, cum sit incorporeus, sed loco eius est in eo quantitas virtualis, sicut ergo corpus est in loco per contactum dimensiuæ quantitatis, ita Angelus est in loco per contactum virtutis. Siquis autem velit virtutis contactum operationem vocare propter hoc quòd operari est proprius effectus virtutis, dicatur quòd Angelus est in loco per operationem, ita tamen quòd per operationem non intelligatur sola motio; sed quæcumque vnio qua sua virtute se corpori vnit, vel præsidendo, vel continendo, vel quocumque alio modo. Vbi D. Thom. non excludit operationem Angeli qua vnitur, & fit præsens corpori, quando dicit per operationem non intelligi solam motionem, sed docet quòd vt Angelus sit in loco, non requiritur operatio quæ est motus localis, & quòd corpus ipsum cui assistit moueatur localiter, sed sufficere quancumque aliam actionem qua se determinat, & applicat circa aliquod corpus, etiam si actio illa motus localis non sit, sicut citato loco ex dist. 37. dicit, quòd Angelus est in loco quatenus operatur circa aliquod corpus locatum, vel motum, vel lumen, vel aliud huiusmodi, cui tamen esse non confert.

Deinde probatur ratione, quia formalis ratio, qua Angelus existit in loco debet esse talis, quòd non contineatur, nec mensuretur corpore locante, sed quòd contineat corpus, & fundet vbi, non circumscriptiuum, nec subiectum legibus loci, & extensionis, sed superius loco, sicut anima nostra est in corpore vt superior, & continens illud: sic enim à fortiori debet Angelus esse in corpore, seu in loco, superiore modo quàm anima, scilicet non vt informans, sed vt motor. Tale autem fundamentum, & ratio habendi contactum non est sola substantia Angeli propter rationem *suprà* dictam, quia si substantia Angeli vnitur corpori locanti à se distincto, & vnio accidentalis est, oportet fundari in aliqua ratione accidentali superaddita substantiæ: Corpus autem cui Angelus coniungitur, tanquam loco, substantia est. Non ergo potest substantia Angeli illi vniri, nisi mediante aliqua accidentali ratione qua accidentaliter comparetur ad tale corpus. Non potest autem fundari in aliquo accidente ipsius Angeli per se, & formaliter commensurabili corpori, quia hoc esset quantitas: nec enim alio accidente commensurabilis est formaliter quantitas corporis locantis. Debet ergo esse accidens virtualiter commensurans Angelum corpori. Nec est alia virtus sic commensurans, quàm virtus operatiua, vel receptio passiva ab alio operante. Et horum omnium ratio est, quæ iam *suprà* est insinuata, quia Angelus est substantia completa. Vnde non potest vniri accidentaliter alteri, nisi vel tanquam causa effectiua operatione sua, vel tanquam subiectum accidenti, vel sicut ea quæ commensurantur quantitate, vt vestes corpori, locus locato, vel ea quæ loco appropinquant, vt plura quæ in aceruo coniunguntur, quæ est coniunctio locorum. Per commensurationem quantitatis, vel distantie localis Angelus non vtitur loco, quia caret quantitate. Nec tanquam subiectum accidenti, quia corpus non subiectatur in Angelo, nec è contra: ergo vt efficiens passo, vel passum agentis.

Nec sufficit operatio immanens, quia hæc solum potest esse in Angelo per intellectum aut voluntatem; operatio autem intellectus, & voluntatis compatitur cum absentia rei circa quam versatur, nec requirit physicam præsentiam obiecti, sed intentionalem, cum possimus intelligere, & amare rem absentem. Et dato quòd intellectio versetur circa

circa rem præsentem, ut quando est intuitiva, tamen adhuc non ponit in ipsa renisi denominationem extrinsecam, qua res redditur visa, quod non pertinet ad constituendum formaliter rem in loco, sed supponit esse præsentem localiter. Requiritur ergo ad istam coniunctionem, & contactum virtuales aliqua operatio transiens, vel passio à tali operatione proveniens, quia in hac concurrunt conditiones requisitæ ad rationem formalem existendi in loco. Nam primò requirit præsentiam saltem in ea parte immediata, unde incipit motus. Secundò operatio Angeli, & superior ad corpus cum sit actio rei spiritualis, vel si Angelus alligatur corpori, manet illi subiectus, non per commensurationem ad eius quantitatem, sed per subiectionem ad actionem corporis, ut instrumenti diuini. Tertiò commensuratur Angelus virtualiter rei extensæ manendo indiuisibilis in se, quia subiicit sibi corpus tanquam superior illo in agendo plus vel minus secundum efficaciam suam, sicut anima commensuratur extensioni corporis, subiiciendo illud sibi per informationem: ergo habet omnes conditiones, ut resultet *ubi* spirituale, & habeatur contactus quo indiuisibilis substantia extenso corpori sit præsens plus, vel minus iuxta virtutem, & efficaciam operationis suæ, ut etiam *art. 3.* ponderabitur.

21 Ex quo colligitur, quomodo non sola virtus Angeli possit esse actualis sine operatione, quæ aliquo modo coniungat spiritum ipsum loco. Nec dico, quod operatio solum se habet ut applicans, virtus autem Angeli ut ratio, qua habetur contactus, sed operatio ipsa se habet ut applicatio suæ substantiæ à qua exit, ut formalis ratio actualis tangendi corpus, seu locum, sicut si quantitas esset actiua in tangendo alterum corpus, non tangeret entitatiuè, ut sic dicam, sed operatiuè, & operando tangeret, seque applicaret. Quod colligitur ex duobus.

Primò, quia in sententia D. Th. *art. 3. huius q. 52.* ideò non possunt plures Angeli esse in eodem loco, quia virtus Angeli tangit locum per modum continentis perfecti: unde cum non possint plures causæ completæ, & perfectæ operari circa eandem rem, nec etiam poterunt plures Angeli esse in eodem loco: quæ ratio nihil probat, si operatio ipsa solum se haberet ut applicatio virtutis, non ut formalis ratio existendi in loco: nam si operatio solum se habet ut applicatio, posset responderi quod causæ completæ operantes in actu, & applicatæ repugnant quidem respectu eiusdem effectus, vel passi, sed operantes virtualiter, seu in actu primo tantum non repugnant, nisi solum quando operantur in actu. Et sic si operatio se habet ut applicatio, & virtus ipsa ut in actu primo applicata est ratio formalis existendi in loco, possent duo Angeli esse simul in eodem loco, si applicarent virtutes suas ad locum, non autem operarentur effectus, sicut si homo applicaretur alicui loco, non tamen operaretur circa illum: Tota enim repugnantia plurium causarum circa eundem effectum est ex operatione, non ex applicatione virtutis. Quare si ratio illa probat non posse plures Angelos esse simul in eodem loco, oportet quod formalis ratio non sit sola virtus applicata, sed etiam operatio, quia ex operatione formaliter sumitur repugnantia operandi eundem effectum, & consequenter existendi plures Angelos in eodem loco: illa est autem formalis ratio existendi in loco, unde sumitur repugnantia coexistendi cum altero, & causandi cum altero.

22 Secundò idem colligitur quia Angelus potest

intra sphaeram suæ virtutis esse in maiori, vel minori loco, ut asserit S. Thom. *in hac q. 52. art. 2.* & dicemus *sequenti art.* & constat quia Marc. 5. dicitur fuisse in vno homine legio Dæmoniorum: & cum quilibet Angelus maius spatium occupare possit quam anima humana, quæ est illi inferior, oportet quod si in vno homine erat legio Dæmonum occuparent minorem locum quam possent occupare: virtus autem Angeli non potest minor esse, vel maior in se, bene tamen operatio eius circa corpus potest versari, & applicari circa maius, vel minus spatium: ergo ipsa operatio, & non solum virtus est ratio formalis existendi in loco, ut possit contrahi, vel extendi talis assistentia Angeli ad locum, sicut in anima nostra ipsa actualis informatio est ratio formalis habendi præsentiam ad corpus, & non solum substantia ut potens informare, ideòque aliquando anima informat exiguum corpusculum, ut in infantia, aliquando maius iuxta actualem capacitatem, & informationem, quæ est ratio habendi istam præsentiam, & contactum informatiui ad corpus: ita Angelus qui est forma non informans corpus, sed operans in illud, per ipsam operationem maiori vel minori corpori redditur præsens secundum quod incipit à maiori vel minori parte. Vbi aduerte posse Angelum diffundere virtutem suam ad effectus faciendos, etiam ultra locum, ubi adest, licet substantia non sit præsens toti illi corpori, sicut Angelus mouens cælum non est in toto cælo, sed in vna parte, unde motum diffundit. Et ita S. Th. *in hac q. 52. artic. 1.* dicit quod *Totum corpus cui per virtutem suam applicatur Angelus, correspondet ei ut vnus locus, eo quod non applicatur virtus eius nisi ad id quod primò mouetur ab ipso.* Et de anima Christi Domini dicit D. Th. 3. p. q. 52. art. 2. quod *In aliqua parte inferni fuit per suam præsentiam, & substantiam, in aliis per operationem seu effectum,* eo quod substantia fuit in aliqua parte immediatè, aliis mediatè, id est, per effectus suos. Intelligimus ergo quod quando Angelus operatur in corpore per actionem transeuntem, cum illa actio, utpote educiua, non possit operari nisi dependenter à corpore, & consequenter debeat coniungi corpori à quo immediatè educit effectum, ibi adest tota virtus, & substantia Angeli, unde primò incipit eius operatio transiens, quia ubi primò incipit operatio, oportet quod sit virtus, & principium à quo immediatè effluit, & consequenter etiam passum à quo educit suum effectum. Cum ergo virtus sit indiuisibilis ex parte Angeli, dicitur applicari toti illi corpori quo primò vritur ad elicientiam actionis, sicut anima applicatur toti illi corpori quod informat, & viuificat. Et sic subiectio corporis ad virtutem indiuisibilem Angeli, & ad operationem eius, ut primò exeunt à virtute, & substantia Angeli, & simul à corpore à quo educit effectum, est ratio quæ constituit contactum spirituales seu virtuales Angeli. In corpore autem vltiori, per quod diffundit suam virtutem post primam elicientiam operationis non ponitur præsens substantia Angeli per se, & immediatè, sed mediatè, id est mediatis effectibus suis. Ad immediatam autem præsentiam virtus operatiua præbet fundamentum, quia præbet quantitatem virtuales, id est virtutem potentem tangere corpus, & actu se coaptantem tanto, vel tanto corpori, quatenus ipsa ratio agendit fundat præsentiam ad passum per modum formæ continentis actiue ipsum, non rei contentæ, & circumscriptæ à loco cui vnitur.

Quare contactus Angeli virtualis non habet pro ratione formali, & fundamento aliquid antecedens virtutem operatiuam, & eius operationem, sed eadem Angeli operatio cum procedat à forma, seu virtute agentis independente à commensuratione cum loco, nec loco subiecta, sed quæ subiicit sibi locum, oportet quod contactum faciat operando, id est, subiiciendo sibi locum, seu passum unde operetur: non subiicit autem nisi agendo; sed illa operatio respicit duos effectus. Primus est subiicere sibi passum coniungendo illud sibi ut formæ agentis independenti ab eius commensuratione. Secundus est ipse effectus quem ex tali passo educit. Et ponimus primum effectum ea necessitate, quia Spiritus est forma purè agens in corpus, non substantia illi commensurata, unde non nisi agendo illud sibi vnit, & subiicit, & sic tangit operatiuè, non quantitatiuè, seu commensuratiuè.

Et si dicas: Quid facit in corpore per hunc contactum? Respondeo ponere corpus applicatum, seu vnitum sibi ut ex eo agat in tanto, vel tanto spatio, vel parte: in applicatione enim passi ad agens duo inueniuntur. Primum, indistantia localis, & commensuratio vtriusque in loco. Hanc non habet spiritus. Secundum est coordinatio, & subiectio ad agens, ut ex illo agat, per quod ponit ordinationem, seu modum quendam, & subiectionem passi ad effectum ex illo educendum; sicut virtus foeminae subiicitur virtuti masculi, non solum localiter, sed causatiuè ordinando illam ad effectum. Hoc secundum causat contactus virtutis Angeli in corpore, deinde educit effectum.

2) Secunda pars conclusionis, scilicet et quod Angelus modo præternaturali possit esse in loco per passionem, & non per operationem, constat, quia aliquando alligatur alicui corpori per operationem superiorem siue à Deo inferente illi torturam per ipsum corpus tanquam per instrumentum, siue ab alio superiori spiritu, sicut *suprà* diximus ex illo loco Tobia 8. ubi dicitur, quod *Angelus Raphaël alligauit Daemonium in deserto superioris Egypti*: sed tamen Angelus tunc non est connaturaliter in loco, sed præternaturaliter, seu violentè, sicut anima non est connaturaliter nisi in corpore quod viuificat, & informat; extra illud verò est præternaturaliter, aut violentè. Vnde Caietanus in hac quæst. 52. art. 3. docet Angelos naturaliter locari in loco per operationem, Dæmones verò per pati potius quàm per agere. Sed de hoc plenius agemus *infra* circa quæst. 64. tractando de pœna Dæmonum per ignem: hanc enim ferè semper explicat nobis Scriptura per modum alligationis, & detentionis qua Dæmones cruciantur in illo igne ut 2. Petri 2. *Rudentibus inferni detractos, in tartarum tradidit cruciandos*: & in Canon. Iudæ. *Vinculis æternis sub caligine reseruantur*. & Actorum 2. *Quem Deus suscitauit solutis doloribus inferni iuxta quod impossibile erat teneri illum ab eo*. Quomodo autem possit corpus alligans Angelum ex tali contactu producere in eo ubi spirituale? dicitur hoc idè esse, quia agit ut instrumentum Dei, vel superioris virtutis, quæ tali instrumento vtitur ad ponendum in Angelo aliud spirituale ut *ibi* dicemus; unde ex tali effectui spirituali posito in Angelo ab aliquo corpore, ut instrumento diuinæ virtutis, resultat in Angelo virtualis contactus passiuus ad illud corpus, cui tanquam instrumento alligatur à Deo Angelus, & producit in illo effectum illum spirituale, siquidem ille spiritualis effectus habet ordi-

nem ad instrumentum corporeum à quo fit, & non potest habere contactum cum illo corpore, nisi virtuale, in quantum est effectus spiritualis à tanto, vel tanto instrumento factus, & illi alligans spiritum, quia ad hoc fit ille effectus, ut Angelus alligetur corpori, & non possit uti suis potentiis, ut voluerit; & idè ad tantum corpus habebit contactum virtuale Angelus ad quantum fuerit alligatus per illum effectum passiuè receptum in Angelo, & sic non correspondet corpori per commensurationem, sed per virtuale contactum spiritualis effectus subiicientis, & alligantis Angelum tanto, vel tanto corpori, ut impeditiuo suarum operationum quatenus est instrumentum Dei. Quis autem effectus sit ille quem ignis ponit in Angelo quando torquetur, vel detinetur à corpore, dicemus *infra* disp. 24.

Dico vltimò: ex contactu virtuali, seu spirituali Angeli ad locum per operationem in ipso, resultat in Angelo ubi intrinsecum, quod propriè non est de prædicamento *ubi*, sed reductiuè: est enim directè præsentia agentis ad passum, & secundariò locati ad locum, quia tale passum est in loco, vtrumque tamen facit modus ille intrinsecè receptus in Angelo, qui vocatur abusiue *ubi*. Hæc est contra P. Suarez lib. 4. de Angelis c. 2. num. 9. ubi tenet, *ubi* Angelicum pertinere ad prædicamentum *ubi*. Et cap. 8. n. 3. apertè admittit posse fundari distantiam, & propinquitatem inter duos Angelos, aut inter vnum Angelum, & corpus, quod vtiq; petit *ubi* ita proprium sicut *ubi* corporum, quatenus ponit situm, & distantiam localem, licet desit circumscriptio corporis locantis. At verò P. Vasquez *hic* disp. 195, censet *ubi* Angelicum esse solum denominationem extrinsecam, quia ipse non aliam præsentiam agnoscit, quàm vnionem Angeli ad corpus, præsentiam autem ad locum solum dicit esse mediatam quatenus illud corpus cui Angelus adest, est in loco. Quod totum nos dicimus fieri proximè, & formaliter per illum modum qui est præsentia intrinsecè resultans in Angelo, licet contactus ex quo ista præsentia resultat, sit virtus ipsa operans Angeli.

Nihilominus quod in Angelo debeat dari *ubi*, seu præsentia intrinseca, iam *suprà* in principio art. supposuimus, & ostendimus eo quod Angelus verè, & propriè mouetur in seipso, siquidem eius substantia non manet immobilis, nec simul est in cælo & in terra, sed verè, & propriè descendit de cælo, ut Scriptura sæpè loquitur, & anima Christi verè, & propriè descendit ad inferos, ut est articulus fidei: ergo oportet quod per istum motum Angelus aliquid acquirat, vel perdat, cum propriè mutetur de vno loco ad alium, & hoc quod per motum acquiratur, seu perditur, non in ipso loco, seu corpore subieclatur, quia locus non mouetur, sed est immobilis, id autem quod mouetur est Angelus: ergo in ipso Angelo non in loco, seu corpore circumstante debet poni terminus productus per motum. Cum ergo Angelus per illum motum acquirat præsentiam ad diuersum locum, consequenter id quod acquirat in se per motum præsentia localis est, & hæc vocatur *ubi*.

Quod verò istud *ubi* acquisitum per motum localem in Angelo non sit de prædicamento *ubi*, deducitur ex D. Thom. tum quia in opusculo 48. tract. de *ubi*, c. 1. expressè reiciit *ubi* Angelicum à prædicamento *ubi*, tum quia in hac qu. 52. art. 1. affirmat Angelum æquiuocè esse in loco, & corpus, oportet ergo quod *ubi* Angelicum, & corporeum æquiuocè dicantur.

Ratio autem est, quia *ubi* prædicamentale est illud,

lud quod primò, & per se directè facit præsentiam loci, seu distantiam in loco, non autem aliud genus præsentiam, v.g. agentis ad passum, vel formæ ad materiam, licet talis præsentia ex consequenti inferat præsentiam localem, sicut videmus quod præsentia, & coniunctio animæ ad corpus, in quantum informat illud, non est primò, & per se præsentia vbialis, licet non possit informare, nisi in aliquo loco; & præsentia vestis ad rem vestitam licet sine loco esse non possit, per se tamen, & directè non constituit rem in loco, seu vbicam, seu indutam: ergo si similiter contactus Angeli est contactus virtutis operatiuæ erga corpus, vel passivè receptus ab alia virtute superiori, oportet quod præsentia seu modus præsentiam, quæ ex tali contactu resultat ad corpus primò, & per se sit præsentia virtutis agentis ad passum, vel è contra, & secundariò sit ad locum, eo quod tale passum in loco est, sicut anima rationalis cum infunditur corpori primò, & directè habet præsentiam informationis, non vbicationis, licet ex consequenti sit in loco corporis cui vnitur. Quod autem anima spiritalis facit informando corpus, Angelus facit agendo, quia est forma actiua, non informatiua.

27 Et si dicas: ergo non est necesse Angelum acquirere *vbi* intrinsecum præter ipsam operationem cum contactu ad corpus, sicut anima rationalis, ex eo quod informat corpus, non acquirit *vbi* intrinsecum in corpore. Negatur consequentia, quia Angelus est in corpore mobiler, quia potest per motum localem separari à corpore, & ab illo recedere, & alium locum acquirere. Vnde oportet quod eius contactus ad corpus talis conditionis sit, quod in ipso Angelo aliquam præsentiam ponat, quæ possit acquiri, vel perdi, & quia hæc reddit præsentem loco, saltem secundariò, idèd ponimus *vbi* intrinsecum in Angelo, licet quia resultat ex contactu virtutis operatiuæ prius efficiat præsentiam agentis, seu operantis erga passum, quàm loci erga locum. Anima autem est informatiua in corpore immobiliter nisi dispositiones corporis remoueantur; & sic non potest per motum localem recedere à corpore, & aliud acquirere; & sic ex vi informationis non oportet quod acquirat *vbi*, seu præsentiam, quæ possit motu locali in ipsa anima subiectato immediatè acquiri, vel perdi, sed quidquid de loco acquiratur vel perditur, in corpore subiectatur, & corporaliter ac circumscriptivè sit: solum ergo extrinsecè tangit animam. Angelus verò non circumscriptiua corporis locatione mouetur, sed per seipsum ab illo recedit, vel illud tangit.

28 Denique probatur hæc pars, quia *vbi* prædicamentale duas condiciones habet, quæ desunt *vbi* Angelico. Prima est, quod secundum illud mensuratur distantia, vel propinquitas vnus ad aliud, quia distinguuntur diuersa *vbi* secundum diuersas distantias. Secunda est, quod per *vbi* habetur circumscriptio corporis locati à locante; vnde definitur *vbi* prædicamentale, quod est circumscriptio passiva corporis locati à corpore locante proueniens. Istæ autem duæ condiciones desunt *vbi* Angelico, & sic non competit illi definitio *vbi* prædicamentalis. Et quidem hæc secunda conditio manifestum est quod non conuenit Angelo, quia circumscribi non potest à corpore id quod illi non commensuratur, nec sub modo mensurationis eius continetur. Prima enim conditio deest, quia vnus Angelus non potest directè, & ratione sui fundare distantiam erga alium, ita quod remoto corpore possit ista distantia mensurari inter Angelum, & Angelum: ergo non habet *vbi* distantiæ, vt sic dicā.

Et ratio est, quia distantia est quædam extensio,

spatij, vel negatiua, si spatium fuerit vacuum, vel positiua, si plenum. Hanc autem extensionem, seu distantiam non potest facere Angelus excludendo se per spatium, eo quod caret extensione. Neque potest fundare illam per modum extremi, seu termini, ita vt ab ipso possit tendi funiculus, seu mensura distantiam, quia sicut distantia diffunditur per spatium, & per partes eius, ita terminatur in termino talium partium, seu diffusionis earum in quem definit situatio, seu positio partium in spatio: & ita terminus ille habet positionem, seu situationem, cum in ipsum continuatio spatij, & distantiam terminetur. Angelus autem est extra omnem situationem, & positionem, non solum tanquam pars, sed etiam tanquam terminus indiuisibilis habens positionem in continuo: ergo non potest ab eo sumi mensura tanquam ab extremo, & termino distantiam, sicut inconuenienter diceretur, quod à visione beatifica Christi Domini, qui est in cælo, potest sumi mensura, & funiculus distantiam vsque ad terram, eo quod visio illa spiritalis, est extra omnes terminos situationis, & distantiam, licet subiectum in quo exercetur, in aliquo loco sit.

Quod verò aliqui dicunt ponendum esse in Angelo modum aliquem, qui non solum sit *vbi*, seu id quod formaliter acquiritur, vel perditur per motum, sed etiam sit ipsa quantitas virtualis Angeli fundans tale *vbi*, cui potest attribui distantia virtualis.

Contra hoc est, quia talis modus vel caret fundamento, vel idem facit erga locum quod virtus operatiua, & eius operatio: debet enim talis modus reddere Angelum præsentem aliqua speciali præsentia distincta à circumscriptio, quatenus scilicet non debet contineri à loco, sed locum sibi subicere, & continere, quia spiritui debetur esse, non subiectum loco, si cōnaturali modo in loco existit. Hoc autem melius facit vis operatiua, quia locus, & quodcunque corpus subiicitur Angelo tanquam agenti: ergo ratio subiiciendi sibi locum debet esse ipsa virtus operatiua, quia hæc pertinet ad rationem agentis vt agens est. Deinde quia ille modus non est substantialis, quia nec est substantia, neque existentia, neque vnio substantialis. Est ergo accidentalis: ergo debet identificari cum aliquo accidente, & non immediatè afficere substantiam, sicut figura non afficit substantiam immediatè, sed mediante quantitate, & intensio afficit mediante qualitate, & *vbi*, & situs mediante circumscriptio; & sic omnis modus accidentalis mediante accidente, cum quo identificatur, afficit. Effectus autem illius modi est similis effectui quantitatis in corpore, cum dicatur esse quantitas virtualis: ergo potius debet esse accidens quàm modus; & tale accidens non potest esse aliud, quàm virtus operatiua. Denique ille modus si pertinet ad quantitatem virtutem, debet esse vnus pro omnibus locis, sicut quantitas in corporibus est contactiua omnium locorum, & corporum: ergo non poterit Angelus pro libito se accommodare maiori, vel minori corpori intra suam sphaeram, & reddi præsens maiori vel minori loco, sicut per quantitatem molis non potest corpus modò maiori, modò minori loco attemperari. Quod ramen facile potest Angelus per operationem in corpus, tangendo sua operatione modò maius corpus, modò minus prout voluerit; & ita operatio prout incipit ab aliqua determinata parte corporis, illi assistentem reddit Angelum, & præsentem.

Quod si dicas, quia ex tali operatione non potest resultare *vbi* intrinsecum in Angelo, quia hoc non potest esse nisi spirituale, cum sit in ipso Angelo

gelo receptum, non potest autem ex actione illa quæ tangit corpus resultare *vbi* spirituale, quia talis actio cum tangat corpus, non producit in illo corpore nisi aliud corporale, ex effectu autem corporali non potest resultare spirituale *vbi* in Angelo.

Respondetur, quod *vbi* resultat, & consequitur actionem Angeli, prout ab Angelo est, non ex effectu passivo, quem relinquit in corpore, quia modus illius vocationis est modus existentis in loco per modum continentis, & agentis, non contenti, & commensurati à loco. Quando autem Angelus præternaturaliter existit subiectus loco, & passivè alligatus illi, iam diximus quod non sequitur talis passiva existentia in loco ex actione propria corporis, ut corporea est, sed ex spirituali operatione superioris virtutis, ut instrumentaliter exercetur per corpus.

Adhuc autem multi inveniunt difficultatem quomodo illud *vbi* Angeli sit indivisibile, quia in Angelo est, & correspondet divisibili, & extenso loco, cui Angelus præsens est formaliter per tale *vbi*.

Sed respon. quod illud *vbi* subiectivè, id est ut tenet se ex parte Angeli in quo subiectatur est indivisibile, & spirituale, sed terminativè, id est ex parte termini quem tangit est divisibile, & extensum, sicut etiam ipsa operatio Angeli, & substantia accommodatur rei divisibili per superioritatem in ipsam, & in se indivisibilis est, & anima nostra corpori divisibili accommodatur, & si in ipsa anima est unio ad corpus, illa spiritualis est, & terminatur ad rem extensam, & *vbi* Sacramentale corporis Christi est indivisibile, & terminatur ad species divisibiles, eisque assistit.

ARTICVLVS II.

Expediuntur difficultates contra sententiam positam artic. præcedenti.

AD duo, vel tria præcipua capita reduci videntur omnes difficultates, quas authores aliqui inveniunt contra nostrum modum dicendi. Primum enim argumentantur à priori, quia Angelus antecederet ad operationem est in loco. Secundò aliquibus exemplis, quibus ostenditur Angelum aliquando esse in loco sine operatione. Tertiò ab inconuenientibus.

Primum ergo argumentum proponitur sic. Prius natura Angelus est præsens corpori, quàm operetur in corpore, & ex corpore: ergo ratio formalis præsentiae Angelicæ ad corpus est anterior ad ipsam operationem transeuntem (de immanenti enim non loquimur, quia hæc impertinens est ad existendum in loco, cum non tangat corpus, sed intra ipsum operantem, & potentiam eius immanenter existat.) Antecedens probatur, tum quia operatio Angeli est causa efficiens *vbi* Angelici: ergo non ratio formalis: tum quia prior est applicatio agentis ad passum, quàm operatio circa passum, eo quod operatio Angeli transiens esteductiva, habetque pro subiecto educationis ipsum corpus, seu passum circa quod operatur: ergo oportet quod operatio egrediatur ab ipso agente, ut coniuncto tali passo: ergo prius est coniungi, quàm operari; & sic prior est ratio formalis præsentiae, & coniunctionis ad corpus, quàm operatio.

Confir. quia Angelus mouet totum cælum, & tamen non est in toto cælo, & potest mouere cor-

pus, non motus cum corpore, sed quiescens: ergo operatio non est ratio formalis essendi in loco, alias *vbi* esset operatio, esset substantia operans.

Respond. disting. antec. prius est Angelus in loco quàm operetur præsentia ordinis, quæ est præsentia in actu primo, transeat, præsentia completa, & applicata, quæ est in actu secundo, nego. Dicitur præsentia ordinis quando incipit Angelus ordinare se erga aliquem locum per applicationem prædicam, qua dirigit motum erga aliquem locum, siue per motum discretum, siue continuum. Dicitur completa, & applicata quando actu tangit corpus: sed tunc iam operatur, quia ipsa operatione tangit & effectum facit, non antecederet tangit, & postea facit. Et ad probationem dicitur, quod licet operatio eliciatur per actionemeductiuam, quæ habet pro subiecto educationis ipsum corpus, tamen illa actio utrumque præstat, & contactum applicatiuum Angeli agentis ad corpus, in quo fundatur præsentia, seu *vbi* Angelicum, & productionem ipsam effectus, ita quod cum in actu secundo incipit elicere operationem, incipit actualiter tangere passum, & simul ex illo, aut in illo effectum operari. Et quando dicitur quod ad educationem alicuius formæ ex subiecto præsupponitur præsentia, & applicatio agentis ad passum: Respondetur requiri quidem talem præsentiam, & applicationem, sed non prærequiri quod alia actione fiat, sed eadem actio habet vim, & coniungendi agens ad passum in actu secundo completè, & producendi effectum ex subiecto applicato, eo quod ipse contactus actiuus est, & per modum continentis, & sub ordinantis ipsam rem contactam Angelo se habet sicut si quantitas in nobis esset actiua operando, & agendo, rangeret aliud corpus, & sicut anima nostra informando tangit corpus, habetque eadem causalitate informationis, & constituere rem informatam, & se præsentem. Sic ergo contactus actiuus, seu virtualis non antea habetur, quàm ipsa met actio: contactus autem passivus præsupponit actionem à qua fiat. Et sicut ipsa actio applicatiua in corporibus, cum sit etiam actioeductiua talis præsentiae (modus enim præsentiaeeductiua actione fit) utique facit eam effectivè, & ut faciat debet esse præsens, sed non per aliam applicationem, sed per seipsam, alias esset processus in infinitum, ita etiam ipsa actio qua Angelus se applicat ad passum, est simul applicatiua, & contactiua sui, &eductiua effectus, nec oportet istas actiones diuidere, tum propter eminentiam suam, & perfectionem; qua potest vna actio in plura; tum quia Angelus tangendo operatur, nec prius commensuratur corpori, quàm operetur, sicut agens corporeum, sed quia operatur, commensuratur. Nec operatio formaliter separat agens à passo, ut aliqui obiciunt, eo quod operatio est in aliquid distinctum. Bene enim stat, quod operatio sit in aliquid distinctum, non tamen separando, & elogando illud à se, sed coniungendo, sicut agens per applicationem coniungitur locato, & forma materiæ, & humanitas Verbo, licet sint distincta.

Ad confir. Respondetur quod Angelus mouens cælum aut diffundens virtutem suam, ut operetur in aliquid distans, non est in omni parte, *vbi* est effectus virtutis, & operationis, seu *vbi* primò incipit operari: inde enim egreditur primò actio; & sic ibi est substantia operantis, ut etiam aduertit S. Th. in hac qu. 52. art. 2. Quod verò dicitur quod Angelus quiescens potest mouere corpus: Respondetur posse fieri, si illa pars vnde primò incipit actio Angeli

geli ita detineatur ab ipso quod non moueatur loco, sed impulsus aliis partibus imprimat, sicut qui tenet arcum, & per ipsum impellit sagittam, arcu non moto à loco. Si verò non ita detineat illam partem immediatam unde incipit actio, sed illam etiam moueat, mouebitur Angelus cum ipsa per accidens, sicut qui agit curru, mouetur cum eo.

2. Secundò fit argumentum ex aliquibus exemplis, quibus ostenditur Angelum posse esse in loco in quo non operatur. Et in primis Angelus potest alligari alicui corpori nihil in ipsum agendo, sicut Dæmon alligatur igni inferni, in quo nihil operatur: ergo operatio non potest esse formalis ratio existendi in loco. Nec potest dici quod est in loco per passionem: nam id quod est formalis ratio alicuius, ita est requisitum, ut eo deficiente, effectus formalis deficiat. Si ergo formalis ratio essendi in loco est operatio in Angelo, non potest per passionem in eo existere. Et præterea in animabus separatis patet quod aliquando sunt in loco, ubi nihil operantur, nec tamen patiuntur, sicut animæ quæ sunt in Limbo, & olim erant in sinu Abraham, ubi nihil patiebantur, & tamen ibi erant nihil operando: quid enim ibi operabantur? & ipsa anima Christi descendens ad inferos in aliqua parte inferni fuit secundum substantiam, in aliis verò per operationem, seu effectum, ut docet S. Thom. 3. p. qu. 52. art. 2. ergo distinctus modus existendi est per substantiam à modo existendi per operationem. Item licet Dæmones patiantur ab igne, tamen prius est esse alligatos igni, quam pati ab eo, ut docet S. Thom. in 4. dist. 44. q. 3. art. 3. *questiuncula* 3. ergo ipsa passio resultans ab actione ignis, non est illis ratio formalis essendi in illo loco, quia quando ignis agit, iam est illis coniunctus. Denique illa poena, & actio ignis in Dæmones æquè torquet ipsos sibi propinquos, & à se distantes, sicut torquet Dæmones in hoc aëre existentes: ergo non est ratio existendi in loco ipsis spiritibus, siquidem compatitur passio illata ab igne cum distantia eorum.

3. Secundum exemplum est de existentia Angelorum in cælo empyreo, ubi certum est Angelos esse, & tamen ibi nihil operantur actione transeunte, quia Angeli non possunt operari in corpore, nisi per motum localem, ut docet S. Thom. *infra quæst.* 210. art. 3. Cælum autem empyreum non potest moueri motu locali ab Angelo, cum sit corpus immobile: ergo nihil in illo operantur. Nec etiam ab illo patiuntur, cum Angeli beati nihil patiantur: ergo sunt in aliquo loco sine operatione aliqua, vel passione. Nec potest dici quod sunt ibi præsentia præsentia ordinis, non operationis, quæ est præsentia in loco incompleta, & imperfecta: contra enim est, quia ista præsentia ordinis non est aliud quam actus practicus, quo Angelus, expeditur, & ordinatur ad existendum in tali loco; & sic quasi in actu primo dicitur ibi esse, sed Angelus non potest habere actum practicum quo ordinetur ad operandum in illo loco, ubi scit nihil se posse operari, id est, in illo cælo: ergo non potest ibi habere præsentiam ordinis, seu in actu primo. Dicere etiam quod in cælo empyreo operantur Angeli occulta aliqua operatione, hoc est confugere ad rem incertam, & non fundatam; & sic non potest impugnari quod ipsa ignorantia se occultat.

4. Tertium exemplum est de animabus separatis consideratis secundum suam naturam, quas certum est esse in loco, ut in cælo, in Purgatorio, in Limbo, & aliquando veniunt ad nos, sicut anima Samuëlis

apparuit Saùli. Sed animæ separatæ nihil operantur circa corpora, etiam motu locali, ut docet S. Thom. *infra qu. 117. art. 4.* quia anima propter sui limitationem, & imperfectionem limitatur ad mouendum solummodo corpus viuificatum à se, cuius est forma, & mediante corpore viuificato potest aliam mouere, non autem per se immediatè: ergo non potest esse in loco per operationem suam. Nec etiam per passionem, quia multæ animæ non patiuntur in loco ubi sunt, ut animæ beatæ in cælo empyreo, & animæ in Limbo.

Vltimum exemplum est de Angelo existente in vacuo sicut D. Thom. concedit, quod potest esse super cælum empyreum in *quodlib. 6. art. 3.* & tamen Angelus in vacuo non operatur in actu secundo, nec potest operari in actu primo, quia ubi est impossibilis operatio, est impossibilis actus primus præparans ad illum. Nec patitur ab aliquo in vacuo cum ibi nihil sit: ergo non est ibi Angelus per operationem, vel passionem.

Confirmatur, quia potest moueri Angelus in vacuo: nec enim in hoc aliqua apparet repugnantia: si enim corpus per vacuum moueri potest, ut ostendimus in 4. *Physic.* cur non etiam spiritus qui est actiuior corpore, & independentior ab illo? aliàs ubi non esset corpus, Angelus esset substantia immobilis. In illo autem motu acquirit aliquam præsentiam quæ sit terminus motus, scilicet *ubi*, & tamen non habet ibi contactum per operationem aut passionem: ergo ista non est ratio habendi præsentiam.

Respondetur, quod antequam ad singula exempla descendamus, oportet nos esse admonitos multo nobis occultiore esse vim virtutis Angelicæ, & modum quo operatur erga corpora, quam virtutes multorum lapidum, vel herbarum, de quibus nescimus reddere rationem, quomodo tam multa insolita operentur; & idè valde infirmi, & constricti intellectus est, velle nos reddere rationem de modo quo operantur Angeli in cælo, vel intra terram, aut quid operantur animæ in Limbo, & similia multa, in quibus fateri oportet multò plura nobis esse occulta, quam quæ ratione inuestigari possint, dicente Scriptura Ecclesiastici 43. *Multa abscondita sunt maiora his: pauca enim vidimus operum eius.* Vnde si quando in his confugimus ad occultas Angelorum operationes, & modos, quibus aut detinentur, aut operantur in loco, non debet mirum videri aut derisibile, sed magis sobriè accipiendum est. Et meminisse debemus verbi Augustini 1. *de Trinit. c. 10.* Vbi quæstionem illam pertractans, an spirituales substantiæ possint miracula facere, tandem concludit: *Mihi omninò utile est, ut meminerim virium mearum, fratresque meos admoneam ut meminerint suarum, ne ultra quam tutum est, humana progrediatur infirmitas: quemadmodum enim hac faciunt Angeli, vel potius quemadmodum Deus hoc faciat per Angelos suos, nec oculorum acie penetrare, nec fiducia rationis enucleare, nec propectu mentis comprehendere valeo, ut tam certus loquar ad omnia quæ requiri de his rebus possunt, quam si essem Angelus, aut Propheta, aut Apostolus.* Ita August.

Quibus suppositis ad primum exemplum iam 6 supra diximus, quod Angelus connaturaliter est in loco per operationem; præternaturaliter autem vel violenter per passionem. Neque hoc est mutare rationes formales existendi in loco, sed proportionatè assignare illas, sicut corpus naturaliter existit in loco per extensionem, supernaturaliter autem per indiuisibilitatem, sicut corpus Christi in Sacramento. Addo, quod spiritus alligati corpori, fortasse

312 Q.LII.&LIII. De loco & motu Angelor.

fortasse non ita alligantur, quod priuentur omni operatione in ipsūmet corpus, ita vt purē existant per passionem, sed aliquid permittuntur operari, & si non ad voluntatem suam, sed magis, vel minus, prout fuerit strictior, vel minus stricta alligatio, per quam illud corpus vt instrumentum Dei impedit, & coërcet virtutem operatiuam Angeli, sicque causat in illo maiorem vel minorem pœnam. Et ad hoc moueor, quia multi Dæmones sunt in isto aëre, qui cruciantur ab igne inferni, & tamen permittuntur aliqua operari circa ista corpora. Quid ergo non verat intelligere, quod illi qui sunt intra terram in ipso inferno aliquid permittantur operari in ipsomet igne, in quo sunt, & in alias animas vel Dæmones, torquendo illos: Et in hoc dabitur latitudo, ita vt qui habent minorem pœnam, minus coërcantur, & impediuntur ab operando in illo corpore cui sunt alligati. Qui autem acerbiorē pœnam sentiūt, multo magis impediti sunt ab operando. Quod si totaliter impediuntur agere, & purē passiuē sint alligati illi corpori, erit cruciatus vehementissimus, sicut in nostro corpore experimur, quod quando per externas pœnas, vel per intrinsecam distemperantiam humorum ita facultates naturales premuntur, vt suas naturales operationes exercere non permittantur, est acerbissimus cruciatus: sic existimandum est quod secundum quod potentia spiritualis magis vel minus impeditur à sua libertate operandi, & intellectus magis fatigatur in applicatione vehementi ad cogitandum de illa pœna, tanto acerbior est cruciatus, eo quod dolor obiectiuus consistit in mala dispositione facultatis, & potentiae, praternaturali, & violenta, sicut delectatio in connaturali. Et licet nobis occultum sit quid operentur Dæmones in illo igne cui alligati sunt, tamen promptum est cogitare, quod sicut Dæmones in isto aëre, vel terra aliquid operantur, ita aliquid poterunt operari circa illum ignem, vel mouendo se, vel mouendo ignem aut animas, aut alios Dæmones.

7 Ad instantiam de animabus in Limbo, dicemus circa tertium exemplum. Interim sufficit dicere, quod si animæ in sinu Abraham nihil ibi operabantur, existerant per passionem in illo loco, id est per detentionem, non quidem pœnalem, sed carcere quodam honorario, quia non mittebantur inde exire, & sic quasi victæ erant ibi, vt insinuat in illo Zachariæ 9. *Tu autem in sanguine testamenti tui emisisti victos tuos de lacu in quo non erat aqua.* Et idem significant illa verba Lucæ 16. Vbi Abraham loquitur ad diuitem damnatum. *Inter vos, & nos chaos magnum firmatum est, vt hi, qui volunt hinc transire ad vos non possint, neque inde huc transmeare.* Ergo etiam ad alia loca pœnalia non poterant illæ animæ moueri, sed erant impeditæ, non quidem ex natura sua, sed ex ordinatione diuina, alioquin non peteret Diues, vt Lazarus mitteretur ad se, & ad domum patris sui, si non possent animæ moueri: ergo erant animæ ibi detentæ, & sic passiuē existentes in loco. An verò possint actiuē operari circa alia corpora, & sic per modum agentis poni in loco, dicemus respondendo ad tertium exemplum, vbi etiam de animabus in Limbo.

8 Quod verò attinet ad animam Christi Domini, quando descendit ad Limbum Patrum, S. Tho. in 3. dist. 22. quæst. 2. art. 2. quæstionc. 1. sentit quod etiam lucem sensibilem, & exteriorem produxit in illo loco, qua illum illustrauit. Quando verò in 3. p. q. 52. distinguit, quod ad quædam loca inferni descendit anima Christi secundum essentiam suam; ad alia per effectus suos, manifestus est sensus,

quod ibi erat præsens secundum essentiam suam, vbi operabatur immediatè, v. g. lucem illam producendo, vel aliquid simile; in aliis autem locis pœnalibus erat per effectus mediatos, quia spiritus inferni increpauit, seu, vt dicit D. Petrus epist. 1. cap. 3. *His qui in carcere erant spiritibus veniens prædicauit.* Sicut sol in visceribus terræ est per effectus mediatos; in isto verò aëre per lucem manifestantem præsentiā eius.

Quod verò additur ex D. Thom. in 4. dist. 44. dicimus S. D. non ibi dicere quod prius sit spiritum esse ligatum igni, quā pati ab eo, sed solum dicit quod res corporea habet ex sua natura quod spiritum loco definiat, sed non quod detineat vel alliget illi loco, sed hoc superadditur illi igni, vt est instrumentum diuinæ iustitiæ, quod sic detinet spiritum, & ita efficitur ei pœnalis, retardans eum ab executione propriæ voluntatis, ne scilicet possit operari vbi vult, & secundum quod vult. Vbi D. Thom. nihil aliud docet, quā doctrinam hucusque traditam.

Denique ad id quod additur de actione ignis inferni in Dæmones existentes in hoc aëre non vrget: dicimus enim quod ille ignis non est ratio ponendi spiritum in loco per passionem, nisi quando detinet illum apud se, & ligat, ne alibi operetur. Si autem alibi operari permittit, sicut Dæmones qui sunt in isto aëre, erit quidem illi pœnalis, secundum quod magis vel minus restringit operationem eius in alio loco, ne iuxta voluntatem suam faciant, non tamen est ratio ponendi illum in loco distanti, quia non operatur aliquam passionem immediatè in eo receptam, sed in loco illo distanti ponetur spiritus per operationem, quam ibi exercere permittitur ab igne, qui ex hoc illi pœnalis redditur.

Ad secundum exemplum, in quo magnam vim faciunt Authores oppositi, quid scilicet operentur Angeli in cælo empyreo: Dico quod possunt producere aliquam lucem, aut agere eam, quam illud cælum habet: nam quod Angeli possint in corporibus lucem producere, affirmat S. Thom. in 1. dist. 37. qu. 3. art. 1. in corp. & hoc conueniens est pluribus testimoniis Scripturæ, in quibus dicuntur aliqua loca sensibilibus ab Angelis illuminata, vt Actorum 12. *Angelus Domini assistit, & lumen refulsit in habitaculo carceris.* Et Lucæ 2. *Angelus Domini stetit iuxta illos, & claritas Dei circumfulsit illos.* Et Matthæi 28. *Erat autem aspectus eius sicut fulgur.* Licet autem possint Angeli producere lucem, non tamen immediatè poterunt alias qualitates alteratiuas producere, v. g. calorem, aut frigus, nisi applicando actiua passiuus, eo quod lux est qualitas cælestis, & magis pertinet ad qualitates intentionales; & ideo congruentius est ab Angelo produci, quā qualitates elementales. Ex hac autem luce corpus illud cæleste maximè condecoratur: nam si de Beatis dicitur Apoc. 21. quod *Afferrent gloriam suam, & honorem in illam*, id est in ciuitatem cælestem, multo magis Angeli luce sua speciali gloriosissimam efficient habitationem illam. Et quia lux illa superioris perfectionis est, etiam conducere poterit ad aliquas influentias cæli empyrei in corpora inferiora, quia licet illud cælum sit immobile motu locali, tamen aliquid influere in hæc inferiora pertinet ad dignitatem, seu permanentiam, docet S. Thom. 1. p. qu. 66. art. 3. ad 2. retractans oppositum quod tenuerat in 2. dist. 2. qu. 2. art. 3. Nec obstat quod cælum illud non emit tit lucem suam ad nos; hoc enim ideo est, quia illud corpus est subtilissimum, lux autem non ei aculatur radios, nisi in corpore denso, sicut sunt astra & planetæ, quibus astris caret illud cælum: tamen nihil

nihil obstat quominus illa lux, ut pote corporis ita nobilis suas occultas qualitates influat in hæc inferiora ad quod plurimum adiuuari poterit à perfectione lucis Angelicæ, qua decoratur.

11 Ad tertium exemplum Respond. non deesse qui existimant animas separatas per seipsas moueri non posse, eo quod circa nullum corpus operari possunt, ut agendo, & mouendo illi assistant, & præsentiam acquirant, sed moueri dicuntur, quia portantur ab Angelis; & sic solum passiuè assistunt in loco, non actiuè, sicut dicitur de anima Lazari Lucæ 16. *Factum est ut moreretur mendicus, & portaretur ab Angelis, in sinum Abrahe.* De anima autem Christi, quia certum est secundum fidem descendisse ad inferos, & iterum ascendisse ad sepulcrum, dicunt non fuisse motam naturaliter, nisi ut instrumentum Verbi diuini. Quorum fundamentum est, quia anima separata non potest per se mouere aliquod corpus, ut docet S. Thom. cit. *quæstione 117. artic. 4. infra*: ergo neque potest se mouere per modum agentis, seu per modum contactus actiui erga corpora, solum ergo mouebitur ab alio. Cæterum in libris de anima q. 12. a. ult. ostendimus hoc non posse stare, sed animam rationalem esse substantiam per se mobilem, quia in separationis statu habet se sicut spiritus, & ad modum spiritus operatur. Est autem inconueniens quod spiritualis, & intellectualis substantia in vi status separationis deterior, & imperfectior reddatur corpore se mouente, & ipsa non possit nisi tantum moueri. Frustra etiam daret illi natura appetitum, seu voluntatem circa res absentes, & loco distantes, & priuaret illam potentia motiua executiua talis voluntatis: sed deberet expectare, si quis Angelus, vel Dæmon vellet illam ferre: quod certè esset deficientissima prouidentia in substantia ita nobili. Quod verò habeant voluntatem existendi in loco distante, patet: nam animæ quæ sunt in Purgatorio desiderant esse in cælo, & anima illa diuitis petebat ut mitteretur ad se anima Lazari, & ad domum patris sui: & illi respondit Abraham quod *Chaos magnum firmatum erat inter illa loca, ut hi qui volunt hinc transire ad vos, non possint, neque inde huc transire.* Supponit ergo quod volebant, sed impediabantur. Naturaliter ergo possunt animæ separatae velle mutare loca: non ergo à natura debet eis denegari potentia locomotiua, seu executiua, quibus concessa est voluntas, cum etiam animalia vilissima quæ appetitum habent, & sensum de re absenti, locomotiua sint, ut dici solet in libris de anima. Hæc & alia ibi ostendimus, & explicauimus S. Th. quod quando negat animabus separatis vim locomotiua, loquitur de illis in ratione formarum, non in quantum operantur, ut spiritus in vi status separationis, ut bene notat, & sentit Caiet. 3. p. q. 52. art. 2. §. Quoad 3. Quare cum anima, in quantum forma, habeat vim mouendi corpus viuificatum à se, in statu separationis habet vim spiritus, ut possit etiam mouere corpora non viuificata à se, aut in eis aliquid operari, sicut ad intelligendum accipit species infusas ratione status illius. Quare non est quod negemus animas posse habere contactum virtualem ad corpora, quæ non informant, & mouere illa, ac mouere se per contactum, & assistentiam ad illa, licet multò infirmior sit vis motiua naturalis in anima, quam in Angelo; & præternaturaliter esse poterunt per detentionem, & alligationem passiuam, sicut de Angelis dicemus disput. 24. Quid verò in Limbo

Ioan. à S. Thom. in 1. part. D. Th. Tom. alter.

operentur animæ paruulorum, aut quomodo ibi sint? Respond quod si animæ separatae nihil possunt agere circa se, vel circa corpora, non est dicendum quod sint ibi per aliquam operationem, sed omnino animæ sunt extra locum ex sua natura, dicuntur autem ex diuina ordinatione esse in istis, vel illis locis alligatae, vel receptæ, quatenus ibi Deus aliquid operatur circa illas, aut quatenus vident se proportionem habere cum dignioribus, vel indignioribus locis: nam, ut dicit S. Thom. in additionibus q. 69. a. 2. ad 2. *Quædam anima cum quibusdam locis magis conueniunt, sicut anima spiritualiter illuminata cum corporibus luminosis, anima verò obtenebrata per culpam cum locis tenebrosis.* Si autem animæ separatae agunt, vel mouent aliquod corpus, & seipsas, possunt animæ in Limbo aliquem motum exercere circa illa loca, quamuis propter generalem naturæ defectum, quæ est culpa originalis, non possint circa quolibet loca operari, vel motum habere, sed tantum circa illa tenebrosa. Et sic sunt in loco modo spiritualibus substantiis conuenienti, ut ibidem dicit S. Tho. ad 1.

Ad quartum exemplum de Angelo existente in vacuo, in primis quod attinet ad D. Tho. dicimus, quod in illo quodlibet. dicit Angelum posse esse in conuexo cæli empyrei, id est, in vltima superficie, vbi adhuc non est vacuum, sed ibi terminatur vltimum corpus, vbi adhuc operari potest, & contactum habere virtutis, atque aded esse ibi, ut in loco positiuo. Si verò demus Angelum totaliter poni extra hunc mundum, aut fuisse productum à Deo ante hunc mundum visibilem, talis Angelus non esset ibi tanquam in loco saltem completè, & iuxta modum contactus sui, qui est contactus operatiuus, vnde vbi nihil est, non tangit; nec aliàs replet illud vacuum, sicut corpus. Posset tamen habere ibi aliquam præsentiam ordinis, seu in actu primo, quatenus posset formare dictamen de operando in tali, vel tali parte spatij illius vacui determinatè, si ibi adesset corpus, ita quod ex vi talis dictaminis, si poneretur corpus, determinatè operaretur, & tangeret illud. Nec posset tunc inter duos Angelos in spatio illo positos fundari aliqua distantia positiua, & formalis, quasi inter terminos extensionis, & mensurationis, sed solum daretur distantia negatiua, & imaginaria, non fundata super Angelos, sed in ipso spatio imaginario, qualis modò datur, etiam si ibi Angeli non sint: sicut enim Angelo assistente alicui corpori, non ab ipso Angelo, sed à corpore sumitur distantia mensura, & extensio, ita remoto corpore, & considerato solo spatio imaginario, non ab ipso Angelo, sed à spatio sumitur imaginaria distantia. Quod verò dicitur Angelum posse moueri per vacuum, si agatur de motu continuo positiuè transeunte per medium, negatur sic posse Angelum moueri, quia non mouetur nisi secundum aliquem contactum virtualem, & actiuum: nec enim repletium spatij habere potest, actiuum autem in vacuo non potest exercere, cum ibi nihil sit in quod agat. Secus est de corpore, quod non habet contactum actiuum, sed repletium spatij. Vnde potest diuersas repletiones mutare, & induere propinquitatem, vel distantiam ad aliud corpus, quæ etiam acquiritur per motum. Et ideo remoto omni alio corpore non posset moueri, quia non haberet quid acquireret per motum, ut in dicta qu. 17. Physic. notauimus. At

Ll verò

verò motu non discreto non transeunte per mediū, bene posset Angelus existens in vacuo moueri ad corpus distans, eo modo quo dicemus *infra*. Et sic non est inconueniens quòd secundum motum continuum, minus possit Angelus moueri in vacuo quàm corpus, quia nobiliori motu mouetur, scilicet per contactum virtuale, non repletum loci, & illius motus vacuum non est capax, nec tamen manet immobilis, quia motu discreto moueri potest.

13 Tertiò arguitur ab inconuenientibus; nam si Angelus existit in loco per operationem transeuntem actualiter operantem: ergo si velit cessare ab omni operatione immutante corpus, vt si purè vellet contemplari, nullibi esset, quod est impossibile, quia res existens in hoc vniuerso, alicubi est, aut in vniuerso non est.

Confirm. quia D. Thom. non exigit ad existentiam Angeli in loco operationem propriè operantem in rem extra: dicit enim sufficere quòd præsideat loco etiam si non moueat locum, vt patet *quodlib. 1. art. 4.* ergo ante operationem transeuntem per solam præsentiam in loco, quæ potest esse per actum immanentem, Angelus existit in loco: ergo non est necesse quòd contactus Angeli ad locum sit per operationem erga locum, sed independentèr à tali operatione debet dari contactus per aliquam vnionem ipsius virtutis ad locum ante operationem in illo, quia semper requiritur coniunctio, & approximatō agentis ad passum antecedenter ad operationem in ipsum passum, & ex ipso passo elicitā.

Respondetur nullum debere censi inconueniens quòd Angelus maneat in hoc vniuerso absque omni loco positio: id enim expressè admittit S. Thom. in 1. dist. 37. art. 1. ad 4. Hoc (inquit) non reputo inconueniens quòd Angelus sine loco non possit esse, & non in loco, quando nullam operationem circa locum habet, nec est inconueniens, vt tunc nusquam, vel in nullo loco esse dicatur, sicut etiam non est inconueniens, quòd nullo colore coloratus esse dicatur; sed tamen hoc non est imaginabile, quia imaginatio continuum non transcendit. Itaque illud magnum absurdum, quod aliqui reputant quòd Angelus possit non esse in loco, est inconueniens imaginationis, non rationis: ratio enim dicit quòd substantia purè spiritualis sicut Angelus nullo modo subiicitur loco, neque dependet ab illo, aut commensuratur illi, sed potius se habet vt quædam vis actiua in illud superior omni corpore; & sic contactus eius ad corpus debet esse per modū actiuitatis, & hæc cum operetur ex subiectione ad voluntatem liberam, potest cessare omnino, & sic manebit Angelus sine contactu erga illud corpus, quod est manere sine coniunctione seu præsentia positua ad corpus, quia hæc per aliquem contactum fit. Sicut etiam Deus si velit destruere omnes creaturas, non erit in loco posituè, sed solum in seipso, sicut modò non est posituè in spatiis imaginariis, vt latius ostendimus *preced. tomo disp. 8.* Angelus ergo si nihil velit operari erga corpus, solum poterit ibi esse præsens præsentia ordinis, id est in actu primo, & secundum potestatem, & ordinem ad talem locum, non secundum applicationem, & contactum in actu secundo. Quando verò dicitur, quòd illud quod nullibi est, neque est, intelligitur quando nullibi est, nec formaliter, nec radicaliter, ita quòd neque secundum capacitatem ordinetur ad locum. Si autem de se potest esse si velit, & in actu primo, & po-

testatiuè, est in aliquo loco, sed de facto, & applicatè non vult illum tangere, quia independens est ab illo, non sequitur quòd nihil sit ex eo quod alicubi formaliter non sit.

Ad Confirmationem Resp. quòd secundum D. Thom. Angelus est in loco, non solum per motionem corporis, sed quocumque modo operetur in illo, vel vniatur illi, aut præsideat illi: sed tamen si præsideat sine aliqua operatione erga corpus qua tangat illud, solum habebit præsentiam ordinis, & in actu primo, quæ pertinet ad illud dictamen practicum quo Angelus ordinat se erga aliquem locum. Si autem præsideat operando aliquid applicatè, & in exercitio erga locum, erit in illo per positium contactum, & præsentiam formalem; & similiter si vniatur illi vnione aliqua passua, per quam existit modo præternaturali in loco. Et ad id quod dicitur de approximatione, seu coniunctione ad locum antecedenter ad operationem, iam *suprà* diximus, eadem operatione Angelum posse se applicare, & tangere locum, & operari effectum ex illo, & in illo. Quod habet Angelus propter eminentiam suam, & superioritatem erga corpus ad quod non habet contactum, nisi per modum virtutis actiue, non subiectæ corpori, neque dependentis ab illo, ita vt prius indigeat illi commensurari, & applicari quam operari. Itaque coniunctio, & applicatio agentis ad passum tunc antecedit operationem eius, quando fit per commensurationem, & coaptationem quantitatiue agentis cum passo, & tunc sequitur operatio: quando verò agens est omnino superius ad passum, ita quòd non indiget illi commensurari per quantitatem, tunc non prius vnitur quàm operetur, sed ipsa operatione subiicit sibi passum, & ex illo elicit effectum.

14 Vltimò arguitur contra vltimam conclus. quia Angeli possunt fundare distantiam, & propinquitatem, etiam ratione sui: ergo non solum habent *vbi*, & præsentiam per modum actionis aut passionis, sed per modum distantie aut indistantie. Antecedens probatur: nam si sint duo Angeli, alter in cælo, alter in inferno, plus distant, quàm duo existentes in aëre, & non solum ratione corporum, cum ipsi independentes sint à corpore: ergo per seipsos. Cuius etiam signum est, quia si Angelis sic existentibus annihilarentur omnia corpora, magis distantes manerent Angeli, qui antea erant in cælo, & in inferno, quàm qui erant in aëre: ergo ratione sui capaces sunt huius distantie, aliàs non posset Deus destruere corpora, nisi destrueret Angelorum *vbi*, & præsentiam.

Confirmatur. Quia si Angeli ponerentur à Deo extra totum mundum visibilem, vel crearentur ante mundum visibilem, non essent substantiæ immobiles, aliàs dependerent in motu à natura corporea. Si autem mouerentur, aliquid deberent acquirere per motum, quod non posset esse nisi aliqua distantia, vel propinquitas: ergo sunt capaces *vbi* distantialis.

Respon. Angelos illos non fundare distantiam in se immediatè, sed mediante corpore, aut spatio in quo sunt, quia sicut in se positionem non habent in loco, ita neque distantiam, aut propinquitatem, quæ positionem aliquam, seu situationem importat. Solum ergo ratione corporis, cui assistunt, distantiam fundare possunt posituam, & formalem, vel ratione spatij distantiam imaginariā. Et hoc modo dicerentur magis distantes Angeli, qui sunt in cælo, & inferno, quàm qui sunt in aëre. Si autè annihilarentur

hilarentur omnia illa corpora interiacētia, non manerent illi Angeli distantes, vel propinqui positiua distantia, sed negatiua, ratione spatij vacui, seu imaginarij, quod maneret: ratione autem sui vnus Angelus non distat, neque indistat ab alio, sicut Angelus se extendens ad totam suam sphaeram non distat secundum vnā partem, qua correspondet multis partibus sine positione ad partes, sicut anima existens in pede non distat à seipsa vt existente in capite, cum tamen pars vnus, & eiusdem corporis distet ab alia; sic duo spiritus non sunt capaces distandi inter se ratione sui, sed ratione corporis quod tangunt, vel spatij in quo remanent, non quia ipsi dependeant à loco, vt sint, sed vt tangentes sint, quia non possunt contactum habere, si nihil tangunt.

Ad confirmat. Respondetur, quod Angeli extra omne corpus positi non sunt mobiles motu contactus virtualis, & consequenter, nec possunt acquirere *vbi* ob defectum materiae, circa quam fit contactus, sicut si non essent corpora, animae non essent informantes, nec modo informatiuo ob defectum materiae. Posset tamen vnus Angelus tunc agere in alium actione morali, vel illuminatiua, & ex consequenti detinere illum per imperium practicum formando, & excitando in illo tam vehemens dictamen per imperium suum, vt non auderet, vel non posset inferior Angelus moueri ex defectu dictaminis ad se mouendum, impeditus ex imperio alterius.

ARTICVLVS III.

Vtrum repugnet vnus Angelum esse in pluribus locis, vel plures in vno.

Sub hoc titulo comprehendimus omnes difficultates, quae pertinent ad modum quo Angelus existit in loco, quae reducuntur ad quatuor.

Prima vtrum Angelus ita sit in loco quod possit modò esse in maiori, modò in minori pro sua voluntate, an verò habeat modum vniuersalem essendi in loco, ita quod semper eodem modo in loco sit, sicut corpus, quod ratione quantitatis commensuratur loco, non potest pro libito collocari modò in maiori, modò in minori, nisi iuxta extensionem quantitatis.

Secunda, vtrum Angelus possit simul esse in diuersis locis adaequatis.

Tertia vtrum saltem in pluribus inadaequatis esse possit intra eandem, videlicet sphaeram suae virtutis.

Quarta. An plures possint esse in eodem loco: an verò repugnet pluribus Angelis identitas loci, sicut pluribus corporibus.

Angelus potest esse in maiori, vel minori loco intra eandem sphaeram.

I Communis Theologorum sententia est, Angelum intra sphaeram suae virtutis non coartari ad existendum in loco determinato, sed posse esse in maiori, vel minori, licet Vasqu. in *praesenti disp. 191. cap. 1.* ex Greg. referat opinionem cuiusdam Hibernici in *1. distinct. 8. quest. 2.* qui dicebat Angelum ita postulare sibi determinatum locum, vt neque in maiori, neque in minori esse posset: imò dicebat locum Angeli esse circularis figuræ. Quod si Angelus aliquando assumit corpus mino-

Ioan. 8. S. Thom. in 1. part. D. Th. Tomus alter.

ris quantitatis quam possit, dicebat substantiam illius, aliqua ex parte esse extra tale corpus. Et eandem sententiam tribuit Bassoli in *2. dist. 2. quest. 4. art. 1. praesertim in solutionibus argumentorum*. Scotus verò in *distinct. 2. quest. 6. §.* De isto articulo, dixit Angelum habere locum determinatum versus maximum, ita quod non posset esse in minori, licet §. *sequenti* fateatur rem hanc esse dubiam. Alij existimant Angelum habere determinationem loci versus maximum, non tamen versus minimum, sed posse esse in minori, & minori in infinitum. Pro qua sententia Vasqu. citat plures ex antiquis, Bonauent. Gabrielem, Maiorem, Marsilium, & alios. Ipse autem Vasquez *ibidem cap. 2.* sentit habere quidem terminum quoad maximum, existentiam Angeli in loco, & posse in minori collocari; esse verò incertum vtrum versus minimum habeat aliquem terminum, an verò possit esse in minori vel minori loco in infinitum.

Sensus autem D. Thom. manifestus est in *hac 2. qu. 5. art. 2.* Vbi inquit, quod. *Non est necesse quod Angelo determinetur vnus locus indiuisibilis secundum situm, sed vel diuisibilis, vel indiuisibilis, vel maior, vel minor secundum quod voluntariè applicat suam virtutem ad corpus maius, vel minus; & sic totum corpus cui per suam virtutem applicatur, correspondet ei vt vnus locus.* Ex quo duo deducuntur, in quibus communiter authores conueniunt, in vno verò est maior difficultas.

Primum est quod cum virtus Angeli sit limitata, non potest esse in quocumque loco quantumuis maximo, sed in loco finito, & determinato; alioquin esset vbique si determinatum locum non haberet, quod esset incidere in opinionem Durandi *suprà* reiectam de existentia Angeli vbique.

Secundum est, quod intra illam sphaeram cui potest Angelus assistere, non cogitur semper toti illi loco praesens esse, & illum tangere, sed posse esse in minori intra talem sphaeram. Quam sententiam non solum discipuli D. Thom. communiter, sed etiam alijs authores *suprà* citati praeter Hibernicum, & Bassolium sequuntur. Et conuincuntur ad hoc, tum exemplo animae rationalis, quae aliquando informat corpus minus, aliquando maius intra suam sphaeram; & tamen quando informat minus corpus, non collocat substantiam suam extra illud in aliquo loco sibi correspondente, vt impleat totam suam sphaeram, siquidem anima non potest esse nisi informando, vel separata; modò autem separata non est cum informet corpus nostrum. Extra illud autem non informat aliud corpus, nec est extra illud tanquam separata, quia vnita est corpori, nec partim vnita, partim separata cum careat partibus. Eadem ergo substantia animae modò est in minori corpore, modò in maiori: ergo similiter poterit Angelus esse. Sicut etiam, quia corpus Christi est in Eucharistia ad modum spiritualis substantiae, modò correspondet minori hostiae, modò maiori. Ex Scriptura etiam colligimus fuisse in vno homine legionem Daemonum, Marci 5. & Lucae 8. & similiter septem Daemonia de Maria Magdalena exiisse: quod stare non potest nisi illi spiritus in minori parte corporis essent quam secundum se esse possint, cum aliquando vnus Angelus in maiori corpore appareat. Nos autem colligimus locum Angeli maiorem vel minorem ex corporibus in quibus manifestantur.

Difficultas est in duobus. Primum, in reddenda ratione; Quare Angelus possit esse in mi-

L 1 2 nori

nori parte, seu loco quàm possit esse intra suam sphaeram. Secundò, an possit esse in loco indiuisibili? Nam circa primum, qui sentiunt Angelum esse in loco per suam substantiam, vel per aliquod *ubi*, seu modum intrinsecum antecederet ad omnem operationem, & contactum Angeli, difficile possunt reddere huius rei rationem, quia substantia non potest mutari inquantum substantia est, ita ut modò correspondeat maiori spatio, modò minori. Ipse autem modus, seu *ubi* intrinsecum non potest modò esse maius, modò minus, nisi detur aliqua causa, & principium fundans talem mutationem: hoc autem non potest fundari in ipsa substantia secundum se sumpta, quia substantia de se est indifferens, ut sit in maiori, vel minori loco: ergo oportet aliquid superaddere quod talis varietatis sit ratio, & fundamentum.

4 Nec sufficit assignare pro causa huius maioris vel minoris praesentiae ipsam voluntatem Angeli tantum, ut assignat Suarez *lib. 4. de Angelis cap. 11.* Nam voluntas est quidem sufficiens causa effectiua motus, & applicationis Angeli ad locum, non tamen potest ipse pro sua libertate immutare modum quo res aliqua assistit in loco, sicut nos etiam libera voluntate mouemur ad loca, non tamen possumus in minori, aut maiori loco esse pro nostra voluntate, sed debemus accommodare nos loco iuxta modum extensionis, & commensurationis ad locum. Si autem possemus in maiori vel minori loco pro nostro arbitratu constitui, deberet in ipso corpore assignari ratio aliqua, seu commensuratio, ratione cuius posset modò maiori loco correspondere, modò minori. Cum ergo Angelus ita possit existere, oportet praeter voluntatem, quae est causa effectiue applicans virtutem motiuam Angeli, assignari ex parte ipsius Angeli rationem, per quam est habilis ad existendum in maiori, vel minori loco.

5 Nec sufficit pro ratione huius assignare ipsam indiuisibilitatem substantiae Angeli ut assignat Arubal: hoc enim est commune omnibus Angelis, quòd habeant indiuisibilitatem, & tamen vnus potest occupare maiorem locum quàm alius, quod non potest prouenire nisi ex aliqua maiori virtute, seu ratione positiua: nam indiuisibilitas, quae est negatio quantitatis aequalis est in omnibus. Similiter stante eadem indiuisibilitate in vno Angelo potest modò esse in maiori loco, modò in minori. Ergo oportet assignare rationem unde illa indiuisibilitas, sic potest variare modum praesentiae, & non eandem semper habere, cum tamen indiuisibilitas, seu carentia quantitatis eadem omnino sit. Nec denique ipsum *ubi*, seu modus praesentiae, aut vnionis potest esse ratio, & fundamentum huius diuersitatis: nam hoc est quod inquirimus, ex quo principio proueniat, quòd istud *ubi* aliquando sit maius, vel minus, id est, maiori loco, vel minori correspondeat, vel etiam ipsa vnio ad corpus, cur modò sit ad tantum corpus, modò ad minus. Dicere ergo quòd ratio, & principium huius est ipsum *ubi*, est petere principium, quia de hoc inquirimus.

6 At verò in sententia D. Thom. facillimè assignatur ratio, & fundamentum ex parte Angeli, quare possit esse in maiori, vel minori loco intra suam sphaeram, nimirum, quia contactus Angeli est contactus formae agentis, & virtutis eius ad passum inquantum illud sibi coniungit, ut ex ipso, vel in ipso incipiat aliquid operari, ita quòd ex illo educat aliquem effectum per virtutem suam. Et cum virtus ista sit purè actiua, & non quantitativa, seu in quantitate existens, non prius applicatur quàm agat, sed agendo applicatur, ut *suprà* diximus, quia in agendo non dependet à commensu-

ratione quantitativa cum passò, tanquam à conditione requisita, sed est virtus subiiciens sibi passum ad operandum ex illo. Non autem subiicit illud sibi informando sicut anima nostra, sed operando, & agendo ex illo, ita quòd eadem operatio Angeli propter eminentiam suam, quia est actio virtutis liberae, & independentis à conditionibus, & quantitate corporis, non aliter commensuratur corpori, quàm subiiciendo illud sibi, non autem prius se illi commensurando per aliquod accidens, non actiuum, sicut corpus per quantitatem applicatur, & commensuratur corpori prius quàm agat. Et quia non est in manu agentis corporei dilatare, vel coarctare istam quantitatem, per quàm est in loco, idè non potest esse in loco maiori vel minori, nisi iuxta exigentiam suae quantitatis: Angelus autem non supponit aliquod accidens, vel aliquam rationem antecedentem ad suam virtutem, per quam commensuretur loco, sed primus, & immediatus contactus Angeli ad corpus est per ipsammet virtutem actiuam, ut subiicientem sibi tale passum, & quia virtus actiua non subiicit nisi operando, oportet quòd ipsa operatio habeat duo officia, & facere effectum ex subiecto, & subiectum ipsum sibi coniungere, & subiicere, quatenus ex illo vult operari, & hoc munus est prius quàm ipsa productio effectus. Virtus autem Angeli operatur ex directione voluntatis, quae potest applicare illam, & moderari, seu temperare ad tantum, vel tantum effectum, & consequenter potest applicare virtutem ad tantum, vel tantum passum, prout voluerit circa illud, vel ex illo operari.

7 Circa secundum verò, quod in hac parte facit difficultatem, videlicet, An possit Angelus se constituere in indiuisibili, non solum in superficie, vel linea, quia ista simpliciter habent partes, & indiuisibilia sunt, licet quantum ad aliquid indiuisibilitatem habeant, sed etiam in puncto quod est omnino indiuisibile: Vasq. *hic dist. 192. c. 2.* tenet cum Scoto in *2. dist. 2. q. 6. §. Ad propositum*, nihil in hac re compertum esse, & fundamenta S. Thom. qui tenet Angelum esse in loco per contactum operationis infirma esse ad probandum posse Angelum esse in puncto, quia non potest virtus Angeli aut operatio eius recipi in puncto, neque, per punctum posse deriuari, & communicari virtutem Angeli in reliquum corpus: ergo non potest Angelus poni in puncto ratione operationis suae, quia punctum non est capax talis operationis.

Nihilominus expresse D. Thom. in *hac q. 52. a. 2.* affirmat, locum Angeli posse esse diuisibilem & indiuisibilem. Idem affirmat in *1. dist. 37. q. 3. art. 2.* & hoc probatur, quia ex parte Angeli nulla est dependentia à partibus continui, & ex alia parte potest aliquis effectus eius terminari ad punctum: nihil enim inconuenit quòd possit aliquod corpus tangere aliud in puncto, & moueri per puncta, ut est communis casus in philosophia, si corpus perfecte sphaericum tangat perfecte planum: inde enim probatur dari indiuisibilia in *6. Physic.* quia talis globus tangeret perfecte planum in indiuisibili, & moueretur ex parte, quia tangeret planum motu discreto saltando partes, & solum tangendo indiuisibilia: sed dari talia duo corpora, scilicet perfecte sphaericum, & perfecte planum non repugnat siue per naturam, siue per artem, & operationem ipsius Angeli, siue etiam ab ipso Deo immediate: ergo non repugnabit tunc etiam Angelum vniri illi corpori sphaerico, & mouere illud maiori velocitate, vel minori per illud corpus planum tangendo id in quo fit motus, vel contactus corporis

corporis sphaerici: ergo si solum tangit in puncto, solum Angelus constituet se in puncto: ergo non est cur negemus quod Angelus possit se constituere in puncto, & mouere in puncto, si id potest corpus. Præterea non repugnat quod Angelus possit designare aliquod punctum in loco, vel in lapide, & illud extrahere, seu corrumpere ut resultet aliud punctum loco illius: ergo poterit tunc applicari soli puncto, & in illo operari aliquem effectum, vel extrahendo illud, vel designando, aut aliquid simile, vel etiam mouendo corpus motu aliquo discreto sicut mouetur corpus ipsum, quando est perfecte sphaericum in perfecte plano.

8 Quare pro hac parte stabilienda non est necesse plures rationes multiplicare, nec illam difficultatem decidere, an possit Angelus diffundere virtutem, vel operationem in corpus, incipiendo à puncto, aut etiam motum imprimere partibus per punctum. Quidquid enim sit de hoc, sufficit nobis contra Vasquez euidenter ostendere quod non repugnet fieri motum in puncto, saltem discretum, sicut potest ab ipso corpore fieri: eodem enim modo non repugnabit Angelo illum facere, & tunc si corpus mouetur in puncto, & ad motum illius omnes partes mouentur, quia totum illud corpus sphaericum mutatur de loco ad locum, quid prohibet quod etiam Angelus moueat idem corpus, taliter quod ex puncto incipiat motus, & diffundatur ad partes, sicut quando globus tangit planum in puncto omnes partes eius mouentur?

Quare ad fundamenta Vasq. quæ solum petunt quem effectum possit Angelus operari in puncto, ex dictis manet plenè responsum, quia iam assignauimus, quid possit operari, scil. illum motum.

Angelus non potest esse simul in pluribus locis adequatis.

9 Circa secundam difficultatem initio articuli propositam, sententia D. Th. est, quod vnus Angelus non potest esse in pluribus locis sibi adequatis, quod omnino certum est, supposito, quod Angelus habeat limitatam virtutem, & efficaciam, seu rationem existendi in loco; nomine enim adequati loci intelligimus maximum locum quem potest tali virtute vel ratione attingere. Vnde si est maximus, in quem potest, non potest in vi naturalis virtutis in alio extra illum siue adequato siue inadecuato existere. Quæ ratio in omnium sententia procedit: nam siue substantia Angeli, siue vnio ad corpus, siue modus aliquis præsentiae, siue ipsa operatio sit ratio existendi in loco, constat, quod quidquid ponatur, totum est finitum: ergo debet habere terminum, quo adequetur talis finita ratio, & consequenter ex vi illius rationis non potest ultra illam adæquationem seu terminum existere: ergo idem est existere in pluribus locis adequatis, atque excedere terminum adæquatum suæ limitatæ virtutis. Si autem hoc semel potest excedere, non restat aliqua ratio vnde limitetur, & sic poterit esse vbique.

10 Difficultas verò est respectu potentiae Dei absolutæ, an possit Angelus existere ultra locum adæquatum naturalem extendendo virtutem contra naturam taliter, ut sine vlla additione substantiæ ultra proprium, & adæquatum locum excurrat: hæc enim addi non potest, cum sit indiuisibilis, & partes non admittat, quæ sequuntur materiam. Si autem adderetur Angelo virtus ultra limitationem naturalem, quam de se habet, iam inciperet pro loco adæquato habere maiorem sphaeram, quam an-

Ioan. à S. Thom. in 1. part. D. Th. Tomus alter,

tea habebat. Et sic nunquā videtur verificari quod Angelus sit in duplici loco adæquato formaliter loquendo, si existit in loco per virtutem operatiuam, bene tamen in duplici loco materiali, id est in eo quod antea erat locus adæquatus naturali limitatione suæ virtutis, & ultra illum in alio, qui sibi conuenit per virtutem superadditam: Sed tamen supposita ista additione, & augmento virtutis iam sibi conuenit pro loco adæquato aliquid amplius, quàm antea. Vnde hac suppositione facta mutatur terminus adæquatus loci Angelici, & incipit habere nouam sphaeram, & terminum, & positio intra illum erit intra locum adæquatum, intra quem poterit esse in minori, qui inadæquatus erit termino, quem nunc habet supposita additione virtutis, licet respectu virtutis minoris, quæ antea erat, adæquatus fuerit. Si autem non fiat aliqua additio virtutis, vel operationis, secundum quam potest habere contactum ad locum, sed maneat eadē, quæ antea erat, non poterit per modum operationis esse in alio loco, quàm qui tangitur à tali virtute.

Quare vnico verbo Respond. quod in nostra sententia de existentia Angeli in loco mediante contactu virtuali operationis non potest Angelus esse in duplici loco adæquato formaliter, id est in aliquo loco ultra terminum, qui sibi competit ex virtute contactiui naturali, vel superaddita à Deo; bene tamen potest esse ultra locum adæquatum suæ propriæ, & naturali virtuti si illa à Deo augeatur: Nulla tamen superaddita virtute non poterit. Angelus esse in aliquo loco ultra adæquatum terminum suæ virtutis, quam habet. Pater hoc, quia contactus iste, de quo loquimur, est contactus operatiuus, qui necessariò fit per virtutem aliquam, & operationem procedentem ab ipso Angelo: ergo si talis virtus non superaddatur, non poterit habere contactum operatiuum ultra terminum proprium. Si autem non potest ultra illum operari, neque potest tangere, quia tangere, est operari. An verò possit esse in duplici loco, in vno per actionem connaturaliter, in alio per passionem præternaturaliter, non apparet aliqua implicatio, ut dicemus, in solutione argumentorum, sicut corpus potest esse quantitatinè in loco per modum connaturalem, & indiuisibiliter seu sacramentaliter in alio loco, ut contingit in corpore Christi.

Sed obijciens; nam repugnat Angelum sine additione virtutis poni in alio loco à Deo: ergo potest esse in duplici loco formali adæquato. Antec. prob. quia Deus potest facere quod ignis, qui calefacit hæc, calefaciat Romæ, nulla superaddita virtute: ergo etiam poterit facere, quod Angelus qui operatur hæc, operetur in cælo, nulla virtute superaddita; sed per te Angelus habet contactum ad locum per operationem: ergo poterit habere contactum ad illum duplicem locum, vbi operatur sine additione virtutis. Vbi autem habet contactum Angelus, etiam habet præsentiam localem: ergo potest esse in duplici loco adæquato formaliter.

Confir. quia Angelus potest esse in loco per passionem, sicut per operationem: ergo poterit Deus facere, quod Angelus patiatur in inferno, & operetur in cælo, & sic vtrouque erit eius substantia secundum diuersas rationes existendi in loco.

Secundò arguitur ex alia parte: Quia repugnat Angelum esse in pluribus locis adequatis, etiam materialiter, & ultra sphaeram quæ naturaliter habere potest, etiam per additionem virtutis: quia virtus addita de nouo non affert nouam additionem substantialem: nec enim se habet sicut quantitas

tas corporea, quæ si superadditur, affert secum novam partem materiæ, ut sibi correspondeat: ergo non potest illa virtus superaddita collocare substantiam Angeli in loco distincto, aliàs posset Angelus, vel anima ubique existere, quia sine additione substantiæ potest eadem manens in aliis locis sine termino poni solum per additionem virtutis.

Confir. quia virtus superaddita ad virtutem naturalem Angeli solum potest esse instrumentalis, quia per illam movet Deus Angelum, ut operetur in loco, ubi naturaliter non potest: sed virtus instrumentalis Dei æquè potest agere in propinquum & remotum: ergo ex vi illius comparatur distantiam, seu absentiam Angeli quando operatur in rem distantem: ergo non potest esse ratio habendi contactum, seu præsentiam in loco.

14 Ad primum Respond. Quod bene potest Deus facere quod virtus Angeli hinc existens operetur in cælo, sed non æquè immediatè arque hinc, nisi addatur distincta virtus per quam inde etiam incipiat operari immediate suppositi, sicut hinc: sicut etiam ignis existens hinc potest operari Romæ, ubi non existit, non tamen operabitur Romæ immediate suppositi, nisi ibi collocetur à Deo tanquam in loco, sed solum dicitur operari Romæ, quia ponit ibi calorem sine transitu per aërem medium: & hoc idè est, quia immediata applicatio, seu operatio immediate suppositi non est quæcumque operatio agentis, sed illa unde primò egreditur motus ab agente, & passo. Non potest autem duplex operatio æquè primò, & immediatè oriri ab aliquo agente ex duplici passo distante, supposito quod tota eius virtus adæquatur isti loco, & non additur illi maior virtus, ut alteri etiam loco assistat, tanquam ad sphaeram suam pertinente, ita ut etiam ab illo æquè primò incipiat. Quare si virtus divina facit ut operetur Angelus in loco distante ultra propriam sphaeram, sine additione novæ virtutis, ille effectus erit mediatus, perinde ac si virtus Angeli per diffusionem sui rateret illum locum: id autem quod Deus supplet est, ut sine diffusionem virtutis per medium operetur Angelus hinc existens in loco remoto. Constat autem quod substantia Angeli non collocatur in loco per virtutem diffusam, sed ut primò operantem, & egredientem ab ipso agente: potest enim diffundi virtus, & effectus Angeli, etiam ultra locum, ubi est eius substantia. Sed si illi superadderetur tanta virtus, ut posset immediatè incipere suam operationem à maiori sphaera, ita ut inciperet ab eo loco in quo nunc est, & ab alio qui sibi antè erat distans, tunc non repugnabit, quod Angelus sit etiam in illo loco per suam substantiam, quia tunc haberet maiorem sphaeram.

15 Ad confirmat. Responderetur, nullum esse inconueniens quod Angelus sit in duplici loco diuinitus, in vno connaturaliter, & per operationem, in altero præternaturaliter, vel supernaturaliter per passionem. Neque hoc est contra D. Thom. quia solum loquitur de duplici loco connaturali, & de existentia in loco per operationem: sicut etiam in corporibus non repugnat quod per vnam rationem formalem v.g. per circumscriptionem sit corpus in vno loco, & in alio per modum sacramentalem. Et similiter si vellet Deus cōvertere substantiam panis hinc existentem in substantiam Angeli existentem in cælo, sicut cōvertit eam in corpus Christi existens in cælo, tunc substantia Angeli esset in cælo, & hinc, non tamen utrobique modo connaturali. Ut tamen passio constituat Angelum in alio loco, oportet quod ita retineat Angelum apud se in

vi passionis, quod non impediat ipsum operari alibi, ut ibi connaturaliter existat, sed detineat sine alligatione potentiarum, sicut erant animæ in sinu Abrahæ.

Ad secundam Resp. virtutem illam posse addi 16 Angelo sine additione novæ substantiæ, sicut docet D. Thom. *infra q. 117. art. 4.* quod animæ rationali, quæ in virtute suæ naturæ non potest mouere corpus, nisi viuificatum, potest superaddi ei aliquid virtute diuina, ut moueat corpus non viuificatum à se. Quia ergo substantia spiritalis obedientialiter est capax, ut sibi maior ac maior virtus superaddatur, quam quæ naturaliter est in illa; idè substantia Angeli potest non naturaliter, sed obedientialiter in maiori, & maiori loco esse, fortificando, & augendo eius virtutem operariam, & contactuam corporis. An verò possit superaddi vsque in infinitum syncategorematicè, an verò habeat certum terminum illa virtus, ultra quem transire non possit, dependet ex opinionibus de extensione, vel intensione virtutis, an terminentur termino aliquo intrinseco, etiam in ordine ad potentiam Dei, vel possit in infinitum crescere sine termino: in hac enim opinione concedi debet quod Angelus potest esse in toto mundo diuinitus sicut potest Deus convertere substantiam omnium corporum existentium in mundo in corpus Christi, & tunc esset in toto mundo, sed non esset sicut Deus ubique, quia non per se primò esset ubique, sed ex adiuncto.

Ad confirm. Respond. virtutem illam sic superadditam Angelo ad tangendum corpus, & operandum in illo non esse instrumentalem, sed eiusdem rationis cum præcedente, quia eam auget in sua intrinseca ratione, magisque extendit, licet quoad modum supernaturaliter augeatur, quia ex propriis causis non est debita quoad tale augmentum, sicut etiam lux Solis augebitur post diem iudicii, iuxta illud Esai. 30. *& lux Solis erit sempiternitè.* Et ipsi Beati habebunt lucem clariorem luce Solis, ut affirmat S. Th. in additionibus q. 85. art. 2. ad 2. & opusc. 10. art. 36.

Angelus quomodo possit esse in duplici loco inadæquato.

Circa tertiam difficultatem duplici modo controuertitur, utrum Angelus possit esse in duplici 17 loco inadæquato: vno modo intra suam sphaeram existendo in duplici parte inadæquata illius, licet diuisa, & discontinuata inter se. Secundo, utrum extra sphaeram propriam possit habere vnam præsentiam inadæquatam, & alteram etiam inadæquatam intra suam sphaeram, v. g. Si Angelus haberet pro sphaera, & termino in quo possit existere præsens vnam leucam potest esse difficultas, utrum intra illam leucam possit habere discontinuatas præsentias inadæquatas, v. g. existendo in quadrante leuæ, & similiter in alio quadrante cum discontinuatione intermedia. Vel secundò utrum possit habere præsentiam inadæquatam intra istam leucam, v. g. dimidiam leucam occupando hinc, & aliam dimidiam in loco longè distante, v. g. in cælo.

In hac re, qui existimant præsentiam Angeli nõ fundari in operatione, sed in ipsa substantia, seu modo superaddito, difficilè reddunt rationem, cur non possit Angelus diuinitus existere in pluribus locis inadæquatis, non existendo in intermediis: ex vna enim parte vrget illa ratio, quia Angelus ita existit in loco, quod totus existit in toto, & totus in qualibet parte: ergo etiam si aliquibus partibus illius totius non existeret, nihil propterea deperiret

ririt Angelo, nec apparet in quo fundetur essentialis dependentia Angeli à continuitate assistentia in loco.

Et confir. exemplo præsentia corporis Christi in Eucharistia: potest enim esse in vna hostia, & in alia quantumcumque distanti: ergo id non repugnat Angelo, qui etiam existit totus in toto, & totus in qualibet parte, sicut corpus Christi.

19 Ex alia verò parte instat illud maximum inconueniens, quia aliàs posset Angelus naturaliter esse simul in cælo, & in terra, imò in locis distantissimis in infinitum posset simul operari, dummodo in quolibet haberet præsentiam inadæquatam, si semel non dependet à continuitate corporis, seu loci, cui applicatur, vt existat hîc & ibi, nulla est ratio, cur non possit in quacumque distantia poni simul. Quod communiter negant Patres, vt Damascenus lib. 1. de fide, cap. 17. vbi inquit, *Nec enim in pluribus aut diuersis locis Angelus operari in eodem tempore potest.* Et lib. 2. c. 3. inquit, quòd *Angelus quando est in cælo, non est in terra.* Et Didymus in lib. de Spiritu sancto longè à principio inquit quòd, *Angelus qui aderat Apostolo in Asia oranti non poterat simul adesse aliis in cæteris mundi partibus constitutis.* Ergo Angelus non potest ita diuidere operationes suas inadæquatas, vt possit extra suam sphaeram poni in pluribus locis inadæquatis sibi, imò sequeretur, non indigere Angelum moueri de vno loco ad alium, sed existendo in vno loco, & non relinquendo illum, posset in alio longè distanti operari. Videtur autem hoc repugnare ex intrinseca natura rei existentis in loco, quia hoc ipso, quòd loco applicatur, non potest nisi vni loco, & per vnicum medium applicari, vt inductione constat in corporibus, & similiter in anima rationali, quæ non potest informare duo corpora quantumuis parua, nisi sint continua per modum vnius: licet super hoc possit dispensare virtus diuina, sicut dispensat in corpore Christi existente in Eucharistia per supernaturalem virtutem discontinuando diuersa loca, quia non ponitur ratione sui, sed ratione panis in ipsum conuersi in quibuscumque locis panis, vel accidentia eius sint. Quòd autem aliquid per seipsum connaturali modo possit loco discontinuari, non apparet conforme modo, & rationi existendi in loco.

20 Qui verò existimant Angelos esse in loco per præsentiam fundatam in operatione, vel contactu virtutis (sicut Thomistæ) communiter tenent, posse Angelum intra suam sphaeram esse diuisim in locis inadæquatis, eò quòd potest operationem suam intra illam sphaeram diuisim inchoare à diuersis partibus non continuis, quæ sunt loca inadæquata, eo quòd non dependet Angelus à continuitate spatij in operando, nec subiicitur legibus loci: at verò extra sphaeram illam, dicunt non posse Angelum operari in locis distantibus, etiam partialibus, & inadæquatis. Ita magister Bannez hîc in hac quæst. 52. art. 2. dub. 1. & ibidem art. 2. ad 3. inconueniens, Ferrer. 3. contra Gent. cap. 68. & hoc propter inconuenientia allata: nam à priori vix potest reddi ratio cur Angelus non possit esse in locis distantibus partialibus, quorum vnus sit extra suam sphaeram, dummodo vterque non excedat adæquationem eius, & efficaciam operandi, si simul iungerentur,

21 Res ista omnino nobis occulta est: verosimilius tamen videtur, quòd naturaliter loquendo non potest Angelus discontinuare locum suum, neque intra suam sphaeram, neque extra, sed hoc ipso quòd determinatur ad operandum, debet vnica operatione, & ex vna, & determinata parte maiori vel

minori, vel ex tota sua sphaera, prout voluerit inchoare operationem suam, & consequenter ibi solum collocare substantiam suam, quia hæc collocatur per operationem, vbi immediate, & primò incipit ex aliquo passo, quatenus reddit illud sibi coniunctum ad operandum ex illa. Hæc resolutio habet pauciora inconuenientia, & est conformior D. Thom. dicit enim artic. 2. in fine quæst. 52. quòd *Totum illud cui Angelus applicatur, reputatur vnus locus, licet sit continuum;* ergo quòd continuum non fuerit, non apparet quomodo reputatur vt vnus locus. Sed in hoc non facimus tantam vim, sicut in ipsa ratione D. Thom. qua vtitur in illo art. quòd *Quia virtus Angeli finita est, non se extendit ad omnia, sed ad aliquid vnum determinatum: oportet enim quidquid comparatur ad vnā virtutem, vt vnum aliquid, comparari ad ipsam.* Si autem Angelus potest æquè primò incipere diuersas operationes à diuersis locis partialibus, non subsistit ratio D. Th. quia illa plura loca neque continuitate sunt vnum, cum sint diuisa, & discontinua, neque ordine, cum non deriuetur operatio ex vno ad aliud, sed æquè primò incipiat ab vtroque, aliàs non collocaret vtroque suam substantiam, quia ibi solum collocatur vnde primò incipit motus, & operatio, non vbi diffunditur. Quòd autem vterque locus contineatur intra sphaeram Angeli, parum interest, si quidem non vritur tota illa sphaera tanquam vno, sed tantum pluribus diuisim se habentibus. Vnde semper vrget illud inconueniens supra allatum, Quòd si Angelus potest intra suam sphaeram discontinuare operationes, & præsentiam localem, incipiendo æquè primò à pluribus locis inadæquatis plures operationes, non potest assignari ratio quare non possit æquè primò illas incipere à locis distantissimis, & quæ sunt extra suam sphaeram, dummodo ita sint inadæquata illa loca, quòd si coniungerentur, non facerent maiorem terminum quàm sphaera suæ, vt si potest Angelus esse in vna leuca, & potest operari in extremitatibus, relictis locis intermediis, non videtur aliquid ob stare, quominus possit vnā extremitatem operari in cælo, & aliam extremitatem in terra, quia vtraque extremitas si iungeretur, non faceret plus quàm leucam. Quòd verò inter media loca quæ relinquuntur ab Angelo, sint plura vel pauciora magis distantia inter se, vel minus, omnino impertinenter se habet, quia si semel potest discontinuare operationes suas operando in vnaquaque inadæquate, parum refert quòd multum vel parum discontinuentur.

Ratio autem à priori ea est, quia natura agentis limitati hoc videtur postulare, quòd si operatur per vnicam virtutem, operetur etiam vnica operatione, nec possit duas æquè primò elicere, quæ inter se ordinatæ non sint, sed si plures operationes æquè primò elicit, semper reducuntur ad diuersas virtutes, vt si homo simul videt, & loquitur, & ambulat, ista sunt per diuersas virtutes; nulla tamen virtus æquè primò incipit plures operationes, sed si plures effectus facit, ordinatè procedit in illis, & non æquè primò plures operationes elicit, quia natura semper studet vnitati, id exigente finita, & limitata natura. Ita perpetuò D. Thom. negat plura, vt plura posse simul intelligi, & multo minus operari, quia intellectus liberior est in apprehendendo, quàm virtus in operando, præsertim cum Angelus per imperium practicum operetur ad extra, & per ipsum imperium moueat cælum, vt docet D. Thom. opusc. 11. art. 3. sed non potest Angelus simul plura, vt plura intelligere, vt docet S. Thom. infra quæst. 58. art. 2. ergo non potest æquè primò

plura ut plura operari. Ut autem Angelus simul esset in pluribus partibus, & locis inadæquatis intra eandem sphaeram, deberet æquè primò habere plures operationes ut plures, quia neque essent ordinatæ inter se, & connexæ, seu unitæ ex parte operantis, neque ex parte continuitatis loci: ergo nullo modo potest sic poni, seu operari in pluribus locis inadæquatis: videmus enim quòd anima rationalis ut informet aliquas partes per modum vnius, non sufficit partes ipsas esse intra sphaeram suæ extensionis, sed oportet quòd inter se sint continuæ, & unitæ: ergo etiam spiritus non informans, sed agens, qualis est Angelus, ut assistat intra suam sphaeram pluribus partibus, oportet quòd illæ sint continuæ, & unitæ inter se, non solum intra suam sphaeram contentæ, etsi discontinuatim, sicut nec potest plura ut plura, etiam inadæquatè simul intelligere in sententia S. Thom. Et ideo hæc ratio fortius me inclinat ad istam partem iuxta sensum S. Doctoris, & eius principia.

23 Ad fundamentum oppositum Respond. quòd nihil deperit Angelo ex eo quòd sit in pluribus locis, siquidem non diuiditur; deperit tamen unitati operationis, quia si est in diuersis locis inadæquatis, non potest habere operationem ut vnam, hoc est, neque entitatiuè vnam, neque ordine vnam. Plures autem operationes, ut plures, non potest habere Angelus, nisi pluribus virtutibus operetur ad extra. Nobis autem non constat Angelum plures virtutes habere ad operandum circa corpora, & tangendo illa. Nec propter hoc ponimus Angelum dependentem à quantitate loci, quia non dependet ab eo quantum ad commensurationem, sed solum ut à conditione requisita ad unitatem operationis eius, quia pluribus locis discontinuis non potest vnica operatione incipere, licet vterque ille locus intra suam sphaeram contineatur, quia non coordinantur inter se illæ inadæquatæ operationes, cum non continuantur.

24 Ad id verò quod dicitur de Corpore Christi in Eucharistia, Respondetur esse disparem rationem: tum quia id non fit in virtute naturali, sed supernaturali, de quo in præsentī non loquimur: diuinæ enim virtuti non repugnat quòd Angelus simul sit in pluribus locis per plures immediatas operationes, secundum plures virtutes; vel in vno per operationem, in altero per passionem; tum quia in Eucharistia non ponitur Corpus Christi per aliquam operationem suam, sed per hoc quòd panis conuertatur in ipsum, vel quantitas specierum diuidatur; & sic etiam potest Deus ponere Angelum in pluribus locis per hoc quòd res diuersorum locorum conuertantur in ipsum. In præsentī autem solum loquitur de modo connaturali quo Angelus existit in loco, scilicet per operationem: hæc enim diuiditur, si æquè primò procedit à pluribus locis.

25 Sed adhuc aliqui obijciunt aliqua exempla: nam Angeli qui excæcauerunt simul omnes Sodomitas, Genes. 19. simul omnes excæcauerunt, & tamen illi erant loco distantes inter se, nec operabantur Angeli aliquid in locis intermediis: ergo erant simul in pluribus locis inadæquatis; & eodem modo Angelus qui occidit milites Sennacherib, Esaiæ 37. simul omnes occidit, qui tamen erant in diuersis locis, castrorum, & in intermediis nihil Angelus operabatur. Eodem modo Angelus superior qui præficitur à Deo vni integro regno, vel provincie, potest simul occurrere negotiis quæ in tali loco geruntur, licet sint inter se discontinua, & loco distantia, aliàs non sufficienter prouideretur custodiæ illius regni per Angelum: ergo oportet quòd pos-

sit esse in pluribus locis discontinuis. Denique Angelus potest se mouere de vno loco ad alium, non transiendo per medium: ergo etiam existere in locis extremis, non existendo in locis intermediis. Similiter potest Angelus intra sphaeram spatij adæquati applicare se ad partem quam voluerit, vel etiam subtrahere se ab omnibus partibus, ita ut nullibi sit formaliter: ergo etiam poterit subtrahere se à partibus intermediis, non operando in illis, & applicare se ad operandum solum in extremitatibus.

Respondetur, Angelos efficientes illum effectum, qui in Scriptura narratur, non constare quòd fecerint illum in omnibus illis hominibus vnico, & indiuisibili instanti, sed tanta celeritate, ut moraliter reputetur in instanti fieri; & sic quasi in ictu oculi, & breuissimo tempore potuerunt Angeli omnes illos Sodomitas percutere cæcitate, & omnes milites exercitus Assyriorum simul interficere simultate breuissimi temporis, non simultate instantis physici, & operationis. Qua ratione Patres hanc Angelorum celeritatem ita exaggerant, ut videantur vbique esse, vel momento omnibus adesse, sicut Hieron. epist. 53. contra Vigilantium, explicans illud: *sequuntur Agnum quocunque ierit*, affirmat Angelos summa celeritate vbique esse. Et Nazianzenus. Orat. 34. in fine inquit: *Angelos omnibus impigre adesse, tum ob ministerij propriitudinem; tum ob nature leuitatem*. Et acutè Tertullianus in Apologetico cap. 32. *Omnis spiritus* (inquit) *ales est: hoc Angeli, & Dæmones: igitur momento vbique sunt*. Quare bene potuerunt illi Angeli breuissimo tempore, & quasi simultate imperceptibili percutere illos homines inter se distantes, effectum cæcitatis, vel mortis, per motum operando de vno in alium. Quòd si persistatur dicendo quòd vnico instanti physico omnes illos effectus simul effecerunt; tunc dicendum est, quòd in toto illo loco operabatur vnus Angelus diuersos effectus ex vnica operatione prouenientes, videlicet intra corpora hominum motum aliquem, quo morerentur, vel cæci fierent; & in aëre intermedio aliquem alium motum, vel effectum prout vellet: sicut Sol vnica operatione producit in aëre lucem, in terra herbam, in visceribus terræ, aurum, &c. Similiter Angelus custos vnius regni, vel provincie potest adesse diuersis locis eiusdem provincie simultate temporis breuissimi, vel si sunt simultate instantis physici, erunt in intermediis locis operando aliquid aliud, continuatum tamen, vel coordinatum effectui quem operantur in extremitatibus distantibus, sicut de effectibus Solis dictum est.

Ad secundum dicimus bene posse Angelum se mouere de vno loco ad alium sine medio per motum discretum, quatenus vult operari in vno loco distante, & nō in intermediis: sed tunc quando transit Angelus ad locum distantem, relinquit priorem, quem habebat. Caterum simul existere in locis distantibus requirit quòd simul exeant plures operationes ab vno Angelo, non continuando, vel coordinando vnam alteri: quòd omnino est inconueniens in agente per modum virtutis finitæ, & limitatæ. Vnde videmus quòd in motu discreto Angeli, potest moueri ad quamcumque distantiam sine termino; & sic potest descendere de cælo in terram, nihil de intermediis corporibus attingendo. Anthores autem oppositi non concedunt quòd potest Angelus simul existere in locis inadæquatis ad quamcumque distantiam, sed solum intra sphaeram suæ limitationis. Similiter concedimus quòd Angelus liberè operatur in termino adæquato totius suæ sphaeræ, vel in parte illius maiori, vel minori, prout voluerit,

luerit, vel etiam abstrahere se ab omni operatione, si tamen voluerit de facto applicare suam virtutem, & operari in dicto loco, non debet pluribus operationibus simul, sed vnica se applicare: hoc autem stare non potest, si diuidat loca inadæquata, quia tunc incipit vna operatio ab vna parte loci, & alia ab alia parte, non communicando, nec coordinando illas inter se, neque continuando vnam cum alia.

Non possunt Angeli esse simul in eodem loco formali?

27 Sententia D. Th. quam explicat q. 52. art. 3. consistit in tribus dictis.

Primum est, in eodem loco materiali non repugnat, absolute loquendo, plures Angelos, vel plures spiritus esse, si operentur diuerso modo, vel diuersos effectus, non autem respectu vnus, & eiusdem effectus in ratione continentis talem locum. Constat hoc ex solutione ad 3. vbi docet, quod *Angelus, & anima possunt esse in eodem corpore, quia non comparantur secundum eandem habitudinem causæ, quia anima existit vt forma, non autem Dæmon.* Et manifestè constat, quod intra idem corpus in quo est anima, non solum vt informans, sed etiam vt mouens, potest existere Angelus, vel Dæmon, torquendo illud corpus per alterationem, & motum, vel etiam fouendo, & confortando. Si militer ergo poterit vnus Angelus esse in vno loco materiali operando, & alius patiando, sicut Angelus qui apprehendit Dæmonium, & religauit illud, Tobie 8. simul erant in eodem loco deserti superioris Ægypti, vnus vt alligans, & alius vt alligatus. Similiter ergo si vnus Angelus producat vnum effectum, v. g. lucem in hac parte aeris, & alius aliquem motum, non repugnabit esse in eodem loco materiali secundum illos diuersos effectus, quia si non repugnat subiectum suscipere diuersos effectus, neque repugnabit agentia illi vniri in ratione diuersi agentis. Constat etiam aliquando plures Angelos simul concurrisse in eodem loco, vt cum tres Angeli venerunt ad Abraham Genes. 18. & similiter Marci 5. Dicitur fuisse in vno homine legio Dæmonum: ergo ille homo erat materialis locus illorum spirituum, nisi vnusquisque vellet solum operari in aliqua parte illius loci, & alius in alia, quod non constat, sed possunt diuersos effectus operari circa idē subiectum. Neque enim impediuntur esse in loco propter repletionem cum sint indiuisibiliter, sed propter vnitatem operationis.

28 Quod si dicatur, quia Angeli sunt diuersæ speciei, & consequenter operationes eorum semper sunt diuersæ speciei: ergo si applicentur eidem loco materiali, nunquam se impediunt sed semper erunt simul, quia semper operationes eorum erunt diuersæ. Et tamen hoc non videtur conducere ad pluralitatem loci, dummodo istæ operationes exerceantur respectu eiusdem spatij, sicut in loco corporeo parum interest quod superficies continentes sint diuersorum corporum secundum speciem, v. g. superficies aquæ, vel aeris, dummodo omnes contineant in eodem spatio: ergo similiter licet plures Angeli distinctæ speciei contineant eundem locum, non facient distinctum locum spiritualem.

Respondetur quod Angeli, licet sint distinctæ speciei, possunt tamen producere etiam effectus eiusdem speciei, v. g. motum localem, vel lucem, quia non repugnat virtutem superiorem producere effectum eiusdem speciei cum inferiori, sicut homo mouetur localiter progressiue, & etiam

equus, vel canis, & Sol producit lucem, & similiter ignis; sic similiter possunt duo Angeli speciei distincti conuenire in aliqua operatione, vel effectui specifico secundum rationem communem spiritualis substantiæ, licet virtus vnus sit perfectior quam alterius. Et tunc si Angeli operentur in loco materiali diuersum effectum speciei, facient distinctum locum spiritualem, seu formalem, de quo statim dicemus. Si autem eundem effectum speciei velint operari, tunc se impediunt, & non poterunt esse in eodem loco materiali, nisi eo modo quo statim dicemus.

Illud verò exemplum de superficie continen- 29 te, & locante quando est diuersæ speciei, non est ad propositum, quia licet illa corpora sint diuersæ speciei in sua substantia, tamen in ratione quantitatis locantis, & ambientis sunt eiusdem rationis, quia quantitas non conuenit corporibus ratione speciei, sed ratione generica corporis. Cæterum Angeli habent contactum ratione virtutis operatiuæ, quæ potest sequi speciem, & secundum diuersas virtutes, sunt contactus, & consequenter resultant diuersa loca spiritualia, seu formalia, id est, in ratione attracti, licet in eodem spatio materiali. In Angelis autem, vt iam diximus, ipsa præsentia, seu *vbi* non respicit primò, & per se spatium, sed contactum agentis ad passum, & ex consequenti spatium in quo fit talis contactus, sicut anima primò, & per se respicit corpus informando, & ex consequenti spatium in quo informat.

Secundum dictum D. Th. est: Quod si Angeli 30 existant in loco secundum contactum operatiuum eiusdem effectus, & se habeant tanquam causæ completæ, & perfectæ, id est, totales talis effectus, repugnat quod duo Angeli simul sint in eodem loco formali. Vocatur locus formalis, ipse effectus, seu contactus, ratione cuius formaliter sunt in loco, eo quod, vt diximus, locatio Angeli non respicit directè patium, sed agentiam, seu contactum, & simultatem agentis ad passum; locus autem materialis dicitur corpus illud seu spatium in quo exercetur.

Ratio est quia non potest idem effectus numero exire à duabus causis totalibus, & adæquatis creatis, vt latè probauimus in 2. *Physic. qu. 12.* cum ergo Angeli, iuxta nostram sententiam, sint in loco tanquam formæ, seu virtutes actiuæ, & per contactum actiuum, iuxta hoc regulandum est, an possint plures Angeli esse in eodem loco formali, videlicet an possit idem effectus procedere à duabus causis totalibus. Quod quia in omnium sententia certum est, saltem naturaliter id esse impossibile, quia ad minus est superfluum, & superfluitatem natura abhorret, non solum in istis causis inferioribus, sed multò magis in entibus perfectissimis, sicut sunt Angeli: Et in nostra sententia etiam de potentia absoluta id videtur impossibile, loquendo de causis creatis adæquatis, vt in loco citato, latè expedimus, idè absolute existimamus non posse plures Angelos esse in eodem loco formali, quando operantur vt causæ completæ, & adæquatæ eundem effectum, quia locus formalis Angelorum, vt diximus, est effectus, seu contactus virtualis Angeli ad passum. Qui verò tenent Angelum existere in loco ratione suæ indiuisibilis substantiæ, vel modi superadditi erga locum, non apparet qua ratione negare possint, plures Angelos posse esse in eodem loco, seu spatio, cum non appareat in tali substantia, vel modo spirituali repugnantia aliqua, & oppositio respectu eiusdem loci corporalis, cum non habeant

habeant quantitatem, qua se inuicem excludant.

31 *art. 2. q. 5. 2. est*, quod de facto, & ordinariè Angeli non sunt in eodem loco formali, possunt tamen absolute loquendo esse quasi praternaturaliter, & per accidens, ut si duo Angeli pluresve partialiter, & inadæquatè ad eundem effectum concurrant, vel unus sit in eodem loco per passionem, & alius per operationem. Primum constat ex doctrina D. Tho. quia Angeli sunt in loco, & tangunt illum per modum continentis perfecti, quia cum sint entia suprema in vniuerso, non operantur tanquā agentia insufficientia, nec decet eorum dignitatem (præsertim in bonis Angelis) quod operentur sicut agentia partialia per se loquendo, quia hoc sonat quandam insufficientiam. Vnde per se, & ordinariè loquendo, quilibet Angelus operatur ut agens perfectum, & perfectè continens effectum. Nec obstat quod Deus cooperatur simul cum creatura: Hoc enim non facit Deus ut partialis causa, sed ut prima, & superior, quæ facit ut causæ inferiores faciant. In genere autem primæ causæ est solus, & nō est alius præter eum. Cæterum per accidens non repugnat quod accommodent suam virtutem, quæ aliàs esset sufficiens ad totum effectum, & attemperant illam ut partialiter coniungatur cum alio ad eundem effectum faciendum: quia cum sint agentia libera, possunt moderatione uti in exercitio suæ virtutis, & sic coaptare illam cum virtute alterius in ordine ad eundem effectum. Et tunc dicuntur esse in eodem loco formali, id est, in eodem effectum, seu contactu partialiter, & inadæquatè procedente à multis. Quare D. Thom. locutus est in *artic. illo 3.* solum de modo existendi in loco connaturaliter, & ordinariè, ut bene aduertit Caietan. *super eundem art.* tum quia D. Th. non posuit conclusionem de possibili, sed de inesse; & sic non loquebatur de eo quod absolute posset fieri. Tum quia loquitur expresse de pluribus motoribus perfectis, & cōpletis. Quod autem Angeli semper sint agentia perfecta, & totalia, non habetur nisi ex quadam conuenientia, quia sunt supremae causæ in vniuerso, & consequenter semper operantur perfectè, quod non esset si operarentur partialiter. Quod tamen non procedit de possibili, sed de eo quod modus connaturaliter postulat. Cum enim sint causæ liberae, bene possunt virtutem suam temperare & non uti illa secundum totam sufficientiam; & sic operari poterunt eundem effectum numero per inadæquatas operationes.

32 Nihilominus tota hæc resolutio D. Tho. & eius ratio displicuit P. Vasq. *disp. 193. c. 2. & 3.* Et primò obicit contra ipsam conclusionem, quia non est superfluum, nec impossibile plures Angelos esse in eodē loco physice, cum constet eundem hominem posse intra se habere plures Dæmones, sicut Lucæ 8. dicitur, quod *Erat in homine legio Dæmonum*, & in arreptitiis, plures Dæmones esse solent: ergo id negandum non est. Nec valet distinctio Caiet. & Ferrar. de loco materiali, & formali: Nam si semel concedatur posse duos Angelos esse in eodem corpore, dicendum est quod sunt in eodem loco formali, quia ad rationem formalem loci non spectat fundamentum, & contactus existendi in illo quod est operatio, sed materialis locus Angeli est ipsa latitudo, vel longitudo corporis, formalis autem ratio est respectus distantiae ad puncta fixa, sicut in loco corporum superficies ambiens est locus materialis, respectus autem ille est formalis ratio.

Confirmatur: Quia unus Angelus potest expellere alium de loco, aut detinere, quod non posset esse, nisi simul coëxisterent in eodem loco. Certè

existente Angelo custode in nobis, vel circa nos potest Dæmon accedere ad tentandum, aliàs non posset tentare Dæmon nisi absente Angelo: ergo possunt simul illi spiritus esse in eodem loco.

Respondetur ex dictis; Plures spiritus posse esse in eodem loco materiali operando diuersas res, seu effectus: posse etiam partialiter coniungi, & temperare suas virtutes in ordine ad eundem effectum numero producendum, potuisse etiam plures Dæmones esse in eodem homine, vnoquoque occupante seu operante in aliqua parte valde parua corporis, specialiter illam torquendo; neque oppositum huius probat Vasq. aut aliamquam rationem contra id assert. Potuerunt etiam ut *suprà* dicebamus, in eadem parte, aut toto corpore simul esse tanquam in materiali loco, seu materia suæ operationis, sed diuersos effectus, seu torturas inducendo, aut partialiter ad eandem concurrando: partialiter enim concurrere non est inconueniens in Dæmonibus, qui principatum, & dignitatem suam non seruant. Quod verò dicit contra distinctionem de loco materiali, & formali, friuolum est, quia licet in loco corporum respectus ad puncta fixa sit aliquid formale respectu superficiei ambientis, tamen locus Angeli spiritualis est formaliter, & secundum operationem virtutis. Totum autem illud quod in loco corporeo est superficies, & respectus distantiae ad puncta fixa, materialiter, & secundariò se habet in loco Angeli: ipsa enim Angeli substantia non potest immediate, & directè fundare respectum distantiae ad talia puncta; & idè quod formale est in loco corporum, materialiter se habet respectu loci Angeli: formale verò loci Angelici est id quod ad spiritualitatem pertinet, scilicet contactus virtualis, & operatio virtutis, unde resultat ubi Angelicum, quod directè non est ad spatium, seu distantiam, sed secundum habitudinem agentis ad passum, continentis ad contentum, sicut præsentia animæ ad corpus, & corporis Christi ad species pro materiali respiciunt distantiam ad puncta fixa spatij huius vniuersi, quatenus corpus, cui adest, in loco est.

Ad Confirm. Respond. Quod quando unus Angelus expellit alium physice à loco, & non solum moraliter per imperium, tunc operatio Angeli expellentis non est simul cum operatione Angeli expulsi, quia potius si expellit illum, non est cum illo, nec supponitur prius tangere alterum Angelum, quàm expellere, quia iste contactus est actiuus, & sic prius inducit effectum operationis, qua expellit, quàm simul coëxistat cum expulso. Quod si tandem necesse sit Angelum expellentem alium à loco, tangere simul eundem locum, ut alter expellatur, id faciet per contactum superioris virtutis, ita vehementem, & contrarium contactui Angeli expellendis, quod non permitat illum esse simul in eodem loco. Vnde talis contactus expulsiui alterius Angeli non sufficit quod sit superioris virtutis, & diuersæ speciei, ut sit in eodem loco simul cum altero contactu, sed debet esse contrarius, & oppositus illi, aliàs non expellet illum, quia hæc expulsio non est per quantitatem, sed per contrarietatem operationum, & effectuum. Vnde non oportet quod tales contactus expulsiui sint simul cum re expulsa, sed ad positionem vnius tollatur alter. Et ad id quod dicitur de Angelo custode, dicitur, quod etiam ipso non recedente, potest dare locum Dæmoni tentanti, quatenus ex diuersis partibus intra eundem hominem possunt inchoare suas operationes, & immutare corpus, seu phantasmam,

vnius

vnus ad suggerendum bonum, & alter malum. Sed tamen dum vnus suggerit vnum preparando tales, vel tales species, potest alter alias species oppositas preparare, vt viuacius moueant; & sic circa diuersa operari simul.

33 Secundo obiicies: Quia si propter aliquam rationem non possent plures Angelieffe in eodem loco, maxime propter rationem D. Th. in hoc art. 3. quia scilicet non possunt duæ causæ perfectæ simul ad eundem effectum concurrere: hæc autem ratio non est sufficiens: tum quia non repugnat vnus Angelum iuari ab altero in aliquo effectum, sicut plures Demones, vt magis torqueant in eodem homine sunt. Et hoc vel propter liberum modum operandi, quia possunt vt non tota efficacia suæ virtutis, sed contemperando illam cum virtute alterius, vt vterque partialiter se habeat, & inadæquatè, vel etiam quia ipse effectus tantus est, vt non possit ab vno solo Angelo fieri, vt si vnus Angelus, v. g. posset mouere velocitate, & fortitudine vt octo, effectus verò sit tantæ difficultatis, quod exigit velocitatem, seu fortitudinem vt viginti, tunc oportebit alium Angelum coniungi cum isto ad faciendum eundem effectum: ergo erunt simul in eodem loco, tum etiã, quia possunt duo Angeli operari in eodem corpore diuersas operationes, v. g. vnus motum rectum, & alter circularem: ergo saltem tunc poterunt esse simul in eodem loco. Sicut etiam sunt intra hominem simul cum anima informante corpus.

Respond. ex dictis: Possent Angelos sic operari, & esse in eodem loco per inadæquatam operationem, seu partialem influxum in aliquem effectum. Hoc tamen non est ita connaturale ipsis Angelis propter suam perfectionem, & dignitatem, quia semper partialitas influxus sonat quandam insufficientiam. Absolutè tamen non repugnat id fieri si voluerint Angeli vt sua virtute partialiter, & inadæquatè cum altero. Quando verò effectus aliquis excedit virtutem alicuius Angeli, existimant aliqui quod etiam si adiunguntur duo Angeli, non poterunt causare talem motum, quia etsi virtus agentis corporalis possit intendi ex coniunctione alterius virtutis, non tamen virtus spiritualis operatiua circa materiam exteriorem. Quod tamen non video quo fundamento dicatur, quia licet potentia non sint capaces intensiōis, tamen conatus potentia, & operatio eius erga aliquid, etiam si spiritualis sit, non apparet quare non sit capax intensiōis, præsertim si operatio Angeli ad extra fit immediatè per imperium practicum intellectus: tunc enim sicut Angelus inferior potest confortari ab Angelo superiori quoad vim illuminationis, vt sentit S. Tho. infra q. 106. art. 1. ita etiam quoad efficaciam dictaminis, vt fortius impetret, & moueat. Sed præter hæc omnia, poterunt duo Angeli in eodem loco materiali vniri ad aliquem effectum operando illum ex diuersis partibus illius corporis, & in vnaquaque applicando totam suam virtutem, quæ simul cum virtute alterius Angeli applicata ex altera parte illius corporis efficiet integrum motum, vt si sit mouenda magna moles, v. g. integer mons, qui exigit virtutem vt viginti, ad hoc vt auellatur ex loco suo, & sint duo Angeli vnus virtutis vt octo, alter vt duodecim, poterit vnusquisque totam suam virtutem imprimere diuersis partibus montis, & sic totum simul mouere.

Ad 2. probat. dicitur, quod illi Angeli, seu spiritus sic producentes diuersos effectus, seu operationes in eodem corpore, seu in eadem parte corporis, erunt in eodem loco materiali, non formali formalitate loci spiritualis, & contactus virtualis, non formalitate solum distantia, quæ in loco Angelico materialiter se habet, vt explicatum est.

ARTICVLVS IV.

Verum Angelus in suo motu necessario debeat transire per media?

Supponimus duo tanquam certa in hac difficultate. Primum est Angelos localiter moueri. Secundum est, posse moueri tam motu continuo, quam discreto. Primum negatur à Durando, & Heruæo, quos citat Vasq. hic disp. 194. c. 1. Heruæus quidem, quia existimat Angelum nullo modo esse in loco; ex quo fit consequens non posse moueri de loco ad locum; Durandus verò, quia existimat Angelum simul esse in omnibus locis, in quibus esse potest, id est, esse vbique intra suam sphaeram, in qua potest adesse. Vtrique falsum dicunt, & contra communem modum loquendi Scripturæ, & PP. & sic ista sententia non est tuta in fide. De Scriptura constat manifestè Exodi 14. *Tollensque se Angelus Dei, qui precedebat castra, abiit post eos.* Iob. 1. dicitur de Diabolo: *Circuini terram, & perambulauit eam.* Esaiæ 6. *Et volauit ad me vnus de Seraphim.* Luc. 1. *Et discessit Angelus ab ea, & c. 2. Et factum est ut recesserunt Angeli in calum.* Matth. 28. *Angelus autem Domini descendit de calo.* Descendere autem, recedere, abire, circuire, moueri est. Deinde quia est articulus fidei, animam Christi descendisse ad Inferos, & de anima Lazari dicitur Lucæ 16. quod *Portata est ab Angelis in sinum Abrahe*; Descensus autem sine motu intelligi non potest si verus, & proprius descensus est, quem in anima Christi fateri oportet: ergo similiter in Angelis verus motus erit.

Eodem modo sensum Scripturæ Patres sequuntur, & aperte motum tribuunt Angelis, vt Nazianzenus oratione 34. circa finem, dum dicit de Angelis: *Loca omnia peragant, omnibusque impigrè adsunt; tum ob ministerij promptitudinem, tum ob naturæ leuitatem.* Et Damascenus lib. 1. de fide c. 17. *Angelus ob naturæ peruitatem celeriter transit, in diuersis locis operatur.* Et lib. 2. cap. 3. dicit, quod *Cum Angeli a calo in terram mittuntur, non manent in calo.* Hoc enim consonat ei quod dicitur Apocal. 12. *Neque locus inuentus est eorum amplius in calo.* Denique videri potest Ambros. lib. 1. de Spiritu S. cap. 10. Chrysost. homil. 3. in epist. ad Hebræos, ad illa verba, *Omnes sunt administratorij spiritus.* Hieron. Epist. 53. contra Vigilantium, & alij multi. Ex quibus fit, quod quando Scriptura ponit Angelos descendere, & ascendere, mitti, &c. non possit id explicari ratione alicuius effectus de nouo, sicut explicamus descensum, & missionem diuinarum personarum; quia supponitur apud Scripturam, & PP. Angelos non esse vbique, sed mutare loca. Et tunc nomen, *descensus*, debet sumi propriè sicut sumitur de descensu animæ Christi ad Inferos.

Denique ratio manifestè hoc probat, quia Angeli non sunt vbique, cum sint substantiæ finitæ, & limitatæ, & habeant intellectum, & voluntatem, quibus valent cognoscere, & velle præsentiam in alio loco, vel absentiam ab illo, sicut Demones rogabant Christum, ne irent in abyssum. Lucæ 8. Ergo debent habere potentiam vt moueantur: frustra enim Angelis tribueret natura voluntatem, seu appetitum mutandi loca, & denegaret potentiam loco motiuam, præsertim tam perfectissimis, & nobilissimis creaturis.

Statim autem se offerebat difficultas de isto motu locali, an sit intrinsecus in Angelo, & intrinsecum terminum producat. Hoc tamen ex dictis

dictis in superioribus articulis facile dignosci potest: dicimus enim in Angelo, quando mouetur de loco in locum dari intrinsecam mutationem, & aliquid de nouo produci, & relinqui in Angelo, quando mouetur, si moueatur per se, & non solum per accidens. Hæc tamen mutatio non acquirit aliquid intrinsecum in Angelo, quod pertineat ad existentiam spatij, & distantiam, vel propinquitatem penes puncta aliqua fixa, sed producit aliquid pertinens ad contactum actiuum, quo Angelus tanquam forma actiua applicatur diuersis corporibus existentibus in diuersis spatiis, & subiicit ea sibi tanquam passum agenti, & quia talia corpora sunt in diuersis distantis, dicitur consequenter, & mediatè respicere distantiam: sicut si posset anima rationalis informare diuersa corpora, transeundo de vno in aliud, non acquireret primò, & per se distantiam, sed vnionem, seu coniunctionem informatiuam, & ex consequenti distantiam: & idem esset si corpus Christi in Sacramento relinqueret istas species & poneretur sub aliis. Quòd enim mutatio, seu motus in Angelo ponat aliquid intrinsecum in ipso, & non solum in spacio, seu corpore, vt putauit Caiet. q. 53. art. 1. constat, quia Angelus verè, & propriè mouetur de loco in locum: vbi autem est mutatio, ibi est motus: si autem tota mutatio passiuæ esset in spatio, seu corpore, Angelus solum moueret actiuè, non autem moueretur verè, & propriè, quod est incidere in sententiam Durandi impugnata. Nec obstat quòd Angelus in suo motu locali non perficitur à loco, sed perficit locum: licet enim non perficiatur à loco materiali, sicut corpora quæ à loco dependent, & in loco conseruantur; & sic acquirunt perfectionem, ex motu tamen Angelus potest acquirere perfectionem ex loco formali, id est, ex ipsa operatione, qua immutat, & perficit locum, quia ista actualis operatio pertinet ad perfectionem agentis: Nullum enim agens creatum operatur actu, quin perficiatur in hoc quod est agere in actu secundo, quantumcumque illa actio sit perfectiua alterius; & quia ista perfectio agendi non potest esse in Angelo, nisi dependenter ab aliquo passo, ex quo educit suum effectum, oportet quòd acquirat aliquam præsentiam, seu coniunctionem resultantem ex contactu suo virtuali, quod vocamus *vbi* Angelicum, quod non consistit in pura
4 denominatione extrinseca.

Nec obstat quòd aliquando D. Thom. docet per motum localem non acquiri aliquid intrinsecum, sed motum localem esse ad formam extrinsecam, vt docet *infra* q. 110. art. 3. ex Philosopho 8. *Physic. textu* 59. hoc enim est commune tam locali motui corporis, quàm spiritus: dicitur autem corpus in motu locali esse in potentia ad aliquid extrinsecum, scilicet ad locum, quia forma, seu *vbi* quod acquiritur per motum localem non est forma in se absoluta, sicut in alteratione est qualitas, & in augmentatione, quantitas, sed est dependens ab aliquo extrinseco, à quo accipitur denominatio, sicut esse vestitum à veste, & esse locatum à loco ambiente. Non tamen ipse locus denominat nisi mediante aliquo modo intrinseco recepto in corpore locato per quod dicitur subesse loco. In Angelo autem non est modus quo dicatur subesse loco, sed quo subiicit sibi locum, redditur tamen illum tangens
5 virtuali suo contactu, eique coniunctus.

Ex quo sequitur quòd tale *vbi* Angelicum, seu terminus intrinsecus, qui acquiritur in Angelo per motum, non consistit in aliquo modo intrinseco importante respectum distantiae ad puncta fixa, aut dicente per se, & immediate ordinem ad existentiam, & distantiam loci, quam Angelus suo

motu acquirat, & ita vniocè conueniat cum motu corporeo. In quo contradicimus sententiæ P. Vasq. *hic disp.* 195. c. 4. & Molina *super* q. 52. art. 1. Vasquez enim dixit quòd quando Angelus per se mouetur, debet quidem dari variatio modi intrinseci in ipso Angelo, id est, illa vnio, seu modus quem ipse dicit producere Angelum in se, vt sit in loco; sed tamen docet, quod motus localis Angeli non consistit formaliter in variatione illius modi, sed in extrinseca quadam denominatione distantiae à punctis fixis, ac proinde terminus motus non est ille modus realis, sed distantia illa. At ved Molina tenet quod motus Angeli est continua acquisitio existentiae Angeli in alia, ac alia parte spatij, quæ est in substantia Angeli tanquam in subiecto, pertinetque ad prædicamentum *vbi*. Vnde id quod Vasq. ponit in extrinseca denominatione distantiae, cuius variatio acquiritur per motum Angeli, id Molina videtur ponere in formali aliqua denominatione intrinseca, & constituyente Angelum præsentem in diuersis partibus spatij secundum diuersam distantiam.

Cæterum neutra sententia sustinenda est, quia Angelus est forma actiua sine quantitate, & non tangit corpus, neque illi redditur præsens per aliquid quo illi commensuretur, id est per aliquid antecedens operationem, seu applicationem virtutis. Vnde non est in Angelo aliquid quod immediate, & directè fundet distantiam, siue ad partem spatij, siue ad puncta fixa, vt *suprà* satis ostendimus, quia omnia ista fundantur in aliqua extensione, aut commensuratione cum loco. Angelus autem non est substantia subiecta loco, sed locum sibi subiiciens, & continens. Ergo motus Angeli non subiicitur legibus loci materialis, & extensi, nec primò, & per se ordinatur ad acquirendam distantiam, vel propinquitatem aut commensurationem cum loco, cum abstrahat ab omnibus conditionibus loci, & quantitatis; & sic est incommensurabilis ipsi, nec potest respicere locum tanquam mensuram suæ potentiae. Quare motus corporis, & spiritus non possunt vniocè conuenire in acquirendo terminum localem, nec in habendo contactum erga corpus. Quia motus corporis acquirat *vbi* circumscriptiuum quod est commensuratum loco, & ab illo dependens, & distantiam seu extensionem in illo habens: *vbi* autem Angelicum non potest habere talem commensurationem, quia contactus Angeli non est per modum extensionis, seu commensurationis ad extensionem corporis, & cum distantia non possit intelligi nisi ratione extensionis, siquidem maior, vel minor distantia mensuratur per extensionem; consequenter dicendū est quod Angelus, qui omnis extensionis expers est, non potest moueri localiter ad hoc vt acquirat aliquam distantiam, seu existentiam, vel præsentiam ad locum secundum extensionem loci: ita quòd antecedenter ad operationem, & contactum virtutis acquiratur in Angelo aliqua præsentia commensurabilis distantiae spatij, quæ commensuratio actiua non sit, sed antecedens ipsam operationem, seu actiuitatem agendi, sicut corpora antequam operentur, prius commensurantur quantitati spatij, vt ex illa operentur, eo quod applicatio corporum ad operandum est dependens à quantitate, quæ actiua non est, sed antecedit operationem: Non est autem commensurabile aliquid ad distantiam, & extensionem spatij antecedenter ad operationem, nisi per aliquam extensionem, cum ipsa distantia quædam extensio sit, nec possit coaptari aliquid ad extensionem, nisi vel virtualiter, quia virtus subiicit aliquam extensionem, & distantiam sibi, vel formaliter, quia antecedenter ad virtutem

tem, & operationem illi coaptatur, & commensuratur, & hoc non potest intelligi, nisi per aliquam extensionem. Quare cum Angelus antecedenter ad virtutem operatiuam, qua subiicit sibi corpus, & extensionem eius, non habeat aliquid quo passiuè, & formaliter coaptetur extensioni loci, consequenter neque motus eius acquirere potest aliquam præsentiam, seu existentiam quæ immediate dicat rationem distantiae, seu commensurationem eius ad partes, & extensionem spatij, vel ad puncta fixa, quia ista puncta solum respiciuntur ratione elongationis, vel approximationis, quæ pertinet ad rationem distantiae, & extensionis, cuius omnino expers est Angelus.

7 Quare motus Angeli non potest habere terminum intrinsecum, qui vniuocè conueniat cum termino motus localis corporum: haberet autem si acquireret distantiam aliquam ad puncta fixa immediate in se, vel existentiam ad partes spatij antecedenter ad operationem: sed id quod acquirit per motum, est modus aliquis, qui resultat ex coniunctione formæ Angelicæ, in quantum actiua est ad corpus, & ad extensionem eius tanquam ad passum quod sibi subiicit, & ex quo incipit operari, quia si contactus Angeli est contactus virtutis, consequenter modus qui resultat in Angelo ex tali applicatione ad agendum circa tantam quantitatem corporis, debet esse modus coniunctionis agentis cum passo, non extensionis cum distantia. Non est autem inconueniens, quod ex coniunctione agentis spiritualis cum passo, resultet in ipso agente aliquis modus præsentiae, & coniunctionis cum tali passo, qui modus immediate, & per se pertinet ad præsentiam, seu coniunctionem agentis in ratione, & linea agentis cum passo, consequenter autem, & mediatè importat ordinem distantiae, vel indistantiae ratione ipsius corporis cui vnitur, sicut anima rationalis ex eo quod vnitur corpori, acquirit modum aliquem, seu statum existendi in corpore, informando illud, quem non habet quando existit separata, qui modus subiectiuè est in ipsa anima, vt ostendimus in *physica qu. 6. art. vlt.* qui non est modus importans *vbi*, seu distantiam ad puncta fixa, & ad locum immediate, vt ex parte animæ se tenet, sed immediate importat habitudinem formæ informantis erga corpus, in quo habetur ipsa præsentia, & distantia ad locum, non ratione sui, sed ratione corporis. Et si posset anima de vno corpore ad aliud transire, mutaret immediate, & per se istos modos informationis, non tamen immediate acquireret distantiam, vel propinquitatem erga locum, sed immediate, & ex consequenti, quatenus illa informatio est ad corpus in aliquo loco. Et similiter si corpus Christi sub speciebus posset transire ab aliis speciebus, illisque coniungi, mutaret vniones, seu præsentias ad species, non acquireret distantiam vel propinquitatem localem immediate, & ratione sui, sed mediante quantitate specierum, quibus subesset. Sic Angelus quia est forma actiua superior omni corpore, quando mutat applicationem, & coniunctionem erga corpora, non mutat propinquitatem, vel distantiam localem fundatam in se, sed præsentiam agentis erga passum, & mediante tali passo cui assistit, dicit respectum ad distantiam, vel propinquitatem loci. Quando autem Angelus, anima, & corpus Christi Domini non mutant coniunctionem ad corpus, vel species, quibus sunt coniuncta, & tamen ipsa corpora mouentur, tunc mouentur res illæ per accidens, id est per aliud, & mutant locum, non ad quem immediate dicunt respectum, sed ad quem dicit respectum ipsum corpus, cui sunt coniuncta; & sic non est ne-

Ioan. à S. Thom. in 1. part. D. Th. Tomus alter.

cesse quod tunc acquirant *vbi* intrinsecum, seu modum intrinsecum suæ præsentiae, quia ille motus corporis non potest acquirere modum, & præsentiam indiuisibilem, & spirituales quam habent Angelus, & anima, & corpus Christi, vt aduertimus in *physica qu. 16. art. 2. circa 2. difficultatem.* 8

Secundum quod supponimus in hoc articulo est, motum Angeli posse esse continuum vel discretum. De motu continuo non est difficultas, quia sicut non repugnat animam rationalem successiuè informare diuersas partes corporis per augmentationem, ita non repugnabit Angelum successiuè applicari partibus continuis spatij, incipiendo operationem suam à partibus immediatioribus; & sic continuando operationes suas per applicationem ad aliquam partem aliquotam, & determinatam, & post ad aliam etiam determinatam immediate sequentem; & sic continuo mouebitur penes partes aliquotas se applicando; nam ad partes proportionales, & determinatas non potest substantiam suam continuo diuersis operationibus applicare, quia non possunt partes istæ diuersis operationibus tangi, quia infinitæ sunt, & diuersis operationibus singillatim vnaquæque attingi non potest. Requiritur autem ad hoc quod substantia Angeli extat in loco, quod non solum eius virtus ab eo diffusa continuatim per partes se extendat, sed quod virtus eius, quæ est in eius substantia, & vnde incipit operatio, applicetur continuo ipsis partibus, quod non potest esse nisi diuerso modo incipiendo operationes suas. Et hæc diuersa inceptio non potest esse numerando partes improporcionales quæ continuatim sequuntur, bene tamen applicando se partibus determinatis, & continuatim ad partes immediatas, etiam determinatas se applicando. Quod non accidit in anima rationali, quæ in augmentatione paulatim informat partes materiæ alimenti secundum partes proportionales, quia introducitur in materiam iuxta modum quo materia se disponit, scilicet vniiformiter difformiter, & per partes proportionales ingrediendo materiam, non sicut Angelus applicando sibi passum, vnde operationem incipiat. Hoc ergo modo Angelum se applicare continuo partibus per motum, neque repugnat ex parte ipsius Angeli, cum à qualibet parte corporis possit incipere aliquando operationem suam, & sic continuo applicari diuersis partibus; Neque etiam id repugnat ex parte corporis, cum omnes eius partes etiam si sint continuæ æquè subiectibiles sunt ipsi Angelo.

9 Quod si dicas, requiri ad motum continuum, quod mobile partim sit in termino à quo, & partim in termino ad quem, quod Angelo non conuenit, quia est indiuisibilis. Imò ex hoc ducitur argumentum contra ipsum motum Angeli absolute, quia Angelus debet se mouere cum sit viuens: ergo debet habere partem mouentem, & partem motam, cum omne quod mouetur, ab alio moueatur, quod non apparet quomodo distinguatur in Angelo.

Ad priorem partem difficultatis Respond. ex D. Thom. in *hac qu. 53. art. 1. ad 1.* Angelum non esse partim in termino à quo, & partim in termino ad quem, ex parte sui, sed ex parte corporis, seu spatij, cuius partem immediatam deserit, & partem immediatam acquirit. Vnde obiter colligitur, quod cum D. Thom. hic expresse posuerit motum continuum in Angelo, non refert quod negauerit illum in 1. dist. 37. sic enim id correxit.

Ad posteriorem partem dubij, Respondet P. Arrubal. *hic dist. 159. c. 2.* quod in Angelo, qui est substantia indiuisibilis, non est necesse distinguere

M m partem

partem mouentem, & partem motam, sed sufficit recipi motum in substantia, & effici à virtute ipsius substantiæ. Cæterum licet verum sit non esse in Angelo partes, inconuenienter tamen dicitur motum effici à virtute ipsius substantiæ, & recipi in substantia Angeli, quia nulla virtus, vel accidens existens in aliquo subiecto effectiue agit in illud, ita quod distinguatur virtus efficiens à substantia recipiente, quia virtus alicuius substantiæ non agit, nisi vt recepta in substantia ipsa, & consequenter substantia per talem virtutem est, quæ agit, sicut calidum est quod calefacit, non calor, sed calor agit vt *quo*, calidum vt *quod*; & sic substantia cum virtute agit, illa vt principium *quod*, ista vt *quo*; vtrumque tamen vt vnum agens, non vnum vt agens, aliud vt recipiens: ergo non se habet substantia solum vt recipiens, & virtus vt efficiens. Vnde respondetur quod in Angelo non distinguitur pars mouens, & pars mota formaliter, sed virtualiter, quia sunt diuersi actus in voluntate, & intellectu, vel etiam in potentia motiua, si ab istis distinguitur, quorum vnus oritur, & mouetur ex alio, sicut electio ex intentione, & ex electione imperium, & ex imperio applicatio ad executionem, & executio operatur erga aliud, scilicet erga corpus, ex qua operatione resultat etiam ipsum Angelum mouentem coordinari, & præsens fieri ipsi corpori. Quare non est inconueniens, quod quando aliquid mouet aliud à se, ex consequenti resultet in se aliquis modus, seu terminus motionis, sicut est ipsum *ubi*, quia hoc non est primò, & per se esse mouens, & motum, sed primò, & per se distinguitur mouens, & motum, & deinde ex ipso moueri resultat aliqua mutatio, seu ordinatio, & præsentia in eo qui mouet, quia sic se applicat ad mouendum alia à se per diuersos actus, quorum vnus est pars mouens, & alius pars mota, seu ratio mouentis, & moti, licet ipsa substantia sit mouens, & mota vt *quod* secundum diuersa, seu secundum ordinem ad diuersos actus.

10 Quod si vltèrius inquiras, an in motu continuo Angeli debeant esse plures operationes, vel vna tantum.

Respondetur, vtroque modo posse contingere motum continuum, vt ex Caiet. docet P. Suarez *lib. 4. de Angelis c. 20.* ita quod si diuersis operationibus velit Angelus continuò moueri, oportebit quod diuersæ operationes respiciant continuationem spatij, & attingant diuersas partes designatas, seu aliquotas diuersis operationibus non disparatè se habentibus, sed coordinatis, & ipsam continuationem spatij intendentibus, ita quod quando assistit vni parti, velit immediatam occupare, & postea aliam immediatam vsque ad certum terminum; & sic efficiatur motus continuus propter continuitatem spatij, licet operationes quæ continuitatem illam consumunt, sint diuersæ, inter se tamen ordinatæ. Si verò sit vnica operatio, tunc habebit continuitatem, non formaliter, & ex parte operationis, sed virtualiter, quia operatio illa indiuisibilis attingit continuum spatium per modum vnus volendo omnes illos contactus vsque ad talem terminum; & sic etiam dabitur tempus continuum, non secundum prius, & posterius in ipsamet operatione, quia vnica, & indiuisibilis est, sed secundum prius, & posterius in ipso effectui, & re operata, quatenus vnica operatione vult Angelus plures partes alicuius spatij attingere, non omnes simul habendo, sed vnâ immediatè, & ordine quodam post aliam; & sic continuatim mutat loca, licet operatio non mutetur, quia vnica operatio plures effectus continuatos, & subordinatos habere potest.

De motu autem discreto possumus loqui dupliciter. Vno modo quod sit discretus solum ratione temporis, & durationis, quia scilicet aliqua quiete interruptitur; & de hoc non est dubium quod possit Angelus moueri motu discreto, sicut etiam corpus, quia non semper operatur, & mouetur, sed aliquando cessat: ergo interruptit motum. Alio modo dicitur motus discretus per interruptionem locorum, ita vt mobile non cessando à motu transeat de vno extremo ad aliud non attingendo spatium intermedium; & de hoc est tota difficultas, vt iam explicamus.

Non repugnat Angelum moueri de vno loco ad alium, non transeundo per medium.

Certum est quod si datur motus discretus discretione se tenente ex parte spatij, necesse est quod aliqua partes maneant intactæ à motu, & contactu Angeli, quia, vt optimè conuincit D. Thom. *in hac qu. 53. art. 2.* si omnes partes medij Angelus tangeret motu discreto, numeraret omnes partes continui, & cum sint partes in potentia infinitæ, si omnes illas numeraret diuerso motu, & discreto, numeraret infinitum, quod non est pertransibile: oportet ergo quod in motu discreto aliqua partes relinquuntur intactæ. Sex ex hoc ipso nascitur difficultas, an talis motus detur, & possit Angelus per illum pertransire quancumque distantiam, transeundo ad extremum sine contactu aliquo in partibus intermediis. Vnde D. Thom. prius *in loco cit.* ostendit quod dato, seu posito motu discreto, necesse est aliquas partes continui intermedias relinquere intactas, nec possunt plures operationes discretæ ab Angelo fieri tangendo singulas partes continui; postea in fine corporis docet, absolute posse dari hunc motum discretum, quia ex illo priori requisito redditur valde difficilis. Imò hæc est difficultas, quæ maximè elongatur à nostra intelligentia in motu spiritualis substantiæ.

Circa quem est duplex sententia.

Altera affirmat posse Angelum transire de vno loco ad alium, quancumque distantem sine eo quod attingat media. Et valde cõmunis est hæc sententia inter Thomistas. Illam tenet Caietanus *in presenti qu. 53. art. 2.* Bannez *ibidem* Ferrar. 2. *contra Gentil. c. 102.* Capreolus *in 2. dist. 6. quæst. 1. art. 1. conclus. 3.* & idem sentit P. Vasquez *hic disp. 196. cap. 2.*

Secunda sententia tenet non posse Angelum moueri nisi transeundo per medium. Quæ tribuitur S. Bonau. Richar. Egidio, aliisque antiquioribus: & tanquam probabilior sequitur P. Suarez *lib. 4. de Angelis c. 19.*

Inter has duas sententias fuit sententia media 12 Scoti *in 2. dist. 2. qu. vlt.* Quem sequitur P. Arrubal. *hic disp. 160. c. 2.* Videlicet Angelum posse moueri de extremo ad extremum sine medio participante extrema, non tamen sine medio non participante. Medium participans apud Scotum est idem, quod partes medij non designatæ, seu proportionales, & communicantes inter se: medium autem non participans est idem quod partes designatæ, seu aliquotæ, quarum vna addit supra aliam distinctam magnitudinem, & in nullo communicantem, seu imbibitam in alia parte. Dicit ergo hæc sententia quod vt Angelus transeat de extremo ad extremum debet tangere omnes partes medias designatas, & aliquotas, non tamen omnes indesignatas, & communicantes inter se. In quo nihil ferè addit supra

supra secundam sententiam: nam si omnes partes designatas, & determinatas debet Angelus tangere, in illis egrediuntur, & consumuntur omnes indesignatas; & sic omnes tangere debet: sicut etiam in motu corporis per assistentiam ad partes spatij, & mutationem continuam, qua tangit partes designatas, fit transitus per partes indesignatas, quæ in illis designatis continentur.

¹³ Quare fundamenta istius secundæ sententiæ late prosequitur Suarez *loco cit.* & variè assignantur à suis authoribus: sed tamen omnia inefficacia sunt.

Primò enim ducuntur ex proportionem corporum, quæ non possunt moveri de extremo ad extremum, nisi transeundo per medium: ergo idem videtur dicendum de spiritibus. Cæterum consequentia ista nulla est, nec transcendit imaginationem, quia spiritus non alligatur legibus quantitatis, & loci. Vnde non deducitur proportio ex corporibus, quæ quantitate moventur, & per commensurationem ad locum ad spiritus, qui carent aliqua commensuratione, & subiectione ad locum, quia carent partibus, & quantitate, quæ sola commensuratur loco, & ratione illius oportet quod partes loci non prætermittantur totaliter à motu qui fit per commensurationem ad locum. Certè nullus dubitat posse Deum non solum substantiam spirituales, sed etiam corporales, de extremo ad extremum transferre, non attingendo medium, sicut per conuersionem panis in corpus Christi id facit ponendo illud modo spirituali. Cur ergo repugnabit quod hoc ipsum sit connaturale Angelo, qui independens est à quantitate, & commensuratione ad locum? Obligatio autem, & necessitas transeundi semper per medium oritur ex commensuratione partium ipsius mobilis cum ipso spatio. Vbi autem non commensuratur cum partibus spatij, nec dependet ab illis, cessat ista ratio, & obligatio transeundi per medium.

Secundò, alij recurrunt ad institutum diuinum qui sic disposuit hoc vniuersum, ut nihil transeat de extremo ad extremum nisi per medium. Cæterum si ista institutio est ex solo beneplacito, & voluntate diuina, oportet illam aliquo testimonio ostendere. Si autem est iuxta exigentiam naturæ rerum, petitur principium: de hoc enim quærimus, cur hoc repugnet naturæ spirituali.

Tertiò, alij id fundant in inconuenienti, quia aliàs darentur duo instantia immediata, scilicet instans, quo Angelus est in isto loco, & instans, quo sine motu continuo inuenitur in alio. Cæterum hoc nullum est inconueniens, quia motus discretus est ille qui componitur ex pluribus instantibus id est operationibus indiuisibilibus (indiuisibilitate se tenente ex parte operantis, non ex parte rei operatæ) immediate inter se coniunctis. Si enim inter ista instantia, quibus componitur motus discretus daretur aliquod medium diuisibile, quod non esset instans, sed tempus, talis motus, & operatio aut esset diuisibilis, si in se, & ex parte operationis continuitatem illam haberet, vel saltem non esset motus discretus, quia continuum spatium tangeret, vel continuum effectum haberet, quæ sūt capita ex quibus desumitur ratio motus continui, ut distinguitur à discreto. Cum autem Angelus moveatur, & tangat loca ratione virtutis, & operationis applicatiuæ ad locum; clarum est quod si attingit plura loca non continuata inter se, quod necesse est contactus ipsos discontinuari, & consequenter operationes, quia contactus operationes sūt. Quod si discontinuantur operationes, quia plures sunt, & una sequitur immediate post aliam, hoc ipsum est

Ioan. à S. Thom. in 1. part. D. Th. Tom. alter.

dare plura instantia Angelica immediata, quia ista instantia nihil aliud sunt quàm operationes indiuisibiles, ut ex parte Angeli se tenent.

Quartò, alij putant hoc esse commune substantiæ corporeæ, & spirituali, quia etiã substantia denudata quantitate, si moueretur, deberet transire per medium, & similiter corpus Christi in Sacramento si non esset coniunctum speciebus, & moueretur, transiret per medium: ergo etiam videtur id conuenire substantiæ spirituali, ut si mouetur, debeat transire per medium. Cæterum hæc exempla neque in se certa sunt, neque consequentiam illam inferunt. Non sunt in se certa, quia corpus sine quantitate, vel sine extensione ad locum, ut est corpus Christi in Eucharistia, non est mobile motu corporeo, & extenso, quia non est commensurabile loco. Vnde si moueretur, esset alio genere motus, quàm per commensurationem ad locum, & talis motus non apparet quod necessitaretur fieri transeundo per medium, eo quod esset motus independens à loco; & sic assumitur aliquid valde dubium, quando dicitur quod talia corpora deberent transire per medium, siquidem vel non mouerentur, remota quantitate, (motu scilicet extenso, & commensurato ad locum) vel si mouerentur, deberent moveri motu ab omni extensione, & commensuratione loci libero. Qui hoc ipso non dependeret à transitu per medium. Non inferitur autem consequentia prædicta, qua dato quod corpora remota quantitate non possint transire ad extremum nisi per medium, hoc idem est, quia non sunt immaterialia, nec per modum agentis immaterialis vniuntur corpori, & tangunt illud, sed per modum cuiusdam contactus substantialis antecedentis omnem operationem, & talis substantia non habet principium mutandi loca ita independentem, quod possit tangere extrema non contactis mediis, eo quod corporea substantia est, & licet non commensuratur quantitati loco, non tamen est superior illo, neque continet illum, & sic non est omnino independens ab illo. At verò substantia spiritualis habet contactum omnino independentem ab ipsis locis, quia eius operatio est purè spiritualis, & ordinata ad perficiendum locum sine vlla commensuratione, & subiectione ad ipsam. Vnde non cogitur operationem suam diffundere, & inchoare secundum continuationem ipsius corporis, sed secundum applicationem suæ virtutis vbicumque voluerit, eo quod ad applicandam suam virtutem neque dependet à dispositione loci, neque à commensuratione eius erga se; & idem potest applicare corpori quod sibi placuerit sine dependentia ab eius legibus, & commensuratione: sicut si anima rationalis haberet vim informandi diuersa corpora, prout essent disposita, posset transire ad aliud corpus dispositum ad sui informationem, sine hoc quod corpora intermedia informaret. Quod autem facit anima tanquàm forma informans, agit Angelus ita, quam forma actiua, non minus independens à quantitate, & extensione loci in sui applicatione, quàm anima in sui informatione, quæ solum dependeret à dispositione corporis, ad hoc ut illi vniueretur. Angelus autem nullam aliam exigit dispositionem quàm suæ actiuitatis applicationem per voluntatem, & quod corpus sit mobile ab ipso.

Tandem P. Suarez *ubi supra* illa ratione innititur, quia difficillimè percipitur à nobis quod aliquid mutetur de extremo ad extremum, & non per medium: ergo licet non ostendatur in hoc aperta repugnantia, videtur tamen superare modum naturalem cuiuscumque creaturæ, præsertim quia aliàs posset Angelus in infinitum spatium se trans-

M m 2 fene

ferre si semel non dependet à medio. Caterum hoc non est declarare repugnantiam, sed difficultati succumbere; & in istis spiritualibus in quibus oportet maximè abstrahi à sensu, & imaginatione, velle hanc impossibilitatem regulare penes id quod in sensibus, & in re corporali impossibile iudicatur, valde constricti, & infirmi animi est: nō enim minùs difficulter apprehenditur vnum corpus indiuisibiliter poni sub pluribus speciebus, sicut fides docet in corpore Christi, aut etiam vnum corpus diuisibiliter esse in pluribus locis, sicut ipsemet Suarez concedit; & tamen non propterea hoc iudicatur repugnans, quia difficile. Cur ergo iudicabitur repugnans quod Angelus ex sua spiritualitate connaturaliter habeat non dependere à transitu per medium, quod corpus potest habere supernaturaliter; siquidem spiritus naturaliter non dependet à commensuratione corporis, sicut dependet corpus: ergo quod corpus supernaturaliter accipit, potest Angelus connaturaliter habere. Quod verò dicitur posse sic Angelum ad infinitum spatium se transferre, dico non esse inconueniens quod transferat se ad spatium infinitum syncategorematicè, id est, quolibet signato possit ad maius: de facto tamen, & categorematicè numquam transfertur ad infinitum, quia nec datur corpus infinitè distans, nec infinitum vacuum sub certam intensiōem cadit.

15 Quare cū opposita sententia nullam efficaciam repugnantiam adducat ad probandum quod non possit Angelus transire de extremo ad extremum nisi per medium: dicendum est quod potest Angelus sic moueri motu discreto, sine hoc quod pertranseat per aliquod medium, quodcumque illud sit, siue communicans, siue non communicans, siue intra suam spherā, siue extra. Est expressa sententia S. Th. nam in ista q. a. 2. inquit, quod *Moueri de extremo in extremum, & non per medium, potest conuenire Angelo, & in 1. dist. 37. q. 4. a. 2. Angelus* (inquit) *potest transire de loco in locum, ita quod transeat omnia media, & potest esse quod transeat de loco in locum sine hoc quod sit in aliquo mediorum.* Et idem habet in 1. ad Annibal. dist. 37. quæst. 2. art. 1. ad 4. & quodlib. 1. art. 5. ubi inquit, quod *Angelus, si vult, potest moueri de vno extremo ad aliud, absque hoc quod pertranseat medium.* Vnde patet quod quando D. Thom. admittit motum Angeli posse esse continuum, & discretum, vt in hac quæst. 53. art. 1. & 2. & dist. 37. cit. q. 4. art. 1. & alibi sapè, non solum loquitur de discretione ex parte durationis, sed etiam ex parte loci, seu medijs, vt in præfatis verbis videmus. Et ita, vt supra diximus, D. Tho. communiter sequuntur eius discipuli, alique Theologi quos citant Carmelitani Salmant. tract. de Angelis disp. 3. dub. 5.

16 Ratio autem, & fundamentum huius sententiæ potest sumi; tum à priori, tum à posteriori. A priori quidem perpetuò D. Thom. illam ponit rationem, quia Angelus non est in loco per contactum quantitatum, qui commensuretur loco vel ab eo dependeat, sed potest vnico, & indiuisibili modo, & æquè primò comparari ad plures partes corporis: sicut enim anima rationalis comparatur ad corpus, quod informat indiuisibili modo, & æquè primò assistens totali corpori, & similiter corpus Christi speciebus panis, ita Angelus, qui est forma actiua spiritualis respectu corporum potest vniri alicui corpori, & partibus eius, æquè primò, & indiuisibili quodam modo propter spiritualitatem suam, qua superior est extensione corporis, circa quod operatur. Ergo ad deferendum illud corpus, & coniungendum se alteri, non obli-

gatur prius coniungi partibus immediatis, & deinde remotioribus, sed potest æquè primò, & indiuisibili modo totum istum locum deferere, & alteri vniri, alioquin non indiuisibili modo se coniungeret corpori, si non posset pluribus partibus corporis simul, & vnica indiuisibili præsentia, seu contactu se coniungere: ergo potest Angelus independentè à partibus intermedijs alicui corpori extremo se coniungere. Probatur consequentia, quia si semel habet Angelus talem vim præsentia quod potest simultaneè, & indiuisibili modo pluribus partibus corporis se applicare, non tenetur paulatim partes spatij acquirere, & alias deferere: ergo potest simul totum spatium quod occupat deferere, & simul, id est, indiuisibili quodam modo totum aliud acquirere. Si autem semel potest omnes partes quas occupat simul, & indiuisibiliter deferere, nihil illi obstat quominus possit etiam simul, & indiuisibiliter totum spatium simul acquirere, & illi adesse. Tunc autem quando deferit totum locum quem occupat, nullo modo est ligatus, vel dependens ab illis partibus immediatis, & coniunctis loco, quem antea occupabat: ergo potest præsentiam suam adhibere partibus, seu spatio distanti, & non coniuncto illi, quem antea occupabat: Vnde enim talis obligatio prouenit Angelo, si nullo modo continetur ab hoc, nec subiaceret illi, sed potest indiuisibiliter, & simul totum locum quem habebat deferere aut occupare?

Et confirm. quia operatio Angeli qua habet contactum ad corpus ita libera est, quod potest à quacumque parte vniversi inchoare suam operationem, & super quodcumque corpus habet potestatem, vt illi se applicet, non quidem tanquam forma in formans, sed tanquam forma agens, & præcipuè, quia est agens omni corpore superius, & nulli alligatum determinatè, & sine extensione illi commensurata: ergo Angelus qui habet contactum ad vnā partem spatij, quia ex illa inchoat operationem suam, potest à tali operatione omnino cessare, & inchoare suam operationem à corpore distanti, & non ab intermedio, quia sua virtute nō vult, aut non potest aliquid operari circa corpus intermedium: ergo hoc ipso quod substantia spiritualis Angeli est forma actiua, ita eleuata, & libera, quod potest à quacumque parte corporis in hoc vniverso suam inchoare operationem, & illi se coniungere tanquam passo, & materiæ ex qua operetur, neque ad hoc indiget dispositione corporali ex parte materiæ, sed virtutis suæ applicatione, poterit etiam se mouere ad quodcūque corpus distans independentè ab intermedijs, quia nō semper vult applicare suam virtutem corporibus intermedijs, & motus Angeli fit secundum diuersam applicationem suæ virtutis ad corpus ex quo operatur, non per dependentiam, & commensurationem ad aliud corpus.

A posteriori autem sumitur ratio huius motus 17 discreti in Angelo independentè à spatio intermedio, ex aliquibus effectibus, vel exemplis, quibus id explicatur. Primò, nam Angelus occupans totam magnitudinem suæ spheræ, potest in minori se ponere, & alias partes relinquere, & è conuerso existēs in minori parte potest in tota sua spherā se ponere: hoc autem non facit Angelus per contractionem aut dilatationem suæ substantiæ, sed per indiuisibilem contactum suæ præsentia, quo potest indiuisibili modo nunc plures, nunc pauciores partes suæ spheræ tangere. Ergo in retrahendo, vel dilatando suæ substantiæ præsentiam non dependet à partibus intermedijs, alias non

non posse vnico, & indiuisibili modo ab illis partibus se retrahere, vel ad illas extendi, nisi prius partes intermedias paulatim ingrederetur, vel egrederetur, quando minus spatium occupat ab illo quod antea occupabat, vel è contra. Quod tamen magnum incòueniens est, quia sicut Angelus potest in aliqua sphaera suae magnitudinis simul, & indiuisibili modo poni, ita potest ad minorem locum se retrahere, non per partes spatij se retrahendo, sed simul vnica, & indiuisibili praesentia minori loco assistendo, & reliquas partes omittendo. Ergo eodè modo poterit Angelus diuersum locum occupare, omittendo omnia loca intermedia, quia si non dependet in retrahendo se, & occupando minorem locum à partibus intermediis, nec etià dependebit in occupando distinctum locum. Inuatur etiam hoc aliquibus exemplis: nam corpus Christi modo indiuisibili assistens speciebus, si diuidantur illae species, assistit in parte distant, vbi species diuisa ponitur, & non in corpore intermedio. Item si anima rationalis, vt *suprà* diximus, posset de suo corpore migrare in aliud, immediatè informaret illud, etiam si esset distans, non informando prius corpora intermedia: ergo similiter Angelus poterit vniri corpori distant, non informatiue, sed actiue, non vniendo se vt agens corpori intermedio, quia non vtitur corpore intermedio tanquam passo ex quo operationem eliciat.

18 Quare tota intelligentia huius motus discreti sine medio reducitur ad hoc, quod intelligamus motum Angeli non esse primò, & per se motum localem acquirentem distantiam vel propinquitatem, vt *suprà* iam diximus, sed quod primò, & per se est vnitiuus virtutis operatiue Angeli ad passum, respectu cuius Angelus est forma actiua superior independens ab omni commensuratione, distantia, vel extensione passi, & habet pro materia cui potest coniungi ad operandum quodcumque corpus ab eo mobile. Et idè in toto vniuerso potest se applicare, & coniungere cuicumque corpori voluerit sine dependentia ab eo quod deserit, vel à spatio quod deserit, & idè potest sine hoc quod vniatur, & operetur ex corporibus intermediis incipere operationem suam à corpore distant, quia Angelus non vincit distantiam per remotionem vel propinquitatem spatij, sed per vnionem, & applicationem suae virtutis, & operationis ad passum, ex quo vult operari, siue in ratione distantiae sit ei propinquum, siue remotum: hoc enim ipsi Angelo vt agenti per accidens est, sicut in exemplo de anima nostra in informando diuersa corpora, & non intermedia manifestatur.

Quòd si Angelus praeternaturaliter ponatur in loco, non per operationem, sed per passionem, seu contactum passiuum, multò melius potest intelligi, quòd Angelus moueatur non transeundo per medium, quia potest ab alio Angelo, vel à Deo alligari ad aliquod corpus, v. g. ad ignem inferni, non alligando illum corpori intermedio, v. g. terrae, vel aquae, & sic contactus eius passiuus immediatè potest esse ad aliquid distans, & non ad intermedia, quia id fit virtute diuina.

19 Ex dictis colliges, quomodo tempus Angeli componatur, & sit distinctum, & independens à tēpore nostro, nec illi simile, sicut neque motus eius, cum spiritalis sit, nō est similis motui nostro, vt S. Th. aduertit in hac q. 53. a. 3. loquendo tam de tempore, & motu continuo, quàm de discreto: constat autè quòd tempus est numerus, & mensura motus secundum durationem, & qualis fuerit motus, tale erit tēpus. Motus autem Angeli non constat partibus, quia est operatio indiuisibilis, sed componitur ex

Ioan. à S. Thom. in 1. part. D. Th. Tomus alter.

pluralitate operationum, quarum quaelibet in se est indiuisibilis, & idè vocatur instans. Neque motus iste ordinatur primò, & per se ad vincendā distantiam spatij, sed ad coniungendum se per modū formae actiuae alicui corpori, cui per accidens est quòd sit distans vel propinquum, & idè neque tempus eius propriè, & directè habet velocitatem, & tarditatem in transeundo: nam, vt bene aduertit S. Th. in hac q. 53. a. 3. ad 1. *Velocitas motus Angeli non est secundum quantitatem suae virtutis, sed secundum determinationem suae voluntatis.* Et sic immediatè proportionantur Angelus, & corpus in ratione mouentis, & mobilis, sed solum ratione magnitudinis, in qua fit motus: Angelus enim iuxta suam voluntatem applicat se vbi vult, & quomodo vult, & inde sumitur velocitas durationis sui motus, nō ex quantitate virtutis vincens distantiam spatij, aut resistantiam mobilis, quae doctrina D. Th. valde notabilis est pro huius rei explicatione. Igitur tempus discretū Angeli est illa duratio, quae cōponitur ex pluribus instantibus, seu operationibus, quarū vna sequitur post aliā ex parte Angeli sic eliciētis illas, sed tamen ex parte effectuum quos faciunt, non continuantur immediatè, neque per immediatas partes alicuius spatij applicant Angelū. Motus autè continuus Angeli differt ex parte effectuum, quos per suam operationem seu motum Angelus facit, quia operatur effectus immediatè se habentes, seu in partibus immediatis spatij se cōtinuātes, & Angeli praesentiam illis vniētes. Ista autem operationes Angeli indiuisibiles sunt in se, quia non sunt operationes procedentes de potentia ad actum, & per partes successiuas procedentes, sed sunt actus perfecti; sed quia successione carent, vocantur instantia, non tamen est necesse quòd corresponsdeant vnico instanti nostri temporis, quod est ex omni parte indiuisibile tam formaliter, quā virtualiter, sed possunt durare secundum correspondentiā ad multum tempus nostrum, vt si Angelus perseveret vno die in sua operatione indiuisibili sine aliqua eius mutatione vel successione partium. Vnde talia instantia seu operationes, quae vt procedunt ab Angelo sunt indiuisibiles formaliter, dicuntur virtualiter diuisibiles, quia æquivalent, & correspondent durationi indiuisibili nostri temporis, quādiu Angelus vult illam operationem durare.

Soluuntur argumenta.

Primò arguitur: Nam anima rationalis non potest informare partem extremam corporis, non in- 20formando intermediam: ergo neque Angelus agere & transire ad extremam partem prius quam ad mediam: quia sicut anima se habet in informando, ita Angelus in agendo.

Confir. Quia Angelus non est infinitae virtutis: ergo non potest in quocumq; spatio remoto se collocare non transeundo per mediū: aliās posset etiā in loco infinitè distant se collocare, quia si semel non obstat distantia media, neque ab illa depēdet in acquirendo locum, à nulla dependebit: ergo potest in infinitū se collocare in aliquo loco distāti.

Conf. secundò, quia D. Th. in hac q. 53. a. 2. ponēs secundum argumētum, quod anima potest sua cogitatione trāsire de vno extremo ad aliud sine medio: ergo & Angelus poterit sic moueri: Respōdet, non esse simile, quia Angelus dum mouetur applicat suam substantiam diuersis locis; anima autem non applicatur rebus quas cogitat, sed potius res applicat ad se. Ergo sentit D. Th. quòd Angelus nō transit motu locali de extremo ad extremum sine medio, sicut potest transire cogitatio animae.

M m 3

Resp.

Respondetur esse disparem rationem inter Angelum, & animam, quia anima est forma corporis, & existit in illo solum informando. Vt autem informet vnum corpus non transeundo ad aliud, dependet à dispositionibus requisitis, vt materia vniatur formæ, quia solum potest informare corpus organicum: istæ autem dispositiones cum sint corporeæ, & modo extenso recipiantur in corpore, dependent à continuatione partium corporis, earumque colligatione, sine qua non est rectè dispositum corpus, & consequenter dependet à partibus intermediis, sine quibus non fit continuatio, neque communicatur virtus vitalis, quæ residet in spiritibus, & sanguine, quæ omnia cum corporea sint, non possunt communicari partibus extremis sine dependentia à mediis, quia modo extenso se communicant res corporeæ: at verò Angelus non existit, neque coniungitur corpori vt forma, sed vt motor, & vt agens independenter à quacumque dispositione corporis. Vnde potest ad quacumque partem corporis voluerit se applicare, & inde inchoare operationem suam independenter à quacumque distantia vel extensione intermedia, vt ostensum est.

Ad primam confir. respondetur, Angelum posse moueri motu continuo vel discreto in infinitum syncategorematicè, quia ex nulla parte positus est illi terminus intra quem non possit moueri si velit, neque ex parte sui, quia non fatigatur in mouendo, neque ex parte termini, quia nullus ei repugnat ratione cuiuscumque distantia. Sed tamen quicumque motus in singulari determinatum terminum habet, & finitus est, vt *suprà* diximus. Ad hoc autem vt sine medio moueatur, non requiritur virtus infinita, sed sufficit independentia à commensuratione loci, vt possit sine transitu per illum poni in loco distant.

Ad secundam confir. respondetur, quòd in illo argumento D. Th. loquitur de motu continuo, & vult ostendere, quòd etiam in illo potest Angelus transire de loco ad locum sine transitu per medium, eo quòd anima sic potest cogitare de locis extremis non cogitando de mediis, quod utique potest anima facere, etiam per cognitionem continuam, & sic comparando cognitionem continuam motui continuo, rectè ponit differentiam D. Th. inter cogitationem, & motum, quòd illa cogitatio, licet sit continua, non tamen applicat substantiam ipsis rebus, sed trahit res ad se, potest autem trahere ad se cogitatio continua res non continuas. Per motum autem continuum non potest applicare spatiis non continuis substantiam suam, quia hoc est contra ipsam rationem continuitatis ex parte motus.

21. Secundò arguit: Angelus non potest pertransire de tempore præterito in futurum, nisi per præsens: ergo similiter non poterit pertransire de spatio extremo ad extremum, nisi per spatium intermedium. Consequentia patet: quia non minus est ordo essentialis inter partes permanentes spatij, quàm inter partes successiuas temporis: ergo si illæ non possunt pertransiri sine medio, neque etiam istæ. Et præsertim hoc vergetur, quia ordo præfixus à Deo inter partes vniuersi est ordo situalis, quem non potest Angelus pertransire, quia à Deo præfixus est: ergo non potest tangere extrema, non contactis mediis.

Confirm. quia Angelus non potest mouere aliquod corpus de extremo ad extremum, v.g. lapidè non transeundo per medium: ergo neque seipsum poterit sic mouere. Patet consequentia, quia motus corporis, & Angeli eodem modo se habent in ratione successiuæ: ergo eodem modo se habet in dependentia à partibus mediis respectu extremorum.

Confir. secundò, quia Angelus non potest extra suam sphaeram collocari in passo distant, quin collocetur in spatiis intermediis, siquidem collocatur mediante operatione, & non potest operari ultra suam sphaeram: ergo neque etiam poterit id facere intra sphaeram propriam. Patet conseq. quia operatio Angeli quando relinquit propriam sphaeram, & acquirit aliam, dependet à spatiis intermediis, ita vt non possit in quamcumque distantiam eam collocare: ergo etiam non poterit intra suam sphaeram eandem virtutem applicare, nisi dependenter à spatiis intermediis: si enim semel dependet à continuitate spatij vt se faciat præsentem, semper dependebit, & motu discreto non poterit moueri, quia hoc non regulatur penes maiorem vel minorem virtutem in mouendo, sed penes dependentiam vel independentiam à commensuratione loci, & ab eius distantia.

Respondetur, esse disparem rationem inter coexistentiam Angeli ad partes temporis, & ad partes spatij, quia partes spatij permanentes existunt, & à parte rei, & qualibet est capax assistentiæ Angeli, nec ipse Angelus per commensurationem ad earum quantitatem coexistit, sed independenter ab extensione spatij: potest ergo assistere cui voluerit sine transitu per partes. At verò tempus futurum nondum est, nec est capax vt ei coexistat Angelus antequam sit in se: nec enim in duratione Angeli existit antequam in se: id enim est proprium æternitatis. Debet ergo Angelus expectare præsentiam partis futuræ vt ei coexistat, quia antè non est capax. Vnde Angelus non coexistit tempori per operationem, & contactum suum in ipsum, sed per meram concomitantiam ad temporis decursum: decursus autem temporis fit per præsens ad futurum, & non aliter: hoc ergo debet expectare Angelus vt ei coexistat. At verò coexistetia ad spatiū non est sola cōcomitantia in existendo, sed est applicatio, & cōtactus Angeli ad spatiū, & ad corpus, vt ex illo, & in illo operetur. Non obligatur autem virtus Angeli propter suā immaterialitatem, & eminentiam ad adhibendū contactū suum iuxta cōmensurationem loci, & extensionem corporis; & ideo potest applicare suam virtutem in ratione formæ agentis corpori extremo, & non corpori intermedio. Quòd verò ordo constitutus à Deo inter partes vniuersi sit ordo situalis, quem non potest Angelus prætermittere: dicimus hunc ordinem esse positum à Deo quoad ipsas partes vniuersi inter se, vt quòd ignis sit sursum, & terra deorsum: & hoc non potest Angelus prætermittere faciendo quòd ipsæ partes quantitatiuæ inter se collocentur sine partibus intermediis; sed tamen quoad coexistentiam Angeli ad tales partes vniuersi, non est positus ordo à Deo, vt prius Angelus tangat partes intermedias, quàm extremas, quia ad hoc in visuæ immaterialitatis, nulla ratione obligatur.

Ad 1. Confirm. Respond. quòd Angelus non potest mouere corpus tollendo ab illo modum proprium, quem habet ex sua propria extensione quantitativa, ratione cuius subiaceret commensurationi loci, nec potest moueri corpus motu locali nisi per contactum quantitativum, nec iste contactus haberi potest, aut intelligi, nisi cum dependentia à commensuratione loci, & secundum leges distantia, & propinquitatis. Vnde S. Tho. in hac q. 53. artic. 2. absolute negat corpori quòd possit moueri motu discreto, & id absolute concedit spiritui, quia corpus & mensuratur, & continetur sub loco, non verò spiritus. Quare si Angelus mouet aliquod corpus, non potest nisi motu continuo

continuo illud mouere, & seipsum ad motum illius.

Ad 2. confirm. Aliqui existimant non posse Angelum moueri motu discreto ad quamcumque distantiam, sed solum quando passum distans non distat extra sphaeram suae actiuitatis, sed continetur in loco quem potest occupare. Caterum motus discretus Angeli non fundatur in quantitate suae virtutis, neque regulatur secundum sphaeram suae actiuitatis, sed solum propter independentiam à commensuratione ad locum: nec enim posse moueri sine transitu per loca media fundatur in maiori vel minori velocitate, qua mouetur Angelus, aut in minori, vel maiori virtute, & actiuitate secundum quod habet maiorem, vel minorem sphaeram quam simul potest actuare, sed fundatur in sola superioritate quam habet ad locum continendo illum, & non contentus sub eo. Vnde S. Th. in hac q. 53. art. 2. ex hoc praecise quod substantia Angeli non est subdita loco, ut contenta, sed superior eo ut continens, infert quod in potestate eius est applicare se loco, prout vult, vel per medium, vel sine medio. Nec in hoc ponit aliquam differentiam respectu locorum, quae sunt intra sphaeram, vel extra sphaeram Angeli, sed absolute dicit quod absque medio potest se applicare loco prout vult. Et praeterea, quia sphaera actiuitatis Angeli mensuratur secundum quantitatem virtutis eius, secundum quam potest maiorem, vel minorem sphaeram occupare: sed velocitas motus Angeli non est secundum quantitatem suae virtutis, sed secundum determinationem suae voluntatis ut expresse dicit S. Th. in hac q. 53. a. 3. ad 1. Ergo etiam quod moueatur motu discreto omitendo plura media (quod etiam pertinet ad velocitatem motus Angeli) non regulatur penes quantitatem virtutis, sed secundum determinationem suae voluntatis: ergo neque attenditur penes loca contenta intra suam sphaeram, vel extra, quia continentia sphaerae, & quod si maior vel minor, regulatur secundum quantitatem virtutis, non secundum determinationem voluntatis.

22 Quare dicendum est quod in motu discreto nulla datur sphaera in Angelis, sed ad quodcumque passum, siue intra, siue extra sphaeram suam potest se applicare prout voluerit, quia hoc non fundatur in maiori virtute motiua, & actiuitate qua potest circa maius passum, vel minus operari, & illi simul assistere, sed fundatur in omnimoda independentia, & superioritate à commensuratione loci, quod omnibus Angelis, & spiritibus commune est, in quantum sunt formae actiuae immateriales. Nam ad vincendam dependentiam à locis intermediis ut transeat ad extremum, nihil conducit velocitas, vel actiuitas virtutis, sed haec solum seruit, ut distantia illa pertranseat breuiori tempore, ad hoc verò ut nullo modo pertranseat velocitas, seu actiuitas, nihil conducit, sed solum independentia à commensuratione loci. Vnde cum Angelus nullis legibus loci sit adstrictus, & ex quocumque corpore possit sibi constituere passum ex quo operetur, poterit pro sua voluntate applicare se corpori cui voluerit sine dependentia ab eius distantia intermedia, quia ad relinquendam totam suam sphaeram quam occupat Angelus ad collocandum se in alia, non indiget attingere corpus immediatum, seu partes illius: ergo poterit independentem à partibus immediatis, & coniunctis termino suae sphaerae aliam acquirere, & occupare. Qua ergo ratione potest immediatas partes relinquere, & ad distantem sphaeram transire, potest quascumque intermedias relinquere, & ad quamcumque distantiam se applicare, quia non est maior ratio quod sit independentem in applicando se ad

corpus à partibus immediatis, & non sit à quibuscumque aliis intermediis, cum hoc non innitatur virtuti, & actiuitati se mouendi, sed independentia à commensuratione loci. Et cum dicitur, quod Angelus collocat se in spatio mediante operatione: ergo non potest in quamcumque distantiam operari.

Resp. quod collocat se in loco mediante operatione, quatenus independentem est à commensuratione loci, non quatenus vincens est resistantiam seu distantiam medij. Et quia talis independentia est à quacumque commensuratione, & distantia loci, potest ad quamcumque partem voluerit inchoare operationem suam, & ibi collocare seipsū.

Vltimò arguitur: Quia in quolibet motu debet dari aliqua successio, & aliquod moueri ante mutatum esse: ergo etiam debet dari aliquod medium inter mutatum esse, quod est in termino ad quem, & illud quod est ex parte termini à quo. Pater consequentia, quia quando Angelus est in termino ad quem, tunc non est in moueri, sed in mutato esse, quando autem est in termino à quo, nondum incipit motus, quia adhuc non recedit ab illo termino: ergo ut detur motus, necesse est quod detur aliquis transitus per medium. Et praesertim hoc urget in motu locali, quia per illum acquirit Angelus aliquam distantiam, & propinquitatem ad puncta fixa, & consequenter oportet quod acquirat istam distantiam, & propinquitatem iuxta leges ipsius distantiae, quae consistit in hoc, quod non possit attingi distans, nisi prius attingatur propinquum, sicut homo licet se applicet liberè alicui loco, tamen quia modo corporeo se applicat illi, debet subdi legibus loci: ergo quia Angelus acquirit distantiam, vel propinquitatem, debet subdi legibus distantiae, & propinquitatis.

Respondetur, quod in motu continuo ad quodlibet mutatum esse praecedit moueri per modum successionis & continuitatis, non tamen in motu discreto, eo quod in motu continuo mutatum esse non est pars motus, sed terminus eius, & ita extrinsecè se habet ad ipsum motum: in motu autem discreto non praecedit aliquod moueri ipsum mutatum esse, quia motus discretus in Angelo non habet mutatum esse pro termino extrinsecò, sed pro parte componente ipsum, eo quod motus discretus componitur ex duplici instanti, siue aliquo medio continuato, quia si daretur continuatum intermedium, ille motus non esset discretus, sed continuus, & ita motus discretus componitur ex duplici operatione indiuisibili, seu duplici instanti, quorum vnum succedit alteri immediate, & primum instans desinit per vltimum esse, & ex illo ut desinente, & altero instanti ut succedente componitur motus ille discretus, & sic non est motus qui consistit in aliqua tendentia intermedia inter terminum à quo, & terminum ad quem, sed consistit in acquisitione instantanea vnius termini, seu mutati esse, non absolute, sed ex termino à quo desinente per vltimum esse, & ex illo instanti desinente, & isto de nouo posito tanquam ex duabus partibus indiuisibilibus, seu duobus instantibus componitur istud genus motus. De quo iterum dicemus art. sequenti.

Ad id verò quod dicitur de acquisitione distantiae; vel propinquitatis ad puncta fixa in motu Angeli, iam supra diximus, motum Angeli primò & per se non tendere ad distantiam, vel propinquitatem, quia haec in ipso Angelo, qui est purus spiritus fundari non potest, sed primò, & per se tendere ad coniunctionem virtutis actiuae Angeli cum corpore, quod quia in aliqua distantia

est, ex consequenti dicitur Angelus acquirere, vel perdere distantiam ratione corporis cui coniungitur. Neque fundamus istam independentiam Angelum à distantia, & spatio intermedio in eo solum quod fiat per voluntatem Angeli liberè operantem tanquam à causa efficiente, & applicante, sed ex eo quod sit mediante contactu virtutis omnino spiritualis independentis ab omni commensuratione loci. Homo autem licet liberè moueatur, tamen contactus eius ad locum est omnino corporeus, quia mediante corpore mouetur, & mediante quantitate ponitur in loco, & ita non est deobligatus à legibus loci, sed omnino illi subiectus, quia corporeus est, quod non currit in Angelo.

ARTICVLVS V.

Vtrum motus Angeli in spatio possit fieri in instanti?

VT sensus difficultatis huius percipiatur, aduertendum est dupliciter posse controuerti, an motus Angeli sit in instanti. Primò, loquendo de instanti non solum Angelico, sed etiam nostro. Secundò, loquendo de instanti Angelico tantum. Tunc instans in Angelis dicitur non solum indiuisibile ex parte sui, sed etiam ex parte nostri, quando operatio Angeli, quæ secundum se indiuisibilis est, non correspondet in sua duratione, nisi tantum instanti nostri temporis: tunc autem instans Angelicum disconuenit ab instanti nostro, quando non correspondet in sua duratione solum instanti nostri temporis, sed perseverat, & durat etiam per partem temporis nostri. Itaque operationes Angeli, quibus motus eius, & tempus, seu duratio numeratur, in se semper est indiuisibilis prout ab Angelo procedit, nec à nostro tempore, & successione eius dependet: sed tamen, quia coexistit duratio Angeli, & operationis eius nostro tempore, quia concomitanter se habent istæ durationes, ideò potest coexistere duratio Angeli, & similiter duratio operationis durationi temporis nostri, vel in multum, vel in parum: & aliquando potest duratio operationis Angelicæ coexistere durationi vnus tantum instantis nostri. Quando ergo inquiritur, an possit motus Angeli fieri in instanti, præcipue controuertitur hoc de instanti Angelico, non de instanti nostri temporis: nec enim mensuratur operatio Angeli instanti nostro, sed sicut est supra omne tempus, ita super omnia instantia temporis nostri. Itaque sensus controuersie est, vtrum motus Angeli vnica eius operatione perfici possit, atque adeò vnico instanti Angelico, siue correspondeat, & coexistat tempore nostro, siue non, sed solum instanti.

2 Secundò, aduertendum est quod Angelus potest de nouo poni in aliquo loco dupliciter. Vno modo per simplicem mutationem, alio modo per motum propriè dictum. Per simplicem mutationem idem est quod per vnica mutationem. Per motum propriè dictum idem est quod per transitum de vno loco ad alium constantem duplici mutatione, altera qua deferitur vnus locus, altera qua acquiritur alius. Tunc erit vnica, & simplex mutatio in acquisitione loci, si præsupponatur Angelus absolutus ab omni loco, & incipiat de nouo esse in loco positum, hoc solum fiet per simplicem, & vnica mutationem, quia acquireretur taliter locus de nouo, quod non relinqueretur locus aliquis positus, sed à simplici negatione existendi in loco,

de nouo collocatur in loco. Tunc autem erit verè, & propriè motus, quando est inter duo loca positua, relinquendo vnum, & acquirendo alium: tunc enim necessariò interuenit duplex mutatio illius duplicis loci, scil. desitio, seu derelictio vnus, & acquisitio alterius.

De hoc ergo motu currit difficultas, vtrum possit vnico instanti, seu operatione Angelica fieri, ita quod complectatur illud instans, & illa operatio tam desitionem vnus loci, quam acquisitionem alterius. Et dato quod vnica operatio non sufficiat complecti vtramque mutationem vtriusque loci, seu termini à quo, & ad quem, an saltem sola acquisitio termini ad quem, quæ vnica operatione, instantique perficitur, habeat vim motus, seu acquisitionis, & tendentiæ ad terminum: existentia verò in termino à quo non pertinet ad motum, sed ad quietem, quia tota duratione ante existentiam, & acquisitionem termini ad quem existit mobile in termino à quo. Et in hoc sensu vltimo controuertitur à D. Th. in hac q. 53 a. 3.

Varia sententia.

Circa hoc punctum duæ sunt extremæ sententiæ, & vna media.

Prima sententia affirmat Angelum posse moueri in instanti quocumque genere motus, siue sit continuus, siue discretus, siue transeat per medium, siue non. Ita P. Suar. lib. 4. de Angelis c. 20. & 21. Molina ad istam q. 53 a. 3. Scotus, Gabriël, Gregorius, Maior, Egidius, & alij quos pro hac sententia citant Carmelitani Salmat. tract. de Angelis disp. 3. dub. 7. & 8.

Alia sententia est in alio extremo, quod Angelus neque in motu discreto, neque in continuo potest moueri in instanti. Ita D. Thomas in hac q. 53 art. 3. Caiet. ibi, Nazarius, Bañez, Zumel, Ripa, Ferrar. 3. contra Gentil. c. 102. Nauarrete controu. 48. Salmant. citati, & alij.

Tertia sententia media est aliquorum, qui dicunt posse Angelum moueri in instanti, motu discreto, & quando non transit per medium. Ita P. Arrubal hic disput. 162. capite 2. qui pro se alios citat, videlicet Caietan. Ferrar. Molin. Valentiam. Vasquez autem hic disput. 197. cap. 2. sentit quod quando Angelus mouetur per medium, non potest moueri in instanti, sed in tempore, non tamen probat rationem S. Thom. quando in art. 3. id probat. De motu verò discreto Angeli quando non transit per medium, sentit cap. 4. non fieri in instanti, sed componi ex pluribus instantibus tanquam ex partibus motus, non tanquam ex terminis extrinsecis ipsi motui, sicut in nostro motu terminus à quo, & ad quem extrinsecè se habent ad motum.

Resolutio.

Sententia S. Thom. à nobis eligenda est, quæ in art. 3. huius quæst. 53. aperte explicatur, scilicet nulum motum Angeli siue continuum siue discretum posse esse in instanti, sed debere esse in tempore, ut patet in illis verbis; *Relinquitur quod motus Angeli sit in tempore: In continuo quidem tempore, si sit motus eius continuus: in non continuo autem, si motus sit non continuus.* Et idem docet in 1. dist. 37. q. 4. art. 3. & in 4. dist. 44. q. 2. art. 3. q. 3. & quodl. 11. art. 4. & aliis locis.

Cæterum quia contingere potest quod Angelus ponatur in loco sine motu, & vnico instanti, oportet distinguere prius istum modum instantaneum acquirendi locum, à modo acquirendi illum

lum per motum, qui nunquam potest fieri in instanti, si verus motus est.

6 Dico ergo primò, Angelus per simplicem mutationem, quæ motus non sit, potest acquirere locum, & applicare substantiam suam toti suæ sphaeræ instantanea actione, non solum quæ sit instans Angelicum, id est vnica, & indiuisibilis operatio circa locum, sed etiã quæ correspondeat vnico instanti nostri temporis.

Probatur hæc conclusio assignando casus, in quibus hoc potest fieri sine motu, & per vnica ac simplicem mutationem.

Primus est, quando à Deo ponitur Angelus subito, & instantaneè in aliquo loco ad quæ antea non se mouebat, v. g. si Angelus de nouo creetur in aliquo loco, vel si reproducatur, vel aliquid conuertatur in ipsum per transubstantiationem, vel fiat præsens alicui loco per subitam positionem in illo, totum hoc fit à Deo sine motu in vnico instanti, etiam correspondente instanti nostri temporis, quia creatio, & transubstantiatio sine motu sunt; & quia ponunt rem à se attactam in aliquo loco, consequenter in instanti tribuunt illum ipsi Angelo.

Secundus casus est: Supposito quòd Angelus est in loco per contactam suæ virtutis, & per operationem suam, potest Angelus desistendo ab omni operatione manere sine loco positio, & actuali, sicut D. Thom. admittit fieri posse, in 1. dist. 37. quæst. 3. art. 1. ad 4. & nos *suprà* diximus. In tali casu potest Angelus applicare se alicui loco quem voluerit ex non loco, seu ex non existentia in loco: ergo non duplici mutatione positio, sed vna. Patet conseq. quia tunc datur mutatio ex parte loci qui acquiritur, quia de nouo acquirit illum, cum antea non haberet, non tamen datur mutatio circa locum, qui relinquitur, quia non datur talis locus, cum supponatur Angelum in nullo loco positio existere, sed abstinere se ab omni loco: ergo talis acquisitio loci non constat duplici mutatione: ergo ex hac parte non est motus, quia non est de positio in positio. Rursus illa acquisitio loci de nouo potest fieri tota simul, & non per partes, quia Angelus indiuisibili operatione, & vnica potest se applicare illi loco, non paulatim & per partes, quia non commensuratur partibus spatij, sicut anima potest vniri in instanti omnibus partibus corporis, quando mortuus resurgit. Ergo etiam Angelus potest se applicare indiuisibili, & vnica operatione alicui passo, & sic ex parte termini, seu loci acquisiti erit illa actio instantanea: & cum ex parte termini à quo non habeat aliquam mutationem, quia non habet locum positio quem relinquat, restat quòd simpliciter illa mutatio in tali casu sit instantanea.

7 Vnde etiam intelligitur quòd Angelus potest totam suam substantiam applicare, & diffundere per suam sphaeram, sine vlla prorsus successione, sed in instanti, etiam respectu nostri temporis. Probatur, quia ex parte suæ operationis potest Angelus vnica operatione totam suam sphaeram velle occupare, vt si ex tota suâ sphaera velit inchoare actionem suam, sicut anima nostra vnico instanti occupat totum corpus suum informando, sic Angelus agendo; & tota illa actio vna est, quia totum illud continetur intra sphaeram virtutis Angeli, & operationis eius, & sic potest vnica, & indiuisibili operatione ex parte sui totam illam sphaeram occupare. Similiter potest id fieri per durationem correspondentem vnico instanti nostri temporis, quia connaturaliter loquendo Angelus nullam habet resistantiam, neque aliquod contrarium, quod per

successiuam mutationem tollendum sit: ergo potest vnico instanti per totam sphaeram diffundi, quantũ ad acquisitionem ipsius loci: licet si derelinquat alium locum positio, debeat præsupponi alia mutatio, & aliud instans desertionis loci prioris cum instanti acquisitionis loci noui, vt mox dicetur. Sed tamen ipsa acquisitio totius sphaeræ, & occupatio illius non requirit tẽpus, sed in instanti potest id fieri. Quod explicatur exemplo lucis, quæ vnico instanti diffunditur per sphaeram totam luminosi, etiam si id fiat per continuam multiplicationem lucis, eo quòd lux non habet contrarium quod per successionem tollatur, sed solum tenebras; virtus autem & operatio Angeli efficacior est ipsa luce, & minus illi resistit corpus quantum ad hoc quod est applicare se illi; imò vt *suprà* diximus ex D. Thom. Angelus potest operari lucem in aliquo corpore: ergo tunc non minus instantaneè poterit Angelus toti illi loco circumfundi, quàm lux ipsa diffundi. Quòd si Angelus velit paulatim, & continuò partibus suæ sphaeræ se applicare, tunc ille motus continuus ex parte spatij, seu effectus quæ in eo ponit, diuisibilis erit, & successiuus, poteritque correspondere durationi temporis nostri, sicut etiam anima potest crescente corpore per augmentum se vnire successiuè, & iuxta motũ augmentationis. Alioquin si tali motu continuo moueretur Angelus in instanti nostro, posset Angelus in eodẽ instanti simul esse in cælo, & in terra, & in aère intermedio, siquidẽ omnia illa vnico instanti pertransiret, cum tamen, vt inquit Damasc. lib. 2. de fide c. 3. Angelus non possit simul esse in cælo, & in terra: ergo non potest vnico instanti secundum motum continuum tangere omnia loca media, quæ sunt inter cælum, & terram: & eadem ratione non poterit pertransire motu continuo ea loca quæ sunt post suâ sphaeram ad collocandum se in alio, licet quando applicat se alicui corpori tanquam sphaeræ in qua existit, possit totam illam sphaeram suæ operationis vnico instanti occupare, & attingere, non tamen de vna sphaera ad aliam per intermedia corpora motu continuo pertransire vnico instanti, & simul, quia hoc opponitur ipsi continuationi, & successioni.

Dico secundò, si motu proprio, & vero moueatur Angelus, & non simplici, & vnica mutatione, siue sit motus continuus, siue discretus, non potest moueri in instanti, sed necessariò motus Angeli debet componi ex pluribus instantibus seu operationibus Angelicis, & vbicumque sunt plura instantia, ibi est tempus. Hæc conclusio est quam præcipuè intendit S. Thom. in hoc art. 3. vt patet ex *calce corporis artic.* vbi aduertit quòd tempus illud quo mensuratur motus Angeli, siue sit continuum, siue discretum est aliud à tempore nostro, quia non dependet à motu cæli: ergo loquitur de tempore Angelico, quod constat ex instantibus Angelicis.

Vt autem ratio, & fundamentum D. Thomæ, quod comprehendit vtrumque motum tam continuum, quàm discretum, & profundè attingit naturam motus, in formam reducatur, & explicetur, aduerto quòd cum motus Angeli suam propriam habeat mensuram (quæ tamen coexistens, & correspondens est tempori, & durationi nostræ,) & illa componatur ex operationibus Angeli, earumque durationibus, sicut nostrum tempus ex partibus, oportet considerare non solum illam vnica operationem, & instans quo terminat motum, & acquirit terminum ad quem, sed etiam videndum est, vtrum Angelus immediatè ante illud instans moueatur, vel quiescat: si enim immediatè ante mouetur, motus non fit vnico instanti, siquidem imme-

diatè

diatè ante vltimum instans mouebatur, & sic non in solo illo instanti datur motus, sed ante illud: idè est autem moueri in tempore, & non moueri in vnico solo instanti. Si autem immediatè ante illud instans vltimum acquisitum termini quiescebat, vel illa quies mensurabatur alio instanti distincto, quod definit per vltimum esse, & succedit aliud, & tunc datur tempus compositum ex illis duobus instantibus, quia in vno deserit terminum *à quo*, & in alio acquirit terminum *ad quem*, & consequenter desitio in vno, & acquisitio in alio conflatur ex duplici instanti, atque adeo fit tempus Angelicum in illo motu: motus enim constare debet ex derelictione vnus termini, & acquisitione alterius. Si autem quies antecedens illud vltimum instans mensuratur tempore, ita vt toto tempore antecedente quiescat Angelus in illo loco, & in vltimo instanti illius temporis inueniatur in alio loco, sine dubio si hoc ita esset, motus ille diceretur esse in instanti, quia ex toto illo tempore, seu duratione solum vltimum instans deseruit pro mutatione, seu motu: quidquid autem est ante vltimum instans, seruit pro quiete, & nō derelinquitur ille terminus *à quo* in toto tempore, vel instanti antecedenti, sed quiescit sub illo termino *à quo*: solum autem vltimum instans seruit pro derelictione termini *à quo*, & acquisitione termini *ad quem*, supposito quod totum tempus antecedens ante vltimum instans est tempus quiescendi, non verò mouendi, & derelinquendi terminum *à quo*: hoc autem D. Th. reputat impossibile, & in hoc ponit totam vim suæ rationis, eo quod solum isto modo potest fingi quod motus sit in instanti: non sufficit autem ad motum distinguere in eodè instanti temporis duo instantia naturæ, ex quibus componatur motus, in quorum vno relinquat terminum *à quo*, & in altero acquirat terminum *ad quem*, vtrumque tamen sit clausum intra idem instans durationis.

Igitur S. Thom. ad hoc punctum reducit suam probationem, vt ostendat impossibile esse, quod aliquid quiescat sub aliquo termino *à quo*, seu sub aliqua forma in tota duratione alicuius temporis, & in vltimo instanti claudente, & terminante illud tempus aliter se habeat seu moueatur, loquendo naturaliter seu conformiter ad naturam motus, & mobilis.

Ratio autem huius est, quia instans designat factum esse, & non solum fieri rei: ergo si toto tempore antecedente non datur fieri, & moueri, sed quiescere, in vltimo autem instanti datur mutatio ad alium terminum: ergo in illo instanti dabitur factum esse sine fieri antecedente, aut erit simul in eodem instanti fieri, & factum esse ex natura rei, si ex ipsa natura non postulat quod antecederet de- tur fieri. Vbi autem in eodem instanti ex natura rei est simul fieri, & factum esse, tollitur successio ex ipsa natura actionis, & consequenter non est motus de positio in positum, sed simplex mutatio de non esse ad esse. Quare impossibile est quod motus detur in instanti, si toto tempore, & duratione antecedente quiescit mobile sub aliqua forma, seu termino, quia non potest aliqua actio ex natura sua in eodem instanti coniungere fieri, & factum esse, nisi ex non esse ad esse procedat, & successionem tollat, quia pertinet ad eandem formam, quæ in instanti fit, per seipsam tollere negationem oppositam, non autem potest sine diuersa mutatione tollere oppositam formam positivam; & idè non potest toto tempore antecedente quiescere sub vna forma opposita, & in vltimo instanti coniungere destructionem illius, & positionem alterius sibi contrariæ, aut à se distantis. Secus est si toto tempo-

re antecedente moueatur, & non quiescat, quia quandiu mouetur, est mobile sub alia, & alia dispositione: hoc enim essentialiter est moueri, sicut è contra quiescere est habere se nunc sicut prius. Vnde potest id quod mouetur manere in vltimo instanti in aliqua forma, in qua non erat prius, quia prius non quiescebat, sed mouebatur ad illam. Quod si quiescat, & non sit in motu, & fieri, seu tendentia ad oppositam formam, non potest intelligi, quod in vltimo instanti detur mutatum esse, seu terminus motus, nisi sit aliqua mutatio instantanea producens terminum, non ex aliquo contrario, neque ex aliqua distantia, seu latitudine vincenda, sed purè ex non esse, quia ad tollendum non esse formæ, sufficit ipsa positio formæ, & non requiritur alia mutatio, ad tollendam verò formam oppositam, requiritur eius mutatio, non quies sub illa. Et quidem iuxta exigentiam causarum naturalium fieri aliter non potest, quia dependent ab accidentibus, dispositionibus contrariis, vel ex aliqua distantia loci, vel latitudine vincenda, sicut si generatio substantialis fit in instanti, præsupponit antecederet alterationem sub qua aliter, & aliter se habet forma præcedens, & passum est in moueri, & transitu, non in puro quiescere etiam respectu ipsius generationis. Et similiter si luminosum illuminat, vbi ante non illuminabat, supponit præcessisse aliquem motum ipsius luminosi, vel eius generationem ad hoc vt illuminet vbi ante non illuminabat, & sic nunquam est in pura quiete mobile ante vltimum instans mutationis instantaneæ: sed vt inquit D. Thom. in hoc art. 3. mutationes istæ instantaneæ semper sunt terminus alicuius motus continui præcedentis. Deus tamen, qui est supra omnes leges causarum naturalium potest ex puro non esse, & ex pura quiete mobilis sub aliqua forma, nulla alteratione, motu, aut dispositione præcedente nouam formam introducere per mutationem purè instantaneam, sine alteratione aut dispositione antecedente.

Hanc ergo doctrinam applicando motibus Angelicis, oportet diuerso modo philosophari circa motum illum continuum, & circa discretum. Nam licet vterque motus conueniat in hoc, quod non possit fieri in vnico instanti, id tamen multò fortius apparet in motu continuo, quàm in discreto: nam in motu continuo non solum obstat pluralitas instantiū seu operationum ex parte ipsius Angeli, & ordo inter terminum *à quo* derelictum, & terminum *ad quem* acquisitum, sed etiam ordo prioris, & posterioris ex parte effectuum, quos ponit motus continuus Angeli in ipso spatio, seu corpore, per quod transit. Vt enim dicit S. Thom. in hac qu. 53. art. 2. si motus sit continuus, non potest Angelus moueri de vno extremo in alterum quin transeat per medium, quia, vt dicitur in 6. Physic. medium est in quod prius venit quod continuè mutatur, quàm in quod mutatur vltimum: ordo enim prioris, & posterioris in motu continuo est secundum ordinem prioris, & posterioris in magnitudine vt dicitur in 4. Physic. Itaque quando Angelus mouetur motu continuo, vel omnia loca quæ acquirit partialiter vsque ad vltimū vnica operatione formali tangit, quæ virtualiter, & ratione effectuum æquiualeat pluribus, vel diuersis operationibus, quæ formaliter diuersæ sunt, licet coordinatæ ad vnum finem. Si hoc secundum, manifestè sunt plura instantia, non vnicum in toto illo motu; & sic non fit motus in instanti, sed in pluribus instantibus, seu operationibus, quibus continuum illud tempus constat, continuitate coordinationis, & diuisibilitate effectuum: Si est vnica operatio, & instans

instans, licet virtualiter multiplex in acquisitione terminorum, tamen ad minus hoc instans, & operatio acquisitiva supponit aliud instans, quo primus terminus *à quo* est relictus, & cum illo motus componitur ex pluribus instantibus, ut de motu discreto dicemus.

11 Loquendo autem de motu discreto, inuenitur in Angelo quod non fiat vnico instanti, sed pluribus, quia motus ille perficitur per hoc quod Angelus deserat vnum terminum in quo existerat, seu operabatur, & sine aliquo transitu per media, & contactu ad illa inchoet aliam operationem, seu instans, quod sit in alio passo distante: ergo constat iste motus duplici instanti, vno derelinquendi, & altero acquirendi, & consequenter non fit talis motus in vnico instanti, sed pluribus, & quod talis motus componatur ex illo duplici instanti, non autem constet solum ex altero eorum, nempe ex acquisitione termini *ad quem*, constat manifestè, quia acquisitio termini in tali motu dependet necessariò ex derelictione termini *à quo*: ergo successio istorum duorum instantium, quorum vnum acquirit terminum, & aliud derelinquit, habent inter se aliquem ordinem, & connexionem, non simul coexistentem, quia vnus terminus non est simul cum alio: ergo succedentem: ergo talis ordo instantium constituit tempus, quia constituit ordinem successuum, & constat ex pluribus instantibus succedentibus tanquam ex partibus, licet inter illa duo instantia non detur medium, quo fiat transitus de vno ad aliud, sicut inuenitur in motu continuo; datur tamen pluralitas instantium sibi ordinatè succedentium, quod pertinet ad motum discretum, & idè non perficitur vnico instanti, neque operatione Angelica, sed pluribus.

Dices: in tota illa duratione, seu instanti, quo Angelus est in termino *à quo*, quiescit sub tali termino, seu forma, quia non mouetur ab illo termino, nec transit per medium ad acquirendum alium, & tamen in instanti immediato inuenitur Angelus in alio loco: ergo transit de quiete ad motum vnico instanti. Patet consequentia, quia tota illa duratione, seu instanti quo est in termino *à quo*, quiescit, & in illo instanti in quo est in termino *ad quem*, aliter se habet, quia in alio loco existit: ergo in isto instanti in quo est in termino *ad quem*, transit de quiete ad motum: ergo mouetur vnico instanti, destruiturque ratio D. Thom. quod non possit aliquid mobile toto tempore quiescere sub aliqua forma, & in vltimo instanti illius esse sub alia, siquidem in hoc motu discreto toto vno instanti, seu duratione antecedenti quiescit sub vna forma, seu in vno loco, & in alio instanti immediato inuenitur sub alia.

12 Respondetur, negando antecedens, nempe quod in motu discreto quiescat Angelus duratione tota illius instantis sub vna forma. Et cum dicitur quod in illo instanti non mouetur ab illo loco, distinguo, non mouetur completè, & terminatiuè ita quod acquirat in illo instanti terminum *ad quem*, concedo; non mouetur inchoatiuè, & definendo esse sub termino *à quo*, nego. In illo enim instanti non solum est Angelus in illo loco, sed etiam definit esse in illo, quia illud instans definit per vltimum sui esse. Quando autem aliquid subiectum est sub aliqua forma, vel termino, non solum existendo, sed etiam definendo esse in illo, utique non quiescet sub tali forma, siquidem non eodem modo se habet, quia est, & definit esse, cum definat per vltimum esse. Hoc autem non est eodem modo se habere, & consequenter non quiescere; & idè illa desitio prioris instantis per vltimum esse, licet in se

considerata non sit motus, est tamen quædam inchoatio motus, & veluti dispositio remouens terminum oppositum, & impediens transitum ad alium locum; & consequenter prout est desitio vltima illius instantis, non est quiescens mobile sub illa forma, sed inchoans, & disponens motum ex illa, quatenus est derelictio talis termini. Quod si defineret esse sub illa forma per appositionem noui termini, ita quod primum esse illius noui termini esset primum non esse termini præcedentis, tunc motus ille diceretur fieri vnico instanti, quia idem instans esset inceptio vnius, & desitio alterius, primum esse illius qui de nouo acquiritur, & desitio alterius qui præcedit. Caterum respectu formæ positivæ tenentis se ex parte termini *à quo*, quæ debet definere, necessarium est, quod toto tempore antecedente non quiescat, sed disponatur, & tendat, & ordinetur ad inceptionem illius noui termini, si iuxta modum, & dispositionem causarum naturalium producendus sit, ut *suprà* ponderauimus. At verò quia in motu discreto Angeli desitio prioris instantis est per vltimum esse illius, & inchoatio alterius instantis per primum esse sui, non autem illud secundum instans recipiens est primum non esse alterius; idè motus ille temporis discreti, qui constat ex desitione vnius instantis, & inceptio alterius, non dicitur vnico instanti fieri, sed pluribus constare, qui se habent sicut partes illius motus, non termini extrinseci. Vasquez autem qui existimat primum esse vnius instantis Angelici esse primum non esse antecedentis; idè saluat motum discretum esse in tempore, quia in quolibet loco in quo mouetur Angelus discretè, existimat debere quiescere per tempus; & sic in quouis loco, in quo Angelus definit esse per primum non esse, necessariò fuit per tempus, ac proinde per tempus quieuit, & sic ponit in tempore discreto plures mutationes, non vnum motum, ut affirmat in hac *disp.* 197. c. 4. Hoc tamen fundamentum eius non admittimus, quod non possit aliquid definere per vltimum esse, sed solum per primum non esse, ut tractat *disp.* 229. c. 10. & nos *infra* contra ipsum ostendemus *disp.* 24. art. 1.

Soluntur argumenta.

Primò arguitur contra illam propositionem D. Thom. in qua totum eius fundamentum innititur, videlicet, quod non possit aliquid toto tempore quiescere sub vna forma, & in vltimo instanti esse sub alia: nam bene potest aer toto tempore vnius horæ esse tenebrosus, & in vltimo instanti illius produci à Deo luminosum, quo tenebræ expellantur: & similiter toto tempore prolationis verborum est substantia panis in Eucharistia, & in vltimo instanti est corpus Christi. Similiter in mutationibus naturalibus illuminationem præcedit motus localis luminosi, & generationem substantialem præcedit alteratio; & tamen non datur talis illuminatio vel generatio in instanti terminante motum localem, vel alterationem, quia motus localis solum terminatur ad *vbi*, & alteratio ad qualitatem, non ad ipsam substantiam: ergo in diuerso instanti terminatur motus localis, & illuminatio, alteratio, & generatio, imò posset dari motus ille localis, quin sequeretur illuminatio, & illa alteratio, quin sequeretur generatio: ergo instans illuminationis, vel generationis separatum est ab instanti terminante motum localem, vel alterationem; & sic bene stat quod toto tempore aliquid quiescat sub vna forma, v.g. sub forma substantiali corruptenda, vel sub tenebris, licet moueatur secundum
aliam

aliam formam, scilicet accidentalem, alio genere motus scilicet locali, vel alterationis in toto tempore antecedente. Quæ est obiectio Arrubalis *hic disp. 162. cap. 2.*

Respondetur ad duas priores instantias, quod illæ mutationes non sunt modo connaturali, & iuxta dispositionem causarum naturalium, sed secundum modum operationis diuinæ, quæ non subditur legibus naturæ; & sic potest subito operari aliquid, non præcedente aliquo motu, seu mutatione, aut dispositione subiecti ad oppositam formam, sed totaliter quiescente subiecto sub forma opposita, ita quod non moueatur, aut disponatur subiectum ad formam contrariam. D. Thom. autem loquitur secundum leges causarum naturalium operantium ex dependentia mutationis, & dispositionis materiæ, sub quibus legibus etiam continentur Angeli, quia non possunt operari nisi per immutationem materiæ, & dispositionem eius. Ad instantiam autem P. Arrub. Respon. quod in eodem instanti intrinseco, quo ponitur luminosum in aliquo loco, est illuminatio, & in eodem instanti intrinseco, quo ponitur vltima dispositio, ponitur generatio substantialis illi annexa. Itaque non debet intelligi quod in vno instanti ponitur, vel producit luminosum, & in alio emittit lucem: sic enim inter instans, & instans esset tempus medium, in quo non luceret luminosum præsens, quia non emitteret lucem: sed dicendum est quod in eodem instanti intrinseco, quo existit luminosum, seu ponitur præsens, emittitur lux. Nec oportet esse duo instantia pro illis diuersis mutationibus, quia bene potest duplex effectus, seu mutatio in eodem instanti fieri. Similiter generatio licet fiat in instanti, & toto tempore antecedenti materia sit sub forma corruptenda, non tamen dicitur quiescere sub illa forma, quia disponitur ad contrariam, & hoc est moueri ad illam, & non habere formam præcedentem substantialem in esse quieto, sed in motu, & in corrupti. In eodem autem instanti, in quo terminatur alteratio ad vltimam dispositionem ponitur generatio substantialis; nec expectat aliud instans (ad quod requireretur tempus medium post vltimam dispositionem) in quo nec amplius disponeretur, neque substantia generaretur.

14 Secundo obijciens ex P. Suarez *lib. 4. de Angelis, cap. 21.* Angelus simul, & in instanti acquirit totum locum ex parte termini *ad quem*: ergo motus eius in instanti est. Consequ. patet. Quia motus nihil aliud facit quam acquisitionem loci: ergo si illa acquisitio est instantanea, totus ille motus instantaneus est. Antecedens autem probatur: Quia in toto instanti antecedenti non mouetur, neque disponitur ad motum, sed manet sub illo loco sine aliqua voluntate transeundi ad alium locum determinatum, magis quam ad alium: sed hanc voluntatem incipit habere in eo instanti quo efficaciter vult esse in alio loco, & tunc iam non est in præcedenti: ergo solum in hoc secundo instanti mouetur, & acquirit vnum locum, & perdit alium: ante istud autem instans solum quiescet in loco præcedenti. Nec potest dici quod mouetur Angelus non in secundo instanti, neque in primo, sed in successione, & coniunctione vtriusque. Nam contra est, quod in priori illo instanti in quo adhuc est in termino *à quo*, nulla pars motus, vel mutationis datur, sed totum pertinet ad quietem: tunc autem primo amittitur ille locus, quando primo ponitur Angelus in termino *ad quem*: ergo totus ille motus fit in instanti, non in successione duorum instantium.

Et confirmatur tam respectu motus discreti, quam continui, quia quod amittitur, vel acquiritur totum simul, & non per partes, in instanti amittitur, vel acquiritur: sed Angelus tam in motu continuo, quam discreto, simul, & non per partes acquirit totum locum, & deserit alium: ergo in instanti, & non in tempore illum acquirit. Minor quantum ad motum discretum patet, quia per motum discretum non tangit Angelus partes intermedias, sed illis omnibus relictis solum acquirit locum extremum: ergo non acquirit per partes, sed totum simul. De motu autem continuo probatur, quia Angelus quando mouetur non est partim in termino *à quo*, & partim in termino *ad quem*, cum Angelus non sit partibilis: ergo totus est in termino *ad quem*, vel totus in termino *à quo*: ergo motus ille fit in instanti, quia totum locum simul acquirit.

Respondetur: Quod in motu discreto dicitur Angelus moueri non in altero duorum instantium, sed in successione, seu coniunctione duorum, ut dicit S. Thom. in 1. dist. 37. quest. 4. artic. 1. ad 3. non quia partialiter in singulis distantibus aliquid motus habeat, sed quia ille motus dependet à duplici instanti, in quorum vno desinit esse in vno loco, & in altero incipit esse in alio, & omnis motus dependet ex derelictione vnius termini, & acquisitione alterius. Quod si hæc desinitio vnius fieret per primum non esse sui, atque adeo per primum esse alterius, sine dubio totum illud pertineret ad vnum instans, scilicet desinitio, & acquisitio. Sed tunc non posset iuxta leges, & modum causarum naturalium subito, & distantem acquirere vnum terminum, & tollere alterum positum sine aliqua dispositione, & motu præuio, ratione cuius mobile non poterit esse sub quiete oppositæ formæ positivæ. Nunc autem cum in priori instanti quo Angelus est, seu operatur in vno loco, desinat esse in illo per vltimum non esse, quia operationes illæ indivisibiles sunt, & privilegio instantium gaudent, quæ desinunt per vltimum sui esse, & noua operatio incipit in alio instanti Angelico; idem desinitio vnius loci, & acquisitio alterius motu discreto facta non mensuratur vnico instanti, sed ex illo duplici componitur: & ut *supra* aduertimus, etiam in primo instanti quo existit Angelus in termino *à quo*, verificatur quod non totaliter Angelus quiescit, quia licet nondum habeat tunc voluntatem efficacem existendi in alio loco determinato, habet tamen voluntatem desinendi esse in isto instanti quantum ad hoc quod est esse in tali loco, & quatenus illa operatio habet in illo instanti vltimum sui esse, & est derelictiva illius loci, iam est inchoatio, & dispositio ad essendum in alio, quatenus est remotiva istius habendo in illo vltimum esse; & sic pro hac parte habet sufficientem rationem inchoationis motus, saltem virtualiter, & dispositivè, quatenus vltima desinitio termini *à quo*.

Ad confirm. Respond. quod quando aliquid acquiritur totum simul, & non per partes, taliter quod ipsum acquirere est alterius corrupti, & primum esse rei generatæ, tunc vnico instanti mensuratur desinitio vnius, & generatio alterius; & sic non fit per motum, sed per simplicem mutationem. Si autem tota desinitio vnius, & tota acquisitio alterius pertinent ad diuersa instantia, tunc non fit motus vnico instanti, sed duplici, atque adeo in tempore, saltem discreto, quia ubi sunt plura instantia, ibi est tempus: aut saltem non est vnicum instans tantum. Non ergo requiritur ad motum quod partialiter sit in duobus instantibus, sed sufficit quod in duobus instantibus sit desinitio

desitio vnus, & acquisitio alterius, & sic saluatur quod motus discretus habeat tempus quo mensuratur, scilicet compositum ex illis duobus instantibus, in quorum vno datur desitio, & in altero acquisitio termini, licet non sit aliquod tempus intermedium, quo partialiter moueatur Angelus, sed partes istius motus sunt totalis, & indiuisibilis derelictio, & totalis acquisitio termini, duobus instantibus facta, & ex vno instanti, seu operatione dicitur disponi, seu moueri ad aliam, quatenus prior operatio in priori instanti facta, habet in eodem instanti vltimum esse sui, & consequenter disponitur ad alterius operationis positionem, & termini alterius acquisitionem. Ad id verò quod dicitur de motu continuo, respondet S. Th. *in hac q. 53. art. 3. ad 3.* quod Angelus est partim in vno locorum continuorum, non quod substantia illius sit partibilis, sed quia virtus sua applicatur ad partem primi loci, & ad partem secundi. Itaque Angelus totus est in termino *ad quem*, & totus derelinquit terminum *a quo*, sed non totaliter, quia effectus eius in spatio, & operatio illius, seu applicatio ad illud corpus fit per partes, non suas ipsius Angeli, sed magnitudinis, seu spatij cui applicatur, quatenus applicat parti vnus loci virtutem suam, & parti sequenti applicatur continuò post illam: sicut etiam anima quæ spiritualis est, applicatur partibus corporis, & incipit esse in aliquibus ad quas de nouo augmentatur homo, & desinit esse in aliis, quatenus applicat suam informationem, non partim existendo in vna, & partim in altera, quia in se partes non habet, sed quia tota existit in qualibet parte, sed non totaliter, & secundum omnem modum, & virtutem, & effectum.

¹⁵ Tertiò obicitur contra eandem rationem D. Tho. quod non est necesse quod quiescens in toto aliquo tempore quiescat etiam in vltimo instanti illius, & non moueatur. Nam quies solum petit quod quiescens eodem modo se habeat nunc, ac prius: ergo sufficit quod in quolibet nunc pertinente ad illud tempus perseveret mobile, sicut prius, non tamen necesse est quod etiam in instanti terminatio illius temporis, v.g. vnus horæ, se habeat sicut prius, quia illud instans terminatum est extrinsecum illi tempori, cum desinat tempus, sicut & motus per primum non esse. Et hoc ipsum patet, si ponatur casus opposito modo nempe quod aliquid moueatur toto tempore, non est necesse quod moueatur in instanti terminatio illius temporis: nam in illo instanti potius desinit motus: ergo è conuerso si quiescit toto tempore, non est necesse quod in instanti terminatio illius quiescat, quia iam hoc instans pertinet ad aliud tempus. Vnde si aliquod mobile moueretur in vna hora, & quiesceret in alia: tunc in primo instanti secundæ horæ quiesceret, & tamen non se haberet eodem modo sicut prius, quia tunc quiescit, & antea mouebatur: ergo non est necesse quod quiescens eodem modo se habeat tunc ac prius.

Confirm. quia Angelus intelligens aliquod obiectum de nouo, aut volens illud, non est necesse quod toto tempore antecedente moueatur ad intelligendum tale obiectum, sed sufficit quod in vltimo instanti terminatio illius temporis cognoscat subito illud: ergo bene potest in vltimo instanti inueniri sub vna forma, nempe sub vna intellectione, & toto tempore antecedente quiescere ab illa sub alia intellectione.

Confirm. secundò: nam motus discretus Angeli si est in tempore, vel incipit in tempore, vel in instanti: non in tempore, quia ibi non interue-

Ioan. à. S. Thom. in 1. part. D. Th. Thomas alter.

nit aliud quàm vtriusque instantis coniunctio: non incipit autem motus in vtroque instanti: non in instanti, quia sic quiesceret Angelus tota duratione, seu tempore antecedenti, & in vltimo instanti inciperet moueri, quod est contra ipsam rationem D. Tho. Et dato quod non precedat ante tale instans aliquod tempus Angelicum in quo quiescat, præcedit tamen aliqua duratio, seu operatio Angeli, quæ correspondeat alicui tempori nostro: ergo iam respectu illius verificabitur, quod quiescit toto tempore nostro, & in vltimo instanti illius incipit moueri, quod est contra intentum D. Thomæ. Et cum semper instans Angelicum correspondeat alicui durationi nostræ, vel instanti, vel parti temporis, vix potest signari ista correspondentia instantibus Angelicis, quin sequatur, vel quod duo instantia nostra sint immedita, vel quod respectu nostri temporis sit Angelus quiescens toto tempore sub vna forma, & in vltimo instanti terminatio eius sit sub alia.

Resp. verum esse quod ad quietem sufficit quod res se habeat nunc sicut prius. Necesse est autem quod si aliquo tempore quiescit mobile etiam in vltimo instanti terminatio illius temporis quiescat, & non aliter se habeat quàm prius, non tam propter ipsam rationem quietis, quasi necessariò extendi debeat ad illud instans terminatum, quàm ex eo quod deficit ibi ratio motus hoc ipso quod quiescit toto tempore antecedente, & deficiente motu, non potest in vltimo instanti terminatio dari mutatum esse, seu aliter se habere, quia iuxta causas naturales ad omne mutatum esse præcedit motus, & non quies (licet de potentia absoluta, & *suprà* leges naturæ hoc non requiratur.) Nec potest in illo instanti terminatio incipere motus, & existere, quia motus in instanti non incipit intrinsecè, sed extrinsecè. Vnde quantumcumque post illam quietem per totum tempus antecedens inciperet motus in vltimo instanti terminatio, adhuc in illo instanti non existeret motus, quia solum incipit extrinsecè in instanti: ergo adhuc pro illo instanti se habet, sicut antea, nec dabitur motus: ergo necesse est, quod in illo instanti adhuc quiescat, etiam si ab illo instanti incipiat moueri extrinsecè, id est, immediate post.

¹⁶ Ad id autem quod vrgetur in casu opposito, nempe si toto tempore antecedente moueretur, quod in instanti terminatio non mouetur. Resp. quod illo instanti non mouetur formaliter, & quantum ad partes motus, sed terminatiue, & quantum ad mutatum esse quod est in instanti vltimo: motus enim terminatur intrinsecè per instans, & in illo instanti aliter se habet, quàm prius terminatiue, licet non motiue, quia in illo instanti datur terminus motus, qui immediate antea non dabatur: ergo in ratione terminandi motum aliter se habet in isto termino, quàm prius. Caterum quies non habet terminum ad quem tendat, quia quies non est tendentia, sed consistentia. Vnde in instanti terminatio totius temporis in quo quieuit, non potest aliter se habere quàm prius, sed eodem modo, quia vt supponitur immediate ante quieuit, & nullus fuit motus. Vnde neque in instanti terminatio potest dari mutatum esse, quia ad omne mutatum esse præcedit motus secundum leges naturæ, & sic non potest aliter se habere tunc quàm prius per modum mutati esse; nec etiam per modum motus, quia ille non incipit in instanti intrinsecè, sed immediate post: ergo in illo instanti nullus est motus, sed immediate post erit: ergo est adhuc quies in illo instanti. Et sic ratio S. Thomæ est euidentis demonstratio, loquendo secundum leges naturæ, vt S. Doctor loquitur.

N n Ad

17 Ad alium verò casum, si moueretur mobile vna hora, & quiesceret in alia, cum dicitur quod in primo instanti illius horæ quiesceret, Respon. quod non datur primum instans horæ in quo intrinsecè incipiat tempus, seu motus horæ, sed extrinsecum, quia motus, & tempus incipiunt per vltimum non esse, scilicet immediate post aliquod instans. Vnde illo primo instanti neque datur motus, aut tempus intrinsecè, neque quies priuatiua, quia hæc tunc incipit, quando poterat esse motus, cuius est priuatio. In instanti autem non potest esse motus, & sic quies quæ in illo datur non est priuatiua, sed negatiua, & in tali instanti non eodem modo se habet sicut prius, sed potius ibi terminatur motus horæ præcedentis, & terminatiue aliter se habet, quàm prius in quantum habet mutatum esse, quod non habebat prius.

Ad confir. Respon. quod intellectio non mensuratur tempore per se, & ex natura sua, quia indiuisibilis actio est, sed per accidens, vt in nobis propter dependentiam à phantasmatibus, à quibus accipimus species. Et in tali intellectioe philosophandum est sicut de aliis motibus tempore mensuratis, quod non est possibile quod intellectus tempore præcedenti quiescat, non accipiendo species, & in vltimo instanti terminatiuo illius temporis sine alio motu phantasmatum illas habeat. In intellectu autem Angelico non dependente ab aliquo sensu in intelligendo, sed simplici, & indiuisibili operatione procedente non potest dici quod toto tempore præcedente quiescat sub vna intellectioe, & in vltimo instanti terminatiuo sit sub alia, quia non datur tempus præcedens, sed instans præcedens istam intellectioem, cum ex vna operatione indiuisibili intelligendi transeat ad aliam, quod est transire de instanti ad instans: & tunc dicendum est, sicut *suprà* diximus de motu discreto, quod constat ex duobus instantibus, non tanquam ex terminis extrinsecis, sed tanquam ex partibus componentibus, & illud primum instans, quia non solum est ad quiescendum, sed etiam ad desinendum, quia desinit illa operatio per vltimum sui esse; ideo illa prima intellectio sub qua dicitur quiescere Angelus, non habet purè, & præcisè quietem, sed etiam virtualiter habet rationem motus seu inchoationis & dispositionis ad intellectioem sequentem, quatenus dat vltimum esse illi priori intellectioi; & sic disponit vt transeat ad aliam relinquendo priorem, sicut de motu discreto dictum est.

18 Ad secundam confir. Resp. quod motus discretus non incipit in primo instanti secundum se sumpto, neque in secundo secundum se, sed in coniunctione vtriusque; & ille ordo prioris instantis ad coniungendum se cum secundo, seu ad transeundum in secundum, dicitur inceptio motus discreti: ordinatur autem primum instans ad secundum, quatenus in illo primo instanti datur vltimum esse illius operationis instantaneæ, & ex desitione illius incipit ordinari Angelus ad incipiendum aliam operationem, & incipit componi motus discretus, quatenus ponitur pars quædam illius, quæ est illud primum instans cum desitione, & vltimo esse sui, vt ordinetur ad inchoandam operationem sequentem, quæ est aliud instans, & altera pars motus illius discreti. Vnde quando dicitur quod si in illo instanti primo incipit motus discretus, toto tempore, seu duratione antecedente quiesceret Angelus, & in vltimo illius instantis inciperet moueri, quod est contra rationem D. Th. Respond. quod Angelus toto illo instanti est sub illa forma, seu in illa operatione, & loco, & in vltimo illius instantis non inuenitur sub alia forma, sed inuenitur in vltimo esse talis instan-

tis, seu operationis, quia cum sit operatio instantanea desinit per vltimum sui esse, & in alio instanti sequenti incipit esse sub alio loco, & in illo ponitur, vnde non currit ibi ratio D. Th. quod non potest aliquid toto tempore antecedenti quiescere, & in vltimo terminatiuo illius esse sub alia forma: hoc enim non currit in prædicto casu, quia non datur tempus antecedens respectu illius secundi instantis, nec respectu prioris, in quo Angelus dicatur quiescere, & in terminatiuo illius mouere: sed in toto instanti priore existit sub vna operatione, & habet vltimum esse in illa, & sic ratione illius vltimi esse, quatenus vltimum est, disponitur, seu ordinatur vt in altero instanti sit in alio loco; & sic non quiescit tota illa duratione pro ea parte qua in illa habet vltimum esse: nec tamen potest dici quod solum in vltimo instanti terminatiuo illius prioris durationis instantaneæ aliter se habeat, quia in tali duratione, & operatione instantanea non est dare vltimum instans terminatiuum, & partes temporis antecedentes, sed totum illud est vnicum instans, in quo illa operatio habet esse, & vltimum esse, & consequenter toto illo instanti quiescit, & desinit quiescere, quia habet vltimum esse quiescendi; & sic non interruptitur quies, nec ponitur motus in aliquo terminatiuo huius prioris instantis, sed desinit illa quies per vltimum esse illius in eodemmet instanti, & quatenus est vltimum esse quietis, & desitio illius, virtualiter mouetur, id est, disponitur, seu ordinatur ad sequentem operationem, seu ad instans immediatum, quod coniungitur priori, non aliqua simultate coexistentiæ, sed consequutione operationis, quatenus ex desitione vnius incipit duratio operationis alterius, & ex tali desitione vnius, vt coordinatæ ex voluntate Angeli ad inchoationem alterius, dicitur componi ille motus discretus, & ordinari illud instans per voluntatem Angeli ad alterum, quia vt vnum alteri succedat, optima dispositio est desitio prioris, & esse in vltimo.

Et ad id quod additur quod istud instans antecedens coexistit durationi nostræ; & sic correspondet instanti temporis, in quo desinit, & tempori antecedenti in quo durat, & quiescit, sicque correspondet toto tempori quiescendo, & instanti terminatiuo non quiescendo. Respond. quod illud instans Angeli correspondet nostro tempori modo indiuisibili ex parte sui, & ita correspondet tam tempori, quàm instanti terminatiuo, existendo indiuisibiliter sub eadem forma, seu operatione, sed taliter quod in illo instanti terminatiuo non mouetur actu, & formaliter, nec aliter se habet, sed habet vltimum esse illius instantis, seu operationis, & quatenus est vltimum esse talis instantis, dicitur virtualiter disponi, & incipere moueri ad sequentem operationem, quatenus desitio vnius est remotio impedimenti ad habendam alteram operationem.

Et ad vltimam instantiam, in qua dicitur semper sequi ex correspondentia ad nostrum tempus quod duo instantia nostra erunt immediata, vel quiescet toto tempore Angelus in vna operatione, & in vltimo instanti erit in alia: respondetur, neutrum sequi, quia si primum instans Angeli correspondet nostro tempori, & instanti terminatiuo illius inclusiuè, ita quod illi instanti correspondeat vltimum esse operationis Angelicæ, non incipiet moueri Angelus immediate post operationem suam coexistendo instanti nostro, quia non datur immediate post, sed incipiet operationem, in se quidem indiuisibilem, & instantaneam ex parte Angeli, non tamen correspondentem instanti nostro in sui inceptione, sed tempori, quia illud datur, & non instans immediate post desitionem prioris instantis.

Si

Si autem velit Angelus secundam operationem suam inchoare à correspondentia instantis nostri, debet terminare ultimum esse præcedentis, non in instanti, sed in tempore, seu in correspondentia ad tempus: nam in se, & ex parte sui illud instans Angelicum semper indiuisibile est. Sed si velit illud terminari in instanti nostro, & sequentem operationem incipere, etiam in correspondentia ad nostrum instans, debet inter illa duo instantia se suspendere ab omni operatione ad extra; unde nunquam duo instantia nostra erunt immediata.

21 Denique ex dictis colligitur velocitatem motus Angeli, etiam quando mouetur motu continuo, licet excedat improporcionabiliter velocitatem cuiuscunque corporis, non tamen idèd posse fieri in instanti, quia etiam si corpus nullam inueniat resistantiam vincendam, nunquam tamen velocitate sua poterit peruenire ad hoc vt fiat in instanti, quia esse in instanti est extra latitudinem & essentiam motus; & sic quantumcumque velocitas crescat, cum sit velocitas in genere motus, non potest

peruenire ad hoc vt motus fiat in instanti, quia hoc esset destruere essentiam motus, & transire ad aliam lineam, & genus alterius actionis. Et licet virtus mouendi sit finita, tamen proportio ipsius ad diuisibilitatem spatij, ratione cuius illa distantia per motum vincitur, est diuisibilis in infinitum syncategorematicè: unde potest in infinitum secundum diuisibilitatem proportio illa ad diuisibilitatem spatij magis ac magis vinci. Quando autem mouetur motu discreto Angelus, non vincit diuisibilitatem spatij per motum, sed subito ponitur in alio loco, non transeundo per medium, sed tamen tunc habet aliud genus motus, nempe discretum, quod non constat ex velocitate partium motus, sed ex desitione vnus instantis: & inceptione alterius, vt dictum est; & idèd neque in corpore glorioso, quod mouetur motu continuo, admittit D. Thom. motum in instanti, sed in breuissimo tempore, quod magis ac magis in infinitum abbreviari potest, & diuidi, vt docet in *additionibus* quæst. 84. art. 3.

QVÆSTIO LIV.

De comparatione Angelorum,

S V M M A L I T T E R Æ.



In ista quæstione incipit agere D. Thom. de potentiis Angelorum, quæ sunt intellectus, & voluntas, pertinentque ad proprietates talis naturæ & substantiæ. Et primò occurrit potentia intellectiua quæ præcedit volitiuam: de qua tria agit. Primò, de eius quidditate in ista quæstione. Secundò, de medio per quod fit intellectio, quæstione sequenti. Terriò, de obiectis ad quæ extenditur, & modo cognoscendi illa, tribus quæstionibus sequentibus.

In hac igitur quæstione ostendit art. 1. quòd intelligere Angeli distinguitur ab eius substantia, quia se habet per modum actus secundi, & substantia per modum actus primi: nulla autem substantia creata est ipsemet actus secundus, nec quantum ad esse, neque quantum ad operari, quia careret potentialitate, & esset actus purus.

In art. 2. ostendit quòd intelligere Angeli distinguitur ab eius existentia, seu esse, quia omnis operatio si est actio transiens, non est esse rei, quia exit extra illam. Si est actio immanens actuat quidem suum operantem, non tamen est esse illius, quia est indifferens ad multa intelligenda, vel volenda, & diuersificatur secundum obiecta, esse autem rei est, vnus speciei determinatæ.

In art. 3. ostendit quòd non solum ipsum intelligere Angeli, sed etiam eius potentia intellectiua distinguitur ab eius essentia, seu substantia, eo quod substantia & potentia operatiua ordinantur ad diuersos actus, scilicet substantia ad esse & potentia operatiua ad operari, & operari, quod est intelligere, differt ab esse: ergo substantia Angeli, quæ est in potentia ad esse, non est idem quòd potentia operatiua.

In art. 4. ostendit in Angelis non distingui duplicem intellectum possibilem & agentem: isti enim duo intellectus distinguuntur quatenus intellectus possibilis est in potentia ad ipsas species intelligibiles: intellectus autem agens reducit illum in actum, imprimendo illi tales species ex obiectis, seu phantasmatibus abstractas. Angelus autem est intellectus perfectus respectu eorum quæ naturaliter cognoscit; & sic non est in potentia ad huiusmodi species, sed habet eas naturaliter cognitæ. Vnde non indiget intellectu agente imprimente illas, & abstrahente à phantasmatibus.

In art. 5. ostendit quòd in Angelis solum est cognitio intellectiua, quia sensitiua est corporea, sicut patet in visu, & auditu. Angeli autem sunt purè immateriales, nec habent corpora sibi vnita; & sic carent organis corporeis, & consequenter potentiis sensitiuis.

QVÆSTIO LV.

De medio cognitionis Angelicæ.

S V M M A L I T T E R A E.



R A C T A T in hac quæst. D. Thom. de speciebus, quibus intellectus Angeli tanquam per medium suæ cognitionis intelligit. Et in 1. art. ostendit quod ipsa substantia Angeli non sufficit ad repræsentandū sibi omnia tanquam species, quia substantia Angeli est finita, & determinata ad certum genus & speciem: ergo non comprehendit perfectè omnia alia extra se: ergo ut intellectus ea intelligat, requirit repræsentationes, seu species, superadditas.

In art. 2. ostendit quod species istæ non accipiuntur à rebus in Angelis, sicut nos eas accipimus à rebus, sed habent illas per influxum & impressionem Dei, quia Angeli in genere intellectualium sunt perfectè intellectui, sicut in genere corporum cæli sunt corpora perfecta respectu inferiorum. Conuenit autem corporibus inferioribus, non totaliter, & adæquatè perfici per aliquam formam, sed modò acquirere vnā, modò aliam: corpora autem cælestia statim à principio habent suam perfectionem: ergo similiter Angeli in genere intellectu habent suam perfectionem, seu formas intelligibiles statim à principio, non autem eas paulatim acquirunt ab obiectis.

In art. 3. ostendit quod species intelligibiles in Angelis superioribus superiores & vniuersaliores sunt, quia quantò intellectus est altior, tantò paucioribus mediis vtitur ad cognitionem rerum, ut etiam apud nos apparet, quod qui sunt fortiores intellectu ex paucis multa capere possunt. Et Deus quia habet infinitam plenitudinem intelligendi, in vno omnia intelligit, id est in essentia sua: ergo Angeli quantò superiores tantò paucioribus speciebus indigent; & sic illæ species ad plura se extendunt, quod est esse vniuersaliores.



DISPUTATIO XXI.

De intellectu, & speciebus Angelorum

ARTICVLVS I.

Quid de potentia intellectiua, & intelligere Angeli D. Thom. probauerit?



V A T V O R præcipua tradidit D. Tho. in quæst. 54. de intellectu, & intelligere Angeli.

Primum est, quod intelligere Angeli non est eius substantia.

Secundum quod non est eius esse.

Tertium quod potentia intellectiua non est eius substantia, sed accidens ei superadditum.

Quartum quod in Angelo non est duplex intellectus, agens, & possibilis, sicut in nobis; agens, qui producat species ex obiectis sensibilibus; possibilis, qui recipiat. De hoc ultimo plenius agemus infra ostendendo, quod Angeli non accipiunt species à rebus, sed à Deo illis imprimuntur. Vnde carent intellectu agente, cuius proprium, & primum munus est species abstrahere, & formare ex obiectis sensibilibus reddendo illas spirituales, & abstractas, & deinde circa earum usum intellectum illustrare.

De tribus prioribus dictis agendum est in præfati art. elucidando rationes D. Tho. quæ valde profundæ, & difficiles sunt.

Rectè probat D. Thom. intelligere Angeli non esse eius substantiam!

Tribus rationibus probauit D. Thom. in art. 1. quæst. 54. quod intelligere Angeli, vel cuiuscunque creaturæ non sit eius substantia seu essentia.

Prima est; Actio est actualitas virtutis, sicut esse est actualitas essentiae, sed impossibile est quod id quod non est actus purus sit sua actualitas: ergo solum actus purus, qui est Deus, est in sua substantia suum esse, & suum agere. Minor prob. Quia actualitas potentialitati repugnat: ergo impossibile est quod id quod non est purus actus, sed habet potentialitatem admixtam, sit sua actualitas: ergo repugnat quod per suammet substantiam sit suum esse, & suum agere.

In hac ratione, illa maior propositio, nempe quod actio est actualitas virtutis, sicut esse est actualitas substantiae, difficultatem non habet, quia vtrumque se habet tanquam actus vltimus, seu actus secundus in suo genere: sicut enim quæcumque substantia vel essentia tunc ponitur vltimatè in actu quando sit extra causas, ita virtus operans tunc est vltimatè in actu, quando operatur actu, ita quod fieri in vno, & facere in altero est vltimū quod intenditur: neque enim amplius intenditur circa aliquam formam, seu naturam, nisi ut ponatur in actu extra causas, & si aliquid deest, est quia illud manet in potentia, & nondum est in actu. Et similiter circa vim operatiuam nihil amplius intenditur,

intenditur, quàm quod exeat in actum, & dicatur operans, & si aliquid deest in ratione producendi, est quia respectu illius non producit in actu, sed remanet in potentia, seu defectu ad producendum.

Circa minorem verò est difficultas quomodo intelligenda sit illa propositio, id quod non est purus actus, non est sua actualitas, quia cum habeat aliquid de potentialitate admixtum, repugnat illi potentialitati quòd sit sua actualitas: est enim difficultas quomodo intelligatur quòd id quod habet aliquid de potentia admixtum, non sit sua actualitas: licet enim non sit actualitas illa ad quam est in potètia, quia si recipit illam, distinguitur ab illa, tamen potest esse sua actualitas, qua constituitur; siquidem hoc ipso quòd habet admixtum aliquid de potentia, non est pura potentia, sed aliquid habet de actualitate: ergo bene potest esse illa actualitas, licet sit in potentia ad alias actualitates. Quid enim repugnat quòd sit vnum in actu, & ad aliud in potètia? Non ergo bene assumit D. Tho. quòd id quod non est purus actus, sed habet aliquid admixtum de potentia, impossibile est quòd sit sua actualitas: ex eo enim quod non sit purus actus, solum infertur quòd non est omnis actualitas, siquidem ad aliquam se habet in potentia, non tamen infertur quòd non sit aliqua actualitas, quia non est pura potètia. Quòd si est aliqua actualitas, vnde infertur quòd non sit sua operatio, & suum intelligere, vel saltem aliquod agere vel intelligere, licet maneret in potentia ad alias actualitates, v.g. ad existentiam, vel subsistentiam, vel ad alias intellectiones. Et hoc solum videtur probare ratio subiuncta à D. Thom. quia videlicet actualitas potentialitati repugnat: non enim potentialitas repugnat omni actualitati, sed solum illi quam recipit, & ad quam est in potentia, non illi quam de se habet, sicut intellectus noster est in potentialitate ad species, est tamen actualitas virtutis intellectiva, seu potentia intelligendi: ergo propositio D. Thom. non potest vniuersaliter probare de omni actualitate, videlicet quòd habes potentialitatem nulla actualitas sit, & sic non sit sua actualitas, licet verum sit quòd non sit omnis actualitas, quia ad aliquam est in potentia. Quòd si non probat ista propositio quòd vniuersaliter sit sua actualitas, sed potest aliqua actualitas esse, enervatur probatio D. Thom. qua probat substantiam Angeli non esse suum agere, quia restat probandum, quòd non sit illa actualitas, quæ est agere, licet non sit alia ad quam est in potentia.

2. Secundò obstat isti rationi, quia dato quòd substantia Angeli non sit suum agere, sed in potentia ad illud, vnde probatur quòd talis actio non sit aliqua substantia, saltem incompleta, ad quam est in potentia: potest enim dari potentialitas, etiam ad aliquid quod substantiale sit, siue ad substantiam, quæ sit forma, siue ad aliquid quod sit modus vel realitas substantialis, sicut existentia, & subsistentia ad quam est in potètia ipsa natura, & materia prima est in potentia ad formam. Et in opinione ponentium plures formas esse in eodem composito, vna potest esse in potentia ad aliam. Restat ergo probandum in ratione D. Tho. quòd licet vis operatiua Angeli sit in potentia ad actionem, non tamen sit in potentia ad aliquid substantiale, sed ad aliquid accidentale: sicut enim forma, quæ est actus primus, potest esse substantialis, cur non etià forma quæ est actus secundus? Denique obstant hinc dubitationes Caiet. q. 54. in principio art. 1. ad quas reducuntur aliæ quas alij obiciunt, nempe quòd non potest dici quòd actus purus sit sua

Ioan. à S. Thom. in 1. part. D. Th. Tomus alter.

actualitas, quia in hoc significatur quòd aliquid in actu puro est actuans, & aliquid actuatum, siquidem ly *sua actualitas* importat rationem actus formalis, qui importat respectum ad aliquid actuatum per ipsum, & sic iam non erit purus actus, cum habeat aliquid actuabile. Ex quo etiam sequitur non bene affirmari à D. Tho. quòd actio est actualitas virtutis, & esse actualitatis substantiæ, vel essentiæ sic loquendo in communi, quia sic supponitur quòd actio est actuans, & virtus actuata, & similiter esse est actuans essentiam, & essentia est actuata. Vnde in actu puro, qui est Deus, etiam hoc deberet verificari, cum tamen falsum sit quòd ibi sit aliquid actuans, & aliquid actuatum. Ex quo sequitur quòd non potest rectè dici quòd illa quæ se habet vt proprius actus, & propria potentia, solum identificantur in actu puro: ibi enim nullo modo identificantur, quia ibi nulla est potentia, sed solum actus: ergo si saluatur potentia, & actualitas identificata, hoc debet esse in his quæ sunt capacia potètiæ, & non sunt sola actualitas.

Nihilominus dicendum est, rationem D. Tho. esse valde efficacem, & vniuersaliter procedere de omni agere, & de omni virtute actiua, sicut de omni esse, & de omni substantia. Nec est explicandus D. Thom. & eius ratio de sola natura intellectuali, & operatione intellectiua, sed vniuersalizauit suam propositionem de omni agere, & de omni virtute actiua, & intelligentia, & vis rationis D. Th. videtur solum consistere in vnico verbo, nempe quòd id quod non est actus purus, sed habet potentialitatem admixtam, non potest esse sua actualitas vltima: addendo enim ly *vltima*, propositio est firma, & nullo modo potest instari, vt statim ostendemus. Debet tamen hoc necessario subintelligi ex propositione maiori: dicit enim D. Thom. quòd actio est actualitas virtutis, sicut esse est actualitas essentiæ: constat autem quòd actio est actualitas virtutis vltima, & terminatiua, non prima, & specificatiua, sicut esse est actus vltimus, seu terminans, non primus, seu constituens substantiam. Cui ergo sub ista propositione subsumit D. Thom. minorè, scilicet quòd id quod non est actus purus, non est sua actualitas, debet in eodem sensu procedere atque in maiori, scilicet quòd non potest esse sua actualitas vltima, de qua locutus fuerat in maiori.

Quod autem sic intellecta propositio sit constans, & firma, & eius probatio efficax, nempe quia actualitas repugnat potentialitati, id est, actualitas vltima, declaratur sic: Quia quicquid est admixtum potètiæ nec est potentia pura, nec actualitas pura, sed actualitas cum imperfectione, & consequenter cum ordine, & capacitate ad vltiorem actualitatem, sed vltima actualitas, non est vltius in potentia ad aliam actualitatem, quia aliàs non esset vltima: ergo si illa actualitas mixta potètiæ esset sua actualitas vltima, non esset in potentia ad vltiorem actualitatem, & sic non esset ex se actus admixtus potètiæ, sed actus sine potentia ad vltiorem actum: ergo esset actus purus.

Dices: vt aliquid sit actus purus, non sufficit quòd sit actus sine potentialitate ad vltiorem actum, sed requiritur etiam quòd non sit actus receptus in anteriore potentia, sicut ipse actus vltimus vt esse, & operatio, etsi non possint existere in potentia ad vltiorem actum, non tamen sunt actus puri in nobis, quia recipiuntur in aliqua potentialitate, & subiecto, ex quo contrahunt limitationem, & impuritatem. Ergo insufficiens probat D. Th. quòd aliquid erit actus purus, si sit sua actualitas vltima, quia potest stare quòd ista vltima

N n 3

actua

actualitas, & prima cum qua identificatur recipiantur in aliqua potentia, verbi gratia, in materia.

Sed contra est: quia nihil aliud est quod aliquid sit sua actualitas, quam quod illa actualitas sit eius substantia, & sic si aliquid est sua actualitas ultima, illa non potest recipi in aliqua potentia; quia actualitas ultima operandi, si recipitur, non potest recipi nisi in potentia operativa, seu in ipso operante, in quantum operans est, seu in quantum est potens ad operandum, non ut est in potentia ad essendum: nisi forte actio consideretur ut entitas est in passo extra operantem; sed de hac non potest esse dubitatio in presenti, quia hoc ipso quod est extra ipsum operantem, & virtutem eius (si quidem est in passo) non potest esse substantia ipsa operantis. Si ergo sumatur pro actione, ut est in operante, est impossibile quod sit eius substantia, si recipiatur in aliqua potentia operativa, seu in ipso subiecto, ut est operans in potentia, quia principium operans, seu potentia operativa vel est forma, si est principium *quo*, vel suppositum, si est principium *quod*. Si ergo actio, seu operatio quae est actualitas ultima recipitur in potentia, ut operativa, seu principio operandi *quo*, recipitur in forma substantiali: (in accidentali enim non potest:) ergo ipsa non est substantia constituens, quia non potest forma seu substantia constituens supponere formam substantialem, quia haec constituens est. Si recipitur in supposito operante, seu principio *quod*, non solum supponit substantiam constitutam, sed etiam terminatam, & subsistentem: ergo ipsa operatio, seu actualitas ultima non potest esse substantia operantis, si recipitur in potentia seu principio operante.

Quapropter cum D. Thom. probaverit actualitatem ultimam, hoc ipso quod actualitas ultima est, repugnare potentialitati, ita quod non possit recipere ulteriorem actualitatem, & ex eo quod substantia sit, seu subsistens sit, per se notum est quod recipi non possit, aut si recipitur, distinguitur a potentia, seu virtute operativa, quae radicaliter est substantia operans, manifeste deducitur quod talis actualitas caret omni potentialitate tam praesupposita ut recipiatur, quam ut recipiat, & consequenter est actus purus.

Et adverte quod non probavit D. Thom. operationem non esse substantiam operantis, quia egreditur ab illo, quod videbatur facilius probationis esse, & conformius ad naturam operationis: esset enim haec probatio magis superficialis, & minus efficax, quia qui ponerent actionem esse substantiam agentis, hoc ipso negarent talem actionem egredi ab operante, neque id esse de conceptu actionis, quae est substantia: unde esset petitio principij probare quod non sit substantia, quia egreditur ab illa. Probavit ergo D. Tho. hanc veritatem ex alio principio quod a nemine negari potest, scilicet quod actio est actualitas ultima respectu virtutis seu potentiae operativae, sicut esse respectu essentiae: hoc enim est per se notum, quia est ultimum intentum ab operante in quantum operans est. Et ita ex hoc principio optime processit ratio D. Thomae.

Ad rationes dubitandi, ferè constat ex dictis.

Ad primam dicitur, quod id quod est sua actualitas ultima, id est sua operatio, vel suum esse, non potest habere potentiam ad alias actualitates, quia ultima actualitas ad nihil ulterius est in potentia. Unde ex genere suo non limitatur per hoc quod recipiat, sed per hoc quod recipiatur. Quare si sit

subsistens, atque adeo irrecepta, neque limitatur ex potentialitate recipiente, neque ex potentialitate in qua recipitur, & sic remanebit actus purus. Non enim negamus quod id quod est potentialitati admixtum, sit aliqua actualitas, nempe aliqua forma, seu actus primus, sed negamus quod sit sua actualitas ultima, ita quod sua operatio, seu esse sit substantia seu subsistens. Et ex hoc bene inferitur quod non sit in potentia ad aliquem actum, licet ex eo quod aliquid mixtum potentiae sit sua actualitas, non ultima, sed aliquis actus primus, vel forma, non inferatur quod sit actus purus. Unde non oportuit probare quod etiam si sit aliqua actualitas, non sit sua operatio, quia D. Thom. assumebat in maiori, quod non est sua actualitas ultima, atque adeo ibi probatum manebat, seu recte inferebatur, quod non est sua operatio, quia operatio est actualitas ultima in agendo.

Nec valet instantia quae adducitur quod potest 7
esse sua actualitas, quae est operatio quantum ad aliquam intellectionem, non quantum ad omnes, vel etiam non quantum ad alias formas seu actualitates, v.g. quoad esse, subsistere, &c. Dicimus enim quod si aliqua substantia est sua intellectio, seu operatio, quantum ad aliquam intellectionem, etiam erit quantum ad omnes: tum quia est eadem ratio de una atque de aliis, cum sint omnes eiusdem generis: tum quia non potest operans habere plures intellectiones seu operationes, quae sint plures substantiae, cum ipsum operans non possit habere nisi unam substantiam, seu essentiam: ergo non poterunt tunc esse plures intellectiones quarum quaelibet sit substantia operantis: sic enim haberet plures substantias, seu essentias. Nec etiam potest intelligi quod sit in potentia ad ipsum esse, seu subsistere: quia hoc ipso quod supponitur actualitatem illam ultimam esse substantiam, hoc ipso supponitur ex se esse subsistentem: nam substantia incompleta esse non potest, cum haec non sit ultima actualitas, sed forma constitutiva essentiae, quae est actus primus, vel materia prima, quae est pura potentia. Praeter constitutionem autem naturae per istas substantias incompletas non restat alia substantia incompleta quae superaddatur, quia ultra constitutionem substantiae, seu naturae, non est ulterius considerare partem constituentem; idem autem est incompleta substantia ac pars substantialis constituens. Unde si operatio est substantia operantis, est tota ipsa substantia subsistens, quia illa est res, seu substantia operans. Quod verò sit in potentia ad esse, etiam non convenit tali actualitati hoc ipso quod est operatio subsistens, quia non est operatio exiens tanquam actio, quia substantia est, & sic non procedit, nec habet esse procedens ut actio, quia si eius esse procederet, etiam ut actio procederet, non subsisteret; nec tanquam effectus, quia non est effectus, sed actio, & alia est actualitas ultima in genere operandi: non ergo est in potentia ad esse, sed seipsa erit esse hoc ipso quod est actualitas ultima subsistens, quia ultima actualitas in genere operandi vel supponit esse si ab ipso procedit, & sic non constituit illud, vel ipsa dat esse operanti, & sic est subsistens, quia substantia est ipsum esse subsistens, quod est actus purus; tunc autem si non supponit esse in operante, ipsa servit pro esse, & est subsistens. Et praeterea quia si illa actio subsistens, & substantia ipsa operantis est, sequitur quod tantum sit una actio, sicut est una substantia, & non specificabitur ab obiecto, quia substantia specificabilis non est: ergo esse illius actionis non erit determinatae speciei hoc ipso quod est subsistens, & praesertim si sit actio intelli

intelligendi, quæ ad omnia obiecta, & ad omnia entia se extendit; unde si est substantia, & à nullo specificatur, & habet actualitatem super omnia, consequenter, neque eius esse, seu existentia determinatam speciem habebit, & sic erit existentia subsistens, & infinita, seu non limitata ad aliquam speciem; tale autem esse non est productum, neque ad illud actio illa erit in potentia, quia solum esse quod est determinatæ speciei potest esse limitatum, & productum.

Vnde sequitur quod non potest dici illam ultimam actualitatem esse in potentia obiectiva, scilicet in potentia ut producat in esse, licet non in potentia subiectiva, id est ad hoc ut aliquid ulterius recipiat. Contra enim est, quia illa actio si est in potentia obiectiva, ut producat, & procedat, vel debet procedere à solo Deo, vel etiam à creatura operante. Si à creatura operante, non erit substantia eius, siquidem ab ea procedit, & sic supponit eius substantiam, non constituit. Si à solo Deo, erit substantia ut effectus procedens à Deo: non autem erit operatio creaturæ, quia operatio est actualitas ultima in operando, & hæc supponit actualitatem ultimam ipsius operantis in essendo, quia operatio sequitur esse: si verò non supponit esse, & substantiam operantis, sed illam constituit: ergo est ipsum esse operantis, & sic illa substantia est esse subsistens, quia operatio, quæ est eius esse, subsistens est: esse autem subsistens est actus purus, ut *infra* dicemus.

8 Ad id verò quod opponitur contra probationem D. Thom. quod actualitas potentialitati repugnat quod non potest intelligi, nisi respectu actualitatis ad quam est in potentia, non autem respectu omnis actualitatis, quia potest esse quod ipsa potentialitas aliquid actualitatis in se habeat. Respondetur, probationem D. Thomæ non consistere in hoc quod omnis actualitas repugnet potentialitati; sed actualitas de qua ibi loquitur est actualitas ultima, seu illa quæ est actus secundus: de hac enim ibi erat sermo; hæc autem repugnat potentialitati ad ulteriorem actum, siquidem in sua linea est ultima, potest tamē admisceri potentialitati, si recipiatur in aliquo subiecto potentialitatem habente. Si autem est subsistens, & non recepta, ex omni parte caret potentialitate. Vnde signanter non dixit D. Thom. in illa probatione quod potentialitas repugnat actualitati, sed quod actualitas potentialitati repugnat, quia videlicet loquebatur de actualitate ultima, quæ est operatio, vel esse, seu existentia, & sic non restabat probandum D. Tho. quod potentialitas Angeli, supposito quod est aliqua actualitas, licet non omnis, non esset illa actualitas quæ est agere: hoc enim non intendebat probare D. Thom. neque ad eius spectabat intentum, vel solum probare quod illa actualitas, de qua ibi agebatur, nempe actualitas ultima, si sit subsistens, repugnat potentialitati, & consequenter est actus purus. Ad hoc autem nihil refert quod potentialitas repugnet omni actualitati, vel alicui, sed solum quod actualitas illa de qua ibi agebatur repugnat potentialitati.

9 Ad secundum Respondetur quod hoc ipso quod substantia Angeli est sua operatio, non oportet probare quod talis operatio non sit aliqua substantia incompleta ad quam sit in potentia, quia licet verum sit quod detur potentialitas ad aliquid substantiale, siue ad substantiam incompletam, quæ sit forma, siue ad aliquid substantiale quod sit modus; tamen operatio non potest hoc modo se habere, ut iam *suprà* insinuatum est, quia substantia incompleta non potest esse actualitas ultima, sed vel

materia, vel forma, quorum prima est pura potentia, & secunda est actus primus: & hoc ideo quia substantiæ incompletæ dicuntur partes constituentes ipsum totum in ratione essendi: unde cum operatio non sit pars constitutiva essentiæ in ratione essendi, non potest se habere ut substantia incompleta, id est forma, vel materia. Et præterea quia si est substantia incompleta, ordinatur ad aliquod totum constituendum quod est perfectius, & maius ipsa, quia omne totum est maius seu perfectius sua parte: ergo non est ultima actualitas, cum sit in potentia ad maiorem actualitatem, seu perfectionem, scilicet ad ipsum totum.

Nec refert ad intentum articuli, quod illa operatio sit modus, vel realitas aliqua substantialis, sicut existentia vel subsistentia, nec onerandus est D. Th. ad hoc probandum, quia tantum intendit ostendere quod non sit ipsa substantia operantis: si autem habemus quod distinguitur ab illa, siue sit substantia incompleta siue modus substantialis, siue accidens, non pertinet ad hanc probationem, quia non intenditur hic illud positivum quod est operatio, an sit accidens, vel non, sed solum illud negativum, quod non sit substantia ipsa operantis. Aliunde verò constat quod non sit substantia incompleta, quia non est materia, neque forma constituens naturam in esse naturæ, sed solum actualitas constituens operantem in actu operandi, nec est modus substantialis, quia non est existentia, vel subsistentia, aut unio, quæ solum agnoscimus esse modos substantiæ: nec enim ordinatur operatio ad ipsam substantiam substantialiter constituendam vel modificando, vel componendo, sed est actualitas eius ultima.

Ad dubitationes quæ ex Caiet. & aliis referuntur, Respondetur quod dicendo quod actus purus est sua actualitas, non significatur quod est ibi aliquid per modum actuantis, & aliquid per modum actuarii, sed simpliciter quod est sua actualitas per modum actus puri, & per modum summæ simplicitatis, non per modum alicuius compositionis: nec enim ly *sua*, cum dicitur quod est sua actualitas, importat respectum actuantis, sed solum quod est sua, tanquam substantia, & essentia sua per unitatem, & identitatem, sicut dicitur quod Deus est sua essentia, & suum esse sine ullo respectu actuantis. Et similiter cum dicit D. Thomas, quod actio est actualitas virtutis, & esse est actualitas essentiæ, non intelligit quod sit actualitas per informationem vel compositionem, aut per summam simplicitatem, vel identitatem, sed loquitur absolute, & in communi, abstrahendo ab omnibus istis modis, sed solum affirmat quod est actualitas virtutis, siue hoc sit per modum informationis, & actuationis, ut in nobis, siue per modum summæ simplicitatis, & identitatis, ut in Deo. Et quando dicitur quod ea quæ se habent ut proprius actus, & propria potentia, solum identificantur in actu puro, intelligitur hoc, semotis imperfectionibus, id est non remanente potentialitate (aliàs enim non identificarentur) sed remanente toto hoc per modum summæ, & puræ actualitatis.

Secunda ratio D. Thom. est quia si intelligere Angeli esset sua substantia: ergo esset subsistens: sed intelligere subsistens non potest esse nisi unum, sicut nec aliquod abstractum subsistens: ergo non distingueretur substantia Angeli, neque à substantia Dei, neque à substantia alterius Angeli, ex quo sequitur.

Tertia ratio, quæ est confirmatio præcedentis, quia si Angelus esset suum intelligere, non posset inueniri in Angelis diuersus gradus in intelligendo

cum ista diuersitas proueniat ex diuersa participatione ipsius intelligere.

Circa hanc rationem ferè totum pondus difficultatis est circa illam propositionem, quod intelligere, si est subsistens, est tantum vnum: nec enim videtur hoc rectè probari, vel supponi, quia vel propositio illa procedit de intelligere vniuersalissimo, quale est intelligere actus puri, vel de intelligere specifico, & determinato, quale est intelligere Angeli, vel talis Angeli, v.g. Gabriëlis. Primo modo vera est propositio, sed non ad propositum, quia non loquimur de intelligere vniuersalissimo, quod est actus purus, sed de intelligere particulari, quod est Angeli. De hoc autem intelligere non apparet in qua vi sequatur illa consequentia, intelligere Angelicum est subsistens: ergo est vnum. Et instatur aliquibus exemplis: nam albedo si esset abstracta, & subsistens, esset quidem vna in ratione albedinis, sed non in ratione, & genere coloris: possent enim esse alij colores abstracti: ergo similiter si intelligere Gabriëlis esset abstractum, esset vnum in specie intellectionis Gabriëlis, non in toto genere intelligendi. Item non sequitur, Gabriël est natura specifica subsistens: ergo intellectualis natura, & non solum Gabriëlis natura est vna, & immultiplicabilis: anima rationalis est forma per se subsistens: ergo immultiplicabilis; albedo est per se subsistens: ergo color illi identificatus, & non solum albedo, erit vnus numero. Quare vel omnis forma subsistens ex hoc quod est subsistens est tantum vna, & hoc est falsum, vt patet in tam multis formis subsistentibus, quæ tamen multiplicantur; vel solum intelligere hoc privilegium habet, quod si est subsistens, est vnum, & de hoc oportet reddere rationem.

Contra aliam consequentiam D. Thom. nempe quod sequeretur quod intelligere subsistens Angeli esset etiam ipsa substantia Dei, instatur, quia Angeli intelligere adhuc subsistens, esset quoddam intelligere Angelicum, vt supponimus: ergo solum identificaret sibi prædicata Angelica, non diuina, vt esse immensum, æternum, increatum, nec identificaret sibi ipsum esse, aut velle: adhuc ergo distingueretur ab illo. Similiter in vltima ratione D. Th. non sequitur non dari diuersos gradus magis vel minus perfectos, quia etiam si intelligere illud esset subsistens, adhuc daretur Deus qui esset primum principium, ex cuius participatione omnes illi gradus descenderent, & vnusquisque subsisteret, sicut modò deriuantur diuersæ substantiæ spirituales magis vel minus perfectæ, & tamen subsistentes.

12 Pro intelligentia huius rationis D. Th. duo solum oportet aduertere.

Primo generalem rationem, & doctrinam de formis abstractis, quæ si in sua abstractione sunt subsistentes, in illo genere in quo sunt formæ, non possunt plurificari, sed esse vnum, quia plurificatio semper est per concretionem.

Secundò, specialem rationem ipsius intelligere, quod propter suam vniuersalitatem hoc ipso quod est subsistens debet esse vnum in toto genere, & vniuersalitate intelligendi. Circa primum supponendum est, quod diximus *precedenti tomo disp. 5. artic. 1.* quod aliud est formam esse subsistentem, aliud esse subsistentem in abstractione formali: nam ad hoc vt forma sit subsistens, non requiritur quod sit vna, neque quod contineat aliquam perfectionem sui generis, sed potest etiam includere limitationem, & imperfectionem aliquam subsistere, quia natura, seu forma substantialis est, sicut videmus animam subsistere, & Angelum, & multas

naturas corporeas, quæ tamen suas retinēt imperfectiones cum tali subsistētia: nam ad hoc vt subsistant, sufficit quod habeant esse per se, & incommunicabile alteri, siue sit perfectum, siue imperfectum, & limitatum: at verò forma subsistens in abstractione formali debet esse forma purificata ab omni eo quod formale non est, id est, ab omni materialitate, seu ab omni cōditione materiali, & potentiali sui generis, & in hac purificatione subsistens, id est, non communicabilis alteri: talis enim forma, ex eo quod est abstracta, seu purificata ab omni materialitate sui generis, nihil de imperfectione illius generis in sui constitutione habet; & ex eo quod subsistens, nihil contrahit de imperfectione, & potentialitate aliena, quia si est subsistens, non communicat alteri, & sic nihil ex eius communicatione cōtrahit. Vnde restat quod talis forma sic abstracta, & subsistens debeat continere totam perfectionem illius generis, & debet esse vna, & immultiplicabilis, quia omnis multiplicatio debet fieri per aliquid extraneum, seu quod sit extra conceptum talis rei quæ multiplicatur. Nam talis multiplicatio debet fieri per aliquam differentiam contrahentem, vel materiam recipientem. Et quidem differentia contrahens, si contrahat genus, est extra conceptum generis, si verò contrahat speciem, multò magis est extra cōceptum speciei, quia sumitur à principiis materialibus, quæ extra conceptum speciei, & quidditatis sunt. Similiter materia, seu subiectum recipiens est extra conceptum formæ receptæ; vnde hoc ipso quod contrahitur, vel recipitur talis forma, hoc ipso extraneatur à propria formalitate, & non manet abstracta, seu purificata in abstractione formali, neque in illa subsistens, siquidem communicatur alicui rationi extraneæ. Adde quod omnis multiplicatio, siue specifica, siue generica aliquam limitationem, & imperfectionem inuoluit, quia aliquid debet esse in isto, quod non in illo, si sit multiplicatio: ergo limitatè habet hoc, & limitatè habet illud, cum vnū careat eo quod aliud habet. Relinquitur ergo tantum certum quod omne abstractum abstractione formali, si subsistat in tali abstractione, non potest esse nisi vnum, & immultiplicabile.

Circa secundum quod pertinet ad rationem 13 ipsius intelligere, est aduertendum quod intelligere ex duplici principio limitatur, scilicet ex obiecto à quo habet specificationem, & ex subiecto à quo habet indiuiduationem, & si est subsistens, caret vtraque. Caret quidem specificatione, quia substantia non est ad aliud, sed ad se, & sic species illius non sumitur ex tendentia ad aliud, quia repugnat substantiam consistere in tendentia, & ordine ad alterum, sed in se, & per se est. Vnde perfectio quæ competit alicui formæ ex ordine ad alterum, hoc ipso quod redditur subsistens, debet competere per se, & in se, & ita si specificatio formæ est ab obiecto, & per tendentiā in illud, si natura illa, & forma substantialis est, & subsistens, hoc ipso specificatio illa subsistens esse debet, & non ad alterum. Quod si verum est dari in diuinis relationes, quæ substantiales sunt, & tamen sunt ad alterum, hoc non est quia specificationem, & perfectionem sumant per dependentiam ad alterum etiam correlatiuum, sed habent vnā, & eandem substantiam, & perfectionem essentialem, solumque opponuntur in ipso excipio respiciendi: & hoc totum habent propter infinitam eminentiam diuinæ naturæ cui identificantur. Vnde si hoc ponitur tali modo in ipso intelligere, hoc ipso debet poni infinitas in tali ratione intelligendi, sed tamē si datur specificatio, & essentialis perfectio in ipso intelligere

intelligere per ordinem ad obiecta, hoc ipso debet tale intelligere esse dependens ab obiecto, & importare tendentiam, seu habitudinem transcendentem ad illud. Et hoc repugnat conceptui substantiæ, quæ in sui specificatione, & natura non potest esse ordinata ad alterum, sed subsistens in se, licet infinitas diuinæ naturæ indentificet sibi relationes eiusdem substantiæ, sed correlatiui exercitij. Quare si datur intelligere subsistens, non potest esse specificabile ab obiecto.

Similiter non potest tale intelligere esse multiplicabile ex parte subiecti, sed carere debet multiplicatione individuali, quia cum intelligere dicatur esse ipsa substantia intelligentis, impossibile est quod multiplicetur intelligere in eodem intelligente, alias multiplicarentur substantiæ; & sic redderetur multiplex intelligens, sicut est multiplex intellectio, quia idem substantialiter essent tunc intelligens, & intelligere: non ergo stat multiplicari ipsum intelligere substantiale, & non multiplicari intelligens. Si ergo intelligere substantia intelligentis est, vnum esse debet, sicut ipse intelligens: nec enim in tali casu erit actio procedens in intellectio, sed erit ipsamet substantia intelligentis, quam implicat procedere à se.

¹⁴ Ex his duobus præsuppositis sequitur cum præcisa euidencia ratio D. Thomæ, quæ tam efficaciter probat quod intelligere quodcumque, si est subsistens, est vnum, quàm quod esse, si est subsistens, est vnum, imò tunc implicat quod intelligere subsistens sit Angelicum, vel humanum, sicut implicat quod esse subsistens sit hominis vel equi, vel Angeli, sed si est esse subsistens, est esse purum, eo quod esse secundum conceptum suæ actualitatis est actus entis, vt ens est: limitatur autem, & contrahitur penes naturas, & essentias, in quibus recipitur, sicut est esse hominis, & esse lapidis, & esse Angeli. Quare remoto omni recipiente, & posito esse subsistenti, reddit ipsum esse in suam amplitudinem, quia non est à quo limitetur. Similiter intelligere est actus vltimus in linea intelligibili, quæ ambit totum ens: omne enim ens est intelligibile. Limitatur autem specificatiue ex obiecto specificante, & individualiter ex subiecto exercente, & producente intellectiōem. Vnde si remouetur omnis specificatio, & exercitium producendi, & emittendi intellectiōem, reducit̃ intelligere in ipsam vniuersalitatem lineæ intelligibilis; & sic est vniuersaliter perfectus in illa linea, sicut actus purus intelligendi.

¹⁵ Formatur ergo probatio S. Th. sic. Intelligere subsistens necessariò debet attingere aliquod obiectum, quia si intelligit, aliquid intelligit, non verò nihil; sed non specificatur tale intelligere ab aliquo subiecto, vt ostensum est, quia substantia non specificatur ab alio: ergo est tale intelligere sine vlla specificatione, & limitatione desumpta ab obiecto: ergo est actus secundus in linea intelligibili extra omnem speciem, quia species intelligendi non sumitur nisi ab obiecto: ergo caret omni limitatione proueniente ex contradictione specifica, & ex multiplicatione per ipsam. Non sufficit autem dicere quod specificaretur à seipso vt obiecto, sicut intelligere diuinum, quod habet seipsum pro obiecto. Non sufficit hoc, quia intelligere est operatio immaterialis amplectens omne intelligibile, alias si solum posset intelligere seipsum, & non alia obiecta, & in se esset limitatum vt Angelus, non infinitum sicut Deus, imperfectius esset hoc intelligere, quàm intelligere humanum, & infimum quod potest omnia euntia attingere. Caret etiam limitatio-

ne proueniente ex receptione in aliquo subiecto, seu principio materiali, quia subsistit in ipsa actualitate, seu actu secundo intelligendi: ergo caret omni principio extraneo dante potentialitatem, & imperfectionem tali actualitati intelligibili: ergo est abstractum intellectualitatis subsistens in ipsa abstractione, quia actualitas intelligibilitatis habetur per abstractionem à materia, seu per ipsam immaterialitatem: ergo intelligere subsistens est actualitas vltima, seu actus secundus in ipsa immaterialitate subsistens: ergo ambit omnem perfectionem illius generis sine admixtione alicuius extranei, seu specificatiui contrahentis, quia in ipsa immaterialitate, & actualitate intelligibili subsistit: ergo non potest multiplicari in genere intelligibili, quantum ad perfectionem, quia omnem colligit & adunat in se, dum abstrahit, & purificatur ab omni limitatione specificationis, & potentialitate receptionis, quod est esse actum purum in genere intelligibili.

Ex hoc autem bene sequuntur reliquæ consequentiæ D. Th.

Prima est quod non distinguetur substantia Angeli, seu substantia illius intelligere à substantia Dei. Hoc patet, quia includeret totam perfectionem in esse intelligibili: purificata omni potentialitate, & contradictione specifica illius, sed substantia, seu natura Dei nihil aliud est quàm intelligere in tota sua perfectione, & sine vlla potentialitate: ergo illud intelligere subsistens esset natura Dei.

Secunda consequentia est, quod non distingueretur à substantia alterius Angeli. Patet quia quælibet substantia Angeli esset suum intelligere, & intelligere subsistens esset vnum: ergo omne intelligere Angelorum esset vnum: ergo & omnis substantia, quia intelligere Angelorum substantia est.

Tertia consequentia: non esset tunc diuersus gradus magis vel minus perfectus in Angelis. Patet hoc, quia non daretur aliqua forma, seu natura per modum actus primi, respectu talis actus secundi, qui esset intelligere, ergo neque diuersus gradus, quia graduatio est penes diuersas naturas, seu formas, quæ se habent vt actus primus ad intelligendum, ipsa autem actio intelligendi, si est subsistens, seu substantia ipsa intelligentis, non est nisi vna, vt ostensum est: ergo in ipsa non sunt plures gradus, quia nec plures specificationes, seu species. Naturæ autem, seu species quæ constituent diuersos gradus per modum actus primi, tunc non dantur: ergo in tali casu non darentur plures gradus intelligendi secundum maiorem vel minorem perfectionem.

Ad rationes dubitandi contra hanc rationem ¹⁷ D. Thom. Responderetur quod illa propositio; Intelligere subsistens est tantum vnum, procedit de quocumque intelligere, non supponendo quod est intelligere vniuersalissimum, sed inferendo quod si est subsistens in illa abstractione formali, hoc ipso est vniuersalissimum, & vnum in illo genere intelligibili. Vnde dicere, quod intelligere Angeli sit eius substantia, seu subsistens, hoc ipso demonstratur impossibile, quia ex vna parte ponitur intelligere particulare, quia dicitur esse Angelicum, & ex alia parte cogitur dicere quod est vniuersalissimum, quia subsistens est; & sic extra omnem speciem & receptionem, quæ sunt principia limitandi & particularizandi ipsum intelligere, & intellectualitatem.

Ad exempla, quæ contra hoc afferuntur, respondetur.

Ad

Ad primum de albedine, si esset abstracta, dicimus quod solum esset una in specie albedinis, & non in genere coloris, vel alterius qualitatis, quia non abstraheret nisi in illa ratione specifica albedinis. Ceterum intelligere hoc ipso quod redderetur subsistens, seu substantia, careret omni principio specificanti, quod est obiectum; & sic abstraheret in ipsa actualitate, tollendo omne contractuum, & limitatum in ratione specifica; & sic esset, unum, & ambiret omnem perfectionem, non solum alicuius speciei intelligibilis, quia eam non haberet, sed totius generis intelligibilis. Dicere autem quod esset intelligere Gabrielis in specie illius, & quod esset intelligere subsistens, esset repugnantia, quia tale intelligere subsistens non specificaretur ab aliquo extra se, nec a se solum, quia intelligere Gabrielis non est solum potens intelligere se, id est, substantiam ipsam Gabrielis, sed etiam alia. Hoc ipso autem quod intelligeret alia, & non specificaretur ab illis, esset intelligere extra omnem speciem, vel in sua substantia haberet unde omnia intelligeret perfecte, & distincte quod nulli substantiae creatae convenire potest. Si autem intelligeret solam substantiam Gabrielis, non esset intelligere perfectum.

Ad secundum exemplum dicitur quod natura specifica Gabrielis est subsistens, & similiter anima rationalis, non tamen subsistunt in ipsa abstractione formali, sed in concretionem, & mixtione aliarum rerum quas in se recipere possunt, sicut recipiunt accidentia, & existentiam, &c.

Ad id quod ultimum ponitur, Resp. quod fundamentum D. Th. non stat in hoc, quod omnis forma subsistens sit una; vel ex eo quod subsistens multiplicabilis non sit: hoc enim adeo manifeste est falsum, quod non potuit in mentem alicuius venire. Neque hoc solum est proprium ipsius intelligere, si subsistens sit, sed, ut inquit D. Th. est proprium omnium abstractorum, id est omnis formae, quae subsistit in abstractione formali, talis in illo genere in quo est forma remanet una; & intelligere hoc ipso quod esset subsistens careret specificatione ab obiecto extrinseco, essetque unum in toto genere intelligibili, ut ostensum est.

Ad 2. instantiam contra aliam consequentiam D. Th. Respon. D. Thomam recte inferre quod si intelligere Angeli esset substantia, non distingueretur a substantia Dei, quia non remaneret solum intelligere Angelicum, sed univ ersalissimum in toto genere intelligibilis, & sic utrumque sequeretur, nempe, & quod esset Angelicum, quia sic supponitur, & quod esset Divinum, quia purificatum, & abstractum ab omni specificatione, & receptivo, quae sunt principia limitantia intellectum: ac per hoc recte probatur implicatio in hoc quod intelligere Angeli sit subsistens.

Ad ultimam instantiam respondetur quod in illo casu recte sequitur non dari diversos gradus in genere intelligibili, quia ut probatum est, intelligere subsistens est unum colligens in se omnem perfectionem illius lineae intelligibilis, & consequenter in hoc intelligere subsistente non possent diuidi diversi gradus magis, vel minus perfecti. Quod autem modò dentur diversae substantiae spirituales diversorum graduum, & tamen subsistentes; idem est quia sunt subsistentes tanquam substantiae per modum actus primi, non tanquam ultima actualitas quae est intelligere subsistens in sua formali abstractione: hoc enim ut ostensum est, semper est unum.

Recte probat D. Thomas quod intelligere Angeli non sit eius esse.

Probat D. Tho. in art. 2. quod intelligere Angeli, non solum non est sua substantia, sed neque eius existentia, seu esse, supponendo quod est duplex actio. Altera transiens, & altera immanens; transiens infert passionem in alio extra se, immanens autem non, sed manet intra agens. Unde prima actio non potest praeberere existentiam suo agenti, quia cum transeat extra ipsum, non potest munus existentiae habere, quia haec non transit extra subiectum quod reddit existens. Secunda autem actio pro hac parte non repugnat quod sit existentia operantis, quia extra illud non transit, cum reuera maneat in agente. Sed tamen potest repugnantiam habere ex duplici capite. Primo, quia procedit ab operante tanquam actio illius, & sic supponitur eius esse: ergo non dat illud. Secundo, quia intelligere, & velle habent diversum munus intrinsece, & essentialiter ab ipso existere: nam intelligere, & velle, & aliae actiones immanentes recipiunt speciem ab obiecto, & quia de se possunt circa infinita obiecta versari, vel simpliciter, vel secundum quid, habent infinitatem quandam. Esse autem Angeli habet determinationem unius tantum speciei ad ipsam substantiam Angeli: ergo non potest intelligere Angeli servire pro eius existentia. D. Th. in praesenti non usus est prima via, sed secunda, quia licet verum sit quod operatio procedens ab intellectu supponit eius existentiam; tamen qui dicerent quod intelligere est esse, negarent quod de ratione intelligere sit dimanare ab intelligente, sed solum quod sit ultima actualitas illius, sicut in Deo intelligere, & velle non sunt emanationes a Deo operante, sed actualitas illius; & sic non repugnabit idem inueniri in aliquo intelligere creato. Quare non poterat supponi id quod ista ratio supponit, nempe, quod intelligere, & velle sint ex suo intrinseco, conceptu emanationes ab intelligente, & volente, sed id deberet probari. Unde elegit D. Th. secundam viam, quae assumit aliquid quod a nullo negari potest, scilicet quod intelligere se habet ad plura obiecta a quibus specificatur, quod non potest convenire ipsi existentiae, seu esse.

Nihilominus ratio haec Divi Thomae parum efficax aliquibus videtur, nec solido fundamento niti: reducitur enim tota eius vis ad illam propositionem, quod non potest id quod determinata speciei est, sicut existentia, identificari cum eo quod in tot species diuiditur, sicut intelligere, quod ab obiectis specificationem desumit, nec potest unicum intelligere deferuire pro omnibus obiectis, quae Angelus valet intelligere, esse autem Angeli unum est. Contra hoc autem instant, quia non repugnat secundum diversos respectus aliquid esse determinatum, & indeterminatum, & esse finitum quoad aliquid, & infinitum quoad aliud: ergo fundamentum D. Thomae nutat. Anteced. variis exemplis prob. Nam in primis albedo & relatio in ea fundata identificatur, & albedinis non est nisi una species, relationes vero plures ut similitudo, & dissimilitudo, aequalitas, mensurabilitas, &c. Item superficies, & locus sunt entitatiue, & identice idem, & superficies est determinata species, loci autem sunt multae species, ut sursum, & deorsum, ante, & retrò, distans, propinquum, &c. & actio, & passio sunt eadem entitas, diversae vero species unius, & alterius. Ergo pari modo dici potest quod esse Angeli sit unum specie, & numero determinatum in ratione existendi, multiplex vero, & indeterminatum in genere cognos

cognoscendi. Item eadem substantia Angeli est in se, & in ratione substantiæ determinatæ speciei, & similiter ipsa potentia intelligendi, & volendi, & tamen est susceptiva diuersorum accidentium, & actuum, & specierum intelligibilium, & illa potentialitas est indeterminatæ speciei, sicut etiam potentia obediens, quæ est ad tam varias species supernaturales, & miraculosas, à quibus specificatur; & tamen ista omnia identificantur cum substantia ipsa, quæ est determinatæ speciei: ergo illa propositio D. Thomæ non est solida, quod aliquid determinatum in vno genere, & linea, non possit esse indeterminatæ speciei in altera. Item ens, & verum, & bonum sunt identicè eademmet entitas, & tamen possunt esse diuersæ species boni, aut veri, manente eadem entitate, sicut bonum diuiditur per honestum, vtile, & delectabile, non autem ens; & verum per diuersas rationes intelligibilitatis, licet sit eadem entitas: ergo bene stat aliquid esse determinatæ speciei in vno genere, & non in alio. Denique ipsa substantia Angeli est non solum forma naturalis in esse entitativo, sed etiam species intelligibilis in esse intelligibili respectu sui: ergo saltem respectu suæ propriæ intellectionis poterit identificari esse, & intelligere, sicut identificatur forma intelligibilis, & substantialis.

Confir. quia sicut esse Angeli est finitum, ita intelligere Angeli finitum est, quia est creatum, licet circa obiecta infinita versari possit: ergo non sequitur quod esse Angeli, quia est finitum, non possit identificari cum intelligere, quia infinitum est, cum hoc intelligere etiam simpliciter sit finitum. Quod autem obiectiue infinitum esse possit, non obstat; tum quia etiam esse Angeli habet similem infinitatem, quia continet totam plenitudinem suæ speciei, & æquualet infinitis indiuiduis: tum etiam quia sicut intelligere formaliter tangit infinita obiecta, ita substantia Angeli radicaliter: ergo bene stat quod etiam ipsum esse habeat infinitatem, sicut ipsum intelligere ex parte obiecti, & finitatem ex parte entitatis. Posset etiam dici, quod intelligere quando est substantia, non specificatur ab obiectis, sicut non procedit à subiecto.

22 Pro intelligentia rationis D. Th. oportet aduerte-
re, quod illa propositio in qua fundatur tota vis rationis eius, quod non potest aliquid esse alicuius speciei determinatæ, & alterius indeterminatæ, etiam identicè, intelligi debet de speciebus perfectis absolutis, & actualibus: nam si sunt species imperfectæ, sicut modi, oportet quod entitatiue quantum ad realitatem identificentur cum aliqua entitate reali determinatæ speciei, quia cum modus non sit realitas, non distinguitur à re cuius est modus realiter, & entitatiue, & ita manet indistinctus realiter, & entitatiue; & consequenter identificatur cum ipsa re, cuius est modus. Vnde non inhæret illi, sicut reliqua accidentia, sed seipso illi coniungitur, quod est entitatiue identificari, aliàs sequeretur processus in infinitum, quia cum ipsa inhærentia, quidam modus sit, si inhæret per aliam inhærentiam, ista rursus inhæret per aliam; & sic in infinitum: nec potest separatim existere à subiecto, sicut accidentia quæ inhærent, licet subiectum possit manere sine modo per corruptionem ipsius modi, seu alicuius ad illud requisitum. Similiter species relatiue identificari possunt cum fundamento quod est determinatæ speciei, & entitatis in se, quia non distinguitur à fundamento tanquam realitas, sed tanquam modus: nam si realitas sit, nullo modo identificabitur cum illo, sed accidentaliter illi adueniet, sicut plures species accidentales adueniunt subiecto habenti suam speciem entitatiue deter-

minatam ab illis distinctam. Denique intelligitur propositio D. Th. de speciebus actualibus, non potentialibus: nam esse plura in potentia, & indeterminatè se habere ad plures species, quas potest recipere, non est esse, neque identificari cum talibus speciebus, sed habere potentiam ad illas. Potentia autem, & indeterminatio ad plura accidentaliter aduenientia non repugnat cum vnitatem, & determinationem eius quod est in potentia, sicut ipsa potentia intellectiua, & substantia intelligens est in potentia ad plures intellectiones. Et hoc modo ipsum esse Angeli actu constituit entitatem in existendo, & potentialiter se habet ad operandum, seu intelligendum. Hoc autem modo nullus dubitat quod aliquid possit esse actu vnum in substantia, & in potentia multiplex, respectu accidentium, & operationum, quarum species potest recipere. Sed aliud est recipere species diuersas, aliud identificare, & esse idem cum illis. Hoc secundum est quod negatur; de primo verò non dubitatur.

Quod verò propositio D. Th. sic debeat intelligi de speciebus perfectis absolutis, & actualibus, constat manifestè, quia loquitur de intelligere, seu de actibus immanentibus, qui sunt realitates, & non modi, & qualitates, & non relationes, actus secundum, & non potentialitates; & de talibus querit, an sint idem cum ipso esse Angeli.

Ratio ergo D. Th. ex hoc supposito declaratur quàm sit efficax: nam si intelligere Angeli esset eius esse, vel tale intelligere esset vnius tantum speciei, & vnicum existens, attingeret omnia obiecta, quæ Angelus potest attingere, vel tale intelligere esset multiplex, & diuersas species habens respectu diuersorum obiectorum, sicut nunc habet intelligere nostrum, & Angelicum, & non obstante hac diuersitate specifica in ipso intelligere adhuc identicè, & entitatiue diceretur esse vnum cum ipso esse Angeli. Si primum dicatur, destruitur ipsa ratio intellectionis, quæ diuersificatur penes obiecta, & non potest vnum existens attingere omnia obiecta, quæ sunt ab intellectu attingibilia, quia intellectus Angeli propter suam vniuersalitatem potest attingere omne ens, imò eleuari potest ad videndum Deum in se. Vnde sicut non potest dari vna species, quæ repræsentatiue contineat omne ens, nec vna virtus naturalis, quæ possit intelligere Deum in se, ita nec potest dari vnum intelligere quod se extendat ad omnia entia intelligibilia, quia maior actualitas requiritur in ipso intelligere in actu secundo, quàm in ipsa specie repræsentante, vel virtute eliciente. Imò sequeretur hinc, quod Angelus naturaliter esset beatus, quia si eius intelligere est vnum ad omnia quæ potest intelligere, quia est eius esse: ergo intelligere beatificum etiam erit eius esse, siquidem ut ponitur, omne intelligere eius est vnum, & illa visio est eius intelligere; atque adeo erit aliquid naturale in Angelo, quia esse Angeli naturale illi est, id est, ipso dono creationis habitum. Et eodem modo non potest esse vna tantum realitas numero intelligere Angeli, etiam si sit superaddita ipsi esse, quia nulla realitas naturalis est, quæ omnia obiecta attingat, in quæ potest Angelus tam naturalis quàm supernaturalis ordinis. Si verò ponitur quod intelligere Angeli est multiplex in specie, ita quod diuersificatur penes diuersitatem obiectorum, repugnat quod sit ipsum esse, quia cum intelligere non sit modus, sed realitas, hoc ipso quod est multiplex species, est multiplex realitas; ergo non potest esse entitatiue vnum, & idem cum esse Angeli quod est vnum. Tum etiam quia nulla entitas creata potest in se adunare plures species reales propter

propter limitationem, & finitatem suam, quia unaquaque res creata constat ex suo genere, & differentia, multae autem species multas habent differentias, & plura constitutiva. Imò nec in Deo sunt species, seu quidditates rerum, nisi sub aliqua eminentia superiori, quae est illarum principium, & semota omni potentialitate, imperfectione, & divisione. Quòd verò plures species manentes in sua pluralitate, & divisione limitata adunentur, & identificentur cum entitate, seu actualitate una, & unius speciei, nec etiam in Deo inuenitur, quia repugnat ex una parte species manere diuersas, & limitatas inter se, & ex alia esse unam, & eandem entitatem, etiam infinitam, cum qua identificentur: quaecumque enim sunt eadem uni tertio, sunt eadem inter se, eo modo quo in illo tertio unum sunt: quod axioma in creatis nullam patitur instantiam: ergo si intelligere Angeli remanet multiplex, & diuisum secundum diuersas species, non potest identificari cum ipso esse Angeli, aut si sunt ipsum esse, sunt idem inter se, & consequenter non sunt plures species reales, sed vel erunt modi, quod repugnat realitati intellectuum, vel erunt una, & eadem species, seu realitas specifica, quòd est incidere in primum membrum impugnatum.

24 Ad instantias allatas contra istam rationem D. Th. patet responsio ex dictis. Negatur enim antecedens. Et ad primam instantiam de albedine, & relatione dicitur quòd relatio constituit speciem relationem solum modaliter diuersam à fundamento. Et pro hac parte non repugnat identificari entitatiue, licet non modaliter. Et sufficit distinctio modalis, ut dicantur illae relationes diuersae specie inter se modaliter, licet entitatiue identificentur cum fundamento. Quòd si relationes sunt realiter distinctae à fundamento, non currit argumentum, quia tunc non identificantur cum fundamento, sed praebent illi diuersas species accidentales, sicut etiam idem subiectum recipit diuersa accidentia specie distincta, quae non sunt idem cum ipso subiecto. Similiter ad exemplum de superficie, & loco, dicimus quòd locus non addit supra superficiem, nisi aliquem modum, vel relationem secundum situationem, vel distantiam spatij, & ista relatio, seu modus distantiae potest variari secundum diuersas species, non variata specie superficie, sicut de reliquis modis, vel relationibus dictum est. Ad exemplum de substantia Angeli, & potentialitate ad diuersas species intelligibiles, vel ad accidentia, vel etiam de potentia obedientiali ad diuersas species supernaturales, Resp. quòd ibi non identificantur cum specie determinata substantiae diuersae species actuales accidentium, sed solum potentialitas ad illa suscipienda, quae potentia susceptiva non importat diuersas species, licet respiciat illas, quia suscipit illas uno modo, scilicet per sustentationem, & inhaerentiam in se, & solum est multiplex in potentia, non in actu. Ratio autem D. Tho. procedit de diuersis speciebus actualibus, ut ostensum est.

25 Ad quartum exemplum de ente, & bono, Resp. quòd illae differentiae, & species boni solum sunt respectuue: dicitur enim aliquod bonum honestum vel delectabile secundum diuersos respectus ad voluntatem, quia honestum respicit conformitatem rationis, & delectabile complacentiam fructualemque appetitus. Vnde si manente eadem entitate dicitur una, & eadem res delectabilis, & utilis, aut honesta, hoc solum arguit diuersas species relationes, quas non repugnat identificari cum eadem realitate, ut de aliis relationibus à nobis dictum est. Si verò non sit eadem res honesta, & delectabilis, sed diuersae, tunc non currit argumentum, quia

non identificantur in eodem esse, & identitate.

Ad quintum exemplum de substantia Angeli 26 quae simul est forma naturalis, & intelligibilis respectu sui, responderetur, non sequi ex hoc quòd intelligere, & esse Angeli possint identificari, etiam loquendo de intelligere, non in tota sua latitudine, sed de intellectione suamet essentiae. Et ratio disparitatis est, quia ut substantia Angeli sit species respectu sui, non requiritur nisi quòd sit immaterialis ipsa substantia, & intellectui coniuncta: cum enim unaquaque res per seipsam sit obiectum intellectus, quia verum est passio entis, ratione cuius quodcumque ens dicitur intelligibile, etiam substantia Angeli per seipsam habet rationem obiecti, & intelligibilis: & ulterius, quia spiritualis substantia est, non indiget specie intelligibili superaddita, quae illam constituat intelligibilem in actu, eo quòd per seipsam spiritualis, & immaterialis est. Ceterum intelligere est actus secundus tendens ad illud obiectum, ut specificabilis ab illo: esse autem Angeli non potest habere specificationem ab ipsa natura tanquam ab obiecto, quia solum ipsum esse habet actuare essentiam, constituendo illam extra causas: tendentia autem ad ipsam, ut ad obiectum cognitum non est esse, sed operari, quod alio modo specificatur ab obiecto, quam esse à natura, & consequenter aliam speciem habet. Duae autem species non possunt simul identificari. Et deinde quia intelligere supponit intellectum, cuius est actualitas, distinctum ab ipsa natura cuius actualitas est esse. Vnde non potest tale intelligere identificari cum esse, quia intellectus, & esse non identificantur, intelligere autem est actualitas pertinet ad intellectum.

Ad confirmationem responderetur: quòd licet intelligere sit finitum entitatiue in Angelo, habet tamen ordinem ad obiecta infinita, ratione cuius unum & idem intelligere non potest omnia talia obiecta comprehendere, sed diuiditur per multas species secundum diuersa obiecta, à quibus specificatur: & ita licet nunc quodlibet intelligere Angeli sit finitum, & sint plures intellectiones finitae, tamen si unicum intelligere sufficeret ad omnia obiecta intellectus attingenda, infinitatem deberet habere in actu, quia intellectus habet infinitatem in potentia, cum possit extendi ad totum ens, & illud intelligere haberet in actu, & simul totum quod intellectus habet in potentia; unde non potest ipsum esse Angeli quod est unum, esse vniuersaliter totum suum intelligere. Si autem intelligere est multiplex secundum speciem, non potest identificari cum esse, quod unum est, ut probauimus. Nec in tali casu procedit argumentum, quia intelligere, si est multiplex, & diuersae speciei, licet sit finitum entitatiue, & infinitum solum obiectiue, quatenus circa infinita obiecta potest versari, tamen est multiplicis, & diuersae speciei, quia ex diuerso obiecto species variatur, & hoc intelligitur etiam nomine indeterminatae speciei; & hoc ipso quòd intelligere est multiplex in specie, non potest identificari cum illo esse, quod est unum tantum, & determinatae speciei, quicquid sit de infinitate: nam hoc ipso quòd est multiplex species vera & realis, & non solum modalis, non potest identificari cum esse quod entitatiue est unum. Quod autem additur etiam esse Angeli habere infinitatem, tum æquiualem respectu plurium indiuiduorum, tum radicalem respectu plurium actuum, quorum est radix, & obiectorum quae per tales actus intelliguntur. Resp. hanc infinitatem solum esse potentialem, non actuaalem, sicut esset si ipsum esse Angeli esset actu omne suum intelligere formale

male, vel identificaret sibi omnes species intellectio-
tionis, quæ possunt esse in Angelo, & illæ species
diuersæ essent, vt ostensum est. Ad id verò quod
dicitur, in hac sententia ponente quòd intelligere
Angeli est eius esse, non specificaretur intelligere
ab obiecto, Respon. hoc esse impossibile, nisi po-
natur vnum tantum intelligere in Angelo respectu
omnium obiectorum, quæ intelligere potest. Vnica
enim intellectio esse non potest, cum intellectio li-
bere producat vel cesset, vna sit naturalis, altera
supernaturalis, quæ ex natura conuenire non po-
test; & naturalis intellectio non potest omnia obie-
cta distinctè comprehendere, cum non sit vna spe-
cies quæ omnia obiecta clarè, & distinctè compre-
hendat. Si autem sunt plures intellectiones, illæ
non fundantur in eadem specie intelligibili, quia
non datur vna species, quæ omnia obiecta possit
repræsentare distinctè naturalia, & supernaturalia:
fundantur ergo in diuersis speciebus, & istæ in di-
uersis obiectis, quorum vices gerunt: ergo ab obie-
ctis specificantur actus illi.

*Quòd potentia intellectiua non sit
substantia Angeli.*

27 Hoc probauit S. Thom. generali ratione, qua
ostendit nullam substantiam creatam esse virtu-
tem, seu potentiam qua operatur. Quam rationem
tractauimus in *Physica quæst. 12. artic. 2. & qu. 2. de
anima art. 2.* Breuiter dicimus quòd ratio S. Th. du-
plici consequentia constat.

Prima est: Potentia dicitur per ordinem ad
actum: ergo oportet, quòd secundum diuersitatem
actuum sit diuersitas potentiarum, vnde commu-
niter dicitur quòd proprius actus respondet pro-
priae potentia.

Secunda consequentia. In omni re creata essen-
tia comparatur ad esse, sicut potentia ad actum, &
actus ad quem comparatur potentia operatiua est
operatio, sed intelligere, seu operatio, & esse non
sunt idem in Angelo, nec in quacumque re creata:
ergo neque potentia ad tales actus sunt idem: ergo
differt in Angelis essentia, seu substantia, & po-
tentia, seu virtus intellectiua.

In his consequentiis videtur latere fallacia, &
non efficaciter procedere. Nam prima consequentia
vt sit solida, oportet quòd procedat de potentia es-
sentialiter, & adæquatè ordinata ad actum, & de
actu adæquatè se habente ad talem potentiam. Et
sic bene probat quòd potentia quæ essentialiter
specificatur ab aliquo actu sub illa formalitate talis
potentia, & specificationis diuersificatur iuxta di-
uersitatem actuum; non tamen infert quòd non
possit in eadem entitate materialiter sumpta iden-
tificari potentia ad vnum actum, & alia potentia
ad alium, ita quòd formaliter sint diuersæ poten-
tiæ, & materialiter, sicut entitatiuè eadem entitas,
sic substantia vt formaliter se habet ad esse, erit po-
tentia formaliter distincta à seipsa, vt se habet ad
operari, sed tamen materialiter, & identicè eadem
substantia habebit vtramque formalitatem poten-
tiæ, & ad esse, & ad operari, sub diuersis respectibus,
& considerationibus. Et hinc enervatur secunda
consequentia: nam essentia est potentia ad esse per
modum potentia receptiua, quia non producit
suum esse, sed recipit ab efficiente: potentia autem
operatiua se habet ad actum suum, qui est opera-
tio, non passiua, sed actiua: non repugnat autem,
quòd eadem entitas sit passiua potentia respectu
vnius, & actiua respectu alterius, vt patet in intel-
lectu nostro, qui est potentia passiua respectu spe-
ciorum, & actiua respectu intellectiois. Et sic esse,

Ioan. à S. Thom. in 1. part. D. Th. Tomus alter.

& operatio non se habebunt vt actus adæquati,
respectu eiusdem entitatis, quæ est substantia, sed
inadæquati, sed esse adæquatè se habebit respectu
potentia passiua recipiendi esse, & operatio respec-
tu potentia operatiua agendi operationem: vna
tamen, & eadem entitas substantialis respectu
vtriusque habebit vim potentia sub diuersis re-
spectibus, passiua respectu esse, actiua respectu
operationis.

Et hoc vrgetur secundo aliquibus exemplis. 28
Nam in primis ipsa entitas accidentis dicit imme-
diatam habitudinem ad suum esse imperfectum,
quia est capax vt sit, & vt producat, & dicit im-
mediatum ordinem ad operari, quia virtus acci-
dentalis per se est immediatum principium, seu po-
tentia operandi vt quo, & immediatè est capax
existendi. Nec potest dici, quòd non est existens
per se, sed ratione substantia; & ita substantia
est quæ dicit immediatum ordinem ad esse, non
accidens. Nam contra est, quia etiam accidens
non est principalis causa operatiua, sed instrumen-
talis, & vt quo: ergo eodem modo se habet ad
esse, sicut ad operari; & sic si per eandem entita-
tem potest dicere ordinem ad esse, & ad operari,
cur principium operatiuum radicale, & vt quod, non
poterit dicere immediatum ordinem ad esse, &
ad operari, sed indiget principio quo instrumentali
ad operandum, non autem ad essendum. Et hinc
sumitur.

Secunda instantia, quia substantia per seipsam
est immediatè potentia passiua, siue ad recipien-
dum formam substantialem, siue accidentalem: er-
go etiam per se poterit esse potentia actiua. Ante-
cedens est certum: nam materia prima per se im-
mediatè est potentia receptiua formæ, & ipsa sub-
stantia est immediatè susceptiua existentia, & alio-
rum accidentium: ergo vt sit potentia passiua non
indiget aliquo superaddito. Consequentia patet,
quia imperfectior est potentia passiua, quàm acti-
ua, & substantia est perfectius ens quàm accidens:
ergo à fortiori potest esse per seipsam potentia acti-
ua, quàm accidens: Nec est conueniens quòd sub-
stantia sit per se immediatè id quod est imperfe-
ctius, nempe potentia passiua, & non possit esse
id quod est perfectius, nempe potentia actiua, quod
tamen tribuimus accidenti. Et ex hoc fit.

Tertia instantia: quia operari immediatè conue-
nit Deo per seipsum, & accidenti, quæ sunt formæ
valde distantes: cur ergo non conueniet etiam for-
mæ mediæ, quæ est substantia creata, præsertim
cum ista immediatè ordinetur ad finem, qui est
operatio, & nobiliori modo, quàm accidens.

Denique sunt aliæ obiectiones Scoti quas *cita-
tis locis* tractauimus, v.g. quia substantia est produ-
ctiua alterius substantia, quia hoc non potest im-
mediatè conuenire accidenti, cum excedat eius
vires. Similiter est causa immediata suarum passio-
num, quæ sunt accidentia emanantia à substantia.
Item est causa influxiua in ipsam virtutem, seu po-
tentiam, medià quâ dicitur operari, quia virtus ac-
cidentalitè operatur vt instrumentum, & princi-
pium quo: ergo ex influxu substantia: ergo iam ali-
quis influxus, seu operatio est immediatè à sub-
stantia sicut concursus, & influxus causæ primæ in
secundam est immediata operatio Dei. Similiter
substantia Angeli est per seipsam species intelli-
bilis respectu intellectiois suæmet essentia, spe-
cies autem actiua concurrat simul cum intellectu
ad actum intelligendi: ergo substantia Angeli est
immediatè operatiua, seu influxiua in actum in-
tellectus.

Pro intelligentia rationis D. Tho. non oportet 29
aliud

aliud fundamentum iacere, quam id quod continetur in prima propositione, quam assumit, ex qua oritur vis omnium consequentiarum, scilicet quod cum potentia dicatur ad actum, oportet quod secundum diuersitatem actuum sit diuersitas potentiarum: loquitur enim de potentia essentialiter ordinata ad actum, & de actu adaequato talis potentia: potentia enim quae dicitur ad actum est potentia, cuius tota essentia est ad actum. Si autem tota essentia est ad actum, tota entitas consistit in ordine ad ipsum actum, quia essentia rei, & entitas idem sunt, quare non possumus dicere quod potentia identificentur in aliqua entitate, & tamen secundum se dicantur essentialiter, & adaequatam specificationem respectu diuersorum actuum, quia specificatio, & essentialis ratio eorum est entitas eorum: & sic diuersificari in specificatione, & in entitate idem est. Cum autem sit duplex potentia, scilicet passiva, & actiua, utraque quidem respicit actum ut perfectionem sui, & ad illam per se ordinatur, si essentialiter, & per se dicat potentiam, ut perfectibilem à tali actu. Est enim aliqua potentia passiva, quae tamen non constituitur essentialiter per recipere actum, nec specificatur per ipsum, & est alia potentia passiva, quae per se immediate ordinatur ad actum ex essentiali ratione, v. g. materia prima est pura potentia, cuius tota essentia consistit in receptibilitate formae, & ab ipsa recipit determinationem specificam, & actuale in esse, quia potentialitas materiae per formam actuatur, & reducitur ad illam speciem actualem, & ad illud esse, cuius habet formam. Similiter substantia totalis, & subsistens per se dicit potentiam ad esse, quia dicitur substantia essentialiter ens quod per se potens est habere esse, & ipsum posse habere esse per se est ei essentialiter, licet ipsum esse actu habere sit ei contingens. Potentia ergo seu posse habere esse essentialiter illi est. Non tamen ratio intrinseca substantiae primo, & per se sumitur ex eo quod recipit accidentia sustentando illa in esse, & non praecise recipiendo actuationem ab illis. Sustentatio autem in esse supponit quod sustentans, & substantia tali formae, habeat esse perfectius illa forma, quia accidens habet esse secundum quid dependens ab esse substantiae, tanquam ab eo quod est per se. Similiter actiua potentia, alia est quae de se est in actu primo, & ordinatur ad actum secundum tanquam ad proprium actum, & specificatum sui, & haec est potentia actiua creata. Alia est potentia actiua, quae non est in actu primo, nec ordinatur, vel specificatur per se ab actu secundo, sed est ipsemet actus secundus, qui est actus purus, & talis potentia est substantialiter actiua, quia est substantialiter ipsemet actus, nec ordinatur ad illum tanquam ad aliquid distinctum à se, à quo specificetur.

Igitur utraque consequentia D. Tho. ex dictis ostenditur efficax, & certa.

30 Prima quidem, quia constat dari aliquas potentias quae immediate ordinantur ad aliquem actum, qui ex sua essentiali, & propria ratione talem ordinem dicunt: ergo oportet quod penes tales actus sibi proprios, & immediatos, & ad quos essentialiter se habent, seu à quibus specificantur, distinguantur, & diuersificentur. Quod si diuersificentur essentialiter, seu specificatiue, oportet quod etiam entitatiue, quia secundum diuersam essentiam, & speciem sumatur diuersa entitas, quia tota entitas in specie, & quidditate consistit. Vnde prima consequentia manet firma, quia si talis potentia datur, quae de se immediate, & essentialiter ex propriis dicatur ad actum, & ex ipsa actuum diuersitate formaliter, & in ratione actuandi, & immutandi po-

tentiam sumatur diuersitas potentiarum, etiam sumitur consequenter diuersitas entitatiua, quia entitas in specie, & quidditate consistit. Quod si habeat aliam entitatem in qua multiplex potentia identificetur, quae solum formaliter distincta inter se sit; talis entitas aliam speciem habebit antecedenter ad speciem talium potentiarum, & illa species entitatiua non erit primo, & per se potentia ordinata ad aliquem actum, sed habebit primo, & per se aliam speciem cui formalitates illae potentiarum quasi secundario, & accessorie adiunguntur; & de tali specie non loquimur in praesenti, nec currit ratio facta.

31 Secunda verò consequentia D. Tho. fundatur in hoc quod essentia, seu substantia per se, & immediate est potentia ad esse, tanquam ad immediatum perfectum sui, & potentia operatiua est immediate, & per se ordinata ad operationem tanquam ad perfectionem, & specificatum sui, quando ista potentia se habet in actu primo, & actus secundus se habet ut accidens illius. Quae duae propositiones manifestae sunt in substantia creata, & in operatiua creato. Nam substantia creata vel dicitur materiam, vel formam, vel substantiam completam, & subsistentem. Materia est entitatiue ipsa potentia essentialiter ordinata ad esse formale quod datur per formam, forma autem est quasi specificans ipsam materiam tanquam actus ad quem immediate, & per se ordinatur, non tanquam potentia. Rursus substantia completa, vel subsistens immediate, & per se est capax ipsius esse, seu existentiae, quia licet existentia sit praedicatum accidentale substantiae, & cuiuscumque entis creati, tamen habere potentiam, & capacitatem ad habendum esse, sine dependentia ab alio priori sustentante, sed immediate, & per se, proprium est substantiae, & discernit essentialiter, & intrinsece illam ab accidente. Et sic substantia intrinsece constituitur per potentiam, & ordinem ad esse, ut patet ex eius definitione, quia substantia est ens per se existens, id est postulans per se existere. Et licet substantia per eandem formam sit capax existentiae, & principium operationis, tamen prius, & immediatius ordinatur ad esse, quam ad operari, quia prius est existere, quam operari, & ad substantiam primo, & per se pertinet ordo ad esse, quia substantia habet esse per se, ut constat ex sua definitione, quod est ens per se, & deinde dicitur rationem substantis, seu sustentatiui accidentium; & ideo per se primo habet esse potentiam receptiuam; & in ratione recipiendi prius, & immediatius se habet ad esse, quam ad accidentia, quae supponunt esse, quia prius est subsistere in se, seu existere per se, quam subistere aliis. Sed tamen tam subsistere, quam subistere, facit substantia, non radicaliter, sed formaliter, & immediate, non mediante alia entitate, seu principio, quia esse immediate conuenit naturae, seu formae, quia ipsa est principium quo aliquid est, & ideo oportet quod ipsa substantia seu natura immediate recipiat ipsum esse, & dicat ordinem ad illud, quia est primus actus, quem potest recipere forma, seu natura, & cum sit substantia, respicit illud per se, & immediate sine dependentia ab alio sustentante.

32 Ex his autem propositionibus sic explicatis colligitur manifeste secunda consequentia D. Thom. videlicet quod actus ad quem per se immediate comparatur substantia, est esse, ad quod se habet ut potentia passiva, si est substantia creata, quia substantia in hoc discernitur ab accidente, quia est primum ens, & per se existens, non sustentatum ab alio, sed in se recipiens esse immediate. At verò operatio

ratio cum sit in rebus creatis distinctus actus ab ipso esse, & accidens secutum post esse, oportet quod potentia substantiae, ut substantia est, non sit immediate ad ipsum operari, eo quod in quantum substantia ordinatur ad actum, qui sit esse, quia solum per ordinem ad ipsum constituitur subsistens, & subsistens. Igitur actus, qui est operari, non pertinet ad formalem, & essentialem rationem substantiae, ut substantia est, quia si in ratione substantiae constituitur primum ens per ordinem ad esse, quidquid non pertinet ad esse, sed est actus distinctus ab esse, non pertinet ad constituendam substantiam in formali ratione substantiae, sed supponit illam constitutam, quia iam supponit esse, & ordinem ad esse, in quo perficitur ratio entis, ut substantis, & subsistentis; ut statim in *solutione argumentorum* amplius declarabitur. Ergo cum operatio, & esse sint actus diversi in rebus creatis; & unus, nempe esse, precedat alterum, scilicet operari, oportet quod ea quae immediate ordinantur ad tales actus, & per modum potentiae se habent ad illos, etiam distinguantur inter se, & sic cum substantia essentialiter in ratione substantiae sit solum ordinata ad esse quod per se recipit, non vero specificetur primo, & per se ab operari, quia iam per ipsum esse supponitur in ratione substantiae specificata, & constituta, consequitur quod principium quod per se primo specificatur ab operatione, sit aliud a substantia. Hoc autem principium datur, quia operatio est actus distinctus ab esse, & sic distinctam potentiam specificare potest: potentiae enim ex diversitate actuum diversificantur.

33 Ad rationes dubitandi Respondetur, ad primam dicimus quod in prima consequentia loquitur D. Thom. de actu adaequato ad quem per se ordinatur aliqua potentia: ex talium enim actuum diversitate ipsae potentiae diversificantur. Non autem stare potest quod diversae potentiae habentes diversos actus adaequatos, a quibus specificantur, & distinguuntur, sint una, & eadem entitas, nisi supponatur illa entitas, in qua uniantur, habere aliam speciem priorem, non desumptam ab istis actibus potentiarum: repugnat autem quod primo, & per se sumantur species, & distinctiva potentiarum ab actibus seu obiectis specificantibus, & illae inter se non distinguantur entitative, si aliquam speciem priorem non supponunt in qua uniantur; si vero eam supponunt, non primo, & per se specificantur, & distinguuntur per ordinem ad actus, & consequenter non tanquam potentiae perfectibiles, & constituibiles per ordinem ad illos; cum tamen constet substantiam essentialiter dici ens per se, & in ordine ad esse, & operativum, quod est actus primus, specificari per ordinem ad operationem, non autem dari aliquid anterius in ordine ad quod sumatur species illius entitatis, quae esset simul substantia, & potentia operativa.

34 Ad instantiam vero contra secundam consequentiam Resp. non posse passivam, & activam potentiam inadaequate se habere ad constituendam substantiam, & potentiam operativam, sicut intellectus passivus se habet respectu specierum, & activus respectu intellectionis. Et disparitas est, quia actus isti, scilicet esse, & operari se habent ex propria ratione tanquam adaequari in specificando: uterque enim est actus ultimus in sua linea, & completus, nec in specificando potentiam dependet ab altero; constat enim quod tota specificatio substantiae completur, & sistit in ipso esse ante operari, siquidem cum operatur, vel quando operationem respicit, iam speciem constitutam habet, tota siquidem ratio substantiae consistit in hoc quod sit ens per se,

Ioan. & S. Thom. in 1. part. D. Th. Tomus alter,

& perat existentiam per se; & sic intra limites ipsius esse, & in ordine ad esse species, ratioque substantiae continetur: nec pro specificatione sua ab aliquo extra se dependet, aut ab illo specificatur, quia substantia est ad se, & per se, & in hoc sistit in linea, & genere substantiae, imò cum operatio talis, vel talis speciei in creaturis procedat a tali, vel tali principio, cuius est actio, totam speciem, & essentialiam illius principij supponit constitutam, ut ab ea exeat. Quare ille alius actus qui est operari iam non potest specificare substantiam in ratione substantiae, quia iam illa specificatio non pertineret ad rationem entis ad se, & per se, sed habentis se ad alterum, & dependentis in essendo, quale est accidens. Vnde non potest actus operandi etiam inadaequate concurrere, & se habere in ordine ad specificandum substantiam intra lineam substantiae, & ita si specificat, aliud genus entis specificare debet, scilicet potentiam quae sit accidens, eo quod potentia quae est substantia, & se habet ad esse, non est specificabilis, in quantum substantia, ab eo quod est extra se, & non pertinet ad esse. At vero in intellectu esse receptum specierum, & activum intellectionis possunt esse inadaequatae rationes eiusdem potentiae, quia illae duae rationes ordinantur ultimatè ad unum actum qui est intelligere: receptio enim specierum est receptio alicuius quod se habet ut actus primus, & ordinatur ad intelligere, ut ad actum ultimum, & secundum. Vnde cum ibi unum sit propter aliud, & ordinetur ad aliud, & ipsa potentia intellectiva cum non sit substantia, sed virtus operativa, bene stat quod tam in ratione passivae quam activae specificetur adaequate, quia ibi passivum ordinatur ad activum, species enim intelligibilis est representatio obiecti, quae nisi actu intellectum, non potest procedere ad intelligendum, & ideo potentia intellectiva debet specificari ab obiecto sub duplici ordine inadaequato, requisito tamen ad intelligendum, & in ipso ordine intelligibili, scilicet quod patitur intelligibiliter, & representatione ab obiecto, & per actum secundum tendat ad illud, eique uniat; & sic cum una ex his rationibus per se ordinetur ad aliam, ex utraque resultat adaequata ratio talis potentiae.

35 Ex quo obiter colligitur ratio quare nulla substantia creata possit ita esse eminens, & excellens quod in unica ratione uniat esse substantiam, & esse operativam, eo quod non potest in aliqua creatura operatio, & existentia esse idem, sed esse, & operari differunt, ut *supra* ostensum est, ita quod operatio sit actus secundus supponens constitutam speciem, & quidditatè operantis. Substantia autem creata, hoc ipso quod creata est, dicit potentiam ad esse, quia eius ratio essentialis, & intrinseca consistit in hoc quod sit ens per se, seu cui debetur esse per se, & potest esse per se: ergo talis potentia, seu tale posse ut pertinet ad lineam substantiae, non potest ordinari essentialiter, nisi tantum ad esse, non ad operari: nam substantia non sumit suam essentialiam, & rationem per ordinem ad aliud extra se, sed ad se, & ad suum esse, quia sistit in hoc quod est ens per se, & hoc est ei essentialis, & proprium pro ut distinguitur ab accidente: Ergo ubicumque operatio fuerit extra substantiam, & extra ipsum esse substantiae, non potest substantia esse potentia ordinata, & specificata per ipsum operari, sed per ipsum esse, ut distinguitur ab operari ergo non potest per se ipsum esse potentia operativa, immediate, quia operativa potentia, seu id quod immediate, & formaliter operatur, per se ordinatur ad actum, qui est operatio, non ad actum qui est esse: potentia autem substantiae in creatis ordinatur ad esse,

Quod 2 quod

quod non est operari. Igitur si non potest dari creatura ita eminens quod in se uniat ipsum esse, & operari, ita non potest dari substantia ita eminens quod sit substantia, & potentia immediate operativa. An vero possit substantia respicere substantiale esse ut specificatum, operationem vero secundario, & mediate, non vero per modum specificativi, dicemus *solutione ad 2.*

36 Ad secundam instantiam, quæ aliquibus exemplis constat, Respond. Ad primum de accidente, quod dicit immediatum ordinem ad esse, & simul potest dicere ad operari, diximus *in cit. loco ex qu. 12. Physic.* quod accidens non est per se principium essendi, nec immediatum, sed essendi secundum quid, & in alio. Etenim accidens habet esse, non recipiendo, nec sustentando illud, sed ut sustentatum ab alio à quo dependet, scilicet à substantia, quæ per se existit, & per se dicit immediatum ordinem ad esse, quia ab alio sustentante non dependet, sed est primum, & per se principium existendi, non solum ut radicaliter existens, sed formaliter, & per se primum. Ad replicam vero contra hanc solutionem, quod etiam accidens non est principaliter, & primum operans, sed quasi instrumentaliter, & ut virtus substantiæ, distingo, accidens non est principaliter operans ut quod, & ut principium radicale operandi, concedo; ut virtus, & principium immediate specificabile ab operatione, nego. Et in hoc est disparitas inter operari, & esse, quod potentia specificabilis ab esse, & primum, & per se ordinata ad ipsum debet esse id quod principaliter, & per se existit, & hæc est substantia; potentia autem specificabilis ab operari, & quæ per se primum ad illud ordinatur, debet esse accidens, seu principium quo operandi, non principium radicale, & operativum ut quod. Et hoc ideo, quia primum, & per se, seu proxime, & immediate habere esse pertinet ad fundamentum, & primam rationem entis, quæ est substantia, immediate autem, & proxime operari pertinet ad ultimum quod est virtus à qua immediate exit actio. Nam esse est primum quod requiritur ut res sit extra nihil, & id quod primum, & per se, & ut sustentans cætera habet hoc esse, est substantia; & ideo esse pertinet formaliter, & non solum radicaliter ad substantiam: at vero operari non pertinet ad id quod est primum in ente, sed ad ultimum, quia operari sequitur esse; & ideo ad substantiam operari solum pertinet radicaliter, formaliter vero pertinet non ad id quod radix, & fundamentum, & substans est in essendo, sed ad id quod ultimum, seu consecutum, & secundarium, quia sicut operatio sequitur esse, ita operativum sequitur ad entitativum, & potentia operandi ad potentiam essendi, quod est pertinere formaliter, & proxime ad id quod est virtus, & potentia operandi ut quo, radicaliter vero ad id quod se habet ut quod, & in ratione existendi fundamentum, & substantia est.

37 Ad secundum exemplum Resp. ex dictis, negando consequentiam: nam licet potentia passiva, in quantum talis, imperfectior videatur quam activa, si eodem modo comparentur ad actum, tamen passiva potentia, quæ se habet in ordine ad esse tali modo, id est primum, & per se sine dependentia ab alio priori sustentare, sed per modum subsistentis, & existentis per se, perfectius quid est, quam potentia activa immediate, & proxime operans, & specificabilis ab operatione. Et quia pertinet ad substantiam immediate & per se comparari, & specificari ab ipso esse, vel ab actu essendi, non autem specificari per ordinem ad aliquid extra se, quia est ens in se, & per se, ideo potentia passiva sic ordinata ad esse, immediate, & proxime convenit substantiæ,

non autem proxime ordinari, & specificari ab operatione, quia hoc est specificari ab alio extra se, id est ab accidente, quod est extra genus substantiæ. Ipsa ergo substantia non specificatur ab alio extra se, seu extra suam quidditatem, sed substantia completa sumit essentialem rationem substantiæ per ordinem ad esse, cuius est capax, & immediate recipit illud; materia per ordinem ad formam, quæ est principium dandi esse formale. Et sic est immediate potentia passiva, quia ordinatur ad habendum esse in se, quod immediate recipitur in substantia, & ente. Ponere autem quod substantia specificetur ab ipso esse, seu essentialem rationem dicat ad esse per modum potentiæ ad existendum per se: dicat autem ordinem ad operari sine aliqua specificatione ab ipso, sed tanquam ad aliquid mediatum, & secundarium, est dicere quod actus operandi etiam in creaturis in quibus est distinctus ab esse, non sit sufficiens specificare potentiam, quæ ad illum comparatur, & cuius est proprius, & per se actus, quod est negare potestias specificari ab actibus, cum tamen videamus, ex diversitate operationum distingui principia operativa, & posse separari unum ab alio, sicut principium audiendi à principio videndi, quia non solum actus videndi, sed potentia ad videndum deest cæco, & non deest illi substantia, ut latius persecuti sumus *in lib. de anima q. 2. art. 2.*

Ad tertium exemplum dicimus, quod Deo convenit per se ipsum operari tali operatione, quæ non distinguitur ab eius esse, neque ab illa tanquam ab aliquo distincto potentia specificari potest: accidenti autem convenit operari immediate operationem distinctam à se tanquam principio immediate specificabili, & dependenti à tali operatione, ut distincta à se, quod maxime distat à Deo: substantia autem creata non potest pervenire ad hoc ut habeat operationem indistinctam à se, sicut Deus, nec tantam imperfectionem habet quod stante operatione distincta, specificetur ab illa, & essentialiter ordinetur ad illam, quia hoc est extra lineam substantiæ, quæ solum est ad se, & per se existens, non ab alio, & ad aliud specificabilis. Unde debet esse media inter Deum, & accidens, ut operetur per aliquid distinctum à se.

Ad ultimum argumentum, ex instantiis Scoti diximus *citatis locis in Physic. q. 12. & in lib. de anima q. 2.* Substantia enim dicitur productiva alterius mediante operatione accidentali à se distincta, licet effectus productus sit substantia. Sicut autem non repugnat quod mediante actione accidentali producat substantia, ita non repugnat quod mediante potentia accidentali producat, quia tam potentia, quam operatio operantur in virtute substantiæ, quæ virtus non est aliquid superadditum ipsi potentiæ, sed ipsamet potentia ut radicata in substantia ab eaque dependens, & dimanans: sic enim dicitur substantia agere per illam, tanquam per aliquid sui: similiter propriæ passionis dicuntur emanare à substantia, non per propriam & veram actionem procedentem ab ipsa essentia, sed procedentem ab ipso agente, quæ primum, & per se terminatur ad essentiam, & ratione connexionis quam habet cum passionibus, transit ipsa actio ab essentia ad passionem, & transitus ille ut fundatus in ipsa connexionione essentiæ dicitur emanatio ab essentia, ut diximus, *citatis locis*, præsertim *in q. 2. de anima*. Item ipsa substantia non habet influxum in suam potentiam, & virtutem distinctam ab influxu, quo ipsamet virtus influat in effectum, sed unicus, & idem influxus pro indiviso exit à substantia ut à principio quod, radicaliter solum operativus,

tiuo, & à principio quo, vt operatiuo proximo, non quia prius exeat influxus à substantia, & recipiatur in potentia, & ab illa exeat in effectum: talis enim modus influendi proprius est vnus causæ superioris in aliam inferiorem tanquam in causam, & virtutem distinctam, non autem principij radicaliter operatiui in suammet virtutem, quia si necesse esset virtutem qua aliquid operatur, recipere aliquid actualitatis à suo principio radicali, quod esset impossibile, cum principium radicale non operetur indistinctè à principio quo operandi, sicut nec substantia existit independentè à principio quo essendi, quod est forma: sed solum ille influxus, qui pro indiuiso procedit à principio radicali, & proximo dicitur procedere secundum diuersos respectus, & dependentias à principio quo, & quod in emanando. De quo latè tractauimus q. 12. *physic. a. 3.*

40 Ad id verò quod vltimo loco ponitur de substantia Angeli, quæ se habet vt species intelligibilis respectu sui, & influit in cognitionem qua Angelus se cognoscit, dicemus *art. sequenti*: Ille enim influxus speciei est in genere repræsentatiuo & per modum obiecti quod non influit in actum, nisi influxu participato à potentia, & mediante ipsa tanquam proximo influente, quādo species est substantia, & nō accidens superueniens potentia. Dato enim quod species influat in genere causæ effectiue in actū (quod non est omnino certū) non tamen est necesse quod species semper influat effectiue vt principium proximum effectiuum, sed si sit accidens, poterit maximè influere superaddendo potentia determinationem influxiuam: si verò sit substantia, influet, & determinabit radicaliter, mediante tamen potentia vt proximo influxiuo, quatenus illa potentia emanat à substantia, non solum tanquam à principio radicali intelligendi, sed etiam vt ab obiecto intelligibili, à quo emanat determinata obiectiue, & non solum subiectiue. De quo plura dicemus *artic. seq.*

ARTICVLVS II.

Vtrum Angelus indigeat specie intelligibili superaddita ad intelligendum se.

Supponit hæc difficultas duo, quæ nos in *libris de anima questione 6. art. 2. & preced. tomo disp. 13. artic. 1. & sequentibus* latè tractauimus.

1 Alterum est in omni potentia cognoscitiua, præter ipsam potentiam quæ est principium vitale indifferens ad hanc, vel illam cognitionem, ad hoc, vel illud obiectum (si quidem plura potest cognoscere) & præter virtutem determinantem illam potentiam quasi effectiue, seu in genere elicentis, requiri aliud determinatiuum per modum repræsentantis, seu gerentis vicem obiecti, & hoc vocatur species, id est, forma repræsentans, & obiectum ipsum sistens, atque vniens potentia. Quod licet prædictis locis ostensum sit, tamen quantum attinet ad præsens, commodius attingetur *seq. art.* agendo de speciebus requisitis ad cognoscenda alia obiecta, ibique difficultates aliquorum authorum expediemus.

2 Secundum, quod supponimus est, quod ad rationem speciei intentionalis valde materialiter se habet quod eius entitas sit qualitas, vel substantia: munus enim speciei in quo formaliter consistit, in quacumque entitate existis exerceri potest: formale enim munus speciei intelligibilis non consistit in eo quod actuè intellectum inhaerendo, vel entitatiue informando,

Ioan. à S. Thom. in 1. part. D. 7b. Tom. alter.

sicut alia accidentia, quæ realiter informant subiectum sistendo in ipsa entitatiua informatione, vel compositione alicuius tertij, sed in hoc quod est reddere intellectum coniunctum obiecto, seu determinatum ab illo, nec tamen cum entitate componentem aliquam naturam, sed intellectus ipse sit ipsummet obiectum non ex obiecto, & intellectu constituitur aliquid tertium, vel aliqua natura, quia hæc informatio, & actuatio obiecti non ordinatur ad componendam aliquam naturam, sed ad apprehendendum, & trahendum ad se id quod est ad extra: hæc enim est vis, & propria ratio entis cognoscitui, quod res ad extra manentes, etiam vt alteras, & entitatiue diuersas, & immutatas, potest sibi vnire, & coniungere, & talis coniunctio obiecti, quæ entitatem obiecti non immutat, nec tertiam entitatem, seu naturam constituit cum intellectu cui coniungitur, sed solum remanet intellectus repræsentatiue, & intentionaliter ipsummet obiectum, quia ipsum in se intimè apprehendit, & attingit, eique assimilatur, hoc est munus speciei formaliter loquendo, id est, obiectum potentia vnire, non entitatiue, nec entitatem aliquam, seu naturam componendo cum illa, sed repræsentatiue, seu intelligibiliter, ita quod totum quod est in se res aliqua entitatiue, totum hoc sit ipse intellectus, & sit in intellectu intelligibiliter, & in esse obiectiuo, seu intentionali, & repræsentatiuo. Quod totum non explicatur melius, quam per hoc quod fiat alterum à se, non entitatiue, nec per commutationem, & conuersionem in illud, sed per quandam tractionem ad se, quæ dicitur repræsentatio, & intelligibilis transformatio, vt latius explicauimus *tomo preced. disp. 16. art. 1.*

Ad hoc autem per accidens se habet, quod ista entitas per quam hoc munus repræsentationis, & vnionis intelligibilis exercetur in intellectu, sit in se qualitas, vel substantia, quia cum coniunctio non ordinetur ad constituendam aliquam naturam, vel compositum entitatiuum, sed vt transformetur obiectum intelligibiliter in intellectu, sicut in se est entitatiue, idè non conducit ad hoc formaliter quod sit ista species in sua entitate substantia, vel accidens, sed solum quod intelligibiliter sit ipsummet obiectum, quia ratio substantia, vel accidentis sumitur per ordinem ad esse, & ad id quod entitatiuum est, intelligibilitas autem est aliquid consecutum ad ipsum ens; idè illud munus quod præstat ab ipsa specie in linea, & ordine intelligibili, solum præsuppositiue dicit ens, seu id quod entitatiuum est, formaliter autem id quod intelligibilitatis, quod est consecutum ad ens: solum ergo materialiter, & præsuppositiue se habet ad munus, & officium speciei hoc quod est esse substantiam, vel qualitatem, solumque requiritur, & reperitur in specie, in quantum necessarium est vt munus illud realiter exerceatur: quia enim realiter repræsentatur, & hoc esse nō potest, nisi in aliqua entitate, & omnis entitas, substantia, vel accidens est; idè præsuppositiue, & materialiter species aliquid istorum esse debet: formaliter autem, quia non exercetur nisi per intelligibilitatem, & sub linea, & ordine intelligibili, quæ intelligibilitas, & ordo est aliquid consecutum ad ens; idè formaliter non exercetur per substantiam, vel qualitatem, sed solum materialiter præsupponitur quod substantia vel qualitas sit vt intelligibiliter repræsentet in re. Quare cum totus ordo, & linea intelligibilis fundetur in spiritualitate, & immaterialitate, & per hoc species

O o 3 ipsa

ipsa munus cognoscibilitatis exerceat, quia immaterialis, & spiritualizata redditur, ideo si substantia aliqua per seipsam immaterialis, & spiritualis est, habet sufficientem conditionem ut munus speciei per se exercere possit, uniendo intelligibiliter, & non solum entitatiue seipsam potentia.

Varia sententia?

His suppositis circa difficultatem præsentem in qua inquirimus an substantia Angeli respectu cognitionis sui, habeat rationem speciei, omnia opinione eorum qui negant uniuersaliter requiri speciem ad cognitionem cuiuscunque rei, & consequenter id negant pro cognitione substantiæ Angeli, quos supra retulimus: inter eos qui communem sententiam sequuntur de speciebus, quod requirantur ad cognitionem, triplex principalis est sententia.

Prima affirmat substantiam Angeli deferuire loco speciei ad cognitionem sui. Est sententia D. Thomæ qu. 56. sequenti art. 1. & quæst. 8. de verit. artic. 6. & 2. contra Gentil. cap. 98. Quem sequuntur communiter eius discipuli super istum locum, & Capreol. in 2. distinct. 3. quæst. 2. art. 1. Ferrar. loco citat. contra Gentil. Suarez lib. 2. de Angelis cap. 4. Arrubal. hic disp. 166. c. 1. Carmelitani Salmant. disp. 6. de Angelis dub. 1. Scotus etiam in 2. distinct. 3. quæst. 10. & eius schola, tenet quod Angelus ad cognitionem sui intuitiuam non indiget specie superaddita, quia sibi sufficienter existit præsens. Sed tamen admittit posse Angelum seipsum cognoscere abstractiue & respectu huius cognitionis dicit requirere speciem superadditam per quam abstrahat à præsentia.

Alia sententia in alio extremo docet Angelum ad seipsum cognoscendum indigere specie superaddita, sicut ad cognoscenda alia obiecta. Quæ opinio tribuitur Alensi, Marfilio, & Henrico, de quibus videri potest Suar. citatus num. 2. & 3.

Tertia sententia est non ipsam substantiam Angeli, sed eius intellectum gerere munus speciei ad cognoscendum ipsam substantiam. Quæ sententia solet tribui Caietan. quæst. 54. art. 3. ad 4. sed immerito, ut postea videbimus. Sed tamen eam tenet Vasquez disputat. 204. cap. 2. & probabiliter docet idem posse dici respectu cuiuscunque obiecti extrinseci, eo quod putat non posse efficaciter probari quod dentur species in intellectu Angeli, eumque sequitur P. Alarcon tract. 6. de Angelis disput. 3. cap. 1. num. 10. cum hac tamen limitatione, quod vis representatiua representandi quodlibet obiectum, sit in ipsa substantia, & intellectu Angeli simul, cum subordinatione ad Deum autorem naturæ excitantem in quolibet primo negotio, & cum subordinatione etiam ad ipsam voluntatem Angeli. Quod tamen dicit non intelligi de formis supernaturalibus, quia ad has intuitiue cognoscendas dicit requiri supernaturalem speciem. Iste tamen author procedit ex principiis longè diuersis, & à natura, & ratione propria speciei aberrantibus, ut notauimus præcedenti tomo disp. 13. artic. 1. quia non ponit speciem propter aliquid supplendum ex parte obiecti, seu ad unionem intelligibilem illius faciendam cum intellectu, sed solum ad determinandam indifferentiam potentia, sicut fit per lumen vel habitum;

& ideo, lumen gloriæ solent vocare speciem isti authores, contra quos ibi egimus.

Resolutio.

Sit ergo nostra conclusio: substantia Angeli 6 habet rationem formæ seu speciei intelligibilis, quia intellectus redditur intelligibiliter perfectus, & actuatus ab ipsa substantia, non solum ut subiecto radicali sui, sed ut obiecto intelligibili, & determinante intellectum ad intelligendum se. Et per eandem substantiam tanquam per speciem cognoscit Angelus accidentia sua naturalia, sibi que debita, supernaturalia autem non nisi per species superadditas.

Prima pars huius conclusionis, quæ principalis 7 est, sumitur ex D. Th. citatis locis, ubi eam expressè affirmat.

Et vnica ratio, & fundamentum est, quia in substantia Angeli inueniuntur ea quæ requiruntur ad munus speciei intelligibilis respectu cognitionis sui: ergo seipsum per suammet substantiam cognoscit tanquam per speciem. Consequenter manifesta, quia species ad hoc ponitur, ut loco obiecti subrogetur, reddendo illud intelligibile in actu, & representatum, seu præsens intellectui: ergo si ipsa substantia, & entitas obiecti totum hoc facere potest sine specie, seu qualitate, aut vi superaddita, frustra talem speciem adhibemus, eiusque representationem subrogamus loco obiecti, cum id faciat per seipsum: hoc enim quod est subrogari pro altero, solum fit casu, quo illud pro quo subrogatur per seipsum non potest, aut non æquè benè potest id facere, sicut substitutum, seu vicarium suum. Aut si ponitur species superaddita, cum obiectum id possit facere per seipsum, non est ex necessitate talis speciei, sed sine ipsa fieri posset tota illa actuatio, & informatio obiecti per ipsam substantiam immediatè. Quod si fieri potest, eadem difficultas est: nam hoc possibili posito, difficultates quæ modo militant, & mouent oppositos authores, etiam in illo casu mouebunt, siquidem hoc ipso quod potest se habere, ut species, quid prohibet quod de facto sic fiat, & tunc difficultates veniunt soluendæ.

Anteced. autem prob. quia inter condiciones requisitas ad speciem intelligibilem aliquæ sunt quæ manifestè conueniunt substantiæ Angeli in ordine ad suum intellectum, aliæ de quibus difficultas est. Conueniunt quidem substantiæ Angeli tres, scilicet esse intelligibilem in actu per se, non per aliquid superadditum, quia est per se immaterialis, & spiritualis, species autem intelligibilis non aliter reddit obiectum intelligibile in actu, quam per hoc quod est deputata à materiali modo, & conditione, in representando, & consequenter in essendo; quia tota essentia speciei representatio est; & sic spiritualizatur.

Secunda conditio sequitur ex hac, scilicet quod sit talis spiritualis substantia proportionata suo intellectui, quia est proprium specificatum illius, & ita spiritualis in actu, sicut ipsemet intellectus, quia ab illa emanat: ergo est illi omnino proportionata.

Tertia conditio, quod sit illi intimè præsens, & vnita, etiā manifestè constat, cum ipsa substantia sit immediata radix à qua emanat intellectus, & ipse intellectus illi inhæreat, & consequenter non

non minus intimè sibi sunt præsentia, & vnita quàm species superaddita intellectui, imò magis, quia licèt species superueniens intellectui, inhæreat illi, tamen non emanat ab intellectu vt à radice, sicut propriæ passiones ab essentia; & ita non habent species superuenientes tantam connexionem cum intellectu, & consequenter nec tam intimam vnionem, & præsentiam, sicut intellectus cum substantia sua spirituali, à qua emanat. Vnde pro hac parte non deest vnio, & præsentia sufficiens inter substantiam, & intellectum, vt species eius esse possit. Istæ tres conditiones sunt bene notæ.

8 Ceterum ex alia parte restant aliæ tres conditiones requisitæ ad hoc vt aliquid habeat munus speciei intelligibilis, de quibus difficultas est quomodo ipsi substantiæ Angeli conueniant.

Prima est, quia licèt substantia Angeli sit præsens, & vnita ipsi intellectui Angeli subiectiuè, non tamen obiectiuè, id est, habet se vt subiectum inhæSIONIS ipsius intellectus; & sic recipit illum in se, eique manet vnita, quia sustentat illum, non tamen ex vi huius vnionis præsentatur, & vnitur illi obiectiuè, id est tanquam obiectum determinans, sed vt subiectum sustentans; sicut etiam anima nostra in statu quo est in corpore habet intellectum sibi intimè vnitum vt subiecto à quo emanat, & cui inhæret, non tamen est illi præsens vt obiectum, quia pro illo statu non cognoscitur immediatè in se, sed ex sensibilibus.

Secunda conditio in qua est difficultas, est quia substantia Angeli non potest actuare reali, & vera informatione, licèt intentionali ipsum intellectum: cum enim intellectus sit potentia accidentalis, non apparet, in quo genere causæ possit ipsam actuare, quia non potest substantia in genere causæ formalis actuare intellectum, cum substantia non sit forma habilis ad actuandum, & informandum accidens: nec enim potentia passiva accidentis potest suscipere formam substantialem, nec in genere causæ efficientis, quia substantia non influit effectiuè in intellectum, vt sit eius species intentionalis, cum esse speciem non sit effectiuus influxus in intellectum: nec in genere causæ materialis, quia hoc pertinet ad rationem subiecti sustentantis intellectum, non obiecti determinantis specificationem eius. Non ergo apparet in quo genere causæ substantia Angeli actuet, & informet intellectum.

Tertia conditio est, quia substantia Angeli non potest immediatè, & proximè esse influxiua in actum intellectionis sui: species autem influit effectiuè in actum qui ab ea procedit secundum certiore sententiam, & quæ videtur esse D. Tho. in hac 1. p. q. 56. art. 1. & quest. 85. art. 2. & q. 2. de verit. art. 6. vbi specie comparat calori in ordine ad actum cognitionis. Ergo substantiæ non competit munus, & ratio speciei intelligibilis, licèt competat esse radicale principium operandi, sed non proximum, sicut est species. Et iterum species subordinatur potentiæ in ratione determinatiui, quia potentia vniuersalior est; substantia autem non subordinatur intellectui suo, sed intellectus illi, vt suæ radici, & principio.

Accumulatur alia difficultas, quia si semel substantia Angeli potest esse species sui intellectus, cum non inhæreat illi, non apparet cur non possit substantia alterius Angeli coniungi, & præsentari intellectui alterius; & sic sine specie informantem ipsum intelligere, quia nullum huius rei impedimentum afferri potest, & non videtur maior vnio, aut præsentia requiri, quàm quæ sit per

Ioan. à S. Thom. in 1. part. D. Th. Tomus alter.

intimam assistentiam, & propinquitatem obiecti spiritualis cum potentia. Et tandem, quia si substantia Angeli seipsa est intelligibilis, & spiritualis in actu, cur non poterit seipsa terminare intellectionem, & esse loco speciei expressæ? nec enim maior immaterialitas, aut intelligibilitas actualior requiritur pro specie expressa, quàm pro impressa.

Nihilominus istæ conditiones etiam non desunt substantiæ Angeli, vt intelligibili, sed eas habet, licèt non eo modo quo species, quæ est accidens, sed altiori. Itaque substantia spiritualis non solum subiectiuè, sed obiectiuè se habet ad intellectum, & in quantum subiectiuè, sic sustentat, & recipit intellectum entitatiuè, quia intellectus illi inhæret, in quantum verò obiectiuè, sic comparatur ad intellectum, vt actus, & determinans illum intelligibiliter, ibique non operatur vt substantia, sed vt intelligibile determinans, cum alia sit vnio, & coniunctio in ratione entis, alia in ratione intelligibilis, & secundum primam concurrat substantia per modum sustentantis, & subiecti, secundum verò alteram per modum obiecti specificantis, & determinantis obiectiuè ad intelligendum. Vnde S. Tho. qu. 8. de verit. art. 6. ad 2. dicit, quod *Essentia Angeli quamuis non possit comparari ad intellectum eius, vt actus ad potentiam in essendo, comparatur tamen ad ipsam vt actus ad potentiam in intelligendo.* Et solut. ad 6. inquit, quod *Essentia Angeli est in intellectu eius, sicut intelligibile in intelligente, intellectus autem in essentia sicut potentia in substantia.*

Sed quia difficilè intelligitur quomodo ista actuario fiat à substantia ipsa, quasi superueniente, & reflectente super intellectum, ita vt prius intelligatur à substantia Angeli entitatiuè considerata emanare intellectus quasi proprietas eius, deinde verò intellectu sic considerato in potentia, & adhuc informi, sicut ei infunduntur species aliarum rerum, ita ei substantia ipsa se superinfundat, seu actuet illum alia vnione quam habebat ex vi entitatis, vt sustentantis, & recipientis intellectum sibi inhærentem: hoc enim difficilè intelligitur quod fiat à substantia ipsa secundum suam intelligibilitatem præcisè, & non secundum realem entitatem, cum munus speciei, & intelligibilitatis non sepeuatur à realitate, nec possit intelligi realis vnio, etiam intelligibilis, quin exerceatur secundum aliquam realem entitatem saltem præsuppositiuè; realis autem entitas substantiæ, vt intelligibiliter supaueretur intellectui iam existenti, & sibi inhærenti, non apparet quo genere causæ vnietur illi, quia in genere causæ materialis vnietur sibi intellectum entitatiuè, non ei vnietur intentionaliter & obiectiuè, quia in quantum obiectum, non sustentat in esse, sed vt subiectum: in genere autem causæ formalis non apparet quomodo possit substantia realiter actuare, & informare ipsum intellectum, qui est accidens sibi inhærens. Dicere autem quod sufficit assistentia, & præsentia substantiæ non assignando in quo genere causæ talis substantia coniungatur, & determinet intellectum, est nihil dicere, quia id quod se habet vt species, non solum per extrinsecam assistentiam, sed per intrinsecam vnionem debet actuare & determinare potentiam: intrinseca autem vnio, & determinatio in aliquo genere causæ esse debet; & sic currunt difficultates positæ, quæ non euacuantur dicendo, quod substantia Angeli intime assistit, & præsens est, non autem explicando quomodo præsens sit.

O o 4 Propter

Propter hoc videtur nihil subtilissime attigisse Caietanus modum huius actuationis, dum *super quest. 56. sequentem art. 1.* proponens hanc eandem difficultatem, quomodo possit substantia Angeli informare intellectum realiter in esse intelligibili, respondet quod substantia Angeli informat intelligibiliter, intellectum, non per inhætionem, nec per informationem, sed per identitatem. Et cum vrgetur hoc amplius, quia intellectus est qualitas distincta realiter à substantia Angeli: ergo non identificantur, nec per identitatem coniungi possunt. Respondet, quod identificatur intelligibiliter cum ipsa substantia intelligente, seu cum ipso radicali principio intelligendi, quatenus ab illa substantia fuit vis intellectiva non indigens respectu sui speciei superueniente, sed ab ipsamet substantia obiectivè determinata. Itaque vno verbo substantia Angeli ut obiectum, & ut obiectivè intelligibilis informat per identitatem ipsum intellectum radicalem, id est, ipsamet substantiam, ut est radix, & principium intellectus, non autem informat ipsam potentiam intellectivam in se, sed ex tali identitate substantiæ in ratione obiecti intelligibilis, & subiecti intellectualis effluit potentia intellectiva, ut virtus intelligendi à subiecto, & ut determinata intentionaliter ab obiecto, quod est ipsamet substantia; & sic non indiget ad determinationem erga obiectum alia informatione ipsius substantiæ superaddita intellectui, nec alia specie accidentali superaddita, quia iam ipsa potentia intellectiva emanat à suaradice, & principio, ut determinata, & completa ad seipsam intelligendum. Est ergo considerandum quod substantia Angeli, quia immaterialis, & spiritualis est, per seipsam est actu intelligibilis, & intellectiva, & esse intelligibilem pertinet ad principium obiectivum intelligendi, esse autem intellectivum pertinet ad principium subiectivum, à quo egreditur operatio intelligendi ut à principio radicali. Et sic cum ipsa substantia sit radicaliter suus intellectus, identificantur in intellectu radicali, qui est ipsamet substantia Angeli duæ illæ rationes seu formalitates, & obiecti intelligibilis, & subiecti intelligentis, unde cum in vna radice intellectus istæ duæ rationes concurrant per identitatem, scilicet ratio obiectiva, & subiectiva, intelligibilis, & intellectiva, quando à tali radice intellectuali emanat potentia intellectiva, emanat ut vis intellectiva, seu operativa intellectio, & ut determinata, & completa obiectivè à seipsa ut ab obiecto intelligibili: sicut si potentia visiva emanaret à substantia animæ sensitivæ, & simul à specie coloris, & luce, emanaret ut determinata ad videndum talem colorem, nec indigeret specie superaddita ad videndum colorem illum; quia iam in ipsa emanatione determinationem haberet ex ipso obiecto intentionaliter emanando: perinde enim est habere determinationem per superuenientem informationem, atque habere per præuenientem emanationem, quia emanando accipit à sua radice, & principio quicquid perfectionis in eo est, & eo modo quo potest ab illo habere; & sic species substantia facit per emanationem in intellectu proprio quicquid species accidens per inhætionem.

Et his Resp. facilis ad omnes difficultas propositas

Ad primam constat ex dictis quod substantia Angeli non solum vnitur intellectui subiectivè & per modum principij à quo emanat, sed etiam obiectivè, & intelligibiliter, non solum intellectualiter, quatenus in eadem substantia concurrunt, & identificantur intelligibilitas, & intelle-

ctualitas, ita ut illa substantia per seipsam sit intelligibilis in actu, quia immaterialis, & spiritualis in actu, & non accipit intelligibilitatem ab aliquo superueniente. Et ideo cum intellectus emanat à tali substantia, quæ simul est actu intelligibilis, & intellectualis, emanat ut virtus intelligendi, & ut intelligibiliter, & obiectivè determinatus ab ipsamet substantia, ut obiectum intelligibile est, & non solum ut subiectum intelligens, ut explicatum est.

Vnde nescio quid Vasquez voluerit, cum illa *disp. 204. cap. 2. circa finem*, dicit quod coniunctio essentiæ cum intellectu in Angelo nihil omnino conducit ut essentiæ sit principium particulare in sui intellectio, quo determinetur efficacia communis intellectus; ipsæque potius censet intellectum esse principium proprium, & propinquum determinans essentiæ, & substantiæ Angeli, quum è contra. Si enim vult quod intellectus determinat substantiam tanquam virtus, seu potentia formalis, radicalem, verè dicit, sed non est ad præsens, cum difficultas solum sit de determinatione ex parte obiecti, & in ratione rei intelligibilis, non de determinatione ipsius potentiæ radicalis, quæ est substantia per ipsam virtutem formalem, quæ est intellectus. Si autem vult quod ipse intellectus habet vim speciei ad determinandum seipsum loco essentiæ tanquam obiecti, hoc valde inconuenienter dicitur, quia intellectus non est similitudo intentionalis substantiæ, sed vis operativa illius; unde ad ipsum non pertinet efficacitatem representandi habere, sed eliciendi actum, seu operandi: nec intelligibilitatem actualem accipit essentiæ ab intellectu, sed à se habet, quia à se, & non ab intellectu habet spiritualitatem, & immaterialitatem; & sic intellectus non seruit ut essentiæ reddat intelligibilem, nec per modum speciei representantis essentiæ, sed ipsa essentiæ ut coniuncta intellectui habet rationem obiecti intelligibilis, & subiecti intelligentis, ut explicatum est. Cur autem non possit similiter intellectus ipse habere utramque formalitatem, & virtutis quæ operatur essentiæ, & speciei, quæ representatur, sicut eadem substantia radicaliter est principium operativum, & formaliter obiectum intelligibile; Ratio est, quia esse representativum obiecti quando est accidens, respicit obiectum per modum similitudinis quo res ipsa redditur representata intellectui, intellectus autem habet se per modum virtutis elicitiuæ, & operatiuæ intellectiois; quæ duæ rationes inter se dicunt diuersas entitates, nec est cur adueniunt in vnam tertiam quæ complectatur utrumque munus, si ex se, & ex specie sua ita est diuersa, quod vnum est representare, aliud vitaliter elicere, & operari. In rebus autem creatis ea quæ in aliquo ordine dicunt diuersas rationes distinguunt entitates specificè, in eodem ordine non sunt vna entitas, sed si adueniunt in vna entitate, est quia eleuantur ad altiorum ordinem, in quo redduntur vnita, quæ in inferioribus sunt dispersa: in ordine autem intelligibili entitas operans, & representans diuersæ sunt, ut patet in speciebus aduenientibus potentiæ: non ergo in eodem ordine vna entitas esse possunt. At verò substantia ipsa intellectiva cum spiritualis, & immaterialis per seipsam sit, per se etiam intelligibilis est actu, & consequenter munus speciei habet.

Ad id quod dicitur de anima nostra, quod pro præsentis statu non est præsens, & vnita intellectui obiectivè, licet sit vnita subiectivè, & ut sustentans illum, Respond. quod pro hoc statu illa

illa vnio obiectiua, & in ratione speciei ibi est in virtute, sicut status separationis ibi est in virtute, sed non in actu manifestatur, etiam si actu iam existat in intellectu propter conuersionem eius ad sensibilia, ex qua impeditur intelligere seipsam immaterialiter purè per seipsam. Itaque intellectus, ut emanat ab anima, emanat ut à radice intelligente, & ut ab obiecto intelligibili, sed non actu manifestante intelligibilitatem suam purè spiritualiter, & per se immediatè pro isto statu, sed impedita manet intelligibilitas ob conuersionem ad sensibilia, & ideo illa coniunctio ad intellectum intimam tam in ratione intellectualis, quàm intelligibilis non operatur manifestationem vsque ad statum separationis.

14 Ad secundam difficultatem patet ex dictis, quòd substantia Angeli non actuatur intellectum formaliter, sed identificatur cum illo radicaliter, seu in sua radice, & exinde dimanatur intellectus ut virtus intelligendi determinata, & completa, non solum ex parte subiecti, & in ratione vis intellectiua, & elicitiua suae operationis, sed etiam ex parte obiecti intelligibilis ut determinata erga tale obiectum, quatenus ab ipsa substantia dimanatur, ut à radice intelligendi, & ut formaliter in se intelligibili, ut explicatum est.

Quòd si instes: nam non sufficit obiectum in esse obiecti, seu in esse intelligibili identificari cum intellectu radicali, id est, cum ipsamet substantia ut radix est intellectiuae virtutis, sed oportet quòd cum ipsamet potentia radicata, & emanante, & non solum cum ipsa eius radice vniatur, & identificetur; siquidem intellectio Angeli qua intelligit se, debet procedere ab ipsa intellectiua virtute proximè, & immediatè, & non solum à radicali quae est ipsa substantia: ergo oportet quòd ipsa virtus intellectiua proxima, & formalis sit determinata proximè, & formaliter ab obiecto, quia à potentia, & obiecto paritur notitia, non autem paritur nisi à potentia proxima, & formali: ergo etiam ab obiecto proximè, & formaliter eam determinante, & actuante. Quòd si identificatur, vel vnitur intellectui, erit vnio in esse intelligibili, sicut per alias species intellectus vnit sibi obiecta representata in esse intelligibili. Nec repugnat quòd illa vnio, qua substantia vnitur intellectui suo, sit virtualiter duplex, alia qua vnitur ei, ut subiectum radicale sustentando, & emittendo illam à se per emanationem, alia qua vnitur ei ut obiectum determinando, & specificando obiectiue, sicut in nostra sententia, existentia quae ab essentia distinguitur vnitur ei dupliciter, & tanquam subiecto quod est in potentia ad esse, illudque recipit, & tanquam principio specificanti ipsam existentiam, quia existentia hominis, v. g. habet speciem existentiae humanae qua distinguitur ab existentia equi, ex ipsa essentia quam actuatur, & à qua determinatur ad hanc speciem.

Resp. non sufficere identificationem obiecti cum virtute radicali intelligendi sine dimanatione ipsius vis intellectiuae à tali identificatione, & ut participat ab ipsa substantia id quod virtutis est in elicendo, & id quod obiecti est in determinando. Illa autem identificatio obiecti cum virtute radicali simul cum emanatione potètiæ ab ipsa, participando utramque perfectionem, & in ratione intelligibilis obiectiue, & in ratione intellectiui subiectiue sufficit ut talis intellectus determinatus maneat ab obiecto, procedatque illa cognitio à potentia, & obiecto, quia ad hoc ut ab obiecto procedat, sufficit quòd ipsa substantia mediante intellectu influat in actum, non solum ut intellectiua

radicaliter est, sed etiam ut intelligibilis, ut statim dicemus. Ut autem determinet intellectum in esse intelligibili, nõ requiritur quòd vniatur illi entitatiue per superadditam vnionem, ut explicatum est, nec quòd identificetur cum intellectu identificatione aliqua entitatiua, ut de se notum est, cum intellectus sit entitas realiter distincta à sua substantia, etiam ut intelligibilis est. Nec denique fit aliqua alia identificatio, seu vnio formalis in esse intelligibili superueniēs intellectui post emanationem à sua radice, quia hæc non apparet quomodo fiat sine noua actione, & applicatione in qua fundatur vnio: nam etiam ipsa essentia diuina quòdo de nouo vnitur intellectui beati per nouam actionem, & applicationem qua immutatur intellectus beati, fit illa vnio, in essentia autem Angeli non fit noua immutatio & applicatio essentiae suae ad intellectum ut in ratione obiecti ei vniatur. Restat ergo quòd fiat identificatio, & vnio radicalis, & virtualis secundum quòd ipsa substantia ut radicaliter intellectiua est, etiam formaliter, & actu intelligibilis, & ex tali radice sic intellectiua intelligibili emanat potentia, etiam intelligibiliter determinata, & non solum ut vis intellectiua & elicitiua: potèstque trahere, & participare per talem emanationem, obiectiuam determinationem formaliter in se ab intelligibilitate substantiae radicali, sicut trahit vim elicendi, & operandi intellectiue ab eius intellectiua vi radicali. Quòd verò dicitur de existentia, quòd eadem vnione, qua coniungitur essentiae, & recipitur in illa, ut in causa materiali, etiam specificatur, seu determinatur ab illa ut à formali, dicimus ita esse, & inde explicari nostram sententiam, quia sicut existentia specificatur, & determinatur ab essentia, non per hoc quòd essentia superueniat existentiae, eique ut causa formalis de nouo vniatur, ipsa existentia materialiter suscipiente essentiam, & specificationem eius, sed per hoc quòd existentia ista, quae resultat ex productione talis essentiae, adaequatur illi, & sic modificatur in ipsa receptione à specificatione huius essentiae, participatque, & ebibit existentia ab ipsa essentia determinatam illam speciem; ita intellectus ex hoc quòd dimanatur à substantia, in qua non solum est intellectiua vis radicaliter, sed etiam intelligibilitas obiectiue, quia immaterialis, & spiritualis est in actu, ex hac emanatione ebibit, & participat non solum intelligendi virtutem ab illa radice, sed etiam determinationem obiectiuam ab illa intelligibilitate, & sic manet actuata, & determinata à sua substantia, ut ab obiecto, non per informationem superuenientem, sed per emanationem à tali substantia, etiam ut habente rationem obiecti intelligibilis, ut dictum est.

Ad tertiam difficultatem Resp. quòd speciei intelligibili prout abstrahit à substantiali, & accidentalibus, conuenit influere effectiue in actum, sed modus influendi non potest eodem modo se habere quando est accidens, & quando substantia: quando enim est accidens subordinatur potentiae, & influit in actum tam proximè, & immediatè quàm potentia. Quando autem est substantia, influit in actum mediatè, & radicaliter, sicut ipsamet substantia, quae est virtus radicalis cui identificatur ipsamet substantia, ut est ratio intelligibilis obiectiua, & exinde emanatur intellectus ipse ut participans à substantia utramque rationem, & virtutis operatiuae, & determinationis obiectiuae, & sic operatur proximè intellectus, ut determinatus, & perfectus obiectiue per suam substantiam in emanatione ab ipsa. Et sicut ex vi ipsius emanationis, semper quòd influit intellectus in actum vitalem, influit

influit, & operatur mediante illo substantia in eundem actum, quatenus radix illius est, ita semper quod influit intellectus in intellectionem sui, influit etiam, & operatur substantia in eundem actum non solum ut subiectum, & radix vitalis est, sed ut obiectum intelligibile tali radici identificatum, & sic ut species sui concurret ad intellectionem, non subordinata potentia, sed subordinans sibi potentiam, quatenus subordinatur illi ut radici intelligendi, & ut obiecto intelligibili identificato eidem radici. Nec est inconueniens quod potentia intellectiva in eliciendo actum subordinetur obiecto, sicut & subiecto intelligenti, seu radici intellectus naturalis: nam obiectum de se est actus ipsius potentia, eamque perficit, & determinat. Vnde quando obiectum per intelligibilitatem substantialem concurret, subordinabit sibi potentiam intellectivam non ipsa substantia seu obiectum potentia intellectiva subordinabitur, sicut in concursu essentia divina cum intellectu beati in ratione speciei impressae, non ipsa species subordinatur intellectui creato, sed intellectus illi: ergo non est de essentiali ratione speciei, quod ipsa influat in actum ex subordinatione ad potentiam, sed potest etiam e conuerso contingere, nempe per subordinationem potentia ad obiectum, quando ipsa potentia emanat a substantia, non solum ut a subiecto, sed etiam ut ab obiecto sui. Et hoc modo explicat Caiet. in qu. 56. art. 1. exemplum D. Thom. de calore, quod non minus erit forma operans calor subsistens, quam calor inherens, quia si calor inquit Caiet. subsisteret in ligno, ut identice se habens cum illo, non minus calefaceret, quam si est inherens: & similiter si species visibilis esset per se subsistens per identitatem in vidente, esset nihilominus principium formale visionis in eo. Cum ergo species substantia Angeli sit idem quod ipsa substantia, operatur ut principium formale intellectionis suae, non immediate influendo formaliter in actum, sed radicaliter, quatenus ab ipsa substantia, etiam ut intelligibili emanat potentia, ut intelligibiliter determinata, & sic mediante tali emanatione, seu potentia emanante influit obiectum ipsum in actum radicaliter, non formaliter. Ipsa vero potentia pro ut sic perfecta, & determinata ex vi suae emanationis influit formaliter ut virtus, & ut determinata, ut habens a subiecto vim elicitivam, & ab obiecto determinationem ut ipsius emanationis. Nec oportet quod ipsa potentia se habeat indifferenter, indigeatque a specie superueniente determinari, quia respectu cognitionis sui non est potentia illa indifferens, sed ex vi suae emanationis determinata. Quod si dicatur ipsam substantiam, ut obiectum intelligibile immediate influere in actum, quia licet substantia per se seipsam non sit operativa elicitivam, bene tamen influere potest obiectivam, hoc quidem non haberet tantum inconueniens, si alias posset componi iste influxus obiectivus cum informatione potentia, quam substantia non potest habere: nam obiectum non potest influere in actum seorsum a potentia, sed pro indiviso cum ipsa, seu unico, & indivisibili influxu, & sic non sufficit quod obiectum influat ut assistens, sed oportet quod intime actuet, & afficiat potentiam, ut ex ipsa, & potentia unus, & indivisibilis influxus nascatur, quod esse non potest, nisi vel potentia determinetur ab obiecto per intrinsecam actuacionem, & informationem ab eo, sicut species superueniens potentia, illique unita formaliter, quod in substantia respectu intellectus proprii non potest intelligi, vel e conuerso quod potentia emanat ab obiecto, quod est idem cum subiecto in

telligente, & in hac emanatione maneat determinatus intellectus, & completus obiectivam, quia emanat a substantia, etiam ut obiectum intelligibile est.

Ad quartam difficultatem constat ex dictis quod substantia Angeli non potest servire pro specie alicui intellectui, nisi vel informando illum, vel e contra per hoc quod intellectus inhareat illi, & emanet ab illo, substantia unius Angeli non potest informare intellectum alterius Angeli: si enim non potest informare proprium intellectum cui intimior est, quanto minus poterit informare alienum? Et inconuenientia quae inveniuntur in hoc quod substantia ut ab extrinseco veniens sit forma informans intellectum, inveniuntur in hoc quod informat alienum intellectum. Et reducitur ad hoc, quia omnis informatio intelligibilis supponit aliquam entitativam coniunctionem in aliquo genere causae vel agentis, sicut Deus intime adest intellectui creato dando illi esse, & anima suo intellectui, quia effluit ab illa, vel materialis recipiendo intellectum, vel formalis sicut species accidentalis inheret entitativam intellectui. Nullo autem modo nec in genere alicuius causae praesupponi potest aliqua unio entitativa inter substantiam Angeli, & alienum intellectum, ut de se constat, & ideo neque intentionaliter potest illum informare. Et quod non possit emanare in intellectus alienus a substantia alterius Angeli manifestius est quam ut indigeat probatione; cum hoc ipso quod alterius sit, ab alio dimanet non a se; & sic non est possibile quod substantia unius Angeli possit esse species, & informare intellectum alterius Angeli, sed indiget specie superaddita. Videantur quae diximus circa hoc *praece.* tomo disp. 13. art. 4. circa finem.

Ad ultimam Respon. ex his quae eodem loco *praece.* tomi artic. 5. in fine solutionis ad 2. diximus, quod Angelus per suam substantiam non potest esse species expressa, sicut est impressa, ut expressum docet S. Tho. 4. contra Gentil. c. 11. quia non est per suam substantiam intellecta, seu terminus intellectionis, in quo consistit species expressa, eo quod esse terminum intellectionis supponit ipsum intelligere, cuius est terminus, & a quo redditur intellecta, nec intelligere quomodoquaque, sed etiam dicere, quia per dicere exprimitur verbum, seu species expressa; cum autem intelligere, & dicere sint aliquid accidentale ipsi Angelo, quia operatio eius, & intelligere non potest esse eius substantia, repugnat quod terminus dictus, seu expressus per ipsum dicere, sit substantia; & sic non potest esse species expressa: bene tamen impressa, quia haec non se habet ut terminus alicuius operationis, sed ut principium. Quod autem substantia ipsa ante omnem operationem sit principium intelligendi per propriam intelligibilitatem, quam ex se habet, & non ex aliquo superaddito, sicut ex se, & non ex superaddito est immaterialis, & spiritualis, nulla repugnantia est. Nec potest poni instantia de ipsa divina essentia, quae habet in intellectu Beati vicem speciei expressae, ut diximus *praece.* tomo disput. 13. ar. 5. & tamen non procedit, nec est formata aut dicta per intellectum Beati, sed solum extrinsece contemplata: ergo similiter essentia Angeli per hoc quod sit extrinsece contemplata, erit species expressa illius. Negatur consequ. quia essentia divina est suum intelligere, & intelligi; & sic per seipsam est intellecta in actu secundo, quod est esse speciem expressam, non per aliquod aliud intelligere in esse intellectu constituitur. Vnde solum communicatur, & applicatur intellectui Beati, non per illud redditur in se species expressa. Essentia autem Angeli

Angeli non est suum intelligere ; unde esse actu intellectum ut terminum intellectus, & ut speciem expressam non per se habet, sed per speciem accidentalem superadditam.

Secunda pars conclusionis de accidentibus Angeli.

18 De accidentibus Angeli distinguimus accidentia naturalia, sibi que proportionata, & supernaturalia, dicimusque pro prioribus non indigere speciebus superadditis, sed per suam substantiam ea intelligere, sicut accidentia alterius Angeli per speciem, representantem substantiam alterius Angeli. Pro secundis autem indigere specie superaddita, ut ea propria cognitione cognoscat. Igitur quoad accidentia naturalia probatur conclusio ratione à priori, & à posteriori. A priori quidem, quia accidentia continentur in substantia, & operationes in potentiis tanquam in radice, & causa propria, & adæquata, sed cognitio Angeli cum sit perfecta, & comprehensiva, tangit effectus in causis, & per causas: ergo Angelus cognoscit sua accidentia, incipiendo à radice, causaque ipsorum creata, & adæquata (nam increata cognoscere non est Angelici intellectus, sed Beati:) constat autem proximam, & adæquatam causam, & radicem accidentium esse substantiam à qua oriuntur: ergo per speciem eius cognoscit Angelus accidentia sua. Patet consequentia, quia species Angelicæ sunt perfectæ, & comprehensivæ rei naturalis quam representant: ergo oportet quod in causa representent effectus, & in substantia proprietates, & accidentia, non autem de his singulis seorsum species habeant, quia sic componerent cognitionem suam ex multarum specierum aggregatione, non qualibet perfecte representaret totum quod ei convenit, & quod per compositionem in nobis, aut discursum congregatur in cognitione. Si autem Angeli intellectus exigeret ex sua natura species, ita imperfecte representantes, quod una representaret substantiam, & non proprietates, & accidentia, alia sola accidentia, & non substantiam, ex sua natura intellectus ille exigeret compositionem, & discursum ad habendam cognitionem perfectam, quæ consistit in cognitione rei, & suarum proprietatum, & effectuum, & in cognitione effectuum per suas causas, & radices, siquidem non posset talem perfectam cognitionem habere, nisi congregando eam ex pluribus speciebus, quarum qualibet imperfecte representaret, ex collatione autem earum resultaret perfecta cognitio, qui est modus quo nos cognoscimus per discursum, licet efficacius Angeli discurrerent, & perfectius, sed tamen discurrerent ex natura sua, quod negatur communiter à Theologis *infra qu. 57.* Necesse est ergo ut hoc inconueniens eitemus, quod species Angeli tales sint quod representando substantiam, etiam accidentia, quæ ei conveniunt, aut debentur, seu quicquid exigitur ad comprehensionem rei representent. Et sic etiam substantia sua quæ deseruit sibi pro specie, non solum seipsam, sed etiam accidentia sua naturalia representare debet, quia sicut illa ab ipsa substantia, & in ipsa habent esse, ita & intelligibilitatem, ac per hoc intelligibilitas eius efficax est ad representandum intelligibiliter accidentia sua, quia perfecte ea continet in se, & quia sic requiritur ad sui comprehensionem.

19 A posteriori autem deducitur ratio, quia si de accidentibus debet intellectus Angeli habere species, de quolibet oportet dicere quod speciem habeat seorsum ut illud cognoscat: nec enim est maior ra-

tio de uno, quam de alio. Sic autem sequetur processus in infinitum, aut sistendum erit in aliquo accidente quod per seipsum sine specie superaddita cognosci possit, ut obiectum, & res cognoscibilis ut quod. Patet hoc manifestè, quia si aliquod accidens, v. g. potentia, intellectus, vel eius operatio, aut species, seu verbum indigent specie seorsum, & distincta, illorum representatiua ut cognoscantur: ergo etiam species istæ quibus talia accidentia representantur, indigebunt specie alia, quia etiam ipsæ species cognosci possunt tanquam obiecta, & res cognitæ, licet enim sint ratio cognoscendi alia, tamen etiam possunt cognosci ut quod; & ut obiecta, & non solum ut quo: ergo pari ratione de illis dabitur aliæ species, & de istis aliæ; & sic in infinitum, aut dabitur aliqua species, & aliquod accidens quod seipso informet ad cognitionem sui intellectum, & eadem erit ratio de aliis accidentibus spiritualibus, imò & de ipsa substantia, quæ non minus spiritualis, & intelligibilis est in actu, quam alia accidentia, & ad rationem speciei perinde est quod entitas illius sit substantia, vel sit accidens. Aduerte tamen quod cum dicimus substantiam representare sua accidentia, potentias, intellectum, & species per seipsam, loquimur de intellectu in statu connaturali, & prout habet hæc accidentia sibi coniuncta, & species infusas: id enim requiritur ut necessaria conditio: si enim producat substantia sine voluntate, v. g. aut intellectus sine speciebus, non cognoscet per substantiam suam ista accidentia, nisi in potentia, & imperfectè, sicut tunc se habet ad illa.

20 Loquendo autem de accidentibus supernaturalibus quæ infunduntur Angelo, si cognoscantur quidditatiuè, & ut sunt in se, requirunt species superadditas, nec sufficit ad illa cognoscenda ipsa substantia Angeli loco speciei, neque aliæ species naturales Angeli, quia ista omnia improporionata sunt, & alterius ordinis à gratia, & accidentibus supernaturalibus: ergo non possunt illa representare quidditatiuè, ut sunt in se: ergo indigebit speciebus proportionatis, & eiusdem ordinis cum gratia ad cognoscendum illa supernaturalia quidditatiuè. Et sicut ad cognoscenda ista mysteria gratiæ habuit anima Christi scientiam infusam, nec sufficere poterat acquisita, sic species naturales Angeli non possunt sufficere ad mysteria supernaturalia cognoscenda, sed requiruntur infusæ, & eiusdem ordinis. Et deinde quia Angeli cognoscunt gratiam, eiusque mysteria, non solum prout sunt in se, & prout sunt accidentia sibi inhaerentia, sed prout sunt communia aliis, & existunt in aliis: ergo possunt habere species representatiuas talis gratiæ, quia prout est in aliis, non potest cognosci, nisi per species superadditas: nec enim per gratiam, quæ est in altero, potest eam intelligere, siquidem sibi non est unita, nec per gratiam, quæ est in se, potest eam, quæ est in altero cognoscere, quia plerumque est in altero perfectior, & cum aliquibus donis, vel specialibus modis, quibus non est in se: ergo specie superaddita indiget ad cognoscendam gratiam, quæ est in altero; similiter ergo ex eadem specie poterit cognoscere gratiam, quæ est in se, cum sit eiusdem quidditatis. Nec potest Angelus uti gratia, & habitibus supernaturalibus in se existentibus loco speciei ad intelligendum illa, siquidem ista non possunt intentionaliter informare intellectum, nisi aliquam unionem entitatiuam habeant ad ipsum in aliquo genere causæ, ut ponderatum est, multi autem ex his habitibus non habent coniunctionem entitatiuam cum intellectu, ut habitus qui sunt in voluntate, & gratia ipsa quæ est ipsa substantia.

Solum

21 Solū possent obijci duo.

Primum est de habitibus supernaturalibus, qui sunt in intellectu, ut fides, lumen gloriæ, & similes; Si enim per inhærentiam sunt entitatiue coniuncti intellectui, & aliās sunt per se intelligibiles, & actu immateriales: ergo possunt loco speciei deferuire.

Secundum est de ipsis speciebus supernaturalibus, quia sequitur processus idem in infinitum, quem in speciebus naturalibus inferebamus, aut sistendum est in aliqua specie, quæ per seipsam feruiat intellectui ut species suimet, & idem dici poterit de reliquis accidentibus supernaturalibus, quæ in ipso intellectu sunt.

Respon. ad primum, esse disparem rationem de habitibus supernaturalibus, etiam si intellectui inhæreant, atque de aliis accidentibus: nam habitus supernaturales qui sunt in intellectu, sicut & alia accidentia non cognoscuntur, nisi ex sua radice, & causa ab Angelo, cum eius cognitio petat esse perfecta; & sic attingere rem per causas, & radices suas. Radix autem habituum supernaturalium est gratia, quæ in re supernaturali se habet tanquam essentia, & habitus potentiarum, ut propriæ passionis. Vnde si ad cognoscendam gratiam indiget Angelus specie superaddita, etiam per eandem attinget habitus, qui sunt in intellectu, & voluntate, & dimanant à gratia, & consequenter etiam operationes; quæ ex talibus habitibus proueniunt. Itaque si Angelus intelligeret habitus intellectuales sibi infusos immediate in seipsis, argumentum vim haberet, & difficile redderetur ratio cur non posset Angelus intelligere tales habitus sine specie superaddita. Caterum cum intelligat illos per suam causam, & radicem à qua emanant, quæ est gratia, vel cui subordinantur, quia iste est connaturalis modus cognoscendi in Angelo, consequenter debet uti ad eorum cognitionem specie illa repræsentatiua gratiæ in cuius penetratione, & connexionem ad tales habitus, ipsi cognoscuntur. Et ex hoc Respon. ad secundam instantiam de speciebus: dicimus enim quod species istæ cum supernaturales sint, ex eadem radice, & causa cognoscuntur, qua habitus ipsi cui deferuiunt; & sic per speciem repræsentatiuam gratiæ, ut infunditur Angelis, vel in eo statu & perfectione in qua habet annexas species ordinis supernaturalis, repræsentatur etiam quidditas, & natura specierum, quatenus annexæ de facto sunt ipsi gratiæ pro tali statu. Si autem species ipsæ infusæ intelligerentur seorsim à sua radice, cui connectuntur, quæ est gratia, sequeretur ille processus in infinitum, sicut sequitur in speciebus ordinis naturalis, si ipsæ cognoscerentur ab Angelo, non in sua radice cui connectuntur, & debentur, scilicet in essentia, & intellectu, sed secundum se seorsim, & per aliās species, ut ostendimus *supra*.

22 Ex his manent soluta omnia quæ adducit Vasquez *disp. illa 204. cap. 2.* tanquam difficultatem facientia contra hanc sententiam, quod substantia Angeli deferuiat pro specie intelligibili ad cognitionem sui: ostendimus enim quomodo id fieri possit, & quomodo substantia non solum assistat, sed etiam verè determinet, & perficiat intellectum, non solum ut eius radix, & subiectum, sed etiam ut obiectum, quia sub utraque ratione ab illa substantia emanat, & perficitur ab ipsa, tum in essendo, tum in intelligendo, in intellectualitate actiua, & in intelligibilitate obiectiua, utriusque perfectionem, & determinationem ei communicans per ipsam emanationem à tali principio, quia utramque habet in se substantia Angeli.

23 Adducit tamen instat Scotus, quia Angelus potest

cognoscere substantiam suam abstractiue, & non solum intuitiue, & ut præsentem, quia potest intelligere ipsam quoad prædicata quidditatiua tantum, & ut possibilem, abstrahendo ab existentia, quia hæc accidentaliter sibi conuenit, & non ut prædicatum quidditatiuum: ergo indiget specie repræsentante abstractiue suam substantiam. Patet consequenter, quia substantia Angeli coniuncta intellectui non potest repræsentare se abstrahendo à præsentia, & existentia, cum hoc ipso quod ibi informet, seu determinet intellectum, præsens illi sit, & existentem illum reddat sustentando ipsum: ergo non potest repræsentare se, nisi ut præsentem, & existentem, non abstractiue.

Confir. quia nulla species potest deferuire intellectui nisi actuet illum, & non solum assistat, quia deferuit ei ut principium intelligendi, & operandi, & consequenter ut forma, & actus eius, sicut in exemplo allato à D. Thom. de calore subsistente, qui esset principium operandi: nam in ipso exemplo manifestum est quod si calor esset subsistens, & consequenter non informans lignum, sed ei assistens, non posset ligno esse ratio, & principium calefaciendi: ergo species si sit subsistens, non erit intellectui ratio, & principium intelligendi, quia non poterit informare ipsum, sed solum ei assistere, cum substantia sit, & subiectum sustentans non forma informans.

Respon. concedendo anteced. quod possit Angelus suam substantiam abstractiue cognoscere, & remouere per considerationem existentiam ab essentia, cum non sit prædicatum essentiale eius. Et constat quod potest Angelus apprehendere substantiam suam in statu quo considerari potest antequam crearetur, & in statu quo considerari potest si annihilaretur: tunc enim si annihilaretur Angelus maneret sine existentia; & solum quidditatiua prædicata possent in illa essentia considerari. Negamus tamen consequentiam quod ad hanc cognitionem abstractiuam non possit uti substantia sua, tanquam specie inadæquatè se habente, & inadæquatè utendo illa ad repræsentandum solum id quod essentiale est in illa substantia, & non quod accidentale seu accidentaliter conueniens, sicut potest Angelus uti specie leonis ad cognoscendum eius quidditatem, & non eius existentiam, vel alia accidentia: ex vnica enim specie potest formare diuersos conceptus, quia vna species Angeli plura, & diuersa obiecta materialiter coniuncta sub eadem formali ratione repræsentat, & potest uti illa inadæquatè pro vno obiecto, & non pro aliis, & formare ex illa diuersos inadæquatos conceptus, ut docet S. Thom. *qu. 8. de verit. art. 13. ad 2. & 4.* sic substantia Angeli quæ repræsentat seipsam obiectiue intellectui, & similiter repræsentat existentiam eius, & subsistentiam, reliquaque accidentia, potest accipi ab intellectu ut repræsentet vnum, & non aliud; & sic cognoscere naturam sine sua subsistentia, qualis maneret si assumeretur hypostaticè à Deo, & sine existentia, ut si consideretur annihilata, vel ut producibilis, nondum ut producta; & sic utendo illa inadæquatè, potest cognoscere se abstractiue. Et cum instatur quod substantia non potest repræsentare seipsam, nisi ut præsentem, & existentem, quia sic informat, & sustentat intellectum quando intelligit ipsam, distinguo; si adæquatè consideretur ab Angelo, & sub omni modo quo est in se præsens; & existens, concedo; si inadæquatè consideretur, & inadæquatè utatur illa Angelus quoad vnum prædicatum, & non quoad aliud, nego: licet enim in se præsens, & existens sit essentia, & sic sustentet, & informet intellectum, nec ista informatio possit variari ab Angelo

Angelo, tamen quoad applicationem, & vsum, & in ordine ad eliciendam cognitionem potest intellectus vti illa adæquatè, vel inadæquatè; & sic non intelligere totum quod in illa substantia est, sed aliquid accipere, & aliquid omittere, quia plura continet repræsentanda, quæ ab intellectu Angeli diuidi possunt. Nec est idem de intellectu beati videntis Deum, qui non potest sic inadæquatè videri quoad essentiam, & non quoad existentiam, quoad vnum attributum, vel personas, non quoad aliud, eo quod omnia illa sunt simplicissimè vnum & quidditatiuè, & essentialiter eadem res. Vnde respectu cognitionis essentialis, & intuitiue, quæ tendit ad illam rem, vt est in se, non est locus vtendi essentia diuina, vt inadæquatè repræsentante cognitioni beatificæ, quæ est Dei in se vnum attributum, & non aliud, vel essentiam, & non existentiam: sic enim definirer illa cognitio esse quidditatiua intuitiua, & beatifica, vt *preced. tomo disp. 15.* ostendimus. Substantia autem Angeli non sic se habet, sed repræsentat aliqua, quæ non sunt essentialia prædicata, vt existentiam, substantiam, & alia, & inter ipsa prædicata quidditatiua etiam potest præscindi vnum ab alio respectu cognitionis inadæquatè, & imperfectæ, quod in cognitione rei creatæ semper locum habet; & sic potest abstractiue cognoscere suam substantiam sine existentia, vtendo illa, vt specie inadæquata.

Ad Conf. Resp. nos non dicere quod substantia Angeli, in quantum species, & obiectum intelligibile, sit solum assistens, & non intimè coniuncta ipsi intellectui, eumque informans, & actuans, sed diuersimodè quàm obiectum extrinsecum, seu species accidentaliter superueniens, quia substantia ipsa informat per identitatem ipsum intellectum radicalem, qui est ipsamet essentia, seu natura Angeli, vt radix est potentie intellectiue, quæ est accidens, & ex tali identificatione quatenus eadè substantia, quæ radix quæ est potentie intelligendi intimè est etiam obiectum intelligibile subsistens, redditur per emanationem ab ipsa intellectus ipse determinatus, & completus intelligibiliter, sicut redditur intellectiuius, & elicituius proximè, eo quod ab vtraque ratione, & obiectiua, & subiectiua substantiæ Angeli emanat, & sic determinatus ab ipsa in ratione obiecti manet, & procedit ad eliciendam cognitionem sui, vt declaratum est. Calor autem si esset subsistens extra lignum, licet esset assistens extrinsecè, non esset ei ratio calefaciendi, sed per se seorsum calefaceret. Si autem esset subsistens, & identificatus ligno, sic esset ipsi ligno ratio, & principium calefaciendi, sicut nunc species Angeli seu substantia vt intelligibilis, est subsistens per identificationem ipsi intelligenti, & intellectui ipsi in sua radice identificatus, vt optimè Caiet. dicit *q. seq. 56. a. 1.*

ARTICVLVS III.

Vtrum respectu aliorum obiectorum habeat Angelus species infusas, vel acquisitas?

Circa obiecta extra se, quæ Angelus intelligit, duplex difficultas circa eorū species confurgit, Prima, an dentur species accidentales distinctæ ab eius substantia, & intellectu in mente Angeli, quibus informetur ad eliciendam cognitionem circa obiecta extra se.

Secunda, an tales species si dantur, sint à Deo infusæ, vel ab essentia, & intellectu Angeli emanantes, vel ab obiectis exceptæ, media aliqua vi eas

Ioan. à S. Thom. in 1. part. D. Th. Tomus alter.

hauriente, & depurante, ita quod ad hoc sit in Angelo virtus, seu potentia aliqua sicut intellectus agens.

Angelus indiget speciebus superadditis, idque efficaciter probatur à D. Thoma.

Fuisse aliquos Authores qui negauerunt requiri species intentionales ad eliciendam, pariendamque notitiam à potentia, diximus in *libris de Anima q. 6. a. 2.* Specialiter Angelis eas negauerunt Durandus in *2. dist. 3. q. 6. n. 17. & sequentibus.* Gabriel, Ocham, Bassolis, Gregorius, quos citat Vafq. *hic disp. 200. c. 1.* Et Durandus quidem exclusit speciem, quæ est similitudo, quia similitudinem existimat petere identitatem specificam, seu conuenientiam naturæ, cum eo cuius similitudo est, quæ vtiq; non intercedit inter illam qualitatem intentionalem, & obiectum ad extra, v.g. Petrus in se, & species intentionalis eius non conueniunt entitatiuè, & realiter; & sic vnum non est realis similitudo alterius, quia non est entitatiuè eiusdem rationis. Gabriel autem putat sufficere obiectum ad extra propositum simul cum potentia, vt ad illud cognitio feratur. Sed quia contingit sæpe intelligi obiectum quod non est præsens, & sic intuitiue non attingitur, sed abstractiue, addunt Ocham, Gabriel, & Gregorius fieri illam abstractiuam cognitionem, non à specie, quæ sit similitudo superaddita, sed ab habitu, seu determinatione aliqua relicta ex notitia intuitiua.

At verò P. Vafq. *loco cit. cap. 3. & postea disp. 204. cap. 2.* existimat non esse aliquam rationem quæ conuincat Angelos habere species superadditas, vt cognoscant alia obiecta extra se: posset enim aliquis dicere quod potentia intellectiua Angeli determinatur ab obiecto extrinsecò, non autem esse necessariam formam intrinsecam loco obiecti in Angelo: nam proprium est facultatum cognoscantium, & appetentium vt determinentur ab obiectis, non efficienter, sed peculiari modo concurrentibus ad operationem, sed facultas appetens determinatur ab obiecto existente in cognitione, intellectus verò ab obiecto exteriori existente secundum illud esse præteritum, præsens, aut futurum quod accommodatū est intellectui: nam eo ipso quod est intra latitudinem intellectus, potest ab eo determinari. Ponere autem species in Angelis difficultate non caret, quia vel sunt acquisitæ à rebus, cuius contrariū docet D. Tho. & nos statim probauimus contra Scotum, vel sunt infusæ à Deo, & non debita ipsi naturæ, Angelicæ; & sic erunt supernaturales, vt potest à solo Deo factibiles, & ipsi naturæ non bebitæ, possetque Deus eas denegare, nulla violentia facta naturæ, sicque naturaliter, & sine violentia posset manere Angelus absque vlla cognitione. Vel sunt species debita ipsi naturæ, & orta ex principiis eius, & hoc stare non potest, cum species intellectus Angeli determinatæ non sint ex natura rei: nam vel habet species omnium possibilium, & hoc est infinitum, & soli Deo notum, vel eorum solum quæ Deus creat, aut creare voluerit, & hoc non est determinatum ex natura rei, sed ex libera Dei voluntate, non dimanat autem à natura tanquam passio, nisi quod determinatum est à natura.

Dicendum nihilominus est, Angelum indigere speciebus accidentalibus superadditis ad cognoscenda alia obiecta extra se, idque efficaciter conuinci non minus in Angelis, quàm in nobis. Et quidem hæc indigentia specierum vel probanda, & conuincenda est pro omnibus potentiis cognoscitiuis generaliter tam in Angelis quàm in nobis, vel quia, etsi concedatur in nobis, negatur tamen in Angelis, sicut facit Vafq. De primo non

P p est

est in presenti agendum: sed in libris de anima late à nobis ostensum est *quest. 6. art. 2. & 3.* necessario requiri istas species ad formandam cognitionem, quia hæc est natura facultatis cognoscitiuæ, quod requirat concursum obiecti ad suum actum, non quomodocumque; sed intra se apprehendendo, & habendo illud. Vnde hæc est communis omnium conceptio distingui potentiam cognoscentem ab appetente, quod illa trahit res ad se, ista verò fertur ad res extra, quia appetitus fertur pondere ad sua subiecta, intellectus verò similitudine. Vnde intra se format similitudines, & ideas, & representationes rerum, ut quotidiana experientia videmus, & ille melius intelligit, qui similitudines, & imagines rerum viuaciores format, & rebus ipsis conformiores. Quare potentia cognoscitiua ex vi sua, & propria, atque essentiali ratione, assimilatiua est, seu formatiua similitudinum, & trahens obiecta ad se per apprehensionem, quod certè trahi non potest nisi secundum aliquam representationem seu similitudinem, & esse intentionale: nam in proprio, & entitatiuo esse constat non posse intrare obiecta exteriora intra mentem, eique vniti, & casu quo possent, illa vnio magis esset destructiua entitatis intellectus, & constructiua alterius tertiæ, non autem deseruiret cognitioni, præsertim intellectuæ, quæ sit secundum esse immateriale, & à conditionibus materialibus abstractum: nec enim obiecta vniantur potentia, ut cum illa componant tertiam aliquam entitatem, sed ut potentia obiectum illud apprehendat, & in totum quod est in obiecto penetret, & ingrediatur cognoscendo; & sic cognoscitiuè cognoscens fit cognitum, & vnum atque idem representatiuè cum obiecto, quod non est aliud quam ex obiecto, & potentia non fieri vniam tertiam entitatem compositam: (nec enim ad entitatem componendam ordinatur cognitio) sed ipsam potentiam apprehensiuè, & representatiuè assimilari, & vniri rei cognitæ, & hoc vniri sine compositione entitatis tertiæ vocamus vnum fieri. Et præsertim Vasq. conuincitur has species ponere in sensibus internis, & in intellectu humano ipsis alligato, quia multa cognoscimus in absentia obiectorum, & de his quæ non sunt, quod utique fieri non potest, nisi aliqua similitudo impressa in nobis remaneat: de his enim quæ nunquam videmus, non possumus sic formare similitudinem; signum ergo est dari in nobis huiusmodi species. Constat autem intellectum separatum siue Angeli, siue animæ recordari rerum absentium vel præteritarum: nam animæ Diuinitis damnati dictum est, *Luc. 6. Recordare fili quod recipisti bona in vitatua*; & ipse quinque fratrum, quos in mundo reliquerat, recordabatur. Angeli similiter præterita cognoscunt, & futura diuinant, non solum boni Angeli, qui ea possunt videre in Verbo, sed etiam demones, qui naturali sua virtute multa ex his penetrant, & coniectant, hominibusque siue falsò, siue verè annunciant, quod utique sine apprehensione non possunt: ergo neque sine specie. Quomodo enim talia obiecta ipsis præsentia sunt, nisi in aliqua similitudine representante? Aut si id conuincit in sensibus internis, & intellectu nostro, cur non in spiritu separato? Dicere enim quod sufficit obiectum esse intra latitudinem obiecti intellectus, sunt meræ nugæ. Nam intra latitudinem obiecti intellectus est omne ens, seu omne intelligibile, ad quodcumque enim obiectum potest extendi potentia intellectiua. Non autem sufficit aliquid in se esse intelligibile, seu ens, ut statim intelligatur ab Angelo, alioquin quodcumque possibile posset nunc intelligere prout vellet, quia quod-

cumque possibile est extra latitudinem obiecti intellectus, præsertim si sit possibile ordinis naturæ. Quare ergo non intelligit illa, sed solum hæc determinata, si sufficit contineri intra latitudinem obiecti, nec requiruntur species? Dicere verò quod remanet aliquis habitus vel determinatio ex intuitiua cognitione, futile omnino est, & sine fundamento: quid enim est ille habitus, vel determinatio, si representatio non est? Si enim habet effectum representationis, scilicet rem præteritam vel absentem reddere intellectui præsentem, cur representatio non erit? Aut quod est fundamentum ad ponendum habitum sine representatione, & negare representationem ex cognitione intuitiua relictam? cum habitus sine representatione solum se habeat ut virtus elicitiva, ad faciendum verò obiectum præsens, seu præsentatum potentia, non deseruiat.

Ex his manifestè deducitur, Authores oppositos, 4 & Vasq. omnino carere sufficienti ratione ad impugandum, seu negandum Angelo istas species; eas verò firmo fundamento à D. Thom. poni, & à communi Theologorum, Philosophorumque consensu: licet enim aliquas difficultates habeat explicatio harum specierum, nunquid propterea fundamento caret? Si quidquid difficilè explicatur, & difficultates habet, negandum est, aut fundamento euacuandum, quid reliquum erit quod sciatur, & euoluatur à scientiis? Nunquid triuialia solum, & superficialia, ac veritates per se notæ, vel discursu facili prouenientes sapientiæ labore eruendæ sunt? Certè de necessitate specierum pro parienda notitia ab obiecto, & potentia, pro obiecto trahendo ad cognoscentem, pro assimilatione cognoscentis ad cognitum, pro formanda similitudine expressa, pro ideis, & aliis similibus, quæ in intellectu, & in sensibus experimur, ita est concors, & fundata Philosophorum atque Theologorum sententia pro omnipotentia cognoscente tam intellectu separato, quam corpori coniuncto, ut id negare, prorsus meridianæ luci sit obistere, ut ex insinuat *hic*, & tractatis *citato loco de anima* constat. Quare D. Th. solum fuit sollicitus in *presenti q. 54. art. 1.* ostendere quod essentia Angeli non est sufficiens representare alia à se perfectè, & ita indiget speciebus superadditis. Hoc autem sufficienter ostendit D. Tho. ex eo quod essentia Angeli cum sit determinata ad certum genus, & speciem, non potest continere perfectè omnia alia genera, & species, sicut continet essentia diuina per modum causæ, & principij à quo deriuantur omnes aliæ res; & idè est infinita in essentia sua, nec limitata ad certum genus, & speciem, quia omnium generum, & specierum causa est quoad omnia quæ in talibus speciebus, & generibus continentur; & idè sola essentia diuina potest esse medium cognoscendi perfectè omnia alia extra se, & quia summè intelligibilis est, sicut deseruit sibi ipsi pro specie, ita etiam mediatè, & secundariò representat ea quæ continentur, & deriuantur ab essentia diuina. Vnde cum Angeli per suam substantiam non possint perfectè assimilari omnibus aliis rebus extra se, quia neque eas continent, neque causant, neque sunt eiusdem speciei cum omnibus illis, inde fit, quod in se substantia Angeli non sit sufficiens similitudo ad cognoscendum perfectè alia extra se, sed solum secundum quid, prout substantia Angeli magis vel minus conuenit, & assimilatur vel dissimilatur rei cognoscendæ: ergo si perfectè cognoscit res alia extra se, indiget aliquo superaddito substantiæ, & intellectui suo per quod habeat perfectam similitudinem rei cognoscendæ.

Ad

5 Ad fundamentum insinuat pro sententia Durandi, & Gabrielis, Respon. Similitudinem repræsentatiuam non requirere conuenientiam vniuocam & substantialem in natura cum re repræsentata, sed solum similitudinem accidentalem, & intentionalem, sicut vna imago repræsentat suū prototypum. Quod autem dicitur sufficere obiectum esse propositum ad extra, vt attingatur à potentia cognoscente, manifestè conuincitur esse falsum, quia si sufficit esse existens in rerum natura, restat tunc assignare, quomodo cognoscantur res non existentes vt præteritæ, & futuræ formando immediatam cognitionem de illis, & non in alio prius cognito, sicut quando immediatè recordamur Petri mortui, nisi ponendo species? Si dicatur sufficere quod aliquid sit intelligibile, seu possibile, etiam si existens non sit, sequitur quod Angelus intelligeret omnia possible, quia omnia sunt intelligibilia ex se. Si verò dicatur requiri quod sint in aliqua distantia proportionata vt cognoscantur ab intellectu, manifestè falsum est, cum possit Angelus intelligere abstrahendo à loco, & tēpore, sicut sunt vniuersalia, & possunt non solum res indistantes, sed etiam absentes, imò non existentes intelligere. Ac denique quidquid sit de omnibus istis, requiritur tamen ad intelligendum quod obiectum trahatur intus ad ipsum intellectum, sibi que intimè præsentetur, ita vt ab ipso intellectu, & obiecto pariatur notitia, quod cum non possit fieri per ipsam entitatem obiecti ad extra, necesse est quod fiat per aliquam similitudinem quæ gerat vices ipsius obiecti in se.

6 Quod si istes. Quid sit ista similitudo, quæ non fundatur in conuenientia naturæ, sed solum in repræsentatione obiecti. Nam etsi manifestum sit imaginem externam repræsentare suum prototypum, hoc tamen idè est, quia illa imago exterior repræsentat sola accidentia rei repræsentatæ; & idè conuenit cum illis entitatiuè. At verò species intelligibilis non solum repræsentat exteriora accidentia, sed etiam interiorem substantiam; & sic oportet quod habeat conuenientiam cum substantia, & natura rei repræsentatæ, si est similitudo illius. Et si dicatur quod est similitudo repræsentatiua, inquirimus quid sit hoc quod dicitur *repræsentatiua*? Si enim mediante similitudine repræsentat, prius præsupponitur similitudo cum natura quàm fundetur repræsentatio, & talis conuenientia inter speciem, & naturam non inuenitur, vel si est aliaqua alia similitudo, explicetur quid sit esse repræsentatiuam, aut quid addat suprâ similitudinem entitatiuam hoc quod dico repræsentatiuam, ita quod non exigatur conuenientia in natura, & entitate.

Respondetur, similitudinem intentionalem non dici accidentalem, quia solum repræsentat accidentia, sicut imago exterior, cum etiam ipsa substantia, & quidditas magis intima ab intellectu penetretur, eique repræsentetur, atque adeò speciem ad id requirat. Dicitur ergo intentionalis similitudo quatenus ad hoc est instituta à natura illa entitas, quam vocamus speciem, vt loco obiecti subrogetur in intellectu, & eius proprium munus, sit vices obiecti gerere. Et quia vices obiecti gerit sine conditionibus materialibus, sed purè cognoscibiliter, aut spiritualiter, seu in alio modo quàm in sua entitate res inuenitur, idè illa similitudo dicitur intentionalis & repræsentatiua, nō verò similitudo entitatiua, & vniuoca in eadem entitate, & natura, sicut duo homines, aut duo lapides, quia eius munus est naturam repræsentare, id est, præsentem, & coniunctam reddere intel-

Ioan. à S. Thom. in 1. part. D. 7b. Tom. alter.

lectui, seu potentiæ sine hoc quod habeat eandem entitatem, seu eundem modum essendi, quem res habet in propria natura, vel in propria materia. Qualitas ergo habens hoc munus, & officiū, quod est rem præsentem, seu coniunctam reddere potentiæ in alio esse, seu modo essendi, quàm in propria entitate, scilicet intelligibili modo, seu ad cognoscendum tantum ordinato, & à conditionibus materiæ segregato, hoc vocatur similitudo repræsentationis, non similitudo, & conuenientia entitatiua in eadem natura.

Ad instantiam P. Vasqu. Resp. species Angelis 7 superadditas non esse acquisitas, sed à Deo infusas, non supernaturaliter, sed connaturaliter, quia naturali modo repræsentant, & de rebus naturalibus sunt, & naturali virtuti intellectus debita, & proportionata, sicut etiam debetur concursus causæ primæ ipsi Angelo, & aliis causis debetur concursus aliarum causarum superiorum, qui quidem non est propria passio inferioris causæ, nec ab ea dimanat, sed à superiori, & tamen debetur ipsi ex colligatione, & subordinatione causarum inter se. Itaque potest esse aliquid debitum alicui naturæ, & tamen non oriri ex principiis propriis, sed ab extra, fietque illi violentia, si negetur talis forma, vel concursus, siquidem etiam respectu passiuæ principij potest violentia dari, vt diximus in *physica quest. 9.* Et anima rationalis debetur corpori organizato, & disposito, ita vt esset miraculum illi non infundi, & tamen non oritur ex propriis principiis, sed ab extra venit, & motus debetur cælo, licet à motore extrinseco proueniat. Sic omni intellectui debetur concursus ex parte obiecti ad intelligendum, qui fit per repræsentationes, & species, sicut materiæ debetur forma ad componendum rem naturalem; sed est hæc differentia, quod intellectus infinitus, id est, anima nostra formatur, & mouetur immediatè ab obiectis ipsis corporalibus mediantibus sensibus; & idè vnitur connaturaliter corpori ad species accipiendas. Spiritus verò separati, quia perfectiores sunt, non accipiunt perfectionem suam, & repræsentationem obiectorum ab ipsis obiectis corporalibus, sed ab eorum radice, & principio quod est Deus, & ab ideis diuinis, quia cum sint perfecti spiritus, & perfectè segregati ab omni corpore non conuertuntur pro intelligentia accipienda ad ipsa corpora, sed ad spiritum factorem corporum, qui est Deus, à cuius ideis accipiunt similitudines ad intelligendum superiori modo, quàm nos ab ipsis obiectis, vt *seq. dubio* dicemus. Atque ita sunt eis debita istæ species passiuæ, vt ab alio, non actiuæ, vt à se.

Obiicies tamen ad probandum quod essentia 8 Angeli sufficit per se ad repræsentandum res alias. Nam Angelus per seipsum est imago Dei creata, & inter creatas perfectissima, iuxta illud Ezech. 28. *Tu signaculum similitudinis plenus sapientia & perfectus decore*: ergo in se habet sufficiens principium ad cognoscendum Deum multò melius quàm per alias res? & ita pro acquirenda cognitione Dei non requirit aliarum rerū species. Multò minus pro aliis rebus creatis cognoscendis, quia habet maiorem conuenientiam, & habitudinem cum ipsis: nam respectu aliorum Angelorum habet conuenientiam valde propinquam, cum sint omnes eiusdem spiritualis naturæ, cum rebus autè corporalibus habet conuenientiam eminentialem, & superiorem, cum corpora naturaliter sint subiecta Angelo, eique obediunt, magisque inflat in illa, quàm cælum, siquid ex motu quem Angelus cælo imprimit, hæc inferiora immutan-

P p 2 tur,

tur, & generantur, sed qui comprehenderet cælum, vel Solem, ut motum ab Angelo, cognosceret per speciem Solis hæc inferiora: ergo qui comprehendit Angelum mouentem Solem, etiam comprehendit hæc inferiora: Angelus autem mouens Solem comprehendit se per suam essentiam, non per superadditam speciem, & quilibet Angelus, præsertim superior, aut eiusdem ordinis, posset Solem mouere: ergo potest per suam essentiam cognoscere hæc inferiora corpora, sine specie superaddita.

⁹ Conf. quia natura intellectiua, & potentia intellectus intelligibiliter continet omne ens, sicut potentia factiua continet id quod est factibile à tali potentia: ergo intellectus, qui comprehendit se, & naturam à qua dimanat, in tali comprehensione cognoscet omne intelligibile pertinens ad talem intellectum, licet intellectus, seu potentia non comprehendens se, indigeat specie superaddita ad alias res cognoscendas. Conseq. patet, quia non minus continet potentia cognoscitiua obiectum suum, quam potentia factiua suum, sicut enim potentia actiua habet proportionem cum effectu, ita potentia cognoscitiua cum obiecto, sicut potentia visiva cum colore potius quam cum sono vel sapore: ergo qui comprehendit potentiam cognoscitiuam, attingit in illa obiectum ad quod dicitur habitudinem vel proportionem, sicut qui cognoscit potentiam visiuam, attingere debet colorem, & comprehendens talem potentiam attinget omnes colores: ergo Angelus comprehendens suum intellectum, attingit in illo omne intelligibile, & sufficienter continet in se omne ens, sicut potentia factiua continet in potentia suos effectus.

¹⁰ Conf. secundò, quia Angelus comprehendit per seipsum suam substantiam, & omnia accidentia sibi conuenientia: ergo etiam suas species, quia sunt accidentia sibi inhaerentia: ergo etiam comprehendit ipsas species: ergo representationem illarum, & consequenter res representatas per illas, alias solum confusè, & valde imperfectè cognosceret species suas: ergo habet in sua substantia sufficientem vim ad cognoscenda obiecta representabilia per species; & sic non indiget speciebus superadditis.

Resp. Angelum sine speciebus superadditis non sufficere ad representandum Deum, & alias res perfectè, & distinctè, sed solum imperfectè, & confusè. Et licet Deus non representetur per aliquam creaturam, vel per speciem creatam quidditatiuè, & ut est in se, sed confusè, & imperfectè, & in hoc genere imperfectæ, & abstractivæ cognitionis essentia Angeli melius representet Deum, quam alij effectus, quia similior est Deo, illique propinquior, tamen respectu aliarum rerum, de quibus Angelus potest habere perfectam, & comprehensiuam notitiam non sufficit essentia ipsius Angeli, sed indiget speciebus superadditis distinctè representantibus. Etenim non potest res una representare aliam perfectè, nisi vel ratione conuenientiae, & similitudinis cum illa, vel ratione causalitatis in illam, vel quia est effectus illius, & procedit ab illa. Nullo autem ex his modis potest essentia Angeli representare sufficienter, & perfectè alias creaturas. Nam Angelus non procedit ab illis ut effectus, sicut procedit à Deo; & ideo licet hac ratione possit representare Deum, sicut effectus eius, non tamen potest sic representare alias creaturas, quia ab eis non procedit. Similiter neque est causa aliorum, nam multæ res ab Angelo fieri non possunt, ut res spirituales, & ordines gratiæ, & cælum, & alia omnia, quæ per creationem solum fieri possunt; & sic non potest illa cognoscere in seipso tanquam in causa. Aliæ verò res, quæ per generationem, &

motum fiunt, non possunt ex virtute Angeli, etiam ad eas concurrentis per motum suum perfectè cognosci, tum quia non causat totum quod in re illa inuenitur, & ex qua componitur, quia non causat materiam; & sic ex vi suæ virtutis non habet perfectam illius cognitionem; tum quia non causat formam virtute sua immediata, sed applicando actiua passiuis; & præcisè per motum localem, eo modo quo cælum mouet. Vnde non cognoscit ex vi suæ virtutis, & causalitatis formas istas, & effectus quantum sunt in se, sed quantum pendent à motu locali, & ab actiuis, & passiuis quæ applicant. Et ad instantiam de Sole, respondetur quod comprehendens Solem, videt in illo virtutem illam causatiuam talium formarum, & effectuum, quia hæc virtus in Sole est, non in Angelo, licet requiratur motum Angeli, ut causet illa virtus, quia non efficit mutationes horum inferiorum, nisi secundum diuersos aspectus & positiones & coniunctiones astrorum, & hæc sine motu fieri non possunt. Comprehendens autem Angelum, non videt in illo virtutem causatiuam istorum effectuum, sed solum motiuam, & applicatiuam illius virtutis à qua causantur. Et ideo ex vi illius, effectus ipsi non possunt perfectè videri, sed solum in quadam confusione, & ratione communi. Denique si attendatur sola conuenientia, & similitudo Angeli cum aliis rebus, constat quod non potest perfectè illas comprehendere, quia in multis prædicatis non conuenit cum illis, sed longè illis dissimilis est; & sic in vi conuenientiae entitatiuæ, & similitudinis non potest illas perfectè cognoscere. Nec in vi huius posset etiam Deum cognoscere, nisi valde confusè, sed quia ex alia parte est effectus eius valde perfectus, potest ex sui cognitione plus per essentiam suam de Deo cognoscere, quam ex aliis effectibus.

Ad 1. Conf. Resp. negando conseq. Et ad probationem redditur disparitas inter potentiam cognoscitiuam secundum se, sine speciebus, & potentiam factiuam, seu operatiuam effectuum, quod potentia cognoscitiua sine speciebus non continet obiecta sua neque dicit ordinem ad illa, nisi ut pura potentia in genere cognoscibili, non ut in actu, & determinatè, ac distinctè ea continens: actuatur enim, & determinatur potentia per obiectum. Vnde ex vi comprehensionis talis potentia solum cognoscuntur obiecta ut contenta in illa sub quadam potentiali, & confusa ratione. Si verò sumatur potentia cognoscitiua, ut repleta, & actuata speciebus, sic cognoscit perfectè obiecta per ipsas species: sicut etiam intellectus per ipsas ideas quas format, & per artem qua dirigit, cognoscit ideata & arte facta, sed hæc supponunt species sine quibus neque intellectus format ideas, neque ars dirigit arte facta. At verò potentia actiua etiam se sola, & sine alio addito dicit ordinem, & proportionem ad suos effectus per modum actiuitatis, & virtutis à qua fiunt, & consequenter per modum actualem, non potentialem. Vnde mediante ipsa sunt cognoscibiles effectus perfectè, & distinctè, & secundum continentiam actualem prout in causa continentur magis vel minus perfectè, secundum quod ipsa causa magis, vel minus influit in effectus ipsos, quos secundum actiuitatem, & actualitatem continet, non secundum potentialitatem, & imperfectionem.

Ad 2. Conf. Resp. quod substantia, & intellectus Angeli possunt considerari in duplici statu. Vno modo secundum se præcisè antequam intelligantur in illo species, quas connaturaliter exigit ille intellectus, sed solum secundum suam substantiam, & potentiam: & hoc modo non potest substantia, & intellectus seruire ad cognoscendas omnes species sibi con

connaturales, & proportionatas perfecte, & complete, & quidditatiue, quia sub hac consideratione solum se habent in potentia passiva, & potentiali ad tales species, sicut & ad obiecta earum, & ita non amplius potest intellectus ex vi suae substantiae sic consideratae cognoscere, quam de ipsis obiectis, scilicet quod est in potentia ab illa, & sub habitudine purae potentiae in esse intelligibili ad tales species, & ad talia obiecta se habet, habitudo autem purae potentiae non potest distincte, & determinate manifestare formas, ad quas est in potentia, sed solum potentialiter, & indeterminate, & in confuso, quod est solum in communi manifestare eas, & quoad *an est*. Alio modo possunt considerari substantia, & intellectus Angeli non solum secundum se praecise, & sine speciebus, sed cum illis, & prout habent illas à Deo, qui est status connaturalis talis intellectus. Et sic substantia intellectiva, & intellectus Angeli, ut completus, & actuatus speciebus est sibi ratio, & medium cognoscendi perfecte ipsas species, & earum representationes, & obiecta, quia sic iam supponuntur species in intellectu, & ipsa substantia intellectiva supponitur perfecta, & completa in suo genere intellectivo, & in statu suo connaturali habendo species, & sic ipsa ut actuata speciebus, & non sine illis est ratio, & medium cognoscendi se, & species quae in se sunt perfecte, & quidditatiue, non ipsa sola, & prout in potentia ad species.

Angeli non acquirunt aliquas species ab obiectis, sed à Deo habent illas infusas.

¹³ Loquimur vniuersaliter de omnibus obiectis tam materialibus, & corporeis, quam spiritualibus, & incorporeis, licet in obiectis immaterialibus possit inueniri specialis difficultas, an ista obiecta immaterialia possint speciem sui immittere, & causare in intellectu Angeli, quod in obiectis materialibus stare non potest, quia si ab eis accipiuntur species spirituales, id debet esse beneficio alicuius intellectus agentis, siue ipsius Angeli, siue seperadditi ab Angelo, potentis illas species depurare, & spiritualizare à materialibus conditionibus, quod in rebus spiritualibus non requiritur.

In hac ergo parte controuersia est inter scholam D. Th. & Scoti. Nam Scotus vult Angelum posse accipere species à rebus materialibus, ut patet in *2. dist. 3. qu. 1. 1.* imò ad notitiam intuitiuam in praesentia obiecti censet concurrere effectiue ipsum obiectum simul cum intellectu, sine alia specie: ad cognitionem verò abstractiuam dicit acquirere Angelum species ab obiectis, quatenus ex notitia intuitiva habita ex ipsa re singulari praesenti relinquitur species ad notitiam abstractiuam, hoc est ad notitiam rei non existentis, aut sine existentia considerata, ut docet *ibidem quæst. 10. §. Ad questionem*. Non tamen negat Scotus, & authores qui ipsum sequuntur, absolute non esse infusas aliquas species Angelo ab initio suae creationis, saltem ut creatur perfectus, & ornatus sapientia, & intelligentia, id enim postulare videtur ille locus Ezechielis 28. vbi loquens de primo Angelo antequam caderet, & consequenter ab ipso instanti creationis, dicit: *Tu signaculum similitudinis plenus sapientia, & perfectus decore in deliciis paradisi Dei fuisti. Tu Cherub extensus, & protegens, & posui te in monte sancto Deo, in medio lapidum ignitorum ambulasti perfectus in viis tuis à die conditionis tuae.* Quae verba cum loquantur de Angelo in illo primo instanti ante-

Ioan. à. S. Thom. in 1. part. D. Th. Tomus alter.

quam peccaret, & in quo adhuc erat perfectus, manifeste supponunt ipsum habuisse in illo primo instanti omnia requisita ad illam plenitudinem sapientiae, & ad cognitionem sine qua non posset mereri, nec esse perfectus in viis suis: cognitio autem, & sapientia, sine speciebus haberi non potest, nec in illo instanti potuit illas acquirere ab aliis rebus, cum hoc in vnico instanti, aut breuissima illa mora intelligi non possit, ita quod applicaretur tunc omnibus obiectis, ut ab illis hauriret species, & redderetur plenus sapientia. Hoc ergo non negat Scotus, & eius schola, quod aliquas species Angelus ab initio suae creationis habuerit infusas, licet de Alexandro referat Vasqu. *hic disp. 20. c. 1.* quod indistincte asserat, omnes species Angeli esse à rebus acceptas in *2. p. qu. 24. memb. 2. & 3.* Addunt tamen Scotista, & Scotus, Angelum acquirere à rebus species singularium, quae decursu temporis fiunt, nec ipsis ab initio nota sunt: imò licet haberet istas species singularium ab initio, tamen ad notitiam intuitiuam eorum quando redduntur praesentia aliquid à rebus dicunt accipere. Et similiter docent ex eodem principio, quod si Angelus non haberet ab initio illas species infusas, posset illas beneficio sui intellectus acquirere à rebus, & sic solum fuerunt per accidens infusae. Consequenter isti authores ponunt in Angelo intellectum agentem, qui sit virtus talium specierum acquisitiua ab obiectis.

At verò P. Vasqu. *disp. 200. c. 3.* inclinatur in illam partem sententiae Scoti, quod Angelus sine specie possit in praesentia obiecti cognitionem illius elicere, quia ad id putat sufficere efficaciam intellectus Angelici per se, sine specie superaddita. Et licet *dist. 201.* cum D. Th. & communi sententia existimet Angelum non accipere species à rebus, tamen *cap. 3.* inquit facilius intelligi posse quod Angelus non indiget speciebus, sed à sola sua virtute potest aliquid intelligere, eo ipso quod aliquid constituitur intra latitudinem obiecti eius.

¹⁴ Dicendum nihilominus est primò, Angelum de facto non acquirere species à rebus, neque à spiritualibus, neque à corporalibus, neque in ordine naturali, neque supernaturali. Hanc tenet manifeste D. Th. in *hac qu. 55. art. 2.* vbi sine vlla distinctione id docet de omnibus speciebus; & idem docet in *2. dist. 3. qu. 3. art. 1.* & de verit. *q. 8. art. 7.* & *2. contra Gentil. c. 92. & 96.* & communiter sequuntur omnes Theologi.

Ratio huius concl. constat ex eo, quod Angelus productus est à Deo perfectus in natura intellectuali, & iuxta modum sibi debitum, & proportionatum, non minus quam primus homo, qui productus est à Deo in statu perfecto tam animae, quam corporis. Angelus autem multò perfectius quam homo creatus est: ergo non est productus ignorans, sed sapiens, & intelligens, imò plenus sapientia, & perfectus decore, sicut eius intellectus exigit, qui perfectus est, ut *ex loco supra citato Ezech. 28.* dicebamus. Ergo si in illo primo instanti suae creationis productus est ut intelligens, & cognoscens, non solum in potentia, & in habitu, sed in actu secundo, oportuit quod haberet species infusas, quia actus intelligendi in illo instanti creationis in Angelo sine speciebus infusis elici non poterat. Item in illo instanti Angelus creatus est in gratia, iuxta illud August. *12. de ciuit. c. 9. Simul erat in eis condens naturam, & largiens gratiam:* ergo in illo primo instanti debuit habere aliquem actum supernaturalem dispositiuum ad istam iustificationem, siquidem non accepit gratiam, & iustificationem, ut paruulus, sed ut adultus, & per proprium

P p 3 actum

actum se disponendo: ergo debuit habere cognitionem supernaturalem à qua regulatur actus voluntatis disponens ad gratiam: ergo & species, sine quibus talis cognitio haberi non potest, quas in illo instanti à rebus acquirere non potuit, quia ut acquireret, deberet præsupponi existens, & productus in facto esse, & sic produceretur ignorans, & non habens gratiam per propriam dispositionem, si cum gratia creatus est. Quare vel debuit Angelus in primo instanti produci à Deo cum ignorantia, & iustificari, nec per propriam dispositionem, si species deberet acquirere, quia ista acquisitio non poterat fieri nisi ab Angelo iam in facto esse producto, & existente, vel si productus esset à Deo non ignorans, sed intelligens, & se disponens ad iustificationem pro illo primo instanti: ergo tunc non habuit species acquisitas, sed infusas. Denique ad hoc ipsum facit id quod supra ponderauimus ex loco illo Ezech. 28. ubi ab ipso die conditionis, id est ab instanti creationis dicitur Angelus perfectus esse in viis suis, & plenus sapientia, & perfectus decore, &c. quæ omnia verificari non possunt, si produceretur à Deo sine speciebus, sed intellectus ipse nudus, & in potentia ad species, & tanquam tabula rasa: sic enim non esset plenus sapientia, sed in potentia ad illam, & actu euacuatus ab illa, sicut homo quando nascitur.

15 Ex his autem assurgimus ad discurrendum quod Angelus accipit species in illo primo instanti non solum representatiuas rerum in vniuersali, sed etiam in singulari, eo quod non potuit tunc habere perfectum solum intellectum speculatiuum, sed etiam practicum, quia habuit meritum, & meritum perfectum in dilectione Dei, & proximi, cognouitque tunc alios Angelos, multasque eorum operationes, cum naturaliter vnus Angelus sit communicatiuus cum altero, vel illuminando, vel illuminationem recipiendo, vel etiam loquendo; & sic postulat cognitionem, & species eorum in singulari. Myſteria etiam gratiæ, quæ per fidem nouit, in singulari cognouit; ac denique non poterat dici perfectus in viis & plenus sapientia, si circa singularia esset ignorans, & solum in vniuersali tunc cognosceret, quia scientia in communi minus apta est ad procedendum in particulari, & ita minus sapienter, & perfectè disponunt intellectum, nec potest qui caret tali notitia vocari plenus sapientia.

16 Solum potest dici quod Angeli habuerunt tunc cognitionem, & species infusas eorum indiuiduorum quæ pro illa duratione extabant siue in creaturis spiritualibus, siue corporalibus, non tamen pro indiuiduis succedentibus decursu temporis; & ideo pro illis debuit habere vim acquirendi species ab obiectis, quæ est sententia Scoti, & in quo à nobis differt. Hæc responsio non potest, euidenter conuinci ex his quæ hucusque adduximus, quæ solum procedunt de cognitione attributa Angelo pro illo primo instanti. Potest tamen non parum vrgeri, & excludi congruentissimis rationibus ex his quæ allata sunt deductis, eo quod ista responsio enervat valde perfectionem Angelici intellectus, & reducit illam quantum est ex natura sua ad eundem modum intelligendi quem habet homo, licet in isto genere viuacius, & perfectius intelligat, sicut differt homo magni ingenij ab aliquo valde rudi, cum tamen ex his quæ allata sunt constet, Angelum non per accidens, sed ex sua natura esse spiritum plenum sapientia, & perfectè intellectualem: id enim significant illa verba, *Tu signaculum similitudinis plenus sapientia*. Et S. Dionysius in 7. c. de diuinis nominibus dicit, *Angelos non congregare diuinam cognitionem à rebus diuisibilibus, & sensibili-*

bus. Si autem talis naturæ esset Angelus quod singularium notitiam ab ipsis obiectis acciperet per species ab eis deriuatas, licet eas in vniuersali haberet infusas, simpliciter ex natura sua non esset plenus sapientia, quia in multis posset eius notitia deficere, siquidem plurimum singularium notitia caret, cum non posset ab omnibus haurire species, sed solum ab illis, quibus se applicaret. Non posset autem Angelus multis singularibus, quæ simul accidunt in toto vniuerso simul se applicare ut illorum notitiam acciperet, quia dum in vno loco acciperet species, in alio distanti multa fierent, quarum notitia penitus careret, sicut si Angelus applicat se Hispaniæ ad accipiendum species eorum, quæ hinc accidunt, non potest simul accipere species eorum quæ accidunt in eodem instanti in alia parte terræ, vel infra terram, vel in cælo. Et ita hoc ipso, quod Angelus non habet scientiam singularium, nisi acquirendo species ab obiectis, & has non potest accipere, nisi applicando se ipsis obiectis, naturaliter talis intellectus subiectus est multorum singularium ignorantia, quia non potest simul applicari omnibus obiectis, quæ sunt vel de nouo fiunt in mundo, & sic oportet quod plurimum species ab eo omittantur: imò etiam ex natura sua non esset debitum illi habere species rerum in vniuersali, sed si quas habuit ab initio suæ creationis, non fuerunt per se, sed per accidens infusæ, siquidem potest eas acquirere à rebus: ergo non est ei debitum quod per infusionem accipiat, quia si est acquisitiuus earum in singulari, etiam ex illis potest in vniuersali accipere sicut nos: non ergo potest naturaliter esse acquisitiuus specierum, & naturaliter petere infusionem earum; nisi fortè peteret infusionem specierum in vniuersali, & in confuso, & postea per acquisitionem singularium perficeretur, quod imperfectionis magnæ est, ut sequi. conclusione ponderabitur. Vnde quantum est ex natura sua, si illa infusio per accidens facta non daretur à principio, per se, & ex natura sua Angelus caret omni specie tam in vniuersali, quam in singulari, quousque aliquas acquireret, & sic dum non acquireret, esset ignorans, non ergo per se, & ex natura sua esset plenus sapientia.

Dico secundò non potest Angelus propter perfectionem suæ naturæ acquirere aliquas species à rebus, sed ex sua natura petit illas habere infusas à Deo; & sic caret principio acquisitiuo specierum, qui est intellectus agens respectu rerum materialium.

Hæc concl. prob. ex duplici principio. Primum ex parte ipsius Angeli. Secundum ex parte ipsorum obiectorum materialium (de his enim tantum loquimur in præsentī conclusione.) Primum principium explicatur sic. Quia si natura Angeli posset acquirere species ab obiectis, vel ex natura sua, id peteret, vel hoc illi accideret ex aliquo defectu talis naturæ, seu imperfectione, quia dependere ab obiectis in acquisitione specierum, & non habere illas connaturaliter à principio, maioris imperfectionis est, quia est carere formis intelligibilibus, quæ sunt species. Hoc secundum non est ad propositum, quia si solum ex defectu naturæ id habet, non ergo ex natura sua id petit, sed potius oppositum, quia non pertinet id ad perfectionem naturæ intellectualis, sed ad defectum eius: natura autem non inclinatur ad id quod defectuosum est sibi, nisi dicatur hoc non esse ex defectu naturæ, sed ex generali imperfectione, & limitatione eius, quia non petit de se habere illam perfectionem, sed per se debet eam acquirere. Quod si ita est: ergo ex natura sua Angelus non est perfectus in intellectualitate,

rate, sed imperfectus, & ignorans, & sic ex natura sua intellectus Angeli non magis esset in actu, nec magis plenus sapientia, quam noster intellectus, quia deberet eam acquirere ex obiectis; quando enim intellectus aliquis caret specie, seu speciebus obiectorum, respectu illorum ignorans est. Quod si Angelus haberet infusas species à principio, id esset per accidens, quia Deus vellet hoc illi largiri supra debitum suæ naturæ, siquidem ex natura sua esset acquisitiuus illarum: non ergo ex natura sua peteret sibi infundi. Inconueniens autem est dicere quod Angelus qui est naturæ intellectualis perfectæ, ex ipsa natura sua habeat ignorantiam, & carentiam specierum, cum in linea intellectuali Angelus se habeat sicut corpora incorruptibilia in corporalibus, quæ petunt iam suam perfectionem habere statim à principio, non paulatim, & successiue eam acquirere: id enim proprium est corporum generabiliu, & motui subiectorum: sic Angeli in genere immateriali, & spirituali cum sint naturæ perfectæ, ex propria ipsa sua natura exigunt non acquirere perfectionem intelligibilem, quæ ei tribuitur per species, quia hoc supponit naturam ipsam, & intellectum ex se, & quando producitur carere illa perfectione, siquidem acquirere non potest, nisi desit sibi id quod acquirit, alias iam haberet, si non careret illa. Intellectus autem carens speciebus intelligibilibus, est in genere intelligibili, sicut materia sine forma: caret enim scientia in actu primo, siquidem intellectus per ipsam potentiam solam ante species non dicitur sciens in actu primo, sed solum in potentia remota, ut patet in puero cum nascitur, qui non dicitur sciens in actu primo, sed ignorans, quia eius intellectus est tanquam tabula rasa sine speciebus, & tamen habet intellectum possibilem capacem illarum, & intellectum agentem acquisitiuum illarum. Si ergo Angelus ex natura sua est acquisitiuus specierum, non autem ex natura sua petat sibi statim à principio infundi, ita quod cum illis nascatur, & creetur, ex natura sua petit nasci ignorans, sicut homo, & consequenter non plenus sapientia, neque ut perfecta natura in esse intellectuali, perfecta, inquam, in actu primo, & in ratione scientiæ: nam in actu secundo non est necesse quod ab initio consideret in actu secundo omnia, quia in creaturis non est imperfectio actu non considerare aliqua, sed est imperfectio carere scientia, seu facultate considerandi: hoc enim est ignorare. Quod si Angelus ex se non est natura intellectualis perfecta, quænam erit perfecta in esse, & genere intellectuali? An forte non est possibilis intellectualis natura perfecta? Hoc sanè summum inconueniens est, & magna infelicitas felicissimæ naturæ, quod in omni sua latitudine, & genere petat ex natura sua nasci cum ignorantia, & nullus intellectus sit ex debito suæ naturæ plenus sapientia, sed si habet illam ab initio, est per accidens.

18 Vnde etiam sit argumentum, & confirmatio pro hac parte non leuis: nam id quod ex natura sua alicui est debitum, & connaturale: nunquam tollitur à tota illa natura, & omnibus speciebus, & indiuiduis eius, licet in aliquo, vel aliquibus præter naturam quandoque fiat, & suppleatur: sicut si homo naturaliter est acquisitiuus scientiæ in anima, & augmenti in corpore, sic accidit communiter in hominibus, licet unus, aut alter accipiat scientiam infusam à Deo per accidens. At videmus quod omnes Angeli creati sunt intelligentes, & scientes, quia in primo instanti meruerunt, & de ipso primo Angelo dictum est quod fuit plenus sapientia, & perfectus in viis suis à die conditionis suæ, est autem eadē ratio de aliis omnibus Angelis: ergo vel

omnibus erat connaturale, & debitum sic nasci, & sibi infundi species ab initio, vel non, sed ex natura sua erant acquisitiui specierum. Si hoc secundum: ergo non omnibus Angelis debebant infundi species, nec ab initio sic creari, quia si connaturale, & debitum est eas acquirere, non debuit hæc connaturalitas in omnibus tolli, & suppleri, licet in uno, vel altero per accidens infunderentur species. Si primum: ergo habemus intentum, quia ex natura sua non sunt acquisitiui specierum, siquidem ex natura sua petunt nasci cum illis, & sibi infundi ab initio. Nec potest stare quod eademmet natura connaturaliter petat nasci plena speciebus, & connaturaliter petat acquirere illas, & sic non nasci cum illis, sicut non potest homo connaturaliter petere potentiam augmentatiuam, quia successiue crescat, & connaturaliter petere nasci in perfecto statu, & omni augmento acquisito, & habito ab initio. Nec dici potest quod Angelus petit connaturaliter habere aliquas species infusas ab initio, scilicet in vniuersali, & de rebus incorruptibilibus, non de singularibus, quæ successu temporis decurrunt. Nā contra est, quia si istæ species infusæ Angelo quas connaturaliter petit, taliter sunt repræsentantes in vniuersali, quod non possunt deferuire pro cognoscendis singularibus, quando singularia producantur, sed indigent noua specie ipsius singularis, sequitur quod Angelus ex natura sua petat species valde imperfectas, & confusas, quia repræsentatio solum in vniuersali, & non potens descendere ad singularia, etiam si dentur, & producantur talia singularia, est repræsentatio imperfecta, & minus efficax, quia cum intellectus sit ex se non solum speculatiuus in vniuersali, & in abstractione, sed etiam directiuius rerum in singulari, & cognoscitiuus rerum experimentaliter, & in indiuiduo, sit quod intellectus solum petens ex sua natura species repræsentatiuas rerum in communi, petat species imperfectas, & inefficaces pro scientia tam speculatiua quam practica, & sic non erit ex natura sua Angelus plenus sapientia, quia caret de se, & connaturaliter aliqua sapientiæ parte, scilicet circa singularia. Vnde vterius sit cōsequens quod talis intellectus ex natura sua manet expositus multis ignorantiis, quia cum multa singularia fiant, & transeant in eodem momento temporis, nec possit Angelus omnibus simul adesse, ut ab omnibus species accipiat multa necesse est ab eo transeant, & ignorantiam eorum habeat, & sic semper remanebit intellectus ille ex natura sua non plenus sapientia, quia multis ignorantis expositus, & sic à sapientia deficiens, cum tamen à Scriptura dicatur, *Plenus sapientia*, & ratio id dicat, quia natura Angelica est perfectissima in genere intellectuali: ergo non est naturaliter ignorans, & acquisitiua scientiæ. Nec propter hoc timendum est quod per illas species cognoscat omnia singularia etiam futura, quia illæ species repræsentant singularia eo modo quo sunt, & dependenter ab eorum terminatione, ita quod quando sunt intra causas, repræsentant ea intra causas, quando extra, ut existentia in se, non verò in se determinatè quando sunt futura: in hoc enim non est inconueniens quod dependant species Angelicæ à productione singularium, ut à termino suæ repræsentationis, quia similitudines sunt deriuatæ ab ideis diuinis, & eo modo repræsentant res in intellectu Angeli, quo deriuantur à Deo per successum temporis, ut dicemus latius *disput. sequenti*.

Secundum principium *supra* positum quod repugnet Angelum acquirere species à rebus materialibus, sumitur ex parte obiectorum, quia non potest Angelus acquirere species ab obiectis materialibus

terialibus, nisi prius sint cognita à sensibus, & imaginatione.

Cuius ratio est, quia vel intellectus sumit suas species ex obiectis iam cognitis, & præsuppositis in aliis potentiis cognoscentibus præter intellectum, vel non, sed immediatè ab ipsis obiectis in se haurit species. Si primum, iam supponit sensum, & cognitionem sensitivam, quia obiecta extra intellectum cognita, non nisi in sensu supponi possunt, quia præter intellectum cognitionem non datur nisi sensitiva, qua tamen caret Angelus; & sic ex illa non potest species haurire; nisi dicatur quod accipit species à sensibus, non suis, sed nostris, quod est omnino ridiculum, & est facere Angelum deterioris conditionis quàm hominem in cognitione sua, cum homo, quia naturaliter petit accipere species à sensibus, naturaliter etiam uniatur corpori, in quo sunt sensus, Angelus autem si connaturaliter etiam petat accipere species à sensibus, non habeat illos sibi unitos, sed indigeat ab homine, vel à brutis accipere species ex eorum sensibus, quasi si homo, vel bruta non sint, Angelus maneat in obscuro. Nec etiam dici potest quod Angelus hauriat species, non à sensibus, sed ab intellectibus aliorum Angelorum, tum quia non bene explicari potest, quomodo vnus Angelus illabatur menti alterius, vt ab eo accipiat species, & si alter noluerit vt ab eo species accipiat, non intelliget; tum quia hoc modo si vnus tantum Angelus produceretur, ille non intelligeret, quia non esset alius intellectus à quo species acciperet; tum quia quilibet Angelus deberet supponere alium iam intelligentem, & habentem species vt ab eo acciperet, & ille alium, & sic vel procederetur in infinitum, vel daretur circulus, ita vt iste acciperet species ab illo, & ille ab isto vt intelligeret; sicque supponerentur ad inuicem habere, & non habere species, vel deueniretur ad vnum qui species non acciperet ab alio, sed à Deo connaturaliter: eadem autem ratio est de omnibus, quia nullus operatur intra mentem alterius, eique illabatur, licet illuminet illum per exteriorem propositionem veritatis, vt *disp. 25. dicitur*.

20 Si autem dicatur, quod intellectus Angeli accipit species, non ex obiectis iam cognitis ab alia potentia siue sensitiva, siue intellectiva, sed immediatè ab ipsis obiectis, peiora sequuntur inconuenientia. Nam vel accipit ab ipsis obiectis species purificatas, & denudatas à conditionibus indiuidualibus, & in vniuersali representantes, vel non, sed directè representant ipsa singularia materialia in se. Si hoc secundum illas species nihil differunt à sensibilibus, quales sunt species sensibus impressæ, quæ representant directè singularia materialia, & essent imperfectiores speciebus nostri intellectus, quia nostræ species representant res in abstracto, & vniuersaliter, illæ autem species, quas Angeli acciperent à rebus, representarent singulariter, & quilibet suum determinatum indiuiduum tantum; & sic quantumcumque essent spirituales, essent tamen in representando minus vniuersales, & perfectæ, quàm species nostri intellectus, quia magis restrictæ, & determinatæ essent. Est autem inconueniens quod Angelus, qui est perfectior homine in intelligendo non petat perfectiores species quàm ille. Si verò accipit ab obiectis species, non in singulari, & determinatè representantes cum conditionibus indiuiduantibus, sed abstractas, & denudatas ab illis, sicut species nostri intellectus: ergo cum ex vna parte non supponat ipsa singularia cognita per sensus, quia non habet illos, sed immediatè abstrahat ob obiectis, & ex alia parte species illas quas abstrahit, non representent directè

ipsa singularia, seu conditiones indiuiduantes, quia abstrahit, & denudat ab illis ipsas species: ergo remanebit Angelus ex natura rei cum cognitione valde confusa, & solum in communi, & in vniuersali, quia directè non representantur singularia cum ab illis abstrahat, nec reflexè potest illa cognoscere, cum non habeat sensus, supra quos reflectat, & in quibus supponat singulare esse cognitum directè sicut in nobis inuenitur, nec supra ipsum obiectum à quo accepit species posset semper reflectere, cum non semper Angelus sit illi coniunctus, nec ipsum obiectum sit semper existens: ergo remanebit cognitio Angeli omnino imperfecta, & truncata respectu cognitionis singularium. Dicere autem quod species illa quam Angelus acquireret ab obiectis, vtrumque directè representaret, scilicet tam vniuersale, quàm singulare, omnino repugnat, quia species quæ sunt vniuersales per abstractionem à singularibus, separant vnum ab alio, & representant vnum relicto alio: & sic representant naturam in vniuersali, non representatis ibi directè conditionibus indiuidualibus, sicut species visibilis representant colorem pomi, & non saporem: ergo non potest species aliqua representare per viam abstractionis naturam aliquam in vniuersali, & simul directè representare conditiones indiuiduantes directè, siquidem abstrahunt ab illis.

Dico tertio: non potest Angelus accipere species 21 à rebus immaterialibus seu spiritualibus, neque per actionem Angeli in talia obiecta, neque per actionem talium obiectorum in intellectum Angeli. De hac conclusione videndus est Nauarrete *hic controu. 50.* & Carmelitani Salmant. *tractatu 6. de Angelis disp. 5. dub. 3.* licet oppositum tribuatur Scoto, & Alensi *supra cit.* Imò D. Th. *qu. de anima art. 18. ad. 13.* & *art. 20. ad. 11.* dicit quod *Anima separata infunduntur species mediantribus Angelis.* Caterum D. Thom. in hac *q. art. 2. ad. 1.* absolute docet, quod *Similitudines, quæ sunt in mente Angeli non sunt à creaturis acceptæ, sed à Deo, qui est creaturarum causa;* & loquitur indistinctè de omnibus creaturis siue spiritualibus, siue corporalibus. Et *infra quæst. 57. art. 2.* expressè docet quod *Impressæ sunt Angelo similitudines seu rationes omnium tam corporalium quàm spiritualium à Verbo Dei.* Et videri potest *infra qu. 106. art. 1.* vbi negat ab Angelo illuminante infundi aliquod lumen inferiori. Et idem docet in *2. dist. 9. qu. 1. art. 2. ad. 2.* & *qu. 9. de verit. artic. 1.* præsertim *ad. 10.* vbi docet, quod *Angelus illuminans non infundit species.* Certè quod substantiæ spirituales non imprimant species suas intellectibus Angelorum, nec isti eas ab illis accipiant, argumento est, quia Angeli in principio suæ creationis acceperunt species, quibus cognoscerent alios Angelos, neque expectauerunt ab eis species accipere: ergo hoc connaturale est ipsis Angelis: nam si connaturale esset accipere species ab ipsis obiectis spiritualibus, non negaretur hoc ipsis Angelis. Habuisse autem ab initio species infusas, quibus Angeli se cognoscerent, patet, quia in ipso primo instanti creationis cognouerunt se, quia exereuerunt actum charitatis, quo dilexerunt Deum, & proximos; similiter quilibet Angelus cognouit gradum & excellentiam suam, quia comprehensiuè se cognouit: ergo cognouit se esse superiorem vel inferiorem aliis, & consequenter alios cognouit: ac denique Angelus dicitur fuisse *plenus sapientia, & perfectus in viis suis à die conditiōis suæ.* Ezech. 28. Non esset autem plenus sapientia, si in illo primo instanti deesset illi perfectissimorum entium cognitio, idest ipsorum Angelorum. Si autem in ipso primo instanti creationis cognouerunt alios Angelos

gelos, non potuit id esse per impressionem specierum ab ipsismet Angelis factam in alios, vel per acceptionem ab ipsismet Angelis, quia omnes simul sunt producti. Non poterat autem vnus ab alio accipere nisi illum supponeret existentem, vt hauriret ab illo, vt ab obiecto species: nec iterum omnes poterant in alios imprimere, quia inferiores non poterant species sui in superiores imprimere; hoc enim esset plusquam illuminare illos. Negat autem S. Tho. inferiores Angelos illuminare superiores *inf. q. 106. art. 2.*

22 Ratio autem à priori ea est, quam sapius indicat S. Tho. vt videri potest 2. *contra Gentil. c. 98. circa finem, in 2. de Anib. dist. 3. qu. unica art. 1. ad. 2.* quia vnus Angelus non potest illabi intra mentem alterius per suam substantiam, neque immediate operando intra illum præsertim infundendo lumen, vel species, vt docet *inf. q. 105. a. 3.* ergo vna substantia spiritualis non potest imprimere speciem suam in intellectu alterius Angeli, neque ipse ab eo haurire. Hæc consequentia patet, quia species spirituales non possunt produci ab vno Angelo in alium transeundo per medium, quia medium est extensum, vel corporeum, species autem illæ sunt accidentia spiritualia; & sic non possunt inherere medio corporeo, & multò minùs in vacuo, in quo essent sine subiecto: debent ergo produci sine aliquo medio in ipso intellectu Angeli à substantia spirituali alterius Angeli, vel ab ipsa extrahi per aliquam virtutem Angeli accipientis species intra se, & non per aliquod medium ab Angelo distante eas attrahendo. Substantia autem alterius Angeli nequit intra intellectum alterius intrare, & præsens ei fieri, quod dicitur illabi intra mentem alterius: talis enim illapsus, seu intima assistentia, & coniunctio solum conuenit vel radici ipsi à qua dimanat intellectus, quæ est ipsa substantia, cuius intellectus iste est, & à qua dimanat, vel principio à quo creatur, & procedit vt effectus proprius, scilicet Deo. Reliqua autem entia quæ influxum non habent in intellectum, vel emanationis, vel creationis, ita vt illi dent esse, non possunt intimè assistere, & intrare intra terminos intellectus, quia ista assistentia, & præsentia intima, non est præsentia localis aut situalis, quia hæc ad nihil deseruiat pro intellectu per se loquendo, licet per accidens, vt in nobis, quia anima nostra vnita est corpori sensibili, quod sibi intimè præsens est, quia ab eo informatur, præsentia localis intercedat erga obiecta à quibus species per sensus hauriuntur, & ipsi sensus animæ, & intellectui præsentem sunt: remota autem indistantia locali, seu situali, non restat aliud quam quòd illabatur, & coniungatur intellectui ratione alicuius causalitatis in illum, vel è contra. Nulla autem substantia creata habet causalitatem in Angelum, seu in intellectum eius, cum non fiat ab illa, nec dependeat: sit enim plenè, & totaliter à Deo per creationem, & eodem modo neque intellectus Angeli habet rationem causæ in alium Angelum, nec ipse rationem effectus eius, quia etiam totaliter est à Deo: nec aliud genus causæ siue materialis siue formalis potest vnus Angelus exercere erga alterum, cum nec vnus recipiat alterum, neque informet. Nulla ergo causalitas interuenire potest, ratione cuius coniungatur vnus Angelus menti alterius, & sic imprimat illi speciem sui agendo in illum, vel è contra.

23 Et si inquiras, quis est iste illapsus qui ita repugnat Angelo intra alterius mentem, vel essentiam quòd soli Deo tribuitur, cum non repugnet Angelum esse in loco, in quo alter Angelus, vel corpus est, & hoc sufficit ad illapsum?

Resp. quòd aliquid illabi alteri est esse intra eius terminos. Vt autem dicit S. Tho. in 2. *dist. 8. q. 1. a. 3. ad 5. Duplex est terminus, alter quantitatis, alter essentia; Angelus autem operans intra terminos corporalis quantitatis, corpori illabatur; non autem ita quòd sit intra terminos essentia sua, nec sicut pars, nec sicut virtus dans esse, quia esse est per creationem à Deo.* Quare illapsus localis non repugnat Angelo, quia ad hoc non requiritur causalitas intra rem, sed non obfistentia ad occupandum locum: illapsus autem intra essentiam, vel intellectum requirit aliquam causalitatem, vel sicut forma, aut materia, seu subiectum sustentans, quod nomine partis intelligit D. Th. vel causalitatem efficientem per modum influentis esse, quod esse est intimum rei. Quare cū respectu intellectus alterius non possit Angelus alter esse, nec causa efficiens dās esse, aut intra immutans, neque forma aut subiectum eius, non illabatur ei.

Quòd si dicas, quòd licet propinquitas, & indistantia situalis nō deseruiat intellectui per se ad cognoscendum, cum potius abstrahat intellectus à loco, & tempore, tamen deseruire potest ad agendum vel recipiendum, sicut Angelus ad agendum in corpus illi appropinquat, & coniungitur, licet non causet illud, & vnus Angelus appropinquat alteri, agitque in illum, sicut Angelus Raphaël apprehendit dæmonium, & religauit illud Tob. 8. & alter Angelus Apocalyp. 20. apprehendit draconem, qui est Diabolus, & ligauit eum per annos mille, & misit in abyssum: ergo supposita hac propinquitate, & indistantia vnus Angeli erga alium, cur repugnabit quòd Angelus speciem sui producat in alterum Angelum.

Resp. propinquitatem vnus Angeli erga alterum, vel erga corpus ad agendum sine dubio dari, sed totum hoc est ad operandum per motum localem, quem Angelus exercere potest, tum erga corpora, tum erga alium Angelum. Cæterum motus iste localis, & præsentia, seu indistantia aut distantia quæ ad illum sequuntur, omnino se habent per accidens ad agendum in intellectum, quia impressio specierum, seu infusio luminis per motum localem non fit, neque ab eo dependet. Vnde quantumcumque vnus Angelus habeat erga alterum indistantiam seu coniunctionem aptam ad motum localem vel agendum, vel recipiendum, non tamen ad producendum speciem sui intra intellectum, quia Angelus quando per motum localem appropinquat vt operetur, vel faciat aliquem effectum, id efficit coniungendo actiua passiuis, non per suam virtutem generando, aut producendo. Si ergo vnus Angelus coniunctus, & appropinquans per motum localem alteri Angelo, potest imprimere species intelligibiles alteri Angelo, oportet quòd præter motum localem quo illi appropinquat, localiterque coniungitur, supponatur in Angelo inesse virtutem ad immutandum intellectum alterius Angeli, quia species illæ produci debent educendo eas de potentia eius subiecti in quo inherere debent, & cum inhaereant intellectui Angeli, vel à substantia eius educantur vt imprimantur intellectui, debet Angelus habere vim causatiuam intra intellectum Angeli præter vim motiuam, & appropinquantem localiter. Hanc ergo causalitatem, & vim immutatiuam intra intellectum alterius Angeli non habet, quia intra intellectum operari immutando ipsum tanquam ab agente extrinseco, sicut & intra voluntatem, solius Dei est, qui tales potentias creat, & facit, & ita vniuersales sunt in operando, quòd soli Deo, qui est vniuersalissimum agens subduntur, vt *inf. q. 105. a. 3. & 4.* docet S. D. præsertim loquendo de voluntate, & eadē ratio est de intellectu, qui in vniuersalitate suppar illi est, & est radicale principium libertatis.

Itaque

Itaque ista potentia propter suam summam vniuersalitatem non possunt per actionem alicuius creaturae immutari intrinsece, nisi vel ab aliquo sui, sicut intellectus agens immutat nostrum intellectum, & intellectus voluntatem, vel à suo proprio generante, & factore, qui est Deus. Et tenemur hoc ita dicere saltem conuicti à posteriori, quia si vnus Angelus posset interius illabi operando, & immutando intellectum aut voluntatem alterius, posset utique intelligere cogitationes cordis eius, quia non est ratio cur habeat vim immutandi intus ipsum intellectum, & non habeat facultatem cognoscendi illud quod immutat, & in quod agit, videndo quid operetur, siquidem intellectus ille est mutabilis ab ipso, potestque intra ipsum operari. Denique ad hoc seruiunt etiam rationes *suprà* allatae quod Angelus comparatur in genere spiritualium sicut cælum in genere corporalium, quod habet perfectionem suam statim à principio, nec per aliud agens perficitur, sic Angelus non perficitur ab alio in habendis formis intelligibilibus, sed à principio eas petit habere; de quo tamen exemplo plura dicemus *infra disp. 22. art. 4.* Et deinde, quia aliàs esset in manu alterius Angeli quod non cognosceretur ab alio si vel nollet ei imprimere species, vel nollet permittere ut intellectus alterius Angeli à se eas hauriret: par enim illapsus, & coniunctio requiritur, siue Angelus imprimat intra intellectum alterius speciem sui, siue permittat, ut intellectus alterius à se accipiat.

25 Ad loca D. Th. *suprà* allata *ex q. de anima*, dicitur quod quidquid ibi fenserit D. Tho. certè in hac 1. p. oppositum docet: nam *infra q. 89. art. 3.* dicitur quod *Anima separata intelligit per species infusas, quas recipit ex influentia diuini luminis, sicut & Angeli.* Vbi nihil discriminat inter Angelos, & animas: ergo sicut Angeli immediate recipiunt à Deo, ita & animæ, & *art. 2. ad 2.* dixerat, quod *Anima separata intelligit Angelos per similitudines diuinitus impressas.* Posset tamen dici quod etiam in illis locis citatis *ex q. de anima*, loquitur S. Tho. de causatione specierum in anima facta ab Angelis, non quantum ad ipsam specierum substantiam, quæ solùm à Creatore fit, sed quantum ad aliquam perfectionem ordinandi has species, quæ ex illuminatione Angelorum per extrinsecam propositionem fit, sicut à magistro species in discipulo ordinantur, non species ipsæ discipulo infunduntur intra intellectum operando. Et moueor ad hoc, quia in primo loco, scilicet *art. 18. ad 13.* non loquitur D. Tho. expressè de speciebus, sed de perfectionibus intelligibilibus, quas dicit prouenire à Deo median-
tibus Angelis, non solùm naturales, sed etiam quæ ad mysteria gratiarum pertinent; constat autem, quod lumen gratiæ, & supernaturales species Angelus producere non potest, sed solùm illuminationes per extrinsecam propositionem. In secundo autem loco, ubi clariùs loquitur de speciebus naturalibus infusis, addit S. D. quod *causantur huiusmodi forma in anima separata per Angelum, non per modum creationis, sed sicut id quod est in actu reducit aliquid sui generis de potentia in actum.* Constat autem quod infusio specierum quoad substantiam fit ad modum creationis, quia Angelis infunduntur species in ipso creationis instanti, & per eum modum infunduntur quoties de nouo dantur. Hoc autem modo negat D. Th. eas ab Angelo causari in anima: ergo non sentit ipsas infundi ab Angelo quoad substantiam, sed perfici, & ordinari, ut à magistro.

26 Sed adhuc instab'is: Nam Angelus potest illuminare alium Angelum, & hominem, non solùm pro-

ponendo exterius veritatem à se cognitam, sed etiam lumen inferioris interius confortando: ergo potest interius immutare intellectum, & consequenter ex hac parte producere speciem sui intra intellectum Angeli. Conseq. patet qui illa confortatio luminis ut condistinguitur à propositione externa veritatis, non potest intelligi nisi per actionem internam intra intellectum: quidquid enim reliquum est pertinet solùm ad illuminationem per modum magisterij, quod non fit per confortationem luminis interius, sed solùm per externam manifestationem. Anteced. probatur ex D. Thom. tum *infra quæst. 106. art. 1.* ubi inquit, quod *Angelus dupliciter notificat veritatem sibi notam alteri. Primò ex parte virtutis intellectiue, fortificando illam. Secundo ex parte similitudinis, & speciei proponendo veritatem magis distinctè, & particulariter quam magis in vniuersali intelligit superior Angelus.* Et *q. 117. a. 1.* dicit quod *Magister confortat intellectum addiscens, non quidem aliqua virtute actiua quasi superioris nature, sed in quantum proponit discipulo ordinem principiorum ad conclusiones.* Ergo condistinguit S. Tho. confortationem luminis à propositione veritatis; & sic non solùm illuminat proponendo, sed etiam interius immutando.

Respondetur quod, ut bene notat Caiet. *q. 106. a. 1.* duplex ille modus illuminandi per fortificationem virtutis intellectiue, & per distinctionem, & propositionem rei representatæ fit per manifestationem conceptus Angeli proponentis rem cognitam ut illustratam clariori, & superiori lumine, & inde emanat duplex effectus in intellectum inferioris, cui talis veritas, & conceptus representatur, scilicet quod eius virtus firmior, & perfectior fiat ad intelligendum, & quod obiectum representatum magis proportionatum reddatur per talem distinctionem, & coaptationem ad eius intellectum. Non autem intelligitur quod Angelus illuminans operetur interius in intellectu inferiori immutando ipsum, & aliquod lumen influendo vel speciem producendo, ut latius tradimus *inf. disp. 25. a. 2.* ubi hoc totum pertractatur, & differentia assignatur inter hominem docentem alium hominem, & Angelum superiorem confortantem, qui ad suum modum intelligendi eleuat, seu rapit intellectum inferioris, etiam per solam propositionem conceptus, & intelligentiæ suæ modo efficaciori, quod non facit homo respectu alterius hominis.

Fundamenta Scoti ex dictis conuellantur. Re-
ducuntur enim ad duo. Alterum à priori. Alterum ab inconuenienti. A priori quidem, quia non repugnat intellectum Angeli accipere species ab obiectis materialibus, vel etiam immaterialibus: nam anima nostra est infima in genere intelligibili, & tamen habet vim accipiendi species intelligibiles à sensibus corporeis, qui non minùs materiales sunt, quàm obiecta ipsa, quæ virtus dicitur intellectus agens: ergo Angelus, quia superioris, & efficacioris nature est, habebit eandem virtutem accipiendi species à rebus materialibus, licet non à sensibus, quia caret illis, vel etiam à rebus ipsis spiritualibus. Ab inconuenienti autem sumitur argumentum. Tum quia si Angelus non accipit species à rebus, sed habet illas infusas: ergo quando aliqua res de nouo fiunt, non accipit species ab illis, & cum aliàs non infundantur de nouo à Deo (alioquin singulis momentis deberet Deus infundere species Angelo quia singulis momentis res aliquæ de nouo fiunt) sequeretur quod ab initio habet Angelus species omnium rerum, quas
de

de nouo potest intelligere; & sic cognosceret omnia futura, & cogitationes cordium, quia de omnibus habet species ab initio. Tum etiam, quia alias non posset cognoscere singularia distincte, si ab ipsis singularibus non accipit species, sed illas habet vniuersales ab initio sine dependentia, & ordine ad quolibet singularia, sic enim solum in confuso, & in communi repraesentarent. Tum denique quia si infunderentur species à Deo, essent supernaturales, siquidem à solo Deo fiunt nulla actione Angeli, vel dispositione prauia id exigente, sed tantum merè passiuè se habente: ergo nihil deest quominus supernaturales sint: vel saltem posset Deus illas denegare Angelo sine vlla violentia, quia ipsa natura ad eas non conatur; & sic posset Angelus manere ignorans sine vlla violentia facta ipsi naturæ.

Respond. ad primum non esse perfectionem in Angelo quod habeat intellectum agentem, sicut nos, quia intellectus agens supponit magnam imperfectionem, nempe quod intellectus sit in pura potentia respectu obiectorum, & perfectionis intelligibilis, quæ ab illis prouenit ipsi intellectui; & sic datur illi virtus, per quam possit hanc imperfectionem tollere, accipiendo species intelligibiles ab obiectis; & sic licet habere talem virtutem acquirendi species sit perfectio intellectus in nostro statu imperfecto, non tamen est perfectio simpliciter, sed supposito statu potenciali carendi ipsis. Absolutè tamen perfectius est non indigere tali virtute, sed à principio habere illam perfectionem, & non esse in potentia ad illam, sicut in nobis habere virtutem augmentatiuam, perfectio est, sed maior perfectio esset, si à principio totum illud augmentum haberetur, & non indigeret homo acquirere illud, sicut non est in cælo hæc virtus crescendi, nec erit in corporibus gloriosis exercitium huius augmentationis, quia omnia corpora erunt in suo debito statu, & mensura. Nec etiam in Angelo est virtus ad acquirendum species ex obiectis spiritualibus, quia etiam respectu istorum maioris perfectionis est intellectum non carere illis; & sic non indigere acquisitione earum, quàm carere; & sic acquirere, & propter alias rationes suprâ assignatas.

28 Ad secundam rationem ex inconuenientibus. Ad primam dicitur quod Angelus ab initio habet species repræsentatiuas omnium singularium, non immediatè, sed mediatè, quia sunt species vniuersales deferuientes pro singularibus alicuius speciei: non verò de quolibet singulari habet species seorsum distinctas, & seorsum cuiuslibet singularis repræsentatiuas, vt dicitur *disput. sequenti*. Vnde sequitur quod species istæ non possunt repræsentare singularia in seipsis, nisi quando existunt in rerum natura; vel extiterunt, quia tunc completè similes redduntur illis obiectis, quando sic præsentia sunt, vel præsentiam sui reliquerunt. Vnde ad repræsentandum singularia dependentes sunt species illæ Angelicæ ab eorum existentia, dicunturque compleri per existentiam obiectorum, quasi extrinsecè: licet enim de se repræsentent quidditatem ipsorum singularium, imò & existentiam illorum, atque circumstantias quidditatiuè, & secundum se consideratas, & in abstracto; exercitium tamen, seu per modum exercitij non repræsentant res ipsas singulares, nisi quando reipsa exercentur, & ponuntur à parte rei & quoad hoc species illæ dependentes sunt ab ipsis rebus tanquam ab extrinsecè terminantibus, & complementibus similitudinem speciei, quæ est in Angelo: cum enim infundantur illæ species ad

repræsentandum res, non absolutè, sed prout descendunt ab ideis diuinis, & prout pertinent ad hoc vniuersum, quia solum est debitum Angelo cognoscere res naturales, & ea quæ huius vniuersi sunt, consequenter repræsentatio singularium per species Angelicas est dependens à derivatione eorum à Deo, & ab existentia eorum in hoc vniuerso, quia aliter non pertinet ad illud. De quo latius dicemus *disp. seq.*

Ad secundum inconueniens dicitur quod species Angeli, licet sint vniuersaliores, extenduntur tamen ad repræsentandum singularia, mediatè quidem, & secundariò, sed directè, & non reflexè, quia non dicuntur vniuersales per abstractionem à conditionibus indiuiduantibus, sicut nostræ species, sed quia repræsentant obiecta, & naturas secundum quod procedunt à causis magis, vel minus vniuersalibus, vel secundum rationes, secundum quas formantur à Deo, & procedunt ab ipso in hoc vniuerso: & sic possunt præbere cognitionem propriam de singularibus, licet species sint vniuersales, quia non sunt vniuersales solum secundum abstractionem naturæ, & vniuersalitatem in prædicando: sic enim singularia solum continentur in potentia in tali natura sic abstracta, & superiori, sed repræsentantur illa singularia in specie vniuersali repræsentante naturam secundum rationem illam vniuersalem, qua descendit à Deo, qui est causa vniuersalis tam naturæ, quàm singularitatis.

Ad secundum, quod illæ species deriuantur ab ideis diuinis quasi quædam earum expressiones repræsentando rationes magis, vel minus vniuersales in causando, & secundum quod res deriuantur à Deo iuxta modum causarum magis, vel minus vniuersalium, sic dicuntur illæ species magis, vel minus vniuersales, vt dicemus *art. sequenti*. Et quia singularia deriuantur ab ideis diuinis successiuè, etiam successiuè ab illis speciebus repræsentantur, non immutatione facta ab obiectis, sed ab ideis, quarum sunt expressiones, vt *seq. disp.* dicitur.

Ad tertium inconueniens iam *suprà* respondimus soluendo argumentum P. Vasquez, & diximus quod istæ species non sunt supernaturales, licet infundantur à Deo, quia non infunduntur à Deo authore supernaturali, sed operante iuxta naturalem capacitatem Angeli, & exigentiam eius, sicut infundit, & creat animam rationalem quando materia est disposita, & sicut imprimit lumen in intellectu nostro, & præbet concursus causis naturalibus, & sicut motus præbetur cælo ab extrinsecò motore, & tamen illi connaturalis est. Vnde si Deus denegaret species Angelo, etiam dato quod non inferret violentiam, non tamen id negaret connaturaliter ad naturam Angeli, sed præter eius naturalem exigentiam. Sed tamen, quia aliqui etiam de hoc dubitant, an species istæ infundantur à Deo, an verò emanent species, tanquam propriæ passionis ab intellectu Angeli, idè hoc amplius à nobis explicandum est.

Species Angelica non sunt propriæ passionis in rigore loquendo, sed accidentia inseparabilia.

Sumitur hæc assertio ex D. Th. qui communiter docet species Angelicas effluere à Deo, & ab ideis diuinis in mentem Angelorum. Videndus est in hac *q. 5. art. 2.* vbi inquit, quod suam perfectionem Angeli consequuntur per intelligibilem influxum quo à Deo species rerum cognitarum acceperunt simul cum intellectu naturali. Vnde August. dicit

in secundo super Genesim ad litteram, quod cetera quae infra Angelos sunt ita causantur, ut prius fiant in cognitione rationalis creaturae, ac deinde in genere suo. Similiter infra q. 89. art. 4. distinguit D. Thom. duplicem modum cognoscendi, unum per abstractionem à phantasmatibus, alium per influentiam specierum à Deo, quia *Sicut Deus per suam essentiam, in quantum est causa universalium, & individualium principiorum cognoscit omnia, & universalis, & singularis, ita substantia separata per species quae sunt quadam participata similitudines illius divinae essentiae, possunt singularia cognoscere; est tamen differentia inter Angelos, & animas separatas quod Angeli per huiusmodi species habent propriam, & perfectam cognitionem de rebus, animae vero separatae confusam.* Et eodem modo docet has species à Deo derivari in mentem Angeli, infra q. 57. art. 2. Et sequuntur D. Tho. communiter eius discipuli, ut videri potest apud Ferrar. 2. contra Gentil. c. 98. §. *Ad secundi dubij evidentiam*, Zumel in presenti qu. 55. art. 2. qu. 2. licet oppositum reputet probabile, Suarez lib. 2. de Angelis c. 7. Navarrete tomo 3. controu. 51. Carmelitani Salmantic. tract. de Angelis, disp. 5. dub. 4. Quamvis M. Bannez super hanc quest. 55. art. 2. dub. 2. & Paulus Nazarius ibidem controuersia 2 oppositum teneant, pro eodemque citari solet Capreolus in 2. dist. 3. q. 2. Caiet. quest. 54. art. 4. & infra q. 79. art. 2. & 3. p. art. 3.

31 Ratio nostrae assertionis est, quia essentia Angeli, licet sit radix, & principium virtutis intellectualis habentis in se capacitatem, & potentiam ut species omnium recipiat, non tamen est radix, & principium omnis intelligibilitatis obiectorum, à qua potest actuari: ergo non possunt species istae dimanare tanquam propria passio ab ipsa substantia, vel intellectu Angeli. Patet consequenter, quia species istae non sunt aliud, quam ipsamet obiecta quae repraesentant in esse intelligibili: ergo si sunt species propriae, & immediatè repraesentantes talia obiecta, oportet quod propriam, & immediatam talium obiectorum intelligibilitatem, immaterialitatemque contineant. Ergo in tantum poterunt dimanare species intelligibiles ab aliqua radice, seu principio, in quantum intelligibilitas obiectorum continetur actu, vel virtute, aut eminentia in tali principio, & radice. Sed substantia Angeli non potest continere actu, vel eminenter intelligibilitatem propriam omnium obiectorum quae potest intelligere, sicut nec omnium quidditates, & perfectiones: ergo non potest esse radix, & principium unde emanant species omnes propriae earum rerum quas potest intelligere. Minor prob. nam substantia Angeli tam entitatiuè, quam intelligibiliter est limitata, & redacta ad suum genus, & differentiam: ergo non potest continere in se proprias perfectiones aliarum rerum, neque propriam intelligibilitatem in eo quod proprium illorum est, & differunt ab ipsomet Angelo: in hoc enim distinguitur ab illis, & coarctatur ac limitatur erga illa, nec habet eminentiam illam infinitam, quam Deus habet in quantum est principium, & causa omnium entium, & quarumcumque differentiarum; & sic per se continet omnia, quia causat omnia: Angelus autem quamvis sit perfectissimus ens, non tamen est principium, neque causa omnium aliorum, quae potest intelligere; & sic non continet omnium perfectiones, & quidditates, etiam in eo quod proprium, & peculiare earum est, & in quo differunt à se: ergo neque continet propriam, & specialem earum intelligibilitatem: ergo neque potest esse radix, & principium ut à se dimanent species propriae, & per

se repraesentatiuè aliorum obiectorum, etiam in eo in quo differunt inter se, & ab ipso Angelo. Quod si solum est principium, & radix specierum repraesentantium alia obiecta secundum intelligibilitatem ipsius Angeli à cuius substantia emanant, non propriam ipsius rei quae intelligitur, tunc ex vi talis speciei non cognoscet rem illam propria cognitione, sed ad instar suae substantiae, & secundum id in quo convenit cum illa, non secundum sibi propria. Unde ad cognoscendum propriè, & quidditatiuè res alias, indigebit speciebus quae à se non dimanent. Et praesertim hoc apparet in speciebus quas inferiores Angeli habent de superioribus: istae enim cum exigant eleuationem intelligibilitatem, nullo modo possunt contineri intra substantiam inferioris Angeli, nec illorum esse radix, & principium à quo emanant. Nec potest dici quod continentur in virtute ipsius intellectus, qui habet efficaciam ad intelligendum perfectè illa obiecta. Contra enim est, quia intellectus habet hanc efficaciam suppositis speciebus ad elicentiam intellectionis, non autem habet efficaciam ut species dimanent à se, quia remotis speciebus intellectus solum est in pura potentia intelligibili ad alias.

Conf. quia si substantia Angeli continet in se intelligibilitatem omnium obiectorum, possentque ab ea dimanare species omnium, ut propriae passionis illius; ergo qui comprehenderet illam substantiam, in ea comprehenderet omnes istas species, quae sunt eius proprietates: qui enim comprehendit aliquam essentiam, in ea omnes proprietates cognoscit quae in tali radice continentur: ergo etiam cognita, & comprehensa substantia Angeli, omnes tales species comprehenduntur quantum ad omne illud quod ex tali essentia, ut à radice trahunt, & participant, sicut omnes aliae proprietates, quae ab essentia dimanant, ex comprehensione essentiae cognoscuntur quidditatiuè, & propriè, ac distinctè in se: ergo si species illae sunt proprietates dimanantes ab essentia, & intellectu Angeli, visa & comprehensa essentia sua, illas comprehendet, & cognoscet. Visis autem, & comprehensis speciebus, videntur obiecta in illis contenta, & repraesentata: ergo per essentiam suam potest Angelus omnia obiecta extra se videre, sicut & omnes species, & repraesentationes talium obiectorum. Hoc autem negat S. Th. in art. 1. huius q. 55. quod Angelus per essentiam suam possit omnia alia obiecta cognoscere propria, & distincta cognitione, quia sic contineret aliorum quidditates, & naturas in se perfectè, nec indigeret speciebus superadditis, quia idem esset comprehendere essentiam ac videre species ipsas, & obiecta: ergo non possunt tales species emanare, sicut proprietates ab essentia.

Dices: emanare illas species à substantia Angeli entitatiuè, non intentionaliter, & repraesentatiuè; & sic visa essentia, videntur species entitatiuè, & ut qualitates sunt, non repraesentatiuè, seu ut obiecta repraesentant. Vel secundo, licet emanent à substantia Angeli, non tamen repraesentant illas formaliter ipsa essentia, sed radicaliter, seu virtualiter, unde visa essentia, non sequitur quod videantur species illae formaliter in se, & ut tagent repraesentatiuè sua obiecta, sed solum prout tenent se ex parte subiecti, & quantum ad id quod est radicalis, & virtualis continentiae, non secundum id quod habent ex parte obiecti, quod pertinet ad repraesentationem.

Sed contra primam solutionem est, quia repraesentatio intentionalis est essentialis, & intrinseca speciei, & per illam distinguitur una species ab alia, siquidem ex obiectis sumit specificationem, & distinctionem: ergo repugnat dicere quod emanant species ab

ab essentia quantum ad suam entitatem, non quoad suam representationem, cum hæc representatio intrinseca illis sit, & ad eorum essentialem rationem pertineat. Aut si entitas illa specierum emanat ab essentia Angeli, non autem representatio, seu intelligibilitas earum: à quo ergo principio representatio specierum est? An entitatem habent à subiecto cui insunt, representationem verò à solo Deo? Cur ergo non habebunt entitatem, & realitatem etiam à Deo, siquidem representatio illa entitas realis est, cum non sit aliquid rationis in ipsa specie? Si ergo non potest emanare representatio, & intelligibilitas speciei à substantia Angeli, quia in ea non continetur, nec etiam entitas, seu realitas talis representationis emanabit, quia nec etiam ista continebitur in tali radice, cum non sit aliud representatio speciei, quam eius entitas, & eius entitas representatiua sit.

Contra secundam autem solutionem manifestè instatur, quia constat res cognosci distinctè, & propriè per causas suas, imò tunc est scientifica, & propria rerum cognitio, quando per suas causas cognoscitur; & tamen effectus in causis non continentur, nisi radicaliter, & virtualiter: nec enim formaliter sunt, nisi in se, & extra causas; in illis autem solum continentur in virtute, & in radice: ergo continentia radicalis, & virtualis sufficit ad manifestandam proprietatem, seu effectum formaliter, & propriè, ut est in se. Ergo si species se habent ut proprietates essentiae in Angelo, non obstante quòd ibi continentur radicaliter, cognoscuntur per ipsam essentiam distinctè, & propriè, & formaliter, si essentia ipsa comprehenditur, & habet speciem qua cognoscitur vel ipsa pro specie serui. Nam, & ipsæ proprietates quæ ab essentia dimanant, non aliter in ea continentur quam sicut in radice, & virtute & tamen per comprehensionem essentiae cognoscuntur propriè, & formaliter in se, quia totum quod in se formaliter sunt, virtualiter continentur in essentia, & per eam tanquam per medium perfectè continens, & emittens tales proprietates attinguntur, sicut per quamlibet aliam causam sui effectus. Ad ipsam autem essentiam non est necesse ponere species, quia per seipsam intelligibilis est, & vim speciei habet.

33 Denique D. Thomas dicit *infra q. 56. art. 2. ad 4.* quòd *Si Deus instituisset plures Angelos, vel plures naturas creare, plures species intelligibiles, mentibus Angelicis indidisset.* Inquiri ergo: Si plures naturæ fierent in vniuerso, an ex natura, & essentia Angeli dimanarent plures species intelligibiles quam modò dimanarunt, vel non. Si non dimanarent: ergo respectu illarum naturarum, quæ de nouo crearentur, deberent dari species à Deo infusæ, & non dimanantes ab essentia Angeli: sicut ergo respectu illarum non haberet natura vim ut emanarent ab illa species, sic neque vim habet ut dimanent species aliorum obiectorum, quia quòd ista obiecta quæ modo sunt creentur, vel alia tunc crearentur, pendet ex mera voluntate Dei, quòd autem natura vim habeat ad habendum vel non habendum species tanquam proprietates, dependet ex naturali colligatione, & connexionem inter essentiam illam, & species, non ex sola libera productione Dei circa obiecta extrinseca nec intelligi potest quod ex sola libera voluntate Dei producendi speciem formicæ substantia Angeli habeat naturalem connexionem cum specie formicæ, & ab ipsa emanet, & voluntate Dei remota, & nolente formicam producere cesset illa naturalis connexio, cum emanatio proprietatum ab aliqua essentia pertineat ad necessariam connexionem prædicatorum, & sic non

Ioan. à S. Thom. in 1. part. D. Th. Tomus alter.

potest variari ex sola libera voluntate extrinseca qua Deus producit, vel non vult producere aliquam creaturam. Si verò dicatur quòd in illo casu dimanarent nouæ species à substantia Angeli respectu creaturarum, quæ tunc de nouo fierent à Deo, vel quòd modò iam dimanarunt omnes illæ species, etiam respectu rerum possibilium, licet non possit uti illis quousque tales reproducantur, pertineantque ad vniuersum in quo est talis Angelus, vtrique responsio claudicat.

Prima, quia ponit emanationem alicuius proprietatis non fundatam in naturali connexionem cum essentia, sed dependentem ab extrinseca voluntate Dei producentis, ita ut Deo producente obiecta illa, emanent illæ species, non producente, retrahantur, quod est merum figmentum, & contra omnem philosophiam de emanatione necessaria proprietatum, satiusque est dicere quòd tales species à Deo infunduntur.

Secunda verò, quia si nunc iam emanarunt species ab Angelo respectu omnium possibilium: habet ergo infinitarum rerum species actu positas in suo intellectu, quia non est maior ratio quòd aliquorum entium species habeat, & non aliorum. Et sic comprehendendo essentiam suam, infinitorum entium cognitionem habebit, quia omnium illarum specierum notitiam ex sua essentia capiet; siquidem omnes ab illa emanant. Frustra autem dicitur impediri Angelum uti talibus speciebus ad cognoscendas res, quæ non sunt huius vniuersi, si potest in sua essentia omnes illas species cognoscere, & mediantibus illis cognitis cognoscere quidquid representant; & sic cognoscere in actu quidquid intellectus capax est cognoscendi: quod totum sequitur, si sunt species istæ proprietates dimanantes ab essentia: comprehensa enim illa, omnes istæ species comprehenduntur.

Quare dicendum est quòd sunt istæ species infusæ, à Deo, & connaturaliter petuntur ab intellectu Angeli, tanquam accidentia inseparabilia, ita quòd intellectus ille emanat ab essentia Angeli, ut capax specierum, sicut cælum producit ut capax motus, & naturaliter illum exigens, quatenus per motum suum est primum alterans, & mouens hæc inferiora, quod non potest facere nisi motum. Sic Angeli sunt substantiæ intellectuales perfectæ, & ab omni materia, & corpore separati. Vnde eorum intellectus emanat ut capax specierum, & potens connaturaliter habere illas non acquirendo ab obiectis, sed à primo spiritu qui est omnium obiectorum principium, à quo accipiunt ab initio illas quæ sibi debentur intra hoc vniuersum in quo creatur, quia illæ sibi debentur, quæ ab obiectis positæ in vniuerso accipere deberent, si essent acquisitiuæ specierum ab obiectis. Sed loco obiecti accipiunt species à primo principio, & à primo intelligibili, quod est causa omnium obiectorum, & ab illius ideis exemplantur species in mentes Angelorum, quia petunt produci ab illo summo spiritu ut perfecti in suo genere intelligibili, & non cum ignorantia, & defectu, & consequenter cum lumine, & speciebus.

Sed obiicies: Nam D. Th. probat *infr. q. 64. art. 1.* cognitionem naturalem Dæmonum non esse diminutam, quia *consequitur naturam ipsam Angeli, qui secundum suam naturam est quidam intellectus, vel mens: propter simplicitatem autem sua substantia nihil potest ab eius natura subtrahi:* Sed cognitio non sequitur naturam sumpta pro actu secundo cognoscendi: sic enim non consequitur ad naturam, sed ex applicatione voluntatis, quia cognoscit quod vult; nec ex subtractione huius, aut cessazione

Qq

tione

tione ab actu cognoscendi, subtrahitur aliquid de simplicitate substantiæ, seu naturæ: ergo loquitur S. D. de cognitione in actu primo, scil. pro speciebus: sic enim consequitur ad naturam Angeli, quia naturaliter emanat ab illa: ergo species se habent ut propriæ passiones Angeli. Quod ipsum videtur explicasse D. Thom. *supra q. 54. art. 4.* dum inquit, quod in Angelo non generatur scientia, sed naturaliter adest; ergo non imprimitur ab extrinseco, sed à natura.

Confir. nam alias si istæ species non resultarent per emanationem ab essentia Angeli, maxime quia non haberent connexionem necessariam cum intellectu Angeli: nam si haberent, dimanarent. Si autem non habent connexionem naturalem: ergo neque exigentiam per se, & connaturalém. Vnde sequitur, quod sicut infunduntur istæ species à Deo, nunc ita possent non infundi sine vlla violentia facta ipsi naturæ Angeli, quia non est violentia, ubi nulla est in contrarium renitentia, aut exigentia naturæ. Similiter non essent naturales Angelo, quia non est naturale principium à quo emanent; & sic vel essent supernaturales, vel præternaturales. Vnde sequitur ulterius quod non debentur ex vi creationis Angelo, quia ea debentur, & fiunt ex vi creationis, quæ exiguntur à natura, & pertinent ad eam, vel consequuntur ad illam, quæ verò non se habent ut propriæ passiones, non fiunt ex vi creationis, seu generationis rei, quæ tota sistit in productione substantiæ, & propriarum passionum. Denique si non sunt propriæ passiones, sequitur quod considerata natura Angeli secundum se, & ante infusionem istarum specierum sit imperfectior anima humana: nam anima licet ex se non habeat species, habet tamen instrumenta acquirendi illas, scil. intellectum agentem cum phantasmatis, Angelus verò caret omni instrumento acquirendi species, & alias ex natura sua non dimanant, sed infunduntur liberè à Deo iuxta numerum obiectorum quæ creat; & sic si non crearet nisi vnum Angelum, & vnum corpus, solum vnā speciem ei infunderet, circa reliqua verò entia esset ignorans.

Respon. sensum D. Thomæ manifestum esse, quod cognitio naturalis dicitur consequi naturam Angeli, quatenus principia huius cognitionis sunt debita naturæ, eamque consequuntur, vel per dimanationem sicut potentia intellectus, vel per passivam exigentiam respectu Dei infundentis, sicut species: nam etiam passiva exigentia qua aliqua natura postulat passivè aliquam formam, seu perfectionem, sufficit ut dicatur aliquid consequi ad naturam consecutione debiti, non emanationis, sicut ad naturam cæli consequitur moveri, & non quiescere, licet ille motus sit ab alio, & sicut naturam stellarum consequitur lumen seu splendor, qui tamen provenit eis à Sole illuminante: & potentia visiva connaturaliter petit videre, & ad illius naturam consequitur visio, mediante tamen specie visibili, quam ex se non habet, sed ab obiectis haurit, Eodem modo intelligitur, quod dicit D. Thomas, quod scientia naturaliter adest Angelo, ubi ly *naturaliter* contraponitur huic quod est per acquisitionem, & discursum, non tamen dicit quod est per emanationem. Adest etiam naturaliter, quia cum ipsa creatione prima Angeli data est à Deo infundente species, & secundum exigentiam naturalem ipsius intellectus Angelici, licet passivam ex parte intellectus susipientis, ut declaratum est.

Ad Conf. Respon. non esse connexionem quasi actiuam inter substantiam Angeli, & species cuius est capax, sed quasi passivam, & secundum de-

bitum, & exigentiam, ut sibi infundantur. Et talis connexio passiva non facit emanationem formæ à subiecto, sed exigentiam, & debitum connaturale, sicut dictum est. Et ad probationem primam, qua dicitur quod posset Deum non infundere species Angelo; & sic carceret illis sine vlla violentia. Respon. ex *supra* dictis, quod fieret violentia Angelo, si species ordinis naturalis ei denegarentur, eo modo quo violentia potest fieri à Deo, id est operando præter naturam, seu exigentiam naturæ, non renitente, & resistente natura, sicut cum negat concursum igni parato ad comburendum, aut si in corpore disposito, & organizato, non infunderet animam rationalem, in quibus casibus agitur præter ordinem exigentiæque naturæ, licet natura ipsa suo auctori non resistat, sufficit quod oppositum naturaliter petat, & in id inclinetur, & ei denegetur, quæ est retinentia connaturalitatis.

Ad secundam probat. sæpius dictum est, non esse has species supernaturales, licet immediate à Deo infundantur, quia dantur iuxta capacitatem, & exigentiam seu inclinationem naturalem ipsius Angeli, & à Deo Authore naturæ, non operante iuxta potentiam obedientialem; sicut etiam anima creatur à solo Deo, & infunditur corpori, nec tamen supernaturalis est eius creatio.

Ad tertiam probationem dicitur deberi ex vi creationis non solum proprias passiones, sed etiam accidentia inseparabilia & connaturalia, & requisita ad perfectionem naturæ pro eo statu, quia ad generantem pertinet dare suo effectui non solum formam, & proprietates eius, sed etiam requisita ut in debito statu collocetur, sicut Deus in ipso instanti creationis debet tribuere Angelo motionem, & concursum ad operandum, quia pro eo statu est debitum ei operari, nec tamen concursus ille est propria passio. Et motus cordis tribuitur viventi à suo generante ex vi generationis, & motus cæli ipsi cælo, & tamen neuter motus est propria passio, cum motus cæli sit à motore extrinseco, motus cordis sit vitalis elicitive proveniens à vivente, licet motive à generante; & ita cum sit actio, seu motus elicitus à vivente, propriè non est passio emanans. Itaque pertinet ad creationem, vel ad generationem primam, non solum eadem productione attingere proprietates emanantes à natura, sed etiam accidentia, aut modos requisitos, ut pro illo statu constitutur in sua perfectione debita, & cum Angelus debeat pro illo instanti operari cognoscendo, oportet quod illi tribuantur species, sine quibus non cognoscit.

Ad ultimam probationem dicitur, quod non est Angelus secundum se, & per se inferior animæ humanæ, quia licet de facto illi Deus denegaret species, tamen de iure seu connaturaliter ab eo exiguntur, & petit eas habere perfecto modo immediate à Deo: anima verò non nisi imperfectè, & ab obiectis eas accipiendo per intellectum agentem. Quod si comparamus Angelum denudatum speciebus à Deo, cum anima se illis vestientem beneficio intellectus agentis, quid mirum quod Angelus per accidens, & præter naturam habeat statum imperfectiorem, cum tamen ex sua natura perfectiorem exigit. Sed si volumus iustam comparisonem facere, consideremus animam sine intellectu, agente, vel sine concursu Dei ut intellectus agens eliciat species, sicut eas denegat Angelo, & videbimus quis perfectior maneat? Nam quod anima nostra beneficio intellectus agentis acquirit, Angelus beneficio Dei creantis habet. Quod si Deus non crearet univèrsam, sed vnum tantum Angelum, vel corpus, non esset Angelo debitum plura

sic sub illa repræsententur etiam distinctè, & propriè, quia sic continentur ibi, sicut proprietates continentur in natura; & sicut ternarius continetur in senario, & imperfectum in perfecto: ergo non repugnat quòd ista plura, quæ sic materialiter plura sunt, formaliter adunentur in aliquo in quo repræsententur ut contenta. Similiter vnus actus cognitionis potest plura obiecta attingere cognoscendo, ut constat ex dictis: ergo etiam poterit vna species attingere repræsentando. Consequentia patet, quia vnica cognitio egreditur, & formatur ab vnica specie, vel saltè non repugnat ab ea formari: ergo si non repugnat vniam cognitionem attingere plura obiecta, neque repugnat vniam speciem ea repræsentare.

5 Denique ab inconuenienti eadem veritas probatur; tum quia si quodlibet singulare indigeret sua specie, deberent istæ species in infinitum multiplicari in Angelo, quia infinita sunt indiuidua possibilis; de facto verò erunt infinita saltè accidentalia, quia per totam æternitatem infinitæ operationes erunt in Angelis, & hominibus. Tum etiam quia adhuc ad cognoscendum vnum, & idem indiuiduum non sufficit vnica species, quia etiam contingit in eodem indiuiduo concurrere diuersa accidentia, variâsque operationes, quorum singula vel indigent singularibus speciebus, vel non. Si indigent, non poterit etiam vnum indiuiduum substantiæ perfectè cognosci ab Angelo comprehensiuè, nisi per plures species. Vnde nunquam dabitur vna species, quæ sufficiat ad comprehensionem perfectam, etiam vnus indiuidui, quia nullum est indiuiduum cuius comprehensio non dependeat ex pluribus accidentibus, & respectibus. Si non indiget: ergo qua ratione possunt plura accidentia, & operationes repræsentari vnica specie, quatenus pertinent ad eandem singularem substantiam, etiam poterunt plures illæ substantiæ indiuiduæ vnica specie repræsentari quatenus coordinantur sub eadem natura, vel sub aliquo tertio in quo continentur, vel tanquam sub causa, vel tanquam sub fine, aut sub aliquo alio ordine, aut ratione, ut postea ampliùs explicabitur.

Ad fundamenta opposita Respondetur.

6 Ad primum negamus Angelum acquirere species à rebus, ut *art. præced.* ostensum est; & sic non est necesse quòd species Angelorum quodlibet indiuiduum seorsim repræsentent. Imò dato quòd à rebus acciperent species, non sequitur quòd à pluribus indiuiduis non possent vniam speciem recipere, quatenus sub aliqua ratione formali conueniunt, vel tanquam in similitudinem naturæ, vel tanquam in aliquo alio ordine vel medio inter se connexa, & conuenientia: nam etiam nos à pluribus indiuiduis abstrahimus vniam speciem, vel ex pluribus vniam formamus, quatenus illa plura coordinantur in aliquo medio aut respectu. Multò ergo fortius virtus Angeli, quæ viuaciùs, & efficacius res penetrat, posset in vnica specie plures adunare rationes indiuiduorum, etiam si ab obiectis species desumeret.

7 Ad secundum dicitur quòd vnica species habet vnicum, & indiuisibilem modum repræsentandi ex parte rationis formalis, & modi repræsentandi, non ex parte rerum quæ repræsentantur ut contenta sub tali ratione formali, & materialiter plures esse possunt. Atque ita vnica species indiuisibilis potest habere plura repræsentata materialiter, sub vna tamen ratione formali. Et cum instatur, quòd sic non repræsentantur distinctè, & particulariter, sed in confuso, & in communi. Respon. quòd si repræsentarentur ut vnum ex parte rei cognitæ,

verum esset; sed si repræsentantur ut vnum ex parte medij, & modi cognoscendi, plura autem, & distincta ex parte rei cognitæ, quia lux illas manifestans, & penetrans vna est, & ad plura se habet, negamus quòd repræsententur in confuso, & in communi, & non in particulari. Quid sit autem hoc medium sub quo illa plura sic cognoscuntur, statim dicemus circa sequentem difficultatem.

Ad terciam Respond. quòd infinita indiuidua 8 possunt repræsentari ab aliqua specie, ut contenta in aliquo finito, scilicet in aliqua natura, vel medio, aut sub aliquo ordine in quo adunantur finito modo; & sic nullum est inconueniens quòd repræsententur infinita inferiora ut contenta sub aliquo superiori in quo finito modo continentur. Nunquam tamen hæc infinita indiuidua cognoscuntur naturali modo simul, & collectiuè, quia non sic continentur in aliqua ratione formali, vel natura creata, sed semper cognoscuntur ut finita in actu, solum autem infinita in potentia, & syncategorematicè; & sic non est inconueniens attingere infinita, neque per aliquam potentiam, & cognitionem attingendo illa, neque per aliquam speciem repræsentando. Quòd autem cognoscantur diuersæ, & contrariæ rationes conuenientes diuersis indiuiduis, nihil inconueniens est: nam etiam eidem indiuiduo hæc conuenire possunt, saltè successiuè, aut in diuersis partibus; omnia enim ista attinguntur sub aliqua ratione formaliter vna, in qua illa plura adunantur vel conueniunt, vel secundum similitudinem, vel alio modo, seu sub aliquo respectu, & ordine, sub quo adunari possunt.

Ad vltimum dicemus sequenti difficultate, ostendendo, quomodo plura etiam specificè diuersa possunt repræsentari in vnica specie conueniendo in aliqua ratione formali repræsentandi.

Species Angelica quanto superiores, tanto vniuersaliores, etiam respectu diuersarum quidditatum.

Circa secundam difficultatem supra propositam, 9 auctores qui ponunt dari species vniuersales in repræsentando in Angelis, concorditer ferè tenent, quòd Angeli sunt perfectiores, eò etiam vniuersaliores, & pauciores species habere, & consequenter posse dari aliquas species, quæ repræsentent plures quidditates specie diuersas; alioquin si quælibet repræsentaret tantum vniam quidditatem specificam, & solum posset plura indiuidua vnica repræsentatione attingere, eodem modo multiplicarentur species in Angelo inferiori, atque in superiori, quia nec vltra vniam quidditatem specificam posset vna species repræsentare, nec posset minùs quàm vniam quidditatem specificam repræsentare, & eius indiuidua sub illa: non enim pro singulis indiuiduis singulas species habent. Nullius enim Angeli intellectus est, in quo oporteat secundum multiplicationem indiuiduorum species multiplicare, ut inquit S. Th. in 2. dist. 3. q. 2. art. 3. ad 3. Licet autem hæc sententia communis sit inter Theologos, qui tenent species Angelorum non sumi ab obiectis, tamen P. Vasquez, hic disp. 203. cap. 2. & 4. tenet quòd ex hypothese quòd dentur species in Angelo adhuc non posse cum fundamento vel probabili coniectura affirmari, quòd perfectiores Angeli per vniuersaliores species intelligunt. Molina etiam super hac quæst. 55. art. 3. opinionem D. Thom. incertam censet: Et Arrub. disp. 165. c. 2. Sed tamen P. Suar. lib. 2. de Angelis, c. 14. & sequenti-
tibus

tibus tenet contra Vasquez cum communi Theologorum, imò, & P. Alarcon supra citatus c. 3. n. 7.

De mente D. Th. in hac parte dubitari non potest, cum expressè hoc teneat in hac q. 55. art. 3. & in 2. dist. 3. quest. 2. art. 2. & quest. 8. de verit. art. 10. ubi ad 2. amplius hoc exprimit dicendo, quòd *In Angelo superiori per unam speciem animalis omnes animalis species representari possunt.* Denique videri potest 2. contra Gentil. c. 98. & eius discipuli, & commentatores super ista loca.

Fundamentum sumitur, tum ex D. Dionysio, quem in hac materia de Angelis communiter Theologi venerantur, & consequuntur. Tum ex ratione. Ex D. Dionysio citantur duo loca, tum ex c. 12. cœlestis Hierarch. Tum ex c. 10. Priorem locum affert D. Th. hic quest. 55. art. 3. quòd *Superiores Angeli participant scientiam magis in vniuersali quam inferiores.* Quæ verba S. D. citat magis secundum sensum, quam secundum corticem litteræ: Loquitur enim Dionysius de ordine Cherubimorum, sub quo dicit esse alios spiritus, qui particularem habent scientiam, seu partem scientiæ pro modo suo atque inferiori modo. Ex quo occasionem sumpsit Vasquez ad interpretandum hunc locum sic, quòd Dionysius solum intendit inferiores Angelos pauciora scire quam superiores, non per species magis, vel minus vniuersales, quia de speciebus nec verbum tractat Dionysius. Et sic verba Dionysij secundum translationem Perionij solum significant scientiam Angeli inferioris esse partem scientiæ superioris, id est, aliquid de illa habere, pauciora, scilicet obiecta attingendo quam superior Angelus. Frustrà tamen Vasquez hac responsione conatur effugere vim testimonij Dionysij: nam, vt bene contra eum ponderat Suarez, in rerum naturalium scientia (de qua ibi videtur loqui Dionysius) non attingunt superiores Angeli aliqua obiecta, quæ non attingant superiores, cum totum vniuersum, & quidquid naturalis ordinis est, eis pateat, vt etiam ipse Vasquez non negat loco cit. cap. 4. in fine. Non ergo ex parte rerum cognitarum differentia est in Angelo inferiore, quasi pauciora intelligat obiecta, quam superior, sed in modo intelligendi, quia superior magis vniuersaliter, seu per pauciores species, & magis vnité intelligit, quam inferior: sic enim impletur Dionysius in eodem lib. cap. 10. dixit: *Supremam hierarchiam illustrari perficique obscuriore, & clariore diuinitatis lumine, obscuriore quidem quòd magis spiritalis sit, & simplicius, ac magis vnum efficiat; clariore autem quòd primum datum sit, primumque splenduerit, & magis totum sit, magisque in eum ordinem vt nitidum, & liquidum effundatur.* Nec potest iuuari Vasquez in translatione Perionij in illis verbis Dionysij. Nam præter quam quod aliæ translationes non minoris auctoritatis sunt, tamen verba translationis Perionij potius pro nobis sunt: hoc enim modo se habent: *Sanctorum Cherubin ordo sapientiæ, scientiæque altioris est particeps; ordines autem earum essentialium quæ eis subiecta sunt, participes quidem etiam ipsi sunt, & sapientiæ, & scientiæ, sed eius quæ pars est, vt ad illos, & quæ inferiorem locum teneat.* Hucusque retulit Vasquez, sed oportet legere sequentia: sic enim pergit translatio Perionij: *Ac particeps quidem esse omnino, & sapientiæ, & scientiæ, commune est diuinarum mentium omnium; sine autem ullo medio, atque primum particeps esse, aut secundo loco, & inferiore, non item, sed vt cuique pro capto suo constitutum est. Id quòd etiam sine errore de omnibus diuinis mentibus statui potest. Vt enim prima cum fœnore habent sanctas inferiorum* Ioan. a S. Thom. in 1. part. D. Th. Tomus alter.

proprietates, sic etiam illas superiorum habent ultimæ, non tamen eodem, sed inferiore modo. Manifestè ergo reuincitur ex verbis Dionysij falsam esse interpretationem Vasq. quòd voluerit Dionysius inferiores mentes partem scientiæ superiorum accipere, id est pauciora obiecta cognoscere, afferens truncatum Dionysij locum, nec sequentia considerans, ubi clarè Dionysius se explicat, quòd eadem sciant inferiores, quæ superiores, sed non eodem modo; & sic in diuersitate modi cognoscendi, diuersitas est, non in paucitate cognitorum: si autem iste modus diuersus est, quòd vnus sit pars alterius, seu particularis respectu alterius, manifestum est quòd in superioribus vniuersalior scientia est, siquidem modus inferiorum pars illius dicitur quantum ad modum, non quantum ad numerum cognitorum. Et licet verum sit quòd D. Thom. in 2. dist. 3. q. 2. art. 2. ad 2. docet, non esse à veritate remotum, quin plura subiaceat cognitioni naturali, superiorum quam inferiorum: hoc enim intelligitur de numero rerum cognitarum, sed de pluribus rationibus, vel respectibus aut dependentiis quas habent res ad superiores illos Angelos, quas non ita cognoscit Angelus inferior, sicut superior. Quæ est doctrina eiusdem S. D. quest. 8. de verit. art. 10. ad 2.

Secundus locus S. Dionysij, quem affert D. Th. inf. q. 106. art. 1. est in c. 15. de cœlesti hierarchia paulò ante medium, ubi loquens de adaptatione humanorum membrorum ad significandum metaphoricè Angelorum virtutes, & ministeria, inquit: *Vnaquæque enim essentia, quæ mente prædita est vnicam intelligentiam quam à diuinitate traditam accepit, vbi quadam qua aliis natura consilii, diuidit atque ampliat pro capto, & ductu inferioris.* Et notandum est quòd in principio capitis dixerat Dionysius loquens de conuersione, & motu Angelorum, quòd *cœlestibus naturis omnibus verè hæc omnia conuenient, etsi aliis superiori modo atque generali vt sæpè dictum est, aliis autem inferiori, & vt ita dicam particulari.* Vbi vides S. Dionysium frequenter hoc tradere quòd superiores Angeli superiori modo, id est, generali seu vniuersali, inferiores particulari cognoscunt, & hoc ipsum deinceps vocat esse vnicam intelligentiam quam superiores diuidunt ac multiplicant pro capto inferiorum. Modus ergo inferiorum est multiplicare, ac diuidere ea quæ vnité, & consequenter vniuersaliori modo, seu generali superiores intelligunt.

Respondet Vasq. ubi supra cap. 4. Dionysium non loqui de speciebus Angelicis, sed de conceptibus circa diuinas reuelationes, quas Angeli superiores cognoscunt vnico conceptu, sed diuidunt vt ab inferioribus capiantur iuxta modum suum: ad quas tamen reuelationes dicit non indigere speciebus propriis.

Cæterum si Angelus superior intelligit vnico conceptu hæc obiecta supernaturalia, inferior autem pluribus: ergo modus cognoscendi superioris Angeli vniuersalior est, & magis vnitus, quam inferioris, & consequenter eodem modo se habebit in cognitione naturalium, quia supernaturalium cognitio datur Angelis iuxta proportionem, & modum quo cognoscunt naturalia, sicut nos cognoscimus illa cum discursu, & Angeli sine illo: ergo similiter in cognitione naturalium magis vnité, & vniuersaliter intelligent superiores Angeli quam inferiores. Quòd si cognitio, & conceptus vniuersalior est, & simplicior, etiā species impressæ simpliciores erunt, & vniuersaliores, quia conformiter ad conceptus, & ad modum intelligendi se habent species, quibus intellectus formatur ad cognoscendum.

dum. Nec est verum ad obiecta supernaturalia Angelos non habere proprias species, cum generaliter probatum sit nullam cognitionem fieri sine speciebus: & si cognitio sit propria, & quidditativa, species etiam habere debet proprias, & quidditativas talis obiecti.

Ratio autem conclusionis posita sumitur ex eo, quia species representatiua obiectorum possunt esse magis vel minus spirituales, & immateriales quam alia iuxta quod intellectus ipse quem actuant magis immaterialis, & spiritualis est. Et constat quod de eadem re sensibili, & materiali datur in nobis diuersa species, alia aliis perfectiores, sicut de colore dantur species visibiles in oculis, & perfectiores, magisque subtiles in imaginatione; spirituales autem in intellectu: signum ergo euidentius est de eadem re formari species diuersa immaterialitatis, & perfectionis in representando: & consequenter sub altiori ratione formali attingi obiectum ab vna specie quam ab alia, nec solum coarctari ad intelligibilitatem, vel immaterialitatem quam obiectum fundat de se: sicut sub altiori ratione representatur color ut imaginabilis, quam ut visibilis: ergo similiter in ipsis intellectibus separatis quoad vnus intellectus est altior, & simplicior, tanto species representatiua obiectorum erunt subtilioris, & perfectioris intelligibilitatis, & immaterialitatis, quam species intellectu inferiorum: ergo obiecta ipsa sub diuersa intelligibilitate, & immaterialitate sunt representabilia, atque adeo in aliquo intellectu superiori habebunt maiorem immaterialitatem in modo representandi, quam obiecta ipsa de se fundant, sicut res corporeæ non fundant de se tantam immaterialitatem, & intelligibilitatem, quantam habet intellectus Angeli superioris, v.g. Cherubini, & Seraphini; & consequenter neque tantam quantam habent species, quibus tales intellectus vtuntur ad obiecta cognoscenda, eo quod proportionari debent species intelligibiles in immaterialitate, & simplicitate ipsi immaterialitati, & simplicitati intellectus.

Si autem semel conuincimur, quod species representatiua alicuius obiecti possunt esse altioris immaterialitatis quam ipsum obiectum de se fundat, consequenter debemus conuinci, quod possit dari species representatiua, quæ plures, & diuersas quidditates vniat sub vnica ratione formali comprehendente illas, quia possunt illæ plures quidditates conuenire in illa altiori immaterialitate, & in quantum vestiuntur sub tali immaterialitate representari sub vnica specie, sicut ea quæ in diuersis sensibus exterioribus diuersis speciebus representantur sub altiori ratione representari possunt in sensu communi, & in imaginatione. Vnde si potentia intellectiua est altior, & efficacior, magisque comprehensiuæ, quam inferior, consequenter postulabit species non solum magis immateriales, sed etiam magis vnitivas, & efficaciores in representando vnitivæ, & comprehensivæ sua obiecta, quam intellectus inferior, desumeturque hæc maior immaterialitas non ex adæquatione ad ipsum obiectum, cuius species est, sed ex alio altiori principio ut in solut. 1. difficultatis dicemus.

13 Sed dices, rationem hanc aut nimis probare, aut nihil: nam si efficax est, probat cuiuscunque intellectus speciem respectu rerum sibi inferiorum esse tantum vnā, quia immaterialitas talis intellectus vna est, species autem illi deseruiētes eandem induunt immaterialitatem, quia proportionantur tali intellectui quem informant: ergo si ideo obiecta representantur vnitivæ, & sub vnica ratione, quia sub altiori immaterialitate representantur à speciebus,

consequenter si illa immaterialitas est vna, sicut & ipsius potentia, etiam species erit vna, & sic omnes Angeli respectu inferiorum rerum tantum habebunt vnica speciem. Et instatur vterius in speciebus infusis animæ Christi: nam tales species supernaturales sunt, & sub lumine supernaturali representant, præsertim res supernaturales, & ordinis gratia, & tamen non vnitivæ, & vniuersaliter representant res illas sicut species Angelica, sed multipliciter, & diuisim, sicut docet S. Th. 3. p. 9. 11. art. 6. Ergo ex maiori immaterialitate sub qua species representant obiecta, non potest earum vnititas, & vniuersalitas in representando inferri.

Resp. rationem factam solum probare quod datur sufficiens fundamentum ex parte specierum, quæ ad intelligendum requiruntur in Angelo, ut non quælibet species debeat adæquari intelligibilitati propriæ huius vel illius obiecti quod representat, sed potest sub aliqua altiori immaterialitate, & spiritualitate quam sit intelligibilitas propria huius obiecti, illud præsetare, atque adeo quod possit in aliquo medio eleuatiore, & vniuersaliori representare plura obiecta, quatenus sub illa maiori, & eleuatiore intelligibilitate plura obiecta possunt conuenire, quod est intentum D. Thom. quod scilicet species istæ sint vniuersaliores ex parte medij, seu rationis formalis sub qua representatur, non verò vniuersaliores solum ex parte rei cognitæ. At verò quod ita eleuetur ista representatio quod per vnica speciem possint omnia obiecta inferiora representari, dependet ex alio principio, videlicet, quod intellectus ille sit ita efficax etiam respectu omnium sibi inferiorum, quod possit in vnica representatione, & vnico actu adæquate correspondere illi speciei omnia inferiora comprehendere: hoc enim non sequitur ex præcisa immaterialitate intellectus, quia excedit, & superat obiectorum inferiorum immaterialitatem, & intelligibilitatem, sed vterius attendenda est ipsa intellectus vis, & efficacia, aut debilitas maior vel minor, secundum quæ lumen illius, & vigor potest accommodari cum minori representatione, magisque particulari, & non cum maiori, & magis vniuersali, quia illa debiliore virtus, & lumen intellectus cum tam vnitivæ, & vniuersali representatione confusius se habet, sicut de anima rationali docet S. Th. inf. 9. 89. art. 3. & 4. quod per species infusas habet cognitionem minus perfectam quam Angeli, etiam respectu rerum materialium, quia habet minorem efficaciam intellectus, Angeli verò propter efficaciam sui intellectus per huiusmodi species habent perfectam, & propriam cognitionem de rebus; & tamen animæ separatæ habent immaterialitatem supra omnia corpora. Eadem ergo ratione intellectus alicuius Angeli inferioris propter minorem efficaciam, & vigorem sui intellectus non poterit in vnica specie omnia sibi inferiora cognoscere propriè, & distinctè, quæ fortasse poterit Angelus superior, licet inferior Angelus in immaterialitate excedat obiecta sibi inferiora, quia non omnis maior immaterialitas respectu obiectorum infert in ipsa actiuitate, & vigore intellectus modum tam vnitivæ, & efficacem, quod possit omnia illa vnico intuitu attingere, vel vnica representatione, quia hoc dependet ex aliis rationibus, scilicet ex maiori perfectione, actiuitate & maiori assimilatione, & accessu ad Deum, vnde sumitur diuersus gradus, & perfectio in Angelis etiam sub eodem immaterialitatis genere. Instantia autem de speciebus infusis animæ Christi non obstat, sed confirmat quod dicimus. Nam licet species illæ sub altiori lumine, & maiori immaterialitate representent, tamen quia intellectu

ctus animæ de se minus efficax, & vigorosus est quam Angeli, indiget sibi particularizari, & proportionari representationes rerum, vt propriâ, & claram cuiusque notitiam habeat, quia ex sua natura inclinatur ad habendum species desumptas ab obiectis, aut si fuerint infusæ, quod adæquatur intelligibilitas earum obiectis ipsis, non ex superiori principio sumatur, scilicet ab ideis diuinis, vt *inf. dice-* mus. Quare maior, & altior vniuersalitas in repræsentando ex parte specierum, sufficienter probatur ex ratione adducta, quod non sit impossibilis. Quod verò cuilibet intellectui habenti immaterialitatem supra sua inferiora sufficiat tam vnica, & vniuersalis ratio repræsentandi, qualis est in vnica specie respectu omnium inferiorum, dependet ex maiori, & altiori efficacia intellectus in tali immaterialitate repertus ad hoc vt possit se accommodare cum illa repræsentatione, aut magis particularizata indigeat, etiam respectu inferiorum, sicut exemplo animæ separatæ comprobatur.

Denique constat quod potest dari conceptus aliquis repræsentans modo magis vnito & vniuersali plures, & diuersas quidditates, sicut potest dari vna scientia adunans sub altiori lumine diuersas quidditates rerum: ergo etiam possunt dari species impressæ magis vniuersales, & modo vnito repræsentantes. Patet consequentia, quia non minus repræsentatiui sunt conceptus, quam species: ergo si ex parte repræsentationis non repugnat conceptus esse magis vniuersales in repræsentando, neque repugnabit quod species impressæ sint etiam magis vniuersales in repræsentando: præsertim, quia species impressæ proportionantur conceptibus, quia ex illis formantur conceptus tanquā ex principio repræsentatiui: ergo sicut dantur tales conceptus vniuersales in repræsentando plures quidditates, etiam & species. Antecedens autem constat, quia licet plura vt plura non possint vnico conceptu attingi, bene tamen plura per modum vnius etiam secundum quod apprehenduntur per modum distinctionis, & differentiarum, vt docet S. Th. *inf. q. 58. a. 2. & q. 58. a. 4. ad 4.* Ergo potest intellectus plures quidditates differentes sub vnico conceptu attingere secundum ipsam comparisonem differentiarum inter se. Similiter constat, quod scientia quantum est abstractior, & altior, sub vna intelligibilitate, & lumine plura attingit, sicut Metaphysica ad plura extenditur quam Physica, & ars architectonica ad plura se extendit, quam ars ministerialis & inferior: ergo similiter non repugnabit quod sub aliquo medio, & intelligibilitate altiori, aliqua species repræsentet plura etiam propriè, & distinctè secundum quod ex tali intelligibilitate altiori illuminari, & manifestari possunt etiam ea quæ propria sunt talium quidditarum, vt ex solutione argumentorum melius explicabitur.

Soluntur argumenta.

Contra hanc tamen resolutionem triplex occurrat difficultas.

- 14 Prima quia illæ species vniuersaliores debent habere vnitatem ex vnitatem obiecti repræsentati, ita quod non solum detur vna ratio formalis *sub qua*, sed etiam vna ratio formalis *qua*: hoc autem non apparet quodnam sit. Nam si est aliquis gradus superior, & genericus in quo conueniunt plura inferiora, tale obiectum, & res repræsentata directè quidem attingetur per talem speciem, non tamen mediātē illo repræsentabūt inferiora propriè, & distinctè, & actu vt sunt in se, quia non poterūt repræsentari nisi prout continentur in tali ratione cōmuni, in qua repræsentantur, ibi autem continetur

solum potentialiter, & in confuso: sic enim genus continet species: ergo sic repræsentabuntur, & non distinctè. Si autem illud quod est ratio repræsentandi plura per aliquam speciem non est gradus aliquis genericus, sed causa, vel conditio, aut respectus, vel accidens aliquod sub quo plures, & diuersæ quidditates possunt vniri, & repræsentari tanquam in eo conuenientes, in primis nō semper poterit assignari aliqua causa creata, quæ sit causa, v.g. omnium animalium, aut totius vnius generis, etiam quantum ad vltimas differentias (suppono enim quod nō nisi in causa creata repræsentari possunt: in Deo enim extra visionem beatam nihil videtur). Sola autē conditio extrinseca, vel accidens aliquod, vel respectus pluribus communis, non apparet quomodo possit esse ratio repræsentandi omnia quæ pertinet ad illas diuersas quidditates propriè, & distinctè, cum talis ratio sit illis extrinseca. Ac denique quidquid creatū est, non potest ita adunare duas quidditates specie, aut genere diuersas, quod adæquatè, & perfectè repræsentet quidquid in illis est, aliàs autem quælibet adæquatè, & perfectè repræsentari potest per speciem sibi propriam, & adæquatam. Ergo non est dabilis species vniuersalior in superioribus Angelis quæ stante illa vniuersalitate repræsentet res contentas distinctè, & propriè, sed solum in confuso tanquam in superiori prædicato.

Secunda difficultas est: quomodo intelligatur 15 quod Angeli quantum superiores, tantum habeant pauciores species: si enim quilibet Angelus quantum est superior in specie sua, seu in specifica ratione pauciores species habet quam inferior, certè cum in sententia D. Th. omnes Angeli differant specie inter se, citò deuenietur ad aliquem Angelum, qui per vnā speciem, vel per nullā intelligat omnia, & admittendo etiam aliā sententiā D. Th. quod Angeli excedunt incomparabiliter omnia corpora, saltem omnes species corporum, facile deueniemus ad Angelum, qui omnia corpora intelligat vnica specie, & Angelus eò superior intelliget corpora, & spiritus sibi inferiores per vnā speciem, & ex ipsis spiritibus etiā plures ex illis per pauciores species intelliget. Vnde potest deueniri ad Angelum, qui poterit intelligere omnes inferiores per vnā speciem, et si alius supra illum crearetur, intelligeret omnia per nullam speciem, sed per suam essentiā, quod D. Th. omni Angelo negat in hac q. 55. art. 1. Quod si dicatur quod non quilibet Angelus perfectior in specie habet pauciores species, sed possunt plures Angeli diuersæ speciei per eandem speciem intelligere, evertitur omne fundamentum ponendi pauciores species in Angelis, quantum sunt superiores, & solum pro libito, & diuinando poterit assignari, quibus Angelis conueniat vt speciebus eiusdē vniuersalitatis, & quibus cōueniat habere vniuersaliores species super alios. Quod enim assignetur species vniuersaliores Angelis, quando sunt distincti ordinis, vel superioris Hierarchiæ, omnino incertū est, nec maius fundamentum habetur ad id affirmandum, quam ad negandum. Et D. Th. solum docuit quod Angeli quod superiores, & perfectiores, vel quantum aliquis est Deo propinquior, tantum habet species vniuersaliores, & ad plura se extendentes, vt affirmat in hac q. 55. a. 3. & in q. de anima a. 7. præsertim ad 5. Constat autem quod quælibet species Angelorum, quantum est altior, tantum est Deo propinquior.

Tertia difficultas est, quia si Angelus quantum 16 superior tantum paucioribus speciebus vtitur, istque vniuersalioribus, poterit Angelus habens vnā speciem pro omnibus animalibus, vel pro omnibus corporibus elicere actum adæquatum talis speciei; & sic vnica cognitione attingere omnes

species animalium, vel corporum. Ex hoc autem sequitur quod possit Angelus vnica specie repræsentare infinitas res, & vnico actu eas attingere, v. g. omnes species animalium, vel corporum, & omnia accidentia, & operationes, seu motus, & quidquid ad illas cōsequitur, quia cum illa omnia quidditatiuè, & comprehensiuè attingat, per illam speciem quatales quidditates cognoscit, omnia ista attingere debet. Hæc autem sunt in infinitum multiplicabilia: nam sub genere animalis possunt infinite species multiplicari, & in qualibet specie possunt infinita accidentia, vel operationes variari: & quacumque specie animalis producta repræsentabitur in illa species Angeli: ergo cum possint in infinitum produci iam de se species illa continet in se omnium illarum repræsentationem, siquidem hoc ipso quod producantur, habet vim ad repræsentandum illas. Constat autem quod repræsentare vnā speciem perfectio est, & repræsentare plures maior perfectio: ergo repræsentare infinitas, erit infinita perfectio. Imò hoc ipso quod vna species intentionalis non solum repræsentat vnā naturam, sed plures poterit repræsentare quascumque in quocumque numero, quia non est maior ratio cur limitetur ad duas, vel viginti, vel centum, quàm ad infinitas. Similiter constat, quod quacumque repræsentantur vnica specie, possunt vnico actu, & conceptu attingi, quia vni speciei correspondet aliquis actus, & conceptus adæquatus: ergo poterit per aliquem actum exprimi totum quod in specie impressa repræsentatur.

17 Ad 1. difficultatem varij sunt modi respondendi quos latissimè referunt, & tractant Carmel. Salmant. *tr. 7. de Angelis disp. 5. dub. 5. n. 107. vsque ad 138.* & Nauarrete *hic contr. 52.* Nos omnibus pensatis breuiter respondemus ex doctrina D. T. duo.

Primum est, quod species Angelorum non dicuntur vniuersaliores, quia obiectum aliquod repræsentent in vniuersali, quod sit abstractum ab inferioribus, & vniuersale in prædicando, vel aliqua natura, & gradus genericus cōtrahibilis ad inferiora: sic enim, vt probat argumentum, solum cognoscerentur res inferiores in confuso, & potentialiter, quia solum attingerentur vt cōtentæ in tali natura, & gradu superiori. Vnde hunc modum repræsentandi vniuersaliter aperte excludit D. T. *in hac. q. 55. a. 3. ad 1. & q. 8. de ver. a. 10. ad 1.* & expressius *in 2. dist. 3. q. 2. a. 2. ad 1.* vbi dicit, quod formæ Angelorū non sunt vniuersales, neque sumpto vniuersali pro ipsa natura quæ est in particularibus, licet in eis non sit secundum rationem vniuersalitatis: neque sumpto vniuersali pro vniuersali per abstractionē. Solum ergo dicuntur species Angelorū vniuersales ratione mediij per quod repræsentant res ipsas vsque ad proprias differentias illarum. Et hoc medium quātō est vniuersalius, tantō perfectius, & intimius repræsentat res quæ sub illo cōprehenduntur, sicut causa quātō est vniuersalior, tantō vehementius influit in effectū, & intimius ac profundius illum attingit, eo quod talis causa est actiuior, & perfectior; & sic vniuersalitas eius est vniuersalitas actiuitatis, quæ ad plures rationes se extendit. Et ad hunc modum habet species Angelicæ modum repræsentandi perfectionē exprimendo in se repræsentatiuè id quod causa vniuersalior habet actiue, & ad eū modum attingendo plura obiecta in repræsentando, sicut causa vniuersalior attingit in causando causa autem vniuersalis non attingit effectus suos solum in communi, & in confuso, sed vsque ad particularia propria descendit, sic species illa vniuersalior in repræsentando attingit omnia particularia ex parte rei cognita.

Secundum quod ex D. T. accipimus est, quod non oportet hoc medium vniuersale, sub quo species Angelicæ repræsentare dicuntur modo vniuersaliori, accipere ex parte alicuius rei, seu obiecti, quod habeat vnitatem per modum rationis, quæ quasi sit res aliqua, quæ directè, & per se repræsentetur, tanquam res repræsentata, & cognoscibilis, & sub illa aliæ res contentæ repræsententur, sed sufficit ponere vnā rationem formalem, sub qua tales species repræsentent plures ac diuersas quidditates, vel rationes intelligibiles. Quæ ratio formalis *sub qua* non est aliud quàm respectus, & habitudo ad ideas diuinas secundum diuersum modum quo causant, & deriuant res in hoc vniuerso: ab ideis enim diuinis exemplantur res in sua propria natura existentes, & in mentibus Angelorum tanquam in similitudine intentionalis repræsentatæ. Hanc enim esse mentem D. T. constat ex pluribus eius locis in quibus ex S. August. affirmat similitudines, quæ sunt in mentibus Angelicis esse quasdam similitudines deriuatas ab ideis diuinis, ita quod sicut ab ideis procedunt res vt existant, aut subsistant in propriis entitatibus, ita etiam vt repræsententur in mentibus Angelorum, vt patet *in hac q. 55. art. 2. & q. 57. a. 2. ad 2. & q. 8. de verit. a. 10. & 11.* & multis locis, vbi tractat de modo, quo Angeli cognoscunt singularia: semper enim recurrit ad hoc, quod formæ, seu similitudines intellectus Angelici sūt exēplata ab ideis diuinis. Vnde sicut illæ causant res, non solum quoad formam, sed etiam quoad materiam, & indiuiduationis principia, & quoad omnes rationes, quæ in vnaquaque re inueniuntur, ita similitudines repræsentatiuæ in Angelis omnia repræsentare possunt, quæ sunt in aliqua re, siue pertineant ad indiuiduationem, siue ad specificationem, siue ad alias latēiores rationes; & de his tantō plures vel pauciores rationes vnica similitudine explicari possunt, quātō similior est ideis diuinis causantibus tales res, & ab illis perfectius, & intimius exēplatur, & quasi sigillatur in mente Angeli.

19 Explicans autem D. Th. quomodo hoc medium, & hæc ratio qua deriuantur istæ species ab ideis diuinis, potest esse ratio repræsentandi plura in speciebus Angelicis; atque adedō constituere species vniuersales, id est, non adæquatè se habentes ad particularia obiecta, sed inadæquatè, multaque completentes, sic dicit *in q. 8. de verit. citata, a. 10. ad 3.* *Id quod vnum est, non potest esse ratio propria plurium, si sit eis adæquatum; sed si sit superexcedens, potest esse propria ratio plurium, quia continet in se vniuersaliter propria vniuersaliusque, quæ in eis diuini inueniuntur.* Et hoc modo essentia diuina est propria ratio rerū omnium; quia in ipsa vniuersaliter præexistit quidquid diuini in omnibus creaturis inuenitur, vt Dionys. dicit. Et similiter cum forma intellectus Angelici sint excellentiores rebus ipsis, utpote diuina essentia propinquiores, non est incōueniens si vna forma intellectus Angelici sit propria ratio plurium secundum diuersas eius habitudines ad res diuersas; ex quibus habitudinibus consurgit pluralitas idearum. Sed forma intellectus nostri accipiuntur ex rebus: vnde nō sunt superexcedentes rebus, sed quasi adæquata quantum ad repræsentationem, licet sint excedentes quantū ad modum essendi, quia immateriale esse habent. Ita S. T. Quare in eius sententia, & pro eius sensu percipiēdo duplex ordo intellectuū considerādus est. Nam intellectus humanus de se naturaliter inclinatus est ad sumendas species ab obiectis, & quia obiecta de se non possunt imprimere, nisi speciē talis intelligibilitatis, qualem ipsa fundant; idedō natus est intellectus formalis speciebus adæquatis ipsis obiectis à quibus species haurit; & tales species habent semper aliquid quod

quod representent tanquam rem unam representatam, à cuius unitate accipiunt unitatem representationis, quia sic obiectum unum est. unde fit, quod quando à Deo infunduntur species animæ humanæ pro isto statu, siue sint naturalis ordinis, & per accidens infusæ (id est quæ aliàs possent non infundi, sed acquiri) siue sint supernaturalis ordinis, & per se infusæ, tamen in modo representandi se adaptant ipsi connaturali modo intellectus humani, uti videlicet tales species sint adæquatæ ipsis obiectis, & unaquæque ad naturam obiecti adaptata, & concisa; ideoque anima Christi licet perfectiores, & limpidiores species in scientia infusa receperit quam Angelus, fuerunt tamen magis particularizata, & coaptata ipsis obiectis. At verò intellectus Angelicus ex natura sua est independens ab obiectis quantum ad hoc quod est non sumere species ab ipsis. Unde non coaptantur species suæ intelligibilitati, quæ est in obiectis, nec ad earum unitatem respicitur unitas rei representatæ, sed desumit species seu similitudines suas ut derivatas ab ideis divinis, quæ sunt principia rerum ipsarum seu obiectorum, sicut si aliquis ad cognoscendam domum non respiceret eam prout est in ipsis lapidibus, & lignis iam fabricata, sed prout est in aliqua copia descendente ab idea artificis, in qua perfectè sigillaretur magis vel minus unitè, sicut domus ducuntur cubitorum potest in vno palmo perfectè delineari, desumendo id ab idea artificis. Et tunc non consideratur unitas speciei ex unitate, vel multiplicitate rei representatæ, sed ex modo quo ab arte delineatur, & adunatur sub quadam uniuersalitate, & unitate ipsius artis sic delineantis. Sicut ex vno sigillo vel typo potest exprimi figura, quæ simul representet hominem, & equum, & arborem, quia non attenditur hæc unitas ex ipsis rebus, sed ex modo quo derivatur à sigillo, & uniuntur in eo. Et ita S. Th. in 2. dist. 3. q. 2. art. 2. ad primum dicit, quod *Est quoddam uniuersale ad rem* (id est uniuersale per modum causæ) *quod est prius re ipsa, sicut forma domus in mente adificatoris, & per hunc modum sunt formæ uniuersales rerum in mente Angeli, non ita quod sint operatiuæ sed operatiuæ similes.* Et art. 3. seq. in fine corporis inquit, quod *Formæ quæ sunt in mente Angeli sunt simillimæ rationibus idealibus in mente diuina existentibus, sicut deductæ immediatè exemplariter ab eis.* Itaque vno verbo, à diuina mente tanquam ab artifice profluunt, & res in propria natura, & materia, sicut domus ab artifice in lapidibus, & lignis, & profluunt imagines representationis talium rerum, sicut ab artifice fit in papyro, vel cera, aut ære incisio, & copia domus faciendæ, quam typum seu modelum vocamus; & hæc non desumit suam unitatem ex re ipsa fabricata ut in se, sed ex unitate, & modo, quo est in mente artificis. Et quia artifex sua idea potest adunare plura vel pauciora alicuius artificij, vel ædificij secundum diuersas habitudines, potest etiam magis vel minus adunare res representatas in vna similitudine, & sicut potest in vno typo coniungere plures partes vnius domus, ita plures domos pro vna ciuitate, aut plures ciuitates pro vno regno; licet quia hæc in materia aliqua pinguntur, non ita perfectè exprimantur: Deus autem qui depingit intelligibiles intentiones in mente Angeli, ex suis ideis eas imprimit cum perfectissima representatione, & cum ea adunatione, & unitate, qua in ideis adunantur, seu simili ad illas, & participata ab illis.

Sed dices: Unde habemus quod Deus infundit Angelis species sic derivatas à suis ideis, & non ut adæquatas ipsis obiectis? hoc enim non nisi diuinando dici potest. Et dato quod ita sit, adhuc non

sequitur intentum: nam ideæ diuinæ considerari possunt vel ut attingunt res ipsas ideatas, & multiplicantur secundum habitudines ad ipsas, vel ex parte ipsius Dei secundum quod illa omnia sub vno modo cognoscendi, & operandi comprehendit. Si considerentur ideæ secundum quod distinguuntur penes ideata, diuersæ ideæ sunt sicut res ipsæ ideatæ, ut ex D. Th. *suprà* diximus *disp. 1.* & sic tot erunt species in Angelo quot sunt ideæ multiplicatæ ad multiplicationem ideatorum, quod est perinde atque accipere species ab obiectis: sic enim multiplicantur ideæ, sicut obiecta ipsa. Si verò considerentur ideæ ex parte ipsius Dei, & modi cognoscendi illius, & operandi, sic non multiplicantur ideæ, sed sunt vnum, & ita si species Angelicæ pro hac parte imitantur ideas, vna species erit in omnibus, non multiplex, quia modus idearum vnus est.

Respond. quod in primis hoc nullam habet repugnantiam quod Deus ex suis ideis, ex quibus uniuersam creaturam format, formet etiam intelligibiles species, & mentibus imprimat Angelorum, ita quod in eis formet intelligibile mundum, sicut extra format illum in sua materia. Quod verò ita de facto fecerit, non diuinando dicitur, sed cum maximo fundamento, tum quia expressè asseritur à S. Aug. 2. de *Genesi ad litteram* c. 8. & affert illum locum S. Th. *hic* q. 55. art. 2. quod *Deus prius ex rationibus per quas condidit creaturas facit eas in cognitione seu mente Angelorum, ac deinde in seipsis.* Dicitur etiam Angelus *signaculum similitudinis plenius sapientia.* Ezechiel. 28. quasi in ipso suæ creationis initio sigillatus sapientia à Deo quod est ex eius ideis, & scientia participare formas suas intelligibiles, quibus sapientia formatur. Congruum quoque est naturæ eius; quia cum sit forma purè intellectualis, & spiritualis, nec sensus habeat, quibus ab obiectis corporeis hauriat species, nec aliæ spirituales substantiæ creatæ eius menti illabi possint, ut eam formet, oportuit à summo spiritu, qui omnium obiectorum continet rationes, formari, eique species imprimi à tali spiritu summo diriuatas: & hoc est ab eius ideis deriuari similitudines in Angelos, quia purè spiritualis est, & à spiritu conditore non ab obiectis formari debet.

Ad id verò, quod dicitur de multiplicatione idearum, respondemus quod licet ideæ multiplicentur per connotationem, & habitudinem ad res in se, ex parte autem Dei, & modi intelligendi eius habeant summam unitatem, in mente tamen Angelorum deriuantur pro captu suo, non solum ita diuisæ, sicut res ipsæ ideatæ, sed cum aliqua unitate, seu adunatione ex parte modi idearum, quia representant res ut procedunt à Deo; & sic ex ipso modo procedendi, quem representant, unitatem sortiri possunt, quia sub illa habitudine representant, sub qua descendunt à Deo. Sed tamen quia sunt similitudines deficientes ab ipsa simplicitate, & infinitate diuinarum idearum, ut sunt in Deo, non possunt illum vnicum modum, qui ex parte Dei se tenent vnico, & adæquato modo representare, sed diuerso, unaquæque iuxta modum, & captum suum. Et sic quia ideæ diuinæ causant res, non solum secundum habitudinem, & dependentiam ab ipso Deo qui summè, & infinitè vnus est, sed secundum habitudines diuersas ad causas, & fines magis particulares, vel etiam magis uniuersales; ideò non solum attenditur distinctio idearum secundum diuersitatem ipsarum rerum procedentium, sed etiam secundum diuersos respectus, & modos procedendi, & secundum diuersas habitudines ad diuersos fines: hæc enim omnia ad ideas pertinent. Et ita possunt deriuari ab illis ideis similitudini

litudines, magis etiam vel minus vniuersales in representando res sub illa derivatione qua fluunt à Deo sub habitudine magis vel minus ampla, & vniuersali; sicut artifex superior potest efformare similitudinem vnius domus, secundum quod in se est quoddam particulare ædificium, vel secundum quod conducit ad ciuitatem, sicut est arx; vel totius ciuitatis aut integri exercitus, vel classis secundum quod conducit ad bonum regni; & sic secundum diuersas habitudines fit vniuersalior representatio, & similitudo. Sic ab ideis diuinis possunt in mentem Angeli derivari similitudines lapidum vel herbarum, vt conducunt ad medicinalem virtutem, vel vt pertinent ad climata huius regionis, potius quam illius, & similiter similitudines auium quatenus tali regioni deseruiunt, aut tali vtilitati, aut fini, vel etiam secundum quod deseruiunt homini, vel secundum quod pertinent ad ornatum integri elementi v.g. aeris vel terræ, vbi est altior, & vniuersalior finis, vel etiam secundum quod sunt à causis vniuersalibus cælorum, ac denique secundum alias diuersas habitudines, & fines qui variare possunt modum quo ista deriuantur à Deo. Quod vnico verbo dixit S. Th. *quæst. illa 8. de verit. art. 10. ad 3. quod Vna forma intellectus Angelici est ratio propria plurimum secundum diuersas eius habitudines ad diuersas res, ex quibus habitudinibus confurgit pluralitas idearum.* Nota hoc bene.

22 Ad argumentum ergo huius primæ difficultatis, Resp. concedendo quod species Angelicæ non sunt vniuersales ex eo quod aliquam naturam in vniuersali seu gradum aliquem genericum directe, & per se representent, vt expressè talem vniuersalitatem representandi excludit S. Th. in 2. dist. 3. qu. 2. art. 2. ad 1. Sed ex eo quod representant plures res sub aliquo vniuersali medio, id est quatenus descendunt à Deo, & ab ideis diuinis secundum diuersas habitudines, vt declaratum est conformiter ad captum, modumque ipsius Angeli. Vnde non oportet istis speciebus assignare vnā rationem tanquam obiectum quod, seu ex parte rei cognitæ, & rationis formalis qua, sed tanquam obiectum quo, & ex parte rationis formalis sub qua, scil. quatenus res illæ descendunt à Deo sub tali, vel tali habitudine, & ordine magis vel minus vniente res illas in ratione deriuandi à Deo.

Et quando instatur, quod nullus modus, aut accidens, aut conditio, aut respectus, vel nulla causa aut ratio creata potest adunare perfecte in intelligibilitate plures quidditates.

Respondemus, quod conditio, aut respectus, seu ratio aliqua creata, si sumatur secundum se, non potest esse ratio adunandi perfecte in representatione plura obiecta; si autem sumatur non præcisè secundum se, sed vt descendens à Deo, & ab ideis diuinis, sic potest esse ratio representandi plura perfecte, & distinctè, quia perfecte, & distinctè descendunt à Deo, & ab ideis diuinis. Vnde non oportet vnitatem huius representationis sumere ex aliqua vnitatem rerum representatarum in se, sed ex vnitatem, & modo exemplaris à quo deriuantur; sicut sigillatum sumit vnitatem à sigillo, licet res valde diuersarum figurarum exprimat. Et ista ratio sub qua non est representabilis vt quod, sed vt quo, & hoc sufficit ad vnitatem representationis sic sigillatæ à diuino exemplari, & idea.

Et cum instatur quod duæ quidditates specificæ representari possunt per duas species adæquatas, nec habere possunt aliquid in quo adunentur, quod perfecte, & distinctè illas representet, quæ est replica Arrubalis disp. 165. c. 1.

Respon. quod illæ quidditates sunt representabi-

les per diuersas species adæquatas, si secundum se, & secundum inferiores, & proprias rationes considerentur, quæ ex obiectis ipsis desumuntur, illisque adæquantur. Si autem represententur secundum altiorē rationem, scil. vt procedunt à Deo, seu ab ideis diuinis, & secundum similitudinem, & sigillationem ab ipsis, sic possunt representari in superiori ratione, & tamen representari proprie, & distinctè, quia non representantur ibi vt in gradu, & prædicato superiori, sed vt in causalitate, & processu ab exemplari superiori: in quo vniri possunt illæ res quæ aliās in se sunt diuersæ, secundum diuersas habitudines magis vel minus vniuersales, secundum quas ab illis procedunt: sicut arborem, & lapidem, & fluium possunt representare distinctæ figuræ, & picturæ, si res illæ secundum se considerentur, sed si in vno sigillo, seu typo ista omnia adunentur vnica sigillatione possunt imprimi & representare. Nec ex hoc inferri potest quod videntur in ipso Deo, seu in ideis, vt tenent se ex parte ipsius Dei, sed videntur in similitudinibus, seu per similitudines deriuatas ab ipsis ideis, quæ nō representant ideas ipsas, vt sunt in se, & ex parte Dei, sed res ipsas ideatas prout procedunt, & dependent passiuè à Deo, quod totum pertinet ad ordinem naturalem, prout tales creaturæ exeunt à Deo ad componendum hoc vniuersum, & sub diuersis respectibus, seu finibus sub quibus istæ vel illæ creaturæ adunantur, & producantur, representari possunt, sicut res sigillata non representat sigillum vt est aureum vel æreum in se, sed prout recipitur impressio eius in sigillato.

Ad secundam difficultatem Respon. sine dubio 23 probabilius esse, quod secundum differentiam specificam vnius Angeli, eleuatiō modus cognoscendi, & vniuersalior species correspondet; & cum quilibet Angelus habeat diuersam naturæ speciem, quilibet superior in species, habet aliquam superioritatem in modo representandi specierum. Et ad hoc facit doctrina S. Thom. qui in hac q. 55. art. 3. absolute, & sine distinctione docet quod Angelus, quod superior, eō per pauciores species intelligit: est autem superior etiam si non hierarchia, aut ordine, sed etiam specie inæqualis, & superior sit. Et q. 8. de verit. artic. 10. inquit, quod *Quanto in Angelo fuerit plus de actu, & minus de potentia, tanto emanatio huiusmodi rationum* (intellige emanationem à Deo, non à natura Angeli) *minus in ipso multiplicabitur.* Quæ ratio currit respectu cuiuscumque Angeli specie diuersi ab alio; quæcumque enim differentia specifica facit Angelum esse superiorem alio & plus habere de actu, & magis participare diuinam similitudinem, quæ sunt rationes minus multiplicandi species, & perfectius participandi similitudinem diuinam. Vnde procedit argumentum quo vritur D. Thom. q. de anima art. 7. in corp. & ad 5. nam Angeli hoc ipso quod differunt specie, differunt etiam in participatione diuinæ similitudinis, & magis, vel minus ad eum accedunt: ergo eam differunt in participanda similitudine diuinarum idearum: ergo oportet quod simpliciori modo representent species perfectioris Angeli, atque adeo, & modo vniuersaliori, qui magis vnitus, & simplex est, siquidem participatio illa idearum actualior est, & minus habet de potentia: ergo magis vnita, & simplex est representatio.

Quod si inquiras: si ita est, quod Angeli, ex eo 24 quod superiores, & actualiores in sua natura, pauciores habent species, & quanto inferiores tanto plures habent, cur etiam non dicemus quod Angeli quanto inferiores tanto plures potentias habent ad intelligendum, & quanto superiores, minus. Si verò

verò in inferioribus est vna potentia, sicut in superioribus, sed potentia inferiorum est minus actualis, & efficax, magisque potentialis, potentia verò superiorum magis vigorosa, & formalior, cur etiam non dicemus idem de speciebus, quòd eadem numero species erunt in superioribus, & in inferioribus, sed in superioribus magis perfectæ, & unitæ, in inferioribus minùs.

Respon. quòd potentia intellectiva non potest magis multiplicari in superioribus Angelis, quàm in inferioribus, imò quàm in hominibus, quia potentia est vis intellectivæ naturæ per modum virtutis ex parte naturæ, & subiecti, quæ potest in totum ens eo quod omne intelligibile est obiectum adequatum eius. Vnde non habet per quid diuidatur, & multiplicetur in eodem subiecto, siquidem est potentia vniuersalissima, & virtus tendens ad omne ens hoc ipso quod intellectiva est; solùm autem differt in diuersis naturis ex diuerso modo, & actualitate, qua magis vel minus immaterialiter tendit in sua obiecta. At verò species non se habent sicut ipsa potentia, quæ respicit obiectum per modum vniuersalis tendentiæ in quodcumque intelligibile, sed sunt repræsentationes ex parte obiecti se tenentes, tanquam vice obiecti subrogatæ in potentia; quæ determinant indifferentiam potentiæ; & sic ex diuerso modo, repræsentandi diuersa obiecta diuersificantur. Et licet possint aliquæ species complecti plura obiecta in manifestatione, seu modo manifestandi superiori, aliæ pauciora, hoc idè est, quia obiecta illa vniuntur in aliqua ratione manifestabili, & intelligibili superiori, prout in se obiecta conueniunt; vel ab ideis diuinis exemplantur. Sed negamus posse easdem numero species æquè poni in intellectu inferiori, atque in superiori, quia si superiores, & vniuersaliores sunt, non repræsentabunt inferiori intellectui distinctè, & propriè res ipsas, sicut superiori quia improporcionatæ illi sunt; & idè ad habendam propriam cognitionem, oportet multiplicari species. Et quia proprium munus speciei est repræsentationem obiectorum propriam, facere, idè simpliciter oportet multiplicari species in inferioribus, vbi non potest distincta notitia, & repræsentatio obiectorum fieri, nisi multiplicatis, & diuisis speciebus, vt in nobis constat: quod non currit de potentia ipsa, seu virtute intelligendi ad quam non pertinet distinctè obiecta manifestare repræsentando, sed solùm secundum suum modum in illa tendere actum eliciendo.

Ad rationem ergo dubitandi in hac secunda difficultate allatam, quòd perueniri potest ad Angelum qui omnia intelligat vnica specie. Respondeo. Primò id non sequi in Angelis inferioribus respectu superiorum, quia de quolibet superiori debet inferior habere speciem distinctam, non eandem cum specie rerum inferiorum. Cuius ratio est, quia Angeli superiores excedunt virtutem Angeli inferioris: ergo oportet quòd vt repræsententur intellectui inferioris secundum capacitatem eius, quilibet repræsentetur secundum distinctam speciem, non autem omnes superiores Angeli per modum vnius inter se, & multò minus vt vnum cum rebus inferioribus: nam si quilibet Angelus superior, est excedens, & improporcionatus capacitati inferioris, si plures vniuntur in vna ratione superiori, illa magis conducet ad improporcionandum, quàm ad coaptandum Angelos superiores inferioribus. Vnde & Angeli superiores quando illuminant inferiorem rationes illas superiores multiplicant, & diuidunt vt ab inferiori capi possit, vt ex D. Dionysio docet S. Th. *infra qu. 106. art. 1.* quod exemplo notari intellectus comprobatur, quia tradiores intelle-

ctus, non possunt ita vnità intelligere, sed indigent diuidi sibi, & multiplicari ea quæ intelligere volunt. Quare nunquam stare potest quòd Angelus inferior, qui habet aliam superiorem possit intelligere omnia obiecta, quæ sunt extra se per vnica speciem: nam etiam dato quod inferiora sibi intelligeret per vnica speciem tamen superiores naturas per distinctas species debet intelligere; & sic nunquam omnia per vnica speciem.

Loquendo ergo de Angelo supremo respectu omnium infra se, vel de quolibet Angelo respectu suorum inferiorum (nam seipsum quilibet Angelus cognoscit per propriam substantiam loco speciei) duplex est modus probabilis respondendi, qui in re tam obscura, & nobis impenetrabili sufficiens iudicari debet. Primus censet non esse inconueniens quòd quilibet Angelus intelligat omnia sibi inferiora per vnica speciem, nec id videtur superare capacitatem intellectus Angelici, eo quod habet perfectionem superantem omnia illa quæ sibi inferiora sunt; & sic non repugnat, quòd per vnica speciem sibi proportionatam omnia illa possit vnire in repræsentatione. Pro quo modo dicendi, P. Suarez *lib. 2. de Angelis c. 16. num. 15. & 26.* citat Caietanum, & nonnullos Thomistas, aliòsque aucthores.

Et si instetur quòd Angelus inferior si intelligit omnia sibi inferiora per vnica speciem: ergo Angelus immediatè illi superior intelliget eadem inferiora sine vlla specie, vel per suammet substantiam, quia debet intelligere altiori modo, & per pauciores species, nec est aliquis altior modus, quàm per nullam, vel per suam substantiam, aut si intelligit per vnica, sicut inferior, habebit æqualem speciem cum illo respectu inferiorum.

Res. facile, quòd semper Angelus superior retinet speciem vniuersaliorum, quàm immediatè sibi inferior, eo quòd complectitur plura in illa vnica specie, quàm inferior nempe omnia quæ inferiori Angelo repræsentantur in sua specie, & superaddit aliquid aliud, nempe ipsummet Angelum inferiorem, quem cum reliquis rebus inferioribus repræsentat, respectu autem superiorum Angelorum habebit species distinctas, & sic semper superior Angelus habebit pauciores species quàm inferior, nam Angelus inferior habebat de illo superiori Angelo speciem, & de omnibus sibi inferioribus aliam, seipsum autem per suam substantiam intelligit, Angelus autem superior de seipso non habet speciem accidentalem, sed se intelligit per suam substantiam. De Angelo autem inferiori, & reliquis rebus habet vnica tantum speciem. De superioribus autem tot habet quot sunt superiores, sicut etiam habebat inferior Angelus. Deueniendo autem ad Angelum supremum ille intelliget etiam omnia inferiora sua per vnica speciem, & seipsum per suam substantiam: si autem crearetur alius Angelus superior, & tunc desineret esse supremus, ille alius superior inferiora omnia etiam per vnica speciem intelliget, in illa tamen includet etiam Angelum, qui antea erat supremus, quia sibi inferior est, & in hoc excedet speciem illius, quia hæc repræsentabat omnia inferiora illi Angelo, sed non ipsummet Angelum, quia cognoscebat se per suam substantiam. Et vltèriùs ille Angelus superior qui de nouo creatur habebit pauciores species quàm ille qui ante erat supremus, quia ille hoc ipso quod creatur Angelus supra ipsum, hoc ipso recipiet speciem repræsentantem sibi ipsummet superiorem; & sic iam habebit duas species vnica de superiori, alteram de omnibus inferioribus: ille autem qui de nouo creatur solùm habebit vnica de omnibus

omnibus inferioribus, nullam autem de aliquo superiori.

27 Alij verò existimant valde difficile quòd vnus Angelus possit per vnā speciem omnia sibi inferiora intelligere: sic enim minimus Angelus omnia corpora vnica specie intelligit, quòd videtur valde incredibile. Et idè dicunt quòd nunquam peruenitur ad aliquem Angelum, qui vnica specie omnia inferiora cognoscat. Primò quidem quia vniuersalitas specierum vt sit maior, non est necesse quòd plures species rerum adunet, & repræsentet, sed sufficit quòd circa eandem rem plures rationes intelligibiles penetrat, vt docet S. Thom. q. 8. de verit. art. 10. ad 2. id est, plures respectus ad causas latentiores, vt mox dicemus; vel etiam plura indiuidua ex possibilibus possit in eadem re penetrare. Neque hoc contra rationem comprehensionis est, vt obiicit Suarez citatus, quia licet quilibet Angelus comprehendat inferiorem naturam, intelligitur hoc de comprehensione absoluta, quantum ad ea scilicet quæ absolute, & in ordine ad se conueniunt rei: non autem de comprehensione respectiva, quia non videt omnia quæ tali naturæ possunt conuenire respectu aliarum causarum superiorum, v.g. respectu superiorum Angelorum, qui aliqua poterunt causare circa talem naturam quod non poterit causare Angelus inferior, idque non ita perfectè intelligit inferior Angelus, sicut superior. Itaque istas latentes rationes, & connexiones causarum non æquè percipiunt omnes; & idè in hoc potest crescere maior vniuersalitas specierum comprehendendo plures rationes, etiam respectu eiusdem rei ad quas tamen inferior Angelus pluribus speciebus indigebit, si eas distinctè, & perfectè debet cognoscere. Et sic non quælibet vniuersalitas maior specierum exigit plures quidditates adunare, sed sufficit plures rationes eiusdem.

28 Secundò etiam si quilibet Angelus superior habeat speciem magis vniuersalem in hoc quod plures quidditates específicas adunet in ea; & sic addendo vnā quidditatem alteri, possit perueniri ad vnū Angelum, qui omnia corporalia vnica specie intelligat, tamè non eadem facilitate plures quidditates spirituales perfectè adunantur in vna specie proportionatè ad capacitatem intellectus superioris propter maximam perfectionem spiritualium substantiarum, quarum accidentia, & affectiones, seu operationes intelligibiles, & voluntariæ, sunt maioris multitudinis, & latentioris profunditatis, & superioris perfectionis; & idè magis indigent multiplicatione specierum vt distinctè cognoscantur. Fortassis etiam inter ipsas res corporeas aliqua sunt tantæ perfectionis, quòd non possunt ita facillè penetrari vnica specie simul cum aliis, sed indigent pluribus. Itaque in istis aliquid sic vel sic amplius determinare, omnino incertum est. cum nobis manifestata non sit mensura, qua singulos Angelos Deus mensus est. Sufficit aperire viam, ne deueniatur ad hoc, vt Angelus se, & omnia tam inferiora quàm superiora vnica specie cognoscat.

29 Circa tertiam difficultatem breuiter dicimus, non repugnare quòd omnia ea, quæ vna specie repræsentantur, vnico etiam actu adæquato ab Angelo intelligantur, dummodò in ipsis rebus sint conditiones debitæ, & requisitæ, vt res possint attingi ab Angelo, scilicet quòd non sint intra causas, nec ad genus moralitatis pertineant, sed ad genus naturale, & tanquam aliquid huius vniuersi: potest etiam Angelus vti aliqua specie inadæquatè ad intelligendum aliquid in tali specie contentum, & non omnia. Quocumque vero modo, siue in ipsa repræsentatione speciei, siue in ipsa cognitione,

non sequitur infinitas. Constat hoc ex D. Thoma, nam *infra q. 58. art. 2.* resoluit quòd *Angeli omnia illa simul possunt intelligere, quæ vna specie cognoscuntur, non illa quæ diuersis.* Idem autem est apud D. Thomam simul intelligere, & vno actu intelligere: nam de cognitione qua cognoscunt Angeli res in Verbo dicit ibi, quòd *simul omnia cognoscunt, quia non erunt volubiles cogitationes ex aliis in alias redeuntes, sed omnem scientiam nostram vno simul conspectu videbimus*; ergo idem est simul cognoscere, & vno actu cognoscere, quia in patria vno actu cognoscuntur omnia in Deo. Similiter quòd possit Angelus inadæquatè vti specie illa quam habet, docet S. Thom. in q. 8. art. 13. ad 2. & 4. vbi docet posse Angelum vti vna specie ad diuersas cognitiones habendas, & ideo Angelus qui videt in alio species quas habet, non videt cogitationem, & vsum earum, quia potest vti specie illa in hanc vel illam partem.

Ratio autem huius est, quia species proportionatur lumini, & potentiæ cui datur, si debita, & proportionata illi est. Ergo si vtatur intellectus sua virtute, & lumine adæquatè, poterit omnia illa adæquare, quæ in tali specie repræsentantur, & consequenter vnico actu videre. Sed quia vis intelligentis, potest vti aliqua specie, & lumine, non adæquatè, sed per inadæquatos conceptus, vel vnum tantum obiectum intelligere, vel non omnes rationes intelligibiles de eodem. Et sic potest præscindere diuersos conceptus & prædicata, quæ rebus conueniunt, sicque formare conceptum de genere, aut specie, aliisque gradibus seorsum vnum ab alio, vel etiam accipere aliqua accidentia vnus rei, & non alia, loquendo de consideratione actuali, quam pro libito exercere potest, supponendo tamen quòd habet comprehensiuam cognitionem de rebus tum habitualiter in vi specierum, & efficaciam luminis, quia potest proximè intelligere adæquatè, & perfectè rem sibi proportionatam; tum quia actualiter vtitur tali comprehensione quando perfectè, & adæquatè se determinat ad aliquid; tum denique quia licet in specie repræsentante plures quidditates, non semper respiciat ad omnes simul, vtendo adæquatè tali specie, tamen si aliquam illarum intelligat, comprehensiuè, & plenè intelliget quantum est ex vi luminis, licet pro libito, & applicatione voluntatis possit omittere in consideratione aliqua ex pertinentibus ad talem rem.

Quòd verò infertur pro inconuenienti, quòd poterit Angelus cognoscere, vel illa species repræsentare infinita, in primis quod attinet ad infinitum actu, nunquam hoc sequitur, quia Angelus non cognoscit de facto, neque species sibi repræsentant nisi ea quæ ad hoc vniuersum in ordine naturali spectant: hæc enim est eius sphaera, & propria limitatio, vt *seq. disp.* dicemus. In hoc autem vniuerso nunquam actu, & simul erunt infinita; quod est infinitum categorematicè. Quòd verò sint infinita in potentia, aut possint infinita succedere, & illa omnia possit Angelus per eandem speciem successiuè intelligere, nihil inconueniens est, neque hoc arguit infinitatem simpliciter, sed secundum quid, sicut eadem potentia intellectiva potest infinitas intellectiones successiuè elicere, & idem calum infinitas circulationes, & illuminationes habere, si duraret motus eius in æternum. Deinde dicitur, quòd licet repræsentare vnum indiuiduum vel vnā speciem sit perfectio, & repræsentare aliam maior perfectio, tamen repræsentare infinita est infinita perfectio, distinguo, est infinita perfectio in genere determinato superabilis, & vincibilis per perfectionem

perfectionem finitam superioris ordinis, concedo: est perfectio infinita simpliciter, & non contenta sub aliquo superioris ordinis, nego. In his enim calculationibus incidit defectus, quia numeratur perfectio ex accretione maioris excessus in aliquo genere inferiori, quæ quidem non pertransitur infinito modo, sed in aliquo finito superioris ordinis continetur: ea enim quæ inferioris generis seu ordinis sunt, licet in infinitum multiplicari possint in se, tamen non requiritur ad illa vincenda infinitus transitus, sed sufficit poni aliquid superioris ordinis quod hoc ipso quod superioris ordinis est, licet sit finitum in se, æquivalet infinitis ordinis inferioris, id est toti generi inferiori, quia omnia superat in perfectione, sicut Rex æquivalet omnibus subditis, & superat indignitate, & cælum infinitis corruptibilibus sibi inferioribus; & sic

de aliis. Quare infinitæ illæ repræsentatione de individuis, vel de speciebus modo inferiori factis exceduntur per vnam repræsentationem altioris ordinis derivatam ab ideis diuinis, quæ plura illa in vnum adunare potest. Nec obstat quod dicitur, speciem quæ repræsentat duas vel tres quidditates posse etiam repræsentare plures in infinitum; respondetur enim quod cum istæ plures quidditates repræsententur quatenus vniuntur sub aliqua ratione formæ, ly *vna*, siue sit ratio *sub qua*, siue ratio *qua*, limitatur semper species repræsentatiua ad non admittendum plures quidditates, quàm quæ sub illa formali ratione contineri possunt, quæ finita est; & ita à qualibet quidditate repræsentata inadæquatè limitatur illa species, & ab omnibus vt contentis sub illa ratione formali, adæquatè.

Q V Æ S T I O LVI.

De cognitione Angelorum respectu immaterialium.

S V M M A L I T T E R Æ.



R I A tractat D. Thom. in hac quæstion.

Primum in art. 1. quod Angelus cognoscat seipsum, imò sibi ipsi deseruit pro specie intelligibilis in actu per se, & non in potentia.

In art. 2. ostendit secundum, scilicet quod cognoscit alios Angelos, quia impressæ sunt cuilibet Angelo à Deo similitudines tam corporalium quàm spiritualium rerum, atque adeò etiam spirituales res potest intelligere.

Tertium determinat in art. 3. quod Angelus per sua naturalia Deum cognoscit, non quidem videndo Deum per essentiam, quod est proprium beatorum, nec cognoscendo Deum solum per cognitionem ab aliis rebus acceptam, sicut nos videmus Deum in speculo, quia ex aliquo externo, seu extra nos sumimus cognitionem, sicut speculum est aliquid extra videntem, sed per cognitionem desumptam à sua substantia, quæ est immediatè effectus Dei. Et quia substantia Angeli deseruit sibi pro specie immediatè ad se, mediatè ad suam causam, quæ est Deus, & intimè illa substantia actuatur intellectum, dicitur cognoscere Deum per seipsum tanquam per similitudinem, seu speciem. Sed quia hæc substantia continet Deum solum abstractiuè, & connotatiuè, & tanquam in alio contentum, dicitur repræsentare Deum, sicut in speculo, quia Angelus speculum, & signaculum Dei est.



QVÆSTIO LVII.

De Angelorum cognitione respectu rerum materialium.

S V M M A L I T T E R Æ.



N art. 1. determinat Angelos cognoscere res materiales, quia superiora semper continent inferiora eminentius, & perfectius quàm in se sint. Angeli autem perfectiores sunt rebus materialibus, & propinquiore Deo: debent ergo continere eas perfectius perfectione conuenienti iuxta modum suum, id est, perfectione intelligibili, quia intellectualis naturæ sunt: intelligunt ergo res materiales.

In art. 2. docet & explicat quomodo Angelus cognoscat singularia materialia, non quia ab eis species accipiat, nec quòd omnino ea ignoret, cum ab homine, qui est Angelo inferior, cognoscantur, sed quia species quas Angeli habent sunt exemplatæ ab ideis diuinis, ubi multò perfectius ista singularia continentur, & causantur; & sic ea tales species repræsentant.

In art. 3. ostendit quòd futura non cognoscit Angelus in seipsis, quia non coëxistunt durationi eius, cognoscit tamen in causa, vel determinatè, & certò, si de necessitate ibi continentur, vel per coniecturam si contingenter plus vel minùs secundum quod causæ futurorum plus vel minùs peterentur.

In art. 4. ostendit quòd cogitationes cordis non intelliguntur ab Angelis, etiam si existant nisi in suo effectu, vel manifestatione, non in seipsis: eo quod ea quæ ex sola voluntate libera pendent, sunt extra ordinem naturalium, & à solo Deo intus in voluntate operante, & à voluntate ipsa fiunt, ubi ly *à solo Deo*, excludit non solum aliam causam, sed aliud consortium, vel connexionem cum aliis rebus naturalibus, quam non habent per se tales cogitationes. In effectibus tamen suis, & multò magis in manifestatione sua possunt cognosci istæ cogitationes secundum quod magis, vel minùs in effectu significantur.

In art. 5. ostendit quòd naturali cognitione non cognoscunt Angeli mysteria gratiæ, quia supernaturalia sunt, & ex sola Dei voluntate dependent. Cognitione autem supernaturali seu visione gloriæ cognoscunt mysteria gratiæ, non omnia, nec æqualiter omnes, sed prout Deus illis manifestat.

QVÆSTIO LVIII.

De modo cognitionis Angelica.

S V M M A L I T T E R Æ.



IN articulo primo ostendit D. Thom. Angelos in cognitione naturali non procedere de potentia ad actum, quantum ad acquirendas species, & scientiam in actu primo, sed à sua creatione plenus est formis intelligibilibus, benè tamen procedit de actu primo ad secundum quantum ad actua-lem considerationem huius vel illius. In visione autem gloriæ nec etiam procedit de actu primo ad secundum, sed semper in actuali consideratione est.

In art. 2. ostendit quòd Angelus non intelligit simul, id est, vnico actu plura vt plura, benè tamen plura vt vnum, seu redacta ad vnam rationem formalem. Ea dicuntur plura vt plura, quæ diuersis speciebus repræsentantur, vt diuersis. Ea vt vnum, quæ ad vnam repræsentationem reducuntur.

In art. 3. ostendit quòd Angeli non intelligunt discurrendo, quia statim in principiis vident conclusiones ex illis deducibiles, & in eis contentas; & sic non indigent ea inferre, & per consequentiam colligere, nos autem, quia visis principiis non statim cognoscimus conclusiones, ideò circa eas discurremus, id est, per consequentiam inferimus.

In art. 4. ostendit quòd non intelligit Angelus componendo, & diuidendo: sicut enim intellectus ex eo discurret, quia comparat principium ad conclusiones, ita ex eo componit, quia comparat prædicatum subiecto. Et vtrumque ex eo prouenit, quia non statim viso principio videt conclusiones, nec viso subiecto prædicatum, quod componendum vel adiungendum est. Angelus autem in re quam cognoscit apprehendit quidquid illi conuenit, vel in virtute eius continetur propter perfectionem sui luminis: ergo non componit, nec diuidit.

In art. 5. ostendit quòd per se non potest esse error vel falsitas in Angelis, benè tamen per accidens. Per se non potest esse falsitas, quia falsitas contingit attribuendo alicui id quod non est in re: Angelus autem non attribuit vnum alteri cum intelligit, sed in ipsa quidditate rei penetrat simplici intuitu quid conueniat, & quid disconueniat. Per accidens autem potest esse falsitas, non sicut in nobis, qui aliquando quidditatem rei componendo inuestigamus, sicut cum ex multis formamus definitionem, sed quatenus possunt iudicare sine lumine superiori, ea quæ à supernaturali ordinatione dependent, sicut interdum Dæmones præcipitant iudicium,

In art. 6. ostendit dari in Angelis cognitionem matutinam, & vespertinam, quæ distinguuntur per hoc, quod matutina cognoscit res creatas in essentia diuina, quasi in suo principio, & causa, sicut manè est principium diei; vespertina verò cognoscit res creatas in se quasi in termino producto, vt sunt extra Verbum.

In art. 7. ostendit has cognitiones differre si cognitio vespertina rerum in se sumatur pro ea quæ fit per proprias species; matutina verò pro ea qua res cognoscuntur per essentiam diuinam. Si verò cognitio rerum in se, & in Verbo non sumatur ex parte diuersorum motiuorum, scilicet per species proprias, & per essentiam diuinam, sed pro diuerso esse, seu statu ipsarum rerum, quæ cognoscuntur, quatenus cognoscuntur creaturæ quantum ad esse quod habent intra Deum in quo sunt creatrix essentia, & esse quod sibi competit extra, sic eadem cognitione vtrumque attingitur in cognitione beata: videtur enim esse quod res habent in Deo, & esse quod habent extra per Deum.



DISPUTATIO XXII.

De obiecto, & modo cognitionis Angelicæ.

ARTICVLVS I.

Virum Angelus comprehensiuè cognoscat tam res inferiores, quam Angelos superiores?



QUIBET quæ Angelus naturali sua cognitione potest attingere ad tria reducuntur, quia cognoscit se, inferiora sibi, & superiora ad se. Respectu sui cognoscit se per suam propriam essentiam; & continetur in hoc obiecto tam substantia ipsa propria Angeli quam eius proprietates, operationes, & accidentia. Inferiora obiecta ad Angelum sunt res corporeæ, animæ humanæ, & alij Angeli qui sunt inferiores alicui superiori: infimus autem Angelus non habet alium Angelum inferiorem, quem attingat tanquam obiectum inferius. Inter superiora autem obiecta in primis est ipse Deus quem ex creaturis tanquam ex effectibus Angelus cognoscit, & tantò perfectiùs quantò ex aliquo perfectiori effectù, & perfectiùs penetrato Deum attingit. Et similiter si non sit Angelus supremus, continentur etiam inter superiora obiecta superiores Angeli ad ipsum qui intelligit.

Secundò aduertendum est quòd in præsentì quādo inquirimus virū Angelus cognoscat omnia ista obiecta cognitione comprehensiuā, loquimur de comprehensione prout dicit perfectam, & adæquatam intelligentiā alicuius obiecti, non solum quantum ad suam existentiam, & quidditatē, sed etiam quantum ad omnia alia quæ ad se pertinent, siue absolutè, siue respectiue, siue terminatiue. Est enim considerandum, quòd circa aliquod obiectū potest dari triplex cognitio. Prima quæ respicit existentia rei, seu quoad *an est*. Secūda quæ respicit quidditatē, & dicitur quidditativa cognitio. Tertia quæ respicit plenitudinē, seu totalitatem alicuius obiecti, quando nō solum quidditas, & existentia, sed quidquid ad rem aliquam pertinet, cognoscitur, & attingitur; vnde cognitio comprehensiuā dicitur, quando aliquid ita videtur, quòd nihil eius lateat videntem, aut cuius fines circumscribi possunt; vbi *ly nihil lateat*, importat quòd nihil tam intrinsecum, quam extrinsecum dummodo ad se pertineat, & secum connectatur, lateat, vt ex Augustino *epist. 112. c. 7*. Theologi acceperunt, & definierunt, vt diximus *præced. tomo disp. 15. art. 8*. Itaque cognitio quoad existentia, si sit cognitio ipsius existentia in se, est visio intuitiua, si per effectus, vel alia extrinseca motiua, est cognitio quoad *an est*, abstractiua, & cōfusa. Si sit cognitio quidditatis, & essentia, est cognitio quidditatiua, seu essentialis. Si sit cognitio exhaustiua, & adæquans totam intelligibilitatem obiecti quoad omnia quæ illi conueniunt, est comprehensiuā in sensu quo nunc loquimur de comprehensione pro perfecta, & plena cognitione rei, nō pro sola assequutione; quo sensu aliquando sumitur comprehensio, & Deus etiam comprehendit dicitur, id est, apprehendit, iuxta illud ad Philippen. 3. *Sequitur autem si quo modo comprehendam, & 1. ad Corinth. 9. Sic currite vt comprehendatis*. Et inter dotes animæ gloriosæ ponitur vna, quæ dicitur

comprehensio, id est, possessio, & correspondet spei, vt docet S. Thom. in *additionibus 9. 95. art. 5.*

Tertiò denique supponendum est, quòd licet comprehensio sit adæquatio intellectus, & cognitionis cum intelligibilitate obiecti quoad omnia quæ ad se pertinet, adhuc tamen admittit latitudinem, & diuersum modum comprehendendi, tum ex parte cognoscentis, tum ex parte ipsius rei cognitæ. Ex parte quidem cognoscentis, quia licet idem videat, & comprehendat in re, quæ alius cognoscit, tamen perfectiori lumine, & altiori modo illud attingit, sicut si duo eandem rem oculis videant, perfectiùs tamen videt qui acutiori visu rem illam attingit; & sic Angelus superior eandem rem quam inferior videt, & comprehendit, v. g. formicam meliori, & altiori lumine comprehendit, & attingit; & Deus multò excellentiùs, quàm omnes, quia infinito lumine. Ex parte autem rei cognitæ admittit latitudinem comprehensionis, non quidem quantum ad ea quæ fundat res ipsa ex se, & quoad rationes intrinsecas: istæ enim ad minus debent cognosci omnes, si res ipsa comprehenditur, sed quoad rationes aliquas extrinsecas, quæ ipsi rei conuenire possunt respectu aliquarum causarum superiorum, respectu quarum est capax aliquarum rationum, quæ ad eam secundum se non pertinent. Et hæc non requiruntur simpliciter ad comprehensionem, sed superaddunt ad meliorationem comprehensionis, si attingantur. Itaque considerandum est quòd res aliqua potest fundare prædicata intrinseca, & proprietates, aliæque accidentia sibi connaturalia, & respectus ad suas causas proprias, & connaturales, & reliqua omnia ad quæ dicit inclinationem & coaptationem connaturalem. Et hæc omnia quia consequuntur vel fundantur in ipsa natura, necesse est quòd comprehensor talis naturæ, illa attingat, vel non comprehendat, pertinetque istorum notitia ad comprehensionem, quia non solum est cognitio de quidditate, sed de eis quæ conueniunt rei extra quidditatem; & sic est cognitio rei ultra quidditativam. Alia sunt prædicata, quæ conueniunt rei per ordinem ad causas extrinsecas, ad quæ non habet inclinationem connaturalem, habet tamen capacitatem, & potentiam ad illa, sicut quod aliquid possit artificiosè fieri ex aliqua materia habet ad id talis materia solum capacitatem. Et similiter habent res potentiam obedientialem respectu Dei authoris supernaturalis. Et in hac capacitatem, quæ est in rebus ad diuersos effectus, seu prædicata, quæ ei possunt conuenire ex causis superioribus, siue per ordinem ad causas corporales superiores, siue spirituales, siue per potentiam obedientialem in ordine ad Deum, potest magis vel minus aliquis intellectus comprehendere, quantò plùs ei proportionatæ fuerint istæ latentes rationes in ordine ad causas illas superiores. Non tamen pertinet penetratio istarum rationum ad comprehensionem simpliciter seu absolutè, aliàs solus Deus potest comprehendere creaturam, quia solus potest cōprehendere potentiam eius obedientialem in ordine ad suam omnipotentiam. Sufficit ergo ad comprehensionem, quòd aliquid attingatur quantum ad omnia quæ sibi conueniunt connaturaliter, & ab intrinseco. Si autem penetrantur etiam ea quæ per respectum ad causas istas extrinsecas possunt alicui rei conuenire, hoc pertinebit ad maiorem perfectionē & cumulum comprehensionis, non ad simpliciter.

Quid certum sit in hac parte.

Ex obiectis circa quæ versatur intellectus Angeli, scilicet circa Deum, circa se, & circa inferiora sibi, certum est quòd Deum ex sua naturali cognitione,

cognitione, neque videt, neque comprehendit. Et certum est quod seipsum & videt, & comprehendit. Et tertio certum est quod inferiora sibi quæ pertinent ad hoc vniuersum, & cum eo connexionem habent, & videt, & comprehendit. Dixi quæ pertinent ad vniuersum, & connexionem cum eo habent, vt excludam futura contingentia, & cogitationes cordis, quæ ad hoc vniuersum non spectant, nec naturalem connexionem, & ordinem cum eo habent, sed futura nondum sunt, & cogitationes moraliter sunt, & consequenter ad ordinem naturalem non pertinent, neque terminant cognitionem naturalem Angeli, quæ solum respicit id quod naturalis ordinis est. Ex tribus ergo obiectis relatis, quod attinet ad Deum, certum est naturali cognitione non posse videri, sed esse inuisibilem respectu omnis creaturæ, & multò minùs comprehendit, quæ fuit hæresis Anomæorum, qui dicebant se comprehendere Deum, contra quos latè agit Chrysost. in homiliis contra Anomæos, & S. Basiliius contra Eunomium, vt latè diximus *tomo præced. disp. 12. art. 1. & disp. 15. art. 8.*

5 Si autem inquitur quomodo Angelus Deum cognoscit naturali ratione, & per quam speciem?

Respondeo Deum non posse cognosci ab Angelo, nisi ex effectibus, quia nulla datur species immediatè repræsentans Deum in se, etiam abstractiue, quia omnis species creata, cum habeat intelligibilitatem creatam, & finitam, oportet quod ei correspondeat pro immediato obiecto aliquod intelligibile finitum, quia intelligibilitas obiecti, & speciei vna, & eadem est, siquidem species est obiectum ipsum in esse intelligibili. Quare si datur species creata ad repræsentandum Deum, oportet quod immediatum eius obiectum sit aliquid creatum, scilicet aliquid finitæ, & limitatæ intelligibilitatis, & solum mediatè, & tanquam in effectu repræsentato, potest illa species repræsentare Deum. Et hinc est quod D. Thom. in hac q. 56. art. 3. cognitione Dei per creaturas assimilauit cognitioni rei in speculo, quia scilicet res in speculo non videtur immediatè per speciem sui, sed per speciem speculi. Et nihilominùs dixit D. Thom. cognosci Deum ab Angelo per essentiam suam tanquam per similitudinem, sicut lapis videtur ab oculo per similitudinem eius in oculo, videturque illam cognitionem condistinguere à cognitione, qua videtur res in speculo. Sed tamen D. Th. ibi se explicauit: dixit enim hanc cognitionem, qua Angelus per sua naturalia cognoscit Deum, assimilari illi cognitioni, qua videtur res per speciem ab ea acceptam. Addit tamen *in calce corporis articuli*, quod magis ista cognitio tenet se cum speculari, quia ipsa natura Angelica est quoddam speculum diuinam naturam repræsentans; Et sic sensus D. Th. est quod natura Angeli, quia sibi deferuit pro specie, ita est species repræsentans se immediatè, quod etiam habet munus speciei respectu Dei mediatè quatenus ipsa natura Angelica est imago Dei. Quod non contingit in aliis rebus cognitis ab Angelo, quia cognoscit illas per species accidentales, non ipsæ res habent rationem, & munus speciei in intellectu Angeli, sed solum rationem obiecti cogniti. Vnde licet ex ipsis intelligat Angelus Deum tanquam ex effectu, non tamen tanquam in specie. In seipso autem, cognoscit Deum, & tanquam in effectu, sicut aliæ creaturæ repræsentant Deum, & hac ratione se habet Angelus vt speculum respectu Dei, cuius est imago, & tanquam species mediatè repræsentans Deum, quia est species respectu sui, & respectu eorum quæ continentur in se, & ad quæ dicit de Ioan. à S. Thom. in 1. part. D. Th. Tomus alter.

pendentiam, & respectum, & vnum ex illis est Deus; & sic respectu Dei habet munus species, non immediatè, sed mediatè repræsentantis Deum vt causam sui.

Quomodo verò possit cognosci Deus Distinctè, 6 & non solum in confuso per cognitionem ipsius essentia Angeli, & quomodo etiam possit eadem cognitio esse intuitiua respectu sui, & abstractiua respectu Dei, non est difficile intelligere. Non enim essentia Angeli repræsentat Deum solum ratione conuenientia analogicæ, quam habet cum Deo: sic enim solum confuse illum repræsentaret, sicut species, quæ repræsentat hominem confuse repræsentat equum, quia solum repræsentat illum vt conuenit in ratione generica cum homine, non secundum differentiam suam specificam, sicut etiam vnus Angelus per suam assentiam non cognoscit alium Angelum propriè, & distinctè, sed solum confuse, quatenus conuenit cum illo in ratione generica. Et generaliter quæcumque repræsentatio, quæ solum fundatur in conuenientia obiectorum, non repræsentat distinctè illud secundum obiectum, cum quo conuenit, sed solum in eo in quo conuenit. Ceterum Deus repræsentatur in essentia Angeli tanquam principium proprium, seu proprium generans Angeli, quia per creationem dat illi esse, & vterius vt proprium principium ex quo participatur intelligibilitas Angeli, tam in ratione naturæ intellectiue secundum quam est imago Dei, quam intelligibilitatis, secundum quam est species sui, & ex consequenti sui principij, cui subordinatur, & ex quo participat talem intelligibilitatem; & sic intelligibilitas Angeli vt participata repræsentat mediatè suum principium à quo participatur distinctè, id est tanquam quid distinctum à se, & ab aliis rebus, nō solum vt aliquid conueniens secum in confuso, & in communi. Illa autem notitia, qua immediatè cognoscit se intuitiue, & Deum mediatè abstractiue non est inconueniens quod habeat has duas formalitates, quia habet illas respectu diuersorum obiectorum, quæ inter se connexionem habent, & in vno repræsentatur, & exercetur præsentia, in alio non, licet vtrumque pertineat ad eandem speciem, seu modum talis notitiæ: sicut qui videt imaginem Imperatoris, in illa attingit Imperatorem, sed imaginem præsentem intuitiue, & Imperatorem abstractiue, quia absens est.

An verò perfectiùs repræsentetur Deus Angelo 7 per assentiam suam quàm per species aliarum rerum?

Respond. quod simpliciter perfectiùs attingit Deum per essentiam suam, quàm per species rerum inferiorum, quia Deus perfectiori modo continetur, & præsentatur in essentia sua, quàm in rebus inferioribus, quia est perfectior similitudo Dei, & magis ad illum accedens: per species autem superiorum Angelorum, si tales species sint quod per eas perfectè ipsos comprehendat, perfectiùs cognoscet Deum per illas, quàm per suam substantiam, quia in illis relucet perfectior similitudo Dei, sicut etiam per mysteria gratiæ, si quiditatiue cognoscantur, perfectiùs cognoscitur Deus, quàm per quemcumque effectum naturalem. Si autem Angelus inferior non comprehendit Angelos superiores, se autem comprehendit, perfectiùs cognoscet Deum per se, quàm per illos, quia licet illi sint effectus perfectiores, non tamen sunt perfectiùs cogniti, & penetrati quàm ipsamet substantia Angeli; & idè ex hac parte perfectiùs manifestat Deum, quia eius participatio licet sit minor, est tamen perfectiùs penetrata, & in eodem ordine intelligibili se habet cum Angelis superiores.

R r 3 riori

rioribus, licet non in eadem perfectione.

- 8 Quod attinet ad 2. & 3. præsuppositum, nempe quod Angelus seipsum comprehendat, & similiter res inferiores, facile constat, quia vis intellectiva sui adæquat totam intelligibilitatem sui, & est sibi intimè præsens, & secundum totam suam intelligibilitatem: ergo habet totum principium requisitum ad comprehensionem perfectam. Quod si Angelus comprehendit, & adæquat intelligibilitatem suæ substantiæ, à fortiori adæquabit, & comprehendet intelligibilitatem rerum sibi inferiorum, quia hæc minoris perfectionis, & actualitatis est, quàm propria: ergo intellectus qui est sufficiens adæquare intelligibilitatem maiorem, etiam minorem adæquabit, & consequenter comprehendet, quia species talium rerum infunduntur Angelo, iuxta proportionem, & capacitatem sui intellectus: ergo si intellectus excedit in intelligendo ipsam obiectorum intelligibilitatem, etiam postulat sibi infundi species repræsentantes talem intelligibilitatem adæquatè, & comprehensivè. Quare restat solum difficultas circa Angelos superiores, utrùm videlicet inferior Angelus illos comprehendat, an verò solum quiditativè cognoscat eos citra comprehensionem.

*Quomodo Angelus inferior cognoscat
superiorem.*

- 9 Circa cognitionem Angeli inferioris respectu superiorum est duplex sententia. Quidam affirmant Angelum inferiorem comprehendere superiorem, quam sequuntur Carmelitani Salmant. tract. 7. de Angelis disp. 6. dub. 3. & pro ea citant Bañes supra quæst. 56. art. 2. dub. 2. Gonzales 1. p. disp. 15. sect. 3. & probabilem reputant Suarez lib. 2. de Angelis c. 31. n. 15. & Zumel super q. 56. art. 2. q. 2. Oppositam autem sententiam sequuntur Nazar. quæst. 56. art. 2. controu. 2. Suar. disp. 35. Metaph. sect. 4. n. 4. & alij. Et fundamentum utriusque sententiæ versatur circa unum punctum, an scilicet proportio intellectus Angeli inferioris cum specie comprehensiva superioris sit talis, quod connaturaliter petat ei adæquari, & consequenter ex illa elicere cognitionem à se quantem totam intelligibilitatem Angeli superioris. Nam.

Prima sententia existimat, quod hoc ipso quod Angelus superior, & omnia quæ ad ipsum pertinent sunt obiecta ordinis, naturalis & de se manent proportionata cuicunque intellectui inferioris Angeli, atque adeò potest totum quod pertinet ad ipsum Angelum attingere, petatque sibi manifestari, & consequenter adæquare potest naturali vi sua totam intelligibilitatem Angeli superioris, aut saltè id non est extra sphaeram adæquatam proportionis suæ, potestque sibi competere totius entis naturalis cognitio tanquam obiecti proportionati.

Secunda verò sententia è conuerso sentit, omne quidem ens naturale esse proportionatum cuicumque intellectui Angeli, sed non omne esse adæquabile, & exhaustibile à quocunque intellectu, sed entia intelligibilia superiora esse in aliquo excedentia vim inferiorum ut penitus ex virtute inferiori adæquari, & exhaustiri non possint. Et ita intellectus inferior habet se ad superiora intelligibilia, sicut oculus æger aut infirmus ad lucem Solis, quæ quidem absolutè ipsi proportionata est, potestque eam percipere, sed non plenè, nisi purgetur, & confortetur.

- 10 Nobis media eligenda est via, & dicendum, quod Angeli inferiores in vi propriæ virtutis, & intelligentiæ non comprehendunt, neque adæquant

superiores substantias; de facto tamen comprehendunt id quod ex propria virtute non possunt ex fortificatione, & communicatione superiorum substantiarum communicantium illis maiorem intelligentiam iuxta captum earum. Hæc mihi videtur legitima mens D. Thom. si attentè inspiciatur in his quæ tradit de Angelorum notitia, eorumque illuminationibus.

Et prima pars ostenditur, quia D. Thom. semper admittit illam propositionem ex libro de causis, quod *intelligentia inferior cognoscit superiorem secundum modum substantiæ cognoscentis, non secundum modum substantiæ cognita, sed inferiori modo*, ut patet in 2. contra Gentil. c. 98. licet in eo quod dicebat Auicenna, quod superior intelligentia causat inferiorem, & idè non perfectè comprehendit eam, illum reprober. Similiter D. Thom. super librum de causis lect. 8. circa finem, loquens de intelligentia inquit, quod *superiora cognoscit per modum suæ substantiæ inferiori modo, quàm res superior sit in seipsa*. Non ergo in vi suæ virtutis comprehendit illam, quia solum iuxta modum suum intelligit superiorem. Modus autem inferioris, licet superiori proportionetur, sed non adæquetur. Et urgetur hoc amplius simulque probatur ex D. Th. secunda pars conclusionis. Nam Angeli inferiores reuera perficiuntur, & illuminantur à superioribus, etiam de his, quæ pertinent ad statum naturæ, & non solum ad statum gratiæ, vel gloriæ, quod est manifestum signum ipsos aliqua non plenè comprehendere de his quæ ad statum naturæ pertinent, quod maximè verificatur in illis rebus naturalibus quæ sunt supra se, scilicet in substantiis Angelicis superioribus. Anteced. constat ex D. Tho. infra qu. 106. art. 1. ad 2. ubi inquit, quod *unus Angelus non illuminat alium tradendo ei lumen naturæ, vel gratiæ, vel gloriæ, sed confortando lumen naturale ipsius, & manifestando ei veritatem de his quæ pertinent ad statum naturæ, & gratiæ, & gloriæ, ut dictum est*. Ecce manifestissimè ponit D. Tho. illuminationem, & manifestationem fieri ab Angelo superiore, etiam de his quæ pertinent ad statum naturæ, & non solum ad statum gratiæ, & gloriæ: ergo in naturalibus aliqua sunt quæ Angelus inferior perfectè non comprehendit, aliàs non indigeret sibi manifestari, & illuminari ab Angelo superiore. Et similiter in 2. dist. 9. quæst. 1. art. 7. ad 4. dicit, quod *Si Angeli haberent naturalia, tantum adhuc lumen unius excederet lumen alterius, & ita posset esse aliqua illuminatio, & perfectio, sed non completè*. Non ergo negari potest in sententia S. Thom. nec sumi pro fundamento quod Angeli inferiores comprehendunt totum ens naturale, ita quod etiam superiores substantias perfectè comprehendunt, & non illuminantur ab eis circa aliquam veritatem naturalem, cum oppositum clarè doceat S. Tho. Quod si aliqua naturalia non comprehendunt, quia de eis illuminantur, hoc non potest circa seipsum, aut circa sibi inferiora, quia hæc perfectè adæquant, & comprehendunt: ergo circa superiora.

Nec obstat id in quo videntur Authores oppositi æquivocasse, quod S. D. infra qu. 109. art. 3. ad 2. affirmat, quod *Secundum ea quæ ad naturalem cognitionem pertinent, non est necessaria manifestatio veritatis, neque in Angelis, neque in Demonibus, quia statim à principio suæ conditionis omnia cognouerunt, quæ ad naturalem cognitionem pertinent, & idè maior plenitudo naturalis luminis non potest in Demonibus esse ratio illuminationis*. Ergo in naturalibus plenè cognoscunt superiores substantias, nec in aliquo ab eis illuminantur.

Sed

Sed facile Respon. quod Angeli superiores non manifestant nunc de nouo veritatem aliquam naturalem, sed statim à principio suæ conditionis, vel saltem immediatè post primum instans creationis, seu quodcumque potuerunt esse illuminationes à superioribus in inferiores. manifestauerunt ista naturalia, quia Angeli superiores de omnibus quæ cognoscunt, illuminant inferiores, licet inferiores non tam eminentiori modo cognoscant sicut ipsi, vt docet S. Tho. *qu. 106. art. 4.* Et quia naturalem suam eminentiam statim ab initio cognouerunt, statim ac potuerunt eam manifestarunt inferioribus, quod non videtur fuisse in primo instanti, quia prius debebant supponi creati Angeli, quàm quod aliis loquerentur vel illuminarent. In cuius signum dicitur Ezech. 31. de primo Angelo in figura Regis. *Assur, Flumina manebant in circuitu eius, & riuos suas emisit ad vniuersa ligna regionis.* Ligna autem illa dicuntur ibi ligna voluptatis quæ erant in paradiso Dei, id est Angeli, ad quos ille supremus Angelus emisit riuos suos, id est scientiæ suæ copiam, & communicationem eminentiæ suæ. An vero modo etiam id continetur sicut à principio? dicendum est, quod Dæmones non illuminant de hoc Angelos beatos etiam inferioris naturæ; tum quia perfectiùs id iam cognoscunt in Verbo; tum quia retinere, & conseruare possunt in memoria illam illuminationem, quam semel ab initio acceperunt, licet modò ampliùs non illuminentur à Dæmonibus, quia *perdiderunt suum principatum*, vt dicitur in Canonica Iudæ: ergo, & actiones principatus, quales sunt actiones hierarchicæ, vt illuminare, & purgare, &c. Vnde nec bonos nec malos Angelos ampliùs illuminant loquendo de propria illuminatione quæ dirigitur in Deum, vt docet S. Thom. *infr. q. 106.*

12 Hæc etiam sententia sumitur ex S. Dionysio, qui in his quæ de Angelis traduntur præfertur aliis, quia vt dicit S. Th. *in 2. dist. 10. qu. 1. art. 2. Discipulus Pauli fuit, & dicitur eius visiones scripsisse;* & sic in eodem *2. ad Anibal. dist. 9. art. 1. ad 5.* modum assignandi ordines in Angelis, quem Dionysius tradit, veriorẽ dicit, quia *Dionysius*, inquit, *ab Apostolo immediatè accepit.* S. Ergo Dionysius in cap. 11. *caelestis hierarchia in fine*, sic inquit: *Vt à nobis sapè rectè dictum est, summa spirituum descriptiones abunde etiam inferiorum sanctas proprietates habent, vltimæ autem summas superiorum proprietates in totum non habent, cum vicissim in eas primarum opera illustrationes quæ primum extiterunt pro earum captu infundantur.* Ita habet Dionysius secundum translationem Perionij, quæ omnino authoritatem habet, Ex eius autem verbis deducitur quod inferiores Angeli non plenè comprehendunt superiores ex vi sua, quia non in totum eorum proprietates habent: habere autem earum proprietates media aliqua participatione superiorum debet esse, & hæc mediante cognitione, hæc enim est intelligibilis participatio. Si ergo non in totum eas habent, non in totum intelligunt; & sic indigent eorum illustratione pro eorum captu, quæ illis datæ sunt quàm primum extiterunt. Et non loquitur Dionysius de illustratione superiorum Angelorum, solum quoad supernaturales veritates, sed etiam quoad naturalia, id est quoad superiorum proprietates, quæ utique naturales sunt. Nec potest dici quod sensus Dionysij est inferiores non habere superiorum proprietates entitatiuè, non tamen negat habere eas intelligibiliter, & comprehensiuè. Contra enim est, quia probat Dionysius non habere in totum proprietates superiorum, quia illustrationes pro eorum captu à superioribus eis infundantur: ergo

loquitur se habere mediantibus illustrationibus ergo mediante cognitione, & non solum entitatiuè.

Fundamentum huius sumitur ex duobus.

Primum est à priori.

Secundum ab inconuenienti.

Primum deducitur ex eo quod intellectus Angeli inferioris non habet substantiam, & naturam adæquatam in perfectione, & actualitate Angelo superiori: ergo neque in virtute, & efficacia intelligendi: ergo neque in ipsa cognitione; & sic ex propriis operando non potest ipsum comprehendere, quia non potest adæquare; & comprehendere, adæquare est, sicut neque oculus infirmus, & debilis potest perfectissimum visibile vt perfectissimam lucem adæquare, & plenè exhaustire. Totus discursus legitimus est, & propositiones eius negari non possunt, siquidem constat substantiam Angeli inferioris esse inæqualem cum superiori in perfectione, cum sint diuersæ speciei, & aliqui etiam sint diuersi in ordine, aut hierarchia, quod tamen non facit maiorem diuersitatem, quàm in specie, quia omnes Angeli eiusdem generis sunt licet intra hoc genus, quædam species magis distent ab aliis, quàm aliæ. Igitur si diuersæ speciei sunt, & inæquales: ergo inferior non adæquat superiorem, licet superior non solum adæquet, sed excedat illam. Quod si dantur aliqui Angeli eiusdem speciei, vt multi sentiunt, contra D. Thom. de illis non procedit difficultas, quia solum est quæstio de Angelis inferioribus respectu superiorum, non de æqualibus. Reliquæ verò propositiones ex ista robur accipiunt, quia virtus Angeli intellectiua, & actus cognoscendi eius sequuntur ad hanc radicem propriæ naturæ, & iuxta eius modum sic est modus intelligendi, quia natura dicit intellectualitatem radicalem, radicali autem intellectualitati debet conformari actualis seu formalis.

14 Et confirmatur atque vrgetur hæc ratio ex simili consequentia, quam format S. D. *in q. 16. de malo artic. 8.* comparant species intellectus inferioris ad species intellectus superioris, & consequentia est huiusmodi: *In vno quoque intellectu species intelligibiles superioris intellectus sunt vniuersaliores; & ideo non possunt comprehendere per species intelligibiles inferioris intellectus: & ideo inferior intellectus non potest eas perfectè cognoscere.* Vbi S. D. tradit generalem doctrinam de quocumque intellectu, non autem solum de intellectu humano, nec de solis speciebus intellectus humani collatis cum speciebus Angelorum, vt aliqui dicunt, non verò de speciebus Angelicis superioris, & inferioris Angeli collatis inter se. Nam licet D. Thom. applicet postea istam doctrinam ad probandum quod Angeli boni vel mali possunt cognoscere species in anima nostra existentes, tamen ad hoc affert doctrinam generalem de quocumque intellectu, & de quibuscumque speciebus superioris intellectus respectu inferioris: ergo sine fundamento aliquo id restringitur ad solum intellectum humanum respectu Angelici: imò nihil probaret D. Thom. quia si intendit probare quod intellectus Angelicus, quia superior est, comprehendit species intellectus humani, & ad hoc affert pro probatione, quod species superioris intellectu sunt vniuersaliores; & ideo non possunt comprehendere per species intelligibiles inferiores, bene autem potest intellectus superior comprehendere species inferioris, intelligendo per superiorem, Angelicum, & per inferiorem, humanum; sensus esset, quod quia species intellectus Angelici comprehendunt species humani, ideo intellectus Angeli comprehendit species humani, quod

R r 4 esset

esset probare idem per idem. Ex hac ergo doctrina D. Thomæ fit argumentum. D. Tho. ponit illam causalem, ideo non possunt per species intelligibiles inferioris intellectus comprehendi species superioris intellectus, quia vniuersaliores sunt: ergo etiam intellectus Angeli inferioris non comprehendet intellectum superioris, quia vniuersalior est. Nam eadem proportio, quæ est inter species superioris, & inferioris, est inter intellectum superioris, & inferioris, præsertim, quia inferior Angelus non potest intelligere superiorem, nisi per species sibi infusas: ergo si istæ secundum D. Th. non comprehendunt species superioris intellectus, neque etiam comprehendunt intellectum superioris Angeli. Et saltim hoc habemus ex D. Th. quod Angelus inferior non comprehendit omne ens naturale, quia species superioris Angeli naturalis ordinis sunt, & tamen eas non comprehendit Angelus inferior.

15 Respondent oppositi authores essentiam Angeli superioris, & eius intellectualitatem, & intelligibilitatem entitatiuè sumptam, seu materialiter esse excedentem, & inadæquatam Angelo inferiori, non tamen formaliter, & in linea intelligibili: intelligibilitas enim formalis consequitur ad radicalem, seu entitatiuam. Bene autem stat quod aliquid sit superius, & inæquale alteri in ipsa intelligibilitate entitatiua, seu radicali, & materialiter sumpta, æquale autem in intelligibilitate formali, seu in linea intelligibili pura, & formaliter sumpta, sed possunt plures res intelligibiles in esse rei inæquales conuenire in eadem intelligibilitate formali, & consequenter inferior intellectus comprehendere superiorem, quia ad hoc sufficit quod adæquetur ipsi in linea intelligibili, licet non in esse entitatiuo. Et similiter dicunt species inferioris Angelis non comprehendere species superioris, quia species non sunt ens naturale sub ordine, & linea entitatiua, sed sub ordine, & linea intelligibili. Et quando dicit D. Thom. quod Angelus inferior comprehendit totum ens naturale intelligitur de ente naturali ut distincto ab ordine intelligibili, & prout est solum in linea entitatiua. Nec oportet ad comprehensionem Angeli superioris comprehendi species illi infusas, quia non sunt accidentia, seu proprietates ab eius essentia fluentes, sed quæ veniunt ab extra, & per infusionem Dei. Vnde sufficit ad comprehensionem superioris Angeli comprehendere intellectum eius nudè, & in se, non autem species eius.

16 Cæterum ista responsio intelligibilis videtur, & complicatoria. Nam intelligibilitas formalis omnino sequitur ad radicalem, & entitatiuam illi, quæ proportionatur. Neque enim potest esse immaterialitas, seu spiritualitas in esse rei excedens, & inæqualis alteri, & eius intelligibilitas formalis æqualis cum intelligibilitate sui inferioris, quia intelligibilitas ista formalis se habet ut proprietates quædam consequuta ad radicalem, & ipsa entitas intellectiua radicalis petit habere aliquam intelligibilitatem sibi propriam, & adæquatam, quam non habeat altera species seu entitas intellectiua, quia vnicuique rei conuenit sua intelligibilitas passiva propria, sicut conuenit sua intelligibilitas actiua, seu intellectualitas (quæ est ipsemet intellectus) si substantia intellectiua sit. Ergo non stat, quod intelligibilitas passiva formalis propria, & per se correspondens intelligibilitati radicali sit eiusdem rationis, & æqualitatis cum intelligibilitate formali alterius rei, si ipsæ intelligibilitates radicales, seu entitatiuè acceptæ sint inæquales in esse entis. Imò cum id quod intelligitur in obie-

cto non sit intelligibilitas formalis tantum, sed entitas ipsius, quia hæc præcipue intenditur cognosci; si hæc inadæquata, & inæqualis est cognitioni rei inferioris, non manet comprehensa ab illa, quantumcumque dicatur inferior cognitio adæquari intelligibilitati illi rei superioris. Nam illa intelligibilitas formalis vel manifestat totam entitatem rei superioris, eamque adæquat tanquam propria illius, vel non. Si non adæquat: ergo neque est propria intelligibilitas rei superioris, neque sufficit ad comprehensionem illius, quia illa est propria intelligibilitas alicuius rei, quæ totam eam reddit intelligibilem, & manifestam, quia si aliquid illius relinquit non manifestatum, nec intelligibile, respectu illius diminuta est; & ided adhuc maiorem intelligibilitatem res illa exigit; & sic illa non erit propria eius, nec comprehensua, quia non adæquata illi. Si autem illa intelligibilitas adæquat, & manifestat totam rem illam superiorem, eamque reddit intelligibilem: ergo non potest esse æqualis, & adæquata formali intelligibilitati, & intellectualitati rei inferioris, quia Angelus inferior per propriam intelligibilitatem suam formalem etiam comprehensivè cognitam non potest adæquare totam entitatem rei superioris, eamque manifestare, & intelligibilem reddere: ergo neque per species sibi proportionatas, & proprias. quia istæ adæquantur, & proportionantur intelligibilitati formali Angeli inferioris, cui infunduntur.

Quod verò dicitur de speciebus quod non comprehenduntur ab inferioribus, quia non sunt ens naturale, sed intelligibile, omnino complicatorium videtur, & repugnans dictis istorum Authorum. Nam in sententia istorum Authorum, quando dicit S. Thom. quod ens naturale est obiectum intellectus Angeli, ab eoque comprehenditur, nomine entis naturalis non solum intelligit ens naturale materiale, & de se non intelligibile in actu, sed etiam immateriale, & intelligibile, siquidem in sensu horum Authorum substantias spirituales, & immateriales etiam superiores comprehendit Angelus, etiam inferior. Si ergo nomine totius entis naturalis intelligit D. Thom. etiam ens intelligibile, seu immateriale, etiam species deseruiens huic intellectuali naturæ pertinebunt ad ordinem entis naturalis, & ad obiectum comprehensionis Angeli, tanquam aliquid illius, licet deseruiant ad lineam intelligibilitatis potius quam ad lineam entitatis: hoc enim non obstante Angelus superior ex vi sua qua comprehendit inferiorem, etiam eius species cognoscit, & comprehendit, ut D. Thom. citato loco fatetur, siquidem eius intelligibilitatem, & non solum entitatem comprehendit: linea enim intelligibilis, & quidquid ad illam lineam pertinet, cum sit aliquid ipsius entitatis, ad eius comprehensionem pertinet: ergo signum est species etiam pertinere ad obiectum comprehensionis Angeli. Respectu verò Angeli superioris dicunt istimet Authores quod essentia Angeli in esse entitatiuo, & in intelligibilitate radicali, seu materialiter sumpta, est inadæquata, & superior intelligibilitati entitatiuæ Angeli inferioris; est tamen illi æqualis, & eiusdem rationis intelligibilitas formalis superioris Angeli cum intelligibilitate inferioris, & ob hoc comprehendit potest ab illo; sed species per se pertinent ad ordinem intelligibilem formalem ut distinguitur ab entitatiuo; ideoque non comprehenduntur ab Angelo, quia, ut dicis, solum ens naturale ut distinguitur ab entitatiuo S. Doctor ponit pro obiecto comprehensiuo Angeli: ergo tribimet contradicis, dum ponis modò quod species

species non comprehenduntur, quia non pertinent ad ordinem entitativum, & ante dicis quod intelligibilitas Angeli superioris entitativè est inadæquata Angelo inferiori; intelligibilitas autem formalis adæquata est: ergo ex hac parte potius species deberent comprehendi, quàm essentia Angeli, quia pertinent species ad lineam formalis intelligibilitatis, & illa est adæquata inferiori.

18 Dicere autem quod licet hoc verum sit, tamen deficit una conditio, ne possint comprehendi species superiores ab inferiori Angelo, quæ non deest ut possit comprehendi essentia, nempe quia species illæ, utpote uniuersaliores, non possunt vnico, & simplici actu perfectè cognosci ab inferioribus, bene tamen essentia; hoc est planè voluntaria petitio principij. Nam si essentia entitativè sumpta, ipsaque intelligibilitas in esse rei considerata est superior, & inadæquata inferiori, & uniuersalior quàm illa, ipsæque intellectus superioris Angeli uniuersalior etià est, intelligibilitas verò formalis est adæquata; & species pertinet ad intelligibilitatem formalem, cur species licet uniuersaliores non vnico simplici actu ab inferioribus attingeretur, bene tamen essentia, & intellectus superior, qui etià uniuersalior est? De hoc enim debet reddi ratio, non verò solum id responderi, ut effugiat vis rationis, quæ cogit dicere quod species uniuersaliores non possunt vnica specie, & cognitione Angeli inferioris attingi, cum eadè cogat, & cōvincat quod essentia ipsa, & intelligibilitas in esse rei, quæ uniuersalior est radicaliter, nō attingatur vnico actu, & specie, quia magis inadæquata est intellectui inferiori entitativè.

19 Denique, quod attinet ad species ipsas uniuersaliores quod debeant comprehendi, si comprehenditur intellectus eas exigens, negari nō potest, quia non potest comprehendi virtus intellectus, & capacitas eius, nisi comprehendatur obiectū formale in quod potest: inde enim pēdet uniuersalitas eius, quoad modū seu eminentiam, & immaterialitatem qua in illud potest: inde enim pendet specificatio eius; sicut non potest, comprehendi potentia, & virtus oculi, nisi cognoscatur obiectum eius in quod potest, scilicet lux & color, & modus quo potest, scilicet quod sit talis perfectionis in videntō, scil. acutioris visus, vel minus acuti, &c. Sed comprehensio obiecto, & modo quo virtus intellectus potest in suum obiectum, comprehendi debent species quarum est capax, & modus earū, scil. quod sint tantæ, vel tantæ uniuersalitatē, quia species non sunt aliud quàm ipsum obiectum in esse intelligibili, & modus specierum in uniuersalitate, & immaterialitate proportionatur obiecto formali in ratione intelligibilitatis: ergo repugnat comprehendere intellectum Angeli superioris, & obiectū eius formale, & vtriusque eminentiam, & non species, quarum est capax, siue videantur ut infusæ de facto ipsi Angelo, siue non: sufficit enim quod cognoscat illas ut possibiles, & debitas ipsi Angelo, earūque uniuersalitatē comprehendat. Quare dato quod non pertineat ad cōprehensionē Angeli superioris videre quod de facto ipsi conueniant accidentia, quæ ab extrinseco adueniunt, tamen si dicit inclinationem, & proportionem ad illa, debet cognoscere eorum propriam rationem, saltē quatenus debita illi, & possibilia illi, quia hæc proportio, & capacitas intrinseca est intellectui. Comprenderet ergo inferior Angelus superiores species, saltē in esse possibili, & ut debitas superiori intellectui, quidquid sit an cognoscat si de facto sint infusæ, vel non: hoc enim non requiritur, & sufficit nobis sic illas comprehendere in esse possibili. Deinde falsum est quod ad cōprehensionem alicuius rei non requiratur quod cognoscantur etiam

accidentia sibi debita, & ab extrinseco aduenientia licet non fluant ab intrinseco tanquam proprietates. Nam si comprehendatur cœlum, etiam motus, eius debet cognosci, licet ab extrinseco motore veniat, quia pertinet ad eius perfectionem in quantum est causa generationis istorum inferiorum per motum Angeli. Et qui comprehenderet potentiam materiæ, etià deberet cognoscere animam rationalem ad quam est in potentia, licet illa per creationē sibi infundatur ab extra. Et qui comprehenderet potentiam obedientialem, etiam formas supernaturales deberet cognoscere, licet non fluant ab illa, sed ab agente supernaturali fiant in illa. Requiritur ergo ad cōprehensionem alicuius rei cognoscere omnia accidentia, quæ sunt ei debita, & cum quibus habet proportionem, etiam si non profluant ab essentia, sed ab extrinseco veniant.

Vltimò ab inconuenienti deducitur nostra sententia: nā in primis non potest Angelus inferior cōprehendere species intelligibiles superioris Angeli, ut ostendimus, neque hoc inconueniens ab oppositis authoribus euitatur. Tum quia id expressè affirmat D. Thom. in q. 16. de modo supra citato. Tum quia, ut ponderatum est, cōprehensio alicuius rei debet esse cognitio adæquata non solum suæ quidditatis, sed etiam omnium perfectionum, quæ sibi debentur, vel ad quas dicit ordinem, & respectum: ergo ad comprehendendum intellectum Angeli superioris requiritur quod etiam comprehendat species eius, quæ eiusdem sunt cum illo perfectionis, & uniuersalitatē.

Alterum inconueniens est, quia sequitur ex opposita sententia, quod si Angelus inferior comprehendat superiorem virtute sua etiam ex cōprehensione illius tanquam ex effectu perfectiori cognoscat Deum tantum quantum ipse Angelus superior cognoscit de Deo ex cognitione sui. Vnde omnes Angeli æquè perfectè cognoscent Deum naturali cognitione, quia comprehendunt omnes quantumcumque sint superiores, & consequenter æquè perfectè attingunt Deum, ut repræsentabilis est ex talibus effectibus. Et licet semper remaneat superiores in esse entis respectu inferiorū, tamen si in esse intelligibili eos adæquat, & cōprehendunt, id quod sufficit ad cōprehensionē eorum, sufficit ad æqualem cognitionem Dei, quia hæc fundatur in cognitione comprehensiuæ effectus repræsentantis Deū; & sic tam beatus, & felix erit beatitudine naturali inferior Angelus quàm superior, quia hæc consistit in cognitione naturali Dei, & tantum cōprehendit, seu cognoscit de Deo propria, & naturali virtute Angelus inferior quàm superior, cum tamen negari nō possit quod felicius sit Angelus superior, quia perfectior in ordine naturali. Imò supposita lege Dei, quod dona gratuita infunduntur, Angelus iuxta capacitatem naturalium, si naturalis virtus Angeli inferioris petit comprehendere superiorem, etiam secundum ordinem gratiæ, petet comprehendere gratiam superioris, & consequenter non indigebit illuminatione superioris ad hoc ut cognoscat inferior ea quæ superiori reuelantur, & infunduntur secundum ordinē gratiæ, ac proinde cessabit omnis ratio, & fundamentum ponendi illuminationem in Angelis, quia scil. veritatē quam superior cognoscit inferiori manifestat, supponendo quod inferior eam non comprehendit: ergo signum est quod etià in naturalibus non cōprehendit Angelum superiorē ex sua virtute præcisè, sicut nec in supernaturalibus

22 Secūda verò pars cōcl. quod ex illuminatione superioris Angeli inferior cognoscat omnes perfectiones naturales superioris, ac per hoc ex parte rei cognita illū cōprehendat, quia omnes perfectiones, & modos eius attingit, licet ex parte modi cognoscendi semper

semper sit diuersitas in superiori, & inferiori, sumitur ex, Th. inf. q. 106. art. 4. vbi docet, quod Angeli superiores de omnibus, quæ cognoscunt illuminant inferiores; ita vt easdem res cognoscant inferiores, quas cognoscunt superiores, licet superiores semper eminentius cognoscant, & diuerso modo se tenente ex parte cognoscentis. Vnde sumitur ratio pro ista parte, quia Angelus superior per illuminationem manifestat totum quod ipse cognoscit ex parte rei cognitæ ipsi inferiori, licet accommodando illud iuxta modum, & capacitatem inferioris: sed sufficit ad comprehensionem alicuius obiecti, quod cognoscatur quantum ad quidditatem, & quoad omnes perfectiones, & modos sibi conuenientes attingendo totum hoc ex parte rei cognitæ, licet ex parte ipsius cognoscentis diuersus modus, & perfectio detur in superiori, quam in inferiori: ergo, &c. Min. prob. quia comprehensio obiecti solum requirit, quod adæquetur tota intelligibilitas obiecti quantum ad omnia quæ sibi conueniunt, ita quod nihil de his lateat videntem, licet possit in hoc dari diuersa perfectio cognitionis, & comprehensionis in intellectu magis perfecto, sicut patet quod duo Angeli, vnus superior, & alter inferior, vterque comprehendit eandem rem corpoream, seu aliam, quæ vtrique inferior est, licet superior Angelus eandem rem inferiorem perfectiori modo attingat, & magis immateriali ex parte ipsius cognoscentis, quam Angelus inferior: ergo signum est sufficere ad comprehensionem Angeli superioris, quod cognoscat illum inferior quoad omnes perfectiones, & modos ex parte rei cognitæ per illuminationem partem, & participatam ex superiori Angelo, licet ex parte cognoscentis semper Angelus superior eminentiori modo cognoscat idemmet obiectum quam inferior. Neque ad istam comprehensionem requiritur quod cognoscantur ex vi talis comprehensionis actus liberi ipsius Angeli. Nam isti semper eximuntur à comprehensione naturali alicuius naturæ intellectiue: naturalis enim comprehensio solum ea petit attingere, quæ ad naturalem ordinem spectant in re comprehensa, non ad moralem, vel supernaturalem. Cuius manifestum signum est, quod etiam Angelus superior, qui sine dubio comprehendit inferiorem, non tamen eius actus liberos ex vi huius naturalis cognitionis attingit: ergo non requiritur ad comprehensionem, de qua loquitur, cognitio actuum liberorum.

Fundamenta opposita solvuntur.

23 Tota vis fundamenti oppositi ad duo principalia reducitur.

Alterum ex autoritate D. Th.

Alterum ex ratione.

Autoritas D. Th. sumitur ex 2. contra Gent. c. 96. vbi inquit S. D. quod *Ex hoc quod substantia aliqua est intellectualis comprehensua est totius entis. Vnde cum substantia separata per suam naturam non fiat actu comprehendens totum ens, ipsa in sua substantia considerata, est quasi in potentia ad similitudines intelligibiles, quibus totum ens cognoscitur, & illæ similitudines erunt actus eius in quantum est intellectualis.* Et similiter cap. 99. seq. inquit, quod *Cum intellectus Angelorum sit perfectus naturali perfectione, vt potest totus in actu existens, oportet quod suum obiectum, scilicet ens intelligibile vniuersaliter comprehendat.* Et infra. *Quia verò intellectus substantia separata est in actu habens omnes similitudines ad quas est in potentia habet virtutem comprehendendi omnes species, & differentias entis, necesse est quod substantia separata quali-*

bet, cognoscat omnes res naturales, & totum ordinem earum. Quibus verbis manifestissime D. Tho. tribuit cuicumque substantiæ separare vim comprehensionem totius entis (scilicet creati, & naturalis, vt se explicat in his ultimis verbis citatis ex c. 99.) nec solum dicit quod sub obiecto intellectus Angeli comprehenditur omne ens, sed quod ipse est comprehensiuus omnis entis: ergo malè negamus non comprehendere Angelos superiores, cum ipsi pertineant ad ordinem entis intelligibilis ordinis naturalis. Nec dici potest quod Angeli inferiores comprehendunt superiores ex illuminatione superiorum. Obstat enim locus supra citatus ex D. Tho. inf. q. 109. art. 3. ad 2. vbi docet, quod *Secundum ea quæ ad naturalem cognitionem pertinent, non est necessaria manifestatio veritatis, nec in Angelis, nec in demonibus, quia hæc statim à principio nouerunt, & ideo secundum ista non est illuminatio in demonibus.* Ergo si ex natura sua inferiores Angeli non comprehendunt superiores, neque ex illuminatione superiorum eos comprehendunt.

Resp. quod in primis si in istis autoritatibus verbum comprehendendi sumatur in toto rigore pro comprehensione perfecta, & adæquata, non potest intelligi illud verbum totum ens, totum intelligibile in omni vniuersalitate, cum dicit D. Thomas quod est comprehensiuus totius entis, quia sub ratione totius entis non potest intelligi ens morale, seu liberum (cogitationes cordis) ens supernaturale, nec ens diuinum; hæc enim tria excipiuntur à cognitione naturali Angeli. Dicunt ita esse, quia D. Th. solum loquitur de ente naturali; & sic intelligendus venit, quia c. 99. citato dicit quod comprehendit substantia separata omnes species, & differentias entis; & sic necesse est quod cognoscat omnes res naturales. De naturalibus ergo solum loquitur, quando dicit quod vniuersaliter omne ens comprehendit. Sed si ita est, quod glossatur D. Th. de omni ente naturali, & creato, quando dicit quod Angelus comprehendit totum ens, quare etiam non glossabitur, & restringetur ad totum ens naturale sibi inferius, quia dicit idem D. Th. in q. 16. de malo supra cit. quod per species inferiores non comprehenduntur species vniuersaliores superioris intellectus. Vel etiam glossare possumus ly *comprehendere* quod sumatur non in rigore pro cognitione adæquata, & addente super quidditativam, sed pro comprehensione communiter dicta, id est apprehensione rei. Quare verba D. Th. propter suam magnam amplitudinem capacia sunt istarum glossarum, & restrictionum ex his per quæ se explicat in aliis locis.

Veritas tamen est, quod nomine comprehensionis non vtitur D. Th. in rigore prout comprehensionis cognitio sumitur in presenti pro adæquata, & perfecta ultra quidditativam, sed communiter pro cognitione assecutiua rei, perfecte etiam citra comprehensionem. Et hoc sumitur tum ex intento D. Th. tum ex modo loquendi promiscue videntis nomine comprehensionis, vel cognitionis in eisdem locis. Ex intento D. Th. nam in illis locis non disputat, nec tractat de comprehensione Angeli, secundum quod comprehensio addit supra quidditativam cognitionem, sed solum intendit in c. 98. ostendere quod Angeli non intelligunt alias substantias spirituales per suam essentiam, sed per species superadditas, & in c. 99. quod cum intelligant totum ens, necesse est etiam quod intelligant substantias materiales, quia perfecti sunt, & in actu respectu totius intelligibilis; & sic vniuersaliter comprehendunt, id est, cōplectuntur, & se extendunt etiam ad substantias materiales. Quare in neutro loco S. T. loquitur

loquitur de comprehensione intensiva, & quoad perfectam adæquationem cum obiecto, sed in primo ostendit debere habere species ad intelligendū alias res, quia per essentiā suā non cognoscit, aut comprehendit nisi seipsum; est autem intellectus Angelus totius entis comprehensivus, id est cognoscitivus: ergo debet habere species aliorum entium: ad inferendum enim quod debet istas species habere, non conducit quod comprehendat alia, sed quod cognoscat. Et in secundo loco solum probat quod ad res materiales se debet extendere, quia perfectus est in genere intelligibili, & debet totum ens vniuersaliter comprehendere, ubi ly *comprehendere*, non refert quod sumatur pro comprehensione rigorosa, sed sufficit quod sit cognitio complectens seu extendens se ad totum ens: hoc enim illi intento tantum deferuiebat. Vnde ut in ipso contextu cerni potest, modò utitur D. Tho. verbo comprehendendi, modò cognoscendi; & sic promiscuè accipit ly *comprehendere* pro eo quod est cognoscere. Nec contra hanc expositionem oppositi Authores aliquid afferunt quod impugnatione indigeat, sed tantum quod D. Tho. reddit rationem quare Angelus comprehendit totum ens, videlicet quia est perfectus perfectione naturali in suo intellectu, & conuenit in gradu immaterialitatis cum quouis ente naturali, quod nihil probare statim ostendemus soluendo rationem: id enim solum probat quod cognoscit omne ens, sed non omne æquè perfectè.

35 Addo denique quod si tenaciter insistatur in eo quod D. Tho. loquitur de comprehensione stricta, & rigorosa, potest adhuc saluari, dicendo quod quilibet Angelus comprehendit totum ens, sed nō æqualiter, & eodem modo, sed se, & inferiora sibi ex virtute propria; superiora autem ex illuminatione, & manifestatione superiorum. Nec obest locus allatus ex q. 109. infra, quia iam supra hunc locum abundè explicauimus, quod negat D. Tho. secundum naturalia ista fieri illuminationes à superioribus, ita quod de nouo fiant istæ illuminationes, sed non negat ab initio fuisse factas, cum alias fateatur illuminationes fieri secundum ea quæ pertinent ad statum naturæ, & gratiæ, & gloriæ, ut ibi retulimus, & ostendimus ex eodem D. Thoma.

26 Secundò arguit. Nam Angelo inferiori est connaturaliter debita species superioris, & ipsum cognitum connaturaliter est in cognoscente, & ipsa etiam cognitio rei superioris connaturaliter est in intellectu inferioris: omnis etiam quidditas, omnes perfectiones, & modi rei superioris sunt obiectum proportionatum intellectui Angeli inferioris: ergo habet omnia requisita, & sufficientia, ut Angelus inferior superiorem comprehendat. Conseq. patet, quia ad comprehendendum obiectum aliquod, sufficit quod nihil illius sit tā in quidditate, quā in perfectionibus, & modis quod non sit tali intellectui proportionatum, & consequenter nihil illius lateat intellectum inferioris. Et similiter quod species representatiua illarum perfectionum, & modorum sit connaturaliter in Angelo inferiori: sic enim signum est quod obiectum representatum per talem speciem non est supra eius naturam; nec improporionatū illi, siquidē connaturaliter in est ipsi inferiori: ergo attingit totum, & totaliter quod in illo obiecto est, quia totum, & totaliter sumptū, connaturaliter in illo est. Anteced. autem probatur: Nam Angelo inferiori datur connaturaliter, & à principio species representans Angelum superiorem tanquam species de obiecto naturalis ordinis, & pertinente ad propriam sphaerā intelligibilem inferioris Angeli, sed Angelus inferior est intellectus perfectus, & in actu non procedens de potentia

ad actum, sicut intellectus noster: ergo petit talis intellectus actuari perfectè circa illud obiectum, cuius species sibi traditur, alias non peteret intellectus Angeli perfectè se habere circa omne obiectum quod sibi cōnaturale, & proportionatum est, quod est habere se in potentia erga illud, atque aded posse acquirere maiorem cognitionem, & proficere in illa, quod est habere radicem, & fundamētum discurrendi. Similiter Angelus superior, omnesque eius perfectiones, & modi spectant ad res ordinis naturalis, & ad integritatem huius vniuersi: ergo sunt obiectum proportionatū cuilibet Angelo etiam, inferiori, etiam secundum propriam virtutem considerato, & independentem ab illuminatione superioris, quia quilibet Angelus respicit pro obiecto omne ens naturale, & ad hoc vniuersum spectans, ut ex D. Th. locis citatis in primo argumento constat: ergo si Angelus superior, & quidditas eius & omnis perfectio, & modus eius pertinent ad ordinem naturalem, consequenter omnia hæc non latent Angelum inferiorem: ergo ex virtute sua comprehendit Angelum superiorem, quia comprehensio consistit in hoc quod nihil de obiecto lateat vidētem, sed adæquetur illi in tota intelligibilitate eius.

Resp. distinguendo anteced. Angelo inferiori est connaturaliter debita species, & cognitio superioris representans Angelum superiorem iuxta modum inferioris, & consequenter cum aliqua confusione, & potērialitate, & inadæquatione ad ipsum concedo, representans Angelum superiorem iuxta modum ipsius superioris, & consequenter cum adæquatione, & perfectā distinctione erga ipsum, nego. Similiter Angelus superior, & omnes eius perfectiones sunt obiectum proportionatum, & ordinis naturalis, & pertinsens ad hoc vniuersum, distinguo, proportionem omnino adæquata, nego antecedens; proportionem inadæquata, & aliquam confusionem admittente ex parte inferioris, concedo. Ergo sufficit ad comprehensionem, distinguo consequens; sublata ista confusione, & inadæquatione per illuminationem superioris, concedo; stante illa, nego; & sic erit comprehensivus Angeli superioris mediātē, & per confortationem intellectus sui ab Angelo superiori factam, non immediātē, & ex vi propriæ virtutis, & proprii modi cognoscendi. Et ad probationem conseq. dicitur, quod ad comprehensionem alicuius obiecti sufficit quod obiectum, & quidquid in illo est, sit proportionatū ipsi cognoscenti, distinguo, sit proportionatum adæquatē, & perfectè iuxta modum rei cognoscendæ, concedo; inadæquatē, & imperfectè, & iuxta modū, & coarctationem, seu confusionem cognoscentis, nego. Et sic obiectum superius, & species eius inest connaturaliter Angelo inferiori iuxta modum ipsius inferioris, non iuxta modum superioris. Quod autem inest connaturaliter iuxta modum recipientis, non sequitur quod totaliter comprehendat illud totalitate adæquationis, sed solum iuxta modum suum, nisi talis modus superiori modo se habeat ad id quod naturaliter ei inest. Et licet connaturaliter ei conueniat, & sic non sit supra naturam eius quantum ad conuenientiam, & ordinem naturæ, nec quantum ad specificationē obiecti, est tamen quantum ad modum, quia semper modus obiecti est superior, & cōnaturaliter se habet ad tale subiectum, non quomodocumque, sed iuxta modum capacitatemque illius: sicut lux connaturaliter recipitur in luminoso, & in diaphano, sed in diaphano iuxta modum inferiorem, & non adæquatē, nec ad modum quod est in luminoso.

Ad probationem antec. dicitur, quod species Angeli superioris datur inferiori Angelo tanquam de obiecto

obiecto naturalis ordinis, & sibi proportionato, & ad suam sphaeram pertinente, distinguo; sibi proportionato, & ad se pertinente iuxta modum suum, concedo; iuxta modum, & adæquationem ad ipsum Angelum superiorem, nego; & sic semper manet extra comprehensionem illius, quantum est ex vi propriæ virtutis, nisi superioris illuminatio intercedat. Et cum dicitur quod Angelus inferior est intellectus perfectus, & non procedit de potentia ad actum, distinguo, est perfectus iuxta modum suum inferiorem, & confusorem respectu superioris, concedo; ultra modum suum, nego. Neque ex hoc sequitur discursus in Angelo, quia non quælibet imperfectio, & habere se in potentia ad aliquod intelligibile fundat discursum, sed habere se in potentia, non vnico intuitu actuabili, sed per circuitum, & pluralitatem illationis. Nam inferiores Angeli sunt illuminabiles à superioribus, illuminantur autem respectu eorum ad quæ sunt in potentia, & actu, non cognoscunt, vel non perfectè; nec tamen propterea discurrunt, etiam quando illuminantur; nec enim sunt in ignorantia priuatiua, id est respectu eorum quorum cognitio sibi debetur, & quam possunt per collationem acquirere, sed sunt in ignorantia negatiua, seu nescientia quæ simplici illuminatione tollitur. Non ergo quælibet potentialitas ad intelligendum sufficit ad discursum, sed aliqua sufficit ad illuminationem sine discursu, scilicet quando est in potentia ad cognoscendum per illuminationem simplicem, & vnico intuitu faciendam: tunc enim etsi actuatur, & perficitur à superiori per illuminationem, sed non discurret, quia non per collationem, & illuminationem actuatur: Et cum dicitur quod Angelus superior, & omnes eius perfectiones sunt proportionatum obiectum inferioris, utpote ad ordinem naturalem pertinentes, iam dictum est, quod sunt obiectum proportionatum, applicatum tamen iuxta modum inferioris, non superioris. Atque ita aliud est esse obiectum proportionatum quoad specificationem, quia scilicet intra sphaeram specificationis eius sunt; aliud quoad adæquationem, & perfectionem qua discernitur, & adæquatè penetrat, & videt omnia illa, sicut omnes colores, & lux sunt obiectum proportionatum, id est, specificationum visus, sed tamen non quilibet visus potest æquè discernere, & adæquare se cuicumque luci, & cuicumque colori, sed iuxta modum, & capacitatem suam, licet totum quod in illa luce, & colore est, visibile sit, & proportionatum sit specificationi, non semper adæquatè, & comprehensiuè. Sic omnia quæ in Angelo superiora sunt, naturalis ordinis sunt, proportionata sunt Angelo inferiori proportionem specificationis, non proportionem adæquationis, & perfectionis in discernendo se iuxta modum, & capacitatem inferioris.

ARTICVLVS II.

Quomodo Angelus futura, & præterita cognoscat?

PRæcipuus difficultatis punctus non est de re ipsa, cum constans sit Angelum vi sua non cognoscere futura contingentia certò, & determinatè, nec alia quæcumque futura in seipsis immediatè: sed difficultas est in reddendo rationem cur ista futura non possit cognoscere, cum non careat speciebus representantibus illa; quando enim præsentia redduntur, certum est cognosci ab Angelo, non iam ut futura, sed ut præsentia, & tunc

non infunduntur illi species de non, siquidem non accipit species pro singulis indiuiduis, quæ sunt, sed utitur speciebus vniuersalibus, quas vtrique à principio habet: & istæ in sua representatione non dependent ab ipsis rebus nec ab illis accipiunt perfectionem aliquam, vel immutationem quando res sunt. Quomodo ergo de nouo representant illa; cum in se de nouo non immutentur; Hæc est difficultas de futuris, & eadem ferè est de præteritis, quando Angelus non aduertit, sed transeunt aliqua, seu sunt eo non aduertente, quare non possit Angelus cognoscere illa præterita in vi speciei, quæ representat illa; Et ex hoc etiam discussa manebit difficultas quomodo Angelus per speciem suam vniuersalem, indiuidua representet, & quomodo ab eorum dependat existentia, ut determinatè hoc vel illud singulare representet.

Supponuntur certa.

Tria sunt certa, & supponenda in hac parte.

Primum est tria esse genera futurorum. Primum est eorum quæ necessariò euentura sunt, nec possunt impediri, sicut Solem cras oriri, eclipsim futuram esse. Secundum est eorum, quæ ut plurimum eueniunt per causas quidem naturales, sed impedibiles, ita tamen ordinatas, ut rarò impedian- tur, sicut quod in verè sint tonitrua, & in hyeme pluuia. Tertium est eorum, quæ omnino contingenter eueniunt, vel quia habent causas liberas, vel quia habent fortuitas, & in vtramque partem contingentes, sicut quod Petrus cras ambulet, vel quod canis latret, aut quod seges comburatur à fulmine. Solum autem est duplex modus cognoscendi ista futura, scilicet vel quia cognoscuntur in seipsis, secundum quod habent existentiam extra causas, vel cognoscuntur in alio, id est, in virtute causarum à quibus procedet talis existentia, & in quibus continentur.

Loquendo ergo de cognitione futurorum, in seipsis, id est pro ut extra causas, nullo modo ab Angelis possunt cognosci, neque futura necessaria, neque contingentia. Et ne accadat æquiuocatio in illo termino *in seipsis*, oportet distinguere de cognitione rerum in seipsis quoad quidditatem, seu quoad quid est, vel secundum durationem, & quoad an est, seu quoad existentiam, ratione cuius ponuntur extra causas, & exeunt ab illis. Quando ergo dicimus futura non cognosci in seipsis, non loquimur de quidditate futuri: sic enim non tanquam futurum, sed tanquam quidditas quædam quasi in abstracto, & in esse possibili attingitur. Loquimur ergo de futuris in seipsis ex parte durationis, & quoad existentiam. Hæc enim pertinent ad futuritionem: nam futuritio durationem designat nondum præsentem, non autem quidditatem ipsam præcisè. Res ergo futura antequam de facto exeat à sua causa, solum est intra ipsam, aliàs si esset extra, iam non esset futura, sed præsens respectu illius mensuræ in qua esset extra causas. Angelus ergo non potest futura cognoscere in seipsis quantum ad existentiam, & durationem, quia non potest duratio futurorum cognosci ab Angelo nisi prout subest successioni temporis, quæ est propria mensura futuri, non autem prout subest altiori, & eminentiori mensuræ, in qua contineatur in seipso, & extra causas sine vlla successione, & mutatione quia nulla mēsurā creata est, in qua res contineatur omnino indiuisibiliter, & immutabiliter; sola autē æternitas est omnino immutabilis, & est causa ipsius temporis, & eorum quæ in tempore accidunt

accidunt sine vlla potentialitate aut variatione ex parte ipsius mensurantis, & sic potest illa omnia indivisibiliter in actu, & immutabiliter continere, & mensurare. Reliquæ omnes mensuræ creatæ non possunt continere successiones temporum per causalitatem actualem in illa, & per omnimodam immutabilitatem, sicut æternitas, sed solum per extrinsecam coexistentiam. Cum autem tempus futurum in quo res futura erit existens, in seipso non sit actu, sed solum in potentia, quia est pars motus per successionem, & evolutionem temporis ventura, & successura, non in se existens, non potest cognosci illud futurum, neque eius mensura in qua existet, nisi prout est in potentia, & successione, & intra ordinem causarum. Nunquam ergo potest attingi in seipso quandiu consideratur vt futurum, quia futurum est idem quod successurum, & successurum est idē, quod ex potentia reducendū in actum.

4 Quod si dicas: quia veritas ipsa futuri contingentis ex se est determinatē vera secundum alteram partem contradictionis, quia vtraque pars non potest esse simul determinatē vera, & falsa: ergo altera est determinatē vera, altera determinatē falsa; & quando in re sit præsens tale futurum, secundum determinatam veritatem ponitur: ergo qui illud diceret antequam fiat, determinatā varietatē diceret.

Respondi negando antecedens, si loquamur de determinatione futuri ex propriis prædicatis, aut ex causis proximis, & creatis, vt latē à nobis probatum est *preced. tomo disp. 19. & 20.* illa enim futura carent omni principio determinatiuo, tam in se quam in causis, quandiu futurum contingens est, cum ipsa contingentia intrinsecē importet indeterminationem: hoc enim est de conceptu essentiali contingentia, quod sit ad vtrumque: ergo repugnat dicere, quod sit contingens illa veritas in ratione veritatis futuræ, & tamen sit determinata, vel in seipsa, vel in causis proximis (excipio decretum diuinum, & æternitatem Dei) cum potius ab illis participet indeterminationem, & contingentiam. Ratio autē contradictionis non petit quod vna pars determinatē sit vera, sed solum quod si vna pars est vera, altera sit falsa, non tamen quod ista præ alia sit determinatē vera, quia contradictio non determinat partes contradictoriarum, earumque veritates, sed solum enunciat oppositum eius quod altera dicit, quod omnino extrinsecum est veritati, sicut & entitati rei, vt possit eam determinare.

5 Secundò est certum, futura necessaria cognosci ab Angelo certò, & euidenter abstractivè, id est in sua causa, non intuitivè in seipsis. Futura verò quæ vt in plurimum eueniunt, cognosci in sua causa proxima coniecturaliter, non euidenter. Constat hoc, quia futura necessaria habet causas necessarias, & inevitabiles, nō solum suæ quidditatis, sed etiam suæ futuritionis, & existentia: ergo ex vi talis connexionis sunt certò cognoscibilia, siquidem certitudo, & euidentia fundatur in cognitione certa, & immutabili ergo quæ cognoscuntur ex vi talis connexionis, cognoscuntur certò, & euidenter, non quidem euidentia intuitiva, quia non est de re in seipsa, sed euidentia abstractiva quæ est de re in sua causa. Futura verò secundi generis dicuntur à D. Thoma in hac q. 57. non cognosci per certitudinem ab Angelo, sed coniecturaliter. Quod intelligendū est in sensu formali, id est quod talia futura in quantum subsunt causæ, vel causis proximis, quæ sunt impeditibiles, non possunt certò cognosci ab Angelo, sed coniecturaliter, quia per medium fallibile, & contingens attinguntur; & sic sub formalitate talis mediij non possunt cognosci certò, & euidenter. Si verò consideretur ille effectus respectu collectionis omnium causarum naturalium, fortasse non manet contingens, neque casualis, & per accidens, sed omnino certus, quia in impeditibilis. Neque in hoc oportet laborare, sicut aliqui conantur ostendere huiusmodi contingentia nunquam certò cognosci posse ab Angelo, quia semper contingentia sunt; & quia sunt effectus per accidens, quia ad nullam causam per se reduci possunt: ergo nunquam indicunt infallibilem connexionem, neque fundant scientiam certam, præsertim, quia causæ quæ possunt impedire effectum sunt infinitæ, comprehendique non possunt, præsertim si ab ipsis Angelis, vel hominibus impedimenta ponantur. Ceterum in hoc non oportet immorari, quia semper loquendum est in sensu formali, quod futura ista impeditibilia ex vi causarum impeditibilium, in quibus proximè continentur, non possunt certò sciri, quia sub medio contingentis, & fallibili continentur. Si tamen excedunt istam contingentiam, & fallibilitatem, & reducuntur ad aliquam necessariam connexionem respectu connexionis omnium causarum, tunc ex vi talis connexionis poterunt certò sciri ab Angelo. Non reducuntur autem ad necessariam connexionem, si inter illas causas interueniat aliqua causa libera, quia hæc per nullam collectionē causarū potest necessitari, & de contingentia remoueri, quia libera est; respectu verò causarum cœlestium, si aliqui effectus manent purè per accidens, & ad causam per se nullo modo reduci possunt, vt sentit S. Th. q. 16. de malo, art. 7. ad 16. & 1. p. q. 115. art. 6. Tunc non manebit talis effectus extra contingentiam, & sub necessitate aliqua qua possit cognosci certò, & per se ex vi illarum causarum. Si verò aliqui effectus sint qui respectu totius collectionis causarum maneat determinati per se ac necessarij, tales certè ab Angelo possunt cognosci per cognitionem omnium illarum causarum naturalium, seu collectionis earum; & sic aliqui effectus qui respectu alicuius causæ proximæ dicuntur contingentes & per accidens respectu aliarum causarum, seu collectionis omnium causarum (quæ infinitæ non sunt, cum omnes causæ creatæ de facto, finito numero comprehendantur) necessarij, & determinati sunt; & Angelus qui omnes causas naturales huius vniuersi comprehendit, poterit certò cognoscere tales effectus, quæ est expressa doctrina S. Thom. q. 8. de verit. art. 12. vbi inquit: *Aliquid est contingens respectu vnius cause, quod respectu conuersus plurium causarum est necessarium: Angeli autem omnes causas naturales cognoscunt: unde quadam quæ contingentia videntur, aliquibus causis eorum pensatis, Angeli vt necessaria cognoscunt, dum omnes causas eorum cognoscunt.* Ita D. Th.

6 Tertiò denique est certum, futura contingentia non posse certò cognosci ab Angelo, licet difficile sit reddere rationem cur excludantur à cognitione Angelorum. Constat hoc, quia futura certò scire, ponitur in Scriptura tanquam signum certissimum diuinitatis, Isai 41. *Annunciate nobis quæ ventura sunt, & dicemus, quia dii estis vos.* Et c. 46. *Nec est similis mei annuncians ab exordio nouissima, & ab initio quæ nondum facta sunt.* Et Danielis 2. ex hoc collegit Nabuchodonosor Deum Danielis verum Deum esse, quia potuit reuelare mysterium illud, & somnium de talibus rebus, id est de futuris: *Loquens ergo Rex (inquit) ait Danieli: Verè Deus vester, Deus Deorum est, & Dominus Regum, & reuelans mysteria, quia tu potuisti aperire hoc sacramentum.* Videndus est Hieronymus super hunc ipsum locum Danielis, id est super c. 2. vbi dicit quod *Confitentur magi, & omnis scientia secularis litteraturæ, præsentiam futurorum non esse hominum, sed Dei.* S s Chrys.

Ioan. à S. Thom. in 1. part. D. Th. Tomus alter.

Chrysostomus homil. 18. in Ioannem: *Certa futurorum prædictio, immortalis Dei solius opus est.* Isidorus lib. de summo bono c. 10. *Futura Angeli nisi reuelatione diuina cognoscere non possunt.* Sumitur etiam ex Damasceno lib. 2. fidei c. 29. August. 4. de Trinit. c. 17. Basilio lib. de Spiritu S. c. 16. circa medium, D. Thoma in hac quæst. 57. art. 3. & 2. 2. q. 95. art. 1. & 3. contra Gentil. c. 154. & q. 8. de Verit. art. 12. in 1. dist. 38. art. 5. & in 2. dist. 7. q. 2. art. 2. & alibi sæpè, communiterque omnes Theologi sequuntur. Denique id quo maximè homines aliqui decepti à Dæmonibus sunt, ut colerentur tanquam Dij, fuit ex prædictione futurorum, saltè ambigua, cum ipsi maximè laborarent, ut dij haberentur, conando prædicere futura, & oracula reddendo circa talium prædictionem.

In quo sit difficultas, cuiusque resolutio.

7 Difficultas ergo tota reducitur ad hoc ut explicemus quæ sit ratio, quare ista futura excluduntur à cognitione Angelorum, cum certum sit habere illorum species, etiam antequam fiant, quia quando accidunt, & redduntur præsentia, non infunduntur species de nouo pro cognoscendis illis indiuiduis ut *suprà* ponderatum est: posita enim specie, & intellectu expedito, ponuntur sufficientia principia ad intelligendum obiectum: cur ergo talium futurorum cognitio excludi debet ab Angelo, si eorum species non excluduntur? Et præterea quia veritas illorum futurorum etiam determinatè sumpta est aliquid creatum: ergo aliqui lumini creato proportionata, & debita: cur ergo non erit Angelo?

Ad hoc varij sunt modi respondendi, qui reducuntur ad tres.

Primus quod aliqua mutatio intrinseca fit in specie, saltè quantum ad aliquem modum, quo mutatur eius representatio, ut respiciat obiectum sub ratione præsentis, quæ antea respiciebat illud sub esse possibili, vel futuro. Sed hic modus habet difficultatem, quia talis mutatio intrinseca, dissoluit speciem, seu corrumpit, quia si intrinsecè mutatur, non manet intrinsecè eadem quæ antea, præsertim cum illa representatio non sit accidentaliter, & superueniens speciei, sed essentialiter, & quidditatiuè ei conueniens. Vnde si remanet aliqua species, corrupta illa priori, debet esse de nouo infusa. Et sic perinde est dicere, quod mutatur intrinsecè species, vel quod infunditur de nouo alia. Deinde, restat videre à qua causa efficièter fit illa mutatio in specie: nec enim fit ab obiecto ipso de nouo producto, neque ab Angelo habente talem speciem, neque à Deo. Non ab obiecto, quia improporcionatum est ut emittat species in intellectu Angeli, vel in illum agat, cum Angelus per species infusas intelligat, non per emissas ab obiecto: ergo neque potest tale obiectum immutare infusas, & præexistentes in mente Angeli: si enim emittere non potest species, quāto minus poterit infusas mutare? præsertim si obiectum sit corporeum, & à longè distans, quod non potest operari in mentem Angeli, speciemque effectiue immutare, quia species spiritualis est, obiectum autem corporeum, & similiter medium. Neque fit immutatio ab ipso Angelo, quia Angelus intra suum intellectum non operatur immutando, sed cognoscendo, cum non operetur aliud quàm cognitionem: non potest autem cognitionem elicere circa talem speciem, seu obiectum eius, nisi per ipsam speciem: ergo prius est speciem esse habilem ut illa utatur intellectus, quàm ut cognitionem eliciat: ergo priusquam eliciat cognitionem circa tale obiectum futurum quādo redditur præsens, debet sup-

poni species immutata, & perfecta, ut tale obiectum representet: ergo non per ipsam cognitionem immutatur, & perficitur, & consequenter neque per ipsum intellectum, qui aliam operationem non habet, quàm cognitionem: nec enim datur in Angelo intellectus agens, qui species producat, aut immutet, non cognoscendo, & casu quo daretur, ille non seruiret pro speciebus infusis, sed pro acquisitis, & factis à se. Et eadem ratione non potest immutari ab alio Angelo, tum quia alius Angelus non operatur intra mentem alterius, nec illi illabatur ad immutandum lumen eius, seu virtutem aut speciem; tum quia solum potest illuminare alterum Angelum per propositionem externam obiecti, ut *infr. disp. 25.* dicitur. Si autem Angelus illuminans proponit futurum illud quando de nouo producit, & fit præsens: ergo iam cognoscit illud, & de ipso erit difficultas, quomodo cognoscat, & per quam speciem, & quomodo, species illa immutetur, ut representet de nouo illud singulare.

Denique si dicatur, à Deo immutari representatione illius speciei, ut de nouo representet aliquod singulare, non quidè per externam illuminationem tantum, quia hæc non immutat intrinsecè representatione speciei, sed coaptat, & accommodat obiectum ut eius representationi, seu modo representandi, qui inferior est, proportionetur; sed per internam eius speciei immutationem in sua representatione, poterit quidem id facere Deus, sed talis immutatio cum intrinsecè vertat, & mutet representationem ipsam, quæ essentialis est speciei, mutat sine dubio essentiā eius, & dissoluit, aliamque infundit, quæ de nouo representat id quod antè non representabatur. Et sic incidimus in aliud incoueniens *præced. disput.* exclusum, quod Angelus non habet omnes suas species ab initio infusas; & sic non nascitur plenus sapiētia, & perfectus decore intelligibili. Et iterum species illa de nouo representans, debet esse representatiua solum illius singularis quod de nouo producit, non aliorum quæ nondum producta sunt, quia illa sunt futura, non aliorum quæ iam producta sunt, quia iam sunt cognita, nec naturæ illius in comuni, quia iā de ea habebatur notitia. Ergo inciditur in illud inconueniens, quod quilibet Angelus intelligit singularia per species adæquatè talium singularium representatiuas, quæ sunt species nimis particulares, & propriæ sensuum, non vniuersalitati intellectus Angelici correspondentes. Quod autem aliqui dicunt immutari speciem à Deo ipso concursu, quo influit cum ipsa, & cum intellectu ad representationem huius determinati obiecti: hoc nihil est, quia ille concursus solum est applicatiuus causæ ad actum secundum, & influxiuius in illum iuxta modum, & potestatem ipsius causæ secundæ; & sic supponit ipsam constitutam, & perfectam in actu primo, & consequenter representationem eius non immutat, quia hæc pertinet ad actum primum: concursus autem Dei ad operandum non immutat, nec constituit aliquid pertinens ad actum primum, sed tantum applicat, & ordinat id quod est in actu primo ad actum secundum. Quod si iste concursus immutat ipsam representationem, & id quod pertinet ad actum primum speciei, idem est ac si dissoluat illam, & infundat aliam, ac proinde reditur ad id quod iam impugnatum est, quod destruat Deus illam speciem, & producat aliam: perinde enim est quod id faciat concursu quo influit in actum, vel alia antecedenti actione, si inconueniens est idem.

9 Quare secunda aliorum sententia affirmat speciem intelligibilem Angeli non immutari intrinsecè, nec per entitatem, nec per modum superadditum, sed per extrinsecā assimilationem, quatenus obiectum non assimilatur

assimilatur speciei representatiuæ sui antequam in rerum natura tale obiectum sit, existente autem obiecto, statim assimilatur speciei, & sic manet completa similitudo ipsa speciei, quia similitudo inter duo extrema est; & sic existente utroque extremo completur. Hæc sententia videtur planè affirmari à D. Thoma. *hic quæst. 57. art. 3. ad 3. & quæst. 8. de verit. artic. 12. ad 1.* Et communiter hoc sequuntur Thomistæ, Caietan. *in hac quæstione 57. artic. 2. §. Quod secundum*, Porrar. *2. contra Gentil. c. 96. & c. 100.* quamuis inter Caietanum, & Ferrariensem sit dissensio, quod Caietanus putat durationem ipsam, seu existentiam ut in exercitio coniunctam cum re ipsa, non representari ut obiectum quod, seu ut re representatam, sed ut conditionem; Ferrar. verò *dicto c. 100.* id impugnat, censetque representari durationem ipsam, etiam ut obiectum quod, & rem representatam, quia reuera duratio ista, & coniunctio eius cum ipsa re est vnum ex accidentibus ipsius rei; atque adeo representabilis est ut obiectum, & res cognita. Putant autem Suarez. *lib. 1. de Angelis c. 11. n. 10.* & Arrubal *hic disp. 167. c. 2.* Sententiam Caietani in eo esse, quod species Angeli representant futura in potentia, quando verò existunt, representant ea in actu sine ulla mutatione ex parte speciei. Cæterum sententia Thomistarum in hoc cõuenit, quod similitudo speciei, quæ est in Angelo, non est cõpleta, & terminata antequam obiectum existat; & idè non potest illud representare, quandiu est futurum. Cõplementum autem similitudinis dependet ab altero extremo ad quod similitudo terminatur: licet varietas magna sit in explicando quomodo ista representatio speciei terminatur ad illam existentiam rei futuræ, & respiciat illam, an sicut conditionem, an sicut rem representatam, & utrùm representatio ipsa speciei mutetur, saltè quoad aliquem modum, seu relationem de nouo acquisitam erga obiectum, seu penes aliquid explicitum, quod ante solum erat implicitum respectu rei futuræ, quod Suarez, & Arrubal vocant representare in potentia, & in actu. Et hoc totum quomodo intrinsecè fiat in specie ex sola positione extrinseca obiecti; de quo etiam videri potest Nauarr. *controu. 58.*

10 Hæc sententia non minores patitur difficultates quam præcedens, & possunt reduci ad duo præcipua capita

Primum est, quia responsio D. Th. *in hac q. 57. a. 3. ad 3. & q. 8. de verit. a. 12. ad 1.* quod species Angeli licet æqualiter se habeat in representando respectu rei præteritæ, præsentis, & futuræ, tamen res ipsæ non æqualiter se habent ad ipsas species, quia quando non existunt, non habent naturam per quam assimilantur speciebus; & sic per eas cognosci non possunt: Hæc, inquam, responsio procedit in æquiuoco de similitudine relativa fundata in cõuenientia extremorum, & de similitudine representatiua fundata in intelligibilitate rei quam participat species intentionales. Nam similitudo relativa exigit quidem naturam utriusque extremi, eorumque præsentiam, ut completa sit, similitudo autem intentionalis, & representatiua hoc non exigit, quia non fundatur in cõuenientia naturæ, & existentia extremorum, imò species in entitate sua longè dissimilis est ab obiecto, ut patet cum per speciem spirituale representatur res corporea. Similiter constat quod per speciem intentionalem potest representari res absens, & non existens, sicut patet quod recordamur rei præteritæ, & tamen similitudo speciei, loquendo de similitudine relativa, tunc non est completa, quia sicut res futura non habet naturam per quam assimilatur speciei, ita nec res præterita habet naturam nec existentiam per quam assimilatur illi: ergo etiam non poterit cognosci; quod tamen ista

10a. à S. Thom. in 1. part. D. Th. Tomus alter.

sententia non concedit. Nec refert dicere quod non cognoscitur res futura in seipsa, & intuitiue, sed prout continetur in causis, & similiter res præterita, ut relinquitur in effectu. Contra enim est, quia sufficit nobis quod futura abstractiue cognoscantur, dummodo cognoscantur certò, sicut præterita: non enim est difficultas an cognoscantur futura intuitiue ab Angelo, sed an cognoscantur certò, licet abstractiue, sicut præterita intuitiue cognosci non possunt, & tamen certò cognoscantur. Addo, quod si ex eo non cognoscantur futura, quia similitudo speciei representantis illa non completur quousque ipsa futura habeant naturam per quam assimilantur tali speciei, sequitur quod nec etiam supernaturaliter possint cognosci ab Angelo, quia quando non producantur non habent naturam per quam assimilantur ipsis speciebus, etiam supernaturaliter: ergo non poterunt per tales species cognosci, nec per alias supernaturaliter infusas, quia quantumcumque supernaturalia sint, non poterunt illis assimilari res ipsæ quandiu non sunt productæ.

Secundò est difficile in hac sententia explicare, 11 quomodo species ipsa representet res istas futuras, quando præsentis redduntur sine ulla sui mutatione, & antè non representabat illas. Nam rem istam, quæ antea non erat præsens, sed futura, & modò redditur existens, & præsens representari actu per speciem, aliquid intrinsecum est in ipsa speciei, siquidem representat aliquid, quod antea non representabat; ergo in ipsa specie aliquid de nouo fit ut representet talia obiecta, nunc de nouo existentia, quæ antea non representabat, & quidquid illud sit, aliquam intrinsecam mutationem petit in specie. Siue enim dicatur quod illa duratio, & existentia est solum conditio, siue quod est res de nouo representata, siue dicatur quod antè solum representabat illam in potentia, & implicitè, & modò est in actu explicita, totum hoc pertinet ad aliquid proprium, & intrinsecum talis speciei, quia pertinet ad diuersum modum representationis eius, & totum quod representationis est, intrinsecum est in specie. Ergo aliquam variationem intrinsecam petit in ipsa specie hæc representatio explicita, & actualis, quando res de nouo producitur, quæ antea solum erat implicitè, & in potentia quando res erat futura. Vnde currunt ibi difficultates *suprà* allatæ contra primam sententiam, scilicet quod si representatio intrinsecè mutatur, species ipsa corrumpitur: & quod non potest ab ipso obiecto extrinseca hæc variatio fieri in specie, cum non habeat efficientiam aliquam, & influxum in ipsam speciem: nulla autem mutatio intrinseca fit in specie nisi mediante aliqua efficientia, & influxu physico.

Tertia ergo sententia est quam docet P. Suarez, 12 & alij, qui absolute docent nullam dari mutationem intrinsecam in ipsa specie Angeli, ex eo quod res futura reddatur præsens, sed totam mutationem tenere se ex parte rei representatæ, non quia completur similitudo speciei per ipsam existentiam obiecti, sed quia quando est præsens, terminat representationem, & cognitionem intuitiuam: quando autem est futurum, non terminat representationem speciei, sed solum res ipsa representatur in abstracto, & quantum ad quidditatem, eo quod species intelligibilis non representat Angelo complete rem esse vel futuram esse, sed simpliciter, & secundum se representat illam, & sic si res non existit, nihil de existentia aut futuritione eius representat, sed tantum quidditatem cum indifferentia ad esse, vel non esse: cum verò de facto res existit, de facto terminatur ad illam representatio, ut ad existentem,

55 2

stentem, antea verò terminabatur ad ipsam ut possibilem, & ad omnia eius accidentia, & circumstantias, etiam ut possibiles: & sic tota hæc variatio reducitur ad diuersam terminationem ex parte obiecti representati, non ad aliquam mutationem intrinsecam in specie, siue formalem, siue effectiuam, neque ad aliquod complementum similitudinis eius.

13 Addit P. Vasq. *hic disp.* 208. c. 4. in specie Angeli nullam fieri variationem intrinsecam per hoc quod antea non representet futurum, & modò representet quando est præsens, sed solum ex parte obiecti quia quandiu est futurum, non est obiectum naturale istius speciei, sed solum quando est præsens, vel præteritum. Eadem autem species, & potentia in se inuariata respiciunt, & attingunt obiectum quando redditur connaturale obiectum speciei, vel potentia, non autem attingunt quandiu connaturale obiectum earum non est. Quam doctrinam dicit tradidit Capreolo in 2. *dist.* 3. q. 2. a. 3. ad 1. Greg. contra 3. *conclusionem*, ubi inquit, idè futura non cognosci ab Angelis, quia capacia non sunt cognitionis nec ei subiiciuntur & ad eundem sensum conatur adducere D. Thomam. *hic q.* 57. art. 3. ad 3. Heruæum, & alios. Et addit P. Arrubal *hic disp.* 167. c. 1. & P. Alarcon. *tract.* 6. de Angelis *disp.* 3. c. 7. existentiam actualem obiecti bene posse facere ut aliquid sit intra virtutem naturalem alicuius potentia vel habitus, intra quam antea non erat, ut patet exemplo habitus fidei diuinæ, ad quam incipit pertinere aliquod obiectum, & intra latitudinem eius contineri, si modò reuelatur à Deo, & declaretur ab Ecclesia, quod ante non continebatur ex solo defectu reuelationis, per quam tamen nihil intrinsecum in habitu fidei ponitur, sed omnino inuariatus manet in se. Sic etiam per hoc quod res aliqua reddatur existens pertinensque ad hoc vniuersum. ponitur intra latitudinem obiecti proportionati alicuius speciei, cum antea ad talem speciem non pertineret, quia non erat illi connaturale, nec intra latitudinem eius continebatur; & si non representabatur, modò verò representatur nulla facta variatione in ipsa specie.

14 Caterum tota hæc sententia, & omnes eius explicationes non minorem difficultatem patiuntur, quam non exactè explicat. Nam prima explicatio diuertit à principali puncto difficultatis, explicans quomodo species non varietur variata solum terminatione obiecti quoad intuitiuium, vel abstractiuum. Dato enim quod eadem species, vel notitia varietur per abstractiuam in intuitiuam solum per extrinsecam terminationem obiecti, nulla facta variatione in ipsa specie, saltem quantum ad substantialem representationem: tamen in præsentia, ut iam monuimus, non est difficultas solum in hoc, quod Angelus non possit cognoscere futura intuitiue: sic enim neque futura necessaria, v.g. eclipsim futuram intueri potest, quia nondum est præsens, neque in seipsa, & extra causas cognoscibilis, sed etiam debet supponi quod futura contingentia non sunt certò cognoscibilia ab Angelo, etiam certitudine abstractiua, & eo modo quo futura necessaria cognoscuntur. Et de hac cognitione abstractiua assignanda est ratio, quare non potest attingi futurum quando est in statu futuritionis abstractiua, supposito quod eadem species inuariata in sua representatione potest illud attingere intuitiue quando sit præsens. Et hæc sententia seu explicatio Suarez totam variationem reducit ad terminationem obiecti, prout seruit cognitioni intuitiua, quando res sit præsens: quomodo autem non terminet cognitionem sui abstractiuam ante quam sit præsens, supposito quod representatio speciei est eadem, non

explicat. Nisi fortè dicatur quod antequam res sit præsens, solum representatur quidditas rei in abstracto, seu in communi, aut etiam in quantum hæc in singulari, sed non representatur eius productio, seu duratio, & existentia ut coniuncta ipsi rei, eo quod species Angeli non representat complexè affirmando, aliquid esse vel non esse. Sed tunc restat difficultas insoluta, videlicet, quomodo quando res sit præsens incipit illa species per suam simplicem representationem representare rem, non solum in sua quidditate, sed etiam cum coniunctione ad existentiam, & durationem sine aliqua variatione intrinseca, & per nudam terminationem extrinsecam: hoc enim quod est rem existere in exercitio sicut est aliqua veritas terminatiua cognitionis ex parte sui, ita representabilis est in aliqua specie ex parte intellectus: & Angelus non format nouam representationem ex speciebus præconceptis ad representandum illam coniunctionem rei cum sua existentia per compositionem aut diuisionem. sed per ipsam simplicem speciem viso obiecto, videt quidquid illi conuenit, inter quæ vnum est existentia seu duratio: ergo si illa species antequam res produceretur non representabat durationem ut conuenientem ipsi rei, quomodo ex sola extrinseca positione rei incipit illam per intrinsecam similitudinem, seu representationem representare sine aliqua variatione sui? Et dato quod posset Angelus formare nouam speciem representantem coniunctionem durationis cum re, quod antea non representabatur, quomodo ex sola extrinseca productione rei mouetur ad formandum illam speciem, cum nihil illi de nouo representetur, aut mutetur in speciebus, quas habebat ante productionem talis rei, & ante illam non poterat formare speciem representantem illammet coniunctionem, etiam pro tempore quo facienda est? Et sic poterit intelligere futurum, saltem abstractiue antequam sit per compositionem, seu formationem illius speciei. Quare sola extrinseca terminatio non apparet quomodo sit sufficiens ad representandam coniunctionem durationis cum ipsa re, si species ex sua intrinseca ratione id antea non representabat.

15 Similiter explicatio Vasquez & Arrubalis nullo modo subsistit, sed manifestè petit principium, & non explicat difficultatem. Dicit enim, idè speciem Angeli non representare futurum, quia sub statu futuritionis non est connaturale eius obiectum. De hoc est difficultas, quare non sit connaturale eius obiectum antequam existat: cum autem existit, incipit esse connaturale obiectum, & species incipit ipsum representare. Et non explicat difficultatem: si enim incipit esse connaturale obiectum, etiam incipiet eius representatio esse in mente Angeli, quæ antea non dabatur, quia connaturale obiectum non erat: ergo non stat obiectum ipsum variari, ita quod sit connaturale obiectum speciei, & ipsam representationem speciei non variari. Vel si antea dabatur representatio sufficiens istius obiecti, licet non exercebatur quomodo connaturale obiectum non erat si iam in mente Angeli species representatiua illius erat? Si dicatur idè non esse proportionatum obiectum, & connaturale, quia quandiu est futurum, non pertinet ad ordinem huius vniuersi, nisi in potentia. Non per hoc euacuatur difficultas, quia dato hoc quod non pertineat ad ordinem vniuersi illud futurum actu, sed solum pertineat ut futurum (de quo tamen inquiri posset, quare hoc non sufficiat ut sit obiectum connaturale) tamen restat explicandum, quomodo quando illud obiectum producit, & incipit pertinere ad ordinem vniuersi representetur ab illa specie sine aliqua

aliqua variatione speciei de potentia ad actum, quia antea repræsentabat obiectum solum in potentia modo in actu, vel si antea repræsentabatur in actu, quare non poterat ab Angelo cognosci? Variatio autem in ipsa repræsentatione intrinseca de potentia ad actum, magna, & realis variatio est, cum ipsa repræsentatio in se realis sit, nec potest intelligi quod fiat per solam denominationem extrinsecam obiecti. Si verò nec in potentia, nec in actu repræsentabatur antea, & modo repræsentatur, aliqua intrinseca mutatio speciei est.

Instantia autem & exemplum Arrubalis de obiecto incipiente pertinere de nouo ad habitum fidei, cum antea non pertineret sine vlla variatione habitus in se, non conducit; quia habitus, & potentia cognoscitiva non respiciunt obiectum repræsentando illud, sed supponendo repræsentationem factam in specie, vel propriam, vel connotatiuam prout obiectum repræsentari potuerit, & scientia postulauerit, qua repræsentatione supposita, habitus & potentia tendunt sub ratione sua formali ad quodlibet obiectum quod sub illa ratione formali contineri potest; & sic contentum in specie repræsentari, & proponi sicut etiam visus ipse non variatur ex eo quod producatur de nouo aliquod obiectum colore affectum, quod hoc ipso sub latitudine suæ formalis rationis continetur, pertinetque ad talem potentiam. Cæterum species ipsa per se immediatè repræsentatiua est obiecti, illudque coniungit potentia in esse intentionali, non in obiectum repræsentatum per modum virtutis elicitiuæ actus fertur, sicut habitus, vel potentia. Non potest autem speciei repræsentare id quod antea non repræsentabat per solam extrinsecam coexistentiam obiecti, si in se intentionaliter non mutetur, quia repræsentatio ipsa intrinseca perfectio est in specie, & realitas eius, & immediatum respectum habet ad obiectum cuius vices gerit species. Habitus autem ut fides, vel potentia fertur ad obiectum, supponendo quod sit repræsentatum in specie; unde perinde est ipsi quod res aliqua de nouo producatur, vel non, sed hoc ipso quod induit suam rationem formalem; & sic repræsentatur in specie, in illam potest tendere id est actum elicere circa illud; species verò ipsa non sic tendit, sed repræsentat rem immediatè, nec potest repræsentare quod non repræsentabat antea, nisi per intrinsecam aliquam rationem, quia repræsentatio, intrinseca eius perfectio est. In habitu autem etiam intrinseca perfectio est elicere actum, & ferri in obiectum, sed prout repræsentatum, & per speciem coniunctum intellectui. Unde tota mutatio non est in ipso habitu, qui supponitur potens in illud obiectum, si sic proponatur, sed in obiecto eiusque repræsentatione, & propositione.

17 Quapropter redeundo ad sententiam D. Thom. eamque explicando, dicimus quod intellectus Angeli in sententia D. Thom. non cognoscit singularia, quæ de nouo sunt per species de nouo acquisitas, sed per species quas prius habebant, per quas tamen non cognoscebant ea prout erant futura: Hæc enim sunt expressa verba ipsius *quest. 16. de malo, art. 7. ad 6.*

Ratio autem quare species illæ non repræsentant futura seu singularia nondum existentia, perpetuò assignatur à D. Thoma per hoc, quod talia singularia nondum participant naturam per quam assimilantur illis speciebus, ut patet *cit. loco q. 16. de malo, & in hac quest. 57. art. 3. ad 3. & in 2. ad Anib. dist. 7. quest. unica art. 3. ad 4. & quest. 8. de Ioan. à S. Thom. in 1. part. D. Th. Tomus alter.*

verit. art. 12 ad 1. Et ut dicit *cit. quest. de malo, Species intelligibiles, quæ sunt in intellectu Angelico sunt directæ similitudines respicientes naturas specierum, per quas tamen singularia cognoscere possunt, non tamen nisi in quantum participant naturam specierum, quod non est antequam sint in actu.* Igitur in hac repræsentatione specierum considerandum est quod naturæ non repræsentantur in illis quomodocumque, sed prout descendunt, & deriuantur ab ideis diuinis, & participant naturam speciei, non solum in prædicando, sed in descendendo, & participando esse effectiue à Deo, à quo naturæ deriuantur in aliquibus indiuiduis, sed non in omnibus simul sed successiue. Et ideo species quæ deriuantur à talibus ideis diuinis accipiunt vim repræsentandi naturas cum successione indiuiduorum; & sic ex vi suæ repræsentationis, quatenus deriuantur ab ideis diuinis non solum ut sunt in se, sed ut operantur in hoc vniuerso, petunt repræsentare indiuidua, quando sunt in vniuerso producta ab ipsis ideis, non quando non sunt, & hoc non per aliquam variationem speciei quasi formalem, & in sua formali repræsentatione, sed per aliquam mutationem modalem quatenus ipsa repræsentatio ex vi suæ repræsentationis deriuatæ ab ideis applicatur ad repræsentandum hoc vel illud indiuiduum in particulari, iuxta quod ab ipsis ideis descendit, & producit, quæ variatio, & applicatio non fit ab ipso obiecto ad extra posito effectiue, sed ab ideis diuinis ex vi prioris infusionis, & deriuationis specierum, ab obiecto autem solum terminatiue, & ut à quodam requisito, seu potius consecuto ex ipsa deriuatione ab ideis, ut species sic determinatè, & applicatè pro isto, vel illo indiuiduo in singulari. Explico singula ex doctrina Diui Thomæ.

In primis certum est, species Angelorum non re- 18
præsentare rem aliquam, nisi prout pertinet ad hoc vniuersum, & participat in eo naturam, & esse ab ideis diuinis. Certum etiam est species Angelicas non esse similitudines deriuatas ab obiectis ad mentem Angeli, sed deriuatas ab ideis diuinis ut factiue sunt rerum ad extra, sicut *precedenti dist. latè* probatum est. Quod autem solum repræsentent res prout pertinent ad hoc vniuersum, & in eo habent esse ab ideis diuinis constat, quia naturalis cognitio Angeli est limitata, & finita, petitque iuxta suam naturam aliquibus terminis claudi, non solum ex parte modi intelligendi, & ut ita dicam ex parte intentionis, sed etiam ex parte rei cognitæ, seu ex parte extensionis, quia aliàs deberet ad omnia possibilis extendi, & ad infinita: non enim est maior ratio quod cognoscat aliquod extra hoc vniuersum, quam omnia saltè diuisiue, quia intellectus de se ad omne intelligibile extenditur. Et præsertim quia extra vniuersum non est aliqua causa naturalis aut creata, sed tantum Deus; Angelo autem, & cuilibet creaturæ non est connaturale cognoscere obiecta sua in Deo, sed in creaturis, & in causis naturalibus, & consequenter pertinentibus ad hoc vniuersum: creatus enim intellectus directè proportionatur, & specificatur ab aliquo creato, & consequenter ab aliqua substantia naturali, quia substantia est obiectum intellectus. Et ita si cognoscit aliquam substantiam in se immediatè, illa naturalis est; si per suas causas debet esse per causas ereatas, & naturales: extra vniuersum autem nihil est præter Deum: ergo neque causæ, neque effectus naturales sunt: ergo nihil ibi est cognoscibile naturaliter ab Angelo.

19

Ex his ergo principiis deducitur, quod si Angelus connaturaliter habet species infusas à Deo representantes ipsas naturas rerum, non quomodoque, sed ut derivatas à Deo, & pertinentes ad hoc uniuersum, in eoque positas, & connexas, consequenter debent representare tales naturas, prout sunt in aliquo, vel aliquibus indiuiduis, quia sic, & non aliter derivantur res ab ideis diuinis (licet etiam pro suo arbitrio possit Angelus uti illa specie inadæquatè ad representandam solam naturam sine indiuiduis vel vnum indiuiduum sine alio) sed quia ipsa indiuidua successiue sunt ab ideis diuinis in hoc uniuerso, hoc ipso quod infunditur Angelo species representatiua rerum secundum quod derivantur ab ideis diuinis, oportet quod aliqua indiuidua successiue representent, & non simul, quia sic derivantur ab ideis diuinis in hoc uniuerso: ergo si species Angelorum representant res, non desumendo aliquid ab ipsis, sed prout descendunt ab ideis diuinis, necesse est quod ex vi suæ representationis, & ex vi quam participant ab ipsis ideis, habeant assimilari indiuiduis, quando fiunt, & participant esse ab ideis, & non aliter. Neque ista representatio seu, applicatio ad cognoscendum indiuiduum determinatè sumenda est ex ipsis rebus, nisi in quantum sunt termini talis representationis. Vnde respectu ipsorum obiectorum in se omnino inuariata manet species Angeli tam in ipsa representatione formali, quam in applicatione naturæ ad tale vel tale indiuiduum: sed tota hæc representatio, & applicatio regulanda est ex ipsis ideis diuinis, à quibus sicut fiunt res in propria entitate, seu in proprio genere, ita fiunt in similitudine, seu specie intelligibili in mente Angeli ut ex D. Aug. 2. *super Genes. ad litteram* c. 8. docet D. Thom. 9. 56. art. 2. & aliis multis locis. Quod ergo species Angeli modo representet aliquod indiuiduum, quod de nouo fit, & antè non representaret illud, non est quia non haberet antè speciem potentem in illud indiuiduum, & aliam de nouo habeat acquisitam, vel infusam, sed idè est, inquit, D. Thomas, quia res ipsæ quæ fiunt, seu indiuidua ipsa quæ de nouo succedunt non assimilantur illi speciei, seu nondum participant naturam representatam ab illa specie, ut dicit in *quæst. 16. de malo, art. 7. ad 6.* id est non assimilantur illi, nec participant naturam illam ab ipsismet ideis, à quibus sicut producantur indiuidua in proprio genere, & entitate, ita in assimilatione speciei, non per nouam speciem infusam, nec per actionem totaliter nouam, sed per determinationem speciei, quæ iam existerat, quæ determinatio fit in illa, & resultat ex vi primæ infusionis, quia sic infusæ sunt ab ideis, & exemplatæ ab illis, quod acceperunt vim representandi naturam specificam, ut descendit ab ideis diuinis in suis indiuiduis; & quia descendit, & derivatur illa natura ab ideis per indiuidua successiue, etiam illa species habet vim intrinsecam representandi indiuidua successiue, ita quod creato indiuiduo in sua entitate per ideas diuinas resultat ex vi prioris infusionis, quia infusæ sunt istæ species ut exemplatæ ab illis ideis, determinatio, & applicatio ad representandum ista indiuidua eorumque existentiam, & durationem, quia sic successiue sunt, & derivantur ab ideis diuinis; & sic etiam successiue assimilantur, & resultat similitudo eorum in speciebus Angelicis iuxta regulam illam Augustini *suprà* positam, quod quidquid fit à Deo in proprio genere, fit primò in mentibus Angelorum, sed in mentibus Angeli fit à principio per species exemplatas ab ideis diuinis, quæ habent vim determinatè representandi per suc-

cessionem temporum indiuidua, quæ sunt ab ideis, quia id habent in representando, quod ideæ in causando. Et sicut lapis ex virtute generantis accipit formam quæ toties mouetur ad centrum, quoties ab illo extrahitur, & dicitur ratione talis virtutis à generante moueri, non per nouam generationem, sed per antiquam hinc de nouo explicatam, quando tendit ad centrum; & sicut posito fundamento, ex vi talis resultat noua relatio, quoties ponitur terminus, non per nouam actionem, quia ad relationem non datur per se motus; sed ex virtute primæ, prout hinc de nouo determinatur, & explicatur: sic species infusæ ut exemplatæ ab ideis diuinis, habent ex vi illius primæ infusionis representare naturam in indiuiduis successiue, quia sic successiue fiunt ab ideis diuinis, & ita toties prorumpunt: & explicantur in representationem determinatam huius vel illius indiuidui hinc, & nunc de nouo succedentis, quoties in tale indiuiduum explicat idea diuina causando, quia quod idea diuina est in causando pro hoc uniuerso, species Angeli est in representando ex vi suæ derivationis qua exemplatur ab idea diuina.

Et moueor ad hoc ita explicandum, tum ex auctoritate D. Thomæ, & modo loquendi ipsius cum D. Augustino, tum ex ratione communi, quia non potest intelligi sine aliqua determinatione intrinseca in specie, de nouo representare quod non antè representabat in exercitio: tum ex speciali ratione, quia istæ species Angelicæ sunt quædam similitudines exemplatæ ab ideis diuinis, & iuxta eorum modum in causando accipiunt vim representandi successiue indiuidua determinatè, quia sic successiue fiunt à Deo. Ex auctoritate D. Thom. id deducitur quia dicta *quæst. 16. de malo art. 7.* postquam *solutione ad 6.* dixerat quod illæ species intelligibiles sunt similitudines directè respicientes naturas specierum, per quas tamen singularia cognoscere possunt, non tamen nisi in quantum participant naturam specierum, quod non est antequam sint in actu: addit *solut. ad 9.* quod *Formæ quæ sunt in rebus à mente diuina procedentes habent quidem se semper eodem modo quantum ad rationem speciei, non autem quantum ad participationem indiuiduorum, quia quandoque forma speciei participatur à quibusdam indiuiduis, quandoque verò ab aliis; & sic etiam species intellectus Angelici secundum seipsos semper eodem modo se habent, sed ex transmutatione indiuiduorum naturalium provenit, quod quandoque assimilantur speciebus existentibus in mente Angeli, quandoque autem non assimilantur.* Quod dicit D. Thom. provenire ex transmutatione indiuiduorum naturalium, intelligi debet de transmutatione facta non solum in ipsa entitate rerum, sed in ipso intellectu Angeli, quia iuxta regulam *suprà* positam ex Augustino, quæcumque fiunt à Deo in hoc uniuerso, fiunt prius in mentibus Angelorum: non autem fiunt nisi ratione specierum, in quibus datur assimilatio, & representatio ad res quas cognoscunt; & sic licet species Angeli æqualiter se habeant ad præsens, præteritum, & futurum, ut dicit S. Thomas in hac *quæst. 57. art. 3. ad 3.* tamen hoc est quantum ad æqualitatem, non accipiendi variationem ab ipsis obiectis. Cæterum quantum ad hoc quod est recipere in se aliquam determinationem, seu perfectionem de nouo resultantem ex ipsa motione Dei, seu idearum diuinarum, id non negat D. Thomas, sed potius colligitur ex immediatè antecedentibus in *solutione ad 2.* ubi inquit quod in intellectu Angeli est tempus secundum successionem intelligibilium conceptionum

20

conceptionum, secundum quod dicit August. 8. *super Genesim ad litteram*, quod *Deus mouet spiritua- lem Creaturam per tempus. Et ita cum sit successio in mente Angeli, non omnia quæ aguntur per totum tem- pus sunt ei presentia*. Notentur hæc vltima verba: nec enim probat D. Thom. ex successione rerum ad quas terminatur cognitio successiva ipsius rei re- præsentationem sine variatione speciei, sed ex eo quod est successio in mente Angeli non omnia di- cit illi esse præsentia. Sed non sunt præsentia An- gelo omnia, non solum in conceptu, sed neque in specie, quia si in hac essent, possent esse in con- ceptu: ergo ipsa species impressa successionem pa- titur: ergo & aliquam mutationem.

21. Ex ratione verò hoc idem deducitur, tum ge- nerali, tum speciali. Generalis ratio est, quia re- præsentatio speciei semper est perfectio illius in- trinseca: nec enim per extrinsecam denominatio- nem potest intelligi, quod species repræsentet intel- lectui aliquod obiectum, sed per intrinsecam simi- litudinem qua intellectum actuat in esse intelli- gibili: ergo non potest concipi quod illa species ali- quid repræsentet de nouo, quod antea non repræ- sentabat, nisi aliqua intrinseca perfectio illi adda- tur, siue vocetur applicatio, siue modus, siue de- termination, siue explicita repræsentatio, quæ an- tea erat implicita, aut in actu, quæ antea erat in potentia. Quidquid horum dicatur, vel his nomi- nibus appelletur, non potest significari aliqua de- nominatio extrinseca in specie, & omnimoda in- uariatio, quia species ista informando, & actuando realiter intellectum illi repræsentat: ergo si repræ- sentat aliquid de nouo, oportet quod intrinsecam actionem faciat circa tale obiectum, quam non faciebat antea: ergo illud aliqua realis perfectio est. Nec potest dici quod non repræsentat indiuiduum tanquam obiectum, & non repræsentatum, sed tanquam aliquid exercitum, vel tanquam conditio- nem aliquam naturæ repræsentatæ. Nam contra est, quia indiuiduum actu existens est res de nouo repræsentabilis, quæ antea non repræsentabatur: cognoscitur enim ab Angelo vt res quædam à se cognoscibilis: ergo vt repræsentabilis, quia id re- præsentatur vt res, quæ cognoscitur vt res? Angeli autem indiuidua cognoscunt vt res, sicut quando loquuntur cum hominibus, vel eis aliqua singula- ria ostendunt, & enuntiant, vt patet in multis locis Scripturæ: ergo talia indiuidua res sunt repræsen- tæ, & cognitæ ab Angelo. Ex ratione autem specia- li iam *suprà* hoc deduximus quia species Angelicæ sunt quædam similitudines exemplatæ ab ideis, vt sæpè docet D. Thom. ita quod id habent species Angelorum in repræsentando, quod ideæ diuinæ in causando. Ergo sicut ideæ diuinæ causant natu- ras rerum in suis indiuiduis successiue productis, ita species Angelorum habent vim repræsentan- di indiuidua, prout successiue fiunt per ideas di- uinas, ita quod ex vi suæ primæ infusionis accepe- runt vim repræsentandi ista indiuidua successiue sicut ab ideis causantur in vniuerso, & non aliter, nec antè, & consequenter ex vi talis infusionis ha- bet illa repræsentatio intentionalis in Angelo de- terminare, & explicare repræsentationem illam ad hoc vel illud indiuiduum, quod de nouo fit, quia sic producit ab ideis diuinis; & species illæ sunt quædam sigilla, & repræsentationes idearum, prout in hoc vniuerso producant.

Corollaria ex dictis.

Ex dictis colliguntur tria.

Primum est quid requiratur in speciebus Ange- licis vt supernaturaliter repræsentent futura in seipsis.

Secundum quomodo possint cognoscere præte- rita quæ transierunt, & nullum sui vestigium reli- querunt;

Tertium quomodo ratio D. Thomæ efficaciter probet futura ista non posse cognosci ab Angelo, naturali cognitione.

Quoad primum dupliciter potest intelligi quod repræsententur futura supernaturaliter ipsi An- gelo. Primò mediante aliqua reuelatione, seu illu- minatione diuina clara vel obscura. Secundò per speciem immediatè repræsentatiuam futuri, non in suis causis, vel in aliqua causa: sed extra omnes illas in seipso. Primo modo non est difficile intelli- gere quod futura supernaturaliter repræsententur Angelo vt contenta in illa reuelatione, eo quod re- uelatio illa, seu illuminatio proponit Angelo obie- ctum illud futurum vt certum, & euidenter cognitum à Deo in sua sapientia, licet non sub eo modo quo Deus cognoscit, sed pro captu, & intelligentia crea- turæ: sicut etiam in illuminationibus quæ fiunt in- ferioribus Angelis à superioribus, repræsentat su- perior Angelus id quod cognoscit iuxta modum captumque inferioris; & sic percipit illam. Co- gnoscere autem rem aliquam, vt cognita est à Deo, & in eius reuelatione contenta, est supra modum proprium, & connaturalem creaturæ cognoscentis, quæ solum connaturaliter cognos- cit res in suis causis naturalibus, non prout in Deo, vel in eius cognitione, & reuelatione; hæc enim totam naturam superant; & sic supernaturalem reddunt cognitionem, quia supra totam naturam repræsentantur in altiori motiuo. Secundo modo potest dupliciter intelligi quod futurum repræ- sentetur in se in specie, seu conceptu Angeli. Vno modo *ly in se* excludente confusam notitiam aut admixtionem alterius rei quæ non est ipsum fu- turum, quasi non cognoscatur cum alio, aut per aliud, abstractiue tamen: alio modo *ly in se* dicen- te terminationem propriam, & intuitiuam alicuius rei, ita quod futura videantur intuitiue per termi- nationem ad eorum existentiam physicam, & rea- lem, seu extra causas, hæc enim requiritur vt noti- tia aliqua sit intuitiua, & terminetur ad rem in se, hoc est in sua existentia extra causas; atque adeò in reali existentia. Primo modo non repugnat abstractiua cognitio repræsentans clarè, & distinctè id quod futurum est, eiusque existentiam, & durationem nondum nunc præsentem, sed aliquando extitutam perinde ac si esset præsens. Quod supernaturaliter potest Deus facere infundendo alicui speciem, & repræsentationem talis futuri indistinctam, & propriam, v. g. Antichristi, quia indiuidualiter cognoscatur qualis futurus sit. Et erit supernaturalis illa species, non quia rem supernaturalem repræsentet, sed quia modo supernaturali datur, id est, antequam sic de- bita, & connaturaliter petita à Deo infunditur, quia antequam ab ideis diuinis causetur in vni- uerso, eius repræsentatio sigillatur in mente, per- inde ac si iam esset, ostendendo tamen quod non- dum est. Nec est maior difficultas in intelligendo, quomodo species illa repræsentabit clarè, & distin- ctè rem futuram, licet abstractiue, quam in intelli- gendo quomodo species aliqua repræsentat rem præteritam clarè, & distinctè, & tamen abstractiue, quia non existit, nec existentia sua terminat cogni- tionem; sic potest Deus eandem distinctam claramque

repræsentationem de re aliqua futura imprimere, manente tamen abstractiua terminatione, non intuitiua.

23 At verò loquendo secundo modo, repugnat quòd infundatur alicui species intuitiua futuri, ita quòd existentia eius in se terminet cognitionem, nisi cognoscens eleuetur ad attingendā eam mensuram in qua est existens tunc quando cognoscitur intuitiue. Non est autem existens, nunc si cognoscitur futurum existentia propriæ mensuræ, quia propria mensura futuri est tempus nondum existens in actu, sed in potentia, & successione partiū: ergo qui respicit futurum pro illa parte temporis in qua producet, non potest nunc ante illam partem temporis terminare ut præsens in actu, sed ut præsens in potentia, atque adeò ut præsens in aliqua causa, & non in seipso in actu: ergo per seipsum non potest intuitiue videri. Quare ut videantur futura intuitiue ante quam sint, oportet quòd eleuetur cognitio ad intuendam rem in aliqua mensura in qua iam sit existens in actu, & non in potentia, & hæc est æternitas, extra quam nulla alia mensura creata potest continere rem aliquam præsentem, antequam in propria mensura præsens reddatur, quia nulla alia mensura creata est causa ipsius esse rei, & propriæ mensuræ eius ambiendo, & continendo illam tanquam principium à quo deriuatur, sed solum potest concomitanter illi coexistere, licet in se sit perfectior, & immutabilior mensura, non tamen tanquam principium, ratio alterius. Ad hoc autem ut aliqua species repræsentet rem ut existentem in æternitate, quidam dicunt necessariam esse visionem beatam, quæ æternitatem videt, & res in æternitate existentes. Alij existimant etiam extra verbum videri posse res eam existentia in æternitate, non quidem videndo ipsam æternitatem in se, sed in quadam participatione æternitatis, seu in æternitate participata, quæ est mensura rerum supernaturalium in seipsis, & præsertim cognitiones earum pro ut sunt deriuatæ à Deo authore supernaturali, ipsūque in quantum operantem supernaturaliter repræsentare possunt; & sic aliquam æternitatis participationem manifestare. Sed tamen hoc difficultate non caret, quia si non videtur æternitas ipsa in se, & continentia ipsa futurorum, ut est in ipsa æternitate, non potest videri nisi in aliquo effectu creato, seu in aliqua operatione Dei ad extra: quidquid enim non videtur intra Deum, videri debet ad extra in aliqua creatura. Hoc ipso autem quòd videntur futura in aliquo creato, nō videntur ut præsentia realiter in se, quia solum in æternitate præsentia sunt, non autē in aliqua mensura creata, vel effectu creato. Dicere autem quòd videatur futurum in se, sed non mensura, in qua est præsens, implicatorium est, quia si videtur in se, videtur in aliqua duratione, & præsentia: ergo & in aliqua mensura, sicut non potest videri res præsens in tempore, & non tempus ipsum. Et sic valde difficile defendi potest quòd extra visionem beatam per quam videtur æternitas in se, futura possint intuitiue cognosci; de quo tamen latius tractari solet 3. p. q. 11. circa scientiam infusam Christi Domini, an per illam cognouerit futura intuitiue.

24 Quare dicendum est quòd ad cognitionem futurorum supernaturalium sufficit reuelatio, vel repræsentatio clara, & distincta ipsius futuri modo abstractiua. Cognitio autem, & repræsentatio singularium secundum quòd descendunt ab ideis diuinis vnumquodque in suo tempore, & in sua propria mensura, non potest repræsentare illa certò, & determinatè, sed solum prout sunt in suis causis, in

quibus certò, & determinatè non continentur: quia antequam producantur, solum sunt positi ab ideis diuinis in virtute causarum, non in seipsis. Repræsentantur certò, & determinatè quando de facto deriuantur à Deo, & producantur extra causas, & tunc etiam speciem ipsam Angeli, determinat Deus ex vi prioris infusionis, & immutat ad repræsentandum determinatè, & applicatè hoc indiuiduum, ut diximus. Quòd si supernaturaliter repræsentat futurum, efficiet Deus, seu mouebit, & applicabit hæc speciē ad repræsentandum hoc indiuiduum antequam illud entitatiue producat cum connotatione non existendi in tempore præsentis, sed in tempore successuro, & hoc supra debitū naturale est sic repræsentari.

25 Vnde sequitur quòd licet Angelus in suo esse mensuretur mensura æui, & similiter species quæ in illo est quantum ad suum esse entitatiuum, eodem æuo mensuretur, quia incorruptibilis, & inamissibilis est, tamen exercitium ipsū repræsentandi quantum ad singularia, quæ successiue fiunt nō mensuratur æuo, sed tempore, quia hoc regulatur non penes modum essendi ipsius speciei, sed penes modū, quo ipsi obiecta repræsentabilia sunt: repræsentantur autem secundum ordinē quo descendunt à Deo; descendunt verò ab ipso per tempus successiuum, non per æuū; & sic Deus mouet creaturam spiritualement per tempus. Addo quòd etiam res illæ quæ coexistunt aliquo instanti Angelico, quando correspondet diuersis partibus temporis, v. g. si correspondet vni horæ vel vni diei, nō possunt cognosci ab Angelo in vi illius instantis sic extensi quandiu non producantur in ipso tempore, sed adhuc correspondent parti temporis futuri, v. g. si operatur Angelus operationi indiuisibili correspondente tempori vnius diei, non potest attingere in principio illius instantis ea quæ futura sunt in fine diei, & adhuc sunt futura, quia licet illud instans sit indiuisibile coexistens omnibus partibus temporis illius diei sine diuisione, & mutatione sui entitatiua, non tamen indiuisibili applicatione, & mensuratione omnibus rebus, & partibus temporis succedentibus coexistit, sed prout illa in se producantur, & exiunt, quia in se non continet actu, neque causat ea quæ successura sunt indiuisibili & immutabili modo, sine vlla potentialitate, sicut æternitas, sed solum coexistit illis quando res ipsæ producantur, non antè, quia hoc est proprium æternitatis.

26 Quod ad secundum dicimus quòd res præteritæ ordinis naturalis, seu de his quæ pertinent ad sphaeram & propriam intelligibilitatem Angeli cognoscuntur ab illo, si, quando præsentia erant, ea cognouit, vel si aliquem effectum aut vestigium sui reliquerunt, abstractiue tamen illa attingit. Si autem, quando præsentia sunt ea non cognouit, neque aliquod sui vestigium reliquerunt, non possunt ab Angelo cognosci, sed reputari debent respectu illius Angeli, perinde ac si nunquam fuissent præsentia.

27 De prima parte conclusionis non est dubiū inter Auctores, quæ enim cognouit Angelus quando præsentia sunt, etiam transeuntibus cognoscere potest, quia in memoria manet; si enim nos possumus recordari præteritorum, quia de actibus nostris recordamur, & de his quæ fecimus aut vidimus, quātò magis Angeli, qui superioris intellectus, & scientiæ acumine vigent. Et similiter si in effectu aliquid præteritū remaneat, in illo tanquam in vestigio manifestari poterit: sicut enim causæ manifestant suos effectus, ita effectus causas: si enim nos in effectibus, & ex effectibus causas cognoscimus, à fortiori Angeli. Certè Angeli cōgregabūt electos à quatuor ventis, ut dicitur Mat. 24. & cineres ipsos ex quibus corpora Sanctorū resuscitanda sunt, colligent, quod stare

stare non posset nisi in aliquo effectu eis innotescerent præterita, sc. in cineribus illis, homines ad quos illa corpora spectant. Et vniuersaliter in quocunque repræsentatio alterius potest Angelus agnoscere id quod ibi continetur; ergo potest in quocunque effectu, vel signo, aut testificatione relicta, re præterita cognoscere. Quod verò abstractiue tantum ea attingant, & non intuitiue, patet, quia talia præterita in se non existunt, neque præsentia sunt: ergo per se, & in se non terminant notitiam, sed vt absentia, & in alio vt in effectu, in signo, in memoria, & recordatione, ergo abstractiue. Nam etiam res quæ in memoria cognoscuntur, non videntur per conceptum immediatè terminatum ad rem extra, sed terminatum ad rem, vt depictam, & assimilaram in imagine, seu, in specie, quæ relinquitur in intellectu repræsentante rem illam, non absolutè, sed vt aliquando cognitam, & expressam in conceptu, & hoc modo illam repræsentare, recordari est.

28 De secunda parte est maior difficultas, cur videlicet non possit Angelus rem præteritam, quæ omnino transiit sine eius aduertentia, & nullum iam eius extat vestigium, v. g. volatus auis in aëre, aut natationis piscis in mari olim facta, modò cognoscere, supposito quòd in nostra sententia ex ipsis ideis diuinis, & ex earum infusione nascitur determinatio speciei Angeli ad tale indiuiduum, non ex aduertentia ipsa rationis. Illa autem determinatio semel posita in specie non euanesceat ex se, neque conseruatur ex aduertentia Angeli, quia omnino extrinseca est vt conseruet vel destruat determinationem factam in specie: ergo etiam si non aduertat, vel cognoscat Angelus tale indiuiduum, poterit ex specie illa, quæ iam semel determinata, & completa fuit, tale indiuiduum cognoscere etiam postquam transiit.

29 Propter hoc P. Vasquez hic disp. 108. c. ultimo, tenet quòd potest Angelus hæc præterita cognoscere siue sine speciebus in sua sententia, siue positis speciebus in sententia communi, quia nulla inuenitur ratio ob quam id non possit, cum species naturales ea repræsentent præsertim posita illa determinatione, & complemento earum respectu singularium quæ de nouo producantur: quam determinationem, & complementum ponit Deus in illis speciebus hoc ipso quod singularia producantur, etiam antequam Angelus id aduertat, quia ad hoc vt aduertat præsupponi debet illa determinatio, siue qua ad tale singulare non potest aduerti: ergo illa repræsentatio, & determinatio non dependet ab aduertentia rationis, quia ante illam est, & sic etiam si non aduertat, & res prætereat, potest illam cognoscere ex vi talis repræsentationis. Et PP. solum negant Angelis futurorum cognitionem, non præteritorum.

30 Nihilominus oppositum est communius apud Theologos, de quo videri potest P. Suar. lib. 2. de Ang. c. 12. vbi eam docet contra Vasq. citatque prof. Zumel, & Pesantium: & fauet D. Th. in hac q. 57. art. 3. ad 3. vbi indifferenter proponit argumentum de futuris, & præteritis, & tamen S. D. solum res præsentis dicit cognosci ab Angelo, quia habent naturam per quam assimilantur speciebus Angelicis: ergo de reliquis siue præteritis, siue futuris censet non assimilari illis, sed solum cognosci, vel in causa, vel in effectu. Faut etiam Scriptura, quæ sicut notitiam futurorum dicit esse propriam Dei, ita, & præteritorum: ergo sicut futura non possunt cognosci in se certò, sed solum in causa, & quantum ipsa causa potuerit manifestare de determinatione eorum, quòd si causam determinatam non habuerint, nihil manifestabitur de illis; sic & præterita

non poterunt manifestari nisi in effectu quem reliquerint. Antecedens constat ex illo Isaia 41. *Accedant, & nuntient nobis quæcumque ventura sunt, priora quæ fuerunt nuntiate, & ponemus cor nostrum &c.* Super quæ verba Hieronymus. *Dicite (inquit) nobis vel præterita, vel futura, & ex eorum euentibus vestram potentiam demonstretis.* Vbi æqualiter ponitur in ipsius diuinitatis signum, futura cognoscere, & præterita. Nec potest hoc intelligi de præteritis, quorum memoria extat aut vestigium: nam de his etiam homines recordantur, quantò magis Angeli, & sic frustra in diuinitatis testimonium, eorum notitia adduceretur. Nec etiam per aliud extremum loquitur de præteritis moralibus tantum, & quæ solum pertinent ad cogitationes cordis: nam hoc modo etiam dicemus quòd futura, de quibus ibi loquitur, sunt solum futura moralia seu cogitationes futurae, reliqua verò quod intelligit Angelus: æqualiter enim de præteritis loquitur, & de futuris; constat autem quòd quæcumque futura contingantia solus Deus certò cognoscit. Denique fauet ratio quia præterita non possunt cognosci nisi vel in seipsis, vel in effectu, sicut futura, vel in seipsis, cognosci debent, vel in causa. In seipsis cognosci non possunt, quia iam transierunt, & non sunt: nec etiam in effectu, quia, vt supponimus, nullum reliquerunt. Nec etiam in ipsa determinatione speciei, quia hæc determinatio fit ex appositione, & productione rei de nouo productæ, quæ assimilatur illi speciei: ergo ex vi illius solum applicatur, & determinatur species ad rem productam dum est vel producit, & assimilatur ipsi speciei. Transiente ergo re non amplius assimilatur ipsi speciei, nec species manet determinatè, & applicatè similis ipsi rei, quia solum determinatur erga illam prout res ipsa producit, seu descendit à Deo, & similis redditur speciei, non verò ad ipsam vt præteritam, quia iam non deriuatur à Deo, nec pertinet ad vniuersum. Vnde vt repræsentetur tanquam præterita, debet suffici species alia determinatione, quatenus scilicet cognita est, & sic manet memoria de illa, quia memoria est repræsentatio de re aliquando cognita: nec enim recordamur nisi eorum quæ cognouimus; quæ enim nunquam vidimus, non per recordationem, & memoriam, sed per nouam notitiam de nouo cognoscimus: vel debet respicere effectum aliquem in quo virtualiter contineatur res præterita, & respectu talis effectus respicit per illam determinationem effectum illum vt præsentem, rem autem in illo contentam, vt præteritam.

Ad fundamentum verò oppositum Resp. quòd per productionem obiecti resultat in specie Angeli determinatio, & applicatio similitudinis talis speciei ad illud obiectum prout existens, & productum, quia sic emanat ab ipsis ideis; & sic applicatio ipsarum specierum resultat ad tale indiuiduum in quantum indiuiduum præsens est, & producit, seu à diuinis ideis descendit vt pertinet ad hoc vniuersum, quia illa determinatio fit intuitu, & ratione productionis rei, & secundum assimilationem actualem speciei ad ipsam rem. Quare ipsa re transiente, & desistente esse, definit talis assimilatio, & determinatio speciei erga tale indiuiduum, aut indiuidui erga talem speciem, siquidem talis determinatio, & applicatio est ad res illas, prout sunt in vniuerso, & prout producantur, & emanant ab ideis diuinis: sic enim etiam effluunt in mentem Angelicam, eique repræsentant quidquid effluit à Deo prout effluit, & prout ab ideis descendit: & quia specifica natura semper, & perpetuò deriuatur à Deo, siue in hoc indiuiduo siue in alio, semper remanet in Angelo species repræsentatiua specificæ natu

naturæ; quia verò individua non manent, nec semper effluunt à Deo, non manet etiam ex derinatione Dei determinatio, & applicatio ad istud individuum repræsentandum in se. Vnde oportet recurrere ad aliquid quod maneat de facto, & in cuius virtute contineatur res præterita, scil. vel quia manet aliquis eius effectus, vel quia in specie manet aliqua eius memoria, memoria autem est de re prius cognita. Quod si nec fuit prius cognita ut in memoria remaneret, nec effectum sui reliquit, omnino nullum principium manet in Angelo vnde tale individuum cognoscat.

32 Et si inquiras: Quid additur illi speciei per hoc quod Angelus usus fuerit illa ad hoc ut dicatur posse per illam cognoscere rem præteritam, non autem per speciem qua non est usus, ut per istam non possit cognoscere tale individuum?

Respon. addi quod species illa possit fungi vice memoriæ, quatenus per cognitionem in qua usus fuit tali specie, manet species determinata, non solum ad repræsentandum obiectum in se, sed ad repræsentandum obiectum fuisse cognitum; hæc autem est conditio rei pertinentis ad memoriam ut recordetur obiecti tamquam antea cogniti; & sic quia Angelus tam per suam naturam, qua cognoscit suas potentias, & actus, quam per species quibus usus fuit ad talem actum eliciendum manet determinatus ad repræsentandum actum quem elicit determinatè, & in illo repræsentata fuit non solum natura, sed etiam tale eius individuum; idè recordando actum illum, seu rem illam ut taliter cognitam, recordari potest, & cognoscere illud individuum quod præterit, & cognovit.

33 Instabis: sicut præterit individuum, ita præterit actus ipse cognitionis: ergo si propterea non potest immediatè repræsentare illa species individuum, quia iam transiit; & sic derivatio illius à Deo iam non est præsens, similiter neque actus ipse cognitionis præteritæ repræsentabitur, quia iam præsens non est, nec derivatur à Deo.

Respon. actum ipsum non cognosci in se, sed in suo effectu quem reliquit, videlicet in ipsa potentia, & specie qua usus fuit ad talem cognitionem; & sic manent cum aliqua determinatione erga talem actum præteritum, quatenus aliquis modus seu ordo relinquitur, seu repræsentatio actus ad quem talis species concurrat; sicut nostræ species manent in memoria repræsentantes non solum rem ad extra, sed etiam quod fuerit cognita; atque adeò & actum ipsum cognoscendi, quatenus species ad illum determinata, & ordinata manet aliquo modo seu ordine superaddito, quia realiter talem actum elicit; & sic potest manere aliqua determinatio, & ordo erga illum, seu repræsentatio illius ut cognitæ.

Ad id quod Vasquez affert ex Patribus quod solum negant Angelis cognitionem futurorum non præteritorum, iam ex loco allegato Scripturæ, & D. Hieronymi, oppositum manifestè constat.

34 Quoad tertium scil. de ratione D. Th. qua probat futura ista contingentia ab Angelo naturaliter non cognosci, constat efficacem esse, licet Vasquez *disp.* 208. *cit. c. 2.* teneat ratione philosophica, & à priori veritatem hanc monstrari non posse. Est tamen efficax ratio S. Thomæ, quia procedit ex propriis, & per se in hac materia: Angelus enim non potest cognoscere hæc futura nisi vel in seipsis, id est ut extracta à causis, & existentia actu, vel ut in causis, & in potentia, non in actu in se. Primo modo non possunt cognosci ab Angelo nisi cognoscat, ipsam mensuram, seu durationem in qua actu po-

nentur illa futura, ita quod illa mensura sit præsens sibi, & actu existens: nam si illa sit etiam in potentia, & intra causas, non poterit videri, & cognosci in se, sed prout in potentia, & consequenter neque in illa contentum, & mensuratum videbitur nisi in potentia & in causa. Solum autem est duplex mensura durationis, alia propria ipsius rei futuræ, scil. illa pars temporis, in qua produceretur futurum in se passivè, alia inadæquata, & superior quæ continet, & ambit illam, & totum tempus indivisibiliter amplectitur, scil. æternitas, quæ est principium, & causa totius temporis. Hanc mensuram æternitatis Angelus non videt, quia est ipse Deus; & sic neque futura in illa intuetur in seipsis. Primam mensuram, scil. tempus videt Angelus, sed nondum illam partem successuram videt in se actu, sed in potentia, quia successura est ex partibus temporis quæ nunc fluunt actu, & in istis solum continetur in potentia, & in causis à quibus ille motus, & tempus proveniunt: non ergo videt illam mensuram temporis futuri in se actu: ergo neque mensuratum, & contentum in illo. Restat ergo quod Angelus solum potest videre futura prout continentur in suis causis proximis, & creatis, à quibus suo tempore procedunt. Istæ autem causæ solum indifferenter continent illud futurum, & indeterminatè, & contingenter, quia modo contingenti illud producturæ sunt: ergo intellectus respiciens ad tales causas non potest ex vi illarum determinationem futuri contingentis elicere.

35 Sed dicit Vasquez non concludere hanc rationem, quia non obstante quod causa ipsa sit indifferens, & determinata, tamen altera pars contradictoria in ipsis futuris determinatè est vera, & altera falsa: ergo utraque est scibilis determinatè, & sicut à Deo scitur, cur non ab Angelo, cum sit res ordinis naturalis? Igitur cum illa veritas determinata sit etiam comparata cum sua causa, poterit in illa ab Angelo determinatè cognosci. Et dato quod non possit proprio, & quidditativo conceptu futurum in se cognosci, vnde probatur quod nec etiam alieno, & connotativo? Quod si per species infusas à Deo cognoscit Angelus, non apparet, cur etiam non habeat proprium, & quidditativum conceptum de tali futuro?

36 Cæterum hæc responsio iam *suprà* à nobis allata est, & *locis ibi citatis*. In summa dicimus quod vis contradictionis non determinat veritatem aut falsitatem suarum partium: veritas enim sequitur ad entitatem, cum sit passio illius, & inde accipit determinationem, sicut & entitas ipsa quæ directè cognoscitur. Nec lex contradictionis petit aut facit talem determinationem, sed solum quod si una pars est vera, altera sit falsa, non quod ista, vel illa vera sit determinatè. Ridiculum enim est dicere quod ista propositio; Petrus cras ambulabit, ex eo quod illi apponam contradictoriam (quod omnino per accidens est) reddatur cerra, & determinata. Quare hæc determinatio veritatis in futuris non oritur ex vi contradictionis, nec ex natura ipsius futuri contingentis in se, quia ex natura sua est cōtingens, & indeterminatum, quomodo ergo ex eadem natura oritur quod sit determinata veritas, & contingens hoc est indeterminata? Et eodem modo ex causis creatis, & proximis habet contingentiam, & determinationem, quia causæ contingentes sunt. Quomodo ergo ex illis habere potest simul determinationem, & certitudinem? Restat ergo quod si determinationem, & certitudinem habet, est ex ordine ad decretum diuinum, quo Deus id determinat. Sed Angelus non potest naturaliter hanc causam videre, neque naturam futuri per ordinem

ordinem ad causam diuinam, sed per ordinem ad causas creatas, vel ex propriis sue quidditatis terminis, & in neutro inuenit determinatam certitudinem, siquidem inuenit contingentiam.

Soluuntur difficultates à principio.

37 Ex dictis ferè omnes solutæ sunt. Ad id quod proposuimus in initio dubitationis ante expositionem sententiarum, facile Respon. dicimus enim ab initio fuisse infusas Angelis species rerum, sed non æquè determinatas, & applicatas ab omnia indiuidua, sed dependenter ab eorum successione, & deriuatione à diuinis ideis, vt dictum est. Quare repræsentant naturas prout descendunt à Deo in talibus vel talibus indiuiduis, causis, & circumstantiis, & ita illa indiuidua quæ producuntur actu, repræsentant actu, quia repræsentant quæ descendunt à Deo prout descendunt. Quæ verò nondum producuntur actu, non repræsentant actu, sed prout in aliqua causa, vel causis de facto continentur, quia causæ illæ præsententur, in seipsis autem repræsentantur quando præsententur erunt, & existentes fient, quia sic repræsentantur sicut ab ideis descendunt, & ita quando descendunt illa indiuidua à Deo, etiam in mentem Angeli effluit à Deo non noua species, & repræsentatio noui obiecti, sed eiusdem noua applicatio, & determinatio ad hoc indiuiduum, eo quod antè repræsentabatur quidditas seu natura, ipsaque existentia, duratio, & reliquæ circumstantiæ per modum quidditatis, & in abstracto, copulantur verò & repræsentantur vt applicata, & exercitè determinata ad hoc indiuiduum, quando illud producit ab ideis diuinis, & non antè, quia species illæ in Angelo non repræsentant res nisi prout descendunt ab ideis, & eo modo, & ordine quo descendunt. Vnde licet non sit noua infusio speciei, est tamen noua variatio quatenus diuersimodè applicantur natura, & principia indiuiduantia, ceteraque repræsentata antè, quasi in abstracto, & quidditatiuè, modò repræsentantur vt applicata in actu exercitè, quia sic modò fiunt à Deo, & non antè, & species illæ repræsentant res vt fiunt, & descendunt ab ideis. Et sic non repræsentant indiuidua absolutè, & independentè ab omni successione, sed repræsentant principia indiuiduantia, & naturas rerum cum dependentia ab ideis diuinis, prout ab ipsis emanauerint, emanant autem successiue; & sic successiue fit determinatio, & applicatio in speciebus, vt illa indiuidua repræsentent in exercitè existentia. Et quando instatur, quia veritas illorum futurorum est creata: ergo alicui lumini creato manifesta; distinguo anteced. Est creata, & indeterminata, seu contingens in se, & in causis proximis, & nondum producta determinatè in actum, concedo; est determinata in causis creatis, vel in se, nego. Ergo potest manifestari lumini creato, vt determinata, & certa, vel in seipsa, nego; vt contingens, & indeterminata, transeat; quia hoc esset excedere propriam rationem talis futuri, & talis veritatis, vt ad causas creatas pertinet, & oporteret inquirere determinationem eius in causa diuina, seu decreto Dei determinante. Sed hoc naturaliter imperuium est Angelo, & cuilibet lumini creato.

38 Ad ea quæ obiecta sunt contra primam sententiam.

Ad primum Respon. quòd illa variatio intrinseca in specie non est essentialis, seu formalis, sed

modalis, seu determinatio quædam virtualiter, & implicite contenta in illa specie ex vi suæ primæ infusionis, nunc autem de nouo explicata ex vi eiusdem infusionis ad positionem obiecti singularis. Vocamus variationem essentialē, seu formalem in specie, quæ fit circa principale, & formale obiectum, eiusque motuum, quod est ipsa natura specifica, seu res noua, quæ antè, nec in abstracto, nec in exercitè, nec implicite, nec explicite repræsentata erat; hoc enim est quasi primum repræsentatum in specie, & non potest ex alio priori oriri. Variatio autem modalis, seu determinatio materialis consistit in applicatione aliqua eorum quæ repræsentantur quasi in abstracto, & quidditatiuè, & modò determinatè applicantur in exercitè hinc, & nunc posita aliqua conditione, quæ antè non ponebatur. Et hæc variatio licet intrinseca sit, id est intra speciem ipsam facta, non tamen corrumpit, & variat intrinsecè speciem, quia hoc ipsum petit species, & accipit virtualiter ex vi prioris infusionis: & suæ formalis repræsentationis, quod repræsentet rem, non quomodocumque, sed cum omnibus ad talem naturam pertinentibus, non absolutè, & independentè ab alio, sed prout descendunt ab ideis diuinis. Et quia successiue descendunt singularia; idè ex ipsa vi sua habet vt nascatur noua determinatio, & applicatio ad hoc indiuiduum, quando de nouo illud producit à Deo, sicut grane ex vi suæ generationis accipit vt quoties remouetur impedimentum moueatur motu sibi intrinseco, & reali. Vnde hoc tantum abest quòd corrumpat repræsentationem speciei, quòd potius id exigit ex sua natura, & in id prorumpit: oritur enim ex vi prioris repræsentationis tali modo exemplatæ ab ideis diuinis, vnde in vi prioris infusionis fit ab ipsis ideis hæc determinatio, & explicatio speciei intrinseco modo, sine corruptione ipsius, quia potius ab ipsa specie emanat ex infusione idearum, tanquam quid explicatum ex virtualiter implicito: sicut enim nos ex collatione plurium specierum vnā formamus, ita Angelus in vna simplici specie habet virtualiter, & implicite plura, quæ successiue explicantur.

Ad secundum dicitur quòd illa variatio non fit ab obiecto efficienter, licet positio obiecti requiratur vt conditio: sed fit efficienter à Deo, & ab ipsis ideis diuinis tanquam debitum ex vi primæ infusionis, quæ hoc ipso quod producit aliquod singulare in vniuerso producit illud in mente Angeli, licet non speciem nouam infundendo, sicut infunderet si nouam aliquam speciem crearet. Itaque infusio speciei solū fit propter repræsentationem alicuius naturæ, quæ de nouo fit à Deo, quia species Angelicæ directè repræsentant naturas, quia secundum vniuersalitatem repræsentant. At verò propter repræsentationem noui singularis nom exigitur noua species, sed determinatio seu modificatio aliqua speciei præexistentis. Quia enim species in mente Angeli sunt quædam similitudines exemplatæ, & sigillatæ ab ideis diuinis, repræsentant res vt descendunt ab ideis. Et quia descendunt primò in aliquibus singularibus, in quibus primò creantur species: deinde succedunt alia singularia; idè ex vi prioris infusionis sic repræsentant naturas in illis primis indiuiduis, quòd petunt repræsentari easdem in indiuiduis succedentibus. Vnde ex vi prioris infusionis repræsentantis res vt descendunt, & conseruantur à Deo, consequitur quod productis nouis

uis indiuiduis in quibus natura illa conseruatur à Deo, illa repræsententur ut id in quo exercitè, & applicatè existit talis natura. Et sic talis variatio est effectiue ab ideis diuinis antecedenter ad concursum, quem dat Angelo ad cognoscendum, & utendum illis speciebus, sed talis effectio debetur, & consequitur ex vi prioris infusionis, quæ infusa est species sigillata ab ideis diuinis, ut repræsentaret naturas quæ ab eis descendunt iuxta modum quo descendunt, & sunt in hoc vniuerso, scilicet cum successione indiuiduorum.

40 Est tamen adhuc contra hoc instantia difficilis, quia sequitur ex hoc quod cum Angeli fuerint creati in ipso initio temporis quando creatum est cælum, & terra, & tunc adhuc non producebantur aliæ species creaturarum, quæ per sex dies creatæ sunt à Deo, consequenter in primo suo instanti non acceperunt Angeli omnium istarum rerum species, sed successiue productæ fuerunt cum productione ipsa rerum, quia sic effluebant ab ideis diuinis: ergo in primo instanti creationis non sunt producti Angeli pleni sapientia, contra id quod Scriptura dicit, & *suprà* ostendimus. Et sequela patet, quia replebantur sequentibus diebus illis speciebus rerum, quæ à Deo creabantur: ergo non fuerunt in primo instanti pleni sapientia, usque ad septimum diem quo Deus requieuit ab omni opere suo. Tunc autem iam Angelus lapsus erat, præsertim si est verum quod hominem tentauit sexto die, vel paulò post. Quando autem Angelus est lapsus, omnem suam scientiam habebat.

Respond. in sententia D. August. qui tenuit illos sex dies non fuisse naturales, & temporibus discretos, sed vnum diem diuersis operibus distinctum, argumentum non procedere, quia tunc simul factæ sunt creaturæ in se, & in mente Angeli, de qua sententia videri potest S. Thomas, *infra* quæst. 74. artic. 2. nec enim illi audeat præiudicare, sed probabilem reputat. Et tamen adhuc in sententia August. currit eadem difficultas quoad plantas, & animalia, quæ ipse sentit non fuisse in actu in primo temporis initio, sed solum virtualiter, postea autem fuerunt facta in actu, ut *ibidem* S. Thom. notat. Quare dicendum est quod in illo primo instanti creationis receperunt Angeli species totius vniuersi eo modo, & ordine quo procedebat à Deo, loquendo secundum naturalem modum suæ cognitionis; & sic intelligitur accepisse omnes species ab initio suæ creationis, iuxta modum quo res fiebant à Deo; & sic ita cognoscebant opera facta primo die, scilicet cælum, & terram, quod in eis videbant cætera, quæ in talibus causis continentur virtualiter, & nondum in actu, quo usque à Deo creabantur. Et sic etiam creati sunt pleni sapientia in ordine naturali iuxta modum quo res ipsæ naturales, & totum vniuersum procedit à Deo. Cæterum secundum supernaturalem cognitionem, scilicet cognitionem fidei dum durauit via, etiam secundum peculiare illuminationes, & visionem gloriæ, dum successit beatitudo, sic cognouerunt omnia etiam in actu, quia circa omnia aliquid operabatur fides, quæ creatorum omnium credebat Deum, & circa hominem plura cognouerunt per fidem, & in Verbo postea, Angeli sancti, & tamen homo factus est die sexto. Secundum hoc ergo pleni sapientia creati sunt, etiam in actu, supplente fide aliisque peculiaribus illuminationibus, multa quæ nondum secundum naturales species poterant cognoscere, quia nondum erant in actu, sed successiue fiebant.

Ad ea quæ contra secundam sententiam obiecta sunt.

Ad primum dicitur quod cum D. Thom. dicit 41 res non existentes non habere naturam, per quam assimilantur speciebus Angelicis, non loqui de sola similitudine relatiua, quæ fundatur in conuenientia extremorum, sed de assimilatione completa, & determinatiua specierum ad ista indiuidua, quatenus ex transmutatione singularium prouenit, quod istæ species aliquando assimilantur ipsis, aliquando non, ut dicit idem S. Thom. *quæst. 16. de malo art. 7. ad 9.* Igitur assimilatio illa qua res assimilantur speciebus in mente Angeli est assimilatio non solum ex parte rerum se tenens, sed in speciebus ipsis resultans per nouam determinationem, seu applicationem ex ideis diuinis proueniens, quæ positis obiectis, & productis resultat intentionalis assimilatio applicata istis indiuiduis hâc & nunc. Dicitur tamen ex parte obiecti inæqualitas ista assimilationis se tenere, quia ex eorum mutatione tanquam ex conditione requisita aut termino prouenit, quod in speciebus Angelicis immutetur illa determinatio, & completa assimilatio ad indiuidua producta, & quia in ipsis rebus fit substantialis mutatio dum producuntur in esse, vel desinunt, in speciebus autem non, sed solum modalis aliqua applicatio, seu explicatio repræsentationis præhabita. Ad præterita autem manet determinatio in specie, supposita cognitione illius per modum memoriæ repræsentantis rem ut cognitam sicut dictam est. Quomodo verò supernaturaliter repræsentari possint futura, iam explicatum est.

Ad secundum contra istam sententiam Respond. aliquam mutationem dari in speciebus, quando res de nouo producantur, non essentialem, & formalem, sed modalem, & applicatiuam, ut declaratum est, quæ etiam dici potest explicata, & in actu, cum antea esset virtualiter, & in potentia. Neque contra hoc currunt difficultates allatæ contra primam sententiam, quibus abundè satisfactum est, & ostensum quod hæc variatio non corrumpit speciem illam, sed perficit, & extendit, seu magis explicat, quia id petit ex natura sua, hoc ipso quod repræsentat naturas eo modo, & ratione qua procedunt in hoc vniuerso ab ideis diuinis.

Ad rationes contra tertiam sententiam non oportet respondere. Nam in quantum probant debere dari variationem specierum in sui repræsentatione essentiali, & formali, non probant, modalem verò, & completiuam admittimus ex ideis diuinis proueniens, modo explicato. Et sic non oportet immorari.

ARTICVLVS III.

Qua ratione Angelus non cognoscat naturaliter cogitationes cordis?

Cogitationes cordis, & secreta cordis idem sunt, & dicuntur talia quæcumque ex libero voluntatis usu proueniunt intra potentias interiores, quæ libertatem participant, & nullo effectu exteriori extra illas produuntur, & exeunt. Itaque ea omnia quæ sub dominiū cadunt voluntatis, vel per elicientiam in ipsa voluntate, vel per directionem eius in intellectu, vel per imperium eius in ipsa voluntate, & intellectu, & appetitu, aut in quacunque potentia capaci libertatis, & indifferentiæ, dicuntur

dicuntur secreta cordis, quandiu in effectu, vel signo aliquo externo, seu extra illas potentias posito non manifestatur, eo quod hæc sunt propria hominis in quantum homo, id est ut libero & humano modo operans; & sic dicuntur à solo homine cognosci, iuxta illud 1. ad Corinth. 2. *Quæ sunt hominis nemo novit, nisi spiritus hominis qui in ipso est.* Et nomine effectus, vel signi manifestantis secreta cordis non solum intelligimus, quæ externis membris fiunt, sed etiam quæ internis corporis mutationibus quas Angeli, licet nobis occultas perspicacius vident. Et ita notavit S. Thom. hic 9. 57. art. 4. quod cogitatio cordis cognoscitur non solum per actum exteriorem, sed per etiam immutationem vultus, & multo magis Angeli & Demones, quanto subtilius huiusmodi immutationes, occultas corporales perpendunt. Loquimur ergo in præsentia non de cogitationibus & secretis cordis, quatenus aliquo signo vel effectu siue interiori, siue exteriori produntur, sed quatenus clausa manent intra potentiam liberè operantem.

2 De his ergo cogitationibus liberis consideratis in se, & non in effectu, vel signo manifestatis, certum est à solo Deo cognosci de facto. Hæc assertio sicut iacet est de fide, aut proximè de fide, & in hoc male audit Durandus qui in 2. dist. 8. q. 5. n. 10. sensit cogitationes & affectus cordis vnius Angeli posse ab alio cognosci non solum quid sint, sed circa quid sint? Sed nostra assertio constat manifestissimis Scripturæ testimoniis. Dicitur enim 2. Paralipom. 6. *Tu solus nosti corda aliorum hominum.* Nec dici potest cum Durando loqui Scripturam de cogitationibus tam præsentibus quam futuris: sic enim solum est proprium Dei eas cognoscere. Contra hoc enim est, tum quia hoc non solum de cogitationibus cordis, sed de quibuscumque effectibus liberis, seu contingentibus dici potest, unde nihil speciale diceretur de cordium secretis: tum quia expressè loquitur Scriptura de cogitationibus cordis præsentibus dicit enim: *Propitiare, & redde unicuique secundum vias suas, quas nosti eum habere in corde suo: tu enim solus nosti corda filiorum hominum.* Et eodem modo 3. Reg. 8. *Ut des unicuique secundum omnes vias suas, sicut videris cor eius, quia tu nosti solus cor omnium filiorum hominum.* Vbi apertè loquitur Scriptura de cognitione eorum, quæ aliquis de facto habet in corde, non de futuris cogitationibus, sed sicut videris, inquit, cor eius, vel quas nosti eum habere in corde suo. Non dicit habiturum, sed habere: ergo loquitur de cogitationibus præsentibus, non futuris. Et rationem reddit, quia tu, inquit, solus nosti corda filiorum hominum; ergo etiam præsentia secreta cordis solus Deus novit, & tanquam quoddam Diuinitatis insigne, & proprietates eius ponitur perpetuè in Scriptura.

3 Unde roboratur & confirmatur hoc ex aliis locis, ubi tanquam proprium Dei significatur scrutari corda, & scire ac videre cogitationes, ut Ierem. 17. *Præsumptum est cor omne & inscrutabile; quis cognoscet illud? Ego Dominus scrutans cor, & probans renes, qui do unicuique iuxta viam suam.* Et Psal. 7. *scrutans corda & renes Deus.* Sapient. 1. *Quoniam renum illius testis est Deus, & cordis illius scrutator est verus.* Inde Paulus 1. ad Corinth. 14. ex manifestatione cogitationum cordis ostendit prophetiam esse à Deo, & Deum esse qui illa manifestat; *Occulta, inquit, cordis eius manifesta fiunt, & ita cadens in faciem adorabit Deum, pronuntians, quod verè Deus in vobis sit.* Inde Evangelistæ inter mirabilia quæ Domini Iesu diuinitatem ostendebant, ponunt cognitionem secretorum

Ioan. à S. Thom. in 1. part. D. Th. Tomus alter.

cordis, sicut Ioannis 2. *Ipsæ autem Iesus non credebatur seipsum eis, eo quod ipse nosset omnes, & quia opus non erat ei, ut quis testimonium perhiberet de homine: ipse enim sciebat quid esset in homine.* Matth. 9. *Cum vidisset Iesus cogitationes eorum.* Marc. 2. *Cognito Iesu spiritu suo, quia sic cogitarent, Luc. 24. Quid turbati estis & cogitationes ascendunt in corda vestra.* Ergo dicendum est, quod cognitio istorum secretorum soli Deo convenit. Et ita communiter Patres docent, ex quibus videri potest Athanasius in libro questionum ad An- tiochum 9. 27. Chrysost. homil. 30. in Matth. Hieronymus in cap. 9. *Matth. ad illa verba; Sciens Iesus cogitationes eorum, & epistola 40.* Cyrillus lib. 2. in Ioan. cap. 19. & lib. 3. cap. 3. & alij plures, quos sequuntur communiter Theologi Scholastici.

4 Quod verò aliqui respondent, ex his testimoniis non probari, quod Angelis istæ cogitationes sint ignotæ quoad substantiam, sed solum quoad aliquem modum; quem variè explicant. Alij modum dicunt, intentionem ipsam qua aliquis operatur ad intra: alij, quod se habeat per modum assensus vel dissensus, complacentiæ, vel displicentiæ; alij modum istum dicunt terminationem ad obiectum particulare & individuum. Ceterum hæc omnia futilia sunt, tum quia ista quæ appellantur modi, in rei veritate ad ipsam substantiam actus pertinent, quia ad eorum substantiam pertinet sic vel sic tangere obiectum; tum quia ipsa intentio, qua aliquis operatur si occulta est, idè est, quia & libera, & modi isti idè est occulti sunt, quia liberi: ergo eadem ratione ipsa substantia actus, ut subest libertati, & prout liberè sit, occulta erit: tum denique quia Scriptura absolutè pronūciat ista secreta cordis occulta esse & soli Deo patere, sed substantia actus liberi etiam intra cor est: ergo sine aliquo fundamento excipimus substantiam actus liberi, & dicimus solum aliquem modum esse occultum.

Examinatur ratio incognoscibilitatis in his secretis.

5 Difficillimum semper visum est reddere propriam & efficacem rationem huius secreti, quare cogitationes cordis sint incognoscibiles omni intellectui creato sine consensu aut manifestatione cogitantis. Cuius difficultatis vis ex eo confurgit, quia istæ cogitationes neque quantum ad id quod habent de naturali entitate (quia supernaturales modò omittimus) neque quantum ad id quod habent de libertate & moralitate occultæ sunt, quia hoc etiam aliquid creatum est, & ordinis naturalis, & per hoc solum quod ipsa voluntas consentiat, manifestabile est alteri; constat autem quod solam voluntatem consentire, nihil in illa cognoscibilitate cogitationis aut diminuit, aut addit, magisve proportionatam & aptam reddit alterius intellectui, cum nihil efficiat nisi puram denominationem extrinsecam. Ergo tota illa entitas & libertas cogitationis ante manifestationem cogitantis, cognoscibilis erat tanquam quid creatum, & habens cognoscibilitatem finitam & limitatam. Ergo aliquis intellectus, & aliquod lumen creatum est cui tale obiectum proportionatum sit, etiam prout intra cor alterius est: mirum enim esset quod aliquod creatum intelligibile non supernaturale, nec ordinis diuini, nullum intellectum creatum habeat cui proportionatum, & debitum sit, atque ad id quod possit illud cognoscere. Quod si alicui intellectui creabili patere potest, cur non Angelico? Ex qua ergo parte, aut ex cuius principij defectu cogitatio est occulta omni alij præter ipsam cogitantem.

T c Propter

6 Propter hoc diuisi sunt Authores, in huiusmodi ratione reddenda. Quorum sententiæ quæ variæ & multæ sunt, ad tres præcipuas classes redigi possunt. Prima sententia negat huiusmodi secreta cordis esse penetrabilia Angelo ex defectu concursus Diuini, quia Deus statuit non concurrere cum Angelo ad cognoscendum cogitationes cordis alterius sine ipsius voluntate, licet ex natura rei non repugnaret Angelum cognoscere illa. Ita attribuitur Scoto in 2. dist. 9. q. 2. §. *Ad argumenta 2. quæst. & in 4. dist. 10. q. 8. ad argum. in solut. 3.* Attribuitur etiam Ocham, Gabrieli, Bassoli, Liquero, & aliis, quos citat Vasq. hic dist. 209. c. 2. & Suarez lib. 2. de Angelis cap. 23.

7 Secunda sententia negat ista secreta cordis esse cognoscibilia ab Angelo, ex defectu speciei representantis illa: carent enim tali specie. Ideo autem dicunt carere, quia talis cogitatio non est res naturalis, sed libera & moralis, super quam creatura rationalis habet plenum dominium & ius, ne alteri dentur species representantes talia secreta, nisi ipsa velit. Ita P. Suarez citato loco cap. 24. Arrub. dist. 169 c. 2. & alij.

8 Tertia sententia docet talia secreta non penetrari ab Angelo, quia carent cognoscibilitate proportionata ipsi, eo quod motus voluntatis à nulla causa creata vel naturali pendet, nisi tantum ab ipso eliciente, & à Deo. Quæ sententia est D. Thom. ubi cumque agit de hac re, ut in hac q. 57. art. 4. & q. 8. de verit. art. 13. & q. 16. de malo art. 8. & communiter sequuntur eius discipuli, Caietan. ibidem Capreol. in 2. distinct. 8. quæst. 1. art. 1. Ferrar. 3. contra Gentil. cap. 154. §. Circa id quod de occultis cordium. Bannez, Nazar. Zumel. super hanc quæst. 57. citatam, Carmelit. Salinart. tract. de Angel. dist. 7. dub. 5.

Alij alias afferunt causas, scilicet ex profunditate, distantia, vel indifferentia voluntatis. Quæ omnia quibuscumque nominibus significantur ad hoc tandem reducuntur, quia secreta illa moralia sunt, & libera; & ideo naturali cognitione non cognoscuntur.

Postremo P. Vasquez hic dist. 209. cap. ultimo, post prolixam disputationem, tandem resoluit, nullam huius rei causam & efficacem rationem posse inueniri ex Philosophia, sed tantum nobis constare ex Scriptura; & sic præsentī difficultati succumbit.

9 Prima sententia omnino reiicienda est, quia si solum ista secreta cordis non cognoscuntur ab Angelo, quia Deus denegat concursum, vel ille concursus debitus est & connaturalis Angelo, vel non, si non est debitus, non bene redditur ratio quod non cognoscantur, quia Deus denegat concursum, sed debet reddi ratio, quare sit indebitus. Si vero debitus est: ergo non est solius Dei proprium cognoscere ista secreta, ut ex Scriptura ostendimus, sed proprium erit etiam alicuius creaturæ, licet de facto non cognoscat ex impedimento appposito denegationis concursus. Nec erit connaturale, & ex propriis naturis rerum, sed violentum, quod ista secreta non cognoscantur, videlicet ex perpetua denegatione concursus debiti. Præter quam quod est magnū inconueniens. Deum alicui naturæ tribuere inclinationem & exigentiam ad aliquam formam, vel effectum, & perpetuò denegare concursum ad talem effectum, non solum in pœnam, sed etiam nulla præcedente culpa, quia non solum Dæmonibus, sed etiam Angelis sanctis inter se, & respectu hominum denegatur cognitio istorum secretorum. Quod inconueniens denegandi perpetuò alicui creaturæ concursum ad aliquid sibi

debitum, & cuius habet naturalem exigentiam, manifestè D. August. excludit, cum inquit lib. 5. contra Iulianum cap. 14. *Nec Deus ita naturas creat, ut leges auferat, quas dedit motibus cuiusque creaturæ, & 7. de Trinit. cap. 30. Sic Deus administrat cuncta quæ creauit, ut etiam ipsa proprios exercere & agere motus sinat.* Denique hæc sententia non explicat authoritatem Scripturæ, & PP. in proprio sensu, nec sufficienter probaretur Diuinitas ex eo, quod aliquis propria vi est cognitor secretorum cordis, quando præsentia sunt (nam de futuris cogitationibus etiam ipse cogitans ignorat) posset enim aliquis dicere, illum qui cognoscit secreta cordis, non esse Deum, sed spiritum creatum, cui non est denegatus concursus debitus ad cognoscendum talia secreta, siquidem ex natura rei potest illa cognoscere si concursus non denegetur. Vnde quando dicitur Hierem. 17. *Prauum est cor omnium & inscrutabile, quis cognoscet illud?* posset planè responderi, quod quilibet Angelus cognoscet, si debitus concursus non denegetur: sicut non esset mirabile, si quæteretur quis intelligit cælum & terram? nempe Angelus, si non denegetur concursus: & quis comburet stupam? nempe ignis, si non denegetur concursus: frustra ergo Scriptura talem responsionem daret attribuens soli Deo scrutiny cordis. Vnde etiam Christus non sufficienter probaret suam diuinitatem ex eo, quod cognoscebat cogitationes aliorum: posset enim etiam Diabolus cognoscere, si concursus debitus ei non denegaretur.

Circa secundam verò sententiam solum notandum est eam non plenè reddere rationem propositæ difficultatis, sed in hoc manere diminutam: reddit enim rationem, quare Angelo non infundantur species representatiuæ secreti cordis alterius, quia alter habet ius ne illi infundantur propter dominium, quod habet super tales cogitationes.

Hoc autem est de quo quærimus, quare dominium quod habet creatura rationalis supra suum actum interiorem, exigat quod Deus non infundat species illius alteri Angelo, ita quod illi debita non sint, si alias ex natura sua sunt cognoscibiles. Oportet ergo prius probare, quod dominium reddat incognoscibilem illum actum. Nam etiam creaturæ rationales habent dominium actuum exteriorum, quos liberè eliciunt: habent etiam dominium ipsarum potentiarum interiorum, v. g. ipsius intellectus, & voluntatis, & appetitus, & potentiæ motiuæ; & tamen de omnibus istis habet species alter Angelus, eosque cognoscit: ergo hoc quod est habere dominium super actus inferiores, nisi aliquid amplius addatur, non probat alteri Angelo non deberi species representatiuas talium actuum. Si dicatur actus externos, etiam si liberè fiant, & cum dominio voluntatis, tamen hoc ipso quod externè produntur, manifestos esse, & eorum species Angelo deberi; & similiter species potentiarum, quia hoc ipso quod debetur species naturæ, seu essentiæ alterius Angeli, debetur etiam species potentiarum eius, quæ sunt proprietates illius, quia naturaliter conueniunt naturæ: actus autem liberi non conueniunt nisi liberè, & contingenter. Contra hoc est, quia actum esse externum vel internum præter dominium voluntatis in illum, qui addit, aut quid ponit, ut vnus reddatur connaturaliter intelligibilis Angelo, scilicet actus externus, alter verò non, scilicet internus? Nam hoc quod est esse externum, vel internum, non dicit aliquid speciale: hoc enim est quod quærimus

rimus, quid sit illud, & qua ratione ille qui est internus ex eo præcisè quod internus, non sit intelligibilis connaturaliter ab Angelo? Et similiter inquirimus quare potentia, quia naturaliter emanant sint cognoscibiles naturaliter ab Angelo, non autem actus, quia liberè sunt? Hoc enim totum est reducere differentiam ad hoc quod unum est ens necessarium, & alterum liberum. Vnde cum inquiramus causam propter quam species liberorum actuum, non sint debita Angelo, bene tamen entium naturalium, si reddimus pro causa, quia hoc est necessarium, illud verò liberum, manifestè petitur principium, & diminutè proceditur. Et ad idem reducitur aliquorum ratio, qui dicunt idè esse incognita secreta cordis, quia in republica necessarium est secretum naturale, & potest etiam unus alterum decipere & mendacium loqui, quod stare non potest secreta omnia cordis de se manifesta sunt alteri Angelo: Hæc enim non est ratio, quare illæ cogitationes ex natura sua notæ non sint, sed inconueniens extrinsecum assignat, si omnibus passim notæ sint, sicut etiam inconueniens magnum sequitur in republica, si id quod unus alteri loquitur in secreto, prodatur omnibus, præsertim in re magni momenti, & tamen hoc ipso quod quis alteri manifestat, res illa de se manet cognoscibilis, saltem Angelo. Ergo rem istam reducere ad sola inconuenientia illa extrinseca non ostendit efficaciter hanc occultationem secretorum cordis ex se, ita quod soli Deo sit notum, sed solum ostendit non ita facilè gubernari rem publicam, si cordis secreta nota essent, sed tamen alio modo tunc gubernaretur, & alio modo procurari posset secretum, si esset necessarium, scilicet modo aliquo artificioso occultante, sicut modò etiam postquam quis alteri loquitur, aut scripto manifestat suum secretum, procuratur occultatio illius artificiosè, puta tali modo loquendo aut scripta mittendo.

11 Omitto id quod in hac sententia deuorandum est, nempe si Angelus caret specie representante secretum cordis alterius, quoties illud cognoscit ex alterius consensu, & manifestatione, debere Angelo infundi speciem representationis illius. Non facio in hoc multam vim: potest enim dici quod non infunditur species de nouo, sed determinatur vel applicatur ad hoc secretum cognoscendum, quoties illud manifestatur, quia tunc quasi de nouo producit in quantum redditur præsens respectu huius, & ad ipsum pertinens, sicut diximus de futuris quando de nouo producantur. Vel fortè si Angeli utantur aliquibus signis in sua locutione, & manifestatione, de quo *infra* *diff. 25.* agendum est, dicere possent hi Authores per species horum signorum præexistentium in mente Angeli, non tamen productorum quousque Angelus suum conceptum manifestat, conceptum cognosci, sicut nos per species vocum significantium, quæ in nobis præexistunt, cognoscimus secreta cordis, quæ alter nobis manifestat. Ut ut est, in hac sententia supponitur, non probatur, speciem secreti cordis ante sui manifestationem esse debitam Angelo, quia alter habet ius ne infundatur. Et de hoc quærimus, quare habet ius? Et solum reducitur ad hoc, quia liber actus est & internus. Hoc ipsum quæritur.

12 Ex quo etiam manet refutata sententia Richardi, qui negat Angelum non posse cognoscere secreta cordis alterius, quia indiget speciebus representantibus illud: istæ enim species non deriuantur à voluntate cogitantis, nisi motu voluntatis eius in quo sunt: ergo nisi ipse velit, non poterit habere species secreti sui. *Ioan. à S. Thom. in 1. part. D. Th. Tomus alter.*

Gregorius autem idè dicit non cognosci secretum alterius ab alio, quia quantumvis sit intimus aut penetratus cum illo, non tamen illi inhæret secretum cordis alterius, quod tamen necesse erat ut ab eo videretur intuituè, & in se, alias si sola intima præsentia sufficeret, posset Angelus intimatus corpori hominis ubi est anima, secretum illius cognoscere. Sed hæc futilia sunt & fundamento carent. Nam in primis Richardus supponit Angelum accipere species à rebus, & sic malè potest explicare quomodo Angelus distans possit loqui alteri, sicut frequenter in Scriptura significatur, ut Zachariæ 2. & Danielis 8. & aliis locis; nec enim species illæ cum spirituales sint, poterunt transire per medium, quod corporale est. Deinde hoc dato quod species singulatum accipiant à rebus, unde probat Richardus, esse in potestate cogitantis impedire quod actus suus non emittat ex se speciem in alium Angelum: licet enim productio illius actus libera sit, & in potestate cogitantis, tamen quod semel productus & existens non emittat speciem, in potestate eius non est, cum emissio specierum naturalis actio sit, ut manifestè apparet in nobis & intellectu agente. Sententia verò Gregorij in eo manifestè deficit, quia ad cognoscendum aliquid intuituè, non est necesse quod inhæreat per seipsum in intellectu alterius, sed per speciem representantem illud in se, ut constat in nobis, cum videmus res ad extra intuituè. Vnde ergo probat Gregorius hanc speciem deesse Angelo, siue distans sit ab altero, siue ei coniunctus: aut unde probat præter speciem requiri etiam quod secretum alterius sit in ipso cognoscente ut attingat illud? sic enim iam esset proprium non alterius, hinc autem loquimur de secreto alterius ut alterius, id est, ut manet in altero, quare cognosci non possit ab Angelo, sicut cognoscantur potentia eius, & natura, & tamen non existunt nisi in altero.

Quare reduci debemus ad tertiam sententiam 13 D. Thom. qui ex propriis probat secretum cordis non esse cognoscibile ab Angelo, non defectu concursus Diuini, non defectu speciei talis secreti, non quia modus non est cognoscibilis ab Angelo, sed sola substantia talis actus, sed quia ex propriis & intimis liberi actus ut emanantis à voluntate & nondum manifestati in aliquo effectu, cognoscibilis non est. Ratio autem, qua id probat S. Thom. talis est: Voluntas rationalis creaturæ soli Deo (præter se) subiaceret, & ipse solus in ea operari potest: ergo ea quæ ex voluntate sola dependent, vel quæ sunt in sola voluntate soli Deo sunt nota. Constat autem quod ex sola voluntate dependet quod aliquis aliquid actu consideret, quia utitur habitu, vel specie intelligibili, cum vult: ergo cogitationes cordis soli Deo sunt cognoscibiles, quia solum ipsi subiaceret, & ei à quo eliciuntur. Hæc ratio difficilis visa est Durando, & aliis, quia multa sunt quæ à solo Deo dependent, & ab eo fiunt & tamen ab Angelo cognoscuntur, sicut substantia animæ rationalis, cælum, & alij Angeli, quæ omnia à solo Deo fiunt, & tamen ab Angelo cognoscuntur: ergo ex hoc quod aliquid à solo Deo dependeat in sua productione, & motu, non inferitur, quod à solo Deo cognoscatur, & non ab alio intellectu creato. Quod si dicatur: propositionem D. Thom. non ianiti illi solum rationi, quod omne quod à solo Deo producit, soli Deo est cognitum, sed addit quod omnis operatio creaturæ, quæ à nulla causa naturali procedit, sed solum à libera, & ab ipso Deo, soli Deo, & ipsi operanti est cognita. Contra hoc instatur, Tr 2 quia

quia tunc petitur principium, & supponitur id quod est probandum, scilicet quod operatio egrediens à causa libera, & à Deo, soli Deo est nota: hoc enim est quod querimus, quare operatio dependens à sola causa libera, alteri non possit esse nota? Nec defenditur ratio S. D. qui idem probat operationem liberam soli Deo esse notam, quia à solo Deo dependet, non quia etiam dependeat à causa libera: tunc enim & peteretur principium, & instaretur in omnibus operationibus exterioribus, quæ procedunt à causis liberis, ut motus cæli factus ab Angelo, motus progressus factus ab homine, aut motus impressus alteri Angelo, qui non dependet ab hoc universo. Itaque vel reddimus rationem incognoscibilitatis harum cogitationem ex eo quod à solo Deo pendent, vel ex eo quod etiam dependent à causa libera.

Si r. instatur in exemplis adductis, imò & in aliis quæ Deus operatur intra voluntatem & intellectum, ut est infusio habituum supernaturalium & specierum intelligibilium, quas ab aliis Angelis intelligi docet S. Thom. *in hac q. 57. art. 4. ad 2.* & tamen hæc omnia operatur Deus solus intra voluntatem & intellectum. Si verò dicatur secundum, manifestè petitur principium, & instatur exemplis adductis.

14 Nihil plus eleuat rationem D. Th. Caietani, & Capreoli supplementum, nempe quia supponit hæc ratio D. Th. Angelum naturaliter solum cognoscere ea quæ à naturalibus causis solum dependent, aut cum eis connexionem habent; actus autem voluntatis prout intra voluntatem sunt, cum nulla causa naturali habent per se connexionem, quia quacumque causa naturali stante, possunt exire, vel non exire à voluntate; & sic illorum cognitionem Angelus non habet.

Cæterum hoc supplementum rationis D. Th. præterquam quod ab ipso non ponitur, sed illi superadditur, nullam vim rationi eius affert, quia non probat solum rerum naturalium species Angelo infundi, non verò actuum liberorum. De hoc enim querimus quare solum res naturales sint obiectum proportionatum intellectus Angeli, & non liberæ, cum tamen actus liberè facti etiam habeant entitatem ordinis naturalis. Et deinde, cur solum actiones liberæ intra intellectum & voluntatem hoc privilegium habent iure libertatis, non autem actiones exteriores liberè factæ præsertim ab Angelo, quia tales prout sic etiam non dependent à causis naturalibus, quæ tamen ab Angelo cognoscuntur. Deinde quam dependentiam habet à causis naturalibus infusio specierum intelligibilium intra intellectum vel aliorum habituum supernaturalium intra voluntatem, aut habitus acquisiti & producti per actus nostros: hæc enim omnia à nulla causa naturali dependent possuntque fieri extra totum universum cum à solo Deo fiant, & tamen cognoscuntur ab alio Angelo independentè à voluntate alterius: ergo insufficiens est totum hoc fundamentum iactum à Caietano & Capreolo pro supplenda ratione D. Thomæ.

15 Nihilominus ratio S. Th. efficax est, & ab ipso tradita ubicumque de hac re agit, ut supra diximus, ut videri potest *q. 4. de verit. art. 13. & quæst. 16. de malo, art. 8. & in præsentī quæst. 57. art. 4.* Et eius intelligentia solum consistit in sensu formali propositionum D. Thom. scilicet quod loquitur de his quæ à sola voluntate dependent. Vbi ly *sola* excludit omnem aliam causam particularem, & determinatam, quæ pertineat ad totum hoc universum, & loquitur de voluntate ipsa ita contingenti & indifferenti, quod à nulla causa creata determinari

potest, nisi à sola universalitate diuinæ operationis. Ex his enim duobus principiis, scilicet exclusione omnium causarum naturalium, & eorum quæ pertinent ad hoc universum, & stante operatione voluntatis indifferenti & indeterminata, à solo autem Deo determinabili, deducitur manifestè, quod à nullo alio intellectu creato, potest liber actus intelligi, nisi ab eo qui elicit: vel à Deo qui determinat.

Et ratio huius est, quia Angelus non habet vim intelligendi quodcumque intelligibile creatum, nisi tantum illud quod pertinet ad hoc universum, & redditur pars illius, & cum eo connexionem habet, quod autem independens est ab hoc universo, nec fit tanquam pars eius, & ad illud pertinens, non est cognoscibile ab Angelo naturali cognitione: ideo enim dicimus Angelum non posse cognoscere omnia possibilia, quæ continentur in omnipotentia Dei, & non in causis creatis, quia coarctatur eius cognitio naturalis ad ea solum quæ ex causis naturalibus proveniunt, seu ad hoc universum spectant ut partes illius, vel ut illi annexa: si enim extra hoc universum possunt aliqua intelligere, utique solum erunt contenta in Deo, quia extra universum non datur alia causa, quam Deus, qui est extra totum universum; & sic poterunt cognoscere quidquid possibile est, saltem divinsuè: non enim est aliquid per quod restringatur ad cognoscendum hæc, & non alia, si semel cognoscere potest ea quæ ad hoc universum non spectant. Si ergo in istis obiectis naturaliter cognoscendis aliquis terminus ponendus est, & non in infinitum protrahenda sunt, quia alias omnia possibilia, & quæcumque futura contingentia cognosceret, & ea quæ purè sunt in manu Dei, contra illud quod dicitur Actorum. 1. *Non est vestrum nosse tempora, vel momenta, quæ Pater posuit in sua potestate*; inde fit generalis regula, quod quæcumque ad hoc universum non pertinent, sed supra illud sunt, nec connexionem cum illo habent, ad naturalem & propriam Angeli cognitionem non pertinent. Cui principio adiungitur aliud, quod actus liber, prout exit à voluntate, non prout alicui effectui manifesto, & ad hoc universum spectanti coniungitur, non habet connexionem aliquam cum causa aliqua totius universi, nec ab aliquo sufficienter, & plenè potest determinari voluntas: ergo nulla vis creata potest ex vi sua, aut ex cognitione alicuius obiecti creati cognoscere determinatum exitum huius actus, aut illius liberi à sua causa: ergo neque cognoscere determinatum actum liberum, sicut neque in futuris determinatum euentum propter indeterminacionem & contingentiam causarum proximarum. Cognoscere autem cogitationes cordis in se est cognoscere illas in ipso exire à voluntate, in quo habent omnimodam contingentiam & indeterminacionem ex parte causæ proximæ, totam verò determinationem habent à solo Deo sic mouente, & sic determinante: ergo nullum principium habet intellectus creatus, ut possit determinatè cognoscere actum liberum in ipso exitu à voluntate creata. Si autem non videt exitum ipsum à voluntate, neque postquam exierit, videbit illum, quia actus ipse quamdiu est, semper exit à voluntate, quia in fieri, & conservari ab ea dependet, eademque contingentia egreditur in ipso conservari, atque in ipso primo exire. Quod in reliquis actionibus contingentibus præter liberos actus non procedit, tum quia actiones aliæ non à solo Deo determinantur, sed etiam ab aliis causis creatis, tum quia effectus aliquos producant, si sint actiones transeuntes, qui effectus manent determinati

minati ut aliquid pertinens ad integrationem vniuersi; & sic spectant ad cognitionem Angeli.

16 Nec obstat quod actus liber, quando exit à voluntate, exit determinatus, alias non exiret. Nam contra est, quia ista determinatio est cum omnimoda dependentia ab ipsa voluntate potente retrahere actum, unde si ex illo actu voluntatis effectus aliquis producendus est, adhuc posito actu intra voluntatem æquè contingens & indeterminatus manet; & perinde atque si esset intra causas, quia totus ille actus ita est intra voluntatem, quod ab ipsa potest mutari & indeterminari, seu tolli; ergo quandiu sic est subiectus mutationi ipsius causæ, retinet contingentiam ad esse, & non esse in ipso exitu à causa, nec ab alio quam à Deo determinatio illa dependet tam in exire, quam in conservari, ita quod Deus in mouendo & determinando intrinsecè voluntatem, operatur independentem à toto vniuerso, quia cum nulla re totius vniuersi habet voluntas dependentiam & connexionem per se. Ergo determinatio causæ liberæ ad intra est vnum ex his quæ pater posuit in sua potestate, quia in alterius causæ creatæ potestate non est, nisi in sua quæ elicit actum, & Dei qui mouet ad illum.

17 Quare D. Thom. ex intimis & propriis voluntatis liberæ in sua contingentia, & indeterminatione, & ex omnimoda independentia ab omni alia re vniuersi, sed solum à Deo, ut est causa supra totum vniuersum, optimè deduxit incognoscibilitatem istorum actuum independentem ab ipsa manifestatione causæ liberæ, vel Dei, quia in nulla causa præter Deum & voluntatem inuenitur continentia istius actus. In ipsa voluntate est cum summa indifferentia & contingentia etiam in ipso exire, & in conservari, quia ita exit actu, quod potest non exire. In ipsa determinatione & motione Dei, est ita occultum & positum in potestate Patris, quod operatur ibi Deus ut causa supra totum vniuersum operans, & nihil ad connexionem cum reliquis vniuersi partibus spectans efficiendo. Et sic ex omni parte latet intellectum creatum.

18 Vnde soluuntur instantiæ allatæ à Durando, Suarez, & aliis contra hanc rationem D. Thom.

Ad primum Resp. quod multa quæ sunt solo Deo, cognoscuntur ab Angelo, quando ita sunt à Deo, quod pertinent ad hoc vniuersum, tanquam partes illius, vel ipsi vniuerso coordinata & connexa, sicut etiam ipsi actus exteriores, qui liberè sunt, hoc ipso quod exteriores sunt, possunt cognosci, quia coordinantur reliquis partibus vniuersi, & concernunt alias causas vel effectus externos, aut corporeos, quibus coordinantur reliquis partibus vniuersi. Et sic cælum, quod à solo Deo fit, & anima rationalis, quæ à solo Deo creatur, & Angelus, si de nouo crearetur, naturaliter cognoscuntur ab Angelo, quia ista omnia producuntur tanquam partes vniuersi, & ut res in se omnino determinatæ, nec dependentes in suo exire, & conservari ab aliqua indifferentia & contingentia sui principij, quod totum non currit in actibus liberis, qui in suo exire à voluntate procedunt cum summa indifferentia & omnimoda dependentia quoad conservari, vel non conservari, esse, vel non esse, etiam stante eadem voluntate, non sicut lux dependet à luminoso in fieri, & conservari cum omnimoda necessitate, stante luminoso: nec sicut creaturæ dependent à Deo in fieri & conservari tanquam ab agente libero in quo parificabatur egressioni actuum liberorum à voluntate, nisi creaturæ fierent à Deo ut pertinentes ad hoc vni-

Ioan. à S. Thom. in 1. part. D. Th. Tomus alter.

uersum, & ut partes illius, & tanquam effectus externi cum aliis effectibus creatis coniuncti & connexi in hoc vniuerso, cuius cognitio naturaliter est debita Angelo: actus autem liberi intra potentiam non habent connexionem aliquam nec dependentiam cum toto ordine vniuersi, quia à nulla causa, vel obiecto illius determinari possunt & æquè bene possunt produci, & fieri, etiam extra totum vniuersum, vel nulla re vniuersi extante. Exempla verò quæ afferuntur de speciebus intelligibilibus, vel habitibus infusis in intellectu, vel voluntate, non obstant: dicimus enim quod si supernaturales sunt, non cognoscuntur naturaliter ab Angelo, sed per species supernaturales: si verò naturalis ordinis sunt, cognoscuntur naturaliter ab Angelo: utrumque tamen cognoscitur sine dependentia à consensu voluntatis, vel eius manifestatione, licet à solo Deo fiant intra ipsas potentias, quia producuntur à Deo tanquam accidentia adornantia ipsum Angelum, & pertinentia ad eius integritatem & debitam dispositionem ad operandum in genere naturali, vel supernaturali, unde pertinent ad cognitionem integritatis ipsius Angeli in se, & consequenter sicut ipse Angelus producit ut pars vniuersi, ita species istæ intelligibiles à Deo infusæ, vel alij habitus supposita elevatione supernaturali cognoscuntur tanquam aliquid pertinens ad integritatem, & perfectionem ipsius Angeli in se, non autem ut aliquid dependens ab indifferentia & contingentia voluntatis, & à Diuina determinatione, ut operante cum omni independentia à toto vniuerso, & ab eius causis, sicut ponderatum est. Ad instantiam autem contra explicationem Caietani, & Capreoli, respondetur ex dictis, quod in primis illa explicatio non superadditur rationi D. Thom. sed supponitur hoc ipso quod loquitur de his, quæ dependent à voluntate solum, & hoc ipso quod dicit voluntatem à solo Deo moueri, ut intra ipsam operantem: hæc enim stare non possunt, nisi supponendo quod voluntas in suis actibus liberis ita est sola, quod est independens, & connexionem non habens cum reliquis partibus vniuersi, nec ut fiant actus liberi necesse est quod sit in vniuerso, sicut nec etiam intellectus ad intelligendum, quamuis si necessariò operetur tam voluntas, quam intellectus se habeant ut natura quædam & pars vniuersi in operando, sicut aliæ naturæ determinatæ.

Et cum instatur quod in hoc petitur principium quare solum res naturales sint obiectum proportionatum Angeli & non actus liberi, cum tamen habeant entitatem naturalem.

Respondetur ex dictis, quod res naturales, & quidquid per modum naturæ consideratur, hoc ipso se habet ut pars huius vniuersi, & ut integrans & componens illud: pertinet autem ad cognitionem naturalem Angeli tota constructio vniuersi, & quidquid ad illud componendum potest ordinari. Quidquid autem remanet in potestate Dei tanquam in causa supra totum vniuersum, non pertinet ad cognitionem Angeli, alias omnia possibilia posset cognoscere, & non esset unde poneremus terminum in obiectis ab Angelo cognoscendis. Et cum quæritur, quare hoc ius libertatis solum est in actibus internis voluntatis, non in externis: iam respondimus quod actus externi habent effectum aliquem, vel signum, in quo manifestantur, quod importat aliquam determinatam naturam pertinentem, vel connexionem habentem cum partibus vniuersi, & cum causis naturalibus. Nec enim est aliquis effectus ad ex-

T t 3 tra

tra qui non subiectetur, vel informet aut perficiat aliquid naturale, aut aliquod corpus; & sic connectitur cum naturis vniuersi.

19 Ad vltimam autem instantiam de infusione specierum intelligibilium, vel aliorum habituum intra voluntatem, vel intellectum, quorum infusio à causis naturalibus non dependet, & potest fieri à Deo extra totum vniuersum, iam respondimus: nec enim dicimus ista causari ab aliqua causa naturali, sed à solo Deo, nec dependere ab ipso vniuerso vt fiat, nec exigere quod res ipsa in vniuerso sit, vt possit accipere istos habitus, vel species: sed tamen idèd ista non latent alium Angelum, quia infunduntur tanquam accidentia, quibus integratur, aut perficitur ipsa virtus & potentia Angeli in ratione virtutis. Perficitur autem ab illis vt à formis, naturali, & necessario modo informantibus, & ornantibus rem, seu naturam huius vniuersi, quæ est Angelus; & sic per modum naturæ ipsæ species, seu habitus se habent non moraliter, & contingenter sicut actus liberi. Vnde sicut ipsa substantia & potentia Angeli, licet possit poni extra totum vniuersum, tamen per se dicit ordinem ad illud, & se habet vt pars illius tanquam natura quædam, ita potentia illius & accidentia, quæ potentiam istam naturali modo & informatione vel integrant vel complent, omnia reputantur, vt pertinentia ad partes vniuersi, & per modum naturæ se habentes quod non ita est in actibus liberis, quia non se habent per modum naturæ in informando, vel perficiendo, nec determinationem habent, & dependentiam, aut connexionem cum aliis; & idèd non pertinent ad lineam rerum naturalium, & constructionem vniuersi, sed ad lineam moralem, & liberam, quæ à solo Deo, vt est extra totum vniuersum determinatur, & dependet. Quod verò attinet ad habitus acquisitos nostris actibus liberis: multi sentiunt eos ab Angelo non cognosci, quia aliàs posset videndo habitus ex eorum intentione vel remissione cognoscere actum magis vel minus intensum, à quo processit ille habitus. Caterum hoc non multum conuincit, quia etiam in externis effectibus potest Angelus cognoscere intensionem vel remissionem actuum liberorum à quibus fiunt. Quod ergo in habitu intenso cognoscat Angelus habuisse hominem intensum actum, iam hoc non pertinet ad cognitionem actus liberi in se, sed in effectu suo, qui relinquitur in potentia. Nec est incoueniens quod actus cognoscantur in suis effectibus, siue effectus sint intra potentiam, siue extra, dummodo non retineant libertatem & indifferentiam in procedendo & perficiendo, sicut ipsi actus, nec à solo Deo determinantur in sui consistentia & processu à potentia libera quod solum actibus conuenit, non habitibus.

20 Sed inquires duo.

Primum est, an lateant Angelum operationes quæ sunt in nostro intellectu, vel in phantasia, seu cogitativa, & operationes etiã appetitus sensitui?

Respondeo omnes istas operationes latere Angelum secundum quod sunt operationes ortæ ex motione voluntatis, licet actus appetitus & phantasiæ, secundum quod ex impressione alterius causæ corporalis, vel spiritualis immutantur, ab Angelo possint cognosci. Totum hoc sumitur ex D. Th. in hac q. 57. art. 4. ad 3. & q. 8. de verit. art. 13. ad 2. 4. & 8.

Ratio est, quia intellectus est potentia immediate dirigens voluntatem, & ab illa immediate mota, & in suis conceptibus representans ipsos actus voluntatis, vt à voluntate eliciuntur; vnde si Angelus posset penetrare omnes actus intellectus, posset per illos ad secreta voluntatis irrumperet. Vnde licet intellectus accipiat species ab obiectis per sen-

sus, & quoad hoc possint illæ species cognosci ab altero Angelo, vt etiam concedit D. Thom. locis citatis, & q. 16. de malo art. 8. ad 5. tamen in vtendo illis speciebus à nulla causa extra se determinatur plenè, sed vtitur illis cum vult, vt S. Thom. aduertit in hac quæst. 57. art. 4. in corp. Et idèd in Scriptura non solum cor, seu voluntas, sed etiam cogitationes cordis, id est à voluntatis imperio ortæ & formatæ dicuntur soli Deo cognitæ.

Quod verò attinet ad operationes partis sensitivæ tam in apprehensione, quàm in appetitu S. Thom. in hac q. 57. art. 4. ad 3. dicit esse ignotas Angelo secundum quod procedunt ex motione voluntatis, licet in quantum sunt ex impressione alterius causæ corporalis vel spiritualis, non repugnet ab Angelo cognosci, quia pertinet ad Angelum cognoscere omnem dispositionem corporalem: sic enim appetitus & phantasia hominis se habet aliquando in hoc, sicut phantasia aut appetitus bruti sequens similes impressiones, non tamen hos motus cognoscit vt procedunt ex motione voluntatis, quia etiam partes inferiores participant aliquam rationem. Videatur D. Thom. q. 8. de verit. art. 13. ad 4. Hinc fit quod bene potest appetitus sensitivus ex aliqua impressione extrinseca, & vehementia imaginationis habere vehementissimam passionem, nec tamen voluntatem deduci detinente continentia. Vnde Angelus non potest ex vi cognitionis appetitus sensitui, aut vehementis huius impressionis cognoscere, nisi coniecturaliter motum voluntatis, non tamen certò, quia non semper appetitus sensitivus mouetur ex voluntate, aut eam plenè mouet. Ex actu tamen externo plenè cognoscit Angelus consensum voluntatis, quia actus externus, non nisi consentiente voluntate potest exire. Motus ergo appetitus sensitui, quando ex voluntate procedunt, redduntur latentes, quia hoc ipso ipse eorum exitus à causa sua est cum indifferentia ex contingentia; & sic latet Angelum, licet impressionem videat vehementem, quæ appetitum fatigat, & inclinat ex impressione naturali. Quod si eorum productio latet, tota substantia actus latet, hæc enim cognosci non potest nisi vt producta. Si autem productio latet, entitas producta latet.

Et hinc sumitur responsio ad id quod in principio difficultatis, & postea sæpè repetitum est, quod hæc entitas actus liberi est naturalis ordinis: ergo non excedit capacitatem intellectus creati, aut Angelici, cum sit aliquid creatum, & lumini creato debeat correspondere. Dicimus enim quod entitas illa in se naturalis ordinis est, id est, non supernaturalis, sed productio eius est libera, & cum contingentia & indifferentia tali quod à solo Deo plenè determinatur, & mouetur, nec habet connexionem per se cum rebus vniuersi, quantum ad determinationem sui plenam, ac per hoc non determinatè patet alicui intellectui ex vi cognitionis talis causæ indifferentis à qua exit. Determinatio autem eius non potest accipi ex aliquo principio naturali pertinente ad hoc vniuersum, quia à nullo dependet, nec cum aliquo habet connexionem per se. Ex principio autem increato, & operante determinationem illam supra ordinem totius vniuersi, id est vt non pertinentem, aut per se connexum cum illo, licet non vt supernaturalem, quia non est supra totum ordinem entis creati, aut creabilis, non potest ab aliquo intellectu creato penetrari, quia non penetrat ea quæ specialiter sunt in potestate Dei, & non ad hoc vniuersum reducuntur, aliàs posset etiam omnia possibilia cognoscere, vt dictum est. Itaque ex productionis incognoscibilitate

rate non cognoscitur illa entitas si producta, sicut ea quæ supernaturaliter producuntur, licet entitativè naturalia sint, non cognoscuntur in vi talis productionis. Nec obstat quod Angeli, imò & homines possunt cognoscere rem supernaturaliter productam, v.g. oculum datum cæco, vel mortuum resuscitatum, licet modo supernaturali producantur. Non inquam obstat, quia illa licet supernaturaliter producantur, sunt tamen naturæ quædam, & effectus determinati, & sunt ut pertinentes ad hoc univèrsim sicut oculus cæci, aut homo resuscitatus; actus autem liberi consistunt in ipsomet egredi à causa sua, unde si egressio est occulta, etiam actus ipse, quia tam in fieri quàm conservari, actus est à potentia indifferenti.

23 Quod si inquiras an etiam hoc procedat respectu præteritorum actuum, siquidem iam iam actus præteriti non dependent ab indifferentia libertatis, nec est in manu eius reddere tales actus incognoscibiles?

Resp. quod actus liberi præteriti licet non dependeant à libera voluntate quoad esse de præsentibus, tamen quia quando existerunt, non fuerunt cogniti, nec cognosci potuerunt, & postquam transierunt non remansit aliquis effectus in quo manifestentur, ut supponimus, relinquitur, quod nullo modo possint cognosci, neque quando præsentibus, neque quando præteritis.

24 Secundum quod inquiri potest, est an habeat Angelus species cogitationum alienarum infusas à principio, an non, sed solum infundantur quando unus Angelus alteri loquitur, & manifestat illi suam cogitationem. De hoc inferius dicemus *disp. 25.* agendo de locutione Angelorum: dependet enim ex illa difficultate, an cognoscat Angelus locutionem alterius immediatè per speciem illius cogitationis, an in aliquo signo vel effectui in quo manifestetur. Nunc autem dicimus varias in hac parte esse Thomistarum sententias, de quibus videri potest M. Bañez *hic q. 57. art. 4.* Sed tamen evidenter S. Thom. sentit per speciem innatam, quam unus Angelus habet de altero cognoscere cogitationem ipsius, quando ei manifestatur ab altero, seu dirigitur ad ipsum: dicit enim in *q. 9. de verit. art. 5. ad 11.* sic; *Quod unus Angelus cogitationem alterius cognoscit, per speciem innatam, per quam alium Angelum cognoscit, quia per eandem cognoscit omne, quod cognoscit in alio Angelo. Unde quamvis Angelus se ordinat ad alium Angelum secundum actum alicuius forme, ille Angelus cognoscit eius cogitationem, & hoc quidem dependet ex voluntate Angeli, sed cognoscibilitas naturæ Angelicæ non dependet ex voluntate Angeli; & ideo non requiritur locutio in Angelis ad cognoscendum naturam, sed ad cognoscendam cogitationem tantum.* Ita D. Th. Ex quo colligitur quod cum Angelus habeat speciem innatam alterius Angeli, & species quashabet Angelus representent non solum substantiam, sed accidentia, etiam illius, quia comprehensivæ sunt, consequenter species alterius Angeli vel hominis debet representare ipsum, & accidentia eius, inter quæ etiam sunt cogitationes eius, ut manifestabiles alteri per aliquam ordinationem erga ipsum. Nec est existimandum quod Angelus loquens, seu ordinans conceptum suum ad alterum semper illuminet illum: plus enim requiritur ad illuminandum quàm loquendum: Est enim illuminatio, manifestatio veritatis superiori modo cognitæ, disponendo illam pro capta alterius; & ideo solum est in superioribus Angelis respectu inferiorum. Locutio autem est sola ordinatio unius conceptus Angeli ad alium, qua ordinatione posita tollitur ratio secreti respectu illius, & sine alia illu-

minatione ab altero cognoscitur. Quare species illæ quæ representant alterum Angelum, & secundariò eius cogitationes tanquam quædam illius accidentia, non absolute illas representant, sed ut manifestabiles alteri per ordinationem ad ipsum: per hoc enim incipiunt pertinere non solum ad ipsum elicientem, sed etiam ad alterum ad quem dirigitur, & præsertim si hoc fiat aliquo effectui, vel signo determinato in quo cognosci possint, ut latius dicemus *infra disp. 25.* agendo de locutione Angelorum. Quamdiu autem non sic manifestantur & ordinantur ad alterum, cognosci non possunt ut in exercitio existentes per speciem innatam representantem naturam alterius Angeli, quia non representat illa species nisi naturam alterius Angeli, & eius accidentia, secundum quod se habent per modum naturæ, vel ut pertinentia ad hoc univèrsim, vel ad ipsummet cognoscentem representantur. Pertinent autem ad ordinem naturæ, & huius univèrsi ipsa substantia, & potètiæ Angeli, & quidquid in eis est per modum virtutis, & accidentis determinati, & naturali modo existentis. Accidentia autem libera si considerentur quoad suam quidditatem, & in abstracto, cognoscuntur ab altero Angelo in communi, quoad sui autem existentiam, cum existant in differenti & contingenti modo; & sic egrediuntur à potentia, non representantur ex se per modum alicuius naturæ determinatæ, prout indifferenti modo exeunt à libertate, sed poterunt manifestari per modum cuiusdam naturæ pertinentis ad hoc univèrsim, si aliquo effectui manifesto & publico manifestentur; poterunt etiam manifestari ut pertinentes ad hunc Angelum cui loquitur, & non ad alium si ordinentur ad istum, & non ad alium, ut dicemus *disp. 25.* Et sicut non est inconueniens quod eadem species representet naturam in individuo in quibus sit à Deo, individua verò successive producenda virtualiter representat, & non in actu, quovisque fiant habilia ut represententur, scilicet quando Deus ea producit, & sic applicat & determinat species Angeli, ut ea representet; ita non est inconueniens quod eadem species, quæ representat alterum Angelum, & eius accidentia, etiam representet cogitationes cordis, non absolute in actu, sed dependenter ab earum productione & alterius manifestatione, quia tunc fiunt obiecta habilia, ut per illas species represententur tanquam aliquid pertinens ad alterum extra ipsum elicientem; & tunc illæ species ex vi suæ prioris infusionis immutentur & applicentur ad representandum hanc cogitationem, non solum productam in se, sed etiam manifestatam, quia ante manifestationem non accipitur, ut pertinens ad hoc univèrsim, vel ad alterum Angelum.

25 Quod si denique dicas: Cur istæ cogitationes dicuntur non pertinere ad ordinem univèrsi, siquidem non excedunt in sua perfectione potètiæ, & agens à quo eliciuntur, nec obiectum circa quod versantur, ut quando versantur circa res naturales: tunc enim tam ex parte obiecti, quàm ex parte potètiæ è qua egrediuntur, pertinent ad ordinem univèrsi, siquidem potètia illa voluntatis de hoc univèrso est, sicut & substantia Angeli; & ita cognoscitur naturaliter ab altero Angelo. Cur ergo actus liberi talis potètiæ, qui sunt immediata eius perfectio non pertinebunt ad ordinem huius univèrsi, sicut ipsa potètia, præsertim si versentur circa obiecta naturalia? Resp. quod isti actus licet quoad actualitatem & entitatem suam sint perfectiones & fines intrinseci potètiæ liberæ, tamen in modo procedendi & exeundi à suo principio, quamdiu intra illud sunt, & effectum ad extra non ponunt, non pertinent ad

hoc vniuersum, quia non habent cōnexionem cum aliqua re vniuersi, à qua sufficēter determinari possint in sua productione, nisi à solo Deo vt operante supra totū vniuersum: hoc enim petit vniuersalitas & amplitudo illius potentiae, quæ in sua vniuersalitate solū vniuersalissimo agenti vt vniuersaliter operanti subditur. Et sic sunt fines & perfectiones potentiae, non solū vt entitas est, sed vt habet modum operandi ita vniuersalem, & excedentem alias partes vniuersi. Et licet ipsa potentia sit entitas in se cognoscibilis determinata & fixa, habensque ordinem inter partes vniuersi, tamen eius modus operandi à nulla parte vniuersi dependet, & solū vniuersalissimo operanti immediatē subest in determinando & emittendo ex se actum liberum, quandiu ille exit intra se propter suam indifferentiam & contingentiam liberam qua exit. Quod autem habeat obiectum ordinis naturalis, parum interest, quia obiectum facit illum actum ordinis naturalis & determinatum quoad specificationem, & solū quoad specificationem ab obiecto dependet & determinatur, sed quoad exercitium, & egressum à suo principio nō plenē determinatur ab obiecto, sed relinquit indifferentem & indeterminatam potentiam, & soli Deo, vt vniuersalissimo operanti subiectam, vt illam determinet; & sic supra totum vniuersum constituitur, quoad exercitium & vsum.

26 Quæ pertinent ad mysteria gratiæ quomodo ab Angelo cognosci possint, non habent peculiarem difficultatem præter illam, quæ tractari solet in materia de Incarnatione, quomodo illud mysterium sit naturaliter ignotum omni creato intellectui? eadem enim ratio est de aliis mysteriis. Vbi Deo dante tractabitur & aliquid etiam attingetur in materia de Fide, & *suprà* agendo de cognoscibilitate Trinitatis insinuaturn est.

ARTICVLVS IV.

Vtrum Angelus possit intelligere aliquid discurrendo, vel componendo, & diuidendo?

Multa quæ pertinent ad modum intelligendi in Angelo, ex his quæ tractauimus de modo intelligendi hominis in *lib. de anima q. 11.* hinc explicanda sunt, vt quod non possit simul plura vt plura intelligere, & quid sit plura intelligere vt plura, vel per modum vnius. Quomodo etiam eis non competat discursus, neque cōpositio & diuisio, sed hoc sit proprium hominis & intellectus rationalis, non intellectus perfecti, qualis est Angelicus; idē breuiter difficultas proposita à nobis expedienda est.

Quid sit supponendum.

1 Supponendum est, quid requiratur ad rationem veri discursus, veramque compositionem & diuisionem? ex eodem enim principio nascitur, quod aliquis intellectus sit discursiuus circa propositiones inferendo veritatem vnius ex aliis, & quod sit cōpositiuus circa terminos, formando ex eis propositiones & iudicium, videlicet quia talis intellectus procedit in cognitione & manifestatione veritatis de imperfecto ad perfectum, seu de potentia ad actum, ita quod vno cognito non statim cognoscit alterum, neque conuenientiam huius cum illo, sed ex illo prius vel magis noto procedit ad aliud minus notum, ita quod illud prius illuminet & inducat in hoc posterius. Et non agimus hinc de discursu obiectiuo tantū, seu ex parte obiecti se tenente, sed ex parte subiecti, ita quod ipsum subiectum, seu ipsum cognoscentem denominet discurs-

rentem Cognoscere enim discursum ex parte obiecti, ita quod cognoscatur discursus ab alio factus tanquam res cognita, vel cognoscatur aliquod obiectum esse capax, vt discurratur circa illud ab intellectu vtente discursu, ita quod ibi cognoscatur ratio causæ & effectus, seu vnum esse notius altero ita quod possit esse ratio illuminandi alterum, hoc etiam simplici intuitu potest cognosci, & à Deo, & ab Angelo, nec tamen per hoc constituitur & denominatur discurrens.

Loquendo ergo de discursu ex parte subiecti tenente & denominante intellectum discurrentem duplex distinguitur discursus à D. Thom. *suprà q. 12. art. 7.* scil. discursus secundum successionem, & secundum causalitatem. Discursus secundum successionem, est cum intelligimus vnum postquam intelleximus aliud, ita quod non simul vtrumque cognoscimus. Et sic talis discursus non est alius quam negatio simultatis in cognoscendo plura, seu vnum post aliud. Discursus secundum causalitatem addit supra successionem cognoscendi, quod vna cognitio causetur ex alia, ita quod ex vno noto seu cognito moueamur ad aliud ignotum ex prioris cogniti & manifestati; & sic manifestatio vnius debet esse causa manifestationis alterius, non solū quia vnum obiectum illuminat aliud (he enim etiam in simplici intuitu plura obiecta attingente obtinere potest) sed quia ipse cognosces prius illuminatur circa vnum, & in illo nondum illuminatur circa aliud, sed mouetur ad educendum ex illo aliud lumen, seu manifestationem alterius. Non ergo sufficit ad discursum illud lumen, quod plura manifestat; etiam si prius vnum, & postea aliud, quia si eodem lumine vtrumque attingitur, totum hoc pertinet ad simplicem intuitum, quia pertinet ad eandem manifestationem, & lumen, seu notitiam, licet sint diuersa manifestata ordine quodam, sicut oculus eodem lumine plura videt & vnum per aliud, quia ordine quodam attinguntur ex parte rerum visarum, & similiter Deus plura attingit vnico lumine. Requiritur ergo ad discursum quod sit diuersitas, & ordo etiam in isto lumine vt tenet se ex parte cognoscentis, & vnum lumen oriatur ex alio, sicut ex lumine principiorum oritur lumen scientiæ, ita quod primum lumen non sufficit ostendere per se ea quæ inferuntur, sed habet se vt lumen probatum, id est, quod manifestat alterum per deductionem & illationem vnius à minis ex alio, quia primum non est sufficiente in se comprehensuum totius. Vnde fit quod requiritur ad discursum ex parte subiecti duplex cognitio seu manifestatio, & quod vnum sit causa alteris, deducendo manifestationem vnā ex alia, ita quod in prima manifestatione non attingatur actu secundum; quas duas condiciones ad discursum poit S. Th. 1. *contra Gent. c. 57.* & eodem modo id explicat in *hac q. 57. a. 3. ad 1.* An verò requiratur successiva duratio inter istas duas cognitiones, ita quod non possit discursus vnico instanti perfici, vel etiam requirantur plures actus, non solū in ratione distincti luminis, sed etiam entitatiuē diuersi ad discursum, non multum interest, quamuis hoc secundum rationem per se requirantur, eo quod in nobis propter limitationem intelligendi non reperitur quod iam actus, seu entitas ita sit eminens, quod includat duplex lumen, alterum per se principiorum, alterum illationum conclusionum, sed si vnum lumen causatur ex alio, diuersa entitate id fit. Quod verū eodem instanti durationis totus discursus fiat vel pluribus, parum interest, & materialiter ad discursum se habet, dummodo plura lumina, seu aūs quorum vnus deducatur ex alio, concurrant.

Ex

3 Ex quibus colliges multas cognitiones non esse discursivas, in quibus tamen vnum cognoscitur in alio, vel per aliud ex parte rerum cognitarum, quia tamen non ex parte luminis, seu actus ista diuersitas habetur, ita vt vnum deducatur, & deriuetur ex alio probatiuo, & illatiuo modo, non habentur per discursum, sicut visio rei in speculo, rei representatae in imagine, visio coloris mediante luce, cognitio rei in testificatione seu autoritate dicentis, omnia haec non attinguntur discursu, sed simul seu vnico lumine, non vno lumine probatiuo alterius, & deducto ex alio lumine; nec enim testificatione probamus, aut ex illa deducimus rem creditam: sic enim non esset credita, sed probata. Nec obstat quod aliquis credit hoc, quia ille dicit seu testificatur, sicque ex dicto huius mouetur ad credendum, quod videtur sufficere ad discursum. Non inquam obstat, quia ly *quia*, non dicit ibi nisi simplicem rationem credendi, & vnum tantum lumen quod est motuum assentiendi, sicut oculus videt parietem, quia est coloratus, non vero dicit rationem illatiuam, & probatiuam veritatis, quasi per illationem causando ex vno manifestationem alterius, sed vnica, & simplici ratione assentiendo rei creditae ex testificatione, non ex illatione, & diuerso lumine.

4 Ex eodem principio nascitur quod intellectus componat, & diuidat in formandis propositionibus, sicut quod discurrat in deducendis veritatibus: componere enim dicitur, quia in vnus simplicis rei conceptu non videt, quid illi rei possit attribui, vel remoueri, sed alio conceptu attingit subiectum, de quo aliquid dicitur, alio id quod de illo dicitur, & ex vtroque format, seu componit enunciationem. Solum est differentia, quod formatio propositionis ex pluribus procedit ad vnum; & sic praesupponit plures conceptus simplices terminorum: tendit vero ad connexionem, seu comparisonem, aut unitatem illorum, siue haec adunatio, & comparatio fiat per tertium conceptum, qui vnus entitativè sit, siue per ipsorum plurimum respectum, & collationem, de quo *supra* disp. 2. diximus, & in *summis* q. 5. At vero discursus non tendit ad vniendum, seu adunandum conceptus, sed ad deducendum veritates, vnam, scilicet ex alia inferendo; & sic magis respicit ordinem causae, & effectus, seu modum vnus ex alio per illationem, quam adunationem, & formationem alicuius ex pluribus.

Quid sit tenendum.

5 His suppositis, circa discursum Angeli versantur tres sententiae, eodemque modo applicantur compositioni, & diuisioni.

Prima admittit Angelis discursum, sicut in nobis tam circa res naturales quam supernaturales, tam circa ea quae euidenter cognoscit, quam quae non euidenter Ita Scotus in 2. dist. 7. quest. 5. *Contra conclusionem*, & in prologo primi sententiarum 3. parte, q. 4. & 5. *lateralis*, & aliis locis. Attribuitur etiam Gregorio, Ocham, Gabrieli, quos citat Vasq. hic disp. 222. c. 1.

Secunda sententia per aliud extremum nullum discursum attribuit Angelis, neque in cognitione rerum naturalium, & sibi euidentium, neque in notitia supernaturalium, aut sibi non euidentium. Haec est communis inter Thomistas Caietan. *super quest. 58. art. 3.* ibi Bañez, Zumel, Nazarius, Nauarrete *contr. 71.* Carmelitani Salmantici. *tract. de Angelis* disp. 8. dub. 2. Capreolus in 2. dist. 3. q. 2. ad argu-

menta *contra decimam conclusionem*, Ferrar. 3. *contra Gentil. cap. 91.* & alij.

Tertia sententia est media, astruitque Angelo per se non conuenire discursum circa naturalia obiecta, & ea quae euidenter cognoscit, bene tamen posse discurrere circa obiecta supernaturalia, & ea quae obscure cognoscit. Non tamen eodem modo explicant hoc Authores huius sententiae. Nam Suarez lib. 2. de Angelis c. 3. absolute tribuere videtur Angelis discursum circa haec obiecta. Vasquez vero disp. 222. cit. c. 3. non absolute tribuit discursum, sed aliquem modum discursus: distinguit enim in discursu duo. Primum, quod aliquid cognoscatur vt ratio alterius, & medium ad alterum, ita quod non immediate videatur in se. Alterum, quod distincta cognitione videatur vnum, & alterum; ita quod vna cognitio sit causa alterius, & non solum obiectum vnum sit ratio alterius: hoc enim in eodem simplici actu potest contingere. Sic ergo primum dicit posse in Angelis reperiri respectu obiecti cogniti supernaturali modo, eo quod haec cognoscunt Angeli coniecturaliter, & in alio, non immediate in se. Secundum vero dicit non reperiri in Angelis, quia eodem actu possunt simul plura apprehendere, vt viso miraculo possunt in eo per eundem actum cognoscere diuinitatem Christi. Et ideo non simpliciter attribuit Angelo discursum, sed aliquo modo, scilicet ex parte obiecti, non ex parte cognitionum, seu cognoscentis. At vero Molina *super hanc* q. 58. art. 3. §. *Ex alio capite*, verum, & proprium discursum Angelis attribuit, sed per accidens, hoc est quando id quod ex alio coniciunt non possunt in vna eademque notitia coniungere, vt quia vnum videtur abstractiue, aliud intuitiue, quia arbitratur non posse vnam, & eandem notitiam esse intuitiuam, & abstractiuam etiam respectu diuersorum, & ita quando Angelus videt vnum effectum, & ex illo coniecturaliter, vel etiam certo cognoscit causam, quam non videt, verè & propriè discurret, sicut cum visis creaturis cognoscit dari vnum Deum, viso miraculo Christi coniciebat Dæmon, ipsum esse Deum; viso aliquo signo, seu effectui externo, conicit cogitationem esse in corde alicuius. In his, & aliis similibus casibus Angelus verè discurret, quia habet plures notitias, quarum vna causatur ab alia: ergo est verè discursus; sunt autem plures notitiae quia non potest vna esse simul abstractiua, & intuitiua.

Eodem modo sentit Molina de compositione, & diuisione, quod quando praedicatum est necessarium, & per se connexum subiecto, viso subiecto per eandem speciem cognoscit praedicatum; & sic non componit: cum vero praedicatum non est necessarium annexum subiecto, nec per eandem vtrumque extremum videtur, & consequenter neque per eundem conceptum, tunc Angelus verè componit si illa extrema coniungat. Idem sentit Vasquez disp. 223. c. 1. respectu accidentium supernaturalium, quae Angelus attribuit alicui subiecto, quia non nisi per diuersas species, & conceptus possunt coniungi ista extrema, & consequenter vtitur compositione. Multo autem difficilius dicit posse teneri quod in Angelis non sit diuisio per quam negetur vnum de altero eo quod negatio fit separando ea quae diuersa sunt, & diuersis speciebus, & conceptibus cognoscuntur, sicut cum dicit hominem non esse lapidem, vbi autem sunt plures conceptus in attribuendo vel negando vnum alteri, ibi est compositio, & diuisio: ergo si separatio fit per plures conceptus, Angelus verè diuidit. Idem sentit probabile Suarez lib. 2. de Angelis cap. 32.

Nihilo

Nihilominus dicendum est primò, Angelum non posse discurrere neque per se, neque per accidens circa obiecta naturalia. Quòd si verum est fundamentum D.Th. ad probandum quòd intellectus Angeli non discurret, etià probat circa nullum obiectum discurrere. Hæc conclusio non aliunde melius deducitur, quàm expendendo rationē ipsam D.Thom. quam adducit, tum in hac q. 58. a. 3. tum in q. 8. de verit. a. 15. sc. ex differentia intellectus Angelici ad nostrum, quia nos sumus rationales, Angeli autem purè intellectuales. Habent enim se Angeli in genere intelligibili respectu intellectus nostri sicut in genere corporali suprema corpora, & incorruptibilia respectu corporū inferiorū. Idè autem illa corpora incorruptibilia sunt, & ingenerabilia, quia suum esse, & suas perfectiones postulant non acquirere per motum, & transeundo de imperfecto ad perfectum, & de potentia ad actum, sed postulant habere suam perfectionem statim à principio: si enim sic non haberent, acquirerent eam per motum, & consequenter generatione aliqua, & corruptione: ergo Angeli qui in genere intelligibili sunt supremi intellectus creati, in hoc debent eleuari supra intellectum infimum, qualis est humanus, quòd illi habeant suam perfectionem intelligibilem, seu in genere intellectuali, non acquirendo eam per motum, & deducendo ex aliqua manifestatione id quod est sibi ignotum, sicut in motu ex eo quod est in actu reducitur id quod est in potentia in actum. Perfectio autem intellectualis naturæ est attingentia veritatis: ergo in ea attingenda non debent eodem modo procedere supremi intellectus, qui sunt perfecti sicut infimi procedunt, qui non possunt visa aliqua veritate statim attingere, & penetrare quicquid cum ea connexionem habet, quia non procedunt in attingenda veritate per comprehensionem, sed per motum seu discursum, & de vna veritate nota ad aliam minùs notam: intellectus ergo supremi, qui in genere intellectuali perfecti sunt, oportet quòd in veritate attingenda cum perfectiori, & superiori actualitate procedant, & in eo in quo inferior intellectus, scilicet humanus se habet in potentia, scil. non penetrando neque comprehendendo in aliqua veritate totum quod ei conuenit, & intelligibile in eo est, Angelicus qui est ex natura sua superior, id habeat in actu; & sic comprehendat actu, quod humanus attingit transeundo de potentia ad actum. Et hoc idè, quia ea quæ ex sua natura, & non per accidens superiora sunt in entibus, & subordinant sibi inferiora, continent actu & unitè ea quæ in inferioribus sunt in potentia, & multiplicia seu diuisa, idèque in eis proceditur de potentia ad actum, & præsertim hoc habet verum si illa superiora influunt in inferiora, ita quòd potentialitatem inferiorum reducunt ad actum, & eorum defectibus prouident. Quod autem habetur in superioribus unitè, & per modum actualitatis respectu eorum quæ diuisa sunt in inferioribus, & potentialiter se habent, hoc est haberet illa comprehensiuè, quia in simplicitate colligunt, & comprehendunt quòd diuisum, & de potentia ad actum procedendo habent inferiora. Quòd si etiam influunt in inferiora, eorūque potentialitatem reducunt in actum, manifestum est quòd debent habere in actu, quòd potentialiter in inferioribus, ac per hoc per modum motus accipitur. Et ad hoc affertur exemplum de cælo respectu inferiorum, quia non perficitur in esse, & augmento suo per motum, sicut inferiora; & ita vniuersaliter influit in illa, quòd continere debet unitè, &

comprehensiuè, quod in inferioribus est multiplex, & dispersum per suam potentialitatem.

Applicando ergo ista intellectui Angelico, qui 8 est supremus, & perfectus in genere intelligibili, inuenimus quòd naturaliter Angelus est superior in intellectu ad hominem, & intellectus humanus subordinatus illi: neque hæc superioritas conuenit, & per accidens, sicut vnus homo potest esse alteri superior in intelligendo, licet omnes æquales sint, sed per se, & naturaliter, quod demonstrat eius pura spiritualitas, & separatio ab omni materia, ex hoc enim clarè colligitur quòd intellectus Angeli non per accidens, & tanquam res eiusdem lineæ, & speciei, sed ex natura sua, & per se est superior, & subordinat sibi intellectum hominis, ita quòd potest illum perficere, & illuminare in omnibus intelligibilibus, licet cum ordine ad sensibilia, sub quibus veritas velata nobis proponitur, vt docet S. Thomas *infra quæst. 111. art. 1.* Ergo oportet quòd Angelus vtatur comprehensione, & actuali intelligentia respectu eorum quæ homo per motum, & exeundo de potentia ad actum intelligit. Pater consequentia, quia superior causa, & de se influxiua, & perfectum inferiorum debet actu, & perfectè, & magis unitè continere ea quæ in inferioribus sunt magis in potentia, & magis diuisa, siquidem omnia illa, quæ homo per discursum intelligit, & procedendo de potentia ad actum potest Angelus perficere, & illuminare, & in actum reducere: ergo respectu eorum est in actu, & non procedens de potentia in actum: ergo comprehensione vtitur, & non motu, seu discursu, quia illa est comprehensio, quæ nihil relinquit non intellectum in obiecto: ergo implicat quòd intellectus comprehensiuus, & procedens perfectè, non actu intelligat omnia quæ ad talem rem pertinent: ergo repugnat quòd procedat discursiuè, si procedit comprehensiuè, quia sunt oppositi modi inter se discursus, & comprehensio: illud enim comprehenditur, cuius nihil latet videntem; & sic non habet necesse procedere de vna manifestatione ad aliam, cum nihil lateat hoc ipso quòd ad intelligendum accedit, illud autem discurretur, quando aliquid latet videntem, quod ex manifestatione alicuius manifestatur ex alio vt inferente, & deducente rem ignotam, non in se manifestante. Intellectus ergo Angeli cum ex vi, & perfectione suæ naturæ procedit comprehensiuè circa obiecta quæ attingit, non procedit discursiuè. Quòd autem comprehensiuè procedat, deducitur ex eo quòd intellectus Angeli est naturaliter superior ad intellectum hominis, & ita superior, quòd potest influere in illum, & perficere. Vnde debet habere proprietates rei, & causæ superioris respectu inferiorum, sicut in rebus corporeis habet cælum respectu horum inferiorum, quorum potentialitates actualat, & imperfectiones reducit ad perfectum; & sic debet unitè habere quæ inferiores intellectus habent dispersè, & potentia, & sic habet ex natura sua Angelus esse comprehensiuus in veritatibus, & non discursiuus, quia unitè tangit, & actu quæ nos per motum, & discursum, & procedendo de potentia ad actum. Vnde S. Thom. non procedit ex similitudine cœlestium corporum solùm quasi ab exemplo, nec quasi ex ratione solùm probabili, aut à posteriori, vt aliqui superficialiter attingentes litteram D. Thom. existimant, sed procedit efficacissimè ratione ducta à priori ex eo, quòd Angeli sunt intellectus

ex

ex natura sua comprehensui, ut patet in illis verbis, quod *Angeli statim in illis, quæ primò naturaliter cognoscunt inspicunt omnia quaecumque in eis cognosci possunt*: hoc enim est intellectus illos esse comprehensivos. Quod verò comprehensui sint, probat ex perfectione, quam habent in genere intelligibili, scil. quia illum gradum habent in hoc genere, quem corpora cœlestia inter res corporeas. Quod quidem non probat ab exemplo, sed ex propriis intellectus Angelici, declarat verò quoad nos quomodo ista vis comprehensiva eis conveniat, & perfectionem in attingenda veritate sine motu habeant ex similitudine cœli respectu inferiorum. Et hanc rationem desumpsit S. Thom. ex D. Dionysio, qui perpetuò affirmat Angelos non congregare ex pluribus intelligentiam suam, sed simplici lumine, & unito procedere, de quo videri potest, id quod citat D. Thom. in hac q. 58. art. 3.

Vnde deducitur secunda pars conclusionis, videlicet quod si hoc fundamentum D. Thom. aliquid valet (& multum valere ostensum est) etiam probat quod in nullo euentu potest Angelus discurre, nec circa supernaturalia, nec circa ea quæ coniecturaliter, aut obscure cognoscit: in omnibus enim non mutat Angelus modum cognoscendi à sua superioritate ad nostrum infimum, & imperfectum modum, sicut homo si per intellectum cognoscit, quantumcumque imperfectè, & ruditer se habeat, nunquam deicitur ad hoc ut intellectus modo brutali cognoscat, id est per instinctum, & determinationem, non per arbitrium, & discursum. Vnde D. Th. perpetuò hoc agnuit, & absolute, & pro omni casu docuit Angelum cognoscere siue discursu, & in specie loquendo de his quæ Angelus naturaliter non cognoscit, & de his quæ coniecturaliter, sicut sunt cognitiones cordis ex aliquibus signis sensibilibus, vel de cognitione causarum in effectibus, manifestè docet omnia ista cognosci ab Angelo sine discursu, ut patet in q. 8. de verit. a. 15. ad 2. & ad 4. & ad 6. ubi circa ista obiecta ponit argumenta ad probandum, quod Angelus cognoscit illa per discursum, & tamen soluit illa.

Et ratio est, quia loquendo de rebus supernaturalibus illarum cognitio non destruit modum connaturalem cognoscendi, sed perficit, & eleuat: ergo per hoc quod Angelus accipit cognitionem supernaturalium, non imperfectitur, nec deprimitur ad modum inferiorem, qualis est modus cognoscendi humanus per discursum: quia gratia non destruit, neque deprimit naturam, sed perficit, & eleuat. Vnde vel dat modum superiorem cognoscendi, sicut visio beatifica, & tunc multò minùs in illa discurretur, vel relinquit modum connaturalem cognoscendi, & non tollit illum, sed eleuat ad altiorum ordinem, & tunc etià Angelus non discurretur: nunquam verò gratia deprimit naturam ad ordinem inferiorem, quia de se est immaterialior, & eleuator, quam natura; & sic ad minus non imperfectitur modum eius connaturalem: esset enim absurdissimum, quod per gratiam, & ordinem diuinum fieret Angelus deterior, & ad inferiorem modum cognoscendi, scil. ad modum humanum deprimeretur. De his verò quæ Angelus coniecturaliter, & non quidditatiuè cognoscit, etiam sine discursu iudicat de illis, quia in ipsis signis, vel effectibus, aut quibuscumque exterioribus, ex quibus sumit coniecturam, statim ipsis cognitis, videt Angelus ad quid, & quantum se extendant, quia quædam manifestant plenè, & quidditatiuè per necessariam, & evidentem connexionem, quædam verò coniecturaliter, quia solum habent connexionem contingentem, & istas connexiones sine aliquo discursu cognoscit Angelus visis effectibus

seu signis, in quibus continentur, sed quia tales connexiones aliquando non plenè manifestant aliqua, quia solum contingenter cum illis connectuntur, idè solum ex talibus obiectis accipit coniecturalem notitiam, seu iudicium, sine vllò tamen discursu, sed simplici intuitu videndo illam connexionem contingentem, sicut sine discursu videt connexionem necessariam cum eo, cum quo habet illam. Vnde sicut respectu eorum cum quibus habent connexionem necessariam, non fundant illa obiecta discursu in Angelo, quia in ipsa simplici notitia obiecti cognoscit connexionem illam ut necessariam, & consequenter ut demonstrantem rem connexam, ita respectu eorum cum quibus habent connexionem contingentem manifestant illa obiecta ea quæ sic connexa sunt sub eadem connexionem contingentem, & hoc est coniecturaliter solum cognoscere rem illam, sed sine discursu, sed unico & simplici lumine penetrante istas connexiones. Non autem dici potest quod ex debilitate sui luminis Angelus coniecturaliter procedat, ut scil. ubi est necessaria connexio veritatum, & per se Angelus infima, & probabili solum ratione procedat, id enim esset non procedere lumine perfecto, & comprehensiuo naturalium, nec per species perfectas, & exemplatas ab ideis diuinis, quæ manifestant, & repræsentant res ut sunt, id est ut derivantur à Deo.

Nec dici potest sufficere ad perfectionem intellectus Angelici, quod illi competat habere statim à principio omnes suas perfectiones in actu primo, non autem oportere quod statim à principio habeat illas in actu secundo, alias haberet Angelus semper in actu secundo intelligere omnia, quorum species habet, quod esset intelligere multa ut multa, quod negat D. Th. in hac q. 58. a. 2. & illa dicuntur intelligi ut multa, quæ intelliguntur per plures species. Si autem non est necesse quod Angelus sit in actu secundo quoad omnem suam perfectionem, nec etiam est necesse quod semper intelligat comprehensiuè, & in actu omnia quæ pertinent ad suas species: ergo poterit de vno procedere ad aliud, tanquam de potentia ad actum. Addo secundò quod Angelus potest uti specie sua inadæquate, & non secundum omnia quæ repræsentat, ut S. Th. docet q. 8. de verit. a. 13. ad 2. Hac enim ratione probat, quod etiam si vnus Angelus videat speciem, quæ est in altero Angelo, non tamen videt quomodo utitur illa, quia potest varia, & diuersa cognoscere ex vna specie: ergo non semper utitur illa adæquate: ergo neque comprehensiuè: ergo potest uti discurrendo, cum scilicet ex vna re cognita per illam speciem transit ad aliam in eadem specie repræsentatam. Et hoc vrgetur exemplo scientiæ infusæ animæ Christi, per quam poterat Christus Dominus discurrendo cognoscere, si vellet, ut docet S. Th. 3. p. q. 11. a. 3. & ibi communiter Thomistæ, solum per hoc quod poterat uti inadæquate illis speciebus infusis, & vnum deducere ex alio, licet omnium notitiam haberet, & nihil illum lateret: ergo non requiritur ad discursum quod procedatur ad aliquid ignotum, & occultum ex aliquo notiori, sed sufficit uti speciebus repræsentantibus omnia inadæquate, & vnum ex alio deducendo etiam intra eandem speciem, videlicet utendo illa specie quoad vnum obiectum inadæquate, & ex illo procedendo ad aliud obiectum partiale eiusdem speciei. Non est ergo id denegandum Angelo. Denique in exemplo corporum cœlestium, quo mouetur D. Th. ad asserendum, quod Angeli non acquirunt perfectionem suam per motum, potius oppositum apparet: nam etsi corpora cœlestia non acquirant perfectionem suam per motum augmentationis suæ, vel alterationis, bene

tamen

tamen per motum localem, quo mouentur, & perficiuntur ad iminutandum hæc inferiora: sine motu enim nihil in his inferioribus generaretur: ergo non habent totam perfectionem suam ab initio, sed per motum, licet non per omnem motum, sed per localem.

11 Ad primam Resp. quod non est necesse quod Angelus habeat in actu secundo omne quod est in ipso in actu primo, ideoque conuenit ei habere discursum successiuum, hoc est diuersa successiue intelligere, & successiue diuersas operationes habere: non tamen competit habere discursum secundum causalitatem, neque hanc perfectionem ita acquirere, quod acquirat illam transiendo de noto ad ignotum per distinctum lumen, sed simplici motu aut actione eam habendo, sicut etiam corpora cœlestia diuersis actibus in hæc inferiora influunt, v. g. diuersis illuminationibus, vel aspectibus, & hoc ideo, quia Angelus petit habere operationes in actu secundo limitate limitatione se tenente ex parte obiecti: actiones enim penes obiecta limitantur, seu specificantur. Vnde cum possit operari circa diuersa obiecta, oportet quod etiam possit habere diuersas operationes, & non omnes simul. Ceterum in habendo vnamquamque operationem, & perfectionem ex illa prouenientem, scilicet attingentiam veritatis, petit non procedere de potentia ad actum, & de imperfecto ad perfectum, quod est procedere per motum, sed illam operationem perfecte habere, quia comprehensiue, & statim attingere totam perfectionem, quam potest per quamlibet operationem. Itaque non habere plures operationes aliquam potentiam creatam non est perfectio, quia limitata potentia limitatas petit operationes; unde si non haberet nisi vnam, imperfecta maneret, quia non omnia obiecta complecteretur, & hæc diuisio operationum non prouenit ex debilitate luminis circa idem obiectum penetrandum, vel circa connexionem obiectorum, sed ex limitatione potentie non valentis vnico actu omnia complecti, præsertim quando ordinatur ad plura obiecta, & potentia est ita ampla quod potest in infinita syncategorematicè, necesse est multiplices esse operationes, quia penes obiecta specificantur, & limitantur; & sic non debet habere omnem suam perfectionem simul, & vnica operatione, quia non potest, nec nisi diuisim, quia multas operationes, seu omnes habere non potest simul, sed successiue, & sic discursus successiuus, hoc est multiplex operatio in intelligendo Angelis attribuitur. Ceterum respectu vnus obiecti, & vnus intelligibilitatis fundantis de se connexionem ad ea quæ sibi conueniunt, procedere de potentia ad actum, & de imperfecto ad perfectum, ita quod non possit vinci tota difficultas, & intelligibilitas obiecti plenè attingi vnica operatione, sed necesse sit plures adhibere, hoc imperfectionis est in tali natura operante, & oritur ex debilitate luminis non comprehendentis, & de hoc procedit S. Thom. quando eam negat supremis, & perfectis intellectibus quales sunt Angelici, ideoque ab eis remouet discursum.

12 Ad secundam dicimus quod vti aliqua specie inadæquatè, & non quantum ad omnia quæ repræsentat, potest stare dupliciter. Vno modo diuidendo ipsum lumen, ita quod non attingatur vtrumque obiectum simplici tendentia eiusdem luminis, sed vnum per se, & immediatè, aliud non per se, sed ex illatione, & connexionem ad alterum eliciendo, ex tali specie lumen quoddam illatiuum, & non eodem simplici vtendo pro vtroque obiecto, & ad

hoc diuidit illam speciem, seu inadæquatè illa vtitur, non solum vt diuidat conceptus seu cognitiones, vnumque cognoscat prius, aliud post, sed etiam diuidit lumina, vt vnum cognoscat lumine simplici, aliud lumine illatiuo, & ex vi connexionis deducendo notitiam. Alio modo potest intellectus vti inadæquatè aliqua specie solum, vt diuidat cognitiones seu conceptus circa diuersa obiecta, non verò diuidat lumina, modumque cognoscendi, ita vt vnum cognoscat simpliciter in se, aliud illatiue, & in vi connexionis, sed vtrumque simplici lumine, licet pro sua voluntate diuidat cognitiones, applicando modo speciem vni cognitioni, seu obiecto tantum, & postmodum alteri, non tamen vnum deducendo ex altero, & in vi ipsius deductionis cognoscendo. Igitur Angelus non potest vti inadæquatè specie sua primo modo, sed secundo: potest enim ex multis obiectis, quæ in vna specie repræsentantur accipere vnum, & relinquere aliud; & sic non omnia intelligere, quæ per illam speciem repræsentabilia sunt, sed tantum aliqua vel aliquod, non tamen potest mutare modum intelligendi, & alio lumine intelligere vnum obiectum, alio aliud, ita vt vnum intelligat per se immediatè, aliud illatiue, seu lumine illatiuo, & per modum connexionis, & illationis manifestatiuo, non simpliciter; sed si prius vnum obiectum tantum cognoscit de repræsentatis per illam speciem, & postmodum aliud; hoc secundum non illatione manifestat, sed simplici visione, sicut prius ex eodem lumine deducta, licet inadæquatè vtrique obiecto applicetur species, & lumen illud, sicut si vnum luminosum vno, eodemque lumine modò illuminet has partes, modò illas, quia diuersa applicatio eiusdem luminis est, non diuersum lumen deriuando vnum ex alio, vnum quod sit simplex, aliud illatiuum, & per consequentiam illuminans. At verò in scientia infusa animæ Christi, si aliquando discursu utebatur, licet per illas species omnia sibi essent manifesta, & cognita, ideo erat, quia ita temperabat illas species, quod vnum obiectum cognoscebat simpliciter, & aliud ex vi connexionis, & illationis. Quod quidem rectè poterat facere Christus Dominus, quia illæ species licet essent infusæ, & possent repræsentare sine discursu propter eleuationem sui luminis, tamen quia attemperabantur subiecto in quo erant, scilicet animæ rationali, & discursuæ, vtroque modo poterant manifestare, & quoad vsum subiecti ipsi intellectui, & taliter ei manifestare vnum obiectum quod possent aliud manifestare ex vi luminis illatiui, & perinde, ac si esset in se ignotum, & latens, sicque poterat intellectus ex illis speciebus lumen illatiuum educere, eo quod licet essent infusæ, erant tamen magis diuisæ seu multiplicatæ, minúsque vniuersales, quàm species Angelicæ, vt eadem quæst. 11. docet S. Thom. art. 4. Vnde fuerunt magis aptæ, vt illos temperaret ad discursum, eliciendo ex eis lumen illatiuum, & non sistendo in lumine simplici manifestatiuo vtriusque obiecti, sed ita inadæquatè vtendo specie quod diuideret lumina, & vnum obiectum attingeret per se, & immediatè, aliud non, sed lumine illatiuo ex illis speciebus educto, licet etiam possint immediatè vtrumque obiectum repræsentare, & simplici lumine attingere propter eleuationem talis luminis, & specierum.

Ad tertiam Respon. similitudinem inductam à D. Thoma de corporibus cœlestibus comparatione ad Angelos optimè tenere quoad id, pro quo adducitur: non adducitur autem à D. Thoma ad probandum, quod aut illa corpora debeant carere omni

moni,

motu, aut illi spiritus omni successione, & pluralitate actuum, vel etiam omni matione superioris causae, ad quam sunt in potentia: sed solum probat carere debere omni motu perficiente, aut augente eorum actualitatem, aut integritatem, sicut per motum augmentationis nos perficimur in his in quibus integramus. Itaque quodcumque perfectio debita, seu quidquid debitum est, & haberi potest per motum, & successivè acquiritur, hoc ad imperfectam naturam spectat. Quando verò motus non ferit ad hoc ut perficiatur, & acquirat debitam perfectionem ipsum subiectum, sed est motus rei perfectæ, ut operetur, & influat secundum modum suum, talis motus non provenit, aut convenit imperfectæ naturæ, quia potius se habet ut motus perfecti, non imperfecti, & si cælum prius supponitur in tota sua perfectione, & complemento, tam quoad substantiam, quam quoad quantitatem, & qualitatem, & tunc movetur motu circulari perfecto, quo non movetur ad acquirendam propriam perfectionem, sed ad dandum, & influendum inferioribus: & talis motus non est imperfectæ naturæ, sed perfectæ. Similiter Angelus supponitur perfectus, & completus in esse intelligibili per species, & tales species quod possint comprehensivè attingere veritatem, & in promptu habere quam volunt, & per illius comprehensionem; quod si hoc non posset acquirere nisi per motum, esset imperfectæ naturæ. Quod verò hac supposita perfectione habeat motum quantum ad successionem diversorum actuum, vel moveatur à Deo ad intelligendum, hoc non est imperfectæ naturæ, sed perfectæ, licet creatæ, & limitatæ.

14 Ex his solvuntur etiam fundamenta aliarum sententiarum ex Molina, Suarez, & Vasquez, quæ inter referendas eorum sententias tacta sunt. Nam quod attinet ad sententiam Vasquez, non est diversa à nostra, quia illa cognitio qua attingitur unum obiectum post aliud, seu in alio, ut in medio, dummodo id fiat eodem simplici lumine extendente se ad diversa obiecta, non autem in vi luminis illatiui, quod tantum cognoscit rem aliquam in vi connexionis, & consequentiæ cum alia non in vi comprehensionis, & penetrationis rei in se simplici intuitu, hoc non est discursus, de quo loquimur ex parte subiecti, sed ex parte obiecti, vel solum ex parte successionis actuum.

5 Ad fundamentum verò Molina quod non potest eadem cognitio esse intuitiva, & abstractiva respectu diversorum. Respon. hoc fundamentum debilissimum esse, licet Molina valde durum videatur quod eadem cognitio sit intuitiva, & abstractiva respectu diversorum, cum ipsemet Molina adducat exemplum in quo oppositum clarè convincitur, scilicet in cognitione divina, & in visione beata, in quibus eadem cognitio attingit Deum intuitivè ut præsentem, & res possibiles quas eadem cognitione in Deo videt, ut non existentes, & abstractivè. Similiter Angelus, intuendo essentiam suam, videt ibi, ut in effectu, Deum abstractivè, & qui intelligit speculum cum imaginè, videt, seu cognoscit in illa abstractivè rem representatam, & speculum intuitivè quia præsens. Et hoc præsertim verum habet, si intuitivum, & abstractivum non sint perfectiones desumptæ ex diversa ratione formali cognitionis, sed sint habitudines (licet intrinsecæ, & perficientes notitiam) ad diversam terminationem obiecti in se cogniti, quatenus cognoscitur res ut Præsens in se, & existens physicè, vel ut absens, aut non existens: sic enim eadem notitia procedens ex eadem ratione formali potest attingere ordine quodam plura obiecta, & unum intuitivè.

Ioan. à S. Thom. in 1. part. D. Th. Tomus alter.

tivè, aliud abstractivè, quia illud existens, hoc ut absens, sed connexum illi.

Fundamenta Suarez quæ etiam militant contra 16 Scotum, etiam ex dictis soluta manent. Ferè enim reducuntur ad illa duo capita iam proposita, & soluta, scilicet quando Angelus intelligit obscure aut opinativè, & coniecturaliter, vel etiam falsò, & erroneè, aut quando intelligit supernaturalia non clarè, & per proprias species, sed connotativè, & provt ex naturalibus format earum cognitionem, aut per distinctas revelationes à Deo revelantur, nec in vna illuminatione manifestat omnia prædicata, quæ ad aliquam rem spectant. In his enim omnibus procedit Angelus de potentia ad actum, & per plures cognitiones, quia in ipsa prima inspectione rei non penetrat quidquid ad illam pertinet, sed ex vno coniecturatur aliud: ergo procedit argutivè non semper comprehensivè. Vnde D. Thom. solum remouet ab Angelo discursum quando perfectè intelligit, supponens, quod cum imperfectè intelligit, non repugnat ei discurrere: sic enim dicit inf. q. 79. art. 8. *Angeli qui perfectè possident secundum modum sue nature cognitionem intelligibilis veritatis, non habent necesse procedere de vno ad aliud, sed simpliciter, & absque discursu veritatem rerum apprehendunt.* Ergo à contrario sensu, quando non perfectè Angeli cognoscunt, videtur ponendum quod Angeli procedant de vno ad aliud atque discurrant.

17 Quod ergo in his casibus in quibus Angeli aut opinativè seu coniecturaliter, aut circa supernaturalia obscure, & ex connotatione ad res naturales procedant per plures actus, quorum vnus ex connotatione ad alterum se habet, & ex notitia vnus ad alterum, quasi de potentia ad actum proceditur quod sufficit ad discursum probatur, quia in his casibus actus qui versatur circa naturalia, seu naturaliter cognita est evidens, actus autem circa ea quæ coniecturaliter videntur est obscurus: circa unum potest esse verus, circa alterum falsus. Similiter circa unum est naturalis, circa alterum supernaturalis, quæ non possunt simul identificari in vno actu. Ad ista autem Angelus est in potentia, quia ex propriis viribus non potest ea attingere: ergo quando movetur de vno ad alterum ut de naturali ad supernaturale, movetur de potentia ad actum, quod sufficit ad discursum, quia si non habet totam perfectionem suam simul in primo actu in quo fundatur ratio discursus.

Et confirmatur hoc ampliùs, atque explicatur 18 quia quando Angelus ex naturalibus attingit supernaturalia, non potest vnico intuitu in naturalibus supernaturalia videre, quia res naturales non representant aliquid de supernaturalibus, quia non se habent positivè ad illas, sed merè negativè: ergo oportet quod id attingat Angelus argutivè, & deducendo unum ex alio: nam per simplicem intuitum nihil in rebus naturalibus manifestari potest de supernaturalibus, quia res naturales solum negativè se habent respectu rerum supernaturalium, & in potentia obedientiali, quæ est non repugnantia ad res supernaturales: ergo non potest Angelus per vnicum intuitum tales res attingere: ergo per diversos actus, quorum vnus deducitur ex alio. Imò si posset vnico intuitu attingere res supernaturales per similitudinem ad naturalia, non posset Angelus decipi, sicut sæpè Daemon decipitur iudicando circa ista obiecta: in his enim quæ vnico intuitu videntur, non contingit deceptio.

Confirmatur secundo: Quia in Angelis potest esse admiratio, quæ importat inquisitionem cum aliqua ignorantia de eo quod inquirimus, & insolitum apparet: similiter est scientia qua verè cognoscunt

V v scunt

scant effectus per causas, quod sine discursu non contingit. Ac denique in voluntate datur processus de intentione finis ad electionem mediorum, & ex dilectione necessaria sui quoad specificationem procedunt ad eligenda alia liberè: ergo similiter in intellectu datur processus à principiis ad conclusiones: ergo discursus.

19 Respondetur, iam *suprà* satis responsum esse, & ostensum quomodo Angeli neque circa ea quæ obscurè, & coniecturaliter cognoscunt, neque circa obiecta supernaturalia habere discursum, sed semper procedere simplici intuitu quantum res ipsa manifestare potest de alia: nunquam verò procedere per distinctum lumen ab eo quo attingunt primum obiectum in quo alia cognoscunt, sed semper carent lumine illatio quo cognoscuntur aliqua per modum connexionis, & consequentiæ tantum. Atque ita non sufficit quòd Angelus per plures actus cognoscat de aliquo obiecto ea quæ illi competunt, aut quia vnum obscurè, & aliud evidenter cognoscit. aut quia vnum sibi reuelatur prius, & aliud postea, sed necesse est quòd cognoscatur vnum ex vi alterius ratione connexionis, seu in vi illius tantum: hoc enim est cognoscere illatiuè, & per consequentiam, seu lumine illatio, quod pertinet ad discursum, quia discursus non penetrat simplici intuitu essentiam, sed ratione connexionum deducit id quod non videt, sed infert ita esse & sic est lumen consequentiæ, id est ratione connexionis manifestans. Si autem non ex vi connexionis cognoscatur aliud quantumcumque diuersis actibus cognoscatur, non fit discursus, nisi fortè secundum successionem tantum, de quo non agimus in præsentī, vt saepe admonuimus. Et sic in omnibus exemplis, & instantiis, quæ adducuntur in oppositum est defectus, quia in nulla eorum probatur dari duas cognitiones, & lumina, quorum vnum deducatur ex altero tanquam ex principio magis noto, & manifestante alteram veritatem vt deductam, & illatam ex priori, ac per hoc in vi luminis illatiui, & per connexionem, & consequentiam, non per simplicem penetrationem veritatis videatur. Et bene stat quòd de supernaturalibus plures illuminationes Deus Angelis faciat, sed in vnaquaque attinget vnico intuitu quicquid ad illam illustrationem spectat, & sine discursu. Quando autem aduenit alia, etiam illam sine discursu intelliget, nec transit de vna ad aliam in vi connexionis, & illationis, licet distincta illustratione detur, quod solum arguit discursum secundum successionem, non secundum causalitatem.

10 Dicimus ergo quòd in illis casibus vel obscuræ, & coniecturalis cognitionis, vel cognitionis supernaturalium per alienas species, non dari processum de potentia ad actum per plures cognitiones, & lumina, quorum vnum se habeat illatiuè ad aliud, sed vnumquodque vel vtrumque percipitur simplici intuitu, & penetratione, non deductione, & illatione vnus ex alio, ita quòd lumen eius vt manifestatum veritatis ex alio sit lumen illatiuum, & per illationem consequentiæ manifestans, non per simplicem penetrationem quidditatis, & eorum quæ sibi conueniunt, licet alias inter se connexa sint, quia ista connexio non est ipsa formalis ratio manifestandi, sicut in illatione, & consequentia, licet quia connexio rerum non est necessaria, sed contingens non manifestat Angelo rem certò, & evidenter in illo simplici intuitu, sed contingenter, & coniecturaliter, atque adeò obscurè. Autoritas autem D. Thom. allata nullo modo est ad rem, quia D. Thom. ibi cum dicit *Angeli qui perfectè possident cognitionem, &c. ly qui perfectè possident*, non est

particula restrictiua discernens Angelos, qui perfectè possident, ab Angelis qui imperfectè intelligunt, aut quando imperfectè intelligunt, sed est vniuersalis distinguens Angelos ab hominibus. non Angelos inter se: dicit enim sic: *Ratiocinari est procedere de vno intellectu ad aliud ad veritatem intelligibilem cognoscendam; & ideo Angeli qui perfectè possident secundum modum suæ naturæ intelligibilem veritatem &c.* Vbi loquitur de Angelis vniuersaliter, & illa particula *qui perfectè possident*, vniuersaliter omnes complectitur, & est perinde ac si redderet rationem, & diceret, Angeli quia perfectè possident, &c.

Ad rationem autem Respon. in illis casibus vni- 21
co actu, & non pluribus, quorum vnus deducatur ex alio, Angelum procedere. Et licet illo actu attingat vnum obiectum clarè aliud obscurè, & coniecturaliter, hoc non est inconueniens, cum hoc sit respectu diuersorum, & secundum inadæquatas rationes materialiter ibi inuentas. Neque in hoc vitimur doctrina *suprà* tradita de intuitiuo, & abstractiuo: in his enim melius apparet quòd idem actus possit respectu diuersorum esse intuitiuus, & abstractiuus, eo quòd intuitiuo, & abstractio tenent se ex parte diuersæ terminationis ex parte obiecti materialis; & ideo non est mirum quòd eidem actui possit conuenire respectu diuersorum: at verò actum esse euidentem, & obscurum, non pertinet ad terminationem ex parte obiecti materialis, sed ad motum, seu rationem formalem, ex qua habetur lumen, sub quo aliquid videtur aut clarè, aut obscurè. Vnde difficilius apparet quomodo idem lumen possit in eadem ratione formali seu in vno actu vnire rationem luminis euidentis, & obscuri. Dicimus tamen id non esse inconueniens respectu diuersorum obiectorum, quando datur diuersa modificatio eiusdem luminis seu rationis formalis, vt applicatur diuersis obiectis, & ex tali diuersa modificatione resultat illa obscuritas, seu minor euidentia in vno quàm in altero, sicut etiam in visu externo, quia lumen externum diuersimodè modificatur propè, vel longè, & species rei propinquæ fortius mouent quàm distantis, ideo bene stat quòd eodem actu videndi rem propinquam videamus distinctè, & rem distantem confusè, & obscurè; & tamen idem actus videndi est, & idem lumen, diuersimodè modificatum; & applicatum. Quid ergo vetat quòd Angelus efficacia sui luminis totam intelligibilitatem obiecti aperiens videat eodem lumine, & actu comprehensiuo, ea cum quibus habet obiectum illud necessariam connexionem euidenter, & certò, ea verò cum quibus habet contingentem connexionem obscurè, & coniecturaliter, & non certò? Sicut videt euidenter causam liberam vel contingentem, v.g. hominem, & ineuidenter, seu coniecturaliter effectum futurum, quia ibi contingenter continetur, quia videlicet iuxta diuersas connexiones cum obiectis diuersimodè applicatur, & modificatur lumen, vt hic sit clarum, ibi obscurum.

Quòd autem circa vnum possit esse iudicium 22
Angeli verum, & circa alterum falsum, dicimus quòd, vt bene notat Caietan. in hac quæst. 58. art. 5. in Angelo solum est falsitas virtualis, quia est virtualis compositio, aut diuisio, quatenus intellectus Angeli simplici intuitu, & ad modum nostræ primæ operationis ex parte cognoscentis, attingit omnia composita, & quicquid nos attingimus nostra compositione, & diuisione. Ille ergo actus simplex in Angelo, quo iudicat de diuersis obiectis, potest virtualem falsitatem habere, quatenus verum attingendo circa ea quæ naturaliter potest, non

non detinet illud iudicium, sed eodem modo procedit circa ea quæ coniecturaliter tantum sibi repræsentantur. Vnde Dæmon quando decipitur, ex præcipitatione sua, sicut & quando peccat, ex abundantia aduertentiæ speculariæ, & malitiæ decipitur, & errat practicè, quia videlicet pleno suo lumine aduertit hoc obiectum non ostendere talem veritatem nisi coniecturaliter, seu contingenter, & tamen hoc aduertendo vult ulterius extendi, & iudicare de illo occulto, & coniecturaliter tantum noto, ac si esset sibi certum, & evidens: in hac extensione deceptio est, & falsitas, sed coniuncta veritati, qua iudicat quid res illa ostendit certò, & quid coniecturaliter, & non obstante quod videt non nisi coniecturaliter hoc repræsentare, non se detinet, sed vult ulterius procedere, & periclitari iudicium, dicendo quòd ita sit determinatè, & fortassis non ita est in re; & sic fallitur, ideoque dicit D. Thom. art. 5. cit. quòd Dæmones non decipiuntur circa ea quæ naturaliter pertinent ad rem, sed circa supernaturalia. Cum iudicio ergo non deceptorio, sed vero circa rem naturalem, præcipitantur in rem sibi occultam. Vnde ulterius fit, quòd inconsideratio Angeli circa suam deceptionem aut peccatum est inconsideratio præiudicia, & affectata, ideoque non minùs ei inhæret, quàm illi rei quam aduertit. Et hoc ideo quia inconsideratio ista non provenit ex ignorantia privatiua, aut ex defectu scientiæ speculariæ, sed ex præcipitatione qua sciens, & volens non se detinet, sed iudicat ultra quam potest, & inconcessa præsumit; unde magis est imprudens, quia magis voluntariè iudicat, & se applicat ad id quod non potest, & sic illud non detineri est maioris imprudentiæ, quia magis volens peccat, & consequenter maior inconsideratio practica, seu defectus prudentiæ.

23 Ad id quod dicitur de cognitione naturali, & supernaturali, quando ex naturalibus procedit ad cognoscendum supernaturalia. Respon. quòd supernaturalia possunt cognosci ab Angelo dupliciter, vel supernaturali cognitione, vel solum naturali, scil. prout in rebus naturalibus seu effectibus, aliquomodo manifestantur, aut prout cum illis conveniunt convenientia aliqua, saltem proportionali. Primo modo non cognoscuntur nisi divina revelatione, non autem ex ipsis rebus naturalibus, quia in naturalibus non continentur supernaturalia ut in se sunt, cum illa incomparabiliter excedant; & sic non currit argumentum quòd ea arguitur cognoscant. Secundo modo non possunt supernaturalia aliquo modo cognosci ex solis rebus purè naturalibus siue per discursum, siue sine discursu, quia nullo modo continentur res supernaturales in naturalibus, nisi secundum potentiam obedientialem, quam Angelus naturaliter nullo modo cognoscit; & sic ex illa non potest elicere, neque per discursum, neque sine illo, cognitionem rei supernaturalis positivè, sed solum in communi, & in confuso, quòd Deus potest ex illa creatura plus facere, quàm nullus valet intelligere, quod est ex cognitione rei naturalis elicere cognitionem divinæ omnipotentia, ut superexcedentis omnia; & hoc sine discursu facit Angelus, sed simplici intuitu, & eodem lumine, tantum percipiens de omnipotentia Dei, & de ordine supernaturali in confuso, & in communi, quantum in illa re naturali manifestabilis est. Cæterum si videat aliquem effectum supernaturalem positivum ut suscitationem mortui, aut negativum, ut non videndo personam creatam in humanitate Christi, & tamen videns talem hominem subsistere, & subsistendo operari, tunc Angelus ex naturali lumine sine ullo discursu iudicat, id quod illi effe-

Ioan. a S. Thom. in 1. part. D. Th. Tomus alter.

ctus manifestant de se, scil. aliquam causam superiorem tota natura, ibi esse à qua ille effectus procedat, & nihil amplius (nisi temerariè, & imprudenter iudicet, ad quod etiam discursu non indiget, sed præcipitatione ducitur) ad hoc autem non indiget discursu, quia totum hoc manifestatur sibi in ipsa naturali, & simplici penetratione effectus tam insoliti, videlicet in illa carentia personalitatis propriæ videndo quòd subsistit, & existit illa natura humana; & in illa resurrectione mortui, quam videt è nulla causa naturali posse procedere. Si autem res supernaturales cognoscit Angelus solum in quadam proportionem, & confusione seu analogia ad res naturales, sic non indiget discursu, neque argumento deducente unum ex alio, sed in ipsa penetratione simplici rei naturalis, etiam proportionem cum supernaturali cognoscit, quia hoc non est aliud quàm cognoscere ens in communi, vel qualitatem in qua communicant naturalia, & supernaturalia, & hunc conceptum sine discursu formare potest.

Vnde patet ad probationem, qua dicitur ad ista 24 omnia procedere Angelum de potentia ad actum, quatenus ex suis viribus naturalibus ea non attingit: dicimus enim quòd ad attingendum supernaturalia in confuso, & in communi, vel prout in aliquibus effectibus externis manifestantur non est in potentia neque procedit de imperfecto ad perfectum magis quàm ad cognitionem ipsiusmet effectus, aut rei naturalis in quo id videt, quia posita cognitione effectus fertur in omne illud quod in tali effectu manifestari aut contineri potest sine alio lumine illatiuo, quod ex vi deductionis, & consequentiæ talem veritatem manifestet. Quòd si in tali effectu res illa non continetur, nisi purè negativè, & per potentiam obedientialem, non poterit neque arguitur, & per discursum, neque sine illo talem rem cognoscere ex vi effectus illius.

Ad primam confirmat. iam responsum est ex 25 dictis, quòd supernaturalia si nullo modo continentur in effectibus naturalibus nisi tantum negativè, seu per non repugnantiam, non possunt Angelo manifestari ex vi cognitionis rerum naturalium, neque per discursum, nec sine illo. Si verò aliquo modo continentur in aliquibus effectibus, hoc ipso sine discursu attingentur ab Angelo vidente talem effectum, quia in ipso videt simplici penetratione, & intuitu quidquid ibi continetur, & eo modo quo continetur, & quidquid nos arguitur, seu per discursum ex tali effectu possemus colligere, & accipere totum id simplici penetratione, id est, eodem lumine, & non per lumen illatiuum videt, nec per consequentiæ ex alio priori lumine. Quod autem possit Dæmon errare, & decipi, non obstant quòd unico intuitu rem videt, iam dictum est quomodo id possit contingere respectu eorum quæ Angelis occulta sunt, & contingentem connexionem habet, & tamen vult determinatè de eis iudicare.

Ad secundam confirmat. dicitur: quòd admiratio 26 in Angelis potest contingere respectu eorum quæ sibi sunt occulta, & tamen aliqua indicia, vel effectus vident, quorum causæ supernaturales sunt, ut visa resurrectione mortui facta à Christo, de cuius divinitate non essent certi, aut visa negatione personæ creatæ in eius humanitate, poterant admirationem habere de causa sustentante ipsam. Sed illa admiratio in Angelis non incitat ad inquisitionem causæ per discursum, sicut nos, sed ad habendam illustrationem à superioribus Angelis, vel à Deo de tali re occulta, quam sine discursu accipere debeant. Et hoc modo introducuntur aliquando Angeli in

V v 2 Scripta

Scriptura quærente aliquid sibi ignotum, ut Psalmo 23. *Quis est iste Rex gloria!* & Esai. 63. *Quis est iste qui venit de Edom.* Quam interrogationem, de Angelis intelligit Dionysius 7. cap. *caelest. Hierarch.* Quod autem dicitur de scientia, respondetur illam esse in Angelis per cognitionem causæ, & effectus ex parte rei cognitæ sine aliquo discursu ex parte cognoscentis, sed ex hac parte habet scientiam eminentiori modo, quàm nos, scilicet in principiis cognoscendo conclusiones sine ullo lumine illatio, sed per lumen comprehensuum. Nos autem inferiori modo intelligimus causam per se; & effectus per illationem ex causa. Ad id autem quod dicitur de processu voluntatis à fine ad media, respondetur esse disparem rationem inter intellectum, & voluntatem, quia voluntas ex perfectione sua habet quædam bona necessariò diligere, alia verò liberè, unde non pertinet ad eius perfectionem, quod amato sine, statim amet omnia media, sed potest pro sua libertate hoc assumere, & aliud relinquere, licet per accidens si sit tantum unum medium, feratur in illud necessitate quadam ex suppositione finis voliti, non simpliciter. Et tamen in illud in quod fertur liberè ex electione, eodem actu fertur quo in finem, nec in fine sistit, licet non omnia media velit, ut *infra disput. 24.* dicemus. Perfectio autem intellectus petit, ut nihil eum lateat, sed omnia videat quæcumque videre potest: unde est imperfectio eius procedere de potentia ad actum, & tantò est perfectior, quantò plura in actu intelligit; unde non est simile in processu voluntatis, & intellectus. Quæ est solutio D. Thom. *infra quæst. 60. art. 1.*

*De compositione, & diuisione intellectus
in Angelo.*

26 Dicendum est secundò, intellectui Angeli nullo modo competere compositionem, aut diuisionem, & ex eodem principio debere negari, ex quo negamus ei discursum. Ita D. Thom. *in præsent. quæst. 58. artic. 4.* ubi communiter omnes eius discipuli, & videri etiam potest *quæst. 16 de malo artic. 6. ad 2. secundi ordinis* Et in 2. *distinct. 3. artic. 2. in corpore.*

Et ratio est eadem quæ allata est ad negandum discursum in Angelis, quia intellectus vtens compositione, & diuisione est ille, qui viso, & intellecto aliquo extremo, non statim videt in illo id quod sibi conuenit aut à se remouetur; & ideo indiget alterius extremi cognitione distincta, quæ comparatur cum prima ad videndum an sibi conueniat vel disconueniat. Vnde formaliter loquendo compositio non consistit in eo quod pluribus speciebus intellectus vtatur ad aliquid integrè, & perfectè cognoscendum, sed quod indigeat comparatione, & conferentia vnus cum altero ad eliciendum iudicium, & cognitionem de conuenientia vel disconuenientia talis prædicati ad tale subiectum: testatur enim debilitatem luminis intellectualis, quandocumque non potest directè, & simplici intuitu penetrare connexiones rerum, sed indiget circuitu, & comparatione vnus cum alio, ut ex tali comparatione rerum manifestationem eliciat. Si autem ommissa omni comparatione, & conferentia vnus extremi cum altero, potest quodam simplici intuitu, & lumine vtrumque extremum, eiusque connexionem attingere, siue vtatur pluribus speciebus, siue vnica, si tamen manifestatio, & lumen inde ortum penetratiuum est, & comprehensuum ipsarum rerum, & connexionum, hoc ipso differt à lumine collatiuo, & ex

comparatione rerum orto, quod semper est lumen debilissimum, sicut valde differt in rebus corporalibus oriri lucem ex collisione, & attritu corporum, vel ex directâ emissionem radiorum à luminoso. Cum ergo Angelus habeat lumen intellectuale perfectum penetratiuo, & comprehensiuo modo tendens in obiecta, quæ sibi proponuntur, non comparatiuo, & collatiuo modo, consequenter non conuenit illi compositione, & diuisione vi ad manifestationem connexionis extremorum, & veritatis, sed simplici quodam intuitu, quia lumine quodam penetrante, & non comparante vtitur.

Ad fundamenta autem P. Vasquez *suprà* indicata referendo eius sententiam, videlicet quod Angelus debet componere, & diuidere, quando attribuit subiecto aliquod prædicatum supernaturale, quia hoc non potest per speciem rei naturalis, nec per conceptum eius cognosci; & sic indiget duplici conceptu, & specie. Et similiter diuisio non fit nisi per cognitionem duplicis extremi, quorum vnum non repræsentatur in specie, seu conceptu alterius, aut illo viso, ut quando dicitur homo non est lapis: nec enim lapis repræsentatur in conceptu hominis: ergo indiget duplici specie seu conceptu: ergo vtitur compositione. Quotiescumque enim intellectus indiget ad cognitionem extremorum duplici conceptu vel specie, hoc ipso vtitur compositione, quia non possunt illi conceptus adunari ad repræsentandam illam veritatem, nisi mediante aliqua comparatione, vel collatione. Denique in intellectu Angeli est veritas, & falsitas formalis: ergo compositio, & diuisio, quia solum in illis agnoscit D. Th. veritatem, & falsitatem.

Sed ad hæc respondetur ex dictis.

Ad primum dicitur quod quando supernaturalia cognoscuntur ab Angelo conuenire extremis naturalibus, verum est, quod species rei naturalis secundum se non repræsentat Angelo rem supernaturalem distinctè, & clarè; potest tamen repræsentari supernaturalis res per aliam speciem, vel propriam de tali re supernaturali, vel connotatiuam, & per respectum ad aliquem effectum, vel rem naturalis ordinis. Si repræsentetur res supernaturalis per speciem propriam, & supernaturalem, talis species repræsentat rem illam cum suo subiecto quasi in obliquo, & secundario, ita quod sicut per speciem naturalem alicuius substantiæ, seu subiecti petit Angelus sibi repræsentari eius accidentia, quia illi conueniunt, illiue connectuntur, ita è conuerso per speciem rerum supernaturalium petit sibi repræsentari talia accidentia non seorsum à subiecto, sed prout in illo, quia debent repræsentari eo modo, quo à Deo fiunt per ideas suas, & secundum statum quem habent, & existunt in re, sunt autem in subiecto; & sic in illo repræsentari debent; & ratione talis repræsentationis potest Angelus vtens illa specie simul videre vtrumque, scilicet subiectum, & accidens supernaturale, quia vtrumque eadem specie, & eodem simplici lumine repræsentatur, non autem lumine collatiuo, & compositiuo, id est, orto ex comparatione vnus cum altero. Si verò repræsentetur res supernaturalis, non per speciem propriam sui, sed connotatiuam, & alienam, v. g. per speciem alicuius effectus aut signi quo manifestatur, tunc talis effectus etiam dicere potest ordinem ad aliquod subiectum, cui conuenire debet tale accidens; & sic per talem speciem sine vlla compositione per simplicem intuitum poterit repræsentari effectus, res supernaturalis connotatiue ad effectum, & subiectum talis rei supernatu

supernaturalis, vt dicit ordinem aliquem ad eundem effectum: vt v. g. si videt miraculum ex quo tanquam ex effectu colligit diuinitatem Christi, seu mysterium Incarnationis, ex eodem intelligit subiectum, cui conuenit tale mysterium, scilicet illum hominem qui dicitur Christus. Quod si tandem aliquis velit gratiam vel accidens supernaturale representari, vel propriè, vel connotatiuè per speciem seorsum ab subiecto, & vt attribuat Angelus tale accidens subiecto, debere coniungere duas species, & hoc esse componere, dico quod adhuc in tali casu non datur compositio, licet detur coniunctio specierum, & vtraque specie vtatur Angelus, quia vt multis speciebus aut coniungere illas ad producendum vnum conceptum non semper est componere, & diuidere: requiritur enim ad compositionem, vt diximus, quod vtatur multis speciebus non manifestantibus conuenientiam, vel disconuenientiam extremorum vnico intuitu, & lumine simplici penetrante, & comprehendente illam conuenientiam, licet ex concursu plurium specierum id procedat, sed manifestantibus illam conuenientiam ex vi comparationis, & conferentia vnus extremi cum alio, ita quod non solum composita extrema cognoscat, sed quod ipsa compositio, & comparatio det manifestationem enunciationis; hoc est formaliter componere, & diuidere.

29 Ad secundum Resp. quod diuisio quæ est propositio negatiua, dupliciter potest formari. Vno modo cum cognitione distincta vtriusque extremi, scilicet tam subiecti, quam prædicati negati, v. g. si dicitur, Petrus non est lapis, quod tam Petrum quam lapidem distinctè, & quidditatiuè intelligat, licet enim non sit necessarium ad formandam propositionem illam negatiuam, quidditatiuè vtrumque extremum cognoscere, potest tamen sic cognoscere extrema, & de eis ita cognitis negationem formare. Alio modo potest formari diuisio, seu propositio negatiua sine cognitione distincta vtriusque extremi, sed solum cum cognitione repugnantia vnus extremi ad aliud, ita quod illud aliud extremum non cognoscatur quomodo, vel quid in se sit, sed in quantum alteri repugnans, seu in quantum exclusum, & negatum, non in quantum in se suis prædicatis constituitur. Ad formandum primo modo propositionem indiget quidem Angelus vti pluribus speciebus coniunctis, quibus representetur illa negatio extremorum, quia non solum representatur negatio, sed etiam vtriusque positiua quidditas, super quam cadat negatio: sed tamen hoc non fit per compositionem, quia duplex illa species simplici representatione, & intuitu representat suas quidditates, non ex vi collationis, & comparationis. Negationem verò vnus de altera quælibet illarum specierum sufficienter representat, non ex comparatione, & collatione vnus ad alteram dignoscitur, quia in ipsa quidditatis positione alterius negatio est imbibita. At verò ad formandam propositionem secundo modo, non requiritur duplicis speciei concursus, sed per eandem speciem qua representatur Angelo aliquod extremum, representatur in illo quidquid ei conuenit, vel remouetur ab eo, vt docet S. Th. in hac q. 58. art. 4. ad 1. intelligètia enim quidditatis rei in Angelo æquiualeat nostræ compositioni, & diuisioni, qua attribuimus aliquid, vel remouemus ab ea. Quod intelligitur de omni eo quod remouetur, seu negatur ab aliquo in quantum negatur, & remouetur. Nam cognita per speciem quidditatiuam hominis, & penetrata natura eius,

Ioan. à S. Thom. in 1. part. D. Th. Tomus alter.

hoc ipso cognoscitur in vi talis naturæ, quod ibi non est alterius rei prædicatum, quam hominis; & sic videtur leo, & lapis, & equus non absolute, & quidditatiuè in se, sed prout non sunt homo, seu prout excluduntur ab homine: viso enim quid sit homo, etiam videtur quid non sit, seu quod ibi nihil aliud est, prout negatio fundatur in affirmatione; & sic non indiget Angelus componere cum alia specie, sed penetrare quidditatem vnus, vt videat quid non sit illa.

Quod verò dicitur, quoties vtitur intellectus duplici conceptu, vel specie, hoc ipso componere, iam dictum est, compositionem aliquid amplius dicere, nempe quod ipsa comparatio, & compositio sit ratio videndi, & cognoscendi connexionem, seu conuenientiam, aut disconuenientiam vnus ad alterum; & sic non sufficit adunare duplicem speciem, si vtraque solum elicitur cognitio comprehensua, & penetratiua alicuius conuenientia, & comparationis, non verò sola ipsa comparatio est ratio cognoscendi illa extrema, & conuenientiam eorum. Vnde si ita comprehensiuè penetratur aliqua veritas ex concursu duarum specierum, conceptus erit vnus, quia si vnus conceptus non sufficit exprimere totum illud, comprehensio non erit vna; atque adeo neque comprehensio erit. Sed quia ille conceptus non formatur ex vi comparationis, & conferentia, sed ex vi penetrationis simplicis, in qua etiam comparatio ipsa attingitur, ideo non est ille conceptus compositio, & diuisio formaliter, licet totam compositionem intelligat simplici intuitu.

Denique ad id quod dicitur de veritate, & falsitate, iam dictum est, quod inuenitur in compositione etiam virtuali, & eminenti, & non solum in formali, quia illa simplex penetratio quidditatis æquiualeat compositioni, & iudicio, quod nos per compositionem formalem facimus, id est, per comparationem, & compositionem, quæ est ratio sic cognoscendi enunciationem illam; virtualis verò est quæ ex parte obiecti cognoscit compositionem, modus verò cognoscendi non est ex vi comparationis, sed simplici penetratione: & specialiter quomodo ibi sit falsitas explicatum est supra.

Duo corollaria.

Vltimò, ex dictis collige duo.

Primum est in Angelis respectu cognitionis naturalis nullus habitus acquisitus, vel ingenuus est ponendus præter species intelligibiles tam respectu veritatum quas euidenter cognoscunt, quam quas cognoscunt coniecturaliter, aut incerto. Respectu autem supernaturalium indiget lumine superaddito per modum habitus præter species intelligibiles. Et licet in hoc sint variae sententiae authorum, tamen hæc videtur conformior menti D. Thom. quam sequitur Caiet. 1. 2. q. 50. art. 6. Vbi D. Th. docet quod habitus intellectuales substantia separata non sunt similes his qui sunt in nobis habitibus, sed magis sunt similes simplicibus, & immaterialibus speciebus, quas continet in se ipsa: Et infra addit quod in quantum Angelus est in potentia, indiget perfici habitualiter per aliquas species intelligibiles, ad operationem propriam, sed in quantum est in actu per essentiam suam, potest aliqua intelligere, ad minus, seipsum, &c. Nec ibi ponit alios habitus propriè dictos præter tales species, sed solum impugnat sententiam eorum, qui excluderunt ab Angelis habitum, &

V v 3 omne

omne accidens, putantes per seipsum sufficere Angelum ad intelligendum omnia: cum tamen respectu rerum naturalium indigeat speciebus superadditis habitualiter disponentibus, qui solum sunt habitus repræsentatiui: in supernaturalibus autem indigent non solum habitu, seu qualitate repræsentatiua, sed etiam habitu operatiuo, seu lumine superaddito virtuti propriæ.

Ratio huius est, quia respectu supernaturalium indiget Angelus non solum repræsentatione obiecti, sed etiam eleuatione virtutis, eo quod virtus eius est improporcionata ad eliciendum actum supernaturalem, qui est superioris ordinis. Vnde in ratione virtutis indiget fortificari, & determinari aliquo habitu operatiuo, & eleuatiuo. Cæterum respectu veritatum naturalium Angelus habet virtutem ita efficacem quod posita repræsentatione suæ speciei, statim comprehendit totum quod illi conuenit sine nouo lumine, & virtute, siue necessariò, & demonstratiuè, siue contingenter, & coniecturaliter vnumquodque in suo ordine, & linea: ergo nullam sentit difficultatem in penetrandis, & intelligendis huiusmodi veritatibus, sed per simplicem intuitum ex virtute suæ potentia ea intelligit. Ergo superfluit ibi habitus, quia potentia ex se est sufficienter in actu ad penetrandum omnes illas veritates. Neque in hoc est aliqua differentia inter veritates, quæ in principiis continentur magis remotè, vel magis proximè, quæ continentur, necessariò, vel probabiliter; nam cum Angelus procedat comprehensiuè circa obiecta repræsentata, primo intuitu attingit quidquid ad talem rem pertinet; atque aded tanta facilitate videt in principiis conclusiones proximas, quàm remotas, quia comprehensio totum hoc postulat, seu modus iste intelligendi comprehensiuè. Et eodem modo intelligit quædam contineri in illis obiectis necessariò, quædam probabiliter: Vnde ad intelligendum aliqua coniecturaliter non indiget alio lumine, sed illo ipso quo rem penetrat, videt aliqua contingenter solum contineri in tali re, &

cum ea connecti, quod sufficit vt coniecturaliter ea cognoscat, nec amplius in illa cognitione meliorari potest, & perfici per habitum aliquem naturalem à se acquisitum.

Secundò colligitur bene stare quod intellectus noster in compositione, & diuisione formanda producat vnum conceptum, qui entitatiuè sit vnus, & secundum qualitatem simplicem formatus, & tamen verè dicatur componere, & diuidere. Non eo modo quo Vasq. *hic disput. 223. c. 3.* impugnauit aliquorum, quos ipse refert, sententiam, quod compositio, & diuisio, & syllogismus in nobis est vna qualitas composita ex pluribus per physicam, & realem vnionem, sicut ex duabus aquis fit vna aqua. Hoc enim nos nullo modo dicimus, cum qualitates illæ seu conceptus non se habeant vt forma, & materia, vel vt partes integrales quæ componant vnum totum; sed dicimus præcedere quidem in prima, & simplici operatione plures conceptus, postea verò in secunda non illos vniri physicè, aut novos respectus accipere, quibus respectiuè coniungantur, sed produci vnum conceptum de nouo, qui sit qualitas quædam vna, & simplex, repræsentans illa plura quæ in simplicibus conceptibus distincta erant per modum vnus, seu vniti, & comparati inter se; sed tamen rectè vocari compositionem, & diuisionem, quia illa plura repræsentat, & manifestat vniri, & coniungi inter se, non ex vi penetrationis alicuius extremi, sed ex vi comparisonis, & conferentiæ vnus cum altero, ex quo nascitur manifestatio conuenientiæ aut disconuenientiæ extremorum. Et quia hæc manifestatio ex collatione, & comparisonem plurium oritur, in eaque fundatur, dicitur formalissimè compositio aut diuisio in ratione formali manifestationis, & luminis, licet in entitate conceptus compositio non sit physica aut respectiua, seu ordine tantum vna, sed repræsentatiua, quia qualitas illa sub vna comparisonem, & collationem plura repræsentat, vt ex D. Th. latè tradidimus *suprà disp. 2. art. ult. & aliis locis.*



QVÆSTIO LIX.

De voluntate Angelorum.

S V M M A L I T T E R Æ.



XPEDITO omni eo quod pertinet ad intellectum Angeli, ipso ordine doctrinæ transit D. Thom. ad ea quæ de ipsorum voluntate agenda sunt. Et in hac quæst. agit de ipsa voluntate eorum per quatuor articulos, in sequenti de actu voluntatis, qui est amor, per quinque.

In primo ergo artic. ostendit dari in Angelis voluntatem, quia datur inclinatio consecuta ad naturam cognoscentem, regulatamque cognitione, & non cognitione sensitiva, quæ in eis non est, sed intellectiva: ergo habent voluntatem.

In art. 2. ostendit hanc potentiam voluntatis distingui in Angelis ab intellectu, & à natura eorum. Distinguitur quidem à natura, quia prædicata constitutiva naturæ intra ipsam includuntur, nec ad aliquid extra se respiciunt, vel ab eo specificantur. Voluntas autem tendit ad aliquid extra, quia est inclinatio in bonum non solum proprium, sed etiam extrinsecum. Ab intellectu autem distinguitur, quia intellectus cognoscit trahendo res ad se, voluntas tendendo, & impellendo se ad illas. Diuersæ autem virtutis est trahere res ad se intelligibiliter, aut in eas ut sunt in se, tendere, nisi sit virtus increata, quæ intra se habet omne bonum, nec indiget aliquo extra se, neque ad intelligendum, neque ad volendum.

In art. 3. ostendit in Angelis esse liberum arbitrium, idque multò excellentius, quàm in nobis, quia est in ipsis altior intellectus cum maiori vniuersalitate, & indifferentia respiciens obiectum suum ex indifferentia autem iudicij circa bonum nascitur libertas in voluntate ad tendendum.

In art. 4. ostendit non distingui in Angelis appetitum concupiscibilem, & irascibilem; neque sicut in nobis, in quibus distinguuntur isti appetitus in parte sensitiva, qua caret Angelus, neque vilo alio modo quia voluntas est appetitus boni secundum vniuersalem rationem boni, vnde non potest dari appetitus in parte intellectiva, seu voluntas, quæ distinguatur penes bona particularia.

QVÆSTIO LX.

De amore & dilectione Angelorum.

S V M M A L I T T E R Æ.



N art. 1. ostendit quòd in Angelis est amor naturalis erga aliqua obiecta. Et sumitur ly *naturalis* non pro appetitu innato, sed pro actu appetitus elicit, qui tamen procedit necessariò, & non liberè ab ipso. Et ratio est, quia in omni natura datur aliqua inclinatio iuxta modum talis naturæ, eique adæquata, & proportionata, quæ necessariò illi conuenit: ergo & in natura intellectiva debet talis inclinatio non deesse.

In art. 2. ostendit dari etiam in Angelis dilectionem electiuam, id est liberam, & ex arbitrio procedens, non ex necessitate: licet enim aliqua debeat voluntas naturaliter appetere, sicut fines, aliqua tamen electiuè, & liberè appetit, sicut media, quia media non de necessitate simpliciter appetuntur, sed propter aliud: sic enim esset abire in infinitum: ergo aliqua debet liberè appetere, scil. quæ in se non habent bonitatem necessariam, & propter se appetibilem, alia autem naturaliter, scil. quæ ratione sui appetuntur, & ex immediata adæquatione cum voluntate. Intelligitur appeti necessariò quoad specificationem.

In art. 3. ostendit quòd Angelus seipsum diligit, tum naturali dilectione, tum electiuam.

V v 4

Naturali

Naturali quidem, in quantum naturali appetitu aliquod bonum sibi diligit, ut esse, vivere, &c. Electiua autem in quantum aliquod bonum liberè sibi vult.

In art. 4. ostendit quòd alium Angelum etiam diligit naturali dilectione sicut seipsum, in quantum conuenit secum in natura; sic enim diligit illum sicut se, & sicut suam naturam, in qua alter conuenit: diligit etiam liberè, in quantum ab eo differt, vel in aliquibus aliis quàm in natura conuenit secum.

In art. 5. ostendit quòd naturali dilectione plùs, & principalius diligit Angelus, & homo Deum, quàm seipsum, quia naturalis habitudo, & inclinatio plus est ad bonum totale, & vniuersale, quàm ad partem, cum magis ex toto dependeat conseruatio partis, ideòque naturaliter partem exponit natura pro conseruatione totius. Deus autem est vniuersale bonum, Angelus autem pars. Plus ergo natura Angeli tendit in Deum, quàm in se.



QVÆSTIO LXI.

De productione Angelorum in esse natura.



EXPLICATA natura Angeli, eiusque proprietatibus, sequitur agere de productione in esse. Et primò in esse naturæ, secundò in esse gratiæ.

In primo ergo articulo ostendit Angelos habere causam sui esse, quia sunt creaturæ, & entia per participationem, solus autem est suum esse, & à se.

In art. 2. ostendit Angelum non esse productum ab æterno, quia nihil ab æterno productum est à Deo, ut fides docet, sed cuncta facta sunt in tempore postquam nihil fuerunt.

In art. 3. ostendit nec etiam fuisse Angelos creatos ante mundum corporeum, sed cum hoc vniuerso in principio temporis factos fuisse, quia pars sunt vniuersi, & vnum faciunt cum natura corporea, quamuis contrarium non sit erroneum, præsertim propter auctoritatem Nazianzeni.

In art. 4. ostendit creatos fuisse Angelos in cœlo empyreo, quia si creati sunt cum ordine ad hoc vniuersum in aliqua illius parte creari debuerunt, & cum sint omni creatura corporali superiores, eique præsidentes, in supremo corpore quod est cœlum empyreum debuerunt creari: quamuis etiam dici possit quòd superiores Angeli in supremo corpore, alij autem in inferioribus corporibus sint creati.



QVÆSTIO LXII.

De perfectione Angelorum in esse gratiæ, & gloria.

SUMMA LITTERÆ.



N art. 1. ostendit D. Thom. quòd Angeli non sunt creati in beatitudine supernaturali, quia hæc beatitudo non est aliquid naturæ, sed finis superior naturæ acquirendus per merita: non ergo in illa sunt creati, bene tamen in felicitate naturali.

In art. 2. ostendit quòd Angelus indiguerit gratia ad conuertendum se in Deum supernaturaliter, eo quòd inclinatio ad id quod est super naturam non potest oriri nisi ab aliquo principio supernaturali moueatur talis natura, sicut calor non potest generare carnem, ut mouetur ab igne, sed ut mouetur ab anima: ergo nulla creatura rationalis potest habere motum ordinatum ad supernaturalem beatitudinem, nisi ut mouetur à supernaturali agente, & hoc vocatur auxilium gratiæ.

In art. 3. ostendit quòd Angeli creati sunt in gratia, utpote magis consonum dictis Sanctorum. Et quia gratia dicitur semen Dei, i. Ioan. 3. sicut in prima creatione corporalis creaturæ inditæ sunt illi rationes seminales omnium effectuum naturalium, ita conueniens fuit, quod intellectuali creaturæ infunderentur à principio seminales rationes effectuum supernaturalium, quia ad illos ordinabatur.

In

Quæst. LXIII. De Angel. malitia. 429

In artic. 4. ostendit Angelum suam beatitudinem meruisse, quia beatitudo est finis excedens totam naturam; & sic non oritur ex ipsa natura, sed ex dono Dei habetur tanquam præmium virtutis: ergo oportet quod meritum præcedat ad illam ex parte eius qui assequitur beatitudinem. Vnde etiam propter hoc oportuit quod gratia esset in Angelis ante gloriam.

In artic. 5. ostendit quod Angeli statim post vnum actum meritorium habuerunt beatitudinem, quia proprius modus operandi in Angelis est, quod suam perfectionem non acquirant per discursum, seu per multos actus transeundo de imperfecto ad perfectum, sed quod statim habeant totam perfectionem, quæ sibi debetur, aut datur: ergo cum iste modus non destruat à gratia, sed perficiatur, oportuit quod etiam in supernaturalibus non per multos actus acquirat suam perfectionem, sed per vnicum habeat id quod nos per plures.

In articulo 6. ostendit quod Angeli habuerunt gratiam, & gloriam, iuxta quantitatem suorum naturalium, non quia natura fuerit dispositio ad gratiam, sed quia Deus sua voluntate, & gratia ita disposuit diuersos gradus in natura Angelica quod illos ad diuersos etiam gradus gratiæ ordinauit, quia gratia modo agendi naturæ se accommodat, natura autem Angeli quantò superior est, tantò efficacius operatur; & sic etiam gratia intensiori vi illam mouet.

In artic. 7. ostendit quod in Angelis beatis remanet cognitio, & dilectio naturalis, quia per beatitudinem non destruitur, sed saluatur natura: ergo & actus naturæ, quæ est operatio naturalis.

In artic. 8. ostendit quod Angelus beatus non potest peccare, quia nullus Beatus potest aliquid operari relinquendo vel omittendo visionem Dei, sed attendendo ad illam: nullus autem attendens ad Deum in sua operatione potest peccare, quia peccatum contingit ex defectu, & auersione à regula, quæ est Deus.

In artic. 9. ostendit quod Angeli beati non possunt proficere in beatitudine quantum ad hoc quod videant Deum clariùs, aut meliùs, quia beatitudo est finis vltimus ultra quem non est progressus, vnde acquisito fine vltimo in eo termino qui à Deo præfigitur, non est vltior progressus.



Q V Æ S T I O LXIII.

De Angelorum malitia.

S V M M A L I T T E R Æ.



In artic. 1. ostendit D. Thom. quod in Angelis, sicut & in qualibet creatura potest esse peccatum, quia quælibet creatura considerata ex sua natura non habet sibi inhærentem regulam suæ rectitudinis, quia hæc est voluntas diuina: vnde potest ab ea deficere pro sua libertate.

In artic. 2. ostendit quod in Angelis solum est peccatum superbiæ, & inuidiæ quantum ad affectum, quia affectus spiritualis substantiæ directè non est ad bona corporalia, sed ad bona spiritualia, in quibus non est peccatum, nisi in quantum in eis appetendis superioris regula non seruatur, quod propriè pertinet ad superbiam, quæ renuit subiici ordini superioris, ex quo sequitur peccatum inuidiæ. Possunt tamen alia peccata esse in Dæmonibus secundum reatum in quantum ad illa inducunt homines.

In art. 3. ostendit quod Diabolus appetierit esse vt Deus, non quidem per æqualitatem in gradu naturæ, quia hoc erat impossibile, sed per similitudinem, non quidem in eo in quo creatura debet imitari Deum, quod est in exercitio virtutum, sed quantum ad hoc in quo Deus non est imitabilis, vt quod voluerit habere vltimum finem, non emendando illum à Deo per gratiam, sed ex sua natura, vel saltem renuendo illum habere ex liberalitate Dei, & solum remanendo in sua naturali felicitate.

In artic. 4. ostendit quod Dæmones non sunt naturaliter mali, sed ex libero arbitrio, quia natura eorum à Deo facta est, & ordinata in bonum: ergo non est ex sua natura malus.

In artic. 5. ostendit quod istam culpam ex libero arbitrio non habuerit Angelus in primo

primo instanti suæ creationis, eo quod operatio, quæ incipit cum esse rei, provenit ipsi à suo generante. Vnde non potest esse defectuosa illa prima operatio, nisi generans à quo mouetur defectuosè moueat. Qui autem Angelum produxit Deus est, qui defectuosè mouere non potest.

In artic. 6. ostendit quod Diabolus statim post primum instans suæ creationis peccauit, quia cum in ipso primo instanti habuerit actum meritorium, cum quo creatus est à Deo, & Angeli per vnicum actum meritorium acquisierint beatitudinem, si non peccasset post primum instans, beatitudinem accepisset.

In artic. 7. ostendit quod Angelus supremus inter peccantes fuerit simpliciter supremus inter omnes, quia habuit maius motuum ad peccandum propter maiorem excellentiam, & peccatum in Angelis non fuit ex aliqua pronitate vel fomite peccati, sed solum ex libero arbitrio.

In artic. 8. ostendit quod peccatum primi Angeli fuit aliis causa peccandi non per modum cogendi, sed persuadendi: sic enim traxit Draco secum tertiam partem stellarum, ut dicitur Apocal. 12. Et in huius signum ceteri Dæmones subduntur primo Angelo peccatori in pœna, cui consenserunt in culpa.

In artic. 9. ostendit plures permanisse de Angelis in bono, quàm cecidisse in malo, quia in naturis perfectis, natura in paucioribus deficit, & in pluribus consequitur suum effectum: peccatum autem est defectus contra naturam.



DISPUTATIO XXIII.

De merito, & peccato Angelorum.

ARTICVLVS I.

Utrum dari possit creatura ex sua natura impeccabilis?



NULLAM dari de facto intellectualem creaturam, quæ ex se impeccabilis sit, absoluta fides est, cum id apertè Scriptura testetur colligens omnem creaturam intellectualem, scil. Angelicam, & humanam, & illis attribuens peccabilitatem, sicut Iob 4 dicitur. *Numquid homo Dei comparatione iustificabitur, aut factore suo purior erit vir? Ecce qui seruiunt ei non sunt stabiles, & in Angelis suis reperit prauitatem, quanto magis hi qui habitant domos luteas, &c.* Et infra c. 15. *Ecce inter sanctos eius nemo immutabilis, & celi non sunt mundi in conspectu eius, quanto magis abominabilis, & inutilis homo?* &c. Quibus verbis omnem creaturam Scriptura complectitur, & loquitur vniuersaliter, ut patet illis verbis *nemo immutabilis, &c.* & hoc inter sanctos eius, sed quæcumque creatura impeccabilis dicatur sancta est: ergo si inter sanctos nemo immutabilis, nulla creatura sancta est impeccabilis. Idem deducitur ex illo Psalmi 142. *Non iustificabitur in conspectu tuo omnis viuens.* Quem locum ponderat S. Hieronym. epist. 146. ab Damasco quod non dicit Scriptura omnis homo, sed omnis viuens, id est, *Non Euangelista, non Apostolus, non Propheta; ad maiora conscendo, non Angeli, non Throni, non Dominationes, non Potestates ceteraque Virtutes: solus Deus est in quem peccatum non cadit, cetera cum sint liberi arbitrij in utramque partem suam flectere possunt libertatem.* Et S. August. lib. de fide ad Petrum cap. 3. *Ideo natura à Deo facta proficere possunt, quia esse coeperunt, ideo deficere, quia de nihilo facta sunt.* Et c. 23. *Firmissimè tene, & nullatenus du-*

bites omnem creaturam naturaliter mutabilem, & à Deo immutabili factam. Eandem rationem quare omnis creatura sit peccabilis, quia ex nihilo facta est, assignant Nissenus lib. 7. de libero arbitrio cap. ultimo. Damasc. lib. fidei 2. cap. 27. quos citat, sequiturque S. Th. q. 24. de verit. art. 7. & in hac q. 63. art. 1. & aliis locis postea citandis.

Difficultas est in assignanda ratione, quare implicet contradictionem, quod aliqua creatura non possit esse impeccabilis. Et difficultas est in duobus. Primò in defendendis rationibus D. Th. quas in hac parte affert. Secundò, an probent omnem creaturam esse peccabilem, tam in ordine ad finem supernaturalem, quàm in ordine ad finem naturalem tantum, ita ut intra limites naturalis ordinis præcisè sint Angeli capaces peccati.

Resolutio ex D. Thoma.

Duabus conclusionibus respondemus.

Prima est: Rationes D. Tho. efficaciter probant Angelum, & quamlibet creaturam intellectualem liberam esse peccabilem ex natura sua, & solum per gratiam reddi posse impeccabilem.

Secunda conclusio est: Angelus intra limites ordinis naturalis consideratus, & in ordine ad finem naturalem tantum, sub hac ratione præcisè, nisi alius ordo seu habitudo addatur, peccare non potest, licet modò peccando de facto contra finem legemque supernaturalem directè, etiam contra legem naturalem, quæ à supernaturali supponitur, peccare potest. Vtraque conclusio suos habet contradictores.

Contra primam conclusionem pauci aut ferè nulli sunt Authores qui oppositum teneant, licet in eius reddenda ratione hæreant. Nam quod Gabriel in 2. dist. 23. art. 1. & 2. & Maior ibidem quæst. 2. concl. 4. & 5. sentiunt posse produci à Deo voluntatem impeccabilem; idè est, quia existimant posse de potentia absoluta dari voluntatem creatam, quæ non sit libera, sublata autem libertate tollitur peccabilitas. Et hoc est quia creaturam intellectualem putant posse esse brutalem. Aliqui etiam existimarunt posse dari creaturam cui sit connaturale lumen gloriæ, ut retulimus, & impugnauimus præced. tomo disp. 14. art. 4. Et hi faciunt creaturam impeccabilem, quia naturaliter faciunt beatam, & participationem diuini, & supernaturalis ordinis,

ordinis, non extrinsecam ponunt, & gratuitam, sed debitam, & naturalem. Attribuitur tamen Oham in 1. dist. 44. quest. 1. ad 1. dubium, quod teneat ut probabile, posse produci Angelum vel hominem alterius speciei, qui peccabilis non sit. Scotus verò in 2. dist. 23. q. unica, §. Dico igitur, in fine, licet teneat non posse produci creaturam impeccabilem per naturam, tamen id magis tenet propter auctoritates, quam ex ratione: ducitur autem auctoritate Hieronymi supra cit. & Augusti. lib. 3. contra Maxim. c. 13. & Anselmi lib. 2. cur Deus homo, cap. 10. in fine. Contra secundam autem conclusionem tenet Vasquez, hic dist. 13. c. 5. Suarez, lib. 3. de Angel. cap. 7. Mol. hic quest. 63. art. 1. Est tamen Durandi in 2. dist. 23. quest. 1. Cap. in 2. dist. 22. q. unica art. 3. à principio. Caiet. in hac q. 63. art. 1. §. Circa consequentiam, & eam tenent multi recentiores Thomistæ, de quibus vide Nauarrete hic controu. 79. Carmelitani Collegium tract. 7. de Angelis disput. 9. dub. 2. & 3.

4 Pro explicanda ergo ratione D. Thom. circa primam conclusionem: (in hoc enim tota eius difficultas consistit) supponendum est nos loqui in præsentia de creatura intellectuali libera: nam sublata libertate vel manebit sicut brutum, quod ducitur instinctu, non arbitrio, vel erit beata, & vrens visione clara Dei; & sic erga amandum Deum caret libertate, & consequenter non potest peccare, quia qui peccat, Deum non amat. Et licet verum sit quod omnis creatura intellectualis, ex vi intellectualitatis non potest carere libertate, sed habeat illam, quia hoc ipso quod intellectualis est, habet iudicium vniuersale, & consequenter indifferens ad omne bonum, & sic nullum quod infinitum non sit clarè visum potest illam vniuersalitatem implere, & consequenter neque necessitate, tamen hoc in præsentia supponendum est non probandum, & coarctanda est disputatio ad creaturam intellectualem liberam, an videlicet aliqua creatura intellectualis, & libera possit produci, quæ impeccabilis sit, quia si libera non supponitur, non est questio. Eodem modo supponendum est quod per gratiam potest aliquis reddi impeccabilis, quia, ut ostendit S. Thom. q. 62. art. 8. impossibile est videntem Deum non amare ipsum, & attendere: si ergo necessariò amat, non stat non amare amore ipsi debito, qui est amor supremæ subiectionis, & appropriationis, qui autem peccat, Deum non amat, quia ab eo auertitur: ergo per illam gratiam per quam redditur necessarius amor Dei, redditur impeccabilis voluntas. Et licet possit dici quod de potentia absoluta posset aliquis videre Deum, & impediri, seu non sequi amorem, tamen hoc non est connaturale ipsi beato, sed ita est debitum ex vi visionis prodire in amorem Dei necessarium, quod si de facto non prodiret, saltem in oppositum exire non posset, quia illa visio ita adhæret fini vltimo, illūque manifestat voluntati ut summum bonum, & primam regulam, quod non possit in elicienda aliqua actione ab illo auertere conspectum, & regulationem; atque adeò neque actum elicere regulæ illi auersum. Quod si gratia hæc reddit impeccabilem voluntatem, consequenter si aliqua natura, seu substantia ex se habet connaturale lumen gloriæ, & visionem Dei, non poterit peccare: si enim voluntas, quæ accidentaliter, & participatiue est beata, non potest peccare, quāto magis si substantialiter, & naturaliter beata fuerit? Quare sicut à disputatione ista reiicimus voluntatem cum gratia beatifica, & loquimur de natura non beata, ita reiicimus substantiam supernaturalem, si esset possibilis, quia illa connaturaliter esset bona. Procedit er-

go conclusio de natura intellectuali non supernaturaliter beata, & libera, & de hac dicimus rationes D. Thom. enuncere quod implicet contradictionem non esse peccabilem.

Rationes autem D. Thom. sunt duæ.

Prima: talis creatura libera est ex nihilo facta: ergo ex natura sua defectibilis, & peccabilis voluntate.

Secunda: talis creatura non est per suam naturam, & intrinsecam rationem vniuersalis regula omnis boni, seu omnis bonæ operationis: ergo ab aliqua potest deficere. Ad quam rationem reducitur illa, quod creatura non habet rationem omnis boni: ergo potest deficere ab aliquo bono, quia habere rationem omnis boni, & habere regulam vniuersalem omnis boni, seu omnis operationis bonæ, idem est.

Vis primæ rationis seu consequentiæ, quam D. 6 Tho. ponit 24. de verit. art. 7. talis est: Natura quæ est ex nihilo, est vertibilis, & mutabilis in nihilum quoad esse, & sic habet potentialitatem, & non purum actum: ergo etiam eius operatio, quæ super tale esse fundatur, est mutabilis à sua perfectione in defectum. Probo consequentiam. Nullus est maior defectus respectu entis, & boni, quam non esse; hoc enim totaliter, & contradictoriè opponitur ipsi esse, & ipsi perfectioni: ergo natura quæ est capax summi defectus, & mutabilitatis, qualis est transitus ad non esse, quod est totaliter deficere, etiam erit capax defectus, & mutabilitatis in operando respectu boni finis, sicut natura est capax defectus, & mutationis in esse. Hæc consequentia probatur, quia potentia operatiua, & modus operandi sequitur modum essendi: ergo potentia operatiua libera fundata in natura mutabili, etiam in quantum operatiua liberè, mutabilis est: ergo non habet libertatem immutabilem, & firmatam in bono, sed potest mutari ab illo, mutari autem à bono est deficere: ergo hoc ipso quod libertas est mutabilis in ratione operationis liberæ, hoc ipso est defectibilis. Est autem mutabilis hoc ipso quod nascitur ex natura mutabili, & defectibili in nihilum: ergo hoc ipso quod aliqua creatura est ex nihilo, erit capax defectus, & peccari.

Dices: hanc rationem D. Th. assumere antecedens impertinens, & inferre consequentiam illegitimam. Est quidem antecedens impertinens, quia creaturam esse factam ex nihilo est idem quod esse creaturam: & sic ratio quæ redditur ad probandum quod creatura sit peccabilis, est quia creatura est creatura, quod est ineptam reddere rationem. Est autem consequentia illegitima, quia plus infert, quam continetur in antecedenti: ex eo enim quod natura est defectibilis in esse, solum sequitur quod eius operatio possit deficere in esse, quod certissimum est: sed quod possit deficere moraliter stante esse entitatio operationis, non apparet: quomodo ex tali antecedenti inferatur, cum sit deficientia à fine quæ non potest inferri ex deficientia ab esse: sicut licet corpora cælestia possint deficere in suo esse per annihilationem, & cessationem ab esse, non tamen sequitur quod possint deficere ex parte materiæ per modum corruptionis, nec inferitur ex maiori deficientia per totalem annihilationem, minor deficientia per corruptionem: ergo neque per ipsum esse ex nihilo, quod infert defectum per annihilationem, inferitur minor deficientia, quæ est deficientia moralis per peccatum. Denique etiam Angelus beatus vel confirmatus in gratia est ex nihilo, & supernaturalis substantia etiam est ex nihilo, & tamen prout tales, sunt impeccabiles: ergo esse ex nihilo non est sufficiens radix, ut aliquid sit pecca-

peccabile, aliàs quandiu non tolleretur ista radix, non posset creatura reddi impeccabilis, non tollitur autem hoc quod est esse ex nihilo per confirmationem in gratia vel beatitudinem, & tamen redditur impeccabilis creatura per illam. Et hoc idè est, quia esse ex nihilo solum opponitur ei quod est esse à se, & ei quod est habere infinitam perfectionem: esse autem impeccabilem non exigit infinitam perfectionem, sed sufficit determinatio voluntatis erga rectitudinem regulæ.

Respondetur ad primam quod obicitur contra antecedens, illud esse valde conducens ad hanc probationem, quia creaturam esse factam ex nihilo non est idem quod esse creaturam, sed est conditio annexa creaturæ, sicut creaturam esse limitatam, & esse causatam, & non esse actum purum, non est idem quod esse creaturam, sed sunt conditiones sine quibus non est creatura, sicut non est ens, sine vero, & bono, non tamen est idem ens quod verum, & bonum. Sic ergo creatura dicit aliquid constans ex omnibus illis conditionibus, non tamen per quamlibet conditionem explicatur totus conceptus creaturæ; sicut ens increatum habet multa attributa, nec tamen quolibet attributo explicatur totum quod est diuinitas; & sic bene potest assumi pro antecedenti, quod creatura est ex nihilo tanquam conditio quædam ad hoc quod sit creatura, ut inde inferatur, quomodo habeat defectum, & mutabilitatem.

8 Ad primum contra illationem consequentiæ, Respondetur: quod ex deficientia in esse non solum infertur defectibilitas operationis in essendo, sed etiam in attingentia finis, quæ est formalitas operationis ut moralis est. Nam quod operatio sit defectibilis in esse, non habet in quantum operatio, sed in quantum entitas est, quia ordo ad esse solum conuenit alicui in quantum est ens. Vnde si ex eo quod creatura habet deficientiam in esse solum, infertur quod operatio habeat deficere in esse, idem diceretur in antecedente, quod in consequenti, siquidem creatura deficiens in esse est creatura in quantum ens, & operatio deficiens in esse est etiam quædam creatura in quantum ens. Quare ex deficientia creaturæ in essendo infertur deficientia operationis, etiam sub formalitate operationis, quia sub hac formalitate operationis fundatur in ipso esse, & modus operandi sequitur modum essendi: ergo etiam in hac ratione formali operandi infertur mutabilitas, & potentialitas, & consequenter defectibilitas. Formalis autem ratio operationis, in quantum operatio, est attingentia obiecti, & finis, quia per ordinem ad obiectum, & finem specificatur actio, præsertim libera: ergo si in quantum libera hoc ipso quod est creata, & ex nihilo, est mutabilis, & defectibilis, etiam in attingentia obiecti, & finis defectibilis erit, quia tota hæc attingentia, & modus operandi sequitur modum essendi, & fundatur in esse; ergo erit peccabilis, quia peccare est deficere à fine, & à rectitudine obiecti.

9 Ad id verò quod dicitur de corpore cælesti, quod non infertur quod sit defectibile ex parte materiæ, vel corruptionis ex eo quod sit defectibile in esse, & quod ex maiori defectibilitate non infertur minor; Respondetur quod non infertur minor corruptibilitas ex maiori, quando una non se habet consequenter ad aliam, ita quod non fundatur in illa; si autem in illa fundatur, & consequitur, bene infertur ex illa. Deficientia autem ex parte materiæ, & per modum corruptionis non infertur ex eo quod cælum sit annihilabile, quia non fundatur in deficientia annihilationis, deficientia & mutabilitas corruptionis: ad hanc enim exigitur

materiam non esse totaliter completam per formam, quod non statim consequitur ad esse limitatum, & ex nihilo; at verò modus operandi semper sequitur modum essendi, & in illo fundatur, & si sit modus operandi liberè, & moraliter, etiam sequitur modus operandi defectibiliter, & mutabiliter in ratione formali operationis liberæ, quæ est attingentia finis: Ergo ex eo quod voluntas libera creata sit ex nihilo, bene sequitur quod non solum entitatiuè, sed etiam operatiuè, & consequenter moraliter, sit defectibilis, quod est posse peccare.

Ad tertium contra eandem consequentiam, 10 Respondetur quod Angelus beatus vel confirmatus in gratia est impeccabilis ex accidenti, non ex natura; & idè non requiritur quod non sit ex nihilo, quia hoc quod est esse ex nihilo non est radix peccabilitatis, nisi secundum naturam; potest tamen compati quod sit impeccabilis ex accidenti, & ab extrinseco; & sit ex nihilo, quia remanet ab intrinseco peccabilis, & ex principiis naturæ. Vnde ut aliqua creatura reddatur impeccabilis, ex accidenti, & ab extrinseco, non debet tolli radix illa essendi ex nihilo, quia hæc solum debet tolli ad hoc ut aliquid sit impeccabile per naturam; ut autem stante natura peccabili reddatur impeccabilis per gratiam, non requiritur quod non sit ex nihilo, sed quod perseveranter teneatur in gratia, seu in aliquo principio gratuito cui impossibile sit peccatum. Si autem daretur substantia supernaturalis, illa esset ex nihilo tanquam gratia, non tanquam natura sine gratia, de qua solum loquimur in præsentis: sed quia implicat talem substantiam dari, ut loco *suprà cit.* ostendimus in *preced. tomo*, idè utrumque sequitur, & quod sit ex nihilo in quantum creatura, & quod sit impeccabilis in quantum substantialiter esset gratia. Et negamus non requiri infinitam perfectionem ad hoc ut aliquis sit impeccabilis per naturam, quia requiritur quod habeat esse indefectibile, & immutabile in essendo, ut etiam in operando sit indefectibilis, non potest autem dari esse immutabile, & indefectibile in essendo, nisi habeat infinitam perfectionem, quia debet carere potentialitate, quod est esse actum purum, & consequenter habere infinitum esse, & perfectionem.

Pro explicanda secunda ratione D. Thom. ad- 11 uertendum est quod omnis actus moralis est idem quod actus regulatus, seu subiectus alicui regulæ, ad quam si conformetur, habet rectitudinem: si difformetur, obliquitatem. Vnde oportet quod principia à quibus dependet talis actus habeant sibi indefectibiliter coniunctam rectitudinem, ut operatio indefectibilis sit in sua regulatione. Quod si principia à quibus dependet non habeant sibi annexam indefectibiliter regulam rectitudinis, necesse est quod ipsa operatio in quantum regulata non sit indefectibiliter recta, seu indefectibiliter regulata, siquidem non potest actus esse indefectibiliter regulatus, si principium applicans seu eliciens actum non sit indefectibiliter regulans, siquidem indefectibilitas regulati essentialiter pendet ex principiis applicantibus, seu dantibus illi regulationem.

Ex hoc ergo deducitur efficax consequentia D. 12 T. Voluntas libera est de se indifferens ad diuersas operationes, ita quod ex natura sua non est determinata ad vnum: ergo oportet quod ut talis voluntas sit indefectibilis in istis operationibus, ad quas est indifferens, per seipsam essentialiter sit sua regula, vel habeat illam inseparabiliter sibi annexam. Quod si nec per seipsam est regula, nec aliunde habet

habet illam indefectibiliter annexam : ergo ex se defectibilis est à regula: ergo peccabilis, quia nihil aliud est peccare, quam deficere à regula. Primum ergo, scilicet quod voluntas creata per seipsam, & essentialiter non sit sua regula, constat, quia voluntas creata operatur ut subiecta voluntati superiori, iuxta illud Rom. 13. *Omnis anima potestatibus sublimioribus subdita sit.* Item quia omnis creata voluntas est capax legis, & imperij à Deo, quia ex ratione creaturæ est serua, & subiecta dominio Dei : ergo potest à Deo sibi imperari, & lex imponi : ergo non est sua regula per seipsam, quia non est sua lex, nec suum imperium, sed imperatur, & dirigitur à Deo. Et eadem ratione probatur secundum. Quia omnis lex, & imperium erga creaturas derivatur liberè à Deo : ergo nulli creaturæ est indefectibiliter annexa applicatio istius legis, & obedientiæ ad illam ex natura creaturæ, sed ex gratia ipsius Dei, quia de se creatura hoc ipso quod indifferens est ad suas operationes, & nulli earum regulæ est inseparabiliter annexa ex ipsa natura indifferentiæ voluntatis: ergo ex vi talis naturæ non habet indefectibilem connexionem cum lege magis, quam cum aliis obiectis, quia ad omnia indifferens est : ergo potest ab illa deficere, sicut à quocumque alio obiecto.

13 Sed dices : Nam si hæc ratio aliquid probat, etiam probaret contra secundam conclusionem, quod posset Angelus peccare immediate contra legem naturalem, quia etiam ista lex provenit à Deo liberè, & non est inseparabiliter applicata omni actioni liberæ : ergo potest ab ea diuertere, & deficere ; sic peccare contra illum, vel si non potest, cur etiam non dicemus quod circa finem supernaturalem non possit ? Deinde ut obicit Scotus, quia licet aliqua facultas operatiua non sit sua regula, potest tamen necessariò, & connaturaliter esse determinata circa illam, sicut intellectus est determinatus circa prima principia ; & tamen non est intellectus ipsa principia. Quod si dicatur pro eodem reputare D. Thomam, regulam aliquam essentialiter esse ipsummet principium operandi, vel esse illi infallibiliter coniunctum, quia si est suamet regula, est illa formaliter, si verò dimanat à se infallibiliter coniunctio cum regula, est sua regula virtualiter sed radicaliter, quia essentia est virtualiter id quod dimanat à se, quæ videtur esse solutio Caiet. in art. 1. huius quest. 63. Contra est, quia in hac solutione eodem modo restat probandum, quod aliqua voluntas non possit habere sibi infallibiliter, & necessariò coniunctam regulam rectè operandi, ita quod inseparabiliter illi adhæreat, etiam ante visionem claræ ipsius summi boni.

Respond. ad primum, ex sequenti conclusione petendam esse disparitatem inter legem naturalem, & supernaturalem, quomodo vna adhæreat, vel non adhæreat immobiliter ipsi operanti. Pro nunc dicimus quod licet utraque lex liberè detur à Deo quantum ad hoc quod est à Deo derivari, sicut etiam datur à Deo liberè, id est, producitur ipsa natura, & potentia eius, &c. tamen quoad usum applicationemque talis regulæ est dispar ratio inter supernaturalem, & naturalem, quod lex naturalis in ipsamet comprehensione naturæ habetur, ita quod cognoscendo Angelus suam naturam perfectè, non potest auertere aspectum suum à lege naturali, nec errorem, aut deceptionem circa hæc naturalia, & naturaliter sibi impressa pati potest primò, & directè, id est, incipiendo ab ipsa natura, ut post-

Joan. à S. Thom. in 1. part. D. Th. Tomus alter.

ea dicitur. Non fertur autem Angelus in ali-quod obiectum naturale, nisi ut contentum in principijs naturalibus, unde neque in practicis potest ferri in obiectum naturale, nisi ut contentum in suis principijs, & secundum quod continentur in lege naturali, & in principijs synderesis. Si autem contra legem naturalem peccaret, immediatè deberet incipere auersionem, & errorem practicum in intellectu ab ipsa lege naturali, & ab eius principijs, quod stare non potest, cum naturalis cognitio in Angelis deficere, & errare non possit magis quam in nobis ipsa cognitio principiorum non potest deficere, Angelus autem omnia naturalia cognoscit in suis principijs, quia per comprehensionem illa attingit, & sine discursu, & consequenter in inspectione principiorum ; & sic non potest accidere defectus incipiendo à naturali cognitione. At verò lex alia supernaturalis non cognoscitur ab Angelo sic, quod non possit ab ea auertere aspectum, & errorem pati practicum, seu inconsiderationem circa eam ; & sic potest circa illam deficere, & ex consequenti circa ea etiam quæ naturali lege distantur, quatenus deseruiunt supernaturalibus principijs, à quibus auertitur. Sed de hoc statim ampliùs dicemus.

Ad secundum Resp. quod si voluntas creata 14 non est sua regula, & hoc idè quia regulatur per regulam. & legem alicuius superioris, necesse est quod de se non sit determinata ad talem regulam, neque essentialiter, quasi sit ipsa essentia legis, neque virtualiter, quasi ab illa dimanet ut propria passio ipsa adhæsiò, & determinatio ad regulam, sed oportet quod imprimatur sibi talis determinatio, & adhæsiò ab ipso superiori ferente legem, vel à Deo authore naturæ per naturalem legis notitiam, & principiorum eius sicut dicitur Psalm. 4. *Signatum est lumen vultus tui Domine super nos,* & Roman. 2. *Ipsi sibi sunt lex, qui ostendunt opus legis scriptum in cordibus suis:* vel ista adhæsiò, & determinatio ad legem est à Deo authore supernaturali, qui sicut legem ipsam, & regulam supernaturalem manifestat, ita potest sua protectione, & beneficio gratiæ confirmare, ne voluntas creata deflectat à lege. Hoc secundo modo potest confirmari voluntas, & reddi impeccabilis circa legem supernaturalem, sed beneficio gratiæ, non ex sua natura. Et respectu huius non procedit argumentum, quia cum lex illa non solum superioris sit, sed etiam sit supernaturalis, non potest esse naturaliter determinata voluntas creata ad illam, & consequenter bene colligit D. Tho. quod si voluntas creata non est sua regula, sed debet expectare regulam à voluntate superioris positam (quod totum expressit S. Th. in a. 1. huius q. 63.) necesse est quod circa aliquam regulam non sit ex natura sua determinata talis voluntas ; & sic ex natura sua possit ab illa deficere, licet ex beneficio, & gratia ipsius superioris possit ei adhære immobiliter. Primo autem modo sit determinatio circa legem naturalem, quandiu operatur natura Angeli intra limites naturæ, iuxta modum sibi connaturalem, id est, utendo principijs naturalibus iuxta modum quo ea intelligit, scilicet plenè, & comprehensivè, & sine errore ; & sic voluntas ex defectu erroris practici in intellectu sic procedente non potest peccare. Unde non remanet probandum in hac ratione D. Thom. quod non possit habere voluntas creata infallibiliter, & necessariò adiunctam sibi regulam, sicut habet prima principia, quia respectu regulæ supernaturalis, vel positivæ lege extraordinaria impositæ

X x

à superiori

à superiori non habet in se voluntas creata sufficientia principia ut immobiliter inhæreat tali legi, quia hoc ipso quod ipsa sibi non est lex, sed à voluntate libera superioris venit, non potest ex sua natura necessario determinari ad illam. Respectu verò naturalis legis determinationem habet, & necessario habet adiunctam regulam bene operandi, quandiu connaturali modo procedit, ut statim dicemus circa secundam conclusionem. Sed hoc non facit Angelum simpliciter impeccabilem, & pro omni statu, & respectu omnis regulæ, sed solum pro aliquo statu particulari.

Secunda conclusio.

15 Pro secundæ conclusionis explicatione quoad utramque sui partem, notandum est quod finis naturalis, & regula actionum liberarum est Deus, ut naturaliter cognitus, & diligibilis super omnia, quia naturale principium practicum est, Deum, qui est summum, & primum omnium principium esse ab omni creatura colendum, & amandū, quia summum principium est. Ex quo per consequentiam deducitur evidentem, quod omnia eius præcepta implenda sunt, & omnia creata diligenda sunt propter ipsum, & ordinanda in ipsum, quod pertinet ad electionem, seu ad rectificationem actuum qui versantur circa media. Hæc omnia in genere ordinis naturalis tantum cognita, & amata regulare dicuntur actiones Angeli in ordine naturali, seu intra limites naturæ tantum. Quando autem Angelus eleuatur ad ordinem supernaturalem, non solum cognoscit Deū altiori modo, & per diuersos effectus, quam per naturales, sed etiam in modo cognoscendi, & amandi aliter se habet, quam circa naturalia, & ex parte rei cognitæ, & amatæ, qui est Deus, ut author supernaturalis, ita tendit in ipsum quod ei subiicit omnia, quæ pertinent ad ordinem naturalem, tali nexu, & subordinatione, quod si decidit, seu aueritur à Deo supernaturaliter cognito, & Authore supernaturali, non possit integrè se habere, & manere respectu Dei authoris naturalis, sed debet etiam ab eo auerti ex consequenti, & indirectè. Quod ergo diuerso modo procedat circa Deum authorem naturalem, & per principia naturalia cognitum, atque Deum authorem supernaturalem, in eo stat, quod circa principia naturalia, & Deum naturaliter cognitum præcisè, non solum procedit Angelus sine discursu, quia simplici intuitu, sed etiam cum plena comprehensione, quia veritas illa naturalis sibi plenè est proportionata sine ullo defectu, & cognita & multo melius quam quælibet veritas supernaturalis, quæ in via obscure cognoscebat, ut pote per fidem, non euidenter, sicut res naturales. Vnde sequitur quod respectu rerum euidenter cognitarum, & cum comprehensione non poterat Angelus inuenire defectum speculatiuum in his quæ tanquam principia speculatiua proponebantur neque circa principia, neque circa conclusiones, quia tam illa, quam istas eodem simplici lumine intuebatur, scilicet ex comprehensione principiorum. Circa principia autem practica similiter non poterat Angelus defectum habere incipiendo ab illis, & utendo ipsis, quia cum plena, & perfecta atque euidenti luce ipsa comprehendit; & sic visis principiis, quæ sunt fines, statim videt media, tam indefectibiliter, quam principia, quia plena comprehensio ipsa principia attingit, comprehensio autem non permittit deficere ab aliquo, quia nihil latet videntem. At verò in supernaturalibus cum procedat obscure, licet simplici modo procedat, id

est, vno actu attingens totum quod potest in re illa; siquidem hic est modus procedendi in intellectu Angeli, qui discursiuus non est (sicut oculus obscure aliquando videt, & non discursiue) tamen non plenè, & clarè attingit, sicque non conuincitur plenè mens, dum per fidem ambulat: potest ergo ex vi talis luminis procedendo auerti, & non considerare atque defectuosè procedere, quia non plena comprehensione ad id cogitur.

Quod verò in eleuatione ad supernaturalia, ita 16 connexa sint ista obiecta, & ordinatio in vtrumque finem supernaturalem, & naturalem, quod si auertatur ab vno, auertatur ab alio, ex eo constat, quod si aueritur à fine supernaturali, hoc ipso non amat Deum super omnia: ergo non subiicit illi omnia: ergo nec etiam in ipsa naturali dilectione illi perfectè subiicitur, quia naturalis dilectio, etsi directè solum tendat in naturalem finem, tamen etiam petit, ut non repugnet voluntas supernaturali ordini, quod si renuit ei subiici, non potest perfectam subiectionem in naturalibus retinere. Vnde non potest aliquis à supernaturalibus cadere, quin etiam in naturalibus vulneretur, nec aliquod peccatum est contra supernaturalia, quin etiam sit contra naturam, ut tradi solet 1.2. quæst. 7. art. 2. quia non potest peccatum esse nisi sit contra ordinem rationis, & dispositionem naturæ, quia etiam in ordine ad supernaturalia ratio dicat ut illis non repugnet neque auertatur, quia bonum est naturæ sic eleuari ad supernaturalem finem. Quare non stat deficere à supernaturalibus, & quoad finem naturalem, & principia practica manere integrum, esto in speculatiuis manserint omnia integra in Dæmonibus.

Denique notandum est quod Angelus circa finem naturalem, & in puris naturalibus consideratus potest dupliciter procedere, scilicet connaturaliter, & iuxta modum, quem natura ipsa secundum se postulat, aut non connaturaliter, nec iuxta modum, quem de se postulat natura, sed præter illud. Nam connaturalis modus Angeli est ut in naturalibus veritatibus siue practicis siue speculatiuis procedat cum plena, & euidenti comprehensione, quia perfectus intellectus est, & in actu, non in potentia respectu naturalium. Præter naturalem autem modum procederet, si Deus ei denegaret istam perfectionem, & comprehensionem debitam, & imperfectè atque ineuidenter attingeret finem naturalem, & principia atque conclusiones, seu media practica, sicut si homini non concederet Deus ut euidenter cognosceret ipsa prima principia speculatiua, vel practica, non connaturaliter se haberet natura rationalis. Tantundem ergo sequeretur si Angelus non euidenter, & indefectibiliter attingeret conclusiones, & media practica, quia per se, & euidenter seu comprehensione attingit media, & fines, conclusiones, & principia.

His suppositis secunda conclusio supra posita probatur. Et in primis quoad primam partem ostenditur, & ex D. Thoma, ex eius fundamento. Est quidem D. Th. quia expressè eam tradit in 9. 16. de malo art. 3. Quidquid, inquit, aliud dici potest, quod ad ordinem naturæ pertineat, in hoc eius malum consistere non potuit: malum enim non inuenitur in his quæ sunt semper actu, sed solum in his in quibus potentia potest separari ab actu, ut dicit in 9. metaph. Angeli autem omnes sic conditi sunt, ut quidquid pertinet ad naturalem perfectionem eorum, statim à principio sua creationis habuerint: tamen erant in potentia ad supernaturalia bona, quæ per Dei gratiam

tiam consequi poterant. Vnde reliquitur, quod peccatum Diaboli non fuerit in aliquod, quod pertinet ad ordinem naturalem, sed secundum aliquid supernaturale. Latius hoc fundamentum extendit idem S. Doctor in eodem loco art. 5. ubi inquit: *Angeli in ipsis principiis intuentur omnes conclusiones, quæ ad naturalem eorum cognitionem pertinent. Et ideo sicut immobiliter nos habemus in cognitione primorum principiorum, ita intellectus eorum immobiliter se habet circa omnia quæ naturaliter cognoscit. Et quia voluntas proportionatur intellectui, consequens est quod etiam voluntas eorum naturaliter sit immutabilis circa ea, quæ ad ordinem naturale pertinent. Verum est autem quod sunt in potentia respectu motus in supernaturalia, siue per conuersionem siue per auersionem. Vnde hac sola mutatio in eis esse potest, ut de gradu naturæ ipsorum moueantur in id quod est supra naturalem conuertendo se, vel auertendo: sed quia omne quod aduenit alicui, aduenit ei secundum modum suæ naturæ, consequens est, ut immobiliter Angeli perseuerent vel in conuersione respectu supernaturalis boni. Sic S. Thomas ubi clare patet quod cum in sententia D. Thom. sit omnino constans, Angelos non potuisse peccare in primo instanti ex eo quod erant in illo instanti incapaces dictaminis defectuosi, ex eodem fundamento debere deduci quod non possunt per se primo, & directe peccare contra naturalem rectitudinem, quia in naturalibus non sunt capaces dictaminis defectuosi; nec poterit vna sententia sine alia recte defendi. Vnde D. Thom. etiam in hac 1. p. q. 63. art. 1. confirmat hanc sententiam quod non possit peccare Angelus contra ordinem naturalem. Nam in solutione ad 2. dicit, quod *In actione naturali Angeli non potest esse malum inordinationis, bene tamen secundum actionem liberi arbitrij: Statim verò solutione ad 3. addit, quod Naturale est Angelo quod conuertatur in Deum, secundum quod est principium naturalis esse: sed quod conuertatur in ipsum secundum quod est obiectum beatitudinis supernaturalis, hoc est ex amore gratuito, a quo auerti potuit peccando. Vbi clare S. Thomas agnoscit peccatum in Angelo solum respectu conuersionis in Deum, ut est obiectum beatitudinis supernaturalis. Sistendo ergo intra naturalis ordinis limites, & sine respectu ad supernaturalia, vel præternaturalia, non est in Angelis principium operandi malum.**

19 Et fundamentum huius non est aliud quam illud quod positum est à D. Tho. quia Angelus consideratus solum in puris naturalibus, & sine ordine ad legem, vel finem supernaturalem, non potest habere operando connaturaliter ad modum suæ naturæ defectuosum dictamen rationis: ergo non potest prout sic peccare. Conseq. patet, quia defectus moralis in voluntate non potest oriri nisi ex defectu dictaminis regulantis, seu applicantis ex parte intellectus, quia cum actus voluntatis sit regulatus, & in sua regulatione, imò & in sua elicentia omnino dependens ab intellectu, quia nihil volitum, quin præcognitum, impossibile est concipere in voluntate motum, seu actum deficientem in regulatione passiuæ, nisi sit defectus ex parte regulationis cognitæ, & per intellectum propositæ, quæ est regulatio actiua. Potest quidem voluntas propositum sibi obiectum bonum, & regulam repellere, sed hoc erit ex propositione talis repulsæ, quæ per intellectum efficacius proponatur, & hoc ipsum defectuosum est, & defectus applicationis regulæ. Quare sicut repugnat voluntatem ferri in aliquid nisi cognitum, ita repugnat ferri in aliquid defectuosè, nisi defectuosè, cognitum, aut propositum. Et hoc est quod communi-

Ioan. à S. Thom. in 1. part. D. Th. Tomus alter.

ter dicitur quod omnis peccans est errans; scil. practice. Anteced. verò probatur: nam defectus dictaminis solum ex duplici capite potest oriri: aut quia regula ipsa per quam actus dirigendus est, non plenè consideratur, nec applicatur secundum se ad omnia regulabilia, aut quia aliquid contrarium ipsi regulæ accipitur ut conuenientiùs sibi, regula verò rationis, & naturalis lex abominatur, & odio habetur, aut omittitur. Hoc secundo modo non potest Angelus per se, & directe legem ipsam, & regulam sui abiicere, & odio habere aut omittere, quia regula illa, & lex est ipsum bonum naturæ eius, quod amatur necessariò quoad specificationem per se loquendo, & ex vi ipsius naturalis boni: ergo non potest odio haberi per se loquendo, ita quod incipiat voluntas ab ipso odio naturalis boni, sed solum per accidens poterit odio haberi, quando consideratur aliquis effectus, ratione cuius displicet voluntati, etiam proprium esse, vel bonum naturæ, ut si aliquis propter pœnas quas sustinet vellet non esse, aut Deum odio habeat, ex quo consequenter non vult ipsum amare ut finem naturalem: ergo per se, & directe non potest contra legem naturalem agere ex odio, & abiectiōe ipsius, siquidem illud bonum naturale amatur necessariò quoad specificationem. Secus est in homine, quia cum sit compositus ex natura sensitiva, & rationali, habet etiam duplex bonum proprium in quod possit ferri intra limites proprii boni, scilicet bonum spirituale, & bonum sensibile, & potest bonum sensibile amare tanquam proprium bonum, etiam relinquendo ipsum bonum rationis, & tamen in statu innocentie, in quo bonum sensibile erat totaliter subiectum regulæ rationis, non poterat circa ipsum incipere peccatum quousque pars superior rationis auerteretur à Deo, Nec potest Deus ipse ut bonum naturale est, & ut regulam rationis proponit immediatè, in quantum talis odio haberi, quousque in aliquo effectu præter effectus naturales repræsentetur aliquid, ratione cuius per accidens odio habeatur Deus, vel ipsum bonum naturale. Quandiu autem consideratur ipsa natura, & effectus eius naturalis, nihil est ibi quod non pertineat ad Deum authorem naturalem, & ad bonum naturale ipsius Angeli. Et sic totum hoc diligitur sub regula rationis, & sub ratione legis naturalis. At verò primo modo, scilicet ex indebita consideratione legis naturalis, seu ex omissione aliqua circa cognitionem eius nõ potest Angelus peccare contra illam, quia quidquid pertinet ad legem naturalem, & ad bonum rationis Angelus comprehensiuè cognoscit, quia cognoscit illud in cognitione suæ propriæ naturæ quam comprehendit, & semper habet ut præsentem, nec ab illa potest auertere aspectum, cum sit primum, & immediatum cognitum, & obiectum formale sui connaturaliter loquendo ergo ibi comprehensiuè cognoscit legem naturalem, quæ ad ipsam pertinet naturam; comprehendendo autem eam, videt principia legis naturalis, & conclusionis, quæ ex talibus principiis practice deducuntur, siquidem eodem pacto tangit conclusiones, sicut principia, & tam adhæret his, quàm illis hoc ipso quod comprehensiuè procedit.

Dices: Cur non poterit Angelus videndo legem naturalem, & bonum rationis, non quidem absolute odisse illam, sed comparatiue, quia scilicet aliquid bonum proprium, v.g. excellentia propria, aut modus cognoscendi, similisque perfectiones Angelicæ amantur plusquam lex naturalis permittit, id est, non ex subiectione ad Deum authorem naturalem, & ad eius legem, aut etiam odio habendo alterum

XX 2

Angelum

Angelum : licet enim bonum proprium vnusquisque amet quoad specificationem necessario, non tamen bonum alienum, neque alterum Angelum, saltem quoad id in quo differt vnus Angelus ab alio, vt docet S. Thom. *suprà q. 60. art. 4.*

Respondetur : non posse proponi omnia ista Angelo contra legem naturalem vt sequenda, nisi in aliquibus principiis, in quibus sibi representetur vt bonum id quod est contra legem naturalem, quia connaturale est Angelo omnia quæ ad naturam spectant in suis principiis causisque cognoscere, quia comprehensiuè procedit. Hoc autem stando intra limites ordinis naturalis fieri non potest, quia Angelus omnia quæ naturalis ordinis sunt cõprehensiuè cognoscit tam speculatiua, quàm practica, & in nullo principio naturali potest representari, & cognosci aliquid vt sequendum contra legem naturalem. Vnde propria excellentia, & ea quæ ad propriam excellentiam pertinent, non possunt representari vt immediatè, & directè contra ipsam legem naturalem diligibilia, quia lex naturalis ita immobiliter, & adhærenter representatur Angelo, sicut ipsa excellentia propria, & vnum ex contentis sub ipsa regula est ipsa propria excellentia vt conuenienter diligenda, & cum subiectione ad suum principium : ergo cum Angelus procedat per comprehensionem speculatiua, & practica ipsius legis, & regulæ naturalis, oportet quod ex vitalis comprehensionis ita immobiliter adhæreat ipsis principiis vniuersalibus legis naturalis, quod etiam omnibus contentis sub illa, quorum vnum est excellentia propria, eadem immobilitate adhæreat, siquidem eodem modo Angelus adhæret principiis, & conclusionibus tam in practicis quàm in speculatiuis. Si autem immobiliter adhæret excellentiæ propriæ vt contentæ sub lege, non potest adhære illi contra legem, nisi sub aliis principiis, vel sub alia lege ponatur, propter quam relinquendam vel sequendam excellentia naturalis, etiam contra propriam naturalem regulam, ametur. Hoc autem iam est ponere Angelum extra limites purè naturales, quo casu nos non loquimur in præfenti. Quod si ipsa excellentia accipiat ut primū principium, & regula diligenda; & sic subtrahatur à regularizationis, sub qua continetur ex vi naturalium principiorum, hoc stare nõ potest nisi mutando cõnaturalem modū procedendi in Angelo, quia si ex naturali cognitione comprehensiuè, & perfectè cognoscitur excellentia propria non vt prima regula, & principium, sed vt contentò sub vniuersali principio, & per modum boni particularis sub fine, non potest Angelus intra limites naturalis ordinis accipere illam vt principium, nisi immutet ordinem cognoscendi naturalem, ita vt ex conclusionibus faciat principia & sic comprehensiuè non procedat, quod est proprium cognitionis imperfectæ discurrentis & fluctuantis, modò ab vno, modò ab alio, quod Angelo connaturale non est, sed contra eius naturam. Si tamen noua & extrinseca lex ponatur Angelo, quæ connaturalis non sit, cui subiiciatur propria excellentia, poterit id renuere, & tunc indirectè etiam subtrahet illam à propriæ regulæ subiectione, & faciet quasi principium deordinationis propriam excellentiam, vt iam dicemus.

21 Quod attinet ad dilectionem proximi, dicimus quod eodem modo Angelus diligit eum ex vi legis naturalis, sicut seipsum, licet ordine quodam seipsum diligit, & alium, quia principalis diligit se, & necessario quoad specificationem, alium autem à se diligit non necessario quoad specificationem, sed diligit illum naturali dilectione,

sicut se, in quantum secum conuenit in ratione generica, vel specifica, vt dicit S. Thom. *suprà quæst. 60. art. 4.* in quantum autem differt à se, diligit illum non dilectione naturali, sed electiua; Et quantum ad dilectionem naturalem dicit ibi S. D. *ad 3.* quod non potest remoueri in Angelis, nec in Dæmonibus remouetur: nec enim habet odio alios Angelos quantum ad id in quo communicant cum eis in natura, sed quantum ad dilectionem electiua, & quantum ad id in quo differunt Angeli inter se possunt eos habere odio. Cæterum istud odiū non potest per se, & directè incipere ex puro motiua naturali, & stante Angelo in puris naturalibus, quia dilectio alterius Angeli, vel hominis etiam in eo in quo differunt, representatur Angelo, vt conueniens, tanquam quid contentum in lege naturali, quia est vnum ex præceptis naturalibus diligere alterum sicut se. Vnde licet ex meritis obiecti posset Angelum non diligere alterum, quia non est necessitatus quoad specificationem circa bonum alienū, sicut circa proprium, tamen in quantum illud bonū dilectionis alterius Angeli continetur sub principiis vniuersalibus legis naturalis, & Angelus cõnaturali modo procedit eadem immobilitate, & comprehensione circa finem, & circa media, circa principia, & circa conclusiones, prout sic non potest odio habere alterum Angelum, quia non potest egredi à limitibus illius regulæ, & legis naturalis, quandiu intra limites ordinis naturalis operatur connaturali modo, id est, comprehensiuè, & perfectè cognitione procedens, sicut exigit natura sua; bene tamen si supponatur alteri legi illud bonum dilectionis alterius Angeli, cui legi si nolit se subordinare, poterit ex aliquibus effectibus, qui sibi contrarij aut differentes videntur, alium Angelum odio habere, etiam non seruando legem naturalem, vt mox amplius explicabitur.

22 Quoad secundam ergo partem conclusionis posite probatur, tum ex eisdem locis D. Thomæ ubi admittit peccatum posse esse in Angelis ex ordine ad ea quæ supernaturalia sunt, seu in ordine ad legem supernaturalem; tum quia *suprà q. 60. a. 5. ad 5.* docet, quod *illi qui non vident Deum possunt ex aliquibus effectibus, qui eorum voluntatē contrariantur Deum odio habere*, quod utique contra naturalem legem est, tum quia vt dicit *infra S. Thom. quæst. 64. art. 2. ad 5.* *Omnis actus Dæmonis ex voluntate deliberata procedens, est malus, actus autem naturalis bonus esse potest, & tamen tali bono actu abutuntur ad malum*: tum denique quia omnia peccata secundum reatum esse in Dæmonibus, quatenus ad ea homines incitat, docet ipse S. D. *in hac q. 64. art. 2.* inter quæ sunt multa contra ordinem legemque naturalem.

Ratio autem à priori huius est, quia non potest aliqua voluntas renuere subiectionem ad regulam supernaturalem, nisi ex consequenti, & indirectè à naturali regula se auertat; tum quia licet naturalis regula non dicat de supernaturalibus aliquid, dicat tamen subiiciendam esse hanc regulam regulæ illi superiori, & nõ esse abiiciendam, sicut lex Prætoris dicat subiiciendam esse sententiam suā, & iudicium, iudicio Imperatoris vel Regis: vnde sicut non stat quod aliquis rectè velit parere iudicio Prætoris, & nolit subiici iudicio, & legi Regis, ita non stat quod aliquis integrè, & rectè se habeat secundum legem naturalem, si renuit subiici regulæ supernaturali, sed hoc ipso manet mancus, & non rectus circa naturalem legem, quia læditur naturalis lex in eo quod dicat subiici debere superiori: hoc enim bonum naturæ est eleuari ad superius. Si ergo ex hac parte læditur lex naturalis

naturalis, hoc ipso Angelus mutat connaturalem modum procedendi practicè, & in aliquibus etiam speculatiue, non quidem respectu eorum quæ naturaliter cognoscit speculatiue, hæc enim integra manent in Angelo, quia simplex est eius lumen, modusque cognoscendi, sed in quantum abutitur ad iudicandum etiam de his quæ naturaliter nota non sunt lumine suo: vult enim præsumptuose præcipitare iudicium, aut de interioribus cogitationibus plus iudicando, aut de rebus supernaturalibus, vt docet S. Tho. *suprà qu. 58. art. 5. & qu. 16. de malo art. 6.* In parte autem affectiua, seu practica etiam iudicat appetendum aliquando id quod appetendum non est. Et hoc totum inde prouenit quod Angelus peccans non retinet in operando modum connaturalem suum, nec intra illum se vult continere. Modus autem connaturalis est vt procedat semper indiuisibili modo, & comprehensiuo, & intra illum se contineat. Si enim hoc obseruaret Angelus, vtique non peccaret: videret enim quod naturalis lex in omnibus obseruanda est, & ad omnia se deberet extendere in ipsis principiis, attingens per intellectum, & voluntatem omnia in eis contenta. Vnum autem ex contentis est dictamen illud legis naturalis, quod cuiusque regulæ superiori debet subiici, etiam supernaturali. Vnde si Diabolus ab hac lege se subtrahit, iam non indiuisibiliter, nec vnité, & comprehensiuè omnia quæ sunt contenta sub lege naturali amplectitur. Sed hoc non est incipiendo rumpere hanc indiuisibilitatem ab ipsa lege naturali absolutè sumpta, & contra eam agendo, sed comparatiue, seu respectiue ad legem superiorem, cui non vult subiici, & in hoc etiam legem naturalem rumpit. Vnde hoc ipso distemperatur, & accipit pro principio, cui inhæreat, suam propriam excellentiam, quæ erat contenta antea sub regula naturali, non vt principium, sed vt medium, seu conclusio, & consequenter facit contra regulam naturalem, & deordinat omnia, faciens finem sibi vltimum ex illo quod se habebat vt medium, & cum in omnibus nolit se subiicere regulæ supernaturali, in omnibus recedit ex consequenti à regula finis naturalis, quia mutat connaturalem modum operandi comprehensiuè, & indiuisibiliter ex vi principiorum naturalium, sed diuidendo illa, quia non tendit in finem naturalem, & regulam secundum omnia, quæ sub tali fine continentur. Vnde vltèrius etiam in speculatiuo iudicio ferendo non se continet intra modum, & limitem naturalem, sed præcipitanter agit iudicando ex naturalibus vltra id quod ipsa manifestare certò, & comprehensiuè possunt, eaque, vt certa accipiendo.

23 Ex quo sequitur verum esse quod suprà notauimus, quod ista conclusio procedit supponendo quod Angelus procebat connaturaliter, seu iuxta modum suum connaturalem agendi, quod non intelligitur sic, quod procedit quando Angelus operatur connaturaliter, id est iuxta id quod exigit sua natura in regulatione recta, quasi modus connaturalis sit ipsa subiectio ad regulam naturalem, quæ recta est: hoc enim idem esset, ac dicere quod non potest peccare contra legem naturalem, quandiu operatur secundum regulam naturalem, seu non potest peccare contra regulam, quandiu operatur secundum regulam. Non sic intelligitur, sed quod non peccat contra legem naturalem, quandiu operatur connaturaliter, & iuxta modum suæ naturæ, id est principia ipsa naturalia. & finem naturalem intelligendo, & accipiendo comprehensiuè, & vnité sicut eius natura postulat, tam speculatiue quàm practicè; Sic enim est proprius modus intelligendi

Angeli, vt naturalia accipiat comprehensiuè, & vnité, & non diuidat sicut nos possumus diuidere ob nostrum imperfectum modum procedendi. Et ita si Deus de potentia absoluta ita produceret Angelum in pura natura, quod non daret ei modum suum procedendi connaturalem, sed quod ea quæ naturalia sunt plenè, & adæquatè non intelligeret, sed aliquid subtraheret, non coordinatè intelligendo aut apprehendendo cum suo principio, tunc non repugnaret Angelum peccare contra legem naturalem primò, & immediatè, quia tunc sibi proponeretur imperfectè, & ad eum modum, quo nobis proponitur sine plena, & perfecta comprehensione; atque adèò posset inuerrere ordinem eorum quæ tenetur diligere pro sua libertate: posset enim ex parte dictaminis diuidere, & non proponere, seu attingere vnum subordinatè ad alterum, atque adèò neque ex parte libertatis, neque ex parte dictaminis impeccabilis esset.

Quod si dicas: Ergo si potest Angelus inuerrere 24 connaturalem ordinem operandi, & intelligendi ea quæ naturalis ordinis sunt ex recessu à finisupernaturali, poterit discurrere; siquidem ex eo non discutrit, quia comprehensiuè procedit: ergo si potest non comprehensiuè procedere, poterit discurrere.

Respon. negando consequ. Et ad probationem dicitur quod ratio non discurrendi in Angelo, est quia comprehensiuè procedit, distingo, quia comprehensiuè procedit ex parte modi operandi, & secundum exigentiam suæ naturæ, concedo, quia comprehensiuè procedit ex parte rei cognitæ, & secundum applicationem ad hanc vel illam materiam determinatè, nego. Itaque potest Angelus procedere, non comprehensiuè in aliqua materia quoad vsum illius, seu quoad extensionem ad omnia, quæ in aliquibus principiis manifestantur, non tamen potest modum comprehensiuum exuere quantum ad hoc quod simplici intuitu procedat in materia circa quam operatur, & non per lumen illatium, ita quod duplici lumine procedat, vno exorto ex alio; atque ita, vno verbo, potest non procedere comprehensiuè, quoad extensionem obiectorum, non quoad intensiorem in modo operandi, & ex primo non infertur discursus, sed solum ex secundo, quia ad discursum oportet quod lumen non sit simplex, sed illatium, id est vnum lumen ortum, & coordinatum ex alio. Ad hoc autem vt Angelus peccet, sufficit diuidere comprehensionem ex parte obiectorum, (quia obiecta sunt quæ mouent secundum bonitatem, & conuenientiam) ita vt in illis non seruet ordinem, quem naturaliter postulant obiecta, id est quod sine vtatur vt fine, & principiis vt principiis, & medio tanquam medio, non verò quod ita diuidat naturalem subordinationem, quod velit vti medio vt fine non subordinando illud legi supernaturali, & ex consequenti, neque sub naturali fine retinendo. Et licet in aliarum rerum cognitione possit etiam Angelus vti suis speciebus inadæquatè, & non omnia ad quæ possunt se extendere simul intelligere, quod est non comprehendere illas quoad extensionem, nec tamen in hoc peccare; ceterum est longè diuersa ratio quàm in præsentia, quia aliud est Angelum inadæquatè vti speciebus quoad cognoscenda obiecta earum, aliud inordinatè, seu naturalem ordinem inuerrendo, ita vt principiis vtatur pro conclusione, vel cōclusionem accipiat pro principio, & medium accipiat pro fine, aut è contra. Potest quidem Angelus etiam in puris naturalibus vti inadæquatè suis speciebus, & non omnia obiecta quæ in qualibet continentur attingere: non tamen hoc facit

nisi seruando ordinem formalem, quo ipsæ species naturaliter repræsentant, scil. vt videat res in suis principiis, quia in illis continentur, & simplici lumine, id est: non duplicato, ita quod vnum oriatur ex alio, quale est lumen illatiuum. Si non simplici lumine vtitur, non solum amittitur comprehensio, sed etiam admittitur discursus, vt in nobis, quia fit lumen illatiuum. Si vtitur lumine simplici, sed non seruat ordinem, seu subordinationem obiectorum, sed vtitur medio tanquam fine, non subordinando illud fini, peccat, licet non discurrat; sed tamen non potest hunc ordinem inuertere Angelus operando præcisè ex lumine naturali, quia naturale lumen semper procedit ordine suo ex principiis ad contenta in illis, si modo connaturali, & formali procedat, non modo potenciali, & confuso, sicut nos, qui modò ab his, modò ab illis procedimus. Vnde vt Angelus hunc ordinem inuertat, oportet quod naturalia ista subiiciantur aliis principiis, seu regulæ, scil. supernaturali, cui cum Angelus non subiiciatur ex ipsa vi naturalis luminis, potest ab illa se subtrahere, non subiiciendo illi ea quæ naturalia sunt, & subiici deberent; quod si non subiicitur, sed subtrahitur ab illo, hoc ipso non vtitur Angelus propria excellentia vt medio, sed vt fine, & principio, & consequenter, neque subiicit illam fini naturali, seu Deo auctori naturali, quia lumen naturale, licet nihil dicat de supernaturali fine, positiuè, dicat tamen non esse illi repugnandum, nec ab eo subtrahendum, & ex hac parte rumpitur, etiam subordinatio, & subiectio ad finem naturalem, & vulneratur in naturalibus, qui non se subiicit cælestibus.

Soluntur argumenta.

Dux nihilominus præcipuæ obiectiones restant contra secundam conclusionem.

25 Prima, quia Angelus etiam in pura natura est liber libertate contradictionis, & contrarietatis, non minus quam nunc: ergo potest peccare. Consequenter patet, quia libertas contrarietatis est circa bonum, & malum. Anteced. patet, quia in statu naturalis ordinis non omnia obiecta amat necessariò necessitate specificationis, nisi tantum bonum proprium, seu in quo non apparet aliqua ratio mali, & tamen naturalis lex etiam plura præcipit circa bonum alienum, vt quod tibi non vis, alteri ne feceris, &c. ergo potest non amare illud; & sic peccare contra illud.

Confir. quia intra puram naturam est Angelus capax vt sibi imponatur præceptum aliquod positiuum non supernaturale, sed merè naturale, v.g. quod præcipiat Deus Angelo ire ad talem locum, vel quod manifestet talem cogitationem suam alteri, vel quid simile, & ille poterit renuere: nec enim est necessitatus obedire omni præcepto positiuo, nec apparet ratio cur possit à præceptis supernaturalibus se subducere, & non à posituius naturalis ordinis? Ergo intra limites puræ naturæ poterit Angelus peccare sine aliquo ordine ad supernaturalia.

Confir. secundò, quia Angelus non potest viribus suis sine gratia seruare totam legem naturalem, sine gratia inquam, ordinis naturalis, & auxilio Dei mouentis: ergo non est impeccabilis ab intrinseco, aliàs non esset gratia quod non peccaret, & seruaret legem.

26 Secunda difficultas est iam suprà insinuata, quia Angelus semel deuians à fine supernaturali, potest peccare contra naturalem legem, vt modò de facto Dæmones peccant contra legem naturalem in-

citando ad tot peccata, quæ sunt ab hominibus contra legem naturæ: eiusdem autem prohibitionis est, non facere illa, & non incitare ad illa. Similiter Dæmon habet modò odium Dei, sanctorum, Angelorum, & hominum, quæ omnia sunt contra legem naturæ. Ergo etiam possunt peccare Angeli immediatè contra legem naturæ. Probatur consequenter quia si voluntas Angeli ex principiis naturalibus est impotens ad peccatum, quomodo ex eleuatione ad finem supernaturalem potest reddi potens ad peccandum contra eandem legem naturalem? sic enim fieret Deo auctore deterior, & ex eleuatione diuina imperfectior. Nam non posse peccare contra legem naturalem, perfectio est, sicut è contra potentia ad peccandum, defectus est: ergo si ante eleuationem non habet voluntas Angeli istum defectum, & post eleuationem habet: sit ergo defectuosior, & deterior Deo auctore. Deinde quia libertas voluntatis, & cognitio intellectus circa bonum ordinis naturalis intrinsecè immutata manent ante eleuationem ad finem supernaturalem, & post: ergo si ante non poterant peccare contra illum finem, neque postea poterunt, & è conuerso, siquidem non potest sine aliqua mutatione intrinseca voluntas impotens ad peccandum, reddi potens, vel è contra; ex eleuatione autem ad finem supernaturalem nihil libertatis, aut intrinsece immutationis acquirit illa libertas. Denique si dicatur intrinsecè non mutari libertatem, aut aliquid acquirere per illam eleuationem, quod antea non haberet, sed ab aliquo extrinseco, scil. ex nouo motiuo, quod antea non proponebatur, currunt omnes instantiæ P. Vasquez *hic disp.* 131. c. 5. & Suarez *lib.* 3. de Angelis c. 7. Arrubalis *hic disp.* 179. c. 2. & aliorum quæ refutantur in hoc, quod Angelus si ex se esset impeccabilis contra legem naturalem, nullo motiuo aut fine posset moueri ad peccandum contra illam. Quod si modò habet motiua ad peccandum, quæ in statu merè naturali non haberet, in primis non omnia motiua modò sunt contra finem supernaturalem: nam etiam peccant, & odio habent Deum, inuidentiámque aliis, quia se vident cruciari, & non solum quia beatitudine sunt priuati, nec apparet, quæ necessitas sit, vt Angeli ad peccandum debeant prius moueri ex motiuo finis supernaturalis, & non possint ex motiuo naturali inuidere aliis Angelis, aut odio habere Deum, quia ad hoc non mouentur ex ipsa lege supernaturali, sed ex eo quod vident se priuatos donis gratiæ. Et licet minora motiua forent sub statu purè naturalis ad peccandum, quam modò sint in statu damnationis; tamen tunc omnino non deessent, quia ad hoc non requiritur error aliquis, sed defectus considerationis, ex quo minus efficaciter apprehenditur bonum honestum, quam delectabile vel vtile proprium; nulla autem apparet repugnantia, cur non posset habere Angelus in statu puræ naturæ talem defectum inconsiderationis, sicut modò habet supposita notitia legis supernaturalis. Ac denique quia Angelus licet modò procedat ex motiuo legis supernaturalis, seu contra illam, tamen verè, & propriè peccat contra ipsam legem naturalem, siquidem obiectum circa quod peccat est prohibitum lege naturali, & participat malitiam eius: ergo signum est Angelum ex natura sua, & intra limites puræ naturæ non esse omnino determinatum ad legem regulamque naturalem: sic enim non posset verè, & propriè nunc peccare contra illam.

Ad primum Respon. Angelum pro illo statu 27 non habere libertatem contrarietatis ad peccandum contra illum finem naturalem sic solitariè sumptum, licet semper habeat ab intrinseco libertatem

tatem ad peccandum contra eundem finem, non solitarie, & seorsum acceptum in puro ordine naturali, sed vt coniunctum, seu subiectum fini super-naturali, vt explicatum est. Remanet tamen in An-gelo libertas quoad exercitium, & respectu huius, vel illius operationis circa bonū: nec enim neces-sse est quod libertas vt sit libertas, sit defectuosa, & circa malum pro omni statu, & consideratione. Et cum instatur quod voluntas nō necessitatur quoad specificationem amare omnia bona quæ præcipiū-tur lege naturali, præsertim quæ versantur erga al-terum. Respon. ex suprā dictis, non necessitari per se, & ex meritis obiecti, sed ex modo quo Angelus natus est apprehendere, & proponere ea quæ ad naturalem ordinem spectant, quandiu non subdun-tur superiori regulæ, sed iuxta naturalem modum ab Angelo attinguntur, & dictamen formatur: sic enim quæcumque sub præcepto naturali cadunt, cum regulentur per ordinem ad finem naturalem, & ex principiis naturalibus deducantur, in ipso met fine ab Angelo attinguntur, & eadem immobilita-te fertur dictamen Angeli, & voluntas circa illa, at-que circa ipsum finem, & circa principia vniuersa-lia, quia iste est modus connaturalis cognoscendi, & volendi in Angelo. Vnde ex vi huius coarctatur ad non volendum aliquid oppositum legi naturali, nisi mutet modum tendendi in legem ex subie-ctione ad legem superiorem quam possunt recusa-re, & ex consequenti etiam naturali legi non sub-di, quia tunc non ex vi ipsius naturalis luminis ten-dit in talem legem, sed ex ordine ad finem supe-riorem, ad cuius amorem non necessitatur quoad specificationem, nec ex naturali determinatione, & ordinatione.

18 Ad confirmationem Respon. esse circa hoc di-uerfas sententias, etiam inter Thomistas. Nam ali-qui sentiūt posse peccare Angelum in pura natura per violationē præcepti positiui quod posset Deus imponere illi in ordine ad finem naturalem, licet non per violationem præceptorum, quæ sunt de iure naturæ. Ita Bannez, & Nazarius *super hanc q. 63. art. 1.* & probabile reputat Ledesma *de perfe-ctione Dei q. 6. art. 7. in subarticulo 2.* & idē attribuit Zumel *super hanc articul. citatum.* Alij verò di-scipuli D. Th. absolutē, & sine limitatione docent in ordine ad finem naturalem non posse peccare primò, & immediatē, non distinguentes de his quæ iubentur per præceptum positiuum, vel iure natu-ræ, sicut sentiunt Authores, quos *suprā* citauimus pro nostra sententia. Et in specie quod etiā posito præcepto positiuo de re merè naturali adhuc An-gelus non possit peccare directē, & per se primò contra motiū merè naturale secundū tale præ-ceptum positiua defendunt Nauarette *hic contro-uersia 79. §. 1.* & Carmelitani *Salmatic. tract. 7. de Angelis, disp. 9. dub. 2. num. 35. & 51.* Et videtur ma-gis propendere D. Thom. in hanc sententiam, quia nusquam distinxit inter præcepta naturalia, & po-sitiua quantum ad hoc quod non possit peccare Angelus contra prima, bene tamen contra secun-da, sed absolutē docuit non posse peccare ex mo-tiū merè naturali, & solū admisit posse peccare ex motiū relato ad finem supernaturalem, vt in lo-*is suprā cit.* videri potest.

29 Quare dicendum est, quod si Angelus manet in pura natura, præceptum quodcumque ei ponatur positiuum, debet esse circa aliquam rem ordinis na-turalis: nam si est circa rem ordinis supernaturalis, iam mutatur casus, & non remanet Angelus in pu-ra natura. Si ergo ponitur præceptum aliquod po-sitiuum, oportet quod sit ordinatum ad finem na-turalem, quia cum sit præceptum à Deo, debet esse

de materia bona, & ordinata in bonum finem, & consequenter sub illo fine naturali contentum, id est sub Deo Authore, naturali, & in ordine ad ipsū, sed in ipsa cognitione, & dictamine quo Deus pro-ponitur vt finis naturalis; & sic amatur, & accepta-tur, hoc ipso acceptantur omnia præcepta sub tali fine ordinabilia, quia ille finis amatur super om-nia: ergo Angelus sic diligens illum finē, virtualiter omnia præcepta sub tali fine ordinabilia includit, vnde non potest aliquod ex illis præceptis non ad-mittere, nisi omittat amorem illius finis naturalis super omnia, quod est non habere illum pro fine, atque aded non immobiliter adhærere principio. illi vniuersali practico, secundū quod diligitur Deus naturalis author super omnia. Quare ego nullam video differēciam inter præcepta naturalia, & positiua in hac parte, quia præcepta naturalia, quæ versantur circa media, seu circa ea quæ sunt ad finem acceptantur ab Angelo in ipso fine, in quo media attingit ordinata ad talem finem, vnde non potest stare, quod diligitur ille finis super om-nia, & non acceptentur media ad talem finem or-dinata, & cōsequenter ipsa ordinatio seu præcepta naturalia, quibus talia media ad illum finem ordi-natur. Sed similiter hoc ipso quod diligitur ille fi-nis super omnia in genere naturæ, virtualiter acce-ptatur quidquid præcipi potest positiuē in ordine ad eundem finem, quia si præcepto positiuo renue-ret subiecti, hoc ipso non diligeret Deum super om-nia: ergo ex suppositione quod finis est acceptatus tanta comprehensione, & immobilitate, vt in ipso acceptentur omnia media requisita, & quidquid ad talem finem ordinari striat, & de necessitate po-terit, quia diligitur super omnia: ergo nisi retroce-dat Angelus in amore illius finis, & principij vni-uerfalis practici, non potest illa præcepta abicere, sicut nec naturalia, quia in hoc nulla est differentia ex suppositione quod Angelus in ipsa cognitione, & acceptatione finis, cognoscit, & acceptat per comprehensionem, & simplicem actum immo-bilem omnia media quæ se habent vt conclusiones connexæ fini.

Quod si dicas: Quia potest Angelus in ipso principio non acceptare illam legem positiuam, & non se illi subicere ex amore excellentiæ propriae, sicut renuit se subicere fini supernaturali, & ex consequenti peccare contra regulam, & finem na-turalem, nec se illi subicere, non autem ex suppo-sitione amoris ipsius finis procedendo, quia hoc supposito non potest retrocedere, & abicere præ-cepto quæ in ordine ad ipsum ponuntur, sicut ac-ceptato fine supernaturali, & diligendo illum super omnia, non potest Angelus renuere præcepta po-sitiua quæ circa talem finem sibi imponantur: sed tamen potest stare quod ab initio quando Angelus debuit acceptare legem naturalem, & ea quæ ad ipsam ordinabantur, renueret aliquod præceptum positiuum sibi impositum propter excellentiam propriam, vnde resuleret non acceptare ex conse-quenti legem naturalem; & in summa, quod proce-deret Angelus circa illud præceptum positiuum, sicut circa præceptum de fine supernaturali.

Respon. idem argumentum prorsus fieri posse de quolibet præcepto naturali contento sub fine naturali, v.g. de diligendo altero Angelo, & non in-uidendo illi dona naturalia, & de similibus, quod posset Angelus renuere tale præceptum circa illā materiam, & conuerti ad propriam excellentiam vt ad finem, & inde ex consequenti abicere à se le-gem naturalem. Quod si hoc non admittitur, quia tale præceptum naturale continetur sub fine illo ordinis naturalis, nec potest ferri Angelus in me-

dium aliquod, nisi ex aliquo fine, sicut nec conclusiones, nisi in aliquibus principiis: idem dicemus de præcepto positivo superaddito, quia etiam tale præceptum continetur sub illo fine, cum ordinetur ad illum, quia versatur circa aliquod medium: nam finis ex præcepto naturali diligitur, & finis ille diligitur super omnia; atque adeo omnia illa præcepta manent virtualiter ibi acceptata, & volita. Nec potest excellentiam propriam accipere tanquam finem ad quem conuertatur subtrahendo illam à subiectione finis naturalis, cui tanquam aliquid inferius naturaliter subiicitur, nisi supponendo aliquem defectum ad aliquo fine, ratione cuius accipiat propriam excellentiam ut finem, quia si connaturali modo operatur, debet propriam excellentiam semper accipere ut contentam sub fine. Si autem accipit illam ut finem, & non ut medium contentum sub fine, hoc ipso deficit ab aliquo fine, sub quo continetur. Non à naturali immediatè, quia ex illo incipit actum suum: ergo à supernaturali: et si iste non datur, non deficit. Et sic oportet quod incipiat hoc peccatum Angeli ab aliquo defectu circa finem, & circa modum connaturalem operandi. Qui quidem defectus optimè cernitur quando interuenit ordo ad finem supernaturalem, cui Angelus renuit se subiicere: tunc enim sub tali defectu à tali fine deficit à connaturali, & proprio modo operandi, ut *suprà* diximus, potestque accipere propriam excellentiam ut finem ad quem conuertatur, quia iam finis naturalis, qui est Deus ut auctor naturæ non plenè, & perfectè attingitur, hoc ipso quod renuit Angelus se subiicere fini supernaturali. Non tamen hoc contingit si renuat se subiicere præcepto positivo circa aliquod medium subordinatum fini naturali, quia cum Angelus nunquam operetur nisi incipiendo à principiis, & à fine (siue per subiectionem, siue per auersionem) propter perfectissimum modum intellectualem quem habet in operando; idè non potest renuere hoc præceptum particulare quod de se est contentum sub amore finis ultimi naturalis, nisi incipiat hanc renuentiam ab ipso fine. Et cum supponatur non esse alius finis quàm naturalis, & circa illum est necessitatus quoad specificationem, quia bonum naturæ est, non potest intra limites puræ naturæ procedens, & modo connaturali, id est incipiendo à principiis ad conclusiones, & à fine ad media renuere subiectionem illam ad tale præceptum positivum magis, quàm ad alia præcepta naturalia, quæ versantur circa media contenta sub illo fine naturali.

Ad secundam conf. argumenti, Respon. quod, ut docet S. Th. 1. 2. q. 109 art. 3. homo in statu naturæ integræ (& idem est de Angelo ex sua natura considerato, ut ibi se refert ad locum 1. p. ubi id tractauit, scil. q. 59. art. 5.) ad diligendum Deum super omnia non indiget dono gratiæ superadditæ naturalibus bonis, licet indigeat auxilio Dei ad hoc eum mouentis. Sic ergo dicimus quod Angelus ad obseruandam legem naturalem indiget auxilio mouente, & concursu generali, qui dicitur gratia generali modo, non autem indiget aliquo dono gratuito superaddito naturalibus bonis. Vnde non tollitur quod sit impeccabilis ex vi illius status, & in ordine ad illum finem tantum, licet auxilio generali indigerit sicut ad omnia alia opera, & sicut indigent beati ad amandum Deum.

Ad secundam difficultatem Respondetur ex dictis negando consequentiam.

31 Ad primam probat. dicitur, quod Angelus non redditur potens ex eleuatione ad supernaturalia ad peccandum, sed per se redditur potens ad superna-

turaliter operandum, quod verò inde sumpserit occasionem Angelus ad peccandum, hoc est ex defectu suo, non ex operatione Dei, qui ad superius bonum eleuabat Angelum, licet ipse beneficio Dei abusus sit nolens se tanto bono, & superiori legi subiicere. Non est autem inconueniens, quod ex beneficio principali Dei, sumatur occasio maioris mali, sicut Incarnatio Verbi fuit summum Dei beneficium, & tamen ex eo occasionatum est peccatum maximum eorum qui noluerunt ipsum recipere, imò, & ipsum occiderunt. Vnde dicebat Dominus suis: *Si non venissem, & locutus eis non fuisset peccatum non haberent; nunc autem excusationem non habent de peccato suo.* Ioan. 15. Et Apostolus dicebat Rom. 7. *Occasione accepta peccatum operatum est in me omnem concupiscentiam: sine lege enim peccatum mortuum erat.* Similiter ergo in Angelo ante eleuationem ad supernaturalia potentia erat ad peccandum, & deficientum si eleuaretur, & sibi proponeretur lex superior, non autem ad peccandum si intra naturalem legem maneret, & in modo connaturali operandi. Vnde per eleuationem non accipit potestatem peccandi, nec libertas immutata est, sed materia maioris boni, & beneficium maius datum est, vnde occasionem accepit Angelus peccandi, non ex potestate noua ad peccandum data, sed occasione accepta. Vnde Angelus non sit Deo authore, deterior sed melior factus, occasionem sumit ex se deteriorationis. Et cum dicitur quod antè non habebat potentiam ad peccandum, & modò habet; Respon. quod etiam antè habebat potentiam ad peccandum, non quidem intra naturalem ordinem manendo, sed habebat potentiam ut cum ordine ad supernaturalia deficere posset. Vnde eleuatione posita, impleta est conditio, & occasio ab ipso accepta deficienti. Et sic patet ad secundum quomodo non mutatur intrinsecè libertas, sed solum extrinsecè ponitur occasio circa quam possit deficere: iam enim antè habebat potestatem ad deficientium posita hoc occasione.

32 Ad tertiam Respon. quod si Angelus esset impeccabilis ab intrinseco absolute, & simpliciter, nullo motiuo posset ad peccandum moueri, sed Angelus ex se, & ab intrinseco est peccabilis, si ponatur in eo ordo ad supernaturalia, est autem indefectibilis si talis ordo non detur, & aliàs operetur iuxta suum modum connaturalem, ut diximus. Et quando dicitur quod modò peccant, etiam ex motiuo merè naturali, ut quia cruciantur, & non solum quia amiserunt beatitudinem, dicimus, quod non possunt ex illo motiuo naturali peccare, nisi prout supponit, & oritur ex alio priori motiuo, quo ipsi noluerunt subiici regulæ supernaturali, seu ordinari per eam; sed ea relicta conuerti ad propriam excellentiam, qua deordinatione supposita, etiam in lege naturali deordinati sunt, & potuerunt contra illam peccare, ut diximus, sed incipiendo semper, & utendo illa prima abusione, & non subiectione ad regulam supernaturalem ut motiuo, quia superbia est præcipuum motiuum eorum, quod virtualiter operatur, & manet in aliis particularibus motiuis, quia Angeli semper operantur incipiendo ab vniuersalibus principiis, & à fine: præterquam quod cruciatus quem nunc habent, ordinem, & connexionem habet cum fine supernaturali, sicut & priuatio beatitudinis, quia vtrumque ex peccato contra legem supernaturalem emanauit. Et similiter inuidia de bonis Angelis est ex eo quod vident illos excellentissimis donis supernaturalibus cumulos, quibus ipsi carent, quod totum ordinem dicit ad supernaturalia; & sic dicit D. Thom. *suprà* quæst. 60. art. 4. ad 3. quod odiunt bonos Angelos in quantum

quantum differantur penes iustitiam, & iniustitiā. Et art. 5. ad dicit quod Odio habent Deum in quantum facit in eis particulares effectus, qui eorum, voluntati contrariantur. Quare non est necesse quod Dæmones moueantur semper ex lege supernaturali, sed sufficit quod contra eam, vel ex aliquo dicente ordinem ad illam, vel supponere illam, ut dictū est.

33 Ad id quod dicitur de motiuis ad peccandum, quod potuerunt dari in statu puræ naturæ, licet nō tot, sicut in statu damnationis, dicimus nō regulari impeccabilitatem Angeli in illo statu penes paucitatem, vel pluralitatem motiuorū, sed propter modum tunc operandi, ex quo non dabatur locus formandi dictamen defectuosum quandiu operabatur connaturali modo suo, id est procedendo comprehensiuē, & tam immobiliter in principiis quā in conclusionibus, in fine, quā in mediis, ut amplius inf. disp. 2. 4. a. 1. dicitur: sic enim cum non proponeretur illi nisi finis naturalis ad quem ex natura sua determinatus, & immobilitatus est, & sub illo continebantur ea quæ poterat pro fine ultimo peruersē habere, scilicet ex cōtētia propria, necesse erat sibi proponi alium finem cui ea non subiiceret, ut posset ab alicuius finis auersione incipiendo operari defectuosē, & ex his quæ sub fine naturali continebantur finē sibi ultimum constituere. Et cum instatur, quod non repugnat etiam in statu naturali dari defectum aliquem cōsiderationis, ratione cuius possit proponi ut conueniens bonum delectabile, seu proprium bonum, relicto bono honesto. Resp. non repugnare defectum cōsiderationis, & quod bonum propriū anteponatur, dummodo ille defectus cōsiderationis detur incipiendo ab aliquo fine a quo se auertat, vel quem sequatur, quia proprius, & connaturalis modus operandi in Angelo est incipiendo a fine, sicut in intellectu incipiendo a principiis, eo quod intellectualis naturæ est perfectæ, & cōprehensiuæ in suo modo procedere; & sic semper incipit a principiis. Cum autem in statu naturali solum ponantur principia naturalia, & finis naturalis sub quo omnia bona continentur, & ex amore talis finis Angelus incipiat, in eoque omnia quæ sub illo ordinantur, attingat, quia comprehensiuē procedit, & vnica immobili attingentia, tam circa principia, quā circa cōclusiones, fines, & media, inde fit, quod nō possit omittere cōsiderationē finis, & incipere ab aliquo bono contento sub tali fine, & illū sibi ut finē proponere, quia hoc esset inuerrere modū connaturalē procedendi, quod stare non potest, nisi si aliquē defectum supponendo, ratione cuius id quod nō est finis, accipiat ut finis, quod esse non potest, nisi auertendo se ab aliquo fine, seu nō subiiciendo se alteri fini, quā naturali, quia huic naturaliter adhæret, & non potest ab ipsius auersione incipere, cum sit necessitatus quoad specificationē ad ipsum. Itaque Angelus potest defectū cōsiderationis pati, sed semper seruando modum suum, qui est incipiendo ab aliquo fine, vel per conuersionem, vel per auersionem: unde si a fine naturali auertitur, est ex altero fine a quo incipit, & ille non potest esse naturalis ipse finis, quia bonus est, nec aliquid contentum sub isto fine naturali, quia hoc non potest accipi ut finis inuerrendo connaturalē ordinē, nisi ex non subiectione ad alium finē cui deberet subiici, quod non stat nisi respectu finis supernaturalis: nam respectu naturalis per se subiicitur.

34 Ad ultimum dicitur: Angelum peccantem contra finem supernaturalem etiam violare legem naturalem, & illius malitiæ reum esse: hinc tamen non sumitur argumentum quod possit Angelus violare eandem legem naturalem stando in mero statu naturali, sed ex motiuo, & ordine aliquo ad

supernaturalia, a quibus si auertitur, etiam ex consequenti auerti potest a fine naturali, ut dictum est; & sic determinatus est ad finem naturalem quandiu non ponitur alius finis ex cuius auersione possit etiam contra finem naturalem agere: si autem ponatur talis finis, cui Angelus naturaliter non sit subiectus, potest se ab illo auertere, & ex consequenti a fine naturali ut explicatum est.

ARTICVLVS II.

Vtrum Angelus potuerit peccare in primo instanti?

DE facto Angelos non peccasse in primo instanti suæ creationis ita ut cum ipsa creatione sui esse nascerentur mali, omnino certum est, & oppositum iudicatur ut erroneum, non solum si dicatur Angelum esse naturaliter malū, id est, ex natura sua, & non ex libero arbitrio, ita quod natura Dæmonis mala fuerit, & a malo Deo creata, quæ est hæresis Manichæorum; sed etiam ponendo quod Angelus libero suo arbitrio fuerit malus in primo instanti, ita quod nunquam fuerit bonus: hoc enim etiam Scripturæ contrariatur, quæ docet Dæmonē aliquando fuisse bonū, ut Ezechielis 28. ubi dicitur de primo Angelo qui vocatur Cherub protegens, *perfectus in viis tuis a die conditionis tue, donec inuenta est iniquitas in te.* Et Ioann. 8. dicitur de Diabolo, *quod in veritate non stetit*, ergo supponitur aliquando in veritate fuisse. Et in Canonica Iudæ dicitur, *Angelos qui non seruauerunt suum principatum, sed dereliquerunt suum domicilium in iudicium magni diei sub caligine reseruauit.* Ergo habuerunt aliquando principatum quem perdidit, non in natura, quia hæc integra mansit: ergo in gratia. Unde S. Leo Papa *epist. 93. c. 6.* ait quod *Diabolus bonus esset si in eo quod factus est permaneret.* Et ita in Concilio Bracharensi 1. inter capitula quibus Priscillina hæresis damnatur, septimum capitulum sic habet, *Siquis dicit Diabolum non fuisse prius bonum Angelum a Deo factum, nec Dei opificium fuisse naturam eius, &c. anathema sit:* ubi ly prius significat durationē temporis, seu instans aliquod durationis, in quo Diabolus bonus Angelus fuit. Quod etiam intendere videtur Concilium Lateranense in *c. Firmiter, de summa Trinitate*, ubi prius docet Angelicam creaturā, sicut & humanam ab initio temporis conditam esse a Deo, & mox subdit: *Diabolus enim, & alij dæmones a Deo quidem natura creati sunt boni* (utique in illo initio temporis, de quo dixerat) *sed ipsi per se facti sunt mali.* In aliquo ergo instanti fuerunt boni, scilicet cum creati sunt. Quare D. T. ubique docet hanc opinionem de peccato Angeli quod contigerit in primo instanti suæ creationi reputatam fuisse tanquam erroneam a Magistris, ideoque rationabiliter, ut patet in hac q. 63. art. 5. & in 2. dist. 3. q. 1. art. 1. & q. 16. de malo art. 4.

Difficultas ergo est: Vtrum in illo primo instanti 2 peccare potuerint, licet de facto non peccauerint. Quod si non potuerūt, unde proueniat ista impeccabilitas pro illo primo instanti? Et supponimus Angelum habuisse in illo primo instanti eleuationē ad supernaturalia, ne dicamus deesse illi ex hac parte conditionem requisitam ad peccandum contra legem supernaturalem, dato quod non possit contra solam legem naturalem: sed præcisē est difficultas, an ratione illius durationis, scilicet primi instantis, seu primi actus quem elicit Angelus detur specialis repugnantia ad peccandū in Angelo. Et idem est primum instans, ac primus actus, quem Angelus habuit in primo instanti quo creatus est, quia

quia creatus est ut actu operans, & intelligens, quia natura perfecta, & non impedita, in ipso primo instanti quo perfecte producit, & habet esse, simul operatur.

Varia sententia.

Duplex est principalis sententia in hac parte.

Prima docet potuisse Angelum in primo instanti, seu in primo actu peccare. Hæc est Scoti in 2. dist. 5. q. 2. quem alij ex antiquis sequuntur, ut Maior, Gabr. Palacios, &c. Ex recentioribus eandem sententiam sequuntur Molina 1. p. q. 63. art. 5. Valentia ibi q. 4. puncto. 4. Vasq. hic disp. 236. c. 3. & ex parte Suarez, ut statim dicemus, cum Alarcon tract. 6. de Angelis disp. 5. c. 3. & aliis.

Secunda sententia extremè contraria affirmat in Angelis non potuisse dari peccatum in primo instanti, seu in primo actu, licet ex diuersis fundamentis diuersi procedant. Hæc est expressa sententia S. Th. in hac q. 63. art. 5. & aliis locis supracit. ex qu. 16. de malo, & in 2. sententiarum. Eum sequuntur omnes eius discipuli in hoc loco 1. p. ubi videri potest Caiet. Banez, Nazarius, Zunel, Carmelit. Salmantic. disp. 11. dubio unico. Capreolus in 2. dist. 4. q. 1. a. 1. concl. 4. Ferrari. 3. contra Gent. c. 109. §. Sed circa prædicta Arrubal disp. 179. c. 2. & 4. Granados tract. 13. disp. 4. Denique communem esse sententiam fatetur Suarez citandus, & plures affert Vasq. citatus. Fuit etiã multorum antiquorum sententia Alberti, Richardi, Argentina, Holcoth, Adam, Henrici quos citant Carmelit. loco dicto. Eam etiam sequitur Hugo de S. Vict. in summa tr. 2. c. 2. attribuiturq; etiam D. Ansel.

Inter has sententias mediam viam voluit P. Suarez conciliare. Et primò supponit potuisse Angelum in puris naturalibus peccare in primo instanti contra legem naturalem, ut docet lib. 3. de Angelis c. 9. a. n. 3. Deinde addit lib. 7. c. 20. n. 47. & seq. regulariter, & secundum ordinariam prouidentiam Dei non potuisse Angelum peccare in illo instanti contra legem supernaturalem. Et in summa hoc quod est non peccasse Angelum reducit ad manutenentiam Dei specialem, quæ tamen non erat debita Angelo absolute, & simpliciter. Et sic docet quod de potentia absoluta, & non secundum leges ordinarias potuit Angelus peccare in primo instanti; qua distinctione videtur sibi conciliasse sententiam D. Th. & Scoti.

Eligitur sententia D. Thome, ostenditur aliorum Authorum inefficaces esse rationes.

Communis igitur sententia à nobis tenenda est, quæ est expressa D. Th. scil. implicare quod prima operatio Angeli, & primus actus eius, ante quem nullus præcessit, sit peccatum. Hæc conclusio non eodem modo probatur ab Authoribus qui eam tenent. Vnde oportet prius videre eorum fundamenta ut ad veram, & efficacem D. Th. rationem accedamus.

Primò igitur non est habendum pro sufficiente fundamento, quod idem Angeli non potuerunt peccare contra finem supernaturalem in primo instanti, quia tunc gratiam acceperunt, & iustificati sunt, repugnat autem simul in eodem instanti esse gratiam, & peccatum, esse eandem voluntatem conuersam, & auersam à Deo, præsertim cum Angeli per propriam dispositionem iustificati sint; & sic non solum habitalem gratiam habuerunt, sed etiam actualem motum conuersionis in Deum, cum quo non compatitur actualis motus auersionis à Deo. Ceterum fundamentum hoc non est sufficiens: solum enim ostendit Angelos non potuisse peccare in primo instanti ex suppositione quod in illo instanti acceperunt gratiam. Potuerunt tamen gratiam tunc non

accipere, & creari in pura natura, & in ordine ad finem naturalem contra quem in aliquorum sententia peccare potuerunt, ut art. præced. vidimus. Potuerunt etiam creari cum ordine ad finem supernaturalem, & cum cognitione illius per fidem sed sine gratia pro illo primo instanti, danda tamè pro alio instanti si se disponerent in primo, in hoc enim nulla apparet repugnancia, cum ex libera Dei dispositione largitio sanctificantis gratiæ dependeat. Vnde potuerunt habere tunc sufficientem rationem, & omnia requisita ut peccarent operando contra legem supernaturalem quam cognoscebant per fidem, & poterant nolle illi subiici per libertatem quia nondum tunc reciperent gratiam efficacem. Quare illud fundamentum non procedit absolute, sed ex suppositione quod in primo instanti Angeli sanctificarentur: sic enim non possent simul peccare.

Secundò alij procedunt ex alio fundamento, quia existimant primam operationem Angeli non esse liberam, sicque non esse capacem peccati, sed neque meriti. Fundantur, vel quia prima operatio non procedit ex deliberatione, cum sit prima omnium, & non præsupponat aliam per quam se moueat deliberando: ergo est indeliberata: ergo non libera. Vel quia existimant in instanti temporis non posse aliquem elicere liberam operationem, nisi tempore antecedenti potuerit se detinere, ne in illo instanti eliceret. Et ratio eorum est, quia in eodem instanti non est potens libertas operari, & non operari, hoc enim contradictionem inuoluit, ad libertatem autem requiritur, quod aliquis sit potes operari tunc quando non operatur, & è contra. Ergo potentia libertatis expedita non potest regulari unico instanti, sed debet constare maiori duratione quam instantanea, quia in vno instanti non potest operari, & non operari; potest autem vtrumque pro diuersis instantibus. Cum ergo Angelus in primo instanti inceperit durationem suam, non præcessit ante aliquod instans, vel duratio, ratione cuius posset vtrumque, scil. operari, & non operari, in illo ergo instanti nondum poterat libertas eius exerceri. Sunt qui Caietano attribuant sensisse in hac q. 63. a. 5. quod Angelus non potuerit peccare in primo instanti, quia eius operatio erat necessaria. Sed Caiet. expresse loquitur de necessario quoad specificationem, non quoad exercitium, ut patet in eodem art. 5. Ad hæc breuiter: ibi enim exponit, & sequitur S. Tho. qui ibi solut. ad 3. dicit, quod Angelus in primo instanti suæ creationis potuit mereri quod sine libertate actus, saltè quoad exercitium stare non potest.

Vnde fundamentum hoc è diametro pugnat cum D. Tho. quia absolute docet Angelum in primo instanti posse eligere actum liberi arbitrij, ut patet in q. 16. de malo a. 4. Et iterum specialiter in primo instanti Angelorum cognoscit meritum in hac q. 63. art. 5. ad 3. ergo & libertatem, quia mereri sine libero actu, contradictio est: necessaria enim laudem non merentur, nec præmium: ergo non habent meritum: & iterum D. Th. 3. p. q. 34. a. 3. expresse inquiri, & determinat quod Christus Dominus in primo instanti suæ cōceptionis habuerit actum meritorium liberi arbitrij, eo quod in primo instanti habuerit gratiam, quia à primo instanti fuit plenus gratiæ, & veritatis, & caput omnium, quod solum per gratiam esse potuit. Non potest autè dici quod istam gratiam, & istud genus sanctificationis accidentaliter habuerit Christus imperfecto modo, sicut sanctificantur paruuli, sed perfecto, sicut adulti, id est concurrente propria dispositione. Dispositio autem fit per actum liberum conuersionis in Deum: ergo si in primo instanti est capax voluntas huius sanctificationis per gratiam, ad modum

dum adulatorum, etiam est capax actus liberi, & meritorij. Denique Christus in primo instanti fuit beatus, & comprehensor, alias non habuisset gratiam perfectam, & plenam, nec esset plenus veritate à primo instanti, si tunc non vider Deum, sed inconueniens est dicere quòd aliquis in aliquo instanti sit capax præmij, & summæ perfectionis in intellectu, & voluntate, qualis est visio, & amor Dei in se, & non sit capax meriti, qui est amor Dei imperfectior, quàm in patria, præsertim cum amor Dei ex visione beata ortus, sicut fertur in Deum necessariò, ita in creaturas, quas propter Deum amat liberè: ergo in primo instanti potest esse meritum, & actus liber. Vnde cum Angeli in primo instanti suæ creationis gratiam acceperint, non imperfecto modo, sicut paruuli, sed perfectò, sicut adulti, fuerunt capaces actus liberi, quo disponent se ad gratiam in illo primo instanti.

Et ratio huius à priori est, quia Angelus cum sit perfectæ naturæ intellectualis, potest in primo instanti perfectè, & comprehensiuè intelligere, quia nullum est impedimentum quominus natura perfectæ possit perfectè operari hoc ipso quòd habet perfectum esse, quia operari sequitur esse: sed perfectæ, & comprehensiuæ operatio intellectualis intelligit obiectum cum vniuersalitate, & indifferentia: ergo format iudicium indifferens: ergo regulatum actus liberi, quia ex propositione indifferenti iudicij, sequitur operatio cum indifferentia in voluntate: ergo si in primo instanti est capax iudicij indifferentis, & perfecti, etiam est capax operationis liberæ & perfectæ, quæ ex tali iudicio oritur.

Vnde soluuntur instantiæ allatæ pro ista parte.

Ad primam enim dicimus, quòd aliud est actio nem esse deliberatam, & aliud liberam, sumendo deliberatam actionem propriè, & in rigore pro operatione illa quæ procedit ex alia priori, à qua aliquis se mouet: sic enim actio deliberata versatur circa media, atq; se mouet aliquis ex fine præconcepto. Ad ipsum autem finem non se mouet ex deliberatione, seu ex aliquo actu priori, & idèò reducitur motio prima voluntatis, & intellectus in Deum. Cæterum ut actio sit libera, sufficit quòd feratur in obiectum cum indifferentia; & si non quoad specificationem, & ex parte obiecti, saltem quoad exercitium, & ex parte actus, quia potest elicere hunc actum, vel illum; & sic ipsamet elicientia actus proponitur cum indifferentia, idèòque regulatur per talem propositionem libertas quoad exercitium. Quare non repugnat quòd primus actus sit liber quoad exercitium, si procedit cum perfectò iudicio, licet non sit deliberatus, id est, ex alio priori actu procedens, est tamen principium deliberationis, quatenus est principium alterius actus. Nec dicitur actio indeliberata, si ly *indeliberata* sumatur priuatiuè, & cum imperfectione pro actu non habente indifferentiam, sed potest dici indeliberatus negatiuè, quatenus non est ex alio actu priori: in Angelo tamen potest aliquo modo dici ille actus primus virtualiter deliberatus quatenus eodem actu fertur in finem, & in media. Sed quia fertur ex motione Dei, & non ex motione sui, quia non supponit priorem actum, quo se moueat, idèò simpliciter, & formaliter non dicitur deliberatè procedere, licet liberè in illo primo instanti.

Ad secundam dicitur ridiculum esse dicere quòd voluntas quæ ex suo modo operandi perfectò instantaneè operatur, indigeat tempore, ut liberè operetur cum possit in instanti proponi sibi iudicium indifferens, & cum maiori vel efficaciori propositione vnius obiecti quàm alterius, vnde voluntas manet expedita ut possit eligere, & ferri in tale ob-

iectum ex vi propositionis indifferentis. Vnde dicimus, quòd libertas non est ad operandum, vel non operandum simul in eodem instanti, & in sensu composito, sed disiunctiuè, & in sensu diuiso, quia ad neutrum est determinata voluntas ex se, vel ex meritis obiecti, & ex vi indifferentiæ iudicij, sed potest eligere alterum quòd voluerit ex propriis; & sic potest diuisiue operari, vel non operari, non coniunctim operari, & non operari. Et ad hoc sufficit quòd sit potes ad vtrumque potentia antecedenti, licet non possit vtrumque simul potentia consequenti, id est, cum effectu simul vtrumque coniungendo. Et hoc modo etiam dum operatur in eodem instanti voluntas vnum actum, potest oppositum potentia antecedenti, seu in sensu diuiso, & quantum est ex se, licet non potentia consequente, & in sensu composito, seu ex suppositione, quòd operatur. Et sic sufficit quòd prius quàm operaretur hunc actum prioritate naturæ, potuit ad oppositum determinari, quantum est ex vi suæ indifferentiæ, licet ex suppositione quòd operatur hunc actum iam non possit oppositum, nec ad hoc est vlla libertas, ut possit vtrumque simul coniungere.

Tertiò probant alij impossibilitatem peccandi in Angelo in primo instanti ex eo quòd non potuit in eo instanti proponi efficacius cogitatio boni delectabilis quàm honesti: ergo non potuit pro illo instanti deuiare à bono honesto, & sequi proprium. Conseq. probatur, quia peccatum non potest contingere, nisi ex aliquo defectu considerationis, quatenus de bono honesto, quòd est debitum, & sequendum, non ita efficaciter considerat, sicut de bono contrario quòd est fugiendum: ergo si iste defectus cogitationis non potest esse in Angelo in primo instanti, neque potest esse peccatum. Anteced. verò probatur, quia in primo instanti si Angelus format sibi cogitationem, debet formare eam in quam magis inclinatur ipsa natura, & cuius viuaciores, & fortiores habet species, magis autem inclinatur in bonum honestum quàm in apparens, & fortiores species habet de illo, pluræque motiua, & efficaciora: ergo illa omnia fortius, & vehementius considerabit, quia tunc in primo instanti operatur ipsa inclinatione, & impetu naturæ, deinde tempore procedente liberè poterit diuertere cogitationem, in primo verò actu non habet quòd diuertat, sed iuxta naturæ inclinationem, & propositum operatur. Si verò à Deo immittatur tunc cogitatio, immittere debet efficacior, & viuacior quàm petit ipsa natura Angeli secundum se, quòd si non fecerit, instigabit ad malum, eritque causa peccati, quia postulante natura meliorem, & viuaciorem cogitationem, Deus minus efficacem immittit. Hæc est ratio Arrubalis loco supra cit. cap. 2. & ad eum modum trahit rationem, & fundamentum D. Thom. in hoc art. 5. propositum, potestque satis iuuari ex his quæ tradit ipse S. Doctor in 2. dist. 3. q. 1. art. 1. ubi docet quòd *Non potest esse peccatum circa verum bonum, sed circa verisimile seu apparens; non potest autem dari intellectus circa bonum verisimile, nisi precedat intellectus veri boni, & ita in primo instanti petit intellectus ferri in obiectum honestum, seu verum bonum ex natura sua, nec potest ante illud ferri in apparens, seu verosimile.* In cuius etiam signum S. Doctor non negat absolutè non posse liberum arbitrium absolutè peccare in primo suæ creationis instanti, sed solum quando est in natura integra, ut patet in 3. p. q. 34. art. 3. ad primum, ubi inquit: *Et idèò liberum arbitrium creatura in primo instanti creationis potest moueri ad bonum merendo, non autem ad malum peccando, si tamen natura sit integræ.*

Sentit

Sentit ergo quodd si non sit integra, potest moueri ad malum, quia videlicet in natura integra efficacius mouetur circa bonum honestum; & ideo est debitum illi sic moueri circa illud, quod in natura non integra, seu corrupta, debitum non est.

10 Nihilominus hæc ratio Arrubalis, quæ aliquibus etiam placet, nõ explicat plenè efficaciam rationis D. Tho. sed assumit aliqua quæ omnino certa non sunt, & maiori indigent probatione. Nam in primis non est certum quodd ex duobus obiectis inæqualiter propositis, & cum inæquali viuacitate, aut efficacia ex parte intellectus, non possit voluntas pro sua libertate inclinare in id quod minus efficaciter proponitur, relicto viuaciori. Hoc enim in opinione positum est, & fortasse est probabilius posse voluntatem in minus bonum, & minus bene propositum inclinare, meliori relicto, de quo agendum est 1.2. circa q. 13. Non potest ergo veritas hæc D. Th. fundari in re tam incerta. Deinde, quia licet conformiter ad illam procederet D. Thom. tamen hoc solum probaret dare Deum collationem auxilij sufficiens pro illa parte, quæ viuacius proponitur, non tamen probat quodd semper teneatur Deus dare auxilium efficax pro bono efficacius propositum. Vnde enim ad hoc tenetur? Siquidem voluntas semper manet indifferens ad vnum & ad alterum. Quare ergo tenetur ex vi naturalis exigentiæ dare concursum suum ad bonum honestum tantum, ita quodd non possit Deus oppositum permittere? Nam dicere quodd aliàs Deus esset causa peccati, ridiculum est, cum in secundo, & in tertio instanti, & deinceps Deus non teneatur dare efficax auxilium ad bonum, quia subiectum indifferenter se habet, nec ex eo quodd illud subtrahat, & permittat peccatum, sequitur quodd Deus sit author peccati, aliàs in quouis instanti curreret eadem ratio hoc ipso quodd Deus permittit peccatum. Si ergo in primo instanti etiam indifferens est voluntas, nec est aliud fundamentum, & ratio vt Deus moueat illam efficaciter ad bonum honestum, quam inclinatio naturalis ad bonum potius quam ad malum, non apparet quomodo ex hoc obligetur Deus ad dandū efficax auxilium, & opportunam seu congruam cogitationem ad bonum, & ita vt oppositū implicet, cum etiam in tota vita eadem sit inclinatio in natura Angeli ad bonum potius quam ad malū: obligatio enim, & necessitas dandi concursum ad bonum, ne aliàs Deus sit author mali, nulla est, vt diximus, quia si natura de se est in statu indifferenti, estque proximè potens ad formandum dictamen defectuosum si à Deo permittatur, nullo iure Deus obligatur illi assistere cum dictamine recto magis in primo instanti, quā in reliquis totius vite; in quibus non alia ratione Deus potest permittere peccatum, & defectuosum dictamen, nec tenetur dare auxilium congruum, nisi quia natura ipsa de se indifferens, & mutabilis est, & de se potens proximè ad deficiendum, & formandum dictamen defectuosum si à Deo permittatur. Cur ergo in primo instanti magis tenetur Deus non permittere defectum, aut cur magis sequitur quodd sit Author peccati, si in illo primo instanti illud permittat, quam in reliquis cum inclinatio nature intellectuales ad bonum honestum eadem semper sit, quia ex natura est? Itaque vel Angelus in illo primo instanti est simpliciter potens ad formandum ex se prauum dictamen, & ad deficiendum ex parte voluntatis, si à Deo permittatur, licet ex eo quodd rationalis natura est, & integra atque perfecta magis in bonum sit inclinata quam in malum: vel non est potens pro illo instanti formare dictamen prauum ita quodd antecederet non sit potens, & simplici-

ter, non consequenter solum, id est, quia de facto non peccabit: hoc enim est petere principium, quare non peccabit, & diuertere à difficultate proposita: nec enim quærimus de facto, sed de possibili: quodd enim de facto non peccet, & supposito hoc facto non possit ex consequenti peccare, res est nullius difficultatis, nec solum pro primo instanti, sed pro quocumque idem dici debet, quodd scilicet Angelus bonus etiam in secundo instanti fuit impeccabilis, consequenter quia de facto non erat peccaturus. Si ergo in primo instanti est impotens etiam antecederet ad formandum dictamen prauum, assignet Arrubal formam impossibilem cum tali deficientia, & radicem vnde natura Angeli pro illo primo instanti eam impossibilitatem habet, sicut si Angelo beato assignamus formam impossibilem ipsam beatitudinem, & in Christo ipsam diuinam personam. Quodd si non assignat, diminuta manet eius ratio, & nihil probat. Sola enim inclinatio rationalis nature ad bonum potius quam ad malum, & quodd petat efficacius sibi proponi bonū quam malum, hanc impotentiā non ostendit, siquidem hæc inclinatio non est necessitans ad bonum, sed indifferentiam relinquens, & mutabilitatem, nec solum datur in primo instanti, sed in toto reliquo tempore, nec viuacior, & efficacior inclinatio est pro primo instanti in natura rationali, quam in reliquo tempore: vnde enim constat oppositum, aut ex qua forma, & ratione id postulat? Et sic quandiu non assignatur ista radix, & causa repugnantia ad dictamen prauum, diminutè proceditur. Si autem pro illo instanti potens est Angelus formare dictamen prauum, si permittatur à Deo: ergo tam potens est ad peccandum, & tam peccabilis in primo instanti quam in secundo quantum est de se, quia de se potens est formare dictamen malum si à Deo permittatur, & æquè indifferens, & contingens est ex se, atque in reliquis instantibus, cum pro primo instanti nullam habeat formam necessitantem magis quam in reliquis.

Quodd si semel ponimus naturam Angeli de se in illo primo instanti non esse impotentem ad formandum dictamen prauum, nec habere necessitatem aliquam intrinsecam aut impedimentum ad formandum illud si à Deo permittatur, ita quodd attento iure creationis, & nature Angeli pro illo primo instanti potens est ex se deficere, & dictamen defectuosum formare, si Deus permittat, non possumus inuenire fundamentum, vnde implicet quodd Deus non permittat, quia ex parte nature Angeli id non implicat. Ex parte autem Dei non repugnat, quia ex hoc quodd permittat nõ erit author peccati magis in primo instanti quam in secundo, nec magis contra inclinationem bonam nature faciet in primo instanti, quam in secundo. Vnde vel hoc quodd est Deum manutenere Angelum in primo instanti, ne peccet, nec permittere vt deficiat, est gratia, & beneficium Dei, vel est debitum, & necessarium. Si est gratia, potest illam negare sine violatione vllius iuris, & sine hoc quodd in Deum refundatur peccatum, vt in Authorem. Si est debitum, & necessarium, debet assignari ex parte creature status vel forma exigens tale debitum, & necessitatem: nam si ex parte creature non est exigentia talis debiti, necessitas, & determinatio ad non peccandum, frustra iniicitur Deo tale onus, & necessitas dandi auxilium congruum, & non denegandi illud, nec permittendi oppositum defectum. Est ergo ratio Arrubalis valde inefficax, & velle ad eam reducere D. Thomæ fundamentum, est reddere illud enervatum.

Efficacia

12 Quare solum restat vna via ad efficaciter probandam sententiã D. Thomæ, scilicet ostendere quod in illo primo instanti est impotentiã ex parte Angelis ad formandum dictamen paruum & ad deficientium. Quæ impotentiã cum non nascatur ex defectu libertatis quoad exercitium, quia constat in illo primo instanti meruisse Angelos per motum libertatis arbitrij; etiam ipso D. Thomæ attestante, restat vt impotentiã ad formandum dictamen prauum sit ex hac vnicã ratione, quia ille actus est omnium primus, nec in illo potest se mouere Angelus, sed solum ab exteriori principio moueri ad formandum dictamen. In hoc stat tota ratio implicationis D. Thomæ, & neruus rationis eius: Angelus, & quæcumque creatura intellectualis in suo primo actu non potest se mouere, nec à se accipere, & formare dictamen, sed à principio exteriori: ergo nisi tale principium exterius mouens, & dans illi dictamen sit principium defectuosum, non poterit defectuosum dictamen dare, si autem possit dare defectuosum dictamen, poterit Angelus recipiens illud deficere, & peccare: sine dictamine autem defectuoso non potest voluntas aliqua peccare, quia voluntas semper vult ex directione, & motu intellectus, vnde si voluntas deficit circa bonum sibi propositum, necesse est quod in ipsa propositione, seu applicatione obiectioni volendi sit aliquis defectus, saltem quia non corrigit, nec detinet voluntatem, ne fetatur in malum, aut vt non tendat in bonum. Quare ipsum determinare ad malum ex parte intellectus, aut permittere quod voluntas determinetur, defectus dictaminis est, quia saltem in applicatione regulæ intellectus manet deficiens, nec potest continere voluntatem aut diuertere illam ne tendat in malum, & sic ex hac parte censetur dictamen intellectus aut omnino prauum, si obiectum malum proponat, aut inconsideratum, & tepidum, si ineffaciter proponat bonum, & vtrūque defectuosum est. Nec potest dici quod æqualiter proponat vtrumque, & voluntas pro suo arbitrio eligat quod vult, nullo defectu stante ex parte dictaminis; quia si vnum ex illis obiectis malum est, siue ex parte sui, siue ex parte modi, non potest acceptari à voluntate, nisi quia conuenientia eius sibi manifestatur, & non reputatur vt multum inconueniens, quod pro nunc acceptetur: nec enim aliàs posset voluntas illud sequi de facto si conuenientia eius non repræsenteretur, sed solum id quod inconuenientiã est. Hoc ergo est dictamen defectuosum, repræsenterare cum conuenientia, seu vt conueniens quod nihil nisi inconuenientiã habet, quale est peccatum, cuius conuenientia solum est apparentia.

13 Restat ergo probare in ista ratione duo: Alterum quod Angelus in primo actu non potest seipsum mouere, & per seipsum formare dictamen, sed debet ad illud moueri ab alio principio exteriori. Secundum est, quod hoc principium exterius mouens intellectum, & tribuens ei primum dictamen non potest defectuosè mouere, & ita non potest defectuosum dictamen emittere. Ex his duobus principiis, manifestè sequitur impedimentum inuitabile in Angelo ad peccandum in primo instanti, scilicet quia caret principio determinante defectuosè ex parte dictaminis, scilicet quia nec à se formare illud potest, neque ab alio exteriori principio defectuoso illud suscipere: ergo est indefectibilis pro illo instanti in dictamine, & motione agendi: ergo impeccabilis: sicut etiam quia beatus non potest dictamen defectuosum habere, reputat. *Ioan. à S. Thom. in 1. part. D. Th. Tomus alter.*

gnante ad hoc ipsa visione beatifica, ita si Angelus in primo instanti caret principio formante dictamen prauum, & defectuosum, omnino redditur indefectibilis, prout est in illo primo instanti.

Primum ergo illud probatur, scilicet quod non possit seipsum mouere in primo actu, ea ratione, qua D. Th. 1. 2. qu. 9. art. 4. probat ex Aristot. quod in primo motu voluntas debet operari ex instinctu alicuius exterioris mouentis, quia scilicet voluntas non mouet se ad aliquem actum nisi ex alio actu priori per quem constituitur in actu ad se mouendum, vnde relinquitur quod in actu omnium primo non potest se mouere voluntas, quia non supponit alium priorem actum per quem deducat se de potentia in actum, & idem est de intellectu.

Et huius ratio est, quia omne mouens est in actu & omne mobile in potentia, & sic mouens vt mouens reducit mobile de potentia ad actum, nulla autem potentia reducit ad actum per potentiam, sed per actum: ergo vt voluntas se moueat, debet supponi in actu, & non solum in potentia. Ergo cum procedit in primum actum, ad illum non potuit se mouere, quia non fuit alius prior actus per quem moueretur ad istum. Nec sufficit habere obiectum propositum, vel intellectum habere speciem illius, quia circa tale obiectum, & circa talem speciem adhuc voluntas est in potentia vt velit, vel nolit, & intellectus est in potentia vt intelligat, vel non intelligat, & vt benè, vel malè intelligat: ergo solum, & nudum obiectum non est sufficiens actualitas vt potentia ista se moueat, cum potius se habeat vt materia, circa quam debet se mouere, & sic circa tale obiectum est potentialitas in voluntate, & intellectu, ad quam vincendam actualitas desideratur: ergo solum ex vno actu potest se mouere ad alium, non verò ex obiecto solum se mouet cum circa illud indigeat moueri, & ab illo quidem mouetur obiectiue, sed non seipsam mouet, nisi ipsa efficienter se applicet circa tale obiectum, sicut circa materiam. Vnde rectè dixit Caietan. citato loco 1. 2. quod *Aliud est loqui de volitione, aliud de volitione, vt à voluntate applicante seipsam ad volendum. Volitio enim nihil aliud dicit nisi operationem voluntatis, qua vult, & certum est quod ad volendum sufficit voluntas cum obiecto. Sed ad volendum à se, ita quod ly à se dicat causalitatem applicantem seipsam ad volendum non sufficit voluntas cum obiecto, sed exigitur voluntas prævolens finem, quia velle à se non solum importat velle, sed agere, seu mouere se, quod quia oportet fieri propter finem, præexigit naturam, vel tempore appetitum finis: & non aduertere hoc casus est loquentium.* Ita Caietanus. Vbi insinuat efficacem huius rationem, & fundamentalem, quia homo vel Angelus se mouens in aliquo actu, debet ex fine aliquo se mouere alioquin casualiter, & fortuitò operetur si se mouendo, non ex aliquo fine procedit, & se applicat. Ex fortuito autem motu non posset rationalis operatio dirigi. Vnde perueniendo ad primum omnium actum cum non possit in illo se applicare voluntas, & intellectus ex præconcepto fine, oporteret quod omnino fortuitò, & cæco modo se applicaret, vel quod applicetur ab illo exteriori mouente, & finem altiore præhabente. Vnde in primo motu, seu actu, tam propter finem propter quem mouetur, quam propter actualitatem secundum quam mouens mouere debet, quæ actualitas sumitur ex affectu, seu actu circa finem, necessarium est quod in primo cuiusque rei actu operans non se moueat, sed moueatur ab alio.

Et in hoc innuitur vis rationis D. Th. in hac qu. 13. art. 1.

63. art. 5. videlicet quod illa operatio, quae simul incipit cum esse rei, est ei ab agente à quo habet esse. Quae doctrina est vniuersalissima de omni prima operatione agentis, quae incipit cum esse rei: semper enim prima operatio supponit potentiam à qua egreditur, non se mouentem, quia supponit illam in potentia, non in actu: mouens autem ut mouens semper est in actu, sicut mobile ut mobile semper est in potentia, eo quod mouere est reducere aliquid de potentia ad actum: non reducit autem aliquid de potentialitate ad actum, nisi per actualitatem, non per potentialitatem, quia potentialitas non reducit, sed reducitur. Vnde cum in prima operatione, quae simul est cum ipso esse non supponatur potentia operans in actualitate ad mouendum seipsam per alium priorem actum suum, oportet transire ad actualitatem exterioris agentis, ut possit per ipsum reduci de potentia ad actum, quod est moueri ab alio; & sic prima operatio motiue & applicatiue debet esse ab alio, licet elicitue possit ab ipsa potentia esse, quia elicientia solum est emanatio actionis, quae utique ab ipsa potentia efficiente est, ut applicata tamen, & mota ad operandum. Applicare autem se, & mouere non potest per eundem actum ad quem applicatur, & mouetur, siquidem ad hoc applicatur, & mouetur, ut operationem illam agat: ergo ex alio actu applicatur ad istum, non per istum se mouet ut ipsummet operetur. Ergo in ipso primo omnium actu, quale est primum dictamen, quod format intellectus in primo instanti suae creationis, non potest formare illud à se, & mouendo seu applicando se, sed debet illud habere à principio exteriori mouente, & applicante intellectum, & excitante ut tale dictamen habeat, quia cum sit primus actus formare illum non potest ex propria applicatione, & excitatione seu motione sui.

16 Secundum quod in ista ratione D. Tho. restat probandum, est quod istud principium extrinsecum mouens Angelum in illo primo instanti, & dans ei dictamen, non possit esse mouens defectuosum, & defectuosè, quia si dictamen defectuosum est ab agente seu mouente defectuosè provenire debet: ab agente enim rectè ut rectum est, defectuosus motus provenire non potest. Et quidem facilis videtur ista probatio, quia in illo primo actu mouetur à suo generante quod est Deus qui solus produxit Angelos in esse, & solus est Author naturae, & solus potest intra mentem illabi, in eaque operari, ergo solus ipse operari potest illum primum actum, & dictamen illud primum intellectus formare, ad illudque excitare: Deus autem indefectibilis agens est: ergo non potest dare dictamen defectuosum Angelo in primo instanti, & ita si non est aliud agens à quo detur, quam à Deo, bene infertur quod deficere non potest.

17 Ceterum si hoc intus perspicatur non modicam habet difficultatem, quia oportet non solum probare quod Deus sit principium mouens ad illud dictamen quod formatur in illo instanti, sed quod sit ita speciale mouens quod pro illo instanti non potest compari, quod ab alio agente creato etiam moueatur intellectus Angeli, qui creatur, à quo utique defectuosè potest moueri, & consequenter impediri illud dictamen, quod à Deo (si solus operaretur) infunderetur. Itaque argumentum bene probat quod connaturale dictamen, quod pro tunc postulat Angelus sit à Deo, non tamen ostendit quod non possit impediri istud dictamen, & ab alio agente seu mouente defectuosum reddi. Similiter oportet ostendere quod Deus sit ita speciale mouens, pro illo instanti, ut non sufficiat mouere

physicè, & entitatiue ad actum illum, & secundum generalem modum quo prae mouet reliqua agentia creata, sed etiam quoad rationem moralitatis, ita ut in modo mouendi moraliter ipse specialiter excitet, & moueat. Specialis autem motio vel potest accipi ex parte obiecti, quia ad obiectum speciale mouet, v.g. ad supernaturalem alicuius obiecti cognitionem, vel ex parte subiecti, ut quia se habet tanquam particulare, & immediatum agens illius effectus, sicut persona diuina in Christo specialiter influens in actus etiam humanos Christi; vel denique ex parte modi, ut quia efficaciter concurrat ad aliquem effectum à se intentum, vel sine consortio alterius causae, sed se solo. In praesenti non potest Deus dici speciale agens solum quia mouet ad obiectum speciale, v.g. ad supernaturale, vel ad honestum, tum quia posset Angelum creare in puris naturalibus, tum quia hoc est de quo inquirimus, cur non possit in illo primo instanti mouere Deus iuxta dispositionem ipsius causae creatae ad entitatem materiale peccati, & non ad actum bonum, si ita à se, vel ab alia mala suggestionem incitaretur, sicut post illud primum instans potest mouere ad entitatem peccati, sine hoc quod sit Author peccati. Nec potest in praesenti accipi specialis motio illo secundo modo ex parte subiecti, cum etiam concurrat voluntas creata ad eliciendum actum, Deus autem non se solo, sed ut prima causa, quae est concursus generalis. Restat ergo quod videamus quomodo specialiter concurrat tertio modo, scilicet applicando, seu excitando intellectum Angeli, & formando illius dictamen, ita quod à nullius alterius suggestionem possit formari.

Nam quod tunc operetur Deus tanquam principium ipsiusmet libertatis creatae, non solum in actu primo, sed etiam in actu secundo, non videtur sufficere, quia hoc etiam debet saluari in omni actu, etiam post primum instans, cum omnis actualis libertas reduci debeat in primum liberum, ideoque ad omnes actus necessaria sit praemotio physica Dei; inquirimus autem qua ratione ita specialiter debeat esse à Deo in hoc primo instanti, quod non possit compari peccatum. Et D. Tho. cum reducit istos motus in Deum, non solum id facit ex eo quod libertas actuum reduci debet, & dependere à primo libero, & ab ipso accipere actualitatem, hoc enim in quocumque actu libero reperiri debet, quia à primo libero dependens est, sed specialiter hoc reducit ad ipsum primum dictamen intellectus, quod debet esse ab exteriori principio, scilicet à Deo, ut ex Aristotele in 8. Ethic. docet infra qu. 82. art. 4. ad 3. & Caietanus ibi, & 3. contra Gentil. c. 89. ratione 6. in fine capituli, & 1. 2. qu. 9. art. 4. quibus locis semper eodem tenore procedit, quod voluntas mouetur ab aliquo exteriori principio, quia mouetur per consilium (idem est quod dictamen) & hoc consilium ex alia priori voluntate, & illa voluntas ex alia priori propositione intellectus, quousque deueniatur in aliquod primum intellectum, quod non est à voluntate, sed ab aliquo instinctu exteriori, & exteriori mouente, scilicet à Deo. Quare in hoc insistendum est sequendo doctrinam D. Thomae, Angelus in primo actu non potest ab alio accipere dictamen, & motum intellectus, quam à Deo, & ideo defectuosum dictamen, & motionem tunc habere non potest.

In hoc autem difficultatem continet ratio D. Tho. quia non apparet, cur non possit in illo primo instanti accipere dictamen defectuosum, si non à se, quia ille est primus omnium actus, in quo nondum potest se applicare, & mouere, licet possit acti elcere, saltè ab alio Angelo malo. Ponamus enim quod

quod modò Deus creet vnum Angelum cum cognitione aliorum Angelorum, & inter illos videat Dæmones, & eorum dictamina mala, aut quia Deus illi reuelat eorum pessimas cogitationes, aut quia videt ipsos operantes, & loquentes mala, aut quia ipse Dæmon in illo instanti in quo Angelus de nouo creatur, suggerit ei, & loquitur malum. In hoc enim nulla implicatio inuoluitur, & præsertim quia potest Deus dicere Dæmoni quod in illo instanti B, producat vnum Angelum, & ipse potest habere paratam suggestionem, & destinatam ad illum suam cogitationem, vt confestim atque producatur, videat illum, & cogitationem eius malam sibi persuadentem, vt habeat illud dictamen, Quod enim loqui possit Angelus illi Angelo qui producitur in eodem instanti in quo creatur, patet, quia bene potest agens creatum operans instantaneè mouere, & agere in rem in eo instanti in quo creatur à Deo, sicut si modò crearetur Luna, vel aer in præsentia Solis, in eodemmet instanti illuminaretur ab eo, & illuminaret alia: & si crearetur homo in præsentia Solis apertis oculis in eodem instanti videret, quod est illuminari à lumine Solis. Et materia prima in instanti quo creatur potest à generante immutari vt formam suscipiat, sicut fit quotidie cum ex speciebus Eucharisticis generatur aliquid in eo instanti in quo subrogatur materia prima loco quantitatatis. Ergo etiam in eodem instanti quo creatur Angelus, potest ab alio Angelo illuminari, & per suggestionem moueri, multo magis quam à luce corporali; si enim Angelus ille creatur apertis oculis videndo alium Angelum: ergo poterit creari videndo eius cogitationem, & dictamen prauum, quod sibi suggerit.

19 Quod si hoc admittitur, ruit totum fundamentum D. Tho. quia licet à Deo vt authore naturæ vel gratiæ moueatur Angelus in illo primo instanti, & propterea ab eo non possit in Angelo esse defectuosum dictamen, neque peccatum, tamen quia potest compati quod ab altero Angelo sibi suggeratur prauum dictamen, iam ex illa parte habere potest Angelus principium in quod refundatur malitia peccati, & non in Deum, sicut in aliis instantibus præter primum potest ex suggestionem alterius peccare sine hoc quod refundatur id in Deum. Nisi dicatur quod Deus in primo instanti per specialem providentiam vel manutenentiam auertit ne Dæmon suggerat malum Angelo quem creat, aut si suggerit, quod iste non consentiat. Sed tunc oportet ostendere quod illa manutenentia, & providentia specialis ita sit debita, quod implicet non dari: nam si est possibilis suggestio mala pro illo instanti, cur erit impossibilis Dei providentia, quæ illam non impediat? Quare iste recursus ad specialem manutenentiam Dei importunè, & extra rem hic interponitur, quia vel illa specialis manutenentia est ex gratia, vel ex debito. Si ex gratia, potest à Deo negari, & peccare Angelus, si ex debito, oportet ostendere ex qua causa, & ratione id necessariò exigat creatura, & illa erit ratio impeccabilitatis ante manutenentiam. Et licet Deus vt generans, & Author naturæ tunc moueat cor Angeli, & mentem, tamen operatio generantis bene potest impediri quantum est ex natura rei, nisi Deus speciali manutenentia id euitet, de quo in præsentia non agimus, sicut aqua à suo generante produci postulat frigida, & tamen potest per impedimentum contrarium produci calida, vt cum producit in æstate sub Sole, & lapis à generante producit in loco deorsum, vel cum motu deorsum, potest tamen ex contrario impediens produci in loco sursum, vt in nube, imò cum motu violento in sur-

Ioan. à S. Thom. 1. part. D. Th. Tomus alter.

sum, vt si fulmen cum lapide excutitur sursum à nube. Quid ergo prohibet quod connaturaliter Angelus producatur à Deo cum recto dictamine in primo instanti, sed tamen possit ab aliquo contratio impediri per suggestionem prauam, vt in casu posito? Quod si Deus tenetur id impedire, ita vt implicet contradictionem non impedire, assignetur ex quo principio id proueniat, vt non possit permitti.

Nihilominus hæc nihil euincunt contra rationem D. Thom. Cuius solida veritas hoc solo verbo conspicietur, quod formatio dictaminis licet pendeat à duobus, scilicet à propositione seu manifestatione obiecti vt à materia circa quam formari debet, & ab efficiente seu applicante per quem mouetur, applicatur, & formatur dictamen, quoad primum potest quidem cooptari in primo instanti aliqua creatura vt exemplis allatis monstratum est; quoad secundum solus Deus qui intus in mente operari potest, ipsa verò mens, seu voluntas mouere se non potest, neque applicare in illo primo actu, esto à Deo mota, & applicata illum eliciat, vt iam ostendimus. Quærumque ergo creatura mouens voluntatem per suggestionem, & locutionem seu propositionem obiecti, quo alliciatur voluntas, non format ipsum dictamen intus in intellectu, sed ipsemet intellectus sibi format illud ex obiectis propositis, siue proponantur per suggestionem, & propositionem, seu persuasionem alterius, siue per propriam inuentionem, aut inquisitionem, vel per immiessionem à Deo. Et sic vt aliqua creatura loquatur alteri ita vt ei suadeat id quod intendit, & de quo loquitur, necesse est quod supponat existentem eum cui suadere vult, quia cum ad ipsum qui audit suggestionem, pertineat intra se formare dictamen, ille autem qui proponit, & persuadet, non facit aliud quam manifestare, & exhibere materiam vt motiua seu rationes attrahentes, & allicientes, vt is qui audit formare sibi possit dictamen, inde est quod persuadens, seu alliciens alterum debet supponere ipsum cui loquitur in statu habili ad formandum dictamen ex his quæ sibi proponuntur, quia is qui proponit, non operatur intus applicando, & formando dictamen, sed manifestando obiectum, & exhibendo materiam, vnde formari possit ab eo qui audit. Et sic debet supponi existens, quia quod non est actu, & in facto esse existens, operari non potest, & consequenter neque effectiue seu applicatiue, aut motiue formare sibi dictamen. Et rursus non sufficit quod sit existens, sed ita in actu quod possit se mouere, & reducere de potentia ad actum, ad quod requiritur, quod sit illa potentia iam facta in actu, quæ est conditio seu status mouentis, non in potentia solum, qui est status mobilis, seu moti. Vnde pro primo actu eliciendo nulla creatura mouere potest, quia esto ex parte existentie posset dici quod sufficit illa existentia illius instantis, vt in illam creaturam agat tunc ipsum agens creatum actione purè physica, & in qua purè recipiat ipsum mobile, tamen agere in ipsam sola actione proponentis, & manifestantis obiectum vt ipsa formare sibi possit dictamen, plus requirit quam existentiam, scilicet rem sic existentem, quod possit se mouere, & applicare, si bique formare dictamen, quod tamen pro primo actu eliciendo nullus intellectus vel voluntas habet, vt ostensum est.

Vnde soluuntur omnia quæ in oppositum allata sunt. Fatemur in formando illo dictamine, & primo actu Deum non dici specialem motorem vel rationem specialem obiecti, id est supernaturalis ad quod moueat, quia etiam si in puris naturalibus creetur

Yy 2 Angelus,

Angelus, adhuc solus Deus operari dicetur illum primum actum; sed dicitur speciale mouens, quia non potest ab alio voluntas moueri quantum ad applicationem effectiuam in illo primo instanti, nec ab alio formari dictamen illud, ut applicante, & mouente ad illud formandum, licet obiectum possit ab alio proponi. Et sic concedimus quod in illo primo instanti operatur Deus specialiter illo modo, scilicet non solum ut primum principium liberorum actuum quantum ad entitatem, & esse, ut primum efficiens, sed etiam ut primum principium excitans, & mouens intellectum ex parte formationis, dictaminis, & consequenter voluntatem constituens in actualitate requisita ut moueat se, in quo genere non potest voluntas neque intellectus applicari ab alio agente creato, nisi a solo Deo, qui est proprium, & immediatum principium voluntatis, & intellectus, illumque generat per creationem tanquam vniuersalissimum principium mouens illas potentias, quae propter suam vniuersalitatem a solo Deo generantur, & ab eo accipiunt primum motum quo constituuntur in actu ad se mouendum, sicut cor accipit a suo generante primum motum vitalem quo incipit se mouere, nec ad illum motum potest se mouere cor, licet illum eliciat vitaliter, quia cum sit primus motus, non supponit alium priorem quo se applicet, & moueat ad istum; & ita debet applicari, & moueri ab alio exteriori principio, scilicet a generante, a quo accipit genitum primam motionem, & applicationem naturalem, qua constituitur in statu conuenienti sibi, & debito ad se mouendum seu viuendum, sicut lapis, ad quiescendum, vel ad tendendum in suam quietem. Ita viuentia vita intellectuali accipiunt a suo generante Deo, qui est primum intelligens, ipsum primum motum se mouendi vita intellectuali, & volitiua, id est ipsum primum dictamen, & applicationem ad illud, ut inde incipiant se mouere, ita quod in eo motu est quasi motus cordis intellectualis, & hoc solum possunt habere a Deo, quia non est aliud agens quod intra intellectualem, & voluntatem possit operari, & influere seu applicare illum primum motum. Et illum quidem voluntas, & intellectus eliciunt, quia vitalis est & libero modo eliciunt, quia cum indifferentia seu vniuersalitate iudicij, & sine coactione voluntatis est, sed non ad illum se mouent, & applicant, quia primus est; nihil autem mouet, & applicat nisi per actum, nec mouetur nisi prout in potentia. Vnde ad primum alicuius rei actum, repugnat quod res illa se moueat, & applicet, licet illum producat, & eliciat.

22 Ad id verò, quod argumentum vrget, quia potest poni, quod Angelus qui modò creatur, ab alio Angelo malo accipiat dictamen defectuosum, & sic habere potest principium ad quod reducat ille defectus dictaminis, quo in primo instanti mouetur; Respon. quod admissio vel dato quod ita possit Angelus iam existens loqui ad Angelum qui de nouo producit in eodemmet instanti in quo creatur, tamen hoc non sufficit ad formandum dictamen illud, quia Angelus vel quicumque exterius proponens, & representans alteri obiectum, non sufficit formare dictamen intra intellectum audientis, sed ipse audiens formare debet ex his quae sibi proponuntur ab alio, vnde qui loquitur alteri, & vult illi persuadere atque eius dictamen formare, debet supponere quod ille cui loquitur non solum sit existens, sed ita existens quod possit se mouere, & applicare ad ea quae audit ab alio, ut ex illis formet dictamen, quia ille qui loquitur, seu proponit, & moraliter mouet audientem ad for-

mandum dictamen, non aliter concurrit quam proponendo obiectum quasi materiam, quam alter intelligat, & intelligendo formet sibi dictamen, sed effectiua formatio, & applicatio interior debet esse ab ipso audiente, vel a Deo qui operatur intra ipsum. Vnde parum interest quod Angelus qui nunc creatur videat dictamina, seu cogitationes aliorum Angelorum siue bonas, siue malas, nisi ipse intus se mouere possit, & applicare ex his quae intelligit ad formandum illud dictamen, sed illa applicatio debet venire ab extrinseco principio, quia est primus actus, nec supponit alium priorem quo se moueat, & applicet. Vnde oportet quod reducat illa applicatio, & motio formandi dictamen ad ipsum Deum, qui in illo primo instanti solus potest mouere intus intellectum, & voluntatem Angeli. Et licet moueat ad intelligendum ea quae ab aliis proponuntur siue sint bona, siue mala, sicut in eodem primo instanti Angeli inferiores illuminabantur a superioribus, & ad illos conuertebantur ex motione Dei: sed tamen intelligere, & cognoscere mala quae alter proponit nondum est malum, sed ita illa accipere ut conformet se illis, & iuxta illud malum quod sibi proponitur velit operari. Ad hoc autem non sufficit propositio mala alterius, eiusque cognitio, sed requiritur defectuosa applicatio audientis, qua se applicet ad consentiendum illi malo, & ad formandum dictamen conforme illi. Quod si ipse audiens non possit se mouere pro illo instanti, & formare sibi dictamen, sed ab alio debeat formari, & moueri, ille alius defectuosè se habebit, si applicet audientem ad formandum illud dictamen defectuosum. Vnde non sufficit in primo illo instanti habere aliquem suggerentem sibi malum dictamen, ut in illum tanquam in principium totaliter reducat prauitas illa, & malitia, sed oportet id reduci in aliud principium, scilicet in illud a quo effectiue formate debet tale dictamen, & moueri, seu applicari ad illud. Et cum hoc principium effectiuum sic mouens, & applicans non possit esse ipse Angelus, qui in illo instanti creatur, & qui audit illam suggestionem, quia non potest se mouere in primo actu, sed solus Deus possit in illo primo actu mouere, & applicare, inde fit quod talis suggestio mali Angeli non possit aliquid tunc operari, nisi ipse Deus, qui solus in illo actu mouet, & applicat cor Angeli, conformiter ad ipsam malam suggestionem applicet ad formandum dictamen prauum quod esset refundere defectum in ipsum Deum. Quod cum stare non possit, efficaciter probat D. Th. quod non possit in illo primo actu Angelus peccare, ex eo quod non datur tunc aliquod principium a quo moueatur defectuosè, & applicetur ad formandum dictamen prauum, nisi refundatur defectus in Deum, qui solus in illo primo actu mouere potest. Neque hoc reducit ad specialem manutentionem Dei, quae in illo primo instanti sit indebita, sed ad puram, & meram impossibilitatem alterius proximè, & immediatè mouentis ad formandum dictamen, nisi solus Deus.

Ad id quod vltimò additur, quod bene potest 23 operatio generantis impediri ab alio extrinseco agente, ut in exemplis allatis apparet, respondeo posse quidem impediri, quando operatio illa dependet ab aliquo exteriori, vel quando agens extrinsecum potest per se immediatè immutare ipsam rem quae generatur, & a statu naturali diuertere. Si autè agens extrinsecum non sit tale quod possit intus immutare ipsum genitum ad operandum, sed solum extrinsecè proponere, & allicere ut se immutet, sicut est intellectu, & voluntate, tunc non poterit Angelus per suggestionem externam immutare

tare alterius Angeli intellectum in ipso primo instanti, & prima operatione sua, quia nec ipse Angelus suggerens potest intra ipsum intellectum alterius operari efficienter, nec ille cui suggeritur pro illo primo instanti potest seipsum mouere, & applicare ad formandum dictamen, si autem deuoluatur ad Deum, ut ipse immutet, & formet dictamen in mente Angeli quem producit, tunc certum est quod Deus potest illud imprimere intra intellectum Angeli producti, sed eodem modo certum est quod non potest defectuose applicare, neque mouere ad formandum defectuosum dictamen, & sic neque iuxta alterius suggestionem prauam ad illud concurrere. Quare illa prima operatio intellectualis creaturæ in primo suæ creationis instanti ita est immediatè à Deo, ut à generante, quod non potest alio creato agente extrinsecus impediri propter rationem allatam.

Soluantur argumenta.

24 Primò arguitur ex autoritate D. Thom. quia si implicaret contradictionem quod Angelus in primo instanti peccaret, vniuersaliter id esset verum pro omni euentu, & in omni casu, siquidem id fundamus in hoc quod sit prima operatio, & primum instans, in quo non potest moueri nisi à Deo. At D. Thom. non pro omni casu ponit Angelum non posse peccare in primo instanti: ergo id non est implicatorium. Minor probatur: nam in primis in *quest. 6. de malo artic. 4.* docet, ideo Angelum non peccasse in primo instanti, quia in primo instanti sue creationis oportuit quod conuerteretur ad naturalem sui cognitionem secundum quam non potuit peccare, postmodum autem in id quod est supra naturam, vel ab eo auerti. Ergo in casu quo in primo instanti conuerteretur, non solum in sui naturalem cognitionem, sed etiam in supernaturalem, potuit peccare. Constat autem ex eodem D. Thom. quod in primo instanti meruit Angelus beatitudinem supernaturalem, & motus fuit supernaturaliter per gratiam, cum receperit gratia sanctificationem in illo primo instanti per propriam dispositionem, ut adultus, non ut paruulus, sicut constat ex ipso D. Thom. in *hac quest. 63. artic. 6. & supra quest. 62. artic. 5. & 3. part. quest. 34. artic. 3.* Item quod aliqua natura in primo instanti mereatur, & non peccet, verificatur solum si natura sit integra, non verò si sit corrupta, ut patet loco cit. ex 3. p. *quest. 34. art. 3. ad 1. ubi inquit; Et ideo liberum arbitrium creature in primo instanti creationis potest moueri ad bonum merendo, non autem ad malum peccando, si tamen natura sit integra.* Ergo à contrario si natura non sit integra, sicut in nobis, non repugnat quod in primo instanti moueatur ad peccatum. Et sic ratio illa quæ totum fundamentum ponit in hoc quod non potest peccare Angelus ratione primi instantis, & quia prima operatio est, non tenet, sed instatur in prima operatione naturæ non integre.

Vnde conficitur argumentum quia homines quando perueniunt ad usum rationis, in illo primo instanti possunt non conuerteri ad Deum, & peccare, ut concedit S. Thomas, & communiter eius discipuli 1. 2. *quest. 89. art. 6.* ponentes quod in illo instanti quo incipit operatio, potest esse peccatum originale cum mortali, sed non cum veniali: ergo sentit quod in primo instanti peccare potest: ergo ex eo præcisè quod primum instans, & prima operatio Angelus est, non conuincitur quod non possit peccare, ut patet in homine.

Ivan à S. Thom. in 1. part. D. Th. Tomus alter.

Respon. negando minorem. Ad primam probationem dicitur quod D. Tho. non fuit sollicitus in omnibus locis tradere omnes rationes quæ probant Angelum non posse peccare in primo instanti, sed aliam tradidit in *sent. dist. 3.* aliam in *q. de malo scilicet aliam in hac 1. p. q. 63. art. 5.* & ista vltima vniuersalior est, & complectitur omnem casum pro omni opinione, id est, siue Angelus in primo instanti habuerit actum supernaturalem, siue tantum naturalem, ut aliqui dixerunt. Et ideo ista ratio vltima est efficacior, & vniuersalior, nec negatur à D. Thom. in aliis locis, ubi alias rationes tradit. Et istam rationem quam tradit in *quest. 16. de malo*, si intelligatur in tanto rigore quod in primo instanti non habuerit Angelus actum supernaturalem, sed naturalem tantum, constat emendatam esse quoad hoc in *hac 1. p.* ubi apertè docet Angelum creatum in gratia meruisse in primo instanti beatitudinem, ut patet in *hac quest. 63. art. 5. ad 3. & art. 6. & supra q. 6. art. 5.* & quod non meruit nisi per conuersionem charitatis, quæ est per gratiam, docet *ibidem quest. 4. art. 2.* & res est certa. Quare, in hoc emendata est illa ratio. Et ideo licet ibi tradita fuerit ratio cur Angelus non peccauerit in primo instanti pro vno casu tantum, scilicet si tunc non habuit conuersionem nisi naturalem, tamen in hoc loco 1. p. tradita est vniuersalior ratio, et à pro casu quo habuerit supernaturalem motum in illo primo instanti.

Ad secundam probat. ex loco 3. p. Resp. in primis constructionem litteræ magis legitimam sic esse faciendam, quod liberum arbitrium creaturæ potest in primo instanti creationis moueri ad bonum merendo, si tamen natura sit integra, non autem ad malum peccando, ita quod illa conditionalis si natura sit integra solum cadat, & construat cum illa particula potest moueri merendo, non autem cum illa & non ad malum peccando, sed illa clausula non autem ad malum peccando censeatur interposita quasi per parenthesis, & illa conditionalis si natura sit integra, referatur ad posse mereri, quia reuera ut possit mereri in primo instanti, oportet quod natura sit integra: si enim per peccatum sit vitata, non poterit tunc mereri. Si verò quis non acquiescat isti constructioni litteræ, quæ satis legitima apparet, sed contendat etiam illam conditionalem cadere super illam particulam & non ad malum peccando, ita quod ad utrumque, scilicet ad merendum, & ad non peccandum requiratur quod natura sit integra, si verò sit corrupta, quod peccare possit; tunc dicendum est quod natura vitata per peccatum, seu non integra potest peccare in primo instanti creationis non simpliciter quando physice creatur in esse, sed quando moraliter, id est, quando venit ad usum rationis, & ante præcessit in esse, sicut modò homines, in quibus ut statim dicemus, probabilius est posse in illo primo instanti usus rationis peccare. Quod locum non habet in Angelis, in quibus natura non potest esse vitata in primo instanti suæ creationis physice, quod etiam est instans usus rationis eorum, quia vitium vel est originale, vel actuale: originale in Angelis esse non potest, cum non propagentur, & contineantur sub aliquo capite peccatore à quo descendant, sed à solo Deo fiant immediatè. Actuale vero, si datur in primo instanti, non supponit naturam vitatam sed eius integritatem destruit, & primò tunc peccat, & hoc dicit D. T. impossibile. Quare natura non esse integram, sed vitatam solum contingere potest in nobis, in quibus quia usus rationis non est operatio quæ nascitur cum anima quando creatur, sed longè tēpore postea aduenit, potest inuenire naturam diuersimodè dispositā, & actuatā, ut moue-

re se possit in illo primo instanti ex praeceptis cognitionibus imperfectis disponentibus ad usum rationis, ut mox dicemus. Ratio ergo D. Thomae quam ponit in hoc articulo 5. solum procedit de operatione, quae simul est cum ipsa inceptio effendi; natura autem quo operatur cum primo esse rei, non supponitur vitiata, sed integra, & difficultas est an vicietur per primum illum actum peccando. D. Thomas autem affirmat quod illa natura meretur, & non peccat in primo instanti, quae cum ipsa inceptio effendi operatur; atque adeo si est integra, si verò fuerit non integra, sed vitiata, ut contingit in nobis, nihil ibi determinat, sed disputatione permittit, de quo iam dicemus.

27 Ad confirm. Respon. quod resolutorie loquendo videtur mihi cum Caietano 1. 2. quaest. 89. art. 6. in calce commentarii, quod perueniens ad usum rationis potest ex mala consuetudine ante actus discretionis moveri magis ad delectabilia mala, quam ad bonum honestum quod sibi tunc proponitur, & praesertim quia illud bonum honestum valde debilitat, & confusè tunc proponitur, delectabilia verò sensus valde efficaciter. Et idè, ut ibi bene notat Caiet. non parvi refert quod assuescat puer ad audienda spiritualia, & honesta.

Ratio verò huius, & simul disparitas inter Angelum in primo instanti creationis, & puero in primo instanti usus rationis est, quia Angelus non habet aliam operationem quam intellectivam, eamque perfectam, nec habet paulatim disponi ab imperfecto ad perfectum ut veniat ad usum rationis, sed statim à principio perfectum iudicium, & intelligentiam habet. Unde ad ipsum primum actum nihil actualitatis supponit, quo primum se excitet, & se moveat intra se, sed debet ab exteriori principio id provenire, scilicet à Deo, qui solus potest applicare mentem, & formare illud dictamen. At verò homo ex sensibus accipit, & disponitur ad excitandum se praecognitione intellectiva, & in hac paulatim procedit, ita ut primum intelligat confusè, & non cum discretionem, & sufficienti dictamine ad liberè se movendum, sed tamen saltem imperfectè intelligit, & se disponit ut crescente maiore claritate, & apertione sensuum tandem prorumpat in actum liberum, & deliberatum se movendo. Et quia Deus movet creaturas intellectuales iuxta earum modum, & exigentiam, inde fit quod pro primo actu, qui est primus simpliciter, ipse solus moveat, quia non est aliud agens à quo actuetur intellectus, ut former sibi dictamen, sed tunc ille actus in nobis est valde imperfectus, & nondum ad libertatem sufficiens. Quando verò format dictamen secundum usum rationis, & discretionis, tunc iam habet, & praesupponit in se dispositiones ante usum rationis acquisitas, & motiones in se factas, quibus actuatus potest in liberum dictamen prorumpere. Et quia illae motiones possunt esse malae, potest iuxta illas formari dictamen, nec Deus teneretur illud avertere, quia iam non solus operatur illud, sed iuxta causae creaturae dispositionem.

28 Dices: ergo etiam in cuiusque negotij inceptio non incipit Deus movere, sed possumus ex nobis incipere determinari. Et si ita est, ad quid tam anxie ponimus praedeterminationem Dei pro omnibus actibus?

Resp. quod inceptio alicuius negotij vel est nova inceptio simpliciter, ut quando aliquis incipit de novo cogitare de his, de quibus ante nihil sciebat,

sicut in supernaturalibus incipit totum negotium salutis ab excitante gratia Dei, ut definit Concil. Trid. sess. 6. c. 5. Et in hoc genere incipit Deus movere, & applicare per exercitationem mentis, & manifestationem sui, iuxta illud Isai. 55. & Roman. 10. *Inventus sum à non querentibus me, palam apparui his, qui me non interrogabant.* Similiter in aliquibus quae fortuitò, & casu accidunt, seu inopinatò nobis eveniunt, etiam si aliàs cogitemus de re aliqua, tamen illa inopinata manifestatio est à causa superiori ut à Deo, sicut cum dicitur 1. Machab. 4. de Iuda. *Et cogitavit de altari holocaustorum quod profanatum erat quid de eo faceret: & incidit illis bonum consilium, &c.* Vbi illa incidencia consilij non fuit in vi cogitationis prioris, sed aliquid non praemeditatum tunc primum accepit. Vel inceptio alicuius negotij non est simpliciter nova, sed paulatim disponitur ex aliquibus praemeditatis, aut ex aliis notiis praecedentibus, ut in aliquid novum modò erumpat. Quando fit hoc secundo modo, clarum est quod ipse homo potest toties de novo incipere, & determinare se, quoties de re illa incipit cogitare, etiam si interrumpat, & dormiat, quia operatur in virtute praecedentium notiarum. At verò primo modo semper illa prima excitatio incipit à causa superiori, si sit in bonum per excitationem Dei intus operantis in intellectu, & voluntate, & extrinsecus ponentis, vel per se, vel etiam ministerio Angelorum, quia ex parte propositionis obiecti vititur Deus ministerio Angelorum, etiam in ordine gratiae, & fidei, quia per eos illuminat homines, ut S. Thomas docet *infra questione 111. artic. 1. ad 1.* sicut etiam ad exteriorem credibilium propositionem vititur ministerio praedicatorum, & ministro- rum, Si verò sit incitatio in malum, incipit per suggestionem spiritus mali, qui tamen intus intra intellectum, & voluntatem non operatur, nec format ipsum dictamen, sed proponit ut homo sibi former. Et potest homo tunc formare, & se movere, quia intellectus eius non est in pura potentia, nec operatur tunc primum actum simpliciter, sed ex aliquibus actibus praecedentibus, qui virtute manent in homine, est in actu ut se moveat ad formandum dictamen de his quae sibi suggeruntur. Quod non posset facere in primo actu, quando est primus simpliciter, quia non supponit aliquid prius, neque actu, neque virtute, in vi cuius moveat se. Et in huius signum constat quod Diabolus quando tentat, & suggerit, semper repraesentat aliqua iuxta ea quae aliquando sensimus, vel experti sumus, licet ab ipso vivacius exprimantur, de his verò quorum notitiam nunquam habuimus, vix potest suggerere, & tentare, sicut caconatum non potest tentare de coloribus. Et hoc idè quia solum proponit obiecta, ut nos formemus dictamen, quod tamen formare non possumus, nec ad illud nos applicare, nisi in vi alicuius actus praeteriti. Deus autem potest etiam de his quae nunquam novimus infundere nobis speciem, & lumen, & excitationem, quamvis etiam aliquando sic proponat ut relinquat nos formare dictamen. Semper tamen intus operatur intra intellectum, & voluntatem, respectu bonorum, quoad entitatem, & bonitatem, respectu malorum, quoad entitatem tantum, non quoad malitiam. Et respectu huius entitativus influxus ponitur illa praedeterminatio: semper enim omnis causa physice subordinatur influxui Dei in quocumque actu, sed non semper excitatione, & formatione dictaminis ipse solus operatur.

Secundò

29 Secundò arguitur : Angelus in primo instanti operatur libere, siquidem potest mereri, & illa potentia libera est defectibilis ab intrinseco, & tunc non est impedita neque physicè, neque moraliter : ergo potest peccare. Anteced. de libertate meriti, D. Thomas, & nos fatemur : de defectibilitate intrinseca, & physica etiam constat, quia eadem entitas, & potentia physica voluntatis est in primo instanti, & in sequenti, eadem etiam radix peccati, & defectibilitatis, scil. quòd sit ex nihilo. Ex parte etiam moralis motionis non est impedita tunc ad peccandum, quia tunc proponitur obiectum cum indifferentia, & cum cognitione huius, & oppositi : ergo non est impedita moraliter ad peccandum, quia impedimentum si daretur, esset coarctatio indifferentiæ ex parte obiecti propositi : cum enim moralis motio teneat se ex parte obiecti, tunc impeditur moraliter voluntas, quando ex parte obiecti non cum indifferentia mouet, & tunc manet expedita cum ex parte indifferentiæ obiectum mouet : ergo si tunc mouebatur cum indifferentia, non erat impedita libertas ad peccandum.

30 Sed dicas : esse liberam voluntatem tunc, & non impeditam quoad libertatem contradictionis, & exercitij, scil. ad velle, & non velle, bene tamen quoad libertatem specificationis, & contrarietatis, quia in hoc est tunc necessitata voluntas : hæc enim libertas non est solum ad velle, & non velle, seu ad ipsum exercitium actus, sed ad obiecta ipsa, scil. ad bonum, vel ad malum ; respectu autem mali, tunc caret libertate. Contra est 1. quia si tunc est voluntas libera ad velle, & non velle, sed non velle est omittere : ergo est libera ad omittere : ergo si pro illo instanti ponatur sibi præceptum (vt de facto habuerunt) vt conuertantur in Deum, si suspenderent actum, & non vellent, omitterent præceptum : ergo peccarent : ergo hoc ipso quòd habent libertatem illam contradictionis, possunt habere & contrarietatis. Item secundò, quia Angelum habere in illo instanti cogitationem illam bonam efficaciter mouentem est gratia Dei, non minus quàm continuatio eius in secundo instanti vt perseueret : quomodo enim intelligi potest, quòd idem auxilium primo collatum in hoc instanti non sit gratia Dei, & in secundo instanti idemmer continuatum sit gratia ? Et deinde, quia illud auxilium si non erat gratia, nec beneficium Dei : ergo Angelus sine gratia merebatur in primo instanti, & consequenter ex viribus liberi arbitrij, quod est hæreticum : ergo quòd illi daretur auxilium ad non peccandum, sed ad operandum bene, non erat debitum iure creationis, sed ex gratia Dei descendens, sicut & in nobis, quòd si non erat debita, poterat negari, & consequenter Angelus peccare. Terriò, quia secundum intrinsecam eandem potestatem physicam, & moralem ad peccandum habuit Angelus in primo, & in secundo instanti vt dictum est : nec enim in secundo instanti aliquid illi aduenit intrinsecè, quod antea non haberet : ergo simpliciter, & extrinsecis principiis loquendo, potuit Angelus peccare in primo instanti, quod si non potuit, solum fuit ex manutenentiâ Dei extrinseca. Denique homo in primo instanti potest nasci cum habituali peccato, scil. originali, quod simpliciter ei est voluntarium : ergo & Angelus cum actuali, quod ei est liberum, & sicut ex primo habituali nihil refunditur in Deum, ita neque ex isto actuali, præsertim, quia homo in primo instanti vsus rationis peccare potest actualiter : ergo & Angelus in primo instanti sui vsus rationis, & liberæ operationis, quæ est primum instans simpliciter.

31 Resp. solutione data inter arguendum quæ sine

dubio certa est, & ex D. Thoma desumitur q. 16. de malo artic. 4. præsertim solut. ad 5. & 7. & 18. Itaque Angelus pro illo instanti non potest moueri libertate contrarietatis penes velle hoc obiectum, scil. bonum, & oppositum eius, scilicet malum, quia primæ operationi, in quantum prima, impossibilis est deficientia circa bonum ex defectu mouentis ad illud, seu formantis dictamen defectuosum ; potest tamen moueri libertate contradictionis penes velle, aut non velle, exercere, vel non exercere ipsum actum. Nec obstat quòd pro illo instanti possit sibi æqualiter proponi bonum aliquod, & malum sub ratione boni, potestque voluntas pro sua libertate eligere minus bonum, vel æquale relicto altero : dicimus enim, quòd licet demus hoc quod in potestate voluntatis est ex duobus æqualibus aut æqualiter propositis eligere æquale, vel etiam minus bonum immediate, & per se, non imperando aliud dictamen fieri, adhuc tamen non sequitur quòd possit eligere minus bonum, vel æquale sine defectu, quia hoc ipsum quod est proponi malum æqualiter, vel meliori modo quàm id quod est in se bonum aut non detinere, vel impedire voluntatem ne minus bene propositum eligat, magnus defectus in ipso dictamine, & propositione est.

Ad primam instantiam de omissione, Respon. 32 quòd voluntas habet principium omittendi ex vi libertatis, & quantum est ex vi, & meritis obiecti omissione physica, quæ non est aliud quàm negatio actus, & suspensio operandi ; per accidens autem, & ratione primi instantis, in quantum ille actus est primus, & prima operandi occasio, non potest omittere moraliter, & culpabiliter : ommissio enim moralis addit supra physicam, quòd sit voluntaria, vel volita. Et vt sit volita, requirit actum, cuius obiectum sit talis ommissio : nihil enim est volitum vt obiectum, nisi respectu alicuius actus volitionis. Et sic si datur in illo primo instanti ommissio volita, datur volitio illius. Vnde iam non est pura ommissio, sed actus malus volens omissionem malam, eademque est ratio illius, & cuiuscumque alterius peccati commissionis. Vt autem ommissio sit voluntaria, licet non sit volita, requiritur quòd illa ommissio emanet à voluntate, seu voluntas sit causa illius. Est autem causa, vel expressa, & directa volendo illam, de quo iam diximus, vel indirecta volendo aliud, ex quo sequitur ommissio, vel antecedenti aliquo actu, vel concomitanti. Et cum antecederet non detur alius actus, siquidem in illo primo instanti, ille est primus, restat quòd solum possit concomitanter illa ommissio esse voluntaria, quatenus in illo primo instanti voluntas conuertitur ad aliquod obiectum per quod impeditur, seu desinit implere præceptum, & omittit illud : & talis actus cum tali circumstantia omissionis peccatum est, exigitque dictamen defectuosum, & inconsiderationem, sicut quæcumque alia peccata. Vnde pro morali omissione stante præcepto pro illo primo instanti, ego non video differentiam inter omissionem moralem culpabilem, vel commissionem.

Et quando dicitur quòd si pro illo instanti voluntas est libera ad omitrendum omissione physica, & secundum libertatem contradictionis, posito præcepto, illa ommissio erit peccatum ; & sic poterit peccare omitiendo. Resp. variari hîc appellationem ex parte illius termini posse, in quo frequenter sunt paralogismi in hac materia de libertate à posse sub vna ratione, ad posse sub

Y y 4 alia,

alia, à posse in sensu diuiso, ad posse in sensu composito, & sexcenta alia, Est ly *posse*, & ly *potentia* terminus importans appellationem erga obiectum suum, & ordo ad obiectum semper debet sumi formaliter, & ut stat sub formali ratione tendendi ad obiectum, & similiter aliquid attentis omnibus non potest, quod ex vi alicuius rationis formalis præcisè sumptæ non repugnat, vel etiam è conuerso. Quæ omnia præ oculis valde habenda sunt, alias continget facillè paralogizare. Dicimus ergo quod in primo instanti potest facere, & non facere Angelus, velle, vel omittere, considerando ly *non facere*, & ly *omittere*, ut sunt extremum contradictionis, & exercitij liberi, non ut sunt extremum contrarietatis, & culpabilis ac voluntariæ omissionis, quæ exigit actum concomitantem, vel antecedentem, & antecedens dari non potest, cum sit ille primus: si autem concomitans daretur, iam non daretur pura omisso, sed etiam commissio. Libertas ergo pro illo instanti solum est libertas contradictionis ad diuersos actus eiusdem speciei non contrarietatis, & ita facit hunc actum quod non cogitur facere illum, sed potest alium facere intra eandem speciem, & ita facit hæc speciem actus, quod non cogitur facere illam, sed potest non facere quantum est ex vi obiecti, & ex meritis illius, ut bonum est, & appetibile; & tamen sub alia ratione consideratum illud obiectum, scilicet ut deficiens à regulis rationis non potest ab ista voluntate hinc & nunc esse volitum per accidens, & ex alia ratione, scilicet quia deest principium defectuosè mouens, & dirigens. Nec enim necesse est quod voluntas ut libera sit, possit omittere illum actum, vel obiectum sub omni ratione, & modo; sufficit quod in quantum conducit ad libertatis indifferentiam, seu ad non coactionem potentie, possit illud non velle, id est, non cogatur ab illo ex meritis obiecti, & ut appetibile est, sicut etiam Christus Dominus ratione personæ, & Beatus ratione status, & Deus ipse ratione summæ perfectionis non possunt velle omissionem, seu illud non facere quatenus defectuosum est, licet libera voluntatis sint, quia non pertinet ad perfectionem libertatis posse velle, & non velle, etiam defectuosè, sed posse velle, & non velle non coactiue, & quoad exercitium, quidquid sit an ad volendum defectuosè necessitentur quoad specificationem.

34 Quare cum dicitur quod potest non facere, etiam stante præcepto, distinguo, potentia antecedenti, seu in sensu diuiso, concedo; potest potentia consequenti, & in sensu composito, nego, dicitur potentia antecedens, quæ consideratur secundum se ante actum, & ante omnia requisita ad actum; & sic respicit obiectum secundum se præcisè, & hoc est in sensu diuiso, scilicet diuidendo à collectione eorum quæ concurrunt, & requiruntur ad operandum hinc, & nunc, & solum considerando id quod est in obiecto ex meritis obiecti. Dicitur potentia consequens, illa quæ est coniuncta cum actu, & respicit actionem ut faciendam hinc, & nunc, & obiectum cum omnibus requisitis & concurrentibus ad agendum, vel non agendum. Et sic non requiritur ad libertatem quod possit non operari, aut possit circa tale obiectum, si importatur obiectum sub aliqua formalitate, & respectu ipsi impossibili. Et sic illa omisso ut culpabilis, & illud non facere, ut defectibile, & ut contrarium rationi, redditur impossibile illi Angelo per accidens, id est, pro primo actu quod alias secundum se, & non sub appellatione defectibilis impossibile non est. Et Christo ratione personæ redditur impossibilis

omissio ut defectuosa, & contraria præcepto, quæ secundum se impossibilis non est, nec illi voluntari ex parte naturæ creatæ, sed ratione personæ, sicut etiam Beato, ratione status, est impossibilis actio, vel ommissio defectibilis, & non ex propriis, & intrinsicis principiis voluntatis, & naturæ. Ad libertatem autem sufficit quod aliquid non sit impossibile antecedenter, & in sensu diuiso, ita quod ex propriis & intrinsicis principiis non coarctetur voluntatem, & in quantum pertinere potest ad id quod perfectionis in voluntate est, licet in sensu composito, & potentia consequenti, & in quantum reducitur ad aliquid, defectibile non possit fieri, quia hoc imperfectionis est, & non requiritur ad libertatem, quod sub omni ratione, & appellatione aliquid possit, sicut nec ad intellectum quod sub omni modo, etiam imperfecto intelligat.

Ad secundam instantiam Resp. quod in auxilio Dei, quod datur ad operandum in primo instanti, est distinguendum de auxilio illo ut supernaturalis ordinis est, & datur cum valore meritorio vitæ æternæ; & sic est omnino gratuitum, nec debitum Angelo iure creationis, aut aliquo alio titulo, quam ex mera liberalitate Dei: posset enim denegare Angelo quidquid supernaturalitatis est. Aliud potest considerari in illo auxilio, seu concursu, scilicet quod non habeat adiunctam permissionem peccati, etiam si in genere supernaturali non sit. Et hoc est debitum iure creationis, nec est gratia specialis, sed solum generalis, sicut concursus cum quacunque alia re iuxta debitum suæ naturæ pro loco, & tempore. Et licet non sit debitum Angelo absolute, est tamen debitum ipsi Deo tunc mouenti, & ex suppositione quod Deus creat Angelum perfectum, id est cum operatione sua in primo instanti tenetur Deus ipso iure creationis illum mouere, & applicare ad agendum, nec est aliud mouens defectuosum à quo determinetur ista creatura, & iuxta cuius dispositionem Deus se accommodando permittat defectum; ideo non est recurrendum ad specialem gratiam pro illo instanti, sed ad ipsam exigentiam creationis sic factæ, & creaturæ intellectualis sic motæ, ut pro illo instanti non adiungatur ei, nec adiungi possit permissio defectus ex suppositione quod operatur. Et ad ipsum præceptum supernaturale charitatis implendum indiget gratia speciali, & supernaturali, non quia evitatio peccati est præcisè, sed quia actus supernaturalis est: semper enim quod supernaturale est, gratia indiget speciali simpliciter, quia non tenetur Deus in ordine supernaturali dare gratiam, & concursus absolute, & simpliciter. Non tamen repugnat quod ex suppositione aliqua Deus habeat debitum dandi gratiam supernaturalem, quod est debitum secundum quid, non quidem ex sola suppositione quod dat notitiam Angelo præcepti supernaturalis: hæc enim notitia communis est pro primo, & secundo instanti. Sed ex alia suppositione, nempe quia creat Angelum eleuatum ad statum supernaturalem cum præcepto illo, & in instanti ita coarctato, quod non potest ab alio quam à Deo dictamen suscipere, sicut ex suppositione quod Christo imponit præceptum dilectionis supernaturalis, tenetur illi dare auxilium supernaturale, quia persona impeccabilis est.

Ad tertiam instantiam dicitur quod, ut dicit S. Thom. quest. 6. de malo art. 4. ad 3. Angelus non potuerit peccare in primo instanti, non fuit neque propter defectum alicuius potentie, qui postmodum fuerit suppletus, neque propter perfectionem quæ postmodum fuerit subtracta ante peccatum, sed propter

propter ordinem actus. Quare dicimus quod totum quod est intrinsecum in potentia peccandi, fuit in primo instanti, sed non omne extrinsecum, quia defuit dictamen defectuosum, & à quo posset formari. Et sic habuit potentiam ad peccandum antecedenter, non consequenter: sicut etiam beati quia ratione status carent dictamine defectuoso, non possunt peccare, quamvis in Beatis hæc impotentia sit magis antecedens, & per se, quia status ille est perpetuus, licet accidentaliter sit Beato, in Angelo autem tota peccabilitas, & defectibilitas intrinseca quæ est in secundo instanti est in primo, & ided potentia peccandi est in illo, sed non posse peccare non provenit in illo ex defectu potentie physicæ, sed per accidens, & ex impotentia dictaminis defectuosi. Quæ impotentia licet moralis sit, est tamen moralis intrinseca, & non solum extrinseca, sufficitque ad denominandum Angelum simpliciter impotentem ad peccandum, sicut homo etiam si habeat habitus supernaturales, si tamen caret gratia excitante, impotens est ad operandum, quia caret aliquo simpliciter requisito ad posse, & intrinsece concurrente ex parte intellectus, licet quia ex parte obiecti mouentis se tenet excitatio, dicatur pertinere ad moralem motionem, ut condistinguitur ab operatione physica intra voluntatem operante. Et ita non posse moraliter dupliciter dicitur. Vno modo, ut distinguitur contra non posse simpliciter. Alio modo ut distinguitur contra non posse physicè, licet per se, & necessariò requiratur illa moralitas. Primo modo intelligitur quod possumus aliquid simpliciter, licet difficulter, & quia difficulter, dicimus moraliter non posse, quia moralitas, non dicit potestatem, sed difficultatem. Et in hoc sensu Patres olim refutabant Pelagium, qui dicebant gratiam dari, non ut simpliciter possumus facere, sed ut facili, quasi moraliter potestatem daret, non simpliciter. Secundo modo potest aliquid morale, & non physicum requiri simpliciter ad aliquid, ita quod sine illo simpliciter non possumus, licet physicum non sit, nec physicè moueat, seu concurrat, sicut propositio obiecti & ea quæ ex parte propositionis se tenent, non physicè influunt intra voluntatem, sed exterius alliciunt, & tamen simpliciter requiruntur, ita ut sine illa non difficulter possit voluntas, sed nullo modo possit: nihil enim volitum quin præcognitum. Et quia Angelus in primo instanti caruit dictamine defectuoso, nec ex aliqua parte potuit illud habere, simpliciter non potuit peccare, & non solum ordinariè, seu connaturaliter aut difficulter; non tamen hæc impotentia simpliciter orta fuit ex impeccabilitate physica, & indefectibilitate ex parte voluntatis, sed ex indefectibilitate morali ex parte intellectus, intrinsece tamen, & simpliciter requisita.

37 Ad quartam instantiam Resp. ex D. Tho. citata quæst. 16. de malo art. 4. ad 2. quod *Anima in primo instanti sue creationis efficitur mala, non per actionem propriam, sed per unionem ad corpus infectum; unde non est similis ratio de Angelo, qui non potuit fieri malus, nisi per actum proprium.* Itaque peccatum originale non refunditur in Deum etiam si in primo instanti contrahatur, quia non ex ipsa motione, aut creatione Dei contrahitur, sed ex ordine, & respectu ad primum hominem, à quo seminaliter descendit corpus, cui vnitur anima, & fit totus homo membrum illius primi hominis, & particeps peccati eius per peccatum sibi communicatum. Vnde datur extra Deum causa, & ratio sufficiens habendi illud peccatum, non per actionem propriam, sed per contractionem, quæ non datur

in Angelo. Ad id verò quod dicitur de perueniente ad usum rationis, quod potest peccare in primo instanti actualiter moraliter, iam *suprà* dictum est, & explicata differentia inter hominem, & Angelum quantum ad hoc.

Tertiò arguitur, quia si aliqua ratio conuincit quod Angelus in primo instanti non potest peccare, maximè ratio D. Thom. quia alias cum prima operatio attribuitur generanti, & generas sit Deus, refunderetur peccatum in Deum. At hæc ratio non probat: ergo. Minor probatur primò, quia dato quod Deus prædeterminet physicè voluntatem ad materiale peccati, adhuc non dicitur author peccati, nec in illum refunditur malitia, etiam si illi entitati inseparabiliter sit annexa malitia; imò etiam si cogitationem offerat, ex qua videt futurum peccatum, quia hæc cogitatio liberam relinquit voluntatem, ut velit, non refunditur in Deum. ergo similiter etiam si Deus moueat voluntatem Angeli in primo instanti, non illi attribuetur malitia, quia non influit ut causa deficiens, nec Deus amplius influit in primo instanti quam ad materiale peccati: hoc enim solum est capax influxus diuini, eo verò posito cum permissione, infallibiliter sequitur peccatum: ergo ut in primo instanti detur peccatum, sufficit quod Deus permittat eius malitiã cum prædeterminatione ad materiale eius entitatem, sed ex hoc quod Deus in illo instanti permittat malitiam peccati, & prædeterminet ad materiale, non refunditur aliqua malitia in Deum, quia totum hoc habetur in secundo instanti, & tamen in Deum non refunditur malitia: ergo ex eo quod Deus ponat in primo instanti quicquid requiritur ad peccandum, & quo posito infallibiliter sequetur peccatum, non sequitur quod in illum refundatur malitia. Quod si dicatur, in illa prima operatione Deum non solum prædeterminare ad materiale peccati, sed etiam infundere cogitationem ostendentem illud obiectum ad quod est illa prædeterminatio esse malum, ac proinde non esse amandum, quæ cogitatio cum in illo primo instanti sit à Deo, sequitur à Deo esse potentiam peccandi; & sic si Deus dat illam, erit causa peccati, quod per se oritur à tali potentia. Hæc responsio omninò inutilis est, càm quæ tanquam Thomistarum responsum affert, & late impugnat Alarcon *tract. 6. de Angelis disp. 5. cap. 2. num. 16. & sequent.* Sed, ut video, fingit hominem quem feriat, & magnam paraturam & Apostolo affert, qua totam illam solutionem potenter enervet. Sed non multo labore opus est, cum constet Deum per legem, per doctrinam, & per multas sanctas cogitationes ostendere hominibus, & Angelis quid sit malum, & fugiendum ab ipsis, quid non; ex hoc autem velle Deum facere authorem potentie peccandi, nullus nisi insanus dicere potest, cum lex sancta sit, & bona, quæ ostendit quid sit malum, & fugiendum, nec tamen ex eo quod Deus dat legem, est author potentie peccandi, aut peccati ipsius, licet occasionaliter ex notitia peccati per legem aggravata sit concupiscentia operando contra illam, ut argumentatur Paulus ad Rom. 7. non oportet nos in hoc immorari, cum hæc responsio non admittatur à nobis.

Secundò probatur eadem minor, quia tota ratio D. Tho. fundatur in eo quod prima operatio, quæ incipit cum esse est illi à generante, sicut lapidi moueri deorsum. Hæc autem propositio non est vera nisi tantum in illa operatione qua ipsum genitum perficitur in statu sibi naturali, & pertinente ad complementum naturæ ipsius, non autem in illis operationibus quæ omnino accidentales sunt, & supponant naturam iam plenè completam in suo statu

statu naturali, ut patet in igne, quia licet generanti attribuat quod ignis moueatur sursum, non tamen attribuitur illi quod calefaciat, vel illuminet, etiam si istae actiones conueniant igni cum ipso suo esse in primo instanti: nam ignis eodem instanti quo est, illuminat, & in eodem instanti quiescit in loco sursum, vel mouetur ad illum, si sit extra (eo modo quo incipit motus, scil. extrinsecè.) & motus attribuitur generanti, quia pertinet ad complementum generationis rem esse in loco, non autem attribuitur ei calefactio vel illuminatio, quia istae actiones non pertinent ad complementum generationis, nec ad constitutionem eius in suo naturali statu, sed ad motionem, seu actionem erga alia. Non ergo omnis operatio, quae est in primo instanti attribuitur generanti. Multo minus attribuentur illi actiones vitales rei genitae à se, & adhuc multo minus actiones liberae, quia omnes istae non pertinent ad constituendam rem in suo naturali statu, & esse, neque ad complementum generationis, sed ad eliciendam actionis supponentis totum esse productum, & in quibus agit, & operatur viuens, non autem mouetur in se: ergo non attribuentur generanti, alias omnes actiones quas viuens operatur, illi attribuentur: ergo non manet fundata illa propositio, quod omnis operatio, quae est cum esse rei attribuitur generanti.

40 Tertio eadem minor probatur, & enervatur principium D. Thom. quia non est necesse omnem operationem incipientem cum esse rei, esse solum à generante, seu ab Authore talis naturae, nisi tantum in his quae à solo generante pendent, & quasi ad ipsam generationem eiusve complementum pertinent, non ad ea quae sunt à generante, seu ab Authore naturae simul cum ipsa re quae generatur, sicut est actus liber, & vitalis, siquidem pro ea parte quae pendet ab ipsa creatura poterit defectuosa esse. Et similiter bene intelligitur quod istae actiones tribuuntur Authori naturae secundum eam rationem qua sunt ab ipso, & secundum principia ab eo data, & quae sibi subordinantur, non secundum ea quae Deo non subordinantur, scil. secundum principia defectibilia: sic enim necesse non est quod moueantur à Deo: ergo cum in primo esse concurrant ista principia, scil. quae participantur à Deo, & quae sunt defectibilia à Deo, poterit Angelus secundum prima à Deo moueri, & non secundum alia, sed deficere sine hoc quod id refundatur in Deum qui author deficientiae non est, sed peccabit ut motus, & applicatus ex propriis, quae tunc cognoscit, vel ex suggestionem alterius, qui sibi potest in illo instanti loqui, ut *suprà* vidimus. Imò cum Angelus possit circa plura operari, quae sibi tunc manifestantur, non est necesse quod Deus moueat ordinatè, & rectè ipsum Angelum quoad omnia, sed potest mouere illum rectè circa ea quae sunt ordinis naturalis, & permittere quod cadat circa supernaturalia: nulla enim in hoc apparet repugnantia, & saluatur quod operatio illa sit à Deo, sed non quoad omnia. Denique vrgetur semper illa paritas de instanti primo cum instanti secundo, & reliquis totius vitae, & operatione illa prima, quae incipit cum esse rei, & de prima, quae incipit in quouis alio negotio: non enim est maior ratio cur illa specialiter sit à Deo, & non alia, quae incipimus quodlibet aliud negotium, in quo tamen saepe incipimus peccando, & prauum finem desiderando. Est etiam paritas in primo instanti, & in reliquis, quia Angelus habuit in primo instanti easdem potentias quoad intrinsecas, & quoad defectibilitatem atque in secundo instanti. Habuit in primo instanti plenum usum cognitionis, & omnia obiecta cognouit, non

solum quoad verum, bonum, & honestum, sed etiam quoad apparens. Indigentia etiam determinationis, & motionis Dei non minus concurrat & necessaria fuit in secundo instanti, quam in primo. Cur ergo determinatio, & motio facta in secundo instanti non refunditur in Deum, & in primo instanti refunditur? Et cur propositio boni apparentis facta in secundo instanti mouere potest ad malum, & cognita in primo instanti non potest?

Resp. negando minorem.

Ad primam probationem Resp. quod ex sola 41 praedeterminatione ad actum materiale peccati, vel ex positione cogitationis quoad entitatem unde potest oriri peccatum, nulla refunditur malitia in Deum, quando supponitur creatura in tali statu, quod possit se mouere, & formare dictamen defectuosum. Non ergo negamus quod siue in primo, siue in secundo instanti praedeterminatio Dei, siue per physicam immutationem ad materiale peccati, siue per permissionem malitiae, aut per ipsius cogitationis productionem in intellectu quantum ad entitatem suam nihil malitiae refundit in Deum, quia totum hoc operatur in quantum efficiens, non in quantum principium actus defectuosi. Ceterum totum hoc debet supponere ipsam creaturam in statu habili, ut possit vel propria motionem, vel ex alterius suggestionem formare dictamen defectuosum, & inconsideratum, atque ita se applicare ut peccet. Quod si hoc non potest, quia est primus actus, & nullum alium priorem supponit, ex quo possit se mouere ad formandum tale dictamen, parum interest quod moueatur à Deo, vel praedeterminetur physice ad materiale peccati, si ex parte intellectus non estabilitas ut formetur à se dictamen, quia primus actus est, sed ut accipiat illud ab alio, nempe à Deo: tunc enim si cum illa praedeterminatione physica accipiat dictamen defectuosum à Deo, malitia ipsa in Deum refunditur, non quia ex praedeterminatione physica ad materiale entitatem praecise resultet malitia in Deum, sed quia totum ipsum dictamen defectuosum à Deo esse debet, quia non ab alio potest formari. Si autem dictamen defectuosum non formetur, non peccabit Angelus in illo primo actu propter essentialem dependentiam peccati à defectuoso dictamine, & consequenter neque praedeterminabitur à Deo ad materiale peccati.

Et cum instatur quod in aliis instantibus potest Deus sic determinare intellectum Angeli, sine hoc quod sit auctor malitiae.

Respondetur quod si in aliis instantibus Deus 42 ipse formaret dictamen defectuosum in mente Angeli, eodem modo refunderetur malitia in ipsum Deum, sicut in primo instanti. Sed quia in aliis instantibus ipse Angelus potest se mouere, & vel ex propria cognitionem, vel ex alterius suggestionem se applicare ad formandum sibi dictamen, ideo tunc non attribuitur defectus ipsi Deo quantumvis ad materiale peccati physice praedeterminet, vel cogitationem ipsam quoad physicam entitatem producat. Et cum dicitur quod ad peccatum nihil aliud requiritur quam quod Deus permittat, malitiam cum praedeterminatione, & concursu ad materiale peccati, ex quo nulla refunditur malitia in Deum. Respondetur: Non amplius requiri in subiecto potente se mouere, & formare dictamen defectuosum: in eo autem quod non potest, vel pro ea duratione, & tempore, quo non potest, non sufficit illa praedeterminatio, & permissio nisi etiam ad huc formatio ipsius dictaminis defectuosi; quod si formatur à Deo, deficit Deus, si non formatur à Deo pro illo instanti, non deficit creatura, quia

quia à se formare non potest pro illo primo actu.
43 Quod si instes: Quid est formare creaturam dictamen defectuosum, vel quid ad hoc requiritur præter ipsam prædeterminationem Dei cum permissione malitiæ, & quare magis refundit in Deum malitiam formatio dictaminis, quam prædeterminatio concursus?

Respondetur quod de hoc ultimo satis à nobis dictum est *suprà* tractando de voluntatis diuinæ, & decretorum eius efficacia, & in *Physica* qu. 25. *aliisque in locis*. Nunc dicimus formationem dictaminis defectuosi nihil aliud esse quam propositionem obiecti prauæ cum practica inconsideratione. Creaturam autem formare hoc dictamen, & mouere se, seu applicare ad talem formationem, requirit quod ex aliquo priori actu virtualiter saltem remanente se moueat, & applicet ad formandum dictamen siue prauum, siue rectum: non enim potest ipsa potentia applicare, & mouere se ad aliquid, nisi aliquo actu præcedente, quia mouere, actualitatem dicit, actumque supponit per quem potèntialitatem suam reducat in actum; & ita, ut iam ponderauimus, aliud est elicere, seu producere actum, aliud mouere, seu applicare se ad eius elicentiam. Cum ergo in actu omnium primo, seu in primo instanti non possit supponi alius prior actus, seu alia actualitas, qua se moueat, & reducat de potentia ad actum, oportet quod in eo actu moueatur seu applicetur totaliter ab alio principio exteriori, etiam in formatione huius dictaminis, sicut in motu cordis animal mouetur à principio generante vitam eius. Et ita in primo instanti neque ad bonum, neque ad defectuosum dictamen se applicare, & mouere potest creatura, sed ab exteriori principio ille motus debet provenire, sicut primus motus cordis. Et sic non sufficit prædeterminatio Dei ut causæ primæ qua generaliter cum qualibet causa, & ad quolibet actum concurrat, quia prædeterminatio neque virtutem dat agenti, neque obiectum proponit aut voluntatē dirigit, sed solum potentiam, virtutemque actiuam creaturam applicat, & determinat iuxta modum suum ut transeat ab actu primo ad secundum. Et quia physicè, & entitatiuè transit voluntas, etiam cum actum peccati elicit, idè ad talis actus entitatem, & elicentiam indiget illa præapplicatione, nec ex illa sequitur defectus aut malitia in Deum, sed entitatis illius actus productio in quantum entitas est, sicut nec concursus simultaneous cum actu peccati refundit malitiam in Deum. At verò excitatio, propositio obiecti, suggestio, formatioque dictaminis cum non influat physicè in actum, sed iuxta allicientiam obiecti, non respicit præcisè entitatem actus, ut entitas est, sed totum quod obiectum illud, & dictamen in se habet, totum imprimat voluntati. Et cum in obiecto non possit separari entitas, seu substantia actus ad quem allicet, à malitia quam habet, sicut in concursu ad entitatem præcisam actus separatur, hinc est quod si per manum Dei formatur dictamen prauum, refunditur in eam defectus, sicut si ex suggestionē alterius formaretur, non verò refunditur ex eo quod physicè ad entitatem concurrat.

44 Ad secundam probat. respondetur: generanti solum attribui illos motus, seu actus rei generatæ, qui pertinent ad constitutionem ipsius in statu conuenienti, & debito ad id quod sibi connaturaliter conuenit. siue operando, siue quiescendo, sicut motus grauium, & leuium attribuitur generanti, quia per talem motum mouetur graue ad connaturalem locum, ubi quiescere, & conseruari debet, quia perfectio, & finis talium corporum consistit in ipso quiescere: & ita si generatur extra locum

proprium, motus ad talem locum dicitur naturalis non propter locum, sed propter quietem in loco. In uiuentibus autem, propria, & connaturalis perfectio est, quod operentur se mouendo, & quia non possunt se mouere nisi in quantum mora, & applicata, quæ applicatio, & motio debet fieri per aliquem motum priorem, per quem constituatur in actu seu moueatur ad se mouendum, idè pertinet ad generantem dare istum primum motum, non propter aliquam quietem, sed quia per ipsum applicatur, & mouetur ad se mouendum: sicut motus cordis in animali datur à generante tanquam principium vitæ, quatenus per talem motum constituitur animal in ratione mouentis se. Et licet talis motus eliciatur à uiuente, tamen quia primus motus est, non mouet se ad illum, sed mouetur ut se moueat, & quia ad connaturalem statum uiuentis pertinet, à generante debet esse. Quod autem facit motus cordis in animali quoad vitam sensibilem, facit prima operatio intellectus quoad vitam intelligibilem. Quare non omnes operationes quæ incipiunt cum ipso esse attribuuntur specialiter generanti, sed solum illæ quæ se habent ut principium cæterarum, & constituunt ipsam rem genitam in statu connaturali, & habili ad se mouendum, vel operandum quoad alias actiones, & motus. Calesfactio enim, & illuminatio licet incipiant cum ipso esse ignis geniti, non tamen incipiunt tanquam principia seu requisita, quibus constituatur ignis in statu connaturali, & apto ad se mouendum, vel ad quiescendum aut operandum alia quæ sunt perfectiones complentes ipsum statum naturalem debitum ex vi generationis: sicut etiam actiones illæ intellectus, & voluntatis, quæ post primam consequuntur, non attribuuntur generanti, sed solum illa prima, qua constituitur in statu habili, & connaturali ad se mouendum: sicut etiam motus vitales, qui sequuntur post motum cordis non attribuuntur generanti, etiam si simul tempore sint cum motu cordis. In Angelo autem quando datur prima operatio, illa constituit primum instans ad quod pertinent quæcumque sub illa operatione coordinantur. Si verò ab illa deficient, & deordinentur, iam pertinent ad aliud instans, quia operationes ipsas diuidunt, non continuant.

Ad tertiam prob. respondetur: verum esse quod prima operatio solum pender à generante, seu ab authore naturæ in his quæ ab ipso generante, & per principia eius fiunt. Non autem in his quæ ab aliis principiis pendent, si talia dentur. Negamus tamen quod in prima operatione creaturæ intellectualis, seu rei genitæ possit dari dependentia ab alio quam à generante, & à principiis à generante deriuatis quantum ad ipsam motionem seu applicationem ad operandum: quia quantumcumque in ipsa re genita dentur alia principia siue defectibilia, siue non, tamen in primo instanti nulla principia creaturæ, seu rei genitæ possunt se mouere, & applicare ad operandum, sed debent ab exteriori principio applicari. Et cum hoc exterius principium sit ipse Deus, qui est indefectibilis, non potest aliquod principium creaturæ à quo illa prima operatio dependet, defectuosè moueri, & applicari ad operandum, licet concurrat ad eliciendum ipsam operationem: sine motione autem, & applicatione defectuosa nunquam resultat defectus, & peccatum in actione quæ à tali motione, & applicatione per se dependet, sed semper fit recta applicatio. Quod etiam currit in his quæ Angelus ex suggestionē alterius, vel ex propria cognitione potest operari in illo primo instanti, quia omnia ista non potest attingere nisi vel se mouendo, vel motus ab alio. Et

cum non possit in primo actu se mouere, necesse est quod operetur tantum ut motus à Deo, & consequenter ut recte motus, quia motus qui est tantum à Deo non potest non esse rectus.

46 Ad id quod dicitur quod in illo instanti potest Angelus operari erga plura, & circa vnum deficere, & non circa aliud: dicimus hoc esse impossibile, quia illa plura attingit Angelus ut coordinata, & ab vno primo principio, seu prima operatione derivata, ex qua incipit se mouere: vel si demus quod illa non se habent coordinatè, sed disparatè, tamen in nullo potest incipere se mouere, quia eadem ratio est de vno atque de alio, sed semper in prima operatione debet reduci ad primum motum, in quo non se moueat, sed moueatur ab exteriori principio, & illud respectu Angeli est indefectibile, quia est solus Deus: sicut si fingeremus in aliquo animali esse plura corda quæ simul mouerentur sine dependentia vnius ab alio sed disparatè, vtrumque moueretur immediatè à generante, nec posset in alio esse defectus, nisi in generante defectus esset. Sic dicendum est si fingeremus in Angelo vel creatura intellectuali esse plures actus, seu motus, quorum quilibet esse prima operatio, non dependens ab alia, in vtraque immediatè moueretur à Deo, & non posset esse defectus in illo, pro ut sic à Deo applicaretur. Si autem solum est vna operatio prima, in qua Angelus immediatè mouetur à suo generante Deo, & reliqua omnia, quæ intelligit, seu operatur derivantur ex ista prima operatione, non potest intelligi quod in reliquis peccet, quandiu operatur illa ut subordinata primæ quæ pro illo primo instanti recta est, ut pore subordinata Deo. Et quidem potest Deus non mouere Angelum ad obiecta supernaturalia, sed tantum ad naturalia, sed in hac denegatione supernaturalium, nullum erit peccatum, quia pura negatio est: sed siue Deus moueat ad supernaturalia, siue ad naturalia tantum, hoc ipso quod immediatè per se mouet tanquam formans, & dans dictamen illius primæ operationis, non potest ibi defectus incidere, & consequenter neque in actu voluntatis in quantum ex tali motione, & dictamine derivatur.

47 Denique ad paritatem illam quæ fit inter primum, & secundum instans Angeli operantis, iam sæpè respondimus: parificari quidem ista instantia quoad intrinsecam entitatem, & defectibilitatem potentiarum, & quoad perfectiones ex parte modi, specierum, & luminis ad intelligendum, & respectu etiam obiectorum quoad bonum, & malum quæ quasi speculariè intelliguntur. Non enim est dubium quod in primo instanti intelligit Angelus peccata, & vitia, sicut & virtutes, & bonum apprensens, sicut & honestum speculariè, & quoad quiditates istorum: solum differentia est, quod in primo instanti, seu in prima operatione non potest operari Angelus ut se mouens in intelligendo, & volendo, sed ut motus à Deo, eo quod illa est prima operatio omnium, in reliquis autem instantibus potest operari non solum ut motus à Deo, sed etiam ut se mouens: & idè illa prima operatio non potest defectuosè proponere, & excitare seu dictamen defectuosum formare, quod tamen reliquæ operationes possunt, nisi gratia Dei conferuntur; & idè ex ipsa natura primæ operationis, solum quia prima est, & ex motione immediata Dei proueniens, non potest deficere; licet in reliquis parificetur cum sequentibus operationibus, quæ possunt deficere.

ARTICVLVS III.

Quo genere peccati, & circa quod obiectum peccauerit Angelus?

IN presenti articulo non solum agimus de genere ipso peccati, sed etiam de specie: species enim ex obiecto sumitur, nec potest declarari obiectum in particulari, nisi species ipsa peccati innoscat.

Genus peccati Angeli.

Peccati genus potest attendi primò in ratione mortalis, vel venialis. Secundò in ratione commissionis vel omissionis.

De peccato veniali constat non fuisse solum in Angelis, sed mortaliter peccasse. Et de fide, tum ex locis quibus Scriptura explicat genus illius peccati, eiusque effectus, tum ex damnatione secuta: constat enim Diabolum esse damnatum pœna æterna Matth. 15. *Ite in ignem æternum qui paratus est Diabolo, & Angelis eius*, sed propter peccatum veniale non debetur pœna æterna: non ergo Diabolus peccauit solum venialiter. Declaratur etiam hoc peccatum Diaboli eo genere peccati, quod mortale peccatum significat, ut cum dicitur Ioan. 8. *Ille homicida erat ab initio, & in veritate non stetit*; homicidium autem aut peccatum quod homicidio æquualet, peccatum veniale non est. Et similiter peccatum eius superbiæ fuisse Scriptura declarat, ut 2. ad Timoth. 3. *Ne in superbiam elatus in iudicium incidat Diaboli*: Ecclesiastici 10. *Initium omnis peccati, superbia*, constat autem primum peccatum omnium fuisse peccatum Diaboli. Et superbia de suo genere peccatum mortale est: superbis enim Deus resistit, & præsertim superbia Diaboli, quæ fuit pessima. Denique nomine iniquitatis peccatum Angeli nominatur Ezechielis 28. quo nomine non nisi peccatum mortale designatur dicitur autem ibi de illo Angelo, qui vocatur Cherub extensus, & protegens, *Perfectus in viis tuis à die conditionis tue, donec inuenta est iniquitas in te*. Et de eius superbia subditur: *Elevatum est cor tuum in decore tuo, perdidisti sapientiam tuam in decore tuo, &c.* Quare ex omni parte constat peccatum illud mortale fuisse.

Statim verò se offerebat illa difficultas, an habuerit Angelus peccatum aliquod veniale, licet etiam mortale habuerit, vel saltem an possit Angelus venialiter peccare? Sed hæc difficultas tractatur à D. Th. 1. 2. qu. 99. art. 4. & qu. 7. de malo art. 9. Et resoluit non posse, quia nunquam Angelus leuiter operatur, sed incipiendo à fine, & in fine attingens media. Quare si errat voluntas, & practicus intellectus, semper errat ex fine, & si vult rectè, etiam rectitudo incipit à fine; & sic in omni actu multus est Angelo, in bono magnus, & in peccato pessimus. Et in tali actu in quo est peccatum oportet quod deuiatio incipiat à fine: illo enim retento, non stat circa media errare, seu in his quæ ad finem sunt, sicut nos. Quæ doctrina aliquibus auersa visa est: licet enim concedant Angelum peccare non posse venialiter ex surreptione, & indeliberatione iudicij: at peccata venialia, quæ cum perfecta deliberatione fiunt, sed ex paruitate materiæ leuia sunt, ut mendacium iocosum, & similia, dicunt Angelo non repugnare, quia hæc ex sua intrinseca ratione leuia sunt: ergo ex eo quod ab Angelo fiant, non reddentur mortalia: quare enim repugnabit quod Angelus

Angelus habeat aliquam inadvertentiam leuem sufficientem ad veniale, & non ad mortale, aut quare non poterit operari cum plena consideratione mendacium, aut aliam rem leuem iuxta modum, & naturam talis rei levis, & non ex superbia, vel contemptu, aut alio fine mortali? Quod si non faciat, id erit ex providentia aliqua Dei extrinseca, pro hoc statu gratiæ, in quo nec hominem in statu innocentiae, nec Angelum voluit destituere congruentibus auxiliis ad non peccandum venialiter quandiu à charitate non excidissent. Et ita tenent plerique Authores, ut videri potest apud Vasq. 1.2. q. 89. art. 4. in notatione articuli. Granados 1. p. tract. 13. disp. 1. n. 8. Alarcon tract. 6. de Angelis disp. 9. c. 3. & alij.

Nihilominus sententia D. Thom. verissima est, nempe Angelos iuxta connaturalem modum suum operandi esse incapaces peccandi venialiter, ut cit. loco 1.2. tradit, & ibi communiter eius discipuli Caietanus, Contradus, Medina, & alij. Et ratio supra indicata id sufficienter probat, quia Angeli nunquam operantur voluntarie, & deliberatè, siue bene, siue malè, nisi incipiendo à fine, sicut neque intelligunt nisi incipiendo à principiis, & in his videndo conclusiones sine discursu, quia proprium est eorum procedere comprehensivè, & in ipsis principiis attingere quicquid ad illa spectat, & in eis continentur. Similiter voluntas in ipso fine eligit media, & non procedit ad media, nisi sub aliquo fine, & in fine, ita quod idem actus est necessarius quoad specificationem ex parte finis, & liber ex parte mediorum cum primum eligit, licet in exercitio quoad utrumque liber sit. Cum ergo deordinatio peccati venialis, siue ex paruitate materiæ, siue ex inadvertentia rationis, non sit deordinatio circa finem, oportet quod Angelus operetur circa illud ex alio priori fine, in quo talia venialia velit. Et quidem si finis sit bonus, & rectè volitus ab Angelo, cum eodem actu, & impetu, quo fertur in finem, feratur in media, non potest tendere in finem bene, & sine defectu, idest sine deordinatione à fine, & in media tendere deordinatè, quia sic separaret motum in ipsa media à motu in finem, quod solum in nobis contingit. Ergo oportet quod si deordinatè tendit in aliqua media, seu in aliquam paruitatem materiæ, quæ solum pertinet ad malitiam mediorum, tendat in illa, ut deordinata in vi alicuius finis, & in eo contenta, in cuius volitione sunt volita, & non seorsim, ac separatim à fine. Ergo omni parvæ materiæ volitæ ab Angelo semper adiungitur granditas alicuius finis, quia paruitas materiæ semper pertinet ad media, nunquam ad finem, quia finis nunquam est parvus, cum sit principium quo etiam magna diriguntur. Tam impossibile igitur est Angelo peccare venialiter in aliquo actu, sicut separatim à fine attingere media, & conclusiones extra principia, & solum illa natura quæ alio actu attingit finem, alio media, potest retenta rectificatione circa finem saltem habituali, errare in applicatione, & tendentia erga media præter finem, licet non contra finem; & sic peccare venialiter, & non mortaliter, quod est idem ac peccare, seu aberrare à mediis, non errando à fine. At verò illa natura quæ non potest tendere in media nisi per eundem actum quo tendit in finem, nunquam deordinatur à mediis, neque paruitatem materiæ attingit, nisi incipiendo deordinationem à fine, atque aded adiungendo illi circumstantiam mortalem deordinationis à fine, seu contemptum, ratione cuius

Joan. à S. Thom. in 1. part. D. Th. Tomus alteri

paruitas illa materiæ, v. g. mendacium quod ex se veniale est, seorsum à fine consideratum, ex pravo fine, & in eius deordinatione volitum, non parvum est. Et hoc ita convenit Angelo, non solum ratione status damnationis, in quo nunc operatur semper ex odio, & contemptu Dei, sed ex natura sua, quia ex ipsa postulat operari circa media, non seorsum à fine, sed eodem actu, eadem ordinatione qua fertur in finem. Vnde sicut quando operantur ex charitate, in ipso fine amato amant media, verbi gratia, in Deo omnes proximos, ita quando operantur circa aliquod malum medium, operantur ex præsupposito fine malo; & sic adhuc in pura natura si operantur ex fine bono, & recta eius intentione, ibi non compatiuntur alicuius mali medij, etiam ex paruitate materiæ, deordinationem. Si verò aliquam deordinationem patiuntur, illa incipit à malo fine.

Vnde soluitur oppositum fundamentum. Respondemus enim quod licet aliqua peccata sint ex natura sua, & materia propria levia; tamen quia Angelus suo connaturali modo operans, non potest illa attingere nisi sub aliquo fine in quo sint volita, & eodem actu quo ipse finis, sicut neque conclusiones, nisi in principiis, idè illi paruitate materiæ semper adiungit pondus gravius circumstantiæ finis, extra quam, vel sine qua non potest paruitatem illam velle, neque ex levi inadvertentia operari circa media, & circa parvam materiam (quæ semper ad media pertinet) non operando circa finem, nec incipiendo deordinationem à fine, quæ semper gravis est. Levem autem inadvertentiam habere non competit Angelo, qui non imperfectè procedit, sed comprehensivè. Ipsam etiam materiam parvam, si acciperet non pro medio, sed pro fine multò esset gravius, quia poneret finem in re creata, & tam parva. Non mutat ergo Angelus parvam materiam in mendacio, v. g. sed accumulatur pravi finem, ante cuius deordinationem, malum medium volitum non est.

Dico secundò: Genus peccati Angeli primum non potuit esse peccatum omissionis, sed commissionis. Probatur ex dictis, quia primum peccatum Angeli incepit in eo ex aliquo motivo circa finem, sed primum motivum, & finis Angeli non potuit esse ommissio: ergo primum peccatum Angeli non potuit esse omissionis, sed commissionis. Maior constat ex ipso connaturali modo Angeli in operando, scilicet ex fine, & in fine attingendo media, sicut conclusiones non potest attingere nisi in principiis, quia comprehensivè procedit: ergo debuit Angelus primum peccatum inchoare ex aliquo motivo circa finem, siquidem voluntas in modo operandi semper proportionatur modo operandi intellectus. Vnde sicut intellectus propter vim comprehensivam semper incipit à principiis, & in principiis conclusiones intelligit, sic voluntas à fine, & in fine tangit media. Minor probatur, quia ommissio illa non potuit esse peccatum, nisi esset voluntaria, vel in se volendo illam, vel in aliqua causa, vel occasione, ratione cuius esset impossibilis adimpletio præcepti cum tali volitione, alioquin ommissio illa culpabilis non esset, si voluntaria non esset. Si illa ommissio sit voluntaria tanquam directè volita, oportet quod hoc ipso involuatur ibi aliquod peccatum commissionis, quia qui vult directè & per se omissionem contra præceptum, hoc ipso in tali omissione representatur aliquid maioris bonis

Z z

vincen

vincēs illud bonum, quod est in adimplerione præcepti diuini: omissio enim vt omissio cum sit priuatio, & non ens, non potest ratione sui esse volita directè, sed vt vestitur aliquo bono, saltē apparēti. Et si est omissio præcepta, oportet vt repræsentetur aliquod bonum, non quomodocumque, sed vincēs illud bonum quod ex adimplerione talis præcepti confurgit, vt possit moueri quis ad frangendū præceptum directè: ergo prius debet affici voluntas illi bono, quo vestitur omissio, vt ex eius appetitu non recuset frangere præceptum; & sic directā volitio omittendi semper importat aliquam commissionem, vel præsuppositiuē, vel concomitanter qua afficiatur taliter erga aliquod bonū, seu obiectū vt ratione eius non recuset vt ille omissionem, quæ in se non est aliquid neque bonū, & habet ad iunctam fractionem præcepti affirmatiui, quia omnis priuatio, seu negatio in aliquo bono, seu positiuo fundatur. Si verò omissio non sit directè volita in se, & vt obiectum, sed indirectè ex eo quod est aliquid prius volitum, cum quo nō compatitur adimpleritio præcepti, iam illud prius volitum pertinebit ad actum positiuum volendi, & non solum omittendi, & ex alia parte est peccatum, qui est impeditiuum adimplerionis præcepti, & causa omissionis: ergo necessariò incipit primum peccatum Angeli ab aliquo motiuo culpabiliter volito, & non omisso; & sic tale peccatum est commissionis.

6 Sed quia posset aliquis dicere, quod licet verum sit quod tale bonum prius volitum est quidem culpabiliter volitum, sed non habet aliam culpam quam culpam omissionis, quia inde sumit totam malitiam; & sic formaliter est peccatum omissionis, licet materialiter habeat adiunctum aliquid commissionis quod vitiatur ex omissionē, quæ ex tali volitione sequitur, & adimpleritio præcepti impeditur.

Contra hoc instauratur argumentum, & confirmatur ratio adducta, quia hoc in primo peccato Angeli locum non habet, sed necessariò illa ommissio, siue indirectè volita ex aliquo priori præsupposito ex quo habet sequi, siue directè volita, vt vestita aliquo bono apparenti, semper debet præsupponere aliquod peccatum commissionis præcessisse: etenim illa ommissio vt sit peccatum, debet esse in præcepto, & esse voluntaria, vt supponimus: Angelus autem non potest aliquid velle, nisi in aliquo fine, vt sæpe dictum est, quia naturalis modus eius est videre in principiis conclusionis, & velle media in fine. Ergo vel ipsa ommissio est finis quem sibi Angelus proponit, vel in aliquo fine est volita tanquā mediū, vel conditio mediij, aut denique vt aliquid subordinatū fini. Si ipsa ommissio est finis, præterquā quod est impossibile, cum ommissio in se solum sit priuatio, & nihil, nec bonitatem habeat, etiam in hoc maximè peccatum commissionis est quod vult facere ipsam omissionem culpabilem finem vltimum, cum in se nihil bonitatis habeat: & præsertim, quia si vult illā habere pro fine vltimo, est peccatum commissionis omninò præposterum, & contra præceptum negatiuum non solum affirmatiuum, siquidem non solum vult frangere præceptum impositum, quæ est ommissio, vt pote contra præceptum affirmatiuum, sed etiam vul in ipsa omissione finem vltimum ponere, quod est contra præceptum negatiuum, & est commissio. Nec potest imaginari quod aliquis nisi insanus velit omissionem ipsam facere finem vltimum, vt est priuatio in se, sed seipsum constituit finem vltimum, nimis se amando, & exinde volendo omittere seu frangere præceptum. Quod si omissionem vult, non vt finem vltimum, sed vt subordinatum

alteri vltimo, aut tanquam medium, vel conditionem fini illi subordinatum: ergo iam supponit illa ommissio finem aliquem vltimum prius volitum, & non finem vltimum bonum, qui est Deus, siquidem sub tali fine non potest subordinari ommissio peccaminosa: ergo supponit finem vltimum malum, seu auersum à Deo antecedenter ad omissionem, & in illo fine, seu eodem actu, & impetu vult omissionem. Ergo peccatum Angeli non incipit ab omissione, sed ab aliquo vltimo fine, quem contra Deum appetit, & in tali volitione peccat, non omittendo, sed committendo, seu positiuē appendendo, & contra præceptum negatiuum non diligendi aliquid vt vltimum finem præter Deum. Nec obstat quod de ipsomet Deo amando datur præceptum affirmatiuum, & hoc potest Angelus frangere: dicimus enim posse quidem frangere tale præceptum, sed ex aliquo priori motiuo quo velit aliquem finem, & volendo illum, omittat conuerti ad Deum finem vltimum: ommissio enim auersionis ab aliquo fine non potest appeti per se primò, nisi ex conuersione ad aliquem finem, sicut nec recedere à termino à quo, nisi conuertendo se ad terminum ad quem; nec potest voluntas purè se suspendere per negationem omnis actus, etiam antecedentis, & qui sit causa, vel occasio illius omissionis, quia talis suspensio (si esset dabilis) esset purè suspensio physica, & non moralis, quia nec voluntaria, vt pote non procedens ab ipsa voluntate aliquo modo, vt latius dicitur 1.2. quæst. 6.

7 Dices: Potuit Angelus in primo instanti, seu in primo actu peccare contra præceptum affirmatiuum: ergo peccato omissionis. Conseq. patet. Antecedens probatur, quia in primo instanti fuit præceptum in Angelo conuertendi se ad Deum, & erat liber ad eliciendum, vel non eliciendum, & saltē pro secundo instanti erat liber libertate etiam contrarietatis, ita quod poterat peccare: ergo per hoc solum quod suspenderet actum amandi peccaret: poterat ego in illo primo peccato incipere ab omissione, quia tam liber erat ad velle, quā ad nolle, etiam contrariè. Quis ergo prohibebat tunc non velle, & incipere à suspensione actus, & hoc erat peccare? Item quia in illa omissione erat peccatum mortale: ergo erat auersio à fine vltimo, & conuersio ad finem prauum: ergo poterat incipere à tali auersione, & à fractione illius præcepti affirmatiui nolendo ei obedire ex contemptu Dei, & omittendo eius præcepta. Et licet vellet omissionem istam ex alio fine, tamen cum non interueniret ibi alia malitia quā omissionis, neque diceretur ibi peccare peccato commissionis, sed omissionis, sicut qui vult propter ludum missam omittere, non peccat peccato commissionis in ludendo, sed omissionis in non audiendo sacrum.

Resp. ad primum non potuisse Angelum peccare in primo peccato, ex motiuo omissionis, sed ex motiuo commissionis, & sic antecedere debuisse peccatum commissionis: licet enim curreret præceptum affirmatiuum conuertendi se in Deum, tamen ista ommissio non erat appetibilis ab Angelo, nisi in aliquo fine, in quo primò auerteretur à Deo, eo quod in bono fine, & rectè ordinato non poterat Angelus velle omissionem culpabilem, quia illa non erat referibilis in talem finem, neque illi subordinabilis: ergo sub aliquo fine auerso deberet appeti, & illa conuersio ad talem finem antecedens omissionem iam erat mala, & non erat ommissio, sed commissio, quia positiuo actu volita, & vt quoddam appetibile. Homo autem non eodem actu vult finem, & id quod sub fine continetur; & sic

& sic potest velle omissionem seorsum sine commissione, licet habeat aliquem actum, qui sit causa, & occasio illius, ut moraliter voluntaria sit. Et poterat Angelus velle, vel nolle, distinguo, nolle moraliter, & voluntarie ex præsuppositione alicuius finis, transeat, sine tali fine, nego, eo quod modus connaturalis in Angelo est velle, vel nolle media sub aliquo fine, & eo actu quo vult, vel non vult finem: omittere autem finem bonum pura omissione, & nullum alium finem appetendo, sed ab omni actu cessando in exercitio, non est connaturale Angelo, imò neque homini, quia non est connaturale voluntati, & fortasse impossibile ab omni actu se suspendere, & sine vlllo vitali motu manere, ut latius 1.2.9.6. dicitur.

8 Ad secundum dicitur quod in omissione, quæ est peccatum mortale, datur conuersio, & auersio à fine, distinguo, taliter quod conuersio ad finem non sit ex meritis ipsius omissionis, ut pura omisio est, concedo, taliter quod sit ex aliquo adiuncto quod non per omissionem, sed per commissionem, seu posituum actum appetatur, transeat. Nec ipsa omisio, ut diximus, potest habere rationem finis secundum se, nisi induat aliquam rationem quæ positivè appetatur, ut propter contemptum, vel odium Dei, propter commoditatem propriam, vel ad experiendam libertatem, aut aliquid simile, quod prius appetitur ut finis, & appetitur nō omittere, sed positivè volendo. Et cum instatur quod potest esse volita omisio ex alio fine, qui non habeat aliam malitiam, quàm omissionis. Resp. quod non, disputando modò an in illo actu, qui est causa omissionis etiam detur propria, & intrinseca ratio peccati, licet cum ordine ad omissionem, sicut ille ludus, v.g. propter quem volo omittere sacrum, etiam in genere ludi fiat superfluous, & malus commissivè, hoc inquam omisso, est specialis ratio in Angelo, qui ex eo quod non potest incipere deordinationem suam, & actum voluntatis, nisi à fine, in quo, & sub quo deordinationem omnem exercet; idè oportet quod si ipsam omissionem non accipit, ut finem in se (quia est privatio, & carens bonitate) præsupponat volitum finem distinctum ab omissione, in quo ipsa omisio ut medium, vel quid contentum sub fine volita sit, & talis finis malus est, & non rectè volitus antecedenter ad omissionem, quia ille finis ultimus sub quo deordinate est volita omisio præcepti, nō potest esse bonus, nec Deus ipse, quia ad illum non est referibilis: est ergo aliquid malum, & auersum à Deo. Non ergo incipit peccatum Angeli ab omissione.

Species peccati Angeli.

9 Circa speciem peccati Angeli vnum est ferè certum apud Authores, scilicet primum peccatum de facto peccatum superbiæ fuisse. Aliud verò controuersum, an motiuum peccandi in Angelis potuerit aliunde incipere quàm ex motiuo superbiæ. Et circa primum dico esse ferè certum: nam aliqui aliud conati sunt assignare pro peccato Angeli, aliqui luxuriam, aliqui inuidiam. Qui luxuriam assignarent non defuerunt inter antiquos Patres, qui etiam carnalem luxuriam Angelis tribuerunt, sic explicantes illud Genes. 6. *Videntes filij Dei filias hominum*, &c. de quo videri potest Tertullianus lib. de idololatria c. 9. Lactantius lib. 2. Institut. c. 14. & alij. Fortasse antiquiores hi Doctores existimantur Angelos corpora habere, licet subtiliora nostris, de quo egimus supra disp. 19. art. 1. In præsentia solum aduerto hos Patres qui sic interpretati sunt locum illum Geneseos, Angelosque in commixtionem carnalem cum filiabus hominum. *Joan. à S. Thom. in 1. part. D. Th. Tomus alter;*

cecidisse existimantur, nequaquam loqui de peccato primo diaboli, quando de celo exturbatus est: nec enim ignorare potuerunt illi Patres, quod illo tempore quo Scriptura narrat filios Dei appetisse filiarum hominum concubitus, iam Diabolus peccauerat, cum illud factum Scriptura contigisse narret post multiplicatum genus humanum; Diabolum verò iam peccasse, & à celo fuisse exclusum cum ex eius tentatione, & suasionem primi nostri parentes peccarunt, ignorare nullus potest. Quapropter peccatum hoc primū Angeli carnalis luxuriæ fuisse, nemo quod sciam potuit sentire. Quomodo verò locus ille Genes. de filiis Dei, & filiabus hominum intelligendus sit, diximus citata disp. 19.

Aliter ergo luxuriam Angelis attribuit Scotus in 2. dist. 6. q. 2. nempe non carnalem, & propriam, sed spiritualem, qua per nimium amorem, & delectationem de proprio decore, & felicitate, quasi luxuriante venustate propria delectati sunt, quod superbiam improprie esse putat, propriam verò cupiditatē, & luxuriā spirituale circa suum decorē.

Inuidiam fuisse peccatū Angelorum docuerunt non pauci, licet non ita clarè explicent fuisse primū peccatum Angeli; quod enim ex primo peccato superbiæ fuerit peccatū inuidiæ secutum, negari non potest, nec D. T. negat. Et Scriptura aperte testatur, quod *Inuidiā Diaboli mors intrauit in mundum*. Aliqui autem hoc peccatū inuidiæ explicant fuisse inuidiam erga homines, ut deducitur ex S. Cypriano opusc. de zelo & linore, Tertulliano de patientia c. 5. Basilio in sermone de inuidia, Irenæo lib. 4. c. 78. Alij fuisse inuidiā erga ipsum Dominum Christum, cui dignitatem vnionis hypostaticæ inuidebant, sibi que immoderatè appetierunt, quod deduci videtur ex S. Bernardo hom. 17. in Cantica. Ruperto, & aliis, quorum sententiam quantum ad appetitum vnionis hypostaticæ sequitur Granados tract. 13. disp. 2. sect. 4. & probabilem reputat Suarez lib. 7. cap. 13. & pluribus confirmat.

Ceterum communis sententia attribuit Angelis 10 peccatum superbiæ, ita quod illud fuerit primum, & initium ceterorum. Ita sentiunt communiter Theologi cum Magistro in 2. distinct. 6. & D. Tho. hic q. 63. art. 2. ubi videri possunt interpretes, Videantur ibi Caiet. Bañez, Zumel, Nazarius, Carmelitani Salmanticenses tract. 6. de Angelis, disp. 10. dub. 1. Vasq. disp. 132. cap. 3. Suarez lib. 7. de Angelis c. 8. & seqq. Granados ubi supra sect. 2. n. 4. qui etiam oppositam sententiam temerariam vocat. Constat autem hoc ex Scriptura, & Patribus: ut enim supra notauimus, Scriptura ponit superbiā pro initio omnis peccati, Ecclesiast. 10. & Tobie 4. ipsum etiam peccatum Angeli, qui primus inter intellectuales creaturas peccauit, siquidē ex eius suasionem peccauit primus homo, superbiā fuisse significat, tum in illo loco 2. ad Tim. 3. *Ne in superbiam elatus in iudicium incidat Diaboli*, tū in aliis locis ubi secundum communem expositionem sermo est de Diabolo, licet sub figura aliorū principum, aperte eius peccatum dicitur superbia, ut Ezech. 28. *Elenatum est cor tuum in deore tuo; Isaiæ 14. Quomodo cecidisti de celo Lucifer, qui mane oriebaris, qui diebas in corde tuo. In celum conscendam, super astra Dei exaltabo solium meum, ascendam super altitudinem nubium, similis ero Altissimo*. Vnde S. Ambrosius epist. 84. inquit, quod siue in lapsu Diaboli, siue in prauaricatione hominis, initium peccati superbia est. Et August. 12. de ciuit. cap. 6. *Initium inquit, omnis peccati superbia. Hic primus defectus, & prima inopia, primumque vitium eius natura, qua ita creata erat, ut non summa esset*. Videndus est Basiliius in capite 2. Isaiæ, ad illa verba, *Dies Domini*

super omnem contumeliosum, & superbum. Gregorius lib. 17. moralium cap. 13. & lib. 23. cap. 4. Hieronym. lib. 2. aduersus Iovinianum cap. 3. Cyrillus lib. 6. in Ioannem cap. 6. Prosper in dimidio temporis cap. 1. & 2. & in libro de vita contemplatiua cap. 3. Bernardus serm. 4. de Ascensione, & alij plures. Quæ omnia sufficienter probant de facto accidisse in Angelis peccatum superbiæ.

Quod verò fuerit superbia propriè dicta, non luxuria illa spiritualis, quam Scotus ponit, manifestè deducitur, tum ex ipsa proprietate locutionis Scripturæ, & SS. nec enim dicendum est tam frequentes locutiones improprias esse sine fundamento valde urgenti, quod in præsentia non apparet. Tum quia illa delectatio quam ponit Scotus circa propriam pulchritudinem, & amorem, vel fuit delectatio de propria excellentia cum subiectione ad Deum, vel sine illa. Si cum subiectione ad Deum non fuit peccatum, etsi fuerit vehemens, & intensa, quia delectatio de pulchritudine, & de bono quod in se bonum est, dummodo non sit contra præceptum Dei, & cum deordinatione à fine non est peccatum, cum delectatio sit consequens amorem de bono præsentis, sicut qui delectatur de pulchritudine vxoris, aut de proprio decore, & sapientia referendo ista omnia ad Deum, non peccat. Si autem delectatus est Angelus de sua pulchritudine, sine subiectione ad Deum, hæc fuit propria superbia, quia appetitus superbiæ propriè sumptus est appetitus inordinatus propriæ excellentiæ sine subiectione ad superiorem, vt docent Theologi cum S. Thoma 2. 2. q. 162. Complacere autem, & delectari de hac ipsa excellentia, de honore, de diuitiis, &c. non facit speciale peccatum luxuriæ, quia delectatio, seu voluptas de eo, in quo peccatur, est valde generalis conditio pro omnibus peccatis. Omnia enim peccata fiunt cum quadam expletione propriæ voluntatis, quæ voluptas quædam est, & delectatio. Tunc autem est luxuria determinatè, quando est in materia intemperantiæ circa sensibilia bona, præsertim venerea in quibus animus diffluit: in reliquis peccatis delectatio est, sed non luxuria. Et sic inordinatus amor propriæ excellentiæ in Angelo fuit in toto rigore vera superbia, nec transiit ad speciem luxuriæ delectatio huic amori annexa, quæ generalis conditio est in peccatis.

11 Circa secundum verò, quod diximus controuersum esse in hac parte, nempe an fuerit aliud motuum quo posset Angelus peccare in primo peccato quàm motuum superbiæ, sententia D. Thomæ est non fuisse aliud motuum quàm superbiæ. Ita sumitur ex his quæ tradit in hac q. 63. a. 2. & in 2. dist. 5. q. 1. a. 3. & agendo de peccato primi hominis in 3. dist. 22. q. 1. art. 1. ad 4. & 2. 2. quæst. 163. art. 1. ad 1. & 3. Viderique potest Caiet. in præsentia q. 63. art. 2. & ibi communiter Thomistæ. Refragatur verò huic sententiæ Vasquez in commentario huius a. 2. & Arrubal hic disp. 178. c. 1. qui plura alia peccata assignant, quæ Angelo conuenire possunt, sicut est peccatum omissionis frangendo præcepta affirmatiua, peccatum odij, aut desperationis, aut inobedientiæ, quia hæc peccata non solum versantur circa materiam sensibilem, sed etiam circa spirituale. & sic non repugnant Angelo. Item erga homines non repugnant quod Angeli committant peccatum iniustitiæ occidendo illos, aut malè tractando, vel res suas; aut etiam peccatum inuidiæ eorum excellentiæ inuidendo. Peccatum etiam iracundiæ non repugnat Angelo, quia non est de ratione iræ quod sit passio appetitus sensitui, sed solum quod sit appetitus vindictæ, vt supra q. 20. a. 1.

dixit S. Thomas. Non ergo talis ira sine passione repugnabit Angelo. Quod si ista peccata Angelo non repugnant: ergo neque eorum motiua, & consequenter neque repugnabit ab illis incipere, quia libertatem habet Angelus incipiendi peccare à quacumque materia, seu obiecto, nec habet aliquam necessitatem incipiendi à superbia.

Nihilominus sententia D. Th. vera est, & tenenda, sed prius explicanda. Et eius explicatio consistit in duobus.

Primum, quod loquitur S. Thomas de Angelo iuxta suum connaturalem modum, & sicut de facto creatus est plenus sapientia, & perfectus decore, vt dicitur Ezechiel. 28. Vnde sequitur quod non poterat peccare in appetendo, seu desiderando illicito modo aliquid, quod sibi deesset ex bonis spiritualibus, quia plenus erat omnibus his quæ sibi debebatur; Et sic ex parte boni spiritualis quod desiderare poterat solum poterat peccare desiderando aliquid ultra propriam mensuram, & ultra id quod sibi debebatur, & quo erat plenus, quod pertinet ad inordinatum motum propriæ excellentiæ.

Secundum est, quod D. Thom. non negat plura alia peccata præter superbiam posse esse in Angelo, sed loquitur de primo peccato, quantum ad motuum, & obiectum cui afficitur Angelus: hoc enim docet non esse aliud quàm motuum inordinatæ excellentiæ, licet posito illo motiuo, & peccato possit etiam ad alia declinare, eaque committere. Vnde in 2. dist. 22. supra citata inquit D. Thom. quod *Aliorum peccatorum occasio defectus aliquis esse solet, sola vero superbia est quæ fundamentum ex perfectione sumit.* Vbi S. Doctor manifestè indicat se loqui de motiuo, seu fundamento ad peccandum in natura perfecta, qualis est Angelica, quæ non mouetur ad peccandum per defectum, sed per excessum, & ratione alicuius perfectionis, & excellentiæ indebitæ, & excessiue.

Ratio autem huius sumitur, tum ex ipsa natura, & modo connaturali operandi Angeli, tum ex solutione oppositi fundamenti, ostendendo, quod licet alia peccata non repugnent Angelo, repugnant tamen esse primū motuum ad peccandum. Ex ipsa natura, & connaturali modo procedendi in Angelo sumitur ratio ex iam supra insinuat, quia Angelus non potest peccare, nisi incipiendo volitionem ab aliquo fine, sicut incipit cognitionem suam à principiis. Finis autem debet esse aliquod bonum, cui Angelus afficiatur: finis enim est id quod appetitur ratione sui, & eius gratia appetuntur alia. Non potest autem Angelus per se primò affici ad bonum sensibile tanquam ad finem, quia non est sibi proportionatum, neque conueniens: finis autem appetitur vt conueniens, & bonum ipsi appetenti: debuit ergo esse bonum aliquod spirituale circa quod tanquam finem operetur Angelus. Rursus bonum spirituale secundum se conforme est rationi, nec illi contrariatur, sicut in nobis bonum sensibile quandoque rationi non subiicitur, spirituale autem bonum de se rationi est conforme, & conueniens, quia spirituale est: solum autem potest reddi malum secundum quod excedit mensuram à Deo constitutam; & sic appetitur inordinatè, seu ultra debitum ordinem. Et cum Angelus productus sit perfectus, & plenus omni perfectione sibi debita, non poterat inordinatè appetere acquisitionem earum perfectionum spiritualium, quæ sibi debentur, v. g. scientiæ, & cognitionis circa quam vitio curiositatis laboraret. Solum ergo potuit appetere aliquem

aliquem modum excellentiæ inordinatum, v.g. circa potentiam, & honorem, aut superiorem scientiam appetendo id quod sibi non debebatur, aut non eo modo quo debebatur, v.g. cum aliqua singularitate peculiari, aut cum independētia ab alio, vel cum aliquo genere non subiectionis contra ordinationem Dei, quod totum pertinet ad superbiam, quæ est appetitus inordinatæ excellentiæ, seu perfectionis. Ab illo ergo debuit incipere motuum peccati in Angelo, siquidem incepit ab aliquo affectu circa spirituale bonum, seu excellentiam aliquam, quæ inordinatè appetitur.

Quare non negamus, multa alia peccata posse esse in Angelo, quæ spiritualia sunt, sed negamus posse modo connaturali præbere Angelo primum motuum peccandi, quia ex aliis peccatis multa sunt, quæ præsupponunt alia peccata præcessisse, vel saltē motuum aliquod peccaminosum; superbia verò est aptissimum, & congruentissimum medium, ut sit primum motuum peccandi in Angelo, quia semper primum motuum peccandi in Angelo debet esse ex aliquo fine, & bono cui afficiatur, & hoc non potest esse aliquid corporale, quia non est proportionatum naturæ spirituali, & perfectæ, sicut est Angelus, ut afficiatur illi tanquam proprio bono: excellentia autem propria immoderatè, & ultra debitam mensuram volita, est potissimum attractivum, & alleciivum naturæ ita perfectæ, & spiritualis, sicut est Angelica. Illud ergo erit primum motuum, & illud est motuum superbiæ.

14 Ex quo secunda ratio deducitur, quæ est etiam solutio fundamenti oppositi, nempe discurrendo circa alia peccata, & ostendendo quòd connaturali modo loquendo non præbent de se primum motuum peccandi. Nam in primis peccatum omissionis per se, & ratione sui non præbet primum motuum peccandi, quia de se est negatio, seu privatio, & ut appetatur debet vestiri aliquo bono apparenti, & aliquo fine, ratione cuius nō recusat quis fractionem præcepti: ergo ipsa ommissio non est primum motuum peccandi, seu primum cui affici potest Angelus tanquam fini. Item odium Dei, & desperatio non potest convenire Angelo, nisi præsupposito aliquo priori peccato, ratione cuius reddatur dissonum eius dictamini id quod habetur odio, vel à quo desperatur, ut S. Thomas aduertit loco supra cit. ex 2. dist. 5. q. 1. art. 3. non enim aliquid habetur odio, nec desperatur ab illo, nisi quia consideratur seu iudicatur ut dissonum, & disconueniens sibi; & sic odio habetur. Et hoc ideo est, quia odium, & desperatio pertinent ad quandam fugam voluntatis, quatenus aliquid apprehenditur ut disconueniens vel nocivum; & sic non amatur, sed abominatione, vel inimicitia prosequitur, aut iudicatur ut impossibile adipisci; & sic non prosequitur illud spes, sed ab illo deicitur, vel fugitur, & hoc est desperatio. Vnde repugnat quòd Angelus inde incipiat peccati sui motuum, tum quia odium, & desperatio pertinent ad fugam, non ad affectum, & prosecutionem, primum autem motuum in Angelo est ex affectu circa aliquem finem, seu bonum quod sibi conueniens apprehendit: finis enim ut finis amatur, non fugitur; & Angelus in amore finis tangit ea quæ se habent ad finem, non seorsum; non ergo primum motuum, & affectus finis est in fuga: tum quia ut Deus habeatur odio, vel desperetur, debet apprehendi ut disconueniens. Non autem apprehenditur Deus ut disconueniens nisi corrupto iam iudicio, & talem supponendo auersionē ab ipso ex aliis effectibus vel affectibus, ut inde formeretur iudicium, quo etiam Deus ipse ut no-

cius, & disconueniens apprehenditur. Quòd verò prima apprehensio de Deo, præsertim in natura perfectæ, & perfectè intelligente, sicut est Angelus sit apprehensio Dei ut disconueniens, omnino videtur contra modum eius connaturalem. Vnde S. Tho. 22. quest. 34. art. 5. docet idèd odium non esse vitium capitale, quia non est primum in destructione virtutum, sed vltimum; & sic potius est peccatum finale quàm capitale, seu initiale, supponens tantam corruptionem in subiecto, quòd potest ab eo summum bonum apprehendi ut disconueniens subiecto: hoc autem sine magna corruptione fieri non potest, & supponendo in subiecto præcedere alia peccata, ex quorum suppositione, & affectu Deus concipitur ut disconueniens, quia concipitur ut contrarius subiecto. Non concipitur autem ut contrarius ipsi naturæ, aut perfectioni eius, cum sit primum eius principium, & author totius esse, sed solum concipi potest ut contrarius, vel in quantum infert mala pænæ, & hæc iam supponunt culpam, vel quatenus prohibet ipsa mala culpæ; & sic ex affectu ad illa mala, quæ prohibet, Deus ut contrarius, & dissonus concipitur, odioque habetur. Sed hoc iam supponit alia mala culpæ. Et sic odiū nunquam est peccatum capitale, & primum, quod versatur erga affectum ad finem, sed est peccatum finale, seu vltimum supponens alia peccata, ex quibus mouetur quis ad apprehendendum Deum ut dissonum, & contrarium sibi, quia vel prohibet, vel punit illa peccata quibus quis afficitur.

Ad ea quæ obijciuntur pro peccatis quæ ver-
santur circa homines. Quòd attinet ad peccata iniustitiæ, dicimus dupliciter eam committi. Primo ex eo quòd aliquis vult accipere aliena in commodum proprium, & tunc iniustitia nascitur ex inordinato amore, & concupiscentia sui. Secundo ex eo quòd aliquis vult eam in incommodum seu nocumentum alterius, & inde mouetur ad faciendum ei iniuriam contra iustitiam. Primo modo non potest Angelus velle iniustitiam, seu iniuriam facere homini, imò nec alteri Angelo, quia non potest ipse ex iniuriis hominum sine ex acceptione suarum rerum, vel iurium, aut ex quibuscumque ipsius bonis fieri ditior, & commodior: quid enim commoditatis sibi provenire potest ex bonis sensibilibus hominis, cum ipse Angelus spiritualis sit? Ex bonis autem eius spiritualibus nihil potest surripere, aut iniustitiam committere circa illa, quia non possunt homine invito perdi, nec etiam eo volente possunt Angelo accrescere, & propria ipsius fieri. Et idem est respectu aliorum Angelorum in bonis spiritualibus eorum. Secundo verò modo potest quidem Angelus nocere homini, & iniustitiam in illum committere, & fortasse etiam in Angelum, v.g. ipsum ultra modum affligendo, & vexando; sed tale peccatum supponit odium, & malevolentiam, erga homines contra quos mouetur, siquidem ex appetitu nocendi facit iniuriam, & hoc iterum est peccatum fugæ, & abominationis; & sic dimanat ex volitione priori alicuius finis, non ergo primum peccatum est iniustitia. De invidia etiam dicimus cum D. Thoma in hac q. 63. art. 2. cit. loco ex 2. dist. 5. quòd invidia est dolor alienæ prosperitatis in quantum est impeditiva alicuius boni proprii. Nulla autem felicitas neque Dei, neque alterius hominis, aut Angeli est impeditiva boni proprii ipsius Angeli, si velit tale bonum proprium eo modo quo sibi à Deo collatum est, & cum subiectione ad Deum, qui distribuit unicuique iuxta modum sibi debitum. Vnde solum potest aliena felicitas impedire bonum proprium Angeli inordinatè volitum, v.g. si ipse vult esse singularis in aliquo bono, & su-

per omnes esse, nec aliquem sibi præferri, etiam ex Dei ordinatione, & tunc invidiam habere potest, sed supponentem deordinationem præcedentem circa aliud bonum, & hoc est supponere aliud peccatum, quod utique est superbia, cum sit circa excellentiam propriam, cui opponitur bonum alienum, quatenus impedit proprium aut singularitatem eius. Et quando dicit S. Basilus in homilia de invidia, quod *Invidia impulit principem malorum Daemonem ad bellum*; quod etiam alij Sancti affirmant, dicimus verum esse quod ab bellum cum homine impulit illum invidia. Sed hanc præcesserat peccatum superbiæ contra Deum. Nec est inconueniens quod in eodem instanti, sicut & nunc modò simul Angelus de propria excellentia nimis delectetur, & de alieno bono tristetur, & corrodat intus in corde, quia isti affectus sunt circa diuersa obiecta; & sic non pugnant inter se.

Ad ea quæ dicuntur de ira, an repugnet Angelo, dicimus D. Thomam in hac qu. 63. artic. 2. ad 2. excludere iram ab Angelo, quia dicit passionem corporalem. De ira verò, quæ est simplex voluntatis affectus appetitis vindictam sine passione corporali nihil dixit; sed hoc non ita curæ fuit D. Thomæ, quia ira ista, quæ est simplex affectus voluntatis, habet rationem auersionis, & fugæ respectu personæ in quam appetitur vindicta. Vnde non feruit talis ira pro motiuo primi affectus erga finem cui afficitur operans, quia talis affectus debet esse sine fuga, sed per prosecutionem, & amorem. Vnde appetitus vindictæ non feruit pro primo peccato, quia est erga finem desideratum, & volitum, quia est finis cuius gratia cætera appetuntur.

De vitio curiositatis non est quod illud attribuamus Angelo in statu quo creatus est plenus sapientia: Sic enim non habuit quod desideraret inquirere circa cognitionem sibi possibilem, & connaturalem, quia Angelus non habet scientiam acquisitam, sed innatam, & ab initio perfectam. Curiositas autem est vitium in excessiuo studio acquirendæ cognitionis superflue. Circa cognitionem verò supernaturalem posset in Angelo esse vitium, si desideraret superiorem scientiam habere contra ordinem diuinum, & sine subiectione ad Deum (nam ex subiectione ad ipsum, & subordinatè ad illum, peccatum non est.) Velle autem scientiam superiorem sine subiectione ad Deum plus habet de superbia, quàm de curiositate, quia Angelus, si quid ibi inordinatè appeteret, non tam esset scire, quàm excellere, sicut cum Euam tentauit de appetitu scientiæ, magis ibi expressit desiderium excellentiæ quàm acquisitionem notitiæ, dicens, *Eritis sicut Dii, scientes*. Sic ergo si id appetiit Diabolus, magis appetiit in illa scientia superioritatem, & excellentiam sine subiectione ad Deum, quod est motiuum propriissimum superbiæ, cui per accidens est quod sit in materia scientiæ, vel potentiæ, aut honoris, vel cuiuscumque alterius excellentiæ.

26 Adhuc tamen obijciens contra nostram conclusionem ad probandum quod non fuerit propriè motiuum superbiæ primum peccatum Angeli, & in fauorem Scoti: Nam in primo peccato Angelus non respexit tanquam rem volitam ipsum præesse aliis, & non subiici superiori, sed solum tanquam conditionem alterius rei volitæ, quia scilicet voluit sibi inhærere, ut vltimo fini, auertendo se, & non subiiciendo se ipsi Deo, quod utique non pertinet ad speciale peccatum superbiæ, sed est conditio generalis cuiuscumque peccati importantis auersionem à Deo. Ut autem esset speciale peccatum superbiæ, oportebat quod non solum ut conditio, sed

ut res volita attingeretur ipsum non subesse superiori, & præesse aliis. Quod verò hoc non potuerit esse primum motiuum peccati Angeli, probatur, quia ut docet S. Tho. in hac qu. 63. artic. 1. ad 4. Angelus non peccauit eligendo malum ex parte rei volitæ, sed eligendo malè ex parte inordinatæ electionis circa obiectum bonum. At nolle subesse superiori si accipiat ut res volita, est malum obiectum, & non solum mala conditio ex parte electionis: ergo non potuit in primo peccato esse peccatum speciale superbiæ.

Conf. quia Angelus non vult inordinatam, & superfluam excellentiam sibi, nisi supponendo dilectionem suæ personæ inordinatam, non quia propriè habeat ad se amorem amicitiae, sed quia se amat ut primum diligibile, & tanquam obiectum, cui vult quidquid vult. Et quia se inordinatè vult ut personam, & obiectum cui, idè vult sibi excellentiam superfluam, ut præesse aliis, non subiici superiori. In hoc autem quod est inordinatam excellentiam velle, est peccatum superbiæ; in eo verò quod est se nimis amare ut personam, & obiectum cui, non est peccatum nisi nimia delectationis de seipso, quod pertinet ad peccatum luxuriæ spiritualis, sicut multoties homines peccant nimiam delectationem capiendo de spiritualibus, & nolendo eis carere, aut saltè solum est generalis conditio omnis peccati quod procedit ex inordinato amore sui; ergo in Angelis præcessit peccatum superbiæ, nimia delectatio, & amor sui, qui est libido spiritualis.

Respon. quod non subiici superiori, potest sumi non solum ut res volita primò, & per se (sic enim non solum est malum, sed pessimum, & vix appetibile nisi stultè, & per errorem) sed potest sumi ut modus, & conditio obiecti voliti; & aliquando potest esse conditio generalis peccatorum, aliquando specialis, vel peccati inobedientiæ, vel peccati superbiæ. Est conditio generalis peccati, quando ly *non subiici* sumitur pro eo quod est non subiici superiori ut regulanti, & mensuranti actus rationis; sic enim omni peccato mortali generale est auerti à regula cui conformari debet actio. Est conditio specialis in peccato inobedientiæ quando recusat aliquis facere rem præceptam, ex hoc quod ab ipso superiori præcipitur, ita quod non vult subesse alteri ut præipienti, & superiori, ut docet S. Tho. 2. 2. q. 104. Est conditio specialis superbiæ, in quantum recusat subiici superiori ex motiuo excellentiæ propriæ: vult enim excellentiam suam ita seruari quod nulli reputetur inferior, & ex hoc recusat superiori subesse ut excellens maneat; & sic propriè non vult subesse superiori, ut excellenti, idè quod ut S. Tho. explicat 2. 2. q. 162. artic. 6. Superbia peruenit ad hoc, ut auersionem quæ in reliquis peccatis est consequens, ipsa habeat pro proprio, quatenus deducitur vsque ad contemptum Dei, sed hoc totum habet sub motiuo excellentiæ propriæ, & contemnit Deum, seu recusat illi subesse, ut excellentiori se in eo in quo Deus vult quod creatura se reputet inferiorem; & idem est de aliis superioribus, quatenus ex hoc videtur propria excellentia diminui, seu non seruari. Dicimus ergo, quod ad superbiam non pertinet velle ipsum non subesse ut rem primò, & per se volitam, sed ut modum, seu conditionem requisitam ad propriam excellentiam, quatenus non vult subesse alteri, ut excellentiori se, & sic sub ratione excellentiæ, & motiuo illius fertur in non subesse, seu admittit ex parte modi, & eligendi, ipsum non subesse.

Ad Conf. Respon. quod ille amor sui tanquam personæ

personæ primò dilectæ non constituit speciale peccatum, sed est principium cuiuscumque peccati, ut sumitur ex D. Tho. 1.2. *quest. 77. art. 4.* Neque talis amor inordinatus sui est separatus ab amore rei sibi volitæ contra præceptum Dei, ratione cuius materiæ, sumitur speciale peccatum modò in excellentia propria, modò in delectatione cibi, aut veneris, modò in possessione pecuniæ, &c. aut in quacumque alia re, quæ vel secundum timorem, & fugam, vel secundum concupiscentiam attingitur, ut *ibidem* docet S. Tho. *solut. ad 3.* Quare illa delectatio, & amor de seipso est generalis conditio omnis peccati, & respectu cuiuscumque peccati, etiam odij Dei, aut iniustitiæ, aut timiditatis, &c. potest fieri idem argumentum quod oritur ex amore nimio erga se, & delectatione sui, ob quam vult aliquis illa bona sibi, aut nimis amando, aut nimis timendo. Et sic probaret argumentum quod pro omni peccato interueniret peccatum luxuriæ, quia interuenit tanquam motuum, & origo nimius amor sui, & delectatio de se. Dicimus ergo quod cum species peccatorum determinata, & in speciali non sumatur ex amore sui, ut præcisè terminatur ad se, ut ad personam cui vult bonum, sed ex ipsa materia circa quam voluntas versatur: Et quia Angelus sic voluit sibi bonum, & amavit se, quod istum amorem exercuit in tali materia, scil. in excellentia propria volita sine subiectione ad excellentius bonum, & ad superiorem secundum regulam, & mensuram Dei, idè illud peccatum ex parte materiæ circa quam fuit specialissimè peccatum superbiæ, licet ex parte sui principij, & originis supposuerit amorem sui, & delectationem de se, quæ est principium generale omnium peccatorum tanquam motuum generale, non verò se habet ut materia cuiuscumque peccati, sed hæc in Angelo fuit propria excellentia. Ex amore autem sui non denominatur aliquod peccatum esse luxuriæ, sed ex materia volita circa quam est delectatio, non ex persona cui est volitum generaliter omne peccatum, scilicet ex amore sui.

Singularitas peccati Angeli: circa quod obiectum determinate superbierit?

17

Superbia cum sit inordinatus appetitus excellentiæ, in qua vult aliquis singulariter eminere, potuit in Angelo circa diuersa obiecta versari. Et difficultatem habet singulariter, & determinatè assignare circa quod obiectum de facto superbierit. Numerari autem possunt quatuor obiecta.

Primum est circa ipsum Deum in se, appetendo eius æqualitatem in altitudine, & maiestate.

Secundum est vnio hypostatica, appetendo eam sibi, aut dedignando quod humanæ naturæ fuerit communicata.

Tertium beatitudo supernaturalis, nolendo eam habere ex indigentia diuini auxilij, aut cum confortio humanum,

Quartum est beatitudo, & felicitas naturalis, volendo eam tantum habere, & in illa omnibus aliis præesse sine eleuatione ad supernaturalem beatitudinem, in qua possent alij ei æquari aut etiam superare, sicut superare debebat anima Christi, & Beatissimæ Virginis.

Circa ista laboratur in duobus.

Primum in assignando obiectum cuius appetitus non appareat impossibilis, aut fatuus in Angelo, qui peccauit cum maxima aduertentia, & malitia,

Secundum in euitando errorem speculatiuum in iudicio requisito, & præsupposito ad peccatum.

Igitur circa primum obiectum, scil. circa æqualitatem Dei, pro certo D. Tho. supponit in *art. 3. huius qu. 63.* quod Diabolus appetiit esse ut Deus. Id enim manifestè deducitur ex Scriptura, tum Isai. 14. vbi ex persona Luciferi dicitur, *Ascendam super altitudinem nubium, similis ero Altissimo, & Ezechielis 28 Eleuatum est cor tuum, & dixisti, Deus ego sum, & in cathedra Dei sedi in corde maris, & dedisti cor tuum quasi cor Dei:* tum quia superbia Dæmonis excedit omnem hominum superbiam, cum dicatur *ipse esse Rex super omnes filios superbiæ*, Iob 40. constat autem quod Antichristus in tantum erumpet superbiam, ut ostendat se tanquam sit Deus 2. ad Thessalonic. 2. Ergo multò ampliùs hæc superbia locum habuit in Diabolo, ut voluerit ipse haberi ut Deus. Ex quo manent etiam firma testimonia allata ex Ezechiele, & Isai: nam licet aliqui velint illa loqui ad litteram de Principe Tyri, vel de Rege Babylonis, non de Diabolo, tamen ex hoc conuincitur etiam ad Diabolum pertinere: nam si eius superbia excessit quorumcumque hominum superbiam, & in istis hominibus fuit talis superbia, quod voluerunt haberi ut Deus, quanto magis talis existimanda est fuisse superbia Luciferi, qui illorum iniquorum caput est, & in superbiendo ipsos excessit?

Difficultas verò est, an peccauerit Angelus desiderando diuinitatem ipsam secundum æqualitatem, & naturam, an verò desiderando solum aliquam illius similitudinem? In quo D. Tho. apertè affirmat *citato loco*, Angelum non potuisse appetere esse ut Deus per æqualitatem, ita ut veller naturam habere diuinam, sed solum appetiuit esse Deus per similitudinem. Aliqui tamen in hoc D. Thomæ refragantur, ut P. Suarez *lib. 7. de Angelis c. 12.* Vasq. *hic disp. 134. c. 1. & 2.* Molina *super quest. 63. art. 3. disput. vnica, membro 3.* Alarcon *tract. 6. de Angelis disp. 9. c. 2. conclus. 4.* citantque ex antiquis Scotum, Gabrielem, Malmem, & alios. Quia verò instat ratio D. Thomæ, quia Angelus euidenter videns, & sciens impossibilitatem huius obiecti, scil. se esse creaturam, & non posse esse creatorem sine dispendio sui esse, & adhuc cum huius dispendio id stare non posse, ut Deus esset per transmutationem sui esse in ipsum: sic enim esset Deus factus, non Deus verus: idè distinguunt duplicem appetitum, scil. efficacem quo intenditur rei consecutio, & inefficacem, quo solum apprehensa bonitas appetitur, & in ea quis delectatur, ut multoties in figmentis, & impossibilibus etiam cognoscendo quod talia sunt, delectamur: dicunt ergo quod primo modo certum est Angelum non potuisse appetere Dei æqualitatem, ut pote rem omnino impossibilem, quam nec stultus aliquis homo posset intentare, quanto magis Angelus. At secundo modo potuit Angelus de illo figmento delectari, seque tanquam Deum apprehendere, & in hac de tali figmento delectatione peccasse: immorari enim in istis vanum est.

Existimo tamen omnino certum esse Angelum directè, & formaliter non peccasse hoc peccato simplicis voluntatis vanæ delectationis circa æqualitatem cum Deo, nec appetiisse esse Deum per naturam, sed per quandam similitudinem. An verò ex consequenti, & quasi virtualiter circa hoc etiam peccauerit, statim dicam. Quæ fuerit autem similitudo illa in qua voluit esse sicut Deus, dicemus tractando difficultates sequentes de appetitu vnionis hypostaticæ, refutatione supernaturalis beatitudinis ex gratia Dei, & remanentia in sola naturali

Z z 4

beatitud

beatitudine. Et ita quoad primam partem, sententiam D. Tho. non solum probabilem, sed certam existimo. Et probatur, quia peccatum Angeli fuit circa aliquem finem, quem voluit, & intendit consequi: ergo non fuit peccatum eius circa aliquid impossibile, neque potuit consistere in aliquo simplici, & inefficaci affectu complacentiae simplicis circa rem impossibilem. Consequenter constat, quia affectus intentionis assentionis non potest esse circa impossibile cognitum ut tale: id enim omnino stultum est; Angelus autem clare, & euidenter cognoscebat esse impossibile quod ipse esset Deus per aequalitatem, & secundum naturam. Anteced. verò prob. primò ex ipsa natura rei, quia primus finis cui afficitur voluntas Angeli accipitur ut finis ultimus, cuius gratia cetera omnia appetuntur, id autem cuius gratia omnia fiunt, non poterat ab Angelo accipi id quod iudicabat esse impossibile, & consequenter non sibi conueniens, nec ad quod ceterarum actiones essent dirigibiles, nisi operaretur ex magna ignorantia, & stultitia: Licet enim circa rem impossibilem, & chimericam possit aliquis vanè, & otiose delectari, & peccare, tamen quod rem chimericam, & impossibilem cognitam ut talem velit aliquis intendere tanquam finem ultimum, & id cuius gratia cetera faciat, omnino videtur impossibile, & vix à summa stultitia imaginabile. Quomodo enim tam serias, & deliberatas actiones, sicut sunt reliquae omnes quas homo facit in vita sua, & sicut fuerunt deliberatae, & cum omni aduertentia, quas Diabolus fecit, dicemus propter quandam rem chimericam, & omnino impossibilem fieri? Et si fatentur Authores citati non potuisse Angelum appetitu efficaci velle esse Deum per aequalitatem, quomodo potuit id sibi proponere ut finem ultimum, cui reliquas actiones subordinaret? cum in istis multae actiones efficaces sint, illae autem originari non possunt ex inefficaci voluntate finis, quia voluntas finis influit in omnes alios actus, qui ex fine sunt, ergo si inter istos multi sunt efficaces, non possunt illi originari ex inefficaci voluntate rei impossibilis, ita quod eius gratia reliqua fiant. Non ergo potuit ille appetitus diuinitatis secundum aequalitatem esse voluntas finis ultimi, & cuius gratia reliqua fierent: ergo debuit ante ipsum supponi aliquid aliud pro fine ultimo, cui subordinabantur reliquae peccaminosae actiones, ergo in illo fuit primum peccatum Angeli, non in appetitu illo inefficaci aequalitatis diuinæ.

20 Deinde probatur idem antecedens, quia Angelus in rei veritate in eo quod appetiit in primo suo peccato non solum intendit, & voluit inefficaciter delectari, sed voluit negotiari, & illud consequi, aliosque ad id sollicitauit. Quis autem dicat totam sollicitudinem, & negotiationem tam sublimis, & tam sapientis creaturae, sicut fuit primus Angelus, & tam intelligentibus creatoris loquens, sicut erant omnes Angeli illi inferiores in vnicum illum scopum collineasse, ut in re omnino impossibili, & cognita ut tali, delectarentur, scilicet inefficaciter, & vanè cogitando se esse Deum per naturam. Quis, non dico Angelorum, sed etiam hominum admittet, vel non ridebit, hanc totam fuisse curam alicuius sapientissimi ac prudentissimi inter omnes homines ut infinitis ferè populis persuaderet vanam, & ineptissimam cogitationem alicuius rei impossibilis, & chimericæ, v. g. quod detinerentur in cogitando se esse Angelos, aut volare, sicut aues, aut se habere corpora caelestia, aut diuinam habere naturam? Et in hoc totam curam, & conatum suum ponere, ut persuaderet immorari in istis. Quid ineptius? Quomodo ergo existimandum est illum Angelum ple-

num sapientia, & vaferrimum Draconem rem talem persuasisse Angelis suis ut vanè, & inefficaci quodam motu cogitarent, & desiderarent se naturam habere diuinam, & in hac ineptia immorarentur? An persuasisse Angelum illum supremum, & inquieta negotiatione sollicitasse inferiorum Angelorum peccatum, intentasseque ut sequerentur se, clare ex Scriptura deducitur Ezech. 28. *Tu Cherub extensus, & protegens, & posui te in monte sancto Dei, &c. In multitudine negotiationis tuae repleta sunt interiora tua iniquitate, & peccasti. Et infra, In multitudine iniquitatum tuarum, & iniquitate negotiationis tuae polluisti sanctificationem tuam, &c. Et Isai. 14. Quomodo cecidisti de calo Lucifer, qui mane oriebaris? corruisti in terram, qui vulnerabas gentes, qui dicebas in corde tuo: In calum conscendam, super astra Dei exaltabo solium meum, ascendam super altitudinem nubium, similis ero Altissimo. Et infra: Tu enim terram tuam perdidisti, tu populum tuum occidisti, &c.* Ecce quomodo peccatum Angeli describitur, non per modum simplicis voluntatis, & complacentiae de re chimærica, & impossibili, sed tanquam negotiatio quædam, & inductio aliorum quos perdidit, & ut intentio rei quam desiderabat consequi, scilicet ascendere super caelum, exaltare solium super astra, & in hoc assimilari Deo, non dixit *Aequalis ero Deo*, aut ero ipse Deus, sed similis ero Altissimo, quod dicit non equiparantiam diuinitatis, sed assimilationem in maiestate, in cultu, &c. Denique quod desiderauerit aliquid non chimæricum, & impossibile ex se, licet illicito, & prauo modo superbiae, constat ex illo Anselmi libro de casu Diaboli; ubi ait, *Diabolum id appetisse, ad quod peruenisset, si stetisset.* Igitur obiectum eius non fuit aliquid impossibile, & chimæricum, sed aliquid ad quod poterat perueniri aliquo medio, licet non illo quo ipse appetiit. At ipsum Angelum esse Deum secundum naturam, nullo medio erat assequibile, nec ad illud peruenisset, etiam si stetisset: ergo illud non fuit primum peccatum Angeli directè, & per se primò desideratum, & volitum.

21 Circa secundam partem conclusionis supra posita, nempe, an ex consequenti, & quasi virtualiter Angelus potuerit sic peccare volendo esse sicut Deus per equiparantiam; dicimus hanc voluntatem non repugnare, quod sit in Angelo tum virtualiter, & indirectè, tum formaliter secundum quandam vanitatem post aliud prius peccatum in quo tamen ipse etiam ex prauo fine adiuncto peccabit mortaliter. Est quidem virtualiter, & indirectè, quatenus in promptitudine, & affectu animi ex odio aduersus Deum, ita Diabolus est dispositus, quod si posset ipsi eripere diuinitatem, & ab eo tollere, quod non esset Deus, id faceret, & ex superbia sua ita est affectus, quod si posset sibi ipsi diuinitatem habere, & nulli subesse, ita vellet, ne scilicet alius ipso excellentior esset. Et hoc est virtualiter velle esse Deum in natura, & secundum aequalitatem, si id non esset impossibile, scilicet in promptitudine, & dispositione animi, quantum est ex vi dispositionis, & affectus quem habent, contra Deum ex odio, & complacentiae circa propriam excellentiam ex superbia. Similiter talis voluntas potest esse formaliter in Angelis, quia ipsi bene cognoscunt illam conditionalem. Si possem esse Deus per naturam, haberem summam excellentiam, nulli subessem, liberarer ab hic miseris, &c. & bene cognoscunt quod hoc est phantasticum, & chimæricum bonum, licet chimæricè sibi representari possit, ut valde delectabile, & cogitare quod multa facerent, si haberent omnipotentiam diuinam: nam, & nos ista cogitamus, & delectamur (esto otiose) in similibus

libus chimericis fictionibus, & historiis, licet illa ficta esse cognoscamus, & multa sic chimærica, & ficta à Dæmonibus nobis proponitur, ut in illis oriemur, sicut multa poetica vana, ut in illis delectemur. Ergo ipsi etiam possunt in similibus chimæricis, & phantasticis vanè delectari, ut si possent electos qui sunt in cælo deicere in infernū, Christum & Beatissimam Virginem occidere, destruere, & conculcare; & inter hæc etiam possunt cogitare se esse sicut Deus in æqualitate, & quid in tali casu facerent: nec enim est maior ratio cur in destruendo Deum, & Christum, & electos, quod est omnino chimæricum possint immorari, & non in cogitando, & desiderando se esse Deum, licet inefficaci, & simplici affectu? Et aliqui docent posse Angelum habere velleitatem de hoc, non voluntatem actualem, & absolutam, id est voluntatem conditionatam, tam ex parte obiecti, quam ex parte actus, quæ explicatur dicendo. Vellem hoc si esset possibile, non quæ explicatur per actum præsentem, Volo hoc, v.g. Volo me esse Deum, si sit possibile, quia licet circa futura possit dari actus absolutus sub conditione tenente se ex parte obiecti, non tamen circa possibilia, eo quod possibilitas, vel impossibilitas non convenit sub conditione, sed absolute ex præcisa terminorum habitudine vel repugnantia. Vnde quantumvis ponatur illa conditio, si hoc fuerit possibile, nunquam reducitur ad veram possibilitatem, sed semper manet impossibile, & chimæricum illud obiectum simpliciter, & absolute, & consequenter sine aliqua convenientia respectu voluntatis, ut possit appeti actu absoluto. Et sic talis conditio, *Si hoc esset possibile* nihil omnino conducit, sed æquo modo se habet voluntas erga illud obiectum impossibile posita illa conditione, vel sine illa.

23 Nihilominus in hoc non oportet multum immorari: Omittimus enim disputare nunc illam questionem quid sit velleitas, & in quo consistat, de quo agendum est 1. 2. *quest. 6.* agentes de voluntario ex metu in quo relinquitur velleitas, de opposito eius, quod ex metu operamur. Et nunc supponimus velleitatem, etiam aliquo actu formali explicari posse, saltim per modum alicuius complacentiæ circa id quod repræsentatur nos facturos; si hoc esset possibile. Vnde licet circa impossibile etiam abiecta conditione ex parte obiecti non possit dari actus de facto, & absolutus per modum resolutionis, poterit tamen dari per modum simplicis complacentiæ, quia ad hoc non requiritur vlla conditio possibilitatis, aut convenientia quoad assecutionem rei, sed sufficit apparens illa, & repræsentata bonitas, ut circa id voluntas delectetur, tanquam circa quoddam bonum apparens, & conveniens in ratione præcisa boni repræsentati, non boni assequibilis. Et tamen illa conditio adiecta, si esset possibile, iuvat, non quidem ut moveatur quis ad assecutionem rei impossibilis: ad hoc enim nihil illa conditio conducit, sed ut magis exciteretur animus ad complacendum de re illa sub apprehensione possibilitatis conditionatæ. Velleitas ergo omnino conditionata est ex parte obiecti, & ex parte actus, quantum ad ordinem efficaciam, & assecutionis, aut resolutionem animi circa illam, non tamen est conditionatus actus, sed de facto, & formaliter datur quantum ad complacendum, & otandum circa illud, sicut quotidie experimur in nobis: Similiter ergo potest in Dæmonibus dari actus, quo absolute, & de facto delectetur de re chimærica, & impossibili, licet sit conditionatus ex parte

actus, & obiecti quoad resolutionem, & determinationem assequendi, & quoad hoc explicatur per *ly vellem*, quod non designat actum qui est, sed qui esset.

Hæc autem voluntas sic conditionata, & imperfecta & inefficax, de se non habet aversionem vel conversionem in peccato vel merito quantum ad electionem, & determinationem erga aliquem finem vel media, quia non potest vim electionis vel intentionis habere; bene tamen potest habere peccatum otiositatis, & vanitatis, aut dissonare ad alia peiora peccata: in Dæmonibus autem quia id procedit ex odio Dei, & ad odium Dei disponit, quatenus delectantur, & complacent, quod essent Deus ex odio contra Deum, idcirco in eo etiam gravissimè peccant, sed aliud supponendo, non primum peccatum statuendo.

Et totum hoc docetur à D. Thom. qui in primis admittit talem voluntatem imperfectam, & inefficacem dari posse de re impossibili, quæ velleitas dicitur, licet non voluntas electiva, & perfecta, seu ad assecutionem tendens, ut patet 1. 2. *quest. 13. artic. 5. ad 1.* Deinde verò loquens de Dæmonibus *quest. 16. de malo art. 3. ad 9.* dicit, quod *Voluntas quæ dicitur impossibile non est perfecta voluntas tendens in aliquid consequendum, quia nullus tendit in id quod existimat impossibile, sed est quædam imperfecta voluntas, quæ dicitur velleitas, quæ aliquis vellet id quod existimat impossibile, sed sub hac conditione si possibile sit. Talis autem non est voluntas aversionis, & conversionis in quâ meritum, & peccatum consistat.* Vbi tota nostra resolutio satis clarè traditur à D. Thoma.

Ex dictis etiam facile soluta manent oppositorum Authorum fundamenta. Quæ reducuntur ad hoc, quod potest aliquis appetere aliquid impossibile, non intendendo eius consecutionem, sed tantum complacendo, & delectando se in illo, sicut pœnitens vellet habere innocentiam, & non peccasse, quod tamen videt esse impossibile, & multa impossibilia fingimus in quibus delectamur. Item possunt Dæmones ex odio Dei velle illum non esse, & quod si posset, destruerent illum, quod non minus impossibile est quam velle se esse Deum: ergo sicut hoc modo appetit sine errore speculativo, ita sine eodem errore potuit ex superbia appetere se esse Deum in primo peccato. Item non obstat quod ad appetendum se esse Deum deberet appetere suum non esse: nam in primis non repugnat quod aliquis appetat non esse apprehendendo illud ut minus malum, quam tolerare alia plurima mala, quibus carere vult, etiam non existendo. Deinde quia potest quis in his impossibilibus solum appetere illam convenientiam boni imaginati, nihil cogitando de destructione sui esse, sicut homo potest cogitare, & desiderare se esse aem, se esse Angelum, nihil cogitando de destructione sui esse, sed delectando de convenientia illius boni. Et eodem modo potest quis delectari de habenda divinitate.

Cæterum ista ex dictis manent soluta.

Ad primum dicitur non repugnare quod aliquis cogitet, & simplici affectu delectetur de re impossibili, voluntate quadam imperfecta, ut ex D. Th. vidimus. Repugnat autem quod hoc assumatur ut finis ultimus, qui est finis cuius gratia; & sic affectu efficaci intenditur. Angelus autem inceptit peccatum suum ab aliquo fine ultimo, ut dictum est, cõque efficaciter desideravit id circa quod primo peccavit.

Ad

Ad secundum iam diximus posse ex odio Dei desiderare, & complacere de illis impossibilibus, & similiter posse simplici affectu desiderare se esse Deum, non tamen potuisse id esse motuum primi peccati, quia incipit in Angelo à voluntate finis ultimi, ut diximus, quæ semper efficax est de se.

Ad tertium similiter constat ex dictis, quod ideò non potest appetere se esse Deum, quia appeteret se non esse loquendo de appetitu efficaci, & intentino consecutionis, non de appetitu simplicis affectus, & velleitatis. Et quia in primo actu debebat Angelus incipere à fine circa quem non datur solum affectus simplex, sed etiam efficax; ideò bene inferitur non appetuisse Angelum se esse Deum in primo peccato, aliàs appetere se non esse, quia ille appetitus debebat esse efficax. Non tamen negamus posse appeti inefficaciter sine hoc quod appetat Angelus se non esse.

Quid de appetitu unionis hypostaticæ?

27 Circa secundum obiectum, scilicet circa unionem hypostaticam, an peccauerit Angelus illam appetendo sibi, & Christo homini inuidendo, multi negant, quia Angelus incepit peccatum suum à fine ultimo, & unio hypostatica neque est finis ultimus supernaturalis, quia non est beatitudo, neque naturalis, quia ad ordinem naturalem non spectat. Similiter Angelus superbiuit circa proprium decorem se eleuando, ut dicitur Ezech. 28. *Elevatum est cor tuum in decore tuo.* At non pertinet unio hypostatica ad perfectionem, & de ore Angelus in quo eleuaretur. Nec etiam potuit primum peccatum Angelus esse in recusando subici homini Christo, aut inuidendo illi, quia peccatum invidiæ, aut non subiectionis pertinet ad actum fugæ, non prosecutionis, primum autem peccatum Angelus debuit incipere à prosecutione alicuius finis mali.

Nihilominus res ista incerta est: Sed tamen cum certum sit Angelos in via habuisse notitiam huius mysterij per fidem, ut ex August. S. Thom. docet 2.2. quæst. 2. art. 7. ad primum, nulla apparet repugnantia quod inter obiecta materialia circa quæ eorum superbia in primo peccato se explicuit, unum etiam fuerit unio hypostatica inordinatè appetita ipsi naturæ Angelicæ, id est, solum ratione excellentiæ propriæ, & quia se digniorè existimavit illo summo honore: hoc enim ad superbiam pertinet, sicut fuit illa superbia magna Aman, quando in corde suo reputavit quod nullum alium Rex, nisi se vellet honorare, ut dicitur Esther 6. sic Diabolus qui omnium superborum est caput, existimare potuit quod tantum honorem, qualis est hypostatica unio, non deberet Deus nisi sibi tribuere non infirmæ humanæ naturæ, & in hoc maximè superbire. Est enim considerandum quod in superbia, licet formalis ratio, & motuum sit propria excellentia, tamen materia, in qua hoc exercetur multiplex est, & varia, sicut quidam excellentiam quarunt in nobilitate generis, alij in scientia, alij in opibus, alij in gloria, & virtute militari. Et non repugnat quod in his omnibus, vel pluribus aliquis excellentiam quarat, & superbiat. Sic ergo verisimile est in Angelo contigisse, qui quærens in propria excellentia superbire, etiam cum primo peccavit, potuit ex parte materiæ non solum proprium decorem inordinatè appetere, sed etiam unionem hypostaticam sub ratione cuiusdam excellentiæ, qua nullum alium nisi se existimavit dignam, & humanæ naturæ sibi longè inferiori talem celsitudinem communicari indignis-

simè tulit. Et licet in seipso, & in decore proprio superbiuit, tanquam in persona amata, & in fine cui, tamen ex parte rerum quas sibi ut fini, & ut personæ maximè dilectæ voluit, unum potuit esse summa illa excellentia unionis hypostaticæ, æstimans (sicut dicitur de Aman) nullum alium nisi se debere sic honorari à Deo. In hoc ergo nullam inuenimus repugnantiam, sed omnino conforme fuisse hoc obiectum immanissimæ illi superbiæ; potuitque hoc obiectum in primo ipso peccato Angelus inueniri, non per modum finis cui: hic enim fuit ipsemet Angelus, sed per modum rei sibi concupitæ, non adæquatè, sed inadæquatè inter plura obiecta materialia, quæ sibi potuit tunc appetere, & materiam excellentiæ propriæ facere.

28 An verò ita de facto contingerit? Res, ut dixi, incerta est, nec quidquam temerè pronuntiandum. Certè Isaiæ 14. inter multa quæ Lucifer pro suæ superbiæ materia desideravit, unum fuit, sedere in monte testamenti; *Sedebō, inquit, in monte testamenti, ascendam super altitudinem nubium.* Nominine autem montis testamenti Christum intelligi, satis notum est. Et hoc ad ipsum primum peccatum pertinuisse constat, quia totum illud inquit Propheta dixisse Luciferum in corde suo, quando manè oriebatur, id est, in ipso peccandi initio. Similiter Ezechielis 28. de eodem primo Angelo dicitur; *Eo quod elevatum est cor tuum, & dixisti, Deus ego sum, & in cathedra Dei sedi in corde maris, & dedisti cor tuum quasi cor Dei.* Quæ verba sine ulla violentia sic intelligi possunt, dixisti Deus ego sum, id est dignus sum Deus esse personaliter, seu hypostaticè, & sedere in cathedra Dei, sicut Christo convenit sedere in sede Dei. Unde hoc ipsum etiā insinuat Bernardus *serm. 69. in Cantica*, ubi significat affectasse Diabolum sedem Christi: *Sedes, inquit, illi (Christo) à dextris tuis, non sub pedibus. Quomodo audet quis pervadere locum unigeniti tui? Precipitetur. Ponit sibi sedem in excelsis. Subvertatur cathedra pestilentia.* Citatur etiam *serm. 17. in Cantica*: sed ibi id expressè non dicit, sed id quod infra ex ipso referemus.

29 Fundamenta opposita contra hoc nihil convincunt. Fatemur incepisse Angelum peccare à fine ultimo non bono, sed deordinato; in quo fine includitur finis cui, id est, ipsemet Angelus, & finis qui, id est, res volita sibi tanquam materia propriæ excellentiæ. Et in hac materia unum ex rebus volitis fuit unio hypostatica, non in quantum adhæsiō ad Deum: sic enim adhærere Deo, etiam in unitate personæ bonum est, sed in quantum excellentia quædam, qua nullum præter se dignum æstimabat. Et sic licet unio hypostatica secundum se non sit finis ultimus, id est beatitudo siue supernaturalis, siue naturalis, potest tamen inordinatè aliquis desiderare illam ut materiam finis ultimi inordinatè, id est, ut materiam excellentiæ propriæ inordinatè desideratam.

Ad secundum dicimus quod in proprio decore elevatum est cor Angelus tanquam in fine cui, amando se ut personam quam summè diligebat, & quam omni honore dignam iudicabat; & sic ex parte materiæ, & rei volitæ pro excellentia potuit sibi ita pulchro, & decore in æstimatione, velle unionem hypostaticam ut materiam magnæ excellentiæ, qua solum se æstimabat dignum. De peccato invidiæ contra Christum hominem, dicimus illū non, posse esse primum peccatū Angelus, sed supponere affectum malum erga finem ultimum, qui præcedere debet in Angelo alia peccata, & motū illum invidiæ, qui pertinet ad fugam, seu abominationem.

Aduer-

Aduertendum tamen est hunc appetitum excellentiæ circa vnionem hypostaticam non eodem modo in omnibus extitisse, quia non omnes desiderabant sibi personaliter vnionem hypostaticam, sed desiderabant fortasse fieri in natura Angelica potius, quàm in humana; & supremus Angelus desiderabat sibi illam personaliter, quia sedere voluit in monte testamenti, & in cathedra Dei.

30 Circa tertium obiectum, scilicet circa beatitudinem supernaturalem, an circa illam exercuerint Angeli peccatum superbiæ? Dicimus, etiam in primo peccato Angeli interuenire potuisse superbiam circa supernaturalem beatitudinem recusando, & despiciendo illam, taliter quòd virtualiter, & interpretatiue voluit, non ex Dei gratia eam habere, sed ex propriis viribus, neque vt communem multis, formaliter autem solum voluit eam efficaciter recusare, & in sua naturali felicitate, & pulchritudine quiescere. Vnde non debet separari in Angelo recusatō beatitudinis supernaturalis à delectatione quiescendi, & manendi in sua naturali felicitate, sicut homo peccans per appetitum rerū inferiorum, & sensibilem recusat simul spiritualia, & superiora bona, licet vellet ea habere sine labore, & non carendo fructu rerum sensibilium. Sic se habuit in Angelo naturalis pulchritudo, & felicitas unicuique propria, & ex propria excellentia habita, & supernaturalis beatitudo vt communis multis, & ex gratia Dei habita, quod istam recusat, quia communis omnibus, & ex gratia, quæ sunt duæ conditiones valde oppositæ tumori superbo, & primam amplectitur, in eaque requiescit, quia propria, & ex propriis habita.

31 Hanc sententiam puto esse mentem ipsissimam D. Thomæ, & per eam optimè explicari quomodo hic interuenit vera superbia, & non error speculatiuus, licet practicus non defuerit, quæ est inconsideratio, & imprudentia omnibus peccatis communis. Propter quòd pars ista de supernaturali beatitudine difficilis visa est aliquibus Authoribus, & vel negant circa hoc obiectum fuisse peccatum superbiæ Angelicæ, vel diuertunt à sententia D. Thomæ in explicando quòd voluerit non ex gratia, sed virtute propria obtinere illam beatitudinem. Nam P. Suarez *lib. 7. de Angelis cap. 11.* absolute docet, esse impossibile affectum illum in Angelo circa beatitudinem supernaturalem propriis viribus obtinendam, vel debitam sibi, etiam si affectus sit simplex, nisi detur aliquis error speculatiuus in intellectu, quòd falsò putet possibile esse; comparare sibi beatitudinem propriis viribus. Addit tamen *ibi num. 7. & 8.* quòd licet Angelus euidenter cognoscat se non posse physicè obtinere beatitudinem illam viribus propriis, nec laborasse hæresi, & errore contra fidem circa hoc, tamen non repugnare quòd errauerit Angelus, putans, sicut Pelagius, habere ex se meritum de condigno, vt Deus daret sibi beatitudinem. Cui assentit P. Alarcon *tract. 6. de Angelis disp. 9. cap. 2. num. 9.* licet existimet culpabilem hunc errorem non fuisse primum peccatum in Angelo. Concedit tamen Suarez *ibidem à num. 19.* potuisse habere Angelum superbiam circa quandam circumstantiam beatitudinis supernaturalis, desiderans illam citius sibi dari, quàm à Deo decretum fuerat, & indignè ferens non statim sibi concedit. Quod ego non credo, quia si Angelus cernebat se non posse habere gloriam nisi per meritum, non potuit breuius meritum desiderare quàm per vnicum instans continuatione facta post creationem, quo posito statim ei dare-

tur beatitudo. Alij, vt Vasquez, *disp. 135. cap. 3.* recurrunt ad effectum simplicem, & inefficacem circa beatitudinem, volendo, & complacendo sibi de consecutione illius ex propria virtute, & sine meritis, de quo affectu interpretatur S. Thomas *in hoc art. 3. quest. 63.* dum dicit, *voluisse Angelum beatitudinem illam habere ex virtute sua, non ex diuino auxilio.* Et sententiam Suarez sequuntur Molina *ad art. 2. & 3. huius quest. 63. membr. 5.* Becanus *lib. 3. de Angelis cap. 4. quest. 7.* Sententiam autem Vasq. sequitur Arrubal, *disp. 178. cap. 3. & 4.* Alarcon *supra cit.* & alij.

Cæterum vt sententia D. Thomæ, quæ verissima est, quàmque sequuntur communiter discipuli eius, explicetur, notandum est quòd circa beatitudinem supernaturalem, quæ est vltimus finis, dupliciter potuit inordinata superbia Angeli considerari.

Primò volendo eam positiue, siue appetitu efficaci, siue inefficaci habere ex propriis meritis sine Dei auxilio.

Secundò volendo eam efficaciter recusare cum illis conditionibus quibus à Deo proposita fuit, scilicet vt communis tam Angelis, quàm hominibus, & vt habenda ex gratia, & beneficio speciali Dei atque auxilio eius, non ex meritis propriis, aut debito aliquo connaturali. Istæ enim duæ conditiones vehementer opponuntur singularitati, & superbiæ, qua ille spiritus volebat singularitatem, & appetebat excellentiam. Vnde potuit beatitudinem supernaturalem vt propositam sub his conditionibus efficaciter recusare, & sic recusando superbire, tacite insinuando quòd sine istis conditionibus eam libenter amplecteretur, quòd est virtualiter velle habere beatitudinem propriis viribus, seu non ex gratia Dei, quatenus recusans habere illam ex gratia, & vt communem hominibus, tacite, & virtualiter non recusaret illam sine prædictis conditionibus, quòd multoties constat contingere inter homines, qui renuunt acceptare aliquam dignitatem, vel munus cum tali onere vel pensione, quam iudicat esse indignam, quam tamen sine illo onere acceptarent, & interim ex propriæ excellentiæ æstimatione prouenit recusare illud munus cum illo onere.

Sic ergo dicimus Angelum non peccasse peccato superbiæ intendendo prosecutionem beatitudinis supernaturalis positiue, neque efficaciter, quia euidenter iudicabat esse impossibile quòd viribus naturalibus id deberetur, vel physicè acquireretur. Nec in hoc habuit errorem Angelus, aut hæresim, quia non conuenit naturæ illi ita perfectæ errorem speculatiuum incurrere, neque hæresim habuisse constat, neque in isto errore potuit primum eius peccatum poni, quia non conuenit tam perfectæ naturæ incipere ab errore speculatiuo, quæ magnum defectum supponit. Nec inefficaci solum appetitu complacendo, & delectando de consecutione beatitudinis ex propriis viribus peccauit Angelus, quia, vt ostensum est *supra* agendo de appetitu æqualitatis Dei, Angelus in primo peccato non potuit solum peccare ex inefficaci appetitu, sed ex aliquo fine efficaciter intento, & cuius gratia cætera appetenterentur: & de facto peccauit appetendo aliquid quòd assequi tentauit, non circa quòd inefficaci tantum complacentia elanguit, vt ibi ostendimus. Et sic omnia quæ diximus contra inefficacem appetitum æqualitatis diuinæ, currunt hic contra inefficacem appetitum beatitudinis. Nec denique superbiuit appetendo positiue aliquam

aliquam circumstantiam beatitudinis, ut quod citius daretur sibi beatitudo, aut aliquid simile ut iam supra ostendimus: satis enim citò data est beatitudo, supposito quod ex meritis dari debuit, cum data fuerit post primum instans meriti continuatum, ut seq. disp. dicetur. Nec assignari poterit aliqua circumstantia in beatitudine supernaturali, quam ex propriis viribus posset desiderare Angelus, & non ex gratia, supposito quod ipsam beatitudinem eiusque assecutionem in singulari non poterat ex viribus propriis desiderare consequi.

34 Ex alia autem parte recusatio beatitudinis supernaturalis ut sibi onerosa cum illis conditionibus quod habenda esset ex gratia Dei, & cum communicatione ad homines est obiectum valde congruum superbiæ Angelicæ, quia videntes dignitatem suam, appetierunt singularitatem, quæ maximè est propria superbiorum, præsertim refugiendo communicare cum inferioribus, quales erant homines; & similiter noluerunt aliquid sibi dari ex gratia, & alieno beneficio, quasi nulla aliter gratia indigendo, quod etiam videmus passim in hominibus superbis inueniri. Hoc ergo maximè fuit possibile, & congruum superbiæ Angeli. Nec aliter voluerunt in sua naturali beatitudine sistere, & ea esse contenti, nisi quia per hoc recusarunt superiorem beatitudinem, ut ex speciali gratia sibi dandam, & ut communem cum hominibus; quorum neutrum habebant in fruitione propriæ, & naturalis beatitudinis.

35 Et hoc ita de facto contigisse suadet tum Patrū, & D. Thomæ in hac parte explicatio, tum Scripturæ insinuatio. Nam ex Patribus Bernardus hoc apprimè attigit *serm. 17. in Cantica*, qui locus licet citetur ad probandum quod Angelus appetiit unionem hypostaticam, reuera tamen id non expressit, sed solum id quod à nobis circa supernaturalem beatitudinem dictum est, his verbis: *Potuit contingere (si tamen incredibile non putetur) plenum sapientia, & perfectum decore homines præscire potuisse futuros etiam, & profecturos in parem gloriam, sed si præsciuit, in Dei verbo, absque dubio vidit, & in suo linore invidit (intellige in verbo non clarè viso, sed per aliquam reuelationem specialem) & molitus est habere subiectos, socios dedignatus. Inferiores sunt, inquit, inferioresque natura, non decet esse concives, nec aequales in gloria. An forte prodit impiam hanc eius machinationem illa præsumpta ascensio, sessioque significans magisterium? Ascendam, inquit, super montem excelsum, & sedabo in lateribus Aquilonis, quo Altissimi quandam proinde similitudinem obtineret, si quemadmodum ille super Cherubim sedens gubernat omnem Angelicam creaturam, ita & ipse altus sederet, regeretque genus humanum.* Ecce expressam à Bernardo superbiæ illius diabolicæ magnitudinem circa beatitudinem supernaturalem, recusando illam habere sine singularitate propria, sed communem cum hominibus; ex quo consecutum est quod voluerit specialem super eos habere prælationem potius quam communicationem, ut etiam D. Thom. fatetur in hac q. 63. art. 3. in calce. Accedit ad hoc autoritas S. Gregorij Papæ 34. *Moral. cap. 13. alias 17. vel 14. ubi inquit, Angelos perdidisse participatam celsitudinem, quia priuatam desiderauerunt, id est, recusarunt cælestem beatitudinem, quia participata, & communis erat multis, & solum voluerunt priuatam, scilicet quatenus priuatam, & propriam, quia prout sic habebat duas condiciones maximè opportunas superbiæ, scil. singularitatem, seu nihil commune habere cum inferioribus, quod ipsis vulgare videbatur, etiam si esset gloria supernaturalis, & non habere il-*

lam ex speciali beneficio, & gratia, & quasi precario: hoc enim maximè recusant superbi, & maximè recusavit Angelus. Et ad hoc pertinet parabola illa Lucæ 14. de homine qui fecit cœnam magnam, & vocavit multos, & cum vocasset inuitatos cœperunt se excusare: ideo enim fortassis recusauerunt ad illam cœnam venire, quia magna erat, & pro multis, dedignantes consortium habere cum tanto numero, potiusque elegerunt suas priuatas comoditates, licet longè inferiores, utpote naturalis ordinis, iste quia villam emit, ille quia iugaboum, alius quia uxorem duxerat, unusquisque propriam excusationem prætendens, & priuatum bonum, quia proprium, recusans verò cœnam, quia magnam, & multis communem. Iste est propriissime spiritus superbiæ. Denique August. relatus à Suarez lib. 7. de Angelis cap. 11. inquit 12. de Ciuit. cap. 1. quod Angelus ipse sibi ad vitam beatam sufficere voluit. Et inf. Mali Angeli sua potestate delectati velut bonum suum sibi ipsi essent à superiori bono ad propria defluerunt. Et idem refert D. Tho. ex August. libro de libro arbitrio, & 4. de Genesi ad litteram, in q. 16. de malo art. 3.

Accedit ad hanc mentem S. Tho. qui perpetuo docet recusasse Angelum habere beatitudinem supernaturalem ex gratia, volendo sistere in sua naturali beatitudine; & ita si appetiit beatitudinem supernaturalem, appetiit illam ex virtute propria. Videatur in hac quæst. 63. art. 3. ibi inquit: *In hoc appetiit esse similis Deo, quia appetiit ut finem ultimum beatitudinis id, ad quod virtute sua natura poterat peruenire, auertens suum appetitum à beatitudine supernaturali, quæ est ex gratia Dei (qui sermo est valde formalis in D. Tho. scilicet auertens, seu recusans beatitudinem supernaturalem, quia est ex gratia). Vel si appetiit ut ultimum finem illam Dei similitudinem quæ datur ex gratia, voluit hoc habere per virtutem suam naturam, non ex diuino auxilio secundum Dei dispositionem. Et hoc consonat dictis Anselmi, qui dicit quod appetiit illud ad quod peruenisset si steteret. Et hac duo quodammodo in idem redeunt, quia secundum utrumque appetiit finalem beatitudinem per suam virtutem habere, quod est proprium Dei.* Ecce formalis ratio quam habuit superbia Diabolica pro intento, scilicet habere beatitudinem, non ex gratia, neque ex beneficio speciali; ad quod non requiritur quod posituè intenderit habere beatitudinem supernaturalem ex virtute propria, sed quod recusauerit illam habere, si ex gratia habenda erat, virtualiter intendens quod si non ex gratia haberetur, illam velleret. Videndus est etiam S. Doctor in 3. contra Gentil. cap. 110. ibi inquit, quod Angelus non appetiit aliquod bonum, nisi unum quod est sibi proprium, sed in hoc fuit peccatum, quia prætermisit superius bonum, in quod debuit ordinari: sicut enim in nobis peccatum est ex hoc, quod bona inferiora, scil. corporis appetimus absque ordine rationis; ita in Diabolo peccatum fuit in hoc, quod proprium bonum non retulit in diuinum bonum. Iuxta hunc sensum intelligitur quod dicit in quæst. 16. de malo art. 2. ad 4. quod Diabolus non appetiit aliquod malum, sed quoddam bonum sibi conueniens, inordinate tamen, & immoderate illud appetiit, quia scilicet non appetiit illud, ut assequendum per diuinam gratiam, sed per propriam virtutem, quod excedebat modum suæ conditionis. Et art. 3. seq. Fuit primum peccatum Diaboli in hoc quod ad consequendam supernaturalem beatitudinem quæ in plena Dei visione consistit, non se erexit in Deum, tanquam finalem perfectionem ex eius gratia desiderans cum Angelis sanctis, sed eam consequi voluit per virtutem suam naturam, non tamen sine

sine Deo in naturam operante, sed sine Deo gratiam conferente. Quæ testimonia licet significare videantur fuisse in Angelo intentum consequendi positivè gloriam sine gratia, quod sine errore speculationis stare non poterat, quem D. Thom. perpetuò negat in Angelis intervenisse, tamen re vera non sunt intelligenda de intento positivè consecutionis formaliter, sed solum virtualiter, & indirectè recusando illam habere ex gratia, quod est virtualiter velle, si non esset ex gratia; quia aliàs esset contradictio in D. Thom. negante Angelo errorem speculationum ex vna parte, ut patet in hac quest. 63. art. 1. ad 4. & 3. contra Gentil. cap. 110. ad primam rationem, & supra quest. 58. art. 5. & quest. 16. de malo art. 6. & alibi sæpe, & ex alia parte concedente intentum formaliter, & positivè consequendi gloriam ex propriis meritis, cum id sit omnino impossibile. Et quia satis se explicat loco cit. ex c. 10. in 3. contra Gentil. & in art. 3. huius quest. 63. ubi circa beatitudinem supernaturalem admittit Angelum se habuisse per modum avertionis, seu recusationis, nolens illam ex gratia, & beneficio Dei, unde virtualiter, & tacitè admitteret illam, si non esset ex beneficio gratuito, sed ex virtute propria. Et hanc tacitam, seu virtualem volitionem beatitudinis ex propriis meritis solum ponit D. Th. in Angelis hoc ipso quod admittit illos peccasse avertendo suum appetitum à supernaturali beatitudine, nec volendo illam ex gratia. Et quando addit quod si appetierunt ut finem ultimum beatitudinem sic assequendam, ex virtute propria voluerunt illam, statim subdit, quod hoc in idem redit cum illo priori appetitu, quo voluerunt naturalem suam beatitudinem avertendo se, aut recusando illam habere ex gratia, quia hæc recusatio beatitudinis, ut ex gratia habenda, est virtualis volitio assequendi illam, non ex gratia.

37 Unde in sententia D. Tho. non debemus separare duos actus superbiæ, unum circa beatitudinem naturalem volendo in illa sistere, alium circa supernaturalem intendendo illam consequi ex propriis viribus, sed unus, & idem actus fuit, eademque superbia, recusans habere ex gratia, & beneficio Dei supernaturalem beatitudinem, & positivè eligens in propria sistere, quam illam supernaturalem ex gratia habere. Et hoc idè quia appetitus efficax, & positivè intentivus gloriæ ex propriis viribus est planè impossibilis, etiam homini stulto, nec dum Angelo intelligentissimo. Appetitus autem recusativus gloriæ ut beneficii gratuiti non potest sufficere ad statuendum primum peccatum Angeli sine altero appetitu, quo vellet sistere in sua naturali felicitate, & excellentia, quia ille primus appetitus est recusationis, & fugæ, ultimus autem finis debet apperi ut prosequendus, nec possumus pro primo peccato, qui in Angelo incipit ex intentione finis assignare solum illam fugam, seu recusationem, non assignando prosecutionem. Ergo si Angelus deliquit circa finem supernaturalem recusando illum ut ex gratia, licet si ex virtute propria esset, non recusaret illum, oportet quod in ipso delicto superbiæ assignetur etiam finis in quo requiritur, & quem prosecutus est, scil. in propria excellentia naturali sistere, potius quam aliquid ex gratia habere.

38 Ex hoc autem solvantur omnes difficultates, quæ contra hoc fieri possunt. Et ferè tota instantia contra D. Thom. fit in hoc, quia non potuit appetere consecutionem beatitudinis supernaturalis ex propriis viribus, nisi vel iudicando illam possibilem, & hic esset magnus error, etiam in speculatione, vel iudicando illam impossibilem, & hoc esset ma-

Ioan. à S. Thom. in 1. part. D. Th. Tomus alter.

gna stultitia, conari in talem consecutionem; vel esset solum inefficax, & simplex affectus illius beatitudinis sine merito, & talis affectus non servit pro ultimo fine appetendo, quia appetitus talis finis debet esse efficax, & positivè intendens, cum sit id cuius gratia. Vel si in eo aliquod peccatum fuit, potius fuit omissionis, quam commissionis, quia omisit tunc agere, & velle quod oportebat circa suam salutem, otiosè occupatus circa illam simplicem delectationem, & imaginariam beatitudinis habendam sine meritis. Item quia velle assequi beatitudinem sine auxilio Dei potius est peccatum presumptionis contra spem, aut magnanimitatem, quam superbiæ contra humilitatem; & sic frustra per illum actum explicamus superbiæ Angelicæ aut saltem peccati Angelus, & laboravit hæresi Pelagij, putans sufficere ad beatitudinem supernaturalem naturales vires, ex quibus haberi posset meritum de condigno talis beatitudinis.

Hæc omnia iuxta nostram explicationem carent 39 vi, nec oportet in eis immorari: nec enim nos dicimus peccatum superbiæ in Angelo processisse ex iudicio intendente consecutionem beatitudinis sine gratia, seu ex viribus propriis: huiusmodi enim consecutio non potuit esse intenta sine errore, sed orta fuit ex iudicio recusandi quodlibet bonum, etiam gloriam ex gratia, & beneficio alieno, & sine singularitate aliqua, sed communicando cum inferioribus: hoc enim maxime dedignantur superbi. Et quia Dæmones superbissimi fuerunt, idè omnem communicationem cum aliis inferioribus, etiam in gloria, & omnem modum habendi aliquid ex gratuito beneficio, & non ut debitum, etiam gloriam ipsam recusarunt: unde virtualiter voluerunt illam, si non esset ex gratia, sed ex propria virtute assequibilis. Et sic nullo modo ex relatis in argumento voluerunt positivè, & formaliter beatitudinem, sed efficaciter voluerunt illam recusare, quia erat ex gratia, & communicabilis omnibus, virtualiter autem volebant illam, si sic non esset: efficaciter verò, & positivè adhærebant propriæ excellentiæ ut fini, quia ibi tales conditiones non inveniabant, sed erat propria non communis, & non ex gratia speciali, sed solum iure creationis conveniens. Nec in hoc fuit peccatum omissionis, sed commissionis, quia voluerunt inordinatè adhæreere propriæ excellentiæ, recusando supernaturalem, ad quam ex gratia ordinabantur à Deo. Semper Diabolus gratiam Dei abominatus est. Nec in hoc habuit peccatum presumptionis contra spem, aut contra magnanimitatem, sed superbiæ contra humilitatem, quia ipsi noluerunt consequi beatitudinem sine meritis, sicut vult presumptuosus, sed recusarunt illam, si erat habenda per gratiam, quod faciunt superbi. Nec oportet illi attribuire errorem Pelagij de habendo merita condigna ex propria natura, quia ipsi non volebant consequi formaliter, & de facto gloriam per sua naturalia, sed recusabant habere illam, si per gratiam consequenda erat, ut verè erat. Unde non habuerunt errorem speculationum Pelagij, sed habuerunt maximam superbiæ, unde eripit scintilla erroris Pelagij.

Circa quartum obiectum, scil. beatitudinem naturalem, an fuerit materia superbiæ Diaboli: Dicimus sine dubio fuisse, ut constat ex D. Thom. supra relato. Sed dubitant aliqui Authores, quomodo in hoc appetitu propriæ excellentiæ, & naturalis felicitatis fuerit peccatum, aut si fuit, quomodo fuerit superbiæ? Nam in appetitu propriæ, & naturalis felicitatis secundum se peccatum non est, imò, ut supra diximus artic. 1. non potuit Angelus peccare, si nudè, & præcisè sisteret in suis natura-

A a a

libus

libus, quia ad illam erat omnino necessitatus, & determinatus, sed oportuit quod haberet respectum aliquem ad supernaturalia bona. Si autem consideretur ordo ad supernaturalem beatitudinem, non apparet quomodo interuenerit ibi peccatum superbiae sine errore speculatio, quia ad peccatum superbiae oportebat quod excellentiam suam ita extolleret, ut praeter illam despiceret supernaturalem, vel iudicando esse inferiorem, vel impossibilem, aut non necessariam, vel non futuram ex Deo, quod totum sine errore speculatio stare non potuit. Si autem diuertit à beatitudine supernaturali, eamque recusauit, non cum tali errore speculatio, sed solum cum practico, recusando illam ut difficilem sibi, aut grauem; & propterea solum quiescendo in tali felicitate naturali, quae magis sibi est facilis, tunc non erit illud peccatum formaliter superbiae, sed pusillanimitatis, vel pigritiae, volendo hoc bonum, non quia proprium, & excellens, sed quia facilius, minusque molestum, sicut homines defluunt ad sensibilia bona, relictis spiritualibus, quia illa apprehenduntur ut faciliora, minusque molesta, quod non est peccatum superbiae, sed pigritiae, seu accediae. Et urgetur secundò, quia velle propriam, & naturalem felicitatem relictam superiori, & supernaturali, potius est descendere, quam ascendere, nec oportet multum negotiari in tali felicitate quaerenda, cum ex natura sua eam habeat. At peccatum Luciferi describitur per modum ascensus, & exaltationis, Isai. 14. non descensus ad inferiora, & per modum negotiationis Ezech. 28. ut *suprà* ponderatum est. Non ergo in naturali felicitate quaerenda fuit peccatum illud superbiae. Et si dicatur fuisse tendentiam in excellentiam naturalem per modum exaltationis, quatenus volebat eam non ordinare in supernaturalem beatitudinem. Contra hoc est, quia tunc formaliter solum esset peccatum omissionis referendi naturalem excellentiam in Deum, & non excoendi tunc actum charitatis, quod quidem erat contra praeceptum affirmatiuum supernaturalis ordinis, tunc obligans, non tamen constituens naturalis excellentiae appetitum in ratione superbiae, siquidem tota malitia illius appetitus reducitur ad hoc, quod fuit causa illius omissionis, & fractionis praecepti tendendi, & ordinandi se ad supernaturalia.

Nihilominus ex dictis circa appetitum recusandi beatitudinem supernaturalem, manet explicatum qualiter iste appetitus sistendi in naturali excellentia fuerit peccatum, & propriissime peccatum superbiae, ut D. Thom. *in art. 3. huius q. 9.* affirmat, & sequuntur omnes eius discipuli, licet id neget Suar. *lib. 7. de Angelis, c. 10.* putans ad id necessariam fuisse errorem speculatiuum quo iudicaretur beatitudo supernaturalis, ut non necessaria, aut non possibilis, vel futura. Et sequuntur ipsum Arrubal *hic disp. 178. c. 3.* Becanos, Molina, Esthius, & alij quos citant Salmanticenses Carmelit. *tract. de Angelis disp. 10. dub. 5. n. 161.* Vasqu. autem *hic disp. 235. c. 5.* licet putet naturalem beatitudinem ut excellentem potuisse esse obiectum superbiae in Angelo, recurrit tamen ad illum simplicem affectum, quo potuit sibi displicere supernaturalis beatitudo, ut per merita acquisibilis, tanquam sibi difficilis, & morosa, atque ita quiescere ut in fine ultimo in sua naturali excellentia, quod etiam concedit Alarcon, *ubi supra disp. 9. c. 2. n. 6.*

Ego autem iuxta superius dicta affirmo natura-

lem felicitatem placuisse Angelo, non solum ut commodiorem, minusque molestim in acquirendo, sicut homines male blandas carnis delicias amant, ne spiritualium austeritate molestantur: hoc enim parum poterat Angelum irretire, sed placuisse Angelo ex affectu superbiae, non quia suam naturalem felicitatem simpliciter, & absolute, & quasi entitatiue excellentiorem putauit supernaturalem, aut istam esse impossibilem, vel sibi non necessariam, vel utilem, sed quia suam naturalem, & propriam excellentiam iudicabat non haberi ex speciali gratia, & beneficio Dei, sed iure creationis, nec ut multis communem, sed sibi singularem; supernaturalem autem beatitudinem utraque conditione, ista carere, & ideo recusabat supernaturalem beatitudinem sub hac praecisa consideratione, ut ex gratia, & ut communem multis, quiescebat verò in propria ut habita iure creationis, & non ex speciali gratia, neque communiter ad multos, licet alias excellentiorem iudicaret supernaturalem beatitudinem, sed non ut sibi conuenientem cum tali onere gratuiti beneficii, in quo nullus interueniebat speculatiuus error, quia totum hoc quod iudicabat verissimum erat, sed interueniebat summa superbia, quia ipse speculatiue iudicabat beatitudinem supernaturalem dari ex beneficio gratuito, & communiter tam Angelo quam homini, & hoc verum erat, iudicabat quoque suam excellentiam naturalem, licet longè inferiorem, esse tamen sibi peculiarem, nec ex gratia speciali, sed iure creationis sibi dari. Errabat autem practice, quia singularitatis audax, & impatiens dependentiae ab aliena gratia, & nolens quidquam precario habere, ante posuit inferiorem excellentiam ut propriam, & non ex gratia speciali, excellentiae superiori, ut ex gratia dandae. Et in hoc tantum errauit practice, quantum superbiuit.

Vnde ad rationes in contrarium manifestè patet 4^a solutio.

Ad primam dicitur, verum esse quod non peccauit Angelus in appetitu naturalis excellentiae, nisi cum ordine ad supernaturalem, nolens hanc admittere cum tanta subordinatione ad gratiam. Nec errauit speculatiue circa ipsam, ut ostensum est, quia iudicauit verè, quod solum ex gratia sibi datur, sed noluit sic habere. Errauit autem practice recusando illam non ex pusillanimitate aut pigritia, quasi grauem, aut molestim sibi, sed ex superbia, quia videbat illam ut gratuito beneficio dandam, & communicandam aliis, quod in sua naturali excellentia non datur; & ideo licet inferior esset, magis illa delectabatur.

Ad secundam dicitur quod licet Angelus verè descendit relinquendo superiora bona, & ut Aug. *suprà cit.* dicit *defluxit ad propria*, tamen in sua apprehensione ascendebat, & magna negotiatione, conabatur aliis ostendere, & satisfacere, se in hoc magis Dei similitudinem intendere, quia minus dependenter ab eius gratia, minusque precario, & magis singulariter, & non communicando cum inferioribus procedebat, & sic debere omnes hoc solum procurare, ut in sua naturali excellentia manerent recusando supernaturalem. Vnde in hoc non erat formaliter peccatum omissionis, sed superbiae, quia non solum frangebat praeceptum affirmatiuum conuertendi se supernaturaliter in Deum, sed positiue appetebat nihil habere ex gratia speciali, nec commune cum aliis, etiam si entitatiue esset melius, quod est peccatum commissionis superbiae.

QVÆSTIO LXIV.

De Pœna Dæmonum.

S V M M A L I T T E R Æ.



QUATUOR pœnas Dæmonum per quatuor articulos explicat D. Thom. Prima est obreuebratio in intellectu. Secunda obstinatio in voluntate. Tertia dolor de malo pœnæ sibi inflictæ. Quarta locus pœnalis in quo patiuntur.

Circa primum ostendit in 1. articulo quod intellectus speculatiuus Dæmonum non est obreuebratus, quia quantum ad naturalem cognitionem nihil in eis diminutum est, quantum verò ad supernaturalem de mysteriis fidei, non est totaliter ablata ab eis speculatiua cognitio, sed diminuta: accipiunt enim eam cognitionem de istis quæ oportet. At verò affectiua cognitio, quæ ad amorem ducit honestum, totaliter in eis extincta est.

In 2. artic. ostendit voluntatem Dæmonum esse obstinatam in malo, ita quod non possit reuerti ad bonum, quod non est ex grauitate culpæ, sed ex conditione status, quia sunt extra statum viæ Angeli post casum, sicut homines post mortem. Conueniens autem fuit Angelos in suo casu terminare viam, quia ex sua natura immobiliter apprehendunt, quando perfectè se determinant, quia sine discursu agunt. Vnde postquam perfectè se determinarunt circa obiectum viæ, non est quod amplius durarent in ea.

In 3. artic. ostendit esse in Dæmonibus dolorem, non secundum quod dolor est passio sensibilis, sed ut dicit renitentiam voluntatis ad ea quæ sibi sunt contraria, sicut quod recludantur in igne, & ab eo detineantur, & impediuntur, &c.

In 4. artic. ostendit quod locus pœnalis, qui debetur Dæmonibus ratione suæ culpæ est infernus, quod detrudentur omnes post diem iudicii. Nunc autem propter exercitium hominum aliqui sunt in hoc mundo, & aëre caliginoso, alij in inferno ad torquendum damnatos.

DISPUTATIO XXIV.

De termino viæ Angelorum, & damnatione Dæmonum.

ARTICVLVS I.

Quot instantibus via Angelorum fuerit terminata?



SICUT à nobis sæpè dictum est, instantia Angelica non nostri temporis instantibus regulatur, aut eis solùm correspondent, sed regulantur operationibus ipsis Angelicis, quæ indiuisibiles sunt; & idè instantia vocantur, quia licet earum duratio multo tempori nostro æquivalere possit, tamen in se actus ille successionem, & partibus caret, idèque duratio est indiuisibilis, seu instantanea: hoc enim est proprium Angelicæ operationis propter perfectionem suam, quod non per partes, neque per successionem actus eius continuantur, aut variantur, sed simul, & indiuisibiliter actu suo attingit quicquid ad obiectum talis actus pertinet, vel cum eo connexionem habet, quia non discursu procedit, sed comprehensione.

Ioan. à S. Thom. in 1. part. D. Th. Tomus alter.

Vnde quilibet actus cum in se successionem careat, & indiuisibilitate gaudeat, eius duratio successiva non est, sed instantanea.

Est tamen aduertendum, quod operationes Angelicæ non constituunt diuersa instantia, & durationes propter accidentalem, & extrinsecam variationem, sed propter intrinsecam, & substantialem. Tunc autem intrinsecè, & substantialiter variatur actus, quando essenziale obiectum, & formale variatur, ita quod non sit compossibilis attingentia vnus, & alterius obiecti in eodem actu. Nam si plura obiecta sub eadem ratione formali, & motu continentur, ad eandem attingentiam pertinent, & per se, & quantum est ex vi actus petit Angelus eodem actu ea attingere, licet per accidens, & ex defectu obiecti possint aliquando de nouo aliqua attingi eodem actu perseverante, vel sub diuerso modo accidentali, v. g. sub diuersa intensione vel extensione, ut si in aliquo actu amoris perseverans Angelus, intensius effervescat, aut si considerante ipso aliquam speciem, seu naturam, v. g. hominem, & eius individua, nascatur de nouo aliquod individuum quod modò de nouo videt, non est necesse propter illam nouam extensionem mutare actum, quia est extrinseca, & accidentalis mutatio. Quare ad distinguendum ista instantia quibus terminata est Angelorum via, oportet discernere tria.

Primum quod attinet ad principium viæ, quod fuit in initio creationis, quantum duravit illud initium, in quo omnes in veritate steterunt.

A A a 2

Secunda

Secundum quoad progressum viæ, quinam actus in ea interuenerunt, & an vno actu consummata sit, & quomodo in illo à primo instanti creationis se discriminauerunt aliqui, alij verò continuauerunt.

Tertium quantum ad terminum viæ, an in eodem instanti fuerit simul meritum, & gloria, peccatum, & pœna, via, & terminus, eo quod videntur ista considerari vt connexionem habentia inter se, & ad eundem finem, & motiūm pertinentia.

*Primum initium viæ seu primum instans
solum durauit per durationem
correspondentem nostro
instanti?*

2 Non est in hac parte concors Theologorum sententia, sed multi tenent durasse malos Angelos in gratia per aliquale tempus, seu morulam ultra primum instans suæ creationis, licet diuerso fundamento ducantur. Vasquez enim in *presenti disp.* 229. c. 10. existimat generaliter nullam operationem Angeli posse correspondere vnico instanti solum nostri temporis, imò nihil posse durare vnico instanti nisi ipsum instans aut mutatum esse, quia hæc desinunt per vltimum sui esse, hoc ipso quod immediate post instans sequitur aliqua pars temporis, vel motus. Quæ autem desinunt per primum non esse, si tantum vnico instanti durarent, hoc ipso darentur duo instantia immediata, quod in nostro tempore est impossibile: ergo neque quod instans Angeli, seu operatio correspondeat solum vnico instanti nostri temporis, & desinat, incipiatque immediate post alia operatio, quæ vtrique in instanti incipit, cum sit indiuisibilis. At verò Suarez lib. 7. de Angelis c. 21. Nazarius hic qu. 63. art. 6. controuersia vnica, & alij mouentur ex eo quod incredibile videtur solum vnico instanti indiuisibili etiam quoad nos tam multa gessisse Angelos, qui etiam ante lapsum in deliciis paradisi Dei fuerunt, & perfecti dicuntur ambulasse Ezech. 28. nec videtur ita connaturale libero arbitrio, & directioni quæ fit per intellectum ita operari vt vnico indiuisibili instanti daret in operatione sua: neque id etiam coherere videtur cum motione illa diuina quæ ita mouit in primo instanti vt durauerit etiam post primum illud instans creationis in bonis Angelis, qui continuauerunt meritum: ergo etiam in aliis durauit post illud primum instans siquidem in ea motione operabatur Deus, vt proptius, & specialis author Angelicæ naturæ, & sic erat communis omnibus illa motio, & ultra hoc deserviebat ad constituendum Angelum in actu primo vt procederet ad electionem omnino liberam, & plenè sui iuris: ergo cum n. Angelus peccans post primum instans elegerit ex plena libertate, vtrique tunc adhuc durabat illa motio Dei erga finem per quam constiruebatur in ratione actus primi ad plenè eligendum.

3 Nihilominus iuxta principia S. Thom. probabilius iudicamus hoc initium quod pertinuit generaliter ad omnes Angelos, & in quo omnes fuerunt in gratia non durasse, nisi vnico indiuisibili instanti ipsius creationis, quod vnico instanti nostri temporis corresponderet. Et ita tenent Carmelitani Salmanticenses tract. de Angelis disp. 12. dub. 1. Principia autem S. Thom. quæ id suadent, sunt, quia D. S. sentit Angelum in primo instanti suæ creationis habuisse actum liberi arbitrij, & fuisse creatum in gratia, vt constat ex qu. 62. art. 3. & qu. 63. art. 5. ad

3. Sentit secundò quod Angeli statim atque habent electionem circa aliquid, sunt inflexibiles, & in illo firmantur, vt patet in hac qu. 63. art. 6. ad 3. & qu. 64. art. 1. Sentit tertio, quod in Angelis incipit electio immediate post instans creationis, vt deducitur ex his quæ tradit dicta qu. 63. art. 6. nec enim post primum instans creationis, in quo mouebantur ab auctore naturæ, aliquid eis deerat, vt possent seipso deliberatè mouere ex præcedenti voluntate, & acte qui vtrique in instanti ipso creationis in Angelis fuit: ergo iam habebant sufficiens principium vt immediate post ex illo priori actu se mouerent, sibi que formarent dictamen. Sentit quartò quod post primum instans suæ creationis statim peccauit Angelus, vt expressè dicit in art. 6. cit. qu. 63. Nomine autem instantis creationis non potest intelligi operatio Angeli correspondens, & æquiuallens pluribus partibus temporis, quia creatio non est operatio Angeli, sed Dei, & solum Angelus se habet vt terminus talis operationis, creatio autem fit in instanti nostri temporis: ergo si immediate post instans creationis Angelus peccauit, meritum eius solum durauit pro instanti nostri temporis, quod est instans creationis.

Conf. quia immediate post instans creationis est conseruatio creaturæ, & non creatio, nec potest dici quod creatur, nisi pro instanti nostri temporis, quo fit de nouo in esse: nam immediate post iam non fit de nouo, sed continuatur quod ante erat: ergo immediate post instans nostri temporis, non est creationis instans, sed conseruationis duratio: ergo si apud D. Thomam, statim post instans creationis peccauerunt, statim post instans correspondens instanti nostri temporis peccauerunt.

Ratio autem, & fundamentum conclusionis ex eo deducitur, quia licet Angelus in primo indiuisibili instanti suæ creationis non possit se mouere per deliberationem ex aliquo priori actu præcedente, quia tunc est primus actus, tamen immediate post tale instans potest se mouere deliberatè, quia iam præcessit actus, & cognitio immediate ante cum plena aduertentia, quia cognitio eius perfecta est, & cum expedita libertate, quia etiam in actu primi instantis liber fuit, vt pote cum meruerit in sententia D. Thom. *suprà* iam explicata: ergo nihil prohibet Angelum immediate post totali, & plena electione se mouere, & deliberare. Similiter immediate post instans creationis potest peccare, discontinuando priorem actum bonum, vel potest continuare meritum si voluerit: nam immediate post primum instans creationis potest formare dictamen prauum, & defectibile, & seipsum mouere, aut ab alio incitari ad malum, aut continuare ex propria voluntate dictamen primum, eo quod immediate post instans creationis potest voluntas intellectum mouere vt desistat à priori dictamine, & aliud former, quod non poterat in primo instanti, quia tunc primò mouebatur voluntas à prima propositione intellectus, non ipsa intellectum mouere poterat vt suo modo cogitaret. Hac enim ratione dicitur Deus in illo primo instanti specialiter mouere, & rectificare dictamen Angeli, quia ita est dictamen illud à Deo pro illo instanti, quod non potest ex imperio voluntatis mutari, & obliquari, vt *disp. præced.* ponderatum est. Post primum autem instans creationis quod correspondet instanti nostri temporis hoc non cutrit, quia immediate post illud instans iam est integrum voluntati mutare dictamen intellectus, & applicare illum quocumque voluerit, quia habet libertatem expeditam ad hoc, vt pote iam potentem se mouere ex actu præcedenti, in quo solum à Deo mota fuit. Ergo ab illa

duratione

duratione immediatè post primum instans creationis potuit peccare Angelus, & in solo primo instanti creationis non potuit.

5 Rursus ex hac propositione deducitur alia consequentia: In illo instanti incepit Angelus habere firmam, & plenam adhesionem, seu deliberationem irrenocabilem, & inflexibilem suæ voluntatis in quo potuit peccare, quia plena deliberatio, & electio Angeli non ex eo fuit post primum instans, quia tunc perfectius cognouerit aut comprehenderit quàm in primo instanti, cum Angelus statim ab initio suam perfectionem habeat, non paulatim acquirat, sed idè fuit, quia post primum instans ex imperio, & motione voluntatis dirigebatur, & se mouebat, cum in primo instanti solum ex motione intellectus, & Dei fuerit directa voluntas; hoc autem ipso quod voluntas se mouet, & dirigit, postulat ita firmiter procedere circa suam resolutionem, sicut postea, quia perfectio quæ conuenit Angelo, siue in intellectu, siue in voluntate statim ab initio nata est conuenire hoc ipso quod capax est illius, non paulatim crescit: ergo si immediatè post primum instans voluntas Angeli ita est sui iuris quod potest peccare, & potest ex sua deliberatione procedere, cum ex plena comprehensione, & cognitione, & non ex discursu procedat, etiam in voluntate ex plena deliberatione, & electione procedit. Ergo si tunc continuaret actum charitatis, & meritum firmaretur in illo, & non peccaret; & sic non minus perueniret ad terminum in actu meritorio, quàm alij Angeli boni. Peccauerunt ergo mali Angeli quamprimum peccare potuerunt, id est, cum primum ex proprio motu deliberare incepserunt, nec permiserunt se firmari in bono: firmarentur autem si immediatè post illud primum instans non interposuissent impedimentum peccati. Quæ est ratio D. Thom. q. 63. a. 6. ad 1.

6 Ad stipulantur etiam huic veritati locutiones Scripturæ: nam 1. Ioan. 3. dicitur quod, *Ab initio Diabolus peccat*, ubi ly *ab initio* non potest esse ab initio intrinseco primi instantis: ergo extrinseco; & sic immediatè post initium, seu ab initio extrinseco peccauit: nam de ipso primo initio, & instanti creationis, constat de fide Angelum creatum fuisse sine peccato. Item Isai. 14. ubi casus Luciferi describitur: *Quomodo, inquit, cecidisti de celo Lucifer, qui mane oriebaris?* quasi in ipso adhuc exortu, seu immediatè post, & dum adhuc oriebatur extrinsecè cecidisse dicatur, quia non in instanti intrinseco sui ortus, sed in extrinseco seu immediatè post cecidit. Item si Angelus qui cecidit ultra primum instans duraret in gratia, aliquantulum permaneret, & staret in veritate, quia non solum in suæ creationis instanti, sed etiam in conseruatione, & continuatione sui esse, quod iam pertinet ad permanere, & ad stare in eo in quo fuit creatus. At Scriptura absolutè dicit ita peccasse Angelum ab initio, quod non stetit in veritate Ioan. 8. *Ille homicida erat ab initio, & in veritate non stetit.* Non quod ab initio occiderit, seu peccare fecerit homines, sed alios Angelos. iuxta illud Isai. 14. *Tu enim terram tuam disperdidisti, tu populum tuum occidisti*, & hoc statim ab initio fecit Diabolus, non intrinsecè ab initio primis instanti suæ creationis, sed extrinsecè, id est, immediatè post. Et August. 11. de ciuit. cap. 15. dicit, *Hoc ita accipiendum esse, quod in veritate quidem fuerit, sed non permanserit.* Et S. Hieronymus lib. de summo bono cap. 2. sentent. 7. inquit, quod *Diabolus mox ut actus est, in superbiam erupit, & statim* Ioan. à S. Thom. in 1. part. D. Th. Tomus alter.

tim ut factus est, cecidit. Ac denique ipse D. Thom. in quest. 63. artic. 6. apertè dicit, quod *Probabilior & Sanctorum dictis magis consonans opinio est, quod statim post primum instans suæ creationis Diabolus peccauerit.*

Ad fundamenta opposita, Resp.

Ad primum ex P. Vasq. dicimus nullum esse inconueniens quod aliquid duret eo modo quo ipsum instans, & desinat immediatè post, præsertim spirituales actus liberi, qui non sunt subiecti motui, & tempori corporeo; & idè potest Angelus immediatè post instans interrumpere actum suum, & nos possumus immediatè post elicitum actum liberum, illum suspendere, & cessare ab illo, quia si liberè elicimus actum in aliquo instanti, & ille non posset desinere immediatè post: ergo immediatè post necessariò duraret; & sic liber non esset, atque adèd omnis actus liber, qui incipit in instanti, immediatè post redderetur necessarius, quia necessariò existeret. Vnde vltèriùs fit quod ille qui in hoc instanti habet actum charitatis non posset immediatè post peccare, aut damnari, nec peccas posset immediatè post saluari, & iustificari, quia necessariò durant illi actus, quod tamen est absurdum cum immediatè post existant per influxum liberum voluntatis: ergo non per necessarium. Si autem non possent desinere per vltimum sui esse, sicut instans, sed per primum non esse, oportet quod immediatè post non possint desinere, quod autem non potest desinere necessariò existit: ergo immediatè post necessariò existit illi actus: ergo non liberè.

Et cum instat Vasquez, quia non possunt esse duo instantia nostri temporis immediata: ergo neque potest aliquid durare solum per vnum instans, & immediatè post incipere alia operatio instantanea, & indiuisibilis, quæ etiam in instanti incipit.

Respondeo, quod quando aliquid desinit per vltimum esse, & ad modum instantis, vel Deo suspendente concursum, vel voluntate non influente, talis desinitio non correspondet instanti nostro, sed tempori, licet possit fieri in instanti Angelico, vel alia indiuisibili mensura superiori ad nostrum tempus, & æquivalenti illi, de quo dicimus in physica q. 2. art. 1. Itaque si actus liber desinit per vltimum esse, hoc erit, quia immediatè post, id est, in parte temporis succedente, voluntas desinit influere in illum actum, ut si suspendat se ab actu, (quod fortasse moraliter non est ita possibile, licet metaphysicè possibile sit) licet non immediatè post actum alium eliciat, quia non elicitur in tempore, sed in instanti nostro pro hac vita; & instans non potest esse immediatum instanti antecedenti; & sic desinet actus immediatè post, sicut si Deus immediatè post instans suspendat influxum suum, desinet res creata post primum instans immediatè. At verò Angelus quia operatur supra omne tempus, & non sicut nos pro hac vita, potest immediatè post operationem suam, quæ correspondit instanti nostro, inchoare aliam operationem suam, quæ etiam instantanea sit, & indiuisibilis respectu sui, æquivalent tamen tempori nostro, & tunc duo instantia Angelica erunt immediata, quod non est inconueniens, ut supra disp. 20. ostensum est, sed non duo instantia temporis nostri, quæ nunquam immediatè sequuntur: tunc enim secundum instans Angelicum correspondet tempori nostro.

Sed instat Vasquez ad probandum debere actum illum, & rem omnem desinere per primum non esse, quia non esse rei est totum simul, & absque vlla successione, sed quidquid incipit totum simul incipit in instanti: ergo si illa desinitio incipit,

tota simul incipit in instanti: ergo per primum non esse, non per ultimum esse.

Confirm. quia nulla res potest in eodem instanti temporis esse, & non esse: ergo nec in eodem instanti habere primum esse, & ultimum esse, siquidem ultimum esse est desinere esse, cui destrui: ergo est non esse.

Resp. quod non esse rei est totum simul, distinguo, intrinsicè vel extrinsicè, concedo, intrinsicè solum, nego. Quando enim instans desinit per ultimum esse, eius desinitio est tota simul intrinsicè, quia hoc esse quod habet in hoc instanti est ultimum, ita quod immediate post non est. Et quia desinitio eius est immediate post hoc instans, ultimum autem esse eius est in hoc instanti; idè instans ultimationis (ut ita loquar) quod est extrinsicum desinitioni eius, dicitur esse totum simul quoad desinitionem extrinsicam, seu quoad ultimationem essendi, quia immediate post, nihil de illo est. Quando autem aliquid desinit per primum non esse, intrinsicè desinit in illo; & tunc desinitio eius est tota simul intrinsicè, non extrinsicè.

Ad confirm. Resp. quod simul esse, & non esse in eodem instanti, nulla res potest, bene tamen in eodem instanti esse, & ultimo esse, quia ultimum esse non est non esse, sed esse in ultimo, ita quod immediate post desinat. Et cum dicitur quod ultimum esse est desinere, dico quod est desinere non intrinsicè, quasi in eo instanti de facto non sit, sed quia immediate post non erit, & ita desinit extrinsicè in illo instanti, quia non in illo, sed post illud immediate desinit. Illud autem immediate post in nobis est tempus: in Angelis autem illud immediate post, erit aliud instans, seu operatio Angelica, quæ æquivaleret tempori nostro, eique correspondet.

9 Ad fundamenta Suarez, & Nazarij.

Ad primum dicimus quod omnes illæ actiones, quæ in illo loco Ezechielis attribuantur primo Angelo antelapsum, non sunt multæ operationes, neque instantia, sed multa obiecta, inadæquata vnius instantis, & operationis, quæ nostro modo concipiendi per diuersos illos actus explicantur, licet in Angelo diuersi actus non fuerint, nec diuersa instantia, sed plura obiecta materialia, & inadæquata sub eodem instanti, & eadem operatione comprehensa. Vnde S. Thom. in quaest. 63. art. 6. ad 1. inquit respondens ad illummet locum Ezechielis, quod *Per motus corporales, qui per tempus mensurantur quandoque in Scriptura intelliguntur metaphoricè motus spirituales instantanei.* Et sic per ambulationem intelligitur motus liberi arbitrij tendentis in bonum. Quare omnia illa obiecta quibus Angelus tendebat in Deum, quando creatus est, & nos per plures actus deberemus attingere, & ambulare in eis, Angelus vnica operatione, & vnico instanti comprehendit. Quod verò illud instans Angelicum, seu operatio, qua omnia illa obiecta comprehendit prorogare voluerit post primum instans creationis quod instanti nostri temporis correspondebat, hoc planè dependebat ab eius libertate, non à maiori comprehensione, vel attingentia obiectorum, quæ antea non attingeret. Vnde in hoc aliqui voluerunt prorogare illum actum merendo, alij discontinuare peccando. Et certum est, immediate post primum instans creationis potuisse peccare, quod non poterant in primo. Quid ergo prohibuit peccasse tunc primum Angelum, cui tanta superbiendi materia tunc apponebatur cum facultate se mouendi per proprium dictamen, & propriam deliberationem ad illam?

Ad id quod obiicitur de connaturalitate liberi arbitrij, quod non est ei connaturale durare solo indiuibili instanti in operatione sua. Respond. id non esse ita connaturale nobis, qui dependenter à tempore formamus nostros actus, & intelligimus paulatim ea quæ agenda sunt; & ita non facile vtimur solis instantaneis operationibus, nisi postquam sufficienter obiectum est cognitum, & propositum: tunc enim voluntas sine difficultate mouetur, & quando expedita est, in instanti operatur: in eliciendo enim actum circa obiectum propositum nullam moram habet voluntas, minúsque impeditur sentit quàm oculus in videndo, vel lux in illuminando, qui sunt actus instantanei. In Angelis ergo in quibus plena comprehensio obiectorum est, statim ab initio, non est contra naturalem modum eius in instanti operari, & tantum per instans durare in actu suo, quia id pertinet ad libertatem eius, siue continuare velit, siue non: tam promptus est enim ad formandum dictamen de prorogando actu, quàm de eliciendo, vel discontinuando, & ita nec ex defectu dictaminis, & actus intellectus, nec ex difficultate potentiae volentis impeditur siue continuare, siue discontinuare, quando nondum per ultimam deliberationem in suo proposito firmatus est, quia tunc est inflexibilis, ut seq. art. dicitur.

Ad id quod dicitur de speciali motione Dei ad bonum data in primo instanti, ut à speciali Authore illius naturæ, & continuata in bonis Angelis, quod debuit etiam continuari in aliis: Respondetur quod illa motio continuata fuit in bonis Angelis, qui non apposuerunt impedimentum, sed voluntate deliberante voluerunt eligere quod voluntate à Deo mota in primo instanti fuerant amplexati, licet vtrumque fuerit liberum, sed in primo instanti fuit liberum arbitrium à solo Deo motum, in sequenti duratione fuit ex propria deliberatione consummatum. In Angelis autem malis non fuit continuata illa motio, quia posuerunt impedimentum immediate post, diuertendo per inconsiderationem defectibilem in intellectu, & per apertam, & formalem culpam in voluntate, ad aliud obiectum. Et cum instatur quod illa motio si continuabatur in bonis Angelis, adhuc erat à Deo ut authore naturæ; & sic etiam debebat in aliis continuari. Resp. quod in bonis Angelis non fuit continuata illo speciali modo Dei, ut authoris illius naturæ sic mouentis in primo instanti, sed alio modo continuata fuit quàm primò data, licet circa idem obiectum, & circa speciem eiusdem actus, eo quod immediate post primum instans iam voluntas erat plenè sui iuris, quantum ad hoc quod erat posse ex proprio imperio formare dictamen, & se mouere deliberare. Et idè motio diuina etiam si continuaretur, quantum ab substantiam actus, & identitatem obiecti, tamen quoad modum debebat aliter procedere, scil. dando locum voluntati, ut suo imperio dictamen formaretur, & procederet non solum ut libera quoad exercitium, & libertatem contradictionis, ut in primo instanti, sed etiam per deliberationem, & motum proprium libertate contrarietatis, & quoad specificationem inter bonum, & malum. Vnde illa specialis ratio primæ motionis, qua voluntas Angeli ita mouetur à Deo quod non potest moveri à se, non est ex aliqua speciali manutentione Dei, sicut iniustis quos protegit ne cadant, sed est ex ipso statu voluntatis, quia est ille actus primus omnium; & sic non est possibile quod operetur illum ex dictamine formato à se, & ex imperio sui, sed ex dictamine formato, & immisso à Deo, & consequenter ex dictamine indefectibili. Transacto

facto autem illo primo actu, seu posito ipso, iam potest Angelus ex voluntate sua, & imperio formate dictamen, & se mouere, atque deficere. Vnde ille concursus, & motio Dei, iam non est ad formandum dictamen, & excitationem illam intellectus à solo Deo, sed vt formetur ex imperio voluntatis. Vnde quoad hoc incipit ille influxus, & concursus esse generalis, quantum ad hunc modum, id est, non iuxta modum, qui seruatur in primo actu, vt sit à solo Deo, sed iuxta modum qui seruatur in tota vita, & operationibus sequentibus, vt scilicet fiat secundum deliberationem, & motionem voluntatis, & non vt præcisè mota à Deo, licet in illa motione adhuc seruetur libertas exercitij quoad contradictionem, sed non quoad contrarietatem. Quod si in illo actu post primum instans ex deliberatione voluntatis non defectuosè procedat Angelus, sed continuet primi instantis meritum, tunc erit specialis Dei gratia, & motio non in eo modo quo in primo instanti mouebat Angelum, sed quia mouendo ad hoc vt voluntas se moueat, & deliberet, præseruat illum ne deficiat, sed vt in bono deliberatè continuat, qui antè sine deliberatione, sed ex sola motione Dei liberè procedebat. Vnde in hoc speciale donum gratiæ Dei acceperunt Sancti Angeli, scilicet donum perseverantiæ, vt in eodem perseverarent ex deliberatione propria, quo inceperunt ex motione Dei, quod aliis est negatum.

Progressus via Angelorum in malis fuit duobus instantibus antè terminum, in bonis vno.

12. Loquimur de Angelorum via, condistinguendo illam à termino in quo mali fuerunt perpetuò damnati, boni perpetuò beati: nā de isto termino, & instanti illi correspondente dicemus postea. Loquendo ergo sic de via Angelorum, certum est in malis Angelis primum instans fuisse interruptum, nec durasse toto tempore viæ: sic enim nunquam demeruerunt, nec percesserunt, quia in illo primo instanti boni fuerunt, vt fides docet: nec enim creati sunt in peccato, sed in gratia. Oportuit ergo viam malorum Angelorum ad minus constare duobus instantibus (omittendo pro nunc instans damnationis, an includatur in aliquo istorum, vel ab illis distinguatur) altero quo bonus fuit, altero quo bonus esse desinit, & de facto peccauit, vbi cumque autem duæ operationes ita se habent, quod vna non ponitur, nisi altera desinente, datur duplex instans, quia datur duplex duratio, siquidem prima non continuatur cum secunda, sed desinit esse; ergo si Angelus desinit esse bonus, illa duratio primæ operationis bonæ cessauit, & altera successit. Vnde hoc generaliter S. Th. in q. 63. art. 6. ad 4. vbi inquit, quod *Prima operatio fuit omnibus communis, sed in secunda sunt distincti; & ideo in primo instanti omnes fuerunt boni, sed in secundo fuerunt boni à malis distincti.* Quod ad minus de ipsis malis Angelis intelligendum est, in quibus constat operationem bonam fuisse interruptam, & consequenter instantia diuisa. De bonis autem Angelis cum fuerit meritum continuatum perseverando in eo ad quod in primo instanti conuersi sunt, potest maior esse difficultas an diuiserint instantia circa diuersa obiecta bona, vel circa diuersum modum tendendi ad obiectum bonum, de quo statim dicemus.

13. Solum circa viam malorum Angelorum potest esse difficultas, an præcisè fuerint duo instantia totum quod ad eorum viam pertinet, an plura quàm duo: nam ad minus debere esse duo monstratum est. Quod verò sint plura, potest dubitari, tum ex parte antè, tum ex parte post: ex parte antè, quia aliqui di-

xerunt in primo creationis instanti Angelos solum habuisse actum puræ naturæ. Vnde ex hac parte tenentur addere tertium instans, primum videlicet pro creatione, & actu purè naturali. Secundum pro actu supernaturali, in quo sanctificati sunt omnes, & meruerunt. Tertium pro peccato per quod illud meritum interruperunt. Et illud primum instans, scilicet pro actu puræ naturæ positum fuit à quibusdam, qui dixerunt Angelos non fuisse creatos in gratia, vt refert S. Thom. *quest. 62. c. 3.* & probabile reputat Scotus in 1. dist. 5. qu. 1. In sententia verò quam cit. loco defendit D. Thom. hoc non habet locum, quia omnes fuerunt creati in gratia, iuxta illud August. 12. de Cuit. cap. 9. *Angelos cum amore casto, quo illi adherent creauit, simul in eis condens naturam, & largiens gratiam.* Certe non est putandum minus parce Deum se gessisse cum Angelis, quàm cum hominibus, qui, si status innocentie duraret, nascerentur in originali iustitia, & consequenter in gratia, cum potius Angelis connaturalis sit vt quidquid perfectionis iuxta suum statum, & mensuram datur, non paulatim, & per acquisitionem, sed à principio detur vt quasi cognatam videantur habere gratiam, non aduentitiam. Et hoc in eis etiam superbiendi occasio magna erat, quod omnis perfectio eis videbatur congenita; & sic qui inter ipsos humiliati sunt, magni meriti fuerunt. Quod si illis data est gratia in primo instanti, vtique non otiosa fuit, sed cum fructu, & operatione data est, præferim quia Angeli non fuerunt iustificati, sicut paruuli, quia hoc imperfectionis est, sed sicut adulti, & perfecti, & consequenter cum dispositione propria, & actu tunc elicto. In illo ergo primo instanti habuerunt operationem supernaturalem, & non merè naturalem; Et sic ratione solius naturalis operationis, non debet distingui illud primum instans.

At verò loquendo de instantibus à parte post, 14 posset aliquis dicere non debere solum durare Angelorum peccantium viam per duo instantia, vnum meriti pro primo instanti, aliud peccati pro secundo, quia nulla ratio conuincit quod vnum tantum peccatum patrauerint, sed plura, & consequenter quod plura instantia peccando consumpserint, quia plurimam negationem tunc habuit Angelus iuxta illud quod dicitur de illo Ezech. 28. *In multitudine negotiationis tue repleta sunt interiora tua iniquitate, & peccasti.* Vnde ipse deordinatus à fine ultimo non seruauit unitatem, & uniformitatem in suis operationibus, sed maxime illas diuisit, & multiplicauit, sicque non fuit amplius mensura durationis Angelicarum, vt ponderauimus *preced. tomo disp. 10.* Ergo videtur quod plura instantia Angelus peccando habuerit, & sic non duobus tantum consumpserit viam.

Ad hoc Respond. quod Angeli peccantes non indiguerunt pluribus operationibus vt inflexibiles redderentur in malo, sicut nec in bono, sed per immediatum actum, quem elicerunt post instans creationis, qui est actus, in quo per voluntatem suam se mouent, & non à solo Deo, sed ex imperio voluntatis formant dictamen, & eligunt quasi pleno iure, & seipsos plena electione mouendo, hoc ipso redduntur inflexibiles, & posita inflexibilitate non est necessarium protelare viam, quia tandiu necesse est durare viam, quandiu est status ambulandi, & mutandi voluntatem: cessante autem statu isto ambulatorio, cessat via; & sic si vnico actu redduntur inflexibiles, non est necesse plures alios expectare. Quod autem illo primo actu pleno in quo seipsa voluntas mouet, & ex se eligit, inflexibilis reddatur, manifestè docet

S. Thom. in quest. 63. artic. 6. ad 3. cum inquit, quod *Angelus habet liberum arbitrium inflexibile post electionem. Et ideo nisi statim post primum instans in quo naturalem motum habuit ad bonum, impedimentum beatitudinis prestisset, fuisset firmatus in bono.* Et in hac quest. 64. artic. 2. docet, quod *Voluntas Angeli adheret fixè, & immobiliter; & ideo si consideretur ante adhesionem, potest liberè adherere, & huic, & opposito, in his scilicet quæ non naturaliter vult; sed postquam iam adhesit, immobiliter adheret.* Quare cum Angelus post primum instans creationis iam non naturaliter velit, sed deliberatè, & deliberatione plena, hoc ipso adhærendo eligit, & per talem electionem immobilizatur, ut latius sequent. artic. dicemus agendo de obstinatione Angelii. Igitur de necessitate ad terminandam viam sufficit instans, seu operatio Angeli plenè facta post primum instans creationis, & statim post primum instans plena operatio Angeli incipit; & sic illa operatio sufficit terminare viam. An verò, licet non de necessitate, tamen ex abundantia, plures operationes Angelus fecerit, & diuiserit ante condemnationem suam, incertum est. Nam licet plura fecerit, & plura peccata, seu malitias habuerit, non tamen constat quod plures operationes fecerit, quia omnia illa potuit vnica operatione perficere, eo quod ordinabantur omnia sub vno motiuo, & fine proximo, & vltimo, quatenus tunc primò auerti volebat à supernaturali beneficio, & magnificari in propria cordis eleuatione, & vel persuadere id multis, vel defendere contra alios, quia & pugna fuit cum bonis Angelis, & persuasio quæ traxit cauda sua tertiam partem stellarum, sed omnia ista obiecta, & effectus potuerunt cadere sub vno adæquato obiecto, & motiuo, & ita sub eadem operatione, & instanti comprehendi, licet in se materialiter plura fuerint. De quo amplius statim redibit sermo respondendo ad obiectiones circa viam bonorum Angelorum.

15 Maior ergo difficultas est circa viam bonorum Angelorum, an durauerit vno tantum instanti, an pluribus. Nam quod fuerit vnicum, licet prolongatum, & æquiualens pluribus illis, quibus mali Angeli diuisi sunt, ex eo suaderetur, quia Angeli sancti in eo discreti sunt à malis, quia boni continuauerunt, & perseuerauerunt in amore casto, in quo creati sunt, & illud obiectum ad quod sunt conuersi à Deo in primo instanti etiam tenuerunt, & amaauerunt post primum instans quando ex electione sua poterant peccare: ergo non diuiserunt operationem primam in qua creati sunt, sed illam continuauerunt, quia circa idem obiectum versati sunt: ergo idem instans continuauerunt, quia instans in Angelis duratio operationis est. Nec dici potest quod licet continuauerint meritum, non tamen est necesse quod operationem eandem continuauerint, quia diuersis actibus mereri poterant, & circa diuersa obiecta occupari, quia Angeli in primo instanti creationis illuminati sunt à Deo perfecte circa obiecta eis debita, & quæ manifestari oportebat ad suam salutem, quia modus quo petit natura Angelica perfici, & illuminari, est non paulatim, & successiue, sicut nos, sed statim à principio accipiendo cognitionem de his quæ tunc sibi sunt debita pro illo statu; & sic totum quod nos per fidem paulatim proficiendo acquirimus, ipsi simul habuerunt, id est, totum quod necessarium ipsis erat ad iustificationem, & salutem, & perfectionem eorum conueniens. Vnde cum pro statu viæ fidem habituri essent, eamque explicite eandem habuerunt in primo instanti creationis, nec nouam explicationem acceperunt in duratione sequenti: sub fide autem

continentur omnia obiecta circa cuius amorem Angeli mereri poterant. Et ipsa voluntas eorum volendo finem, vult in fine media, sicut in principiis attingit conclusiones. Vnde sicut illuminabatur plenè per fidem in primo instanti, ita mouebatur perfecte voluntas circa finem per charitatem, & circa media ad talem finem per virtutes. Vnde non fuit necesse novas operationes, seu actus efficere, aut circa noua obiecta occupari ad merendum, sed solum circa eadem perseuerare. Et totus hic discursus est S. Thom. *suprà quest. 62. artic. 5. vbi probat Angelum per vnum actum charitatis ita meruisse beatitudinem, quod post primum actum statim beatus fuit.* Quæ doctrina non potest stare nisi Angeli boni continuauerint primum instans, quia eadem operatio mansit, cum ex propria deliberatione post primum instans perseuerauerunt in eo in quo coeperant: sic enim verificatur quod post vnum actum meriti beatificati sunt, quia ille actus primus quo meruerunt, continuatus fuit in eis; & sic solum fuit vnus, cum tamen maius Angelus primum actum in quo etiam bonus fuit interrupit volendo peccatum.

Quod verò in bonis Angelis meritum non sic 16 fuerit continuatum, quod idemmet actus quo incoeperunt continuatus fuerit, sed diuersus, licet circa idem obiectum, alio tamen modo propositum, ex eo probatur, quia post instans creationis in quo operatur Angelus ut motus à Deo, & non ex propria deliberatione, post istud inquam instans, quod est creationis, incipit Angelus deliberatè se mouere, & tanquam sui iuris plenè esse, formando dictamen ex propria voluntatis imperio: ergo oportet quod obiectum illud aliter proponatur nunc, atque antea, & actus similiter voluntatis diuersus sit. Patet conseq. quia antè non erat ille actus cum indifferentia ad bonum, & malum, sicut postea est, nec cum deliberatione, & motione propriæ voluntatis, sicut postea; vnde etiam in primo instanti est iudicium illud mutabile, & flexibile, postea non. Quæ omnia non possunt eidem actui conuenire, quia non sunt denominationes extrinsecæ, sed intrinsecæ, & ita nisi actus mutetur, & alius eliciatur, non potest hæc variatio dari: ergo debet esse alia operatio, & aliud instans; & sic duobus etiam instantibus constabit via bonorum Angelorum. Et fauet etiam D. Thom. in quest. 63. artic. 6. ad 4. vbi inquit, quod *Prima operatio fuit omnibus communis, sed in secunda sunt distincti.* Et ideo in primo instanti omnes fuerunt boni, sed in secundo fuerunt boni à malis distincti. Ex quo sic deducitur; Angeli boni sunt distincti, & discreti à malis ante condemnationem, & glorificationem, dum adhuc erant in via, quia adhuc ut viatores habuerunt pugnam inter se boni & mali Angeli, & dum illi merebantur, isti peccabant, sed non fuerunt discreti inter se in primo instanti, in quo omnes communiter boni fuerunt, ut inquit D. Thomas, sed in secundo: ergo adhuc in via fuit secundum instans in nobis Angelis: ergo non vnico instanti terminata est.

Nihilominus dicendum est, quod licet vtraque hæc sententia sit probabilis, videtur tamen probabilior, & sensui D. Thom. conformior, quod boni Angeli viam suam vno instanti perfecerunt continuato à primo instanti creationis vsque ad glorificationem exclusiue, licet aliquas accidentales variationes habuerit, quæ non sufficiunt distinguere instantia, sed in eodem compatiuntur. Quod vtraque hæc sententia sit probabilis, constat tum ex rationibus pro vtraque adductis, & autoritatibus D. Th. tum quia vtraque habet pro se graues Authores 17

thores, quæ illam probabilem reputant. Nam quod fuerint duo instantia in merito Angelorum, & duplex operatio, tenent Capreolus in 2. dist. 4. qu. 1. ad argumenta contra 5. Conclusionem, Zumel. super qu. 63. art. 6. quest. 1. conclus. 7. Suarez lib. 6. de Angelis cap. 3. Molina ad hunc art. 6. qu. 63. & probabilem reputat Nazarius super eundem artic. controu. unica, conclus. 8. Carmelitani Collegium, ibidem disput. 12. dub. 3. conclus. 2. Quod fuerit autem tantum vnum instans, & vna operatio meriti, quæ Angeli consummati sunt, tenet M. Bannez super eundem art. 6. dub. 3. conclus. 1. Nazarius cit. conclus. 9. & Carmelitani Salmanticenses ubi sup. conclus. 1. Valsq. hic disp. 229. c. 10. & alij.

18 Ego autem in hanc secundam sententiam vt probabiliorē inclino, tum propter auctoritatem S. Tho. expressiorem; tum propter rationem vrgentiorē. Auctoritas D. Th. præter supra relata arguendo pro ista sententia. constat ex consequentia quadam quam facit D. Tho. dicta qu. 63. art. 6. ad 3. ubi in corpore art. inquit quod Si Diabolus in primo instanti in gratia creatus meruit, statim post primum instans beatitudinem accepisset, nisi statim impedimentum peccando præstitisset. Ergo si Diabolus post primum instans, si non peccasset, beatitudinem accepisset, Angeli sancti qui non peccauerunt post primum instans, beatitudinem acceperunt. Ergo durauit illud primum instans, quousque receperunt beatitudinem. Rursus antequam beatitudinem receperent, Dæmones peccauerunt, quia pugna inter malos, & bonos Angelos fuit ante eorum condemnationem, & consequenter ante glorificationem bonorum, siquidem ex illa pugna Angeli mali de cælo deiectioni sunt, Apocalyp. 12. quod est condemnari. Ergo durabat primum instans bonorum Angelorum, dum Angeli mali peccabant, & iam diuiserant operationem suam, & instans; & sic instans bonorum Angelorum continuatur, & vnicum existens vsque ad glorificationem æquiualeuit pluribus instantibus malorum Angelorum.

Ratio verò vrgentior ea est, quia actus primi instantis, & continuationis post illud instans substantialiter fuit idem, licet accidentalem variationem habuerit: ergo non constituit duplex instans, sed idem continuauit. Consequenter patet: quia instantia non distinguuntur in Angelis nisi quando actus substantialiter distinguuntur, ita vt vnus cesset, & alius succedat, nec continuari possint. Hoc autem solum potest contingere dupliciter, aut ex necessitate, & propria ratione ipsius operis, quia non habet continuabilitatem cum altero, aut ex voluntate operantis, quia vult diuidere actus, & vt in adæquatis rationibus aliquorum obiectorum, vel alicuius obiecti, cum possit vnica adæquata ratione vti, quantum est ex natura actus. Hoc secundo modo est minus decens, & perfectus modus in Angelo, licet absolute possibilis quia de se magis reducuntur, & colliguntur ad vnitatem, idque magis conducit ad Angelicam maiestatem, vt non pro libito, sed pro necessitate, & ratione actus multiplicent, & oppositum magis est Dæmonum qui leuitate sua ducti magis propendunt ad diuisionem, sicut boni Angeli ad vnitatem, & magis colliguntur quam disperguntur, & quanto paucioribus actibus res absoluitur, si plures necessarij non sint, tanto magis sacratior, & angustior apparet. Quare licet in Dæmonibus non sit inconueniens quod actus multiplicentur pro libito suo, & pro leuitate, & mutabilitate cordis, tamen in Angelis sanctis, qui vnitati adhæserunt non cōuenit poni multiplicationē actuum, & instantium ob solam voluntatem, sed ob necessi-

tatem, & rationem, quæ nobis non innotescit, nisi ex adæquatione actuum. Anteced. autem prob. quia in illo actu in quo creati sunt Angeli, conuersi sunt ad Deum, non solum ex naturali dilectione, & cognitione, sed etiam ex supernaturali, siquidem ibi iustificati sunt: ergo actum veræ charitatis elicerunt, & fidei, & spei, reliquarumque virtutum, quæ ad iustificationis gratiam, eamque ita perfectam sicut in Angelis fuit, per se conducunt: sed in sequenti duratione post primum illud creationis instans non cessauerunt ab actu charitatis meritorio, & fidei, sed continuauerunt illud, quia meritum eorum semper fuit perfectum; & sic à charitate ortum, & formatum, non solum per virtualem attentionem, sed per actualem, quia ista est perfectior, & magis decet Angelicam sublimitatem: ergo eadem charitas quæ in primo instanti actum habuit, consequenter continuata est, sed omnis charitas viæ, & omnis cognitio fidei, quæ est in via, est eiusdem speciei, nec variatur ex propria ratione: ergo attendendo ad naturam, & rationem actus meritorij, non habuit ille actus vnde variaretur. Quod autem continuatus fuerit ex deliberatione propria, cum in primo instanti incepit ex sola motione diuina, non petit diuersum actum, nec variat illum intrinsecè, & essentialiter, quia in Angelo ad deliberandum, & se mouendum libertate quoad contrarietatem, & non solum quoad exercitium contradictionis, non requiritur maior aduertentia, aut cognitio, quam in primo instanti, quia ipse non fuit melioratus, aut auctus in cognitione post primum instans creationis, quam in ipso primo instanti, cum acceperit à primo instanti plenam, & perfectam cognitionem circa ea obiecta, quæ per fidem sibi proponebantur. Non ergo ad deliberandum nouo actu, seu dictamine ex parte cognitionis indiguit, sed solum indigebat duratione, seu operatione aliqua, quæ præcederet, vt ex illa se posset mouere, & quasi pleni iuris per propriam deliberationem effici. In qua deliberatione si volebat cōtinuare actum primum, non erat necesse nouum actum facere, sed in eodem persistere, cum posset oppositum, & hoc addebatur de nouo, scil. posse oppositum facere, & dictamen primum mutare, quod non addit nouum actum sed nouam potestatem, seu expeditionem ad illum mutandum, quod in primo instanti non poterat, quia ille erat actus omnium primus, in quo voluntas erat mota sub exercitio libertatis non imperans, & mouens intellectum vt dictamen formaret, aut continuaret ex imperio voluntatis.

Dices: Ipsa noua approbatio voluntatis, & imperium ad continuandum quod antea incepit, 19 nouus actus est, qui antè non erat: ergo nouum instans. Item deliberatio in actibus distinguit illos à non deliberatis, non solum extrinsecè, & per extrinsecam denominationem, sed per intrinsecam: nec enim actum esse liberum, & indeliberatum aliqua denominatio extrinseca est: ergo variationem actuum importat quoad entitatem, & substantiam: nec enim idem actus potest esse liber, & non liber, deliberatus, & non deliberatus: ergo diuersum instans est.

Respon. non esse nouam approbationem, aut imperium voluntatis substantialiter, & essentialiter, siquidem versatur circa idem obiectum, sed solum accidentaliter, quia habet potestatem, & ius expeditum se mouendi, quod antea ex defectu actus præcedentis quo se moueret, non poterat. Quare in illo imperio, & approbatione ad continuandum sunt duo. Vnum est complacentia, & voluntas circa illum actum in quo incepit, & hæc cum sit circa idem obiectum, & actum qui iam cœperat, quia ad hoc

hoc est ut actus idem continetur, non requirit nouum, & distinctum actum, sed continuationem eiusdem. Alterum est nouus modus mouendi, & dirigendi illum actum, scilicet quia ad continuationem illam procedit se mouendo ex alio præcedenti actu, & priori, cum tamen inceperit illum actum, non ex motione propria, sed ex speciali, & propria motione Dei, & hoc non variat intrinsecè actum, & substantialiter, quia solum pertinet ad rationem seu modum causæ efficientis, & mouentis, quod formaliter non petit discontinuationem actus in sua substantia, eo quod ab eodem principio elicitur, & diuersitas tota est in illo modo operandi ex motione propria, & se mouendo, vel ex motione Dei, ut iam dicemus.

- 20 Ad secundum Respon. quod actum esse liberum vel necessarium sunt modi intrinseci variantes intrinsecè ipsum actum, etsi non semper specie diuersificent ipsum, non autem esse actum deliberatum aut indeliberatum præcisè, nisi aliàs actus indeliberatus necessarius sit, & deliberatus sit liber, sed ex eo præcisè quod vnus sit deliberatus, id est, ex propria motione procedens, aut indeliberatus, id est, ex motione Dei, ex hoc præcisè non variatur intrinsecè actus. Ratio huius est, quia actus non est necessarius aut liber, nisi variato iudicio de indifferenti in determinatum omnino ad vnum. Vbi autem variatur iudicium, & aduertentia, variatur influxus in actum, & sic actus ipse est alius, quia diuerso modo obiectum proponitur, & consequenter diuersa tendentia datur in illum. Nec tamen semper variatur specie actus, quia potest manere idem obiectum specie, sicut patet in actu charitatis erga Deum, qui est liber in via, & necessarius in patria, & tamen est eiusdem speciei, quia charitas non excidit. Existimo tamen non posse esse eundem actum numero, quia variatur omnino iudicium, & cognitio, ex qua regulatur, & originatur talis actus in via, & in patria, & valde dissimili modo obiectum proponitur, & sic diuersa tendentia resultat ex parte voluntatis, ut latius dicemus 1.2 circa qu. 3. Et in præsentia actus ille liber est, semper liber fuit quoad exercitium, etiam in primo instanti, etiam ut versatur circa finem, & circa media, licet quoad vnum non habeat libertatem contrarietatis, quoad aliud sic, quod non est actum esse simpliciter necessarium, & liberum, etiam pro diuersis instantibus vel obiectis. At verò actum esse deliberatum, & ex propria motione ortum vel non esse deliberatum, ex hac præcisa ratione non petit nouum iudicium, & aduertentiam, quia ut actus sit deliberatus præter aduertentiam, & cognitionem sufficientem, & plenam, & cum indifferentia ac libertate, requirit etiam aliquem priorem actum, & præcedentem, per quem se reducat ad alium quod est mouere se. Et sic potest esse quod actus non sit deliberatus non ex defectu pleni iudicii, indifferentiæ, & aduertentiæ, sed ex defectu prioris actus quo moueat se; & sic est in Angelis primus actus, qui indeliberatus dicitur, non ex defectu cognitionis, & aduertentiæ, quia in illo primo instanti fuit plenus sapientia, sed ex defectu prioris actus quo moueat se. In nobis autem est e conuerso indeliberatus actus ex defectu cognitionis seu aduertentiæ, & idèd tales actus indeliberati sunt imperfecti, & non liberi. Sic ergo deliberatum, & indeliberatum ex imperfectione, & inaduertentia proueniens distinguitur intrinsecè à deliberato, quia est intrinsecè imperfectius, & ex parte principij influentis, & regulantis, scilicet ex parte iudicii, & obiecti diuersitatem inducit, quæ est diuersitas intrinseca. Vnde etiam talis diuersitas reducitur ad diuer-

sitatem liberi, & non liberi, quæ est variatio secundum principia intrinseca. At verò deliberatum, & indeliberatum quod oritur ex solo, & præciso defectu prioris, & antecedentis actus, sine quo potentia non se mouet, de vno actu ad alium, licet ex se, & vitaliter eliciat, non variat intrinsecè, & substantialiter actum, quia supponitur procedere secundum eandem perfectionem, & plenitudinem iudicii, & aduertentiæ, sicut in Angelis tam perfecta, & comprehensua fuit cognitio in primo instanti, sicut requirebat ipsa perfectio actus in se. Vnde per hoc quod ei deesset prior actus, ex quo se moueret, solum extrinsecè actus variabatur, quia hoc non pertinet neque ad principium obiectuum à quo sumitur specificatio intrinseca, neque ad principium elicitiuum à quo substantialiter actus procedit, sed ad modum extrinsecum applicandi, & mouendi, scilicet quod se moueat & reducat in talem actum, vel solum moueatur ab alio.

Quod si istes: Si deliberatus est per hoc quod voluntas ex vno actu se moueat ad alium: ergo aliquem actum habet nunc, quem prius non habebat, scilicet illum ad quem se mouet: ergo non solum continuatur præcedens actus, sed alius de nouo habetur; atque adeo nouum instans est, quia instantia variantur sicut, & actus.

Respon. quod etiam dato quod essent diuersi actus, non tamen diuersa instantia constituerent, quia vnus se habet ex consequenti ad alium, illique connexus est; & ita licet actus sint diuersi, tamen quia connexi, & eadem connexionem deducti, ad idem instans pertinent, quia instans non sumitur nisi ex adæquato actu, vel pluribus inadæquatis qui sub eodem motiuo, & formali ratione, & connexionem conueniunt, licet materialiter diuersi sint, sicut ad idem instans pertinent plures actus meritorij secundum diuersas virtutes; & plura etiam peccata potest Angelus committere, quæ pertinent ad idem instans, licet vnum sequatur ad aliud, & ex motione illius sit, & post illum ordinetur, & potest intelligendo hominem vel equum, intelligere indiuiduum quod de nouo producit, non mutando actum, quia illud indiuiduum pertinet ad eandem speciem, & motiuum intelligendi. Sic ergo etiam aliquis actus ad quem se mouet potest sequi ad priorem actum, & erit actus materialiter, & entitatiue diuersus; & tamen pertinet ad idem instans, quia sub eodem motiuo, & ratione formali sunt & sub illo mensurantur omnes, qui sic connectuntur, & consequuntur. Vel secundò dicitur, quod Angelus, sicut non se mouet distinctis actibus à principiis ad conclusiones, etiam si conclusiones plures, sint similiter procedit à fine ad media, etiam si media sint plura eodem actu, quia omnia illa sub eodem fine comprehenduntur, & eo actu quo attingit principia, vel finem, attingit conclusiones, & media. Similiter ergo in primo actu Angelus etiam attingit media ad quæ ex amore finis se poterat mouere, sed totum illud attingit ex motione Dei, & non ex aliquo priori actu quo se moueret. Quando ergo post primum instans creationis Angelus bonus continuat eundem actum meritorium, & bonum in quo creatus est, non dicitur de nouo moueri formaliter, quasi ex vno actu alium nouum adæquatè diuersum producat, sed dicitur mouere se virtualiter, quia ita continuat illum actum, quod posset ad oppositum se mouere, & contrarium distans formare, & ad id habet iam potestatem expeditam, & quia videns se posse ad aliud diuertere non vult nisi continuare, idèd dicitur in illo bono actu se mouere virtualiter, & potestatiue, non formaliter diuersos actus exercendo.

Ad

22 Ad rationes autem quæ contra hanc nostram sententiam *suprà* factæ sunt, sententias ipsas referendo, constat ex dictis: nam satis *supér*que explicauimus, quomodo in Angelis deliberatum, & non deliberatum non distinguitur penes perfectum, & imperfectum in iudicio, & aduertentia, & cognitione, sed penes habere, vel non habere antecedentem, & priorem actum quo moueantur. Vnde post primum instans semper deliberatè procedunt, licet Angeli mali aliquando præcipitanter, & temerariè. Et quod dicitur, non posse in primo instanti moueri ad bonum, & ad malum contrariè. Respon. id non esse ex defectu cognitionis, & repræsentationis circa bonum, & malum speculatiuè, sed defectu mouentis motione defectuosa, & dictamine defectuoso, sicut requiritur ad peccatum, quia in illo primo actu, & instanti ipsi sibi non possunt formare dictamen, & iudicium, vt sæpè dictum est, sed formari debet à Deo; & sic non potest proponi malum cum inconsideratione, & defectu practico, vt sequatur illud. Post primum autem instans potest Angelus si velit sic inconsideratè, & defectuosè proponere illud obiectum prauum. Si verò velit continuare illud dictamen bonum, & sine defectu prosequi, non considerabit malum practicè, sed tamen dicitur considerare bonum quod continuat nouo modo, id est approbando, & volendo ex se continuare illud primum dictamen quod ex sola applicatione Dei in primo instanti habebat, cum posset discontinuare, & ad aliud diuertere; quod non exigit nouam formationem dictaminis ex nouo imperio, sed velle continuare primum, seu aliud distinctum non velle. Et cum dicitur quod hoc non est denominatio extrinseca in illo actu; dico denominationem extrinsecam esse, quia solum importat positionem actus, quo potest ad alium se mouere, si velit, de facto tamen non vult nisi continuare præcedentem actum; vnde ab actu illo quem potest habere, & non vult habere non recipit denominationem intrinsecam iste actus quem continuat. Ex positione autem sui, & continuatione in rerum natura non additur sibi aliquid, quod antè non haberet: de se enim vim habet vt illo posito possit se mouere, vel ad aliud diuertendo, vel eundem continuando. Quod si continuat, nihil additur sibi per hoc quod possit cessare ab illo, & ad aliud defectuosum diuertere.

Ad locum D. Thom. *ex qu. præced. 93. art. 6. ad 4.* Respon. sensum D. Tho. probatum esse, quod in primo instanti Angeli non fuerunt discreti, sed omnes fuerunt boni, in secundo autem fuerunt discreti mali à bonis, id est in instanti quod fuit secundum pro malis, sed continuatum pro bonis, & consequenter non diuersum, æquiualeuit tamen duobus malorum Angelorum. Et sic in secundo instanti, quod fuit in malis Angelis secundum formaliter, & in re, in bonis autem æquiualeuter, sed formaliter idem, & continuatum, fuerunt discreti mali à bonis.

Terminatio via fuit in bonis Angelis, & in malis in distincto instanti à merito.

23 Supposita diuisione, & discretionem Angelorum in via inter bonos, & malos, quam *suprà* posuimus, videlicet quod in Angelis bonis instans primum non fuit diuisum, sed continuatum, & confirmatum, in malis autem diuisum fuit, & distinctum auertendo se in secundo instanti ab eo quod in primo amauerunt, scil. à fine recto, & bono, vix resta-

bat difficultas quod perueniendo ad terminum, qui in bonis fuit præmium, & glorificatio, in malis damnatio, & supplicium, vix inquam poterat restare dubium, quod ista glorificatio in bonis Angelis fuit secundum instans distinctum ab instanti merendi, in malis fuit tertium distinctum ab instanti demerendi, in quo peccauerunt, & instanti reititudinis in quo creati sunt. Ceterum orta est in præsentia difficultas ex quadam Caietani sententia in *qu. 63. artic. 6.* vbi ad saluandam doctrinam S. Thomæ, quod Angeli tantum habuerunt vnum actum meritorium, per quem ad beatitudinem perueniunt, & tamen quod aliqui posuerunt impedimentum merito per peccatum, alij verò non, distinxit ipse duplicis generis meritum, alterum est meritum puræ viæ, alterum est meritum termini viæ. Meritum puræ viæ procedit à gratia imperfecta, & præcedit duratione ipsum præmium seu glorificationem. Meritum termini est simul cum præmio. Nec sequitur quod simul sit gratia imperfecta, & perfecta, sed quod simul sit terminus gratiæ imperfectæ, & gratia perfecta. Vnde ex ratione meriti rectè inferitur, quod prius duratione sit meritum quam præmium, non tamen sequitur quod nullum instans meriti sit etiam instans præmij. Nam cum meritum sit in via, & in termino viæ, meritum quidem prout in via præcedit duratione præmium, prout autem in termino non præcedit præmium, sed est simul cum illo. Eandem Caietani sententiam sequitur Nazarius *super eandem qu. 63. art. 6.* Itaque in hac sententia datur aliquod meritum quod solum præcedit præmium antecedentia naturæ, aliquod quod præcedit etiam tempore, & hoc vocatur meritum puræ viæ, illud meritum in termino viæ. Ex quo componitur dictum S. Thomæ, quod per vnum actum meritorium perueniunt Angeli ad beatitudinem, & huic merito positum fuit impedimentum ab Angelis peccantibus, quia loquendo de merito puræ viæ, illud fuit in primo instanti, communèque fuit omnibus tam bonis quam malis, & impeditum fuit per peccatum malorum. Loquendo verò de merito termini, fuit illud meritum simul cum præmio, ita quod in instanti in quo Angeli mali peccabant, boni Angeli merebantur, sed simul præmiabantur, eratque illud meritum terminus viæ. Idem censetur de demerito malorum, quod simul peccabant, & accipiebant damnationem, non diuersis instantibus durationis, sed eodem, licet demeritum natura præcederet: Illud enim meritum erat confirmatum, & hoc demeritum inflexibile, vnde vtrumque habebat annexam suam retributionem.

Ex hac autem Caietani sententia excitatur profundior difficultas, vnde nam repugnet præmium, & meritum simul esse in eodem instanti absolute loquendo, an ex aliquo essentiali, & intrinseco prædicato, an ex aliquo extrinseco, licet connaturali, an ex sola Dei voluntate sic disponentis, & ordinantis? Nam quod non repugnet simul esse ex essentiali ratione præmij, & meriti, videtur deduci ex communi illa doctrina, quod potest dari præmium anticipata solutione, vt si detur equus militi in stipendium futuri laboris. Et licet non possit dari in præmium id quod est principium meriti, & radix valoris eius, ratione cuius gratia non potest dari in præmium boni operis ab ipsa eliciendi, tamen si principium meriti sit distinctum à præmio, non apparet cur sit impossibile cum præmio, sicut si à gratia procedit valor meritotum gloriæ, non apparet cur non possit elici meritorium opus à gratia, existente iam gloria in homine, & in eodem instanti quo humanitari vniretur persona Verbi, quod
proce

24

procedat opus meritorium de congruo talis vni-
onis, non accipiendo valorem, & influxum à perso-
na, sed ab humanitate, & gratia, pro ut in eodem in-
stanti prius intelligitur humanitas quàm persona.
Quòd si dicatur repugnare specialiter gloriam esse
in eodem instanti, quo meritum, eo quod meritum
regulatur per fidem, cui repugnat visio gloriæ in
eodem instanti. Contra hoc est, quia licet ita con-
naturali modo fiat, tamen bene potest regulari me-
ritum per cognitionem euidentem supernaturalem,
sicut Christus in quantum viator non habebat fi-
dem, sed regulabatur illud meritum per scientiam
infusam, quæ comparibilis erat cum visione bea-
ta: ergo similiter posset reperiri in Angelo, quòd
meritum in termino non regulatur per fidem, sed
solum meritum puræ viæ, quod præcedit duratione
glorificationem. Quòd si solum ex voluntate, &
ordinatione Dei meritum, & præmium non com-
patiuntur simul, oportebit ostendere vnde constet
hanc Dei ordinationem ita dari, & indispensabilem
esse, si aliàs non postulatur ex ipsa natura rei, & sic
non apparet cur non detur meritum termini simul
cum ipsa gloria in eodem instanti durationis, licet
præcedat meritum ordine naturæ.

- 25 Nihilominus dicendum est, de facto non fuisse
in Angelis meritum in eodem instanti, & in eadem
duratione, qua præmium, seu gloria, & ita nullum
dari meritum quod sit meritum termini, & non viæ,
sed totum meritum terminatur cum via, instans au-
tem terminatiuum est extrinsecum merito, & viæ,
sicut instans terminatiuum motus iam nihil habet
de motu, sed cessationem motus. Et sic verificatur
quòd meritum duravit tantum per vnum instans,
seu per vnum actum in Angelis bonis, scil. per
vnum actum continuatum qui, æquiualebat duobus
instantibus malorum, eo quod dum illi disconti-
nuarunt actus peccando, boni Angeli continua-
runt, & in eodem permanserunt. Hæc resolutio cla-
rè deducitur ex D. Thom. supra q. 62. art. 4. *Actus*,
inquit, *non potest esse meritorius secundum quod est ex*
libero arbitrio, nisi in quantum est gratia informatus.
Non autem simul potest informari gratia imperfecta,
quæ est principium merendi, & gratia perfecta, quæ est
principium fruendi. Vnde non videtur possibile, quòd
simul fruatur, & suam fruitionem mereatur. Et art. 5.
sequenti. ad secundum: Instantia, inquit, in his qua
ad Angelos pertinent non accipiuntur nisi secundum
successionem in ipsorum actibus. Non autem potuit si-
mul in eis esse actus meritorius beatitudinis, & actus
beatitudinis qui est fruitio, cum unus sit gratia imper-
fecta, & alius gratia consummata. Vnde relinqui-
tur quod oportet diuersa instantia accipi in quorum
uno meruerit beatitudinem, & in alio fuerit beatus.
Ita D. Thom.

- 26 Et cum totum fundamentum eius sumatur per
hoc quòd non potest dari duplex actus simul in
eodem subiecto, vnus informatus gratia imperfe-
cta, alius gratia consummata, oportet videre quæ
sit illa gratia imperfecta, quæ requiritur ad meri-
tum, & quæ sit illa gratia consummata, quæ inue-
nitur in gloria, seu præmio. Et dicimus quòd gratia
imperfecta, quæ de facto fuit data Angelo pro sta-
tu viæ, fuit gratia vt regulata lumine fidei: eam
enim habuisse Angelum docet S. Th. 2. 2. q. 5. art. 1.
& concors Theologorum sententia, quia autori-
tates Scripturæ, quibus dicitur fidem esse necessa-
riam ad salutem, ita generaliter, & præcisè loquun-
tur, vt sine dubio non solum homines, sed etiam
Angelos comprehendant, sicut cum dicitur ad
Hebr. 11. *Sine fide impossibile est placere Deo: credere*
enim oportet accedentem ad Deum, quia est, & inqui-
rentibus se remunerator sit; ad Rom. 1. & Galat. 3. In-

stus autem ex fide uiuit. Ergo cuiusque conuenit
iustum esse, & ad Deum accedere, & Deo placere,
fidem habere debet. Angeli autem iustificati sunt
per gratiam, & accesserunt ad Deum per merita, &
placuerunt Deo: ergo habuerunt fidem. Et præfer-
rim, quia in his supernaturalibus æqualiter apud
Deum censentur homines, & Angeli: est enim in
ciuitate illa cælesti *mensura hominis etiam mensura*
Angeli, vt dicitur Apocalypsis 2. Et in ipsa gloria
promittitur hominibus æqualitas cum Angelis
Matthæi 22. & Marci 12. ergo & in merito, seu gra-
tia, atque adeò si homines in merito regulantur per
fidem, etiam & Angeli: Si ergo gratia imperfecta,
qua Angeli meruerunt, fuit gratia regulata per fi-
dem, fides autem impossibilis est cum visione
gloriæ: ergo repugnat quòd in eodem instanti sit
actus fidei, & visio gloriæ. Nec Caiet. dubitat de
impossibilitate fidei cum visione, cum pugnent
penes euidentiam, & ineuidentiam circa idem, &
expressè id doceatur à D. Tho. 1. 2. q. 67. art. 3. Sed
forasse dicer meritum puræ viæ regulari per fidem,
meritum verò in termino, non. Hoc tamen est in-
conueniens, quia meritum termini vel regulatur
per ipsam visionem gloriæ, vel per scientiam infu-
sam claram, vel per fidem: nec enim est alius mo-
dus cognoscendi Deum supernaturaliter. Per fi-
dem non potest esse stante visione gloriæ in eo-
dem instanti. Per scientiam infusam claram non
constat regulari illud meritum in illo instanti: nec
enim constat aut fundamentum est vt dicamus ta-
lem scientiam infusam loco fidei succedere in illo
secundo instanti antecedenter ad gloriam: nec
enim ex Scriptura, aut Patribus aliquid tale habe-
tur, sed fidei solum succedit visio gloriæ, & ita cum
constet non minus Angelos habuisse fidem in via
ad merendum, quàm homines, nec aliunde constet
eis scientiam claram infundi de mysteriis fidei, ante
gloriam sine vilo fundamento ponetur tale meri-
tum in termino non regulatum à fide, sed à scien-
tia infusa, quam nulla ratione astruere possumus in
Angelo ante visionem beatificam. Vt omittam,
quòd scientia infusa, quæ versatur circa res fidei, &
circa eius mysteria non potest clarè illa cognosce-
re, nisi supposita clara visione principiorum in qui-
bus tales veritates continentur, quia nulla scientia
potest clarè cognoscere conclusiones si principia
sint cognita obscure. Et si obscure sunt cognita,
hoc ipso cognoscuntur per fidem, nam etiam scien-
tia subalternata, dum non continuatur subalter-
nanti, fidei utitur credens subalternanti. Et cum my-
steria fidei non contineantur in alio principio quàm
in essentia diuina, si hæc obscure cognoscitur, per
fidem attingitur. Quare vel illa scientia infusa co-
gnoscit mysteria seu res fidei euidenter in suo prin-
cipio, quod est essentia diuina clarè, & euidenter
cognita, vel obscure. Si obscure: ergo per fidem, &
sic corripitur argumentum factum, quòd non potest si-
mul stare meritum regulatum per fidem in eodem
instanti cum visione gloriæ. Si autem cognoscun-
tur mysteria fidei per scientiam infusam supponen-
tem cognitionem claram suorum principiorum,
scil. essentia diuinæ: ergo talis scientia infusa oritur
ex visione beatifica, & supponit illam: ergo si per
talem scientiam regulatur meritum illud quòd vo-
catur meritum in termino, à fortiori regulabitur
per visionem beatam, quæ est principium, & origo
talis scientia, eamque præcedit sicut cognitio prin-
cipiorum cognitionem conclusionum. Non potest
autem visio beata regulare meritum siue puræ viæ,
siue termini, quia sic visio beata esset principium
meriti, vt pote in illud influens, ipsamque regu-
lans: ergo eaderet sub meritum principium meriti,
quod

quod repugnat. Et præterea, quia visio beata essentialiter est præmium: ergo repugnat quod præcedat meritum, ipsumque regulet, ita quod prius habeat præmium, & postea per actus ab eo procedentes mereatur illud, cum potius meritum sit id, ratione cuius datur tantum, vel tantum præmium. Et licet in diuerso genere causæ possit meritum præcedere præmium, & è contra, tamen hoc non potest intelligi taliter quod præmium præcedat meritum per modum regulantis, & dirigentis, seu tanquam cognitio præsupposita ex qua oriatur meritum directiue quia sic influeret in meritum, sed semper debet supponi meritum regulari ab alio, quam à suo præmio; & sic in alio genere causæ poterunt se ad inuicem causare, videlicet in ratione causæ finalis, & dispositiue (meritum enim disponit ad præmium, & præmium est terminus, seu finis illius) in hoc enim poterunt ad inuicem se causare. Ratio est, quia si visio beata, quæ est præmium, regularet meritum, prius haberetur præmium, & esset assecutum, quam poneretur meritum. Meritum autem essentialiter tendit ad hoc vt detur, & habeatur præmium: ergo repugnat quod procedat meritum a præmio vt habito, & influente in se: ergo repugnat quod ab eo reguletur, & oriatur, cum essentialiter tendat ad illud vt assequendum.

Ex his ergo manet exclusum illud meritum non viæ, sed termini, quod ponit Caiet. & quod dicit non esse incompatible cum visione gloriæ in eodem instanti: constat enim ex ratione D. Tho. meritum procedere ex gratia imperfecta, scil. ex fide quæ compati non potest cum consummata, quæ est clara visio gloriæ: de facto enim non est data alia gratia, quæ regulet, & mensuret actus meritorios nisi fides: à visione autem gloriæ meritum mensurari, & oriri non potest.

27 Quid verò dicendum sit ad quæstionem insinuatam de possibili, an scil. possit aliquis de potentia absoluta mereri per aliud principium, quod non sit fides, sed compatibile sit cum ipsa visione gloriæ, & ita possit in eodem instanti in quo est meritum, esse & præmium, seu glorificatio ipsa, non taliter quod procedat ille actus à visione gloriæ, nec per illam reguletur, sed quod procedat ab alio principio, & cum eo concomitetur in eodem instanti durationis visio beata, id operosius alibi disquirendum est, scil. agendo de merito Christi, an potuerit gloriam animæ mereri, & tamen non habere habitum fidei, qui imperfectionem importat. Nunc breuiter duo aduerto pro aliquali luce huius difficultatis.

Alterum est non videri possibile quod meritum procedat, & reguletur per cognitionem supernaturalem, quæ non sit visio beata, & non sit fides, vt ex dictis constat, quia cognitio supernaturalis, quæ regulat meritum, est cognitio mysteriorum fidei, scil. cognitio Dei, & eorum quæ ad Deum spectant: debet enim ad meritum concurrere charitas, & hæc versatur circa Deum; & sic oportet quod reguletur per cognitionem illius, & eorum quæ ad Deum pertinent. Cognitio autem supernaturalis de Deo, aut est per visionem beatam, aut per scientiam infusam euidentem, aut per fidem. Visio beata non potest regulare meritum: sic enim non concomitanter se haberet in eodem instanti, sed influxiue, & causatiue. Scientia infusa, cognoscit mysteria gratiæ, vt deducta, & contenta in suis principiis, quæ nō sunt aliud, quam essetia diuina. Et hæc si cognoscitur clarè supponit visionem beatam, & ex eius influxu cognoscit, & deriuatur scientia infusa; & ita si hæc regulat meritum, à fortiori visio beata. Si autem non cognoscitur clarè essetia diuina: ergo cognoscitur obscure, & consequenter per fidem

Ioan. d. Thom. in 1. part. D. Th. Tomus alter;

& sic inciditur in tertium genus cognitionis, quod est fidei. Hæc autem nullo modo potest stare in eodem instanti cum visione beata. Vnde non videtur possibile quod meritum, & præmium sint simul in eodem instanti, quando meritum postulat ad sui regulationem principium impossibile cum visione beata.

Alterum quod aduertimus est, quod quando id quod datur in præmiū, talis naturæ est quod de se habet vniuersalem influxū in omnes actus operantis, tale præmium non potest simul esse cum merito, sed post ipsum, eo quod si est cum merito, debet influere in ipsum atque aded esse principium eius. Repugnat autem principium meriti cadere sub merito, vt est concors Theologorum axioma. Sic autem se habent vniō hypostatica, & visio beata. Nam vniō hypostatica cum ponat in humanitate personam, reddatque naturam subsistentem, est principium quod omnium operationum quia actiones suppositorum sunt, & subsistentium, vt alibi satis probauimus. Similiter visio beata influit in omnes actiones liberas tanquam supremū dictamen, & regula comprehendens omnes actiones liberas operantis. Nam ideò beatitudo reddit impeccabiles ipsos beatos, quia videns Deum non potest aliquod dictamen formare defectuosum, & auersiuum à Deo; & sic omnes actiones illi subiiciuntur: in omnes ergo influit directiue, & moraliter, quia est cognitio finis vltimi, & vniuersalissimi, finis autem vltimus simpliciter, omnes actiones comprehendit, & in omnes influit. Non ergo illa potest solum concomitanter esse cum merito; & non influxiue, quia illud meritum, & illa operatio est ex illo fine, & ex vi coniunctionis cum visione beata non potest esse peccatum.

Ex dictis soluantur fundamenta opposita. Nam 28 quod attinet ad doctrinam D. Thomæ, occasione cuius Caiet. distinxit illud duplex meritum, constat optimè saluari sine tali distinctione, sed solum ponendo meritum vnius rationis, scilicet paræ viæ, & tamen saluatur quod tantum habuerit Angelus vnum actum meritorium, quia, est vnus per continuationem, dum alij discontinuarunt illum, peccando. Et ipse Angelus, qui continuauit meritum, poterat discontinuare peccando; & sic poterat facere, quod non esset illud meritum continuatione vnum: omnes tamen habuerunt actum meritorium in primo creationis instanti, & immediatè post instans creationis, quidam voluerunt continuare, quidam peccare, & diuidere impedimentum peccati præstando. Vnde illi qui continuare voluerunt, non immediatè post instans creationis glorificati sunt, sed adhuc in via perseuerarunt, & in merito primi instantis; & tamen adhuc verificatur quod post vnum actum meritorium glorificati sunt, quia adhuc post instans creationis ille actus meritorius idem manebat, quia continuabatur; & sic non erat diuersus, neque duplex actus, sed vnus, & idem actus meritorius non purè indiuisibiliter vnus, sed continuatione vnus æquiualens pluribus malorum Angelorum, quia dum isti peccabant, & discontinuabant actus seu instantia, illi perseuerabant in vnitæ actus sui. Qua perseuerantia posita confirmati sunt in bono, eodem actu meritorio existente, & in alio instanti, seu operatione incepit glorificatio cessante omni merito.

Ad ea verò quæ adducuntur ad inquirendum 29 vnde repugnet meritum, & præmium esse simul in eodem instanti, Respond. ex verbis supra allatis ex D. Thom. quod repugnant ex conditionibus essen-

Bbb tialiter

tialiter impossibilibus, scil. quia meritum est gratia imperfecta, & gloria est gratia consummata. Quæ imperfectio ex parte meriti ad gloriam est, quia debet supponere carentiam visionis, & obscure, seu per fidem cognoscere Deum. Perfectio autem gratiæ consummata est, tum in eo quod est cognitio clara Dei; tum in eo quod visio illa est influens vniuersaliter in omnes actus operantis, non solum concomitanter se habens, sicut etiam persona in vnione hypostatica est vniuersale principium actionum ipsius subiecti, vnde per nullam actionem quæ sit cum tali præmio potest cadere sub meritum, alias principium influens in meritum caderet sub merito. Et Christus Dominus merebatur vt viator, non obstante quod erat beatus, non tamen merebatur ipsam gloriam animæ, sed gloriam corporis, & alia extrinseca. Vnde in aliis præmiis, quæ non sunt gloria, & vnio hypostatica an possint in eadem instanti simul esse præmium, & meritum, non disputo, nec contendo, saltem de possibili; licet connaturaliter loquendo non conuenienter ponantur in eodem instanti meritum & præmium, si simpliciter meritum sit, & non etiã dispositio, quæ perseverat, & compatitur cum ipso præmio. Imò ex hoc iudicari, & discerni debet quando meritum compatitur cum præmio, vel nò, scil. quando procedit meritum ex principio compatibili cum præmio, potestque perseverare stante præmio, nec præmium influit valorem in meritum vt quado se habet operatio meritoria per modum dispositionis, & præmium per modum formæ: forma enim cõpatitur cum dispositione ex se secuta.

30 Vnde soluitur instantia quæ adduci solet pro sententia Caiet. quia non repugnat in eodem instanti, quo infunditur gratia sanctificans esse actum contritionis, qui est actus meritorius, saltem de congruo respectu ipsius gratiæ: ergo bene stat meritum in termino simul cum ipso termino. Et idem est de augmento gratiæ per actum feruentiorem quo quis se disponit ad illud: simul enim infunditur hoc augmentum, & existit actus ille meritorius. Cum enim meritum sit via ad præmium, & non repugnet dari actionem instantaneam, quæ simul sit fieri, & factum esse, similiter non repugabit quod simul sit actus meritorius, & eius terminus, seu præmium.

Et Conf. amplius in sententia probabili, quod in instanti separationis animæ potest dari actus meritorius, vel dispositiuus ad præmium, & mensuratiuus eius: ergo non est negandum quod simul sit meritum, & præmium in eodem instanti. Anteced. variis exemplis probatur. Nam in primis in sententia plurium Thomistarum probabile est, quod actus minus intensi qui meruerunt augmentum charitatis, & de facto non præbuerunt illud in hac vita, quia non proruperunt in actum feruentiorem, in illo instanti separationis prorumpunt in feruentiorem actum, & disponunt ad augmentum charitatis, & gloriæ, & tamen illud instans potest esse instans glorificationis, si anima nihil purgandum tunc habeat. Item martyrium non consummatur, nisi in ipsa morte, quia ante mortem nullus dicitur martyr, martyrium autem est actus meritorius: ergo datur meritum in termino post hanc vitam. Et idem est si quis cum attritione confiteatur, & in ipso instanti ultimo prolutionis formæ separetur anima, vel sensum prorsus amittat; & sic moriatur, recipit gratiam: ergo potest in termino vitæ iustificari, & beatificari: ergo & mereri.

Respon. illas instantias nihil iuuare oppositam sententiam, quia meritum illud, siue contritionis

ad primam iustificationem, siue feruentioris actus ad augmentum non sunt merita prouenientia ex aliquo principio impossibili cum ipso præmio, sed sunt dispositiones ad talem formam requisitæ, imò ab ipsa deriuatæ, & formatæ; & sic cum ipsa compossibiles. Vnde non negamus meritum, & præmium repugnare simul solum ex ratione communi, & generica actionis meritoria, cum hæc instantanea esse possit, & simul cum termino, sed ex ratione speciali talis meriti, & talis præmij, quatenus à principiis impossibilibus procedunt, vt dictum est.

Ad Conf. etiam patet ex dictis. Nam ille feruentior actus, qui tunc prorumpit in instanti separationis iam non est meritorius, quia est extra statum viæ, sed est dispositiuus ad illud augmentum, sine nouo merito. Talis autem dispositio non est in cõpatibilis cum illa forma, quæ est gloria, sed eiusdem rationis cum illa, & cum ea perseverans. De martyrio dicimus non consummari eius meritum in ipsa morte in facto esse, sed in ipsa morte in fieri, id est immediatè ante separationem animæ, aut quando ex vi passionis redditur ineuirabilis ipsa mors, seu cum aliquis voluntariè patitur inflectionem mortis, vt docet S. Tho. 2. 2. q. 124. art. 4. ad 4. De illo qui in momento separationis accipit absolutionem, quia ibi terminatur prolatio verborum, si non habet nisi attritionem, certius est non iustificari, quia in instanti intrinseco separationis Sacramenta non operantur, quæ sunt signa sensibilia recepta in homine, tunc autem iam non est homo. Secus est si tunc incidat in amentiam, quia in illo instanti adhuc est homo, licet non exerceat functiones humanas. Non requiritur autem ad hoc vt recipiatur Sacramentum, quod subiectum actu exerceat liberas actiones, sufficit quod existat verè homo, & antè exercuerit illas actiones, nec retractauerit. Potest tamen in instanti separationis sibi remitti peccatum veniale, sed tunc in illo instanti non habebit gloriam, quia restabit pœna illius luenda in Purgatorio, de quo D. Tho. in 4. dist. 21. quæst. 1. art. 3. Vel si in eodem instanti tota pœna illi irrogetur à Deo, adhuc non merebitur simul cum gloria, quia est extra statum viæ, sed satisfaciet.

31 Ex dictis colligitur, non repugnare quod peccatum Angeli, & pœna illius simul in eodem instanti, detur, de facto tamen incepit pœna Dæmonum quando & gloria Angelorum, fuitque instans tertium in Dæmonibus quo terminata est illorum via secundum autem in Angelis. Prima pars deducitur ex dictis, quia demeritum est culpa, quæ non est, impossibilis cum damnatione, nec à principio aliquo ei impossibili procedit, imò cum ipso statu damnationis vehementius crescunt peccata: non ergo cessant peccata adueniente supplicio: ergo possunt simul esse in eodem instanti peccatum Angeli cum obstinatione, & simul cum supplicio. De facto tamè præcessit in Angelis instans peccati, & fuit ante instans damnationis, non propter impossibilitatē, sed propter diuersitatem actionū, quia aliquæ actiones fuerunt in Angelis peccatis quæ cessauerunt in damnatione, & supplicio corū. Ergo fuerunt diuersa instantia, quia instantia in Angelis distinguuntur penes diuersos actus, quorū vnus cessat, alio adueniente. Anteced. patet, quia Angeli peccantes non fuerunt puniti quandiu erant in celo, sed cum ex illo proiecti sunt. At quando erant in celo, fuit pugna inter Angelos bonos, & malos, Apocalyp. 12. Factum est prælium magnum in celo, Michael & Angeli eius præliabantur cum dracone, &c. cum ergo exercebatur pugna, iam Angelus peccator erat, quia draco erat

erat, & tamen adhuc non damnatus, quia adhuc in celo erat, & illa pugna cessauit, cum proiectus est de celo, & punitus in inferno: ergo aliquod instans cessauit in damnatione, quod durabat in culpa, quia instans, operatio est. Nec obstat quod post vnum instans immediatè est tempus; & sic in illo tempore immediatè post neque essent in termino, quia nondum inceperat damnatio, neque in via, quia cessauerat instans peccati. Contra enim est, quia instantia in Angelis non se habent sicut instantia nostris temporibus, quæ ex partibus motus procedunt, & inter illas colligantur, sed sunt indiuisibiles durationes perfectæ, ab omni motu diuisibili independentes; & sic immediatè se habet vnum instans ad aliud, transitque Angelus ab vna duratione indiuisibili vnius operationis ad aliam, sine media diuisibilitate motus. Quare Angeli in alio instanti puniti sunt, in aliquo peccauerunt. Peccauerunt pugnando, & negotiando multa, cessauit pugna, & negotiatio, seu suasio aliorum in ipsa damnatione. Incepit in damnatione passio, & pœna acerbissima ignis, multaque peccata in Deum vt blasphemix, odium, aliæque similia, quæ in damnatione perseverant. Quando autem aliqui Patres dicunt initium damnationis in ipsa auersione Angelum inuenisse, vt non sit aliud incipere iam puniri, quam illius beatifici boni dilectione destitui, intelliguntur de initio damnationis extrinseco, quia cum fuerunt obstinati in malo, hoc ipso in tali auersione incepit damnatio. Et eodem modo dicitur hoc fuisse Angelis lapsum, quod hominibus mors, scilicet quoad obstinationem, & inflexibilitatem ad resipiscendum, non quoad intrinsecam inceptionem supplicij, quasi cum ipso lapsu incepit in Dæmonibus.

ARTICVLVS II.

Quæ sit causa obstinationis in Dæmonibus?

Obstinatio in malo est firma, & immobilis adhæsiō voluntatis ad finem prauum sine vllō remedio retrocedendi, & conuertendi se ad bonum, & hæc datur in damnatis, quia in inferno nulla est redemptio, nec ibi aliquis ordo, sed sempiternus horror inhabitat. E contra verò confirmatio in bono est immobilis adhæsiō erga rectum finem sine vlla potestate aut periculo recedendi ab illo, sicut datur in statu gloriæ.

Duo autem tanquam certa supponenda sunt.

Primum est in damnatis dari hanc obstinationem, ita vt reuerti non possint ad bonum, neque à malitia sua conuerti. Constat hoc in Scriptura, tum ex ipsa continuatione culpæ, tum ex perpetuitate pœnæ, quæ non posset esse perpetua, si à culpa posset damnatus resipiscere: pœnitenti enim conceditur remissio, & peccato remisso cessat pœna, aut temporalis redditur. Quod ergo in damnatis semper continetur constat in primis ex illo Psalm. 73. *Superbia eorum qui te oderunt, ascendit semper*: si ergo semper ascendit, nunquam cessat, quod est obstinatum in peccato habere cor. Item nunquam damnatos de peccato pœnitere deducitur ex illo Psalm. 6. *In inferno autem quis confitebitur tibi?* Item Ecclesiastes 9. *Nec opus, nec ratio, nec scientia erunt apud inferos*: si autem à peccato posset resipiscere, rationem haberent, & opus bonum. Ad quod etiam pertinet illud Christi Domini Ioan. 9. *Venit nox* (id est damnatio post mortem) *quando nemo potest operari*; & ad Galat. 6. *Ioan. à S. Thom. in 1. part. D. Th. Tomus al ter.*

Dum tempus habemus operemur bonum: ergo post hoc tempus, scil. post spatium huius vitæ non est operatio bona. Similiter constat pœnam seu supplicium damnatorum in perpetuum duraturum, iuxta illud Matth. 25. *Ite in ignem æternum, qui paratus est Diabolo, & Angelis eius.* Et infra: *Et ibunt ibi in supplicium æternum.* Vbi autem pœna est æterna, culpa non remittitur: ergo semper manet: ergo voluntas illi semper adhæret, & afficitur, quod est esse obstinatam voluntatem in malo: si enim voluntas illi non adhæreret, ab illa resipisceret. Vnde S. Gregorius lib. 34. *moralium* exponens illa verba Iob. 41. *Æstimabit abyssum quasi senescentem*, id explicat de persuasionē Diaboli, quæ aliquibus persuadet abyssi, seu inferni pœnas quandoque finire, qui fuit error Origenistarum, quem etiam refutat S. Thomas in hac quæst. 64. art. 2. & inde deducit voluntatem Dæmonum esse obstinatam in malo, quia nunquam mutabitur eius voluntas in bonum, vt pœna eius finiatur. Et rationem soluens S. Gregorius cit. loco, cur videlicet Sancti non orent pro damnatis, cum scriptum sit *Orate pro inimicis vestris*, respondet; *Orant sancti pro inimicis suis eo tempore, quo possunt ad fructuosam pœnitentiam eorum corda conuertere, atque ipsa conuersione saluare. Et quomodo pro illis tunc orabitur, quando iam nullatenus possunt ad iustitia opera ab iniquitate commutari? eadem itaque causa est, cur non oretur tunc pro hominibus æterno igne damnatis, quæ nunc etiam causa est, vt non oretur pro Diabolo, Angelisque eius æterno supplicio deputatis.* Igitur certissimum est, & contrarium est error manifestus, vt D. Thom. citato loco dicit, quod Dæmones, & damnati non possunt conuerti ad pœnitentiam, quod est esse obstinatos in malo.

Secundò tanquam certum supponendum est huius tam duræ obstinationis, & tenebrôsæ obsecrationis causam solùm posse esse duplicem, scil. extrinsecam, & intrinsecam. Cum enim miserabilis ille status creaturæ damnatæ comparetur nocti, Ioan. 9. *Venit nox quando nemo potest operari*, sicut materialis nox habet causam intrinsecam, & extrinsecam, ita & nox spiritualis: causatur enim nox ex absentia Solis tanquam ex causa extrinseca, & ex interpositione terræ inter nos, & Solem quæ est obstaculum impediens illuminationem Solis. Sic ergo horrenda illa nox quæ cadit in spiritum in peccato mortali finientem statum viæ, solùm oritur ex duplici causa, scilicet ex subtractione diuinæ gratiæ tam actualis quàm habitnalis, & hæc est causa extrinseca, scilicet absentia Dei illuminantis; & secundò ex adhæsiōne immutabili ad peccatum: Si enim peccata nostra differunt inter Deum, & nos, vt dicitur Isaïa 59. vbi voluntas adhæsiōnem perpetuam habet ad peccatum, immobilem obstinationem habet, & excludit omne Dei auxilium, & gratiam à se. Vtramque hanc causam in obstinatione Diaboli assignauit S. Thom. Primam quidem, scilicet extrinsecam in quæst. 24. de verit. art. 10. & quæst. 16. de malo artic. 5. dicens, quod *causa obstinationis Dæmonum est denegatio diuini auxilij.* Secundam verò causam scilicet intrinsecam dicit esse inflexibilitatem Angeli, quæ post plenam deliberationem, & electionem circa vnā partem illi adhæret tanta immobilitate, quanta ipsi fini in comuni, quia eodem actu, & impetu fertur in finem, intendit in media, quæ ex deliberatione, & motione finis vult eligendo determinatè. Quam causam tradit in hac. quæst. 64. art. 2. & 4. contra Gentil. c. 95.

Licet autem quæcumque causa obstinationis ad vnam ex prædictis reduci debeat, vtrique tamē sigillatim sumpta suas patitur difficultates, & grauiiores se offerunt circa secundam, quàm circa primam. Singulas tamen examinabimus in præfenti.

*Subtractio omnis auxilij ad bonum
est causa obstinationis
Dæmonum.*

Quod subtractio diuini auxilij sit causa obstinationis in malo, difficultate caret: sicut enim posita permissione diuina, infallibile est hominem cadere in peccatum, ita continuata permissione certum est continuari peccatum; & sic denegata omni gratia ad bonum voluntas manet affecta ad malum, & adhæsiō ista continuata, obstinatio est. Nihil autem aliud est permissio cadendi in peccatum, quàm denegatio gratiæ & subtractio auxilij, dicitur enim Deus obdurare corda, non impertiendo malitiam, sed non largiendo gratiam, vt Augustin. docet. Quod autem Dæmonibus denegetur omnis gratia, omnēque auxilium ad bonum, deducitur ex ratione communi hominibus, & Angelis damnatis, scilicet ratione status illius, qui est status summæ miseriæ, status termini vltimi, status retributionis peccati secundum rigorem diuinæ iustitiæ. Et præter rationem communem Angelis, & hominibus, etiam attenditur specialis, aliqua ratio in Angelis, propter quam Deus illis subtrahit omne auxilium gratiæ. Igitur ille status damnationis, in quantum communis est Angelis, & hominibus exigit subtractionem omnis auxilij diuini, primò quia est status summæ miseriæ, & infelicitatis, sicut status beatitudinis est summæ felicitatis. Quæ summa miseria explicatur illis verbis Iob 10. *Vbi nullus ordo, sed sempiternus horror inhabitat, & illis supra citatis Ecclesiastes 9 Nec opus, nec ratio, nec scientia erunt apud inferos.* Status ergo tantæ miseriæ quod caret omni ordine, omni scientia, omni ratione, & vestitur omni horrore, etiam petit carere omni auxilio ordinante ad bonum, & ad rationem. Secundò ille est status termini vltimi, per quem aliquis ponitur extra viam. In via autē tenditur ad patriam, & ad beatitudinem: ergo qui ita deniat, quod amplius non potest poni in via, sed est in termino vltimo, & totaliter extra viam, manifestum est quod ex vi talis termini carere debet omni auxilio ordinante, & dirigente ad patriam; omne autem auxilium ad bonum opus est de se directiuum ad vltimum finem, qui est Deus, & beatitudo. Vnde dicit D. Tho. q. 16. de malo, art. 5. quod *Immutabiles sunt Angeli post primam electionem, vel in bono, vel in malo, quia tunc finitur in eis status viatoris, vnde non pertinet ad rationem diuinæ sapientiæ, vt vltius Dæmonibus gratia infundatur per quam renocentur à malo primæ auersionis, in qua immobiliter perseuerant.* Denique quia ille status est status retributionis secundum rigorem iustitiæ, conuenit vt tunc denegetur omnis gratia, quia per peccatū homo incurrit debitum carenti illa. Vnde hoc ipso, quod ponitur extra statum viæ in peccato per quod abiicit à se gratiam, nec amplius voluit illā vt se ordinaret ad debitum finem, iustum est vt diuina iustitia id exequatur, illūque omni gratia, & benedictione, seu auxilio suo priuet, iuxta illud Psal. 108. *Et dilexit maledictionem, & veniet ei, & noluit benedictionem, & elongabitur ab eo.* Et ita hoc reducit D. Tho. ad diuinam iustitiam in quæst. 24.

de verit. art. 10. Hoc, inquit, iustitia eius deposcit: iustum est enim, vt qui bene velle dum possent, noluerunt, ad hanc miseriā deducantur, & bene velle omnino non possint, quod vtiq; est denegatio omnis auxilij sufficientis, siquidem auxilium sufficiens dat posse. Subdit tamen S. Doctor in calce corporis specialem rationem habere in Angelis diuinam iustitiam, vt eos priuet omni auxilio gratiæ, quod quia per alium ceciderunt, nec per alium resurgere debent. Est verò alia peculiaris causa in Angelis pro sua abstractione, quia congruit modo conaturali operandi eorum, vt quia immobiliter adhærent suæ sententiæ, & electioni, in qua semel firmantur; idēd semel posita electione, & adhæsiōe eorum ad malum, non amplius eis detur, vnde conuertantur. Sed hoc ad causam intrinsecam obstinationis pertinet, de qua statim agemus.

Insurgit nihilominus contra hanc obstinationis causam non dissimulanda difficultas. Etenim damnati retinent libertatem ad peccandum, & de facto peccant in illo statu: ergo non debent carere auxilio sufficienti ad bonum. Pater consequentia, quia si non haberent auxilium sufficiens, non haberent potentiam ad bonum, quia auxilium sufficiens dat posse: in hoc enim consistit sufficientia, si autem non habent potentiam ad bonum, non peccant in non faciendo bonum, quia ad peccandum requiritur quod aliquis possit facere, & non faciat id quod lege præceptum est: si ergo non possunt facere bonum: ergo non peccant in non faciendo illud, sed sunt necessitati ad malum. Ad libertatem autem peccati requiritur potentia ad vtrumlibet, tam ad bonum quàm ad malum, quæ est libertas contrarietatis. Sine auxilio autem sufficienti non datur potentia ad bonum. Quod si retinent potentiam ad bonum, ac per hoc habent auxilium sufficiens: ergo non carent omni gratia, & omni auxilio Dei. Et vltius obstinatio Dæmonum solum erit carentia auxilij efficacis ad operandum de facto, non auxilij sufficientis quo operari possint si velint, quod negat D. Thom. *vbi supra.* Et sic non erit maior obstinatio Dæmonum, & hominum damnatorum, quàm obduratio aliquorum peccatorum in hac vita, quibus denegatur auxilium efficax totaliter, quia nullum opus bonum faciunt, præsertim aliqui insignes peccatores, qui circa mortē nullum bonum opus faciunt, nec facturi præuidentur; & sic moriuntur: ergo talibus denegatur omne auxilium efficax, nec tamen eorum obduratio tanta est, quanta obstinatio Dæmonum. Quare difficile est componere libertatem damnatorum, & imputationem peccati cum carentia omnis auxilij sufficientis, etiam ad bonum honestum ordinis naturalis, per quod auxilium datur ipsum posse.

Variè conantur Authores hanc difficultatem dissoluere. Quidam, vt P. Vasquez *hic disput. 141. cap. 4.* dicunt damnatum carere omni cogitatione congrua, seu efficaci, quæ habitura sit aliquem effectum: hanc enim censet esse gratiam, seu gratuitum donum, & indebitum, etiam si sit ordinis naturalis; vnde optimè potuit Deus huiusmodi gratiam denegare damnatis; & sic manent priuati omni operatione bona, etiam ordinis naturæ. Hæc tamen solutio solum denegat Dæmonibus auxilium efficax, non sufficiens, quod est contra D. Thomam *supra citatum qu. 24. de verit.* Et, vt bene contra ipsum Vasquez vrget Suarez *lib. 8. de Angelis c. 9.* negatio cogitationis congruæ potius in sententia Vasquez debet poni pro effectū obstinationis, quàm pro casu, quia iuxta dictā solutionem

solucionem non negatur Angelis auxilium sufficiens, sed efficax, quia sufficiens requiritur ut imputetur peccatum: sine ipso enim non datur posse ad bonum. Auxilium autem ipsum sufficiens in sententia Vasquez redditur congruum, vel incongruum, non ex se, sed ex futuro consensu, vel dissensu voluntatis. Qui dissensus resistentia est, & obduratio voluntatis: ergo potius obstinatio seu resistentia voluntatis est causa incongruitatis auxilij, quam incongruum auxilium sit causa obdurationis, & obstinationis in Dæmone.

Alij existimant Deum denegare concursum generalem, & simultaneum ipsi damnato, ne eliciat aliquem actum bonum; & sic dici obstinatum in malo. Non potest autem creatura elicere aliquam operationem denegato concursu generali. Sed isti vel fatentur denegari etiam auxilium sufficiens denegato simultaneo, vel concedunt manere. Si denegatur sufficiens, quare recurrunt ad negationem simultanei, cum simultaneus non det ipsam posse, sed supponat. Et tunc restat illis integra difficultas, quomodo cum denegatione sufficientis auxilij stet libertas ad utrumlibet, imputeturque peccatum, si deest potentia ad bonum. Si verò non denegatur sufficiens auxilium, currunt difficultates allatae, nec assignatur obstinatio quæ tollat posse facere bonum, sed solum quæ deneget efficax, seu actuale auxilium. Certè posita potentia, & auxilio sufficienti ad bonum, dicere quòd Deus negat concursum generalem in perpetuum, videtur violentiam quandam inducere, sicut si igni denegetur concursus ad calefaciendum, & ad miraculum perpetuò continuatum obstinationem illam reducere, non ad conaturalitatem illius status. Inconueniens autem est ponere potentiam cui perpetuò Deus deneget concursum generalem, qui omnibus creaturis communis est.

P. Suarez lib. 8. de Angelis c. 11. dicit obstinationem Dæmonum oriri ex misero statu quem habent, adiuncta naturali conditione, & fragilitate voluntatis creatæ, suis tantum viribus relictae, sine ullo gratuito vel morali dono, cum solo physico concursu generali. Miseriam autem illius status exaggerat per conditiones ad illum concurrentes, sicut continua consideratio malorum quæ patiuntur, bonorum quæ amiserunt, peccati quod commiserunt, continuum odium Dei, quem vix apprehendunt ut beneficium, sed ut punientem, ita ut ipsum esse quod eis dat non reputent beneficium: potius enim vellent non esse, quam sic esse. Ex quibus infert hanc impossibilitatem operandi bonum in quo obstinatio consistit, non esse physicam, sed moralem, tantam tamen, ut oppositum infallibiliter nunquam eueniat, sicut homini lapso impossibile est omnia venialia collectiue vitare. Quòd si maiorem impossibilitatem velimus illi obstinationi tribuere, necesse est denegationem auxilij generalis ad omne bonum eis tribuere. Certè in hoc modo dicendi illud desideratur, ut explicetur tandem, an denegetur eis, & subtrahatur omne auxilium sufficiens inter tot miseras illius status; quia si denegatur, restat explicare punctum difficultatis, quomodo eis imputetur peccatum. Si non denegatur, est contra D. Tho. & non est illa obstinatio carentia omnis auxilij, sed tantum efficacis, quod etiam datur in hac vita.

Quare dicendum est quòd auxilium sufficiens cum constet ex multis concurrentibus ut potentia constituatur proximè potens, & expedita ad agendum; aliquid pertinens ad auxilium sufficiens datur damnatis, & aliquid denegatur. Concurrit autem ad rationem auxilij sufficientis aliquid ex par-

Joan. à S. Thom. in 1. part. D. Th. Tomus alter.

te cognitionis quasi speculatiue, quæ cognoscitur ipsum bonum etiam supernaturale, & iudicatur de eius conuenientia, aut excellentia secundum se, & quasi in abstracto, quæ est cognitio arida, & non affectiua, nec inclinatiua affectus, sufficiens tamen ad formandum dictamen indifferens: hoc enim non semper formatur ex obiectis quibus afficimur, sed etiam ex his quibus dissentimus, ita quòd vnum extremum repræsentatur contrariè ad alterum, vnum ut abominandum, aliud ut amandum. Concurrit secundo ex parte auxilij sufficientis cognitio affectiua, seu excitatiua voluntatis, licet inefficaciter, respectu consensus, inspiratio etiam in ipsam voluntatem, non quæ de facto consentiat, sed quæ paulatim disponitur voluntas ad consentiendum: sæpe enim sentimus aliquas in voluntate dispositiones, & excitationes ad bonum, quas tamen repellimus, & ad effectum non perducimus, & tales non perueniunt ad vim gratiæ efficacis, sed manent in vi sufficientis auxilij, sed tamen plus habent quam sola, & arida cognitio boni secundum se, & quasi in abstracto. Denique seruiunt ad auxilium sufficiens etiam habitus infusi, sicut fidei, & spei, piæ affectionis, & si qui alij qui etiam in peccatore possunt reperiri: seruiunt externæ suasiones, bona exempla, Sacramenta &c. His sufficientibus auxiliis quæ vno verbo vocamus auxilium sufficiens affectiuum, omnino priuatur Diabolus, & spiritus damnatus. Sic enim docet S. Thom. in hac q. 64. art. 1. quòd *Cognitio affectiua totaliter est ablata a Dæmonibus*, non illa quæ in speculatione consistit, etiam si supernaturalis sit. Et hoc congruit illi miserrimo statui in quo nullus ordo, utique, nec ordinatio ad bonum, sed sempiternus horror inhabitat. Quòd autem hæc affectiua cognitio pertineat ad auxilium sufficiens, & non ad efficax, patet, quia non habet infallibiliter annexum ipsum effectum, sed sistit in puro affectu, seu dispositione inclinante affectum, & consequenter se habet in actu primo respectu consensus, quòd est pertinere ad auxilium sufficiens. Quòd verò ad saluandam libertatem sufficiat cognitio indifferens pro utroque extremo, licet non sit inclinatiua nec affectiua ad utrumque, sed ad vnum tantum, constat ex dictis, quia aliquando proponuntur duo contrariè opposita, vnum ut fugiendum, & abominandum, aliud ut prosequendum, quia opposita sunt: ergo non requiritur cognitio affectiua erga utrumque, sed sufficit affectiua erga vnum, & cognoscitiua tantum erga alterum, licet in abstracto, & quasi speculatiue, quia ad libertatem sufficit potentia indifferens remota, ita quòd non se habeat coactè ad aliquod extremum, licet desit illi potentia proxima ad sequendum alterum ex parte inclinationis, & affectus circa tale obiectum. Licet autem potentia voluntatis sit vis elicitiua vtriusque actus, siue boni, siue mali, & hæc maneat in dæmonibus quantumcumque obstinentur; & similiter licet obiectum huius potentia sit bonum cognitum, & propositum, & hoc etiam maneat in Dæmonibus, qui cognoscunt obiectum bonum à quo auersi sunt: siquidem illud odio habent, tamen ultra hoc requirunt vires in voluntate quibus proximè reddatur potens, id est, proportionata, & coaptata erga hoc obiectum ut ponderet, & inclinetur in illud. Inclinatur autem, & vires sumit voluntas per affectum, quia vires istæ sunt ad ponderandum, & inclinandum in aliquod obiectum, & pondus, seu vis illa ponderatiua non est aliud quam affectus, iuxta illud August. *Pondus meum amor meus*. Et sicut intellectus accipit ex cognitione, & illustratione principiorum vires per modum luminis ad penetrandas, & inferendas con-

Bbb 3 clusio

clusiones, ita voluntas ex affectu finis redditur ponderans, & vires habens ad ea quæ ex fine deducenda sunt. Vnde ipsa inspiratio qua Deus voluntati dat affectum, & suauitatem, & coarctat voluntatem erga aliquod obiectum, sunt vires gratiæ, quibus homo potest operari, sicut illustratio principiorum dat vires intellectui ad inferendum conclusiones. Et è contra privatio istius affectus, & suauitatis, seu proportionis voluntatis erga bonum, est absentia gratiæ, qua induratur voluntas, & manet sine viribus, quasi intellectus sine principiis, & visus sine luce erga obiecta appetenda.

7 Ex quibus manifestè explicatur quomodo obstinata voluntas maneat libera ad peccandum, si bique imputetur peccatum, & tamen careat omni auxilio sufficienti, & potentia proxima, seu viribus gratiæ ad volendum quodcumque bonum honestum. Nam voluntas obstinata manet potens, & indifferens ad utrumque obiectum bonum, & malum in ratione potentia volitivæ physicæ, & manet cum cognitione utriusque obiecti: & ex hac parte retinet totam suam libertatem ad utriusque volitionem, plenamque indifferentiam, sine vlla coactione. Sed tamen caret omni incitatio, & affectivo ad bonum honestum, etiam naturalis ordinis, ideoque privatur omni gratia, & auxilio disponente, & inclinante, seu afficiente ad bonum. Et sic manet privata etiam in actu primo, & in præparatione omnibus viribus, & auxilio sufficienti affectivo ad bonum, omnique inspiratione ad bonum. Et hoc sufficit ut dicatur simpliciter non posse converteri Diabolum ad bonum, non solum quia difficile, sed quia simpliciter non potest, sicut Augustinus, & Patres, & Concilia dicunt contra Pelagium, quod sine gratia non solum difficile, sed simpliciter, non potest homo converteri, & operari bonum. Et nomine gratiæ intelligebant contra ipsum Pelagium non solum ipsam voluntatem, seu potentiam liberam, quæ physicè est indifferens ad velle, & non velle, nec solum legem, aut etiam prædicationem externam vel internam, qua homo accipit cognitionem obiecti boni, sed etiam subministrationem spiritus, qua affectivè homo tangitur, & proponuntur sibi res modo affectivo, & sine tali auxilio afficiente, & inclinante homo non habet vires, & non solum difficile non potest, sed simpliciter non potest converteri. Si ergo damnati carent omni cognitione affectiva, & inspiratione voluntatis ad bonum tam formaliter, quam in præparatione Dei oblata, non solum difficile, sed simpliciter non possunt operari bonum, carentes omnibus viribus ad bonum. Et quidquid sit, an ista inspiratio, & affectiva cognitio qua carent, sit aliquid morale, vel physicum, tamen illud tale est, quod sine ipso simpliciter non possunt, & non solum difficile. Vnde cauenda est æquivocatio illius termini *moraliter* quando dicitur, quod moraliter non possunt operari bonum, bene tamen physicè. Si enim intelligatur per *ly moraliter*, quod non possunt morali, id est ordinario, & facili modo, possunt tamen aliquantulum, licet difficile, negandum est quod solum moraliter non possint, prout *ly moraliter* opponitur huic quod est simpliciter, quidquid sit de morali ut opponitur physico, sed dicendum est quod simpliciter non possint, sicut dicitur contra Pelagium, quod simpliciter sine gratia non possumus facere bonum, quidquid sit an illa gratia morali modo moueat, vel physico.

Inflexibilitas Angeli in malo, vel bono post plenam electionem, & iudicium.

Veniamus ad causam intrinsecam obstinationis, seu ex parte Angeli se tenentem, quæ difficilior à plerisque intelligitur. Nam D. Tho. in hac quaest. 64. art. 2. assignat pro causa obstinationis Angeli eius inflexibilitatem, seu immobilitatem, tum in cognoscendo, tum in appetendo. Dicitur enim Angelus immobiliter apprehendere, quia sine discursu, quippe cum in ipsis principiis immediatè videat conclusiones; & ideo illis ita perfectè adhæret, sicut primis principiis, quia per comprehensionem principiorum illas videt. Voluntas similiter, quia regulatur per intellectum, immobiliter vult quod immobiliter repræsentatur bonum, sicut est bonum in communi; bona autem particularia mutabiliter vult, si mutabiliter etiam repræsententur, sed si eodem actu, & comprehensione qua repræsentatur bonum in communi, accipitur bonum particulare, & voluntas eodem act, & imperio quo fertur in finem in communi feratur in bonum particulare, tam inflexibilis erit circa particulare, cui semel adhæret, quam circa bonum in communi cui naturaliter afficitur, nec potest mutari circa conclusiones, nisi mutetur circa principia, nec circa bona particularia, nisi circa bonum in communi.

Hæc doctrina multis difficilis visa est, si in eo rigore sumatur quod Angelus ab eo quod semel perfectè iudicat, aut vult, simpliciter non possit reverteri secundum naturam suam: solumque istam doctrinam D. Tho. admittunt quoad hoc, quod Angelus difficile possit reduci, & retractare id quod semel intellexit, & voluit, quia cum perfectæ cognitionis sit, non faciliè mutat sententiam: omnis enim mutabilitas in sententia, & in affectu ad quendam defectum spectat, & turpe reputatur etiam apud homines, quia id videtur ex quadam ignorantia, seu inadvertentia oriri, quia non satis attenditur in principio ad id quod sentiendum, vel volendum est. Certè Angelus advertenter vidit se ita amare propriam excellentiam, quod ex certa scientia recusabat ex gratuito beneficio habere gloriam supernaturalem. Si ergo tota supernaturalis gloria eum non potuit movere à sententia sua de sequenda propria excellentia, quid reliquum erit, quo ab ea possit diuelli? Ceterum quod ex ipsa natura, & naturali modo agendi in Angelo sit simpliciter ei impossibilis ista retractatio, & reductio, multi nolunt tenere, nec in eo sensu accipiunt doctrinam hanc D. Tho. sed solum quod sit valde difficile. Ita Suarez lib. 8. de Angelis c. 11. Vasquez hic disp. 239. c. 3. & 4. Valentia, hic quaest. 15. puncto 2. Arrubal disp. 180. c. 2. Curiel lib. 2. controuers. controu. 5. & ex antiquis Scotus in 2. distinct. 7. & alij ibidem. Oppositum autem, scil. D. Thomæ doctrinam in toto rigore esse explicandam, scil. quod Angelus non solum difficile, sed simpliciter non possit reduci, neque retractare id quod semel iudicauit, & cui ex plena electione adhæsit, tenent communiter discipuli S. Thomæ. Caiet. ad art. 2. huius quaest. 64. & ibi Nazarius controuers. 1. Bannèz dub. 1. Ferrar. 4. contra Gétil. c. 9. Capreolus in 2. dist. 7. quaest. 1. Carmelit. Salmant. tr. 7. de Angel. disp. 13. dub. 1. Nauarrete tomo 3. controu. 84.

Dicimus ergo quod Angelus post electionem, seu resolutionem positam circa aliquod obiectum non potest iuxta connaturalem suum modum operandi retractare, seu mutare iudicium, seu affectum, & adhæSIONem ad tale obiectum, quod est ex modo

do suo connaturali manere inflexibilem, & simpliciter non posse conuerti. Ad quem modum sic connaturaliter procedentem consequitur quod iuxta illum non debetur Angelo sic peccanti, & inflexibiliter adhærenti aliqua gratia ut conuertatur, quod est manere obstinatum in malo, & iuxta suam pessimam dispositionem omni gratia priuari. Antequam verò Angelus resolutione eligat, seu adhæreat alicui parti, se mouendo, & ordinando ad illam, potest mutare iudicium, & voluntatem. Assertio hæc docetur clarè quoad vtramque partem à S. Thom. in hac qu. 64. art. 2. & qu. 16. de malo art. 5. & qu. 24. de verit. art. 10. & 4. contra Gentil. c. 95. & videri etiam potest in 2. ad Annibald. dist. 7. qu. 1. art. 2. & in aliis sententiariis, ibidem. In quibus omnibus locis reducit hanc immobilitatem D. Thom. ad vnum principium, scil. quia naturalis modus procedendi in Angelo est modus ita perfectus, & comprehensiuus, quod eodem actu, & tendentia qua fertur in principia, fertur in conclusiones, & qua fertur in fines, fertur in media. Vnde si resolutione adhæret conclusionibus, & mediis tanta immobilitate fertur in vnum, sicut in alterum, quia indiuisibili, & vnica tendentia: ergo tam impossibilis est in Angelo resolutione, & determinatè procedente reuersio, & retractatio conclusionum, sicut principiorum, mediorum quàm finium. Ergo sicut nos immobiliter nos habemus in actu synderesis circa principia practica vniuersalia, & in voluntate circa finem in communi, sic se habet Angelus respectu omnium eorum, quæ sub fine in communi continentur, quando vult determinatè, seu resolutione, & per electionem se habere erga illud.

Et pro huius explicatione aduerte, quod immobilitas ista, & inflexibilitas Angeli non consistit in immobilitate actus quoad exercitiū, sed quoad specificationē. Nec enim Angelus quādo aliquid determinatè eligit, ita necessitatur quoad exercitiū, quod non possit vnquā cessare ab illo actu, sicut beatus in actu amoris Dei. Non hoc dicimus, neq; hoc est necessariū ad rationē inflexibilitatis, & irreducibilitatis, sed solum dicimus quod illud motiū, quo determinatè elegit, non potest mutari in Angelo in contrarium, sed manet quoad illud, ita immobilitatus, sicut circa ipsum finem, & bonum in communi, quia eo tanquam motiū indiuisibili vtitur, & extenditur ad determinandum, & resolutionem se circa id quod eligit. Secundò aduerte, quod hæc inflexibilitas in Angelo non dicitur ex natura ipsa sic conuenire quod nec de potentia absoluta tolli possit à Deo, & conuerti voluntas Angeli ad oppositum eius quod semel voluit: hoc enim nullo modo dici potest in sententia D. Tho. qui expresse fatetur posse Deum mutare voluntatem Angeli peccantis in bonum: dicit enim sic in qu. 16. de malo art. 5. ad 13. quod *Mouere voluntatem solus Deus potest, qui etiam secundum absolutam potentiam posset mutare voluntatem Demonis in bonum, sed tamen hoc non congruit naturæ ipsius, ut dictum est.* Quare inflexibilitas ista in Angelo solum intelligitur secundum modum naturalem operandi eius, quia ita indiuisibili modo tendit in finem, & in ea quæ ex fine eligit, & determinatè vult, quod non alia, nec minori immobilitate adhæret fini, quàm mediis, seu rationi formali tendendi ad finem, & rei illi quæ accipit pro fine. Et generaliter loquendo omnis determinatio, & adhæsiō Angeli, siue in intellectu, siue in voluntate ex ipso naturali modo operandi, immobilis est, quia modo immobili fit, id est, eadem indiuisibili tendentia, & comprehensione, qua fertur in principia, vel in finem.

Denique aduertendum est, quod Angelus in his quæ iudicat, aut vult, aliquando procedit cum plena determinatione, & comprehensione, aliquando non, sed ductus coniectura aliqua, & in re non plenè à se cognita. Tunc autem dicitur procedere cum plena determinatione, & resolutione, quando circa aliquid procedit ex aliquibus principiis sibi euidenter, aut certò cognitis, ratione quorū conueniē sibi comprehensione procedere, & attendendo ad omnia quæ possunt conuenientiam rei proponere, aut ab ea retrahere. Principia autem euidenter Angelo cognita sunt principia naturalia, quantum ad lumen naturale, & principia certò cognita, sed non euidenter sunt principia supernaturalia fide diuina cognita, quibus adhæret Angelus ex gratia supernaturali, si vult uti tali lumine, sed si non vult illo uti, sed ex adhæsiōne ad naturalia principia, quæ euidenter cognoscit, & comprehensione, & vult recusare supernaturale lumen, & ab illo se subducere, non quidem dissentiendo aut reputando falsas res fidei (sic enim esset hæreticus) sed non regulando per fidem suas actiones, talis adhæsiō cum recusatione rei superioris est plenè determinata, & recusatio illa plenè volita, quia consequitur ex adhæsiōne facta ad rem naturalem comprehensione in suis principiis cognitam: tunc autem iudicium Angeli non est plenè determinatum, neque ex adhæsiōne, & consequenter reuertibile, quando non ex principiis quæ cognoscit euidenter, & comprehensione, sed ex quibusdam coniecturis, aut aliis effectibus non plenè manifestantibus causas iudicat aliquid, aut sentit, & sic etiam vult, sicut sentit. Hoc enim iudicium sic formatum ex talibus principiis non est firmum, & sic non facit adhæsiōnem, nec inflexibilitatem inducit. Et hoc ita ponendum esse in Angelis patet ex doctrina D. Tho. qua docet inter Angelos etiam bonos posse esse pugnam, & discordiam, non voluntatum, sed opinionū, quatenus secundum contraria merita, vel demerita iudicant diuersimodè aliquid conuenire non cognoscendo super hoc plenè diuinam voluntatem, quam tamen consulunt, & iuxta eius instructionem concordantur, ut docet *infra qu. 113. art. 8. & in 2. dist. 11. q. 2. art. 5.* Et sic necesse est alterum eorum, vel vtrumque mutare iudicium, si antè erant discordes, & post consultam Dei voluntatem concordantur. Nec tamen aliquis eorum fallitur, etiam si discordes sint, inquit D. Tho. *cit. loco ex dist. 11. solut. ad 4.* quia *ei quod nesciunt, per iudicium non adhærent, ideo falli non possunt, sed secundum contrarietatem rerum quæ in iudicium diuinum veniunt contrarietates inter eos memorantur.* Ecce quomodo ex rebus quas non comprehendunt, sed nesciunt quoad latentibres causas, licet cognoscant exteriores illos effectus, seu actus, qui sunt merita, vel demerita, non formatur adhæsiō iudicij, imò neque iudicia contraria propriè, sed solum contrarietates inter eos memorantur, quasi narrando, & proponendo, magis quàm plenè iudicando. Et sic tale iudicium non est adhæsiō, sed mutabile.

His suppositis, ratio, & fundamentum S. Tho. explicatur sic, qui Angelus vtens ad aliquam determinationem seu resolutionē principiis sibi naturaliter, & euidenter notis, ad omnia quæ per talia principia attingit, fertur vnica, & indiuisibili tendentia, & tanta perfectione, seu firmitate, & immobilitate attingit cōtenta sub talibus principiis, atque attingit ipsa principia, ita quod non potest ex talibus principiis nouas rationes elicere, nec alia habet quibus inuictur ad immutandum illud dictamen, quia comprehensione procedit ex vi talium principiorum, & sic nihil eū latet, sed totum con-

siderat quod ad talia principia vllō modo pertinere potest: Angelus autē in deliberādo de fine vsus est principiis naturaliter notis, & à se comprehensis, non solum pro appetenda excellentia propria, sed etiam pro recusanda, & excludenda directione luminis supernaturalis, à qua posset dirigi ad rectum finem: ergo ex vi naturalis modi procedendi mansit irreducibilis Angelus, & inflexibilis, nō solum circa bonum quod appetit, scilicet circa propriā excellentiam, sed etiam circa regulam quam recusauit, & inconsiderationem seu neglectum rei supernaturalis, quem voluit habere. Hoc enim maxime obseruandum est in doctrina ista D. Tho. quod ipsamet inconsideratio Angeli, & recusatio regulæ superioris fuit volita, & præuisa, & à se iudicata conueniens, claudens voluntariē oculos suos, seu recusans lumen cæleste, & supernaturale, iuxta illud Iob. 24. *Ipsi fuerunt rebelles lumini, nescierunt vias eius, nec reuersi sunt per semitas eius*; quasi ex rebellionē ad ipsum lumen, & voluntariā exclusionē viarum eius, non sint reuersi. Vnde dicit S. Thom. *Suprà q. 58. art. 5. in calce*, quod *Proteritas Dæmonum est secundum quod non subduuntur diuine sapientie*; in hoc quippe maxime proterui sunt, & firmati, quod excludunt regulam diuinæ sapientiæ, noluntque illam considerare. Et amplius super Dionysium *de diuinis nominibus c. 4. lect. 19. circa finem*, exponens verbum Dionysij, quod *in Angelis naturalia dona sunt integra, & splendidissima*, quamuis ipsi non videant claudētes ipsorum boni inspectiuas virtutes, subiicit D. Tho. *Quod ipsi non videant* (non considerant,) *provenit ex hoc, quod ipsi per liberum arbitrium clausurunt suas virtutes inspectiuas boni, id est, auerterunt voluntariē suum intellectum, non à consideratione veri, sed ab inspectione boni, in quantum est bonum, quia scilicet nolunt illud sequi.*

14 In hoc ergo discursu, quo fundamentum D. Th. elaboramus, mentemque ruimus, maior certa est, quia Angelus vtens principiis sibi naturaliter notis procedit lumine perfecto, cōprehensiuo, non discurrente: vnico ergo actu, & ictu totum, quod illis principiis subiicitur, amplectitur, & consequenter eodem motiuo, eadēque firmitate ipsa principia, & quæ sub eis contenta sunt, attingit. Minor probatur, quia Angelus in resoluendo seu determinando de fine solum potest attendere aut bonum proprium, aut diuinum: diuinum cognouit lumine supernaturali; naturaliter enim solum cognoscit Deū ex effectibus, præsertim ex sua essentia, quæ est bonum proprium) ad quem per gratiam conuersus est in primo instanti: proprium bonum cognouit per propriam naturam, quam non coniecturaliter, nec obscure, sed euideater, & comprehensiuē cognoscit: ergo in deliberando de fine, quādo immediate post instans creationis tractauit de eo, processit ex principiis, vel certò notis per fidem, etsi obscure, vel comprehensiuis per lumen naturale circa propriam naturam, & bonum. Non ergo processit coniecturali iudicio, & non pleno, sed comprehensiuo, & plenē determinato. Rursus in hoc negotio, & deliberatione de fine tractatum est non solum de vno fine sequendo, sed de altero recusando, & excludendo: ergo motiua quæ posset mouere ad vtrumque visa sunt, & tractata, & cum cognitione vtriusque vnum est relictum, aliud assumptum, & id quod est relictum dicitur inconsideratum, non quia non satis cognitum speculatiuē, sed quia non vt debuit tractatum est. Ergo sicut proprium bonum ex comprehensiuo iudicio orto, & formato circa propriam naturam est acceptum pro fine, Ita recusatum est bonum diuinum ex eodem iudicio, & exclusum est vti lumine supernaturali ad eius

directionem. Quidquid autem ex vi principiorum comprehensiuē cognitorum attingitur, vel recusatur, inflexibiliter attingitur, quia eadē indiuisibilitendētia, & actu attingitur, vel deseritur, quo ipsa principia. Ergo ille finis malus determinatē accipitur, & finis diuinus recusatur, ipsaque exclusio luminis superioris, & inconsideratio irreuocabiliter est volita, quia per motiua, seu principia comprehensiuē proposita tangitur. Et licet per lumen superius, seu supernaturale posset corrigi ista inconsideratio, & fieri conuersio in oppositum, tamen cum determinatus, & firmatus fuerit Angelus in nō admittendo illo lumine, sed in recusando illud, & ad hanc recusationem processerit ex principiis, & motiuis à se comprehensiuē cognitis circa suam naturam, & bonum proprium; idē manet circa hoc ipsum inflexibilis, quia omne remedium immobiliter excludit, eo quod recusatio ipsa remediū volita est ex motiuo comprehensiuē, & plena deliberatione cognito. Vnde vt Deus conuertat Angelum, necesse est vel infundere illi lumen clarum supernaturale, vincens totam comprehensionem naturalium principiorum, vel destruendo modum connaturalem eius in cognoscendo naturaliter reducere illum in modo cognoscendi ad illum statum quo fuit in primo instanti in quo creatus est, Vt inde iterum incipiat de nouo eligere, & deliberare de fine.

Quod si dicas: quomodo si Angelus habebat in illo instanti cognitionem certam per fidem de ipso Deo, & de conuenientia rei supernaturalis, potuit per comprehensiuam cognitionem proprii boni, & excellentiæ propriæ, ita inflexibiliter excludere cognitionem, & considerationem illius superioris regulæ, & luminis supernaturalis?

Respon. quod illud lumen supernaturale, licet esset superius, erat tamen obscure cognitum Angelo, & imperfectē, utpote per fidem, & voluntati Angeli subiectum, quia fides pender ex pia affectione voluntatis; vnde liberum est Angelo tali lumine vti, vel non vti, potestque ex cognitione, & comprehensione suorum principiorum naturalium moueri ad recusandum refutandumque tale lumen quoad eius vsum. Et quia illa recusatio est volita ex motiuo immobiliter, & comprehensiuē cognito, & ex penetratione taliū principiorum, quibus subiicit hoc quod est velle, vel non velle tali lumine vti; idē eadē immobilitate qua principia illa cōprehendit, recusationem illam attingit, quia vt subiectam talibus motiuis, & principiis vult.

Ex quibus manent concisæ omnes solutiones, quæ huic rationi possunt adhiberi.

Prima non tam immobiliter ferri Angelum in illa principia, & fines, quā in cōclusiones, & media nec omnino certum esse Angelum non discurre saltē circa supernaturalia; nec eodem actu ferri necessariō in finem, & liberē in media, quia liberum, & necessarium distinguunt ipsos actus.

Secunda posse vti illa cognitione principiorum, non adæquatē, & comprehensiuē, sed inadæquatē, & modō secundum istud obiectum, modō secundum illud: nec enim sēper vtitur adæquatē qualibet specie, & attingēdo omnia, quæ tali specie representari possunt, vt etiam D. Tho. cōcedit: ergo potest vti aliqua specie, seu principio ad cognoscendam vnā veritatem quantum ad aliquid, & postea quantum ad illud; & sic non omnia motiua modō considerare, & postea considerare illa, & sicut variari aut crescere potest cognitio in motiuis, ita & possunt variari affectus. Vnde etiam cogitationes Angeli volubiles sunt, & habet discursum successiuum, esto, non habeat causalem, sufficit autem

autem successiuus discursus, seu mutatio cognitionum, ut possit mutare voluntatem, quia hæc non tam dependet ex discursu formali, & causali, quam ex successiuo, quo diuersa obiecta, vel motiua manifestantur, ex diuersa autem manifestatione mutatur voluntas; & sic potest nouo modo obiecta considerare, & ab eo quod voluit semel reduci, & reuerti.

17 Tertia quod Angelus peccauit ex inconsideratione alicuius; quod considerari debebat, ut docet S. Tho. *supra* q. 63. art. 1. ad 4. cum peccatum necessario contingat ex defectu dictaminis, seu considerationis. Si autem peccauit Angelus non considerando: ergo si iterum consideret, potest oppositum velle: si enim voluit peccatum ex considerationis defectu, sublato tali defectu poterit cessare à peccato, & oppositum velle. Posse autem Angelum de nouo considerare id quod considerare desinit quando peccauit, certum est, quia facultatem habet ex parte intellectus, lumenque sufficiens, & speciem ex parte obiecti, cum nihil horum amiserit per peccatum; & sic nullum principium ei deest ad considerandum id quod considerare omisit, præsertim quia suo iam malo edoctus, bene potest considerare quantum errauit in peccando, & recedendo à Deo.

18 Ceterum solutiones istæ nihil eleuant fundamentum D. Tho. Non prima, quia Angelum non discurre, sed comprehensiuè procedere, & simplici actu attingere principia, & res contentas sub principijs, supponendum hic est, non probandum, ut D. Tho. etiam supponit, reliquitque probatum *supra* q. 58. Et quidquid sit de discursu, quem aliqui attribuunt circa supernaturalia, tamen constat in his quæ naturaliter cognoscit comprehensiuè procedere, & sine discursu, alias non esset eleuator, & perfectior intellectus Angeli, quam hominis si discursu utitur, quo homo intelligit. Quod si in modo naturali intelligendi, & circa naturalia principia procedendo, sine discursu cognoscit, etiam in supernaturalibus sic procedet, quia lumen supernaturale accommodatur modo naturali intellectus, cui infunditur, nec deprimat modum intelligendi, & inferiorem facit, sed eleuat. Quod verò dicitur non tanta immobilitate adherere, & tangere conclusiones ipsas, sicut principia, media sicut fines; Resp. quod eadem prorsus immobilitate, & firmitate fertur in utrumque, quia eodem actu, & tendentia, sed non æquè immediatè, sed ordine quodam, eo quod conclusiones se habent ex parte obiecti, ut dependentes à veritate principiorum, & appetibilitas eorum quæ sunt ad finem ex appetibilibitate finis, sed tamen ex parte actus, & efficaciam motui attingentis in utrumque eadem immobilitate fertur, quia eadem tendentia comprehensiuè utriusque, non tendentias diuidendo. Quod verò dicitur de libero, & necessario. Resp. quod actus ille erga finem est necessarius quoad specificationem, non quoad exercitium, & ita potest comprehendere media circa quæ versatur liberè, etiam quoad specificationem: sufficit enim quod sit liber quoad exercitium, ut non sit necessarius simpliciter; & sic identificabit sibi liberum exercitium circa media, nec ab illo distinguetur ratione necessitatis. In visione autem Dei, actus erga finem clarè visum est necessarius quoad exercitium, & respectu obiecti creati est liber, sed hoc est propter eminentiam illius actus identificantis illas duas rationes respectu diuersorum.

Nec secunda solutio quidquam obstat. Fatemur posse Angelum uti inadæquatè principijs respectu aliquarum conclusionum, aut speciebus respectu

obiectorum, quæ repræsentant; fatemur etiam dari in Angelo discursum successiuum, & intelligere vnum post aliud; negamus tamen hoc posse quidquam conducere ad retractationem, & flexibilitatem liberi arbitrij semel determinati, & ex plenâ determinatione eligentis, quia ad retractationem non confert quidquam successio, & diuersitas cognitionum aut inadæquatè attingere diuersa obiecta, quia totum hoc est respectu diuersorum, quorum vnum cognoscitur post aliud, sed ad retractationem solum conducit noua, & diuersa cognitio circa idem obiectum, quia scilicet melius, aut diuerso modo apparet nunc, quam antè, quod solum potest contingere quando nouo lumine illustratur, aut aliquid nouum, quod de illo antè latebat, nunc apparet: si enim tale obiectum nouo modo non consideratur, sed id quod per cognitionem succedentem cognoscitur est diuersum, nihil omnino conducit ad mutandum dictamen circa prius obiectum. Non potest autem Angelo manifestari de nouo obiectum illud circa quod semel resolutorè, & determinatè deliberauit, aut saltè conaturali modo ad naturam Angeli id non potest fieri: tum ex generali ratione, quia Angelus quando plenè deliberat, præsertim in re tam magni momenti, tota attentione considerat, & comprehensione sua utitur: multò enim perfectius procedit Angelus in deliberatione graui, quantum est ex natura sua, quam quilibet cordatissimus, & sapientissimus homo, cum sit altior, & perfectior eius natura modòque procedendi, homo autem sapiens non procedit ad resolutionem rei magnæ, nisi attentis omnibus quæ facultati eius possibilia sunt: multò ergo minùs Angelus, qui per naturam habet superiorem sapientiam, & lumen, quam quilibet homo per industriam possit acquirere: tum in speciali circa hoc negotium deliberandi de suo fine ultimo processit Angelus cum plena cognitione totius causæ, quantum est ex parte veritatis cognitæ, ut dicemus contra tertiam solutionem, licet defectuosè se habuerit in affectiua cognitione; & ita circa illud obiectum ad quod se determinauit nihil ei restat cognoscendum, nec reliquit viam, qua possit illuminari de alio motiuo retrahente, sed ipsi claudunt virtutem inspectiuam ab omni consideratione boni, ut ex D. Dionysio 4. c. de diuinis nominibus, & D. Th. *ibi* lect. 19 *supra* dicimus, quod etiam repetit in 2. dist. 7 q. 1. a. 2. ad 3. Itaque Angelus cum deliberauit in peccando circa finem, eodem indiuisibili, & simplici actu considerauit bonum, & excellentiam propriam comprehensiuè, & plena cognitione ex suis naturalibus principijs, & recusauit, seu exclusit à se supernaturale lumen, claudens inspectiuam virtutem a bono, & nolens per illud dirigi, sed in sua propria excellentia, & naturali cognitione remanere. Vnde ipsa exclusio luminis superioris fuit vna ex conclusionibus sub principijs eius contenta, & ad quam ex fine ipso volito se determinauit; & sic ex consequenti præcludit viam omni remedio, & omni motiuo conuersionis ad Deum ad modum eorum, qui peccant in Spiritum S. qui ex ipso genere, & obiecto peccati se opponunt gratiæ, qua Spiritus S. eos mouet ad conuersionem, & remissionem peccati, ideòque si tales aliquando sonantur quasi miraculosè sonantur, ut docet S. Thomas 2. 2. q. 14. art. 3. Hoc ergo quod ex suo obiecto habet peccatum in Spiritum S. habet ex parte subiecti peccatū superbiæ in Angelo, quia ita fertur in proprium bonum, & excellentiam tanquam in finem, quod

quodd sine aliquo discursu, sed comprehensiuo modo fertur in finem in communi, & in talem determinatum finem, & ex eodem motiuo, & immobili, ac firma tendentia accipit tanquam conclusionem, seu quid consecutum non subiaci fini bono, & recusare beatitudinem, seu supernaturale lumen quo sibi oppositum manifestaretur. Vnde cum ista recusatio, & exclusio qua suam inspectiuam virtutem claudit, à lumine cælesti sit acceptata ab Angelo, eadem tendentia, & actu quo ipsa principia videntur, eodemque motiuo, quo ipse finis in communi, idè nec ex proprio modo operandi ex principiis suæ naturæ, neque ex amissione luminis supernaturalis, quod eadem immobilitate excludit, est naturali modo reducibilis, sed solum de potentia absoluta Dei per magnum miraculum vincens naturalem illum modum operandi.

20 Denique 3. solutio nihil obstat, quia inconsideratio illa Angeli non fuit inuoluntaria, & ex aliqua ignorantia veritatis, & motiuorum orta, sed fuit volita, & præuisa, & cum cognitione causæ, & totius veritatis affectata, & hæc est peior inconsideratio in genere practico, & prudentiali: tunc enim peius errat practica vis in genere prudentiali, quando magis sciens peccat, & cum maiori notitia, & sciens ac volens claudit oculos à superiori lumine, quia tunc executionem vllam non habet. Itaque speculatiua consideratio, & notitia quando quis ea abutitur, magis conducit ad inconsiderationem practicam, & errorem prudentialem, & abundantia speculationis magis irremediabilem facit inconsiderationem practicam: tunc enim peius erratur quando quis sciens errat, & auertit se à via: & tunc inconsideratio illa est irreducibilis, quia est ex contemptu ipsius veritatis, & motiuorum per quæ posset reuerti: dicitur autem inconsideratio, non ex parte veri, sed ex parte boni, quia est minus affectiua ad bonum, & quanto plùs cognoscit de obiecto, magis vult auertere aspectum ab eo quod in ratione boni mouere, & conducere potest, si autem quis cognoscendo rem ipsam, ex affectu tamen ad proprium bonum firmatur in excludendo à se cognitionem vt affectiuam ad aliud bonum fit irreducibilis, sicut in peccatis contra Spiritum S. & si hoc excludat ex ipso connaturali modo procedendi, quia indiuisibili, & simplici modo procedit in determinando se, & comprehensiuo modo erga finem, & media, principia, & conclusiones, naturaliter est inflexibilis, & solum de potentia Dei absoluta immutante naturam in suo naturali modo procedendi potest reuerti. Angelus autem non peccauit ex infirmitate aut ignorantia, sed ex certa scientia, & summa malitia, nec in recusando, & excludendo à se obedientiam ad supernaturalem ordinationem, & finem, se habuit ignoranter, sed cum cognitione causæ voluit illam recusare, & totaliter illi non subiici: nam circa hoc fuit tota pugna inter bonos, & malos Angelos, dum erant in via, & ipse Diabolus bene videt alios Angelos sequi oppositum, & velle subiectionem in supernaturalibus ipsi Deo, & consequi ex eius beneficio gloriam, quod tamen ipsi recusabant. In hoc ergo non peccauerunt ex inconsideratione ignorantia, sed ex inconsideratione malitiæ, & voluntaria, vt S. Tho. docet *loco supra cit. lect. 19. in c. 4. Dionysij*. Et talis inconsideratio non est reducibilis, quando oritur ex modo operandi subiecti, quia nō est ex defectu considerationis obiecti, vt veritas est, sed ex defectu considerationis, vt boni, seu vt efficientis, vt S. Th. *cit. loco*. Et quia hoc ipsum quod est excludere hanc considerationem boni, vt bonum, & recusare lumen su-

per naturale per quod oppositum sibi poterat sic manifestari vt afficeret voluntatem, accipit Angelus tanquam pertinens ad ipsum finem, & ad propriam excellentiam quam appetit, volens illam sine subiectione ad gratiam, & beneficium speciale Dei, ideo circa talem determinationem remanet naturaliter irreducibilis, quia eadem immobilitate qua finem vult, claudit omnem viam considerandi, & admittendi supernaturale lumen, quo posset reduci, quatenus illi subiici non vult, & hoc non velle subiici, est pars finis ab eo immobiliter voliti. Vnde hæc est summa eius inconsideratio in re practica, & in ratione boni vt affectiui, quæ non potest tolli per aliquid de nouo consideratum in ordine naturali, quia totum vidit, nec in ordine supernaturali, quia claudit ab eo lumine oculos cæcitæ orta ex comprehensiuo, & indiuisibili modo tendendi in propriam excellentiam.

Soluntur argumenta.

Primò arguitur: Inconsideratio ex qua Angelus peccauit, non fuit talis, quodd omnem viam & aditum claudit (quantum est ex se, & remoto statu condemnationis) lumini diuino, nec ex tanta comprehensione, & euidencia principiorum peccat, quod de necessitate immobiliter iudicat de his quæ sub fine continentur: ergo ex natura sua, & ex intrinseca causa non immobilitatur. Consequentia patet, quia tota ratio D. Thom. pro immobilitate Angeli est ipsa immobilitas iudicij: conformatur enim voluntas in appetendo ipsi intellectui in iudicando, nec est magis intrinseca, & propria causa adhesionis voluntatis, quàm firmitas, & immutabilitas iudicij Anteced. probatur: nam peccatum præcludens viam gratiæ mouenti ad penitentiam, eamque recusans est peccatum in Spiritum S. ideoque irremissibilitatem secum affert, quia ipsa remedia, quibus tolli poterat peccatum, contemnit, & quæ aditum præcludit vt docet S. Thom. 2. 2. *quæst. 14*. Angelus autem in primo peccato non peccauit in Spiritum S. vt expressè docet S. Thom. in 2. *dist. 43. q. 1. art. 6*. sed peccauit ex nescientia, quia non considerauit ea quæ consideranda erant ad euitationem peccati, ideoque magis dicitur peccatum eius in Filium, quàm in Spiritum S. vt *ibidem* dicit S. Tho. ergo illud peccatum non fuit ex genere suo irremissibile: ergo neque inflexibile. Deinde probatur idem anteced. quia tunc Angelus in suo iudicio procedit comprehensiuè, & irrevocabiliter, quando in principiis attingit ea quæ per necessariam consequentiam, seu connexionem cum talibus principiis connectuntur, quæ autem contingenter, seu liberè connectuntur, non euidenter, nec per se attinguntur in talibus principiis: ergo nec comprehensiuè, nec immobiliter, sed ad talem attingentiam rei contingentis interuenire debet aliqua ratio, vel motiuum mutabile & non fixum. Quodd autem Angelus viso, & comprehenso fine in communi velit determinatè hoc vel illud pro fine determinato est omnino contingens, & non per se connexum cum ratione finis in communi, vt patet, quia ante adhesionem, & deliberationem plenam, liberum erat ei adherere, vel non adherere illi parti: ergo non erat illa pars per se & necessariò connexa cum tali principio: ergo ex vi comprehensionis illius, & immobilis adhesionis ad principium, non sequitur immobilis adhesio ad talem partem contingentem.

Conf. quia si ex vi penetrationis comprehensiuæ principiorum, & conclusionum non potest Angelus mobilitari, sed inflexibilis permanet in re quam iudicat: ergo in ipso primo instati creationis

ex sua natura mansit immobilitatus, & cum in illo instanti non potuit peccare, sequitur quod nec in sequenti, nec vnquam potuit peccare. Consequenter patet, quia etiam in primo instanti comprehensivè, & perfectè attingit principia, & conclusiones, finem, & media, quia fuit in illo instanti plenus sapientia: ergo si ex vi iudicii comprehensivè immobilitatur, tunc iam immobilis factus est, aut si tunc non operatur immobilitatem comprehensivè, cur postea eam operatur?

Resp. negando anteced.

23 Ad primam probationem dicitur quod peccatum Angeli præcludit viam gratiæ conuertenti, non ex ipsa ratione obiecti sui, sed ex statu ipsius subiecti operantis, ut *cit. loco* dicit S. Thom. *solut. ad 5.* Vnde primum eius peccatum non fuit peccatum in Spiritum S. ex obiecto, quia ex obiecto fuit excellentia propria, quæ est obiectum superbiæ; non peccati in Spiritum S. quia peccatum in Spiritum S. est quando ex obiecto ipso quod intenditur, specialem reuerentiam facit ad gratiam Dei ut propositum non poenitendi, desperatio, præsumptio, & similia ratione quorum retrahitur homo à peccatorum adhæsiōe. Tale obiectum non habuit peccatum primi Angeli, sed in suam excellentiam nimis effusus est. Attramen ex ipso modo peccandi, & operandi simul cum tali obiecto propriæ excellentiæ recusavit omnem gratiam specialem Dei, voluitque sistere intra limites propriæ, & naturalis excellentiæ, ideoque ex consequenti præcludit viam omni gratiæ Dei mouenti, habuitque eodem effectus quoad irremissibilitatem, ac si esset peccatum in Spiritum S. ex suo genere, & obiecto, imò id multò fortius, quia non ex sola obiecti ratione, sed ex modo operandi subiecti immobilitatus fuit in sua determinatione. Nec renuit S. Thomas ex consequenti tribuere Angelo peccatum in Spiritum S. licet primum peccatum fuerit superbia, ut docet *solut. ad 6. loco cit. ex 2. sententiarum.*

24 Ad secundam probationem dicitur quod comprehensiva vis Angeli non solum extenditur ad ea quæ necessariò connectuntur essentiæ, seu principiis, sed ad ea etiam quæ contingenter, cum constet Angelum visâ substantia aliqua videre eius accidentia, non solum quæ sunt propriæ passionis, sed etiam accidentia communia, potestque sine compositione, & diuisione formare de eis iudicium, ut S. Thomas *suprà quest. 58.* tenet: licet verum sit non æqualiter iudicare Angelum de prædicatis necessariis, & de contingentibus, sed illa tanquam necessariò connexa, hæc tanquam contingenter attingere. Fatemur ergo quod iudicium regulatiuum voluntatis fertur in hoc obiectum, illudque proponit tanquam indifferens, & contingens, aliàs non esset eligibile; sed tamen dicimus quod sicut intellectus proponit hoc iudicium attingendo illud obiectum contingens in suis principiis, ita voluntas fertur in hoc indifferens, & contingens, seu liberum eodem impetu, eademque tendentia qua ipsum finem. Quare immobilitas, & adhæsiō voluntatis Angeli ad id quod semel eligit, non est sumenda ex ipsa vi, & ratione obiecti quasi necessitante, & immobilitante voluntatem, cum reuera contingens, & liberum obiectum sit, sed ex conditione, & modo operandi ipsius subiecti, quia unico, & eodem actu fertur in finem, & in ea quæ ad finem pertinet, in principia, & conclusiones. Vnde quantumque sit res contingens, si tamē determinatè, & resolutoriè vult non per consequentiam se determinat, nec per resolutionē à cōclusionibus in principia, quæ potest

diuersis rationibus impediri, & ad opposita viam præbere, sed in ipsismet principiis naturaliter visis, & comprehensis, & in ipso fine immobiliter, & determinatè volito, licet liberè quoad exercitiū propter indifferentiam iudicii determinationem suam accipit, etiam circa obiectum contingens. Nec defectum habet Angelus in hoc quod omittit considerare aliquid ex his quæ sub talibus principiis continentur etiam si contingentia sint: omnia enim comprehendit, & ex hac parte non potest reuerti, nouas rationes considerando ex his quæ ad naturalem ordinem pertinent, cum comprehensivè procedat, sed si quem defectum habet, est in nolendo, aut non iudicando conueniens considerare ea quæ super naturam suam sunt, sed claudit considerationem suam ab hoc lumine, recusans à tali obiecto affici. Sed quia hanc ipsam recusationem iudicat, & vult eodem actu quo principia attingit, & finem vult, ideò etiam in recusando, & excludendo supernaturale lumen, quatenus illo affici posset ad superiorem finem, immobilis est ex vi modi procedendi. Negamus ergo quod circa contingentia obiecta non possit Angelus immobiliter procedere, nō ex meritis obiecti, quod de se liberè, & contingenter mouet, nec ab illo prouenit immobilitatio, & necessitas in voluntate, sed ex modo operandi ipsius Angeli, qui etiam circa contingentia, & libera accipit determinationem, & resolutionem eodē actu, & tendentia indiuisibili qua fertur in finem ipsum, seu in prima principia. Non potest autem idem actus esse immobilis circa principia, & non circa conclusiones, si non seorsum eas attingit, sed in ipsis principiis: nec enim habet unde moueatur in eas, nisi ex ipsa principiorum attingentia, quæ immobilis est. Argumentum autem procedit quantum est ex parte, & meritis obiecti contingentis, quod cum non habeat connexionem per se cum principiis, & fine, quia contingens est, ex vi sua non mouet immobiliter voluntatem, sicut mouetur voluntas ab obiecto necessitante, ut ab essentia diuina clarè visa. Non tamen probat quod ex parte modi operandi ipsius subiecti Angelus attingens, & procedens comprehensivè, non attingat in ipsis principiis contingentia obiecta, quæ eis subordinantur, & sub habitudine ad illa debent attingi; & sic ex vi modi operandi immobiliter procedat, quia eodem actu indiuisibili procedit.

25 Quod si instes: Si Angelus ex principiis immobilibus, & ex adhæsiōe ad finem in communi procedit ad istas conclusiones contingentes, & ad ista media, vel res contingenter illi fini subordinatas: videns non esse inter ea necessariam habitudinem, cur non poterit iterum vti illo eodem fine ad oppositum volendam postquam semel usus fuit illo ad volendum id quod contingenter videbat illi annexum? Et si non cōsiderauit aliquas rationes, quibus poterat affici ad oppositum bonum, cur non poterit illas de nouo considerare; & sic affici ad oppositum bonum, non quidem vtendo discursu, sed ipsa comprehensione finis, seu principiorum, siquidem illis potest comprehensivè procedere ad vñ, & ad oppositum, quia contingentia sunt? Et sicut antequam determinatè eligeret, poterat ipsa comprehensione principiorum vtendo oppositum eligere, cur non etiam postea poterit, non quidem per discursum, sed alio actu tendendo in finem comprehensivè, & penetratiuè cum habitudine ad oppositum bonum, quia contingens est: hoc enim nō pendet à discursu, sed etiam discursu cessante potest sub eisdem principiis, modò vñ attingere, modò aliud, quia contingentem connexionem, & habitudinem habent cum talibus principiis.

Resp.

Resp. non posse Angelum circa illas res contingentes, earumque connexionem cum principiis mutare iudicium procedendo suo connaturali modo, quia secundum naturalia principia non potest accipere nouam cognitionem immutatiuam sui affectus, quàm illam quam habuit à principio: licet enim circa res quæ de nouo fiunt, in vniuerso possit accipere diuersam notitiam, & iudicium in indiuiduo, & consequenter diuersum affectum, tamen circa illud indiuiduum quod semel eligit deliberatè, & præfertim circa finem determinatum quem semel elegit, non potest amplius variare notitiam, & accipere, seu considerare aliquid quod tunc non considerauit, quia Angelus non accipit notitias incipiendo à particularibus, & à rebus ipsis, sicut nos accipimus per sensus; & sic variatur nostrum iudicium, quia in ipsis principiis immobilibus non apprehendimus quidquid sub illis continetur, & ad illa pertinet, sed dependemus à sensibus, vnde tota variatio est, & per discursum deducimus ex principiis, & idèò patet nobis via ad variandum iudicium, & procedendum ad vtrumque oppositorum, vt dicit D. Th. *in hac quæst. 64. art. 2.* Angelus autem non accipit notitiam aliquam ex rebus, aut sensibus, neque discurret ex principiis, sed in ipsis videt totum quod ad illa pertinet, si comprehensiuè, & plenè procedit: & eodem actu quo immobiliter tangit principia, descendit ad ea quæ sub illis continentur; & sic quantumcumque velit verti, & reuerti super talem finem, & obiecta sub eo contenta, semper ex vi talium principiorum eadem sibi, & eodem modo repræsentantur, quia comprehensiuè circa illa se habet. Non variata autem notitia voluntas non mutatur, quia tota pendet à iudicio, & cognitione intellectus. Nec pro suo libito potest eisdem rationibus, & motiuis stantibus mutare voluntatem, sine aliqua noua notitia affectiua ad oppositum, præfertim in natura intellectuali perfecta, cui mutabilitas imperfectionem affert; nulla autem maior mutabilitas, quàm stantibus eisdem rationibus, & motiuis, nec alia de nouo apparente ratione modò velle, modò nolle. Quod verò dicitur de inconsideratione, quare non poterit de nouo Angelus considerare, dicimus inconsiderationem illam non esse circa naturalia, quæ comprehendit, & semper videt eodem modo, præfertim seipsum quem vult vt finem, & propriam excellentiam, vt primum bonum, sed inconsideratio est circa bonum supernaturale, cuius considerationem in ratione boni gratuiti, & ex speciali beneficio habendi, omnino refutauit, & exclusit, & exclusio illa fuit volita, sicut & ipse finis cui adhæsit, quia adhæsit ei cum exclusione alienæ gratiæ; & sic ipsa exclusio fuit eadem immobilitate volita qua finis. Remoto autem discursu non potest ipso simplici, & indiuisibili actu quo vult finem, & ea quæ ad finem pertinent hic, & nunc mutari, & velle oppositum, quia non habet vnde sumat notitiam qua de nouo afficiatur ad oppositum obiectum, cum in ipsis principiis immobiliter omnia cognouerit, quibus ad id affici poterat hoc ipso quod comprehensiuè processit, nec aliunde possit accipere notitiam, qua de nouo afficiatur. Ex supernaturali autem lumine non accipit, quia ab illo, se excludit.

16 Et cum instatur, quòd potuit ante deliberationem, & adhæSIONem ad istam partem liberè determinare se ad oppositam, quia contingens erat, & tamen etiam tunc per comprehensionem procedebat.

Respond. quòd ante deliberationem, procedebat

quidem per comprehensionem ex parte cognitionis, sed nondum omni modo quo poterat, scilicet se mouendo, & ex se formando dictamen, sed secundum dictamen formatum à Deo; nec adhuc excludendo à se lumen supernaturale, vt affectiuum, & claudendo illi oculos, sed adhuc vtendo illo, & proponendo indifferenter, an esset bonum illi subiici, vel illud recusare; Et sic illa comprehensio pro tunc ante deliberationem, licet esset perfecta in attingendo per cognitionem obiecta, nondum tamen erat in omni statu perfecta, scilicet in applicatione, & determinatione eligendi vnum, & recusandi aliud, sicut postea. Et idèò comprehensio in statu perfecto, id est, sic applicata, quòd se mouet voluntas ad determinandum vnum, & recusandum aliud, immobilitas tam in determinatione ad proprium, quàm in recusatione boni supernaturalis, quia vtrumque eodem actu accipit quo tendit in finem; & sicut naturali lumine non potest maiorem notitiam accipere circa naturalia, quia comprehensiuè, & plenè ea videt, sic præcludit viam eadem determinatione, & immobilitate, ne acceptet supernaturale lumen, à quo poterat vinci illa naturalis comprehensio, & adhæSIO; & sic non relinquit viam procedendi ad vtrumque oppositorum, vt dicit S. Th. *in hac quæst. 64. art. 2.* quia scilicet excludit inspectionem omnis boni supernaturalis, vt boni, id est, vt affectiui. Quod tandem expressit S. Thom. & ex D. Dionysio hausit *super cap. 4. de diuinis nominibus lect. 19. circa finem*, exponens illa verba Dionysij, vt *suprà* diximus quòd *Dæmones habent splendidissima dona naturalia, quamuis ipsi non videant claudentes ipsorum boni inspectiuas virtutes.* Quòd S. Thom. sic glossat: *Sed quod ipsi non videant, hoc prouenit ex hoc, quod ipsi per liberum arbitrium clausurunt suas virtutes inspectiuas boni, id est, auerterunt voluntariè suum intellectum, non à consideratione veri, sed ab inspectione boni in quantum bonum, quia scilicet nolunt illud sequi.*

Et ex hoc apparet, quomodo intrinseca causa naturalis obstinationis conformetur, & coniungatur causæ extrinsecæ Dei denegantis gratiam. Nam ex eo quòd naturalia splendidissima sunt in Angelo, procedit in sua determinatione, & electione comprehensiuè, & in ipsa immobili, & indiuisibili inspectione principiorum videt omnia etiam contingentia, & libera, quibus moueri potest; & sic facta determinatione, non restat ei locus, neque via vnde nouas rationes accipiat, quibus se moueat, quia à rebus non accipit cognitionem, sicut nos, nec per nouam penetrationem, & illationem ex principiis. Ex eadem autem immobilitate, qua in illis principiis se determinat erga propriam excellentiam, recusat, & excludit à se finem supernaturalem, & omnem manifestationem eius vt affectiuam, & inclinantem voluntatem, licet in ratione veri rem supernaturalem cognoscat; & sic ex ipso modo connaturali operandi manet Angelus obstinatus, & inflexibilis in malo quod elegit, non quia ab obiecto determinetur aut necessitetur, sed propter modum operandi per comprehensionem immobilem rei in suis principiis, & exclusionem omnis alterius luminis supernaturalis ad afficiendum: sic enim claudit virtutes inspectiuas boni in modum aspidis surdæ obturantis aures suas. Vnde fit quòd gratia Dei ordinatio modo operans, & iuxta connaturalem modum subiecti in operando se attemperans non conuertit talem voluntatem, nisi miraculosè, & de potentia absoluta, aut remouendo modum illum

lumen connaturalem operandi, aut dando lumen supernaturale quod vincat totam comprehensionem, & modum comprehensuum naturalem, non quodd ei se accommodet, & faciendo quodd illud acceptet, vt si euidens lumen sit. Sed quia hoc est miraculosum in genere gratiæ, dicitur simpliciter ex modo naturali procedendi esse Angelum inflexibilem facta electione, quod tamen ante illam non erat, quia nondum elegerat, nec determinatè vsus fuerat illis principiis habentibus se ad oppositum antecedenter, sed immobili modo consequenter, licet liberè, quia circa obiectum indifferens procedit, & iudicium indifferens, iuxta modum tamen naturæ Angeli comprehensiuè procedentis in sua determinatione, quia determinatio illa in ipsa immobili principiorum apprehensione facta est, vt statim magis explicabitur.

28 Ad Conf. *suprà* positam in argumento, Respon. quodd, vt iam diximus, in primo instanti, licet Angelus comprehensiuè attingat principia, & quæ in principiis continentur, non tamen in illa comprehensione se mouet, neque se determinat, sed mouetur, & determinatur à Deo. Et sic non manet immobilitatus, & inflexibilis in illo primo instanti, quia nondum tunc operatur omni modo quo natus est operari, sed quando operatur se determinando, & est quasi sui iuris in eligendo & determinando, tunc illa est vltima resolutio, & determinatio secundum quam potest operari, ideoque exinde incipit esse inflexibilis, quia est comprehensio in statu perfecto, & perfectè applicata, nec amplius restat aut alius modus mouendi se, aut alia repræsentatio maior habenda, cum ex comprehensione plena procedat, quoad naturalia, lumen autem supernaturale vt affectuum recuset.

29 Quodd si vrgeas: quomodo facta electione, & determinatione à se, redditur sic immobilitatus, cum ante se habuerit ad opposita, etiam ex vi comprehensionis principiorum: poterat enim comprehensione illa vtendo inclinari ad vnam partem, vel ad oppositam; poterat etiam non vti tota comprehensione principiorum, sed inadæquatè, non attendendo ad omnes circumstantias, & sic procedere ad deliberandum. Vnde restabat locus ad retractandum, vel propter contingentiam, & indifferentiam ad opposita, vel propter inadæquatam principiorum considerationem.

Respon. quodd Angelus semper est sic dispositus, vt post determinationem, seu consequenter ad ipsam immobilitetur, non antecedenter; & sic consequitur immobilitatio ad electionem, non ante, Sed quia de hoc ipso reddenda est ratio, quare sic se habeat post electionem, & non ante, supposito quodd comprehensiuè intelligit, etiam ante electionem, sed quia comprehendit cum indifferentia, & contingentia ad opposita, potest liberè eligere, cur ergo non poterit idem post electionem factam, cum sit eadem cognitio cum indifferentia: & idem obiectum liberum; ideo addimus quodd aduertenter posuit S. Thom. in hoc art. i. illa verba *Si consideretur ante adhesionem, potest liberè adherere, & huic, & opposito, in his scil. que non naturaliter vult, sed postquam iam adhaesit, immobiliter adheret*: Ea ergo quæ non naturaliter vult Angelus sunt contingentia, & indifferentia sibi, & præsertim ea quæ supernaturalia sunt, quia ad ea quæ naturalibus principiis attinguntur, ex ipsa naturali manifestatione determinatur Angelus. Ante adhesionem: ergo sic proponuntur talia obiecta determinatè eligibilia, quodd proponuntur cum indifferentia, & contingentia ex se, & ex meritis obiecti; & sic liberè potest adherere, & huic, & opposito. Sed tamen, quando se de-

Ioan. à S. Thom. in 1. part. D. Th. Tomus alter.

terminat ad vnum præ alio ipsa ratio determinationis, & accipiendi hoc, & relinquendi illud non proponitur Angelo mutabili modo, sed immobili, quia in ipsismet principiis, & cum eadem tendentia, & attingentia qua attinguntur principia, ipsa etiam ratio determinationis accipitur. Et sic principia quatenus deseruiunt isti determinationi, seu rationi determinandi acceptionem vnius præ alio immobilitant mentem Angeli, non solum quoad principia secundum se, sed quoad principia, vt sunt ratio determinandi hinc, & nunc, eo quodd in Angelo, qui non potest cognitionem accipere ex rebus in seipsis, sed natus est accipere cognitionem in principiis respectu quorumcumque, quæ sub eis continentur, etiam si contingentia sint, oportet quodd ipsa principia accipi possint vt ratio determinandi ad vnum præ alio, & quia hoc faciunt non per discursum, sed eadem attingentia indiuisibili, qua ipsa principia in se attinguntur; ideo, etiam vt sic extensa immobiliter se habent, quod tamen ante electionem, & determinationem non poterat dici, quia nondum extensio ista dabatur; quia nondum se mouebat, nec se applicabat ad determinationem huius, & reuocationem alterius vt *suprà* diximus; & sic immobilitas extensiuæ ad hanc determinationem formaliter adhuc non erat, licet radicaliter ibi erat. Certe nos in consiliando, & iudicando practice, tunc firmiter procedimus quando accipimus consilium, & sententiam per reductionem ad aliquod certum, & firmum principium, licet quia hoc facimus per consequentiam, & illationem, semper detur locus retractationi, quia diuersis notitiis, & modis potest considerari illud principium, & deduci illatio. Si ergo Angelus non per illationem ex principiis se determinat, sed ipsa, & eadem indiuisibili attingentia, qua comprehendit principia, determinationem accipit in re contingenti: ergo extenditur ad talia obiecta sub eadem immobilitate, qua attingit principia, sicut nos firmiter procedimus, quando sub illatione deducimus necessariò ex principiis, sed nos reuocabiliter, Angelus irrevocabiliter, quia nos per illationem, & minorem penetrationem principiorum, Angelus sine illatione, in ipsa principiorum attingentia extendente se ad obiecta sub eis contenta. Et quia non potest sumere alias notitias ex rebus ipsis, sed semper à principiis debet incipere, ideo semper eadem immobilitate procedit, & eodem modo cognoscit ea quæ semel in comprehensione principiorum cognoscit naturali lumine. Quodd autem posset ex supernaturali lumine reuerti, non habet locum connaturaliter loquendo, quia eadem immobilitate qua eligit propriam excellentiam, excludit lumen supernaturale sibi manifestans convenientiam boni gratuiti, & claudit suam inspectionem ab eo. Vnde nisi miraculosè detur lumen supernaturale, vincens propriam, & naturalem comprehensionem, non est reuertibilis. Quodd autè dicitur posse Angelum ex inadæquata comprehensione principiorum se determinare: Respon. quodd non determinaret se tunc plenè, & perfectè, sicut loquimur in præsentia, & sicut debuit facere in re summi momenti, sicut est determinate sibi finem, vnde omnes eius actiones pendebant, & quia fuit circa propriam excellentiam, & circa seipsum. Se autem plenè comprehendit. Vnde si inadæquatè cognosceret res illas, posset retractari, & non curreret casus præsens.

Secundò arguit contra nostram resolutionem, 30 quia Angelus facta electione circa aliquod obiectum, manet liber, & non necessitatus ad malum: ergo non manet immobilis, & inflexibilis. Consequenter, quia non stat ista inflexibilitas, & immutabi-

C C c litas

litas sine aliqua necessitate voluntatis : si enim necessitatus non manet, nihil prohibet resilire. Antecedens patet, tum quia eodem modo se habet voluntas Angeli post electionem, & determinationem atque antea, tam ex parte obiecti voluntatis, quam ex parte subiecti, seu potentiae: nihil enim immutatum est, & ablatum : ergo manet eadem libertas : tum quia circa eadem obiecta peccat sicut antea, teneturque conuertere ad Deum sicut antea electionem: ergo manet liber. Tum quia, ut late prosequitur Suarez *ubi supra*, non est unde proveniat ista immutabilitas, & inflexibilitas post deliberatam determinationem : nec enim provenit ex actu praeterito, aut ex aliqua naturali proprietate, aut ex habitu superueniente, nihil horum immobilizat, quia libertatem non tollit, sed libero modo operatur. Et vrget hic ratio, quia idem possunt Angeli eligere indifferenter, & liberè à principio, quia habent perfectionem cognoscendi obiecta cum indifferentia, hæc autem perfectio eodem modo manet ante, & post electionem : ergo æquè liberè potest antea, & post operari circa talia obiecta.

Conf. quia totum fundamentum D. Thom. stat in hoc, quod Angelus immobiliter, & sine discursu procedit in his quæ intelligit ; & sic æquè immobilizatur circa principia, & circa conclusionem, finem, & media. At hoc solum est verum circa naturalia: nam supernaturalia non comprehendit Angelus, & sic non procedit immobiliter circa illa, sed discursu, peccatum autem Angeli fuit circa supernaturalem finem recusando illum, nec potuit circa legem naturalem purè, & secundum se primò peccare, ut *supra* dictum est : ergo fuit totum fundamentum D. Thom.

Conf. secundò, quia Angeli ante finitam viam semper poterant mutari, aliàs ante terminum viæ essent plenè obstinati, cum tamen hæc sit pœna damnationis, sed ante viam finitam plura peccata commiserunt : ergo immediatè post primum peccatum nondum sunt redditi inflexibiles, & tamen primum peccatum ex plena deliberatione commiserunt.

31 Respon. illud argumentum de libertate solui debere, etiam si non ponamus inflexibilitatem intrinsecam, & ex connaturali modo operandi, sed extrinsecam, & solum ratione status, sicut fatemur in omnibus damnatis : damnati enim modò peccant, & tenentur operari bonum, & conuertere ad Deum, & tamen sunt inflexibiles in malo, licet ratione status. Per accidens autem est ad libertatem si illa tollitur, quod ex causa intrinseca, vel extrinseca tollatur. Ergo quantum ad istud punctum libertatis idem quod de omnibus damnatis dicitur ratione status, nos dicimus de Angelis, ratione etiam connaturalis modi operandi. Fatemur ergo Dæmones post electionem determinatam, manere in sua libertate, sed non in libertate ad retractandum, sed ad remanendum in eo quod semel voluerunt : manent enim inflexibiles ad continuandum id quod semel liberè voluerunt, non ad necessariò volendum. Vnde illa continuatio inflexibilis, est continuatio liberæ volitionis, & illa inflexibilitas per voluntariam, & liberam adhæSIONem causata est, & sic manet libertas prima in tota illa continuatione. Vnde dixit D. Thom. *hic art. 2. in solut. ad 1.* quod *Habent liberum arbitrium Angeli, sed secundum conditionem naturæ suæ, id est non retractabile, sed permanentis, & continuatæ volitionis, quæ hoc ipso quod continuatur ex prima libera volitione, semper manet libera quia ex libertate originata est, & solum secundum quid manet necessaria, scil. ex suppositione quod liberè voluit, non manet retra-*

ctabilis propter perfectionem talis naturæ, manet tamen continuata ex priori libertate. Sufficit autem ad libertatem, quod pro illo instanti quo actus fit, liberè fiat, possetque non fieri, non autem requiritur quod pro omni statu, & tempore possit retractari. Non est autem de essentia libertatis quod sit mutabilis postquam perfectè quis deliberavit, sed id pertinet ad imperfectionem defectumque naturæ : nam in Deo per naturam datur summa immutabilitas, & in beatis per gratiam, & in illis non auferitur libertas; & sic Diabolus, & damnati peccant modò, quia continuant primam volitionem malam, quæ virtute manet in reliquis actibus. Et licet non possint reuerti ad bonum, hoc nihil eis diminuit de culpa, tum quia non ex meritis obiecti, & necessitate eius ad hoc determinantur, sed ex modo operandi Angeli comprehensiuo, & totali, tum quia voluntariè in talem statum se proiecerunt, sicut peccat ebrius de præsentī, quia voluntariè se posuit in tali statu, quæ est solutio D. Thom. q. 16. de malo art. 5. ad 11.

Et quando instatur, quia nihil amisit liberum arbitrium posita electione quod antea habuit, nec aliquid acquisiuit de nouo, quod antea non haberet, & petitur ut explicemus quid sit illud quod de nouo additur voluntati, ut sit inflexibilis, & immutabilis : Respon. hoc ipsum inquiri, & proponi à D. Thom. in qu. 24. de verit. art. 10. in argumento 14. *Quia si peccatum, inquit, causat obstinationem, vel hoc facit subtrahendo vel superaddendo. Non subtrahendo, quia naturalia in Daemonibus manent integra: non superaddendo, quia illud quod superadditur cum sit accidens, oportet quod insit per modum recipientis, & sic cum liberum arbitrium sit flexibile ad utrumque, non redditur per hoc immobiliter inherens in malo. Ecce quod tam late inquirat Suarez, qui addatur libertati Angeli ut reddatur inflexibilis, breui hoc argumento complectitur D. Thom. Responder autem sic: Ad 14. Dicendum quod peccatum libero arbitrio adueniens non adimit aliquid essentialium, quia sic species liberi arbitrii non remaneret, sed per peccatum aliquid additur, scil. unio quædam liberi arbitrii cum fine peruerso, quæ ei quodammodo naturalis efficitur. Et ex hoc necessitatem habet, sicut & alia quæ sunt libero arbitrio naturalia. Ita D. Thom. Quare respondemus breuiter remanere inflexibilem voluntatem ex ipso connaturali modo operandi, quia sicut per sua naturalia principia immobiliter adhæret fini, ita si in ipsis principis eadem indiuisibili attingentia extenditur ad determinandum se circa media, illa noua extensio, seu unio ad illud obiectum facta sic, id est, in ipsismet principis, eadem immobilitate tangit principia, & extenditur ad media, & hæc noua extensio sic facta reddit immobilizatum Angelum, sicut *supra* explicatum est. Et ad rationem quæ vrgetur, quod obiectum eadem perfectione intelligitur, & cum eadem indifferentia ante electionem & post, distingo, cum eadem indifferentia, & perfectione in eodem statu, & dispositione sicut antea, nego, cum diuerso statu concedo; sicut etiam in omnibus damnatis tenemur dicere, quod ratione status damnationis obiecta apprehenduntur quidem ut indifferentia, quia circa illa peccatur, sed sub diuersa dispositione, & statu. Diuersa autem dispositio stat in hoc, quod illud obiectum de se indifferens, & contingens ex meritis suis, accipitur ut indutum quadam ratione formali immobili, quatenus accipitur ut convenientia, & congruentia dispositioni huius subiecti : iuxta convenientiam enim ad subiectum diuersimodè sumitur convenientia, vel disconvenientia rei appetibilis, quæ ex dispositione subiecti habet variari. Ex eodem*

dem autem respectu sumit immobilitatem, & determinationem, quia illa dispositio subiecti per ordinem ad quam induit convenientiam, est dispositio determinans, & afficiens voluntatem, non ex rationibus particulariter, aut per discursum acceptis, sed in ipsa immobili comprehensione principiorum. Et sic obiecta de se indifferentia, quatenus sic movent vi principiorum se extendentium ad manifestandam illam determinationem, libertatem seruant, quia indifferentia sunt, oriunturque ex libera determinatione voluntatis, & inflexibilitatem habent, quia sub tali determinatione movent. Illa autem determinatio, quia in sui initio libera fuit, non tollit libertatem, sed continuatio eius continuat illam, quia actus liber est qui continuatur: solum autem ex suppositione, & secundum quid necessitatur, sicut ex suppositione intentionis efficaci, & electio vnici medij simpliciter libera est, licet ex suppositione sit necessaria, sic ex suppositione primæ determinationis liberæ tali comprehensione factæ omnia secuta determinata, & necessaria manent, sed non simpliciter, sed ex suppositione.

Ad primam Conf. Resp. quod Angelus peccauit circa finem supernaturalem recusando illum ex libera adhesionem ad finem naturalem, & propriam excellentiam quam comprehensiuè cognoscebat; unde per eandem comprehensionem qua finem naturalem attingit, motus est ad recusandum supernaturalia, & claudendum oculos suos ne videret illa modo affectiuo, quatenus ex gratia danda erant; & sic modo immobili circa recusationem supernaturalium processit, scilicet ex naturalibus principiis, quæ vtrique comprehensiuè attingebat, & circa quæ immobiliter procedebat. Vnde in recusando supernaturalia immobiliter se habuit, quidquid sit, an in attingendo res supernaturales comprehensiuè procedat. Quod verò non potuerit peccare immediate contra legem naturalem, verum est, quia non potest immediate recusare, & abiicere illam, potuit tamen recusare supernaturalem, & mediatè naturalem, vt *supra* diximus. Secundò addo quod in cognoscendis rebus supernaturalibus licet Angelus non procedat comprehensiuè ex parte rerum cognitarum, quia nec euidenter, sed obscure per fidem cognouit in via res supernaturales, tamen ex modo attingendi sine discursu ea cognoscit, & eodem actu, & attingentia fertur in totum quod sibi conceditur de illis attingere, eo quod gratia superueniens alicui naturæ non deprimit, neque destruit modum eius connaturalem, & perfectum, sed potius eleuat, & perficit: inconueniens est enim quod natura Angeli, quæ ex sua perfectione, & modo connaturali petit non discurre, ex modo supernaturali quo eleuatur, reddatur deterius conditionis, quia deprimitur ad modum cognoscendi discursiuè, qui est valde imperfectus. Quare circa supernaturalia Angelus non discurnt; & sic eadem attingentia, & immobilitate attingit finem, & media, principia, & conclusiones, sicque ex ipso modo operandi petit etiam immobilitati post electionem determinatam in bono.

32 Quod si istes: Ergo confirmatio in bono, & perseverantia in Angelo non est ex gratia Dei, sed ex connaturali modo operandi, aut saltem non est distincta gratia à prima operatione, & electione, cum tamen perseverantia in bono sit specialissimum donum Dei præter gratiam primam.

Resp. fuisse in Angelo specialissimam gratiam, & distinctam à prima in qua creati sunt: etenim post primam operationem ex gratia Dei in primo creationis instanti, cum cœperunt Angeli se determinare, & mouere, & quidam in sua naturali excellen-

Ioan à S. Thom. in 1. part. D. Th. Tomus alter.

lentia sistentes clausierint oculos, & recusauerint finem supernaturalem ex gratia habere, manifestum est, quod fuit ex luce, & viribus gratiæ quod alij sic fuerint confortati, vt elegerint subiecti fini supernaturali, & ex gratia Dei obtinere regnum cœlorum, quæ gratia tanta fuit, vt quadam connaturalitate ad se traxerit naturam eorum, eamque firmaverit, inflexibili, & quasi connaturali modo operas in illis, non connaturali modo, id est debito, sed connaturali, id est firmo, & immobili, eo quod accommodauit se modo operandi illius naturæ in immobilitate. Et hoc totum fuit ex vi ipsius gratiæ distinctæ à prima, seu distincto beneficio habitata, licet continuatio fuerit primæ vsque ad perseverantiam finalem: perseverantia enim continuationem hanc importat, sed distincto beneficio, quia poterat Deus permittere interruptionem, vt in Demonibus, sed dedit gratiam efficacem, vt continuarent, & continuando perseverarent, & confirmarentur, licet etiam in hoc iuxta modum illum naturæ in operando accommodauerit se.

Ad secundam Conf. Resp. quod Angelus ante terminatam viam non fuit adæquatè redditus inflexibilis, & in facto esse, quia non fuit plenè, & adæquatè terminatus actus, quo deliberabat in peccato, & concludebat illud instans. In quo licet plura fuerint peccata, omnia tamen subordinabantur vni fini, & rationi formali, sub qua fiebant, & integrabant totum illud instans. Vnde in quolibet illorum erat illud instans, & ille integer actus inadæquatè; & sic erat inflexibilitas quasi inadæquatè, & nondum plenè consummata, quia actus ille peccandi sic eligeat determinatum finem, quod non sistingebat in eo, sed concomitanter omnes alios actus & peccata, quæ illi subordinabantur ex vi talis electionis. Vnde totum illud instans cum omnibus illis peccatis debet reputari, vt vna integra causa inflexibilitatis: modò autem peccata, quæ ab eis committuntur, iam supponunt inflexibilitatem consummatam in toto illo instanti, non illam constituunt.

33 Vltimò arguit quia iudicium Angeli non est inflexibile, & immobile, etiam post deliberationem: ergo neque voluntas. Consequenter patet, quia voluntas sequitur modum intellectus, & propter hoc ponit D. Th. inflexibilitatem in Angelo, quia intellectus immobiliter apprehendit: ergo si non apprehendit immobiliter, consequentia non valet. Anteced. verò probatur: tum quia Angeli qui peccauerunt, mutauerunt iudicium in secundo instanti ab eo, quod habuerunt in primo, cum tamen in primo instanti comprehenderint omnia obiecta, quæ in secundo: Angelus enim creatus est plenus sapientia, & tamè cum peccauit, vtrique dictamen mutauit. Dicere autem, quod post electionem non potest mutare dictamen, quia non potest considerare aliter practicè, licet possit speculatiuè, est mera petitio principij: cur enim considerauit omnia practicè, & non omnia speculatiuè, vel si potest aliter considerare speculatiuè, cur non poterit practicè? Tum etiam quia Angelus mutauit iudicium circa mortem Christi, prius instigans ad illam Iudam, & Iudæos, deinde per uxorem Pilati procurans ne damnaretur; & similiter quando est pugna inter Angelos, & concordantur à Deo, alter eorum saltem sententiam mutat; formant ergo iudicium mutabile. Dicere autem quod mutant iudicium imperfectum, non verò perfectum, & deliberatum, videtur omnino voluntarium: unde enim constat Angelum non plenè iudicare, licet cum defectu, sicut format dictamen cum defectu; & tamen dicitur plenè iudicare, quia non mutat illud? Certè in primo instanti

habuit Angelus tam plenam cognitionem, sicut in secundo: ergo fuit plenum illud iudicium, quia ortum est ex plena scientia, & tamen mutauit illud: ergo & nunc potest mutare. Tum denique quia modò Dæmon videt per experientiam ipsam pœnam sui peccati, videt sibi esse impossibile consequi illam altitudinem, quam prius consequi desiderabat, habet etiam vermem conscientiae remurmurantis contra ipsum: ergo habet ex parte sui sufficientia principia, ut retractet oppositum, seu cognoscat se errasse, licet ex defectu gratiae pœnitere non possit, ut oportet.

Conf. ex quibusdam autoritatibus, quæ huic mutabilitati fauere videntur: nam Angeli dicuntur ex natura sua mutabiles, & Angeli sancti solum ex gratia immutabiles in bono, ut docet Damascenus lib. 2. de fide c. 3. Isidorus de summo bono c. 12. Aug. lib. de correptione & gratia c. 10. & 11. ergo non sunt ex natura sua inflexibiles, aliàs gratia non egerent, sed solum quod naturali modo operarentur. Et specialiter Damascenus dicit, *Angelum esse semper mobilem, & voluntatis ac sententia ratione mutabilem*. Item Fulgentius lib. de fide ad Petrum c. 3, dicit, quod *initium resumendi bonam voluntatem est ex gratia, & non ex natura: nam si homines possent per naturam illud initium habere, posset etiam Angelus*. Ergo supponit Angelum esse mutabilem, sicut hominem, aliàs illa consequentia non valeret: posset enim dici, quod etsi homo posset per naturam resumere voluntatem, sed non Angelus, quia inflexibilis.

34 Respond. negando anteced. Ad primam probationem dicitur, quod dictamen quod habent Angeli in primo creationis instanti possunt mutare, quia licet in illo plenè cognoscant, sicut in secundo, non tamen se mouent, & applicant, neque formant suum dictamen, sed à Deo formatum accipiunt, à quo immediatè tunc mouentur. Non immobilitatur autem Angelus in aliquo fine, nisi se determinet, & moueat, si enim præcisè moueatur ab alio, solum operabitur bonum proptè subest illi motioni; si autem relinquatur sibi ipsi ut se moueat, & determinet, oportet quod ex modo illo se mouendi, & iuxta naturam eius reguletur mobilitas, vel immobilitas in electione facta. Quare cum operatio in primo instanti facta sit solum ex motione speciali Dei, & nondum ibi appareat, quid faciat Angelus ex propria motione, nondum ibi potest immobilitari, quantumcumque perfectè, & comprehensiuè cognoscat, quia restat adhuc alius modus, quo seipsum debet mouere, & ex seipso formare dictamen; & idè ex comprehensione non quomodocumque, sed sic applicata ut se moueat, & ex se deliberet, sumitur quod immobiliter procedat. Et sic à primo instanti in secundum potest mutare iudicium, & dictamen, quia potest mutare modum operandi, sed post hoc secundum non restat alius modus operandi; & sic exinde sumitur immobilitatio.

35 Ad secundam probationem dicitur, quod illud iudicium Diaboli non fuit perfectum, & deliberatè omnino determinatum, sicut neque est inter Angelos quando est pugna inter eos. Et dicimus non fuisse omnino plenum, non quia non sit cum sufficienti aduertentia ad peccandum mortaliter, sed quia non est cum iudicio firmo intellectus circa tale obiectum, & comprehensione plenè, & perfectè applicata. Et cum inquiritur, unde constat non fuisse iudicium plenum, & determinationem? Respond. constare, quia illa cognitio versatur circa res naturaliter ignotas Angelo, & in quibus procedit coniecturaliter ex effectibus quos videt (licet sine

discurso, quia immediatè in effectibus sine alio lumine deducto, vel actu coniectat de causis, imperfectè tamen) non autem procedit ex principiis comprehensiuè cognitis; & idè plenum iudicium formare non potest, nec certi aliquid statuere, nisi præcipitanter, & temerariò, quod ex hoc ipso non est fixum neque immobile.

Ad tertiam probationem dicitur Angelum iudicare modò esse impossibilem consecutionem rei quam appetit, scil. ut singulariter dominaretur omnibus, vel relinqueretur in sua pura natura potius quam ex beneficio Dei habere gloriam, aut communicando cum hominibus, quos valde despiciebat. Cæterum licet quoad affecutionem istarum rerum amiserit spem, quia nihil horum intentabat efficaciter consequi, nisi sub conditione si ad id pateret via, & dependenter ab aliis extrinsecis, quæ non erant in sua potestate, idè quæ circa illam consecutionem non habebat immobile iudicium; tamen circa propriam excellentiam, & rationem formalem appetendi illam cum tanta singularitate, & circa refutationem gloriæ, & supernaturalium bonorum, ut ex gratia, & speciali beneficio habendorum efficaciter se habet, & in hoc non mutat iudicium ex pœna quam sentit, sed obstinatio manet, eligens potius illam pœnam, quam ex gratia Dei habere gloriam, & ita, ut dicit D. Thom. in hoc a. 2. ad 2. manet in Diabolo peccatum quantum ad appetitum, licet non quantum ad hoc quod credat se posse obtinere. Imo quando ipse peccauit, & refutauit ex superbia gratiam Dei, bene vidit se peccare, & damnationem incurrere. Quomodo enim ignorare hoc potuit, quod etiam homines sciunt? Nec ipse credidit se absolutè posse obtinere res illas, quas desiderabat sine affectatæ dominationis, siue superbissimæ singularitatis, licet vellet illa, sic si posset esse locus obtinendi. Quod autem efficaciter voluit, sc. manere in sua singularitate, & excellentia sine dependentia à beneficio speciali gratiæ Dei, hoc semper efficaciter voluit, & modò vult, etsi cum tanto damno suo, quod etiam tunc non recusauit, quia non ignorauit.

Ad Confir. Resp. illas autoritates non conuincere. 37

Ad primam dicitur Angelum rectè appellari à Damasceno semper mobilem, & omne arbitrium creatum esse mutabile, sed non dicit esse mobilem sic, id est per retractationem, & postquam semel aliquid voluit. Hoc non dicit Damascenus. Verificatur autem semper esse mobilem, vel circa diuersa obiecta quæ de nouo accidunt, & circa quæ Angeli habent nouos affectus, licet semper sub eodem fine quem prius elegerunt. Et circa ipsum finem fuerunt mutabiles, antequam determinatè eligerent inter primum, & secundum instans, non postea, nec contra hoc dicit Damascenus. Similiter cum dicunt Sancti solum ex gratia Dei esse immutabiles in bono, verissimum est: licet enim Angelus ex proprio modo operandi petat inflexibilitatem post electionem, tamen quod ista sit in bono, & non in malo ex magna Dei gratia est, quam si suspenderet, in malo obstinarentur. Per gloriam autem redduntur immutabiles, etiam quoad supernaturalia, quod ex natura sua non habent. Ad autoritatem Fulgentij Resp. illam conditionalem esse verissimam, sed non supponere Angelum esse mutabilem, postquam semel elegit, sed loquitur de conuersione ad bonum ex parte gratiæ, & virtutis ad eam requisitæ. Et dicit quod si gratia, & initium resumendi bonam voluntatem esset homini naturale, etiam Angelo, quantum est ex parte virtutis, seu virium, quæ ad id requiruntur: ista enim virtus supernaturalis est

est, quæ quidem supernaturalitas, & virtus, si esset naturalis homini, etiam Angelo, & sic procedit illa conditionalis Fulgentij. Sed quantum ad exercitium huius virtutis, modumque operandi, ut sc. si homo potest ex natura sua esse reducibilis postquam voluit aliquid, etiam Angelus reducibilis sit, quantum ad hoc Fulgentij conditionalis non procedit, nec ab ipso ponitur, sed solum quod si ex parte supernaturalitatis, & excellentiæ esset homini conaturalis illa gratia, etiam Angelo.

ARTICVLVS III.

Quomodo spiritus torquantur ab igne?

INter pœnas sensus quæ in damnatis sunt, & pertinent omnes ad afflictionem, & dolorem, seu tristitiam quam voluntas concipit de obiectis sibi dissonis, & contrariis, præcipua, & difficilior ad explicandum est tortura, quam spiritus patiuntur ab igne, cum iste sit corporeus, illi extra omnem corporeæ actionis sphaeram. Ideo aliis omissis, quæ commodius in 1.2. circa peccatorum pœnas explicabuntur, de hac solum pœna in præsentia agemus.

Duo præsupposita.

1 Primò supponendum est duplicem dolorem, vel tristitiam distinguere, scil. formalem, & obiectiuam. Formalis dolor est actus voluntatis seu appetitus refugientis malum sibi coniunctum, à quo patitur vel grauatur. Vnde res carentes appetitu sentiente, vel intellectu, pœnæ, & doloris capaces non sunt. Dolor obiectiuus est illud obiectum disconueniens, quod refugit voluntas, v. g. vulneratio, verberatio, adustio, &c. In Dæmonibus ergo certum est non esse dolorem, qui est passio, seu actus appetitus sensitui, quia carent potentiis corporalibus, & sensituiis. Dari autem dolorem qui sit actus voluntatis refugientis, & tristantis de cruciatu illato, certissimum est, quia de fide est dari in Dæmonibus cruciatum, non solum qui pertinet ad pœnam damni, propter bonum gloriæ amissum, sed etiam qui pertinet ad pœnam sensus, & mediante igne inferitur: dicitur enim 2. Petri 2. *Deus Angelis peccantibus non pepercit, sed in Tartarum tradidit cruciandos: Apocalyp. 20. Missus est Diabolus in stagnum ignis, & sulphuris, ubi bestia, & Pseudopropheta cruciabuntur die ac nocte.* De quo etiam igne dicitur Matth. 25. *Ite in ignem æternum, qui paratus est Diabolo, & Angelis eius.* Non paratur autem ignis ille, nisi ad cruciatum, & supplicium, de quo ibi subditur, *Ibunt hi in supplicium æternum.* Et de eodem dicitur Isaia 33. *Quis poterit habitare de vobis cum igne deuorante, quis habitabit ex vobis cum ardoribus sempiternis?* Quare cruciatum in inferno futurum, & non solum pœnam damni, indubitata fides est. Quod etiā constat ex Innocentio III. in c. *Maiores, de Baptismo, §. Sed ad hac, ubi definit actualis peccati pœnam esse perpetuum cruciatum.*

2 Secundò supponendum est tanquam certum, ignem illū quo cruciantur spiritus in inferno esse corporeum. Quod aliqui negauerunt, existimantes illum ignem, qui cruciaturus est spiritus, esse ipsam conscientiam peccatorum, quæ metaphoricè dicitur ignis, & vermis, de quo dicitur Iudith 16. *Dabit ignem & vermes in carnes eorum ut urantur, & sentiant in sempiternum;* & Isaia 66. *Vermis eorum non morietur, & ignis eorum non exstinguetur:* sed constat quod vermis intelligitur metaphoricè, quia in Ioan. à S. Thom. in 1. part. D. Th. Tomus alter.

inferno non erunt vera, & propria animalia præter humana corpora: ergo etiam ignis metaphoricè intelligendus est. Et quidem S. Hieronymus in c. 66. *Isaia, & epist. 59. c. 2.* inter Origenis errores refert, quod ignem inferni non ponit in suppliciis, sed in conscientia peccatorum. Quæ sententia arrisit Caluino, aliisque Nouatoribus, qui negant ignem Inferni, & Purgatorii, solumque pœnas damnatorum dicunt esse terrores, & anxietates quibus anima Deum sibi iratum, & infestum cogitat, ut refert Belarminus tomo 1. lib. 4. de Christo, c. 8. Catharino etiam attribuitur, quod libro de premio bonorum, & supplicio malorum dixerit ignem inferni non esse sensibilem, sed pœnam spirituales illo igne designari.

Cæterum indubitatè tenendum est ignem illum esse materialem, & corporeum, & oppositum pro errore deputandum est, quia Scriptura frequentissimè nominat ignem pro futura pœna damnatorum, non solum pro animabus separatis, & Dæmonibus, sed etiam pro corporibus damnatorum post resurrectionem, & diem iudicii: de illis enim iam resuscitatis dicitur Matth. 25. *quod Ibunt in ignem æternum, qui paratus est Diabolo, & Angelis eius,* corpora autem non cremabuntur igne spirituali, & metaphoricè, sed verò: cum ergo idem ignis ponatur pro Diabolo, & pro corporibus damnatorum, manifestum est quod ille ignis corporeus est. Et ita est communis Patrum traditio, & expositio, ut patet ex S. Hieron. locis citatis, ex S. Gregorio 4. *Dialogorum cap. 19.* interrogans, an ignis ille corporeus sit, respondet, *corporeum esse non ambigo,* August. 21. de ciuit. c. 10. *Adharebunt, inquit, spiritus incorporei corporeis ignibus cruciandi, non ut ignes eorum iunctura inspirentur, & animalia fiant, sed, ut dixi, miris, & ineffabilibus modis adherendo, accipientes ex ignibus pœnam, non dantes ignibus vitam.* Videndus est etiam idem S. August. 20. de ciuit. cap. 22. S. Cyprianus libro de laudibus martyrij cap. 12. luculenter Infernum describens, *Saniens locus, inquit, cui nomen gehenna est, magno plangentium murmure, & gemitu, & eructantibus flammis per horrendam spissa caliginis noctem sua semper incendia camini fumantis expirat. Globus ignium arctatus obstruitur, & in varios pœna exitus relaxatur. Tunc sentiendi plurima genera, & cum in se ipse conuoluit quidquid ardoris emissi eadem flamma cruciaret.* S. Iulianus Archiepiscopus Tolertanus qui citatur à Magistro in dist. 44. in 4. sententiarum. *Si uiuentis hominis spiritus tenetur in corpore, cur non post mortem etiam corporeo igne tenetur?* Denique sequuntur hoc omnes Scholastici Doctores cum Magistro ibidem; & D. Th. opusc. 2. cap. 179. concludit quod *Pœna ista ignis corporalis est, & omnia quæ in Scriptura de hoc igne inferni dicuntur, ad litteram, & non per metaphoram esse intelligenda.* Videatur de his latissimè Suarez lib. 8. de Angelis c. 12.

Nec obstat comparatio illa vermis, & ignis supra facta: vermis enim non potest convenienter intelligi, nisi per metaphoram, scil. pro ipso conscientia remorsu, eo quod post diem iudicii non manebunt animalia aliqua, quæ corpora depascant damnatorum, quia cessabit omnis generatio, & corruptio, & omnia hæc finienda erunt, quæ ad res mixtas, & viuentia pertinent præter hominem, quod de igne non currit, qui est elementum, & semper permanebit. Vnde Aug. inter ista duo ponens differentiam in libro 10 de ciuit. c. 22. *In pœnis, inquit, malorum erit inextinguibilis ignis, & viuacissimus vermis.* Ab aliis autem aliter atque aliter exponitur. Alij verumque ad corpus, alij verumque ad animam retulerunt, alij propriè ad corpus ignem, tropicè ad animam vermem, quod esse credibile

lins videtur. Idem affirmat S. Th. in 4. dist. 50. q. 2. a. 3. Quod verò aliqui Sancti aliquando insinuant illum ignem non esse corporeum, ut S. Ambr. lib. 7. in Lucā, titulo de parata cœna, ubi inquit, *Neque ignis perpetuus est flammam corporaliū, neque vermis est corporalis.* Et S. Aug. 12. de Genesi ad litterā, c. 32. idē negare videtur. Hæc & similia explicari debent vel de proximo cōtristatē, quod est apprehensio spiritalis, non de remoto, quod est ignis corporalis, vel de virtute spiritali, qua à Deo agitur ille ignis ut instrumentum eius, nō ut virtute propria corporea vrēs. Videatur D. Th. in additionibus, q. 70. a. 3. ad 1.

His ergo suppositis, difficultas currit, quomodo ignis ille corporeus torqueat spiritus, an physicē aliquid spirituale illis imprimendo, & quid hoc sit, quomodo ab igne corporeo imprimatur, an verò solum moraliter, quatenus obiectum tristitiæ est, & quomodo cognitionem moueat, & voluntatem excitet ad dolorē, si nihil physicū, quod contrariū & disconueniens sit in spiritu imprimat realiter, & physicē? Quæ disputatio sua etiam difficultate non parum Authorum ingenia torquet.

Varia sententia.

Duo sunt, in quibus variæ Authorum sententiæ diuiduntur.

Alterum quid causet ignis in spiritibus, quo eos cruciet, & torqueat.

Alterum quo modo id causet ignis. Nam id quod cruciat illos, non videtur esse corporeū, cum nulla qualitas, modusve corporeus ipsis spiritibus sit cōtrarius. Si verò spirituale aliquid est, nō apparet, quomodo ignis corporeus id producat, seu efficiat, physicē, an moraliter, ut propria, & principalis causa, an ut instrumentalis? Quid etiam sit illud spirituale quod sic cruciat, cū non videatur repugnās?

Igitur ut possimus in ordinem redigere tantam diuersitatem sententiārum, dico duas esse classes, & quasi præcipua capita sententiārum circa id quod ignis causet; duas etiam circa modum quo causet cruciatum illum. Circa id quod causet ignis in spiritibus, quos torquet, prima sententia docet ignem causare in spiritibus, quos torquet aliquid mortale, scilicet aliquid pertinens ad cognitionem, seu apprehensionem, vel aliquam speciem, qua eliciatur cognitio apprehendens illum ignem, ut nocium, vel aliquo alio modo tristitiam inferens, quod tamen diuersis modis explicant auctores, qui hanc viam sequuntur. Nam quidam affirmant per talem apprehensionem solum formari iudicium alicuius mali, seu nocimenti, non veri, sed apparentis, ad eū modum quo nos aliquādo ex phantasia delusa, vel somniantes prægramur. Itaque in istorū auctoriū sententiā tormēta illa solum sunt somniata. Alia verò putant causari per ignem apprehensionem boni amissi, id est beatitudinis, à qua sententia nō multum abhorret Arrubal in presenti, disput. 171. cap. 1. qui dolorem illum illatum ab igne, censet non esse distinctū à dolore, quem sentiunt spiritus ab amissione beatitudinis, solumque dicuntur pati ex igne corporeo, quatenus virtute diuina sit ut actus ille vitalis, quo apprehenditur, & sentitur illa pœna, seu amissio tanti boni dependeat ab igne, non ut à causa principali, quia vitalis non est, sed tanquam à causa instrumentali. Alij denique in hac parte existimant ignem producere diuinā virtute speciem quandam intentionalem impressam, vel expressam, qua spiritus vehementissimē applicatur ad cogitandum de illo igne, vel de alio simili obiecto nocino, & ista coactio violentiam quandam, & tristitiam infert voluntati. De quibus sententiis quæ solum aliquid intentionale, vel morale prouenire

dicunt ab igne, videri potest D. Tho. in 4. dist. 44. q. 3. art. 3. Suarez lib. 8. de Angelis cap. 13. & Vasq. hic disp. 243. tribus primis capitulis.

Alia sententia, seu classis Auctorum tener ignem illum non solum torquere obiectiue tanquam causans apprehensionem, vel speciem contristantem, sed etiam effectiue, quatenus aliquid physicum ponitur in spiritu, quod sit illi malum, & disconueniens, eo quod, ut S. Gregorius dicit, 4. dialog. c. 42. *Incendium anima non solum videndo, sed etiam experiendo patitur.* Vbi distinguit experientiam passionis ab apprehensione. Quid autem sit hoc malum causatum in spiritu variè explicant Authores huius sententiæ. Quidam dicunt produci ab igne qualitatem quandam spiritualem dissonam Angelo, sicut producit qualitas dolorifera in corpore, quam sententiam sequitur Suarez ubi supra cap. 15. & tomo 4. in 3. partem disp. 46. sect. 2. Alij dicunt solum produci ubi, seu detentionem in loco, ne egrediatur quod velit. Quæ sententia Caietano, & Thomistis communiter tribuitur ad hanc q. 64. art. 4. & eadem sententiam ex parte sequitur Vasq. ubi supra cap. 6. licet alijs etiam occultis modis nobis ignotis affirmet Angelos torqueri. Alij existimant eandem læsionem, seu dolorem quem ignis infert corpori animato imprimi in anima, seu spiritu separato, perinde ac si corpora ipsa animarent, sicque in Dæmonibus causatur ille dolor quem ignis causet modò in nostra anima mediante carne. Quæ sententia attribuitur Soto in 4. dist. 50. q. unica art. 2. & multis discipulis D. Thom. placuisse docet Bannez super hanc quæst. 64. art. 4. dubio 3.

Circa 2. quod supra proposuimus, nempe quomodo ignis cum sit corporeus, causet rem illā quæ tantum dolorē imprimat spiritibus, præsertim si est res physica, & spiritalis, duplex etiā sententia est.

Prima affirmat rem illam produci ab igne tanquam ab instrumento physico Dei. Huius sententiæ subscribunt omnes, qui affirmant dari instrumenta physica ad producendam gratiam, & effectus supernaturales: eadem enim ratio est de illa qualitate spiritali cruciatiua. Communiter autem id tenent Thomistæ ad 3. part. quæst. 13. & q. 62. ubi etiam videri potest Suarez id latissimē propugnans, licet ponat potentiam obedientialem actiuam (quam communiter reiciunt Thomistæ) ut instrumenta ista physica dari possint. Alia sententia quæ istam physicam efficientiam instrumentalem non admittit, solum concedit ignem inferni moralem causalitatem habere in rem illam quæ producit à Deo ad torquendos spiritus. Quæ sententia denegans causalitatem istam physicam est Scoti, cui subscribit Vasquez, & alij recentiores huius temporis, ut citatis locis 3. partis dici solet.

Resolutio.

Non est disputatio ista occupanda in præsentia lōga illa, & prolixa difficultate de causatione physica instrumentali rei corporeæ respectu effectus spiritalis: hæc enim difficultas suum specialem locum habet in tr. de Sacram. ad q. 62. in 3. parte, vel etiam q. 13. agendo de potentia animæ Christi. Et ut ab isto puncto nos expediamus; dico, quod iuxta communem D. Thomæ, & Thomistarum sententiam nulla inuenitur implicatio quod res corporea assumatur à Deo tanquam instrumentum physicū ad producendam gratiam, seu effectum aliquem spiritualem recipiendo ad hoc virtutē eleuatā Dei, qua actio eius physica præter suū proprium effectum operetur, & producat spiritualem effectum, siue actio illa propria instrumenti operetur aliquid in ipsomet subiecto in quo sit effectus spiritalis, siue non.

non, sed tantum operetur circa aliud subiectum, de quo videri possunt quæ diximus in *physica*. q. 26 art. 2. & *supra* in hoc tomo disp. 18, agentes de instrumento creationis: cum ergo non repugnet quod corpus aliquod assumatur ut instrumentum physicum spiritualis effectus non est cur denegemus igni corporeo talem causalitatem, si verè cruciatus ille est per aliquid spirituale physicum in anima, seu spiritu impressum: sic enim cum omni proprietate intelligitur ignem torquere, & affligere spiritus, si physicè producit id quo torquentur, sicut Sacramenta dicuntur in omni proprietate sanctificare nos, si gratiam physicè producant in anima per modum instrumenti. Sed quia causalitas ista instrumentalis rei corporeæ in spiritum, valde occulta, & mirabilis est, solumque ab infinita potentia Dei expediri potest, idè optimè dixit Augustinus *ubi supra* 21. de civit. c. 10. *Miris, & ineffabilibus modis ignem illum spiritus cruciare*. Alia verò sententia quæ talem causalitatem physicam non admittit, solum fatetur moralem causalitatem ignis in torturam spiritum, non quia solum aliquid morale torqueat Dæmones, sed aliquid verum, & physicum, non tamen physicè procedens ab igne, sed à solo Deo ad præsentiam ignis, sicut ad præsentiam signi, seu virgæ iudicis tortor cruciat reum. Et sic solus Deus est qui physicè, & formaliter torquet Dæmones in hac sententia; ignis verò solum se habet ut signum talis torturæ; & sic dicitur moraliter torquere.

Relicta ergo ista controuersia de causalitate physica instrumentali, de qua tamen possunt videri quæ diximus *cit. locis*. In præsentia solum est videndum illud primum quod præsentis loci proprium est, scilicet quid sit illud quo torquentur spiritus ab igne, siue moraliter, siue physicè rem illam operetur.

9 Dico ergo primò: Non potest explicari cruciatus ignis in spiritibus per hoc solum, quod ignis sit causa apprehensionis cruciantis, non autem ipsimet cruciatus effectiue. Sumitur hæc conclusio ex D. Tho. *loco cit. ex 4. dist. 44.* & sequuntur communiter authores, qui videri possunt apud Suarez, Vasquez & Bannez *locis citatis*.

Ratio istius conclusionis supponit vnum principium valde certum, quod pœna illa quæ ex igne infligitur spiritibus non est phantastica, neque falsa, sed verè, & in re affligens, nec ad hoc ut torqueat, indiget falsa, & deceptoria apprehensione Angelis, alioquin si non deciperetur spiritus, non torqueretur. *Non est autem probabile* (ut inquit D. Th. *loco cit.*) quod anima separata vel Dæmones, qui magna subtilitate ingenij pollent, putarent ignem corporeum sibi nocere posse, si ab eo nullatenus grauarentur. & non minus inconueniens est, quod non possit Deus torquere spiritum per ignem, nisi decipiendo vel permittendo deceptionem in eo: si verò veritatem manifestaret, vel relinqueret ipsum apprehendere id quod est in re, hoc ipso cessaret omnis cruciatus: hoc ergo principio supposito; vel ille ignis crucias facit apprehendere aliquid, quod verè, & in re affligit Angelum, vel non, sed solum illa apprehensio est phantastica, & in re nihil est contrarium, & nocium ipsi spiritui condistinctum ab illa apprehensione, & quasi obiectum eius. Si hoc secundum dicatur, inuidimus in inconueniens propositum, quod illa pœna non est vera, & propria, sed solum quædam illusio pœnarum. Si dicatur primum: ergo restat istj sententiæ, explicare, quid sit illud quod verè, & in re affligit Angelum condistinctum ab ipsa apprehensione: non enim potest affligere, nisi sit nocium, & repugnans, seu disconueniens, quia quod est conueniens non affligit, sed delectat: ergo hæc sententia non se

expedit à difficultate, sed magis illa aggrauatur, vel prius à puncto difficultatis deflectit, explicans apprehensionem cruciantem, sed non rem ipsam, seu obiectum istius apprehensionis quo fit cruciatus: & utrū fiat à Deo immediatè vel ab igne: aut si ab igne non sit, quomodo ab eo dicatur spiritus cruciari.

Quare omnes istæ sententiæ quæ ad intentionale, seu moralem afflictionem recurrunt, quæ in apprehensione ipsa consistit, diminutæ sunt, non explicantes, quid sit illud obiectum afflictiuum, quod in re tali apprehensioni correspondet: quod enim imprimatur aliqua species intentionalis ab igne ad affligendum spiritum, hoc nihil est, quia species non affligit ratione sui, cum sit perfectio ipsius intellectus, sed ratione obiecti quod repræsentat, quia scilicet repræsentat aliquid nocium ipsi cognoscenti, & hoc inquirimus quidnam sit præter ipsam speciem repræsentantem. Nec aliquid ad pœnam conducit quod dicatur illa species imprimi mediante corpore, quod est aliquid ignobilius Angelo, & subici illi, quod aliquid indecorum, & afflictiuum est. Sed hæc parui nominis est afflictio: nec enim ignis imprimeret illam speciem virtute propria, sed diuina, & hæc semper superior est ad Angelum: aliàs probaretur affligi animam ex receptione gratiæ per Sacramenta, quia rem ita spirituale, & supernaturale recipiunt mediante causalitate corporis, seu corporei Sacramenti. Nec denique ista aggrauatio ignis explicatur sufficienter per hoc quod virtute diuina facit vehementem applicationem ad apprehendendum aliquid nocium. Nam apprehensio quantumcumque vehemens nisi sit circa aliquid obiectum disconueniens, non affligit: constat enim quod circa aliquid delectabile vehemens applicatio afflictiva non est: si autem illa vehemens applicatio est circa aliquid nocium distinctum ab ipsa apprehensione, hoc inquirimus quid sit; & sic hæremus in eadem salebra. Itaque vehemens cognitio in Angelo nisi aliud ponatur, neque contristat, neque impedit alias functiones. Nam ipse vehementissimè apprehendit seipsum, ut pote sibi maximè coniunctum, & conueniens, & amabile; & Beati summo conatu, & vehementia Deum apprehendunt; nec tamen ista vehementia impedit alias functiones, aut contristat, quare nisi assignetur obiectum realiter contristans, & repugnans Angelo, super quod cadat apprehensio illa, & applicatio vehemens, nihil explicat ista sententia de dolore illato Angelis ab igne.

Dices ignis in corporibus damnatis non habebit post diem iudicii actionem alteratiuam, & reale, sed solum intentionale, quia illa corpora non corrumpuntur ab igne, nec dissoluitur temperamentum tactus: cessabit enim tunc omnis corruptio, & consequenter omnis alteratio realis, quæ corruptiua est, sed solum immittet species intentionales in sensus, & hoc sufficit ut dicatur affligere illa corpora: ergo similiter per actionem intentionalem, qua ignis ille virtute diuina immittat speciem non sensibilem, sed spirituales in Angelum, dicetur illum affligere.

Resp. ignem illum immittere speciem sensibilem in corpora damnatorum repræsentatiuam caloris vehementissimi illis corporibus coniuncti, qui licet non corrumpat illa corpora corruptione physica, est, tamen qualitas valde disconueniens ipsi temperamento sensibili corporis, & de se valde impedit omnes functiones facultatum sensibilibus, connaturali modo, & conuenienti fieri, & ita iam affligamus respectu corporum aliquid reale afflictiuum præter apprehensionem, & speciem repræsentantem, scilicet coniunctionem caloris excessiui, & comburentis, non quantum ad corruptionem, sed quantum ad disconuenientiam temperamenti, quam acriter imprimit illis corporibus.

CCc 4 Ex

12 Ex quo etiam manet refutata sententia P. Arrubal *supra* relata, qui nihil explicat in pœna sensus illata ab igne præter dependentiam doloris formalis, seu tristitiæ de beatitudine amissa ab ipso igne, ut ab instrumento diuino concurrente ad talem actum. Quæ amissio beatitudinis pertinet ad pœnam damni. Quodd autem apprehensio, & tristitia de isto dāno, & amissione beatitudinis dependeat ab igne instrumentaliter, non superaddit nouam pœnam ex parte obiecti afflictui, nec nouam repugnantiam, seu disconuenientiam aut damnum affert ipsi spiritui: ergo non erit distincta pœna, seu cruciatus, pœna ignis, & pœna damni. Quod enim actus vitalis, quem ego elicio dependeat, vel non dependeat ab aliquo instrumento extrinseco in sui elicentia, non affert specialem pœnam, afflictionem elicenti: supposito enim quodd totum damnum de quo tristandum est, iam est factum, dependentia in elicentia actus tristitiæ, nouum damnum aut iacturam non affert, sicut è contrā posito obiecto delectationis, & gaudij, quodd actus eliciatur dependenter ab instrumento extrinseco, vel non, neque auget, neque minuit delectationem. Ergo similiter in hac sententia, posito damno beatitudinis nihil augetur de pœna per hoc quod spiritus tradantur igni, quia solum additur, quodd actus ille doloris, qui circa tale obiectum elicendus erat à sola voluntate, dependeat instrumentaliter ab igne, quod certè nihil pœnalitatis addit: nec enim propterea magis defatigatur, aut laborat voluntas in elicendo illo actu: si enim laboraret, & defatigaretur, iam aliquid pœnale de nouo poneretur in voluntate, & explicari deberet quidnam sit illud impedimentum. Ponere autem quodd non magis torquentur spiritus per alligationem ad ignem, quàm sine illa, supposita pœna damni, & missione beatitudinis, de qua tristandum sibi est, & solum superadditur dependentia illius tristitiæ ab instrumento ignis, quod noua pœna non est, valde periculosè diceretur: quis enim dubitet ex adhesionem, & coniunctionem ad ignem crescere pœnam in damnatis præter amissionem beatitudinis? Et iterum variæ sunt pœnæ, & cruciatus ab igne illo prouenientes, acerbioræque tormenta sunt in quibusdam, quàm in aliis. Si autem cruciatus in hoc solum consistit quodd dependeat actus vitalis tristitiæ ab igne, ut ab instrumento, non apparet quomodo ex tali dependentia maior acerbitas cruciatus ignei sit in vno, quàm in alio.

13 Dico secundò: Ignis torquet Dæmones per alligationem, non solum extrinsecam quoad locum, & determinationem in illo, sed multò magis per alligationem intrinsecam, qua ipsæ potentia impeduntur, & alligantur plus, vel minus in ordine ad suas operationes præsertim externas in mouendo se, & mouendo alia. In prima parte huius conclusionis nobiscum conueniunt Vasquez, & Suarez *supra* citati, quos etiam sequitur P. Alarcon *tract. 6. de Angelis disput. 9. cap. 10.* Sed differunt, quia censent non solum per alligationem, quæ est detentio in loco, sed etiam per alios modos cruciari Dæmones: Vasquez quidem per alios modos nobis occultos, Suarez verò per qualitatem doloriferam: alij verò per detentionem in loco factam ab igne per causalitatem instrumentalem moralem, ad modum quo Sacramenta causant gratiam, ut sentit Alarcon citatus. Ex quo sequitur quodd ignis etiam habeat obiectiuam causalitatem respectu apprehensionis Angeli, quatenus concipitur ut obiectum contristans, & affligens ob detentionem

prædictam. Addit P. Alarcon in animabus separatæ causari ab igne tristitiæ eiusdem rationis, quàm habebunt, quando post resurrectionem corpora illis vnita cremabuntur ab igne apprehensione quadam ficta, sed dolore vero, in quo dicit se sequi Sorum, Vasquez, Valentiam, & alios, licet Sotus, & Valentia etiam ad Dæmones hoc extendant.

14 Nihilominus quod attinet ad primam partem conclusionis, loquendo in genere quodd illa pœna ab igne illata sit pœna alligationis, siue solum sit alligatio quoad locum per modum carceris, siue sit alligatio potentiarum quoad liberam executionem suarum functionum, manifestè deducitur, quia Scriptura ferè semper explicat illam pœnam ignis per modum alligationis, & detentionis, quod est magnum argumentum solum eo modo fieri, aut saltè de alio modo non posse aliquid certò à nobis affirmari. Antecedens probatur: nam in Canonica Iudæ dicitur, *Angelos verò qui non seruauerunt suum principatum, vinculis æternis sub caligine reseruauit*, & 2. Petri 2. *Angelis peccantibus Deus non pepercit, sed rudentibus inferni detractos in tartarum tradidit cruciandos.* Apocalypsis 20. *Et apprehendit Angelus Draconem qui est Diabolus, & Satanas, & ligauit eum per annos mille, & misit in abyssum.* Vbi cruciatus Dæmonum in inferno explicantur per vincula, rudentes, & alligationem. Vnde etiam dicitur Isaïæ 24. *Et congregabuntur in congregatione vnus fascis in lacum, & claudentur ibi in carcere.* Item Threnorum 3. *In tenebris collocauit me, sicut mortuos sempiternos circumdificauit aduersum me, ut non egrediar, aggregauit compedem meum.* Quo loco duplex insinuat detentio, seu alligatio: vna quantum ad locum, cum dicitur *ut non egrediar*: egressus enim à loco est; altera quoad impedimentum ipsarum potentiarum, cum dicitur *aggregauit compedem meum*: compedibus enim aggrauatur, & impeditur potentia motiua, quæ per pedes designatur, ut non liberè operetur, & moueat.

15 Ex hoc autem accipimus explicationem nostræ conclusionis, etiam quoad secundam partem, distinguendo duplicem alligationem. Vna quæ solum est in ordine ad locum, detinendo aliquem, ne recedat à tali, vel tali loco: & hoc pertinet ad pœnam carceris, qui tantò est grauior, quantò strictior, & limitatior. Et de hac pœna non est dubium quodd detur in Dæmonibus, quia qui sunt in ipso inferno non permittuntur ab illo loco egredi. Qui autem sunt in isto aëre, seu extra infernum, solum permittuntur discurrere, & operari quantum Deus permittit, non quantum ipsi volunt, sicut feræ funibus alligatæ, licet permittantur aliquantulum moueri, non tamen pro libito, sed iuxta laxationem, vel constrictionem funis: sic ille ignis gehennalis ligat Dæmones, etiam dum extra infernum permittuntur exire, ne pro suo libito operentur. Alia alligatio est in ordine ad ipsas potentias, seu facultates operatiuas, quæ quando impediuntur operari modo suo connaturali, dicuntur constringi, & alligari, sicut si alicuius membra constringantur funibus, vel ferro, aut si aliquo humore prædominante membra intrinsecus præpediantur: tunc enim dolor tantò est vehementior, quantò fortius est impedimentum ne facultates illæ suas connaturales operationes possint elicere. Imò si rectè perpendatur omnis dolor, quem in nostro corpore sentimus, ferè ad hoc reducitur quodd facultates, & membra non permittuntur suo connaturali modo operari, propter distemperamentum qualitatis contrariæ, vel diuisionem, compressionem, vel aggrauationem membrorum, quod totum quædam alligatio seu impedimentum potentiarum est.

Dicimus

16 Dicimus ergo, quod ignis inferni hoc secundo modo, & non solum primo (licet etiam illo affligat) alligat spiritus, impediendo ne potentia operentur, praesertim operationes ad extra modo conaturali pro libero, sed cum limitatione, & coarctatione: ex quo sequitur vehemens apprehensio in intellectu, & afflictio in voluntate de tali impedimento, & alligatione cruciante, sicut si potentia nostra motiva non solum alligaretur exterius, sed etiam interius impediretur in nervis, & musculis, aliisque organis potentia motiva, per aliquem humorem vel distemperamentum, aut aliquo alio aggrauatio magis, vel minus forti, ne conaturali modo operetur. Et sic explicat hanc poenam D. Thomas, *dist. illa 44. citata*, dum inquit, quod *Hoc superadditur igni corporeo, in quantum est instrumentum Diuinae iustitiae vindicantis, quod sic detinet spiritum, & ita efficitur ei poenalis, retardans eum ab executione propria voluntatis, ne scilicet possit operari ubi vult, & secundum quod vult*. Et hoc ipsum probat ibi ex Augustino, Gregorio, & Iuliano, idemque affirmat *q. 2. de anima art. 21. & q. 26. de veritate art. 1.* vt statim amplius referemus. Et explicatur etiam exemplo animae, quae quidem naturaliter vnitur corpori, vt forma viuificans, & tamen aggrauatur a corpore corruptibili in suis operationibus, ne exerceat illas, sicut vult: *Corpus enim quod corrumpitur aggrauat animam*. Sic ergo vnit Deus corpus igneum spiritui, non quantum ad informationem, sed quantum ad aggrauationem, quod illis verbis acute explicauit Augustinus *21. de ciuitate c. 10. Adhaerebunt spiritus corporalibus ignibus accipientes ex ignibus poenam, non dantes ignibus vitam*: quasi ex duobus officiis, quae in nostro corpore videmus: erga animam, alterum viuificari ab illa, & hoc est naturale, & delectabile: alterum aggruari animam a corpore ne prompte semper, & liberè operetur, & hoc est aggrauatiuum: ex his inquam duobus officiis, alterum non est in igne respectu spirituum, scilicet viuificari ab illis: alterum habet ignis virtute Diuina, scilicet aggruare spiritum, ne ad suum libitum operetur, magis vel minus, secundum quod maior vel minor fuerit poena. Hic autem dolor vehementissimus est, quia quantum aliqua forma est perfectior, & actiuior, tanto naturalius, & vehementius inclinatur ad agendum, & operandum iuxta modum actiuitatis suae. Vnde detentio, & alligatio ne operetur sic, est illi violentior, & magis repugnans: ex maiori autem violentia, & repugnantia nascitur maior acerbitas doloris. Vnde cum spiritus sit forma actiuissima, & tanto magis, quanto subtilior, & perfectior est, non potest excogitari vehementior afflictio, quam impedimentum, & alligatio illius ne operetur sicut vult.

17 Restat autem explicare quomodo fiat hoc impedimentum in spiritibus: nam alligatio impeditiua potentiarum in nobis non intelligitur, nisi per aliquam qualitatem contrariam impediendam vires proprias, sicut in corpore non dissoluitur temperamentum, nec impediuntur vires, nisi posita aliqua contraria qualitate, v. g. excessiuo calore per adustionem ignis, vel febrem, aut per rigorem frigoris quo contrahuntur nervi, aut aliquo alio simili. Non apparet autem in Angelo quid ponatur per illum ignem quod sit contrarium vel substantiae eius, vel potentiis, quia non potest aliquid ab illis tolli, cum indiuisibiles sint: contrarium autem, quod non tollit, nec etiam impedit, relinquit enim subiectum sicut antea, si nihil ab illo tollit. Ad hoc ergo explicandum.

18 Dico vltimò: hoc impedimentum, seu alligatio

potentiarum spiritualium sit per aliquam qualitatem, vel impressionem alicuius modi, seu cuiuslibet alterius entitatis, quae impedit potentias in executione suarum operationum, nihil ab eis tollendo, sed solum impediendo executionem. Ex hoc autem nascitur detentio passiva in loco, seu vbicatio passiva, quae in Angelis non potest intelligi antecedenter ad aliquid in ipso Angelo factum, seu receptum. Itaque detentio in loco non potest bene intelligi in Angelo sine detentione, & alligatione potentiarum: nec est prior incarceration quoad locum quam potentiarum impedimentum, sed è conuerso. In hac conclusione quantum ad primam partem de productione qualitatis contrariae conuenit nobiscum Suarez, *ubi supra cap. 13. num. 40. & seqq.* quatenus ponit in Dæmonibus immiti qualitatem aliquam doloriferam: Ceterum dicit illam subiectari in substantia Angeli, esseque illi disconuenientem, non quia aliquid tollat de ipsa substantia, sed quia deformat, & deturpat illam, sicut gratia reddit pulcherrimam: & ex illa deformitate spiritus redditur tristis, & afflicus. Sed hoc inconuenienter dicitur, & superflue, quia vel loquimur de pulchritudine Angeli naturali, vel de supernaturali per gratiam. Prima nullatenus est ablata in Dæmonibus, quia quidquid ad naturam pertinet in eis manet: si enim aliquid tolleretur, totum tolleretur, quia indiuisibilis entitas est. Et idè dicit S. Dionysius *4. cap. de Diuinis nominibus*, quod *Naturalia dona manserunt in Angelis integra, & splendidissima*. Non ergo deturpantur per qualitatem. Si verò loquamur de pulchritudine supernaturali, quae est per gratiam, illa nullo modo tollitur per qualitatem, sed per culpam, & maculam ex ea relictam: nulla enim qualitas naturalis potest gratiam destruere, quia superioris ordinis est: per qualitatem autem supernaturalem multò minus destruitur, quia omnis qualitas supernaturalis ad gratiam pertinet, & gratiae subordinatur. Quare omnis tristitia de carentia, & destructione gratiae pertinet ad poenam damni, quia damnum, seu amissio gloriae, & gratiae pari iure censentur: ergo ista deformitas non conducit ad poenam sensus, vt distinctam à poena damni.

19 Exclufa ergo qualitate deformatiua, & pertinente ab substantiam Angeli, oportet redire ad qualitatem afflictiuam, quae pertineat ad potentias, eas aggrauando, & impediendo: constat enim quod in spiritibus non potest dari qualitas contraria, quae aliquid corrumpat, siue de substantia, siue de potentia, quia totum ibi est indiuisibile, & sic non potest intelligi quod aliquid tollatur, & aliquid maneat: vnde non potest afflictio causari per corruptionem potentiae vel entitatis: ergo solum restat quod per impedimentum ipsius potentiae ne exequatur, & sic distinguit D. Thomas *quest. 2. de anima art. 21.* duplex impedimentum. *Impeditur*, inquit, *aliquid vno modo à suo contrario, quantum ad esse suum, quod habet ex aliqua forma inherente; & sic patitur aliquid à suo contrario per alterationem, & corruptionem, sicut lignum ab igne comburitur: aliquid autem impeditur ab aliquo obstante, vel contrariante quantum ad suam inclinationem, sicut naturalis inclinatio lapidis est, vt feratur deorsum, impeditur autem ab aliquo obstante, & vim inferente, vt per violentiam quiescat, vel per violentiam moueatur*. Et hoc secundo modo, non primo patitur anima ab igne; & licet ibi explicet impedimentum hoc per ordinem ad locum, tamen in *quest. 26. de veritate art. 1.* dicit quod *Patitur anima ab igne corporeo, prout dicimus pati omne quod impeditur à propria actione, vel ab alio sibi competenti*. Et in loco supra citato ex *dist. 44.* dicit

dicit quod ignis efficitur pœnalis spiritui retardans eum ab executione propriæ voluntatis, ne scilicet possit operari ubi vult, & secundum quod vult. Manifestum est ergo in sententia S. Thomæ, quod istud impedimentum non solum est quoad detentionem in loco, sed etiam quoad executionem operationum in potentiis.

20 Fit autem valde verisimilis iste modus dicendi, tum quia est conformior modo loquendi Scripturæ, ut locis supra citatis ponderatum est: tum quia est aptior spiritualibus potentiis affligendis, quia nihil corrumpendo impedit ipsas operari ad libitum suum, siue in se mouendo, siue alia mutando; & sic per talem retardationem aggrauantur illæ potentia, & quasi enervantur, & euacuantur viribus; & hoc redditur illis valde pœnale, quia est valde repugnans naturali inclinationi spirituum, qui cum valde actiui sint, quælibet retardatio, & impedimentum est illis valde repugnans. Pœna autem, & afflictio sumitur ex aliquo repugnante coniuncto. Tum denique est hoc etiam conforme naturis rerum, quia videmus aliqua impediri à suis connaturalibus operationibus per qualitatem impediens, & non destruentem, sicut impeditur descensus lapidis sine destructione grauitatis, & Remota impedit cursum navis sine destructione virtutis deferentis: & Torpedo iniicit stuporem manui piscatoris sine destructione virtutis motiua, solum impediendo operationes ne exeant. Quid ergo mirum est quod possit Deus iniicere qualitatem aliquam in potentias Angeli mediante igne per quam nihil destruat de virtute, & tamen impediatur exire in suas operationes iuxta libitum suum, plus vel minus secundum maiorem vel minorem aggrauationem?

21 Quod si inquiras, ubi subiectetur immediate ista qualitas, an in potentia intellectus vel voluntatis, an in potentia motiua, & executiua, & quem effectum ibi faciat?

Respondetur qualitatem hanc debere poni, & effectus suos facere in omnibus potentiis requisitis, & concurrentibus ad operationes externas, eo modo quo ad id concurrunt, & influunt. Exinde autem etiam in intellectu vehementem apprehensionem potest inducere de tali impedimento afflictivo, & in voluntate tristitiam, seu fugam, & dolorem de illo. Itaque si in Angelis potentia motiua distinguitur ab intellectu, & voluntate, ibi præcipue qualitas ista residebit, ut quantumcumque intellectus ordinet, & voluntas velit quod potentia motiua aliquid exequatur, illa qualitas reddat impeditam potentiam, ne prorumpat in suam operationem, quia sicut ipsa virtus, seu potentia motiua est qualitas de se potens prorumpere in operationem, ita illa qualitas sit opposita conditionis, & formalitatis obstands ne illa virtus prorumpat in actionem. Nec possumus aliquid amplius de ista qualitate speculari, quia neque in rebus corporeis qualitates explicamus, nisi per suos effectus, sicut qualitatem magnetis quod sit attractiua ferri, & non auri; Remora quod detineat nauim, & non piscem; torpedo quod stupefaciat manum, & multas alias similes qualitates solum explicamus per effectus, quos sentimus. Si verò potentia motiua, & executiua Angeli non distinguitur ab ipso intellectu practico, ut videtur sentire D. Thomas, tunc dicendum est quod illa qualitas residet in intellectu, non quidem tanquam species aliqua, vel lumen, quia totum hoc non est repugnans intellectui, sed perficiens, sed est qualitas quædam potius opposita lumini, & speciei, aut ipsi virtuti elicitiua intellectus ne utatur virtute, & speciebus, eo mo-

do & efficacia, quæ requiritur ut moueat se, vel alia ad libitum: & sic solum possit elicere conceptus inefficaces, nisi prout permittitur ab illo igne, quod ipsi valde afflictiuum est: constat autem diuerso modo elici conceptus efficaces ab intellectu, atque inefficaces, cum efficaces operentur in vi voluntatis, ut expeditur, & potentis ad operandum circa se, vel circa alia, si in illa potestatem habeat; & sic elicit intellectus conceptum practicum imperij potentis super se, vel super alia iuxta subiectionem ad voluntatem suam: hoc enim modo per talem conceptionem practica Angelos mouere cœlos docet S. Tho. opusc. 11. art. 3. Illa ergo qualitas ab igne immissa diuina virtute impedit elicentiam talis efficaciis conceptus, pro ea parte qua afficax est in alia, non prout simplex apprehensio est, & inefficax. Dicit autem D. Tho. citato loco, quod ipsa conceptio intellectus secundum quod habet efficaciam aliquid transmutandi imperium nominatur. Impedit ergo qualitas illa elicere conceptionem, quatenus efficaciam transmutandi habet: sicut Adam perdita innocentia non potuit elicere conceptum cum efficacia, & vigore, ut sibi membra omnia, & appetitus sensituius, & animalia obedi- rent, sicut antè poterat elicere. Quod ergo non potuit Adam ex carentia doni iustitiæ originalis, non possunt Dæmones ad mouendum se, & alia pro libito. Sed hoc fit in Dæmonibus per qualitatem contrariam impediens, non in Adam, eo quod in Adam potestas illa non erat naturalis ei, sed superaddita, unde ea sublata, non poterat cum illo vigore, & efficacia imperium elicere: in Angelis autem talis potestas mouendi est connaturalis, nec tolli potest ab eis, nisi destructa natura: & sic oportet quod inefficacia illa proueniat ab aliquo impediēte, extrinseco quod contrariam qualitatem infert.

Dices: Sufficiebat Deum suspendere concursum suum, ne Angelus se, vel alia moueret sine qualitatis illius adiectione: nec enim apparet quomodo qualitas illa id præstet, formaliter, an effectiue, & quem concursum habeat ad impediendum intellectum.

22 Respon. non sufficere suspensionem Diuini concursus, quia talis suspensio et si sufficere posset ad negationem actionis, non tamen ad violentiam naturæ, & repugnantiam, sine repugnantia autem, & violentia, non sequitur dolor, & afflictio. Vnde in nobis si manus non moueatur, vel moueat ex suspensione Diuini concursus, nihil doloris sentiet, si ex qualitate contraria distemperante, cruciabitur; quia cruciatus seu afflictio nascitur ex contrario repugnante, & insistente, seu faciente vim, cui cum natura ipsa repugnet, causat dolorem: dolor enim est de aliquo repugnante propriæ inclinationi. Deo autem suspendente concursum, natura nihil resistit, sed omnino succumbit, & sic sine repugnantia, & oppositione in contrarium manet, atque adeo sine dolore. De modo autem quo qualitas illa talem affectum inducit, dicimus, quod qualitas illa effectiue fit à Deo, & ab igne instrumento eius, sed ipsa posita in subiecto formaliter illud afficit, non effectiue illud impedit; tum quia nulla qualitas effectiue operatur in suum subiectum, sed in partem coniunctam, aut rem contiguam; eo quod qualitas inhærens non operatur, sed subiectum per talem qualitatem; & sic effectiue operaretur in se; tum quia si effectiue operaretur, faceret aliquem effectum, & de illo inquiram, quomodo impedit, formaliter an effectiue? non effectiue, quia faceret alium effectum, & esset processus in infinitum; si verò formaliter, idem dicemus de illa qualitate ab igne producta. Et dicimus effectum eius formalem esse

esse reddere potentias quasi languidas, & enerues, seu impeditas ne eliciant suas operationes: hunc enim effectum videmus etiam in corporibus fieri per qualitates corporeas, quibus virtutes languescunt, & impediuntur, etsi non destruantur: sic enim in genere qualitatis se habent potentia, & impotentia, quod potentia dicit vim robustam, & potentem, impotentia infirmam, & eneruatam: & sic illa qualitas reddit potentiam infirmam per impedimentum, non per ablationem virtutis: multo autem magis potest id Deus facere in potentiis spiritualibus: nec enim talis qualitas, & effectus eius impossibilis est.

- 23 Ex his manet explicata vltima pars conclusionis de detentione Angeli quoad locum, & vocationem eius passiuam: dicimus enim hanc non poni immediate in Angelo, nisi supponendo prius passiuam detentionem, & impedimentum in potentiis operatiuis ut factam ab aliquo corpore, cuius loco manet Angelus alligatus.

Ratio est quia, ut supra disp. 20. late tradidimus, substantia Angeli non habet immediatam coaptationem in sua substantia ad locum corporalem, nec ad eius distantiam, sicut quantitas in nostris corporibus, quia non habet proportionem spiritus indiuisibilis cum loco diuisibili immediate, & per se, & per modum alicuius commensurationis: sed oportet interuenire aliquem contactum virtutis, quatenus ipsa potentia operatiua Angeli potest agere in rem corpoream, & in locum eius, quia non continetur a corpore, sed continet illud, & ipsa ordinatio, seu applicatio Angeli ad agendum in tali corpore, locutio eius est: ordinatur autem ad agendum per suas potentias, & ita locatio actiua, quæ connaturalis est ipsi Angelo, utpote formæ actiue mediante potentia actiua conuenit Angelo. Quando ergo Angelus præternaturaliter, seu violenter ponitur in loco, non actiue, sed passiue, oportet etiam quod talis passiuæ vocationis non intelligatur, per immediatam commensurationem substantiæ Angeli ad locum, quasi prius ibi sit detenta substantia, & alligata, & postea impediatur potentia: sed prius potentia impediuntur a corpore aggrauante ipsas, & consequenter detinentur in loco ipsius corporis, ita quod in ipsis potentiis, a quibus debebat actiua vocationis provenire, ponatur opposita vocationis passiuæ ex detentione passiuæ virtutis proveniens. Quod si ignis impediens potentiam Angeli non detineat ipsum in illo loco ignis, sed permittat exire, sicut aliquando Dæmones exeunt de inferno, tunc Angelus erit in loco distincto vel per operationem suam, si ibi permittatur aliquid agere, vel per alligationem passiuam potentia ad illum locum distinctum ab igne, quæ tamen detentio, etiam quoad illum locum fiet instrumentaliter ab igne distante, & detinente alibi, ut statim amplius dicemus.

- 24 Quod attinet ad animam separatam, nullo modo debemus recurrere ad illam fictam apprehensionem, quam ponit P. Alarcon, ita ut anima apprehendat in seipsa separatam illam vitionem quam sentiret si esset coniuncta carni: hoc enim est recurrere ad illud inconueniens supra reiectum quod æquæ currit in Angelis, & animabus, quod per falsam, & illusam apprehensionem crucientur: hoc enim non minus in animabus quam in Angelis reprehendit D. Thom. loco citato ex 4. sententiarum, ubi inquit quod *Non est probabile quod anima separata vel Dæmones qui subtilitate ingenij pollent, putarent ignem corporeum sibi nocere posse, si ab eo nullatenus grauentur.* Et sic imaginatio istius auctoris nullo modo est probabilis secundum D. Thomam,

neque saluat dictum S. Gregorij 4. Dialog. cap. 19. ubi inquit, quod *Incendium non solum anima videndo, sed etiam experiendo patitur.* Ergo non solum ab apprehensione vitionis patitur, quod est pati videndo, seu apprehendendo, sed ab ipsa experientia doloris patitur anima. Non potest autem tunc experi illam vitionem, & dolorem quem in carne sibi coniuncta anima haberet ab igne, cum sit separata à carne: ergo hanc non experiendo patitur. Et licet ex falsa imaginatione possit provenire vera tristitia, ut dicit Augustinus 12. super Genesim ad litteram cap. 10. & 32. tamen ut D. Thomas citatus notat, tunc non patitur aliquis ab ipsa re, sed à similitudine rei. Nos autem debemus verificare iuxta Scripturam & Patres, quod anima, & Diabolus patitur ab igne.

Maiores difficultates est ex alia parte, quia multi sentiunt animam separatam non habere potentiam motiuam, qua se moueat, vel alia corpora. In qua sententia non videtur posse assignari quid impediat ignis in anima separata, ut illam affligat: nec enim impedit ipsum intelligere aut velle, quia anima eodem modo intelligit in illis pœnis quoad naturalia, sicut etiam intelligit Angelus: unde diues ille in inferno, Lucæ 16. cognoscebat Abraham, & loquebatur cum illo, & recordabatur fratrum, quos habebat in hac vita: ergo in intelligendo non impediatur; imò potius acumen sciendi conducit ad viuaciorem dolorem. Si ergo impotentia intellectiua non impeditur anima, & potentiam motiuam non habet in sententia istorum auctorum, nulla restat alligatio potentiarum, quæ fiat in anima. Detentio autem in loco præcisè parum pœnalis videtur esse animæ in hac sententia, tum quia secundum illam anima non mouetur de loco ad locum per seipsam, sed solum portatur. Vnde per hoc quod relinquatur in loco, & non portetur, manet ibi detenta; & sic non habet ignis quod faciat in anima ad detinendum illam in loco, sed sufficit quod non portetur ab aliquo Angelo: tum quia animæ in Limbo detinentur quoad locum, & tamen nihil pœnæ sensus inde patiuntur. Quare hæc sententia, quæ negat potentiam motiuam in anima separata, & consequenter omnem actionem transcurrentem ad aliquid extra se reicienda est, ut reieciimus in libris de anima quest. 12. art. vlt. Certè D. Thomas, locis supra citatis, & præsertim in 4. sententiarum, in specie loquens de anima separata, dicit torqueri ab igne, *quatenus retardat eam ab executione propria voluntatis, ne scilicet possit operari ubi vult, & secundum quod vult.* Et sic dicendum est quod anima si habet aliquam actionem, qua possit se vel alia mouere, in illa patitur impedimentum ab illo igne, & ex consequenti habet detentionem in loco pœnalem. Si verò anima nullius actionis est capax circa se, & circa alia, sed solum habet intelligere, & velle, in executione istarum actionum patitur impedimentum solum intelligendo id quod sibi disconueniens, & pœnale est, non aliquid quod delectare possit.

Soluntur argumenta.

Primo arguitur: Qualitas quam dicimus producere ignem instrumentaliter non est qualitas corporea, sed spiritualis, sed hæc non potest esse repugnans, neque contristatiua Angeli: ergo fictitia est talis qualitas. Maior est certa, quia illa qualitas subiectatur permanenter, & in facto esse in subiecto spirituali: ergo non potest esse corporea. Minor probatur, quia illa qualitas hoc ipso quod spiritualis est, perficit subiectum, & multo magis si sit super

supernaturalis, & nihil expellit ad Angelo corrumpendo, & destruendo, quia, ut diximus, dona naturalia in Angelis sunt integra, utpote incorruptibilia, & indivisibilia: supernaturalia autem dona solum excluduntur per culpam voluntariam, non per qualitatem violentam: ergo illa qualitas nihil inuenit in Angelo quod expellat, & cui contrarietur. Nec etiam contristat illa qualitas per hoc quod impedit aliquas operationes in Angelo, quia non apparet quis sit effectus formalis, & primarius talis qualitatis impediens, & non destruentis: si enim virtus ipsa habet omnia requisita ad operandum, non est impedita, & solum potest cessare ab operatione per suspensionem concursus, quod non pertinet ad talem qualitatem. Sed ad Deum qui subtrahit concursum. Si autem illa qualitas facit quod non habeat omnia requisita ad operandum: ergo in tantum impedit, in quantum aliquid tollit, nec videtur intelligibile quod aliquid impediat agens, nihil tollendo ab illo ex requisitis ad agendum. Nec potest recurri ad aliquam contrarietatem quam faciat illa qualitas in intellectu imprimendo aliquam speciem intentionalem aut applicationem vehementem ad aliquod obiectum contristans: quia totum hoc pertinet ad immutationem intentionalem, quæ in se pœnalis non est, neque afflictiva intellectus, sed potius perfectio illius, nisi ratione obiecti quod per talem speciem, seu apprehensionem representatur: & tunc restat explicare, quid sit illud obiectum contristans, quod sic apprehenditur, & quid contrarietatis, & repugnantiae ponat in Angelo.

27 Confirmatur, quia si illa qualitas ponitur ad alligandum Angelum in loco, vel ad alligandum potentias ne se moueant, vel operentur circa alias res: ergo hoc ipso quod Angelus soluitur ab illo loco, aut permittitur moveri, vel operari circa alia, cessabit pœna, & cruciatus. Consequens est falsum: ergo non potest in illa alligatione constitui pœna Angeli illata ab igne. Sequela manifesta est, quia si tota ratio pœnæ, & cruciatus consistit in detentione, siue quoad locum, siue quoad operandum, si permittitur operari, vel mutare locum, cessat detentio: ergo & pœna. Minor autem probatur, quia Diabolus sæpe permittitur moveri, & exire ex loco inferni. Nam quod moueatur, & non sit semper alligatus, constat ex illo Job. i. ubi dicitur, quod *Inter filios Dei affuit etiam Sathan, cui dixit Dominus, unde venis, qui respondens ait, circumui terram, & perambulavi eam.* & de alio spiritu nequam dicitur 3. Regum 22. *Egressus spiritus stetit coram Domino, &c. & infra: Egrediar, & ero spiritus mendax in ore omnium Prophetarum eius, & dixit Dominus decipies, & praualebis, egredere, & fac ita.* & de ipso Diabolo dicitur Apocalyp. 20. quod *Ligatus est ab Angelo per annos mille, & missus in abyssum, & post hæc oportet illum solui modico tempore.* Ergo aliquando soluitur Diabolus, & egreditur de inferno, & operatur, & mouetur: ergo tunc non est detentus: & tamen non amittit aliquid de pœna, quia pœna illa ad quam est damnatus est æterna, & refrigerium non habet, ergo non potest illa pœna consistere in sola alligatione, & detentione, etiam facta per qualitatem.

28 Respondetur ad principale argumentum concedendo illam qualitatem contristantem non esse corpoream: hæc enim non potest magis nocere Angelo quam ipse calor ignis, vel quæcumque alia qualitas corporea. Quando autem dicitur quod spiritualis qualitas est perfectio, distingo; est perfectio in se, & absolute, transeat, comparative, & relative ad hoc subiectum, nego, sicut etiam frigus per-

fectio quædam est, sed non igni, quem potius corrumpit. Sic illa qualitas perfectio est in se, sed impeditiva connaturalis perfectionis Angeli, & sic illi non est perfectio. Nec sentio illam qualitatem esse supernaturalem quoad entitatem, quia sic pertineret ad ordinem gratiæ: gratia autem non destruit naturam, sed perficit, & eleuat: licet verum sit quod extrinsecè sit supernaturalis quoad modum efficiendi, qui est à Deo operante super naturam, ut ignis agat in spiritum, & ad finem supernaturalem ordinatur ut vindicetur peccatum pœna æterna propter oppositionem cum gloria, & gratia, & contra ipsum Deum, etiam ut supernaturalis auctor est.

Ad id autem in quo argumentum facit vim, 29 quod illa qualitas nihil tollit aut corrumpit de virtute, & substantia Angeli, nec potest intelligi quod impediat potentiam operatiuam, nisi aliquid tollat de requisitis ad agendum, quæ utique destructio seu corruptio sine alicuius rei influentia intelligi non potest: Respondetur quod, ut *suprà* diximus, ex D. Thoma, ignis ille ponit aliquid contrarium in spiritu, non quod corrumpat, sed quod impediat inclinationem, & operationem naturalem. Vnde in *additionibus* quest. 70. art. 3. ad 4. inquit, quod *Ignis ille agit in animam, non per modum influentis, sed per modum detinentis.* Vbi non est sensus quod ignis ille nihil efficiat in anima, cum dicat D. Thomas quod ille agit, sed quia id quod producit solum est ad detinendum, non ad alterandum, vel corrumpendum; idè dicitur non esse per modum influentis, sed per modum detinentis. Datur ergo impedimentum per modum detentionis condistinctum ab impedimento per modum corruptionis, ut etiam *suprà* exemplis monstrauimus, & patet in eo qui detinet lapidem, ne descendat, nec tamen aliquid corrumpit de eius substantia, vel qualitate quæ est grauitas. Cum ergo insistitur inquirendo quomodo illa qualitas tollat aliquid de requisitis ad operandum, vel non tollat: Respondeo quod qualitas detentiva, & non corruptiva non tollit aliquid de requisitis ex parte virtutis, sed ex parte applicationis, aut dispositionis, seu motionis, qua ipsa potentia se applicat ad operandum. Itaque etiam si tota virtus sit in subiecto, potest tamen per aliquod extrinsecum impedimentum impedi ipse exitus actionis, & non tolli aliquid de virtute, quia cum ipsa virtus applicetur, vel habilitetur, aut moueatur ad operandum, potest aliqua qualitas impedire istam applicationem, seu motionem potentiae, aut quamcumque aliam dispositionem eius ad operandum, non ablata, neque destructa eius virtute, sicut per impulsum detinetur applicatio lapidis ad descendendum, non eius grauitas corrumpitur aut læditur. Et ita hoc argumentum etiam soluendum est in illis qualitatibus corporeis, per quas videmus detineri, & impedi potentias, non destructa, neque ablata virtute, ut quando detinetur lapis ne descendat, aut Remora detinet nauem ne procedat, & aliis similibus exemplis *suprà* adductis. Quod in spiritualibus multò melius à Deo posse fieri, & nihil id implicare, nullus sanæ mentis dubitare potest. Quod autem dicitur de vehemente applicatione intellectus vel immisione speciei intentionalis; iam diximus, non in hoc consistere cruciatum ab igne instrumentaliter illatum, sed in alligatione potentiarum, qua posita vehemens illa apprehensio consequitur circa ignem illum tanquam circa instrumentum illius cruciatus.

Ad confirmationem respondetur, quod, ut D. 30 Thomas sæpe citatus in illa dist. 44. & in quest. 70. *additionum* dicit, ille ignis non est pœnalis nisi in quantum

quantum retardat spiritum ab executione propriæ voluntatis, ne scilicet possit operari ubi vult, & secundum quod vult. Quare licet Diabolus exeat ab illo loco materialiter sumpto, v.g. à loco inferni, & permittatur moveri, aut operari circa aliquid, tamen quia non facit ibi quod vult, & secundum quod vult, sed secundum quod permittitur ex obligatione ad ignem, ideò non minuitur ei pœna, sed mutatur, aut si in aliquo minuitur, est in aliquo valde accidentali, & aliunde sic aggrauatur, & recompensatur illa parua diminutio, quod in maiorem solet cedere cruciatum, & miseriam. Itaque si aliqui Dæmones sunt qui nunquam descenderunt ad infernum, sed manserunt in isto aëre, & manent vsque ad diem iudicii, vt satis insinuat S. Thom. in *art. 4. huius quest. 64.* tales non minuunt pœnam ex eo quod actualiter non alligentur loco ignis in inferno, sed habent istum aërem pro carcere, vt dicit Aug. 1. *de Genesi ad litteram*, & ibi citatur à D. Thom. Affliguntur tamen ex igne inferni, licet actu in eo non sint, tanquam ex loco sibi debito. Quanquam non improbabiler dici potest quod ignis ille, etsi distans, virtute diuina agit in spiritus in isto aëre existentes, non alligando eos loco gehennali, sed eorum potentias hic impediendo ne operentur ubi volunt, & quod volunt, sed iuxta quod permittuntur plus, vel minus, totum tamen operantur, non ex libito, sed ex permissio ignis, qui etiam eos alligat ne exeant ab isto aëre, vt à loco carceris sui, & totus iste aër carcer eorum est, sicut concanitates terræ; ubi est infernus, est locus eorum qui ibi sunt. Si verò spiritus qui de facto detrusi sunt in infernum, & loco illi alligati, aliquando permittantur exire ad tempus ex diuina dispensatione, mutant quidem pœnam, quasi materialiter, quatenus aliquantulum, & ad aliquem effectum, eorum impedimentum laxatur, sed incurrunt aliam vel æqualem vel maiorem, quatenus soluuntur, & permittuntur operari aliquid, non iuxta eorum voluntatem, sed vt crescat eorum dolor, & pœna ex hominibus quos exercent, quia vel vincunt illos, & secum trahunt ad damnationem; & sic crescit eorum pœna accidentalis, vel vincuntur ab hominibus qui electi sunt; & sic crescit eorum confusio, quia vincitur. Itaque mutari potest accidentalis pœna dæmonum, & in aliquid crescere accidentaliter, vel minui, vsque ad diem iudicii, vt expressè docet S. Thom. in *4. dist. 22. quest. 1. art. 1. ad 5. & dist. 50. quest. 2. art. 1. quest. 6.* Et sic non est inconueniens quod egressione ab inferno in quo detinebatur Diabolus, mutet pœnam, & aliquantulum diminuat in aliquo accidentali relaxando ei detentionem pœnalem, & aggrauationem pœnarum quoad illum locum, non tamen necesse est hoc dicere, aut aliquod refrigerium illis tribuere, quia etsi mutant illam quoad istum vel illum locum, aut detentionem materialiter sumptam, sicut etiam transeunt à calore ad frigus, tamen ex alia parte augetur illa pœna, & recompensatur illa mutatio, quia licet moucantur, & operentur in aliquo loco, forsitan operantur quod minus vellent, & vnde maiorem confusionem aut pœnam postea reportabunt; & quoad alia quæ ipsi vellent facere, vel se mouere, arctius aggrauantur, & impediuntur.

31 Secundo arguitur: Nam si pœna illa ignis explicetur solum per alligationem, & detentionem factam à qualitate impediante, sequitur quod non sit diuersitas pœnarum in damnatis per hoc quod modò torqueantur à calore ignis, modò

Ioan. à S. Thom. in 1. part. D. Th. Tom. alter.

à frigore niuis, cum tamen ex hoc multiplicetur pœna damnatorum, quod à tam diuersis creaturis, & tormentorum generibus crucientur. Consequens autem est falsum: ergo, &c. Sequela probatur, quia tota vis illius cruciatus consistit in hoc, quod potentia Angeli accipiant virtute illius ignis qualitatem quandam impeditiuam suarum operationum, quod verò illam accipiant ab igne, vel ab aqua, omnino per accidens est nec pœna augetur ex hoc quod instrumentum producat illam qualitatem sit aqua, vel ignis, si qualitas eadem est, sicut quod gratia producat mediā aquā in Baptismo, vel chrismate in Confirmatione, non auget gratiam si dispositio eadem sit. Minor verò probatur, quia in pœnis damnatorum datur veritas: transeunt enim ad calorem nimium ab aquis niuium, vt dicitur Iob 24. & in Psalm. 10. diuersæ pœnæ narrantur *Ignis, grando, nix, glacies, spiritus procellarum pars calicis eorum.* In istis autem diuersis tormentis transitur de vna pœna ad aliam, non eadem continuatur, aliàs diuersa non esset, esse autem diuersam docet S. Thom. in *4. dist. 50. quest. 2. art. 3. quest. 2.* si autem solum detinendo affligeret, eadem pœna continuaretur, licet instrumenta variarientur.

Confirmatur primò, quia ignis non nocet Angelo, nec potest agere in ipsum, nisi media apprehensione, & tanquam obiectum eius ei representatum, & propositum: ergo non vt instrumentum diuinæ virtutis. Patet consequentia, quia obiectum non comparatur ad potentiam, vt instrumentum efficiens, sed vt motiuum, vel terminationem specificans: ergo si nocet vt obiectum, non vt instrumentum. Anteced. verò probatur, quia intellectus non mouetur, neque inducit tristitiam nisi ratione alicuius apprehensi: quantumcumque enim in re sit aliquod malum, nisi apprehendatur, non contristat: ergo propria ratio nocendi, & affligendi est in quantum ignis se habet vt obiectum mouens apprehensionem, non vt instrumentum diuinæ efficientiæ.

Confirmatur secundò, quia nullum instrumentum eleuatur physicè ad efficiendum, nisi supponatur habere actionem aliquam propriam, quæ dispositiuè operetur in ordine ad effectum principalis agentis, vt docet S. Thomas *suprà quest. 45. art. 5.* sed ille ignis nullam talem actionem habet circa Dæmones: ergo non eleuatur physicè ad eos torquendos. Minor probatur, quia ignis corporeus non habet aliquam actionem, seu effectum in ipso spiritu disponentem ad effectum principalis agentis cum propria virtute, & antecederet ad eleuationem diuinam nihil possit agere in spiritum. Quod autem habet circa alia subiecta corporalia, parum interest, quia id quod agit circa aliud subiectum, non disponit ad effectum principalis agentis in subiecto distincto, sed perinde se habet ac si nihil operaretur in ordine ad tale subiectum. Vnde in aliis instrumentis supernaturalibus, vt in Sacramento, prius supponitur actio propria ipsius Sacramenti, v.g. Baptismi circa hominem, quàm quod in ipsomet infundatur gratia. Inconueniens etiam videtur quod Deus assumat instrumentum corporeum ad supplicium spiritus, & ad præmium conferendum, v.g. ad dandum lumen gloriæ nullo vtatur instrumento.

Respondetur pœnam sensus in spiritibus esse inæqualem, & diuersam quatenus magis vel minus constringitur, & alligatur potentia ne operetur secundum quod vult: sicut in infirmitate

DDd

corporali

corporali, tantò aliquis dolor, & cruciatus est vehementior, quantò magis ipsæ facultates naturales à propriis operationibus impediuntur. Vnde aliquis spiritus ita alligantur ab illo igne, quòd tamen aliquid permittuntur agere, vel circa ipsum locum inferni, vel etiam extra illum aliquando excundo ex dispensatione diuina. Et in hac permissione, & alligatione potest esse magis, & minus, secundum maius, & minus impedimentum in operando. Quòd si aliquis spiritus ita fortiter alligetur, quòd nihil omnino permittatur agere, vel se mouere, erit illa pœna vehementissima. Quare fatemur diuersa esse genera tormentorum, non solùm in diuersis subiectis propter inæqualitatem peccatorum, sed etiam in eodem, transeundo de vno tormento ad aliud, vt in argumento ponderatum est; & tunc non continuatur eadem prorsus detentio, & alligatio, sed transitur de vna ad aliam, ita quòd fortius seu strictius alligatur nunc in vno tormento quàm antea, vel è contra: aut etiam potest alligari modò circa talem operationem, vel locum, & postea circa aliam, in qua antea permittebatur agere, vel è contra; & sic miris & occultis modis possunt illa tormenta infligi, vt inquit Augustinus, nobis quidem in singulari occultis, sed in genere notis. Deus autem perfectè nouit qui reddat vnicuique secundum opera eius.

Ad primam confirmationem respondetur quòd ignis ille vtroque modo affligit, primo quidem vt instrumentum diuinæ virtutis retardando, seu detinendo naturales operationes Angeli. Deinde hanc ipsam detentionem per modum obiecti representando mediante specie Angeli infusa, qua cognoscitur illud tormentum; quæ species etiam inuenitur in sanctis Angelis, quia cognoscunt illa tormenta, licet non vt sibi irrogata, & conuenientia, sicut Dæmones eo modo quo addictus supplicio cognoscit gladium quò ferendus est, & lignum vnde suspendendus est, per speciem visibilem, qua alij adstantes idem vident, sed isti vt spectatores, ille vt patiens. Et sic species qua representatur obiectum afflictuum non ab igne imprimitur, sed à Deo infunditur tam bonis quàm malis Angelis. Sed tamen vt ignis ille apprehendatur tanquam nocius, oportet quòd in re noceat, non quidem corrumendo aliquid in spiritu, sed impediendo, & detinendo, & tunc illa detentio apprehenditur vt obiectum nociuum, sicut prius est hominem aduri aut verberati, quàm

apprehendere talem actionem vt nociuam. Et sic dicitur à D. Thoma *quæst. 70. additio art. 3. ad 1.* quòd *Ignis corporeus est affligens remotum, sed ignis apprehensus est affligens proximum.*

Ad secundam confirmationem respondetur ex his quæ diximus *suprà disputatione 18.* agendo de instrumento creationis, & in *physica quæst. 26. art. 2.* quòd non repugnat assumi à Deo pro instrumento aliquid distans ab alio, nec in illo habens effectum propriæ virtutis, sicut admittit D. Thomas *2.2 quæst. 178. art. 2. ad 1.* quòd potest Deus assumere actum immanentem pro instrumento ad producendum aliquid extra, vbi constat actum immanentem non habere operationem propriam. Et quando dicit D. Thomas quòd instrumentum debet dispositiue operari ad effectum principalis agentis, non est idem quod operari dispositionem aliquam ad talem effectum, vt dispositio subiectetur in eodem subiecto in quo effectus principalis agentis: hoc enim in instrumentis diuinis nec requiritur, nec semper inuenitur; sed sufficit quòd instrumentum aliquo modo operetur circa quodcumque subiectum vt possit illa actio eleuari à Deo ad producendum effectum siue in eodem, siue in alio subiecto: hoc enim est dispositiue se habere vt à Deo eleuetur, id est dispositiue obedientialiter respectu diuinæ potentiae, licet non sit dispositiue connaturaliter in ordine ad effectum faciendum. Ignis autem corporeus aliquam actionem habet propriam circa alia corpora, in quibus operari potest calorem vel lucem, & similiter de se potest vniri spiritui, vt mobile ab ipso, ex hoc autem vltèrius eleuatur vt instrumentum diuinæ virtutis ad detinendum, & alligandum spiritum, eius operationes impediendo.

Ad id verò quod dicitur Deum non vti instrumento ad dandum præmium, sicut ad irrogandum supplicium, respondetur esse disparem rationem, quia in supplicio subiicitur spiritus ignobiliori creaturæ, quia ipse noluit se subiicere Deo; & ideò conueniens fuit vti re corporea tanquam instrumento ad alligandum, & subiiciendum illum. At verò in præmio beatitudinis eleuatur Spiritus super omnem creaturam (*super omnia bona sua constituet eum*, dicitur Matth. 24.) vnde conueniens fuit non à creatura, sed immediatè à Deo sic exaltari, & glorificari. Et tamen homines etiam mediante humanitate Christi vt instrumento, & iustificantur, & glorificantur.

QVÆSTIO CVI. ET CVII.

De illuminatione & locutione Angelorum.

S V M M A L I T T E R Æ.



VÆ fuerit ratio, vt D. Thom. hoc loco de locutione, & illuminatione Angelorum agat post quadraginta & amplius quæstiones in tractatu de Angelis exactas, diximus *præcedenti tomo, in explicationem ordinis, & connexionis partium D. Thom.* Nempe quia illuminatio, & locutio, hierarchiarum ordinatio, custodia, & impugnatio Angelorum, & Dæmonum ad gubernationem pertinent creaturæ, siue spiritualis, siue corporalis, quam Deus per Angelos administret. Et cum tractatus de gubernatione diuina incœperit à quæstione 103. post tractatum processionis, seu emanationis creaturarum à Deo, ideò in quæst. 106. & seqq. proprius locus fuit agendi de illuminatione, & locutione Angelorum, cæterisque actionibus ad gubernationem eorum spectantibus. Nos istas duas quæstiones tantum, quæ de illuminatione, & locutione tractant, libabimus, quia difficiliorem continent disputationem.

Agit ergo S. D. de illuminatione Angelorum in quæst. 106. per quatuor articulos, in quibus ostendit vnum Angelum illuminare intellectum alterius, manifestando ei occultam veritatem, quam non attingit adaptando eam captui alterius, quod est planè ipsum docere. Mouet etiam voluntatem alterius proponendo ei obiectum quod diligat, & per modum persuadentis, non ipsam voluntatem intus immutando. Docet tertio Angelum inferiorem nunquam illuminare superiorem, quia ex natura sua habet lumen imperfectius, ex virtute autem diuina non apparet ratio prætermittendi ordinem à Deo sancitum in spiritualibus, vt inferiora per superiora regantur, non è contra. Docet quarto superiores Angelos illuminare inferiores, quia sunt in plenissima participatione diuinæ bonitatis, cuius proprium est diffundi, & communicari.

De locutione autem Angelorum agit *seq. q. 107.* ostendens vnum Angelum loqui alteri, manifestando ei suum conceptum, per hoc quod voluntate sua ordinet conceptum ad eum, cui vult esse manifestum. Ex quo principio colligit quatuor per quatuor sequentes articulos. Primum est quod Angelus inferior potest loqui superiori, etiam si non illuminet, quia locutio non semper fit ad illuminandum, sed etiam ad manifestandum quod quis desiderat in corde, quod alteri ignotum est. Secundò quod etiam Deo potest Angelus loqui, non quidem manifestando ei aliquod secretum quod non sciat, sed ordinando, seu erigendo se ad ipsum, vt ab eo accipiat. Tertio non impediri locutionem Angeli locali distantia, quia fit operatione intellectuali, & ordinatione voluntatis ad alterum, quod à distantia loci non dependet. Quarto locutionem vnius non cognosci ab omnibus, quia potest ordinare conceptum suum ad vnum, & non ad alios; & sic respectu illorum manebit occultus.

DISPUTATIO XXV.

De locutione & illuminatione Angelorum.

ARTICVLVS I.

Quomodo spiritualiter loquantur Angeli inter se?

IAM certum est loqui Angelos inter se, quàm difficile, & obscurum assignare quo medio, instrumento, signove loquantur. Illud primum, *Ioan. à S. Thom. in 1. part. D. Th. Tomus alter.*

& fides docet, & ratio persuadet. Fides quidem, quia passim in Scriptura inuenitur locutio Angelorum, non solum cum hominibus loquentium, quæ locutio modo corporali fieri debet, sed etiam inter se, vel cum Deo, quæ locutio spiritualis esse debet. Sic dicitur Isaia 6. *Seraphim clamabant alter ad alterum.* Et Daniëlis 8. *Audiui vocem viri inter Vsaï, & clamauit, & ait Gabriel fac intelligere istam visionem: Zachariæ 1. Et respondit Angelus Domini, & dixit, Domine exercituum, usquequo tu non misereberis Ierusalem?* Similiter in Canonica Indæ, dicitur, *Cum Michaël Archangelus cum Diabolo disputans altercaretur de Moysi corpore.* Et Paulus 1. ad Corinthios 13. *Si linguis hominum loquar, & Angelorum.* Id etiam ratio persuadet, quia Angeli cum sint intellectuales, modo etiam intellectuali debent gubernari, & politicam

DD d 2

rempu

republicam formare : sine locutione autem non potest esse communicatio, & gubernatio in aliqua communitate, quæ ratio non solum persuadet intra Angelos locutionem inueniri, sed etiam id euincit in animabus separatis, quia etiam intellectuales sunt, & inter se sociabiles, non minus quam dum sunt in corpore: ergo habent communicationem, & locutionem inter se, qua suos explicent conceptus, & voluntates: nemo enim sibi solus sufficit, etiam Angelus. Et in huius signum introducitur Luca 16. collocutio inter animam diuitis damnati, & animam Abraham longè positam in sinu Patrum.

*Punctum difficultatis, & diuersitas
sententiarum.*

- 2 Tam plana, indubitata, & certa veritas mirum est quam occultos recessus, & sinus, quæ prærupta, non difficilia tantum, sed humano ingenio insuperabilia habeat. Et consurgit difficultas ex quatuor conditionibus ad veram, & essentialem locutionem requisitis, quas in nostra locutione quotidie experimur, in Angelica quando spiritualis est penitus ignoramus. Et dico in spirituali locutione, quia quando Angeli loquuntur in corporibus assumptis accommodant se locutioni corporali, quæ fit per voces, & signa sensibilia ad palatum significantia.

Prima conditio est, quod detur aliquod manifestatum conceptus interioris, seu secreti cordis.

Secunda quod detur excitatio audientis ad percipiendum loquentem.

Tertia quod possit seruari secretum, aliàs si obligaretur aliquis manifestare omnibus id quod loquitur vni, euerteretur totus conuictus, & regimen politicum.

Quarta, quod possit aliquis in locutione decipere, & mentiri. Has quatuor condiciones componere in locutione spirituali Angelorum valde difficile est: nam Angeli non indigent signis, aut nutibus corporalibus, vt se explicent, & communicent: esset enim valde deficiens, & diminuta societas, & communitas spiritualium substantiarum, si habendo vitam omnino separatam à corporibus, & independentem ab illis, indigerent ad sui communicationem sensibilibus signis. Et iterum esset valde difficile posito illo signo sensibili ita deferri, & communicari vni Angelo quod ab aliis non posset intelligi, sicut apud nos vox submissè prolata percipitur à propinquo audiente, non à distante, quia per sensus in quibus distantia potest obstare percipi debet: Angelus autem qui sine sensu cognoscit quæcumque intelligibilia, difficile occultaretur eius intellectui quodcumque sensibile, in quo alius committeret suum secretum. Quare remotis signis sensibilibus, quæ ad nihil conducunt pro spirituali locutione, de qua solum agimus in præsentia, restat vt ad spiritualia signa confugiamus, seu ad aliquid spirituale, & intelligibile, quo manifestetur secretum cordis. Hoc autem spirituale, quidquid aliud sit, solum potest inueniri vel in ipso loquente, cuius secretum manifestatur alteri, vel in ipso audiente, cui manifestatio fit. Et inuenire aliquid spirituale in quo omnes illæ conditiones *suprà* positæ concurrant, difficile est.

- 3 Ex his inceperunt auctores diuidi in varias sententias circa locutionem spirituales, assignando medium per quod talis locutio fiat. Et generaliter reducuntur ad duas classes.

Primi assignant pro medio locutionis aliquid manens in ipso loquente ab ipso factum, seu productum.

Alij ponunt aliquid in ipso audiente de nouo factum seu productum, quia omnes in hoc conueniunt quod locutio debet esse aliquid proueniens à loquente: si enim aliquis cognoscat meum secretum, vel Deo reuelante, vel ipso coniectante, vel altero prodente, non dicor ego loqui illi qui secretum cognoscit, sed necesse est ad locutionem quod fiat per aliquid procedens à loquente.

In prima classe sententiarum ponitur duplex principalis sententia; & in secunda classe alia duplex.

Prima sententia ex his qui dicunt locutionem Angeli fieri per aliquid in ipso loquente positum, & repertum, & affirmat locutionem Angeli fieri per hoc solum quod Angelus loquens ordinet, & referat conceptum suum ad illum, cui vult loqui, & reddat talem conceptum quasi rem pertinentem ad illum, cui vult loqui: nam hoc ipso redditur illi manifestus, quia incipit esse aliquid illius, & ad ipsum pertinere, ratione cuius antea non poterat cognosci ab alio secretum cordis, quia non pertinebat ad ipsum, sed tantum ad elicientem iure moralitatis, & indifferentiæ. Et ideo quam primum incipit pertinere ad alterum facta ordinatione ad illum, incipit illi manifestari. Quem modum dicendi tradit D. Thom. in hac q. 107. art. 1. & vbi cumque tractabat de hac re, sequunturque communiter eius Discipuli, vt postea expendemus. Hæc sententia facile explicat quomodo locutio procedat à loquente, quia ordinat conceptum ad alium. Et similiter saluat secretum, quia potest ordinare conceptum ad vnum, vel plures, & non ad alios, qui hoc ipso non intelligent illum, quia non pertinet ad se. Saluat etiam deceptionem, & mendacium, quia potest formare Angelus duos conceptus, & ordinare vnum erga alterum representando se aliud non velle, vel non habere, referuando sibi alterum. Sed patitur difficultatem in explicandis aliis duabus conditionibus locutionis, scilicet quomodo ista ordinatio sit manifestatiua secreti cordis, cum ipsamet ordinatio quoddam secretum cordis sit, utpote libera quædam cogitatio: quomodo ergo manifestat alteri cum ipsa in se sit occulta? Et secundò patitur difficultatem in explicanda excitatione quod maxime pertinet ad locutionem: ex eo enim quod ego in corde meo ordinem cogitationem ad Sanctum Raphaellem vel Gabrielem, quomodo ista ordinatio hinc existens applicat, & excitat intellectum illius Angeli ad attendendum ad me?

Propter hoc alia sententia conatur euincere istam difficultatem manifestationis, & excitationis, ponendo præter ordinationem conceptus aliquam qualitatem productam in ipsomet Angelo loquente, quæ manifestet illi conceptum ipsius tanquam obiectum ipsi naturaliter cognitum; & sic excitans mentem Angeli, sicut quodlibet obiectum naturale positum, seu productum de nouo in rerum natura. Quæ sententia saluat quidem rationem manifestatiui, & excitatiui, & rationem etiam mendacij, si Angelus producat qualitatem representantem vnum conceptum, cum ipse penes se retineat alterum; sed difficillimè saluat secretum; quia vel illa qualitas est actus moralis, & liber, vel qualitas naturalis; si primum, incidit in sententiam præcedentem, & in maiorem difficultatem, quomodo illa qualitas libera, & moralis existens, sit de se manifesta alteri Angelo, & possit manifestare secretum cordis. Si est qualitas naturalis, naturaliter etiam representat, & cognoscitur ab omnibus Angelis. Vnde posita tali qualitate in intellectu loquentis, non minus manifestatur illi cui loquitur, quam omnibus aliis, quibus non potest occultari.

Propter

6 Propter hoc aliqui recurrunt ad significationem ad placitum, dicuntque qualitates illas significare secretum cordis ad placitum, & ex impositione sicut nostræ voces significant ad placitum, & per illas manifestamus secreta cordis, & seruatür etiam secretum, non exhibendo ista signa coram omnibus, sed coram quibus volumus significare; sic Angeli per spirituales qualitates ad placitum significantes suos conceptus manifestant quibus volunt, aut aliis occultant. Quam sententiam aliquibus antiquis attribuit P. Suarez *lib. 3. de Angelis c. 26. num. 12. & 18.* Ceterum difficultas semper manet integra circa secretum, quia non minus est nota omnibus Angelis illa impositio, quam illa qualitas, siquidem impositio illa debet esse publica, & externa, utpote in communi usu recepta, & per conventionem publicam facta. Id autem quod publice, & externe fit, licet liberè fiat à quolibet Angelo potest intelligi, sicut ipsi intelligunt omnia idiomata, & linguas hominum, quia cognoscunt impositionem auctoritate publica factam, & ipso usu publico continuatam. Et iterum illa impositio in qualitatibus illis spiritualibus ad hoc ordinatur, ut ipsi Angeli inter se communicent, & loquantur: ergo ad omnes pertinet eius notitia. Posita ergo, & producta qualitate significante ex impositione aliquid quod Angelus loquens cogitat, non est in manu, eius occultare illam ab omnibus, quia omnibus nota est, tam quoad se, quam quoad sui impositionem, cum non sit ipsamet cogitatio cordis, sed signum eius. Nec potest occultari per hoc quod ponatur in presentia unius Angeli, & non alterius, sicut apud nos voces significant presenti, & audienti, sed non absenti. Sed hoc non habet locum in Angelis, in quibus distantia localis, quantumcumque magna, non impedit quominus possint cognoscere quicquid cognoscibile ab ipsis est, & ad suam sphaeram pertinet eo quod non dependet intellectio illa à speciebus sensibilibus per medium corporeum delatis, sicut apud nos cognitio sensuum. Vnde Angelus de cælo cognoscit id quod agitur apud nos, ut nobis succurrat: & anima diuitis damnati vidit Abraham à longè, & Lazarum in sinu eius; & sic distanti loquebatur, Lucæ 16. Ergo posita illa qualitate representante ad placitum à quocumque Angelo cognoscetur, si velit attendere; & sic non potest saluari secretum.

7 Pressi hac difficultate auctores huius sententiæ distinguunt duo genera signorum, quæ sunt imposita apud Angelos; quædam publica pro omnibus, tanquam linguam communem, aliam pro quolibet privato, ut possint loqui secreta. Quod Marfilio tribuit Suarez *suprà citatus n. 18.* & aliqui recentiores sequuntur. Sed nondum ista multiplicatione linguarum possunt hoc secretum tegere, sed multiplicant in infinitum ista signa sine fundamento: nam demus quod aliquis Angelus velit loqui duobus vel tribus simul, & non reliquis, quam linguam utetur? Si privata non intelligetur, nisi ab uno, nempe illo, cui soli est nota; quia pro illo solum est imposita. Si communi non poterit occultari aliis, quibus etiam nota est illa impositio. Vnde oportebit aliam linguam instituire, non communem omnibus, nec priuatam pro uno, sed communem pro aliquibus, & non pro aliis. Cum autem combinationes istæ possint in infinitum multiplicari, quia aliquando potest velle loqui duobus, modò quatuor, aut decem, aut viginti, aut pluribus, vel paucioribus, & illis quibus modò loquitur, potest postea velle occultare, aut alicui, vel aliquibus eorum; & sic in infinitum possunt istæ combinationes variari, aut multiplicari; & hoc per totam æternitatem.

Ioan à S. Thom. in 1. part. D. Th. Tomus alter.

tem, oportet quod à principio acceperint Angeli infinitas species, seu representationes infinitarum linguarum. Similiter quantum ad priuatam locutionem unius Angeli cum altero tantum, oportet quod de singulis conceptibus, quos potest Angelus formare, & actibus voluntatis, quos potest habere, habeat representationes pro quolibet Angelo, & cum conceptus in infinitum sint multiplicandi per totam æternitatem, oportebit quemlibet Angelum habere infinitas impositiones, seu linguas ad loquendum cum Angelo, quem voluerit laorim, & secretè ab alio. Quare hæc sententia obruitur ipsa infinitate linguarum, quas tenetur ponere si secretum vult seruari quod maximam confusionem parit. Ut omitiam alias difficultates, quas non potest ista sententia explicare, nisi diuinando, v.g. an impositio tot priuatarum linguarum facta sit ab initio, quando Angeli producti sunt, an modò quotidie de nouo fiant? Et si est facta ab ipsis Angelis sic inter se convenientibus, sicut apud nos fit impositio vocum, an à solo Deo sit facta, & earum notitia Angelis indita. Si ex conventionem Angelorum facta est, vel modò fit, hoc ipso tollitur secretum, quia illa conventio fuit publica, & consequenter omnibus manifesta, etiam si ab uno solo imponeretur, quia impositio illa esset actus externus, & non cogitatio cordis. Si à Deo solum fit, vel à principio infudit Deus omnibus Angelis notitias istarum linguarum quoad omnes conceptus, qui possunt per totam æternitatem manifestari priuatim, aut publice, quoad paucos, vel quoad multos; & sic, ut ponderauimus, debuit infundere infinitas species, seu idiomata cuiuslibet Angelo, quia in infinitum ista multiplicari possunt. Si autem Deus modò infundit species, & imponit significationem idiomatum, præterquam quod est contra perfectionem Angeli, quod sibi à principio non infundantur omnes species, restat semper difficultas, an Deus imponat ista signa, illaque notificet Angelis, antequam loquantur, vel dum loquuntur. Si ante, sequitur idem inconueniens, ac si à principio infunderetur: cognosceret enim Angelus locutionem futuram à tali Angelo faciendam per hoc quod sentit sibi infundi illud idioma respectu talis Angeli. Si verò imponat illa signa dum loquuntur, quomodo possunt ipsi incipere loqui, & velle loqui, si prius non habent notitiam linguæ, quia locuturi sunt? Denique quæ sit ista qualitas difficillimè explicatur, an sit conceptus ipse, vel species, vel aliqua tertia qualitas ignota; an subiectetur in intellectu Angeli, vel in eius substantia, an producat per actionem transeuntem, vel permanentem, an sit qualitas vitalis, vel non: quæ omnia expediri non possunt nisi diuinando.

In secunda serie, vel classe sententiarum quæ locutionem Angeli explicat, non per id quod ponitur in loquente, sed in audiente, occurrit duplex sententia.

Prima Scoti in 2. dist. 9. quest. 2. §. *Ad questionem istam*, qui docet, Angelum loquentem producere in intellectu audientis intellectionem quandam, seu cognitionem qua representetur obiectum quod vult notificare alteri: hoc enim est loqui, manifestare conceptum suum alteri, seu facere ut intelligat illum: cum ergo Angelus non faciat hoc per signa sensibilia, faciet hoc imprimendo ipsam intellectionem in Angelo.

Ceterum hæc sententia nullatenus admittenda est, utpote contra totam Philosophiam, quæ docet cognitionem, seu intellectionem esse actum vitalem, & immanentem, & consequenter de sua essentiali ratione petit quod non ab extrinseco imprimatur,

DDd 3

matur, sed ab ipso principio intrinseco oriatur: vitalis enim actus necessarius est à principio vitæ coniuncto: ergo vel id quod imprimatur non est vera, & propria cognitio, quæ essentialiter actus vitalis est, vel non imprimatur ab extrinseco agente, sed à principio vitali oritur: principium autem vitale est, quod se mouet, & ex se elicit, non autem, quod præcisè mouetur, & patitur ab alio. Deinde vel Angelus loquens vt imprimat istam cognitionem in audiente, debet esse intra eius intellectum intimè, que illi præsens, vel potest etiam ab extra, & habendo distantiam ab Angelo audiente illam imprimere. Primum præterquam quod est contra commune proloquium Theologorum, quod Angelus non illabatur menti, sed solus Deus: præter hoc inquam non saluat quomodo vnus Angelus possit simul loqui pluribus Angelis, cum non possit simul intra plures poni, vel etiam quomodo possit loqui ad Angelum distantem. Possit autem vnum Angelum loqui pluribus simul, constat ex illo Apocalypsis 7. *Vidi alterum Angelum ascendentem ab ortu Solis, habentem signum Dei vini, & clamauit voce magna quatuor Angelis, &c.* Similiter quod possit loqui ad Angelum distantem, constat, quia potest loqui ad hominem distantem: ergo, & ad Angelum, Genesis 22. *Angelus Domini de cælo clamauit dicens, Abraham, &c.* Item quia animæ separatae possunt loqui à longè, sicut Lucæ 16. anima diuitis; *vidit Abraham à longè, & ipse clamans dixit, Pater Abraham misereri mei:* ergo à fortiori possunt Angeli distantes loqui. Si autem dicatur secundum, repugnat quod actus ipse cognitionis producat ab Angelo distanti in alio, nisi transeat per medium, quando ita est distans, quod virtus Angeli loquentis, & substantia eius non tangit alterum, sicut anima diuitis se habebat ad Abraham: conceptus autem, seu cognitio non potest transire per medium, cum sit accidens spirituale, & vitale, quod non potest per media corpora produci, illisque inhaerere. Nec posset conceptus sic transiens latere alios Angelos, qui ad illud medium attenderent.

9 Secunda sententia in hac serie est aliorum qui volentes vitare hoc inconueniens Scoti, dicunt quod non producit Angelus loquens in audiente conceptum, seu cognitionem, sed producit speciem representatiuam secreti cordis loquentis, vel aliquid simile, quo manifestetur illud secretum. Ita docuerunt aliqui antiqui, vt Alensis, Bonauentura, Aureolus, & alij, quos refert Suarez lib. 2. de Angelis, cap. 27. num. 30. & tandem sequitur num. 35. & 37. & latissimè explicat in toto cap. 28.

10 Cæterum hæc sententia incidit in non minora inconuenientia, quam omnes præcedentes. Primum quidem, quia impressio specierum in mentibus Angelorum physica non potest fieri, nisi à Deo, qui solus intra mentem Angeli operari potest: reliqua quæ extrà Angelum sunt solum possunt obiectiue se habere ad istas species, non effectiue immutando intus intellectum Angeli. Si autem Deus solus producit in mente audientis illam speciem, ipse erit qui loquitur, seu reuelat Angelo cogitationem alterius, non ipse Angelus loquens, quia manifestatiuum locutionis, quæ est species, solus Deus producit, non Angelus loquens, quod si Angelus ipse loquens producit speciem in altero Angelo ad modum, quo sensus exterior immitit speciem in interiorem, vel intellectus agens in intellectum possibilem, tunc talis Angelus habebit vim immutandi intellectum alterius, & operandi intra illum, quod communiter Theologi ne-

gant, etiam respectu mentis humanæ. Secundò currit hæc difficultas attracta contra sententiam præcedentem, quomodo possit Angelus distans loqui Angelo distanti, quam locutionem non possumus negare salua fide, urgente exemplo animæ diuitis, quæ loquebatur cum anima Abraham à longè: tunc enim currit difficultas quomodo possit anima, vel Angelus immittere illam speciem, seu qualitatem spirituales, quæ transeat per medium corporeum, vel si duo Angeli ponantur extra mundum, vel in vacuo, non poterunt loqui, quia non datur medium per quod transeat illa species, quæ cum sit accidens, necessariò exigit subiectum in quo sit. Nec satisfacit responsio Suarez cap. 28. num. 13. nam ex vna parte sentit, non esse improbabile, quod ad locutionem requiritur indistantia inter loquentem, & audientem, oppositum tamen reputat probabilius, sed dicit posse fieri hanc efficientiam independentem à situ, & loco, & non per medium. Cæterum hæc responsio quoad primam sui partem non solum est omnino improbabilis, sed non apparet quomodo salua fide sustineri possit quod ad locutionem Angeli requiratur indistantia, quod absolute reputauit probabile Suarez in Metaphysica disp. 18. sectione 8. num. 45. & 46. quod tamen meliora sapiens reformauit dicto cap. 28. num. 13. Sed non ad plenum, quia non debet probabilius solum hoc reputari, sed certissimum, quia locus Scripturæ est valde expressus, cum dicat, *Elenans autem oculos suos, cum esset in tormentis, vidit Abraham à longè, & Lazarum in sinu eius, & ipse clamans dixit, &c.* Et infra, *In his omnibus inter nos, & vos chaos magnum firmatum est, vt hi qui volunt hinc transire ad vos, non possint, neque inde huc transire.* Ergo illa locutio fiebat inter loca valde distantia. Certè nullus auderet affirmare quod anima illius diuitis esset in eodem loco in quo anima Abraham, & indistans ab illo, vt ei loqueretur; alias in ipso sinu Abraham esset anima damnata, & cruciata tormentis æternis; & inter flammæ, quod totum non erat in sinu Abraham; ergo non solum vt probabilius, sed vt certissimum tenendum est inter spiritus distantes posse interuenire locutionem. Quoad secundam verò partem solutionis contradicit Suarez vniuersæ Philosophiæ, & veritati, & sibi met ipsi in loco citato Metaphysica, vbi illud principium philosophicum explicat, quod nihil possit agere in distans, quin agat in propinquum. Nec est aliquo modo intelligibile quod ab aliqua virtute egrediatur operatio, & effectus, vbi talis virtus non est: ergo quando primò, & per se operatur effectus, exit ab illa virtute in illa parte, & loco, vbi est, non autem vbi non est, nec per suam substantiam, nec per suam virtutem. Vnde etiam immensitatem Dei ex eo probamus, & probauit S. Paulus Actorum 17. quia operatur in omni re. Si autem posset operari vbi non est, careremus fundamento ad ponendum Deum vbique, quia operatur vbique, cum posset operari vbi non esset, nec per se, nec per suam virtutem. Si verò Angelus distans immitit speciem, & illa debet transire per medium, currunt difficultates attractæ, quomodo qualitas spiritualis per medium transeat; quæ ponderatae sunt, nec caret suo pondere, quod si ipse Suarez renuit concedere quod Angelus motu discreto transeat sine medio ad locum distantem, quomodo concedit quod sine medio producat aliquid in loco distanti? Et tamen in hoc quod moueatur Angelus de vno loco ad alium sine medio, ponimus nos quod hoc ipso quod operatur Angelus in loco distanti, ibi ponitur, & definit.

definit esse in loco, ubi erat: dicendo autem quod operatur speciem in Angelo distanti, dicitur quod ipso remanente ubi erat distans, operatur speciem in loco distanti ubi non est, quod non potest intelligi.

¹¹ Denique adhuc in ista sententia non saluatur sufficienter ratio secreti, quia illa species, vel lumen, aut quodcumque sit quod Angelus producit in mente alterius est aliquid ordinis naturalis cum producat virtute naturali Angeli, & praefertim quando locutio non est de rebus supernaturalibus, & non est ipsa libera cogitatio cordis, sed effectus illius ad extra, utpote receptus in alio subiecto, qui necessariò recipitur in intellectu Angeli. Nec est futurum contingens, quia de facto producit in rerum natura: ergo non occultatur aliis Angelis, quia nec est futurum, nec actus liber, nec aliquid supernaturale. Continetur ergo intra obiecta naturaliter cognoscibilia à quocumque Angelo, nec est magis occulta ab aliorum mentibus, quia imprimitur, & subiectatur in intellectu audientis, quam si esset qualitas producta, & remanens in intellectu loquentis, sicut ponunt aliae sententiae, quas tamen Suarez non admittit, sed impugnat eos qui ponunt fieri locutionem per signa existentia in ipso Angelo loquente. Et praeterea quia unus Angelus naturaliter cognoscit species à Deo infusas, & innatas in altero Angelo: cur ergo non cognoscet illam quae ab alio Angelo producit? Vnde Divus Thomas *quest. 8. de veritate artic. 13.* fatetur species, quae sunt in intellectu unius Angeli, omnibus aliis esse notas, non tamen usum, & exercitium earum liberum.

Respondet Suarez *ubi supra numero 26.* alios Angelos non cognoscere species, quae sunt à loquente in audiente, quia ipsi non habent à principio species innatas actuum liberorum, & consequenter neque illarum specierum. Ceterum praeterquam quod oppositum expressè tenet Divus Thomas *questione 9. de verit. articulo 4. ad 11.* ut postea ponderabimus, tamen hoc dato quod de actibus ipsis liberis Angeli non habeant species innatas, quia morales, & liberi actus sunt, tamen de ipsis speciebus quas Angelus loquens imprimit audienti quare non habebunt alij Angeli species innatas, cum tales species neque sint aliquid supernaturale, neque futurum contingens, neque actus liber formaliter, sed effectus productus ad extra? qui non minus debet esse manifestus quam motus Angeli vel corpus ab eo assumptum, vel aliquis alius effectus ad extra productus. Et quod semper facit vim in hac parte, est id quod ponderatum est, quomodo qualitas significatiua proprii conceptus posita in ipso loquente non saluaret secretum, quia omnibus nota est siue naturaliter significet, siue ex impositione, & impressa, seu translata ad ipsum audientem, siue sit species, siue alia qualitas representans hoc ipso est occulta aliis, cum nec sit supernaturalis nec futurum contingens, neque actus liber. Fateor me non intelligere.

*Resolutio ex mente Diui
Thomae.*

¹² Visis tot difficultatibus, quibus aliae sententiae sciant, nec ab illis se possunt expedire, eligimus ut probabilior in re tam obscura sententiam Diui Thomae locis statim citandis, Caietani, & aliorum discipulorum eius, quam etiam

sequitur Vasquez *hic disputatione 211. capite 11.* & Arrubal *disputatione 171. capite 3.* videlicet Angelos manifestare secreta cordis sui per ipsos conceptus, quos formant ut ordinatos ad illum; vel ad illos, quibus loqui volunt, quia hoc ipso manet ille conceptus, & secretum obiectum proportionatum speciei, quam habet Angelus audiens de natura talium actuum, & conceptuum: connaturaliter enim quicumque Angelus habet speciem innatam de natura, & quidditate ipsorum conceptuum, & actuum liberorum: sed tamen exercitium, & productio actualis talium actuum latet alios Angelos propter moralitatem, & indifferentiam, qua procedunt à libero arbitrio, sicut latent futura contingentia, quia sunt in indifferentia causarum. Vnde si ipse cogitans tollat hanc moralitatem, & indifferentiam, determinando, seu ordinando istum conceptum ad alium, quasi ad ipsum pertinentem, hoc ipso redditur pertinens ad cognoscibilitatem eorum quae sunt propria alterius, & intra sphaeram obiecti sui existit, hoc ipso potest illud cognoscere.

Mens ergo Diui Thomae manifestissima est, ¹³ quod Angelus per ordinationem sui conceptus ad alium, manifestet ipsum; quae manifestatio est locutio, non autem per aliquid quod infundat, seu ponat in Angelo audiente. Constat manifestè ex his quae docet *questione 9. de veritate, articulo 4.* ubi *solutione ad 9.* inquit, quod *Ipsa ordinatio cogitationis ad alterum exterior locutio in Angelis dicitur.* Et ad undecimum inquit, quod *Angelus cogitationem alterius cognoscit per speciem innatam, per quam alium Angelum cognoscit, quia per eandem cognoscit omne quod cognoscit in alio Angelo.* Vnde quam cito Angelus se ordinat ad alium Angelum secundum actum alicuius formae, ille Angelus cognoscit cogitationem eius. Et idem prorsus docet in hac *questione 107. articulo primo, & articulo secundo, sicut dictum est, inquit, Angelum loqui Angelo, nihil est aliud quam conceptum suum ordinare ad hoc ut ei innotescat per propriam voluntatem.* Videndus etiam est in *2. distinctione 11. in secunda parte textus, questione prima, articulo tertio, ad quartum.* Quam cito, inquit, unus Angelus ordinat locutionem suam ad alterum, efficitur locutio eius de pertinentibus ad illum; & ita ab eo cognoscitur. Et *solutione ad secundum.* Non exigitur, inquit, aliquod medium per quod deferatur locutio unius ad alterum, sed sufficit ad hoc solus ordo intentionis unius ad manifestandum alteri. Et denique quod in Angelo audiente nihil ponatur à loquente, expressè dicit *questione citata de veritate, in articulo quinto, ad secundum.* Angelus, inquit, loquens nihil facit in Angelo cui loquitur, sed fit aliquid in Angelo ipso loquente, & ex hoc ab alio cognoscitur modo prius dicto. Vnde non oportet etiam quod loquens aliquid infundat ei cui loquitur. Et idem docet *solutione ad quintum.*

Cum ex praedictis locis tam manifesta sit mens Diui Thomae, laborat nihilominus Pater Suarez, & conatur nobis persuadere esse expressam sententiam Diui Thomae eam, quam ipse docet de locutione unius Angeli ad alterum per impressionem alicuius speciei, vel similis qualitatibus in mente audientis, eo quod in hac *questione 107. articulo primo ad tertium, inquit, quod Sicut sensus mouetur à sensibili, ita intellectus mouetur ab intelligibili. Sicut ergo per signum sensibile excitatur sensus, ita per aliquam virtutem*

DDd 4 intelli

intelligibilem potest excitari mens Angeli ad attendendum. Constat autem quod signum sensibile immittit speciem in sensum audientis: ergo etiam signum intelligibile excitat mentem audientis tanquam obiectum motuum: obiectum autem mouet immittendo speciem, nec alio modo excitare potest. Illa autem ordinatio, qua voluntas Angeli ordinat istum conceptum erga alterum, nihil ponit in prædicto conceptu, nisi extrinsecam denominationem, quæ vtrique non potest excitare mentem alterius Angeli, nec ad id habet virtutem intelligibilem.

15 Fortius posset aliquis diuertere mentem Diui Thomæ ad aliam sententiam *suprà* relata de locutione Angeli, non solum per ordinationem conceptuum, sed per exhibitionem signi naturaliter cogniti ab altero Angelo: dicit enim sic loco citato ex secundo sententiarum, *In Angelis interior conceptus mentis libero arbitrio subiacens ab alio videri non potest: quando ergo speciem conceptam ordinat ut manifestandam alteri, dicitur verbum cordis, quando verò coordinatam alicui eorum, quæ unus Angelus in alio naturaliter videre potest, illud naturaliter cognoscibile fit signum expressiuum interioris conceptus, & talis expressio vocatur locutio, non quidem vocalis, sed intellectualibus signis expressa.* Et in 2. ad Anibaldum distinctione decima, quæstione unica, articulo quarto, inquit, quod *Sicut ad enunciandum ea quæ in nobis ab alio videri non possunt utimur his quæ in nobis ab alio possunt cognosci, sicut vocibus, vel quibuslibet sensibilibus signis, ita Angeli per ea quæ unus de alio cognoscere potest naturaliter suos inuicem sibi nunciant conceptus.* Et denique 1. ad Corinthios 13. lectione 1. exponens illud Apostoli, *Si linguis hominum loquar, & Angelorum,* inquit, quod *In quolibet Angelo aliquid quod naturaliter ab altero Angelo cognoscitur: dum ergo id quod est naturaliter notum proponitur ut signum eius quod est ignotum, manifestatur occultum, & talis manifestatio dicitur locutio ad similitudinem hominum, qui occulta cordium manifestant aliis per voces sensibiles, aut per quodcumque aliud corporale exterius apparens.* Quæ loca satis vrgentia videntur ad sustinendum secundum Diuum Thomam, illam sententiam de locutione per signa; siquidem condistinguit ordinationem conceptuum ab istis signis per quæ exprimuntur.

16 Nihilominus sententia Diui Thomæ manifesta est ex auctoritatibus *suprà* adductis. Et ad instantiam Patris Suarez respondetur quod virtus illa intelligibilis per quam dicitur excitari mens Angeli ad attendendum, non est impressio speciei in mente Angeli cum in sententia Diui Thomæ *suprà* quæstione 55. articulo secundo, ex Augustino, & Dionysio, Angeli non acquirant species à rebus, sed infusas habeant à Deo à principio suæ creationis. Vnde quodcumque sit aliquod obiectum de nouo, non dicitur excitari Angelum à tali obiecto, per immisionem alicuius speciei, sed per hoc solum quod obiectum sic positum in rerum natura manet proportionatum, & habile, ut intelligatur ab Angelo, utpote ad se pertinens, & intra sphaeram suæ cognoscibilitatis contentum. Et comparatio illa facta à Diuo Thoma de signo sensibili mouente, non est quantum ad modum mouendi, & excitandi, quasi vtroque fiat eodem modo, scilicet per immisionem specierum, sed quantum ad effectum ipsum excitandi,

di, quia vtroque excitatio ab obiecto proposito, non tamen vtroque specierum emissio. Nec alia excitatio ponenda est, sicut nec ponitur alia in obiectis, quæ quotidie de nouo producantur, & antea non intelligebantur ab Angelo, quia futura erant, modò autem intelliguntur quia de facto sunt, & ipsum de facto produci reddit obiectum habile, & proportionatum ut cognoscatur ab Angelo, & per hoc ipsum excitatur ab obiecto nouiter producto, non autem per impressionem speciei ab obiecto ipso immutatur. Similiter ergo ordinatio ipsa conceptus ad alterum est virtus intelligibilis, qua redditur illi proportionatus, & coaptatus, perinde ac si tunc de nouo produceretur in ordine ad istum Angelum ad quem nunc ordinatur, & hoc ipsum excitat Angelum ad attendendum: sic enim explicuit Diuus Thomas hanc excitatiuam virtutem in hac quæstione 107. articulo primo ad secundum, dicens, quod *Angelus ordinat per voluntatem conceptum suum ad alterius manifestationem, & sic lingua Angelorum metaphoricè dicitur ipsa virtus Angeli qua conceptum suum manifestat.* Hæc est ergo virtus intelligibilis excitatiua, scilicet illa, qua manifestat suum conceptum ordinando ad alterum, & proportionando illi. Quod tandem expressit Diuus Thomas loco citato ad Anibaldum, articulo quarto ad tertium, ubi inquit, quod *Quando aliquis Angelus ad alium conuertitur ut eum alloquatur, ipsa conuersio ab alio Angelo cognoscitur tanquam ad se pertinens, nec est ibi aliqua excitatio necessaria.* Non ergo datur excitatio per impressionem speciei, sed per ipsam conuersionem, & ordinationem ad alterum, quæ reddit obiectum illi coaptatum, & ad ipsum pertinens, quod est ei manifestari. Quod verò dicitur hoc solum ponere extrinsecam denominationem in conceptu, infra in solutionibus argumentorum ostendemus quid realitatis hoc habeat, vel quid sufficiat, ut conceptus manifestabilis, & proportionatus reddatur audienti.

Ad ea verò quæ ex Diuo Thoma afferuntur 17 pro stabiliendis illis signis superadditis pro locutione Angelorum, dicimus non poni à Diuo Thoma talia signa, quæ sint qualitates de nouo productæ, sed dicitur coordinatio conceptus ad aliquid quod Angelus naturaliter cognoscere potest in alio in quantum ille conceptus posita tali ordinatione redditur ita cognoscibilis, & manifestus sicut ipsa substantia, & potentia Angeli quæ naturaliter sunt cognita alteri, & per eandem speciem, qua cognoscit Angelus audiens ipsam substantiam, & potentias Angeli loquentis per eandem cognoscit omne quod in altero Angelo cognoscibile est naturaliter, & redditur pertinens ad hoc vniuersum, vel ad Angelum cui loquitur; cum autem cogitatio cordis ratione suæ moralitatis sit occulta alteri Angelo, per hoc solum quod ordinatur ad alterum Angelum, moralitas illa non obstat, quia illa cogitatio hoc ipso quod ordinatur ad alterum, redditur de pertinentibus ad eum; atque adeò proportionatur illi, ut pertinens ad eius sphaeram, & ordinem, & sic redditur illa cogitatio eodem modo, cognoscibilis ab eo ad quem dirigitur, & in eadem linea, ac si moralis non esset, sed sicut cognoscitur, ipsa substantia, & potentia, & species, seu habitus, ita cognoscitur illa cogitatio, quia per hoc quod ordinatur ad alterum, pertinet ad eum, & fit respectu eius, sicut vnum ex istis;

istis; & sic dicitur coordinari his, quæ naturaliter sunt cognita, quasi eiusdem proportionis cum illis ut intelligatur ab Angelo, eo quod per eandem speciem, qua cognoscit naturam, & potentias Angeli loquentis cognoscit illas cogitationes, quando sic coordinantur à loquente, quod pertinent ad ipsum audientem, manent enim coordinatæ his quæ Angelus naturaliter cognoscit. Quæ est expressa solutio D. Thom. q. 9. de verit. cit. art. 4. ad 11. ubi inquit, quod *Vnus Angelus cogitationem alterius cognoscit per speciem innatam per quam alium Angelum cognoscit, quia per eandem cognoscit omne quod cognoscit in alio Angelo. Unde quam cito Angelus se ordinat ad alium Angelum secundum actum alicuius forme, ille Angelus cognoscit eius cogitationem, & hoc dependet ex voluntate Angeli.* Cui addit D. Thom. in illis ipsis locis ex 2. sent. quod *Quam cito unus Angelus ordinat locutionem suam ad alterum, efficitur locutio eius de pertinentibus ad illum, & ita ab eo cognoscitur.* Quæ loca statim iterum ponderabimus.

18 Quare cum apud D. Th. non detur particularis species de cogitationibus cordis distincta ab ea, quæ cognoscuntur res naturales Angeli, ut substantia, potentia, habitus, seu species, & cogitatio cordis impediatur repræsentari alij Angelo per speciem istorum naturalium, quovsq; sit illa cogitatio ordinata ad talem Angelum, & reddatur quasi vnum de pertinentibus ad se; idè talis cogitatio posita hac ordinatione coordinatur his quæ Angelus naturaliter cognoscit, id est respectu ipsius ad quem dirigitur, sit ita proportionata, & debita cognitio istius cogitationis ad se directæ, sicut aliæ res naturales, quæ in ipso Angelo cognoscuntur, utpote iam ad se pertinentes; & sic coordinata, & coaptata ipsis aliis rebus quæ naturaliter cognoscibiles sunt. Unde signanter D. Th. non ponit signa aliqua determinata, & imposita ad significandum istos conceptus, sicut ponit alia sententia, sed quodcumque naturaliter notum in ipso Angelo loquente ponit pro signo, quatenus illi coordinatur illa cogitatio per hoc quod dirigitur ad audientem, & per talem directionem fit sicut vnum ex naturaliter cognitis, illique coordinatur, & coaptatur, ita ut per speciem qua illud naturaliter notum attingitur, etiam cogitatio sic ordinata attingitur. Et hoc sensu illud naturaliter notum dicitur esse signum cogitationis, quatenus per speciem eius manifestatur; & sic coordinari illi, manifestatio eius fuit, non productio qualitatium ad significandum conceptus impositarum, quas D. Thom. nec leuiter agnouit.

19 Ratio ergo huius resolutionis D. Th. sumitur, tum ex impugnatione aliarum sententiarum, & modorum explicandi, qui insufficientes sunt, tum ex eo quod in isto modo dicendi omnes illæ conditiones requisitæ ad locutionem inter Angelos conuenientiùs saluantur; tum à priori, quia posito isto modo dicendi, ponitur manifestatio conceptus vnus Angeli ad alterum facta per actum ipsiusmet Angeli manifestatis: ergo locutio, quia locutio non aliud est, quàm manifestatio conceptus. Primam rationem iam supra expendimus referendo, & expungendo sententias. Secundam melius explicabimus in solutione argumentorum, & difficultatum quæ contra hanc sententiam obiciuntur. Tertiam rationem nunc breuiter explicabimus supponendo duo.

Alterum est, quod cum Angelus non accipiat cognitionem à rebus, sed habeat species infusas de rebus quas cognoscit, non oportet ut aliquid de nouo cognoscat, quod ad ipsum deferatur, vel quomodocumque approximetur ut illam intelligat, vel ut alteri maneat occulta ad quem non sic defertur, vel approximat, sicut fit apud nos, qui per sensus cognoscimus res, & dependet ex approximatione

vel absentia illarum manifestatio, vel occultatio rerum. Angelus autem non sic, sed hoc ipso quod ponitur in rerum natura aliquod obiectum ad se pertinens, & intra sphaeram suæ cognoscibilitatis contentum, hoc ipso cognoscitur ab Angelo ubicumque sit tale obiectum, nec potest illi occultari si naturale obiectum sit. Nec indiget aliqua impressione, vel actione talis obiecti in intellectum Angeli, ut ab ipso cognoscatur: sicut patet quando aliquid quod antea erat futurum contingens modò de nouo producit, antea non cognoscebatur, & modò cognoscitur ab Angelo, quia per suam productionem redditur obiectum aptum, & pertinens ad sphaeram intelligibilitatis Angeli.

Secundum quod aduertimus est, quod excitatio Angeli ad cognoscendum aliquid quod de nouo incipit esse, vel ad suam cognoscibilitatem pertinere, non requirit aliquam actionem talis obiecti, quod de nouo fit erga ipsum intellectum Angeli, sicut patet in rebus quæ de nouo producuntur ad quas cognoscendas non excitatur Angelus per actionem obiectorum in ipsum, sed excitatio fit per hoc quod Angelus attendendo ad seipsum consequenter attendit, & cognoscit omnia quæ ad seipsum pertinent. Unde hoc ipso quod fit aliquid in rerum natura de nouo, & pertinet ad sphaeram intelligibilitatis Angeli per hoc quod attinet ad se, & ad species suas, excitatur ad cognoscendum illud. Unde D. Thom. in 2. dist. 11. supra cit. art. 3. ponens 4. argumentum quod in Angelis non potest esse aliquid excitatum, cum nihil sit in vno, postmodum in altero factum, & tamen necessaria sit excitatio ad attendendum si esset locutio: Respondet quod *Angelus, præcipue beatus, semper est in actuali consideratione sui ipsius, & per consequens eorum quæ ad ipsum pertinent, quorum omnium ipse est ratio cognoscendi, quam cito autem unus Angelus ordinat locutionem suam ad alterum, efficitur locutio eius de pertinentibus ad illum.* Addit autem in 2. ad Anibald. dist. 10. art. 4. ad 3. quod *Non est aliqua excitatio necessaria, nisi conuersio vnus Angeli ad alium, quia hoc ipso illa conuersio est pertinens ad Angelum audientem, & per considerationem suæ essentia cognoscit omnia quæ ad se pertinent, suam autem essentiam semper actu considerat.* Quare non ponitur alio modo excitatio ad locutionem alterius Angeli quàm ad cognitionem cuiuscumque obiecti quod de nouo fit: hoc enim ipso quod ponitur in re, excitatur Angelus per ipsam considerationem sui, & specierum quas in se habet: (nomine enim essentia intelligit D. Th. etiam quidquid in essentia est, sicut species) quas de nouo sentit proportionatas esse ad tale obiectum, & præsertim si hoc fiat per aliquam actionem Dei qua coaptat illas species ad obiecta quæ de nouo fiunt ex vi prioris infusionis qua illas posuit in mente Angeli, ut supra dist. 22. agendo de cognitione futurorum in Angelo ostendimus. Et hac ratione loquens D. Thomas in hac q. 107. art. 1. in argumento tertio de excitatione Angeli ad attendendum dicit, quod *Sicut per signum sensibile excitatur sensus, ita per aliquam virtutem intelligibilem potest excitari mens Angeli ad attendendum.* Et non dixit excitari per ipsum obiectum intelligibile, sed per virtutem intelligibilem, videlicet per illam qua Angelus attendit ad omnia pertinentia ad se, vel per quam proportionantur, & coaptantur species ad hoc ut cognoscat obiecta de nouo ad se pertinentia, quæ ante non repræsentabantur, quia non pertinebant, ut amplius dicetur in solutione argumentorum.

His suppositis, ratio pro sententia D. Th. formatur sic: Angelus per species quas in se habet sine alia impressione, vel actione obiecti in ipsum natus

rus est intelligere quidquid ad se pertinet, & intra sphaerā cognoscibilitatis eius naturalis ponitur: ergo hoc ipso quod cogitatio cordis incipit pertinere ad cognoscibilitatem Angeli audientis, cognosceret ipsam, & hoc ipso quod Angelus loquens facit talē cogitationem pertinere ad alterum, ponit illā intra sphaeram cognoscibilitatis eius, quia unicuique Angelo naturaliter debetur cognitio omnium eorum quæ ad se pertinent, aliās non esset perfectus ex natura sua in genere cognoscibili: ergo hoc ipso quod loquens reddit cogitationem suam pertinentem ad alterū, manifestat eam illi, quia ponit eam intra latitudinem cognoscibilitatis eius: ergo per hoc præcisè loquitur alteri, quia nihil aliud est loqui, quā manifestare conceptum. Rursus per hoc quod ordinat conceptū suum ad alterum, volens illi manifestare, & communicare, reddit illū de pertinentibus ad alterum, quia si vult communicari ipsi, vult ad ipsum pertinere: ergo hoc ipso talis cōceptus remanet in latitudine rerum pertinentiū ad illū Angelum, & consequenter soluitur omne impedimentū, & omnis moralitas ratione cuius non poterat ab altero cognosci, quia non pertinebat ad ipsum, nec ad res naturales, sed tantū ad ipsā volūtatē elicientem, quæ habebat ius domini, & libertatis super ipsum actum liberum, quod ius transfunditur in alterum per hoc quod vult communicari alteri, & ad alterum pertinere: sic enim fit proprium illius & consequenter cognoscibile naturaliter ab ipso: hac enim ratione *supra* posuimus non cognosci naturaliter secreta cordis ab alio, quia non pertinent ad illum, sicut ad elicientem, nec ad res naturales cum quibus non habent de se connexionem. Si ergo incipiant pertinere, quia iste vult ei communicare, hoc ipso habet, & debetur ei ius cognoscendi illa.

21 Dices: Hac ratione sequitur quod ad locutionem Angeli non requiratur actus intellectus manifestans & exprimens, sed sufficiet solus actus voluntatis, quo vult Angelus manifestari alteri suum actum. Consequens est falsum: ergo. Sequela probatur, quia hoc ipso quod voluntas vult hoc ordinari ad alterum, tollit impedimentum, & moralitatem, quæ occultabatur illi, quia facit ad ipsum pertinere: ergo iam manet alteri manifestum: ergo non indiget alia locutione. Falsitas consequentis patet, quia locutio formaliter non est actus voluntatis, sed intellectus: ergo per solam voluntatem non fit locutio.

Resp. negando sequelam: Ad probationem dicitur, quod volitio ordinandi non tollit impedimentū moralitatis, & occultationis quovsque de facto ordinetur, & disponatur id quod vult manifestari: nec enim voluntas vult quomodocumque ad alterum, sed vult pertinere hoc ad alterum ut manifestetur illi, & quod ordinetur ad ipsum, non ut volitum tantum, sed ut manifestum. Manifestatio autem pertinet ad actum intellectus, & similiter ordinare propriè pertinet ad intellectum, cuius proprium est ordinem ponere, & vnum alteri conferre. Sic ergo ordinare, & communicare aliquid alteri per modum manifestationis non facit solus actus voluntatis, sed debet interuenire actus intellectus, in quo id perficitur, & completur, licet actus voluntatis sit principium ad id mouens, & efficaciam præbens illi actui, & sine cuius arbitrio moralitas illa, & impedimentum non tollitur, non tamen ablatio illa per actum voluntatis exercetur, sed per ordinationem intellectus, sicut sine arbitrio & voluntate, seu decreto iudicis, non soluitur reus, nec carcer aperitur, tamen id non fit sola voluntate Iudicis, sed manu ministri, & instrumento clavis ianuam aperientis; sic cum illa apertio cogitationum non sit solum volitio ad alterum, sed voluntas manifestandi ea quæ cogitamus, seu tractamus, oportet

quod ista apertio, quia manifestatio est, & manifestatio voluntatis cogitata, & cognita, id fiat manu intellectus. Et iterum, quia ordinatio est ad alterum, & hæc ordinatio potest fieri imperio, vel oratione, vel narratione, aut quocumque alio genere insinuationis, & intimationis, & hoc ad vnum, vel ad plures, oportet præter actum voluntatis id determinari, & disponi per actum intellectus, qui est potentia ordinans, & modum intimationis, & ordinationis disponens, non solo actu voluntatis, quæ est potentia mouens, sed non ordinans, neque modum enunciandi disponens.

Instabis: Ordinatio ista reddit cogitationem 22 cordis in se proportionatam speciei Angeli, sicut quando aliquod obiectum de nouo fit in vniuerso: ergo reddit illam cogitationem patentem intuitu ipsi Angelo: ergo non per locutionem manifestam. Pater consequentia, quia locutio solum manifestat rem locutam obscure, & in vi dicentis, & per fidem: manifestatio ergo illa per ordinationem cogitationis, quæ ipsam in se manifestat, repugnat locutioni, quæ solum manifestat rem per fidem, & in authoritate dicentis.

Resp. aliud esse loqui de manifestatione cogitationis, aliud de manifestatione rei cogitata, seu cōceptus obiectiui. Cogitatio ipsa euidenter manifestatur, neque hoc est cōtra locutionē: nā verba ipsa, seu voces nos verè loquimur, & illas euidenter manifestamus, nō res per voces significatas, neq; cōceptus. Angelus autē caret vocibus, & loco earū manifestat cōceptus euidenter; res autem cogitatas manifestat, prout in conceptibus sunt. Et quia conceptus, licet sint signa naturalia, non tamen sunt semper adæquata obiectis, & vera; ideò non euidenter manifestant obiecta, sed iuxta modum cōcipientis.

Quantum verò in hoc modo dicendi seruetur secretum in Angelis ex *supra* dictis manifestum est: nam in primis nihil producitur siue in Angelo loquente, siue in audiente, quod sit signum, vel qualitas omnibus nota, deinde ipsa conceptus ordinatio, & voluntatis motio per quas cogitatio ipsa, & repræsentatum in illa incipit pertinere ad alterum; & sic redditur ei cognoscibile, solum pertinet ad illum ad quem ordinatur; & non ad alios. Respectu ergo aliorum remanet occultum, siquidem in tantum est ei cognoscibile in quantum ad eum pertinet, & non aliter. Cum ergo solum pertineat ad illum, vel illos ad quos ordinatur, solum illis manifestatur, quoad reliquos manet secretū, & occultū.

An verò requiratur conceptus reflexus supra volitionem qua quis vult rem aliquam manifestari, ita ut sit ipsa locutio de obiecto ut volito manifestari, vel quomodo ista ordinatio fiat, commodiùs in *solutione argumentorum* dicetur,

Soluntur argumenta.

Primò arguitur difficultatibus *supra* positis referendo istā sententiā D. Th. quia videlicet ipsa ordinatio qua ordinatur conceptus loquentis ad audientem est in se actus liber: ergo est occultus Angelo audienti: ergo per hoc præcisè quod detur talis ordinatio, non manifestatur secretum cordis. Similiter per ipsam ordinationem positam in intellectu Angeli loquentis, non potest fieri excitatio in intellectu Angeli audientis, quia nihil in illo ponitur de nouo, excitatio autem non fit sine mutatione eius qui excitatur. Istæ sunt difficultates *supra* positæ. 23

Confirmatur, quia ordinatio illa, qua Angelus ordinat suum conceptum ad alium nihil reale ponit in tali conceptu, quod antea non habebat, sed solam extrinsecam denominationem ortam ex actu voluntatis ordinante: ergo si antè ille conceptus non

non erat notus Angelo audienti, neque postea manifestus erit, quia sola extrinseca denominatio non ponit aliquid quo manifestetur id quod ex natura sua occultum est. Denique posset Angelus vnica locutione loqui ad infinitos Angelos sine termino per hoc solum quod ad omnes ordinaret conceptum suum.

Respondetur ad primam difficultatem quod illa ordinatio, seu conceptus sic ordinans ad alterum, licet sit liber quoad exercitium, & vsum, quo fit, tamen libertas non tollit quod sit manifestus alteri, quando ex modo quo fit, procedit ab ipso loquente tanquam pertinet ad alterum, & vt communicatus illi; & sic cum voluntas facit talem ordinationem, hoc ipso vult non vti iure suo ad continentum, & occultandum actum suum, sed ordinando ipsum ad alium, hoc ipso dat illi ius super istum actum, quia producit illum tanquam aliquid de pertinentibus ad illum in quem ordinat, & consequenter relinquit illum actum vt debitum cognosci à tali Angelo, & consequenter manet intra sphaeram, & latitudinem obiecti cognoscibilis ab illo: sicut hoc ipso quod res aliqua producit, & ponitur extra futuritionem redditur intelligibilis ab Angelo, quia est obiectum pertinet ad vniuersum; & sic pertinet ad sphaeram suae cognoscibilitatis.

24 Nec est necesse ad hoc ponere actum reflexum propriè, & in rigore loquendo, sicut requirit Ar-
ruba *disp. 171. c. 3.* ita quod ad locutionem Ange-
li concurrant tres actus. Primò conceptus abso-
lutus de aliqua re, v. g. de homine, vel de lapide
in mente Angeli. Secundò volitio manifestandi
illum conceptum: tertio conceptus alius reflexus
qui complectitur illam priorem cognitionem, &
volitionem manifestandi illam. Et sic iste tertius
conceptus qui est propriè locutio, habet pro obie-
cto conceptum priorem vt volitum manifestari,
& de hoc habet quilibet Angelus speciem natu-
ralem à principio sibi congenitam, qua repræsen-
tatur sibi secretum cordis vt volitum manifestari,
non autem secretum cordis absolute: de hoc enim
non datur species in Angelo, sed de illo vt volito
manifestari. Suspecta tamen mihi est tota ista re-
flexio, nec in compendium venit iste circuitus, sed
in dispendium. Etenim si Angelus habet à prin-
cipio speciem congenitam secreti cordis vt voliti
manifestari, vel potest ab initio vti tali specie, vel
non. Si potest vti: ergo ab initio cognoscit omnia
secreta cordis volita sibi manifestari, quod est ab-
surdum: sic enim iam cognosceret Angelus secre-
tum quod eras erit volitum manifestari. Si impe-
ditur vti illa: ergo aliquid requiritur quo tollatur
istud impedimentum, nempe quod ipsa positio, &
existentia volitionis derur, qua posita species illa
repræsentet secretum cordis vt volitum manifesta-
ri. Si ergo sola positio, & existentia volitionis reddit
speciem illam expeditam vt possit Angelus au-
diens cognoscere tale secretum, eodem modo di-
cemus quod posita ordinatione, qua iste conceptus
ordinatur ad alium, species quæ est in Angelo au-
diente repræsentabit secretum cordis, etiam si non
fiat illa reflexio repræsentandi secretum vt voli-
tum manifestari, sed solum ponatur illud exerci-
tium ordinandi istum conceptum ad alium, quia
hoc ipso talis conceptus sic ordinatus redditur per-
tinet ad alium, & consequenter cognoscibilis ab
ipso. Quare non dubitamus requiri voluntatem or-
dinandi conceptum vnius ad alterum, vt ille ma-
nifestetur alteri, vt expressè docet D. Thom. *in hac*
q. 107. a. 1. & aliis locis supra citatis, sed sufficit præ-
supponi istam voluntatem vt principium mouens

ad manifestandum alteri conceptum suum, & vt or-
dinetur ad ipsum. Quod verò etiam requiratur quod
repræsentetur tanquam obiectum ipsa volūtas ma-
nifestandi, ita quod solum possit repræsentari obie-
ctum seu secretum cordis vt volitum manifestari,
ego non video necessariū, sed omnino superfluum.
Nam etiam apud nos quando volumus loqui, non
oportet quod ad singulas clausulas repetatur per
reflexionem hoc esse volitum manifestari, id enim
iudicaretur omnino puerile, & barbarum. Incon-
ueniens autem est dicere Angelos non esse poli-
tioris locutionis, quam nos, sed indigere pro sin-
gulis obiectis quæ manifestant addere illam reflex-
am in quantum volitam manifestari. Quare non
est necessaria reflexa illa cognitio ad locutionem
quæ potius reddit illam minus politam, & moro-
sam; sed sufficit ipso actu directo, & exercito velle
ordinare tales conceptus ad alium, vt hoc ipso in-
telligatur quod voluntariè sunt ordinari ad ipsum.
Quæ verò species sint in Angelo audiente ad re-
præsentandum sibi ista secreta cordis alterius, po-
sita ordinatione illa, quæ antea non repræsentaba-
tur, iam *supra* insinuauimus ex D. Thom. & iterum
in solutione sequentis argumenti explicamus.

25 Ad secundam difficultatem de excitatione au-
dientis ad attendendum, in primis dicimus, Ange-
lum eo modo excitari ad cognoscendum, & atten-
dendum ad locutionem sibi de nouo factam ab
alio Angelo, sicut excitatur ad attendendum, &
cognoscendum indiuidua quæ de nouo fiunt in
toto mundo: excitatur enim Angelus ad atten-
dendum quæ animalia nascantur modò in man-
do, qui pisces in mari, qui lapides, vel metalla in
terra; & sic de reliquis indiuiduis, præsertim con-
tingentibus, quæ antea non cognoscebat exci-
tatur inquam Angelus non per impressionem ali-
quam, vel motionem obiectorum erga se, sed
per ipsam actualem cognitionem sui, quam sem-
per habet, & videndo se videt species quas habet
in intellectu, & determinationem quæ in eis re-
sultat erga obiecta quæ de nouo fiunt, quam vt
supra tradidimus *disp. 22.* existimo non solum
resultare per modum relationis ex ipsa obiecti
positione, sed ab ipsis ideis diuinis deriuari ex vi
prioris infusionis specierum. Eodem ergo modo
cum Angelus habet speciem repræsentantem natu-
ram, potentias, & actus alterius Angeli quantum
ad specificam rationem suam per talem speciem
repræsentatiuam attendit Angelus ad locutionem
quæ de nouo fit, & ad se dirigitur per hoc quod
illa species sua determinatur ad hoc indiuiduum
conceptus alterius, quando ponitur in rerum na-
tura erga se: sicut enim determinatur, & excitatur
per speciem leonis ad cognoscendum leunculum,
qui in isto instanti nascitur in Africa, vel in Asia,
nec indiget alia actione excitatiua, quam ipsa de-
terminatione speciei erga talem leunculum de nouo
productum; ita similiter si vnus Angelus habet
speciem alterius, v. g. Gabrielis, repræsentantem sibi
intellectum illius, & omnes actus eius, sicut & re-
liqua accidentia eius, quantum ad suam naturam, &
quidditatem determinatur, & excitatur ad cognos-
cendum istum conceptum in particulari, qui modo
de nouo producit non per aliquam impressionem
Angeli loquentis erga se, sed per ipsam determina-
tionem speciei, quæ est in Angelo audiente de na-
tura & conceptibus talis Angeli, quæ naturaliter
determinatur ad quæcumque indiuidua quæ de
nouo fiunt in illo genere conceptuum sicut con-
naturaliter determinatur species leonis ab ideis
diuinis, quæ illam infuderunt ad repræsentan-
dum quodcumque indiuiduum leonis, quod de
nouo

516 Quæst. CVI. & CVII De locutione, &c.

novo nascatur, & illa determinatio speciei quædam est excitatio. Sed est differentia quod species leonis, & cuiuscumque rei naturalis determinatur, & excitatur per hoc præcisè quod producat, & ponatur indiuiduum illius in rerum natura: species autem cogitationum, & actuum liberorum alterius Angeli non determinatur, nec excitatur per hoc solum quod illi conceptus ponantur in rerum natura physicè, sed per hoc quod ponantur etiam moraliter, id est, ut ordinati ad se, & pertinentes ad se, eo quod propter moralitatem suam non manifestantur per solam existentiam, & productionem physicam sui in corde, quia per hoc solum non pertinent per se ad partes vniuersi, nec connexionem habent cum illis, sed solum per hoc quod ad alterum ordinantur, & fiunt de pertinentibus ad eum.

Sed instat aliquorum scrupulus. Nam Angelus respectu rerum naturalium multa fortè non attendit, quia occupatus, vel distractus circa aliquid, aliquando non attendit ad alia, quæ fugiunt eius obtutum: & hoc est inconueniens quod in locutione Angelorum debemus vitare: si enim Angelus velit loqui Angelo circa alia distracto, quomodo excitabit illum ad attendendum ad conceptum suum, quia etiam si sit ordinatus ad ipsum, non attendit ad illum?

26 Sed respond. quod respectu perspicaciæ Angeli rara sunt, & fortasse nulla in naturalibus; quæ eius aduertentiam effugiant propter expeditissimum modum intelligendi, quem habet, & multo minus effugiant in moralibus, & liberis, quæ ad se diriguntur, quia hæc multo maiori conatu, & aduertentia Angeli attendunt, utpote maiora, & nobiliora. Quod si aliquando Angelo valdè distracto, & occupato circa alia alius Angelus loquatur, & ille non attendat, sed effugiat eius aduertentiam, illa locutio, quid inconueniens habet, quod aliquas locutiones ad se factas aliquis Angelus non attendat, cum inter nos sic quotidie contingat, quod valdè distractis, vel occupatis nobis aliquis loquatur, & quod non attendamus, nec extemur. Nullam ergo inconueniens est quod etiam in politia Angelorum alicuius locutionem alter non percipiat, nec attendat, sed elabatur, & perdatur illa locutio, quamuis hoc aut rarissimè, aut nunquam accidat, propter perfectissimam perspicaciam Angelici intellectus ad attendendum ad omnia quæ ad se pertinent. Et in Angelis beatis nunquam id accidit, quia in Verbo vident quidquid ad se pertinet.

27 Quod si adhuc inquiras: si Angelo vel Dæmoni loquenti (ut abstrahamus à beatis) incumbat necessitas ut audiatur vel percipiat id quod loquitur quibus utitur remediis, vel quomodo urgebit alterum, ut attendat.

Resp. hoc iam non pertinere ad modum excitationis, sed ad remedia excitandi ad hoc vel illud negotium. Et dico suppetere multa, sicut etiam apud nos, quando non facilè possumus loqui alicui, quærimus varia remedia ut audiamur, quæ multò facilius in Angelis adhibentur, quia si ad momentum fortè non attendunt ad hoc vel illud obiectum ad se pertinens, statim & facillimè ad id conuertuntur propter perspicaciam cognoscendi. Poterit ergo

Primò id procurare per alios Angelos quibus cognoscit familiariter alterum uti, nec est casus moraliter dabilis, quod nullus illorum attendat ad se, sicut nos procuramus per alios homines loqui aliis, nec est casus ita facilis, quod nullus velit nos audire.

Secundò potest accedere ad alterum Angelum,

& aliquem motum vel impulsum exerceri circa illum quo facto attendat ad se. Nam posse vnum Angelum mouere alterum, aut impellere extra omnem dubitationem est. Et constat ex illo Tobia 8. vbi dicitur, quod *Raphaël Angelus apprehendit Dæmonium, & religauit illud*. Et licet Angelus inferior non possit sic mouere superiorem, poterit tamen saltem aliquem impulsu illi imprimere, seu aliquem actum exteriorem exercere; & sic efficere ut attendat ad se.

Tertiò potest orare Deum ut excitet alterum Angelum ad attendendum sibi.

Quartò si nihil horum velit efficere, non est inconueniens quod expectet occasionem, qua alter Angelus ad se attendat ipso interim perseverante in dirigendo conceptum suum ad illum, quod breuissimè, & facillimè consequetur, quia Angeli non diu perseverant in non attendendo ad omnia quæ ad se pertinent, eo quod actu in se vident species suas determinari ad ea quæ ad se pertinent.

Ad confirmationem respondetur, quod dato quod illa ordinatio voluntatis nihil reale ponat in conceptu, ut manifestus reddatur Angelo audienti, sufficit quod tollat impedimentum morale, ratione cuius occultabatur, quia erat sub iure, & potestate alterius, & dependens ab eius voluntate, & dominio. Et sicut hoc dominium, & hæc dependentia nihil ponebat in conceptu, qui sub tali dominio erat, ita non mirum, quod ut sit manifestus ille conceptus sufficiat tolli aliquid extrinsecum, nempe quod consentiat talis voluntas, quæ habet illud dominium.

Secundò dicitur, quod etiam potest fieri aliquid reale in ipso conceptu: nam supposita voluntate manifestandi, producit de nouo conceptus ordinans, & disponens id quod alteri manifestandum est, & quod ab ipso dirigatur tanquam aliquid ad illum pertinens. Et hoc totum fit per actum realem, & productionem realem conceptus, qui cum tali ordine, & habitudine ad alterum exprimitur, & hæc expressio, & habitudo realis est, sicut actus imperij, & actus orationis habitudinem realem habent erga personas ad quas sunt, licet nihil reale in personis ponant. Ad inconueniens autem, quod posset Angelus sua locutione loqui infinitis, dico non esse inconueniens quod loquatur omnibus quos velit, id est, ad quos velit pertinere talem locutionem, qui tamen nunquam erunt infiniti in re, & categorematicè loquendo non sunt dabiles infiniti Angeli.

Secundò arguitur, quia in hac sententia non potest saluari quod vnus Angelus loquendo, alterum decipiat, eique mentiatur, quod tamen locutioni negari non potest, dicente Domino ad spiritum nequam 3. Reg. 23. *Decipies & praualebis*: & ipse Diabolus pater mendacij est. Sequela verò probatur, quia nos non admittimus locutionem Angelorum fieri per signa, in quibus posset concipi fallax significatio, sed per ordinationem conceptus ad alium. Conceptus ergo qui ordinatur ad alterum non potest non significare Angelo id quod est ille conceptus: ergo respectu eius conceptus quem significat, nullo modo decipit, quia repræsentat id quod ordinat ad alterum, & non aliud, id autem quod ordinat verè repræsentat, quia verè ordinat ad ipsum, & in tantum repræsentat in quantum ordinat: ergo respectu huius non decipit. Respectu autem cuiuscumque alterius conceptus non decipit, nec mentitur, quia alterum nec verè nec falsò repræsentat, cum nec verè, nec falsò eum ordinet ad alterum: ergo respectu nullius conceptus decipit, aut falsò significat.

Conf.

Conf. quia Angelus nullius cogitationis liberæ alterius habet speciem propriam, & sibi debitam, quia cuius non est debita cognitio, neque species: ergo nec etiam habebit speciem repræsentantem sibi conceptum alterius ut ordinatum ad se, vel ut volitum manifestari sibi: nam etiam hæc cogitatio seu ordinatio cogitationis, aut volitio libera est: cur ergo istius solum ponitur species nisi petendo principium? hoc enim inquirimus, cur istius detur species in Angelo audiente? Etsi datur, cur non potest illa uti Angelus antequam sibi alter eam manifestare velit, & sic cognoscere omnes locutiones futuras?

Conf. secundò ex Vasquez, quia conceptus non ordinatur ad alterum, nec fit ei manifestus ex vi suæ expressionis, & dictionis, sed ex vi voluntatis ordinantis: ergo formaliter non est actus intellectus, sed voluntatis locutio, quod apertè est falsum.

Denique Angelus excitat hominem, & loquitur ei per immutationem specierum eius, & impressionem alicuius physici in phantasia, & imaginatione: ergo & alterum Angelum.

29 Respon. negando sequelam. Ad probationem dicitur, optimè componi in hac sententia, quòd possit dari mendacium, & deceptio in locutione Angelorum, nimirum si formet duplicem conceptum, vnum quoad se, per quem cognoscit suos affectus, & id quod habet in re, & hunc non dirigat ad alterum, sed apud se retineat; alterum verò formet, in quo neget se tales affectus habere, vel talia cogitare, aut velle, aut accidere, sicut in rei veritate habetur apud se; & hunc conceptum ordinet, & dirigat ad alterum, tunc illum decipit, & illi mentitur. Similiter circa res supernaturales aut futuras, vel quæ latent alium Angelum potest eum decipere narrando id, quod à parte rei non datur, circa res verò naturales quas alter cognoscit, non potest ipsum decipere, quia alter comprehensivè illas cognoscit, & videt id quod est in re. Quare licet respectu illius conceptus quem Angelus ordinat ad alterum præcisè sumpti non possit dari mendacium, tamen respectu duplicis conceptus seu affectus, quorum vnus se refert ad alium, quando non ita est in re, potest Angelus componere mendacium aut etiam narrando, vel repræsentando per conceptum id quod non ita est in re. Et quia conceptus sunt signa, naturalia quidem, sed fallibilia, aut fallentia, quia non semper adæquatè se habent ad obiecta, ut in re; idèò ut diximus *suprà* res per illos conceptus non semper evidenter attinguntur ab audiente, sed per fidem obscuram, & fallibilem.

30 Ad primam confirmationem respondetur ex supradictis quòd cuiuscumque conceptus, & secreti cordis alterius habet quilibet Angelus speciem repræsentativam ipsius, quantum ad quidditatem, & naturam eius, quia, ut dixit D. Thomas q. 9. de verit. art. 4. ad 11. per eandem speciem innatam per quam alium Angelum cognoscit, cognoscit omne quod in eo est, & ad se ordinatur, & consequenter conceptus eius qui ab eo nascitur, & manifestantur, & aliquid illius sunt. Cæterum species quæ sic repræsentat cogitationes alterius quoad essentiam, & quidditatem earum, quæ secreta non est secundum se, non repræsentat eas prout in exercitio, & in esse quousque ponantur in rerum natura non solum physicè, sed etiam moraliter, ut *suprà* diximus, quia propter suam libertatem non sunt cognoscibiles ab altero Angelo, etiam si physicè producantur in se quousque dirigantur ad ipsum, tanquam pertinentes ad se, quod est quasi produci ipsi Angelo, id est, notificari. Et illa ordinatio, licet

Ioan. à S. Thom. in 1. part. D. Th. Tomus alter.

etiam libera sit, tamen per se est nota alteri, & ratio cognoscendi alia quæ ordinat ad ipsum, quia hoc ipso quod est ordinatio ad alterum, est manifestatio, & vnum de pertinentibus ad illum; & sic debetur illi cognitio eius potius quàm aliarum cogitationum, quia hoc ipso quod est pertinens ad illum, & alia non pertinent, illius cognitio est debita, non aliarum.

Ad secundam confirmationem respondetur distinguendo antecedens; conceptus non ordinatur ad alterum, neque est illi manifestus ex vi suæ expressionis, distinguo, ex vi suæ expressionis absolute factæ, & in ordine ad se tantum, concedo; ex vi suæ expressionis comparativæ, & ordinatæ ad alterum, nego: ordinatio enim non fit formaliter per actum voluntatis, sed per actum intellectus, qui propriè est collatiuus, & ordinatiuus de rebus: voluntas autem solum est principium mouens per volitionem suam ut intellectus ordinet, & disponat de rebus, & conceptibus, siue in ordine ad se, siue in ordine ad alterum, qua voluntate præsupposita intellectus exprimit, & producit conceptum repræsentantem rem, non præcisè, & absolute, sicut in ordine ad se, sed cum ordine ad alterum, quatenus exprimit rem illam ut intimandam alteri, aut cum imperio, aut cum deprecatione, aut alio modo, & illa habitudo exprimitur in conceptu, non quidem ut obiectum reflexè cognitum, & in actu signato, sed ut exercitium cognoscentis, & dirigentis: & sic locutio semper est actus intellectus sic ordinatiue exprimentis, licet præsupponat actum voluntatis. Quod verò dicitur de excitatione, qua Angelus excitat hominem. Respondetur homines non excitari nisi mediante sensu, à quo dependet omnis eorum cognitio. Vnde oportet immutari sensum hominis ab Angelo, siue exteriori siue interiori, ut excitetur: sensus autem non immutatur ad cognoscendum, nisi per aliquam speciem, quam accipit ab obiectis, vel de nouo in se formatur, aut in memoriam reducitur; quod sine aliqua immutatione corporali non fit. Quod totum secus accidit in Angelis, qui nec excitantur per sensus, nec excipiunt species ab obiectis; & sic non possunt excitari sicut homines.

Postremò ex dictis colliges, quomodo in locutione Angelorum nihil obstat distantia, vel indistantia, quia sicut vnus Angelus potest cognoscere rem aliquam naturalem à quacumque distantia, & ubicumque sit, eo quòd non accipit species à rebus nec ab ipsis earumve actione dependet, ut moueatur ad cognoscendum, ita potest cognoscere locutionem, & conceptum alterius Angeli quantumcumque distans sit; quia in hoc non mouetur ab Angelo loquente accipiendo ab eo speciem, sed per speciem quam in se habet de Angelo loquente, hoc ipso quod in loquente producit conceptus ordinatus ad alterum, hoc ipso illum cognoscet, sicut cognoscit rem naturalem hoc ipso quod producitur physica in rerum natura ubicumque producat. Vnde distantia, vel indistantia quoad hoc nihil operatur. Similiter intelligitur, quomodo in Angelis intelligatur lingua, nutus, & signa, quibus loquantur: est enim lingua, ipsa vis expressiva conceptuum erga alterum, ut dicit S. Thom. in hac q. 107. art. 1. Nutus autem, & signa sunt ipsi conceptus, & ordinatio eorum ad alterum, quatenus sic proponuntur, quod eodem modo cognoscibiles redduntur alteri sicut ipsa natura, & substantia, & potentia Angeli cui coordinatur, & tanquam aliquid illius cognoscitur hoc ipso, quod dirigitur ad alterum, ut ad eum pertinens. Vnde S. Thom. q. 9. de verit. artic. 4. ad 12. dicit, quòd Nutus, & signa hoc

E E e modo

modo possunt in Angelis distingui, ut signum dicatur ipsa species, nutus autem ordinatio ad alium, sed possibilitas hæc faciendi dicitur lingua.

ARTICVLVS II.

Quid sit illuminatio in Angelis, & quibus conueniat?

INomine illuminationis in Angelis intelligimus non simplicem locutionem, sed quæ manifestat alteri veritatem cum magisterio, & doctrina, id est, taliter disponendo, & coaptando illam pro captu alterius, quod ex vi talis propositionis possit eam percipere, & intelligere: tunc enim est manifestatio quasi clarificans, & illuminans alterius mentem ad percipiendam veritatem. Hanc ergo illuminationem inter Angelos dari supponimus contra Durandum, qui in 2. dist. 11. q. 3. dicit, omnes Angelos à Deo solo illuminari, licet illa illuminatio prius tangat vnum Angelum quam alium. Caterum dari talem illuminationem in Angelis, ita ut vnus verè alium doceat, & illuminet aperte docet S. Dionysius 8. cap. *caelestis hierarchia*, probans quod Angeli secundæ hierarchiæ purgantur, illuminantur, & perficiuntur ab Angelis primæ hierarchiæ. Et hoc communiter tenent omnes Scholastici, quia doctrina Dionysij in hac parte firma habetur: ea enim quæ de Angelis docuit, à D. Paulo, & ab Apostolis videtur accepisse. Nec Durandus absolute eam negauit, sed interpretatus est, quod Dionysius loquatur de illuminatione Angelorum, quæ fit à solo Deo, mediantibus tamen Angelis, non mediatione causæ inter eos, quasi vnus causet lumen in altero, sed mediatione consequentiæ, quatenus prius natura tangit vnum quam alterum, quia vnus est dignior altero. Attamen Dionysij mentē hæc interpretatio non tangit, cui alij Patres subscribunt. Nam c. 4. *caelestis hierarchia*, expresse docet, quod *Hæc lex à Deo sancita est, ut in vnaquaque hierarchia, & primi sint, & medij, & postremi ordines, inferiorumque superiores Doctores sint, eisque quasi digito viam monstrent.* Et c. 7. dicit Cherubim plenum esse munerum, quæ sapientiam efficiant, eaque largè copioseque communicat natura cum secundis sapientia quæ concessa est effusione. Ac denique c. 8. *Hoc, inquit, in vniuersum Diuina præscriptione ac lege pro Dei dignitate sancitum est, ea quæ secunda sunt primorum procuratione participare Diuinis illustrationibus.* Hoc autem non potest explicari de illustratione solum mediante consequentiâ, & non mediante causalitate, cum esse Doctorem, efficere, & communicare sapientiam, inferiores participare eam procuratione superiorum, manifestam causalitatem designet in docendo, & illuminando. Idem tradit S. Athanasius libro de *communione similis essentia*, Damasc. lib. 2. de *fide* c. 3. Bernardus lib. 5. de *consideratione* c. 4. alijque Patres. Certè ratio ipsa persuadet quod cum Angeli sint purè intellectuales, & in perfectione intellectualitatis inæquales, vnus alio subtilius, altiusque intelligat: ergo poterit illas subtiliores intelligentias, inferioribus manifestare, ut eas percipiant: hoc autem illustrare, seu illuminare est. Quomodo autem circa beatam visionem vnus Angelus alium non illuminet, quia in hac non docebit vir proximum suum, nec ciuitas illa cælestis indiget Sole, & Luna, quia claritas Dei illuminat eam, sed solum quoad aliqua quæ ad accidentalem beatitudinem spectant Angeli illuminari possint ab aliis, infra expediemus.

Hoc ergo supposito, tria circa illuminationem Angelorum discussione indigent. Primum circa formam illuminationis, quomodo fiat. Secundum circa materiam, de quibus fiat. Tertium circa personas, de quibus fiat, & à quibus. Circa primum,

Dico primò illuminatio non est actio aliqua ² physicè influens, & effectiue intra intellectum Angeli illuminati aliquod lumen, vel speciem, sed solum externè proponit obiectum clariùs, & manifestius, habet tamen duo officia illuminatio Angeli sic externè proposita; alterum ex parte virtutis intellectiue in Angelo illuminato, scilicet determinare, vel confortare illam erga talem veritatem: alterum ex parte speciei, scilicet proportionare illam obiecto representato, ut iuxta suum modum talis veritas ibi reluceat. In hac conclusione eodem modo est disconuenientia inter Auctores, sicut circa locutionem Angeli: illuminatio enim quædam locutio est, & solum addit supra locutionem communem, quod fiat cum quodam magisterio, & per modum docentis ab eo qui illuminat, seu veritatem minus cognitam explicat. Vnde illi qui tenent locutionem Angeli fieri per impressionem alicuius speciei in mente audientis, tenent etiam quod illuminatio fiat per impressionem speciei nouæ in intellectu illuminati. Quam sententiam ex aliquibus antiquis, ut Scoti, Ocham, Gabriëlis, Richardi, & aliorum sequitur Suar. lib. 6. de *Angelis*, c. 13. At verò Caiet. *super hanc questionem* 106. art. 1. tenet quod illuminatio fit per solam externam propositionem obiecti, non per physicam influentiam in intellectum Angeli illuminati. Quam sententiam sequitur Vasq. *hic disp.* 2. 16. cap. 5. licet existimet sententiam Caietani non esse ad sensum D. Thomæ. Et eandem sententiam sequuntur communiter discipuli D. Thomæ, & ex antiquioribus Alensis, Bonauentura, Egidius, & alij, & ex recentioribus Arrubal, Granados, Turrianus, & alij quos citant, & sequuntur Carmelitani Salmanticenses *disp.* 14. de *Angelis*, dub. 2.

Nos existimamus eandem esse expressam sententiam D. Thomæ, quod illuminatio fiat per propositionem obiecti, ut docet q. 9. de *verit.* art. 1. ad 2. vbi inquit, quod *Ab Angelo illuminante non fit nouum lumen, natura, vel gratia, nisi ut participatum: cum enim omne quod intelligitur ex vi intellectualis luminis cognoscatur, ipsum cognitum in quantum huiusmodi includit intellectuale lumen, ut participatum, ex cuius virtute habet intellectum confortare, sicut patet quando magister tradit discipulo aliquod medium alicuius demonstrationis in quo participatur lumen intellectus agentis.* Vbi patet nihil physicæ influentiæ, sed externæ propositionis interuenire inter magistrum, & discipulum, & concludit D. Thomas, quod *Non fit in Angelo illuminato nouum lumen natura, vel gratia, sed lumen quod prius inerat confortatur per lumen contentum in cognito percepto à superiori Angelo.* Lumen autem quod diffunditur mediante ipso cognito sic percepto, non infunditur aut producit effectiue, & physicè intra intellectum alterius Angeli, sed mediante obiecto proposito illuminatio fit. Obiectum autem propositum physicè non influit in intellectum Angeli, quia non producit in eo species, sicut fit in sensibus. Nec dissentit D. Thomas, sed hoc ipsum confirmat in hac *quest.* 106. art. 1. ad 2. vbi docet, quod *Vnus Angelus non illuminat alium tradendo ei lumen natura, vel gratia, vel gloria, sed confortando lumen naturale ipsius, & manifestando ei veritatem de his quæ pertinent ad statum natura, & gratia, & gloria, ut dictum est, scilicet in corpore articuli.* Quare ³ duo

duo illi effectus, quos ponit D. Thomas *in corpore artic.* resultare ex illuminatione Angeli, semper veniunt intelligendi cum ista restrictione posita *in solutione ad 2.* scilicet, quod hoc fiat non tradendo aliquod lumen naturæ, gratiæ, vel gloriæ: ergo non physicè influendo, quia omnis physicus influxus in intellectum traditio luminis est. Quare Caietanus iuxta mentem S. Doctoris locutus est.

4 Prima ergo pars conclusionis constat ex his quæ de locutione Angelorum dicta sunt, quod non fiat per impressionem speciei in mente audientis, & quæ *suprà* diximus *diff. 21.* agendo de infusione specierum in mentibus Angelorum, quod non possit fieri ab vlla causa quam à Deo immediatè, ita quod non possit vnus Angelus etiam sui speciem in alterius Angeli mente imprimere, vt ibi videri potest *art. 3. circa 3. conclus.* Angelus enim non potest immutare physicè ipsam potentiam intellectiuam Angeli, reddendo illam perfectiorem, & viuaciorem, quia potentia Angeli non est qualitas suscipiens magis, & minus, sed est naturalis potestas tanquam propria passio ipsius naturæ, quæ in qualibet natura Angelica habet totam perfectionem illi naturæ debitam: & sic non potest augeri: quod si posset, non hoc fieret ab altero Angelo, sed à suo creatore, qui solus potest intellectualem naturam immutare. Similiter non potest alter Angelus producere lumen, quod sit habitus in altero Angelo: nam vel ille habitus esset naturalis, vel supernaturalis. Naturali non vtitur Angelus, quia habet potentiam intellectiuam perfectam in ordine ad naturalia, nec habitum acquirit, sicut nos, qui paulatim proficimus de imperfecto ad perfectum, & ipsa assuetudine proficimus: Angelus autem non sic procedit, nec melioratur per assuefactionem habitus; & casu quo melioraretur, hoc acciperet per suam assuefactionem, qua acquireret habitum, non per alterius Angeli infusionem, qui non potest supplere assuefactionem, sicut Deus qui potest infundere scientiam aliis acquisibilem. Denique non potest Angelus imprimere species in intellectu alterius, sicut exigitur ad illuminationem, quia ad summum posset Angelus suimet speciem imprimere alteri Angelo, sicut quodlibet obiectum imprimit speciem sui in potentiam cognoscitiuam. Hac autem non indiget alter Angelus ad illuminationem, cum à principio quilibet Angelus habeat species representantes alios Angelos. De aliis autem rebus non potest vnus Angelus infundere aliis species, quia vel illas continet Angelus ab initio, & sic non indiget sibi infundi, vel casu quo non contineret, non posset alter Angelus eas infundere, quia non continet in se perfectiones, nec ideas aliarum rerum vt posset aliarum similitudines imprimere, nec habet vim intellectus agentis vt possit ex obiectis species elicere pro altero Angelo: essent enim illæ species valde imperfectæ, sicut sunt nostræ, quia per abstractionem ab obiectis fiunt, & tunc conuenientiùs quilibet Angelus haberet suum intellectum agentem, sicut habet anima nostra, quam vnus Angelus respectu alterius haberet vim vel potestatem intellectus agentis. Quare nullo modo apparet quod Angelus illuminans possit aliquid physicè producere intra intellectum alterius. Cui additur, quod vnus Angelus non potest illabi intra alterius intellectum, vt est commune proloquium Theologorum, sed hoc est primum Dei qui ipsam naturam intellectiuam propter suam perfectionem, & vniuersalitatem solus immutare potest, nec alteri agenti subicitur. Vt autem Angelus effectiue operaretur intra mentem alterius debebat illabi intra illam, & non solum esse illi propin-

Ioan. à S. Thom. in 1. part. D. Th. Tomus alter.

quus vel indistans, vt *citato loco, disputatione 21.* ponderauimus.

Secunda pars conclusionis ex priori relinquitur manifesta, quia si non potest Angelus illuminare alterum per efficientiam physicam luminis, in illo relinquitur quod solum fiat mediante propositione obiecti clariùs, & illuminatiùs propositi, sicut magister docens discipulum, illuminat illum per propositionem elariorem obiecti. Vnde fit quod si queramus agens physicum, & effectiuum illius maioris illuminationis, quæ datur ex parte Angeli illuminati, erit eius intellectiua vis, quæ ad propositionem obiecti magis illuminati, & propositi ab Angelo loquente, qui loquendo illuminat inferiorè producit efficaciorè, & perfectiorem actum circa talem veritatem. Ex parte autem Angeli illuminantis vis effectiua illuminationis est eius intellectus producens conceptum representatiuum veritatis, quam ordinat, & dirigit ad Angelum inferiorem, sic disponendo, & coaptando illam iuxta quod est capax intellectus inferioris ad percipiendum. Et ita obiectum propositum ex quo illuminatur Angelus inferior relucet, & exprimitur in conceptu Angeli illuminantis, ad quem respiciens inferior, tanquam ad conceptum directum ad se iuxta modum illius elicit conceptum suum, & hoc est illuminari, & perfici ab illo. Quod autem ista propositio veritatis illuminata habeat illos duos effectus in mente Angeli inferioris, scilicet confortare virtutem intellectiuam, & speciem representatiuam proportionare, & perficere in ordine ad tale obiectum viuaciori, & distinctiori modo representatum, melius ex solutione sequentis obiectionis percipietur.

Obiicies, D. Tho. in ista *q. 107. art. 1.* dicere, quod 6
*Vnus Angelus illuminat alterum secundum duo. primo fortificando virtutem eius intellectiuam, sicut corpus minus calidum ex propinquitate ad magis calidum perficitur in calore. Secundo ex parte similitudinis, quatenus Angelus superior notitiam veritatis quam in vniuersali accipit; distinguit iuxta capacitatem inferioris: ergo Angelus non solum illuminat proponendo obiecta, sed etiam influendo actiue in ipsam virtutem intellectiuam, siquidem illuminatio, quæ fit mediante propositione obiecti, solum pertinet ad illuminationem ex parte speciei, quia ipsa est quæ representat obiectum: ergo illa alia confortatio ex parte virtutis intellectiue cõdistincta ab ista quæ tenet se ex parte speciei, influentia physica est. Et hæc mens D. Thom. fit magis manifesta, ex his quæ docet *infra q. 107. art. 1.* vbi loquens de modo, quo magister illuminat discipulum inter homines, dicit quod *Magister confortat intellectum addiscentis, non quidem aliqua virtute actiua, quasi superioris nature, sicut *suprà* dictum est de Angelis illuminantibus, quia omnes humani intellectus sunt vnius gradus in ordine nature, sed in quantum proponit discipulo ordinem principiorum ad conclusiones, &c.* Ergo sentit quod illuminatio Angeli, quia est superioris naturæ, non fit per solam propositionem obiecti, sicut apud homines, sed etiam per aliquam actionem physicam, seu actiuitatem naturæ superioris in inferiora.*

Respon. vtrumque illud munus, & confortatio- 7
nis intellectiue virtutis, & illustrationis representatiue ex parte speciei, fieri ab Angelo, non per effectiuam influentiam intra intellectum, sed per representationem, & propositionem obiecti, in qua & melior representatio obiecti fit, & efficacia virtutis intelligentis exprimitur, qua percepta inferior intellectus confortatur: quod enim hæc confortatio non fiat tradendo lumen naturæ aut gratiæ inferiori Angelo, S. Doctor expressè docet

E E e 2 in

in hac q. 106. art. 1. ad 2. Et iterum q. 12. de verit. art. 8. ad 4. dicit, quod *Angelus neque lumen in intellectu humano creat, neque species in vi imaginatiua, sed operatione Angeli lumen naturale in intellectu humano diuinitus confortatur, & secundum hoc, hominem Angelus illuminare dicitur.* Manifestè ergo distinguit confortationem luminis naturalis ab impressione specierum, & creatione luminis, quod pertinet ad influentiam physicam. Et quod hoc fiat ab Angelo per medium representatum, & oblatum inferiori Angelo, docet expressè S. Tho. in 2. dist. 9. q. 1. art. 2. ad 2. dicens quod *Confusio intellectus est in hoc, quod est in potentia respectu plurium, per lumen ergo receptum à Deo mediante superiori Angelo, liberatur intellectus Angelicus ab hac dissimilitudinis confusione, in quantum terminatur ad unum, cui fortius inhaeret, quanto magis medium cognitionis, efficax est sicut patet in eo, qui nescit, quam partem contradictionis eligat, sed inuento medio probabili magis ad unam flectitur: sed addito medio demonstratio, magis firmatur in illo.* Ecce quomodo S. Tho. ponit totam confortationem luminis Angelici ex parte medij confortantis, id est tollentis confusionem, quæ erat in Angelo, non ex parte infusionis noui luminis, vel productionis speciei.

8 Itaque Angelus illuminans in aliquo conuenit cum homine docente, in aliquo excedit. Conuenit quidem quantum ad hoc quod est proponere obiectum melius dispositum exteriori propositione, & non intra intellectum operando, vel tradendo, aut imprimendo lumen vel species effectiuè. Excedit in hoc quod medium illud seu obiectum propositum ab Angelo illuminante cum sit superioris naturæ, & eleuationis intellectus, etiam in modo operandi inferiorem intellectum eleuat, ita ut aliquando quasi rapiatur extra se ille qui illuminatur, & ad modum superioris intellectus illuminantis exerceat operationem suam. Vnde aliquando videmus quod homines in excessu mentis rapiuntur, & cum abstractione à sensibus operantur, qui modus operandi prouenit ex efficacia propositionis obiecti facta à superiori virtute, siue à Deo, siue ab Angelo, qui per efficaciam ipsius obiecti propositi, etiam modum operandi intellectus inferioris immutat, quod non potest facere vnus homo respectu alterius, quando ipsum docet, quia non est superioris naturæ respectu alterius hominis. Angelus autem quia superioris naturæ est respectu hominis, & quilibet Angelus superior respectu inferioris, idèd propositio obiecti facta à superiori Angelo non solum habet vim representandi obiectum meliori modo distinguendo, & coaptando illud iuxta captum inferioris quod pertinet ad perfectionem ex parte representationis speciei, sed etiam sua efficacia trahit, & quasi rapit intellectum inferioris ut feratur maiori conatu in rem propositam circa quam illuminatur, & iuxta modum intelligendi superioris Angeli, & hoc est confortare intellectum inferiorem ex parte virtutis intellectiuæ, id est ex parte ipsius modi intelligendi, & non solum ex parte representationis; quod tamen non facit Angelus superior physicè infundendo, vel immutando lumen naturale, sed proponendo obiectum cum tanta efficacia, ut ad suum modum assimilet, & trahat inferiorem. Quod tamen rectè negat D. Thomas homini docenti, seu illuminanti in q. 117. quia homo, in docendo non potest immutare modum cognoscendi alterius hominis, cum non sit superioris naturæ respectu alterius hominis.

Et cum D. Thomas dicat hanc confortationem fieri virtute actiua Angeli illuminantis, dicimus verum esse fieri virtute actiua non efficiente, & im-

mutante interiùs ipsum lumen, sed exeriùs efficaciam ipsam sui modi intelligendi representante, & proponente in obiecto, ita ut mediante ipsa propositione trabatur intellectus inferior ad modum intelligendi superiorem. Quod D. Thomas expressit in 2. d. st. 9. q. 1. artic. 2. ad 4. ubi inquit, *Dupliciter dicitur aliquis docere, vel sicut proponens intelligibile, vel sicut præbens lumen ad intelligendum: hoc autem lumen est duplex, vnum intrinsecum, vel connaturale intellectui, cui similatur lumen quod est de compositione oculi, & per collationem huius luminis solus Deus docere dicitur. Secundum lumen est superueniens ad confortationem naturalis luminis cui similatur in visu corporali lumen solis vel candele, & sic potest Angelus alium Angelum, vel etiam hominem illuminare ad aliquid cognoscendum, non autem homo sic docere potest, cum in eo lumen intellectuale debilissimè recipiatur.* Sic ergo tria possumus in illuminatione considerare. Vnum est representatio viuacior ex parte speciei. Aliud est lumen exterius tangens potentiam, quod tamen confortare illam dicitur, saltem quoad modum operandi. Tertium est lumen interius, siue sit ipsa vis potentia, siue habitus superadditus. Hoc tertio modo Angelus non illuminat physicè tradendo lumen, vel naturale quod est potentia, vel habituale quod gratia, ut dicit D. Thomas hic ad 2. Secundo, & tertio modo potest Angelus illuminare: homo autem solum tertio modo, ita proponendo obiectum, quod non confortet lumen intellectuale, sicut lux Solis confortat lumen oculorum. Angelus autem per propositionem obiecti vtrumque facit, & speciem disponit, & virtutem intellectuam in modo operandi confortat, sed extrinseca propositione luminis seu obiecti illuminati, non intrinseca influentia.

9 Quod si quæras, quod producat Angelus superior illuminans in tali illuminatione, aut quomodo sit principale agens in illuminando si nihil recipit passum ab ipso, scilicet intellectus inferior: Si enim per illam illuminationem Angelus superior solum tradit instrumenta quibus Angelus inferior utatur ad perfectiorem cognitionem, sequitur quod principale agens in tali illuminatione erit Angelus inferior, qui producit effectiuè intellectionem illam magis perfectam, & illuminatam proposito medio superioris Angeli illuminantis, sicut in curatione infirmi principalis operatur natura, quam ars quæ præbet medicinam. Denique quomodo potest excitari Angelus inferior ad aliquid quod antea ignorabat, nisi per productionem alicuius speciei, vel luminis?

Respondetur per illuminationem Angeli superioris non produci aliquid physicè ab ipso in intellectu inferioris, sed solum in suo proprio intellectu in quo producit conceptus ordinatus, & directus ad inferiorem, qui obiectiuè non physicè influit in intellectum inferiorem, non solum perfectiorem representationem, sed etiam efficaciorum modum operandi, taliter quod trahat ipsum, & eleuet ad altioremodum operandi. Neque ex hoc sequitur quod Angelus inferior sit principale agens in illuminando, licet sit principale, & physicum agens in eliciendo intellectionem suam, sicut natura est principale agens in reparanda sanitate: sed tamen in adiuuanda natura, quod propriè est curare, principalis se habet ars medicina: sic in adiuuando intellectum inferiorem principalis se habet Angelus illuminans, quia illuminatio supponit pro ipsa adiutione non pro elicientia intellectionis Angeli adiuti. Et ad hoc adiutorium passiuè se habet intellectus inferior, superior verò Angelus qui illuminat, actiuè se habet, non efficienter, & physicè

physicè influendo intra intellectum, sed obiecti-
uè, id est illuminando, & proponendo obiecta, vt
explicatum est. Quòd verò dicitur de excitatione
satis dictum est *preced. art.* quomodo fiat ista exci-
tatio sine physica impressione speciei in intellectu
alterius.

Materia circa quam fiat illuminatio.

10 Dico secundò : materia de qua illuminantur
Angeli potest esse in his quæ pertinent ad ordi-
nem naturæ, gratiæ, & gloriæ : frequentius tamen
illuminatio fit de mysteriis supernaturalibus per
revelationes factas extra verbum. Docet hanc
conclusionem S. Thom. *in hac quest. 106. artic. 1.*
ad 2. dicens, quòd *Angelus illuminat alium ma-*
nifestando ei veritatem de his, quæ pertinent ad sta-
tum naturæ, gratiæ, & gloriæ. Et *in 2. dist. 9. quest. 1.*
artic. 7. ad 4. inquit, quòd *in pura natura daretur*
illuminatio, & perfectio, licet non completè. Secun-
dam verò partem conclusionis docet D. Thomas
eadem *quest. 106. artic. 1. ad 1.* vbi inquit, quòd
Superior Angelus plura in Deo de rationibus diui-
norum operum cognoscit quam inferior, & de his eum
illuminat.

11 Duo tamen oportet explicare circa hanc con-
clusionem.

Primum quomodo in naturalibus possit dari il-
luminatio, siquidem quilibet Angelus compre-
hendit omnes res naturales à principio : ergo non
potest crescere in illuminationes neque illuminari
circa illa. Vnde S. Thomas *infra quest. 109. art. 3.*
ad 2. inquit, quòd *secundum ea quæ pertinent ad*
naturalem cognitionem non est necessaria manifesta-
tio veritatis, neque in Angelis, neque in Dæmoni-
bus, quia hæc omnia cognouerunt à principio.

Secundum est, quia ea quæ Angelus videt in
Verbo cognoscit per visionem beatam. In hac au-
tem non potest Angelus inferior proficere, & il-
luminari, quia est immutabilis illa visio : ergo
oportet quòd extra verbum illuminetur. Ex hoc
autem sequitur duplex inconueniens.

Primum, quia Angelus inferior cognoscit per
suam scientiam infusam gratiam alterius Angeli,
& visionem beatam illius : ergo cognoscit omnia
ad quæ talis visio se extendit, sicut cognita vir-
tute aliqua vel potentia cognoscit omnia ad quæ
talis virtus se extendit : ergo non est necesse illu-
minari Angelum inferiorem de his, ad quæ se
extendit scientia beata superioris Angeli.

Alterum inconueniens est, quia oportebit An-
gelo inferiori infundi speciem supernaturalem
repræsentantem clarè rem ipsam supernaturalem,
aliàs si solum videt conceptum Angeli superioris
illuminantis, sequitur quòd Angelus inferior so-
lùm cognoscat rem illam in fide, & auctoritate
dicentis, non clarè, & in se. Si verò illi infundit-
ur species supernaturalis clara, non indiget illu-
minatione superioris cum totum sibi repræsentetur
in specie.

12 Ad primum responderetur quòd in ordine natu-
ræ comprehendit quilibet Angelus omnes quiddi-
tates rerum existentes secundum quod dependent
à causis naturalibus, præsertim si sint inferiores
ipsi Angelo. De his autem quæ pendent à causis
putè contingentibus, etiam in statu naturali, vel
ex aliquo speciali Dei beneficio fiunt, aut ab An-
gelis superioribus administrantur, etiam si purè na-
turalia sint, non plenè comprehendunt Angeli in-
feriores ; & de his possunt illuminari à superio-
ribus vt admittit D. Thomas *dist. illa 9 citata.* Cir-
ca cognitionem verò naturalem priori modo
Ioan. à S. Thom. in 1. part. D. Th. Tomus alter.

sumptam, id est de quidditatibus rerum, & de exi-
stentibus in hoc vniuerso secundum dependen-
tiam à causis naturalibus inferioribus ; non illumi-
nantur Angeli ; & sic loquitur *in q. 109. cit.*

Ad secundum responderetur quòd in ipsa visio-
ne beata non potest fieri illuminatio ab aliqua
creatura, quia illa visio non potest crescere cum sit
finis vltimus immutabilis, & æternus, sed de his
quæ videntur in Deo, & quorum rationes Ange-
lus cognoscit in ipso potest illuminare Angelum,
qui illas non videt, vt S. Thom. docet *in hac q. 106.*
artic. 1. ad 1. Ad hoc autem necesse est, quòd
Angelus videns Deum formet species aliquas ex-
tra visionem beatam, vel potius infundantur sibi
per quas in proprio genere cognoscit, & extra Ver-
bum creaturas illas, seu rationes, quas in ipso Ver-
bo per visionem beatam cognoscebat : quas spe-
cies relictas ex visione Dei agnoscit S. Thom. *su-*
pra quest. 12. art. 9. ad 2. & 2. quest. 275. art. 4. ad
3. & necesse est eas admittere, tum quia non pos-
sent beati communicare ea quæ vident in Verbo,
nisi per cognitionem extra Verbum, quia in ipsa
visione beata non possunt magis aut minus co-
gnoscere, quia illa visio non admittit mutationem :
tum quia Paulus qui in sententia D. Thomæ vidit
Diuinam essentiam, postea recordabatur se audiisse
arcana verba, quæ non licet homini loqui, quòd
sine speciebus extra Verbum esse non poterat.
Quare per istas species, & per istam cognitionem
quam habent Angeli extra Verbum illuminant
alios de his quæ in verbo cognoscunt.

Ad inconuenientia autem quæ inferuntur con-
tra hoc dicitur.

Ad primum, quòd vnus Angelus cognoscit vi-
sionem beatificam alterius præsertim superioris es-
sentialiter, & quidditatiuè, non tamen est necesse
quòd attingat comprehensiuè quoad omnia, &
singula ad quæ se extendit, sed sufficit quòd co-
gnoscat visionem illam esse superiorem suam, &
ad plura se extendere, non tamen oportet quòd
cognoscat quantum, & ad quæ se extendat in per-
ticulari.

Et ratio huius est, quia de rebus supernaturali-
bus non est debitum Angelo inferiori quòd com-
prehendat ea, quæ pertinent ad superiores, vel
etiam ad alios Angelos, cum etiam naturas supe-
riorum probabile sit quòd non comprehendat.
Est autem certum quòd nullum ita comprehen-
dant, quòd cogitationes cordis in eo vident : ergo
multò minùs vident in particulari quid attingat
visio beata alterius, cum in ea etiam secreta pro-
prij cordis vnusquisque attingat. Et sic negamus
quòd comprehensiuè in particulari attingat vnus
Angelus visionem beatam alterius, quæ multò
secretiores res attingit, quàm cogitationes cor-
dis.

Ad secundum inconueniens P. Suarez *lib. 6. de* 14
Angelis cap. 14. n. 24. putat quòd quando Angelus
superior illuminat inferiorem, solum illi ostendit
veritatem in vi testificationis eidentis. Sed hoc
tenendum non est, quia testificatio illa etiam si sit
euidens in ipsa ratione testificationis compatitur
cum fide de ipsa re, nec demonstrat illam quiddita-
tiuè, sed solum quoad *an est*, vt pote in auctori-
tate dicentis. Sed dicendum est quòd Angelus in-
ferior etiam habet species de rebus illis supernatu-
ralibus extra Verbum sibi infusas, aut ex vi ip-
sius visionis relictas. Sed ramen ista species in in-
ferioribus Angelis sunt minus perfectæ, quàm in
superioribus : ideoque non tot veritates demon-
strant, vel non cum tanta determinatione, & di-
stinctione sicut species superiorum ; & ideo ista

confusio, & indistinctio debet determinari per illuminationem Angeli superioris, ut D. Thomas loquitur in 2. dist. 9. quæst. 1. art. 2. ad 2. Nec est inconueniens, quod etiam in supernaturalibus species, & lumen possit à superiori confortari per propositionem medijs, sed non physicè infundi.

Ad quos pertineat illuminare.

15 Dico vltimò; Angeli inferiores non illuminant superiores, neque Dæmones, etiam si sint superiores, illuminant aliquos.

Prima pars asseritur à D. Tho. q. 106. art. 3.

Secunda verò, q. 109. art. 3.

Ratio primæ partis est, quia licet inferiores possint loqui superioribus, & illis manifestare conceptus, qui naturaliter sunt ignoti, non tamen id faciunt per modum docendi, id est proportionando illis species, & confortando lumen, & distinctius rem proponendo, seu perfectius, quia inferiores sunt, & luminis imperfectioris, cum tamen hoc requiratur ad illuminationem, ut ostensum est.

Ratio secundæ partis est, quia licet aliqui Dæmones clarius percipiant veritatem quàm inferiores, non tamen illam ordinant sub Deo, à quo est omnis lux, sed ad suam nequitiam retorquent; &

ita non illuminant, sed obtenebrant. Vnde hoc est certissimum signum spiritus mali, si quando loquitur homini relinquit illum in aliqua confusione, & non ordinatam ad Deum.

Et aduerte, quod illuminationes Angelorum 16 non est necesse, quod semper descendant ad inferiores per omnes intermedios, cum constet posse vnum Angelum simul multis loqui, & si superior sit eos illuminare, & non vnum mediante alio, quia immediatè omnibus loquitur. Sed tamen si aliquando ex dispensatione Dei manifestant Angeli superiores Angelo infimo, quod non aliis intermedijs, ille infimus non poterit illuminare superiores intermedios de illâ veritate, quia non potest respectu superiorum modo magisteriali, & docendo veritatem manifestare, sed solum simplici locutione proponendo: si enim Deus velit, quod talis Angelus intermedius illam veritatem sciat, etiam providebit, ut à superiori Angelo illuminetur, & non ab inferiori. Vnde nunquam datur casus quod ab inferiori illuminetur superior, ut dicit S. Thom. in hac quæst. 106. art. 3. licet aliquando reueletur aliquid inferiori in secreto, quod non intermedio.

Et hæc sufficiant pro tota ista materia de Angelis ad laudem, & gloriam Saluatoris nostri Iesu Christi, Beatissimæ Virginis, & Beati Thomæ.





INDEX

HVIVS SECVNDI TOMI.

Primus numerus, indicat paginam, secundus, sectionem, vel numerum, vel columnam. Qualibet enim Pagina duabus constat columnis. Vbi ponitur n. ibi est nota numeri, vel sectionis. Vbi autem ponitur ly (col.) indicium est columna.



A

BAYLARDVS erravit contra S. Trinitatis mysterium, iuxta depositionem S. Bernardi, pag. 8. 19. Eius discipulus fuit Arnoldus de Brixia. ibid. v. Omnipotentia.

Ablatiuus. Hæc propositio, Pater, & Filius se diligunt Spiritu Sancto, quo sensu vera dici possit. 186. Hæc propositio, Pater intelligit Verbo, & plures ei similes vix ullam continent veritatem. Ibid. n. 1. & 2. Non enim verificatur propositio, in quâ prædicatum stat in sensu Ablatiui, nisi tribus positis conditionibus. 186. 5.

Absentes à se inuicem Angeli sese amare possunt quoad communicationem intentionalem, & quantum ad ea, quæ ad ipsam consequuntur, non autem quoad alias actiones, quæ ex motu locali pendere possunt, & in quibus Angeli etiam communicare possunt. 229. n. 5. v. Amor.

Absolutio, quæ datur in intrinseco separationis animæ à corpore, est inualida. 482. col. 2.

Absolutum. De Absoluto, & Relatiuo. 36. 13.

Abstracta. Forma abstracta etiam si sit subsistens, est tamen vna. p. 344. n. 12. Abstracta, & concreta in Diuinis non sunt diuersa ex parte rei significatæ, sed bene ex parte modi significandi. 141. 2. v. Notiones.

Abusus. Angeli mali abusi sunt Dei beneficio in detrimentum suæ salutis sempiternæ, respicientes gratiam Dei, & dona supernaturalia. 440. 31.

Accidens. Angeli componuntur ex subiecto, & accidente. 286. col. 2. fin. & 293. 20. Accidens non est per se essendi principium, nec immediatum, sed essendi secundum quid, & in alio 352. 36. Deus non est capax accidentium. 118. 11. v. Angeli. fin. v. Species intelligibilis.

Actio est actualitas vltima virtutis, sicut esse est actualitas vltima essentia. 341. 3. Actiones ad intra dantur in nobis, & in Deo. 38. 19. Actiones significatæ per modum actionis in diuinis non possunt prædicari in abstracto, sed in concreto de relationibus diuinis. Vnde ista propositio est falsa, Paternitas generat; non autem ista, Pater generat. 142. 5.

Actualitas. v. Actio. Quod non est actus purus, non est sua actualitas, vltima supple. 341. col. 1. & c. Actualitas vltima repugnat potentialitati ad vltiorem actum. 342. 6. & 343. 8. Actualitas est multiplex. 342. 10. v. Quo, & Quod.

Actus. Forma constitutiva essentia, est actus primus. 342. 7. Actualitas vltima, est actus secundus. 343. 8. Actus immanentes non sunt productui suorum obiectorum, sed bene effectuum, quos intra se producant. 72. 10. Actus Moralis. v. Regula. v. Deliberatum. v. Libertas. Actus meritorius. v. Mereri. Actus, & potentia an sint semper in eodem genere. 287. col. 2. fin.

Adiectiuè prædicari. v. Attributa Dei.

Æqualitas Filij cum Patre vnde probetur. pag. 15. 17. Illa æqualitas fundatur in identitate naturæ. 37. 10. Est enim omnimoda. Ibid. & p. 214. 13. & c. Quomodo æqualitas inter personas diuinas sit rationis, & non realis. 215. 16. & c. Obiectiones Scoti diluuntur. 216. 18. col. 1. & c. Filius quidem est realiter æqualis Patri, secundum conuenientiam, & communicationem ad æquata formæ, non autem secundum realem respicientiam. 216. col. 2. An Diabolus appetierit veram Dei æqualitatem, an eius similitudinem tantum? 463. col. 2. Initio, & n. 18. & 19. & p. 464. 20. & c. v. Omnipotentia, v. Similitudo Æternitas Filij qua Deus est. vnde probetur. p. 22. 11.

Æuum. v. Tempus: licet enim tempus sit mensura durationis rerum corruptibilium, & æuum sit mensura durationis Angelorum, & animarum (Æuo enim mensurantur) ibi tamen agitur de tempore Angelico secundum rationem.

Alarcon. v. Superiores Angeli

Aliud dicit alietatem essentia, alius autem connotat alietatem personæ. Vnde ista vera est, Pater est alius à Filio, & Filius est alius à Patre, & Spiritus S. est alius à Patre, & Filio. Ista autem est falsa, Pater est aliud à Filio, & sic de cæteris personis. 141. 9.

Alligari dicuntur Dæmones Igni Infernali, & quoad detentionem localem, & quoad impedimentum suarum potentiarum, suarumque operationum. 500. 13. & c. & 501. 16. & c.

Alogi, hæretici, errabant, circa Verbum Incarnatum, seu quod idem est circa Christum Dominum eum esse Deum negantes. p. 3. n. 3. & 4.

Amor. v. Absentes. Amorem potest esse inter absentes, licet magis præsentiam expetat. Pro quo v. Præsentia realis.

Amor sui, est principium cuiuscumque peccati, etiam odij Dei. 462. col. 2. fin. & 463. Init.

Spiritus Sanctus non procedit ex amore libero creaturarum. 161. 33. Angeli sunt incorporei, neque corpori vnibiles, sicut anima nostra. 275. 276. & c. Quo sensu Angeli sint immateriales. 275. Et quo sensu simplices substantia. Ibid. & pag. 281. n. 17. & 19. Angeli sunt in magno numero. 275. Differunt

EE e 4 autem

Index rerum memorabilium,

autem inter se specie, & non numero, numerositate suppositi, duntaxat, quamvis differant numero numerositate essentia. pag. 275. Angeli sunt incorruptibiles ab intrinseco, licet corruptibiles, & annihilabiles, respectu Dei omnipotentis, tanquam ab extrinseco. Ibi. Motus continuus, & discretus potest conuenire Angelis. 223. 8. & c. V. Partes. Quid de Angelis per certam consequentiam colligatur ex Scriptura. p. 277. n. 3. Angeli sub sunt Deo homini Christo Domino, & Beatæ Virgini, non ratione naturæ, sed ratione gratiæ, & gloriæ. p. 279. n. 10. v. Maria. v. Creatio. v. Velocitas. v. Gradus. v. Lex. v. Simplicitas. v. Spiritualitas. Angeli sunt vnus, & eiusdem naturæ genericæ, non specificæ. 295. 28. & 29. Sunt etiam eiusdem naturæ cum hominibus secundum ordinem, quem habent ad beatitudinem, non autem secundum esse naturæ. 296. col. 1. Init. v. Multiplicatio. v. Multitudo. & c. v. Instans. v. Iniustitia. v. Libertas. v. Locus. Mouetur Angelus intrinsece in suâ substantiâ. 301. 3. Contra sentit Durandus, qui dicit Angelum esse præsentem omni corpori, non quidem per suam substantiam, vel operationem, sed per ordinem ad illa. 302. 5. Prius est Angelus in loco, quam in eo operetur, præsentia ordinis, quæ est præsentia in actu primo, non autem præsentia completa, & applicata, quæ est in actu secundo. 310. 1. col. 2. Initio. An possit Angelus operari in puncto, & in re indiuisibili. 316. 7. & 317. 8. v. Vacuum. v. Locus. Angelus in pluribus locis adæquatis esse nequit naturaliter. 317. n. 9. & n. 11. Sed nec supernaturaliter. Ibid. n. 10. Soluuntur quatuor argumenta contraria huic sententiæ. 318. 14. & c. v. Comprehendere. v. Futura. v. Præterita. v. Tempus. v. Corpus. v. Creatio. v. Intellectualitas. Angelus per suam substantiam non potest esse species expressa, sicut est impressa. 358. 17.

Accidentia Angeli alia sunt naturalia, alia supernaturalia. Pro primis cognoscendis non eget specie superaddita, sed bene pro secundis. 359. 18. Habitus autem supernaturales cognoscit per causam suam, id est, per gratiam. 360. 21. Alia autem quæ sunt extra, cognoscit per species superadditas. 361. 3. Illæ autem species superadditæ, sunt à Deo infusæ, non autem ab ipsis acquisitæ. Sunt verò infusæ à Deo, connaturaliter, non supernaturaliter. 363. 7. & 365. 13. & c. & 371. 29. ante finem. v. Locutio. v. Illuminatio. v. Velocitas. v. Species. v. Compositio. v. Simplicitas. v. Cognitio. v. anima. v. Indiuuatio.

Annihilatio. Deus potest annihilare Angelos. pag. 297. n. 2. Non autem annihilabit. Nihil enim ex rebus creatis à Deo annihilatur. 297. 5. Quod si Deus annihilaret Angelos, nullam violentiam eis in hoc inferret, respectu potentia obedientialis ipsorum. 299. col. 2. Annihilatio non est proprie mutatio, sed defectio. 252. 24. col. 2. fi. Ex annihilabilitate corporis celestis non infertur eius deficientia ex parte materiæ, & per modum corruptionis. 432. 9. col. 1. fin.

Appetibile. Vtrum impossibile sit appetibile. v. Impossibile.

Arnoldus de Brixiâ. v. Trinitas. v. etiam Abaylardus.

Arrij hæresis, hæresi Sabellianæ per extremum opposita est: Arrius enim ex distinctione personarum intulit distinctionem essentiarum. Sabellius autem ex vnione essentia intulit vnitatem personæ. pag. 2. num. 1. & pag. 3. num. 5. Sanctus Augustinus Dionysium quemdam Arrij fontem vocat p. 3. n. 5. v. Origenes. Contra Arrium scripsere multi. pag. 4. 6. Arrij discipuli non idem planè senserunt, quod Arrius, nunquam tamen consubstantialitatem filij cum Patre admiserunt, p. 4. 7. & c. Quidam tamen initio cum eo idem planè senserunt. p. 4. n. 7. Prima Arrij moderatio, quando contigit. p. 4. n. 8. Quando secunda. p. 5. 9. & c.

Quando tertia. p. 6. n. 12. & c.

Assimilare Deo. v. Gradus. v. Spiritualitas.

Attributa Dei absoluta multiplicari non possunt substantiue. pag. 101. n. 1. pag. 109. num. 29. & c. Sicut Diuinitas multiplicari nequit substantiue. p. 101. n. 1. Adiectiue autem multiplicantur ad solam multiplicationem suppositorum. Ibid. Attributum potentia non est attributum scientia. pag. 140. n. 40. & 42. Attributorum applicationes in Diuinis v. Prædicationes.

Auersio à Deo est in omni peccato p. 462. n. 16. Sed est consequens in aliis peccatis à superbia. Ibid. col. 2. ante finem.

Auxilium Dei. Ad rationem auxilij sufficientis aliquid concurrat ex parte cognitionis quasi speculatiua circa bonum supernaturale, scilicet cognitio arida, sufficiens ad efformandum dictamen indifferens, & c. pag. 485. col. 1. & pag. 109. num. 29. & c. De auxilio Dei generali, seu debito, & de speciali, seu non debito. p. 452. n. 35. Angelus malus consequi voluit beatitudinem per virtutem suæ naturæ, non tamen sine Deo in naturam operante, sed bene sine Deo auxilium gratiæ conferente. pag. 468. col. 2. fi. & pag. 469. Initio columnæ primæ. Actus diuersi auxilij diuini, quorum vnus se habet ex consequenti ad alium, pertinent ad idem instans p. 378. n. 21. v. Homo. & c. v. Nox.

B

Beati, redduntur impeccabiles. p. 481. n. 27. col. 2. ante medium pagina. Necessariò amant Deum, & per consequens non peccant. pag. 431. n. 4. & pag. 432. n. 10. Confirmati enim in gratiâ, & Beati redduntur impeccabiles, ex accidenti, non ex natura suâ, pag. 432. n. 10. Remanent enim peccabiles ab intrinseco, & ex principiis naturæ. Ibid. Ad hoc ergo, vt aliquis sit impeccabilis per naturam, requiritur perfectio infinita. Requiritur enim quòd habeat esse indefectibile, & incommutabile in essendo, vt sit etiam indefectibilis in operando. Ibid. Modus enim operandi sequitur modum essendi. pag. 432. num. 9. col. 2. Initio. est tantum variatio accidentalis, non autem substantialis in actu, per quem Angeli Beati meruerunt beatitudinem, in primo perseverando. p. 476. num. 17. Quidam tamen secus sentiunt. 476. num. 16.

Beatitudo. v. Fides. v. Prescientia. v. Precariò. v. Error. Beatitudo naturalis, fuit materia superbiæ Diaboli. p. 469. n. 40. Contempsit Angelus malus beatitudinem supernaturalem, & quare? 467. n. 30. & 32. Errauitne Angelus, sicut Pelagius, circa beatitudinem? v. Error. v. Hæresis. 467. n. 32. Id semper negat S. Thomas, quidquid dicant Suarez, & Alarcon. 469. col. 1. Init. & num. 37. & 38. & pag. 497. 36.

Abusus est Dæmon Beneficio Dei eum eleuantis ad finem supernaturalem, dum ei sese subiicere recusauit. 440. 31.

Bonitas est duplex, vna absoluta, altera se habens relatiue. 101. 2. Non est inconueniens, quòd alicui enti sub aliquâ consideratione, vel formalitate non conueniat bonitas, licet in re conueniat. 105. 14. Bonitas in relationibus Diuinis, non multiplicatur etiam relatiue. p. 111. n. 36.

Bonum. v. Dæmon. Triplex est bonum, scilicet honestum, vtile, & iucundum. 348. 25. Quòd si vnus, & idem bonum possideat hæc tria, tunc illæ differentia, & species boni sunt solum respectiua. Si autem vnum, & idem non habeat has circumstantias, tunc illæ differentia erunt entitatiua, & absoluta. Ibid.

Natura

In hoc tertio tomo contentarum.

Natura studet breuitati, & paucitati, nisi propter bonum speciei 293. 26. Principium prolixum esse decet, secundum Platonis præcepta, quatenus ex Principiis benè discussis facilius sit ad reliqua aditus. p. 2. post medium.

C

Cæcitas Dæmonum vnde proveniat. 488. 13. v. Obsecratio. v. Nox.

Carcer Dæmonum est talis, quod ei alligantur, & quoad detentionem localem, & quoad detentionem moralem operationum suarum liberarum impeditur. p. 500. 13. v. Alligari. v. Ligari.

Causa. Vnus numero effectus non potest prodire à duabus causis totalibus creatis, 321. 30.

Cerinthus Christum negauit Deum. v. Ebion. v. Christus.

Christus est minor Angelis viâ naturæ, non autem viâ gratiæ, & gloriæ, 279. 10.

Christus. v. Incarnatio. v. Ebion. v. Filius Dei.

Christus est verè Deus, quidquid dicat Cerinthus, pag. 14. n. 14 & c. v. Consubstantialitas. v. Aequalitas. v. Aternitas. Christus Dominus ab initio, seu in primo instanti suæ conceptionis meruit. 442. 6. & fuit Beatus, & comprehensor. 443. col. 1. Init. De Christo malè sensit Seruetus 9. 21. v. Complutenses. v. Subiectio.

Circuminceffio, est reciproca, & mutua existentia vnius personæ diuinæ in aliâ, 211. 1. & c.

Coexistentia est dispar ratio inter coexistentiam Angeli ad partes temporis, & ad partes spatij. 330. col. 2. ante medium.

Cogitationes cordis cur Angelus non cognoscat naturaliter, cum sint ens creatum, naturale, & finitum 408. 1. 409. 2. & c. v. Scrutari corda. v. Concurfus. Quomodo vnus Angelus cogitationem possit cognoscere. 512. 17. & c. & p. 513. 514. 515.

Cognitio. Triplex est genus cognitionis. Prima respicit existentiam. Secunda quidditatem. Tertia totalitatem obiecti. 388. 2. Cognitio sumitur dupliciter. 52. 16. v. Notitia. Cognitio duplex, scilicet abstractiua & intuitiua, 421. 15.

Cognitio. Sui vtrum Angelus se cognoscat, & quomodo se cognoscat. 354. 6. v. Reflexio sui, & c.

Cognitio comprehensiuæ est in Angelis respectu rerum omnium naturalium, non autem respectu entis supernaturalis, & diuini, & moralis, seu liberi. Ens enim morale, seu liberum (scilicet cogitationes cordis) & ens supernaturale & diuinum non comprehendunt. 389. 5. v. Futura. Ex hoc quod substantia aliqua est intellectualis, est comprehensiuæ, id est assecutiua totius entis, quod subest suæ cognitioni. 394. 23. In cognitione comprehensiuâ alius est modus ex parte cognoscentis, & alius ex parte cognitæ. 388. 3. Potest Angelus non comprehensiuè procedere. 437. 24. Quidam tenent Angelum inferiorem comprehendere superiorem. Quidam autem id negant. Quidam mediam viam sequuntur. 390. 9. & 10. Angelus, & se videt, & se comprehendit naturaliter, non autem Deum. 388. & 389. num. 4. 5. 6. & c. & 390. num. 8.

Communicabilitas. Vniuersale dicit communicabilitatem. Singulare autem dicit incommunicabilitatem. 116. n. 1. & 3. Individuum, seu persona triplicem excludit communicabilitatem, primò vniuersalis ad inferiora, secundò partis ad totum, tertio assumptibilis, seu terminabilis vltiori termino ad aliquid dignius. 117. 4. Essentia diuina secundum se est communicabilis tribus personis. 128. 21. Dupliciter potest aliqua forma, seu esse communicari. Vno modo ob indigentiam sui. Alio modo ex abundantia sui. 129. 23. Non datur intra Deum communicabilitas per com-

positionem, aut vnionem vnius cum alio, sed per summam simplicitatem, & idemnitatem, 36. 11. Pater æternus communicat totam essentiam suo Filio, sed non totaliter. Totam enim eam communicat, quantum ad quid, non autem totam quantum ad aliquid. 101. col. 1. Init. Comunicatur esse à se in diuinis. 25. 23.

Complutenses. Arguuntur Complutenses temeritatis dicentes Christum in suâ sanctificatione dici filium Dei naturalem respectu totius Trinitatis, & non solius personæ Patris, per hoc solum quod sanctificatur, & c. 82. 36. & c. 83. 39.

Componere. Vtrum Angeli componantur, & quod componuntur non physice, sed metaphysice. 346. 18. fi & p. 286. col. 1. fi. v. Simplicitas. Componere, & diuidere non spectat ad Angelum. 424. 6. & c. Quid sit componere. 425. 30. Compositio, vt est secunda mentis operatio, est coaptatio subiecti ad prædicatum. Ibi. Compositum fit ex partibus, & tamen non desinit creari. 239. 1. Fit enim ex partibus constituentibus, non fit autem ex eis, tanquam ex subiecto; à quo educatur aliquid, aut tanquam ex termino à quo, qui relinquatur. Ibi. v. Diuisio. v. Productio. fi.

Comprehendere, seu comprehensiuè cognoscere. v. Cognitio.

Comprehensor. v. Beati. v. Christus.

Comproduci. v. Patres.

Conceptio. Christus Dominus in primo instanti conceptionis suæ meruit. 442. 6. Et fuit beatus, & comprehensor. Ibi.

Conceptus formalis. Esse de conceptu formali alterius quid sit 94. 13. ante medium.

Concreta. v. Abstracta.

Concursum negat Deus Angelo, quo cognoscat cordis secreta. 410. 6.

Confirmatio in bono quid p. 483. art. 2. Init. Est à gratiâ Dei specialissimâ. 494. n. 32.

Consubstantialitas. Vnitas naturæ, & consubstantialitas in diuinis probatur contra Arrianos. pag. 13. n. 12. & c. 44. 34. 59. 1. 64. 17. 65. 20. 66. 21. & 22. Eam primi negarunt Platonici inter Ethnicos, & Alogi, alique, vt Arius, & Origenistæ, inter Christianos. p. 3. 5. Consubstantialitas Spiritus Sancti cum Patre, & Filio. v. Spiritus Sanctus. Voluntas diuina, vt diuina, non habet quod processio amoris sit substantialis, vel consubstantialis suo principio formali, sed solum suo principio actiuo, seu operatiuo, videlicet ex eo quod actus ille immanens est, & fit processio secundum actum immanentem in tali principio, quod non est capax accidentis, nec alterius substantiæ. 68. 27. col. 1. fi. & col. 2. Init.

Contemptus. Angeli mali contemptus circa bona supernaturalia, videlicet circa gratiam, & gloriam v. Beatitudo. v. Beneficio Dei abuti. v. Abusus.

Contingentia. Quomodo Angelus iudicet firmiter, & immobiliter circa illa. 491. 24.

Contradictoria. Duo contradictoria non possunt de re eadem simul verificari p. 26. n. 28. An verificentur de re eadem simul, & semel in diuinis. Ibi. & pag. 27. col. 1. & 2. n. 29. Hoc axioma malè intellectum, Gilbertum, aliosque pepulit in errores 90. 20. Quomodo Beatus videat in Deo non esse contradictoria, quæ viatores esse contradictoria putant. 91. 23.

Conseruatio. Ex gratiâ creationis, est conseruatio rei existentis, non autem ex gratiâ naturæ eius superadditâ. 298. n. 8. & 9. & p. 299. n. 10.

Conuersio. Conuertendo se ad se peccauit Angelus malus, superbiendo. 462. 16. De Conuersione Eucharisticâ. v. Eucharistia. Conuersio peccatoris est opus Dei 450. 28.

Corpus de extremo in extremum moueri nequit, impertransito medio, sed benè id potest Angelus. 330. col. 2. n. 21.

Creatio

Index rerum memorabilium,

Creatio. v. Compositum. Angeli creati sunt ante hoc vniuersum, quantum ad tempus suæ creationis, neque extrâ hoc vniuersum, sed in cælo, quantum ad locum, pag. 279. n. 11. Deus enim creauit omnia simul. p. 280. n. 11. &c. Quid fides doceat circa creationem, & articulum Dei creatoris. 239. 1. Variè erratum est circa hoc. 239. 2. &c. Quid fides in hac parte probet, quid ratio. 240. 5. & 6. &c. Soluuntur Obiectiones contrâ creationem rerum ex nihilo. 243. 10. v. Elohim Creatio ex parte Dei quid. 245. 1. & 2. & 246. 4. &c. Ex parte creaturarû quid. ib. 3. & p. 248. 12. &c. & 253. 25. Creatio influit totam entitatē, nihil præsupponendo, sed totum faciendo, in suo termino, & ex hoc dicitur vniuersalissimus influxus, &c. 250. 17. Implicat creaturam vi natiuâ creare. 261. 1. & 2. &c. Est hoc contrâ Durandum. Ibi. n. 2. Implicat dari instrumentum creationis physicum, contrâ Scotum. 268. 17. &c. Quod autem id sit contâ Scotum, patet p. 261. 2. Generatio longè differt à creatione. 250. 18. Relatio consecuta ad creationem, est accidens, & prædicamentalis, non autem transcendentalis, vt dicit Scotus, & Vasquez. 251. 18. Creatio non est mutatio realis, nec de prædicamento actionis. 252. 23. Licet intelligatur ad modum mutationis. Ibi. n. 24. Malè infert Pater Vasquez ex eo, quod Sacramenta causent gratiam, quod aliquid possit esse instrumentum creandi. Supponit enim falsum, videlicet creati gratiam. Non enim creatur, sed concreatur. 256. n. 3. Creare est solius Dei. 261. 1. &c. Dicimur creati in operibus bonis, & gratia item dicitur aliquando creati, non physicè, sed moraliter. 259. num. 10. fi.

Creatura. Est differentia inter creaturas futuras, & possibiles. 160. 30. & 161. 32. Essentia diuina est æquè perfecta sine creaturis, sicut modò est, sine creaturis, inquam, se constituentibus; non autem sine creaturis, vt à se constitutis, 161. 32.

Cruciatus. Poena peccati actualis, est cruciatus perpetuus. 497. 1. fi.

Curiositas. Non fuit primum, peccatum in Angelo malo. 462. col. 2.

Cyrillus. S. Cyrillus asseruit Spiritum Sanctum à filio emitti, & procedere. Et eius epistola à quintâ, & sextâ Synodo, & ab Ephesinâ recepta fuit. pag. 163. n. 8.

Cythara Dauidica quomodo spiritum malum, à quo Saül torquebatur, compescere poterat? pag. 282. n. 21.

D

Dæmones. v. Curiositas. v. Cécitas. v. Auxilium Dei v. Fumus. Dæmones non sunt mali ex naturâ suâ, sed ex abusu suæ libertatis. 441. 1. Boni enim aliquando fuerunt, sed in bonitate suâ non permanserunt. Ibi. & p. 445. 21. & 13. 449. 24. 472. 2. &c. 475. 12. & 13. 481. 28. Per actum ergò proprium facti sunt mali. Quod in primo instanti suæ creationis non est effectum. 453. 37. Peccarunt per superbiam vsque ad cōtemptū, & odiū Dei, & ex consequenti voluerunt esse, vt Deus. 464. n. 20. &c. Esto. In speculatiuis manserint omnia integra in Dæmonibus, non tamen sic in practicis. 434. 16. & 17. & 436. 22. & 438. col. 1. Omnia peccata secundum reatum sunt in Dæmonibus, quatenus homines ad ea excitant. 436. 22. v. Inuidia. v. Obsecratio. v. Misericordia. v. Inconsideratio. v. Odium. v. Regula. Quomodo patiantur ab igne infernali, cum sint spiritus? 181. 20. 181. 21. Dæmon, & anima possunt esse simul in eodem corpore, non secundum eandem habitudinem causæ, 321. 27. v. Expulsio, &c. Dæmones ex prædictione futurorum, in id elaborarunt, vt pro Diis haberentur, 398. 6. fi. v. Fu-

tura. v. Descendere. v. Desperatio. v. Cythara. v. Ignis.

Damnatio. Dæmones in primo instanti meruerunt, in secundo demeruerunt, in tertio sunt Dammati. 482. 31. v. Poena. v. Dæmones. v. Cruciatu. v. Noctis tenebræ. v. Nox.

Dare. Beatius est dare, quam accipere. Id verum est in creaturis, non autem in diuinis. pag. 22. n. 12.

Dauid. v. Cythara Dauidica.

Defectibilitas. An rectè inferatur defectibilitas operationis, ex defectibilitate in esse. 432. num. 8. & 9.

Defectus Dictaminis solùm ex duplici capite oriri potest, aut quia regula ipsa, per quam actus dirigendus est non planè consideratur, nec applicatur secundum se ab omnia regulabilia: aut quia aliquid contrarium ipsi regulæ accipitur, vt conuenientius sibi, sed regula rationis, vel naturalis lex abominatur, vel odio habetur, vel omittitur. 435. col. 2. Init

Deformitas Dæmonum vnde proueniat. 501. 18.

Deliberatio Deliberatum. Deliberatum, & indeliberatum non variant actum intrinsecè, sed tantum extrinsecè. 478. 20. Deliberatum, & liberum differunt. 443. 7. Actio deliberata propriè, & in rigore est operatio procedens ex priori operatione. Versatur enim circa media. Et sic se mouet aliquis ex fine præconcepto. Vt autem actio sit libera, sufficit quod feratur in obiectum cum indifferentia, saltem quoad exercitium. Ibi. Non repugnat, quod primus actus sit liber, quoad exercitium, si procedat cum iudicio perfecto, licet non sit deliberatus. Ibi. de actu deliberato. v. p. 478. 20. &c.

Demonstrare Demonstratio. v. Mundus.

Dependentia. Ad dependentiam quid requiratur. 26. col. 1. ante finem.

Descendere. Licet descenderit Angelus malus ad inferiora bona, ascendit tamen per superbiam. 470. 41. fi.

Descendit Christus ad inferos, quoad animam suam eo genere motus, quo Angeli mouentur. 301. 2. v. Lymbus.

Desinere. Desitio. v. Annihilatio.

Desperatio. Desperatio in Dæmonibus supponit aliquod peccatum, quod præcesserit. Non est ergo eorum primum peccatum. 461. 14. v. Damnatio. v. Superbia.

Determinatio voluntatis. Per quid fiat. 71. 8. & 9. 72. 10. & 11. v. Voluntas. Determinatio veritatis circa propositiones in materia contingenti est petenda ex decreto diuino. 406. 36.

Deus. Dei nomen verè competit Christo. 14. n. 14. ex Matth. 22. 4. Act. 2. 34. Hebr. 1. 8. & 13. Psalm. 44. 7. & 12. &c.

Dicere. Dici. Dicere est proferre verbum, &c. 40. col. 2. fin. Dicere imperfectum est, quando speciem impressam præsupponit. 24. 21. Dici vnum de vno, quod non de alio, non arguit distinctionem, ex parte rei, sed solùm distinctionem virtualem, seu fundamentalem. 140. 43. v. Notiones.

Dictio, Theologicè, non Grammaticè tenta, intrinsecè est cognitio, quidquid secus dicat Scotus. p. 55. 15. &c.

Differre. Per eandem entitatem, quâ aliquid constituitur, differt ab aliis. 27. col. 1. & p. 29. 3. Genitum & ingenitum in diuersis naturis differunt genere, non autem in eadem naturâ, qualis est diuina. 32. 42. Deus enim generans, & Deus genitus sunt idem essentialiter, non autem personaliter. 26. col. 1. fin. v. Specie differre.

Diligere

In hoc tertio tomo contentarum.

Diligere. Vtrum Pater, & Filius diligant se Spiritu Sancto. 186. 1. &c. In statu Innocentiæ non indigebat homo dono gratiæ superadditæ naturalibus bonis, ad hoc, vt diligeret Deum super omnia, licet indigeret auxilio Dei, ad hoc eum mouentis. 440. 30. fi. Angelus diligit se principalius, & alium Angelum, sicut seipsum, naturali dilectione in quantum secum conuenit in ratione genericâ, vel specifica; in quantum autem differt à se, diligit illum, non dilectione naturali, sed electiuâ. 436. n. 21.

Discursus. An sit in Angelis. 416. 1. &c. 417. 5. 418. 7. &c. 437. 24. 489. 18.

Dispositio. Duplex est dispositio. Vna connaturalis, & alia obediens in instrumento eleuato supra se. 506. col. 2.

Distinctio. v. Gilbertus. Durandi error expeditur circa distinctionem modalem inter essentiam, & personas in Diuinis. 87. 10. Distinctio trium Diuinarum personarum, est vera, & realis, contra Sabellium. pag. 10. 2. &c. Relationes Diuinæ solâ ratione distinguuntur ab essentiâ 86. 7. Distinctio orta ex contrarietate, negatione, aut priuatione, imperfectiorem dicit. 36. 13. Relationes distinguuntur realiter in rebus creatis, tum ratione oppositionis ad correlatiuum, tum ratione limitationis. 138. 35. In Diuinis verò, solum ex primo modo. Ibi. Distinctio formalis ex naturâ rei, est Distinctio virtualis, & potest vocari distinctio rationis. 88. 16. & 89. 17. & 18. fi. Distinctio rationis ratiocinantis est sine fundamento in re, & solum se tenet ex parte modi significandi eandem rem, sicut nomina synonyma non distinguunt rem aliquam, neque extrema diuersa faciunt in conceptibus, sed conceptum de eadem re multiplicant. 89. 19. Distinctio autem rationis ratiocinata, seu fundata in obiecto ipso, & in nostrâ limitatione intelligendi, quatenus tanta eminentia nequit vno conceptu nostræ limitationis attingi; & sic conceptus diuiditur iuxta diuersas formalitates, seu rationes explicatas in illis conceptibus, licet in re sint vnum eminentialiter complectens omnes illas rationes, quæ à nobis non nisi cum ordine, & connotatione ad rationes creatas, & limitatas explicari possunt. 89. 19. Distinctio virtualis, & antecedens omnem operationem intellectus, iuxta Scotistas, an intercedat inter essentiam Dei, & Diuinas personas, vt vult Alarcon. p. 90. 21. v. Differre. v. Diuersitas.

Distraçtio à primo actu in Angelis malis peccaminosa fuit. 474. 11.

Disparata. Disparatè opponi. In disparatis relationibus possitne dari oppositio inter eas, absque eo quod vna procedat ab alia. 35. 9.

Diuersitas. Prædicatorum diuersitas in Diuinis, non postulat diuersam essentiam, sed diuersam relationem, quia illa oppositio prædicatorum est relatiua. 26. col. 1. fin. Distingui diuersitate naturæ, idem est, ac distingui penes absolutum, & relatiuum. pag. 36. n. 12.

Diuisio, vt est secunda mentis operatio est propositio negatiua. 425. 29. Compositio ergo debet esse propositio affirmatiua.

Dolor. Est duplex dolor in damnatis. 497. 1.

Dona supernaturalia, à solo Deo infunduntur. Vnde, & creati dicuntur. 255. 1. Quod debet sic intelligi, vt magis concreari, quàm creati dicantur. Ibid. & n. 2. Propriè enim non creantur, cum creatio sit tantum rerum subsistentium. Ibid. & n. 3.

Duratio, est ipsamet existentia non discontinuata. 109. 28. fin.

E

Eadem. Quæ sunt eadem vni tertio, sunt eadem

inter se. 27. 18. Quomodo id sit intelligendam. p. 28. n. 31. & 32. & p. 30. n. 37.

Ebion Christum negauit Deum. v. Incarnatio.

Effectus. Vnus numero effectus non potest exire à duabus causis adæquatis, & totalibus, creatis. p. 321. 30. & p. 323. 33.

Elohim. In principio creauit Elohim plurali numero. 244. 245. n. 15. & 16. Non sequitur ex hoc loco Scripturæ, quod alij fuerint creatores cum Deo. Isaias enim dicit, quod Deus solus creauit, & nullus alius secum. Ibid. Quodd autem verbum creandi, debeat sumi rigorosè, scilicet ex nihilo, habetur ex 2. Machabeorum 7. Ibidem.

Emanatio. De emanatione passionum. v. pag. 352. num. 39.

Error Speculatiuus non fuit primum peccatum in Angelo. 461. 33. v. Beatitudo. v. Dæmones. v. Græcorum error.

Essentia Diuina dupliciter accipi potest. 92. 4. Quomodo est, & quomodo non est de conceptu personarum? 93. 6. Essentia Diuina, secundum se, est res subsistens, sed non persona. 26. col. 1. ad 3. partem argumenti, & pag. 33. 6. Non valet hoc argumentum: Essentia Diuina nec gignit, nec gignitur, nec procedit. Sed quod nec gignit, nec gignitur, nec procedit, non est Deus. Ergo essentia Diuina non est Deus. Est enim ibi fallacia accidentis. pag. 31. n. 39. 40. Non valet etiam istud: Relatio, seu persona, est essentia. Essentia autem est communis. Ergo persona est communis. 26. col. 2. Init. v. Relatio.

Existentia. Existere. Medicina existimat non distinguit existentiam à subsistentiâ. 107. 31. Et tamen reuera distinguuntur penes suos effectus. Ibi. col. 2. Existentia est propria suppositi, seu subsistentis. 126. 15. Existentia non resultat ex propriis principiis naturæ, sed à Deo datur, & recipitur in naturâ, & ideo hæc multiplicari potest toties, quoties Deus voluerit annihilare, & reproducere eundem numero Angelum. 294. 21. fin. Existentia non multiplicatur in relationibus Diuinis. 107. 20. Existentia est esse, quo aliquid est extra nihil, & extra puram possibilitatem in actu, & sic se habet, vt vltimum in ratione actus entitatiui. Ibid. Existere in Deo non est quid contingens, &c. Ibi.

Expositorius Syllogismus. In Syllogismo expositorio meritum debet perfectè singularizari. 33. n. 47.

Expulsio Angeli per Angelum. Non arguit duos Angelos in eodem loco coexistere. 322. 32. col. 2. post medium.

Eucharistia. In Eucharistiâ quoad sumptionem considerata mittitur Filius ad sumentem. In Eucharistiâ verò quoad consecrationem mittitur Filius specialiter ad Sacramentum. 226. 17. sub specie alienâ, & sic est visibilis per aliud, non per se. Ibi. v. Præsentia realis.

F

Fides. Angeli, adhuc viatores, habuerunt fidem. 480. 26. Fides autem est impossibilis cum visione beatificâ. Ibi.

Filiatio. Datur in Deo. p. 11. n. 5.

Filius Dei. In quodam priori procedit, vt Filius; & in quodam posteriori, vt spirator. Idque secundum modum nostrum concipiendi tantum. pag. 156. n. 15. & 16. Diabolus ferre non valens gloriam Filij Dei, eam per hæreticos pro viribus, impugnat. 9. 1. Diuinitas Filij, est vera, & propria. pag. 14. n. 14. &c. non autem metaphorica, seu participata cum essendi nouitate, sicut hæretici voluerunt. p. 14. n. 13. Filius Dei, in quantum homo, est minor Patre, non autem in quantum Deus. 18. 1. &c. 22. 11. fi. v. Sapientia

Index rerum memorabilium,

tia. Quomodo dicatur Primogenitus omnis creaturæ. 19. 3. Quod dedit Patre Filio, maius omnibus est, scilicet Diuinitas ei ab ipso communicata. Hæc enim sola est omnibus rebus maior. 21. 9. Filius Dei habet esse à se, increatum, quia per has processiones communicatur illudmet esse, quod est in suo principio. 25. 23. Filius procedit, vt Verbum, idque citra vllam imperfectionem. 38. 18. &c. Durandus denegat Filio Dei propriam Verbi rationem. 52. 17. &c. Sed præsertim. n. 18. An possit Spiritus sanctus dici filius naturalis ratione sanctitatis Diuinæ, quâ Sanctus est. 82. 36. &c. p. 83. n. 38. 39. 40. v. Platonici.

Finis. In peccato superbiæ Angeli multiplex finis fuit; scilicet finis vltimus deordinatus, in quo fine includitur finis cui, id est ipsemet Angelus, & finis, qui, id est res volita sibi, tanquam materia propriæ excellentiæ. p. 466. n. 27. 28. & 29.

Forma. Aliud est formam esse subsistentem, & aliud esse subsistentem in abstractione formali. 344. 12. col. 1. f. forma est triplex, scilicet incompleta, inhærens, & subsistens. Forma autem intellectualis subsistens est persona p. 25. n. 25. v. Abstracta. v. Ordo. v. Pluralitas. v. Persona. fin.

Fumus iecoris Piscis, de quo Tob. 6. Quomodo fugauit Dæmonem? p. 282. n. 21.

Futura. Tria sunt genera futurorum. Primum est eorum, quæ euentura sunt necessariò. Secundum est eorum, quæ vt plurimum eueniunt per causas naturales impedibiles rarò autem impeditas. Tertium est eorum, quæ omnino contingenter eueniunt. 396. 2. Est duplex modus cognoscendi ista futura, scilicet vt in seipsis, vel in virtute causarum; à quibus procedet eorum existentia. Ibi. n. 3. Ea in seipsis non potest cognoscere Angelus quoad existentiam, & durationem. Ibi. & pag. 406. n. 24. Sed videt in suâ causâ futura quidē necessaria, certò, & euidenter, Contingentia autem quæ vt plurimum eueniunt, in suâ causâ proximâ, coniecturaliter, non euidenter, & certò. 397. num. 5. Certò enim scire futura est signum certissimum Diuinitatis. Ibi. n. 6. Angeli ergò futura (merè contingentia) nisi ex Diuinâ reuelatione cognoscere non possunt, certò, & euidenter. Ibi Est valde difficile reddere rationem, cur ea certò non cognoscant, cum antequam fiant, eorum habeant speciem. 397. 6. Init. & 398. 7. Ratio tamen S. Tho. est omnium optima. 401. 17. Aliæ enim, quas reddunt alij, vel sunt futes, vel valde claudicantes. 399. 12. 400. n. 13. 14. 15. & 16. Species Angelorum non repræsentant rem aliquam, nisi prout pertinet ad hoc vniuersum, & participat in eo naturam, & esse ab Ideis Diuinis. Et hæc est ratio D. Thomæ, cur Angeli non cognoscant futura merè contingentia. 401. 17. & 18. Quando dicit S. Tho. quod res non existentes non habent naturam, per quam assimilentur speciebus Angelicis, non loquitur ibi de solâ similitudine relatiuâ, quæ fundatur in conuenientiâ extremorum, sed de assimilatione completiuâ, & determinatiua specierum ad ista indiuidua. 408. 41. v. Tempus. v. Præterita. v. Futurum. v. Sapientia.

Futurum designat existentiam, & durationem, nondum præsentem, non autem quidditatem ipsam præcisè. 396. 3.

G

Generare. Generans. Genitus. Generatio.

Generare est perfectio. Et Generari etiam est perfectio in Diuinis tanta, quanta est prima. 32. 44. Semper gignit Pater, & semper nascitur Filius, quia fit generatio sine essendi nouitate. 32. 45. Generatio imperfecta, qualis est in Creaturis, est mutatio, procedit enim de potentiâ ad actum, non autem generatio

quæ reperitur in Diuinis. Procedit enim ab actu semper ad actum. 25. 27. & p. 60. 3. &c. & 62. 9. Est enim origo viuētis à viuente principio vitæ coniuncto in similitudinem naturæ. 60. 2. 4. &c. & p. 66. 23. Quomodo denegetur Spiritui sancto. 69. 1. &c. Error Durandi circa Generationem Verbi. 52. 17. &c. & 57. 33. &c. Et error item Molina. 54. 22. &c. v. p. 102. 4. Et Scoti quoque. p. 55. 25. &c. v. Essentia.

Genus non sumitur à materiâ physicâ, quæ est altera pars compositi, sed ab ipso toto, quatenus in eo inuenitur aliquid de potentiâ, aliquid de actu determinante, & contrahente hanc potentiam p. 286. col. 2. post. Init. v. Gradus.

Gilbertus. Gilberti error ponentis realem distinctionem inter essentiam, & personas meritò damnatus est. 86. 7. & 8. & pag. 87. n. 9. &c. Suarez iure inuenitur in illos, qui existimant S. Thomam, & S. Bonauenturam imposuisse Gilberto. 87. 8. fin. Fundamenta Gilberti. 87. 11.

Gloria. Homines sunt capaces gratiæ, & gloriæ, sicut Angeli. 480. 26. Christus, vt viator, merebatur, non gloriam animæ, sed gloriam corporis, & alia extrinseca. 480. 25. & 26.

Graduatio est penes diuersas naturas, seu formas. 345. 16. ibid. Tertia consequentia.

Gradus Intellectualitatis quo sensu perfectè assimilet Angelos Deo. p. 282. 22. 23. & 24. Gradus genericus, specificus, & numericus quo sensu proueniat ab eadem entitate. 291. 15.

Græcorum error. Circâ Spiritum Sanctum Græci errarunt dicentes eum à solo Patre procedere. 161. 1. &c. In quo errore fuit quandoque Theodoretus, seu ab eo subinde respuit. Ibid. Quidam loco Theodreti legunt Theodoricum 161. 2. In eo quoque errore iacuit Damascenus, dum dixit Spiritum Sanctum esse per Filium, sed non à Filio. Ibid. Multi verò ex Patribus Græcis in eo errore non sunt versati. Ibid. Eo tamen aspersus fuit Theophylactus. 161. 3. Urbanus II. in Concilio Barenfi Sancti Anselmi recordatus, videns Græcos defendere errorem suum circâ processionem Spiritus Sancti, contra ipsos eum accendit, qui eorum impetum non minùs doctè, quàm fortiter repressit. Ibid. Qui error in aliis Conciliis quoque condemnatus est. 162. 5. &c. v. Cyrillus.

Gratia. Spiritus Sanctus dicitur simpliciter esse in animâ in qua est gratia sanctificans. 123. 8. & 9. Est autem secundum quid in eis, in quibus sunt gratiæ gratis datæ, vel aliqua earum. 224. 10. v. Propheta. v. Notitia. v. Scientia Sanctorum. Quando quis proficit in gratiâ, & charitate fit noua missio diuinarum personarum ad animam. 224. 11. &c. In Beatissimis est gratia consummata, & perfecta. 225. 13. v. Dona supernaturalia. v. Gloria. De Angelis dicit S. August. quod Deus est simul condens naturam, & largiens gratiam. Gratia ergo concreatur, non creatur, contra Vasquez 256. 3. col. 1. post Init. Educitur enim de potentiâ subiecti obedientiali, non naturali, educatione supernaturali, non naturali. 259. 10. col. 1. Init. Diabolus semper Dei gratiam abominatus est, eo quod esset superbissimus. 469. 39. Gratia viæ est imperfecta, & ista est principium meriti. Gratia patriæ est perfecta, & ista est principium fruitionis. 480. 26. v. Nox. v. Pelagius.

H

Habitudo. v. Actus Immanentes. v. Intellectio.

Hæceitas. An sit principium Indiuiduationis in Deo. p. 290. n. 10. 11. 12. &c. Diuersæ hæceitates, quæ sunt in Angelis, nihil sunt in aliud, quàm plures Indiuiduationes, seu plures differentiæ indiuiduales, substantiales. 293. 17. & 18.

Hæresis. v. Error. Errauit Angelus, vt Pelagius, credens

In hoc tertio tomo contentarum.

dens ex se habere meritum, de condigno, ut Deus sibi daret beatitudinem, si creditur Suarez. 467. 29. S. Thomas, negat perpetuū errorem speculatiuum in Angelis interuenisse 469. col. 1. Init. Extrahit ergo practice in quantum superbiuit. 470. 40. fi. & 41. v. Regula. v. Noctus. v. Abaylardus.

Homo in statu Innocentiæ. v. Diligere. Non indigebat dono gratiæ superadditæ naturalibus bonis, ad hoc, ut dilegeret Deum super omnia, licet indigeret auxilio Dei ad hoc cum mouentis. 440. n. 30. ante finem.

Humilitas. Diabolus gratiæ Dei aduersatus est, eo quod infensus esset virtuti humilitatis. 469. 39. Ante finem Angeli boni, è contrā valde meruerunt eo quod humiliauerunt semetipsos, sese recognoscentes in gratiā creatos 475. 13.

Hypostasis Nomen hypostasis, personæ, suppositi, substantiæ, & primæ substantiæ ad singulare in genere substantiæ pertinet. 116. 1. Nomen hypostasis, seu substantiæ plures olim sunt decepti. 117. 5. Nomina hypostasis, substantia, suppositum, res naturæ, etiam in creatis distinguuntur, non ex parte rei significatæ, sed ex parte modi significandi. Nec tamen sunt synonyma, quia habent originem ex diuersis principiis. 118. n. 11. circa fi. Hypostasis non est idem, quod substantia, sed idem quod substantia. 127. 19.

I.

Idemitas. v. Communicabilitas. v. Eadem. v. Aequalitas.

Ignis. Angeli mali, licet sint spiritus, patiuntur tamen ab igne infernali, p. 281. n. 20. Hoc autem est difficillimum ad explicandum 496. art. 3. Illi enim sunt incorporei. Ignis autem inferni est corporeus. 497. 2. Quod tamen quidam negant. Ibid. & p. 498. & c. 506. col. 2. v. Dæmones. v. Pœna. v. Misericordia. S. August. dicit ignem illum miris, & ineffabilibus modis cruciare. p. 499. 8. ex S. Aug. v. Qualitas.

Illuminans, Illuminatio. Angelus superior illuminat inferiorem, procedendo cum magisterio, & doctrinā. pag. 518. 1. & 521. 8. fi. Non è contrā. 523. 15. Illuminatio non est actio aliqua physice influens, & effectiue intra intellectum Angeli illuminati aliquod lumen, vel speciem, sed solum externè proponit obiectum clariùs, & manifestiùs. Ibi. n. 2. & 3. & p. 519. 4. & c. Angelus illuminans conuenit in aliquo cum homine docente, & in aliquo excedit. 520. 8. Nihil producit physice in intellectu inferioris, sed bene in intellectu superioris, putā conceptus, quem directè ordinat ad inferiorem, obiectiue, non physice. Ibi n. 9. Illuminantur Angeli in his quæ pertinent ad ordinem naturæ, gratiæ, & gloriæ. Ibi. 522. 13 & 14. Quoad ordinem naturæ, proponitur quoddam dubium. Ibi. 12. & 13. Quoad ordinem gloriæ illuminatio fit à Deo. Ibi n. 12. Responso ad obiecta. Ibid. n. 13. & 14.

Imago est duplex. Vna in re alterius naturæ, ut imago regis in denario; & hæc imago ordinatur purè ad repræsentandum; alio modo in re eiusdem naturæ, sicut imago regis in Filio suo, & hæc est perfecta imago nec ordinatur solum ad repræsentandum, sed ad propagandum naturam sui principij. 63. 14. 76. col. 1. fi. & col. 2. Init.

Immediate. Virtus spiratiua quomodo sit immediate in Patre, & Filio. 184. 30 v. Operari Substantia debet esse media inter Deum, & accidens, ut operetur per aliquid distinctum à se 352. n. 38.

Impeccabilitas. Nulli creaturæ competit ex suā naturā 430. 1. Sed tantum ex gratiā. Ibid. n. 2. Pauci Authores huic veritati contradicunt. Ibid. 430. n. 3. v. Regula v. Imperfectio. v. Distinctio.

Ioan. à S. Thom. in 1. part. D. Th. Tomus alter.

Impossibile appeti potest, non quidem ut assequibile, sed ut obiectum complacentiæ, & inanis delectationis. 465. 24. & c. v. Velleitas.

Incarnatio est à tota Trinitate. 22. 13. fi. Incarnationis negantes mysterium, non negabant propterea Trinitatem diuinarum personarum. p. 3. n. 3.

Incommunicabile. Quod per se non existit, sed in alio, non potest esse incommunicabile. p. 119. n. 15. v. Individuum. v. Communicabilitas. v. Persona diuina.

Inconsideratio. Angeli mali peccarunt ex inconsideratione. 488. 17. Sed illa inconsideratio fuit meè malitiosa, non verò inuoluntaria 490. 20.

Incorruptibilia non egent multiplicari. 295. 25. Corpora Damnatorum post diem iudicij erunt incorruptibilia, sen non impossibilia. 499. n. 11.

Indefectibilitas oritur ex hoc, quod aliquid est sibi recta regula, vel habet eam sibi semper annexā. 432. 11.

Indeliberatum sumi potest duobus modis, scilicet priuatiue, & negatiue. 443. 7.

Indifferentia voluntatis. v. Libertas voluntatis.

Individuatio. v. Substantia. Vtrum hæcceitas, an verò materia sit principium individuationis. 290. 9. & c. v. Vasquez. v. Hæcceitas. Individuatio in substantiis est gradus intrinsecus, & substantialis, & sic intrinsecum principium postulat, & substantiale. 293. col. 1. fi. Individuatio, sine multiplicatione naturæ, non exigit materiam, neque materiale principium, neque ordinem ad illud, sed sufficit formam ipsam esse completam, & irreceptibilem, seu non dicere ordinem ad aliquid, in quo recipiatur, sed in se manere. 294. 23. Anima indiuiduatur per ordinem ad corpus 294. 23. fi.

Individuum. v. Substantia. v. Singulare. Quod perfectè, & completè individuū est, ut suppositum, vel Persona, perfectè incommunicabile est 116. 1. & 3. Individuum, seu persona excludit triplicem communicabilitatem. 117. 4. Individua substantia idem est quod prima substantia. 117. 6. 119. 15. Individuum dupliciter sumitur, scilicet logicè, & physice. 119. 13.

Individuum vagum. Quomodo plura complectatur sub conceptu communi. 122. 24. Neque est analogum. 123. 26.

Infernus. In inferno nulla est redemptio, vel remissio, quidquid dicant Origenistæ. 483. col. 1. v. Ignis.

Infinitas, Duplex est. 111. 38. & c. Vna in genere entis, simpliciter, & alia propria in vnoquoque genere. Itā distinguit Pater Suarez. Ibid.

Inflexibilitas Angeli non consistit in immobilitate actus, quoad exercitium, sed quoad specificationem. 287. 11. Nec est propria passio Angeli ab eo inseparabilis per ipsam Dei potentiam absolutam. Ibid. Nunquam tamen ab ipso remouebitur. Est enim accidens commune inseparabile ex principiis indiuidui. 488. 14. & c. & 492. 26. & 27.

Influere. Speciei intelligibili conuenit influere effectiue in actum. 431. 4.

Ingenitum esse. v. Innascibilitas. Vide etiam interim. p. 146. col. 2. fi. & c.

Inimici. v. Oratio.

Iniustitia. De peccato Iniustitiæ. v. p. 461. 15. Vtrum Angelus illud peccatum committere possit. Respondet Author sub distinctione. Ibid. v. Peccatum.

Innascibilis. Innascibilitas. De istā materiā. v. 146. 147. & c. Innascibilitas non constituit personam patris. 198. 27. v. Notiones. Fuit necessarium assignare Patri notionem innascibilis contrā Arrium. p. 136. 26. p. 137. 30. Si duo essent innascibiles, non opponerentur relatione, sed naturæ diuersitate distinguerentur. 34. 3. & c. 35. 8. & 10.

Innocentiæ status. v. Diligere. v. homo in statu Innocentiæ.

Inobedientia. Non subiici superiori, ut præcipienti, & ut superiori, est conditio specialis peccati. Inobedientia

FFF

Index rerum memorabilium,

L.

dientia. 462. col. 2. med.

Inspirabilitas. Cur non sit notio? 134. n. 17. & p. 137. num. 30.

Instans. Vtrum motus Angeli in spatio possit fieri in instanti. p. 332. 1. & c. Deus in instanti operatur. 336. 13. Non autem sic Angelus. Ibid. n. 14. & p. 471. 1. 474. 10.

Instrumentum. Implicat dari instrumentum creationis physicum, 268. 17. & c. 269. 22. & c. Ignis inferni agit in Dæmones, & in animas, ut instrumentum eleuatum à Deo omnipotente, cui omnis creatura obedire nata est. 418. 8. & c. 506. col. 2.

Intellectio. Principia limitantia intellectionem, sunt, specificatum, & receptum. 346. 19. Ad secundam, & c. Intellectio habet duplicem habitudinem, alteram ad obiectum, quod intelligit, & ut sic non est productiua; alteram ad Verbum, in quo repræsentatur res intellecta, & ut sic est productiua. 58. 38. Distinguntur in nobis hæc quatuor, scilicet intellectus, ut potentia; species impressa, intellectio, & Verbum, seu species expressa. 47. 6. Scotus ponit duas actiones in intellectu, scilicet intellectionem, & dictionem. 48. 7. Secundum autem S. Thomam, est una, & eadem actio attingens duos terminos inadæquatos. Ibid. v. Intelligere.

Intellectualitas. Ex ratione perfectæ intellectualitatis concluditur esse existentia naturæ Angelicæ. 282. 23. & 24. v. Gradus. v. Intellectus. v. Intelligere.

Intellectus noster est potentia passiva, respectu, specierum, actiua verò, respectu intellectionis. 349. col. 1. fi. & 351. 34. Indiget enim specie intelligibili. 353. 1. 2. & c. Intellectus agens est in nobis, non autem in Angelis. Denotat enim magnam imperfectionem. 371. col. 1. Post initium. Assimilatio intellectus ad obiectum, semper respicit identificationem, non in esse entitativo, sed in esse intelligibili 44. 32. Pertinet ad intellectum nostrum, & intelligere, & dicere, seu manifestare id, quod intelligit 46. 4. v. Operatio.

Intelligere Angeli, non est eius substantia. p. 340. 1. & c. Intelligere ex duplici principio limitatur, scilicet ex obiecto, à quo habet specificationem, & ex subiecto, à quo habet indiuiduationem; & si est subsistens, caret utraque 344. 13. Initio 345. 14. & c. Intelligere Angeli, non est suum esse. 346. 20. & c. Intelligere in Angelo, est finitum entitativè, habens tamen ordinem ad obiecta infinita. 348. col. 2. post med. Intelligere est quoddam pati 40. 24. hoc tamen non impedit, quominus sit etiam quoddam agere. Ibid. & 51. 15. In quo consistat formaliter agere, seu intellectio, & in quo formaliter consistat dictio, seu locutio 49. 9. & c. Intelligere formalissimè est actus vitalis, & viventis. 51. 14. Intelligere est actio perfecta, & sine motu, & in se est actus quidam secundus. 57. 30. Intelligere essentiale seu commune toti Trinitati sit notionale, & paternum, per additionem relationis, & ut modificatum. 57. 32.

Intuitiva cognitio, & abstractiua, stare possunt, respectu diuersorum, licet illud neget Vasquez. Ex exemplo enim, quod adfert, conuincitur. 421. 15.

Inuidia. Quid sit inuidia. 461. 15. col. 2. fi. Inuidia Impulit Diabolum ad bellum cum homine. 462. col. 1. Initio.

Ira non conuenit Angelo, prout dicit passionem corporalem, sed benè prout est simplex voluntatis affectus appetentis vindictam sine passione corporali. 462. col. 1. ante medium.

Iudicium. Quomodo dies iudicii dicatur à Filio Dei ignorari, cum ipse sit omniscius? p. 20. 5. Certè eam non ignorat, sed quia de eà tacuit, nec eam reuelare voluit, admodum ignorantis se se habuit in hoc. p. 20. 5. Initio.

Lex Angelus non potest peccare speculatiuè, sed benè practicè contrà legem naturalem, sed benè potest peccare contrà legem supernaturalem. 433. n. 13. v. Regula.

Libertas actus moralis. Liberum, & necessarium sunt modi intrinseci, intrinsecè variantes rationem ipsius actus. 478. 20. Deliberatum autem, & indeliberatum, sunt modi extrinseci extrinsecè variantes rationem actus moralis. Quare actus erit liber, licet non sit deliberatus. Ibid. & n. 21. & pag. 479. 22.

Libertas voluntatis Est multiplex, scilicet contrarietatis, contradictionis, & complacentiæ. Libertas contrarietatis, seu quoad specificationem actus, est circa bonum, & malum, 438. 25. & 451. 30. Libertas contradictionis, seu quoad exercitium actus, est ad velle, & non velle. 451. 30. Libertas complacentiæ, est in voluntate, quando obiectum, quod elegit, sic ei placet, ut ei mordicus adhærescat. v. Inflexibilitas. Libertas contrarietatis, & contradictionis an sit in Angelo in pura natura considerato. 438. 25. & 27. & p. 440. 31. fi. Angeli in primo Instanti suæ creationis elegerunt quod voluerunt, actu liberi arbitrij, secundum Sanctum Thomam 442. 6. Id tamen quidam negant Ibi. n. 5. Contrà quos arguitur à priori. 443. col. 1. ante med. v. Deliberatum. v. Libertas actus moralis. Voluntas, ut sit libera, non indiget tempore. Ex suo enim modo operandi perfecto operatur in instanti. 443. 8. Ad hoc autem, ut reducatur liberè de potentia ad actum, debet, determinari à Deo, ut à principio libertatis creatæ, 445. n. 12. & c. Quæ cōditio in omni actu Libero reperitur. 446. 27. col. 2. med. Non pertinet ad perfectionem libertatis posse velle, & non velle, defectuosè, sed posse velle, & non velle, non coactè, & quoad exercitium. 452. 33. fi. De libertate Angelorum & motione Dei in viâ eorundem. 474. 11. v. Actus. Ex libertate meritò infert D. Th. secreta cordis esse Angelo incognoscibilia, nisi ea Deus reuelet. 411. & c. 413. 17. & 18. Ea enim non pertinent ad rationem vniuersi, quia determinatio illorum à solo Deo dependet, qui est supra vniuersum. Ibid. & 416. 25. Sublata libertate à voluntate tolleretur ab ea peccabilitas. 430. 3. 431. 4. Tunc autem vel esset, sicut Brutum; vel esset sicut Beati. 441. 4. Ex vi autem intellectualitatis, non potest carere libertate. Ibi. & num. 5. 6. & c. An valeat ista consequentia: Talis creatura libera, est ex nihilo facta, ergo est ex natura sua defectibilis, & peccabilis voluntate. 431. 7. 432. col. 1. post Initium, & n. 8. & 9. Voluntas est indifferens, & indeterminata ad diuersas operationes, ergo de se non est indefectibilis. v. Indefectibilitas, & pag. 433. n. 14.

Ligati sunt Dæmones. Et quoad detentionem in loco, & quoad executionem operationum suarum liberarum impeditam. Non enim agunt ubi volunt, nec sicut volunt, nec quantum volunt. 500. 13. & c. 501. 16. & c. & 502. 19. fin. Detentio eorum, quoad locum, supponit prius passiuam detentionem impeditiuam operationum potentiarum factam ab aliquo corpore, cuius loco manent alligati. 503. 23. Ligamen autem, quo detinentur, subiectatur in omnibus potentiis requisitis, & concurrentibus ad potentias externas. 502. 21. & 22. v. Locus.

Limbus. Animæ erant in limbo Patrum, velut in carcere honorario. 312. 7. & 313. 11. Quando anima Christi descendit ad limbum Patrum, lucem sensibilem, & exteriorem produxit, quâ locum illum illustrauit. 312. 8.

Locus. Est duplex, scilicet rei intrinsecus, & extrinsecus. 301. 1. Angeli sunt in loco diffinitiuè. Ibid. n. 4. Opinio Scoti circa hoc. 302. 5. Durandi, ib. Variæ sententiæ

In hoc tertio tomo contentarum.

sententiæ. Ibi. &c. & 303. 9. Causa effectiua existentie Angeli in loco, est illius voluntas. 303. 10. Substantia Angeli secundum se, & remota operatione, non est formalis, & immediata ratio contactus Angelici ad locum: neque immediatum, & proximum fundamentum presentie localis, sed solum radicale principium in quantum est radix operationis, & virtutis. 303. 11. Suarez, Vasquez, & Molina non explicant sufficienter presentiam Angeli in loco, & rationem formalem existendi in loco. 304. 14. &c. S. Thomas docet Angelum esse in loco per contactum virtutis. 306. 20. &c. Angelus modo præternaturali potest esse in loco per passionem, & non per operationem. 308. 23. Angelus non potest esse in pluribus locis adæquatis. p. 317. 9. &c. & p. 319. 19. Sed bene potest esse in duplici loco inadæquato. 318. 17. Angelus, non operando, potest manere sine loco positivo. 333. 6. Secundus casus est. v. Limbus. v. Superficies.

Locutio Angelorum inter se est difficillima explicatu. p. 508. 2. Quatuor conditiones requisitæ ad veram, & essentialem locutionem, in nostra locutione reperiuntur, quas omnes in Angelicâ non reperies. 508. 2. Medium locutionis Angelicæ an se teneat ex parte audientis, an ex parte loquentis. 508. 3. &c. v. Loqui. v. Medium.

Loqui. Quomodo spiritualiter loquantur Angeli inter se. 507. art. 1. Id dubium soluere valde difficile est. 508. 2. Locutio Angelorum cum hominibus debet fieri modo quodam corporali. ibid. n. 1. Inter se autem, vel cum Deo, debet esse spiritualis. ibid. Animæ separata, cum sint intellectuales, & sociabiles, loquuntur inter se. 508. 1.

Lux. Producitur ab Angelis lux in loco, in quo existunt. 312. 10. v. Limbus.

Luxuria carnalis. Quidam ex Patribus antiquioribus dixerunt Angelos malos luxuriam carnalem exercuisse cum filiabus hominum pulcherrimis. 459. 9. col. 1. ante fin. Existimant enim Angelos habere corpora nostris subtiliora. ibid.

Luxuria spiritualis. Scotus dicit peccatum Angelorum malorum fuisse luxuriam spirituales quâ per nimium amorem, & delectationem de proprio decore, & felicitate, luxuriante venustate propriâ delectati sunt, quod superbiam impropiam esse putat, propriam verò cupiditatem, & luxuriam circa suum decorem. p. 459. n. 9. col. 2. post Init. Quod autem fuerit superbia propriè dicta, probatur. ibid. num. 10. & p. 460. col. 1. ante medium. Delectatio autem, quæ reperitur in omnibus peccatis, non est luxuria spiritualis. ibid. Ex amore sui non denominatur peccatum luxuriæ peccatum. Amor enim sui est principium omnis peccati. 463. col. 1. post med.

M.

Macedonius. v. Spiritus Sanctus.

Mahumetes. v. Trinitas.

Maria. Vnde constat Mariam supra Angelos esse, cum sint viâ naturæ Creaturis omnibus superiores: Id fit ex vi gratiæ, & gloriæ, quibus ipsa est præstantior. p. 279. n. 10. Spiritus sanctus superuenit in Mariam, ut fieret Mater Dei. 227. 20. col. 1. fin. & col. 2. post medium. v. Maternitas.

Martyr. Martyrium. Valentinus Gentilis se iactabat primum Martyrem fore pro Patris eminentiâ, non ut ceteri Martyres, pro Christi gloriâ. Sed Bernæ condemnatus, & morti adiudicatus, nihil non egit etiam canendo palinodiam, ut mortem effugeret quam tamen non euasit. p. 9. 21. Martyrij meritum consummatur in morte in fieri. p. 482. col. 2. ante medium.

Materia. Est duplex scilicet physica, & metaphysica. *Ioan. à S. Thom. in 1. part. D. Th. Tomus alter.*

Physica autem est duplex, scilicet sublunaris, & cœlestis. p. 283. 1. &c. 284. 5. &c. Omnia materiâ physicâ carent Angeli, non autem omni materiâ metaphysicâ. ibid. & pag. 288. 1. Non est eadem materia visibilium, & inuisibilium. pag. 286. 11. ex S. Aug. Implicat dari materiam spirituales. pag. 287. 12. Est necesse, quod materia prima careat omni actu entitativo, si careat omni actu formali. pag. 285. 8. Materia prima quomodo creetur à Deo? &c. 241. col. 2. post. Initium. 256. num. 3. Qui deberet esse. 4. & n. 4. Qui deberet esse. 5. contra Vasquez. Materia dicitur potentia substantialis, non quomodocumque, sed in ordine ad componendum cum formâ substantiali, tanquam cum parte, & principio specificationis, cum quo componit ipsam naturam, seu speciem. p. 286. col. 2. Init. Proprium munus materiæ est diuisionem partium facere secundum diuersam incommunicabilitatem, & quare? 292. col. 2. Init. Genus sumitur à materiâ ut aliquid potentiale est ad plures formas, & formaliter determinabile. Multiplicatio ab ea, ut diuisibilis est substantialiter per partes, & non specificè. ibid. v. Ordo.

Maternitas. Non est maternitas in diuinis, sed bene Paternitas. 61. 7. Dignitas Maternitatis in Mariâ Virgine congruè, & connaturaliter exigebat sanctitatem. 227. col. 2. ante finem.

Medium. Locutionis Angelicæ an se teneat ex parte loquentis, an ex parte audientis. 508. n. 3. &c. In re tam difficili satius est S. Thomæ, quàm cunctis aliis adhærescere. Sententiæ enim aliorum sunt plenæ magnis inconuenientibus. ibid. & 511. num. 11. Angelus moueri potest motu discreto, &c. impertransito medio. 326. col. 2. Init. & num. 11. &c. & pag. 328. 15. & p. 331. col. 1. Init. n. 21. &c.

Mereri. v. Gloria. Angelus in primo instanti meruit beatitudinem. 449. 25. & 26. Erat enim in naturâ integrâ. ibid. Duplex meritum somniat Caietanus. 479. 23. col. 2. post. Init. Sed illud refellitur. 480. 25. & 26. & 481. 29. v. Libertas.

Miseria. De miseria Damnatorum. v. p. 484. 3. &c. 485. 6. ex Suarez.

Mittere. Mitti, Missio, Missus. v. pag. 217. 1. &c. Solus Pater nunquam legitur missus. Solæ ergo personæ procedentes dicuntur mitti. ibid. & pag. 220. 10. Per cognitionem, & amorem naturalem Deus non est in animâ, ut cohabitans, & ut conuiuens, nec per modum missionis. 227. fin. & 228. col. 1. Init. Missio de principali non significat aliquid notionale, id est ipsam processionem originis, quâ vna persona procedit ab aliâ, scilicet aliquid essentiale, videlicet productionem effectus, in quo manifestatur; processionem autem notionalem, ex consequenti. 220. 12. Duplex est missio, scilicet visibilis, & inuisibilis. 221. 2. Vna persona non potest mittere se. 220. 11. Nisi in sensu, qui proponitur. ibid. num. 12. Missio inuisibilis fit tantum secundum donum gratiæ sanctificantis p. 223. 8.

Modus. Modi substantiæ sunt existentia, vel vnio. 343. n. 9.

Moralis actus. v. p. 432. 11. v. Deliberatum, &c. v. Liberum. v. Libertas actus moralis.

Motuum. Motiua ad peccandum in Angelis. 440. 31. 441. 33. Motuum peccandi in Angelo nullum aliud fuit, quàm superbiæ motuum. 460. 12. & 13.

Moueri potest Angelus utroque motu, scilicet discreto, & continuo, in infinitum syncategorematicè. 330. 20. v. Coexistentia. v. Velocitas. v. Descendere, quoad animâ Christi. Monetur Angelus intrinsecè in suâ substantiâ 301. 3. Anima etiam separata. ibid. n. 2. Motu discreto potest Angelus se mouere de vno loco ad alium, relinquendo priorem locum, pertransitis intermediis. 320. 26. v. Angelus. Angeli mouentur locis.

FFF 2 calit

Index rerum memorabilium,

caliter, licet secus sentiant Durandus, & Heruæus. 323. 1. Init. v. Corpus. v. Partes.

Multitudo Angelorum excedit numerum rerum materialium. 296. 31. &c. Non quoad indiuidua, sed quoad species earum. ibid. n. 32. Multitudo indiuiduorum conducit ad perfectionem vniuersi in rebus corruptibilibus, non autem in rebus incorruptibilibus. 296. n. 30.

Multiplicatio non est in Angelis, quoad indiuidua eiusdem speciei. 288. 2. Naturam intellectualem multiplicari, ex eo quod est intellectualis, non repugnat, modo dicat ordinem ad materiam. 289. 6. Sed bene repugnat naturam intellectualem omnino separatam, & irreceptibilem in materiâ, ad instar formæ numericæ, seu indiuidualiter multiplicari. ibid. n. 8. Multiplicatio, & genus sumuntur à materiâ, sed diuersimodè. 292. col. 2. post Init. v. Subsistentia. v. Existentia. Multiplicatio plus petit, quàm incommunicabilitatem, scilicet diuisionem cum distinctione formali. 294. 23. post med. Incorruptibilia non egent multiplicari. v. Incorruptibilia. Et natura. v. Attributa. Omnis multiplicatio siue numerica, siue specifica, aliquam limitationem, & imperfectionem inuoluit. 344. 12. fin. Multiplicatio personarum ad intra non repugnat naturæ diuinæ. p. 13. vers. 16. &c. Multiplicatâ entitate reali, necesse est multiplicari id, quod ad talem entitatem sequitur. p. 102. 1. 106. 18. Multiplicato inferiori, multiplicatur superius, si multiplicetur inferius realiter, & entitatiuè, non autem si multiplicetur tantum terminatiuè. p. 140. n. 39.

Mundus. Non potest probari naturali demonstratione, quod mundus inceperit in tempore. 241. 7. & 242. 9. col. 2. ante finem. Multi Philosophi posuerunt mundum æternum. 240. 4. Aristoteles circa æternitatem mundi quid præcipuè intenderit. 242. col. 2. ante finem.

N

Natura studet paucitati, & breuitati, nisi propter bonum speciei. 295. 26.

Noctis tenebræ. Sunt symbolum dānationis. 483. 2. Noctius. Fuit hæreticus. v. Sabellius.

Notionalia. Notiones. Attributa notionalia, seu personalia ab essentialibus distinguuntur. 96. 19. col. 2. post Init. Notiones sunt quinque, putà quatuor positivæ, scilicet Paternitas, Filiatio, Spiratio actiua, & Spiratio passiuæ; & vna negatiua, scil. innascibilitas. 134. 16. & 135. 20. &c. Notiones latius patent, quàm relationes; & relationes, quàm proprietates in diuinis. 141. 44. Notiones sunt nomina in abstracto sumpta, scil. illa forma, seu nota, quâ, vt ratione formali innotescit nobis, & distinguitur propria aliqua ratio personæ, vt paternitas, &c. 141. 1. col. 1. fin. Actiones non tribuuntur notionibus in abstracto, possunt tamen propter identitatem substantiæ personalia, & essentialia dici de notionibus. 142. 5. fin. v. Voluntarium. Cur inspirabilitas non sit notio. 234. 17. Quomodo spiratio actiua est notio, cum nō sit proprietas? 137. 31.

Notitia aliquando sumitur pro eo, quod intellectus concipit cognoscendo, non verò pro actu intellectus cognoscentis. 52. 16. Conceptio quomodo procedat ex notitiâ, secundum S. Thomam. 57. 30. Aliquando post notitiam verbum producit. Non formatur enim nisi per cognitionem, & intellectionem, secundum esse intelligibile, & intellecti in actu ipsius obiecti. 57. 31. fin. Illa notitia, ex quâ procedit amor, viget in feruentibus diuino amore, &c. 223. 7. Notitia, seu cognitio supernaturalis, quæ habetur de Deo, aut est per visionem beatam aut per scientiam infusam euidentem, aut per fidem. 481. 27. col. 1. ante finem.

Novitatum amor impatiens in sinistros sæpè doctrinæ fœtus degenerat. 82. 36. v. Complutenses.

Nox. Vtrum omne auxilium, quod denegatur Beatis, nomine noctis significari possit. 484. 4. &c. Quidā negant omne auxilium denegari beatis. Equidem aliquid pertinet ad auxilium sufficiens datur dānatis, & aliquid denegatur. 485. 6. col. 1. fin. Nox corporalis habet duplicem causam, vnam extrinsecam, aliam intrinsecam. Extrinseca est solis absentia. Intrinseca, est interpositio terræ inter nos, & Solem ipsum. Ita nox spiritualis damnatorum habet duplicem causam, vnam extrinsecam, putà subtractionem gratiæ diuinæ, tam actualis, quam habitualis; aliam intrinsecam, nempe adhesionem immutabilem ad peccatum. 483. 2.

Numerus. An dicat imperfectionem. 143. 10. Numerus personarum diuinarum diuidit solum realitatem relatiuam, & facit pluralitatem. ibid. n. 11. Sic autem non dicit imperfectionem. Non enim componit vnum ex pluribus, nec addit aliquid per aggregationem in vno super aliud, nec mensurat multa per vnum tanquam per quid simplicius, quæ tria imperfectionem important. 142. 10. & 11. &c. De numero in diuinis. v. 168. 15. ex Concilio Toletano II.

O

Obcæcatio. Obcæcationis damnatorum causa duplex, scilicet subtractio gratiæ diuinæ, actualis, & habitualis, & propria ipsorum malitia. 483. n. 2. v. Nox. v. Dæmones. v. Regula. v. Damnatio. v. Misericordia. v. Pœna.

Obduratio. v. Obstinatio.

Obiecta peccati superbiæ Angeli quatuor numerantur. 463. 17.

Obiectum intellectus. Obiecta cognitionis Angelicæ sunt tria. Cognoscit enim se, inferiora sibi, & superiora ad se. 388. 1. Modò inferiora sibi non sint intra suas causas. v. Futura. Modò non sint pertinentia ad genus moralitatis, vt sunt secreta cordis. v. Cogitationes. v. Scrutari corda. Modò sint aliquid vniuersi. v. Futura. Et p. 384. 29. & p. 418. 18. Supernaturalia obiecta quomodo cognoscit Angelus? 426. 31. Obiectum intellectus redditur immateriale. 284. col. 2.

Obliquitas. v. Regula.

Obstinatio. v. Inflexibilitas. Quod est hominibus mors, id lapsus est Angelis. 483. 31. col. 1. Obstinatio quid. 483. art. 2. init. Damnati sunt obstinati in malo, p. 483. v. Opus.

Occasio peccandi. v. Motiua, &c. v. Obiecta peccati. Occasionem peccandi accepit Angelus ex maiore Dei beneficio. 440. 31. Sicut ex beneficio Incarnationis sumptum Deicidæ occasionem Deum incarnatum occidendi. ibid.

Odium Dei est in Dæmonibus per accidens. 435. 19. col. 2. & 436. 22. Odio enim habet Deum, in quantum facit in eis particulares effectus, qui eorum voluntati contrariantur. 441. col. 1. init. 461. 14. Odio etiam habent Angelos bonos, in quantum diuersificantur penes iustitiam, & iniustitiam. 440. 30. col. 2. fi. & 441. init. Odium Dei non est peccatum capitale, seu primū, seu initiale, sed vltimū, seu finale. 461. 14. col. 2.

Omissio. Peccatū primum Angeli non fuit omissionis, sed commissionis. p. 470. 41. Omissio est pura negatio, vel priuatio actus. p. 451. n. 32. Omissio adimplerionis præcepti, cum fuerit voluntaria, habuit peccatum commissionis sibi adiunctum. 457. 4. post med. & p. 458. 5. Imò eam præcessit peccatum commissionis. 458. 6. & 7. Omittere enim finem bonum nullū alium finem appetendo, & ab omni actu cessando, non est Angelo, imò nec homini connaturale. ibid. & p. 459. 7. Nec ipsa omissio potest habere rationem finis secundum se, nisi induat aliquam rationem, quæ positiuè appetatur, vt propter contemptum, vel odium Dei, propter commoditatem propriam, vel ad experiendum libertatem, &c. p. 459. 8. & p. 461. 14.

Omni

In hoc tertio tomo contentarum.

Omnipotentia. Abaylardus ita Deo Patri tribuit omnipotentiam, ut eam denegat Filio Dei, & Spiritui Sancto. p. 8. n. 19. Quod autem æquè conueniat Filio, ac Patri ipsi, rectè docetur. p. 15. 18. &c. & p. 19. 2. Responsio ad loca Sacrae Scripturae, quæ eam Dei Filio denegare videntur. p. 20. n. 5.

Operari, Operatio, Opus. Nulla substantia creata operatur immediatè. 349. 27. &c. Substantia prius, & immediatè ordinatur ad esse, quàm ad operari. 350. 31. Operari enim sequitur esse. 352. 36. Operatio, & esse sunt actus diuersi in rebus creatis. 351. 32. & 34. Operatio prima intellectus nostri est simplicium apprehensio. Secunda est compositio, & diuisio. Tertia est discursus. Secunda, & tertia non est in Angelis, sed bene prima. 416. 1. &c. & 424. 26. &c. Opus bonum nullum facere, est signum obdurationis. 484. 4.

Opinionum diuersitas est in Angelis, etiam bonis, circa ea, quæ cognoscunt coniecturaliter. Concordantur tamen subindè, postquam diuinam voluntatem consuluerunt. 487. 12. post Init.

Oratio, Orationes, quæ diriguntur ad Patrem, inuunt totam Trinitatem intendi. 22. 13. fi. Oratio non fit in Ecclesiâ pro Damnatis. 483. 1. col. 2. Orandum est pro inimicis, qui sunt in statu viæ, non autem pro iis, qui iam sunt in termino. Ibid.

Ordo formæ ad materiam non est relatio prædicationalis, sed bene transcendentalis, pertinetque ad genus substantiæ incompletæ. 294. 23. ante fi. Vbi est ordo processionis, & originis vnius ab alio, non potest esse similtas naturæ. p. 27. col. 1. An id sit verum in Diuinis. p. 29. 34. v. Origo.

Origenes. Verbum, seu Dei Filium negauit. Vnde in hoc fons quidam Arrij fuit. p. 3. n. 5. Patres Origenem defendentes dicunt illius scripta fuisse ab hæreticis deprauata. Ibid.

Originale Peccatum. Contrahit anima, simulac infunditur in corpus, corpus enim est infectum. 453. 37.

Origo. Inter ea, quæ ad ordinem notionalem spectant tria inueniuntur, ad quæ omnia alia possunt reduci. Primum est relatio. Secundum est origo. Tertium est notio. 193. 8. Quidam tenent formam constitutionem Personarum in Diuinis esse originem, non verò relationem. 194. 8. Oppositum tenet S. Tho. Ibid. n. 9. &c. Responderetur ad fundamenta primæ opinionis, quæ contrariatur S. Thomæ. 194. 12. &c.

P

Paratæ Fuerunt hæretici. v. Trinitas.

Partes. Non sunt in Angelo. Et tamen in eo est motus continuus, vel discretus. 325. & 316. 9. col. 1. Partes non producuntur per se, sed comproducentur. Totum autem bene producitur. 108. 24.

Participatum, seu participatiuè tale. Omne, quod habet esse participatum, est ab eo, quod est essentialiter tale, & independens à quocumque. 243. 10. col. 1. & 2.

Passionum emanatio. De emanatione passionum. v. p. 352. 39.

Paternitas. Pater æternus. An sit formale constitutum personæ Patris. Circa hoc valde diuisi sunt Authores. 196. 19. &c. An Pater æternus sit solus Deus. 19. 4. Pater æternus habet esse à se, id est non communicatum: Filius autem habet esse à se, id est non factum. 25. 23.

Paulus Samosatensis. Concilium Braccarense primum tribuit Priscilliano hæresim Pauli Samosatensis. p. 3. 4. fi.

Peccabilitas. An rectè inferatur ex libertate Creaturæ. 431. 5. 6. 7. & 8. 440. 32. 441. 33. 442. 3. &c. Si dicas, ex deficientiâ in esse non semper infertur defectus. Ioan. à S. Thom. in 1. part. D. Th. Tomus alter.

bilitas operationis, ex maiori enim defectibilitate, non semper infertur minor, ut patet in corpore celesti, Resp. id verum esse, quando vna non sequitur ad aliam. 432. 9. v. Defectibilitas.

Peccatum. Angelorum fuit mortale, non veniale, 456. 1. Idque peccatum commissionis, & non solius omissionis. 457. 4. Peccatum originale contrahit anima, quando in corpus infunditur. Corpus enim est infectum. 453. 37. Peccatum iniustitiæ duobus modis committi potest. Primò ex eo, quod aliquis vult accipere aliena bona, vel iura, in commodum proprium. Secundò vult ea sibi, in eius nocumentum. Primo modo Angelus non committit peccatum iniustitiæ, sed tantum secundo modo. 461. 15. Peccatum Angeli non fuit peccatum in Spiritum Sanctum. Ergò non fuit irremissibile. 490. 21. Distinguo antecedens, ex ipsâ ratione obiecti sui, C. ex ipsâ ratione subiecti operantis. N. p. 491. 23. v. Permissio peccati.

Pelagius. Fuit impugnator gratiæ. v. Hæresis. Eius Discipuli non idem prorsus cum ipso sentierunt, gratiam tamen, qualis est in se, nunquam illi admiserunt. p. 4. n. 7.

Permanentia. v. Successiva.

Permissio peccati. Ut positâ permissione Diuinâ homo cadit in peccatum: ita continuatâ permissione, peccatum continuatur. 484. 3.

Per se. Spiritus Sanctus sit similis Patri, & Filio, ex vi suæ processionis, per se primò, non per se in quarto modo perfeitatis. 79. n. 25. & 26. Vel sit eis similis, &c. ut persona spirata subsistens, non autem ut persona nata, & propagata. p. 79. n. 27. & p. 80. n. 31. Per se in primo modo, & per se in secundo modo, quid sit. 152. n. 1. &c.

Perseuerantia in bono defuit Angelis malis. 441. 1. Non autem bonis, qui per primum actum, beati sunt effecti. 476. 15. Primus enim ille actus fuit continuatione vnus, non autem purè indiuisibiliter vnus. 481. 28. 495. 32.

Persona. Personalitas in Diuinis. Vnaquæque persona singulariter, plenus est Deus. 94. 11. Personæ Diuinæ verè, & realiter distinguuntur inter se. p. 10. n. 3. &c. p. 11. n. 6. & 7. p. 12. 8. &c. In Deo nequeunt esse plures personæ improductæ. p. 33. n. 1. Persona, secundum Boëtium, est rationalis naturæ indiuidua substantia; vel, secundum Richardum à S. Victore, est Diuinæ naturæ incommunicabilis existentia. p. 116. n. 1. Præfert Scotus istam secundam diffinitionem primæ. 116. 3. Obiectiones contra primam diffinitionem traditam à Boëtio. 117. 7. Soluuntur verò n. 10. Persona significat naturam cum quodam modo existendi per se. 119. 15. Persona est nomen commune rationis, ut ly (aliquis homo.) 121. 21. &c. Persona Diuina significat relationem, ut subsistentem. 119. 17. Id est, per modum substantiæ. Ibid. Quæ sit forma constituens in Diuinis personas. 192. 1. &c. v. Origo. Quomodo vna persona sit in aliâ. 211. 1. & 2. &c. Personalitas est id, quo formaliter constituitur persona, & nihil aliud importat in naturâ rationali, vel intellectuali, quàm subsistentiam, & suppositalitem in quacumque substantiâ. 118. 12. v. Relatio fi.

Philoponus. v. Trinitas.

Photinus. Christum negauit Deum. p. 3. n. 3. col. 1. Post. Init. Non tamen negabat propterea Trinitatem. Ibid.

Platonici. Errarunt circa mentem Diuinam, eam esse primam Creaturam asserentes. p. 3. & 4. n. 5.

Pluralitas Personarum in Diuinis. v. Productio.

Pœna. In demonibus duplex est pœna, scilicet pœna damni, & pœna sensus. 497. 1. Pœna sensus in eis non est phantastica, neque falsa, sed verè, & in re est affligens. 449. v. Ignis. Proinde qui intentionalem, vel moralem tantum afflictionem prouenire

FFF 3 dixerunt,

Index rerum memorabilium,

dixerunt, sunt valde diminuti, circa explicationem illius obiecti afflictivi. 499. 10. Pœna ignis ponit aliquid contrarium in spiritu, non quod corumpat, sed quod liget, & impediatur operationes naturales. 504. 29. v. Ligati, &c., Diabolus quibusdam persuadet pœnas inferni esse aliquando finiendas. 483. n. 1. col. 2. In sententiâ Arrubalis pœna sensus non est distincta realiter, sed tantum modaliter, vel ratione ratiocinante à pœnâ damni. 500. 12. In sententiâ autem P. Alarcon pœna sensus est tantum ficta apprehensio. Probatur autem quod sit falsa illius opinio. 503. 24. & 25. Quando soluitur Angelus malus, & finitur operari id, quod intendit, pœna eius non cessat, sed mutatur materialiter non formaliter. Semper enim, & ubique Dæmones cruciantur. q. 504. & 505. n. 30.

Possē. Sæpē variatur appellatio in ly (posse) quando est sermo de libertate. 451. 33. 452. 34. v. Sensus compositus, & diuisus.

Potentia Est principium, ut quo. Id autem, cuius est potentia, est principium, ut quod. 349. 28. Init. Potentia est duplex scilicet naturalis, & obediētiālis. v. Dispositio. Nulla substantia creata, est potentia, quā operatur. Ibid. 27. Obiectiones Scoti contrā hoc Axioma. 349. 28. ante finem. Cum potentia dicatur ad actum, oportet quod secundum diuersitatem actuum, sit diuersitas potentiarum. Hoc autem intelligitur de potentiā essentialiter ordinatā ad actum, & de actu adæquato illius potentiæ. 350. col. 1. Init. 351. 33. Duplex est potentia, scilicet passiva, & actiua. 349. col. 1. fi. &c. & 350. 29. Aliter loquendum est de potentiā actiua, & de cognoscitiua. 364. 11. Potentia, & actus an sint semper in eodem genere. p. 287. col. 2. fi. Esse in potentiā obiectiua, est esse in potentia, ut producat: Esse autem in potentia subiectiua, est esse in potentia, ad hoc, ut aliquid recipiat. 343. 7. v. Possē.

Potentia in Deo. Quid sit potentia generatiua, & spiratiua in Deo. 207. 1. De potentia Filij Dei, & de potentiā Spiritus Sancti male sensit Abaylardus. p. 8, n. 19.

Præcisio. Duplex est. Vna per non inclusionem: alia per non expressionem. p. 99. n. 26.

Prædeterminatio. Voluntas indiget præmoueri, & prædeterminari à Deo in omni actu suo libero. 445. 12. &c. 446. 17. col. 2. med. 447. 21. 450. 27. & 28. col. 2. ante finem. Ex solâ prædeterminatione ad actum materiale peccati, vel ex positione cogitationis quoad entitatem, unde potest oriri peccatum, nulla refunditur malitia in Deum, quando supponitur creatura in tali statu, quod possit se mouere, & formare dictamen defectuosum. pag. 454. 41. & 42. 455. 43.

Prædicationes in diuinis. Seu applicationes Prædicatorum, seu attributorum in personis diuinis. Regula. 198. &c.

Præxas. v. Trinitas.

Præscientia. Præscire. Præsciuit Angelus malus homines habituros communem cum Angelis beatitudinem sempiternam. Dicit enim S. Ber. quod hoc vidit in Verbo (supple non clarè viso, sed per reuelationem manifestato.) p. 468. n. 35.

Præsentia realis. Amor non contentus affectiua vniōne ad obiectum, quærit vniōnem effectiuam, & realē, in quantum potest. 229. 4. & 230. 9. & 231. 10. &c. Maxime vero n. 12. & 232. 14. & 15. &c. & 235. 20. Pater Vasquez tenet vniōnem gratiæ, & amoris, solum esse affectiuam, non substantialem. 229. 3. Contrā discipulos S. Thomæ, qui tenent missionem personarum diuinarum itā personas ipsas dare, quod realem, & entitatiuam suæ substantiæ præsentiam habent in anima. 229. 3. Init. & 228. 1. &c. 230. 7. &c.

Præteritum. Quomodo ab Angelo cognoscantur præterita. 404. 26. &c. Vasquez negat Sanctos Patres

dicere præterita cognosci ab Angelis. Contrarium tamen patet. 406. 33. fi. & 405. 30. & 31. & 406. 32. & 33. Actus liberi, voluntatis etiam præteriti, quorum nulum est relictum vestigium, sunt Angelo incognoscibiles. 415. 23.

Priscillianus. Hæreticus. p. 3. 4. fi.

Priscillianistæ dicebāt dari Trinitatē Trinitatis. Ibi.

Precariō habere aliquid dedignantur superbi. 468. 35. col. 2. Init.

Primogenitus. v. Filius Dei.

Principium. Est duplex, ut quo, & ut quod, (seu quod idem est) formale, vel instrumentarium; & radicale, seu operatiuum. 349. 28. Init. 352. 36. Principium, quo essendi, est forma; principium autem, quo operandi, est virtus accidentalē, in re creatā. 353. 39.

Prioritas. Quatuor modi Prioritatis assignantur, scilicet durationis, naturæ, originis, & rationis. 213. 6. In rigore nulla est planē prioritas in diuinis. Ibid. n. 8. Duas tamen vltimas admittunt Scotus, & Vasquez. Ibi. An sibi in hoc S. Thomas contradixerit. 214. num. 12. Negat id noster Author. 214. 9. &c.

Processio. Ad processionem, & originem duo pertinent. 136. 24. v. Pluralitas. v. Productio.

Productio. Sine productione, & sine realibus processionibus ad intrā, esse non potest pluralitas personarum. 33. 1. &c. Quod autem sit intrā Deum vera, & realis processio, non ficta, & metaphorica, rite probatur. 34. 7. Perfectio relatiuorum stare non potest sine pluralitate. 36. 13. 37. 15. Pluralitas rerum in diuinis, est pluralitas relationum subsistentium oppositarum. Ex quo non sequitur compositio in diuinis. 144. 12. v. Numerus.

Prolixitas. v. Breuitas.

Prophetæ. Prophetia. In prophetis, qui non sunt in gratiā, non est illustratio mentis, quæ faciat æstimationem de vltimo fine. 223. 7. Per fidem, & spem, & prophetiam, & alia dona supernaturalia extrā gratiam dicitur Spiritus Sanctus mitti secundum quid. 228. Ad quartam, &c.

Propinquus. Propinquitas. Ratione propinquitatis non dat Christus federe potentibus ad dexteram suam, aut ad sinistram. p. 20. n. 5.

Proteruitas Dæmonum, est secundum quod non subduntur diuinæ Sapientiæ. 488. n. 13.

Punctum. Vtrum Angeli in puncto possint operari. 316. 7. 317. 8.

Q

Qualitas. Non repugnat, quod qualitas sit productio actiua. p. 57. n. 30. Qualitas, quam ignis imprimit infernalis Dæmonibus, & animabus, est spiritalis, & non corporea. 504. 28. & 503. 16. Init. Qualitas est perfectio, absolute loquendo, non autem comparatiue, seu relatē ad hoc subiectum. 504. 28.

Quaternitas. Anastasius imperator ponebat Quaternitatem in diuinis. p. 9. n. 20. In Deo autem est Trinitas, non Quaternitas. p. 31. n. 41.

Quatuor. v. Notiones. v. Obiecta peccati. v. Relatio fi. v. Subsistentia. fi.

Quies. Non est tendentia, sed consistentia. p. 337. n. 16.

Quiescens. Dere quiescente, prout opponitur mobili v. p. 337. 15. &c.

Quo, & Quod distinguuntur. Id est ratio formæ constituentis, & ratio habentis formam inter se differunt. 142. 6. Principium, quo generandi non debet distingui ab ipso genito, sed ei communicari. Debet tamen ab eo distingui ex parte relationis connotatæ. 210. & 211. 12. & 13. v. Principium. v. Spiritus S.

Rationis

In hoc tertio tomo contentarum.

R

Rationis vsus. Vsum rationis attingens, in primo instanti peccare potest, ob naturæ corruptionem. Quod in Angelo esse non potuit, ob naturam integram. 450. 27.

Rebelles lumini. Id est gratiæ Dei. 489. 19. col. 2. ante fi.

Rectitudo actus. v. Regula.

Reflexio sui supra seipsum. Intellectus reflectit se supra seipsum, volens cognoscere seipsum. 355. 9. &c. Anima nostra, ob conuersionem ad sensibilia, impeditur intelligere seipsam immaterialiter purè per seipsam. 356. 13. v. Cognitio sui.

Regula. Actus moralis subiicitur regulæ. Si ergo ei conformatur, inde habet rectitudinem: si autem ab eâ deflectit, inde sortitur obliquitatem. 432. 11. Nihil aliud est peccare, quàm deficere à regulâ. 433. col. 1. Init. Regula autem illa vel est lex naturalis, vel est lex supernaturalis. 433. 13. Lex naturalis immobiliter adhæret Angelo, quia in ipsâmet naturæ comprehensione habetur, ita quod Angelus naturam suam perfectè cognoscendo, non potest auertere aspectum suum à lege naturali, nec errorem, aut deceptionem circa hæc naturalia, & naturaliter sibi impressa pati potest primò, & directè 433. col. 1. fin 434. 18. 435. 19. & 20. Lex autem supernaturalis non cognoscitur sic ab Angelo, quod ab eâ auertere non possit ad aspectum suum, & errorem pati practicum, seu inconsiderationem circa eam. Ibid. col. 2. post. Init. & p. 452. 36. Hoc autem non facit Angelum simpliciter impeccabilem & pro omni statu, & respectu omnis regulæ; sed solum pro aliquo statu particulari. 434. post. Init. n. 14. fi. Regula actionum liberarum, & finis earum naturalis est Deus, vt naturaliter cognitus, & diligibilis super omnia. Ex quo infertur omnia præcepta eius esse implenda, & omnia creata amanda esse propter ipsum & in ipsum ordinando. 434. 15. Hæc omnia regulant actiones Angeli, prout sunt in ordine naturali, circa Deum, vt Authorem naturæ. Eleuatur autem Angelus supra hunc ordinem, quando tendit in Deum, vt authorem gratiæ, & gloriæ. Vnde circa hoc peccare potest, quum ambulat per fidem, quia obscure, & non clarè procedit. Ibi. Quod si aueritur à fine supernaturali, non potest perfectam subiectionem in naturalibus retinere. 434. 16. 436. 22. 437. 24. 438. 24. ante fi. 440. 32. 441. 34. Esto, in speculatiuis manserint omnia integra in Dæmonibus, non tamen sic in practicis. Præternaturaliter enim agunt. 434. 16. fi. & n. 17. &c. v. Defectus dictaminis. Non subiici superiori, vt regulanti, & mensuranti actus rationis, est conditio generalis cuiuscumque peccati. pag. 462. num. 16. col. 2. med.

Relatio non est duorum absolutorum connotatio, & assistentia, sed est aliquid præterea scilicet respicientia, & ordo, quo comparatur vnum extremum ad aliud. 85. 5. & 6. De Relatione in, & ad in diuinis. 23. 19. 91. 1. & 2. 102. 4. 108. 26. 139. 38. 199. 29. &c. 200. 32. De Relatione, quæ est in Deo. v. p. 26. col. 1. post. med. Vbi non obuiat oppositio relatiua, omnia sunt vnum in diuinis. 25. n. 22. 168. 26. Fundamentum relationum diuinarum est essentia diuina, quæ est vnum quid entitatiuè, sed eminenter plura. 26. Relatio non potest intelligi ante suum fundamentum. 27. col. 2. num. 28. 30. 38. Relatio in diuinis dicit perfectionem, eamque multiplicat, quoad esse in, non autem quoad esse ad p. 31. n. 38. fin. Relationes reales in Deo solum fundari possunt in actione. p. 35. n. 9. & p. 37. num. 18. v. Plurilitas, &c. Relatio realis in tribus innitur fundamentis. p. 35. n. 9. col. 2. Init. Relationes non dicunt incommunicabilitatem, nisi respectu sui termi-

ni, suisque correlatiui. p. 36. n. 11. v. Communicabilitas. In Deo dati relationes reales est de fide. p. 84. n. 2. col. 1. fi. & col. 2. 85. 3. & 4. Relationes diuinæ solâ ratione distinguunt ab essentiâ. 86. 7. Quomodo relatio se extrinsece habeat ad essentiam. 96. 19. fi. Relatio est de intellectu personæ, non de intellectu essentiæ, ex parte modi significandi, benè autem ex parte rei significatæ. 96. 20. Vel relatio non est de conceptu essentiæ, tanquam prædicatum adæquatum, & conuertibile cum ipsâ, & vt constitutum essentialis rationis sed benè tanquam illi inadæquatum. Ibid. Denique relatio non ingreditur conceptum essentiæ vt prædicatum eam constituens, sed benè vt eam terminans, & modificans. 97. 19. Relationes diuinæ quomodo dicant perfectionem. 101. 2. &c. 102. 4. &c. Dicunt perfectionem, sed non explicant eam nisi per ordinem ad subiectum, & fundamentum, non autem in ordine ad terminum. Et consequenter non multiplicantur istæ perfectiones, quia non multiplicatur fundamentum. 103. 8. &c. Solum in his, quæ sunt ad aliquid, inuenitur secundum propriam rationem, aliquid secundum rationem, & non realiter, quod in aliis generibus non inuenitur. 105. 15. Relatio, vt relatio est, & vt opposita suo correlatiuo est perfectio in in se, entitatiuè, vel subiectiuè, non autem terminatiuè. 105. 16. Relatio non indiget fundamento, ad existendum, sed ad respiciendum. 121. 20. Init. Relatio, vt opposita specificatiuè, & secundum se, constituit personam, non autem prout opposita est reduplicatiuè, & in exercitio. Ibid. Essentia diuina per relationes redditur subsistens terminatiuè, & incommunicabiliter. 129. 24. Non sunt concedendæ quatuor res relatiuæ in Deo, sicut Durandus dicit. 138. 32. 33. & 34.

Retractare. Dæmones nunquam retractant, quod semel eligendo, vel iudicando, determinauerint. 486. n. 8. 9. 10. 489. 19. 493. 29. 494. 31. 496. 3.

Reuelatio. Factâ reuelatione potest aliquis naturali discursu probabiliter de mysterio Trinitatis cognoscere. 133. 15.

S

Sabellius. Ex vnitæte essentiæ diuinæ vnâ personam diuinam asseruit, quæ, vt persona ingenta, diceretur Pater; vt Incarnata, diceretur Filius; vt sanctificans homines, diceretur Spiritus Sanctus. pag. 2. Sabellius cum Noëto conuenit, præter hoc quod non dicit Patrem esse passum. p. 3. n. 3. & 4. Quidam tamen asserunt Sabellianos fuisse Patripassianos cognominatos p. 3. n. 4. Sabellij hæresim Priscillianistæ in hispaniâ tenuerunt, & Michael Seruetus non ita pridem. Ibid. & p. 9. n. 21.

Sabelliani. v. Sabellius.

Sacramentum v. Absolutio. Sacramenta non operantur in intrinseco separationis animæ à corpore. 482. col. 2.

Salus. Negotium Salutis incipit à Deo prorsus, quando peccator de eâ nihil ante cogitabat, vel audiebat. 450. 28.

Sanctitas diuina. Personalis & relatiua non multiplicatur in personis diuinis. p. 112. col. 1. fin.

Sanctitas Mariæ. Dignitas maternitatis in Mariâ Virgine, congruè, & connaturaliter exigebat Sanctitatem p. 227. col. 2. ante finem.

Sapientia. Angeli quomodo dicuntur pleni fuisse Sapientiâ ab initio, si cunctas futuras creaturas non cognouerunt? Respondetur ad hoc dubium. p. 408. n. 40. v. Futura. Sapientia creata, non est Filius Dei, sed est ea, quam indidit Creaturis. p. 19. 3. Vbi datur Sapientia, eò Filius Dei dicitur mitti. p. 223. 6. Vbi

F F f 4 non

Index rerum memorabilium,

non datur, eò non dicitur mitti. Ibi & n. 7.

Scientia Sanctorum. Est de omnibus necessariis ad salutem. 223 n. 7. Hanc non habent, qui Deum non amant vehementer. Ibid.

Scotus. Scoti opinio explicata. 88. 16. v. Spiratio. v. Spiritus S. v. Verbum Diuinum.

Scrutari corda, vel ad Deum spectat, vel ad eum, qui habet spiritum Propheticum. 409. 2. & 3. & 413. 17. Est valde difficile reddere rationem, cur secreta cordis sint Angelis incognoscibilia. 409 5. v. Obiecta cognitionis Angelicæ. Propter hoc diuisi sunt Authores in tali ratione reddenda. 410. 6. & c. v. Cogitationes. v. Secreta cordis.

Secreta cordis non cognoscit Angelus, nisi ea Deus reuelat, ob multas causas, quæ ab Authore recensentur p. 410. n. 6. Quarum primam reiecit. Ibid. n. 7. Secundam dicit diminutam. Ibi. n. 10. & 11. Tertiam autem, quæ est S. Thomæ, admittit. p. 411. num. 13. Vasquez dicit nullam rationem efficacem posse inueniri depromptam ex Philosophiâ, quæ id prober. Ibid. n. 8. fin.

Sedere ad dexteram meam, aut ad sinistram, non est meum dare vobis, sed quibus paratum est à Patre meo, quomodo id veniat intelligendum. p. 20. 5.

Sensus. v. Poena.

Sensus compositus, & diuisus. De utroque. v. pag. 452. 34. In sensu diuiso, seu in potentiâ antecedenti; in sensu composito, seu in potentiâ consequenti. Ibid. Quæ distinctio recidit in idem cum illâ priscâ allatâ alicubi à Pererio, in potentiâ remotâ ab actu opposito, C. In potentiâ propinquâ, vel proximâ, vel coniunctâ actui opposito, N.

Seruetus. Michaël Seruetus hæresim Sabellianam iam dudum consopitam exsuscitauit. v. Sabellius.

Similitudo. Est causa amoris. pag. 82. n. 35. fin. Filius Dei, vt Verbum, procedit in similitudinem naturæ. p. 62. 8. Verbum enim est perfecta similitudo rei cognitæ. Ibid. & p. 63. 14. & 16. & p. 64. n. 17. & 18. & p. 68. 28. & p. 69. n. 30. & pag. 71. n. 7. & p. 74. n. 15. & c. & p. 75. num. 17. & c. & p. 76. 20. & 21. p. 77. n. 22. & p. 78. n. 23. v. Æqualitas. fi. v. Voluntas.

Simul. Creauit Deus omnia simul. v. Creatio.

Simultas naturæ. Vbi simultas est naturæ, ibi in rigore nulla est Prioritas. p. 214. n. 11. v. Ordo.

Simplicitas Angelorum non excludit compositionem metaphysicam, putâ ex esse, & essentiâ; ex actu & potentiâ; ex subiecto, & accidente; ex genere, & differentiâ, ex naturâ, & subsistentiâ, sed bene excludit omnem compositionem physicam, seu ex materiâ, & formâ physica, qualis illa cumque sit. p. 283. n. 1. 2. 3. & 4. & p. 284. n. 5. 6 & 7. & p. 285. n. 8. & 9. p. 286. n. 10. & 11. & p. 287. n. 12. & 13.

Singulare. Est differentia inter singulare accidentis, & substantiæ, p. 116. n. 2. Nomen ergo (singulare) est commune substantiæ, & accidenti, sicut nomen (particulare) & nomen (indiuinduum.) Ibi. n. 3. v. Hypostasis. v. Suppositum. v. Syllogismus.

Sol. Cur sit vnus, & non plures. 228. col. 1. med.

Specie differre. Angeli specie differunt inter se, & non solo numero. 288. 3.

Species intelligibilis. Angelus non accipit species à rebus, vti fingit Richardus à S. Victore. p. 411. n. 12. Conditiones requisitæ ad speciem intelligibilem. 354. n. 7. & c. Angelus habet ab initio species omnium singularium, non quidem immediatè, sed mediâtè. 371. 28. & c. Species autem illæ non sunt propriæ passionis in rigore loquendo, sed sunt accidentia inseparabilia. 371. 30. & c. v. Variatio. v. Vniuersalitas. Sunt quidem ab initio infusæ, sed non æquè determinatæ, & applicatæ. 407. 37. Species intelligibilis, quâ Angelus influit in alium, est substantia ipsa Angeli, tanquam à

se cogniti: influit autem instar obiecti, seu in genere repræsentatio. 353. 40. & n. 1. & c. & 377. 15. v. Intellectus. De specie impressâ, & expressâ. v. pag. 48. n. 8.

Spiratio. Actiua quid. 182. 6. v. Immediatè. Spiratio actiua non distinguitur realiter à Paternitate, & Filiatione, sicut putat Durandus. 134. 19. Scotus vult distinguere has relationes ex natura rei. Ibid. Spiratio actiua, & Paternitas sunt vna res relatiua, & duæ relationes reales. p. 139. n. 36. & 37. Impulsus, seu pondus, quo voluntas fertur in rem amatam, dicitur spiratio. p. 71. n. 6. & p. 72. 11.

Spiritualitas Angelorum non potest concludi demonstratiuè ex ipsorum velocitate, sed bene ex eorum intellectualitate. p. 282. n. 22. Id autem ponitur contra Vasquez. Ibi. Et ex modo operandi, in quo Angeli perfectè Deo assimilantur, similitudine, quantum ad gradum intellectualem, non quantum ad speciem. Ibi. n. 23. & 24.

Spiritus, aliquando idem sonat, quod ventus. 22. 14.

Spiritus Sanctus. Postulat pro nobis causaliter, id est facit nos postulare: non autem postulat formaliter. 22. 14. Spiritus Sanctus procedit per modum impulsus, & non per modum imaginis. p. 23. 15. Verbum est principium quo manifestandi obiectum, seu proponendi ipsum voluntati, & est principium quod, operandi per voluntatem. p. 74. n. 14. Macedonij hæresis contra Spiritum Sanctum, p. 7. n. 16. Error Græcorum contra Spiritum Sanctum. p. 8. & 9. n. 20. v. Error Græcorum Spiritus Sancti diuinitas & consubstantialitas eius cum Patre, & Filio probatur ex Scriptura. p. 61. & c. Processio Spiritus Sancti à Filio, vnde probetur. p. 163. n. 9. & c. Si Spiritus Sanctus à Filio non procederet, non distingueretur ab eo. p. 166. n. 21. & c. Contra hoc sentit Scotus. p. 167. n. 23. Cuius fundamenta reuellantur. 170. 31. Extirpantur etiam fundamenta Græcorum. 173. 38. & c. Spiritus Sanctus à Patre Filioque procedit, vt ab vnico spiratore. 174. 40. & p. 175. n. 2. & c. & 719. 16. & c. v. Gratia. v. Complutenfes.

Suarez. v. Gilbertus. v. Vasquez. v. Superiores Angeli

Subiectio. Subiectus. Christus subiectus erit æterno Patri, postquam subiecerit sibi omnia. p. 19. n. 2. Apparuit maior illius subiectio in patiendi, non autem in agendo. Ibid.

Subsistentia, vt subsistentia, non multiplicat indiuidua, quia non est principium indiuiduationis, sed terminus. 294. col. 1. ante medium. Subsistentia absoluta, & relatiua, diuersimodè considerantur in Diuinis. p. 37. n. 14. Tres sunt subsistentiæ relatiuæ in ratione termini incommunicabilis, & perfectionis communis. 106. 20. & 120. 18. Vna est subsistentia absoluta. 108. 23. 124. 5. & c. 127. 17. Quid sit personalis subsistentia. p. 118. n. 12. & 13. Duo sunt effectus subsistentiæ. p. 119. n. 15. Nomine subsistentiæ quatuor possunt considerari. p. 123. n. 1.

Substantia. Diuiditur primò in creatam, & increatam. Creatam autem subinde diuiditur in spiritualement, & corporalem, & constantem ex vtraque. p. 279. n. 10. ex Concil. Lateran. p. 283. 4. De ratione substantiæ, quæ est genus, non est, quòd sit composita ex materia, & forma. Diuiditur enim in incorpoream, & corpoream. p. 287. n. 13. med. Substantia incompleta non est omnimò ad se, sed alterum, cui coopratur, & coordinatur, non vt relatio prædicamentalis, sed vt pars. 294. 23. fi. Substantia incompleta est forma, vel materia; si sit forma, est actus primus; si autem sit materia, est pura potentia p. 34. n. 9. Substantia in diffinitione personæ, non significat essentiam, sed suppositum. 117. 16. ex S. Thoma.

Sucessiua. Species Angelorum non sunt æquè applicatæ

In hoc tertio tomo contentarum.

applicata circa entia successiva, ac sunt circa permanentia, quæ sunt condita ab origine mundi. p. 407. 37.

Superbia. Fuit primum peccatum malorum Angelorum. p. 459. n. 9. & 10. Non subesse Superiori, & præesse aliis, est res volita, & non dumtaxat conditio ut sit speciale peccatum superbiæ. 462. 16 col. 1. fi. & col. 2. med. Non subesse Superiori, ex motivo excellentiæ propriæ est conditio specialis superbiæ. Ibi. col. 2. med.

Superficies. Locus addit supra superficiem aliquem modum, vel relationem secundum situationem, vel distantiam spatij. 348. 24.

Superiores Angeli participant scientiam magis in vniuersali, quam inferiores. 376. 10. Init. & c. quidquid dicat P. Vasquez, cui Suarez, & Alarcon contradicunt. Ibi. In vniuersali (inquam) quantum ad vim representandi. 380. 17. & c. Sicut ex vno sigillo, vel typo potest exprimi figura, quæ simul representet hominem, equum, arborem. 381. 19.

Suppositum & singulare, non conuertuntur. p. 116. n. 3 Nomen suppositi incommunicabilitatem importat. 117. 4. fi.

Syllogismus. Sicut in syllogismis de termino communi, requiritur, quod medium perfecte distribuatur: ita in Syllogismo expositorio requiritur, quod medium perfecte singularisetur. p. 33. n. 47 col. 1. fi.

T

Tempus Angeli non est idem cum nostro. 329. 19. & 332. 1. & 471. 1. Correspondet tamen initium viæ Angelorum malorum, seu primum illorum instans instanti nostro. 472. 2. & 473. 7. Partibus temporis nostri non coexistit Angelus eo modo, quo partibus loci coexistit. De loco enim in locum transire potest medio impertransito, de præterito autem in futurum transire nequit nisi per præsens. 330. col. 2. post. Init. v. Coexistentia. Deus mouet spirituales creaturas per tempus. Et ita cum sit successio in mente Angeli, non omnia, quæ aguntur per totum tempus, sunt ei præsentia. 403. col. 1. Init. Vnde ipsa species impressa successionem patitur, proindeque mutationem Ibi. & n. 21. Dupliciter representantur Futura Angelo, scilicet primo supernaturaliter, seu mediante reuelatione, secundo per speciem immediatè representationem futuri non in suis causis, vel in aliquâ causâ, sed extra illas omnes in seipso. 403. 22. & c. Licet Angelus in suo esse, & specie, quâ intelligit, mensuretur æuo quoad suum esse entitatum; tamè exercitium ipsum representandi, quantum ad singularia, quæ successiuè fiunt, tempore mensurantur, non æuo. 404. n. 25.

Tenebræ, v. Nox. v. Noctis tenebræ.

Tentatio. Omnia peccata, quoad reatum, sunt in Dæmonibus; quatenus ad ea homines incitant, inter quæ multa sunt contra ordinem, legemque naturalem 436. 22. 450. 28. col. 2. post. med.

Transcendentale creatum, aliter imbibitur intimè in omnibus, ad quos transcendit, & aliter transcendente diuinum. 92. 5.

Trinitas. v. Abaylardus. Trinitatis mysterium est oppugnatum nedum ab Ethnicis, & Iudæis, sed etiam à Sabellio, & ab Atrio, qui tamen variè processerunt in suo errore proponendo. p. 2. Istis tamen prior fuit Praxeas, contra quem scripsit Tertull. p. 2. fi. v. Priscillianistæ. Mahumetres contra S. Trinitatis mysteriū blasphemauit. p. 8. 17. Mahumetani nec disputare volunt, nec audire Catholicos vlllo pacto, eorumue rationes. p. 8. n. 18. Quomodo cum eis sit procedendum, docet Ricoldus, & ante eum Damascenus. Ibi. Paratæ tres personas diuinas dicebant esse tres Deos. p. 9. n.

20. Quos secutus est Ioannes Philoponus. Ibi. Abbas autem Ioachimus dixit tres personas diuinas non esse vnā essentiam numero, sed solū per collectionem, sicut Fideles sunt vna Ecclesia. Ibi. Raymundus verò Lullus dixit tres personas diuinas esse tres essentias. Ibi. Valentinus Gentilis dixit tres personas diuinas esse tres spiritus æternos. Patrem esse essentiatorem, & solū esse verum, & summum Deum, alias personas essentias. Dixit item Filium non esse factum ex nihilo, sed ex Patris substantia, & ab æterno. p. 9. n. 21. col. 2. Init. Nouantes pro Trinitate contra Seruetum concertantes, Trinitatem tamen impugnarunt. p. 9. n. 21. Quomodo possit mysterium Trinitatis persuaderi Paganis. 18. 29. v. Oratio. Solutio argumentorum, quæ hæretici contra Trinitatis mysterium confinxerunt. p. 30. n. 37. & c. p. 31. n. 39 & c. Ex naturalibus effectibus Trinitas est incognoscibilis p. 131. n. 2. Imò nec ex supernaturalibus, ut sunt effectus. Ibi. 4. & 5. & c. Malè ergò Vasquez affirmat contra D. Tho. Philosophos cognouisse hoc mysterium. p. 132. n. 8. v. Reuelatio.

Tristitia duplex est scilicet formalis, & obiectiua. Formalis, est actus voluntatis refugientis malum sibi coniunctum. Obiectiua, est obiectum ipsum disconueniens, quod refugit voluntas. 497. 1. In Dæmonibus non est tristitia, prout est passio, seu actus appetitus sensitui, sed benè ut actus voluntatis se contristantis de cruciatu sibi illato. Ibi. v. Dolor.

V

Vacuum. De motu in vacuo. p. 311. 5. & p. 313. 12.

Valentinus Gentilis declinauit ad Atrianismum. p. 13. n. 13. v. Trinitas. v. Martyr.

Variatio in speciebus Angelicis non est essentialis, sed modalis. 407. 38. 408. 41. Non fit autem efficienter ab obiecto, sed à Deo. Ibi. n. 3.

Vasquez, & Suarez valde pugnant. 121. 20. 405. 9. 29. & 30. v. Superiores Angeli. v. Trinitas. v. Spiritualitas. v. Secreta cordis. v. Verbum diuinum.

Vbi, est locus rei intrinsecus. 301. 1. 308. 24. & c. Vbi prædicamentale quid. 308. & 309. n. 26. & 28. Vbi spirituale. Ibi. n. 30. 324. 4. & c.

Vbique. Angelus non est vbique. 315. n. 2. Contra quod sentit Durandus. 302. 5. col. 1. fi. 323. 1. & c. Opinio tenentium Angelos esse vbique non est tuta in fide. 343. 1. & c.

Velleitas esse potest impossibile, in eis se oblectando. 465. n. 24. & 25. & 26.

Velocitas. v. Spiritualitas Angelorum. De celeritate actionis Angelorum. 282. 22. & 320. 25. v. Tempus. v. Instans. Angelus potest totam suam substantiam applicare, & diffundere per suam spheram, sine vllâ prorsus successionē, sed in instanti, etiam respectu temporis nostri. 333. 7. Si motu proprio, & vero moueatur Angelus, & non simplici, & vnica mutatione, non potest moueri in instanti, neque continuo, neque discreto motu. 333. 8. 334. 9. & c. 335. 11. & c.

Veniale peccatum non fuit, sed mortale, peccatum Angelorum. 456. 1. Venialiter enim, seu leuiter peccare nequeunt prorsus. Ibi. n. 2. & 457. 3. & 4.

Verbum, seu species expressa, ut est accidens, quid faciat in mente. 154. 9. Instantiæ contra productionē Verbi in diuinis. 38. 19. & c. Verbum, seu species expressa, duo facit in nobis. 24. 21. 46. 5. v. Intellectus. Quotuplex sit minus Verbi. 56. 27. & c. In omni intellectione non semper producit Verbum. 41. 25. & c.

Verbum Incarnatum Deum esse negabant Alogi, Ebion, Cerinthus, alique permulti. p. 3. n. 3. & 4.

Verbum diuinum an procedat præcisè ex vi cognitionis obiecti primarij, & non secundarij, seu, quod idem

Index rerum memorabilium,

idem est; creaturarum. Aliter respondet Scotus, Aliter Vasquez, Aliter S. Tho. 152.n.3.4.5.&c. Contra Scotum est duplex principium. 154.n.7.&c. Contra Vasq. arguitur ex Vasq. 155. 11.&c. Verbum procedit per se in quarto modo ex cognitione Creaturarū. 157.17.&c. Respondetur ad rationes Scot. 158.20.&c. Ad fundamenta autem Vasquez. Ibi.n.22.&c. Verbū est Creaturæ, non à Creaturā. 160.n.29.&31. Creaturam enim exprimit, non ut principium, à quo est, sed tanquam obiectum terminatiuum, ad quod potentia creatiua se habet, & circa quod versatur. Ibid.

Veritas. Angelus dupliciter notificat alteri veritatem, sibi notam. Primò ex parte virtutis intellectiua, fortificando illam. Secundò ex parte similitudinis, & speciei, proponendo veritatem magis distinctè. 370. col.2. post. Init.

Vermis Damnatorum, est quid metaphoricum. 497.2. Sed ignis inferni non est quid metaphoricum, sed verum, & reale quid. Ibi. & n.3. & 4.

Via Angelorum tribus instantibus est terminata. 471.1.

Vnio hypostatica. An eam Diabolus appetierit. 466.27.

Vnitas Dei, tum ratione, tum numero, rectè deducta est ab Aristotele ex carentiâ materiæ. 290.9.&c. Vnitas essentiæ inter Patrem, & Filium, rectè probatur per hæc verba, ego, & Pater vnum sumus. 21.n.9. Quidquid dicatur in oppositum. 20.6. & p.21.n.10. & 11.

Vniuersalitas specierum quoad vim repræsentandi vel cognitio obiecti in vniuersali, potest intelligi dupliciter. Vno modo ex parte rei cognitæ, seu obiecti repræsentati. Alio modo ex parte mediij cognoscendi, aut repræsentandi. 373.1. Dantur species vniuersales

in Angelis complectentes ad minus plura singularia. 373.3. &c.

Vnum, & vnus Quî differant in diuinis. 142.9.

Voluntarij actus. Notionales, seu ad intrā, possunt esse voluntarij, voluntate comitante, vel subsequente ipsos, non autem voluntate, vt principio illorum. 205.1.&c.

Voluntas. Per actum voluntatis producituraliquis terminus, quosies amata dicatur esse in voluntate, non per modum similitudinis, sed per modum ponderis, & inclinationis determinatæ ergà hoc obiectum. 70.4 & 5. Ad hoc, vt volūtas determinetur magis ad hoc, quam illud, quid requiritur? p.71.8. & 9.72.10. & 11. Obiectum est in voluntate, non per seipsum, nec per similitudinē, & repræsentationem, sicut in intellectu sed per modum proportionis, & coaptationis ad obiectum, quo voluntas redditur ponderans, & affecta ergà ipsum. 72.11. Vocatur à D. Tho. appetitus complacentiæ 73.13. col.2. Non negat S. Tho. aliquid operatum in voluntate, sed negat aliquid sic operatum in voluntate, sicut in intellectu. 73.12. Terminus productus in voluntate non habet rationem imaginis trahentis, & continentis in se per repræsentationem obiectum. 73.1.3. Actus voluntatis in duplici genere causæ, scilicet formalis extrinsecæ, & finalis dependet à conceptu mentis, & ab appetibili apprehenso actiue, seu efficienter, secundum Caietanum. Ibid. Quando dicit S. Thomas, quod processio Spiritus Sancti est à voluntate, vt naturā, non sumit naturam pro appetitu innato, & non elicitō, seu appetitu inani, sed appetitu elicitō, licet non arbitrariē, & contingenter, sed cum plenā necessitate, & adæquatione. 207.10. fi. Voluntas Angelorum est inflexibilis in eo, quod semel elegerunt. 475.14.v. Inflexibilitas. v. Regula.

F I N I S.

